


परमप्रभु यावे आ  
लोव



Bible in Sunwar (NP:suz:Sunwar)

## परमप्रभु यावे आ लोत्र

### **Bible in Sunwar (NP:suz:Sunwar)**

copyright © 2011 Wycliffe Bible Translators, Inc.

Language: Sunwar

Translation by: Wycliffe Bible Translators, Inc.

### **Copyright Information**

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9789937101646

#### **The Bible without Deuterocanon**

in Sunwar

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 18 Apr 2025 from source files dated 29 Jan 2022  
27cd6a1c-0244-5add-a4e8-b4f0e5104473

## Contents

उत्पत्ती . . . . .	1
प्रस्थान . . . . .	54
लेवी . . . . .	101
गन्ती . . . . .	133
ब्यवस्था . . . . .	179
यहोसु . . . . .	217
न्यायाधीस . . . . .	243
रूथ . . . . .	269
१ सामुएल . . . . .	273
२ सामुएल . . . . .	307
१ राजा . . . . .	335
२ राजा . . . . .	369
१ इतिहास . . . . .	402
२ इतिहास . . . . .	436
एज़ा . . . . .	474
नेहेम्याह . . . . .	486
एस्तर . . . . .	503
अय्युब . . . . .	511
भजन संग्रह . . . . .	541
हितोपदेस . . . . .	617
उपदेसक . . . . .	642
ठेयब कुम्सो . . . . .	650
यसैया . . . . .	655
येरमीया . . . . .	708
बिलाप . . . . .	767
इजीकीएल . . . . .	772
दानीएल . . . . .	824
होसे . . . . .	841
योएल . . . . .	850
आमोस . . . . .	854
ओबदिया . . . . .	861
योना . . . . .	863
मीका . . . . .	866
नहुम . . . . .	871
हबकुक . . . . .	874
सेफन्याह . . . . .	877
हागै . . . . .	880
जकरिया . . . . .	882
मलाकी . . . . .	892
मत्ती . . . . .	895
मर्कूस . . . . .	935
लूका . . . . .	960
यूहन्ना . . . . .	1002

प्रेरित . . . . .	1033
रोमी . . . . .	1074
१ कोरिन्थी . . . . .	1091
२ कोरिन्थी . . . . .	1108
गलाती . . . . .	1119
एफिसी . . . . .	1125
फिलिप्पी . . . . .	1131
कलस्सी . . . . .	1135
१ थिस्सलोनिकी . . . . .	1139
२ थिस्सलोनिकी . . . . .	1143
१ तिमोथी . . . . .	1145
२ तिमोथी . . . . .	1150
तीतस . . . . .	1154
फिलेमोन . . . . .	1157
हिब्रू . . . . .	1159
याकूब . . . . .	1172
१ पत्रुस . . . . .	1177
२ पत्रुस . . . . .	1182
१ यूहन्ना . . . . .	1185
२ यूहन्ना . . . . .	1190
३ यूहन्ना . . . . .	1191
यहूदा . . . . .	1192
प्रकाश . . . . .	1194

## उत्पत्ती

**ब्रेकब मुर:** यहूदी आन ब्रेकब मुर नु थमा सुइकब आन गुम्तीकेमी मेको किताब ब्रेकब मोसा बाकब, देंनीम। येसु खीस्तमी यो मोसा आ ब्रेकशो आ पर्बम लोत्र पशो बाक्त। यूहन्ना ५:४६; लूका २४:२७

**गेना दुम्शो:** एको किताब परमप्रभु यावेम नेल्ल सेला रे योसेफ आ बेक्ची ना सम्म डा लोत्र बाकब।

**मार ब्रेकशो:** उत्पत्ती किताब आ शेंशो

१. परमप्रभु यावे रागी सेल्व बाकब उत्पत्ती १:१-२:३

परमप्रभु यावे मुर कली सेल्व बाकब उत्पत्ती २:४-१५

२. डोंइती सेल्लो मुर आस पशो ब्रेकशो बाकब उत्पत्ती ३:-११:-

मुरुम परमप्रभु यावे आ देंशो मटितीके उत्पत्ती ३:-

काइन नु हाबील उत्पत्ती ४:१-२४

हाबील रे नोआह सम्म उत्पत्ती ४:२५-५:३२

रागी नेल्ल कली ब्वाक्कुम सुम्शो उत्पत्ती १०:-

बेबीलोन सहरम लाइशो खिं सेल्लो उत्पत्ती ११:१-९

किकी पिपी आन नें उत्पत्ती ११:१०-३२

३. यहूदा आ किकी पिपी उत्पत्ती १२:-५०:-

अब्राहाम उत्पत्ती १२:-२३:-

इसहाक उत्पत्ती २४:-२६:-

याकूब उत्पत्ती २७:-३६:-

योसेफ उत्पत्ती ३७:-५०:-

डोंइती डा लोत्र

उत्पत्ती २:४-२५; भजन संग्रह १०४

१ नेल्ल क्येडा डोंइती परमप्रभुमी सरीड नु रागी दुम्पदा बाक्त।

२ मिनू खप, फश, ब्वाक्कु नेल्ल खाल्सीशा, मारेड मवाशो बाक्माक्त। मिनू मेको तारी छिडछिड बाक्माक्त। परमप्रभु आ सोक्त ब्वाक्कु तारी फिल फिल पा हिम्सीशा बाक्बाक्माक्त।

परमप्रभुमी मारेड मारेड सेल्लो

उत्पत्ती ४-२५; भजन संग्रह १०४

३ मिनू परमप्रभुमी “छेडछेड दुमो” देंमेनु, छेडछेड दुम्माक्त। भजन संग्रह ३३:९; हिब्रू ११:३; यसैया ४५:१७

४ मेको तशा “रिम्शो दुम्त” देंमाक्त। मिनू छेडछेड नु छिडछिड फ्रादीम्सी बाक्त।

५ मिनू परमप्रभुमी छेडछेड कली नाक्ती नु छिडछिड कली नाक्दो, दे नें वोदा बाक्त। मिनू नां रिक्शा, नां सोत्रशा, मेको डोंइती डा नाक्ती दुम्माक्त।

६ मिनू परमप्रभुमी “ब्वाक्कु आ दातेमी फ्रातीक दुमो। ब्वाक्कु ब्राशा बाक्मल” देंमाक्त।

७ मोपा परमप्रभुमी सरीड आगा डा ब्वाक्कु नु सरीड तारी डा ब्वाक्कु फ्रादीम्सी बाक्त। मिनू ब्वाक्कु बुक्शा बाक्मा बाक्त। भजन संग्रह १९:२; भजन संग्रह १३६:६; भजन संग्रह १४८:४

८ परमप्रभुमी मेको फ्रातीके कली सरीड, दे नें वोदा बाक्त। मिनू नां रिक्शा, नां सोत्रशा, मेको निक्शी नाक्त दुम्माक्त।

९ मिनू परमप्रभुमी “सरीड आगा डा ब्वाक्कु काथा दुमीन। सोत्रशो रू गूडो” देंमाक्त। मेको यो दुम्माक्त। अय्युब ३८:८-११; भजन संग्रह २४:२; २पत्रुस ३:५

१० मिनू परमप्रभुमी सोत्रशो रू कली रागी नु ब्वाक्कु देम्शा लीशो कली समुन्द्र, दे नें वोदा बाक्त। मिनू मेको आ सेल्लो तशा “रिम्शो दुम्त” देंमाक्त।

११ मिनू परमप्रभुमी रागी डा खप कली “घांस, फू नु रवापुकी दुम्मल। घांस नु फूपुकीम वांचेर बाक्मल। फल फुल सिब्ब रवापुकी वाशा, आम आम फल सिम्मल। मेको आन वांचेर चहिं आन फलपुकीम बाक्मल” देंमाक्त। मिनू मोदेंशो दुम्माक्त।

१२ रागीम घांस नु फूपुकी वाशा, आन वांचेर यो वामा बाक्त। फल फुल रवापुकी वाशा, आन वांचेर यो वामा बाक्त। मिनू परमप्रभुमी आ सेल्लो तशा “रिम्शो दुम्त” देंमाक्त।

१३ मिनू नां रिक्शा, नां सोत्रशा, मेको सां नाक्ती दुम्माक्त।

१४ मिनू परमप्रभुमी “नाक्ती नु नाक्दो फ्राचा कली सरीडमी छेडछेड पा ब्राइबपुकी दुमीन। मेको ब्राइबपुकीम हिंडद नु बर्खा, नाक्ती नु बर्स कली फ्रातीक गेय पामेक्ल। ब्यवस्था ४:१९; भजन संग्रह ७४:१६; यसैया ४७:१३

१५ मिनू मेको सरीड डा ब्राइबपुकीम रागी कली छेडछेड गेचा माल्मीम” देंमाक्त। मिनू मेको दुम्माक्त।

१६ मोपा परमप्रभुमी ठेयब बत्ती निक्शी सेला बाक्त। शुश छेडछेड पा ब्राइब नाक्त कली नु इक्का छेडछेड पा ब्राइब बत्ती नाक्दो कली वोदा बाक्त। सोरुल यो सेल्मी बाक्त। भजन संग्रह १३६:७-९

१७ परमप्रभुमी रागी छेडछेड बाक्ल, दे मेको नेल्ल आन कली सरीडमी वोइक्मी बाक्त।

18 नाक्त नु नाक्तदो कली फ्राचा नु छेडछेड छिडछिड रे फ्राचा कली सरीडम वोदा बाक्त। परमप्रभुमी मेको तशा “रिम्शो दुम्त” देमाक्त।

19 मिनु नां रिक्शा, नां सोत्रशा, मेको ४ नाक्ती दुम्माक्त।

20 मिनु परमप्रभुमी “ब्वाक्कुमी मारेड मारेड ब्रोडशा बाक्बपुकीम ब्रीमल। रागी तारी मारेड मारेड चिक्ब सरीडम बेरमल” देमाक्त।

21 मोपा परमप्रभुमी ब्वाक्कुम बाक्ब ठेयब हिचा डा जन्तु नु मारेड मारेड ब्रोडशा बाक्ब सेल्मी बाक्त। मेको शुश दुम्शा, समुन्द्र ब्रीशा बाक्मा बाक्त। चिक्ब यो शुश दुम्मा बाक्त। मिनु परमप्रभुमी मेको तशा “रिम्शो दुम्त” देमाक्त। भजन संग्रह ७४:१३-१४; १४८:१७

22 परमप्रभुमी मेको नेल्ल आन कली आसीक गेशा “सोशा बोशा, शुश दुमीन, समुन्द्र डा ब्वाक्कु ब्रीडीने” देमाक्त। चिक्ब आन कली यो “सोशा बोशा, रागीमी शुश दुमीन” देमाक्त।

23 मिनु नां रिक्शा, नां सोत्रशा, मेको ५ नाक्ती दुम्माक्त।

24 मिनु परमप्रभुमी “रागीम मारेड मारेड ब्रोडशा बाक्ब गूचा मालनीम। मार गूचा मालनीम देशा हना बी ब्यफ, खपीम गेशा गाक्ब आइक्च जन्तु नु मार मार ब्वाकी डा जन्तु दुमीन” देमाक्त। मिनु मेको दुम्माक्त।

25 मोपा परमप्रभुमी मारेड मारेड ब्वाकी डा जन्तु, मारेड मारेड बी ब्यफ, खपीम गेशा गाक्ब नु मारेड मारेड आइक्च जन्तु सेल्मी बाक्त। मिनु परमप्रभुमी आ सेल्शो तशा “रिम्शो दुम्त” देमाक्त।

26 मिनु नोले परमप्रभुमी “इं खोदेशो पा मुर का सेल्य। मिनु समुन्द्र डा डांड, सरीडम बेरब चिक्ब, बी ब्यफ, ब्वाकी डा जन्तु नु खपीम गेशा गाक्ब आइक्च जन्तु नेल्ल आन कली हुकुम पाइब दुम्ल” देमाक्त। भजन संग्रह ८:६-९; एफिसी ४:२४; कलस्सी १:१५; याकूब ३:९

27 मिनु परमप्रभुमी आ खोदेशो तांडसीशो का सेला बाक्त। मेकोमी वोंडश मुर का नु मीश मुर का सेला बाक्त। उत्पत्ती ९:६; मत्ती १९:४

28 मिनु परमप्रभुमी मुर आस कली आसीक गेशा “सोशा बोशा, तमी तौ थिशा, रागी प्रिंशा, रिम्शो पा हुकुम पस। समुन्द्र डा डांड, सरीडम बेरब चिक्ब, रागीम बाक्ब जन्तु नेल्ल नु खपीम गेशा गाक्ब आइक्च जन्तु नेल्ल आन कली रिम्शो पा हुकुम पसे” देमाक्त।

29 मिनु परमप्रभुमी “नेनीस, गो इस कली वांचेर सिप्ब, गिग खाइ, फल सिप्ब नु वांचेर सेल्ब रवा गेतन्सी। मेको इस कली जचा ब्बचा दुम्ब। मत्ती ६:२५-३४

30 मिनु गो रागीम बाक्ब जन्तु, बी ब्यफ, रागी डा चिक्ब, खपीम गेशा गाक्ब आइक्च जन्तु नु मारेड मारेड ब्रोडशा बाक्ब आन कली घांस, सुवा ब्बचा गेतामी” देमाक्त। मिनु मोदेशो दुम्माक्त। भजन संग्रह १४५:१६

31 मिनु परमप्रभुमी आ सेल्शो नेल्ल तशा “शुश रिम्शो दुम्त” देमाक्त। मिनु नां रिक्शा, नां सोत्रशा, मेको ६ नाक्त दुम्माक्त। मत्ती १९:१७; १तिमोथी ४:४

## 2

डोंडती डा नाइक्तीक नाक्त

1 मिनु मोपा परमप्रभुमी सरीड, रागी नु मार मार बाक्मा, मेको नेल्ल सेल्ने थुमा बाक्त।

2 मिनु ६ नाक्तीम आ गेय नेल्ल थुम्शा डा मिन ७ नाक्तीम नांडसे बाक्त। हिबू ४:४

3 मिनु परमप्रभुमी नाइक्तीक नाक्त कली आसीक गेवा बाक्त। मिनु मेको नाक्त आम कली नाइक्चा, दे वोदा बाक्त। मारदे हना मेको नेल्ल सेल्तीक गेय थुम्शा नांडसे बाक्त। प्रस्थान २०:११; भजन संग्रह ९५:११; इजीकीएल २०:१२; हिबू ४:९-१९

परमप्रभुमी मुर सेल्शो

4 एको परमप्रभुमी सरीड नु रागी सेल्ची ना डा लोत्र बाक्ब। परमप्रभु यावेमी रागी नु सरीड सेलानु,

5 मारेड मारेड घांस खपीम मवाशो बाक्मा बाक्त। कोत्रकेली यो मदाण्शो बाक्मा बाक्त। मारदे हना परमप्रभु यावेमी रागीम रेड मयिपाइशो बाक्माक्त। मिनु रूम गेय पाइब मुर यो मबाक्मा बाक्त।

6 मेना रागी रे खोला गूशा, रागी नेल्ल डा खप जिप्पाइक्बाक्माक्त।

7 मिनु नोले परमप्रभु यावेमी रू डा खप के मुर का सेला बाक्त। मिनु मुर आ नेमी ब्रोंडतीक सोक्त मुइक्ता बाक्त। मिनु मुर सोक्त पाइशो दुम्माक्त। उत्पत्ती ३:१९; अय्युब १०:९; अय्युब ३३:४; भजन संग्रह १०४:२९-३०; १कोरिन्थी १५:४५, ४७

परमप्रभुमी आ रू सेल्शो

8 मिनु नोले परमप्रभु यावेमी पूर्वम एदेन माइशो रू का सेला बाक्त। मेकेर आ सेल्शो मुर कली वोदा बाक्त।

9 मिनु परमप्रभु यावेमी मेकेर मार मार दारशो तांडसीब रवा नु जचा ब्बचा फल सिप्ब रवा वापदा बाक्त। ब्रोंडपाइक्ब का नु रिम्शो नु मरिम्शो तुइक्पाइक्ब रवा का यो रू आ दातेमी वापदा बाक्त। उत्पत्ती ३:२२; प्रकाश २:७; प्रकाश २२:२

10 मिनु रू कली जिप्पाइक्चा, दे एदेन रे खोला का गूमाक्त। मेको खोला नोले ब्राशा, ४ ओटा खोला दुम्शो बाक्मा बाक्त। इजीकीएल ४७:१-१२

11 डोंडती डा खोला आ नें पीशोन बाक्ब। मेको खोला हवीलाह रागी आ एर ओंथ रे लशो बाक्ब। मेको रागीमी सुन बाक्बाक्माक्त।

- 12 मेको रागी डा सुन रिम्शो बाकबाकमाक्त। मेकेर गोकुल धूप नु ओनीक्स माइश्शो हीरा यो बाकबाकमाक्त।  
 13 मेको आ नोले डा खोला आ नें गिहोन बाकब। मेको कूश माइश्शो रागी आ एर ओंथ हिरशो बाकब।  
 14 मिनु मेको आ नोले डा खोला आ नें टाइग्रीस बाकब। मेको खोला अस्सुर रागी आ पूर्व गे लशो बाकब। मिनु नेल्ल क्येडा नोले डा खोला आ नें युफ्रेटीस बाकब।  
 15 मिनु परमप्रभु यावेमी मुर कली लाइश्शा, एदेन रू दोचा नु कोव्रचा कली वोदा बाक्त।  
 16 मिनु परमप्रभु यावेमी मेको मुर कली “नेल्ल रवा डा फल जने ब्वने चाप्नेवे।  
 17 तन्न रिम्शो नु मरिम्शो तुइक्पाइक्ब रवा रे ब्वचा मदुम्ब। तेको नाक्त ब्वाइनेवे, मेको नाक्तीन बेक्नेवे” दे अरेवा बाक्त। रोमी ६:२३

मुर आ गेय

- 18 मिनु परमप्रभु यावेमी “मुर का ला बाकचा मरिम्शो दुम्ब। गो मेको नु बाकचा कली वारच पाइब का सेल्लुड” देमाक्त। उपदेसक ४:३०  
 19 मिनु परमप्रभु यावेमी आ खप के सेल्लो मार मार जन्तु नु सरीडम बेरब चिक्ब आन कली मुरुम मार मार नें वोइक्बाक्मे, दे मुर आ बाक्तीके चाक्मी बाक्त। मिनु मुरुमी ब्रोंडशा बाक्ब नेल्ल आन कली नें वोदा बाक्त। मार नें वोदा, मेको नें लीमा बाक्त।  
 20 मुरुमी बी ब्यफ, सरीडम बेरब चिक्ब नु ब्वाकी डा जन्तु नेल्ल आन कली नें वोदा बाक्त। तन्न मुर कली मेको नु बाकचा कली वारच पाइब मबाक्शो बाक्माक्त।  
 परमप्रभुमी मुर आ वारच सेल्लो  
 21 मिनु परमप्रभु यावेमी आदम कली मारिड मतुइक्चा डा पा निन्द्रा पपदा बाक्त। मिनु मेको के जेरी का शोला बाक्त। मिनु मेको पोव्रला कली श्येमी सुवा बाक्त।  
 22 मिनु परमप्रभु यावेमी मेको शोल्लो जेरी के मीश मुर का सेल्लो, मुर आ बाक्तीकेमी चाक्गा बाक्त।  
 23 मिनु आदममी “ओहो, एको रुश, आं रां डा रुश बाक्त। एको श्ये आं रां डा श्ये बाक्त” दे तुइक्ता बाक्त। मिनु मेकोमी “मेको आ नें मीश मुर वोइक्चा माल्ब। मारदे हना वोंडश मुर आ रां रे शोल्लो बाक्ब” देमाक्त।  
 24 मोपतीके वोंडश मुरुमी आ आम आफ आस कली प्रोंडशा, आ मीश नु काथा बाक्ब। मेको निक्शी रां का दुम्नीस। मती १९:५-६; १कोरिन्थी ६:१६; एफिसी ५:३१  
 25 मेना आदम नु आ मीश निम्फा शिन्ना बाक्सा बाक्त। मुने चहिं मतुइक्बाक्सा बाक्त।

### 3

मुरुम परमप्रभु आ देशो मटिशो

- 1 मिनु परमप्रभु यावे आ सेल्लो जन्तु आन दातेमी नेल्ल क्येडा निप्स पाइश्शो बुस्स दुम्माक्त। मिनु बुस्सुमी मीश मुर कली “परमप्रभुमी इस कली ‘एको रू डा रवा आन फल मारिड मब्वसे’ देमे?” दे हिल्लो पवा बाक्त। प्रकाश १२:९; प्रकाश २०:२  
 2 मिनु मीश मुरुमी बुस्स कली “गो एको रू डा रवा आन फल ब्वचा दुम्नस्कु। उत्पत्ती २:१६  
 3 तन्न रू आ दातेमी बाक्शो रवा आ फल आ पर्वम परमप्रभुमी ‘मब्वचा, मथिचा यो। ब्वाइतीसी हना, गे बेक्नीसी’ देंत” देमाक्त। उत्पत्ती २:१७  
 4 तन्न बुस्सुमी “गे बेक्सीन मबेक्नीसी। यूहन्ना ८:४४  
 5 ब्वाइतीसी हना, इस कली रिम्शो नु मरिम्शो मार बाक्बा तुइक्पाइक्ब। मिनु गे परमप्रभु खोदेशो दुम्नीसी। मेकोन परमप्रभुमी तुइक्ताक्ब” देमाक्त।  
 6 मिनु मीश मुरुम मेको रवा तशा ब्वशोनु, बोव्रचा डा कोव्रशोनु, दारशो, रुप्तीक थुं गेचा डा तवा बाक्त। मोपतीके फल सेक्शा, ब्ववा बाक्त। मेको आ नेक्था बाक्ब आ वोंडश कली यो गेवा बाक्त। मेकोमी यो ब्ववा बाक्त। याकूब १:१४-१५; १तिमोथी २:१४  
 7 मिनु नोले निम्फा शिन्ना बाक्शो तुइक्तसे बाक्त। मिनु फोव्रशी रवा आ सफा सेक्शा फेक्तीक सेल्से बाक्त। उत्पत्ती २:२५  
 8 मिनु नाक्नाक्दो मेको निक्शीमी परमप्रभु यावे रूमी हिरशो नेन्से बाक्त। मिनु “परमप्रभु यावेम मतचा डा पा खुइक्चा” दे रवा आन दातेमी लशा, खुइक्ससा बाक्त। भजन संग्रह १३९:७-१०; येरमीया २३:२४  
 9 मिनु परमप्रभु यावेमी आदम कली “ते बाक्डे?” दे ब्रेत्ता बाक्त।  
 10 मेकोमी “गो इन गाक्शो नेता। मिनु गो शिन्ना बाक्तीके, हिंशा खुइक्साक्यी” देमाक्त।  
 11 मिनु “गे शिन्ना बाक्नेवे, दे दोपा तुइक्नेवे? मब्वचा देशो रवा आ फल ब्ववी?” दे हिल्लो पवा बाक्त।  
 12 मिनु मुरुमी “इन गेशो मीश मुरुमी आं कली मेको रवा आ फल गेती। मिनु गो ब्वाता” देमाक्त। २कोरिन्थी ११:३  
 13 मिनु परमप्रभु यावेमी मेको मीश मुर कली “मार पवी?” दे हिल्लो पवा बाक्त। मीश मुरुमी “बुस्सुमी आं कली जोल पा ब्वपाइक्ती। मिनु गो ब्वाता” देमाक्त। २कोरिन्थी ११:३  
 14 मिनु परमप्रभु यावेमी बुस्स कली “बी ब्यफ नु ब्वाकी डा जन्तु नेल्ल आन दातेम गे सराप राइनेवे। मारदे हना मोदेशो मरिम्शो पाप्तीवी। इ रांमी ग्रेशा गाक्चा माल्नेवे। इ ब्रोंडशीक नाक्त सम्म खप जशा, बाक्चा माल्नेवे।

15 गे नु मेको मीश मुर जिशा, बाक्चा मलीसे। मेको आ युड नु इ युड जिशा बाक्नीमी। मीश मुर आ युड कामी इ पिया दिम्शा प्रोल्ब। गे चहिं मेको आ गेग्रेम कोक्नेवे” दे सराप पदा बाक्त। प्रकाश १२:४-५, १५-१७

16 मिनु मेकोमी मेको मीश मुर कली “कोव्रज कुरशा, आल थिवेनु, इ कली ठेयब श्येत गेनुड। आल थिचा रोड पाडनेवे। मो हना यो इ वोंडश कली माल्नेवे। मिनु मेकोमी इ कली हुकुम पाडब” देमाक्त। एफिसी ५:२२-२३; १तिमोथी २:१२

17 मिनु आदम कली “मारदे हना गे इ मीश आ लोत्र नेशा, मब्वचा देशो रवा आ फल ब्वाप्तीवी, इ पतीके आ पर्बम इ रू नेल्लेमी सराप ताइनीम। इ जचा थोव्रक श्येत पा खुम्चा माल्नेवे। उत्पत्ती ८:२१-२२; अय्युब ३१:३८-३९

18 इ रूमी चू नु चोंक वानीम। मिनु गे गिगी खाड ब्वचा माल्नेवे।

19 इ कुप्फी रे गाल यिपाइशशा शोब्ले जचा माल्नेवे। गे खप मदुमे सम्म मोदेशो पचा माल्नेवे। मारदे हना गो इ कली खप रे सेल्शो नड” दे परमप्रभु यावेमी आदम कली देमाक्त। उत्पत्ती २:७; भजन संग्रह ९०:१०; भजन संग्रह १०४:२९; उपदेसक १२:७; रथिस्सलोनिकी ३:१०

20 मिनु आदममी आ मीश कली हव्वा नें वोदा बाक्त। मारदे हना मेको ब्रोइब मुर नेल्ल आन ममा दुम्माक्त।

21 मिनु परमप्रभु यावेमी आदम नु आ मीश आस कली कुशुल के फेक्तीक सेल्शा, फेक्तीमी बाक्त।

22 मिनु परमप्रभु यावेमी “मुर इं खोदेशो दुम्त। रिम्शो नु मरिम्शो तुडक्ब दुम्त। मेको ब्रोइपाइक्ब रवा आ फल यो सेक्शा, ब्वाप्तु हना, गेना हना यो ब्रोइब, गेनायो मबक्ब दुम्ब” देमाक्त।

23 मोपतीके परमप्रभु यावेमी खप रे सेल्शो मुर कली एदेन माइशशो रू रे गुंइशा, अरु रूम गेय पथ सोइक्ता बाक्त। उत्पत्ती २:१५

24 परमप्रभुमी मेको आस कली खेरसी बाक्त। मेको आस कली खेरशा, एदेन रू डा पूर्वमी आ स्वर्ग डा करूब माइशशो गेय पाइब वोदा बाक्त। मेकेर मी ब्रशो एर ओथ हिरब तरवार का यो वोदा बाक्त। मेको ब्रोइपाइक्ब रवा आ फल ब्वचा मताम्सेक्ल, दे कोव्रब वोदा बाक्त।

## 4

### परमप्रभु रे डोन बाक्शो

1 मिनु नोले आदम आ मीश हव्वा नु इम्माक्त। मिनु हव्वाम कोव्रज कुरशा, तौ का थिमाक्त। हव्वामी “परमप्रभु यावेमी आं कली वारच पा आल का गेती” देमाक्त। मिनु आ नें काइन वोदा बाक्त।

2 मिनु मेको आ नोले लेंशा अर्को तौ का यो थिमाक्त। मेको कली हाबील नें वोदा बाक्त। हाबील काइन आ लोकब बाक्माक्त। मेको आल निकशी कोल्शा, हाबील भेडा गोठला दुम्माक्त। काइन चहिं रू डा गेय पाइब दुम्माक्त।

3 काबु काइनमी आ रू डा सिशशो मारेड मारेड थोव्रक परमप्रभु यावे कली चढेवा बाक्त। प्रस्थान २३:१९

4 हाबीलमी आ डोंइती गिक्शो पाठा आ श्ये नु बोंसो परमप्रभु यावे कली चढेवा बाक्त। मिनु परमप्रभु यावेमी हाबील आ चढेशो ब्रवा बाक्त। प्रस्थान ३४:१९; लेवी ३:१६

5 तन्न काइन आ चढेशो मब्रवा बाक्त। मिनु काइन आ कुल राव किक्पा चुरमाक्त। प्रस्थान ३३:१९; हिब्रू ११:४

6 मिनु परमप्रभु यावेमी काइन कली “मारदे चुरे? मारदे राव किक्डे?

7 गे रिम्शो पाप्तीवी हना, गो इ कली मब्राइनुडा डा? ब्राइनुडा। गे मरिम्शो पाप्तीवी हना, मुर साइक्ब जन्तु खोदेशो पा, पाप इ लाप्चोमी बाक्ब। मिनु इ कली माल्ब। गे इ मरिम्शो थु कली ग्राडो” देमाक्त। गलाती ५:१७; रोमी ६:१२

8 मिनु काइनमी आ लोकब हाबील कली “रूमी लस” देमाक्त। मिनु रूमी बाक्सानु, काइनमी हाबील कली सदा बाक्त। १यूहन्ना ३:१२, १५

9 मिनु परमप्रभु यावेमी काइन कली “इ लोकब ते बाक्म?” दे हिल्लो पवा बाक्त। मिनु काइनमी “डाद, गो आं लोकब आ गोठला नडा डा?” देमाक्त। उत्पत्ती ३:९

10 मिनु मेकोमी “नेनो, मार पवी? इ लोकब आ हुशेमी आं कली खप रे ब्रेशशो नेंता। भजन संग्रह ९:१३; मत्ती २३:३५; हिब्रू १२:२४

11 मुल गे सराप रशा, इ रू रे खेरचा पुंइसीनेवे। मारदे हना इ लोकब आ हुश मेकेर जारशो बाक्ब। गन्ती ३५:३३

12 मुल रे गे रू डा गेय पवीनु, मारेड मग्रेल्ब। रागी प्रोंइशा, गाक्ब मुर दुम्चा माल्नेवे” दे परमप्रभु यावेमी देमाक्त।

13 मिनु काइनम परमप्रभु यावे कली “इन गेशो सजाइ ठेयब बाक्ब। मोमो श्येत गेतीनी हना, फाल्ने मचाप्नुड।

14 मुलाक्ती आं कली आं रू रे गुंइताक्वीनी। मिनु इन नेक्था बाक्चा मताइनुड। गो मुल रागी प्रोंइशा, गाक्ब मुर दुम्नुड। आं कली सुम थित्तेक्म हना यो, साइक्नीम” देमाक्त। अय्युब १५:२०-२४

15 मिनु परमप्रभु यावेमी “ममाइ, सुइमी इ कली साइक्तेमी हना, इ तशो सराप मेको कली ७ खेयप रचा माल्ब” देमाक्त। मिनु परमप्रभु यावेमी “काइन कली सुइमी मसदमेक्ल” दे आ रांम चिनु वोदा बाक्त। इजीकीएल ९:६; प्रकाश ७:३-४

16 मिनु नोले काइन परमप्रभु यावे आ डोंइती रे लमाक्त। मिनु एदेन आ पूर्व गे, नोद माइशशो रागीम जाक्दीशशा बाक्माक्त।

### मुर आन ठेयब लेशो

17 मिनु काइन आ मीश नु इम्माक्त। मिनु मेकोमी कोव्रज कुरशा, हनोक थिमाक्त। मिनु काइनम सहर का सेला बाक्त। मेको सहर कली आ तौ हनोक आ नें खोदेशो पा हनोक नें वोदा बाक्त।

18 हनोकमी इराद थिमाक्त। इरादमी मेहुयाएल थिमाक्त। मेहुयाएल मेथुशाएल आ आफ दुम्माक्त। मेथुशाएल लमेक आ आफ दुम्माक्त।



लमेकमी यो मुर साइशो

- 19 मिनु लमेकमी मीश निकशी चाक्का बाक्त। का आ नें आदाह नु अर्को आ नें चिल्लाह बाक्काक्त।
- 20 मिनु आदाहमी याबाल थिमाक्त। मेको ताम्बुम बाक्ब नु गोठम बाक्ब बस्तु योत्रब आन किक्की पिपी बाक्काक्त।
- 21 मेको आ लोकब आ नें यूबाल बाक्काक्त। मेको बीना नु मुइक्तीके ताप्ब आन किक्की पिपी बाक्काक्त।
- 22 मिनु चिल्लाहमी तूबल-काइन थिमाक्त। मेकोमी कांसा नु फलाम के मार मार सेल्लतीक गेय पवा बाक्त। तूबल-काइन आ समी नामा बाक्काक्त।
- 23 मिनु लमेकमी आ मीश निकशी आस कली “आदाह नु चिल्लाह, आं लोत्र नेनीस, गे लमेक आ मीश निकशी, आं सेंदा नेंशा, होस पसे। गो मुर का साइक्ता। मारदे हना मेको ठिटामी आं कली तुप्ती।
- 24 काइन साइक्ब ७ खेयप क्येक्क लेत्चा पुंडसीब हना, लमेक साइक्ब ७७ खेयप क्येक्क लेत्चा पुंडसीब” देंमाक्त। उत्पत्ती ४:१५; लेवी १९:१८; ब्यवस्था ३२:३५; मत्ती १८:२२
- आदम नु हव्वा आस अर्को तौ
- 25 मिनु आदम लेशा आ मीश नु इप्शा, तौ का थिमाक्त। मेको कली सेथ नें वोदा बाक्त। हव्वामी “परमप्रभुमी हाबील आ पा डा अर्को तौ का गेती। मारदे हना काइनमी हाबील कली साइक्तु” देंमाक्त।
- 26 मिनु सेथमी यो तौ का थिमाक्त। मिनु मेको कली एनोश नें वोदा बाक्त। मिनु मेना रे मुरपुकीमी परमप्रभु यावे कली पुंडचा नु ठेयब सेल्चा गोत्रमे बाक्त। उत्पत्ती १२:८

## 5

आदम आ चच युड

१इतिहास १:१-४

- 1 एको आदम आ चच, युड बाक्नीम। परमप्रभुमी मुर सेलानु, आ खोदेशो पा सेला बाक्त। लूका ३:३७-३८; उत्पत्ती १:२७
- 2 वोंडश मुर का नु मीश मुर का सेला बाक्त। मिनु मेको आस कली आसीक गेशा, आस नें मुर वोंडसी बाक्त।
- 3 मिनु आदम सहे का ३० बर्स दुम्मेनु, आ खोदेशो तौ का थिमाक्त। मिनु मेको कली सेथ नें वोदा बाक्त। भजन संग्रह ५१:७; १कोरिन्थी १५:४५
- 4 सेथ थिशा नोले आदम ८ सहे बर्स ब्रोंडमाक्त। अरु तमी तौ यो थिमाक्त।
- 5 मिनु आदम नेल्ल पा ९ सहे ३० बर्स ब्रोंडशा बेक्काक्त।
- 6 मिनु सेथ सहे का ५ बर्स दुम्मेनु, तौ का थिमाक्त। मेको कली एनोश नें वोदा बाक्त।
- 7 एनोश थिशा नोले ८ सहे ७ बर्स ब्रोंडमाक्त। अरु तमी तौ यो थिमाक्त।
- 8 मिनु सेथ नेल्ल पा ९ सहे १२ बर्स ब्रोंडशा बेक्काक्त।
- 9 मिनु एनोश ९० बर्स दुम्मेनु, तौ का थिमाक्त। मेको कली केनान नें वोदा बाक्त।
- 10 केनान थिशा नोले ८ सहे १५ बर्स ब्रोंडमाक्त। अरु तमी तौ यो थिमाक्त।
- 11 मिनु एनोश नेल्ल पा ९ सहे ५ बर्स ब्रोंडशा बेक्काक्त।
- 12 मिनु केनान ७० बर्स दुम्मेनु, तौ का थिमाक्त। मेको कली मा-हालालेल नें वोदा बाक्त।
- 13 केनान मा-हालालेल थिशा नोले ८ सहे ४० बर्स ब्रोंडमाक्त। अरु तमी तौ यो थिमाक्त।
- 14 मिनु केनान नेल्ल पा ९ सहे १० बर्स ब्रोंडशा बेक्काक्त।
- 15 मिनु मा-हालालेल ६५ बर्स दुम्मेनु, तौ का थिमाक्त। मेको कली यरेद नें वोदा बाक्त।
- 16 यरेद थिशा नोले ८ सहे ३० बर्स ब्रोंडमाक्त। अरु तमी तौ यो थिमाक्त।
- 17 मिनु मा-हालालेल नेल्ल पा ८ सहे ९५ बर्स ब्रोंडशा बेक्काक्त।
- 18 मिनु यरेद सहे का ६२ बर्स दुम्मेनु, तौ का थिमाक्त। मेको कली हनोक नें वोदा बाक्त।
- 19 यरेद हनोक थिशा नोले ८ सहे बर्स ब्रोंडमाक्त। अरु तमी तौ यो थिमाक्त।
- 20 मिनु यरेद नेल्ल पा ९ सहे ६२ बर्स ब्रोंडशा बेक्काक्त।
- 21 मिनु हनोक ६५ बर्स दुम्मेनु, तौ का थिमाक्त। मेको कली मेथुसेलाह नें वोदा बाक्त। हनोक कली हिबू लोत्रमी एनोक देंनीम।
- 22 हनोक आ थुमी परमप्रभु आ नेक्था बाक्शो बाक्काक्त। हनोक मेथुसेलाह थिशा नोले सहे सां बर्स ब्रोंडमाक्त। अरु तमी तौ यो थिमाक्त। उत्पत्ती ६:९
- 23 मिनु हनोक नेल्ल पा सहे सां ६५ बर्स दुम्माक्त।
- 24 हनोक परमप्रभु नु गाक्बाक्काक्त। मिनु परमप्रभुमी हनोक कली आ बाक्तीक लदा बाक्त। मुरपुकीम हनोक कली माल्शा, मथिदमे बाक्त। २राजा २:११; हिबू ११:५
- 25 मिनु मेथुसेलाह सहे का ८७ बर्स दुम्मेनु, तौ का थिमाक्त। मेको कली लमेक नें वोदा बाक्त।
- 26 मेथुसेलाह लमेक थिशा नोले ७ सहे ८२ बर्स ब्रोंडमाक्त। अरु तमी तौ यो थिमाक्त।
- 27 मिनु मेथुसेलाह नेल्ल पा ९ सहे ६९ बर्स ब्रोंडशा बेक्काक्त।
- 28 मिनु लमेक सहे का ८२ बर्स दुम्मेनु, तौ का थिमाक्त।
- 29 मेको कली नोआह नें वोदा बाक्त। मेको नें आ अर्थ थुं बारपाइक्तीक बाक्ब। मिनु लमेकमी “परमप्रभु यावेमी खप कली सराप पाप्नु। आं तौ रूम गेय पपाइक्तीके श्येत रे प्रोंडब बाक्ब” देंमाक्त। उत्पत्ती ३:१७-१९

- 30 लमेक नोआह थिशा नोले ५ सहे ९५ बर्स ब्रोंडमाक्त। अरु तमी तौ यो थिमाक्त।  
 31 मिनु लमेक नेल्ल पा ७ सहे ७७ बर्स ब्रोंडशा बेक्माक्त।  
 32 मिनु नोआह ५ सहे बर्स दुम्मेनु, शेम हाम नु यफेथ थीमी बाक्त।

## 6

रागी ब्वाक्कुम सुम्शो

- 1 मिनु नोले रागीमी मुर शुश दुम्मा बाक्त। मेकोपुकीमी शुश तमी थीमा बाक्त।  
 2 मिनु परमप्रभु आ तौपुकीमी मुर आन तमी आन कली तशा “दारशो बाक्नीम” दे मिम्तमे बाक्त। मिनु मेको आन दाते रे योत्रशा चाक्मे बाक्त। अय्युब १:६; २पत्रुस २:४; यहूदा ६  
 3 मिनु परमप्रभु यावेमी “आं सोक्त मुर आन कली शुश बर्स बाक्चा मगेनुड। मुर बेक्चा माल्नीम। आन ब्रोंडतीक सहे का २० बर्स ला दुम्ब” देमाक्त।

परमप्रभु आ थुं मनुशो

- 4 मेना रागीमी नेफीलीम माइशशो थम लाइशशो मुरपुकी बाक्शो बाक्मा बाक्त। मिनु नोले परमप्रभु आ तौपुकीमी रागी डा तमी आन कली चाक्शा, आल थीमे बाक्त। मेको बोल्यो नु टेयब लडाइ पाइब मुर दुम्मा बाक्त। इजीकीएल ३२:२७  
 5 मिनु परमप्रभु यावेमी “रागीम बाक्शो मुर आं अरेशो मटीब नु मरिम्शो पाइब ला बाक्नीम। मार मिम्ताक हना यो, मरिम्शो बाक्त” दे मिम्ता बाक्त। उत्पत्ती ८:२१  
 6 मिनु परमप्रभु यावेमी आंम सेल्शो मुर आन कली तशा, शुश आ थुं मनुथु बाक्शो बाक्माक्त। १सामुएल १५:११-३५; येरमीया १८:७-१०  
 7 मिनु परमप्रभु यावेमी “आं सेल्शो मुर आन कली रागी रे क्याम्नुड। मुर नु जन्तु नेल्ल क्याम्नुड। खपीम ग्रेशा गाक्ब आइक्च जन्तु नु सरीडम बेरब चिक्ब यो क्याम्नुड। मारदे हना गो मेको आन कली सेल्शा यो, आं थुं मनुड” दे मिम्ता बाक्त। गन्ती २३:१९; रोमी ३:३-४; रतिमोथी २:१३  
 8 मिनु परमप्रभु यावेमी नोआह तवानु, मेको कली दाक्ता बाक्त। हिब्रू ११:७

नोआह नु आ तौ

- 9 नोआह आ तौ सां बाक्मा बाक्त। नोआह शुश रिम्शो मुर बाक्माक्त। मुर नेल्लेमी “ठीक पाइब दोस मताइब मुर बाक्ब” दे तुइक्तमे बाक्त। नोआह परमप्रभु नु गाक्बाक्माक्त। उत्पत्ती ५:२२  
 10 मिनु नोआह आ तौ सां आन नें शेम, हाम नु यफेथ बाक्मा बाक्त।  
 11 परमप्रभुमी मुर आन कली कोव्रडानु, नेल्ल मरिम्शो बाक्मा बाक्त। रागी नेल्ल हुश ख्वाक्श पोक्तीकेमी ब्रीमाक्त। अर्को मरिम्शो पाइब यो बाक्मा बाक्त।  
 12 मिनु परमप्रभुमी रागीम बाक्ब मुर आन कली कोव्रडानु, शुश मरिम्शो बाक्मा बाक्त। मुर नेल्लेमी आन दला दाक्स पामे बाक्त। भजन संग्रह १४:२-३  
 13 मिनु परमप्रभुमी नोआह कली “गो मुर नेल्ल आन कली क्याम्नुडमी। मारदे हना मेको आन पबर्म रागी हुश ख्वाक्श पोक्तीकेमी ब्रीत। मुर नु रागी नेल्ल आन कली क्याम्नुड। आमोस ८:२  
 14 गे चहिं खिं खोदेशो पा शी के टेयब डोंगा का सेलो। मिनु आगामी कोठापुकी सेलो। ब्वाक्कु मओव्रचा डा पा आगा नु लाडगा अल्कत्राम सिल्दो” दे नोआह कली देमाक्त।

नोआहमी परमप्रभु कली टिशो

- 15 मिनु परमप्रभुमी “डोंगा दोपा सेल्चा माल्नेवे देशा हना, मेको आ लाइशशो सहे सां कुबीत दुम्चा माल्ब। आ ब्रेम्शो ५० कुबीत दुम्चा माल्ब। आ ग्येथ लाइशशो ३० कुबीत दुम्चा माल्ब। कुबीत का ०.५ मिटर खोदेशो बाक्ब।  
 16 मिनु छाना रे हात का प्रोंडशा, फश यूतीक बोखा का सेल्चा माल्नेवे। मिनु का पटटीम लाप्चो का वोइक्चा माल्नेवे। आगामी खप तला का, दाते तला का नु तला तारी बाक्तीक का सेल्चा माल्नेवे।  
 17 आं देशो रिम्शो पावो। मारदे हना गो मारेड मारेड साइक्चा कली रागी ब्वाक्कुम प्रिनुड। रागीम मार मार सेस बाक्मा, मेको नेल्ल बेक्चा माल्नीम।  
 18 तन्न गो इन कली कोव्रनुड, गे नु आं कबल पाइनुड। मिनु गे, इ तौपुकी, इ मीश, नु इ चाइमीपुकी मेको डोंगामी ओव्रचा माल्नीमी। मेको नेल्ल गे नु ब्रोंडचा माल्नीम। मेको पोथी भाले, बी ब्यफ नेल्ल निक्निकशी बाक्चा माल्नीम। उत्पत्ती ९:९  
 19 गेपुकी नु मारेड मारेड सेस जन्तु निक्निकशी ओव्रचा माल्नीम।  
 20 मारेड मारेड चिक्ब, मारेड मारेड जन्तु नु मारेड मारेड खपीम ग्रेशा गाक्ब आइक्च जन्तु निक्निकशी ब्रोंडचा, दे गे नु डोंगामी ओव्रशा, बाक्चा माल्नीम।  
 21 मिनु इन कली, मार मार जचा ब्वचा ओइशा, उप्शा वोतो। मेको इन कली नु मेको आन कली जचा थोव्रक दुम्ब” दे परमप्रभुमी नोआह कली अरेवा बाक्त।  
 22 मिनु परमप्रभुमी मार मार मदा, नोआहमी नेल्ल टिशा, पवा बाक्त। हिब्रू ११:७

## 7

नोआह टेयब डोंगाम ओव्रशो

- 1 मिनू परमप्रभु यावेमी नोआह कली “गे नु इ खिं डा मुर नेल्ल शी के ठेयब डोंगामी ओव्रडीन। मारदे हना एको पाला डा मुर आन दातेमी गे का ला ठीक पाइब बाकनेवे। उत्पत्ती ६:८
- 2 गे चढ़ेचा दुम्ब बी ब्यफ, क्यारश बोका, भेडा सांड रे ७ जोड लतो। उत्पत्ती ८:२०; लेवी ११:-
- 3 मिनू चढ़ेचा दुम्ब सरीडम बेरब चिक्ब यो ७ जोड लतो। भाले नु पोथी लतो। मारदे हना मेकोपुकी रागीमी ब्रोंइचा माल्नीम।
- 4 गो ७ नाक्त नोले ४० नाक्त नु ४० नाकदो सम्म रेउ यिपाइक्नुड। मिनू आं सेल्शो रागीम मार मार ब्रोंइशा बाक्मा, मेको नेल्ल आन कली साइक्नुडमी” देमाक्त।
- 5 मिनू परमप्रभु यावेमी मार मार अरेवा, नोआहमी नेल्ल टिशा पवा बाक्त।
- 6 रागीमी रेउ यिचा गोवानु, नोआह ६ सहे बर्स दुम्शो बाक्माक्त।
- 7 मिनू नोआहम मार पवा बाक्त देशा हना, डोंइती आ तोपुकी, आ मीश, आ चाइमीपुकी ब्वाक्कु रे प्रोंइचा कली ठेयब डोंगामी ओव्रपाइक्मी बाक्त। १ पत्रुस ३:२०
- 8 मिनू चढ़ेचा दुम्ब बस्तु, चढ़ेचा मदुम्ब बस्तु नु चिक्ब नु मारेड मारेड खपीम गेशा गाक्ब आइक्च जन्तु,
- 9 निक्निकशी बी ब्यफ, जोड जोड भाले पोथी नोआह नु ठेयब डोंगामी ओव्रमा बाक्त। परमप्रभुमी दोपा नोआह कली अरेवा, मोपा पवा बाक्त। उत्पत्ती ६:१९-२०
- 10 मिनू ७ नाक्त नोले रागीम ब्वाक्कु ब्रीचा गोवा बाक्त।
- 11 मिनू रेउ यिमेनु, उड रे यो ब्वाक्कु बारशा कुचा गोवा बाक्त। मेना नोआह ६ सहे बर्स, महिना निक्शी १७ नाक्त दुम नाक्त मोदेशो दुम्माक्त। प्रकाश ९:१
- 12 मिनू ४० नाक्त नु ४० नाकदो शुश रेउ यिमाक्त।
- 13 मेको रेउ यिचा आ डोंइती नाक्ती नोआह नु आ तौ शेम, हाम, नु यफेथ सांफा, नोआह आ मीश नु आ चाइमी सांफा मेको डोंगामी ओव्रमा बाक्त।
- 14 मिनू मारेड मारेड जन्तु, मारेड मारेड बी ब्यफ, क्यारश भेडा, मारेड मारेड खपीम गेशा गाक्ब आइक्च जन्तु नु मारेड मारेड फ्रां पाइशो, ब्रोंइशा बाक्ब जन्तु
- 15 जोड जोड पा नोआह नु ठेयब डोंगामी ओव्रमा बाक्त।
- 16 मिनू ब्रोंइशा बाक्ब नेल्ल जोड जोड पा, भाले पोथी नेल्ल ओव्रमा बाक्त। परमप्रभुमी नोआह कली दोपा अरेवा, मोपा नेल्ल टिशा पवा बाक्त। मेको नेल्ल ओव्रमा नोले परमप्रभु यावेमी लाप्यो चोक्गा बाक्त। उत्पत्ती ६:१९
- 17 मिनू ब्वाक्कु ४० नाक्त सम्म रागीम ब्रीना ब्रीन बाक्माक्त। ब्वाक्कु शुश बारशा, ब्वाक्कुमी ठेयब डोंगा कली कुरा बाक्त। ब्वाक्कु रागीम शुश बारमाक्त।
- 18 मिनू रेउ यिना यिन, ब्वाक्कु बारना बारन लमेनु, मेको डोंगा ब्वाक्कु तारी गाक्चा गोवा बाक्त।
- 19 रागी नेल्लेम ब्वाक्कु शुश दुम्शा, ठेयब डांडा यो सुमा बाक्त।
- 20 डांडा क्येडा यो १५ कुबीत सम्म ग्येत्थ सुमा बाक्त। कुबीत का ०.५ मिटर खोदेशो बाक्ब।
- 21 मिनू रागीम मार मार ब्रोंइशो बाक्मा, बी ब्यफ, क्यारश भेडा, ब्वाकी डा जन्तु, रागीम फोंडब, खपीम गेशा गाक्ब आइक्च जन्तु नु मुर नेल्ल बेक्मा बाक्त। २पत्रुस ३:५-६
- 22 रागीम ब्रोंइशा बाक्ब नेल्ल बेक्मा बाक्त।
- 23 मोपा मेकोमी रागीम ब्रोंइशा बाक्ब मार मार बाक्मा, मुर, जन्तु खपीम गेशा गाक्ब आइक्च जन्तु नु सरीडम बेरब चिक्ब नेल्ल क्याम्दा बाक्त। नोआह नु आ खिं डा मुर ला प्रोंइमी बाक्त।
- 24 मिनू मेको ब्वाक्कु सहे का ५० नाक्त सम्म रागीम बारना बारन बाक्माक्त।

## 8

परमप्रभुम ब्वाक्कु सोव्रपाइशो

- 1 मिनू परमप्रभुमी नोआह नु ठेयब डोंगामी बाक्ब नेल्ल ब्वाकी डा जन्तु नु बी ब्यफ क्यारश भेडा आन कली मप्रेंदीमी बाक्त। मिनू परमप्रभुमी रागीम फश पपदा बाक्त। मिनू ब्वाक्कु सोव्रमाक्त।
- 2 मिनू ब्वाक्कु बुक्तीके नेल्ल सोव्रना सोव्रन लमा बाक्त। रेउ यो देक्माक्त।
- 3 मिनू मेको ब्वाक्कु सोव्रना सोव्रन लशा, सहे का ५० नाक्त नोले शुश सोव्रमाक्त।
- 4 मिनू मेको बर्स डा ७ महिना डा १७ नाक्त मेको ठेयब डोंगा आरारात माइशो डांडामी जाक्दीशशा दिक्माक्त। उत्पत्ती ७:११
- 5 मिनू मेको बर्स डा १० महिना सम्म ब्वाक्कु सोव्रना सोव्रन लमाक्त। १० महिना डा डोंइती नाक्ती अर्को पहाड डा डांडा ताइसमा बाक्त।
- 6 मिनू ४० नाक्त नोले नोआहम आ सेल्शो डोंगा डा झेल रोकगा बाक्त। उत्पत्ती ७:१२, १७
- 7 मिनू मेकेर रे खद का सोइक्ता बाक्त। मेको रागी डा ब्वाक्कु मसोव्रम सम्म एर ओंथ बेरशा बाक्माक्त।
- 8 मिनू नोआहमी “ब्वाक्कु नेल्ल सोव्रमा कों” दे तुइक्चा कली दुकुर का यो सोइक्ता बाक्त।
- 9 मेको दुकुर चहिं जुक्तीक मथित्थु लेशा, नोआह आ बाक्तीके जाक्माक्त। मारदे हना आ लतीकेमी ब्वाक्कुम सुम्शो बाक्माक्त। मिनू नोआहम गुइ दिशा ताक्शा, मेको कली ओइदा बाक्त।
- 10 मिनू अर्को ७ नाक्ती रिम्शा, मेको दुकुर कली लेंशा डोंगा रे सोइक्ता बाक्त।

11 मिनु नाक्नाक्दो ढुकुरमी आ टुंडमी नक वाशो तेल रवा आ सफा का कुरशा जाक्माक्त। मिनु नोआहमी “ब्वाक्कु नेल्ल सोव्रमाक्त” दे तुडक्ता बाक्त।

12 मिनु नोले यो ७ नाक्त रिम्शा, ढुकुर कली सोडक्ता बाक्त। मिनु मेको ढुकुर मलेम्माक्त।

ब्वाक्कु सोव्रशो

13 मेको नोआह ६ सहे बर्स का दुम्मे आ डोंडती डा महिना डा डोंडती डा नाक्तीम रागीमी ब्वाक्कु सोव्रमाक्त। नोआहमी टेयब डोंगा आ छाना थूशा, कोव्रशा “लो, ब्वाक्कु नेल्ल सोव्रमाक्त” देमाक्त। उत्पत्ती ७:११

14 मिनु महिना का नु २७ नाक्त नोले खप नेल्ल सोव्रमाक्त।

15 मिनु परमप्रभुमी नोआह कली

16 “गे, इ मीश, इ तौपुकी नु इ चाइमीपुकी डोंगा रे गूडीन” देमाक्त।

17 मिनु “मारेड मारेड ब्रोंडशा बाक्ब, चिक्ब, जन्तु नु खपीम ग्रेशा गाक्ब आइक्च जन्तु नेल्ल आन कली यो गुंडो। मेकोपुकी सोशा बोशा रागीम शुश दुम्चा माल्नीम” देमाक्त।

18 मिनु नोआह, आ तौपुकी, आ मीश नु आ चाइमीपुकी गूमा बाक्त। २ पत्रुस २:५

19 मिनु जन्तु नेल्ल, खपीम ग्रेशा गाक्ब आइक्च जन्तु नेल्ल, चिक्ब नेल्ल नु रागीम ब्रोंडशा बाक्ब मार मार नेल्ल डोंगा रे गूमा बाक्त।

परमप्रभु यावेमी गेशो लोव्र

20 मिनु नोले नोआहम परमप्रभु यावे कली चढेतीक का सेला बाक्त। मिनु चढेचा दुम्ब बस्तु नु चढेचा दुम्ब चिक्ब नेल्ल लाइशशा चोशा चढेतीक चढेवा बाक्त। उत्पत्ती ७:२

21 मिनु परमप्रभु यावेमी मेको ब्रोंव्रशो रिना नाम्शा, ग्येरसे बाक्त। आ थुमी “मुरुम मरिम्शो पतीकेम खप कली मुल सराप गेनायो मपाइनुड। मुर आ थु मरिम्शो बाक्त हना यो, गेनायो सराप मपाइनुड। गो ब्रोंडशा बाक्ब नेल्ल आन कली साइशशा क्याम्ताक्ड। मोदेशो गेनायो लेंशा मपाइनुड। उत्पत्ती ६:५; अय्युब १४:४; भजन संग्रह १४:३; मत्ती १५:१९; रोमी ३:२३

22 रागी बाक्म सम्म शोक्चा, खुम्चा नु रिक्चा तांडसीब। ग्यू पाइब, हुप्ब, हिउद नु बर्खा दुम्ब। नाक्दो नाक्त दुम्ब” दे लोव्र पवा बाक्त। येरमीया ३३:२०, २५

## 9

परमप्रभुमी आसीक गेशो

1 मिनु परमप्रभुमी नोआह नु आ तौ आन कली आसीक गेमी बाक्त। मेकोमी “तमी तौ थिशा, सोशा बोशा शुश दुमीन। रागी प्रिदीने। उत्पत्ती १:२८

2 रागी डा जन्तु नेल्ल, सरीडम बेरब चिक्ब, खपीम ग्रेशा गाक्ब आइक्च जन्तु नु समुन्द्र डा डांड नेल्ल, इन कली तशा, हिंचा माल्नीम। मेको आन कली इन गुडमी गेता।

3 डोंडती इन कली गिगी खाइ ब्वचा गेता। मुल गो ब्रोंडशा बाक्ब जन्तु नेल्ल इन कली ब्वचा गेतन्नी। उत्पत्ती १:२९; कलस्सी २:१६

4 क्योरशा हुश मचुइक्थु चहिं मब्वने। मारदे हना हुशेमी ब्रोंडतीक सोक्त बाक्ब।

5 मुरुमी मुर कली साइक्तु हना, जन्तुमी मुर कली साइक्तु हना, मेको यो साइक्चा पुंडसीब। मुरुमी आ लोकब साइक्तु हना, मेको यो साइक्चा पुंडसीब। लेवी ३:१७; लेवी १७:१०-१४; ब्यवस्था १२:२३

6 सु सुमी मुर साइशशा हुश जारबा, मेको यो मोपान साइशशा, हुश जारचा पुंडसीब। मारदे हना गो मुर कली आं खोदेशो पा सेलता। प्रस्थान २१:१२; लेवी २४:१७; गन्ती ३५:३३; मत्ती २६:५२; रोमी १३:४; प्रकाश १३:१०

7 गे रागीम सोशा बोशा शुश दुमीने” दे परमप्रभुमी नोआह कली देमाक्त।

परमप्रभुमी कबल पशो

8 मिनु नोले परमप्रभुमी नोआह नु आ तौ आन कली

9 “नेनीन, गे नु इन नोले डा चच युड नु आं कबल पाइनुड। उत्पत्ती ६:१८

10 डोंगामी ब्रोंडशा बाक्ब चिक्ब, बी ब्यफ, रागी डा जन्तु गे नु डोंगा रे गूशो नेल्ल नु आं कबल पाइनुड। होसे २:२०

11 गो मार कबल पाइनुड देंशा हना, ब्रोंडशा बाक्ब नेल्ल आन कली ब्वाक्कुम मसाइक्नुड। रागी बिग्रेचा कली गेनायो ब्वाक्कु मबारपाइक्नुड” देमाक्त।

12 मिनु परमप्रभुमी “गे नु गे नु ब्रोंडशा बाक्ब नेल्ल इन कली आं कबल पतीके चिनु का गेनुड। मेको इन नोले डा पाला नेल्ल आन कली यो बाक्ब।

13 गो गोस्सुमी आं वाक्श वोइक्नुड। मेको गो रागी नु कबल पशो आ चिनु बाक्ब।

14 मिनु गो रागी तारी गोस्स सोइक्तुनु, मेको गोस्सुमी आं वाक्श तांडसीब।

15 मिनु गो गे नु मारेड मारेड ब्रोंडशा बाक्ब नु कबल पाता, दे मिम्नुड। गो गेनायो ब्रोंडशा बाक्ब नेल्ल आन कली ब्वाक्कुमी मसाइक्नुडमी। यसैया ५४:७-१०

16 मेको वाक्श गोस्सुम बाक्मेनु, गो मेको कली ताइनुड। मिनु गो रागीम बाक्ब मुर नु ब्रोंडशा बाक्ब नेल्ल नु गेना हना यो लीब कबल पाता, दे मिम्नुड” देमाक्त।

17 मिनु परमप्रभुमी नोआह कली “मेको वाक्श कबल आ चिनु बाक्ब। गो गे नु रागीम ब्रोंडशा बाक्ब नेल्ल नु कबल पाता” देंमाक्त।

18 डोंगा रे यूशो नोआह आ तौपुकी शेम, हाम नु यफेथ बाक्मा बाक्त। हाम चहिं कनान आ आफ बाक्माक्त। उत्पत्ती ५:३२

19 मेको सांफा नोआह आ तौ बाक्मा बाक्त। मेको रे रागी नेल्ल ब्रीमा बाक्त।

नोआहम अडगुर रू सेल्शो

20 मिनु नोआह रूमी गेय पाइब दुग्शा, अडगुर रू सेला बाक्त। मेको नेल्ल क्येडा डोंडती अडगुर खुम्ब मुर दुग्माक्त।

21 मिनु अडगुर शांबु तूशा दुक्शा, आ ताम्बुमी शिन्ना इग्माक्त।

22 मिनु कनान आ आफ हाममी आ आफ शिन्ना तशा, लाडगामी बाक्शो आ लोकब आस कली देंमाक्त। प्रस्थान २०:१२; हितोपदेस ३०:१७

23 मेको नेंशा, शेम नु यफेथम वा का सुर सुरम ग्याड्गशा लाग्शा, नोले रे ग्रेना ग्रेन लशा, आस आफ आ ताम्बु ओत्रसा बाक्त। मिनु आस आफ आ भेत्रे रां सुम्से बाक्त। नोले रे ग्रेशा, आस आफ आ शिन्ना रां मताम्से बाक्त।

24 मिनु नोले नोआह आ दुक्शो रे सेंसे बाक्त। आ चचमी आ कली मार पवा, नेल्ल तुडक्ता बाक्त।

25 मिनु नोआहमी “कनान सराप रल। आ लोकब आस नेल्ल क्येडा आडक्च वाइल दुग्ल” दे सराप पवा बाक्त।

26 मिनु मेकोमी लेंशा “परमप्रभु, शेम आ परमप्रभु यावे ठेयब बाक्ब। कनान मेको आ नेल्ल क्येडा आडक्च वाइल दुग्ल” दे शेम कली आसीक गेवा बाक्त।

27 मिनु लेंशा “परमप्रभुमी यफेथ कली ‘सोशा बोशा शुश दुग्पदल। मेको शेम आ ताम्बुम बाक्चा तवल। कनान चहिं मेको आ वाइल दुग्ल’ ” दे लोत्र पवा बाक्त।

28 मिनु ठेयब ब्वाक्कु बारशा नोले, नोआह सहे सां ५० बर्स ब्रोंडमाक्त।

29 मिनु नोआह नेल्ल पा ९ सहे ५० बर्स ब्रोंडशा बेक्माक्त।

## 10

रागी नेल्ल डा मुर

१ इतिहास १:५-२३

1 ब्वाक्कु बारम नोले नोआह आ तौपुकी शेम, हाम नु यफेथमी तौपुकी थीमा बाक्त। नोआह आ तौ आन चच युइ सु बाक्मा बाक्त देंशा हना,

यफेथ आ चच युइ

2 यफेथ आ तौ गोमेर, मागोग, मादै, यावान, तूबल, मेशेक नु तिरास बाक्मा बाक्त। इजीकीएल २७:१३-२२; इजीकीएल ३८:२; इजीकीएल ३९:१,६

3 गोमेर आ तौपुकी अश्केनज, रीफत नु तोगारमाह बाक्मा बाक्त।

4 यावान आ तौपुकी एलीशाह, कितीम, टारशीश नु दोदानीम बाक्मा बाक्त।

5 मेको मुरपुकी रे समुन्द्र आ नेक्था बाक्ब जरमेशो बाक्मा बाक्त। मेकोपुकी यफेथ आ चच युइ बाक्मा बाक्त। मेकोपुकी आंम रागीम बाक्शो बाक्मा बाक्त। मिनु आंम रागी रागीमी, आंम खिं खिं डा मुरुमी आंम लोत्र ब्वाक्मा बाक्त।

हाम आ चच युइ

6 हाम आ तौपुकी कूश, इजीप्त, पूत नु कनान बाक्मा बाक्त।

7 कूश आ तौपुकी शेबा, हवीलाह, साब्ताह, रामाह नु साब्तेका बाक्मा बाक्त। रामाह आ तौ निक्शी शेबा नु देदान बाक्सा बाक्त।

निग्नेद सक्ति पाइग्गशो दुग्शो

8 मिनु कूशमी निग्नेद यो थिमाक्त। मेको बोल्थो नु सक्ति पाइग्गशो मुर दुग्माक्त।

9 मेको परमप्रभु यावे आ डोंडती सक्ति पाइग्गशो सिखारी बाक्माक्त। मोपतीके मुरुमी बोल्थो मुर का तशा “परमप्रभु यावे आ डोंडती निग्नेद खोदेंशो सक्ति पाइग्गशो सिखारी बाक्बाक्त” दे देंतीके देंमा बाक्त। मत्ती ५:५

10 मिनु आ डोंडती डा राज्य बेबीलोन बाक्माक्त। अरु एरेक नु अक्कद सहर बाक्मा बाक्त। मेको नेल्ल शिनार रागीम बाक्बाक्मा बाक्त।

11 निग्नेद मेको रागी रे अस्सुर जाक्शा, निनवे, रेहोबोथ-इर नु कालाह सहर सेला बाक्त।

12 निनवे नु कालाह सहर आस दातेमी रेसेन सहर सेला बाक्त। मेको डेयब सहर बाक्माक्त।

13 इजीप्त, लूदीम, अनामीम, लेहाबीम, नफतुहीम,

14 पथूसीम, कस्लुहीम नु काफतरीम आन आफ दुग्माक्त। मेकोपुकी रे पलिस्ती यूमा बाक्त।

15 मिनु कनानमी आ डोंडती डा तौ सीदोन नु नोले हेथ थिमाक्त।

16 मिनु नोले यबुसी, एमोरी, गिरगाशी,

17 हिव्वी, अरकी, सिनी,

18 अरवादी, सेमारी नु हमाथी थिमाक्त। नोले कनान रागी डा मुर शुश दुग्मा बाक्त।

19 कनान डा मुर आन रागी सीदोन रे गेरा गे नु गाजा सम्म दुग्माक्त। सोदोम नु गोमोररा गे अदमाह, सेबोयीम नु लाशा सहर सम्म दुग्माक्त।

- 20 मिनू हाम आ चच युड आन खिं खिं डा मुर आन लोत्र, आन रू नु आन रागी बाक्मा बाक्त।  
 शेम आ चच युड  
 21 शेम यफेथ आ लोकबमी यो तौपुकी थिमाक्त। शेम एबेर आ आल आन किकी पिपी बाक्माक्त। उत्पत्ती ११:१०  
 22 शेम आ तौ चच युड सु सु बाक्मा बाक्त देशा हना, एलाम, अरशुर, अरपक्शाद, लूद नु अराम बाक्मा बाक्त।  
 23 अराम आ तौपुकी ऊज, हुल, गेथेर नु माश बाक्मा बाक्त। उत्पत्ती २२:२१  
 24 मिनू अरपक्शाद शेलाह आ आफ दुम्माक्त। शेलाह एबेर आ आफ दुम्माक्त।  
 25 एबेरमी तौ निक्शी थिमाक्त। का आ नें पेलेग बाक्माक्त। मारदे हना मेना रागी योक्शो बाक्माक्त। पेलेग नें आ अर्थ भाग का बाक्माक्त। अर्को आ नें योक्तन बाक्माक्त। उत्पत्ती ११:८-९; ब्यवस्था ३२:८  
 26 मिनू योक्तनमी अल्मोदाद, शेलेफ, हासार-मावेथ येराह  
 27 हदोराम, उजाल, दिकलाह,  
 28 ओबाल, अबीमा-एल, शेबा,  
 29 ओफीर, हवीलाह नु योबाब आन आफ दुम्माक्त। मेको नेल्ल योक्तन आ तौ बाक्मा बाक्त।  
 30 मिनू आन बाक्तीक मेशा रे पूर्व डा सेफार माडरशो पहाड सम्म दुम्माक्त।  
 31 मिनू शेम आ चच युड आन खिं खिं डा मुर आन लोत्र, आन रू नु आन रागी बाक्मा बाक्त।  
 32 मिनू मेको नोआह आ तौ नेल्ल आन खिं खिं डा मुर, आन चच युड, आन आन रागी बाक्मा बाक्त। ब्वाक्कु बारशा नोले मेकोपुकी रे रागी नेल्ल ब्रीमा बाक्त।

## 11

- बाबेल सहर डा लाइरशो खिं  
 1 डोंडती रागी नेल्ल डा मुर लोत्र का ब्वाक्बाक्मा बाक्त।  
 2 मुरपुकी पूर्व गे लना लन बाक्मानु, शिनार नें पाइरशो रागीम ठेयब दिंम का थित्मे बाक्त। मिनू मेकेर खिं सेल्शा बाक्मा बाक्त।  
 3 मिनू मुरपुकीमी “लो, इंटा सेल्य। मिनू मीमी रिम्शो पा चोय” देमा बाक्त। मिनू फुल्लु आ पा डा इंटा नु हिलो आ पा डा अल्कत्रा गुंडदमे बाक्त।  
 4 मिनू नोले मेकोपुकीमी “गोपुकी इं कली सहर का सेल्सीय, ठेयब लाइरशो सरीड थिचा डा खिं का सेल्य। इं नें ठेयब सेल्सीशा, इं मुरपुकी रागी नेल्लेमी मब्राथु बाक्य” देमुमा बाक्त।  
 5 मिनू परमप्रभु यावे मेको मुरपुकीमी सेल्शो सहर नु सरीड थिचशो ठेयब लाइरशो खिं कोत्रथ यिमाक्त। उत्पत्ती १८:२१; भजन संग्रह १४:२  
 6 मिनू परमप्रभु यावेमी “लो, मेको नेल्ल थुं का डा मुर नमी। मेको नेल्ल लोत्र का ब्वाक्नीम। मेको आन नक गोशो गेय ला बाक्ब। मार मार मिम्त्मे, मेको नेल्ल पने चान्नीम। प्रेरित २:१-११  
 7 मुल उड लय। मेको आन पशो लोत्र खाल्शा पपाइय्य। मिनू कामी अर्को आ लोत्र मरुबल” देमाक्त।  
 8 मोपा परमप्रभु यावेमी मुर आन कली नेल्ल रागीम फ्रादीमी बाक्त। मिनू मेकोपुकीमी सहर सेल्चा प्रोन्मे बाक्त। ब्यवस्था ३२:८; लूका १:५१  
 9 मोपतीके मेको सहर आ नें बाबेल वोदमे बाक्त। मारदे हना मेकेर रे परमप्रभु यावेमी रागी नेल्ल डा मुर आन लोत्र खाल्दा बाक्त। मिनू परमप्रभु यावेमी मोपा मुर नेल्ल आन कली फ्रादीमी बाक्त।

शेम आ चच युड

- 10 शेम आ आ चच युड सु सु बाक्मा बाक्त देशा हना, शेम सहे का बर्स दुम्मेनु, अरपक्शाद आ आफ दुम्माक्त। मेना ब्वाक्कु बारशा सोत्रशो बर्स निक्शी दुम्शो बाक्माक्त। १इतिहास १:२४-२७; लूका ३:३४-३६; उत्पत्ती १०:२१-२२  
 11 मिनू शेम अरपक्शाद थिशा नोले ५ सहे बर्स ब्रोंडमाक्त। अरु तमी तौ यो थिमाक्त।  
 12 मिनू अरपक्शाद ३५ बर्स दुम्मेनु, शेलाह आ आफ दुम्माक्त।।  
 13 मिनू शेलाह थिशा नोले ४ सहे बर्स सां ब्रोंडमाक्त। अरु तमी तौ यो थिमाक्त।  
 14 मिनू शेलाह ३० बर्स दुम्मेनु, एबेर थिमाक्त।  
 15 मिनू शेलाह एबेर थिशा नोले ४ सहे बर्स सां ब्रोंडमाक्त। अरु तमी तौ यो थिमाक्त।  
 16 मिनू एबेर ३४ बर्स दुम्मेनु, पेलेग आ आफ दुम्माक्त।  
 17 मिनू एबेर पेलेग थिशा नोले ४ सहे ३० बर्स ब्रोंडमाक्त। अरु तमी तौ यो थिमाक्त।  
 18 मिनू पेलेग ३० बर्स दुम्मेनु, रेऊ आ आफ दुम्माक्त।  
 19 मिनू पेलेग रेऊ थिशा नोले सहे निक्शी ९ बर्स ब्रोंडमाक्त। अरु तमी तौ यो थिमाक्त।  
 20 मिनू रेऊ ३२ बर्स दुम्मेनु, सेरूग आ आफ दुम्माक्त।  
 21 मिनू रेऊ सेरूग थिशा नोले, सहे निक्शी ७ बर्स ब्रोंडमाक्त। अरु तमी तौ यो थिमाक्त।  
 22 मिनू सेरूग ३० बर्स दुम्मेनु, नाहोर आ आफ दुम्माक्त।  
 23 मिनू सेरूग नाहोर थिशा नोले सहे निक्शी बर्स ब्रोंडमाक्त। अरु तमी तौ यो थिमाक्त।  
 24 मिनू नाहोर २९ बर्स दुम्मेनु, तेराह आ आफ दुम्माक्त।  
 25 मिनू नाहोर तेराह थिशा नोले सहे का १९ बर्स ब्रोंडमाक्त। अरु तमी तौ यो थिमाक्त।

26 मिनु तेराह ७० बर्स दुम्मेनु, अब्राम, नाहोर नु हारान आन आफ दुम्माक्त।

तेराह आ चच युड

27 तेराह आ चच युड सु सु बाक्मा बाक्त देशा हना, तेराह अब्राम, नाहोर नु हारान आन आफ दुम्माक्त। हारानमी लोत थिमाक्त।

28 हारान चहिं आ आफ तेराह क्येडा डोंडती आ जरमेशो कल्दी डा ऊर सहरमी बेक्माक्त।

29 मिनु अब्राम नु नाहोर निम्फामी ग्युबे पाम्से बाक्त। अब्राम आ मीश आ नें साराइ बाक्माक्त। नाहोर आ मीश आ नें मिल्का बाक्माक्त। मिल्का हारान आ तमी बाक्माक्त। हारान मिल्का नु यिस्का आस आफ बाक्माक्त। उत्पत्ती २२:२०

30 साराइ आल मथीब बाक्माक्त।

31 मिनु तेराहमी आ तौ अब्राम, आ चच लोत, हारान आ तौ, नु आ चाइमी, अब्राम आ मीश साराइ आन कली लाइशशा, कल्दी रागी डा ऊर रे कनान रागी लचा गोत्रमे बाक्त। मिनु हारान माइशशो सहर जाकदीशशा बाक्मा बाक्त। यहोसु २४:२; नेहेम्याह १:७

32 तेराह सहे निकशी ५ बर्स दुम्शा, हारान सहरम बेक्माक्त।

## 12

परमप्रभुमी अब्राम नु लोत्र पशो

1 मिनु परमप्रभु यावेमी अब्राम कली “इ रागी, इ खिं खिं डा मुर नु इ आफ आ खिं रे लावो। तेको रागी लचा माल्नेवे, गो इ कली कौंडनन। गन्ती २३:९; प्रेरित ७:३; हिब्रू ११:८

2 गो इ रे पा ठेयब जात डा मुर सेल्लुडमी। गो इ कली आसीक गेनन। इ नें ठेयब सेल्लुड। गे अर्को आन कली आसीक दुम्नेवे। उत्पत्ती २४:१,३,५; भजन संग्रह ७२:१७

3 सुमी इ कली आसीक गेवा, गो मेको कली आसीक गेनुड। सुम इ कली सराप पाइबा, गो मेको कली सराप पाइनुड। इ पबर्म रागी डा मुर नेल्ल आसीक ताइनीम” देमाक्त। उत्पत्ती १८:१८; उत्पत्ती २२:१८; उत्पत्ती २६:४; उत्पत्ती २८:१४; प्रस्थान २३:२२; प्रेरित ३:२५; गलाती ३:८

अब्राममी परमप्रभु कली टिशो

4 मिनु अब्राम परमप्रभु यावे आ लोत्र नेंशा, हारान सहर रे गाक्माक्त। लोत यो अब्राम नु गाक्माक्त। हारान सहर रे गाक्मेनु, अब्राम ७५ बर्स, दुम्शो बाक्माक्त।

5 अब्राममी आ मीश साराइ, आ लोक्ब आ तौ, लोत, आन मारेइ मारेइ, हारान सहरमी ग्याप्शो वाइलीम वाइल आन कली यो लदा बाक्त। मिनु मेको नेल्ल कनान रागी लचा गोत्रमे बाक्त। मिनु लशा कनान रागी जाकदीम्मा बाक्त।

परमप्रभुमी अब्राम कली रागी कौंडशो

6 मिनु अब्राम कनान रागी जाकदीशशा, शेकेम सहर आ नेक्था मोरेह माइशशो मुर आ रवा आ नेक्था जाकदीम्माक्त। मेना कनान डा मुरपुकी रागीम बाक्शो बाक्मा बाक्त। उत्पत्ती ३५:४; यहोसु २४:२५-२६

7 मेकेर जाकदीम्मेनु, परमप्रभु यावे अब्राम आ डोंडती गूशा, मेको कली “एको रागी इ चच युड आन कली गेनुड” दे लोत्र गेवा बाक्त। मिनु अब्राममी “गो परमप्रभु यावे कली ताता” दे चढेतीक का सेला बाक्त। उत्पत्ती १३:१५; उत्पत्ती १५:१८; उत्पत्ती १७:८; उत्पत्ती ३५:१२; प्रस्थान ६:४,८; प्रस्थान ३२:१३; यहोसु २१:४३; प्रेरित ७:५

8 मेकेर रे लशा, बेथेल सहर आ पूर्व गे डा डांडामी आ ताम्बु याक्शा कीडा बाक्त। बेथेल सहर पच्छिम गे नु ऐ सहर पूर्व गे बाक्शा, मेकेर यो परमप्रभु यावे कली चढेतीक का सेल्ला, परमप्रभु यावे कली लोत्र पा ठेयब सेला बाक्त। उत्पत्ती ४:२६

अब्राम इजीप्त रागीम लशो

उत्पत्ती २०:१-१८; उत्पत्ती २६:७-११

9 मेकेर रे लशा, नेगेब माइशशो रागी आ दक्खिन गे लमाक्त।

10 मिनु मेको रागीम अन्काल बाक्माक्त। मोपतीके मेकेर रे लशा, इजीप्त रागीम बाक्थ, लमाक्त। मारदे हना ठेयब अन्काल बाक्माक्त।

11 मिनु इजीप्त ओत्रचा क्येडा डोंडती अब्राममी आ मीश साराइ कली “नेनो, गे दारशो मीश मुर बाक्नेवे।

12 मिनु इजीप्त डा मुरुम इ कली तशा ‘मेको आ मीश बाक्ब’ दे आं कली साइक्नीम। इ कली चहिं ब्रोंडचा गेनीम।

13 मोपतीके ‘आ समी नड’ देनो। मिनु इ मो देशो आ पबर्म गो साइक्चा मपुंडसीनुड, ब्रोंडचा ताइनुड” दे आ मीश कली मदा बाक्त।

साराइ कली लाइशशो

14 मिनु अब्राम इजीप्त रागीम जाकदीम्मेनु, इजीप्त डा मुरपुकीमी साराइ आ पबर्म “मेरे मीश मुर थम दारशो बाक्ब” देमुमा बाक्त।

15 मिनु फाराओ माइशशो पिप आ मुरपुकीमी साराइ कली तशा “थम दारशो मीश मुर का ताइतक” दे मदमे बाक्त। मिनु साराइ कली फाराओ आ खिं लदमे बाक्त।

16 मिनु साराइ आ पबर्म अब्राम भेडा, ब्यफ, गधा, वाइलीम वाइल नु दलओठ मारेइ मारेइ गेचा पुंडसे बाक्त।

17 तन्न परमप्रभु यावेमी फाराओ नु आ खिं डा मुर आन कली अब्राम आ मीश साराइ आ पबर्म ठेयब श्येत गेवा बाक्त।

- 18 मिनु फाराओमी अब्राम कली ब्रेशशा “गे आं कली मार पवी? मारदे ‘इ मीश बाकब’ मदेने?  
 19 मारदे ‘आं समी बाकब’ देने? गो हेरा आं मीश सेल्ला। मुल इ मीश लते। एकेर रे लावो” दे मदा बाक्त।  
 20 फाराओमी मेको लोत्र आ मुर आन कली माइशशा, अब्राम, आ मीश नु आ नु बाकब नेल्ल आन कली मेकेर रे सोइक्तमे बाक्त।

## 13

अब्राम नु लोत ब्राशो

- 1 मिनु अब्राम, आ मीश, आ मारेइ मारेइ नेल्ल नु लोत यो लाइशशा इजीप्त रे नेगेब रागी लमाक्त।  
 2 अब्राम शुश बी ब्यफ क्यारश भेडा नु सुन चांदी पाइशशो मुर बाक्माक्त।  
 3 मिनु दक्खिन डा नेगेब रे लशा, बेथेल सहर जाकदीम्माक्त। मेकेर बेथेल सहर नु ऐ सहर आस दातेमी डोंइती आ ताम्बु कीतीकेम जाकदीम्माक्त।  
 4 मिनु इजीप्त लचा क्येडा डोंइती मेकेर सेल्लो चढ़ेतीकेमी लेशशा जाकदीशशा, परमप्रभु यावे कली लोत्र पा, ठेयब सेला बाक्त। उत्पत्ती १२:८  
 5 मिनु लोत के यो क्यारश भेडा, बी ब्यफ नु ताम्बु शुश बाक्माक्त।  
 6 मिनु अब्राम नु लोत आस मारेइ मारेइ शुश दुम्तीके मेको निक्शी काथा बाक्ने मचाप्से बाक्त।  
 7 मिनु अब्राम आ गोठलापुकी लोत आ गोठलापुकी नु जीमे बाक्त। मेना मेको रागीम कनानी नु परिज्जीपुकी बाक्मा बाक्त।  
 8 मिनु अब्राममी लोत कली “गो पोबु नस। जिचा मदुम्ब। इ गोठलापुकी नु आं गोठलापुकी यो जिचा मदुम।  
 9 गे नु गो ब्राचा रिम्शो दुम्ब। एको रागी नेल्ल इ डोंइती बाकब। गे पेरा गे लते हना, गो ग्युरा गे लाइनुड। गे ग्युरा गे लते हना, गो पेरा गे लाइनुड” देमाक्त।  
 10 मिनु लोतमी यर्दन खोला आ नेक्था ब्वाक्कु बाक्शो रिम्शो दिम तवा बाक्त। मेको परमप्रभु यावे आ रू नु इजीप्त रागी खोदेशो दारशो तांइसे बाक्त। सोआर सहर सम्म मोदेशो दारशो तांइसे बाक्त। परमप्रभु यावेम सोदोम नु गोमोररा सहर मीम जेप्पाइक्का क्येडा डोंइती मेकेर थाम्पा दारशो बाक्माक्त। उत्पत्ती २:८-१०  
 11 मिनु लोत यर्दन खोला डा दिम योत्रशा, पूर्व गे लमाक्त। मोपा लोत नु अब्राम ब्रासा बाक्त।  
 12 मिनु अब्राम कनान रागीम बाक्शो बाक्माक्त। लोत चहिं यर्दन खोला डा दिमम बाक्शो सहर आन नेक्था बाक्शा, आ ताम्बु याक्ना याक्न सोदोम सहर सम्म जाकदीम्माक्त।  
 13 सोदोम सहर डा मुरपुकी थम मरिम्शो बाक्मा बाक्त। मेकोपुकीमी परमप्रभु यावे आ डोंइती शुश मरिम्शो पामे बाक्त। उत्पत्ती १८:२०; उत्पत्ती १९:४-९

परमप्रभुम अब्राम कली लोत्र गेशो

- 14 लोत नु अब्राम ब्रासा नोले परमप्रभु यावेमी अब्राम कली “इ बाक्तीके रे पूर्व, पच्छिम, उत्तर, दक्खिन गे कोत्रडो।  
 15 गे तेको तेको रागी ताइनेवे, मेकोन इ कली नु इ चच युइ आन कली गेना हना यो कली गेनुड। उत्पत्ती १२:७  
 16 गो इ चच युइ खप डा फुरक खोदेशो पा शुश सेल्लुड। मुरुम फुरक हिक्ने चाप्तेक्म हना ला, इ चच युइ आन कली यो हिक्ने चाप्नीम। तन्न मचाप्नीम। उत्पत्ती २८:१४; गन्ती २३:१०; १राजा ४:२०  
 17 बोक्को, रागी नेल्ल हिरशा लावो। मेको नेल्ल इ कली गेनन” दे परमप्रभु यावेमी लोत्र गेवा बाक्त।  
 18 मिनु अब्राममी आ ताम्बु याक्शा, हेब्रोन रागी डा माप्रे माइशशा ब्वाकीम कीडा बाक्त। मिनु मेकेर परमप्रभु यावे कली चढ़ेतीक का सेला बाक्त। उत्पत्ती १४:१३-२४

## 14

अब्राममी लोत कली प्रोंइशो

- 1 मिनु शिनार डा पिप अन्नफेल, एल्लासार डा पिप अरयोक्, एलाम डा पिप केदोर-लाओमेर नु गोयीम रागी डा पिप तिदालम सासन पामे ना, यहोसु १२:२३  
 2 सोदोम डा पिप बेरा, गोमोररा डा पिप बिरशा, अदमाह डा पिप शिनाब नु सेबोयीम डा पिप शेमेबेर, बेला सहर डा पिप नु लडाइ पामे बाक्त। बेला सहर कली सोआर यो देनीम। उत्पत्ती १९:२४  
 3 मेको नेल्ल सिददीम दिममी लडाइ पथ खुम्सीशो बाक्मा बाक्त।  
 4 मारदे हना मेकोपुकीमी लडाइ का ब्रुशा नोले, १२ बर्स सम्म श्येत जशा, पिप केदोर-लाओमेर कली मार मार गेचा माल्मा बाक्त। मोपतीके मेकोपुकीम १३ बर्समी “मगेय, लडाइ पय” दे सल्ला पामे बाक्त।  
 5 मिनु १४ बर्समी पिप केदोर-लाओमेर नु मेको आ वारच पिपपुकी अशतारोथ-कारनाडमम बाक्ब रेफाइमपुकी, हामम बाक्ब जूजीमपुकी, शावेह-किरयथ-थाइम बाक्ब एमीमपुकी, उत्पत्ती ३६:२०-३०  
 6 सेइर पहाडम बाक्ब होरी आ मुर नेल्ल आन कली एल-पारान मुर बाक्तीक आ नेक्था सम्म फ्रूमे बाक्त।  
 7 मेको प्राब पिप आन लां लेशशा, एन-मिशपात जाक्शा, हासासोन-तामारम बाक्ब अमालेकी नु एमोरी आन कली फ्रूमे बाक्त। एन-मिशपात कली कादेश यो देनीम।  
 8 मेना सोदोम डा पिप, गोमोररा डा पिप, अदमाह डा पिप, सेबोयीम डा पिप नु बेला डा पिप सल्ला पशा, बेला सहर कली सोआर यो देनीम



9 सिददीम दिंममी एलाम डा पिप केदोर-लाओमेर गोयीम रागी डा पिप तिदाल, शिनार डा पिप अम्राफेल नु एल्लासार डा पिप अरयोक नु लडाइ पथ जाकमा बाकत। ४ जना पिपपुकीम ५ जना पिप नु लडाइ पशो बाकमा बाकत।

10 मिनु सिददीम डा दिंममी अल्कत्रा खाल्टा शुश बाकमा बाकत। मिनु सोदोम नु गोमोररा डा पिप प्रोक्शा, खाल्टा आगा दोक्सा बाकत। लीशो मुरपुकी चहिं पहाड गे प्रोक्सा बाकत।

11 मिनु केदोर-लाओमेर नु आ हुलमी सोदोम नु गोमोररा सहर डा मुर नु आन मार मार नेल्ल रोडशशा लदमे बाकत।

12 मिनु मेकोपुकीमी सोदोम सहरम बाकशो अब्राम आ लोकब आ तौ लोत नु आ मारेड मारेड नेल्ल यो लाइशशा लमा बाकत। उत्पत्ती १३:१०-१२

13 मिनु पहाडम प्रोक्शा मुर कामी हिबू अब्राम कली मेको लोत्र शेंदा बाकत। अब्राम चहिं एमोरी माम्रे आ ब्वाकीम बाकशो बाकमाकत। माम्रे एशकोल नु आनेर वोबु बाकसा बाकत। मेको अब्राम कली वारच पाइब बाकमा बाकत।

14 मिनु अब्राममी आ लोकब आ तौ ग्याइशशो नेशा, आ खिंमी जरमेशो सहे सां १८ जना लडाइ पचा कली शेंसीशो मुर कली या गेशा, ठीक पवा बाकत। मिनु मेकोपुकीमी रोइक्ब आन कली दान सहर सम्म खेदा पामे बाकत। यहोसु १९:४७; न्यायाधीस १८:२९

15 नाकदोमी अब्राममी आ मुर आन कली हुल निकशी पशा, रोइक्बपुकी नु लडाइ पशा ग्राशा, होबाह सम्म खेदा पामे बाकत। होबाह दमस्कस सहर आ उत्तर गे बाकब।

16 मोदेशो पा अब्राममी सोदोम नु गोमोररा रे रोइशशा मारेड मारेड नु आ लोकब आ तौ लोत आ मारेड मारेड नेल्ल, मीश मुर नेल्ल नु मेको निकशी सहर डा मुर नेल्ल लेप्पदा बाकत।

मेलकीसेदेक नु अब्राम

17 मोपा अब्राम केदोर-लाओमेर नु आ वारच पिपपुकी नु लडाइ पशा ग्राशा, लेशशा नोले सोदोम डा पिप शावेह माइशशो दिंमम जाकशा, अब्राम कली गुम्थ जाकमाकत। शावेह माइशशो दिंम कली पिप आन दिंम यो देंनीम। हिबू ७:१-४

18 मिनु सालेम डा पिप मेलकीसेदेकम अब्राम नु आ मुर आन कली शोब्ले नु अडगुर शांबु चाकगा बाकत। मेको नेल्ल क्येडा ठेयब परमप्रभु कली चढेब बाकमाकत। भजन संग्रह ११०:४; भजन संग्रह ७६:३

19 मिनु मेकोमी अब्राम कली आसीक गेशा “सरीड नु रागी सेल्ल नेल्ल क्येडा ठेयब परमप्रभु आ आसीक इ कली रल।

20 मिनु नेल्ल क्येडा ठेयब परमप्रभु मान ताइब बाकब। मारदे हना इ जोरी सनु इ गुडमी गेशा, इ कली ग्रापाइकुतु” दे ठेयब सेला बाकत। मिनु अब्राममी नेल्ल थोत्रक १० भाग डा भाग का मेलकीसेदेक कली गेवा बाकत। उत्पत्ती २८:२२; लेवी २७:३०-३२

21 मिनु सोदोम डा पिपमी अब्राम कली “मुर ला गोयी। अरु मार मार इन कली दुम्त” देमाकत।

22 मिनु अब्राममी सोदोम डा पिप कली “गो आं गुड परमप्रभु यावे, नेल्ल क्येडा ठेयब सरीड नु रागी सेल्ल परमप्रभु गे पोक्शा कसम जाता।

23 गो इन के मारेड मलाइकुनुड। श्येले का, जुता आ डोरी का यो मलाइकुनुड। मिनु गेमी ‘गो अब्राम कली शुश शोंप पाइशशो सेल्ला’ दे गेनायो देंने मचाप्नीनी।

24 आं गेय पाइब आन जशो चहिं लाइकुनुड। गो नु गाकब आनेर, एशकोल नु माम्रे आन भाग चहिं लाइक्का गेन” देमाकत।

## 15

अब्राम आ आल

उत्पत्ती १७:-

1 मिनु नोले परमप्रभु यावेमी अब्राम कली डोमु खोदेशो पा कोइतीक कोइदा बाकत। मिनु मेकोमी अब्राम आ नें थिशा “अब्राम महिनो। गो इ कली कोत्रनन। शुश आसीक गेनन” देमाकत। गन्ती २४:४,१६; भजन संग्रह ३:४

2 तन्न अब्राममी “आं कली मार गेनीनी डा? आं के आल मबाकनीम। आ अडस ताइब दमस्कस डा एलीएजर दुम्ब।

3 गे आं कली तमी तौ मगेयीनी। मुल आं खिंम जरमेशो वाइलम आं अडस ताइब दुम्त” देमाकत।

4 मिनु परमप्रभु यावेमी लेंशा “मेको मुरुम इ अडस मताइब। इ आंम रां डा इ तौमी इ अडस ताइब” देमाकत।

5 मिनु मेकोमी अब्राम कली ताम्बु रे गुंडशा “सरीड गे कोत्रडो, सोरुल आन कली हिक्को। मेको हिक्के चाप्नेवे? गिश बाकमा, इ चच युड यो मिश दुम्नीम” देमाकत। उत्पत्ती २२:१७; प्रस्थान ३२:१३; ब्यवस्था १:१०; हिबू ११:१२

6 मिनु अब्राममी परमप्रभु यावे आ लोत्र थमा सुदा बाकत। मिनु परमप्रभु यावेमी अब्राममी थमा सुइशशो तशा “ठीक पाइब मुर का बाकत” दे तुइक्ता बाकत। रोमी ४:३-५; याकूब २:२३

7 मिनु लेंशा अब्राम कली “गो परमप्रभु यावे नड। गो एको रागी इ कली गेचा कली कल्दी डा ऊर सहर रे गुंडताकन” देमाकत। उत्पत्ती ११:३१; प्रस्थान ३:१४; यसेया ४५:५; यूहन्ना ८:२४-२९

8 मिनु अब्राममी “परमप्रभु, परमप्रभु यावे, आं के रागी दुम्ब, दे दोपा तुइकुनुडा डा?” दे हिल्लो पवा बाकत।

9 मिनु मेकोमी “आं कली बर्स सां डा बी का, बर्स सां डा क्यारश का, बर्स सां डा सांड का, डुकुर का परवा आ चाइक्ब का चाक्ती” देमाकत।

10 मिनु अब्राममी मेको नेल्ल चाक्शा क्योरशा, फेके पा रिक्शा, फेके का एर गे, फेके का ओथ गे पा वोदा बाकत। डुकुर नु परवा चहिं फेके मसेला बाकत, येरमीया ३४:१८-१९

11 मिनु ठेयब चिक्बपुकी मेको श्ये तशा, जुक्तमे बाकत। तन्न अब्राममी “हाइ हाइ” दे ग्रीशा खेरमी बाकत।

परमप्रभुमी कबल पशो

12 मिनु नां रिक्चावानु, अब्राम मारेड मतुडक्चा डा पा निन्द्रा पवा बाक्त। मिनु शुश हिंचा माल्शो आ एर ओंथ नेल्ल छिडछिड दुम्माक्त। उत्पत्ती २:२१; १सामुएल २६:१२; यसैया २९:१०

13 मिनु मेकोमी अब्राम कली “इ तौ चच युड अर्को रागीमी अर्को रागी डा मुर दुम्नीम। मेकेर बाक्मानु, वाइलीम वाइल यो दुम्नीम। मेकेर ४ सहे बर्स सम्म श्येत जाइनीम। प्रस्थान १:१३; प्रस्थान १२:४०; प्रेरित ७:६

14 गो चहिं मेको आन बाक्शो रागी डा मुर आन कली निसाफ पा सजाइ गेनुड। मारदे हना इ मुर आन कली वाइलीम वाइल सेल्नीम। मिनु नोले इ मुरपुकीम मेको आन मारेड मारेड लाइशशा, मेको रागी रे यूशा लाइनीम। प्रस्थान ३:२१-२२; प्रेरित ७:७

15 गे चहिं थुं नाइशशा इ किकी पिपी आन बाक्तीक लाइनेवे। शुश बर्स दुम्शा बेक्नेवे। उत्पत्ती २५:७-८

16 इ मुरपुकी ४ पाला नोले ला एकेर लेशशा जाक्नीम। मारदे हना एमोरी आन मरिम्शो पशो मनुष्शो बाक्त” दे परमप्रभु यावेमी देमाक्त। प्रेरित ७:७

17 मिनु नां रिक्शा, छिडछिड दुम्शा नोले मी ब्रशो चुप्लु का यूमाक्त। मिनु ब्रशो तोव्रशी का मेको श्ये आ एर ओंथ गाक्माक्त। प्रस्थान १९:१८

18 मेको नाक्ती परमप्रभु यावेमी अब्राम नु कबल पशा “मेको रागी इ चच युड आन कली गेनुड। मेको इजीप्त डा ठेयब खोला रे युफ्रेटीस सम्म बाक्ब। उत्पत्ती १२:७; १राजा ८:६५; १राजा ५:१

19 मेकेर बाक्बपुकी केनी, केनीज्जी, कादमोनी,

20 हिती, परिज्जी, फाइम,

21 एमोरी, कनानी, गिरगाशी नु यबुसी आन रागी नेल्ल इ कली गेनुड” दे अब्राम कली लोव्र गेशा, कबल पवा बाक्त।

## 16

हागार नु इश्माएल

उत्पत्ती २१:९-२१

1 अब्राम आ मीश साराइ आल मथीब बाक्माक्त। मिनु साराइ नु इजीप्त डा वाइलीम का बाक्माक्त। मेको आ नें हागार बाक्माक्त।

2 मिनु साराइमी अब्राम कली “नेनीन, परमप्रभु यावेमी आं कली आल मगेयी। मोपतीके आं वाइलीम नु बाक्कीन। मोपा गो आल ताइनुडा, को?” देमाक्त। मिनु अब्राममी आ मीशेमी मार देंमे, मेको पवा बाक्त। उत्पत्ती ३०:३,९

3 मिनु अब्राम कनान रागीम १० बर्स बाक्म नोले, आ मीश साराइमी आ इजीप्त डा वाइलीम हागार लाइशशा, आ वोंइश कली गेवा बाक्त।

4 मिनु अब्राम हागार नु इम्माक्त। मिनु हागार कोव्रज कुरशो दुम्माक्त। मेको तुइशशा, ठेयब लेशशो दुम्शा, आ होव्रपोक्म कली मटिवा बाक्त।

5 मिनु साराइमी अब्राम कली “आं कली मरिम्शो दुम्तीके इन कली दुम्ल। गो आं वाइलीम इन कली गेता। मुल आंम कली कोव्रज कुरशो तशा, आं कली आइक्च सेलती। परमप्रभु यावेमी गे नु गो, इस दातेम निसाफ पवल” देमाक्त।

6 मिनु अब्राममी “नेनो, इ वाइलीम इ गुडमी बाक्ब। मेको कली इ दाक्शो पावो” दे साराइ कली देमाक्त। मिनु साराइमी हागार कली हुइक्तानु, मेको प्रोक्माक्त।

हागार प्रोक्शो

7 मिनु परमप्रभु यावे आ स्वर्ग डा गेय पाइबमी हागार कली गोरशो रागी शुर लतीक लां डा ब्वाक्कु बुक्तीके आ नेक्था थिदा बाक्त। प्रस्थान १४:१९; प्रस्थान २३:२०; गन्ती २२:२२; १राजा १९:७; १राजा १९:७; २राजा १९:३५

8 मिनु मेकोमी “हागार, साराइ आ वाइलीम, ते लशा पिनी?” दे हिल्लो पवा बाक्त। मिनु हागारमी “आं होव्रपोक्म साराइ आ डोंइती रे प्रोक्ती” दे लोव्र लेत्ता बाक्त।

9 मिनु परमप्रभु यावे आ स्वर्ग डा गेय पाइबमी मेको कली “इ होव्रपोक्म आ खिं लेतो। मिनु मेको आ अरेशो टिशा बाक्को” देमाक्त।

10 मिनु परमप्रभु यावे आ स्वर्ग डा गेय पाइबमी लेंशा “इ चच युड आन कली शुश दुम्पाइक्नुड। इ मुरपुकी सुडमी हिक्ने मचाप्चा डा पा शुश दुम्नीम” देमाक्त। उत्पत्ती १७:२०

11 मिनु परमप्रभु यावे आ स्वर्ग डा गेय पाइबमी लेंशा “नेनो, गे कोव्रज कुरशो बाक्नेवे। तौ का थीनेवे। मेको कली इश्माएल नें वोइक्चा माल्नेवे। मारदे हना परमप्रभु यावेमी इ श्येत ताप्तु। प्रस्थान २:२३; अय्युब ३४:२८; भजन संग्रह ९:१३; यसैया ४१:१७; याकूब ५:४

12 इ तौ जीब दुम्ब। मुर नेल्ल नु जीब। मुरपुकी यो मेको नु जीनीम। मेको आ लोक्बपुकी नु यो जीब दुम्ब” देमाक्त। उत्पत्ती २५:१८

13 मिनु हागारमी आ नु लोव्र पाइब परमप्रभु यावे कली “गे आं कली ताइब परमप्रभु ननी। गो थमा पा आं कली ताइब कली ताता” देमाक्त। उत्पत्ती २२:१४; प्रस्थान ३:७; २राजा १३:४

14 मोपतीके मेको ब्वाक्कु बुक्तीक आ नें बेयर-लहाइ-रोइ वोदमे बाक्त। मेको कादेश नु बेरेद आस दातेम बाक्ब। उत्पत्ती २४:६२; उत्पत्ती २५:११

15 मिनु हागारम अब्राम के तौ का थिमाक्त। अब्रामम मेको कली इश्माएल नें वोदा बाक्त।

16 हागारम इश्माएल थिमेनु, अब्राम ८६ बर्स दुम्शो बाक्माक्त।

## 17

परमप्रभुमी अब्राम नु कबल पशो

- 1 मिनु अब्राम ९९ बर्स दुम्मेनु, परमप्रभु यावे अब्राम आ डोंइती यूशा, मेको कली “गो नेल्ल क्येडा सक्ति पाइइशो परमप्रभु नड। गे, गो नु बाकशा, ठीक पाइब दुमो। उत्पत्ती ३५:११; प्रस्थान ६:३; ब्यवस्था १०:१२
  - 2 मिनु गो गे नु आं कबल पाइनुड। गो इ मुर हिवने मचाप्या डा पा शुश सेल्लुडमी” देमाक्त।
  - 3 मिनु अब्राम खुम्की पा बाम्माक्त। परमप्रभुमी मेको कली
  - 4 “नेनो, मेको गो, गे नु आं कबल पतीके बाकब। गे शुश रागी डा मुर आन किकी पिपी दुम्मेवे।
  - 5 मुल रे इ नें अब्राम देंचा मदुम्ब। इ नें अब्राहाम दुम्चा माल्ब। मारदे हना गो इ कली शुश रागी डा मुर आन किकी पिपी सेल्लतन। रोमी ४:११,१७
  - 6 गो इ रे शुश मुर सेल्लुडमी, रागी रागी डा मुर सेल्लुड। इ रे पिपपुकी यो दुम्नीम।
  - 7 मिनु गो गे नु लोत्र पा आं कबल पाइनुड। गो इ चच युइ नु यो आं कबल पाइनुड। मेको गेना हना यो लीब कबल बाकब। गो इ परमप्रभु नु इ चच युइ आन परमप्रभु नड।
  - 8 मुल गे इ बाकतीक रागीमी अर्को रागी डा मुर बाकनेवे। नोले गो एको कनान रागी गेना हना यो इन कली नु इ चच युइ आन कली गेनन्नी। गो चहिं मेको आन परमप्रभु दुम्नुड” दे अब्राहाम कली देमाक्त। उत्पत्ती ३५:२७; हिब्रू ११:९-१०; प्रेरित ७:५
  - 9 मिनु परमप्रभुमी अब्राहाम कली “आं कबल पशो डा लोत्र नेल्ल टिवो। मिनु इ नोले इ चच युइपुकीमी नेल्ल पालामी यो आं कली मिम्शा, टिचा माल्नीम।
  - 10 गे नु इ नोले डा तो चच युइ आन पचा माल्शो कबल मार बाक्त देशा हना, इ चारतीक डा कुशुल कुल पा खोइक्या माल्नेवे। गे नु इ चच युइ, वोंइश मुर नेल्ल कली कुशुल खोइकतीक चिनु खोइक्या माल्नीम। लेवी १२:३; यूहन्ना ७:२२
  - 11 मेको गे नु गो इस कबल पशो आ चिनु बाकब। इजीकीएल २०:१२; ब्यवस्था ३०:६; रोमी ४:११
  - 12 मुल रे इ पाला डा मुरुम आन तौ कली ८ नाक्ती दुम्मानु, खोइकतीक चिनु खोइक्या माल्नीम। इ खिंम जरमेशो वोंइश आल, तेको तेको रागी रे ग्याप्यो इ वाइल नु आन तौ नेल्ल आन कली यो खोइकतीक चिनु खोइक्या माल्नीम।
  - 13 इ खिंम जरमेशो, इ चांदीम ग्याप्यो मुरपुकी कली यो खोइकतीक चिनु खोइक्या माल्नीम। मिनु आं कबल पशो डा चिनु इ राम बाक्या माल्ब। मेको गेना हना यो लीब कबल बाकब।
  - 14 खोइकतीक चिनु मखोइशो वोंइश मुर नु वोंइश आल आन मुर आन दाते रे तिल्ला पुंडसीनीम। मारदे हना मेकोपुकीमी आं कबल पशो प्रोंइशो बाक्नीम” देमाक्त।
  - 15 मिनु परमप्रभुमी अब्राहाम कली “गे इ मीश कली ‘साराइ’ मदेंचा, मुल रे मेको कली ‘सारा’ नें वोइक्या माल्नेवे।
  - 16 गो मेको कली आसीक गेनुड। गो इ कली मेको रे तौ का गेनुड। मिनु सारा रागी रागी डा मुर नु जात जात डा मुर आन पिप आन ममा दुम्ब” दे परमप्रभुमी देमाक्त। उत्पत्ती १२:२-३
  - 17 मिनु अब्राहाममी खुम्की पा बाप्या, रिशशा “सहे का बर्स डा मुरुम आल थीबा? सारा ९० बर्स दुम्शा, आल थिने चाप्या?” दे आंम कली देमाक्त। उत्पत्ती १८:१२; उत्पत्ती २१:६; लूका १:१८; रोमी ४:१९-२१
  - 18 मिनु अब्राहाममी परमप्रभु कली “इश्माएल इन डोंइती बाक्ल” देमाक्त।
  - 19 मिनु परमप्रभुमी “ममाइ, इ मीश सारामी थमा पा तौ का थीब। मेको आ नें इसहाक वोइक्या माल्नेवे। मेको नु आं कबल पतीक गेना हना यो दुम्ब। मेको आ नोले डा आ तौ चच युइ नु यो लीब।
  - 20 इश्माएल आ पबंम मार देंने, गो मेको नेल्ल नेंता। नेनो, गो मेको कली आसीक गेनुड। मेको सोशा बोशा, शुश दुम्ब। गो मेको कली १२ जना पिप आन आफ सेल्लुड। गो मेको कली ठेयब जात दुम्पाइक्नुड। उत्पत्ती १६:१०; उत्पत्ती २१:१३,१८; उत्पत्ती २५:१६
  - 21 तन्न आं कबल इसहाक नु पाइनुड। सारामी बर्स का नोले इसहाक थीब” देमाक्त।
  - 22 मिनु परमप्रभु अब्राहाम नु लोत्र पने थुम्शा लमाक्त।
- खोइकतीक चिनु आ पबंम शेंशो
- 23 मिनु परमप्रभुमी लोत्र पवा नाक्ती अब्राहाममी आ तौ इश्माएल, आ खिंमी जरमेशो नु ग्याप्यो वाइल नु आ खिं डा वोंइश मुर नेल्ल आन कली खोइकतीक चिनु खोइक्यापाइक्मी बाक्त।
  - 24 अब्राहाममी खोइकतीक चिनु खोडा नाक्ती ९९ बर्स दुम्शो बाक्माक्त।
  - 25 आ तौ इश्माएल खोइकतीक चिनु खोइकतीक नाक्ती १३ बर्स दुम्शो बाक्माक्त।
  - 26 मिनु अब्राहाम नु इश्माएल नाक्त कामी खोइकतीक चिनु ताम्से बाक्त।
  - 27 आ खिं डा वोंइश मुर नेल्ल, आ खिंम जरमेशो नु रागी रे ग्याप्यो वाइल नेल्लेम यो मेको नाक्ती खोइकतीक चिनु तामे बाक्त।

## 18

परमप्रभु माप्रे आ ब्वाकीम यूशो

- 1 मिनु काबु नाक्ती अब्राहाम माप्रे आ ब्वाकीमी बाक्माक्त। आ ताम्बु आ लाप्योमी निस्से बाक्त। मारदे हना शुश ह्प्टा बाक्त। मेना परमप्रभु यावे मेको कली युम्थ जाक्माक्त।

2 मिनू मुर सां यूशा, आ डोंडती राप्शो तवा बाक्त। मेको आन कली तशा, छुल बोक्शा बाप्शा, सेउ पवा बाक्त। हिब्रू १३:२

3 मिनू अब्राहाममी “आं परमप्रभु, आं कली दाक्ताकनी हना, इन गेय पाइब रे मो मलने।

4 इन खोइल चिक्या कली ब्वाक्कु गेननी। मिनू चिक्या, रवा आगाम नांडसीन।

5 गो इन कली इक्का शोब्ले ब्रथ लाइनुड। लाम्ज जचा माल्नीनी। मारदे हना गेपुकी इन गेय पाइब कली गुम्थ जाक्शो बाक्नीनी” देमाक्त। मिनू मेकोपुकीमी “इ देशो खोदेशो पावो” देमा बाक्त।

6 मिनू अब्राहाम दोरशा, ताम्बुम लशा, सारा कली “गे रीब पा सेआह सां रिम्शो फस के शोब्ले चोवो” देमाक्त। सेआह का ७ लिटर पुक्तीके बाक्ब।

7 अब्राहाम चहिं गोठमी दोरशा लशा, दोम्शो रिम्शो बाछा का चाक्शा क्योरपाइरशा, गेय पाइब कली क्येपदा बाक्त।

8 मिनू दहि, दूध नु रये चाक्शा, मेको आन कली खेत्तीमी बाक्त। मिनू मेकोपुकीमी जामेनु, अब्राहाम मेको आन नेक्था रवा आ पुंम राप्शा बाक्माक्त।

9 मिनू मेकोपुकीमी “इ मीश सारा ते बाक्मे?” दे हिल्लो पामे बाक्त। मिनू अब्राहाममी “ताम्बुम बाक्ब” देमाक्त।

10 मिनू कामी “गो एकेर लेशा माइक्थ जाक्नुड। मेना इ मीशेमी तौ का थिशो बाक्ब” देमाक्त। मिनू सारा ताम्बु आ लाप्चोम मेको लोत्र पाइब आ नोले खुइरशा बाक्शा, मेको लोत्र नेना बाक्त। उत्पत्ती १७:१९; रोमी ९:९

11 अब्राहाम नु सारा खाल्पा खाल्पी दुम्शो बाक्सा बाक्त। सारा आ रां ब्रोल्चा यो नुप्शो बाक्माक्त।

12 मोपतीके सारामी मेको लोत्र नेशा “गो खाल्पी दुम्ती। आं वोंडश यो खाल्पा दुम्त। मिनू आल थीनुडा डा?” दे रिस्से बाक्त। उत्पत्ती १७:१७; १पत्रुस ३:६

13 मिनू परमप्रभु यावेमी अब्राहाम कली “सारा मारदे ‘गो खाल्पी दुम्शा, आल थीनुडा डा?’ दे रिस्से?

14 गो परमप्रभु यावे नड। गो नेल्ल पने चानुड। गो माइक्थ लेरशा जाक्डानु, सारामी तौ थिशो बाक्ब” देमाक्त। मती १९:२६; लूका १:३७

15 सारामी चहिं “गो मरिस्सीड” दे जोल पवा बाक्त। मारदे हना हिंमाक्त। तन्न मेकोमी “गे थमा पा रिस्साक्वे” देमाक्त।

16 मिनू मेको मुर सां बोक्शा, सोदोम सहर गे लमा बाक्त। अब्राहाममी मेको आन कली आइक्की सम्म चोत्रथ लमाक्त।

17 मिनू परमप्रभु यावेमी “गो मार पचा चिक्तु, मेको मखुडक्थु अब्राहाम कली शेंनुड। आमोस ३:७

18 अब्राहाम ठेयब नु बोल्यो रागी डा मुर आन आफ दुम्ब। मिनू रागी नेल्ल डा मुरपुकीमी मेको आ पबंम आसीक ताइनीम। उत्पत्ती १२:३

19 गो अब्राहाम कली तुडक्नुड, आ आल नु आ चच युड आन कली परमप्रभु यावे आ लां गाक्पाइक्चा कली अरेब। मिनू मेकोपुकी परमप्रभु यावे आ लां खोइक्ब दुम्शा, ठीक नु रिम्शो पचा शेंसीशा पाइनीम। परमप्रभु यावेमी अब्राहाम कली मार लोत्र देमे, मेको नेल्ल दुम्ल” देमाक्त। ब्यवस्था ६:७; ब्यवस्था ३२:४६

अब्राहाममी परमप्रभु नु लोत्र पशो

20 मिनू परमप्रभु यावेमी “गो सोदोम नु गोमोरा सहर निक्शी आस पबंम शुश मरिम्शो लोत्र नेता। मारदे हना मेकेर डा मुर आन मरिम्शो पशो शुश हिंचा डा बाक्त। उत्पत्ती १९:१३

21 मुल गो कोत्रथ यीनुड। एको नेशो लोत्र थमा बाक्म कों, जोल बाक्म, गो तुडक्नुड” देमाक्त।

22 मिनू परमप्रभु यावे आ स्वर्ग डा गेय पाइब निक्शी सोदोम गे लसा बाक्त। अब्राहाम परमप्रभु यावे आ डोंडती राप्शा बाक्माक्त।

23 मिनू अब्राहाम मेको आ नेक्था लशा “गे ठीक पाइब आन कली नु मरिम्शो पाइब आन कली खाल का डा पा क्याम्नीनी? गन्ती १६:२२

24 मेको सहरमी ५० जना ठीक पाइब मुर बाक्तेक्म हना, सहर कली क्याम्नीनी? मेको ५० जना ठीक पाइब मुर आन पबंम मेको सहर मप्रोंडनीनी?

25 ममाड, गे मोदेशो पा मक्याम्नीनी। गे ठीक पाइब नु मरिम्शो पाइब आन कली खाल का डा पा मसाइक्नीनी। थमान, ठीक पाइब नु मरिम्शो मुर आन कली खाल का डा मपाइनीनी। गे रागी रागी डा निसाफ पाइब बाक्शा, ठीक निसाफ पाइनीनी” देमाक्त। भजन संग्रह ८२:१; भजन संग्रह ९४:२

26 मिनू परमप्रभु यावेमी “सोदोम सहरम ५० जना ठीक पाइब मुर बाक्तेक्म हना, गो मेको आन पबंम सहर मक्याम्नुड” देमाक्त। यसैया ६५:८; मती २४:२२

27 मिनू अब्राहाममी “गो फुरक नु पुलु रे दुम्शो मुरुमी परमप्रभु नु लोत्र पाता।

28 मेको सहरम ४५ जना मुर ला ठीक पाइब बाक्तेक्म हना, गे मेको ४५ जना मुर, ५ जना मजाक्दीतीके सहर क्याम्नीनी?” दे हिल्लो पवा बाक्त। मिनू मेकोमी “गो मेकेर ४५ जना ठीक पाइब मुर थिल्तामी हना, गो सहर मक्याम्नुड” देमाक्त।

29 मिनू अब्राहाममी लेशा “४० जना ठीक पाइब बाक्तेक्म हना?” देमेनु, मेकोमी “गो मेको ४० जना आन पबंम यो सहर मक्याम्नुड” देमाक्त।

30 मिनू अब्राहाममी “परमप्रभु, मगाइक्तीने, गो चिनु लोत्र पाइनुड। ३० जना ठीक पाइब मुर बाक्तेक्म हना?” देमाक्त। मिनू परमप्रभुमी “३० जना बाक्तेक्म हना, मेको आन पबंम यो मक्याम्नुड” देमाक्त।

31 मिनू अब्राहाममी लेशा “गो परमप्रभु इन कली लेशा लोत्र पाइनुड, सहरमी २० जना ला ठीक पाइब मुर बाक्तेक्म हना?” देमाक्त। मिनू मेकोमी “२० जना ठीक पाइब मुर बाक्तेक्म हना यो, मेको आन पबंमी सहर मक्याम्नुड” देमाक्त।

- 32 मिनू अब्राहाममी “परमप्रभु, मगाइकतीने। गो चिनु लोत्र हिल्लो पाइनुड। १० जना ला ठीक पाइब मुर बाक्तेकम हना?” देमाकत। मिनू मेकोमी “गो मेको १० जना ठीक पाइब आन पर्वम यो सहर मक्याम्नुड” देमाकत। न्यायाधीस ६:३९
- 33 मिनू अब्राहाम नु लोत्र पने थुम्शा, परमप्रभु यावे आ लां लमाकत। अब्राहाम आ बाक्तीके लेम्माकत।

## 19

सोदोम नु गोमोररा क्याम्शो

- 1 मेको परमप्रभु यावे आ स्वर्ग डा गेय पाइब निकशी सोदोम सहरम नाकनाकदो जाकदीस्सा बाकत। मेना लोत सहर आ गारो डा ठेयब लाप्चो आ नेक्था निश्शा बाक्मेनु, गुम्से बाकत। मिनू लोतमी मेको आस कली तशा बोक्शा, खुम्की पा बाम्माकत। उत्पत्ती १८:२२
- 2 मिनू लोतमी “आं प्रभु निकशी, नेनीसे, मुलाकदो आं खिम बाक्कीसे। इस खोइल चिकसीसे। सुनी बोक्शा, इस लां लने चाप्नीसी” देमाकत। मेको निकशीमी “ममाड, गो मेरे लाडगाम इप्नस्कु” देसा बाकत।
- 3 मिनू लोतमी शुश लोत्र पवा नोले आ खिमी बास बाक्सा बाकत। लोतमी मेको आस कली ब्रोत्रब्रोत्रशो क्येशा, बोरब ओल्की मसुप्शो शोब्ले सेला बाकत। मिनू जाम्से बाकत।
- 4 मिनू इप्चा क्येडा डोइती सोदोम सहर डा वोंडश मुरपुकी खिं आ एर ओंथ खुम्सीशा बाक्सा बाकत। खाल्पा, टिटा सहर डा वोंडश मुर नेल्ल खुम्सीशा बाक्सा बाकत।
- 5 मेकोपुकीमी लोत कली “नाकनाकदो इ खिम जाक्शो वोंडश मुर ते बाक्सा। आंइ दाक्शो पचा कली लाडगाम सोइक्तो” देसा बाकत। लेवी १८:२२-२५; न्यायाधीस १९:२२-२४; रोमी १:२७
- 6 मिनू लोत लाप्चो रे लाडगा गूशा, आ नोले लाप्चो चोक्शा वोदा बाकत।
- 7 मिनू मेकोमी “आं लोक्बपुकी, मोपा मरिम्शो मपने।
- 8 नेनीन, आं के कन्ने तमी निकशी बाक्नीसी। मेको इन कली लाडगा सोइक्नुड। मार मार पचा दाक्नीनी, मेको निकशी नु पने। आं खिमी जाक्शो वोंडश मुर आस कली मारेड मपने। मारदे हना बास बाक्सा कली आं खिम जाक्ताक्से” देमाकत।
- 9 मेकोपुकीमी चहिं “गे लावो। गे ला एको सहरमी अर्को रागी डा मुर बाक्नेवे, आंइ कली हुकुम पचा माल्नेवे? लो, मेको निकशी आस क्येडा इ कली श्येत गेनीकी” देसा बाकत। लोत कली शुश लोत्र पशा, लाप्चो रोक्चा माल्मे बाकत। २ पत्रुस २:७-८
- 10 तन्न आगा डा वोंडश मुर निकशीमी आस गुड लाडगा गुंइशा, लोत कली ग्याइश्शा आगा कीशा, लाप्चो चोक्गसे बाकत।
- 11 मिनू मेको निकशीमी लाडगाम बाक्शो मुर आन कली मिक्च मताइब सेल्से बाकत। मिनू मेकोपुकीमी लाप्चो मथित्थु, माल्चा प्रोन्मे बाकत। २राजा ६:१८
- 12 मिनू मेको निकशीमी लोत कली “गे इ के सु सु बाक्नीमी? चांइवा, तमी तौ नु सहरम इ मुर सु सु बाक्नीमी? एको सहर रे गुंइदो।
- 13 मारदे हना गो एको सहर कली क्याम्नस्कु। परमप्रभु यावे आ डोइती एको आन ग्रांघा दिचा डा गेय आ पर्वम शुश रेयके बाक्ब। परमप्रभु यावेमी आंस कली एको सहर क्याम्चा, दे सोइश्शो बाक्ब” देसा बाकत। उत्पत्ती १८:२०
- 14 मिनू लोतमी आ तमी आस कली गुंवे पचशो वोंडश आल आस कली गुम्शा “बोक्कीस, सहर रे लसे। मारदे हना परमप्रभु यावेमी सहर क्याम्ब” दे माइक्सी बाकत। मेको निकशीमी चहिं “रित्या डा लोत्र बाकत” दे मिम्तसे बाकत। गन्ती १६:२१
- 15 मिनू भाले ग्रीमेनु, परमप्रभु यावे आ स्वर्ग डा गेय पाइब निकशीमी लोत कली “बोक्को, इ मीश नु इ तमी निकशी आस कली लाइश्शा, एको सहर रे प्रोक्कीन। मप्रोक्तीनी हना, एको सहर डा मुर खोदेशो पा क्याम्चा पुंइसीनीनी” देसा बाकत।
- 16 मिनू लोत कली ओंखां बोक्शो तशा, मेको कली आ तमी निकशी नु आ मीशे आन कली गुइ रे कीशा, सहर रे गुंइदसे बाकत। मोपा परमप्रभु यावेमी लोत नु आ खिं डा मुर आन कली दाक्शा प्रोंइमी बाकत।
- 17 सहर रे गुंइशा, परमप्रभु यावे आ स्वर्ग डा गेय पाइब कामी “ब्रोंइचा दाक्नीनी हना, नोले मकोत्रथु प्रोक्कीन। दिंमम मबाक्कीन। पहाड गे प्रोक्कीन। मो मपाइतीनी हना, गे सहर डा मुर नु क्याम्चा पुंइसीनीनी” देमाकत। मत्ती २४:१६
- 18 मिनू लोतमी “आं प्रभु, गो मचबु।
- 19 नेनीन, गो इन शिशी ताता। गो आंइ कली दाक्शा, बेक्चा रे प्रोंइतीनी। गो पहाड प्रोक्ने मचबु। पहाडमी अर्को श्येतमी आं कली साइक्वा, को।
- 20 नेनीन, हयु उइ डा सहर प्रोक्चा कली आं नेक्था बाक्ब। आइक्च यो बाक्ब। मेकेर प्रोक्चा गेयीनी। मेको सहर आइक्च बाक्ब। मेकेर ब्रोंइने चाप्नुड” देमाकत।
- 21 मिनू मेकोमी “लो, गो इ पुंइशो गेनुड। इ देशो सहर मक्याम्नुड।
- 22 रीब पा प्रोक्कीन। गे मजाक्दीन्नी सम्म मारेड पने मचाप्नुड” देमाकत। मेको सहर कली सोआर नें वोदा बाकत। आइक्च कली सोआर देंसीब।
- 23 मिनू लोत सोआर सहर ओत्रची ना रागीमी नां दान्ने थुम्शो बाक्माकत।
- 24 मिनू नोले परमप्रभु यावेमी सोदोम नु गोमोररा सहर आस तारी सरीड रे गन्धक नु मी रेड यिशो खोदेशो पा यिपदा बाकत। ब्यवस्था २९:२२; भजन संग्रह ११:६; यसैया १:९-१०; यसैया १३:१९; आमोस ४:११; लूका १७:२९; २पत्रुस २:६; प्रकाश १४:१०

25 मिनू परमप्रभु यावेमी मेको सहर निक्शी, दिंम नेल्ल, सहर डा मुर नेल्ल नु रूम मार मार वाशो बाकमे, मेको नेल्ल क्याम्दा बाक्त।

26 लोत नु आ मुर प्रोक्मानु, लोत आ मीशेमी नोले बिर लेशशा कोवडा बाक्त। मिनू मेको हिक्सी के थाम दुम्माक्त।

27 मिनू अब्राहाम नाक्त का डोंइती परमप्रभु यावे आ डोंइती राप्शा बाक्तीकेम लमाक्त।

28 मिनू सोदोम नु गोमोररा सहर डा दिंम डा रू नेल्ल कोवडा बाक्त। मिनू मेको सहर निक्शी नु रू नेल्ल रे ठेयब चुप्लु डा मी खोदेशो पा कुन ग्रूशो तवा बाक्त।

29 मोपा परमप्रभुमी मेको दिंम, सहर निक्शी क्याम्दा बाक्त। मेना परमप्रभुमी अब्राहाम आ पुंइशो लोत्र मिम्शा, लोत कली मेको सहर रे ग्रुंइशा प्रोना बाक्त। नोले मेकोमी मेको सहर नेल्ल खतम पोक्गा बाक्त।

लोत आ तमी निक्शी

30 मिनू लोत नु आ तमी निक्शी सोआर रे लशा, पहाड मेर लमा बाक्त। मारदे हना सोआर सहरम बाक्चा हिंमा बाक्त। मेको नु आ तमी निक्शी पहाड डा पुक्खीम बाक्शो बाक्मा बाक्त।

31 मिनू लोत आ डोंइती जरमेशो तमीमी “इस आफ खाल्पा दुम्त। नेल्ल रागीमी इस कली वोंइश मुर मबाक्म।

32 लो, इस आफ कली अडगुर शांबुमी दुक्पाइश्शा, इस आफ नु बाक्स। मोपा इस आफ कली चच युड दुम्नीम” दे आ लोक्ब कली देंमाक्त। लेवी १८:१७

33 मेको नाक्दो आस आफ कली अडगुर शांबुम दुक्पदसे बाक्त। मिनू आ ठेयब तमी आ आफ नु इम्माक्त। लोतमी आ तमी आं नु इप्शो, बोक्शो मारेड मतुइक्ता बाक्त।

34 मिनू आ दीसा ठेयब तमीमी आ लोक्ब कली “नेनो, गो सिनाक्दो आफ नु बाक्ती। गो लेंशा आफ कली अडगुर शांबुमी दुक्पाइक्स। मुलाक्दो गे इपो। मोपा इस आफ रे चच युड दुम्नीम” देंमाक्त।

35 मिनू मेको निक्शीमी आस आफ कली मेको नाक्दो यो दुक्पदसे बाक्त। मिनू कान्छी आ आफ नु इप्थ लमाक्त। मिनू लोतमी आ तमी आं नु इप्शो, बोक्शो मारेड मतुइक्ता बाक्त।

36 मिनू लोत आ तमी निक्शीमी आस आफ के कोव्रज कुरसे बाक्त।

37 मिनू ठेयब तमीम तौ का थिमाक्त। मेको आ नें मोआब वोदा बाक्त। मेको मोआबी आन किकी पिपी बाक्माक्त। ब्यवस्था २:९

38 कान्छीमी यो तौ का थिमाक्त। मेको आ नें बेन-अम्मी वोदा बाक्त। मेको अम्मोनी आन किकी पिपी बाक्माक्त। ब्यवस्था २:१९; ब्यवस्था २३:४

## 20

अब्राहाम नु अबीमेलोक

उत्पत्ती १२:१०-२०; उत्पत्ती २६:१-११

1 मेकरे रे अब्राहाम दक्खिनम बाक्ब नेगेब गे लमाक्त। मिनू कादेश नु शुर आस दाते गेरार सहरमी अर्को रागी डा मुर दुम्शा बाक्माक्त। उत्पत्ती १२:९; उत्पत्ती २६:१

2 मेकोमी मुर आन कली आ मीश, सारा आ पर्वम “आं समी बाक्ब” देंमाक्त। मिनू गेरार डा पिप अबीमेलोकमी मेको कली ब्रथ सोइक्ता बाक्त।

3 मिनू अबीमेलोकम आ डोमुमी परमप्रभु आ डोंइती ग्रूशो तवा बाक्त। मिनू “गे मीश चाक्शो आ पर्वम बेक्चा माल्नेवे। मारदे हना मेको ग्रुंबे पशो मीश मुर बाक्ब” देंमाक्त।

4 मिनू अबीमेलोकम मेको नु मइप्तीके “परमप्रभु, गे दोस मताइब मुर आन कली यो साइक्नीनी?

5 मेकोमी आं कली ‘आं समी बाक्ब’ मदेंम डा? आ मीशेमी यो ‘आं लोक्ब बाक्ब’ देंत। गो रिम्शो थुं नु थमा पा मतुइक्तीकेमी चाक्ता” देंमाक्त।

6 मिनू परमप्रभुमी मेको आ डोमुमी “गे रिम्शो थुंमी पाप्तीवी। गो तुइक्नुड। मोपतीके गो इ कली मेको कली थिचा मगेथु, आं डोंइती मरिम्शो पचा मगेड।

7 मुल मेको मुर आ मीश लेत्तो। मारदे हना मेको आं लोत्र पाइब का बाक्ब। मेकोमी इ पर्वम पुंइब। मिनू गे ब्रोंइनेवे। गे आ मीश कली मलेत्ताक्वी हना, गे थमा पा बेक्चा माल्नेवे। इ मुर नेल्ल यो बेक्चा माल्नीमी, दे तुइक्तो” देंमाक्त। १ राजा १३:६

8 मोपतीके अबीमेलोक सुनी कना बोक्शा, आ गेय पाइब नेल्ल आन कली ब्रेशशा, आ डोमु नेल्ल शोवडा बाक्त। मिनू मुर नेल्ल शुश हिंमा बाक्त।

9 मिनू अबीमेलोकम अब्राहाम कली यो ब्रेत्ता बाक्त। मिनू मेको कली “मारदे आंइ कली ओदेशो पवी? गो नु आं रागी कली ओदेशो मरिम्शो पपाइक्चा कली गो इ कली मार मरिम्शो पाइक्ना? गे मपचा डा गेय पाप्तीवी।

10 गे मारदे ओदेशो पचा मिप्ती?” देंमाक्त।

11 मिनू अब्राहाममी “थमा पा, एको रागी डा मुरपुकी परमप्रभु कली मान पा महिनीमी। मिनू आं मीश आ पर्वम आं कली साइक्नीम, दे मिम्ताक्ड।

12 मेको थमा आं समी यो बाक्ब। आं आफ आ तमी बाक्ब। तन्न आं ममा आ तमी ममाइ। गो मेको कली चाक्ता। लेवी १८:९

13 मिनू परमप्रभुमी आं कली आं आफ आ खिं रे गाक्पाइय्यीनु, गो आं मीश कली ‘आं कली दाक्नेवे हना, गो ते ते जाक्दीस्सा, मेक मेक एको आं लोक्ब बाक्ब, देनो’ दे माइक्ता” देंमाक्त।

14 मिनु अबीमेलेकमी भेडापुकी, बी ब्यफ नु वाइलीम वाइल आन कली लाइशशा, अब्राहाम कली गेवा बाक्त। आ मीश सारा यो लेत्ता बाक्त।

15 मिनु “नेनीन, आं रागीमी ते ते बाक्चा दाक्नेवे, मेक मेक बाक्ने चाप्नेवे” देमाक्त।

16 मिनु सारा कली “नेनो, इ लोकब कली हजार का चांदी टुक्रा गेता। मेको इन कली इ मुर आन डोंडती इ कली रिम्शो पचा कली गेता। मोपा नेल्ल आन डोंडती इ कली ठीक पाता” देमाक्त।

17 मिनु अब्राहामम अबीमेलेक आ परबम परमप्रभु कली पुना बाक्त। मिनु परमप्रभुमी अबीमेलेक, आ मीश नु आ गेय पाइब नेल्ल आन परबम आल मथितीक रोइ रे सापदा बाक्त।

18 मारदे हना परमप्रभु यावेमी अब्राहाम आ मीश सारा आ परबम अबीमेलेक आ खिं डा मुर नेल्ल आन कली आल मथीब सेल्शो बाक्माक्त।

## 21

इसहाक जरमेशो

1 मिनु परमप्रभु यावेमी सारा कली मार देमे, मेकोन दुम्पदा बाक्त। उत्पत्ती १८:१०

2 मिनु सारामी खाल्पी दुम्शा, अब्राहाम के कोब्रज कुरशा, तौ का थिमाक्त। परमप्रभुमी गेना थीब देमे, मेना थिमाक्त।  
हिब्रू ११:११

3 मिनु अब्राहाममी सारा आ थिशो तौ कली इसहाक नें वोदा बाक्त। उत्पत्ती १७:१९

4 मिनु अब्राहाममी आ तौ इसहाक कली ८ नाक्ती दुम्मेनु, खोइक्तीक चिनु खोदा बाक्त। परमप्रभुमी डोंडती दोपा अरेवा, मोपा पवा बाक्त। उत्पत्ती १७:११-१२; प्रेरित ७:८

5 अब्राहाम आ तौ इसहाक थिमेनु, सहे का बर्स दुम्शो बाक्माक्त। उत्पत्ती १७:१७

6 मिनु सारामी “परमप्रभुमी आं कली रिप्पाइक्ती। सु सुम एको नेंनीमी, मेको यो गो नु रित्नीम। उत्पत्ती १८:१२

7 सु सुमी अब्राहाम कली ‘इ मीशमी आल कली दूध तुंडब’ देनीमी? गो खाल्पा दुम्शो अब्राहाम के तौ का थिती” देमाक्त।

हागार नु आ तौ खेरशो

8 मिनु आल कोल्शा, दूध तूचा प्रोना बाक्त। मिनु दूध तूचा प्रोना नाक्ती अब्राहाममी ठेयब भोज सेल्शा, मुर आन कली थुल्मी बाक्त।

9 मिनु सारामी इजीप्त डा हागार नु अब्राहाम आस थिशो तौ इश्माएलमी इसहाक कली शुक्शी पशो तवा बाक्त।

10 मिनु मेकोमी अब्राहाम कली “वाइलीम नु आ तौ आस कली खेरो। मेको वाइलीम आ तौ कली, आं तौ इसहाक नु अडस योक्शा गेचा मदुम्ब” देमाक्त। गलाती ४:३०

11 अब्राहामम आ लोत्र नेंशा, थुं मनुमाक्त। मारदे हना इश्माएल यो आ तौ बाक्माक्त।

12 तन्न परमप्रभुमी अब्राहाम कली “वोंडश आल नु इ वाइलीम आ परबम सुर्तां मपावो। सारामी मार मार देमे, मेको नेल्ल पावो। मारदे हना इसहाक आ चच युइ इ जात दुम्मीम। उत्पत्ती १७:२१; रोमी ९:७-८; हिब्रू ११:१८

13 मिनु इ वाइलीम आ तौ इश्माएल आ चच युइ रे यो ठेयब जात का सेल्नुड। मारदे हना मेको यो इ तौ बाक्ब” देमाक्त। उत्पत्ती १७:२०

14 मिनु अब्राहाम सुनी कना बोक्शा, हागार कली शोब्ले नु ब्वाक्कु कुरपाइशशा, आ तौ नु सोइक्ता बाक्त। मिनु हागार नु आ तौ लसा बाक्त। मिनु लशा, लां जाम्शा, बेयर-शेबा माइशशो गोरशो रागीम हिरससा बाक्त।

15 मिनु ब्वाक्कु नुष्शा, आ आल कली बुटा आगाम वोदा बाक्त।

16 मिनु हागार चहिं आइदी लशा, निस्से बाक्त। मारदे हना मेकोमी “आं आल बेक्शो मतडल” दे मिम्ता बाक्त। मिनु ठेयब सेंदा पा डाक्माक्त। यसेया ४९:१५

17 मिनु परमप्रभुमी आल आ डाक्शो सेंदा नेना बाक्त। मिनु परमप्रभु आ स्वर्ग डा गेय पाइबमी सरीड रे “हागार, मार दुमे? महिनो। मारदे हना परमप्रभुमी उइ बाक्शो इ तौ आ ब्रेशो नेंतु।

18 बोक्को, इ तौ लाइशशा गाक्को। गो मेको रे ठेयब जात का सेल्नुड” देमाक्त।

19 मिनु परमप्रभुमी हागार आ मिक्च तपदानु, ब्वाक्कु बुक्तीके का तवा बाक्त। मिनु आ ब्वाक्कु कुरतीके प्रिशा, आ तौ कली तूपदा बाक्त। २राजा ६:१७,२०

20 मिनु परमप्रभु मेको वोंडश आल नु बाक्मेनु, मेको कोल्शा, गोरशो रागीमी बाक्शा, लिब्रा आप्स शुश जोक्ब दुम्माक्त।

21 मेको गोरशो रागी आ नें पारान बाक्माक्त। मिनु आ ममामी आ तौ कली इजीप्त रागी डा तमी चाक्शा गेवा बाक्त। उत्पत्ती १६:३

अबीमेलेक नु अब्राहाम सल्ला पशो

उत्पत्ती २६:१५-३३

22 मिनु काबु अबीमेलेक नु आ फौज डा ठेयब कप्तान फीकोल अब्राहाम आ बाक्तीक जाक्शा, अब्राहाम कली “गे मार मार पाइनीनी, परमप्रभु गे नु बाक्ब।

23 मोपतीके गो इन कली मार पुंडनुड देंशा हना, आं कली, आं तमी तौ नु आं चच युइ आंइ कली श्येत मगेकी। गो इन कली रिम्शो पशो खोंदेंशो पा, आं कली यो रिम्शो पने। इन बाक्शो रागी कली यो रिम्शो पने। ‘रिम्शो पाइनुड’ दे परमप्रभु आ नें थिशा, कसम जने” दे पुना बाक्त। उत्पत्ती २०:१५

- 24 मिनू अब्राहाममी “गो कसम जाइनुड” देमाक्त।  
 25 मिनू अब्राहाममी अबीमेलक कली हुडक्ता बाक्त। मारदे हना अबीमेलक आ गेय पाइबपुकीमी अब्राहाम आ इनार आ पर्वम जिशा, रोडक्तेमे बाक्त।  
 26 मिनू अबीमेलकमी “गो मेको मतुडक्त, सुम पवा? गे यो मशेंदीनी। मुलाक्त ला नेता” देमाक्त।  
 27 मिनू अब्राहाममी भेडापुकी नु ब्यफपुकी अबीमेलक कली गेवा बाक्त। मोपा मेको निक्शी सल्ला पाम्से बाक्त।  
 28 अब्राहाम ७ ओटा पाठी चहिं बगाल रे गुडशा, वोदा बाक्त।  
 29 मिनू अबीमेलकम “मेको ७ ओटा पाठी मारदे वोडक्नी?” दे हिल्लो पवा बाक्त।  
 30 मिनू “मेको ७ ओटा पाठी आं गुड रे लाइक्का माल्नीनी। गो आं दोशो इनार आ सांकछी दुम्नीनी” देमाक्त।  
 31 मिनू मेको बाक्तीके कली बेयर-शेबा, दे नें वोदसे बाक्त। मारदे हना मेको निक्शी मेकेर कसम जाम्से बाक्त।  
 32 मिनू बेयर-शेबामी मेको सल्ला पने थुम्शा, अबीमेलक नु फीकोल आ ठेयब कप्तान पलिस्ती आन रागी लेस्सा बाक्त।  
 33 अब्राहाममी चहिं बेयर-शेबाम रवा का खुमा बाक्त। मिनू मेकेर परमप्रभु यावे, गेना हना यो बाक्ब परमप्रभु आ नें थिशा, मेको नु लोत्र पवा बाक्त। उत्पत्ती १२:८; रोमी १६:२६  
 34 मिनू पलिस्ती आन रागीमी अब्राहाम अर्को रागी डा मुर दुम्शा, शुश नाक्त बाक्माक्त।

## 22

परमप्रभुमी अब्राहाम आ थुं नाक्शो

- 1 मिनू नोले परमप्रभुमी “अब्राहाम आ कली टीबाक्म कों, मटीबाक्म” दे मिम्शा “अब्राहाम” दे ब्रेत्ता बाक्त। अब्राहाममी “गो एक बाक्ती” दे परमप्रभु कली मदा बाक्त। प्रस्थान १५:२५; प्रस्थान १६:४; प्रस्थान २०:२०; ब्यवस्था ८:२; ब्यवस्था १३:४; न्यायाधीस २:२२; हिब्रू ११:१७; याकूब १:१३  
 2 मिनू मेकोमी “इ तौ लतो। का ला बाक्शो दाक्शो इ तौ इसहाक लतो। मिनू मोरीयाह रागी लावो। मेकेर लशा, इ तौ कली चोशा चढेयी। तेको डांडाम चढेचा माल्नेवे, गो इ कली कौइनन” देमाक्त।  
 3 मिनू अब्राहाम सुनी कना बोक्शा, चढेतीकेम चोचा कली शी चेशशा, आ गधा ठीक पवा बाक्त। मिनू ठिटा निक्शी नु आ तौ इसहाक कली लाइश्शा, परमप्रभुमी देशो पहाड लमा बाक्त।  
 4 लमा लमा नाक्त सां नोले परमप्रभु आ देशो बाक्तीके डोन रे तवा बाक्त।  
 5 मिनू अब्राहाममी आ गेय पाइब निक्शी आस कली “एकेर गधा नु बाक्कीसे। गो आं तौ नु मिरि आइक्था लशा, चढेशा, इस बाक्तीक लेत्नस्कु” देमाक्त।  
 6 मिनू अब्राहाममी चोशा चढेतीक शी इसहाक कली कुरपदा बाक्त। मिनू मी नु चुक्ब आंमा कुरा बाक्त। मोपा निम्फा लसा बाक्त।  
 7 मिनू इसहाकम आ आफ कली “आं आफ” देमाक्त। मिनू अब्राहाममी “गो नेता” देमाक्त। मिनू इसहाकमी “गो मी नु शी ला कुरशा गाक्तस, चोशा चढेतीक पाठा चहिं ते बाक्म?” दे हिल्लो पवा बाक्त।  
 8 मिनू अब्राहाममी “चोशा चढेतीक पाठा परमप्रभुमी गेब” देमाक्त। मोपा निम्फा लसा बाक्त।  
 9 मिनू परमप्रभुमी देशो रागी जाक्दीस्सानु, अब्राहाममी फुल्लु चाक्शा, चढेतीक सेला बाक्त। मिनू चढेतीक तारी शी प्रोवडा बाक्त। मिनू आ तौ इसहाक कली गुड खोइल फ्रेशा, शी तारी वोदा बाक्त।  
 10 मिनू अब्राहाममी आ तौ क्योरचा कली चुक्ब शोइश्शा तरेवा बाक्त। मती २६:३९; याकूब २:२१  
 11 मिनू परमप्रभु यावे आ स्वर्ग डा गेय पाइबमी सरीड रे “अब्राहाम, अब्राहाम” दे ब्रेत्ता बाक्त। मिनू अब्राहाममी “गो नेता” देमाक्त।  
 12 मेकोमी “इ तौ कली मक्थोरो। मेको कली मारेड मपतो। मारदे हना गे परमप्रभु कली मान पा हिंबाक्ते। गो मुल तुडक्ताक्ड। गे इ का ला बाक्शो तौ आं कली गेचा ठीक पाप्तीवी। इ का ला तौ यो आं कली गेचा टीबाक्ते” देमाक्त। रोमी ८:३२; हिब्रू ११:१७  
 13 मिनू अब्राहाममी एर गे कोत्रडानु, सांड का आ ग्रोत्र चू लहाराम रेशशा, बाक्शो तवा बाक्त। मिनू लशा सांड चाक्शा, आ तौ आ पा डा मेको सांड क्योरशा, चोशा चढेतीक चढेवा बाक्त।  
 14 मिनू अब्राहाममी मेको डांडा कली परमप्रभु यावे यीरह, दे नें वोदा बाक्त। मोपतीके मुल सम्म मुरपुकीमी “परमप्रभु यावे आ डांडाम परमप्रभु यावेमी माल्शो गेब” देनीम। “परमप्रभु यावे यीरह” आ अर्थ “परमप्रभु यावेमी आं माल्शो गेब” देशो बाक्ब। उत्पत्ती १६:१३  
 15 मिनू परमप्रभु यावे आ स्वर्ग डा गेय पाइबमी लेशा सरीड रे अब्राहाम कली  
 16 “परमप्रभु यावेमी ‘गो आं नेमी कसम जाता। मारदे हना गे इ तौ आं कली गेचा ठीक पाप्तीवी। प्रस्थान ३२:१३; यसैया ४५:२३; आमोस ६:८; मीका ७:२०; लूका १:७३; हिब्रू ६:१३  
 17 मार कसम जाता देशा हना, गो इ कली आसीक गेनुड। इ चच युड आन कली सोरुल नु समुन्द्र आ नेक्था डा बाल्वा खोदेशो पा शुश सेल्लुडमी। मिनू मेकोपुकीमी आन जोरी सत्रु आन सहर आंम के सेल्नीम। उत्पत्ती १३:१६; हिब्रू ११:१२  
 18 इ चच युड आन पर्वम रागी रागी डा मुर नेल्ल आसीक राइनीम। मारदे हना गे आं देशो टीब बाक्ते’ दे परमप्रभु यावेमी दैत” दे आ स्वर्ग डा गेय पाइबम अब्राहाम कली लोत्र पवा बाक्त। उत्पत्ती १२:३; गलाती ३:१६  
 19 मिनू अब्राहाम मेकेर रे लशा, आ गेय पाइब निक्शी आस रिम्तीके लेस्सा बाक्त। मिनू गुम्शा, बेयर-शेबा माइक्तीकेम लमा बाक्त। मिनू अब्राहाम मेक उड बाक्माक्त।



नाहोर आ चच युड

20 मिनु मेको नोले मुरुमी अब्राहाम कली “मिल्कामी यो इन लोकब नाहोर रे पा आल थिप्टु। उत्पत्ती ११:२९

21 आ डोंडती जरमेशो तौ ऊज, आ लोकब बूज, अराम आ आफ केमुएल,

22 केसेद, हाजो, पिलदाश, यिदलाफ नु आ कान्छा बेथुएल बाकनीम।

23 बेथुएल चहिं रेबेका आ आफ बाकत। मिल्कामी अब्राहाम आ लोकब नाहोर के ८ जना तौ थिप्टु। उत्पत्ती २४:१५

24 नाहोर आ कान्छी मीश आ नें रुमा बाक्माकत। मेकोमी तेबाह, गाहाम, ताहाश नु माकाह थिमाकत” देमाकत।

## 23

सारा बेकशो

1 मिनु सारा सहे का २७ बर्स दुम्शो बाक्माकत। आ ब्रोंडतीक नाकत नेल्ल मोशोन बाक्माकत।

2 सारा कनान रागी डा किरयथ-अरबाम बेक्माकत। मेको कली हेब्रोन यो देंनीम। मिनु अब्राहाम सारा आ पर्वम हिंशेक पा डाक्थ लमाकत।

3 अब्राहाम सारा आ बेकशो रां बाकतीके रे लशा, हिती आ मुर आन कली

4 “गो इन दातेमी अर्कां रागी डा मुर बाक्नुड। गो थिम्तीक का ग्याप्चा दाक्नुड। मारदे हना आं बेकशो मुर कली थिम्चा माल्नुड” देमाकत। उत्पत्ती १७:८

5 मिनु हिती आ मुरपुकीमी अब्राहाम कली

6 “प्रभु, आंइ लोव्र नेनीन, गे आंइ दातेमी परमप्रभुमी सेल्शो ठेयब मुर बाकनीनी। आंइ के बेकशो मुर आन कली वोइक्तीक पुक्खी शुश बाकनीम। तेको दाक्नीनी, मेकोमी इन बेकशो मुर थिमीन। इन बेकशो मुर थिम्चा सुडमी मतेक्ब” देमा बाकत।

7 मिनु अब्राहाम बोक्शा, हिती आ मुर आन डोंडती सेउ पवा बाकत।

8 मेको आन कली “आं बेकशो मुर थिम्चा गेतीनी हना, आं पर्वम सोहार आ तौ एफ्रोन नु लोव्र पने।

9 मेको आ रू आ नोले बाक्ब माक-पेला पुक्खी आं कली लेयड, दे पुड्डीन। गिश थाप्चा माल्नुडा, थाप्नुड। इन दातेमी आं बेकशो मुर थिम्तीके दुम्ल” देमाकत।

10 मेना एफ्रोन हिती आन दातेमी निरशो बाक्माकत। मेको आन सहर डा गारो डा ठेयब लाप्चो आ नेक्था बाक्शा, अब्राहाम आ लोव्र नेन्मेनु, मेको हिती एफ्रोनमी अब्राहाम कली

11 “प्रभु, ममाड, आं लोव्र नेनीन, गो इन कली मेको रू नु पुक्खी गेनुड। आं मुरपुकी सांकछी बाकनीम। गो इन कली गेनुड। इन बेकशो मुर थिमीन” देमाकत।

12 मिनु अब्राहाममी मेको मुर आन डोंडती सेउ पवा बाकत।

13 मिनु मुर नेल्ल आन डोंडती अब्राहाममी एफ्रोन कली “आं लोव्र नेनीन। गो मेको रू डा क्येट थाप्नुड। मेको ताक्कीन। गो आं मीश मेक थिम्नुड” देमाकत।

14 मिनु एफ्रोनमी अब्राहाम कली

15 “प्रभु, आं लोव्र नेनीन, मेको रू ४ सहे शेकेल चांदी डा बाक्ब। मेको इस दातेमी मारेड ममाड। मोपतीके थिमीन” देमाकत। शेकेल का ११.५ ग्राम बाक्ब।

16 मिनु अब्राहाममी एफ्रोन आ लोव्र बिस्से बाकत। मेकोमी एफ्रोनमी हिती आ मुर आन डोंडती देशो खोदेशो पा ४ सहे शेकेल चांदी नाक्शा, गेमी बाकत। मेको ४ सहे शेकेल चहिं ग्याप्ब लेयब आन दातेमी मोदेशो रू कली ठीक बाक्माकत। शेकेल का ११.५ ग्राम चांदी बाकत।

17 माक-पेलामी बाक्शो एफ्रोन आ रू माग्रे आ पूर्व गे बाक्शो बाक्माकत। मोपा रू नु पुक्खी, रूमी बाक्शो रवा नेल्ल नु एर ओंथ सुरम खुम्शो रवा यो

18 हिती नेल्ल नु ठेयब लाप्चोम बाक्ब आन डोंडती अब्राहाम के दुम्माकत।

19 मिनु नोले अब्राहामम आ मीश सारा कली माग्रे आ नेक्था माक-पेलामी बाक्शो पुक्खीमी थिमा बाकत। माग्रे चहिं कनान रागी डा हेब्रोन सहर बाक्माकत।

20 मिनु मेको रू नु मेक बाक्शो पुक्खी हिती आ मुरपुकी रे अब्राहाम आ मुर थिम्तीक रू दुम्माकत। उत्पत्ती २५:९-१०; उत्पत्ती ४७:३०; उत्पत्ती ४९:२९-३२; उत्पत्ती ५०:१३

## 24

रेबेका इसहाक आ मीश दुम्शो

1 मिनु अब्राहाम शुश बर्स दुम्शा, खूशो दुम्माकत। परमप्रभु यावेमी अब्राहाम कली आ पतीक नेल्लेमी आसीक गेवा बाकत। उत्पत्ती १२:२

2 मिनु अब्राहाममी आ रू खिं नेल्ल कोव्रब नु वाइल आन कली अरेब ठेयब वाइल कली “इ गुड आं फिला तारी वोतो।

3 गो इ कली परमप्रभु यावे, सरीड नु रागी डा परमप्रभु आ नैमी कसम जपाइक्नुड। मार कसम जपाइक्नुड देशा हना, आं तौ कली आं बाक्शो कनान रागी डा मीश आल मचाक्को। उत्पत्ती २८:१; प्रस्थान ३४:१६

4 आं रागी नु आं जात डा मीश आल का चाक्को” दे अब्राहाममी वाइल कली मदा बाकत।

5 मिनु वाइलमी “मेको मीश आल एको रागी जाक्चा मबिस्साक्ब हना, इन तौ इन जरमेशो रागीम लाइक्चा माल्नुडा?” दे हिल्लो पवा बाकत।

- 6 मिनु अब्राहाममी “मोदेशो गेनायो मपावो। आं तौ कली मेक मलतो।
- 7 डोंइती परमप्रभु यावे, सरीड नु रागी डा परमप्रभुम आं कली आं आफ आ खिं नु आं जात डा रागी रे गुंडशा, एक सोइकताकयी। मेकोमी कसम जशा, आं कली लोत्र पाप्टु ‘कनान रागी इ चच युड आन कली गेनुडमी’ दे माइकती। मेकोमी आ स्वर्ग डा गेय पाइब इ डोंइती सोइकब। आं तौ कली आं जात रे मीश आल का चाकको। २इतिहास ३६:२३; नेहेम्याह २:२०
- 8 मेको मीश आल गे नु जाकचा मबिस्साकव हना, गे कसम मजशो खोंदेशो दुम्मेवे। आं तौ कली चहिं मलतो” दे अब्राहाममी आ वाइल कली अरेवा बाकत।
- 9 मिनु मेको वाइलमी आ होत्रप अब्राहाम आ फिला तारी गुड वोइशशा, आ देशो आ पर्वम कसम जवा बाकत।
- 10 मिनु नोले मेको वाइलम आ होत्रप आ दलओठ १० ओटा लाइशशा, आ होत्रप के मारेड मारेड रिम्शो कोसेली कुरशा लमाकत। मेकेर रे लशा, मेसोपोतामीया रागीमी नाहोर आ बाकतीक सहर, अराम-नहराइम मेर जाकदीम्माकत। उत्पत्ती ११:२२-३१
- 11 मिनु मेकेर जाकदीशशा, नाकनाकदो मीश मुरपुकी ब्वाककु दिथ जाकची ना, सहर मओव्रथु, दलओठपुकी इनार आ नेकथा नाइकपदा बाकत।
- 12 मिनु मेकोमी “परमप्रभु यावे, आं होत्रप अब्राहाम आ परमप्रभु, मुलाकती आं कली वारच पने। आं होत्रप कली इन गेना हना यो दाकतीके कोंइदीने। मेकोन पुंडनुड।
- 13 गो इनार आ नेकथा बाकनुड। मिनु सहर डा मुर आन तमी ब्वाककु दिथ जाकनीम।
- 14 गो मीश आल कली ‘इ गाग्री डा ब्वाककु इचका तूचा गेयी’ देनुड। मेको मीश आलमी ‘तूडो। गो इ दलओठ आन कली यो ब्वाककु तुंडनुड’ देत हना, मेको मीश आल इन गेय पाइब इसहाक कली योव्रशो बाकल। मोदेशो दुम्त हना, गे आं होत्रप कली इन गेना हना यो दाकतीके कोंइताकनी, दे गो तुइकनुड” दे परमप्रभु कली लोत्र पवा बाकत।
- 15 मोपा लोत्र पन पना, रेबेका माइशशा मीश आल का गाग्री कुरशा जाकमाकत। मेको रेबेका बेथुएल आ तमी बाकमाकत। बेथुएल चहिं अब्राहाम आ लोकब नाहोर नु आ मीश मिल्का आस तौ बाकमाकत। उत्पत्ती २२:२३
- 16 रेबेका थम दारशो मीश आल बाकमाकत। मिनु ग्युबे मपथु, कन्ने बाकशो बाकमाकत। मिनु इनारम तोइशशा, आ गाग्री प्रिशा बेप मुप्या डोंइसे बाकत।
- 17 मिनु मेको वाइल रेबेका कली युम्थ दोरमाकत। मिनु “इ गाग्री डा ब्वाककु इचका तूचा गेयी” दे पुना बाकत।
- 18 मिनु रेबेकामी आ गाग्री रीब पा नाइशशा, तूचा गेवा बाकत।
- 19 मिनु तूचा गेने थुम्शा “गो इन दलओठ आन कली यो ब्वाककु चाकशा, मरूमा सम्म तुंडनुड” देमाकत।
- 20 मिनु आ गाग्री डा ब्वाककु मेकेर बाकशो शुंगुमी मोइशशा, दोरशा ब्वाककु ब्रथ लमाकत। दलओठ नेल्ल आन कली मरूमा सम्म ब्वाककु तुंडना बाकत।
- 21 मिनु मेको वाइल छक लाकशा, मेको कली कोत्रशा, परमप्रभु यावे आ योव्रशो मीश आल बाकम कों मबाकम, दे ब्वालेइ पा बाकमाकत।
- 22 मिनु दलओठ रूथी ब्वाककु तूडे नोले वाइलम आधी शेकेल सुन के मुन्द्री नु १० शेकेल सुन के चुरा निकशी शोल्शा, रेबेका कली गेवा बाकत। शेकेल का ११.५ ग्राम बाकब।
- 23 मिनु वाइलमी “गे सु का आ तमी नवे? आं कली देनो। इ आफ आ खिंम आंइ कली बास बाकचा गेनीमी को?” दे हिल्लो पवा बाकत।
- 24 मिनु रेबेकामी “गो बेथुएल आ तमी नड। बेथुएल चहिं नाहोर नु मिल्का आस तौ बाकब।
- 25 आंइ खिंम नल नु जचा थोत्रक शुश बाकब। बास बाकतीक यो बाकब” दे मदा बाकत।
- 26 मिनु वाइलमी खुम्की पा बापशा, परमप्रभु यावे आ डोंइती गु बापशा बाकमाकत।
- 27 मिनु मेकोमी “परमप्रभु यावे, आं होत्रप अब्राहाम आ परमप्रभु, गे ठेयब बाकनीनी। गे इन शिशी नु इन रिम्शो पशो मप्रोंइथु, आं होत्रप कली कोंइताकनी। गे आं कली आं होत्रप आ लोकब आ खिं कोंइताकयीनी” दे परमप्रभु यावे कली ठेयब सेला बाकत।
- 28 मिनु रेबेका दोरशा खिं लेशशा, आ ममा आ खिं डा मुर आन कली मार मार दुम्मे, मेको नेल्ल देमाकत।
- 29 मिनु लाबान माइशशा, रेबेका आ लोकब का बाकमाकत। मेको दोरशा, इनारम मेको मुर कली युम्थ लमाकत।
- 30 मारदे हना मेकोमी आ समी आ मुन्द्री नु चुरा तशा “मेको मुरुम आं कली मोदेशो लोत्र पाप्टु” देशो नेंशा, लाबान मेको मुर कली युम्थ लमाकत। मेको मुर आ दलओठ नु इनारम बाकशो बाकमाकत।
- 31 मिनु लाबानम मेको कली “परमप्रभु यावे आ आसीक राइब, गे मारदे मेकेर बाकनीनी? आंइ खिं पिने। गे नु इन दलओठ आन कली मारेड मारेड ठीक पाता” देमाकत।
- 32 मिनु वाइल खिं ओव्रमाकत। लाबानमी दलओठ तार वोइशशा नेल्ल शोल्शा, थुल्चा कली नल लाप्टा बाकत। मिनु मेको मुर नु आ गेय पाइब आन कली खोइल चिकचा कली ब्वाककु यो गेवा बाकत।
- 33 नोले मेको आ डोंइती जचा थोत्रक खेत्मे बाकत। मेकोमी चहिं “गो मारदे पिडा, इन कली मदेडा सम्म मजाइनुड, मब्वाइनुड” देमाकत। मिनु लाबानमी “इन के मार लोत्र बाकमे? लो देनीन” देमाकत।
- 34 मिनु वाइलमी “गो अब्राहाम आ वाइल नड।
- 35 मिनु परमप्रभु यावेमी आं होत्रप कली शुश आसीक गेप्टु। मिनु शुश शोंप पाइशशा दुम्त। मेकोमी मेको कली क्यारश भेडा, सुन चांदी, वाइलीम वाइल, दलओठ नु गधा शुश गेप्टु।

36 मिनू आं होत्रप आ मीश सारामी खाल्पी दुम्शा, अब्राहाम के तौ का थिप्तु। मिनू अब्राहाम आ तौ कली आ मारेइ मारेइ नेल्ल गेप्तु।

37 मिनू आं होत्रपमी आं कली 'आं तौ कली आं बाक्शो कनान रागी डा मुर आन तमी मचाक्को।

38 गे आं आफ आं खिं नु आं मुर आन खिं रे मीश आल का चाक्को' दे कसम जपाइक्ती।

39 मिनू गो आं होत्रप कली 'मीश आल एको रागी जाक्ने मबिप्बा, कोर में' देती।

40 मेकोमी चहिं 'गो परमप्रभु यावे आ डोंइती गाक्नुड। मेकोमी आ स्वर्ग डा गेय पाइब गे नु सोइक्व। मेकोमी इ कली वारच पाइब। मिनू आं तौ कली आं मुर आन खिं नु आं आफ आं खिं रे मीश आल का चाक्को।

41 आं खिं डा मुर आन बाक्तीके जाक्दीशशा, मीश आल का मगेतेमी हना, गे कसम मजशो खोंदेशो दुम्नेवे' दे आं होत्रपमी आं कली माइक्ती।

42 मिनू मुलाक्ती इनारम जाक्शा, गो 'परमप्रभु यावे, आं होत्रप, अब्राहाम आ परमप्रभु, गे आं कली वारच पने।

43 गो इनार आ नेक्शा बाक्नुड। मिनू मीश आल ब्वाक्कु दिथ जाक्मानु, मीश आल कली इ गाग्री डा ब्वाक्कु इच्का तूचा गोयी, देंनुड।

44 मिनू मेको मीश आलमी तूडीन, गो इन दलओठ आन कली यो ब्वाक्कु तुंडनुड, देंत हना, मेको मीश आल आं होत्रप आ तौ कली परमप्रभु यावेमी योत्रशो बाक्ल' देती।

45 मिनू गो आं थुमी लोत्र पने मथुथु, रेबेका आ गाग्री मुप्शा पित। मिनू इनारम ब्वाक्कु कीथ तोइसाक्व। मिनू गो 'आं कली इच्का तूचा गोयी' दे माइक्ता।

46 मिनू मेकोमी आ गाग्री रीब पा नाइशशा 'तूडो। गो इन दलओठ आन कली यो तुंडनुड' देंत। मिनू गो तूता। मेकोमी आं दलओठ आन कली ब्वाक्कु तुंडताक्व।

47 मिनू गो 'गे सु का आ तमी नवे?' दे हिल्लो पडानु 'गो बेथुएल आ तमी नड। बेथुएल नाहोर नु मिलका आस तौ बाक्ब' दे माइक्ती। मिनू गो आ नेमी मुन्डी पाइक्ताक्ड, आ गुडमी चुरा लिक्ताक्ड।

48 मिनू गो परमप्रभु यावे आ डोंइती गु बाप्शा 'परमप्रभु यावे, आं होत्रप अब्राहाम आ परमप्रभु, गे रिम्शो पाइब बाक्नीनी' दे टेयब सेल्ला। मारदे हना आं होत्रप आ लोक्ब आ खिं डा मुर रे आ तौ कली तमी चाक्का कली रिम्शो लां कोइताक्की।

49 मिनू 'गे आं होत्रप कली शिशी नु रिम्शो पचा मप्रोंइतीनी हना, आं कली देनीन। मेको पचा मदाक्नीनी हना यो देनीन। मारदे हना गो युरा पेरा गे लचा माल्नुड' " दे लोत्र पवा बाक्त।

50 मिनू लाबान नु बेथुएलमी "मेको नेल्ल परमप्रभु यावे आ पशो बाक्ब। मार पाइनस्कु मार देंनस्कु डा।

51 लो, रेबेका कली लतो। मिनू लावो। इन होत्रप आ तौ आ मीश दुम्ल। दोपा परमप्रभु यावेमी लोत्र पवा, मोपा दुम्ल" देंसा बाक्त।

52 मिनू अब्राहाम आ वाइलम मेको लोत्र नेंशा, परमप्रभु यावे आ डोंइती खुम्की पा बाप्शा, मेको कली टेयब सेला बाक्त।

53 मिनू आ गेय पाइबमी सुन नु चांदी के गहना नु दारशो वासी रेबेका कली गेमे बाक्त। आ लोक्ब नु आ ममा आस कली यो मार मार गेमे बाक्त।

54 मिनू जशा तूशा, आ गेय पाइबपुकी नु नाक्दो बाक्मा बाक्त। मिनू सुनी कना बोक्मानु, वाइलमी "आं होत्रप आ बाक्तीक लेत्चा गोयीनी" देंमाक्त।

55 मिनू रेबेका आ लोक्ब नु आ ममामी "रेबेका १० नाक्त सम्म बाक्ल, कोर में। मिनू नोले लन" देंसा बाक्त।

56 मिनू वाइलमी "परमप्रभु यावेमी आं कली आसीक गेशा, रिम्शो पा वारच पाइक्ती। मोपतीके आं कली मक्वोयलीनी। आं होत्रप आ बाक्तीक लेत्चा गोयीनी" देंमाक्त।

57 मिनू मेको निक्शीम "रेबेकामी मार देंबा, मेको नेंय" देंसा बाक्त।

58 मिनू रेबेका कली ब्रेशशा "एको मुर नु लाइनेवे?" दे हिल्लो पाम्सेनु "गो लाइनुड" देंमाक्त।

59 मिनू नोले आ समी रेबेका नु आ कली वारच पाइब, अब्राहाम आ वाइल नु आ गेय पाइब आन कली सोइक्तमे बाक्त।

60 लचा डोंइती रेबेका कली आसीक गेशा "गे आं समी बाक्नेवे। सोशा बोशा, शुश दुमीने। इ चच युड आन कली आन जोरी सवु आन कली ग्राडीन" दे आसीक गेमे बाक्त। उत्पत्ती २२:१७

61 मिनू नोले रेबेका नु आ वारच पाइब बोक्शा, दलओठ डोइशशा, मेको मुर नु लसा बाक्त। मोपा वाइलमी रेबेका कली लाइशशा, आ होत्रप आ खिं लेम्माक्त।

62 मिनू इसहाक बेयर-लहाइ-रोइ माइशशा ब्वाक्कु बुक्तीके रे पिमाक्त। मारदे हना दक्खिन रागी नेगेबम बाक्शो बाक्माक्त। उत्पत्ती १६:१४; उत्पत्ती २५:११

63 मिनू नाक्नाक्दो रूमी हिरथ लमाक्त। मिनू कोव्रडानु, डोन रे दलओठपुकी पिशो तवा बाक्त।

64 मिनू रेबेकामी इसहाक कली तशा, दलओठ रे फु तोंइसे बाक्त।

65 मिनू अब्राहाम आ वाइल कली "मेरे इं कली गुम्थ पीब मुर सु में?" दे हिल्लो पवा बाक्त। मिनू वाइलमी "आं होत्रप बाक्ब" देंमाक्त। मेको नेंशा, रेबेकामी आ कुप्नीम कुल सुम्से बाक्त।

66 मिनू वाइलमी इसहाक कली मार मार दुम्मे, मार मार पवा, नेल्ल शेंदा बाक्त।

67 मिनू इसहाकम रेबेका कली आ ममा सारा आ ताम्बुम ओइदा बाक्त। मिनू नोले ग्युबे पाम्से बाक्त। मिनू इसहाकम आ मीश कली दाक्ता बाक्त। मोपा इसहाक आ ममा बेक्शो प्रेंदा बाक्त। उत्पत्ती २३:१-२

## 25

अब्राहाम आ चच युइ

- 1 मिनु अब्राहामम अर्को मीश चाकगा बाक्त। मेको आ नें केतुराह बाक्माक्त।
- 2 मिनु मेकोमी अब्राहाम रे जिम्नान, योकशान, मेदान, मिदयान, इशबाक नु शुआह थिमाक्त।
- 3 मिनु योकशानमी शेबा नु देदान थिम्सी बाक्त। देदान आ तौपुकी अशशुरीम, लेतुशीम नु ले-उम्मीम बाक्मा बाक्त।
- 4 मिनु मिदयान आ तौ एफाह, एफेर, हनोक, अबीदा नु एल्दाह बाक्मा बाक्त। मेको नेल्ल केतुराह आ चच युइ बाक्मा बाक्त।
- 5 मिनु अब्राहामम आ मार मार नेल्ल इसहाक कली गेवा बाक्त।
- 6 अब्राहाममी आ मबेक्थुन अर्को मीश आन तौ आन कली मार मार कोसेली गेमी बाक्त। मिनु आ तौ इसहाक रे फ्राशा, पूर्व डा रागीम बाक्मल, दे पूर्व गे सोइकतीमी बाक्त।

अब्राहाम बेक्शो

- 7 मिनु अब्राहाम नेल्ल पा सहे का ७५ बर्स ब्रोंइमाक्त। उत्पत्ती १२:४
- 8 मिनु नोले शुश बर्स डा खाल्पा दुम्शा बेक्शा, आ किकी पिपी नु लमाक्त। उत्पत्ती १५:१५
- 9 मिनु इसहाक नु इश्माएल आ तौ निकशीमी आ बेक्शो रां माक-पेला माइश्शो रू डा पुक्खीमी लाइश्शा, वोदसे बाक्त। डोंइती मेको रू सोहार आ तौ एफ्रोन आ रू बाक्माक्त। एफ्रोन हिती का बाक्माक्त। मेको रू माग्ने आ पूर्व गे बाक्माक्त। उत्पत्ती २३:१३-२०
- 10 अब्राहाममी मेको रू हिती आ मुर रे ग्याप्शो बाक्माक्त। मेकेर डोंइती आ मीश सारा कली नोले अब्राहाम कली वोदसे बाक्त।
- 11 मिनु अब्राहाम बेक्म नोले परमप्रभुमी इसहाक कली आसीक गेवा बाक्त। मेना इसहाक बेयर-लहाइ-रोइ माइश्शोमी बाक्शो बाक्माक्त। उत्पत्ती १७:१९; उत्पत्ती २४:६२

इश्माएल आ चच युइ

- 12 सारा आ वाइलीम इजीप्त डा हागार रे जरमेशो अब्राहाम आ तौ इश्माएल बाक्माक्त। उत्पत्ती २१:१३
- 13 इश्माएल आ तौ सु सु बाक्मा बाक्त देशा हना, आ डोंइती जरमेशो तौ नेबायोथ बाक्माक्त। मिनु नोले थिशो आन नें केदार, अदबेल, मिब्सा, म, 14 मिश्मा, दुमा, मस्सा,
- 15 हादाद, तेमा, येतुर, नाफीश नु केदमा बाक्मा बाक्त।
- 16 एको इश्माएल आ तौ आन नें, आन बाक्तीके आन नें बाक्मा बाक्त। मेको नेल्ल आन थर डा टेयब मुर बाक्शो बाक्मा बाक्त। उत्पत्ती १७:२०; गन्ती १:४४
- 17 इश्माएल नेल्ल पा सहे का ३७ बर्स ब्रोंइमाक्त। मिनु बेक्शा, आ किकी पिपी नु लमाक्त।
- 18 आ तौपुकी हवीलाह रे इजीप्त लतीक लां शुर सम्म बाक्शो बाक्मा बाक्त। शुर रागी इजीप्त आ डोंइती अस्सुर गे बाक्ब। इश्माएल चहिं आ लोकब नेल्ल आन दातेमी बाक्माक्त। उत्पत्ती १६:१२

इसहाक आ तौ निकशी

- 19 इसहाक अब्राहाम आ तौ बाक्माक्त।
- 20 इसहाक ४० बर्स दुम्मेनु, रेबेका चाकगा बाक्त। रेबेका चहिं अरामी पदान-अराममी बाक्ब बेथुएल आ तमी, लाबान आ समी बाक्माक्त।
- 21 मिनु इसहाकमी परमप्रभु यावे कली आ मीश आ परबंम पुना बाक्त। मारदे हना आल मथीब बाक्माक्त। परमप्रभु यावेमी आ पुंइशो गेवा बाक्त। मिनु रेबेकामी कोव्रज कुरा बाक्त।
- 22 मिनु आल निकशी आ कोव्रजम राम्शी पाम्से बाक्त। मिनु रेबेकामी “मुल ओदेंशो दुम्ती हना, मार दुम डा? दोपा ब्रोंइनुडा डा?” दे मिम्ता बाक्त। मिनु परमप्रभु यावे कली “मार दुम्नुडा?” दे हिल्लो पवा बाक्त।
- 23 मिनु परमप्रभु यावेमी मेको कली “इ कोव्रजम जात निकशी डा मुर बाक्नीसी। मेको जात निकशी फ्राचा पुंइसीनीस। का अर्को क्येडा बोल्यो बाक्ब। डोंइती जरमेशो चहिं कान्छा आ गेय पाइब दुम्ब” दे शेंदा बाक्त। उत्पत्ती २७:२९; मलाकी १:२; रोमी ९:१०-१२
- 24 मिनु रेबेकामी आल थिमेनु, जौले बाक्सा बाक्त।
- 25 मिनु डोंइती डा आ रांम वा फेक्शो खोदेशो पा लल चां पाइश्शो वोंइश आल का थिमाक्त। मिनु मेको कली एसाव नें वोदा बाक्त।
- 26 मिनु नोले आ लोकबमी आ लोकब आ गेप्रे ग्याइश्शा यूमाक्त। मोपतीके आ नें याकूब वोदा बाक्त। रेबेका आल थिची ना इसहाक ६० बर्स दुम्शो बाक्माक्त। होसे १२:४
- 27 मिनु मेको तौ निकशी कोल्सानु, एसाव जोक्ब सिखारी दुम्माक्त। नेल्ल नाक्त ब्वाकीम बाक्चा दाक्ता बाक्त। याकूब चहिं ताम्बुम बाक्ब नु रू डा गेय पा, सिकसी पा बाक्ब दुम्माक्त।
- 28 इसहाकम एसाव कली दाक्ता बाक्त। मारदे हना आ चाक्शो सिखार ब्ववा बाक्त। रेबेकामी चहिं याकूब कली दाक्ता बाक्त।

डोंइती जरमेशो तौ आ अधिकार

- 29 मिनु काबा युक्बमी खोले क्येवानु, एसाव ब्वाकी रे शोत्रलु बेक्शा जाक्माक्त।

- 30 मिनू एसावमी याकूब कली “इ क्येशो लल दाल खोले इच्छा गेयी। गो शोत्रलु बेक्ती” देमाक्त। मोपतीके एसाव कली एदोम माइश्शो याइनी नें वोइश्शो बाक्माक्त।
- 31 मिनू याकूबमी “मुलाक्ती डोंइती जरमेशो तौ इ आसीक आं कली गेयी” देमाक्त।
- 32 मिनू एसावमी “मुल गो बेक्चता डोंइती जरमेशो तौ आ तथा डा आसीकम मार दुम्बा डा?” देमाक्त।
- 33 मिनू याकूबमी “गो मुलाक्ती गेतन, दे कसम जावो” दे मदा बाक्त। मिनू एसावमी याकूब कली “डोंइती जरमेशो तौ आं आसीक इ केन दुम्ल” दे कसम जवा बाक्त। उत्पत्ती २७:३६; हिब्रू १२:१६
- 34 मिनू नोले याकूबमी एसाव कली शोब्ले नु दाल खोले खेत्ता बाक्त। मिनू मेको जशा तूशा बोक्शा लमाक्त। मोपा एसावमी “डोंइती जरमेशो तौ आ ततीक आसीक ममाल्नुड” दे प्रोना बाक्त।

## 26

इसहाक गेरार सहर लशो

- 1 मिनू नोले रागीमी अन्काल दुम्माक्त। डोंइती अब्राहाम बाक्मेनु यो, अन्काल दुम्शो बाक्माक्त। मिनू इसहाक पलिस्ती आन पिप अबीमेलेक आ रागी डा गेरार सहर लमाक्त।
- 2 मिनू परमप्रभु यावेमी इसहाक आ डोंइती गूमाक्त। मिनू इसहाक कली “इजीप्त रागी मलावो। आं देशो रागीम बाक्थ लावो।
- 3 मेको रागीमी अर्को रागी डा मुर दुम्शा बाक्को। गो गे नु बाक्शा, इ कली आसीक गेनुड। गो इ कली नु इ चच युड आन कली एको रागी नेल्ल गेनुड। गो इ आफ अब्राहाम नु कबल पा, कसम जाता। मुल आं कबल खाप्नुड। उत्पत्ती १७:१९; उत्पत्ती २२:१६-१७
- 4 इ चच युड आन कली सरीड डा सोरुल खोदेशो पा शुश सेल्नुड। मेको आन कली एको रागी नेल्ल गेनुड। मिनू इ चच युड आन परबम रागी रागी डा मुर नेल्ल आसीक ताइनीम।
- 5 मारदे हना अब्राहाम आं देशो टिशा, आ पचा माल्शो पाप्नु। आं शेशो, आं फुल्लुम मुशा ब्रेक्शो लोत्र नु आं अरेशो नेल्ल पाप्नु” दे मदा बाक्त। उत्पत्ती १५:५
- 6 मिनू इसहाक गेरार सहर उड बाक्माक्त।
- 7 मिनू अबीमेलेक आ मुरपुकीमी इसहाक कली आ मीश आ परबम लोत्र पामे बाक्त। मेकोमी चहिं “आं समी बाक्ब” दे लोत्र लेत्ता बाक्त। मारदे हना रेबेका शुश दारशो मीश मुर दुम्तीके “आं मीश बाक्ब” देंचा हिंमाक्त। मारदे हना “मेको कली तशा, लाइक्चा कली आ कली साइक्नीम” दे हिंशो बाक्माक्त।
- 8 मिनू इसहाक मेको रागीमी शुश बाक्शा, काबु पलिस्ती आन पिप अबीमेलेकमी डेल रे इसहाक नु आ मीश रेबेका चाल्शो तवा बाक्त।
- 9 मोपतीके अबीमेलेकमी इसहाक कली ब्रेशा “नेनो, एको थमा पा इ मीश बाक्ब। दोपा ‘आं समी बाक्ब’ देने?” दे हुडक्ता बाक्त। मिनू इसहाकमी “एको आ परबम आं कली साइक्नीमी, कों, दे हिंती” देमाक्त।
- 10 मिनू अबीमेलेकमी “आंइ कली मार पवी? आं मुर का मेको नु इण्शो हना, गे आंइ कली शुश मरिम्शो मपपदी वा?” दे मदा बाक्त।
- 11 मिनू अबीमेलेकमी आ मुर नेल्ल आन कली “सुम मेको नु आ मीश आस कली मरिम्शो पाइबा, मेको थमा पा साइक्चा पुंइसीब” दे माइक्मी बाक्त।
- 12 मिनू इसहाकमी मेको रागीमी मार मार शोक्शा, मेको बर्सम गेडा का के सहे का गेडा सम्म सिप्पाइश्शा खेला बाक्त। मारदे हना परमप्रभु यावेमी इसहाक कली आसीक गेवा बाक्त। हितोपदेस १०:२२
- 13 मिनू शुश शोंप पाइश्शो दुम्शा, दारना दारन शुश क्येट थीब दुम्माक्त।
- 14 मेको आ क्यारश भेडा नु बी ब्यफ शुश दुम्मा बाक्त। मिनू वाइलीम वाइलपुकी यो शुश दुम्मा बाक्त। मोपतीके पलिस्तीपुकीमी गेहे पामे बाक्त।
- 15 मिनू पलिस्तीपुकीमी अब्राहाम आ गेय पाइब आन दोशो इनार खपीम प्रिंशा, ब्वाक्कु तेक्गमे बाक्त। उत्पत्ती २१:२२-३४
- 16 मिनू अबीमेलेकम इसहाक कली “आंइ क्येडा गे बोल्यो बाक्नीनी, मोपतीके एकेर रे लने” दे मदा बाक्त।
- 17 मिनू इसहाक नु आ मुरपुकी मेकेर रे लशा, गेरार डा दिंममी जाक्दीश्शा, आन ताम्बु कीशा बाक्मा बाक्त।
- 18 मिनू इसहाकमी डोंइती अब्राहाम आ दोशो इनारपुकी, लेंशा दोपाइश्शा, ब्वाक्कु गूपदा बाक्त। मारदे हना अब्राहाम बेक्म नोले पलिस्तीपुकीमी मेको इनार आन कली खपीम प्रिंशो बाक्मा बाक्त। मिनू मेको इनार आन कली आ आफ आ वोइश्शो नें लेंशा वोदा बाक्त।
- 19 मिनू इसहाक आ गेय पाइबपुकीमी मेको दिंममी दोशा, ब्वाक्कु बुक्तीके थित्मे बाक्त।
- 20 मिनू गेरार डा गोठलापुकीमी इसहाक आ गोठला आन कली “एको ब्वाक्कु आंइ के बाक्ब” दे जीमे बाक्त। मोपतीके इसहाकम मेको इनार कली एसेक नें वोदा बाक्त। मारदे हना मेकोपुकी आ मुर नु जीमे बाक्त।
- 21 मिनू लेंशा अर्को इनार का दोत्रमे बाक्त। मेको आ परबम यो जीमे बाक्त। मेको कली सित्ता नें वोदा बाक्त।
- 22 नोले मेकेर रे लशा, अर्को इनार का दोत्रमे बाक्त। मेको आ परबम सुइमी जिचा मपोक्गमे बाक्त। मिनू मेको आ नें रेहोबोथ वोदा बाक्त। मिनू “मुल परमप्रभु यावेमी आंइ कली बाक्तीक गेवा बाक्त। गोपुकी एको रागीमी शुश दुम्कल” देमाक्त।
- 23 मिनू मेकेर रे लशा, बेयर-शेवा जाक्दीम्मा बाक्त।

24 मिनू मेको नाकदो परमप्रभु यावे यूशा “गो इ आफ अब्राहाम आ परमप्रभु नड। महिनो। गो गे नु बाक्नुड, इ कली आसीक गेनन। आं गेय पाइब अब्राहाम आ परबम गो इ चच युड आन कली शुश सेलनुड” दे लोत्र पवा बाक्त।

25 मिनू इसहाकम मेकेर चढेतीक सेल्शा, परमप्रभु यावे आ नें थिशा ब्रेशशा, मेको नु लोत्र पवा बाक्त। मिनू आ ताम्बु मेक उड कीडा बाक्त। आ गेय पाइबपुकीमी मेकेर इनार का दोत्रमे बाक्त। उत्पत्ती १२:८

इसहाक नु अबीमेलेक सल्ला पशो

26 काबु अबीमेलेक, आ अर्ती गेब अहुज्जाथ नु आ फौज डा ठेयब कप्तान फीकोल नु गेरार सहर रे जाक्शा, इसहाक कली गुम्मे बाक्त।

27 मिनू इसहाकमी “गेपुकी आं कली मदाक्थु, इन बाक्तीके रे सोइक्ताक्वीनी। मुल मारदे आं कली गुम्थ जाक्नी?” दे हिल्लो पवा बाक्त।

28 मिनू मेकोपुकीमी “परमप्रभु यावे गे नु बाक्ब, गो तुडक्नीकी। मोपतीके गोपुकीमी ‘गे नु कसम जशा, कबल पचा’ रिम्शो दुम्ब। ब्यवस्था २९:३; मत्ती १३:१३

29 गे आंइ कली श्येत मगेने। गोपुकीमी यो इन कली श्येत मगेथु, रिम्शो पा लडाइ मपथु सोइक्ताक्क। गे परमप्रभु यावे आ आसीक राइब बाक्नीनी” दे इसहाक कली देमा बाक्त।

30 मिनू इसहाकम मेको आन कली भोज सेला बाक्त। मिनू मेकोपुकीम जामे, तूडमे बाक्त।

31 मिनू मेकोपुकी आ दीसा सुनी कना बोक्शा, कसम जामे बाक्त। मिनू नोले इसहाकमी मेको आन कली लचा गेवा बाक्त। मिनू आन थु नाइशशा लमा बाक्त।

32 मेको नाक्ती इसहाक आ गेय पाइबपुकी जाक्शा, इसहाक कली “आंइ दोतीकेमी ब्वाक्कु पूत” दे शेंदमे बाक्त।

33 मिनू मेको इनार कली शिबा नें वोदा बाक्त। मोपतीके मेको सहर आ नें मुल सम्म बेयर-शेबा बाक्ब।

एसाव आ मीश निक्शी

34 एसाव ४० बर्स दुम्मेनु, हिती आ मुर बेयरी आ तमी युदीथ नु हिती आ मुर एलोन आ तमी बासेमाथ चाक्सी बाक्त। उत्पत्ती ३६:२-३

35 मिनू मेको निक्शी आस परबम इसहाक नु रेबेका थु मनुथु, शुश सुर्ता पाम्से बाक्त।

## 27

इसहाकमी आसीक गेशो

1 मिनू इसहाक खाल्पा दुम्शा, ब्राब्रा पा मिक्च मताइब दुम्माक्त। मिनू मेकोमी आ डोंइती जरमेशो तौ एसाव कली “आं तौ” दे ब्रेत्ता बाक्त। मिनू एसावमी “मार देंनी?” दे लोत्र लेत्ता बाक्त।

2 मिनू इसहाकमी “नेनो, गो खाल्पा दुम्ती, आं बेक्ची ना मतुइक्नुड।

3 इ लिब्रा लाइशशा, सिखार ग्यारथ लावो। मिनू आं कली सिखार चाक्को।

4 मिनू नोले आं दाक्शो ब्रोत्रब्रोत्रशो क्येशा, गेयी। गो आं बेक्चा क्येडा डोंइती जशा ब्वशा, इ कली आसीक गेनुड” देमाक्त।

5 मिनू रेबेकामी इसहाक नु एसाव लोत्र पशो नेंशो बाक्माक्त। मिनू एसाव ब्वाकी सिखार ग्यारथ लमेनु,

6 रेबेकामी आ तौ याकूब कली “आं तौ नेनो, गो इ आफोमी एसाव कली लोत्र पशो नेता।

7 मेकोमी एसाव कली ‘आं कली सिखार चाक्को। ब्रोत्रशो क्येवो। गो जशा ब्वशा नोले परमप्रभु यावे आ डोंइती आं बेक्चा क्येडा डोंइती इ कली आसीक गेनुड’ देंत।

8 मोपतीके आं तौ, आं देंशो टिवो। दोपा अरेना, मोपा पावो।

9 मुल गोट लावो। क्यारश आन दाते रे रिम्शो पाठा निक्शी चाक्को। मिनू गो इ आफ कली आ दाक्शो ब्रोत्रशो क्येनुड।

10 मिनू गे चहिं लाइशशा, इ आफ कली खेत्तो। मेकोमी जशा ब्वशा, आ बेक्चा क्येडा डोंइती इ कली आसीक गेवल” देमाक्त।

11 मिनू याकूबम आ ममा कली “नेनीन, आं लोकब एसाव शुश चां पाइशशो बाक्ब। गो मोदेंशो मनड। उत्पत्ती २५:२५

12 मिनू आं आफोम आं कली थिशा, तुडक्ब। मिनू गो जोल पाइब दुम्शा, आसीक मतथु, सराप राइनुड” देमाक्त।

13 मिनू आ ममामी “इ कली पशो सराप गो रडल, आं तौ। गे आं देंशो पावो। पाठा निक्शी ब्रथ लावो” देमाक्त।

14 मिनू याकूबम गोट लशा, पाठा निक्शी चाक्शा, आ ममा कली गेवा बाक्त। मिनू आ ममामी आ आफ कली आ दाक्शो ब्रोत्रशो श्ये क्येवा बाक्त।

15 मिनू रेबेकामी आ खिंमी वोइशशा आ डोंइती जरमेशो तौ एसाव आ नक वा लाइशशा, आ कान्छा याकूब कली फेक्पदा बाक्त।

16 मिनू मेको पाठा आस कुशुल याकूब आ गुड तारी नु आ शुर तारी क्येप्ता बाक्त।

17 मिनू आ क्येशो ब्रोत्रशो श्ये नु शोब्ले याकूब कली गेवा बाक्त।

18 मिनू याकूबम आ आफ बाक्तीके लशा, मेको कली “आं आफ” देमाक्त। मिनू “गो बाक्ती। आं तौ, गे सु नवे” दे हिल्लो पवा बाक्त।

19 याकूबम आ आफ कली “गो इन डोंइती जरमेशो तौ, एसाव, नड। इन पुंइशो गो पाता। बोक्शा निशशा, आं सिखार ब्वने। मिनू आं कली आसीक गेयीनी” देमाक्त। लेवी १९:१४

- 20 मिनू इसहाकमी “गिश रीब पा पवी, आं तौ?” दे हिल्लो पवा बाक्त। मिनू “परमप्रभु यावे, इन परमप्रभुमी सिखार आं नेक्था चावतु” देमाक्त।
- 21 मिनू इसहाकम याकूब कली “आं नेक्था पिवो। इ कली थीनन, आं तौ। गे थमा पा, आं तौ एसाव नवे कों, मनवे” दे मदा बाक्त।
- 22 मिनू याकूब आ आफ आ नेक्था लमाक्त। इसहाकम मेको कली सुल्शा “आ सेंदा याकूब के बाक्त, आ गुड चहिं एसाव के बाक्त” देमाक्त।
- 23 मिनू मेको कली मतुडक्ता बाक्त। मारदे हना आ गुड एसाव खोदेशो पा चां पाइश्शो बाक्माक्त। मोपतीके आसीक गेवा बाक्त।
- 24 मिनू “गे थमा पा आं तौ एसाव नवे?” दे हिल्लो पवानु “गो नड” देमाक्त।
- 25 मिनू इसहाकम “लो, इ सेल्शो जचा ब्वचा थोत्रक चाक्को। इ कली आसीक गेनन” देमाक्त। मिनू याकूबमी चाक्गा बाक्त। मिनू आ आफोम ब्वचा बाक्त। मिनू याकूबमी अडगुर शांबु यो चाक्शा, गेवा बाक्त। मिनू मेको यो तूडा बाक्त।
- 26 मिनू आ आफ इसहाकम “आं नेक्था पिवो, आं कली पुक्पु पावो, आं तौ” देमाक्त।
- 27 मिनू आ नेक्था लशा, पुक्पु पवा बाक्त। इसहाकमी आ वा आ रिना नाम्शा, आसीक गेवा बाक्त। मिनू मेकोमी “आं तौ आ रिना परमप्रभु यावेमी आसीक गेशो रू आ रिना खोदेशो बाक्ब।
- 28 परमप्रभुमी इ कली सरीड डा सीत रे नु रिम्शो खप रे शुश चेरब नु अडगुर शांबु गेवल।
- 29 मुरपुकीम इ कली गेय पामेक्ल। रागी रागी डा मुरपुकी इ डोंइती खुम्की पा बाम्मल। इ लोकब आन दातेमी गे टेयब दुमो। इ ममा आ तौपुकी इ डोंइती बाम्मल। सु सुम इ कली सराप पामे, मेको आंमान रमल। सु सुम इ कली आसीक गेमे, मेको आसीक रमल” दे आसीक गेवा बाक्त। उत्पत्ती २३:२५; उत्पत्ती १२:३
- 30 मिनू इसहाकमी आसीक गेवा नोले, याकूब आ आफ आ बाक्तीक रे लमेनु, आ लोकब एसाव आ सिखार ग्यारतीक रे जाक्माक्त।
- 31 मेकोमी ब्रोव्रशो श्ये क्येशा, आ आफ आ बाक्तीके जाक्शा, आ आफ कली “आं आफ बोक्कीन। आं सिखार ब्वशा, आं कली आसीक गेयीनी” देमाक्त।
- 32 मिनू आ आफ, इसहाकमी मेको कली “गे सु नवे?” दे हिल्लो पवानु “गो इन डोंइती जरमेशो तौ, एसाव नड” देमाक्त।
- 33 मिनू इसहाक शुश ख्रिंखि पा “सुमी आं कली सिखार चाक्गा? इ जाक्चा क्येडा डोंइती गो जाता। मिनू आसीक गेता। आं आसीक लीब” देमाक्त।
- 34 मिनू एसाव आ आफ आ लोव्र नेशा, ठेयब सेंदा पा डाक्माक्त। मिनू आ आफ कली “आं आफ, आं कली यो आसीक गेयीनी” देमाक्त। हिबू १२:१७
- 35 मिनू “इ लोकब जाक्शा, जोल पशा, इ आसीक रोडक्ताक्व” देमाक्त।
- 36 मिनू एसावमी “आ नें याकूब दुम्शो, ठीक बाक्ब। मुल आं कली निक्शी खेयप ठगेती। आं डोंइती जरमेशो तौ आ अधिकार रोडक्ताक्वी। मुल आं आसीक यो लाइक्तु। गे आं कली आसीक महेंदीनी?” दे जाक्शा, देमाक्त। उत्पत्ती २५:२६; उत्पत्ती २५:३३
- 37 मिनू इसहाकम एसाव कली “नेनो, गो मेको कली इ प्रभु सेल्ला। आ लोकब नेल्ल आन कली मेको आ गेय पाइब सेल्ला। चेरब नु अडगुर शांबु शुश ग्रेल्लम, दे लोव्र पाता। मिनू इ कली मार गेनना डा, आं तौ?” दे लोव्र पवा बाक्त।
- 38 मिनू एसावमी आ आफ कली “इन के आसीक का ला बाक्बा डा, आं आफ? आं कली यो आसीक गेयीनी” दे शुश डाक्माक्त।
- 39 मिनू आ आफ इसहाकम “नेनो, मलिलो खप नु सरीड डा सीत इ बाक्तीक रे डोन बाक्ब।
- 40 इ तरवारम इ गेय पाइनेवे। इ लोकब कली गेय पाइनेवे। २राजा ८:२०,२२ गे बोल्यो दुम्ते हना, आ जुवा इ शुर रे ताइक्नेवे” दे एसाव कली यो आसीक गेवा बाक्त।
- 41 मिनू एसावमी आ आफोम याकूब कली गेशो आसीक लोव्र आ पर्वम, याकूब कली काइ मदाक्ता बाक्त। आ थुंमी “आं आफ बेक्शा रेंका पने थुंमो नोले, आं लोकब याकूब कली साइक्नुड” दे मिम्ता बाक्त।
- 42 मिनू रेबेकामी आ तौ आ लोव्र नेना बाक्त। मिनू मेकोमी याकूब कली ब्रेशा “नेनो, इ लोकबमी इ कली साइक्चा कली मिम्ब।
- 43 मोपतीके आं तौ, गे आं देशो पावो। बोक्को, आं लोकब लाबान आ बाक्तीके, हारान सहर लोकको। उत्पत्ती २४:२९
- 44 इ लोकब आ गाइश्शो मनाइसे सम्म मेक उइ बाक्को।
- 45 मिनू इ लोकबमी इ पशो प्रेशा, मचुरत हना, गो इ कली ब्रथ सोइक्नुड। गो दोपा नाक्त कामी आं मुर निक्शी जाम्शो तने चाप्नुड डा?” दे आ तौ कली देमाक्त।
- 46 मिनू रेबेकामी इसहाक कली “गो हित्ती आ तमी आस पर्वम बेक्चा डा दुम्ती। याकूबमी यो एको खोदेशो पा एको रागी डा हित्ती आ तमी का चाक्तु हना, गो ब्रोंइचा मदाक्नुड” दे मदा बाक्त। उत्पत्ती २६:३४-३५

## 28

याकूब कली सोइश्शो

1 मिनू नोले इसहाकमी याकूब कली अरेशा “गे कनान रागी डा मीश आल मचाक्को। उत्पत्ती २४:३

2 साशा, पदान-अराम इम्मा आ आफ बेथुएल आ खिं लावो। मिनु इम्मा आ लोकब लाबान आ तमी का चाक्को। उत्पत्ती २२:२३; उत्पत्ती २४:२९

3 मिनु नेल्ल क्येडा सक्ति पाइशो परमप्रभुमी इ कली आसीक गेवल। मिनु इ कली सोशा बोशा, शुश सेलल। हिक्ने मचाप्या डा पा शुश दुम्पदल।

4 अब्राहाम कली गेशो आसीक मुल इ कली नु इ चच युइ आन कली गेवल। इ मुल बाक्शो रागीम अर्को रागी डा मुर बाक्ते, तन्न परमप्रभुमी अब्राहाम कली गेपु। मेको इ कली दुम्ल” दे आसीक गेवा बाक्त।

5 मोदेशो पा इसहाकमी याकूब कली पदान-अराम डा मुर बेथुएल आ तौ आ खिं सोइक्ता बाक्त। मेको याकूब नु एसाव आस ममा आ लोकब लाबान बाक्माक्त।

6 मिनु एसावमी, इसहाकम याकूब कली आसीक गेशा, मीश चाक्का कली पदान-अराम गे सोइशो तुइशशा, आ आफ आ अरेशो “कनान रागी डा तमी मचाक्को” दे माइशो तुइक्ता बाक्त।

7 याकूबमी आम आफ आस कली टिशा, पदान-अराम गे लशो तवा बाक्त।

8 मिनु एसावम कनान रागी डा तमीपुकी आ आफ इसहाकम मदाक्शो तुइशशा,

9 इश्माएल आ बाक्तीके लमाक्त। मिनु मीश निक्शी बाक्शा यो, अब्राहाम आ तौ इश्माएल आ तमी नेबायोथ आ समी महलाथ चाक्का बाक्त। उत्पत्ती १६:१६; उत्पत्ती २६:३४; उत्पत्ती २५:१३

याकूबमी डोमु तशो

10 मिनु याकूब बेयर-शेबा रे गाक्शा, हारान सहर गे लमाक्त।

11 मिनु बाक्तीके का जाक्दीशशा, नाक्दो मेकेर बाक्माक्त। मारदे हना नां रिक्माक्त। मिनु फुल्लु तार आ पिया वोइशशा इम्माक्त।

12 मिनु इम्मेनु, डोमुम खप रे सरीड थिशो क्रेसी का तवा बाक्त। मेको क्रेसीमी परमप्रभु आ स्वर्ग डा गेय पाइबपुकी तोइशशो, डोइशशो तवा बाक्त। यूहन्ना १:५१

13 मिनु क्रेसी आ डरम परमप्रभु यावे राप्शा, याकूब कली “गो परमप्रभु यावे, इ बाजे अब्राहाम नु इ आफ इसहाक आस परमप्रभु नड। मुल इ इप्शा बाक्तीक रागी इ कली नु इ चच युइ आन कली गेनन्नी।

14 इ चच युइ खप डा फुरक खोदेशो पा शुश दुम्नीम। सोशा बोशा, शुश दुम्शा, पूर्व, पच्छिम, उत्तर, दक्खिनम ब्रशा बाक्नीमी। गे नु इ चच युइ आन पबंम रागी नेल्ल डा मुर आसीक ताइनीम। उत्पत्ती १३:१४-१५

15 गो गे नु बाक्शा, ते लाइनेवे, गो इ कली कोवन्नन। गो इ कली एको रागी लेप्पाइक्वन। मारदे हना गो इ कली मप्रॉइन्नन। इ कली मार मार देंडा, गो मेको नेल्ल पाइनुड” देंमाक्त।

16 मिनु याकूब आ निन्द्रा रे सेंसीशा “परमप्रभु यावे थमा पा एकेर बाक्ब। गो मतुइक्तु” देंमाक्त।

17 मिनु हिंशा “एको हिंशा डा बाक्तीके बाक्ब। परमप्रभु आ बाक्तीक खिं बाक्शा, सरीड डा लाप्चो बाक्ब” देंमाक्त। प्रस्थान ३:५

18 मिनु याकूब सुनी कना बोक्शा, आ पिया आगा डा वोइशशो फुल्लु राप्पाइशशा तेल लुक्ता बाक्त। उत्पत्ती ३५:१४-१५

19 मिनु मेको बाक्तीके कली बेथेल नें वोदा बाक्त। डोइती मेको सहर आ नें लूज बाक्माक्त।

20 मिनु याकूबमी “परमप्रभु गो नु बाक्त हना, लां कोइशा कोवती हना, जचा नु फेक्का यो गेती हना,

21 थुं नाइशशा, आं आफ आ खिं लेत्चा गेती हना, परमप्रभु यावे आं परमप्रभु बाक्ब” दे कसम जवा बाक्त।

22 मिनु परमप्रभु कली “आं राप्पाइशशा वोइशशो फुल्लु परमप्रभु आ खिं दुम्ल। आं कली मार मार गेनी, मेको के १० भागमी भाग का थमा पा इन कली गेनन्नी” देंमाक्त। उत्पत्ती ३५:१

## 29

याकूब लाबान आ खिं जाक्दीशशो

1 मिनु याकूब लमे लमे, पूर्व डा मुर आन रागी जाक्दीम्माक्त।

2 मिनु कोवडानु, दिम कामी इनार का तवा बाक्त। हुल सां भेडा मेकेर बाक्शो बाक्मा बाक्त। मारदे हना मेको आन कली मेको इनार डा ब्वाक्कु तुंडबाक्मा बाक्त। मेको इनार चहिं टेयब फुल्लुमी सुम्शो बाक्माक्त।

3 मिनु भेडा आन हुल नेल्ल मेकेर खुम्सीशा, गोठलापुकीमी मेको इनार डा फुल्लु क्युक्शा, भेडा आन कली ब्वाक्कु तुंडशा, नोले लेंशा इनार सुम्शा वोइक्बाक्मा बाक्त।

4 मिनु याकूबमी मेको भेडा गोठला आन कली “आं लोकबपुकी गे ते डा बाक्नीनी?” दे हिल्लो पवा बाक्त। मिनु मेकोपुकीमी “हारान डा बाक्नीकी” देंमा बाक्त।

5 मिनु याकूबमी “गे नाहोर आ तौ लाबान तुइक्नीनी?” दे हिल्लो पवा बाक्त। मिनु “गो तुइक्नीकी” दे लोव लेत्मे बाक्त। उत्पत्ती २४:१०,२४

6 याकूबमी “रिम्शो बाक्मे?” दे हिल्लो पवानु, मेकोपुकीमी “रिम्शो बाक्ब। हयु आ तमी राहेल आ भेडा नु जाक्त” देंमा बाक्त।

7 मिनु याकूबमी “चोक्की मजाक्शो, भेडा आन कली ब्वाक्कु तुंडशा, जोपाइक्थ लतीन” देंमाक्त।

8 मिनु मेकोपुकीमी “हुल नेल्ल मखुम्सीथु, इनार डा फुल्लु मयाक्थु, भेडा आन कली ब्वाक्कु तुंडने मचाप्नीकी” दे लोव लेत्मे बाक्त।

9 मिनु याकूब मेकोपुकी नु लोव पवा सम्म, राहेल आ आफ आ भेडा नु जाक्माक्त। मेको गोठाल्नी बाक्माक्त।



- 10 मिनु याकूबमी आ मामा, लाबान आ तमी राहेल तवा बाक्त। मिनु मेको कली गुमथ लशा, इनार डा फुल्लु याक्ता बाक्त। मिनु आ मामा आ भेडा आन कली ब्वाक्कु तुंडा बाक्त।
- 11 मिनु राहेल कली चुप पाइशशा डाक्माक्त।
- 12 राहेल कली “गो इ आफ आ बहिनी रेबेका आ तौ नड” देमाक्त। मिनु राहेल दोरशा लशा, आ आफ कली मेको लोत्र शेंदा बाक्त।
- 13 मिनु लाबानमी आ भानीच याकूब जाक्शो लोत्र नेंशा, दोरशा मेको कली गुमथ जाक्माक्त। मिनु मुप्शा, पुक्पु पा, आ खिं लदा बाक्त। मिनु याकूबमी लाबान कली शुश लोत्र शोवडा बाक्त।
- 14 मिनु लाबानमी “गे थमा पा आं खिं डा मुर बाक्नेवे” देमाक्त। मिनु याकूब महिना का खोदेशो मेकेर बाक्माक्त।
- 15 मिनु लाबानमी याकूब कली “गे आं खिं डा मुर बाक्ते हना यो, आं कली मो गेय पचा ममाल्नेवे। मार पुंडनेवे, देनो” दे हिल्लो पवा बाक्त।
- 16 लाबान आ तमी निकशी बाक्सा बाक्त। आ डोंइती जरमेशो आ नें लेआ नु कान्छी आ नें राहेल बाक्माक्त।
- 17 लेआ मदरशो बाक्माक्त। राहेल चहिं शुश दारशो बाक्माक्त।
- 18 याकूबम राहेल कली दाक्ता बाक्त। मिनु लाबान कली “इन कान्छी तमी राहेल आ परबम गो इन कली ७ बर्स गेय पाइनुड” देमाक्त।
- 19 मिनु लाबानमी “अर्को मुर कली गेचा क्येडा इ कली गेचा रिम्शो बाक्ब। गो नु गेय पा बाक्को” देमाक्त।
- 20 मिनु याकूबम राहेल आ परबम ७ बर्स गेय पवा बाक्त। मेको ७ बर्स याकूब कली नाक्त का निकशी खोदेशो पा लमाक्त। मारदे हना राहेल कली शुश दाक्ता बाक्त।
- 21 मिनु याकूबमी लाबान कली “आं मीश गेयीनी। ७ बर्स दुम्माक्त। मेको नु ग्युबे पाइनुड” दे मदा बाक्त।
- 22 मिनु लाबानमी सहर डा मुर नेल्ल ब्रेशशा, भोज गेमी बाक्त।
- 23 मिनु नाकनाक्दो लाबानमी आ तमी लेआ लाइशशा, याकूब कली गेवा बाक्त। मिनु याकूब मेको नु इम्माक्त।
- 24 लाबानमी आ तमी लेआ कली आ गेय पाइब वाइलीम जिल्पा गेवा बाक्त।
- 25 मिनु याकूब सुनी कना बोक्शा, आ मीश कोव्रडानु, लेआ बाक्माक्त। मिनु गाइशशा लाबान कली “गे आं कली मार पनी? गो इन कली राहेल आ परबम गेय मपडा डा? मारदे आं कली ठगेनी?” दे मदा बाक्त।
- 26 मिनु लाबानमी “आंइ रागीमी जेठी क्येडा डोंइती कान्छी मगेनीकी।
- 27 हप्ता का मेको नु बाक्को। नोले गो इ कली अर्को यो गेनन। गे अर्को ७ बर्स गेय पचा माल्नेवे” दे मदा बाक्त।
- 28 मिनु याकूब मेको बिशशा, लेआ नु हप्ता का बाक्माक्त। मिनु नोले लाबानमी राहेल कली यो गेवा बाक्त।
- 29 लाबानमी आ तमी राहेल कली आ गेय पाइब वाइलीम बिल्हाह गेवा बाक्त।
- 30 मिनु याकूबम राहेल कली यो चाक्गा बाक्त। मिनु लेआ क्येडा राहेल कली शुश दाक्ता बाक्त। मिनु लाबान कली अर्को ७ बर्स गेय पवा बाक्त। लेवी १८:१८

परमप्रभुमी लेआ आ श्येत तशो

- 31 मिनु परमप्रभु यावेमी याकूबमी लेआ कली मदाक्शो तशा “आल थीब दुम्ल” दे आसीक गेवा बाक्त। तन्न राहेल आल मथीब बाक्माक्त।
- 32 मिनु लेआ कोव्रज कुरशा, तौ का थिमाक्त। मेको आ नें रूबेन वोदा बाक्त। मारदे हना “परमप्रभु यावेमी आं श्येत ताप्तु। मुल रे आं वोंइशेम आं कली दाक्ब” देमाक्त।
- 33 मिनु लेंशा कोव्रज कुरशा, तौ का नु थिमाक्त। मिनु “परमप्रभु यावेमी आं कली मदाक्शो तशा, अर्को तौ का यो गेती” देंशा, मेको आ नें सिमियोन वोदा बाक्त।
- 34 मिनु लेंशा कोव्रज कुरशा, अर्को तौ का थिमाक्त। मिनु “मुल रे आं वोंइश गो नु बाक्ब। मारदे हना गो तौ सां थीतामी” देमाक्त। मोपतीके आ नें लेवी वोदा बाक्त।
- 35 मिनु लेंशा कोव्रज कुरशा, तौ का नु थिमाक्त। मिनु “गो परमप्रभु यावे कली टेयब सेल्लुड” दे मेको कली यहूदा नें वोदा बाक्त। मिनु आल थिचा नांडसे बाक्त।

## 30

याकूब आ अर्को आल

- 1 मिनु राहेलमी “आल मथीब बाक्डा बाक्त” दे तुइशशा, आ लोकब कली गेहे पवा बाक्त। मिनु याकूब कली “गे आं कली आल मगेतीनी हना, गो बेक्नुड” देमाक्त।
- 2 मिनु याकूबमी राहेल आ लोत्र आ परबम गाइशशा “परमप्रभुमी इ कली आल मथीब सेल्लु। गो मेको क्येडा टेयब नडा डा?” देमाक्त। भजन संग्रह १२७:३
- 3 मिनु राहेलमी “गो इन कली आं गेय पाइब बिल्हाह गेनुड। मेकोमी आं कली आल थिचा माल्ब। मिनु आं के आल दुम्ल” देमाक्त। उत्पत्ती १६:२
- 4 मिनु मेकोमी याकूब कली आ गेय पाइब बिल्हाह गेवा बाक्त। मिनु याकूब मेको नु इम्माक्त।
- 5 मिनु बिल्हाह कोव्रज कुरशा, तौ का थिमाक्त।
- 6 मिनु राहेलमी “परमप्रभुमी आं कली नाक्शा, आं पुंइशो नेंतु। मिनु आं कली तौ का गेती” देमाक्त। मोपतीके आ नें दान वोदा बाक्त।

- 7 मिनू राहेल आ गेय पाइब बिल्हाहमी लेंशा कोत्रज कुरशा, अर्को तौ का थिमाक्त।  
 8 मिनू राहेलमी “गो आं लोकब नु परमप्रभु खोदेशो पा जिशा ग्राती” देमाक्त। मोपतीके मेको आ नें नाप्टाली वोदा बाक्त।  
 9 मिनू लेआमी “लेंशा आल मथीनुड” दे मिम्शा, याकूब कली आ गेय पाइब जिल्पा गेवा बाक्त।  
 10 मिनू लेआ आ गेय पाइब जिल्पामी तौ का थिमाक्त।  
 11 मिनू लेआमी “रिम्शो दुम्त” दे आ नें गाद वोदा बाक्त।  
 12 मिनू लेआ आ गेय पाइब जिल्पामी अर्को तौ का नु थिमाक्त।  
 13 मिनू लेआमी “गो ग्येरसाकयी। मारदे हना मीश मुरपुकीमी आं पर्वम ‘आसीक राइब बाकब’ देनीम” देमाक्त। मिनू आ तौ कली आशेर नें वोदा बाक्त।  
 14 मिनू काबु रूबेनमी चेरब रिक्ची ना आल थिपाइकब फल थिदा बाक्त। मिनू आ ममा लेआ कली गेवा बाक्त। मिनू राहेलमी लेआ कली “इ तौ आ चाकशो फल आं कली का निक्शी गेयी” देमाक्त।  
 15 मिनू मेकोमी “गे आं वोंइश आ थुं रोइक्चा ला ममाइ, आं तौमी चाकशो फल यो रोइक्नेवे?” देमाक्त। मिनू राहेलमी “इ तौ आ फल आ पर्वम मुलाकदो याकूब इ खिम बाकल” देमाक्त।  
 16 मिनू नाक्नाकदो याकूब रूरे जाकमेनु, लेआम युम्थ लशा “गे आं खिम बाकचा माल्नीनी। गो आं तौ आ चाकशो फल इन पर्वम थाप्टाकड” देमाक्त। मिनू मेको नाकदो याकूब लेआ नु इम्माक्त।  
 17 मिनू परमप्रभुमी लेआ आ पुंइशो गेवा बाक्त। मिनू याकूब के ४ जना तौ थिशा नोले अर्को तौ का नु थिमाक्त।  
 18 मिनू लेआमी “परमप्रभुमी आं कली रिम्शो पाप्तु। मारदे हना गो आं गेय पाइब आं वोंइश कली गेता” देमाक्त। मिनू आ नें इम्साकार वोदा बाक्त।  
 19 मिनू लेंशा कोत्रज कुरा बाक्त। मिनू ५ जना तौ थिशा यो, अर्को तौ का नु थिमाक्त।  
 20 मिनू “परमप्रभुमी आं कली रिम्शो पाप्तु। मुल आं वोंइश गो नु बाकब। मारदे हना गो ६ जना तौ थीतामी” देमाक्त। मिनू मेको कली जबलून नें वोदा बाक्त।  
 21 मिनू नोले तमी का यो थिमाक्त। मेको कली दीना नें वोदा बाक्त।  
 22 नोले परमप्रभुमी राहेल कली मिम्ता बाक्त। मिनू आ पुंइशो गेशा, आल थीब दुम्माक्त। १सामुएल १:१९  
 23 मिनू कोत्रज कुरशा, तौ का थिमाक्त। मिनू “परमप्रभुमी श्येत रे प्रोंइती” देमाक्त। यसेया ४:१; लूका १:२५  
 24 मोपतीके आ नें योसेफ वोदा बाक्त। मिनू “परमप्रभु यावेमी आं कली अर्को तौ का नु गेयील” दे पुना बाक्त। उत्पत्ती ३५:१७-१९

#### याकूब शोंप पाइशो दुम्शो

- 25 मिनू राहेलमी योसेफ थिशा नोले याकूबमी लाबान कली “आं कली लचा गेयीनी। गो आं रागी, आं खिं लचा दाक्नुड।  
 26 आं मीशपुकी, आं आलपुकी नु आं कली लचा गेकी। गो एको तचा कली इन गेय पाता। गो इन कली दोदेशो रिम्शो गेय पडा, मेको गे तुइक्नीनी” देमाक्त। उत्पत्ती २९:२०, ३०; उत्पत्ती ३१:४३  
 27 मिनू लाबानमी “गे आं कली दाक्नेवे हना, इक्का नु बाक्को। मारदे हना गे एक बाकशा, परमप्रभु यावेमी इ गेय पतीके आं कली आसीक गेती, दे तुइक्नुड। उत्पत्ती ३९:५  
 28 गे मार माल्नेवे, मेको इ कली गेनुड” दे मदा बाक्त।  
 29 मिनू याकूबमी “गो दोदेशो गेय पडा, इन बी ब्यफ गिश दुम्मा, गे तुइक्नीनी।  
 30 आं जाक्ची ना का निक्शी बाक्तेकमे, मुल शुश दुम्तेकम। मिनू गो जाक्डा रे परमप्रभु यावेमी इन कली आसीक गेप्तु। मिनू आं खिं गेना कोत्रनुडा?” दे मदा बाक्त।  
 31 मिनू लाबानमी “गो मार गेचा माल्नुडा?” देमेनु, याकूबमी “आं कली मारेइ गेचा ममाल्नीनी। आं देशो पाइतीनी हना, गो लेंशा इन गोठला दुम्नुड।  
 32 गो मुलाक्ती इन क्यारश भेडा नेल्ल कोत्रथ लाइनुड। मिनू पुत्ले पाडग्रे नेल्ल गुंइनुड। क्यारश भेडा रे यो क्येर नु पुत्ले पाडग्रे गुंइनुड। मेको आं गाल्च दुम्मीम।  
 33 मोदेशो दुम्मेनु, आं ठीक पतीके तुइक्नीनी। तेको क्यारश आन दातेमी पुत्ले पाडग्रे मपाइशो नु पाठा आन दातेमी क्येर मबाक्मा, मेको आं खुइ पशो, दे तुइक्नीनी” दे मदा बाक्त।  
 34 मिनू लाबानमी “इ देशो खोदेशो दुम्ल” देमाक्त।  
 35 मिनू मेको नाक्ती लाबानमी गोठ नेल्ल रे टाटे पाडग्रे क्यारश बोका नेल्ल नु पुत्ले पाडग्रे भेडा सांड गुंइदा बाक्त। तेक तेको इक्का बुश नु क्येर बाक्मा, मेको योत्रशा, आ तौ आन गुइमी गेवा बाक्त।  
 36 मिनू आ तौ आन गोठ नु याकूब आ गोठ नाक्त सां गाक्तीक लां डोन वोदा बाक्त। याकूबम चहिं लाबान आ अरु क्यारश भेडा कोत्रडा बाक्त।  
 37 मिनू याकूबमी ब्वाकीम पिपल, कटुस नु अर्को रवा आन क्येख राशी जिक्शा, बुश रेखा गुंइशा खेवा बाक्त।  
 38 मिनू मेको कोक्केपुकी क्यारश नु भेडा आन ब्वाक्कु त्तीकेमी वोदा बाक्त। मिनू ब्वाक्कु तूशा डा मिन ब्वांडसीमानु,  
 39 मेको आ टाटे पाडग्रे कोक्के तशा, टाटे पाडग्रे पाठापुकी जरमेसीमा बाक्त।  
 40 याकूबमी मेको पाठा आन कली गुंइशा फ्राशा आम बगाल डा गोठ सेला बाक्त। आम क्यारश भेडा लाबान आ गोठम मचोदा बाक्त।

41 मिनु गेना बोल्यो नु रिम्शो बोकापुकी माल्ची ना बाक्मा नु ब्वाक्कु त्थ जाक्मा, मेना मेको कोक्केपुकी तूतीकेमी आन डोंइती वोदा बाक्त। मिनु “कोक्के आन डोंइती ब्वाइसीमल” देंमाक्त।

42 बगाल डा मरिम्शो क्यारश भेडा जाक्तेकम हना, कोक्के मवोदा बाक्त। मोदेशो पा मरिम्शो क्यारश भेडा लाबान कली, रिम्शो बोल्यो चहिं याक्कब के दुम्मा बाक्त।

43 मिनु याक्कब शुश शॉप पाइश्शो दुम्शा, क्यारश भेडा, वाइलीम वाइल, दलओंटपुकी नु गधा शुश पाइश्शो दुम्माक्त।

## 31

याक्कबम लाबान कली प्रोंइशो

1 मिनु लाबान आ तौपुकीमी “याक्कबमी आइ आफ आ मारेइ मारेइ नेल्ल रोइक्ताक्व। आइ आफ आ शॉप रे शॉप पाइश्शो दुम्त” देंशो, याक्कबमी नेना बाक्त। उत्पत्ती ३०:३५

2 मिनु याक्कबमी “लाबानम आं कली मदाक्व दुम्त” दे तुइक्ता बाक्त।

3 मिनु परमप्रभु यावेमी याक्कब कली “इ आफ आ रागी इ मुर आन बाक्तीक लेशशा लावो। गो गे नु बाक्नुड” देंमाक्त। उत्पत्ती २८:१५

4 मिनु याक्कबमी राहेल नु लेआ आस कली गोठीम ब्रेत्तीम्सी बाक्त।

5 मिनु मेको आस कली “इस आफोम डोंइती आं कली दाक्शो खोदेशो पा मुल मदाक्व, दे तुइक्ताक्व। आं आफ आ परमप्रभु गो नु बाक्शो बाक्त।

6 गो इस आफ कली दोदेशो पा आं बोल नेल्लेमी गेय पडा, मेको गे निक्शीम तुइक्नीसी।

7 इस आफोमी आं कली ठगेत्तु। आं गेय डा तचा माल्शो थोत्रक १० खेयप फाइक्तु। तन्न परमप्रभुमी मेको कली आं कली श्येत गेचा, मगेवा बाक्त।

8 इस आफोमी ‘पुल्ले पाडग्रे नेल्ल इ के दुम्ल’ देंमेनु, क्यारश भेडा नेल्लेमी पुल्ले पाडग्रे गिक्तेकम। मेकोमी ‘रेखा पाइश्शो नेल्ल इ के दुम्ल’ देंमेनु, नेल्ल रेखा पाइश्शो गिक्तेकम।

9 मोदेशो पा परमप्रभुमी इस आफ आ क्यारश भेडा बी ब्यफ रोइश्शा, आं कली गेती।

10 क्यारश भेडा आन ब्वाइसीची ना गो डोमुमी बोका नेल्ल पुल्ले पाडग्रे, रेखा पाइश्शो नु खाल्शो रड डा तातामी।

11 मिनु परमप्रभु आ स्वर्ग डा गेय पाइबमी आं कली डोमुमी ‘याक्कब’ दे ब्रेत्ताक्वी। ‘मिनु गो बाक्ती’ दे लोत्र लेत्ताक्व।

12 मिनु मेकोमी आं कली ‘कोत्रडो, ब्वाइसीब बोका नेल्ल पुल्ले पाडग्रे, रेखा पाइश्शो नु खाल्शो रड डा बाक्नीम। मारदे हना लाबानमी इ कली मार पशो बाक्बा, गो नेल्ल ताता।

13 गो परमप्रभु नड। गो इ कली बेथेलम गुम्ता। गो मेकर फुल्लु का कली तेल लुक्ताक्वी। मिनु आं कली कसम जाप्तीवी। मुल बोक्को, मेको रागी रे गूडो। इ जरमेशो रागी लेतो’ दे माइक्ती” दे आ मीश निक्शी आस कली देंमाक्त। उत्पत्ती २८:१८-२२

14 मिनु राहेल नु लेआमी “आंस आफ आ खिंमी आस थेशो रू नु शॉप बाक्मा डा?

15 आंस कली अर्को रागी डा मुर खोदेशो सेल्शा, लेयशा ताक्शो नेल्ल जात्तु। उत्पत्ती २९:१८,२७

16 परमप्रभुमी आंस आफ रे लाइश्शो शॉप, आंस कली नु आंस आल के दुम्त। परमप्रभुमी इन कली मार देंबा, मेकोन पने” देंसा बाक्त।

17 मिनु याक्कब सुनी कना बोक्शा, आ आलपुकी नु आ मीशपुकी दलओंट तारी डोइक्पदा बाक्त।

18 मिनु मारेइ मारेइ पदान-अराम रे आ गेय पा सेल्शो बस्तु भाव नेल्ल खुल्शा, आ शॉप लाइश्शा, आ आफ इसहाक आ खिं कनान रागी लचा गोवा बाक्त।

19 लाबान आ भेडा आन ऊन खोइक्थ लशो बाक्माक्त। मेना राहेलमी आ आफ आ खिं डा मूर्तिपुकी खुइ पा कुरा बाक्त। न्यायाधीस १७:५; न्यायाधीस १८:१७; १सामुएल १९:१३; २राजा २३:२४; जकरिया १०:२

20 याक्कबमी अरामी लाबान कली “गो लशो” दे मदंथु, गाक्मा बाक्त।

21 मोदेशो पा याक्कब आ मारेइ मारेइ कुरशा, प्रोक्माक्त। मिनु सुनी बोक्शा, युफ्रेटीस खोला शोक्समा बाक्त। मिनु गिलाद डांडा गे लमा बाक्त।

22 मिनु लमा आ नाक्त सां नोले मुरुमी “याक्कब प्रोक्त” दे लाबान कली शेंदमे बाक्त।

23 मिनु लाबानमी आ लोकब आन कली ब्रेश्शा, मेकोपुकी नु ७ नाक्ती सम्म याक्कब कली माल्शा, गिलाद डांडाम गुमा बाक्त। उत्पत्ती ३१:४७

24 मिनु परमप्रभुमी अरामी लाबान कली डोमुमी “गे होस पावो। याक्कब कली मारेइ मपावो” देंमाक्त।

25 मिनु लाबानमी याक्कब कली गुमानु, आ ताम्बु गिलाद डा पहाडम कीडा बाक्त। याक्कबम चहिं आ ताम्बु आइक्था डा डांडाम कीशा, वोदा बाक्त।

26 मिनु लाबानमी याक्कब कली “गे मार पवी? मारदे आं मतुइक्थु प्रोक्नी? आं तमीपुकी लडाइमी ग्याइश्शो खोदेशो पा लाइक्तीवी।

27 गे मारदे खुइश्शा गाक्नी? मारदे आं कली मारेइ मदेनी? गो इन कली ग्येशरा, कुम्सो पशा, खैजडी नु बीना ताप्शा, लां सम्म चोत्रदीशा सोइक्तन्नी वा।

28 गे आं कली आं चचपुकी नु आं तमीपुकी नु पुक्पु पाइक्मुचा मगेवी। मरिम्शो पाइब बाक्ते।

29 इ कली श्येत गेचा आं गुइमी बाक्ब। तन्न सिनाक्दो इ आफ आ परमप्रभुमी आं कली ‘गे होस पावो। याक्कब कली मारेइ मरिम्शो मपावो’ दे लोत्र पात्तु।

- 30 मिनु गे इ आफ गुम्चा शुश दाक्ताकवी हना यो, मारदे आं खिं डा मूर्ति खुइ पा लदी? दे हिल्लो पवा बाक्त।
- 31 मिनु याकूबमी लाबान कली “गे इन तमी निक्शी आं गुइ रे रोइक्नीनी, दे हिंती। उत्पत्ती ३१:१९
- 32 इन मूर्तिपुकी चहिं सुका आ ताम्बुम थित्नीनी, मेको मब्रोइल। इन लोकब आन डोंइती आं बाक्तीकेम इन के मार बाक्मे, कोत्रशा लतीन” देमाक्त। मारदे हना याकूबमी राहेलम मेको मूर्तिपुकी खुइ पशो, दे मतुइक्ता बाक्त।
- 33 मिनु लाबानमी याकूब आ ताम्बु, लेआ आ ताम्बु, गेय पाइब निक्शी आस ताम्बु ओत्रशा, माल्शा मथिदा बाक्त। लेआ आ ताम्बु रे गूशा, राहेल आ ताम्बु ओत्रमाक्त।
- 34 मिनु राहेलम मेको खिं डा मूर्ति आन कली दलओंठ आ तारी डा निक्तीकेमी खुइशशा, मेको आ तारी निस्से बाक्त। मिनु लाबानमी ताम्बु नेल्लेमी माल्शा मथिदा बाक्त।
- 35 मिनु राहेलमी “आं प्रभु, मगाइक्तीने, गो इन डोंइती बोक्ने मचाप्नुइ, मारदे हना गो मथिचा दुम्ती” देमाक्त। मोपतीके माल्शा मथिदा बाक्त। लेवी १५:१९-२०
- 36 मिनु याकूब चुरशा, लाबान कली “मार दूली पडा। आं कली मार मरिम्शो पशो आ पर्वम खेदा पनी?
- 37 आं मारेइ मारेइम माल्तीनी, इन थोत्रकी मार थिन्नी? इन लोकब नु आं लोकब आन डोंइती देनी। एकोपुकीमी इस दातेमी निसाफ पामेक्ल।
- 38 गो गे नु २० बर्स बाक्ती। इन क्यारश भेडाम पाठा मशाम्देम। इन बगाल डा बोका का यो मब्वड।
- 39 जन्तुमी साइशो यो इन कली मचाक्गु। गो आंमा थाप्ताक्ड। नाक्दो, नाक्ती जन्तुमी साइक्तेकम हना यो, गे आं कली थाप्पाइक्तीनी। प्रस्थान २२:११-१२
- 40 नाक्ती हुप्शोम बाक्ती, नाक्दो ग्यू बेक्शा, यो मइप्थु, नां सोंइताक्ड।
- 41 मोदेशो पा गो इन खिंमी २० बर्स गेय पाता। इन तमी निक्शी आस पर्वम गो १४ बर्स गेय पाता। ६ बर्स इन क्यारश भेडा आन पर्वम गेय पाता। गे आं गेय डा तचा माल्शो थोत्रक १० खेयप फाइक्तीनी। उत्पत्ती २९:२०,३०; उत्पत्ती ३०:३१-३६
- 42 आं आफ आ परमप्रभु, अब्राहाम आ परमप्रभु नु इसहाक आ मान पा हिंशो परमप्रभु गो नु मबाक्शो हना, गे आं कली मुल श्येतथ सोइक्तीनी वा। परमप्रभुमी आं श्येत नु आं गेय तशा, सिनाक्दो इन कली हुइक्ताक्व” देमाक्त। उत्पत्ती ३१:२४,५१
- 43 मिनु लाबानमी याकूब कली “एको तमी निक्शी आं तमी बाक्नीस। एको आल आं आल बाक्नीम। एको क्यारश भेडा आं के बाक्नीम। इ तशो नेल्ल आं के बाक्ब। आं तमी आस कली मुलाक्ती गो मार पने चाप्नुडा डा? एको आस तौ आन कली गो मार पने चाप्नुडा डा?
- 44 मोपतीके गे नु गो कबल पस, इस डोंइती सांकछी बाक्मल” दे मदा बाक्त।
- 45 मिनु याकूबम फुल्लु का चाक्शा राप्पाइशशा,
- 46 आ मुर आन कली यो “फुल्लु खुप्तीन” देमाक्त। मिनु मेकोपुकीमी यो फुल्लु खुप्तमे बाक्त। मिनु मेकेर जामे बाक्त।
- 47 मिनु लाबानमी मेको कली येगार-सहादुता, दे नें वोदा बाक्त। याकूबम चहिं मेको कली गलेद, दे नें वोदा बाक्त। उत्पत्ती ३१:२३
- 48 मिनु लाबानमी “एको फुल्लु खुप्तीके मुलाक्ती इस पशो कबल आ सांकछी बाक्ब” देमाक्त। मोपतीके मेको कली गलेद देंनीम। गलेद आ अर्थ सांकछी डा फुल्लु खुप्तीके बाक्ब। यहोसु २४:२७
- 49 मिनु मेको राप्पाइशशो फुल्लु कली मिस्पानें वोदा बाक्त। मारदे हना लाबानमी “परमप्रभु यावे गे नु गो इस ब्राची ना इस कली कोत्रब बाक्ल। न्यायाधीस ११:११
- 50 गे आं तमी आस कली श्येत गेप्तीवी हना, अर्को मीश चाक्तीवी हना, गो इस दातेमी मुर सांकछी मबाक्तेकम हना यो, परमप्रभु इस सांकछी बाक्ब” देमाक्त।
- 51 मिनु लाबानमी लेंशा, याकूब कली “कोत्रडो, एको खुप्शो फुल्लु नु मेको लाइशशो राप्पाइशशो फुल्लु गो इस दातेमी बाक्ब।
- 52 एको खुप्शो फुल्लु गो रे इ बाक्तीके, गे रे आं बाक्तीके श्येत गेथ मलमल।
- 53 अब्राहाम आ परमप्रभु, नाहोर आ परमप्रभु नु आन किकी पिपी आन परमप्रभुम इस दातेमी निसाफ पवल” देमाक्त। मिनु याकूबमी इसहाक आ मान पा हिंशो परमप्रभु आ नें थिशा, कसम जवा बाक्त।
- 54 मिनु मेको डांडामी याकूबमी चढेतीके चढेवा बाक्त। मिनु आ खिं डा मुर आन कली “शोब्ले जने” दे गेवा बाक्त। मिनु जशा, मेको नाक्दो मेक उइ बाक्मा बाक्त। उत्पत्ती ३१:४२
- 55 मिनु लाबान सुनी कना बोक्शा, आ तमी नु आ चच आन कली पुक्पु पाइशशा, आसीक गेशा, आ खिं लेम्माक्त।

## 32

याकूबम एसाव कली गुम्चा चिक्शो

- 1 मिनु याकूब लामी लना लन बाक्मेनु, परमप्रभु आ स्वर्ग डा गेय पाइबपुकी याकूब कली गुम्थ जाक्मा बाक्त।
- 2 मिनु याकूबमी मेको आन कली तशा “एकेर परमप्रभु आ लडाइ पाइब आन बाक्तीके बाक्ब” देमाक्त। मोपतीके मेको गुम्तीक रागी आ नें महा-नाइम वोदा बाक्त। महा-नाइम आ अर्थ चहिं “बाक्तीक निक्शी” बाक्ब।
- 3 मिनु याकूबमी आ लोकब एसाव गुम्चा कली आ डोंइती मुरपुकी एदोम डा सेइर रागी सोइक्ता बाक्त। उत्पत्ती ३६:८
- 4 मेको आन कली “गे आं प्रभु एसाव कली ‘इन गेय पाइब याकूबमी इन कली लोत्र सोइक्ताक्व। गो मुल सम्म लाबान नु आ रागीमी अर्को रागी डा मुर दुम्शा बाक्ती।

5 गो नु शुश ब्यफ, गधा, क्यारश भेडा, वाइलीम वाइल बाकनीम। गो आं प्रभु, इन डोंइती शिशी तडल, दे मुर आन कली सोइक्ताकड' देत, देंचा माल्नीनी" दे अरेशा सोइक्तीमी बाक्त।

6 मिनु आ सोइश्शो मुरपुकी लोश्शा जाक्शा, याकूब कली "गोपुकी इन लोकब एसाव आ बाक्तीक जाक्दीत्तक। मेकोमी ४ सहे मुर नु कुशा, इन कली गुम्थ जाक्ब" दे शेंदमे बाक्त।

7 मिनु याकूब शुश हिंशा, सुर्ता पवा बाक्त। मेको नु बाक्ब मुर क्यारश भेडा, बी ब्यफ नु दलओंठ आन कली हुल निक्शी पा योक्गा बाक्त।

8 मेकोमी "एसावमी डोंइती डा हुल साइक्तु हना, अर्को प्रोक्ने चाप्नीम" दे मिम्ता बाक्त।

9 मिनु याकूबम "आं बाजे अब्राहाम आ परमप्रभु, आं आफ इसहाक आ परमप्रभु, आं कली लोत्र पाइब परमप्रभु यावे, गे आं कली 'इ खिं डा मुर आन बाक्तीक, इ रागी लेतो। गो इ कली रिम्शो पाइनुड' दे लोत्र पाइतीनी। उत्पत्ती ३१:३, १३

10 गो, इन गेय पाइब आं कली पशो गेना हना यो दाक्तीक नु इन रिम्शो पचा मप्रोंइतीके मशिरनुड। गो कोक्के का ला कुरशा, यर्दन खोला शोक्शा लशो नड। मुल आं के हुल निक्शी दुम्शो बाक्नीम। २सामुएल ७:१८

11 गो आं कली आं लोकब एसाव आ गुड रे प्रोनीने। मारदे हना आं कली, आं मीश आन कली नु आल नेल्ल आन कली साइक्ब, दे हिंती।

12 गे आं कली 'गो इ कली थमा पा रिम्शो पाइनुड। इ चच युड आन कली समुन्द्र डा बाल्वा खोदेंशो पा, हिक्ने मचाप्चा डा सेल्लुड' देतीनी" दे याकूबमी परमप्रभु कली लोत्र पवा बाक्त। उत्पत्ती २८:१३-१४

13 मिनु मेको नाकदो मेकेर बाक्शा, आ मारेड मारेड रे एसाव कली कोसेली योवडा बाक्त।

14 मेकोमी सहे निक्शी ओटा क्यारश, २० ओटा बोका, सहे निक्शी ओटा भेडा नु २० ओटा सांड,

15 मिनु ३० ओटा दूध तूब चाइक्ब पाइश्शो दलओंठ, ४० ओटा बी नु १० ओटा ब्यफ, २० ओटा गधैनी नु १० ओटा गधा एसाव कली योवशा, ठीक पवा बाक्त।

16 मिनु आ गेय पाइब आन कली का का पा हुल हुल पा गेवा बाक्त। आ गेय पाइब आन कली "गे आं डोंइती हुल हुल पना पन गाक्कीन। हुल नेल्ल कालेमी मखुलीन। का अर्को क्येडा इन खुल्चा माल्नीनी" दे माइक्मी बाक्त।

17 मिनु नेल्ल क्येडा ठेयब अरेतीके लोत्र "आं लोकब एसाव इन कली गुम्थ जाक्त हना, मेकोमी इन कली 'गे सुका आ मुर ननी? ते लाइनीनी? इन डोंइती गाक्ब बगाल सु के नमी?' दे हिल्लो पाप्नु हना,

18 गेमी 'एको इन गेय पाइब याकूब के नम। आ प्रभु एसाव कली कोसेली बाक्ब। आं यो खोइश्शा पिना पिन बाक्ब' देंचा माल्नीनी" दे गेय पाइब आन कली माइक्मी बाक्त।

19 मोदेंशो पा डोंइती गाक्ब, नोले गाक्ब नु नेल्ल क्येडा नोले गाक्ब नेल्ल आन कली अरेमी बाक्त। मिनु "मोदेंशो पा एसाव नु गुम्ची ना लोत्र पचा माल्नीनी।

20 मिनु 'इन गेय पाइब आंइ नोले पिना पिन बाक्ब' देंचा मप्रेंदीन" दे माइक्मी बाक्त। मारदे हना याकूबमी "गो आं डोंइती सोइश्शो कोसेलीमी गो मेको कली लेम्नुड। मिनु नोले मेको कली गुम्नुड, आं कली ब्राइबा को" दे मिम्ता बाक्त।

21 मिनु आ कोसेली आ डोंइती लदमे बाक्त। आं चहिं मेको नाकदो आ मुर बाक्तीकेमी बाक्माक्त।

याकूब यब्बोक खोलाम बाक्शो

22 मिनु मेको नाकदो बोक्शा, आ मीश निक्शी, आ गेय पाइब मीश निक्शी नु आ ११ जना तौ आन कली लाइश्शा, यब्बोक खोला शोक्पाइक्मी बाक्त।

23 मिनु मेको आन कली शोक्पाइश्शा, आ मारेड मारेड यो सोइक्ता बाक्त।

24 मिनु आइक्ची हांबुम याकूब का ला बाक्माक्त। मिनु नां रिक्शा, नां मसोत्रम सम्म मुर का नु राम्शी पवा बाक्त। होसे १२:४-५

25 मेको मुरुम याकूब नु राम्शी पा आं बुचशो तशा, याकूब आ फिला डा बोंइसे थिवा बाक्त। मिनु आ फिला डा बोंइसे याक्ता बाक्त।

26 मिनु मेको मुरुमी "नां दाप्चावानु, मुल लचा गेयी" देमाक्त। मिनु याकूबमी "आं कली आसीक मगेवी सम्म मप्रोंइनन" दे मदा बाक्त मत्ती १५:२२-२८

27 मिनु मेकोम "इ नें मार में?" दे हिल्लो पवानु, याकूबमी "याकूब" देमाक्त।

28 मिनु मेकोमी "मुल डा मेरे इ नें याकूब ममाड, इ नें इस्राएल देंचा माल्नीम। मारदे हना गे परमप्रभु नु राम्शी पा ग्राते, मुर नु राम्शी पा यो ग्राते" देमाक्त। उत्पत्ती ३५:१०; येरमीया २०:७

29 मिनु याकूबम "इन नें मार में?" दे हिल्लो पवा बाक्त। मिनु मेकोमी "आं नें मारदे माल्दे?" देंचा, मेको कली आसीक गेवा बाक्त। न्यायाधीस १३:१७-१८

30 मिनु याकूबमी "गो परमप्रभु आ कुल तशा यो मबेक्ड" दे मेको बाक्तीके आ नें पेनीएल वोदा बाक्त। प्रस्थान ३३:२०

31 मिनु नां दाप्मेनु, याकूब पेनुएल रे खोड चेड पा गाक्माक्त।

32 मोपतीके इस्राएलीपुकीमी मुल सम्म मेको बोंइसे ग्याइक्ब नारी नु मेकेर डा श्ये मब्वाइनीमी। मारदे हना मेकोमी याकूब आ फिला डा बोंइसे याक्ता बाक्त।

- 1 मिनू याकूबम लां गे कोव्रडानु, एसाव नु ४ सहे मुर पिन पिन पशो तवा बाक्त। मिनू आ आलपुकी लेआ, राहेल नु आस गेय पाइब मीश निकशी नु आस गाकपाइकमी बाक्त। उत्पत्ती ३२:७
- 2 मेको गेय पाइब मीश नु आस आल आन कली नेल्ल क्येडा डोंइती गाकपदा बाक्त। मिनू मेको आन नोले लेआ नु आ आलपुकी, नेल्ल क्येडा नोले राहेल नु योसेफ गाकपदा बाक्त।
- 3 मिनू मेको नेल्ल आन डोंइती आंमा गाक्माक्त। मिनू मेको आ लोकब गुम्चा क्येडा डोंइती ७ खेयप खुम्की पा बाक्माक्त।
- 4 मिनू एसावमी मेको कली तशा, दोरशा गुम्थ जाक्माक्त। मिनू आ लोकब कली मुष्ठा पुक्पु पदा बाक्त। मिनू निम्फा डाकसा बाक्त।
- 5 मिनू एसावमी कोव्रशा, आलपुकी नु मीश मुर आन कली तशा “गे नु बाक्ब सु नमी?” दे हिल्लो पवा बाक्त। मिनू याकूबमी “परमप्रभुमी इन गेय पाइब कली शिशी पशा, गेशो आलपुकी नम” दे मदा बाक्त। भजन संग्रह १२७:३
- 6 मिनू नोले मेको गेय पाइब मीश निकशी नु आस आलपुकी जाक्शा, एसाव आ डोंइती खुम्की पा बाक्मा बाक्त।
- 7 मिनू लेआ नु आ आलपुकी जाक्शा, खुम्की पा बाक्मा बाक्त। मिनू नोले योसेफ नु राहेल जाक्शा, खुम्की पा बाक्सा बाक्त।
- 8 मिनू एसावमी “इ डोंइती गाक्शो मार मार मारदे सोइक्ती?” दे हिल्लो पवा बाक्त। मिनू “आं प्रभु, इन डोंइती शिशी तडल, दे सोइक्ताकड” दे लोव्र लेत्ता बाक्त। उत्पत्ती ३२:१४-२१
- 9 मिनू एसावमी “आं लोकब, आं कली मारेड मारेड गाप्शो बाक्ब। इ कली वोंइसो” देमाक्त।
- 10 मिनू याकूबमी “मदुम्ब। गो इन डोंइती शिशी ताता हना, आं कोसेली ताक्कीन। मारदे हना गो इन कुल तशा, परमप्रभु आ कुल तशो खोदेशो पा ग्येरसाक्यी। गे आं कली दाक्शा ब्राइतीनी। उत्पत्ती ३२:३१
- 11 इन कली गेशो आसीक लतीन। मारदे हना परमप्रभुमी आं कली शुश शिशी पाप्तु। आं के मारेड मारेड यो गाप्शो बाक्ब” दे एसाव कली मदा बाक्त। मिनू याकूबमी शुश लोव्र पा एसावमी मेको नेल्ल ताक्गा बाक्त।
- 12 मिनू एसावमी “लो, पिन। गो गे नु लाइनुड” देमाक्त।
- 13 मिनू याकूबमी “आं प्रभु, आं आलपुकी आइक्च बाक्नीम। क्यारश भेडा, बी ब्यफ आन चाइक्ब बाक्नीम। मेको आन कली नाक्ती का ला शुश गाकपाइरशा, श्येत गेता हना, नेल्ल बेक्नीम।
- 14 आं प्रभु, गे इन गेय पाइब क्येडा डोंइती गाक्कीन। गो बी ब्यफ नु आलपुकी चाप्चा डा पा गाक्नीकी। नोले आं प्रभु आ बाक्तीक सेइर सहर जाक्नीक” देमाक्त।
- 15 मिनू एसावमी “आं मुर का निकशी गे नु गाक्मल” दे मदा बाक्त। मिनू याकूबम “ममाल्नुड। मारदे आं प्रभुम आं कली मोदेशो रिम्शो पचा मिम्बा?” देमाक्त।
- 16 मिनू मेको नाक्ती एसाव सेइर गे लेम्माक्त।
- 17 याकूब चहिं सुक्कोथ गे लमाक्त। मेकेर खिं का सेल्शा, आ बी ब्यफ आन कली गोठपुकी सेला बाक्त। मोपतीके आ बाक्तीके आं नें सुक्कोथ वोदा बाक्त।
- 18 मोपा याकूब पदान-अराम रागी रे मारेड मदुम्थु रिम्शो पा लेरशा, कनान रागी डा शेकेम सहर जाक्दीम्माक्त। सहर आ नेक्था आ बाक्तीक सेला बाक्त।
- 19 मिनू आ ताक्बु कीतीके रू हमोर आ तौ आन दाते शेकेम आ आफ रे सहे का केसीता थाप्शा, ग्यबा बाक्त। केसीता मेकेर डा क्येट बाक्त। सुन के बाक्बा कों, चांदी के बाक्बा कों, गिश हेल्लो बाक्ब मंतुंडसीब। यहोसु २४:३२
- 20 मिनू मेकेर चढेतीक का सेला बाक्त। मेको आ नें “एल-एलोहे-इसाएल” दे वोदा बाक्त। मेको आ अर्थ परमप्रभु, इस्राएल आ परमप्रभु बाक्ब। उत्पत्ती १२:७-८

## 34

दीना शेकेम सहर कोव्रथ लशो

- 1 मिनू लेआ आ तमी, दीना मेको रागी डा मीश आल आन कली गुम्थ लमाक्त।
- 2 हिंव्वा डा हमोर आ तौ शेकेम, मेको रागी डा पिप आ तौमी दीना कली तशा, ग्याइरशा मेको नु इप्शा, बिथोलो पवा बाक्त। न्यायाधीस ९:२८
- 3 मिनू याकूब आ तमी दीना कली शुश दाक्शा, रिम्शो लोव्र पवा बाक्त।
- 4 मिनू शेकेममी आ आफ कली “मेको मीश आल आं कली चाक्कीन” दे मदा बाक्त।
- 5 मिनू याकूबमी “शेकेममी इन तमी दीना कली बिथोलो पाप्तु” देशो नेना बाक्त। आ तौपुकी चहिं रू डा गोठीम बाक्मा बाक्त। याकूब आ तौपुकी मजाक्मा सम्म सिक्सी पा बाक्माक्त।
- 6 मिनू शेकेम आ आफ हमोर याकूब नु लोव्र पचा कली जाक्माक्त।
- 7 मिनू मेको नेंशा, याकूब आ तौपुकी यो रू रे जाक्मा बाक्त। आन थुं मनुथु, शुश चुरमा बाक्त। मारदे हना शेकेमम इस्राएल आ तमी नु इप्शा, बिथोलो पशो बाक्माक्त। मो पचा मदुम्शो बाक्माक्त।
- 8 मिनू हमोरमी इस्राएल कली “आं तौ शेकेममी इन तमी कली शुश दाक्ब, चाक्चा गेने।
- 9 मिनू आंइ तमीपुकी इन तौपुकीमी चाक्मेक्ल। इन तमीपुकी आंइ कली चाक्चा गेने।
- 10 गे गोपुकी नु बाक्कीन। आंइ रागी इन कली ग्याप्चा लेयचा, बाक्चा कली गेनीकी” देमाक्त।
- 11 मिनू शेकेममी मीश आल आ आफ याकूब नु आ लोकब आन कली “इन डोंइती शिशी तडल। गे मार देंनीनी इन कली गेनुड।

- 12 मेको मीश आल चाक्या गेतीनी हना, गो इन माल्शो मारेइ मारेइ गेनुड” देंमाक्त। प्रस्थान २२:१५  
 13 याकूब आ तौपुकीमी आन समी कली बिथोलो पाइब, शेकेम नु आ आफ हमोर आस कली जोल पा  
 14 “गो आंइ समी खोइक्तीक चिनु मखोइश्शो मुर आन कली गेने मचाप्नीकी। मेको आंइ कली मशिरब।  
 15 गे आंइ खोदेशो पा वोंइश आल वोंइश मुर नेल्लेमी खोइक्तीक चिनु खोइक्तीनी हना, उत्पत्ती १७:१०-१४  
 16 आंइ तमीपुकी इन कली लाइक्चा गेनीकी। मिनु इन तमीपुकी गो चाक्नीकी। मिनु गो गेपुकी नु बाक्शा, मुर का खोदेशो दुम्नीकी।  
 17 गेपुकी आंइ देशो मबिस्साक्नी हना, आंइ तमी लाइश्शा, गाक्नीकी” दे लोत्र पामे बाक्त।  
 18 मिनु हमोर नु आ तौ शेकेम मेको आस देशो नेंशा, ग्येरससा बाक्त।  
 19 मिनु मेको टिटा मेको पचा बिस्से बाक्त। मारदे हना याकूब आ तमी कली शुश दाक्ता बाक्त। मेको आ आफ आ खिं डा नेल्ल क्येडा मान ताइब बाक्माक्त।

लेआ आ तौ निक्शी गाइश्शो

- 20 मिनु हमोर नु आ तौ शेकेम आस सहर डा लाप्यो ओत्रशा, मेको निक्शीमी मुर आन कली  
 21 “एको मुरपुकी गो नु दुशा बाक्चा दाक्नीम। मोपतीके एक बाक्चा गेने। मारदे हना इं रागी टैयब बाक्ब। मेको आन कली यो गारब। गोपुकी मेको आन तमी चाक्च। इं तमी मेको आन कली गेय।  
 22 गो वोंइश मुर नेल्ल खोइक्तीक चिनु खोइक्साक्च हना ला, मेकोपुकी गो नु बाक्ने बिल्लीम।  
 23 मार, मेको आन बी ब्यफ, क्यारश भेडा नु आन शोंप नेल्ल इं के मदुम्बा डा? गो मेको आन लोत्र बिश्शा हना, इं दातेमी बाक्नीम” देंसा बाक्त।  
 24 मिनु सहर डा मुर नेल्ल हमोर नु शेकेम आस लोत्र टिशा, खोइक्तीक चिनु खोइक्चा गेमे बाक्त। सहर नेल्ल डा वोंइश मुरुम मोदेशो पामे बाक्त।  
 25 मिनु नाक्त सां नोले आन खोइक्तीके नेल्ल क्येडा खाइक्मानु, याकूब आ तौ निक्शी, दीना आ लोक्ब, सिमियोन नु लेवी, आस तरवार लाइश्शा, सुइ आन मतुइक्थु, सहर ओत्रशा, सहर डा वोंइश मुर नेल्ल सदसे बाक्त। उत्पत्ती ४९:५-७  
 26 मिनु मेको निक्शीमी हमोर नु शेकेम आस कली यो साइश्शा, दीना शेकेम आ खिं रे गुंइशा, लदसे बाक्त।  
 27 मिनु याकूब आ अर्को तौपुकी यो सहर ओत्रमा बाक्त। मेकोपुकीमी सहर डा मारेइ मारेइ लदमे बाक्त। मारदे हना शेकेममी आन समी कली बिथोलो पवा बाक्त।  
 28 मिनु आन क्यारश भेडा, बी ब्यफ, गंधा नु मार मार सहर नु आन रूमी बाक्मा, मेको नेल्ल लदमे बाक्त।  
 29 आन शोंप नेल्ल, आन आलपुकी, आन मीश नु आन खिं डा मारेइ मारेइ नेल्ल लदमे बाक्त।  
 30 मिनु याकूबमी सिमियोन नु लेवी आस कली “गे आं कली श्येत गेतीसी। मुल एको रागी डा मुरुमी आं कली मदाक्नीम। कनानी नु परिज्जी आन दातेम आं कली मरिम्शो रिना पाइश्शो खोदेशो सेलतीसी। गोपुकी नु शुश मुर मबाक्नीम। इं कली लडाइ तोशा, इं खिं डा मुर नेल्ल साइक्नीम” दे मेको आस कली हुइक्तीम्मी बाक्त।  
 31 मिनु मेको निक्शीमी “मार, मेकोमी आंस समी कली तेल्लेम खोदेशो सेल्चा दुम्बा?” देंसा बाक्त।

## 35

याकूबमी आसीक तशो

- 1 मिनु परमप्रभुमी याकूब कली “बोक्शा सासो। बेथेल सहर लावो। मिनु मेकेर बाक्को। इ लोक्ब एसाव रे प्रोक्डेनु, इ डोंइती यूशो परमप्रभु, आं कली, चढेतीक का सेलो” दे मदा बाक्त। उत्पत्ती २८:११-२२; उत्पत्ती ३१:१३  
 2 मिनु याकूब आ खिं डा मुर नु आ बाक्शो मुर नेल्ल आन कली “इन गुइमी बाक्शो मूर्ति ताइक्तीन। इन फेक्शो वा प्रुइश्शा, चिक्शा, अर्को फेक्सीन। उत्पत्ती ३१:१९; ब्यवस्था २७:१५; यहोसु २४:२३  
 3 मिनु बोक्च, बेथेल लय। गो मेकेर जाक्दीश्शा, परमप्रभु कली चढेतीक का सेल्लुड। गो श्येत जडानु, आं पुंइशो गेपु। गो ते गाक्ती हना यो, मेको गो नु बाक्त” दे माइक्मी बाक्त।  
 4 मिनु मेकोपुकीमी याकूब कली आन मूर्ति नु आन पांइशो मारवाडी नेल्ल गेमे बाक्त। याकूबमी मेको नेल्ल शेकेम आ नेक्था बाक्शो रवा आगाम थिमा बाक्त। यहोसु २४:२६; न्यायाधीस ९:६  
 5 मिनु मेकोपुकी लचा गोत्रमे बाक्त। परमप्रभुमी एर ओंथ डा सहर डा मुर आन कली हिंब सेल्मी बाक्त। मोपतीके मेकोपुकीमी मेको आन कली खेदा मपामे बाक्त। प्रस्थान २३:२७; यहोसु १०:१०  
 6 मिनु लशा, याकूब नु मेको नु बाक्ब मुर नेल्ल कनान रागी डा लूज सहर जाक्दीम्मा बाक्त। लूज सहर कली बेथेल नें वोंइश्शो बाक्माक्त।  
 7 याकूबम मेकेर चढेतीक का सेला बाक्त। मेको आ नें एल-बेथेल वोदा बाक्त। मारदे हना आ लोक्ब एसाव रे प्रोक्मेनु, मेकेर परमप्रभुम तपांइसीशो बाक्माक्त।  
 8 मेना रेबेका कली कोत्रब देबोरा बेक्माक्त। मिनु मेको कली बेथेल आ नेक्था, रवा आगामी थिम्मे बाक्त। मेको कली याकूबम अल्लोन-बकुथ नें वोदा बाक्त। मेको आ अर्थ डाक्चा डा रवा बाक्ब। उत्पत्ती २४:५९

परमप्रभुमी याकूब कली गुम्शो

- 9 पदान-अराम रे लेम्मेनु, परमप्रभुमी याकूब कली लेंशा गुम्शा, मेको कली आसीक गेशा

10 “इ नें याकूब बाकब। तन्न मुल रे याकूब मदेचा, इ नें इस्राएल दुम्या मालब” देमाकत। मोपतीके इस्राएल नें वोइशशो बाकमाकत। उत्पत्ती ३२:२९

11 मिनु परमप्रभुमी मेको कली “गो नेल्ल क्येडा सक्ति पाइशशो परमप्रभु नड। गे सोशा बोशा, शुश दुमीने। गे रे रागी का डा शुश मुर नु रागी रागी डा मुर यो दुम्नीम। गे रे पिपपुकी दुम्नीमी। उत्पत्ती १७:१; उत्पत्ती २८:३-४; उत्पत्ती १७:६

12 अब्राहाम नु इसहाक कली गेशो रागी गो इ कली नु इ चच युइ आन कली गेनुड” देमाकत।

13 मिनु परमप्रभुमी लोत्र पने थुम्शा, मेको आ बाक्तीक रे लमाकत।

14 मिनु याकूबमी परमप्रभु नु लोत्र पशो मिम्चा कली मेकेर फुल्लु का राप्पदा बाकत। मिनु मेको आ तारी तूचा थोत्रक चढेतीक नु तेल लुक्ता बाकत। उत्पत्ती २८:१८-१९

15 याकूबमी परमप्रभु नु लोत्र पतीक सहर कली बेथेल नें वोदा बाकत।

बेन्यामीन जरमेसेनु राहेल बेकशो

16 मिनु बेथेल रे एफ्राथ जाकदीन्चा कली गाकशो बाकमा बाकत। मेना राहेल आल थिचा चिकशो बाकमाकत।

17 सुत्केरी रोडम शुश श्येत जवानु, आ वारच पाइब मीश मुरुमी “महिने, गे अर्को तौ का नु थिनेवे” दे लोत्र पवा बाकत। उत्पत्ती ३०:२४

18 मिनु मेको मबेक्थु, आ सोकत लची ना आ तौ आ नें बेन-ओनी वोदा बाकत। आ आफोम चहिं आ नें बेन्यामीन वोदा बाकत। मेको आ अर्थ आं श्येत डा तौ बाकब।

19 मिनु राहेल बेकमाकत। मिनु एफ्राथ लतीक लांमी थिम्मे बाकत। एफ्राथ बेथलेहेम सहरम बाकब। उत्पत्ती ४८:७; १सामुएल १०:२; येरमीया ३१:१५; मत्ती २:१८

20 मिनु याकूबमी आ थिम्तीक तारी फुल्लु के थाम का राप्पदा बाकत। मुल सम्म राहेल आ थिम्तीके तारी मेको ठेयब फुल्लु के थाम बाकब।

इस्राएल आ तौपुकी

21 मिनु इस्राएल लना लन, आ ताम्बु एदेर माइशशो लाइशशो खिं आ नेक्था कीडा बाकत।

22 मिनु इस्राएल मेको रागीमी बाकमेनु, आ तौ रूबेन आ आफ आ मीश बिल्हाह नु इम्माकत। मिनु इस्राएलमी मेको नेना बाकत। उत्पत्ती ४९:४

याकूब आ १२ जना तौ

१इतिहास २:१-२

23 लेआ आ तौ रूबेन, याकूब आ डोंडती जरमेशो तौ बाकमाकत। सिमियोन, लेवी, यहूदा, इस्साकार नु जबूलून नेल्ल लेआ आ तौ बाकमा बाकत।

24 राहेल आ तौ योसेफ नु बेन्यामीन बाकसा बाकत।

25 राहेल आ गेय पाइब बिल्हाह आ तौ दान नु नाफ्ताली बाकसा बाकत।

26 लेआ आ गेय पाइब जिल्पा आ तौ गाद नु आशेर बाकसा बाकत। मेको नेल्ल पदान-अराममी जरमेशो याकूब आ तौ बाकमा बाकत।

इसहाक बेकशो

27 मिनु याकूब, आ आफ इसहाक आ खिं माग्ने जाकदीम्माकत। मेको कली किरयथ-अरबा सहर नु हेब्रोन यो देंनीम। मेको अब्राहाम नु इसहाक आस बाक्तीक रागी बाकमाकत।

28 मिनु इसहाक सहे का ८० बर्स दुम्माकत।

29 मिनु इसहाक शुश बर्स डा खाल्पा दुम्शा बेकमाकत। आ क्येडा डोंडती बेकशो किकी पिपी आन बाक्तीक लमाकत। मिनु आ तौ एसाव नु याकूबम मेको कली थिम्से बाकत।

## 36

एसाव आ तौ चच युइ

१इतिहास १:३५-५४

1 एको एसाव आ चच युइ बाक्नीम। एसाव कली एदोम यो देंनीम। उत्पत्ती २५:३०; ब्यवस्था २३:८

2 एसावमी कनान रागी डा मीश निक्शी चाक्गा बाकत। का हित्ती डा एलोन आ तमी आदाह, अर्को होर डा हिच्वी सिबोन आ तौ अनाह आ तमी ओहोली-बामा बाकमाकत। उत्पत्ती २६:३४

3 मिनु इस्राएल आ तमी बासेमाथ, नेबायोथ आ समी यो चाक्गा बाकत। उत्पत्ती २८:९

4 मिनु आदाहमी एसाव के एलीफाज थिमाकत। बासेमाथमी रूएल थिमाकत।

5 ओहोली-बामामी येऊश, यालाम नु कोराह थिमाकत। मेकोपुकी कनान रागीम जरमेशो एसाव आ तौ बाकमा बाकत।

6 मिनु एसावमी आ मीशपुकी, आ तौपुकी, आ तमीपुकी, आ खिं डा मुर नेल्ल, आ बी ब्यफ नु बस्तु भाव नेल्ल कनान रागीम चेशो शोंप नेल्ल लाइशशा, याकूब रे डोन अर्को रागी लमाकत।

7 मारदे हना शुश शोंप दुम्तीके, बस्तु भाव शुश दुम्तीके, काथा बाक्ने मचाप्से बाकत। मिनु आस बाकशो रागीम शुश बस्तु भाव दुम्तीके थुल्ले मचाप्से बाकत। उत्पत्ती १३:६

8 मिनु मेको एदोम माइशशो एसाव सेइर डा पहाड लशा बाकमाकत।



- 9 एसाव आ चच युइ सेइर पहाड डा एदोमी माइश्शो सु सु बाक्मा बाक्त देशा हना,  
 10 एसाव आ मीश आदाह आ तौ एलीफाज, आ मीश बासेमाथ आ तौ रूएल बाक्माक्त।  
 11 मिनु एलीफाज आ तौपुकी तेमान, ओमार, सेफो, गाताम नु केनाज बाक्मा बाक्त।  
 12 एसाव आ तौ एलीफाज आ कान्छी मीश तिम्ना बाक्माक्त। मेकोमी अमालेक थिमाक्त। मेकोपुकी एसाव आ मीश आदाह आ तौपुकी बाक्मा बाक्त।  
 13 मिनु रूएल आ तौपुकी नाहाथ, जेराह, शम्माह नु मिज्जा बाक्मा बाक्त। मेको एसाव आ मीश बासेमाथ आ तौपुकी बाक्मा बाक्त।  
 14 मिनु सिबोन आ तौ अनाह आ तमी, एसाव आ मीश ओहोली-बामा आ तौपुकी येऊश, यालाम नु कोराह बाक्मा बाक्त।

हुकुम पाइब एसाव आ तौपुकी

- 15 मिनु एसाव आ तौ आन दाते डा ठेयब मुर सु सु बाक्मा बाक्त देशा हना, आ डोंइती जरमेशो तौ एलीफाज आ तौ तेमान, ओमार, सेफो नु केनाज,  
 16 कोराह, गाताम नु अमालेक, एलीफाजमी एदोम रागीमी थिशो आदाह आ तौ बाक्मा बाक्त।  
 17 मिनु एसाव आ तौ रूएल आ तौ आन दाते डा ठेयब मुर नाहाथ, जेराह, शम्माह नु मिज्जा बाक्मा बाक्त। मेकोपुकी रूएलमी एदोम रागीमी थिशो, एसाव आ मीश बासेमाथ आ तौ बाक्मा बाक्त।  
 18 मिनु एसाव आ मीश ओहोली-बामा आ तौ आन दाते डा ठेयब मुर येऊश, यालाम नु कोराह बाक्मा बाक्त। मेकोपुकी अनाह आ तमी, एसाव आ मीश ओहोली-बामाम, जरमेशो बाक्मा बाक्त।  
 19 मेकोपुकी एदोम माइश्शो एसाव आ तौ आन दाते डा ठेयब मुर बाक्मा बाक्त।

सेइर आ चच युइ

- 20 मिनु डोंइती मेको रागीम बाकब सेइर आ तौ होरीपुकी सु सु बाक्मा बाक्त देशा हना, लोतान, शोबाल, सिबोन, अनाह उत्पत्ती १४:६; ब्यवस्था २:१२,२२  
 21 दीशोन, एजेर नु दीशान बाक्मा बाक्त। मेकोपुकी एदोम रागी डा सेइर आ तौ होरी आन दाते डा ठेयब मुर बाक्मा बाक्त।  
 22 लोतान आ तौ होरी नु हेमान बाक्सा बाक्त। लोतान आ समी तिम्ना बाक्माक्त।  
 23 शोबाल आ तौपुकी अल्वान, मानाहाथ, एबाल, शेफो नु ओनाम बाक्मा बाक्त।  
 24 सिबोन आ तौ आइयाह नु अनाह बाक्सा बाक्त। मिनु अनाहमी आ आफ सिबोन आ गधा योत्रदीमेनु, गोरशो रागीमी होश ब्वाक्कु बुक्तीके थिदा बाक्त।  
 25 अनह आ आल दीशोन नु आ तमी ओहोली-बामा बाक्सा बाक्त।  
 26 मिनु दीशोन आ तौपुकी हेम्दान, एशबान, इथ्रान नु केरान बाक्मा बाक्त।  
 27 एजेर आ तौपुकी बिलहान, जावान नु अकान बाक्मा बाक्त।  
 28 दीशान आ तौ ऊज नु अरान बाक्सा बाक्त।  
 29 होरी आन दाते डा ठेयब मुरपुकी लोतान, शोबाल, सिबोन, अनाह,  
 30 दीशोन, एजेर नु दीशान बाक्मा बाक्त। मेको सेइर रागी डा होरी आन ठेयब मुर बाक्मा बाक्त।

एदोम रागी डा पिपपुकी

- 31 डोंइती इस्राएल डा मुर आन पिप मबाक्शो बाक्माक्त। एदोम रागीमी चहिं सासन पाइब पिपपुकी बाक्मा बाक्त।  
 32 मिनु बेओर आ तौ बेलामी एदोम रागीमी सासन पवा बाक्त। मिनु मेको आ सहर आ नें दिनहाबा बाक्माक्त।  
 33 मिनु बेला बेक्शा नोले बोजा डा जेराह आ तौ योबाब मेकेर डा पिप दुम्माक्त।  
 34 मिनु योबाब बेक्शा नोले तेमान आ मुर आन रागी डा हुशाम पिप दुम्माक्त।  
 35 मिनु हुशाम बेकम नोले बेदाद आ तौ हादाद पिप दुम्माक्त। मेकोमी मोआब रागीमी मिदयानी नु लडाइ पशा ग्रामाक्त। आ सहर आ नें अवीथ बाक्माक्त।  
 36 मिनु हादाद बेकम नोले मासैकाह डा सम्ला पिप दुम्माक्त।  
 37 मिनु सम्ला बेकम नोले युफ्रेटीस खोला आ नेक्था बाक्शो रेहोबोथ डा शावल पिप दुम्माक्त।  
 38 मिनु शावल बेकम नोले आकबोर आ तौ बाल-हनान पिप दुम्माक्त।  
 39 मिनु आकबोर आ तौ बाल-हनान बेकम नोले हादार पिप दुम्माक्त। आ सहर आ नें पाहु बाक्माक्त। आ मीश मेहेताबेल बाक्माक्त। मेको मात्रेद आ तमी बाक्माक्त। मात्रेद चहिं मे-जाहाब आ तमी बाक्माक्त।

एसाव रे पिशो थर

- 40 एसाव रे पिशो थर आन खिं नु आन बाक्तीके तेको बाक्मा बाक्त देशा हना, तिम्ना, अलवाह, येथेथ,  
 41 ओहोली-बामा, एलाह, पिनोन,  
 42 केनाज, तेमान, मिब्सार,  
 43 मग्दीएल नु यिराम बाक्मा बाक्त। मेको एदोम आ थर आन बाक्तीक बाक्मा बाक्त। एसाव एदोमी आन किकी पिपी बाक्माक्त।

## 37

याकूब आ तौ योसेफ आ कथा

- 1 याकूब आ आफ अर्को रागीम बाकशो खोदेशो पा याकूब यो कनान रागीम बाकशो बाक्माक्त।
- 2 एको याकूब आ खिं डा मुर आन कथा बाक्ब। योसेफ १७ बर्स दुम्शा आ लोकब आन क्यारश भेडा गोठ डा गोठला बाक्माक्त। आ आफ आ मीश बिल्हाह नु जिल्पा आस तौ कली वारच पाइब बाक्माक्त। मिनु योसेफमी मेको आन मरिम्शो पशो आ आफ कली शोत्रबाक्माक्त।
- 3 इस्राएलमी नेल्ल क्येडा योसेफ कली दाकशो बाक्माक्त। मारदे हना मेकोमी खाल्पा दुम्शा थिमाक्त। मिनु योसेफ कली दारशो फेक्तीके का फेरपदा बाक्त।
- 4 मिनु आ लोकबपुकीमी “आफोम नेल्ल क्येडा योसेफ कली दाक्ताक्व” दे तुइरशा, योसेफ कली मदाक्तमे बाक्त। मिनु योसेफ नु रिम्शो लोत्र यो मपामे बाक्त।

योसेफ आ डोंइती डा डोमु

- 5 काबु नाकदो योसेफमी डोमु का तवा बाक्त। मिनु योसेफमी आ लोकब आन कली शेंदीमी बाक्त। मिनु मेकोपुकीमी डोंइती क्येडा मदाक्तमे बाक्त।
- 6 योसेफमी मेको आन कली “गो सिनाक्दो डोमु का ताता।
- 7 गो नेल्ल रूमी चेरब मुठा फ्रेशा बाक्तय। मिनु आं मुठा बोक्शा राप्त। मिनु इन मुठापुकी एर ओथ बाक्शा, आं मुठा कली सेउ पाम्तेक्मे” देमाक्त।
- 8 आ लोकबपुकीमी “गे आंइ कली अरेब दुम्नेवे? आंइ कली हुकुम पाइब दुम्नेवे?” दे गाइरशा देमा बाक्त। मिनु योसेफ कली आ डोमु नु आ देशो आ पर्वम डोंइती क्येडा मदाक्तमे बाक्त।

योसेफ आ नोले डा डोमु

- 9 मिनु नोले योसेफम लेशा अर्को डोमु तवा बाक्त। मिनु आ लोकब आन कली “नेनीन, गो अर्को डोमु का यो ताता। नां, तास्ला नु ११ ओटा सोरुलपुकीमी आं कली सेउ पाइक्तीमी” देमाक्त।
- 10 मेको डोमु आ आफ नु आ लोकब आन कली शेंदीमीनु, आ आफोमी “मार डोमु तवी? गो, इ ममा नु इ लोकबपुकी इ डोंइती थमा पा खुम्की पा बाप्चा माल्नीकी?” दे हुइक्ता बाक्त।
- 11 मिनु आ लोकबपुकीमी योसेफ कली मदाक्तमे बाक्त। आ आफोम चहिं योसेफ आ देशो मिम्शा आ थुंमी वोदा बाक्माक्त।

योसेफ कली लेयशो

- 12 मिनु योसेफ आ लोकबपुकी क्यारश भेडा योत्रचा कली शेकेम माइरशो रागीमी बाकशो बाक्मा बाक्त। उत्पत्ती ३३:१८-१९
- 13 इस्राएलमी योसेफ कली “इ लोकबपुकी शेकेम नेक्थान क्यारश भेडा योत्रनीम। गो इ कली शेकेम सोइक्नन” देमाक्त। मिनु योसेफम “लो, गो लाइनुड” देमाक्त।
- 14 मिनु “लावो, इ लोकब नु क्यारश भेडा नेल्ल रिम्शो बाक्मा कों, दोदेशो पा बाक्मा, कोत्रथ लावो। मिनु कोत्रशा, शेंदी” देमाक्त। मिनु योसेफ कली हेब्रोन बेंसी रे सोइक्तानु, शेकेम गे लमाक्त। उत्पत्ती ३५:२७
- 15 मिनु योसेफमी लेखमी मुर का ग्रुमाक्त। मिनु मेकोमी “गे मार मली?” दे हिल्लो पवा बाक्त।
- 16 मिनु योसेफमी “आं लोकब आन कली माल्थ गाक्ती। क्यारश भेडा ते योत्रशो बाक्मा, तुइक्ती?” दे हिल्लो पवा बाक्त।
- 17 मिनु मेको मुरुमी “मेकोपुकी एकेर रे लाम्तेक्मे। ‘दोथान लचा’ देशो नेता” देमाक्त। मिनु योसेफम आ लोकब आन कली दोथानम थिम्मी बाक्त।
- 18 मिनु आ लोकबपुकीमी योसेफ कली डोन रे पिशो तशा, आन नेक्था जाक्चा क्येडा डोंइती “मेको कली साइक्चा” दे सल्ला पामे बाक्त।
- 19 मिनु मेकोपुकीमी “कोत्रडीन, डोमु ताइब जाक्त।
- 20 मुल मेको कली साइय्य। मिनु ढोडोडगा कामी पिक्व। मिनु ‘जन्तुम साइरशा ब्वाप्तु’ देंय। आ डोमु तशो गाप्चाक्म कों, मगाप्चाक्म तुइक्नय” देमुमा बाक्त।
- 21 मिनु रूबेनमी मेको आन लोत्र नेंशा, मेको कली “मसाइय्य” देमाक्त। मेकोमी “आ लोकबपुकी रे प्रोंडनुड” दे मिम्ता बाक्त। उत्पत्ती ४२:२२
- 22 रूबेनमी मेको आन कली “मसतीने। लेख डा ढोडोडगा कामी ताइक्चा” दे माइक्मी बाक्त। मारदे हना योसेफ कली आन गुइ रे प्रोंइशा, आफ आ खिं सोइक्नुड, दे मिम्ता बाक्त।
- 23 मिनु योसेफ आ लोकब आन बाक्तीके जाक्मेनु, मेकोपुकीमी आ नक फेरशो रिम्शो फेक्तीक वा पुइक्तमे बाक्त।
- 24 मिनु लेख डा ढोडोडगा कामी पिक्वामे बाक्त। मेको ढोडोडगाम ब्वाक्कु मबाक्शो बाक्माक्त।
- 25 मिनु शोब्ले जथ निस्सीमा बाक्त। मिनु कोत्रडमेनु, गिलाद सहर रे इश्माल जात डा ग्याप्ब लेयब मुर नु आन दलओंठपुकी पिशो तामे बाक्त। मेको आन दलओंठपुकीमी मस्लापुकी, खेक्तीकपुकी नु धूप इजीप्टमी लेयचा कली लाइक्बाक्मा बाक्त।
- 26 मिनु यहूदामी आ लोकब आन कली “इ लोकब साइरशा, जोल पचा, मार रिम्शो दुम्बा डा?”

27 नेनीन, इश्माएली आ मुर आन कली लेयशा सोइकतय, मसाइय्य। मारदे हना इं लोकब, इं आम मुर बाकब” देमाकत। मिनु आ लोकबपुकी बिस्समा बाकत।

28 मिदयान डा इश्माएली ग्याब्व लेयब मुर पिना पिन बाकमा बाकत। मिनु योसेफ कली ढोडोडगा रे फेरशा, इश्माएली आन कली चांदी के २० शेकेलम लेयडमे बाकत। मिनु मेकोपुकीमी योसेफ कली इजीप्ट लदमे बाकत। शेकेल का ११.५ ग्राम, तोला खोदेशो बाकब।उत्पत्ती २५:२; लेवी २७:१-८

29 मिनु रूबेनमी योसेफ प्रॉइचा कली मेको ढोडोडगा लशा कोव्रडानु, योसेफ कली मथित्थु, सुर्ता पा, आ वा खाक्या बाकत।

30 मिनु आ लोकब आन कली “मेको आल मबा। दोपा आ आफ आ डोंइती जाकदीत्नुडा?” दे लोव्र पवा बाकत।

31 मिनु मेकोपुकीमी योसेफ आ फेक्शो वा लाइश्शा, पाठा का क्योरशा, आ फेक्शो वा हुशेम खुम्मे बाकत।

32 मिनु मेको फेरशो फेक्शो वा आन आफ कली लाइश्शा गेमे बाकत। मेकोपुकीमी आन आफ कली “कोव्रडीन, एको वा थित्क। इन तौ आ फेक्शो वा कों?” दे हिल्लो पामे बाकत।

33 मिनु मेको वा तशा “आं तौ आ फेक्शो वा बाकत, दे तुइकता बाकत। मिनु ब्वाकी डा जन्तुमी मेको कली साइश्शा, नेकमे बाकत” दे डाकमाकत। उत्पत्ती ३७:२०

34 मिनु याकूबम आ फेक्शो वा खाक्शा, अरन्डी फेक्शा, शुश नाक्ती रोंका पवा बाकत।

35 आ तमी तौ आन आफ कली लेमथ जाकमा बाकत। मिनु याकूबमी “गो आं बेक्ची ना सम्म आं तौ कली रोंका पाइनुड” दे लेमचा मंगेमी बाकत। मोपा आ आफ योसेफ आ परबं डाकमाकत।

36 मिनु मेको मिदयान डा मुरपुकीमी योसेफ कली इजीप्ट रागी डा फाराओ आ नेल्ल क्येडा ठेयब गेय पाइब पोतीफर कली लेयडमे बाकत।

## 38

यहूदा नु तामार

1 मिनु नोले यहूदा आ लोकबपुकी रे लशा, अदुल्लाम सहर डा हीरा माइश्शो मुर आ बाक्तीक लमाकत।

2 मेकेर बाक्शा, यहूदामी कनानी शुआ नें पाइश्शो मुर आ तमी तवा बाकत। मिनु मेको चाक्शा, मेको नु बाक्माकत।

3 मिनु मेकोमी कोव्रज कुरशा, तौ का थिमाकत। मेको आ नें एर वोदा बाकत।

4 मिनु लेशा कोव्रज कुरशा, अर्को तौ का नु थिमाकत। मेको आ नें ओनान वोदा बाकत।

5 मेकोमी लेशा कोव्रज कुरशा, अर्को तौ का नु थिमाकत। मेको आ नें शेलाह वोदा बाकत। मेको आल थिची ना यहूदा केसीभा माइक्तीकेमी बाक्शो बाक्माकत।

6 मिनु यहूदामी आ डोंइती जरमेशो तौ एर कली मीश आल का चाक्या बाकत। मेको आ नें तामार बाक्माकत।

7 यहूदा आ डोंइती जरमेशो तौ एरमी परमप्रभु यावे आ डोंइती मरिम्शो पना पन बाक्माकत। मिनु परमप्रभु यावेमी मेको कली सदा बाकत।

8 मिनु यहूदामी ओनान कली “रिउम पतीक गेय पा इ लोकब आ मीश नु बाक्को। इ लोकब कली आल सेलो” दे मदा बाकत। ब्यर्वस्था २५:५-१०

9 मिनु ओनानमी आ आल मदुम्ब, दे तुइश्शा, आ लोकब आ मीश नु बाक्की ना आ लोकब आ आल मसेल्चा, दे आ वांचेर खपीम ताइक्बाक्माकत।

10 मिनु मेको कली मो पशो तशा, परमप्रभु यावेमी मेको कली मदाक्शो बाक्माकत। मोपतीके मेको कली यो सदा बाकत।

11 मिनु यहूदामी आ चाइमी तामार कली “इ आफ आ खिम बाक्शा, शेलाह मकोल्म सम्म रिम्दो” दे लेम्दा बाकत। मारदे हना यहूदामी “मेको नु बाक्शा, आ लोकब निक्शी खोदेशो पा, अर्को यो बेक्बा कों” दे मिम्ता बाकत। मिनु तामार आ आफ आ खिम लमाकत।

12 मिनु नोले शुआ आ तमी, यहूदा आ मीश बेक्माकत। मिनु आ रोंका पतीक नुम नोले यहूदा आ भेडा आन कली ऊन खोइक्बपुकी गुम्चा कली आ वारच अदुल्लाम सहर डा मुर हीरा नु तिम्नाह लमाकत।

13 मिनु मुर कामी तामार कली “इ शिउ आ भेडा ऊन खोइक्थ तिम्नाह कुइब” दे मदा बाकत। योहोसु १५:५७

14 मिनु आ वोंइश बेक्शो वा पुइश्शा, आ कुल तेल्लेम खोदेशो पा सुम्से बाकत। मिनु मोदेशो पा तिम्नाह एनाइम लतीक लांमी निश्शा बाक्माकत। मारदे हना शेलाह कोल्शा यो, यहूदामी मेको नु गुंये मपाइकता बाकत।

15 मिनु यहूदाम मेको कली लांम तशा “तेल्लेम का बाक्ब” दे मिम्ता बाकत। मारदे हना आ कुल सुमा बाकत।

16 मिनु मेको कली “आं कली ओव्रचा गेयी” देमाकत। मारदे हना आ चाइमी बाक्ब, दे मतुइकता बाकत। मिनु तामारमी “गे गो नु बाक्शो डा आं कली मार गेनीनी?” दे हिल्लो पवा बाकत। लेवी १८:१५

17 मिनु “गो आं गोठ डा पाठा का सोइक्वन” देमाकत। मिनु तामारमी “मेको मसोइक्तीनी सम्म मार गेनीनी?” दे हिल्लो पवा बाकत।

18 मिनु यहूदामी “मार पुंइनेवे?” दे हिल्लो पवा बाकत। मिनु मेकोमी “इन छाप, इन डोरी नु इन गुइ डा कोक्के गेचा नड” दे मदा बाकत। मिनु मेको नेल्ल गेशा नोले मेको नु बाक्माकत। मिनु कोव्रज कुरा बाकत।

19 मिनु तामार बोक्शा लशा, आ वोंइश बेक्शो डा वा लेशा फेक्से बाकत।

20 मिनु यहूदामी मेको पाठा गेचा नु आ छाप, डोरी नु कोक्के लेत्क्या कली आ अदुल्लाम डा आ वारच कली सोइकता बाकत। मेकोमी मेको मीश मुर कली मथिदा बाकत।

21 मिनु मेकोमी मेकेर डा मुर आन कली “एकेर एनाइम डा लांम बाक्ब तेल्लेम ते लमे?” दे हिल्लो पामी बाक्त। मिनु मेकोपुकीमी “एकेर तेल्लेम मबाक्ब” देंमा बाक्त।

22 मिनु मेको यहूदा आ बाक्तीक लेशशा “मेको कली थिन्ने मचबु। मेकेर डा मुरपुकीमी ‘एकेर तेल्लेम मबाक्ब’ देंतेकम” दे यहूदा कली शेंदा बाक्त।

23 मिनु यहूदामी “मेकोन बाक्ल। गो मुने मदोक्डल। गो पाठा का सोइक्ताक्ड। गे मेको कली मथिदी, मार पचा डा?” देंमाक्त।

24 मिनु महिना सां नोले मुर कामी यहूदा कली “इ चाइमी तामारम तेल्लेम पाप्तु। तेल्लेम पा कोव्रज कुरशो बाक्त” देंमाक्त। मिनु यहूदामी “मेको चोचा कली चाक्कीन” दे लोव्र लेत्ता बाक्त।

25 मिनु तामार कली चाक्गामेनु, मेकोमी आ शिउ कली “एको छाप, डोरी नु कोक्के सु के बाक्मे मेको रे पा कोव्रज कुरशो नड। एको छाप, डोरी नु कोक्के सु के बाक्मे, कोव्रडीन” दे लोव्र कुरब सोइक्ता बाक्त।

26 मिनु यहूदा मेको छाप, डोरी नु कोक्के तुइशशा, मेकोमी “आं क्येडा मेको ठीक पाइब बाक्त। मारदे हना गो मेको कली आं तौ शेलाह मगेड” देंमाक्त। तन्न तामार कली मचाक्गा बाक्त।

27 मिनु आल थिचा रोइ पची ना, आ कोव्रजम जौले आल बाक्सा बाक्त।

28 मिनु आल थिचावानु, आल कामी आ गुइ गुइदा बाक्त। मिनु आ वारच पाइब मीश मुरुमी लल श्येले पाइशशा “एको डोंइती डा बाक्ब” देंमाक्त।

29 मिनु मेको आ गुइ ओइशा, आ लोक्ब जरमेसे बाक्त। मिनु मेको वारच पाइबमी “इ यूची ना गिश ठेयब गार सेली” दे मदा बाक्त। मोपतीके आ नें पेरस वोदा बाक्त। पेरस आ अर्थ खाक्शो गार बाक्ब। रूथ ४:१८; मती १:३

30 मिनु नोले लल श्येले पाइशशा आल जरमेसे बाक्त। मिनु मेको आ नें जेराह वोदा बाक्त।

## 39

योसेफ पोतीफर आ खिंम बाक्शो

1 मेको इश्माएल जात डा ग्याब्ब लेयबपुकीमी योसेफ कली इजीप्त रागी चाक्दीन्मे बाक्त। मिनु इजीप्त रागी डा पिप आ नेल्ल क्येडा ठेयब गेय पाइब पोतीफरमी योसेफ कली ग्यबा बाक्त। उत्पत्ती ३७:२८, ३६

2 मिनु परमप्रभु यावे योसेफ नु बाक्शो बाक्माक्त। योसेफ इजीप्त डा होव्रप आ खिंम बाक्मेनु, मार मार पवा, मेको नेल्ल रिंशो दुम्या लमाक्त। उत्पत्ती २६:२४

3 मिनु आ होव्रपमी “परमप्रभु यावे योसेफ नु बाक्माक्त। मिनु योसेफमी मार मार पवा, मेको नेल्ल परमप्रभु यावेमी रिंशो दुमपदा बाक्त।” दे तुइक्ता बाक्त।

4 मिनु योसेफ पोतीफर आ डोंइती शिशी तवा बाक्त। मिनु आ खिंमी गेय पवानु, आ ठेयब गेय पाइब सेला बाक्त। मिनु अर्को गेय पाइबपुकी कली अरेब यो सेला बाक्त। आ मारइ मारइ योसेफ कली कोव्रपदा बाक्त।

5 मिनु पोतीफरमी योसेफ कली आ खिं डा नेल्ल कोव्रब मुर सेलानु, परमप्रभु यावेमी योसेफ आ पर्वम मेको कली शुश आसीक गेवा बाक्त। पोतीफर आ खिंम मार मार बाक्मा, आ रूम मार मार ब्वारा, मेको नेल्ल कली परमप्रभु यावेमी आसीक गेवा बाक्त। उत्पत्ती ३०:२७

6 मोपा पोतीफरमी आ मार मार नेल्ल योसेफ आ गुइमी जिम्मा गेवा बाक्त। आ जचा ब्वचा ला आंमा कोव्रडा बाक्त। योसेफ आ रां नु कुल थम दारशो बाक्माक्त। उत्पत्ती ४३:३२

7 मिनु पोतीफर आ खिंमी बाक्मेनु, आ होव्रपोक्ममी योसेफ कली दाक्शा, मेको नु बाक्चा मला बाक्त। मेको मीश मुरुम योसेफ कली “पिवो, गो नु बाक्को” दे मदा बाक्त।

8 योसेफमी “गो गे नु मबाक्नुड। आं होव्रपमी आ मार मार नेल्ल आं कली ‘कोव्रडो’ दे जिम्मा गेती।

9 आं कली आ खिं डा नेल्ल क्येडा ठेयब सेलती। मार मार बाक्मा, नेल्ल जिम्मा गेती। इन कली चहिं आं कली मगेयी। मारदे हना गे आ मीश ननी। गो दोपा परमप्रभु आ डोंइती मोदेशो मरिंशो पाप पने चानुडा? गो मपाइनुड?” दे मदा बाक्त। प्रस्थान २०:१४; लेवी १८:२०

10 मिनु मेको मीश मुरुमी नाक्त किंत किंत योसेफ कली लोव्र पशा “पिवो, गो नु बाक्को” दे मदा बाक्त। योसेफम चहिं मेको आ लोव्र मटिवा बाक्त।

11 मिनु काबु योसेफ आ गेय पचा कली पोतीफर आ खिंम बाक्माक्त। खिंम गेय पाइब मुर सुइ मबाक्मा बाक्त।

12 मिनु मेको मीश मुरुमी योसेफ आ फेक्शो वा ग्याइशशा कीशा “गो नु बाक्को” देंमाक्त। मिनु योसेफ आ फेक्शो वा प्रोंइशा, खिं रे दोरशा लाडगा यूमाक्त।

13 पोतीफर आ मीशेमी योसेफ आ फेक्शो वा आंम गुइमी प्रोंइशा वोइशशा, खिं रे प्रोक्शो तशा,

14 खिं डा मुर आन कली ब्रेशशा “कोव्रडीन, पोतीफरमी एको हिबू मरिंशो पपाइक्चा कली चाक्तु। एकोमी आं कली ग्याइक्ताक्यी ‘गो नु बाक्को’ दे माइक्ती। गो चहिं ठेयब सेंदामी वाइ ब्रेत्ती।

15 मिनु आं कली वाइ ब्रेशशा तशा, आ वा प्रोंइशा प्रोक्त” दे माइक्मी बाक्त।

16 मिनु मेकोमी योसेफ आ फेक्शो वा आ नेक्था वोइशशा, आ वोंइश मजाक्म सम्म रिम्दा बाक्त।

17 पोतीफर जाक्मेनु, आ मीशेमी “एको इन चाक्शो गेय पाइब हिबूमी आं कोठा ओव्रशा ‘गो नु बाक्को’ देंत।

18 गो चहिं वाइ ब्रेत्ती। मिनु आ फेक्शो वा प्रोंइशा, खिं रे यूशा प्रोक्त” दे मदा बाक्त।

19 मिनु आ होव्रपमी आ मीश आ लोव्र नेंशा, चुरमाक्त।

20 योसेफ कली लाइश्शा, जेल्खानम चोक्पदा बाक्त। मेकेर पिप आ चोक्शो मुरपुकी यो बाक्मा बाक्त। मिनु योसेफ मेकोपुकी नु बाक्माक्त।

21 मिनु परमप्रभु यावेमी योसेफ कली वारच पशा, जेल्खान डा कोव्रब कली “योसेफ रिम्शो मुर बाक्ब” दे तुडक्पदा बाक्त।

22 मिनु मेको कोव्रब मुरुमी योसेफ कली जेल्खानम चोक्शो मुर आन कली कोव्रब सेला बाक्त। मिनु मेकेर बाक्शो गेय नेल्ल योसेफमी पवा बाक्त।

23 मेको जेल्खान डा कोव्रब मुरुमी योसेफ आ पशो यो मकोव्रडा बाक्त। मारदे हना परमप्रभु यावे मेको नु बाक्शो तुडक्ता बाक्त। मेको नेल्ल रिम्शो पाइब, दे थमा सुदा बाक्त। मिनु परमप्रभु यावे मेको नु बाक्मेनु, आ गेय नेल्ल रिम्शो दुम्माक्त।

## 40

योसेफमी डोमु आ अर्थ शेशो

1 मिनु नोले मार दुम्माक्त देशा हना, इजीप्त डा पिप फाराओ आ खिमी पिप कली तूचा गेब आन ठेयब मुर नु पिप कली शोब्ले चोइब आन ठेयब मुरुमी आस प्रभु इजीप्त डा पिप कली मरिम्शो पाम्से बाक्त।

2 मिनु फाराओमी मेको तूचा गेब आन ठेयब मुर नु शोब्ले चोइब आन ठेयब मुर आस पबर्म गाइक्ता बाक्त।

3 मिनु मेको निम्फा आस कली नेल्ल क्येडा ठेयब गेय पाइब आ जेल्खानमी चोक्सी बाक्त। मेकेर योसेफ यो बाक्शो बाक्माक्त।

4 मिनु जेल्खान डा कोव्रब मुरुम योसेफ कली “मेको निम्फा आस कली वारच पावो” दे अरेवा बाक्त। मिनु वारच पवा बाक्त।

5 मिनु इजीप्त डा पिप आ गेय पाइब ठेयब मुर निक्शी जेल्खानमी बाक्सानु, काबु नाक्दो निम्फामी डोमु ताम्से बाक्त। मेको आस डोमु आस अर्थ निक्शी बाक्माक्त।

6 मिनु सुनी कना योसेफ मेको निक्शी आस कली वारच पथ, आस कोठा ओव्रमेनु, निम्फा सुर्ता पा बाक्शो ताम्सी बाक्त।

7 मिनु योसेफमी जेल्खानम बाक्शो फाराओ आ गेय पाइब आ ठेयब मुर निक्शी आस कली “मारदे सुर्ता पनी?” दे हिल्लो पाम्सी बाक्त।

8 मिनु मेको निक्शीमी “गो डोमु ताइतस्कु। मिनु मेको डोमु आ अर्थ मरुप्स्कु। शेंब मुर मबा” देसा बाक्त। मिनु योसेफमी “परमप्रभुमी मेको डोमु मार बाक्वा दे शेंबा ममाइ डा? लो, आं कली देनीन” दे माइक्सी बाक्त। उत्पत्ती ४१:१५-१६; दानीएल २:२७-२८

9 मिनु फाराओ कली तूचा गेब आन ठेयब मुरुमी “गो आं डोमुमी आं डोंइती अडगुर बोट का ताता।

10 मिनु मेको अडगुर बोटमी राशी सां बाक्तेक्म। मिनु मेको कोच्वा दाष्णा, फू यो बोइक्तेक्मे। बोइश्शा डा मिन अडगुर गेडा सिश्शा मीतेक्म।

11 मिनु आं गुइमी फाराओ आ कचौरा बाक्त। मिनु गो अडगुर आ गेडा आ रस फाराओ आ कचौरामी चिम्ता। मिनु कचौरा पिप कली गेता” दे लोव्र पवा बाक्त।

12 मिनु योसेफमी “इन तशो डोमु आ अर्थ मार बाक्ब देशा हना, मेको राशी सां नाक्ती सां बाक्नीम।

13 मिनु सांबु नाक्ती फाराओम इन कली जेल्खान रे प्रोंइशा डा मिन इन डोंइती पशो गेय लेंशा गेब। मिनु गे डोंइती डा खोदेशो पा फाराओ कली तूचा गेनीनी। लेंशा फाराओ कली कचौरा गेनीनी। इन तशो डोमु आ अर्थ एको बाक्ब।

14 इन कली रिम्शो दुम्मेनु, आं कली यो मप्रेंदीन। आं कली शिशी पने। फाराओ कली आं कली मेको जेल्खान रे गुंइचा, दे लोव्र पने।

15 डोंइती आं कली हिबू रागी रे खुइ पा चाक्तीमी। मुल जेल्खानम चोक्तीमी। गो मारेइ मरिम्शो मपड” देमाक्त। उत्पत्ती ३७:२८

16 मिनु फाराओ कली शोब्ले चोइब आन ठेयब मुरुम मेको डोमु आ अर्थ रिम्शो बाक्त, देशा, योसेफ कली “गो यो डोमु का ताता। मेको डोमुम पिरीड्या सां बुश शोब्ले पियाम कुरशो बाक्ती।

17 नेल्ल क्येडा आ तार डा पिरीड्यामी फाराओ कली शुश खाल डा चोशो शोब्ले बाक्तेक्मे। मेको पिरीड्या डा शोब्ले चिक्बीम खुइ पा जाम्तेक्म” दे मदा बाक्त।

18 मिनु योसेफमी “इन तशो डोमु आ अर्थ मार बाक्ब देशा हना, मेको पिरीड्या सां, नाक्त सां बाक्नीम।

19 सांबु नाक्ती फाराओमी इन कली जेल्खान रे गुंइपाइश्शा, रवाम क्याइक्पाइक्ब। मिनु चिक्बीम इन श्ये ब्वाइनीम। इन तशो डोमु आ अर्थ एको बाक्ब” दे शेंदा बाक्त।

20 मिनु आ सांबु नाक्ती फाराओ आ जरमेशो नाक्त बाक्माक्त। मिनु फाराओमी आ गेय पाइब नेल्ल आन कली भोज सेला बाक्त। मिनु आ कली तूचा गेब आन ठेयब मुर नु शोब्ले चोइब आन ठेयब मुर आस कली जेल्खान रे गुंइदीम्सी बाक्त।

21 मिनु आ कली तूचा गेब आन ठेयब मुर कली लेंशा डोंइती डा गेय पचा गेवा बाक्त। मिनु मेकोमी लेंशा फाराओ कली तूचा गेब दुम्माक्त।

22 शोब्ले चोइब आन ठेयब मुर कली चहिं क्याइश्शा साइक्पदा बाक्त। योसेफमी दोदेशो देमे, मोदेशो दुम्माक्त।

23 तन्न फाराओ कली तूचा गेब आन ठेयब मुरुमी योसेफ कली यु प्रेंदा बाक्त।

## 41

फाराओ आ डोमु आ अर्थ

- 1 मिनु बर्स निक्शी नोले फाराओमी डोमु निक्शी तवा बाक्त। मिनु डोमुमी मार तवा बाक्त देशा हना, आंम कली नील खोला आ नेक्थान राप्शा बाक्शो तवा बाक्त।
- 2 मिनु नील खोला रे ७ ओटा दारशो दोम्शो बी यूशो तवा बाक्त। मेको बीपुकीमी बुदी मीलु घांस ब्वामे बाक्त।
- 3 मिनु नोले नील खोला रे ७ ओटा अर्को काइ मदारशो ग्येशो बी यूशो तवा बाक्त। मिनु मेकोपुकी अर्को बी नु नील खोला आ नेक्था राप्शा बाक्मा बाक्त।
- 4 मिनु काइ मदारशो ग्येशो बीपुकीमी दारशो दोम्शो बी आन कली ब्वामे बाक्त। नोले फाराओ सेंसे बाक्त।
- 5 मिनु फाराओ लेंशा निन्द्रा पवानु, लेंशा अर्को डोमु तवा बाक्त। मार तवा बाक्त देशा हना, चेरब बोट कामी शुश आख पाइशो ७ ओटा ग्रेल्शो बाला सिशशो तवा बाक्त।
- 6 मिनु नोले पूर्व डा फशेम बुश सेल्शो ७ ओटा सोप्पीक्च आइक्च बाला तवा बाक्त।
- 7 मिनु मेको आइक्च बालामी मेको शुश आख पाइशो ७ ओटा बाला आन कली दाक्मे बाक्त। नोले फाराओ सेंशा, आ डोमु तशो तुइक्ता बाक्त।
- 8 मिनु आ थुं मनुथु सुनी कना इजीप्त डा जादू पाइब नु जोक्ब तुइक्ब नेल्ल आन कली ब्रेत्थ सोइक्तीमी बाक्त। मेको जाक्मानु, आ डोमु मेको आन कली शेंदीमी बाक्त। तन्न सुइमी फाराओ कली मेको डोमु आस अर्थ देने मचाप्मे बाक्त। दानीएल २:३
- 9 मिनु फाराओ कली तूचा गेब आन ठेयब मुरुमी आ पिप कली “मुलाक्ती आं मरिम्शो पशो मिम्ताक्ड।
- 10 फाराओमी आ गेय पाइब आस पबंम चुरमेनु, गो नु शोब्ले चोइब आन ठेयब मुर नेल्ल क्येडा ठेयब गेय पाइब आ जेल्खानम चोक्सीशा बाक्स्कुनु,
- 11 गो निक्शीम काबु नाक्दो डोमु ताइतस्कु। मेको डोमु निक्शी के अर्थ निक्शी बाक्सा बाक्त।
- 12 मेना हिब्रू रागी डा ठिटा का यो जेल्खानम बाक्त। मेको इन नेल्ल क्येडा ठेयब गेय पाइब आ गेय पाइब बाक्त। गो निक्शीमी तशो डोमु मेको कली माइक्स्कुनु, योसेफमी डोमु आ अर्थ नेल्ल आंस कली शेंताक्स्की। आं तशो डोमु आ अर्थ शेंताक्यी। मिनु अर्को मुर आ तशो डोमु आ अर्थ यो शेंताक्व।
- 13 दोदेशो पा शेंदा, मोदेशोन दुप्त। आं गेय आं कली लेंशा गेतीनी। अर्को कली चहिं क्याइशशा साइक्तेक्म” देमाक्त।
- 14 मिनु फाराओमी योसेफ कली ब्रथ सोइक्ता बाक्त। मेकोपुकीमी योसेफ कली रीब जा जेल्खान रे गुंडपदमे बाक्त। योसेफ कली चां प्रेक्शा, नक वा फेक्पा, फाराओ आ बाक्तीके चाक्मे बाक्त।
- 15 मिनु फाराओमी योसेफ कली “गो डोमु निक्शी ताता। सुइमी मेको आस अर्थ शेने मचबेम। मिनु गो इ पबंम लोत्र नेंता। गे मुर आन तशो डोमु आ अर्थ शेने चाप्नेवे ने” देमाक्त।
- 16 मिनु योसेफमी फाराओ कली “गो डोमु डा लोत्र मतुइक्नुड। परमप्रभुमी फाराओ कली थमा पा थुं नाइक्चा डा लोत्र तुइक्पाइक्ब” देमाक्त। उत्पत्ती ४०:८
- 17 मिनु फाराओमी “गो आं डोमुमी नील खोला आ नेक्था बाक्ती।
- 18 मिनु नील खोला रे ७ ओटा दारशो दोम्शो बी यूतेक्म। मिनु बुदी मीलु घांस ब्वाम्तेक्म।
- 19 मिनु नोले ७ ओटा मदारशो ग्येशो बी यूतेक्म। गो इजीप्त रागी नेल्लेमी मोदेशो मदारशो बी गेनायो मतडमी।
- 20 मिनु मदारशो गेयशो बीपुकीमी डोंइती यूशो दोम्शो बी आन कली ब्वाम्तेक्म।
- 21 मिनु मेको आन कली ब्वशा यो, गेयशो बी मदोम्म। डोंइती डा खोदेशो पा गेयस डा गेयस बाक्तेक्म। बी ब्वाम्तेक्म, दे सुइमी थमा मसुदेम। मिनु नोले गो सेंसाक्यी।
- 22 मिनु लेंशा इप्ती। मिनु डोमु तडानु, चेरब बोट का रे ७ ओटा ठेयब रिम्शो बाला पाइशो तातामी।
- 23 मिनु नोले अर्को बोट रे ७ ओटा पूर्व डा फशेम सोव्रशो इम्चीली सोप्पीक्च बाला ताता।
- 24 मिनु इम्चीली सोप्पीक्च बालापुकीमी मेको ७ ओटा रिम्शो बाला आन कली दाक्तेक्म। गो एको आं डोमु जादू पाइब आन कली माइक्तामी। मेकोपुकीमी एको डोमुमी मार दुम्बा, दे देने मचबेम” दे योसेफ कली देमाक्त।
- 25 मिनु योसेफमी फाराओ कली “इन डोमु निम्फा कांइचीक खोदेशो बाक्ब। परमप्रभुमी मार पचशो बाक्मे, मेको इन कली डोमुमी कोंइताक्व।
- 26 मेको ७ ओटा रिम्शो बी ७ ओटा बर्स बाक्नीम। मिनु मेको ७ ओटा रिम्शो बाला यो ७ बर्स बाक्नीम। डोमु निक्शी कांइचीक खोदेशो बाक्नीस।
- 27 मिनु मेको आ नोले यूशो ७ ओटा ग्येशो बीपुकी ७ ओटा बर्स बाक्नीम। मिनु मेको ७ ओटा गेडा मसिश्शो, पूर्व डा फशेम सोव्रशो सोप्पीक्च बाला यो ७ ओटा बर्स बाक्नीम। मेको ७ बर्स डा अन्काल बाक्नीम।
- 28 आं देशो मार बाक्ब देशा हना, परमप्रभुमी मार पचा चिक्शो बाक्मे, मेको इन कली कोंइताक्व। मोदेशो बाक्ब।
- 29 नेनीन, इजीप्त रागी नेल्लेमी ७ बर्स सम्म शुश बाली नाली ग्रेल्शा, रिम्शो बर्स दुम्चा चिक्शो बाक्नीम।
- 30 मिनु आ नोले ७ बर्स सम्म अन्काल दुम्ब। मिनु मेको मरिम्शो ७ बर्सम इजीप्त रागीमी अन्न ग्रेल्शो नेल्ल प्रेंनीम। मिनु मेको अन्कालमी रागी कली थुम्पाइक्ब।
- 31 मिनु मेको ठेयब अन्काल दुम्शा, डोंइती अन्न ग्रेल्शो बर्स नेल्लेमी प्रेंनीम। मारदे हना मेको अन्काल शुश श्येत डा बाक्ब।

32 मिनु इन डोमु निक्शी खेयप ताइतीनी, मेको आ अर्थ मार बाकब देशा हना, परमप्रभुमी मेको थमा पा पाइब नु पचा चिकशो बाकब।

33 मोपतीके फाराओमी निप्स पाइशो मुर का इजीप्त रागी डा ठेयब मुर सेलीन।

34 मिनु आं देशो पशा, कोव्वब मुरपुकी यो वोइक्चा माल्नीनी। मेकोपुकीमी फाराओ आ सासनमी रिम्शो ७ बर्सम इन रागी नेल्ल रे अन्न ५ भाग तिरो पोक्चा माल्नीम।

35 मेको रिम्शो बर्स डा अन्न खुप्शा, अन्काल डा बर्सम सहर डा मुर आन कली थुल्चा कली उप्शा वोइक्चा माल्नीम।

36 मेको उप्शा वोइशो अन्न इजीप्त रागीमी अन्काल मदुम सम्म उप्चा माल्ब। मोपा वोइशोनु, अन्कालमी मबेक्नीम” दे योसेफमी फाराओ कली मदा बाकत।

योसेफ ठेयब मुर दुम्शो

37 मिनु फाराओ नु आ गेय पाइब नेल्लेमी “योसेफ आ देशो लोव्व रिम्शो बाकब” दे मिम्तमे बाकत। हितोपदेस १४:३५

38 मिनु फाराओम आ गेय पाइब आन कली “गो योसेफ खोदेशो मुर अर्को सु थिन्ने चापन्या डा? परमप्रभु आ सोकतीम ब्रीशो मुर का थिन्ने चापन्या डा?” दे हिल्लो पामी बाकत। प्रस्थान ३१:३; हितोपदेस २:६

39 मिनु फाराओमी योसेफ कली “परमप्रभुमी मेको नेल्ल इ कली तुइक्पाइवकु। इ खोदेशो जोक्ब तुइक्ब मुर सुइ मथिशीब।

40 इ कली आं रागी डा मुर आन कली हुकुम पाइब सेल्लन। इ देशो लोव्व मुर नेल्लेमी टिचा माल्नीम। गे आं सरकार डा गेय पाइब नेल्ल आन क्येडा ठेयब मुर दुम्नीनी। गो सिरपेचम पतीके ला इ क्येडा ठेयब बाक्नुड। भजन संग्रह ११३:७

41 नेनीन, गो इ कली इजीप्त रागी नेल्ल डा ठेयब मुर सेल्लनी” देमाकत। प्रेरित ७:१०

42 मिनु फाराओम आ छाप क्येप्तीक औठी आ ब्रेप्चो रे पुइशशा, योसेफ आ ब्रेप्चोम लिक्ता बाकत। मिनु योसेफ कली दारशो बुश वा फेक्पाइशशा, सुन के माला रेल्दा बाकत। एस्तर ३:३०; दानीएल ५:२९

43 मिनु फाराओमी योसेफ कली आ नोले डा बग्गीमी डोइक्पदा बाकत। मिनु योसेफ आ डोंइती बाकबपुकीमी “योसेफ आ डोंइती पोक्च थेक्शा, सेउ पने” दे ब्रेम्मा बाकत। मोपा इजीप्त रागी डा हुकुम पाइब सेला बाकत। एस्तर १०:३

44 मिनु फाराओमी “गो फाराओ नड। इजीप्त रागीमी गे मार पचा देंनी, मेको ला पचा माल्नीम” दे योसेफ कली देमाकत।

45 मिनु फाराओमी योसेफ कली साफेनाथ-पानेआह, दे नक नें वोदा बाकत। मिनु योसेफ कली पोतीफेरा माइशो ओन सहर डा नाक्सो आ तमी आसेनाथ नु ग्युबे पाइक्ता बाकत। मिनु योसेफ इजीप्त रागी नेल्ल कोव्वथ हिरचा गोवा बाकत।

46 योसेफ फाराओ पिप आ डोंइती लोव्व पवानु, ३० बर्स दुम्शो बाक्माकत। मिनु फाराओ आ डोंइती रे लशा, इजीप्त रागी नेल्ल हिरथ लमाकत। उत्पत्ती ३७:२

योसेफम इजीप्त कली गेय पशो

47 मिनु मेको रिम्शो बाली ग्रेल्लेमी ७ बर्समी इजीप्त नेल्ल डा रूमी थाम्पा अन्न ग्रेल्लेमाकत।

48 मिनु योसेफमी मेको बाली ग्रेल्लो ७ बर्स डा अन्न सहर सहरम उप्शा, वोदा बाकत। मेको सहरम एर ओंथ सु सु आन रू बाक्मे, मेकेर डा अन्न मेको सहरम उप्शा वोदा बाकत।

49 मिनु योसेफमी समुन्द्र डा बाल्वा खोदेशो पा अन्न उप्शा, शुश दुम्तीके पुक्चा यो प्रोना बाकत। मारदे हना पुक्ने मचाप्चा डा पा शुश बाक्माकत।

योसेफ आ तौ निक्शी

50 मिनु अन्काल दुम्चा डोंइती योसेफ आ मीश ओन सहर डा नाक्सो पोतीफेरा आ तमी आसेनाथमी तौ निक्शी थिमाकत।

51 मिनु योसेफमी “डोंइती श्येत जडानु, परमप्रभुमी आं आफ आ खिं डा मुर आन कली प्रेपाइक्ती” दे मिम्शा, आ डोंइती जरमेशो तौ कली मनस्से नें वोदा बाकत।

52 अर्को कली एफ्राइम नें वोदा बाकत। मारदे हना “परमप्रभुमी आं कली रागीमी श्येत जडानु, शुश दुम्पाइक्ती” दे मिम्ता बाकत।

53 मिनु इजीप्त रागीमी मेको रिम्शो अन्न ग्रेल्लो ७ बर्स नुम्माकत।

54 मिनु योसेफ आ देशो ७ बर्स डा अन्काल दुम्चा गोवा बाकत। मेको अन्काल रागी रागी नेल्लेमी दुम्माकत। इजीप्त रागीमी चहिं अन्न थिंसे बाकत।

55 मिनु इजीप्त रागीमी ठेयब अन्काल दुम्शा, मुरपुकीमी फाराओ कली “अन्न गेकी” दे पुन्मे बाकत। मिनु फाराओम इजीप्त डा मुर आन कली “योसेफ नु पुंइथ लने। मेकोमी मार देंबा, मेको पने” दे माइक्मी बाकत।

56 मिनु मेको अन्काल रागी रागी नेल्लेमी दुम्माकत। मेना योसेफमी अन्न वोइक्तीक नेल्ल रोक्चा गोवा बाकत। इजीप्त डा मुर आन कली अन्न लेयपदा बाकत। रागी नेल्लेमी ठेयब अन्काल दुम्माकत।

57 मिनु अर्को रागी डा मुरपुकी यो इजीप्त रागीमी अन्न ग्याप्थ, योसेफ आ डोंइती जाक्मा बाकत। मारदे हना मेको अन्कालम रागी नेल्ल ग्राइक्माकत।

1 मिनु याकूबमी इजीप्त रागीमी अन्न बाक्ब दे तुइश्शा, आ तौ आन कली “गे मारदे कोवमुशा बाक्नीनी? मारदे मपाइनीनी?

2 नेनीन, इजीप्त रागीमी अन्न बाक्ब। मिनु गोपुकी अन्कालमी मबेक्क, ब्रोंइय अन्न ग्याप्थ लने” देमाक्त।

3 मिनु योसेफ आ १० जना लोकबपुकी इजीप्त अन्न ग्याप्थ लमा बाक्त।

4 याकूबमी योसेफ आ लोकब बेन्यामीन कली चहिं श्येत दुम्बा कों, दे हिंशा, आ लोकबपुकी नु मसोइक्ता बाक्त।

5 मोपा याकूब आ तौपुकी अर्को मुर नु इजीप्त अन्न ग्याप्थ जाक्दीम्मा बाक्त। मारदे हना कनान रागीमी यो अन्काल दुम्माक्त।

6 मिनु योसेफ सरकार डा ठेयब मुर दुम्शा, रागी नेल्ल डा मुर आन कली अन्न लेयपदा बाक्त। योसेफ आ लोकबपुकी जाक्शा, योसेफ आ डोंइती खुम्की पा बाप्शा, सेउ पामे बाक्त।

7 मिनु योसेफमी आ लोकब आन कली तशा, तुइक्ता बाक्त। तन्न मतुइश्शो खोदेशो पा ठेयब सेदामी “ते रे जाक्नी?” दे हिल्लो पामी बाक्त। मिनु मेकोपुकीमी “गो कनान रागी रे अन्न ग्याप्थ जाक्तक” देमा बाक्त।

8 योसेफम आ लोकब आन कली तुइक्ता बाक्त। मेकोपुकीमी चहिं योसेफ कली मतुइक्ते बाक्त।

9 मिनु योसेफम आ लोकब आन परबम आ डोमु मिम्ता बाक्त। मिनु मेको आन कली “गे क्यारी पाइब बाक्नीनी। एको रागीम ते रे ओव्रचा, दे कोव्रथ जाक्तीनी” दे आ लोकब आन कली माइक्मी बाक्त। उत्पत्ती ३७:५-९

10 मिनु मेकोपुकीमी “ममाइ प्रभु, इन गेय पाइब अन्न ग्याप्थ जाक्तक।

11 गो नेल्ल मुऱु का आ तौ नकी। गोपुकी ठीक पाइब बाक्नीकी। इन गेय पाइब, गो क्यारी पाइब मनकी” देमा बाक्त।

12 मिनु योसेफमी “ममाइ, गे एको रागी ‘दोपा ओव्रचा’ दे कोव्रथ जाक्तीनी” देमाक्त।

13 मिनु मेकोपुकीमी “गो इन गेय पाइब १२ जना लोकब बाक्नीकी। कनान रागी डा मुर का आ तौ नकी। नेनीन, कान्छा मुल आ आफ नु बाक्ब। का चहिं मबाक्ब” दे योसेफ कली मदमे बाक्त।

14 मिनु योसेफमी “आ देशो खोदेशो पा, गे क्यारी पाइब बाक्नीनी।

15 गो इन कली कोव्रनुड, फाराओ आ नेमी इन लोकब कान्छा मजाक्क सम्म गे एकेरे रे लचा मताइनीनी।

16 इन दाते डा का कली इन लोकब कान्छा ब्रथ सोइक्तीन। मेना सम्म गे एक जेल्खानम बाक्नीनी। इन लोव्र थमा बाक्म कों, जोल बाक्म कों, नोले तुइसीब। गे इन लोकब कान्छा मचाक्तीनी हना, फाराओ आ नेमी गे क्यारी पाइब बाक्नीनी” देमाक्त।

17 मेको नेल्ल आन कली नाक्त सां सम्म जेल्खानम चोक्मी बाक्त। उत्पत्ती ३७:२४

18 मिनु नाक्त सां नोले योसेफमी “गो परमप्रभु कली मान पा हिंनुड। मोपतीके गोपुकी ब्रोंइचा कली आं देशो पने।

19 गे ठीक पाइब मुर बाक्तीनी हना, इन दाते डा का चहिं जेल्खानम बाक्कीने। अर्को अन्न कुरशा, इन खिं लने।

20 इन लोकब कान्छा कली एक चाक्कीन। मिनु इन लोव्र थमा बाक्ब, दे तुइसीब। मिनु गे बेक्चा ममाल्नीनी” दे आ लोकब आन कली माइक्मी बाक्त। मिनु आ देशो पामे बाक्त।

21 मेकोपुकीमी “गो थमा पा इं लोकब आ परबम ठेयब पाप पाइतय। मेकोमी इं कली तशा, शुश हिंशा, पुनानु यो, मेको आ लोव्र मनैय। मोपतीके इं कली एको श्येत दुम्त” देमुमा बाक्त। भजन संग्रह ५०:२१

22 मिनु रूबेनीमी “मेको आल कली मारैड पाप मपने, दे गो इन कली मदेंडा डा? तन्न गे आं लोव्र मनैनी। मेको कली श्येत गेशो हुश आ क्येक्क लेच्चा पुंइसाक्य” दे आ लोकब आन कली देमाक्त। उत्पत्ती ३७:२१-२२

23 मिनु योसेफमी मेको आन लोव्र नेल्ल रूप्तु, दे मतुइक्ते बाक्त। मारदे हना योसेफमी मेकोपुकी नु लोव्र पवानु, आन लोव्र रूप्ब नु आ कली आ अर्थ देंब मुर का वोदा बाक्त।

24 मिनु योसेफ आ लोकबपुकी रे लशा डाक्माक्त। मिनु लेशशा जाक्शा, मेकोपुकी नु लोव्र पशा, मेको आन डोंइती सिमियोन कली पाइक्ता बाक्त।

25 मिनु नोले योसेफमी आन धोक्रोम अन्न प्रिपाइश्शा, आन गेशो क्येट यो लेंशा, आन धोक्रोम कुर पपाइश्शा, लां कली जचा थोव्रक यो गेपाइक्मी बाक्त। आ लोकब आन कली मोदेशो पाइक्मी बाक्त।

26 मिनु मेकोपुकी अन्न आन गधा तारी वोइश्शा लमा बाक्त।

27 मिनु लांमी बास बाक्मानु, आन दाते डा कामी आ गधा कली थुल्चा, दे आ धोक्रो रोक्मा बाक्त। मिनु आ धोक्रो आ शोव्रमी आ थाप्शो क्येट थिदा बाक्त।

28 मिनु मेकोमी आ लोकब आन कली “आं क्येट लेत्मे देय मार में? आं धोक्रो आ शोव्रम बाक्त, शां” दे लोव्र पवा बाक्त। मिनु नेल्लेमी सुर्ता पशा “परमप्रभुमी इं कली मार पवा” दे हिंमा बाक्त।

29 मेकोपुकीमी आन आफ याकूब आ खिं कनान रागी जाक्दीश्शा, मार मार दुम्मे, नेल्ल शोव्रडमे बाक्त।

30 मेकोपुकीमी “मेको रागी डा ठेयब मुरुम आंइ कली ठेयब सेदामी लोव्र पशा, आंइ कली आन रागी क्यारी पाइब सुइक्तु।

31 गोपुकीमी “गो ठीक पाइब बाक्नीकी, गो क्यारी पाइब मनकी।

32 गो १२ लोकब, आफ का आ तौ नकी। का मुल मबाक्ब, कान्छा कनान रागीम आफ नु बाक्ब” दे माइक्तक।

33 मिनु मेको रागी डा ठेयब मुरुम आंइ कली “गो दोपा तुइक्नुडा, गे ठीक मुर बाक्नीनी, दे इन लोकब का गो नु बाक्चा माल्ब। अरु चहिं अन्कालम जचा कली अन्न कुरशा, खिं लेशशा लने। उत्पत्ती ४२:२४

34 मिनु इन लोकब कान्छा कली एक चाक्कीन। मेको नोले ला गेपुकी क्यारी पाइब मननी, दे तुइक्नुड। मेना इन लोकब कली प्रोंइशा, लचा गेनुड” दे माइक्तीकी” दे आन आफ कली देमा बाक्त।



35 मिनू नोले आन धोक्रो रोक्शा, नेल्लेमी आन थाप्शो क्येट आन धोक्रोमी थित्मे बाक्त। मिनू मेकोपुकी नु आन आफ मेको क्येट तशा, हिंमा बाक्त।

36 मिनू आन आफ याकूबमी “गे आं आल कली रोडक्व बाक्नीनी। योसेफ लत। सिमियोन लत। मुल बेन्यामीन लाइक्वा माल्नीनी। एको नेल्ल आं कली श्येत गेचा कली बाक्ब” दे आ तौ आन कली देंमाक्त।

37 मिनू रूबेनमी “गो बेन्यामीन ठीक पा मलेत्ताकड हना, आं तौ निक्शी आस कली सतीन” दे आ आफ कली मदा बाक्त।

38 मेकोमी “आं तौ गे नु लचा मगेनुड। आ लोकब बेक्त, आ का ला बाक्ब। मेको कली लामा मार मार दुम्मे चाप्ब। बेक्त हना, गेपुकीमी चां बोइशशो आं कली ठेयब श्येत जपाइशशा तुरसुम वोइक्वा माल्नीनी” दे याकूबम आ तौ आन कली माइक्मी बाक्त।

## 43

याकूब आ तौपुकी लेशा इजीप्त लशो

1 मिनू मेको रागीमी अन्काल बारना बारन लमाक्त।

2 मिनू आन इजीप्त रे चाक्शो अन्न नेल्ल नुप्शा, आन आफोमी मेको आन कली “लेशा इच्का जचा थोव्रक ग्याप्थ लने” दे माइक्मी बाक्त।

3 मिनू यहूदामी “मेको ठेयब मुरुमी ‘गे इन लोकब कान्छा मचाक्तीनी हना, आं कली गुम्थ मजाक्कीन’ दे आंइ कली हुइक्ताक्व। उत्पत्ती ४२:१५-३४

4 गे आंइ लोकब कान्छा कली गोपुकी नु सोइक्ताक्वी हना, ला लाइनीकी।

5 गे मेको कली गो नु मसोइक्ताक्वी हना, मलाइनीकी। मारदे हना मेको ठेयब मुरुमी ‘गे इन लोकब कान्छा मचाक्तीनी हना, आं कली गुम्थ मजाक्कीन’ दे आंइ कली हुइक्ताक्व” दे आ आफ कली देंमाक्त।

6 मिनू इस्राएलमी “मारदे मेको मुर कली ‘आंइ लोकब कान्छा बाक्ब’ दे शेंदीनी? मिनू आं कली ओदेशो मरिम्शो पाइय्नीनी” दे माइक्मी बाक्त।

7 मिनू मेकोपुकीमी “मेको ठेयब मुरुमी ‘इन आफ मुल सम्म ब्रोंइशो बाक्बा? अर्को लोकब यो बाक्बा?’ दे आंइ कली खिं डा मुर आन पर्वम शुश हिल्लो पाप्तु। मिनू गोपुकीमी मेकोन देंतक। ‘इन लोकब कान्छा चाक्कीन’ देंब, दे गो दोपा तुइक्कीनी?” दे आन आफ कली देंमा बाक्त। उत्पत्ती ४२:७-१३

8 मिनू यहूदामी “कान्छा गो नु सोइक्तीनी। गे गो नु इं आइक्च आल यो मबेक्मल, दे गो लाइनीकी।

9 गो एको आ जमानी दुम्नुड। गो लेशशा जाक्डानु, गो एको कली चाक्शा, इन डोंइती मवोइक्ता हना, गेना हना यो आं पाप लील।

10 गो एको कली रिम्शा मबाक्शो नकी हना, गो खेयप निक्शी लने पिने थुम्क वा” दे आ आफ कली देंमाक्त।

11 मिनू आन आफ इस्राएलमी “मुल मो दुम्चा माल्शो बाक्त हना, गे मेको ठेयब मुर कली इं रागी डा नेल्ल क्येडा रिम्शो फल, इच्का खेक्तीक तेल, इच्का खुदो, मस्लापुकी, ब्रोव्रशो रिना पाइब थोव्रक, फोरो नु देसी बदाम कोसेली लतीन। हितापदेस १८:१६

12 मिनू इन क्येट नु डोंइती डा इन धोक्रोम बाक्शो क्येट यो लतीन। प्रेशा मो दुम, कों? मार दुम्मे? उत्पत्ती ४२:२७, ३५

13 इन लोकब कान्छा लाइशशा, मेको ठेयब मुर कली लेशा गुम्थ लने।

14 नेल्ल क्येडा सक्ति पाइशशो परमप्रभुमी मेको मुर आ डोंइती इन कली शिशी गेवल। मिनू इन अर्को लोकब नु बेन्यामीन यो सोइक्तल। गो श्येत जचान माल्शो बाक्ती हना यो, श्येत जडल” दे आ तौ आन कली माइक्मी बाक्त।

15 मिनू आ तौपुकीमी मेको कोसेली, डोंइती डा क्येट, अर्को क्येट नु बेन्यामीन लाइशशा, इजीप्त रागी लशा, योसेफ आ डोंइती जाक्दीम्मा बाक्त।

16 मिनू योसेफमी मेकोपुकी नु बेन्यामीन कली तशा, आ खिं डा ठेयब गेय पाइब मुर कली “मेको मुर आन कली आं खिं लाइक्मी। बस्तु का क्योरशा, भोज ठीक पावो। मारदे हना मुलाक्ती मेकोपुकी गो नु जाइनीम” देंमाक्त।

17 मिनू मेको मुरुम योसेफ आ देंशो पशा, नेल्ल आन कली योसेफ आ खिं ओइदीमी बाक्त।

18 मेकोपुकी चिं हिंमा बाक्त, मारदे हना योसेफ आ खिं आगा ओइदीमी बाक्त। मिनू मेकोपुकीमी “मारदे हना इं डोंइती डा क्येट इं धोक्रोम थित्तय। मिनू इं कली वाइल सेल्चा नु इं गधा रोइक्वा कली इं कली एके ओइताक्मे” देंमुमा बाक्त। उत्पत्ती ४२:२८

19 मिनू योसेफ आ खिं डा ठेयब गेय पाइब आ नेक्था लशा, लाप्शो रे मेको नु लोव्र पामे बाक्त।

20 मिनू “हजुर, गोपुकी डोंइती खेयप का जचा थोव्रक ग्याप्थ जाक्तक।

21 मिनू गोपुकी बास बाक्तीके जाक्दीशशा, आंइ धोक्रो रोक्शा, कोव्रकानु, आंइ क्येट नेल्ल आंइ धोक्रो धोक्रोम थित्तक।

22 मुल गो लेशा चाक्तक। अर्को जचा थोव्रक ग्याप्चा कली यो क्येट चाक्तक। सुम आंइ क्येट आंइ धोक्रोम कुर पवा, गो मतुइक्कीनी” दे ठेयब गेय पाइब कली देंमा बाक्त।

23 मिनू मेकोमी “इन थुं नाइक्तीने, महिनीने। इन परमप्रभु, इन आफ आ परमप्रभुमी इन क्येट इन धोक्रोम कुर पवा माइ। गो इन क्येट ताक्ता” देंमाक्त। मिनू मेकोमी सिमियोन कली चाक्गा बाक्त। उत्पत्ती ४२:२४

24 मिनू मेको मुरुम मेको आन कली योसेफ आ खिं ओइशा, खोइल चिक्चा कली व्वाक्कु गेवा बाक्त। आन गधा आन कली थुला बाक्त।

- 25 मिनू नाक्ती दुम्चा चिक्तानु, मेको नु काथा जचा माल्ब देशो नेशा, आन कोसेली गेचा कली ठीक पामे बाक्त।
- 26 मिनू योसेफ जाक्मेनु, मेकोपुकीमी आन कोसेली लाडगा रे ओंइशा, मेको आ डोंइती वोइइशा, खुम्की पा बाप्शा खेत्मे बाक्त।
- 27 मिनू योसेफमी मेको आन कली “दोपा बाक्नी? इन आफ, इन देशो खाल्पा, रिम्शो बाक्मे? मुल सम्म ब्रोंइमे?” दे हिल्लो पामी बाक्त।
- 28 मिनू मेकोपुकीमी “इन गेय पाइब आंइ आफ मुल सम्म ब्रोंइशो नु रिम्शो बाक्ब” देशा, आन पिया खुक्शा, सेउ पामे बाक्त। उत्पत्ती ३७:७,९
- 29 मिनू योसेफमी आ लोकब बेन्यामीन, आ ममा आ तौ तशा “इन देशो इन लोकब कान्छा एकोन बाक्बा?” देशा, बेन्यामीन कली “परमप्रभुमी इ कली शिशी पवल, आं तौ” देमाक्त।
- 30 मिनू योसेफमी आ लोकब तशा, ग्येरसीशा डाक्चा कली ते लड, दे आ कोठा लशा डाक्माक्त।
- 31 मिनू आ कुल चिक्शा, लेम्माक्त। मिनू गेय पाइब आन कली “शोब्ले खेत्तीन” देमाक्त।
- 32 मिनू योसेफ, आ लोकब नु मेको नु जाइब इजीप्त डा मुर नेल्ल आन कली आन पेवा पेवा जचा थोव्रक खेत्मे बाक्त। मारदे हना इजीप्त डा मुर हिल्लू नु जचा मद्बुम्बाक्माक्त। इजीप्त डा मुरपुकी ग्रांशा दीबाक्मा बाक्त। उत्पत्ती ३९:६; उत्पत्ती ४६:३४; प्रस्थान ८:२२
- 33 मिनू योसेफमी आ लोकब आन कली डोंइती जरमेशो, माइला, साइला पा कान्छा सम्म गार पा निप्पदा बाक्त। मिनू मेकोपुकी छक लाक्मा बाक्त।
- 34 मिनू योसेफ आ डोंइती रे जचा ब्वचा थोव्रक लाइइशा, मेको आन कली खेप्पदा बाक्त। बेन्यामीन आ भाग अरु आन क्येडा ५ भाग खोइ शुश बाक्माक्त। मिनू मेकोपुकी योसेफ नु जशा तूशा, ग्येरशा बाक्मा बाक्त।

## 44

योसेफ नु आ लोकबपुकी

- 1 मिनू योसेफमी आ खिं डा ठेयब गेय पाइब कली “मेको मुर आन धोक्रो प्रिंपतो। गिश कुरने चाप्नीमी, मिश प्रिंपतो। मिनू आन क्येट अन्न आ शोव्रम वोतो।
- 2 मिनू आं चांदी के कचौरा, आ क्येट नु मेको नेल्ल क्येडा टिटा आ धोक्रो आ शोव्रम वोतो” दे मदा बाक्त। मिनू मेकोमी योसेफ आ देशो खोदेशो पा पवा बाक्त।
- 3 मिनू सुनी कना रिम्शो पा नां मसोव्रथु, मेको मुर नु आन गधा आन कली लचा गेमे बाक्त।
- 4 मिनू सहर रे लमानु, योसेफम आ ठेयब गेय पाइब कली “बोक्को, मेको आन नोले खोतो। मिनू मेको आन कली थिरशा ‘मारदे गे रिम्शो पाइब कली मरिम्शो पनी?’
- 5 मारदे आं प्रभु आ मार मार तूतीक नु लिंक्यु कोव्रतीक चांदी के कचौरा खुइ पनी? गे मरिम्शो पाइतीनी’ दे माइक्मी” दे मदा बाक्त।
- 6 मिनू मेको आन कली थिरशा, मोदेशो लोव्र पवा बाक्त।
- 7 मिनू मेकोपुकीमी “आंइ प्रभुम मारदे मोदेशो लोव्र पाइबा? गो मो मपक।
- 8 नेनीन, आंइ धोक्रोमी थिरशा क्येट कनान रागी रे लेशा चाक्तक। गो दोपा इन प्रभु आ खिं रे सुन चांदी खुइ पाइनीकी? उत्पत्ती ४३:२१
- 9 गो इन गेय पाइब सु नु मेको कचौरा बाक्मे, मेको बेक्ल। मिनू गोपुकी यो इन वाइल दुम्कल” दे मदमे बाक्त।
- 10 मिनू मेकोमी “इन देशो खोदेशो दुम्ल। सु आ धोक्रोम थिंसीबा, मेको आं वाइल दुम्ब। अरु मो लाइनीनी” देमाक्त।
- 11 मिनू नोले मेकोपुकीमी रीब रीब पा आन धोक्रो गधा रे शोल्शा, रोकशा कोव्रडमे बाक्त।
- 12 मिनू मेकोमी डोंइती जरमेशो आ धोक्रोमी, नोले नेल्ल आन धोक्रोमी का का पा माल्शा, कान्छा ला लीमाक्त। मिनू कचौरा बेन्यामीन आ धोक्रोमी थिदा बाक्त।
- 13 मिनू मेकोपुकीमी आन वा खाक्शा, आन अन्न लेशा गधा तार वोइइशा, सहर लेम्मा बाक्त।
- 14 मिनू यहूदा नु आ लोकबपुकी योसेफ आ खिं जाक्मानु, योसेफ मेक उइ बाक्माक्त। मेको आ डोंइती खुम्की पा बाम्मा बाक्त।
- 15 योसेफम मेको आन कली “गे मार पनी? आं खोदेशो मुरुम नेल्ल तुइक्ब, दे मतुइक्तीनी?” दे मेको आन कली हुइक्ता बाक्त।
- 16 मिनू यहूदामी “आंइ प्रभु कली मार देनीकी? मार लोव्र पाइनीकी? गोपुकी ‘ठीक मुर बाक्नीकी’ दे दोपा देने चाप्नीकी? परमप्रभुमी इन गेय पाइब आन मरिम्शो कोंइताक्व। नेनीन, गोपुकी नु कचौरा धोक्रोम बाक्ब, गो नेल्ल आंइ प्रभु इन वाइल दुम्तक” देमाक्त। उत्पत्ती ४२:२१-२२
- 17 मिनू योसेफमी “ममाइ, मेको मपाइनुइ। तन्न सु मुर नु आं कचौरा बाक्मे, मेको ला आं वाइल दुम्चा माल्ब। गोपुकी चहिं थुं नाइइशा, इन आफ आ बाक्तीक लने” देमाक्त।
- 18 मिनू यहूदा मेको आ नेक्था लशा “आं प्रभु, लोव्र का पचा गेयीनी। इन गेय पाइब आ परबम मगाइक्तीने। गे फाराओ खोदेशो बाक्नीनी।
- 19 आं प्रभुमी डोंइती आ गेय पाइब आन कली ‘इन के आफ बाक्बा? अर्को लोकब यो बाक्बा?’ दे हिल्लो पाइतीनी। उत्पत्ती ४२:७,१३; उत्पत्ती ४३:७

20 मिनू गोपुकीमी आंड प्रभु कली 'आंड के आफ खाल्पा दुम्शो बाक्ब। मिनू खाल्पाम थिशो तौ का यो बाक्ब। मेको आ लोकब चहिं बेक्त। मेको लीशो आ ममा आ का ला तौ बाक्ब। मिनू आ आफोमी मेको कली शुश दाक्ब' दे इन कली देंतक।

21 मिनू गेमी 'आं कली कोंडचा कली मेको एक चाक्कीन' देंतीनी।

22 गोपुकीमी आंड प्रभु कली 'मेको वोंडश आलमी आ आफ कली प्रोंडने मचाप्ब। प्रोंडतु हना, आ आफ बेक्ब' देंतक।

23 मिनू गेमी इन गेय पाइब आन कली 'इन लोकब कान्छा मचाक्तीनी हना, गे आं कली गुम्थ मपिने' देंतीनी। उत्पत्ती ४२:१५; उत्पत्ती ४३:३-५

24 गोपुकी आंड आफ इन गेय पाइब आ बाक्तीके जाक्दीशशा, इन लोत्र नेल्ल माइक्तक।

25 आंड आफोमी 'लेंशा जचा थोव्वक ग्याप्य लने' देंत।

26 मिनू गोपुकीमी 'आंड लोकब कान्छा मलाइक्तक हना, गो लने मचाप्नीकी। मारदे हना आंड कान्छा भाइ गोपुकी नु मलत हना, गुन्चा मदुम्ब' देंतक।

27 मिनू इन गेय पाइब आंड आफोम आंड कली 'आं मीशेम तौ निक्शी थिप्टु, गे तुडक्नीनी।

28 का आं बाक्तीक रे लत। जन्तुमी मेको कली ब्वाम्तेकमे। गो मेको कली लेंशा मतड। उत्पत्ती ३७:३२-३३

29 मिनू गे एको कली यो लाइक्तीनी हना, लाम बेक्बा कों, बेक्त हना, गे आं बोइशशो चां श्येतम प्रिशा, तुरसुम वोइक्चा माल्नीनी' दे लोत्र पाप्टु। उत्पत्ती ४२:३८

30 मिनू गो इन गेय पाइब आंड आफ आ बाक्तीक जाक्दीकानु, एको वोंडश आल, आ आफ आ थुं नेल्लेमी दाक्ब। मोपतीके गोपुकी नु मबाक्त हना,

31 मेको तशा, आ आफ बेक्ब। मिनू गोपुकीमी आंड आफ, चां बोइशशो इन गेय पाइब कली सुर्ता पपाइशशा, श्येत जपाइशशा तुरसुम वोइक्चा माल्नीकी।

32 गो मेको आ जमानी बाक्शो बाक्नुड। गो आफ कली 'मेको आल मचाक्ता हना, आं मरिम्शो पशो गेना हना यो आं तारी लील' देंती। उत्पत्ती ४३:९

33 मोपतीके एको वोंडश आल ममाइ, आं प्रभु, आं कली इन वाइल वोतीन। एको वोंडश आल आ लोकबपुकी नु लचा गेने।

34 गो आं आफ आ डोंडती एको वोंडश आल मलाइक्थु, दोपा लने चाप्नुडा? आं आफ आ श्येत तशा, गो यो फाल्ने मचाप्नुड" दे यहूदामी योसेफ कली देंमाक्त।

## 45

योसेफमी तुइक्पांडसीशो

1 मिनू नोले योसेफमी आ मुर नेल्ल आन डोंडती फाल्ने मचबा बाक्त। मिनू "आं गेय पाइब नेल्ल एकेर रे लने" दे सोइक्पदा बाक्त। मिनू योसेफमी आंम कली आ लोकब आन कली तुइक्पदानु, कोठामी सुइ मबाक्शो बाक्मा बाक्त।

2 मिनू टेयब सेंदामी डाक्मेनु, फाराओ आ खिंम बाक्ब इजीप्ट डा मुर नेल्लेम नेन्मे बाक्त।

3 मिनू योसेफमी आ लोकब आन कली "गो योसेफ नड। आं आफ मुल सम्म ब्रोंडमे?" देंमाक्त। आ लोकबपुकीमी लोत्र लेन्ने मचाप्मे बाक्त। मारदे हना शुश हिंमा बाक्त।

4 मिनू योसेफमी आ लोकब आन कली "आं नेक्था पिने" देंमाक्त। मिनू मेकोपुकी आ नेक्था जाक्मा बाक्त। मिनू योसेफमी "गो इन इजीप्ट रागीम लेयशो लोकब योसेफ नड।

5 गो आं कली लेयशो आ पबंम सुर्ता मपने। आंम कली दोस मगेने। मारदे हना परमप्रभुमी आं कली नेल्ल ब्रोंडमल, दे इन डोंडती सोइशशो बाक्त। उत्पत्ती ५०:२०

6 एको अन्काल मुल बर्स निक्शी दुम्त। मिनू मुल ५ बर्स सम्म तेइ वाक्शो नु रिक्शो मतांइसीब।

7 परमप्रभुमी आं कली गोपुकी ब्रोंडनील। रागीम जात का लीनील। इन पबंम शुश ब्रोंडमल, दे इन क्येडा डोंडती एक सोइक्ताक्यी। एको टेयब श्येत रे प्रोंडतीके बाक्ब।

8 मोपतीके गोपुकीमी आं कली एक सोइशशो ममाइ, परमप्रभुमी सोइशशो बाक्त। मेकोमी आं कली फाराओ आ आफ खोदेशो सेल्शा, आ खिं डा होव्रप नु इजीप्ट रागी नेल्ल डा हुकुम पाइब सेलती।

9 गोपुकी मुल रीब पा इ आफ आ बाक्तीके लने। मिनू मेको कली 'परमप्रभुमी इन तौ योसेफ कली इजीप्ट रागी नेल्ल डा टेयब मुर सेला बाक्त। एक यिचा मरिम्दीन।

10 आं नेक्था बाक्चा कली गे, इन आल, इन चच, इन क्यारश भेडा, बी ब्यफ नु मारेइ मारेइ नेल्ल चाक्शा, गोशेन माइक्तीकेमी जाक्चा माल्नीनी।

11 आं नेक्था बाक्कीन। गो इन कली थुल्लुड। मारदे हना अन्काल मुल ५ बर्स सम्म दुम्ब। गे मयीतीनी हना, गे, इन खिं डा मुर नु गोपुकी नु बाक्ब नेल्ल शुश पुडग दुम्नीनी' देंत, दे इ आफ कली माइक्चा माल्नीनी।

12 मिनू गोपुकी नु आं लोकब बेन्यामीनम तशो 'गो योसेफ नड। गो इन कली लोत्र पाता' दे तुडक्नीनी।

13 गो इजीप्ट रागीमी गिंश रिम्शो बाक्डा, इन तशो नेल्ल, गोपुकीमी इ आफ कली देंचा माल्नीनी। रीब पा इ आफ कली एक चाक्कीन" दे आ लोकब आन कली माइक्मी बाक्त।

14 मिनू आ लोकब बेन्यामीन कली मुप्शा डाक्माक्त। मिनू बेन्यामीन यो डाक्माक्त।

15 मिनू नोले आ लोकब नेल्ल आन कली मुप्शा, पुक्पु पाइशशा डाक्माक्त। मिनू नोले आ लोकबपुकीमी लोत्र पचा गोव्रमे बाक्त।

- 16 मिनु “योसेफ आ लोकबपुकी जाक्तेकम” देशो लोत्र फाराओ आ खिंम यो जाक्दीम्माक्त। मिनु फाराओ नु आ गेय पाइब नेल्ल ग्येरसमा बाक्त।
- 17 मिनु फाराओमी योसेफ कली “गेमी इन लोकब आन कली ‘इन गधापुकीमी अन्न कुरपाइशशा, कनान रागी लने।
- 18 मिनु इन आफ नु इन खिं डा मुर नेल्ल आं नेक्था जाक्कीन। गो इजीप्त रागी डा नेल्ल क्येडा रिमशो रू इन कली गेनुड। मिनु गे रागी डा नेल्ल क्येडा ब्रोव्रशो जचा ताइनीनी’ दे माइक्चा मालनीनी।
- 19 इन कली अरेशो एकोन बाक्ब। इन आइक्च आल नु इन मीश आन कली डोइक्चा कली इजीप्त रागी रे बग्गीपुकी लतीन। इन आफ चाक्कीन।
- 20 ‘इन मारेइ मारेइ ममिम्तीन। मारदे हना इजीप्त डा रिमशो नेल्ल इन के बाक्ब’ दे माइक्मी” दे योसेफ कली मदा बाक्त।
- 21 मिनु इस्राएल आ तौपुकीमी योसेफ आ देशो पामे बाक्त। मिनु फाराओम मार देमे मेको पा, योसेफमी मेको आन कली बग्गी नु लां कली लाम्जी गेवा बाक्त।
- 22 मेको आन कली जोड का का फेक्तीक नक वा गेवा बाक्त। बेन्यामीन कली चहिं सहे सां चांदी के शेकेल नु ५ जोड फेक्तीक वा गेवा बाक्त।
- 23 मिनु आ आफ कली १० ओटा गधैनीमी इजीप्त रागी डा नेल्ल क्येडा ब्रोव्रशो जचा थोव्रक नु लामं जचा कली १० ओटा गधाम अन्न, शोब्ले नु श्ये कुर पा सोइक्ता बाक्त।
- 24 मिनु लचा डोंइती मेको आन कली “लामी मजिने” दे अरेवा बाक्त। उत्पत्ती ४२:२२
- 25 मिनु मेकोपुकी इजीप्त रागी रे पा कनान रागी आन आफ याकूब आ बाक्तीके जाक्दीम्मा बाक्त।
- 26 मिनु आन आफ कली “योसेफ मुल यो ब्रोइशो बाक्त। इजीप्त रागीम हुकुम पाइब मेको बाक्माक्त” दे लोत्र पामे बाक्त। याकूबम चहिं आन देशो थमा मसुदा बाक्त।
- 27 मिनु मेकोपुकीमी योसेफ आ लोत्र नेल्ल शोव्रडमे बाक्त। मिनु याकूबम आ कली डोइक्चा, दे योसेफमी सोइशशो बग्गी तशा, आ थुं लेत्ता बाक्त।
- 28 मिनु इस्राएलमी “आं तौ योसेफ ब्रोइशो थमा बाक्ब। आं बेक्चा क्येडा डोंइती मेको आ कुल कोव्रनुड” देमाक्त। उत्पत्ती ४६:३०

## 46

याकूब इजीप्त लशो

- 1 मिनु इस्राएल नु आ खिं डा मुर नेल्ल इजीप्त गे लमा बाक्त। मिनु बेयर-शेबा जाक्दीरशा, आ आफ इसहाक आ परमप्रभु कली चढेवा बाक्त। उत्पत्ती २६:२३-२५
- 2 मिनु मेको नाक्दो परमप्रभुमी इस्राएल कली “याकूब, याकूब” देमाक्त। मिनु इस्राएलमी “गो नेता” दे लोत्र लेत्ता बाक्त।
- 3 मिनु परमप्रभुमी “गो परमप्रभु, इ आफ आ परमप्रभु नड। इजीप्त लचा महिनो। मारदे हना गे उइ बाक्डेनु, इ रे पा ठेयब जात सेल्लुड। उत्पत्ती ४७:२७; प्रस्थान १:७
- 4 गो गे नु इजीप्त रागी लाइनुड। मिनु इ कली थमा पा लेप्पाइक्नुड। बेक्शा नोले योसेफमी इ मिक्च खेप्ब” दे परमप्रभुमी देमाक्त।
- 5 मिनु याकूब बेयर-शेबा रे लमाक्त। मिनु इस्राएल आ तौपुकीमी आन आफ, आन आइक्च आल नु आन मीश फाराओमी सोइशशो बग्गीम डोइक्पदमे बाक्त।
- 6 मिनु आन बस्तु भाव, कनान रागीम आन चाक्शो मारेइ मारेइ नु याकूब नु आ मुर नेल्ल इजीप्त रागी जाक्दीम्मा बाक्त।
- 7 याकूबमी आ तौपुकी नु मेको आन तौपुकी, आ तमीपुकी नु आ तौ आन तमीपुकी नु चच युइ नेल्ल इजीप्त रागी चाक्दीम्मी बाक्त।
- याकूब आ तौ नु चच युइ
- 8 मिनु इजीप्त रागीम जाक्दीरशो इस्राएल आ आल आन नें एको बाक्नीमी। आ डोंइती जरमेशो तौ रूबेन बाक्माक्त। प्रस्थान ६:१४-१६
- 9 रूबेन आ तौपुकी हनोक, फल्लु, हेस्रोन नु कारमी बाक्मा बाक्त।
- 10 सिमियोन आ तौपुकी येमुएल, यामीन, ओहद, याकीन नु सोहार, कनान डा मीश रे जरमेशो शावल, नेल्ल सिमियोन आ तौ बाक्मा बाक्त।
- 11 लेवी आ तौपुकी गेरशोन, कोहाथ नु मेरारी बाक्मा बाक्त।
- 12 यहूदा आ तौपुकी एर, ओनान, शेलाह, पेरस नु जेराह बाक्मा बाक्त। एर नु ओनान चहिं कनान रागीम बेक्सा बाक्त। पेरस आ तौ हेस्रोन नु हामुल बाक्सा बाक्त। उत्पत्ती ३८:३,४,२९,३०
- 13 इस्राएल आ तौपुकी तोला, पुवा याशुब नु शिम्रोन बाक्मा बाक्त।
- 14 जबूलन आ तौपुकी सेरेद, एलोन नु याहलेल बाक्मा बाक्त।
- 15 मेको नेल्ल लेआमी याकूब के पदान-अराममी थिशो तौ बाक्मा बाक्त। आ तमी दीना यो बाक्माक्त। याकूब नु आ तमी तौ नेल्ल पा ३३ जना बाक्मा बाक्त।
- 16 मिनु गद आ तौपुकी सिफ्योन, हाग्गी, शुनी, एस्बोन, एरी, अरोदी नु अरेली बाक्मा बाक्त।

17 आशेर आ तौपुकी इम्नाह, इश्वाह, इश्वी, बेरीआ नु आ तमी सेराह बाक्मा बाक्त। मिनु बेरीआ आ तौ निकशी हेबेर नु माल्कीएल बाक्सा बाक्त।

18 मिनु लाबान आ तमी लेआ कली गेशो गेय पाइब जिल्लपाम याकूब के थिशो तौपुकी बाक्मा बाक्त। मेको १६ जना बाक्मा बाक्त। उत्पत्ती २९:२४

19 मिनु याकूब आ मीश राहेल आ तौ योसेफ नु बेन्यामीन बाक्सा बाक्त।

20 योसेफमी इजीप्त रागीमी मनस्से नु एफ्राइम थिमाक्त। आ मीश ओन सहर डा नाक्सो पोतीफेरा आ तमी आसेनाथ बाक्माक्त।

21 बेन्यामीन आ तौपुकी बेला, बेकेर, अशबेल, गेरा, नामान, एही, रोश, मुप्पीम, हुप्पीम नु आरद बाक्मा बाक्त।

22 मेको नेल्ल राहेल आ थिशो तौ बाक्मा बाक्त। मेको नेल्ल पा १४ जना बाक्मा बाक्त।

23 दान आ तौ हुशीम बाक्माक्त।

24 नाप्ताली आ तौपुकी याहसेल, गुनी, येसेर नु शिल्लेम बाक्मा बाक्त।

25 मेको लाबानमी आ तमी राहेल कली गेशो गेय पाइब बिल्हाहम याकूब के थिशो तौ बाक्मा बाक्त। मेको नेल्ल ७ जना बाक्मा बाक्त। उत्पत्ती २९:२९

26 मिनु याकूब आ चाइमीपुकी महिक्थु, याकूब नु इजीप्त रागी जाक्शो मुर नेल्ल पा ६६ जना बाक्मा बाक्त।

27 इजीप्त रागीमी योसेफमी तौ निकशी थिमाक्त। मोपा इजीप्त रागीमी जाक्शो याकूब आ खिं डा मुर ७० जना बाक्मा बाक्त। याकूब नु योसेफ नु आ तौ निकशी यो हिक्शो बाक्मा बाक्त।

याकूब नु योसेफ ग्रुम्शो

28 मिनु याकूबमी यहूदा कली गोशेन लां शेंसीचा नु योसेफ ग्रुम्चा, दे आन डोंइती ग्रुम्थ सोइक्ता बाक्त। मिनु मेकोपुकी गोशेन माइक्तीके जाक्दीम्मानु, उत्पत्ती ४५:१०

29 योसेफ आंम बग्गी ठीक पा आ आफ इस्त्राएल कली गोशेनम ग्रुम्थ जाक्माक्त। मिनु मेको कली ग्रुम्शा, मुप्शा शुश डाक्सा बाक्त।

30 मिनु इस्त्राएलमी योसेफ कली “मुल गो बेक्ने चाप्नुड। मारदे हना गे ब्रोंइशो बाक्ते, गो इ कुल कोव्रचा ताता” दे आ तौ कली देमाक्त। उत्पत्ती ४५:२८

31 मिनु योसेफम आ लोकब नु आ आफ आ खिं डा मुर आन कली “गो फाराओ आ बाक्तीके लाइनुड। मिनु मेको कली ‘कनान रागीम बाक्शो आं आफ, आं लोकबपुकी नु आं आफ आ खिं डा मुर नेल्ल जाक्तेक्म।

32 मेकोपुकी भेडा गोठला नु बस्तु भाव थुल्ब बाक्नीम। मेको आन क्यारश भेडा, बी ब्यफ नु आन मारेइ मारेइ चाक्शो बाक्तेक्मे’ देनुड।

33 मिनु फाराओम इन कली ब्रेत्ताक्व हना, मिनु इन कली इन गेय आ पर्बम हिल्लो पाप्तु हना,

34 गेपुकीमी ‘इन गेय पाइब आन आल रेन मुल सम्म बस्तु भाव थुल्ब बाक्नीम। आंइ किकी पिपी यो मोदेशो गेय पशो बाक्मा बाक्त’ देंचा माल्नीनी। नोले मेकोमी इन कली गोशेनमी बाक्तीके गेब। मारदे हना इजीप्त डा मुर गोठला आन कली तशा ग्रान्रा दीनीम” दे योसेफमी आ लोकब आन कली देमाक्त। उत्पत्ती ४३:३२

## 47

याकूब फाराओ आ डोंइती

1 मिनु नोले योसेफमी फाराओ कली “आं आफ, आं लोकबपुकी, आन क्यारश भेडा, बी ब्यफ, आन मारेइ मारेइ नेल्ल कनान रागी रे चाक्शा, गोशेनमी जाक्शो बाक्नीमी” दे शेंदा बाक्त।

2 मिनु आ लोकब आन दाते रे ५ जना योव्रशा, फाराओ आ डोंइती राप्पदा बाक्त।

3 मिनु फाराओमी मेको आन कली “इन गेय मार बाक्बा?” दे हिल्लो पवा बाक्त। मिनु मेकोपुकीमी “गो, इन गेय पाइबपुकी, भेडा गोठला बाक्नीकी। गो आंइ किकी पिपी रे गोठला बाक्तक” दे फाराओ कली देमा बाक्त। उत्पत्ती ४६:३३-३४

4 मिनु लेंशा “कनान रागीमी ठेयब अन्काल दुम्तीके, गो अर्को रागी डा मुर दुम्शा, एक बाक्थ जाक्तक। मारदे हना आंइ क्यारश भेडा आन कली जोतीके मबा। मोपतीके आंइ कली गोशेन माइक्तीकेमी बाक्चा गेने, दे पुंइनीकी” दे पुंइदमे बाक्त।

5 मिनु फाराओम योसेफ कली “इ आफ नु इ लोकबपुकी इ बाक्तीक रागी जाक्तेक्मे।

6 इजीप्त रागी इ रागी खोदेशो मिम्तो। नेल्ल क्येडा रिम्शो जोतीके गोशेनमी मेको आन कली बाक्पतो। मिनु मेको इ मुर आन दातेमी रिम्शो गेय पाइब बाक्तेक्म हना, आं बस्तु भाव आन कली यो कोव्रपतो” दे मदा बाक्त।

7 मिनु नोले योसेफमी आ आफ कली फाराओ आ डोंइती राप्पदा बाक्त। मिनु याकूबमी फाराओ कली आसीक गेवा बाक्त।

8 मिनु फाराओमी “गिश बर्स दुम्ती?” दे हिल्लो पवा बाक्त।

9 मिनु याकूबमी “गो मुल सम्म रागीम बाक्शो, सहे का ३० बर्स दुम्ती। आं किकी पिपी खोदेशो पा शुश बर्स मदुम्ड। गो मरिम्शो नाक्त यो ताता” देमाक्त। हिब्रू ११:१३

10 मिनु आसीक गेशा, फाराओ रे लमाक्त।

11 मिनु योसेफमी फाराओ आ देशो खोदेशो पा आ आफ नु आ लोकब आन कली इजीप्त रागीमी रू गेवा बाक्त। रागी डा नेल्ल क्येडा रिम्शो बाक्तीके रामेसेस आ रागी गोशेनमी बाक्पाइक्मी बाक्त।

12 मिनू योसेफम आ आफ, आ लोक्ब नु आ आफ आ खिं डा मुर नेल्ल आन कली आन खिं खिं कली गाप्चा डा पा जचा थोत्रक गेशा थुल्मी बाक्त। उत्पत्ती ४५:११

इजीप्त डा मुरपुकी पुडग दुम्शो

13 रागी नेल्लेमी जचा थोत्रक मथिदमे बाक्त। मारदे हना मेको अन्काल बारना बारन लमाक्त। मिनू इजीप्त नु कनान रागी डा मुर शुश श्येत जामे बाक्त।

14 मिनू योसेफमी इजीप्त नु कनान रागी डा अन्न ग्याप्थ जाक्ब आन गुड रे क्येट ताक्शा, फाराओ आ खिंमी वोदा बाक्त।

15 मिनू इजीप्त नु कनान डा मुर आन क्येट नुप्शा, योसेफ आ बाक्तीकेमी जाक्शा, मेकोपुकीमी “जचा थोत्रक गेकी। आंड के क्येट नुप्त। गे जचा थोत्रक मगेतीनी हना, गो इन डोंइती बेक्चा माल्नीकी” दे मदमे बाक्त।

16 मिनू योसेफमी “इन के क्येट मबाक्त हना, इन बस्तु भाव चाक्कीन। मेको रे पा जचा थोत्रक ताइनीनी” देमाक्त।

17 मिनू आन बस्तु भाव योसेफ आ बाक्तीके चाक्मे बाक्त। मिनू योसेफमी शारापुकी, क्यारश भेडा, बी ब्यफ, गधा ताक्शा, जचा थोत्रक गेमी बाक्त। मेको बर्समी मेको आन कली आन बस्तु भाव आन पा डा अन्न गेवा बाक्त।

18 मिनू मेको बर्स नुप्शा डा मिन, अर्को बर्स लेंशा जाक्शा योसेफ कली मेकोपुकीमी “गो आंड प्रभु आ डोंइती आंड क्येट नुप्त, आंड क्यारश भेडा, बी ब्यफ नेल्ल आंड प्रभु केन दुम्तेकम। मुल आंड के रूपुकी नु आंम रां ला लीब।

19 मारदे गो इन डोंइती बेक्नीकी? आंड कली नु आंड रू कली यो अन्न गेशा ग्यापीन। गोपुकी फाराओ आ वाइलीम वाइल दुम्नीकी। गोपुकी ब्रोंइचा नु आंड रागीम मुरपुकी लीचा कली वांचेर गेने” देमा बाक्त।

20 मिनू योसेफमी इजीप्त रागी नेल्ल फाराओ कली ग्यबा बाक्त। मारदे हना ठेयब अन्काल आ पर्वम इजीप्त डा मुरपुकीमी आन रू नेल्ल लेयडमे बाक्त। मिनू रू नेल्ल फाराओ के दुम्माक्त।

21 मुर नेल्ल आन कली वाइलीम वाइल सेल्शा, आन बाक्तीक रे याक्शा वोदा बाक्त।

22 नाक्सो आ रू चहिं मग्यबा बाक्त। मारदे हना आन जचा फाराओ आ गुड रे तामे बाक्त। मोपतीके आन रू यो लेयचा ममाल्मा बाक्त। गन्ती १८:२०; यहोसु १३:१४; इजीकीएल ४४:२८; इजीकीएल ४५:१-५

23 मिनू योसेफम मुर आन कली “नेनीन, मुलाक्ती रे गेपुकी नु इन रू नेल्ल फाराओ के दुम्त। गो ग्याप्ता। एको वांचेर लाइशशा, शोक्कीन।

24 मिनू रिक्ची ना ५ भाग डा भाग १ फाराओ कली गेचा माल्नीनी। अर्को ४ भाग वांचेर कली नु इन कली, इन खिं डा मुर नु आइक्च आल नेल्ल आन कली थुल्चा कली लीब” दे माइक्मी बाक्त। एफाह का २२ लिटर खोदेशो बाक्ब।

25 मिनू मेकोपुकीमी “गे आंड कली बेक्चा रे प्रोंइतीनी। गे आंड कली थम रिम्शो पाइतीनी। गो फाराओ आ वाइल बाक्नीकी” देमा बाक्त।

26 मिनू योसेफमी इजीप्त रागी डा ऐन कानुनमी “फाराओ कली ५ भाग डा भाग का गेचा माल्नीम। नाक्सोपुकीमी चहिं गेचा ममाल्नीम। मारदे हना आन रू फाराओ के मदुम” दे ब्रेक्पदा बाक्त। मेको मुल सम्म मोदेशो बाक्ब।

27 मिनू इस्राएल इजीप्त रागी डा गोशेनमी बाक्मेनु, आन मारेड मारेड नु मुरपुकी सोशा बोशा, शुश दुम्मा बाक्त। उत्पत्ती ४६:३; प्रस्थान १:७,१२

28 याक्ब इजीप्त रागीमी १७ बर्स ब्रोंइमाक्त। मेको आ ब्रोंइतीक नेल्ल पा सहे का ४७ बर्स बाक्माक्त।

29 मिनू आ बेक्ची जाक्माक्त। मिनू आ तौ योसेफ कली ब्रेशशा “गे आं कली शिशी पाप्तीवी हना, इ गुड आं फिला तार वोइशशा, जोल मपथु, आं कली रिम्शो पावो। आं कली इजीप्त रागीम मथिम्थी, दे पुंडनुड। उत्पत्ती ५०:५

30 गो बेक्शा, आं कली इजीप्त रागी रे कुरशा, आं कली आं किकी पिपी आन तुरसुम थिम्थी” दे पुंडदा बाक्त। मिनू योसेफमी “इन देशो पाइनुड” देमाक्त। उत्पत्ती २३:२०

31 मिनू मेकोमी “कसम जावो” दे मदा बाक्त। मिनू योसेफमी कसम जवा बाक्त। मिनू इस्राएल ब्राख्येम बाक्शा, खुम्की पांडसे बाक्त। हिब्रू ११:२१

## 48

याक्ब, एफ्राइम नु मनस्से

1 मिनू नोले मुर कामी योसेफ कली “इन आफ रोड पाप्तु” दे शेंदा बाक्त। मिनू योसेफमी मनस्से नु एफ्राइम आ तौ निक्शी लाइशशा, युम्थ लमाक्त।

2 मिनू मुर कामी याक्ब कली “नेनीन, इन तौ योसेफ इन कली युम्थ जाक्त” दे नेंपदा बाक्त। मिनू इस्राएल बोल पा बोक्शा, आ ब्राख्येम निस्से बाक्त।

3 मिनू याक्बमी योसेफ कली “नेल्ल सक्ति पाइशशो परमप्रभुमी कनान रागी डा लूज सहरम यूशा, आं कली आसीक गेती। उत्पत्ती २८:१७-१९

4 मेकोमी आं कली ‘नेनीन, गो इन कली सोशा बोशा, शुश सेल्लुड। गो इ रे शुश थर डा मुर सेल्लुड। इ कली नु इ चच युड आन कली मेको रागी गेना हना यो इन केन बाक्ब, दे गेनुड’ देत। उत्पत्ती ३५:११-१२

5 आं जाक्चा डोंइती, इजीप्त रागीम जरमेशो एफ्राइम नु मनस्से, इ तौ निक्शी आं मुर दुम्चा माल्नीस। रूबेन नु सिमियोन खोदेशो पा आं केन दुम्चा माल्नीस। उत्पत्ती ४१:५०-५२

6 इ नोले थिशो आल चहिं इ के दुम्मल। मिनू आन लोक्ब आन जात डा नें वोइशशो, इजीप्त रागीम अडस ताइब दुम्मल।

7 गो पदान रे गाक्डानु, कनान रागी डा एफ्राथ आ डोंइती राहेल बेक्त। मिनु गो मेको कली एफ्राथ माइशो बेथलेहेम सहर लतीक लांमी थिम्ता” देमाक्त। उत्पत्ती ३५:१९

8 मिनु इस्राएलमी योसेफ आ तो निकशी आस कली तशा “मेको निकशी सु नसी?” दे हिल्लो पवा बाक्त।

9 मिनु योसेफमी आ आफ कली “परमप्रभुमी आं कली गेशो तौ बाकनीसी” देमाक्त। मिनु याकूबमी “मेको आस कली एक चाक्सी। मिनु गो मेको आस कली आसीक गेनुड” दे मदा बाक्त।

10 इस्राएल खाल्पा दुग्शा, आ मिक्च रिग्शो मताइब दुग्शो बाक्माक्त। मोपतीके मेको आस कली मतुइक्ता बाक्त। मिनु योसेफमी मेको आस नेक्था चाक्दीस्सी बाक्त। मिनु इस्राएलमी मेको आस कली पुक्पु पाइशशा, मुबा बाक्त।

11 मिनु योसेफ कली “गो इ कुल ताइनुड दे ममिग्शो नड। तन्न परमप्रभुमी आं कली इ आल आन कली यो कोंइताकयी” देमाक्त। उत्पत्ती ३७:३३-३५; उत्पत्ती ४५:२६; भजन संग्रह १२८:६

12 मिनु योसेफम मेको आस कली आ आफ आ थुकु रे याक्शा, खुम्की पा सेउ पवा बाक्त।

13 मिनु योसेफमी आ तौ निम्फा आस कली लाइशशा, एफ्राइम आ ग्युरा गुड नु मनस्से आ पेरा गुड ग्याइशशा लाइशशा आ आफ आ डोंइती वोदा बाक्त। मोपा मनस्से याकूब आ ग्युरा गुड नु एफ्राइम याकूब आ पेरा गुड आ नेक्था वोदा बाक्त। उत्पत्ती ४१:५१-५२

14 तन्न इस्राएलमी आ गुड ख्राक्शा आ ग्युरा गुड एफ्राइम आ पिया तारी नु आ पेरा गुड मनस्से आ पिया तारी वोदा बाक्त। मनस्से चहिं योसेफ आ डोंइती जरमेशो तौ बाक्माक्त।

15 मिनु याकूबमी योसेफ कली आसीक गेशा “आं किकी पिपी अब्राहाम नु इसहाक परमप्रभु आ डोंइती गाक्शो बाक्ताक्से। मेको परमप्रभुमी आं कली आं ब्रोंइतीक नाक्त नेल्ल मुल सम्म कोवती। उत्पत्ती ३२:१०; भजन संग्रह २३:१

16 आं कली श्येत रे प्रोंइब परमप्रभु यावे आ स्वर्ग डा गेय पाइबम एको वोंइश आल आस कली आसीक गेवल। मिनु एको आस पतीके आं नें नु आं किकी पिपी अब्राहाम नु इसहाक आस नें मप्रेंसेक्ल। एको निकशी रे पा रागीमी शुश दुम्मल” दे आसीक गेम्सी बाक्त। उत्पत्ती ३२:२५-३०; यसेया ४१:१४

17 मिनु योसेफमी आ आफ आ ग्युरा गुड एफ्राइम आ पिया तारी वोंइशो तशा, आ थुं मनुमाक्त। मिनु आ आफ आ गुड एफ्राइम आ पिया रे शोल्शा, मनस्से आ पियाम वोंइक्नुड, दे मिम्ता बाक्त।

18 मिनु योसेफम आ आफ कली “ममाइ आं आफ, मेको आं डोंइती जरमेशो बाक्ब। इन ग्युरा गुड एको आ पिया तारी वीतीन” देमाक्त।

19 तन्न आ आफ मबित्थु “गो तुइक्नुड, आं तौ, गो तुइक्नुड। एको यो थर का दुम्ब, एको यो ठेयब दुम्ब। तन्न एको क्येडा आ लोकब एफ्राइम ठेयब दुम्ब। मिनु आ चच युड शुश ठेयब जात दुम्नीम” दे आसीक गेम्सी बाक्त। गन्ती १:३३, ३५; ब्यवस्था ३३:१७

20 मिनु मेको नाक्ती मेको आस कली आसीक गेशा “इस नें थिशा इस्राएलमी आसीक गेनीम। मेकोपुकीमी ‘परमप्रभुमी इ कली एफ्राइम नु मनस्से खोदेशो सेलल’ दे आसीक गेनीम” देमाक्त। मोपा याकूबमी मनस्से क्येडा एफ्राइम डोंइती वोदा बाक्त। हिब्रू ११:२१

21 मिनु इस्राएलमी योसेफ कली “नेनो, गो बेक्नुड। मिनु परमप्रभु गे नु बाक्शा, इ कली लेंशा इ किकी पिपी आ रागी लाइक्ब।

22 गो इ कली इ लोकब आन क्येडा निकशी अडस गेतन। आं तरवार नु लिब्रामी एमोरी आन गुड रे रोइशो रू इ कली गेतन” दे याकूबमी योसेफ कली मदा बाक्त। यूहन्ना ४:५

## 49

याकूब आ तौ आन आसीक  
ब्यवस्था ३३:-

1 मिनु याकूबमी आ तौ आन कली ब्रेशशा मेको आन कली “नोले इन कली मार मार दुम्बा, नेंचा कली एकेर बुक्कीन।

2 याकूब आ तौपुकी बुक्शा, इन आफ इस्राएल, आं लोव नैनीन।

रूबेन

3 रूबेन, गे आं डोंइती जरमेशो तौ नवे। डोंइती डा आं बोल नु सक्ति बाक्नेवे। नेल्ल क्येडा शिरशो नु सक्ति पाइशशो डोंइती डा बाक्ते। उत्पत्ती २९:३२; ब्यवस्था २१:१७

4 समुन्द्र डा छाल खोदेशो पा गे हिम्सीशो थुं पाइशशो मुर दुम्नेवे। मारदे हना गे इ आफ आ खात डोइशशा, बिथोलो पाप्तीवी। आं इप्तीकेम बाक्ते। गे मान मताइब दुम्नेवे। उत्पत्ती ३५:२२

सिमियोन नु लेवी

5 सिमियोन नु लेवी वोबु बाकनीसी। गे हुश ख्राक्श पोक्ब बाकनीसी। उत्पत्ती ३४:२५

6 आं थुं इस खुइशशा अरेशोम गेनायो मबिस्सेक्ल, आं नें इस युम्तीकेमी गेनायो मदेमल। थुं का मदुमीसे। मारदे हना इस चुरतीकेमी मुर साइक्तीसी। महिब दुग्शा, ब्यफ कली गाक्ने मचापब सेलतीसी।

7 इस गाइशशोम सराप राइब। मारदे हना मेको ठेयब बाक्ब। इस चुरचाम सराप राइब। मारदे हना मेको शिशो मपाइशशो मरिग्शो बाक्ब। थुं का मदुमीसे। इस्राएल रागीमी ब्राशा बाक्कीस। यहोसु १९:१-९; २१:१-४२

यहूदा

8 यहूदा, इ लोकबपुकीमी इ कली ठेयब सेलमेकल। इ गुडमी इ जोरी सत्रु आन क्रोकक्रो निप्नेवे। इ आफ आ आल इ डोंइती खुम्की पा बाप्नीम। गन्ती १०:१४; न्यायाधीस १:१-२

9 यहूदा गुप्स आ चाइक्व खोदेशो बाक्व। सिखार ब्वशा ठेयब दुम्ते। ठेयब गुप्स खोदेशो पा खुम बाप्व। गुप्सनी खोदेशो पा इप्व। सुम मेको कली बोक्पाइक्ने चाप्वा? गन्ती २३:२४; इजीकीएल १९:२; प्रकाश ५:५

10 ठेयब श्येत रे प्रोंइब मजाक्म सम्म आ राज दन्ड आ सासन पतीके आ गुडमी लीब। जात जात डा मुर मेको आ नोले खोइक्नीम। गन्ती २४:१७; १इतिहास ५:२; हिब्रू ७:१४; इजीकीएल २१:३२

11 मेकोमी आ गधा अडगुर आ बोटम पाइक्व, आ गधा आ चाइक्व नेल्ल क्येडा रिम्शो अडगुर बोटम पाइक्व। आफेक्तीक वा अडगुर शांबुम मुरब। आ वा अडगुर आ रसम खुम्ब। योएल ४:१८

12 आ मिक्च अडगुर क्येडा रिम्शो रड डा बाक्व। आ खुइ दूध क्येडा बुश बाक्नीम।

जबूलून

13 जबूलून समुन्द्र नु डोंगा वोइक्तीकेमी बाक्ल। सीदोन सहर सम्म आ बाक्तीके दुम्ल। यहोसु १९:१०-१६

इस्साकार

14 इस्साकार बोल्यो गधा दुम्शा, भारी आस दातेमी इप्व।

15 मेकोमी नाइक्तीके रिम्शो नु रागी दारशो बाक्व, दे ताप्तु। मेकेर कुरब दुम्शा, अर्को आन गेय पाइब दुम्त।

दान

16 दान इस्साएल आ जात डा ठेयब मुर दुम्शा, अरु आन कली निसाफ पाइब दुम्ल। न्यायाधीस १३:२,२४,२५

17 दान लामी बाक्शो बुस्स खोदेशो दुम्शा, मेको बीस पाइशो बुस्स खोदेशो दुम्शा, आइक्च लाम बाक्व। शारा डोइक्व मुर तोक्चा कली शारा आ गेंग्रेम कोक्व। मिनु शारा डोइक्व मुर नोले गे दोक्व।

18 परमप्रभु यावे, गे आं मरिम्शो पशो रे प्रोंइनीनी, दे रिम्शा बाक्ती। भजन संग्रह ११९:१६६; हबकुक् २:३

गाद

19 रोइक्व मुरपुकी गाद कली रोइक्चा कली जाक्नीम। गादमी मेको आन कली खेदा पा मेको आन के रोइक्व।

आशेर

20 आशेर आ जचा थोवक शुश ब्रोवशो बाक्व। पिपम खोदेशो पा ब्रोवशो जचा गेब। यहोसु १९:२४-३१

नाप्ताली

21 नाप्ताली प्रोंइशो रोकोश बाक्व। मेकोमी दारदारशो चाइक्व पाइब। न्यायाधीस ४:६-१०

योसेफ

22 योसेफ फल सिप्ब रवा का बाक्व। आ राशी गारो तारी बाक्शा, ब्वाक्कु बुक्तीकेमी खुम्शो रवा का बाक्व।

23 ब्रा आप्बपुकीमी मेको कली ब्रा आप्तेक्म। मेको कली आप्शा, खेदा पशा, काइ मदाक्तेम।

24 तन्न आ लिब्रा बोल्यो बाक्व, आ गुड बोल्यो बाक्नीम। सक्ति पाइशो याक्ब आ परमप्रभु, इस्साएल आ गोठला नु सेरथे फुल्लुम, मेको कली वारच पाप्तु। ब्यवस्था ३२:१८

25 इ आफ आ परमप्रभुमी इ कली वारच पाइब। नेल्ल क्येडा सक्ति पाइशो परमप्रभुमी इ कली सरीड रे नु खप रे आसीक गेब। शुश आल थिंचा डा आसीक यो गेवल। ब्यवस्था २८:३-६; ब्यवस्था ३३:१३

26 गेना हना यो बाक्व डांटा डा आसीक क्येडा इ आफ आ गेशो आसीक ठेयब बाक्व। योसेफ आ लोकब खोदेशो मदुम्शु, एको आसीक आ पिया तारी दुम्ल।

बेन्यामीन

27 बेन्यामीन बुष्शा ग्याइक्व फर खोदेशो बाक्व। मिनु सुनी आ सिखार ब्वाइब, नाक्दो आ रोइशो योक्व” दे याक्बम आ तौ नेल्ल आन कली आसीक गेमी बाक्त। न्यायाधीस २०:२५; १सामुएल ९:१-२

इस्साएल बेक्शो

28 एको इस्साएल आ १२ थर बाक्नीम। आन आफोम मेको आन कली आसीक गेशा पशो लोव एकोन बाक्व। मेकोमी मेको आन कली का का पा आसीक गेवा बाक्त।

29 मिनु मेको आन कली “गो आं किकी पिपी आन बाक्तीके लाइनुड। हिती डा एफ्रोन आ रूमी बाक्शो पुक्खी, आं किकी पिपी आन कली थिम्तीकेमी आं कली वीतीन। उत्पत्ती २३:१३-२०

30 मेको पुक्खी कनान रागीमी मात्रे आ पूर्व डा माक-पेलामी बाक्व। अब्राहाममी मेको थिम्तीक हिती डा एफ्रोन रे ग्यबा बाक्त।

31 अब्राहाम नु आ मीश सारा मेक थिम्शो बाक्नीस। इसहाक नु आ मीश रेबेका यो मेक थिम्शो बाक्नीस। मेकेर लेआ यो थिम्ता। उत्पत्ती २५:९; उत्पत्ती ३५:२९

32 मिनु मेको रू नु पुक्खी हिती मुर रे ग्याप्शो बाक्त” देमाक्त।

33 याक्बमी आ तौ आन कली मोदें लोव पशा नोले, खाटमी आ खोइल दिंशा, बेक्माक्त। मिनु आ किकी पिपी आन बाक्तीक लमाक्त।



- 1 मिनु योसेफ आ आफ आ कुल तार गुर ब्वेशा, पुक्पु पाइशशा, डाक्माक्त।
- 2 मिनु आ गेय पाइब नु डाक्टर आन कली “आं आफ आ रां कली खेक्तीन” दे माइक्मी बाक्त। मिनु मेकोपुकीमी बेक्शो मुर आ रां खेक्तमे बाक्त।
- 3 मिनु ४० नाक्त खेक्तमे बाक्त। मारदे हना खेक्चा कली ४० नाक्ती माल्बाक्माक्त। इजीप्त डा मुरपुकी यो ७० नाक्ती रोंका पामे बाक्त।
- 4 मिनु रोंका पतीक नाक्ती नुमेनु, योसेफमी फाराओ आ खिं डा मुर आन कली “गो इन डोंइती शिशी ताइनुड हना, गे फाराओ कली आं पब्रम लोत्र पने।
- 5 आं आफोम आं कली ‘गो बेक्डानु, कनान रागीम आं कली थिम्तीके ठीक पाता, मेकेर थिम्चा माल्नेवे’ दे कसम जपाइक्ती। मोपतीके आं आफ थिम्चा कली मेकेर लचा गेयीनी। मिनु गो थिम्शा लेत्नुड। एको लोत्र फाराओ कली देनीन” दे मेको आन कली मदा बाक्त। उत्पत्ती ४७:२९-३०
- 6 मिनु फाराओमी “इ कसम जशो खोदेशो पा इ आफ कली थिमो” दे योसेफ कली देंमाक्त।
- 7 मिनु योसेफ, फाराओ आ गेय पाइबपुकी, मेको आन ठेयब मुरपुकी, इजीप्त रागी डा ठेयब मुरपुकी,
- 8 योसेफ आ खिं डा मुर नेल्ल, आ लोकबपुकी नु आ आफ आ खिं डा मुर नेल्ल आ आफ थिम्थ लमा बाक्त। आन आइक्च आलपुकी नु आन क्यारश भेडा, बी ब्यफ ला गोशेनमी बाक्मा बाक्त।
- 9 मिनु योसेफ नु बग्गी नु शारा डोइक्बपुकी लमा बाक्त। मिनु शुश मुर दुम्मा बाक्त।
- 10 मिनु मेकोपुकी आताद आ चेरब तुप्तीके यर्दन खोला आइक्ची हांबु जाक्दीशशा, ठेयब रोंका पामे बाक्त। मिनु योसेफमी आ आफ कली ७ नाक्त सम्म रोंका पवा बाक्त।
- 11 मिनु मेकेर बाक्ब कनान रागी डा मुरपुकीम आताद आ चेरब तुप्तीक खलाम मेको रोंका पाइब आन कली तशा “एको इजीप्त डा मुर आन ठेयब रोंका का बाक्ब” देंमा बाक्त। मोपतीके मेको यर्दन आइक्ची हांबु डा बाक्तीके कली आबेल-मिसैम नें वोदमे बाक्त। आबेल-मिसैम आ अर्थ “ठेयब रोंका पतीके” बाक्ब।
- 12 मोपा याक्ब आ तौपुकीमी आन आफ आ अरेशो खोदेशो पामे बाक्त। उत्पत्ती ४९:२९
- 13 मिनु आ तौपुकीम आन आफ आ रां कनान रागी चाक्दीशशा, अब्राहाममी मुर थिम्चा कली हिती डा एफ्रोन रे ग्याप्शो माप्ने आ नेक्था माक-पेला डा रूमी थिम्मे बाक्त। उत्पत्ती २३:१३-२०
- 14 मिनु आ आफ थिम्शा नोले, योसेफ नु आ नु गाक्ब नेल्ल इजीप्त रागी लेम्मा बाक्त।
- 15 मिनु आन आफ बेक्म नोले योसेफ आ लोकबपुकीम “मुल योसेफमी इ कली क्येक्क लेप्बा कों। मारदे हना गोपुकीमी मेको कली मरिम्शो पाइतय” दे लोत्र पमुमा बाक्त। उत्पत्ती २७:४१
- 16 मिनु आ लोकबपुकीमी लोत्र पचा कली मुर का योसेफ आ बाक्तीके सोइक्तमे बाक्त। मेकोमी “इन आफ आ बेक्चा क्येडा डोंइती मार अरेवा बाक्त देंशा हना,
- 17 गे योसेफ कली ‘इन लोकब आन मरिम्शो पशो आ पब्रम माफ गेने। मारदे हना इन कली मरिम्शो पाम्तेक्मे। मिनु इन आफ आ परमप्रभु आ गेय पाइब आन कली आन पाप माफ गेने’ दे माइक्चा” दे सोइशशो मुरुमी योसेफ कली देंमाक्त। मिनु योसेफमी मेको आ लोत्र नेंशा डाक्माक्त।
- 18 मिनु आ लोकबपुकी यो जाक्मा बाक्त। मिनु आ डोंइती खुम्की पा बाप्शा “इन चाइल नकी” दे सेउ पामे बाक्त।
- 19 मिनु योसेफमी “महिनीन, गो परमप्रभु मनड।
- 20 गेपुकीमी आं कली मरिम्शो पाइतीनी। परमप्रभुमी चहिं रिम्शो सेलती। मो दुम्शा परमप्रभुमी शुश मुर आन कली ब्रोंइचा गेत्तु। उत्पत्ती ४५:५,७
- 21 मोपतीके महिनीन, गो इन कली नु इन आल आन कली कोव्रनुड” दे आ लोकब आन कली लेम्शा, रिम्शो लोत्र पवा बाक्त।
- 22 योसेफ नु आ खिं डा मुर नेल्ल इजीप्त रागीमी बाक्मा बाक्त। मिनु योसेफ सहे का १० बर्स ब्रोंइमाक्त।
- 23 मिनु आ तौ एफ्राइम आ चच युइ यो तवा बाक्त। आ डोंइती जरमेशो, मनस्से आ तौ मार्कीर आ तौ आ थुकुम वोदा बाक्त।
- 24 मिनु योसेफमी आ लोकब आन कली “गो बेक्नुड। परमप्रभुमी इन कली कोव्रब। परमप्रभुमी अब्राहाम, इसहाक नु याक्ब कली ‘इन कली कनान रागी लेप्पाइक्नुड’ दे कसम जशा, लोत्र पशो बाक्ब” देंमाक्त।
- 25 मिनु योसेफमी आ लोकब आन कली “परमप्रभुमी इन कली थमा पा एकेर रे लेप्पाइक्ब। मेना आं रुश यो लतीने” दे कसम जपाइक्मी बाक्त। प्रस्थान १३:१९; यहोसु २४:३२
- 26 मिनु योसेफ सहे का १० बर्स दुम्शा बेक्माक्त। मिनु आ रां कली मराक्चा डा पा ओरुक्ती खेक्शा, इजीप्त रागीमी बाकसम कुर पा वोदमे बाक्त।

## प्रस्थान

**ब्रेक्ब मुर:** एको किताब ब्रेक्ब मोसा बाक्ब, दे सां खेयप ब्रेक्शो बाक्ब। प्रस्थान १७:१४; प्रस्थान २४:४; प्रस्थान ३४:२७-२८

**गेना ब्रेक्शो:** एको किताब योसेफ बेक्म नोले रे परमप्रभु यावे आ ताम्बु सेल्ची ना सम्म इस्राएलीपुकी इजीप्त रागीम श्येत जशो आ पर्वम बाक्ब। इस्राएलीपुकी ४३० बर्स सम्म इजीप्तम बाक्शो बाक्तेक्म। परमप्रभुम मेको आन श्येत जशो तशा, आ टेयब सक्ति इजीप्त डा मुर आन कली कौंइशा, आ मुर इस्राएली आन कली श्येत रे प्रोना बाक्त। एको लोत्र गेना दुम्शो बाक्बा मेको मतुंडसीब। एको किताब मोसामी आ गेय पची ना ब्रेक्शो बाक्त।

### मार ब्रेक्शो:

१. इस्राएलीपुकी इजीप्त रागीम बाक्शा श्येत जशो प्रस्थान १:-१२:३६
२. इजीप्त रे युंइशा, आन श्येत रे प्रौंइशो प्रस्थान १२:३७-१८:२७
३. परमप्रभु यावेमी मेकोपुकी नु कबल पशो

### इस्राएलीपुकीमी श्येत जशो

१ आन खिं खिं डा मुर लाइशा, याकूब नु इजीप्त लाइब इस्राएल आ तौ सु सु बाक्मा बाक्त देशा हना, उत्पती ४६:८-२७

२ रूबेन, सिमियोन, लेवी, यहूदा,  
३ इस्साकार, जबूलून, बेन्यामीन,  
४ दान, नाप्ताली, गाद नु आशेर बाक्मा बाक्त।  
५ मिनु याकूब आ तौ आन खिं खिं डा मुर नेल्ल पा ७० जना बाक्मा बाक्त। योसेफ चहिं इजीप्त रागीमी बाक्शो बाक्माक्त।

६ मिनु नोले योसेफ नु मेको आ लोक्ब आन पाला डा मुर नेल्ल बेक्मा बाक्त। उत्पती ५०:२६

७ मिनु इस्राएल आ चच युइ सोशा बोशा शुश दुम्मा बाक्त। शुश दुम्शा डा मिन, बोल्यो दुम्मा बाक्त। मिनु इस्राएल आ मुरपुकीमी रागी नेल्ल ब्रीमा बाक्त। प्रेरित ७:१७-१९

८ मिनु नोले योसेफ कली मतुइक्ब पिप काम इजीप्त रागी कली सासन पवा बाक्त।

९ मेकोमी आ मुर आन कली “नेनीन, इ रागीमी बाक्शो इस्राएल डा मुरपुकी इ क्येडा शुश नु बोल्यो दुम्तेक्म।

१० मेको आन पर्वमी शुश मिम्शा, सल्ला पय। मो मपाइतय हना, मेको शुश दुम्शा, नोले लडाइ दुम्मेनु, इ जोरी सत्रु आन कली वारच पाइशा, एक रे प्रोक्नीमी, कोर में” दे आ मुर आन कली माइक्मी बाक्त।

११ मोपतीके मेकोपुकीमी इस्राएली आन कली श्येत गेशा, गेय पपाइक्चा कली कोत्रब टेयब मुरपुकी वोदमे बाक्त। मिनु इस्राएलीपुकीमी फाराओ माइशाओ पिप आ मार मार वोइक्चा कली पिथ्रम नु रामेसेस सहर निक्शी सेल्मे बाक्त। उत्पती १५:१३; उत्पती ४७:११

१२ तन्न इस्राएली गिश श्येत जामे, मिश बारना बारन शुश दुम्शा, इजीप्त रागी ब्रीमा बाक्त। मिनु मेको आन कली तशा, इजीप्त डा मुर शुश हिमा बाक्त।

१३ मोपतीके इस्राएली आन कली डोंइती क्येडा यो शुश गेय पपदमे बाक्त। उत्पती १५:१३

१४ शुश श्येत गेशा, शुश गेय पपदमे बाक्त। मार गेय पपदमे बाक्त देशा हना, हिलो निपदमे बाक्त, इंटा सेल्पदमे बाक्त, रू डा गेय यो पपदमे बाक्त। तेको गेय गेमे, मेको शुश श्येत डा गेय बाक्माक्त।

### परमप्रभु कली मान पाइब मीश मुर

१५ मिनु इजीप्त डा पिपमी हिबू मीश मुर आन आल थिची ना वारच पाइब आन टेयब मीश मुर आस कली लोत्र पवा बाक्त। मेको आन दाते डा का आ नें शिप्रा नु अर्को आ नें पुआ बाक्माक्त।

१६ मिनु फाराओमी “गे निक्शी हिबू मीश मुर आन कली आल थिची ना वारच पाइनीसी। तौ थिम्तेक्म हना, सतीसे। तमी बाक्त हना, मसतीसे” दे माइक्सी बाक्त।

१७ तन्न मेको मीश मुर आन कली वारच पाइब नेल्लेमी परमप्रभु कली मान पा हिंशा, इजीप्त डा पिपमी देशो मपथु, वोइशा आल आन कली यो मसदमे बाक्त।

१८ मिनु इजीप्त डा पिपम मेको वारच पाइब मीश मुर आस कली ब्रेशशा “गे मारदे वोइशा आल आन कली यो ब्रोंइचा गेसी? मारदे मोदेशो पसी?” दे लोत्र पवा बाक्त।

१९ मिनु मेको मीश मुरुमी “हिबू मीश मुरपुकी इजीप्त डा मीश मुर आन क्येडा बोल्यो बाक्नीम। मोपतीके गो जाक्दीत्या क्येडा डोंइती आल थिने थुम्शो बाक्नीमी” देसा बाक्त।

२० मोपतीके परमप्रभुमी मेको आल थिचा वारच पाइब मीश मुर आन कली आसीक गेवा बाक्त। मिनु इस्राएली शुश दुम्शा, बोल्यो दुम्मा बाक्त।

२१ वारच पाइब मीश मुरपुकी परमप्रभु कली मान पा हिंतीके परमप्रभुमी मेको आन खिं कली यो आसीक गेवा बाक्त।

२२ मिनु पिप फाराओमी आ मुर आन कली “हिबूपुकीमी दोशो तौ थीमे, मेको नेल्ल नील खोलाम लाइशा ताइक्तीन। आन तमी आन कली चहिं ब्रोंइचा गेने” दे हुकुम पवा बाक्त।

## 2

मोसा जरमेशो

- 1 लेवी आ थर डा मुर का बाक्माक्त। मिनु मेकोमी लेवी आ थर डा मीश आल का ग्युंवे पवा बाक्त। प्रस्थान ६:२०
- 2 मिनु मेको मीश मुरुमी तमी का नु तौ का थिमाक्त। नोले लेंशा आल कुरशा, तौ का थिमाक्त। आ थिशो तौ कली तशा “शुश दारशो आल बाक्ब” दे महिना सां सम्म खुइशशा वोदा बाक्त। प्रेरित ७:२०; हिब्रू ११:२३
- 3 मिनु नोले आल आ ममामी महिना सां डा आल कली खुइकने मचबा बाक्त। मिनु आल कली सुम्टीके पाइशशो ग्युर सेल्शा, ब्वाक्कु मओव्रचा डा पा अल्कत्राम सिल्दा बाक्त। मिनु मेको आ तौ कली ग्युरुम कुर पा खोला आ नेक्था डा बुदी मीलु घांस आगा, ब्वाक्कुम वोदा बाक्त।
- 4 मिनु मेको आल आ दिदी “आं लोकब कली मार दुम्मे” दे डोन रे कोव्रदीम्माक्त। गन्ती २६:५९
- 5 मेना पिप आ तमी खोलाम चिक्चा कली जाक्दीम्माक्त। आ गेय पाइबपुकी यो खोला आ नेक्था लमा बाक्त। मिनु पिप आ तमीमी बुदी मीलु घांस आगा, ब्वाक्कुमी मेको ग्युर तशा, आ गेय पाइब का कली “मेको ग्युर ब्रथ लावो” दे सोइक्ता बाक्त।
- 6 मिनु पिप आ तमीमी मेको सुम्टीक पाइशशो ग्युर रोक्शा कोव्रडानु “ए, आल का बाक्त” देमाक्त। मिनु आल डाक्माक्त। मेको आल तशा, शिशो पवा बाक्त। मिनु पिप आ तमीमी “एको हिब्रू डा मुर आ तौ का बाक्ब” देमाक्त।
- 7 मिनु आल आ दिदीमी “गो इन कली हिब्रू दूध तुंडब मीश मुर का चाक्गु? आल कली दूध तुंडबा को” दे हिल्लो पवा बाक्त।
- 8 मिनु फाराओ आ तमीमी “लो, चाक्को” दे मीश आल कली देमाक्त। मिनु मेको मीश आलम आ ममा ब्रथ लमाक्त।
- 9 मिनु फाराओ आ तमीमी मेको मीश मुर कली “एको आल आं कली थुलो। एको आल थुल्शो डा, इ कली क्येट गेनुड” दे लोव्र पवा बाक्त। मिनु मीश मुरुमी आल लाइशशा, थुला बाक्त।
- 10 मेको नोले आल कोल्माक्त। मिनु काबु मेकोमी मेको आल फाराओ आ तमी कली लाइशशा, गेवा बाक्त। मिनु आ तौ खोदेशो दुम्माक्त। मिनु पिप आ तमीमी मेको आ नें मोसा वोदा बाक्त। मारदे हना “गो मेको कली ब्वाक्कु रे गुंडताक्ड” देमाक्त। मोसा आ अर्थ हिब्रू लोव्रमी “ब्वाक्कु रे गुंडशो” देशो बाक्ब।

मोसामी इजीप्त डा मुर साइशशो

- 11 मिनु नोले मोसा डेयब दुम्शा, आ लोकब आन कली युमथ लशा, आन श्येत जशो ताप्टु। मेकोमी इजीप्त रागी डा मुरुमी आ हिब्रू लोकब का कली तुप्यो ताप्टु। प्रेरित ७:२३-२९; हिब्रू ११:२४-२७
- 12 मिनु मोसामी एर ओंथ कोव्रशा, सुइ मबाक्शो तशा, इजीप्त डा तुप्ब मुर कली साइक्तु। मिनु बाल्वामी थिम्तु।
- 13 आ दीसा मोसा लेंशा हिरथ लमेनु, हिब्रू निकशी जिशा तुम्मुशो ताप्टु। मिनु मोसामी मरिम्शो पाइब कली “मारदे आम लोकब कली तुबी?” दे हिल्लो पाप्टु।
- 14 मिनु मेकोमी “सुमी इ कली आंस होव्रपु नु निसाफ पाइब सेला? इजीप्त डा मुर कली साइशशो खोदेशो पा आं कली यो सडु, देने?” देत। मिनु मोसामी “मुल एको लोव्र, मुर नेल्लेमी तुइक्नीमी” दे मिम्शा हित। प्रेरित ७:३५
- 15 मिनु फाराओमी “मोसाम इजीप्त डा मुर का साइक्तु” देशो नेंशा, मोसा कली साइक्चा माल्तु। मोसा चहिं फाराओ आ बाक्तीक रे प्रोक्शा, मिदयान रागी जाक्दीशशा, इनार तारी निशशा बाक्त।

मोसा मिदयान रागी प्रोक्शो

- 16 मिनु मिदयान रागीमी ७ जना तमी बाक्शो नाक्सो का बाक्माक्त। मेको मीश आलपुकीमी आन आफ आ क्यारश भेडा आन कली ब्वाक्कु तुंडचा, दे शुंगु ब्वाक्कुम प्रिंचा कली, ब्वाक्कु कीतेक्म। प्रस्थान ३:१
- 17 तन्न अरु गोठलापुकी जाक्शा, मेको आन कली श्येत गेम्तेक्म। मोसामी चहिं मेको मीश आल आन कली वारच पा, आन भेडा आन कली ब्वाक्कु तुंडताक्व।
- 18 मिनु मेको आन आफ रूएल आ खिं जाक्दीम्मानु, मेकोमी आ तमी आन कली “मुलाक्ती गे दोपा रीब पा जाक्नी?” दे हिल्लो पवा बाक्त।
- 19 मिनु मेको आ तमीपुकीमी “इजीप्त रागी डा चोइश मुर कामी आंइ कली गोठला आन गुइ रे प्रोइतु। मिनु शुश ब्वाक्कु कुर पा आंइ क्यारश भेडा आन कली तुंडताक्व” दे आन आफ कली मदमे बाक्त।
- 20 मेकोमी आ तमी आन कली “मेको मुर ते बाक्मे? एक मारदे मचाक्नी? मुल गो नु जथ ब्रेत्तीने” दे माइक्मी बाक्त।
- 21 मिनु मोसा मेकोपुकी नु बाक्चा बिस्साक्व। रूएलमी मोसा कली आ तमी सिप्पोरा ग्युंवे पा गेप्टु। गन्ती १२:१
- 22 मिनु नोले तौ का थिप्टु। मिनु मोसामी मेको आल आ नें गेरशोम वोइक्तु। मारदे हना “गो मतुइशशो रागीमी अर्को रागी डा मुर दुम्ती” देत। प्रस्थान १८:४

परमप्रभुमी इस्राएली आन लोव्र नेंशो

- 23 मिनु शुश बर्स नोले इजीप्त रागी डा पिप बेक्माक्त। इस्राएल जात डा मुर इजीप्त रागीम वाइलीम वाइल खोदेशो दुम्शा, शुश श्येत जशा, परमप्रभु कली “वारच पाइय्यीकी” दे पुंइशा डाक्मा बाक्त। मिनु परमप्रभुमी मेको आन डाक्शो नेना बाक्त।
- 24 मिनु परमप्रभुमी अब्राहाम, इसहाक नु याकूब नु कबल पशो मिम्ता बाक्त। उत्पत्ती १५:१८; उत्पत्ती २६:३; उत्पत्ती २८:१३-१४
- 25 मिनु परमप्रभुमी आन श्येत जशो तशा शिशो पवा बाक्त।

## 3

परमप्रभुमी लोत्र पशो

1 मेना मोसा आ शिउ आ क्यारश भेडा योव्रथ लत। आ शिउ रूएल आ नें यित्रो यो बाक्माक्त। यित्रो चहिं मिदयान रागी डा नाक्सो का बाक्माक्त। मोसामी क्यारश भेडा आन कली गोरशो रागी डा नां परतीके गे योव्रतु। मोपा योव्रना योव्रन, होरेब माइशशो परमप्रभु आ डांडा आ नेक्था जाक्दीत्त। प्रेरित ७:३०-३४

2 मेकेर परमप्रभु यावे आ स्वर्ग डा गेय पाइब मी ब्रशो बुटा रे गृत। डोंइती दोदेशो बाक्त देशा हना, मोसामी डोन रे कोव्रडानु, ब्रशो बुटा का कली मीम काइ मनेक्शो ताप्तु। व्यवस्था ३३:१६

3 मिनु मोसामी “गो मेकेर लशा कोव्रचा माल्नुड। छक लाक्चा डा बाक्त। मारदे मीम मेरे बुटा कली मनेक्गा?” दे आंमा लोत्र पाप्तु।

4 मिनु परमप्रभु यावेमी मोसा कली ब्रशो बुटा कोव्रथ पिशो तशा, परमप्रभुमी बुटा रे “मोसा, मोसा” दे ब्रेत्ताक्व। मिनु मोसामी “गो एक बाक्ती” दे लोत्र लेत्ताक्व।

5 मिनु लेशा “एक मपिवो। इ जुत्ता पुतो। मारदे हना इ राष्ठा बाक्तीके आं बाक्तीके बाक्ब। उत्पत्ती २८:१७; यहोसु ५:१५

6 गो इ आफ आ परमप्रभु इ किकी पिपी अब्राहाम, इसहाक नु याकूब आन परमप्रभु नड” दे मोसा कली लोत्र पाप्तु। मिनु मोसामी परमप्रभु कली तशा हिंशा, आ कुल सुम्साक्व। उत्पत्ती १७:१; उत्पत्ती २८:१-४; उत्पत्ती ३५:९-११; मती २२:३२

7 मिनु परमप्रभु यावेमी “गो इजीप्त रागीमी बाक्शो आं मूर आन श्येत ताता। मेको आन कली गेय पपाइक्ब आन पबर्म डाक्नीमी। गो आन डाक्शो नेंता, ताता। गो आन श्येत जशो तुइक्ताक्ड। प्रस्थान २:२३

8 मिनु मेको आन कली इजीप्त रागी डा मुरपुकीम गेशो श्येत रे प्रॉइनुडमी। गो आं मूर आन कली रिम्शो नु ठेयब रागी लाइक्नुडमी। मेको रागीम दूध नु खुदो शुश बाक्ब। मारेड मारेड यो शुश ग्रेल्ब। मेको रागी कनानी, हिती, एमोरी, परिज्जी, हिक्वी नु यबुसी आन बाक्तीक रागी बाक्ब।

9 नेनो, गो इसाएल जात डा मूर आन डाक्शो नेंता। इजीप्त रागी डा मुरुमी मेको आन कली दिष्ठा श्येत गेम्तेक्म। गो मेको यो ताता।

10 गो इ कली फाराओ आ बाक्तीके सोइक्नुड। गे इसाएल जात डा मूर आन कली इजीप्त रागी रे गुंडदो” दे परमप्रभुमी मोसा कली माइक्व। प्रस्थान ७:१६; न्यायाधीस ६:१४

11 मिनु मोसामी परमप्रभु यावे कली “गो दोपा मो पने चाप्नुडा? फाराओ आ बाक्तीकेमी लशा, इसाएल जात डा मूर आन कली इजीप्त रागी रे दोपा गुंडने चाप्नुडा?” दे परमप्रभु कली देत। प्रस्थान ४:१०; उत्पत्ती ३२:११; २सामुएल ७:१८; यसैया ६:५,८; येरमीया १:६

12 मिनु परमप्रभुमी “गो थमा पा, गे नु बाक्नुड। इ कली सोइक्ब गो नड, दे चिन्ड का कोइनन। मेको चिन्ड मार बाक्त देशा हना, गे इसाएल जात डा मूर आन कली इजीप्त रागी रे गुंडशा नोले एको परमप्रभु आ डांडामी आं कली ठेयब सेल्नीनी” दे माइक्व। येरमीया १:८

परमप्रभुमी आ नें तुइक्पाइशशो

13 मिनु मोसामी परमप्रभु कली “गो इसाएल जात डा मूर आन बाक्तीके जाक्दीशशा, मेको आन कली ‘इन किकी पिपी आन परमप्रभुमी आं कली इन बाक्तीके सोइक्ताक्यी’ देंडानु, मेकोपुकीमी चहिं ‘मेको आ नें मार में?’ दे हिल्लो पाइनीम। मेना गो मार देंनुडा?” दे हिल्लो पाप्तु।

14 मिनु परमप्रभुमी मोसा कली “आं नें ‘गो नड’ बाक्ब। इसाएल जात डा मूर आन कली ‘गो नड’ देंबमी आं कली इन बाक्तीकेमी सोइक्ताक्यी, देंचा माल्नेवे” देंत। प्रस्थान ६:२; मलाकी ३:६; प्रकाश १:४,८

15 मिनु लेशा परमप्रभुमी मोसा कली “इसाएल डा मूर आन कली मार देंचा माल्नेवे देशा हना ‘परमप्रभु यावे, इन किकी पिपी अब्राहाम, इसहाक नु याकूब आन परमप्रभुमी इन कली गुम्थ सोइक्ताक्यी। आं नें गेना हना यो लीब। नेल्ल पाला डा मुरम आं नें आन थंमी मिष्ठा वोइक्चा माल्नीम’ देंचा माल्नेवे। प्रस्थान ६:२-३; यसैया ४२:८

16 गे इसाएल जात डा मूर आन खाल्पा आन कली खुप्थ लावो। मिनु मेको आन कली ‘परमप्रभु यावे इन किकी पिपी आन परमप्रभु आं डोंइती गृत। अब्राहाम, इसहाक नु याकूब आन परमप्रभुमी आं कली गुम्था, लोत्र पाप्तु’। मेकोमी आं कली ‘गो थमा पा इन कली गुम्थ यिती, इजीप्त रागीम इन कली गिश श्येत गेमे, मेको ताता।

17 गो इन कली इजीप्त रागी डा मूर आन गेशो श्येत रे प्रॉइनुड। गो इन कली कनानी, हिती, एमोरी, परिज्जी, हिक्वी नु यबुसी आन बाक्शो रागी गेनुड। मेको रागीम दूध नु खुदो शुश बाक्ब, अन्न यो शुश ग्रेल्ब। गो आं देशो लोत्र खाप्नुड’ देंत, देंचा माल्नेवे।

18 इ देशो लोत्र नेंशा, टिम्तेक्म हना, गे नु इसाएल डा मूर आन खाल्पापुकी इजीप्त रागी डा पिप आ बाक्तीक लशा, मेको कली लोत्र पचा माल्नीनी। गेमी इजीप्त रागी डा पिप कली ‘परमप्रभु यावे हिब्रू आन परमप्रभुमी आं कली युम्तीकी। आंइ कली नाक्त सां गोरशो रागीम लचा गेकी। मेकेर परमप्रभु यावे आंइ परमप्रभु कली चढ़ेथ लाइनीकी’ दे पिप कली देनीन। प्रस्थान ५:१,३

19 मेको पिपमी चहिं इन कली लचा मगेब, गो तुइक्नुड। गो थम ठेयब सक्तिमी इन कली वारच पाता हना ला, लचा गेब।

20 मिनु गोमी इजीप्त रागी डा मूर आन दातेमी थम छक लाक्चा डा गेय कोइशा, मेको आन कली श्येत गेनुड। मिनु नोले मेकोमी इन कली लचा गेब।

21 इजीप्त रागी डा मुरपुकीमी इन कली दाकब सेल्लुडमी। इजीप्त रे गूनीनु, श्येत्थ यूचा ममाल्नीनी। प्रस्थान ११:२-३; प्रस्थान १२:३५-३६

22 मीश मुर नेल्लेमी आन नेक्था डा इजीप्त रागी डा वारच रे सुन, चांदी नु वासी पुंडचा माल्नीम। आन तमी तौ आन कली पांडपाडक्चा माल्नीम। मोदेशो पा इजीप्त डा मुर आन शोंप रोडक्चा माल्नीनी” दे परमप्रभु यावेमी मोसा कली दैत।

## 4

परमप्रभुमी मोसा कली चिन्ड कोंडशो

1 मिनु मोसामी परमप्रभु कली “मेकोपुकीमी आं देशो थमा मसुडक्थु, मटीनीमी कों? ‘परमप्रभु यावेमी इ कली मयुम’ देंनीमी कों” दैत।

2 मिनु परमप्रभु यावेमी “इ गुडमी मार कुरी?” दे हिल्लो पाप्तु। मिनु मोसामी “कोक्के कुरता” दैत।

3 मिनु “खपीम ब्वारदो” दैत। मिनु मोसामी आ कोक्के ब्वारदानु, बुस्स दुम्त। मिनु मोसा मेको तशा प्रोक्त। प्रस्थान ७:१०

4 मिनु परमप्रभु यावेमी “आ मीलुम ग्याडक्तो” दैत। मिनु मोसामी आ गुड दिशा, बुस्स कली ग्याडक्दीमेनु, आ गुडमी लेशा कोक्के दुम्त।

5 मिनु मेको तशा, मेकोपुकीमी “परमप्रभु यावे, आन किकी पिपी अब्राहाम, इसहाक नु याकूब आन परमप्रभुमी इ डोंडती यूशा, इ कली युम्तु, दे थमा सुडक्नीम” दैत।

6 मिनु परमप्रभु यावेमी लेशा “इ गुड इ फेक्शो वा आगाम वोतो” दैत। मिनु मोसामी मो पाप्तु। मिनु नोले आ गुड गुंडशा कोल्लडानु, कोल्लर मुशा बुश दुम्शो ताप्तु।

7 मिनु मेकोमी “लेशा, इ गुड इ फेक्शो वा आगाम वोतो” दैत। मिनु वोडशशा गुंडदानु, आ गुड डोंडती डा खोदेशो पा सेस दुम्शो ताप्तु।

8 “इ डोंडती डा चिन्ड तशा, इ लोत्र थमा मसुडक्थु, मटिम्तेक्म हना, नोले डा चिन्ड तशा, थमा सुडक्नीमी कों?”

9 तन्न मेकोपुकीमी चिन्ड निक्शी तशा यो, थमा मसुडक्थु, इ कली मटिम्तेक्म हना, गे नील खोला डा ब्वाक्कु लाइशशा, सोल्लशो खप तारी मोतो। खोला रे लाइशशा ब्वाक्कु सोल्लशो खप तारी मोदीनु, मेको हुश दुम्ब” दे परमप्रभु यावेमी दैत। प्रस्थान ७:१७-२१

10 मिनु मोसामी परमप्रभु यावे कली “आं परमप्रभु, गो लोत्र पस मजोक्नुड। गे, मुल इन गेय पाडब नु लोत्र पनीनु यो, आं कली लोत्र पचा मपी। गो थोंडशो लें पाडशो मुर बाक्नुड” दैत। प्रस्थान ३:११; प्रस्थान ६:१२-३०

11 मिनु परमप्रभु यावेमी “सुमी मुर आ शोत्र सेला? सुम लोत्र पपाडक्ब, नोफा नेंब नु मनेब, मिक्च ताडब नु मताडब सेला? गो, परमप्रभु यावे मनडा डा? भजन संग्रह ९४:९

12 मुल लावो। गो इ कली लोत्र पपाडक्नुड, मार देंचा माल्बा, मेको इ कली शेंनुड” दैत। ब्यवस्था १८:१८; मती १०:१९

13 मोसाम चहिं “आं परमप्रभु, आं पा डा अरु कली सोडक्ने चाप्नीनी कों? तन्न आं कली मसोडक्तीनी” दैत।

14 मिनु परमप्रभु यावे मोसा आ पबंम गाडशशा “लेवी थर डा इ लोक्ब हारून रिम्शो लोत्र पस जोक्ब बाक्ब, गो मतुडक्नुडा डा? मिनु मुल इ कली युम्थ जाक्ब। इ कली तशा शुश ग्येब।

15 गो इ पचा माल्लो लोत्र नेल्ल शेंनुड। मिनु गे मेको हारून कली देंचा माल्लेवे। मिनु मेकोमी इ पा डा मुर आन कली लोत्र पचा माल्ब। मेको इ शोत्र खोदेशो दुम्ब। गो इ कली लोत्र पाडब परमप्रभु खोदेशो पा, गे हारून कली लोत्र पाडब बाक्नीनी।

16 दोपा गो, परमप्रभुम इ कली लोत्र पाडनुडा, मोपा गे हारून कली लोत्र पचा माल्लेवे। मिनु मेकोमी मुर आन कली लोत्र पचा माल्ब। प्रस्थान ७:१-२

17 मेको कोक्के लाइशशा, आं देशो चिन्ड कोंडदो” दे परमप्रभु यावेमी मोसा कली माडक्तु।

मोसा इजीप्त रागी लेशशो

18 मिनु मोसा आ शिड, यित्री आ खिं लशा, मेको कली “इजीप्त रागीम बाक्शो आं लोक्ब आन कली युम्थ लचा गेयीनी। बेक्मा कों, ब्रोंडम, गो तुडक्चा दाक्ती” दे पुंडतु। मिनु यित्रीमी “इ थुं नाइशशा, लावो” दैत। प्रस्थान ३:१

19 मिनु मोसा मिदयान रागीम बाक्मेनु, परमप्रभु यावेमी “लेंशा इजीप्त रागी लावो। मारदे हना इ कली साडक्चा माल्बपुकी बेक्तेक्मे” दे लोत्र पाप्तु।

20 मिनु मोसा आ मीश नु आ तौ निक्शी नु गधा डोंडशशा, इजीप्त रागी लेत्त। परमप्रभु आ गेशो कोक्के यो कुरुतु। प्रस्थान १८:३-४

21 मिनु परमप्रभु यावेमी मोसा कली “इ नोफा दाइशशा नेनो। गे इजीप्त रागी जाक्दीशशा, गो इ कली पपाडशो छक लाक्चा डा गेय नेल्ल फाराओ आ डोंडती पावो। गो चहिं मुर आन कली लचा मगेचा डा पा फाराओ कली काइ मटीब सेल्लुड। प्रस्थान ७:३,१३; ब्यवस्था २९:३; यसैया ६:१०; रोमी ९:१८

22 मिनु गे मेको कली “परमप्रभु यावेमी इन कली मार लोत्र पाप्तु देशा हना, इसाएल आं डोंडती जरमेशो तौ बाक्ब। ब्यवस्था ३२:६

23 आं तौ कली आं कली चढेतीक चढेथ लचा गेवो। गे मटिप्तीवी हना, गो इ डोंडती जरमेशो तौ कली साडक्नुड” दैत, देनो” दे परमप्रभु यावेमी मोसा कली माडक्तु। प्रस्थान ११:५; प्रस्थान १२:२९

मोसा आ तौ कली चिनु खोडशशा

24 मिनु लाम बास बाक्मानु, परमप्रभु यावेमी मोसा आ नेक्था जाक्शा, मेको कली साइक्चा माल्तु। उत्पत्ती १७:१४; उत्पत्ती ३२:२५

25 मिनु सिप्पोरामी चहिं हेश्शो फुल्लु का गुप्शा, आ तौ कली खोइक्तीक चिन्ड खोदा बाक्त। मोपा मेकोमी आ तौ आ चारतीक डा कुशुल खोइश्शा, आ तौ आ कुशुलम मोसा आ रां थिशा “गे हुश के ग्युम्ले नवे” देमाक्त। यहोसु ५:२

26 मोदेशो पतीके, परमप्रभुमी मोसा कली मसाइक्थु, प्रोना बाक्त। सिप्पोरामी मारदे “हुश के ग्युम्ले” देत देशा हना, खोइक्तीक चिन्ड रे हुश यिमाक्त।

मोसा नु हारून

27 डोंइती परमप्रभु यावेमी हारून कली “मोसा गोरशो रागीम जाक्चा चिक्शो बाक्ब। मेको कली गुमथ लावो” दे माइक्तु। मिनु लशा, परमप्रभु आ डांडाम मोसा कली युमशा, पुक्पु पाइक्तु।

28 मोसामी आ कली सोइक्ब परमप्रभु यावे आ लोत्र नेल्ल नु आ पचा माल्शो चिन्ड यो हारून कली शेंताक्व।

29 मिनु मेको निक्शीमी इस्राएली आन खाल्पा नेल्ल आन कली खुप्ताक्से।

30 हारूनमी परमप्रभु यावेमी मोसा नु पशो लोत्र नेल्ल मेको आन कली शेंताक्व। मोसा कली कोंइशो चिन्ड, हारूनमी मुर आन डोंइती कोंइताक्व।

31 मिनु मुरपुकीमी थमा सुइक्तेक्म। मिनु परमप्रभु यावेमी इस्राएली आन कली युमशा, आन श्येत तशा, वारच पचा चिक्शो तुइश्शा, मेकोपुकी बाप्शा, परमप्रभु कली ठेयब सेल्लेक्म। प्रस्थान ३:१६

## 5

मोसा नु हारून आस लोत्र

1 मिनु नोले मोसा नु आ लोक्ब हारून फाराओ गुमथ लाम्ताक्स। मिनु मेको कली “परमप्रभु यावे, इस्राएली आन परमप्रभुमी आंस कली लोत्र पात्तु। मेकोमी ‘आं मुर आन कली गोरशो रागीमी आं पबंम चाड मानेचा कली लचा गेवो’ दे परमप्रभु यावेमी इन कली देशो बाक्ब” देताक्स। प्रस्थान ३:१८; प्रस्थान ७:१६, २६; प्रस्थान ९:१, १३

2 मिनु फाराओमी “परमप्रभु यावे सु बाक्म, गो मतुइक्नुड। मार, आ देशो लोत्र टिचा माल्नुडा? गो इस्राएली आन कली मारदे लचा गेनुडा? गो परमप्रभु यावे कली मतुइक्नुड। मोपतीके इस्राएल डा मुर, इन कली लचा मगेनन्नी” देत।

3 मिनु मेको निक्शीमी “हिब्रू मुर आन परमप्रभुमी आंस कली युम्तु। आंइ कली लचा गेने, दे पुंइनस्कु। गोपुकी रोइमी, लडाइमी मबेक्कल, दे परमप्रभु यावे, आंइ परमप्रभु कली चढेथ नाक्त सां सम्म गोरशो रागीम लचा गेने” दे माइक्ताक्स।

4 मिनु इजीप्त् डा पिपम मेको आस कली “मोसा नु हारून, गे मारदे मुर आन कली आन गेय क्योल्चा माल्नीसी? इस गेय पथ लस” देत।

इस्राएली आन कली श्येत गेशो

5 मिनु फाराओमी लेशा “नेनीस, इस जात डा मुर शुश दुम्लेक्म। गे मेको आन कली आन गेय रे नाइक्चा गेचा माल्सी?” दे मोसा नु हारून आस कली हुइक्ताक्व। प्रस्थान १:७, १२

6 मोपतीके मेको नाक्ती रे फाराओमी गेय पपाइक्ब ठेयब मुर नु कोत्रब मुर आन कली

7 “मुल रे इस्राएली आन कली इंटा सेल्चा कली पराल मगेचा, आंमा गुप्थ लचा माल्नीम।

8 तन्न इंटा चहिं डोंइती दोशो सेल्मे, मुल यो मोशोन सेल्चा माल्नीमी। मिनु आन गेय डोंइती पशो खोदेशो पा पचा माल्नीम। मारदे हना आन गेय मबाक्मेनु, मेकोपुकीमी ‘गोपुकी गोरशो रागीम आंइ परमप्रभु कली चढेचा दाक्नीकी’ दे लोत्र पशा ग्रीनीम।

9 मेको मुर आन कली शुश गेय पपाइश्शा श्येत गेचा माल्नीनी। मेकोपुकीम गेय पा बाक्मानु, दूली लोत्र मनैनीम” दे आ मुर आन कली देमाक्त।

10 मिनु इस्राएली आन कली गेय पपाइक्बपुकी नु कोत्रबपुकीमी मुर आन कली “फाराओमी ‘इन कली पराल मगेनुड’ देशो बाक्ब।

11 मोपतीके ते खुप्ने चाप्नीनी, मेक डा खुप्तीन। इंटा चहिं डोंइती दोशो सेल्नी, मुल यो मोशोन सेल्चा माल्नीनी” दे मदमे बाक्त।

12 मोपा मेकोपुकी इजीप्त् रागीमी पराल मथिल्लेक्के पराल के टुटा गुप्थ ब्रशा गाक्मा बाक्त।

13 गेय पपाइक्बपुकीमी “पराल गेशो नाक्त दोशो इंटा सेल्नी, मुल यो मोशोन सेल्चा माल्नीनी” दे शुश गेय पपदमे बाक्त।

14 फाराओ आ गेय पपाइक्ब इस्राएली कोत्रबपुकी यो वोइश्शो बाक्मा बाक्त। मेको आन कली तुप्शा “डोंइती डा खोदेशो पा सिनाक्ती मुलाक्ती इंटा मारदे मसेल्नी?” दे इस्राएली कोत्रब आन कली हुइक्तेमे बाक्त।

15 मिनु इस्राएली कोत्रबपुकीमी फाराओ कली “मारदे इन वाइल आन कली ओदेशो मरिम्शो पाइनीनी?

16 इन वाइल आन कली पराल मगेथु ‘इंटा सेलीने’ दे हुइक्नीनी। मेको ला ममाइ, इन मुरपुकीमी आंइ कली तुप्नीम। गे इन रागी डा मुर आन कली मरिम्शो पपाइक्नीनी” देमा बाक्त।

17 मिनु फाराओमी “गे अल्सेपुकी, थम अल्से दुम्लेक्म। मोपतीके गे ‘आंइ कली परमप्रभु यावे कली चढेथ लचा गेने’ देतीनी।

18 मुल गेय पथ लने। पराल मगेसीब, इंटा चहिं डोंइती दोशो सेल्नी, मोशोन सेल्चा माल्नीनी” देमाक्त।

19 मिनू इस्राएली कोत्रबपुकीमी “इं कली मरिम्शो पशा, शुश श्येत गेनीम” दे तुइक्तमे बाक्त। मारदे हना “डोंइती नाक्त किंत किंत दोशो इंटा सेल्नी, मुल यो मोशोन सेल्चा माल्नीनी” देशो बाक्मा बाक्त।

20 मिनू फाराओ आ बाक्तीके रे लमानु, मेकोपुकीमी लांमी रिम्शा बाक्शो मोसा नु हारून आस कली युम्तेक्म।

21 मिनू मेको कोत्रबपुकीमी “परमप्रभु यावेमी इस कली सजाइ गेवल। मारदे हना गे निकशीमी फाराओ नु आ मुर आन डोंइती आंइ कली मरिम्शो सेल्तीसी। आंइ कली साइक्चा, दे तरवार आन गुइमी गेतीसी” दे गाइश्शा हुइक्ताक्म।

22 मिनू मोसा परमप्रभु यावे आ नेक्था लशा “परमप्रभु, मारदे गे इन मुर आन कली मरिम्शो पाइनीनी? आं कली मारदे एक सोइक्तीनी?

23 गो इन नेमी फाराओ नु लोत्र पडा नोले, मेकोमी इन मुर आन कली डोंइती क्येडा शुश श्येत गेप्टु। गे चहिं इन मुर आन कली मप्रोंइनी” देंत।

## 6

परमप्रभुमी मोसा नु लोत्र पशो

1 मिनू नोले परमप्रभु यावेमी मोसा कली “गो फाराओ कली मार पाइनुडा, गे मुल ताइनेवे। फाराओम मेको आन कली लचा गेचा ला ममाइ, टेयब सक्तिमी फाराओ कली आं मुर आन कली आ रागी रे खेरपाइक्नुड” देंत। प्रस्थान ११:१; प्रस्थान १२:३३

2 मिनू लेंशा परमप्रभुमी मोसा कली “गो यावे नड। प्रस्थान ३:१४-१५; उत्पत्ती १७:१

3 गो अब्राहाम, इसहाक नु याकूब आन डोंइती यूशो ‘नेल्ल क्येडा सक्ति पाइश्शो परमप्रभु नड’ दे मेको आन कली तुइक्पाइक्ताक्मी। तन्न ‘आं नें यावे बाक्ब’ दे मतुइक्पदुमी।

4 गो मेको आन कली ‘गे मुल अर्को रागी डा मुर दुम्शा, हिरना हिरन बाक्शो कनानी आन रागी इन कली गेनुड’ दे अब्राहाम, इसहाक नु याकूब नु कबल पने थुम्शो नड। उत्पत्ती १७:८

5 मिनू गो इजीप्त डा मुरपुकीमी इन कली गेय पाइब सेल्मेनु, श्येत जशो इस्राएली आन डाक्शो ताता। मिनू गो आं कबल पशो मिन्ताक्ड।

6 मोपतीके गो इस्राएली आन कली ‘गो परमप्रभु यावे नड। गो इजीप्त डा मुर आन गेशो श्येत नु इन वाइल दुम्शो गेय रे प्रोंइनन्नी। गो इजीप्त डा मुर आन कली टेयब सजाइ गेशा, आं टेयब सक्तिमी इन कली गुंइनुड।

7 मिनू गो इन कली आं मुर सेल्नुड। गो इन परमप्रभु हुम्नुड। मिनू गो इन कली इजीप्त डा मुर आन गेशो श्येत रे गुंइब, परमप्रभु यावे, इन परमप्रभु नड, दे तुइक्चा माल्नीनी।

8 मिनू गो अब्राहाम, इसहाक नु याकूब आन कली गेनुड, दे कसम जशो रागीम इन कली चाक्दीनुड। मिनू मेको रागी इन के दुम्ब। गो परमप्रभु यावे नड’ दे गे इस्राएली आन कली देंचा माल्नेवे” देंत। उत्पत्ती २२:१६

9 मिनू मोसामी मेको लोत्र इस्राएली आन कली नेंपदानु, वाइल दुम्तीके नु आन थुं लुकच लतीके मोसा आ लोत्र मनेनेम।

10 मिनू परमप्रभु यावेमी मोसा कली

11 “गे इजीप्त डा पिप फाराओ कली ‘इस्राएली आन कली इन रागी रे लचा गेने’ दे मतो” देंत।

12 मिनू मोसामी परमप्रभु यावे कली “इस्राएलीपुकीमी ला यो आं लोत्र मनेनेम हना, गो ब्वाक्स मजोक्ब मुर आं लोत्र फाराओम दोपा नेंबा?” दे लोत्र लेत्ताक्व। प्रस्थान ६:३०; प्रस्थान ४:१०

13 मोपा परमप्रभु यावेमी मोसा नु हारून आस कली इस्राएली आन पर्बम लोत्र पाप्टु। मिनू “गेमी इजीप्त डा पिप फाराओ कली ‘इस्राएली आन कली इन रागी रे लचा गेचा माल्नीनी’ दे रूप्तीस” देंत।

मोसा नु हारून आस किक्की पिपी

14 इस्राएली आन किक्की पिपी आन दातेमी टेयब दुम्शो, सु सु बाक्मा बाक्त देशा हना, इस्राएल आ डोंइती जरमेशो तौ रूबेन मेको आ तौपुकी हनोक, पल्लु, हेसोन नु कारमी बाक्मा बाक्त। मेको रूबेन आ खिं खिं डा मुर बाक्मा बाक्त। उत्पत्ती ४६:९-११

15 सिमियोन आ तौपुकी येमुएल, यामीन, ओहद, याकीन नु सोहार बाक्मा बाक्त। मिनू का कनानी मीश रे जरमेशो शावल बाक्माक्त। मेको सिमियोन आ खिं डा मुर बाक्मा बाक्त।

16 मिनू लेवी आ तौ आन खिं खिं डा मुर सु सु बाक्मा बाक्त देशा हना, गेरशोन, कोहाथ नु मेरारी बाक्मा बाक्त। मिनू लेवी सहे का ३७ बर्स ब्रोंइमाक्त। इइतिहास ५:२७-३०; इइतिहास ६:१-४

17 गेरशोन आ तौ लिब्नी नु शिमेइ बाक्सा बाक्त।

18 कोहाथ आ तौपुकी अग्राम, इच्छार, हेब्रोन नु उज्जीएल बाक्मा बाक्त। मिनू कोहाथ सहे का ३३ बर्स ब्रोंइमाक्त।

19 मिनू मेरारी आ तौ माहली नु मुशी बाक्सा बाक्त। मेको लेवी आ खिं खिं डा मुर बाक्मा बाक्त।

20 मिनू अग्राममी आ आफ आ समी चाक्गा बाक्त। मेको आ नें योकेबेद बाक्माक्त। मेकोमी हारून नु मोसा थिमाक्त। अग्राम सहे का ३७ बर्स ब्रोंइमाक्त। प्रस्थान २:१; लेवी १८:१२

21 इच्छार आ तौपुकी कोराह, नेफेग नु जिक्की बाक्मा बाक्त। गन्ती १६:१

22 उज्जीएल आ तौपुकी मीशाएल, एल-साफान नु सिथ्री बाक्मा बाक्त। लेवी १०:४

23 मिनू हारूनम नहशोन आ समी अम्मीनादाब आ तमी एली-शेबा चाक्गा बाक्त। मेकोमी नादाब, अबीहु, एलाजर नु इथामार थिमाक्त। प्रस्थान २८:१

24 कोराह आ तौपुकी अस्सीर, एल्काना नु अबी-आसाफ बाक्मा बाक्त। मेको कोराह आ खिं डा मुर बाक्मा बाक्त।

- 25 मिनू हारून आ तौ एलाजरम पुतीएल आ तमी चाक्या बाक्त। मेकोमी फिनेहास थिमाक्त। मेकोपुकी लेवी आ खिं डा ठेयब मुर बाक्मा बाक्त। गन्ती २५:७
- 26 मिनू परमप्रभु यावेमी हारून नु मोसा कली “गे इस्राएल डा मुरपुकी हुल हुल पा इजीप्त रागी रे गुंडीस” दैत। प्रस्थान ६:१३
- 27 मिनू मेको निकशीमी इजीप्त डा पिप फाराओ कली “इस्राएल डा मुर आन कली लचा गेने” दे लोत्र पाम्ताक्से।
- 28 मिनू परमप्रभु यावेमी इजीप्त रागीमी मोसा कली
- 29 “गो परमप्रभु यावे नड। गे इजीप्त डा पिप फाराओ कली आं देशो लोत्र नेल्ल माइक्या माल्नेवे” दैत।
- 30 मिनू मोसामी परमप्रभु यावे कली “गो ब्वाक्स मजोक्ब मुर नड। दोपा फाराओमी आं लोत्र नैबा डा?” दैत। प्रस्थान ६:१२

## 7

### मोसामी चिन्ड कोइशो

- 1 परमप्रभु यावेमी मोसा कली “नेनो, गो इ कली फाराओ आ डोंइती परमप्रभु खोदेशो पा चिन्ड कोइने चापब सेल्लत। इ लोक्ब हारून चहिं इ लोत्र पाइब दुम्ब। प्रस्थान ४:१६
- 2 गो इ कली मार मार माइक्ना, गे मेको दैचा माल्नेवे। मिनू इ लोक्ब हारूनमी ‘इस्राएली आन कली इन रागी रे लचा गेन’ दे फाराओ कली दैचा माल्ब।
- 3 तन्न गो फाराओ कली काइ मटीब सेल्लुड। मिनू गो इजीप्त रागीमी शुश चिन्ड नु छक लाक्या डा गेय कोइनुड। प्रस्थान ४:२१
- 4 मिनू फाराओमी इस कली मटीब। मिनू गो इजीप्त डा मुर आन कली थाम्पान सजाइ गेशा, आं शुश मुर आन कली इजीप्त रागी रे गुंडनुड।
- 5 गो इजीप्त डा मुर आन कली थाम्पान सजाइ गेशा, इस्राएली आन कली आन दाते रे गुंडदुनु ‘गो परमप्रभु यावे नड’ दे इजीप्त डा मुर आन कली तुइक्पाइक्नुड” दैत। प्रस्थान ७:१७; प्रस्थान ८:१८; प्रस्थान ९:२९; १सामुएल १७:४६; १राजा २०:२८; २राजा १९:१९; इजीकीएल २९:६
- 6 मिनू मोसा नु हारूनमी परमप्रभु यावे आ देशो पाम्ताक्से।
- 7 मोपा फाराओ नु लोत्र पची ना, मोसा ८० बर्स दुम्शो बाक्त। हारून ८३ बर्स दुम्शो बाक्त।

### कोक्के ब्वारशा बुस्स दुम्पाइशो

- 8 मिनू परमप्रभु यावेमी मोसा नु हारून आस कली
- 9 “फाराओमी इस कली ‘छक लाक्या डा चिन्ड कोइदीसे’ देमिनु, गेमी हारून कली ‘इ कोक्के बुस्स दुम्पाइक्या कली फाराओ आ डोंइती ब्वारदो’ दैचा माल्नेवे। मिनू मेको कोक्के बुस्स दुम्ब” दैत। प्रस्थान ४:३
- 10 मोपा मोसा नु हारूनमी परमप्रभु यावे आ देशो पशा, फाराओ आ बाक्तीकेमी लाम्ताक्स। मिनू हारूनमी आ कोक्के फाराओ नु आ गेय पाइब मुर आन डोंइती ब्वारताक्व। मिनू मेको कोक्के बुस्स दुम्त।
- 11 मिनू फाराओमी इजीप्त रागी डा जादू नु टुना मुना पाइब आन कली ब्रेत्ताक्मी। मेकोपुकीमी यो आन टुना मुनामी हारून खोदेशो पा आन कोक्के ब्वारशा, बुस्सपुकी सेल्लेक्म। प्रस्थान ७:२२; प्रस्थान ८:३; उत्पत्ती ४१:८; रतिमोथी ३:८
- 12 तन्न हारून आ कोक्के रे दुम्शो बुस्सुमी मेको आन कोक्के रे दुम्शो बुस्स नेल्ल आन कली दाक्तीमी।
- 13 मिनू परमप्रभु यावेमी देशो खोदेशो पा फाराओ काइ मटीब दुम्शा, मोसा नु हारून आस देशो लोत्र मबिस्से। प्रस्थान ४:२१

### ब्वक्कु नेल्ल हुश सेल्शो

- 14 मिनू परमप्रभु यावेमी मोसा कली “फाराओ काइ मटीब दुम्त। आं मुर आन कली लचा मगेब।
- 15 गे दीसा सुनी फाराओ गुम्थ लचा माल्नीसी। फाराओ ब्वक्कु आ नेक्था लमेनु, गे मेको आ क्येडा डोंइती खोला आ नेक्था जाक्दीशशा, रिष्शा बाक्चा माल्नीसी। बुस्स दुम्ब कोक्के यो लाइक्या माल्नीसी।
- 16 मिनू गे मेको कली ‘परमप्रभु यावे, हिब्रू मुर आन परमप्रभुमी इन कली, आं मुर आन कली आं कली चढ़ेतीक चढ़ेथ गोरशो रागी लचा गेवो, दैती। तन्न गे मुल सम्म आं लोत्र मटिवी’ दैत” देनीस। प्रस्थान ५:१
- 17 मोपतीके परमप्रभु यावेमी “गो परमप्रभु यावे नड। गे आं पतीकेमी तुइक्नेवे। गो आं कोक्केमी नील खोला डा ब्वक्कु तुनुड। मिनू मेको हुश दुम्ब। प्रस्थान ४:९
- 18 मिनू खोला डा डांइ नेल्ल बेक्नीम। खोला शुश राक्शो रिना पाइब। मिनू इजीप्त डा मुरपुकी मेको ब्वक्कु तूचा ग्राना दीनीम” दे मोसा कली दैत।
- 19 मिनू परमप्रभु यावेमी मोसा कली “गेमी हारून कली ‘इ कोक्के इजीप्त रागी डा ब्वक्कु हुश दुम्पाइक्या कली ब्वक्कु तारी दिंदो। नादी, खोला, कुवा नु इनार आन तारी दिंदो। मुर आन चाक्शो ठेका नु गरम बाक्शो ब्वक्कु यो हुश दुम्ब’ दे हारून कली देनो” दैत। प्रकाश ११:६
- 20 मिनू परमप्रभु यावेमी मोसा नु हारून कली दोदेशो देमे, मोदेशो पाम्ताक्स। मोसामी फाराओ नु आ गेय पाइब आन डोंइती आ कोक्के खोला डा ब्वक्कु तार दिशा तुबानु, हुश दुम्त।



21 मोपा नील खोला डा डांड नेल्ल बेक्तेक्म। मिनू ब्वाक्कु राक्शो रिना पाडशो दुम्त। इजीप्ट रागी डा मुर नेल्लेमी नील खोला डा ब्वाक्कु तूने मचबेम। इजीप्ट रागी नेल्ल हुशेइ हुश दुम्त।

22 इजीप्ट रागी डा टेयब टुना मुना पाडबपुकीमी यो आन मन्तरमी आस पशो खोदेशो पाक्तेक्म। फाराओ आ थुं चहिं डोंइती डा खोदेशो पा काइ मटीब दुम्माक्त। मिनू मोसा नु हारून आस देशो मटिवो। परमप्रभु यावेमी डोंइती दोदेशो देमे, मोदेशो दुम्त। प्रस्थान ७:११

23 मिनू फाराओ आ खिं लेम्माक्त। मार दुम्मे, मारेइ ममिम्ता बाक्त।

24 इजीप्ट रागी डा मुरपुकीमी नील खोला आ नेक्था शुश कुवा दोम्तेक्म। मारदे हना नील खोला डा ब्वाक्कु काइ तूचा मदुम।

25 मोपा परमप्रभु यावेमी नील खोला डा ब्वाक्कु तुप्शा, हुश दुम्शो ७ नाक्ती दुम्त।

## 8

### कुक्कु गूपाइशो

1 मिनू नोले परमप्रभु यावेमी मोसा कली “गे फाराओ आ बाक्तीक लावो। परमप्रभु यावेमी आ मुर आन कली लचा गेमी। प्रस्थान ५:१

2 गे लचा मगेतीनी हना, कुक्कुपुकीमी इ रागी डा मुर नेल्ल आन कली श्येत गेपाइक्नुडमी।

3 नील खोलाम शुश कुक्कु गूपाइक्नुड। मेकोपुकी इन खिंम बाक्थ जाक्नीम। इन इप्तीक कोठामी यो ओवनीम। इन खाट तार डोंइक्नीम। मिनू इन दरवार डा गेय पाइब आन खिंमी यो ओवनीम। मुर आन तार नु आन चुप्तुमी यो बाक्नीमी। आन फस नित्तीके बोस आगाम ओवनीम।

4 मेको कुक्कुपुकी इन तारी, इन मुर आन तारी नु इन दरवार डा गेय पाइब आन तारी जाक्नीम, दे परमप्रभु यावे आ देशो लोत्र बाक्ब, दे मतो” दे मोसा कली देंत।

5 मिनू नोले परमप्रभु यावेमी मोसा कली “गेमी हारून कली “इ कोक्के खोला नेल्ल आन तार दिदो। मोपा गे इजीप्ट रागीम कुक्कु गूपाइक्नेवे” दे हारून कली देनो” देंत।

6 मिनू हारूनमी आ गुड इजीप्ट डा ब्वाक्कु तारी दिताक्व। मिनू कुक्कुपुकी गूशा, इजीप्ट रागी नेल्ल ब्रीतेक्म।

7 इजीप्ट रागी डा जादू टुना मुना पाडबपुकीमी यो आन मन्तरमी हारून खोदेशो पा कुक्कु गूपाइक्तेक्म। प्रस्थान ७:११

8 मिनू फाराओमी मोसा नु हारून आस कली ब्रेप्पाइशशा “आं पबंम नु आं मुर आन पबंम परमप्रभु यावे कली पुनीस। कुक्कु लमल, दे पुनीस। गोमी इस्राएल जात डा मुर आन कली परमप्रभु यावे कली चढेथ लचा गेनुड” दे मोसा नु हारून आस कली देंत। प्रस्थान ८:२४; प्रस्थान ९:२८; प्रस्थान १०:१७

9 मिनू मोसामी फाराओ कली “हजुर, इन कली नु इन गेय पाइब आन कली, इन मुर आन खिं नु इन खिं रे कुक्कु लमल, नील खोलाम ला बाक्मल, दे गेना पुंडुचा माल्नस्कु?” दे हिल्लो पाप्तु।

10 मिनू “दीसा कली पुनीस” दे लोत्र लेत्ताक्व। मोसामी “परमप्रभु यावे आंइ परमप्रभु खोदेशो मुइ मबा, दे तुडक्पाइक्चा कली इन देशो दीसा दुम्ब। प्रस्थान ९:१४; प्रस्थान १५:११; ब्यवस्था ३३:२६; २सामुएल ७:२२; येरमीया १०:६

11 दीसा कुक्कुपुकी इन बाक्तीक, इन गेय पाइब नु इन मुर इन खिं नेल्ल रे गाक्नीमी। नील खोलाम ला बाक्नीम” देंत।

12 मोपा मोसा नु हारून फाराओ आ खिं रे लाम्ताक्स। मिनू मोसामी मेको परमप्रभु यावे आ सोइशो कुक्कु आ पबंम पुंडुतु।

13 मिनू परमप्रभु यावेमी मोसामी पुंडुशो नेशा पाप्तु। खिंम, लाडगाम नु रूम बाक्शो कुक्कु नेल्ल बेक्तेक्म।

14 मुरुमी बेक्शो कुक्कु नेल्ल खुप्ताक्म। मिनू रागी नेल्ल थाम्पा रिना पाइक्तु।

15 इजीप्ट रागी डा फाराओ चहिं मेको कुक्कु रे ब्रोंइशो तशा, आ थुं डोंइती डा खोदेशो पा काइ मटीब दुम्माक्त। मिनू मोसा नु हारूनम देशो लोत्र मपव। डोंइती परमप्रभु यावेमी मो देशो बाक्माक्त। प्रस्थान ४:२१

### भुम्ना गूपाइशो

16 मिनू नोले परमप्रभु यावेमी मोसा कली “गेमी हारून कली “इ कोक्के दिंशा, फुरक तुपो” दे मतो। मिनू मो पवानु, इजीप्ट रागीमी फुरक नेल्ल भुम्ना दुम्शा फोंइनीम” दे मोसा कली माइक्तु। प्रस्थान

17 मिनू हारूनमी फुरक तुवानु, इजीप्ट रागी नेल्लेमी मुर नु बस्तु भाव आन तारी भुम्ना शुश फोंइतेक्म।

18 इजीप्ट रागी डा जादू टुना मुना पाडबपुकीमी यो हारून खोदेशो पा भुम्ना गूपाइक्चा माल्लेक्म। तन्न मचबेम। मुर नु बस्तु भाव आन तारी भुम्ना शुश जुक्ताक्म। प्रस्थान ७:११

19 मिनू जादू टुना मुना पाडबपुकीमी फाराओ कली “एको परमप्रभुमी पाप्तु” देमा बाक्त। फाराओ चहिं काइ मटीब दुम्माक्त। मिनू मोसा नु हारून आस देशो लोत्र मटिव। परमप्रभु यावेम डोंइती देशो खोदेशो दुम्त। भजन संग्रह ६४:१०; भजन संग्रह ७२:१८; लूका ११:२०

### डांस गूपाइशो

20 मिनू परमप्रभु यावेमी मोसा कली “सुनी कना बोक्को। फाराओ खोला लमेनु, मेको कली युम्थ लावो। मिनू फाराओ कली ‘परमप्रभु यावेमी, आं मुर आन कली आं कली चढेथ लचा गेवो। प्रस्थान ५:१

21 नेनो, गे आं मुर आन कली लचा मगेप्तीवी हना, गो इ कली, इ गेय पाइब आन कली नु इ मुर नेल्ल आन कली श्येत जपाइक्चा कली इ खिंमी, इ रागी डा मुर आन खिंमी डांसम ब्रीपाइक्नुड। रू नेल्ल डांसम ब्रीपाइक्नुड।

22 मेको मो दुम नाक्ती आं मुर आन बाक्तीक गोशेनमी चहिं डांस मगूपाइक्नुड। अरु इजीप्त रागीमी गूपाइक्नुड। आं परबम तुडक्पाइक्का कली मो पाइनुड। मिनु गे आं परबम परमप्रभु यावे मेको रागीम बाक्ब, दे तुडक्का माल्नेवे। प्रस्थान 9:५

23 मोदेशो पा गो आं मुर आन बाक्तीकेमी डांस मगूपाइक्नुड। इ मुर आन बाक्तीकेमी ला डांस गूपाइक्नुड। दीसा गे तुडक्नेवे, देनो' दैत" दे परमप्रभु यावेमी मोसा कली दैत।

24 मिनु परमप्रभु यावेमी आ देशो पापु। डांस शुश फोंइशा फाराओ आ खिं, आ दरवारम गेय पाइब आन खिं, इजीप्त रागी नेल्लेमी शुश डांस फोंइशा ब्रीतेकम। मिनु डांसमी मेको रागी नेल्ल खतम सेल्लेकम।

25 मिनु नोले फाराओमी मोसा नु हारून आस कली ब्रेप्पाइशशा "लने, इन परमप्रभु कली आं रागी उइ चढ़ेने" दैत।

26 मोसामी चहिं "मो पचा मदुम्ब। मारदे हना परमप्रभु यावे, आंइ परमप्रभु कली चढ़ेशो तशा, इजीप्त डा मुर ग्रांघा दीनीम। मोपा इजीप्त डा मुर आन डोंइती आन मदाक्शो गेय पकानु, मेकोपुकीमी आंइ कली फुल्लु आप्शा, साइक्नीम। उत्पत्ती ४३:३२; उत्पत्ती ४६:३४

27 गोपुकी नाक्त सां डा लां गाक्शा, गोरशो रागीम लशा, परमप्रभु यावेम देशो खोदेशो पा चढ़ेचा माल्नीकी" दैत। प्रस्थान ३:१८

28 मिनु फाराओमी "गो इन कली गोरशो रागीम परमप्रभु यावे, इन परमप्रभु कली चढ़ेथ लचा गेनुड। शुश डोन चहिं मलने। आं परबम यो पुनीस" दैत।

29 मिनु मोसामी "मुल गो एंकेर रे लशा, परमप्रभु यावे कली पुंइनुड। मार पुंइनुड देशा हना 'दीसा फाराओ, आ गेय पाइब नु रागी डा मुर नेल्ल आन बाक्तीक रे डांस प्रोक्पतीने' दे पुंइनुड। तन्न लोत्र का पाइनुड। गे आंइ कली परमप्रभु यावे कली चढ़ेचा दुम्ब, दे नोले 'लचा मगेनुड' देशा, जोल मपने" दे मोसामी फाराओ कली दैत।

30 मो देशा मोसा फाराओ आ खिं रे लशा, परमप्रभु यावे कली पुंइतु। प्रस्थान ८:८

31 मिनु परमप्रभु यावेमी मोसा आ पुंइशो लोत्र नेशा पापु। मिनु डांस फाराओ आ खिं, आ गेय पाइब नु मुर नेल्ल रे तिल्लु। काइ मलीम।

32 तन्न फाराओ लेशा काइ मटीब दुम्शा, इस्राएली आन कली लचा मगेव। प्रस्थान ४:२१

## 9

बस्तु भाव बेक्पाइशशो

1 मिनु परमप्रभु यावेमी मोसा कली "फाराओ आ बाक्तीके लावो। मिनु गे परमप्रभु यावे, हिबू मुर आन परमप्रभुमी इन कली 'आं मुर आं कली चढ़ेथ लचा गेवो। प्रस्थान ५:१

2 नेनो, गे मेको आन कली लचा मगेथु, तेक्तीवी हना, यसैया १:२०

3 परमप्रभु यावेमी इन गोठम बाक्शो बस्तु भाव आन कली ठेयब रोइ पपाइक्ब। इन शारा, गधा, दलओठ, बी ब्यफ नु क्यारश भेडा नेल्ल आन कली बेक्तीक रोइ पपाइक्ब। प्रस्थान ३:२०

4 तन्न इस्राएली आन बस्तु भाव आन कली रोइ मपपाइक्ब। इजीप्त डा मुर आन बस्तु भाव आन कली चहिं रोइ पपाइक्ब। इस्राएली आन बस्तु भाव मबेक्नीम" दे फाराओ कली माइक्का माल्नेवे" दे परमप्रभु यावेमी मोसा कली दैत। प्रस्थान ८:१८

5 मिनु परमप्रभु यावेमी "गो दीसा इजीप्त रागीम मो पाइनुड" दैत।

6 मिनु आ दीसा परमप्रभु यावेमी आ देशो पापु। इजीप्त रागी डा मुर आन बस्तु भाव बेक्मा बाक्त। तन्न इस्राएली आन बस्तु भाव चहिं मबेक्म।

7 मिनु फाराओमी इस्राएल डा मुर आन बस्तु भाव यो बेक्मा कों, दे कोत्रथ मुर सोइक्ताक्व। तन्न का यो मबेक्शो बाक्तेकम, दे तुडक्पाइक्तेकम। मोपा यो फाराओ काइ मटीब दुम्शा, इस्राएली आन कली लचा मगेव। प्रस्थान ४:२१

परमप्रभुमी गार मुपाइशशो

8 मिनु नोले परमप्रभु यावेमी मोसा नु हारून आस कली "गे चुप्लु डा पुलु हुइशशा कुरशा लस। मिनु मोसामी फाराओ आ डोंइती मेको पुलु सरीड गे फ्रचा माल्ब।

9 मेको पुलु फुरक दुम्शा, मुर नु बस्तु भाव आन कली मरिम्शो गार मुपाइक्ब। इजीप्त रागी नेल्लेमी मोदेशो दुम्ब" दैत। ब्यवस्था २८:२७

10 मिनु मोसा नु हारूनमी चुप्लु डा पुलु हुइशशा कुरशा, फाराओ आ डोंइती राप्ताकस। मिनु मोसामी मेको पुलु सरीड गे फ्रापु। मिनु मुर नु बस्तु भाव नेल्ल शुश गार मुतेकम। प्रकाश १६:२

11 मिनु इजीप्त रागी डा जादू पाइबपुकी यो शुश गार मुशा, रोइ पशा, मोसा आ नेक्था बाक्ने मचबेम।

12 परमप्रभु यावेमी फाराओ कली काइ मटीब दुम्पदा बाक्त। मिनु मोसा नु हारून आस लोत्र मटिव। परमप्रभु यावेमी मोसा कली डोंइती दोदेशो देमे मोदेशो दुम्त। प्रस्थान ४:२१

ठेयब मुप्स यिपाइशशो

13 मिनु परमप्रभु यावेमी मोसा कली "सुनी कना बोक्शा, फाराओ कली गुम्थ लशा, परमप्रभु यावे, हिबू मुर आन परमप्रभुमी इन कली 'आं मुर आन कली आं कली चढ़ेथ लचा गेवो। प्रस्थान ५:१

14 मारदे हना मुल रे गेयशो श्येतम इ कली, इ गेय पाइब आन कली नु इ मुर नेल्ल आन कली सोइक्नुड। रागी रागीमी आं खोदेशो सुइ मबाक्ब, दे इ कली तुडक्पाइक्नुड। प्रस्थान ८:६

- 15 मुल गो इ कली नु इ मुर आन कली बेक्तीक रोइ पपदु वा।
- 16 तन्न गो आं सक्ति रागी नेल्लेम तुइक्पाइक्चा कली इ कली मुल सम्म ब्रोंइचा गेता। आ नें रागी नेल्ल डा मुर आन कली तुइक्पाइक्चा, दे इ कली ब्रोंइचा गेता। प्रस्थान १४:४; रोमी ९:१७
- 17 गे आं मुर आन कली लचा मगेतीके, इ ठेयब लेशशो तुइक्ताक्ड।
- 18 नेनो, दीसा गो शुश मरिम्शो मुप्स यिपाइक्नुड। मुल सम्म इजीप्ट रागीमी मुर बाक्चा गोव्रमे रे मोदेशो ठेयब मुप्स गेनायो मयिंशो बाक्ब।
- 19 मोपतीके इ बस्तु भाव आन कली खिं आगा ओइदो। मारदे हना मुर नु बस्तु भाव, सु सु लाडगाम बाक्नीमी, मेको मुप्सीम तुप्शा बेक्नीम' देनो देत" दे परमप्रभु यावेमी मोसा कली देंपाइक्तु।
- 20 फाराओ आ गेय पाइब आन दातेमी सु सु परमप्रभु यावे क्येडा हिंमा, मेकोपुकीमी आन गेय पाइब नु आन बी ब्यफ, क्यारश भेडा आन कली खिं आगा ओइताक्म।
- 21 सु सु परमप्रभु यावे आ देशो लोव क्येडा महिंमा, मेकोपुकीमी चहिं आन गेय पाइब नु आन बस्तु भाव आन कली खिं आगा मओइदेम।
- 22 मिनु नोले परमप्रभु यावेमी मोसा कली "इ गुइ सरीड गे दिंदो। मो पवीनु, इजीप्ट रागी नेल्लेमी मुप्स यीब। मुप्स यिशा, मुर बी ब्यफ, क्यारश भेडा नु रू आन तारी देलब" दे परमप्रभु यावेमी मोसा कली देत।
- 23 मिनु मोसामी आ कोक्के सरीड गे दिंदा, बुंबु चिला पा, मुप्स यित। मोपा परमप्रभु यावेमी इजीप्ट रागीमी मुप्स यिपाइक्तु। मिनु परमप्रभु यावेमी चिला दाप्पाइशशा, मुप्स यिपाइक्तु। प्रकाश १६:२१
- 24 चिला पना पन मुप्स यित। मेको मुप्स थम कोल्कोल्शो बाक्तेक्म। इजीप्ट रागीम मुर बाक्चा गोव्रमे रे मोमो कोल्शो मुप्स गेनायो मतशो बाक्तेक्म।
- 25 मिनु इजीप्ट रागी डा रूम वाशो मारेड मारेड मुप्सीमी श्येत्थ पोक्तु। मुर नु बी ब्यफ, क्यारश भेडा आन कली साइक्तु। रूम मार मार ख्रुम्शो बाक्मे, मेको नेल्ल साइशशा, रवा आन कली यो जिक्तु।
- 26 इस्राएली आन बाक्तीके गोशेनमी ला मुप्स मयी। प्रस्थान ९:४; प्रस्थान ८:१८
- 27 मिनु फाराओमी मोसा नु हारून आस कली ब्रेत्ताक्मसी। मिनु मेको आस कली "मुल गो पाप पाता। परमप्रभु यावे ठीक पाइब बाक्ब। गो नु आं मुरपुकीम मरिम्शो पाइतक।
- 28 आंइ परबम परमप्रभु यावे कली पुनीस। एको बुंबु नु मुप्स मयिपदल। गो इन कली लचा गेनुड। मुल गे एकेर बाक्चा ममालनीनी" देत। प्रस्थान ८:४
- 29 मिनु मोसामी "गो सहर रे लशा, इन परबम आं गुइ पोक्शा, परमप्रभु यावे कली पुंडनुड। नोले बुंबु पचा नु मुप्स यिचा नाइक्ब। मिनु गे रागी नेल्ल परमप्रभु यावे केन बाक्ब, दे तुइक्नीनी। प्रस्थान ७:५
- 30 तन्न गे नु इन दरवार डा गेय पाइबपुकी मुल सम्म परमप्रभु, परमप्रभु यावे कली महिंशो बाक्नीनी, दे तुइक्ताक्ड" दे फाराओ कली देत।
- 31 मेको मुप्सीमी मार पाप्टु देशा हना, सनपाट नु क्योव्रज नेल्ल खतम सेल्लु। मारदे हना क्योव्रज बाला दुम्ने थुम्शो नु सनपाट बोइक्ने थुम्शो बाक्त।
- 32 तन्न चेरब नु अर्को अन्न चहिं नोले ला मीबाक्तेक्म। मोपतीके मसद।
- 33 मोदेशो दुम्शा मोसामी फाराओ आ बाक्तीके रे लशा, आ गुइ परमप्रभु यावे गे पोक्शा, फाराओ आ परबम पुंडतु। मिनु बुंबु पा, मुप्स नु रेड यिचा नाइक्ताक्व।
- 34 मिनु फाराओ नु आ गेय पाइबपुकीमी रेड, मुप्स यिचा नु बुंबु पचा नाइशशो तशा, लेंशा पाप पाप्तेक्म। मोपा मटीम।
- 35 फाराओ काइ मटीब दुम्शा, इस्राएली आन कली लचा मगेव। परमप्रभु यावेमी मोसा कली देशो खोदेशो दुम्त। प्रस्थान ४:२१

## 10

सल्हा माले गूपाइशशो

- 1 मिनु परमप्रभु यावेमी मोसा कली "गे फाराओ कली आं चिन्डपुकी कोंइचा कली युम्थ लसे। मारदे हना गो मेको नु आ गेय पाइब आन कली काइ मटीब दुम्पाइक्ता।
- 2 मिनु गे इ चच युइ आन कली 'गो इजीप्ट डा मुर आन कली मार मार पडा' मेको शेंदो। गो मोदेशो चिन्ड कोंइब बाक्नुड। 'गो परमप्रभु यावे नड' दे नेल्लेमी तुइक्तमेक्ल" देत। प्रस्थान ६:२-८
- 3 मिनु मोसा नु हारून फाराओ आ बाक्तीके जाक्दीशशा, मेको कली "हिबू आंइ परमप्रभु यावे, हिबू मुर आन परमप्रभुमी इन कली 'गेना सम्म गे आं डोंइती ठेयब लेशशा बाक्नेवे? आं मुर आन कली आं कली चढ्थे लचा गेवो। प्रस्थान ५:३
- 4 नेनो, गे आं मुर आन कली लचा मगेनेवे हना, दीसा इ रागीम शुश सल्हा माले जाक्पाइक्नुड।
- 5 मेकोपुकीमी रागी मतचा डा पा सुन्नीम। मिनु मुप्स रे पा गिग खाइ मार मार लीशो बाक्मा, मेको नेल्ल नेक्नीम। रवा आन सफा यो नेल्ल नेक्नीम।
- 6 मिनु मेकोपुकी इ खिं, इ दरवार डा गेय पाइब आन खिं नु नेल्ल इजीप्ट डा मुर आन खिं खिंम ओव्रशा ब्रीनीम। इ किक्की पिपीम मोदेशो गेनायो मतामे' दे परमप्रभुमी इन कली देत" दे मोसामी देत। मिनु मोसा फो गूशा गाक्त।
- 7 मिनु फाराओ आ दरवार डा गेय पाइबपुकीमी फाराओ कली "मेको मुक्म आंइ कली गेना सम्म श्येत गेबा? मेको मुर आन कली परमप्रभु यावे, आन परमप्रभु कली चढ्थेचा गेने। इजीप्ट रागी मुल थुम्साक्व, दे मतुइक्नीनी?" देमा बाक्त।

8 मिनु मेकोपुकीमी मोसा नु हारून आस कली फाराओ आ बाक्तीके लेशशा चाक्तेकम। मिनु फाराओमी मेको आस कली “गो लने। परमप्रभु यावे, इन परमप्रभु कली गेय पने। सु मु लाइक्नीनी?” दे हिल्लो पाप्तु।

9 मिनु मोसामी “परमप्रभु यावे आ चाड मानीचा कली गो तमी तौ, खाल्पी खाल्पा, बी ब्यफ नु क्यारश भेडा नेल्ल लाइशशा, लचा माल्नीकी” दैत। प्रस्थान ५:१

10 मिनु फाराओमी मेको आस कली “इन परमप्रभु यावे गे नु बाक्शो खोदेशो पा गो इन कली नु इन आल नु लचा मंगेनुड। गे मरिम्शो पचा माल्नीनी, दे आंमा तुइक्नीसी।

11 मोदेशो मदुम्ब। वोंइश मुरपुकी ला परमप्रभु यावे कली चढेथ लने। मारदे हना एकोन इन माल्शो बाक्ब” दे हुइक्ताक्व। मिनु फाराओ आ डोंइती रे खेरतु।

12 मिनु परमप्रभु यावेमी मोसा कली “सल्हा माले यूपाइक्चा कली इ गुइ इजीप्ट रागी तार दिंदो। मेकोपुकीम रागीमी मार मार गिग खाइपुकी मुप्सीम हेंशो बाक्मा, मेको ब्वाइनीमी” दैत। प्रस्थान ९:३२

13 मिनु मोसामी आ कोक्के इजीप्ट रागी तार दिताक्व। मेको नाक्त रे आ दीसा सुम्म परमप्रभु यावेमी पूर्व रे फश पपाइक्वतु। मिनु सुनी नां सोवमेनु, पूर्व रे पिशो फशेमी सल्हापुकी चाक्वतु। योएल १:२-१२; योएल २:१-११

14 मिनु सल्हा मालेमी इजीप्ट रागी नेल्ल सुम्तेकम। डोंइती रे मोदेशो शुश सल्हा माले गेनायो मबाक्शो बाक्मा बाक्त। मिनु नोले यो मोदेशो गेनायो मदुम्माक्वतु।

15 मेको शुश सल्हा माले बेरमानु, नाक्ती यो नाक्दो खोदेशो पा छिडछिड दुम्त। मेको सल्हा मालेमी मुप्स रे लीशो रू डा वाशो नु रवा डा फल नेल्ल नेक्तेकम। मार मार गिग बाक्मा, मारेइ महेंदेम। इजीप्ट रागी डा रवा नु गिग खाइ नेल्ल नेक्तेकम।

16 मिनु फाराओमी रीब पा मोसा नु हारून आस कली ब्रेप्पाइक्वतु। मिनु मेकोमी “गो परमप्रभु यावे, इन परमप्रभु आ डोंइती पाप पाता। मिनु इस कली यो मरिम्शो पाता। प्रस्थान ९:२७

17 मुल खेयप का ला आं कली माफ गेयीसी, दे पुंडनुड। मिनु आं पर्बम परमप्रभु यावे, इन परमप्रभु कली पुनीस। सल्हा माले खेरशा, अन्काल रे मबेक्पाइक्चा नम, दे पुनीस” दे मोसा नु हारून आस कली माइक्तीम्सी। प्रस्थान ८:४

18 मो देंम नोले मोसा फाराओ आ डोंइती रे लशा, परमप्रभु यावे कली पुंडतु।

19 मिनु परमप्रभु यावेमी नां परेतीक रागी रे ठेयब फश गिवार सोइक्ताक्व। मेको फश गिवारमी सल्हा माले आन कली हुरशा, लल समुन्द्रम ताइक्ताक्व। मिनु मोपा इजीप्ट रागीम सल्हा माले काइ मलीम।

20 तन्न परमप्रभु यावेमी फाराओ कली मबिप्पाइक्चा कली काइ मटीब दुम्पाइक्वतु। मोपतीके मेकोमी इस्राएली आन कली लचा मगेव। प्रस्थान ४:२१

### छिडछिड दुम्पाइशशा

21 मिनु परमप्रभु यावेमी मोसा कली “इ गुइ सरीड गे पोक्को। मो पवीनु, इजीप्ट रागीम हिंचा डा पा छिडछिड दुम्ब” दे माइक्वतु।

22 मिनु मोसामी आ गुइ सरीड गे पोक्वतु। मिनु इजीप्ट रागीमी नाक्त सां सम्म शुश छिडछिड दुम्त। मारेइ मतांइस।

23 मिनु मेकोपुकी मतमुथु, आन बाक्तीक रे बोक्ने मचबेम। तन्न इस्राएली आन बाक्तीकेमी चहिं छेडछेड बाक्त।

24 मिनु फाराओमी मोसा कली ब्रेशशा “लने, परमप्रभु यावे कली गेय पने। इन आल नु मीश आन कली यो लाइक्ने चाप्नीनी। इन बी ब्यफ नु क्यारश भेडा चहिं मेकेरेन बाक्मल” दैत। प्रस्थान १०:१०

25 मोसामी चहिं “आंइ चढेतीक नु चोशा चढेतीक बस्तु भाव नेल्ल लाइक्चा माल्नीकी। मेको ला परमप्रभु यावे, आंइ परमप्रभु कली चढेने चाप्नीकी।

26 गोपुकी आंइ बी ब्यफ, क्यारश भेडा नेल्ल लाइशशा, लचा माल्नीकी। का यो मप्रोंइथु लाइक्चा माल्नीकी। परमप्रभु यावे, आंइ परमप्रभु कली मार चढेचा माल्नीकी मुल मजाक्दीशशा सम्म मतुइक्नीकी” दे फाराओ कली माइक्वतु।

27 परमप्रभु यावेमी चहिं फाराओ कली काइ मटीब दुम्पाइक्वतु। मोपतीके फाराओमी इस्राएली आन कली लचा मगेव। प्रस्थान ४:२१

28 मिनु फाराओमी मोसा कली “मुल एकेर रे लावो। आं कली युम्थ मपिवो। गे लेंशा आं कली युम्थ पिते हना, गो इ कली साइक्नन” दैत।

29 मिनु मोसामी “दुम्ब, गो इन कली लेंशा युम्थ मपीनुड” दैत।

## 11

### डोंइती जरमेशो तौ नेल्ल बेक्शो

1 मिनु परमप्रभु यावेमी मोसा कली “फाराओ नु इजीप्ट रागी डा मुर आन कली नेल्ल क्येडा नोले डा बेक्चा डा श्येत का गेनुड। मिनु इन कली लचा गेब। लचा गेवानु, नेल्ल इन कली ब्रा बु खेरब।

2 गे मुल इ मुर आन कली ‘वोंइश मुर नु मीश मुरपुकीमी आन नेक्था बाक्ब इजीप्टी आन के सुन नु चांदी के पांइतीक शोंप पुंडुचा माल्नीम’ दे शेंचा माल्नेवे” दैत। प्रस्थान ३:२१-२२

3 मिनु परमप्रभु यावेमी इजीप्ट डा मुर आन कली इस्राएली आन कली दाक्ब सेल्लु। मिनु मोसा फाराओ आ गेय पाइब नु इजीप्ट डा मुर नेल्ल आन डोंइती शुश ठेयब मुर दुम्त।

4 मिनु मोसामी फाराओ नु आ मुर आन कली “परमप्रभु यावे आ देंशो लोत्र मार बाक्त देंशा हना नाक्दो उइक्थ दुम्मेनु, इजीप्टी आन दातेम लाइनुड।

5 इजीप्त रागीमी सु सु डोंइती जरमेशो बाक्मा, मेको बेक्चा माल्नीम। फाराओ आ नोले सासन पाइब डोंइती जरमेशो तौ रे नेल्ल क्येडा आइक्च यात हिल्ल मीश मुर आन डोंइती जरमेशो तौ सम्म नेल्ल बेक्चा माल्नीम। बस्तु भाव आन के यो डोंइती जरमेशो बेक्चा माल्नीम। प्रस्थान ४:२३

6 मिनु इजीप्त रागी नेल्लेमी ठेयब रोंका पा डाक्नीम। डोंइती मोदेशो गेनायो मदुम्शो बाक्त। मिनु नोले यो लेंशा मदुम्ब।

7 इस्राएली आन दातेमी चहिं मुर नु बस्तु भाव आन चां का यो महेम्ब। परमप्रभु यावेमी इजीप्त डा मुर आन कली नु इस्राएल डा मुर आन कली खाल का डा मपाइब, दे तुइक्तमेक्ल। प्रस्थान ९:४

8 मिनु नोले इन गेय पाइब नेल्लेमी आं डोंइती खुम्की पा बाप्शा, आं कली 'गे नु इन नोले खोइक्ब मुरपुकी एक रे लने' देंनीम। मिनु गो लाइनुड" दे मोसामी फाराओ कली देंत। मिनु मोसा फाराओ आ बाक्तीके रे शुश गाइश चुरशा गाक्त।

9 मिनु परमप्रभु यावेमी मोसा कली "इजीप्त रागीम आं छक लाक्चा डा शुश चिन्ड दुम्ल, दे फाराओम इ कली मटिपदु" देंत।

10 मोसा नु हारूनमी फाराओ आ डोंइती मेको छक लाक्चा डा चिन्ड मार मार नेल्ल पात्ताक्स। इस्राएल डा मुर आन कली लचा मगेवल, दे परमप्रभु यावेमी फाराओ कली काइ मटीब दुम्पाइक्तु। प्रस्थान ४:२१

## 12

डोंइती डा पास्सा चाड

गन्ती ९:१-१४; ब्यवस्था १६:१-८

1 मिनु मोसा नु हारून इजीप्त रागीम बाक्सानु, परमप्रभु यावेमी मेको आस कली

2 "मुल जाक्शो महिना बर्स डा डोंइती डा महिना दुम्चा माल्ब। प्रस्थान १३:४

3 मिनु गो इस्राएली नेल्ल आन कली 'मेको महिना डा १० नाक्ती खिं का डा ठेयब मुरुमी पाठा का चाक्चा माल्नीम।

4 खिं का कली पाठा का आ श्ये शुश दुम्त हना, आ नेक्था बाक्शो मुर आन कली हिक्शा, दोशो ब्वाइनीमी योक्शा, ब्वचा कली ब्रेत्या माल्नीम।

5 मेको पाठा मारेइ मदुम्शो थम रिम्शो नु बर्स का डा बोका बाक्चा माल्ब। भेडा के हना यो, क्यारश के हना यो दुम्ब। लेवी २२:२०

6 मिनु मेको महिना डा १४ नाक्ती सम्म मेको बोका कली ठीक पा वोइक्चा माल्नीनी। मिनु नां रिक्चावानु, इस्राएली नेल्लेमी मेको बोका क्योरचा माल्नीनी।

7 तेको खिंमी ब्वाइनीनी, मेको खिं डा मुरुमी बोका आ हुश इक्का लाइशशा, आ खिं डा थाम निक्शी नु लाप्चो आ पियाम खेक्चा माल्नीनी। प्रस्थान १३:२२

8 मेको नाक्दो मेको बोका आ श्ये ब्वचा माल्नीनी। दोपा ब्वचा माल्नीनी देशा हना, मीम चोशा, बोरब ओरुती मसुप्शो शोब्ले, कशो खाइ नु ब्वचा माल्नीनी।

9 मेको श्ये क्येख ब्वचा मदुम्ब, लोप्शा ब्वचा यो मदुम्ब। आ पिया, खोइली क्यी नेल्ल मी तारी चोचा माल्नीनी। ब्यवस्था १६:७

10 सुनी सम्म मारेइ हेंत हना, मीम चोशा थुम्चा माल्नीनी।

11 मेको श्ये किप्शुर किप्शा, जुता लिक्शा, गुइमी कोक्के ग्याइशशा, रीब पा ब्वचा माल्नीनी। मारदे हना मेको परमप्रभु यावे आ पास्सा चाड बाक्ब। ब्यवस्था १६:३; यसैया ५२:१२

12 मेको नाक्दो गोमी इजीप्त रागी हिरशा, इजीप्त डा मुर आन डोंइती जरमेशो तौ नेल्ल साइक्नुडमी। बस्तु भाव आन के यो डोंइती जरमेशो नेल्ल साइक्नुडमी। इजीप्त डा देवी देवता नेल्ल आन कली सजाइ गेनुडमी। गो, परमप्रभु यावे मेकोन पाइनुड। गन्ती ३३:४

13 मेको खेक्शो हुश इन खिं डा चिन्ड दुम्ब। तेको खिंम हुश खेक्शो तडा, मेको खिं कली हेरशा लाक्नुड। गो इजीप्त रागी डा मुर आन कली बेक्चा डा श्येत गेनुडमी। इन कली चहिं मेको श्येत मगेनुड। हिबू ११:२८; प्रस्थान ३०:१२

14 मेको नाक्ती इन कली मिम्तीक नाक्ती दुम्चा माल्ब। मोपतीके आं नेंम भोज जचा माल्नीनी। गे बर्स बर्सम मेको चाड परमप्रभु यावे कली मानेचा माल्नीनी। इन पाला नेल्ल आन कली गेना हना यो अरेशो लोत्र बाक्ब।

बोरब ओरुती मसुप्शो शोब्ले

15 गे ७ नाक्त सम्म बोरब ओरुती मसुप्शो शोब्ले जचा माल्नीनी। ७ नाक्त डा डोंइती नाक्ती गे इन खिंम बाक्शो बोरब ओरुती ताइक्चा माल्नीनी। सुम मेको ७ नाक्तीम बोरब ओरुती सुप्शो शोब्ले जाइबा, मेको इस्राएली आन दाते रे तिल्चा पुंइसीब। प्रस्थान १३:७; प्रस्थान २३:१५

16 मिनु ७ नाक्त डा डोंइती नाक्ती नु नोले डा नाक्ती परमप्रभु आ नेंमी थुम्चा माल्नीनी। मिनु जचा थोव्रक सेल्चा क्येडा लाक्शा, अरु गेय काइ मपने।

17 बोरब ओरुती मसुप्शो शोब्ले डा चाड मानेचा माल्नीनी। मारदे हना मेको नाक्ती गो इन हुल आन कली इजीप्त रागी रे गुइताकड। मोपतीके इन पाला मुर नेल्ल आन कली गेना हना यो अरेशो लोत्र बाक्ब।

18 डोंइती डा महिना डा १४ नाक्ती डा नाक्दो रे २१ नाक्त डा नाक्दो सम्म गे बोरब ओरुती मसुप्शो शोब्ले ला जचा माल्नीनी।

19 मेको ७ नाक्ती इन खिंमी बोरब ओरुती काइ मवोइक्चा। सुमी बोरब ओरुती सुप्शो शोब्ले जाइबा, मेको अर्को रागी डा मुर बाक्त हना यो, इस्राएली बाक्त हना यो इस्राएली आन दाते रे तिल्चा पुंइसीब।

20 इन बाकतीक नेल्लेमी बोरब ओरुती मसुप्शो शोब्ले ला जने, बोरब ओरुती सुप्शो शोब्ले मजने' दे माइक्मी" दे परमप्रभुमी देंत।

पास्सा डा पाठा आ हुश

21 मिनू नोले मोसामी इस्राएल डा खाल्पा नेल्ल आन कली ब्रेशशा "इन खिं डा ठेयब मुर आन कली पाठा का का चाक्कीन। मिनू मेको पाठा पास्सा चाड मानेचा कली क्योरीन।

22 मिनू गे हिस्सोप के ब्राक्स लाइशशा, हुश दाइक्तीक बोसुम खुम्शा, लाप्चो आ पिया नु थाम निकशी कली खेक्तीन। मेको नाकदो सुनी सम्म सुइ लाडगा मयूडीने। प्रस्थान १२:१३

23 परमप्रभु यावे इजीप्ट डा मुर साइक्चा कली हिरब। परमप्रभु यावेमी लाप्चो आ पिया नु थाममी हुश खेक्शो तशा, इं खिं हेरशा लाक्ब। मिनू साइक्ब कली इं खिंम ओत्रचा मगेब।

24 मुल रे इन तौ, चच युइ नेल्लेमी एको पास्सा चाड बर्स बर्सम मानेचा माल्नीम। मेको गेना हना यो लीशो अरेशो लोत्र बाल्ब।

25 मिनू गे परमप्रभु यावेमी देशो खोदेशो पा इन कली गेशो रागी जाक्दीशशा, यो एको चाड मानेचा माल्नीनी।

26 इन आलपुकीम इन कली 'एको चाड आ अर्थ मार बाक्मे?' दे हिल्लो पाम्तेक्म हना,

27 गे मेको आन कली 'इस्राएल डा मुरपुकी इजीप्ट रागीम बाक्मानु, परमप्रभु यावेमी इजीप्ट डा मुर आन कली साइक्ची ना इस्राएली आन खिं चहिं हेरशा लत। एको हेरतीक आ पर्बम चढेशो बाक्ब' देंचा माल्नीनी" दे मोसामी देंत। मिनू मुरपुकीमी खुम्की पा बाप्शा, परमप्रभु यावे कली ठेयब सेल्लेक्म।

28 मिनू इस्राएलीपुकीमी लशा, परमप्रभु यावेमी मोसा नु हारून आस कली दोदेशो देंमे, मोदेशो पाम्तेक्म।

डोंइती डा जरमेशो नेल्ल बेक्शो

29 मिनू नाकदो उइक्थ दुम्मेनु, परमप्रभु यावेमी इजीप्ट रागी डा मुर आन डोंइती जरमेशो तौ आन कली साइक्तीमी। फाराओ आ नोले सासन पाइब तौ रे जेल्खानम बाक्ब मुर आन डोंइती जरमेशो तौ नेल्ल आन कली साइक्तीमी। बस्तु भाव आन डोंइती जरमेशो यो साइक्तु। प्रस्थान ४:२३

30 मिनू मेको नाकदो फाराओ, आ गेय पाइबपुकी नु इजीप्ट रागी डा मुर नेल्ल बोक्तेक्म। इजीप्ट रागीमी ठेयब रोंका पा डाक्तेक्म। मारदे हना खिं खिं नेल्लेमी मुर बेक्तेक्म। प्रस्थान ११:६-७

इस्राएलीपुकी इजीप्ट रे युशो

31 मिनू मेको नाकदो फाराओमी मोसा नु हारून आस कली ब्रेशशा "छुल छाल बोक्कीस। गे नु इस्राएल डा मुर नेल्ल आं रागी डा मुर आन दाते रे गूडीन। इस देंशो खोदेशो पा परमप्रभु यावे कली चढेशे लने।

32 इन बी ब्यफ नु क्यारश भेडा आन कली लाइशशा, फो फु गूडीने। आं कली आसीक गेयीसी" देंत। प्रस्थान १०:२६; एज्रा ६:१०

33 मिनू इजीप्ट डा मुरपुकीमी मेको आन कली आन रागी रे ब्रा बु खेरशा सोइक्ताक्म। मारदे हना "गो नेल्ल बेक्नय" दे हिंतेक्म। प्रस्थान ६:१

34 मिनू मुरपुकीमी बोरब ओरुती मसुप्शो, निशो फस आन बोस वाम गिल्शा, बलाम लाप्शा कुरतेक्म।

35 मिनू इस्राएलीपुकीम मोसा आ देंशो खोदेशो पा इजीप्टी आन सुन चांदी नु वासी पुंइतेक्म। प्रस्थान ११:२

36 मिनू परमप्रभु यावेमी इजीप्ट डा मुर आन कली इस्राएली आन कली दाक्पाइक्तीके, आन पुंइशो नेल्ल गेम्तेक्म। मोपा इजीप्ट डा मुर आन शोंप लाइशशा गाक्तेक्म। प्रस्थान ३:२१

37 मिनू इस्राएल डा मुरपुकी रामेसेस सहर रे गाक्शा, सुक्कोथ सहर जाक्दील्लेक्म। मेको आन मीश नु तमी तौ नेल्ल महिक्थु, वोंइश मुर ला ६ लाख बाक्तेक्म।

38 मिनू हिक्ने मचाप्चा डा पा इस्राएली खोदेशो पा परमप्रभु यावे कली टीबपुकी यो, आन बी ब्यफ, क्यारश भेडा, शुश बस्तु भाव खुल्शा गाक्तेक्म।

39 मिनू इजीप्ट रे कुरशो बोरब ओरुती मसुप्शो निशो फस रे शोब्ले चोम्तेक्म। मारदे हना इजीप्ट रागी रे खेरचा पुंइसीतीके मेकेर लाम्जी सेल्ले मचाप्शो बाक्तेक्म।

40 इस्राएलीपुकी ४ सहे ३० बर्स इजीप्ट रागीमी बाक्शो बाक्मा बाक्त। उत्पत्ती १५:१३

41 मिनू ४ सहे ३० बर्स गाम नाक्ती, परमप्रभु यावे आ योत्रशो इस्राएली नेल्ल इजीप्ट रागी रे गाक्मा बाक्त।

42 मेको नाकदो इस्राएलीपुकीमी परमप्रभु यावे आ डोंइती शुश मिम्तीक नाकदो दुम्माक्त। मारदे हना मेको आन कली इजीप्ट रागी रे गुंइदा बाक्त। मेको परमप्रभु यावे आ नाकदो बाक्ब। इस्राएल डा मुर आन पाला नेल्लेमी मेको मिम्तीक नाकदो बाक्ब। यसैया ३०:२९

पास्सा चाड दोपा मानेचा

43 मिनू परमप्रभु यावेमी मोसा नु हारून आस कली "पास्सा दोपा पचा आं अरेशो लोत्र मार बाक्त देंशा हना, अर्को रागी डा मुरुम मेको जचा ब्वचा मदुम्ब।

44 खोइक्तीक चिनु खोइशशो इन वाइलपुकीम चहिं जचा ब्वचा दुम्मीम। उत्पत्ती १७:१२-१३

45 तन्न अर्को रागी डा मुर इन दातेमी बाक्त हना यो, गेय पाइब हना यो जचा ब्वचा मदुम्ब।

46 मेको पास्सा डा पाठा आन खिंमी ब्वचा माल्नीम। आ श्ये लाडगा गुंइचा मदुम्ब। आ रुश का यो जिक्या मदुम्ब। यूहन्ना १९:३६

47 इस्राएली नेल्लेमी मोदेशो पचा मालनीम। प्रस्थान

48 इन दातेमी अर्को रागी डा मुर काम परमप्रभु यावे कली पास्सा चाड मानेचा दाक्ताक्व हना, आ खिं डा गेय पाडब वोंडश मुर नु आ तौ आन कली खोडक्तीक चिनु खोडशशा ला, इस्राएली आन नेक्था जाक्शा, पास्सा चाड मानेने चापब। मोपा ला इन खोदेशो दुम्ब। मारदे हना खोडक्तीक चिनु मखोडशशो मुरुम जने ब्वने मचाप्नीम।

49 मेको इन कली नु इन दातेम बाक्ब अर्को रागी डा मुर आन कली अरेशो लोत्र का बाक्ब” दे परमप्रभुमी देंत। लेवी १९:३४; लेवी २४:२२

50 मिनु परमप्रभु यावेमी मोसा नु हारून आस कली दोदेशो देंमे, मोदेशो इस्राएली नेल्लेमी पाम्तेक्म।

51 मिनु मेको नाक्ती परमप्रभु यावेमी इस्राएली थर आन कली हुल हुल पा इजीप्त रागी रे गुंडताक्व।

## 13

डोंडती डा तौ परमप्रभु के बाक्ब

1 मिनु परमप्रभु यावेमी मोसा कली

2 “इस्राएलीपुकी, इन डोंडती जरमेशो तौ नु इन बी ब्यफ, क्यारश भेडा आन डोंडती जरमेशो बोहोर बोका योत्रशा गेयीनी। मारदे हना मेको आं के बाक्नीम, दे मुर आन कली देंचा मालब” देंत। प्रस्थान १३:१२,१३; प्रस्थान २२:२८

3 मिनु मोसामी मुर आन कली “गेपुकी इजीप्त रागीम वाइलीम वाइल दुम्शा, ब्रोंडशा, एक जाक्शो नाक्त मप्रेंदीन। परमप्रभु यावेमी इन कली आ सक्तिमी गुंडताक्व। मोपतीके मेको नाक्त गे बोरब ओख्ती मसुप्शो शोब्ले ला जचा मालनीनी। प्रस्थान १२:३३-३४

4 गे मुलाक्ती आबीब महिनामी गृतीनी। प्रस्थान १२:२

5 मिनु परमप्रभु यावेमी इन किकी पिपी आन कली ‘कनानी, हिती, एमोरी, हिव्वी नु यबुसी आन रागी इन कली गेनुड’ दे कसम जशो बाक्माक्त। मेको रागीमी जाक्दीशशा, आबीब महिनामी पास्सा चाड मानेचा मालनीनी। मेको रागीम दूध नु खुदो शुश बाक्ब, मारेड मारेड यो शुश ग्रेलब। उत्पत्ती १५:१८

6 ७ नाक्त सम्म बोरब ओख्ती मसुप्शो शोब्ले जचा मालनीनी। मेको आ नोले डा नाक्ती परमप्रभु यावे आ नेमी चाड का मानेचा मालनीनी। प्रस्थान १२:१५-१६

7 मिनु बोरब ओख्ती मसुप्शो शोब्ले ७ नाक्त सम्म जचा मालनीनी। इन बाक्तीके नेल्लेमी बोरब ओख्ती सुप्शो शोब्ले काड वोडक्चा मदुम्ब। मिनु बोरब ओख्ती यो वोडक्चा मदुम्ब। १कोरिन्थी ५:८

8 मेको नाक्ती इन आल आन कली ‘परमप्रभु यावेमी इ कली इजीप्त रागी रे गुंडशो कोंडचा, दे ओदेशो पाइनय’ दे शेंचा मालनीनी।

9 मेको पास्सा चाड इन गुडमी नु इन कुप्फीम मिम्तीके चिन्ड खोदेशो पा बाक्चा मालब। मोपा परमप्रभु यावे आ अरेशो लोत्र गे नु बाक्ब। मारदे हना परमप्रभु यावेमी आ टेयब सक्तिमी इन कली इजीप्त रागी रे गुंडताक्व। ब्यवस्था ६:८; ब्यवस्था ११:१८

10 मोपा गेपुकी बर्स बर्समी मेको चाड ठीक नाक्तीम मानेशा आ अरेशो लोत्र पचा मालनीनी।

11 मिनु परमप्रभु यावेमी इन कली नु इन किकी पिपी आन कली ‘गे मेको रागी इन कली गेनुड’ दे कसम जशो, कनानी आन रागीम चोत्रदीब।

12 गे इन डोंडती जरमेशो तौ नु इन बी ब्यफ, क्यारश भेडा आन डोंडती जरमेशो परमप्रभु यावे कली गेचा मालनीनी। डोंडती जरमेशो बोहोर बोका परमप्रभु यावे केन नम।

13 तन्न इन गधैनी आ डोंडती जरमेशो बोहोर प्रोंडचा कली मेको आ पा डा पाठा का गेचा मालनीनी। पाठा गेचा मदाक्ताक्नी हना, आ शुर जिक्चा मालनीनी। इन डोंडती जरमेशो तौ आ पा डा क्येट गेचा मालनीनी।

14 मिनु काबु इन आलपुकीमी ‘गे मारदे ओदेशो पाडनीनी?’ दे हिल्लो पाडनीम। मेना गेपुकीमी ‘परमप्रभु यावेमी इ कली आ टेयब सक्तिमी इजीप्त रागी रे गुंडताक्व। वाइलीम वाइल दुम्शो रे यो प्रोंडतु’ दे इन आल आन कली शेंचा मालनीनी। प्रस्थान १२:२६,२९

15 ‘फाराओम इ कली काड लचा मगेतीके, परमप्रभु यावेमी इजीप्त रागी डा मुर आन डोंडती जरमेशो तौ नु बस्तु भाव आन दाते डा डोंडती जरमेशो नेल्ल साइक्तु। मोपतीके डोंडती जरमेशो बोहोर बोका परमप्रभु यावे कली चढेनीकी। तन्न डोंडती जरमेशो तौ आ पा डा क्येट गेशा प्रोंडनीकी।

16 एको पतीके इन गुडमी नु इन कुप्फीम मिम्तीके चिन्ड खोदेशो पा बाक्चा मालब। मारदे हना परमप्रभु यावेमी इ कली आ टेयब सक्तिमी इजीप्त रागी रे गुंडताक्व’ दे इन आल आन कली शेंचा मालनीनी” देंत।

गोस्स के थाम नु मी के थाम

17 मिनु फाराओमी इस्राएली आन कली लचा गेवानु, परमप्रभुमी इस्राएली आन कली आन नेक्था डा लां पलिस्ती आन रागी डा लां मकोंडद। मारदे हना मुरपुकीमी “लडाइ पचा मालतेक्म हना, हिंशा इजीप्त रागी लेत्नीमी, कों” दे लाइशशो लां कोंडताक्व।

18 मोपा परमप्रभुमी इस्राएली आन कली गोरशो रागी रे लल समुन्द्र गे डा लां कोंडताक्व। मिनु इस्राएली इजीप्त रागी रे गाक्मानु, लडाइ पचा कली यो ठीक दुम्शो बाक्तेक्म।

19 मोसामी योसेफ आ रुश यो कुरुतु। मारदे हना योसेफमी इस्राएली आन कली “परमप्रभुम इन कली थमा पा एको रागी रे गुंडशा लाइब। मेना आं रुश यो लाइक्चा मालनीनी” दे कसम जपाइशशो बाक्माक्त। उत्पत्ती ५०:२५; यहोसु २४:३२

20 मेकोपुकी सुक्कोथ सहर रे लशा, एथाम सहर डा गोरशो रागी आ नेक्थामी बास बाक्तेक्म।

21 मिनू परमप्रभु यावेमी मेकोपुकी नाकदो नाकती गाकने चाप्मेकल, दे मेको आन कली लां कोंइचा कली नाकती गोस्स के थाम नु नाकदो मी के थाम दुग्शा, मेको आन डोंडडोंइती गाकत। प्रस्थान ४०:३६-३८; गन्ती ९:१५-२३; भजन संग्रह ७८:१४; १कोरिन्थी १०:१

22 नाकती गोस्स के थाम नु नाकदो मी के थाम आन डोंडडोंइती गाकचा मप्रोन।

## 14

लल समुन्द्र शोकशो

1 मिनू परमप्रभु यावेमी मोसा कली

2 “इसाएली आन कली ‘गेपुकी इच्का लेत्चा माल्नीनी। मिग्दोल नु लल समुन्द्र आस दातेम बाकशो पी-हहीरोथ, बाल-सेफोन आ डोंइती इन बास बाकतीके सेल्चा माल्नीनी। मेको लल समुन्द्र आ नेक्था बाकब’ देंचा माल्नेवे।

3 मिनू फाराओमी ‘गोरशो रागीमी आन लां जाग्शा, हेंथे गाकनीम’ देंब।

4 मिनू गो फाराओ आ थुं काइ मटीब दुम्पाइक्नुड। मिनू फाराओमी इन कली खेदा पाइब। गो फाराओ नु आ फौज आन कली आं सक्ति कोंइनुड। मिनू इजीप्ट रागी डा मुर नेल्लेमी ‘परमप्रभु यावे बाकब’ दे तुइक्नीम” देंत। मिनू मोदेशो पाम्तेक्म। प्रस्थान ४:२१; इजीकीएल २८:२२

5 मिनू इजीप्ट रागी डा मुरपुकीम आन पिप कली “इसाएली प्रोक्ने थुम्तेक्म। गो मार पया? मारदे गो इसाएली आन कली गेय प्रोंइपाइश्शा, लचा गया?” दे थुं फाइश्शा, लोत्र पमुमा बाकत।

6 मिनू पिपमी आ बग्गी ठीक पशा, आ लडाइ पाइबपुकी ठीक पचा बाकत।

7 मिनू ६ सहे रिम्शो पा लडाइ पने चापब बग्गी नु इजीप्ट रागी डा अरु बग्गी नु चलेब आन ठेयब मुर आन कली लाइश्शा, लमाकत।

8 मिनू परमप्रभु यावेमी इजीप्ट रागी डा फाराओ कली काइ मटीब दुम्पाइक्तीके इसाएली आन कली खेदा पामे बाकत। इसाएली चहिं ठेयब सक्तिमी यूशा गाक्तेक्म। प्रस्थान ३:१९-२०

9 इजीप्ट डा फाराओ आ शारापुकी, शारा डोइक्बपुकी, बग्गी नु लडाइ पाइब नेल्ल लल समुन्द्र आ नेक्था इसाएली आन बास बाकतीक पी-हहीरोथ सहर आ नेक्था बाल-सेफोन आ डोंइती जाक्तेक्म।

10 मिनू इसाएलीपुकी फाराओ नु आ लडाइ पाइबम आम कली खेदा पशो तशा, हिंशा खिखि पाम्तेक्म। मिनू परमप्रभु यावे कली “वारच पाइय्यीकी” दे पुंइतेक्म।

11 मिनू मेकोपुकीम मोसा कली “गे आंइ कली मारदे इजीप्ट रे गुंइदीकी? इजीप्ट रागीम मुर थिम्तीके मबाकबा डा? मारदे गोरशो रागीम साइबथ चाक्मी?”

12 गोपुकी इजीप्ट रागीम बाककानु, इन कली ‘आंइ कली श्येत मगेकी। इजीप्ट डा मुर आन गेय पचा गेकी, मदेंका डा? गोरशो रागीम बेक्चा क्येडा इजीप्ट रागी डा मुर आन गेय पक वा” दे मोसा कली ग्रीतेक्म।

13 मिनू मोसामी मुर आन कली “महिनीन। मुलाक्ती परमप्रभु यावेमी दोपा इन कली इजीप्ट डा मुर रे प्रोंइबा, कोव्रशा बाक्कीन। मुलाक्ती तशो इजीप्ट डा मुर आन कली गे लेंशा गेनायो मताइनीनी।

14 इन पचा डा लडाइ परमप्रभु यावेमी पाइब। गे थुं नाइश्शा बाक्कीन” दे माइक्तीमी। ब्यवस्था १:३०; २इतिहास २०:१५,२९; यसेया ५१:९

15 परमप्रभु यावेमी मोसा कली “मारदे आं कली ठेयब सेंदा पा पुंइनेवे? इसाएली आन कली ‘गाक्कीन’ दे मतो।

16 इ कोक्के लल समुन्द्र तार दिंदो। मो पवीनु, समुन्द्र ब्राशा, गाक्तीक लां दुम्ब। इसाएलीपुकी हिलो मबाकशो लाम गाकने चाप्नीम।

17 मिनू गोमी इजीप्ट डा मुर आन कली काइ मटीब दुम्पाइक्नुड। मो दुम्मेनु, इसाएली आन नोले खोइश्शा, लल समुन्द्र ओव्रशा, खेदा पाइनीम। मिनू गो फाराओ आ मुरपुकी, आ बग्गी नु आ शारा डोइक्ब नु लडाइ पा आं सक्ति कोंइशा ग्रानुड।

18 गो फाराओ, आ बग्गी नु आ शारा डोइक्ब आन कली आं सक्ति कोंइनुड। मिनू इजीप्ट डा मुरपुकीमी ‘परमप्रभु यावेमी पात्तु’ दे तुइक्नीम” देंत।

19 मिनू इसाएली आन डोंइती गाकशो परमप्रभु आ स्वर्ग डा गेय पाइब नोले गे लेशशा लशा, इसाएली आन नोले खोइक्तु। मेको आन डोंइती गाकशो गोस्स के थाम यो लेशशा, आन नोले गाकत। उत्पत्ती १६:७; प्रस्थान १३:२१

20 मेको गोस्स इजीप्ट डा फौज आन कली छिडछिड दुम्माकत। इसाएली आन लडाइ पाइब आन कली चहिं छेडछेड दुम्त। मोपा मेको नाकदो इजीप्ट डा फौज इसाएली आन नेक्था जाक्ने मचबेम। भजन संग्रह १०५:३९

21 मिनू मोसामी आ गुड लल समुन्द्र तारी दिंदानु, परमप्रभु यावेमी नाकदो नां दाप्तीके रे फश गिवार पपाइश्शा, समुन्द्र फ्राशा सोव्रशो गाक्तीक लां सेल्लु।

22 मिनू इसाएलीपुकी समुन्द्र डा सोव्रशो लां लाम्तेक्म। समुन्द्र डा ब्वाक्कु चहिं आन ग्युरा नु पेरा गे गारो खोदेशो पा बाकत। यहोसु ४:२३; २राजा २:८; यसेया ११:५-१६; १कोरिन्थी १०:१; हिब्रू ११:२९

23 मिनू इजीप्ट रागी डा लडाइ पाइब इसाएली आन कली खेदा पा, मेको आन नोले लल समुन्द्र ओव्रतेक्म। पिप आ शारापुकी, आ बग्गीपुकी नु आ शारा डोइक्ब नेल्ल ओव्रतेक्म।

24 मिनू सुनी कना परमप्रभु यावे गोस्स के थाम नु मी के थामम बाकशा, इजीप्ट डा लडाइ पाइब आन कली कोव्रशा हिंपाइक्तु।



25 आन बग्गी डा गुगील पुडइशा गेतीके, गाक्ने मचबेम। मिनु इजीप्त डा मुरपुकीमी “इसाएली रे प्रोक्य, परमप्रभु यावेमी मेको आन कली वारच पशा, इजीप्त डा मुरपुकी नु लडाइ पाइब” देमा बावत।

26 मिनु परमप्रभु यावेमी मोसा कली “इजीप्त रागी डा मुर, आन बग्गी नु आन शारा डोइक्ब आन कली ब्वाक्कुम सुम्पाइक्चा कली इ गुड लेंशा समुन्द्र तार दिदो” देत।

27 मिनु मोसामी आ गुड समुन्द्र तार दिदानु, नां सोवची ना समुन्द्र डोंइती डा खोदेशो दुम्त। मिनु इजीप्त डा लडाइ पाइब लेशा प्रोक्ने मचबेम। मोपा परमप्रभु यावेमी इजीप्त डा लडाइ पाइब आन कली समुन्द्रमी खुम्तु।

28 मिनु ब्वाक्कु लेंशा डोंइती डा खोदेशो दुम्मेनु, इजीप्त डा बग्गी, शारा डोइक्बपुकी नु फाराओ आ लडाइ पाइब आन कली सुम्शा, समुन्द्रमी योल्ताक्व। सुइ यो मब्रोंडम।

29 तन्न इसाएली चहिं सोवशो लां लशा, समुन्द्र शोकसाक्म। ब्वाक्कु गारो खोदेशो पा, आन ग्युरा नु पेरा गे बावत।

30 मोपा परमप्रभु यावेमी मेको नाक्ती इसाएली आन कली इजीप्त रागी डा लडाइ पाइब रे प्रोंइतीमी। मिनु इसाएलीपुकीमी इजीप्त डा मुर आन कली दिल दिल थिरशा, समुन्द्र आ नेक्था बेक्शो ताम्तेक्म।

31 मिनु मुरपुकीमी “परमप्रभु यावेमी इजीप्त डा मुर आन कली साइक्तीमी” दे तुइइशा, परमप्रभु यावे क्येडा हितेक्म। मिनु “परमप्रभु यावेमी नेल्ल पने चाप्व। मोसा आ गेय पाइब बाक्ब” दे थमा सुइक्तेक्म। प्रस्थान १९:९; २इतिहास २०:२०

## 15

मोसा आ कुम्सो

1 मिनु नोले मोसा नु इसाएलीपुकीमी परमप्रभु यावे कली कुम्सो पाम्तेक्म। “गो परमप्रभु यावे कली कुम्सो पाइनुड। मारदे हना मेकोमी आ ठेयब सक्ति कोंइशा, ग्रात। शारा नु शारा डोइक्ब आन कली समुन्द्रमी ताइक्ताक्व। प्रकाश १५:३

2 यावे आं सक्ति बाक्ब। आं कली कुम्सो पपाइक्ब। मारदे हना आं कली आ जोरी सनु रे प्रोंइती। मेको आं परमप्रभु बाक्ब। मिनु गो मेको कली ठेयब सेल्लनुड। परमप्रभु आं आफ आ परमप्रभु बाक्ब। मिनु गो मेको कली मान पाइनुड। भजन संग्रह ११८:१४; यसेया १२:२

3 परमप्रभु यावे लडाइ पाइब बाक्ब। मेको आ नें परमप्रभु यावे बाक्ब। प्रस्थान १४:१४; भजन संग्रह ४६:१०; प्रस्थान ३:१५

4 मेकोमी इजीप्त डा फाराओ आ बग्गीपुकी नु आ लडाइ पाइब आन कली लल समुन्द्रमी योल्पाइक्तु। ठेयब कप्तान नेल्ल आन कली ब्वाक्कुम गुम्पाइक्तु।

5 समुन्द्र डा ब्वाक्कुमी मेको आन कली सुम्तु। मेकोपुकी फुल्लु खोदेशो पा आगा गुम्तेक्म।

6 परमप्रभु यावे, इन सक्ति ठेयब बाक्ब। इन सक्तिमी इन जोरी सनु आन कली थुम्पाइक्तीनी।

7 इन जोरी सत्रुमी गे नु लडाइ पामेनु, गे इन ठेयब दुम्तीकेमी मेको आन कली ग्रातीनी। मिनु गाइइशा मेको आन कली मीम भूस चोशो खोदेशो पा थुम्पाइक्तीनी।

8 इन नैमी मुइइशा, समुन्द्र डा ब्वाक्कु कली ग्येत्य गे पोक्तीनी। समुन्द्र गारो बुदी सोजो पा ग्येत्य गे बोक्शा, आ पुं चहिं सोवशो लां दुम्त। यसेया ५१:१०

9 आंइ जोरी सत्रुमी ‘मेको आन कली खेदा पा, बो ब्रु थित्लय। गो ग्येरशा, इं ग्राशो थोवक् योक्मुडनय। इं तरवार शोइइशा, नेल्ल आन कली साइक्नय’ दैतेक्म।

10 गे चहिं फश पपाइक्तीनी। मिनु समुन्द्रमी मेको आन कली सुम्तीमी। मेकोपुकी फलाम खोदेशो पा ठेयब समुन्द्रम गुम्तेक्म।

11 परमप्रभु यावे, देवी देवता आन दातेमी इन खोदेशो ठेयब सुइ मबाक्नीम। इन खोदेशो सक्ति पाइइशो, ठेयब मान ताइब सुइ मबाक्नीम। इन ठेयब गेय हिंचा डा बाक्ब। गे छक लाक्चा डा गेय पाइब बाक्नीनी। प्रस्थान ८:६; प्रस्थान १८:११; भजन संग्रह ८६:८

12 इन ग्युरा गुइ दिनीनु, रागीम मेको आन कली दाक्तु।

13 गे इन गुंइशो मुर आन कली गेना हना यो शिशी पा, लां कोंइताक्नी। मेको आन कली इन सक्तिमी इन आंम बाक्तीकेम खुल्लतीनी।

14 जात जात डा मुरपुकी इन लोत्र नेंशा शुश हितेक्म। पलिस्ती रागी डा मुरपुकी हिंशा, खिंखिं पाम्तेक्म। यहोसु २:९-११

15 मुल एदोम रागी डा ठेयब मुरपुकी हितेक्म। मोआब रागी डा ठेयब मुरपुकी हिंशा खिंखिं पाम्तेक्म। कनान रागीम बाक्बपुकीम आन सक्ति साम्तेक्म।

16 परमप्रभु यावे, इजीप्त रागी रे इन गुंइशो मुरपुकी मजाक्दीम्मा सम्म मेको आन जोरी सत्रु इन सक्ति डा गेय तशा, हिंशा फुल्लु खोदेशो पा सिक्सी पा बाक्तेक्म। मोपा हिंशा मेको आन थुं लुक्च लत।

17 गे इन मुर आन कली आन रागी ओंइनीनी। मिनु इन आंम बाक्तीक डांडाम बाक्पाइक्नीनी। परमप्रभु यावे, मेको इन बाक्तीके आंमा सेल्लतीनी। इन आंम बाक्तीक खिं गे आंमा सेल्लतीनी। भजन संग्रह ७८:५४

18 परमप्रभु यावे गेना हना यो पिप बाक्ब” दे कुम्सो पाम्तेक्म। भजन संग्रह ९३:१

19 फाराओ आ बग्गी नु शारा डोइक्बपुकी समुन्द्र डा लां लाम्तेक्म। परमप्रभु यावेमी समुन्द्र डा ब्वाक्कु लेंशा लेप्पाइइशा, मेको नेल्ल आन कली योल्पाइक्तु। इसाएली चहिं समुन्द्र डा सोवशो लां रे पा गाक्तेक्म। प्रस्थान १४:२२-२९

मिरयामम यो कुम्सो पशो

20 हारून आ समी मिरयाम परमप्रभु आ लोत्र पाइब यो बाक्त। मेकोमी खैजडी ताप्शा, कुम्सो पथ लमेनु, अरु मीश मुरपुकी यो खैजडी ताप्शा, सिल पना पन मेको आ नोले खोइक्तेकम। भजन संग्रह ६८:२६

21 मिरयामम मेको आन कली कुम्सो पा लोत्र लेशशा “परमप्रभु यावे कली कुम्सो पान। मारदे हना मेकोम ठेयब लडाइ पा ग्रात। शारा नु शारा डोइक्ब आन कली समुन्द्रम ताइक्ताक्व” दे कुम्सो पाप्तु।

मारा डा कशो ब्वाक्कु

22 मिनु मोसामी इस्राएली आन कली लल समुन्द्र रे शुर माइशशो गोरशो रागी कोंइताक्व। मिनु मेको गोरशो रागीमी नाक्त सां सम्म गाक्मानु, ब्वाक्कु मथिदेम। उत्पत्ती २०:१

23 माराह माइशशोमी जाक्दीशशा, मेक डा ब्वाक्कु तूने मचबेम। मारदे हना मेको ब्वाक्कु कशो बाक्त। मोपतीके मेको कली माराह नें वोइक्तेकम। हिब्रू लोत्रमी मारा देशो कशो रुम्सीब।

24 मिनु मुरपुकीमी मोसा कली “मुल मार तूचा?” दे गन गन पाम्तेकम। प्रस्थान १६:२

25 मोसामी चहिं परमप्रभु यावे कली पुंडस डा पुंडस बाक्त। मिनु परमप्रभु यावेमी मोसा कली रवा आ शी का कोंइताक्व। मिनु मोसामी मेको शी ब्वाक्कुम ब्वाक्कुम। मिनु मेको ब्वाक्कु मकशो ब्रोंब्रशो दुम्त। मेकेर इस्राएली आन कली आ फुल्लुम मुशा ब्रेक्शो नु आन पतीक लोत्र गेशो बाक्त। मोपा मेको आन कली नाक्ताक्व। उत्पत्ती २२:१

26 मिनु मेकोमी “गे परमप्रभु यावे, इन परमप्रभु आं लोत्र नेशा, आं डोंइती ठीक पाइतीनी हना, आं शेशो लोत्र नेशा, टिशा, आं अरेशो लोत्र टीतीनी हना, गो इजीप्त रागी डा मुर आन कली पपाइशशो रोइ इन कली मपपाइक्नुड। मारदे हना गो इन कली सापाइक्ब परमप्रभु यावे नड” देंत। ब्यवस्था ७:१५; उत्पत्ती २०:१७; ब्यवस्था ३२:३९; भजन संग्रह ३०:३; यसेया ५७:१८

एलीम रागीमी जाक्दीशशो

27 मिनु इस्राएली मेकेर रे लशा, एलीममी जाक्दीत्तेकम। मेकेर १२ ओटा धारा नु ७० ओटा रवा बाक्तेकम। मेकोपुकी मेको ब्वाक्कु आ नेक्था बाक्तेकम।

## 16

इस्राएलीपुकीम गन गन पशो

1 मिनु इस्राएली नेल्ल एलीम रे लशा, सीन माइशशो गोरशो रागी जाक्दीत्तेकम। सीन माइशशो गोरशो रागी एलीम नु सीनै डांडा आस दातेमी बाक्ब। इजीप्त रागी रे गाक्शा नोले मेकेर आबीब आ नोले डा महिना डा १५ नाक्तीम जाक्दीत्तेकम।

2 मिनु इस्राएली नेल्ल मोसा नु हारून आस कली तशा गाइशशा, प्रस्थान १७:२-३

3 “इजीप्त रागी उइ परमप्रभु यावेमी आंड कली सद हना, रिम्शो दुम वा। मेकेर श्ये नु शोब्ले शुश बाक्त। गे आंड कली जचा मगेशु, साइक्वा कली एको गोरशो रागीमी चाक्तीसी” दे गन गन पाम्तेकम। प्रस्थान १४:११

4 मिनु परमप्रभु यावेमी मोसा कली “नेनो, गो इन कली रेउ यिशो खोंदेशो पा सरीड रे शोब्ले यिपाइक्नुड। मिनु मुरपुकीम नाक्त कित कित गुप्चा माल्नीम। खेयप का गुप्मेनु, नाक्त का कली ला गुप्चा माल्नीमी। आं अरेशो लोत्र पाइबाक्मा कों, मपाइबाक्मा, गो मेको आन कली नाक्नुड। प्रस्थान १६:१५; उत्पत्ती २२:१

5 मुरुमी सुक्रुबार आन गुप्शो शोब्ले नाक्त का कली ठीक पाम्तेकम हना, नाक्त का कली गुप्शो यो, नाक्त निक्शी कली ठीक दुम्ब” देंत।

6 मिनु मोसा नु हारूनम इस्राएली आन कली “परमप्रभु यावेमी इन कली इजीप्त रागी रे प्रोंइता, दे आपो नाक्दो लेंशा मिम्पाइक्ब।

7 सुनी कना गे परमप्रभु यावे आ छेडछेड गूशो ताइनीनी। मारदे हना मेकोमी इन परमप्रभु यावे कली गन गन पशो तुइक्ताक्व। गो निक्शी सु नस्कु डा? गे आंस पबंम गाइक्नीनी?” देताक्म।

8 मिनु मोसामी इस्राएली आन कली “परमप्रभु यावेमी आपो नाक्दो इन कली श्ये गेब, सुनी कना रूथी शोब्ले गेब, इन गन गन पशो लोत्र नेंतु, दे तुइक्तीन। गो निक्शी सु नस्कु डा? इन गन गन पशो आंस कली ममाइ, परमप्रभु यावे नु कका गाइक्ताक्नी दे तुइक्तीन” देंत।

9 मिनु मोसामी हारून कली “गे मुर नेल्ल आन कली ‘परमप्रभु यावे आ डोंइती जाक्कीन। मारदे हना मेकोमी इन गन गन पशो नेंतु’ देंचा माल्नेवे” देंत।

10 मिनु हारूनमी इस्राएली नेल्ल आन कली लोत्र पवानु, मेकोपुकी गोरशो रागी गे कोवतेकम। मिनु मेकेर गोस्सुमी परमप्रभु यावे आ छेडछेड गूशो ताम्तेकम। गन्ती १२:५; गन्ती १४:१०; गन्ती १६:१९

11 मिनु परमप्रभु यावेमी मोसा कली

12 “गो इस्राएली आन गन गन पा पशो लोत्र नेंता। गे मेको आन कली ‘आपो नाक्दो श्ये ब्वाइनीनी। मिनु सुनी कना रूथी शोब्ले जाइनीनी। गो परमप्रभु यावे, इन परमप्रभु नड, दे गे तुइक्नीनी’ दे माइक्मी” देंत।

बटटाइ चिक्ब नु मन्ना शोब्ले गेशो

13 मिनु नाक्दो बटटाइ गूमा बाक्त। मिनु इस्राएली आन बाक्तीक नेल्ल सुम्मे बाक्त। मिनु सुनी कना आन बाक्तीकेमी शुश सीत यिशो बाक्माक्त। गन्ती ११:३१

14 मिनु सुनी कना सीत मजाम्म सम्म गोरशो रागी डा खपीम फुरश खोदेशो पा आइक्च गेडा बाक्त।

15 इस्राएलीपुकीमी मेको तशा “मार में?” देंमुक्तेकम। मारदे हना मार बाकमे, मतुइकतम। मिनु मोसामी मेको आन कली “परमप्रभु यावेमी इन कली गेशो मन्ना शोब्ले एकोन बाकब। प्रस्थान १६:४; ब्यवस्था ८:३; यूहन्ना ६:३१; १कोरिन्थी १०:३

16 परमप्रभु यावे आ अरेशो लोत्र मार बाकब देशा हना, इन मुर नेल्लेमी गिश जने चाप्नीमी, मिश गुपीन। इन ताम्बुमी गिश जना मुर बाक्नीमी, मिश गोमेर गुप्चा माल्नीनी” दे इस्राएली आन कली देंत। गोमेर का २ लिटर कि ४ माना खोदेशो बाकब।

17 मोसामी इस्राएली आन कली दोदेशो देंमे, मोदेशो पाम्तेकम। का निक्शीमी शुश, का निक्शीमी इचकका ला गुप्तेकम।

18 तन्ना पुक्गमेनु, मेको शुश गुप्ब नु इचकका ला गुप्ब नेल्ल आन के उइक्थ उइक्थ दुम्माक्त। नेल्लेमी गिश जचा दाकतमे, मिश गुप्तेकम। २कोरिन्थी ८:१५

19 मिनु मोसामी मेको आन कली “दीसा सुनी सम्म सुइमी मारेइ हेंचा मडुन्ब” दे माइक्तीमी। प्रस्थान १६:४; मत्ती ६:३४; लूका ११:३

20 तन्ना मेकोपुकीमी मोसा आ देशो मटीम। मिनु का निक्शीमी मेको मन्ना सुनी सम्म हेंदमे बाक्त। मिनु लुस्पु जोल्शा, शुश रिना पाइक्तु। मिनु मोसा शुश गाइक्ताकव।

21 मिनु गिश माल्दमे, सुनी सुनी गुप्तेकम। नां चोक्तानु, मेको यत।

नाइक्तीक नाक्त कली मन्ना गुप्शो

22 मिनु सुक्रबार नाक्ती मुरपुकीम मुर का कली गोमेर निक्निक्शी मन्ना गुप्तेकम। इस्राएली आन कली कोत्रब मुरपुकीमी मो पाम्तेकम दे मोसा कली देंतेकम। गोमेर का २ लिटर कि ४ माना खोदेशो बाकब।

23 मिनु मेकोमी “परमप्रभु यावेमी इन कली गे मार पचा माल्नीनी, मेको शेंशो बाकब। मारदे हना दीसा परमप्रभु यावे कली मिम्शा नाइक्तीक नाक्ती बाकब। मोपतीके मुलाक्त माल्लो जचा थोत्रक वयेने चोने। लीशो चहिं दीसा सुनी सम्म हेंचा दुम्ब” देंत। उत्पत्ती २:२-३

24 मिनु मोसा आ देशो खोदेशो पा आ दीसा सम्म हेंताकम। मिनु मेको रिना मपाइक्थु, लुस्पु यो मजोल।

25 मिनु मोसामी “गे मुलाक्ती जने। मारदे हना परमप्रभु यावे आ नाइक्तीक नाक्ती बाकब। मुलाक्ती लाडगाम मारेइ मथिसीब।

26 गे ६ नाक्त गुप्चा माल्नीनी। ६ नाक्त आ दीसा डा नाक्त मारेइ मथिसीब। मारदे हना नाइक्तीक नाक्त बाकब” देंत।

27 मिनु सन्चरबार नाइक्तीक नाक्त का निक्शी मुर मन्ना गुप्थ लाडगा थूमानु, मारेइ मथिदमे।

28 मिनु परमप्रभु यावेमी मोसा कली “गेपुकी आं शेंशो नु आं अरेशो गेना सम्म मटीनीनी?”

29 नोफा दाइशशा नेनीन ‘परमप्रभु यावेमी इन कली सन्चरबार नाइक्तीक नाक्ती गेपु। मोपतीके सुक्रबार इन कली नाक्त निक्शी कली जचा थोत्रक गेब। मिनु नाइक्तीक नाक्ती इन बाक्तीक बाक्तीकेमी बाक्कीन। इन खिं रे लाडगा मलने’ दे मुर आन कली देनो” देंत।

30 मिनु मुरपुकी सन्चरबार नाक्ती नांइसाकम।

31 मिनु इस्राएलीपुकीम मेको गेडा कली मन्ना दे नें वोइक्तेकम। मेको बुश धन्या वांचेर खोदेशो बाक्त। मेको खुदोमी सेल्शो शोब्ले खोदेशो पा ब्रोत्रमाक्त।

मन्ना हेंशो

32 मिनु मोसामी “परमप्रभु यावे आ अरेशो लोत्र मार बाक्त देशा हना, मेकोमी ‘मेको जचा थोत्रक गोमेर का हेंचा माल्नीनी। इन कली इजीप्त रागी रे प्रोंइशा, चाक्गानु, गोरशो रागीमी गेशो जचा थोत्रक मेको बाकब दे शुश पाला डा मुर आन कली कोंइचा कली हेंदो। गो इन कली इजीप्त रे गोरशो रागीमी चाक्शा, दोपा थुलु, मेको नेल्लेमी तामेकल’ देंत” देंत। गोमेर का इस्राएली आन अन्न पुक्तीके का बाक्त। मेको २ लिटर रिक्ब बाक्त। मिनु ओमेर का ४ माना खोदेशो बाकब।

33 मिनु मोसामी हारून कली “बोस का लतो। मिनु ओमेर का मन्ना मेकेर कुर पावो। मेको नेल्ल पाला डा मुरपुकीम तचा डा पा परमप्रभु यावे आ डोंइती वोतो” देंत। हिलू ९:४

34 परमप्रभु यावेमी मोसा कली दोपा देंमे, मोपा हारूनमी कबल पशो सन्दोस आ डोंइती वोइक्तु।

35 मिनु इस्राएलीपुकीमी ४० बर्स सम्म मन्ना जान्तेकम। मुर बाक्तीक कनान रागी डा सांद मजाक्मा सम्म मेको जान्तेकम। यहोसु ५:१२

36 गोमेर का एफाह डा १० भाग बाकब। एफाह का टेयब पुक्तीके बाकब।

## 17

इस्राएली मस्साह नु मेरीबा जाक्शो

1 मिनु इस्राएली नेल्ल सीन माइशशो गोरशो रागी रे गाक्शा, परमप्रभु यावे आ देशो बिशशा, रेफीदीम माइशशोमी बाक्तेकम। मेकेर चहिं तूचा ब्वाक्कु मथिदम। गन्ती ३३:१२-१४

2 मोपतीके “मोसामी आंइ कली मरिम्शो लां कोंइब” दे गाइशशा, मोसा कली “आंइ कली तूचा ब्वाक्कु गेकी” दे जिचा पोक्तेकम। मिनु मोसामी मेको आन कली “गे आं कली मारदे जिचा तोइनीनी? मारदे परमप्रभु यावे सक्ति पाइशशो बाकब, दे थमा मसुइक्नीनी?” देंत। ब्यवस्था ६:१६

3 मिनू मुरपुकी ब्वाक्कु तूतू दाक्शा, गाडक्ताक्म। मेकोपुकीमी मोसा कली “गे मारदे आंइ कली इजीप्ट रागी प्रॉइपाइय्कीकी? आंइ कली, आंइ आल आन कली, आंइ बस्तु भाव आन कली तूचा ब्वाक्कु मबा, आंइ कली बेक्पाइक्चा कली इजीप्ट प्रॉइपाइय्कीकी?” दैतेक्म। प्रस्थान १५:२४; प्रस्थान १६:२; गन्ती १४:-; गन्ती १७:६-२८

4 मो दैमानु, मोसामी परमप्रभु यावे कली “गो एको मुर आन कली मार पाइनुडा? आं कली फुल्लु आप्शा, साइक्चा चिक्तायीमी। मुल मार पड?” दैत। गन्ती १४:१०

5 मिनू परमप्रभु यावेमी मोसा कली “इसाएल डा खाल्पा आन कली लाइश्शा, इस्राएली आन डोंइती गाक्को। नील खोला तुप्शो कौक्के यो लाइश्शा लावो। प्रस्थान ७:२०

6 गो हारेब माइश्शो डांडा आ नेक्था सेरथे फुल्लु तार इ डोंइती बाक्नुड। मिनू गे मेको सेरथे फुल्लु तुप्चा माल्नेवे। मिनू, सेरथे फुल्लु रे ब्वाक्कु यीब। मिनू मुरपुकीमी तूने चाप्नीम” दैत। मिनू इस्राएली आन खाल्पा आन डोंइती मोसाम मो पाप्तु। गन्ती २०:११; १कोरिन्थी १०:४

7 मिनू मोसामी मेको सेरथे फुल्लु बाक्तीक कली मास्साह नु मेरीबा नें वोइक्तु। मारदे हना इस्राएलीपुकीमी परमप्रभु यावे कली नाक्शा गाइश्शा “परमप्रभु यावे आंइ दातेमी बाक्ब” दे थमा मसुदम। भजन संग्रह ९५:८-९; मीका ३:११

अमालेकी नु लडाइ पा ग्राशो

8 मिनू अमालेकी रेफीदीमम जाक्शा, इस्राएली नु लडाइ पाप्तेक्म। उत्पत्ती ३६:१२-१६

9 मिनू मोसामी यहोसु कली “इं मुरपुकी रे योव्रशा, अमालेकी नु लडाइ पथ लावो। गो परमप्रभु आ कौक्के शेशा, दीसा मेको डांडा तार राप्शा बाक्नुड” दैत। गन्ती १३:८, १६

10 मिनू यहोसुमी मोसाम दैशो खोदैशो पा अमालेकी नु लडाइ पाप्तु। मोसा, हारून नु हुर चहिं मेको डांडा डोंइसाक्म। प्रस्थान २४:१४

11 मोसामी आ गुइ पोक्गानु, इस्राएलीपुकी ग्रातेक्म। आ गुइ तोक्गानु, अमालेकीपुकी ग्रातेक्म।

12 मिनू मोसा आ गुइ योक्तीके हारून नु हुरमी फुल्लु का थॉइशा, मेको तारी निप्पाइक्ताक्स। मिनू मोसा आ गुइ तिक्शा, वोइक्ताक्स। मोदैशो पा का ग्युरा गे, का पेरा गे बाक्शा, नां मपेरदा सम्म गुइ पोक्स डा पोक्स बाक्ताक्स।

13 मिनू यहोसु नु आ मुरुमी अमालेक नु आ मुर आन कली ग्राशा, तरवारम साइक्तेक्म।

14 मिनू परमप्रभु यावेमी मोसा कली “एको लडाइ गेना हना यो मिम्चा कली किताबम ब्रेक्तो। गो अमालेकी आन कली रागी रागी रे क्यान्डुमी, दे यहोसु कली मिम्पतो” दैत। ब्यवस्था २५:१७-१९; १सामुएल १५:२-३

15 मिनू मोसामी चढ्ढेतीक का सेल्शा “परमप्रभु यावे आं छेदर बाक्ब” दे नें वोइक्तु।

16 मिनू मेकोमी “यावे आ नित्तीक गे इन गुइ पोक्कीन! मारदे हना परमप्रभु यावेमी ‘अमालेकी नेल्ल आन पालामी मेकोपुकी नु लडाइ पाइनुड’ दे डोंइती दैशो बाक्ब” दैत। येरमीया ३:१७

## 18

यित्रो मोसा कली गुम्थ जाक्शो

1 मिनू मिदयान रागी डा नाक्सो मोसा आ शिउ यित्रोमी परमप्रभुमी मोसा नु इस्राएली आन पर्वम मार मार पवा नु परमप्रभु यावेमी मेको आन कली इजीप्ट रागी रे दोपा गुंइदा, मेको नेल्ल नेना बाक्त। प्रस्थान ३:१

2 डोंइती मोसामी आ मीश नु आ तौ निक्शी आस कली आ माइत सोइश्शो बाक्माक्त। मुल यित्रोमे मेको आन कली मोसा आ बाक्तीक चाक्तीमी। प्रस्थान ४:२०

3 मोसामी आ तौ का आ नें गेरशोम वोइश्शो बाक्त। मारदे हना मेकोमी “गो मतुइश्शो रागी डा मुर आन दातेमी अर्को रागी डा मुर दुम्ती” दैत। प्रस्थान २:२२

4 मिनू अर्को कली एलीएजर नें वोइक्तु। मारदे हना मेकोमी “आं आफ आ परमप्रभुमी आं कली फाराओ आ तरवार रे प्रॉइशा, चारच पाइक्ती” दैशो बाक्त। १इतिहास २३:१५-१७

5 मिनू मोसा आ शिउ यित्रो, मोसा आ मीश नु आ तौ निक्शी गोरशो रागीमी मोसा कली गुम्थ जाक्तेक्म। मेना मोसामी आ ताम्बु परमप्रभु आ डांडा आ पुंमी कीतु।

6 मिनू यित्रोमी मोसा कली “इ शिउ यित्रो, इ मीश नु इ तौ निक्शी इ कली गुम्थ जाक्तक” दे लोव्रो सोइक्ताक्व।

7 मिनू मोसा आ शिउ गुम्थ जाक्शा, सेउ पशा, पुक्पु पशा “दोपा बाक्नी” दे ताम्बुम ओंइताक्व।

8 मिनू मोसामी परमप्रभु यावेमी इजीप्ट डा फाराओ कली नु आ मुर आन कली मार मार पवा, लाम्मी मार मार श्येत जामे, दोपा परमप्रभु यावेमी मेको नेल्ल रे प्रोना, मेको नेल्ल आ शिउ कली शेंताक्व।

यित्रो थमा सुइक्ब दुम्शो

9 मिनू यित्रोमी परमप्रभु यावेमी इस्राएली आन कली गिश रिम्शो पवा नु इजीप्ट डा मुर आन गुइ रे दोपा प्रोना मेको नेल्ल नैशा, शुश ग्येरसाक्व।

10 मिनू मेकोमी “इन कली इजीप्ट डा मुरपुकी नु फाराओ आ गुइ रे प्रॉइब परमप्रभु यावे कली ठेयब सेल्य।

11 देवी देवता आन क्येडा परमप्रभु यावे ला ठेयब बाक्ब, दे गो मुल तुइक्ताक्ड। आ मुर आन कली इजीप्ट डा मुर आन गुइ रे प्रॉइतु। मारदे हना इजीप्टीपुकीमी मेको आन कली ठेयब लेश्शा दिप्शो बाक्तेक्म” दैत। नेहेम्प्याह ९:१०; येरमीया ५०:२९

12 मिनू मोसा आ शिउमी परमप्रभु कली चोशा चढ्ढेतीक नु अरु चढ्ढेतीक यो चढ्ढेपुतु। मिनू हारून नु इस्राएल डा मुर आन खाल्पा नेल्ल मोसा आ शिउ नु परमप्रभु कली मान पा ठेयब सेल्शा जाम्तेक्म। उत्पत्ती ३१:५४

यित्रोम मोसा कली अर्ती गेशो

- 13 मिनु मोसा सुनी कना बोक्शा, मुर आन कली निसाफ पचा कली निस्साक्व। मुरपुकी सुनी रे जाक्शा, नाक्दो सम्म मोसा आ डोंइती बाक्तेक्म।
- 14 मिनु मोसा आ शिउ मी मोसा कली मोदेशो पा मुर आन कली निसाफ पशो तशा “गे मुर आन कली मार पाइनेवे? गे मारदे इ का ला गेय पना पन बाक्नेवे? मुरपुकी सुनी रे नाक्दो सम्म जाक्शा, बाक्शो बाक्नीमी” दैत।
- 15 मिनु मोसामी आ शिउ कली “मुरपुकीमी परमप्रभु आ देशो तुइक्चा दाक्नीम, मोपतीके जाक्नीम।
- 16 मेको आन दातेमी मार मार निसाफ पाचा माल्शो बाक्मे, मेको गो गारपाइक्नुड। मोपा गो निसाफ पचा माल्नुड। मिनु मेको आन कली परमप्रभु आ फुल्लुम मुशा ब्रेक्शो लोत्र नु आ अरेशो लोत्र तुइक्पाइक्नुड” दैत।
- 17 मिनु आ शिउमी “इ पशो मरिम्शो बाक्ब।
- 18 गे शेम्सीनेवे। गे नु बाक्ब मुरपुकी यो शेम्सीनीम। एको गेय इ मचाप्चा डा बाक्ब। गे ला पने मचाप्नेवे। गन्ती ११:१४; ब्यवस्था १:९
- 19 आं लोत्र नेनो, गो इ कली अर्ती गेनुड। परमप्रभु गे नु बाक्ब। गे मुर आन पर्वम परमप्रभु कली पुंडदो।
- 20 परमप्रभु आ फुल्लुम मुशा ब्रेक्शो लोत्र नु आ अरेशो लोत्र मेको आन कली तुइक्पतो। मोपा गे मेको आन गाक्तीक लां नु आन पचा माल्शो गेय मेको आन कली शेंदो।
- 21 गे मुर नेल्ल आन दाते रे रिम्शो गेय पने चाप्ब परमप्रभु कली मान पा हिंब, थमा सुइक्चा पुंडसीब नु खुइश्शा मार मार ताक्शा मजाइब मुरपुकी योत्रचा माल्नेवे। नोले मेको मुर आन कली कोत्रब ठेयब मुर वोतो। मेको आन कली १० जना मुर आन कली कोत्रब, ३० जना मुर आन कली कोत्रब, सहे सहे जना मुर आन कली कोत्रब नु हजार हजार जना मुर आन कली कोत्रब ठेयब मुर आन कली योत्रबो।
- 22 मेको कोत्रब मुरपुकीमी नाक्त किंत किंत डा निसाफ पामेक्ल। ठेयब मुददा चहिं इ डोंइती चाक्गमेक्ल। आइक्च मुददा आंमा गारपदमेक्ल। मो पाप्तीवी हना, इ कली रिम्शो दुम्ब। मिनु मेको कोत्रबपुकीमी इ गेय नु श्येत योक्शा पाइनीम।
- 23 गे आं देशो पाप्तीवी हना, परमप्रभुमी यो इ कली मोदेशो पचा गेब। गे मेको गेय फाल्ने चाप्नेवे। मिनु इ मुर नेल्ल दुशा गारशा, आंम आन बाक्तीके लाइनीम” दे यित्रोमी मोसा कली अर्ती गेप्टु।
- 24 मिनु मोसामी आ शिउ आ अर्ती नेशा, आ देशो नेल्ल पाप्टु।
- 25 मिनु इस्राएली आन दाते रे रिम्शो गेय पाइब आन कली योत्रशा, मुर आन कली कोत्रब वोइक्तु। १०, १०, ३०, ३०, सहे सहे नु हजार हजार जना मुर आन कली कोत्रब वोतो।
- 26 मेको मुरपुकीमी मुर आन कली निसाफ पची ना, निसाफ पाइनीम। मिनु ठेयब मुददा बाक्त हना, मोसा कली ब्रेत्ताक्म। आइक्च मुददा चहिं आंमा निसाफ पाप्तेक्म।
- 27 मिनु मोसामी आ शिउ कली लचा गेप्टु। मिनु मेको आ रागी लेत्त।

## 19

सीने डांडा जाक्दीश्शो

- 1 मिनु इस्राएलीपुकी इजीप्ट रागी रे गृशा महिना सां नोले सीने माइश्शो गोरशो रागीमी जाक्तेक्म।
- 2 डोंइती रेफीदीम माइश्शो रे लशा, सीने माइश्शो डांडा आ डोंइती आन ताम्बु कीतेक्म। मेको डांडा आ डोंइती बाक्शो बाक्तेक्म।
- 3 मिनु मोसा परमप्रभु नु लोत्र पचा कली डांडा डोंइसाक्व। मिनु डांडा रे परमप्रभु यावेमी मोसा कली “इ किकी पिपी याक्ब आ विं डा मुर, इस्राएली आन कली
- 4 ‘गो इजीप्ट डा मुर आन कली मार मार पडा, मेको ताइतीनी। ककाकुली आ फ्रां तार कुरशो खोदेशो पा इन कली आं नेक्था वोइक्तन्नी। ब्यवस्था ३२:११
- 5 गे आं देशो लोत्र पाइतीनी नु आं कबल पशो टीतीनी हना, गे नेल्ल जात जात डा मुर आन दातेमी आं योत्रशो मुर दुम्नीनी। मारदे हना रागी नेल्ल आं केन बाक्ब। ब्यवस्था ५:२; ब्यवस्था ७:६
- 6 गे आं कली चढेब आन राज्य नु आं योत्रशो जात डा मुर दुम्चा माल्नीनी” दे मेको लोत्र इस्राएली आन कली देंचा माल्नेवे” दे माइक्तु। यसेया ६१:६; १ पत्रुस २:९; प्रकाश १:६; लेवी १९:२
- 7 मिनु मोसामी इस्राएल आ थर डा मुर आन खाल्पा आन कली ब्रेशरा, परमप्रभु यावेमी देशो लोत्र मेको आन कली माइक्तीमी।
- 8 मिनु मुर नेल्ल का दुम्शा “परमप्रभु यावे आ देशो नेल्ल पाइनीकी” दैतेक्म। मिनु मोसामी मेको मुर आन देशो लोत्र परमप्रभु यावे कली दैत। प्रस्थान २४:३-८
- 9 परमप्रभु यावेमी मोसा कली “लो, गो मारेइ मतांइसीचा डा गोस्सुमी इ कली गुम्थ जाक्नुड। मोपा गो मुर आन कली, गे नु लोत्र पशा नैपाइक्नुडमी। मिनु इ कली गेना हना यो थमा सुइक्नीम” दैत। मोसामी मुर नेल्ल आन देशो यो परमप्रभु यावे कली दैत। प्रस्थान १६:१०; प्रस्थान ३४:५; भजन संग्रह १८:१२; प्रस्थान १४:३१
- 10 मिनु परमप्रभु यावेमी मोसा कली “मुलाक्ती नु दीसा इस्राएली आन कली गो नु गुम्पाइक्चा ठीक पावो। आन फेक्शो वा मुरपतो। लेवी ११:४४; यहोसु ३:५; अय्युब १:५
- 11 नित्थ नाक्त आं कली गुम्चा कली ठीक दुम्चा माल्नीमी। मारदे हना नित्थ नाक्ती गो सीने डांडाम मुर नेल्ल आन डोंइती जाक्नुड।

12 मिनू गे डांडा आ एर ओंथ थरपु हिरचा माल्लेवे। गेमी मुर आन कली 'डांडा मडोइक्या, मथिचा डा पा थरपु हिरचा माल्लेवे। होस पा बाक्कीन। सुम डांडा आ पुं थीबा, मेको थमा पा साइक्या पुंडसीब। प्रस्थान ३४:३

13 मुर आन गुडमी थरपु थिचा मदुम्ब। मेको थरपु थीबा बस्तु भाव बाक्तेकम हना यो, मुर बाक्तेकम हना यो, मेको कली फुल्लु आप्शा हना यो ब्रा आप्शा हना यो साइक्या माल्नीनी' दे इस्राएली आन कली शेंचा माल्लेवे। तुराही आ ठेयब सेंदा नेशा नोले ला, मेकोपुकी डांडा डोइक्या माल्नीनी" देंत। हिब्रू १२:१८-२०

14 मिनू मोसा डांडा रे मुर आन बाक्तीके तोइश्शा, मेको आन कली परमप्रभु नु गुम्पाइक्या कली ठीक पाप्तु। मिनू मेकोपुकीमी आन फेकशो वा मुरतेकम।

15 मिनू मोसामी वोंइश मुर आन कली "नित्थ नाक्त ठीक दुम्शा बाक्कीने। मीश मुर नु मबाक्कीन" देंत। १सामुएल २१:४-५; १कोरिन्थी ७:५

परमप्रभु यावे गृशो

16 मिनू मेको आ नित्थ नाक्ती डांडा तार बुंबु पा, चिला पा, ठेयब गोस्स का गूत। मिनू तुराही का थम ठेयब सेंदा पा ग्रीत। मेको नेशा, इस्राएलीपुकी हिंशा, डोन लशा, बाक्तेकम।

17 मिनू मोसामी इस्राएली आन कली परमप्रभु कली गुम्थ जाक्कीन, दे आन बाक्तीक रे गुंडताकव। मेकोपुकी डांडा आ पुंमी राप्शा बाक्शो बाक्तेकम।

18 मिनू सौने डांडा कुनै कुन दुम्त। मारदे हना परमप्रभु यावे मेकेर मीम तोंइसाकव। मेको मार मार चोशो खोदेशो पा ठेयब कुन गूत। मिनू डांडामी ठेयब खिनु कुत। उत्पत्ती १५:१७

19 तुराही आ सेंदा शुश ठेयब दुम्मेनु, मोसामी परमप्रभु नु लोव्र पाप्तु। मिनू परमप्रभु बुंबु पशो खोदेशो पा मोसा कली लोव्र लेताकव। प्रस्थान ३३:११; प्रेरित ७:३८

20 मिनू परमप्रभु यावे सौने डांडा तारी जाक्त। मिनू परमप्रभु यावेमी मोसा कली "डांडा तार डोंइसो" दे ब्रेलत। मिनू मोसा डोंइसाकव।

21 मिनू परमप्रभु यावेमी मोसा कली "तोंइसो। मुर आन कली 'होस पा मेकेर बाक्कीने। परमप्रभु यावे गे मलने' दे अरेवो। आं कली कोव्रथ कुम्तेकम हना, शुश मुर बेक्नीम।

22 आं कली गुम्थ कुइब चढेबपुकी यो आंम कली चिक्शा ठीक दुम्चा माल्नीम। मो मपाम्तेकम हना, गो मेको आन कली यो साइक्नुडमी" देंत।

23 मिनू मोसामी परमप्रभु यावे कली "मुरपुकी सौने डांडा डोइकने मचाप्नीम, मारदे हना गे आं कली 'एर ओंथ थरपु हिरशा, इन के सेल्चा' दे अरेतीनी" देंत।

24 मिनू परमप्रभु यावेमी मोसा कली "लावो, हारून कली डोइकपतो। तन्न चढेबपुकी नु मुर आन कली चहिं मचाक्को। परमप्रभु यावे आ बाक्तीके कुम्तेकम हना, गो मेको आन कली साइक्नुडमी" देंत। प्रस्थान २४:९-११

25 मिनू मोसा मुर आन बाक्तीके तोइश्शा, मेको लोव्र नेल्ल मुर आन कली माइक्तीमी।

## 20

परमप्रभु आ अरेशो १० ओटा लोव्र

ब्यवस्था ५:६-१८

1 मिनू परमप्रभुमी मार लोव्र पाप्तु देंशा हना मती ५:१७-२८

2 "गो परमप्रभु यावे, इन परमप्रभु नड। गो इन कली वाइलीम वाइल दुम्शो इजीपत रागी रे गुंडताक्नी। न्यायाधीस ६:८; येरमीया ३४:१३

3 गे आं कली ला बाप्शा सेउ पने, देवी देवता आन कली बाप्शा सेउ मपने। ब्यवस्था ६:४-५; यसैया ४५:५-६; १कोरिन्थी ८:५-६

4 मूर्ति मसेलीन। सरीडम बाक्ब, रागीम बाक्ब नु ब्वाक्कु गाम बाक्ब तेकोइ जन्तु आन मूर्ति मसेलीने। ब्यवस्था ४:१५-१९; ब्यवस्था २७:१५; यसैया ४०:१८-२६; रोमी १:२३

5 मेको आन कली बाप्शा सेउ मपने। मेको आन कली ठेयब मसेलीने। मारदे हना गो परमप्रभु यावे, इन परमप्रभु नड। गो रुश पाइब परमप्रभु नड। आं कली काइ मदाकब नु आ अरेशो मटीब मुर आन आल, चच, युइ नु युइ आन युइ आन पाला सम्म यो सजाइ गेब परमप्रभु नड। प्रस्थान ३४:१४; ब्यवस्था ४:२४; ब्यवस्था ५:९; ब्यवस्था ६:१५; अय्युब २१:१९; येरमीया ३१:२९-३१; इजीकीएल १८:२५

6 तन्न सु सुमी आं कली दाक्नीमी, आं शेंशो लोव्र टीनीमी, मेको आन आल, चच युइ नु युइ आन युइ आन पाला सम्म कली ला ममाइ, हजार हजार पाला सम्म गेना हना यो शिशी पाइक्नुडमी। प्रस्थान ३४:७; ब्यवस्था ७:९

7 गे परमप्रभु यावे, इन परमप्रभु आं नें, मो मथिने। मारदे हना सुम परमप्रभु यावे आं नें मो थीबा, मेको कली सजाइ मगेशु, मप्रोंइब। लेवी १९:१२; लेवी २४:१६

8 सन्चरबार नाइक्तीक नाक्ती आं नाक्त बाक्ब। मानेचा माल्नीनी। प्रस्थान १६:२५-२९

9 गे ६ नाक्त इन गेय नेल्ल पचा माल्नीनी।

10 तन्न मेको आ नोले डा नाक्त परमप्रभु यावे, इन परमप्रभु आ नाइक्तीक नाक्त बाक्ब। मेको नाक्ती गेपुकी काइ गेय मपने। इन तमी तौ, इन वाइलीम वाइल, इन बस्तु भाव, इन रागीम बाक्शो अर्का रागी डा मुर आन कली यो काइ गेय मपपतीन। प्रस्थान ३१:१३-१७; इजीकीएल २०:१२; मर्कूस २:२७-२८; कलस्सी २:१६-१७

11 मारदे हना परमप्रभु यावेमी ६ नाकतीमी सरीड नु रागी, ठेयब समुन्द्र नु ठेयब समुन्द्रमी बाकशो नेल्ल आन कली सेल्लु। मिनु नोले डा नाक्त नांडसाकव। मोपतीके परमप्रभु यावेमी 'मेको आं नाक्त बाकब' दे मेको नाक्त कली आसीक गेशो बाकब। उत्पत्ती २:२-३

12 इन आम आफ आन कली मान पने। मो पाइतीनी हना, परमप्रभु यावेमी, इन परमप्रभु इन कली गेशो रागीम शुश ब्रोंडचा गोब। प्रस्थान २१:१७; ब्यवस्था २७:१६; मती १५:४-६; एफिसी ६:२-३

13 मुर मसतीन। प्रस्थान २१:१२; उत्पत्ती १:५-६; याकूब २:१०-११

14 मुर आन मीश वोंडश नु मइपीन। लेवी २०:१०; मती १५:१९

15 खुड मपने। प्रस्थान २१:१६; लेवी १९:११; एफिसी ४:२८

16 जोल पा सांकछी मबाककीन। प्रस्थान २३:१; ब्यवस्था १९:१८-१९; एफिसी ४:२५

17 इन नेकथा बाकब मुर आ खिं, आ मीश आ वाइलीम वाइल, आ बी ब्यफ नु आ गधा, मेको के मार बाक्त हना यो, मेको तशा मबालदीन। एको परमप्रभु यावे आ अरेशो लोत्र बाकब" दे मोसामी इस्त्राएली आन कली देंत। रोमी ७:७; रोमी १३:९

परमप्रभु कली मान पा हिंशो

18 मिनु मुरपुकी डोन बाकमानु, बुंबु पशो नेशा नु चिला पशो तशा, तुराही ताप्शो नेशा, डांडा रे कुशो कुन तशा, डोन लशा हिंशा खिंखि पा, कोव्रशा बाक्तेकम।

19 मिनु मेकोपुकीमी मोसा कली "गे आंड कली लोत्र पाइतीनी हना, गो नेंनीकी। तन्न परमप्रभुमी आंड कली लोत्र पाप्टु हना, बेक्नीकी" देंतेकम।

20 मिनु मोसामी "महिनीन। परमप्रभु इन कली नाकथ जाक्त। गे परमप्रभु कली मान पा हिंचा डा बाकब, दे मिस्ताकनी हना, पाप मपाइनीनी" देंत। उत्पत्ती २२:१

21 मुरपुकी डोन बाकशो बाक्तेकम। मोसा चहिं परमप्रभु आ नेकथा क्येर गोस्सुम लत। १राजा ८:१२

22 मिनु परमप्रभु यावेमी मोसा कली "गे इस्त्राएली आन कली 'आं कली सरीड रे लोत्र पशो नेंतीनी।

23 गे गो नु देवी देवता मसेलीन। गे आंम कली सुन नु चांदी के देवी देवता मसेलीने।

24 गे आं कली खप के चढेतीके सेल्चा मालनीनी। मेको तारी चोशा चढेतीक चढेचा मालनीनी। इन दुशा बाकचा आ पर्वम चढेतीक चढेन। भेडा, ब्यफ चढेचा मालनीनी। गो ते ते इन कली आं नें मिम्पाडक्नुडा, मेक मेक इन कली आसीक गेनुड। प्रस्थान १७:१५; प्रस्थान २७:१-८; ब्यवस्था १२:५

25 गे आं कली फुल्लु के चढेतीके सेल्चा दाकताकनी हना, मप्रोल्लोशो फुल्लु के सेल्चा मालनीनी। मेको फुल्लु फलामम प्रोल्लतीनी हना, मेको आं कली मदुम्ब। ब्यवस्था २७:५; यहोसु ८:३१

26 आं कली चढेतीकेम थेंका मडोंडसीन। इन मुने दोक्तीक मतांडसेकल' दे माडक्मी" देंमाक्त।

## 21

हिब्रू वाइलीम वाइल

1 मिनु परमप्रभुमी लेशा "मेको निसाफ पतीक लोत्र मुर आन कली शेंचा माल्नेवे।

2 'गेपुकीमी हिब्रू वाइल ग्याप्तीनी हना, ६ बर्स इन गेय पपाइशशा, नोले डा बर्स मो लचा गेचा मालनीनी। लेवी २५:३९-४१; ब्यवस्था १५:१२-१७; येरमीया ३४:१४

3 मेको वाइल आ का जाक्त हना, आ का लचा माल्ब। ग्युंवे पा जाक्त हना, आ मीश लाइशशा लचा माल्ब।

4 आ होत्रपम आ वाइल कली ग्युंवे पपाइक्तु हना, मेकोमी तमी तौ थित हना, मेको मीश मुर नु आलपुकी मेको होत्रप केन दुम्मीम। मेको वाइल आ का ला लचा माल्ब।

5 तन्न मेको वाइलम "आं होत्रप, मीश नु आं आल आन कली दाक्नुड, गो प्रोंडशा मलाइनुड" देंत हना,

6 आ होत्रपम आ वाइली कली परमप्रभु आ डोंइती लाइक्चा माल्ब। मिनु लाप्यो डा शीम आ नोफा खित्या कली राप्पाइक्चा माल्ब। मिनु आ होत्रपम लूजेमी आ वाइली आ नोफा खित्या माल्ब। मिनु मेको गेना हना यो वाइल दुम्या बाकब। ब्यवस्था १:१७; भजन संग्रह ८२:१

7 सुडमी आ तमी कली वाइलीमी सेल्शा, लेयतु हना, मेको प्रोंडचा मपुंडसीब।

8 मेको होत्रपमी आंम कली चाक्गा नोले मेको कली मदाक्ताक्व हना, मेको कली क्येट ताक्शा प्रोंडचा माल्ब। आ होत्रपमी मेको वाइलीम कली अर्को रागी डा मुर आन कली लेयेने मचाप्व। मारदे हना मेको मीश मुर मरिम्शो पचा पुंडसीशो बाकब।

9 मिनु मेको होत्रपमी मेको ग्याप्शो मीश आल आ तौ कली गेप्टु हना, आ तमी खोदेशो पचा माल्ब।

10 मेकोमी अर्को मीश यो चाक्तु हना, डोंइती डा कली जचा, फेक्चा नु ग्युंवे पशो मीश मुर आन माल्लो नेल्ल गेचा माल्ब।

11 तन्न मेको आ माल्लो नेल्ल मगेप्टु हना, मो लचा गेचा माल्ब' देनो" देंत।

साइक्चा नु तुम्मुचा आ पर्वम लोत्र

12 मिनु "सुमी मुर कली मबेक्म सम्म तुप्बा, मेको मुर थमा पा साइक्चा पुंडसीब। प्रस्थान २०:१३; उत्पत्ती ९:६; मती ५:२१-२२

13 मुरुमी अरु कली खेदा मपथु, साइक्चा ममाल्लो बाक्त, तन्न परमप्रभुमी मेको मोदेशो दुम्पाइक्तु, गो इन कली मोदेशो मुर कली प्रोक्शा बाक्तीक का कोंडनुड। गन्ती ३५:६-२९; ब्यवस्था १९:४-१३

14 तन्न मुर कामी अरु कली 'गो साइक्नुड' दे मेको कली साइक्नु हना, मेको मुर कली आं चढेतीक रे लाइशरा, साइक्चा माल्ब। १राजा २:२९-३०

15 सुम आ आम आफ आस कली तुप्बा, मेको थमा पा साइक्चा पुंडसीब।

16 सुमी मुर कली लेयचा कली खुइ पाइबा, मिनु मेको आ खुइ पशो मुर कली आ खिम थित्तेकम हना, मेको मुर थमा पा साइक्चा पुंडसीब। ब्यवस्था २४:७; १तिमोथी १:१०

17 सुमी आ आम आफ आस कली सराप पाइबा, मेको थमा पा साइक्चा पुंडसीब।

18 मिनु मुरपुकी जिशा कामी अर्को कली फुल्लु आप्तु हना, आ गुइमी तुप्तु हना, तन्न मेको मुर मबेक्थु, आ बाक्तीकेम इप्शा,

19 बोक्मेनु, कोक्के तिकशा, गाक्ने चाप्ब दुम्त हना, मेको तुप्बमी मेको तुप्चा पुंडसीब नु गारचा माल्ब। तुप्चा पुंडसीब आ गेय मपशो डा ला थाप्चा ममाइ, मेको कली ठीक पा मसाम सम्म थाप्चा माल्ब।

20 मिनु सुइमी आ वाइलीम वाइल कली कोक्केमी तुप्तु हना, तुबानु बेक्त हना, मेको मुर थमा पा सजाइ ताइब।

21 तन्न मेको तुप्चा पुंडसीशो मुर का निकशी नाक्त सम्म ब्रोंडत हना, मेको तुप्ब मुर सजाइ गेचा मपुंडसीब। मारदे हना आं आ क्येटीम ग्याप्शो बाक्ब।

22 मिनु वोंइश मुर जिशा, राम्शी पा आन नेक्था बाक्शो कोव्रज कुरशो मीश मुर कली चुशा चिप्शा, मेको मीश मुरुम आ कोव्रज डा आल शाप्ताक्व हना, तन्न आ चहिं मारेइ मरिम्शो मदुम्त हना, आ वोंइशेमी देशो खोदेशो पा मेको डी डा चुशा चिप्ब मुरुम सजाइ ताइब। निसाफ पाइबमी गिश थाप्चा माल्ब देंबा, मिश थाप्चा माल्ब।

23 तन्न मेको मीश मुर नोले बेक्त हना, चुशा चिप्ब मुर साइक्चा पुंडसीब। लेवी २४:१९-२०; ब्यवस्था १९:२१; मती ५:३८

24 सुइमी अरु आ मिक्ची का पुक्ताक्व हना, मेको यो आ मिक्च पुक्चा पुंडसीब। सुइमी अरु आ खुइ का जिक्ताक्व हना, मेको यो आ खुइ जिक्चा पुंडसीब। सुइमी अरु आ गुइ जिक्ताक्व हना, मेको यो आ गुइ जिक्चा पुंडसीब। सुइमी अरु आ खोइली का जिक्ताक्व हना, मेको यो आ खोइली जिक्चा पुंडसीब।

25 सुइमी अरु कली मीम चोशा, गार सेल्लु हना, मेको कली यो मीम चोशा गार सेल्लु माल्ब। सुइमी अरु कली तुप्तु हना, मेको तुप्ब यो तुप्चा पुंडसीब। सुइमी अरु कली क्योरशा गार सेल्लु हना, मेको यो क्योरशा गार सेल्लु पुंडसीब।

26 मिनु होव्रप कामी आ वाइलीम वाइल आन मिक्चीम तुप्तु हना, मेको मिक्च बुक्त हना, मेको होव्रपमी मेको मिक्च आ पबंम मेको कली मोशा प्रोंइचा माल्ब।

27 आ वाइलीम वाइल कली तुप्शा, आ खुइ जिक्ताक्व हना, मेको होव्रपमी मेको खुइ आ पबंम मोशा प्रोंइचा माल्ब।

28 मिनु ब्यफ कामी वोंइश मुर, मीश मुर, सुइ कली खुशा साइक्नु हना, मेको ब्यफ कली थमा पा फुल्लु आप्शा साइक्चा माल्नीनी। आ श्ये ब्वचा मदुम्ब। मेको ब्यफ आ होव्रप चहिं सजाइ मताइब। उत्पत्ती ९:५; गन्ती ३५:३३

29 तन्न मेको ब्यफ डोंइती रे खुइब बाक्त हना, मिनु आ होव्रपमी तुइशशा यो, आ ब्यफ कली रिम्शो पा मवोइक्नु हना, मेको ब्यफोमी वोंइश मुर, मीश मुर, सुइ कली साइक्नु हना, मेको ब्यफ कली फुल्लु आप्शा, साइक्चा माल्ब। मिनु आ होव्रप कली यो साइक्चा माल्ब।

30 मसाइक्चा, दे क्येट पुंडतेकम हना, दोशो पुन्मे मोशो गेचा माल्ब।

31 ब्यफोमी तमी तौ खुप्तु हना, मेको मोदेशोन पचा माल्ब।

32 ब्यफोम सुइ आन वाइलीम वाइल आन कली खुप्तु हना, मेको ब्यफ आ होव्रपमी वाइलीम वाइल आन होव्रप कली ३० शेकेल चांदी गेचा माल्ब। मिनु ब्यफ कली चहिं फुल्लु आप्शा साइक्चा माल्ब" देनो। शेकेल का ११.५ ग्राम, तोला खोदेशो बाक्ब। ३० शेकेल चांदी ३४५ ग्राम बाक्ब।

बस्तु भाव आन पबंम अरेशो

33 मिनु "सुइमी लाइशरो इनार रोक्तु हना, इनार दोप्तु हना, मिनु मेको मसुम्थु लत हना, नु ब्यफ हना यो गधा हना यो बिक्त हना, लेवी ७:२४; लेवी १७:१५

34 मेको इनार आ होव्रपमी मेको गारपाइक्चा माल्ब। मेकोमी बस्तु भाव आ होव्रप कली क्येट गेचा माल्ब। मेको बेक्शो बस्तु चहिं इनार आ होव्रप के दुम्ब।

35 मिनु मुर का आ ब्यफोमी अरु मुर आन ब्यफ कली खुशा साइक्नु हना, मेको सेस ब्यफ कली लेयचा माल्ब। मेको ताक्शो क्येट मेको आस दातेमी योक्शा, बेक्शो ब्यफ यो आस दातेमी योक्चा माल्नीस।

36 तन्न मेको ब्यफ डोंइती रे खुइब बाक्ब, दे तुइशशा यो, आ होव्रपमी मेको ब्यफ कली रिम्शो पा मवोइक्नु हना, मेको बेक्शो ब्यफ कली थमा पा थाप्चा माल्ब। मिनु बेक्शो ब्यफ मेको के दुम्ब" देनो।

## 22

खुइ आ पबंम अरेशो

1 सुइमी ब्यफ, भेडा खुइ पशा, क्योरशा ब्वाप्तु हना यो, लेयतु हना यो, मेको मुरुमी ब्यफ का के ५ ओटा ब्यफ थाप्चा माल्ब। भेडा का के ४ ओटा भेडा थाप्चा माल्ब। २सामुएल १२:६; हितोपदेस ६:३१; लूका १९:८

2 मिनु खुइ कली खुइ पना पन थित्तेकम हना, मेको कली तुप्शा साइक्तेकम हना, साइक्ब साइक्चा डा सजाइ गेचा मपुंडसीनीम।

3 तन्न नां दाप्शा नोले सम्म तुप्शा साइक्नु हना, मेको साइक्ब साइक्चा डा सजाइ ताइब। खुइ पाइब आ खुइ पशो नेल्ल लेत्चा माल्ब। थाप्ने मचाप्तु हना, वाइल सेल्लु पुंडसीब।



4 मेको खुइ आ खुइ पशो ब्यफ, गधा, भेडा आ बाक्तीकेम सेल थित्तेकम हना, मार बाक्त हना यो का के निक्शी थाप्पाइक्चा माल्ब।

रू आ पर्वम अरेशो

5 मिनु “सुइमी आ बी ब्यफ, क्यारश भेडामी अरु मुर आन शोकशो रू नेक्पाइक्चु हना, अडगुर रू डा अडगुर नेक्पाइक्चु हना, मेकोमी आ आंम रू डा नेल्ल क्येडा रिम्शो फल थाप्चा माल्ब।

6 सुइमी मी मुइक्तानु, मेको मीम चू नु रूमी बाक्शो मारेइ नेक्चु हना, मेको मी मुइक्वमी मीम नेक्शो नेल्ल थाप्चा माल्ब” देनो।

वोइक्चा गेशो आ पर्वम अरेशो

7 मिनु “सुइमी आ नेक्था डा मुर कली आ क्येट, अरु मारेइ वोइक्चा कली गेप्तु हना, वोइक्ब मुर आ खिं रे खुइ दुम्त हना, नु खुइ कली थित्तेकम हना, मेको खुइमी का के निक्शी थाप्चा माल्ब।

8 खुइ मथित्तेकम हना, मेको खिं डा टेयब मुरुमी आंम नेक्था डा मुर आ मार मार खुइ पवा कों, दे परमप्रभु आ डोंइती रप्पाइक्चा माल्ब।

9 मिनु बी ब्यफ, गधा, भेडा नु वासी मार मार वोइक्बमी नु वोइक्चा गोब, निम्फामी ‘आं के बाक्ब’ देंताक्स हना, मेको निक्शी परमप्रभु आ डोंइती जाक्चा माल्नीस। परमप्रभुमी सुम खुइ सुइक्बा, मेकोमी का डा निक्शी थाप्चा माल्ब।

10 मिनु सुइमी आ नेक्था डा मुर कली गधा, ब्यफ, भेडा नु अरु बस्तु भाव वोइक्चा कली गेप्तु हना, मेको बस्तु भाव बेक्तेकम हना, तुप्शा बिप्रेन्तेकम हना, सुइम मतचा डा पा मुरुम खुइ पा लाइशो बाक्तेकम हना, १राजा ८:३१-३२

11 मेको वोइक्बम आ नेक्था डा मुर आ बस्तु भाव ‘खुइ मपड’ दे परमप्रभु यावे आ डोंइती कसम जचा माल्ब। मिनु बस्तु भाव आ होत्रपम मेको थमा सुदानु, वोइक्ब मुरुमी मारेइ थाप्चा ममाल्ब।

12 तन्न आ खिं रे खुइ पशो बाक्त हना, मेको वोइक्बमी मेको थाप्चा माल्ब।

13 ब्वाकी डा जन्तुम मेको बस्तु कली ग्याइशशा साइशो बाक्त हना, मेको वोइक्बम मेको साइशो बस्तु दसी चाक्चा माल्ब। मेको ब्वाकी डा जन्तुमी साइशो कली थाप्चा ममाल्ब। उत्पती ३१:३९

14 मिनु सुइमी आ नेक्था डा मुर रे ब्यफ का परमा पचा कली पुंडतु हना, बस्तु आ होत्रपम मबाक्थु, मेको ब्यफ खजा दुम्त हना, बेक्त हना, मेको थमा पा थाप्चा माल्ब।

15 तन्न आ होत्रप यो बाक्त हना, मेको मारेइ थाप्चा ममाल्ब। मारदे हना गेय पचा कली क्येट गेशो बाक्ब” देनो।

मीश आल आ पर्वम अरेशो

16 मिनु “वोंइश मुर कामी कन्ने मीश आल नु मिलो शिलो पा, मेको नु इप्त हना, मेको कली थमा पा ग्युंवे पा आ आफ कली मार मार थाप्चा माल्ब। ब्यवस्था २२:२८-२९

17 तन्न मीश आल आ आफोमी आ तमी मगेप्तु हना, मेको वोंइश मुरुम कन्ने ग्युंवे पशो खोदेशो पा, क्येट थाप्चा माल्ब।

थमा पा साइक्चा पुंडसीब मुर

18 टुना मुना पाइब कली ब्रोंइचा मगेचा। लेवी २०:६, २७; लेवी १९:३१; ब्यवस्था १८:१०; १सामुएल २९:९; मलाकी ३:५

19 सु बस्तु नु इप्बा, मेको कली थमा पा साइक्चा माल्नीनी। लेवी १८:२३; ब्यवस्था २७:२१

20 सुमी देवी देवता कली पूजा पाइबा, मेको मुर थमा पा साइक्चा पुंडसीब। परमप्रभु यावे कली ला चढेचा माल्ब। प्रस्थान २०:३-५; ब्यवस्था १३:७-१९; ब्यवस्था १७:२-७

महिकसीशो मुर आन पर्वम अरेशो

21 अर्को रागी डा मुर आन कली श्येत मगेचा, मदिप्चा। मारदे हना गे यो इजीप्त रागीमी अर्को रागी डा मुर दुम्शा बाक्तीनी। लेवी १९:३३-३४; ब्यवस्था १०:१८, १९

22 आ वोंइश बेक्शो मीश मुर नु रोम रोइक्च आन कली श्येत मगेचा। ब्यवस्था २७:१९; यसैया १:१७; जकरिया ७:१०

23 गेपुकीमी श्येत गेतीनी हना, मेकोपुकीमी आं कली लोत्र पाम्तेकम हना, गो थमा पा आन पुंडशो गेनुड।

24 मिनु गो गाइशशा, इन कली तरवारमी साइकनन्नी। मिनु इन मीश वोंइश बेक्शो मीश दुम्ब। इन आलपुकी आफ बेक्शो आल दुम्नीम।

25 गेपुकीमी आं मुर आन दाते डा पुडग आन कली क्येट जेर गेतीनी हना, गे क्येट चेम्चा कली चाइक्ब ताक्ब मुर खोदेशो मदुमीन। लेवी २५:३६; ब्यवस्था २३:२०; हितोपदेस २८:८

26 मिनु गेपुकीमी मेको आन सुम्तीक वासी क्येट आ पा डा लाइक्तीनी हना, नां पेरची ना मेको लेत्चा माल्नीनी। ब्यवस्था २४:१०-१३

27 मारदे हना मेको आन रॉ डा सुम्तीक का ला बाक्ब। इप्ची ना दोपा सुम्सीनीमी? आं कली ब्रेत्तेकम हना, गो आन पुंडशो गेनुड। मारदे हना गो शिशी पाइब नड।

परमप्रभु कली मान पा हिंचा

28 परमप्रभु आ पर्वम मरिम्शो लोत्र मपचा। इन कली सासन पाइब कली सराप मपचा। लेवी २४:१४-१६; प्रेरित २३:५

29 गे इन रू डा डोंइती मीशो मारेइ मारेइ नु अडगुर रस चढेचा मरिम्दीन। मिनु इन डोंइती जरमेशो तौपुकी आं कली गेचा माल्नीनी। प्रस्थान २३:१९; ब्यवस्था १८:४; हितोपदेस ३:९-१०; प्रेरित १३:२, १३

30 इन बी ब्यफ नु इन भेडा रे यो मोदेशो पचा माल्नीनी। ७ नाक्त आन ममा नु बाक्का माल्नीनी। मेको नोले डा नाक्ती आं कली गेचा माल्नीनी।

31 गेपुकी आं मुर ला दुम्चा माल्नीनी। गे ब्वाकी डा जन्तुपुकीम साइशशो मब्वने। मेको कुचुम कली ब्वचा गेन” देनो। लेवी १९:२; १पत्रुस १:१५; लेवी ७:२४; ब्यवस्था १४:२१; इजीकीएल ४:१४; इजीकीएल ४४:३१

## 23

ठीक पतीके आ पबर्म अरेशो

1 “गेपुकी जोल लोत्र मब्रपतीने। मरिम्शो पाइब कली वारच मपने। जोल पा सांकछी मबाक्कीन। प्रस्थान २०:१६; लेवी १९:१६; भजन संग्रह १५:३; हितोपदेस १९:९

2 मिनु ठेयब हुल का मरिम्शो पाइब बाक्तेकम हना, मेको आन नोले मखोतीन। निसाफ पाइब आ डोंइती ‘ठेयब हुल डा मुर ठीक बाक्नीम’ मदेनीन। मोपा आं ठीक पतीके रे डोन मलने।

3 दूली पाइब मुर पुडग बाक्त हना यो मेको कली वारच मपतीन। लेवी १९:१५

4 मिनु गे इन जोरी सत्रु आन ब्यफ, गधा लां जाम्पा, हिरशो ताइतीनी हना, मेको कली वारच पा, लेशशा आ खिं चोव्रदीत्या माल्नीनी। अय्युब ३१:२९; हितोपदेस २५:२१-२२; लूका ६:२७

5 गे नु मदुइब मुर आ गधा आ भारीम चिप्शो थिल्तीनी हना, गे मेको पोक्ने मचाप्शो मुर ताइतीनी हना, मेको कली महेरदीन। मेको कली वारच पा मेको कली पोक्कीन।

6 मिनु पुडग मुर का पित हना, मेको कली पुडग बाक्त हना यो, ठीक निसाफ पने। ब्यवस्था २५:१९; भजन संग्रह ८२:२-४; उपदेसक ५:७; यसेया १:१७

7 जोल पा सांकछी माल्ब आन क्येडा डोन बाक्कीन। दोस मताइब नु ठीक पाइब कली मसतीन। मारदे हना गो मरिम्शो पाइब आ पबर्म ठीक पाइब बाक्ब मदेनुड।

8 गेपुकी खुइशशा मारेड मताक्कीन। मारदे हना मेकोमी मिक्च सिल्व। मिनु खुइशशा ताक्शोमी ठीक पाइब आ मुददा लोकब। ब्यवस्था २७:२५; १सामुएल ८:३; हितोपदेस १७:२३

9 मिनु अर्को रागी डा मुर आन कली मदिपीन। मारदे हना गेपुकी यो इजीप्त रागीम अर्को रागी डा मुर दुम्चा, अर्को रागी डा मुर आन थुं तुइक्नीनी। प्रस्थान २२:२०

नाइक्तीक नाक्त नु बर्स

10 मिनु ६ बर्स सम्म इन रूमी खुम्शा, सेक्शा खुपतीन। लेवी २५:१-१७, १८-२४

11 मिनु मेको आ नोले डा बर्स चहिं मारेड मशोक्थु, मो वोतीन। इन रागी डा पुडगपुकीमी मेको आंमा वाशो जामेक्ल। लीत हना, जन्तुपुकीम जामेक्ल। इन अडगुर रू नु इन तेल रवापुकी यो मेको खोदेशोन पने।

12 गेपुकी ६ नाक्त गेय पचा माल्नीनी। मेको आ नोले डा नाक्ती चहिं नांडसीन। मोपा इन ब्यफ नु गधा यो नाइक्ने चाप्नीम। मिनु इन वाइलीम आ तौ नु इन खिंम बाक्शो अर्को रागी डा मुर यो नाइक्का ताइनीम। प्रस्थान २०:८-११

13 आं अरेशो नेल्ल पने। देवी देवता आन कली मारेड मपुइचा आन नें यो मथिचा। यहोसु २३:७; जकरिया १३:२

बर्स डा चाड सां

14 बर्सम आं पबर्म खेयप सां चाड मानेचा माल्नीनी। प्रस्थान ३४:१८-२६; लेवी २३:४-४४; ब्यवस्था १६:१-१७

15 गो इन कली देशो खोदेशो पा, बोरब ओख्ती मसुप्शो शोब्ले डा चाड मानेचा माल्नीनी। गेपुकी ७ नाक्त सम्म बोरब ओख्ती मसुप्शो शोब्ले जचा माल्नीनी। मेको आबीब महिनामी पचा माल्नीनी। मारदे हना गेपुकी आबीब महिनामी इजीप्त रागी रे गृतीनी। आं डोंइती श्येत्थ गुड मजाक्कीन। प्रस्थान १२:१५-२०

16 मिनु इन रूम खुम्शो डोंइती डा मीशो मारेड मारेड डा चाड मानेचा माल्नीनी। बर्स नुप्ची ना नेल्ल रिक्शा, खुप्शा, ओइने थुम्शो डा चाड मानेचा माल्नीनी। प्रस्थान ३४:२२

17 वोंइश मुर नेल्ल परमप्रभु, परमप्रभु यावे आ डोंइती बर्समी खेयप सां जाक्का माल्नीनी।

18 गेपुकीमी चढेनीनु, चढेशो आ हुश नु बोरब ओख्ती सुप्शो मारेड मारेड कालेमी मचढेन। मेको चढेशो श्ये आ बोंसो सुनी सम्म महेंचा। प्रस्थान १२:७-१०; प्रस्थान ३४:२५

19 मिनु इन रू डा डोंइती मीशो नेल्ल क्येडा रिम्शो फल फुल नु अन्न परमप्रभु यावे, इन परमप्रभु आ बाक्तीकेम चाक्का माल्नीनी। गेपुकीमी पाठा कली आ ममा आ दूधम लोप्शा मक्येने, देनो” दे परमप्रभु मोसा कली देंत। उत्पत्ती ४:४; ब्यवस्था २६:१-११; नेहेन्याह १०:३६; ब्यवस्था १४:२१

परमप्रभु आ अरेशो नु गेशो लोत्र

20 मिनु परमप्रभुमी “नेनीन, गो इन डोंइती आं स्वर्ग डा गेय पाइब का सोडक्नुड। मेकोमी लांमी इन कली कोत्रशा नु आं देशो बाक्तीकेम चोव्रदीब। प्रस्थान १४:१९

21 गेपुकी होस पा बाक्शा, आं देशो टिने। गेपुकी मेको कली मगाइक्पतीन। मारदे हना आं नें मेको नु बाक्ब। मिनु मेकोमी इन हेंथे पतीक मक्याम्ब। यसेया ६३:१०

22 गेपुकी आ देशो नेनीन। आं देशो नेल्ल पाइतीनी हना, गो इन जोरी सत्रु आन जोरी सत्रु दुम्नुड। इन कली खेदा पाइब आन कली खेदा पाइब दुम्नुड।

23 आं स्वर्ग डा गेय पाइब थमा पा इन डोंइती लाइब। मिनू इन कली एमोरी, हिती परिज्जी, नानी, हिच्ची नु यबुसी कनानी आन रागी चोवदीब। मिनू गो मेको नेल्ल आन कली क्याम्नुड।

24 गेपुकी मेको आन खोदेशो मपने। मेको आन देवी देवता आन डोंइती बाप्शा सेउ मपने। मेको आन कली गेय मपने। तन्न मेको आन मूर्ति जिक्शा प्रोल्शा ताइक्तीन। प्रस्थान २०:५; ब्यवस्था १२:३०; लेवी १८:३

25 गे परमप्रभु यावे, इन परमप्रभु कली गेय पाइतीनी हना, गो इन जचा तूचा थोवक कली आसीक गेनुड। मिनू इन कली रोइ नेल्ल रे प्रोंडनुड। प्रस्थान १५:२६

26 इन रागीमी मीश मुरपुकी आल शम्ब नु आल मथीब मदुम्नीम। मिनू गेपुकी खाल्पी खाल्पा दुम्चा सम्म ब्रोंइनीनी।

27 गो इन डोंइडोंइती हिच कोंइनुडमी। मिनू गे ते ते जाक्दीलीनी, गो मेक डा जात जात डा मुर आन थुं लुकच लपाइक्नुड। मिनू इन जोरी सनु इन कली तशा प्रोक्नीम। उत्पत्ती ३५:५; यहोसु २:९-११; १सामुएल १४:१५

28 गो इन डोंइडोंइती हिक्वा सोइश्शो खोदेशो पा हिंतीक सोइक्नुड। मिनू हिच्ची, कनानी नु हिती इन डोंइती रे प्रोक्पाइक्नुड। ब्यवस्था ७:२०; यहोसु २४:१२

29 तन्न बर्स कामी मेको आन कली मप्रोक्पाइक्नुडमी। मोपा प्रोक्पाइक्तामी हना, गोरशो रागी दुम्शा, इन क्येडा ब्वाकी डा जन्तु शुश दुम्नीम।

30 गे शुश दुम्शा, मेको रागी मब्रीनी सम्म, गो मेको आन कली इन डोंइती रे का का पा युंइनुडमी। ब्यवस्था ७:२२

31 गो इन रागी लल समुन्द्र रे पलिस्ती आन ठेयब समुन्द्र सम्म नु गोरशो रागी रे युफ्रेटीस खोला सम्म दुम्पाइक्नुड। मिनू गो मेको रागी डा मुर इन कली जिम्मा गेनुड। मिनू गे मेको आन कली खेरनीनी। उत्पत्ती १५:१८

32 गे मेकोपुकी नु मेको आन देवी देवता नु कबल मपमुने। प्रस्थान ३४:१२

33 मेकोपुकीम इन कली पाप पपाइक्नीम। मोपतीके मेको आन कली इन रागीमी बाक्चा मगेने। गे मेको आन देवी देवता आन कली गेय पाइतीनी हना, आन ग्याइलीम रेट्वा पुंइसीनीनी” दे परमप्रभु यावेमी इस्राएली आन कली अरेवा बाक्त।

## 24

सिनै डांडाम कबल पशो

1 मिनू परमप्रभु यावेमी मोसा कली “गे, हारून, नादाब, अबीहु नु इस्राएली आन खाल्पा रे ७० जना मुर कुने। मिनू डोन रे आं कली सेउ पचा माल्नीनी। प्रस्थान २८:१; लेवी १०:१; गन्ती ११:१६

2 गे ला आं नेक्था जाक्ने चाप्ने। अरु चहिं नेक्था मजाक्थु, बाक्चा माल्नीमी। मिनू मुरपुकी गे नु डांडा डोइक्चा मदुम्नीम” दे परमप्रभु यावेमी देंत।

3 मिनू मोसा डांडा रे तोइश्शा, मुर आन कली परमप्रभु यावेमी देशो नु अरेशो लोत्र नेल्ल नेंपाइक्तीमी। मिनू मुर नेल्लेमी मुर का खोदेशो पा “परमप्रभु यावेमी देशो लोत्र नेल्ल गो पाइनीकी” देंतेक्म। प्रस्थान १९:८

4 मिनू मोसामी परमप्रभु यावे आ देशो लोत्र नेल्ल ब्रेक्ताक्व। मिनू सुनी कना बोक्शा, डांडा आ पुंमी चढेतीक का नु इस्राएल आ १२ थर मिम्चा कली १२ ओटा फुल्लु खुक्तु। प्रस्थान ३४:२७; यहोसु ४:२०

5 मिनू मोसामी इस्राएली टिटा आन कली बोहोर क्योरशा, चोशा चढेतीक नु परमप्रभु यावे नु दुशा बाक्चा आ पबंम चढेतीक चढेपपाइक्तु। न्यायाधीस १७:७

6 मिनू चढेशो बस्तु आन हुश आधा लाइश्शा, बोसपुकीम कुर पाप्तु। मिनू लीशो हुश चढेतीकेम ब्रुइक्ताक्व।

7 नोले कबल डा लोत्र ब्रेक्थो किताब मुर आन कली नेंपाइक्चा कली पढेन्तु। मिनू मेकोपुकीमी “परमप्रभु यावे आ देशो नेल्ल पाइनीकी। आ लोत्र टीनीकी” देंतेक्म।

8 मिनू मोसामी बोस डा हुश लाइश्शा, मुर आन कली ब्रुइश्शा “नेनीन, परमप्रभु यावेमी गेपुकी नु कबल पाप्तु। मेको हुश परमप्रभु यावे आ कबल डा देशो लोत्र आ छाप बाक्ब” देंत। हिब्रू ९:१९-२७; मर्कूस १४:२४

9 मिनू मोसा, हारून, नादाब, अबीहु नु इस्राएली आन खाल्पा रे ७० जना मुर डांडा डोंइसाक्म।

10 मिनू मेकोपुकीमी इस्राएली आन परमप्रभु कली ताम्तेक्म। आ बाक्तीक बास साफीर माइश्शो हीरा खोदेशो दिंम का बाक्शो बाक्त। मेको हाक्शो सरीड खोदेशो नीलो बाक्त। इजीकीएल १:२६

11 मिनू परमप्रभुमी इस्राएली आन खाल्पा आन कली मारिड मपव। मिनू मेकोपुकीमी परमप्रभु कली तशा, जशा तूशा बाक्तेक्म। प्रस्थान १९:२१-२२; प्रस्थान ३३:२०-२३

मोसामी परमप्रभु आ अरेशो टिशो

12 मिनू परमप्रभु यावेमी मोसा कली “गे डांडा डोइश्शा, आं नेक्था जाक्शा रिम्शा बाक्को। गो आं अरेशो लोत्र नु आं शेशो लोत्र इस्राएली आन कली शेंचा कली फुल्लु निक्शीम मुशा ब्रेक्ताक्व। गो मेको फुल्लु ड कली गेनन्न” देंत। प्रस्थान ३१:१८; २कोरिन्थी ३:६

13 मिनू मोसा आ गेय पाइब यहोसु लाइश्शा, परमप्रभु आ डांडा डोंइसाक्व। प्रस्थान ३३:११

14 तन्न डोंइती मोसामी इस्राएली आन खाल्पा आन कली “गो मलेस्कु सम्म, एकेर रिम्दीन। नेनीन, हारून नु हुर गेपुकी नु बाक्नीस। मार निसाफ पचा माल्नीनी, मेको निक्शीमी गारपाइक्नीस” देंत। प्रस्थान १७:१२

15 मिनू मोसा डांडा डोंइसाक्व। मिनू गोस्सुम मेको डांडा सुन्तु।

16 मिनू परमप्रभु यावे आ छेडछेड सिनै डांडाम बाक्शो बाक्त। मेको गोस्सुम डांडा कली ६ नाक्त सम्म सुन्तु। मिनू नाक्त का नोले गोस्स आ दाते रे परमप्रभु यावेमी मोसा कली ब्रेत्ताक्व। प्रस्थान १६:१०

- 17 मिनू परमप्रभु यावे आ छेडछेड इस्राएली आन कली डांडा तारी थम टेयब ब्रशो मी खोदेशो पा तांइसाकव। ब्यवस्था ४:२४; ब्यवस्था ९:३; हिब्रू १२:२९
- 18 मिनू मोसा गोस्स आगा ओव्रशा, डांडा डोइशशा, ४० नाकदो नु ४० नाक्ती बाकत। प्रस्थान ३४:२८

## 25

ताम्बु सेल्चा कली शुश गेशो

- 1 मिनू परमप्रभु यावेमी मोसा कली
- 2 “इस्राएली आन कली ‘आं कली मार मार गेचा मिम्नीनी, मेको गेने’ दे मतो। आन थुमी गेचा दाकशो, नेल्ल आन चाकशो गे नु इ कली वारच पाइबपुकीमी ताक्कीन। प्रस्थान ३५:४-७; १इतिहास २९:५; एजा २:६८,६९
- 3 आं कली मार मार ताक्चा माल्नीनी दंशा हना, सुन चांदी नु कांसा,
- 4 नीलो, प्याजी नु लल रड डा श्येले, रिम्शो पा किरशो सुती श्येले के प्रोव्रशो वा, क्यारश आ चां,
- 5 लल रड नुपुशो सांड आ कुशुल, नेल्ल क्येडा रिम्शो सेल्शो कुशुल, बोल्यो शी,
- 6 बत्ती दातीक तेल, लुक्तीक तेल नु धूप कली ब्रोव्रशो रिना पपाइक्ब थोव्रक,
- 7 निसाफ पतीके ऊरीम नु थुम्मीम वोइक्तीक झोला नु कुचु तार वोइक्तीक सेल्चा कली ओनीक्स माइशशो हीरा नु अरु हीरा ताक्चा माल्नीनी।
- 8 मिनू गो मेको आन दातेमी बाक्चा कली आं बाक्तीक सेल्पतो। इजीकीएल ३७:२६-२८
- 9 गो इ कली कौइशो खोदेशो पा ताम्बु सेल्पाइक्चा माल्नेवे। आगाम मार मार वोइक्चा माल्नेवे, मेको आं कौइशो खोदेशो पा सेल्पतो। प्रस्थान २५:४०; प्रस्थान २६:३०; प्रस्थान २७:८

कबल पशो सन्दोस

प्रस्थान ३७:१-९

- 10 मेकोपुकीमी बोल्यो शी के सन्दोस का सेल्चा माल्नीम। मेको आ पित्थ लाइशशो कुबीत निक्शी नु आधा, आ ब्रेम्शो कुबीत का नु आधा नु आ ग्येत्थ लाइशशो कुबीत का नु आधा डा सेल्चा माल्नीम। कुबीत का ०.५ मिटर खोदेशो बाक्ब।
- 11 मिनू गे मेको सन्दोस आ खिंडगा नु आ लाडगा नेल्ल क्येख सुनमी गिल्पाइक्चा माल्नेवे। मिनू एर ओथ सुन के सुर सेल्पाइक्चा माल्नेवे।
- 12 मिनू सुन के ४ ओटा मुन्द्रा सेल्पाइक्चा माल्नेवे। का पटटी निक्शी नु अर्को पटटी निक्शी पा सन्दोस आ ४ सुरमी क्येप्चा माल्नीम।
- 13 मिनू बोल्यो शी के कुरतीक कोक्के निक्शी सेल्पाइशशा, सुनमी गिल्पाइक्चा माल्नेवे। १राजा ८:८
- 14 मिनू मेको कुरतीक कोक्के निक्शी मेको मुन्द्राम शुइक्चा माल्नेवे। मो पा मेको सन्दोस कली कुरने चाप्नीम।
- 15 मेको कोक्के निक्शी सन्दोसम बाक्शो मुन्द्राम शुइक्चा माल्नीस। मेको आस कली मशोल्चा।
- 16 मिनू गो इ कली गेचा चिकशो कबल पा अरेशो लोव्र मेको सन्दोसमी कुर पा वोइक्चा माल्नेवे।

सन्दोस सुम्तीके

- 17 मिनू सन्दोस सुम्तीके क्येख सुन के चेम्शा सेल्चा माल्नेवे। मेकेर परमप्रभु आ शिशी बाक्ब। आ पित्थ लाइशशो कुबीत निक्शी नु आधा नु आ ब्रेम्शो कुबीत का नु आधा बाक्चा माल्ब। कुबीत का ०.५ मिटर, कुबीत का खोदेशो बाक्ब। लेवी १६:१२-१५; हिब्रू ४:१६; हिब्रू ९:५
- 18 मिनू गे आं स्वर्ग डा गेय पाइब खोदेशो सुन के करूब निक्शी चेम्शा सेल्पाइक्चा माल्नेवे। मेको सुम्तीकेम आ निम्फा पटटी का का करूब चेम्शा सेल्चा माल्नेवे।
- 19 का पटटी करूब का, अर्को पटटी करूब का चेम्शा सेल्चा माल्नेवे। मेको सुम्तीके नु करूब निम्फा मखौइसीशो सुन का केन चेम्शा सेल्चा माल्नेवे।
- 20 मेको करूबम आस फ्रां हाम्शा, सुम्तीके फारचा माल्नीस। आस कुल कोव्रमुशा, सन्दोस सुम्तीके गे कोव्रचा माल्नीसी।
- 21 मेको सुम्तीके मेको कबल पशो सन्दोस तार वोइक्चा माल्नेवे। मिनू गो इ कली गेचा चिकशो कबल पा अरेशो लोव्र मेको कबल पशो सन्दोसम कुर पा वोइक्चा माल्नेवे। प्रस्थान ३४:२९; १राजा ८:९
- 22 मिनू गो मेको सन्दोस सुम्तीके शिशी बाक्तीकेम गे नु गुम्शा, लोव्र पाइनुड। मेको सुम्तीके आ तारी मेको करूब निक्शी आस दाते रे गो इस्राएली आन कली मार मार अरेचा माल्नुडा, मेको गो इ कली देंनुड। गन्ती ७:८९; २सामुएल ६:२

शोब्ले वोइक्तीके टेबल

प्रस्थान ३७:१०-१६

- 23 गे बोल्यो शी के टेबल का सेल्पाइक्चा माल्नेवे। मेको आ पित्थ लाइशशो कुबीत निक्शी नु आ ब्रेम्शो कुबीत का नु आ ग्येत्थ लाइशशो कुबीत का नु आधा दुम्चा माल्ब। कुबीत का ०.५ मिटर, खोदेशो बाक्ब।
- 24 मिनू मेको कली क्येख सुनमी गिल्पाइक्चा माल्नेवे। सिरपेच खोदेशो पा एर ओथ नेल्ल सुन के सुर सेल्पाइक्चा माल्नेवे।
- 25 मेको एर ओथ डा सुर नेल्ल ४ आंडची ब्रेम्शो दुम्चा माल्ब। मेको कली सिरपेच खोदेशो पा बुटा आप्पाइक्चा माल्नेवे।
- 26 मिनू ४ ओटा सुन के मुन्द्रा चेम्शा, मेको आ ४ ओटा खोइलीम टेबल आगाम क्येप्पाइक्चा माल्नेवे।

- 27 टेबल कुरचा कली मुन्द्रापुकी टेबल आ सुर आ नेक्था क्येप्पाइक्का माल्नेवे।  
 28 मिनु बोल्यो शी के कोक्के निकशी सेल्शा, सुनमी गिल्पाइक्का माल्नेवे। मेको टेबलम बाक्शो मुन्द्राम शुइश्शा कुरने चाप्नीम।  
 29 मिनु टेबलम वोइक्का माल्यो थाल, लोटा नु बोस नेल्ल नु तूचा थोत्रक चढेतीक लुक्का कली लोटा नेल्ल क्येख सुन के सेल्पाइक्का माल्नेवे।  
 30 मिनु मेकेर गेना हना यो आं डोंइती कोंइतीक शोब्ले वोइक्का माल्नेवे। लेवी २४:५-६

सुन के बत्ती दातीक  
 प्रस्थान ३७:१७-२४

- 31 गे क्येख सुन के बत्ती दातीक का चेम्शा सेल्पाइक्का माल्नेवे। आ थाम, आ राशी, आ दियारी, आ डल्ला नु फूपुकी ठेयब सुन का केन दुम्चा माल्नीम।  
 32 मिनु मेको बत्ती दातीक आ थाम रे ६ ओटा राशी गूचा माल्नीम। का पटटी रे सां नु अर्को पटटी रे सां गूचा माल्नीम।  
 33 मिनु मेको राशी कामी देसी बदाम आ फू खोदेशो बुटा पाइश्शो फू सां गूचा माल्नीम। अर्को राशीपुकी यो नेल्ल मोदेशोन दुम्चा माल्नीम।  
 34 मेको बत्ती दातीक आ थाम चहिं ४ ओटा देसी बदाम आ फू खोदेशो बुटा पाइश्शो गूचा माल्नीम।  
 35 थाम आ डोंइती डा डल्ला, आ दाते डा डल्ला नु नोले डा डल्ला रे निम्फा पटटी गे राशी निक्निकशी गूचा माल्नीम।  
 36 मेको आ राशी नु डल्ला नेल्ल ठेयब क्येख सुन का केन चेम्शो दुम्चा माल्नीम।  
 37 गे क्येख सुन के ७ ओटा दियारी सेल्पाइक्का माल्नेवे। मिनु सल्दो वोइश्शा, नेल्ल तांडसीचा डा पा दाचा माल्नेवे। मेको ब्रशा, छेडछेड दुम्।  
 38 मिनु आ कांडची नु आइक्च बोस क्येख सुन के दुम्चा माल्नीम।  
 39 गे मेको नेल्ल टलेन्ट का क्येख सुन के सेल्पाइक्का माल्नेवे।  
 40 गे मेको नेल्ल गो इ कली डांडाम कोंइशो खोदेशो पा सेल्पाइक्का माल्नेवे। प्रस्थान २५:९; प्रस्थान २६:३०; प्रेरित ७:४४; हिब्रू ८:५

## 26

ताम्बु कली साप्तीके  
 प्रस्थान ३६:८-३८

- 1 आं बाक्तीके सेल्चा कली रिम्शो पा किरशो सुती श्येले के १० ओटा ताम्बु साप्तीके प्रोत्रपाइक्का माल्नेवे। मेको सुती श्येले नीलो, प्याजी नु लल रडम नुप्शो बाक्चा माल्ब। मिनु मेको वामी करूब बुटा आप्शा, थाम्पा रिम्शो प्रोत्रस जोक्ब मुर आन कली प्रोत्रपाइक्का माल्नेवे।  
 2 वा का आ लाइश्शो २८ कुबीत नु आ ब्रेम्शो ४ कुबीत दुम्चा माल्ब। मेको १० ओटा वा नेल्ल मोदेशोन दुम्चा माल्नीम। कुबीत का ०.५ मिटर, खोदेशो बाक्ब।  
 3 मिनु ५ ओटा वा बोइश्शा, का सेल्पाइक्का माल्नेवे। मिनु अर्को ५ ओटा वा यो बोइश्शा, का सेल्पाइक्का माल्नेवे।  
 4 मिनु वा आ सुर कली नीलो रड डा श्येले के बोइक्तीके यो सेल्पाइक्का माल्नेवे। मोपा वा निकशी बोइश्शा का सेल्पाइक्का माल्ब।  
 5 मिनु गे का का पा ताम्बु साप्तीके ५० ओटा सेल्पाइक्का माल्नेवे। मेकोपुकी गारपाइक्का कली सेल्पाइक्का माल्नेवे।  
 6 मिनु ५० ओटा सुन के ग्याइक्पाइक्तीके सेल्पतो। मोपा मेको वापुकी बोइश्शा, आं बाक्तीक ताम्बु आगा साप्तीक काण दुम्ब।  
 7 मिनु आं बाक्तीक ताम्बु साप्चा कली क्यारश आ चां के ११ ओटा टुक्रा सेल्पाइक्का माल्नेवे।  
 8 का आ लाइश्शो ३० कुबीत नु आ ब्रेम्शो ४ कुबीत दुम्चा माल्ब। मिनु मेको ११ ओटा टुक्रा नेल्ल खाल का डा दुम्चा माल्नीम। कुबीत का ०.५ मिटर खोदेशो बाक्ब।  
 9 गे ५ ओटा टुक्रा बोइश्शा का नु ६ ओटा बोइश्शा, अर्को का सेल्पाइक्का माल्नेवे। ६ ओटा बोइश्शो टुक्रा ताम्बु आ डोंइती आ सुर तोक्तीके फेके का मुक्शा तोक्चा माल्ब।  
 10 मेको टुक्रा का आ सुरमी ५० ओटा बोइक्तीक सेल्पाइक्का माल्नेवे। मिनु अर्को टुक्रा आ सुरमी यो ५० ओटा बोइक्तीक सेल्पाइक्का माल्नेवे।  
 11 मिनु गे कांसा के ५० ओटा ग्याइक्पाइक्तीके सेल्पतो। मेको ग्याइक्पाइक्तीक बोइक्तीकेमी वोइश्शा, टुक्रा निकशी के का दुम्चा माल्ब। मोपा टुक्रापुकी बोइश्शा, ताम्बु साप्तीक का दुम्ब।  
 12 ताम्बु आ साप्तीके आ दी गे आइदी सम्म तोक्चा डा पा साप्पाइक्का माल्नेवे।  
 13 निम्फा पटटी साप्पाइक्का कली कुबीत का का आइदी सम्म तोक्चा डा पा साप्पाइक्का माल्नेवे। कुबीत का ०.५ मिटर खोदेशो बाक्ब।  
 14 ताम्बु आ साप्तीके निकशी आस तारी लल रडम नुप्शो बोका आ कुशुल के सेल्पाइक्का माल्नेवे। मिनु मेको आ तार अर्को साप्तीके नेल्ल क्येडा रिम्शो कुशुल के सेल्पाइक्का माल्नेवे।

ताम्बु कली फलेक सेल्शो

15 गे आं बाक्तीक ताम्बु आ एर ओंथ थारचा कली फलेक सेल्पाइक्चा माल्नेवे। मेको फलेकपुकी बोल्यो शी के सेल्पाइक्चा माल्नेवे।

16 फलेक नेल्ल १० कुबीत ग्येत्थ लाइशशो नु कुबीत का नु आधा ब्रेम्शो दुम्चा माल्नीम। कुबीत का ०.५ मिटर खोदेशो बाक्ब।

17 फलेक नेल्लेमी युक्तीक निक्निक्शी आ पुं गे एर ओंथ पा सेल्पतो। आं बाक्तीक डा फलेक नेल्ल मोदेशो पा सेल्पाइक्चा माल्नेवे।

18 आं बाक्तीक कली मोदेशो फलेक सेल्पाइक्चा माल्नेवे। २० ओटा फलेक दक्खिन गे थारचा कली सेल्पाइक्चा माल्नेवे।

19 मिनु गे २० ओटा फलेक आन कली ४० ओटा चांदी के राप्पाइक्तीके सेल्पाइक्चा माल्नेवे। फलेक का कली युक्तीक निक्शी गारचा डा पा ग्याइक्पाइक्तीक निक्शी माल्ब। अर्को फलेक आन कली यो गारचा डा पा युक्तीक नु राप्पाइक्तीके निक्निक्शी सेल्पाइक्चा माल्नेवे।

20 मोदेशो पा उत्तर गे यो २० ओटा फलेक बाक्चा माल्नीम।

21 मिनु ४० ओटा राप्पाइक्तीक सेल्शा, फलेक कामी राप्पाइक्तीक निक्शी युक्पाइक्चा माल्नेवे। फलेक नेल्ल मोदेशो पा सेल्चा माल्नेवे।

22 मिनु आं बाक्तीक ताम्बु आ नोले पटटी, पच्छिम गे ६ ओटा फलेक सेल्पाइक्चा माल्नेवे।

23 नोले पटटी डा सुर निक्शी कली फलेक निक्शी सेल्पाइक्चा माल्नेवे।

24 मेको सुर डा फलेक आइक्था नु उइ अर्को फलेक नु गारचा डा दुम्चा माल्नीस।

25 नोले पटटी डा फलेक नु सुर डा फलेक नेल्ल पा ८ ओटा दुम्नीम। मेको फलेक नेल्ल आन कली १६ ओटा चांदी के राप्पाइक्तीके सेल्पाइक्चा माल्नेवे। फलेक का कली निक्शी माल्ब। फलेक नेल्ल मोदेशो पा सेल्चा माल्नेवे।

26 मिनु का पटटी डा फलेक आन कली बोल्यो शी के ५ ओटा लाइशशो कोक्के,

27 अर्को पटटी कली यो ५ ओटा लाइशशो कोक्के सेल्पाइक्चा माल्नेवे। मिनु पच्छिम गे नोले पटटी कली ५ ओटा लाइशशो कोक्के सेल्पाइक्चा माल्नेवे।

28 मिनु फलेक ग्येत्थ आ दातेमी सुर का रे अर्को सुर सम्म लाइशशो कोक्के बाक्चा माल्नीम।

29 मिनु गे मेको फलेकपुकी सुनम गिल्पाइक्चा माल्नेवे। मेको कोक्के शुइक्तीक मुन्द्रा सुन के सेल्पाइक्चा माल्नेवे। मेको लाइशशो कोक्केपुकी यो सुनमी गिल्पाइक्चा माल्नेवे।

30 गो इ कली डांडामी कौइशो खोदेशो पा आं बाक्तीक ताम्बु सेल्पाइक्चा माल्नेवे। प्रस्थान २५:९

ताम्बु कली फारतीक

31 मिनु गे फारतीक सेल्चा कली नीलो प्याजी नु लल रड डा श्येले नु रिम्शो पा किरशो सुती श्येले के वा प्रोव्रपाइक्चा माल्नेवे। मेको वा करूब बुटा आप्शा थाम्पा रिम्शो प्रोव्रस जोक्ब मुर आन कली प्रोव्रपाइक्चा माल्नेवे। २इतिहास ३:१४

32 मेको फारतीके बोल्यो शी के सेल्शो सुनम गिल्शो सुन के हेक्तीक पाइशशो नु चांदी के राप्पाइक्तीक पाइशशो ४ ओटा थामम क्युक्पाइक्चा माल्नेवे।

33 मिनु मेको फारतीके हेक्तीकेम हेक्पाइक्चा माल्नेवे। मिनु गे मेको आं अरेशो लोव्र आगाम वोइशशो सन्दोस मेको फारतीके आगा गे वोइक्पाइक्चा माल्नेवे। मोपा मेको फारतीके चोव्रखो नु नेल्ल क्येडा चोव्रखो बाक्तीक कली फारब दुम्ब। मती २७:५१; हिब्रू ९:३; प्रस्थान २६:६,११

34 मिनु गे मेको सुम्तीक अरेशो लोव्र आगाम वोइशशो सन्दोस तारी वोइशशा, मेको फारतीक आ आगा गे नेल्ल क्येडा चोव्रखो बाक्तीकेमी वोइक्पाइक्चा माल्नेवे। प्रस्थान २५:२१

35 कौइतीक शोब्ले वोइक्तीक टेबल चोव्रखो बाक्तीके उत्तर गे वोइक्पाइक्चा माल्नेवे। बत्ती दातीक चहिं दक्खिन गे वोइक्पाइक्चा माल्नेवे। प्रस्थान २५:२३-३०; प्रस्थान ४०:४२

36 मिनु ताम्बु ओव्रतीक कली नीलो प्याजी नु लल रड डा श्येले नु रिम्शो पा किरशो सुती श्येले के प्रोव्रशो वा, बुटा आप्शा टेयब फारतीक सेल्पाइक्चा माल्नेवे।

37 मेको फारतीके हेक्चा कली ५ ओटा बोल्यो शी के थाम सेल्पाइक्चा माल्नेवे। मेको थाम सुनम गिल्पाइक्चा माल्नेवे। मेको थामम सुन के हेक्तीके यो सेल्पाइक्चा माल्नेवे। मेको थाम राप्पाइक्तीके ५ ओटा कांसा के सेल्पाइक्चा माल्नेवे।

## 27

चढ़ेतीक सेल्शो

प्रस्थान ३८:१-७

1 मिनु बोल्यो शी के चढ़ेतीक का सेल्चा माल्नेवे। मेको ५ कुबीत लाइशशो नु ५ कुबीत ब्रेम्शो दुम्चा माल्ब। ४ पाटे नु कुबीत सां ग्येत्थ लाइशशो दुम्चा माल्ब। कुबीत का ०.५ मिटर दंशो बाक्ब।

2 आ ४ सुरमी ४ ओटा योव्र गृपाइक्चा माल्नेवे। योव्र नु चढ़ेतीक सेल्चा कली फलेक का केन दुम्चा माल्ब। मेको नेल्ल कांसाम गिल्पाइक्चा माल्नेवे। लेवी १६:१८; १राजा १:५; भजन संग्रह ११२:२७

3 चढ़ेतीके कली माल्लो मारेड मारेड कांसा के सेल्पाइक्चा माल्नेवे। पुलु वोइक्तीक बोसपुकी, पुलु ताप्तीकपुकी, बुइक्तीक बोसपुकी, श्ये गुंडतीक कांटापुकी नु मी कोइला कुर पतीकपुकी सेल्पाइक्चा माल्नेवे।

4 मिनु गे मी तिक्तीक कांसा के जाली सेल्पाइक्चा माल्नेवे। मिनु जाली आ ४ सुरमी ४ ओटा मुन्द्रा सेल्पाइक्चा माल्नेवे।

5 मेको जाली चढ़ेतीक उइ गे नु इर गे आ दातेम वोइक्पाइक्चा माल्नेवे।

6 मिनु चढ़ेतीक कली यो बोल्यो शी के कांसाम गिल्शो कुरतीक कोक्के निक्शी सेल्पाइक्चा माल्नेवे।

7 मेको चढेतीक आ निम्फा पटटी डा मुन्द्रामी कोकके शुइशशा, कुरने चाप्नीम।  
 8 मेको चढेतीक फलेक के सेल्पाइक्चा माल्नेवे। पुं नु सुम्तीके मपाइशशो सन्दोस खोदेशो पा सेल्पाइक्चा माल्नेवे।  
 डांडामी इ कली कौइशो खोदेशो पा सेल्पाइक्चा माल्नेवे। प्रस्थान २६:३०;

ताम्बु आ लाडगा  
 प्रस्थान ३८:१-२०

9 मिनु ताम्बु आ लाडगा थरपु हिरचा कली रिम्शो पा किरशो सुती श्येले के फारतीके प्रोवपाइक्चा माल्नेवे। मेको फारतीके दक्खिन गे सहे का कुबीत लाइशशो दुम्चा माल्ब। कुबीत का ०.५ मिटर खोदेशो बाक्ब।

10 मेको फारतीक ग्याइक्पाइक्चा कली खाल का डा थाम, खाल का डा कांसा के राप्पाइक्तीके, मुन्द्रापुकी नु कोककेपुकी चहिं चांदी के सेल्पाइक्चा माल्नेवे।

11 मिनु मोदेशो पा उत्तर गे यो सहे का कुबीत लाइशशो फारतीक प्रोवपाइक्चा माल्नेवे। मेको कली २० ओटा थाम, २० ओटा कांसा के राप्पाइक्तीके, मेको मुन्द्रापुकी नु कोककेपुकी चहिं चांदी के सेल्पाइक्चा माल्नेवे।

12 लाडगा डा पच्छिम गे ब्रेम्शो कली ५० कुबीत लाइशशो फारतीक माल्ब। आ थाम नु आ राप्पाइक्तीके १०, १० ओटा दुम्चा माल्नीम। कुबीत का ०.५ मिटर खोदेशो बाक्ब।

13 लाडगा आ पूर्व, नां दाप्तीके गे फारचा कली यो ५० कुबीत ब्रेम्शो दुम्चा माल्ब।

14 मिनु ओव्रतीक डा पटटी का कली १५ कुबीत डा फारतीक दुम्चा माल्ब। थाम नु आ राप्पाइक्तीके सां सां दुम्चा माल्नीम।

15 मिनु अर्को पटटी यो मोदेशो पा १५ कुबीत डा फारतीक, थाम नु राप्पाइक्तीके सां सां दुम्चा माल्नीम।

16 मिनु लाडगा ओव्रतीके कली २० कुबीत डा नीलो, प्याजी, श्येले नु रिम्शो पा किरशो सुती श्येले के प्रोवशो फारतीक माल्ब। मेको फारतीक कली लूजेम बुटा आप्पाइक्चा माल्नेवे। ओव्रतीके कली थाम नु राप्पाइक्तीके ४, ४ ओटा दुम्चा माल्नीम।

17 लाडगा एर ओथ डा थाम नेल्ल चांदीमी गिल्शो कोककेमी ग्याइक्पाइशशो दुम्चा माल्नीम। मुन्द्रा चांदी के नु आन राप्पाइक्तीक कांसा के दुम्चा माल्नीम।

18 मेको लाडगा आ पिथ लाइशशो सहे का कुबीत, आ ब्रेम्शो ५० कुबीत नु आ फारतीके ग्येत्थ ५ कुबीत दुम्चा माल्ब। मिनु फारतीक वा नेल्ल रिम्शो पा किरशो सुती श्येले के प्रोवशो वा के दुम्चा माल्ब। थाम आन राप्पाइक्तीके कांसा के दुम्चा माल्नीम।

19 मिनु ताम्बु डा नाक्त् किंत् किंत् गेय पचा कली माल्शो मारेइ मारेइ कांसा के दुम्चा माल्नीम। किलापुकी नु लाडगा डा किला नेल्ल यो कांसा के दुम्चा माल्नीम।

बत्ती कली तेल

20 मिनु गे इस्राएली आन कली 'गे नेल्ल क्येडा रिम्शो तेल रवा आ फल के खाक्शो तेल चाक्कीन। मेको बत्ती गेना हना यो ब्रशा बाक्ल' दे माइक्मी। लेवी २४:२-४

21 मिनु गुम्तीक ताम्बु आगामी, कबल डा सन्दोस बाक्शो नेल्ल क्येडा चोव्रखो कोटा फारतीक आ डोंइती हारून नु आ तौपुकीमी नाक्दो रे सुनी सम्म मेको बत्ती दातीक परमप्रभु यावे आ डोंइती ब्रशा बाक्ल, दे ठीक सेल्चा माल्नीम। मेको इस्राएली आन चच युइ आन कली गेना हना यो पतीके लीचा माल्ब। मेको गेना हना यो पचा माल्नीम।

## 28

चढेब आन वासी

प्रस्थान ३९:१-३१

1 मिनु इस्राएली आन दाते रे योव्रशा, इ लोकब हारून नु आ तौपुकी इ डोंइती राप्पाइक्चा माल्नेवे। मारदे हना हारून नु आ तौ नादाब, अबीहु, एलाजर नु इथामार आं कली चढेब दुम्चा माल्नीमी। १इतिहास २३:१३; प्रस्थान ६:२३

2 मिनु गे इ लोकब हारून कली आं गेय पची ना ला फेक्चा कली फेक्तीक वा फेरपाइक्चा माल्नेवे। मेको हारून कली ग्योम्शा दारपाइक्चा कली बाक्ब।

3 मिनु सु सुमी फेरस जोक्नीमी, मेको नु लोव्र पावो। मारदे हना गो मेको आन कली जोक्ब नु तुइक्ब सोक्तीम प्रिताक्डमी। मेकोपुकीमी हारूनमी आं कली चढेतीक गेय पचा कली वासी फेरचा माल्नीम। प्रस्थान ३१:५

4 मेकोपुकीमी मार वासी फेरचा माल्नीम देशा हना, कुचु तार वोइक्तीके, निसाफ पतीके ऊरीम नु थुम्मीम वोइक्तीक झोला, आ तार फेक्तीके नु आगा फेक्तीक वा फेरचा माल्नीम। पियाम गुप्तीक नु किप्शुर यो सेल्चा माल्नीम। मेको आं कली गेय पची ना फेक्तीक बाक्ब। इ लोकब हारून नु आ तौपुकीमी आं कली गेय पामेनु, मेको वा फेक्चा माल्नीम।

5 फेरबपुकीमी सुन, नीलो, प्याजी नु लल रड डा श्येले नु रिम्शो पा किरशो सुती श्येले के प्रोवशो वा के सेल्चा माल्नीमी। प्रस्थान २६:१

चढेब आ कुचु तार वोइक्तीके

6 कुचु तार वोइक्तीके सुन के, नीलो, प्याजी नु लल रड डा श्येले नु रिम्शो पा किरशो सुती श्येले के प्रोवशो नु बुटा आप्शो वा के सेल्पाइक्चा माल्नेवे।

7 मेको आ बला सुम्तीके निक्शी निम्फा पटटी बोइशशो दुम्चा माल्ब।

8 मिनु आ पाइक्तीके मेको कुचु तार वोइक्तीके का रेन दुम्या माल्ब। मिनु खाल का डा रिमशो गेयम सेल्शो दुम्या माल्ब। मेको पाइक्तीके सुन, नीलो, प्याजी नु लल रड डा श्येले नु रिमशो पा किरशो सुती श्येले के प्रोव्रशो वा दुम्या माल्ब।

9 मिनु गे ओनीक्स हीरा निकशी चाक्शा, इस्राएल आ १२ जना तौ आन नें मेको आस तारी मुशा ब्रेक्पाइक्चा माल्नेवे। प्रस्थान २५:७

10 गे आन जरमेशो खोदेंशो पा हीरा का तारी ६ जना आन नें नु अर्को हीरा तारी ६ जना आन नें मुशा ब्रेक्पाइक्चा माल्नेवे।

11 छाप सेल्बपुकीमी दोदेंशो पा मुशा छाप सेल्नीमी, मोदेंशो पा मुशा इस्राएल आ तौ आन नें ब्रेक्पाइक्चा माल्नेवे। मिनु मेको हीरा निकशी सुनमी क्येप्पाइक्चा माल्नेवे।

12 मेको कुचु तार वोइक्तीक आ बला डा टुक्रा तारी क्येप्शा फेरपाइक्चा माल्नेवे। मिनु मेको हीरा कोव्रशा इस्राएली इन कली मिन्नुड, दे कोइतीक बाक्ब। हारूनम आं डोंइती मेको आन नें बलाम कुरानु, गो मेको आन कली मिन्नुड।

13 मिनु हीरा वोइक्चा कली गे सुन के क्येप्तीक सेल्पाइक्चा माल्नेवे।

14 मिनु गे क्येख सुन के डोरी खोदेंशो पा सिक्री निकशी चेम्पाइश्शो, हीरा क्येप्पाइश्शोमी बोइक्पाइक्चा माल्नेवे।

निसाफ पतीक झोला

15 गे निसाफ पतीक झोला सेल्पाइक्चा माल्नेवे। मेको कुचु तार वोइक्तीके खोदेंशो पा, सेल्पाइक्चा माल्नेवे। सुन, नीलो, प्याजी, लल श्येले नु रिमशो पा किरशो सुती श्येले के प्रोव्रपाइक्चा माल्नेवे।

16 मेको खेयप का मुक्शोनु, स्पान का लाइश्शो नु स्पान का ब्रेमशो ४ पाटे दुम्या माल्ब। स्पान का २३ सेन्ती मिटर खोदेंशो बाक्ब। बिक्ता खोदेंशो बाक्ब कों?

17 मिनु ४ लस्कर हीरा सुनम का का पा क्येप्पाइक्चा माल्नेवे। डोंइती डा लस्कर लल मानीक माइश्शो हीरा, हाव पुशराज माइश्शो हीरा नु गिगी बेरूज माइश्शो हीरा वोइक्पाइक्चा माल्नेवे।

18 मेको आ नोले डा लस्कर लल फिरोजा माइश्शो हीरा, बुश नीर माइश्शो हीरा नु बुश नु नीलो पन्ना माइश्शो हीरा वोइक्पाइक्चा माल्नेवे।

19 मेको आ नोले डा लस्कर गिगी नु नीलो रड ब्वाइश्शो रिमशो टल्केशो नीलमनी माइश्शो हीरा, गिगी हाकीक माइश्शो हीरा नु प्याजी रड डा कटेला माइश्शो हीरा वोइक्पाइक्चा माल्नेवे।

20 मिनु नेल्ल क्येडा नोले डा लस्कर पीतमनी माइश्शो हीरा, लल रड डा ओनीक्स नु नीलो बिलौरा माइश्शो हीरा वोइक्पाइक्चा माल्नेवे। मोपा हीरा नेल्ल आन कली सुनम क्येप्पाइक्चा माल्नेवे।

21 मेको हीरा १२ ओटा दुम्या माल्नीम। मिनु इस्राएल आ तौ आन नें का का पा मेको आन तार छाप थोक्शो खोदेंशो पा मुशा ब्रेक्पाइक्चा माल्नेवे। हीरा का आ तारी थर का आ नें दुम्या माल्ब।

22 गे मेको निसाफ पतीक झोला कली क्येख सुन के डोरी किरशो खोदेंशो पा सिक्री निकशी चेम्पाइक्चा माल्नेवे।

23 मिनु गे मेको निसाफ पतीक झोला कली सुन के मुन्द्रा निकशी चेम्पाइक्चा माल्नेवे। मिनु मेको मुन्द्रा निसाफ पतीक झोला आ सुर निकशीमी वोइक्पाइक्चा माल्नेवे।

24 मेको सुन के सिक्री निकशी निसाफ पतीक झोला आ सुरम वोइश्शो मुन्द्रा निकशीमी लिक्पाइक्चा माल्नेवे।

25 मेको सिक्री चढेब आ कुचु तार वोइश्शो वा आ बला डा हीरा क्येप्शो सुनम हेक्पाइक्चा माल्नेवे।

26 मिनु गे लेंशा सुन के मुन्द्रा निकशी सेल्पाइक्चा माल्नेवे। मेको निकशी निसाफ पतीक ऊरीम नु थुम्मीम वोइक्तीक झोला आ उड आगा गे पाइक्चा माल्नेवे। मोपा कुचु तार वोइक्तीक वा आ तार बाक्ब।

27 मिनु गे लेंशा सुन के मुन्द्रा निकशी सेल्पाइक्चा माल्नेवे। मेको कुचु तार वोइक्तीक आ बाला सुम्तीके उड डा सुरम वोइक्चा माल्नेवे। मिनु दारपाइश्शो पाइक्तीके आ तारी क्येप्पाइक्चा माल्नेवे।

28 मिनु मेको निसाफ पतीक ऊरीम नु थुम्मीम वोइक्तीक झोला आ मुन्द्रामी नीलो डोरीम लिक्शा, कुचु तार वोइक्तीक वामी पाइक्पाइक्चा माल्नेवे। मोपा मेको निसाफ पतीक झोला दारपाइश्शो पाइक्तीक तार बाक्शा कुचु वोइक्तीक वा रे एर ओथ मयाक्सीब।

29 मिनु मोदेंशो पा हारून परमप्रभु यावे आ बाक्तीक ओव्रमेनु, इस्राएल आ तौ आन नें ब्रेक्शो निसाफ पतीक झोला आ कुचु तारी कुरचा माल्ब। मेको परमप्रभु यावेमी गेना हना यो मिम्या कली बाक्ब।

30 मेको निसाफ पतीके झोलामी मेको ऊरीम नु थुम्मीम निकशी कुर पचा माल्नेवे। हारून परमप्रभु यावे आ डोंइती लमेनु, इस्राएली आन निसाफ पतीके गेना हना यो आ कुचु तारी बाक्चा माल्ब। लेवी ८:८; गन्ती २७:२१; ब्यवस्था ३३:८

आगा डा फेक्तीक वा

31 मिनु मेको कुचु तार वोइक्तीके आगा फेक्तीके नेल्ल नीलो प्याजी रड डा वा के फेरपाइक्चा माल्नेवे।

32 मिनु पिया खीतीक पोव्रला वोइक्पाइक्चा माल्नेवे। मेको एर ओथ मगाक्चा डा पा आ सुर थम बोल्यो पा प्रोव्रपाइक्चा माल्नेवे।

33 मेको फेक्तीके आ उड डा सुर एर ओथ गे नीलो, लल नु प्याजी रड डा श्येले के सेल्शो दारीम सेल्पाइक्चा माल्नेवे। मेको आन दातेम सुन के आइक्च आइक्च किडगो क्युकपाइक्चा माल्नेवे।

34 किडगो का, दारीम का, किडगो का दारीम का पा मेको फेक्तीक नेल्ल आ एर ओथ क्युकचा माल्नीम।

35 मिनु हारूनमी मेको वा गेय पची ना फेक्चा माल्ब। मोपा परमप्रभु यावे आ नेल्ल क्येडा चोव्रखो बाक्तीके ओव्रमेनु, किडगो आ रेयके नैपाइक्चा माल्ब। हारून मबेक्ल, दे मोदेंशो दुम्या माल्ब। प्रस्थान ३०:२१; लेवी १६:२,१३



कुप्फीम पांडतीके नु फेक्तीके वा

36 गे कुप्फीम पांडतीके क्येख सुन के फू खोदेशो पा चेम्पाइक्का माल्नेवे। मेकेर छाप थोकशो खोदेशो पा 'परमप्रभु यावे कली ला' दे मुशा ब्रेक्पाइक्का माल्नेवे। जकरिया १४:२०; प्रस्थान ३९:३०

37 पियाम गुक्तीकेम आ डोंइती गे वोइक्का कली नीलो प्याजी डोरीम फ्रेपाइक्का माल्नेवे।

38 मोपा मेको हारून आ कुप्फीम बाक्का माल्ब। आ कुप्फीम पाइश्शा, इस्राएली आन मरिम्शो पशो कुरब। मिनु परमप्रभु कली चढ़ेशो रिम्शो दुम्नीम। परमप्रभु यावेमी आन चढ़ेशो ब्रवल, दे गेना हना यो आ कुप्फीम बाक्का माल्ब।

39 नेल्ल क्येडा आगा फेक्तीके रिम्शो पा किरशो सुती श्येले के बुटा आप्शा प्रोत्रशो वा के सेल्पाइक्का माल्नेवे। पियाम गुक्तीके रिम्शो पा किरशो सुती श्येले के प्रोत्रशो वा के सेल्पाइक्का माल्नेवे। किप्तीके रड रड डा सेल्पाइक्का माल्नेवे।

हारून आ तौ आन फेक्तीके

40 गे हारून आ तौ आन कली फेक्तीके किप्तीक नु आइक्च गुक्तीके सेल्पाइक्का माल्नेवे। मेको हारून आ तौ आन कली ग्योम्शा दारपाइक्का कली बाक्नीम। प्रस्थान २८:२

41 गे मेको इ लोकब हारून नु आ तौ आन कली फेक्तीमी। मिनु तेल लुक्शा, आं कली ला गेय पचा कली योत्रशा वोइक्की। मोपा आं कली चढ़ेब दुम्नीम। प्रस्थान २९:९, २९-३६; प्रस्थान २९:२४; लेवी ८:१२, २२-३१

42 गे मेको आन शिश्ना रां सुम्पाइक्का कली सुती वा के कटटु फेरपाइक्का माल्नेवे। मेको कम्बर रे पोक्च सम्म दुम्चा माल्ब।

43 मिनु हारून नु आ तौपुकी गुम्तीक ताम्बु ओत्रशा, चढ़ेतीक आ नेक्था लमानु, मेको वा फेक्सीशो बाक्का माल्नीम। मफेक्साक्म हना, दोस तशा बेक्नीम। हारून नु आ चच युड आन पाला नेल्लेमी गेना हना यो मोदेशो पचा माल्नीम।

## 29

चढ़ेब आन डोंइती डा पतीके

लेवी ८:-

1 गे हारून नु आ तौपुकी आं कली चढ़ेब सेल्पा कली मार पचा माल्नेवे देशा हना, बोहोर का, मारिड मद्मुशो थम रिम्शो सांड निकशी चाक्को।

2 मिनु रिम्शो चेरब फस के बोरब ओरुती मसुप्पो शोब्ले, तेल ब्वाइश्शो जिज शोब्ले नु तेल खेक्शो बोरब ओरुती मसुप्पो शोब्ले सेल्पाइक्का माल्नेवे।

3 मेको शोब्ले नेल्ल तोत्रलो कामी कुर पा, बोहोर नु सांड चाक्का माल्नेवे।

4 मिनु हारून नु आ तौ आन कली गुम्तीक ताम्बु आ ओत्रतीकेमी चाक्का नम। मिनु गे मेको आन कली चिक्या माल्नेवे।

5 वासी चाक्शा, हारून कली आगा फेक्तीक वा, मेको आ तार डा फेक्तीके वा फेक्पाइश्शा, कुचु तार वोइक्तीक फेक्शा निसाफ पतीके ऊरीम नु थुम्मीम बाक्शो झोला रेल्या माल्नेवे। मिनु मेको तारी बुटा आप्शो किप्तीके किप्पाइक्का माल्नेवे।

6 आ पिया तारी गुक्तीके गुप्शा, मेको तारी 'परमप्रभु यावे कली ला' दे ब्रेक्शो कुप्फीम पांडतीके पांडपाइक्का माल्नेवे। प्रस्थान २८:३६; प्रस्थान ३९:३०

7 मिनु लुक्तीक तेल लाइश्शा आ पियामी तेल लुक्तो। प्रस्थान ३०:२५

8 मिनु हारून आ तौ आन कली यो चाक्शा, वा फेक्का माल्नेवे।

9 मिनु आ तौ आन कली किप्तीके किप्चा माल्नेवे। मिनु आन पियाम गुक्तीके गुप्चा माल्नेवे। मिनु मेकोपुकी गेना हना यो आं कली चढ़ेब गेय पाइब दुम्नीम। मोपा हारून नु आ तौ आन कली आं कली चढ़ेब सेल्मी। प्रस्थान २८:४१

10 मिनु मेको बोहोर गुम्तीक ताम्बु आ डोंइती चाक्शा, हारून नु आ तौ आन कली आन गुड मेको बोहोर आ पिया तारी वोइक्पाइक्का माल्नेवे।

11 मिनु मेको बोहोर कली परमप्रभु यावे आ डोंइती, गुम्तीक ताम्बु आ ओत्रतीकेम राप्पाइश्शा क्योरचा माल्नेवे। लेवी १:४

12 मिनु बोहोर आ हुश इक्का खोइ लाइश्शा इ ब्रेप्चोमी चढ़ेतीक आ प्रोत्रपुकीमी खेक्का माल्नेवे। मिनु लीशो हुश नेल्ल चढ़ेतीके आ पुंमी मोइक्का माल्नेवे।

13 मिनु गे क्यी गिल्शो बोंसो नेल्ल, आइदी तारी डा जाला, आ चिच निम्फा नु आ तार डा बोंसो नेल्ल चढ़ेतीकेम चोचा माल्नेवे। लेवी ३:१६-१७

14 आ श्ये, आ कुशुल नु आ गोबर चहिं ताम्बु आ लाडगा रे गुंडशा, चोचा माल्नेवे। मेको पाप पशो आ परबम चढ़ेशो बाक्ब। लेवी ४:११-१२

15 मिनु मेको सांड का चाक्शा, हारून नु आ तौ आन गुड मेको आ पिया तार वोइक्पाइक्का माल्नेवे।

16 मेको कली क्योरशा, मेको आ हुश चढ़ेतीक नेल्ल ब्रुइक्का माल्नेवे।

17 मिनु मेको सांड आ श्ये कली टुक्रा टुक्रा पा चेक्शा, पिया नु वोइक्का माल्नेवे। मिनु मेको आ क्यी नु आ खोइली नेल्ल मुरशा, मेको श्ये नु पियामी वोइक्का माल्नेवे।

18 मोदेशो पा सांड नेल्ल चढ़ेतीक तारी चोचा माल्नेवे। मेको परमप्रभु यावे कली चोशा चढ़ेतीक बाक्ब। परमप्रभु यावे कली ब्रोत्रशो रिना पाइश्शो मीम चोशा चढ़ेतीके बाक्ब। १सामुएल २:२८

19 मिनु मेको लीशो सांड चाक्का माल्नेवे। मिनु हारून नु आ तौ आन गुड मेको सांड आ पिया तार वोइक्पाइक्का माल्नेवे।

20 मिनू मेको सांड क्योरशा, आ हुशेम हारून आ ग्युरा नोफा डा लोव्रतीम नु आ तौ आन ग्युरा नोफा डा लोव्रतीम खेक्चा माल्नेवे। मिनू मेको आन ग्युरा गुड डा ठेयब ब्रेप्चोम नु आन ग्युरा खोइली डा ठेयब ब्रेप्चोम खेक्चा माल्नेवे। मिनू लीशो हुश चढेतीक तार नु आ एर ऑथ बुइक्चा माल्नेवे।

21 मिनू चढेतीकेम बाक्शो हुश नु लुक्तीक तेल लाइश्शा, हारून नु आ वा नु आ तौ आन वा तारी बुइक्चा माल्नेवे। मोपा हारून नु आ वा, आ तौ नु मेको आन वा नेल्ल परमप्रभु यावे कली ला गेय पचा कली दुम्नीम।

22 मिनू सांड आ बोंसो, आ बोंसो पाइश्शो मीलु, आ कयी गिल्थो बोंसो, आइदी तार डा जाला, आ चिच निम्फा, मेको तार डा बोंसो नु आ ग्युरा फिला लाइक्चा माल्नेवे। मारदे हना मेको चढेब सेल्टीके सांड बाक्ब। लेवी ३:३-४

23 मिनू परमप्रभु यावे आ डोंइती चोइश्शो बोरब ओरुती मसुप्शो शोब्ले, तोव्रलो डा शोब्ले का, तेलम ब्वाइश्शो जिज शोब्ले का नु तेल खेक्शो शोब्ले का लाइश्शा,

24 मेको नेल्ल हारून नु आ तौ आन दाइश्शो गुड गुइमी गेचा माल्नेवे। मेको परमप्रभु यावे आ डोंइती ग्येत्थ लुक्च पा हिम्शा चढेतीक चढेचा माल्नीम।

25 मिनू गे मेको आन गुइ रे ताक्शा, परमप्रभु यावे आ डोंइती ब्रोव्रशो रिना पाइब चढेतीके तारी चोशा चढेचा माल्नेवे। मेको परमप्रभु यावे कली मीम चोशा चढेतीक बाक्ब।

26 मिनू हारून कली चढेब सेल्टीके सांड आ कुथु चाक्शा, परमप्रभु यावे आ डोंइती ग्येत्थ लुक्च पा हिम्शा चढेचा माल्नेवे। मेको चहिं इ के दुम्ब।

27 मिनू मेको हारून नु आ तौ आन कली चढेब सेल्शो सांड आ ग्येत्थ लुक्च पा हिम्शा चढेशो कुथु नु क्युक्शा चढेशो फिला मेको आन कली गेचा माल्नीम। गन्ती १८:१८

28 मारदे हना इस्राएलीपुकीमी मेको हारून नु आ तौ आन कली गेना हना यो गेचा माल्शो भाग बाक्ब। मेको गेचा माल्शो चढेतीके बाक्ब। इस्राएलीपुकीमी आन परमप्रभु यावे नु दुशा बाक्चा आ परबम चढेतीके रे गेचा माल्शो मेकोन बाक्ब।

29 हारून आ चढेची ना फेक्तीक मेको आ नोले चढेब दुम्ब आ तौ के दुम्ब। मेको वा फेक्शा, तेल लुक्शा, चढेब दुम्ब। प्रस्थान २८:४०-४१

30 हारून आ पा डा चढेब दुम्ब आ तौ गुम्तीक ताम्बु आगा परमप्रभु यावे आ बाक्तीकेम गेय पथ ओव्रमेनु, ७ नाक्त सम्म मेको वा फेक्चा माल्ब।

31 मिनू मेको चढेब सेल्टीके सांड आ श्ये गुम्तीक ताम्बु आ लाइगाम क्येचा माल्नेवे।

32 मिनू नोले हारून नु आ तौपुकीमी मेको सांड आ श्ये नु तोव्रलो डा शोब्ले गुम्तीक ताम्बु आ ओव्रतीकेमी बाक्शा जचा माल्नीम।

33 मेको डोंइती आन पाप क्याम्चा कली चढेशो थोव्रक आम कली परमप्रभु यावे कली ला गेय पाइब दुम्चा, दे जचा माल्नीम। तन्न अरुमी मेको जचा मदुम्नीम। मारदे हना मेको परमप्रभु यावे के बाक्ब। लेवी १०:१७

34 चढेब सेल्ची ना डा श्ये नु शोब्ले सुनी सम्म हेंत हना, मेको हेंशो नेल्ल चोचा माल्नेवे। मेको मजचा मब्वचा। मारदे हना मेको चढेब सेल्ची ना डा बाक्ब।

35 गोम इ कली अरेशो खोदेंशो पा हारून नु आ तौ आन कली पाइक्मी। मेको आन कली ७ नाक्त सम्म मोदेंशो चढेब सेल्टीक गेय पचा माल्नेवे।

36 मिनू गे नाक्त कित कित बोहोर का पाप पशो आ परबम चढेचा माल्नेवे। मेको पाप क्याम्तीक गेय पचा कली चढेशो बाक्ब। मिनू चढेतीक परमप्रभु के दुम्त, दे हुश बुइश्शा, तेल लुक्चा माल्नेवे।

37 गे ७ नाक्त सम्म चढेतीकेमी मो पशा पाप क्याम्तीक गेय पचा माल्नेवे। मिनू मेको चढेतीके परमप्रभु कली ला दुम्ब। मेको चढेतीक कली मार मारम थीनीमी, मेको यो परमप्रभु केन दुम्नीम। प्रस्थान ३०:२९

नाक्त कित कित डा चढेतीक

गन्ती २८:३-८

38 मिनू गे चढेतीकेमी मार चढेचा माल्नेवे देंशा हना, नाक्त कित कित बर्स का दुम्शो सांड निक्शी चढेचा माल्नेवे।

39 मेको का सुनी का चहिं नाक्दो चढेचा माल्नेवे। २राजा १६:१५; भजन संग्रह १४१:२

40 डोंइती डा सांड नु रिम्शो चेरब फस १० भाग डा भाग का, ४ भाग डा हिन भाग का रिम्शो तेल मेको नु बुल्शा, ४ भाग डा हिन अडगुर शोबु भाग का तूचा थोव्रक चढेचा माल्नेवे। चेरब फस एफाह का २२ लिटर खोदेंशो बाक्ब। मेको के १० भाग का २ लिटर खोदेंशो बाक्ब। हिन का ४ लिटर, ४ भाग डा भाग का लिटर का बाक्ब। प्रस्थान २७:२०

41 मिनू अर्को सांड नाक्दो चढेचा माल्नेवे। मिनू मेको नु अन्न चढेतीक नु आ तूचा थोव्रक चढेतीक सुनी डा खोदेंशो पा नाक्दो यो चढेचा माल्नेवे। परमप्रभु यावे कली ब्रोव्रशो रिना पाइब मीम चोशा चढेतीके मेकोन बाक्ब।

42 गे इ चच युइ आन पाला नेल्लेमी गेना हना यो परमप्रभु यावे आ डोंइती गुम्तीक ताम्बु आ ओव्रतीक आ नेक्था चोशा चढेतीक चढेचा माल्नीम। मेकेर गो गे नु लोव्र पचा कली गुम्नन। प्रस्थान ३३:७; प्रस्थान २५:२

43 मिनू गो इस्राएली आन कली मेकेर गुम्नुड। मिनू मेको ताम्बु आं छेडछेडम ब्रीशा आं के दुम्ब। प्रस्थान ३३:१०; प्रस्थान ४०:३४

44 गो गुम्तीक ताम्बु नु चढेतीक आं के सेल्नुड। हारून नु आ तौ आन कली यो आं कली चढेब दुम्शा, आं गेय पपाइक्चा कली आं के सेल्नुडमी।

45 गो इस्राएली आन दातेमी बाक्नुड। मिनू मेको आन परमप्रभु दुम्ती। प्रस्थान २५:८; जकरिया २:१४; लेवी २६:१२

46 गो मेको आन दातेमी बाक्चा कली मेको आन कली इजीप्त रे गुंडब मेको परमप्रभु यावे, आन परमप्रभु नड। गो मेको आन परमप्रभु यावे नड, दे मेकोपुकीम तुडक्चा माल्नीम। प्रस्थान २०:२

## 30

धूप चोशा चढेतीके

प्रस्थान ३७:२५-२८

- 1 मिनु गे धूप चोचा कली बोल्यो शी के चढेतीक का सेल्चा माल्नेवे।
- 2 मेको आ पित्थ लाइश्शो कुबीत का नु आ ब्रेम्शो कुबीत का डा ४ पाटे दुम्चा माल्ब। मिनु आ ग्येत्थ लाइश्शो कुबीत निकशी दुम्चा माल्ब। मेको ग्रोत्र पाइश्शो दुम्चा माल्ब। ग्रोत्र नेल्ल मखोंडसीशो शी का केन दुम्चा माल्नीम। कुबीत का ०.५ मिटर बाक्ब।
- 3 मेको नेल्ल क्येख सुनमी गिल्चा माल्ब। मिनु मेको कली सिरपेच के खोदेशो पा सुन के सुर सेल्पाइक्चा माल्नेवे।
- 4 मिनु सुन के मुन्द्रा निकनिकशी सेल्पाइक्चा माल्नेवे। मेको मुन्द्रा धूप चोतीके आ सिरपेच खोदेशो सुर आ दी निम्फा पटटी गे क्येप्पाइक्चा माल्नेवे। मेको कुरतीक कोक्के आन कली शुइक्तीक दुम्ब।
- 5 मिनु मेको कुरचा कली बोल्यो शी के कोक्के निकशी सेल्शा, सुनमी गिल्पाइक्चा माल्नेवे।
- 6 मिनु मेको परमप्रभु यावे आ अरेशो लोत्र वोइश्शो कबल पशो सन्दोस नु सुम्तीके फारतीक वा आ डोंइती वोइक्चा माल्नेवे। गो मेकेर इ कली युम्नुड। प्रस्थान २५:२१-२२
- 7 मिनु हारूनमी सुनी कुस कुस बती दाचा कली सादानु, ब्रोत्रशो रिना पाइब धूप चोचा माल्ब। भजन संग्रह १४१:२
- 8 नाक्दो हारूनमी बती दाडानु यो धूप चोचा माल्ब। मेको परमप्रभु यावे आ डोंइती धूप चोतीक मेको आन चच युड आन पालामी गेना हना यो पचा माल्नीम।
- 9 मेको धूप चोतीकेमी अरु धूप चोचा मदुम्ब। चोशा चढेतीके नु जचा थोत्रक चढेतीके मेकेर चढेचा मदुम्ब। तूचा थोत्रक चढेतीके यो मेकेर मोइक्चा मदुम्ब। लेवी १०:१-२
- 10 बर्सम खेयप का हारूनमी चढेतीक आ ग्रोत्रम हुश खेक्शा पाप क्याम्तीक गेय पचा माल्ब। मेको हुश पाप आ पर्बम चढेशो बस्तु आ हुश बाक्चा माल्ब। मेको गेना हना यो बर्समी खेयप का इन चच युड आन पाला सम्म मेको पाप क्याम्तीक गेय चढेतीके आ हुशेमी पचा माल्ब। मेको परमप्रभु यावे आ डोंइती नेल्ल क्येडा चोत्रखो सेल्तीके बाक्ब” दे परमप्रभु यावेमी मोसा कली देंत। लेवी १६:१८

क्येट पोक्चा शेंशो

- 11 परमप्रभु यावेमी मोसा कली
- 12 “गे इस्राएली वोंइश मुर आन कली हिकगीनु, मेको आन कली मुर बेक्तीक रोड पमापेक्ल, दे ब्रोंइचा कली नेल्लेमी परमप्रभु यावे कली क्येट गेचा माल्नीम। मिनु मेको आन कली हिकशोनु, मारेड मरिम्शो मदुम्ब। गन्ती १:३; २सामुएल २४:२-३
- 13 गिश जना वोंइश मुर हिकसीनीमी, मिश जना ताम्बु डा नाक्तीके डा आधा शेकेल गेचा माल्नीमी। शेकेल का २० गेराह चांदी बाक्नीम। मोपा परमप्रभु यावे कली गेशो क्येट आधा शेकेल गेचा माल्शो बाक्ब। शेकेल का ११.५ ग्राम खोदेशो बाक्ब। गेरा का ०.६ ग्राम बाक्ब।मती १७:२७
- 14 वोंइश मुर गिश जना २० बर्स गाप्शो नु मेको क्येडा लाक्शो बाक्मा, मिश जनाम परमप्रभु यावे कली गेचा माल्शो चढेचा माल्नीम।
- 15 इन पाप क्याम्तीक गेय पचा कली थीबमी आधा शेकेल, मथीबमी यो आधा शेकेल परमप्रभु यावे कली गेचा माल्नीमी।
- 16 इस्राएली वोंइश मुरुमी आन गेशो प्रोंइतीक क्येट ताक्शा, गुम्तीक ताम्बु डा गेय पचा कली गेचा माल्नेवे। मिनु मेको क्येट परमप्रभु यावे आ डोंइती इस्राएली आन कली प्रोंइशो मिम्तीक चिन्ड दुम्ब” देंत।

चिक्तीक ठेयब बोस

- 17 मिनु लेंशा परमप्रभु यावेमी मोसा कली
- 18 “गे चिक्चा कली कांसा के ठेयब बोस का सेल्पतो। मेको आ निप्पाइक्तीके यो कांसा केन दुम्चा माल्ब। मेको गुम्तीक ताम्बु नु चढेतीक आस दातेमी वोइश्शा, ब्वाक्कु कुर पपाइक्चा माल्नेवे। प्रस्थान ३८:८
- 19 मेको ब्वाक्कुमी हारून नु आ तौपुकीमी आन गुड खोइली चिक्सीचा माल्नीम।
- 20 मेकोपुकी मबेक्कल, दे गुम्तीक ताम्बुम ओत्रचा क्येडा डोंइती चिक्सीचा माल्नीम। मिनु चढेतीकेमी गेय पचा, दे परमप्रभु यावे आ डोंइती मीम चोशा चढेतीक चढेचा कली लमानु, मेको ब्वाक्कुम चिक्सीचा माल्नीम। ब्वाक्कुम चिक्सीमानु, मेको मबेक्नीम।
- 21 मेकोपुकी नु आन चच युड आन पाला नेल्लेमी गेना हना यो पतीके लोत्र बाक्ब” देंत।

ताम्बु डा लुक्तीक तेल

- 22 मिनु लेंशा परमप्रभु यावेमी मोसा कली
- 23 “गेमी शुश क्येट लाइब ब्रोत्रशो रिना पाइब थोत्रक चाक्चा माल्नेवे। मार चाक्चा माल्नेवे देशा हना, मूरे आ रस ५ सहे शेकेल, दाल चिनी सहे निकशी ५० शेकेल नु ब्रोत्रशो रिना पाइब बोच सहे निकशी ५० शेकेल चाक्चा माल्नेवे। शेकेल का ११.५ ग्राम चांदी के क्येट बाक्ब। ताम्बु डा शेकेल चहिं १२ ग्राम बाक्ब।

24 नु कस्सीया माइश्शो ब्रोव्रशो रिना पाइब फू ५ सहे शेकेल, ताम्बु डा नाक्तीकेमी नाक्शा, चाक्चा माल्नेवे। रिम्शो तेल हिन का यो चाक्चा माल्नेवे। हिन का ४ लिटर खोदेशो बाक्ब।

25 मेको नेल्ल ब्वाइश्शा थम रिम्शो लुक्तीक तेल सेल्पाइक्चा माल्नेवे। मेको परमप्रभु यावे कली ला बाक्ब। मेको ब्रोव्रशो रिना पाइब सेल्स जोक्ब मुर कली सेल्पाइक्चा माल्नेवे। मेको थम रिम्शो लुक्तीक तेल ताम्बु कली ला सेल्चा माल्ब। प्रस्थान ३७:२९

26 मिनु गे गुम्तीक ताम्बु नु कबल पशो सन्दोस,

27 टेबल नु मेकेर डा मार मार नेल्ल, बत्ती दातीके नु मेको आ मार मार नेल्ल नु धूप चोशा चढेतीके,

28 चोशा चढेतीके नु मेको आ मार मार नेल्ल नु चिक्तीके ठेयब बोस नु आ निप्पाइक्तीके नेल्ल खेक्पाइक्चा माल्नेवे। प्रस्थान ३०:१०

29 मोपा मेको मारेइ मारेइ नेल्ल खेक्तीनु, मेको ताम्बु डा गेय कली ला दुम्नीम। मेको कली मार मारम थीनीमी, मेको यो परमप्रभु कली दुम्नीम।

30 आं कली चढेब दुम्ब हारून नु आ तौ आन कली यो तेल खेक्शा, आं गेय पाइब सेल्चा माल्नेवे। प्रस्थान २९:७

31 इस्राएली आन कली 'मेको गेना हना यो इन चच युइ आन पाला सम्म लुक्तीक तेल दुम्चा माल्ब। मेको तेल परमप्रभु यावे के ला बाक्ब।

32 मेको अरु मुर आन कली खेक्चा मदुम्ब। मेको खोदेशो पा ब्वाइश्शा तेल सेल्चा मदुम्ब। मेको परमप्रभु आ तेल ला बाक्ब' दे मिम्चा माल्नीनी।

33 सुमी मेको खोदेशो पा ब्वाइश्शा तेल सेल्बा नु अरु मुर आन कली खेक्बा, मेको मुर आ थर रे तिल्चा पुंइसीब" दे परमप्रभु यावेमी मोसा कली दैत।

धूप सेल्चा शेशो

34 मिनु परमप्रभु यावेमी मोसा कली "ब्रोव्रशो रिना पाइब थोव्रक मार ब्वाइक्पाइक्चा माल्नेवे देशा हना, चोव्रक, कुन्दापुमी, ब्रोव्रशो रिना पाइब रवा आ दूध नु मारेइ मब्वाइश्शो मूरे, उइक्थ उइक्थ पा नाक्शा ब्वाइक्पाइक्चा माल्नेवे।

35 जोक्ब मरुम मेको नेल्ल ब्वाइश्शा, ब्रोव्रशो रिना पाइब धूप, हिकसी सुप्चा, अरु मब्वाइश्शो परमप्रभु कली ला चढेतीक धूप सेल्पाइक्चा माल्नेवे।

36 मेको रे इच्का खोइ तुप्शा, फस सेलो। मिनु मेको फस गुम्तीक ताम्बु डा नेल्ल क्येडा चोव्रखो कोटा कबल पशो सन्दोस आ डोंइती वोइश्शा, मेको फस चोचा माल्नेवे। मेको इन कली नेल्ल क्येडा चोव्रखो दुम्ब। मेकेर गो इ कली गुम्नुड। प्रस्थान ३०:६

37 इन कली धूप सेल्नीनु, आं धूप खोदेशो पा मसेलीन। 'मेको धूप परमप्रभु यावे आं धूप ला बाक्ब' दे मिम्चा माल्नीनी।

38 सुइमी मेको नाम्चा कली सेल्तेक्म हना, मेको आन थर रे तिल्चा पुंइसीनीम" दे परमप्रभु यावेमी मोसा कली माइक्तु।

## 31

रिम्शो पाइब आन कली योव्रशो

प्रस्थान ३५:३०-३५

1 मिनु परमप्रभु यावेमी मोसा कली प्रस्थान ३५:३०-३५

2 "नेनो, गो यहूदा आ थर डा हरु आ चच ऊरी आ तौ बेचालेल आ नें थिशा आं गेय पचा कली योव्रता।

3 गो मेको कली आं सोक्तीमी प्रिशा, मार मार सेल्चा कली जोक्ब तुइक्ब सेल्ता। मिनु पने चाप्तीक सक्ति यो गेता।

4 मेकोमी नेल्ल मिम्शा, सुन, चांदी नु कांसा के मारेइ मारेइ चेम्ने चाप्ब।

5 हीरा खोइक्तीक नु सुनम क्येप्तीके, शी मुतीके नु मारेइ मारेइ सेल्स जोक्ब दुम्पाइक्ता।

6 गो दान आ थर डा अहीसामाक आ तौ ओहोली-आब कली बेचालेल नु गेय पचा कली योव्रता। गो इस्राएल डा जोक्ब रिम्शो गेय पाइब मेको आस कली वारच पाइब यो योव्रतामी। गो इ कली मार मार देंडा, मेको नेल्ल आन कली सेल्ने चाप्तीक सक्ति गेतामी।

7 गुम्तीक ताम्बु, कबल पशो सन्दोस, मेको आ तार डा सुम्तीके नु ताम्बु आ गा डा माल्शो मारेइ मारेइ, प्रस्थान ३५:११-१९

8 टेबल नु मेको आ मारेइ मारेइ, बत्ती दातीके नु आ मारेइ मारेइ, धूप चोशा चढेतीके,

9 चोशा चढेतीके नु आ मारेइ मारेइ, ठेयब चिक्तीक बोस नु आ राप्पाइक्तीके,

10 आं कली चढेब दुम्तीके रिम्शो प्रोव्रशो वा नेल्ल, चढेब हारून आ चढेची ना फेक्तीक वा नु आ तौ आन फेक्तीक वा,

11 लुक्तीक तेल नु ब्रोव्रशो रिना पाइब धूप गोम इ कली देशो खोदेशो पा मेकोपुकीमी आं बाक्तीक कली सेल्चा माल्नीम" दैत।

नाइक्तीक नाक्त आ पर्बम अरेशो

प्रस्थान ३५:१-३

12 मिनु परमप्रभु यावेमी मोसा कली

13 "गे इस्राएली आन कली मार माइक्चा माल्नेवे देशा हना 'गेपुकीमी थमा पा आं नाइक्तीक नाक्ती मानेचा माल्नीनी। मारदे हना मेको गेपुकी नु इन चच युइ सम्म कली चिन्ड लीब। गो, परमप्रभु यावेमी, इन कली आं मुर सेल्ता, दे गे तुइक्नीनी। प्रस्थान २०:८; इजीकीएल २०:१२

14 मोपतीके गेपुकीमी नाइक्तीक नाक्त मानेचा माल्नीनी। मारदे हना मेको परमप्रभु आ नाक्त बाक्ब। सु सुमी मेको नाक्ती ममानेथु, गेय पाइनीमी, मेको मुर आ जात डा मुर रे तिल्शा, साइक्चा पुंडसीनीम। गन्ती १५:३२-३५; येरमीया १७:२१-२३

15 मोपा ६ नाक्त सम्म गेय पामेक्ल, तन्न ७ नाक्त चहिं नाइक्तीक नाक्ती बाक्ब। मेको परमप्रभु यावे आ नाक्त बाक्ब। सु सुम मेको नाक्ती गेय पाइनीमी मेको थमा पा साइक्चा पुंडसीनीम।

16 मोपतीके इस्राएलीपुकीमी नाइक्तीक नाक्ती मानेचा माल्नीनीम। मेको नाक्ती गेना हना यो आन चच युड सम्म कबल पतीके बाक्ब। मर्कूस २:२७-२८

17 गो नु इस्राएली इन दातेमी मेको गेना हना यो लीब चिन्ड बाक्ब। परमप्रभु यावेमी ६ नाक्तीमी सरीड नु रागी सेल्ने थुम्तु। ७ नाक्ती चहिं नाइसीशा, आ दशो सात' दे इस्राएली आन कली माइक्चा माल्नेवे' दैत। प्रस्थान १६:२३,२५; उत्पत्ती २:२

18 मिनु परमप्रभुमी मोसा नु सीनै डांडाम लोत्र पने थुम्शा, आ देशो फुल्लु निक्शीमी मुशा आंम ब्रेक्शो लोत्र मोसा कली गेन्तु। प्रस्थान २४:१२; प्रस्थान ३२:१५-१६; प्रस्थान ३४:२८; ब्यवस्था ४:१३; ब्यवस्था ५:२२; ब्यवस्था ९:१०; ब्यवस्था १०:१-५

## 32

इस्राएलीमी सुन के मूर्ति सेल्शो

1 मिनु इस्राएल डा मुरपुकीमी मोसा कली डांडा रे मयिशो तशा, हारून आ बाक्तीक जाक्शा, मेको कली “लो, इं डोंडडोंडती गाक्शा लां कोंडब देवता सेलो। आंइ कली इजीप्त रागी रे गुंडशा, एक चाक्ब मोसा मार दुम्मे? मतुइक्ताक” दे हारून कली देंमा बाक्त। ब्यवस्था ९:८-२१

2 मिनु हारूनमी मेको आन कली “इन मीश, इन तमी तौ आन पांडशो सुन पुइश्शा, आं बाक्तीके चाक्कीन” देंमाक्त।

3 मिनु मुर नेल्लेमी आन नोफामी पांडशो सुन पुइश्शा, हारून आ बाक्तीके चाक्गमे बाक्त।

4 मिनु हारूनमी मेको सुन आन गुइ रे ताक्शा, यपाइश्शा, बाछा का सेला बाक्त। मिनु इस्राएलीपुकीमी “इस्राएल डा मुरपुकी, एकोन इं देवता बाक्ब। एकोमी इं कली इजीप्त रागी रे गुंडताक्ब” दे मुमा बाक्त। १ राजा १२:२८; भजन संग्रह १०६:१९-२०; प्रेरित ७:४१

5 मिनु हारूनमी मेको आन कली तशा, बाछा आ डोंडती चढेतीक का सेला बाक्त। मिनु ठेयब सेंदा पा “दीसा परमप्रभु यावे कली चाड का मानेचा माल्ब” देंमाक्त।

6 मिनु आ दीसा मेकोपुकी सुनी कना बोक्शा चोशा चढेतीक नु दुशा बाक्चा आ पर्वम चढेतीक चढेमे बाक्त। मिनु मुरपुकी जचा तूचा कली निस्समा बाक्त। मिनु नोले जशा तूशा बोक्शा, आन दला दाक्स पामे बाक्त। १ कोरिन्थी १०:७

7 मिनु परमप्रभु यावेमी मोसा कली “डांडा रे तोइसो। इजीप्त रे गुंडशा चाक्शो इ मुरपुकीमी आन दला दाक्स पा पाप पाम्तेक्म।

8 मेकोपुकीमी आं शेंशो लोत्र थु था प्रोंडतेक्म। आंम कली सुन के बाछा का सेल्शा, मेको कली पूजा पशा ‘इस्राएल डा मुरपुकी, एकोन इं कली इजीप्त रागी रे गुंडब परमप्रभु बाक्ब’ देंतेक्म” दे परमप्रभु यावेमी मोसा कली देंत। प्रस्थान २०:४,२३

9 मिनु लेंशा परमप्रभु यावेमी मोसा कली “गो मेको मुर आन कली ताता। काइ मटीब बाक्नीम, दे तुइक्ताकड। ब्यवस्था ९:६; यसेया ४८:४; प्रेरित ७:५१

10 मोपतीके आं कली मतेक्वी। मेको आन कली तशा गाइक्ताक्वी। गो मेको आन कली साइक्नुडमी। मिनु गो इ लां पा ठेयब जात का सेल्नुडमी” देंत। गन्ती १४:११-२०

11 मिनु मोसामी परमप्रभु यावे कली “परमप्रभु यावे, आं परमप्रभु, इन मुर आन पर्वम मारदे गाइक्तीनी? गेमी इन ठेयब सक्तीमी मेको आन कली इजीप्त रागी रे गुंडताक्नी।

12 मो पाइतीनी हना इजीप्त रागी डा मुरपुकीमी ‘परमप्रभुमी मेको आन कली पहाडमी साइश्शा, रागी रे क्याम्चा कली एक रे गुंडताक्ब’ देंनीम। मोपतीके इन ठेयब गाइक्तीक प्रोनीन। इन मुर आन कली मसतीन। ब्यवस्था ९:२८; यहोसु ७:९

13 इन गेय पाइब अब्राहाम, इसहाक नु याक्ब मिम्तीने। मेको आन पर्वम इन नैमी ‘गो इन कली सरीड डा सौरुल खोदेशो पा शुश सेल्नुड। आं देशो रागी इन चच युड आन कली गेनुडमी। मिनु एको रागी गेना हना यो मेको आन के दुम्ब’ दे कसम जाइतीनी” देंत। उत्पत्ती १५:५; उत्पत्ती २२:१६-१७; उत्पत्ती २६:४

14 मिनु परमप्रभु यावेमी आ थुं लेशशा, आ मुर आन कली मसाइक्मी। भजन संग्रह ८५:-

परमप्रभु आ ब्रेक्शो फुल्लु प्रोल्शो

15 मिनु मोसा परमप्रभु यावे आ देशो लोत्र ब्रेक्शो फुल्लु निक्शी कुरशा, डांडा रे ब्रुत्त। मेको फुल्लु निक्शी निम्फा पटटीम मुशा ब्रेक्शो बाक्त।

16 परमप्रभुमी मेको फुल्लु आंमा चेशशा सेल्शो बाक्माक्त। मिनु मुशा ब्रेक्शो बाक्त। प्रस्थान ३१:१८

17 मिनु यहोसुमी मुर आन कली रेयके पशो नेंशा, मोसा कली “इस्राएल डा मुर आन बाक्तीकेमी लडाइ पशो रेयके खोदेशो नेंसाक्ब” देंत।

18 तन्न मोसामी “एको रेयके लडाइ ग्राब आन रेयके ममाइ, बुइब आन रेयके यो ममाइ। गो कुम्सो पशो नेंता” देंत।

19 मिनु मोसा इस्राएली आन बाक्तीके आ नेक्था जाक्मेनु, बाछा नु बाछा आ एर आंथ मुरपुकी सिल पशो तशा, शुश गाइश्शा, फुल्लु निम्फा ताइश्शा, डांडा आ पुंम प्रोल्तु।

20 मिनू मोसामी इस्राएली आन सेल्शो बाछा लाइशशा, मीम हुम्शा, तुप्शा फस सेल्शा, ब्वाक्कुम फुइशशा, इस्राएली आन कली तूपाइक्तीमी।

21 मिनू नोले मोसामी हारून कली “एको मुरपुकीमी इ कली मार पामे डा? मारदे मेको आन कली ओदेशो ठेयब पाप पपाइक्मी?” दे हिल्लो पाप्तु।

22 मिनू हारूनमी “आं पबंम मगाइक्तीन। गे एको मुर आन कली तुइक्तीनी। एकोपुकी दूली पाइब ला बाक्नीम।

23 आं कली ‘आंइ डोंडोंइती गाक्शा लां कोंइब देवता सेलो। मारदे हना आंइ कली इजीप्त रे गुंइशा, एक चाक्ब मोसा कली मार दुम्मे, मतुइक्तक’ दैतेक्म।

24 मिनू गो मेको आन कली ‘सु सु इन के सुन बाक्मे, मेको प्रुइशशा, एक चाक्कीन’ दे माइक्तामी। मिनू मेकोपुकीमी चाक्तेक्म। मिनू गो मेको सुन मीम हुम्ताक्ड। मिनू एको बाछा दुम्त” दैत।

इस्राएली आन कली सजाइ

25 मोसामी मुर आन कली आन दला दाक्स पशो ताप्तु। मारदे हना हारूनमी आन दला दाक्स पचा गेवा बाक्त। मिनू आन जोरी सनु नेल्ल ग्येरसमा बाक्त।

26 मिनू मोसामी इस्राएली आन बाक्तीक ओव्रतीकेम राप्शा “सु सु परमप्रभु यावे गे बाक्नी, मेकोपुकी आं गे पिने” दैत। मिनू लेवी आ थर डा मुर नेल्ल मोसा गे लशा, आ एर ओथ राप्तेक्म।

27 मिनू मोसामी मेको आन कली “परमप्रभु यावे, इस्राएली आन परमप्रभुमी ‘गे नेल्लेमी इन तरवार पिप्शा, मुर आन बाक्तीके लशा, इन लोक्ब, इन खिं डा मुर, इन वारच नु सु बाक्तेक्म हना यो, सतीन’ दैत” दैत।

28 मिनू लेवी आ थर डा मुरपुकीमी मोसा आ देशो खोदेशो पा पाप्तेक्म। मेको नाक्ती हजार सां मुर साइक्चा पुंइसाक्म।

29 मिनू मोसामी लेवी आ थर डा मुर आन कली “गेपुकीमी मुलाक्ती परमप्रभु यावे आ गेय पा, आंम आंम इन तौ नु आंम आंम इन लोक्ब आन कली मप्रोंइथु साइक्तीनी। मिनू मुलाक्ती गे आसीक राइनीनी” दैत। प्रस्थान २६:४१; गन्ती ३:६-१०; ब्यवस्था ३३:८-११

मोसामी परमप्रभु नु लोव्र पशो

30 आ दीसा मोसामी मुर आन कली “गेपुकीमी ठेयब पाप पाइतीनी। मिनू गो परमप्रभु यावे आ बाक्तीक डोइशशा, लाइनुड। गो इन पशो पाप क्याम्तीक गेय पने चाप्नुडा, कों?” दैत।

31 मिनू मोसा परमप्रभु यावे आ बाक्तीक लशा मेको कली “मुरपुकीमी थमा पा ठेयब पाप पाप्तेक्म। आंम कली सुन के देवता सेल्तेक्म।

32 मो हना यो गे मेको आन पाप क्याम्तीन, दे पुंइनुड। मक्याम्ताक्नी हना, इन ब्रेक्शो किताब रे आं नें क्याम्तीने” दैत। भजन संग्रह ६९:२९; लूका १०:२०; रोमी ९:३

33 मिनू परमप्रभु यावेमी मोसा कली “सुमी आं देशो मटिथु पाप पाइबा, मेको आ नें आं ब्रेक्शो किताब रे क्याम्नुड।

34 तन्न मुल लावो। मेको मुर आन कली आं देशो रागी लाइक्मी। नेनो, आं स्वर्ग डा गेय पाइब इ डोंडोंइती सोइक्नुड। तन्न काबु मेको आन कली पाप पशो आ पबंम सजाइ गेनुड” दैत। प्रस्थान ३३:२:१४; गन्ती १४:२७-३०

35 मिनू परमप्रभु यावेमी इस्राएल डा मुर आन कली बेक्तीक रोइ पपाइक्तु। मारदे हना मेकोपुकीमी हारून कली मेको सुन के बाछा सेल्पाइशशो बाक्तेक्म।

## 33

परमप्रभु आ शिशी पुंइशो

1 मिनू परमप्रभु यावेमी मोसा कली “इजीप्त रे गुंइशा, एक चाक्शो मुरपुकी नु आं देशो रागी लावो। मेको रागी आ पबंम गो ‘इ चच युइ आन कली गेनुड’ दे अब्राहाम, इसहाक नु याक्ब नु कसम जाता। उत्पत्ती १२:७

2 आं स्वर्ग डा गेय पाइब इन डोंडोंइती सोइक्नुड। मिनू गो कनानी, एमोरी, हिती, परिज्जी, हिक्वी नु यबुसी आन कली खेरनुडमी। प्रस्थान २३:२०

3 मेको रागीम दूध नु खुदो शुश बाक्ब। मारेइ मारेइ यो शुश ग्रेल्ब। गेपुकी काइ मटीब मुर बाक्नीनी। मोपतीके गो गेपुकी नु मगाक्नुड। गो गाक्ती हना, इन कली लांमीन साइक्नन्नी” दैत। प्रस्थान ३२:९-१०

4 मिनू मुरपुकीमी मेको मरिम्शो लोव्र नेशा, सुतां पाप्तेक्म। सुइमी आन सुन चांदी मारेइ मपांइसम।

5 मारदे हना परमप्रभु यावेमी मोसा कली “इस्राएली आन कली ‘गेपुकी काइ मटीब मुर बाक्नीनी। गो याम का गे नु गाक्ती हना, नेल्ल इन कली साइक्नन्नी। मुल इन सुन चांदी नेल्ल प्रुतीन। मिनू इन कली मार पचा माल्नुडा, दे मिम्नुड” देशो बाक्त। योएल २:१३

6 मोपतीके होरेब डांताम बाक्मा रे इस्राएलीपुकीमी सुन चांदी मपांइसम। योना ३:६

परमप्रभु नु लोव्र पतीक ताम्बु

7 मिनू मोसामी अरु आन बाक्तीक क्येडा डोन ताम्बु का कीशा वोइक्तु। मेको ताम्बु कली परमप्रभु नु लोव्र पतीक ताम्बु दैत। सु सु परमप्रभु यावे कली ग्रुम्चा दाक्तेम, मेको मुर आन बाक्तीक रे प्रूशा, मेको परमप्रभु नु लोव्र पतीक ताम्बु लाइबाक्तेक्म। प्रस्थान २९:४२

8 मिनू मोसा मेको परमप्रभु नु लोव्र पतीक ताम्बु लमेनु, मुर नेल्ल बोक्शा, आन ताम्बु आ ओव्रतीकेम राप्शा, मोसा मेको ताम्बु मओव्रम सम्म, कौव्रशा बाक्तेक्म।

9 मिनु मोसा मेको ताम्बु आगा ओवमेनु, गोस्स के थाम यिशा, ताम्बु आ ओव्रतीकेम राष्णो ताम्तेक्म। मिनु परमप्रभु यावेमी मोसा नु लोत्र पाप्तु। गन्ती ११:२५; ब्यवस्था ३१:१५

10 मुर नेल्लेमी मेको गोस्स के थाम, ताम्बु आ ओव्रतीकेम राष्णो ताम्तेक्म। मिनु मुर नेल्ल बोकशा आंम आंम ताम्बु आ ओव्रतीकेमी बाष्णा, परमप्रभु कली मान पा ठेयब सेल्लेक्म।

11 मिनु परमप्रभु यावे नु मोसा कोव्रमुशा, लोत्र पाम्ताक्स। दोदेशो पा मुर आन वारच नु बाक्शा, लोत्र पाइनीमी, मोदेशो पा लोत्र पाम्ताक्स। मिनु मोसा लेशशा, आ ताम्बुम लत। आ गेय पाइब ठिटा, नून आ तौ यहोसु चहिं ताम्बु उड बाक्त। प्रस्थान ३३:२०; गन्ती १२:८; ब्यवस्था ३४:१०

मोसाम परमप्रभु कली पुंइशो

12 मिनु मोसामी परमप्रभु यावे कली “कोव्रडीन, गे आं कली ‘एको मुर आन कली लतो’ देंतीनी, तन्न गो नु सु सु सोइक्नीनी, गे आं कली मतुइक्पाइय्यीनी। मो हना यो, गे आं कली ‘इ नें कली तुइक्नुड। मिनु इ कली दाक्नुड’ देंतीनी। प्रस्थान ३३:२,३,१७

13 मोपतीके गे आं कली दाक्ताक्नी हना, आं कली इन लां कौइदीने। गो इन कली तुइक्ने चबुल। गो इन डौइती शिशी तडल। एको जात डा मुरपुकी इन मुर नम, दे मिम्तीने” देत। भजन संग्रह १०३:७

14 मिनु परमप्रभुमी “गो गे नु लाइनुड। मिनु इ थुं नाइक्चा गेनुड” देत। यसैया ६३:९; यहोसु २१:४४; हिब्रू ४:९

15 मिनु मोसामी “गे गो नु मलाइतीनी हना, आंइ कली एक रे मसोइक्तीन।

16 गो नु इन मुरपुकीमी इन डौइती शिशी तशो बाक्नीकी, दे गो दोपा तुइक्नीकी? गे गो नु लाइतीनी हना ला, तुइक्नीकी। मोपा ला गो नु इन मुरपुकी रागी डा मुरपुकी नु खाल का डा मदुम्नीकी” देत। ब्यवस्था ४:६-८

17 मिनु परमप्रभु यावेमी मोसा कली “गो इ देशो पाइनुड। मारदे हना गो इ कली दाक्नुड। मिनु इ नें यो तुइक्नुड” देत। प्रस्थान ३३:१२; यसैया ४३:१; रतिमोथी २:१९

मोसामी परमप्रभु कली तचा दाक्शो

18 मिनु मोसामी “गे आं कली इन छेइछेइ तपाइय्यीनी” दे पुंइतु। यूहन्ना १:१४; २कोरिन्थी ३:१८

19 मिनु मेकोमी “गो इ डौइती रे लाइनुड, आं गेना हना यो दाक्तीक कौइनन। इ डौइती आं नें ‘यावे, देना देन गाक्नुड’ सु सु आन कली शिशी पचा दाक्डा, मेको आन कली शिशी पाइनुड। सु सु आन कली दाक्चा दाक्डा, मेको आन कली दाक्नुड” देत। रोमी ९:१५

20 मिनु मोसा कली “गे आं कुल कोवने मचाप्नेवे। मारदे हना आं कुल तामेनु, मुर बेक्नीमी” देत। प्रस्थान २४:११; उत्पत्ती ३२:३१; न्यायाधीस ६:२२-२३; न्यायाधीस १३:२२-२३; यसैया ६:५; यसैया ३३:१४; १तिमोथी ६:१६

21 मिनु लेशा परमप्रभु यावेमी मोसा कली “कोव्रडा, आं बाक्तीकेम सेरथे फुल्लु का बाक्ब, गे मेको तार रपो। १राजा १९:८-१३

22 आं छेइछेइ मेके रे लमेनु, गो इ कली मेको सेरथे फुल्लु आ काक्पेमी खुइइशा वोइक्नन। गो मलाक्गु सम्म इ कली आं गुइमी सुम्शा वोइक्नन। प्रस्थान ३४:५-६; प्रस्थान २४:११;

23 नोले आं गुइ क्युक्नुड। मिनु गे आं ची ताइनेवे। आं कुल चहिं मताइनेवे” देत।

## 34

परमप्रभु आ अरेशो लेशा ब्रेक्शो

1 मिनु परमप्रभु यावेमी मोसा कली “डौइती डा खोदेशो पा फुल्लु निक्शी खोतो। गो मेको फुल्लुमी इ डौइती प्रोल्लो फुल्लु डा लोत्र ब्रेक्नुड। प्रस्थान ३२:१९

2 सुनी कना बोकशा, सीने डांडा डोइइशा, आं डौइती जाक्को।

3 गे नु सुइ डांडा डोइक्चा मदुम्नीम। बी ब्यफ, क्यारश भेडा यो डांडा गे जोचा मदुम्नीम” दे माइक्तु। प्रस्थान १९:१२-१३

4 मिनु मोसामी परमप्रभु यावेमी देशो खोदेशो पा डौइती डा खोदेशो फुल्लु निक्शी खोइक्तु। मिनु सुनी कना बोकशा, फुल्लु कुरशा सीने डांडा डौइसाक्व।

5 मिनु परमप्रभु यावे गोस्स आगाम बाक्शा, तौइसाक्व। मिनु मोसा नु राष्णा आ नें देना देन गाक्त।

6 मिनु परमप्रभु यावे मोसा आ नेक्था गाक्ना गाक्न “यावे, यावे, शिशी पाइब नु दाक्ब परमप्रभु बाक्ब। रीब पा मगाइक्ब। गेना हना यो शिशी पाइब नु आ दाक्चा मप्रौइब बाक्ब। प्रस्थान ३३:१८-२६; गन्ती १४:१८; भजन संग्रह १०३:८; नहुम १:३; १यूहन्ना ४:१६

7 मिनु हजार हजार आन पाला सम्म गेना हना यो दाक्ब। मुर आन ठीक मपशो, आन हेंथे पशो नु पाप पशो क्याम्ब। तन्न सजाइ मगेथु मप्रौइब। आम आफ आन मरिम्शो पशो आन तमी तौ, चच, युइ नु युइ आन युइ सम्म सजाइ ताइनीम” देत। प्रस्थान २०:५-६; ब्यवस्था ३२:९; भजन संग्रह २८:९

8 मिनु मोसामी गु बाष्णा सेउ पा ठेयब सेल्लु।

9 मिनु “आं परमप्रभु, इन डौइती शिशी तशो बाक्ती हना, गे परमप्रभु, गो नु गाक्कीन, दे पुंइनुड। एको काइ मटीब मुर बाक्तेक्म हना यो, आंइ ठीक मपशो नु पाप क्याम्दीन। आंइ कली आंम इन मुर सेल्ला ब्रकी” देत।

10 मिनु मेकोमी “नेनो, गो कबल का पाइनुड। इ मुर नेल्ल आन डौइती छक लाक्चा डा गेय पाइनुड। गो मोदेशो गेय रागी रागी आन दातेमी गेनायो मपड। मिनु गे नु बाक्ब मुर नेल्लेमी परमप्रभु यावे आ गेय बाक्ब, दे तुइक्नीम। आं पचशो गेय हिंचा डा नु छक लाक्चा डा बाक्ब। प्रस्थान १९:५

11 गो मुलाकती मार देनुडा, मेको लोत्र टिचा मालेवे। नेनो, गो इ डोंडती रे एमोरी, कनानी, हित्ती, परिज्जी, हिक्वी नु यबुसी आन कली खेरनुडमी।

12 गो इन कली गेनुड देशो रागी जाकदीत्नीनु, मेको रागी डा मुरपुकी नु काड कबल मपावो। होस पा बाकको। कबल पाप्तीवी हना, मेकोपुकीमी इन कली दूली पाडब सेलीम। प्रस्थान २३:३२-३३

13 मेको आन चढेतीकपुकी प्रेशशा, आन पूजा पचा कली खुकशो फुल्लु प्रोल्शा, मूर्ति पाडशशो थाम कली क्योरशा, तिम्चा माल्नीनी। प्रस्थान २३:२४

14 गे मेको आन देवी देवता आन डोंडती बाप्शा सेउ मपने। मारदे हना आं नें रुश पाडब बाकब। मिनु गो रुश पाडब परमप्रभु बाकनुड।

15 मेको रागी डा मुर नु काड कबल मपने। मारदे हना मेको रागी डा मुरुमी आन देवी देवता आन कली पूजा पा क्योरशा चढेनीमी। मिनु इन कली ब्रेम्मानु, गे मेको आन देवी देवता आन कली चढेशो जाइनीनी।

16 मिनु गे आन तमी इन तौ आन कली चाकनीनी। मिनु मेको आन तमीम आन देवी देवता आन कली पूजा पा चढेनीमी। इन तौ आन कली यो आन देवी देवता आन कली पूजा पा चढेपपाडकनीम। ब्यवस्था ७:३; न्यायाधीस ३:६; १राजा ११:२

17 गेपुकीमी आंम कली मूर्ति मचेम्सीन। प्रस्थान २०:४

18 बोरब ओरुली मसुप्शो शोब्ले डा चाड मानेचा माल्नीनी। आं देशो खोदेशो पा आबीब महिनाम ७ नाक्त सम्म बोरब ओरुली मसुप्शो शोब्ले जचा माल्नीनी। मारदे हना गे आबीब महिनाम इजीप्त रे गूशो ननी। प्रस्थान २३:१४-१९

19 इन बस्तु भाव आन डोंडती जरमेशो बाछा, पाठा, नेल्ल आं के नम। उत्पती ४:४

20 डोंडती जरमेशो गधा आ बोहोर आ पा डा पाठा का गेशा प्रोंडचा माल्नीनी। मो मपाइनीनी हना, आ शुर जिकशा, साडकचा माल्नीनी। इन डोंडती जरमेशो तौ आ पा डा क्येट गेशा प्रोंडचा माल्नीनी। आं डोंडती सुड श्येत्थ गुड मजाककीन। प्रस्थान १३:१२-१६

21 मिनु ६ नाक्त इन गेय नेल्ल पचा माल्नीनी। ७ नाक्त चहिं नाडकचा माल्नीनी। ब्यफ वाकची नु बाली नाली रुप्ची ना यो नाडकचा माल्नीनी।

22 गेपुकीमी हप्ता डा चाड मानेचा माल्नीनी। मेको डोंडती मीशो चेरब आ चाड बाकब। बाली नाली रुप्शा ओंडतीक डा चाड यो मानेचा माल्नीनी। मेको बर्स नुप्ची ना डा चाड बाकब। लेवी २३:१५-१६; ब्यवस्था १६:९-१०

23 इस्राएल डा वोंडश मुर नु वोंडश आल नेल्ल बर्सम खेयप सां परमप्रभु आ डोंडती, परमप्रभु यावे, इस्राएली आन परमप्रभु आ डोंडती जाकचा माल्नीम।

24 गो रागी रागी डा मुर आन कली इन डोंडती रे खेरशा, इन बाक्तीक रागी बारपाडकुनुड। बर्सम खेयप सां परमप्रभु यावे इन परमप्रभु आ डोंडती जाककीन। मिनु सुडम इन रागी तशा मवाल्नीम।

25 आं कली चढेतीक हुश बोरब ओरुली सुप्शो शोब्ले नु मचढेन। पास्सा चाड डा चढेशो श्ये सुनी सम्म मारेड महेंचा।

26 इन रू डा डोंडती मीशो नेल्ल क्येडा रिम्शो थोत्रक परमप्रभु यावे, इन परमप्रभु आ खिम चाकचा माल्नीनी। क्यारश आ पाठा आ ममा आ दूधमी लोप्शा क्येचा मदुम्ब” दे मोसा कली देंत। प्रस्थान २३:१९

27 मिनु परमप्रभु यावेमी मोसा कली “गो, गे नु इस्राएली नेल्ल नु एको अरेशो लोत्र पा कबल पाता, मोपतीके ब्रेकतो” देंत। प्रस्थान २४:४

28 मिनु मोसा परमप्रभु यावे नु ४० नाकदो नाक्ती बाक्त। मारेड मजवो। ब्वाककु यो मतूड। मिनु कबल डा १० ओटा अरेशो लोत्र फुल्लुम ब्रेकताकव। प्रस्थान २४:१८; मत्ती ४:२; प्रस्थान ३१:१८

मोसा आ कुल छेडछेड दुम्शो

29 मिनु नोले मोसा मेको परमप्रभु यावे आ कबल डा लोत्र ब्रेकशो फुल्लु निक्शी कुरशा, सीनै डांडा रे तोंडसाकव। मोसा परमप्रभु यावे नु लोत्र पतीके आ कुल परमप्रभु आ छेडछेडम छेडछेड दुम्शो बाकब, दे मतुडकत।

30 मिनु हारून नु इस्राएली नेल्लेमी मोसा कली तामेनु, आ कुल छेडछेड दुम्शो ताम्तेकम। मिनु आ नेक्था लचा हितेकम। २कोरिन्थी ३:७-१८

31 मिनु मोसामी मेको आन कली ब्रेत्तीमीनु, हारून नु ठेयब मुर नेल्ल आ नेक्था जाक्तेकम। मिनु मेकोपुकी नु लोत्र पाप्तु।

32 मिनु नोले इस्राएलीपुकी यो मोसा आ नेक्था जाक्तेकम। सीनै डांडाम परमप्रभु यावेमी आ कली मार मार मदा, मेको नेल्ल आन कली अरेम्तीमी।

33 मोसामी मेकोपुकी नु लोत्र पने थुम्शा, आ कुल वामी सुम्साकव।

34 मोसा परमप्रभु यावे नु लोत्र पथ आ डोंडती लमेनु, लाडगा मग्रम सम्म आ कुल हुकसाकव। मिनु नोले गूशा, आ कुल सुम्सीशा मेको लोत्र इस्राएली आन कली नेंपाडकतीमी। प्रस्थान ३३:८-९

35 इस्राएलीमी मोसा आ कुल छेडछेड दुम्शो ततीके, मोसामी परमप्रभु यावे नु लोत्र पथ, आगा मओत्रम सम्म आ कुल सुम्साकव।

## 35

नाडक्तीक नाक्त आ पर्वम अरेशो

प्रस्थान ३१:१२-१७

1 मोसामी इस्राएली नेल्ल आन कली ब्रेरशा “परमप्रभु यावेमी शेंशो इन पचा माल्शो गेय, मार मार बाकब देशा हना,



2 गे ६ नाक्त सम्म गेय पने। ७ नाक्ती चहिं परमप्रभु यावे आ नाक्त दुम्तीके, मेको नाक्ती नाइक्तीक नाक्त बाक्ब। सु सुमी मेको नाक्ती गेय पाइनीमी, मेको साइक्चा पुंइसीनीम। प्रस्थान २०:८-११; प्रस्थान ३४:२१

3 नाइक्तीक नाक्ती इन खिं नेल्लेमी मी मुइक्चा यो मदुम्ब” दे माइक्तीमी।

ताम्बु सेल्चा कली मार मार पोक्शो  
प्रस्थान २५:३-९; प्रस्थान ३१:७-११

4 मिनु नोले मोसामी इस्राएली आन कली “परमप्रभु यावे आ शेंशो लोत्र मार बाक्ब, देशा हना

5 ‘परमप्रभु यावे कली गुम्तीक ताम्बु सेल्चा कली चढ्देतीक मार मार पोक्चा माल्नीनी। सु सुम ग्येरशा गेनीनी, मेकोमी परमप्रभु यावे कली मार चाक्चा माल्नीनी देशा हना, सुन, चांदी, कांसा, प्रस्थान २५:२

6 नीलो, प्याजी नु लल श्येले नु रिम्शो पा किरशो सुती श्येले के प्रोवशो वा नु क्यारश आ चां,

7 लल रड नुप्यो बोका आ कुशुल, नेल्ल क्येडा रिम्शो कुशुल नु बोल्यो शी,

8 बत्ती दाचा कली तेल, लुक्तीक तेल कली ब्वाइक्तीक नु धूप कली ब्वाइक्तीक,

9 निसाफ पतीके ऊरीम नु शुम्मीम वोइक्तीक झोला नु कुचु तार वोइक्तीक सेल्चा कली ओनीक्स माइश्शो हीरा नु अरु हीरा चाक्चा माल्नीनी” देत।

10 मिनु मोसामी “इन दातेम सु सु जोक्ब बाक्नी, मेको नेल्ल जाक्शा, परमप्रभु यावे आ देशो थोत्रक नेल्ल सेल्चा माल्नीनी।

11 गुम्तीक ताम्बु नु ताम्बु कली सुम्तीक, ग्याइक्पाइक्तीकपुकी, फलेक नु लाइश्शो कोक्केपुकी, थामपुकी नु राप्पाइक्तीकपुकी,

12 कबल पशो सन्दोस नु आ कुरतीक कोक्के निक्शी, सन्दोस आ सुम्तीके, फारतीके,

13 टेबल नु आ कुरतीक कोक्के, ग्योब नेल्ल नु कोइतीक शोब्ले,

14 बत्ती दातीक नु मेको आ दियारीपुकी, बत्ती कली ठीक सेल्टीक थोत्रक नु बत्ती कली तेल,

15 धूप चोशा चढ्देतीके नु मेको आ कुरतीक कोक्के, लुक्चा कली तेल नु ब्रोवशो रिना पाइश्शो धूप, ताम्बु ओव्रतीक डा फारतीक वा,

16 चोशा चढ्देतीके नु आ एर ओंथ डा कांसा के थरपु, कुरतीक कोक्के नु आ मार मार, चिकतीक ठेयब बोस नु मेको आ निप्पाइक्तीके,

17 ताम्बु आ लाडगा डा फारतीक वा, आ थामपुकी नु मेको आन राप्पाइक्तीकपुकी, ओव्रतीक डा फारतीक वा,

18 ताम्बु आ किला नु लाडगा थरपु डा किलापुकी नु डोरीपुकी,

19 नु हारून नु आ तौ परमप्रभु कली चढ्देब दुम्चा कली फेक्तीक वासी सेल्चा माल्नीनी” दे मुर आन कली माइक्तीमी।

ताम्बु कली मार मार चाक्शो

20 मिनु नोले इस्राएली नेल्ल मोसा आ डोंइती रे लाम्तेक्म।

21 सु सु आन शुमी “यो चाक्नुड” देमा, मेकोपुकीमी गुम्तीक ताम्बु सेल्चा कली नु मेकेर डा गेय पचा कली मार मार थोत्रक नु फेक्तीक वा कली मार मार माल्दा, मेको परमप्रभु यावे कली गेचा, दे चाक्तेक्म। १इतिहास २९:५-९; २कोरिन्थी ९:७

22 मीश मुर, वोइश मुर नेल्लेमी मार मार चाक्तेक्म देशा हना, मुन्दी, मारवाडी, औठी, सुन के चुरा नु अरु सुन के थोत्रकपुकी परमप्रभु यावे कली चाक्तेक्म।

23 सु सु नु नीलो, प्याजी नु लल श्येले नु रिम्शो पा किरशो सुती श्येले के प्रोवशो वा, क्यारश आ चां, लल रड नुप्यो सांड आन कुशुल, नेल्ल क्येडा रिम्शो सेल्शो कुशुल बाक्मे, मेको चाक्तेक्म।

24 सु सु आन के चांदी नु कांसा बाक्मे, मेकोमी परमप्रभु यावे कली चाक्तेक्म। सु सु नु गेय पचा कली ठीक पशो बोल्यो शी बाक्मे, मेको चाक्तेक्म।

25 मिनु मीश मुर आन दातेमी सु सु जोक्ब बाक्मा, मेकोपुकीमी आन पांइशो नीलो, प्याजी, लल श्येले नु रिम्शो पा किरशो सुती श्येले के प्रोवशो वा चाक्तेक्म।

26 सु सु जोक्ब बाक्मा, मेकोपुकीमी क्यारश आ चां पांइतेक्म।

27 मिनु ठेयब मुरपुकीमी ओनीक्स माइश्शो नु अरु हीरा कुचु तार वोइक्तीक नु निसाफ पतीक ऊरीम नु शुम्मीम वोइक्चा कली झोलाम क्येप्पाइक्चा कली चाक्तेक्म।

28 बत्ती कली तेल, लुक्चा कली तेल नु धूप कली ब्रोवशो रिना पाइब ब्वाइक्तीक थोत्रक चाक्तेक्म।

29 मोपा इस्राएली नेल्लेमी ग्येरशा, परमप्रभु यावे कली गेचा कली मारेड मारेड चाक्तेक्म। मीश मुर नु वोइश मुरुमी मार मार माल्बा मेको नेल्ल चाक्तेक्म। परमप्रभु यावेमी मोसा कली अरेशो खोदेशो पा ताम्बु सेल्टीक गेय पचा कली मार मार चाक्तेक्म।

बेचालेल नु ओहोली-आब

प्रस्थान ३१:१-६

30 मिनु मोसामी इस्राएली आन कली “नेनीन, परमप्रभु यावेमी यहूदा आ थर डा हरु आ चच, ऊरी आ तौ बेचालेल कली आ नें थिशा, आ गेय पचा कली योत्रतु।

31 मेकोमी मेको कली परमप्रभुमी आ सोक्तीम प्रिंशा, मार मार सेल्चा कली जोक्ब तुइक्ब सेल्लु। मिनु पने चाप्तीक सक्ति यो गेप्टु।

- 32 मेकोमी नेल्ल मिम्शा, सुन, चांदी नु कांसा के मारेइ मारेइ चेम्ने चाक्ब।  
 33 हीरा खोइक्तीक नु सुनम क्येप्तीके, शी मुतीके नु मारेइ मारेइ सेल्चा जोक्ब दुम्पाइक्तु।  
 34 परमप्रभुमी बेचालेल नु दान आ थर डा अहीसामाक आ तौ ओहोली-आब आस कली अरु आन कली शेंतीक सक्ति गेशो बाक्ब।  
 35 मिनु मेको आस कली जोक्ब तुइक्ब थुं गेशा, गेय पतीक सक्ति नेल्ल गेशो बाक्ब। मार गेय पचा कली जोक्ब तुइक्ब सेल्शो बाक्ब देशा हना, दारशो मार मार गेय पाइब, मिम्शा ब्रेक्स ब्रेक्शा, नीलो प्याजी नु लल श्येले बुटा प्रोत्रचा नु रिम्शो पा किरशो सुती श्येले के प्रोत्रशो वामी बुटा आप्चा कली जोक्ब तुइक्ब सेल्शो बाक्ब।

## 36

परमप्रभु आ बाक्तीक सेल्चशो  
 प्रस्थान २६:-

- 1 मिनु परमप्रभु यावेमी बेचालेल, ओहोली-आब नु अरु आन कली आ बाक्तीक सेल्चा, दे जोक्ब तुइक्ब नु रुप्तीक थुं गेशो मुर नेल्लेमी, परमप्रभु यावेमी देशो खोदेशो पा गेय पचा माल्नीम” दे मोसामी इस्राएली आन कली दैत।  
 2 मिनु मोसामी, बेचालेल, ओहोली-आब नु परमप्रभुमी जोक्ब तुइक्ब सेल्शो मुर नेल्ल आन कली ब्रेत्ताक्नमी। सु सु आन थुमी “गो यो मेको गेय पाइनुड” दे मिम्शो बाक्मा, मेको आन कली यो ब्रेत्ताक्नमी।  
 3 इस्राएलीपुकीमी परमप्रभु यावे आ बाक्तीक सेल्चा कली मार मार चाक्शो बाक्मा, आन थुमी ग्येरशा गेशो नेल्ल मोसा आ गुड रे ताक्तेक्म। मेना सम्म मुरपुकीमी सुनी कुस कुस मार मार चाक्स डा चाक्स बाक्तेक्म।  
 4 मिनु परमप्रभु यावे आ बाक्तीक सेल्ब जोक्ब तुइक्बपुकीमी आन गेय प्रोइशा, मोसा आ बाक्तीक जाक्तेक्म।  
 5 मिनु मेकोपुकीमी मोसा कली “परमप्रभु यावेमी अरेशो सेल्चा कली माल्शो क्येडा यो शुश चाक्ना चाक्न बाक्नीम” दैतेक्म।  
 6 मिनु मोसामी “मुल रे परमप्रभु यावे आ बाक्तीक डा गेय कली सुइम मारेइ मचाक्कीन” दे मुर आन बाक्तीक बाक्तीकेमी नेपाइक्थ मुर सोइक्ताक्मी। मोपा मारेइ मचाक्कीन, दे आन चाक्चा नाइक्पाइक्तेक्म।  
 7 मारदे हना आन चाक्शो मारेइ मारेइ गाप्शा, शुश दुम्शो बाक्त।

ताम्बु सेल्टीक गेय

- 8 मिनु जोक्ब गेय पाइब नेल्लेमी परमप्रभु यावे आ बाक्तीक कली १० ओटा सुम्तीक वा सेल्लेक्म। रिम्शो पा किरशो सुती श्येले के प्रोत्रशो वा के नु नीलो, प्याजी नु लल रड डा श्येलेमी शुश रिम्शो करुबपुकी बुटा आप्शा सेल्लेक्म।  
 9 मेको सुम्तीक वा का का पा २८ कुबीत दुइश्शो नु ४ कुबीत ब्रेम्शो, खाल का डा पा सेल्लेक्म। कुबीत का ०.५ मिटर खोदेशो बाक्ब।  
 10 मेकोपुकीमी ५ ओटा सुम्तीक वा बोइश्शा, का सेल्लेक्म। मिनु अर्को ५ ओटा बोइश्शा, अर्को का सेल्लेक्म।  
 11 सुम्तीक वा का आ एर सुर गे नीलो रड डा ५० ओटा बोइक्तीके सेल्लेक्म। अर्को सुम्तीक वा के यो ओंथ सुर गे ५० ओटा नीलो बोइक्तीक सेल्लेक्म।  
 12 सुम्तीक वा कामी ५० ओटा बोइक्तीके नु अर्को सुम्तीक वा कली यो ५० ओटा बोइक्तीके सेल्शा, निक्शी कली का सेल्चा कली ठीक पा वोइक्तेक्म।  
 13 मिनु मेकोपुकीमी ५० ओटा सुन के ग्याइक्पाइक्तीके सेल्शा, डोंइती डा नु नोले डा सुम्तीक वा आस कली बोइश्शा, का सेल्लेक्म।  
 14 परमप्रभु यावे आ बाक्तीक साप्चा कली यो क्यारश आ चां के ११ ओटा सुम्तीके सेल्लेक्म।  
 15 मेको सुम्तीके का का पा ३० कुबीत लाइश्शो नु ४ कुबीत ब्रेम्शो खाल का डा पा सेल्लेक्म। कुबीत का ०.५ मिटर खोदेशो बाक्ब।  
 16 मेकोपुकीमी का सेल्चा कली ५ ओटा सुम्तीके बोइश्शा का नु ६ ओटा सुम्तीके बोइश्शा अर्को का सेल्लेक्म।  
 17 डोंइती डा सुम्तीके आ एर सुर गे ५० ओटा बोइक्तीक सेल्लेक्म। मिनु अर्को सुम्तीके आ ओंथ सुर गे यो ५० ओटा बोइक्तीक सेल्लेक्म।  
 18 मिनु ताम्बु सुम्तीके का सेल्चा कली कांसा के ५० ओटा ग्याइक्पाइक्तीक सेल्लेक्म।  
 19 मेकोपुकीमी ताम्बु सुम्चा कली लल रड नुप्शो सांड आ कुशुल के सुम्तीक का सेल्लेक्म। मेको आ तारी नेल्ल क्येडा रिम्शो सेल्शो कुशुल के अर्को सुम्तीक का सेल्लेक्म।  
 20 मिनु नोले मेकोपुकीमी परमप्रभु यावे आ बाक्तीक सेल्चा कली बोल्यो शी के फलेक सेल्शा, थारतेक्म।  
 21 फलेक का का पा १० कुबीत लाइश्शो नु कुबीत का आधा ब्रेम्शो सेल्लेक्म। कुबीत का ०.५ मिटर, हात का खोदेशो बाक्ब।  
 22 फलेक का कामी, राप्पाइक्चा कली किला निक्शी गारपाइश्शा, सेल्लेक्म।। परमप्रभु यावे आ बाक्तीक सेल्चा कली फलेक नेल्ल मोदेशो पा सेल्लेक्म।  
 23 मिनु बाक्तीके आ दक्खिन गे कली २० ओटा फलेक सेल्लेक्म।  
 24 मिनु मेको २० ओटा फलेक आन पुं गे, ४० ओटा चांदी के राप्पाइक्तीके, फलेक का कली राप्पाइक्तीके निक्शी सेल्लेक्म।  
 25 उत्तर गे कली २० ओटा फलेक सेल्लेक्म।  
 26 मेको आन कली ४० ओटा चांदी के राप्पाइक्तीके, फलेक का कली राप्पाइक्तीके निक्शी सेल्लेक्म।

- 27 बाक्तीके आ पच्छिम गे कली ६ ओटा फलेक सेल्लेकम।  
 28 पच्छिम डा सुर निक्शी कली, फलेक निक्शी सेल्लेकम।  
 29 मेकोपुकीम उइ रे ममाइ, इर गे मुन्द्रामी ग्याइक्पाइक्तेकम।  
 30 मोपा मेको नेल्ल ८ ओटा फलेक दुम्तेकम। मिनू १६ ओटा चांदी के राप्पाइक्तीके, फलेक का कली राप्पाइक्तीक निक्शी दुम्त। प्रस्थान २६:-  
 31 बोल्यो शी के लाइशो कोक्के सेल्लेकम। परमप्रभु यावे आ बाक्तीक का पटटी कली फलेक ग्याइक्पाइक्चा कली ५ ओटा लाइशो कोक्के सेल्लेकम।  
 32 अर्को पटटी कली यो फलेक ग्याइक्पाइक्चा कली ५ ओटा लाइशो कोक्के सेल्लेकम। आ नोले पच्छिम गे कली ५ ओटा लाइशो कोक्के सेल्लेकम।  
 33 मिनू फलेक ग्येत्थ आ दातेमी सुर का रे अर्को सुर सम्म कली लाइशो कोक्के सेल्लेकम।  
 34 मिनू फलेक नु लाइशो कोक्के आन कली सुनम गिल्लेकम। मिनू लाइशो कोक्के शुइक्चा कली सुन के मुन्द्रापुकी सेल्लेकम।  
 35 मिनू नीलो, प्याजी नु लल श्येले नु रिम्शो पा किरशो सुती श्येले के प्रोव्रशो वा के नेल्ल क्येडा चोव्रखो कोटा फारतीक का सेल्शा, रिम्शो पा करूब बुटा आप्तेकम।  
 36 मेकोमी मेको फारतीक कली बोल्यो शी के ४ ओटा थाम सेल्शा, सुनम गिल्लेकम। मेको आन ग्याइक्तीके सुन के सेल्लेकम। मेको आन कली ४ ओटा चांदी के राप्पाइक्तीके सेल्लेकम।  
 37 मिनू नीलो, प्याजी नु लल श्येले नु रिम्शो पा किरशो सुती श्येले के प्रोव्रशो वा दारशो बुटा आप्शो ताम्बु आ ओव्रतीके कली फारतीक का सेल्लेकम।  
 38 मेको फारतीक ब्वेक्चा कली ५ ओटा थाम सेल्लेकम। मेको आन पिया, ब्वेक्तीक नु हाम्तीक कोक्के सुनम गिल्लेकम। मेको ५ ओटा थाम आन राप्पाइक्तीके चहिं कांसा के सेल्लेकम।

## 37

कबल पशो सन्दोस सेल्शो

प्रस्थान २५:१०-२२

- 1 मिनू बेचालेलामी बोल्यो शी के सन्दोस का सेल्लु। मेको आ लाइशो कुबीत निक्शी नु आधा, आ ब्रेम्शो कुबीत का नु आधा नु आ ग्येत्थ लाइशो कुबीत का नु आधा डा पा सेल्लु। कुबीत का ०.५ मिटर, हात का खोदेशो बाक्ब।  
 2 मिनू मेको आ खिंडगा नु आ लाडगा नेल्ल क्येख सुनमी गिल्लु। मिनू एर ओंथ नेल्ल सुन के सुर सेल्लु।  
 3 मिनू सुन के ४ ओटा मुन्द्रा सेल्लु। का पटटी निक्शी नु अर्को पटटी निक्शी पा सन्दोस आ ४ सुरमी क्येप्ताक्व।  
 4 मिनू बोल्यो शी के कुरतीक कोक्के निक्शी सेल्शा, सुनमी गिल्लु।  
 5 मिनू मेको कुरतीक कोक्के निक्शी मुन्द्रामी शुइश्या, सन्दोस कुरने चाप्तेकम।

सन्दोस सुम्तीक सेल्शो

- 6 मिनू मेकोमी क्येख सुन के चेम्शा, सन्दोस सुम्तीके सेल्लु। मेको आ पित्थ लाइशो कुबीत निक्शी नु आधा नु आ ब्रेम्शो कुबीत का नु आधा सेल्लु। कुबीत का ०.५ मिटर, हात का खोदेशो बाक्ब।  
 7 मिनू परमप्रभु यावे आ स्वर्ग डा गेय पाइब खोदेशो सुन के करूब निक्शी चेम्शा सेल्लु। मेको सुम्तीके आ निम्फा पटटी डा का का चेम्शा सेल्लु।  
 8 का पटटी करूब का, अर्को पटटी करूब का चेम्शा सेला बाक्त। मेको सुम्तीके नु करूब निम्फा मखोंडसीशो सुन का रेन चेम्शा सेल्लु।  
 9 करूब आस फ्रां हाम्शा, सुम्तीके फारपाइश्या, खाल का डा पा सन्दोस सुम्तीके गे कोव्रपाइश्या चेम्शा सेल्लु।

शोब्ले वोइक्तीक टेबल सेल्शो

प्रस्थान २५:२३-३०

- 10 बोल्यो शी के टेबल का सेल्लु। मेको आ पित्थ लाइशो कुबीत निक्शी नु आ ब्रेम्शो कुबीत का नु आ ग्येत्थ लाइशो कुबीत का नु आधा डा पा सेल्लु। कुबीत का ०.५ मिटर खोदेशो बाक्ब।  
 11 मिनू मेको कली क्येख सुनमी गिल्ल्या, आ एर ओंथ नेल्ल सिरपेच खोदेशो पा सुन के सुर सेल्लु।  
 12 मेको आ एर ओंथ डा सुर नेल्ल ४ गुइ ब्रेम्शो सेल्शा, सिरपेच खोदेशो पा बुटा आप्शा सेल्लु। गुइ का ८ सेन्ती मिटर कि ३ आइची खोदेशो बाक्ब।  
 13 मिनू ४ ओटा सुन के मुन्द्रा चेम्शा, मेको आ ४ ओटा खोइलीम टेबल आगाम क्येप्ताक्व।  
 14 टेबल कुरचा कली मुन्द्रापुकी टेबल आ सुर आ नेक्था क्येप्ताक्व।  
 15 मिनू टेबल कुरचा कली बोल्यो शी के कुरतीक कोक्के सेल्शा, सुनमी गिल्लु।  
 16 मिनू टेबलम वोइक्चा माल्यो थाल, लोटा नु बोस नेल्ल नु तूचा थोव्रक चढ़ेतीक लुक्चा कली लोटा नेल्ल क्येख सुन के सेल्लु।

सुन के बत्ती दातीक सेल्शो

प्रस्थान २५:३१-४०

- 17 मेकोमी क्येख सुन के बत्ती दातीक का चेम्शा सेल्लु। आ थाम, आ राशी, आ दियारी, आ डल्ला नु फूपुकी ठेयब सुन का केन सेल्लु।

- 18 मिनु मेको बत्ती दातीक आ थाम रे ६ ओटा राशी गुंडशा, का पटटी रे सां नु अर्को पटटी रे सां राशी चेम्शा सेल्लु।  
 19 मिनु मेको राशी कामी देसी बदाम आ फू खोदेशो फू सां नु डल्ला सां रे गुंडशो सेल्लु। अर्को राशीपुकी यो नेल्ल मोदेशो पा सेल्लु।  
 20 मेको बत्ती दातीक आ थामम चहिं ४ ओटा देसी बदाम आ फू खोदेशो आन डल्ला रे गूशो सेल्लु।  
 21 थाम आ डोंइती डा डल्ला रे, आ दाते डा डल्ला रे नु नोले डा डल्ला रे निम्फा पटटी गे राशी निक्किक्शी गूशो सेल्लु।  
 22 मेको आ राशी नु डल्ला नेल्ल ठेयब क्येख सुन का केन चेम्शा सेल्लु।  
 23 बत्ती दातीक ७ ओटा दियारी, आ कांडची नु आइक्च बोस नेल्ल क्येख सुन के चेम्शा सेल्लु।  
 24 मेको नेल्ल टलेन्ट का क्येख सुन के चेम्शा सेल्लु।

धूप चोशा चढ़ेतीक सेल्लो

प्रस्थान ३०:१-५, २२-३८

- 25 धूप चोशा चढ़ेतीके बोल्यो शी के कुबीत का लाइशो नु कुबीत का ब्रेम्शो ४ पाटे पा सेल्लु। आ ग्येथ लाइशो कुबीत निक्की डा सेल्लु। मेको नु मेको आ ग्रोव नेल्ल मखोंइसीशो शी का केन सेल्लु। कुबीत का ०.५ मिटर, हात का खोदेशो बाक्व।  
 26 मिनु मेको नेल्ल क्येख सुनमी गिल्शा, सिरपेच के खोदेशो पा सुन के सुर सेल्लु।  
 27 मेको आ सुर आगा निम्फा पटटी कली सुन के मुन्द्रा निक्किक्शी सेल्शा, आ सिरपेच खोदेशो सुर आ दी निम्फा पटटी गे क्येप्ताक्व। मिनु मेको कुरतीक कोक्के शुइक्तीक दुम्त  
 28 मिनु मेको कुरचा कली बोल्यो शी के कुरतीक कोक्के निक्की सेल्शा, सुनम गिल्लु।  
 29 मिनु मेकोमी ताम्बु डा लुक्तीक तेल नु ब्रोवशो रिना पाइब धूप जोक्ब मुरुम सेल्शो खोदेशो पा सेल्लु।

## 38

चोशा चढ़ेतीके सेल्लो

प्रस्थान २७:१-८; प्रस्थान ३०:१८-२१

- 1 मिनु बेचालेलमी बोल्यो शी के चोशा चढ़ेतीके सेल्लु। मेको ५ कुबीत लाइशो नु ५ कुबीत ब्रेम्शो, ४ पाटे नु कुबीत सां ग्येथ लाइशो पा सेल्लु।  
 2 आ ४ सुरमी ग्रोव सेल्लु। मेको ग्रोवपुकी मेको चढ़ेतीक फलेक का केन सेल्शा, कांसामी गिल्लु।  
 3 चढ़ेतीके कली माल्लो मारेड मारेड कांसा के सेल्लु। पुलु वोइक्तीक बोसपुकी, पुलु ताप्तीकपुकी, बुइक्तीक बोसपुकी, श्ये गुंडतीक कांटापुकी नु मी कोइला कुर पतीकपुकी सेल्लु।  
 4 चोशा चढ़ेतीक कली कुबीत का नु आधा डा पा ग्येथ पा मी तिक्तीक कांसा के जाली सेल्लु। कुबीत का ०.५ मिटर, हात का खोदेशो बाक्व।  
 5 कुरतीक कोक्के शुइक्चा कली, ४ ओटा मुन्द्रा सेल्शा, आ ४ सुरमी क्येप्ताक्व।  
 6 बोल्यो शी के कुरतीक कोक्के निक्की सेल्शा, कांसामी गिल्लु।  
 7 चढ़ेतीक कुरचा कली मेको कोक्के मुन्द्राम शुइक्ताक्व। फलेक के सेल्शो चोशा चढ़ेतीके आगाम श्येथ बाक्शो बाक्त।

चिक्तीके ठेयब बोस सेल्लो

- 8 बेचालेलमी कांसा के चिक्तीक ठेयब बोस नु आ निप्पाइक्तीके सेल्लु। मेको गुम्तीक ताम्बु ओव्रतीकेम गेय पाइब मीश मुर आन कांसा के ऐना के सेल्लु।

ताम्बु आ लाइगा

प्रस्थान २७:९-१९

- 9 मिनु बेचालेलमी ताम्बु आ लाइगा थरपु हिरचा कली रिम्शो पा किरशो सुती श्येले के वा प्रोवपाइक्तु। मेको फारतीक दक्खिन गे सहे का कुबीत लाइशो पा सेल्लु। कुबीत का ०.५ मिटर खोदेशो बाक्व।  
 10 मेको फारतीक ग्याइक्पाइक्चा कली खाल का डा थाम नु खाल का डा कांसा के राप्पाइक्तीके के सेल्लु। मुन्द्रापुकी नु कोक्केपुकी चहिं चांदी के सेल्लु।  
 11 मिनु मोदेशो पा उत्तर गे यो सहे का कुबीत लाइशो फारतीक प्रोवपाइक्तु। मेको कली २० ओटा थाम, २० ओटा कांसा के राप्पाइक्तीके सेल्लु। मुन्द्रापुकी नु कोक्केपुकी चहिं चांदी के सेल्लु। सहे का कुबीत ५० मिटर बाक्व।  
 12 पच्छिम गे ५० कुबीत डा फारतीक सेल्लु। मेको कली १० ओटा थाम नु १० ओटा राप्पाइक्तीके सेल्लु। आन मुन्द्रा नु कोक्केपुकी चहिं चांदी के सेल्लु।  
 13 मिनु लाइगा आ डोंइती पूर्व गे कली ५० कुबीत डा फारतीक वा सेल्लु।  
 14 ओव्रतीके पटटी का कली १५ कुबीत डा फारतीक वा सेल्लु। थाम नु राप्पाइक्तीके सां सां सेल्लु।  
 15 मिनु ओव्रतीके डा अर्को पटटी कली यो १५ कुबीत डा फारतीक वा सेल्लु। थाम नु राप्पाइक्तीके सां सां सेल्लु।  
 16 लाइगा डा एर ओंथ नेल्ल डा फारतीक रिम्शो पा किरशो सुती श्येले के प्रोवशो वा के सेल्लु।  
 17 मेको थाम आन राप्पाइक्तीक कांसा के बाक्तेक्म। थाम आन मुन्द्रा नु कोक्केपुकी चहिं चांदी के बाक्तेक्म। थाम आन पिया चांदीम गिल्लो बाक्तेक्म। थाम आन फ्रेंतीके नेल्ल चांदी के बाक्तेक्म।

18 मेको लाडगा डा ओव्रतीके डा फारतीक नीलो, प्याजी नु लल श्येले नु रिम्शो पा किरशो सुती श्येले के प्रोव्रशो वाम दारशो बुटा आप्शा सेल्लु। मेको आ लाइशशो २० कुबीत नु आ ग्येत्थ ५ कुबीत डा पा अर्को फारतीक नु उडक्थ उडक्थ पा सेल्लु। कुबीत का ०.५ मिटर, हात का खोदेशो बाक्ब।

19 मिनु ओव्रतीक डा ४ ओटा थाम नु आन ४ ओटा राप्पाइक्तीके कांसा के बाक्तेक्म। मेको फारतीक कली ब्वेक्तीक, थाम आन पिया नु फ्रेंतीके चांदी के बाक्तेक्म।

20 मिनु परमप्रभु यावे आ बाक्तीके नु लाडगा डा किला नेल्ल कांसा के बाक्तेक्म।

सुन चांदी नु कांसा नाक्शो

21 परमप्रभु यावे आ बाक्तीक सेल्चा कली मार मार माल्ला, मेको ब्रेक्शो बाक्त। मेको बाक्तीके कबल पशो सन्दोस वोइक्तीके बाक्त। मोसामी “मेको नेल्ल ब्रेक्चा माल्ल” दे अरेशो बाक्त। चढेब हारून आ तौ इथामार लेवी आन कली गेय पपाइक्ब बाक्त। गन्ती ४:२८

22 परमप्रभु यावेमी मोसा कली शेशो खोदेशो पा, यहूदा आ थर डा हुर आ चच, ऊरी आ तौ बेचालेलमी मारेड मारेड सेल्लु। प्रस्थान ३१:१-११

23 मेको नु दान आ थर डा अहीसामाक आ तौ ओहोली-आब यो बाक्त। मेको मार मार मुशा सेल्लिक गेय जोक्ब, ब्रेक्स ब्रेक्शा सेल्चा जोक्ब नु नीलो, प्याजी नु लल रड डा रिम्शो पा किरशो सुती श्येलेम दारशो बुटा आप्तीक गेय यो जोक्ब बाक्त।

24 परमप्रभु यावे आ बाक्तीक नु मेकेर माल्लो मारेड मारेड सेल्चा कली मुर आन गेशो सुन गिश दुम्माक्त दंशा हना, २९ टलेन्ट नु ७ सहे ३० शेकेल दुम्त। नेल्ल नाक्शा, हजार का किलो खोदेशो दुम्त। टलेन्ट का ३४ किलो बाक्ब। शेकेल का ११.५ ग्राम, तोला का खोदेशो बाक्ब।

25 डोंइती हिक्शो वोइश मुर आन रे पोक्शो चांदी सहे का टलेन्ट नु हजार का ७ सहे ७५ शेकेल दुम्त।

26 मिनु २० बर्स गाप्शो नु मेको क्येडा लाक्शो वोइश मुर ६ लाख हजार सां ५ सहे ५० जना बाक्तेक्म। मेको आन के का का पा आधा आधा शेकेल पोक्तेक्म। प्रस्थान ३०:१२-१६; गन्ती १:२६

27 ताम्बु आन फलेक राप्पाइक्तीक नु नेल्ल क्येडा चोत्रखो कोटा कली फारतीक डा थाम आन राप्पाइक्तीक कली सहे का टलेन्ट माल्ताक्व। सहे का राप्पाइक्तीके कली सहे का टलेन्ट माल्ताक्व। का कली टलेन्ट का माल्ताक्व।

28 मेको हजार का ७ सहे ७५ शेकेल चांदीमी ब्वेक्तीक सेल्शा, थाम आन पिया गिल्लिक नु आन फ्रेंतीकपुकी सेल्लेक्म।

29 मुर आन चाक्शो कांसा ७० टलेन्ट नु हजार निक्शी ४ सहे शेकेल दुम्शो बाक्त।

30 मेको के गुम्तीक ताम्बु डा ओव्रतीके डा थाम आन राप्पाइक्तीके, कांसा के चोशा चढेतीके, आ मी तिक्तीक जाली नु चढेतीक आ मारेड मारेड सेल्पाइक्व।

31 मिनु लाडगा डा थाम आन राप्पाइक्तीकपुकी, ठेयब ओव्रतीके डा थाम आन राप्पाइक्तीकपुकी, ताम्बु नु लाडगा डा किला नेल्ल सेल्पाइक्व।

## 39

चढेब आन वा सेल्शो

प्रस्थान २८:-

1 परमप्रभु यावेमी मोसा कली दोपा अरेवा, मोपा बेचालेल नु आ मुरपुकीमी हारून कली परमप्रभु यावे आ बाक्तीकेमी गेय पचा कली नीलो प्याजी नु लल रड डा श्येले के प्रोव्रशो फेक्तीक वा सेल्लेक्म।

चढेब आ कुचु तार वोइक्तीके

2 मेकोमी कुचु तार वोइक्तीके सुन के, नीलो, प्याजी नु लल रड डा श्येले नु रिम्शो पा किरशो सुती श्येले के प्रोव्रशो वा के सेल्लेक्म।

3 मिनु सुन तुप्शा, पात्लो सेल्शा, आइक्च पा खोइशशा, श्येले खोदेशो सेल्लेक्म। मिनु नीलो, प्याजी नु लल श्येलेमी रिम्शो पा किरशो सुती श्येले के प्रोव्रशो वा दारशो बुटा आप्शा सेल्लेक्म।

4 मेको कुचु तार वोइक्तीकेमी बलाम सुम्तीके निक्शी सेल्शा, निम्फा पटटी वोइक्ताक्म।

5 मिनु आ पाइक्तीके मेको कुचु तार वोइक्तीके का रेन सेल्लेक्म। मेको खाल का डा पा रिम्शो पा सेल्लेक्म। मेको पाइक्तीके सुन, नीलो, प्याजी नु लल रड डा श्येले नु रिम्शो पा किरशो सुती श्येले के प्रोव्रशो वा के सेल्लेक्म। परमप्रभु यावेमी मोसा कली दोपा अरेवा, मोपा सेल्लेक्म।

6 मिनु मेकोमी ओनीक्स हीरा निक्शी चाक्शा, इस्राएल आ तौ आन नें छाप खोदेशो पा हीराम मुशा ब्रेक्शा सुनम क्येप्ताक्म।

7 मेको हीरा निक्शी कुचु तार वोइक्तीक आ बला डा टुक्रा तारी फेरतेक्म। मिनु मेको हीरा इस्राएल आ तौ आन कली मिम्चा कली बाक्ब। परमप्रभु यावेमी मोसा कली दोपा अरेवा, मोपा सेल्लेक्म। प्रस्थान २८:१२

निसाफ पतीक झोला

8 मेकोमी निसाफ पतीके ऊरीम नु थुम्मीम वोइक्तीक झोला सेल्पाइक्व। कुचु तार वोइक्तीके खोदेशो पा सुन, नीलो, प्याजी नु लल श्येले नु रिम्शो पा किरशो सुती के प्रोव्रशो वा के दारशो पा सेल्लेक्म।

9 मेको खेयप का मुक्शोनु, बित्ता का लाइशशो नु बित्ता का ब्रेम्शो ४ पाटे पा सेल्लेक्म।

10 मिनू ४ लस्कर हीरा सुनम का का पा क्येप्ताकम। डोंइती डा लस्कर लल मानीक माइश्शो हीरा, हाव पुशपराज माइश्शो हीरा नु गिगी बेरूज माइश्शो हीरा क्येप्ताकम।

11 मेको आ नोले डा लस्कर लल फिरोजा माइश्शो हीरा, बुश नीर माइश्शो हीरा नु बुश नु नीलो पन्ना माइश्शो हीरा क्येप्ताकम।

12 मेको आ नोले डा लस्कर गिगी नु नीलो रड ब्वाइश्शो रिम्शो टल्केशो नीलमनी माइश्शो हीरा, गिगी हाकीक माइश्शो हीरा नु प्याजी रड डा कटेला माइश्शो हीरा क्येप्ताकम।

13 मिनू नेल्ल क्येडा नोले डा लस्कर पीतमनी माइश्शो हीरा, लल रड डा ओनीक्स नु नीलो बिलौरा माइश्शो हीरा क्येप्ताकम। मोपा हीरा नेल्ल कली सुनम क्येप्ताकम।

14 मेको हीरा १२ ओटा बाक्तेकम। मिनू इसाएल आ तौ आन नें का का पा मेको आन तार छाप थोकशो खोदेंशो पा मुशा ब्रेक्शो बाक्तेकम। हीरा का आ तारी थर का आ नें ब्रेक्शो बाक्तेकम।

15 मेको निसाफ पतीक झोला कली क्येख सुन के डोरी किरशो खोदेंशो पा सिक्की सेल्लेकम।

16 मेकोपुकीमी निसाफ पतीक झोला कली सुन के ग्याइक्तीक निक्शी नु मुन्द्रा निक्शी चेम्तेकम। मिनू मेको मुन्द्रा निसाफ पतीक झोला आ सुर निक्शीमी वोइक्तेकम।

17 मेकोपुकीमी सुन के सिक्की निक्शी निसाफ पतीक झोला आ सुरम वोइश्शो मुन्द्रा निक्शीमी लिक्ताकम।

18 मेको सिक्की निक्शी चढेब आ कुचु तार वोइश्शो वा आ बला डा हीरा क्येप्शो सुनम हेक्ताकम।

19 मेकोपुकीमी सुन के मुन्द्रा निक्शी सेल्लेकम। मेको निक्शी निसाफ पतीके ऊरीम नु थुम्मीम वोइक्तीक झोला आ उड आगा गे पाइक्ताकम। मोपा मेको झोला कुचु तार वोइक्तीके वा आ तार बाक्तेकम।

20 मेकोपुकीमी लेंशम सुन के मुन्द्रा निक्शी सेल्लेकम। कुचु तार वोइक्तीके आ बला सुम्तीके उड डा सुरम वोइक्तेकम। दारपाइश्शो पाइक्तीके आ तारी क्येप्ताकम।

21 मिनू मेको निसाफ पतीके ऊरीम नु थुम्मीम वोइक्तीक झोला आ मुन्द्रामी नीलो डोरीम लिक्शा, कुचु तार वोइक्तीक वामी पाइक्ताकम। मोपा मेको निसाफ पतीके झोला दारपाइश्शो पाइक्तीक तार बाक्शो कुचुम वोइक्तीक वा रे एर ओंथ मयाक्सेकल, दे पाइक्ताकम। परमप्रभु यावेमी मोसा कली दोपा अरेवा, मोपा सेल्लेकम।

कुचु तार वोइक्तीके आगा डा वा

22 मिनू मेको कुचु तार वोइक्तीके आगा फेक्तीक नेल्ल नीलो प्याजी रड डा वा के फेरतेकम।

23 मिनू पिया खीतीक पोत्रला सेल्लेकम। मेको पोत्रला आ एर ओंथ मगाक्वा डा पा आ सुर थम बोल्पो पा प्रोत्रतेकम।

24 मेको फेक्तीके आ उड डा सुर एर ओंथ गे नीलो, लल नु प्याजी रड नु रिम्शो किरशो सुती श्येले के प्रोत्रशो वा के सेल्लो दारीम क्युक्शा सेल्लेकम।

25 मिनू मेकोपुकीमी क्येख सुन के आइक्च किडगो सेल्लेकम। फेक्तीक उड गे किडगो का दारीम का खाक्शा क्युक्तेकम।

26 किडगो का दारीम का नु किडगो का दारीम का पा खाक्शा, बिर हिरशा क्युक्तेकम। मेको परमप्रभु यावे आ डोंइती गेय पची ना फेक्तीक वा दुम्त। परमप्रभु यावेमी मोसा कली दोपा अरेवा मोपा सेल्लेकम।

आगा डा फेक्तीके सेल्लो

27 हारून नु आ तौ आन कली रिम्शो पा किरशो सुती श्येले के प्रोत्रशो वा के फेक्तीक यो सेल्लेकम।

28 रिम्शो पा किरशो सुती श्येले के प्रोत्रशो वा के पियाम रुक्तीक नु गुक्तीक ताकी नु सुरुवाल सेल्लेकम।

29 रिम्शो पा किरशो सुती श्येले के प्रोत्रशो वा के नीलो, प्याजी नु लल रड डा श्येलेमी दारशो बुटा आप्शो किप्तीकपुकी सेल्लेकम। परमप्रभु यावेमी मोसा कली दोपा अरेवा, मोपा सेल्लेकम।

कुप्फीम पांडतीके सेल्लो

30 मेकोपुकीमी क्येख सुन के फू खोदेंशो पा कुप्फीम पांडतीके चेम्तेकम। मेकर छाप मुशो खोदेंशो पा “परमप्रभु यावे कली ला” दे मुशा ब्रेक्ताकम। प्रस्थान २९:६; प्रस्थान २७:३६; लेवी ८:९; जकरिया १४:२०;

31 कुप्फीम पांडतीके कली पियाम गुक्तीकेमी नीलो श्येलेमी फ्रेताकम। परमप्रभु यावेमी मोसा कली दोपा अरेवा, मोपा सेल्लेकम।

मोसामी ताम्बु डा गेय कोत्रशो

32 मिनू परमप्रभु यावे आ बाक्तीक गुम्तीक ताम्बु डा गेय नेल्ल नुम्त। परमप्रभु यावेमी मोसा कली दोपा अरेवा, मोपा इसाएल डा मुरपुकीमी नेल्ल सेल्लेकम।

33 मिनू मेकोपुकीमी परमप्रभु यावे आ बाक्तीक नु आ मारेइ मारेइ मोसा आ बाक्तीकेमी चाक्तेकम। मार मार चाकगमे बाक्तेक देशा हना, ताम्बु नु आ ग्योब नेल्ल, ब्वेक्तीक, फलेक, लाइश्शो कोक्के, थाम नु राप्पाइक्तीकपुकी,

34 लल रडम नुप्शो सांड आ कुशुल के सुम्तीके, नेल्ल क्येडा रिम्शो कुशुल के सुम्तीके, फारतीके,

35 कबल पशो सन्दोस, मेको आ कुरतीक कोक्के नु सुम्तीके,

36 टेबलम वोइक्चा माल्शो मारेइ मारेइ नु कोंइतीक शोब्ले,

37 क्येख सुन के बत्ती दातीके नु आ दियारी आन कली ठीक सेल्लेकी थोत्रक नु बत्ती कली तेल,

38 सुन के चढेतीक, लुक्या कली तेल, बोत्रशो रिना पाइब धूप, ताम्बु ओत्रतीके डा फारतीक वा,

39 कांसा के चढेतीक, मेको आ कांसा के मी तिक्तीक जाली, कुरतीक कोक्के नु चढेतीक आ मारेइ मारेइ, चिक्तीक ठेयब बोस नु मेको निप्पाइक्तीके,

- 40 ताम्बु आ लाङगा डा फारतीक नु थामपुकी, आन राप्पाइक्तीकपुकी, लाङगा ओव्रतीक डा फारतीक वा, आ फ्रेंतीकपुकी नु किलापुकी, मिनु परमप्रभु यावे आ बाक्तीक गुम्तीक ताम्बु डा गेय पचा कली मारेड मारेड नेल्ले,  
 41 परमप्रभु यावे आ बाक्तीक डा गेय पचा कली हारून कली फेक्तीक वा नु आ तौ आन कली परमप्रभु यावे कली चढेब दुम्चा कली आन फेक्शा गेय पतीके वा नेल्ल चाक्तेकम।  
 42 परमप्रभु यावेमी मोसा कली दोपा अरेवा, मोपा इस्राएल डा मुरपुकीमी सेल्लेकम।  
 43 मिनु मोसामी मेको नेल्ल कोव्रतु। मिनु परमप्रभु यावेमी दोपा अरेवा, मोपा ठीक सेल्लो तशा, मोसामी मेको नेल्ल आन कली आसीक गेपु।

## 40

गुम्तीक ताम्बु कीचा शेंशो

- 1 मिनु परमप्रभु यावेमी मोसा कली  
 2 “डोंइती डा महिना डा डोंइती नाक्ती, आं बाक्तीके गुम्तीक ताम्बु कीडो। प्रस्थान ४०:१७; प्रस्थान १२:२; प्रस्थान १९:१  
 3 गे कबल पशो सन्दोस आगाम वोइश्शा, फारतीक वाम फारदो।  
 4 टेबल ओइशा, मेको तारी मार मार वोइक्चा माल्बा, ठीक पा वोतो। मिनु बत्ती दातीके ओइशा आ दियारी दाडो।  
 5 सुन के धूप चोशा चढेतीके कबल पशो सन्दोस आ डोंइती वोतो। आं बाक्तीक आ ओव्रतीक डा फारतीक वा क्युकको।  
 6 गुम्तीक ताम्बु आ ओव्रतीक आ डोंइती चोशा चढेतीके वोतो।  
 7 गुम्तीक ताम्बु नु चढेतीक आस दातेम चिक्तीक ठेयब बोस वोइश्शा, ब्वाक्कुम प्रिदो।  
 8 लाङगा डा थाम वोइश्शा, एर ओंथ हिरशा फारतीक वा नु ओव्रतीक डा फारतीक वा क्युकको।  
 9 मिनु गे लुक्या कली तेल चाक्शा, आं बाक्तीक नु मेकेर डा मारेड मारेड आन कली ‘परमप्रभु यावे केन बाक्ब’ दे तेल लुकतो। मोपा मेको नेल्ल आं के दुम्नीम।  
 10 चोशा चढेतीक नु मेको आ मारेड मारेड आन कली यो ‘परमप्रभु यावे केन बाक्ब’ दे तेल लुकतो। मोपा मेको नेल्ल यो आं के दुम्नीम।  
 11 चिक्तीक ठेयब बोस नु मेको आ निप्पाइक्तीके कली यो तेल लुकतो। मिनु मोपा मेको आं के दुम्ब।  
 12 मिनु हारून नु आ तौ आन कली, गुम्तीक ताम्बु डा ओव्रतीकेम चाक्शा चिक्तो।  
 13 आं कली चढेब दुम्पाइक्चा कली हारून कली चढेतीक वा फेक्पा, तेल लुकशा आं कली जिम्मा गेयी।  
 14 आ तौ आन कली यो चाक्शा, वा फेक्तो।  
 15 आन आफ कली खोदेशो पा मेको आन कली यो तेल लुकतो। मेकोपुकी यो चढेब दुम्शा, आं गेय पचा माल्नीम। मेको तेल लुकतीके आन चच युड आन पाला नेल्लेमी गेना हना यो आं कली चढेब दुम्नीम” दैत।  
 16 मिनु परमप्रभु यावेमी मोसा कली दोपा अरेवा, मोपा पापु।

गुम्तीक ताम्बु कीशो

- 17 इजीप्त रे गाक्मा आ नोले जाक्शो बर्स आ डोंइती डा महिना, डोंइती डा नाक्ती परमप्रभु यावे आ बाक्तीक ताम्बु कीतेकम।  
 18 मोसामी परमप्रभु यावे आ बाक्तीक ताम्बु कीशा, राप्पाइक्तीकपुकी वोइक्कु। मिनु फलेक थारशा, लाइश्शो कोक्के शुइश्शा, थाम राप्पाइक्कु।  
 19 परमप्रभु यावे आ बाक्तीक तारी सुम्तीके यो कोप्ताक्व। परमप्रभु यावेमी मोसा कली दोपा अरेवा, मोपा पापु।  
 20 मिनु मोसामी परमप्रभु यावे आ अरेशो लोत्र मुशा ब्रेक्शो फुल्लु कबल पशो सन्दोसम कुर पापु। मिनु कबल पशो सन्दोसम कुरतीक कोक्के शुइक्ताक्व। मिनु मेको आ तार सुम्तीकेम सुम्तु।  
 21 मेको कबल पशो सन्दोस परमप्रभु यावे आ बाक्तीके ओइशा, फारतीक वामी फारताक्व। परमप्रभु यावेमी मोसा कली दोपा अरेवा, मोपा पापु।  
 22 मोसामी टेबल कली गुम्तीक ताम्बुम ओइशा, फारतीक वा आ डोंइती उत्तर गे वोइक्कु।  
 23 टेबल तारी परमप्रभु यावे आ डोंइती कोइतीक शोब्ले वोइक्कु। परमप्रभु यावेमी मोसा कली दोपा अरेवा, मोपा पापु।  
 24 टेबल नु एर ओंथ पा दक्खिन गे बत्ती दातीक कली गुम्तीक ताम्बुम वोइक्कु।  
 25 परमप्रभु यावे आ डोंइती दियारी दातु। मिनु परमप्रभु यावेमी मोसा कली दोपा अरेवा, मोपा पापु।  
 26 मिनु मोसामी सुन के सेल्लो धूप चोशा चढेतीके कली गुम्तीक ताम्बु डा फारतीक वा आ डोंइती वोइक्कु।  
 27 मिनु मेकेर ब्रोव्रशो रिना पाइब धूप चोपु। परमप्रभु यावेमी मोसा कली दोपा अरेवा, मोपा पापु।  
 28 नोले ताम्बु डा ओव्रतीकेम फारतीक वा क्युकु।  
 29 मिनु चोशा चढेतीके परमप्रभु यावे आ बाक्तीके गुम्तीक ताम्बु आ ओव्रतीकेमी वोइक्कु। मिनु मेकेर चोशा चढेतीक नु अन्न चढेतीके चढेपु। परमप्रभु यावेमी मोसा कली दोपा अरेवा, मोपा पापु।  
 30 मोसामी गुम्तीक ताम्बु नु चढेतीक आस दातेमी चिक्तीक ठेयब बोस वोइश्शा, चिक्चा कली ब्वाक्कुम प्रिताक्व।  
 31 मिनु मोसा, हारून नु हारून आ तौपुकीमी आन गुड खोइली चिक्साक्व।

32 युम्तीक ताम्बुमी ओव्रशा चढ्देतीकेम लमानु, आन गुड खोडली चिक्चा माल्तेक्म। परमप्रभु यावेमी मोसा कली दोपा अरेवा, मोपा पाप्तु।

33 मोसामी युम्तीक ताम्बु नु चढ्देतीक आ लाडगा एर ओंथ नेल्ल थरपु हिरशा, आ ओव्रतीके डा फारतीक वा क्युक्तु। मोपा मोसामी युम्तीक ताम्बु डा गेय नेल्ल थुम्तु।

परमप्रभु आ बाक्तीकेम जाक्शो

34 मिनु गोस्सुमी युम्तीक ताम्बु सुम्तु। परमप्रभु यावे आ सक्ति नु छेडछेडमी मेको आ बाक्तीक ब्रीत। इजीकीएल ४३:१-९

35 मिनु मोसा युम्तीक ताम्बुमी ओव्रने मचब। मारदे हना मेको गोस्स मेको तारी बाक्शा, परमप्रभु यावे आ सक्ति नु छेडछेडमी आ बाक्तीक ब्रीत। गन्ती ७:८९

36 मेको गोस्स परमप्रभु यावे आ बाक्तीक तारी रे ग्येत्थ बोक्मेनु, इस्राएलीपुकी गाक्चा गोम्तेक्म। प्रस्थान १३:२१; गन्ती १:१५-२३; गन्ती १०:३४-३६; १राजा ८:१०-११; यसेया ४:५

37 मेको गोस्स ग्येत्थ मबोक्म सम्म इस्राएली मेक उड बाक्तेक्म।

38 नाक्ती परमप्रभु यावे आ गोस्स आ बाक्तीक तारी बाक्त। नाक्दो चहिं मेको गोस्स आगाम मी दुम्त। इस्राएली गोरशो रागीम गाक्मा सम्म मोदेशो दुम्स डा दुम्स पा नेल्लेमी ताम्तेक्म।



## लेवी

**ब्रेक्ब मुरः** साड परमप्रभु यावे आ मुर नु खीस्त सेंसे नोले डा थमा सुडक्वपुकीमी एको किताब मोसामी ब्रेक्शो बाक्व, देंनीम। मोसामी परमप्रभु यावे आ देंशो नेल्ल ब्रेक्शो बाक्व।

**गेना ब्रेक्शोः** एको किताब ५० नाक्व गोरशो रागीम गाक्तीक डा लोत्र ला बाक्व। इस्राएली इजीप्त रे गूशो बर्स निकशी नोले, सीनै डांडा आ नेक्था बाक्तेक्म। मोसामी डांडाम बाक्शा, परमप्रभु यावे आ अरेशो नेल्ल ब्रेक्शो बाक्व। प्रस्थान ४०:१-१७; गन्ती १०:११

**मार ब्रेक्शोः** मुर दोपा परमप्रभु यावे नु गारचा डा दुम्नीम एको किताबमी ब्रेक्शो बाक्व।

१. दोपा नु मार चढेचा, लेवी १:- ५:-
२. चढेब आन गेय, लेवी ६:- १०:-
३. ग्रांग्रा दिचा नु ग्रांग्रा मदिचा आ पर्वम शेंशो, लेवी ११:- लेवी १६:-
४. परमप्रभु यावे का बाक्व। मेको आ नोले ला खोडक्चा, दे ब्रेक्शो बाक्व। लेवी १७:- लेवी २७:-

चोशा चढेतीक  
लेवी २६:१-६

- 1 मिनू परमप्रभु यावेमी गुम्तीक ताम्बु रे ब्रेशशा मोसा कली
- 2 गे "इस्राएली आन कली 'इन दाते डा सुडम परमप्रभु यावे कली इन बी ब्यफ, क्यारश भेडा चढेनीनु, आंम इन बगाल रे चढेने।
- 3 मेको चढेशो बी ब्यफ चोशा चढेतीक बाक्व हना, मेकोमी मारेड मटुम्शो थमा रिम्शो बाछा चढेचा माल्ब। मेकोमी मेको गुम्तीक ताम्बु आ ओत्रतीकेम चाक्चा माल्ब। मिनू मेको इन पर्वम परमप्रभु आ डोंइती ब्रतीके दुम्ब। लेवी १७:४
- 4 मेकोमी आ गुड चोशा चढेतीक बस्तु आ पिया तारी वोडक्चा माल्ब। मिनू मेको परमप्रभु यावे आ डोंइती ब्रशा मेको मुर आ पर्वम पाप क्याम्तीक गेय बाक्व।
- 5 मेकोमी मेको बाछा कली परमप्रभु यावे आ डोंइती क्योरशा साडक्चा माल्ब। मिनू चढेब हारून आ तौपुकीमी मेको हुश चढेतीक आ एर ओंथ बुडक्चा माल्नीम। मेको चढेतीक गुम्तीक ताम्बु आ ओत्रतीकेम बाक्व।
- 6 मिनू मेको नोले मेकोमी मेको चोशा चढेतीक आ कुशुल उक्शा टुक्रा टुक्रा पा चेक्चा माल्ब। लेवी ७:८
- 7 चढेब हारून आ तौपुकीमी चढेतीक तार मी सुडशशा मेको तार शी गारपाडशशा वोडक्चा माल्नीम।
- 8 मिनू चढेब हारून आ तौपुकीमी चढेतीके तारी वोडशशा शी आ तार मेको चेक्शो श्ये पिया नु बोंसो गार पा वोडक्चा माल्नीम।
- 9 मेकोमी मेको आ गा कयी नु खोडली चहिं ब्वाक्कुम मुरचा माल्नीम। मिनू चढेबपुकीमी मेको नेल्ल कली चढेतीकेमी चोचा माल्नीम। मेको परमप्रभु यावे कली आ दाक्शो ब्रोत्रशो रिना पाडशशा मीम चोशा चढेतीके बाक्व। उत्पत्ती ८:२१; प्रस्थान २९:१८
- 10 मेको आ चोशा चढेतीक आ बगाल डा क्यारश भेडा बाक्तेक्म हना, मेकोमी मारेड मटुम्शो थम रिम्शो बोका, सांड चढेचा माल्नीम।
- 11 मेकोमी परमप्रभु यावे आ डोंइती चढेतीक आ उत्तर गे मेको क्योरशा साडक्चा माल्ब। मिनू चढेब हारून आ तौपुकीमी मेको आ हुश चढेतीक आ एर ओंथ बुडक्चा माल्नीम।
- 12 मेको चढेबमी मेको चढेशो कली टुक्रा टुक्रा पचा माल्नीम। आ पिया बोंसो सुन्दा चेक्चा, श्ये नु काथा शी तारी गारपाडशशा, चढेतीक डा मी तारी वोडक्चा माल्ब।
- 13 मेकोमी मेको आ गा कयी नु खोडली चहिं ब्वाक्कुम मुरचा माल्नीम। मिनू चढेबपुकीमी मेको नेल्ल कली चढेतीकेमी चोचा माल्नीम। मेको परमप्रभु यावे कली आ दाक्शो ब्रोत्रशो रिना पाडशशा मीम चोशा चढेतीके बाक्व।
- 14 मिनू परमप्रभु यावे कली चोशा चढेतीके चिक्व बाक्तेक्म हना, बुकुर कि परवा चढेचा माल्नीम।
- 15 चढेबमी मेको चढेतीक आ नेक्था मेको आ पिया प्रोडशशा साडक्चा माल्ब। मिनू मेको कली चढेतीकेमी चोचा माल्ब। मिनू आ हुश चहिं चढेतीक आ नेक्था चिरचा माल्ब।
- 16 मेकोमी मेको आ सोके फेशशा चढेतीक आ पूर्व गे डा पुलु ताडक्तीकेम ताडक्चा माल्नीम।
- 17 मेकोमी मेको कली मचेक्थु, फ्रां आस दाते रे चेट्या माल्ब। मिनू चढेबमी चढेतीक डा मी तार डा शीम मेको चोचा माल्ब। मेको परमप्रभु यावे कली आ दाक्शो ब्रोत्रशो रिना पाडशशा मीम चोशा चढेतीके बाक्व।

## 2

अन्न चढेतीक  
लेवी ६:७-११

- 1 मिनू सुड मुरमी परमप्रभु यावे कली अन्न चढेचा थुं पात्तु हना, मेको अन्न चढेतीक थम रिम्शो फस बाक्चा माल्ब। मिनू मेकोमी मेकर तेल लुक्शा, धूप सुप्चा माल्नीम। लेवी ७:१०; गन्ती १५:४

2 मिनू मेकोमी मेको चढेब हारून आ तौ आन बाक्तीके चाक्चा माल्ब। मिनू चढेबमी मेको तेल नु धूप ब्वाइश्शो रिम्शो फस मुठी का हुइश्शा, मीम चोचा माल्ब। मिनू मेको परमप्रभु यावे कली आ दाक्शो ब्रोव्रशो रिना पाइश्शो मीम चोशा चढेतीके बाक्ब।

3 मेको अन्न चढेशो रे लीशो चहिं हारून नु आ तौ आन के दुम्ब। मेको परमप्रभु यावे कली मीम चोशा चढेतीक डा नेल्ल क्येडा चोत्रखो चोशा चढेतीक बाक्ब। लेवी ६:२२

4 अन्न चढेतीक चाक्चा थुं पाम्नेक्म हना, चोशो शोब्ले चाक्चा माल्नीम। मेको शोब्ले रिम्शो फस के, तेलमी निशा बोरब ओख्ती मसुप्थु चोचा माल्नीम। बटुक तेलमी निशा बोरब ओख्ती मसुप्थो दुम्चा माल्नीम। तेलम मनिशो बाक्त हना, शोब्ले कली तेल खेक्शो बाक्चा माल्ब। लेवी ७:९

5 मिनू इन चढेतीक अन्न बाक्त हना, तेल ब्वाइश्शो बोरब ओख्ती मसुप्थो रिम्शो फस बाक्चा माल्ब।

6 मेको आइक्च आइक्च सेल्शा, तेल लुक्चा माल्ब। मेको अन्न चढेतीक बाक्ब।

7 इन चढेतीक दिउरेम क्येशो अन्न चढेतीक बाक्त हना, मेको तेलम क्येशो रिम्शो फस के दुम्चा माल्ब।

8 मोपा चोशो क्येशो अन्न चढेतीक परमप्रभु यावे आ बाक्तीक लाइक्चा माल्नीम। मिनू मेको चढेब आन बाक्तीक चाक्मे नोले चढेबमी मेको चढेतीक आ नेक्था चाक्चा माल्ब।

9 मिनू चढेबमी मेको अन्न चढेतीक रे मुठी का हुइश्शा, मेको चढेतीक डा मीम चोचा माल्ब। मेको परमप्रभु यावे कली आ दाक्शो ब्रोव्रशो रिना पाइश्शो मीम चोशा चढेतीके बाक्ब।

10 मेको अन्न चढेतीके आ लीशो चहिं हारून नु आ तौ आन के दुम्ब। मेको परमप्रभु यावे कली मीम चोशा चढेतीक डा नेल्ल क्येडा चोत्रखो चोशा चढेतीक बाक्ब।

11 गेपुकीमी परमप्रभु यावे कली अन्न चढेतीकेमी गेनायो बोरब ओख्ती सुप्चा मदुम्ब। परमप्रभु यावे कली मीम चोशा चढेतीकेमी बोरब ओख्ती नु खुदो गेनायो चोचा मदुम्ब।

12 खुदो नु बोरब ओख्ती सुप्थो चढेतीक लाइश्शा परमप्रभु यावे कली चढेने चाप्नीनी। तन्न मेको कली चढेतीक मीम हुम्चा मदुम्ब। गन्ती १८:१२-१३; २इतिहास ३१:५

13 गेपुकीमी इन अन्न चढेतीक नेल्ल हिक्सी सुप्था, हिक्सी डाम्शो सेलीन। इन परमप्रभु आ कबल डा अन्न चढेतीकेमी हिक्सी मडाम्शो मदुम्ब। इन चढेतीक नेल्लेमी हिक्सी सुप्थो चढेचा माल्नीनी। गन्ती १८:१९; २इतिहास १३:५

14 परमप्रभु यावे कली डोंइती मीशो अन्न चढेचा थुं पाइतीनी हना, इन डोंइती मीशो नक बाला आन अन्न मीम क्रोइश्शा चढेन। ब्यवस्था २६:२-११

15 मेको तारी तेल लुक्शा, धूप वोइक्चा माल्ब। मेको अन्न चढेतीक बाक्ब।

16 मिनू चढेबमी मेको तेल लुक्शा, धूप वोइश्शो रे मुठी का हुइश्शा, मीम चोचा माल्ब। मेको परमप्रभु यावे कली मीम चोशा चढेतीक बाक्ब।

### 3

दुशा बाक्चा आ पर्वम चढेतीक

लेवी ७:११-२१, २८-३४

1 सुइ आन चढेतीके दुशा बाक्चा आ पर्वम बाक्त हना, मेकोमी बी ब्यफ रे का चढेब हना, परमप्रभु यावे आ डोंइती मारेइ मदुम्शो थम रिम्शो बी कि ब्यफ चढेचा माल्ब।

2 मेकोमी आ गुइ आ चढेतीक बस्तु आ पिया तार वोइक्चा माल्ब। मिनू गुम्तीक ताम्बु आ ओत्रतीक आ डोंइती मेको कली क्योरशा साइक्चा माल्ब। मिनू चढेब हारून आ तौपुकीमी मेको आ हुश लाइश्शा चढेतीक आ एर ओंथ ब्रुइक्चा माल्नीम।

3 मेकोमी दुशा बाक्चा आ पर्वम परमप्रभु यावे कली मीम चोशा चढेतीक चढेचा माल्ब। गा कयी आ तार डा नु मेको कली गिल्लो बोंसो नेल्ल चढेचा माल्ब।

4 आ चिच निम्फा नु मेको आ तार नु आ क्रातोम बाक्शो बोंसो, नु आइदीम क्येप्शो बोंसो नेल्ल गुंइचा माल्नीम।

5 मिनू हारून आ तौपुकीमी मेको नेल्ल कली चढेतीके डा मी तार डा शीम वोइश्शा, चोचा माल्नीम। मेको परमप्रभु यावे कली आ दाक्शो ब्रोव्रशो रिना पाइश्शो मीम चोशा चढेतीक बाक्ब।

6 मेकोमी आ दुशा बाक्चा आ पर्वम परमप्रभु यावे कली चढेतीके क्यारश भेडा रे का चढेब हना, मेकोमी मारेइ मदुम्शो थम रिम्शो क्यारश भेडा बाक्त हना यो, बोका सांड बाक्त हना यो, चढेचा माल्ब।

7 मेको आ चढेतीक भेडा का बाक्त हना, मेको परमप्रभु यावे आ डोंइती चाक्चा माल्ब।

8 मेकोमी आ गुइ आ चढेतीक भेडा आ पिया तार वोइक्चा माल्ब। मिनू गुम्तीक ताम्बु आ ओत्रतीक आ डोंइती मेको कली क्योरशा साइक्चा माल्ब। मिनू चढेब हारून आ तौपुकीमी मेको आ हुश लाइश्शा चढेतीक आ एर ओंथ ब्रुइक्चा माल्नीम।

9 मेकोमी दुशा बाक्तीक आ पर्वम चढेतीक भेडा आ बोंसो परमप्रभु यावे कली मीम चोशा चढेचा माल्ब। मेको बोंसो पाइश्शो मीलु नु क्रातो आ नेक्था रे नेल्ल गुंइचा माल्नीम। गा कयी आ तार डा नु मेको कली गिल्लो बोंसो नेल्ल चढेचा माल्नीम।

10 आ चिच निम्फा, मेको आ तार डा क्रातो डा बोंसो नेल्ल नु आ आइदीम क्येप्शो बोंसो नेल्ल गुंइचा माल्नीम।

11 मिनू चढेबमी मेको परमप्रभु यावे कली मीम चोशा जचा थोत्रक चढेतीक चढेचा माल्नीम।

12 मिनु दुशा बाक्चा आ पर्वम परमप्रभु यावे कली चढेतीक क्यारश का बाक्त हना, मेकोमी मेको परमप्रभु यावे आ डोंइती चाक्चा माल्ब।

13 मेकोमी आ गुड मेको क्यारश आ पिया तारी वोइक्चा माल्ब। मिनु मेको कली युम्टीक ताम्बु आ डोंइती क्यारश साइक्चा माल्ब। मिनु हारून आ तौपुकीमी मेको आ हुश चढेतीक आ एर ओंथ बुइक्चा माल्नीम।

14 मिनु मेकोमी मेको आ चढेतीके परमप्रभु यावे कली मीम चोशा चढेचा माल्ब। गा कयी सुमशो नु गिल्शो बोंसो नेल्ले,

15 आ चिच निम्फा, मेको आ तार डा क्रातो डा बोंसो नेल्ले नु आ आइदीम क्येपशो बोंसो नेल्ल गुंड्या माल्नीम।

16 मिनु चढेबमी ब्रोवशो रिना पाइशो जचा थोत्रक मेको मीम चोशा चढेतीकेमी चढेचा माल्ब। बोंसो नेल्ले परमप्रभु यावे के बाक्ब।

17 मिनु गेपुकीमी बोंसो नु हुश मब्वने। इन नोले डा पाला नेल्ल आन कली गेपुकी ते बाक्तीनी हना यो, गेना हना यो लीब अरेतीक बाक्ब' दे इस्राएली आन कली देनो" दे परमप्रभु यावेमी मोसा कली देत। लेवी ७:२३, २७; लेवी १७:१०-१४; उत्पत्ती ९:४; ब्यवस्था १२:१६, २३; प्रेरित १५:२०-२९

## 4

पाप पशो आ पर्वम चढेतीक

1 मिनु परमप्रभु यावेमी मोसा कली

2 "गे इस्राएली आन कली 'परमप्रभु यावेमी मपचा, दे शेंशो सुइ मुरुमी मतुइक्थु पाप पाप्तु हना,

3 मिनु तेल लुक्शो चढेबमी पाप पा, मुर आन कली दोस ताइब सेल्लु हना, मेकोमी आ पशो पाप आ पर्वम मारेइ मदुमशो थम रिमशो ब्यफ का परमप्रभु यावे आ डोंइती पाप पशो आ पर्वम चढेचा माल्ब।

4 मेकोमी मेको ब्यफ कली युम्टीक ताम्बु आ ओव्रतीक आ नेक्था परमप्रभु यावे आ डोंइती चाक्चा माल्ब। मेकोमी आ गुड मेको ब्यफ आ पिया तारी वोइक्चा माल्ब। मिनु मेको ब्यफ कली परमप्रभु यावे आ डोंइती साइक्चा माल्ब।

5 मिनु मेको तेल लुक्शो चढेबमी ब्यफ आ हुश इक्का हुइश्या युम्टीक ताम्बुमी चाक्चा माल्नीम।

6 मिनु चढेबमी आ ब्रेच्यो हुशेम खुमशा, मेको हुश परमप्रभु यावे आ ताम्बु आ आगा डा चोत्रखो कोठा आ बारेशो वाम आ नेक्था परमप्रभु यावे आ डोंइती ७ खेयप बुइक्चा माल्ब। लेवी ९:९

7 मिनु नोले चढेबमी मेको हुश युम्टीक ताम्बु आ आगामी बाक्शो धूप चढेतीके आ ग्रोवपुकीमी खेक्चा माल्ब। मेको ब्रोवशो रिना पाइशो धूप परमप्रभु यावे आ डोंइती चढेतीके बाक्ब। मिनु लीशो हुश नेल्ले युम्टीक ताम्बु आ ओव्रतीक डा चोशा चढेतीक आ पुंम मोइक्चा माल्ब। प्रस्थान ३०:१, ६; प्रस्थान ४०:६

8 मेकोमी पाप आ पर्वम चढेशो ब्यफ आ बोंसो नेल्ल शोल्चा माल्ब। गा कयी आ तार डा नु मेको कली गिल्शो बोंसो,

9 आ चिच निम्फा, मेको आ क्रातो तार डा बोंसो नेल्ले नु आ आइदीम क्येपशो बोंसो नेल्ल गुंड्या माल्नीम।

10 दुशा बाक्चा आ पर्वम चढेशो ब्यफ आ बोंसो गुंड्यो खोदेंशो पा शोल्चा माल्ब। मिनु चढेबमी मेको मीम चोशा चढेतीकेमी चढेचा माल्ब। लेवी ८:१७

11 तन्न ब्यफ आ कुशल, मेको आ श्ये नेल्ल, मेको आ पिया, खोइली नु मेको आ गा कयी गोबर सुन्दा,

12 ब्यफ आ लीशो नेल्ले मुर बाक्तीके रे डोन चोत्रखो पुलु ताइक्तीकेमी लाइश्या, शी तार वोइश्या चोचा माल्नीम। लेवी ६:४

13 इस्राएल डा मुर नेल्लेमी मतुइक्थु पाप पशो बाक्तेकम हना, परमप्रभु यावेमी मपचा दे शेंशो मारेइ पशो बाक्तेकम हना, मेको पाप मेको मुर आन दातेमी खुइशशो बाक्त हना यो, मेकोपुकी दोस ताइब दुमनीम। गन्ती १५:२२-२६

14 मिनु मेको आन पशो पाप गूमेनु, मेको इस्राएली नेल्लेमी पाप आ पर्वम चढेतीके ब्यफ चाक्शा युम्टीक ताम्बु आ डोंइती जाक्चा माल्नीम।

15 मिनु इस्राएल डा खाल्पा नेल्लेमी परमप्रभु यावे आ डोंइती मेको आन गुड ब्यफ आ पिया तारी वोइक्चा माल्नीम। मिनु मेको ब्यफ परमप्रभु यावे आ डोंइती साइक्चा माल्नीम।

16 मिनु नोले तेल लुक्शो चढेबमी मेको ब्यफ आ हुश इक्का युम्टीक ताम्बु आगा चाक्चा माल्नीम।

17 मिनु चढेबमी मेको आ ब्रेच्यो हुशेमी खुमशा, परमप्रभु यावे आ डोंइती बारेशो वा आ पुंमी ७ खेयप बुइक्चा माल्ब।

18 मिनु नोले मेकोमी युम्टीक ताम्बु आगाम बाक्शो धूप चढेतीक आ ग्रोवपुकीम परमप्रभु यावे आ डोंइती खेक्चा माल्ब। मिनु लीशो हुश नेल्ल युम्टीक ताम्बु आ ओव्रतीके आ डोंइती बाक्शो चोशा चढेतीक आ पुंम मोइक्चा माल्ब।

19 मेकोमी मेको आ बोंसो नेल्ल शोल्शा, चढेतीकेम चोचा माल्ब।

20 मेकोमी पाप आ पर्वम चढेशो ब्यफ कली दोदेंशो पामे, मेको ब्यफ कली यो मोदेंशोन पचा माल्ब। मोपा चढेबमी मेको आन पर्वम पाप क्याम्टीक गेय पाइब। मिनु मेकोपुकीम माफ ताइनीम।

21 मेकोमी मेको ब्यफ कली मुर बाक्तीके रे डोन गुंड्या लाइक्चा माल्ब। डोंइती डा ब्यफ चोशो खोदेंशो पा चोचा माल्ब। मेको इस्राएली आन पाप आ पर्वम चढेशो बाक्ब। लेवी ४:११-१२

22 मिनु सासन पाइब कामी मतुइक्थु, परमप्रभु यावेमी मपचा, दे शेंशो पाप पाप्तु हना, मेको दोस ताइब दुम्ब।

23 मिनु मेको आ पशो पाप तुइक्तेम नोले, मेकोमी मारेइ मदुमशो थम रिमशो बोका का चाक्चा माल्ब।

24 मिनु मेकोमी आ गुड मेको बोका आ पिया तार वोइक्चा माल्ब। मिनु तेकेर परमप्रभु यावे आ डोंइती चोशा चढेतीक साइक्तीमी, मेकेर रेन मेको साइक्चा माल्ब। मेको पाप आ पर्वम चढेतीके बाक्ब।

25 मिनु चढेबमी आ ब्रेच्यो हुशेमी खुमशा, चोशा चढेतीक आ ग्रोवपुकीम खेक्चा माल्ब। मेको लीशो हुश चोशा चढेतीक आ पुंम मोइक्चा माल्ब।

26 मेको आ बोंसो नेल्ले चढेतीक आ तार चोचा मालब। मेको दुशा बाक्तीक आ पर्वम चढेशो बोंसो खोदेशो पा चढेतीकेमी चोचा मालब। मोपा चढेबमी मेको आ पाप आ पर्वम पाप क्याम्तीक गेय पाडब। मिनु मेको माफ ताडब।

27 मिनु मुर आन दाते डा कामी मतुडक्थु पाप पाप्तु हना, परमप्रभु यावेमी मपचा, दे शेशो पाप्तु हना, मेको दोस ताडब दुम्ब।

28 मिनु मेको आ पशो पाप तुडक्तमे नोले, मेकोमी आ पशो पाप आ पर्वम चढेचा कली मारेड मटुम्शो थम रिम्शो क्यारश का चढेचा कली चाक्चा मालब। गन्ती १५:२७-२८

29 मिनु मेकोमी आ गुड मेको पाप आ पर्वम चढेतीक तार वोडक्चा मालब। मिनु मेको पाप आ पर्वम चढेतीके कली मेको चोशा चढेतीक आ नेक्था साडक्चा मालब।

30 मिनु चढेबमी आ ब्रेप्चो हुशेमी खुम्शा, चोशा चढेतीक आ ग्रोवपुकीम खेक्चा मालब। मेको लीशो हुश चोशा चढेतीक आ पुंम मोडक्चा मालब।

31 मेकोमी आ बोंसो नेल्ल दुशा बाक्चा आ पर्वम चढेशो आ बोंसो खोदेशो पा शोल्चा मालब। मिनु चढेबमी मेको चढेतीकेमी चोशा परमप्रभु यावे आ दाक्शो ब्रोत्रशो रिना पाडक्चा कली चोचा मालब। मोपा चढेबमी मेको आ पाप आ पर्वम पाप क्याम्तीक गेय पाडब। मिनु मेको माफ ताडब। लेवी ३:१४-१५

32 मेकोमी आ पाप आ पर्वम चढेचा कली भेडा चाक्तु हना, मारेड मटुम्शो थम रिम्शो भेडा चाक्चा मालनीम।

33 मिनु मेकोमी आ गुड मेको पाप आ पर्वम चढेतीक तार वोडक्चा मालब। मिनु तेकेर चोशा चढेतीक साडक्नीम, मेकेर मेको पाप आ पर्वम चढेतीके साडक्चा मालब।

34 मिनु चढेबमी आ ब्रेप्चो हुशेमी खुम्शा, चोशा चढेतीक आ ग्रोवपुकीम खेक्चा मालब। मेको लीशो हुश चोशा चढेतीक आ पुंम मोडक्चा मालब।

35 मेकोमी आ बोंसो नेल्ल दुशा बाक्चा आ पर्वम चढेशो आ बोंसो खोदेशो पा शोल्चा मालब। मिनु चढेबमी मेको चढेतीकेमी अरु चोशा चढेतीक नु परमप्रभु यावे कली चोचा मालब। मोपा चढेबमी मेको आ पशो पाप आ पर्वम पाप क्याम्तीक गेय पाडब। मिनु मेको माफ ताडब।

## 5

पाप आ पर्वम चढेतीक

1 मिनु मुर कामी मार मार तशा तुडशशा यो, सांकछी दुम्चा कली ब्रेत्मेनु, सांकछी दुम्चा कली मजाक्वा, मेकोमी आ तशो तुडशशो मदेंत हना, मेको आ पर्वम दोस ताडब दुम्ब। न्यायाधीस १७:२; हितोपदेस २९:२४

2 मिनु सुडमी ग्रांरा दिशो थोवक, बेक्शो ब्वाकी डा जन्तु, बेक्शो बस्तु भाव, बेक्शो ग्रांरा दिशो आडक्च ग्रेक्शा गाक्ब जन्तु थिप्तु हना, मेकोमी मतुडक्ताक्ब हना यो, मेको ग्रांरा दिशो दुम्शो बाक्ब। मिनु दोस ताडब दुम्शो बाक्ब।

3 मिनु मेकोमी मुर आन ग्रांरा दिशो थोवक थिप्तु हना, तेकोड मुर आन ग्रांरा दिशो सेल्शो थोवक थिप्तु हना, मेकोम मेको मतुडक्ताक्ब हना यो, मेको दोस ताडब दुम्ब। गन्ती १९:१३, २०

4 मिनु सुमी मारेड रिम्शो मरिम्शो ममिम्थु कसम जाप्तु हना, मारेड मतुडक्थु कसम जाप्तु हना, मिनु मेको रे मेको लोत्र खुडशशो बाक्त हना यो, मेकोमी तुडक्ता नोले मेको दोस ताडब दुम्ब।

5 मिनु मेको मुर आ पशो पाप तुडक्ता नोले, मेकोमी आ पशो पाप शोव्रचा मालब। लेवी १६:२१; गन्ती ५:७; यहोसु ७:२०

6 मेकोमी परमप्रभु यावे आ डोंडती आ पशो पाप आ पर्वम चढेचा कली आ बगाल रे भेडा बाक्त हना यो, क्यारश बाक्त हना यो, का चाक्चा मालब। मिनु चढेबमी मेको आ पशो पाप आ पर्वम पाप क्याम्तीक गेय पचा मालब।

7 तन्न मेकोमी भेडा चाक्ने मचाप्तु हना, मेको आ पशो पाप क्याम्तीक गेय पचा कली ढुकुर निक्शी कि परवा निक्शी परमप्रभु यावे आ डोंडती चाक्चा मालब। मेको का पाप आ पर्वम चढेचा कली नु का चोशा चढेचा कली चाक्चा मालब।

8 मेकोमी मेको चढेब आन बाक्तीक चाक्चा मालनीम। मिनु चढेबमी का कली पाप आ पर्वम डोंडती चढेचा मालब। मिनु मेको कली आ शूर रोप्चा मालब। तन्न मेको कली प्रोडक्चा मटुम्ब।

9 मिनु मेको चढेबमी चढेशो परवा आ हुश चढेतीक आ एर ओथ बुडक्चा मालब। मिनु लीशो हुश चढेतीक आ पुंम चिरचा मालब।

10 मिनु चढेबमी अर्को परवा चहिं परमप्रभु यावेमी डोंडती देशो खोदेशो पा चोशा चढेतीक चढेचा मालब। मोपा मेको चढेबमी मेको आ पाप आ पर्वम पाप क्याम्तीक गेय पचा मालब। मिनु मेकोम माफ ताडब।

11 तन्न ढुकुर निक्शी नु परवा निक्शी यो चाक्ने मचाप्तु हना, मेकोमी मार पाप पशो बाक्मे, मेको पाप आ पर्वम एफाह का डा १० भाग थम रिम्शो फस चाक्चा मालब। मेकोमी मेको फस तार तेल लुकचा नु धूप वोडक्चा मटुम्ब। मारदे हना मेको पाप आ पर्वम चढेतीके बाक्ब। एफाह पुक्तीके का बाक्ब। एफाह का २२ लिटर रिक्ब। मेको डा १० भाग २ लिटर नु डक्का खोड खोदेशो बाक्ब।

12 मेकोमी मेको चढेब आन बाक्तीक चाक्चा मालब। मिनु चढेबमी मेको मिम्चा कली मुठी का हुडशशा, परमप्रभु यावे कली मीम चोशा चढेतीकेम अरु नु चोचा मालब। मेको पाप आ पर्वम चढेतीक बाक्ब।

13 मोपा मेको चढेबमी मेको आ पाप आ पर्वम पाप क्याम्तीक गेय पाडब। मिनु मेकोमी माफ ताडब। मेको रे लीशो चहिं अन्न चढेशो खोदेशो पा चढेब आन के दुम्ब' दे इझ्राएली आन कली देनो" दे परमप्रभु यावेमी देत। लेवी २:३

गारचा आ पर्वम चढेतीक

लेवी ७:१-१०

14 मिनु लेशा परमप्रभु यावेमी मोसा कली

15 “सुइ मुरुमी प्रेशा, परमप्रभु यावे आ देशो मटिथु, पाप पाप्टु हना, मेको आ बगाल रे मारेइ मदुमशो थम रिमशो ताम्बु डा चांदी के शेकेलम फाइक्या कली सांड का मेको पाप आ पर्वम चढेचा कली परमप्रभु यावे आ डोंइती चाक्या माल्ब। मेको गारचा आ पर्वम चढेतीक बाकब। शेकेल का ११.५ ग्राम बाकब। चांदी नु सुन के क्येट बाकत।

16 मेकोमी गारचा कली प्रेशो बाकत हना, परमप्रभु यावे कली गेतीकेम ५ भाग तेम्चा माल्ब। मिनु मेको चढेब कली गेचा माल्ब। मिनु चढेबम मेको पाप गारचा आ पर्वम चढेशो सांड लाइशशा पाप क्याम्तीक गेय पचा माल्ब। मिनु मेको माफ ताइब दुम्ब। लेवी ५:२३-२४; लेवी २२:१४; लेवी २७:१३;

17 सुइ मुरुमी परमप्रभु यावेमी मपचा, दे शेशो पाप्टु हना, मेकोमी मेको मतुडक्ताक हना यो, मेको दोस ताइब दुमशो बाकब। मिनु मेको सजाइ ताइब दुम्ब।

18 मेकोमी चढेब आन बाक्तीकेम मारेइ मदुमशो थम रिमशो ठीक क्येट लाइब सांड का आ बगाल रे गारचा आ पर्वम चढेतीक चढेचा कली चाक्या माल्ब। मिनु चढेबमी मेको आ मतुडक्थु पशो पाप आ पर्वम पाप क्याम्तीक गेय पचा माल्ब। मिनु मेकोम माफ ताइब।

19 मेको गारतीक आ पर्वम चढेतीक बाकब। मेको परमप्रभु यावे आ डोंइती थमा पा दोस ताइब दुमशो बाकब” दे मोसामी मुर आन कली देंत।

## 6

चढेब आन पचा माल्शो

1 मिनु लेशा परमप्रभु यावेमी मोसा कली

2 “सुइ मुरुमी परमप्रभु यावे कली मटिथु, मेको आ डोंइती आ नेक्था डा मुर नु जाकटी वोइशशो थोत्रक आ पर्वम जोल पाप्टु हना, सुइम गेनुड, दे कबल पा यो मगेप्टु हना, कि मेको थोत्रक रोइक्ताक हना, कि जोल पा आ नेक्था डा मुर आ मारेइ थोत्रक आंम के सेल्टु हना, गन्ती ५:६-८

3 आ नेक्था डा मुर आन मार मार रोइक्ताक हना, जाम्शो थोत्रक थिरशा यो, मथिदु, दे जोल पाप्टु हना, जोल पा कसम जाप्टु हना, मेकोमी पाप पशो बाकब।

4 मेको मोपा पाप पा दोस ताइब दुम्ब। मिनु मेकोमी आ रोइशशो, आ खुइ पशो, आ ताकशो थोत्रक मलेत्ताक हना, आ थिरशो आ पर्वम जोल पाप्टु हना, इजीकीएल ३३:१५

5 तेको थोत्रक आ पर्वम जोल पा कसम जशो बाकमे, मेकोमी मेको थोत्रक नेल्लेमी ५ भाग तेम्शा, आ होत्रप कली लेरशा गेचा माल्ब। मेकोमी दोस आ पर्वम चढेतीक नाक्ती मेको सु के बाकमे मेको आ नेक्था डा मुर कली लेरशा गेचा माल्ब।

6 मिनु मेकोमी परमप्रभु यावे आ डोंइती ठीक पा हिकशो क्येट कि आ बगाल रे मारेइ मदुमशो थम रिमशो सांड का आ मरिमशो पशो आ पर्वम चढेब आ नेक्था परमप्रभु यावे आ बाक्तीकेमी चढेचा कली चाक्या माल्ब।

7 मिनु मेको चढेबमी मेको आ पर्वम परमप्रभु यावे आ डोंइती पाप क्याम्तीक गेय पचा माल्ब। मिनु मेकोमी मार आ पर्वम दोस तशो बाकमे, मेकोम माफ ताइब” देंत।

चोशा चढेतीक आ पर्वम अरेशो

8 मिनु परमप्रभु यावेमी मोसा कली

9 “गे हारून नु आ तौ आन कली चोशा चढेचा आ पर्वम अरेमी। मेको चोशा चढेतीक नाकदो रे सुनी सम्म चढेतीके शी तार बाक्या माल्ब। मिनु चढेतीक डा मी यो ब्रस डा ब्रस बाक्या माल्ब।

10 मिनु चढेबमी आ सुती के आगा फेक्तीक वा नु सुती के फेक्तीके फेक्चा माल्ब। मिनु मेकोमी मीम दाकशो चोशा चढेशो आ पुलु हुइशशा चढेतीक आ नेक्था वोइक्या माल्ब। प्रस्थान २८:४२

11 मिनु नोले मेकोमी आ फेक्शो वा पुइशशा, अर्को वा फेक्शा, मेको पुलु ताम्बु रे गुंइशा चोत्रखो पुलु ताइक्तीकेमी लाइशशा ताइक्या माल्ब।

12 चढेतीक डा मी चहिं ब्रस डा ब्रस बाक्या माल्ब। मेको काप्या मदुम्ब। मिनु सुनी कुस कुस चढेबमी मेकेर शी तेम्चा माल्ब। मिनु चोशा चढेतीके मीम दुशा बाक्तीक आ पर्वम चढेशो आ बांसो चोचा माल्ब।

13 चढेतीक डा मी ब्रस डा ब्रस बाक्या माल्ब। मेको गेनायो काप्या मदुम्ब।

अन्न चढेशो आ पर्वम अरेशो

14 एको अन्न चढेतीक आ पर्वम अरेशो लोत्र बाकब। हारून आ तौपुकीमी परमप्रभु यावे आ डोंइती चढेतीक आ नेक्था चाक्या माल्नीम।

15 मिनु मेकोपुकीम अन्न चढेतीके, तेल नु धूप आ तार वोइशशो रिमशो फस रे मुठी का लाइशशा, मिन्चा कली परमप्रभु यावे कली आ दाकशो ब्रोत्रशो रिना पाइशशो चढेतीकेमी चोचा माल्नीम।

16 मिनु लीशो हारून नु आ तौपुकीम जचा माल्नीम। तन्न मेको चोत्रखो बाक्तीकेमी बोरब ओरुंती मसुपुथु, चोशा जचा माल्नीम। मेकोपुकीमी युम्तीक ताम्बु आ लाइगाम बाक्या, जचा माल्नीम।

17 मेकेर बोरब ओरुती सुप्शा शोब्ले चोचा मदुम्ब। आं कली मीम चोशा चढेशो रे मेको आन कली आं गेशो भाग बाकब। मेको पाप आ पर्वम चढेतीके नु गारपाडक्या आ पर्वम चढेतीके खोदेशो मेको थम चोत्रखो बाकब।

18 हारून आ खिं डा वोंइश मुर नेल्लेमी गेना हना यो परमप्रभु यावे कली मीम चोशा चढेशो रे जचा मालनीम। परमप्रभु यावे कली मीम चोशा चढेशो रे मेको आ खिं डा मुर नेल्ल आन कली गेशो आन भाग बाकब। मेको थीब नेल्ल चोत्रखो दुम्नीम” दैत।

19 मिनु परमप्रभु यावेमी लेंशा मोसा कली

20 “हारून नु आ तौपुकीम तेल लुक्या पुंइसे नाकती परमप्रभु यावे कली मार नु दोपा चढेचा मालनीम देंशा हना, एफाह का डा १० भाग थम रिम्शो फस नाकदो आधा नु सुनी आधा गेना हना यो चढेचा मालनीम। एफाह पुक्तीके का बाकब। एफाह का २२ लिटर रिक्ब। मेको डा १० भाग २ लिटर नु इक्का खोड ४ माना खोदेशो बाकब। लेवी ७:३७; प्रस्थान २९:-

21 मेको शोब्ले तेलम चोचा मालब। गे मेको कली शुशु तेलम चोशा, अन्न चढेतीके टुक्रा टुक्रा पा परमप्रभु यावे कली आ दाक्शो ब्रोत्रशो रिना पाइशो चढेतीके चढेचा मालनीम।

22 मोपा हारून आ नोले आ तेल लुक्यो तौमी मोदेशो पचा मालब। मेको गेना हना यो परमप्रभु यावे केन बाकब। मिनु मेको नेल्ल चोचा मालब।

23 मिनु चढेब आन अन्न चढेतीक नेल्ल चोचा मालनीम। मेको जचा मदुम्ब” दैत।

पाप क्याम्चा कली चढेतीके

24 मिनु परमप्रभु यावेमी मोसा कली

25 “गे हारून नु आ तौ आन कली मार देंचा मालनेवे देंशा हना ‘पाप क्याम्चा कली चढेतीक आ पर्वम अरेशो बाकब। पाप क्याम्चा कली चढेतीक परमप्रभु यावे आ डोंइती चोशा चढेतीक कली साइक्तीकेमी साइक्या मालब। मेको थम चोत्रखो बाकब। लेवी ४:-

26 मेको पाप क्याम्चा कली चढेशो चढेबमी मेको रे ब्वचा मालब। मेकोपुकीमी गुम्तीक ताम्बु डा लाडगाम बाक्शा, ब्वचा मालनीम।

27 मेको श्ये मारम थीबा, मेको यो चोत्रखो दुम्ब। मेको आ हुश वाम प्रेक्ताकव हना, गेपुकीम मेको वा चोत्रखो बाक्तीकेमी मुरचा मालनीम।

28 मेको श्ये तेको खप के ग्योबुम लोप्नीमी, मेको ग्योब प्रोल्शा ताइक्या मालनीम। मेको कांसा के ग्योबुम लोप्शो बाकत हना, मेको सिकस ब्वाक्कुम शेक्चा मालनीम।

29 मेको चढेब आन दाते डा वोंइश मुर नेल्लेमी मेको ब्वचा मालनीम। मेको थम चोत्रखो बाकब।

30 तन्न तेको पाप क्याम्चा कली चढेतीके आ हुश पाप क्याम्तीक गेय पचा कली गुम्तीक ताम्बु आ आगाम चाक्नीमी, मेको ब्वचा मदुम्ब। मेको चोचा मालनीम।

## 7

गारचा आ पर्वम चढेशो

1 गारचा आ पर्वम चढेतीक थम चोत्रखो बाकब। एको दोपा पचा मालब देंशा हना, लेवी ५:१४-२६

2 चोशा चढेतीक तेकेर साइक्नीमी, मेकेरेन गारचा आ पर्वम चढेतीक साइक्या मालब। मेको आ हुश, चढेतीक आ एर ओंथ बुडक्या मालब।

3 मेको आ बोंसो नेल्ले, बोंसो पाइशो मीलु, गा क्यी सुम्शो बोंसो, लेवी ३:९-१०

4 चिच निम्फा, मेको आ तार डा नु क्रातो डा बोंसो, चिच सुन्दा आइदीम क्येप्शो बोंसो नेल्ल शोल्शा, चढेचा मालब।

5 चढेबमी परमप्रभु यावे कली मीम चोशा चढेचा मालब। मेको गारचा आ पर्वम चढेतीके बाकब।

6 मेको चढेब आन खिं डा वोंइश मुर नेल्लेमी मेको ब्वचा मालनीम। मेको चोत्रखो बाक्तीके ब्वचा मालनीम। मेको थम चोत्रखो बाकब।

7 गारचा आ पर्वम चढेतीके पाप आ पर्वम चढेतीक खोदेशो बाकब। पतीक गेय यो कान बाकब। मिनु तेको चढेबम मेको पाप क्याम्तीक गेय पचा, मेको मेको केन दुम्ब।

8 मिनु तेको चढेबमी मुर आन चाक्शो चोशा चढेतीक चढेबा, मेको चोशा चढेशो आ कुशुल यो मेको केन दुम्ब। लेवी १:६

9 मिनु चुप्लुम चोशो, दिउरमी क्येशो नु तांवाम चोशो चढेशो नेल्ले मेको चढेब केन दुम्ब। लेवी २:४,५,७

10 तन्न अरु अन्न चढेतीके तेलम ब्वाइशो नु म्बवाइशो नेल्ल हारून नु आ तौ आन कली योक्चा कली बाकब। लेवी २:१-३

दुशा बाक्चा आ पर्वम चढेशो

11 मिनु परमप्रभु यावे कली दुशा बाक्चा आ पर्वम चढेतीके दोपा चढेचा मालब, दे अरेशो बाकब देंशा हना, लेवी ३:-

12 सुइमी परमप्रभु यावे कली “गे रिम्शो पाइब बाक्नीनी” दे ठेयब सेल्शा चढेप्टु हना, मेकोमी तेलम निशो बोरब ओरुती मसुप्शो बटुक, बोरब ओरुती मसुप्शो तेल खेक्शो शोब्ले नु थम रिम्शो फस के सेल्शो तेल वोंइशो शोब्ले चढेचा मालनीम। लेवी १९:५-८; लेवी २२:२९-३०

13 मेकोमी “गे रिम्शो पाइब बाक्नीनी” दे ठेयब सेल्शा नु दुशा बाक्चा आ पर्वम चढेशो नु बोरब ओरुती सुप्शो शोब्ले यो चढेचा मालब।

14 मेकोमी चढेशो शोब्ले नेल्ल रे का का पा परमप्रभु यावे कली क्युकशा चढेचा माल्ब। दुशा बाक्या आ परबम चढेतीके आ हुश तेको चढेबम बुडक्बा, मेको केन दुम्ब।

15 “गे रिम्शो पाइब बाक्नीनी” दे ठेयब सेल्शा नु दुशा बाक्या आ परबम चढेशो श्ये मेको चढेशो नाक्तीन नेक्चा माल्नीम। सुनी सम्म मारेड हेचा मदुम्ब।

16 मेको चढेशो कसम जशो आ परबम नु ग्येरशा चढेशो बाक्त हना, मेको चढेशो नाक्ती ब्वचा माल्नीम। आ लीशो आ दीसा ब्वचा दुम्ब।

17 आ नित्थ नाक्त सम्म लीशो चढेशो श्ये चहिं मीम चोचा माल्ब।

18 मेको दुशा बाक्तीक आ परबम चढेशो आ श्ये आ नित्थ नाक्त सम्म सुडम ब्वाप्तु हना, मेको काड मदुम्ब। मेको मुरुमी यो मचढेशो खोदेशो दुम्ब। मेको श्ये ब्वचा ग्रांघा दित्वा डा बाक्ब। मेको ब्वाइब मुर दोस ताडब।

19 मारेड ग्रांघा दिशो थोव्रकम थिशो श्ये ब्वचा मदुम्ब। मेको चोचा माल्ब। तन्न सुड चोव्रखो दुम्शो बाक्तेक्म हना, अरु श्ये ब्वने चाप्नीम।

20 तन्न सुड ग्रांघा दिशो दुम्शा, परमप्रभु यावे कली दुशा बाक्या आ परबम चढेशो श्ये ब्वाप्तु हना, मेको आ खिं डा मुर रे तिल्ला पुंडसीब।

21 मिनु इन दातेमी सुमी मारेड मारेड ग्रांघा दिशो थोव्रक थिशा, मुर आन ग्रांघा दिशो, ग्रांघा दिशो जन्तु कि मारेड ग्रांघा दिशो थिप्तु हना, नोले परमप्रभु यावे कली दुशा बाक्या आ परबम चढेशो श्ये ब्वाप्तु हना, मेको आ खिं डा मुर रे तिल्ला पुंडसीब’ दे माडक्मी” दे परमप्रभु यावेमी मोसा कली दैत।

बोंसो नु हुश ब्वचा मदुम्ब

22 मिनु लेंशा परमप्रभु यावेमी मोसा कली

23 “गे इस्राएली आन कली ‘गेपुकीम ब्यफ, भेडा नु क्यारश आन बोंसो काड मब्वने। लेवी ३:१७

24 आंमा बेक्शो, मारेडमी साइशो बस्तु भाव आन बोंसो अर्का मारेड गेयम चलने चाप्नीनी। तन्न गेपुकीमी मेको ब्वचा मदुम्ब। प्रस्थान २२:३०

25 मिनु इन दातेमी सुमी परमप्रभु यावे कली मीम चोशा चढेतीके आ बोंसो ब्वाइबा, मेको आ खिं डा मुर रे तिल्ला पुंडसीब।

26 गेपुकी ते बाक्तीनी हना यो, तेकोड चिक्ब नु बी ब्यफ, क्यारश भेडा आन हुश ब्वचा मदुम्ब।

27 मिनु सुमी हुश ब्वाइबा, मेको आ खिं डा मुर रे तिल्ला पुंडसीब’ माडक्मी” दैत।

चढेब आन भाग

28 मिनु परमप्रभु यावेमी मोसा कली

29 “गे इस्राएली आन कली ‘सुमी परमप्रभु यावे कली गे रिम्शो पाइब बाक्नीनी, दे ठेयब सेल्शा चढेतीक चाड सेल्बा, मेकोमी आ चढेशो रे परमप्रभु यावे आ बाक्तीकम आंमान चाक्चा माल्ब।

30 मेकोमी परमप्रभु यावे कली मीम चोशा चढेचा कली बोंसो नु कुथु चाक्चा माल्ब। मिनु मेको कुथु परमप्रभु यावे कली क्युकशा चढेतीक चढेचा माल्ब। प्रस्थान २९:२४

31 मिनु चढेबमी मेको बोंसो कली मीम चोचा माल्ब। तन्न मेको कुथु हारून नु आ तौ आन के दुम्ब।

32 मिनु इन दुशा बाक्या आ परबम चढेतीके रे आ ग्युरा फिला चढेब कली क्युकशा चढेचा कली गेचा माल्नीनी। लेवी ९:२१

33 हारून आ तौ तेकोम दुशा बाक्या आ परबम चढेतीक चढेबा नु हुश बुडक्बा, ग्युरा फिला मेको के दुम्ब।

34 मारदे हना गो इस्राएली आन “गे रिम्शो पाइब बाक्नीनी” दे ठेयब सेल्शा चढेशो कुथु नु ग्युरा फिला गेपुकी रे ताक्शा चढेब हारून नु मेको आ तौ आन कली गेना हना यो कली गेतामी’ दे माडक्मी।

35 हारून नु आ तौपुकी तेको नाक्त रे परमप्रभु यावे कली चढेब दुम्मा, मेको नाक्ती रेन परमप्रभु यावे कली मीम चोशा चढेशो चढेतीक रे मेको आन भाग गेतामी।

36 तेको नाक्ती रे मेकोमी मेको आन कली तेल लुक्ता, मेको नाक्त रेन मेको आन कली इस्राएलीपुकी रे ततीक भाग परमप्रभु यावेमी ‘मेको आन के बाक्ब’ देशो बाक्ब। मेको आन कली गेना हना यो नेल्ल आन पाला सम्म आन भाग बाक्ब, देनो” दैत।

37 “मेको चोशा चढेतीके, अन्न चढेतीके, पाप आ परबम चढेतीके, गारचा आ परबम चढेतीके, नक गेय पचा आ परबम चढेतीके नु परमप्रभु यावे कली ‘गे रिम्शो पाइब बाक्नीनी’ दे ठेयब सेल्शा चढेतीक आ परबम पतीके बाक्ब।

38 मिनु परमप्रभु यावेमी मेको लोव्र मोसा कली सीनै डांडाम अरेशो बाक्त। मेको नाक्ती परमप्रभु यावेमी सीनै डा गोरशो रागीम इस्राएली आन कली आन चढेतीक आ बाक्तीक चाक्कीन” दे अरेशो बाक्ब।

## 8

हारून नु आ तौ चढेब दुम्शो

प्रस्थान २९:-

1 मिनु परमप्रभु यावेमी मोसा कली

2 “गे हारून नु आ तौ आन कली, चढेब आन फेक्तीक वा, आन कली लुक्चा कली तेल, पाप आ परबम चढेतीक ब्यफ, सांड निक्शी नु बोरब ओरुती मसुप्शो शोब्ले चाक्को। प्रस्थान २८:३९-४३

- 3 मुर नेल्ल आन कली गुम्टीक ताम्बु आ ओव्रतीकेम पुक्मी” दैत।
- 4 मिनु मोसामी परमप्रभु यावेमी दोदेशो पा अरेवा, मोदेशो पा पाप्तु। मिनु मुरपुकी गुम्टीक ताम्बु आ ओव्रतीकेम बुक्तेकम।
- 5 मिनु मोसाम बुक्शो मुर आन कली “परमप्रभु यावेमी ‘पावो’ दे अरेशो लोत्र एकोन बाक्ब” दैत।
- 6 मिनु मोसामी हारून नु आ तौ आन कली चाक्शा चिक्ताकमी।
- 7 मिनु मेकोमी हारून कली आगा वा फेक्ताकव। मिनु किप्शुर किप्ताकव। मिनु मेकोमी आ तार डा फेक्तीक फेक्ताकव। मेकोमी क्रातो आ डोंडती क्युक्तीक वा क्युक्ताकव। मिनु रिम्शो पा प्रोत्रशो बुटा आप्शो किप्शुर नु क्रातो डोंडती क्युक्तीक झोला मेको आ तार किप्ताकव।
- 8 मिनु नोले मेकोमी हारून कली कुचुम रेल्टीक झोला रेल्लाकव, मिनु मेको आगा “ऊरीम नु थुम्मीम” कुर पाप्तु। ऊरीम नु थुम्मीम कली डेडडेड नु निसाफ पतीके दैसीब। परमप्रभु यावे आ देशो कोंडब बाक्ब। प्रस्थान २८:३०
- 9 मिनु मेको आ पियाम गुप्तीके गुप्ताकव। मिनु सुन के मुशो कुप्फीम पांडतीके “परमप्रभु यावे कली ला” दे मेको आ डोंडती गे पांडताकव। परमप्रभु यावेमी मोसा कली दोदेशो पा अरेवा, मोदेशो पा पाप्तु। प्रस्थान २८:३६-३८; लेवी ३९:३०
- 10 मेको नोले मोसामी लुक्तीक तेल चाक्शा परमप्रभु यावे आ बाक्तीके नु मेकेर बाक्शो मारेड मारेड आन कली बुइशशा, “परमप्रभु यावे केन बाक्ब” दे चोत्रखो सेल्लु।
- 11 मिनु मेकोमी तेल इच्का चढेतीकेम उ खेयप बुइक्ताकव। मोपा चढेतीके, मेकेर बाक्शो चढेचा कली माल्तीक नेल्ले नु चिक्तीक टेयब ग्योब नु आ नाइक्तीके, नेल्ल आन कली परमप्रभु यावे के सेल्चा कली तेल बुइक्ताकमी।
- 12 मिनु मेकोमी हारून आ पियाम लुक्तीक तेल लुक्शा, मेको कली परमप्रभु यावे कली ला गेय पाइब सेल्लु।
- 13 मिनु मोसामी हारून आ तौ आन कली चाक्पाइशशा, आगा वा फेक्ताकमी। मिनु किप्शुर किप्शा पियाम गुप्तीके गुप्ताकमी। परमप्रभु यावेमी मोसा कली दोदेशो पा अरेवा, मोदेशो पा पाप्तु।
- 14 मिनु नोले मोसामी पाप आ परबम चढेतीक ब्यफ चाक्तु। मिनु हारून नु आ तौपुकीम मेको पाप आ परबम चढेतीक ब्यफ आ पिया तारी आन गुड वोइक्तेकम। लेवी ४:१-१२
- 15 मिनु मोसामी मेको ब्यफ कली साइक्तु। मिनु मेकोमी मेको इच्का हुश लाइशशा आ ब्रेप्चोमी चढेतीक एर ओंथ डा प्रोत्रम खेक्शा, चढेतीक कली परमप्रभु यावे कली ला, चोत्रखो सेल्लु। मिनु लीशो हुश चहिं चढेतीक आ पुंम मोइक्तु। मोपा मेको चढेतीक कली पाप क्याम्तीक गेय पचा, दे चोत्रखो सेल्लु।
- 16 मिनु मोसामी गा कयी गिल्लो बोंसो नेल्ल, आइदी क्येप्शो बोंसो नु चिच निम्फा नु आ बोंसो चढेतीकेम चोप्तु।
- 17 मिनु ब्यफ, मेको आ कुशुल, आ श्ये नु गोबर मुर आ बाक्तीक क्येडा डोन मीम चोप्तु। परमप्रभु यावेमी मोसा कली दोदेशो पा अरेवा, मोदेशो पा पाप्तु।
- 18 मिनु नोले मोसामी चोशा चढेतीक सांड चाक्तु। मिनु हारून नु आ तौपुकीमी आन गुड मेको सांड आ पिया तार वोइक्तेकम। लेवी १:१०-१३
- 19 मिनु मोसामी मेको सांड कली क्योरतु। मिनु मेकोमी आ हुश चढेतीक एर ओंथ बुइक्ताकव।
- 20 मिनु मोसामी मेको सांड कली टुक्रा टुक्रा पा चेक्तु। मेको आ पिया, चेक्शो श्ये नु बोंसो नेल्ल चोप्तु।
- 21 मेकोमी गा कयी नु फिला मुरतु। मोपा मोसामी मेको सांड नेल्ल चढेतीकेमी चोप्तु। मेको परमप्रभु यावे कली ब्रोत्रशो रिना पाइशशा मीम चोशा चढेशो बाक्त। मिनु परमप्रभु यावेमी मोसा कली दोदेशो पा अरेवा, मोदेशो पा पाप्तु।
- 22 मिनु नोले मोसामी अर्को चढेतीक सांड चाक्तु। मेको गेय गोचा कली चढेतीक डा सांड बाक्त। मिनु हारून नु आ तौपुकीम आन गुड मेको सांड आ पिया तार वोइक्तेकम।
- 23 मिनु मोसामी मेको सांड कली क्योरतु। मिनु मेकोमी मेको आ हुश हारून आ ग्युरा नोफा आ फेनेम, आ ग्युरा गुड डा बोंग्ये नु आ ग्युरा खोइल डा बोंग्येमी खेक्ताकव।
- 24 मिनु मोसामी हारून आ तौ आन कली चाक्पाइक्तु। मिनु मेकोमी मेको आन ग्युरा नोफा आन फेनेम, आन ग्युरा गुड डा बोंग्ये नु आन ग्युरा खोइल डा बोंग्येमी खेक्ताकव। मिनु मोसामी मेको हुश कली चढेतीके आ एर ओंथ बुइक्ताकव। लेवी १७:११
- 25 मिनु मेकोमी मेको सांड आ बोंसो, मेको बोंसो पाइशशा मीलु, गा कयीम गिल्लो बोंसो, आइदीम क्येप्शो बोंसो, चिच निम्फा नु मेक डा बोंसो नु ग्युरा फिला लाइक्तु।
- 26 मिनु परमप्रभु यावे आ डोंडती बाक्शो बोरब ओरुत्ती मसुप्शो मार मार आ डालो रे बोरब ओरुत्ती मसुप्शो हिरशो शोब्ले का, तेलम खुम्शो शोब्ले का नु बाबर का गुंडशा, मेको बोंसो नु ग्युरा फिला तार वोइक्तु।
- 27 मिनु मेको नेल्ल लाइशशा हारून नु आ तौ आन गुडमी वोइक्तु। मिनु परमप्रभु यावे आ डोंडती हिम्शा चढेतीके चढेप्तु।
- 28 मिनु मोसामी मेको आन गुड रे लाइशशा, चोशा चढेशो आ तारी चोप्तु। मेको गेय गोचा कली चढेतीके परमप्रभु यावे कली ब्रोत्रशो रिना पाइशशा मीम चोशा चढेतीक बाक्त।
- 29 मिनु मोसामी मेको सांड आ कुथु लाइशशा, परमप्रभु यावे आ डोंडती हिम्शा चढेतीके चढेप्तु। मेको गेय गोचा कली चढेशो सांड आ श्ये मोसा आ भाग दुम्त। परमप्रभु यावेमी मोसा कली दोदेशो पा अरेवा, मोदेशो पा पाप्तु।
- 30 मिनु मोसामी लुक्तीक तेल नु चढेतीकेम वोइशशा हुश लाइशशा, हारून नु आ तौ आन फेक्शो वाम बुइक्ताकव। मोपा मोसामी हारून नु मेको आ फेक्शो वा, आ तौपुकी नु मेको आन फेक्शो वा नेल्ल परमप्रभु यावे कली ला गेय पाइब, दे चोत्रखो सेल्लु।



- 31 मिनू मोसाम हारून नु आ तौ आन कली “गे मेको श्ये कली गुम्टीक ताम्बु आ ओव्रतीकेम लोपीन। मिनू गेय गोचा कली चढेशो डालो डा शोब्ले नु मेक उड जने ब्वने। आं देशो खोदेशो पा जचा ब्वचा माल्नीनी।
- 32 हंशो श्ये नु शोब्ले गे मीम चोचा माल्नीनी।
- 33 मिनू नोले गे ७ नाक्त सम्म, इन कली गेय गोचा कली चढेशो ७ नाक्त मगाम सम्म गुम्टीक ताम्बु आ ओव्रतीक रे लाडगा मलने। मारदे हना ७ नाक्त मजाकदीम सम्म इन गेय गोचा कली चढेतीक गेय ला थुम्सीब।
- 34 मुलाक्त मार पडा, मेको परमप्रभु यावेमी अरेशो इन कली पाप क्याम्तीक गेय बाक्त।
- 35 गेपुकी ७ नाक्त सम्म नाकदो नाकती गुम्टीक ताम्बु आ ओव्रतीकेमी बाक्चा माल्नीनी। गे परमप्रभु यावेमी अरेशो पने। मो मपाइतीनी हना, गे बेक्नीनी। मारदे हना आं कली मोदें अरेशो बाक्ब” दे माइक्तीमी।
- 36 मिनू परमप्रभु यावेमी मोसा रे पा अरेशो नेल्ल हारून नु आ तौपुकीम पाम्तेक्म।

## 9

हारून नु आ तौ आन गेय

- 1 मिनू ८ नाकती मोसामी हारून, आ तौ नु इस्राएल डा खाल्पा आन कली ब्रेत्ताक्मी। लेवी ८:३३
- 2 मिनू मेकोमी हारून कली “गे पाप आ परबम चढेचा कली मारेड मदुम्शो थम रिम्शो बाछा का नु चोशा चढेचा कली मारेड मदुम्शो थम रिम्शो सांड का चाक्शा परमप्रभु यावे आ डोंइती चढेवो।
- 3 मिनू इस्राएली आन कली ‘गेपुकीमी पाप आ परबम चढेचा कली बोका का नु चोशा चढेचा कली बर्स का दुम्शा, मारेड मदुम्शो थम रिम्शो बाछा का नु मारेड मदुम्शो थम रिम्शो पाठा का चाक्कीन।
- 4 मिनू परमप्रभु यावे आ डोंइती दुशा बाक्चा आ परबम चढेचा कली ब्यफ का, सांड का नु तेलम निशो अन्न चढेतीक यो चाक्कीन। मारदे हना मुलाक्ती परमप्रभु यावेमी इन कली तपांडसीब’ माइक्मी” देंत।

हारूनम आंम आ परबम चढेशो

- 5 मिनू मोसामी अरेशो खोदेशो पा मेकोपुकीमी मारेड मारेड गुम्टीक ताम्बु आ डोंइती चाक्तेक्म। मिनू मुर नेल्ले परमप्रभु यावे आ डोंइती जाक्शा राप्तेक्म।
- 6 मिनू मोसामी “गेपुकीमी परमप्रभु यावेमी अरेशो पचा माल्शो गेय एकोन बाक्ब। मिनू परमप्रभु यावे आ छेडछेडम इन कली तपांडसीब” देंत।
- 7 मिनू मोसाम हारून कली “चढेतीक आ नेक्था जाक्शा, इ पाप आ परबम चढेतीक नु इ चोशा चढेतीक चढेवो। मिनू आंम इ परबम नु मुर आन परबम पाप क्याम्तीक गेय पावो। परमप्रभु यावेमी अरेशो खोदेशो पा मुर आन चाक्शो चढेतीक चढेशा, मुर आन परबम पाप क्याम्तीक गेय पावो” देंत। लेवी १६:६, ११, १५; हिब्रू ५:३; हिब्रू ७:२७
- 8 मिनू हारून चढेतीक आ नेक्था जाक्शा, आ पाप आ परबम चढेतीक बाछा क्योरतु।
- 9 मिनू हारून आ तौपुकीमी मेको आ हुश चाक्तेक्म। मिनू मेकोमी आ ब्रेप्चो हुशेम खुम्शा चढेतीक आ ग्रोवपुकीम खेक्ताक्व। मिनू लीशो हुश कली चढेतीक आ पुंम मोइक्तु।
- 10 मिनू मेकोमी पाप आ परबम चढेशो आ बोंसो, चिच नु आइदीम क्येप्शो बोंसो चढेतीकेम चोप्तु। परमप्रभु यावेमी मोसा कली दोदेशो पा अरेवा, मोदेंशो पा हारूनमी पाप्तु। लेवी ४:८-१२; लेवी ८:१४-१७
- 11 तन्न श्ये नु कुशुल चहिं मुर आन बाक्तीके क्येडा डोन चोप्तु।
- 12 मिनू नोले हारूनमी चोशा चढेतीक क्योरतु। मिनू मेको आ तौपुकीमी मेको आ हुश चाक्शा गेम्तेक्म। मिनू मेकोमी मेको चढेतीक आ एर ओंथ बुइक्ताक्व। लेवी १:१०-१३
- 13 मिनू मेकोपुकीमी मेको चोशा चढेतीके टुक्रा टुक्रा पा चेक्शा, पिया सुन्दा चाक्शा, मेको कली गेम्तेक्म। मिनू हारूनमी मेको चढेतीकेमी चोप्तु।
- 14 मिनू मेकोमी गा कयी नु खोइल मुरशा, चोशा चढेतीके नु चोप्तु।

हारूनम अरु आन परबम चढेशो

- 15 मिनू नोले हारूनमी मुर आन परबम चढेतीक चाक्शा, मेको आन पाप आ परबम चढेशो बोका क्योरतु। मिनू डोंइती डा खोदेशो पा पाप आ परबम चढेतीके चढेप्तु।
- 16 मेको नोले चोशा चढेतीक चाक्शा, अरेशो खोदेशो पा चढेप्तु।
- 17 मिनू अन्न चढेतीक चाक्शा, मुठी का हुइश्शा, सुनी डा चोशा चढेतीक नु चढेप्तु।
- 18 मिनू हारूनमी मुर आन कली दुशा बाक्चा आ परबम चढेतीके ब्यफ नु सांड क्योरतु। मिनू हारून आ तौपुकीम हुश चाक्शा, मेको कली गेम्तेक्म। मिनू मेकोमी चढेतीक आ एर ओंथ बुइक्ताक्व।
- 19 मिनू ब्यफ नु सांड आस बोंसो, बोंसो पाइश्शो मीलु, गा कयी गिल्लो बोंसो, चिच निम्फा नु आइदीम क्येप्शो बोंसो लाइक्तेक्म।
- 20 मिनू डोंइती कुथु तार वोइक्तेक्म। नोले बोंसो चढेतीकेम चोम्तेक्म।
- 21 मिनू मोसाम अरेशो खोदेशो पा हारूनमी कुथु नु ग्युरा फिला चहिं परमप्रभु यावे आ डोंइती क्युक्शा हिम्शा चढेतीके चढेप्तु। लेवी ७:३०-३४;
- 22 मिनू हारूनमी आ गुड मुर आन गे पोक्शा, आसीक गेम्तीमी। मोपा पाप आ परबम चढेतीके, चोशा चढेतीके नु दुशा बाक्चा आ परबम चढेतीके चढेशा, मेको उड तोंइसाक्व।

23 मिनु मोसा नु हारून युम्तीक ताम्बु आगा ओन्नताक्स। मिनु यूशा मुर आन कली आसीक गेम्ताक्स। मिनु परमप्रभु यावे आ छेडछेड मुर नेल्लेमी ताम्तेकम। प्रस्थान १६:१०; प्रस्थान ४०:३४

24 मिनु परमप्रभु यावे आ डोंइती रे मी यूशा, चढेतीकम बाकशो चोशा चढेतीक नु मेक बाकशो बोंसो नेक्तु। मिनु मुरपुकीमी मेको तशा, ठेयब सेंदा पा ग्येरसीशा, खुम्की पा बाप्तेकम। न्यायाधीस ६:२१; १राजा १८:३८; १इतिहास २१:२६; २इतिहास ७:१

## 10

नादाब नु अबीहुम मटिशो

1 मिनु हारून आ तौ नादाब नु अबीहुम आस थनैरो लाइशशा, मी कुर पाम्ताक्स। मिनु मी आ तारी धूप वोइक्ताक्स। मोपा मेको निक्शी परमप्रभु यावेमी “अरु मी मलाइक्चा” दे अरेशो लोत्र मटिम्स, मेको परमप्रभु यावे आ डोंइती चढेम्ताक्स। प्रस्थान ६:२३; प्रस्थान २८:१; प्रस्थान ३०:९

2 मिनु परमप्रभु यावे आ डोंइती रे मी यूशा, मेको आस कली यु दाक्तु। मोपा मेको निक्शी परमप्रभु यावे आ डोंइती बेक्ताक्स।

3 मिनु मोसामी हारून कली “परमप्रभु यावेमी देशो ‘आं नेक्था बाक्ब आन कली गो नेल्ल क्येडा ठेयब बाक्नुड’ दे कोंडनुड। मिनु नेल्ल मुर आन डोंइती गो ठेयब सेल्चा पुंडसीनुड” दैत। मिनु हारून सिक्सी पा बाक्त।

4 मोसामी हारून आ बकान्छा उज्जीएल आ तौ एल-साफान नु मीशाएल आस कली ब्रेशशा “इस लोकब आस कली ताम्बु रे कुरशा गुंडदीस” दैत। प्रस्थान ६:२२

5 मिनु मेको निक्शी जाक्शा, आस फेक्शो वा रे क्युक्शा मोसा आ देशो खोंदेशो पा कुरशा गुंडताक्स।

6 मिनु मोसाम हारून नु आ तौ एलाजर नु इथामार आन कली “रोंका पा इन पिया डा चां मप्रेक्कीन। इन वा मखाक्कीन। मो पाइतीनी हना, गेपुकी बेक्नीनी। मिनु परमप्रभु यावे आ गाइक्तीक नेल्ल मुर आन तारी जुक्ब। तन्न परमप्रभु यावे आ सोइशशो मीम दुप्शा बेक्ब आस पबंम इन खिं डा मुर नु इसाएली डा मुर नेल्ल रोंका पचा दुम्ब। लेवी २१:१०

7 गेपुकी चहिं युम्तीक ताम्बु रे लाडगा मलने। मो पाइतीनी हना, बेक्नीनी। मारदे हना परमप्रभु यावे आ लुक्शो तेल गे इन तार बाक्ब” दैत। मिनु मेकोपुकीमी मोसा आ देशो खोंदेशो पाम्तेकम।

चढेब आन कली लेंशा अरेशो

8 मिनु नोले परमप्रभु यावेमी हारून कली

9 “गे नु इ तौपुकी युम्तीक ताम्बुम ओवनीनु, अडगुर शांबु नु अरु दुक्तीक थोत्रक मतूडीन। तूतीनी हना, गेपुकी बेक्नीनी। मेको गेना हना यो इन पतीक दुम्ब। इजीकीएल ४४:२१; होसे ४:११; आमोस २:८

10 आं थोत्रक नु मुर आ थोत्रक तिल्चा मालनीनी। ग्रांप्रा दिशो थोत्रक नु चोत्रखो थोत्रक यो तिल्चा मालनीनी। इजीकीएल २२:२६; इजीकीएल ४४:२३

11 मिनु गो मोसा कली अरेशो नेल्ल, गे इसाएली आन कली शेंचा मालनीनी” दैत।

12 मिनु मोसामी हारून नु आ लीशो तौ एलाजर नु इथामार आन कली “परमप्रभु यावे कली मीम चोशा अन्न चढेशो रे लीशो बोरब ओरुती मसुपुथु चढेतीके आ नेक्था बाक्शा जने। मारदे हना मेको थम चोत्रखो बाक्ब। लेवी ९:१७,१८

13 गेपुकीमी मेको कली चोत्रखो बाक्तीकेमी जने। मारदे हना परमप्रभु यावे कली मीम चोशा चढेशो चढेतीक रे मेको गे नु इ तौ इन भाग बाक्ब। आं कली मोदें अरेशो बाक्ब। लेवी २:३

14 तन्न क्युक्शा चढेशो कुथु नु हिम्शा चढेशो फिला चहिं गे इन तौ नु इन तमीम चोत्रखो बाक्तीकेमी बाक्शा ब्वने। मारदे हना मेको इसाएली आन दुशा बाक्चा आ पबंम चढेशो रे गे नु इ तमी तौ इन भाग बाक्ब। लेवी ७:३४

15 मिनु हिम्शो फिला, क्युक्शो कुथु नु मीम चोशा चढेशो मार मार आन बोंसो परमप्रभु यावे आ डोंइती हिम्शा चढेचा कली चाक्चा मालनीनी। मिनु परमप्रभु यावेमी अरेशो खोंदेशो पा गेना हना यो, गे नु इ तमी तौ इन भाग दुम्ब” दैत। लेवी ९:२०-२१

16 मिनु मोसामी पाप आ पबंम चढेशो बोका माल्तु। तन्न मेको चोने थुम्शो बाक्माक्त। मिनु मेकोमी हारून आ लीशो तौ एलाजर नु इथामार आस कली गाइशशा, लेवी ९:१५

17 “गेपुकीमी मारदे पाप आ पबंम चढेशो कली चोत्रखो बाक्तीकेम मब्वनी? मारदे हना मेको थम चोत्रखो बाक्ब। मिनु परमप्रभु यावेमी मुर आन पबंम पाप क्याम्तीक गेय पचा, दे मेको इन कली गेशो बाक्ब।

18 मेको आ हुश ताम्बु आ आगामी मलाइशशो बाक्त। गेपुकीमी थमा पा आं देशो खोंदेशो पा चोत्रखो बाक्तीकेम मेको श्ये ब्वचा माल्शो ननी” दैत। लेवी ६:१९,२२

19 मिनु हारूनमी मोसा कली “नेनीन, मुलाक्ती मेकोपुकीमी आन पाप आ पबंम चढेतीक नु आन चोशा चढेतीक परमप्रभु यावे आ डोंइती चढेम्तेकम। मिनु मुलाक्त गो गिश श्येत जशो बाक्नुड। गो मुलाक्ती मेको पाप आ पबंम चढेशो ब्वशो नड हना, मार, मेको परमप्रभु यावे आ डोंइती रिम्शो दुम वा डा?” दैत।

20 मिनु मेको लोत्र नेंशा मोसा सिक्सी पाप्तु।

## 11

ग्रांप्रा दिशो नु मदिशो  
ब्यवस्था १४:३-२०

- 1 मिनू परमप्रभु यावेमी मोसा नु हारून आस कली
- 2 “गे इस्राएली आन कली ‘रागीम बाकशो जन्तु, बस्तु भाव, चिकब तेक तेको ब्वचा दुम्बा, तेक तेको ब्वचा मदुम्बा, मेको शेंदीस। मिनू जन्तु नु बस्तु भाव तेको ब्वने चाप्नीनी देशा हना, प्रेरित १०:१२-१५; कलस्सी २:१६; १तिमोथी ४:३-४
- 3 गेपुकीमी आन गेंच जेशशो नु शोंया हेक्बपुकी ब्वने चाप्नीनी।
- 4 मो हना यो गेंच जेशशो ला कि शोंया हेक्ब दुम्शो ला ब्वचा मदुम्ब। दलओंठ मेको शोंया हेक्ब, तन्न आ गेंच मजेशशो बाकब। मेको इन कली ग्रांघा बाकब।
- 5 मिनू शापन मब्वने। मारदे हना मेकोमी शोंया हेक्ब, तन्न आ गेंच मजेशशो बाकब। मेको इन कली ग्रांघा बाकब।
- 6 मिनू खरायो मब्वने। मारदे हना मेकोमी शोंया हेक्ब, तन्न आ गेंच मजेशशो बाकब। मेको इन कली ग्रांघा बाकब।
- 7 मिनू पोत्र मब्वने। मारदे हना मेको आ गेंच जेशशो बाकब, तन्न शोंया महेक्ब। मेको इन कली ग्रांघा बाकब। यसैया ६५:४; यसैया ६६:१७
- 8 गेपुकीमी मेको आन श्ये मब्वने। आन सिनु यो मथिने। मेको इन कली ग्रांघा बाकब।
- 9 ब्वाक्कु, खोला नु समुन्द्रम बाकबपुकीमी फ्रां नु कत्ला पाइशशो ब्वने चाप्नीनी।
- 10 तन्न समुन्द्र नु खोलाम बाकब फ्रां नु कत्ला मपाइशशो ब्वचा मदुम्ब। मेको आइक्च ब्वाक्कुम बाकब जन्तु नु अरु नेल्ल सेल जन्तु इन कली ग्रांघा बाक्नीम।
- 11 मेको इन कली ग्रांघा बाक्तीके, मेको आन श्ये मब्वने। मिनू मेको आन सिनु इन कली ग्रांघा बाक्नीम।
- 12 मिनू ब्वाक्कुम बाकब नेल्ले फ्रां नु कत्ला मपाइशशो जन्तु, इन कली ग्रांघा बाक्नीम।
- 13 मिनू चिकब आन दातेमी इन कली तेको तेको ग्रांघा दिशो नु ब्वचा मदुम्शो बाक्नीम देशा हना, ककाकुली, गिद, क्येर गिद,
- 14 लल ब्वारदे नु नेल्ल खाल डा क्येर ब्वारदे, लेवी ५:२
- 15 खद नेल्ले,
- 16 टेयब हुहुचील, ग्रीब बुक्स, ब्वाक्कुम बाकब चिकब, मिनू बाज नेल्ले,
- 17 आइक्च हुहुचील, ब्वाक्कु डा खदी, भुल्का,
- 18 बुश हुहुचील, गोरशो रागी डा हुहुचीलपुकी, डांड ब्वाइब ब्वारदे,
- 19 सारस, बोकुला नेल्ल, फाप्रे चिकब नु पकातिकती मब्वने। यसैया ६६:१७
- 20 फ्रां पाइशशो, ४ ओटा खोइलीम गेशा गाकब जन्तु नेल्ल इन कली ग्रांघा बाक्नीम।
- 21 मिनू ४ ओटा खोइलीम गेशा गाकब, फ्रां पाइशशो खपीम प्रेक्चा कली खोइल बोइशशो नेल्ल मालेपुकी ब्वने चाप्नीनी।
- 22 गे सल्हा माले, खुइले माले, किश्रो माले नु फटेडग्रापुकी ब्वने चाप्नीनी।
- 23 ४ ओटा खोइल पाइशशो नु फ्रां पाइशशो नेल्ल इन कली ग्रांघा बाक्नीम।
- 24 मेकोपुकी रे गेपुकी ग्रांघा दिशो दुम्नीनी। सुमी मेको आन सिनु थीबा, मेको नां मरिक्म सम्म ग्रांघा दिशो दुम्ब।
- 25 मिनू सुमी मेको सिनु रे इच्का कुरबा, मेकोमी आ वा मुरचा माल्ब। मिनू नां मरिक्म सम्म ग्रांघा दिशो दुम्ब।
- 26 मिनू तेको जन्तु आन गेंच जेशशो बाक्बा, तन्न मब्राक्शो बाक्बा, मेको शोंया महेक्बा, मेको इन कली ग्रांघा बाकब। मेको थीब नेल्ल ग्रांघा दिशो दुम्नीम।
- 27 मिनू ब्रेप्चोम थेक्शा ४ ओटा खोइलीम गाकब जन्तु नेल्ल इन कली ग्रांघा बाक्नीम। मेको आन सिनु थीब नेल्ल नां मरिक्म सम्म ग्रांघा दिशो दुम्नीम।
- 28 मेको सुमी आन सिनु कुरब मेकोमी आ वा मुरचा माल्ब। मिनू मेको नां मरिक्म सम्म ग्रांघा दिशो दुम्ब। मेको इन कली ग्रांघा दिशो बाक्नीम।
- 29 मिनू खपीम गेशा गाकब आइक्च जन्तु तेको ग्रांघा दिशो बाक्नीम देशा हना, कोचोम्बो, यिच, टेयब नु आइक्च खोते नेल्ले,
- 30 माउसुली, घोरी, भाले मुडग्रो, बाल्वाम बाकब खोते नु रड फाइक्ब खोतेपुकी,
- 31 मेको गेशा गाकब नेल्ल इन कली ग्रांघा बाक्नीम। सुमी मेको आन सिनु थीबा, मेको नां मरिक्म सम्म ग्रांघा दिशो दुम्ब।
- 32 मोदेशो जन्तु बेक्शा, मार तारी दोक्बा, मेको थोत्रक ग्रांघा दिशो दुम्ब। शी के सेल्शो, वा, कुशुल, भाडग्रा नु मारेड के बाक्ल, मेको थोत्रक ब्वाक्कुम नुप्चा माल्ब। मिनू मेको नां मरिक्म सम्म ग्रांघा दिशो दुम्ब। मिनू नोले ठीक दुम्ब।
- 33 मिनू मेको मार मार खप के बोसुम दोक्त हना, मेको बोस नेल्ल ग्रांघा दिशो दुम्ब। गेपुकीमी मेको बोस प्रोल्चा माल्नीनी।
- 34 मेको आगाम ब्वाक्कु बाक्त हना, मिनू मेको ब्वाक्कुम थिशो मारेड मारेड जचा थोत्रक ग्रांघा दिशो दुम्ब। मिनू मेको बोसुम बाक्शो तूचा थोत्रक नेल्ल ग्रांघा दिशो दुम्नीम।
- 35 मेको आन सिनु मारेड थोत्रकम दोक्त हना, चुप्लुम बाक्त हना यो, मेको प्रेशा ताइक्चा माल्ब। मेको ग्रांघा दिशो बाक्ब। मेको गेना हना यो इन कली ग्रांघा बाक्ब।
- 36 मो हना यो ब्वाक्कु बुक्तीके, कुवा नु ब्वाक्कु वोइक्तीके चोत्रखो बाक्नीम। तन्न मेको आन सिनु थीब चहिं ग्रांघा दिशो बाक्ब।
- 37 मेको आन श्ये शोक्तीक वांचेरम दोक्त हना, मेको चहिं चोत्रखो लीब।
- 38 तन्न मेको आ सिनु शोक्चा कली ब्वाक्कुम वोइशशो वांचेर तारी दोक्त हना, मेको इन कली ग्रांघा दिशो दुम्ब।
- 39 इन बस्तु भाव बेक्व हना, सुमी मेको कली थीब, मेको नां मरिक्म सम्म ग्रांघा दिशो दुम्ब।

40 मेको सुम ब्वाइबा, मेकोमी आ वा मुरचा माल्ब नु नां मरिक्म सम्म ग्रांघा दिशो दुम्ब। मेको सिनु कुरबमी यो आ वा मुरचा माल्ब। मिनु मेको नां मरिक्म सम्म ग्रांघा दिशो दुम्ब। प्रस्थान २२:३०

41 खपीम ग्रेशा गाक्ब जन्तु नेल्ल ग्रांघा दिशो बाक्नीम। मेको ब्वचा मदुम्ब।

42 कोव्रजीम ग्रेशा गाक्ब, ४ ओटा खोइलीम गाक्ब नु शुश खोइल पाइशशो खपीम गाक्ब जन्तुपुकी ब्वचा मदुम्ब। मारदे हना मेकोपुकी ग्रांघा दिशो बाक्नीम।

43 मिनु गेपुकी तेकोइ ग्रेशा गाक्ब जन्तु रे ग्रांघा दिशो मदुमीन। मेकोपुकी रे इन कली ग्रांघा दिशो मसेलीन।

44 मिनु गो परमप्रभु यावे, इन परमप्रभु नड। मोपतीके गेपुकी ग्रांघा दिशो मदुम्ब मेको रे डोन बाक्कीन। मारदे हना गो ग्रांघा दिशो रे डोन बाक्नुड। गेपुकी खपीम ग्रेशा गाक्ब जन्तु रे ग्रांघा दिशो मदुमीन। लेवी १९:२

45 गो परमप्रभु यावे, इन कली इजीप्त रागी रे गुंइशा एक चाक्ब, इन परमप्रभु नड। मोपतीके गेपुकी ग्रांघा दिशो रे डोन बाक्कीन। मारदे हना गो ग्रांघा दिशो रे डोन बाक्नुड' देनो" दंत।

46 एको रागी डा जन्तु, चिक्ब नु ब्वाक्कुम गाक्ब नु खपीम ग्रेशा गाक्ब जन्तु आन परबम अरेतीक बाक्ब।

47 मिनु ग्रांघा दिशो नु ग्रांघा मदिशो, ब्वचा दुम्ब नु मदुम्ब जन्तु आन परबम तिलीन।

## 12

सुत्केरी दोपा चोव्रखेचा, दे अरेशो

1 मिनु परमप्रभु यावेमी मोसा कली

2 "इसाएली आन कली 'कोव्रज कुरशा तौ थीब मीश मुर ७ नाक्त सम्म ग्रांघा दिशो बाक्ब। मेको आ रां ब्रोल्म नाक्त डा खोदेशो पा ग्रांघा बाक्ब। लेवी १५:१९

3 मिनु ८ नाक्ती मेको आ तौ कली खोइक्तीक चिनु खोइक्चा माल्ब। उत्पती १७:१०-१२; लूका २:२१; यूहन्ना ७:२२

4 मिनु मेको मीश मुर आ हुश चोव्रखेचा कली ३३ नाक्त सम्म दुम्चा माल्ब। मिनु मेकोमी चोव्रखो दुम्तीक नाक्ती मगाम सम्म मारेइ चोव्रखो थोव्रक थिचा मदुम्ब। मिनु गुम्तीक ताम्बु यो ओव्रचा मदुम्ब।

5 तन्न मेकोमी तमी थिप्नु हना, आ रां ब्रोल्म नाक्त डा खोदेशो पा १४ नाक्त सम्म ग्रांघा दिशो बाक्ब। मिनु आ हुश चोव्रखेचा कली ६६ नाक्त दुम्चा माल्ब।

6 मिनु मेको आ चोव्रखेतीक गाम नाक्ती, तौ आ परबम बाक्त हना यो, तमी आ परबम बाक्त हना यो, मेकोमी चोशा चढेचा कली बर्स का गाप्शो भेडा का नु पाप आ परबम चढेचा कली ढुकुर का कि परवा का गुम्तीक ताम्बु आ ओव्रतीकेम बाक्शो चढेब कली चाक्चा माल्ब।

7 मिनु चढेबमी परमप्रभु यावे आ डोंइती मेको चढेशा, मेको आ परबम पाप क्याम्तीक गेय पचा माल्ब। मिनु मेको आ हुश यिशो रे चोव्रखो दुम्ब। मेको मीश मुरुमी तौ कि तमी थिवा नोले, एको पचा माल्शो अरेतीक लोव्र बाक्ब।

8 मिनु मेकोमी भेडा चाक्ने मचाप्बाक्त हना, ढुकुर निक्शी कि परवा निक्शी चाक्चा माल्ब। मेको का चोशा चढेतीक नु का पाप आ परबम चढेतीक बाक्ब। मिनु चढेबमी मेको चढेशा मेको आ परबम पाप क्याम्तीक गेय पचा माल्ब। मिनु मेको ग्रांघा मदिशो दुम्ब' माइक्मी" दंत। लेवी ५:७; लूका २:२४

## 13

कोव्र पाइब आन कली पचा माल्शो

1 परमप्रभु यावेमी मोसा नु हारून आस कली गन्ती १२:१०-१२; ब्यवस्था २४:८-९; अय्युब १८:१३

2 "सुइ मुर आन रां डा कुशुल बोरत हना, गार दुम्त हना, बुश दुम्त हना, मेको कोव्र खोदेशो दुम्त हना, मेको कली चढेब हारून कि आ तौ का आ बाक्तीके चाक्चा माल्ब।

3 मिनु मेको चढेबमी आ रांम दुम्शो गार कोव्रचा माल्ब। मिनु मेको आ गारम बाक्शो चां बुश बाक्त नु मेको आ गार इक्का लुकच लशो बाक्त हना, मेको याक्सीब रोइ बाक्ब। मिनु चढेबमी मेको कली कोव्रडा नोले 'एको ग्रांघा बाक्ब' देचा माल्ब।

4 तन्न मेको कुशुल डा बुश गार कुशुल लुकच मलशो बाक्त हना, मिनु मेकेर वाशो चां यो बुश मदुम्शो बाक्त हना, चढेबमी मेको रोइ पाइब मुर कली ७ नाक्त सम्म तिल्शा वोइक्चा माल्ब।

5 मिनु चढेबमी ७ नाक्त नोले मेको गार लेंशा कोव्रचा माल्ब। मिनु मेको कुशुल डा गार एर ओंथ मबारशो बाक्त हना, चढेबम मेको कली अर्को ७ नाक्त सम्म तिल्शा वोइक्चा माल्ब।

6 मिनु लेंशा ७ नाक्त नोले चढेबमी कोव्रडानु, आ गार बारचा नांइसाक्ब हना, आ कुशुलम मब्रशो बाक्त हना, चढेबम मेको कली ग्रांघा मदिशो बाक्ब, मेको गार ला बाक्ब, देंचा माल्ब। मेको मुर आ वा मुरचा माल्ब। मिनु मेको चोव्रखो दुम्ब।

7 तन्न चढेबमी 'चोव्रखो दुम्त' देंम नोले यो गार बारत हना, मेको लेंशा चढेब आ बाक्तीक जाक्शा, आ गार कोइचा माल्ब।

8 मिनु चढेबमी लेंशा कोव्रचा माल्ब। आ गार कुशुलम बारशा लशो बाक्त हना, चढेबमी 'मेको कली ग्रांघा दिशो बाक्ब' देंचा माल्ब। मेको कोव्र खोदेशो याक्सीब रोइ बाक्ब।

9 मिनु सुइ मुर कली कोव्र खोदेशो याक्सीब रोइ दुम्शो बाक्त हना, चढेब आन बाक्तीकेम चाक्चा माल्ब।

10 मिनू चढेबमी मेको कली कोव्रचा माल्ब। मिनू आ कुशुल बुश दुम्शा बोरशो बाक्त हना, नु मेको आ गार डा चां बुश दुम्शा, बोरशो कुशुल डा गारम श्ये तांडसाक्व हना,

11 मेको शुश नाक्ती सम्म बाक्व कुशुल डा रोड कोव्र बाक्व। मिनू चढेबमी मेको कली 'ग्रांया दिशो बाक्व' देंचा माल्ब। मेकोमी मेको कली तिल्शा वोडक्चा ममाल्ब। मारदे हना मेको ग्रांया दिशो बाक्व।

12 मिनू मेको आ रोड कुशुलम बारना बारन लशा, चढेबमी कोव्रडानु, आ गार पिया रे खोडल सम्म बाक्त हना,

13 चढेबमी मेको कली रिम्शो पा कोव्रचा माल्ब। मिनू मेको कुशुल डा रोडम आ रां नेल्ल कली सुम्शो बाक्त हना, चढेबमी मेको कली 'ग्रांया मदिशो बाक्व' देंचा माल्ब। मारदे हना मेको आ रां नेल्ल बुश दुम्तीके, मेको मुर ग्रांया मदिशो बाक्व।

14 तन्न मेको मुर आ रांम श्ये तांडसाक्व हना, मेको ग्रांया दिशो बाक्व।

15 मिनू चढेबमी मेको तांडसीशो श्ये कोव्रशा, मेको कली 'ग्रांया दिशो बाक्व' देंचा माल्ब। मेको तांडसीशो श्ये ग्रांया बाक्व। मारदे हना मेको कोव्र बाक्व।

16 तन्न मेको तांडसीशो श्ये लेंशा बुश दुम्त हना, मेको मुर लेंशा चढेब आ बाक्तीक लचा माल्ब।

17 मिनू मेको गार बुश दुम्शो बाक्त हना, मेको चढेबमी ग्रांया मदिशो बाक्व देंचा माल्ब। मिनू मेको मुर चोव्रखो बाक्व।

18 सुड मुर आ रांमी कान गूशा, सात हना,

19 मिनू मेको कान गूशा साशो गारम बुश दुम्शा, बोरत हना, कि लल दुम्शा बुश पा बोरत हना, मेको मुरुमी मेको आ गार चढेब कली कोड्चा माल्ब।

20 मिनू चढेबमी रिम्शो पा कोव्रडानु, मेको गार लुकच लशो बाक्त नु चां यो बुश दुम्शो बाक्त हना, मेको कली 'ग्रांया दिशो बाक्व' देंचा माल्ब। मेको कोव्र खोदेशो रोड कान रे गूशो बाक्व।

21 तन्न चढेबमी रिम्शो पा कोव्रडानु, मेकेर बुश चां मगूशो बाक्त नु मेको कुशुल क्येडा लुकच मलशो बाक्त हना, तन्न सोव्रना सोव्रन, जाम्ना जाम्न लशो बाक्त हना, चढेबमी मेको कली ७ नाक्त सम्म तिल्शा वोडक्चा माल्ब।

22 मेको गार कुशुलम बारना बारन लत हना, चढेबमी मेको कली 'ग्रांया दिशो बाक्व' देंचा माल्ब। मारदे हना मेको याक्सीब रोड बाक्व।

23 तन्न मेको गार एर ओंथ मबारथु, मेक उड ला बाक्त हना, मेको कान आ खत बाक्व। चढेबमी मेको कली 'ग्रांया मदिशो बाक्व' देंचा माल्ब।

24 सुड मुर आन रांमी दुप्शा गार दुम्त नु मेको दुप्शो गारम नक श्ये गूशा, लल दुम्त हना यो, बुश दुम्त हना यो,

25 चढेबमी मेको गार रिम्शो पा कोव्रचा माल्ब। मिनू मेको गार डा चां बुश दुम्शा, कुशुल क्येडा लुकच लशो बाक्त हना, मेको याक्सीब रोड बाक्व। मेको दुप्शो गार रे गूशो बाक्व। मिनू चढेबमी मेको कली 'ग्रांया दिशो बाक्व' देंचा माल्ब। मेको कुशुल डा याक्सीब रोड बाक्व।

26 तन्न चढेबमी रिम्शो पा कोव्रडानु, मेको गार डा चां बुश मबाक्थु नु कुशुल क्येडा लुकच मलथु, सोव्रना सोव्रन बाक्त हना, चढेबमी मेको मुर कली ७ नाक्त सम्म तिल्शा वोडक्चा माल्ब।

27 मिनू चढेबमी मेको कली ७ नाक्त नोले रिम्शो पा कोव्रचा माल्ब। मिनू मेको कुशुलम एर ओंथ बारशो बाक्त हना, चढेबमी मेको कली 'ग्रांया दिशो बाक्व' देंचा माल्ब। मेको याक्सीब कुशुल डा रोड बाक्व।

28 तन्न मेको गार एर ओंथ मबारथु, सोव्रना सोव्रन लशो बाक्त हना, मेको दुप्शो रे होम्शो ला बाक्व। मिनू चढेबमी मेको कली 'ग्रांया मदिशो बाक्व' देंचा माल्ब। मारदे हना, मेको दुप्शो गार आ खत ला बाक्व।

29 सुड मीश मुर, वोंडश मुर आन पियाम, गाल शोक्नेम मारिड गार का बाक्त हना,

30 चढेबमी मेको गार रिम्शो पा कोव्रचा माल्ब। मिनू मेको कुशुल क्येडा लुकच लशो बाक्त हना, नु मेको गार डा चां हाव जिशो नु आडक्च बाक्त हना, चढेबमी मेको कली 'ग्रांया दिशो बाक्व' देंचा माल्ब। मेको रक सुडब आ पिया डा नु गाल शोक्ने डा याक्सीब रोड बाक्व।

31 मिनू चढेबमी मेको रक सुडब रोड रिम्शो पा कोव्रडानु, मेको कुशुल क्येडा लुकच मलशो नु मेकेर क्येर चां यो मबाक्तेक्म हना, चढेबम मेको कली ७ नाक्त सम्म तिल्शा वोडक्चा माल्ब।

32 मिनू ७ नाक्त नोले चढेबमी मेको कली रिम्शो पा कोव्रचा माल्ब। मिनू मेको रक सुडब रोड मबारशो बाक्त हना, मेक डा चां हाव मजिशो बाक्त नु गार यो कुशुल क्येडा लुकच मलशो बाक्त हना,

33 मेकोमी गार प्रोंडशा आ चां प्रेक्चा माल्ब। मिनू चढेबम मेको रोड पाडब कली अर्को ७ नाक्त सम्म तिल्शा वोडक्चा माल्ब।

34 मिनू ७ नाक्त नोले चढेबमी मेको रक सुडब गार रिम्शो पा कोव्रचा माल्ब। मिनू मेको मबारथु, कुशुल क्येडा लुकच मलशो बाक्त हना, चढेबमी मेको कली 'ग्रांया मदिशो बाक्व' देंचा माल्ब। मिनू मेको मुर आ वा मुरशा, चोव्रखो दुम्ल।

35 तन्न मेको चोव्रखो दुम नोले यो मेको रक सुडब रोड बारशा लत हना,

36 चढेबमी मेको गार रिम्शो पा कोव्रचा माल्ब। मेको कुशुलम बारशा लशो बाक्त हना, चढेबमी मेकेर डा चां हाव बाक्म कों मबाक्म, दे कोव्रचा ममाल्ब। मेको मुर ग्रांया दिशो बाक्व।

37 तन्न चढेबमी मेको रक सुडब रोड रिम्शो पा कोव्रडानु मेकेर क्येर चां वाशो बाक्त हना, मेको साशो बाक्व। मेको ग्रांया मदिशो बाक्व। मिनू चढेबम मेको कली 'ग्रांया मदिशो बाक्व' देंचा माल्ब।

38 सुड मीश मुर, वोंडश मुर आन रांम बुश गारपुकी बाक्तेक्म हना,

39 चढेबमी मेको रिम्शो पा कोव्रचा माल्ब। मिनू मेको आन रां डा गारपुकी बुश बाक्तेक्म हना, मेको कुशुल डा रोड ला बाक्व। मेको कुशुल रे ला गूशो बाक्व। मेको मुर ग्रांया मदिशो बाक्व।

- 40 सुइ मुर आन पिया डा चां दुल्शो बाक्त हना, मेको ग्रांरा मदिशो बाक्नीम।  
 41 मेको आ चां कुप्फी रे दुल्शो बाक्त हना, मेको ग्रांरा मदिशो बाक्ब।  
 42 तन्न मेको आन कुप्फीमी लल बुश गार गूत हना, मेको कुप्फीम यूशो याक्सीब रोइ बाक्ब  
 43 मिनु चढेबमी मेको कली रिम्शो पा कोवडानु, आ कुप्फीम होम्शो गार लल बुश नु कोवुर खोदेशो तांइसाक्व हना,  
 44 मेको मुर कोवुर पशो नु ग्रांरा दिशो बाक्ब। मिनु चढेबमी मेको कली 'ग्रांरा दिशो बाक्ब' देंचा माल्ब। मेको रोइ आ पियाम बाक्ब।

कोवुर पाइबमी मार पचा माल्शो

- 45 कोवुर पशो मुरुम गाक्शो वा फेक्शा, आ पियाम मारेइ गुप्चा मदुम्ब। मेकोमी आ गाल शोके कली सुम्शा 'ग्रांरा दिशो, ग्रांरा दिशो' दे ग्रीचा माल्ब।  
 46 मेको आ रोइ गेना सम्म लीबा, मेना सम्म मेको ग्रांरा दिशो दुम्ब। मेको आ कांइचीक बाक्चा माल्ब। मिनु मेको मुर आन बाक्तीक क्येडा डोन बाक्चा माल्ब। गन्ती ५:२-३; २राजा १५:५

बुंखी डाइशो थोव्रक

- 47 मिनु वाम बुंखी डाइक्ताक्व हना, ऊन के वासी बाक्त हना यो, सुती के वासी बाक्त हना यो,  
 48 फेक्तीक नेल्ल, कुशुल के सेल्शो मारेइ मारेइमी  
 49 बुंखी डाइशो गिगी लल लुम्सीशो बाक्त हना, वासी नेल्ल नु मारेइ मारेइ चढेब कली कोंइचा माल्ब।  
 50 मिनु चढेबमी मेको रिम्शो पा कोवुरचा माल्ब। मिनु मेको बुंखी डाइशो थोव्रक आन कली ७ नाक्त सम्म तिल्ला वोइक्चा माल्ब।  
 51 मिनु चढेबमी ७ नाक्त नोले लेंशा रिम्शो पा कोवुरचा माल्ब। मिनु मेको वासी, कुशुल के सेल्शो मारेइ थोव्रकीम बुंखी बारशा लशो बाक्त हना, मेको बिग्रेब बुंखी डाइशो बाक्ब। मेको थोव्रक ग्रांरा दिशो बाक्ब।  
 52 मिनु मेकोमी बुंखी डाइशो वासी कि कुशुल के सेल्शो मारेइ थोव्रक चोचा माल्ब। मारदे हना मेको राक्ब बुंखी बाक्ब। मेको मीम चोचा माल्ब।  
 53 तन्न चढेबमी रिम्शो पा कोवडानु, मेको वासी, कि कुशुल के सेल्शो मारेइ थोव्रकम मेको बुंखी मबारशो बाक्त हना,  
 54 मिनु चढेबमी मेको मुर कली 'मेको बुंखी डाइशो थोव्रक मुरचा माल्ब' दे अरेचा माल्ब। मिनु मेकोमी चिनु ७ नाक्त सम्म मेको वासी कली तिल्ला वोइक्चा माल्ब।  
 55 मेको मुरशो नोले चढेबम मेको कली रिम्शो पा कोवुरचा माल्ब। मिनु मेको बुंखी आ लुम्सीशो रड मफांइसीशो बाक्त हना यो, मेको ग्रांरा दिशो बाक्ब। मेको बुंखी आ तार गे बाक्त हना यो, आगा गे बाक्त हना यो, मेको कली मीम चोचा माल्ब।  
 56 तन्न चढेबमी मेको मुरशो नोले कोवडानु, बुंखी जाम्ना जाम्म लशो बाक्त हना, मेको वासी कि मारेइ मारेइ कुशुल के सेल्शो मेको लुम्सीशो ला खाक्शा ताइक्चा माल्ब।  
 57 तन्न मेको बुंखी, वासी, कुशुल के सेल्शो मारेइ मारेइमी लेंशा तांइसाक्व हना, मेको बारना बारन लशो बाक्ब। मेको बुंखी डाइशो थोव्रक मीम चोचा माल्ब।  
 58 मिनु मेको वासी, कुशुल के सेल्शो मारेइ मारेइ थोव्रक मुरशोनु, मेको रे बुंखी लत हना, मेको लेंशा मुरचा माल्ब। मेको ग्रांरा मदिशो बाक्ब।  
 59 ऊन के सेल्शो वासीम, सुती के वासी नु कुशुल के सेल्शो मारेइ थोव्रकम बुंखी डाइशो आ पर्वम ग्रांरा दिशो नु मदिशो आन पर्वम पचा माल्शो गेय एकोन बाक्नीम, दे शेंचा" दे मोसा नु हारून आस कली देंत।

## 14

कोवुर साम नोले पचा माल्शो

- 1 मिनु परमप्रभु यावेमी मोसा कली  
 2 "कोवुर खोदेशो पा रोइ पशो मुर कली आ रोइ साम नोले मार पचा माल्ब देंशा हना, मुरुमी मेको कली चढेब आन बाक्तीक चाक्चा माल्नीम। मती ८:४  
 3 मिनु चढेबमी मुर आन बाक्तीके रे लाडगा यूशा, मेको मुर कली रिम्शो पा कोवुरचा माल्ब। मिनु मेको कुशुल डा याक्सीब रोइ साशो बाक्त हना,  
 4 मेको चढेबमी मेको चोव्रखो सेल्चा पुंइसीशो मुर आ पर्वम 'सेस नु चोव्रखो चिक्ब निक्शी, लेबानोन डा लाइशो रवा आ शी, लल रडम नुप्शो ऊन नु हिस्सोप चाक्को' दे अरेचा माल्ब। लेवी ११:३-२०; गन्ती १९:६  
 5 मिनु चढेबमी 'मेको चिक्ब निक्शीमी का खप के सिक्स ब्वाक्कुम ब्रीशो बोस तारी सतो' दे अरेचा माल्ब।  
 6 मिनु चढेबमी मेको सेस चिक्ब, मेको लेबानोन डा लाइशो रवा आ शी, मेको लल रडम नुप्शो ऊन नु हिस्सोप मेको सिक्स ब्वाक्कु तारी साइशो चिक्ब आ हुशेमी खुम्शा गुंइचा माल्ब।  
 7 मिनु मेकोमी रोइ रे साशो चोव्रखो सेल्चा पुंइसीब मुर कली ७ खेयप बुइशो 'चोव्रखो बाक्ब' देंचा माल्ब। मिनु मेकोमी मेको सेस चिक्ब कली प्रोइशा बेरपाइक्चा माल्ब। लेवी १६:२२  
 8 मिनु मेको चोव्रखो सेल्चा पुंइसीशो मुरुम आ वा मुरचा माल्ब। आ चां नेल्ल प्रेक्शा, चिक्चा माल्ब। मिनु मेको ग्रांरा मदिशो चोव्रखो दुम्ब। मिनु नोले मुर आन बाक्तीके लचा दुम्ब। तन्न ७ नाक्त सम्म आ ताम्बु आ लाडगाम बाक्चा माल्ब। गन्ती ८:७

9 मिनू ७ नाक्त नोले मेकोमी आ चां, गाल शोत्रे, मुकुक्स नेल्ल प्रेक्चा माल्ब। मिनू नोले आ वा मुरशा, चिक्चा माल्ब। मिनू मेको मुर चोत्रखो दुम्ब।

10 मिनू ८ नाक्त नोले मेकोमी मारिड मदुम्शो थम रिम्शो सांड निकशी नु बर्स का दुम्शो मारिड मदुम्शो थम रिम्शो पाठी का, अन्न चढेचा कली तेलम निशो थम रिम्शो फस एफाह का के ३० भाग नु लोग का तेल चाक्चा माल्ब। एफाह पुक्तीके का बाक्ब। एफाह का २२ लिटर रिक्ब। मेको डा ३० भाग ६.५ लिटर खोदेंशो बाक्ब। नेल्ल १२ माना खोदेंशो बाक्ब। लोग का पुक्तीके का बाक्ब। मेको ०.३ लिटर रिक्ब।

11 मिनू चढेबमी मेको चोत्रखो सेल्चा पुंडसीशो मुर नु मेको आ चाक्शो नेल्ल परमप्रभु यावे आ डोंइती गुम्तीक ताम्बु आ ओव्रतीकेम वोडक्चा माल्ब।

12 मिनू चढेबमी सांड का नु मेको लोग का तेल गारचा आ पर्वम चढेचा माल्ब। मिनू क्युक्शा हिम्शा चढेतीक परमप्रभु यावे आ डोंइती चढेचा माल्ब। लोग आडक्च पुक्तीके बाक्ब। मेको ०.३ लिटर रिक्ब।

13 मिनू मेकोमी पाप आ पर्वम चढेतीक नु चोशा चढेतीक साडक्तीके मेको चोत्रखो बाक्तीकेम साडक्चा माल्ब। मारदे हना गारचा आ पर्वम चढेशो नु पाप आ पर्वम चढेशो चढेब के दुम्ब। मेको थम चोत्रखो बाक्ब। लेवी ७:७

14 मिनू चढेबमी मेको गारचा आ पर्वम चढेशो आ हुश लाइशशा, मेको चोत्रखो सेल्चा पुंडसीशो मुर आ ग्युरा नोफा आ फेनेम, आ ग्युरा गुड डा बोंग्ये नु आ ग्युरा खोइल डा बोंग्येमी खेक्चा माल्ब। लेवी ८:२३; प्रस्थान २९:२०

15 मिनू चढेबमी मेको तेल रे इक्का लाइशशा, आ पेरा गुड डा ताप्लाम लुक्चा माल्ब।

16 मिनू चढेबमी आ ग्युरा गुड डा ब्रेप्चोम आ पेरा गुडम बाक्शो तेलम खुम्शा, परमप्रभु यावे आ डोंइती ७ खेयप बुडक्चा माल्ब। लेवी ४:६, १७

17 मिनू चढेबमी आ गुडम लीशो तेल चोत्रखो सेल्चा पुंडसीशो मुर आ ग्युरा नोफा डा फेनेम, मेको आ ग्युरा गुड डा बोंग्येमी नु आ ग्युरा खोइल डा बोंग्येम नु गारचा आ पर्वम चढेशो आ हुश तारी खेक्चा माल्ब।

18 मिनू चढेबमी आ गुडम लीशो तेल मेको चोत्रखो सेल्चा पुंडसीशो मुर आ पियाम खेक्चा माल्ब। मिनू चढेबमी परमप्रभु यावे आ डोंइती मेको मुर आ पर्वम पाप क्याम्तीक गेय पचा माल्ब।

19 मिनू चढेबमी मेको आ पाप आ पर्वम चढेचा माल्ब। मोपा मेको चोत्रखो सेल्चा पुंडसीशो मुरुम पाप क्याम्तीक गेय पशो बाक्ब। मिनू नोले मेकोमी चोशा चढेतीक क्योरचा माल्ब।

20 मिनू चढेबमी मेको चोशा चढेतीक नु अन्न चढेतीक चढेतीकेम चढेचा माल्ब। मोपा मेको चढेबमी मेको आ पर्वम पाप क्याम्तीक गेय पचा माल्ब। मिनू मेको मुर ग्रांशा मदिशो चोत्रखो दुम्ब।

21 मिनू मेको मुर पुडग बाक्त हना, मोशो यो चाकने मचाप्वाक्त हना, मेकोमी आ पाप क्याम्तीक गेय आ पर्वम क्युक्शा हिम्शा चढेचा कली सांड का नु अन्न चढेचा कली तेलम निशो एफाह का के १० भाग थम रिम्शो फस नु लोग का तेल चाक्चा माल्ब। एफाह पुक्तीके का बाक्ब। एफाह का २२ लिटर रिक्ब। मेको के १० भाग २ लिटर नु इक्का खोड बाक्ब। लोग आडक्च पुक्तीके का बाक्ब। मेको ०.३ लिटर रिक्ब।

22 मिनू आ चाप्शो खोदेंशो पा परवा निकशी कि डुकुर निकशी, का पाप आ पर्वम चढेचा कली नु का चोशा चढेचा कली चाक्चा माल्ब। लेवी ५:७

23 मिनू मेकोमी ८ नाक्ती आंम कली चोत्रखो सेल्पाडक्चा कली मेको निकशी गुम्तीक ताम्बु आ ओव्रतीक परमप्रभु यावे आ डोंइती चढेब आ बाक्तीकेमी चाक्चा माल्ब।

24 मिनू चढेबमी गारचा आ पर्वम चढेचा कली मेको सांड नु लोग का तेल चाक्शा, क्युक्शा, हिम्शा, चढेतीके परमप्रभु यावे आ डोंइती क्युक्शा हिम्शा चढेचा माल्ब। लोग का इस्राएली आन आडक्च पुक्तीक का बाक्ब। मेको ०.३ लिटर रिक्ब। मेको माना का नु इक्का खोड खोदेंशो बाक्ब।

25 मिनू चढेबमी मेको गारचा आ पर्वम चढेतीक सांड क्योरशा, मेको आ हुश इक्का लाइशशा, चोत्रखो सेल्चा पुंडसीब मुर आ ग्युरा नोफा डा फेनेम, आ ग्युरा गुड डा बोंग्ये नु आ ग्युरा खोइल डा बोंग्येमी खेक्चा माल्ब।

26 मिनू चढेबमी मेको तेल इक्का आ पेरा गुड डा ताप्लाम लुक्चा माल्ब।

27 मिनू आ ग्युरा गुड डा ब्रेप्चोम पेरा गुडम बाक्शो तेल परमप्रभु यावे आ डोंइती ७ खेयप बुडक्चा माल्ब।

28 मिनू चढेबमी आ गुडम बाक्शो तेल मेको चोत्रखो सेल्चा पुंडसीब मुर आ ग्युरा नोफा आ फेनेम, आ ग्युरा गुड डा बोंग्ये नु आ ग्युरा खोइल डा बोंग्येम गारचा आ पर्वम चढेशो आ हुश खेक्शो तार खेक्चा माल्ब।

29 मिनू चढेबमी आ गुडम लीशो तेल मेको चोत्रखो सेल्चा पुंडसीब मुर आ पियाम खेक्चा माल्ब। मोपा मेकोमी चोत्रखो सेल्चा पुंडसीब मुर कली परमप्रभु यावे आ डोंइती पाप क्याम्तीक गेय पाडब।

30 मिनू मेकोमी डुकुर कि परवा आ चाप्शो खोदेंशो पा चढेचा माल्ब।

31 मिनू का पाप आ पर्वम, का चोशा चढेचा कली अन्न चढेतीक नु चढेचा माल्ब। मोपा चढेबमी चोत्रखो सेल्चा पुंडसीब मुर आ पर्वम परमप्रभु यावे आ डोंइती पाप क्याम्तीक गेय पचा माल्ब।

32 कुशुल डा याक्सीब रोड पशा, चोत्रखो दुम्तीक आ पर्वम पुडग आन पचा माल्शो गेय एको बाक्ब” देत। लेवी १३:४७-५९

बुंखी डाइशशो खिं

33 परमप्रभु यावेमी मोसा नु हारून आस कली

34 “मुल गो इन कली गेशो कनान रागीम जाक्दीशशा बाक्नीनु, इन आंम के सेल्नी नोले, गो मेको रागी डा तेकोड खिंम बुंखी डाइक्पाडक्ता हना,

- 35 मेको खिं डा मुर जाकशा चढेब कली 'आं खिंम बुंखी डाइशशो खोदेशो तांडसाकव' देंचा माल्ब। लेवी १३:२
- 36 मिनु चढेबमी 'आं जाकशा रिम्शो पा कोव्रचा क्येडा डोंइती इ खिं कली श्येत्थ पावो। मो मपाइतीनी हना खिंम बाकशो मारंड मारंड ग्रांरा दिशो दुम्ब' दे अरेचा माल्ब। मिनु नोले मेको चढेब मेको खिं कोव्रथ लचा माल्ब।
- 37 मिनु मेकोमी मेको बुंखी डाइशशो रिम्शो पा कोव्रचा माल्ब। मेको खिं डा गारो गिगी, लल दुम्शा, गारो क्येडा लुकच लशो बाक्त हना, लेवी १३:३
- 38 चढेब खिं रे लाडगा यूशा, ७ नाक्त सम्म लाप्यो चोक्शा वोइक्चा माल्ब।
- 39 मिनु मेको चढेब ७ नाक्त नोले जाकशा, मेको बुंखी गारोम बारशो बाकम कों मबाकम रिम्शो पा कोव्रचा माल्ब। मिनु मेको गारोम बारशो बाक्त हना,
- 40 चढेबमी मेको बुंखी डाइशशो फुल्लु गुंडपाइशशा, सहर क्येडा डोन ग्रांरा दिशो ताइक्तीकेमी ताइक्पाइक्चा माल्ब।
- 41 मेको खिं आगा तेड तेड खोतेर पपाइक्चा माल्ब। मिनु खोतेर पाइशशो खप सहर क्येडा डोन ग्रांरा दिशो ताइक्तीकेमी ताइक्पाइक्चा माल्ब।
- 42 मिनु नोले मेकोपुकीमी ताइशशो फुल्लु आ पा डा अर्को फुल्लु चाकशा, मेको फुल्लु बाक्तीकेम प्रोव्रचा माल्नीम। मिनु नक खप चाकशा, खिं सिल्चा माल्नीम।
- 43 मिनु फुल्लु गुंडशा, अर्को फुल्लु प्रोव्रशा, खप खोतेर पा गुंडशा, अर्को खप सिल्चा यो, मेको बुंखी लेशा यूत हना,
- 44 चढेबमी लेशा जाकशा, रिम्शो पा कोव्रचा माल्ब। मिनु मेको बुंखी खिंम बारना बारन लशो बाक्त हना, मेको बारतीक बुंखी डाइशशो बाकब। मेको खिं ग्रांरा बाकब।
- 45 मिनु मेको खिं कली प्रेत्चा माल्ब। मेको आ फुल्लु, शी नु सिल्शो खप सहर क्येडा डोन ग्रांरा दिशो ताइक्तीकेमी ताइक्चा माल्ब।
- 46 मिनु सुड मेको खिं चोक्शो नोले ओव्रत हना, मेको नां मरिक्म सम्म ग्रांरा दिशो दुम्ब। लेवी ११:२४
- 47 मिनु सुड मेको खिंमी इप्त हना यो, जापुत हना यो, मेकोमी आ वा मुरचा माल्ब।
- 48 तन्न चढेबमी मेको खिं रिम्शो पा कोव्रडानु, सिल्शा फिक्शा नोले मेको बुंखी डाइशशो मबारत हना, चढेबमी मेको खिं कली 'ग्रांरा मदिशो चोव्रखो बाकब' देंचा माल्ब। मारदे हना मेको बुंखी जाम्शा लत।
- 49 मिनु मेको खिं डा मुरुमी खिं कली चोव्रखो सेल्चा कली चिक्ब निक्शी, लेबानोन डा लाइशशो रवा आ शी, हिस्सोप नु लल श्येले चाकचा माल्ब।
- 50 मिनु चढेबमी 'मेको चिक्ब निक्शीमी का खप के सिक्स ब्वाक्कुम ब्रीशो बोस तारी सतो' दे अरेचा माल्ब। लेवी १४:४-७
- 51 मिनु चढेबमी मेको लेबानोन डा लाइशशो रवा आ शी, हिस्सोप नु लल रडम नुप्यो श्येले नु मेको सेस चिक्ब लाइशशा, मेको नेल्ल कली मेको सिक्स ब्वाक्कु तारी साइशशो चिक्ब आ हुशेमी खुम्शा गुंडचा माल्ब। मिनु मेकोमी मेको खिं कली ७ खेयप बुइक्चा माल्ब।
- 52 मोपा मेकोम चिक्ब आ हुश, सिक्स ब्वाक्कु, सेस चिक्ब, लेबानोन डा लाइशशो रवा आ शी, हिस्सोप नु लल रडम नुप्यो श्येलेमी मेको खिं ग्रांरा मदिशो चोव्रखो सेल्चा माल्ब।
- 53 मिनु मेकोमी मेको सेस चिक्ब कली सहर रे लाडगा प्रोइशा बेरपाइक्चा माल्ब। मोपा मेकोमी मेको खिं डा बुंखी क्याम्तीक गेय पचा माल्ब। मिनु मेको खिं ग्रांरा मदिशो चोव्रखो दुम्ब।
- 54 मिनु कुशुल डा याकसीब रोड नेल्ल, रक सुडब रोड,
- 55 वासी नु खिं डा बुंखी डाइक्तीके,
- 56 होम्शो नु आइक्च गार नु बुश लुम्सीशो गारपुकी चोव्रखो सेल्तीक गेय एकोन बाक्नीम।
- 57 ग्रांरा दिशो नु मदिशो तुइक्तीक एको बाकब। मेको कोव्र नु कोव्र खोदेशो रोड नु बुंखी डाइशशो आन पर्बम पतीक गेय एकोन बाक्नीम" दे परमप्रभु यावेमी मोसा नु हारून आस कली माइक्तीमसी।

## 15

वोंइश मुर आ रां डा ग्रांरा दिशो

- 1 परमप्रभु यावेमी मोसा नु हारून आस कली
- 2 "इसाएली आन कली 'सुड वोंइश मुर आन के मार मार यित हना यो, मेको यितिके मेको मुर ग्रांरा दिशो बाकब। गन्ती ५:२
- 3 मेको आ रां रे यितिके मार बाकब देंशा हना, रां रे यित हना यो, देक्त हना यो, मेको मुर ग्रांरा दिशो बाकब।
- 4 मेको मुर इप्यो ब्राख्ये नेल्ल नु आ निरशो नित्तीके नेल्ल ग्रांरा दिशो बाक्नीम।
- 5 सुमी मेको आ ब्राख्ये थीबा, मेकोमी आ वा मुरशा, चिक्सीचा माल्ब। मिनु मेको नां मरिक्म सम्म ग्रांरा दिशो दुम्ब।
- 6 मिनु सु मेको आ नित्तीकेमी निप्या, मेकोमी आ वा मुरशा, चिक्सीचा माल्ब। मिनु मेको नां मरिक्म सम्म ग्रांरा दिशो दुम्ब।
- 7 सुमी मेको मुर कली थीबा, मेकोमी आ वा मुरशा, चिक्सीचा माल्ब। मिनु मेको नां मरिक्म सम्म ग्रांरा दिशो दुम्ब।
- 8 मेको मुरुमी चोव्रखो मुर कली तोक्ताकव हना, मेको चोव्रखो मुर चिक्सीचा माल्ब। मेकोमी आ वा मुरचा माल्ब। मिनु मेको नां मरिक्म सम्म ग्रांरा दिशो दुम्ब।
- 9 मेको मुर तेको शारा तार ब्रतीके थेंकाम निप्या, मेको ग्रांरा दिशो दुम्ब।



10 सुमी मेको आ नित्तीके थीबा, मेको नां मरिक्म सम्म ग्रांरा दुम्ब। सुमी मेको थोत्रक कुरबा, मेकोमी आ वा मुरशा, चिक्सीचा माल्ब। मेको नां मरिक्म सम्म ग्रांरा दुम्ब।

11 मेको मुरुमी आ गुड मचिक्थु, सुड कली थिप्टु हना, मेको थिचा पुंडसीब मुरुम आ वा मुरशा, चिक्सीचा माल्ब। मिनु मेको नां मरिक्म सम्म ग्रांरा दुम्ब।

12 मेको मुरुम तेकोड खप के बोस थिप्टु हना, मेको प्रोल्चा माल्ब। तन्न शी के बाक्त हना, ब्वाक्कुम शेक्चा माल्ब। लेवी ११:३३

13 मेको मुरुमी आ ग्रांरा दिशो देक्म नोले, चोत्रखो दुम्चा कली ७ नाक्त रिम्चा माल्ब। मिनु आ वा मुरशा, आ रां नेल्ल ब्वाक्कुम चिक्सीचा माल्ब। मिनु मेको चोत्रखो दुम्ब।

14 मिनु मेकोमी ८ नाक्ती परवा निक्शी कि दुक्कुर निक्शी कुरशा, परमप्रभु यावे आ डोंइती युम्तीक ताम्बु आ ओत्रतीक जाक्शा, मेको चढेब कली गेचा माल्ब। लेवी ५:७

15 मिनु चढेबमी मेको का पाप आ परबंम नु का चोशा चढेतीक चढेचा माल्ब। मोपा चढेबमी मेको ग्रांरा दिशो यिशो मुर आ परबंम परमप्रभु यावे आ डोंइती पाप क्याम्तीक गेय पचा माल्ब।

16 मिनु सुड वोंइश मुर आ बिउ मोशा यित हना, मेकोमी आ रां नेल्ल ब्वाक्कुम चिक्सीचा माल्ब। मिनु मेको नां मरिक्म सम्म ग्रांरा दुम्ब। लेवी २२:४

17 मिनु आ बिउ तेको वा नु कुशुल के सेल्शो मारेइमी दोक्त हना, मेको मुरचा माल्ब। मिनु मेको नां मरिक्म सम्म ग्रांरा दुम्ब।

18 सुड वोंइश मुर मीश मुर नु इम्मेनु, बिउ दोक्त हना, मेको निम्फा चिक्सीचा माल्नीस। मिनु नां मरिक्म सम्म ग्रांरा दुम्नीस।

मीश मुर आ रां डा ग्रांरा दिशो

19 सुड मीश मुर मथिचा दुम्त हना, मेको आ रां डा दुम्तीक बाक्ब। मेको ७ नाक्त सम्म ग्रांरा दिशो दुम्ब। सुम मेको कली थीबा, मेको नां मरिक्म सम्म ग्रांरा दिशो बाक्ब। लेवी १८:१९

20 मेको मीश मुर ग्रांरा दिशो दुम्मेनु, आ इप्तीके नु नित्तीके नेल्ल ग्रांरा दिशो दुम्नीम।

21 सुम मेको आ ब्राख्ये थीबा, मेकोमी आ वा मुरशा, चिक्सीचा माल्ब। मिनु मेको नां मरिक्म सम्म ग्रांरा दिशो दुम्ब।

22 सुम मेको आ निश्शो थोत्रक थीबा, मेकोमी आ वा मुरचा माल्ब। मिनु चिक्सीचा माल्ब। मिनु मेको नां मरिक्म सम्म ग्रांरा दिशो दुम्ब।

23 सुड मुरुमी आ ब्राख्ये कि आ निश्शो पीरा थिप्टु हना, मेको नां मरिक्म सम्म ग्रांरा दिशो दुम्ब।

24 मिनु वोंइश मुर मेको नु इप्ट नु मेको आ ग्रांरा दिशो लुम्साक्व हना, मेको ७ नाक्त सम्म ग्रांरा दिशो दुम्ब। मिनु मेको आ इप्शो ब्राख्ये यो ग्रांरा दिशो दुम्ब।

25 मिनु सुड मीश मुर आ रां ब्रोल्शो प्रोंइशा मेको क्येडा शुश नाक्त सम्म हुश यिस डा यिस बाक्त हना, आ मथिचा दुम्शो नडा खोदेशो पा ग्रांरा दिशो दुम्ब। मेको आ मथिचा नाक्त खोदेशो पा मेको ग्रांरा दिशो दुम्ब।

26 मेको आ हुश यिशो नाक्त, आ इप्शो ब्राख्ये आ मथिचा दुम्शो नडा खोदेशो पा ग्रांरा दिशो दुम्ब। आ निश्शो पीरा आ मथिची नडा खोदेशो पा ग्रांरा दिशो दुम्ब।

27 मेको थोत्रक थीब ग्रांरा दिशो दुम्ब। मेकोमी आ वा मुरशा, चिक्सीचा माल्ब। मिनु मेको नां मरिक्म सम्म ग्रांरा दिशो दुम्ब।

28 मेकोमी आ हुश यिचा देक्म नोले ७ नाक्ती रिम्चा माल्ब। मिनु मेको नोले मेको ग्रांरा मदिशो दुम्ब।

29 मिनु ८ नाक्ती मेकोमी दुक्कुर निक्शी कि परवा निक्शी चाक्शा, युम्तीक ताम्बु आ ओत्रतीक चढेब आ डोंइती जाक्चा माल्ब।

30 मिनु चढेबमी का पाप आ परबंम नु का चोशा चढेतीके चढेचा माल्ब। मोपा चढेबमी मेको आ हुश यिशो आ परबंम परमप्रभु यावे आ डोंइती मेको आ परबंम चोत्रखो दुम्तीक गेय पचा माल्ब।

31 मोपा गे निक्शीमी इसाएल डा मुर आन कली ग्रांरा दितीक रे डोन वोतीस। मो मपाइतीसी हना, मेकोपुकीम आं बाक्तीक ताम्बु ग्रांरा दिशो सेल्नीम। मिनु मेको आन ग्रांरा आ परबंम बेक्नीम।

32 एको ग्रांरा दिशो यितीक कि बिउ दोक्शो ग्रांरा दिशो दुम्शो वोंइश मुर आ परबंम चोत्रखो सेल्तीके गेय बाक्ब।

33 मिनु मथिचा दुम्शो, ग्रांरा यिशो वोंइश मुर कि मीश मुर नु ग्रांरा दिशो दुम्शो मीश मुर नु इप्ट वोंइश मुर आन कली ग्रांरा मदिशो सेल्तीक गेय एकोन बाक्नीम” देचा माल्नीसी” देत।

## 16

पाप क्याम्तीक नाक्त

लेवी २३:२६-३२; गन्ती २९:७-११; हिब्रू ९:७-१४

1 हारून आ तो निक्शी परमप्रभु यावे आ डोंइती बेक्सा नोले परमप्रभु यावेमी मोसा नु लोत्र पाप्टु। लेवी १०:१-२;

2 मिनु परमप्रभु यावेमी मोसा कली “इ लोकब हारून कली “इ दाक्शो खोदेशो पा, गेना हना यो फारशो वा आ आगा बाक्शो चोत्रखो कोठामी कबल पशो सन्दोस तार बाक्शो शिशी पतीके आ डोंइती मजाक्को। मटीतीनी हना, गे बेक्नेवे। मारदे हना गो शिशी बाक्तीकेम गोम्स आगाम बाक्शा जाक्नुड। प्रस्थान २६:३३-३४

3 हारून दोपा ओवने चाप्व देशा हना, पाप आ परबम चढेचा कली ब्यफ का नु चोशा चढेचा कली सांड का चाकशा ला ओवने चाप्व। लेवी ४:३; लेवी १:१०

4 सुती के आं गेय पचा कली ला आगा फेक्तीक वा फेक्शा, सुती के आ तार फेक्तीक फेक्शा, सुती के किप्शुर किप्शा नु सुती वा के पियाम गुप्तीक गुक्शा ओवचा माल्व। मेको वा आ गेय पचा कली ला बाक्ता। मेकोमी चिकसीशा ला मेको वा फेक्सीचा माल्व। प्रस्थान २८:३९, ४२; प्रस्थान २९:४; प्रस्थान ३०:१९-२०

5 मेकोमी इस्राएल डा मुर आन गुड रे पाप आ परबम चढेचा कली बोका निकशी नु चोशा चढेचा कली सांड का ताक्चा माल्व। लेवी ३:९, १५, १६

6 मिनु हारूनमी आंम पाप आ परबम चढेतीक ब्यफ चढेचा माल्व। मिनु आ नु आ खिं डा मुर आन परबम पाप क्याम्तीक गेय पचा माल्व। लेवी ९:२, ८-११; हिबू ७:२७

7 मिनु मेकोमी मेको बोका निकशी लाइशशा, गुम्तीक ताम्बु आ ओवतीक परमप्रभु यावे आ डोंइती वोइक्चा माल्व।

8 मिनु हारूनमी मेको बोका निकशी आ परबम फेन्टे आप्चा माल्व। मेकोमी परमप्रभु यावे कली का नु मो प्रोंइचा कली का फेन्टे आप्चा माल्व।

9 मिनु हारूनमी परमप्रभु यावे कली दुम्शो बोका कली आ नेक्था चाकशा पाप आ परबम चढेचा माल्व।

10 फेन्टे आप्चा मो प्रोंइतीक बोका कली सेसीन परमप्रभु यावे आ डोंइती चाक्चा माल्व। मिनु मेको आ तारी पाप क्याम्तीक गेय पा, मेको बोका कली गोरशो रागीम प्रोंइशा सोइक्चा माल्व।

11 मिनु हारूनमी आ आंम पाप आ परबम चढेतीक ब्यफ चाक्चा माल्व। मिनु आ आंम कली नु आ खिं डा मुर आन परबम पाप क्याम्तीक गेय पचा माल्व। मिनु मेकोमी आ पाप आ परबम चढेतीक ब्यफ क्योरचा माल्व। रोमी ३:२५

12 मिनु मेकोमी परमप्रभु यावे आ डोंइती चढेतीके रे ब्रशो कोइला धूप चोतीकेम कुर पा मुठी निकशी चुशो ब्रोव्रशो रिना पाइशशो धूप कुरशा फारतीक वा चोवखो कोठा ओवचा माल्व।

13 मिनु मेकोमी परमप्रभु यावे आ डोंइती बाक्शा, धूप चोचा माल्व। मिनु धूप आ कुनम कबल पशो सन्दोस आ तार बाक्शो शिशो बाक्तीक कली सुम्चा माल्व। मोदेशो मपाप्तु हना, मेको बेक्ब। प्रस्थान २५:१७-२२

14 मेको नोले मेकोम ब्यफ आ हुश इक्का ब्रेक्शा पिशशा, परमप्रभु यावे आ बाक्तीक तारी पूर्व गे बुइक्चा माल्व। मेकेर मेकोमी आ ब्रेचोमी मेको हुश कली ७ खेयप बुइक्चा माल्व।

15 मिनु मेकोमी मुर आन पाप आ परबम चढेतीक बोका क्योरचा माल्व। मिनु मेको आ हुश फारशो वा आ आगा डा कोठा चाक्शा, ब्यफ आ हुश खोदेशो पा, शिशो बाक्तीक तार नु आ डोंइती बुइक्चा माल्व। हिबू ४:१६; हिबू ९:५

16 मोपा मेकोमी मेको कोठा चोवखो दुम्ब। मिनु इस्राएल डा मुर आन ग्रान्ना दिशो नु मरिम्शो पशो नु मेको आन पाप आन परबम पाप क्याम्तीक गेय बाक्ब। मिनु मेकोमी गुम्तीक ताम्बु कली यो पचा माल्व।

17 मिनु हारूनमी चोवखो कोठामी पाप क्याम्तीक गेय पवानु, सुइ मुर गुम्तीक ताम्बु ओवचा मडुम्ब। मेकोमी आंम आ परबम, आ खिं डा मुर आन परबम नु इस्राएल डा मुर नेल्ल आन परबम पाप क्याम्तीक गेय मथुमा सम्म, सुइमी गुम्तीक ताम्बु ओवचा मडुम्ब।

18 मिनु नोले मेको लाडगा यूशा, परमप्रभु यावे आ डोंइती बाक्शो चढेतीकेम लशा, मेको आ परबम पाप क्याम्तीक गेय पचा माल्व। मिनु मेकोमी ब्यफ आ हुश नु बोका आ हुश इक्का लाइशशा, चढेतीक आ एर ओंथ डा शोव नेल्लेम खेक्चा माल्व। प्रस्थान ३०:१०

19 मिनु इक्का हुश लाइशशा, आ ब्रेचोम ७ खेयप मेको चढेतीक तार बुइक्चा माल्व। मोपा मेको चढेतीके इस्राएली आन ग्रान्ना दिशो रे चोवखो सेल्चा माल्व।

20 मिनु हारूनमी चोवखो कोठा, गुम्तीक ताम्बु नु चढेतीके आ परबम पाप क्याम्तीक गेय पचा नोले, मेको सेस बोका चाक्चा माल्व।

21 मिनु नोले हारूनम आ गुड निम्फा मेको सेस बोका आ पिया तार वोइक्चा माल्व। मिनु इस्राएली आन मरिम्शो पशो नेल्ल नु आन पशो पाप नेल्ल शोवशा, मोपा नेल्ल पाप बोका आ पियाम वोइक्चा माल्व। मिनु नोले मुर काम मेको बोका कली गोरशो रागीम चोक्चा माल्व।

22 मोपा मेको बोकांम मेको आन मरिम्शो पशो कुरशा, सुइ मबाक्शो गोरशो रागीम लाइक्चा माल्व। मेको मुरुम मेको बोका कली गोरशो रागीम प्रोंइचा माल्व।

23 मेको नोले हारून गुम्तीक ताम्बुम ओवशा, मेको आ डोंइती चोवखो कोठा ओवशा, फेक्शो सुती वा पुइशशा, मेक उइ वोइक्चा माल्व।

24 मिनु मेकोमी चोवखो बाक्तीके लशा, चिकसीचा माल्व। मिनु आ वा फेक्शा लेत्चा माल्व। मिनु आंम आ परबम नु मुर आन परबम चोशा चढेतीक चढेशा, आंम कली नु मुर आन कली पाप क्याम्तीक गेय पचा माल्व।

25 मिनु मेकोमी पाप आ परबम चढेशो आ बोसो चढेतीकेमी चोचा माल्व।

26 मिनु प्रोंइचा पुंडसीब बोका कली चोवथ लाइब मुर आ वा मुरशा, चिकसीचा माल्व। मिनु मेको नोले मुर आन बाक्तीक जाक्ने चाप्व।

27 मिनु पाप आ परबम चढेशो ब्यफ नु बोका आस हुशेमी मेको चोवखो कोठा कली पाप क्याम्तीक गेय पशा नोले मेको मुर आन बाक्तीक रे पुंडशा, मेको आस कुशुल, श्ये नु गोबर नेल्ल चोचा माल्व। लेवी ४:१२; लेवी ६:२३; हिबू १३:११

28 मिनु मेको चोइबमी आ वा मुरशा, चिकसीचा माल्व। मिनु मेको नोले मुर आन बाक्तीके लेन्ने चाप्व।

29 एको नेल्ले इन कली गेना हना यो पतीके बाक्ब। ७ महिना झा १० नाक्ती परमप्रभु यावे आ नेक्था जाक्चा माल्नीनी। मेको नाक्ती गे, इस्राएली नु अर्को रागी डा मुर नेल्लेमी काइ गेय मपने। लेवी २३:२७-३२; गन्ती २९:७

30 मारदे हना मेको नाक्ती इन परबंम पाप क्याम्तीक गेय पाइनीम। मिनु परमप्रभु यावे आ डोंडती इन पाप क्याम्शो बाक्ब।

31 एको इन टैयब नाइक्तीक नाक्ती बाक्ब। मोपतीके काइ गेय मपने। एको गेना हना यो कली पतीक बाक्ब।

32 तेल लुक्शो नु आ आफ आ पा डा चढ़ेब दुम्चा कली सु योत्रसीशो बाक्मे, मेकोमी पाप क्याम्तीक गेय पचा माल्ब। मिनु मेकोमी मेको गेय कली ला वोइशो सुती के फेक्तीके फेक्चा माल्ब। प्रस्थान २८:४१-४२

33 मेकोमी चोइखो कोटा कली, गुम्तीक ताम्बु नु चढ़ेतीक कली पाप क्याम्तीक गेय पचा माल्ब। मिनु मेकोमी चढ़ेबपुकी नु मुर नेल्ल आन परबंम पाप क्याम्तीक गेय पचा माल्ब।

34 मिनु बसंम खेयप का इस्राएली नेल्ल आन कली पाप क्याम्तीक गेय पचा माल्ब। मेको इन कली गेना हना यो पतीक बाक्ब। बसंम खेयप का इस्राएली नेल्ल आन पाप आ परबंम माफ पुंइचा माल्ब' दे हारून कली देनो" देंत। मिनु परमप्रभु यावेमी मोसा कली दोदेशो पा अरेवा, मोदेशो पा पापु। प्रस्थान ३०:१०; हिब्रू १०:३

## 17

क्योरशा चढ़ेतीके

1 मिनु परमप्रभु यावेमी मोसा कली

2 "गे हारून, मेको आ तौपुकी नु इस्राएली नेल्ल आन कली 'परमप्रभु यावेमी अरेशो मार बाक्ब देशा हना,

3 सुमी इस्राएली आन बाक्तीकेमी ब्यफ, भेडा नु क्यारश क्योरबा,

4 मिनु परमप्रभु यावे आ डोंडती चढ़ेचा कली गुम्तीक ताम्बु आ ओत्रतीकेम मचाक्बा, मेको मुर साइशो आ परबंम दोस ताइब। मेकोमी साइक्तीके आ मुर रे तिल्या पुंइसीब। उत्पत्ती ९:६

5 मोपतीके इस्राएलीपुकीमी आन क्योरशा चढ़ेतीके आन बाक्तीके रे गुंइशा, परमप्रभु यावे आ डोंडती चाक्चा माल्नीम। मेकोपुकीमी आन क्योरतीक बस्तु भाव चढ़ेब आ बाक्तीकेम, गुम्तीक ताम्बु आ ओत्रतीके आ डोंडती चाक्चा, दुशा बाक्तीक आ परबंम चढ़ेचा माल्नीम।

6 मिनु चढ़ेबमी मेको आ हुश गुम्तीक ताम्बु आ ओत्रतीके आ डोंडती बाक्शो परमप्रभु यावे कली चढ़ेतीकेम बुइक्चा माल्ब। मिनु बोंसो परमप्रभु यावे कली आ दाक्शो ब्रोइशो रिना पपाइशो सेल्चा कली चोचा माल्ब।

7 मेकोपुकीमी मोपा वोल कली चढ़ेशा, आंम कली तेल्लेम खोदेशो सेल्ले मचाप्नीम। एकोम परमप्रभु यावे आ अरेशो लोव नेल्ल आन पाला सम्म गेना हना यो कली अरेतीके बाक्ब' देनो" देंत। ब्यवस्था १७:१७

8 मिनु परमप्रभुमी "मेको आन कली 'इस्राएली नु मेको नु बाक्ब अर्को रागी डा मुर चोशा चढ़ेतीके चढ़ेचा दाक्ताक्म हना, ब्यवस्था १२:१४

9 मिनु मेको गुम्तीक ताम्बु आ ओत्रतीके मचाक्थु, परमप्रभु यावे कली मचढ़ेत्तु हना, मेको मुर कली आ मुर आन दाते रे तिल्या माल्नीम' दे माइक्मी।

हुश मब्वचा, दे अरेशो

10 इस्राएली नु मेको आन दातेम बाक्ब अर्को रागी डा मुर सुइमी हुश ब्वाम्तेक्म हना, गो मेको हुश ब्वाइब कली मरिम्शो पाइनुड। मिनु मेको मुर कली आ मुर आन दाते रे क्याम्नुड। लेवी ३:१७

11 मारदे हना मेको बस्तु भाव आन हुशेम ब्रोंडतीक सोक्त बाक्ब। मिनु गो मेको हुश इन कली चढ़ेतीकेमी इन पाप क्याम्तीक गेय पचा कली गेता। मारदे हना हुशेम पाप क्याम्तीके बाक्ब। हिब्रू ९:२२

12 मोपतीके गेपुकी नु गेपुकी नु बाक्ब अर्को रागी डा मुर सुइमी हुश ब्वचा मदुम्ब, दे गो इस्राएली आन कली देशो बाक्नुड।

13 मिनु सुइ इस्राएलीपुकी नु गेपुकी नु बाक्ब अर्को रागी डा मुर सिखार ग्यारशा, ग्याइशशा मारेइ साइक्तीनी हना, मेको आ हुश नेल्ल जाइशा, खपीम सुम्चा माल्ब।

14 मारदे हना मारेइ मारेइ के ब्रोंडतीक सोक्त हुशेमी बाक्ब। मोपतीके गो इस्राएली नेल्ल आन कली 'गे तेकोइ जन्तु, बस्तु भाव आन हुश ब्वचा मदुम्ब। मारदे हना नेल्ल जन्तु आन ब्रोंडतीके हुशेम बाक्ब। मेको सुमी ब्वाइबा, मेको क्याम्चा पुंइसीब। उत्पत्ती ९:४

15 मिनु इस्राएली नु अर्को रागी डा मुर नेल्लेमी, सुम आंमा बेक्शो मारेइ मारेइ नु ब्वाकी डा जन्तुम साइशो मार मार ब्वाम्तेक्म हना, मेको आन वा मुरशा, चिक्सीचा माल्नीम। मिनु नां मरिक्म सम्म ग्रांया बाक्चा माल्नीम। मिनु नोले मेको ग्रांया मदिशो दुम्नीम। लेवी ११:४०; लेवी २२:८; प्रस्थान २१:३३-३६; प्रस्थान २२:३०; प्रेरित १५:२०

16 तन्न मेकोपुकीमी आन वा ममुरथु, मचिक्साक्म हना, मेको आन पशो आ परबंम मेको दोस ताइब दुम्नीम' दे हारून नु आ तौ आन कली देनो" दे परमप्रभु यावेमी देंत।

## 18

ग्रांया दितीक गेय मपने

1 मिनु परमप्रभु यावेमी मोसा कली

2 "गे इस्राएली आन कली 'गो परमप्रभु यावे, इन परमप्रभु नड।

3 गेपुकी इजीप्त रागीम पशो खोदेशो मपने। मिनु गो इन कली कनान रागी लाइक्नन्नी। गेपुकीमी मेक डा मुर आन पशो खोदेशो मपने। प्रस्थान २३:२४

4 गेपुकीमी आं पावो, दे अरेशो लोत्र नु आं फुल्लुम मुशा ब्रेक्शो लोत्र पचा माल्नीनी। मारदे हना गो परमप्रभु यावे, इन परमप्रभु नड।

5 सुमी आं फुल्लुम मुशा ब्रेक्शो लोत्र नु आं पावो, दे अरेशो लोत्र पाइबा, मेको ब्रोंइचा ताइब। मारदे हना गो परमप्रभु यावे नड। नेहेम्याह ९:२९; इजीकीएल २०:११; रोमी ७:१०; रोमी १०:५; गलाती ३:१२

6 गेपुकी सुइ आंम नेक्था डा नाता नु मइपीन। मारदे हना गो परमप्रभु यावे नड।

7 इन ममा नु इप्शा इन आफ कली मुने मतोककीन। इन ममा नु इप्चा मदुम्ब।

8 गे इ आफ आ अरु मीश नु मइपो। मो पाइतीनी हना, गेपुकीमी इन आफ कली मुने तोक्नीनी। उत्पत्ती ३५:२२; ब्यवस्था २७:२०; २सामुएल १६:२२; १कोरिन्थी ५:१

9 गे इ दिदी, बहिनी नु मइपो। इ आफ आ तमी बाक्त हना यो, इ ममा आ तमी बाक्त हना यो नु आंम खिंम जरमेशो बाक्त हना यो अर्को रागीम जरमेशो बाक्त हना यो, मेको नु इप्चा मदुम्ब।

10 मिनु तौ आ तमी बाक्त हना यो, इ तमी आ तमी बाक्त हना यो, इ चच बाक्त हना यो मेको नु मइपो। मो पाप्तीवी हना, गे आंमा मुने दोक्नेवे।

11 गे इ आफ आ अरु मीश आ तमी नु मइपो। मेको इन समी बाक्ब।

12 गे इन फुपु नु मइपो। मेको इन आफ आ समी बाक्ब। प्रस्थान ६:२०

13 गे इ ममा आ लोक्ब नु मइपो। मेको इन ममा आ नाता बाक्नीम।

14 इन बोडमा नु आमा कान्छी नु मइपो। मेको इन बोडमा नु आमा कान्छी बाक्नीम।

15 गे इ चाइमी नु मइपो। मेको इ तौ आ मीश बाक्ब। गे मेको नु इप्चा मदुम्ब।

16 गे इ भोग्यु, बोहारी नु मइपो। मोपा इ लोक्ब कली मुने मतोकको। लेवी २०:२१; मर्कूस ६:१८

17 गे मीश मुर का नु आ तमी निम्फा नु मइपो। मिनु मेको आ तौ आ तमी नु आ तमी आ तमी, चच नु मइपो। मेकोपुकी नेक्था डा नाता बाक्नीम। मो पचा मरिम्शो बाक्ब।

18 गे इ मीश बाक्ना बाक्न, मेको आ लोक्ब मचाक्को। मेको नु मइपो।

19 गे रां ब्रोंल्शा ग्रॉग्रा दिशो दुम्शो मीश मुर नु मइपो।

20 गे अर्को मुर आ मीश नु इप्शा आंम कली ग्रॉग्रा मसेलो। २सामुएल ११:४

21 गे मोलेक कली आंम तमी तौपुकी चढ़ेशा, आंम परमप्रभु यावे, इन परमप्रभु आ नें ग्रॉग्रा मसेलीन। गो परमप्रभु यावे नड।

22 मीश मुर नु इप्शो खोदेशो पा वोंइश मुर नु मइपो। मेको थम ग्रॉग्रा बाक्ब।

23 गे बस्तु भाव नु इप्शा, आंम कली ग्रॉग्रा मसेलो। मीश मुर यो बस्तु भाव नु इप्चा मदुम्ब। मेको थम मरिम्शो दूली गेय बाक्ब। प्रस्थान २२:१८; लेवी २०:१६

24 गेपुकीमी मोदेशो पाप पा आंम कली ग्रॉग्रा मसेलीन। मारदे हना गो मोदेशो पाप आ पबंम जात जात डा मुर इन डोंइती रे गुंडनुडमी। मेको नेल्लेम मोदेशो पाप पा ग्रॉग्रा दिशो दुम्शो बाक्तेक्म।

25 मोपान मेको रागी ग्रॉग्रा दिशो दुम्त। मिनु गो मेको आन पाप आ पबंम सजाइ गेता। मिनु रागीम मेक डा मुर आन कली उक्बे पा ताइक्ताक्ब।

26 तन्न गे आं फुल्लुम मुशा ब्रेक्शो लोत्र नु आं पावो, दे अरेशो लोत्र टिने। मिनु गे इस्राएली नु इन दातेमी बाक्ब अर्को रागी डा मुर मोदेशो ग्रॉग्रा दिशो गेय मपने।

27 मारदे हना इन डोंइती मेकेर बाक्ब मुरपुकीमी मोदेशो ग्रॉग्रा नेल्ल पाम्तेक्म। मिनु रागी ग्रॉग्रा दिशो दुम्त।

28 मिनु आं अरेशो मपथु, मेको रागी ग्रॉग्रा दिशो सेलतीनी हना, मेको डोंइती बाक्ब मुर आन कली खोदेशो पा मेको रागीमी इन कली यो उक्बे पा ताइक्ब।

29 सुइमी मेको मरिम्शो का ला पाप्टु हना, मेको मुर आ मुर रे तिल्ला पुंडसीब।

30 मोपतीके गे डोंइती डा मुरपुकीमी पशो खोदेशो पा मेको दूली ग्रॉग्रा दिशो पाप मपने। मिनु आंम कली ग्रॉग्रा दिशो मसेलीन। मारदे हना गो परमप्रभु यावे, इन परमप्रभु नड' देनो' दैत।

## 19

अरु पतीक गेय

1 मिनु परमप्रभु यावेमी मोसा कली

2 “इस्राएली आन गुम्तीक डा मुर नेल्ल आन कली ‘गेपुकी आं कली ला ठेयव सेलीन। मारदे हना गो परमप्रभु यावे, इन परमप्रभु का ला नड। लेवी ११:४४-४५; मत्ती ५:४८; १ पत्रुस १:१५-१६

3 गे नेल्लेमी इन आंम आफ आस कली मान पने। मिनु आं नाइक्तीक नाक्ती नांइसीन। गो परमप्रभु यावे, इन परमप्रभु नड। प्रस्थान २०:१२; प्रस्थान २०:८

4 गे मूर्ति कली पूजा मपने। मिनु गे आंम कली मूर्ति मसेलीन। गो परमप्रभु यावे, इन परमप्रभु नड। प्रस्थान २०:३; प्रस्थान ३४:१७

5 गे दुशा बाक्चा आ पबंम परमप्रभु यावे आ डोंइती चढ़ेनीनु, परमप्रभु यावेमी ब्रचा डा पा चढ़ेने। लेवी ७:१२-१८;

6 गे चढेनीनु, मेको चढेशो नाक्त नु आ दीसा सम्म नेल्ल ब्वशा नेंचा माल्नीनी आ नित्थ नाक्त सम्म मारेड लीत हना, मेको चोचा माल्नीनी।

7 आ नित्थ नाक्त मेको ब्वाडताक्नी हना, थम ग्रांग्रा दुम्ब। मिनु मेको चढेशो मब्राडब।

8 मेको ब्वाडब नेल्लेमी सजाड ताडनीम। मारदे हना मेकोमी परमप्रभु यावे कली चढेशो ग्रांग्रा दिशो सेल्शा, मेको कली मटीम। मिनु मोदेंशो मुर आन मुर रे तिल्ला पुंडसीनीम।

9 मिनु गे इन बाली नाली रिक्नीनु, रू आ सुर सुर सम्म मरिक्कीन। सिला बाला मगुपीन। लेवी २३:२२; ब्यवस्था २४:१९; रूथ २:२,१५,१६

10 गेपुकीमी इन अडगुर रू डा फल काड मलीपाडक्थु, मसेक्कीन। मिनु रूम दोक्शो अडगुर यो मगुपीन। मेको पुडग नु अर्को रागी डा मुर आन कली बाक्ल। गो परमप्रभु यावे, इन परमप्रभु नड।

11 गे खुड मपने। मठगेने। गे जोल मपमुने। प्रस्थान २०:१५-१६; १ थिस्सलोनिकी ४:६

12 गेपुकीमी आं नें थिशा, जोल पा कसम मजने। मो पाडतीनी हना, गे इन परमप्रभु आ नें आडक्च सेल्नीनी। गो परमप्रभु यावे नड। प्रस्थान २०:७; मती ५:३३

13 गे आंम नेक्था डा मुर आन कली श्येत गेशा, मदिपीन। मिनु मेको आन मार मार मरोडक्तीन। गाल्च ताक्शा गेय पाडब आन क्येट काब नाकदो यो इन खिम वोडक्चा मदुम्ब। ब्यवस्था २४:१४-१५; येरमीया २२:१३; याकूब ५:४

14 नोफा मनेब मुर कली मरिम्शो लोत्र मपने। मिक्च मताडब आ डोंडती दाडल पाडक्तीक थोत्रक मवोतीन। इन परमप्रभु क्येडा हिनीन। गो परमप्रभु यावे नड। उत्पती २७:१९; ब्यवस्था २७:१८

15 गे जोल पाडब सांकछी मदुमीन। ठेयब मुर बाक्त हना यो, आडक्च मुर बाक्त हना यो, मुर आन कुल मकोव्रथु, ठीक निसाफ पने। प्रस्थान २३:३,६; ब्यवस्था १६:१९,२०

16 गेपुकी मुर आन पबंम जोल पा लोत्र मपमुने। गे इन नेक्था डा मुर कली साडक्चा ममालीन। गो परमप्रभु यावे नड। प्रस्थान २३:७

17 गे इन लोक्ब कली काड मदाक्ब मदुमीन। इन नेक्था डा मुर कली रिम्शो पा मोदेंशो दूली गेय मपने' दे लोत्र पने। मो मपाडतीनी हना, गे पाप राडनीनी। भजन संग्रह १४१:५; मती १८:१५

18 गे इन मुर आन कली क्येक्क मलेत्तीन। ईख मकुरीन। तन्न इन नेक्था डा मुर कली आंम कली खोदेंशो पा दाक्तीन। गो परमप्रभु यावे नड। २राजा ६:२२; २इतिहास २९:९-१५; मती ५:४३-४८; मती २२:३९; लूका १०:२५-३७; यूहन्ना १३:३४; रोमी १३:९; गलाती ५:१४; याकूब २:८

19 गे आं फुल्लु मुशा ब्रेक्शो लोत्र पने। निक्शी खाल डा जन्तु, बस्तु भाव आन कली मब्वाडक्तीन। इन रूमी निक्शी खाल डा वांचेर मशोक्कीन। गेपुकीमी निक्शी खाल डा श्येले ब्वाडशशा प्रोत्रशो वा मफेक्सीन। ब्यवस्था २२:९-११

20 मिनु वोंडश मुर कामी वाडलीम दुम्शो मीश आल नु इप्त हना, मेको मीश आल चहिं अरु वोंडश मुर कली गेचा चिक्शो बाक्त हना, तन्न मग्याप्थु, मप्रोंडथु बाक्त हना, मेको वोंडश मुर कली खोदील निदील पचा माल्नीम। मेको आस कली साडक्चा मदुम्ब। मारदे हना मेको मीश आल मप्रोंडशो बाक्त। प्रस्थान २१:७-११

21 तन्न मेको वोंडश मुरुमी परमप्रभु यावे आ डोंडती गुम्तीक ताम्बु आ ओवतीकेम आ दोस आ पबंम सांड का चढेचा माल्ब।

22 मिनु चढेबमी मेको आ दोस आ पबंम सांड चढेशा परमप्रभु यावे आ डोंडती पाप क्याम्तीक गेय पचा माल्ब। मोपा मेको आ पाप क्याम्तीशा माफ ताडब दुम्ब। लेवी ५:१७-१८

23 मिनु गेपुकी मेको रागी जाक्दीशशा, तेकोड जचा दुम्ब फल फुल रवा खुम्नीनु, बर्स सां सम्म मेको आन फल मजने।

24 मिनु ४ बर्सम चहिं फल फुल नेल्ले परमप्रभु यावे कली ग्येरशो गेचा माल्नीनी। परमप्रभु यावे कली ठेयब मान पचा कली बाक्ब।

25 तन्न ५ बर्सम गेपुकीम मेको फल फुल जने चाप्नीनी। मिनु मेको रवा इन कली शुश सिप्ब दुम्नीम। गो परमप्रभु यावे, इन परमप्रभु नड।

26 गेपुकीमी तेकोड चिक्ब, जन्तु, बी बयफ, क्यारश भडा आन श्ये हुश सुन्दा मब्वने। मिनु गेपुकी लिंक्यु मकोव्रडीन। मिनु गे टुना मुना काड मपने। लेवी ३:१७; ब्यवस्था १८:१०

27 गेपुकीमी इन चां एर ओथ मखोतीन। मिनु इन गाल शोक्त्रे आ सुर मखोतीन। लेवी २१:५; ब्यवस्था १४:१

28 गेपुकी बेक्शो मुर आन पबंम आंम रां क्योरशा गार मसेलीन। मिनु इन रांमी चिनु मखोपेन। गो परमप्रभु यावे नड।

29 गेपुकीमी इन तमी आन कली तेल्लेम सेल्शा, ग्रांग्रा दिशो मसेलीन। मो पाडतीनी हना, रागी तेल्लेम बाक्तीक खोदेंशो दुम्शा, ग्रांग्रा दिशोमी ब्रीब। ब्यवस्था २३:१८; २राजा २३:७

30 गे आं नाडक्तीक नाक्तीम नांडसीन। मिनु आं बाक्तीक ताम्बु कली मान पने। गो परमप्रभु यावे नड। लेवी २६:२

31 गेपुकी बेक्शो मुर रे लोत्र पाडब नु लिंक्यु कोत्रब कली 'वारच पाडक्की' दे आन बाक्तीके मलने। मेकोपुकी नु सल्ला पा, गे आंम कली ग्रांग्रा दिशो मसेल्सीन। गो परमप्रभु यावे, इन परमप्रभु नड। लेवी २०:६; ब्यवस्था १८:१०-११; १सामुएल २८:७

32 गे खुशो आ डोंडती बोक्कीन। खाल्पी खाल्पा आन कली मान पने। मिनु इन परमप्रभु कली मान पा हिनीन। गो परमप्रभु यावे नड।

33 गेपुकी नु बाक्ब अर्को रागी डा मुर आन कली मदिपीन। प्रस्थान २२:२०

34 गे मेको आन कली इन रागीम जर्मेशो मुर खोदेंशो मिम्तीन। मेको आन कली आंम कली खोदेंशो पा दाक्तीन। मारदे हना गेपुकी यो इजीप्तमी अर्को रागी डा मुर दुम्शा बाक्शो बाक्तीनी। गो परमप्रभु यावे, इन परमप्रभु नड।

- 35 गेपुकीमी पुक्नीनु, नाक्तीनीनु नु थाप्तीनीनु जोल मपने।  
 36 इन नाक्तीकेम तुला ठीक दुग्चा माल्ब। इन ढक ठीक दुग्चा माल्नीमी। मिनु इन पुक्तीके ठीक दुग्चा माल्नीमी। गो इन कली इजीपत रे गुंडब परमप्रभु यावे, इन परमप्रभु नड। ब्यवस्था २५:१३-१६; हितोपदेस ११:१  
 37 गे आं फुल्लुम मुशा ब्रेक्शो लोत्र नु आं पाबो, दे अरेशो लोत्र नेल्ल थुंम वोइश्शा, पचा माल्नीमी। मारदे हना गो परमप्रभु यावे नड” दे परमप्रभु यावेमी मोसा कली देंत।

## 20

- काइ मरिम्शो पशो कली सजाइ  
 1 मिनु परमप्रभु यावेमी मोसा कली  
 2 “गे लेंशा इसाएली आन कली ‘इसाएलीपुकी, मेको नु बाक्ब अर्को रागी डा मुरपुकी सुम आन आल मोलेक कली चढेनीमी, मेको आन कली साइक्चा माल्नीम। गुप्तीक डा मुरपुकीम मेको कली फुल्लु आप्शा साइक्चा माल्नीम।  
 3 मेकोपुकीमी आन आल मोलेक कली चढेमेनु, आं बाक्तीक ताम्बु नु आं ठेयब नें ग्रांरा दिशो सेल्लेक्म। मोपतीके गो आंमा मेको आन कली ब्रोंइचा मगेथु, आ मुर आन दाते रे क्याम्नुडमी।  
 4 मिनु मेको रागी डा मुरपुकीम आ आल मोलेक कली चढेब मुर कली तुइश्शा यो मसाइक्तेक्म हना,  
 5 गो आंमा मेको नु आ खिं डा मुर आन कली ब्रोंइचा मगेथु, मेको आन मुर आन दाते रे क्याम्नुडमी। मेको नु मेको आन नोले खोइक्ब मोलेक कली चढेब नेल्ल आन कली क्याम्नुडमी।  
 6 सु मुर बेक्शो मुर रे लोत्र पाइब नु लिंक्यु कोत्रब आन कली “वारच पयी” दे आन बाक्तीके लाइबा, गो मेको कली ब्रोंइचा मगेथु, आ मुर आन दाते रे क्याम्नुड। लेवी १९:३१  
 7 मोपतीके आं कली जिम्मा गेंसीशा आं के दुमीन। मारदे हना गो परमप्रभु यावे, इन परमप्रभु नड। लेवी १९:२  
 8 आं फुल्लुम मुशा ब्रेक्शो लोत्र इन थुंम वोइश्शा टिने। गो परमप्रभु यावे नड। गो इन कली आं खोदेशो सेल्लुनड।  
 9 सुमी आ आंम आफ आस कली सराप पाइक्बा, मेको मुर कली साइक्चा माल्ब। आ आंम आफ आस कली सराप पाइक्तीके साइक्चा पुंडसीब। प्रस्थान २१:१७  
 10 सुइ मुर अरु आन मीश नु इप्ट हना, मेको पाइब निम्फा आस कली साइक्चा माल्ब। प्रस्थान २०:१४; २सामुएल ११:४; यूहन्ना ८:५  
 11 सु आ आफ आ मीश नु इप्बा, मेकोम आ आफ कली मुने तोक्ब। मेको निम्फा आस कली साइक्चा माल्ब। मेको साइक्चा पुंडसीनीस। लेवी १८:६-२३  
 12 सु आ चाइमी नु इप्बा, मेको निम्फा आस कली साइक्चा माल्ब। मेको दूली पा मेको थम मरिम्शो बाक्ब। मेको साइक्चा पुंडसीनीस।  
 13 सुइ मुर मीश मुर नु इप्शो खोदेशो पा वोंइश मुर नु इप्ट हना, मेको थम ग्रांरा दितीक बाक्ब। मेको आस कली साइक्चा माल्ब। मेको थमा पा साइक्चा पुंडसीनीस।  
 14 सु मुर ममा नु आ तमी निम्फा नु इप्बा, मेको काइ मरिम्शो बाक्ब। मेको सां आन कली चोचा माल्ब। इन दातेमी मोदेशो मरिम्शो मटुम्ल।  
 15 सुइ वोंइश मुर बस्तु भाव नु इप्ट हना, मेको कली साइक्चा माल्ब। मिनु मेको बस्तु कली यो साइक्चा माल्ब।  
 16 सुइ मीश मुर बस्तु भाव नु इप्ट हना, मेको मीश मुर नु बस्तु निम्फा आस कली साइक्चा माल्ब। मेको साइक्चा पुंडसीनीस।  
 17 सु मुर आ दिदी बहिनी, आ आंम आ तमी कि आ आफ आ तमी नु इप्ट हना, मेको थम मुने बाक्ब। मेको निम्फा आस कली आस मुर आन दाते रे नेल्लेम तचा डा पा साइश्शा क्याम्चा माल्ब। मेकोमी आंम आ समी नु इप्तीके सजाइ गेचा पुंडसीब।  
 18 सुइ मुर रां ब्रोल्लो मीश मुर नु इप्ट हना, मेको निम्फा आस कली आस मुर आन दाते रे साइश्शा क्याम्चा माल्ब। मारदे हना मेको वोंइश मुरुमी मीश मुर आ हुश यितीक ताप्टु। मिनु मीश मुरुमी चहिं आ हुश यितीके कोइताक्व। लेवी १५:२४  
 19 इन ममा आ लोक्ब नु इन आफ आ समी नु मइपीन। मारदे हना मो पाइतीनी हना, आंम खिं डा मुर कली मुने तोक्नीनी। मेको सजाइ ताइनीस।  
 20 सुइ मुरुमी आ बोडो, बकान्छा कि मामा आ मीश नु इप्ट हना, मेकोमी आ बोडो, बकान्छा कि मामा कली मुने तोक्ब। मेको सजाइ जचा पुंडसीनीस। मिनु आल मथिथु बेक्नीस।  
 21 सुमी मुरुमी आ भोग्यु कि बोहारी चाक्बा, मेको ग्रांरा दिशो बाक्ब। मेकोमी आंम लोक्ब कली मुने तोक्ब। मिनु आल मथिथु बेक्नीस।  
 22 गेपुकीमी आं फुल्लुम मुशा ब्रेक्शो लोत्र नु आं पाबो, दे अरेशो लोत्र नेल्ल तुइश्शा पचा माल्नीनी। मो मपाइतीनी हना, गो इन कली चाक्शो रागीमी इन कली उक्बे पा ताइक्ब।  
 23 गे इन डोंइती खेरशो रागी रागी डा मुर आन पशो मपने। मेकोपुकीमी मोदेशो नेल्ल पाम्तेक्म। मोपतीके गो मेको आन कली तशा थम ग्रांरा दीती।  
 24 तन्न गो इन कली मेको आन रागी इन के दुम्ब। गो इन कली गेनुड, देंती। मिनु मेको रागीम दूध नु खुदो शुश बाक्ब। गो परमप्रभु यावे, इन परमप्रभु नड। मिनु गो इन कली रागी रागी डा मुर रे तिल्ला योत्रतन्नी। प्रस्थान १९:५-६

25 मोपतीके गेपुकीमी ग्रांघ्रा मदिशो नु ग्रांघ्रा दिशो जन्तु नु ग्रांघ्रा मदिशो नु ग्रांघ्रा दिशो चिक्ब तुइशशा तिल्चा माल्नीनी। गेपुकीमी ग्रांघ्रा दिशो जन्तु, चिक्ब नु खपीम ग्रेशा गाक्ब जन्तु रे आम कली ग्रांघ्रा दिशो मसेल्सीन। मारदे हना मेको ग्रांघ्रा दिशो बाक्नीम, दे शेंताक्ड। लेवी ११:-

26 गेपुकी ग्रांघ्रा दिशो क्येडा डोन बाक्शो दुमीन। मारदे हना गो ग्रांघ्रा दिशो क्येडा डोन बाक्शो परमप्रभु यावे नड। मिनू गो इन कली आं मुर दुम्चा कली अरु मुर रे तिल्शा योव्रतन्नी।

27 सु इन दातेमी वोंइश मुर कि मीश मुर बेक्शो मुर रे लोव्र पाइबा कि लिक्वु कोव्रनीम, मेको आन कली साइक्चा माल्ब। मेको आन कली फुल्लु आप्सा साइक्चा माल्ब। मेको साइक्चा पुंडसीनीम' दे इस्राएली आन कली शेंदो" दे परमप्रभु यावेमी मोसा कली देंत। प्रस्थान २२:१७

## 21

चढेब आन कली अरेशो लोव

1 मिनू परमप्रभु यावेमी मोसा कली "हारून आ तौ, चढेब आन कली 'इन मुर बेक्तेक्म हना, गेपुकी मेको बेक्शो मुर कली थिशा आम कली ग्रांघ्रा दिशो मसेलीन। इजीकीएल ४४:२५-२७

2 तन्न इन आम आफ, तमी तौ नु लोक्ब,

3 कन्ने दिदी बहिनी आन पबंम ला आम इन कली ग्रांघ्रा दिशो सेल्ने चाप्नीनी।

4 मिनू गेपुकीमी ग्युबे पा नक नाता डा मुर आन पबंम आम कली ग्रांघ्रा दिशो सेल्चा मदुम्ब।

5 गे चढेबपुकीमी रोंका पा, इन चां प्रेक्चा, इन गाल शोक्रे आ मुर खोइक्चा नु इन रां क्योरशा गार सेल्चा मदुम्नीनी। लेवी १९:२७-२८

6 इन परमप्रभु कली ला गेय पाइब दुमीन। इन परमप्रभु आ नें ग्रांघ्रा दिशो सेल्ब मदुम्नीम। मारदे हना गेपुकीमी परमप्रभु यावे कली मीम चोशा चढेतीके चढेनीनी। मोपतीके गेपुकी परमप्रभु कली ला गेय पाइब बाक्नीनी।

7 गे चढेबपुकीमी तेल्लेम मीश मुर, ग्रांघ्रा दिशो मीश मुर नु आ वोंइशेमी प्रोंइशो मीश मुर चाक्चा मदुम्ब। मारदे हना गेपुकी परमप्रभु आ मुर बाक्नीनी।

8 मिनू गे इस्राएलीपुकीमी चढेब आन कली परमप्रभु आ गेय पाइब मिम्तीन। मारदे हना मेकोपुकी इन परमप्रभु आ जचा चढेनीम। मेकोपुकी इन पबंम परमप्रभु आ गेय पाइब दुम्शो बाक्नीम, दे मिम्तीन। मारदे हना इन कली ग्रांघ्रा रे डोन बाक्ब सेल्ब, गो ग्रांघ्रा रे डोन बाक्ब परमप्रभु यावेमी इन कली आं खोदेशो सेलनुड।

9 मिनू चढेब आ तमीमी तेल्लेम पा आम कली ग्रांघ्रा दिशो सेल्लु हना, मेकोमी आ आफ कली ग्रांघ्रा दिशो सेल्ब। मेको कली मीम चोशा साइक्चा माल्ब।

10 मिनू सु आम लोक्ब आन दातेम ठेयब चढेब दुम्शो बाक्मे, मिनू आ पियाम तेल लुक्शो बाक्मे नु ठेयब चढेब आ वा फेक्चा कली तिल्शो बाक्मे, मेकोमी रोंका पशा, आ पिया डा चां प्रेक्चा मदुम्ब नु आ वा खाक्चा मदुम्ब। लेवी ८:१२; प्रस्थान २८:४१; प्रस्थान २९:७; लेवी १०:६; लेवी २१:२

11 मेकोमी बेक्शो मुर बाक्तीके लशा, आम कली ग्रांघ्रा दिशो सेल्चा मदुम्ब। मेको आ आम आफ आ बेक्शो रां यो कोव्रथ लचा मदुम्ब।

12 मेको परमप्रभु यावे आ बाक्तीके ताम्बु रे ग्याचा मदुम्ब। मोदेशो पाप्तु हना, मेकोमी आम परमप्रभु आ बाक्तीके ग्रांघ्रा दिशो सेल्ब। मारदे हना मेको परमप्रभु आ तेल लुक्शो मुर बाक्ब। गो परमप्रभु यावे नड।

13 मेकोमी कन्ने मीश आल कली ला ग्युबे पने चाप्ब।

14 आ वोंइश बेक्शो मीश मुर, आ वोंइश प्रोंइशो मीश मुर, ग्रांघ्रा दिशो कि तेल्लेम मीश मुर चाक्ने मचाप्ब। मिनू मेकोमी आ जात डा कन्ने मीश आल ग्युबे पचा माल्ब।

15 मगारचा डा मीश मुर नु ग्युबे पा, आम जात नु आम तमी तौ आन कली ग्रांघ्रा दिशो सेल्चा मदुम्ब। मारदे हना गो परमप्रभु यावे नड। गो मेको कली आम मुर सेल्ला' दे शेंदो" दे परमप्रभु यावेमी मोसा कली देंत।

16 मिनू परमप्रभु यावेमी मोसा कली

17 "गे हारून कली 'इ तमी तौ, चच युइ आन दातेमी गुइ खोइल कुंजे नु दूली मुर आम परमप्रभु कली चढेब दुम्ने मचाप्ब।

18 मारदे हना सुइ दूली मुर, मिक्च मताइब, खोइल मदुक्ब, आ कुल कि रां बिग्रेशो कि खोइल का लाइशशो मुर परमप्रभु आ डोंइती जाक्चा मदुम्ब।

19 गुइ जिक्शो, खोइल जिक्शो,

20 कुप्रे, बामन्ने, मिक्च रोइ पशो, रक सुतीक रोइ पशो, लुतो पशो कि आ गेडा ठीक मदुम्शो मुर आं परमप्रभु आ डोंइती जाक्ने मचाप्ब।

21 चढेब हारून आ तमी तौ चच युइ सु दूली दुम्शो बाक्मे, मेको परमप्रभु यावे कली चोशो चढेतीक चढेने मचाप्ब। मारदे हना मेको दूली बाक्ब। मेकोम आम परमप्रभु कली जचा थोव्रक चढेचा मदुम्ब।

22 मेकोमी आम परमप्रभु कली चढेशो नु चोव्रखो नु थम चोव्रखो जचा थोव्रक चहिं जने ब्वने चाप्ब।

23 तन्न मेको फारशो वा नु चढेतीक आ नेक्था जाक्चा मदुम्ब। मारदे हना मेको दूली मुर जाक्शा, आं बाक्तीक ताम्बु ग्रांघ्रा दिशो मसेलल। गो परमप्रभु यावे नड। गो मेको आन कली मेको आं के सेलनुड' दे शेंदो" दे परमप्रभु यावेमी मोसा कली देंत।

24 मिनू मोसामी हारून, मेको आ तौपुकी नु इस्राएली नेल्ल आन कली एको लोव्र नेंपाइक्तीमी।

## 22

सुमी चढेतीक रे जने ब्वने चाप्व

1 परमप्रभु यावेमी मोसा कली

2 “गे हारून नु आ तौ आन कली मार शेंचा माल्नेवे देशा हना, ‘इसाएलीपुकीमी आं कली चढेशो थोत्रक आन पर्वम होस पा बाक्कीन। मिनु आं नें कली ग्रांघा दिशो मसेलीन। गो परमप्रभु यावे नड’ दे शेंचा माल्नेवे” दे परमप्रभु यावेम मोसा कली दैत।

3 मिनु मोसा कली “गो परमप्रभु यावे नड। गे मेको आन कली ‘इन तौ, चच युड आन पाला डा तेकोड मुर ग्रांघा दिशो दुम्शा, इसाएलीपुकीमी परमप्रभु यावे कली चढेशो थोत्रक आन नेक्था जाक्तेक हना, मेको मुर आं डोंइती रे तिल्या पुंडसीब। गो परमप्रभु यावे नड।

4 मिनु हारून आ तौ, चच युड आन दातेमी सुड कुशुल डा रोड नु ग्रांघा यितीक पशो बाक्तेक हना, मेको ग्रांघा मदिशो सम्म आं कली चढेशो मारेड थोत्रक जचा ब्वचा मदुम्ब। सुडमी बेक्शो मुर के कि बिउ यिशो मुर रे ग्रांघा दिशो दुम्शो मुर कली थीबा, लेवी १३:-१५:-

5 कि खपीम ग्रेशा गाक्ब जन्तु कली थिशो ग्रांघा दिशो दुम्शो मुर थीबा, कि मार मार आ पर्वम ग्रांघा दिशो बाक्त हना,

6 मेको मुर नां मरिक्म सम्म ग्रांघा दिशो बाक्ब। मेकोमी मचिक्से सम्म ला आं कली चढेशो जचा ब्वचा मदुम्ब। लेवी ११:-

7 मोदेशो मुर नां रिक्म नोले ला ग्रांघा मदिशो दुम्ब। मिनु नोले मेकोमी आं कली चढेशो थोत्रक जने ब्वने चाप्व। मारदे हना मेको आं कली चढेशो आ जचा ब्वचा थोत्रक बाक्ब।

8 मिनु बेक्शो, ब्वाकी डा जन्तुपुकीम क्राइशशा साइशो जन्तु, बस्तु भाव कली ब्वचा मदुम्ब। मोदेशो पाप्टु हना, मेको मुर ग्रांघा दिशो सेल्सीब। गो परमप्रभु यावे नड। लेवी ७:२४

9 चढेबपुकीमी आं देशो टिचा माल्नीम। मो मपाक्तेक हना, मेकोपुकीमी आं देशो मटितेक हना, मेकोपुकी दोस तथा आं बाक्तीक ताम्बुमी बेक्नीम। मिनु गो मेको आन कली आंम आं मुर सेल्ब परमप्रभु यावे नड।

10 मिनु अर्को रागी डा मुर नु चढेब आ खिंम पौना बाक्शो कि गाल्च ताडब मुर आं कली चढेशो थोत्रक जचा ब्वचा मदुम्ब।

11 तन्न चढेबमी क्येट थाप्ला ग्याप्लो मुर नु मेको आ खिंम जरमेशो मुर चढेब आ भाग रे जचा ब्वचा दुम्ब।

12 मिनु चढेब आ तमी अर्को खिं डा मुर नु ग्युवे पशो बाक्त हना, परमप्रभु कली चढेशो जचा ब्वचा मदुम्ब।

13 तन्न चढेब आ तमी आ वोंइश बेक्शो कि प्रोंइचा पुंडसीशो बाक्त हना, आ तमी तौ मदुम्बु, आ आफ आ खिं लेत्त हना, आ आल ना डा खोदेशो पा आन आफ आ भाग डा चढेशो रे जने ब्वने चाप्व। तन्न अर्को खिं डा मुर मेको जचा ब्वचा मदुम्ब।

14 मिनु मरुम मतुडक्थु परमप्रभु कली चढेशो रे जाप्टु हना, मेकोमी चढेब कली मेको आ जशो क्येडा ५ भाग तेम्शा, परमप्रभु कली चढेशो खोदेशो पा चढेब कली लेत्चा माल्ब। लेवी ५:१६

15 मोपा सुडमी इसाएली आन परमप्रभु यावे कली चढेशो थोत्रक ग्रांघा सेल्चा मदुम्ब।

16 मोदेशो परमप्रभु कली चढेशो जशो मुर दोस ताडनीम। मिनु मेकोमी गारशा आ पर्वम चढेतीक चाक्चा माल्ब। मारदे हना मेकोमी परमप्रभु यावे कली चढेशो जाप्टु ब्वाप्टु। गो परमप्रभु यावे नड। मिनु गो मेको कली आंम आं मुर सेल्ता” दे शेंदो” दैत।

17 मिनु परमप्रभु यावेमी मोसा कली

18 “गे हारून, आ तौपुकी नु इसाएली नेल्ल आन कली ‘इसाएली आन दातेमी मुर का कि इसाएलम बाक्ब अर्को रागी डा मुरुमी ग्येरशा परमप्रभु यावे कली चढेतीके चोशा चढेशो खोदेशो परमप्रभु यावे कली चढेचा दाक्ताक्ब हना,

19 मिनु परमप्रभु आ डोंइती ब्रचा डा पा मेकोमी मारेड मदुम्शो थम रिम्शो ब्यफ, सांड कि बोका चढेचा माल्ब।

20 गार पाइशो बस्तु चढेचा मदुम्ब। मारदे हना मेको मब्रचा डा बाक्नीम। ब्यवस्था १५:२१; ब्यवस्था १७:१; मलाकी १:८

21 मिनु मुर कामी दुशा बाक्चा आ पर्वम चढेतीके परमप्रभु यावे कली चढेशा, आ पशो कसम खबानु, ग्येरशा परमप्रभु यावे कली चढेतीके, खोदेशो पा, मेको ब्रचा डा दुम्पाइक्चा कली आ हुल रे मारेड मदुम्शो थम रिम्शो बस्तु चढेचा माल्ब।

22 मिनु गेपुकीमी परमप्रभु यावे कली मिक्च मताडब, गार दुम्शो, आन रां बिग्रेशो, ग्रांघा यितीके पाडब, कुशुल रोड पाडब कि लुतो पाडब बस्तु भाव चढेचा मदुम्ब। मोदेशो मीम चोशा चढेचा कली परमप्रभु यावे कली चढेतीकेमी वोडक्चा मदुम्ब।

23 मिनु गेपुकीमी लाइशशा खोइल पाइशो ब्यफ कि भेडा चहिं ग्येरशा चढेतीके चढेतीनी हना दुम्ब। तन्न कसम जशोन, इन चढेतीके मब्राइब दुम्ब।

24 तेको ब्यफ, क्यारश भेडा खसी पशो गार सेल्शो नु चेशो बाक्बा, मेको परमप्रभु यावे कली चढेचा मदुम्ब। इन रागीम मो पचा मदुम्ब।

25 गेपुकीमी मोदेशो बस्तु भाव अर्को रागी डा मुर रे ग्याप्ला ताक्शा इन परमप्रभु कली जचा थोत्रक चढेचा मदुम्ब। मेको आन रां बिग्रेशो नु गारम पतीके इन पर्वम मब्रतीक दुम्ब’ दे शेंदो” दे परमप्रभु यावेमी मोसा कली दैत।

26 मिनु परमप्रभु यावेमी मोसा कली



- 27 “बाछा, भेडा पाठा कि क्यारश पाठा जरमेशा, मेको ७ नाक्त सम्म आ ममा नु बाक्चा माल्ब। मिनु मेको कली ८ नाक्त रे चोशा चढेशोनु, परमप्रभु यावेमी ब्राइब। प्रस्थान २७:२९
- 28 तन्न गेपुकी बी नु आ चाइक्ब कि भेडा नु आ पाठा काबुमी क्योरचा मडुम्ब। ब्यवस्था २२:६-७
- 29 गेपुकीमी परमप्रभु यावे कली ‘गे रिम्शो पाइब बाक्नीनी’ दे चढेशो चढेनीनु, मेको इन पर्वम ब्रचा डा पा चढेने। लेवी ७:१५
- 30 मेको चढेशो नाक्ती मेको कली ब्वने। आ दीसा सुनी सम्म मारेइ महेंचा। गो परमप्रभु यावे नड।
- 31 मिनु गेपुकीमी आं शेंतीके तुइश्शा टिने। गो परमप्रभु यावे नड।
- 32 गे आं ग्रॉग्रा रे डोन बाक्शो नें ग्रॉग्रा दिशो मसेलीन। मोपतीके गो इस्त्राएली आन दातेमी का ला ठेयब दुम्ती। गो परमप्रभु यावे नड। मिनु गो इन कली आंम आं मुर सेल्ला। लेवी २२:९,१६
- 33 मिनु इन परमप्रभु दुम्चा कली गो इन कली इजीप्त रागी रे गुंडताक्ड। गो परमप्रभु यावे नड, दे शेंदो” देंत।

## 23

सन्चरबार नाइक्तीक नाक्ती

- 1 मिनु परमप्रभु यावेमी मोसा कली
- 2 “गे इस्त्राएली आन कली ‘परमप्रभु यावे आ देशो पचा माल्शो चाड परमप्रभु यावे के बाक्नीम। मिनु गे मेको पचा माल्नीनी।
- 3 गे ६ नाक्ती सम्म गेय पचा माल्नीनी। तन्न ७ नाक्त चहिं थमा पा नाइक्तीक नाक्ती बाक्शा, परमप्रभु यावे केन बाक्ब। गे मारेइ गेय मपने। इन बाक्तीक नेल्लेमी परमप्रभु यावे आ नाइक्तीक नाक्ती बाक्ब” देंत। प्रस्थान २०:८-११

पास्सा चाड आ पर्वम अरेशो

- 4 मिनु परमप्रभु यावेमी लेंशा, मुर आन कली शेंचा, दे मोसा कली “परमप्रभु यावे आ देशो पचा माल्शो चाड आ चाड बाक्नीम। आ देशो नाक्ती मानेचा माल्नीनी। परमप्रभु यावे आ चाडपुकी मार बाक्नीम देशा हना, प्रस्थान २३:१४-१९
- 5 डोंइती डा महिना डा १४ नाक्ती नाक्नाक्दो पास्सा चाड डा परमप्रभु यावे कली चढेतीक गेय पचा माल्नीम। प्रस्थान १२:-
- 6 मेको महिना डा १५ नाक्ती परमप्रभु यावे कली बोरब ओख्ती मसुप्शो शोब्ले जतीक चाड बाक्ब। गेपुकीमी ७ नाक्त सम्म बोरब ओख्ती मसुप्शो शोब्ले जचा माल्नीनी।
- 7 डोंइती डा नाक्ती आं पर्वम गुम्तीक नाक्ती दुम्चा माल्ब। मेको नाक्ती मारेइ गेय मपने।
- 8 मिनु ७ नाक्त सम्म गेपुकीमी परमप्रभु यावे कली मी चोशो चढेतीके चढेचा माल्नीनी। मेको आ ७ नाक्ती लेंशा परमप्रभु यावे आ पर्वम गुम्तीक दुम्चा माल्ब। मेको नाक्ती गेपुकीमी मारेइ गेय मपने” देंत। प्रस्थान १३:६

डोंइती मीशो बाली नाली

- 9 मिनु परमप्रभु यावेमी मोसा कली
- 10 “गे इस्त्राएली आन कली ‘इन कली गेशो रागीम जाक्दीश्शा, मेकेर डा बाली नाली खुप्तीनीनु, गेपुकीमी डोंइती डा रिक्शो बाली मुठा का चढेब आन कली चाक्कीन।
- 11 मेकोमी अन्न मुठा परमप्रभु यावे आ डोंइती क्युक्शा हिम्चा माल्ब। मो पाइतीनी हना परमप्रभु यावेमी इन कली ब्राइब। नाइक्तीक नाक्ती आ दीसा चढेबमी मेको क्युक्शा हिम्चा माल्ब।
- 12 मेको क्युक्शा हिम्शो नाक्ती गेपुकीमी परमप्रभु यावे कली बर्स का दुम्शो मारेइ मडुम्शो थम रिम्शो सांड चोशा चढेचा माल्नीनी।
- 13 मेको नु अन्न चढेतीक चढेचा माल्नीनी। मेको अन्न चढेतीक चहिं तेलम निशो एफाह के २० भाग थम रिम्शो फस दुम्चा माल्ब। मेको परमप्रभु यावे कली आ दाक्शो ब्रोन्नशो रिना पाइश्शो मीम चोशा चढेतीके बाक्ब। मेको नु तूचा थोन्नक चढेतीके हिन का डा ४ भाग सेल्शो रे भाग का अडगुर शांबु चढेचा माल्नीनी। एफाह पुक्तीके का बाक्ब। एफाह का २२ लिटर रिक्ब। मेको के २० भाग ४.४ लिटर बाक्ब। लोग आइक्च पुक्तीके का बाक्ब। मेको ०.३ लिटर रिक्ब। हिन अर्को पुक्तीके का बाक्ब। हिन का ४ लिटर खोदेशो रिक्ब। हिन का ४ भाग सेल्शो रे भाग का लिटर का खोदेशो बाक्ब।
- 14 मेको नेल्ल परमप्रभु कली चढेशो नोले ला शोब्ले, कारशो अन्न नु गिगी बाला मारेइ जने चाप्नीनी। मेको गेपुकी ते बाक्तीनी हना यो, एको गेना हना यो नेल्ल पाला सम्म पतीक बाक्ब।

७ हप्ता नोले डा चाड

- 15 मिनु नाइक्तीक नाक्ती आ दीसा, गे अन्न आ मुठा क्युक्शा हिम्शा चढेतीक नाक्त रे गेपुकीमी ७ हप्ता हिक्चा माल्नीनी। गन्ती २८:२६-३१; ब्यवस्था १६:९-१२
- 16 मिनु गेपुकीमी ७ हप्ता आ दीसा, ५० नाक्त सम्म हिक्चा माल्नीनी। मेको नाक्ती गेपुकीम परमप्रभु यावे कली नक अन्न चढेचा माल्नीनी।
- 17 गेपुकीमी आंम इन खिं रे शोब्ले निक्शी क्युक्शा हिम्शा चढेचा कली माल्नीनी। मेको शोब्ले का एफाह का के २० भाग थम रिम्शो फस रे बोरब ओख्ती सुप्थु चोशा सेल्शो दुम्चा माल्ब। मेको डोंइती मीशो अन्न के परमप्रभु यावे कली चढेतीक बाक्ब। एफाह पुक्तीके का बाक्ब। एफाह का २२ लिटर रिक्ब। मेको के २० भाग ४.४ लिटर खोदेशो बाक्ब।

18 मेको शोब्ले नु बर्स का गाप्शो ७ ओटा मारेड मद्दुश्शो थम रिम्शो पाठा नु ब्यफ का नु सांड निक्शी चढेचा माल्नीनी। मेको अन्न चढेतीक नु तूचा थोव्रक चढेतीके परमप्रभु यावे कली आ दाक्शो ब्रोव्रशो रिना पाइश्शो मीम चोशो चढेतीक बाक्ब।

19 मिनु गेपुकीमी पाप आ परबम चढेचा कली बोका का नु दुशा बाक्चा आ परबम चढेचा कली बर्स का गाप्शो सांड निक्शी यो चढेचा माल्नीनी।

20 मिनु चढेबमी परमप्रभु यावे कली डोंइती नक मीशो अन्न के शोब्ले नु सांड निक्शी क्युकशा हिम्शा चढेचा माल्ब। मेको चढेब आ भाग दुन्चा कली परमप्रभु यावे कली गेशो बाक्नीम।

21 मेको नाक्त इन कली टेयब गुम्तीक नाक्त बाक्ब, दे गेपुकीमी नेल्ल आन कली नेंपाइक्चा माल्नीनी। गेपुकीमी मारेड गेय मपने। मेको गेपुकी ते बाक्तीनी हना यो, एको गेना हना यो नेल्ल पाला सम्म पतीक बाक्ब।

22 मिनु गेपुकीमी इन बाली नाली रिक्नीनु, रू आ कुना कुना सम्म मरिक्कीन। गेपुकीमी इन रू डा सिला बाला यो मगुपीन। गेपुकीमी इन दाते डा पुडग नु अर्को रागी डा मुर आन परबम प्रोनीन। गो परमप्रभु यावे, इन परमप्रभु नड' दे शेंचा माल्नेवे" देंत। लेवी १९:९-१०

नाइक्तीक डा चाड

23 मिनु परमप्रभु यावेमी मोसा कली

24 "इसाएली आन कली "७ महिना डा डोंइती डा नाक्ती गे नाइक्चा माल्नीनी। गे परमप्रभु यावे आ परबम गुम्शा, मेको नाक्त मिम्चा कली तुराही ताप्चा माल्नीनी। गन्ती २९:१-६; गन्ती १०:१०

25 गेपुकीमी मेको नाक्त मारेड गेय मपने। मिनु परमप्रभु यावे कली मीम चोशो चढेतीके चढेन' दे शेंचा माल्नेवे" देंत।

पाप क्याम्तीक नाक्ती डा चाड

26 मिनु परमप्रभु यावेमी मोसा कली

27 "मेको ७ महिना डा १० नाक्त पाप क्याम्तीक नाक्त बाक्ब। मेको नाक्ती गेपुकीमी परमप्रभु यावे आ परबम गुम्चा माल्नीनी। गेपुकी मेको नाक्त माइजा बाक्चा माल्नीनी। मिनु गेपुकीमी परमप्रभु यावे कली मीम चोशा चढेतीक चढेचा माल्नीनी। लेवी १६:-

28 मेको नाक्त मारेड गेय मपने। मारदे हना मेको पाप क्याम्तीक नाक्त बाक्ब। मेको नाक्ती परमप्रभु यावे, इन परमप्रभु आ डोंइती इन परबम पाप क्याम्तीक गेय पतीक नाक्ती बाक्ब।

29 मिनु सु मेको नेल्ल नाक्ती माइजा मबाक्बा, मेको आ मुर आन दाते रे साइक्चा पुंडसीब।

30 मिनु सुइमी मेको नाक्त मारेड गेय पाप्तेक्म हना, गो मेको आन कली साइक्नुडा।

31 गेपुकीमी मेको नाक्त मारेड गेय मपने। गेपुकी ते बाक्तीनी हना यो, मेको गेना हना यो इन पतीक बाक्ब।

32 मेको नाक्त इन कली थमा पा नाइक्तीक नाक्त बाक्ब। मिनु मेको नाक्त गेपुकी माइजा बाक्चा माल्नीनी। मेको महिना डा ९ नाक्त डा नां रिक्म रे आ दीसा नां रिक्म सम्म गेपुकी माइजा बाक्चा नाइक्चा माल्नीनी, दे शेंचा माल्नेवे" देंत।

गोठ सेल्शा बाक्तीक चाड

33 मिनु परमप्रभु यावेमी मोसा कली

34 "गे इसाएली आन कली "७ महिना डा १५ नाक्त रे ७ नाक्न सम्म परमप्रभु यावे आ डोंइती गोठ सेल्शा बाक्तीक चाड मानेचा माल्नीनी।

35 मेको आ डोंइती डा नाक्ती परमप्रभु यावे आ परबम गुम्चा माल्नीनी। गेपुकी मेको नाक्त इन गेय मपने।

36 मिनु गेपुकीमी ७ नाक्त सम्म परमप्रभु यावे कली मीम चोशा चढेतीक चढेन। मिनु गेपुकीमी आ दीसा परमप्रभु यावे आ परबम गुम्तीक नाक्ती मानेन। मिनु परमप्रभु यावे कली मीम चोशा चढेन। मेको टेयब गुम्तीक नाक्ती बाक्ब। मिनु गेपुकीमी मेको नाक्त इन गेय काइ मपने। यूहन्ना ७:३७

37 मिनु परमप्रभु यावे आ देंशो टेयब गुम्तीक डा मानेचा माल्लो चाड तेको बाक्नीम देंशा हना, मेको नाक्ती गेपुकीमी परमप्रभु यावे कली मीम चोशा चढेतीके, अन्न चढेतीके, क्योरशा चढेतीके नु तूचा थोव्रक चढेतीके ठीक नाक्ती चढेचा माल्नीनी।

38 मेको क्येडा परमप्रभु यावे आ नाइक्तीक नाक्ती डा, इन दाक्शा गेतीक थोव्रक, इन कबल पशो गेतीक थोव्रक नु इन ग्येरशा गेशो थोव्रक परमप्रभु यावे कली चढेचा माल्नीनी।

39 मिनु ७ महिना डा १५ नाक्ती आंम रू डा अन्न खुप्शो नोले गेपुकीमी ७ नाक्त सम्म परमप्रभु यावे आ चाड मानेचा माल्नीनी। डोंइती डा नाक्त नु ८ नाक्ती थमा पा नाइक्चा माल्नीनी।

40 डोंइती डा नाक्ती गेपुकीमी रवा आन रिम्शो फल फुल, खजूर रवा आन राशी, शुश सफा पाइश्शो रवा आन राशी नु अरु खोलामी बाक्शो रवा आन राशी चाक्शा, गो परमप्रभु यावे, इन परमप्रभु आ डोंइती ७ नाक्त सम्म ग्येरसीन। नेहेम्याह ८:१४-१६

41 गेपुकीमी बर्सम ७ नाक्त सम्म एको चाड मानेशा, परमप्रभु यावे कली टेयब सेल्चा माल्नीनी। गेपुकी ७ महिनामी एको चाड मानेचा माल्नीनी। एको इन कली गेना हना यो पतीक बाक्ब।

42 गे ७ नाक्त सम्म गोठीमी बाक्कीन। इसाएल डा मुर नेल्ल गोठीम बाक्चा माल्नीम।

43 गो इन कली इजीप्त रे गुंडशा चाक्नीनु, गोठीम बाक्पाइश्शो नड, दे इन चच युडपुकीम तुइक्चा माल्नीम। गो परमप्रभु यावे, इन परमप्रभु नड' दे शेंदो" देंत।

44 मिनु मोसांमी परमप्रभु यावे कली मानेचा माल्लो चाड मुर नेल्ल आन कली नेंपाइक्तीमी।

## 24

बत्ती नु शोब्ले

1 मिनु परमप्रभु यावेमी मोसा कली

2 “गे इस्राएली आन कली ‘बत्ती गेना हना यो ब्रपाइशशा वोइक्का कली गेपुकीमी तेल रवा आ फल रे तुप्शा सेल्शो तेल चाक्कीन। प्रस्थान २७:२

3 मिनु हारूनमी बत्ती कली युम्तीक ताम्बु आगा, फारशो वा आ डोंइती वोइक्का माल्ब। मेको परमप्रभु यावे आ डोंइती नाक्दो रे सुनी सम्म गेना हना यो ब्रचा माल्ब। मेको इन कली गेना हना यो पतीके बाक्ब।

4 मेकोमी परमप्रभु यावे आ डोंइती क्येख सुन के सेल्शो बत्ती दातीक तारी गेना हना यो वोइक्का माल्ब।

5 गे रिम्शो फस चाक्शा, बार ओटा शोब्ले चोवो। शोब्ले का एफाह का के २० भाग थम रिम्शो फस के दुम्चा माल्ब। एफाह पुक्तीके का बाक्ब। एफाह का २२ लिटर रिक्ब। मेको के २० भाग ४.४ लिटर खोदेशो बाक्ब। प्रस्थान २५:३०

6 मेको शोब्ले परमप्रभु यावे आ डोंइती क्येख सुन के टेबल आ तार ६, ६ ओटा खोप्शा वोइक्का माल्ब।

7 मेको निक्शी खोप्तीकेमी का का पा रिम्शो धूप वोइक्का माल्ब। मिनु मेको शोब्ले आ पा डा मेको धूप मीम चोशा परमप्रभु यावे कली चढेचा माल्ब।

8 मोपा हारूनमी नेल्ल नाइक्तीक नाक्ती मेको शोब्ले कली परमप्रभु यावे आ डोंइती वोइक्का माल्ब। मेको इस्राएली आन कली मेको गेना हना यो पतीक नु लीब कबल बाक्ब।

9 मेको शोब्ले हारून नु आ तौ चच आन कली बाक्नीम। मेकोपुकीमी मेको शोब्ले चोत्रखो बाक्तीकेमी बाक्शा जचा माल्नीम। मारदे हना मेको शोब्ले परमप्रभु यावे कली मीम चोशा चढेशो रे नेल्ल क्येडा चोत्रखो हारून नु आ तौ चच आन भाग बाक्ब’ दे अरेवो” देंत।

परमप्रभु कली शुक्शी पाइब

10 मिनु इजीप्ती आफ नु इस्राएली ममा पाइशशो मुर का बाक्माक्त। मेको मुर इस्राएली आन दातेमी जाक्शा, इस्राएली का नु तुम्मुसा बाक्त।

11 मिनु मेको इस्राएली ममा आ तौमी परमप्रभु यावे आ नें थिशा, सराप पवा बाक्त। मिनु मुरपुकीमी मेको कली मोसा आ बाक्तीकेम चाक्गामे बाक्त। मेको आ ममा आ नें शेलोमीथ बाक्माक्त। मिनु मेको दान आ थर डा दिब्री आ तमी बाक्माक्त।

12 मिनु मेको मुर कली चाक्शा, परमप्रभु यावे आ मिम्शो मतुडक्तमे सम्म चोक्शा वोदमे बाक्त। गन्ती १५:३४

13 मिनु नोले परमप्रभु यावेमी मोसा कली

14 “मेको सराप पाइब कली मुर आन बाक्तीक रे लाडगा गुंडदीन। मिनु मेको आ नेक्था बाक्ब मुर नेल्लेमी मेको आन गुड आ पिया तारी वोइक्का माल्नीम। मिनु मेको नोले नेल्लेमी मेको कली फुल्लु आप्शा साइक्का माल्नीम। गन्ती १५:३६; ब्यवस्था १५:५; प्रेरित ७:५६

15 मिनु गे इस्राएली आन कली ‘सुम आ परमप्रभु कली सराप पाइबा, मेको आ पाप राइब।

16 परमप्रभु यावे आ नें आ परबम मरिम्शो लोत्र पाइब साइक्का पुंडसीब। इस्राएल डा मुर बाक्त हना यो, अर्को रागी डा मुर बाक्त हना यो, सुम परमप्रभु यावे आ नें आ परबम मरिम्शो लोत्र पाइबा, मेको साइक्का पुंडसीब। प्रस्थान २०:७; मती २६:६५-६६

17 सुमी मुर का कली साइक्का, मेको साइक्का पुंडसीब। प्रस्थान २१:१२

18 सुडमी बस्तु भाव कली तुप्शा साइक्कु हना, मेको आ पा डा अरु गेचा माल्ब। ब्रोंइशो बस्तु आ पा डा ब्रोंइशो बस्तु गेचा माल्ब। प्रस्थान २१:३३-३७

19 सुडमी आ नेक्था डा मुर कली आ खोइल जिक्ताक्व हना, मेको यो आ खोइल जिक्का पुंडसीब।

20 जिक्तीके आ पा डा जिक्तीके, मिक्च आ पा डा मिक्च, खुड आ पा डा खुड, सुमी सु कली मार पाइबा, मेको यो मो पाइक्का पुंडसीब। मेको कली यो मो पाइक्का माल्ब। प्रस्थान २१:२३-२५

21 सुडमी बी ब्यफ, क्यारश भेडा आन कली तुप्शा साइक्कु हना, मेको आ पा डा अर्को गेचा माल्ब। तन्न मुर साइक्ब कली चहिं, साइक्क्यान माल्ब।

22 आंम रागी डा मुर नु अर्को रागी डा मुर आन परबम खाल का डा ऐन कानुन दुम्चा माल्ब। मारदे हना गो परमप्रभु यावे, इन परमप्रभु नड’ दे शेंचा माल्लेवे” देंत। लेवी १९:३४; प्रस्थान १२:४९

23 मिनु मोसामी इस्राएली आन कली मेको लोत्र शेंदीमी नोले मेकोपुकीमी मेको सराप पाइब कली मुर आन बाक्तीक रे गुंडशा, फुल्लु आप्शा साइक्क्तेम। मिनु परमप्रभु यावेमी मोसा कली अरेशो खोदेशो पा इस्राएली नेल्लेमी पाम्तेक्म।

## 25

नाइक्तीक बर्स

1 मिनु परमप्रभु यावेमी सीने डांडामी मोसा कली

2 “गे इस्राएली आन कली ‘गेपुकी गो इन कली गेशो रागीमी जाक्दीन्नी नोले मेको रागी यो परमप्रभु यावे आ नेमी नांडसीचा माल्ब।

3 गे ६ बर्स सम्म आंम रूम मार मार शोक्का खुम्चा माल्नीनी। ६ बर्स सम्म इन अडगुर रू डा बोट आन मसिश्शो राशी खोइशशा ताइक्का माल्नीनी। मिनु मेको आ अडगुर खुप्चा माल्नीनी। प्रस्थान २३:१०-११

4 तन्न ७ बर्सम रू नेल्ले परमप्रभु यावे आ बर्सम नाइक्का माल्ब। गेपुकीमी ७ बर्सम इन रूम मारेइ मशोक्या मखुम्चा। मिनु अडगुर बोट आ फल मसिन्ब राशी यो मखोतीन।

5 इन रूमी आंमा वाशो मारेइ मारेइ खुप्चा मदुम्ब। मखोइश्शो अडगुर बोट आ फल खुप्चा मदुम्ब। मेको रू कली थम नाइसीतीक बर्स दुम्चा माल्ब।

6 मेको रू नाइसे ना आंमा सिश्शो मारेइ मारेइ जने चाप्नीनी। मिनु इन वाइलीम वाइल नु गे नु बाक्ब इन थाप्शो गेय पाइबपुकीमी जने चाप्नीमी।

7 मेको रूमी वाशो, इन बस्तु भाव नु ब्वाकी डा जन्तु आन कली ब्वतीक दुम्ब।

डोंइती डा खोदेशो सेलतीक बर्स

8 मिनु गेपुकीमी ७ नाइक्तीक बर्स मानेनी नोले, मिनु ४९ बर्स दुम्बा,

9 मिनु ७ महिना डा १० नाक्ती पाप क्याम्तीक नाक्त बाक्ब। मेको नाक्ती इन रागी नेल्लेमी तुराही ताप्पाइक्का माल्नीनी। लेवी २३:२७

10 मिनु ५० डा बर्स परमप्रभु यावे आ बर्स बाक्ब। मिनु गे रागी डा मुर नेल्ल आन कली आन डोंइती डा अधिकार लेंशा ताइनीम, दे नेंपाइक्का माल्नीनी। मेको इन कली प्रोंइतीक बर्स बाक्ब। मिनु मुर नेल्ल आन आन खिं नु आन आन बाक्तीक लेन्ने चाप्नीम। यसेया ६१:२; लूका ४:१९

11 मेको ५० बर्स इन कली डोंइती डा खोदेशो पा लेंशा सेलतीक बर्स बाक्ब। मेको बर्स गेपुकीमी मारेइ मशोककीन, मखुमीन। आंमा वाशो बाली नाली मरुप्चा। अडगुर बोट आन ममुंइशो राशीम सिश्शो अडगुर मखुप्चा।

12 मारदे हना मेको प्रोंइतीक बर्स बाक्ब। मेको परमप्रभु यावे आ बर्स दुम्ब। गेपुकीमी रूम आंमा वाशो, आंमा सिश्शो ला जने।

13 मेको प्रोंइतीक बर्समी मुर नेल्ल आन आन रू नु खिं लेत्चा माल्नीम।

14 मिनु आम नेक्था डा मुर नु ग्याप्तीक लेयतीक गेय पनीनु, मठगेपामुने। १ थिस्सलोनिकी ४:६

15 गे इन नेक्था डा मुर रे रू का ग्याप्तीवी हना, मेको प्रोंइतीक बर्स जाक्का गिश बर्स लीनीम, दे हिक्शा ला ग्यापीन।

16 गिश बर्स लीनीमी मेको कोव्रशा गेपुकीमी आ क्येट बारपाइक्का माल्नीनी। मिनु इक्का बर्स ला लीतेक्म हना, क्येट तोक्का माल्नीनी। मारदे हना अन्न खुप्तीक बर्स कोव्रशा, मेको रू लेयशो बाक्ब।

17 गेपुकी आंम आंमा मठगेपामुने। तन्न परमप्रभु क्येडा हिनीन। मारदे हना गो परमप्रभु यावे, इन परमप्रभु नड।

18 गेपुकीमी आं फुल्लुम मुशा ब्रेक्शो लोव्र तुइश्शा पचा माल्नीनी। आ पावो, दे अरेशो लोव्र टिने। मोपा ला गे मेको रागीमी रिम्शो पा बाक्ने चाप्नीनी। लेवी २६:५; १राजा ५:५

19 मिनु रागीमी अन्न ग्रेल्ब। गेपुकी जचा तूचाम श्येत मजाइनीनी। मिनु मेको रागीमी महिंथु थुं नाइश्शा बाक्का ताइनीनी।

20 गेपुकीमी अन्न मशोकथु मखुप्थु ७ बर्सम चहिं गो मार जाइनीकी, दे देंतीनी हना,

21 गो ६ बर्सम इन कली आं आसीक गेनन्नी। मिनु रागीम बर्स सां सम्म शुश अन्न ग्रेल्पाइक्कुड। ब्यवस्था २८:८

22 गेपुकीमी ८ बर्सम खुम्नीनु, गे माइत अन्न रे जाइनीनी। ९ बर्सम नक बाली नाली ममीम सम्म गे माइतन जाइनीनी।

रागी रू नेल्ल परमप्रभु के बाक्ब

23 मिनु इन गे रू गेना हना यो कली लेयने मचाप्नीनी। मारदे हना मेको रागी आं के बाक्ब। गेपुकी गे आं के वाइल नु बुम्था पाइब खोदेशो बाक्नीनी। भजन संग्रह ३९:१३

24 इन ग्याप्शो अधिकारम पिशो रू लेंशा लेत्चा माल्नीनी।

25 सुइ इन मुर पुडग दुम्तीके आन रू लेयचा माल्तेक्म हना, मेको आ नेक्था डा मुर जाक्का, मेको लेशशा ग्याप्पाइक्का माल्ब। रूथ ४:३-४

26 तन्न मो पाइब सुइ मबाक्तेक्म हना, नोले मेको आंमान क्येट थीब दुश्शा, लेशशा आंमा ग्याप्चा माल्ब।

27 मेकोमी मेको लेयशो गिश बर्स दुम्मे, मेको हिक्का माल्ब। मिनु सु कली लेयशो बाक्मे, मेको लीशो बर्स डा खुप्तीक अन्न डा क्येट गेचा माल्ब। मिनु मेको मुर आ रू लेंशा मेको केन दुम्ब।

28 तन्न आंमा लेन्ने मचाप्तु हना, मेको रू ग्याप्ब मुर नु बाक्ब। मिनु रू ग्याप्बमी प्रोंइतीक बर्सम लेत्चा माल्ब।

29 मिनु सुइमी गारो हिरशो सहर आगा डा खिं लेयतु हना, लेयशो बर्स का सम्म मेकोमी मेको आ खिं लेन्ने चाप्ब। मेको कली मेको अधिकार बर्स का सम्म बाक्ब।

30 तन्न बर्स काम यो मेको लेन्ने मचाप्तु हना, ग्याप्ब नु आ खिं डा मुर आन कली मेको खिं आन शोंप दुम्ब। प्रोंइतीक बर्सम यो मेको लेशशा गेचा ममाल्ब।

31 तन्न गारो महिरशो बाक्तीके डा खिंपुकी चहिं रूपुकी खोदेशो पा पचा माल्ब। मेको लेन्ने चाप्नीम। मिनु प्रोंइतीक बर्सम लेशशा गेचा माल्नीम।

32 मिनु लेवी आन सहरमी बाक्शो खिं चहिं मेकोपुकीमी आंम खिं गेना हना यो लेन्ने चाप्नीम। गन्ती ३५:२-५

33 लेवी आन सहरम बाक्शो लेयशो खिं अरु लेवीम लेन्ने मचाप्तेक्म हना, प्रोंइतीक बर्समी मेको खिं लेयशा, मेको कली गेचा माल्ब। मारदे हना लेवी आन सहरम बाक्शो खिं इस्त्राएली आन दातेमी लेवी आन शोंप बाक्नीम।

34 मेको आन सहर क्येडा लाडगाम बाक्शो रूपुकी लेयचा मताइनीम। मारदे हना मेको आन गेना हना यो लीब शोंप बाक्नीम।

क्येट आ चाइक्ब मताक्को

35 मिनू इन इस्राएली लोकब का शुश पुडग दुम्शा, पने जने मचाप्टु हना, गेपुकीमी मेको कली अर्को रागी डा मुर खोदेशो पा वारच पचा माल्नीनी। मिनू मेको गेपुकी नु बाक्ने चबल।

36 मिनू गे मेको कली जेर गेनीनु, आ चाडक्ब मताक्कीन। गे इन परमप्रभु क्येडा हिनीन। मिनू इन लोकब कली गे नु बाक्चा गेन। प्रस्थान २२:२४; ब्यवस्था २३:२०

37 गेपुकीमी मेको कली क्येट गेतीकेमी चाडक्ब मताक्कीन। मिनू मेको कली जचा थोवक गेशा, मेको आ क्येडा शुश मलेप्पाडक्तीन।

38 गो इन परमप्रभु दुम्चा नु इन कली कनान रागी गेचा, दे इन कली इजीप्त रागी रे गुंडशा, एक चाक्ब, गो परमप्रभु यावे, इन परमप्रभु नड।

39 मिनू गे इन इस्राएली लोकब शुश पुडग दुम्शा, आंमा इन कली लेयसाक्ब हना, मेको आन कली वाइल खोदेशो पा गेय मपपतीन। प्रस्थान २१:२

40 मिनू गेपुकीमी मेको कली थाप्शो गेय पाइब कि अर्को रागी डा गेय पाइब खोदेशो पा बाक्चा गेने। मिनू मेको प्रोइतीक बर्स सम्म गेपुकी नु बाक्चा इन गेय पाइब दुम्ब।

41 मिनू नोले मेकोपुकी नु आन तमी तौ गे इन बाक्तीक रे लशा, आन खिं डा मुर नु आन बाक्तीक लेम्मल।

42 मारदे हना मेकोपुकी गो इजीप्त रे गुंडशा चाक्शो आं गेय पाइबपुकी बाक्नीम। मेको आन कली वाइलीम वाइल खोदेशो पा लेयचा मदुम्ब।

43 मिनू गेपुकीमी मेको आन कली शुश अरेशा श्येत मगेन। इन परमप्रभु कली तशा हिनीन। प्रस्थान २१:२०-२१

44 मिनू गेपुकीमी इन वाइलीम वाइल चहिं एर ओंथ डा अर्को रागी डा मुर रे ग्याप्चा माल्नीनी।

45 गेपुकी नु बाक्ब अर्को रागी डा मुरपुकी नु इन रागीम जरमेशो मेको आन खिं डा मुर रे ग्याप्चा, इन के सेल्ले चाप्नीनी।

46 गे मेको आन कली आंम तौ चच आंम वाइलीम वाइल दुम्चा कली ग्याप्चा वोडक्ने चाप्नीनी। गे मेको आन कली वाइलीम वाइल खोदेशो पा दिप्शा गेय पपाडक्ने चाप्नीनी। तन्न आंम लोकब इस्राएली आन कली मोपा श्येत गेशा दिप्ने मचाप्नीनी।

47 मिनू इन दातेमी बाक्ब अर्को रागी डा मुर क्येट थीब दुम्त हना नु सुड इन लोकब श्येत जशा, पुडग दुम्शा, मेको आंम कली कि आ खिं डा मुर कली लेयसाक्ब हना,

48 मेको लेयसे नोले आ लोकबपुकीमी मेको कली लेन्ने चाप्नीम। मेको आ लोकब कामी मेको कली लेन्ने चाप्ब।

49 मेको आ आफ आ लोकब, आं लोकब नु सुड आ नेक्था डा मुरुमी मेको कली लेन्ने चाप्ब। मेको नोले शुश क्येट थीब दुम्त हना, आंमा थाप्शा गूने चाप्ब।

50 मेको मुरुमी आ अर्को रागी डा टेयब मुर कली लेयसीशो बर्स रे प्रोइतीक बर्स सम्म हिक्शा, आ गेय पतीक लीशो बर्स कली जेला तशो खोदेशो पा हिक्चा माल्ब। मिनू लीशो बर्सम ततीके जेला डा क्येट हिक्शा थाप्चा माल्ब।

51 मिनू शुश बर्स लीमेनु, आंमा लेयसीशो मुरुमी मेको गेय मपशो नेल्ल बर्स हिक्शा, मेको कली गारचा डा पा थाप्चा माल्ब।

52 मिनू मेको प्रोइतीक बर्स सम्म का निक्शी बर्स ला लीतेक्म हना, मेकोमी जेला तशो खोदेशो पा का निक्शी बर्स डा गारचा डा पा प्रोइतीक बर्स सम्म क्येट थाप्चा माल्ब।

53 मिनू मेको अर्को रागी डा टेयब मुरुमी आंमा लेयसीशो इस्राएली कली बर्स का कली जेला ताक्शा गेय पाइब खोदेशो पा रिप्शो पचा माल्ब। मेको कली वाइलीम वाइल कली खोदेशो पचा मदुम्ब। लेवी २५:४३

54 मोपा यो मेको मुर प्रोइचा मपुंडसाक्ब हना, रिप्शा। मेको नु आ खिं डा मुर प्रोइतीक बर्सम ला लचा ताइनीम।

55 मारदे हना इस्राएलीपुकी आं गेय पाइब बाक्नीम। गो मेको आन कली इजीप्त रागी रे गुंडशा चाक्ताक्मी। गो परमप्रभु यावे, इन परमप्रभु नड: 'दे शेंदो' दे परमप्रभु यावेमी देंत।

## 26

लोत्र टीब आन कली आसीक

प्रस्थान २३:२०-३३; ब्यवस्था २८:-

1 मिनू लेंशा परमप्रभु यावेमी मोसा कली "गेपुकीमी इन कली मूर्तिपुकी मसेलीन। मिनू आंम कली मुशा मूर्ति नु पूजा पचा कली थाम मवोतीन। मिनू इन रागीमी मुशो फुल्लु मवोतीन। मेको कली पूजा पा आन डोंइती मवपीन। मारदे हना गो परमप्रभु यावे, इन परमप्रभु नड। प्रस्थान २०:४-५

2 गेपुकीमी आं नाइक्तीक नाक्ती मानेन। मिनू आं बाक्तीक कली मान पने। गो परमप्रभु यावे नड। लेवी १९:३०

3 गेपुकीमी आं फुल्लुम मुशा ब्रेक्शो लोत्र टिशा पाइतीनी हना,

4 गो रेड यिची ना रेड यिपाडक्नुड। मिनू इन रूम शुश अन्न ग्रेलीम। मिनू रवाम शुश फल फुल सिल्तीम।

5 मिनू अडगुर सेक्ची ना सम्म इन अन्न तुप्नीनी। मिनू अडगुर सेक्ने मथुम्थु शोक्वी ना दुम्ब। मोपा गेपुकी नु शुश जचा तूचा बाक्ब। मिनू इन रागीम थुं नाइश्शा बाक्चा ताइनीनी। आमोस ९:१३

6 मिनू गो रागी डा मुर आन कली थुं नाइश्शा बाक्चा गेनुड। मिनू गेपुकी गोल्शा निन्द्रा पाइनीनी। सुइमी इन कली हिंच मकोडब। गो इन रागी रे हिंचा डा जन्तु आन कली खेरनुडमी। इन रागीमी लडाइ मदुम्ब। इजीकीएल ३४:२५

7 मिनू गेपुकीमी इन जोरी सत्रु आन कली खेदा पा तरवारम साडक्नीनी।

8 इन मुर ५ जनामी सहै का मुर आन कली नु सहै का मुरुमी १० हजार मुर आन कली खेदा पाइनीम। इन जोरी सत्रु इन तरवारम शोल्मो पा बेक्नीम। ब्यवस्था ३२:३०; यहोसु २३:१०

9 मिनू गो इन कली शिशी पा कोवनन्नी। मिनू गो इन कली सोशा बोशा शुश दुम्पाइक्नुड। मिनू आं पशो कबल गेपुकी नु गेना हना यो लीपाइक्नुड। इजीकीएल ३६:११

10 गेपुकीम इन खेक्शा वोइशो माइत अन्न जना जन, नक अन्न वोइक्का कली माइत अन्न तिल्या मालनीनी।

11 गो इन कली ग्रान्रा मदित्थु, इन दातेमीन आ बाक्तीकेम बाक्नुड। येरमीया ७:२३; २कोरिन्थी ६:१६

12 मिनू गो इन दातेमी बाक्शा, गो परमप्रभु दुम्नुड। मिनू गेपुकी आं मुर बाक्नीनी। गो परमप्रभु यावे, इन परमप्रभु बाक्नुड।

13 गो परमप्रभु यावे, इन परमप्रभु नड। गेपुकी इन कली इजीप्ती आन वाइलीम वाइल मदुम्पाइक्थु, एक चाक्तनीनी। गो इन शुर डा जवा जिक्शा, इन पिया पोक्शा गाक्ब सेलतनीनी। इजीकीएल ३४:२७-२८

लोव्र मटीब आन कली सजाइ

14 तन्न गेपुकीमी आं लोव्र मटीतीनी नु आं अरेशो मपाइतीनी,

15 नु आं फुल्लुम मुशा ब्रेक्शो लोव्र मकोव्रतीनी, आं अरेशो मपाइतीनी नु आं कबल प्रॉइतीनी हना,

16 गो इन कली मार पाइनुड देशा हना, गो इन दातेमी शुश हिंतीके सेलनुड। मिनू इन रां सोव्रना सोव्रन बाक्नीम। मिनू जरो पा इन मिक्च ततीके जाम्ना जाम्ना लाइब। मिनू गे ओंखां पा बेक्नीनी। इन शोक्शो अन्न मोशा दुम्नीम। मारदे हना इन जोरी सत्रुम नेक्नीम।

17 गो इन कली मरिम्शो पाइक्नुड। गे इन जोरी सत्रु रे ब्रुइनीनी। इन जोरी सत्रु इन कली हुकुम पाइब दुम्नीम। मिनू सुइमी इन कली खेदा मपास्तेक्म हना यो, गेपुकी प्रोक्नीनी।

18 मेको नेल्ल तुइशशा यो, आं कली मटीतीनी हना, गो इन पाप ७ खेयप तेम्शा सजाइ गेनन्नी।

19 गो इन ठेयब लेशो खतम सेलनुड। मिनू गो इन सरीड फलाम खोदेशो नु इन रू तांबा खोदेशो सेलनुड। ब्यवस्था ११:११:१७

20 मिनू इन सक्ति मोशा दुम्शा मरिड पने मचाप्नीनी। इन रूम मरिड मवाब। मिनू इन रागी डा रवापुकीम फल मसिल्लीम।

21 गेपुकी दूली लांम गाक्स डा गाक्स पा, आं कली मटीतीनी हना, गो इन पाप ७ खेयप तेम्शा इन कली श्येत गेनन्नी

22 गो इन दातेमी ब्वाकी डा जन्तुपुकी सोइक्नुडमी। मेकोमी इन आल आन कली ब्वाइनीम। मिनू इन बस्तु भाव साइक्नीम। मिनू गे का निक्शी ला दुम्तीके इन लां नेल्ल श्येत्थ दुम्नीम। इजीकीएल ५:१७

23 मोपा सजाइ तशा यो, गेपुकी आं गे मलेत्तीनी हना, नु दूली लां गाक्स डा गाक्स पाइतीनी हना, २सामुएल २२:२७

24 गो इन कली यो मरिम्शो पस डा पस पाइनुड। मिनू गो इन पाप ७ खेयप तेम्शा, इन कली श्येत गेनुड।

25 गो इन कली लडाइ तोपाइक्नुड। मिनू आं कबल प्रॉइशो आ पर्वम क्येक्क लेत्नुड। गेपुकी आंम आंमा सहरम बुक्तीनी हना, गो मेकेर यो इन दातेम बेक्पाइक्ब रोड सोइक्नुड। मिनू इन जोरी सत्रु आन गुडम दुम्नीनी। यसेया १:२०,२४

26 मिनू गो इन अन्न थमा पा साम्पाइक्नुड। १० ओटा खिं डा मीश मुरुमी चुल्तु कामी क्येनीम। क्येशा पुक्शा तेम्मेनु, सुइ मरूनीम। यसेया ३:१; इजीकीएल ४:१६

27 मिनू मेको मो दुम्शा यो, गे आं कली मटित्थु, दूली लां गाक्स डा गाक्स पाइतीनी हना,

28 गो इन कली मरिम्शो पस डा पस गुम्नुड। मिनू इन पाप ७ खेयप तेम्शा, सजाइ गेनन्नी। ब्यवस्था २८:५३; येरमीया १९:९

29 गेपुकीमी इन तमी तौ आन श्ये ब्वचा मालनीनी।

30 गो इन डांडा डा पूजा पतीक थामपुकी प्रेत्नुड। इन धूप चोतीक नेल्ल प्रेत्नुड। मिनू इन बेक्शो रां मेको ब्रोल्लो मूर्ति आन तार ताइक्नुड। मिनू गो इन कली तशा ग्रान्रा दिशा तिल्लुड। इजीकीएल ६:४,६

31 गो इन सहर गोरशो रागी खोदेशो सेलनुड। मिनू इन पूजा पतीके थान श्येत्थ सेलनुड। गो इन ब्रोल्लो धूप आन रिना मनाम्नुड।

32 मिनू गो रागी कली खतम पोक्नुड। मिनू मेकेर जाक्शा बाक्ब इन जोरी सत्रुमी मेको तशा छक लाक्नीम।

33 गो इन कली रागी रागी डा मुर आन दातेमी ब्रपाइक्नुड। मिनू लडाइ तोपाइशशा, इन कली खेदा पपाइक्नुड। मिनू इन रागी श्येत्थ नु इन सहरपुकी गोरशो सेलनुड।

34 मिनू रागी श्येत्थ दुम्मेनु, मेको आ नाइक्तीक बर्स ग्येरशा मानेब। मिनू गेपुकी इन जोरी सत्रु आन रागीम बाक्नीनु, इन रागी चहिं ग्येरशा नाइसीब। लेवी २५:२; २इतिहास २६:२१

35 मेको रागी गिश नाक्त्त सम्म श्येत्थ लीबा, मिश नाक्त्त नाइक्का ताइब। गेपुकी मेक बाक्नीनु, नाइक्तीक बर्स नाइक्का मतशो, नाइक्तीक बर्स मानेशो बाक्ब।

36 मिनू गो इन जोरी सत्रु आन रागीम बाक्शो लीशो मुर आन थुं लुकच लपाइक्नुड। मिनू सफा दोक्शो रेयके नेशा यो, आन जोरी सत्रुम खेदा पशो खोदेशो पा प्रोक्नीम। मिनू मोशा दाइल पा थिल्लीम।

37 सुइमी खेदा मपथु यो, मेकोपुकी तरवार तशा प्रोक्शो खोदेशो पा, प्रोक्नीम। मिनू थोक्मुशा गोलनीम। मोपतीके आन जोरी सत्रु आन डोंइती राप्ने मचाप्नीम।

38 गेपुकी अर्कां रागी डा मुर आन दातेमी जाम्शा लाइनीनी। मिनू इन जोरी सत्रु आन रागीमी इन कली दाक्ब।

39 मिनू लीशोपुकी चहिं जोरी सत्रु आन रागीमी आन पाप नु आन किकी पिपी आन पाप पतीके बेक्ना बेक्न लाइनीम। इजीकीएल २४:२३; इजीकीएल ३३:१०

40 तन्न मेकोपुकीमी आंम पाप नु आन किकी पिपी आन पाप आ पर्वम 'मरिम्शो पाइतक नु दूली लां गाक्स डा गाक्स पाइतक' देतेक्म हना, ब्यवस्था ४:३०

41 मिनु गो मेको आन कली मरिम्शो पस डा पस बाक्शा, आन जोरी सत्रु आन रागीम सोडक्ताक्डमी। मिनु मेको आन खकटा थुं ब्रेम्शो दुम्शा, आन पाप आ पर्वम पाप क्याम्तीक गेय पाम्तेक्म हना, ब्यवस्था १०:१६; येरमीया ९:२५

42 गो याकूब, इसहाक नु अब्राहाम नु पशो आं कबल नु मेको रागी कली मिम्नुड। प्रस्थान २:२४; २राजा १३:२३

43 मारदे हना मेको रागी श्येल्थ दुम्शा, आ नाइक्तीक बर्सपुकी मुर मबाक्तीके मानेना मानेन बाक्ब। मिनु मेकोपुकीमी आन मरिम्शो पशो आ पर्वम सजाड ताडनीम। मारदे हना मेकोपुकीमी आं पावो, दे अरेतीक लोत्र नु आं फुल्लुम मुशा ब्रेक्शो लोत्र काड मपाप।

44 मिनु मोदेशो पाम्तेक्म हना यो, गो मेको आन कली आन जोरी सत्रु आन रागीमी कोत्रशा, ग्रांया दिशा खतम मसेल्लुडमी। मिनु मेकोपुकी नु पशो आं कबल मप्रॉडनुड। मारदे हना गो परमप्रभु यावे, मेको आन परमप्रभु नड। होसे ११:९

45 तन्न गो मेको आन कली मिम्शा, आन किकी पिपी नु पशो आं कबल मिम्नुड। गो नेल्ल रागी डा मुरपुकीम तचा डा पा मेको आन परमप्रभु दुम्तीके, मेको आन कली इजीप्त रागी रे गुंडशा चाक्ताक्मी। गो परमप्रभु यावे नड” दे परमप्रभु यावेमी देंत। उत्पत्ती १२:७

46 एको परमप्रभु यावेमी सीनै डांडाम मोसा कली गेशो आं नु इस्राएली आन दातेमी फुल्लुम मुशा ब्रेक्शो लोत्र नु “पावो” दे अरेशो लोत्र बाक्नीम।

## 27

मुर आ पर्वम कसम जशो

1 मिनु परमप्रभु यावेमी मोसा कली

2 “गे इस्राएली आन कली ‘सुडमी परमप्रभु यावे कली मुर आ पा डा क्येट गेनुड’ दे कसम जाप्तु हना,

3 मेकोमी २० बर्स रे ६० बर्स सम्म डा वोंडश मुर आन पर्वम आं ताम्बु डा चांदी के ५० शेकेल परमप्रभु यावे कली गेचा माल्नीम। शेकेल इस्राएली आन क्येट बाक्ब। शेकेल का ११.५ ग्राम चांदी बाक्ब। ताम्बु डा शेकेल चहिं १२ ग्राम बाक्त न्यायाधीस ११:३१; १सामुएल १:११

4 मीश मुर आ पर्वम बाक्त हना, मेकोम ३० शेकेल गेचा माल्ब। ३० शेकेल ३६० ग्राम चांदी बाक्ब।

5 मिनु ५ बर्स रे २० बर्स सम्म डा वोंडश आल आन पर्वम २० शेकेल गेचा माल्ब। मीश आल बाक्त हना, १० शेकेल गेचा माल्ब।

6 मिनु महिना का रे ५ बर्स सम्म डा वोंडश आल आन पर्वम चांदी के ५ शेकेल नु मीश आल आन पर्वम चांदी के शेकेल सां गेचा माल्नीम।

7 मिनु ६० बर्स क्येडा ग्येत्थ डा वोंडश मुर आ पर्वम १५ शेकेल नु मीश मुर आ पर्वम १० शेकेल गेचा माल्ब। ताम्बु डा शेकेल का १२ ग्राम बाक्ब।

8 मिनु मेको मुर पुडग दुम्शा, गेने मचाप्ब बाक्त हना, मेको कली चढ़ेब आ डोंडती चाक्चा माल्नीम। मिनु चढ़ेबमी मेको कसम जाडब आ चाप्शो खोदेशो पा मेको आ क्येट देंचा माल्ब।

9 मिनु परमप्रभु यावे कली चढ़ेचा डा बी ब्यफ, क्यारश भेडा बाक्तेक्म हना, मेको मारेड मदुम्शो थम रिम्शो नु ग्रांया मदिशो बाक्चा माल्नीम।

10 मेको आ पा डा अरु फाइक्चा मदुम्ब। रिम्शो बस्तु आ पा डा मरिम्शो नु मरिम्शो आ पा डा रिम्शो फाइक्चा मदुम्ब। चढ़ेचा डा बस्तु फाइक्तेक्म हना, मेको बस्तु निम्फा मारेड मदुम्शो थम रिम्शो ग्रांया मदिशो बाक्चा माल्नीस।

11 मिनु परमप्रभु यावे आ डोंडती चढ़ेचा मदुम्शो ग्रांया दिशो बस्तु भाव बाक्तेक्म हना, मेको आन कली चढ़ेब कली कोंडचा माल्नीम।

12 मिनु चढ़ेबम मेको बस्तु रिम्शो बाक्त हना यो, मरिम्शो बाक्त हना यो, मेको गिश क्येट लाडक्बा, दे चढ़ेबमी देंचा माल्ब। मिनु चढ़ेबमी दोशो देंबा मेको ठीक दुम्ब।

13 मेको मुरुम क्येट थाप्शा, मेको बस्तु कली प्रॉडचा दाक्ब हना, चढ़ेब आ देंशो क्येडा यो ५ भाग डा भाग का क्येट तेम्शा गेचा माल्ब। लेवी ५:१६

14 मिनु सुड मुरुमी परमप्रभु यावे कली खिं का चढ़ेपु हना, चढ़ेबमी मेको खिं कोत्रशा रिम्शो बाक्म कों मरिम्शो बाक्मे ‘ओशो क्येट लाडक्ब’ देंचा माल्ब। मिनु चढ़ेबमी दोशो देंबा मेको ठीक दुम्ब।

15 मिनु मेको मुरुमी क्येट थाप्शा लेत्चा थुं पाप्तु हना, चढ़ेबमी देंशो क्येडा यो ५ भाग डा भाग का क्येट तेम्शा गेचा माल्ब। मिनु मेको खिं मेको केन दुम्ब।

16 मिनु सुड मुरुमी तेकोड आम रू परमप्रभु यावे कली चढ़ेपु हना, चढ़ेबमी मेको रूम दोशो वांचेर लाडबा कोत्रशा, मेको आ क्येट देंचा माल्ब। होमेर का क्योत्रज वांचेर लाडब रू कली ५० चांदी के शेकेल दुम्चा माल्ब। होमेर का २२० लिटर रिक्ब पुक्तीक का बाक्ब। ताम्बु डा शेकेल का १२ ग्राम चांदी बाक्ब।१सामुएल २४:२४

17 मेको मुरुमी आ रू कली लेंशा प्रॉडतीक बर्स आ नोले डा बर्स रे चढ़ेपु हना, मेको आ क्येट चढ़ेबमी देंशो खोदेशो दुम्ब। लेवी २५:८-५५

18 तन्न मेकोमी आ रू लेंशा प्रॉडतीक बर्स इक्का बर्स नोले चढ़ेपु हना, लेंशा प्रॉडतीक बर्स जाक्चा दोशो लीशो बाक्मे, चढ़ेबमी मेको हिक्चा माल्ब। मिनु आ देंशो क्येट रे तोक्चा माल्ब।

19 मेको मुरुमी मेको रू लेंशा फेत्चा दाक्ब हना, चढ़ेबमी देंशो क्येट क्येडा ५ भाग डा भाग का क्येट तेम्शा गेचा माल्ब। मिनु मेको रू मेको केन दुम्ब।

20 तन्न मेकोमी मेको रू मलेप्व हना, मेकोमी मेको रू अर्को मुर कली लेयशो बाक्त हना, मेकोमी मेको रू गेनायो लेत्चा मताइब।

21 मेको रू लेंशा प्रॉइतीक बर्सम प्रॉइशो बाक्त हना, मेको परमप्रभु यावे कली जिम्मा गेशो रू दुम्शा, चढेबमी मेको रूम शोक्ब।

22 मिनु सुइ मुरुमी आंम के ममाइ, तन्न आ ग्याप्शो रू परमप्रभु यावे कली चढेप्टु हना,

23 चढेबमी लेंशा प्रॉइतीक बर्स सम्म हिक्शा, मेको आ क्येट दोशो बाक्मे, मोशो गेचा माल्ब। मेको नाक्तीन परमप्रभु यावे कली गेचा माल्ब।

24 मिनु लेंशा प्रॉइतीक बर्सम मेको रू सु रे ग्याप्शो बाक्मे, मेको लेंशा ताइब।

25 मिनु गिश क्येट लाइबा, मेको नेल्ल परमप्रभु यावे आ ताम्बु डा चांदी के शेकेलम थाप्चा माल्ब। शेकेल काम २० गेरा बाक्नीम। गेरा का ०.६ ग्राम बाक्ब।

26 मिनु बी ब्यफ, क्यारश भेडा आन डोंइती जरमेशो ब्यफ बाक्त हना यो, सांड बाक्त हना यो, बोका बाक्त हना यो, मेको डोंइती रे परमप्रभु यावे केन बाक्ब। सुइमी परमप्रभु यावे कली गेने मचाप्नीमी। प्रस्थान १३:२, १२, १३; गन्ती १८:१५

27 मेको ग्रंया दिशो बस्तु भाव बाक्त हना, आ देशो क्येट क्येडा ५ भाग डा भाग का तेम्शा, लेत्चा माल्ब। तन्न मलेत्ताकम हना, आ देशो क्येटीम लेयचा माल्ब।

28 मिनु परमप्रभु यावे कली साइक्चा कली जिम्मा गेशो मारेइ मारेइ मुर बाक्त हना यो, बस्तु भाव बाक्त हना यो, आंम रू बाक्त हना यो, मेको लेयने नु लेन्ने मचाप्नीम। मेको साइक्चा कली जिम्मा गेशो मारेइ मारेइ थमा पा परमप्रभु यावे केन बाक्नीम। गन्ती १८:१४; गन्ती २१:२; यहोसु ६:१८, २६; इजीकीएल ४४:२९

29 मिनु सु मुर साइक्चा कली जिम्मा गेचा पुंडसीशो बाक्बा, मेको कली क्येट थाप्शा मलेत्थु, साइक्चा माल्ब। यहोसु ६:१७-१८; १सामुएल १५:३-९

30 मिनु रू नेल्ल डा, अन्न कि रवा आ फल फुल १० भाग परमप्रभु यावे केन बाक्ब। मेको परमप्रभु यावे केन बाक्ब। गन्ती १८:२१; ब्यवस्था १४:२२-२९; नेहेम्याह १३:१२

31 मुरुमी आंमा आ गेशो १० भाग लेत्चा दाक्ताक्व हना, ५ भाग तेम्शा, लेन्ने चाप्ब।

32 नेल्ल गोठ डा बी ब्यफ, क्यारश भेडा, मारेइ मारेइ गोठलाम हिक्तु हना यो, १० ओटा डा का परमप्रभु यावे केन बाक्ब। २इतिहास ३१:६

33 मेकोमी रिम्शो नु मरिम्शो तिल्शा फाइक्चा मदुम्ब। मुरुमी मेको बस्तु फाइक्चा थुं पाप्टु हना, निम्फा परमप्रभु यावे कली गेचा माल्ब। मिनु क्येट थाप्शा, लेत्चा मदुम्ब, दे अरेवो” दे परमप्रभु यावेमी मोसा कली देंत।

34 मिनु सीनै डांडामी परमप्रभु यावेमी इस्राएली आन कली मोसा रे पा शेंशो लोव्र एको बाक्नीम। लेवी ७:३८; लेवी २५:१; २६:४६



## गन्ती

**ब्रेकब मुर:** एको किताब ब्रेकब यो मेको गोरशो रागी हिरब आन दातेमी बाकशो बाक्त। मारदे हना दोपा मेकोमी मुर आन कली हिकतीके नु अरु मार मार आइकच गेय पशो नेल्ल ब्रेकने चाप्बा डा? मोपतीके मोसामी एको किताब ब्रेकशो बाकब, दे मिन्मीम। गन्ती ३३:२

**गेना ब्रेकशो:** प्रस्थान ब्रेकशो नोले, एको किताब सीनै डांडाम मार मार दुम्यो बाकमे, मेको आ परबम ब्रेकशो बाक्त। एको किताब मोसा आ ब्रोंडची ना ब्रेकशो बाकब।

### मारदे ब्रेकशो:

१. सीनै डांडा रे गाकचा साशो गन्ती १:-१०:१०
२. सीनै डांडा रे कादेश सम्म जाकशो गन्ती १०:११
३. मोआब रागी यर्दन खोला आ पूर्व सम्म जाकशो गन्ती २२:- ३६:-

सीनै डांडाम मुर हिकशो

गन्ती २६:२-५१

1 इस्राएलीपुकी इजीप्ट रे जाकमा आ बर्स निकशी, महिना निकशी डा डोंडती डा नाक्त परमप्रभु यावेमी सीनै डा रागीमी बाकशो युम्तीक ताम्बुमी मोसा कली लोत्र पाप्तु। प्रस्थान ४०:१७

2 मिनु मेकोमी “गे इस्राएली वोंडश मुर आन थर थर नु आन खिं खिं पा नेल्ल आन नें ब्रेकचा मालनेवे। उत्पती ३५:२३-३६; प्रस्थान ३०:१२

3 इस्राएलीमी २० बर्स गाप्शो नु मेको क्येडा लाकशो लडाइम लने चाप्ब मुर नेल्ल आन कली गे नु हारूनमी लडाइ पचा कली खुप्शा वोडकचा मालनीसी।

4 मेको नेल्ल आन थर रे मुर का कामी इस कली वारच पचा मालनीम। मेको मुर आन खिं डा ठेयब मुर बाकचा मालनीम।

5 मिनु सु सुम इन कली वारच पचा मालनीम देशा हना, रूबेन आ थर रे शेदेउर आ तौ एली-सुर,

6 सिमियोन आ थर रे सुरी-शदै आ तौ शेलुमीएल,

7 यहूदा आ थर रे अम्मीनादाब आ तौ नहशोन, प्रस्थान ६:२३

8 इस्साकार आ थर रे सुआर आ तौ नेथनेल,

9 जबूलून आ थर रे हेलोन आ तौ एलीआब,

10 योसेफ आ तौ एफाइम आ थर रे अम्मीहुद आ तौ एली-शामा, योसेफ आ तौ मनस्से आ थर रे पेदा-सुर आ तौ

गमलीएल, १इतिहास ७:२६; उत्पती ४८:५

11 बेन्यामीन आ थर रे गिदेओनी आ तौ आबी-दान,

12 दान आ थर रे अम्मी-शदै आ तौ अही-एजेर,

13 आशेर थर रे ओक्रान आ तौ पगीएल,

14 गाद आ थर रे दूएल आ तौ एली-आसाफ,

15 नाप्ताली आ थर रे एनान आ तौ अहीरा बाक्नीम” दे परमप्रभु यावेमी मोसा कली देंत।

16 एकोपुकी इस्राएली आन दाते रे योत्रशो आन थर डा ठेयब मुर बाक्नीम।

17 मोसा नु हारूनमी योत्रशो मुर आन कली ब्रेक्ताक्स।

18 मिनु मेको निकशीमी महिना निकशी डा डोंडती डा नाक्ती इस्राएली नेल्ल आन कली पुक्ताक्स। मिनु मुर नेल्लेमी आन थर नु आन खिं देशा, ब्रेक्पाइक्तेकम। मिनु २० बर्स गाप्शो नु मेको क्येडा लाकशो आन नें नेल्ल ब्रेक्पाइक्तेकम।

19 मिनु परमप्रभु यावेमी अरेशो खोदेशो पा, मोसामी सीनै डा गोरशो रागीमी मेको आन कली खुप्शा वोडकतीमी।

20 इस्राएल आ डोंडती जरमेशो तौ रूबेन आ थर डा आन खिं खिं डा २० बर्स गाप्शो नु मेको क्येडा लाकशो लडाइम लने चाप्ब वोंडश मुर नेल्ल आन नें ब्रेक्ताकम।

21 मिनु मेको लडाइ पचा कली खुप्शो रूबेन आ थर डा मुर ४६ हजार ५ सहे बाक्तेकम।

22 सिमियोन आ थर डा आन खिं खिं डा २० बर्स गाप्शो नु मेको क्येडा लाकशो लडाइम लने चाप्ब वोंडश मुर नेल्ल आन नें ब्रेक्ताकम।

23 मिनु मेको लडाइ पचा कली खुप्शो सिमियोन आ थर डा मुर ५९ हजार सहे सां बाक्तेकम।

24 गाद आ थर डा आन खिं खिं डा २० बर्स गाप्शो नु मेको क्येडा लाकशो लडाइम लने चाप्ब वोंडश मुर नेल्ल आन नें ब्रेक्ताकम।

25 मिनु मेको लडाइ पचा कली खुप्शो गाद आ थर डा मुर ४५ हजार ६ सहे ५० बाक्तेकम।

26 यहूदा आ थर डा आन खिं खिं डा २० बर्स गाप्शो नु मेको क्येडा लाकशो लडाइम लने चाप्ब वोंडश मुर नेल्ल आन नें ब्रेक्ताकम।

27 मिनु मेको लडाइ पचा कली खुप्शो यहूदा आ थर डा मुर ७४ हजार ६ सहे बाक्तेकम।

28 इस्साकार आ थर डा आन खिं खिं डा २० बर्स गाप्शो नु मेको क्येडा लाकशो लडाइम लने चाप्ब वोंडश मुर नेल्ल आन नें ब्रेक्ताकम।

29 मिनु मेको लडाइ पचा कली खुप्शो इस्साकार आ थर डा मुर ५४ हजार ४ सहे बाक्तेकम।

30 जबूलून आ थर डा आन खिं खिं डा २० बर्स गाप्शो नु मेको क्येडा लाक्शो लडाइम लने चाप्व वोंइश मुर नेल्ल आन नें ब्रेक्ताक्म।

31 मिनु मेको लडाइ पचा कली खुप्शो जबूलून आ थर डा मुर ५७ हजार ४ सहे बाक्तेक्म।

32 योसेफ आ तौ एफ्राइम आ थर डा आन खिं खिं डा २० बर्स गाप्शो नु मेको क्येडा लाक्शो लडाइम लने चाप्व वोंइश मुर नेल्ल आन नें ब्रेक्ताक्म।

33 मिनु मेको लडाइ पचा कली खुप्शो योसेफ आ तौ एफ्राइम आ थर डा मुर ४० हजार ५ सहे बाक्तेक्म।

34 योसेफ आ तौ मनस्से आ थर डा आन खिं खिं डा २० बर्स गाप्शो नु मेको क्येडा लाक्शो लडाइम लने चाप्व वोंइश मुर नेल्ल आन नें ब्रेक्ताक्म।

35 मिनु मेको लडाइ पचा कली खुप्शो योसेफ आ तौ मनस्से आ थर डा मुर ३२ हजार सहे निक्शी बाक्तेक्म।

36 बेन्यामीन आ थर डा आन खिं खिं डा २० बर्स गाप्शो नु मेको क्येडा लाक्शो लडाइम लने चाप्व वोंइश मुर नेल्ल आन नें ब्रेक्ताक्म।

37 मिनु मेको लडाइ पचा कली खुप्शो बेन्यामीन आ थर डा मुर ३५ हजार ४ सहे बाक्तेक्म।

38 दान आ थर डा आन खिं खिं डा २० बर्स गाप्शो नु मेको क्येडा लाक्शो लडाइम लने चाप्व वोंइश मुर नेल्ल आन नें ब्रेक्ताक्म।

39 मिनु मेको लडाइ पचा कली खुप्शो दान आ थर डा मुर ६२ हजार ७ सहे बाक्तेक्म।

40 आशेर आ थर डा आन खिं खिं डा २० बर्स गाप्शो नु मेको क्येडा लाक्शो लडाइम लने चाप्व वोंइश मुर नेल्ल आन नें ब्रेक्ताक्म।

41 मिनु मेको लडाइ पचा कली खुप्शो आशेर आ थर डा मुर ४१ हजार ५ सहे बाक्तेक्म।

42 नाप्ताली आ थर डा आन खिं खिं डा २० बर्स गाप्शो नु मेको क्येडा लाक्शो लडाइम लने चाप्व वोंइश मुर नेल्ल आन नें ब्रेक्ताक्म।

43 मिनु मेको लडाइ पचा कली खुप्शो नाप्ताली आ थर डा मुर ५३ हजार ४ सहे बाक्तेक्म।

44 मिनु मेको मुर नेल्ले लडाइ पचा कली खुप्ताक्म। मोसा, हारून नु मेको आस कली वारच पाइब इस्राएल आ १२ थर डा डेयब मुरपुकीमी मेको आन कली लडाइ पचा कली खुप्ताक्म। उत्पती १७:२०; उत्पती २५:१६

45 मिनु गिश मुर २० बर्स गाप्शो नु मेको क्येडा लाक्शो लडाइम लने चाप्व वोंइश मुर बाक्शो बाक्तेक्म देंशा हना, गन्ती २:३२; प्रस्थान १२:३७

46 मेको नेल्ल पा ६ लाख ३ हजार ५ सहे ५० जना बाक्तेक्म।

47 लेवी आ खिं डा मुरपुकी चहिं अरु आन खोदेशो पा महिक्सम।

लेवी आ थर डा मुर मखुप्शो

48 मिनु डोंइती परमप्रभु यावेमी मोसा कली

49 ५लेवी आ थर डा मुर आन कली चहिं लडाइ पचा कली मखुप्तीमी। मिनु इस्राएली आन कली खोदेशो पा महिक्मी। गन्ती २:२३; गन्ती ३:१५-३९

50 तन्न गे लेवी आन कली आं कबल पशो सन्दोस वोइश्शो ताम्बु नु आ मारेड मारेड थोव्रक कोव्रचा कली वोइक्मी। मेकोपुकीमी गुम्तीक ताम्बु नु आ मारेड मारेड थोव्रक कुरचा माल्नीम। मेकोपुकीमी मेको कोव्रचा माल्नीम। मिनु आन ताम्बु गुम्तीक ताम्बु आ एर ओथ कीचा माल्नीम।

51 मिनु गुम्तीक ताम्बु याक्तमेनु, लेवीपुकीम मेको प्राक्चा माल्नीम। मिनु गुम्तीक ताम्बु कीडमेनु, मेकोपुकीमी सेल्चा माल्नीम। आन नेक्था जाक्ब अरु मुर साइक्चा पुंडसीनीम। गन्ती ३:१०, ३८; गन्ती १७:५

52 अरु इस्राएली आन आन हुल आन दातेमी नु आन छेदर आ खुक्तीके डा बाक्तीकेम बाक्चा माल्नीम।

53 लेवी आ मुर चहिं परमप्रभु यावे आ कबल पशो सन्दोस वोइश्शो ताम्बु आ एर ओथ आन ताम्बु कीचा माल्नीम। इस्राएलीपुकी गुम्तीके ताम्बु आ नेक्था लचा मदुम्नीम। मिनु मेको आन पर्बम परमप्रभु यावे मगाइक्ब। मिनु लेवीपुकीमी परमप्रभु यावे आ कबल पशो सन्दोस वोइश्शो ताम्बु खाल पचा माल्नीम” दे परमप्रभु यावेमी देंत। गन्ती १७:११; गन्ती १८:५; २सामुएल २४:१; २इतिहास १९:२; यसैया ५७:१७; यसैया ६४:४-६

54 मिनु इस्राएलीपुकीमी परमप्रभु यावेमी मोसा कली अरेशो खोदेशो पा नेल्ल पाम्तेक्म।

## 2

मुर आन बाक्तीक ताम्बु

1 मिनु परमप्रभु यावेमी मोसा नु हारून आस कली

2 “इस्राएलीपुकीम आन थर डा छेदर बाक्तीकेम आन ताम्बु कीचा माल्नीम। मेकोपुकी गुम्तीक ताम्बु क्येडा डोन एर ओथ बाक्चा माल्नीम।

3 पूर्व, नां दाप्तीक गे यहूदा आ हुल आन बाक्तीके बाक्ब। मेको आन छेदर आ नेक्था आन ताम्बु कीचा माल्नीम। यहूदा आ थर डा मुर आन डेयब मुर अम्मीनादाब आ तौ नहशोन बाक्त।

4 मेको आन कली खुप्शा हिकशोनु ७४ हजार ६ सहे लडाइ पाइब वोंइश मुर बाक्नीम।

5 मेको आन नेक्था इस्साकार आ हुल आन बाक्तीके बाक्ब। इस्साकार आ थर डा मुर आन डेयब मुर सुआर आ तौ नेथनेल बाक्ब।

- 6 मेको आन कली खुप्शा हिकशोनु ५४ हजार लडाइ पाइब वोंइश मुर बाक्नीम।
- 7 मिनु नोले जबूलून आ थर डा मुर आन बाक्तीके बाक्ब। जबूलून आ थर डा मुर आन ठेयब मुर हेलोन आ तौ एलीआब बाक्ब।
- 8 मेको आन कली खुप्शा हिकशोनु ५७ हजार ४ सहे लडाइ पाइब वोंइश मुर बाक्नीम।
- 9 यहूदा आ नेक्था खुप्शा हिकशो मुर आन हुल नेल्ल पा लाख का ८६ हजार ४ सहे लडाइ पाइब वोंइश मुर बाक्नीम। मेको नेल्ल मुर आन डोंइती गाक्चा माल्नीम।
- 10 मिनु दक्खिन गे रूबेन आ हुल आन बाक्तीके बाक्ब। मेको आन छेदर आ नेक्था आन ताम्बु कीचा माल्नीम। रूबेन आ थर डा मुर आन ठेयब मुर शेदेउर आ तौ एली-सुर बाक्ब।
- 11 मेको आन कली खुप्शा हिकशोनु ४६ हजार ५ सहे लडाइ पाइब वोंइश मुर बाक्नीम।
- 12 मेको आन नेक्था सिमियोन आ हुल आन बाक्तीके बाक्ब। सिमियोन आ थर डा मुर आन ठेयब मुर सुरी-शदै आ तौ शेलुमीएल बाक्ब।
- 13 मेको आन कली खुप्शा हिकशोनु ५९ हजार सहे सां लडाइ पाइब वोंइश मुर बाक्नीम।
- 14 मिनु नोले गाद आ थर डा मुर आन बाक्तीके बाक्ब। गाद आ थर डा मुर आन ठेयब मुर रूएल आ तौ एली-आसाफ बाक्ब।
- 15 मेको आन कली खुप्शा हिकशोनु ४५ हजार ६ सहे ५० जना लडाइ पाइब वोंइश मुर बाक्नीम।
- 16 रूबेन आ नेक्था खुप्शा हिकशो मुर आन हुल नेल्ल पा लाख का ५२ हजार ४ सहे ५० जना लडाइ पाइब वोंइश मुर बाक्नीम। मेकोपुकी यहूदा आ हुल आन नोले गाक्चा माल्नीम।
- 17 मिनु गुम्तीक ताम्बु नु लेवी आन बाक्तीक ताम्बु कुरशा गाक्चा माल्नीम। दोदेशो पा आन ताम्बु कीशो बाक्मे, मोदेशो पा आन छेदर आ नेक्था गाक्चा माल्नीम। गन्ती १०:१७,२१
- 18 पच्छिम गे एफ्राइम आ हुल आन बाक्तीके बाक्ब। मेको आन छेदर आ नेक्था आन ताम्बु कीचा माल्नीम। एफ्राइम आ थर डा मुर आन ठेयब मुर अम्मीहुद आ तौ एली-शामा बाक्ब।
- 19 मेको आन कली खुप्शा हिकशोनु ४० हजार ५ सहे लडाइ पाइब वोंइश मुर बाक्नीम।
- 20 मेको आन नेक्था मनस्से आ हुल आन बाक्तीके बाक्ब। मनस्से आ थर डा मुर आन ठेयब मुर पेदा-सुर आ तौ गमालीएल बाक्ब।
- 21 मेको आन कली खुप्शा हिकशोनु ३२ हजार सहे निक्शी लडाइ पाइब वोंइश मुर बाक्नीम।
- 22 मिनु नोले बेन्यामीन आ थर डा मुर आन बाक्तीके बाक्ब। बेन्यामीन आ थर डा मुर आन ठेयब मुर गिदेओनी आ तौ आबी-दान बाक्ब।
- 23 मिनु मेको आन कली खुप्शा हिकशोनु ३५ हजार ४ सहे लडाइ पाइब वोंइश मुर बाक्नीम।
- 24 एफ्राइम आ नेक्था खुप्शा हिकशो मुर आन हुल नेल्ल पा लाख का ८ हजार सहे का लडाइ पाइब वोंइश मुर बाक्नीम। मेकोपुकी लेवी आन नोले गाक्चा माल्नीम।
- 25 उत्तर गे दान आ हुल आन बाक्तीके बाक्ब। मेको आन छेदर आ नेक्था आन ताम्बु कीचा माल्नीम। दान आ थर डा मुर आन ठेयब मुर अम्मी-शदै आ तौ अही-एजेर बाक्ब।
- 26 मेको आन कली खुप्शा हिकशोनु ६३ हजार ७ सहे लडाइ पाइब वोंइश मुर बाक्नीम।
- 27 मेको आन नेक्था आशेर आ हुल आन बाक्तीके बाक्ब। आशेर आ थर डा मुर आन ठेयब मुर ओक्रान आ तौ पगीएल बाक्ब।
- 28 मेको आन कली खुप्शा हिकशोनु ४१ हजार ५ सहे लडाइ पाइब वोंइश मुर बाक्नीम।
- 29 मिनु नोले नाप्ताली आ थर डा मुर आन बाक्तीके बाक्ब। नाप्ताली आ थर डा मुर आन ठेयब मुर एनान आ तौ अहीरा बाक्ब।
- 30 मेको आन कली खुप्शा हिकशोनु ५३ हजार ४ सहे लडाइ पाइब वोंइश मुर बाक्नीम।
- 31 दान आ नेक्था खुप्शा हिकशो मुर आन हुल नेल्ल पा लाख का ५७ हजार ६ सहे लडाइ पाइब वोंइश मुर बाक्नीम। मेकोपुकी मुर नेल्ल आन क्येडा नोले गाक्चा माल्नीम।
- 32 एको इस्राएली आन थर थर डा लडाइ पने चाम्बु खुप्शा हिकशो मुर बाक्नीम। आन हुल हुल डा मुर नेल्ल पा ६ लाख हजार सां ५ सहे ५० जना लडाइ पाइब वोंइश मुर बाक्नीम” दंत गन्ती १:४६
- 33 मिनु परमप्रभु यावेमी मोसा कली अरेशो खोदेशो पा लेवी आ थर डा मुर अरु इस्राएलीपुकी खोदेशो पा मखुप्शो महिकशो बाक्तेक्म। गन्ती १:४८-४९
- 34 इस्राएलीपुकीमी परमप्रभु यावेमी मोसा कली अरेशो खोदेशो पा पाम्तेक्म। आन थर डा बाक्तीकेमी आन छेदर आ नेक्था बाक्शा, आन थर थर पा गाक्तेक्म।

### 3

हारून आ तौपुकी

1 परमप्रभु यावेमी मोसा नु सीनै डांडाम लोत्र पची ना मोसा नु हारून आस खिं डा मुर सु सु बाक्तेक्म देशा हना, प्रस्थान ६:२३

2 हारून आ तौ आन नें, आ डोंइती जरमेशो तौ नादाब नु अबीहु, एलाजर नु इथामार बाक्तेक्म।

3 मेको नेल्ल तेल लुकशो चढेब बाक्तेक्म। हारूनमी मेको आन कली चढेतीक गेय पचा, दे तेल लुकताक्व। प्रस्थान ४०:१५

4 नादाब नु अबीहु सीनै डा गोरशो रागीम बेक्ताक्स। मारेदे हना, मेको निक्शीमी परमप्रभु यावेमी मडुम्ब देंशो अर्को मी धूप चोतीकेम कुर पा, परमप्रभु यावे आ डोंइती चढेम्ताक्स। मिनु परमप्रभु यावे आ डोंइती बेक्ताक्स। मिनु मेको आस के आल मबाक्म। मोपतीके आ तौ एलाजर नु इथामार निक्शीमी ला आस आफ आ डोंइती चढेतीक गेय पाम्ताक्स। लेवी १०:१-२

लेवीपुकी आन गेय

5 परमप्रभु यावेमी मोसा कली

6 “लेवी आ थर डा मुर आन कली ब्रेशशा, मेको आन कली चढेब हारून आ डोंइती राप्पाइक्मी। मिनु मेकोपुकीमी मेको कली वारच पचा माल्नीम। प्रस्थान ३२:२९

7 मिनु मेकोपुकीमी हारून कली वारच पा इस्राएली नेल्ल आन परबंम गुम्तीक ताम्बु आ डोंइती गेय पचा माल्नीम। गन्ती १८:३; गन्ती १६:९

8 मेकोपुकीमी गुम्तीक ताम्बु डा मारेड मारेड कोव्रचा माल्नीम। मिनु मेकोपुकीमी गुम्तीक ताम्बु डा इस्राएली आन पचा माल्शो गेय पचा माल्नीम। गन्ती ४:-

9 गे मेको लेवी आ मुर आन कली हारून नु आ तौ आन कली गेचा माल्नेवे। मेको इस्राएली आन दाते रे योव्रशा हारून कली गेशो बाक्नीम।

10 मिनु गे हारून नु आ तौ आस कली चढेबम पचा माल्शो गेय पपाइक्मी। मेकोपुकी डा लाक्शा अर्को सुड मुरुम मो पाम्तेक्म हना, मेको आन कली साइक्चा माल्नीम” देंत। गन्ती १:१५

11 मिनु लेंशा परमप्रभु यावेमी मोसा कली

12 “गो इस्राएली आन डोंइती जरमेशो तौ आन पा डा लेवी आ थर डा मुर आन कली इस्राएली आन दाते रे योव्रतामी। मोपतीके लेवी आ मुर आ केन बाक्नीम। गन्ती ८:१६; प्रस्थान १३:२

13 डोंइती जरमेशो नेल्ल आं के बाक्नीम। इजीप्टमी डोंइती जरमेशो नेल्ल सदुमी नाक्ती, गो इस्राएली आन डोंइती जरमेशो आं कली वोंइसाक्वी। मिनु गो मुर नु बी ब्यफ, क्यारश भेडा नेल्ल आं कली वोंइसाक्वी। मेको आं के बाक्नीम। गो परमप्रभु यावे नड” देंत।

14 मिनु परमप्रभु यावेमी सीनै डा गोरशो रागीमी मोसा कली

15 “गे लेवी आ थर डा मुर आन कली आन खिं खिं पा हिक्मी। महिना का गाप्शो नु मेको क्येडा लाक्शो वोंइश मुर नेल्ल आन कली हिक्मी” देंत।

16 मिनु मोसामी परमप्रभु यावेमी अरेशो खोंदेंशो पा मेको आन कली हिक्तीमी।

17 मिनु लेवी आ तौ सु सु बाक्तेक्म देंशा हना, गेरशोन, कोहाथ नु मेरारी बाक्तेक्म। प्रस्थान ६:१६-१९; गन्ती २६:५७-६४

18 गेरशोन आ तौ लिब्नी नु आ खिं डा मुर नु शिमेड नु आ खिं डा मुर बाक्तेक्म।

19 कोहाथ आ तौ अग्राम नु आ खिं डा मुर नु इच्चार नु आ खिं डा मुर, हेब्रोन नु आ खिं डा मुर नु उज्जीएल नु आ खिं डा मुर बाक्तेक्म।

20 मेरारी आ तौ माहली नु आ खिं डा मुर नु मुशी नु आ खिं डा मुर बाक्तेक्म। एको लेवी आ थर डा मुर आन खिं खिं डा मुर बाक्तेक्म।

21 गेरशोन रे पा लिब्नी नु शिमेड आस खिं खिं डा मुर दुम्तेक्म। मेकोन गेरशोन आ खिं खिं डा मुर बाक्नीम।

22 मेकोपुकी महिना का गाप्शो नु मेको क्येडा लाक्शो वोंइश मुर हिक्शोनो ७ हजार ५ सहे बाक्तेक्म।

23 गेरशोन आ खिं डा मुर आन बाक्तीके गुम्तीक ताम्बु आ नोले, पच्छिम गे दुम्चा माल्ब।

24 गेरशोनी आन खिं डा ठेयब मुर, लाएल आ तौ एली-आसाफ बाक्त।

25 गेरशोन आ मुरपुकीमी गुम्तीक ताम्बु कली सुम्तीके, गुम्तीक ताम्बु आ आगा ओव्रतीक डा फारशो वा,

26 लाडगा डा फारशो वा, ताम्बु नु चढेतीक आ एर ओथ डा लाडगा आ आगा ओव्रतीक डा फारशो वा नु ताम्बु डा डोरीपुकी कोव्रचा माल्बाक्तेक्म।

27 कोहाथ रे पा अग्राम आ खिं डा मुर, इच्चार आ खिं डा मुर, हेब्रोन आ खिं डा मुर नु उज्जीएल आ खिं डा मुरपुकी दुम्तेक्म। मेको कोहाथ आ खिं खिं डा मुर बाक्नीम।

28 मेकोपुकी महिना का गाप्शो नु मेको क्येडा लाक्शो वोंइश मुर हिक्शोनो ८ हजार ६ सहे बाक्तेक्म। मिनु मेकोपुकी गुम्तीक ताम्बु डा गेय पाइब आन कली वारच पाइब बाक्तेक्म।

29 कोहाथ आ खिं डा मुर आन बाक्तीके गुम्तीक ताम्बु आ दक्खिन गे दुम्चा माल्ब।

30 कोहाथी आन खिं डा ठेयब मुर उज्जीएल आ तौ, एली-जाफान बाक्ब। लेवी १०:४

31 कोहाथीपुकीमी कबल पशो सन्दोस, शोब्ले वोइक्तीक टेबल, बसी दातीके, चढेतीक निक्शी नु चढेब आन माल्शो मारेड मारेड नु नेल्ल क्येडा चोव्रखो कोठा डा फारशो वा कोव्रचा माल्बाक्तेक्म। गन्ती ७:९

32 मिनु चढेब हारून आ तौ एलाजर चहिं लेवी आन थर डा ठेयब मुर आन नेल्ल क्येडा ठेयब मुर बाक्त। मिनु मेको गुम्तीक ताम्बु डा गेय पाइब नेल्ल आन कली कोव्रच मुर बाक्त।

33 मेरारी रे पा माहली आ खिं डा मुर नु मुशी आ खिं डा मुर बाक्तेक्म। एको मेरारी आ खिं खिं डा मुर बाक्नीम।

- 34 मेकोपुकी महिना का गाप्शो नु मेको क्येडा लाक्शो वोंइश मुर नेल्ल हिकशोनु ६ हजार सहे निकशी बाक्तेक्म।
- 35 मेरारी आ खिं डा ठेयब मुर अबीहेल आ तौ सुरीएल बाक्ब। मेरारी आ खिं डा मुर आन बाक्तीके गुम्तीक ताम्बु आ उत्तर गे दुम्चा माल्ब।
- 36 मेरारी आ तौपुकीमी गुम्तीक ताम्बु डा फलेकपुकी, थामपुकी नु आन राप्पाइक्तीकपुकी नु आन मारेइ मारेइ कोव्रचा माल्नीम।
- 37 मेकोपुकीमी लाडगा एर ओंथ डा थामपुकी नु आन राप्पाइक्तीकपुकी, किलापुकी नु डोरीपुकी कोव्रचा माल्नीम।
- 38 मोसा, हारून नु आस तौ आन बाक्तीके गुम्तीक ताम्बु आ डोंइती पूर्व गे, नां दाप्तीके गे दुम्चा माल्बाक्त। मेकोपुकीमी गुम्तीक ताम्बुम इस्राएली आन पर्वम मार मार पचा माल्शो बाक्मे, मेको पचा माल्बाक्तेक्म। मेकोपुकी डा लाक्शा अर्को सुड मुरुम मो पाम्तेक्म हना, मेको आन कली साइक्चा माल्नीम।
- 39 मोसा नु हारूनमी परमप्रभु यावे आ देशो खोदेशो पा हिकशो लेवी आ थर डा खिं खिं डा मुर महिना का गाप्शो नु मेको क्येडा लाक्शो नेल्ल २२ हजार जना बाक्तेक्म।
- 40 मिनु परमप्रभु यावेमी मोसा कली “महिना का गाप्शो नु मेको क्येडा लाक्शो इस्राएली आन डोंइती जरमेशो तौ नेल्ल आन कली हिकशा आन नें ब्रेक्तो।
- 41 मिनु गे इस्राएली आन डोंइती जरमेशो तौ आन पा डा लेवी आ मुर आन कली आं के सेल्मी। मोपा इस्राएली आन डोंइती जरमेशो बी ब्यफ क्यारश भेडा आन पा डा लेवी आन बी ब्यफ क्यारश भेडा आं के सेल्मी। गो परमप्रभु यावे नड” देत। गन्ती १८:१५
- 42 मिनु मोसामी परमप्रभु यावेमी अरेशो खोदेशो पा इस्राएली आन डोंइती जरमेशो तौ आन कली हिकतीमी।
- 43 मिनु मेकोपुकी महिना का गाप्शो नु मेको क्येडा लाक्शो डोंइती जरमेशो आन नें ब्रेक्शा, हिकशोनु नेल्ल २२ हजार सहे निकशी ७३ जना बाक्तेक्म।
- 44 मिनु लेंशा परमप्रभु यावेमी मोसा कली
- 45 “इस्राएली आन डोंइती जरमेशो तौ आन पा डा लेवी आ मुर आं के सेल्मी। मिनु मेको आन बी ब्यफ, क्यारश भेडा आन पा डा लेवी आ मुर आन बी ब्यफ, क्यारश भेडा आं के सेल्मी। लेवी आ मुर आं के बाक्नीम। गो परमप्रभु यावे नड।
- 46 मिनु लेवी आन क्येडा शुश दुम्शो इस्राएली आन डोंइती जरमेशो तौ सहे निकशी ७३ जना बाक्तेक्म। मेको आन कली प्रोंइचा माल्बाक्त।
- 47 मेको आन कली प्रोंइचा कली का के ५ शेकेल ताक्को। गुम्तीक ताम्बु डा शेकेल का २० गेराह डा बाक्ब। गेराह का ०.६ ग्राम बाक्ब। गुम्तीके ताम्बु डा शेकेल १२ ग्राम बाक्ब।
- 48 मिनु गे इस्राएली आन कली प्रोंइचा कली गेशो शेकेल हारून नु आ तौ आन कली गेचा माल्नेवे” देत। शेकेल इस्राएली आन क्येट बाक्ब। बजार डा शेकेल ११.५ ग्राम बाक्ब। ताम्बु कली गेतीक शेकेल चहिं १२ ग्राम बाक्ब। मेको सुन के नु चांदी के शेकेल बाक्नीम।
- 49 मिनु मोसामी लेवी आन क्येडा शुश दुम्शो, प्रोंइचा माल्शो मुर रे प्रोंइतीक क्येट ताक्तु।
- 50 मिनु मेकोमी इस्राएली आन डोंइती जरमेशो तौ रे प्रोंइतीक क्येट ताक्शा, मेको हजार का सहे सां ६५ ताम्बु डा शेकेल बाक्तेक्म।
- 51 मिनु मोसामी परमप्रभु यावेमी अरेशो खोदेशो पा, मेको प्रोंइतीक क्येट हारून नु आ तौ आन कली गेम्तीमी।

## 4

कोहाथ आ मुर आन कली हिकशो

- 1 परमप्रभु यावेमी मोसा नु हारून आस कली
- 2 “लेवी आ मुर आन दाते डा कोहाथी आन कली आन खिं खिं डा मुर पा हिककीस।
- 3 गे ३० बर्स रे ५० बर्स सम्म डा वोंइश मुर आन कली हिककीस। मेकोपुकी ला गुम्तीक ताम्बु डा गेय पने चान्पीम। गन्ती ८:२४-२५; १इतिहास २३:२४
- 4 मेको कोहाथी आन पचा माल्शो गेय गुम्तीक ताम्बु डा नेल्ल क्येडा चोव्रखो थोव्रक नु बाक्ब।
- 5 मिनु गुम्तीक ताम्बु याक्तेमनु, हारून नु आ तौ गुम्तीक ताम्बु ओव्रशा, फारशो वा शोल्शा, मेको वामी कबल पशो सन्दोस सुम्चा माल्नीम।
- 6 मिनु नोले मेकोपुकीमी मेको आ तार रिम्शो कोक्तेमी सुम्चा माल्नीम। मेको आ तारी नीलो रड डा वामी सुम्चा माल्नीम। मिनु मेको आ कुरतीक कोक्के शुडक्चा माल्नीम।
- 7 मिनु मेकोपुकीमी कोइतीक शोब्ले वोइक्तीक टेबल तार नीलो वा का ब्रशा, मेको आ तारी थालपुकी, थनोरुपुकी, बोसपुकी नु तूचा थोव्रक चढेचा कली कचौरा वोइक्चा माल्नीम। मिनु नाक्त किंत किंत डा कोइतीक शोब्ले यो मेको तार बाक्चा माल्ब।
- 8 मिनु नोले मेको आ तार लल रड डा वा ब्रशा, मेको आ तार रिम्शो कोक्तेम सुम्चा माल्नीम। मिनु मेको आ कुरतीक कोक्के शुडक्चा माल्नीम।
- 9 मेकोपुकीमी बत्ती दातीके नीलो वाम सुम्चा माल्नीम। मेको आ बत्ती, आ थनारो, आ थाल नु तेल वोइक्तीके नेल्ल सुम्चा माल्नीम। प्रस्थान २५:३१
- 10 मिनु मेको नेल्ल कली रिम्शो कोक्तेमी वोइश्शा, कुरतीक तारी वोइक्चा माल्नीम।

11 मेकोपुकीमी सुन के चढ़ेतीक तारी नीलो वा ब्रशा, रिम्शो कोक्तेम सुम्चा माल्नीम। मिनु मेको आ कुरतीक कोक्के शुडक्चा माल्नीम। प्रस्थान ४०:२६-२७

12 मिनु गुम्तीक ताम्बुम माल्शो मारेड मारेड खुप्शा, नीलो वाम कुम्लो पचा माल्नीम। मिनु मेको कली रिम्शो कोक्तेम सुम्चा माल्नीम। मिनु कुरतीक तारी वोडक्चा माल्नीम।

13 मेकोपुकीमी चढ़ेतीक रे पुलु शोल्शा, मेको आ तार प्याजी रड डा वा ब्रचा माल्नीम।

14 मिनु मेकोपुकीमी चढ़ेतीकेम माल्शो मारेड मारेड थोवकी मेको आ तारी वोडक्चा माल्नीम। मी वोडक्तीके, श्ये गुंडतीके, बेलचापुकी, ब्वाक्कु वोडक्तीक ग्योबपुकी नु चढ़ेतीक डा मारेड मारेड वोडइशा, मेको तार रिम्शो कोक्तेम सुम्चा माल्नीम। मेको आ कुरतीक कोक्के शुडक्चा माल्नीम।

15 मिनु हारून नु आ तौपुकीमी मेको गुम्तीक ताम्बु डा मारेड मारेड सुम्ने थुम्मे नोले कोहाथीपुकी मेको कुरथ जाक्चा माल्नीम। तन्न मेकोपुकीमी परमप्रभु यावे आ मार मार थोवक थिचा मटुम्नीम। मेकोपुकीम थिम्तेकम हना, बेक्नीम। कोहाथीपुकीमी गुम्तीक ताम्बु डा कुरचा माल्शो थोवक मेकोन बाक्नीम। गन्ती ७:९; २सामुएल ६:६-७

16 चढ़ेब हारून आ तौ एलाजर बत्ती दाशो तेल, ब्रोवशो रिना पाडक्ब धूप, नाक्त किंत किंत डा चढ़ेतीक अन्न नु लुक्तीक तेल कली कोव्रब बाक्ब। मेको गुम्तीक ताम्बु नु मेकेर डा मारेड मारेड कोव्रब बाक्ब” दैत।

17 मिनु नोले परमप्रभु यावेमी मोसा नु हारून आस कली

18 “गे लेवी आन दाते डा कोहाथी आन खिं खिं डा मुर आन कली खतम दुम्चा मगेस।

19 गे, कोहाथी मबेक्थु, ब्रोंडमल दे नेल्ल क्येडा चोवखो थोवक आ नेक्था जाक्मानु, मार पचा माल्नीनी देशा हना, हारून नु आ तौपुकी आगा ओव्रशा, मेको आन कली आन आन गेय नु मार मार कुरचा माल्नीनी, मेको योक्शा गेचा माल्नीमी।

20 तन्न कोहाथीपुकीम मेको नेल्ल क्येडा चोवखो थोवक आन कली कोव्रचा मटुम्ब। कोव्रतेकम हना, बेक्नीम” दैत। १सामुएल ६:१९

गेरशोन आ मुर आन कली हिक्शो

21 मिनु परमप्रभु यावेमी मोसा कली

22 “गेरशोनी आन कली यो आन खिं खिं पा हिक्मी।

23 गे ३० बर्स रे ५० बर्स सम्म डा वोडश मुर आन कली हिक्को। मेकोपुकी ला गुम्तीक ताम्बु डा गेय पने चान्नीम।

24 मिनु गेरशोन आ मुर आन पतीके मार बाक्त देशा हना, गेय पचा नु मार मार कुरचा माल्नीम।

25 गुम्तीक ताम्बु डा फारशो वा, गुम्तीक ताम्बु आ सुम्तीके नु मेको तार बाक्शो रिम्शो कोक्ते नु गुम्तीक ताम्बु आ ओव्रतीक डा फारशो वा कुरचा माल्नीम।

26 मिनु लाडगा डा एर ओंथ फारशो वा, ओव्रतीक डा फारशो वा, गुम्तीक ताम्बु नु चढ़ेतीक आ एर ओंथ डा वा नु आ डोरी नु मेको आ गेय कली माल्शो नेल्ल पचा माल्नीम।

27 गेरशोन आ मुरपुकीमी हारून नु आ तौपुकीमी अरेशो खोदेशो पा ला आन कुरतीक नु अरु गेय पने चान्नीम। हारून नु आ तौपुकीमी मेको आन कुरचा माल्शो नु पतीक गेय नेल्ल अरेचा माल्नीम। प्रस्थान ३८:२१

28 मिनु गेरशोनीमी गुम्तीक ताम्बुम पचा माल्शो गेय एकोन बाक्ब। मिनु हारून आ तौ इथामार मेको आन कली अरेब बाक्ब।

मेरारी आ मुर आन कली हिक्शो

29 गे मेरारी आ मुर आन कली आन खिं खिं डा मुर पा हिक्शा, ब्रेक्तो।

30 गे ३० बर्स रे ५० बर्स सम्म डा वोडश मुर आन कली हिक्को। मेकोपुकी ला गुम्तीक ताम्बु डा गेय पने चान्नीम।

31 मिनु मेकोपुकीमी गुम्तीक ताम्बु डा मार कुरचा माल्नीम देशा हना, गुम्तीक ताम्बु डा फलेकपुकी, मेको आन ग्याडक्तीक कोक्केपुकी, थामपुकी नु राप्पाडक्तीकपुकी कुरचा माल्नीम।

32 मिनु लाडगा डा थाम नेल्ले, आन राप्पाडक्तीकपुकी, किलापुकी, डोरीपुकी नु मार मार अरु बाक्मा मेको कोव्रचा नु कुरचा माल्नीम।

33 मेको मेरारी आ मुरपुकीम आन गुम्तीक ताम्बु कली पचा माल्शो गेय बाक्ब। मिनु चढ़ेब हारून आ तौ इथामार मेको आन कली अरेब बाक्ब” दैत।

लेवी आ मुर आन कली हिक्शो

34 मोसा, हारून नु थर थर डा मुर आन ठेयब मुरपुकीमी कोहाथी आन खिं खिं डा मुर आन कली हिक्शा ब्रेक्ताकम।

35 मिनु ३० बर्स रे ५० बर्स सम्म डा मुर ला गुम्तीक ताम्बुमी गेय पने चाप्बाक्तेकम।

36 मिनु मेको आन खिं खिं डा मुर हिक्शोनु, हजार निक्शी ७ सहे ५० जना बाक्तेकम।

37 मेको गुम्तीक ताम्बु डा गेय पाडब कोहाथीपुकी बाक्नीम। मिनु मोसा नु हारूनमी परमप्रभु यावेमी अरेशो खोदेशो पा मेको आन कली हिक्शा ब्रेक्शो बाक्ताकस।

38 मिनु गेरशोनी आन खिं खिं डा मुर आन कली हिक्शा ब्रेक्ताकम।

39 मिनु ३० बर्स रे ५० बर्स सम्म डा मुर ला गुम्तीक ताम्बुमी गेय पने चाप्बाक्तेकम।

40 मिनु मेको आन खिं खिं डा मुर हिक्शोनु, हजार निक्शी ६ सहे ३० जना बाक्तेकम।

- 41 मेको गुम्तीक ताम्बु डा गेय पाइब गेरशोनी बाक्नीम। मिनु मोसा नु हारूनमी परमप्रभु यावेमी अरेशो खोदेशो पा मेको आन कली हिक्शा ब्रेक्ताक्स।
- 42 मिनु मेरारी आ मुर आन खिं खिं डा मुर आन कली हिक्तेक्म।
- 43 मेको ३० बर्स रे ५० बर्स सम्म डा मुर ला गुम्तीक ताम्बुमी गेय पने चाप्बाक्तेक्म।
- 44 मिनु मेको आन खिं खिं डा मुर हिक्शोनु, हजार सां सहे निक्शी बाक्तेक्म।
- 45 मेको गुम्तीक ताम्बु डा गेय पाइब मेरारी आ मुर बाक्नीम। मिनु मोसा नु हारूनमी परमप्रभु यावेमी अरेशो खोदेशो पा मेको आन कली हिक्शा ब्रेक्ताक्स।
- 46 मिनु मोसा, हारून नु इस्राएल आ थर डा मुर आन ठेयब मुरपुकीमी लेवी आ मुर नेल्ल आन खिं खिं डा मुर हिक्शा ब्रेक्ताक्म।
- 47 मिनु ३० बर्स रे ५० बर्स सम्म डा मुर ला गुम्तीक ताम्बुमी गेय पने नु मार मार कुरने चाप्बाक्तेक्म।
- 48 मिनु मेको आन खिं खिं डा मुर हिक्शोनु ८ हजार ५ सहे ८० जना बाक्तेक्म।
- 49 मिनु परमप्रभु यावेमी अरेशो खोदेशो पा मोसामी मेको आन कली हिक्शा, मार गेय पचा माल्नीमी, मार कुरचा माल्नीमी, मेको अरम्तीमी। मिनु परमप्रभु यावेमी मोसा कली अरेशो खोदेशो पा मेको आन कली हिक्शा बाक्त।

## 5

मुर बाक्तीक ग्रांया मसेल्चा

- 1 परमप्रभु यावेमी मोसा कली
- 2 “गे इस्राएली आन कली गेपुकीमी कोत्रर खोदेशो रोड पाइब, आन रां रे ग्रांया दिशो यिशो नु बेक्शो मुर थिशा ग्रांया दुम्शो मुर आन कली इन बाक्तीक क्येडा डोन वोइक्चा माल्नीनी। लेवी १३:४६; लेवी १५:२; गन्ती ९:६-७
- 3 मोदेशो वोंडश मुर नु मीश मुर नेल्ल आन कली मुर आन बाक्तीके क्येडा डोन वोइक्चा माल्नीनी। मेकोपुकीमी मुर आन बाक्तीके ग्रांया दिशो सेल्चा मदुम्नीम। मारदे हना गो इन दातेमी बाक्शो बाक्नुड” दैत। गन्ती १२:१४-१५; प्रस्थान २५:८
- 4 मिनु इस्राएलीपुकीमी मो पान्तेक्म। मोदेशो मुर आन कली मुर आन बाक्तीके क्येडा डोन वोइक्तेक्म। परमप्रभु यावेमी मोसा कली अरेशो खोदेशो पा इस्राएलीपुकीमी पान्तेक्म।

खुड पशो आ पर्वम शेंशो

- 5 मिनु लेशा परमप्रभु यावेमी मोसा कली
- 6 “गे इस्राएली आन कली ‘मीश मुर, वोंडश मुर सु बाक्त हना यो, परमप्रभु यावे आ डोंइती पाप पा अरु मुर आन कली मारेड मरिम्शो पाप्टु हना, मेको मुर दोस ताइब दुम्ब। लेवी ५:२१-२६
- 7 मिनु मेकोमी आ मरिम्शो पशो शोत्रचा माल्ब। मिनु मेको मुरुमी आ खुड पशो नेल्ल लेशा गेशा, मेको क्येडा यो ५ भाग तेम्शा गेचा माल्ब।
- 8 तन्न मेको खुड पचा पुंडसीशो मुर बेक्शा, मेको के सुड मबाक्तेक्म हना, मेको पाप आ पर्वम थाप्शो परमप्रभु यावे के दुम्शा, चढेब आन के दुम्ब। मिनु आ पाप क्याम्तीक गेय पचा कली सांड का गेचा माल्ब।
- 9 मिनु इस्राएलीपुकीमी आन परमप्रभु यावे कली गेशो क्युक्शा चढेतीक नेल्ले चढेब कली गेचा माल्नीम। मिनु मेको चढेब केन दुम्ब। गन्ती १८:८
- 10 मिनु मुर नेल्ल आन परमप्रभु यावे कली गेशो, मेको केन दुम्ब। मार गेम्तेक्म हना यो, मेको चढेब केन दुम्ब’ दे अरेमी” दैत।

मीश मुर कली नाक्शो

- 11 मिनु परमप्रभु यावेमी मोसा कली
- 12 “गे इस्राएली आन कली ‘सुड आन मीश हेंथे गाक्शा, आ वोंडश कली मरिम्शो पाप्टु हना,
- 13 अरु वोंडश मुर नु इप्ट हना, मेको आ वोंडश रे खुडशशो बाक्त हना, मेकोमी सुडम मतुडक्थु, ग्रांया दिशो सेल्सीशो बाक्त हना यो, मेको सुडम थित्चा मपुंडसीशो बाक्त हना यो,
- 14 मेको वोंडश मुरुमी आ ग्रांया दिशो सेल्सीशो मीश आ पर्वम रुश पा, आ थुंम मरिम्शो मिम्शो बाक्त हना, मेको आ मीश आंम कली ग्रांया दिशो मसेल्सीशो बाक्त हना यो,
- 15 मेको वोंडश मुरुमी आ मीश कली चढेब आ बाक्तीके चाक्चा माल्ब। मिनु मेको आ मीश आ पर्वम एफाह का डा १० भाग डा भाग का क्योत्रज फस चाक्चा माल्ब। मेको आ तारी तेल लुक्या नु धूप वोइक्चा मदुम्ब। मारदे हना मेको रुश पशो आ पर्वम अन्न चढेतीक बाक्ब। मेको अन्न चढेतीक मरिम्शो पशो मिम्चा कली बाक्ब। एफाह का २२ लिटर डा पुक्तीक बाक्ब।
- 16 मिनु चढेबमी मेको मीश मुर कली आ नेक्था चाक्शा, परमप्रभु यावे आ डोंइती राप्पाइक्चा माल्ब।
- 17 मिनु चढेबमी खप के ग्योबुम नक ब्वाक्कु चाक्चा माल्ब। मिनु मेकोमी गुम्तीक ताम्बु डा खप डा फुरक इक्का हुडशशा, मेको ब्वाक्कुम कुर पचा माल्ब।
- 18 मिनु चढेबमी मेको मीश मुर कली परमप्रभु यावे आ डोंइती राप्पा, मेको आ चां पुडक्चा माल्ब। मिनु मेकोमी मेको मिम्चा कली अन्न चढेतीक आ गुडमी वोइक्चा माल्ब। मेको रुश पशो आ पर्वम अन्न चढेतीक बाक्ब। मिनु मेको चढेबमी मेको सराप चीले रशो कशो ब्वाक्कु आ गुडमी ग्याइक्चा माल्ब।

19 मिनू चढेबमी मेको मीश मुर कली कसम जपाइशशा “थमा पा गे सुइ वोंइश मुर नु मइप्शो बाक्ते हना, इ वोंइश नु बाक्शा, हेंथे मगाक्शु, इ कली ग्रांरा दिशो मसेल्सीशो बाक्ते हना, एको कशो ब्वाक्कु तूडीनु, गे सराप चीले मराइनेवे।

20 तन्न गे इ वोंइश नु बाक्शा यो, हेंथे गाक्शा, ग्रांरा दिशो सेल्सीशो बाक्ते हना, गे अरु वोंइश मुर नु इप्शो बाक्ते” हना, देशा,

21 चढेबमी मेको मीश मुर कली सराप चीले रतीक कसम जपाइक्चा मालब। मिनू मेकोमी मीश मुर कली “परमप्रभु यावेमी इ कोव्रज होम्पाइक्तीक नु देल्लो सोव्रपाइक्तीक रोइ पपाइशशो तशा, गे इ मुर आन दातेमी हिंचा डा कोंइतीक दुम्मेवे।

22 एको सराप चीले रतीक ब्वाक्कु इ कोव्रजम ओव्रशा इ कोव्रज होम्तीक नु इ देल्लो सोव्रतीक रोइ पपाइक्ब” देंचा मालब। मिनू मेको मीश मुरुमी “आमेन, मोदेशोन दुम्ल” देंचा मालब।

23 मिनू नोले चढेबमी मेको सराप चीले कागजम ब्रेक्शा मेको कशो ब्वाक्कुम मेको कागज कली मुरचा मालब।

24 मिनू नोले मेकोमी मेको मीश मुर कली मेको सराप चीले बाक्शो कशो ब्वाक्कु तूपाइक्चा मालब। मिनू मेको सराप चीले बाक्शो ब्वाक्कु मेको मीश मुर आ कोव्रजम ओव्रशा मेको कली शुश खाइक्पाइक्ब। भजन संग्रह १०९:१८

25 मिनू चढेबमी मेको रुश पतीक आ पर्वम चढेशो अन्न मेको मीश मुर आ गुइ रे लाइशशा, परमप्रभु यावे आ डोंइती क्युक्शा, चढेतीकेम चाक्चा मालब।

26 मिनू चढेबमी मेको अन्न चढेतीक रे मिम्चा कली योल का हुइशशा चढेतीकेमी चोचा मालब। मिनू नोले मेको कली मेको ब्वाक्कु तूपाइक्चा मालब।

27 मिनू मेकोमी मेको मीश मुर कली मेको ब्वाक्कु तूपदानु, मेको ग्रांरा दिशो दुम्शो बाक्त हना, नु आ वोंइश कली मरिम्शो पशो बाक्त हना, मेको सराप चीले बाक्शो कशो ब्वाक्कु मेको आ आगा ओव्रशा, शुश खाइक्पाइक्ब। मेको आ कोव्रज होम्ब। मिनू मेको आ देल्लो सोव्रब। मिनू मेको मीश मुर आ मुर आन दातेमी हिंचा डा कोंइतीक दुम्ब।

28 तन्न मेको मीश मुरुम आंम कली ग्रांरा दिशो मसेल्सीशो नु मरिम्शो मपशो बाक्त हना, मेको ब्वाक्कु मखाइक्शु, आल थीब दुम्ब।

29 आ वोंइश नु बाक्शा यो, हेंथे गाक्शा ग्रांरा दिशो सेल्सीशो मीश मुर आ पर्वम रुश पाइब वोंइश कली अरेशो लोव्र बाक्ब।

30 मिनू वोंइश मुर रुश पाइब दुम्शा, आ मीश आ पर्वम रुश पाप्तु हना, मेकोमी आ मीश परमप्रभु यावे आ डोंइती राप्पाइक्चा मालब। मिनू चढेबमी मेको अरेशो लोव्र नेल्ले मेको मीश मुर आ पर्वम पचा मालब।

31 मिनू मेको वोंइश मुर दोस मताइब दुम्ब। मिनू आ मीशमी चहिं आ मरिम्शो पशो राइब” दे इस्माएली आन कली शेंदो” दे परमप्रभु यावेमी मोसा कली देंत।

## 6

परमप्रभु कली नाजिरी दिल्लो

1 परमप्रभु यावेमी मोसा कली

2 “गे इस्माएली आन कली ‘सुइ मीश मुर, वोंइश मुरुमी परमप्रभु यावे कली दिल्ला बाक्चा, दे नाजिरी कबल पाप्तु हना, १सामुएल १:११

3 मेकोमी शांबु राकसी तूचा काइ मदुम्ब। मेकोम ग्युरशो अडगुर शांबु नु अडगुर आ रस तूचा मदुम्ब। क्येख नु सोव्रपाइशशो अडगुर यो ब्वचा मदुम्ब। आमोस १:११-१२; लूका १:१५

4 गिश नाक्त सम्म मेको नाजिरी दुम्शा दिल्ला बाक्बा, मिश नाक्त सम्म मेको अडगुर आ वांचेर रे आ खोरले सम्म यो ब्वचा मदुम्ब।

5 मेको गिश नाक्त सम्म नाजिरी दुम्शा दिल्ला बाक्बा, मिश नाक्त सम्म आ पिया डा चां प्रेक्चा मदुम्ब। मेको आ नाजिरी दुम्शा दिल्लो नाक्ती मनुम्म सम्म मेकोमी परमप्रभु यावे कली ला दिल्लो बाक्ब। मेकोमी आ चां बारचा गेचा मालब। न्यायाधीस १३:५

6 गिश नाक्त सम्म मेको परमप्रभु यावे आ पर्वम दिल्ला बाक्बा, मिश नाक्त सम्म मेको बेक्शो मुर आन नेक्था लचा मदुम्ब।

7 मेको आ आम आफ, आ लोकबपुकी सु बेक्तेकम हना यो, मेको आन पर्वम मेकोमी आंम कली ग्रांरा दिशो सेल्चा मदुम्ब। मारदे हना मेको आ पियाम आ परमप्रभु आ पर्वम दिल्लो चिन्ड बाक्ब। लेवी २१:११

8 आ दिल्ला बाक्शो नाक्त नेल्ले मेको परमप्रभु यावे कली ला दुम्शो बाक्ब।

9 मिनू दोक का का पा सुइ मुर मेको आ नेक्था बेक्शा, आ चां ग्रांरा सेल्लु हना, ग्रांरा मदिशो दुम्चा कली ७ नाक्तीम आ चां प्रेक्चा मालब। गन्ती १९:११, १४, १६

10 मिनू मेकोमी ८ नाक्ती परवा हना यो, ढुकुर हना यो निकशी युम्तीक ताम्बु डा ओव्रतीक चढेब आ डोंइती चाक्चा मालब। लेवी ५:७

11 मिनू चढेबमी मेको का पाप आ पर्वम चढेतीके नु का चोशा चढेतीके चढेचा मालब। मिनू मेको मुर आ पर्वम पाप क्याम्तीक गेय पचा मालब। मारदे हना मेको बेक्शो मुर आ नेक्था बाक्शा पाप दुम्शा, ग्रांरा दिशो दुम्शो बाक्ब। मिनू मेको नाक्त रे मेकोम आ पिया परमप्रभु यावे कली तिल्ला मालब।



12 मिनू मेको मुरुमी आ नाजिरी बाक्तीक नाक्ती नक गोशा परमप्रभु यावे कली दिल्या माल्ब। मिनू मेकोमी गारचा आ परबम चढेचा कली बर्स का गाप्शो सांड का चाक्चा माल्ब। मेको मुर दिलशा बाक्मेनु, ग्रंथा दिशो दुम्टीके आ डोंडती डा नाक्त महिक्सीब।

13 मिनू नाजिरी आन कली अरेशो लोत्र मार बाक्ब देशा हना, आंम दिलशा बाक्शो नाक्त गाक्म नोले, मेको मुर आ पतीके मार बाक्ब देशा हना, मेको कली गुम्टीक ताम्बु आ ओत्रतीक आ डोंडती चाक्चा माल्ब।

14 मिनू मेकोमी परमप्रभु यावे कली मारेड मदुम्लो थम रिम्लो सांड का चोशा चढेतीक चढेचा माल्ब। मिनू मेकोमी बर्स का गाप्शो मारेड मदुम्लो थम रिम्लो पाठी का पाप आ परबम चढेचा माल्ब। मिनू मारेड मदुम्लो थम रिम्लो बर्स का गाप्शो सांड का दुशा बाक्चा आ परबम चढेचा माल्ब।

15 मिनू मेकोमी डालो का बोरब ओरुली मसुप्शो शोब्ले, थम रिम्लो तेलम निशो फस के बटुकपुकी नु तेल खेक्शो बोरब ओरुली मसुप्शो बाबरपुकी चढेचा माल्ब।

16 मिनू चढेबमी मेको नेल्ल परमप्रभु यावे आ डोंडती वोडक्चा माल्ब। मिनू मेको पाप आ परबम चढेतीके नु चोशा चढेतीके चढेचा माल्ब।

17 मिनू मेकोमी मेको सांड दुशा बाक्चा आ परबम परमप्रभु यावे कली चढेचा माल्ब। मेको नु डालोम बाक्शो बोरब ओरुली मसुप्शो शोब्ले चढेचा माल्ब। मिनू मेको चढेबमी मेको नु अन्न चढेतीके नु तूचा थोत्रक चढेतीक चढेचा माल्ब।

18 मिनू नोले मेको नाजिरीमी गुम्टीक ताम्बु ओत्रतीक आ डोंडती आ तिल्लो पिया डा चां प्रेक्चा माल्ब। मिनू मेको चां दुशा बाक्चा आ परबम चढेतीक आ आगाम चोचा माल्ब। प्रेरित १८:१८

19 मिनू आ पिया प्रेक्गा नोले मेको चढेबमी मेको सांड आ लोप्शो बला नु डालो डा बोरब ओरुली मसुप्शो बटुक का नु बोरब ओरुली मसुप्शो बाबर का मेको नाजिरी आ गुडम वोडक्चा माल्ब।

20 मिनू चढेबमी मेको कली क्युक्शा परमप्रभु यावे आ डोंडती क्युक्शा चढेतीक चढेचा माल्ब। मिनू क्युक्शा चढेशो, कुशु नु फिला चढेब आ भाग दुम्ब। मेको नोले मेको नाजिरीमी अडगुर शांबु तूतु हना दुम्ब। प्रस्थान २९:२३, २४, २७

21 मिनू कसम जशो नाजिरी कली अरेशो लोत्र मार बाक्ब देशा हना, आ परमप्रभु यावे कली चढेशो नाजिरी आ कसम जशो खोदेशो बाक्चा माल्ब। आ चाप्शो तेम्ने चाप्ब। आ कसम जशो गारचा माल्ब। मिनू आ जिम्मा डा अरेशो लोत्र नेल्ल गारचा माल्ब' देनो" दैत।

हारूनमी गेचा माल्लो आसीक

22 मिनू परमप्रभु यावेमी मोसा कली

23 "गे हारून नु आ तौ आन कली 'गे इस्राएली आन कली आसीक गेनीनु, मार देंचा माल्लीनी देशा हना, लेवी ९:२२-२३; ब्यवस्था १०:८

24 परमप्रभु यावेमी इन कली आसीक गेवल। इन कली गेना हना यो कोत्रडल। उत्पत्ती २४:१, ३५; भजन संग्रह १२१:-

25 परमप्रभु यावे इन कली तशा ग्येरसेक्ल। मिनू इन कली शिशी पवल। भजन संग्रह ८०:४; प्रस्थान ३४:६-७

26 परमप्रभु यावेमी इन कली कोत्रशा, इन थुं नाइश्शा बाक्चा गेवल' देंचा माल्लीनी। भजन संग्रह ६९:१७-१८; भजन संग्रह ८५:९; यसैया ५७:१९

27 मेकोपुकीमी मोदेशो लोत्र पा, आं नें इस्राएली आन तार वोडक्चा माल्लीम। मिनू गो मेको आन कली आसीक गेनुडमी" दे मोसा कली दैत।

## 7

इस्राएली आन थर डा ठेयब मुर

1 मोसामी गुम्टीक ताम्बु सेल्ने थुम्लो, मेको नु आ मारेड मारेड आन कली तेल बुडक्ताक्मी। मिनू परमप्रभु यावे आ गेय पचा कली वोडक्तु। मिनू मेकोमी चढेतीक नु आ मारेड मारेड तेल बुडश्शा परमप्रभु यावे आ गेय पचा कली वोडक्तीमी। प्रस्थान ४०:९, १०, १७

2 मिनू इस्राएल डा थर थर नु खिं खिं डा खुप्शा हिक्शो मुर आन ठेयब मुरपुकीमी चढेम्तेक्म।

3 मेकोपुकीमी आन चढेतीके परमप्रभु यावे आ डोंडती चाक्तेक्म। मार चाक्तेक्म देशा हना, ६ ओटा बग्गी, १२ ओटा ब्यफ, निक्शी थर डा मुर आन ठेयब मुर आस कली बग्गी का बाक्त। मिनू ठेयब मुर का का पा ब्यफ का का चढेचा कली चाक्तेक्म। मिनू मेकोपुकीमी गुम्टीक ताम्बु आ डोंडती वोडक्तेक्म।

4 मिनू नोले परमप्रभु यावेमी मोसा कली

5 "मेको आन चाक्शो ताक्को। मिनू मेकोमी गुम्टीक ताम्बु डा गेय पने चाप्नीम। लेवी आन कली आन आन गेय गारचा डा पा गेमी" दैत।

6 मिनू मोसामी मेको बग्गी नु ब्यफपुकी ताक्शा, लेवी आन कली गेम्तीमी।

7 मिनू मेकोमी बग्गी निक्शी नु ४ ओटा ब्यफ गेरशोन आ तौ आन गेय कोत्रशा, मेको आन कली गेम्तीमी।

8 मिनू ४ ओटा बग्गी नु ८ ओटा ब्यफ मेरासी आ मुर आन गेय कोत्रशा, मेको आन कली गेम्तीमी। चढेब हारून आ तौ इथामार मेको आन कली अरेब बाक्त। गन्ती ४:२८, ३३

9 तन्न मेकोमी कोहाथी आन कली मारेड मगेमी। मारदे हना मेकोपुकीमी परमप्रभु यावे आ मार मार थोत्रक कोत्रचा नु आन बलाम कुरचा माल्बाक्तेक्म। गन्ती ४:१५

10 मिनू चढेतीक कली तेल बुडक्तीक नु परमप्रभु यावे आ गेय पचा कली वोडक्तीक नाक्त मेको इस्राएल आ थर डा मुर आन ठेयब मुरुमी यो चढेचा कली मार मार चाक्शा, चढेतीक आ डोंडती वोडक्तेक्म।

11 मिनू परमप्रभु यावेमी मोसा कली “मेकोपुकीमी चढेचा कली मार मार चाक्या माल्नीम। मेको चढेतीके आं गेय पचा कली वोइक्तीक नाक्ती इझाएल आ थर डा मुर आन ठेयब मुर का कामी नाक्त का कली चढेतीक चाक्या माल्नीम” दंत। गन्ती १:४-१६; गन्ती २:३-२९

12 मिनू डोंडती डा नाक्ती यहूदा आ थर डा मुर आन ठेयब मुर अम्मीनादाब आ तौ नहशोनमी आ चढेतीक चाक्तु।

13 मिनू मार चाक्तु देशा हना, सहे का ३० शेकेल डा चांदी के थाल का ७० शेकेल डा चांदी के बोस का चाक्तु। मेको शेकेल गुम्टीक ताम्बु डा शेकेल खोदेशो बाक्तेकम। मेको थाल नु बोस निम्फामी तेलम निशो रिम्शो फसीम प्रिंशो बाक्ताक्स। मेको अन्न चढेतीके बाक्त। ताम्बु डा शेकेल का १२ ग्राम डा क्येट बाक्ब। बजार डा शेकेल चहिं ११.५ ग्राम बाक्ब।

14 मिनू १० शेकेल डा धूपम ब्रीशो सुन के आइक्च बोस का,

15 चोशा चढेचा कली ब्यफ का, सांड का नु बर्स का गाप्शो पाठा का चाक्तु।

16 पाप आ पर्वम चढेचा कली बोका का,

17 दुशा बाक्चा आ पर्वम चढेचा कली ब्यफ निक्शी, ५ ओटा सांड, ५ ओटा बोका नु ५ ओटा बर्स का गाप्शो पाठा चाक्तु। मेको अम्मीनादाब आ तौ नहशोन आ चढेतीक बाक्त।

18 मिनू आ दीसा इस्साकार आ थर डा मुर आन ठेयब मुर सुआर आ तौ नेथनेलम आ चढेतीक चाक्तु।

19 मिनू मार चाक्तु देशा हना, सहे का ३० शेकेल डा चांदी के थाल का नु ७० शेकेल डा चांदी के बोस का चाक्तु। मेको शेकेल गुम्टीक ताम्बु डा शेकेल खोदेशो बाक्तेकम। मेको थाल नु बोस निम्फामी तेलम निशो रिम्शो फसीम प्रिंशो बाक्ताक्स। मेको अन्न चढेतीके बाक्त।

20 मिनू १० शेकेल डा धूपम ब्रीशो सुन के आइक्च बोस का,

21 चोशा चढेचा कली ब्यफ का, सांड का नु बर्स का गाप्शो पाठा का चाक्तु।

22 पाप आ पर्वम चढेचा कली बोका का,

23 दुशा बाक्चा आ पर्वम चढेचा कली ब्यफ निक्शी, ५ ओटा सांड, ५ ओटा बोका नु ५ ओटा बर्स का गाप्शो पाठा चाक्तु। मेको सुआर आ तौ नेथनेल आ चढेतीक बाक्त।

24 मिनू मेको आ नित्थ नाक्ती जबूलून आ थर डा मुर आन ठेयब मुर हेलोन आ तौ एलीआबमी आ चढेतीक चाक्तु।

25 मिनू मार चाक्तु देशा हना, सहे का ३० शेकेल डा चांदी के थाल का नु ७० शेकेल डा चांदी के बोस का चाक्तु। मेको शेकेल गुम्टीक ताम्बु डा शेकेल खोदेशो बाक्तेकम। मेको थाल नु बोस निम्फामी तेलम निशो रिम्शो फसम प्रिंशो बाक्ताक्स। मेको अन्न चढेतीके बाक्त।

26 मिनू १० शेकेल डा धूपम ब्रीशो सुन के आइक्च बोस का,

27 चोशा चढेचा कली ब्यफ का, सांड का नु बर्स का गाप्शो पाठा का चाक्तु।

28 पाप आ पर्वम चढेचा कली बोका का,

29 दुशा बाक्चा आ पर्वम चढेचा कली ब्यफ निक्शी, ५ ओटा सांड, ५ ओटा बोका नु ५ ओटा बर्स का गाप्शो पाठा चाक्तु। मेको हेलोन आ तौ एलीआब आ चढेतीक बाक्त।

30 मिनू मेको आ सांबु नाक्ती रूबेन आ थर डा मुर आन ठेयब मुर शेदेउर आ तौ एली-सुरमी आ चढेतीक चाक्तु।

31 मिनू मार चाक्तु देशा हना, सहे का ३० शेकेल डा चांदी के थाल का नु ७० शेकेल डा चांदी के बोस का चाक्तु। मेको शेकेल गुम्टीक ताम्बु डा शेकेल खोदेशो बाक्तेकम। मेको थाल नु बोस निम्फामी तेलम निशो रिम्शो फसीम प्रिंशो बाक्ताक्स। मेको अन्न चढेतीके बाक्त। ताम्बु डा शेकेल का १२ ग्राम चांदी बाक्ब।

32 मिनू १० शेकेल डा धूपम ब्रीशो सुन के आइक्च बोस का,

33 चोशा चढेचा कली ब्यफ का, सांड का नु बर्स का गाप्शो पाठा का चाक्तु।

34 पाप आ पर्वम चढेचा कली बोका का,

35 दुशा बाक्चा आ पर्वम चढेचा कली ब्यफ निक्शी, ५ ओटा सांड, ५ ओटा बोका नु ५ ओटा बर्स का गाप्शो पाठा चाक्तु। मेको शेदेउर आ तौ एली-सुर आ चढेतीक बाक्त।

36 मिनू मेको आ नोले डा नाक्ती सिमियोन आ थर डा मुर आन ठेयब मुर सुरी-शदै आ तौ शेलुमीएलमी आ चढेतीक चाक्तु।

37 मिनू मार चाक्तु देशा हना, सहे का ३० शेकेल डा चांदी के थाल का नु ७० शेकेल डा चांदी के बोस का चाक्तु। मेको शेकेल गुम्टीक ताम्बु डा शेकेल खोदेशो बाक्तेकम। मेको थाल नु बोस निम्फामी तेलम निशो रिम्शो फसीम प्रिंशो बाक्ताक्स। मेको अन्न चढेतीके बाक्त।

38 मिनू १० शेकेल डा धूपम ब्रीशो सुन के आइक्च बोस का,

39 चोशा चढेचा कली ब्यफ का, सांड का नु बर्स का गाप्शो पाठा का चाक्तु।

40 पाप आ पर्वम चढेचा कली बोका का,

41 दुशा बाक्चा आ पर्वम चढेचा कली ब्यफ निक्शी, ५ ओटा सांड, ५ ओटा बोका नु ५ ओटा बर्स का गाप्शो पाठा चाक्तु। मेको सुरी-शदै आ तौ शेलुमीएल आ चढेतीक बाक्त।

42 मिनू मेको आ नोले डा नाक्ती गाद आ थर डा मुर आन ठेयब मुर दूएल आ तौ एली-आसाफमी आ चढेतीक चाक्तु।

43 मिनू मार चाक्तु देशा हना, सहे का ३० शेकेल डा चांदी के थाल का नु ७० शेकेल डा चांदी के बोस का चाक्तु। मेको शेकेल गुम्टीक ताम्बु डा शेकेल खोदेशो बाक्तेकम। मेको थाल नु बोस निम्फामी तेलम निशो रिम्शो फसीम प्रिंशो बाक्ताक्स। मेको अन्न चढेतीके बाक्त।



78 मिनू मेको आ नेल्ल क्येडा नोले डा नाक्ती नाप्ताली आ थर डा मुर आन ठेयब मुर एनान आ तौ अहीरामी आ चढेतीक चाकतु।

79 मिनू मार चाकतु देशा हना, सहे का ३० शेकेल डा चांदी के थाल का नु ७० शेकेल डा चांदी के बोस का चाकतु। मेको शेकेल गुम्टीक ताम्बु डा शेकेल खोदेशो बाक्तेकम। मेको थाल नु बोस निम्फामी तेलम निशो रिम्शो फसम प्रिंशो बाक्ताक्स। मेको अन्न चढेतीके बाक्त।

80 मिनू १० शेकेल डा धूपम ब्रीशो सुन के आडक्च बोस का,

81 चोशा चढेचा कली ब्यफ का, सांड का नु बर्स का गाप्शो पाटा का चाकतु।

82 पाप आ पबर्म चढेचा कली बोका का,

83 दुशा बाक्चा आ पबर्म चढेचा कली ब्यफ निक्शी, ५ ओटा सांड, ५ ओटा बोका नु ५ ओटा बर्स का गाप्शो पाटा चाकतु। मेको एनान आ तौ अहीरा आ चढेतीक बाक्त।

84 मिनू परमप्रभु यावे आ गेय पचा कली चोइशो चढेतीक कली तेल बुडक्तीक नाक्ती इस्राएल आ थर थर डा मुर आन ठेयब मुर आन चढेशो मार बाक्तेकम देशा हना, १२ ओटा चांदी के थाल, १२ ओटा चांदी के बोस नु १२ ओटा सुन के आडक्च बोस बाक्तेकम।

85 मेको चांदी के थाल का का पा सहे का ३० शेकेल हेल्लो बाक्तेकम। मेको चांदी के बोस का का पा ७० शेकेल हेल्लो बाक्तेकम। मेको चांदी के ग्योब नेल्ल नाक्शोनु, गुम्टीक ताम्बु डा शेकेल खोदेशो पा हजार निक्शी ४ सहे शेकेल हेल्लो बाक्त।

86 मिनू मेको १२ ओटा धूपमी ब्रीशो सुन के आडक्च बोस का का पा गुम्टीक ताम्बु डा शेकेल खोदेशो पा १०, १० शेकेल हेल्लो बाक्तेकम। मेको सुन नेल्ल नाक्शोनु, सहे का २० शेकेल हेल्लो बाक्त।

87 मिनू बी ब्यफ, क्यारश भेडा रे चोशा चढेचा कली १२ ओटा ब्यफ, १२ ओटा सांड, १२ ओटा बर्स का गाप्शो पाटा नु मेकोपुकी नु गारचा डा पा अन्न चढेतीके बाक्तेकम। मिनू पाप आ पबर्म चढेचा कली १२ ओटा बोका बाक्तेकम।

88 मिनू बी ब्यफ, क्यारश भेडा रे दुशा बाक्चा आ पबर्म चढेचा कली २४ ओटा ब्यफ, ६० ओटा सांड, ६० ओटा बोका नु ६० ओटा बर्स का गाप्शो पाटा बाक्तेकम। मेको परमप्रभु यावे आ गेय पचा कली ला मेको चढेतीक कली तेल बुडक्तीक नाक्ती आ नोले चढेशो बाक्तेकम।

89 मिनू मोसा परमप्रभु यावे नु लोत्र पचा कली गुम्टीक ताम्बुम ओत्रमेनु, मेकोमी कबल पशो सन्दोस मुम्शो शिशी बाक्तीके, करुब निक्शी आस दाते इर रे लोत्र पशो नेंतु। मोपा मेकोमी मोसा नु लोत्र पाप्तु। प्रस्थान २५:१७-२२; प्रस्थान २९:४२; प्रस्थान ३३:७; १सामुएल ३:३-१४

## 8

बत्ती दातीक वोइशो

1 मिनू परमप्रभु यावेमी मोसा कली

2 “गे हारून कली ‘गे मेको बत्ती चोदीनु, मेको ७ ओटा बत्ती दातीक आ डोंइती गे ब्रपतो’ देनो” दैत।

3 मिनू हारूनमी मो पाप्तु। परमप्रभु यावेमी मोसा कली अरेशो खोदेशो पा दातीक आ डोंइती गे ब्रपाइकतु। प्रस्थान २५:९, ३१-४०

4 मिनू बत्ती दातीके दोपा सेल्लो बाक्त देशा हना, मेको सुन के तुप्शा सेल्लो बाक्त। मेको उइ रे इर सम्म तुप्शा सेल्लो बाक्त। मिनू परमप्रभु यावेमी मोसा कली कोंइशो खोदेशो पा, हारूनमी मेको बत्ती दातीक सेल्लु।

लेवी आ मुर परमप्रभु के दुम्शो

5 परमप्रभु यावेमी मोसा कली

6 “इसाएली आन दाते रे लेवी आन कली चाक्शा, मेको आन कली चोत्रखो सेलमी।

7 मेको आन कली मार पचा माल्नेवे देशा हना, मेको आन तारी चोत्रखो सेल्लीक ब्वाक्कु बुडक्तीमी। मिनू मेकोपुकीमी आन र डा चां नेल्ल प्रेक्शा, आन वा मुरशा, चिक्सीशा ग्रॉग्रा मदिशो सेल्लसीचा माल्नीम। गन्ती १९:९, १७; लेवी १४:८

8 मिनू नोले मेकोपुकीमी ब्यफ का नु तेलम निशो रिम्शो फस अन्न चढेतीके चाक्चा माल्नीम। गे चहिं पाप आ पबर्म चढेचा कली ब्यफ का चाक्को।

9 मिनू गे लेवी आन कली गुम्टीक ताम्बु आ डोंइती चाक्शा, इस्राएली नेल्ल आन कली गुम्पाइकमी।

10 मिनू गे लेवी आन कली परमप्रभु यावे आ डोंइती चाक्गीनु, इस्राएली नेल्लेमी आन गुइ लेवी आन तार चोइक्चा माल्नीम।

11 मिनू हारूनमी लेवी आ मुर आन कली परमप्रभु यावे आ गेय पचा कली मेको आ डोंइती क्युकशा चढेशो खोदेशो पा वोइक्चा माल्ब। प्रस्थान २९:२४

12 मिनू लेवी आ मुरपुकीमी आन गुइ मेको ब्यफ आस पिया तार चोइक्चा माल्नीम। मिनू हारूनमी लेवी आ मुर आन पबर्म पाप क्याम्तीक गेय पचा कली ब्यफ का पाप आ पबर्म चढेतीके नु अर्को चोशा चढेतीके परमप्रभु यावे कली चढेचा माल्ब।

13 मिनू मेको नोले गे लेवी आ मुर आन कली हारून नु आ तौ आन डोंइती राप्पा, परमप्रभु यावे कली क्युकशा चढेतीक खोदेशो पा वोइक्चा माल्नेवे।

14 मोपा गे लेवी आ मुर आन कली अरु इस्राएली रे तिल्ला माल्नेवे। मिनू लेवी आ मुर आं के दुम्नीम। गन्ती ३:४५

15 मिनू गे लेवी आ मुर आन कली ग्रॉग्रा मदिशो सेल्शा, मेको आन कली क्युकशा चढेतीक खोदेशो पा वोडकमी नोले मेकोपुकीमी गुन्तीक ताम्बुमी गेय पने चापनीम।

16 मिनू मेकोपुकी इस्राएली आन दाते रे थमा पा आं कली तिल्शो बाक्नीम। गो मेको आन कली इस्राएली आन नेल्ल क्येडा डोंइती जरमेशो तौ आन पा डा आं कली वोडक्तामी। गन्ती ३:१२-१३

17 मिनू इस्राएली आन दातेम मुर बाक्तेकम हना यो, बी ब्यफ, क्यारश भेडा बाक्तेकम हना यो, डोंइती जरमेशो नेल्ल आं के बाक्नीम। इजीप्ती आन नेल्ल क्येडा डोंइती जरमेशो तौ नेल्ल आन कली सदुमी नाक्त रे गो मेको आन कली आं कली तिल्शा वोडसाक्यी। प्रस्थान १३:२

18 मिनू इस्राएली आन डोंइती जरमेशो आन पा डा गो लेवी आ मुर तिल्शा वोडसाक्यी।

19 मिनू गो इस्राएली आन दाते रे लेवी आ मुर आन कली हारून नु आ तौ आन कली गेतामी। मार कली गेतामी दैशा हना, इस्राएली आन पर्वम गुन्तीक ताम्बुमी गेय पचा कली इस्राएली आन पर्वम पाप क्याम्तीक गेय पचा कली नु इस्राएलीपुकी गुन्तीक ताम्बु आ नेकथा मजाकमल नु मुर बेक्तीक रोडम मबेकम, दे गेतामी” दे परमप्रभु यावेमी मोसा कली दैत। गन्ती ३:९; गन्ती १:५३

20 मिनू मोसा, हारून नु इस्राएल डा मुर नेल्लेमी लेवी आ मुर आन पर्वम परमप्रभु यावेमी मोसा कली अरेशो खोदेशो पा पाम्तेकम।

21 मिनू लेवी आ मुरपुकीमी आंम आन पाप रे ग्रॉग्रा मदिशो सेल्सीशा आन वा मुरतेकम। मिनू नोले हारूनमी मेको आन कली क्युकशा चढेतीक खोदेशो पा परमप्रभु यावे आ डोंइती वोडक्तीमी। मिनू हारूनमी मेको आन कली पाप क्याम्तीक गेय पा ग्रॉग्रा मदिशो सेल्तीमी।

22 मिनू मेको नोले लेवी आ मुरपुकीमी हारून नु आ तौ आन कली वारच पा गुन्तीक ताम्बु डा गेय पाम्तेकम। मिनू परमप्रभु यावेमी मोसा कली लेवी आ मुर आन पर्वम अरेशो खोदेशो पा मेकोपुकीमी पाम्तेकम।

23 मिनू परमप्रभु यावेमी मोसा कली

24 “एको लोत्र २५ बर्स गाप्शो नु मेको क्येडा लाकशो लेवी आ मुर आन पर्वम बाक्ब। मिनू मेकोपुकी गुन्तीक ताम्बुमी गेय पचा गोचा माल्नीम। गन्ती ४:३, २३, ३०, ४७; १इतिहास २३:३, २४

25 मिनू मेकोपुकी ५० बर्स लाकगमेनु, गेय पचा प्रोन्मेकल।

26 मिनू मेकोपुकी गुन्तीक ताम्बुमी गेय पाडब आन लोकब आन कली वारच पदमेकल। तन्न आंमा चहिं गेय मपामेकल। गे लेवी आ मुर आन कली मोदेशो पा गेय पपाडक्चा माल्नेवे” दैत।

## 9

पास्सा चाड

प्रस्थान १२:-; लेवी २५:५-८

1 मिनू परमप्रभु यावेमी इस्राएलीपुकी इजीप्तर रे जाक्मा आ बर्स निक्शी नोले डोंइती डा महिनाम सीने डा गोरशो रागीमी मोसा कली

2 “गे इस्राएलीपुकीमी आं देशो नाक्ती पास्सा चाड मानेचा माल्नीनी।

3 मेको महिना डा १४ नाक्त डा नाक्नाक्दो मेको चाड मानेचा माल्नीनी। गेपुकीमी मेको आ पर्वम फुल्लुम मुशा ब्रेकशो लोत्र नु शेशो पतीके नेल्लेमी मानेचा माल्नीनी” दैत।

4 मिनू मोसामी इस्राएली आन कली “पास्सा चाड मानेचा माल्नीनी” दे अरेप्टु।

5 मिनू मेकोपुकीमी डोंइती डा महिना डा १४ नाक्ती डा नाक्नाक्दो सीने डा गोरशो रागीमी पास्सा चाड मानेक्तेकम। परमप्रभु यावेमी मोसा कली अरेशो खोदेशो पा इस्राएलीपुकीमी पाम्तेकम।

6 मिनू मेकेर मुर का निक्शी बेक्शो मुर थिशा, ग्रॉग्रा दिशो दुम्शो बाक्तेकम। मोपा मेकोपुकीमी मेको नाक्ती मेको पास्सा चाड मानेचा मतामे। मेकोपुकी मेको नाक्ती मोसा नु हारून आस डोंइती जाक्तेकम। गन्ती १९:११

7 मिनू मेको मुरपुकीमी “गो बेक्शो मुर थिशा ग्रॉग्रा दिशो दुम्शो बाक्तेक हना यो, मारदे मेको देशो नाक्ती गोपुकीमी इस्राएली आन दातेमी आंइ परमप्रभु यावे कली चढेतीके चढेचा मताइनीकी?” दैतेकम।

8 मिनू मोसाम मेको आन कली “रिम्दीन, परमप्रभु यावेमी इन पर्वम मार देबा, गो मेको नेंचा माल्नुड” दैत।

9 मिनू परमप्रभु यावेमी मोसा कली

10 “गे इस्राएली आन कली ‘सुड इन दातेमी नु इन चच युड आन दातेमी बेक्शो मुर थिशा ग्रॉग्रा दिशो दुम्शो बाक्तेक हना यो, डोन लत हना यो, मेकोमी परमप्रभु यावे कली पास्सा चाड मानेचा माल्ब।

11 मेकोपुकीमी महिना निक्शी डा १४ नाक्ती नाक्नाक्दो मेको मानेचा माल्नीम। मिनू मेकोपुकीमी मेको पाठा कली बोरब ओरुती मसुप्शो शोब्ले, कशो खाड नु ब्वचा माल्नीम।

12 मिनू मेको आ दीसा सुनी सम्म मारेड हेंचा मदुम्ब। मिनू मेको आ रुश का यो जिक्चा मदुम्ब। मिनू पास्सा चाड आ पर्वम फुल्लुम मुशा, मार ब्रेकशो बाक्मे, मेको पचा माल्नीम।

13 तन्न तेको मुर ग्रॉग्रा दिशो मदुम्शो बाक्बा, डोन यो मलशो बाक्बा, मेकोमी पास्सा चाड ममानेप्टु हना, मेको मुर आ मुर आन दाते रे तिल्चा पुंडसीब। मारदे हना मेकोमी आ देशो नाक्ती परमप्रभु यावे कली चढेतीक मचढेवो। मेको मुर आ पाप राडब।

14 मिनू इन दातेमी बाकशो अर्को रागी डा मुरुमी परमप्रभु यावे कली पास्सा चाड मानेचा दाकताकव हना, मेकोमी मेको आ पर्वम ब्रेकशो नेल्ल शेंशो पतीक खोदेशो पा पचा माल्ब। मिनू अर्को रागी डा मुर नु इन मुर नेल्ल आन कली पास्सा चाड आ पर्वम ब्रेकशो लोत्र का दुम्या माल्ब' दैनु" दैत।

ताम्बु आ तार बाकशो गोस्स

15 मिनू गुम्टीक ताम्बु वोडक्ने थुम्यो नाक्ती गोस्सुमी मेको कबल पशो सन्दोस वोडशो ताम्बु सुम्तु। मेको नाक्नाकदो रे सुनी सम्म ताम्बु तारी बाक्त। मेको गोस्स मी खोदेशो तांडसीशो बाक्त। प्रस्थान ४०:३४-३५

16 मेको मोदेशो गेना हना यो दुम्यो बाक्त। गोस्सुमी मेको ताम्बु कली नाक्ती सुम्बाक्त। मिनू नाकदो मी खोदेशो दुम्बाक्त।

17 मिनू मेको गोस्स ताम्बु आ तार रे इर गे लमेनु, इस्राएलीपुकी गाक्चा गोम्तेकम। मिनू तेकेर मेको गोस्स जुक्ता, मेकेर इस्राएलीपुकीमी आन बाक्तीक सेल्लेकम। प्रस्थान ४०: ३६-३८

18 मिनू इस्राएलीपुकी परमप्रभु यावे आ अरेशोमी गाक्बाक्तेकम। मिनू परमप्रभु यावे आ अरेशोमी मेकोपुकीमी आन बाक्तीक सेल्बाक्तेकम। मिनू मेकोपुकी मेको गोस्स गुम्टीक ताम्बु तार बाकम सम्म मेकेर बाक्बाक्तेकम।

19 मेको गोस्स शुश नाक्त सम्म गुम्टीक ताम्बु तार बाक्त हना यो, इस्राएलीपुकी परमप्रभु यावे आ देशो टिशा मगाक्बाक्तेकम।

20 कोड नाक्ती मेको गोस्स गुम्टीक ताम्बु आ तार का निक्शी नाक्त सम्म ला बाक्बाक्त। मिनू मेकोपुकी परमप्रभु यावे आ अरेशो टिशा, बास बाक्बाक्तेकम। मिनू परमप्रभु यावे आ अरेशो खोदेशो पा गाक्बाक्तेकम।

21 कोड नाक्ती मेको गोस्स नाकदो रे सुनी सम्म ला बाक्बाक्त। मिनू सुनी गोस्स इर लमेनु, मेकोपुकी गाक्बाक्तेकम। नाक्ती बाक्त हना यो, नाकदो बाक्त हना यो, मेको गोस्स इर लत हना, मेकोपुकी गाक्बाक्तेकम।

22 मिनू मेको गोस्स नाक्त निक्शी, महिना का नु मेको क्येडा शुश नाक्त सम्म यो गुम्टीक ताम्बु तार बाक्त हना, इस्राएली आन बाक्तीकेमी बाक्बाक्तेकम। तन्न गोस्स इर गे लत हना, मेकोपुकी गाक्बाक्तेकम।

23 मिनू मेकोपुकी परमप्रभु यावेमी अरेशो खोदेशो पा आन बाक्तीक सेल्बाक्तेकम। मिनू परमप्रभु यावे आ अरेशो खोदेशो पा गाक्बाक्तेकम। मेकोपुकीमी परमप्रभु यावेमी मोसा कली अरेशो खोदेशो पा पाडबाक्तेकम।

## 10

चांदी के तुराही

1 परमप्रभु यावेमी मोसा कली

2 "गे चांदी के तुराही निक्शी सेलो। मेको तुप्शा, सेल्चा माल्नेवे। मिनू गे मेको ताप्शा, इस्राएली आन कली गुम्पाइक्चा माल्नेवे। मिनू गाक्ची ना दुम्मेनु, गे मेको ताप्चा माल्नेवे। गन्ती ३१:६

3 मेको निक्शी कालेम ताप्शोन, इस्राएली नेल्ल इ डोंइती गुम्टीक ताम्बु आ ओव्रतीकेमी जाक्शा बुक्चा माल्नीम।

4 तन्न का ला ताप्शोन, इस्राएली आन थर थर डा मुर आन ठेयब मुरपुकी इ डोंइती जाक्शा बुक्चा माल्नीम।

5 मिनू ठेयब सेंदामी ताप्शोन, पूर्व गे बाकशो मुरपुकी गाक्चा माल्नीम।

6 मिनू निक्शी खेयप ताप्शोन, दक्खिन गे बाकशो मुरपुकी गाक्चा माल्नीम। गाक्ची ना दुम्मेनु, गेना हना यो तुराही ताप्चा माल्नीम।

7 गे मुर आन कली गुम्पाइक्ची ना मेको ताप्चा माल्नेवे। तन्न मेको गाक्ची ना डा खोदेशो पा ताप्चा मदुम्ब।

8 मिनू हारून आ तौ चढेब निक्शीमी मेको तुराही ताप्चा माल्नीस। मेको इन कली नु इन चच युड आन कली गेना हना यो पतीके बाक्ब।

9 मिनू गे इन रागीमी इन कली दिक्ब जोरी सत्रुपुकी नु लडाइ पथ लनीनु, ठेयब सेंदामी तुराही ताप्चा माल्नीस। मो पाइतीनी हना, परमप्रभु यावे, इन परमप्रभुमी इन कली मिम्शा, इन जोरी सत्रु रे प्रोंडब। न्यायाधीस ६:३४

10 मिनू गेपुकी ग्येशा बाक्नीनु, गे इन पचा माल्लो चाड मानेनीनु, औसी डा चाड मानेनीनु, इन चोशा चढेतीके नु इन दुशा बाक्चा आ पर्वम चढेतीके चढेनीनु, गेपुकीमी तुराही ताप्चा माल्नीनी। मिनू मेको ताप्नीनु, इन परमप्रभुमी इन कली मिम्ब। गो परमप्रभु यावे, इन परमप्रभु नड" दैत। लेवी २३:२४; २राजा ११:१४; २इतिहास ७:६

इस्राएली सैनै डांडा रे गाक्शो

11 मिनू बर्स निक्शी, महिना निक्शी डा २० नाक्ती मेको गोस्स परमप्रभु यावे आ कबल पशो सन्दोस बाकशो ताम्बु रे इर लत। गन्ती १:१

12 मिनू नोले इस्राएलीपुकी सैनै डा गोरशो रागी रे हुल हुल पा गाक्तेकम। मिनू मेको गोस्स पारान डा गोरशो रागीम नांडसाक्व।

13 मिनू परमप्रभु यावेमी मोसा कली अरेशो खोदेशो पा टिशा, मेकोपुकी गाक्तेकम। गन्ती २:-

14 नेल्ल क्येडा डोंइती यहूदा आ बाक्तीक डा मुर हुल हुल पा आन छेदर कुरशा गाक्तेकम। मेको आन ठेयब मुर अम्मीनादाब आ तौ नहशोन बाक्त।

15 मिनू इस्साकार आ बाक्तीक डा मुर आन ठेयब मुर सुआर आ तौ नेथनेल बाक्त।

16 मिनू जबूलून आ बाक्तीक डा मुर आन ठेयब मुर हेलोन आ तौ एलीआब बाक्त।

17 मिनू नोले गुम्टीक ताम्बु पोक्शा, गेरशोन आ मुरपुकी नु मेरारी आ मुरपुकीमी मेको कुरशा, गाक्तेकम।

- 18 मिनु मेको आन नोले रूबेन आ बाक्तीक डा मुरपुकी हुल हुल पा आन छेदर कुरशा गाक्तेकम। मेको आन ठेयब मुर शेदेउर आ तौ एली-सुर बाक्त।
- 19 मिनु सिमियोन आ बाक्तीक डा मुर आन ठेयब मुर सुरी-शदै आ तौ शेलुमीएल बाक्त।
- 20 मिनु गाद आ बाक्तीक डा मुर आन ठेयब मुर दूएल आ तौ एली-आसाफ बाक्त।
- 21 मिनु कोहाथीपुकी परमप्रभु यावे आ ताम्बु डा मार मार कुरशा, गाक्तेकम। मेको आन जाक्चा क्येडा डोंइती मेको गुम्तीक ताम्बु सेलेने थुम्शो बाक्चा माल्बाक्त।
- 22 मेको नोले एफ्राइम आ बाक्तीक डा मुरपुकी हुल हुल पा आन छेदर कुरशा गाक्तेकम। मेको आन ठेयब मुर अम्मीहुद आ तौ एली-शामा बाक्त।
- 23 मिनु मनस्से आ बाक्तीक डा मुर आन ठेयब मुर पेदा-सुर आ तौ गमालीएल बाक्त।
- 24 मिनु बेन्यामीन आ बाक्तीक डा मुर आन ठेयब मुर गिदेओनी आ तौ आबी-दान बाक्त।
- 25 मिनु नेल्ल आन क्येडा नोले दान आ बाक्तीक डा मुर हुल हुल पा आन छेदर कुरशा, गाक्तेकम। मेको आन ठेयब मुर अम्मी-शदै आ तौ अही-एजेर बाक्त।
- 26 मिनु आशेर आ बाक्तीक डा मुर आन ठेयब मुर ओक्रान आ तौ पगीएल बाक्त।
- 27 मिनु नाप्ताली आ बाक्तीक डा मुर आन ठेयब मुर एनान आ तौ अहीरा बाक्त।
- 28 मोपा इस्राएली आन हुल हुल पा गाक्चा माल्शो बाक्तेकम।

मोसामी आ शिउ आ तौ कली गुम्शो

- 29 मिनु मोसामी मिदयान डा रूएल आ तौ होबाब, आ रिउ कली “परमप्रभु यावेमी आंड कली गेशो रागी लना लन बाक्नीकी। गे यो गोपुकी नु पिने। गो इन कली रिम्शो पाइक्नीकी। मारदे हना परमप्रभु यावेमी ‘इसाएली आन कली रिम्शो पाइनुड’ दैत” दे मोसामी दैत। प्रस्थान २:१८; प्रस्थान १८:१; न्यायाधीस १:१६; न्यायाधीस ४:११
- 30 होबाबमी “गो मलाइकुण्ड। गो आं रागी नु आं मुर आन बाक्तीके लेल्लुड” दैत।
- 31 मिनु मोसामी “आंड कली मप्रोनीन। मारदे हना मेको गोरशो रागीमी ते ताम्बु कीचा मेको तुइक्नीनी। मिनु गे आंड कली लां कौइब दुम्नीनी।
- 32 गे गोपुकी नु गाक्तीनी हना, परमप्रभु यावेमी आंड कली मार मार रिम्शो पाइबा, गो मेको खोदेशो पा इन कली पाइनीकी” दैत।
- 33 मिनु मेकोपुकी परमप्रभु यावे आ डांडा रे नाक्त सां सम्म गाक्तेकम। परमप्रभु यावे आ कबल पशो सन्दोस कुरबपुकी मेको आन कली बास बाक्तीक माल्चा, दे मेको आन डोंइडोंइती गाक्तेकम।
- 34 मिनु परमप्रभु यावे आ गोस्स मेको आन गाक्ची ना मेको आन तार बाक्त। प्रस्थान १३:२१; गन्ती १:१५-२३
- 35 मिनु कुरबपुकीमी मेको कबल पशो सन्दोस कुरशा गाक्मानु, गेना हना यो मोसामी “परमप्रभु यावे, बोक्कीन। इन जोरी सत्रु एर ओथ ब्रामल। मिनु इन जोरी सत्रु इन क्येडा प्रोक्मल” दैबाक्त। २इतिहास ६:४१; भजन संग्रह ३:८; भजन संग्रह १:२०; भजन संग्रह १०:१२; भजन संग्रह १७:१३; भजन संग्रह ६८:२; भजन संग्रह १३२:८
- 36 मिनु मेको कबल पशो सन्दोस नाइक्तेमेनु, मेकोमी “परमप्रभु यावे, गे हजार, हजार इस्राएली आन दातेमी लेशशा, जाक्कीन” दैबाक्त।

## 11

इसाएलीपुकीमी गन गन पशो

- 1 मिनु परमप्रभु यावेमी मुर आन श्येत जशो आ परबम गन गन पशो नैतु। परमप्रभु यावेमी मेको नैशा, शुश गाइक्ताक्व। मिनु परमप्रभु यावे गाइशशा, मुर आन बाक्तीके गे मी सोइशशा, एर सुर मीम नेक्पाइक्तु। लेवी १०:२
- 2 मिनु मुरपुकीमी मोसा कली “वारच पने” दे ग्रीतेकम। मिनु मोसामी परमप्रभु यावे कली पुंडतु। मिनु मेको मी काप्त।
- 3 मिनु परमप्रभु यावेमी मेको आन दातेमी मी सोइक्तीके, मेको बाक्तीके आ नें तबेरा वोइक्तेकम।
- 4 मिनु मेको आन दातेमी बाक्शो अर्को रागी डा मुरपुकीमी मार मार जचा थोव्रक जचा ब्वचा दाक्तेकम। मिनु इस्राएली यो लेंशा डाक्शा “गोपुकीमी श्ये ब्वचा तक हना, दुम वा। प्रस्थान १२:३८; प्रस्थान १६:३; १कोरिन्थी १०:६
- 5 गो इजीप्तीमी मो ब्वशो डांड श्ये मिम्नीकी। मिनु वोबीस, खाइपुकी, प्याज नु लसुन यो मिम्नीकी।
- 6 तन्न गो मुल ओले पते दुम्शा, एको मन्ना डा लाक्शा मारेइ मथित्नीकी” दैतेकम।
- 7 मन्ना चहिं धन्या वांचेर खोदेशो बाक्त। मेको कोव्रशोन, खोटो खोदेशो तांडसीबाक्त। प्रस्थान १६:१४-३१
- 8 मिनु मुरपुकी लशा, मेको खुप्शा, कोइमी हिल्ला, कोइमी चुशा, कौइमी नेल्ला, कौइम बटुक सेल्ला जाम्तेकम। मिनु मेको तेलम चोशो शोब्ले खोदेशो पा ब्रोव्रबाक्त।
- 9 मिनु नाक्दो आन बाक्तीकेमी सीत यिमेनु, मन्ना यो यीबाक्त।
- 10 मिनु मोसामी मुर नेल्ल आन आन ताम्बु डा ओवतीकेमी राप्शा डाक्शो ताप्तु। मिनु मुरपुकीमी परमप्रभु यावे कली शुश गाइक्पाइक्तीके, मोसामी मेको आन पशो काड मदाक्शो बाक्त।
- 11 मिनु मोसामी परमप्रभु यावे कली “गे मारदे आं कली श्येत गेयीनी? मारदे गो इन डोंइती शिशी मतडा? मारदे आं कली इश डा मुर आन कली कोव्रब सेल्यनीनी?
- 12 मार, एको इश डा मुर आं आल नमी डा? मार, गो मेको आन कली थिडमी डा? गे आं कली ‘दूध तूब आल कली आ आममी कुरशा लाइशशो खोदेशो पा, आंड किकी पिपी आन कली इन गेशो रागीमी कुरशा लावो’ दैनीनी।

13 गो इश डा मुर आन ब्वतीक श्ये ते थित्नुड डा? मिनु मेकोपुकीमी आं कली 'श्ये ब्वचा गेकी' दे जाक्शा डाक्तेकम।  
 14 गो इश डा मुर आन कली खुल्ले मचापुनुड। एको आं मचाप्या डा गेय बाक्ब।  
 15 मिनु गे आं कली ओदेशो पाइक्तीनी। मिनु गो इन शिशी ताता हना, साइय्नीनी। मिनु गो आं खतम दुम्तीके तया ममाल्नुड" देत। प्रस्थान ३२:३२

16 मिनु परमप्रभु यावेमी मोसा कली "गे इस्राएली आन दाते रे ७० जना खाल्पा आन कली खुप्तीमी। मेको आन मुर आन दाते डा ठेयब मुर नु मेको आन कली सासन पाइब मुर दुम्चा माल्नीम। मिनु गे मेको आन कली तुडक्चा माल्नेवे। मिनु मेको आन कली युम्तीक ताम्बुमी चाक्मी। मिनु मेकोपुकी गे नु बाक्चा माल्नीम। प्रस्थान १८:२१-२६; प्रस्थान २४:९-११

17 मिनु गो यिशा, गे नु लोत्र पाइनुड। मिनु गो इ आगामी बाक्शो सोक्त रे लाइशशा, मेको आन तारी वोइक्नुड। मिनु मेकोपुकीमी गे नु गारशा, मेको मुर आन श्येत कुरनीम। मिनु गे का ला कुरचा ममाल्नेवे।

18 मिनु गे मुर आन कली 'गे दीसा कली ग्रॉग्रा मदिशो दुम्शा, ठीक दुमीन। गेपुकीमी श्ये ब्वचा ताइनीनी। मारदे हना गेपुकीमी परमप्रभु यावे आ डोंइती श्ये ब्वचा तक हना, रिम्शो दुम वा, दे डाक्शो बाक्तीनी। आंइ कली एको रागी क्येडा इजीप्तमी रिम्शो बाक्त' देतीनी। मोपतीके परमप्रभु यावेमी इन कली श्ये ब्वचा गेब। मिनु गे मेको ब्वाइनीनी। प्रस्थान १९:१०

19 मिनु नाक्त का, नाक्त निक्शी ५ नाक्ती, १० नाक्ती नु २० नाक्त ला ममाड,  
 20 गेपुकीमी ब्रीचा डा पा महिना का सम्म श्ये ब्वचा ताइनीनी। मारदे हना गेपुकीमी आंम इन दातेम बाक्शो परमप्रभु यावे कली मटिनी। मिनु गे मेको आ डोंइती 'गो मारदे इजीप्त रे यूशा गाक्का?' दे डाक्तीनी" देत।

21 मिनु मोसामी "गो नु लां गाक्ब मुर ६ लाख बाक्नीम। मो हना यो, गे 'मेको आन कली महिना का सम्म श्ये ब्वचा गेनुडमी' देतीनी।

22 मार, बी ब्यफ, क्यारश भेडा नेल्ल क्योरशा हना यो, एको इश डा मुर आन कली गाप्बा डा? समुन्द्र डा डांइ नेल्ल रेशशा हना यो, नेल्ल आन कली गाप्बा डा?" देत।

23 मिनु परमप्रभु यावेमी मोसा कली "मार, आं सक्ति ग्युम्शो बाक्बा डा? आं देशो लोत्र गाप्बाकम कों मगाप्बाकमे, तुडक्नेवे" देत। यसैया ५०:२; यसैया ५९:१

24 मोपतीके मोसा लाडगा यूशा, मुर नेल्ल आन कली परमप्रभु यावे आ देशो लोत्र नेंपाइक्तीमी। मिनु मेको मुर आन दाते डा ७० जना खाल्पा आन कली ताम्बु आ एर ओंथ राप्पाइक्मी।

25 मिनु नोले परमप्रभु यावे गोस्सुमी उइ आगा तोइशशा, मोसा नु लोत्र पाप्टु। मिनु मेकोमी मोसा आ आगा बाक्शो सोक्त इक्का लाइशशा, मेको ७० जना खाल्पा आन तार वोइक्नु। मिनु मेको सोक्त मेको आन तार नांइसेनु, मेकोपुकीमी परमप्रभु यावे आ लोत्र पाप्तेकम। तन्न नोनोले मो मपाम।

26 मिनु ७० जना खाल्पा आन दातेमी एल्दाद नु मेदाद माइशशा मुर निक्शी बाक्ताकस। मेको आस नें यो ब्रेक्शो बाक्त। तन्न मेको निक्शी युम्तीक ताम्बुम मलसा बाक्त। मिनु परमप्रभु यावे आ सोक्त मेको आस तार यो नांइसे बाक्त। मिनु मेको निक्शीमी मुर आन बाक्तीकेमी परमप्रभु यावे आ लोत्र पाप्से बाक्त।

27 मिनु वोइश मुर का दौरशा जाक्शा, मोसा कली "एल्दाद नु मेदादमी मुर आन बाक्तीकेमी परमप्रभु यावे आ लोत्र पाप्ताकस" देत।

28 मिनु नून आ तौ यहोसु मोसा कली वारच पाइब बाक्त। मेको मोसा आ योव्रशो मुरुमी मोसा कली "हजुर, आं होव्रप मेको आस कली तेक्कीन" देत। गन्ती १३:१६; प्रस्थान २४:१३

29 तन्न मोसामी मेको कली "मार, आं पर्वम गे ईख पाइब दुमे? परमप्रभु यावेमी आ सोक्त आ मुर नेल्ल आन तार वोइशशा, मेको नेल्ल परमप्रभु यावे आ लोत्र पाइब दुम हना, गिश रिम्शो दुम वा" देत। योएल ३:१; मकूस ९:३८-३९

30 मिनु मोसा नु इस्राएली खाल्पा मुर आन बाक्तीके लेत्तेकम।

इस्राएलीपुकीमी बटटाइ ब्वशो

31 मिनु नोले परमप्रभु यावेमी फश पपाइक्नु। मिनु मेको फशेमी समुन्द्र रे बटटाइपुकी चाक्नु। मिनु मुर आन बाक्तीक आ एर ओंथ नेल्ल नाइक्पाइक्नु। काबु डा नाक्त डा लां सम्म कुबीत निक्निक्शी थॉइशो पा नांइसाकम। कुबीत का ०.५ मिटर खोदेशो बाक्ब। प्रस्थान १६:१३

32 मिनु मुरपुकीमी मेको नाक्त रे, नाक्दो रे नु आ दीसा नाक्त सम्म मेको ग्याइक्ताकम। नेल्ल क्येडा इक्का खोइ ग्याइक्बमी यो १० होमेर ग्याइक्ताकमे। मिनु मेकोपुकीम आन बाक्तीक एर ओंथ नेल्ल सोव्रपाइक्तेकम। होमेर का २२० लिटर रिक्ब पुक्तीके का बाक्ब।

33 तन्न मेकोपुकीमी श्ये ब्वना ब्वन परमप्रभु यावे मेको आन पर्वम शुश गाइक्ताकव। मिनु परमप्रभु यावेमी मेको आन कली थम ठेयब बेक्तीक रोइ पपाइक्तीमी।

34 मोपतीके मेको बाक्तीके आ नें किब्रोथ-हत्तावा वोइक्तेकम। मारदे हना मेकेर शुश वाल्ब मुर आन कली थिम्तेकम।

35 मिनु मुरपुकी किब्रोथ-हत्तावा रे पा गाक्शा, हसेरोथ गे लाप्तेकम।

## 12

हारून नु मिरयाम गाइशो

1 मिनु हसेरोथमी बाक्मानु, मोसामी कूश रागी डा मीश चाक्तीके मिरयाम नु हारूनमी मोसा कली मरिम्शो लोत्र पाप्ताकस। मारदे हना मेकोमी कूश रागी डा मीश ग्युबे पशो बाक्त। प्रस्थान २:२१



- 2 मिनू मेको निक्शीमी “मार, परमप्रभु यावेमी मोसा नु ला लोत्र पशो बाक्बा डा? मार, मेकोमी गोपुकी नु यो लोत्र मपशो बाक्बा डा?” देंताक्स। मिनू परमप्रभु यावेमी मेको लोत्र नेतु।
- 3 मोसा चहिं रागी डा मुर नेल्ले आन क्येडा ब्रेम्शो मुर बाक्त।
- 4 मिनू परमप्रभु यावेमी रीब पा मोसा, हारून नु मिरयाम आन कली “गे सांफा, युम्तीक ताम्बुम रे गूडीन” देंत। मिनू मेको सांफा गूतेक्म।
- 5 मिनू नोले परमप्रभु यावे गोस्स के थामम यिशा युम्तीक ताम्बु आ ओव्रतीक राप्शा, हारून नु मिरयाम आस कली ब्रेत्ताक्मसी। मिनू मेको निम्फा जाक्ताक्स। प्रस्थान १६:१०
- 6 मिनू मेकोमी “आं लोत्र नेनीन। गेपुकी इन दातेमी परमप्रभु यावे आ लोत्र पाइब बाक्त हना, गो मेको कली कौंइतीकेम तपांडसीनुड। गो मेको नु आ डोमुमी लोत्र पाइनुड।
- 7 तन्न आं गेय पाइब मोसा नु मोदेशो मपाइनुड। मेको आ गेय नेल्लेमी थमा सुइक्चा पुंडसीशो बाक्ब। हिबू ३:२
- 8 गो मेको नु कोव्रमुशा लोत्र पाइनुड। मिनू मेको नु रुप्चा डा लोत्र पा खुइश्शो लोत्र मपाइनुड। मिनू मेको आं नेक्था जाक्ने चाप्ब। मारदे गे आं गेय पाइब मोसा आ परबं मरिम्शो लोत्र पचा काइ महिशी?” देंत। प्रस्थान ३३:११; ब्यवस्था ३४:१०
- 9 मिनू परमप्रभु यावेमी मेको आस परबंम शुश गाइक्ताक्व। मिनू मेको गाक्त।
- 10 मिनू मेको गोस्स ताम्बु आ तार रे लमेनु, मिरयाम कोव्रर मुशा फुं खोदेशो बुश दुम्त। मिनू हारूनमी मिरयाम कली कोव्रडानु, मेको कोव्ररी दुम्ने थुम्शो बाक्त। ब्यवस्था २४:९
- 11 मिनू हारूनमी मोसा कली “आं प्रभु, गो मूर्ख दुम्शा, पाप पशो आ परबंम आंस कली सजाइ मगेने।
- 12 एको कली आ आम आ कोव्रज रे गूमेनु, आ रं फेके का राक्शो शाम्शो आल खोदेशो दुम्चा मगेने” देंत।
- 13 मिनू मोसामी परमप्रभु यावे कली “परमप्रभु, एको कली सापतीन” दे पुंडतु। प्रस्थान १५:२६
- 14 मिनू परमप्रभु यावेमी मोसा कली “मार, मेको आ आफोमी आ कुलुम तोक्शो हना, मेको ७ नाक्त सम्म मुने मदोक्बा डा? मेको कली ७ नाक्त सम्म मुर आन बाक्तीक क्येडा लाडगाम तिल्ला वोतो। मेको नोले ला लेशशा जाक्चा गेवो” देंत। गन्ती १३:४६
- 15 मिनू मिरयाम ७ नाक्त सम्म मुर आन बाक्तीक क्येडा लाडगाम तिल्ला वोइक्चा पुंडसाक्व। मिनू मिरयाम कली लेशशा मचाक्गमे सम्म मुरपुकी यो मगाक्म।
- 16 मिनू मेको आ नोले मेकोपुकी हसेरोथ रे गाक्शा, पारान डा गोरशो रागीम आन बाक्तीक सेल्लेक्म।

## 13

कनान रागी कली क्यारी पशो  
ब्यवस्था १:१९-२५

- 1 मिनू परमप्रभु यावेमी मोसा कली
- 2 “गे कनान रागी क्यारी पाइब मुरपुकी सोइक्तो। गो मेको रागी इस्राएली आन कली गेनुड। मेको आन थर थर रे पा मुर का का सोइक्तो। मेको आन मुर आन दाते डा ठेयब मुर दुम्चा माल्नीम” देंत।
- 3 मिनू परमप्रभु यावे आ देशो खोदेशो पा, मोसामी मेको क्यारी पाइब आन कली पारान डा गोरशो रागी रे सोइक्ताक्मी। मेको नेल्ले इस्राएली आन दाते डा ठेयब मुर बाक्तेक्म।
- 4 मिनू सु सु बाक्तेक्म देंशा हना, रूबेन आ थर रे जाक्कुर आ तौ शम्मुआ,
- 5 सिमियोन आ थर रे होरी आ तौ शाफात,
- 6 यहूदा आ थर रे यपुन्ने आ तौ कालेब, यहोसु १४:७
- 7 इस्साकार आ थर रे योसेफ आ तौ इगाल,
- 8 एफ्राइम आ थर रे नून आ तौ होशेआ, गन्ती १३:१६
- 9 बेन्यामीन आ थर रे रफु आ तौ पाल्ती,
- 10 जबूलून आ थर रे सोदी आ तौ गददीएल,
- 11 योसेफ आ तौ मनस्से आ थर रे सूसी आ तौ गाददी,
- 12 दान आ थर रे गेमल्ली आ तौ अम्मीएल,
- 13 आशेर आ थर रे मिकाएल आ तौ सेथुर,
- 14 नाफ्ताली आ थर रे वोफसी आ तौ नाहबी,
- 15 गाद आ थर रे माकी आ तौ गूएल बाक्तेक्म।
- 16 मिनू मोसामी मेको रागी कली क्यारी पथ सोइश्शो मुर आन नें एकोन बाक्नीम। मोसामी नून आ तौ होशेआ आ नें यहोसु वोइक्तु। गन्ती ११:२८; इइतिहास ७:२७
- 17 मोसामी मेको आन कली कनान रागी कली क्यारी पथ सोइक्ताक्मी। मिनू मोसामी मेको आन कली “गे एक रे लशा, नेगेब माइश्शो दक्खिन डा रागी रे पहाड गे लने।
- 18 मेको रागी दोदेशो बाक्म, मेकेर डा मुरपुकी बोल्यो बाक्मा कौं, मबाक्मा, शुश बाक्मा कौं, इक्का खोइ ला बाक्मा? मेको नेल्ल कोव्रडीन।
- 19 मिनू मेको आन रागी रिम्शो बाक्म कौं, मरिम्शो बाक्म? मिनू मेको आन सहर गारो हिरशो बाक्म कौं महिरशो बाक्म?

20 मिनू मेको रागी डा खप दोदेशो बाक्मे, मलिलो बाक्म कों, पाङकोक्च बाक्म? मेकेर रवापुकी बाक्मा कों, मबाक्मा? महिंब दुमीन। मिनू मेको रागी डा फल फुल चाक्कीन” दे माइक्तीमी। मेना डोंइती डा अङगुर मीची जाक्शो बाक्त।

21 मिनू मेकोपुकी ग्येत्थ लशा, जीन डा गोरशो रागी रे रेहोब सम्म मेको रागी क्यारी पाम्तेक्म। रेहोब लेबो-हमाथ आ नेक्था बाक्माक्त।

22 मिनू मेकोपुकी नेगेब गे ग्येत्थ लशा, हेब्रोन सहर जाक्दीम्मा बाक्त। मेकेर अनाक आ मुर अहीमान, शैशे नु तल्ले बाक्बाक्तेक्म। हेब्रोन चहिं इजीप्त डा सोआन सहर क्येडा ७ बर्स डोंइती सेल्शो बाक्त।

23 मिनू नोले एश्कोल डा दिममी जाक्दीत्तेक्म। मिनू मेकेर अङगुर सिश्शो राशी क्योरशा, मेको कोक्के कामी शुडश्शा मुर निक्शीमी कुरशा चाक्तेक्स। मेकोपुकीमी अनार नु फोत्रशी गेडा यो चाक्तेक्म।

24 मिनू मेको ठेयब अङगुर खोइक्तीके नोले मेको बेसी आ नें एश्कोल डा बेसी चोइक्तेक्म।

क्यारी पथ लाइब आन लोत्र

25 मिनू ४० नाक्ती नोले मेकोपुकीमी मेको रागी क्यारी पशा, लेत्तेक्म।

26 मिनू लेश्शा, मोसा, हारून नु इस्राएली नेल्ल आन बाक्तीके, पारान डा गोरशो रागी कादेशमी जाक्तेक्म। मिनू मेको क्यारी पाइबपुकीमी मोसा, हारून नु मुर नेल्ल आन कली आन तशो शेंताक्मे। मिनू मेको रागी डा फल फुल कोंइताक्मे। गन्ती २०:१; उत्पत्ती १६:१४; उत्पत्ती २०:१; ब्यवस्था १:१९,४६; यहोसु १४:६-७

27 मिनू मोसा कली “गोपुकी इन सोइश्शो रागीमी जाक्दीत्तक। मेको रागीम थमा पा दूध नु खुदो शुश बाक्ब। मिनू मेको रागी डा फल फुल एकोन बाक्नीम। प्रस्थान ३:८,१७

28 तन्न मेकेर बाक्ब मुरपुकी बोल्यो बाक्नीम। मिनू मेको आन सहरपुकी गारोम हिरशो नु थम ठेयब बाक्नीम। मिनू गोपुकीमी मेकेर अनाक आ मुर आन कली यो ताइतक।

29 मिनू अमालेक आ मुर नेगेब रागीम बाक्बाक्तेक्म। मिनू हित्ती, यबुसी नु एमोरी पहाडम बाक्बाक्तेक्म। मिनू कनानी ठेयब समुन्द्र आ नेक्था नु यर्दन खोला आ नेक्था बाक्बाक्तेक्म” देतेक्म।

30 मिनू कालेबमी मोसा आ डोंइती बाक्शो मुर आन थुं नाइक्पाइक्चा, दे मोसा कली “गोपुकी रीब पा लशा, मेको रागी इं के सेल्य। मारदे हना गो मेको थमा पा ग्राने चान्नय” देंत। गन्ती १४:६

31 मिनू नोले मेको नु लाइब मुरपुकीमी “गोपुकी मेको मुरपुकी नु लडाइ पथ लने मचान्नय। मारदे हना मेकोपुकी गो इं क्येडा शुश बोल्यो बाक्नीम” देतेक्म।

32 मोपा मेकोपुकीमी क्यारी पथ लतीक रागी आ पर्वम मरिश्शो लोत्र नेंपाइश्शा “गोपुकीमी क्यारी पथ लशो रागीमी आ मुर आन कली साइक्ब ताइतक। मिनू आंइ तशो मुरपुकी थम ठेयब बाक्नीम।

33 गोपुकीमी मेकेर नेफीलीमपुकी यो ताइतक। अनाक आ मुर नेफीलीम रे दुश्शो बाक्नीम। मिनू गो मेको आन कली तशा, गो आंमा माले खोदेशो तांइसाक्क। मिनू गो मेको आन डोंइती यो मोदेशान तांइसीनय” देतेक्म। ब्यवस्था १:२८; ब्यवस्था ९:२

## 14

इस्राएलीपुकीमी थमा मसुइश्शो

1 मिनू मेको नाक्दो मेको मुर नेल्ले वाइ ब्रेश्शा डाक्तेक्म। ब्यवस्था १:२६-४४

2 मिनू इस्राएली नेल्ल मोसा नु हारून आस पर्वम गन गन पाम्तेक्म। मिनू नेल्लेमी मेको आस कली “गोपुकी इजीप्त उइ बेक्शो नकी हना, रिश्शो दुम वा। एको गोरशो रागीम बेक्शो नकी हना यो, दुम वा। गन्ती ११:१; प्रस्थान १६:२-३; प्रस्थान १७:२-३

3 मारदे परमप्रभु यावेमी आंइ कली तरवारम साइक्पाइक्चा कली एको रागी चाक्गा? गो आंइ मीशपुकी नु आंइ आलपुकी रोइश्शा लाइक्नीम। गोपुकी इजीप्त रागी लेत्चा रिश्शो ममाइ डा?” देतेक्म। भजन संग्रह १०६:२४-२६

4 मिनू मेकोपुकी “मुल गो लां कोंइब मुर का योत्रशा, इजीप्त रागीम लेत्थ” देमुम्तेक्म।

5 मिनू मोसा नु हारून मेकेर बुक्शो इस्राएली नेल्ल आन डोंइती खुम्की पा बाप्ताक्स। गन्ती १६:४

6 मिनू मेको रागीम क्यारी पथ लाइब नून आ तौ यहोसु नु यपुन्ने आ तौ कालेबमी सुर्ता पा आस आस वा खाक्ताक्स। गन्ती १३:६,८,१६,३०

7 मिनू मेको निक्शीमी इस्राएली नेल्ल आन कली “गोपुकी आंइ क्यारी पथ लशो रागी थम रिश्शो बाक्ब।

8 परमप्रभु यावे गोपुकी इं कली तशा ग्येरसाक्व हना, मेकोमी इं कली मेको रागीम चाक्दीप्ब। मिनू मेको रागी दूध नु खुदो शुश बाक्शो रागी बाक्ब। मेको रागी इं कली गेब। गन्ती १३:२७

9 गोपुकी परमप्रभु यावे कली गन गन मपने। मिनू मेको रागी डा मुर आन क्येडा महिनीन। मारदे हना गो मेको आन कली शोब्ले खोदेशो पा नेक्नय। मेको आन कली प्रॉइब सुइ मबाक्नीम। परमप्रभु यावे गोपुकी नु बाक्ब। मेको आन क्येडा महिनीन” देंताक्स। गन्ती १३:३२

10 तन्न मुर नेल्लेमी मेको आस कली “फुल्लु आप्नीकी” दे हिंच कोंइताक्म। मेना परमप्रभु यावे आ छेडछेड इस्राएली नेल्ल आन कली युम्तीक ताम्बुम तपांइसाक्व। प्रस्थान १७:४; प्रस्थान १६:१०

11 मिनू परमप्रभु यावेमी मोसा कली “एको मुरपुकीम गेना सम्म आं कली मटीनीमी? एको आन दातेम आं कोंइशो चिन्ड तशा यो, गेना सम्म आं कली थमा मसुइक्नीमी?

12 गो मेको आन कली बेक्तीक रोइमी साइक्नुडमी। मेको आं मुर खोदेशो मबाक्नीम। मिनू गो इ रे मेको आन क्येडा शुश नु बोल्यो जात का सेल्लुडमी” देंत। प्रस्थान ३२:१०-१४

13 मिनू मोसामी परमप्रभु यावे कली “मोदेशो पाइतीनी हना, इजीप्ट डा मुरपुकीमी एको लोत्र नेंनीम। मारदे हना गे मेको आन कली इन सक्तिमी मेकेर रे गुंडताकनी।

14 एको रागी डा मुरपुकीम मेको आन कली नेंपाइकनीम। परमप्रभु यावे, गे इन मुर आन दातेम बाकशो बाकनीनी, दे मेकोपुकीमी देशो लोत्र नेंने थुम्शो बाकनीम। परमप्रभु यावे, गे मेको आन डोंडतीन तपांडसीशो बाकनीनी। मिनू इन गोस्स मेको आन तार बाकशो बाकब। मिनू गे नाकती गोस्स के थामम नु नाकदो मी के थामम बाकशा, मेको आन डोंडती गाकनीनी। प्रस्थान १३:२१-२२; गन्ती ९:१५-२३

15 मिनू मुल गे एको मुर आन कली कालेमी साइकतीनी हना, इन पशो नेंब रागी रागी डा मुरपुकीमी

16 ‘परमप्रभु यावेमी मेको आन कली गेनुड, दे कसम जशो रागीम चाकदीन्ने मचब। मोपतीके मेको आन कली गोरशो रागीम साइकतु’ देंनीम। ब्यवस्था ९:२८; यहोसु ७:८-९

17 मोपतीके, परमप्रभु, इन ठेयब सक्ति कोंडदीन। गे इन थोकशो पशो लोत्र खाप्पीन।

18 ‘परमप्रभु यावे रीब पा मगाइकब नु गेना हना यो दाकब, प्रस्थान ३४:६-७ मेकोमी मरिम्शो पशो नु टूली पशो क्याम्ब, तन्न दोस ताइब कली दोस मताइब मदेब। आन आम आफ आन पशो पाप मेको आन आल, चच, युइ नु युइ आन आल सम्म रपाइकब’ दे थोकशा लोत्र पशो बाकतीनी।

19 मिनू गे मेको मुर आन मरिम्शो पशो इन ठेयब नु गेना हना यो दाकतीकेमी क्याम्दीन। गे इन मुर आन कली इजीप्ट रे एक सम्म आन मरिम्शो पशो क्याम्शो खोदेशो पने” दे पुंडतु। प्रस्थान ३४:१०

20 मिनू परमप्रभु यावेमी “गे इ पुंडशो खोदेशो पा एको मुर आन मरिम्शो पशो क्याम्नुड।

21 मो हना यो गो थमा पा, रागी नेल्ले आं सक्तिमी प्रिनुड। प्रस्थान ९:१६

22 मेकोपुकीमी इजीप्टमी नु गोरशो रागीमी आं ठेयब सक्ति नु छक लाक्या डा गेय तशा यो, आं कली १० खेयप नाकशा, मटीब दुम्शा, मेको नेल्लेमी

23 मेको आन किकी पिपी आन कली कसम जशा ‘गेनुड’ देशो रागी ओत्रचा मताइनीम। मिनू आं कली काइ मदाकबपुकीम मेको रागी मताइनीम। भजन संग्रह ९५:११; हिब्रू ३:११,१७-१९

24 तन्न आं गेय पाइब कालेब आ थुमी अर्को सोकती बाकब। मिनू मेकोमी आ थुं नेल्लेमी आं कली टिशो बाकब। गो मेको कली आ क्यारी पथ लशो रागी चाकदीत्नुड। मिनू मेको आ तौ चच युइ आन रागी दुम्ब। यहोसु १४:६-९

25 मिनू अमालोक आ मुर नु कनानीपुकी बेसीम बाकतीके, गेपुकी दीसा लने। मिनू लल समुन्द्र गे पा गोरशो रागी लने” देंत।

26 मिनू परमप्रभु यावेमी मोसा नु हारून आस कली

27 “गेना सम्म एको मरिम्शो मुरपुकीम आं पर्वम गन गन पाइनीमी? गो इस्राएली आन आं कली गन गन पशो नेता। मेकोपुकीम आं कली गन गन पाइनीम। प्रस्थान ३२:३४-३५

28 गे मेको आन कली ‘परमप्रभु यावेमी थमा पा इन देशो खोदेशो पा इन कली पाइनुड।

29 गे नेल्ल गोरशो रागीमी बेक्या माल्नीनी। नें ब्रेकशो नेल्ले, २० बर्स गाप्शो नु मेको क्येडा लाकशो आं कली गन गन पाइब बेक्या माल्नीम। १कोरिन्थी १०:१०

30 आं कसम जशा, इन कली गेनुड देशो रागीमी सुइ ओत्रचा मताइनीम। यपुन्ने आ तौ कालेब नु नून आ तौ यहोसु ला ओत्रचा ताइनीस।

31 मिनू रोइक्या पुंडसीनीम, देशो इन आल आन कली चहिं गो मेक चाकदीत्नुडमी। मिनू मेकोपुकीमी इन मदाकशो रागीम बाकशा, तुइकनीम।

32 गेपुकी चहिं एको गोरशो रागीमी बेकनीनी।

33 मिनू इन आल मेको गोरशो रागीमी ४० बर्स सम्म गोठला दुम्शा हिरचा माल्नीम। मोपा इन मटिशो आ पर्वम श्येत जाइनीम। गे नेल्ल इन नेल्ल क्येडा नोले डा मुर मबेकनी सम्म मोदेशो पा हिरचा माल्नीम। प्रस्थान १६:३५; ब्यवस्था २:७; ब्यवस्था ८:४

34 गेपुकीमी मेको रागी क्यारी पचा कली ४० नाक्त सम्म माल्शो बाकतीनी। मोपतीके नाक्त का डा बर्स का पा ४० बर्स सम्म गेपुकीम इन मरिम्शो पशो आ पर्वम श्येत जचा माल्नीनी। मिनू गो इन पर्वम गाइक्ताकड, दे तुइकनीनी’ दे येरमीया २:१९; गन्ती ३२:१३

35 गो, परमप्रभु यावेमी, लोत्र पाता। मिनू गो एको आं कली गन गन पा बुकशो मरिम्शो मुर आन कली थमा पा मो पाइनुड। मेको नेल्ल एको गोरशो रागीमीन बेकशा नुप्नीम” देंत।

36 मिनू मोसाम क्यारी पथ सोइशशो मुरपुकी लेशशा जाकशा मेको रागी आ पर्वम मरिम्शो लोत्र पा मुर नेल्ल आन कली परमप्रभु यावे कली गन गन पपाइक्तेकम। १कोरिन्थी १०:५,१०; यहूदा:५

37 मेको रागी आ पर्वम मरिम्शो लोत्र चाकब मुर नेल्ल परमप्रभु यावे आ डोंडती बेक्या माल्नीम।

38 मिनू मेको रागी क्यारी पथ लाइब आन दाते डा नून आ तौ यहोसु नु यपुन्ने आ तौ कालेब ला ब्रोंडनीस।

39 मिनू मोसाम मुर नेल्ल आन कली एको लोत्र नेंपदानु, मुर नेल्ल शश रोंका पाम्तेकम।

40 मेकोपुकीमी सुनी कना बोकशा इर पहाड गे डोइशशा “गेपुकी मुल एक रे परमप्रभु यावे आ कबल पशो रागी लाइनीकी। मारदे हना, गोपुकीम पाप पशो बाकनीकी” देंतेकम। ब्यवस्था १:४१

41 तन्न मोसामी मेको आन कली “मारदे गेपुकीमी परमप्रभु यावे आ लोत्र लाकनीनी? गे मयानीनी।

42 गे हन डोंडसीन। मारदे हना परमप्रभु यावे गेपुकी नु मबाक्ब। मो पाइतीनी हना, इन जोरी सत्रुपुकीमी इन कली साइक्नीम।

43 मिनु अमालेक आ मुर नु कनानीपुकीमी इन कली लडाइ तोडनीम। मिनु गेपुकी तरवारम साइक्चा पुंडसीनीनी। मारदे हना गेपुकी परमप्रभु यावे कली टिचा प्रॉइतीनी। मोपतीके परमप्रभु यावे इन दातेमी मबाक्ब” देंत।

44 मो हना यो मेकोपुकीम लोत्र मनेंथु, इर पहाड गे डोंडसाक्म। तन्न परमप्रभु यावे आ कबल पशो सन्दोस गुम्तीक ताम्बुम बाक्त। मिनु मोसा मुर आन बाक्तीक उड बाक्त।

45 मिनु मेको पहाडम बाक्ब अमालेक आ मुर नु कनानीपुकी उड तोडशशा, मेको आन कली साइक्ना साइक्न होरमा सम्म खेदा पाम्तेक्म। गन्ती २१:३; ब्यवस्था १:४४

## 15

दोपा चढेचा, दे अरेशो

1 परमप्रभु यावेमी मोसा कली

2 “गे इस्राएली आन कली ‘गो इन कली गेशो बाक्तीक रागीम जाक्दीन्नीनु,

3 गे कसम जशो खाप्चा कली मीम चोशा चढेतीक चढेचा दाक्ताक्नी हना, यो, चोशा चढेतीके चढेचा दाक्तीनी हना यो, क्योरशा चढेचा दाक्ताक्नी हना यो, इन कली देशो चाडमी ग्येरशा परमप्रभु यावे कली चढेचा दाक्ताक्नी हना यो, गे इन गोठ नु बगाल रे परमप्रभु यावे कली आ दाक्शो ब्रोव्रशो रिना पाइशशो चढेचा माल्नीनी।

4 मिनु सुमी परमप्रभु यावे कली चढेबा, मेकोमी अन्न चढेतीके यो चढेचा माल्ब। मेको अन्न चढेतीक एफाह का डा १० भाग डा भाग का रिम्शो फस, हिन का डा ४ भाग डा भाग का तेल ब्वाइशशा, चढेचा माल्नीनी। एफाह का २२ लिटर पुक्तीके बाक्ब। हिन का ४ लिटर खोदेशो बाक्ब। लेवी २३:१५

5 गे चोशा चढेतीक पाठा का का नु तूचा थोत्रक चढेतीक हिन का डा भाग सां डा भाग का अडगुर शांबु यो चढेचा माल्नीनी। गन्ती २८:७; प्रस्थान २९:४०; लेवी २३:१३

6 सांड का चढेचा दाक्तीनी हना, मेको नु अन्न चढेतीक यो चढेचा माल्नीनी। मेको अन्न चढेतीक एफाह का डा १० भाग डा भाग निक्शी रिम्शो फस नु हिन का डा भाग सां डा भाग का तेल ब्वाइशशा, चढेचा माल्नीनी।

7 तूचा थोत्रक चढेतीक कली हिन का डा भाग सां डा भाग का अडगुर शांबु चढेचा माल्नीनी। मेको परमप्रभु यावे कली आ दाक्शो ब्रोव्रशो रिना पाइशशो चढेतीक बाक्ब।

8 मिनु कसम जशो खाप्चा कली कि दुशा बाक्चा आ पर्वम परमप्रभु यावे कली चोशा चढेचा कली कि क्योरशा चढेचा कली ब्यफ का चढेतीनी हना,

9 मेको नु अन्न चढेतीके यो चढेचा माल्नीनी। गे एफाह का डा १० भाग डा भाग सां रिम्शो फस नु आधा हिन तेल ब्वाइशशा, चढेचा माल्नीनी। एफाह का २२ लिटर पुक्तीक बाक्ब। हिन का ४ लिटर पुक्तीके बाक्ब।

10 मिनु तूचा थोत्रक चढेतीक कली आधा हिन अडगुर शांबु यो मेको चोशा चढेतीक नु चढेचा माल्नीनी। मेको परमप्रभु यावे कली आ दाक्शो ब्रोव्रशो रिना पाइशशो मीम चोशा चढेतीके बाक्ब।

11 मिनु मेको ब्यफ, सांड, बोका, पाठा नु आइक्च पाठा चढेशोनु, मो पचा माल्नीनी।

12 गेपुकीम दोशो चढेनीनी, मेको नेल्ल आन कली का का पा मो पचा माल्नीनी।

13 मिनु इस्राएली सु सुमी परमप्रभु यावे कली ब्रोव्रशो रिना पाइशशो मीम चोशा चढेतीके चढेनीमी, मेकोपुकीमी मोदेशो पचा माल्नीमी।

14 मिनु अर्को रागी डा मुर, गेपुकी नु इक्का नाक्त बाक्त हना यो, गेना हना यो बाक्त हना यो, मेकोमी परमप्रभु यावे कली आ दाक्शो ब्रोव्रशो रिना पाइशशो मीम चोशा चढेतीक चढेचा दाक्ताक्ब हना, इन खोदेशो पा पचा माल्ब।

15 मिनु इन गुम्तीकेमी गेपुकी नु बाक्शो अर्को रागी डा मुर आन कली नेल्ल पाला सम्म एको पचा माल्शो कान बाक्ब। गेपुकी नु अर्को रागी डा मुर परमप्रभु यावे आ डोंडती खाल का डा बाक्नीनी। प्रस्थान १२:४८-४९

16 गेपुकी नु गे नु बाक्शो अर्को रागी डा मुर आन कली अरेशो लोत्र नु ठीक पतीक लोत्र खाल डा बाक्चा माल्ब’ देंचा माल्नेवे” दे परमप्रभु यावेमी मोसा कली देंत।

डोंडती डा शोब्ले

17 परमप्रभु यावेमी मोसा कली

18 “गे इस्राएली आन कली परमप्रभु यावेमी इन कली लाइशशो, रागीम जाक्दीन्नीनु,

19 गेपुकीमी मेको रागी डा अन्न जनीनु, परमप्रभु यावे कली कोसेली का गेचा माल्नीनी।

20 मिनु इन डोंडती निशो फस रे सेल्लो शोब्ले का परमप्रभु यावे कली गेचा माल्नीनी। खला रे क्युक्शा चढेशो खोदेशो पा चढेचा माल्नीनी। नेहेम्याह १०:३८; इजीकीएल ४४:३०

21 मिनु गेपुकीमी नेल्ल इन पाला सम्म इन डोंडती डा निशो फस रे शोब्ले का परमप्रभु यावे कली क्युक्शा चढेतीके कली चढेचा माल्नीनी।

मतुइक्थु पशो पाप

22 मिनु गेपुकीमी मतुइक्थु परमप्रभु यावेमी मोसा कली शेंशो लोत्र नेल्लेमी का मपाइतीनी हना, लेवी ४:१३-१२

23 परमप्रभु यावेमी मोसा रे पा इन कली नु इन नोले डा मुर आन कली शेंशो लोत्र मपाइतीनी हना,

24 गे नु गुम्तीक डा मुरुमी मतुडक्थु पशो पाप आ परबम मेको गुम्तीक डा मुर नेल्लेमी ब्यफ का चोशा चढेचा माल्नीम। मेको परमप्रभु यावे कली आ दाक्शो ब्रोत्रशो रिना पाडशो बाक्ब। मेको आ शेशो खोदेशो पा अन्न चढेतीक नु तूचा थोत्रक चढेतीक यो चढेचा माल्नीम। मिनु पाप आ परबम बोका का यो चढेचा माल्नीम।

25 मिनु चढेबमी इस्राएली नेल्ल आन परबम पाप क्याम्तीक गेय पचा माल्ब। मिनु मेकोपुकी आन पाप क्याम्चा ताडनीम। मारदे हना मेकोम मतुडक्थु पाप पशो बाक्नीम। मिनु मेकोपुकीमी परमप्रभु यावे कली मीम चोशा चढेतीक चढेचा माल्नीम। मेको आन मतुडशो पाप आ परबम परमप्रभु यावे कली चढेचा माल्नीम।

26 मिनु गुम्तीक डा इस्राएली नु मेको नु बाक्शो अर्को रागी डा मुर नेल्ल माफ ताडनीम। मारदे हना मेको मुर नेल्लेम मतुडक्थु पाप पशो बाक्नीम।

27 मिनु सुडमी मतुडक्थु पाप पाप्तु हना, मेकोमी आ पाप आ परबम बर्स का गाप्शो क्यारश आ पाठी का चढेचा माल्ब। लेवी ४:२७-२८

28 मिनु चढेबमी मेको मुर आ पशो पाप मतुडक्तीके, परमप्रभु यावे आ डोंडती पाप क्याम्तीक गेय पचा माल्ब। मिनु नोले मेको मुरुम माफ ताडब।

29 मतुडक्थु पाप पाडब इस्राएलीपुकी नु मेको नु बाक्ब अर्को रागी डा मुर नेल्ल आन कली मतुडक्थु पाप पशो आ परबम पचा माल्शो गेय खाल का डा बाक्ब।

30 तन्न इस्राएली बाक्त हना यो, अर्को रागी डा मुर बाक्त हना यो, तुडश्या यो, मटिथु पाप पाप्तु हना, मेको परमप्रभु यावे कली पाप पाडब बाक्ब। मेको मुर कली गुम्तीके रे तिल्चा माल्ब। प्रेरित १३:३८; हिब्रू १०:२६-२९

31 मिनु मेको मुरुमी परमप्रभु यावे आ लोत्र लाक्शा, आ अरेशो काड मटितीके, मेको मुर तिल्चा पुंडसीशा, आ पाप राडब” दैत।

मुरुम नाडक्तीक नाक्त गेय पशो

32 मिनु इस्राएलीपुकी गोरशो रागीम बाक्मानु, मेकोपुकीमी नाडक्तीक नाक्ती मुर का कली शी खुप्शो थित्तेक्म। प्रस्थान २०:८-१०

33 मिनु मुरपुकीमी मेको शी खुप्ब कली मोसा, हारून नु मुर नेल्ल आन डोंडतीमी चाक्तेक्म।

34 मिनु मेको कली मार पाडक्चा माल्बा मतुडक्तीके चौक्शा वोडक्तेक्म। लेवी २४:१२

35 मिनु परमप्रभु यावेमी मोसा कली “मेको मुर कली साडक्चा माल्ब। गुम्तीक डा मुर नेल्लेमी मेको कली मुर आन बाक्तीके रे गुंडशा, फुल्लु आप्शा साडक्चा माल्नीम” दैत। प्रस्थान ३१:१४-१५; प्रस्थान ३५:२-३

36 मिनु गुम्तीक डा मुर नेल्लेमी मेको कली मुर आन बाक्तीके रे गुंडशा, फुल्लु आप्शा साडक्तेक्म। परमप्रभु यावेमी मोसा कली दोदेशो पा अरेवा, मोदेशो पा मुरपुकीमी पाम्तेक्म।

परमप्रभु आ शेंतीके मिम्चा कली

37 मिनु लेंशा परमप्रभु यावेमी मोसा कली

38 “गे इस्राएली आन कली ‘गेपुकीमी इन फेक्तीक वा आन सुरमी नीलो श्येले के फेने सेलीन। मोदेशो नेल्ल इन पाला सम्म पचा माल्नीनी। ब्यवस्था २२:१२; मत्ती २३:५; प्रस्थान ३९:१

39 मारदे मोदेशो पचा माल्नीनी दंशा हना, गे मेको फेने तशा, परमप्रभु यावे आ शेंतीके नेल्ल मिम्शा, टिचा कली मोदेशो पचा माल्नीनी। इन थुं डा दला दाक्स मपचा कली नु इन मिक्च कली पाप मपपाडक्चा कली मोदेशो पचा माल्नीनी।

40 गे परमप्रभु यावे आ शेंतीक नेल्ल मिम्शा पचा माल्नीनी। मिनु गे इन परमप्रभु आ डोंडती ग्रांया मदिशो दुम्चा माल्नीनी।

41 गो, परमप्रभु यावे, इन परमप्रभु नड। गो इन परमप्रभु दुम्चा कली इन कली इज्जिप्त रागी रे गुंडताक्नी। गो परमप्रभु यावे, इन परमप्रभु नड” दैचा माल्नेवे” दैत।

## 16

कोराह, दाथान नु अबीराम

1 मिनु लेवी आ तौ कोहाथ, आ चच इच्छार, आ युड कोराह, नु रूबेन आ थर डा एलीआब आ तौ निक्शी दाथान नु अबीराम नु पेलेथ आ तौ आन सल्ला पाम्तेक्म। प्रस्थान ६:१६, १८, २१; गन्ती २६:७-९; यहूदा १:११

2 मिनु मेकोपुकीम सहे निक्शी ५० जना इस्राएली ब्रेत्ताक्म। मेकोपुकी गुम्तीकेमी योत्रचा पुंडसीशो ठेयब मुर बाक्तेक्म। मेको आन कली मुर नेल्लेमी तुडशो बाक्तेक्म। मेकोपुकीम मोसा कली दोस गोम्तेक्म। गन्ती १२:१-२

3 मिनु मेकोपुकी बुक्शा, मोसा नु हारून आस कली “गे निक्शीमी थम मरिम्शो पाडतीसी। गुम्तीक डा मुर नेल्ले का का पा, ग्रांया मदिशो बाक्नीम। मिनु परमप्रभु यावे मेको आन दातेमी बाक्ब। गे मारदे इस कली परमप्रभु यावे आ मुर आन क्येडा ठेयब सेल्सीनीसी?” दैतेक्म।

4 मिनु मोसा मेको लोत्र नेंशा, खुम्की पा बाप्त। गन्ती १४:५

5 मिनु मेकोमी कोराह नु मेको आ मुर नेल्ल आन कली “दीसा सुनी परमप्रभु यावेमी सु मेको आ मुर बाक्बा, सु ग्रांया मदिशो बाक्बा नु सु आ नेक्था जाक्दीत्वा गेबा, मेको तुडक्पाडक्ब। २तिमोथी २:१९

6 कोराह, गे नु बाक्ब मुर नेल्लेमी थनौरो चाक्शा जाक्कीन।

7 मिनु गे दीसा मेकेर मी कुर पा परमप्रभु यावे आ डोंडती धूप चोने। मिनु परमप्रभु यावेमी सु कली योत्रचा, मेको ग्रांया मदिशो बाक्ब। लेवीपुकी, गे थम मरिम्शो पाडतीनी” दैत।

8 मिनु मोसामी कोराह कली “गे लेवीपुकी नेनीन।

9 इस्राएली आन परमप्रभु यावेमी इन कली आ नेक्था जाक्चा गेशा, आ ताम्बु डा गेय पचा कली मुर आन दाते रे योव्रशो बाक्ब। गे गुम्तीक आ डोंइती राप्शा, मेको मुर आन गेय पचा, आइक्च मिम्नीनी? गन्ती ३:६-१३; गन्ती ४:४-२०

10 मेकोमी गे नु इ लोकब, लेवी नेल्ल आन कली आ नेक्था जाक्चा गेत्तु। मार, गेपुकीम चढेब आन गेय यो माल्नीनी?

11 गे नु इ मुर नेल्ले परमप्रभु यावे कली दोस गेशा बुक्तीनी। हारून सु बाक्बा डा? गे मेको कली गन गन पनी?" दे माइक्तीमी।

12 मिनु मोसामी एलीआब आ तौ दाथान नु अबीराम आस कली ब्रेथ सोइक्ताक्व। तन्न मेको निक्शीमी "गो मजाक्नस्कु।

13 गे आंइ कली दूध नु खुदो शुश बाक्शो रागी रे एको गोरशो रागीम साइक्थ चाक्शा यो, मार, इन कली मजाक्दीम्मे? मिनु गे आंइ कली हुकुम यो पचा माल्नीसी?

14 गे आंइ कली दूध नु खुदो शुश बाक्शो रागीम चाक्दीन्नी? रू नु अडगुर रू गेनी? मार, गे एको मुर आन मिक्च फेत्चा दाक्नीनी? गोपुकी थमा पा मजाक्नीकी" देताक्स। प्रस्थान ३:८

15 मिनु मोसा शुश गाइशशा, परमप्रभु यावे कली "मेको आन चढेशो मताक्कीन। गो मेको आन गधा का यो मताक्गु। गो मेको आन कली मरिम्शो यो मपड" देत।

16 मिनु मोसामी कोराह कली "गे नु इ मुरपुकी नु हारून यो दीसा परमप्रभु यावे आ डोंइती जाक्कीन।

17 गे नेल्लेमी आम आंम थनौरो चाक्शा, मेकेर धूप कुर पने। मिनु गे का का पा आंम थनौरो परमप्रभु यावे आ डोंइती चाक्कीन। गे नु हारूनम यो इस थनौरो चाक्कीस। मेको सहे निक्शी ५० ओटा थनौरो बाक्नीम" देत।

18 मिनु मेको का का पा आन थनौरोमी मी कुर पा धूप वोइक्तेक्म। मिनु मेकोपुकी मोसा नु हारून गुम्तीक ताम्बु आ ओव्रतीकेमी राप्तेक्म।

19 मिनु कोराहमी गुम्तीक डा मुर नेल्ल आन कली मोसा नु हारून आस पर्बम गन गन पचा, दे गुम्तीक ताम्बु आ ओव्रतीकेमी पुक्तीमी। मेना परमप्रभु यावे आ छेडछेड मेको नेल्ल आन डोंइती गूत। गन्ती १६:१०

20 मिनु परमप्रभु यावेमी मोसा नु हारून आस कली

21 "गे निक्शी मेको मुर आन रे दिलीस। मिनु गो याम कामी एको नेल्ल आन कली रोवल चिवल पोक्नुडमी" देत। उत्पत्ती १९:१४

22 मिनु मोसा नु हारूनमी खुम्की पा "परमप्रभु मुर नेल्ल आन कली ब्रोंइचा गेब परमप्रभु, मुर कामी पाप पतीके गे मुर नेल्ल नु गाइक्नीनी?" देताक्स। अय्युब १०:१२; अय्युब १२:१०; २सामुएल २४:१७; गन्ती २७:१६

23 मिनु परमप्रभु यावेमी मोसा कली

24 "एको मुर आन कली 'कोराह, दाथान नु अबीराम आन बाक्तीक रे दिलीन' दे माइक्मी" देत।

25 मिनु मोसा बोक्शा दाथान नु अबीराम आस बाक्तीक लत। मिनु इस्राएली आन खाल्पापुकी यो लाम्तेक्म।

26 मिनु मेकोम नेल्ल मुर आन कली "मेको मरिम्शो मुर आन ताम्बु रे दिल्ला बाक्कीन। मेको आन के मारेइ मथिने। मो मपाइतीनी हना, मेको आन पापमी पतीके गेपुकी यो साइक्चा पुंइसीनी?" दे माइक्तीमी।

27 मोपतीके मेकोपुकी कोराह, दाथान नु अबीराम आन ताम्बु रे दिल्लेक्म। मिनु दाथान नु अबीराम आस ताम्बु रे गूशा, मेको आस ताम्बु आ ओव्रतीकेम आस मीश नु आस आलपुकी नु राप्ताक्स।

28 मिनु मोसामी मेको नेल्ल आन कली "परमप्रभु यावेमी आं कली एको गेय पचा कली सोइशशो बाक्ब, दे गे तुडक्नीनी। एको गेय नेल्ल गो आंमा पशो मनड।

29 मेको मुरपुकी अरु मुरपुकी खोदेशो पा बेक्तेक्म हना, गो परमप्रभु यावे आ सोइशशो मनड।

30 तन्न परमप्रभु यावेमी नक गेय का पा, रागीम आ शोत्र पाक्शा, दाक्तु हना, एको आन मारेइ मारेइ सुन्दा सेसीन बेक्शो मुर आन बाक्तीके दोक्तेक्म हना, एकोपुकीमी परमप्रभु यावे आ लोत्र लाक्शो बाक्मा बाक्त, दे गेपुकीमी तुडक्नीनी" देत।

31 मिनु मेको लोत्र पने थुमा नोले मेको आन बाक्शो रागी ब्रोल्त। ब्यवस्था ११:६

32 मिनु रागीम आ शोत्र पाक्शा, मेको नु मेको आस खिं डा मुर नेल्ल, कोराह आ खिं डा मुर नेल्ले नु मेको आन मारेइ मारेइ नेल्ल दाक्तु।

33 मिनु मेकोपुकी नु आन मारेइ मारेइ सेसीन बेक्शो मुर आन बाक्तीके लाम्तेक्म। मिनु रागीम मेको आन तार आ शोत्र ख्रेप्ताक्व। मिनु मेकोपुकी गुम्तीक डा मुर आन दाते रे जाम्तेक्म।

34 मिनु आन नेक्था बाक्ब इस्राएली नेल्लेमी मेको आन वाइ ब्रेशो नेंशा "गेपुकी इ कली यो मुल रागीम दाक्ब" देना देंन प्रोक्तेक्म।

35 मिनु परमप्रभु यावे रे मी गूशा, मेको सहे निक्शी ५० जना धूप चोइब आन कली दाक्तु। लेवी १०:१-२; भजन संग्रह १०६:१७-१८

36 मिनु परमप्रभु यावेमी मोसा कली

37 "चढेब हारून आ तौ एलाजर कली थनौरोपुकी ब्रशो मी रे गुंइचा कली नु मी आ फिलीडगो शुश डोन लाइशशा फ्रचा कली अरेवो। गन्ती ३:४; प्रस्थान ६:२५

38 मारदे हना मेको पाप पाइबपुकी बेक्तीके आन थनौरोपुकी ग्रांग्रा मदिशो बाक्नीम। मेको थनौरो तुप्शा, चढेतीके गिल्तीक पाता सेल्चा माल्ब। मारदे हना मेको मुर आन थनौरो परमप्रभु यावे आ डोंइती चढेतीके ग्रांग्रा मदिशो दुम्तेक्म। मिनु मेको इस्राएली आन कली मिम्तीक चिन्ड दुम्चा माल्नीम" देत।

39 मिनु चढेब एलाजरमी मेको बेकशो मुरपुकीम धूप चोशो तांबा के थनौरो गुप्तु। मिनु मेको कली तुप्शा चढेतीक गिल्चा कली पाता सेल्लु।

40 मेको इस्त्राएली आन कली मिम्तीके बाकब। मार मिम्तीके बाकब देशा हना, हारून आ मुर डा लाकशा, अरु मुरपुकी परमप्रभु यावे आ डोंइती धूप चोचा कली आ नेकथा लने मचाप्नीम। मिनु कोराह नु आ मुरपुकी खोदेशो पा साइक्या मपुंडसीनीम, दे मिम्पाइक्तीक बाकब। मिनु परमप्रभु यावे मोसा रे पा एलाजर कली दोदेशो पा लोत्र पवा, मोदेशो पा पाप्तु। गन्ती ३:१०

41 मिनु आ दीसा सुनी इस्त्राएली नेल्लेमी मोसा नु हारून आस पबंम गन गन पा “गे निक्शीमी परमप्रभु यावे आ मुर आन कली साइक्तीसी” दैतेकम। प्रस्थान १७:३

42 मिनु मुरपुकीम मोसा नु हारून आस कली गन गन पा बुक्शा, युम्तीक ताम्बु गे कोत्रडमेनु, गोस्सुमी मेको ताम्बु कली सुम्शो ताम्तेकम। मिनु परमप्रभु यावे आ छेडछेड यूत।

43 मेना मोसा नु हारून युम्तीक ताम्बु आ डोंइती लाम्ताक्स।

44 मिनु परमप्रभु यावेमी मोसा कली

45 “गे मेको मुर आन दाते रे दिलीस। गो मेको आन कली याम कामी रोवल चिचल पोक्नुडमी” दैत। मिनु मेको खुम्की बाप्ताक्सै।

46 मिनु मोसामी हारून कली “मेको थनौरो लाइश्शा, मेको चढेतीक डा मी कुर पा धूप चोवो। मिनु रीब पा मेको मुर आन दातेमी लाइश्शा, मेको आन पाप क्याम्तीक गेय पावो। मारदे हना परमप्रभु यावे गाइक्ताक्व। मिनु मुर बेक्तीक रोइ बोक्चा गोप्तु” दैत। लेवी १६:१२, १३, १७; गन्ती १:५३

47 मिनु मोसामी देशो खोदेशो पा हारून थनौरो लाइश्शा मुर आन दातेमी दोरशा लत। मेना मुर आन दातेमी मुर साइक्ब रोइ जाक्ने थुम्शो बाक्त। मिनु मेकोमी धूप चोशा मुर आन पबंम पाप क्याम्तीक गेय पाप्तु।

48 मिनु हारून बेकशो नु सेस मुर आन दातेमी राप्त। मिनु मेको मुर बेक्तीक रोइ देकत।

49 कोराह बेक्तीकेम बेकशो प्रोंइशा, मेको मुर बेक्तीक रोइम बेकशो मुर १४ हजार ७ सहे बाक्तेकम।

50 मिनु मेको मुर बेक्तीक रोइ देकम नोले हारून मोसा आ बाक्तीक, युम्तीक ताम्बु आ ओत्रतीकेम लेत्त।

## 17

हारून आ कोक्के

1 मिनु परमप्रभु यावेमी मोसा कली

2 “गे इस्त्राएली नेल्ल आन कली ‘गे इन किकी पिपी आन थर थर रे पा का का पा १२ ओटा कोक्के चाक्कीन’ दे माइक्मी। मेको मुर आन नें मेको आन आन कोक्केमी ब्रेक्तो।

3 मिनु हारून आ नें लेवी आ थर डा मुर आन कोक्केम ब्रेक्तो। मारदे हना नेल्ल थर डा ठेयब मुर आन नेंम कोक्के का का दुम्चा माल्ब।

4 मिनु गे मेको कोक्के आन कली युम्तीक ताम्बुमी सल्ला पशो सन्दोस आ डोंइती वोतो। गो मेकेर रे इन कली लोत्र पाइनुड। प्रस्थान २५:२२

5 मिनु आं योत्रशो मुर आ कोक्केम कोच्वा दाब्ब। मोपा गो इस्त्राएलीपुकीम इस पशो गन गन नाइक्पाइक्नुडमी” दैत। गन्ती १६:५-७

6 मिनु मोसाम इस्त्राएली आन कली मेको लोत्र नेंपाइक्तीमी। मिनु मेको आन ठेयब मुर नेल्लेमी मेको कली कोक्के का का चाक्शा, गोम्तेकम। मिनु मेको आन किकी पिपी आन थर थर पा १२ ओटा कोक्के गोम्तेकम। मिनु हारून आ कोक्के यो मेको आन कोक्के आन दातेम बाक्त।

7 मिनु मोसामी मेको कोक्के नेल्ल परमप्रभु यावे आ सल्ला पशो सन्दोस बाक्शो ताम्बुमी परमप्रभु यावे आ डोंइती वोइक्तु।

8 मिनु मोसा आ दीसा सल्ला पशो सन्दोस बाक्शो ताम्बुम लत। मिनु लेवी आ थर डा मुर, हारून आ कोक्केम कोच्वा दाप्शा, फू बोइश्शा देसी बदाम सिश्शो मीशो ताप्तु।

9 मिनु नोले मोसामी कोक्के नेल्ल खुप्शा, परमप्रभु यावे आ डोंइती रे लाइश्शा, इस्त्राएली आन कली गोम्तीमी। मिनु मेकोपुकीमी कोत्रशा, आन आन कोक्के लांडसाक्म।

10 मिनु परमप्रभु यावेमी मोसा कली “मरिम्शो पाइब मुर आन कली मिम्तीके दुम्पाइक्चा कली हारून आ कोक्के लेंशा सल्ला पशो सन्दोस आ डोंइती लाइश्शा वोतो। मिनु मेकोपुकीमी आं पबंम गन गन पचा मप्रोंइतेकम हना, बेक्नीम” दैत। हिबू ९:४

11 मिनु मोसामी परमप्रभु यावे आ देशो खोदेशो पा पाप्तु।

12 मिनु इस्त्राएलीपुकीमी मोसा कली “कोत्रडीन, गोपुकी खतम दुम्शा जाम्शा लाइनीकी।

13 सु परमप्रभु यावे आ ताम्बु आ नेक्था लाइबा, मेको बेक्ब। मार, गो नेल्ल यो बेक्नीकी?” दैतेकम। भजन संग्रह १३०:३-४

## 18

लेवी नु चढेब आन गेय

1 मिनू परमप्रभु यावेमी हारून कली “गे इ तौपुकी नु इ आफ आ खिं डा मुरुम परमप्रभु यावे आ बाक्तीक कली मरिम्शो पशो कुरचा माल्नीनी। मिनू गे नु इ तौपुकीमी चढेतीक गेय पाडब आन मरिम्शो पशो कुरचा माल्नीनी। प्रस्थान २८:३८; लेवी १६:३२-३३

2 मोपतीके गे इ लोकब लेवी आ थर डा मुर आन कली यो इ कली वारच पचा कली चाक्मी। गे नु इ तौपुकीम ताम्बु आ डोंइती गेय पना पन बाक्नीनु, मेकोपुकीम इन कली वारच पामेक्ल। गन्ती ३:६-१०

3 मेकोपुकी इ कली वारच पशा, ताम्बु डा गेय पचा माल्नीम। तन्न मेकोपुकीम ताम्बु डा मार मार थिचा मटुम्नीम। मिनू चढेतीक आ नेक्था जाक्चा मटुम्नीम। मो पाम्तेक्म हना, मेकोपुकी नु गे यो बेक्नीनी।

4 मेकोपुकीम इन अरेशो टिशा, युम्तीक ताम्बु डा मारेड मारेड गेय पचा माल्नीम। गे इन डा लाक्शा अरु सुडम मेको गेय पचा मताइनीम।

5 मिनू गे इसाएली आन दातेमी लेंशा गाडक्तीक गेनायो मजाक्ल, दे परमप्रभु यावे आ बाक्तीक नु चढेतीक डा गेय आंमा पचा माल्नेवे। गन्ती १७:११

6 मिनू गो मुल इसाएली आन दाते रे इ लोकब लेवी आन कली योव्रनुड। गो मेको इ कली गेनुड। मेकोपुकी युम्तीक ताम्बु डा गेय पचा कली आं कली जिम्मा गेशो बाक्नीम। गन्ती ३:१२,४५

7 तन्न गे नु इ तौपुकीम चढेतीक नु फारशो वा आगा डा कोठा डा गेय थम रिम्शो पा पने। चढेतीक गेय इन कली गेतन्नी। अरु सुड मेकेर जाक्तेक्म हना, मेको साडक्चा पुंडसीनीम” दैत। गन्ती १:५१

#### चढेब आन भाग

8 मिनू परमप्रभु यावेमी हारून कली “गो आं कली चढेशो इ कली गेतन। इसाएलीपुकीमी आं कली चढेशो नेल्ल गेतन। मेको इ कली नु इ तौ आन कली चढेतीक गेय पशो डा गेना हना यो इन भाग बाक्ब। लेवी ३:२,१०; लेवी ६:९-११,१९-२२; लेवी ७:६-१०

9 मिनू मी रे पा प्रोंइशा आं कली चढेशो इन कली मार बाक्ब देंशा हना, मेको आं कली नेल्ल क्येडा चोव्रखो चढेशो अन्न चढेशो बाक्त हना यो, पाप आ पबंम चढेशो बाक्त हना यो नु गारचा आ पबंम चढेशो नेल्ल इ कली नु इ तौ आन कली बाक्ब।

10 मिनू मेको इन कली नेल्ल क्येडा चोव्रखो जचा थोव्रक बाक्ब। मेको इन दाते डा वोंइश मुर नेल्लेमी जने चाप्नीम। मेको इन कली चोव्रखो बाक्ब। लेवी ६:९; लेवी १०:१२,१४

11 मिनू इसाएलीपुकीमी क्युकशा चढेतीक चढेम्तेक्म हना, मेको तिल्लो नेल्ल इ कली नु इ तमी तौ आन कली गेना हना यो इन भाग बाक्ब, दे गेतन्नी। इ खिम ग्रांया मदिशो बाक्शो सुइ सुइमी मेको जने चाप्नीम।

12 मिनू मेकोपुकीमी परमप्रभु यावे कली गेशो नेल्ल क्येडा रिम्शो तेल, नेल्ल क्येडा रिम्शो अडगुर शांबु, अन्न नु रिम्शो मारेड मारेड गो इ कली गेतन।

13 मेकोपुकीमी परमप्रभु यावे कली चढेथ चाक्शो आन डोंइती मीशो फल फुल नेल्ल इ केन दुम्ब। इ खिंमी ग्रांया मदिशो बाक्शो मुर नेल्लेमी मेको जने चाप्नीम। प्रस्थान २३:१९; ब्यवस्था १८:३-४

14 इसाएलम आं कली चढेशो मारेड मारेड इ केन बाक्ब। लेवी २७:२८

15 मिनू परमप्रभु यावे कली चढेशो, मुर आन डोंइती जरमेशो, बी ब्यफ क्यारश भेडा आन डोंइती जरमेशो नेल्ल इ केन बाक्नीम। मो दुम्त हना यो, गे मुर आ डोंइती जरमेशो कली प्रोंइचा माल्नेवे। ग्रांया दिशो बस्तु भाव आन डोंइती जरमेशो यो प्रोंइचा माल्नेवे। प्रस्थान १३:२; प्रस्थान ३४:१९-२०

16 मेको आन कली प्रोंइतीक क्येट महिना का गाप्शो कली चांदी के ५ शेकेल ताक्चा माल्नेवे। मेको ताम्बु डा शेकेल बाक्चा माल्नीम। मेको ताम्बु डा शेकेल का २० गेराह डा बाक्ब। गेराह का ०.६ ग्राम बाक्ब। ताम्बु डा शेकेल का १२ ग्राम डा क्येट बाक्ब। लेवी २७:६,२७

17 मिनू बी, भेडा क्यारश आन डोंइती जरमेशो आन कली प्रोंइने मचाप्नीम। मेको आं केन बाक्नीम। गे मेको आन हुश चढेतीकेमी ब्रुडक्चा माल्नेवे। मिनू मेको आन बोंसो चोचा माल्नेवे। मेको परमप्रभु यावे कली आ दाक्चा ब्रोंव्रशो रिना पाडशशो मीम चोशा चढेतीक बाक्ब।

18 तन्न आन श्ये इ केन बाक्ब। मेको क्युकशा चढेशो कुथ्रु नु ग्युरा फिला खोदेंदो पा इ केन बाक्ब।

19 मिनू इसाएलीपुकीमी आं कली चढेशो नेल्ल इ कली नु इ तमी तौ आन कली गेना हना यो कली गेतन्नी। मेको इ कली नु इ चच युड आन कली परमप्रभु यावे आ डोंइती गेना हना यो लीशो हिक्सी आ कबल पशो बाक्ब” दैत। लेवी २:१३; २इतिहास १३:५

20 मिनू नोले परमप्रभु यावेमी हारून कली “गे मेको रागीम मुर आन दातेमी रू मताइनीनी। गो इसाएली आन दातेमी इन भाग नु इन शोंप नड। गन्ती ३५:५; ब्यवस्था १०:९; ब्यवस्था १२:१२; यहोसु १३:१४,३३; भजन संग्रह १६:५; भजन संग्रह ७३:२६; इजीकीएल ४४:२८

21 गो लेवी आ मुर आन कली युम्तीक ताम्बुमी गेय पचा कली इसाएली नेल्ल आन १० भाग डा भाग का गेतामी। लेवी २७:३०

22 मुल रे इसाएलीपुकी युम्तीक ताम्बु आ नेक्था जाक्ने मचाप्नीम। जाक्तेक्म हना, पापम पतीकेमी बेक्नीम।

23 तन्न लेवीपुकीमी युम्तीक ताम्बु डा गेय पचा माल्नीम। मेकोपुकीमी पाप पाम्तेक्म हना, मेको आंमा कुरचा माल्नीम। मेको इन कली गेना हना यो लीब शेंतीके बाक्ब। तन्न मेकोपुकीमी इसाएली आन दातेमी रू मताइनीम।

24 मारेड हना गो लेवी आन कली इसाएली आन परमप्रभु यावे कली चढेशो १० भाग डा भाग का गेतामी। मोपतीके गो मेको आन कली “गे इसाएली आन दातेमी रू मताइनीनी” दैती” दैत।



- 25 मिनु परमप्रभु यावेमी मोसा कली  
 26 “गे लेवी आन कली ‘परमप्रभु यावेमी इन कली मुर आन गुड रे इन भाग दुम्चा कली गेशो, इस्राएली आ १० भाग डा भाग का ताक्नीनु, गेपुकीम मेको रे यो परमप्रभु यावे कली १० भाग डा भाग का तिल्शा, गेचा माल्नीनी।  
 27 मिनु मेको अन्न नु अडगुर शांबु मुर आन रे चाक्शो भाग खोदेशो मिम्सीब।  
 28 मोपा गे इस्राएली आन रे ताक्शो १० भाग डा भाग का नेल्ल रे तिल्शा परमप्रभु यावे कली १० भाग डा भाग का गेचा माल्नीनी। मेको चढेब हारून कली गेचा माल्नीनी।  
 29 मिनु गे मार मार ताक्नी, मेको नेल्ल रे परमप्रभु यावे आ भाग तिल्शा माल्नीनी’ दे माडक्मी।  
 30 मिनु गे मेको आन कली ‘गेपुकीमी नेल्ल क्येडा रिम्शो भाग तिल्नी नोले, मेको लीशो इन रू रे रुप्यो अन्न नु इन अडगुर रू डा शांबु खोदेशो बाक्ब।  
 31 मिनु गे नु इन खिं डा मुर नेल्ले ते ते जचा दाक्नीनी, मेक मेक जने चाप्नीनी। मारदे हना मेको इन गुम्तीक ताम्बुमी गेय पशो डा गाल्च बाक्ब। मत्ती १०:१०  
 32 मिनु गे मेको आन नेल्ल क्येडा रिम्शो भाग गेतीके इन कली मारेड दोस मटुम्ब। तन्न इस्राएलीपुकीम आन परमप्रभु यावे कली गेशो थोत्रक दूली पा मचलेने। मो पाइतीनी हना गे बेक्नीनी’ दे माडक्चा माल्नेवे” दे परमप्रभु यावेमी मोसा कली दैत।

## 19

चोत्रखेतीक आ परबम चढेशो

- 1 परमप्रभु यावेमी मोसा नु हारून आस कली  
 2 “गे इस्राएली आन कली ‘परमप्रभु यावेमी ब्रेक्शा अरेशो पचा माल्शो लोत्र का एको बाक्ब। गेपुकी थम रिम्शो मारेड मटुम्शो गेनायो जवा मलाप्शो लल बी का आंस बाक्तीक चाक्कीन’ देनीस। हिबू ९:१३; लेवी २२:२०; ब्यवस्था २१:३  
 3 मिनु गे मेको बी कली चढेब एलाजर कली गेसे। मिनु मेकोमी मेको बी कली मुर आन बाक्तीक रे डोन लाइश्या, आ डोइती मेको कली क्योरपाइक्चा माल्ब।  
 4 मिनु चढेब एलाजरमी आ ब्रेप्चोमी आ हुश खुम्शा, गुम्तीक ताम्बु आ डोइती ७ खेयप बुइक्चा माल्ब। लेवी ४:६, १७  
 5 मिनु नोले मेको बी चढेब आ डोइती चोचा माल्ब। आ कुशुल, आ श्ये, आ हुश नु गोबर सुन्दा चोचा माल्ब। लेवी ७:८; लेवी ४:११-१२  
 6 मिनु चढेबमी लेबानोन डा लाइश्या रवा आ शी, हिस्सोप के ब्राक्स, लल रड डा ऊन चाक्शा, मेको बी कली जेन्ना जेन्ना पशो मीम हुम्चा माल्ब। लेवी १४:६  
 7 मेको नोले चढेबमी आ वा मुरशा, चिक्सीचा माल्ब। नोले मेको मुर आन बाक्तीके लेन्ने चाप्ब। तन्न मेको चढेब नां मलाक्गा सम्म ग्रांघा दिशो बाक्ब। लेवी १६:२८  
 8 मिनु नोले मेको बी चोइबमी आ वा मुरशा, चिक्सीचा माल्ब। मेको नां मलाक्गा सम्म ग्रांघा दिशो बाक्ब।  
 9 मिनु ग्रांघा मदिशो मुर कामी मेको बी कली चोशो पुलु खुप्शा, मुर आन बाक्तीके रे डोन ग्रांघा मदिशो बाक्तीकेम वोइक्चा माल्ब। मेको इस्राएली आन कली चोत्रखेतीक ब्वाक्कु सेल्चा कली बाक्ब। मेको चोत्रखेतीचा कली चढेतीक बाक्ब।  
 10 मिनु मेको बी चोशो पुलु हुइक्बमी यो आ वा मुरचा माल्ब। मिनु नां मलाक्गा सम्म मेको ग्रांघा दिशा बाक्ब। मेको इस्राएलीपुकी नु मेकोपुकी नु बाक्ब अर्को रागी डा मुर नेल्ल आन कली पचा माल्शो गेय बाक्ब।  
 11 मिनु सुमी बेक्शो मुर कली थीबा, मेको ७ नाक्त सम्म ग्रांघा दिशोन बाक्ब।  
 12 मिनु मेकोम मेको सां नाक्तीम ब्वाक्कु चोत्रखेतीचा माल्ब। मिनु ७ नाक्तीम लेशा चोत्रखेतीचा माल्ब। मिनु मेको ग्रांघा मदिशो दुम्ब। तन्न मेकोमी सां नाक्त नु ७ नाक्त मचोत्रखेसाक्ब हना, मेको ग्रांघा दिशा बाक्ब।  
 13 मिनु सुमी बेक्शो मुर थिशा, मचोत्रखेतीबा, मेकोमी परमप्रभु यावे आ ताम्बु ग्रांघा दिशो सेल्ब। मेको मुर इस्राएली आन दाते रे तिल्चा पुंइसीब। मारदे हना चोत्रखेतीक ब्वाक्कु मेको आ तार मबुइश्या बाक्ब। मोपतीके मेको ग्रांघा दिशो बाक्ब। मिनु मेको आ ग्रांघा दितीके मेको नु लीब। लेवी १५:३१  
 14 मिनु मुर आ ताम्बुम बेक्त हना, मेको आ परबम पचा माल्शो गेय मार बाक्ब दंशा हना, सु मेको ताम्बुम बाक्बा, सु मेको ताम्बुम जाक्बा, मेको ७ नाक्त सम्म ग्रांघा दिशो बाक्नीम।  
 15 मिनु मसुम्शो ग्योब नेल्ल ग्रांघा दिशो बाक्नीम।  
 16 मिनु सुमी लांम तरवारम साइक्चा पुंइसीशो मुर बाक्त हना यो, आंमा बेक्शो मुर बाक्त हना यो, मुर आ रुश बाक्त हना यो, मेको थीब मुर ७ नाक्त सम्म ग्रांघा दिशो दुम्ब।  
 17 मिनु मुरुमी मेको ग्रांघा दिशो मुर कली चोत्रखेचा कली चढेतीक पुलु ग्योबुम कुर पा नक ब्वाक्कु लुक्चा माल्ब।  
 18 मिनु नोले ग्रांघा मदिशो मुर कामी हिस्सोप के ब्राक्स मेको चोत्रखेतीक ब्वाक्कुम नुप्शा, मेको बेक्शो मुर आ ताम्बु, मेकेर बाक्शो मारेड मारेड, मेक बाक्ब मुर आन कली, रुश थीब मुर आन कली, साइक्चा पुंइसीशो मुर थीब, बेक्शो मुर नु तुरस थीब मुर आन कली मेको ब्वाक्कु बुइक्चा माल्ब।  
 19 मिनु ग्रांघा मदिशो मुरुमी सां नाक्तीम नु ७ नाक्तीम ग्रांघा दिशो मुर आन कली मेको चोत्रखेतीक ब्वाक्कु बुइक्चा माल्ब। मिनु ७ नाक्तीम मेको आन कली चोत्रखेतीके नुप्ब। मिनु नोले मेकोपुकीम आन वा मुरशा, आन रां चिक्सीचा माल्नीम। मिनु मेकोपुकी नां लाक्गा नोले ग्रांघा मदिशो दुम्नीम। गन्ती १९:१२-१३

20 मिनू सु ग्रॉग्रा दिशो दुम्शा यो, मचोव्रखेसीबा, मेकोमी परमप्रभु यावे आ ताम्बु ग्रॉग्रा दिशो सेल्ब। मेको मुर इस्राएली आन दाते रे तिल्चा पुंडसीब। मारदे हना चोव्रखेतीक ब्वाक्कुम मेको कली मबुइशो बाक्ब। मोपतीके मेको ग्रॉग्रा दिशोन बाक्ब।

21 मिनू मेको, मेको कली गेना हना यो आ पतीक दुम्ब। मिनू मेको ब्वाक्कु बुइक्ब मुरुम आ वा मुरचा माल्ब। मिनू सुमी चोव्रखेतीक ब्वाक्कु थीबा, मेको नां मलाक्गा सम्म ग्रॉग्रा दिशो दुम्शो बाक्ब।

22 ग्रॉग्रा दिशो दुशो मुरुमी मार थिवा, मेको नेल्ल ग्रॉग्रा दिशो दुम्नीम। मिनू सुमी मेको ग्रॉग्रा दिशो थोव्रक थीबा, मेको यो नां मलाक्गा सम्म ग्रॉग्रा दिशो दुम्ब” दैत।

## 20

सेरथे फुल्लु रे ब्वाक्कु बुक्शो

1 मिनू डोंइती डा महिनाम इस्राएली नेल्ले जीन डा गोरशो रागीम जाक्तेक्म। मिनू कादेशमी बाक्तीक सेल्शा बाक्तेक्म। मिनू मिरयाम मेक उइ बेक्त। मिनू मेक उइ थिम्तेक्म। गन्ती १३:२१; गन्ती १२:१५

2 मिनू मेकेर मुर आन कली ब्वाक्कु मबा। मिनू मुरपुकी मोसा नु हारून आस पर्वम मरिम्शो पा बुक्तेक्म। प्रस्थान १७:१-७

3 मिनू मेकोपुकीमी मोसा कली जिचा तोशा मेको कली “गो आंइ लोकबपुकी परमप्रभु यावे आ डोंइती बेक्मानु, गोपुकी यो बेक्शो नकी हना, रिम्शो दुम वा।

4 गे मारदे परमप्रभु यावे आ मुर, आंइ कली एको गोरशो रागीम चाक्नी? मुल गोपुकी नु आंइ बी ब्यफ, क्यारश भेडा नेल्ल एक बेक्ब दुम्तक।

5 गे मारदे आंइ कली इजीप्त रे एको मरिम्शो रागीम चाक्नी। एको रागीम अन्न, फोव्रशी, अडगुर नु अनार मारेड मथिंसीब। एकोक्के तूचा कली ब्वाक्कु यो मबा” दैतेक्म।

6 मिनू नोले मोसा नु हारून मुर आन बाक्तीक रे लशा, युम्तीक ताम्बु आ ओव्रतीकेमी खुम्की पा बाप्ताक्स। मिनू परमप्रभु यावे आ छेडछेड मेको आस डोंइती गूत।

7 मिनू परमप्रभु यावेमी मोसा कली

8 “एको कोक्के लतो। मिनू गे नु इ लोकब हारून लशा, मुर आन कली पुक्कीस। मिनू मेको आन डोंइतीन एको फुल्लु कली हुकुम पावो। मिनू फुल्लु रे ब्वाक्कु यीब। मिनू गे मुर आन डोंइती एको सेरथे फुल्लु कली ‘ब्वाक्कु बुक्को’ दे मतो। मोपा गे मुर आन कली मेको सेरथे फुल्लु रे ब्वाक्कु यिपाइक्नेवे। गे मोपा मुर नु मेको आन बी ब्यफ क्यारश भेडा आन कली तूचा गेनेवे” दैत।

9 मिनू मोसामी मेको कोक्के परमप्रभु यावेम देशो खोदेशो पा ताक्तु। गन्ती १७:२५

10 मिनू मोसा नु हारूनमी मुर नेल्ल आन कली सेरथे फुल्लु आ डोंइती पुक्ताक्स। मिनू मोसाम मेको आन कली “गे गन गन पाइबपुकी नेनीन। मार, गो एको सेरथे फुल्लु रे इन कली ब्वाक्कु बुक्पाइशशा गेन्ती?” दे माइक्तीमी। भजन संग्रह १०६:३२-३३

11 मिनू मोसामी आ गुइ क्युक्शा आ कोक्केमी निक्शी खेयप मेको सेरथे फुल्लु कली तुप्तु। मिनू मेकेर शुश ब्वाक्कु बुक्शा गूत। मिनू मुरपुकी नु आन बी ब्यफ, क्यारश भेडामी तूतेक्म।

12 तन्न परमप्रभु यावेमी मोसा नु हारून आस कली “गे आं कली थमा मसुइक्तीके नु आं टेयब सक्ति इस्राएली आन डोंइती मकोइतीके, गे एको मुर आन कली गो इन कली गेशो रागीम चाक्दीत्वा मताइनीसी” दैत। गन्ती २७:१४; ब्यवस्था १:३७; ब्यवस्था ४:२१; ब्यवस्था ५०:५१

13 मोपतीके मेको ब्वाक्कु कली मेरीबा डा ब्वाक्कु देसीब। मेकेर इस्राएलीपुकीमी परमप्रभु यावे कली जिचा तोम्तेक्म। मिनू मेकोमी आ सक्ति कोइताक्ब। भजन संग्रह ८१:८

इस्राएली आन कली लचा मगेशो

14 मिनू मोसामी कादेश रे एदोम डा पिप कली “इन लोकब इस्राएलमी इन कली ‘गो आंइ कली दुम्शो श्येत गे तुडक्नीनी। उत्पती ३६:१, ३१; ब्यवस्था २:१-८; ब्यवस्था २३:८

15 आंइ किकी पिपी इजीप्त लशा, मेकेर शुश बाक्शो बाक्तेक्म। मिनू इजीप्तीपुकीमी आंइ किकी पिपी नु आंइ कली दिप्शा, मरिम्शो पाम्तेक्म।

16 मिनू गोपुकीमी परमप्रभु यावे कली पुंडतक। मिनू मेकोमी आंइ पुंडशो नेंशा, आ स्वर्ग डा गेय पाइब का सोइशशा, गो आंइ कली इजीप्त रे गुंइशा एक चाक्तु। मुल गो इन रागी डा सांद कादेश देशो सहरम बाक्शो बाक्नीकी। प्रस्थान २३:२०

17 मिनू गो आंइ रागी रे पा लचा गेने। गोपुकी रू नु अडगुर रू रे पा मलाइनीकी। गोपुकीम इन तेकोइ इनार डा ब्वाक्कु मतूनीकी। गो पिप आ टेयब लां रे पा लाइनीकी। इन रागी मलाक्का सम्म गो ग्युरा पेरा मपाइनीकी देशो बाक्ब, देनीन” दे मुर सोइक्ताक्मी। गन्ती २१:२२; ब्यवस्था २:१-८; न्यायाधीस ११:१७

18 तन्न एदोममी मेको कली “गोपुकी एको रागी रे पा लचा मताइनीनी। मो पाइतीनी हना, गोपुकीमी गोपुकी इन कली लडाइ तोइनीकी” दैत।

19 मिनू इस्राएलीपुकीमी मेको कली “गोपुकी टेयब लां रे पा लाइनीकी। मिनू गो नु आंइ बी ब्यफ क्यारश भेडामी इन ब्वाक्कु तूतक हना, मेको डा क्येट थाप्नीकी। आंइ कली इन रागी रे पा ला लचा गेने” दैतेक्म।

20 तन्न मेकोपुकीमी “गेपुकी लचा मताइनीनी” दैतेकम। मिनु एदोममी मेको आन कली लडाइ तोचा कली शुश या कुरशा, ठेयब हुल लडाइ पाइब चाकशा जाकत।

21 मोपा एदोममी इस्राएली आन कली आ रागी रे पा लचा मगेमी। मोपतीके इस्राएलीपुकी मेकेर रे लेत्तेकम।

हारून बेकशो

22 मिनु इस्राएली कादेश रे गाकशा, होर डांडामी जाक्तेकम।

23 मिनु नोले परमप्रभु यावेमी एदोम रागी डा सांद डा होर डांडामी मोसा नु हारून आस कली

24 “हारून आ किकी पिपी नु बाक्थ लाइब। गे निम्फा मेरीबा डा ब्वाक्कुम आ देशो मटितीके, गोम इस्राएली आन कली गेशो रागीम हारून ओत्रचा मताइब।

25 हारून नु मेको आ तौ एलाजर आस कली होर डांडा लाइशा लावो।

26 मिनु हारून आ वा पुइशा, मेको आ तौ एलाजर कली फेकतो। मेको नोले हारून आ किकी पिपी नु बाक्थ लचा कली बेक्ब” दैत। प्रस्थान २९:४-७

27 मिनु मोसामी परमप्रभु यावे आ देशो खोदेशो पा पाप्तु। मिनु मुर नेल्ल आन डोंडती रे मेकोपुकी होर डांडा लाम्तेकम।

28 मिनु मोसामी हारून आ वा पुइशा, आ तौ एलाजर कली फेक्ताकव। मिनु हारून मेको डांडा तार बेक्त। मिनु मोसा नु एलाजर मेको डांडा रे बुत्ताकस। गन्ती ३३:३८-३९; ब्यवस्था १०:६

29 मिनु इस्राएली नेल्लेमी हारून बेकशो तुइशा, ३० नाक्त सम्म रोंका पाम्तेकम। ब्यवस्था ३४:८

## 21

कनानी आन रागी ग्राशो

1 मिनु नेगेबम बाक्ब कनानी आराद डा पिपम इस्राएली अथारीम डा लां रे पा पिना पिन बाक्नीम, देशो लोत्र नेंतु। मिनु मेकोमी इस्राएली नु लडाइ, इस्राएली का निक्शी आन कली ग्याइक्ताकव। गन्ती १४:४४,४५; न्यायाधीस १:११-१५

2 मिनु इस्राएलीपुकीमी परमप्रभु यावे कली “गे एको मुर आन कली थमा पा आंड गुइमी गेतीनी हना, गोपुकीमी मेको आन सहर नेल्ल रोवल चिवाल पोक्नीकी” दे कसम जाम्तेकम। ब्यवस्था १३:१६; ब्यवस्था २०:१४,१६,१७; यहोसु ६:१७; न्यायाधीस १:१७; १सामुएल १५:३

3 मिनु परमप्रभु यावेमी इस्राएली आन पुइशो लोत्र नेशा, मेको कनानी आन कली मेको आन गुइमी गेपुतु। मिनु इस्राएलीपुकीम मेकोपुकी नु मेको आन सहर नेल्ल खतम पोक्तेकम। मोपतीके मेको रागी आ नें होरमा वोइक्तेकम। होरमा हिबू लोत्रमी खतम दुम्तीके देसीब। गन्ती १४:१४,४५; ब्यवस्था १:४४

कांसा के बुस्स

4 मिनु मेकोपुकी एदोम रागी कली हेरशा लचा, दे होर डांडा रे लल समुन्द्र गे लाम्तेकम। तन्न मुरपुकी शुश गाक्चा माल्तीके दाम्तेकम। गन्ती ११:४-६

5 मिनु मेकोपुकीम परमप्रभु नु मोसा आस पर्वम गन गन पा “मारदे गे आंड कली एको गोरशो रागीम बेक्पाइक्चा कली इजीप्त रागी रे गुंइशा एक चाक्सी? एकेर जचा थोत्रक मबा। ब्वाक्कु यो मबा। गो एको मब्रोत्रशो जचा थोत्रक क्येडा ब्रीताक्क” दैतेकम।

6 मिनु नोले परमप्रभु यावेमी बीस पाइशो बुस्स मेको मुर आन दातेमी सोइक्ताकव। मिनु बुस्सपुकीमी मुर आन कली कोक्तेकम। मिनु शुश इस्राएली बेक्तेकम। १कोरिन्थी १०:९

7 मिनु मुरपुकी मोसा आ बाक्तीक जाक्शा “गोपुकीम परमप्रभु यावे नु इन पर्वम मरिम्शो लोत्र पा पाप पाइतक। मेको बुस्सपुकी खेरचा, दे परमप्रभु यावे कली आंड पर्वम पुनीन” दैतेकम। मिनु मोसामी मेको मुर आन पर्वम पुंइतु। प्रस्थान ३२:३०-३४

8 मिनु परमप्रभु यावेमी मोसा कली “गे मेको बीस पाइशो बुस्स खोदेशो पा बुस्स का सेल्शा, खांबा काम क्युकको। मिनु सु बुस्सुम कोक्शो बाक्मे, मेकोमी मेको बुस्स कोत्रशा, ब्रोंडब” दैत। २राजा १८:४; यूहन्ना ३:१४

9 मिनु मोसाम कांसा के बुस्स का सेल्लु। मिनु मेको कली खांबा काम क्युकुतु। मिनु सु सु बुस्सुमी कोक्शो बाक्मा, मेकोपुकीम कांसा के बुस्स कोत्रडमेनु, ब्रोंडतेकम।

इस्राएलीपुकी मोआब रागी लशो

10 मिनु इस्राएलीपुकी गाक्शा, ओबोथम बाक्तीक सेल्लेकम।

11 मिनु ओबोथ रे गाक्शा, मोआब आ पूर्व गे डा सांद इये-अबारीम डा गोरशो रागीम बाक्तीक सेल्लेकम।

12 मिनु मेकोपुकी मेकेर रे गाक्शा, जेरद डा बेसीम बाक्तीक सेल्लेकम।

13 मिनु मेकोपुकी मेकेर रे गाक्शा, एमोरी आन सांदम गृतीक गोरशो रागीम बाक्शो अरनोन खोला आ आइक्ची हांबुम आन बाक्तीक सेल्लेकम। मेको अरनोन खोला मोआब आ सांद बाक्ब। मेको एमोरी नु मोआबी आन दातेम बाक्ब।

14 मोपतीके परमप्रभु यावे आ लडाइ डा किताबमी दोपा ब्रेक्शो बाक्ब देशा हना “वाहेब सहर सुफाह नु अरनोन खोला आ दिम, यहोसु १०:१३; २सामुएल १:१८

15 नु आर माइशो बाक्तीके सम्म लाइब लुक्य लतीक लां। मेको मोआब आ सांद सम्म लशो बाक्ब” देशो बाक्ब।

16 मिनु मेकेर रे मेकोपुकी बेयर लाम्तेकम। मिनु परमप्रभु यावेमी मोसा कली “मुर आन कली पुक्मी। मिनु गो ब्वाक्कु गेनुडमी” देशो कुवा मेकेर बाक्ब।

- 17 मिनू नोले इस्राएलीपुकीमी एको कुम्सो पाम्तेकम्। “कुवा, ब्वाक्कु बुक्शा यूडो। मिनू मेको आ पबर्म कुम्सो पावो।  
 18 मेको कुवा मेको ठेयब मुरपुकीमी दोशो बाक्तेकम्। मिनू मुरपुकीमी मेको कुवा पिप आ सुन के कोक्केम दोशो बाक्तेकम्” दे कुम्सो पाम्तेकम्। मिनू मेकोपुकी गोरशो रागी रे यूशा मत्ताना लाम्तेकम्।  
 19 मिनू नोले मत्ताना रे नाहालीएल, नाहालीएल रे बामोथ सम्म  
 20 बामोथ रे मोआब डा दिम बाक्शो बेंसी सम्म, गोरशो रागी रे तांडसीतीक इर पिस्गा डांडा सम्म लाम्तेकम्।

सीहोन नु ओग ब्रुशो

- 21 मिनू नोले इस्राएलीपुकीमी एमोरी आन पिप सीहोन आ बाक्तीकेम मुर आन कली सोइश्शा ब्यवस्था २:२६-३७  
 22 “गो आंड कली इन रागी रे पा लचा गेने। गो रू नु अडगुर रू रे पा मलाइनीकी। गोपुकीमी इन तेकोड कुवा डा ब्वाक्कु मत्नीकी। इन रागी मलाक्का सम्म गो पिप आ ठेयब लां रे पा लाइनीकी” देपाइक्तेकम्।  
 23 तन्न सीहोनमी इस्राएली आन कली आ रागी लाक्शा लचा मगेवो। मेकोम आ लडाइ पाइबपुकी खुप्शा, गोरशो रागीम इस्राएली आन कली लडाइ तोपु। मेकोमी याहास सम्म जाक्शा, इस्राएली नु लडाइ पापु।  
 24 मिनू इस्राएलीपुकीमी मेको कली तरवारम क्योरशा साइक्तेकम्। मिनू अरनोन खोला रे यब्बोक खोला सम्म मेको आ रागी आन के सेल्लेकम्। मिनू अम्मोनी आन सांद सम्म मेकोपुकीमी आन रागी सेल्लेकम्। मारदे हना, अम्मोनी आन सांद बोल्यो बाक्त।  
 25 इस्राएलीपुकीमी मेको सहर नेल्ल आन के सेल्लेकम्। मिनू मेकोपुकीमी एमोरी आन सहर नेल्ल नु हेश्बोन नु मेको आ एर ओथ डा गाउं नेल्लेम बाक्तेकम्।  
 26 हेश्बोन सहर एमोरी आन पिप सीहोन आ सहर बाक्त। पिप सीहोनमी मोआबी आन डोंइती डा पिप नु लडाइ पा मेको आ रागी अरनोन खोला सम्म आ के सेल्लो बाक्त।  
 27 मोपतीके कुम्सो पाइबपुकीमी “गेपुकी हेश्बोन सहरम जाक्कीन। मिनू मेको लेंशा सेल्लेकीन। सीहोन आ सहर लेंशा सेलीन।  
 28 हेश्बोन रे मी यूत। सीहोन आ सहर रे ब्रुशो मी यूत। मिनू मेको मीम मोआब डा आर सहर नु अरनोन डा डांडा दाक्तु।  
 29 आबी आबी, मोआब, केमोश आ मुरपुकी बेक्तेकम्। एमोरी आन पिप सीहोनमी मेको आ तौ आन कली प्रोक्ब सेल्लेकीमी। आ तमी आन कली ग्याइक्का पुंडसीब सेल्लेकीमी। न्यायाधीस ११:३४; १राजा ११:१७  
 30 मोपा मेको आन थेरशो रू हेश्बोन रे दीबोन सम्म खतम दुम्त। मिनू मेदेबा मीम नेक्का क्येडा डोंइती गो मेको खतम पोक्ताका” दे कुम्सो पाम्तेकम्।  
 31 मोपा इस्राएलीपुकी एमोरी आन रागीम आन खिं सेल्लेकम्।  
 32 मिनू मोसामी याजेर रागी कली क्यारी पथ मुर सोइक्ताक्व। मिनू मेकोपुकीमी मेको आन एर ओथ डा गाउं आन के सेल्लेकम्। मेकेर डा एमोरी आन कली खेरतेकम्।  
 33 मेको नोले मेकोपुकी हिरशा बाशान डा लां रे पा डोइश्शा लाम्तेकम्। मिनू बाशान डा पिप ओग नु आ मुरपुकी इस्राएली नु लडाइ पचा कली यूशा एट्रेडमी जाक्तेकम्। ब्यवस्था ३:१-११  
 34 मिनू परमप्रभु यावेमी मोसा कली “मेको नु महिंनो। मारदे हना गो मेको कली आ मुर नेल्ल नु मेको आ रागी यो यो इ कली गेतन। गे हेश्बोन डा एमोरी आन पिप सीहोन कली पाइश्शो खोंदेशो पा मेको कली यो पतो” दे माइक्कु। भजन संग्रह १३६:१७-२२  
 35 मोपतीके मेको कली, मेको आ तौपुकी नु मेको आ मुर नेल्ल आन कली का यो मप्रोंइथु साइश्शा, मेको आन रागी आन के सेल्लेकम्।

## 22

बालाक नु बालाम

- 1 मिनू इस्राएलीपुकी गाक्शा, यरीको यर्दन खोला आ आइक्ची हांबुम बाक्शो मोआब डा दिममी बाक्तीक सेल्लेकम्।  
 2 मिनू सिप्पोर आ तौ बालाकमी इस्राएलीपुकीमी एमोरी आन कली मार पाइश्शो बाक्मा, मेको नेल्ल तुइश्शो बाक्त।  
 3 मिनू मोआब डा मुर इस्राएली आन कली तशा साप्पा हिंतेकम्। मारदे हना मेको शुश बाक्तेकम्। मोपतीके मेको आन थुं ग्येत्थ लुकुच दुम्त।  
 4 मिनू मोआबीपुकीमी मिदयान डा खाल्पा आन कली “दोपा ब्यफोम घांस बाक्तीक दिम चाइश्शा घांस नेल्ल ब्वाइबा, मोपा एको हुलपुकीमी इ कली एर ओथ नेल्ल रे ब्वाइनीम” देंतेकम्। मेना सिप्पोर आ तौ बालाक मोआब डा पिप बाक्त।  
 5 मेकोमी आमाव रागी युफ्रेटीस माइश्शो ठेयब खोला आ नेक्था, पेशोर सहरम बाक्शो बेओर आ तौ बालाम कली मुरपुकी ब्रथ सोइक्ताक्व। मेकोपुकीमी “इजीप्ट रे जाक्शो मुरुम रागी नेल्ल ब्रीतेकम्। मेकोपुकी आं नेक्था जाक्शा बाक्शो बाक्नीम। गन्ती ३१:८; यहोसु २४:९; मीका ६:५  
 6 मुल गे जाक्को। आं कली वारच पा, मेको मुर आन कली सराप चीले पाइक्कीमी। मारदे हना मेकोपुकी आं क्येडा शुश नु बोल्यो बाक्नीम। मो पाइतीनी हना, गो मेको आन कली ग्राशा, आं रागी रे गुंइने चबु वा। मारदे हना गे सु कली आसीक गेनीनी, मेको आसीक राइनीम। मिनू सु कली सराप चीले पाइनीनी, मेको सराप चीले राइनीम, दे गो तुइक्नुड” दे सोइक्ताक्व। २पत्रुस २:१५  
 7 मिनू मोआब नु मिदयान डा खाल्पापुकीमी मेको गेय पचा कली क्येट कुरशा, बालाम आ बाक्तीक जाक्शा, बालाक आ लोव्र शोव्रतेकम्।

8 मिनू बालाममी मेको आन कली “मुलाकदो एकेन बाक्कीन। मिनू परमप्रभु यावेमी आं कली मार देंबा, गो मेकोन इन कली देंनुड” देंत। मोपतीके मेको मोआब डा ठेयब गेय पाइब मुरपुकी मेको नाकदो बालाम आ खिं उड बाक्तेकम।

9 मिनू परमप्रभु बालाम आ बाक्तीक जाक्शा, मेको कली “गे नु बाक्ब मुरपुकी सु नमी?” देंत।

10 मिनू बालाममी परमप्रभु कली “मोआब डा पिप, सिप्पोर आ तौ बालाकमी आं कली

11 ‘इजीप्त रे गूशा जाक्शो मुरपुकीम रागी नेल्ल ब्रीशो बाक्नीम। मुल जाक्शा आं कली वारच पा मेको आन कली सराप चीले पाइक्मी। मो दुन्त हना, गो मेको आन कली लडाइ पा ग्राशा, खेरने चान्पुड डा कों?’ दे लोत्र कुर पा सोइश्शो मुर बाक्ब” देंत।

12 मिनू परमप्रभुमी बालाम कली “गे एकोपुकी नु मलावो। गे मेको मुर आन कली सराप चीले मपाइक्मी। मारदे हना मेकोपुकी आसीक रशो बाक्नीम” देंत।

13 मिनू बालाम सुनी कना बोक्शा, मेको बालाक आ सोइश्शो मुर आन कली “गेपुकी इन रागी लने। मारदे हना, परमप्रभु यावेमी आं कली गेपुकी नु लचा मगेयी” दे माइक्तीमी।

14 मिनू मोआब डा ठेयब मुरपुकी बालाक आ बाक्तीक जाक्शा “बालाम गोपुकी नु जाक्ने मबिस्से” देंतेकम।

15 मिनू बालाकमी लेंशा, मेको आन क्येडा ठेयब नु शुश मुरपुकी सोइक्ताक्मी।

16 मिनू मेकोपुकी बालाम आ बाक्तीक जाक्दीश्शा “सिप्पोर आ तौ बालाकमी इन कली ‘आं बाक्तीक जाक्चा मारेडम मतेकगल।

17 गो थमा पा इ कली मान पशा, ठेयब सेल्लुड। गे मार देंनीनी, गो मेकोन पाइनुड। मिनू जाक्शा, मेको मुर आन कली सराप चीले पाइक्मी” देंत” देंतेकम।

18 तन्न बालाममी बालाक आ गेय पाइब मुर आन कली “बालाकमी सुन नु चांदीम ब्रीशो आ दरवार गेती हना यो, गो परमप्रभु यावे, आं परमप्रभु आ लोत्र आइक्च बाक्त हना यो, ठेयब बाक्त हना यो, मेको लोत्र लाक्ने मचाप्नुड। १राजा १३:८

19 मिनू अरु आन खोदेशो पा गेपुकी यो, मुलाकदो एक उड बाक्कीन। मिनू परमप्रभु यावेमी आं कली लेंशा मार मार देंबा गो तुइक्नुड” देंत।

20 मिनू मेको नाकदो परमप्रभु बालाम आ बाक्तीक जाक्शा, मेको कली “एको मुरपुकी इ कली ब्रेथ जाक्शो बाक्तेकम हना, बोक्को, मिनू मेकोपुकी नु लावो। तन्न गो इ कली मार देंडा, मेको ला पावो” देंत।

21 मिनू बालाम सुनी कना बोक्शा, आ गधा छांदेशा मोआब डा ठेयब मुरपुकी नु लत।

बालाम आ गधा

22 मिनू मेको मोपा लतीके परमप्रभु गाइक्ताक्व। मिनू परमप्रभु यावे आ स्वर्ग डा गेय पाइब कामी मेको कली तेक्चा, दे लांम राप्शा बाक्त। मिनू बालाम आ गधाम डोइश्शा लना लन बाक्त। मेको आ गेय पाइब निक्शी यो मेको नु गाक्शो बाक्ताक्स। उत्पत्ती १६:७

23 मिनू मेको गधामी परमप्रभु यावे आ स्वर्ग डा गेय पाइब शोइश्शो तरवार शेशा, लांम बाक्शो ताप्तु। मिनू मेको गधा हिंशा, लां रे रूम लत। मिनू बालाम गधा कली लां गे सोइक्चा कली तुप्तु। यहोसु ५:१३

24 मिनू परमप्रभु यावे आ स्वर्ग डा गेय पाइब आइक्च लांम राप्शा बाक्त। मेको लां निम्फा पटटी गारो प्रोत्रशो अडगुर रू आस दातेमी बाक्त।

25 मिनू मेको गधामी परमप्रभु यावे आ स्वर्ग डा गेय पाइब कली तशा, गारो गे हेंसेसीशा गाक्त। मिनू बालाम आ खोइली मेको गारोम खोरताक्व। मिनू मेकोमी मेको कली लेंशा तुप्तु।

26 मिनू लेंशा परमप्रभु यावे आ स्वर्ग डा गेय पाइब इक्का ग्येथ लशा, ग्युरा पेरा तेइ रे मलाक्चा डा पा आइक्च लांमी राप्त।

27 मिनू बालाम आ गधाम परमप्रभु यावे आ स्वर्ग डा गेय पाइब कली तशा, गु ब्रेशा बाक्त। मिनू बालाम थाम्पा गाइश्शा, आ गधा कली कोक्केमी तुबा बाक्त।

28 मिनू नोले परमप्रभु यावेमी मेको गधा कली ब्वाक्ब सेल्लु। मिनू मेकोमी बालाम कली “गो इन कली मार पडा? मारदे गे आं कली सां खेयप तुप्यीनी?” देंत। २ पत्रूस २:१६

29 मिनू बालाममी मेको गधा कली “गे आं कली शाक्ती। गो आं गुडम तरवार बाक्शो हना, गो इ कली मुलन साइक्न वा” दे माइक्तु।

30 तन्न गधाम बालाम कली “गो डोंइती रे मुल सम्म इन डोइश्शो गधा मनडा डा? गो डोंइती इन कली गेनायो ओदेशो मपड” देंत। मिनू मेकोमी “मपवी” देंत।

31 मिनू परमप्रभु यावेमी बालाम कली मिक्च ताइब सेल्लु। मिनू मेकोमी तरवार शोइश्शो परमप्रभु यावे आ स्वर्ग डा गेय पाइब का लांम राप्शो ताप्तु। मिनू बालाम खुम्की पा बाप्त।

32 मिनू मेको परमप्रभु यावे आ स्वर्ग डा गेय पाइबमी मेको कली “मारदे इ गधा कली खेयप सां तुबी? कोत्रडो, गो इ लां तेक्चा कली जाक्शो बाक्नुड। मारदे हना गे आं डोंइती इ दला दाक्स पाप्तीवी।

33 इ गधामी आं कली तशा, खेयप सां सम्म आं बाक्तीक रे प्रोक्त। मेकोम आं कली तशा, मप्रोक्शो हना, गो इ कली मुल साइक्ने थुमु वा। तन्न मेको कली चहिं सेसीन सोइक्तु वा” दे माइक्तु।

34 मिनू बालाममी परमप्रभु यावे आ स्वर्ग डा गेय पाइब कली “गो पाप पाता। आं लां तेक्शा इन राप्शो गो मतुइक्तु। मिनू इन डोंइती एको मरिम्शो बाक्त हना, गो लेशशा लाइनुड” देंत।

35 मिनू परमप्रभु यावे आ स्वर्ग डा गेय पाइबमी बालाम कली “एको मुरपुकी नु लावो। तन्न गो इ कली मार लोत्र पाइनुडा, गे मेको ला देनो” दे माइव्तु। मोपतीके बालाम बालाक आ सोइशशो ठेयब मुरपुकी नु लत।

36 मिनू बालाकमी बालाम जाकशो नेंशा, मेकोमी आ रागी आ सुर अरनोन खोला डा सांड डा सहर इर-मोआब सम्म मेको कली गुमथ लत।

37 मिनू बालाकमी बालाम कली “गो इन कली ब्रेथ मुर सोइक्ताकडमी। तन्न गे मारदे आं बाक्तीक मजाक्नी? गो इ कली मान पने मचापनुडा डा?” दैत।

38 मिनू बालाममी बालाक कली “मुल गो इन बाक्तीके जाक्ती। मार दैचा माल्नुडा, दे मतुइक्नुड। परमप्रभुम मार देंबा, गो मेको ला देने चापनुड” दैत।

39 मिनू बालाम बालाक नु लत। मिनू मेको नेल्ल किरयथ-हुसोथमी जाक्तेक्म।

40 मिनू बालाकमी ब्यफ नु क्यारश भेडा क्योरशा चढेशा, बालाम नु मेको नु बाक्ब ठेयब मुर आन कली यो थुलतीमी।

41 आ दीसा सुनी बालाकमी बालाम कली लाइशशा, बामोथ-बालमी डोइशशा लत। मिनू मेकेर रे बालाममी इक्का मुर आन कली ताप्तु। यहोसु १३:१७

## 23

बालाममी आसीक गेशो

1 मिनू बालाममी बालाक कली “आं कली ७ ओटा चढेतीक सेलीन। मिनू ७ ओटा ब्यफ नु ७ ओटा सांड ठीक सेलीन” दैत।

2 मिनू बालाकमी बालाममी देशो खोदेशो पाप्तु। मिनू बालाक नु बालाममी ब्यफ का नु सांड का चढेतीक का काम चढेम्ताक्से।

3 मिनू नोले बालाममी बालाक कली “गे इन चोशा चढेतीके आ नेक्था राप्शा बाक्कीन। गो चहिं एर गे लाइनुड। परमप्रभु यावे आं कली गुमथ जाक्बा, कों। मिनू मेकोमी आं कली मार कोइबा, मेको इन कली देनुड” दैत। मिनू मेको गोरशो डांडा डोंइसाक्व।

4 मिनू परमप्रभुमी बालाम कली गुमानु, बालाममी मेको कली “गो ७ ओटा चढेतीके सेल्पाइशशा, मेकेर ब्यफ का का नु सांड का का चढेता” दैत।

5 मिनू परमप्रभु यावेमी बालाम कली लोत्र पशा “गे बालाक आ बाक्तीके लेतो। इ कली देशो लोत्र मेको कली मतो” दैत।

6 मिनू मेको बालाक आ बाक्तीके लेशशा जाक्त। मेना बालाक नु मोआब डा ठेयब मुरपुकी चोशा चढेतीके आ नेक्था राप्शा बाक्तेक्म।

7 मिनू बालाममी परमप्रभु आ देशो लोत्र पा बालाकमी आं कली अराम रागी रे चाक्तु। नां दाप्तीके डा पहाडम बाक्ब मोआबी आन पिपमी आं कली “जाक्कीन, मिनू आं पा डा याक्ब कली सराप चीले पने। इस्राएली आन कली हिंच कोइदीमी” दैत।

8 मिनू “परमप्रभुमी सराप चीले मपाइशशो आन कली, गो दोपा सराप चीले पाइक्नुडमी? परमप्रभु यावेमी हिंच मकोइशो आन कली, गो दोपा हिंच कोइनुडमी?”

9 गो सेरथे फुल्लु तार बाक्शा, मेको आन कली ताइनुड। गो डांडाम बाक्शा, मेको आन कली कोव्रनुड। मेको आन का ला बाक्ब जात डा मुर बाक्नीम। मिनू रागी रागी डा मुर नु मखाल्सीनीम।

10 याक्ब आ मुर फुरक खोदेशो पा शुश दुमशो बाक्नीम। इस्राएल डा मुर आन ४ भाग डा भाग का यो, सुम हिकने चाप्नीमी डा? उत्पत्ती १३:१६ गे आं कली ठीक पाइब मुर आन कली खोदेशो पा बेक्चा गेयीनी। मिनू आं बेक्तीके मेको आन केन खोदेशो दुम्ल” दैत।

11 मिनू बालाकमी बालाम कली “गे आं कली मार पनी? गो इन कली आं जोरी सत्रु आन कली सराप चीले पाइक्चा कली ब्रेशशा चाक्तन्नी। तन्न गे दूली पा मेको आन कली आसीक कका गेतीनी” दैत।

12 मिनू मेकोमी “गो परमप्रभु यावेम आं थुम वोइशशो देशो लोत्र ब्वाक्चा माल्नुड” दैत। गन्ती २२:३८

बालाममी लेंशा आसीक गेशो

13 मिनू बालाकमी मेको कली “गो नु अर्को बाक्तीके पिने। गे एकेर रे मेको आन कली ताइनीनी। मेकेर रे मेको आन कली इक्का ला ताइतीनी। नेल्ल आन कली तने मचाप्नीनी। मेको आन कली मेकेर रे सराप चीले पतीन” दैत।

14 मिनू मेकोमी मेको कली चोफीम डा रू पिस्गा डांडाम लाइक्तु। मिनू ७ ओटा चढेतीक सेल्शा, मेको तारी ब्यफ का का नु सांड का का चढेप्तु।

15 मिनू बालाममी बालाक कली “गो परमप्रभु यावे कली गुमथ एर लाइनुड। गे चहिं एको इन चोशा चढेशो आ नेक्था राप्शा बाक्कीन” दैत।

16 मिनू परमप्रभु यावेमी बालाम कली गुमशा, आ थुमी लोत्र वोइशशा, मेको कली “गे बालाक आ बाक्तीके लेतो। इ कली देशो लोत्र मेको कली मतो” दैत।

17 मिनू मेको बालाक आ बाक्तीके लेशशा जाक्त। मेना बालाक नु मोआब डा ठेयब मुरपुकी चोशा चढेतीके आ नेक्था राप्शा बाक्तेक्म। मिनू बालाकमी मेको कली “परमप्रभु यावेम मार दैम?” दे हिल्लो पाप्तु।

18 मिनू बालाममी परमप्रभु आ देशो लोत्र पा “बालाक बोक्शा, आं लोत्र नेनो। सिप्पोर आ तौ इ नोफा दाइक्तो।

19 परमप्रभु मुर ममाइ। मेकोमी जोल मपाइब। मेको बेक्शा लाइब मुर खोदेशो पा आ थुं मफाइक्व। मेकोमी लोत्र थोक्शा दैम डा मेरे पाइब। मेकोम पाइक्नुड दैम डा मेरे मेको मपाइक्वडा? १सामुएल १५:२९

20 नेनीन, गो मेको आन कली आसीक गेतीक लोत्र तशो बाक्नुड। मेकोमी मेको आन कली आसीक गेशो बाक्व। मिनु गो मेको फाइक्ने चाप्नुडा डा?

21 याकूब कली मरिम्शो मदुम्ब, देशो बाक्व। मिनु इस्राएली आन कली श्येत मदुम्ब। मेको परमप्रभु यावे, आन परमप्रभु मेकोपुकी नु बाक्व। मिनु मेको आन दातेमी पिप बाक्व।

22 परमप्रभुमी मेको आन कली इजीप्त रे गुंइशा, आ सक्तिम मेको आन कली ब्वाकी डा ब्यफ खोदेशो सेल्शो बाक्व।

23 थमा पा, याकूब कली राइब मारेइ मन्तर तन्तर मबाक्व। इस्राएली आन कली राइब मारेइ लिक्वु कोव्रतीके मबाक्नीम। मुल याकूब नु इस्राएल आ परबम परमप्रभु आ पशो कोव्रडीन।

24 कोव्रडीन, मेको जात डा मुर गुप्सनी खोदेशो पा बोक्नीम। प्रेक्शा ग्राम्चा चिक्शो गुप्स खोदेशो पा मेको छुल बोक्व। मेकोमी सिखार मब्वा सम्म नु सिखार आ हुश मतूडा सम्म मनाइक्व” दैत। गन्ती २४:९; इजीकीएल १९:२

25 मिनु बालाकमी बालाम कली “मेको आन कली सराप चीले मग्ने, आसीक यो मग्ने” दैत।

26 तन्न बालाममी बालाक कली “परमप्रभु यावेमी मार देबा, गो मेको पचा माल्नुड, दे गो इन कली ना कना मदेंडा डा?” दैत।

27 मिनु बालाकमी बालाम कली “मुल पिने, गो इन कली अर्को बाक्तीकेमी लाइक्वन्नी। मेकेर रे गे आं पा डा मेको आन कली सराप चीले पचा कली परमप्रभुमी दाक्वा को?” दैत।

28 मिनु बालाकमी बालाम कली पेओर डांडाम लाइक्वतु। मेकेर रे गोरशो रागी नेल्ल तांडसाक्व। गन्ती २२:४१; गन्ती २५:३

29 मिनु बालाममी बालाक कली “एकेर आं कली ७ ओटा चढेतीक सेलीन। मिनु ७ ओटा ब्यफ ७ ओटा सांड ठीक पने” दैत।

30 मिनु बालाकमी बालाममी देशो खोदेशो पा पाप्तु। मिनु चढेतीक नेल्लेमी ब्यफ का का नु सांड का का चढेप्तु।

## 24

बालाममी सां खेयप लोत्र पशो

1 मिनु बालाममी परमप्रभु यावेमी इस्राएली आन कली आसीक गेचा थुं पशो बाक्त, दे तुइक्ताक्व। मिनु मेको डोंइती डा खोदेशो पा परमप्रभु कली हिल्लो पथ मला। तन्न मेकोमी आ कुल गोरशो रागी गे हिरशा कोव्रतु।

2 मिनु बालाममी कोव्रना कोव्रन, इस्राएली आन कली थर थर पा बाक्शो ताम्तीमी। मिनु परमप्रभु आ सोक्तीम मेको कली सुम्तु।

3 मिनु मेकोमी परमप्रभु आ पपाइश्शो लोत्र पा “गो बेओर आ तौ बालाम, मिक्च ताइब नड, आ देशो लोत्र मार बाक्त देशा हना, १सामुएल ९:९

4 गो, परमप्रभु आ लोत्र नैबमी, एको लोत्र पाइनुड। गो नेल्ल क्येडा सक्ति पाइश्शो आ कोइशो ताइनुड। मिनु गो आ डोंइती बाप्शा, मेको कली ताइनुड।

5 याकूब आ मुर इन ताम्बु गिश रिम्शो बाक्नीमी। गे इस्राएली इन बाक्तीके दारशो बाक्नीम।

6 मेको खजूर रवा खुम्शो ठेयब दिंम खोदेशो बाक्व। मेको खोला आ नेक्था खुम्शो फू रू खोदेशो बाक्व। मेको परमप्रभु यावेमी खुम्शो ठेयब च्यू कुमारी खोदेशो बाक्व। ब्वाक्कु आ नेक्था वाशो लेबानोन डा लाइश्शो रवा खोदेशो बाक्व।

7 मेको आन गरपुकीम ब्वाक्कु ब्रीशा क्युपब। मिनु मेको आन रू शुश ब्वाक्कु ताइनीम। मेको आन पिप अगाग क्येडा यो ठेयब बाक्व। मिनु मेको आ राज्य ठेयब सेल्चा पुंडसीब।

8 परमप्रभुमी मेको आन कली इजीप्त रे गुंइशा चाक्शो बाक्व। आ सक्ति इस्राएली आन कली ब्वाकी डा ब्यफ आ योत्र खोदेशो बाक्व। रागी रागी डा जोरी सत्रु आन कली क्याम्ब। मेको आन रुश जिक्व। मेको आन लिब्रामी मेको आन कली खिरशा साइक्व।

9 मेको गुप्स खोदेशो पा बाप्शा बाक्व। गुप्सनी खोदेशो पा बाप्शा बाक्व। सुम मेको कली पोक्वा डा? इस्राएली, सुमी इन कली आसीक गेनीमी, मेको आसीक राइनीम। सुमी इन कली सराप चीले पाइक्नीमी, मेको सराप चीले राइनीम” दैत। गन्ती २३:२४; उत्पती ४९:९; उत्पती १२:३; उत्पती २७:२९

10 मिनु बालाक बालाम कली तशा, शुश गाइक्ताक्व। मिनु मेकोमी आ गुड क्युक्शा, बालाम कली “गो इ कली आं जोरी सत्रु आन कली सराप चीले पाइक्वा कली कका ब्रेत्ताक्न। तन्न गे मेको आन कली सां खेयप आसीक कका गेप्तीवी।

11 मोपतीके मुल गे दोरोर पा इ खिं लेतो। गो इ कली ठेयब सेल्नुड, दे मिम्शो नड। तन्न परमप्रभु यावेमी इ कली मान ततीक रे तेक्तु” दैत।

12 मिनु बालामम बालाक कली “गे आं कली ब्रेत्थ सोइश्शो मुर आन कली गो

13 ‘बालाकमी आं कली सुन नु चांदीम ब्रीशो आ दरवार गेती हना यो, परमप्रभु यावे आ लोत्र लाक्शा आं मिम्शोमी मारेइ रिम्शो नु मरिम्शो पने मचाप्नुड। परमप्रभु यावेमी आं कली मार देबा, गो मेकोन देनुड’ मदेशो नडा डा? गन्ती २२:१८

14 मुल गो आं मुर आन बाक्तीके लाइनुड। तन्न इस्राएलीपुकीम इन मुर आन कली नोले मार पाइक्नीमी, मेको इन कली शेनुड” दैत।

बालाममी परमप्रभु आ लोत्र पशो

15 मिनू बालाममी परमप्रभु आ पपाइशशो लोत्र पा “गो बेओर आ तौ बालाम, मिक्च ताइब नड, आ देशो लोत्र मार बाक्त देशा हना,

16 गो, परमप्रभु आ लोत्र नेंबमी, एको लोत्र पाइनुड। गो नेल्ल क्येडा ठेयब तुइशशा, नेल्ल क्येडा सक्ति पाइशशो आ कोंइशो ताइनुड। मिनू गो आं मिक्च मसुम्शो आ डोंइती बाप्शा,

17 गो मेको कली ताइनुड, तन्न मुल ममाइ। गो मेको कली कोव्रनुड। तन्न आ नेक्था रे ममाइ। याकूब रे पा सोरुल का दाप्ब। मिनू इस्राएली रे पा पिप का यूब। मिनू मेकोमी मोआब रागी आ सांद रे पा खतम सेल्ब। मिनू शेष आ थर डा मुर आन कली खतम पोक्ब। मती २:२; लूका १:७८; उत्पत्ती ४९:१०; २सामुएल ८:२

18 एदोम रागी आ केन सेल्ब। मिनू सेडर रागी ग्राब। मिनू इस्राएल बोल्यो दुम्ब। २सामुएल ८:१४; येरमीया ४९:७-२२ 19 याकूब रे पा हुकुम पाइब का यूब। मिनू इर सहर डा लीशो आन कली साइक्ब” दैत। मीका ५:१,७,८

20 मिनू बालाममी अमालेक आ मुर आन कली कोव्रशा “अमालेक आ मुरपुकी रागी रागी नेल्ल क्येडा डोंइती डा बाक्तेक्म। तन्न मेकोपुकी गेना हना यो जाम्शा लाइनीमी” दैत। प्रस्थान १७:१४; १सामुएल १५:२-३,७

21 मिनू नोले मेकोमी केनी डा मुर आन कली कोव्रशा “इन बाक्तीक रागी बोल्यो बाक्ब। इन बाक्तीक सेरथे फुल्लुमी सेल्शो ग्योत्र खोदेशो बाक्ब। १सामुएल १५:६

22 तन्न गे काइन सहर डा मुरपुकी मीम चोचा पुंडसीनीनी। गिश सम्म अश्रुरीमी इन कली फ्रेशा लाइक्नीम” दैत।

23 मिनू लेशा मेकोमी लोत्र पा “आबी, परमप्रभुम मोदेशो पवानु, सु ब्रोंइने चाप्बा डा?

24 कितीम रे जहाजपुकी जाक्नीम। मिनू मेकोपुकीम अश्रुर नु एबेर कली श्येत गेनीम। मिनू मेकोपुकी यो खतम दुम्नीम” दैत। उत्पत्ती १०:-४; उत्पत्ती १०:२१-२२

25 मिनू बालाम बोक्शा, आ खिं लेत्त। मिनू बालाक यो आ लां लत। गन्ती ३१:८,१६

## 25

शित्तीममी मूर्ति पूजा पशो

1 इस्राएलीपुकी शित्तीममी बाक्मानु, मुरपुकी मोआबी आन तमीपुकी नु इप्शा, मरिम्शो पचा गोम्तेक्म। गन्ती ३३:४९; १कोरिन्थी १०:८

2 मिनू मेकोपुकीम इस्राएली आन कली आन देवी देवता आन कली चढेतीकेम ब्रेत्ताक्म। मिनू मेकोपुकीम मेको आन भोज जशा, मेको आन देवी देवता आन डोंइती बाप्तेक्म।

3 मोपा इस्राएलीपुकीम पेओर डांडा डा बाल देवता कली पूजा पचा गोम्तेक्म। मिनू परमप्रभु यावे इस्राएली आन पर्वम गाइक्ताक्व। ब्यवस्था ४:३; भजन संग्रह १०६:२८

4 मिनू परमप्रभु यावेमी मोसा कली “एको मुर आन ठेयब मुर नेल्ल आन कली चाक्शा क्युकशा साइशशा, परमप्रभु यावे आ डोंइती नाप्शो नांम चोइक्मी। मिनू परमप्रभु यावे इस्राएली आन पर्वम आ थाप्पा गाइशशो नांइसीब” दैत। ब्यवस्था २१:२-२३; २सामुएल २१:६-९

5 मिनू मोसाम इस्राएली आन निसाफ पाइब आन कली “गे नेल्लेमी पेओर डांडा डा बाल देवता कली पूजा पाइब इन मुर नेल्ल आन कली साइक्चा माल्नीनी” दे माइक्तीमी। प्रस्थान ३२:२७

6 मिनू इस्राएलीपुकी गुम्तीक ताम्बु आ ओव्रतीकेम डाक्शा बाक्मानु, मेना इस्राएली काम मोसा नु इस्राएली नेल्ल आन डोंइती आ खिंम मिदयानी मीश का चाक्तु। गन्ती ३१:१६

7 मिनू चढेब हारून आ चच, एलाजर आ तौ फिनेहासमी मेको तशा, मेको बोक्शा, आ गुइमी तूतीक का शेशा, प्रस्थान ६:२५

8 मेको इस्राएली आ नोनोले लशा, आ बाक्तीक ओव्रशा, मेको इस्राएली नु मेको मीश मुर निम्फा आस कली एर ओंथ खिप्पाइशशा थोक्तीम्सी। मिनू इस्राएली आन दाते रे मेको मुर बेक्तीक रोइ जांमत्।

9 तन्न मेको मुर बेक्तीक रोइम बेक्बपुकी २४ हजार बाक्तेक्म। भजन संग्रह १०६:२९-३१

10 मिनू परमप्रभु यावेमी मोसा कली

11 “चढेब हारून आ चच, एलाजर आ तौ, फिनेहासमी इस्राएली आन पर्वमी आं गाइशशो नाइक्पाइक्तु। फिनेहासमी आं रुश पशो तुइशशा, आ जॉब बोक्शा, आं गाइशशो नाइक्पाइक्तु। मिनू मेको आन कली मसदुमी।

12 मोपतीके गे मेको कली “परमप्रभुमी इ कली आं थुं नाइक्तीक कबल पाइब। १इतिहास ९:२०; यसैया ५४:१०; मलाकी २:५

13 मिनू मेको कबल इ कली नु इ चच युइ आन कली बाक्ब। मेको गेना हना यो चढेब दुम्तीक कबल बाक्ब। मारदे हना गे इ परमप्रभु आ पर्वम जॉब बोक्शा, गेय पाप्तीवी। मिनू गेमी इस्राएली आन पर्वम पाप क्याप्तीक गेय पाप्तीवी’ देनो” दैत।

14 मेको मिदयानी मीश मुर नु साइक्चा पुंडसीब इस्राएली आ नें जिप्पी बाक्त। मेको सालु आ तौ सिमियोन आ थर डा खिं का डा ठेयब मुर बाक्त।

15 मेको साइक्चा पुंडसीब मिदयानी मीश मुर आ नें कोज्बी बाक्त। मेको सुर आ तमी बाक्त। मेको मिदयान डा ठेयब मुर बाक्त।

16 मिनू परमप्रभु यावेमी मोसा कली

17 “मिदयानी आन कली श्येत गेशा, साइक्मी। गन्ती ३१:२-१०



18 मारदे हना, मेकोपुकीमी इन कली यो श्येत गोचा गोम्तेकम। मिनु इन कली बाल-पेओर कली पूजा पपाइक्तेकम। मेना मिदयान डा ठेयब मुर आ तमी कोज्बीमी इन कली श्येत गोपाइक्तु। मेको चहिं मुर साइक्चा रोड बोक्म नाक्त साइक्चा पुंडसाक्व। पेओर कली पूजा पतीक मो दुम्शो बाक्त” देत।

## 26

इसाएली आन कली हिक्शो

- 1 मेको मुर बेक्तीक रोड दुम नोले परमप्रभु यावेमी मोसा नु चढेब हारून आ तौ एलाजर आस कली
- 2 “इसाएली नेल्ल आन दातेमी २० बर्स गाप्शो नु मेको क्येडा लाक्शो लडाइम लने चाप्ब आन कली थर थर पा हिक्कीस” देत। गन्ती १:२-४७;
- 3 मिनु मोसा नु चढेब एलाजरमी यरीको आ आइक्ची हांबु यर्दन खोला आ शुंडच मोआब डा दिंमम इसाएली आन कली गुम्पाइश्शा
- 4 “परमप्रभु यावेमी मोसा कली अरेशो खोदेशो पा २० बर्स गाप्शो नु मेको क्येडा लाक्शो मुर आन कली हिक्कीन” दे माइक्तीमी। मिनु इजीप्त रे यूशा जाक्शो इसाएलीपुकी एकोन बाक्तेकम।
- 5 इसाएल आ डोंइती जरमेशो तौ रूबेन आ थर, हनोक आ खिं खिं डा मुरपुकी, पल्लु आ खिं खिं डा मुरपुकी, उत्पती ३५:२३-२६; उत्पती ४६:८-२७; १इतिहास ४:-८:-
- 6 हेसोन आ खिं खिं डा मुरपुकी नु कारमी आ खिं खिं डा मुरपुकी बाक्तेकम।
- 7 एको रूबेन आ थर डा खिं खिं डा मुरपुकी बाक्तेकम। मेको नेल्ल आन कली हिक्शोनु, ४३ हजार ७ सहे ५० जना बाक्तेकम।
- 8 पल्लु आ तौ आन दातेमी का एलीआब बाक्त।
- 9 एलीआब आ तौपुकी, नेमुएल, दाथान नु अबीराम बाक्तेकम। एकोपुकी मेको दाथान नु अबीराम आन दाते डा ठेयब मुरपुकी बाक्तेकम। मेकोपुकी कोराह आ हुलम ब्वाइसीशा मोसा नु हारून नु जिचा पोक्शा, परमप्रभु यावे आ परबम दूली पा बोक्शो बाक्तेकम। गन्ती १६:१, १२
- 10 मिनु रागीम आ शोत्र पाक्शा मेको आन कली कोराह नुन दाक्शो बाक्त। मेना सहे निक्शी ५० जना आन कली मीम खतम पोक्शो बाक्त। मेकोपुकी मरिम्शो पाइब दुम्शो बाक्तेकम।
- 11 तन्न कोराह आ तौपुकी चहिं मबेक्शो बाक्तेकम।
- 12 सिमियोन आ थर डा मुर आन खिं खिं डा मुरपुकी का का पा हिक्शोनु, नेमुएल आ खिं खिं डा मुरपुकी, यामीन आ खिं खिं डा मुरपुकी, याकीन आ खिं खिं डा मुरपुकी,
- 13 जेराह आ खिं खिं डा मुरपुकी नु शावल आ खिं खिं डा मुरपुकी बाक्तेकम। उत्पती ३६:१३
- 14 एको सिमियोन आ थर डा खिं खिं डा मुरपुकी बाक्तीम। मेको नेल्ल आन कली हिक्शोनु, २२ हजार सहे निक्शी बाक्तेकम।
- 15 गाद आ थर डा मुर आन खिं खिं डा मुरपुकी का का पा हिक्शोनु, सेफोन आ खिं खिं डा मुरपुकी, हाग्गी आ खिं खिं डा मुरपुकी, शुनी आ खिं खिं डा मुरपुकी,
- 16 ओज्नी आ खिं खिं डा मुरपुकी, एरी आ खिं खिं डा मुरपुकी,
- 17 अरोद आ खिं खिं डा मुरपुकी नु अरेली आ खिं खिं डा मुरपुकी बाक्तेकम।
- 18 एको गाद आ थर डा खिं खिं डा मुरपुकी बाक्तेकम। मेको नेल्ल आन कली हिक्शोनु ४० हजार ५ सहे जना बाक्तेकम।
- 19 मिनु यहूदा आ तौ एर नु ओनान बाक्ताक्स। तन्न मेको कनान रागीम बेक्ताक्स। उत्पती ३८:७-१०
- 20 यहूदा आ थर डा मुर आन खिं खिं डा मुरपुकी का का पा हिक्शोनु, शेलाह आ खिं खिं डा मुरपुकी, पेरेस आ खिं खिं डा मुरपुकी, जेराह आ खिं खिं डा मुरपुकी बाक्तेकम।
- 21 मिनु पेरेस आ चच युड डा मुर चहिं, हेसोन आ खिं खिं डा मुरपुकी नु हामुल आ खिं खिं डा मुरपुकी बाक्तेकम। रूथ ४:१८
- 22 एको यहूदा आ थर डा खिं खिं डा मुरपुकी बाक्तेकम। मेको नेल्ल आन कली हिक्शोनु, ७६ हजार ५ सहे जना बाक्तेकम।
- 23 इसाकाकार आ थर डा मुर आन खिं खिं डा मुरपुकी का का पा हिक्शोनु, तोला आ खिं खिं डा मुरपुकी, पुवा आ खिं खिं डा मुरपुकी,
- 24 याशुब आ खिं खिं डा मुरपुकी नु शिमोन आ खिं खिं डा मुरपुकी बाक्तेकम।
- 25 एको इसाकाकार आ थर डा खिं खिं डा मुरपुकी बाक्तेकम। मेको नेल्ल आन कली हिक्शोनु, ६४ हजार सहे सां बाक्तेकम।
- 26 जबूलून आ थर डा मुर आन खिं खिं डा मुरपुकी का का पा हिक्शोनु, सेरेद आ खिं खिं डा मुरपुकी, एलोन आ खिं खिं डा मुरपुकी नु याहलेल आ खिं खिं डा मुरपुकी बाक्तेकम।
- 27 एको जबूलून आ थर डा खिं खिं डा मुरपुकी बाक्तेकम। मेको नेल्ल आन कली हिक्शोनु, ६० हजार ५ सहे जना बाक्तेकम।
- 28 मिनु योसेफ आ तौ मनस्से नु एफ्राइम आस थर डा मुर आन खिं खिं डा मुर आन कली का का पा हिक्शोनु,
- 29 मनस्से आ चच युड डा मार्कीर आ खिं खिं डा मुरपुकी बाक्तेकम। मार्कीर गिलाद आ आफ बाक्त। यहोसु १७:१-६

- 30 गिलाद आ चच युडपुकी इएजेर आ खिं खिं डा मुर रे इएजेर, हेलेक आ खिं खिं डा मुरपुकी,  
 31 असीएल आ खिं खिं डा मुरपुकी, शेकेम आ खिं खिं डा मुरपुकी,  
 32 शेमीदा आ खिं खिं डा मुरपुकी नु हेफेर आ खिं खिं डा मुरपुकी बाक्तेक्म। हेफेर आ तौ सेलोफेहाद के चहिं तौ मबाक्थु, तमीपुकी ला बाक्तेक्म।  
 33 हेफेर आ तौ सेलोफेहाद आ तमी आन नें महलाह, नोआह, होग्ला, मिल्का नु तिरचा बाक्तेक्म। गन्ती २७:१  
 34 एको मनरसे आ थर डा खिं खिं डा मुरपुकी बाक्तेक्म। मेको नेल्ल आन कली हिक्शोनु, ५२ हजार ७ सहे बाक्तेक्म।  
 35 एफ्राइम आ थर डा मुर आन खिं खिं डा मुरपुकी का का पा हिक्शोनु, शुथेलाह आ खिं खिं डा मुरपुकी, बेकेर आ खिं खिं डा मुरपुकी नु तहन आ खिं खिं डा मुरपुकी बाक्तेक्म।  
 36 मिनु शुथेलाह आ खिं खिं डा मुरपुकी चहिं एरान आ खिं खिं डा मुर बाक्तेक्म।  
 37 एको एफ्राइम आ थर डा खिं खिं डा मुरपुकी बाक्तेक्म। मेको नेल्ल आन कली हिक्शोनु, ३२ हजार ५ सहे बाक्तेक्म। मेको योसेफ आ चच युड आन खिं खिं डा मुरपुकी बाक्तेक्म।  
 38 बेन्यामीन आ थर डा मुर आन खिं खिं डा मुरपुकी का का पा हिक्शोनु, बेला आ खिं खिं डा मुरपुकी, अशबेल आ खिं खिं डा मुरपुकी, अहीराम आ खिं खिं डा मुरपुकी,  
 39 शुफाम आ खिं खिं डा मुरपुकी नु हुफाम आ खिं खिं डा मुरपुकी बाक्तेक्म।  
 40 मिनु बेला आ तौ आरद नु नामान बाक्ताक्स। आरद आ खिं खिं डा मुरपुकी नु नामान आ खिं खिं डा मुरपुकी बाक्तेक्म।  
 41 एको बेन्यामीन आ थर डा खिं खिं डा मुरपुकी बाक्तेक्म। मेको नेल्ल आन कली हिक्शोनु, ४५ हजार ६ सहे बाक्तेक्म।  
 42 दान आ थर डा मुर आन खिं खिं डा मुरपुकी का का पा हिक्शोनु, शुहाम आ खिं खिं डा मुरपुकी बाक्तेक्म। मेको दान आ थर डा खिं खिं डा मुरपुकी बाक्तेक्म।  
 43 एको शुहाम आ खिं खिं डा मुर नेल्ल आन कली हिक्शोनु, ६४ हजार ४ सहे बाक्तेक्म।  
 44 आशेर आ थर डा मुर आन खिं खिं डा मुरपुकी का का पा हिक्शोनु, इम्नाह आ खिं खिं डा मुरपुकी, इशवी आ खिं खिं डा मुरपुकी, बेरीआ आ खिं खिं डा मुरपुकी,  
 45 हेबर आ खिं खिं डा मुरपुकी नु माल्कीएल आ खिं खिं डा मुरपुकी बाक्तेक्म।  
 46 आशेर आ तमी आ नें सेराह बाक्त।  
 47 एको आशेर आ थर डा खिं खिं डा मुरपुकी बाक्तेक्म। मेको नेल्ल आन कली हिक्शोनु ५३ हजार ४ सहे बाक्तेक्म।  
 48 नाप्ताली आ थर डा मुर आन खिं खिं डा मुरपुकी का का पा हिक्शोनु, याहसेल आ खिं खिं डा मुरपुकी, गुनी आ खिं खिं डा मुरपुकी,  
 49 येसेर आ खिं खिं डा मुरपुकी नु शिल्लेम आ खिं खिं डा मुरपुकी बाक्तेक्म।  
 50 एको नाप्ताली आ थर डा खिं खिं डा मुरपुकी बाक्तेक्म। मेको नेल्ल आन कली हिक्शोनु, ४५ हजार ४ सहे बाक्तेक्म।  
 51 इस्राएली वोंइश मुर नेल्ल आन कली हिक्शोनु, ६ लाख हजार का ७ सहे ३० जना बाक्तेक्म।  
 52 मिनु परमप्रभु यावेमी मोसा कली  
 53 “मेको आन खिं खिं डा मुर गिश बाक्नीमी, दे मिम्शा, रागी आंम के सेल्चा कली योक्शा गेमी।  
 54 गे मेको आन कली ठेयब थर आन कली ठेयब रागी नु आइक्च थर आन कली आइक्च रागी पा योक्शा गेमी। थर का का आन कली मेको आ मुर आन कली कोव्रशा हुकुम पचा गेमी।  
 55 मो हना यो मेको रागी चिटठा आप्शा योक्चा माल्ब। मेकोपुकीमी आन किंकी पिपी आन नें नें खोदेशो पा अधिकार पामेक्ल। गन्ती ३३:५४; यहोसु १४:२  
 56 ठेयब नु आइक्च आन दातेमी आन अधिकार पतीके चिटठा आप्शा योक्चा माल्ब” देंत।  
 57 मिनु लेवी आ थर डा मुर का का पा हिक्शोनु, सु सु बाक्तेक्म देशा हना, गेरशोन आ खिं खिं डा मुर, कोहाथ आ खिं खिं डा मुर, मेराारी आ खिं खिं डा मुर बाक्तेक्म। गन्ती ३:१७-२०; प्रस्थांन ६:१६-२५  
 58 मिनु लेवी आ थर डा खिं खिं डा मुर अरु सु सु अरु बाक्तेक्म देशा हना, लिब्नी आ खिं खिं डा मुर, हेब्रोन आ खिं खिं डा मुर, माहली आ खिं खिं डा मुर, मुशी आ खिं खिं डा मुर, कोराह आ खिं खिं डा मुर बाक्तेक्म। कोहाथ चहिं अग्राम आ किंकी बाक्त। गन्ती ३३:२०; गन्ती १३:२२  
 59 अग्राम आ मीश आ नें योकेबेद बाक्त। मेको चहिं लेवी आ थर डा इजीप्त रागीमी थिशो तमी बाक्त। मेकोमी अग्राम रे हारून नु मोसा नु आस समी मिरयाम आन कली थिन्तीमी।  
 60 मिनु हारूनमी नादाब, अबीहु, एलाजर नु इथामार थिन्तीमी।  
 61 तन्न नादाब नु अबीहु चहिं परमप्रभु यावे आ डोंइती अरु मी रे पा चोशा चढ़ेतीके, बेक्ताक्स। लेवी १०:१-२  
 62 मेको वोंइश आल नेल्ले महिना का नु मेको क्येडा लाक्शो हिक्शोनु २३ हजार बाक्तेक्म। मेकोपुकी अरु इस्राएली आन खोदेशो पा लडाइ पचा कली महिक्शो बाक्तेक्म। मारदे हना मेकोपुकी इस्राएली आन दातेमी आंम आन रागी कली मंगेशो बाक्त।  
 63 मिनु मोसा नु एलाजर चढ़ेबमी मेको नेल्ल आन कली हिक्ताक्स। मेना मेकोपुकी मोआब डा दिंम यर्दन आ शुंडच, यरीको आ नेक्था बाक्तेक्म।  
 64 तन्न मोसा नु हारूनमी सीनै डा गोरशो रागीम हिक्शो इस्राएली का यो मबाक्म। गन्ती १:-

65 मारदे हना, परमप्रभु यावेमी मेको आन पबंम “मेकोपुकी थमा पा गोरशो रागीमीन बेक्चा माल्नीम” देशो बाक्त। यपुन्ने आ तौ कालेब नून आ तौ यहोसु डा लाक्शा, मेको आन दाते डा का यो सेस मलीम। गन्ती १४:२२-३८

## 27

सेलोफेहाद आ तमीपुकी

गन्ती ३६:-

1 योसेफ आ तौ मनस्से, मनस्से आ तौ माकीर, माकीर आ तौ गिलाद, गिलाद आ तौ हेफेर, हेफेर आ तौ सेलोफेहाद आ तमीपुकी महलाह, नोआह, होग्ला, मिल्का नु तिरचा बाक्तेक्म। गन्ती २६:३३; यहोसु १७:३-६

2 मेकोपुकी मोसा, चढ़ेब एलाजर, टेयब मुरपुकी नु मेकेर बाक्ब मुर नेल्ले आन डोंइती गुम्तीक ताम्बु आ लाप्यो आ डोंइती बाक्तेक्म।

3 मिनु सेलोफेहाद आ तमीपुकीमी “आंड आफ गोरशो रागीम बेक्त। तन्न मेको परमप्रभु यावे आ पबंम मरिम्शो पा बोक्ब कोराह आ हुलम मबाक्शो बाक्त। तन्न मेको आ आंम पाप पतीके बेक्त। मिनु मेको के तौ मबाक्म। गन्ती १६:७; उत्पत्ती ३:१९

4 मिनु तौ मबाक्तीके आंड आफ आ नें आ थर आ मुर आन दाते रे मारदे क्याम्सीबा? आंड आफ आ लोकबपुकी नु आंड कली यो अडस गेने” दैतेक्म।

5 मिनु मोसामी मेको आन पोक्शो लोत्र परमप्रभु यावे आ डोंइती चाक्तु।

6 मिनु परमप्रभु यावेमी मोसा कली

7 “सेलोफेहाद आ तमीपुकीम पोक्शो लोत्र ठीक बाक्ब। गे थमा पा मेको आन कली आन आफ आ लोकब आन दातेमी अडस गेचा माल्नेवे। मिनु गे मेको आन आफ आ अडस मेको आन कली गेमी।

8 मिनु गे इस्राएली आन कली ‘सुड मुर तौ मथिथु, बेक्त हना, मेको आ तमी आन कली आ अडस गेचा माल्नीनी।

9 मेको के तमी यो मबाक्त हना, मेको आ अडस आ लोकब आन कली गेचा माल्नीनी।

10 मेको के आ लोकब यो मबाक्त हना, मेको आ अडस आ आफ आ लोकब कली गेचा माल्नीनी।

11 मिनु मेको आ आफ आ लोकब यो मबाक्त हना, मेको आ अडस आ थर डा नेल्ल क्येडा आ नेक्था डा मुर कली गेचा माल्नीनी। मिनु मेको अडस मेको केन दुम्ब’ दे माइक्मी” दैत। मेको लोत्र परमप्रभु यावेमी मोसा कली देशो, इस्राएली आन कली फुल्लुम मुशा ब्रेक्शो नु अरेशो लोत्र बाक्ब।

यहोसु लां कोइब दुम्शो

12 मिनु परमप्रभु यावेमी मोसा कली “गे एको अबारीम पहाड डा डांटा डोंइसो। मिनु इस्राएली आन कली गेशो रागी कोत्रडो। गन्ती २१:११; ब्यवस्था ३२:४८-५२

13 मिनु गे मेको रागी तवी नोले, गे इ लोकब हारून खोदेशो पा इ किकी पिपी नु बाक्थ लाइनेवे। गन्ती २०:२४-२८

14 मारदे हना जीन डा गोरशो रागीमी मुरपुकी गो नु जिचा पोक्मेनु, गे यो मटिसी। मेरीबाथ-कादेश डा ब्वाक्कुम मुर आन डोंइती गे आं कली टेयब मसेल्यीसी” दैत। गन्ती २०:१२-१३

15 मिनु मोसामी परमप्रभु यावे कली

16 “परमप्रभु यावे, मुर नेल्ल आन ब्रोंइचा गेब परमप्रभु, एको मुर आन कली लां कोइब मुर का वोतीन। गन्ती १६:२२

17 मिनु मेको मुर आन डोंइती गाक्ल। मिनु मेको आन कली लतीक नु जाक्तीक लां कोइदल। मोपा परमप्रभु यावे आ मुर गोठला मबाक्शो भेडा खोदेशो मदुम्मल” दैत। मीका ५:३; मत्ती ९:३६

18 मिनु परमप्रभु यावेमी मोसा कली “गे आं सोक्त पाइश्शो नून आ तौ यहोसु कली चाक्शा, इ गुड मेको आ तार वोतो। प्रस्थान ३३:११; ब्यवस्था ३४:९

19 मिनु मेको कली चढ़ेब एलाजर नु मुर नेल्ल आन डोंइती राप्पतो। मिनु मेको मुर नेल्लेम तचा डा पा मेको कली एको गेय जिम्मा गेवो।

20 मोपा गे मेको कली इ अधिकार गेवो। मिनु इस्राएली नेल्लेमी मेको आ देशो टीमेक्ल। प्रस्थान ३४:२९-३०; २राजा २:९, १५

21 मिनु यहोसु चढ़ेब एलाजर आ डोंइती राप्चा माल्ब। मिनु एलाजरमी ऊरीम यहोसु आ पबंम मार देबा, दे परमप्रभु यावे आ डोंइती हिल्लो पचा माल्ब। यहोसु आ देशोमी इस्राएली नेल्ले मेको नु लडाइ पथ लचा नु लेत्चा माल्नीम” दैत। प्रस्थान २८:३०; ब्यवस्था ३३:८

22 मिनु मोसामी परमप्रभु यावेमी अरेशो खोदेशो पा पाप्तु। मेकोमी यहोसु कली चाक्शा चढ़ेब एलाजर नु इस्राएली नेल्ल आन डोंइती राप्पाइक्तु।

23 मिनु मोसामी परमप्रभु यावेमी देशो खोदेशो पा आ गुड यहोसु आ तार वोइश्शा, आ गेय पचा कली जिम्मा गेप्तु।

## 28

नाक्त किंत किंत डा चढ़ेतीके

1 परमप्रभु यावेमी मोसा कली

2 “गे इस्राएली आन कली मीम चोशा चढ़ेतीके आं जचा थोत्रक, आं दाक्शो ब्रोंइशो रिना पाइश्शो चढ़ेतीके गे आं देशो नाक्त चढ़ेचा माल्नीम, दे शेंचा माल्नेवे। लेवी २१:६

3 मिनु गे मेको आन कली “गे परमप्रभु यावे कली मीम चोशा चढ़ेतीके मार चढ़ेचा माल्नीनी देशा हना, मारेड मदुम्शो थम रिम्शो बर्स का गाप्यो पाठा निक्शी नाक्त किंत किंत चढ़ेचा माल्नीनी। प्रस्थान २९:३८-४२

- 4 मिनू का सुनी नु का नाक्टो चढ़ेचा माल्नीनी।  
 5 मेको नु अन्न चढ़ेतीके कली एफाह का डा १० भाग डा भाग का रिम्शो फस नु हिन का डा ४ भाग डा भाग का खाक्शो तेल ब्वाइश्शा चढ़ेचा माल्नीनी। एफाह का २२ लिटर पुक्तीक बाक्ब। हिन का ४ लिटर बाक्ब। ४ भाग डा भाग का लिटर का बाक्ब।  
 6 एको परमप्रभु यावे कली गेना हना यो मीम चोशा चढ़ेतीके बाक्ब। मेको आ दाक्शो ब्रोव्रशो रिना पाइश्शो सनी डाडाम देशो खोदेशो पा चढ़ेतीके बाक्ब।  
 7 मेको नु तूचा थोव्रक चढ़ेतीके पाठा का कली हिन का डा ४ भाग डा भाग का अडगुर शांबु चढ़ेचा माल्नीनी। मेको परमप्रभु यावे आ बाक्तीकेम परमप्रभु यावे आ डोंइती मोइक्चा माल्नीनी।  
 8 मेको अर्को पाठा नां रिक्चावानु, चढ़ेचा माल्नीनी। मेको नु सुनी डा खोदेशो पा अन्न चढ़ेतीके नु तूचा थोव्रक चढ़ेतीके चढ़ेचा माल्नीनी। एको परमप्रभु यावे कली मीम चोशा चढ़ेतीके आ दाक्शो ब्रोव्रशो रिना पाइश्शो चढ़ेतीके बाक्ब।

नाइक्तीक नाक्त डा चढ़ेतीके

- 9 मिनू नाइक्तीक नाक्तीम मारेइ मटुम्शो थम रिम्शो बर्स का गाप्शो पाठा निक्शी चढ़ेचा माल्नीनी। मेको नु अन्न चढ़ेतीके तेल ब्वाइश्शो रिम्शो फस एफाह का डा १० भाग डा भाग निक्शी चढ़ेचा माल्नीनी। मिनू मेको नु तूचा थोव्रक चढ़ेतीके यो चढ़ेचा माल्नीनी। एफाह का २२ लिटर पुक्तीक बाक्ब। मत्ती १२:५  
 10 मेको नाइक्तीक नाक्ती डा चोशा चढ़ेतीके बाक्ब। मेको नाक्त किंत किंत डा चोशा चढ़ेतीके नु तूचा थोव्रक चढ़ेतीके चढ़ेचा यो मेको चढ़ेचा माल्नीनी।

औंसी डा चढ़ेतीके

- 11 मिनू गे नेल्ल महिना डा डोंइती डा नाक्त परमप्रभु यावे कली चोशा चढ़ेतीके चढ़ेचा माल्नीनी। मेको ब्यफ निक्शी, सांड का नु ७ ओटा मारेइ मटुम्शो थम रिम्शो बर्स का का गाप्शो पाठा चढ़ेचा माल्नीनी। गन्ती १०:१०; इजीकीएल ४६:१,३,६; यसेया १:१३  
 12 मिनू मेको ब्यफ का का पा नु अन्न चढ़ेतीके तेलम निशो रिम्शो फस एफाह डा १० भाग डा भाग सां चढ़ेचा माल्नीनी। मेको सांड का नु अन्न चढ़ेतीके तेलम निशो रिम्शो फस एफाह का डा १० भाग डा भाग निक्शी चढ़ेचा माल्नीनी। एफाह का २२ लिटर पुक्तीके बाक्ब। गन्ती १५:२-१२  
 13 मिनू मेको ७ ओटा पाठा नु का का पा एफाह डा १० भाग डा भाग का तेलम निशो रिम्शो फस चढ़ेचा माल्नीनी। एको परमप्रभु यावे कली आ दाक्शो ब्रोव्रशो रिना पाइश्शो मीम चोशा चढ़ेतीके बाक्ब।  
 14 मेको नु तूचा थोव्रक चढ़ेतीके ब्यफ का का नु आधा हिन अडगुर शांबु बाक्चा माल्ब। सांड नु हिन का डा भाग सां डा भाग का अडगुर शांबु बाक्चा माल्ब। मिनू पाठा नेल्ल नु हिन का डा ४ भाग डा भाग का अडगुर शांबु चढ़ेचा माल्नीनी। मेको बर्स डा महिना नेल्ल डा औंसीम चोशा चढ़ेतीके बाक्नीम।  
 15 मिनू पाप पशो आ पर्बम बोका का परमप्रभु यावे कली चढ़ेचा माल्नीम। मेको नाक्त किंत किंत डा चोशा चढ़ेतीक नु तूचा थोव्रक चढ़ेतीके चढ़ेचा यो मेको चढ़ेचा माल्नीनी।

पास्सा नाक्त डा चढ़ेतीक

- 16 मिनू डोंइती डा महिना डा १४ नाक्ती परमप्रभु यावे कली पास्सा चाड डा चढ़ेतीके चढ़ेचा माल्नीनी। लेवी २३:५-१४  
 17 मिनू मेको महिना डा १५ नाक्ती टेयब चाड का मानेचा माल्नीम। मेको चाडम ७ नाक्त सम्म बोरब ओख्ती मसुप्शो शोब्ले जचा माल्नीनी।  
 18 डोंइती डा नाक्तीम परमप्रभु यावे नु युम्तीके का दुम्चा माल्ब। मेको नाक्ती गे काइ गेय मपने।  
 19 गे परमप्रभु यावे कली मीम चोशा चढ़ेतीके चढ़ेचा माल्नीनी। मार चढ़ेचा माल्नीनी देशा हना, ब्यफ निक्शी, सांड का नु बर्स का का गाप्शो ७ ओटा पाठा चढ़ेचा माल्नीनी। मेको नेल्ल मारेइ मटुम्शो थम रिम्शो बाक्चा माल्नीम।  
 20 मेको नु अन्न चढ़ेतीके तेल ब्वाइश्शो रिम्शो फस दुम्चा माल्ब। मेको ब्यफ का नु एफाह का डा १० भाग डा भाग सां चढ़ेचा माल्नीनी। मेको सांड का नु एफाह का डा १० भाग डा भाग निक्शी चढ़ेचा माल्नीनी। एफाह का २२ लिटर खोदेशो बाक्ब।  
 21 मिनू मेको ७ ओटा पाठा नु एफाह डा १० भाग डा भाग का का पा रिम्शो फस चढ़ेचा माल्नीनी।  
 22 मिनू इन पाप आ पर्बम पाप क्याम्तीक गेय पचा कली बोका का चढ़ेचा माल्नीनी।  
 23 मिनू सुनी डा चोशा चढ़ेतीके, मेको गेना हना यो पचा माल्लो चोशा चढ़ेतीक बाक्ब, मेको चढ़ेचा माल्नीनी।  
 24 गे मोदेशो चढ़ेतीके ७ नाक्त सम्म नाक्त किंत किंत जचा थोव्रक कली चढ़ेचा माल्नीनी। मेको परमप्रभु यावे कली आ दाक्शो ब्रोव्रशो रिना पाइश्शो मीम चोशा चढ़ेतीक बाक्ब। मेको नाक्त किंत किंत डा चोशा चढ़ेतीके नु तूचा थोव्रक चढ़ेतीके चढ़ेचा यो मेको चढ़ेचा माल्नीनी।  
 25 मिनू ७ नाक्तीम परमप्रभु यावे नु युम्तीके का दुम्चा माल्ब। मेको नाक्ती गे काइ गेय मपने।

डोंइती मीशो अन्न डा चाड

- 26 डोंइती मीशो अन्न नु फल फुल डा चाड नाक्त गे परमप्रभु यावे कली नक अन्न रे अन्न चढ़ेतीक चढ़ेनीनी। मेको हप्ता डा चाड बाक्ब। मेना परमप्रभु यावे नु युम्तीके का दुम्चा माल्ब। मेको नाक्ती गे काइ गेय मपने। लेवी २३:१५-२१; ब्यवस्था १६:१०  
 27 गे परमप्रभु यावे कली चोशा चढ़ेतीके चढ़ेचा माल्नीनी। मेको परमप्रभु यावे कली आ दाक्शो ब्रोव्रशो रिना पाइश्शो चढ़ेतीके बाक्ब। गेपुकीमी ब्यफ निक्शी, सांड का नु बर्स का का गाप्शो ७ ओटा पाठा चढ़ेचा माल्नीनी।

28 मेको नु अन्न चढेतीके तेल ब्वाइश्शो रिम्शो फस दुम्चा माल्ब। मेको ब्यफ का नु एफाह का डा १० भाग डा भाग सां चढेचा माल्नीनी। मेको सांड का नु एफाह का डा १० भाग डा भाग निकशी चढेचा माल्नीनी। एफाह का २२ लिटर खोदेशो बाक्ब।

29 मिनु मेको ७ ओटा पाठा नु भाग का रिम्शो फस चढेचा माल्नीनी।

30 मिनु इन पाप आ पर्वम पाप क्याम्तीक गेय पचा कली बोका का चढेचा माल्नीनी।

31 मिनु नाक्त कित कित डा चोशा चढेतीक नु मेको अन्न चढेतीक गेपुकीम मेको नु आ तूचा थोत्रक चढेतीक चढेचा माल्नीनी। मेको ब्यफ, सांड, पाठा नेल्ल मारेड मदुम्शो थम रिम्शो बाक्चा माल्नीम।

## 29

नक बर्स डा चाड

1 गेपुकी ७ महिना डा डोंइती डा नाक्ती गुम्तीके का सेल्चा माल्नीनी। मेको नाक्ती गे काड गेय मपने। मेको नाक्ती गे तुराही ताप्चा माल्नीनी। गन्ती १०:१०; लेवी २३:२४-२५

2 गे परमप्रभु यावे कली चोशा चढेतीके चढेचा माल्नीनी। मेको परमप्रभु यावे कली आ दाक्शो ब्रोत्रशो रिना पाइश्शो चढेतीके बाक्ब। गेपुकीमी ब्यफ का, सांड का नु बर्स का का गाप्शो ७ ओटा पाठा चढेचा माल्नीनी। मेको मारेड मदुम्शो थम रिम्शो दुम्चा माल्नीम।

3 मिनु मेको ब्यफ नु अन्न चढेतीके, तेल ब्वाइश्शो रिम्शो फस एफाह का १० भाग डा भाग सां नु सांड नु १० भाग डा भाग निकशी चढेचा माल्नीनी। एफाह का २२ लिटर पुक्तीके का बाक्ब। भाग सां ६ नु आधा लिटर खोदेशो बाक्ब। भाग निकशी ४ नु आधा लिटर खोदेशो बाक्ब।

4 मिनु मेको ७ ओटा पाठा नु का का पा भाग का चढेचा माल्नीनी।

5 मिनु इन पाप आ पर्वम पाप क्याम्तीक गेय पचा कली बोका का चढेचा माल्नीनी।

6 मेको नेल्ले औसी नाक्त डा चोशा चढेतीक नु मेको नु अन्न चढेतीके, नाक्त कित कित डा चोशा चढेतीक नु मेको नु अन्न चढेतीके, मेको नेल्ल नु तूचा थोत्रक चढेतीके यो चढेचा माल्नीनी। मेको नेल्ले परमप्रभु यावेमी देशो खोदेशो पा आ दाक्शो ब्रोत्रशो रिना पाइश्शो मीम चोशा चढेतीक बाक्नीम।

पाप क्याम्तीक नाक्त डा चाड

7 मेको ७ महिना डा १० नाक्त परमप्रभु यावे नु गुम्तीके का दुम्चा माल्ब। मेको नाक्ती गे माइजा बाक्शा, काड गेय मपने। लेवी २३:२७-३२

8 गे परमप्रभु यावे कली चोशा चढेतीके चढेचा माल्नीनी। मेको आ दाक्शो ब्रोत्रशो रिना पाइश्शो चढेतीके बाक्ब। मिनु गे ब्यफ का, सांड का नु बर्स का का गाप्शो ७ ओटा पाठा चढेचा माल्नीनी। मेको थम रिम्शो मारेड मदुम्शो दुम्चा माल्नीम।

9 मिनु मेको ब्यफ नु अन्न चढेतीके, तेल ब्वाइश्शो रिम्शो फस एफाह का डा १० भाग डा भाग सां नु सांड नु १० भाग डा भाग निकशी चढेचा माल्नीनी। एफाह का २२ लिटर खोदेशो बाक्ब

10 मिनु मेको ७ ओटा पाठा नु का का पा भाग का का पा चढेचा माल्नीनी।

11 मिनु मेको नु पाप पशो आ पर्वम बोका का चढेचा माल्नीनी। मेको पाप पशो क्याम्तीक गेय पचा कली चढेचा यो नाक्त कित कित डा चोशा चढेतीके, मेको नु अन्न चढेतीके नु तूचा थोत्रक चढेतीके चढेचा माल्नीनी। लेवी १६:११-२८

गोठ सेल्शा बाक्तीक चाड

12 गे ७ महिना डा १५ नाक्ती परमप्रभु यावे नु गुम्तीके का सेल्चा माल्नीनी। मेको नाक्ती गे काड गेय मपने। गे परमप्रभु यावे कली ७ नाक्त सम्म चाड मानेचा माल्नीनी। लेवी २३: ३४-४३

13 गेपुकीमी परमप्रभु यावे कली चोशा चढेतीके चढेचा माल्नीनी। मेको आ दाक्शो ब्रोत्रशो रिना पाइश्शो मीम चोशा चढेतीके बाक्ब। मेको चोशा चढेतीके मार बाक्चा माल्नीम देशा हना, १३ ओटा ब्यफ, सांड निकशी नु बर्स का गाप्शो १४ ओटा पाठा बाक्चा माल्नीम। मेको नेल्ल थम रिम्शो मारेड मदुम्शो बाक्चा माल्नीम।

14 मिनु मेको नु अन्न चढेतीके तेल ब्वाइश्शो रिम्शो फस बाक्चा माल्ब। मेको १३ ओटा ब्यफ आन कली का का पा एफाह का डा १० भाग डा भाग सां चढेचा माल्नीम। मेको सांड निकशी नु एफाह का डा १० भाग डा भाग निकशी रिम्शो तेल ब्वाइश्शो फस चढेचा माल्नीम। एफाह का २२ लिटर खोदेशो बाक्ब।

15 मिनु मेको १४ ओटा पाठा नु का का पा भाग का का रिम्शो फस चढेचा माल्नीनी। भाग ला ब्रेक्शो बाक्त हना, एफाह डा १० भाग डा भाग का मिम्सीब। मेको २ लिटर २०० सी सी बाक्ब।

16 मिनु मेको नु पाप पशो आ पर्वम बोका का चढेचा माल्नीनी। मेको पाप पशो क्याम्तीक गेय पचा कली चढेचा यो नाक्त कित कित डा चोशा चढेतीके, मेको नु अन्न चढेतीके नु तूचा थोत्रक चढेतीके चढेचा माल्नीनी।

17 मिनु मेको आ दीसा गे १२ ओटा ब्यफ, सांड निकशी १४ ओटा बर्स का गाप्शो पाठा चढेचा माल्नीनी। मेको नेल्ल थम रिम्शो मारेड मदुम्शो बाक्चा माल्नीम।

18 मेको नु अन्न चढेतीके नु तूचा थोत्रक चढेतीके डोंइती डा खोदेशो पा ब्यफ, सांड नु पाठा आन कली हिक्शा, चढेचा माल्नीनी।

19 मिनु मेको नु पाप पशो आ पर्वम बोका का चढेचा माल्नीनी। मेको पाप पशो क्याम्तीक गेय पचा कली चढेचा यो नाक्त कित कित डा चोशा चढेतीके, मेको नु अन्न चढेतीके नु तूचा थोत्रक चढेतीके चढेचा माल्नीनी।

20 मिनु मेको आ दीसा गे ११ ओटा ब्यफ, सांड निक्शी १४ ओटा बर्स का गाप्शो पाटा चढ़ेचा माल्नीनी। मेको नेल्ल मारेड मटुम्शो थम रिम्शो बाक्चा माल्नीम।

21 मेको नु अन्न चढ़ेतीके नु तूचा थोव्रक चढ़ेतीके डोंइती डा खोदेशो पा ब्यफ, सांड नु पाटा आन कली हिव्का, चढ़ेचा माल्नीनी।

22 मिनु मेको नु पाप पशो आ परबम बोका का चढ़ेचा माल्नीनी। मेको पाप पशो क्याम्तीक गेय पचा कली चढ़ेचा यो नाक्त कित कित डा चोशा चढ़ेतीके, मेको नु अन्न चढ़ेतीके नु तूचा थोव्रक चढ़ेतीके चढ़ेचा माल्नीनी।

23 मिनु मेको आ दीसा गे १० ओटा ब्यफ, सांड निक्शी १४ ओटा बर्स का गाप्शो पाटा चढ़ेचा माल्नीनी। मेको नेल्ल मारेड मटुम्शो थम रिम्शो बाक्चा माल्नीम।

24 मेको नु अन्न चढ़ेतीके नु तूचा थोव्रक चढ़ेतीके डोंइती डा खोदेशो पा ब्यफ, सांड नु पाटा आन कली हिव्का, चढ़ेचा माल्नीनी।

25 मिनु मेको नु पाप पशो आ परबम बोका का चढ़ेचा माल्नीनी। मेको पाप पशो क्याम्तीक गेय पचा कली चढ़ेचा यो नाक्त कित कित डा चोशा चढ़ेतीके, मेको नु अन्न चढ़ेतीके नु तूचा थोव्रक चढ़ेतीके चढ़ेचा माल्नीनी।

26 मिनु मेको आ दीसा गे ९ ओटा ब्यफ, सांड निक्शी, १४ ओटा बर्स का गाप्शो पाटा चढ़ेचा माल्नीनी। मेको नेल्ल थम रिम्शो मारेड मटुम्शो बाक्चा माल्नीम।

27 मेको नु अन्न चढ़ेतीके नु तूचा थोव्रक चढ़ेतीके डोंइती डा खोदेशो पा ब्यफ, सांड नु पाटा आन कली हिव्का, चढ़ेचा माल्नीनी।

28 मिनु मेको नु पाप पशो आ परबम बोका का चढ़ेचा माल्नीनी। मेको पाप पशो क्याम्तीक गेय पचा कली चढ़ेचा यो नाक्त कित कित डा चोशा चढ़ेतीके, मेको नु अन्न चढ़ेतीके नु तूचा थोव्रक चढ़ेतीके चढ़ेचा माल्नीनी।

29 मिनु मेको आ दीसा गे ८ ओटा ब्यफ, सांड निक्शी १४ ओटा बर्स का गाप्शो पाटा चढ़ेचा माल्नीनी। मेको नेल्ल मारेड मटुम्शो थम रिम्शो बाक्चा माल्नीम।

30 मेको नु अन्न चढ़ेतीके नु तूचा थोव्रक चढ़ेतीके डोंइती डा खोदेशो पा ब्यफ, सांड नु पाटा आन कली हिव्का, चढ़ेचा माल्नीनी।

31 मिनु मेको नु पाप पशो आ परबम बोका का चढ़ेचा माल्नीनी। मेको पाप पशो क्याम्तीक गेय पचा कली चढ़ेचा यो नाक्त कित कित डा चोशा चढ़ेतीके, मेको नु अन्न चढ़ेतीके नु तूचा थोव्रक चढ़ेतीके चढ़ेचा माल्नीम।

32 मिनु मेको आ दीसा गे ७ ओटा ब्यफ, सांड निक्शी १४ ओटा बर्स का गाप्शो पाटा चढ़ेचा माल्नीनी। मेको मारेड मटुम्शो थम रिम्शो बाक्चा माल्नीम।

33 मेको नु अन्न चढ़ेतीके नु तूचा थोव्रक चढ़ेतीके डोंइती डा खोदेशो पा ब्यफ, सांड नु पाटा आन कली हिव्का, चढ़ेचा माल्नीनी।

34 मिनु मेको नु पाप पशो आ परबम बोका का चढ़ेचा माल्नीनी। मेको पाप पशो क्याम्तीक गेय पचा कली चढ़ेचा यो नाक्त कित कित डा चोशा चढ़ेतीके, मेको नु अन्न चढ़ेतीके नु तूचा थोव्रक चढ़ेतीके चढ़ेचा माल्नीनी।

35 मिनु मेको आ नोले डा नाक्त गे परमप्रभु यावे नु युम्तीके का सेल्चा माल्नीनी। मेको नाक्त गे काड गेय मपने।

36 गे परमप्रभु यावे कली चोशा चढ़ेतीके चढ़ेचा माल्नीनी। मेको आ दाक्शो ब्रोव्रशो रिना पाइश्शो चढ़ेतीके बाक्ब। मिनु गे ब्यफ का, सांड का नु बर्स का का गाप्शो ७ ओटा पाटा चढ़ेचा माल्नीनी। मेको नेल्ल मारेड मटुम्शो थम रिम्शो बाक्चा माल्नीम।

37 मेको नु अन्न चढ़ेतीके नु तूचा थोव्रक चढ़ेतीके डोंइती डा खोदेशो पा ब्यफ, सांड नु पाटा आन कली हिव्का, चढ़ेचा माल्नीनी।

38 मिनु मेको नु पाप पशो आ परबम बोका का चढ़ेचा माल्नीनी। मेको पाप पशो क्याम्तीक गेय पचा कली चढ़ेचा यो नाक्त कित कित डा चोशा चढ़ेतीके, मेको नु अन्न चढ़ेतीके नु तूचा थोव्रक चढ़ेतीके चढ़ेचा माल्नीनी।

39 मिनु गे मेको चढ़ेतीके नेल्ले इन कली डोंइती देशो नाक्तीम परमप्रभु यावे कली चढ़ेचा माल्नीनी। मेको नु इन नाक्त कित कित डा चढ़ेतीके, इन ग्येरशा चढ़ेतीके, चोशा चढ़ेतीके, इन अन्न चढ़ेतीके, इन तूचा थोव्रक चढ़ेतीके नु इन दुशा बाक्चा आ परबम चढ़ेतीके चढ़ेचा यो मेको चढ़ेचा माल्नीनी' देनो' देत।

40 मिनु परमप्रभु यावेमी मोसा कली अरेशो खोदेशो पा मोसाम लोव्र नेल्ल इसाएली आन कली शेंताक्मी।

## 30

कसम जचा आ परबम शेंशो

1 मिनु मोसामी इसाएल आ थर थर डा टेयब मुर आन कली "परमप्रभु यावेमी अरेशो मार बाक्त देशा हना,

2 मुर कामी परमप्रभु यावे कली लोव्र पाप्तु हना यो, कसम जाप्तु हना यो, मेकोमी आ पशो लोव्र पचा नु आ कसम जशो खाप्या माल्ब। मेको आ शोव रे मार लोव्र यूशो बाक्मे, मेकोमी मेको खाप्या माल्ब।

3 मिनु मीश आलमी आ आम आफ आस खिम बाक्मेनु, परमप्रभु यावे कली लोव्र गेप्तु हना यो, कसम जाप्तु हना यो, लेवी २७:२-२५; ब्यवस्था २३:२२; न्यायाधीस ११:३५; उपदेसक ५:३,४; गन्ती ६:१-२१

4 मिनु मेको आ आफोमी आ लोव्र नेशा यो सिक्सी पा बाक्त हना, मेको आ गेशो लोव्र बाक्त हना यो कसम बाक्त हना यो लीब।

5 तन्न आ आफोमी मेको नेना नाक्ती 'मेको मटुम्ब' देत हना, मेको आ लोव्र गेशो नु आ कसम जशो मलीब। मेको आ आफोमी मटुम्ब देतीके परमप्रभु यावेमी मेको आ पाप क्याम्ब।

- 6 मिनू मेकोम कसम जशो बाक्त हना यो, ममिम्थु लोत्र गेवा नोले आ ग्युंवे दुम्त हना,  
 7 मिनू आ वोंइशेमी मेको नेंशा यो सिक्सी पा बाक्त हना, मेको आ गेशो लोत्र बाक्त हना यो कसम बाक्त हना यो मेको लीब।  
 8 तन्न मेको आ वोंइशेमी मेको लोत्र नेंना नाक्त मेको कली 'मदुम्ब' दैत हना, मेको आ जशो कसम नु आ ममिम्थु गेशो लोत्र मलीब। मिनू परमप्रभु यावेमी मेको आ पाप क्याम्ब।  
 9 आ वोंइश बेक्शो नु आ वोंइशेमी प्रोंइशो मीश मुरुमी कसम जाप्टु हना, मेको लीब।  
 10 सुइ मीश मुरुमी आ वोंइश आ खिम बाक्शा, लोत्र गेप्टु हना, कसम जाप्टु हना,  
 11 मिनू आ वोंइशेमी मेको नेंशा यो सिक्सी पा बाक्त हना, मेको आ गेशो लोत्र बाक्त हना यो, कसम बाक्त हना यो, मेको लीब। येरमीया ४४:१९, २५  
 12 तन्न आ वोंइशेमी मेको नेंशा 'मदुम्ब' दैत हना, मेको आ गेशो लोत्र डा कसम मलीब। आ वोंइशेमी मेको आ गेशो लोत्र क्याम्शो बाक्त। मिनू परमप्रभु यावेमी मेको मीश मुर आ पाप क्याम्ब।  
 13 आ वोंइशेमी आ मीश आ मारेइ लोत्र गेशो, आ मारेइ कसम जशो पचा गेने नु क्याम्ने चाप्व।  
 14 तन्न मेको आ वोंइशेमी मेको नेंशा यो नाक्त किंत किंत सिक्सी पा बाक्त हना, मेकोमी आ कसम जशो नु आ गेशो लोत्र पचा गेशो बाक्ब।  
 15 तन्न मेकोमी नेंना आ नाक्त का निक्शी नोले 'मेको मदुम्ब' दैत हना, मेकोमी आ मीश आ तशो दोस कुरचा माल्ब" दैत।  
 16 एको वोंइश मीश नु आ आम आफ आस खिम बाक्शो मीश आल आ पर्बम फुल्लुम मुशा ब्रेक्शो लोत्र एको बाक्ब। एको लोत्र परमप्रभु यावेमी मोसा कली अरेशो बाक्ब।

## 31

मिदयान डा मुर आन कली प्राशो

- 1 मिनू परमप्रभु यावेमी मोसा कली  
 2 "इसाएली आन पर्बम गे मिदयान डा मुर आन कली क्येक्क लेत्तीमी। मेको आ नोले गे बेक्नेवे" दैत।  
 3 मिनू मोसामी मुर आन कली "इन लडाइ पाइब आन दाते डा मिदयान नु लडाइ पचा कली नु परमप्रभु यावेमी मेको आन कली क्येक्क लेत्वा कली इन मुर आन कली ठीक पने।  
 4 गे इसाएली आन थर थर नेल्ल रे हजार का का मुर लडाइ पचा कली सोइक्तीने" दैत।  
 5 मोपतीके इसाएली आन शुश मुर रे थर थर रे हजार का का पा, १२ हजार लडाइ पाइब मुर या कुरशा ठीक दुम्तेक्म।  
 6 मिनू मोसामी थर नेल्ल रे हजार का का मुर आन कली लडाइम सोइक्ताक्मी। मिनू मेकोपुकी नु चढेब एलाजर आ तौ फिनेहास यो सोइक्ताक्व। मेकोमी परमप्रभु यावे आ ताम्बु डा माल्शो नु लडाइ डा तुराही ताप्तीक कुरशो बाक्त। गन्ती १०:२  
 7 परमप्रभु यावेमी मोसा कली अरेशो खोदेंशो पा मेकोपुकीम मिदयान डा मुर नु लडाइ पांम्तेक्म। मिनू मेको आन वोंइश मुर नेल्ल आन कली साइक्तेक्म। ब्यवस्था २०:१३  
 8 मेकोपुकीमी मिदयान डा ५ जना पिप एवी, रेकेम, सुर, हुर नु रेबा आन कली साइक्तेक्म। मिनू मेको नु बाक्ब अरु मुर यो साइक्तेक्म। मिनू बेओर आ तौ बालाम कली यो तरवारमी साइक्तेक्म। यहोसु १३:२१-२२; गन्ती २२:५  
 9 मिनू इसाएलीपुकीम मिदयान डा मीश मुरपुकी नु आल ब्रेप्च ग्याइक्तेक्म। मेको आन बी ब्यफ, क्यारश भेडा नु आन शोंप नेल्ल लाइक्तेक्म।  
 10 मिनू मेको आन बाक्शो सहर नेल्ल नु मेको आन ताम्बु नेल्ल क्रोइक्तेक्म।  
 11 मेको आन प्राशो मुर, बी ब्यफ, क्यारश भेडा, नु शोंप नेल्ल लाइशशा गाक्तेक्म।  
 12 मिनू यरीको आ आइक्ची हांबु यर्दन खोला आ शुंडचीम मोआब डा दिममी बाक्शो ताम्बुम मोसा, चढेब एलाजर नु इसाएली नेल्ल आन डोंइती चाक्तेक्म।  
 13 मिनू मोसा, चढेब एलाजर नु मेको आन दाते डा ठेयब मुर नेल्ल मेको आन कली गुम्थ, लाड्या गूतेक्म।  
 14 मिनू मोसामी लडाइ रे प्राशा, लेशशा जाक्शो हजार का नु सहे का डा कप्तान आन कली तशा गाइक्ताक्व।  
 15 मिनू मोसाम मेको आन कली "मार गे मीश मुर नेल्ल आन कली सेसीन प्रॉन्नी?  
 16 एको मीश मुरपुकीमी बालाम आ देशो पशा, इसाएली आन कली पेओरम परमप्रभु यावे कली मरिम्शो पपाइशो बाक्तेक्म। मोपतीके परमप्रभु यावे आ मुर आन दातेमी मुर साइक्ब रोइ गूत। गन्ती २५:१-३; प्रकाश २:१४  
 17 मोपतीके वोंइश आल नेल्ल वोंइश मुर नु बाक्शो मीश मुर नेल्ल आन कली सतीन। न्यायाधीस २१:११-१२  
 18 तन्न वोंइश मुर नु मबाक्शो मीश आल नेल्ल चहिं इन कली वोंइसीन।  
 19 गेपुकी सु सुम मुर साइशो बाक्नी नु बेक्शो मुर आन कली थिशो बाक्नी मेको नेल्ल ७ नाक्त सम्म इन बाक्तीक आ लाडगाम बाक्कीन। मिनू सां नाक्त नु ७ नाक्ती गेपुकीमी इन कली ग्रांशा मदिशो सेल्सीशा, इन ग्याइशो आन कली यो ग्रांशा मदिशो सेलीन। गन्ती १९:११-२०  
 20 गेपुकीम वा नेल्ले, कुशल के मार मार, क्यारश आ चां के सेल्शो नु शीं के मार मार नेल्ल ग्रांशा मदिशो सेलीन" दैत।  
 21 मिनू चढेब एलाजरमी लडाइम लाइब मुर नेल्ल आन कली "परमप्रभु यावेमी मोसा कली फुल्लुम मुशा ब्रेक्शो आ अरेशो लोत्र मार बाक्त देशा हना,  
 22 'सुन, चांदी, कांसा, फलाम, टीन नु सिसा,

23 मीम मनेकब मारेइ मारेइ थोत्रक मीम क्रोइशशा, ग्रांग्रा मदिशो दुम्ब। मीम नेकचा डा थोत्रक चहिं ग्रांग्रा मदिशो दुम्तीक ब्वाक्कुमी ग्रांग्रा मदिशा सेल्ले चाप्नीमी।

24 मिनु ७ नाक्ती गेपुकीमी इन वा मुरचा माल्नीनी। मिनु गेपुकी ग्रांग्रा मदिशो दुम्नीनी। मेको नोले गे इन बाक्तीके ओव्वने चाप्नीनी” ” दैत।

लडाइम रोइशशो मार मार

25 मिनु परमप्रभु यावेमी मोसा कली

26 “गे, चढेब एलाजर नु मुर आन थर डा टेयब मुरपुकीम ‘ग्याइशशो मुर नु बी ब्यफ, क्यारश भेडा आन कली हिक्शा ब्रेक्चा माल्नीनी।

27 मेको नेल्ल के भाग निक्शी सेलीन। भाग का लडाइम लाइब आन कली नु भाग का अर्को मुर नेल्ल आन कली बाकब। यहोसु २२:८; १सामुएल ३०:२४-२५

28 लडाइम लाइब मुर आन भाग रे मुर, बी ब्यफ, गधा नु क्यारश भेडा ५ सहे रे का परमप्रभु यावे कली गेचा माल्नीनी।

29 मेको लडाइ पाइब आन भाग रे ताक्शा, चढेब एलाजरमी परमप्रभु यावे कली चढेचा माल्ब।

30 मिनु इस्राएली आन भाग रे मुर, बी ब्यफ, गधा नु क्यारश भेडा ५० रे का ताक्शा, परमप्रभु यावे आ ताम्बुम गेय पाइब लेवी आ थर डा मुर आन कली गेचा माल्नीनी” दैने” दैत।

31 मिनु परमप्रभु यावेमी मोसा कली अरेशो खोदेंशो पा मोसा नु चढेब एलाजरमी पाम्ताक्स।

32 मेको लडाइ पाइबपुकीमी रोइशशो गिश बाक्तेकम देंशा हना, क्यारश भेडा ६ लाख ७५ हजार

33 बी ब्यफ ७२ हजार

34 गधा ६१ हजार

35 वोइश मुर नु मबाक्शो मीश आलपुकी ३२ हजार जना बाक्तेकम।

36 मेको लडाइम लाइब आन भाग गिश बाक्तेकम देंशा हना, क्यारश भेडा ३ लाख ३७ हजार ५ सहे,

37 मेको रे पा ६ सहे ७५ ओटा परमप्रभु यावे कली गेशो बाक्तेकम।

38 बी ब्यफ ३६ हजार बाक्तेकम। मेको रे पा ७२ ओटा बी ब्यफ परमप्रभु यावे कली गेशो बाक्तेकम।

39 गधा ३० हजार ५ सहे बाक्तेकम। मेको रे पा ६१ ओटा गधा परमप्रभु यावे कली गेशो बाक्तेकम।

40 मिनु मीश आल १६ हजार जना बाक्तेकम। मेको रे पा ३२ जना परमप्रभु यावे कली गेशो बाक्तेकम।

41 परमप्रभु यावेमी मोसा कली देंशो खोदेंशो पा मोसामी परमप्रभु यावे कली गेशो भाग चढेब एलाजर कली गेपु।

42 मोसामी लडाइम लाइब मुर रे योक्शा अर्को इस्राएली आन कली गेशो,

43 क्यारश भेडा लाख सां ३७ हजार ५ सहे बाक्तेकम,

44 बी ब्यफ ३६ हजार बाक्तेकम,

45 गधा ३० हजार ५ सहे बाक्तेकम,

46 नु मीश आल १६ हजार जना बाक्तेकम।

47 परमप्रभु यावेमी अरेशो खोदेंशो पा मोसामी इस्राएली आन भाग रे मुर नु बी ब्यफ, क्यारश भेडा हिक्शा, ५०, ५० रे का का युंइशा परमप्रभु यावे आ बाक्तीकेमी गेय पाइब लेवी आ थर डा मुर आन कली गेपु।

48 मिनु लडाइ पाइब आन हजार का नु सहे का डा कप्तान मोसा आ बाक्तीके जाक्तेकम।

49 मिनु मेकोपुकीमी मोसा कली “इन गेय पाइब, गोपुकीमी आंइ लडाइ पाइब आन कली हिक्कत। मिनु आंइ के मुर का यो मजाम्शो बाक्नीम।

50 मिनु गो नेल्ल आंइ थिरशो सुन के गहाना, बाला, छाप थोक्तीक औंठी, नचे नु साडलीपुकी परमप्रभु यावे कली चढेशा, आंइ परबम पाप क्याम्तीक गेय पचा, दे चाक्शा जाक्ताक” दैतेकम। न्यायाधीस ८:२४-२६

51 मिनु मोसा नु चढेब एलाजरमी मेको आन चाक्शो सुन के गहाना नेल्ल ताक्ताकसे।

52 मिनु हजार, हजार डा कप्तान नु सहे, सहे डा कप्तान आन चाक्शो परमप्रभु यावे कली चढेशो सुन १६ हजार ७ सहे ५० शेकेल बाक्तेकम। शेकेल का ११.५ ग्राम बाकब।

53 लडाइम लाइब आन रोइशशो मार मार आंम आंमा लांइसीशो बाक्तेकम।

54 मिनु मोसा नु चढेब एलाजरमी हजार का, हजार का, नु सहे का, सहे का मुर आन कप्तानपुकीमी चाक्शो सुन ताक्शा, परमप्रभु यावे आ गुम्तीक ताम्बुम वोइक्ताकस। मेको परमप्रभु यावे आ डोंइती इस्राएली आन कली मिम्पाइक्चा कली वोइक्ताकस। प्रस्थान ३०:१२-१६

## 32

रूबेन नु गाद आस खिं खिं डा मुर

ब्यवस्था ३:१२-२२

1 मिनु रूबेन आ थर डा मुर नु गाद आ थर डा मुर आन के शुश बी ब्यफ बाक्तेकम। मिनु मेकोपुकीम याजेर नु गिलादमी रिम्शो योव्वतीक ताम्तेकम।

2 मिनु गाद आ थर डा मुर नु रूबेन आ थर डा मुरुमी मोसा, चढेब एलाजर नु गुम्तीक डा टेयब मुर आन बाक्तीक जाक्शा

3 “अतारोथ, दीबोन, याजेर, निम्ना, हेशबोन, एलेआले, सेबाम, नेबो नु बेओन,

4 परमप्रभु यावेमी मेको रागी इस्राएली आन डोंइती खतम पोक्शो बाक्त। मेको रागी बी ब्यफ योव्वचा कली रिम्शो बाकब। मिनु इन गेय पाइब, गोपुकी नु बी ब्यफ यो बाक्नीम।



- 5 गे आंड कली दाक्ताक्नी हना, एको रागी आंड कली गेकी। आंड कली यर्दन आडक्की हांबु मलाडक्की” देतेक्म।
- 6 मिनु मोसामी गाद आ थर डा मुर नु रूबेन आ थर डा मुर आन कली “इन लोकबपुकी एर लडाइम लमानु, गेपुकी चहिं एक बाक्नीनी?
- 7 मारदे गे परमप्रभु यावे आ गेशो आडक्की हांबु डा रागीम लचा कली इस्राएली आन थुं क्याल्नीनी?
- 8 गो इन आफ आन कली कादेश-बारनेआ रे एको रागी क्यारी पथ सोइडकुनु, मेकोपुकीमी यो इन खोदेशो पशो बाक्तेक्म। गन्ती १३:-
- 9 मिनु मेकोपुकी एश्कोल डा खोला लशा, एको रागी ताम्तेक्म। मिनु परमप्रभु यावेमी गेशो रागीम मलचा, दे इस्राएली आन थुं क्याल्शो बाक्तेक्म।
- 10 मिनु मेको नाक्ती परमप्रभु यावे गाडक्ताक्व। मिनु मेकोमी कसम जशा
- 11 “इजीप्त रे जाक्शो २० बर्स गाप्शो नु मेको क्येडा लाक्शो सुड मेको अब्राहाम, इसहाक नु याकूब नु कसम जशो रागी ओव्रचा मताइनीम। मारदे हना आं कली मटीयीमी। गन्ती १४:२२-३८; गन्ती २६:६५
- 12 केनीज्जी यपुन्ने आ तौ कालेब नु नून आ तौ यहोसु ला ओव्रचा ताइनीस। मारदे हना मेको निक्शीमी थमा पा आं नोले खोइक्तीस्सी’ दे कसम जाप्तु” दे मोसामी देत। गन्ती १४:७-९; यहोसु १४:६-१५
- 13 मिनु मोसामी “परमप्रभु यावे इस्राएली आन पर्बम गाडक्ताक्व। मिनु मेकोमी मेको आन कली ४० बर्स सम्म गोरशो रागीम हिरपाइक्तीमी। परमप्रभु यावे आ डोंइती मरिम्शो पाइब मबेक्म सम्म मोदेशो पाप्तु।
- 14 मिनु मुल गे, पाप पाइबपुकी, परमप्रभु यावेमी इस्राएल आ पर्बम गाइशशो बाक्त। मिनु गेपुकीमी चिनु तेम्शो बाक्नीनी।
- 15 गेपुकीम मेको आ नोले खोइक्ने मबिस्साक्नी हना, मेकोमी एको मुर नेल्ल आन कली एको गोरशो रागीमीन प्रोंडब। मिनु गे मेको मुर नेल्ल आन कली खतम सेल्ल दुम्नीनी” दे माइक्तीमी।
- 16 मिनु मेकोपुकी मोसा आ नेक्था जाक्शा “गो आंड भेडा आन कली गोठ नु आंड आल आन कली सहर सेल्चा दाक्नीकी।
- 17 तन्न गोपुकी चहिं इस्राएली आन कली मेको आन बाक्तीकेमी मचाक्दीशशो सम्म मेको आन डोंइडोंइती लडाइ पा लाइनीकी। मेना आंड मीशपुकी नु आंड आलपुकी चहिं एको रागी डा मुर आन रे मारेड पाइक्चा मपुंडसीथु, मेको सहर डा गारो आगाम बाक्नीम।
- 18 इस्राएल डा मुर नेल्लेमी आन योव्रशो रागी मतामे सम्म गो आंड खिं मलेत्तीकी।
- 19 गोपुकीमी यर्दन खोला आ आडक्की हांबु नु मेको क्येडा एर गे रागी मताक्नीकी। मारदे हना, आंड भाग यर्दन ओंथ हांबु पूर्ब गे दुम्शो बाक्व” देतेक्म। यहोसु १:१२-१५
- 20 मिनु मोसामी मेको आन कली “दुम्ब। गेपुकी परमप्रभु यावे आ डोंइती लडाइम लाइनीनी हना, यहोसु १:१२-१५
- 21 नु परमप्रभु यावेमी आ जोरी सत्रु आन कली खेरशा मेको रागी मफ्रुवा सम्म गेपुकी परमप्रभु यावे आ डोंइती लडाइ पा यर्दन आडक्की हांबु लाइतीनी हना,
- 22 मिनु मेको रागी परमप्रभु यावे आ डोंइती ग्रानी नोले, गे लेन्ने चाप्नीनी। मिनु इन पुंडशो रागी परमप्रभु यावे आ डोंइती इन के दुम्ब।
- 23 तन्न गेपुकीम मो मपाइतीनी हना, परमप्रभु यावे आ डोंइती पाप पाइनीनी। मिनु इन पाप थमा पा राइनीनी।
- 24 गेपुकी इन मीश नु आल आन कली सहर नु इन बी ब्यफ, क्यारश भेडा आन कली गोठ सेलीन। तन्न इन गेशो लोव्र खाप्चा माल्नीनी” देत।
- 25 मिनु गाद नु रूबेन आस थर डा मुरपुकीमी मोसा कली “इन गेय पाइब, गोपुकी इन अरेशो पाइनीकी।
- 26 आंड आलपुकी, आंड मीशपुकी, आंड बी ब्यफ, क्यारश भेडा नेल्ल एको गिलाद सहरमी बाक्नीम।
- 27 तन्न इन गेय पाइब, गोपुकी इन अरेशो खोदेशो पा परमप्रभु यावे आ डोंइती लडाइ पचा कली या कुरशा लाइनीकी” देतेक्म।
- 28 मिनु मोसामी मेको आन पर्बम चढेब एलाजर, नून आ तौ यहोसु नु इस्राएली आन थर थर डा ठेयब मुर आन कली अरेम्तीमी।
- 29 मिनु मोसाम मेको आन कली “गाद नु रूबेन आस थर डा मुर गेपुकी नु या कुरशा, परमप्रभु यावे आ डोंइती लडाइ पा यर्दन आडक्की हांबु लाम्तेक्म हना, नु मेको रागी इन गुडम दुम नोले, गेपुकीमी गिलाद रागी मेको आन कली गेचा माल्नीनी।
- 30 तन्न मेकोपुकी या कुरशा लडाइ पा गेपुकी नु यर्दन आडक्की हांबु लने मबिस्साक्म हना, मेकोपुकी इन दातेमी कनान रागीमीन आन रागी तचा माल्नीम” दे माइक्तीमी।
- 31 मिनु गाद नु रूबेन आस थर डा मुरपुकीमी “परमप्रभु यावेमी इन गेय पाइब, आंड कली मार देमे मेको पाइनीकी।
- 32 गोपुकी या कुरशा परमप्रभु यावे आ डोंइती आडक्की हांबु कनान रागी लाइनीकी। तन्न आंड योव्रशो रागी यर्दन ओंथ हांबुमी बाक्ल” देतेक्म।
- 33 मिनु मोसामी गाद आ थर, रूबेन आ थर नु योसेफ आ तौ मनस्से आ उइक्थ थर डा मुर आन कली एमोरी आन पिप सीहोन आ राज्य नु बाशान डा पिप ओग आ राज्य, मेको रागी नु आ एर ओंथ डा सहर नेल्ल गेम्तीमी। यहोसु १३:१५-३२
- 34 मिनु गाद आ थर डा मुरपुकीमी दीबोन, अतारोथ, आरोएर,
- 35 अत्रोथ-शोफान, याजेर, योग-बेहा,
- 36 बेथ-निम्ना, बेथ-हारान नेल्ल गारोम हिरशो सहर सेल्लेक्म। मिनु भेडा आन कली गोठ यो सेल्लेक्म।
- 37 मिनु रूबेन आ थर डा मुरपुकीमी हेरबोन, एलेआले नु किरयथ-थाइम,

- 38 नेबो, बाल-मेओन नु सिब्बा लेंशा सेल्लेकम। मिनु मेकोपुकीमी आन लेंशा सेल्लेशो सहर कली नक नें वोइक्तेकम।  
 39 मनस्से आ तौ माकीर आ चच युइ गिलादम लशा, मेको आन के सेल्ला, मेकेर बाक्ब एमोरी आन कली खेरतेकम।  
 40 मोपतीके मोसामी मनस्से आ तौ माकीर आ चच युइ आन कली गिलाद गेप्टु। मिनु मेकोपुकी मेकेर बाक्तेकम।  
 ब्यवस्था ३:१४; न्यायाधीस १०:३-४  
 41 मनस्से आ तौ याइर लशा, मेकेर डा गाउं आंम के सेल्लु। मिनु मेको नेल्ल आन नें हल्वोथ-याइर वोइक्तु।  
 42 मिनु नोबाह लशा केनाथ नु मेको आ गाउंपुकी आंम के सेल्लु। मिनु मेको नेल्ल आन नें आ नें रे पा नोबाह वोइक्तु।

### 33

इसाएली आन गाक्शो लां

- 1 मिनु इसाएली लडाइ पाइब खोदेशो पा इजीप्ट रे हुल हुल पा गाक्तेकम। मोसा नु हारून मेको आन लां कौइब बाक्ताक्स।  
 2 मिनु मोसामी परमप्रभु यावेमी देशो खोदेशो पा ते ते लचा माल्बा, नेल्ल ब्रेक्ताक्व। मिनु आन गाक्शो लां डा रागी नु सहर तेको तेको बाक्तेकम देशा हना,  
 3 मेकोपुकी डोंइती डा महिना डा १५ नाक्ती रामेसेस रे गाक्चा गोम्तेकम। मिनु इजीप्ती नेल्ल आन डोंइती काइ महिंथु पास्सा चाड आ दीसा नाक्ती गाक्चा गोम्तेकम। प्रस्थान १:११; प्रस्थान १२:३,६; प्रस्थान ३:१९  
 4 मेना इजीप्तीपुकीमी परमप्रभु यावेमी साइशो आन डोंइती जरमेशो तौ आन कली थिम्शो बाक्तेकम। मिनु परमप्रभु यावेमी मेको आन देवी देवता आन कली यो निसाफ पशो बाक्त।  
 5 मिनु इसाएलीपुकी रामेसेस रे गाक्शा, सुक्कोथ सहर जाकदीशशा बाक्तीके सेल्ला बाक्तेकम। प्रस्थान १२:३७  
 6 मिनु सुक्कोथ सहर रे गाक्शा, गोरशो रागी आ सुर डा एथाम सहरम बाक्तीके सेल्ला बाक्तेकम। प्रस्थान १३:२०  
 7 मिनु एथाम रे गाक्शा, बाल-सेफोन गे बाक्शो पी-हहीरोथ लेत्तेकम। मिनु मिग्दोल आ नेक्था बाक्तीके सेल्ला बाक्तेकम। प्रस्थान १४:२  
 8 मिनु पी-हहीरोथ रे गाक्शा, समुन्द्र आ दाते रे पा गाक्शा, गोरशो रागीम जाक्तेकम। मेकोपुकी नाक्त सां डा लां एथाम डा गोरशो रागीम गाक्शा, माराह माइक्तीकेमी बाक्तीके सेल्ला बाक्तेकम। प्रस्थान १४:२२; प्रस्थान १५:२३  
 9 मिनु माराह रे गाक्शा, एलीम जाक्तेकम। एलीमम १२ ओटा ब्वाक्कु बुक्तीके नु ७० ओटा खजूर रवा बाक्तेकम। मिनु मेकेर बाक्तीके सेल्ला बाक्तेकम। प्रस्थान १५:२७  
 10 मिनु मेकोपुकी एलीम रे गाक्शा, लल समुन्द्र आ नेक्था बाक्तीके सेल्ला बाक्तेकम।  
 11 मिनु मेकोपुकी लल समुन्द्र रे गाक्शा, सीन माइशो गोरशो रागीम बाक्तीके सेल्ला बाक्तेकम। प्रस्थान १६:१  
 12 मिनु सीन माइशो गोरशो रागी रे गाक्शा, दोफ्कामी बाक्तीके सेल्ला बाक्तेकम।  
 13 मिनु दोफ्का रे गाक्शा, आलुशमी बाक्तीके सेल्ला बाक्तेकम।  
 14 मिनु आलुश रे गाक्शा, रेफीदीमी बाक्तीके सेल्ला बाक्तेकम। मेकेर मुर आन कली तूतीक ब्वाक्कु मबा। प्रस्थान १७:१  
 15 मिनु रेफीदीम रे गाक्शा, सीनै डा गोरशो रागीम बाक्तीक सेल्ला बाक्तेकम।  
 16 मिनु सीनै डा गोरशो रागी रे गाक्शा, किब्रोथ-हत्तावामी बाक्तीक सेल्ला बाक्तेकम। गन्ती ११:३४  
 17 मिनु किब्रोथ-हत्तावा रे गाक्शा, हसेरोथमी बाक्तीक सेल्ला बाक्तेकम।  
 18 मिनु हसेरोथ रे गाक्शा, रिथ्माहमी बाक्तीके सेल्ला बाक्तेकम। गन्ती १२:१६  
 19 मिनु रिथ्माह रे गाक्शा, रिम्मोन-पेरेसमी बाक्तीके सेल्ला बाक्तेकम।  
 20 मिनु रिम्मोन-पेरेस रे गाक्शा, लिब्नामी बाक्तीके सेल्ला बाक्तेकम।  
 21 मिनु लिब्ना रे गाक्शा, रिस्साहमी बाक्तीके सेल्ला बाक्तेकम।  
 22 मिनु रिस्साह रे गाक्शा, केहेलाथामी बाक्तीके सेल्ला बाक्तेकम।  
 23 मिनु केहेलाथा रे गाक्शा, शेफेर डांडा आ नेक्था बाक्तीके सेल्ला बाक्तेकम।  
 24 मिनु शेफेर डांडा रे गाक्शा, हरादामी बाक्तीके सेल्ला बाक्तेकम।  
 25 मिनु हरादा रे गाक्शा, मखेलोथमी बाक्तीके सेल्ला बाक्तेकम।  
 26 मिनु मखेलोथ रे गाक्शा, तहाथमी बाक्तीके सेल्ला बाक्तेकम।  
 27 मिनु तहाथ रे गाक्शा, तेराहमी बाक्तीक सेल्ला बाक्तेकम।  
 28 मिनु तेराह रे गाक्शा, मिथ्कामी बाक्तीक सेल्ला बाक्तेकम।  
 29 मिनु मिथ्का रे गाक्शा, हश्मोनाहमी बाक्तीक सेल्ला बाक्तेकम।  
 30 मिनु हश्मोनाह रे गाक्शा, मोसेरोथमी बाक्तीक सेल्ला बाक्तेकम।  
 31 मिनु मोसेरोथ रे गाक्शा, बेने-याकानमी बाक्तीक सेल्ला बाक्तेकम। ब्यवस्था १०:६-७  
 32 मिनु बेने-याकान रे गाक्शा, होर-हगीद-गादमी बाक्तीक सेल्ला बाक्तेकम।  
 33 मिनु होर-हगीद-गाद रे गाक्शा, योत्वाथाहमी बाक्तीक सेल्ला बाक्तेकम।  
 34 मिनु योत्वाथाह रे गाक्शा, अब्रोनाहमी बाक्तीक सेल्ला बाक्तेकम।  
 35 मिनु अब्रोनाह रे गाक्शा, एस्योन-गेबेरमी बाक्तीक सेल्ला बाक्तेकम। १राजा ९:२६; १राजा २२:४९  
 36 मिनु एस्योन-गेबेर रे गाक्शा, जीन डा गोरशो रागीम बाक्शा, कादेशमी बाक्तीक सेल्ला बाक्तेकम। गन्ती २०:१  
 37 मिनु कादेश रे गाक्शा, एदोम रागी आ सांदमी बाक्शो होर डांडा आ नेक्था बाक्तीक सेल्ला बाक्तेकम। गन्ती २०:२-२९; ब्यवस्था ३४:१-१२

38 मिनू परमप्रभु यावे आ देशो खोदेशो पा, चढेब हारून होर डांडा डोइरशा लत। मिनू मेकेर बेक्त। मेना इस्राएली इजीप्त रागी रे गूशो ४० बर्स ५ महिना डा डोइती डा नाक्ती बाक्त।

39 हारून होर डांडा तार बेक्मेनु, हारून सहे का २३ बर्स दुम्शो बाक्त।

40 कनान डा नेगेब देशो रागीम हुकुम पाइब पिप आरादमी इस्राएली पिन पिन पाइरशो बाक्नीम, देशो लोत्र नेतु। गन्ती २१:१

41 मिनू मेकोपुकी होर डांडा रे गाक्शा, सल्मोनामी बाक्तीक सेल्शा बाक्तेक्म।

42 मिनू सल्मोना रे गाक्शा, पुनोनमी बाक्तीक सेल्शा बाक्तेक्म।

43 मिनू पुनोन रे गाक्शा, ओबोथमी बाक्तीक सेल्शा बाक्तेक्म। गन्ती २१:१०-११

44 मिनू ओबोथ रे गाक्शा, मोआब डा सांदमी बाक्शो इये-अबारीममी बाक्तीक सेल्शा बाक्तेक्म।

45 मिनू इयीम रे गाक्शा, दीबोन-गादमी बाक्तीक सेल्शा बाक्तेक्म। गन्ती ३२:३४

46 मिनू दीबोन-गाद रे गाक्शा, अल्मोन-दिब्लाथाइममी बाक्तीक सेल्शा बाक्तेक्म।

47 मिनू अल्मोन-दिब्लाथाइम रे गाक्शा, नेबो सहर आ डोइती अबारीम डा पहाडम बाक्तीक सेल्शा बाक्तेक्म।

48 मिनू अबारीम डा पहाड रे गाक्शा, यर्दन आ शुंडचीमी बाक्शो यरीको रे आइक्ची हांबु मोआब डा दिममी बाक्तीक सेल्शा बाक्तेक्म। गन्ती २२:१; ब्यवस्था ३२:४९

49 मिनू यर्दन खोला आ शुंडच डा मोआब डा दिममी बेथ-येशीमोथ रे पा आबेल-शित्तीम सम्म बाक्तीक सेल्शा बाक्तेक्म। गन्ती २५:१

कनानी आन कली गुंडचा, दे अरेशो

50 मिनू यरीको आ आइक्ची हांबु यर्दन खोला आ नेक्था मोआब डा दिममी परमप्रभु यावेमी मोसा कली

51 “गे इस्राएली आन कली ‘गे यर्दन खोला शोक्शा, कनान रागीमी जाक्दीनीनु, प्रस्थान २३:२३-२४; प्रस्थान ३४:१२-१४

52 मेको रागी डा मुर नेल्ल आन कली मेको रागी रे खेरचा माल्नीनी। मिनू मेको आन मुशा सेल्शो नु कांसा के सेल्शो मूर्ति नेल्ल कली खतम पोक्कीन। मेको आन डांडा डा थानपुकी प्रेशा खतम पोक्चा माल्नीनी।

53 गे मेको रागी इन के सेल्शा, मेक उइ बाक्कीन। मारदे हना गो मेको रागी इन कली गेता।

54 मिनू गे थर थर आन खिं खिं डा मुर आन कली हिक्शा, रागी योव्रशा, मेको रागी योक्सीन। शुश खिं पाइरशो थर आन कली टेयब रागी गेचा, शुश खिं मपाइरशो थर आन कली आइक्च रागी गेचा माल्नीनी। सुका आ नें बाजीम कोइबा, मेको मेको थर केन दुम्ब। इन किकी पिपी आन थर थर पा मेको रागी योक्कीन। गन्ती २६:५४-५५

55 तन्न गे मेको रागीम बाक्ब मुर आन कली इन डोइती रे मखेरतीनी हना, मेको लीशो मुर इन मिक्चीम कसीडगर नु इन कोव्रखाम थोक्शो चू खोदेशो दुम्मीम। मिनू गे ते बाक्तीनी हना यो, मेकोपुकीमी इन कली श्येत गेनीम। प्रस्थान २३:३१-३३; यहोसु २३:१२-१३

56 मिनू गो मेको आन कली मार पदुमी, दे मिम्शा बाक्डा, मेको इन कली पाइनुड’ दे माइक्मी” देंत।

## 34

कनान रागी डा सांद

1 मिनू परमप्रभु यावेमी मोसा कली

2 “इस्राएली आन कली ‘गे कनान रागी ओव्रनीनु, इन कली योक्शा गेशो रागी आ सांद तेको बाक्नीम देशा हना, इजीकीएल ४१:१३-२०; ब्यवस्था ३२:८

3 इन दक्खिन डा रागी जीन डा गोरशो रागी रे एदोम सम्म बाक्ब। इन दक्खिन डा सांद हिक्सी समुन्द्र आ पूर्व रे गोचा माल्ब। यहोसु १५:२-४

4 मिनू अक्रब्बीम डा ग्येत्य लतीक लां डा दक्खिन गे जीन गे लाइब। कादेश-बारनेआ आ दक्खिन सम्म जाक्दीत्या माल्ब। मिनू नोले हासार-अददार रे पा अज्मोन जाक्दीत्या माल्ब।

5 मिनू नोले मेको सांद अज्मोन रे पा हिरशा, इजीप्त डा खोला सम्म जाक्दीरशा टेयब समुन्द्र नुप्ब।

6 मिनू पच्छिम डा सांद टेयब समुन्द्र बाक्ब। मेको टेयब समुन्द्र आ शुंडच इन पच्छिम गे डा सांद बाक्ब।

7 मिनू इन उत्तर गे डा सांद टेयब समुन्द्र रे होर डांडा सम्म फ्रेंचा माल्नीनी।

8 मिनू होर डांडा रे लेबो-हमाथ सम्म फ्रेंदीन। मिनू मेको सेदाद सम्म जाक्दीत्या माल्ब।

9 मिनू नोले सिप्रोन सम्म जाक्दीत्या माल्ब। मिनू हासार-एनानमी नुप्ब। मेको इन उत्तर गे डा सांद बाक्ब।

10 मिनू इन पूर्व डा सांद हासार-एनान रे शेफाम सम्म फ्रेंदीन।

11 मिनू शेफाम रे उइ बुष्फा पेन डा पूर्व गे डा रिब्ला सम्म जाक्दीत्या माल्ब। मिनू नोले मेको सांद बुष्फा, किन्नेरथ समुन्द्र आ पूर्व डा शुंडच सम्म जाक्दीत्या माल्ब।

12 मिनू मेको सांद यर्दन खोला रे पा हिक्सी समुन्द्र सम्म जाक्दीरशा नुप्ब। इन रागी आ एर ओथ डा सांद एको बाक्नीम’ दे माइक्मी” देंत।

13 मिनू मोसामी इस्राएली आन कली “परमप्रभु यावे आ अरेशो खोदेशो पा फेन्टे आप्शा ९ थर नु आधा थर आन कली गेशो रागी बाक्ब।

14 मारदे हना रूबेन आ थर डा खिं खिं डा मुर, गाद आ थर डा खिं खिं डा मुर नु मनस्से आ उइक्थ थर डा खिं खिं डा मुर आन भाग तने थुम्शो बाक्तेक्म। गन्ती ३२:२९-३३

15 मेको निकशी नु उडक्थ थर डा मुरपुकीमी यरीको ओंथ हांबु, यर्दन खोला आ पूर्व गे आन आन रागी तशो बाक्नीम” दैत।

16 मिनु परमप्रभु यावेमी मोसा कली

17 “इन कली रागी योक्शा गेब मुर आन नें मार बाक्नीस देशा हना, डोंडती मेको चढेब एलाजर नु नून आ तौ यहोसु बाक्नीस। यहोसु १४:१; ब्यवस्था १:३८

18 मिनु गे थर थर डा मुर आन टेयब मुर का का योत्रचा माल्नेवे।

19 मेको थर थर डा टेयब मुर सु सु बाक्नीम देशा हना, यहूदा आ थर डा यपुने आ तौ कालेब, गन्ती १३:६,३०

20 सिमियोन आ थर डा अम्मीहुद आ तौ शेमुएल,

21 बेन्यामीन आ थर डा किस्लोन आ तौ एलीदाद,

22 दान आ थर डा योग्ली आ तौ बुक्की,

23 योसेफ आ तौ मनस्से आ थर डा एफोद आ तौ हन्नीएल,

24 योसेफ आ तौ एफ्राइम आ थर डा शिफतान आ तौ केमुएल,

25 जबूलन आ थर डा पारनाक आ तौ एली-जाफान,

26 इस्साकार आ थर डा अज्जान आ तौ पाल्तीएल,

27 आशेर आ थर डा शेलोमी आ तौ अहीहुद,

28 नाप्ताली आ थर डा अम्मीहुद आ तौ पेदाहेल बाक्नीम।

29 मिनु मेको परमप्रभु यावेमी अरेशो इसाएली आन कली कनान रागी योक्ब थर थर डा योत्रशो टेयब मुर एको बाक्नीम” दैत।

## 35

लेवी थर डा मुर आन सहर

1 परमप्रभु यावेमी यरीको आ आइक्ची हांबु यर्दन खोला आ शुंइच मोआब डा दिमम मोसा कली यहोसु २१:१-३

2 “गे इसाएल आन कली ‘गे इन आम सेल्लो रागी रे लेवी आ थर डा मुर आन कली सहरपुकी गेचा माल्नीनी। मिनु मेको आन कली मेको सहर आन एर ओंथ बी ब्यफ, क्यारश भेडा योत्रतीके गेचा माल्नीनी। गन्ती १८:२०; लेवी २५:३२-३४

3 मेको सहरपुकी मेको आन कली बाक्तीक दुम्नीम। बी ब्यफ, क्यारश भेडा योत्रतीक मेको आन बी ब्यफ, क्यारश भेडा आन कली दुम्ब।

4 मिनु गे लेवी आ थर डा मुर आन कली गेशो सहर मेर डा योत्रतीक मेको सहर आ गारो आ एर ओंथ रे हजार का कुबीत बाक्चा माल्ब। कुबीत का ०.५ मिटर बाक्ब।

5 गे सहर आ लाडगा पूर्व गे हजार निकशी कुबीत, दक्खिन गे हजार निकशी कुबीत, पच्छिम गे हजार निकशी कुबीत नु उत्तर गे हजार निकशी कुबीत पुक्चा माल्नीनी। मिनु सहर मेको आ दातेम बाक्चा माल्ब। मेको आन सहर डा योत्रतीके मेकोन बाक्नीम’ देनो” दैत।

ब्रोंडशा बाक्तीक सहर

6 मिनु “गे लेवी आ थर डा मुर आन कली गेशो सहर रे ६ ओटा सहर चहिं ब्रोंडशा बाक्तीक सहर दुम्चा माल्नीम। गे मेकेर मुर साइक्ब मुर कली प्रोक्चा गेचा माल्नीनी। मेको नु तेम्शा ४२ ओटा सहर दुम्चा माल्नीम। प्रस्थान २१:१३

7 गे लेवी थर डा मुर आन कली नेल्लेमी ४८ ओटा सहर नु मेको आन एर ओंथ डा योत्रतीक रू गेचा माल्नीनी।

8 मिनु टेयब रागी तशो इसाएली आन थर रे शुश सहर गेचा नु आइक्च रागी तशो इसाएली आन थर रे का निकशी सहर गेचा माल्नीनी। मेको थर थर डा मुरुमी आ योक्शा गेशो रागी गारचा डा पा लेवी थर डा मुर आन कली सहरपुकी गेचा माल्नीम, देंचा माल्नेवे” दे परमप्रभु यावेमी मोसा कली दैत। गन्ती २६:५४

9 मिनु परमप्रभु यावेमी लेशा मोसा कली

10 “गे इसाएली आन कली ‘गेपुकी यर्दन खोला शोक्शा कनान रागी जाक्दीन्नी नोले,

11 गे ब्रोंडशा बाक्तीक सहर योत्रचा माल्नीनी। मिनु मतुइक्थ, मुर साइक्तु हना, मेको मुर साइक्ब मुर मेकेर प्रोक्ने चाप्ब।

12 मेको सहरपुकी क्येक्क लेप्ब आन क्येडा ब्रोंडशा बाक्तीक सहर दुम्ब। मिनु मेको मुर साइक्ब मेको सहर डा मुर आन दातेमी निसाफ पचा पुंडसीचा डोंडती साइक्चा मपुंडसेक्ल।

13 मिनु इन योत्रशो ब्रोंडशा बाक्तीक सहर ६ ओटा दुम्चा माल्नीम।

14 गे यर्दन खोला आ ओंथ हांबुमी सां नु कनान रागीमी सां सहर ब्रोंडशा बाक्चा कली तिल्चा माल्नीनी।

15 मेको ६ ओटा सहर इसाएली, आन दातेम बाक्ब अर्को रागी डा मुर नु लां गाक्ब मुर आन कली ब्रोंडशा बाक्तीक सहर दुम्ब। मोपा मतुइक्थ मुर साइक्ब मुर मेकेर प्रोक्शा लशा बाक्ने चाप्नीम।

मुर साइक्चा आ पर्बम

ब्यवस्था १९:४-१३

16 सुडमी फलाम के मारेडमी आप्शा, मुर साइक्तु हना, मेको मुर साइक्ब बाक्ब। मेको मुर साइक्ब कली साइक्चान माल्ब।

- 17 सुइ मुरुमी मुर आन कली फुल्लु आप्शा साइव्तु हना, मेको मुर साइव्ब बाक्ब। मेको मुर साइव्ब कली साइव्कचान माल्ब।
- 18 सुइमी मुर कली शीम तुप्शा साइव्तु हना, मेको मुर साइव्ब बाक्ब। मेको मुर साइव्ब कली साइव्कचान माल्ब।
- 19 मेको क्येक्क लेप्बमी मेको मुर साइव्ब कली साइव्कचान माल्ब। मेको कली गुमानुन, मेको कली साइव्कचान माल्ब।
- 20 मिनु सुइमी मुर कली काइ मदाक्थु नेप्शा, मार मार आप्शा कि लाम बाप्शा साइव्तु हना,
- 21 गुइम तुप्शा साइव्तु हना, मेको मुर कली साइव्कचान माल्ब। मेको मुर साइव्ब बाक्ब। मेको क्येक्क लेप्बमी मेको मुर साइव्ब कली गुमानु, मेको कली साइव्कचान माल्ब।
- 22 तन्न सुइमी मुर कली मगाइक्थु, मतुइक्थु, चुशा तोक्तु हना, कि मारेइ थोत्रक आबानु मेको कली खशा बेक्त हना,
- 23 मेको आ वारचमी ठेयब फुल्लु म्पाइव्कतानु, आ गुइ रे दोक्शा खशा बेक्त हना,
- 24 मेको सहर डा मुरपुकीम मेको मुर साइव्ब नु क्येक्क लेप्ब आस दातेमी निसाफ पचा माल्नीम।
- 25 मिनु मेको सहर डा मुरपुकीम मेको मुर साइव्ब कली क्येक्क लेप्ब आ गुइ रे प्रोइचा माल्नीम। मिनु नोले सहर डा मुरपुकीमी मेको मुर साइव्ब ब्रोंइशा बाक्तीक सहर सोइक्का माल्नीम। मिनु मेको मुर साइव्ब तेल लुक्शो ठेयब चढेब मबेक्क सम्म मेकेर बाक्का माल्ब। लेवी २१:१०
- 26 तन्न मेको मुर साइव्ब मेको आ ब्रोंइशा बाक्तीक सहर रे यूत हना,
- 27 मिनु क्येक्क लेत्का माल्ब मुरुमी मेको कली गुम्शा साइव्तु हना, मेको कली साइव्ब दोस मताइब।
- 28 मारदे हना मेको साइव्ब ठेयब चढेब मबेक्क सम्म मेको ब्रोंइशा बाक्तीक सहरम बाक्का माल्ब। तन्न ठेयब चढेब बेक्क नोले ला मेको आ रू खिंम लेत्ते चाप्ब।
- 29 मिनु मेको गेना हना यो परमप्रभु यावेमी इन कली फुल्लुम मुशा ब्रेक्शो नु आ शेंशो लोत्र बाक्ब। मिनु गेपुकी ते बाक्तीनी हना यो, इन तौ चच युइ नेल्ल पाला डा मुरुमी पचा माल्नीम।
- 30 सुइम सुइ आन कली साइव्तु हना, मेको मुर साइव्ब कली सांक्छी आन लोत्र नेंशा ला साइव्कचान माल्ब। तन्न सांक्छी का आ लोत्र नेंशा ला मेको कली मसाइक्का। ब्यवस्था १७:६; ब्यवस्था १९:५
- 31 गेपुकी साइव्कचान पुंडीसीब मुर प्रोइचा कली मेको आ पा डा क्येट मताक्कीन। मेको मुर साइव्ब कली साइव्कचान माल्ब। भजन संग्रह ४९:८-९
- 32 ब्रोंइशा बाक्तीक सहरम प्रोक्शो मुर, ठेयब चढेब मबेक्क, आ खिं रू लेत्का गेचा कली गे क्येट मताक्कीन। ठेयब चढेब मबेक्क सम्म मेको आ खिं रूमी लेत्का मताइब।
- 33 मिनु गेपुकीमी इन बाक्तीक रागी ग्रॉग्रा दिशो मसेलीन। मारदे हना रागी हुशेम ग्रॉग्रा दिशो सेल्ब। मिनु मेको ग्रॉग्रा मदिशो सेल्ने मचाप्नीम। हुश ख्वाक्क पोक्क कली साइव्कचान ला मेको रागी ग्रॉग्रा मदिशो सेल्ने चाम्सीब।
- 34 गे इन बाक्शो रागी ग्रॉग्रा दिशो मसेलीन। गो यो मेकेर बाक्नुड। मारदे हना गो परमप्रभु यावे इसाएली आन दातेमी बाक्नुड' दे इसाएली आन कली देनो" देत। लेवी १८:२४-२८; प्रस्थान २९:४५

## 36

सेलोफेहाद आ तमी आन थेरशो रू तशो  
गन्ती २७:१-११

- 1 योसेफ आ युइ, मनस्से आ चच माकीर आ तौ गिलाद आ खिं खिं डा योसेफ आ थर का डा ठेयब मुरपुकी, मोसा नु इसाएली आन थर थर डा ठेयब मुर आन डोंइती जाक्तेक्म।
- 2 मिनु मेकोपुकीमी "परमप्रभु यावेमी आंइ होइप, इन कली इसाएली आन कली रागी योक्शा गेचा, दे अरेशो बाक्त। मिनु आंइ लोक्ब सेलोफेहाद आ शोप चहिं मेको आ तमी आन कली गेचा माल्ब, दे परमप्रभु यावेमी अरेशो बाक्त। गन्ती २६:५५
- 3 तन्न मेको मीश आलपुकीम इसाएली आन अरु थर डा मुर नु ग्युंबे पाम्तेक्म हना, मेको आन शोप वोंइश मुर आन शोपोम तेम्सीब। मोपा मेको आन भाग आंइ किकी पिपी आन रागी रे जाम्शा लाइब।
- 4 मिनु प्रोइतीक बर्स जाक्मेनु, मेको मीश मुर आन रू यो ग्युंबे पा लाइब मुर आन रूम तेम्सीब। मोपा गो आंइ थर रागी रे जाम्शा लाइब" देतेक्म। लेवी २५:१०-१३
- 5 मिनु परमप्रभु यावेमी मोसा कली अरेशो खोदेशो पा मोसामी इसाएली आन कली "योसेफ आ तौ आन थर डा मुर आन देशो लोत्र थमा बाक्ब।
- 6 परमप्रभु यावेमी सेलोफेहाद आ तमी आन परबम अरेशो मार बाक्त देशा हना, मेकोपुकीमी आन दाक्शो वोंइश आल ग्युंबे पने चाप्नीम। तन्न आन आफ आ खिं खिं डा मुर नु ला ग्युंबे पने चाप्नीम।
- 7 मो दुम्मेनु इसाएली आन रागी थर का रे अर्को थरम मयाक्सीब। मारदे हना इसाएली नेल्ल आन किकी पिपी आन रागीम बाक्का माल्नीम।
- 8 सुइ मीश आल आ आफ आ शोप तशो बाक्त हना, मेकोमी आ आफ आ खिं खिं डा मुर का ग्युंबे पचा माल्ब। मोपा इसाएली नेल्ले आन किकी पिपी आन थर डा रागी लीब।
- 9 मिनु इसाएली आन रागी थर का रे अर्को थरम याक्का म्दुम्ब। मोपा इसाएली नेल्ल आन आम रागीम बाक्का ताइनीम" देत।
- 10 सेलोफेहाद आ तमीपुकीमी परमप्रभु यावेमी मोसा कली अरेशो खोदेशो पा पाम्तेक्म।
- 11 सेलोफेहाद आ तमीपुकी महलाह, तिरचा, होग्ला, मिल्का नु नोआहमी आन आफ आ लोक्ब आन तौपुकी नु ग्युंबे पाम्तेक्म। गन्ती २६:२९-३४

12 मेकोपुकीमी योसेफ आ तौ मनस्से आ थर डा मुरपुकी नु ग्युंवे पाम्तेक्म। मोपा मेको आन शोंप आन थर नु आन आफ आ खिं खिं डा मुर नु लीत।

13 एको परमप्रभु यावेमी मोसा कली शेंतीके नु ठीक पतीके लोव बाक्ब। मिनु मोसामी इस्राएली आन कली नेल्ल अरेशो बाक्ब। मेना मेकोपुकी यर्दन खोला आ शुइच, मोआब डा दिममी यरीको आ नेक्था बाक्तेक्म।

## ब्यवस्था

**ब्रेक्ब मुर:** एको किताब यो मोसा आ ब्रेक्शो बाक्ब। मोसा परमप्रभु आ अरेशो लोत्र ब्रेक्ब नु कुम्सो सेल्ब बाक्त। ब्यवस्था ३१:९, २२, २४ मोसा बेकम नोले अरु मुरपुकीम ब्रेक्शो बाक्तेकम। का निक्शीम “यहोसुम ब्रेक्शो बाक्ब” देनीम। मोसामी डांडा डोइक्का क्येडा डोंइती आंमा ब्रेक्शो बाक्ब, दे यो मिन्मीम।

**गेना ब्रेक्शो:** एको किताब इस्राएलीपुकी गोरशो रागीम हिरशा ४० बर्स ११ महिना डा डोंइती नाक्त रे ३० नाक्त सम्म डा ब्रेक्स बाक्ब। मोसामी आ बेक्का क्येडा डोंइती ब्रेक्शो कि ब्रेक्पाइशो बाक्त।

**मार ब्रेक्शो:** एको किताब परमप्रभु आ अरेशो लोत्र लेंशा शेंतीक ला ममाइ, परमप्रभु आ देंशो नेल्ल टिचा आ पबंम लोत्र बाक्ब। एको नेल्ल मोसा आ पशो लोत्र बाक्ब।

होरेब रे कादेश सम्म गाक्शो

1 मोसामी एको ब्रेक्शो लोत्र इस्राएली नेल्ल आन कली शेंशो बाक्ब। मिनु मेना मेकोपुकी सुफ माइशो दिम आ ओंथ हांबुम बाक्तेकम। मेको बाक्तीके अराबाहम, पारान, तोफेल, लाबान, हसेरोथ नु दी-साहाब आन दातेमी यर्दन खोला आइक्की हांबु डा रागीम बाक्ब।

2 होरेब रे पा कादेश-बारनेआ सम्म, सेइर डा लां रे लचा कली ११ नाक्त माल्ब।

3 मिनु परमप्रभु यावेमी मोसा कली मार मार शेंदा, मेको मोसामी ४० बर्स नु ११ महिना डा डोंइती डा नाक्तीमी मेको इस्राएली नेल्ल आन कली शेंताक्ब। गन्ती ३३:३८

4 डोंइती मेकोपुकीमी हेरबोन डा एमोरी आन पिप सीहोन नु अशरारोथ नु एद्रेइ सहरम बाक्ब बाशान डा पिप ओग नु लडाइ पा ग्रातेकम। गन्ती २१:२१-३५

5 मिनु यर्दन खोला आइक्की हांबुम, मोआब रागीम बाक्शा, मोसामी परमप्रभु यावे आ अरेशो लोत्र शेंचा गोपु।

6 मिनु मोसामी “होरेब डांडाम बाक्शो परमप्रभु यावे, इ परमप्रभुमी ‘गेपुकी एको पहाडम शुश नाक्त बाक्तीनी। गन्ती १०:११-१२

7 मुल गे गाक्चा गोने। कनानी आन रागी लने। एमोरी आन पहाड नु दिमम लने। मेको आ नेक्था डा अराबाह माइक्तीके यो लने। मेको पहाड बाक्ब। मेको शेफेलाह, नेगेब नु समुन्द्र आ नेक्था डा कनानी आन रागी बाक्ब। गे लेबानोन नु युफ्रेटीस माइशो ठेयब खोला सम्म लने” देत।

8 मिनु लेंशा परमप्रभु यावेमी ‘कोव्रडीन, मेको रागी इन डोंइती बाक्ब। मेकेर ओव्रशा, मेको रागी आंम के सेलीन। मारदे हना गो मेको रागी इन किंकी पिपी अब्राहाम, इसहाक, याकूब नु आन चच युइ आन कली गेनुड’ दे कसम जाता” देत। उत्पत्ती १२:७; गन्ती ११:१४

मोसामी निसाफ पाइब वोइशो

9 मिनु गो इन कली “गो आं का ला इन कली कोवने मचापुड। प्रस्थान १८:१८

10 मिनु परमप्रभु यावे, इन परमप्रभुमी इन कली शुश सेल्शा, गे मुल सरीड डा सोरुल खोदेशो पा शुश दुम्शो बाक्नीनी। ब्यवस्था १०:२२; उत्पत्ती १५:५

11 परमप्रभु यावे, इन किंकी पिपी आन परमप्रभुमी इन कली का का पा हजार क्येडा शुश सेलल। आ देंशो खोदेशो पा इन कली आसीक गेवल।

12 दोपा गो का ला इन श्येत तशा, इन जिशो खेशो नेल्ल गारपाइक्ने चापुडडा डा?

13 मिनु गे इन थर थर रे निप्स पाइशो, लोत्र रुप्ब नु मारेइ मारेइ तुइक्ब मुर योव्रडीन। मिनु गो मेको आन कली इन कली कोवब सेल्लुड।

14 मिनु गेपुकीमी आं कली ‘इन देंशो लोत्र रिम्शो बाक्ब’ देतीनी।

15 मोपतीके गो इन थर डा निप्स पाइशो, तुइक्ब नु ठेयब मुरपुकी योव्रशा, इन कली कोवब सेल्ला। मिनु इन थर थर डा हजार का, सहे का, ५० नु १० जना मुर आन कली का का पा कोवब ठेयब मुरपुकी सेल्लाक्मी। आंम इन थर थर डा मुरपुकी यो योव्रताक्मी। प्रस्थान १८:२५

16 मेना गो इन कली निसाफ पाइब आन कली ‘इन लोक्ब आन दातेमी जिशो खेशो रिम्शो पा नेंशा, ठीक पा निसाफ पने। इस्राएली नु रागी डा मुर जिशो यो नेल्ल आन कली ठीक पा निसाफ पने। लेवी १९:१५

17 निसाफ पनीनु, मुर आन कुल मकोव्रडीन। गेपुकीमी आइक्च नु ठेयब मुर, नेल्ल आन लोत्र नेनीन। सुइ कली महिनीन। मारदे हना निसाफ परमप्रभु आ गुडमी बाक्ब। इन मचापुशो निसाफ चहिं गो नेंनुड। मेको कली आं बाक्तीक चाक्कीन’ दे माइक्ताक्मी। ब्यवस्था १६:१९; २इतिहास १९:६-७; प्रस्थान २१:६

18 मेना गो इन पचा माल्शो गेय नेल्ल अरेतन्नी।

मोसामी क्यारी पाइब सोइशो

19 मिनु नोले परमप्रभु यावे, इ परमप्रभुमी देंशो खोदेशो पा गोपुकी होरेब डांडा रे पा एमोरी आन बाक्तीक पहाड लाइतक। गोपुकी एको हिंचा डा ठेयब गोरशो रागी लकानु, गे मेको नेल्ल तुइक्नीनी। मोपा गो कादेश-बारनेआम जाक्तक। गन्ती २०:१

20 मिनु गो इन कली ‘परमप्रभु यावे, इ परमप्रभुमी इ कली गेशो एमोरी आन पहाड रागीमी जाक्तीनी।

21 कोव्रडीन, परमप्रभु यावे, इन परमप्रभुमी एको रागी इन कली गेशो बाक्त। मिनु परमप्रभु यावे, इन किंकी पिपी आन परमप्रभुमी देंशो खोदेशो पा मेकेर इर लशा, आंम के सेलीन। गेपुकी महिनीन। सुतां मपने’ देती।

- 22 मिनू गे नेल्लेमी आं कली 'मेको रागी डा मारेड मारेड तुडक्चा कली आंड डोंडती क्यारी पाइबपुकी सोडक्तीन। मेकोपुकीम तेको लां गाक्चा नु तेको सहर जाक्दीत्तीकी, दे शेंने चाप्नीमी' देंतीनी। गन्ती १३:२
- 23 मिनू गो मेको लोव्र ठीक लाक्ती। गो इन थर डा का का पा १२ जना मुर योव्रताक्मी।
- 24 मिनू मेकोपुकी पहाड गे लशा, एश्कोल डा दिमम जाक्दीश्शा, क्यारी पथ लाम्तेक्म।
- 25 मिनू मेकोपुकीमी मेको रागी डा फल फुल कुरशा चाक्शा, आंड कली 'परमप्रभु यावे, इं परमप्रभुमी गेशो रागी शुश रिम्शो बाक्ब' देंतेक्म।

इसाएलीपुकीमी मटिशो

- 26 तन्न गेपुकी परमप्रभु यावे, इन परमप्रभुमी देंशो मटिथु, मेको रागी लचा मबिस्सीनी।
- 27 मिनू गे इन बाक्तीक ताम्बुमी गन गन पा 'परमप्रभु यावेमी आंड कली मदाक्तीके नु एमोरी आन गुड रे पा साइक्पाइक्चा कली आंड कली इजीप्ट रे गुंइशा, एक चाक्शो बाक्ब। गन्ती १४:-
- 28 मारदे मेकेर लचा? मेको क्यारी पाइबपुकीमी आंड कली मेकेर डा मुरपुकी आंड क्येडा लाइश्शो नु बोल्यो बाक्नीम। मेको आन सहर आन गारो सरीड थिचा डा पा लाइश्शो बाक्नीम। मिनू मेकेर गोपुकीमी अनाकीम डा मुर यो ताइतक, दे हिंच कोंइताक्म' दे गन गन पाइतीनी। ब्यवस्था १:१-२; गन्ती १३:३३
- 29 मिनू गो इन कली हिंशा, खिंखि मपने। मेको आन कली तशा महिनीन। प्रस्थान १४:१४-२५; यहोसु १०:१४
- 30 इन डोंडती गाक्ब, परमप्रभु यावे, इन परमप्रभुमी इन पा डा लडाइ पाइब। दोपा इजीप्ट रागीमी इन डोंडती मार मार पवा, मोपा पाइब।
- 31 मिनू गोरशो रागीम गेपुकी गाक्नीनु, आफोम आ तौ कली कुरशो खोदेंशो पा, परमप्रभु यावे, इन परमप्रभुमी इन कली एक जाक्ची सम्म कुरशो बाक्त। गे आंमा तुडक्तीनी। ब्यवस्था ८:५; प्रस्थान १९:४
- 32 मोदेंशो दुम्त हना यो गे परमप्रभु यावे, इन परमप्रभु कली थमा मसुडक्नी।
- 33 मेको इन डोंडती इन कली बाक्तीके कोंइथ गाक्त हना यो, गे थमा मसुडक्नी। मिनू लां कोंइचा कली नाक्दोम मी नु नाक्तीम गोस्स दुम्शा इन कली लां कोंइताक्व। प्रस्थान १३:२१

थमा मसुडक्ब सजाइ तशो

- 34 मिनू परमप्रभु यावेमी इन रेयके पा लोव्र पशो नेंशा गाइश्शा
- 35 'एको मरिम्शो मुर आन दातेमी मुर का ला मेको आन किंकी पिपी आन कली गेशो रिम्शो रागी लचा ताइब। गन्ती १४:२३-२४
- 36 मेको यपुन्ने आ तौ कालेब बाक्ब। मेको नु आ तौ चचम मेको आ थेक्शो रागी ताइनीम। मारदे हना मेकोमी आं कली, परमप्रभु यावे कली थमा पा नोले खोइश्शो बाक्त' दे कसम जशा देंत।
- 37 मिनू परमप्रभु यावेमी इन पशो तशा, आं पर्वम यो गाइक्ताक्व। मिनू मेकोमी आं कली 'गे यो मेको रागी ओव्रचा मताइनेवे। गन्ती २०:१२
- 38 इ के गेय पाइब नून आ तौ यहोसु चहिं ओव्रचा ताइब। गे मेको आ थुं बारपाइक्चा माल्नेवे। मारदे हना यहोसुमी इसाएली आन कली मेको रागी योक्शा गेचा माल्ब' दे परमप्रभुमी कसम जशा देंत। गन्ती ३४:१७
- 39 मिनू गेपुकीमी इन आल ब्रेच आन पर्वम 'मेको गोरशो रागीमी बेक्नीम' देंतीनी। तन्न मेकोपुकी ओव्रचा ताइनीम। इन आइक्च तौपुकी ओव्रचा ताइनीम। मेको रागी मेको आन कली गेनुड। मिनू मेकोपुकीमी मेको रागी आंम के सेल्नीम।
- 40 मिनू गेपुकी चहिं लेश्शा गोरशो रागी लल समुन्द्र गे लने। गन्ती १४:२५
- 41 मिनू गेपुकीमी आं कली 'गो परमप्रभु यावे कली पाप पाइतक। परमप्रभु यावे, इं परमप्रभुमी शेंशो खोदेंशो पा गो लडाइ पथ लाइनीकी' देंतीनी। मिनू गे नेल्ले इन या पिम्साक्नी। मिनू गो ग्रानीक, दे मिम्शा, पहाडी रागी कली लडाइ तोचा, दे ग्येत्थ लाइतीनी। गन्ती १४:४०
- 42 मिनू परमप्रभु यावेमी आं कली 'गेपुकी इन जोरी सयु रे ब्रुइनीनी, गे मेको डांडा डोइश्शा मलने। लडाइ मपने। मारदे हना गो इन दातेमी मबाक्शो बाक्नुड, दे मेको आन कली माइक्मी' देंत।
- 43 मिनू गो इन कली मेको लोव्र पाता। तन्न गेपुकीमी नेंसीन मनेनी। ठेयब लेश्शा, परमप्रभु यावे आ लोव्र मबिथु मटिथु, गे डांडा डोंइसाक्नी।
- 44 मिनू मेको डांडाम बाक्ब एमोरीपुकीमी गेपुकी नु लडाइ पाम्तेक्म। मिनू मेकोपुकीमी सुरब आन हुल खोदेंशो पा इन कली खेदा पाम्तेक्म। मिनू सेडर नु होरमा सम्म खेदा पा इन कली फ्रुम्तेक्म। गन्ती १४:४५
- 45 मिनू गेपुकी लेश्शा जाक्शा, परमप्रभु यावे आ डोंडती डाक्तीनी। तन्न मेकोमी इन डाक्शो मनेन। इन पुंइशो लोव्र यो मगेवो।
- 46 मिनू नोले गे शुश नाक्त कादेशम बाक्तीनी। ब्यवस्था २:१४

## 2

इसाएलीपुकी गाक्शो

- 1 मिनू परमप्रभु यावेमी आं कली देंशो खोदेंशो पा गोपुकी गोरशो रागी लल समुन्द्र गे लाइतक। मिनू शुश नाक्त सम्म सेडर डांडा हिरना हिरन बाक्तक। गन्ती २१:४
- 2 मिनू परमप्रभु यावेमी आं कली
- 3 'गेपुकी शुश नाक्ती एको डांडा कली हिरना हिरन बाक्तीनी। मुल उत्तर गे लने।



4 गे मुर आन कली मुल गे सेडरम बाकब, इन लोकबपुकी एसाव आ चच युइ आन रागी लाइनीनी। मेकोपुकी इन कली तशा हिंनीम। मिनु गेपुकी होस पचा माल्नीनी। गन्ती २०:१४

5 मेकोपुकी नु काइ मजिने। मारदे हना गो मेको आन रागी रे इन कली खोइल थैक्तीक खोमो रू यो मगेनुइ। गो सेडर पहाइ एसाव कली गेशो बाक्नुइ। उत्पत्ती ३६:८

6 मिनु इन माल्शो जचा थोत्रक मेको आन के ग्याप्शा ला जने। ब्वाक्कु यो मेको आन के ग्याप्शा तूडीन।

7 मारदे हना परमप्रभु यावे, इन परमप्रभुमी इन पशो नेल्लेमी इन कली आसीक गेशो बाकब। गेपुकी मेको ठेयब गोरशो रागीम गाक्नीनु, इन कली कोत्रतु। मिनु परमप्रभु यावे, इन परमप्रभु ४० बर्स सम्म गेपुकी नु बाक्त। इन माल्शो नेल्ल ताइतीनी' दे परमप्रभुमी देंत। गन्ती १४:३३

8 मिनु गो, सेडरम बाकब एसाव आ चच युइ, आंड लोकब आन बाक्तीक दिंम डा अराबाह डा लां रे पा एलाथ नु एस्योन-गेबर रे मगाक्थु, गो मोआब डा गोरशो रागी गे लाइतक।

9 मिनु परमप्रभु यावेमी आं कली 'मोआब नु लडाइ मपने। मेकोपुकी नु काइ मजिने। मेको रागी इ कली मगेनन। मारदे हना गो आर सहर लोत नु आ चच युइ आन कली गेता। उत्पत्ती १९:३६-३७

10 मिनु डोंइती मेकेर एमीमपुकी बाक्तेकम। मेको शुश नु लाइश्शो मुर बाक्तेकम। अनाकीम डा मुर खोदेशो शुश लाइश्शो कोल्शो मुर बाक्तेकम। व्यवस्था १:२८

11 मिनु अनाकीम डा मुर आन कली खोदेशो पा रेफाइम माइश्शो मुरपुकी शुश कोल्शो मुर देंनीम। मिनु मोआबीम मेको आन कली एमीम देंनीम।

12 डोंइती होरीपुकी यो सेडरम बाक्शो बाक्तेकम। मिनु नोले एसाव आ मुरपुकीम मेको आन कली साइश्शा, मेको आन रागीम बाक्तेकम। परमप्रभु यावेमी इसाएली आन कली गेशो रागी मेकोपुकीम आंम के सेल्शो खोदेशो पा, मोआब डा मुरपुकीमी मेको रागी आंम के सेल्शो बाक्तेकम' देंत। उत्पत्ती १४:६

13 मिनु नोले परमप्रभुमी 'गेपुकी जेरेद खोल्सा शोकसीन' देंत। मिनु गो जेरेद खोल्सा शोकसाक्क। गन्ती २१:१२

14 मिनु डोंइती परमप्रभु यावेमी कसम जशो खोदेशो पा कादेश-बारनेआ रे जेरेद खोल्सा आइक्की हांबु सम्म जाक्चा नु लडाइ पाइब नेल्ल मनुम्मा सम्म आंड कली ३८ बर्स माल्ताक्व। गन्ती १४:३४

15 थमा पा परमप्रभु यावेमी मेको लडाइ पाइब आन कली आंमान क्याम्ताक्व। गन्ती १६:३१-३२; गन्ती २१:६; गन्ती २५:३-५

16 मिनु मुर आन दाते डा लडाइ पाइब नेल्ल बेक्ने थुम्मे नोले

17 परमप्रभु यावेमी आं कली

18 'गे मुलाक्त मोआब डा सांद आर सहर लाक्शा, लचा माल्नीनी। गन्ती २१:१३, १५

19 मिनु गे अम्मोनी आन रागी जाक्दीतीनी। मेको नु लडाइ मपने। काइ मजिने। मारदे हना अम्मोनी आन रागी इन कली मगेनुइ। मेको लोत नु आ चच युइ आन कली गेतामी। उत्पत्ती १९:३८

20 मेको रागी यो लाइश्शो कोल्शो मुर आन रागी बाक्त। डोंइती मेकेर रेफाइम माइश्शो मुर बाक्तेकम। तन्न अम्मोनीपुकीमी मेको आन कली जाम्जुमीम देंनीम।

21 मेको शुश दुम्शो नु लाइश्शो अनाकीम डा मुर खोदेशो बाक्तेकम। मिनु परमप्रभु यावेमी मेको आन कली अम्मोनी आन डोंइती खतम सेल्लु। मिनु मेको नेल्ल आन कली खेरशा, अम्मोनी मेको आन बाक्तीकेम बाक्तेकम।

22 परमप्रभुम सेडरम बाकब एसाव आ खिं खिं डा मुर आन परबम यो मोदेशोन पाप्तु। मेको आन डोंइती होरी आन कली खतम सेल्लु। मिनु होरी नेल्ल आन कली खेरशा, मुल सम्म एसाव आ खिं खिं डा मुर मेकेर बाक्नीम।

23 मिनु मेको मोदेशो पा गाजा डा काफ्तोर सहर रे जाक्शो काफ्तोरीपुकीमी आव्वीम सहर डा मुर आन कली साइक्तेकम। मिनु मेको आन बाक्तीकेमी बाक्तेकम' देंत। उत्पत्ती १०:१४; यहोसु १३:३

पिप सीहोन नु लडाइ पा ग्राशो

24 मिनु परमप्रभुमी 'बोक्कीन। गाक्चा गोने। मिनु अरनोन खोल्सा शोकसीन। मारदे हना गो हेरबोनम बाक्शो एमोरी आन पिप सीहोन नु आ रागी इन कली गेता। मेको इन के सेल्ना सेल्ल लडाइ पने।

25 मुलाक्त रे गो जात जात डा मुर नेल्ल आन कली इन लोत्र नेशा, इन क्येडा हिंशा, खिंखि पाइब सेल्लुडमी' देंत। प्रस्थान २३:२७

26 मिनु गो केदेमोथ माइश्शो गोरशो रागी रे हेरबोन डा पिप सीहोन नु दुचा गारचा आ परबम मुरपुकी लोत्र पथ सोइक्ताक्डमी। गन्ती २१:२१-२६

27 मार लोत्र सोइक्ताक्डमी देशा हना 'आंड कली इन रागी रे लचा गेकी। गो एर आंथ मपथु, ठेयब लां खोइश्शा गाक्नीकी।

28 गे जचा थोत्रक क्येट ताक्शा आंड कली लेयडीन। ब्वाक्कु यो क्येट ताक्शा गेकी। आंड कली गाक्तीक लां ला गेकी।

29 मोपा सेडरम बाकब एसाव आ खिं खिं डा मुरपुकीमी नु आर सहरम बाकब मोआबी डा मुरपुकीमी गाक्चा गेम्तेकम। परमप्रभु यावे, इ परमप्रभुमी गेशो यर्दन खोला आइक्की हांबु डा रागी जाक्दीचा सम्म लां गेने' देंथ, मुरपुकी सोइक्ताक्डमी।

30 तन्न हेरबोन डा पिप सीहोनमी आंड कली गाक्तीक लां मगेव। मारदे हना परमप्रभु यावे, इन परमप्रभुमी इन पा डा लडाइ पा ग्राचा कली मेको आ थुं खकटा नु मटीब सेला बाक्त। मिनु मोदेशो दुम्ता प्रस्थान ४:२१

31 मिनू परमप्रभु यावेमी आं कली 'गो सीहोन नु आ रागी इन कली जिम्मा गेचा गोव्रता। मेको आ रागी लडाइ पा आंम के के सेलीन' दैत। यहेसु १०:१२; येरमीया २४:८; रोमी १:२४; रोमी ४:२५; ८:३२

32 मिनू सीहोन नु आ मुर नेल्ल गोपुकी नु लडाइ पथ याहास माइक्तीकेमी जाक्तेक्म।

33 मिनू परमप्रभु यावे, इं परमप्रभुमी मेको कली साइक्च, दे इं कली जिम्मा गेप्टु। मिनू गोपुकीमी मेको कली, मेको आ तौ नु मेको आ मुर नेल्ल आन कली साइक्तक।

34 मेना गो मेको आन सहर नेल्ल आइ के सेल्लतक। आन मुर नेल्ल कली साइक्तक। वोंइश मुर, मीश मुर नु आल नेल्ल साइक्तक। का कली यो मप्रोंइथु, नेल्ल आन कली साइक्तक।

35 गो आइ ग्राशो सहर डा मारेइ मारेइ आंम के सेल्शा, बी ब्यफ, क्यारश भेडा यो आइ कली वोंइसाक्क।

36 अरनोन खोल्ला डा दिंम बाक्ब आरोएर सहर रे गिलाद सम्म आइ ग्राने मचाप्चा डा सहर कान मबाक्म। परमप्रभु यावे, इं परमप्रभुमी मेको नेल्ल आइ कली ग्राचा गेप्टु। यहेसु १३:९; २सामुएल २४:५

37 यब्बोक खोल्ला आ नेक्था बाक्ब अम्मोनी आन रागी, पहाड डा सहरपुकी नु परमप्रभु यावे, इं परमप्रभुमी इं कली मलचा देंशो रागी ला मलक।

### 3

पिप ओग कली ग्राशो

1 मिनू नोले गो बाशान ग्येन्थ लाइतक। मिनू बाशान डा पिप ओग नु आ मुर नेल्ले गोपुकी नु लडाइ पथ एद्रेइम जाक्तेक्म। गन्ती २१:३३-३५

2 मिनू परमप्रभु यावेमी आं कली 'मेको आन कली तशा महिनो। मारदे हना गो मेको नु आ मुर नेल्ल आन कली इन गुडमी गेता। मेको आ रागी नु आ मुरपुकी इन के दुम्त। मिनू गे हेरबोनम बाक्शो एमोरी आन पिप सीहोन कली खोदेंशो पा मेको कली यो पने' दैत।

3 मिनू परमप्रभु यावे, इं परमप्रभुमी बाशान डा पिप ओग कली यो नु आ मुर नेल्ल आन कली इं गुडमी गेप्टु। मेकेर यो का कली यो मप्रोंइथु, नेल्ल आन कली साइक्तक।

4 मेना गो मेको आ सहर नेल्ल ग्रातक। का यो मली। बाशान डा ओग आ राज्यम अरगोब माइशो रागी नेल्ल पा ६० ओटा सहर ग्रातक।

5 मेको सहर नेल्ले लाइशो गारो हिरशो बाक्तेक्म। मेको गारो डा टेयब लाप्चो आग्लो पाइशो बाक्तेक्म। मेको प्रोंइशा, अरु गारो महिरशो शुश गाउं यो ग्रातक।

6 मिनू हेरबोन डा पिप सीहोन कली खोदेंशो पा मेको सहर डा वोंइश मुर, मीश मुर नु आल नेल्ल साइक्तक।

7 मिनू बी ब्यफ, क्यारश भेडा नु सहर डा मारेइ मारेइ आइ कली वोंइसाक्क। व्यवस्था २०:१३-१८

8 मोपा गो यर्दन ओंथ हांबु डा एमोरी पिप निक्शी आस रागी ग्रातक। अरनोन खोल्ला रे हेरमोन डांडा सम्म डा रागी ग्रातक। व्यवस्था ४:४८; १इतिहास ५:२३; भजन संग्रह २९:६

9 सीदोनीपुकीमी हेरमोन डांडा कली सिरीयोन नु एमोरीपुकीमी सेनीर देंनीम।

10 गोपुकी दिंम डा सहर नेल्ले, गिलाद रागी नेल्ल, बाशान, साल्ला नु एद्रेइ सम्म, बाशानम बाक्शो ओग आ राज्य नेल्ल ग्रातक।

11 मिनू बाशान डा पिप ओग चहिं मेको लाइशो मुर, रेफाइम आन दातेमी नेल्ल क्येडा नोले साइक्चा पुंइसाक्क। मिनू मेको आ फलाम के खाट मुल सम्म अम्मोनी आन सहर रब्बाहम बाक्ब। मेको खाट ९ कुबीत लाइशो नु ४ कुबीत ब्रेम्शो बाक्ब। कुबीत का आधा मिटर कि हात का खोदेंशो बाक्ब।

यर्दन आ पूर्व डा रागी योक्शो

गन्ती ३२:-

12 मिनू मेना तेको तेको रागी आइ के सेल्लतक देंशा हना, अरनोन खोल्ला आ नेक्था दिंम बाक्शो आरोएर रे गिलाद पहाड आधा नु मेकेर डा सहरपुकी सम्म गो रूबेन आ थर नु गाद आ थर डा मुर आन कली गेतामी।

13 गिलाद डा लीशो, ओग आ राज्य, बाशान रागी नेल्ल, मनस्से आ उइक्थ थर डा मुर आन कली गेतामी। बाशान नु अरगोब रागी नेल्ल रेफाइम माइशो, लाइशो मुर आन रागी देंनीम।

14 मनस्से आ युइ याइरमी अरगोब डा रागी नेल्ल, गेशुरी नु माकाथी आन सांद सम्म लाइक्तु। मेको बाशान कली आ नें हव्वोथ-याइर वोइक्तु। मेको मुल सम्म बाक्ब।

15 मिनू गो मार्कीर कली गिलाद गेता।

16 मिनू गो रूबेन आ थर नु गाद आ थर डा मुर आन कली मार गेतामी देंशा हना, गिलाद रे अरनोन खोल्ला आ दाते सम्म नु आ नेक्था डा दिंम यब्बोक खोल्ला सम्म गेतामी। मेको अम्मोनी आन सांद बाक्ब।

17 मिनू मेको अराबाह दिंम, यर्दन नु आ नेक्था डा किन्नेरेथ रे अराबाह समुन्द्र, मेको हिक्सी समुन्द्र यो देंनीम, सम्म नां दाप्तीके डा पिस्सा डांडा रूबेन आ थर नु गाद आ थर डा मुर आन कली गेतामी। यहेसु ११:२; यहेसु १९:३५; मर्कूस ६:५३

रूबेन नु गाद आस कली लोव्र पशो

18 मेना गो इन कली 'परमप्रभु यावे, इन परमप्रभुमी एको रागी इन के दुम्चा कली गेशो बाक्ब। मो हना यो इन दाते डा लडाइ पाइब वोंइश मुरपुकी इन या पिम्सीशा, इन लोक्ब इस्त्राएली आन डोंइती यर्दन खोला शोक्चा माल्नीनी।

19 मिनू इन मीश, इन आलपुकी नु इन बी ब्यफ, क्यारश भेडा गो इन कली गेशो सहरम ला बाक्चा ताइनीम। इन के बी ब्यफ, क्यारश भेडा शुश बाक्नीम, दे तुइक्नुड।

20 परमप्रभु यावेमी इन कली खोदेशो पा इन लोक्ब आन कली मनाइक्पदा सम्म मोदेशो दुम्या माल्ब। मिनू परमप्रभु यावे, इन परमप्रभुमी यर्दन आइक्ची हांबु मेको आन कली गेशो रागी आंम के मसेल्मे सम्म गेपुकीमी मो पचा माल्नीनी। मिनू नोले गोम इन कली गेशो रागी लेशशा, जाक्ने चाप्नीनी' दे माइक्मी" देंत।

मोसाम यहोसु कली लोत्र पशो

21 मिनू मेना गो यहोसु कली "परमप्रभु यावे, इन परमप्रभुमी एको पिप निक्शी आस कली मार मार पवा, मे मेको नेल्ल ताप्तीवी। मुल गे आइक्ची हांबु शोक्सेनु, परमप्रभु यावेमी मेकेर डा राज्य नेल्ल आन कली यो मोदेशो पाइब। गन्ती २७:१८-२२

22 मेको आन क्येडा महिनीन। मारदे हना परमप्रभु यावे, इन परमप्रभुमी इन पा डा लडाइ पाइब" दे माइक्ता। व्यवस्था १:२९-३०

मोसामी परमप्रभु नु लोत्र पशो

23 मिनू मेना गो परमप्रभु यावे कली

24 "परमप्रभु, परमप्रभु यावे, गे इन गेय पाइब कली इन ठेयब पतीके नु सक्ति कोइचा गोइतीनी। मिनू स्वर्ग नु रागीम बाक्ब तेको प्रभु इन खोदेशो पा ठेयब पतीके नु सक्ति पाइशो गेय पने चाप्चा डा?

25 मेको यर्दन आइक्ची हांबु डा रिम्शो रागी, ठेयब पहाड नु लेबानोन तडल, दे आं कली यर्दन खोला आइक्ची हांबु शोक्चा गेयीनी" दे पुंइता।

26 तन्न इन पतीके परमप्रभु यावे गो नु गाइशो बाक्त। मिनू मेकोमी आं पुंइशो मनेन। मिनू परमप्रभु यावेमी आं कली "मुल रे एको आ पर्वम लोत्र मपावो। गन्ती २०:१२

27 गे पिस्मा डांडा डोइशरा, पच्छिम, उत्तर दक्खिन नु पूर्व गे कोत्रडो। मारदे हना गे यर्दन आइक्ची हांबु शोक्चा मताइनेवे।

28 मिनू गे यहोसु कली अरेशा, लोत्र पा ठेयब थुं पाइशो सेलो। मारदे हना मेकोमी मुर आन डोंइती शोक्शा, इ तशो रागी मेको आन के दुम्या कली योत्रब" दे परमप्रभुम आं कली देंत। व्यवस्था ३१:३,७;

29 मिनू गोपुकी बेथ-पेओर आ डोंइती डा दिमम बाक्तक।

## 4

लेशा परमप्रभु आ लोत्र शेशो

1 मिनू मोसामी "मिनू गे इसाएली नेल्ले, गो इन कली परमप्रभु यावे आ फुल्लुम मुशा ब्रेक्शो लोत्र नु आ निसाफ पतीक लोत्र शेंनुड। इन नोफा दाइक्तीन। मिनू आ शेशो पने। मेको पाइतीनी हना, गे ब्रोंइचा ताइनीनी। मिनू गे परमप्रभु यावे, इन किकी पिपी आन परमप्रभुमी इन कली गेशो रागी ओत्रचा नु इन के सेल्चा ताइनीनी।

2 मिनू गो इन कली परमप्रभु यावे, इन परमप्रभु आ लोत्र शेशा 'परमप्रभु आ शेशो पचा माल्ब' दे अरेनुड। गेपुकीमी आं शेशो लोत्र कली का यो मतेम्दीन। का यो मशोलीने। व्यवस्था १३:१; हितोपदेस ३०:६; प्रकाश २२:१८-१९

3 मिनू परमप्रभु यावेमी बाल-पेओर मूर्ति आ नोले खोइक्ब आन कली मार पवा, गे आंमा ताइतीनी। मिनू परमप्रभु यावे, इन परमप्रभुमी बाल-पेओर आ नोले खोइक्ब वोंइश मुर नेल्ल साइक्तु। गन्ती २५:३-९

4 गे परमप्रभु यावे, इन परमप्रभु कली आ नोले खोइक्बपुकी चहिं नेल्ल ब्रोंइशो बाक्नीनी।

5 मिनू परमप्रभु यावे, आं परमप्रभुमी आं कली अरेशो खोदेशो पा, गो इन कली आ फुल्लुम मुशा ब्रेक्शो लोत्र नु आ निसाफ पतीक लोत्र शेंतान्नी। मारदे शेंतान्नी देंशा हना, गे जाक्शा इन के सेल्चा चिक्शो रागीमी मेको नेल्ल पचा, दे शेंतान्नी।

6 मोपतीके गेपुकीमी एको लोत्र होस पा, टिने। मेकोमी इन कली तुइक्ब नु रुप्ब मुर सेल्ब। मिनू जात जात डा मुरपुकी मेको फुल्लुम मुशा ब्रेक्शो लोत्र नेल्ल नेशा, मेकोपुकीमी 'मेको ठेयब जात डा मुर थमा पा तुइक्ब नु रुप्ब मुर बाक्नीम' देंतीम। यसेया २:३

7 मिनू परमप्रभु यावे इं परमप्रभुमी आंइ नेक्था बाक्शो नु आंइ पुंइशो लोत्र नेंब खोदेशो पा तेको अर्को ठेयब जात डा देवी देवताम मोदेशो पाइनीमी? २सामुएल ७:२३

8 मुलाक्त गो इन कली परमप्रभु यावे आ अरेशो लोत्र नेल्ले नेंपाइक्नुड। मिनू तेको ठेयब जात डा मुर इं खोदेशो रिम्शो पचा कली फुल्लुम मुशा ब्रेक्शो लोत्र नु निसाफ पतीक लोत्र नेंचा ताइनीमी। येरमीया ८:८

परमप्रभु आ अरेशो लोत्र

9 इन आंम तशो इन थुंम वोइशरा, मप्रेंथु, होस पा बाक्कीन। गे ब्रोंइनी सम्म इन थुंम वोतीन। इन आल नु चच युइ आन आन कली शेंदीन। भजन संग्रह १०३:२

10 मिनू गेपुकी काबु परमप्रभु यावे, इन परमप्रभु आ डोंइती होरेब डांडा तार राप्शो बाक्तीनी, मेको मिम्तीन। मिनू परमप्रभु यावेमी आं कली मुर आन कली आं डोंइती पुक्मी। गो मेको आन कली आं लोत्र नेंपाइक्नुडमी। मिनू मेकोपुकी रागीम मबेक्सा सम्म आं कली मान पा हिंथा शेंसामल। मिनू मेकोपुकीमी एको लोत्र आन तमी तौ आन कली शेंचा माल्नीम" देंत। प्रस्थान १९:१७; व्यवस्था ६:७

11 मिनु गे आ नेक्था जाक्शा, डांडा आ पुंम राप्तीनी। मेको डांडाम सरीड सम्म मी ब्रत। मिनु छिडछिड, ठेयब गोस्स नु नाकदो खोदेशो बाकत।

12 मिनु परमप्रभु यावेमी मी आ दाते रे गेपुकी नु लोत्र पाप्तु। गे मेको आ लोत्र नेतीनी, तन्न मारेड मतनी। व्यवस्था ५:४, २४

13 मिनु मेकोमी गे नु कबल पाप्तु। आ अरेशो १० ओटा लोत्र गे टिशा पने, दे गेप्तु। मिनु मेकोमी मेको लोत्र फुल्लु निक्शी तार मुशा गेप्तु। प्रस्थान ३१:१८

14 मिनु मेना परमप्रभु यावेमी आं कली “मेको आन कली आं फुल्लुमु मुशा ब्रेक्शो लोत्र नु निसाफ पतीक लोत्र शेंदो। नोले आन गाक्शो आंम के सेल्शो रागीमी मेको लोत्र टिशा पचा, दे मेको लोत्र शेंदो” दे माइक्ती।

15 मिनु परमप्रभु यावेमी इन कली हारेब डांडाम मी रे लोत्र पवानु, गे मारेड मतनी।

16 मिनु गे इन कली मूर्ति सेल्शा, खतम मसेल्सीन। गे होस पा बाक्कीन। तेकोड वोंडश मुर, मीश मुर, प्रस्थान २०:४

17 रागी डा बी ब्यफ, क्यारश भेडा, जन्तु सरीडम बेरब चिक्ब,

18 खपीम गाक्ब, ब्वाक्कुम बाक्ब डांड के मूर्ति काड मसेलीन।

19 मिनु गे सरीड इर कोत्रशा, परमप्रभु यावे, इन परमप्रभुमी जात जात डा मुर नेल्ल आन कली गेशो नां, तास्ला, सोरुल नेल्ल तशा, मेको आन डोंडती सेड पा पूजा मपने। होस पा बाक्कीन। व्यवस्था १७:३; रोमी १:२३

20 परमप्रभु यावेमी इन कली आंम मुर सेल्शा, दे फलम चोतीके खोदेशो इजीप्त रागी रे गुंडताक्व। मोदेशो पा मुलाकत बाक्ब, दे तुडक्नीनी। १राजा ८:५१; यसैया ४८:१०; येरमीया ११:४; प्रस्थान १९:५-६; यसैया १९:२५

21 मिनु परमप्रभु यावे इन पतीके, आं पबंम गाइक्ताक्व। मेकोमी आं कली “गे यर्दन खोला मशोकथु, इसाएली आन कली गेशो रिम्शो रागी लचा मताइनेवे” दे कसम जाप्तु। व्यवस्था ३:२६

22 मिनु गो यर्दन खोला मशोकथु, मुल बाक्शो रागीमी बेक्चा माल्लुड। तन्न गेपुकी यर्दन शोकशा, मेको रिम्शो रागी इन के सेल्तीनी।

23 मिनु परमप्रभु यावे, इन परमप्रभुमी गे नु पशो कबल मप्रेक्थु, होस पा बाक्कीन। गे मप्रेथु परमप्रभु यावे, इन परमप्रभुमी देशो टिशा मारेड के मूर्ति मसेलीन।

24 मारदे हना परमप्रभु यावे, इन परमप्रभु ठेयब मी खोदेशो नु रुश पाइब परमप्रभु बाक्ब। व्यवस्था ९:३; प्रस्थान २४:१७; यसैया १०:१७; हिब्रू १२:२९; प्रस्थान २०:५

दूली पाइब परमप्रभु गे लेशो

25 मिनु गेपुकी मेको रागीमी शुश बर्स बाक्शा, तमी तौ, चच युड थिशा बाक्नीनी। तन्न परमप्रभु यावे, इन परमप्रभुमी मदाक्चा डा पा मारेड के मूर्ति सेल्शा, परमप्रभु यावे कली गाइक्पाइक्तीनी हना,

26 गो मुलाक्ती सरीड नु रागी कली इन दूली पशो आ पबंम सांक्छी वोइक्नुड। गे यर्दन आइक्ची हांनु डा इन के सेल्शा चिक्शो रागीम रीब पा खतम दुम्नीनी। गे शुश नाक्त मेकेर बाक्चा मताइनीनी। गे क्याम्चा पुंडसीनीनी। व्यवस्था ३०:१९; ब्यवस्था ३१:२८; ब्यवस्था ३२:१;

27 मिनु परमप्रभु यावेमी इन कली जात जात डा मुर आन दातेमी ब्रपाइक्ब। मिनु परमप्रभु यावेमी इन कली कोइशो रागी रागी आन दातेमी इक्का ला लीनीनी।

28 मिनु गेपुकीमी मेकेर डा मुर आन सेल्शो शी के, फुल्लु के मताइब, मनैब, मजाइब नु मनाम्ब मूर्ति आन कली पूजा पाइनीनी। व्यवस्था २८:३६; भजन संग्रह ११५:४-७

29 तन्न गे मेकेर बाक्शा, परमप्रभु यावे, इन परमप्रभु कली माल्नीनी। मिनु गे थमा पा इन थुं नेल्लेम माल्तीनी हना, गे मेको कली थिल्नीनी। भजन संग्रह २७:८; येरमीया २९:१३-१४

30 आं देशो लोत्र मोदेशो पा दुम्शा, श्येत जनीनु, गे नोले डा नाक्तीम परमप्रभु यावे, इन परमप्रभु गे लेत्तीनी। आं देशो लोत्र टीनीनी। व्यवस्था ३०:२

31 मारदे हना परमप्रभु यावे, इन परमप्रभु, शिशी पाइब परमप्रभु बाक्ब। इन किकी पिपी नु कसम जशा पशो कबल मप्रेब। मेकोमी इन कली मप्रोंडथु, खतम मसेल्ब।

32 मिनु गे इन क्येडा डोंडती डा नाक्त मिम्तीन। परमप्रभुमी मुर नु रागी सेल्शो रे मुल सम्म ओदेशो ठेयब गेय पशो आ पबंम लोत्र नेनी? तनी?

33 अरु सुइ मुरुम गे इन खोदेशो पा परमप्रभुमी मी रे लोत्र पशो नेन्मे? मिनु गे नेशा यो ब्रोंडशो बाक्नीनी। प्रस्थान २०:१, १९

34 मिनु तेको देवी देवतामी इन कली खोदेशो पा शुश रागी आन दाते रे आंम मुर सेल्शा कली योत्रशो बाक्बा? मुर आन कली नाक्शा, चिनु कोइशा, छक लाक्चा डा गेय पा, मेको आन पबंम लडाइ पा, शुश हिंचा डा सक्तिमी, परमप्रभु यावे, इन परमप्रभुमी इन कली इजीप्त रागी रे गुंडशो गे ताइतीनी। व्यवस्था ७:१९; ब्यवस्था २९:२

35 गे मारदे मेको ताइतीनी देशा हना, परमप्रभु यावे, का ला परमप्रभु बाक्ब। मेको क्येडा लाक्शा अर्को परमप्रभु मबाक्ब, दे तुडक्पाइक्चा कली इन कली कोइताक्व।

36 मिनु मेकोमी सरीड रे इन कली शेंचा, दे आ सेंदा नेपाइक्व। मिनु खपीम इन कली आ ठेयब मी कोइताक्व। गे मी आ दाते रे आ लोत्र पशो नेतीनी। प्रस्थान २०:१, १८, २०

37 मिनु इन किकी पिपी आन कली दाक्तीके, आन चच युड आन कली योत्रशा, मेकोमी आंमान आ ठेयब सक्तिमी इन कली इजीप्त रे गुंडताक्व। प्रस्थान ३३:१४

38 इन कली रागी गेचा, दे इन डोंडती इन क्येडा सक्ति पाइशशो नु शुश मुर आन कली आन रागी रागी रे गुंडताकव। मिनु गे रागी इन के सेल्चा कली ठीक दुम्शो बाक्नीनी। मोदेशो मुलाक्ती बाक्ब, दे तुडक्नीनी।

39 मिनु गे मुलाक्ती परमप्रभु यावे, का ला सरीड नु रागी डा परमप्रभु बाक्ब। मेको डा लाक्शा अर्को सुइ परमप्रभु मबाक्ब। एको लोत्र गे मुलाक्ती थमा पा तुडक्तीन। मिनु इन थुम लील।

40 मुलाक्त गो इन कली माइशशो परमप्रभु यावे आ फुल्लुम मुशा ब्रेक्शो लोत्र नु आ शेंशो टिने। मो पाइतीनी हना, इन आल नु चच आन कली रिम्शो दुम्ब। मिनु परमप्रभु यावे, इन परमप्रभुमी इन कली गेना हना यो बाक्चा कली गेशो रागीम गे शुश नाक्ती बाक्चा ताइनीनी।

मुर साइशशा प्रोक्तीक सहर

41 मिनु मोसामी यर्दन खोला नां दाप्तीक गे सहर सां योत्रतु। ब्यवस्था १९:२-१३; गन्ती ३५:६-२९

42 डोंडती मगाइक्मुशो, मतुडक्थु मुर का कली साइक्ब मुर मेकेर प्रोक्शा लने चाप्ब। मोदेशो मुर मेको सहरम प्रोक्शा, ब्रोंडचा ताइब।

43 मोसामी रूबेन आ थर डा मुर आन कली गोरशो रागी डा दिमम बेसेर सहर योत्रतु। गाद आ थर डा मुर आन कली गिलाद डा रामोथ सहर योत्रतु। मनस्से आ थर डा मुर आन कली बाशान डा गोलान सहर योत्रतु।

परमप्रभु आ अरेशो मिम्पाइशशो

44 मोसामी इस्त्राएली आन कली परमप्रभु यावे आ अरेशो लोत्र शेंताकव।

45 मिनु मेको परमप्रभु यावे आ आ देशो, आ फुल्लुम मुशा ब्रेक्शो लोत्र नु आ निसाफ पतीक लोत्र बाक्नीम। मोसामी मेको नेल्ल इस्त्राएली आन कली इजीप्त रे गुंडची ना शेंताकव।

46 मिनु मेना मेकोपुकी यर्दन ओथ हांबु, बेथ-पेओर आ डोंडती बाक्शो बेसीम बाक्तेकम। मेको डोंडती हेरबोनम बाक्शो सीहोन, एमोरी आन पिप आ रागी बाक्त। मेको रागी मोसा नु इस्त्राएलीपुकीमी इजीप्त रे गाक्मा नोले लडाइ पा प्राशो बाक्तेकम। गन्ती २१:२४

47 मेको रागी आंम के सेल्शा, बाशान डा पिप ओग आ रागी यो आंम के सेल्शो बाक्तेकम। मेको निकशी एमोरी आन पिप बाक्ताक्स। मेको रागी यर्दन ओथ हांबु नां दाप्तीके गे बाक्त।

48 मेको रागी अरनोन खोलसा आ नेक्था बाक्ब आरोएर सहर रे सिरियोन माइशशो, हेरमोन पहाड, ब्यवस्था ३:८-९

49 मिनु यर्दन आ ओथ हांबु नां दाप्तीके गे अराबाह नेल्ल पिस्गा डांडा नु आ दिमम अराबाह समुन्द्र माइशशो, हिक्सी समुन्द्र सम्म इस्त्राएलीपुकीमी आंम रागी सेल्ने थुम्शो बाक्तेकम।

## 5

१० ओटा अरेशो लोत्र

प्रस्थान २०:-

1 मिनु मोसामी इस्त्राएली नेल्ल आन कली ब्रेशशा, मेको आन कली “इस्त्राएली नेनीन। परमप्रभु यावे आ फुल्लुम मुशा ब्रेक्शो लोत्र नु आ निसाफ पतीक लोत्र नेनीन। मुलाक्ती गो मेको इन कली शेनुड। गे मेको लोत्र शेंसीशा, होस पने।

2 मिनु परमप्रभु यावे, इ परमप्रभुमी होरेब डांडाम गोपुकी नु कबल का पाप्तु। प्रस्थान १९:५

3 परमप्रभु यावेमी इ किंकी पिपी नु एको कबल मपथु, मुलाक्त एकेर बाक्शो गोपुकी नु पशो बाक्त। ब्यवस्था २९:१४

4 परमप्रभु यावेमी गो आंइ नेक्था डांडाम बाक्शो, मी आ दाते रे लोत्र पाप्तु। ब्यवस्था ५:२४

5 मारदे हना गे मी तशा हिंतीनी, डांडा मडोंडसीनी। गो परमप्रभु यावे आ लोत्र इन कली शेंचा, दे परमप्रभु यावे नु इन दातेम, राप्शो बाक्ती” दैत।

6 मिनु परमप्रभुमी इन कली “वाइलीम वाइल दुम्शा बाक्शो इजीप्त रे गुंडशा एक चाक्ब, गो परमप्रभु यावे, इन परमप्रभु नड।

7 आं क्येडा लाक्शा सुइ देवी देवता आन कली ठेयब सेल्शा ममानेचा। ब्यवस्था ११:१६,२८

8 सरीडमी, रागीमी, रागी आ आगामी ब्वाक्कुम बाक्ब मारेइ जन्तु के गेपुकीमी आंम कली मूर्ति मसेल्सीन। ब्यवस्था २७:१५

9 मेको आन डोंडती मबपीन। मेको आन कली पूजा मपने। मारदे हना गो परमप्रभु यावे, इन परमप्रभु रुश पाइब परमप्रभु नड। आ कली मटीब आम आफ बाक्ताक्स हना, मेको आ आल, चच, युड नु युड आन युड सम्म सजाइ ताइनीम। ब्यवस्था ४:२४

10 मिनु सुम आं कली दाक्बा नु आं शेंशो लोत्र टीबा, मेको आन चच युड आन हजार हजार पाला सम्म गेना हना यो दाक्नुडमी।

11 गे परमप्रभु यावे, इन परमप्रभु आ नें मो मथिने। मारदे हना सुमी परमप्रभु यावे आ नें मोशा थिक्ब, मेकोम पाप पाइब” दैत।

12 परमप्रभु यावे, इन परमप्रभुमी अरेशो खोदेशो पा नाइक्तीक नाक्ती परमप्रभु आ नाक्ती बाक्ब, दे नाइक्सीन।

13 ६ नाक्त गे इन गेय पने।

14 मिनु मेको आ नोले डा ७ नाक्ती चहिं परमप्रभु यावे, इन परमप्रभु आ नाइक्तीक नाक्त बाक्ब। मेको नाक्ती मारेइ गेय मपने। गे इन तमी तौ, वाइलीम वाइल, ब्यफ, गधा, क्यारश भेडा नेल्ल नु इन सहरम बाक्शो अर्को रागी डा मुर नेल्ल आन कली इन खोदेशो पा गेय मपपतीन।

15 मिनू गेपुकी इजीप्तमी वाइल दुम्तीके मप्रेंदीन। परमप्रभु यावे, इन परमप्रभुमी शुश सक्ति पाइशशो नु आ ठेयब बोल पतीकेमी इन कली गुंडशा, एक चाकतु। मोपतीके परमप्रभु यावे, इन परमप्रभुमी इन कली नाइक्तीक नाक्ती नाइक्चा माल्ब, दे अरेशो बाक्ब। ब्यवस्था १५:१५; ब्यवस्था १६:१२; ब्यवस्था २४:१६,२२

16 परमप्रभु यावे, इन परमप्रभुमी अरेशो खोदेशो पा इन आम आफ कली मान पने। मो पाइतीनी हना, परमप्रभु यावे, इन परमप्रभुमी इन कली गेशो रागीम रोड मपथु, शुश नाक्त ब्रोंडशा बाक्नीनी।

17 मुर मसाइक्चा।

18 आम मीश क्येडा अरु नु मइप्चा।

19 खुइ मपचा।

20 आम नेक्था डा मुर आन पबर्म जोल पा सांकछी मबाक्चा।

21 आम नेक्था डा मुर आ खिं, आ मीश, आ रू, आ वाइलीम वाइल, आ बी ब्यफ, गधा मेको के मार बाक्त हना यो, मेको तशा मवाल्चा। मीका २:२

परमप्रभु आ लोत्र मिम्पाइशशो

22 परमप्रभु यावेमी डांडाम नेल्ल इन कली एको लोत्र नेंपाइक्तु। मेकोमी मी, गोस्स नु हिंचा डा छिडछिड खोदेशो पा आ दाते रे ठेयब सेंदामी इन कली लोत्र पाप्तु। मिनू मेकोमी मारिइ मतेम्द। मिनू नोले मेकोमी मेको अरेशो लोत्र फुल्लु निक्शीम ब्रेक्शा, गेती। प्रस्थान ३१:१८

23 मिनू गेपुकीमी डांडाम मी ब्रशो तशा, छिडछिड रे सेंदा नेंनीनु, गे इन थर थर डा ठेयब मुरपुकी नु खाल्पापुकी आं नेक्था जाक्तेक्म।

24 मिनू गेपुकीमी “परमप्रभु यावे, इं परमप्रभुमी इं कली आ ठेयब पतीके नु आ छेडछेड कोइताक्व। मिनू गोपुकीमी मेको आ सेंदा मी आ दाते रे नेंतक। मुलाक्त मार ताइतक देशा हना, परमप्रभुमी मुर नु लोत्र पाइब। मो हना यो मुर मबेक्म, दे ताइतक। ब्यवस्था ४:१२-१३,३३

25 मुल गोपुकी एको ठेयब मीमी मारदे ब्रेक्चा? गोपुकी मुल यो परमप्रभु यावे, इं परमप्रभु आ सेंदा नेंना नेंन बाक्तय हना, बेक्नय।

26 मिनू सु मुरुम इं खोदेशो पा ब्रोंडशा बाक्ब परमप्रभु आ सेंदा मी आ दाते रे पा नेंशा यो ब्रोंडशो बाक्बा?

27 गे आ नेक्था लने। मिनू परमप्रभु यावे, इं परमप्रभु आ देशो लोत्र नेंशा, आंइ कली नेल्ल शेंदीन। मिनू मेको नेंशा पाइनीकी” देंतीनी।

28 मिनू परमप्रभु यावेमी इन पशो लोत्र नेंतु। मिनू आं कली “मुरपुकीम इ कली देशो लोत्र नेंता। आन देशो नेल्ल रिम्शो बाक्ब।

29 आं कली मान पा हितेक्म हना, आं शेंशो गेना हना यो टिम्तेक्म हना, मेको नु आन आल आन कली गेना हना यो रिम्शो दुम्ब। ब्यवस्था २९:३

30 मेकर लावो। मिनू मेको आन कली ‘इन ताम्बुम लेत्तीन’ दे माइक्मी।

31 तन्न गे आं नेक्था बाक्को। मिनू गेमी आं शेंशो नेल्ल, आं फुल्लुम मुशा ब्रेक्शो लोत्र नु आं निसाफ पतीक लोत्र इ कली देंनन। मिनू मेकोपुकीमी मेको आन कली गेशो रागीम मेको पचा माल्नीम” दे परमप्रभुम देंत।

32 मोपतीके इन परमप्रभु यावेमी इन कली शेंशो होस पा टिने। गेपुकी ग्युरा पेरा गे मलथु, आ लां खोतीन। ब्यवस्था ४:२; ब्यवस्था २८:१४; यहोसु १:७; हितोपदेस ४:२७

33 परमप्रभु यावे, इन परमप्रभुमी इन कली कोइशो लां ठीक पा गाक्कीन। मो पाइतीनी हना, गे ब्रोंडनीनी, इन कली रिम्शो दुम्ब नु इन के सेल्चा चिक्शो रागीम शुश नाक्ती ब्रोंडनीनी।

## 6

नेल्ल क्येडा ठेयब अरेशो लोत्र

1 मिनू मोसामी “परमप्रभु यावेमी इन कली माइशशो फुल्लुम मुशा ब्रेक्शो लोत्र नु निसाफ पतीक लोत्र बाक्ब। मिनू गो इन कली शेंचा माल्नुड, दे आं कली माइक्ती। गेपुकी मुल इन लशा, इन के सेल्चा चिक्शो रागीम बाक्नीनु, मेको पचा माल्नीनी।

2 गेपुकी मबेक्नी सम्म परमप्रभु यावे, इन परमप्रभु कली मान पा हिंचा माल्नीनी। गो इन कली माइशशो परमप्रभु आ फुल्लुम मुशा ब्रेक्शो लोत्र नु आ शेंशो नेल्ल थुंम वोइक्चा माल्नीनी। गे, इन तौ नु इन चच युइ नेल्लेमी होस पा टिचा माल्नीनी। मो पाइतीनी हना, शुश नाक्त ब्रोंडनीनी।

3 मोपतीके इस्राएलीपुकी, इन नोफा दाइशशा, एको पचा कली होस पा बाक्कीन। गे शुश सोशो बोशो दुम्शा इन कली रिम्शो दुम्ब। डोंइती परमप्रभु यावे, इन किकी पिपी आन परमप्रभुमी मेको आन कली मोदेशो पा लोत्र पाप्तु। मेको दूध नु खुदो शुश बाक्शो रागी इन के दुम्ब। लूका ११:२८

4 इस्राएलीपुकी, नोफा दाइशशा, नेंनीन। परमप्रभु यावे, का ला इं परमप्रभु बाक्ब। मर्कूस १२:२९; १कोरिन्थी ८:४-६

5 मिनू गेपुकी परमप्रभु यावे, इन परमप्रभु कली इन थुं नेल्लेमी, इन सोक्त नेल्लेमी नु इन बोल नेल्लेमी दाक्चा माल्नीनी। ब्यवस्था १०:१२; २राजा २२:२५; मती २२:३७

6 मिनू गो इन कली मुलाक्ती अरेशो लोत्र इन थुंम वोइक्चा माल्नीनी। ब्यवस्था ११:१८-२०

7 मिनू गेपुकीम मेको लोत्र इन आल आन कली शेंचा माल्नीनी। मिनू खिंम बाक्नीनु, लांम गाक्नीनु, इप्शा बाक्नीनु, बोक्नीनु, मेको अरेशो लोत्र आन पबर्म लोत्र पने। उत्पत्ती १८:१९

- 8 मिनू मेको मिम्चा कली इन गुडम फ्रेंशा वोतीन। मेको इन कुप्फीम फ्रेंचा माल्नीनी। प्रस्थान १३:९; मत्ती २३:५
- 9 मिनू मेको इन खिं डा थाम नु इन लाप्चोपुकीम ब्रेकशा वोतीन।
- 10 मिनू डोंइती परमप्रभु यावे, इन परमप्रभुमी इन किकी पिप अब्राहाम, इसहाक नु याकूब आन कली 'मेको रागी इन चच युड आन कली गेनुड' दे कसम जाप्टु। मुल मेकेर गे इन मसेल्शो टेयब रिम्शो सहर,
- 11 इन मसेल्शो रिम्शो थोव्रकीम ब्रीशो खिं, इन मदोशो इनारपुकी, इन मखुम्शो अडगुर रू नु तेल रवा रू ताडनीनी। मिनू गे शुश जचा तूचा तशा, व्यवस्था ८:३०
- 12 परमप्रभु यावे कली मप्रेंचा, दे होस पा बाक्कीन। मेकोमी इन कली इन वाइलीम वाइल दुम्शो इजीप्ट रे गुंडताक्व।
- 13 गेपुकी परमप्रभु यावे, इन परमप्रभु कली मान पा हिनीन। मेको कली गेय पने। मिनू मेको आ नैम ला कसम जने। व्यवस्था १०:२०; मत्ती ४:१०
- 14 गे इन एर ऑथ डा रागीम बाक्शो जात जात डा मुर आन देवी देवता आन नोले मखोतीन।
- 15 मारदे हना परमप्रभु यावे, इन परमप्रभु, रुश पाइब परमप्रभु इन दातेमी बाक्ब। मो पाइतीनी हना, परमप्रभु यावे, इन परमप्रभु इन पर्वम शुश गाइक्ब। मिनू मेकोमी इन कली रागी रे क्याम्ब। प्रस्थान २०:५
- 16 गेपुकीमी मास्साहमी परमप्रभु यावे, इन परमप्रभु कली नाक्शो खोदेशो पा, मेको कली मनाक्तीन। मत्ती ४:७; प्रस्थान १७:२-७
- 17 गेपुकीमी परमप्रभु यावे, इन परमप्रभुमी इन कली माइश्शो आ शेंशो लोत्र, आ देशो नेल्ल नु आ फुल्लुम मुशा ब्रेकशो लोत्र शुश होस पा पने।
- 18 मिनू परमप्रभु यावे आ डोंइती तेको ठीक नु रिम्शो बाक्बा, मेको पने। मोपा इन कली रिम्शो दुम्ब। मिनू परमप्रभु यावेमी इन किकी पिप नु कसम जशो, रिम्शो रागी इन के सेलीन।
- 19 मेको नोले परमप्रभु यावेमी देशो खोदेशो पा इन जोरी सत्रु नेल्ल आन कली इन डोंइती रे खेरब। प्रस्थान २३:२७-२८
- परमप्रभु आ टेयब पतीके
- 20 मिनू नोले इन तौपुकीमी इन कली 'परमप्रभु यावे, इं परमप्रभुमी आ देशो लोत्र, आ फुल्लुम मुशा ब्रेकशो लोत्र नु आ निसाफ पतीक लोत्र आन अर्थ मार में?' दे हिल्लो पाम्तेकम हना, प्रस्थान १३:१४
- 21 गे मेको आन कली 'गो इजीप्ट डा पिप फाराओ आ वाइलीम वाइल बाक्तया। मिनू शुश सक्ति पाइश्शो परमप्रभु यावेमी मेक रे गुंडताक्व। भजन संग्रह ४४:२
- 22 मिनू परमप्रभु यावेम गोपुकीम तचा डा पा इजीप्टी डा पिप फाराओ नु आ खिं डा मुर नेल्ल कली खतम सेल्चा, दे टेयब नु हिंचा डा चिन्ड नु छक लाक्चा डा गेय पाप्टु।
- 23 मिनू आंइ किकी पिपी आन कली गेनुड देशा कसम जशो रागीम इं कली चाक्चा कली मेकेर रे गुंडताक्व।
- 24 मिनू परमप्रभु यावेमी एको फुल्लुम मुशा ब्रेकशो लोत्र नेल्ल पचा माल्ब, दे माइश्शो बाक्त। गोपुकी परमप्रभु यावे, इं परमप्रभु कली मान पा हितय हना, आंइ कली नेल्ल नाक्त रिम्शो दुम्ब। मिनू आंइ कली ब्रोंइचा गेब। मुलाक्त मोदेशो बाक्ब।
- 25 मिनू गोपुकी मेको आ शेंशो नेल्ल परमप्रभु यावे, इं परमप्रभु आ डोंइती पाइतय हना, मेकोमी रिम्शो दुम्ब' दे इन तौ आन कली देंचा माल्नीनी" देंत। व्यवस्था ९:५-६; रोमी २:१३, १९-२४

## 7

कनानी नु मखाल्सीचा

- 1 मिनू मोसामी "परमप्रभु यावे, इन परमप्रभुमी इन कली गेशो रागीम चाक्दीत्वी ना, इन ओव्रचा क्येडा डोंइती हित्ती, गिरगाशी, एमोरी, कनानी, परिजी, हिल्वी नु यबुसी आन कली खेरब। मेको नेल्ल इन क्येडा बोल्यो नु शुश मुर पाइश्शो ७ रागी डा मुर बाक्नीम। व्यवस्था ३१:३
- 2 मिनू परमप्रभु यावे, इन परमप्रभुमी मेको आन कली इन गुडमी जिम्मा गेप्टु हना, गे मेको नेल्ल आन कली साइक्चा माल्नीनी। मेकोपुकी नु कबल मपने। मिनू शिशी यो मपने।
- 3 मेकोपुकी नु ग्युंवे मपचा। इन तमी मेको आन तौ कली ग्युंवे पा मगेन। इन तौ कली आन तमी मचाक्चा। प्रस्थान ३४:१५-१६
- 4 मारदे हना मेकोपुकीमी इन तौ आन कली आंम देवी देवता गे कीनीम। परमप्रभु यावे कली गेय मपथु, देवी देवता आन नोले खोइक्पाइक्नीम। मो दुम्मेनु, परमप्रभु यावे शुश गाइश्शा, इन कली रीब पा साइक्ब।
- 5 मेको आन कली मार पचा माल्नीनी देंचा हना, मेको आन चढेतीक प्रेत्या माल्नीनी। मेको आन लाइश्शो मूर्ति जिक्चा माल्नीनी। मेको आन अशेराह देवी आ मूर्ति खोइक्चा माल्नीनी। मेको आन शी मुशा सेल्शो मूर्तिपुकी मीम हुम्चा माल्नीनी। व्यवस्था १२:२-३
- 6 मारदे हना गे परमप्रभु यावे, इन परमप्रभु आ आंम मुर बाक्नीनी। परमप्रभु यावेमी नेल्ल जात जात डा मुर आन दाते रे इन कली आंम मुर सेल्चा, दे योव्रतु। प्रस्थान १९:५-६
- 7 मिनू परमप्रभु यावेमी जात जात आन क्येडा गे शुश मुर बाक्तीक इन कली दाक्शा योव्रशो ममाइ। थमा पा, गे जात जात डा मुर आन क्येडा आइक्च जात बाक्नीनी। व्यवस्था १०:१५
- 8 तन्न परमप्रभु यावेमी इन कली दाक्ब। मिनू मेकोमी 'इन किकी पिपी नु पशो कबल खानुड' देंत। मोपतीके परमप्रभु यावेमी शुश सक्ति पाइश्शोमी इन कली वाइलीम वाइल सेल्शो इजीप्ट डा पिप फाराओ रे प्रोइशा, गुंडताक्व। होसे ११:१

9 परमप्रभु यावे, इन परमप्रभुमी आ कबल काड मप्रॉइब आ देशो पाइब परमप्रभु बाकब। मिनु परमप्रभु कली दाकब नु आ शेंशो टीब आन कली हजार पाला सम्म आ पशो कबल खाण्व नु आ शिशी कौइना कौइन बाकब। प्रस्थान २०:६

10 मेकोमी आ कली मदाकब आन कली चहिं क्येक लेशशा, साइकब। आ कली मदाकब आन कली शुश मफाल्थु, मेको आन कली शोल्मो पा साइकब। नहुम १:२

11 मोपतीके गो मुलाक्त इन कली माइशो आ शेंशो, आ फुल्लुम मुशा ब्रेकशो लोत्र नु आ निसाफ पतीके लोत्र होस पा पने।

12 मिनु गेपुकीमी एको ठीक पतीके लोत्र होस पा नेंशा टिशा, पाइतीनी हना, इन परमप्रभुमी इन किकी पिपी नु कसम जशा, पशो कबल खाण्शा इन कली मप्रॉइब। प्रस्थान २३:२२-३१

13 मेकोमी इन कली दाकशा, आसीक गेशा, शुश सेल्व। मेकोमी इन आल आन कली आसीक गेब। इन किकी पिपी आन कली कसम जशा गेशो रागीमी इन रू डा फल फुल, इन अन्न, इन अडगुर शांबु नु तेल, इन बी ब्यफ आन बाछा नु इन क्यारश भेडा आन चाइकब नेल्ल आन कली आसीक गेब। होसे २:७-१२

14 गे नेल्ल जात जात डा मुर आन क्येडा आसीक राइब दुम्नीनी। इन दातेमी सुइ वोंइश मुर नु मीश मुर आल मथीब मबाकनीम। इन बी ब्यफ, क्यारश भेडा थारा मदुम्नीम।

15 मिनु परमप्रभु यावेमी रोइ नेल्ल इन क्येडा डोन वोंइकब। गे इन तशो इजीप्त डा हिंचा डा रोइ इन कली मपाइकब। तन्न इन कली मदाकब आन कली मेको रोइ कोण्व। प्रस्थान ९:१-१२

16 मिनु गे परमप्रभु यावे, इन परमप्रभुमी इन कली जिम्मा गेशो जात जात डा मुर नेल्ल कली रीब पा साइकनीनी। मिनु गे मेको आन कली शिशी मपने। मेको आन देवी देवता आन कली सेउ मपने। मारदे हना मो पाइतीनी हना, गे खतम दुम्नीनी। प्रस्थान २३:३३; प्रस्थान ३४:१२; यहोसु २३:१३

17 मिनु गे इन थुंमी 'एको रागी रागी डा मुर आंइ क्येडा शुश बाकनीम। गो मेको आन कली दोपा गुंइशा, खेरने चाप्नीकी डा?' मदेनीन। गन्ती १३:३१; गन्ती १४:१-४

18 मेको आन क्येडा महिनीन। परमप्रभु यावे, इन परमप्रभुमी फाराओ नु इजीप्त रागी डा मुर नेल्ल कली मार मार पवा, मेको मिम्तीन।

19 गेपुकीमी परमप्रभु यावे, इन परमप्रभुमी आ ठेयब नाकतीक, आ पशो चिन्ड नु छक लाक्या डा गेय, आ शुश सक्ति पाइशो नु ठेयब बोल पतीकेमी इन कली गुंइताकब। गे आंमा तशो बाकनीनी। मिनु परमप्रभु यावे, इन परमप्रभुमी इन हिंशो जात जात डा मुर नेल्ल आन कली इजीप्ती आन कली खोदेशो पाइब। ब्यवस्था ४:३४; ब्यवस्था २९:२

20 मिनु परमप्रभु यावे, इन परमप्रभुमी मेको आन के लीशो नु इन कली तशा हिंशा खुइशशा बाकशो मुरपुकी यो मुर साइकब रोइ सोइशशा साइकब।

21 गेपुकी चहिं मेको आन क्येडा महिनीन। मारदे हना परमप्रभु यावे, इन परमप्रभु इन दातेमी बाकब। मेको ठेयब नु मान पा हिंचा डा परमप्रभु बाकब।

22 मिनु परमप्रभु यावे, इन परमप्रभुमी मेको रागी रागी डा मुर आन कली इन डोंइती रे का का पा गुंइब। गेपुकीमी मेकेर डा मुर आन कली कालेम साइक्या मताइनीनी। मो पाइतीनी हना, इन एर ओंथ डा ब्वाकी डा जन्तु शुश दुम्नीम।

23 मिनु परमप्रभु यावे, इन परमप्रभुमी मेको जात जात डा मुर आन कली शुश वाम ग्याम सेलशा, का का पा साइक्या सम्म, इन कली जिम्मा गेब।

24 मिनु मेकोमी मेको आन पिप यो इन कली जिम्मा गेब। मिनु गे मेको आन नें रागी रे क्याम्नीनी। इन डोंइती सुइ मबाकनीम।

25 गेपुकीमी मेको आन शी मुशा सेल्लो मूर्तिपुकी मीम हुम्चा माल्नीनी। मूर्तिम बाकशो सुन चांदी बाकत हना, वालशा आंम कली मवोंइसीन। मारदे हना मोदेशो पाइतीनी हना, इन कली मरिम्शो दुम्ब। मेको परमप्रभु यावे, इन परमप्रभु कली ग्रॉग्रा बाकब।

26 मिनु गेपुकीमी मारेइ ग्रॉग्रा दिचा डा थोत्रक इन खिंम मचाकनीन। मो पाइतीनी हना गेपुकी यो मेको आन खोदेशो पा सराप राइब दुम्नीनी। गेपुकीमी मेको नेल्ल कली ग्रॉग्रा दिशो दुम्तीके, तिल्ला माल्नीनी" दैत। यहोसु ७:११-१२

## 8

परमप्रभु आ अरेशो नेंशा टिचा

1 मिनु मोसामी "गो मुलाक्त इन कली परमप्रभु आ शेंशो नेल्ल माइकतन्नी। गेपुकीमी मेको होस पा पचा माल्नीनी। मो पाइतीनी हना, गेपुकी ब्रॉइचा ताइनीनी, सोशा बोशा शुश दुम्नीनी नु परमप्रभु यावेमी इन किकी पिपी आन कली 'मेको गेनुड' दे कसम जशो रागी ओव्रशा इन के सेलशा बाक्या ताइनीनी।

2 मिनु परमप्रभु यावे, इन परमप्रभुमी इन कली ४० बर्स सम्म गोरशो रागीमी बाकपाइकतु। इन कली मारदे मोदेशो पाप्टु देशा हना, इन कली ब्रेम्पाइक्या, इन थुं नाक्या नु गे इन नेल्ल थुंमी आ शेंशो पाइतीनी देय मपाइतीनी, दे तुडक्या कली इन कली मेको ४० बर्स सम्म मेकेर गाकपाइकतु। ब्यवस्था १३:४; उत्पत्ती २२:१; प्रस्थान १६:४; प्रस्थान २०:२०; न्यायाधीस २:२२

3 मिनु मेकोमी इन कली ब्रेम्पाइक्या, दे शोत्रलु बेकपाइकतु। मिनु मेकोमी इन किकी पिपी कली इन मतुइशो मन्ना जपाइकतु। मारदे इन कली मन्ना जपाइकतु देशा हना, मुरुम जचा थोत्रक जशा ला मब्रॉइनीम, तन्न परमप्रभु यावे आ लोत्र रे ब्रॉइनीम, दे तुडक्याइक्या कली मन्ना जपाइकतु। प्रस्थान १६:१३-१५; मती ४:४

4 मेको ४० बर्स सम्म इन फेकशो वा मजे। इन खोइल महोम्म। ब्यवस्था २९:४



5 मिनू मुरपुकीमी दोदेशो पा आन तौ आन कली शेंचा, दे सजाइ गेनीमी, मोदेशो पा परमप्रभु यावे, इन परमप्रभुमी इन कली शेंचा, दे सजाइ गेण्टु। मेको तुडक्चा माल्नीनी। यसेया २८:२६; येरमीया ३०:११; येरमीया ४६:२८

6 मिनू गेपुकीमी परमप्रभु यावे, इन परमप्रभु आ शेंशो पना पन बाक्कीन। परमप्रभु आ लां गाक्शा, मेको कली मान पा हिनीन।

7 परमप्रभु यावे, इन परमप्रभुमी इन कली रिम्शो रागी लाइक्ब। मेकेर खोला, दिंम नु पहाड रे बुक्शो ब्वाक्कु नु दोम्ली बाक्नीम।

8 मेको रागीम चेरब, क्योव्रज, अडगुर बोट, फोव्रशी रवा, दारीम बोट, तेल रवा नु खुदो बाक्ब।

9 मेको रागीम गे काइ श्येत मजथु, मारेडमी खांचो मदुम्नीनी। मेको रागी डा फुल्लुमी फलाम बाक्ब। मेको आ पहाड रे गे तांबा गुंडनीनी।

10 मिनू गेपुकीमी मरूनी सम्म जशा तूशा, इन कली गेशो रिम्शो रागी आ पर्वम परमप्रभु यावे, इन परमप्रभु कली ठेयब सेल्चा माल्नीनी।

11 मिनू गे परमप्रभु यावे, इन परमप्रभु कली मप्रेदीन। मिनू मुलाक्त गो इन कली देशो आ शेंशो, आ निसाफ पतीके लोव्र नु आ फुल्लुम मुशा ब्रेक्शो लोव्र यो मप्रेचा, दे होस पा बाक्कीन।

12 मिनू गेपुकी जशा तूशा, रूशा, रिम्शो खिं सेल्शा बाक्नीनी,

13 मिनू इन बी ब्यफ नु क्यारश भेडा शुश दुम्शा, इन सुन चांदी नु इन मारेड मारेड शुश दुम्मेनु,

14 गेपुकी ठेयब लेशशा, वाइलीम वाइल दुम्तीक इजीप्ट रे गुंडब परमप्रभु यावे, इन परमप्रभु कली मप्रेचा, दे होस पा बाक्कीन।

15 मेकोमी इन कली ठेयब हिंचा डा गोरशो रागीम बाक्पाइक्तु। मेकेर बीस पाइशशो बुस्स नु बिच्छी बाक्तेकम। मेकोमी इन कली सोव्रशो रागीम हिरताक्ब। मिनू इन पर्वम ठेयब फुल्लु रे ब्वाक्कु बुक्पाइक्तु। गन्ती २१:६; प्रस्थान १७:६

16 मिनू मेकोमी इन कली गोरशो रागीम मन्ना जचा गेण्टु। मेको इन किकी पिपी आन मतुइशशो जचा थोव्रक बाक्त। मारदे मोदेशो पाण्टु देशा हना, मेको नेल्ल इन कली ब्रेम्पाइक्चा, नाक्चा नु नोले रिम्शो पचा कली पाण्टु।

17 मिनू गे नोले इन थुंमी 'गो आंम आंइ सक्तिम एको शोंप चेन्तक' दे मदनीन।

18 तन्न परमप्रभु यावे, इन परमप्रभुमी आंइ कली शोंप चेन्तीक सक्ति गेण्टु, दे मिम्तीन। मेकोमी इन किकी पिपी नु कसम जशा पशो कबल गेना हना यो लीपाइक्ब। मोदेशो पा मुलाक्त बाक्ब, दे तुडक्नीनी। व्यवस्था ४:३१

19 मिनू गे परमप्रभु यावे, इन परमप्रभु कली प्रेशा, देवी देवता आन नोले खोइक्तीनी, मेको आन कली पूजा पाइतीनी नु मेको आन डोंइती बाप्तीनी हना, गो इन कली 'गेपुकी थमा पा साइक्चा पुंडसीनीनी' दे मुलाक्ती लोव्र का पाडनुड।

20 मिनू परमप्रभु यावेमी इन डोंइती रागी रागी डा मुर आन कली खतम सेल्शो खोदेशो पा, गेपुकीमी आ लोव्र मनेंथु, मटीतीनी हना, परमप्रभु यावे, इन परमप्रभुमी इन कली यो खतम सेल्ब" दैत।

## 9

परमप्रभुमी लडाइ पशो

1 मिनू मोसामी "गे इसाएलीपुकी, नोफा दाइशशा, नेनीन! मुल गे मेको रागी ओव्रचा कली यर्दन खोला शोक्नीनी। इन क्येडा ठेयब नु सक्ति पाइशशो रागी रागी, सरीड थिंचा चिक्शो गारो हिरशो सहरपुकी इन के सेल्नीनी। व्यवस्था १:२८

2 मेकेर अनाक आ चच युड बाक्नीमी। मेकोपुकी ठेयब नु लाइशशो मुर बाक्नीम, दे तुडक्नीनी। गे डोंइती 'अनाकीम डा मुर आन डोंइती सु राप्ने चाप्बा डा' दे लोव्र पशो नेंतीनी।

3 परमप्रभु यावे, इन परमप्रभु इन डोंडोंइती शोक्शा लाइब, दे तुडक्चा माल्नीनी। मेको नेल्ल यु दाक्ब मी खोदेशो बाक्ब। मिनू मेको आन कली मी खोदेशो पा दाक्ब। मेकोमी इन कली जिम्मा गेब। मिनू परमप्रभु यावेमी देशो खोदेशो पा, गे मेको आन कली खेरशा रीब पा साइक्नीनी। व्यवस्था ४:२४

4 मिनू परमप्रभु यावे, इन परमप्रभुमी मेको आन कली इन डोंइती रे खेरानु, गे इन थुंमी 'परमप्रभु यावेमी आंइ ठीक पतीके एको रागीम चाक्तु' दे ममिम्तीन। मेको रागी रागी डा मुर आन मरिम्शो पतीके परमप्रभु यावेमी मेको आन कली इन डोंइती रे खेरब। व्यवस्था ८:१७; उत्पती १५:१६

5 गेपुकी इन ठीक पतीक नु इन ठीक थुं दुम्तीके मेको आन रागी इन के सेल्चा तशो मननी। तन्न मेको रागी रागी डा मुर आन मरिम्शो पतीके परमप्रभु यावे, इन परमप्रभुमी मेको आन कली खेरब। मिनू इन किकी पिप अब्राहाम, इसहाक नु याकूब नु जशो कसम खाप्चा कली मो पाइब। व्यवस्था ६:२५

6 परमप्रभु यावे, इन परमप्रभुमी इन ठीक पतीक आ पर्वम इन कली मेको रिम्शो रागी इन के सेल्चा कली मगेवो। मारदे हना गे शुश मटीब मुर बाक्नीनी। प्रस्थान ३२:९

7 मिनू गेपुकी गोरशो रागीम परमप्रभु यावे, इन परमप्रभु कली दोपा गाइक्पाइक्नी, मेको मप्रेदीन। इजीप्ट रागी रे गे एक जाक्नी सम्म गे परमप्रभु यावे आ देशो मटिशो बाक्तीनी।

8 मिनू हारेब डांडामी यो गे परमप्रभु यावे कली गाइक्पाइक्तीनी। मिनू परमप्रभु यावेमी इन कली क्याम्चा डा पा शुश गाइक्ताक्ब। प्रस्थान ३२:१-२४

9 मिनू गो परमप्रभु यावेमी गेपुकी नु पशो कबल डा लोव्र ब्रेक्शो फुल्लु ब्रथ डांडा डोंइसाक्की। मिनू गो ४० नाक्त नु ४० नाक्दो मेकेर बाक्ती। शोब्ले मजड, ब्वाक्कु यो मतूडु। प्रस्थान ३४:२८

10 मिनु परमप्रभु यावेमी, आंम गुडम ब्रेकशो फुल्लु निक्शी गेती। मिनु मेको फुल्लु तार मार ब्रेकशो बाक्त देशा हना, परमप्रभु यावेमी डांडामी इन कली पशो लोत्र नेल्ल ब्रेकशो बाक्त। परमप्रभुमी मेको गुम्ची नाक्त डांडाम ब्रशो मी आ दाते रे इन कली लोत्र पशो बाक्त।

11 मिनु मेको ४० नाक्ती नाकदो थुम्ची ना परमप्रभु यावेमी मेको कबल डा लोत्र ब्रेकशो फुल्लु निक्शी आं कली गेती।

12 मिनु परमप्रभु यावेमी आं कली 'बोक्को, रीब पा एक रे बुपो। मारदे हना इ इजीप्ट रे गुंडशो मुरपुकीमी आं देशो लां रीब पा प्रॉइतेक्म। आंम आन कली खतम सेल्लेक्म। गोम मेको आन कली मपचा देशो पाम्तेक्म नु आंम कली सुन के मूर्ति सेल्लेक्म' देत।

13 मिनु परमप्रभु यावेमी आं कली 'गो एको मुर आन कली कोव्रता। मिनु एकोपुकी काइ मटीब बाक्नीम।

14 मुल आं कली पुंडचा प्रॉइयी। मिनु गो मेको आन कली खतम सेल्लुड। मिनु मेको आन नें रागी रे क्याम्नुड। मिनु गे रे पा मेको आन क्येडा ठेयब नु सक्ति पाइशो जात का सेल्लुड' देत।

15 मिनु गो डांडा रे बुप्ती। मेको डांडाम मी ब्रस डा ब्रस बाक्त। मिनु गो मेको कबल डा लोत्र ब्रेकशो फुल्लु निक्शी कुरता।

16 मिनु गेपुकीमी परमप्रभु यावे, इन परमप्रभु कली पाप पा, आंम कली बाछा आ मूर्ति सेल्लसीशो बाक्तीनी। परमप्रभु यावेमी इन कली अरेशो लां रीब पा प्रॉइशा दूली लां खोइक्नी बाक्त।

17 मिनु गो मेको फुल्लु निम्फा ताइशशा, इन डोंइती प्रोल्ता।

18 मिनु डोंइती खोदेशो पा, गो परमप्रभु यावे आ डोंइती बाप्शा, ४० नाक्ती ४० नाकदो शोब्ले मजड, ब्वाक्कु यो मत्तुडु इन पशो पाप आ पबंम मोदेशो पा बाक्ती। गे परमप्रभु यावे कली काइ मरिम्शो पा गाइक्पाइक्तीनी।

19 मारदे हना गो परमप्रभु यावेमी इन पबंम गाइशशा, चुरशा पशो तशा, साप्पा हिंती। मेकोमी इन कली थमा पा साइक्च, दे मिम्शो बाक्त। मिनु परमप्रभु यावेमी मेना यो आं पुंडशो लोत्र नेंतु। हिब्रू १२:२१

20 परमप्रभु यावे हारून आ पबंम यो शुश गाइशशा 'मेको कली साइक्नुड' दे मिम्शो बाक्त। गो हारून आ पबंमी यो पुंडता।

21 मिनु इन पशो पाप, मेको बाछा लाइशशा, मीम हुम्ताक्ड। मेको कली तुप्शा, फस सेल्ला। मिनु मेको फस पहाड रे यिशो खोलाम ताइक्ताक्ड।

22 मिनु गेपुकीमी तबरे, मास्साह नु किब्रोथ-हत्तावामी यो परमप्रभु यावे कली गाइक्पाइक्तीनी। गन्ती ११:३; प्रस्थान १७:७; गन्ती ११:३४

23 मिनु परमप्रभु यावेमी गे कादेश-बारनेआ रे लशा, इन कली 'मेकेर लने। मिनु इन कली गेशो रागी इन के सेलीन' दे सोइक्ताक्व। मिनु गेपुकीमी परमप्रभु यावे, इन परमप्रभु आ अरेशो मबित्थु, गन गन पा मेको कली थमा मसुइक्नी। मेको आ लोत्र यो मटिनी। गन्ती १३:२, ३१; गन्ती १४:१-४

24 गो इन कली तुडक्तु रेन गे परमप्रभु यावे आ लोत्र मटिथु गन गन पाइतीनी।

मोसामी इस्त्राएली आन पबंम पुंडशो

25 मोपतीके परमप्रभु यावे आ डोंइती गो ४० नाक्ती ४० नाकदो सम्म बाप्शा बाक्ती। मारदे हना परमप्रभु यावेमी 'गे इन कली क्याम्नुड' देशो बाक्त। व्यवस्था ९:१८

26 मिनु गो परमप्रभु यावे कली 'परमप्रभु, इन मुर आन कली मक्यान्दीन। गे मेको आन कली प्रॉइशा इन शुश सक्ति पाइशोमी इजीप्ट रागी रे गुंडताक्नी।

27 इन वाइल अब्राहाम, इसहाक नु याकूब आन कली मिम्तीन। एको मुर आन खकटा थु, इन अरेशो मटितीके नु आन मरिम्शो पतीके मकोव्रडीन।

28 गे मेको आन कली क्याम्ताक्नी हना, आंइ कली गुंडशो रागी डा मुरपुकीमी "परमप्रभु यावेमी मेको आन कली देशो रागी चाक्दीन्चे मचाप्तीके, मेको आन कली मदाक्तीके गोरशो रागीम साइक्चा कली एक रे गुंडशा लाइक्तु" देनीम। गन्ती १४:१६

29 मेको इन मुर बाक्नीम। मिनु गे शुश सक्ति नु ठेयब बोलमी गुंडशा चाक्तीनी' दे परमप्रभु कली पुंडशा, लोत्र पाता" देत।

## 10

लेंशा फुल्लुम मुशा ब्रेकशो लोत्र

1 मेना परमप्रभु यावेमी आं कली "डोंइती डा खोदेशो पा फुल्लु निक्शी चेतो। मिनु आं कली गुम्थ, डांडा डोंइसो। मिनु शी के सन्दोस का यो सेलो। प्रस्थान ३४:१; प्रस्थान २५:१०

2 मिनु गो डोंइती डा इ प्रोल्शो फुल्लुम ब्रेकशो लोत्र खोदेशो पा, नक फुल्लुम लेंशा ब्रेक्नुड। मिनु गे मेको कली सन्दोस कुर पा वोतो" माइक्ती। प्रस्थान ३२:१९

3 मिनु गो बोल्थो शी के सन्दोस का सेल्ला। मिनु डोंइती डा खोदेशो पा फुल्लु निक्शी चेतता। मिनु मेको चेशशो फुल्लु निक्शी कुरशा, डांडा डोंइसाक्ती।

4 मिनु परमप्रभु यावेमी डोंइती डांडाम लोत्र पशो खोदेशो पा मेको १० ओटा लोत्र लेंशा ब्रेक्ताक्व। मेको लोत्र, गेपुकीम डांडा डा मी आ दाते रे नेंशो ननी। मिनु परमप्रभु यावेमी मेको ब्रेक्स पाइशो चेशशो फुल्लु निक्शी गेती।

5 मिनु मेको कुरशा गो डांडा रे बुप्ती। मिनु गो मेको चेशशो फुल्लु निक्शी कली आं सेल्लो सन्दोस आगाम कुर पा चोइक्ता। मिनु परमप्रभु यावेमी आं कली अरेशो खोदेशो पा मेको फुल्लु सन्दोस आगाम बाक्नीस। प्रस्थान २५:२१

हारून बेक्शो

6 मिनू इस्राएलीपुकी बेयरोथ-बेने-याकान रे गाक्शा, मोसेराह माडक्तीके जाक्तेक्म। मेकेर हारून बेक्त। मिनू मेको कली मेकेर थिम्तेक्म। मिनू आ तो एलाजरमी आ पा डा चढ्तेक गेय पचा गोप्तु। गन्ती ३३:३१-३३; गन्ती २०:२८; गन्ती ३३:३७-३९

7 मिनू इस्राएलीपुकी मेकेर रे गाक्शा, गुदगोदा गे लाम्तेक्म। मिनू गुदगोदा रे गाक्शा, शुश ब्वाक्कु बाक्तीके योत्बाथाह जाक्तेक्म।

8 मेना परमप्रभु यावेमी लेवी आ थर डा मुर आन कली योत्रतीमी। मार कली योत्रतीमी देशा हना, परमप्रभु यावे आ कबल डा लोत्र कुरपाइश्शो सन्दोस कुरचा, परमप्रभु यावे कली गेय पचा कली आ डोंइती राप्चा नु आ नैम मुर आन कली आसीक गेचा कली योत्रतीमी। मुल सम्म मोदेशो बाक्ब। ब्यवस्था १८:५; गन्ती ६:२३-२७

9 मोपतीके लेवीपुकीम आन लोकब खोदेशो पा रागी डा रू मतामे। परमप्रभु यावे मेको आन शोप बाक्ब। परमप्रभु यावे, इन परमप्रभुमी दोदेशो देमे, मोदेशो दुम्त। गन्ती १८:२०

परमप्रभुमी मोसा आ पुंइशो गेशो

10 मिनू गो डोंइती डा खोदेशो पा ४० नाक्ती ४० नाक्दो डांडाम बाप्शा बाक्ती। मेना यो परमप्रभु यावेमी आं लोत्र नेंतु। मिनू इन कली मसद।

11 मिनू परमप्रभु यावेमी आं कली “मुल बोक्शा लावो। मुर आन डोंइती गाक्चा कली लावो। मिनू गो मेको आन किकी पिपी आन कली कसम जशा गेशो रागी मेकोपुकी ओत्रशा, आंम के सेल्चा माल्नीम” दे माडक्ती।

परमप्रभु आ दाक्शो

12 मिनू गे इस्राएलीपुकी, परमप्रभु यावे, इन परमप्रभुमी इन कली मार पशो दाक्ब देशा हना, गेपुकी परमप्रभु यावे, इन परमप्रभु कली मान पा हिंचा माल्नीनी। गेपुकी मेको आ लां गाक्शा, मेको कली दाक्चा नु इन थुं नु सोक्त नेल्लेमी परमप्रभु यावे, इन परमप्रभु कली गेय पचा माल्नीनी। मीका ६:८

13 दोपा दाक्चा नु गेय पचा देशा हना, गो मुलाक्ती इन कली देशो परमप्रभु यावे आ शेशो नु आ फुल्लुम मुशा ब्रेक्शो लोत्र पचा माल्नीनी। मेको इन कली थम रिम्शो दुम्ब।

14 मिनू नेनीन, स्वर्ग नु सरीड नु रागी नु मेकेर बाक्ब मारेड मारेड नेल्ल परमप्रभु यावे, इन परमप्रभु केन बाक्ब।

15 मो हना यो परमप्रभु यावेमी इन किकी पिपी आन कली तशा, दाक्ताक्ब। मिनू मेको आन चच युड, इन कली जात जात डा मुर नेल्ल आन दाते रे योत्रतु। मोदेशो पा मुलाक्ती बाक्ब, दे तुडक्नीनी। ब्यवस्था ७६

16 मोपतीके इन थुं कली खोडक्तीक चिनु खोतीन। मिनू मटीब मदुमीन।

17 मारदे हना परमप्रभु यावे, इन परमप्रभु देवी देवता आन परमप्रभु बाक्ब। मेको प्रभु आन प्रभु बाक्ब। मेको नेल्ल क्येडा टेयब, सक्ति पाइश्शो नु हिंचा डा परमप्रभु बाक्ब। मेकोमी सुड आन कुल मकोत्रब। मेकोमी घूस मताक्ब।

18 मेकोमी रोम रोडक्च नु वोंइश बेक्शो मीश मुर आन कली ठीक निसाफ पाइब। मेकोमी अर्को रागी डा मुर आन कली दाक्ब। मिनू मेको आन कली जचा फेक्चा गेब।

19 मिनू गेपुकी यो अर्को रागी डा मुर आन कली दाक्तीन। मारदे हना गे यो इजीप्तमी अर्को रागी डा मुर बाक्तीनी। प्रस्थान २२:२०-२३

20 गेपुकीमी परमप्रभु यावे, इन परमप्रभु कली मान पा हिंचा माल्नीनी। मेको आ गेय पचा माल्नीनी। मेको आ नोले खोइश्शा, आ नैमी कसम जचा माल्नीनी।

21 मेकोन इन कली टेयब सेल्टीके बाक्ब। मिनू इन परमप्रभु दुम्शा, इन परबम हिंचा डा टेयब गेय पाइब मेकोन बाक्ब। गे मेको नेल्ल आंमा तशो बाक्नीनी।

22 इन किकी पिपी इजीप्त रागी लमानु, ७० जना मुर ला लशो बाक्तेक्म। मिनू मुल परमप्रभु यावे, इन परमप्रभुमी इन कली सरीड डा सोरुल खोदेशो पा शुश सेल्लु। उत्पत्ती ४६:२७; ब्यवस्था १:१०

## 11

परमप्रभु यावे आ टेयब गेय

1 मिनू मोसामी “गे परमप्रभु यावे, इन परमप्रभु कली दाक्चा माल्नीनी। गे नाक्त किंत किंत मेको आ ब्रेक्शा अरेशो लोत्र, आ फुल्लुम मुशा ब्रेक्शो लोत्र, आ निसाफ पतीक लोत्र नु आ शेशो नेल्ल टिने।

2 मिनू परमप्रभु यावे, इन परमप्रभुमी इन आल आन डोंइती मारेड यो छक लाक्चा डा गेय नु सजाइ मकोइद। तन्न मेकोमी दोपा आ टेयब पतीकेमी शुश सक्ति पाइश्शो नु टेयब बोल पतीकेमी इन कली इजीप्त रागी रे युंइशो, गे नेल्लेम तशा तुइश्शा मिम्चा माल्नीनी। ब्यवस्था ४:३६

3 मिनू इजीप्त रागी नु आ पिप फाराओ नु मेको आ मुर नेल्ल आन कली कोंइशो चिन्ड नु आ पशो गे नेल्ले तशो तुइश्शो बाक्नीनी।

4 मिनू मेकोमी इजीप्त डा लडाइ पाइक्ब, शारा नु बग्गी आन कली पशो नेल्ल तुइक्नीनी। इन कली खेदा पामेनु, मेकोमी मेको आन कली लल समुन्द डा ब्वाक्कुम साइक्चा कली खुम्तु, मेको यो तशो बाक्नीनी। मुल सम्म मेको लडाइ पाइब आन हुल खतम दुम्शो बाक्नीम। प्रस्थान १४:२५, २७

5 मिनू एको रागी मजाक्शो सम्म गोरशो रागीम मेकोमी इन कली मार मार पवा, मेको गे तुइश्शो बाक्नीनी।

6 मिनू मेकोमी रूबेन आ चच निक्शी, एलीआब आ तौ दाथान नु अबीराम आस कली पशो तुडकनीनी। दोपा खपीम आ शोत्र पाक्शा इसाएली आन दातेमी मेको आस कली दाक्का। मिनू आस खिं डा मुर नु आस ताम्बु नु मेको आस मारेड मारेड दाक्को गेपुकीम तुइश्शो बाकनीनी। गन्ती १६:२५-३४

7 गेपुकी परमप्रभु यावेमी पशो टेयब गेय नेल्ले तशो बाकनीनी।

8 मोपतीके गो मुलाक्ती इन कली देशो परमप्रभु यावे आ शेंशो नेल्ल टिशा पने। मेको पाइतीनी हना, गेपुकी बोल्यो दुम्नीनी। मिनू खोला शोक्शा इन के सेल्चा चिक्को रागीम ओत्रशा, थमा पा इन के सेल्ने चाप्नीनी।

9 मोपा गे परमप्रभु यावेमी इन किकी पिपी नु आन चच युड, इन कली, गेशो रागीम शुश ब्रोंइशा बाक्का ताइनीनी। मेको रागीम शुश दूध नु खुदो बाक्ब। प्रस्थान ३:१७

10 मारदे हना मेको इन के सेल्चा चिक्को रागी, इन यूशा पिशो इजीप्त रागी खोदेशो ममाइ, मेकेर वांचेर शोक्शा, गिग खाइ रू कली ब्वाक्कु कुर पचा माल्ताकनी।

11 मेको गे शोक्का, इन के सेल्चा चिक्को रागी, डांडा नु बेंसी डा रागी बाक्ब। मेकेर रेउ यिशा, रागी जिप्पाइक्ब।

12 परमप्रभु यावे, इन परमप्रभुमी मेको रागी कली कोत्रब। मेकोमी बर्स डा डोंइती डा नाक्तर रे नोले डा नाक्तर सम्म, गेना हना यो कोत्रब।

13 मिनू मुलाक्ती गो इन कली देशो आं शेंशो नेंतीनी, गे परमप्रभु यावे, इन परमप्रभु कली इन थुं सोक्तर नेल्लेमी दाक्का नु मेको कली गेय पाइतीनी हना, लेवी २६:३-५; येरमीया ५:२४

14 मेना परमप्रभु यावेमी इन कली 'गो इन रू कली गारचा डा रेउ गेनुड। डोंइती नु नोले डा रेउ ठीक पा गेनुड। मोपा इन अन्न, इन अडगुर नु तेल रवा आन फल खुप्ने चाप्नीनी।

15 मिनू गो इन बी ब्यफ, क्यारश भेडा आन कली योत्रतीकेम घांस वापाइक्नुड। मिनू गे जशा तूशा रूनीनी' दे परमप्रभुमी इन कली देंत।

16 मोपतीके सुइम इन कली हेंथे गाक्पाइक्का मगेने, होस पा बाक्कीन। गेपुकी परमप्रभु क्येडा डोन लाइतीनी नु देवी देवता आन कली सेउ पाइतीनी हना,

17 परमप्रभु यावेमी गाइश्शा रागीम रेउ मयिपाइक्ब। मिनू मारेड खुप्चा मताइनीनी। मिनू परमप्रभु यावेमी इन कली गेशो रिम्शो रागी रे कयाम्ब। ब्यवस्था २८:२३-२४; लेवी २६:१९-२०

आसीक नु सराप

18 मिनू गेपुकीमी आं देशो लोत्र इन थुंम वोतीन। मेको मिम्चा कली इन गुइमी चिन्ड फ्रेंदीन। मिनू कुप्फीम फ्रेंतीके खोदेशो पा फ्रेंचा माल्नीम। ब्यवस्था ६:६-९

19 आंम खिंम बाकनीनु, लां गाकनीनु, इप्थ लनीनु नु बोक्नीनु इन तमी तौ आन कली मेको अरेशो आ परबंम लोत्र पा शेंदीन।

20 इन खिं डा थाम तारी नु लाप्चो तारी ब्रेक्तीन।

21 मिनू गे नु इन आलपुकी परमप्रभु यावेमी इन किकी पिपी आन कली 'गेनुड' दे कसम जशो रागीमी शुश ब्रोंइनीनी। रागी तार सरीड बाक्ब सम्म शुश ब्रोंइनीनी।

22 गेपुकीमी गो इन कली देशो अरेशो लोत्र नेल्ल होस पा पाइतीनी नु परमप्रभु यावे, इन परमप्रभु कली दाक्ताकनी हना, मेको आ लां नेल्ल गाक्का, मेको कली मप्रोंइतीनी हना,

23 परमप्रभु यावेमी मेकेर डा रागी रागी डा मुर नेल्ल कली इन डोंइती रे खेरब। मिनू गे इन क्येडा शुश नु सक्ति पाइश्शो रागी रागी डा मुर आन रागी इन के सेल्नीनी। ब्यवस्था ७:१-२

24 गे इन खोइलीम थेक्को रागी नेल्ल गे इन के दुम्ब। गोरशो रागी रे लेबानोन सम्म नु टेयब खोला युफ्रेटीस रे पच्छिम डा समुन्द्र सम्म इन के सांद दुम्ब।

25 गे नु लडाइ पा सुइ मग्रानीम। परमप्रभु यावे, इन परमप्रभुमी आ देशो खोदेशो पा तेको रागी थेक्कीनी, मेकेर डा मुर आन कली इन कली तशा हिंतीक थुं गेब। प्रस्थान २३:२७

26 नेनीन, मुलाक्ती गो आसीक नु सराप इन डोंइती वोइक्नुड। ब्यवस्था ३०:१,१५,१९

27 गे परमप्रभु यावे, इन परमप्रभु आ शेंशो टीतीनी हना, आसीक राइनीनी। ब्यवस्था २८:२,१५

28 परमप्रभु यावे, इन परमप्रभु आ शेंशो मटिथु, गो मुलाक्ती इन कली देशो लचा माल्लो लां रे हेंथे गाक्तीनी नु इन मतुइश्शो देवी देवता आन नोले खोइक्तीनी हना, सराप राइनीनी।

29 मिनू परमप्रभु यावे, इन परमप्रभुमी इन कली इन के सेल्चा चिक्को रागीम ओइचानीनु, गेरीजीम डांडा रे आसीक गेचा नु एबाल डांडा रे सराप पचा माल्नीनी। ब्यवस्था २७:१२-१३; यहोसु ८:३३-३४

30 मेको डांडापुकी यर्दन आइक्की हांबु, नां रिक्तीक गे यर्दन बेंसी डा लां आ नोले, अराबाहमी बाक्को कनानी आन रागीम बाक्कीस। मेको गिल्याल आ डोंइती मोरेह माइश्शो ब्वाकी आ नेक्था बाक्कीस। उत्पत्ती १२:६

31 मिनू गेपुकी यर्दन शोक्का, परमप्रभु यावे, इन परमप्रभुमी इन कली गेशो रागी ओत्रनीनी। मिनू गे मेको इन के सेल्चा, मेकेर बाक्कीनी।

32 मुलाक्ती गो इन कली शेंशो फुल्लुम मुशा ब्रेक्को लोत्र नु ठीक पतीक लोत्र नेल्ल पशा, होस पा बाक्कीन" देंत।

## 12

परमप्रभु यावे आ बाक्तीके

- 1 मिनू मोसामी “मेको परमप्रभु यावे आ फुल्लुम मुशा ब्रेकशो लोत्र नु आ ठीक पतीक लोत्र बाक्नीम। गे मेको नेल्ल परमप्रभु यावे, इन किकी पिपी आन परमप्रभुमी इन के सेल्चा कली गेशो रागीम मबेक्नी सम्म टिचा माल्नीनी।
- 2 मिनू गे तेको रागी डा मुर आन कली खेरनीनी, मेको आन देवी देवता आन थान नेल्ल प्रेत्चा माल्नीनी। मेको लाइशशो डांडाम, पहाडीम नु नेल्ल रवा आन पुंम बाक्शो बाक्नीम। ब्यवस्था ७५:२५; प्रस्थान ३४:१३
- 3 गे मेको आन चढेतीक प्रेत्चा माल्नीनी। मेको आन लाइशशो मूर्तिपुकी जिक्चा माल्नीनी नु मेको आन मूर्ति मीम हुम्चा माल्नीनी। मिनू मेको शी के सेल्शो मूर्तिपुकी खोलशा बिग्रेचा माल्नीनी। मिनू आन नें क्याम्चा माल्नीनी।
- 4 मिनू गेपुकीमी मेको आन देवी देवता आन कली टेयब सेल्शो खोदेशो पा परमप्रभु यावे, इन परमप्रभु कली टेयब मसेलीन।
- 5 परमप्रभु यावे, इन परमप्रभुमी इन थर थर आन बाक्तीक रागीमी ते बाक्चा दाक्बा, मेको माल्शा मेकेर लचा माल्नीनी।
- 6 मिनू इन चोशा चढेशो, क्योरशा चढेशो, इन १० भाग डा भाग का, इन गेचा डा चढेशो, इन देशो चढेशो नु इन आम दाक्शो चढेशो, इन बी ब्यफ आन डोंडती जरमेशो नु इन क्यारश भेडा आन डोंडती जरमेशो मेकेर लाइक्चा माल्नीनी।
- 7 मिनू गे नु इन खिं डा मुर नेल्लेमी परमप्रभु यावे, इन परमप्रभुमी इन कली आसीक गेशो गेय मिम्चा, दे मेकेर परमप्रभु यावे, इन परमप्रभु आ डोंडती जशा तूशा, ग्येरसीचा माल्नीनी।
- 8 गेपुकीम मुल सम्म ‘आंम पशो ठीक बाक्ब’ दे पशो खोदेशो पा मुल मपने।
- 9 मारदे हना गेपुकी मुल सम्म परमप्रभु यावे, इन परमप्रभुमी गेशो नाइक्तीके नु रागी मजाक्दीशो बाक्नीनी।
- 10 तन्न यर्दन शोकशा, परमप्रभु यावे, इन परमप्रभुमी इन कली गेशो रागीमी बाक्नीनी, मिनू इन एर ऑथ बाक्शो इन जोरी सनु रे ब्रोंडशा, श्येत मजथु बाक्नीनी। यहोसु १:१३; यहोसु २१:४४; १राजा ५:५; भजन संग्रह १५:११; होसे २:२०; हिब्रू ४:११
- 11 मेना परमप्रभु यावे, इन परमप्रभुम आ बाक्तीके का योत्रब। गो इन कली अरेशो इन चोशा चढेशो, इन क्योरशा चढेशो, इन १० भाग डा भाग का, इन गेचा डा चढेशो नु इन मार मार परमप्रभु यावे कली देशो चढेशो मेकेर चाक्चा माल्नीनी।
- 12 मिनू गेपुकी, इन तमी तौ, वाइलीम वाइल, इन सहरम बाक्शो आंम कली शोंप मतशो लेवी नेल्ल परमप्रभु यावे, इन परमप्रभु आ डोंडती ग्येरसीचा माल्नीनी। ब्यवस्था १०:९
- 13 इन चोशा चढेतीक ते ते थिन्नी मेक मेक मचढेन, गे होस पा बाक्कीन।
- 14 तन्न परमप्रभु यावेमी इन थर थर आन दातेमी योत्रशो आ बाक्तीकेम ला चढेने चाप्नीनी। मेकेर ला इन चोशा चढेतीके चाक्चा माल्नीनी। गो आं अरेशो गेय नेल्ल मेकेर पचा माल्नीनी।
- 15 तन्न गेपुकी श्ये ब्वचा दाक्तीनी हना, परमप्रभु यावे, इन परमप्रभुमी इन कली आसीक गेशो खोदेशो पा इन सहर सहरमी क्योरशा, ब्वने चाप्नीनी। ग्रॉग्रा दिशो नु ग्रॉग्रा मदिशो मुर नेल्लेमी ब्वने चाप्नीम। गेपुकीम किश्र नु रोकोश खोदेशो पा ब्वने चाप्नीनी। ब्यवस्था १२:२२; ब्यवस्था १४:५
- 16 तन्न हुश चहिं मब्वने। मेको ब्वाक्कु खोदेशो पा खपीम ताइक्तीन। लेवी ३:१७; लेवी १७:११
- 17 इन अन्न, अडगुर शांबु नु तेल आन १० भाग डा भाग का चढेशो, बी ब्यफ नु क्यारश भेडा आन डोंडती जरमेशो, इन देशो चढेशो, इन आम दाक्शा गेशो नु इन गेचा माल्शो चढेशो चहिं आंम सहरम मजने मब्वने।
- 18 तन्न परमप्रभु यावे, इन परमप्रभु आ डोंडती, आ योत्रशो बाक्तीकेमी मेको गेपुकी नु इन तमी तौ, वाइलीम वाइल नु इन सहरम बाक्शो लेवीपुकी नु जने ब्वने। गेपुकी इन पशो नेल्लेमी परमप्रभु यावे, इन परमप्रभु आ डोंडती ग्येरसीने। ब्यवस्था १४:२३
- 19 इन रागीम गेना सम्म बाक्नीनी, मेना सम्म लेवी आ थर डा मुर आन कली रिम्शो कोत्रडीन। ब्यवस्था १२:१२; ब्यवस्था १४:२७
- 20 मिनू परमप्रभु यावे, इन परमप्रभुम आ कबल पशो खोदेशो पा इन रागी बारपाइक्ब। गेपुकी श्ये ब्वचा दाक्तीनी हना, रूचा डा पा ब्वने।
- 21 परमप्रभु यावे, इन परमप्रभु आ योत्रशो बाक्तीके इन क्येडा डोन बाक्त हना, परमप्रभु यावेमी इन कली गेशो बी ब्यफ नु क्यारश भेडा आ अरेशो खोदेशो पा इन सहरम क्योरशा ब्वने चाप्नीनी।
- 22 मिनू किश्र नु रोकोश ब्वशो खोदेशो पा परमप्रभु आ डोंडती ग्रॉग्रा दिशो नु ग्रॉग्रा मदिशो नेल्लेमी ब्वने चाप्नीम। ब्यवस्था १२:१५
- 23 होस पा हुश गेनायो ब्वचा मदुम्ब। मारदे हना हुशेमी ब्रोंडतीक सोक्त बाक्ब। श्ये नु ब्रोंडतीक सोक्त ब्वचा मदुम्ब। ब्यवस्था १२:१६
- 24 मेको ब्वचा मदुम्ब। मेको कली ब्वाक्कु खोदेशो पा खपीम ताइक्चा माल्नीनी।
- 25 गेपुकीम मेको मब्वचा। मिनू गे परमप्रभु यावे आ डोंडती मार ठीक बाक्मे, मेको पतीके, गेपुकी नु इन नोले डा इन आल आन कली रिम्शो दुम्ब।
- 26 तन्न गेपुकी इन परमप्रभु कली गेशो थोत्रकपुकी नु इन गेचा माल्शो, इन दाक्शा गेशो कुरशा परमप्रभु यावे आ योत्रशो बाक्तीकेम लचा माल्नीनी।
- 27 मिनू इन चोशा चढेशो श्ये नु मेको आ हुश परमप्रभु यावे, इन परमप्रभु कली चढेतीकेम चढेचा माल्नीनी। इन क्योरशा चढेशो आ हुश परमप्रभु यावे, इन परमप्रभु कली चढेतीके आ पुंम जारचा माल्नीनी। मेको आ श्ये गे ब्वने चाप्नीनी। ब्यवस्था १२:६
- 28 गेपुकीमी होस पा आं अरेशो लोत्र नेल्ल नेनीन। मिनू टिशा पाइतीनी हना, इन कली नु इन नोले डा इन तमी तौ आन कली गेना हना यो रिम्शो दुम्ब। परमप्रभु यावे, इन परमप्रभु आ डोंडती रिम्शो नु ठीक पाइबपुकी रिम्शो दुम्नीम।

29 परमप्रभु यावे, इन परमप्रभुमी मेको रागी रागी डा मुर आन कली इन डोंइती क्याम्ब। गे मेको आन कली खेरचा कली जाकनीनी। मिनु थमा पा खेरशा, मेको आन बाकतीकेम बाकनीनी।

30 इन डोंइती क्याम्शो मुर आन देवी देवता आन पर्वम मेको रागी रागी डा मुरपुकीमी आन देवी देवता कली दोपा ठेयब सेल्ये? गो यो मोदेशो पाइनीकी, दे हिल्लो पा लोत्र मपने। होस पा बाककीन। गे यो मेको आन खोदेशो पा हेंथे गाकतीनी हना, मेको आन खोदेशो पा साइक्चा पुंडसीनीनी। प्रस्थान २३:२४; इजीकीएल २०:३२

31 गेपुकीमी परमप्रभु यावे, इन परमप्रभु कली मोदेशो मपने। मारदे हना मार मार परमप्रभु यावे आ डोंइती ग्रांरा दित्या डा बाक्म, मेकोपुकीमी आन देवी देवता आन कली नेल्ल पाम्तेक्म। मेकोपुकीमी आम तमी तौ आन कली मेको आन देवी देवता आन पर्वम मीम चोशा चढेम्तेक्म।

32 गो इन कली दोशो अरेडा, मेको नेल्ल होस पा पने। गेपुकीमी मारेड मतेम्दीन, मारेड मशोलीने” दैत।

## 13

मूर्ति पूजा मपने

1 मिनु मोसामी “इन दातेमी परमप्रभु यावे आ लोत्र पाइब, डोमु शेंब ‘चिन्ड नु छक लाक्चा डा गेय दुम्ब’ दैब।

2 मिनु आन देशो खोदेशो पा दुग्शा मेकोपुकीमी ‘गोपुकी आंइ डोंइती मतुइग्शो देवी देवता आन नोले खोइय्या। मेको आन कली ठेयब सेल्ये’ दे लोत्र पाम्तेक्म हना,

3 गेपुकीमी मेको परमप्रभु यावे आ लोत्र पाइब, डोमु शेंब, आन लोत्र काइ मनेनीन, मटिने। मारदे हना परमप्रभु यावे, इन परमप्रभुमी गे इन थुं नु सोक्त नेल्लेमी परमप्रभु यावे, इन परमप्रभु कली दाकनीनी देय मदाकनीनी, दे इन थुं नाक्शो बाक्ब।

4 गेपुकी परमप्रभु यावे, इन परमप्रभु कली ला खोतीन। मिनु मेको कली ला मान पा हिनीन। मिनु मेको आ शेंशो पचा मालनीनी। मेको आ देशो टिशा, मेको कली गेय पशा, मप्रोंइथु बाककीन। ब्यवस्था ८:२

5 मिनु गेपुकीमी परमप्रभु यावे आ लोत्र पाइब मेको डोमु डा लोत्र शेंब कली साइक्चा मालनीनी। मारदे हना मेकोमी परमप्रभु यावे, इन परमप्रभु कली प्रोंइपाइक्चा, दे इन कली दूली शेंताक्व। मिनु इन कली वाइलीम वाइल दुम्तीके रे इजीप्ट रे गुंडशा एक चाक्ब परमप्रभु यावे, इन परमप्रभु बाक्ब। मोदेशो मुरपुकीमी इन कली परमप्रभु यावे आ कोंइशो लां रे हेंथे गाक्पाइक्चा दाकनीम।

6 मिनु सुइमी इ कली खुइग्शोमी हेंथे गाक्चा कली लेम्ब, मेको इ लोकब बाक्त हना, इ आफ आ तौ बाक्त हना, इ आंम आ तौ बाक्त हना, इ आंम आ तमी बाक्त हना, इ दाक्शो मीश बाक्त हना, इ शुश दाक्शो वारच बाक्त हना, नु मेकोमी ‘गे नु इ किकी पिपीमी मतुइग्शो देवी देवता आन कली सेउ पय’ दैतेक्म हना, ब्यवस्था १८:२०; १कोरिन्थी ५:९, १३

7 इन एर ओंथ बाक्शो जात जात डा इन नेक्था रागी डा बाक्ल कि डोन रागी डा बाक्ल आन देवी देवता बाक्तेक्म हना यो,

8 मेको लेम्ब आ लोत्र मनेंचा, आ देशो मटिचा। गे मेको कली शिशी मपथु, मेको कली मखुइक्थु,

9 मेको कली थमा पा साइक्चा मालनीनी। मिनु गे नेल्ल क्येडा डोंइती मेको कली साइक्च, दे आप्चा माल्नेवे। नोले ला इ मुर नेल्लेम आप्चा साइक्चा मालनीनी।

10 मिनु नेल्लेमी मेको कली मवेक्म सम्म फुल्लु आप्चा मालनीम। मारदे हना इन वाइलीम वाइल दुम्तीके इजीप्ट रे गुंडब परमप्रभु यावे, इन परमप्रभु रे हेंथे गाक्ब सेल्चा माल्शो बाक्त। ब्यवस्था १७:७

11 मिनु इस्राएली नेल्ल मेको नेंशा, हिंचा मालनीम। मिनु इन दातेमी मोदेशो मरिग्शो गेनायो मपमेक्ल।

12 मिनु परमप्रभु यावे, परमप्रभुमी इन कली बाक्चा कली गेशो सहर काम

13 इन दाते रे मरिग्शो वोइश मुरपुकी बोक्शा, सहर डा मुर आन कली दूली पपाइग्शा, मेकोपुकीमी ‘लय, देवी देवता आन कली पूजा पय’ दैतेक्म हना, गेपुकी मेको देवी देवता गेनायो मतुइग्शो बाक्तीनी हना,

14 गेपुकीम रिग्शो पा खोदील निदील पा हिल्लो पचा मालनीनी। मिनु मेको मरिग्शो थमा पा इन दातेमी पशो बाक्त हना,

15 गेपुकीमी मेको सहर डा मुर आन कली थमा पा क्योरशा साइक्चा मालनीनी। मेको सहर नेल्ल कली खतम सेल्चा मालनीनी। मिनु मेकेर बाक्शो बी ब्यफ, क्यारश भेडा नेल्ल यो साइक्चा मालनीनी।

16 मेकेर बाक्शो मारेड मारेड, मेको सहर आ दातेम खुप्चा मालनीनी। मिनु मेको खुप्शो नु सहरम मी सुइक्तीन। मेको परमप्रभु यावे, इन परमप्रभु कली चोशा चढेशो खोदेशो दुम्ल। मेको सहर गेना हना यो फोहोर ताइक्तीके दुम्ल। मिनु मेको सहर कली लेंशा मसेलीन। ब्यवस्था २०:१६-१८

17 मिनु गेपुकीमी मथिचा देशो थोत्रक मारेड मलतीन। मिनु परमप्रभु यावे आ गाइग्शो नाइक्ब कों, इन कली शिशी पा दाक्ब। इन किकी पिपी नु कसम जशो खोदेशो पा इन कली शुश सेल्ब।

18 गेपुकी परमप्रभु यावे, इन परमप्रभु आ देशो टीतीनी, मुलाक्ती गो इन कली देशो आं शेंशो नेल्ल पाइतीनी हना, गेपुकी परमप्रभु यावे, इन परमप्रभु आ डोंइती ठीक पाइब दुम्नीनी” दैत। यहोसु ७:-

## 14

ब्वचा नु मव्वचा डा श्ये  
लेवी ११:-

- 1 मिनू मोसामी “गेपुकी परमप्रभु यावे, इन परमप्रभु आ तमी तौ ननी। बेक्शो मुर आ पर्बम इन कुशुल प्रेक्चा मदुम्ब। इन चां प्रेक्चा मदुम्ब। लेवी १९:२७-२८; येरमीया ४७:५; इजीकीएल ७:१८
- 2 मारदे हना गेपुकी परमप्रभु यावे, इन परमप्रभु आ आम मुर बाक्नीनी। मिनू परमप्रभु यावेमी जात जात डा मुर नेल्ल आन दाते रे इन कली आ मुर सेल्चा कली योव्रतु।
- 3 गेपुकीमी मारेड ग्रॉग्रा दिचा डा थोव्रक मजने मब्वने।
- 4 गेपुकीमी ब्वचा दुम्ब जन्तु तेको बाक्नीम देशा हना, ब्यफ, क्यारश, भेडा,
- 5 रोकश, किरश, बरांट, कौरो किरश, साबर, चितल नु थार बाक्नीम।
- 6 मिनू गेपुकीमी जन्तु आन दातेमी तेको नेल्ल गेंच चेशशो नु शोकाल हेक्ब बाक्नीमी, मेको आन कली ब्वचा दुम्ब।
- 7 तन्न शोकाल हेक्ब नु गेंच जेशशो आन दातेमी तेको मब्वचा देशा हना, दलओठ, खरायो, रोंगु डा खरायो मब्वचा। मारदे हना मेकोपुकी शोकाल हेक्नीम हना यो, आन गेंच मजेरशो बाक्नीम। मेको इन कली ग्रॉग्रा बाक्ब।
- 8 मिनू पोव्र आन गेंच जेशशो बाक्नीम हना यो, शोकाल महेक्नीम। मेको इन कली ग्रॉग्रा बाक्ब। मेको आन श्ये मब्वचा, आन सिनु यो थिचा मदुम्ब।
- 9 ब्वाक्कुम बाक्बपुकीमी फ्रां नु कत्ला पाइशशो ब्वचा दुम्ब।
- 10 तन्न फ्रां नु कत्ला मपाइशशो मब्वने। मेको इन कली ग्रॉग्रा बाक्ब।
- 11 गेपुकीमी ग्रॉग्रा मदिचा डा चिक्ब नेल्ल ब्वने चाप्नीनी।
- 12 तन्न गेपुकीमी ब्वचा मदुम्शोपुकी चहिं ककाकुली, ब्वारदे, गिद, कुही,
- 13 नेल्ल खाल डा ब्वारदे,
- 14 खद,
- 15 सुतुमर्ग, हुहुचील, हांस, नेल्ल खाल डा बेसारा,
- 16 हुहुचील, कोडरालो नु बुक्स,
- 17 धनेस, सिनु ब्वाइब गिद हांडगील,
- 18 सारस, नेल्ल खाल डा बोकुला, फाप्पे चिक्बी नु पकातिकती चहिं मब्वने।
- 19 फ्रां पाइशशो माले फटेडग्रा नेल्ल इन कली ग्रॉग्रा बाक्ब। मेकोपुकी मब्वचा।
- 20 तन्न ग्रॉग्रा मदिचा डा फ्रां पाइशशो नेल्ल ब्वने चाप्नीनी।
- 21 गेपुकीमी परमप्रभु यावे, इन परमप्रभुम आ कली योव्रशो मुर बाक्नीनी। मोपतीके आंमा बेक्शो जन्तुपुकी ब्वचा मदुम्नीनी। गे नु बाक्शो अर्को रागी डा मुर आन कली मेको गेने चाप्नीनी। मेकोपुकीमी मेको ब्वाम्तेक्म हना यो, लेयतेक्म हना यो, ठीक दुम्ब। क्यारश आ पाठा आ ममा आ दूधम मक्येने। प्रस्थान २२:३०; प्रस्थान २३:१९

१० भाग डा भाग का चढेचा

- 22 गेपुकीमी गेनायो मप्रॉइचा डा पा बर्स बर्स डा इन रूम नु खेतम वाशा सिशशो नेल्ल रे १० भागम भाग का तिल्शा वोइशशा, गेचा माल्नीनी। लेवी २७:३०
- 23 मिनू परमप्रभु यावे, इन परमप्रभु आ योव्रशो बाक्तीकेमी मेको आ डोंइती जचा माल्नीनी। मार जचा ब्वचा माल्नीनी देशा हना, इन १० भाग डा भाग का अन्न, इन अडगुर शांबु, इन तेल, इन कली डोंइती जरमेशो ब्यफ नु क्यारश भेडा जचा ब्वचा तूचा माल्नीनी। मो पाइतीनी हना, गे मबेक्नी सम्म परमप्रभु यावे, इन परमप्रभु कली मान पा हिचा शेंसीनीनी। ब्यवस्था १२:१७-१८; ब्यवस्था १९:२३
- 24 मिनू परमप्रभु यावे, इन परमप्रभु आ योव्रशो बाक्तीक इन बाक्तीके रे शुश डोन बाक्त हना, नु परमप्रभु यावे, इन परमप्रभुमी इन कली आसीक गेप्टु नु इन १० भागम भाग का मेकेर लाइक्ने मचाप्तीनी हना,
- 25 मेको इन तिल्शा वोइशशो १० भागम भाग का लेयडीन। मेको रे ताक्शो क्येट लाइशशा, परमप्रभु यावे, इन परमप्रभु आ योव्रशो बाक्तीके लने।
- 26 मिनू इन दाक्शो खोदेशो पा बी ब्यफ, क्यारश भेडा, अडगुर शांबु, रकसी मेको क्येटीमी ग्यापीन। मिनू गे नु इन खिं डा मुर परमप्रभु यावे, इन परमप्रभु आ डोंइती जचा ब्वशा ग्येरसीने।
- 27 इन सहरम बाक्ब लेवी आ थर डा मुर आन कली रिश्शो पा कोव्रडीन। मारदे हना मेकोपुकी इन खोदेशो पा शोंप मतामे। ब्यवस्था १२:१२,१९;
- 28 मिनू बर्स सां नोले गे इन रुश्शो डा १० भागमी भाग का इन सहर डा वोइक्तीकेम वोइक्चा माल्नीनी। ब्यवस्था २६:१२-१५; लेवी २७:३२-३३
- 29 मिनू इन खोदेशो पा शोंप मताइब लेवी आ थर डा मुरपुकी, अर्को रागी डा मुर, रोम रोइक्च नु वोंइश बेक्शो मीश मुरपुकी मेकेर जाक्शा, रूथ्री जचा ब्वचा तामेक्ल। मो पाइतीनी हना, परमप्रभु यावे, इन परमप्रभुमी इन कली इन पतीक नेल्लेमी आसीक गेब” दैत।

## 15

७ बर्स नु जेर

- 1 मिनू मोसामी “गे इन कली ७ बर्स नोले जेर क्याम्तीक बर्स बाक्ब। प्रस्थान २३:१०-११
- 2 मेको मथाप्तीक माफ गेतीक बर्स दोपा पचा माल्नीनी देशा हना, सु सुमी आ वारच, दे लोकब आन कली जेर गेम्तेक्म हना, मेको गेबपुकीमी जेर ताक्ब आन कली गेशो जेर मथाप्पाइक्थु प्रोन्मेक्ल। मेकोमी आ वारच नु आ लोकब आन कली

जेर आ पबंम गेन कि गेन, दे पुंइचा मदुम्ब। मारदे हना परमप्रभु यावे रे पा जेर क्याम्तीक डा बर्स बाक्ब। नेहेम्याह ५:१०; नेहेम्याह १०:३२

३ अर्को रागी डा मुर आन कली चहिं गेन कि गेन, दे पुंइने चाप्नीनी। तन्न इन लोकब आन कली चहिं दोशो जेर बाक्मे मेको प्रॉइचा माल्नीनी।

४ इन दातेमी सुइ पुडग मबाक्म कौ? मारदे हना परमप्रभु यावेमी योत्रशा गेशो इन के सेल्शो रागीम इन कली शुश आसीक गेब।

५ गेपुकीमी परमप्रभु यावे, इन परमप्रभु आ देशो होस पा टीतीनी हना, इन कली अरेशो नेल्ल पाइतीनी हना, सुइ पुडग मदुम्नीनी।

६ मारदे हना परमप्रभु यावे, इन परमप्रभुमी इन कली देशो खोदेशो पा इन कली आसीक गेब। मिनु गे शुश रागी रागी डा मुर आन कली जेर गेब दुम्नीनी। गेपुकीम चहिं जेर पुंइचा ममाल्नीनी। मिनु गेपुकीमी शुश रागी रागी डा मुर आन कली हुकुम पाइनीनी। तन्न मेकोपुकीमी इन कली हुकुम मपाइनीम। व्यवस्था २८:१२

७ मिनु परमप्रभु यावे, इन परमप्रभुमी इन कली गेशो रागीम, सहर कामी बाक्शो इन लोकब का पुडग बाक्त हना, इन थुं खकटा पा मबाक्कीन। 'काइ मगेनुड' दे मदेनीन। १यूहन्ना ३:१७

८ तन्न गे शिशी पा मेको कली आ माल्शो नेल्ल जेर गेने। लूका ६:३४-३५

९ मिनु इन थुंमी 'जेर क्याम्तीक बर्स जाक्वा चिक्ताक्व' दे इन पुडग लोकब आ पबंम गन गन पा, मेको कली वारच पा जेर गेचा मदाक्नीनी हना, होस पने। मेको पुडगुमी इन पबंम परमप्रभु यावे कली पुंइब। मिनु गे पापी दुम्नीनी।

१० गेपुकीमी मेको कली हाइशशो थुं पा गन गन मपथु गेने। मारदे हना ओं पतीकेन परमप्रभु यावे, इन परमप्रभुमी इन कली इन पशो नेल्लेमी आसीक गेब। २कोरिन्थी ९:६-७

११ मारदे हना रागीम श्येत जशो पुडगपुकी गेना हना यो बाक्नीम। मोपतीके गो इन कली इन रागीम बाक्शो श्येत जाइब इन लोकब नु पुडग आन कली तशा, हाइशशो मुर दुम्शा गेन। मती २६:११; यसैया ५८:७; याकूब २:१५-१६

७ बर्स डा वाइलीम वाइल

प्रस्थान २१:१-६

१२ मिनु इन हिबू आन दाते डा लोकब, मीश मुर वोंइश मुर, आम कली इन गुडमी लेयसीनीम हना, मेकोमी इन कली ६ बर्स गेय पचा माल्नीम। मेको ७ बर्समी मेको आन कली प्रॉइशा लचा गेचा माल्नीनी। येरमीया ३४:१४

१३ मिनु गे मेको प्रॉइनीनु, श्येतथ गुइ मसोइक्तीन।

१४ परमप्रभु यावे, इन परमप्रभुमी इन कली आसीक गेशो रे इन क्यारश भेडा इन अन्न नु अडगुर शांबु रे मेको कली शुश गेशा सोइक्तीन।

१५ गेपुकी इजीप्त रागीमी वाइलीम वाइल दुम्शा बाक्तीनी। मिनु परमप्रभु यावे, इन परमप्रभुमी इन कली प्रॉइतु, मेको मिन्तीन। मोपतीके गो मुलाक्ती दोपा पचा, दे गो इन कली शेनुड। व्यवस्था ५:१५

१६ मिनु मेकोमी इन कली नु इन मुर आन कली दाक्शा, मेकोमी 'गो इन कली मप्रॉइथु, एकेन गेय पाइनुड' दैत हना,

१७ गे मेको मुर कली लाप्चोमी राप्पाइशशा लूजे का लाइशशा, मेको आ नोफा लाप्चो डा शी तारी खित्वा माल्नीनी। मिनु मेको मबेक्म सम्म इन वाइल दुम्ब। वाइलीम कली यो मोदेशो पचा माल्नीनी।

१८ गेपुकीमी मेको आन कली प्रॉइशा सोइक्वा श्येत मलाक्कीन। मारदे हना गाल्च ताक्शा गेय पाइब आन क्येडा निक्शी खेयप हिक्शो खोदेशो पा मेकोमी ६ बर्सम गेय पने थुम्शो बाक्ब। गेपुकीमी इन प्रॉइशो वाइलीम वाइल कली रिशो पा गेतीनी हना, परमप्रभु यावे, इन परमप्रभुमी इन कली इन पशो नेल्लेमी आसीक गेब।

डोंइती जरमेशो ब्यफ नु सांड

१९ इन बी ब्यफ आ डोंइती जरमेशो बाछा नु इन क्यारश भेडा आ डोंइती जरमेशो पाठा परमप्रभु यावे, इन परमप्रभु कली गेचा माल्नीनी। इन डोंइती जरमेशो ब्यफ लाइशशा गेय मपचा। डोंइती जरमेशो सांड आन कली ऊन मप्रेक्चा। प्रस्थान १३:२, १३-१६

२० मिनु बर्स बर्सम गेपुकी नु इन खिं डा मुर नेल्लेमी परमप्रभु यावे आ बाक्तीकेमी परमप्रभु यावे, इन परमप्रभु आ डोंइती ब्वचा माल्नीनी। व्यवस्था १४:२३

२१ तन्न मेको ब्यफ, सांड कली मारेइ दुम्शो बाक्त हना, कोडटे बोडटे बाक्त हना, नु मिक्च मताइब मारेइ दुम्शो बाक्त हना, गेपुकीमी मेको कली परमप्रभु यावे, इन परमप्रभु कली चढेचा मदुम्ब। लेवी २२:२०

२२ गेपुकीमी इन सहरमी किशश नु रोकेशो ब्वशो खोदेशो पा परमप्रभु आ डोंइती ग्रांरा दिशो नु मदिशो नेल्लेमी ब्वने चाप्नीम। व्यवस्था १२:१५, २२

२३ मेको आ हुश ला मब्वचा। मेको ब्वाक्कु खोदेशो पा खपीम ताइक्वा माल्नीनी" दैत। व्यवस्था १२:१६

## 16

पास्सा चाड मानेतीके

प्रस्थान २३:१४-१७; प्रस्थान ३४:१८-२४

१ मिनु मोसामी "गेपुकीमी आबीब महिनाम परमप्रभु यावे, इन परमप्रभु आ पास्सा चाड मानेचा माल्नीनी। मारदे हना परमप्रभु यावे, इन परमप्रभुमी आबीब महिना डा नाक्दो इन कली इजीप्त रे गुंइताक्वा। प्रस्थान १२:-



2 मिनू गेपुकीमी परमप्रभु यावे आ नें वोडकचा कली आ योत्रशो बाक्तीकेमी परमप्रभु यावे, इन परमप्रभु कली बोका नु ब्यफपुकी क्योरशा पास्सा चाड मानेचा माल्नीनी।

3 गेपुकीमी ग्युरशो बोरब ओरुली सुप्शो शोब्ले मेको श्ये नु मजने। गेपुकी ७ नाक्त सम्म ग्युरशो बोरब ओरुली मसुप्शो शोब्ले जचा माल्नीनी। मेको इन श्येत डा शोब्ले बाकब। मारदे हना गे इजीप्ट रे चुडशशा यूतीनी। मिनू गेपुकीमी मबेक्नी सम्म इजीप्ट रे गूशो नाक्ती मिम्चा कली मेको पास्सा चाड मानेचा माल्नीनी। प्रस्थान १२:११

4 मिनू ७ नाक्त सम्म इन रागी नेल्लेमी ग्युरशो बोरब ओरुली बाकचा मदुम्ब। मिनू गेपुकी डोंइती डा नाकदो क्योरशो श्ये सुनी सम्म मारेड हेंचा मदुम्ब।

5 परमप्रभु यावे, इन परमप्रभुमी इन कली गेशो सहरमी मेको पास्सा चाड डा मार मार क्योरने मचाप्नीनी।

6 परमप्रभु यावे, इन परमप्रभुमी आ नें वोडकचा कली नोले योत्रशो बाक्तीकेमी मेको पास्सा चाड डा मार मार क्योरचा माल्नीनी। गे मेको इजीप्ट रे गुंडशा, नां रिक्ची ना पचा माल्नीनी।

7 मिनू गे मेको श्ये कली वालशा, परमप्रभु यावे, इन परमप्रभुमी नोले योत्रशो बाक्तीकेम चोचा माल्नीनी। मिनू सुनी लेशशा, आम आम ताम्बु लने।

8 गे ६ नाक्त सम्म ग्युरशो बोरब ओरुली मसुप्शो शोब्ले जचा माल्नीनी। मिनू ७ नाक्तीम परमप्रभु यावे, इन परमप्रभु आ परबम बुक्तीक नाक्त बाकब। मेको नाक्ती मारेड गेय मपने।

पास्सा आ ७ हप्ता नोले डा चाड

9 मिनू मीशो बाली रिक्चा गेशो नाक्त रे गेपुकीमी ७ हप्ता हिक्चा माल्नीनी।

10 मिनू गेपुकी हप्तापुकी डा चाड परमप्रभु यावे, इन परमप्रभु कली मानेचा माल्नीनी। परमप्रभु यावे, इन परमप्रभुमी इन कली आसीक गेशो खोदेंशो पा इन ग्येरसीशो थुमी चढेशा चाड मानेचा माल्नीनी। प्रस्थान ३४:२२

11 मिनू गेपुकी, इन तमी तोपुकी, वाइलीम वाइल, इन सहरम बाकशो लेवी आ थर डा मुरपुकी, इन दातेमी बाकशो अर्को रागी डा मुरपुकी, रोम रोडकच नु आन वोंइश बेक्शो मीश मुर नेल्ल परमप्रभु यावे, इन परमप्रभु आ नें वोडकचा कली नोले योत्रशो बाक्तीकेमी मेको आ डोंइती ग्येरसीचा माल्नीनी।

12 गेपुकी इजीप्ट रागीम वाइलीम वाइल दुश्शो मिम्चा माल्नीनी। गे मेको फुल्लुम मुशा ब्रेक्शो लोत्र होस पा टिचा माल्नीनी। व्यवस्था ५:१५

बाली नाली ओंइतीक चाड

13 मिनू इन रू डा अन्न अडगुर मारेड मारेड खुम्ने थुम्शा, गेपुकीमी बाली नाली ओंइतीक चाड ७ नाक्त सम्म मानेचा माल्नीनी।

14 मिनू गेपुकी, इन तमी तौ, इन वाइलीम वाइल, इन सहरम बाकशो लेवीपुकी, अर्को रागी डा मुरपुकी, रोम रोडकच नु आन वोंइश बेक्शो मीश मुरपुकी, नेल्लेमी ग्येरसीशा मेको चाड मानेचा माल्नीम। व्यवस्था २६:११; यसैया ३०:२९

15 मिनू गेपुकीमी परमप्रभु यावे, इन परमप्रभु आ योत्रशो बाक्तीकेमी ७ नाक्त सम्म मेको चाड मानेचा माल्नीनी। मारदे हना परमप्रभु यावे, इन परमप्रभुमी इन कली बाली नाली शुश गेब नु इन मारेड मारेड पशोमी इन कली आसीक गेब। मोपतीके गेपुकी शुश ग्येरसीचा माल्नीनी।

16 मिनू परमप्रभु यावे, इन परमप्रभुमी आ नोले योत्रशो बाक्तीकेमी इन दाते डा वोंइश मुर नेल्ले सां खेयप परमप्रभु यावे आ डोंइती जाकदीत्चा माल्नीम। ग्युरशो बोरब ओरुली मसुप्शो शोब्ले डा पास्सा माडशशो चाड, ७ हप्ता नोले डा हप्ता डा चाड नु बाली नाली ओंइतीक गोठ सेल्टीक चाडम जाकदीत्चा माल्नीम। मिनू परमप्रभु यावे आ डोंइती श्येत्य गुड जाकचा मदुम्ब।

17 परमप्रभु यावे, इन परमप्रभुमी आसीक गेशो खोदेंशो पा नेल्लेमी आन चाप्शो गेचा माल्नीम।

निसाफ पतीके

18 मिनू मुर आन कली ठीक निसाफ पचा कली गेपुकीमी इन थर थर डा नु परमप्रभु यावे, इन परमप्रभुमी इन कली गेशो सहर सहरम निसाफ पाडब नु टेयब मुर योत्रशा वोडकचा माल्नीनी। व्यवस्था १:१६-१८; गन्ती ११:१६

19 निसाफ हेंथे मपने। कुल मकोव्रदीन। घूस मजने। मारदे हना घूसमी जोकब तुडकब मुर आन मिक्च सिल्ल। मिनू ठीक पाडबमी घूस जशा दूली लोत्र पाडब। १ सामुएल ८:३

20 मिनू परमप्रभु यावे, इन परमप्रभुमी गेशो रागीम ब्रोंइचा नु इन के सेल्चा, दे ठीक पतीक लां खोतीन।

चढेतीके परमप्रभु कली ला बाकब

21 गेपुकीमी अशेराह देवी आ लाइशशो मूर्ति परमप्रभु यावे, इन परमप्रभु कली चढेतीक आ नेक्था खुक्चा मदुम्ब। व्यवस्था ७:५; २राजा २३:४

22 गेपुकीमी तेकोड अर्को मूर्ति वोडकचा मदुम्ब। मारदे हना मेको नेल्ल परमप्रभु यावे, इन परमप्रभुमी कली ग्रॉग्रा दीब" देंत। लेवी २६:१; येरमीया २:२७

## 17

1 मोसामी "गेपुकीमी परमप्रभु यावे, इन परमप्रभु कली कोडटे बोडटे गाकब मिक्च मताडब, मारेड दुश्शो ब्यफ भेडा चढेचा मदुम्ब। मोदेंशो परमप्रभु यावे, इन परमप्रभु कली ग्रॉग्रा बाकब। लेवी २२:२०; मलाकी १:६-९

मूर्ति पूजा आ परबम

2 मिनू परमप्रभु यावे, इन परमप्रभुमी इन कली गेशो सहरमी सुइ वोंइश मुर मीश मुरुमी परमप्रभु यावे, इन परमप्रभु आ डोंइती मरिम्शो पा आ कबल कली प्रोंइशा, व्यवस्था १३:७-१२

3 मेकोपुकीमी देवी देवता खोइशा, मेको आन कली ठेयब सेल्शा, नां, तास्ला, सोरुल आन डोंइती बाप्शा गोम 'मपन देशो' पातेक्म हना, व्यवस्था ४:१९

4 मिनू मुरपुकीम मेको आन परबंम इन कली शेंताक्म हना, गेपुकीम रिम्शो पा खोदील निदील पा हिल्लो पचा माल्नीनी। मिनू मेको थमा पा इन इस्राएलमी मोदेशो ग्रॉग्रा दिचा डा गेय पशो बाक्त हना,

5 मेको मोदेशो ग्रॉग्रा पाइब वोंइश मुर हना यो, मीश मुर हना यो इन सहर रे गुंइशा, फुल्लु आप्शा साइक्का माल्नीनी। लेवी २४:१४

6 साइक्का पुंइसीब आन परबंम मुर निक्शी नु सांमी 'गो ताता, सांकछी दुम्ती' देतेक्म हना, ला साइक्का दुम्ब। का ला सांकछी बाक्त हना साइक्का मदुम्ब। व्यवस्था १९:१५; १राजा २१:१०; हिब्रू १०:२८

7 मेको आन पशो ताइब सांकछीपुकीमी नेल्ल क्येडा डोंइती मेको आन कली साइक्का, दे फुल्लु आप्शा माल्ब। मेको नोले ला नेल्ल अरुम पचा माल्नीम। मिनू मोपा गेपुकीमी मरिम्शो नेल्ल इन दाते रे गुंइचा माल्नीनी।

नेल्ल क्येडा ठेयब निसाफ

8 मिनू इन सहरम मुर साइक्कीके, रू योक्तीके, तुम्मुतीके नु मारेइ मारेइ मचाप्शा डा निसाफ बाक्त हना, इन सहर रे परमप्रभु यावे, इन परमप्रभु आ योत्रशो बाक्तीकेम लचा माल्नीनी।

9 मिनू गेपुकी चढेब, लेवी आ थर डा मुर नु मेना गेय पाइब निसाफ पाइब कली 'मार पचा' दे हिल्लो पचा कली गुम्थ लचा माल्नीनी। मेकोमी इन कली दोपा निसाफ पचा शेंनीम। २इतिहास १९:८, ११

10 मिनू परमप्रभु यावे आ योत्रशो बाक्तीकेमी मेकोपुकीमी इन कली मार देनीम, मेको मोदेशो पा ठीक पा निसाफ पचा माल्नीनी। मिनू इन कली दोपा शेंदमे, मोपा होस पा पचा माल्नीनी।

11 मेको इन कली शेंशा अरेशो लोत्र नु निसाफ पतीके गे पचा माल्नीनी। मेको लोत्र नेंशा, ग्युरा नु पेरा गे मलने।

12 सुइम ठेयब लेशशा, परमप्रभु यावे, इन परमप्रभु आ गेय पचा कली वोइशा चढेब, निसाफ पाइब आन लोत्र मटिप्टु हना, मेको साइक्का पुंइसीब। मिनू मोपा गेपुकीमी इस्राएली, इन दाते रे मरिम्शो नेल्ल गुंइचा माल्नीनी।

13 मिनू मुर नेल्लेमी मेको नेंशा हिंशा मोदेशो मपाइक्नीम।

पिप योत्रतीके आ परबंम

14 मिनू गेपुकी परमप्रभु यावे, इन परमप्रभुमी इन कली गेशो रागी जाक्दीरशा, इन के सेल्शा बाक्नीनु, गेपुकीमी 'एर ऑथ डा रागी रागी खोदेशो पा आंइ कली यो पिप का वोइक्का माल्नीक' देतीनी हना, १सामुएल ८:५-९

15 परमप्रभु यावे, इन परमप्रभुमी योत्रशो मुर कली ला वोइक्का दुम्ब। इन लोकब आन दाते रे योत्रशा पिप वोइक्का माल्नीनी। अर्को जात डा मुर पिप सेल्शा मदुम्ब, इन लोकब कली ला सेल्शा माल्ब।

16 मेकोमी शुश शारा आंम कली मवोदल। मिनू मेकोमी शारा ग्याप्शा कली मुर आन कली इजीप्त मसोइक्तल। मारदे हना परमप्रभु यावेमी 'मेको लां गेनायो लेशशा मलने' देत। १राजा १०:२६-२९

17 मिनू परमप्रभु यावे रे डोन मलल, दे मीश मुर शुश चाक्का मदुम्ब। मिनू मेकोम आंम कली शुश सुन चांदी मखुप्टल। १राजा ११:१-८; १राजा १०:१४

18 मिनू मेको पिपमी सासन पवानु, चढेब, लेवी आ थर डा मुर आन किताब रे परमप्रभु यावे आ अरेशा लोत्र किताब काम ब्रेक्का माल्ब।

19 मेको लोत्र मेको नु बाक्का माल्ब। मिनू मेकोमी परमप्रभु यावे, आ परमप्रभु कली मान पा हिंचा कली शेंसीचा कली मबेक्म सम्म नाक्त कित किंत पढेचा माल्ब। मेको अरेशो लोत्र नेल्ल नु फुल्लुम मुशा ब्रेक्शो लोत्र होस पा पचा माल्ब।

20 मेकोमी आंम लोकब आन दातेमी आंम कली ठेयब मसुदल। परमप्रभु यावे आ शेंशो लोत्र रे डोन मलल। ग्युरा पेरा गे मलल। मिनू आं तौ चचपुकीमी इस्राएल डा राज्य कली शुश नाक्ती सम्म सासन पामेक्ल" देत। व्यवस्था ५:२९

## 18

लेवी आ थर डा चढेब आन गेय

1 मोसामी "लेवी आ थर डा चढेब, नु लेवी आ थर डा मुर नेल्लेमी रू मथेरनीम। परमप्रभु यावे कली चोशा चढेशो नु मेको कली गेशो मेकोपुकीम जामेक्ल। व्यवस्था १०:९; गन्ती १८:८-२०; १सामुएल २:२८; १कोरिन्थी ९:१३

2 मेको आन लोकब आन दातेमी मारेइ शोंप मताइनीम। आं देशो खोदेशो पा परमप्रभु यावे मेको आन शोंप बाक्ब।

3 मिनू मुरपुकीमी ब्यफ, भेडा, क्यारश क्योरशा चढेमेनु, चढेब कली मार गेचा माल्नीम देशा हना, आ बला रे खोइल सम्म, शापे निक्शी नु कोत्रज गेचा माल्नीम।

4 मिनू इन डोंइती रिक्शो अन्न, डोंइती डा अडगुर शांबु, डोंइती डा खाक्शो तेल नु भेडा आन डोंइती प्रेक्शो ऊन गेचा माल्नीम। प्रस्थान २३:१९

5 मारदे हना परमप्रभु यावे, इन परमप्रभुमी नेल्ल इन थर रे लेवी आ थर योत्रशो बाक्त। मारदे योत्रशो बाक्त देशा हना, मेको नु आ लौपुकी गेना हना यो परमप्रभु यावे आ डोंइती राप्शा, आ गेय पचा कली योत्रशो बाक्त।

6 मिनू इस्राएलम बाक्ब लेवी आ थर डा मुर तेको तेको सहर रे परमप्रभु यावे आ योत्रशो बाक्तीके जाक्शा, न्यायाधीस १७:७; न्यायाधीस १९:१

7 परमप्रभु यावे आ डोंइती राप्ब आ लोकब नेल्ल खोदेशो पा परमप्रभु यावे, आ परमप्रभु कली गेय पने चाक्ब।

8 मेको नु आ मार मार लेयशो क्येट बाक्त हना यो, अरु चढेब खोदेशो पा उइक्थ उइक्थ जचा ताइब।

मपचा डा ग्रांघ्रा दिशो गेय

9 परमप्रभु यावे, इन परमप्रभुमी इन कली गेशो रागी जाक्दीन्नी नोले मेकेर डा रागी रागी डा मुर आन पशो ग्रांघ्रा दिशो गेय शेंसीशा काड मपने।

10 मेको ग्रांघ्रा दिशो गेय मार बाक्ब देशा हना, आंम तमी तौ आन कली मीम चोशा चढेशा, लिंक्यु कोत्रचा, टुना मुना पचा, मन्तर तन्तर पचा, लेवी १८:२१; लेवी १९:२६,३१

11 ठेयब मिक्च पचा, बेक्शो मुर रे लोत्र पचा नु बेक्शो मुर आ अर्ती नेंथ माल्चा मेको नेल्ल ग्रांघ्रा दिचा डा गेय बाक्ब। मोदेशो पाडब इन दातेमी काड मदुम्ब। लेवी २०:२७; १सामुएल २८:३-२०

12 मोदेशो पाडब मुर परमप्रभु यावे आ डोंइती ग्रांघ्रा दिचा डा बाक्नीम। मेको ग्रांघ्रा दिचा डा गेय आ परबंम परमप्रभु यावे, इन परमप्रभुमी मेको मुर आन कली इन डोंइती रे गुंडब।

13 परमप्रभु यावे, इन परमप्रभु आ डोंइती गेपुकी थमा सुडक्चा पुंडसीब रिम्शो पाडब दुमीन। उत्पती ६:९; उत्पती १७:१

14 मारदे हना गे खेरचा चिकशो रागी रागी डा मुरुम टुना मुना पाडनीम नु लिंक्यु कोत्रनीम। परमप्रभु यावे, इन परमप्रभुमी इन कली मोदेशो पचा मगेब।

परमप्रभु आ लोत्र पाडब

15 परमप्रभु यावे, इन परमप्रभुमी इन दाते रे आं खोदेशो पा आ लोत्र पाडब का योत्रब। गेपुकीमी मेको आ लोत्र नेंचा मालनीनी। गन्ती १२:६-८; यूहन्ना १:४५; यूहन्ना ६:१४; यूहन्ना ७:४०; प्रेरित ३:२२; प्रेरित ७:३७

16 मिनु होरेब डांडाम गुण्या नाक्त परमप्रभु यावे, इन परमप्रभु कली मार पुंडतीनी देशा हना 'गो परमप्रभु यावे, आंइ परमप्रभु आ सेंदा लेंशा नेंचा मदाक्नीक। मिनु मेको ठेयब मी लेंशा तचा मदाक्नीकी। लेंशा, ताडताक हना, बेक्नीकी, कों' दे हिंशा पुंडतीनी। प्रस्थान २०:१९; हिब्रू १२:१९

17 मिनु परमप्रभु यावेम आं कली 'मेकोपुकीमी रिम्शो लोत्र पाम्तेकम' देंत। व्यवस्था ५:२५

18 मिनु परमप्रभु यावेमी आं कली 'इ खोदेशो पा आं लोत्र पाडब, आन लोकब आन दाते रे का योत्रनुड। आं देंचा माल्शो लोत्र गो मेको कली देंपाडक्नुड। मिनु आं अरेशो लोत्र मेकोमी नेल्ले मुर आन कली देंब। प्रस्थान ४:१२; यसैया ६:८; येरमीया १:९; मती १०:१९

19 मिनु सुमी मेको आं नेंम, देशो लोत्र मटीबा, मेको कली गो सजाइ गेनुडमी।

20 तन्न तेको आं लोत्र पाडबमी आं मदेशो लोत्र देशा नु अरु देवी देवता आन देशो लोत्र पापुतु हना, मेको आं लोत्र पाडब कली साडक्चा मालनीनी। व्यवस्था १३:२-६; येरमीया १४:१३-१५

21 मिनु गे इन थुंमी "परमप्रभु यावे आ लोत्र बाक्बा देय मबाक्बा मेको दोपा तुडक्नय?" दे मिम्ताक्नी हना,

22 मेको परमप्रभु यावे आ लोत्र पाडबमी परमप्रभु यावे आ नेंमी लोत्र पाडब, तन्न मेको लोत्र मगापुतु नु मदुम्त हना, मेको आं देशो ममाड। मेको आं लोत्र पाडबमी आंमा थुं डा लोत्र पापुतु। गेपुकी मेको कली तशा महिनीन' दे परमप्रभुमी देंत" दे मोसामी इसाएली आन कली लोत्र पापुतु। येरमीया २३:१४; येरमीया २८:५; इज्जीकीएल १३:३-१६

## 19

मुर साइशशा प्रोक्तीक सहर

1 मिनु परमप्रभु यावे, इन परमप्रभुमी रागी रागी डा मुर आन कली खेरशा इन कली गेशो रागीमी आन सहर नु खिंपुकी इन के दुम्मेनु,

2 मेना परमप्रभु यावे, इन परमप्रभुमी इन कली गेशो रागीम गे सहर सां तिल्चा मालनीनी। व्यवस्था ४:४१-४३

3 मिनु परमप्रभु यावे, इन परमप्रभुम इन कली गेशो रागी कली का का पा प्रोक्तीक सहर योत्रचा, दे भाग सां सेल्चा मालनीनी। मेको का का पा सहर सांम मुर साडक्ब मुर प्रोक्शा, लशा बाक्तीक सहर सेल्चा मालनीनी।

4 मिनु सुडमी गेहे मपथु, साडक्चा ममिम्थु मुर का कली साडक्तु हना, मेकेर प्रोक्शा लशा ब्रोंडल।

5 दोदेशो दुम्ने चाप्व देशा हना, आन वारच नु शी खोइक्थ ब्वाकी लमानु, रवा तिम्मेनु, मेको खा डा फलम बुडशशा, लशा, ख्रशा आ वारच बेक्त हना, मोदेशो पा मुर साडक्ब मुर मेको सहरम प्रोक्शा लने चाप्नीम।

6 मेको सहर डोन बाक्त हना बेक्ब मुर आ मुरपुकीम मेको कली क्येक्क लेत्चा कली लांमी खेदा पा साडक्ब। तन्न मेको मुर साडक्चा मपुंडसीब बाक्ब। मारदे हना मेको आ वारच बाक्त।

7 मोपतीके गो इन कली "सहर सां तिल्चा मालनीनी" दे माडक्तन्नी।

8 मिनु परमप्रभु यावे, इन परमप्रभुमी इन किकी पिपी नु कसम जशो खोदेशो पा इन रागी बारपाडक्तु हना,

9 मिनु गे मुलाक्ती शेंशो परमप्रभु यावे आ अरेशो नेल्ल होस पा पाडतीनी हना, मिनु गे परमप्रभु यावे, इन परमप्रभु कली दाक्ताक्नी हना, गे नेल्ल नाक्ती मेको आ लांम गाक्तीनी हना, मेको सहर सां कली अर्को सहर सां तेम्चा मालनीनी।

10 मोपा परमप्रभु यावे, इन परमप्रभुमी इन कली गेशो रागीम दोस मताडब कली मसदमेक्ल। दोस मताडब कली साडक्नीम हना, इन दातेमी साडक्चा डा पाप राडब।

11 तन्न मुरुम डोंइती रे ईख कुरशा, गेहे पशा, बाप्शा मुर कली तुप्शा साडक्तु हना, प्रोक्तीक सहर काम प्रोक्त हना,

12 मेको मुर आ सहर डा खाल्पापुकीमी मेको कली चाक्पाइशशा, क्येक्क लेप्व आन गुडमी साडक्पाइक्चा कली जिम्मा गेमेक्ल।

13 मेको कली शिशी मपन। मिनु इसाएलम सुम मारेड दोस मतशो मुर कली हुश खाक्श पोक्शो पाप मोदेशो पा क्याम्चा माल्ब। व्यवस्था २१:८-९

सांद याक्चा मदुम्ब

14 मिनु गे परमप्रभु यावे, इन परमप्रभुमी इन कली इन के सेल्चा कली गेशो रागीम बाक्तीनी हना, इन किकी पिपीमी वौइशशो इन नेक्था डा मुर आन सांद याक्चा मदुम्ब। ब्यवस्था २७:१७

सांकछी आन लोत्र गारचा माल्ब

15 मुर कामी दोस ताडब दुश्चो बाक्त दैतेक्म हना, सांकछी का आ लोत्र ला नेशा मदुम्ब। सांकछी निक्शी, सां आन लोत्र गारत हना ला मेको कली दोस गेचा। ब्यवस्था १७:६; गन्ती ३५:३०; यूहन्ना ८:१७; २कोरिन्थी १३:१; हिब्रू १०:२८

16 मिनु जोल पा सांकछी बाक्शा, मुर का कली दोस गेचा कली बोक्त हना,

17 दोस गेब नु दोस ताडब निम्फा, परमप्रभु यावे आ डोंइती, चढेब नु निसाफ पाडब आ नेक्था जाक्चा माल्नीस।

18 मेको निसाफ पाडबमी मेको निक्शी आस कली खोदील निदील पा हिल्लो पचा माल्ब। दोस गेब आ लोत्र जोल बाक्त हना, दूली पा आ लोक्ब कली दोस गेशो बाक्त हना,

19 मेकोम आंम लोक्ब कली मार पचा मिम्शो बाक्मे, मेको कली मोन पचा माल्ब। मोपा गे इन दाते रे मरिम्शो पतीके क्याम्चा माल्नीनी।

20 मिनु अरु मुरपुकीमी मेको नेशा हिंचा माल्नीम। मिनु नोले इन दातेमी मोदेशो मरिम्शो मपाइनीम।

21 मिनु गेपुकीमी शिशी मपने। साडक्ब कली साडक्चा माल्ब। मिक्च पुक्ब कली आ मिक्च पुक्चा माल्ब। खुड जिक्ब कली आ खुड जिक्चा माल्ब। गुड खोडल जिक्ब कली आ गुड खोडल जिक्चा प्रस्थान २१:२३-२५

## 20

लडाइ आ पबंम लोत्र

1 मिनु मोसामी “गेपुकी लडाइ पथ लनीनु, शारा नु बग्गीपुकी तशा, इन जोरी सत्रु इन क्येडा शुश बाक्तेक्म हना, महिनीन। मारदे हना परमप्रभु यावे, इन कली इजीप्त रे थुंडब इन परमप्रभु गेपुकी नु बाक्ब।

2 मिनु लडाइम लचा क्येडा डोंइती चढेबमी लडाइ पथ लाडब आन डोंइती लशा

3 “इसाएलीपुकी नेनीन, गेपुकी मुल लडाइ पथ लचा चिक्शो बाक्तीनी। मोपतीके आडक्च थुं मपने। महिनीन। मेको आन कली तशा, ग्रीचोक पा इन थुं ग्येत्थ लुक्च मदुमीने।

4 मारदे हना परमप्रभु यावे, इन परमप्रभु इन जोरी सत्रु नु लडाइ पा इन कली ग्रापाडक्चा कली गेपुकी नु लाइब’ दैचा माल्ब।

5 मिनु आन ठेयब मुरपुकीमी मुर आन कली ‘सु इन दातेमी नक खिं का सेल्शा, ओव्रतीक चाड ममानेशो बाक्त हना, मेको आ खिं लेशशा, लचा माल्ब। मेको लडाइम बेक्त हना, आ खिंम अर्को मुर चाड सेल्शा ओव्रब, मेको मदुम्ब। ब्यवस्था १:१५; ब्यवस्था १६:१८

6 सुड इन दातेमी अडगुर रू खुम्शा, जचा मतशो बाक्तीनी हना, इन खिं लेशशा लने। मेको लडाइम बेक्त हना, आ अडगुर रू अर्कोम जाइब, मेको मदुम्ब। ब्यवस्था २८:३०; लेवी १९:२४-२५

7 सुड इन दातेमी मीश आल का पुंडशा ग्युंवे पचा चिक्शो बाक्तीनी हना, मेको खिं लेशशा लचा माल्ब। मेको लडाइम बेक्त हना, मेको मीश आल अर्कोम लाइक्ब। मेको मदुम्ब’ दैचा माल्नीम। ब्यवस्था २४:५

8 मिनु मेको ठेयब मुरपुकीमी लेशा मुर आन कली ‘इन दातेमी सुडम हिंन नु आ थुं लुक्च लाइब बाक्त हना, मेको आ खिं लेशशा लचा माल्ब। मेकेर बाक्त हना, आ लोक्ब आन थुं यो ग्येत्थ लुक्च लपाइक्ब’ दैचा माल्नीम। न्यायाधीस ७:३

9 मिनु ठेयब मुरपुकीमी मो दैने थुम्मे नोले, मेकोपुकीमी लडाइ पाडब आन डोंइती गाक्चा कली, ठेयब मुरपुकी योवचा माल्नीमी।

लडाइ दोपा पचा, दे शेशो

10 मिनु गेपुकी सहर का कली लडाइ पथ, आ नेक्था जाक्दीन्नी नोले मेको आन कली ‘लडाइ मपय, गुड पोक्कीन’ दैचा माल्नीनी।

11 मिनु मेकोपुकीमी ‘दुम्ब’ दे गुड पोक्तेक्म हना, मेकेर डा मुर नेल्ले आन कली वाइलीम वाइल खोदेशो पा गेय पाडब सेल्चा माल्नीनी।

12 तन्न मेको सहर डा मुरपुकीमी इन देशो मबित्थु लडाइ पचा दाक्ताक्म हना, मेको सहर कली पुम्दीन।

13 मिनु परमप्रभु यावे, इन परमप्रभुमी मेको सहर इन कली गेप्टु हना, गेपुकीमी मेकेर डा वौइश मुर नेल्ल आन कली तरवारम साडक्चा माल्नीनी। ब्यवस्था ३:६-७; गन्ती ३१:७, १४-१८

14 तन्न मीश मुर, आलपुकी, बी ब्यफ, क्यारश भेडा नु सहरम बाक्शो मारेड मारेड इन के दुम्ब। मोपा परमप्रभु यावे, इन परमप्रभुमी गेशो ग्राशो थोव्रक तशा ग्येरसीन।

15 आंम नेक्था डा रागी रागी कली ममाइ, तन्न डोन डा सहर कली मोदेशो पचा माल्नीनी।

16 तन्न परमप्रभु यावे, इन परमप्रभुमी मेको जात जात डा मुर आन सहर इन कली गेशो सहरम मार मार सेस बाक्मे, मेको साडक्चा माल्नीनी। गन्ती २१:१-३; यहेसु १०:४०

17 परमप्रभु यावे, इन परमप्रभुमी अरेशो खोदेशो पा, हिती, एमोरी, कनानी, परिज्जी, हिव्वी नु यबुसी नेल्ल आन कली साडक्चा क्याम्चा माल्नीनी।

18 मो मपाइतीनी हना, मेको आन देवी देवता आन कली ग्रांघा दिचा डा पतीके शेंसीनीनी। मोपा परमप्रभु यावे, इन परमप्रभु कली मरिम्शो पा पाप पाइनीनी।

19 मिनु गेपुकीमी सहर का कली लडाइ पा शुश नाक्त सम्म पुम्शा बाक्नीनु, मेको सहर डा रवापुकी मतिम्चा। मारदे हना गेपुकीमी नोले मेको आन फल जने चापनीनी। मार, मेको एर ओंथ डा रवापुकी मुर खोदेशो बाक्नीमी डा?

20 तन्न इन तुइश्शो जचा फल मसिन्च रवा तिम्ने चापनीनी। मिनु मग्रानी सम्म मेको रे सहर डा गारो डोइक्तीके सेल्ने चापनीनी” देत।

## 21

मतुइक्थु साइश्शो

1 मिनु परमप्रभु यावे, इन परमप्रभुमी इन कली गेशो इन के सेल्चा चिकशो रागी डा दिम मेर बेक्शो मुर का थित्तीनी नु मेको साइक्व मुर मतुइसाक्व हना,

2 इन खाल्पा नु निसाफ पाइबपुकी लशा, मेको साइश्शो मुर तेको एर ओंथ डा सहर क्येडा नेक्था बाक्वा, पुक्चा माल्नीम।

3 मिनु मेको आ नेल्ल क्येडा नेक्था डा सहर आ खाल्पापुकीमी गेय मपपाइश्शो नु हलो मवाक्शो बी बाछा का चाक्चा माल्नीम।

4 मिनु मेको खाल्पापुकीमी मवाक्शो नु वांचेर मशोक्शो रू नु गेना हना यो ब्वाक्कु बाक्शो खोला आ नेक्था लाइश्शा, मेको बाछा आ शुर रोप्चा माल्नीम।

5 मिनु चढ़ेब, लेवी आ तोपुकी मेको आ नेक्था जाक्चा माल्नीम। मारदे हना परमप्रभु यावे, इन परमप्रभु आ गेय पचा नु आ नेमी आसीक गेचा कली योत्रतु। मिनु जिशो खेशो बाक्त हना, मेको आन देशो पचा माल्नीम। ब्यवस्था १७:८-९

6 मिनु मेको साइश्शो मुर आ सहर नेक्था डा खाल्पापुकी मेको शुर रोप्चा साइश्शो खोला डा बी तार आन गुड चिकसीमल। मती २७:२४

7 मिनु मेकोपुकीमी “गोपुकी आंइ गुइमी हुश खाक्श मपोक्शो। सुम पवा मेको यो मतुइश्शो।

8 मोपतीके परमप्रभु यावे इन श्येते र प्रोइशो इन मुर इसाएली आंइ पाप क्याम्दीन। इन मुर इसाएली आन दातेमी एको दोस मतशो मुर कली पोक्शो हुश खाक्श आ पाप गो आंइ दातेमी मलील” दे पुंइचा माल्नीम। मिनु मेको हुश खाक्श पोक्तीके पाप क्याम्सीब।

9 मोपा गेपुकीमी दोस मतशो मुर कली साइक्वा पुंइसीतीके इन दाते रे गुंइचा माल्नीनी। मारदे हना गेपुकीमी परमप्रभु यावे आ डोंइती ठीक पचा माल्नीनी। गन्ती ३५:३३

लडाइम तशो मीश आल

10 मिनु गेपुकीमी लडाइम लनीनु, परमप्रभु यावे, इन परमप्रभुमी इन जोरी सनु आन कली इन गुइमी गेवानु,

11 मिनु फ्रेशा लाइश्शो आन दातेमी दारशो मीश आल का ताइतीनी नु मेको नु ग्युंवे पचा दाक्ताक्नी हना,

12 मेको कली इन खिम लतीन। मिनु मेको मीश आलम आ चां फ्रेंचा नु आ ग्ये खोइक्चा माल्ब।

13 मिनु नोले मेकोमी आ माइत वा पुइश्शा नक वा फेक्चा माल्ब। मेको इन खिम बाक्शा, महिना का सम्म आ आंम आफ आन पबंम रोंका पचा माल्ब। मिनु नोले मेको कली ग्युंवे पा मेको निक्शी मीश वोंइश दुम्ने चापनीम।

14 मिनु गे मेको कली तशा ब्रीताक्नी हना, मेको कली तिल्चा दाक्ताक्नी हना, मेको कली प्रोइशा लचा गेन। गे मेको कली लेयचा मताइनीनी। मिनु वाइलीम कली खोदेशो पचा मताइनीनी। मारदे हना मेको इन मीश बाक्त।

डोंइती जरमेशो तौ

15 मिनु वोंइश मुर का के मीश निक्शी बाक्शा, का आ दाक्शो नु का आ मदाक्शो मीश बाक्त हना, मेको निक्शीमी तौ का थिशा, आ मदाक्शो मीशेम चहिं डोंइती तौ थिशा बाक्त हना, उत्पती २९:३०-३२

16 अडस पशोनु, आ दाक्शो मीश आ तौ, मदाक्शो आ तौ प्रोइशा, डोंइती जरमेशो तौ सेल्ने मचाप्ब।

17 मेकोमी आ मदाक्शो मीश आ तौ “डोंइती जरमेशो तौ बाक्ब” दे आ शोंप डा भाग निक्शी गेचा माल्ब। मारदे हना मेको आ डोंइती डा सक्ति थिशा बाक्ब। डोंइती जरमेशो तौ आ अधिकार मेको केन बाक्ब। उत्पती ४९:३

हेंथे गाक्ब तौ कली सजाइ

18 मिनु मुर का हेंथे गाक्ब मटीब तौ का बाक्त हना, मेको आ आम आफ आस देशो काइ मटीब बाक्त हना, तुप्शा, शेशा यो मेको आस देशो मटिपु हना, ब्यवस्था २७:१६; प्रस्थान २०:१२

19 मेको आ आंम आफोम मेको कली ग्याइश्शा, सहर डा खाल्पा आन डोंइती सहर डा लाप्चो आ नेक्था चाक्चा माल्नीम।

20 मिनु नोले मेको निक्शीमी सहर डा खाल्पा आन कली “एको आंस तौ हेंथे गाक्ब नु मटीब बाक्ब। एकोमी आंस अरेशो मटीब। एको शुश जाइब नु रकसी शांबु तूब बाक्ब” देसल।

21 मिनु मेको सहर डा मुर नेल्लेमी मेको कली फुल्लु आप्शा साइक्वा माल्नीम। मिनु गेपुकीमी इन दाते डा मरिम्शो क्याम्चा माल्नीनी। मिनु इसाएली नेल्लेमी मेको नेंशा, हिंचा माल्नीम।

मरिम्शो पाइब कली सजाइ

22 मिनु मुर कामी बेक्चा माल्शो सजाइ तशा, गेपुकीमी मेको कली रवाम क्युक्तीनी हना, गन्ती २५:४; यहोसु ८:२९; यहोसु १०:२६-२७; १सामुएल ३१:१०; २सामुएल ४:१२; २सामुएल २१:६,९

23 मेको आ लास आ दीसा सुनी सम्म रवाम क्युक्शा, वोइक्चा मटुम्ब। मेको नाकतीन मेको कली थिम्का मालनीनी। मारदे हना क्युक्शा साइशशो मुर परमप्रभु पशो सराप चीले बाकब। परमप्रभु यावे, इन परमप्रभुमी गेशो रागी कली ग्रांघा दिशो मसेलीन। यहोसु ८:१९; यहोसु १०:२७; यूहन्ना १९:३१; गलाती ३:१३

## 22

वारच पतीके आ पर्वम अरेशो

1 गे इन लोकब आन ब्यफ, भेडा हेंथे गाकशो ताइक्तीनी हना, गे मेको कली इन लोकब आ बाक्तीकेम चाक्दीतीन। प्रस्थान २३:४

2 इन लोकब इन नेक्था मबाक्त हना, मेको आ होत्रप मतुइक्ताक्नी हना, गे मेको आन कली इन खिं चाक्शा वोतीन। मिनु ममाल्मे सम्म इन खिंम थुलीन। मिनु मेको मुर ब्रथ जाक्त हना, लेलीन।

3 मिनु जाम्शो गधा, वासी नु मारेड मारेड जाम्शो थित्तीनी हना, मेको मोदेशो पचा मालनीनी। वारच पचा मप्रोनीन।

4 मिनु इन नेक्था डा मुर आ गधा, ब्यफ लाम थिरशो ताइतीनी हना, मतशो खोदेशो मपने। मेको कली पोक्चा कली वारच पतीन।

5 मीश मुरुमी वोंइश मुर आन फेक्तीक वा मफेक्सीन। वोंइश मुरुमी मीश मुर आन फेक्तीक वा मफेक्सीन। सु सुमी मेको पाइबा, मेको परमप्रभु यावे, इन परमप्रभु कली ग्रांघा बाकब।

6 मिनु गे, रवाम खपीम चिक्ब आ ग्योत्र का थित्तीनी हना, मेको ग्योत्रम ब्वोफु कि चाइक्ब बाक्तेक्म हना, गे मेको चिक्बी नु आ चाइक्ब आन कली लाइक्चा मटुम्ब।

7 मेको चिक्ब कली बेरचा गेचा मालनीनी। आ चाइक्ब आन कली लाइक्ने चाप्नीनी। मो पाइतीनी हना, गे रिम्शो पा बाक्चा ताइनीनी। मिनु इन ब्रोंइतीक नाक्त शुश दुम्मीम।

8 गे नक खिं सेलतीनी हना, खिं तार एर ओंथ नेल्ल थरपु हिरचा मालनीनी। मारदे हना मुर का दोक्त हना, गे इन खिं तार दोस मतशो मुर कली साइक्तीक पाप राइब।

9 गेपुकीमी इन अडगुर रूमी अरु वांचेर तेम्शा मशोक्कीन। मो पाइतीनी हना, इन शोक्शो निम्फा परमप्रभु कली मगारचा डा दुम्ब। लेवी १९:१९

10 गे ब्यफ नु गधा कालेम वाक्चा मटुम्ब।

11 गे ऊन नु सुती ब्वाइशशा प्रोवशो फेक्चा मटुम्ब।

12 गे इन फेक्तीक वा आ कुनामी झुम्का क्युक्शा सेलीन। गन्ती १५:३८

मीश मुर आन पर्वम अरेशो

13 मिनु मुर कामी ग्युंवे पा आ मीश नु बाक्शा, नोले मदाक्ताक्व हना,

14 आ मीश प्रोइचा कली आ मीश आ पर्वम “आं ग्युंवे पशो मीश आल नु बाक्डानु, कन्ने मबा” दैत हना,

15 मेना मेको मीश आल आ आम आफोम आस तमी कन्ने दुम्तीक चिनु लाइशशा, सहर डा ठेयब लाप्चोम बाक्ब खाल्पा आन बाक्तीके लचा मालनीस।

16 मिनु मीश मुर आ आफोम मेको खाल्पा आन कली “गो आं तमी मेको मुर कली ग्युंवे पा गेता। मिनु मेकोमी मुल आं तमी कली मदाक्ब।

17 मिनु मेकोमी आं तमी नु ब्राचा कली ‘इ तमी कन्ने मबाक्शो बाक्त’ दैत” दैशा, मेको इप्शो वा मेको खाल्पा आन डोंइती ब्रचा माल्ब।

18 मिनु सहर डा खाल्पापुकीमी मेको वोंइश मुर कली सजाइ गेचा मालनीम।

19 मिनु मेको वोंइश मुरुम मेको मीश मुर आ आफ कली सहे का चांदी के शेकेल थाप्चा माल्ब। मारदे हना इस्राएल डा कन्ने मीश आल आ नें मरिम्शो सेल्चा माल्शो बाक्त। मिनु मेको आ मीश कली मबेक्म सम्म प्रोंइने मचाप्ब। शेकेल का ११:५ ग्राम चांदी के क्येट बाक्ब। ब्यवस्था २२:२९

20 तन्न मेको वोंइश मुर आ देशो थमा बाक्त हना, मिनु कन्ने आ चिनु मेको मीश आल नु मबाक्शो बाक्त हना,

21 मेको मीश मुर कली आ आफ आ खिं डा लाप्चोम चाक्चा मालनीम। मिनु मेको आ सहर डा वोंइश मुर नेल्लेमी मेको कली फुल्लु आप्शा साइक्चा मालनीम। मारदे हना मेकोमी आ आफ आ खिंम तेल्लेम पा इस्राएलम काइ मरिम्शो पाप्तु। मिनु मोपा गेपुकीमी इन दातेमी पशो मरिम्शो क्याम्चा मालनीनी। उत्पती ३४:७

वोंइश मुर आ पर्वम अरेशो

22 मिनु वोंइश मुर का अरु आन मीश नु इप्शो थितेक्म हना, मेको निम्फा आस कली साइक्चा मालनीम। मेको मीश मुर नु बाक्शो वोंइश मुर यो साइक्चा मालनीम। मिनु मोपा गेपुकीमी इन इस्राएलम पशो मरिम्शो क्याम्चा मालनीनी। लेवी २०:१०; रसामुएल ११:४

23 मिनु ग्युंवे पचा कली पुंइशो मीश आल का कली सहरम अरु वोंइश मुर काम गुम्तु हना, मेको नु इप्त हना,

24 मेको निम्फा आस कली सहर डा ठेयब लाप्चो रे गुंइशा, फुल्लु आप्शा साइक्चा मालनीम। मेको मीश आल वारच पन, दे मग्रीतीके नु मेको वोंइश मुर आ इस्राएली लोकब आ मीश आल नु बाक्तीके, निम्फा आस कली साइक्चा मालनीम। मिनु मोपा गेपुकीमी इन दातेमी पशो मरिम्शो क्याम्चा मालनीनी।

25 तन्न मेको वोंइश मुरुम मेको ग्युंवे पचा कली पुंइशो मीश आल कली रूम थित्तु हना, मेको कली ग्याइशशा बिथोलो पाप्तु हना, मेको वोंइश मुर कली ला साइक्चा माल्ब।

26 मेको मीश आल कली मारेइ मपचा। मारदे हना मेकोमी साइकचा पुंडसीचा डा पाप मपशो बाकब। मेको पाप कली साइशो खोदेशो बाकब।

27 मेको पुंडशो मीश आल रूमी वाइ ब्रेशशा ग्रीम माइ, तन्न सुइमी वारच मपामे माइ।

28 मिनू वोंइश मुर काम ग्युंवे पचा कली मपुंडशो कन्ने मीश आल कली ग्याइशशा, मेको नु बाकशो, थित्तेकम हना, प्रस्थान २२:१५

29 मेको नु बाकशो वोंइश मुरुम मेको मीश आल आ आफ कली ५० शेकेल चांदी थाप्या माल्ब। मिनू मेको वोंइश मुरुम मेको मीश आल नु बाकतीके, आ मीश दुम्या माल्ब। मेकोमी मेको कली मबेकम सम्म प्रॉइने मचापब। मारदे हना मेको मेको नु इप्त।

30 मुरुमी आ आफ आ मीश कली चाकने मचापब। आ आफ नु इप्यो मीश मुर नु आ तौ इप्या मदुम्ब। लेवी १८:८; २सामुएल १६:२२

## 23

परमप्रभु आ अरेशो लीशो लोत्र

1 मिनू वोंइश मुर कली आल मथीब सेल्चा कली आ चारतीक खोइशशो बाकत हना, परमप्रभु यावे आ गुम्टीकेमी ओवने मचापब। यसेया ५६:३-४; प्रेरित ८:२७

2 तेल्लेम पा थिश्शो आल परमप्रभु यावे आ गुम्टीकेमी ओवने मचापब। मेको आ १० पाला सम्म परमप्रभु यावे आ गुम्टीकेमी ओवचा मताइनीम। एजा ९:५; एजा १०:-

3 अम्मोनी नु मोआबी परमप्रभु यावे आ गुम्टीकेमी ओवने मचापनीम। मेको आ १० पाला सम्म परमप्रभु यावे आ गुम्टीकेमी ओवचा मताइनीम। उत्पत्ती १९:३७-३८

4 मारदे हना गे इजीप्ट रे ग्रीनीनु, मेकोपुकीमी जचा थोत्रक नु ब्वाक्कु कुरशा इन कली ग्युथ मपीम। मिनू मेकोपुकीमी यो इन कली सराप पचा, दे बेओर आ तौ बालाम मेसोपोटामीया आ नेक्या डा अराम-नाहाराइम डा पेशोर सहर रे क्येट गेशा ब्रेताकम। गन्ती २२:५-६

5 मो हना यो परमप्रभु यावे, इन परमप्रभुमी बालाम आ लोत्र मनेन। मेकोमी मेको सराप के आसीक सेल्लु। मारदे हना परमप्रभु यावे, इन परमप्रभुमी इन कली दाक्ताकब।

6 मोपतीके गेपुकीमी गेनायो मोआबी नु अम्मोनी नु मगरीन, वारच मदुमीन। एजा ९:१२

7 मिनू गेपुकीमी एदोमी आन कली ग्रांग्रा मदित्चा। मारदे हना मेकोपुकी इन लोत्रक बाकनीम। गेपुकीमी इजीप्ती आन कली ग्रांग्रा मदित्चा। मारदे हना गेपुकी मेको आन रागीम बाकशो बाकतीनी।

8 मेको आन युइ आन पाला रे परमप्रभु यावे आ गुम्टीकेमी ओवचा गेने चापनीनी।

लडाइ पाइब आन बाकतीके

9 मिनू गेपुकी लडाइ पथ लनीनु, इन ताम्बुम नेल्ल मरिश्शो रे डोन बाककीन।

10 मिनू इन दाते डा वोंइश मुर का नाकदोम ग्रांग्रा दितीके दुम्त हना, मेको बाकतीके रे डोन लचा माल्ब। मिनू लडाइ पाइब आन बाकतीके मओवचा। लेवी १५:१६-१८

11 मिनू मेको मुर नाकनाकदो चिक्सीशा, नां रिक्की ना लेंशा आ बाकतीके ओवचा ताइब।

12 मिनू गेपुकी लडाइ पाइब आन बाकतीक मेर डाइक्तीके का सेल्चा माल्ब।

13 गेपुकी इन थोत्रक नु दोतीक का यो बाकचा माल्ब। डाइकचा कली लनीनु, पोत्रला दोशा, आगा डाइशशा नोले स्त्री सुम्शा वीतीन।

14 मारदे हना इन कली प्रॉइचा नु इन जोरी सत्रु आन कली इन कली जिम्मा गेचा कली परमप्रभु यावे, इन परमप्रभु इन लडाइ पाइब आन बाकतीकेम बाकब। मेकोमी इन कली इन जोरी सत्रु रे प्रॉइचा नु मेको आन कली इन गुडम गेब। मोपतीके इन बाकतीके रिश्शो, आ खोदेशो दुम्या माल्ब। मिनू इन दातेमी ग्रांग्रा दित्या डा ताप्टु हना, इन बाकतीक रे गाकब। लेवी २६:१२

प्रोकशो मुर आन पर्वम शेंशो

15 मिनू वाइल का आ होत्रप रे प्रोकशा, इन बाकतीकेम जाकत हना, गेपुकीमी मेको कली लेंशा आ होत्रप कली गेचा मदुम्ब।

16 मेको इन दातेमी आ दाकशो सहरमी बाकचा गेने। गेपुकीमी मेको कली श्येत मगेने। फिलेमोन १२-१६

17 मिनू इस्राएली आन तमी कि तौ मन्दीर डा तेल्लेम पाइब दुम्या मदुम्ब। होसे ४:१४; १राजा १४:२४; २राजा २३:७

18 वोंइश मुर, मीश मुर तेल्लेम पशो क्येट परमप्रभु यावे, इन परमप्रभु आ खिंम कबल खाप्या कली चाक्या मदुम्ब। मारदे हना मेको परमप्रभु यावे, इन परमप्रभु कली ग्रांग्रा बाकब। प्रकाश २२:१५

19 मिनू गेपुकीमी क्येट, जचा थोत्रक नु मारेइ मारेइ जेर गेशो इन आंम लोत्रक रे मेको आ चाइकब मताकचा। प्रस्थान २२:२४; लेवी २५:३६

20 अर्को रागी डा मुर आन कली चाइकब गेपाइकने चापनीनी। तन्न इन लोत्रक आन कली जेर गेशा आ चाइकब मथाप्पाइकचा। मिनू मेको टीतीनी हना, परमप्रभु यावे, इन परमप्रभुमी गे लचा चिक्शो इन के सेल्चा चिक्शो रागीमी इन कली आसीक गेब।

21 मिनू गेपुकीमी परमप्रभु यावे, इन परमप्रभु नु कसम जनीनु, मेको खाप्या, थाप्या कली मरिम्दीन। मारदे हना परमप्रभु यावे, इन परमप्रभुमी कसम खाप्यो कोवचा दाकब। मो मपाइतीनी हना, गे पाप राइनीनी। गन्ती ३०:३

- 22 तन्न गेपुकी कसम मजाइतीनी हना, गे पाप मराइनीनी।  
 23 गेपुकीमी मार देंनी, मेको खाप्शा, पचा माल्नीनी। मारदे हना गे परमप्रभु यावे, इन परमप्रभु नु आंमान कसम जाइतीनी।  
 24 मिनु गेपुकी इन लोकब आ अडगुर रूमी ओव्रतीनी हना, मरूनी सम्म सेक्शा ब्वने चाप्नीनी। तन्न कुरशा लाइक्चा मताइनीनी। मली १२:१  
 25 मिनु गेपुकी इन लोकब आ बाली मीशो रूमी ओव्रतीनी हना, जचा कली बाली सेक्चा ताइनीनी। तन्न रिक्चा चहिं मताइनीनी।

## 24

ग्युंवे पा प्रोइतीक आ पर्वम

- 1 मिनु मुर कामी ग्युंवे पा आ मीश नु बाक्शा, नोले ला मेको मरिम्शो बाक्त, दे तुइश्शा, मेको कली प्रोइचा कली ब्राचा आ पर्वम ब्रेक्स गेशा, आ खिं रे सोइक्ताक्व हना,  
 2 मेको लशा, अर्को आ मीश दुम्मेनु,  
 3 मिनु मेको अर्को वोंइशेम गो मरिम्शो बाक्त, दे तुइश्शा, मेको कली मदाक्थु प्रोइचा कली ब्राचा आ पर्वम ब्रेक्स गेशा, आ खिं रे सोइक्ताक्व हना, कि मेको मुर आंमा बेक्त हना,  
 4 मेको आ डोंइती प्रोइशो वोंइशेम मेको मीश मुर अरु वोंइश नु बाक्शा ग्रांया दुम्शो नोले लेंशा चाक्ने मचाप्ब। मारदे हना मोदेशो पशो परमप्रभु यावे आ डोंइती ग्रांया बाक्ब। परमप्रभु यावे, इन परमप्रभुमी इन कली गेशो रागीमी पाप मचाक्कीन।

रिम्शो दुम्चा कली अरेशो

- 5 वोंइश मुर कामी नक ग्युंवे पशो बाक्त हना, मेको लडाइम लचा मटुम्ब। अरु गेय यो “मेको कली पावो” दे अरेचा मटुम्ब। बर्स का सम्म मेको आ खिंम बाक्शा आ नक चाक्शो मीश नु ग्येरसीचा माल्ब। ब्यवस्था २०:७  
 6 सुइमी सुइ आन यात जाकटी मवोइक्चा। मारदे हना मेको मबाक्त हना दोपा शोब्ले सेल्ने चाप्नीमी?  
 7 सुइ मुरुमी इस्माएली लोकब कली ग्याइश्शा खुइ पा आ वाइल सेल्लु हना, लेयतु हना, मेको खुइ कली साइक्चा माल्नीम। मोपा गेपुकीमी इन दाते रे मरिम्शो नेल्ले गुंइचा माल्नीनी। प्रस्थान २१:१६  
 8 कोवर मुतीक तशा होस पा बाक्कीन। चढेब, लेवीपुकीमी मेको आ पर्वम इन कली शेंशो खोदेशो पा नेल्ल पचा माल्नीनी। गो मेको आन कली अरेशो खोदेशो पा होस पा बाक्कीन।  
 9 गेपुकी इजीप्त रे यूशा पिनीनु, परमप्रभु यावे, इन परमप्रभुमी लांम मिरयाम कली पशो गेय मप्रेंदीन। गन्ती १२:१०-१५  
 10 मिनु गेपुकीमी इन वारच कली जेर गेनीनु, मेको के मार मार जाकटी पुंइथ आ खिं मओव्रडीन।  
 11 लाडगाामीन रिम्दीन। मिनु जेर लाइबमी मेको जाकटी लाडगा गुंइशा गेब।  
 12 मेको मुर पुडग बाक्त हना, मेको आ जाकटी इन खिंम वोइश्शा ब्रशा मडपीन।  
 13 नां रिक्ची ना मेको जाकटी लेशशा गेने। मिनु मेकोमी मेको आ फेक्तीक फेक्शा इप्थ लने चाप्ब। मिनु मेकोम इन कली आसीक गेब। मेको परमप्रभु यावे, इन परमप्रभु आ डोंइती ठीक पतीक बाक्ब। प्रस्थान २२:२५; अय्युब २२:६; आमोस २:८; ब्यवस्था ६:२५  
 14 गेपुकीमी इस्माएल डा कि इन सहरम बाक्शो अर्को रागी डा पुडग नु श्येत जाइब खेतलाम इन कली गेय पाप्तु हना, आ ततीक ठीक पा गेने।  
 15 गेय पची नाक्ती नां मरिक्थु, आ तचा डा गाल्च गेचा माल्नीनी। मेको पुडग मुर आ गाल्च माल्ब बाक्ब। ठीक पा मगेतीनी हना, मेकोमी इन मरिम्शो पशो आ पर्वम परमप्रभु यावे नु लोत्र पाइब। मिनु गे पाप राइनीनी।  
 16 मुर आ तमी तौम साइक्चा डा पाप पाप्तु हना, आफ कली मसाइक्चा। मिनु आफोमी साइक्चा डा पाप पाप्तु हना, आ तमी तौ आन कली मसाइक्चा। सुमी पाप पाइबा, मेको ला साइक्चा पुंइसीब। २राजा १४:६  
 17 मिनु अर्को रागी डा मुर नु रोम रोइक्च आन कली निसाफ दूली मपने। मिनु वोंइश बेक्शो मीश मुर आन फेक्तीक वा जाकटी मवोतीन।  
 18 गेपुकी इजीप्त रागीम वाइलीम वाइल दुम्शो मिम्तीन। मिनु परमप्रभु यावे, इन परमप्रभुमी इन कली मेक रे प्रोइशो मप्रेंदीन। मोपतीके गो इन कली मोदेशो पचा, दे अरेता। ब्यवस्था ५:१५  
 19 गेपुकीमी खेतम बाली नाली रिक्शा, मुठा का खेतम प्रेंताक्नी हना, लेशशा ब्रथ मलने। मेको मुठा अर्को रागी डा मुर, रोम रोइक्च नु वोंइश बेक्शो मीश मुर आन कली बाक्ब। मो पाइतीनी हना, परमप्रभु यावे, इन परमप्रभुमी इन गेय नेल्लेमी इन कली आसीक गेब। लेवी १९:९-१०  
 20 गेपुकीमी तेल रवा आ फल थेंपतीनी हना, लेंशा लीशो फल मथेपीन। मेको लीशो फल अर्को रागी डा मुर, रोम रोइक्च नु वोंइश बेक्शो मीश मुर आन कली बाक्नीम।  
 21 गेपुकीमी इन अडगुर रू डा अडगुर सेक्तीनी हना, लेंशा लीशो फल मसेक्कीन। मेको लीशो फल अर्को रागी डा मुर, रोम रोइक्च नु वोंइश बेक्शो मीश मुर आन कली बाक्नीम।  
 22 गेपुकी इजीप्त रागीम वाइलीम वाइल दुम्शो, मिम्तीन। मोपतीके गो इन कली मोदेशो पचा, दे अरेता।

## 25

तुप्तीक सजाइ



1 मिनू मोसामी “वोंडश मुर निक्शी जिम्ताक्स हना, मुददा कोमुइनीस। मिनू निसाफ पाइबमी का कली रिम्शो नु का कली मरिम्शो देब। प्रस्थान २३:७

2 मिनू मरिम्शो पाइब का तुप्चा सजाइ पुंडसाक्व हना, मेको निसाफ पाइब आ डोंइतीन मेको कली खोलशा, मेको आ पाप गिश खेयप तुप्चा डा बाक्मे, मिश खेयप मेको कली तुप्चा माल्नीम।

3 मेकोमी ४० खेयप सम्म तुप्चा दुम्ब। मेको क्येडा शुश तुप्पाइक्व हना, इन लोकब इन डोंइती मुने दोक्ब। २कोरिन्थी ११:२४

बी ब्यफ आ पर्वम अरेशो

4 दांड पशो ब्यफ कली फुडला पाइक्चा मदुम्ब। १कोरिन्थी ९:९; १तिमोथी ५:१८

खिं डा शोंप आ पर्वम अरेशो

5 मिनू लोकब निक्शी काथा बाक्ताक्स हना, का तौ मथिथु, बेक्त हना, मेको आ मीशेम अर्को खिं डा मुर नु ग्युबे पचा मदुम्ब। बेक्शो मुर आ लोकबमी मेको मीश मुर कली ग्युबे पचा माल्ब।

6 मिनू मेको आ डोंइती जरमेशो तौ कली मेको बेक्शो आ नें वोइक्चा माल्नीम। मिनू मोपा आ नें इस्राएल रे मक्याम्सीब।

7 तन्न आ रिउम आ भोग्यु वोइक्चा मबिस्साक्व हना, मेको मीश मुरुमी सहर डा टेयब लाप्चोम बाक्ब खाल्पा आन नेक्था लशा ‘आं रिउम आ लोकब आ नें इस्राएलम वोइक्ने मबिस्से। मेकोमी आ पचा माल्शो गेय मपावो’ देंचा माल्ब।

8 मिनू मेको सहर डा खाल्पापुकीमी मेको कली ब्रेशा, मेको नु लोत्र पचा माल्नीम। मिनू मेकोमी ‘गो एको कली मचाक्नुड’ दे आ थुं मलेत्ताक्व हना,

9 आ भोग्युम सहर डा खाल्पा आन डोंइती मेको आ जुत्ता पुइश्शा आ कुलम तोक्चा माल्ब। मिनू मेको मीश मुरुम ‘सुम आ लोकब आ खिं डा मुर सेल्चा मदाक्बा, मेको कली आं पाइक्चा माल्ब’ दे लोत्र पचा माल्ब।

10 मिनू इस्राएलमी मेको आ खिं डा मुर आन कली ‘जुत्ता पुइसीशो मुर’ दे नें वोइक्चा माल्नीम।

जीब आस कली हेंथे वारच पशो

11 मिनू वोंडश मुर निक्शी राम्शी पाम्सेनु, का आ मीश जाक्शा, आ वोंडश कली प्रोंइचा, दे अर्को आ खुइश्शो थोत्रक ग्याइक्ताक्व हना,

12 गेपुकीमी मेको कली शिशी मपाइक्थु, आ गुड खोइक्चा माल्ब।

पुक्तीक नु नाक्तीकेम जोल मपने

13 मिनू इन पुक्तीक नाक्तीक टेयब नु आइक्च बाक्चा मदुम्ब। लेवी १९:३५-३६; इजीकीएल ४५:१०; आमोस ८:५; मीका ६:११

14 इन खिंमी यो निक्शी खाल डा पुक्तीके एफाह मदुम्ब। एफाह का २२ लिटर रिक्ब पुक्तीके बाक्ब।

15 तन्न इन खिंमी ठीक नाक्तीक नु ठीक पुक्तीक बाक्चा माल्नीम। मो पाइतीनी हना, परमप्रभु यावे, इन परमप्रभुमी गेशो रागीम शुश नाक्त ब्रोंइनीनी।

16 मारदे हना मरिम्शो पुक्बपुकी, परमप्रभु यावे, इन परमप्रभु आ डोंइती ग्रांया दित्वा डा बाक्नीम।

अमालेकी आन नें क्याम्दीन

17 मिनू गेपुकी इजीप्त रे पिनीनु, अमालेक डा मुरपुकीमी इन कली लॉम मार पामे मेको मप्रेंदीन। प्रस्थान १७:८-१६

18 मेकोपुकीमी इन कली लडाइ तोशा, गेपुकी लॉम गाक्शो रे दनीनु नोले गाक्ब नेल्ल आन कली साइश्शो बाक्तेक्म। मेकोपुकी परमप्रभु क्येडा महिंम।

19 मोपतीके परमप्रभु यावे, इन परमप्रभुमी इन कली योत्रशा गेशो इन के सेल्चा चिक्शो रागीम इन जोरी सत्रु नु लडाइ पशा, नाइक्साक्नी हना, अमालेकी आन नें रागी रे क्याम्चा माल्नीनी। मेको मप्रेंदीन” देत। १सामुएल १५:२-३

## 26

डोंइती मीशो अन्न चढेतीक

1 मिनू मोसामी “परमप्रभु यावे, इन परमप्रभुमी इन कली गेशो रागी जाक्दीश्शा, इन के सेल्शा, मेक बाक्नीनु,

2 परमप्रभु यावे, इन परमप्रभुमी इन कली गेशो रागी डा डोंइती मीशो मारेइ मारेइ डालो काम कुर पा परमप्रभु यावे, इन परमप्रभु आ योत्रशो बाक्तीकेम लतीन। प्रस्थान २३:१९; लेवी २:१४

3 मिनू गे मेना गेय पाइब चढेब आन बाक्तीक लचा माल्नीनी। मिनू मेको कली गो परमप्रभु यावे, इन परमप्रभु आ डोंइती ‘परमप्रभु यावेमी आंइ किकी पिपी नु कसम जशा गेनुड, देंशो रागीम गो मुलाक्ती जाक्ती’ देंचा माल्नीनी।

4 मिनू मेको चढेबमी मेको डालो इन गुइ रे ताक्शा, परमप्रभु यावे, इन परमप्रभु कली चढेतीक आ डोंइती वोइक्चा माल्ब।

5 मिनू गेपुकीमी परमप्रभु यावे, इन परमप्रभु आ डोंइती ‘आं किकी पिपी हिरब अरामी बाक्तेक्म। मेको इजीप्त रागीम अर्को रागी डा मुर दुश्शा बाक्शो बाक्त। डोंइती मेको शुश मुर मबाक्म। नोले शोशा बोशा शुश नु बोल्यो टेयब रागी डा मुर दुत्तेक्म। ब्यवस्था ६:२०-२५; यहोसु २४:२-१३; भजन संग्रह ७८:-; भजन संग्रह १०५:-; भजन संग्रह १३६:-

6 मिनू इजीप्तीपुकीम आंइ कली मरिम्शो पा दिप्शा, आंइ कली शुश गेय पपाइक्तेक्म।

7 मिनू गोपुकीमी परमप्रभु यावे, इं किकी पिप आन परमप्रभु कली पुंडतक। मिनू मेकोमी आंइ पुंडशो नेंशा, आंइ श्येत तशा नु दोपा आंइ कली दिप्शो बाक्मा, मेको तात्नु।

8 मिनू परमप्रभु यावेमी शुश सक्ति पाइशशो ठेयब बोल पतीकेमी हिंचा डा चिन्ड नु छक लाक्का डा गेय कोइशा, आंइ कली इजीन्त रे गुंइशा एक चाक्तु।

9 मेकोमी एंकेर चाक्शा, एको रागी आंइ कली गेपुतु। मिनू एको रागीम दूध नु खुदो शुश बाक्त।

10 मिनू परमप्रभु यावे, आं कली गेशो रागी डा डोंइती डा मीशो मारेइ मारेइ इन बाक्तीक चाक्ता' देंचा माल्तीनी। मिनू मेको नेल्ल परमप्रभु यावे, इन परमप्रभु आ डोंइती वोइशशा, मेको परमप्रभु यावे, इन परमप्रभु आ डोंइती बाष्पा ठेयब सेल्चा माल्तीनी।

11 मिनू गे परमप्रभु यावे, इन परमप्रभुमी इन कली नु इन खिं डा मुर आन कली शुश गेशो तशा, लेवीपुकी नु गेपुकी नु बाक्ब अर्को रागी डा मुरपुकी ग्येरसीचा माल्तीनी। ब्यवस्था १६:११-१४

पुडग आन कली गेतीक

12 मिनू गेपुकीमी बर्स सां सांमी इन बाली नाली डा मारेइ मारेइ रे इन सहरम १० भाग डा भाग का तिल्शा वोइक्का माल्तीनी। मेको इन सहर डा लेवी आ थर डा मुर, अर्को रागी डा मुर, रोम रोइक्च नु वोंइश बेक्शो मीश मुर आन कली गारचा डा जचा थोत्रक बाक्ब। ब्यवस्था १४:२७-२९

13 मिनू गेपुकीमी परमप्रभु यावे, इन परमप्रभु आ डोंइती 'गो इन भाग आं खिं रे तिल्शा, इन शेंशो खोदेशो पा लेवी आ थर डा मुर, अर्को रागी डा मुर, रोम रोइक्च नु वोंइश बेक्शो मीश मुर आन कली गेता। गो इन शेंशो नेल्ल पाता। गो मेको काइ मप्रेदु' देंचा माल्तीनी।

14 रेंका पडानु, मेको रे मारेइ मजड। गो यांया दिशो बाक्डानु, मेको रे मारेइ मयुंइदु। मिनू बेक्शो मुर आन कली यो मेकेर रे मारेइ मगेशो बाक्ती। गो परमप्रभु यावे, आं परमप्रभु आ देशो टिशा, इन अरेशो नेल्ल खाप्शो बाक्ती। गन्ती १९:१४-१५; इजीकीएल २४:१७,२२; होसे ९:४

15 इन स्वर्ग डा बाक्तीके रे कोवशा, इन मुर, इस्राएली, आंइ कली आसीक गेने। मिनू आंइ किकी पिपी नु कसम जशा गेशो शुश दूध नु खुदो बाक्शो रागी कली यो आसीक गेने" दे परमप्रभु कली लोत्र पचा माल्ब।

परमप्रभु आ कबल डा लोत्र

16 मिनू मोसामी "मुलाक्त परमप्रभु यावे, इन परमप्रभुमी इन कली मेको फुल्लुम मुशा ब्रेक्शो लोत्र नु निसाफ पतीक लोत्र पचा माल्तीनी। गेपुकीमी मेको कली इन थुंम वोइशशा, इन थुं नु सोंक्त नेल्लेमी टिने।

17 गेपुकीमी मुलाक्ती परमप्रभु यावे कली 'गे आंइ परमप्रभु बाक्नीनी। गो इन लां खोइक्नीकी। मिनू इन फुल्लुम मुशा ब्रेक्शो लोत्र, इन शेंशो नु इन निसाफ पतीके लोत्र पाइनीकी नु इन देशो टीनीकी' दे परमप्रभु कली लोत्र पाइतीनी।

18 मिनू मुलाक्ती परमप्रभु यावेमी इन कली 'गो इन कली आं दाक्शो मुर सेल्ला। आं शेंशो नेल्ल टिचा माल्तीनी।

19 गो आं सेल्लो रागी रागी आन दातेमी इन कली नेल्ल क्येडा ठेयब सेल्लुड। मान पाइक्का पुंइसीशा, इन नें ठेयब सेल्चा नु शुश दारशो सेल्लुड। मिनू परमप्रभु यावे, इन परमप्रभु आ मुरपुकी दुम्चा माल्तीनी" दे परमप्रभु यावेमी इन कली देशो बाक्त" देंत। ब्यवस्था १८:१

## 27

मिम्तीक फुल्लु थारशो

1 मिनू मोसा नु इस्राएल डा खाल्पापुकीमी मुर आन कली "मुलाक्ती इन कली देशो शेंशो लोत्र नेल्ल टिशा पने।

2 परमप्रभु यावे, इन परमप्रभुमी इन कली गेशो यर्दन आइक्ची हांबु डा रागीमी शोक्सीनी नोले डा नाक्तीमी ठेयब फुल्लु थारशा, बुलु ब्रुइक्तीन।

3 मिनू शोक्सीनी नोले गेपुकीमी मेको अरेशो लोत्र नेल्ले मेको फुल्लु तार ब्रेक्का माल्तीनी। मो पाइतीनी हना, परमप्रभु यावे, इन परमप्रभुमी इन कली गेशो रागी ओत्रचा ताइनीनी। परमप्रभु यावे, इन किकी पिपी आन परमप्रभुमी इन कली देशो खोदेशो पा इन कली दूध नु खुदो शुश बाक्शो रागी गेब।

4 यर्दन आइक्ची हांबु जाक्दीनी नोले गो इन कली अरेशो, मेको फुल्लुपुकी एबाल डांडाम थारशा बुलु ब्रुइक्तीन।

5 मिनू मेकेर रे गेपुकीम परमप्रभु यावे, इन परमप्रभु कली फुल्लु के चढेतीक का सेलीन। मेको सेल्लीनु, मेको फुल्लु आन कली फलम के यामी काइ मथिचा। प्रस्थान २०:२५

6 गेपुकीमी परमप्रभु यावे, इन परमप्रभु कली चढेतीक सेल्लीनु, मप्रोल्लो फुल्लु के सेलीन। मिनू मेको तारी परमप्रभु यावे, इन परमप्रभु कली चोशा चढेतीक मेकेर चढेचा माल्तीनी।

7 मिनू गेपुकीमी दुशा बाक्का आ परबम चढेतीक चढेचा माल्तीनी। मिनू गेपुकीमी परमप्रभु यावे, इन परमप्रभु आ डोंइती मेको जशा ब्वशा ग्येरसीने। ब्यवस्था १२:७

8 मिनू मेको फुल्लु आन तारी एको अरेशो लोत्र नेल्ल मुशा, रिम्शो पा ब्रेक्का माल्तीनी" देंत।

परमप्रभुम मुर नु पशो कबल

9 मिनू मोसा नु चढेब, लेवीपुकीमी इस्राएली नेल्ल आन कली "इस्राएलीपुकी ब्वालेइ पा, नेनीने। मुलाक्ती गेपुकी परमप्रभु यावे, इन परमप्रभु आ मुर दुम्तीनी। ब्यवस्था २६:१८-१९

10 मोपतीके परमप्रभु यावे, इन परमप्रभु आ देशो टिने। मुलाक्ती गो इन कली माइशशो आ शेंशो लोत्र नु आ फुल्लुम मुशा ब्रेक्शो लोत्र नेल्ल टिने" देंतेक्म।

सराप नु आसीक राइब

- 11 मिनू मेको नाक्तीम मोसामी मुर आन कली
- 12 “गेपुकी यर्दन आइक्वी हांबु शोक्सीने थुन्नी नोले, सु सुमी मुर आन कली आसीक गेचा कली गेरीजीम माइश्शो डांडाम राप्शा बाक्चा माल्नीम देशा हना, सिमियोन, लेवी, यहूदा, इस्साकार, योसेफ नु बेन्यामीन राप्शा बाक्चा माल्नीम। व्यवस्था ११:२९
- 13 मिनू सु सुमी मुर आन कली सराप पचा कली एबाल माइश्शो डांडाम राप्शा बाक्चा माल्नीम देशा हना, रूबेन, गाद, आशेर, जबूलून, दान नु नाप्ताली राप्शा बाक्चा माल्नीम।
- 14 मिनू लेवीपुकीमी नेल्ल इस्त्राएल डा मुर आन कली ठेयब सेंदामी लोत्र पचा माल्नीम” दैत।
- सराप रचा आ पर्वम शेंशो
- 15 मिनू मेकोपुकीमी “सु मुरुमी मुशा, यपाइश्शा मूर्ति सेल्व, मेको परमप्रभु यावे कली ग्रंथा दित्चा डा बाक्ब। मिनू मेको जोक्ब मुरुमी आ सेल्लो मूर्ति कली खुइश्शोमी वोइक्ब, मेको मुर सराप राइब” दैतेक्म। मिनू मुर नेल्लेमी “आमेन, मोदेशो दुम्ल” दैचा माल्नीम। प्रस्थान २०:४,२३
- 16 मिनू “सु मुरुमी आम आम आफ कली मान मपाइब, मेको मुर सराप राइब” दैतेक्म। मिनू मुर नेल्लेमी “आमेन, मोदेशो दुम्ल” दैचा माल्नीम। प्रस्थान २१:१७
- 17 मिनू “सु मुरुमी आ नेक्था डा मुर आ रू डा सांद याक्ब, मेको मुर सराप राइब” दैतेक्म। मिनू मुर नेल्लेमी “आमेन, मोदेशो दुम्ल” दैचा माल्नीम। व्यवस्था १९:१४
- 18 मिनू “सु मुरुमी मिक्च मताइब कली हेंथे लां कोंइब, मेको मुर सराप राइब” दैतेक्म। मिनू मुर नेल्लेमी “आमेन, मोदेशो दुम्ल” दैचा माल्नीम। लेवी १९:१४
- 19 मिनू “सु मुरुमी अर्को रागी डा मुर, रोम रोइक्च नु वोंइश बेक्शो मीश मुर आन कली ठीक निसाफ मपाइबा, मेको मुर सराप राइब” दैतेक्म। मिनू मुर नेल्लेमी “आमेन, मोदेशो दुम्ल” दैचा माल्नीम। प्रस्थान २२:२०-२१
- 20 मिनू “सु मुर आ आफ आ मीश नु इप्बा, मेको मुर सराप राइब। मारदे हना मेकोमी आ आफ कली मुने तोक्ब” दैतेक्म। मिनू मुर नेल्लेमी “आमेन, मोदेशो दुम्ल” दैचा माल्नीम। लेवी १८:९
- 21 मिनू “सु मुरुमी बी ब्यफ, क्यारश भेडा नु इप्ब, मेको मुर सराप राइब” दैतेक्म। मिनू मुर नेल्लेमी “आमेन, मोदेशो दुम्ल” दैचा माल्नीम। लेवी २२:१८
- 22 मिनू “सु मुर आ समी नु इप्ब, मेको आ आफ आ तमी बाक्त हना यो आ आम आ तमी बाक्त हना यो, सराप राइब” दैतेक्म। मिनू मुर नेल्लेमी “आमेन, मोदेशो दुम्ल” दैचा माल्नीम। लेवी १८:९,११
- 23 मिनू “सु मुर आ शिमी नु इप्ब, मेको मुर सराप राइब” दैतेक्म। मिनू मुर नेल्लेमी “आमेन, मोदेशो दुम्ल” दैचा माल्नीम। लेवी १८:१७
- 24 मिनू “सु मुरुमी बाप्शा, मुर कली साइक्ब, मेको मुर सराप राइब” दैतेक्म। मिनू मुर नेल्लेमी “आमेन, मोदेशो दुम्ल” दैचा माल्नीम। प्रस्थान २१:१२; गन्ती ३५:२०
- 25 मिनू “सु मुरुमी क्येट ताक्शा, दोस मतशो मुर कली साइक्ब, मेको मुर सराप राइब” दैतेक्म। मिनू मुर नेल्लेमी “आमेन, मोदेशो दुम्ल” दैचा माल्नीम। प्रस्थान २३:८
- 26 मिनू “सु मुरुमी एको अंशो लोत्र नेल्ल खाप्शा मपाइब, मेको मुर सराप राइब” दैतेक्म। मिनू मुर नेल्लेमी “आमेन, मोदेशो दुम्ल” दैचा माल्नीम। गलाती ३:१०

## 28

### टीबपुकी आसीक राइनीम

- 1 मिनू मोसामी “मुलाक्त गो इन कली माइश्शो परमप्रभु यावे, इन परमप्रभु आ देशो नेल्ल होस पा टिशा, आ शेंशो पाइतीनी हना, परमप्रभु यावे, इन परमप्रभुमी इन कली नेल्ल रागी रागी डा मुर आन क्येडा ठेयब सेल्व। व्यवस्था २६:१९
- 2 गे परमप्रभु यावे, इन परमप्रभु आ देशो टिशा पाइतीनी हना, गेपुकी एको आसीक नेल्ल राइनीनी।
- 3 गेपुकी सहरम बाक्शा, आसीक राइनीनी। मिनू रूम बाक्शा, आसीक राइनीनी। उत्पत्ती ४९:२५-२६
- 4 इन आलपुकी, इन बाली नाली, इन बी ब्यफ नु इन क्यारश भेडा नु गोट नेल्ल आसीक रशा सोशा बोशा लाइनीमी।
- 5 इन फस वोइक्तीक डालो नु फस नित्तीक बोस आसीक राइनीम।
- 6 गेपुकी खिंडगा ओत्रनीनु, आसीक राइनीनी। मिनू लाडगा ग्रीनीनु, आसीक राइनीनी। भजन संग्रह १२१:८
- 7 मिनू परमप्रभु यावेमी इन कली लडाइ पाइब इन जोरी सत्रु आन कली इन डोंइती बुपाइक्ब। मेको लां कामी इन कली लडाइ पथ जाक्नीम। मिनू बुशा, शाउ शिउ ब्रशा ७ ओटा लां रे प्रोक्नीम।
- 8 मिनू परमप्रभु यावेमी इन भकारीमी आसीक गेब। मिनू गे मार मार पाइनीनी रिम्शो दुम्चा कली आसीक गेब। मिनू परमप्रभु यावे, इन परमप्रभुमी इन कली गेशो रागीमी इन कली आसीक गेब। लेवी २५:२१
- 9 मिनू गेपुकीमी परमप्रभु यावे, इन परमप्रभु आ शेंशो लोत्र टिशा पाइतीनी हना नु आ लांमी गाक्तीनी हना, आ कसम जशो खोदेशो पा इन कली आम मुर सेल्लो वोइक्ब। प्रस्थान १९:५-६
- 10 मिनू ‘गेपुकी परमप्रभु यावे आ नें पाइश्शो मुर बाक्नीनी’ दे जात जात डा मुर नेल्लेम तुइश्शा, इन कली तशा, शुश हिनीम।
- 11 मिनू परमप्रभु यावेमी इन किकी पिपी आन कली गेनुइमी देशो रागीमी गेपुकी शुश आल थीब दुम्नीनी। इन बी ब्यफ, क्यारश भेडा आन चाइक्ब शुश दुम्नीम, इन बाली नाली नेल्ल सोशा बोशा लाइनीनी। इन रागी रिम्शो दुम्ब।

12 मिनू परमप्रभु यावेमी नेल्ल सरीड डा शोंप वोडक्तीक रोकशा, इन रू कली माल्ची ना रेउ यिपाइक्ब। मिनू गे मार मार पाइनीनी, मेको कली आसीक गेब। मिनू गेपुकीमी शुश रागी रागी डा मुर आन कली जेर गेनीनी, गे चहिं सुड आन जेर मताक्नीनी। ब्यवस्था १५:६

13 मिनू मुलाक्ती इन कली माइश्शो परमप्रभु यावे, इन परमप्रभु आ शेंशो होस पा टिशा पाइतीनी हना, परमप्रभु यावेमी इन कली पिया खोदेशो पा, मुर आन कली अरेब सेल्ब। मीलु खोदेशो पा अरु आन कली खोइक्ब ममाइ। मिनू गे शुश टेयब दुम्शा लाइक्नीनी।

14 मिनू आं देशो लोव नेल्ल पाइतीनी हना, आइदी आइक्था पा अरु देवी देवता आन हेंथे लां मलाइतीनी हना, मोदेशो आसीक राइब दुम्नीनी। ब्यवस्था ५:२९-३२

#### मटीबपुकी सराप राइनीम

15 मिनू गे परमप्रभु यावे, इन परमप्रभु आ देशो मटीब दुम्तीनी हना, मुलाक्ती गो इन कली माइश्शो आ शेंशो नु आ फुल्लुम मुशा ब्रेक्शो लोव नेल्ल होस पा मपाइतीनी हना, एको सराप चीले नेल्ल राइनीनी। मिनू गेपुकी सराप रशो मुर दुम्नीनी। दानीएल ९:११

16 गेपुकी सहरम बाक्शा, सराप राइनीनी। मिनू रूम बाक्शा, सराप राइनीनी।

17 इन फस वोइक्तीस डालो नु इन फस निल्तीक बोस सराप राइनीनी।

18 इन आल, इन बाली नाली, इन बी ब्यफ, इन क्यारश भेडा गोठ सराप राइनीनी।

19 गेपुकी खिंडगा ओव्रनीनु, सराप राइनीनी, मिनू लाडगा ग्रीनीनु, सराप राइनीनी।

20 मिनू परमप्रभु यावे कली टिचा प्रोंइशा बाक्तीनी हना, इन मार मार पतीकेमी इन थुं ग्यशा सराप राइनीनी। इन मरिश्शो पतीके गे रीब पा क्याम्चा पुंडसीनीनी।

21 मिनू परमप्रभु यावेमी इन कली गेशो नु इन के सेल्शो रागी रे गुंड्या सम्म इन कली मुर बेक्तीक रोड पपाइक्ब।

22 मिनू परमप्रभु यावेमी इन कली रां सोक्तीक रोड, जोरो, शुश गार मुडक्तीके, रेउ मयितीके, नेल्ल बाली नाली सोवतीके बुंखी डाइक्तीके रोड सोइक्ब।

23 मिनू इन तारी बाक्शो सरीड कांसा खोदेशो दुम्ब। मिनू इन रू डा खप फलम खोदेशो दुम्ब। ब्यवस्था ११:१७

24 मिनू परमप्रभु यावेमी इन रागीम रेउ कली फुरक सेल्ब। मिनू गेपुकी खतम मटुम्नी सम्म सरीड रे मोदेशो पा फुरक इन तारी यिना यिन बाक्ब।

25 मिनू परमप्रभु यावेमी इन कली इन जोरी सत्रु आन डोंइती बुपाइक्ब। गेपुकी मेकोपुकी नु लडाइ पथ लां कामी लाइनीनी, मिनू बुशा शाउ शिउ ब्रशा ७ ओटा लां रे प्रोक्या माल्नीनी। मिनू राज्य राज्य डा मुर नेल्ल आन डोंइती ग्रंथा दिशो दुम्नीनी।

26 मिनू गेपुकी बेक्नीनु, चिक्बपुकी नु ब्वाकी डा जन्तुपुकीमी इन श्ये ब्वाइनीम। मिनू मेको आन कली खेरब 'हा हाइ' दे ग्रीब सुड मबाक्नीम।

27 मिनू परमप्रभु यावेमी इन कली इजीप्त रागी डा कान मुपाइक्ब, साने मचाप्चा डा पा गार नु लुतो पपाइक्ब। प्रस्थान ९:९

28 मिनू परमप्रभु यावेमी इन थुं ग्यपाइक्ब, मिक्च मतपाइक्ब नु निप्स ग्यशो दुम्पाइक्ब।

29 मिनू मिक्च मताइबमी एर ओंथ सुल्ना सुल्न गाक्शो खोदेशो पा गेपुकी नाक्तीन सुल्शा गाक्नीनी। मिनू गेपुकीमी मार पाइतीनी हना यो, रिश्शो मदुम्नीनी। मिनू गेपुकी नाक्त कित कित तुप्चा नु रोइक्चा पुंडसीशा बाक्नीनी। सुइमी इन कली वारच मपाइब। यसेया ५९:१०

30 गेपुकी मीश आल का कली पुंडनीनी, तन्न अरु वोंइश मरुम मेको नु इप्ब। मिनू खिं का सेल्नीनी, तन्न आंमान बाक्चा मताइनीनी। मिनू गेपुकीम अडगुर रू का खुम्नीनी, तन्न आंमान ब्वचा मताइनीनी।

31 मिनू इन डोंइती इन बी ब्यफ क्योरनीम, तन्न आ श्ये ब्वचा मताइनीनी। इन गथा इन कली तचा डा पा रोइक्नीम, मलेत्लीम। इन क्यारश भेडा इन जोरी सत्रु आन कली गेनीम। मिनू इन कली वारच पाइब सुड मबाक्नीम।

32 इन तमी तौपुकी अर्को रागी डा मुर आन कली गेनीम। मिनू गे मेको तशा, नाक्त कित कित मेको आन लां कोव्रशा बाक्नीनी, तन्न मारेड पने मचाप्नीनी।

33 इन मतुइश्शो मुरपुकीमी इन रू डा खुम्शो जाइनीम। मिनू गेपुकी गेना हना यो श्येत जचा नु दिप्चा पुंडसीनीनी। न्यायाधीस ६:३

34 मिनू इन मिक्चीम तशोपुकीम इन निप्स ग्यपाइक्ब।

35 मिनू परमप्रभु यावेमी इन पोकच नु खोइलीम गेनायो मसाब गार मुपाइक्ब। मिनू मोदेशो गारम इन पिया रे दिम्ला सम्म रां नेल्ल सुम्पाइक्ब। मिनू सुइम इन कली सापाइक्ने मचाप्ब।

36 मिनू परमप्रभु यावेमी इन कली नु इन योव्रशो पिप कली, गेपुकी नु इन किकी पिपी यो मतुइश्शो जात डा मुर आन रागी कोइब। मिनू गेपुकीमी मेकेर रे शी नु फुल्लु के देवी देवता आन कली गेय पाइनीनी। ब्यवस्था ४:२८

37 मिनू परमप्रभु यावेमी इन कली खेरशा जात जात डा मुर आन दातेमी इन पर्वम शुक्शी पा, देतीके सेल्शा, शुक्शी पचा पुंडसीनीनी। १राजा ९:७; येरमीया २४:९

38 गेपुकीमी शुश वांचेर शोक्नीनी, तन्न इक्का ला रुप्नीनी। मारदे हना मालेपुकीमी मेको नेल्ल नेक्नीम। मीका ६:१५

39 गेपुकीमी अडगुर रू खुम्नीनी, तन्न बुस्स जोल्शा अडगुर खुप्चा नु अडगुर शांब तूचा मताइनीनी।

40 गे इन बाक्तीक तेइ तेइ तेल रवा बाक्नीम, तन्न खेक्चा कली तेल मताइनीनी। मारदे हना मेको फल हेम्शा दोक्नीम।

- 41 गे तमी तौ थीनीनी, तन्न मेकोपुकी इन के मदुम्नीम। मेकोपुकी ग्याइशशा अर्को रागी लाइक्का पुंडसीनीम।
- 42 इन रवा नु बाली नाली नेल्ले मालेपुकीमी खतम सेल्लनीम।
- 43 मिनु गेपुकी नु बाक्ब अर्को रागी डा मुर क्येट थीब दुम्शा, डोंइती क्येडा ठेयब दुम्नीम, तन्न गेपुकी दोक्ना दोक्न लाइनीनी।
- 44 मेकोपुकीमी इन कली जेर गेनीम। तन्न गेपुकीमी मेको आन कली जेर गेने मचाप्नीनी। मेकोपुकी पिया खोदेशो दुम्नीम, गेपुकी चहिं मीलु खोदेशो दुम्नीनी। ब्यवस्था २८:१२-१३
- 45 मिनु मेको सराप चीले नेल्ल गे मबेक्नी सम्म राइनीनी। मारदे हना गेपुकीमी परमप्रभु यावे, इन परमप्रभु आ शेंशो लोव्र नु आ फुल्लुम मुशा ब्रेक्शो लोव्र नेल्ल होस पा मटिनी।
- 46 मिनु मेको सराप इन कली नु इन चच युइ आन कली छक लाक्का डा नु हिंचा डा बाक्नीमी।
- 47 मारदे हना गेपुकी मारेइ मारेइमी गाप्शो बाक्नीनु, गे परमप्रभु यावे, इन परमप्रभु कली ग्येरसीशा नेल्ल थुंम टिशा गेय मपनी।
- 48 मोपतीके परमप्रभु यावेमी इन कली जोरी सत्रु सोइक्ब। गेपुकी शोव्रलु बेक्शा नु तूत दाक्ना दाक्न, फेक्का मतथु नु मारेइ मगाप्शो दुम्शा, मेको आन गेय पचा माल्लीनी। मिनु मेकोमी इन कली मक्याम्दमे सम्म फलम के हलो इन तारी वोइक्नीम। येरमीया २८:१३-१४
- 49 मिनु परमप्रभु यावेमी नेल्ल क्येडा डोन बाक्शो रागी रे मरुप्शो लोव्र पाइब मुरपुकी बेरशो ककाकुली खोदेशो पा इन तारी जुक्पाइक्ब। हबकुक् १:८; यसैया ३३:१९; येरमीया ५:१५
- 50 मेको मुरपुकी काइ शिशी मपाइशशो बाक्नीम। मेकोपुकीमी खाल्पा आन कली मान मपाइनीम। मिनु आल आन कली यो काइ शिशी मकोइनीम।
- 51 मिनु गेपुकी खतम मदुम्नी सम्म मेकोपुकीमी इन थुल्शो बी ब्यफ, क्यारश भेडा नु बाली नाली जाइनीम। मिनु मेकोपुकीमी इन अन्न, अडगुर शांबु, तेल, बी ब्यफ आन चाइक्ब, क्यारश भेडा आन पाठा का यो मगेनीम।
- 52 मिनु मेकोपुकीमी इन सहर नेल्ल आन कली पुम्नीम। मिनु गेपुकीमी 'सुइम आंइ कली मफुइब' दे इन बोल्यो नु ग्येत्थ लाइशशो ठेयब गारो कली थमा सुइक्तीनी, तन्न मेकोपुकीमी परमप्रभु यावे, इन परमप्रभुमी इन कली गेशो रागी डा सहर नेल्ल पुम्शा, गारो प्रेल्लीम।
- 53 मिनु मोदेशो पा इन जोरी सत्रुपुकीमी इन कली पुम्दमेनु, गे श्येत जशा, परमप्रभु यावे, इन परमप्रभुमी इन कली गेशो तमी तौ आन श्ये ब्वाइनीनी। लेवी २६:२९; २राजा ६:२८-२९; येरमीया १९:९; बिलाप २:२०; बिलाप ४:१०; इजीकीएल ५:१०
- 54 मिनु गेपुकी इन दाते डा नेल्ल क्येडा रिम्शो थुं पाइशशो नु ठीक पाइब वोंइश मुरुमी यो आ लोक्ब, आ दाक्शो मीश नु आ लीशो आ तमी तौ आन कली शिशी मपथु, जचा थोव्रक रोइक्ब।
- 55 मिनु मेकोमी मेको आन कली आ ब्वाच माल्लो आ आल आ श्ये सुइ आन कली मगेब। मारदे हना जोरी सत्रुपुकीमी सहर पुम्शा जचा थोव्रक मारेइ मबाक्ब।
- 56 मिनु इन दाते डा नेल्ल आन क्येडा शकल मकल पाइशशो नु नेल्ल क्येडा सुख जशो, आ खोइलीमी खप यो थेक्ने मबिप्ब मीश मुरुम आ दाक्शो वोंइश नु आ तमी तौ कली गेहे पा कोव्रब।
- 57 मारदे गेहे पा कोव्रब देशा हना, आ नक थिशो आल नु आल आ उम्रो आ पर्वम गेहे पा कोव्रब। मिनु जोरी सत्रुम सहर पुम्तीके श्येत जशा, मेको मीश मुरुम खुइशशोमी आ उम्रो 'आंमा ब्वाइनुड' दे मिम्ब।
- 58 मिनु गेपुकीमी एको किताबमी ब्रेक्शो अरेशो लोव्र नेल्ले टिशा मपाइतीनी हना, मेको ठेयब नु हिंचा डा परमप्रभु यावे, इन परमप्रभु आ नें कली मान पा महितीनी हना,
- 59 परमप्रभु यावेमी इन कली नु इन चच युइ आन कली गेचा डा श्येत डोंइती मतशो खोदेशो पा ठेयब फाल्ने मचाप्चा श्येत गेब। मेको ठेयब श्येत नु ठेयब नु मसाचा डा रोइ पपाइक्ब।
- 60 मिनु परमप्रभु यावेमी हिंचा डा इजीप्त रागी डा मुर बेक्तीक रोइ इन कली पपाइक्ब। मिनु मेको बेक्तीक डा रोइ इन दातेमी याक्सीब। ब्यवस्था २८:२७
- 61 मिनु मेको अरेशो लोव्र डा किताबम मब्रेक्शो रोइ नु बेक्तीक रोइ यो इन कली पपाइक्ब। परमप्रभु यावेमी गेपुकी खतम मदुम्नी सम्म मोदेशो पपाइक्ब।
- 62 मिनु गेपुकी डोंइती सरीड डा सोरुल खोदेशो पा शुश बाक्तीनी। मिनु नोले इक्का ला लीनीनी। मारदे हना गेपुकीमी परमप्रभु यावे, इन परमप्रभु आ देशो मटिनी।
- 63 मिनु परमप्रभु यावेमी दोपा इन कली रिम्शो पचा नु शुश सेल्चा कली ग्येरसीशो बाक्मे, मोपा परमप्रभु यावेमी इन कली खतम सेल्चा नु क्याम्चा कली ग्येरसीशो बाक्ब। मिनु मेकोमी गे ओव्रचा नु इन के सेल्चा चिक्शो रागी रे इन कली तुल्ब। हितोपदेस १:२६
- 64 मिनु परमप्रभु यावेमी इन कली जात जात डा मुर आन दातेमी फ्राइब। मिनु गेपुकीमी मेकेर डा इन किकी पिपी नु इन मतुइशशो शी नु फुल्लु के देवी देवता आन कली गेय पाइनीनी।
- 65 मेको रागी रागी डा मुर आन दातेमी गे नाइक्का मताइनीनी। इन कली गेना हना यो खेरनीमी। मिनु परमप्रभु यावेमी मेकेर इन कली हिंब थुं गेब। मिनु फाल्ने मचाप्ब नु थुं लुक्च लाइब मुर दुम्नीनी।
- 66 मिनु गेपुकी दीसा मार दुम्बा 'ब्रोंइनुडा, मब्रोंइनुडा' दे मारेइ मतुइक्थ, नाक्दो नाक्ती हिंशा बाक्का माल्लीनी।

67 मिनु सुनी कना गेपुकीमी 'नां रिक्शो हना, रिम्शो दुम वा' देनीनी। मिनु नां रिक्ची ना 'नां सोत्रशो हना, गिश रिम्शो दुम वा' देनीनी। मारदे हना मार मार ताइनीनी, गे शुश हिनीनी।

68 परमप्रभु यावेमी इन कली जहाजम इजीप्ट रागीम लेशशा सोइक्ब। गो मेको लां आ पर्वमी 'गेपुकीमी एको लां गेनायो लेशा लचा मदुम्ब' दे गो इन कली देती। मेकेर जाक्शा इन कली इन जोरी सत्रु आन कली वाइलीम वाइल सेल्चा कली लेयचा दाक्नीम, तन्न सुइम इन कली मग्याप्नीम" देत। ब्यवस्था १७:१६; होसे ८:१३

## 29

अर्ती गेशो नु हिंच कोइशो

1 मिनु हारेब डांडामी परमप्रभु यावेमी इस्त्राएली नु पशो कबल नु तेम्शा, मोआब रागीम मोसा कली इस्त्राएली आन कली तेम्चा डा लोत्र मार बाक्नीम देशा हना, ब्यवस्था ५:२

2 मोसामी इस्त्राएली नेल्ल आन कली ब्रेशशा "परमप्रभु यावेमी इजीप्टमी फाराओ नु मेको आ गेय पाइब नेल्ल नु आ रागी कली पशो गेपुकीमी नेल्ल तशो बाक्नीनी। प्रस्थान १९:४

3 गेपुकी मेको ठेयब नाक्तीके ताइतीनी। मिनु मेको ठेयब चिन्ड नु छक लाक्चा डा गेय यो ताइतीनी। ब्यवस्था ४:३४; ब्यवस्था ७:१९

4 तन्न मुल सम्म परमप्रभु यावेमी इन कली रुप्तीक थुं, कोत्रतीक मिक्च नु नेतीक नोफा मगेशो बाक्ब। ब्यवस्था ५:२६

5 मिनु गो इन कली ४० बर्स सम्म गोरशो रागीम लां कोइताक्नी। इन फेक्तीक मजे, जुता यो मजे। ब्यवस्था ८:४

6 गेपुकीमी शोब्ले मजनी, अडगुर शांबु नु रकसी यो तूचा मतनी, तन्न ब्रोंडतीनी। मिनु गो परमप्रभु यावे, इन परमप्रभु नड, दे गेपुकीमी रुप्तीनी।

7 मिनु गेपुकी एको रागीम जाक्नीनु, हेरबोन डा पिप सीहोन नु बाशान डा पिप ओग गोपुकी नु लडाइ पचा कली गुम्शा जाक्ताक्स। मिनु गो मेको आन कली फुइतय। गन्ती २१:२१-३५

8 मिनु गोपुकीमी मेको आन रागी ग्राशा, रूबेन आ थर, गाद आ थर नु मनस्से आ थर डा आधा मुर आन कली आन के सेल्चा कली रू गेशो। गन्ती ३२:-

9 मोपतीके एको कबल पशो लोत्र होस पा पने। मिनु मो पाइतीनी हना, गे मार मार पनी, मेको रिम्शो दुम्ब।

10 मिनु गे नेल्ल परमप्रभु यावे, इन परमप्रभु आ डोंइती राप्शो बाक्नीनी। इन थर थर डा ठेयब मुरपुकी, इन खाल्पापुकी, ससान पाइबपुकी नु इस्त्राएली नेल्ल,

11 इन आलपुकी नु इन मीशपुकी, अर्को रागी डा इन दातेमी बाक्शो मुरपुकी, शी चाक्ब नु ब्वाक्कु कुरब नेल्ल बाक्नीम। यहोसु ९:२७

12 मारदे नेल्ल बाक्शो बाक्तीनी देशा हना, परमप्रभु यावे, इन परमप्रभुमी गे नु कसम जशो कबल मुलाक्त परमप्रभु यावे, इन परमप्रभुमी गे नु पाइब।

13 दोपा परमप्रभु यावेमी इन किकी पिपी अब्राहाम, इसहाक नु याकूब नु कसम जशो बाक्मे, मोपान मुलाक्ती इन परमप्रभुमी इन कली आंम के मुर सेल्चा कली कबल पाप्तु।

14 मिनु गो मेको कसम जशो कबल परमप्रभु यावे, इ परमप्रभु आ डोंइती राप्शा बाक्ब इन कली ला ममाइ, ब्यवस्था ५:३; उत्पत्ती १७:७

15 तन्न सु सु मुलाक्त मबाक्तेकम हना, यो मेको कबल पाइनुड।

16 गो दोपा इजीप्ट रागीम बाक्चा, तुइक्नीनी। गोपुकी रागी रागीम गाक्शा, दोपा जाक्चा, दे यो तुइक्नीनी।

17 मिनु गे आन ग्रांरा दिल्चा डा शी, फुल्लु, सुन नु चांदी के देवी देवता आन कली यो तशो बाक्नीनी।

18 मिनु इन दाते रे सुइ बोइश मुर, मीश मुर, खिं डा मुर नु थर डा सुइ आन थुं परमप्रभु यावे, इ परमप्रभु रे नोले शोंइसीशा, मेको रागी रागी डा देवी देवता आन कली पूजा पचा दाक्ब बाक्नीम को? इन दातेमी मोदेशो ओशयेर पाइशशो शाक्श का बाक्बा को? ब्यवस्था ३२:३२; होसे १०:४; आमोस ६:१२; हिब्रू १२:१५

19 मिनु मोदेशो पाइब मुर मेको कसम डा लोत्र नेशा, आ थुंमी 'गो आंम मिम्तीके पशा बाक्ती हना यो, गो सराप मराइनुड। गो आसीक ताइब बाक्ती' दे मिम्ब। मोदेशो मिम्तीके नेल्ल आन कली खतम सेल्ल।

20 मिनु परमप्रभु यावेमी मोदेशो मुर आ पाप मक्चाम्ब। परमप्रभु यावे मेको कली तशा, आ गाइक्चा नु आ गेहे पतीके मी खोदेशो पा ब्राइब। मिनु मेको अरेशो लोत्र डा किताबम ब्रेक्शो सराप नेल्ल मेको मुर कली राइब। मिनु परमप्रभु यावेमी मेको आ नें रागी रे क्याम्ब। ब्यवस्था २८:१५-६८

21 मिनु परमप्रभु यावेमी मेको कली इस्त्राएली आन थर रे तिल्शा, मेको अरेशो किताबम ब्रेक्शो कबल डा सराप नेल्ल रपाइक्ब।

22 इन नोले जरमेशो पाला, इन नोले जाक्शो तमी तौ नु डोन रागी डा मुरपुकीमी मेको रागी डा श्येत नु परमप्रभु यावेमी मेको आन कली गेशो बेक्तीक डा रोड तशा

23 मेको रागी नेल्लेम मी ब्रशा गन्धक नु हिकसी बाक्ब। मारेइ मशोक्शो, काइ गिग मग्रूशो मारेइ मवाशो बाक्ब। मेको परमप्रभु यावेमी चुरशा गाइशशो सोदोम नु गोमोररा, अदमाह नु सेबोयीम खतम सेल्लशो रागी खोदेशो बाक्ब। उत्पत्ती १९:२४

24 मिनु रागी रागी डा मुर नेल्लेमी 'परमप्रभु यावेमी एको रागी कली मारदे ओदेशो सेला? एको आ पर्वम मारदे मोदेशो शुश चुरशा गाइक्ता?' दे हिल्लो पाइनीम।

25 मिनू मेकोपुकीमी 'मेको परमप्रभु यावे, आन किकी पिपी आन परमप्रभुमी मेको कली इजीप्त रे गुंडची ना पशो कबल प्रोडने थुम्शो बाक्तेकम।

26 मिनू मेकोपुकीमी आन मतुइश्शो नु परमप्रभुम मपचा देशो देवी देवता आन डोंडती बाप्शो बाक्तेकम।

27 मोपतीके परमप्रभु यावे एको रागी आ पर्वम शुश गाइक्ताकव। मिनू मेकोमी एको किताबम ब्रेक्शो सराप नेल्ल मेको रागी कली रपाइक्तु।

28 मिनू परमप्रभु यावेमी चुरशा, गाइश्शा, आ ठेयब गाइश्शोम मेको आन कली आन रागी रे खेरशा, अर्को रागीम ताइक्ताकव। मेको मोदेशो मुलाक्त दुम्शो बाक्ब' देंनीम।

29 मिनू मारेड मारेड खुइश्शो परमप्रभु यावे, इ परमप्रभु के बाक्ब। तन्न मेको अरेशो लोव्र नेल्ल टिचा नु मेको तुइक्तीके आंड के नु आंड तमी तौ के बाक्ब" देंत। ब्यवस्था ३२:३४

## 30

परमप्रभु यावे गे लेत्चा

1 मिनू गो इन कली देशो लोव्र, दोपा आसीक राइनीनी नु दोपा सराप राइनीनी, गे मेको नोले आंमा तशो, परमप्रभु यावे, इन परमप्रभुमी इन कली रागी रागी डा मुर आन दाते रे खेरा नु ला तुइक्नीनी। ब्यवस्था २८:-

2 मिनू गो मुलाक्ती इन कली अरेशो खोदेशो पा गे नु इन तमी तौ इन थुं नु सोक्त नेल्लेमी परमप्रभु यावे, इन परमप्रभु गे लेशशा टिचा दाक्तीनी हना, ब्यवस्था ४:३०; लेवी २६:४०

3 मेना परमप्रभु यावे, इन परमप्रभुमी इन रिम्शो नाक्ती लेप्पाइक्ब। मिनू परमप्रभु यावे, इन परमप्रभुमी इन कली शिशो पाइश्शा, जात जात डा मुर आन दातेमी ब्रपाइक्तीके रे खुप्शा चाक्ब। इजीकीएल १६:५३; येरमीया २९:१४; आमोस ९:१४; येरमीया ३२:३७

4 मिनू गे शुश डोन रागी सम्म खेरचा पुंडसाक्नी हना यो परमप्रभु यावे, इन परमप्रभुमी इन कली खुप्शा एक चाक्ब। ब्यवस्था २८:६४; नेहेम्याह १:९

5 मिनू परमप्रभु यावे, इन परमप्रभुमी इन कली इन किकी पिपी आन रागीमी चाक्ब। मेको रागी इन के बाक्ब। मिनू मेकोमी इन कली इन किकी पिपी क्येडा शुश नु रिम्शो सेल्ब।

6 मिनू परमप्रभु यावे, इन परमप्रभुमी इन थुं नु इन तमी तौ आन थुं खोइक्तीक चिनु खोदेशो पा खोइक्ब। मोपा ला गे परमप्रभु यावे, इन परमप्रभु कली इन थुं नु सोक्त नेल्लेमी दाक्शा, ब्रोंडने चाप्नीनी। ब्यवस्था १०:१६; येरमीया ४:४; इजीकीएल ११:१९; रोमी २:२९

7 मिनू परमप्रभु यावे, इन परमप्रभुमी मेको सराप नेल्ल इन कली खेदा पाइब, इन कली गेहे पाइब जोरी सत्रु आन कली रपाइक्ब।

8 मुलाक्ती गो इन कली माइश्शो गे लेशशा परमप्रभु यावे आ शेशो नेल्ल टीनीनी।

9 मिनू परमप्रभु यावे, इन परमप्रभुमी इन पतीके नेल्लेमी इन कली आसीक गेब। मेकोमी इन कली शुश तमी तौ, वी ब्यफ, क्यारश भेडा नु इन रू डा अन्न शुश सेल्ब। मारदे हना परमप्रभु यावेमी इन किकी पिपी आन कली रिम्शो पशो खोदेशो पा इन कली यो रिम्शो पचा दाक्ब।

10 गेपुकीम परमप्रभु यावे, इन परमप्रभु आ देशो टीतीनी हना, आ शेशो, आ फुल्लुम मुशा ब्रेक्शो लोव्र नु मेको अरेशो लोव्र डा किताबम ब्रेक्शो लोव्र पाइतीनी हना, गे इन थुं नु सोक्त नेल्लेमी परमप्रभु यावे, इन परमप्रभु गे लेत्तीनी हना, गे लेशा आसीक राइनीनी।

परमप्रभु आ लोव्र इन नेक्था बाक्शो

11 मिनू गो मुलाक्त इन कली माइश्शो परमप्रभु यावे आ शेशो मरुप्चा डा नु इन पने मचाप्चा डा मबाक्ब। मेको इन नेक्था बाक्ब।

12 मेको लोव्र इर सरीडमी मबाक्ब। मिनू गेपुकीमी "सु सरीड लशा मेको लोव्र आंड कली चाक्बा? मिनू मेको नेशा, पाइनीकी" देंचा ममाल्नीनी। रोमी १०:६-८

13 मिनू मेको समुन्द्र आ आइक्ची हांबु यो मबाक्ब। गेपुकीमी "सुम आंड कली समुन्द्र आइक्ची हांबु मेको ब्रथ लाइबा? मिनू मेको नेशा, पाइनीकी" देंचा ममाल्नीनी।

14 मेको अरेशो लोव्र इन नेक्था बाक्ब। गे मेको आ पर्वम लोव्र पाइनीनी। मिनू मेको पचा कली इन थुंमी बाक्ब।

ब्रोंडचा नु बेक्चा

15 मिनू मुलाक्ती गो ब्रोंडतीक नु रिम्शो दुम्तीक, बेक्तीक नु मरिम्शो दुम्तीक इन कली कोंइशो बाक्नुड। ब्यवस्था ११:२६

16 मिनू गोम मुलाक्त इन कली माइश्शो परमप्रभु यावे आ शेशो, आ फुल्लुम मुशा ब्रेक्शो लोव्र नु आ निसाफ पतीक लोव्र टीतीनी हना, परमप्रभु यावे, इन परमप्रभु कली दाक्ताक्नी हना, मेको आ लां गाक्तीनी हना, गे ब्रोंडशा, सोशा बोशा, शुश दुम्शा बाक्नीनी। मिनू परमप्रभु यावे, इन परमप्रभुमी इन ओव्रचा चिक्शो रागीमी आसीक गेब।

17 तन्न गे इन थुं हिरशा मटीब दुम्तीनी हना, नु देवी देवता आन डोंडती बाप्शा, गेय पाइतीनी हना,

18 गो इन कली मुलाक्ती "गेपुकी थमा पा बेक्नीनी। मिनू यर्दन आइक्ची हांबु इन के सेल्शो रागीमी गे शुश नाक्ती मब्रोंइनीनी" देंनुड। ब्यवस्था ८:१९

19 गो मुलाकती सरीड नु रागी कली इन डोंडती सांकछी वोइक्नुड। गो इन कली ब्रोंडचा नु बेक्चा, आसीक नु सराप इन कली कोइताकड। गो नु इन चच युड ब्रोंडतीक योत्रडीन। ब्यवस्था ४:२६

20 परमप्रभु यावे, इन परमप्रभु कली दाकतीन। आ देशो टिने। मेको कली मप्रोंडथु बाक्कीन। मारदे हना मेकोम इन कली ब्रोंडचा नु शुश नाक्ती बाक्चा गोब। मिनु गेपुकी परमप्रभु यावेमी इन किकी पिपी अब्राहाम, इसहाक नु याकूब आन कली कसम जशा गेशो रागीम बाक्ने चाप्नीनी।

## 31

मोसामी यहोसु कली अरेशो

- 1 मिनु मोसामी इस्राएली नेल्ल आन कली एको लोत्र नेंपाइक्तु।
- 2 मिनु मेकोमी “मुलाकती गो सहे का २१ बर्स गाप्ती। गो मुल रे इन कली लां कोइने मचाप्नुड। मिनु परमप्रभु यावेमी आं कली ‘गे मेको यर्दन मशोक्नेवे’ दे माइक्ती। प्रस्थान ७:७; गन्ती २०:१२
- 3 परमप्रभु यावे, इन परमप्रभु इन डोंडती यर्दन शोक्शा, आइक्की हांबु लाइब। मेकोमी इन डोंडती मेको रागी रागी डा मुर आन कली क्याम्ब। मिनु गेपुकीमी मेको आन कली खेरेने चाप्नीनी। मिनु परमप्रभु यावेमी देशो खोदेशो पा यहोसु इन डोंडती शोक्ब। ब्यवस्था ३:२२
- 4 मिनु परमप्रभु यावेमी मेको एपोरी आन पिप सीहोन नु ओग नु आन रागी खतम पोक्शो खोदेशो पा, मेको आन कली यो खतम पोक्ब। गन्ती २१:२१-३५
- 5 मिनु परमप्रभु यावेमी मेको आन कली इन जिम्मा गोब। गो इन कली माइशशो परमप्रभु यावे आ शेंशो खोदेशो पा नेल्ल गेपुकीमी मेको आन कली पचा माल्नीनी। प्रस्थान २३:३२-३३
- 6 बोल्यो नु महिब दुमीन। मेको आन कली तशा महिनीन मारदे हना परमप्रभु यावे, इन परमप्रभु गेपुकी नु लाइब। मेकोम इन कली कोत्रशा, मप्रोंडब” दे मोसामी देंत। ब्यवस्था १:२९-३०
- 7 मिनु मोसामी यहोसु कली ब्रेशशा, इस्राएली नेल्ल आन डोंडती “बोल्यो नु महिब दुमो। मारदे हना परमप्रभु यावेमी मेको इन किकी पिपी आन कली कसम जशा ‘मेको रागी इन कली गेनुड’ देशो बाक्त। मिनु गे मेको रागी मेको आन कली योक्शा गेनीनी। ब्यवस्था ३:२८; यहोसु १:६
- 8 मिनु परमप्रभु यावे इ डोंडती लाइब। मेको गे नु बाक्ब। मेकोम इन कली कोत्रशा, मप्रोंडब। महिनीन नु मेको आन कली तशा इन थुं लुकच मलने” दे मोसामी यहोसु कली देंत।

चढेब आन कली अरेशो लोत्र गेशो

- 9 मिनु मोसामी परमप्रभु आ अरेशो लोत्र ब्रेक्शा, चढेब, लेवी आ थर डा मुर नु इस्राएली आन खाल्पा आन कली गेम्तीमी। मिनु लेवी आ थर डा मुरपुकीमी चहिं परमप्रभु यावे आ सल्ला पतीक सन्दोस कुरशो बाक्तेकम।
- 10 मिनु मोसाम मेको आन कली “७ बर्स डा प्रोंडतीक बर्समी गोठ सेलतीक चाडमी ब्यवस्था १५:१; ब्यवस्था १६:१३
- 11 नेल्ल इस्राएली परमप्रभु यावे, इन परमप्रभु आ योत्रशो बाक्तीकेमी मेको अरेशो लोत्र इस्राएली नेल्ल आन डोंडती पढेचा माल्नीनी।
- 12 गेपुकीमी वोंडश मुर, मीश मुर, आलपुकी नु इन सहरम बाक्शो अर्को रागी डा मुर नेल्ल आन कली खुप्चा माल्नीनी। मिनु मेकोपुकीमी मेको अरेशो लोत्र नेंशा, शेंशा, परमप्रभु यावे, इन परमप्रभु कली मान पा हिंब दुन्चा माल्नीम। मिनु एको अरेशो लोत्र नेल्ल तुइशशा पचा माल्नीम।
- 13 मिनु एको अरेशो लोत्र मतुइक्ब, आन आलपुकीमी यो नेंशा रुप्शा, परमप्रभु यावे, इन परमप्रभु कली मान पा हिंचा शेंचा माल्नीम। गेपुकीमी यर्दन खोला आ आइक्की हांबु इन के सेल्लो रागीम बाक्की ना मोदेशो पचा माल्नीनी” दे माइक्तीमी।

यहोसु नु मोसा कली शेंशो लोत्र

- 14 मिनु परमप्रभु यावेमी मोसा कली “मुल इ बेक्की नाक्ती जाक्शो बाक्ब। मोपतीके यहोसु कली ब्रेशशा, मेको कली इ गेय जिम्मा गेनुड। मोपतीके गुम्तीक ताम्बुम जाक्शा, राप्शा बाक्कीस” देंत। मिनु मोसा नु यहोसु लशा गुम्तीक ताम्बुम राप्शा बाक्ताक्स।
- 15 मिनु परमप्रभु यावे गुम्तीक ताम्बुम गोस्स के थामम गूत। मिनु गोस्स के थाम ताम्बु आ ओव्रतीकेमी बाक्त। प्रस्थान ३२:९
- 16 मिनु परमप्रभु यावेमी मोसा कली “गे इ किकी पिपी नु बाक्चा चिक्शो बाक्नेवे। गे बेक्डे नोले मेको मुर आन लशो रागीम जाक्दीशशा, मेको रागी डा आन मतुइशशो देवी देवता आन कली खोइक्नीम। आं कली प्रोंडशा, गो नु पशो कबल क्याम्नीम।
- 17 मिनु गो मेको नाक्त मेको आन पर्वम शुश गाइक्नुड। मिनु गो मेको आन कली प्रोंडशा, मेको आन कली वारच मपाइनुड। मेकोपुकी रोइक्चा पुंइसीनीम। मिनु मेकोपुकीमी शुश मरिम्शो दुम्शा, टेयब श्येत जाइनीम। मिनु मेको नाक्त मेकोपुकीमी ‘इ परमप्रभु गेपुकी नु मबाक्तीके इ कली मोदेशो दुम्शो बाक्ब’ देंनीम।
- 18 मिनु मेकोपुकी शुश मरिम्शो पा, देवी देवता आन नोले खोइक्ब दुम्नीम। मोपतीके गो मेको आन कली वारच मपाइनुड।

मोसा कली ब्रेक्पाइशशो कुम्सो

- 19 एको कुम्सो ब्रेक्तो। मिनु इस्राएली आन कली शेंदो। मेको रिम्शो तुइक्पतो। मारदे हना मेको कुम्सो इस्राएली आन पर्वम आं सांकछी दुम्चा माल्ब। ब्यवस्था ३२:१-४३



20 गो मेको आन किकी पिपी आन कली गेनुड, दे कसम जशो दूध नु खुदो शुश बाकशो रागी मेको आन कली गेनुड। मिनु मेकोपुकी जशा ब्वशा, रूशा दोम्नीम। मिनु मेकोपुकीमी देवी देवता खोइशशा, मेको आन गेय पाइनीम। आं कली चहिं आइकच सेल्नीम गो नु आं कबल कयाम्नीम।

21 मिनु मेको मरिम्शो दुम्शा, शुश श्येत जाम्तेकम हना, मेको कुम्सो मेको आन पशो आ पबंम आं सांकछी दुम्ब। मारदे हना आन चच युइ मेको कुम्सो शेंसीशा, तुइशशो बाक्नीम। ‘मेको आन कली गेनुड’ दे कसम जशो रागीम चाक्का क्येडा डोंइती आन मिम्तीके दूली बाक्ब, दे तुइक्नुड” दे परमप्रभु यावेमी मोसा कली देंत। भजन संग्रह १३९:२

22 मिनु मेको नाक्ती मोसामी एको कुम्सो ब्रेक्शा, इसाएली आन कली शेंताक्मी।

23 मिनु परमप्रभु यावेमी नून आ तौ यहोसु कली अरेशा “बोल्यो नु महिब दुमो। मारदे हना ‘मेको आन कली गेनुड’ देंशो रागीम गे इसाएली आन कली चाक्दीत्वा माल्नेवे। मिनु गो गे नु बाक्नुड” देंत।

अरेशो किताब नु कुम्सो

24 मिनु मोसामी मेको अरेशो लोव्र किताबम ब्रेक्ने थुम्शा नोले

25 मेकोमी परमप्रभु यावे आ सल्ला पतीक सन्दोस कुरब लेवी आ थर डा मुर आन कली

26 “एको अरेशो लोव्र डा किताब लाइशशा, परमप्रभु यावे, इन परमप्रभु आ सल्ला पतीक सन्दोस आ नेक्था वोतीन। मोदेंशो पा मेको आन पबंम सांकछी दुम्शा बाक्ब। यूहन्ना ५:४५

27 मारदे हना गो इन मरिम्शो पतीक नु इन मटितीके तुइक्नुड। गो मुल सम्म गेपुकी नु बाक्शा यो, गेपुकी परमप्रभु यावे कली गन गन पा मटीब बाक्तीनी। गो बेक्डा नोले दोशो मरिम्शो पाइनीनी?

28 मिनु गे इन थर थर डा खाल्पा नु टेयब मुर नेल्ल आं बाक्तीकेम ब्रेशा खुम्सीन। मिनु गो मेको आन कली एको लोव्र नेंपाइक्नुडमी। मिनु मेको गो सरीड नु रागी आन पबंम सांकछी वोइक्नुड। ब्यवस्था ३२:१

29 मारदे हना गो बेक्डा नोले गेपुकी थमा पा दूली पाइब दुम्नीनी। मेको गो तुइक्नुड। मिनु गेपुकी आं अरेशो लां रे डोन लाइनीनी। मिनु गेपुकीमी परमप्रभु यावे आ डोंइती मरिम्शो पाइनीनी। मिनु मेको इन पतीकेमी मेको कली गाइक्पाइक्नीनी। नोले डा नाक्तीमी इन कली शुश श्येत दुम्ब” देंत।

30 मिनु मोसामी इसाएली नेल्ल आन डोंइती एको कुम्सो थुम्चा सम्म नेंपाइक्तीमी।

## 32

मोसा आ ब्रेक्पाइशशो कुम्सो

मिनु मोसामी 1 “सरीड, गो मार देंनुडा, नोफा दाइशशा नेनो। रागीम, आं लोव्र नेनल। यसैया १:२

2 आं अरेशो लोव्र रेड खोदेंशो पा यीब। आं अरेशो लोव्र सीत खोदेंशो पा दोक्ब। कल्लो घांस तार भूस भुसे रेड खोदेंशो पा नु सुवा आन तार टेयब रेड खोदेंशो पा यीब। यसैया ५५:१०-११

3 मारदे हना गो परमप्रभु यावे आ नें टेयब सेल्नुड। इ परमप्रभु टेयब बाक्ब।

4 मेको सेरथे फुल्लु बाक्ब। मेको आ गेय नेल्ल क्येडा रिम्शो बाक्ब। आ लां नेल्ले ठीक बाक्नीम। मारदे हना मेको आ देंशो पाइब परमप्रभु बाक्ब। जोल मपाइब, कुल मकोव्रब नु ठीक पाइब बाक्ब।

5 तन्न मेको पाला डा मरिम्शो दुम्शो मुरपुकीमी मेको कली मरिम्शो पाम्तेकम। मेको दूली पाइब नु हेंथे गाक्ब ला डा बाक्नीम। यसैया १:२-४; मत्ती १७:१७

6 मूर्ख नु निप्स मपाइशशो मुरपुकी, मार, गे परमप्रभु यावे कली क्येक्क लेत्नीनी? मार, इन कली सेल्ब इन आफ मेको ममाइ डा? मेको इन कली सेल्ब नु वोइक्ब बाक्ब।

7 साइ डोंइती डा नाक्त मिम्तीन। साइ डा बर्स कली मिम्तीन। इन आफ कली हिल्लो पने। मिनु मेकोमी इन कली शेंनीम। इन खाल्पा आन कली हिल्लो पने। मेकोमी इन कली देंनीम।

8 नेल्ल क्येडा टेयबमी रागी रागी डा मुर आन कली आन रागी गेपुतु। मेकोमी मुर नेल्ल आन कली शुश खाल डा सेल्लु। मेना इसाएली आन थर डा खिं खिं डा मुर कोव्रशा, आन सांद योक्शा गेपुतु। उत्पत्ती ११:८; प्रेरित १७:२६

9 मिनु परमप्रभु यावे आ भाग आ मुरपुकी बाक्तेकम। याक्ब आ मुर आन भाग आ योव्रशो रागी बाक्त।

10 मेकोमी याक्ब कली सुइ मबाक्शो रागीम थुल्लु। गोरशो रागीमी कोव्रशा थुल्लु। मिनु मेकोमी मेको कली आ एर ओंथ नेल्ल रे कोव्रतु। मिनु मेको कली आ मिक्च कली खोदेंशो पा होस पा कोव्रतु। भजन संग्रह १७:८; इजीकीएल १६:१०-१४; जकरिया २:१२

11 आंम चाइक्ब कली रिम्शो कोव्रशा जचा गेब, फ्रां प्राक्शा चाइक्ब कली पुव्व नु आ फ्रांम इर कुरब ककाकुली खोदेंशो पा, प्रस्थान १९:४

12 परमप्रभु यावेमी मेको कली लां कोइताक्व। मेको नु अर्को तेकोड देवता मबाक्म।

13 मेकोमी मेको कली नेल्ल क्येडा रिम्शो रागीम वोइक्तु। मेकोमी रूम शोक्शो थोव्रकीम थुल्लु। मिनु मेको कली रोगु डा खुदो नु फुल्लु रे तेल जचा गेपुतु। भजन संग्रह ८१:१७

14 मिनु बी आन दूध के दहि, भेडा आन दूध नु पाठा नु सांड आन बॉसो ब्वचा गेपुतु। बाशान डा ब्यफ नु क्यारश आन श्ये ब्वचा गेपुतु। नेल्ल क्येडा रिम्शो चेरब फस जशा, अडगुर शांबू तूशा बाक्ते।

15 मिनू येशुरुनमी दोम्शा ताडवकु। गे दोम्ते। गे दोम्शा, ठेयब लेशशो दुम्ते। मेकोमी आ कली सेल्व परमप्रभु कली प्रोडतु। मिनू आ श्येत रे प्रोडब सेरथे फुल्लु, कली प्रोडतु। येशुरुन याकूब-इसाएल कली मान पतीक नें बाकब। ब्यवस्था ३३:५, २६; यसैया ४४:२; ब्यवस्था ३१:२०; नेहेम्याह ९:२५

16 मिनू मेकोपुकीमी अर्का देवी देवता आन कली ठेयब सेल्शा, मेको कली गेहे पपाइक्तेकम। मेकोपुकीमी ग्राम्रा दिचा डा थोवकीम पतीके मेको कली गाइक्पाइक्तेकम।

17 मेकोपुकीमी परमप्रभु कली ममाइ, वोल आन कली चढेम्तेकम। आन डोंडती मतुइशशो देवी देवता आन कली चढेम्तेकम। आन किकी पिपीमी महिंशो नक सेल्शो देवी देवता आन कली चढेम्तेकम।

18 मिनू गे इन कली सेल्व सेरथे फुल्लु कली ममिम्तीनी। इन कली थीब परमप्रभु यावे कली प्रेंतावनी। उत्पत्ती ४९:२४; भजन संग्रह १८:३२; भजन संग्रह ७८:१५-१६

19 मिनू परमप्रभु यावे मेको तशा रुश पाप्तु। मारदे हना आ तमी तौपुकीम मेको कली आइक्च सेल्वेकम।

20 मिनू मेकोमी 'गो मेको आन कली वारच मपाइनुड। मेको दोपा बेक्नीमी, मेको कोव्रनुड। मारदे हना मेको दूली पाइब पाला डा मुर बाक्नीम। मेको थमा मसुइक्चा डा बाक्नीम।

21 देवी देवता आन पर्वमी आं कली रुश पपाइक्नीम। मूर्ति पूजा पा आं कली गाइक्ब सेल्वतीमी। मोपतीके गो डोन डा मुर आन कली आंम के सेल्शा, एको आन कली रुश पपाइक्नुड। रागी डा मतुइक्ब मुर आन कली गुप्शा, मेको आन कली गाइक्पाइक्नुड। भजन संग्रह ७८:५८; येरमीया २:११; रोमी १०:१९

22 मारदे हना आं गाइक्चा मी खोदेशो पा ब्रशो बाकब। रागी आगा सम्म ब्राइब। रागी नु मेकेर बाक्शो नेल्ले नेक्ब। मेकोमी डांडा आन जग नेल्ल नेक्ब।

23 गो मेको आन कली शुश श्येत गेनुड। गो मेको आन कली ब्रा आप्नुड। दोपा आप्नुड देशा हना,

24 बेक्चा डा शोव्रलु, शुश नाप्शो जोरो, मुर कली साइक्ब रोड नु मेको आन कली बुष्शा ब्वाइब जन्तुपुकी नु खपीम प्रेशा गाक्ब बीस पाइशशो बुस्सपुकी सोइक्नुड।

25 लां लांमी तरवारम मेको आन कली रोम रोइक्च सेल्वनुड। खिं खिंम राम्शी पोक्नुड। टिटा टिटी, दूध तूब आल, चां बोइशशो नेल्ल आन कली खाल का डा पाइनुड। इजीकीएल ५:१७; इजीकीएल १४:२१

26 गो मेको आन कली डोन डोन सम्म ब्रापाइक्नुड। गो मेको आन कली मुर आन दातेम ममिम्पाइक्नुड।

27 तन्न आन जोरी सत्रुपुकीमी दूली मिम्शा "गोपुकीमी इं सक्तिम प्रातया। एको परमप्रभु यावे आ पशो ममाइ" देनीम। मिनू आं कली गाइक्पाइक्नीम।

28 मारदे हना मेकोपुकी रागी डा निप्स मपाइशशो मुर नम। मेकोपुकी नु मारेइ रुप्तीक थुं मबाक्ब। यसैया २७:११; येरमीया ४:२२

29 मेकोपुकी निप्स पाइशशो नम हना, एको लोव्र रुबेम वा। मेको आन बेक्तीक तुइक्तेम वा।

30 मेको आन सेरथे फुल्लुम मेको आन कली लेयने थुम्शो बाक्ब। परमप्रभु यावेमी मेको आन कली प्रोडने थुम्शो बाक्ब। मोपतीके मुर कामी हजार का आन कली खेदा पाप्तु। मुर निकशीमी १० हजार आन कली खेदा पने चाप्नीसी। लेवी २६:३६-३७; यसैया ३०:१७

31 इं जोरी सत्रुमी "मेको आन सेरथे फुल्लु आंइ सेरथे फुल्लु खोदेशो ममाइ" दे लोव्र पाम्तेकम। ब्यवस्था ३२:४, ३७

32 मारदे हना मेको आन अडगुर सोदोम डा अडगुर बाक्नीम। मेको गोमोररा डा अडगुर रू रे दुम्शो बाक्नीम। मेको आन अडगुर बीखम बीशो बाक्नीम। मेको आ गेडा कशो बाक्नीम।

33 मेको आन अडगुर बुम्स आ बीस नु साइक्चा डा बीख बाक्ब।

34 गो एको मिम्शा वोइशशो बाक्नुड। आं वोइक्तीकेमी छाप थोक्शा वोइशशो बाक्नुड। ब्यवस्था २९:२८

35 सजाइ नु क्येक्क लेत्तीक आं के बाक्ब। मिनू ग्रेक्शा थित्तीक नाक्त नु आन बेक्तीक नाक्त जाक्चा चिक्शो बाक्ब। मेको आन खतम दुम्तीक नाक्त जाक्चा चिक्शो बाक्ब। भजन संग्रह ९४:१; रोमी १२:१९; हिबू १०:३०

36 परमप्रभु यावेमी आ मुर आन कली थमा पा वारच पाइब। आ मुर आन कली शिशो पाइब। मेको आन सक्ति लत हना, मुर नु वाइलीम वाइल यो खतम दुम्नीम।

37 मेको आन देवी देवता ते बाक्नीमी? मेको आन खुइक्तीक सेरथे फुल्लु ते बाक्बा डा? ब्यवस्था ३२:३१

38 आन क्योरशा चढेतीके डा बोसो सुमी ब्ववा? मिनू तूचा थोव्रक चढेतीके रे सुम तूडा? मेकोपुकी बोक्शा इन कली वारच पामेक्ल। मिनू इन कली प्रोन्मेक्ल। न्यायाधीस १०:१४; येरमीया २:२८

39 मुल कोव्रडीन, गो ला परमप्रभु नड। आं क्येडा लाक्शा सुइ परमप्रभु मबाक्ब। गो साइक्ब नु ब्रोंडपाइक्ब नड। गो गार सेल्व नु सापाइक्ब नड। आं गुइ रे ब्रोंडब सुइ मबाक्ब। ब्यवस्था ४:३५; यसैया ४५:५; १सामुएल २:६; प्रस्थान १५:२६; अय्युब ५:१८; होसे ६:१-२

40 मिनू गो आं गुइ सरीड गे पोक्शा, गो गेना हना यो ब्रोंडशा बाक्शो खोदेशो पा कसम जाइनुड।

41 गो आं टल्केशो या शेप्ता हना, आं गुइमी निसाफ पचा कली ग्याइक्ताक्ड हना, आं जोरी सत्रु आन कली क्येक्क लेत्नुड। आं कली काइ मदाक्ब आन कली क्येक्क लेत्नुड। येरमीया ४६:१०

42 आं ब्रा आन कली ग्याइशशा साइशशो मुर आन हुशेमी गिल्लुड। आं या लाइशशो चां पाइशशो आं जोरी सत्रु आन श्ये ब्वाइब खोदेशो सेल्वनुड" दे परमप्रभुमी दैत।

43 गे रागी रागी डा मुरपुकी, ग्येरसीशो मेको आ मुर बाक्नीनी। मिनू नेल्लेमी परमप्रभु कली मान पने। मारदे हना मेकोमी आ गेय पाइब आन हुश आ क्येक्क लेप्ब। आ मुर आन कली मरिम्शो पाइब आन कली क्येक्क लेप्ब। मिनू मेको आन

कली काइ मदाकब आन कली क्येकक लेपब। मिनु मेकोमी आ मुर आन रागी कली लेंशा रिम्शो सेलब” दे मोसामी कुम्सो पापु। रोमी १५:१०; ब्यवस्था २१:८; गन्ती ३५:३३-३४

मोसा आ नोले डा अरेशो लोत्र

44 मिनु मोसा नू नून आ तौ यहोसु मुर आन डोंइती एको कुम्सो डा लोत्र नेंपाइक्ताक्स।

45 मिनु मोसामी इस्राएली नेल्ल आन कली एको लोत्र नेंपाइक्ने थुम्शा,

46 मेको आन कली “मुलाकत गे इन कली आं देशो लोत्र नेल्ल इन थुंम वोतीन। इन तमी तौ आन कली देनीन। गे मेको आन कली ‘मेको अरेशो लोत्र नेल्ल होस पा पचा माल्नीनी’ दे मतीन। ब्यवस्था ६:७

47 मारदे हना एको इन कली आइक्च लोत्र ममाइ। एको इन ब्रॉइतीक बाकब। एको पशा, गेपुकी यर्दन शोक्शा इन के सेल्लो रागीम शुश नाकत ब्रॉइनीनी” दे माइक्तीमी। लेवी १८:५

परमप्रभुमी मोसा कली लोत्र पशो

48 मिनु मेको नाक्ती परमप्रभु यावेमी मोसा कली

49 “गे अबारीम डांडा डोंइसो। यरीको आ नेक्था मोआब रागीम बाक्शो नेबो डांडा डोंइसो। मिनु गो इस्राएली आन कली गेशो कनान रागी नेल्ल कोत्रडो। गन्ती २७:१२; गन्ती ३३:४८

50 मिनु दोपा इ लोक्ब हारून होर डांडाम बेक्मे नु आ किकी पिपी आ मुर आन बाक्तीक लमे, मोपा गे मेको इ डोइश्शो डांडाम बेक्नेवे। मिनु बेक्शा इ किकी पिपी आन बाक्तीक लाइनेवे। गन्ती २०:२३-२९

51 मारदे हना गे निकशीमी जीन डा गोरशो रागी मेरीबाथ-कादेशमी आं ब्वाक्कु आ नेक्था इस्राएली आन दातेमी आं कली थमा मसुइक्वीसी। आं कली टिचा माल्नीम, दे इस्राएली आन डोंइती मकोंइथु, आं कली ठेयब मसेल्सी। गन्ती २०:१२-१३

52 गे आं इस्राएली आन कली गेशो रागी डोन रे ताप्तीवी हना यो, गे मेकेर लचा मताइनेवे” दे परमप्रभु यावेमी मोसा कली देंत।

### 33

मोसामी आसीक गेशो

उत्पत्ती ४९:-

1 परमप्रभु आ मुर, मोसामी आ बेक्चा क्येडा डोंइती इस्राएली आन कली मार आसीक गेपु देंशा हना

2 “परमप्रभु यावे सीने रे जाक्शो बाक्ब। मेको सेइर रे पा आंइ डोंइती ग्रूत। मेको पारान डांडा रे पा टल्केसाक्ब। मेको नु लाख लाख आ मुर बाक्तेक्म। आ ग्युरा गे आंम मुर डा ठेयब हुल बाक्तेक्म। न्यायाधीस ५:४

3 थमा पा, मुर आन दातेमी आ मुर शुश दाक्शो मुर बाक्नीम। गे इन मुर नेल्ल आन कली कोत्रब बाक्तीनी। मेकोपुकी इन खोइल आ नेक्था गाक्शो बाक्तेक्म। इन देशो नेल्ल पाक्तेक्म।

4 मोसामी आंइ कली इन अरेशो लोत्र ‘पचा माल्नीनी’ दे माइक्तु। मेको अरेशो लोत्र याक्ब आ जात डा मुर नेल्ल आन के दुम्त।

5 मिनु येशुरुन पिप का दुम्त। मुर आन ठेयब मुरपुकी बुक्तेक्म। मिनु इस्राएल आन थर थर नेल्ल गुम्तेक्म। येशुरुन याक्ब-इस्राएल कली मान पतीक नें बाक्ब। प्रस्थान १५:१८; ब्यवस्था ३२:१५; प्रस्थान १९:७

6 रूबेन आ मुर शुश मदुम्तेक्म हना यो, ब्रॉइशा बाक्ल, मबेक्ल” देंत।

7 मिनु यहूदा आ पर्वम मार देशो बाक्त, देश हना “परमप्रभु यावे, यहूदा आ लोत्र नेनीन। मेको कली आ मुर आन बाक्तीक चाक्कीन। मेको कली सक्ति गेने। मेको आ जोरी सत्रु आन पर्वम मेको कली वारच पतीन” देंत।

8 मिनु लेवी आ पर्वम मार देशो बाक्त, देश हना “गे लेवी कली इन थुम्मीम गेने। इन ऊरीम इन थमा सुइक्चा डा गेय पाइब कली गेने। गे मेको कली मास्साहम नाक्ताक्नी। गे मेरीबा डा ब्वाक्कुम मेको नु जीतीनी” देंत। प्रस्थान २८:३०; १सामुएल १४:४१; प्रस्थान १७:२,७; भजन संग्रह ९५:८

9 मेकोमी आ आम आफ आस पर्वम “गो मेको आस कली ममिम्नुड। मेकोमी आं खिं डा मुर आन कली प्रॉइतु। आ तौ आन कली मतुइक्त। मारदे हना मेकोमी इन लोत्र टिप्टु। मिनु गे नु कबल पशो बाक्त। प्रस्थान ३२:२७-२९; मती १०:३७

10 मेकोपुकीमी याक्ब कली इन पतीके लोत्र नु इस्राएली आन कली इन अरेशो लोत्र शेंनीम। मेकोपुकीमी इन डोंइती धूप चोइनीम। इन कली इन चढ़ेतीके तार नेल्ल चोशा चढ़ेतीके चढ़ेनीम।

11 परमप्रभु यावे, गे मेको कली आसीक गेने। मेको आन गेय ताक्कीन। मेको कली काइ मदाकब आन कली नु आ जोरी सत्रु आन कली लेंशा मबोक्चा डा पा खतम सेलीन” देंत।

12 मिनु बेन्यामीन आ पर्वम मार देशो बाक्त, देश हना “परमप्रभु यावे आ दाक्शो महिंचा डा पा नाइक्ब। नेल्ल क्येडा ठेयबमी मेको कली नाक्त रे कोत्रब। मेको आ दाक्शो मुर आ बला आस दातेम नाइक्ब” देंत।

13 मिनु योसेफ आ पर्वमी मार देशो बाक्त, देश हना “परमप्रभु यावे आ रू आन कली आसीक गेवल। मेकोमी इर सरीड नु उइ रागी डा नेल्ल क्येडा रिम्शो तवल। उत्पत्ती ४९:२५

14 नांम सिश्शो फल फुल तवल। महिना महिना डा रिम्शो फल फुल तवल।

15 माइत पहाड डा नेल्ल क्येडा रिम्शो अन्न नु गेना हना यो लीब डांडा डा शुश बाली नाली तवल।

16 मेको रू डा नेल्ल क्येडा रिम्शो सिश्शो शुश तवल। मिनु सीने डांडाम बाक्ब आ दाक्शो तवल। मिनु मेको आसीक योसेफ आ पिया तार दुम्त। प्रस्थान ३:२-४; उत्पत्ती ४९:२६

17 मेको आ लोकब आन दाते डा नेल्ल क्येडा ठेयब मुर, योसेफ आ पिया तार दुम्ल। मेको डोंइती जरमेशो बाछा खोदेशो बाकब। मेको ताइब बाकब। मेको आ ग्रोत्र ब्वाकी डा ब्यफ आ ग्रोत्र खोदेशो बाकब। मेकोमी जात जात डा मुर आन कली खेरशा, रागी आ सुरु सम्म नेब। मेकोपुकी एफ्राइम आ लाख लाख डा मुर नु मनस्से आ हजार हजार डा मुर बाक्नीम” दैत। उत्पत्ती ४६:२०

18 मिनू जबूलन आ परबम मार देशो बाकत, देशा हना “जबूलन, लाडगा लशा ग्येरसो। मिनू इस्साकार इ ताम्बुम बाक्शा ग्येरसो।

19 मेकोपुकीमी जात जात डा मुर आन कली डांडाम ब्रेत्नीम। मेकेर ठीक दुम्लो चढेतीक चढेनीम। मारदे हना मेकोपुकीमी समुन्द्र डा शोप नु बाल्वाम खुइश्शो शोप जाइनीम” दैत।

20 मिनू गाद आ परबम मार देशो बाकत, देशा हना “गाद कली सोशो बोशो दुम्ला ग्येरसो। गाद गुप्स खोदेशो पा बाप्शा बाकब। मेकोमी गुइ नु पिया रेपब।

21 मेकोमी आंम कली नेल्ल क्येडा रिम्लो रागी योत्रतु। मारदे हना मेको कली कप्तान आ भाग वोइश्शो बाकत। मेको नेल्ल इस्साली आन डोंइती गाकत। परमप्रभु यावेमी देशो ठीक पतीके पाप्तु” दैत। गन्ती ३२:२९-३२

22 दान आ परबम मार देशो बाकत, देशा हना “दान बाशान रे प्रेक्शा, जाकब, गुप्स आ चाइकब बाकब” दैत।

23 मिनू नाप्ताली आ परबम मार देशो बाकत, देशा हना “नाप्ताली, गे परमप्रभु यावे आ दाक्शो, आसीक ताइब बाक्नेबे। गे पच्छिम नु दक्खिन इ के सेलो” दैत।

24 मिनू आशेर आ परबम मार देशो बाकत, देशा हना “मुर आन दातेमी नेल्ल क्येडा आसीक राइब आशेर बाकब। मेको आ लोकबपुकीमी मेको कली दाकतमेकल। मेको आ खोइल तेलम चिकसेकल।

25 इ आग्लोपुकी फलाम नु कांसा के बाक्नीम। इ नाकत दोदेशो बाक्मे इ सक्ति यो मोदेशोन बाकल” दैत।

26 मिनू “येशुरुन आ परमप्रभु खोदेशो सुइ मबाकब। मेको इ कली वारच पाइक्या कली स्वर्ग रे पीब। मेको सरीड मेर रे मान पचा पुइसीशा पीब। येशुरुन याकूब-इस्साल कली मान पतीक नें बाकब। आ अर्थ ठीक पाइब बाकब। ब्यवस्था ३२:१५

27 साइ नेसी डा परमप्रभु खुइश्शा बाक्तीक बाकब। इन डोंइती इन जोरी सत्रु आन हुल कली खेरतु। मिनू मेको आन परबम खतम सेलीन, दैत।

28 मोपतीके इस्साली मारेइ मदुम्लु, रिम्लो पा बाकब। याकूब आ बाक्तीकेमी श्येत मजाइनीम। मेको अन्न नु अडगुर आ रागीमी सीत यीब। लेवी २५:१८; १राजा ५:५; भजन संग्रह ६८:२७-२८; यसैया ५१:१-२; उत्पत्ती २७:२८

29 गे इस्साली, ग्येरसीने। परमप्रभु यावेमी प्रोंइचा पुंइसीशो इन खोदेशो जात सु बाकबा? परमप्रभु यावे इन कली वारच पाइब नु तेक्तीक बाकब। मेको इन प्रातीक तरवार बाकब। इन जोरी सत्रु इन डोंइती बाप्नीम। मिनू गे मेको आन चीमी थेक्शा गाक्नीनी” दे आसीक गेशा, दैत। ब्यवस्था ४:७-८; भजन संग्रह ३३:१२; भजन संग्रह १४४:१५

## 34

मोसा बेक्शो

1 मिनू नोले मोसा मोआब रे यरीको आ नेक्था बाक्शो नेबो डांडा रे पिस्गा डांडा डोंइसाकब। मेको यरीको एर बाकब। परमप्रभु यावेमी मेको कली गिलाद रागी नेल्ल दान सम्म कोंइताकब। ब्यवस्था ३:२७

2 नाप्ताली आ रागी नेल्ल, एफ्राइम नु मनस्से, यहूदा आ रागी नेल्ल पच्छिम गे डा समुन्द्र सम्म,

3 नेगेब नु दिंम, मेको यरीको डा दिंम बाकब। खजूर रवा आ सहर यरीको रे सोआर सम्म कोंइताकब। इतिहास २८:१५

4 मिनू परमप्रभु यावेमी मेको कली “इन चच युइ आन कली गेनुड, दे अब्राहाम इसहाक नु याकूब नु कसम जशो रागी एकोन बाकब। गो एको इ कली कोंइतन। तन्न गे मेकेर लचा मताइनेवे” दैत। उत्पत्ती १२:७

5 मिनू परमप्रभु यावेमी आ देशो खोदेशो पा परमप्रभु यावे आ गेय पाइब मोसा मोआब रागीम बेकत। ब्यवस्था ३२:५०

6 मिनू परमप्रभुमी मोसा कली मोआब रागी बेथ-पेओर आ डोंइती दिंम कामी थिम्तु। तन्न मुल सम्म मोसा आ तुरस सुइमी मतुइक्नीम।

7 मोसा बेक्मेनु, मेको सहे का २१ बर्स दुम्लो बाकत। मेको आ मिक्च ब्राब्रा मदुम्लो बाकत। आ बोल यो मग्युम्लो बाकत। ब्यवस्था ३१:२

8 मोआब डा दिंमम इस्सालीपुकीमी ३० नाकत सम्म मोसा आ परबम रोंका पाम्तेक्म। नोले मोसा आ परबम रोंका पतीक नाकत नुप्त।

9 मिनू नून आ तौ यहोसु रुप्तीक तुइक्तीक सोक्तीम ब्रीशो बाकत। मारदे हना मोसामी आ गुइ मेको आ तार वोइश्शो बाकत। मिनू परमप्रभु यावेमी मोसा कली माइश्शो खोदेशो पा इस्सालीपुकीमी यहोसु कली टिम्तेक्म। गन्ती २७:१८-२३; १तिमोथी ४:१४; २तिमोथी १:६

10 मेना रे मुल सम्म इस्साली आन दातेमी मोसा खोदेशो परमप्रभु यावे आ लोत्र पाइब सुइ मयूम। परमप्रभु यावेमी मेको कली थमा पा तुइक्बाकत। प्रस्थान ३३:११; गन्ती १२६-८; १कोरिन्थी १३:१२

11 मिनू परमप्रभु यावेमी मेको कली इजीप्ट रागीमी चिन्ड नु छक लाक्या डा गेय पथ सोइक्ताकब। मोदेशो मुल सम्म सुइम मपावो मोसामी फाराओ, आ गेय पाइब नु रागी डा मुर नेल्ल आन डोंइती कोंइताकब।

12 मिनू मेकोमी इस्साली आन दातेमी सक्तिम पाइश्शो गेय नु हिंचा डा गेय कोंइशो बाकत।

## यहोसु

**ब्रेक्व मुर:** एको किताब ब्रेक्व मुर आ नें तेइ मब्रेक्वशो बाक्व। तन्न “यहोसुमी मेको नेल्ल परमप्रभु आ अरेशो लोत्र ब्रेक्तीक किताबमी ब्रेक्ताक्व” दे ब्रेक्वशो बाक्व। टाल्मुत माइश्शो यहूदी आन माइत किताबमी “ब्रेक्व मुर यहोसु बाक्व। मिनु यहोसु बेक्म नोले डा लोत्र फिनेहासम तेम्शो बाक्व” दे ब्रेक्वशो बाक्व। यहोसु २४:२९-३३

**गेना ब्रेक्वशो:** एको किताब ब्रेक्ची ना यबुसीपुकी रागीम बाक्वशो बाक्तेक्म। यहोसु १५:६३ पिप दाऊदमी आ सासन पची ना मेको आन कली खेरशो बाक्वत। एको किताब ब्यवस्था आ नोले डा दुम्शा, मोसा आ बेक्वशो रे यहोसु आ बेक्वशो सम्म इस्राएली आन इतिहासम बाक्व।

**मार ब्रेक्वशो:** एको किताबम इस्राएली आन १२ थर का का पा आन थेरशो रू योक्तीके ला ममाइ, मेको रागी कली ग्राशा, आंम के सेल्चा कली परमप्रभु यावे आ देंशो टितीकेम ला दुम्ब, दे शेंशो बाक्व। मेको आ कोइतीके आकान आ मटितीके बाक्वत।

१. कनान रागी आंम के सेल्चा कली ठीक दुम्तीके यहोसु १:- ५:-
२. कनान रागी कली ग्राशो यहोसु ६:-१२:-
३. इस्राएली आन थेरशो रू योक्वशो यहोसु १३:-२४:-

इस्राएली रागी ओव्रचा सासीशो

1 परमप्रभु यावे आ गेय पाइब मोसा बेक्म नोले परमप्रभु यावेमी मोसा आ गेय पाइब नून आ तौ, यहोसु कली लोत्र पाप्तु।

2 परमप्रभु यावेमी मार लोत्र पाप्तु देंशा हना “आं गेय पाइब मोसा बेक्वत। मोपतीके गे मुर नेल्ल आन कली लाइक्चा सासो। मिनु गो इस्राएली आन कली गेचा चिक्वशो रागी यर्दन खोला आ आइक्ची हांबु लावो। ब्यवस्था ३४:५

3 गोमी मोसा कली देंशो खोदेशो पा, इन खोइलीम थेक्वशो रागी नेल्ल इन कली गेता। ब्यवस्था ११:२४

4 गोरशो रागी नु लेबानोन रे टेयब युफ्रेटीस खोला सम्म, हिती आन रागी नेल्ल, पच्छिम गे डा टेयब समुन्द्र सम्म इन रागी दुम्ब।

5 गे मबेक्डे सम्म इ कली सुइमी यो फुने मचाप्नीम। गो दोपा मोसा नु बाक्वडा, मोपा गे नु यो बाक्नुड। गो इ कली गेना हना यो कोव्रनुड। मिनु गेनायो मप्रोइनुड। ब्यवस्था ३१:७,८; हिबू १३:५

6 गे बोल्यो नु महिब दुमो। मिनु गो डोंइती ‘इ किर्की पिपी आन कली गेनुड’ दे कसम जशो रागी, गे इस्राएली आन कली आंम के सेल्पाइक्चा माल्नेवे। ब्यवस्था ३:२८;

7 गे थम बोल्यो नु महिब दुमो। आं गेय पाइब मोसामी इ कली अरेशो लोत्र नेल्ल होस पा टिवो। मेको रे ग्युरा पेरा गे मलावो। मिनु गे ते लते हना यो ग्रानेवे। ब्यवस्था ५:२९; ब्यवस्था २९:८; १राजा २:३

8 एको आं अरेशो लोत्र डा किताब इ थुं रे डोन मवोतो। मेको कली नाक्वदो नाक्ती मिम्तो। मेकेर ब्रेक्सीशो नेल्ल होस पा टिवो। मो पाप्तीवी हना, गे ग्राना ग्रान गाक्नेवे। मिनु इ पतीक नेल्ल थम रिम्शो दुम्ब। भजन संग्रह १:२-३

9 गो इ कली ‘बोल्यो नु महिब दुमो’ देंती। इ थुं लुक्च मलल। गे गेनायो हिंशा खिंखि मपावो। मारदे हना गे ते लते हना यो, गो, परमप्रभु यावे, इ परमप्रभु, गे नु बाक्नुड” दे परमप्रभु यावेमी यहोसु कली देंत।

यर्दन खोला शोक्सीचा गोशो

10 मिनु यहोसुमी मेकेर डा टेयब मुर आन कली “गे नेल्ल मुर आन बाक्तीकेमी लने। मिनु मेको आन कली

11 “बुत लाम्ज कुरशा सासीन। मारदे हना सांबु नाक्ती परमप्रभु यावे, इन परमप्रभुमी गेशो रागी आंम के सेल्चा कली यर्दन खोला शोक्सीचा माल्नय’ देनीन” दे अरेप्तु।

12 मिनु यहोसुमी रूबेन आ थर, गाद आ थर नु मनस्से आ उइक्थ थर कली ब्यवस्था ३:१२-२०; गन्ती ३२:२०-२९

13 “परमप्रभु यावे आ गेय पाइब मोसामी इन कली अरेशो लोत्र मिम्तीन। मिनु मेकोमी इन कली ‘परमप्रभु यावे, इन परमप्रभुमी इन कली नाइक्पाइक्तीक गेशा, मेको रागी गेनुड’ देंशो लोत्र मपेंदीन।

14 इन मीश नु आलपुकी, बी ब्यफ, क्यारश भेडा नेल्ल मोसामी इन कली गेशो रागी यर्दन ओंथ हांबुम बाक्चा माल्नीम। तन्न गे लडाइ पाइब वोंइश मुरपुकी या कुरश इन लोकब आन कली वारच पचा कली मेको आन क्येडा डोंइती आइक्ची हांबु लचा माल्नीनी।

15 मिनु परमप्रभु यावेमी इन लोकब आन कली, इन कली खोदेशो पा नाइक्चा मगेवा सम्म, मेको रागी आंम के मसेल्मे सम्म नु परमप्रभु यावे, इन परमप्रभुमी मेको आन कली गेचा चिक्वशो रागी मग्रामा सम्म मेको आन कली वारच पचा माल्नीनी। मिनु नोले परमप्रभु यावे आ गेय पाइब मोसामी यर्दन आ पूर्व गे इन कली गेशो रागीमी लेरशा, बाक्ने चाप्नीनी” देंत।

16 मिनु मेकोपुकीमी यहोसु कली “गे आंइ कली मार मार अरेनी, गो मेको नेल्ल पाइनीकी। मिनु गे आंइ कली ते ते सोइक्नीनी, गो मेक मेक लाइनीकी।

17 दोपा मोसा आ लोत्र नेल्ल टिशो नया, मोपान इन लोत्र यो टीनीकी। दोपा परमप्रभु यावे, इन परमप्रभु मोसा नु बाक्मे, मोपान गे नु यो बाक्ल।

18 सुमी इन अरेशो लोव्र 'मपाइनुड' दे इन लोव्र मनेंबा, मेको साइक्चा पुंडसीब। मोपतीके गे बोल्यो नु महिब दुमीन" देंतेकम। यहोसु १:६

## 2

यरीकोम क्यारी पथ सोइशशो

1 मिनू नून आ तौ यहोसुमी, सुइम मतुडक्चा डा पा, शिलीम रे मुर निक्शी क्यारी पथ सोइक्ताक्व। मिनू यहोसुमी मेको आस कली "मेको रागी नु यरीको नेल्ल क्यारी पथ लस" देंत। मिनू मेको निक्शी मेकेर जाक्दीशशा, राहाब माइशशो तेल्लेम आ खिमी बास बाक्सा बाक्त। मती १:५; हिब्रू ११:३१; याकूब २:२५

2 मिनू मेकेर डा मुर कामी यरीको डा पिप कली "हजुर, मुलाक्त नाक्दो इसाएल डा मुर निक्शी एको रागी कली क्यारी पथ, जाक्ताक्स" दे मदा बाक्त।

3 मिनू यरीको डा पिपमी राहाब आ बाक्तीकेमी मुर सोइक्ता नाक्त। मेकोपुकीमी राहाब कली "इ खिमी जाक्शो मेको मुर निक्शी आस कली गुंडशा, एक चाक्को। मारदे हना मेको निक्शी इ रागी नेल्ल कली क्यारी पथ जाक्शो नसी" दे लोव्र सोइक्ता बाक्त।

4 तन्न मेको मीश मुरुमी मेको निक्शी आस कली लाइशशा, खुइक्तीम्सी बाक्त। मिनू मेकोमी लोव्र चाक्ब आन कली "मेको निक्शी थमा पा आं बाक्तीकेमी जाक्ताक्स। तन्न ते रे जाक्शो नसी गो मतुइक्तु।

5 मिनू नां रिक्शा, सहर डा ठेयब लाप्चो चोक्ची ना, मेको निक्शी गूशा गाक्ताक्स। मेको ते लसा गो मतुइक्नुड। रीब पा माल्तीनी हना, थिल्लीनी को" दे लोव्र लेत्ता बाक्त।

6 तन्न मेकोमी मेको निक्शी आस कली तला तारी वोइशशा, पले आ डाठमी सुम्शा, खुइशशा वोइशशो बाक्माक्त।

7 मिनू मेको निक्शी आस कली खेदा पाइबपुकी यर्दन डा लां लशा, खोला सम्म जाक्दीम्मा बाक्त। मेको खेदा पाइबपुकी सहर रे गूमा नोले ठेयब लाप्चो चोक्गमे बाक्त।

8 मेको मीश मुर इप्चा क्येडा डोंइती मेको निक्शी आस बाक्तीक डोइशशा, गुथ लमाक्त।

9 मिनू मेको मीश मुरुमी मेको आस कली "परमप्रभु यावेमी आंइ रागी इन कली गेशो बाक्ब, दे गो तुइक्नुड। मारदे हना एको रागीम बाक्ब मुर नेल्ल इन कली तशा, शुश हिंनीम। प्रस्थान २३:२७

10 गे इज्जीप्त रागी रे गूशा पिनीनु, परमप्रभु यावेमी इन डोंइती लल समुन्द्र सोव्रपाइक्तु। मिनू यर्दन आइक्ची हांबु डा एमोरी आन पिप सीहोन नु ओग आस कली साइशशा खतम सेल्शो लोव्र गोपुकीमी नेंतक। प्रस्थान १४:२१; गन्ती २१:२१-२६

11 मोदेशो लोव्र नेशो नोले, गोपुकी साप्पा हितक। इन पतीक तशा, गो नेल्ल शुश हितक। मारदे हना परमप्रभु यावे, इन परमप्रभु इर स्वर्ग डा नु उइ रागी डा परमप्रभु बाक्ब। यहोसु ५:१; प्रस्थान १५:१४-१५; ब्यवस्था ४:३९

12 मोपतीके गो इस कली वारच पाता। गे परमप्रभु यावे आ नें थिशा, कसम जसे। मार कसम जस देशा हना, गो इस कली वारच पशो खोदेशो पा, गे लडाइ पनीनु, आं खिं डा मुर नेल्ल आन कली यो वारच पसे। आं कली वारच पतीके चिन्ड का गेयीसी। यहोसु ६:२३,२५

13 मिनू आं आम आफ, आं लोकबपुकी नु मेको आन खिं डा मुर नेल्ल आन कली ब्रोंइचा गेन। बेक्चा रे प्रोनीन" दे मेकोमी देमाक्त।

14 मिनू मेको निक्शीमी "गे आंइ पचशो गेय सुइ आन कली मदेते हना, नु परमप्रभु यावेमी एको रागी आंइ कली गेवा नोले गो इ कली थमा पा वारच पा रिम्शो पाइनस्कु। इ कली साइक्चा क्येडा डोंइती आंस कली साइक्चा माल्नीम" देसा बाक्त।

15 मिनू मेको मीश मुरुमी मेको निक्शी आस कली झेल रे डोरी तोक्शा, उइ तोइक्चा गेम्सी बाक्त। मारदे हना मेको आ खिं मेको सहर डा गारोम बाक्माक्त।

16 मिनू मेको मीश मुरुमी मेको निक्शी आस कली "गे डांडा गे लसे। मेक लाइतीसी हना, खेदा पाइबपुकीमी इस कली मथिल्लीम। मेको खेदा पाइब एक्य मलेम्मा सम्म, गे सां नाक्ती मेकेर खुंडसीस। मिनू नोले इस लां लसे" देमाक्त।

17 मिनू मेको निक्शीमी "गे आस देशो मपाप्तीची हना, गो कसम मजशो खोदेशो दुम्नस्कु।

18 गो लेंशा एक जाक्कानु, गे आंस कली तोइक्तीक झेलम मेको लल डोरी फ्रेंशा वोतो। इ आम आफ, इ लोकब नु इ खिं डा मुर नेल्ल यो इ खिं बाक्चा माल्नीम।

19 मेना सु इन खिं रे लांम गूबा, मेको साइक्चा पुंडसीब। मिनू आंइ कली मारेइ यो दोस मदुम्ब। सु चहिं इ खिं बाक्शा यो, साइक्चा पुंडसीबा, मेको आ दोस आंइ तारी दुम्ल।

20 तन्न एको लोव्र गे सुइ कली देते हना, आंस कली जपाइशशो कसम मराइनीक" देसा बाक्त।

21 मिनू मेको मीश मुरुमी "इस देशो खोदेशो दुम्ल" देमाक्त। मिनू मेको निक्शी लसा बाक्त। मिनू नोले मेको मीश मुरुमी आ झेलम मेको लल डोरी फ्रेंशा वोदा बाक्त।

22 मेको निक्शी लशा, डांडांमी जाक्दीशशा, खेदा पाइब मलेम्मा सम्म नाक्ती सां मेकेर बाक्सा बाक्त। खेदा पाइबपुकीमी मेको निक्शी आस कली साप्पा माल्मे बाक्त हना यो, मथिदमे बाक्त।

23 मिनू मेको निक्शी डांडा रे बुप्शा, लेशशा, खोला आइक्ची हांबु नून आ तौ यहोसु आ बाक्तीक जाक्दीशशा, मेको कली मार मार दुम्मे, मेको नेल्ल शोव्रताक्स।

24 मेको निक्शीमी यहोसु कली "थमा पा, परमप्रभु यावेमी मेको रागी नेल्ल इ कली गेशो बाक्ब। मेको रागी डा मुर इ कली तशा, शुश हिंशा, खिंखिं पशो बाक्तेकम" देंताक्स। यहोसु २:९

## 3

यर्दन खोला शोकसीशो

- 1 मिनु यहोसु सुनी कना बोक्शा, इस्राएलीपुकी नु शित्तीम प्रॉइशा, यर्दन खोलामी जाक्तेक्म। मिनु आडक्की हांबु शोकसीचा क्येडा डोंइती मेकेर बास बाक्तेक्म। गन्ती २५:१
- 2 मिनु सां नाक्त नोले ठेयब मुरपुकी मुर आन बाक्तीकेमी लाम्तेक्म।
- 3 मिनु मेकोपुकीमी मुर आन कली “गेपुकी गेना परमप्रभु यावे, इन परमप्रभु आ कबल पशो सन्दोस चढेब लेवीपुकीम कुरशो ताइनीनी, मेना छुल छाल बोक्शा, इन मारेइ मारेइ कुरशा, मेको आन नोले खोतीन।
- 4 मो पाइतीनी हना, इन लतीक लां तुइक्नीनी। मारदे हना गे मेको लां डोंइती मगाकशो बाक्तीनी। गे मेको आन क्येडा हजार निक्शी हात नोले ला गाक्कीन। मेको आन नेक्था मलन” दैतेक्म। कुबीत का, ०.५ मिटर खोदेशो बाक्ब।
- 5 मिनु यहोसुमी मुर आन कली “गेपुकी आंम कली परमप्रभु यावे आ डोंइती बाक्चा कली ठीक सेल्सीन। मारदे हना दीसा परमप्रभु यावेमी इं दातेमी छक लाक्चा डा गेय पाइब” दैत। प्रस्थान १९:१०
- 6 यहोसुमी चढेब आन कली “परमप्रभु आ कबल पशो सन्दोस कुरशा, मुर आन डोंइती गाक्कीन” दैत। मिनु मेकोपुकी सन्दोस कुरशा, मुर आन डोंइती गाक्तेक्म। यहोसु ६:६
- 7 मिनु परमप्रभु यावेमी यहोसु कली “मुलाक्तर रे गो इ कली इस्राएली नेल्ल आन डोंइती ठेयब सेल्सन। दोपा गो मोसा नु बाक्डा, मोपा गे नु यो बाक्नुड, दे नेल्ल आन कली तुइक्पाइक्नुड। यहोसु ४:१४; यहोसु १:५,१७
- 8 गे कबल पशो सन्दोस कुरब चढेब आन कली “गेपुकी यर्दन खोला आ सुर डा ब्वाक्कुम जाक्दीशशा, मेक उड राष्ठा, बाक्चा माल्नीनी” दे अरेचा माल्नेवे” दैत।
- 9 मिनु यहोसुमी इस्राएली आन कली “ओंथ पिन। मिनु परमप्रभु यावे, इन परमप्रभु आ लोत्र नेनीन” दैत।
- 10 मिनु यहोसुमी “ब्रोंइशा बाक्ब परमप्रभु इन दातेमी बाक्ब, गे तुइक्ब दुम्नीनी। मिनु मेकोमी कनानी, हिन्ती, हिन्वी, परिज्जी, गिरगाशी, एमोरी नु यबुसी आन कली इन डोंइती रे थमा पा खेरब।
- 11 कोव्रडीन, रागी नेल्ल आन कली सासन पाइब परमप्रभु आ कबल पशो सन्दोस इन डोंइती यर्दन शोक्या कली लाइब।
- 12 मिनु मुल इस्राएल डा थरपुकी रे १२ जना वोंइश मुर थर का रे का का पा योव्रडीन।
- 13 गेना परमप्रभु यावे, रागी नेल्ल आन कली सासन पाइब परमप्रभु आ कबल पशो सन्दोस कुरब चढेब आन खोइली यर्दन डा ब्वाक्कुमी खुम्नीमी, मेना इर रे यिशो यर्दन डा ब्वाक्कु नांइसीब। मिनु गारो खोदेशो पा राष्ठा बाक्ब” दैत। भजन संग्रह ९७:५; मीका ४:१३; जकरिया ४:१४
- 14 मिनु मुर नेल्ल यर्दन शोकसीचा कली ठीक पा बाक्मानु, चढेबपुकीमी मुर आन डोंइती परमप्रभु यावे आ कबल पशो सन्दोस कुरशा गाक्तेक्म।
- 15 मिनु बाली नाली रुच्ची ना, खोला गेना हना यो शुश बारशो बाक्ब। मिनु चढेबपुकीमी आन खोइली यर्दन खोला आ सुर डा ब्वाक्कुम खुम्मेनु,
- 16 इर रे यिशो ब्वाक्कु तेक्साक्व। मेको गारो खोदेशो दुम्शा, मुर आन लतीके लां रे डोन बाक्त। मेको ते तेक्सीशो बाक्त दैशा हना, चारेथन आ नेक्था डा आदम सहर माइशोमी तेक्सीशो बाक्त। मिनु इर रे यिशो दिंम डा अराबाह समुन्द्र, मेको कली हिक्सी समुन्द्र यो देंनीम, यीब ब्वाक्कु तेक्सीशो बाक्त। प्रस्थान १४:२१-२२; भजन संग्रह ११४:३
- 17 मिनु मुरपुकी गाक्शा, सोव्रशो खपीम यर्दन शोकसीचा गोम्तेक्म। मिनु परमप्रभु यावे आ कबल पशो सन्दोस कुरब चढेबपुकी यर्दन आ दातेमी सोव्रशो खपीम राष्ठा, रिम्शा बाक्तेक्म। मिनु इस्राएली नेल्ल सोव्रशो खपीम गाक्शा, यर्दन आडक्की हांबु जाक्दीत्तेक्म।

## 4

१२ ओटा फुल्लु वोइशशो

- 1 मिनु मुर नेल्ल यर्दन आडक्की हांबु शोक्ने थुम्मे नोले परमप्रभु यावेमी यहोसु कली
- 2 “मेको मुर आन दाते रे १२ जना वोंइश मुर योव्रडो। थर का रे का का पा योव्रशा लावो।
- 3 मेको आन कली “यर्दन आ दातेमी चढेब आन राप्तीके रे १२ ओटा फुल्लु गुष्ठा, कुरशा चाक्कीन। मिनु नाक्दो ते बास बाक्नीनी, मेको फुल्लु यो मेक उड वोतीन” दे मतो” दैत।
- 4 मिनु यहोसुमी आ योव्रशो इस्राएली थर नेल्ल डा का का पा १२ जना वोंइश मुर आन कली ब्रेत्ताक्व।
- 5 मिनु यहोसुमी मेको आन कली “गे यर्दन आ दातेमी परमप्रभु यावे, इन परमप्रभु आ कबल पशो सन्दोस आ डोंइती लने। मिनु मेकेर इस्राएल आ १२ थर खोदेशो पा १२ ओटा फुल्लु बलाम लाष्ठा पितनी।
- 6 मिनु मेको इन कली मिम्तीके दुम्ल। दीसा नित्थी इन तमी तोपुकीमी ‘एको फुल्लु आ अर्थ मार बाक्म?’ दे हिल्लो पाम्तेक्म हना, प्रस्थान १२:२६;
- 7 गेपुकीमी मेको आन कली ‘परमप्रभु यावेमी आ कबल पशो सन्दोस यर्दन शोक्या ना, मेको आ डोंइती यर्दन डा ब्वाक्कु तेक्पाइक्तु। मेको यर्दन शोक्या ना, यर्दन डा ब्वाक्कु नाइक्पाइक्तु। एको फुल्लु इस्राएली आन कली गेना हना यो मिम्तीक दुम्ल’ दैचा माल्नीनी” दैत।
- 8 मिनु परमप्रभु यावेमी यहोसु कली माइशो खोदेशो पा यहोसुमी दोपा अरेवा, मोपा इस्राएल डा १२ थर डा १२ जना वोंइश मुरुमी १२ ओटा फुल्लु यर्दन आ दाते रे पिशशा, मेको आन बाक्शो दिंममी वोइक्तेक्म।

१२ ओटा फुल्लु यर्दनमी वोइश्शो

9 मिनु यहोसुमी कबल डा सन्दोस कुरशा चढेबपुकी राप्तीकेमी यो यर्दन खोला आ दातेमी १२ ओटा फुल्लु वोइक्तु। मिनु मेको फुल्लुपुकी मुलाक्त सम्म बाक्नीम।

10 मिनु सन्दोस कुरब चढेबपुकी यर्दन आ दातेमी परमप्रभु यावेमी यहोसु कली देशो लोव नेल्ल मपामे सम्म राप्शा बाक्तेक्म। डोंइती मोसामी अरेशो खोदेशो पा यहोसुमी मुर आन कली मअरेवा सम्म राप्शा बाक्तेक्म। मिनु मुरपुकी रीब पा शोक्साक्म।

11 मिनु मुरपुकी शोक्ने थुम्मे नोले, परमप्रभु यावे आ कबल पशो सन्दोस कुरब आन डोंइती चढेबपुकी यो शोक्साक्म।

12 मोसामी मेको आन कली देशो खोदेशो पा, रूबेन आ थर, गाद आ थर नु मनस्से आ उइक्थ थर डा वोंइश मुर या कुरशा, इस्राएली आन डोंइती गाक्तेक्म। यहोसु १:१२-१६

13 मिनु परमप्रभु यावे आ डोंइती हेररा ४० हजार लडाइ पाइब, या कुरशो वोंइश मुरपुकी शोक्शा, लडाइ पचा कली यरीको डा दिमि गे लाप्तेक्म।

14 मेको नाक्त परमप्रभु यावेमी यहोसु कली इस्राएली आन डोंइती टेयब सेल्लु। मिनु मेकोपुकीमोसा कली हिक्शो खोदेशो पा यहोसु कली यो मबेक्म सम्म हिक्तेक्म। यहोसु ३:७

15 मिनु परमप्रभु यावेमी यहोसु कली

16 “कबल पशो सन्दोस कुरब चढेब आन कली ‘मुल यर्दन रे इर कुन’ देशो ब्रेत्तो” दे माइक्तु।

17 मोपतीके यहोसुमी मेको आन कली “यर्दन रे इर कुन” दे ब्रेत्ताक्व।

18 परमप्रभु यावे आ कबल पशो सन्दोस कुरब चढेबपुकी यर्दन आ दाते रे गाक्शा, खोला आ सुर डा सोव्रशो खपीम थेक्त्मे नोले यर्दन डा ब्वाक्कु लेंशा डोंइती डा खोदेशो पा एर ओंथ सुम्शा शांइसाक्व।

गिल्गालमी वोइश्शो फुल्लु

19 मिनु इस्राएलीपुकी डोंइती डा महिना डा १० नाक्तीमी यर्दन रे यूतेक्म। मिनु यरीको आ पूर्व गे गिल्गाल माइक्तीकेमी बास बाक्तीक सेल्साक्म। यहोसु ५:१-१०

20 मिनु यहोसुमी मुरपुकीम यर्दन रे गुंइशा पिश्शो १२ ओटा फुल्लु गिल्गालमी पुक्पाइक्तु।

21 मिनु इस्राएली आन कली “इन तमी तौपुकीमी आन आफ आन कली ‘एको फुल्लु आ अर्थ मार बाक्बा?’ दे हिल्लो पाप्तेक्म हना, यहोसु ४:६

22 गेपुकीमी इन तमी तौ आन कली ‘गो इस्राएलीपुकी सोव्रशो खपीम गाक्शा, यर्दन खोला शोक्सीशो नकी’ देंचा माल्नीनी।

23 दोपा परमप्रभु यावे, इन परमप्रभुमी लल समुन्द्र मशोक्सीशो सम्म सोव्रपदा, मोपान आंइ डोंइती यर्दन मशोक्सीशो सम्म मेकेर डा ब्वाक्कु यो सोव्रपाइक्तु। यहोसु ३:१-१७; प्रस्थान १४:२१-२२

24 मिनु रागी डा मुर नेल्लेमी परमप्रभु यावे, इन परमप्रभु टेयब सक्ति पाइश्शो बाक्ब, दे तुइक्तेक्म। मिनु गे परमप्रभु यावे, इन परमप्रभु कली तुइश्शा, गेना हना यो मान पा हिनीन, दे मोदेशो पाप्तु” देत।

## 5

खोइक्तीक चिनु खोइश्शो

1 मिनु यर्दन आइक्की हांबु पच्छिम गे डा एमोरी आन पिप नेल्ल नु टेयब समुन्द्र आ नेक्था डा कनानी आन पिप नेल्लेमी “परमप्रभु यावेमी इस्राएली आन डोंइती यर्दन खोला मशोक्सीमा सम्म सोव्रपाइक्तु” दे नेंशा, मेकोपुकी इस्राएली आन कली तशा, साप्पा हिंशा आन थुं लुक्च लत। यहोसु ३:१६; यहोसु २:२४

2 मेना परमप्रभु यावेमी यहोसु कली “फुल्लु के खोइक्तीक सेल्शा, चिनु मखोइश्शो इस्राएली आन कली खोइक्तीक चिनु खोतो” दे अरेप्तु। प्रस्थान ४:२५; उत्पत्ती १७:१२-१४

3 मिनु यहोसुमी फुल्लु के खोइक्तीक सेल्शा, गिबेआथ-हारालोथमी इस्राएली आन कली खोइक्तीक चिनु खोइक्तु।

4 यहोसुमी मारदे इस्राएली आन कली खोइक्तीक चिनु खोइक्तु देशा हना, इजीप्त रागी रे पिशो वोंइश मुर नु लडाइ पाइब नेल्ल गोरशो रागीमी बेक्ने थुम्शो बाक्तेक्म।

5 इजीप्त रागी रे पिशो वोंइश मुर नेल्ल आन के खोइक्तीक चिनु खोइक्ने थुम्शो बाक्तेक्म। तन्न गोरशो रागीमी जरमेशो आन कली चहिं खोइक्तीक चिनु मखोइश्शो बाक्तेक्म।

6 मिनु डोंइती परमप्रभु यावेमी आंइ किकी पिपी आन कली “दूध नु खुदो शुश बाक्शो रागी इन चच युइ आन कली गेनुइ” दे कसम जाप्तु। तन्न आ लोव्र मटितीके इजीप्त रे पिशो लडाइ पाइब नेल्ल ४० बर्स गोरशो रागीमी मबेक्मा सम्म हिर्चा माल्तेक्म। परमप्रभु यावेमी मेको आन मटितीके मेको आन कली “गे इन कली मेको दूध नु खुदो शुश बाक्शो रागी ओव्रचा मगेनुइ” दे कसम जशो बाक्त। गन्ती १४:२२-२३

7 मेकोमी आन आफ आन पा डा आन तौ आन कली मेको रागी तचा कली कोल्पाइक्तु। मिनु यहोसुमी मेको आन तौ आन कली खोइक्तीक चिनु खोइक्पाइक्तु। मारदे हना लांमी गाक्तीके मेको आन कली खोइक्तीक चिनु मखोइश्शो बाक्तेक्म।

8 मिनु नेल्ल मुर आन कली खोइक्तीक चिनु खोइक्ने थुम्मे नोले, मेकोपुकी खोइश्शो गार मसाम सम्म आन बाक्तीकेमी बाक्शो बाक्तेक्म।



9 मिनु परमप्रभु यावेमी यहोसु कली “मुलाक्त डा नाक्ती इजीप्त डा इन मुने नेल्ल क्याम्ताक्ड” दैत। मोपतीके मुलाक्त सम्म मेको आन बाक्शो बाक्तीके कली गिल्गाल देशो बाक्नीम। यहोसु ४:१९

पास्सा चाड मानेशो

10 इस्राएलीपुकी गिल्गाल सहरम बाक्शो बाक्तेक्म। मिनु मेकोपुकीमी महिना डा १४ नाक्ती पास्सा चाड मानेक्तेक्म। मेको यरीको डा दिम्म बाक्शो बाक्तेक्म। प्रस्थान १२:६,३९; लेवी २३:१०,१४; २राजा २३:२१:२२; होसे ९:१५

11 पास्सा चाड आ दीसा नाक्ती मेकोपुकीमी मेको रागी डा सिश्शो अन्न रे पा बोरब ओख्ती मसुप्शो शोब्ले नु कारशो अन्न जाम्तेक्म।

12 मेको रागी डा अन्न जामे नोले, आ दीसा नाक्त रे मन्ना शोब्ले यिचा नांडसाक्व। मेकोपुकीमी मेको नाक्त रे कनान रागी डा अन्न जाम्तेक्म। प्रस्थान १६:३५

स्वर्ग डा गेय पाइब नु यहोसु

13 यहोसु यरीको आ नेक्था बाक्मेनु, मेको आ डोंडती गुडमी तरवार शेशा मुर का दोक राप्शो ताप्नु। मिनु यहोसु मेको आ नेक्था लशा “गे आंड मुर ननी देय आंड जोरी सत्रु आ मुर ननी?” दे हिल्लो पाप्नु। गन्ती २२:२३,३१

14 मिनु मेकोमी “ममाड, गो परमप्रभु यावे आ फौज आन कली चलेब नड। मोपतीके जाक्ती” दैत। मिनु यहोसुमी गु बाप्शा सेउ पशा “आं प्रभु, गो इन गेय पाइब नड। आं कली मार लोत्र पाइनीनी?” दे हिल्लो पाप्नु।

15 मिनु परमप्रभु यावे आ फौज आन कली चलेबमी यहोसु कली “इ लिक्शो जुत्ता पुतो। मारदे हना इ बाक्शो परमप्रभु यावे आ बाक्तीक बाक्ब” दैत। मिनु यहोसुमी मेको आ देशो खोदेशो पा आ जुत्ता पुइक्तु। प्रस्थान ३:५

## 6

यरीको सहर कली ग्राचशो

1 मिनु यरीको डा मुरपुकीमी इस्राएली आन कली तशा, आन गारो डा ठेयब लाप्चो चोक्तेक्म। मिनु सुड मुर सहर रे खिंडगा लाडगा मपाम।

2 मिनु परमप्रभु यावेमी यहोसु कली “गो यरीको, मेकेर डा पिप नु मेकेर डा लडाइ पाइब नेल्ल इ कली गेता।

3 मोपतीके ६ नाक्त सम्म, नाक्तीमी खेयप का इ लडाइ पाइब वोंडश मुर नेल्ल आन कली मेको यरीको सहर एर ओंथ हिरपते।

4 मिनु ७ जना चढ़ेब ७ ओटा ताप्तीक ग्रोत्र कुरशा, परमप्रभु यावे आ सल्ला पतीक सन्दोस कुरशो चढ़ेब आन डोंडडोंडती गाक्चा माल्नीम। मिनु ७ नाक्तीमी गे ७ खेयप मेको सहर एर ओंथ हिरचा माल्नीनी। मेना मेको ७ जना चढ़ेबपुकीमी आन ग्रोत्र ताम्ना ताम्न गाक्चा माल्नीम।

5 मिनु मेकोपुकीमी शुश रेयके पा ग्रोत्र ताम्ना ताम्न बाक्मानु, इन मुर नेल्लेमी मेको रेयके नेन्मे नोले, ठेयब सेंदा पा ग्रीचा माल्नीम। मोपा ग्रीमानु, मेको सहर डा गारो नेल्ल ब्रेचब। मिनु मुर नेल्ल आंम आंम डोंडती बारशा, ब्रेशो गारो डोइक्चा माल्नीम” दे परमप्रभुम माइक्तु।

6 मिनु नून आ तौ यहोसुमी चढ़ेब आन कली ब्रेशो, मेको आन कली “परमप्रभु यावे आ कबल पशो सन्दोस कुरीन। मेको ७ जना अरु चढ़ेबपुकी चहिं ७ ओटा ताप्तीक ग्रोत्र कुरशा, परमप्रभु यावे आ कबल पशो सन्दोस कुरब आन डोंडती गाक्पतीन” दैत।

7 मिनु मेकोमी मुर आन कली “गे यो सहर एर ओंथ हिरसीन। मिनु या कुरशो मुरपुकी परमप्रभु यावे आ कबल पशो सन्दोस आ डोंडडोंडती गाक्चा माल्नीम” दैत।

8 मिनु यहोसुमी देशो खोदेशो पा मेको ७ जना चढ़ेब परमप्रभु यावे आ डोंडती ताप्तीक ग्रोत्र कुरशा, ताम्ना ताम्न गाक्तेक्म। मिनु परमप्रभु यावे आ कबल पशो सन्दोस कुरबपुकी मेको आन नोले खोइक्तेक्म।

9 मिनु या कुरब चहिं ग्रोत्र ताप्ब चढ़ेब आन डोंडडोंडती गाक्तेक्म। मिनु मुर नेल्ल सन्दोस आ नोनोले गाक्तेक्म। चढ़ेबपुकी ताप्तीक ग्रोत्र ताम्ना ताम्न गाक्तेक्म।

10 मिनु यहोसुमी नोनोले गाक्ब मुर आन कली “गे काइ मग्रीडीन। इन सेंदा काइ मनसेक्ल। सिक्सी पा गाक्कीन। तेको नाक्त गो इन कली ‘ग्रीडीन’ देनुडा, मेको नाक्त ला वाइ ब्रेशो ग्रीचा माल्नीनी” दे माइक्तु।

11 मोपा मेकोपुकी परमप्रभु यावे आ कबल पशो सन्दोस नाक्त कामी खेयप का सहर आ एर ओंथ हिरताक्म। मिनु मुर नेल्ल आन बाक्तीकेमी लशा, बास बाक्तेक्म।

12 मिनु यहोसु सुनी कना बोक्त। मिनु चढ़ेबपुकीमी परमप्रभु यावे आ कबल पशो सन्दोस कुरतेक्म।

13 मिनु परमप्रभु यावे आ कबल पशो सन्दोस आ डोंडती गाक्ब ताप्तीक ग्रोत्र कुरब ७ जना चढ़ेबपुकीमी ग्रोत्र ताम्ना ताम्न गाक्तेक्म। या कुरब मेको आन डोंडडोंडती गाक्तेक्म। अर्को नेल्ल परमप्रभु यावे आ कबल पशो सन्दोस आ नोले मेको ताप्शो नेंना नेंन खोइक्तेक्म।

14 मोपा आ दीसा नाक्त यो खेयप का सहर आ एर ओंथ हिरताक्म। मिनु आन बाक्तीकेमी लेत्तेक्म। मोपा ६ नाक्त सम्म मोदेशो पाम्तेक्म।

यरीको सहर डा गारो ब्रेशो

15 मिनु मेको आ ७ नाक्ती नां सोत्रचा क्येडा डोंडती बोक्शा, डोंडती डा खोदेशो पा मेको सहर एर ओंथ हिरसाक्म। तन्न मेको नाक्ती मेकोपुकीमी मेको सहर ७ खेयप हिरसाक्म।

16 मिनू ७ खेयप हिरसीमा नोले चढेबपुकीमी ताप्तीक ग्रोत्र ताप्ची ना, यहोसुमी मुर आन कली “वाइ ब्रेशशा ग्रीडीन। मारदे हना परमप्रभु यावेमी एको सहर इन कली गेप्टु।

17 एको सहर नु एको आगा बाकशो मारेड मारेड खतम सेल्टीक परमप्रभु यावे केन बाकब। राहाब तेल्लेम नु आ खिंमी बाकब मुर ला ब्रोडचा ताडनीम। मारदे हना मेकोमी आंड सोडशशो क्यारी पाडब मुर आस कली खुडशशा प्रोडशो बाकत। ब्यवस्था २०:१६-१७; यहोसु २:१२-१३; हिब्रू ११:३१

18 मिनू परमप्रभुमी खतम सेल्चा, देशो थोव्रक लाइक्चा मदुम्ब। होस पा बाककीन। गे परमप्रभु आ देशो मटिथु, मारेड लाइक्तीनी हना, गे आंमा खतम दुम्नीनी। सुडमी मारेड खुड पा, इस्राएली आन बाक्तीकेम वोडक्तीनी हना, मेको खतम दुम्ब। मिनू मुर नेल्ल आन कली श्येत जपाडक्ब। लेवी २७:२८; ब्यवस्था १३:१८

19 सुन चांदी, कांसा नु फलाम के सेल्शो थोव्रक नेल्ल परमप्रभु यावे केन बाक्नीम। मेको परमप्रभु यावे आ शोंप वोडक्तीकेमी वोडक्चा माल्नीम” दंत।

20 मिनू मुरपुकी वाइ ब्रेशशा ग्रीतेकम। मिनू चढेबपुकीमी ग्रोत्र ताम्ना ताम्ना बाक्तेकम। मुरपुकीमी ग्रोत्र ताप्शो नेशा, शुश ग्रीतेकम। मिनू मेको गारो ब्रेलत। मिनू मुरपुकी ग्येत्थ बारशा, मेको सहर आंम के सेल्तेकम। हिब्रू ११:३०

21 मिनू सहर डा मीश मुर वोंडश मुर, आल, खाल्पी खाल्पा बी ब्यफ, क्यारश भेडा, गधा नेल्ल आन कली तरवारम साडक्तेकम।

22 मिनू यहोसुमी मेको क्यारी पाडब निकशी आस कली “गे मेको तेल्लेम आ खिं लस। मिनू इस कसम जशो खोदेशो पा मेको मीश मुर नु आ खिं डा मुर नेल्ल आन कली गुंडदीस” दंत। यहोसु २:१२-१४

23 मिनू मेको डोंडती क्यारी पाडब टिटा निकशी मेको आ खिं ओव्रशा, राहाब कली गुंडताक्स। मेको नु आ आम आफ आ लोक्ब नु आ खिं डा मुर नेल्ल आन कली यो गुंडताक्स। मिनू मेको आन कली इस्राएली आन बाक्तीके आ लाडगाम बाक्चा गेम्ताक्स। गन्ती ३१:१९

24 मिनू मी सुडशशा, मेको सहर नु आगा डा थोव्रक नेल्ल क्रोडक्तेकम। सुन चांदी, कांसा नु फलाम के सेल्शो थोव्रकपुकी ला परमप्रभु यावे आ खिं डा शोंप वोडक्तीकेमी वोडक्तेकम।

25 तन्न यहोसुमी राहाब तेल्लेम नु आ खिं डा मुर आन कली प्रोडतु। मारदे हना मेकोमी यहोसु आ यरीको सोडशशो क्यारी पाडब निकशी आस कली खुडशशा प्रोडशो बाकत। मेको नाकत रे राहाब आ खिं डा मुरपुकी इस्राएली आन दातेमी बाक्तेकम। मती १:५; न्यायाधीस १:२५

26 मेना यहोसुमी “सुमी यरीको सहर लेंशा सेल्बा, मेको परमप्रभु यावे आ डोंडती सराप राडब। मेकोमी जग फुल्लु वोदानु, आ डोंडती जर्मेशो तौ बेक्ब। मिनू आ गारो डा ठेयब लाप्चो वोदानु, आ कान्छा तौ बेक्ब” दे कसम जाप्टु। १राजा १६:३४

27 मिनू परमप्रभु यावेमी यहोसु कली वारच पाप्टु। मेको रागी डा मुर नेल्ल मेको तुडशशा, यहोसु तशा हितेकम।

## 7

आकानमी मार मार खुड पशो

1 मिनू इस्राएलीपुकीमी मटिथु, खतम सेल्चा माल्शो परमप्रभु यावे आ थोव्रक रे खुड पांम्तेकम। यहूदा आ थर डा जेराह आ युड, जब्दी आ चच, कारमी आ तौ आकानमी मलाडक्चा थोव्रक रे पा मार मार खुड पा लदा बाकत। मोपतीके परमप्रभु यावे इस्राएली नेल्ल आन कली तशा चुरमाकत। यहोसु ६:१८

2 मिनू यहोसुमी यरीको रे बेथेल आ पूर्व बेथ-आवेन आ नेक्था ऐ सहरमी मुर आन कली सोडक्ताक्ब। मिनू मेको आन कली “गेपुकी मेक लशा, मेको रागी कली क्यारी पन” दे माडक्तु। मिनू मेको मुरपुकी लशा, मेको ऐ सहर कली क्यारी पांम्तेकम।

3 मिनू मेकोपुकीमी यहोसु बाक्तीक लेशशा जाक्शा “मुर नेल्ल ऐ सहरम लचा ममाल्नीम। निकशी सां हजार मुर ला लशा, लडाइ पांम्तेकम हना, ग्रानीम। नेल्ल कली श्येत मगेन। मारदे हना मेकेर शुश मुर मबाकम” दंतैकम।

4 मोपतीके हजार सां खोड मुर ला लांम्तेकम। तन्न मेकोपुकी ऐ सहर डा मुरपुकी नु लडाइ बुशा, प्रोक्शा लेल्तेकम।

5 मिनू ऐ डा मुरपुकीमी ३६ जना इस्राएली आन कली साडक्तेकम। मेकोपुकीमी सहर डा ठेयब लाप्चो रे शेबारीम डा लुकच लतीक लां सम्म खेदा पा, मेको आन कली साडक्तेकम। मिनू इस्राएली आन थुं लुकच लशा, शुश हितेकम।

6 मिनू यहोसु नु इस्राएल डा खाल्पापुकीम सुर्ता पा आंम वा खाक्शा, पियामी फुरक फुडशशा, परमप्रभु यावे आ कबल पशो सन्दोस आ नेक्था पोक्च थेक्शा, मेकेर नाक्दो सम्म बाक्तेकम।

7 मिनू यहोसुमी “परमप्रभु, परमप्रभु यावे, मारदे गे मेको मुर आन कली यर्दन खोला शोक्चा गेनी? मारदे गे आंड कली एमोरी आन गुडमी साडक्चा कली गेनी? गो यर्दन आडक्ची हांबु ठीक पा बाक्शो नकी।

8 परमप्रभु, इस्राएली आन जोरी सनु रे प्रोक्चा माल्तेकम। गो मुल मार पाडनुडा डा?

9 मारदे हना कनानीपुकी नु एको रागी डा मुर नेल्लेमी एको लोव्र नेशा, आंड कली पुम्नीम। मिनू आंड नें रागी रे पा क्यान्नीम। मिनू गे इन ठेयब नें आ पर्बंम मार पाडनीनी?” दे परमप्रभु यावे कली लोव्र पाप्टु। प्रस्थान ३२:१२

10 मिनू परमप्रभु यावेमी यहोसु कली “बोक्को। गे मारदे इ कुल खुक्शा, बाप्शा बाक्नेवे?

11 इस्राएलीपुकीमी पाप पांम्तेकम। मेकोपुकीमी आं माडशशा “पचा माल्ब” दे पशो कबल प्रोडतेकम। खतम सेल्चा माल्शो थोव्रक खुड पा लाडशशा, आंम थोव्रक नु ब्वाडशशा, खुडशशा वोडक्तेकम।

12 मोपतीके इस्राएली आन जोरी सनु आन कली तशा, प्रोक्नीम। मारदे हना मेकोपुकी यो खतम सेल्चा माल्शो दुम्शो बाक्नीम। मेको आन खतम सेल्चा माल्शो खुडशशा थोव्रक इन दाते रे मगुंडताक्नी हना, गो गे नु मबाक्नुड।

13 बोकको। मुर आन कली आं डोंइती ठीक सेल्पतो। मिनु मेको आन कली गे दीसा कली परमप्रभु यावे आ डोंइती ठीक सेल्सीन। मारदे हना परमप्रभु यावे, इस्राएली आन परमप्रभुमी इन दातेमी खतम सेल्चा माल्शो थोत्रक बाक्नीम। मेको मयुंडताक्वी हना, इन जोरी सनु क्येडा ग्राने मचाप्नीनी। यहोसु ३:५

14 मिनु गे सुनी कना थर थर डा मुरपुकी बुक्शा, जाक्चा माल्नीनी। मिनु परमप्रभु यावेमी तेको थर कली कोंइबा, मेको थर डा नेल्ल खिं खिं डा मुरपुकी जाक्चा माल्नीम। मिनु परमप्रभु यावेमी तेको खिं डा मुर कली कोंइबा, मेको आ खिं खिं डा मुर आन डोंइती जाक्चा माल्नीम। मिनु परमप्रभु यावेमी तेको खिं कली कोंइबा, मेको खिं रे का का पा वोंइश मुरपुकी मुर आन डोंइती जाक्चा माल्नीम।

15 मिनु तेको मुर नु खुड पशो थोत्रक बाक्बा तुंडसीब, मेको नु आ मारेड मारेड मीम हुम्चा पुंडसीब। मारदे हना मेकोमी परमप्रभु यावे आ देशो मटिशु, इस्राएली आन दातेमी काड मरिम्शो ग्रान्गा दिशो गेय पाप्तु” दे माडक्तु।

16 मिनु यहोसुमी सुनी कना बोकशा, इस्राएली नेल्ल आन कली थर थर पा बुक्पाइक्तु। मो पशोनु यहूदा आ थर कोंइचा पुंडसाक्व। १सामुएल १०:२०-२१; १सामुएल १४:४१-४२

17 मिनु यहूदा आ खिं खिं डा मुर आन डोंइती जाक्चा माल्तेक्म। मिनु जेराह आ खिं खिं डा मुर कोंइचा पुंडसाक्म। मिनु यहोसुमी जेराह आ खिं खिं डा मुर आन कली आ डोंइती जाक्पाइक्तु। मेको रे जब्दी आ खिं डा मुर कोंइचा पुंडसाक्व। गन्ती २६:२०

18 मिनु यहोसुमी मेको आ खिं डा वोंइश मुर का का पा मुर आन डोंइती जाक्पाइक्तु। मोपा जाक्मानु, यहूदा आ थर डा जेराह आ युड, जब्दी आ चच, कारमी आ तौ आकान कोंइचा पुंडसाक्व।

19 मिनु यहोसुमी आकान कली “आं तौ, परमप्रभु यावे, इस्राएली आन परमप्रभु कली ठेयब सेलो। मार मार पवी, मेको कली देनो। इ पशो आं कली देनो। लोत्र का यो मखुडक्तो” देंत।

20 मिनु आकानमी यहोसुमी कली “थमा, गो परमप्रभु यावे, इस्राएली आन परमप्रभु आ डोंइती पाप पाता। गो मार पाता देशो हना, गन्ती २१:७; न्यायाधीस १०:१०; १सामुएल ७:६; भजन संग्रह ५१:५-६

21 गो खतम सेल्चा माल्शो थोत्रक रे पा शिनार रागी डा रिम्शो फेक्तीक वा, सहे निक्शी शेकेल चांदी नु ५० शेकेल हेल्शो सुन के कोक्के का ताता। गो मेको साप्पा दाक्ताक्ड डा मिन लांडसाक्वी। मिनु मेको आं ताम्बु आगाम थिम्शा वोंइक्ता। मेको चांदी नेल्ल क्येडा आगाम बाक्ब” देंत। शेकेल का ११.५ ग्राम बाक्ब।

22 मिनु यहोसुमी गेय पाडब आन कली आकान आ ताम्बुम सोइक्ताक्व। मेकोपुकी दोरशा लशा, मेको आ ताम्बुमी दोशा, फेक्तीक वा नु खुडशशो थोत्रक नेल्ल गुंडताक्म। मिनु मेको चांदी नेल्ल क्येडा आगाम बाक्त।

23 मिनु मेकोपुकीमी मेको थोत्रक गुंडशा, यहोसु नु इस्राएली नेल्ल आन बाक्तीकेम चाक्तेक्म। मिनु परमप्रभु यावे आ डोंइती वोंइक्तेक्म।

24 मिनु यहोसु नु इस्राएली नेल्ल गारशा, जेराह आ खिं डा आकान नु आ खुड पशो चांदी, फेक्तीक वा नु सुन के कोक्के, मेको आ तमी तौ मेको आ बी ब्यफ, आ गधापुकी, आ भेडापुकी, मेको आ ताम्बु नु मेको नु बाक्शो मारेड मारेड आकोर आ बेंसीमी लाइक्तेक्म। लेवी २४:१४-१५

25 मिनु यहोसुमी आकान कली “गे गो आंड कली शुश श्येत गेप्तीवी। मुलाक्ती परमप्रभु यावेमी इ कली श्येत गेब” देंत। मिनु इस्राएली नेल्लेमी मेको आन कली फुल्लुमी आप्शा साइक्तेक्म। मिनु मेको आन कली साइशशा, मीम हुम्ताक्म। ब्यवस्था १३:१६-१७

26 मिनु मेको आन तारी शुश फुल्लु तेल्तेक्म। मेको फुल्लु तेल्तीके मुलाक्त सम्म बाक्ब। मिनु नोले परमप्रभु यावे आ गाइक्चा नांडसाक्व। मिनु मेको बेंसी आ नें आकोर बेंसी वोंइक्तेक्म। मेको मुल सम्म बाक्ब। यसैया ६५:१०; होसे २:१७

## 8

ऐ सहर कली खतम सेल्शो

1 मिनु परमप्रभु यावेमी यहोसु कली “महिनो। इ थुं लुकच मलल। मुल लडाइ पाडब नेल्ल लाइशशा, ऐ सहर कली लडाइ तोवो। मारदे हना गो ऐ सहर डा पिप, मेकेर डा मुरपुकी, सहर नु रागी इ कली गेता।

2 गे यरीको नु मेकेर डा पिप कली मार मार पवी, ऐ सहर नु मेकेर डा पिप कली यो मोदेशो पावो। मेक डा मारेड मारेड, बी ब्यफ क्यारश भेडा नेल्ल गे इन कली लांडसीन। मिनु सहर आ नोले गे हुल का मुर बाप्पाइशशा, वोतीन” देंत। यहोसु ६:२१; ब्यवस्था २०:१०-१८

3 मिनु यहोसु नु लडाइ पाडब नेल्ल ऐ सहर कली लडाइ तोथ, लाम्तेक्म। यहोसुमी ३० हजार लडाइ पाडब मुर आन कली योत्रशा, नाक्दो सोइक्ताक्व।

4 मिनु मेकोमी “गे मेको सहर आ नोले बाप्शा बाक्चा माल्नीनी। मेको सहर क्येडा डोन मलने। लडाइ पचा कली ठीक दुम्शा, होस पा बाक्कीन।

5 गो नु आं मुर नेल्ल सहर गे बारनीकी। मिनु मेको डोंइती खोदेशो पा आंड कली खेदा पा ग्रूतेक्म हना, गो प्रोक्खु पाइनीकी।

6 मेकोपुकीमी आंड कली खेदा पा खोइक्नीम। आंड कली खेदा पा खोदमेनु, गोपुकी मेको आन कली सहर रे शुश डोन लपाइक्चा कली आंड कली खेदा पपाइक्नीकी। मारदे हना मेकोपुकीमी “इस्राएलीपुकी डोंइती डा बुदी गो आंड कली तशा, प्रोक्ना प्रोक्न बाक्नीम” दे मिन्मीम। मोपा गो प्रोक्कानु, यहोसु ७:५

7 गेपुकी इन बाप्तीके रे बोकशा गूशा, सहर आंम के सेलीन। मिनु परमप्रभु यावे, इन परमप्रभुमी मेको सहर इन कली गेब।

8 परमप्रभु यावेमी आ देशो खोदेशो पा, सहर इन गुडमी गेवा नोले, मेको कली मी सुडक्तीन” दे मेको आन कली देंत।

9 मिनू यहोसुमी मेको आन कली सोडक्ताक्व। मिनू मेकोपुकी ऐ क्येडा पच्छिम बेथेल नु ऐ आस दातेम बाप्शा बाक्तेकम। मिनू यहोसु मेको नाकदो आ मुर आन दातेमी बाक्त।

10 मिनू यहोसु नु बाक्शो लडाइ पाइब नेल्ल यो मेकेर लाम्तेकम। इस्राएल डा खाल्पा नु ऐ सहर गे लाम्तेकम।

11 यहोसु नु बाक्शो लडाइ पाइब नेल्ल यो मेकेर लाम्तेकम। मिनू ऐ सहर आ डोंइती जाक्तेकम। सहर आ उत्तर गे जाक्शा बाक्तेकम। मेको ऐ सहर नु आन दातेमी बेंसी का बाक्त।

12 मिनू डोंइती यहोसुमी ५ हजार लडाइ पाइब आन कली लाइशशा, ऐ क्येडा पच्छिम गे बेथेल नु ऐ आस दातेम बाप्शा कली चोइक्तु।

13 मोपा ऐ सहर आ उत्तर गे शुश लडाइ पाइब आन बाक्तीकेमी बाक्मानु, पच्छिम गे मेको बाप्शो ५ हजार लडाइ पाइब बाक्तेकम। मेको नाकदो यहोसु नु आ मुरपुकी बेंसीम बाक्तेकम।

14 मिनू सुनी कना ऐ डा पिपमी मेको आन कली तशा, ऐ डा लडाइ पाइब नु सहर डा वोंइश मुर नेल्ल इस्राएली नु लडाइ पथ लाम्तेकम। पिप नु आ मुर नेल्ल अराबाह माइक्तीकेमी दिम आ डोंइती जाक्तेकम। तन्न सहर आ नोले मेकोपुकी बाप्शा बाक्शो बाक्नीम मतुइक्तेम।

15 मिनू यहोसु नु इस्राएली नेल्ल ब्रुशो खोदेशो पा, गोरशो रागी गे प्रोक्खु पाम्तेकम।

16 मेको पिपमी ऐ सहर डा मुर नेल्ल आन कली ब्रेशशा, इस्राएली आन कली खेदा पपाइक्तु। मोपा यहोसु कली खेदा पा, मेकोपुकी ऐ सहर क्येडा डोन सम्म लाम्तेकम।

17 ऐ नु बेथेल डा वोंइश मुर नेल्लेमी इस्राएली आन कली खेदा पाम्तेकम। खेदा मपाइब का सम्म यो मलीम। मेकोपुकी आंम सहर डा गारो आ ठेयब लाप्चो रोक्शा चोइशशा, इस्राएली आन कली खेदा पाम्तेकम।

18 मिनू परमप्रभु यावेमी यहोसु कली “इ गुडमी बाक्शो तरवार ऐ सहर गे कोंइशा दिंदो। मारदे हना गो मेको सहर इ कली गेनन” देंत। मिनू यहोसुमी आ गुडमी बाक्शो तरवार ऐ सहर गे कोंइशा दिंताक्व।

19 मिनू यहोसुम आ तरवार दिंदानु, मेको बाप्शा बाक्ब लडाइ पाइब नेल्ल बोक्शा बारशा, ऐ सहर आगा ओव्रतेकम। मेकोपुकी ओव्रशा, सहर कली आंम के सेल्शा, मी सुडक्ताक्व।

20 मिनू ऐ सहर डा खेदा पाइबपुकीमी बिर हिरशा, कोव्रडमेनु, आंम सहरमी कुन जुइशशो ताम्तेकम। मोपा कुन जुइशशो तशा, मेकोपुकीमी एर ओंथ प्रोक्ने मचबेम। मारदे हना गोरशो रागी गे प्रोक्खु पाइब इस्राएलीपुकी लेशशा, मेकोपुकी नु लडाइ पचा गोम्तेकम।

21 यहोसु नु इस्राएली नेल्लेमी मेको ऐ सहर बाप्शा बाक्बपुकीमी सहर आंम के सेल्शो ताम्तेकम। सहर रे कुन जुइशशो तामे चोटीन, मेकोपुकी बिर हिरशा, ऐ सहर डा वोंइश मुर आन कली साइक्का गोम्तेकम।

22 मिनू डोंइती बाप्शा बाक्बपुकी सहर रे यूतेकम। मोपा इस्राएलीपुकीमी ऐ सहर डा मुर आन कली आन दाते पा आन एर ओंथ बाक्शा, का कली यो प्रोक्का मगेम। नेल्ल आन कली साइक्तेकम।

23 मिनू मेकेर डा पिप कली चहिं सेसीन ग्याइशशा, यहोसु आ बाक्तीक चाक्तेकम।

24 मिनू इस्राएलीपुकीमी ऐ डा मुर नेल्ल आन कली, गोरशो रागी डा दिंममी साइक्ने थुम्शा, ऐ सहर लेशशा, ओव्रशा, मेकेर बाक्शो आन कली यो तरवारमी क्योरशा साइक्तेकम।

25 मेको नाक्ती साइक्का पुंडसीशो मुर वोंइश मुर नु मीश मुर नेल्ल पा १२ हजार बाक्तेकम। ऐ डा मुर नेल्ल मोशोन बाक्तेकम।

26 मिनू यहोसुमी ऐ डा मुर नेल्ल साइक्ने मथुम्मे सम्म आ तरवार शेशा दिंशो गुइ मतोक्का।

27 मिनू परमप्रभु यावेमी यहोसु कली देशो खोदेशो पा बी ब्यफ, क्यारश भेडा नु रोइशशो मारेइ मारेइ इस्राएलीपुकीमी चोंइसाकम।

28 मिनू यहोसुमी ऐ सहर कली चोशा, गेनायो मसेल्चा डा पा खतम सेल्लु। मोदेशो मुल सम्म बाक्ब।

29 मिनू मेकोमी ऐ डा पिप कली नां मरिक्म सम्म रवामी क्युकशा चोइक्पाइक्तु। मिनू नां रिक्म नोले यहोसुमी पिप आ रां रवा रे शोल्शा, सहर ओव्रतीक लाप्चोम लाइशशा ताइक्पाइक्तु। मेको आ तारी शुश फुल्लु तेल्लेक्म। मेको मुल सम्म बाक्ब। ब्यवस्था २१:२२-२३

एबाल डांडाम अरेशो लोव्र पदेशो

30 मिनू यहोसुमी परमप्रभु यावे, इस्राएली आन परमप्रभु कली एबाल डांडामी चढेतीक का सेल्लु। ब्यवस्था २७:२-८

31 परमप्रभु यावे आ गेय पाइब मोसामी इस्राएली आन कली देशो खोदेशो पा नु मोसामी अरेशो लोव्र ब्रेक्शा किताबम ब्रेक्शो खोदेशो, मक्योरशो, फलामम मथिपाइशशो फुल्लु खुप्शा, चढेतीक का सेल्लेक्म। मेकेर परमप्रभु यावे कली चोशा चढेतीके नु दुशा बाक्का आ परबंम चढेतीके चढेम्तेकम। प्रस्थान २०:२५; प्रस्थान २४:१-८

32 मिनू मेकेर इस्राएली नेल्ल आन डोंइती यहोसुमी परमप्रभु यावे आ अरेशो लोव्र मोसामी मुशा ब्रेक्शो खोदेशो पा, फुल्लुम मुशा ब्रेक्ताक्व।

33 मिनू इस्राएली नेल्ल, मेको नु बाक्ब अर्को रागी डा मुरपुकी, खाल्पापुकी, ठेयब मुर नु मेको आन ठेयब मुरपुकी परमप्रभु यावे आ कबल पशो सन्दोस आ नेक्शा राप्शो बाक्तेकम। मेकोपुकी परमप्रभु यावे आ सन्दोस कुरब लेवी आ थर डा चढेब गे कोव्रशा, राप्शो बाक्तेकम। इस्राएली नु मेको नु बाक्ब अर्को रागी डा मुर नेल्ल आधी गेरीजीम डांडा गे कोव्रशा, अरु आधी एबाल डांडा गे कोव्रशा राप्शो बाक्तेकम। मिनू परमप्रभु यावे आ गेय पाइब मोसामी अरेशो खोदेशो पा यहोसुमी इस्राएली नेल्ल आन कली आसीक गेण्टु। ब्यवस्था ११:२९; ब्यवस्था २७:१२-२६; ब्यवस्था २८:-

34 मिनु नोले यहोसुमी परमप्रभु यावे आ अरेशो लोत्र नेल्ल, आसीक नु सराप आ पर्वम ब्रेकशो यो पढेप्टु। दोदेशो पा ब्रेकशो बाकमे, मोदेशो पा पढेप्टु।

35 मोसामी मार मार लोत्र अरेशा, ब्रेकशो बाकमे, मेको नेल्ल यहोसुमी इस्राएली नेल्ल कली पढेशा नेंपाइवक्तु। मेक बाकशो वोंडश मुर, मीश मुर, आलपुकी नु मेकोपुकी नु बाकब अर्को रागी डा मुर आन डोंडती नेल्ल पढेशा नेंपाइवक्तु।

## 9

गिबोन डा मुरपुकीम जोल पशो

1 मिनु यर्दन आइक्वी हांबु पहाड नु दिममी, ठेयब समुन्द्र आ नेक्था नु लेबानोन गे बाकब हिली, एमोरी, कनानी, परिज्जी, हिब्वी नु यबुसी आन पिपपुकीमी एको लोत्र नेंशा,

2 मेकोपुकी थु का दुम्शा, यहोसु नु इस्राएलीपुकी नु लडाइ पचा कली बुक्तेक्म।

3 मिनु गिबोन डा मुरपुकीमी यहोसुमी यरीको नु ऐ सहर कली मार मार पवा, मेको लोत्र नेंशा, यहोसु ६:२०-२१; यहोसु ६:२६-२८

4 मेकोपुकीमी डोन रागी रे जाकशो खोदेशो पा बुत सेल्शा, आन गधा तारी माइत धोक्रो वोइशशा, गाकशो फेरशो कुशुल के अडगुर शांबु वोइक्तीक कुर पाइक्तेक्म।

5 मिनु गाकशो माइत जुत्ता नु जेक्शो वासी फेक्साक्म। मेको आन कुरशो बुत सोवशो नु बुंखी डाइशशो बाकत।

6 मिनु मेकोपुकीमी गिल्गाल यहोसु आ बाक्तीकेमी जाकशा, यहोसु नु इस्राएली नेल्ल वोंडश मुर नेल्ल आन कली “गोपुकी डोन रागी रे जाकशो नकी। मोपतीके गोपुकी नु गारशा, कबल पने” दैतेक्म।

7 मिनु इस्राएलीपुकीमी मेको हिब्वी आन कली “गोपुकी आंइ दातेमी बाकब मुर बाक्नीनी, को? गोपुकी गोपुकी नु दोपा गारने चाप्नीकी डा?” दैतेक्म। यहोसु ११:१९; प्रस्थान २३:३२

8 मिनु मेकोपुकीमी यहोसु कली “गो इन गेय पाइब नकी” दे लोत्र लेत्ताक्म। मिनु यहोसुमी मेको आन कली “गे सु ननी? ते रे जाकशो ननी” दे हिल्लो पाप्टु।

9 मिनु मेकोपुकीमी “गो इन गेय पाइबपुकी शुश डोन रागी रे जाकशो नकी। गोपुकी परमप्रभु यावे, इन परमप्रभु आ पर्वम शुश नेंतक। मिनु इजीप्त रागीमी मार पवा मेको नेल्ल नेंतक।

10 यर्दन आइक्वी हांबु डा एमोरी आन पिप निक्शी, हेरबोन डा पिप सीहोन कली नु अशतारोथम बाकब बाशान डा पिप ओग कली मार मार पनी मेको नेल्ल नेंतक। गन्ती २१:२१-३५

11 मोपतीके आंइ ठेयब मुरपुकी नु आंइ रागी डा मुर नेल्लेमी ‘गोपुकीमी लांम जतीक बुत कुरशा, मेको आन कली गुम्थ लने’ दैतेक्म। मेको आन कली ‘गो इन गेय पाइब नकी। गे गो नु कबल पा आंइ कली बने, दे देनीन’ दैतेक्म।

12 इन कली गुम्थ गाकशो नाक्ती गोपुकीमी आंइ खिं रे एको शोब्ले होश कुरशो नकी। मुल सोवशा बुंखी डाइशशो बाकब।

13 मिनु आंइ गाक्की ना एको अडगुर शांबु प्रिशो कुशुल के थैलो नक बाक्तेक्म। मुल कोव्रडीन, एको यो गाक्ने थुम्तेक्म। मेको लाइशशो लां दुम्तीके आंइ फेक्शो वासी नु जुत्ता यो माइत दुम्शा जेक्तेक्म” दैतेक्म।

14 मिनु इस्राएलीपुकीमी आन चाकशो कोसेली ताक्तेक्म, तन्न परमप्रभु यावे कली हिल्लो मपथु, जाम्तेक्म। गन्ती २७:२१

15 मिनु यहोसुमी मेको आन कली “इन थुं नांइसीन। ब्रोंडचा ताइनीनी” दे कबल पाप्टु। मिनु मेकेर डा ठेयब मुरपुकीमी यो कसम जाम्तेक्म।

16 मिनु कबल पशो सां नाक्त नोले मेको मुर आन नेक्था डा मुर आंम दातेमी बाकब मुर बाक्तेक्म, दे इस्राएलीपुकीमी नेंतेक्म।

17 मिनु इस्राएली गाकशा, सां नाक्तीमी मेको आन सहर जाक्दीत्तेक्म। मेको आन सहर गिबोन, केफीरा, बेयरोथ नु किरयथ-यारीम बाक्तेक्म।

18 मिनु इस्राएलीपुकीमी मेको आन सहर कली लडाइ मतोम। मारदे हना इस्राएल डा ठेयब मुरपुकीमी मेको नु परमप्रभु यावे, इस्राएली आन परमप्रभु आ डोंडती कसम जशो बाक्तेक्म। मोपतीके मुरपुकीमी इस्राएली आन ठेयब मुर आन पर्वम गन गन पाम्तेक्म।

19 मिनु ठेयब मुरपुकीमी इस्राएली नेल्ल आन कली “गोपुकीमी परमप्रभु यावे, इस्राएली आन परमप्रभु आ नेमी कसम जाइतक। मोपतीके गो मेको आन कली ब्रोंडचा गेचा माल्नीकी।

20 मुल मेको आन कली ब्रोंडचा गेचा माल्नीकी। मोदेशो मपाइतक हना, आंइ जशो कसममी पतीके, गो सराप राइनीक” दे इस्राएली आन कली दैतेक्म। गन्ती १:५३; २सामुएल २४:१

21 मिनु ठेयब मुरपुकीमी “मेको आन कली ब्रोंडचा गेन” दैतेक्म। मिनु मेकोपुकी इस्राएली आन शी चेपब नु ब्वाक्कु क्याक्ब वाइल दुम्तेक्म। ठेयब मुरुमी दोदेशो दैमे मोदेशो दुम्त।

22 मिनु यहोसुमी मेको गिबोन डा मुर आन कली ब्रेशशा “गोपुकी आंइ नेक्था गोपुकी नु बाकब बाक्नीनी। तन्न ‘गो डोन रागी डा नकी’ दे मारदे जोल पनी?

23 मोपा जोल पतीके मुल गोपुकी सराप रशो दुम्तीनी। गोपुकी गेना हना यो वाइल दुम्चा माल्नीनी। गोपुकी आं परमप्रभु यावे आ खिं डा शी चेपब नु ब्वाक्कु क्याक्ब दुम्तीनी” दैत।

24 मिनू मेकोपुकीमी यहोसु कली “परमप्रभु यावे, इ परमप्रभुमी आ गेय पाइब मोसा कली ‘रागी नेल्ल इन के दुम्ब। एको रागी डा मुर नेल्ल सतीन’ दे अरेशो तुइश्शो नकी। मोपतीके गो इन कली तशा शुश हित्तिके, आंड कली प्रॉइचा कली जोल पाइतक।

25 मुल गो इन गुइमी बाकनीकी। आंड कली मार पशो नु रिम्शो लाकनीनी, मोदेशोन पन” देतेक्म।

26 मोपा यहोसुमी मेको आन कली इस्राएली आन गुइ रे पा प्रॉइतु। मिनू इस्राएलीपुकीमी मेको आन कली साइक्वा मतामे।

27 मिनू मेको नाक्त रे यहोसुमी मेको आन कली इस्राएली नेल्ल नु परमप्रभु यावे आ चढेतीक कली शी चेप्ब नु ब्वाक्कु क्याक्ब सेल्लु। मेकोपुकीम मुल सम्म मोदेशो पाइनीमी। ब्यवस्था २९:१०; १इतिहास २१:२९; २इतिहास १:३

## 10

नां नाइश्शा बाक्शो

1 मिनू यरूसलेम डा पिप अदोनी-सेदेकमी “यहोसुमी ऐ सहर ग्राशा, खतम सेल्लु। मिनू यरीको नु मेकेर डा पिप कली पाइश्शो खोदेशो पा मेको ऐ सहर नु मेकेर डा पिप कली यो पाइक्तु। मिनू गिबोन डा मुरपुकी इस्राएली नु गारशा, मुल आन दातेमी बाक्शो बाक्तेक्म” दे नेंतु। यहोसु ६:-; यहोसु ८:-; यहोसु ९:-

2 मिनू मेको नु आ मुर नेल्ल शुश हित्तेक्म। मारदे हना गिबोन थम ठेयब सहर, पिप आ बाक्तीक सहर खोदेशो, बाक्त। मिनू मेको ऐ सहर क्येडा ठेयब बाक्त। मिनू मेकेर डा वॉइश मुर नेल्ल बोल्यो लडाइ पाइब बाक्तेक्म।

3 मिनू यरूसलेम डा पिप अदोनी-सेदेकमी हेब्रोन डा पिप होहाम, यरमुथ डा पिप पिराम, लाकीश डा पिप याफ़ीया नु एग्लोन डा पिप देबीर बाक्तीकेमी लोत्र सोइक्ताक्व।

4 मिनू मेको आन कली “आं कली वारच पथ पिन। गो नेल्ल गारशा, गिबोन नु लडाइ पय। मारदे हना मेकोपुकी यहोसु नु इस्राएलीपुकी नु गारमा बाक्त” दे लोत्र सोइक्ताक्व।

5 मोपा एमोरी आन ५ जना पिप, यरूसलेम, हेब्रोन, यरमुथ, लाकीश नु एग्लोन डा पिप खुम्सीशा, आन लडाइ पाइब नेल्ल नु जाक्शा, गिबोन नु लडाइ पांतेक्म।

6 मिनू गिबोन डा मुरपुकीमी गिल्याल सहरम बाक्शो यहोसु कली “मुल, गे इन गेय पाइब, गो आंड कली मप्रेदीन। गे रीब पा जाक्कीन। आंड कली वारच पा प्रोनीन। मारदे हना पहाड रागीम बाक्ब एमोरी आन पिप नेल्ल गो नु लडाइ पचा कली खुम्सीशो बाक्नीम” दे लोत्र सोइक्ताक्व।

7 मिनू यहोसुमी आ लडाइ पाइब नेल्ल आन कली लाइश्शा, गिल्याल रे लत। मिनू आ नेल्ल क्येडा बोल्यो लडाइ पाइबपुकी यो मेको नु लांतेक्म।

8 मोपा लमानु, परमप्रभु यावेमी यहोसु कली “मेको आन कली तशा, महिनो। मारदे हना गो मेको आन कली इन गुइमी गेता। मेको आन मुर का सम्म यो इन डोंइती राप्ने मचाप्नीम” देत।

9 मिनू नेल्ल नाक्दो यहोसु नु इस्राएली गिल्याल रे गाक्शा, मेक जाक्दीश्शा, छक लाक्वा डा पा मेको आन कली लडाइ तोंतेक्म।

10 मिनू परमप्रभु यावेमी एमोरी डा मुर आन कली इस्राएली आन डोंइती वाम ग्याम सेल्लशा, मेको आन कली गिबोन सहरम बुपाइक्तु। इस्राएलीपुकीमी मेको आन कली गिबोन रे बेथ-होरोन डा ग्येत्थ लां रे पा खेदा पांतेक्म। आजेका नु माकेदा सम्म खेदा पा साइक्तेक्म।

11 मिनू मोपा इस्राएली आन डोंइती बेथ-होरोन रे आजेका सम्म बुप्शा प्रोकमानु, परमप्रभु यावेमी सरीड रे ठेयब मुप्स यिपाइक्तु। इस्राएलीपुकीमी तरवारमी क्योरशा बेक्शो क्येडा ठेयब मुप्सीम खशा बेक्शो मुर शुश बाक्तेक्म। प्रस्थान ९:२२-२५; अय्युब ३८:२२-२३; हबक्कु ३:११; २सामुएल १:१८

12 मिनू परमप्रभु यावेमी एमोरी आन कली इस्राएली आन गुइमी गेशो नाक्ती यहोसुमी परमप्रभु यावे कली इस्राएली नेल्ल आन डोंइती “नां, गे गिबोन तारी नांइसो। तास्ला, आइयालोन बेंसी तारी नाइश्शा बाक्को” देत।

13 मिनू यहोसुमी मेको आन कली क्येक्क मलेत्ता सम्म नां नु तास्ला नांइसाक्व। मेको लोत्र याशार डा किताबमी यो ब्रेक्सीशो बाक्ब। मिनू नां सरीड आ दातेमी नांइसाक्व। मिनू नां मेको नाक्त का मपरस।

14 मोदेशो डोंइती नु नोले गेनायो मडुश्शो बाक्त। मारदे हना परमप्रभु यावेमी मुर आ लोत्र नेंशा, इस्राएली आन पबंम लडाइ पाप्तु।

15 मिनू नोले यहोसु नु इस्राएली नेल्ल आंम बाक्तीके गिल्याल लेत्तेक्म।

एमोरी आन पिप साइश्शो

16 मिनू मेको ५ जना पिपपुकी चहिं प्रोकशा, माकेदा डा पुक्खीमी खुंइसाक्म।

17 मिनू मुरपुकीमी यहोसु कली “मेको ५ जना पिपपुकी माकेदा डा पुक्खीमी खुइश्शो बाक्नीम” दे नेंपाइक्तेक्म। ब्यवस्था २१:२२-२३

18 मिनू यहोसुमी “ठेयब ठेयब फुल्लु लोकशा लाइश्शा, मेको पुक्खी आ ओत्रतीके सुने। मिनू आ डोंइतीमी खाल पाइबपुकी वोतीन।

19 तन्न गेपुकी मो मबाक्कीन। इन जोरी सनु आन कली खेदा पना पन डोंइती बारीन। नेल्ल क्येडा नोले डा सम्म यो सतीन। मेको आन कली लेंशा, आन सहर ओत्रचा मगेन। मारदे हना परमप्रभु यावे, इन परमप्रभुमी मेको इन गुइमी गेशो बाक्ब” देत।

20 मिनु यहोसु नु इस्राएलीपुकीमी मेको आन कली खतम सेल्लेक्म। का निक्शी चहिं प्रोक्शा, गारो पाइश्शो सहर आगा ओल्लेक्म।

21 मिनु मुर नेल्ल माकेदा, यहोसु आ बाक्तीकेमी, रिम्शो पा लेत्तेक्म। मेको इस्राएली आन पबर्म सुइ मुरुमी यो शुक्शी लोत्र पने मचबेम।

22 मिनु यहोसुमी “पुक्खी रोक्शा, मेको ५ जना पिप आन कली आं बाक्तीक चाक्कीन” दैत।

23 मिनु मेकोपुकीमी मेको ५ जना पिप आन कली चाक्तेक्म। यरूसलेम डा पिप, हेब्रोन डा पिप, यरमुथ डा पिप, लाकीश डा पिप नु एग्लोन डा पिप कली पुक्खी रे गुंइशा, यहोसु आ बाक्तीकेम चाक्तेक्म।

24 मिनु मेको आन कली यहोसु आ बाक्तीक चाक्मे नोले, यहोसुमी इस्राएली नेल्ल आन कली खुप्शा, लडाइ पाइब आन ठेयब मुर आन कली “एको पिप आन शुर्मी इन खोइलीमी दिम्दीन” दैत। मिनु मेकोपुकीमी जाक्शा, आन खोइलीमी मेको पिप आन शुर दिम्ताक्म।

25 मिनु यहोसुमी मेको आन कली “बोल्यो नु महिब दुमीन। मारदे हना इ परमप्रभु यावेमी गे सु नु लडाइ पाइनीनी, मेको आन कली मोदेशो पाइब” दैत।

26 मेको नोले यहोसुमी मेको ५ जना पिप आन कली तुप्शा साइश्शा, ५ ओटा रवामी क्युकपाइक्तु। मिनु नाक्दो सम्म क्युकशा, वोइक्तेक्म।

27 मिनु नां रिक्की ना, यहोसुमी “मेको आन कली लाइश्शा, डोंइती आन खुइश्शा पुक्खीमी वोतीन। मिनु मेको पुक्खी आ ओव्रतीकेमी ठेयब फुल्लुपुकी लाइश्शा सुने” दे अरेप्टु। मिनु मेको फुल्लु मुल सम्म बाक्नीम। ब्यवस्था २१:२२-२३

कनान रागी कली ग्राशो

28 मिनु मेको नाक्ती यहोसुमी माकेदा आंम के सेल्लु। मेको सहर डा मुर नेल्ल आन कली नु मेकेर डा पिप कली तरवारमी साइक्तु। मेकोमी मेकेर डा मुर नेल्ल आन कली खतम पोक्तु। सुइ कली यो मप्रोन। मेकोमी यरीको डा पिप कली पशो बुदी माकेदा डा पिप कली यो पाइक्तु।

29 मिनु यहोसु नु इस्राएली नेल्ल माकेदा रे गाक्शा, लिब्ना लाम्तेक्म। मिनु लडाइ पाम्तेक्म।

30 मिनु परमप्रभु यावेमी मेक डा मुर नु पिप कली यो यहोसु नु इस्राएली आन गुइमी गेप्टु। मेकोपुकीमी लिब्ना डा मुर नेल्ल आन कली तरवारमी साइक्तेक्म। सुइ कली यो मप्रोनेम। यरीको डा पिप कली पशो खोदेशो मेकेर डा पिप कली यो पाम्तेक्म।

31 मिनु यहोसु नु इस्राएली नेल्ल लिब्ना रे गाक्शा, लाकीश लाम्तेक्म। मिनु लाकीश कली पुम्शा, लडाइ पाम्तेक्म।

32 परमप्रभु यावेमी लाकीश कली यो इस्राएली आन गुइमी गेप्टु। मिनु मेको आ दीसा नाक्ती यहोसुमी लाकीश आंम के सेल्लु। मिनु मेकेर डा मुर नेल्ल आन कली लिब्ना कली पशो खोदेशो पाप्टु। नेल्ल आन कली तरवारमी साइक्तु।

33 मेना गेजेर डा पिप होराम लाकीश कली वारच पथ जाक्त। मिनु यहोसुमी मेको नु आ लडाइ पाइब नेल्ल आन कली फुशा, का कली यो मप्रोंइथु, ग्याइश्शा साइक्तु।

34 मिनु यहोसु नु इस्राएली नेल्ल लाकीश रे गाक्शा, एग्लोन लाम्तेक्म। मिनु मेकेर यो पुम्शा, लडाइ पाम्तेक्म।

35 मेको नाक्ती मेकोपुकीमी एग्लोन कली ग्रातेक्म। मिनु मेकेर डा मुर नेल्ल आन कली तरवारमी साइक्तेक्म। लाकीश कली दोदेशो पामे, एग्लोन कली यो मोदेशो पाम्तेक्म।

36 मिनु यहोसु नु इस्राएली नेल्ल एग्लोन रे ग्येत्थ डोइश्शा हेब्रोन लाम्तेक्म। मेकेर यो लडाइ पाम्तेक्म।

37 मिनु मेकोपुकीमी हेब्रोन सहर कली ग्राशा, मेको सहर डा पिप नु आ एर ओथ गांउ डा मुर नेल्ल आन कली तरवारमी साइक्तेक्म। सुइ कली यो मप्रोनेम। मेकोपुकीमी एग्लोन कली पशो खोदेशो पा, नेल्ल मुर आन कली खतम पोक्तेक्म।

38 मिनु यहोसु नु इस्राएली नेल्ल देबीर गे लेशशा, मेको नु लडाइ पाम्तेक्म।

39 मेकोमी मेकेर डा सहर नेल्ल, आन पिप नु एर ओथ डा गांउ आन कली ग्रातेक्म। मुर नेल्ल आन कली खतम पोक्तेक्म। सुइ कली यो मप्रोनेम। मेकोपुकीमी हेब्रोन नु मेकेर डा पिप नु लिब्ना कली दोदेशो पामे, मोदेशो पा देबीर नु मेकेर डा पिप कली यो पाम्तेक्म।

40 मोपा यहोसुमी पहाड नेल्ल, नेगेब रागी, पच्छिम नेल्ल डा आइक्च पहाड नु आइक्च डांडा डा देम्सीलो ग्रात। पिप नेल्ल आन कली साइक्तु। का कली यो मप्रोन। मेको ब्रोंइशो नेल्ल आन कली खतम सेल्लु। परमप्रभु यावे, इस्राएली आन परमप्रभुमी दोदेशो अरेवा, मोदेशो पाप्टु। ब्यवस्था २०:१६-१८

41 मिनु यहोसुमी कादेश-बारनेआ, गाजा नु गोशेन रे लाइश्शा गिबोन सम्म नेल्ल ग्रात। यहोसु ११:१६

42 मिनु यहोसुमी मेको आन पिप आन कली नु आन रागी नेल्ल कली कालेम ग्रात। मारदे हना परमप्रभु यावे, इस्राएली आन परमप्रभुमी इस्राएली आन पा डा लडाइ पाप्टु।

43 मिनु नोले यहोसु नु इस्राएली नेल्ल आन बाक्तीके गिलगालमी लेत्तेक्म। यहोसु १०:१५

## 11

याबीन नु अरु पिपपुकी बुशो

1 मिनु हासोर डा पिप याबीनमी यहोसुमी पशो नेल्ल नैशा, मादोन डा पिप योबाब, शिम्रोन डा पिप आकशाफ,

2 उत्तर डा पहाडम बाक्ब पिपपुकी नु किन्नेरोथ डा दक्खिन डा पिप, अराबाह डा पहाडम बाक्ब आन पिप नु पच्छिमम नाफथ-डोर डांडा गे बाक्ब आन पिप, किन्नेरोथ किन्नेरोथ यो बाक्ब।

3 पूर्व नु पच्छिम डा कनानी आन पिप नु एमोरी आन पिप, हित्ती आन पिप, परिज्जी आन पिप, पहाड रागीम बाक्ब यबुसी आन पिप नु रागी डा हेरमोन डांडा आइदी मिस्पा रागी गे बाक्ब हिठ्ठी आन पिप, नेल्ल आन कली ब्रेशशा सोइक्ताक्व।

4 मिनु मेको पिपपुकी नु आन लडाइ पाइब मुर नेल्ल जाक्तेक्म। मेकोपुकी ठेयब समुन्द्र डा बाल्वा खोदेशो पा शुश बाक्तेक्म। मिनु मेको आन के शारापुकी नु बग्गीपुकी यो शुश बाक्तेक्म।

5 मिनु मेको पिप नेल्ल खुम्सीशा, इस्राएली नु लडाइ पचा कली मेरोम माइशशो ब्वाक्कु आ बुक्तीके आ नेक्था बाक्तेक्म।

6 मिनु परमप्रभु यावेमी यहोसु कली “मेको आन कली तशा महिनीन। मारदे हना दीसा गो मेको आन कली साइशशा, गे इस्राएली इन गुडमी गेनुड। गे मेको आन शारा आन ठेयब नारी खोइशशा, आन बग्गी आन कली मीम क्रोतो” देंत।

7 मिनु यहोसु नु आ लडाइ पाइब नेल्लेमी मेरोम माइशशो ब्वाक्कु बुक्तीके आ नेक्था जाक्दीशशा, मेकोपुकी नु लडाइ पाप्तेक्म।

8 मिनु परमप्रभु यावेमी मेको आन कली इस्राएली आन गुडमी गेपु। मिनु इस्राएलीपुकीमी मेको आन कली ठेयब सहर सीदोन नु मिसेपोत-माइम सम्म नु पूर्व डा मिस्पा दिंम सम्म खेदा पा साइक्तेक्म। सुड कली यो मप्रोनेम। यहोसु १३:६

9 मिनु यहोसुमी परमप्रभु यावेमी देशो खोदेशो पा, मेको आन शारा आन ठेयब नारी खोइशशा, मेको आन बग्गीपुकी मीम क्रोइक्तु।

10 मिनु यहोसु नु इस्राएलीपुकी मेकेर रे लेशशा, हासोर ग्रातेक्म। मेकेर डा पिप कली तरवारमी साइक्तेक्म। हासोर चहिं मेको रागी डा नेल्ल क्येडा ठेयब सहर बाक्माक्त।

11 मिनु इस्राएलीपुकीमी मेकेर बाक्ब मुर नेल्ल आन कली तरवारमी साइक्तेक्म। मेकोपुकीमी नेल्ल आन कली खतम सेल्लेक्म। ब्रोइशो का कली यो मप्रोनेम। मिनु मेकोपुकीमी हासोर सहरम मी सुइक्ताक्म। यहोसु १०:४०

12 मिनु यहोसुमी मेकेर डा पिप नेल्ल आन सहर ग्राशा, पिप नेल्ल आन कली साइक्तु। मिनु परमप्रभु यावे आ गेय पाइब मोसामी देशो खोदेशो पा नेल्ल आन कली खतम पोक्तु।

13 मिनु इस्राएलीपुकीमी अरु डांडाम बाक्शो सहर आन कली मक्रोदेम। यहोसुमी हासोर सहर कली ला क्रोइक्तु।

14 मिनु इस्राएलीपुकीमी मेको सहर डा मार मार थोव्रक नु बी ब्यफ, क्यारश भेडा आम कली वोंइसाक्म। तन्न मुर नेल्ल आन कली साइक्तेक्म। नेल्ल आन कली खतम सेल्ला, का कली यो मप्रोनेम। ब्यवस्था २०:१०-१५

15 दोपा परमप्रभु यावेमी आ गेय पाइब मोसा कली अरेशो बाक्मे, मोपा मोसामी यहोसु कली अरेशो बाक्माक्त। मिनु यहोसुमी मोदेशोन पापु। परमप्रभु यावेमी मोसा कली अरेशो लोत्र यहोसुमी का सम्म यो मप्रोन। नेल्ल रिम्शो पा टिपु।

16 मोपा यहोसुमी मेको रागी नेल्ल आम के सेल्लु। तेको तेको रागी आम के सेल्लु देशा हना, पहाड, नेगेब नेल्ल, गोशेन नेल्ल नु दिंम डा रागी, अराबाह रागी नु इस्राएल डा ठेयब डांडा नु आ दिंम, यहोसु १०:४१

17 सेडर ग्येत्थ लाइब हालाक माइशशो डांडा रे पा लेबानोन डा बेसी हेरमोन डांडा आइदी बाल-गाद सम्म ग्राशा, आम के सेल्लु। मिनु मेकेर डा पिप नेल्ल आन कली ग्याइशशा साइक्तु।

18 मिनु शुश नाक्त सम्म यहोसुमी मेको पिपपुकी नु लडाइ पापु।

19 मिनु गिबोन डा मुर हिठ्ठीपुकी ला इस्राएलीपुकी नु गारशा सल्ला पाप्तेक्म। अरु सहर डा मुरपुकी मेकोपुकी नु गारथ मजाक्म। मोपतीके इस्राएलीपुकीमी सहर नेल्ल नु लडाइ पा ग्राशा, आम के सेल्लेक्म। यहोसु ९:१५

20 मारदे हना नेल्ल आन कली खतम सेल्ला, दे परमप्रभु यावेमी मेको नेल्ल आन थुं खकटा सेल्ला, नेल्ल खतम दुम्चा कली इस्राएलीपुकी नु लडाइ पतीक थुं गेपु। मिनु शिशी मपथु, नेल्ल आन कली खतम सेल्पाइक्तु। परमप्रभु यावेमी मोसा कली अरेशो खोदेशो दुम्त। प्रस्थान ४:२१; ब्यवस्था ७:२

21 मिनु मेना यहोसुमी हेब्रोन, देबीर, आनाब नु यहूदा आन पहाड नु इस्राएली आन पहाड रागीमी बाक्ब अनाकीम डा मुर आन कली खतम सेल्लु। यहोसुमी मेको आन कली नु आन सहर नेल्ल खतम सेल्लु। यहोसु १४:६-१५; ब्यवस्था ९:२

22 इस्राएली आन रागीमी अनाकीम डा मुर का सम्म यो मलीम। गाजा, गाथ नु अशदोदमी का निक्शी ला लीतेक्म। १सामुएल १७:४; २सामुएल २१:२२

23 परमप्रभु यावेमी मोसा कली देशो खोदेशो पा यहोसुमी रागी नेल्ल ग्राशा, आम के सेल्लु। मिनु यहोसुमी इस्राएली आन थर थर डा मुर आन कली कोइशा, रागी रागी योक्शा गेपु। मिनु नोले रागी लडाइ रे नोइसाक्म। यहोसु १४:१५

## 12

बुशो पिप आन नें नु आन रागी

1 मिनु इस्राएलीपुकीमी यर्दन डा पूर्व, अरनोन खोला रे हेरमोन डांडा सम्म नु पूर्व डा अराबाह दिंम नेल्ल आम के सेल्लेक्म। मेको बुशो पिप सु सु बाक्तेक्म देशा हना,

2 एमोरी आन पिप सीहोन, मेको हेरबोनमी बाक्शो बाक्माक्त। मेकोमी ते ते हुकुम पाइब बाक्माक्त देशा हना, अरनोन खोला आ नेक्था बाक्शो आरोएर रे अरनोन खोला आ दाते रे यब्बोक खोला सम्म सासन पाइब बाक्माक्त। मेको अम्मोनी आन सांद बाक्त। मिनु मेकोमी आधा गिलाद कली यो सासन पशो बाक्माक्त। गन्ती २१:२४

3 मिनु पूर्व गे किन्नेरोथ माइशशो समुन्द्र रे अराबाह दिंम नु अराबाह हिक्सी समुन्द्र, बेथ-येशीमोथ नु दक्खिन गे पिस्पा डांडा आधी रागी सम्म यो सासन पशो बाक्माक्त।

4 मेको बाशान डा पिप, ओग आ रागी बाक्त। मिनु मेको रेफाइम आन नोले डा पिप का बाक्माक्त। मेको ते ते सासन पाइबाक्माक्त देशा हना, अशतारोथ नु एंइइमी सासन पाइबाक्माक्त। गन्ती २१:३३; ब्यवस्था ३:१०-११



5 हेरमोन डांडा, साल्का, बाशान नेल्ल, गेशुरी आन सांद नु माकाथ आ मुर आन सांद सम्म नु आधा गिलाद रे लाइशशा, हेरबोन डा पिप सीहोन आ सांद सम्म सासन पाइबाक्माक्त।

6 परमप्रभु यावे आ गेय पाइब मोसा नु इस्राएलीपुकीमी मेको आन कली ग्राशा साइक्तेकम। मिनु परमप्रभु यावे आ गेय पाइब मोसामी रूबेन आ थर, गाद आ थर नु मनस्से आ उइक्थ थर डा मुर आन कली “मेको रागी इन के दुम्त” दे गेप्टु। गन्ती ३२:३३

7 मिनु यहोसु नु इस्राएलीपुकीमी यर्दन खोला आ पच्छिम डा पिप आन रागी तेको तेको ग्रातेकम देशा हना, लेबानोन बेसी डा बाल-गाद, सेइर डा ग्येथ लां डा हालाक डांडा सम्म ग्रातेकम। मिनु डोंइती देशो खोदेशो पा यहोसुमी इस्राएली आन थर थर डा मुर गिश बाक्नीम, दे कोव्रशा, मेको आन कली “मेको रागी इन के दुम्त” दे गेप्टु। मेको रागी तेको तेको बाक्तेकम देशा हना,

8 पहाड रागी, पच्छिम डा आइक्च डांडापुकी, अराबाह रागी, पहाड डा देम्सीलो, गोरशो रागी नु नेगेब बाक्तेकम। मेकेर तेको जात डा मुर बाक्तेकम देशा हना, हित्ती, एमोरी, कनानी, परिज्जी, हिक्वी नु यबुसीपुकी बाक्तेकम। मिनु बुइब पिप तेको तेको सहर डा बाक्तेकम देशा हना, यहोसु ११:३

9 यरीको डा पिप, ऐ डा पिप, मेको बेथेल आ नेक्था बाक्ब, यहोसु ६:२; यहोसु ८:२९

10 यरूसलेम डा पिप, हेब्रोन डा पिप, यहोसु १०:-

11 यरमूथ डा पिप, लाकीश डा पिप,

12 एग्लोन डा पिप, गेजेर डा पिप,

13 देबीर डा पिप, गेदेर डा पिप यहोसु १३:३८; न्यायाधीस १:११

14 होरमा डा पिप, आराद डा पिप, न्यायाधीस १:१७; गन्ती २१:१

15 लिब्ना डा पिप, अदुल्लाम डा पिप, यहोसु १०:२९-३०

16 माकेदा डा पिप, बेथेल डा पिप, यहोसु १०:२८

17 ताप्पुआह डा पिप, हेफेर डा पिप, यहोसु १५:५३; १सामुएल ४:१; १इतिहास ५:१६

18 अफेक डा पिप, लशारोन डा पिप,

19 मादोन डा पिप, हासोर डा पिप, यहोसु ११:१, १०

20 शिम्रोन-मेरोन डा पिप, आकशाफ डा पिप,

21 तानाक डा पिप, मेगीददो डा पिप, यहोसु १७:११

22 केदेश डा पिप, कारमेलम बाक्शो योकनाम डा पिप, यहोसु १९:३७; यहोसु १९:११

23 नाफाथ-डोरम बाक्शो डोर डांडा डा पिप, गिल्यालम बाक्शो गोयीम डा पिप, ग्रीक लोत्रम गिल्याल कली गालील यो देंब।उत्पत्ती १४:१९

24 नु तिरचा डा पिप बाक्तेकम। मेको नेल्ल पा ३१ जना पिप बाक्तेकम। १राजा १४:१७

## 13

ग्राचा लीशो रागीपुकी

1 मिनु यहोसु शुश खाल्पा दुम्त। मिनु परमप्रभु यावेमी मेको कली “गे मुल शुश खाल्पा दुम्ते। रागी शुश इन के सेल्चा माल्शो लीशो बाक्नीम।

2 मिनु तेको तेको रागी लीशो बाक्तेकम देशा हना, पलिस्ती नु गेशुरी आन रागी नेल्ल, १सामुएल २७:८

3 इजीप्त रागी डा पूर्व डा शीहोर खोला रे लाइशशा इजीप्त आ उत्तर डा एक्रोन सम्म लीशो बाक्तेकम। मेको नेल्ल कनानी आन रागी बाक्ब। मिनु पलिस्ती आन ५ जना सासन पाइब आन सहर गाजा, अशदोद, अश्कलोन, गाथ नु एक्रोन लीशो बाक्नीम। मिनु दक्खिन डा आर्वीम डा मुर आन रागी यो लीशो बाक्त।

4 मिनु दक्खिन गे कनानी आन रागी नेल्ल नु सीदोनी आन मेआरा रागी रे लाइशशा, अफेक सहर एमोरी आन सांद सम्म लीशो बाक्नीम।

5 गेबाली आन रागी, लेबानोन नेल्ल नु पूर्व गे डा हेरमोन डांडा दी डा बाल-गाद रे लाइशशा, लेबो-हमाथ सम्म लीशो बाक्नीम।

6 मिनु लेबानोन रे मिस्रेपोत-माइम सम्म पहाड डा मुर नेल्ल नु सीदोनी आन रागी लीशो बाक्नीम। गो मेको मुर नेल्ल आन कली इस्राएली आन डोंइती रे गुंडनुडमी। गोम इ कली अरेशो खोदेशो पा मेको रागी इस्राएली आन कली योक्शा गेवो। मेको रागी आंम के सेल्चा कली योक्शा गेमी।

7 मिनु एको रागी ९ थर नु मनस्से आ उइक्थ थर कली योक्शा गेवो” दे परमप्रभु यावेमी यहोसु कली दैत।

रूबेन, गाद नु मनस्से आ उइक्थ थर

8 मिनु डोंइती परमप्रभु यावे आ गेय पाइब मोसामी मनस्से आ उइक्थ थर, रूबेन आ थर नु गाद आ थर आन कली यर्दन आइक्ची हांबु पूर्वमी आन रागी गेने थुम्शो बाक्त। यहोसु १३:१५-३२

9 तेको रागी गेशो बाक्त देशा हना, अरनोन खोला आ नेक्था बाक्शो आरोएर सहर नु दिंम आ दातेमी बाक्शो मेदेबा सहर डा दिंम दीबोन सहर सम्म डा रागी नेल्ल गेशो बाक्त।

10 मिनु हेरबोन सहरम हुकुम पाइब एमोरी आन पिप सीहोन आ सहर नेल्ल अम्मोनी आन सांद सम्म गेशो बाक्त।

11 गिलाद रागी नु गेशुरी नु माकाथी आन रागी नु हेरमोन नेल्ल नु बाशान नेल्ल रे लाइशशा साल्का सम्म गेशो बाक्त। ब्यवस्था ३:१४; २सामुएल ३:३; २सामुएल १५:८

12 मिनु अशतारोथ नु एट्रेडमी सासन पाइब बाशान सहरम बाकब ओग माइशशो पिप आ रागी नेल्ल गेशो बाक्त। मेको पिप ओग ला रेफाइम आन दातेमी ब्रोइशा लीशो बाक्माक्त। मोसामी मेको आन कली ग्राशा, खेरशो बाक्त।

13 तन्न इस्राएलीपुकीमी गेशुरी नु माकाथ आ मुर आन कली मखेरम। मोपतीके मुल सम्म मेको गेशुरी नु माकाथी इस्राएली आन दातेमी बाकशो बाक्नीम।

14 मोसामी लेवी आ थर कली ला रागी मगेवो। मारदे हना परमप्रभु यावे आ दंशो खोदंशो पा परमप्रभु यावे, इस्राएली आन परमप्रभु कली चोशा चढ़ेशो मेको आन भाग बाकब। यहोसु १३:३३; उत्पत्ती ४९:५; गन्ती १८:२०-२१

रूबेन आ थर डा मुर आन रागी

15 मिनु मोसामी रूबेन आ थर डा खिं खिं डा मुर गिश बाक्नीमी, दे कोव्रशा, रागी गेशो बाक्त।

16 मेको आन रागी अरनोन खोला आ नेक्था बाकशो आरोएर सहर नु मेको दिम आ दातेम बाकशो सहर नु मेदेबा दिम आ नेक्था डा रागी नेल्ल,

17 हेरबोन नु दिम डा सहर नेल्ल, दीबोन, बामोथ-बाल नु बेथ-बाल-मेओन,

18 याहास, केदेमोथ नु मेफा-आथ,

19 किरयथ-थाइम, सिब्मा नु बेसी डा डांडामी बाकशो सेरेथ-शाहार,

20 बेथ-पेओर, पिस्गा डा देम्सीलो, बेथ-येशीमोथ,

21 दिम डा सहर नेल्ल नु एमोरी आन पिप सीहोन आ रागी नेल्ल गेशो बाक्त। सीहोन हेरबोनमी सासन पाइब बाक्त। मिनु मोसामी मेको कली नु मिदयान डा सासन पाइब आन कली ग्राशा साइशशो बाक्त। मेको सासन पाइब सु सु बाक्तेकम दंशा हना, मिदयानमी बाकशो एवी, रेकेम, सुर, हुर नु रेबा, सीहोनमी चोइशशो सासन पाइब बाक्तेकम।

22 मिनु इस्राएलीपुकीमी मेकोपुकी नु बेओर आ तौ बालाम, लिंक्यु कोव्रब कली यो तरवारमी साइक्तेकम। गन्ती २२:५; गन्ती ३१:८

23 मिनु रूबेन आ थर डा मुर आन सांद यर्दन नु आ सुर सम्म बाक्त। मेको रूबेन आ थर आन खिं खिं डा मुर आन कली गेशो सहर नु गाउंपुकी एकोन बाक्तेकम।

गाद आ थर डा मुर आन रागी

24 मिनु मोसामी गाद आ थर डा खिं खिं डा मुर आन कली कोव्रशा, रागी गेशो बाक्त। उत्पत्ती ४९:१९

25 मेको आन कली याजेर नु गिलाद डा सहर नेल्ल नु अम्मोनी आन आधा रागी, रब्बाह आ पूर्व डा आरोएर सम्म गेशो बाक्त।

26 मिनु हेरबोन रे रामाथ-मिस्पे नु बेतोनीम सम्म नु महा-नाइम रे देबीर सहर सम्म गेशो बाक्त।

27 मिनु हेरबोन डा पिप सीहोन आ लीशो राज्य नेल्ल, दिम बेथ-हाराम, बेथ-निम्रा, सुक्कोथ, साफोन, यर्दन नु आ सुर मेको आ सांद बाक्त। मेको आन कली यर्दन डा पूर्व गे किन्नेरेथ समुन्द्र आ दक्खिन उइ सम्म गेशो बाक्त।

28 मेको गाद आ थर आन खिं खिं डा मुर आन कली कोव्रशा गेशो रागी डा सहर नु गाउंपुकी एकोन बाक्नीम।

मनस्से आ थर डा मुर आन रागी

29 मिनु मोसामी मनस्से आ उइक्थ थर कली रागी गेशो बाक्त। मेको आ खिं खिं डा मुर आन कली गिश बाक्नीम, दे कोव्रशा, रागी योक्शा गेशो बाक्त।

30 मेको आन रागी महा-नाइम रे लाइशशा, बाशान नेल्ल गेशो बाक्त। बाशान डा पिप ओग आ राज्य नेल्ल नु बाशान डा याइर आ सहर नेल्ल पा ६० ओटा सहर गेशो बाक्त। यहोसु १७:१; न्यायाधीस १०:३-४

31 मिनु आधा गिलाद, अशतारोथ नु एट्रेड बाशान डा पिप ओग आ राज्य डा सहरपुकी मनस्से आ तौ माकीर आ खिं खिं डा आधा मुर आन कली आन खिं खिं कोव्रशा गिश बाक्नीमी योक्शा गेशो बाक्त।

32 मिनु डोइती मोसामी मेको रागी नेल्ल मोआब डा दिमम बाकशा योक्शा गेशो बाक्त। मेको दिम ते बाकशो बाक्त दंशा हना, यरीको नु यर्दन आ पूर्व गे बाक्त।

33 तन्न लेवी आ थर डा मुर आन कली तेकोइ रागी मगेम। मारदे हना परमप्रभु यावे, इस्राएली आन परमप्रभु मेको आन भाग बाकब। यहोसु १३:१४

## 14

मनस्से नु ९ थर आन रागी

1 मिनु इस्राएलीपुकीमी कनान रागी डा तेको तेको रागी आंम कली ताम्तेकम दंशा हना, चढ़ेब एलाजर, नून आ तौ यहोसु नु इस्राएल डा थर नेल्ल आन ठेयब मुरपुकीमी इस्राएली आन थर थर आन कली रागी योक्तेकम। गन्ती ३४:१७

2 मिनु परमप्रभु यावेमी मोसा कली दोपा अरेवा, मोपा मेको ९ थर नु उइक्थ थर आन कली रागी योक्शा गेशो बाक्त। गन्ती २६:५५

3 मारदे हना मोसामी थर निकशी नु उइक्थ थर आन कली यर्दन खोला आ पूर्वम रागी गेने थुम्शो बाक्त। तन्न लेवी आन कली मेको आन दातेमी तेकोइ रागी मगेशो बाक्त। यहोसु १३:१४,३३; ब्यवस्था १०:९

4 मिनु योसेफ आ तौ मनस्से नु एफ्राइम निकशी थर बाक्ताकस। तन्न लेवी आन कली रागी काइ मगेमे बाक्त। मेकोपुकी बाक्चा कली सहरपुकी नु मेको आन बी ब्यफ, क्यारश भेडा योव्रचा कली इच्छा रू ला तामे बाक्त। यहोसु २१:-

5 परमप्रभु यावेमी मोसा कली दोदेशो पा अरेवा, मोदेशो पा इस्राएलीपुकीमी थर थर आन कली रागी योक्शा गेम्तेकम।

हेब्रोन सहर कालेब कली गेशो

6 मिनु यहूदा आ थर डा वोंडश मुरपुकी यहोसु बाक्तीक गिल्यालमी जाक्तेक्म। मिनु केनीज्जी यपुन्ने आ तौ कालेबमी मेको कली “परमप्रभु यावेमी कादेश-बारनेआमी आं नु इन पबर्मी परमप्रभु आ मुर मोसा कली देशो लोत्र तुइक्नीनी। गन्ती १४:२४; ब्यवस्था १:३६

7 गो ४० बर्स डा बाकडानु, परमप्रभु यावे आ गेय पाइब मोसामी कादेश-बारनेआ रे एको रागी कली क्यारी पथ सोइक्ताक्व। मिनु गो क्यारी पा आं तुइश्शो लोत्र शोत्रशो नड। गन्ती १३:६, ३०

8 गो नु लशो लोकबपुकीमी चहिं मरिम्शो लोत्र पा, मुर नेल्ल आन कली हिंपाइक्तेक्म। तन्न गो परमप्रभु यावे, आं परमप्रभु कली आं थुं नेल्लेमी आ नोले खोइक्ता।

9 मिनु मेको नाक्ती मोसामी आं कली कसम जशा गे ते गाकडे, मेको रागी इ कली नु इ तौ, चच युइ आन कली गेना हना यो कली दुम्ल। मारदे हना इ थुं नेल्लेमी परमप्रभु यावे, आं परमप्रभु नोले खोइक्तीवी।

10 मिनु नेनीन, परमप्रभु यावेमी आं कली ब्रोंडचा गेप्टु। इस्राएलीपुकी गोरशो रागीमी हिरसामानु, परमप्रभु यावेमी मोसा कली एको लोत्र देशो ४५ बर्स दुम्त। मिनु मुलाक्ती गो ८५ बर्स दुम्ती।

11 मिनु मोसामी आं कली सोइक्ची ना दोशो बोल्यो बाकडा, मोशोन मुलाक्ती यो बोल्यो बाक्नुड। लडाइ पचा नु खिंडगा लाइगा पचा मेना दोदेशो नडा, मुलाक्ती यो मे मोदेशोन बाक्नुड।

12 मोपतीके एको डांडा डा रागी आं कली गेने। परमप्रभु यावेमी एको आ पबर्म मेनान देने थुम्तु। मिनु ‘मेकेर अनाकीम डा मुर बाक्नीम। मिनु मेकेर गारो पाइश्शो टेयब सहर बाक्नीम’ देशो गे नेतीनी। मिनु परमप्रभु यावे गो नु बाक्त हना, परमप्रभु यावे आ देशो खोदेशो पा गो मेको आन कली खेरने चाप्नुड” देत। यहोसु ११:२१

13 मिनु यहोसुमी मेको कली आसीक गेशा, यपुन्ने आ तौ कालेब कली हेब्रोन सहर गेप्टु। यहोसु १५:१३-१९; यहोसु २१:११-१२

14 मोपतीके मुल सम्म केनीज्जी यपुन्ने आ तौ कालेब आ रागी हेब्रोन बाक्ब। मारदे हना मेकोमी परमप्रभु यावे, इस्राएली आन परमप्रभु कली आ थुं नेल्लेमी आ नोले खोइश्शो बाक्त। गन्ती ३२:१२

15 डोंइती हेब्रोन कली किरयथ-अरबा देशो बाक्तेक्म। मेको अरबा माइश्शो मुर अनाकीम डा मुर आन दातेमी नेल्ल क्येडा लाइश्शो मुर बाक्तेक्म। मिनु मेको रागी लडाइ रे नाइसाक्व। गन्ती १३:२२; यहोसु ११:२३

## 15

यहूदा आ थर डा मुर आन रागी

1 मिनु योक्शा गेशो यहूदा आ खिं खिं डा मुर आन रागी एदोम रागी रे दक्खिन जीन माइश्शो गोरशो रागी सम्म बाक्त। उत्पत्ती ४९:८-९; गन्ती ३४:३-५

2 मेको आन रागी डा दक्खिन डा सांद हिक्सी समुन्द्र आ दक्खिन रे दक्खिन गे

3 अक्रब्नीम रे ग्येत्थ लाइश्शा जीन लाक्शा कादेश-बारनेआ आ दक्खिन रे ग्येत्थ लशा, हेसोन लाक्शा, अदार सम्म जाक्दीश्शा, कारका सहर सम्म बाक्त।

4 मेकेर रे अर्चोमन लाक्शा इजीप्ट आ खोला रे समुन्द्र जाक्दीश्शा नुप्शो बाक्त। मेको रागी मेको आन के दक्खिन गे डा सांद बाक्त।

5 मिनु पूब डा सांद चहिं हिक्सी समुन्द्र यर्दन आ ओवतीक सम्म बाक्त। उत्तर डा सांद यर्दन आ ओवतीक रे लाइश्शा

6 बेथ-होगला रे बेथ-अराबाह आ उत्तर लाक्शो बाक्त। मिनु मेको सांद रूबेन आ तौ बोहान आ फुल्लु सम्म ग्येत्थ लशो यहोसु १८:१७

7 नु आकोर नें पाइश्शो दिम रे देबीर नु उत्तर गे गिल्याल सम्म बाक्त। गिल्याल अदुम्मीम डा ग्येत्थ लतीक लां रे आइक्ची गे सम्म बाक्त। मेको अदुम्मीम दिम डा दक्खिन गे बाक्ब। मेको सांद एन-शेमेश नें पाइश्शो खोला रे लशा, एन-रोगेल सम्म लशो बाक्त। २सामुएल १७:१७

8 मेको सांद हिन्नोम आ तौ आ दिम रे यबुसी आन सहर आ दक्खिन रे ग्येत्थ खोइश्शो बाक्त। यबुसी आन सहर यरूसलेम बाक्ब। मिनु मेकेर रे हिन्नोम दिम डा पच्छिमम बाक्शो डांडा ग्येत्थ रे रेफाइम आन दिम डा उत्तर सम्म लशो बाक्त। २इतिहास २८:३

9 मेको सांद डांडा आ थेपील रे नेप्टोआह नें पाइश्शो ब्वाक्कु बुक्तीके जाक्दीश्शा, एफ्रोन पहाड डा सहर सम्म जाक्दीश्शो बाक्त। लेंशा मेको सांद मेको किरयथ-यारीम, मेको कली बालाह यो देंनीम, सम्म जाक्दीश्शो बाक्त। यहोसु १५:६०; यहोसु ९:१७; यहोसु १८:१५

10 मिनु मेको सांद बालाह रे पा सेइर पहाड सम्म पच्छिम गे हिरब। येआरीम डांडा आ उत्तर गे डा देम्सीलो रे पा बेथ-शेमेश रे लुकच लशा, तिम्नाह सम्म बाक्त। मेको येआरीम डांडा कली केसालोन यो देंनीम। यहोसु १९:४३; न्यायाधीस १४:१

11 मेको सांद लेंशा एफ्रोन आ उत्तर गे जाक्दीश्शो बाक्त। मिनु शिक्केरोन सहरमी जाक्दीश्शा, बालाह डांडा लाक्शा, यब्नेलमी जाक्दीश्शो बाक्त। मेको सांद समुन्द्र सम्म बाक्त।

12 पच्छिम डा सांद चहिं टेयब समुन्द्र सम्म बाक्त। यहूदा आ थर आन खिं खिं डा मुर आन रागी एर ओथ डा सांद एकोन बाक्नीम। यहोसु १४:६-१५; न्यायाधीस १:१०-१५

13 मिनु परमप्रभु यावेमी यहोसु कली अरेशो खोदेशो पा यहूदा आ थर डा रागी आ दातेमी यपुन्ने आ तौ कालेब कली किरयथ-अरबा गेप्टु। मेको कली हेब्रोन यो देंनीम। मेको अरबा अनाक आ आफ बाक्त।

- 14 मिनु कालेबमी हेब्रोन रे अनाक आ चच युड सां शेशै, अहीमान नु तल्लै आन कली खेरतीमी।
- 15 मिनु मेकेर रे देबीरमी बाक्ब मुरपुकी नु लडाइ पथ लत। डोंइती देबीर कली किरयथ-सेफेर देशो बाक्तेकम।
- 16 मिनु कालेबमी “सुमी चहिं किरयथ-सेफेर लडाइ पा प्राशा, खतम पाइबा, मेको कली आं तमी अकसा ग्युंवे पा गेनुड” देत। न्यायाधीस १:१२
- 17 मिनु कालेब आ लोकब केनाज आ तौ ओथनीएलमी मेको सहर ग्रात। मिनु कालेबमी ओथनीएल कली आ तमी अकसा ग्युंवे पा गेपु। न्यायाधीस ३:९
- 18 अकसा ओथनीएल नु लम नोले, अकसामी ओथनीएल कली “आं आफ नु रू का पुन” देत। मिनु अकसा आ गधा रे तोंइसाक्व। मिनु आ आफ कालेबमी अकसा कली “मार माल्दे” दे हिल्लो पापु।
- 19 मिनु अकसामी “आं कली रिम्शो थोव्रक का गेन। मारदे हना गे आं कली नेगेब डा रू गेतीनी। मुल आं कली ब्वाक्कु बुक्तीके यो गेन” देत। मिनु कालेबमी अकसा कली आइदी नु आइक्था डा ब्वाक्कु बुक्तीके गेपु।
- 20 मिनु यहूदा आ थर डा मुर आन खिं खिं डा मुर आन कली गेशो रागी तेको तेको बाक्नीम देश हना,
- 21 यहूदा आ खिं डा मुर आन दक्खिनम बाक्शो एदोम आ सांद गे डा सहरपुकी कब्सेल, एदेर नु यागुर,
- 22 कीनाह, दिमोना नु अदादाह,
- 23 केदेश, हासोर नु इथनान,
- 24 जीफ, तेयलेम नु बेआलोथ,
- 25 हासोर-हादत्ता, केरयोथ-हेसोन, मेको कली हासोर यो देंनीम,
- 26 अमाम, शेमा नु मोलादा
- 27 हासार-गददा, हेरमोन नु बेथ-पेलेत,
- 28 हासार-शुआल, बेयर-शेबा नु बिज्योत्या,
- 29 बालाह, यीम नु एसेम,
- 30 एल्लोलद, केसील नु होरमा,
- 31 सिकलाग, मदमन्ना नु सन्सन्ना,
- 32 लेबाओत, शिल्हीम, ऐन नु रिम्मोन सहर बाक्नीम। मेको नेल्ल पा २९ ओटा सहर नु आन नेक्था डा गाउं नेल्ल यो बाक्नीम।
- 33 मिनु दिम गे चहिं एशताओल, सोराह नु अशना, न्यायाधीस १३:२५; न्यायाधीस १६:३१
- 34 जानोह, एन-गन्नीम ताप्पुआह नु एनाम,
- 35 यरमुथ, अदुल्लाम, सोकोह नु आजेका,
- 36 शा-आराइम, अदीथैम, गेदेराह नु गेदे-रोथैम बाक्नीम। मेको नेल्ल पा १४ ओटा सहर नु आन नेक्था डा गाउं नेल्ल यो बाक्नीम।
- 37 मिनु सेनान, हदाशा नु मिग्दल-गाद,
- 38 दिलेआन, मिस्पा नु योकतेल,
- 39 लाकीश, बोस्कत नु एग्लोन,
- 40 कब्बोन, लहमाम नु किल्लीश,
- 41 गेदे-रोथ, बेथ-दागोन, नामा नु माकेदा बाक्नीम। मेको नेल्ल पा १६ ओटा सहर नु आन नेक्था डा गाउं नेल्ल यो बाक्नीम।
- 42 लिब्ना, एथेर नु आशान,
- 43 इफताह, अशना नु नेजीब,
- 44 कैलाह, अकजीब नु मारेशा बाक्नीम। मेको आन बाक्तीक नेल्ल पा ९ ओटा सहर बाक्नीम। यहोसु १९:२९
- 45 मेको एक्रोन सहर नु आ नेक्था डा खिंपुकी नु गाउं नेल्ल, १सामुएल ५:१०; यहोसु १९:४१-४६
- 46 एक्रोन आ पच्छिम गे डा समुन्द्र सम्म अशदोद आ नेक्था डा सहर नेल्ल नु मेकेर डा गाउं नेल्ल
- 47 अशदोद नु मेको आ नेक्था डा खिंपुकी नु गाउं नेल्ल, गाजा नु मेको आ नेक्था डा खिंपुकी नु गाउं नेल्ल नु डजीप्ट डा खोला नु टेयब समुन्द्र आ सुर सम्म बाक्नीम। १सामुएल ५:१; न्यायाधीस १:१८
- 48 मिनु पहाड डा शामीर, यत्तीर नु सोकोह,
- 49 दन्ना, किरयथ-सन्ना, मेको कली देबीर यो देंनीम,
- 50 आनाब, एशतेमोह नु अनीम,
- 51 गोशेन, होलोन नु गिलोह। मेको नेल्ल पा ११ ओटा सहर नु आन नेक्था डा गाउं नेल्ल यो बाक्नीम।
- 52 अराब, दुमा नु एशान,
- 53 यानीम, बेथ-ताप्पुआह नु अफेकाह,
- 54 हुम्ता, किरयथ-अरबा, मेको कली हेब्रोन यो देंनीम, नु सीओर बाक्नीम। मेको नेल्ल पा ९ ओटा सहर नु आन नेक्था डा गाउं नेल्ल यो बाक्नीम।
- 55 माओन, कारमेल, जीफ नु युत्ता,
- 56 येज़ेल, योकदाम नु जानोह,
- 57 काइन, गिबा नु तिम्नाह बाक्नीम। मेको नेल्ल पा १० ओटा सहर नु आन नेक्था डा गाउं नेल्ल यो बाक्नीम।

- 58 हलहुल, बेथ-सुर नु गेदोर,  
 59 माराथ, बेथ-अनोत नु एल्लेकोन। मिनु मेको नेल्ल पा ६ ओटा सहर नु आन नेक्था डा गाउं नेल्ल यो बाक्नीम।  
 60 किरयथ-बाल, मेको कली किरयथ-यारीम यो देंनीम नु रब्बाह बाक्नीम। मेको नेल्ल पा सहर निक्शी नु आस नेक्था डा गाउं नेल्ल यो बाक्नीम। यहोसु ९:१७; यहोसु १८:१४  
 61 मिनु गोरशो रागीमी बेथ-अराबाह, मिदीन नु सेकाका  
 62 निब्शान, शुश हिकसी सेल्ब आन सहर नु एन-गेदी बाक्नीम। मेको नेल्ल पा ६ ओटा सहर नु आन नेक्था डा गाउं नेल्ल यो बाक्नीम।  
 63 तन्न यहूदा आ खिं डा मुरपुकीमी यरूसलेम सहरमी बाक्ब यबुसी आन कली खेरने मचबेम। मोपतीके एको यबुसीपुकी मुलाक्त सम्म यरूसलेममी यहूदा आ खिं डा मुरपुकी नु काथा बाक्नीम। यहोसु १८:२८; २सामुएल ५:६-७

## 16

- योसेफ आ तौ एफ्राइम आ रागी  
 1 मिनु योक्शा गेशो योसेफ आ खिं खिं डा मुर आन रागी तेको तेको बाक्तेक्म देंशा हना, यरीको आ नेक्था डा यर्दन रे यरीको खोला आ पूर्व रे ग्येथ लाइब गोरशो रागी लाक्शा, बेथेल डा पहाड रागी सम्म बाक्त। उत्पती ४९:२२  
 2 बेथेल कली लूज यो देंनीम। मेकेर रे अरकी आ मुर आन रागी लाक्शा, अतारोथ सम्म जाक्दीशो बाक्त।  
 3 मिनु पच्छिम गे तोइशशा याफलेत आ मुर आन रागी रे पा आइदी डा बेथ-होरोन नु गेजेर सम्म डा समुन्द्र जाक्दीशशा नुप्शो बाक्त।  
 4 मिनु योसेफ आ तौ निक्शी, मनस्से नु एफ्राइम आस खिं खिं डा मुरपुकीमी आंम कली रागी ताम्तेक्म।  
 5 मिनु एफ्राइम आ खिं खिं डा मुर आन रागी तेको तेको बाक्तेक्म देंशा हना, मेको आन के सांद पूर्व गे अतारोथ-अदार रे पा आइक्था डा बेथ-होरोन सम्म बाक्त।  
 6 मिनु मेको सांद ठेयब समुन्द्र सम्म लत। उत्तर गे डा मिकमेथाथ रे लाइशशा, पूर्व गे तानत-शिलो लाक्शा, पूर्व डा यानोह सम्म जाक्दीशो बाक्त।  
 7 मिनु नोले यानोह रे पा अतारोथ नु नाराह सम्म तोइशशा यरीको जाक्दीशशा, यर्दन सम्म बाक्त।  
 8 मेको सांद ताप्पुआह रे पा लाइशशा पच्छिम गे कानाह खोल्सा सम्म लशा समुन्द्रमी जाक्दीशशा नुप्शो बाक्त। मेको एफ्राइम आ खिं खिं डा मुर आन रागी बाक्ब।  
 9 एको क्येडा लाक्शा मनस्से आ खिं डा मुर आन दातेमी एफ्राइम आ खिं डा मुर आन कली यो सहर नु गाउंपुकी गेशो बाक्त। यहोसु १७:९  
 10 तन्न मेकोपुकीमी गेजेर सहरमी बाक्ब कनानी आन कली मखेरम। मोपतीके कनानीपुकी मुल सम्म एफ्राइम आ मुर आन दातेमी बाक्नीम। मेकोपुकी वाइलीम वाइल दुम्शा बाक्शो बाक्नीम। न्यायाधीस १:२९; १राजा ९:१६

## 17

- मनस्से आ थर डा मुर आन रागी  
 1 मिनु योसेफ आ ठेयब तौ मनस्से नु मनस्से आ ठेयब तौ माकीर कली योक्शो रागी गिलाद नु बाशान बाक्माक्त। गिलाद आ किकी पिपी बाक्माक्त। मेकोपुकी बोल्यो लडाइ पाइब बाक्तेक्म। यहोसु १३:३१; गन्ती २६:२९  
 2 मिनु मेको योव्रशो रागी मनस्से आ लीशो मुर आन कली बाक्त। मिनु मेको लीशो मुर सु बाक्तेक्म देंशा हना, अबीएजेर आ खिं डा मुर, हेलेक आ खिं डा मुर, असीएल आ खिं डा मुर, शेकेम आ खिं डा मुर, हेफेर आ खिं डा मुर नु शेमीदा आ खिं डा मुर बाक्तेक्म। मेकोपुकी योसेफ आ चच युड आन खिं खिं डा मुर बाक्तेक्म। न्यायाधीस ६:११, २४; न्यायाधीस ८:३२  
 3 तन्न मनस्से आ तौ माकीर, मेको आ तौ गिलाद, मेको आ तौ हेफेर नु मेको आ तौ सेलोफेहाद के तमीपुकी ला बाक्तेक्म, तौ मबाक्म। मेको आ तमीपुकी महालाह, नोआह, होग्ला, मिल्का नु तिरचा बाक्तेक्म। गन्ती २६:३३; गन्ती २७:१-८; गन्ती ३६  
 4 मेकोपुकीमी चढ़ेब एलाजर, नून आ तौ यहोसु नु ठेयब मुर आन डोंइती जाक्शा “आंइ कली आंइ लोक्ब आन दातेमीन रागी गेचा, दे परमप्रभु यावेमी मोसा कली अरेशो बाक्ब” देंतेक्म। मिनु यहोसुमी मेको आन कली, परमप्रभु यावे आ देंशो खोदेंशो पा, आन बोडो बकान्छा आन दातेमी रागी गेप्तु।  
 5 मिनु मनस्से कली १० ओटा रागी गेम्तेक्म। मिनु मेको कली यर्दन आ पूर्व डा गिलाद नु बाशान रागी यो तेम्शा गेम्तेक्म।  
 6 मारदे हना मनस्से आ थर डा तमीपुकीमी यो मेको आन तौ आन दातेमीन रागी ताम्तेक्म। गिलाद रागी चहिं मनस्से आ अरु तौ आन रागी दुम्त।  
 7 मनस्से आ रागी आशेर रे लाइशशा शेकेम आ पूर्व डा मिकमेथाथ सम्म बाक्शो बाक्त। मेको सांद दक्खिन गे लशा एन-ताप्पुआह सहरमी बाक्ब आन रागी सम्म जाक्दीशो बाक्त।  
 8 मिनु ताप्पुआह आ एर ओथ डा रागी मनस्से के बाक्त। तन्न मनस्से आ सांदमी बाक्शो ताप्पुआह सहर चहिं एफ्राइम आ खिं डा मुर आन के बाक्त।

9 मेको सांद दक्खिन गे कानाह खोला सम्म जाक्दीशो बाक्त। एफ्राइम आ सहर आन दातेमी मनस्से आ सहरपुकी यो बाक्तेक्म। तन्न मनस्से आ सांद चहिं खोला आ उत्तर गे डा समुन्द्र जाक्दीशो नुप्शो बाक्त।

10 दक्खिन गे एफ्राइम आ रागी बाक्त। मिनु उत्तर गे मनस्से आ रागी बाक्त। मनस्से थर आ रागी समुन्द्र रे लशा, उत्तर गे आशेर आ रागी नु पूर्व गे इस्साकार आ रागी सम्म जाक्दीशो बाक्त।

11 इस्साकार नु आशेर आस रागी आस दातेमी मनस्से आ सहर नु गाउं का निक्शी यो बाक्तेक्म। मेको तेको तेको बाक्तेक्म देशा हना, बेथ-शेआन, इब्लाम नु आ एर ओंथ, एन-डोर, तानाक, मेगीददो नु एर ओंथ डा गाउंपुकी बाक्तेक्म। मेको कली डांडा सां यो देनीम। न्यायाधीस १:२७-२८

12 मिनु मनस्से आ थर डा मुरपुकीमी मेको सहर आंम के सेल्ले मचाप्शो बाक्तेक्म। मिनु कनानीपुकी मेकेर बाक्शो बाक्तेक्म।

13 मिनु नोले इस्सालीपुकी बोल्यो दुम्शा, मेको कनानी आन कली वाइलीम वाइल सेल्लेक्म। तन्न नेल्ल आन कली मखेरेम। यहोसु १६:१०

14 मिनु योसेफ आ खिं डा मुरपुकीमी यहोसु कली “गे मारदे आंड कली रागी का ला गेनी? गो शुश मुर बाक्नीकी। मिनु परमप्रभु यावेमी आंड कली शुश आसीक गेप्टु” दैतेक्म।

15 मिनु यहोसुमी मेको आन कली “गेपुकी मोदेशो शुश बाक्नीनी नु एफ्राइम आ पहाड रागी इन कली आइक्च दुम्त हना, परिज्जी नु रेफाइम आन रागी डा ब्वाकी कोव्रथ लने” दैत।

16 मिनु योसेफ आ खिं डा मुरपुकीमी “पहाड रागी आंड कली मजाक्दीम्ब। मिनु दिंम बाक्ब कनानीपुकी नु फलाम के बग्गी बाक्नीम। मिनु बेथ-शेआन, एर ओंथ डा मुरपुकी नु येजेल आ दिंममी बाक्बपुकी नु यो फलाम के बग्गी बाक्नीम” दैतेक्म।

17 मिनु यहोसुमी योसेफ आ खिं डा मुर, एफ्राइम नु मनस्से आस मुर आन कली “गे शुश मुर नु बोल्यो यो बाक्नीनी। गे रागी का ला मताइनीनी।

18 गे पहाड ब्वाकी डा रागी यो ताइनीनी। मिनु लशा, मेको कली शुश लाइशो सम्म क्योव्रडीन। मिनु मेको इन के दुम्ब। मेको कनानीपुकी नु फलाम के बग्गी बाक्त हना नु बोल्यो बाक्तेक्म हना यो, गेपुकीमी मेको आन कली खेरेने चाप्नीनी” दैत।

## 18

लीशो रागीपुकी योक्शो

1 मिनु इस्साल डा मुर नेल्ल शिलोमी बुक्तेक्म। मेकेर युम्तीक ताम्बु कीतेक्म। मेना मेको रागी मेको आन रागी दुम्शो बाक्त। न्यायाधीस २१:१९; १सामुएल १:३; येरमीया ७:१२-१५

2 तन्न इस्साली ७ थरपुकीमी आंम कली रागी मतशो बाक्तेक्म।

3 मिनु यहोसुमी इस्साली आन कली “गे परमप्रभु यावे, इन किकी पिपी आन परमप्रभुमी इन कली गेशो रागी आंम के सेल्ल्या कली मार रिन्नीनी।

4 मुल गेपुकीमी थर थर रे सां सां मुरपुकी योव्रडीन। गो मेको आन कली रागी कोव्रथ सोइक्नुड। मिनु मेकोपुकी लशा, आंम आंम रागी दोदेशो बाक्मे, मेको ब्रेक्चा मालनीम। मिनु नोले आं बाक्तीक लेल्ल्या मालनीम।

5 मिनु गे मेको रागी कली ७ भाग पा योक्चा मालनीनी। यहूदा दक्खिन गे आंम रागीमी बाक्ब। योसेफ आ खिं डा मुर चहिं उत्तर गे मेको आन रागीम बाक्नीम।

6 गेपुकीमी मेको रागी कली ७ भाग पा ब्रेक्स ब्रेक्ने थुम्शा नोले, आं बाक्तीक चाक्कीन। मिनु गो परमप्रभु यावे, इं परमप्रभु आ डोंइती मेको रागी इन कली योक्शा गेनन्नी।

7 तन्न लेवी आ थर डा मुरपुकीमी इन दातेमी रागी मताइनीम। मारदे हना परमप्रभु यावे आ च्हेब दुम्तीकेन मेको आन भाग बाक्ब। मिनु गाद, रूबेन नु मनस्से आ उइक्थ थरमी यर्दन आ पूर्व गे आन रागी तशो बाक्तेक्म। मारदे हना परमप्रभु यावे आ गेय पाइब मोसामी मेको आन कली आन रागी गेने थुम्शो बाक्त” दैत। यहोसु १३:१४,३३

8 मिनु मेको मुरपुकी बोक्शा लशा, मेको रागी आ ब्रेक्स ब्रेक्चा गोम्तेक्म। यहोसुमी मेको आन कली दोदेशो देंमे, मोदेशो पाम्तेक्म। मिनु डोंइती यहोसुमी “लने, मेको रागी नेल्ल हिरसीन। मिनु मेको रागी आ ब्रेक्स ब्रेक्शा, आ बाक्तीक चाक्कीन। मिनु गो एक शिलोमी गे इन कली परमप्रभु यावे आ डोंइती योक्शा गेनन्नी” दैत।

9 मिनु मेकोपुकी लशा, रागी नेल्ल हिरसाक्म। मिनु सहर सहर कोव्रशा, मेको रागी ७ भाग सेल्ल्या ब्रेक्ताक्म। मिनु यहोसु आ बाक्तीके शिलोम लेतेक्म।

10 मिनु यहोसुमी शिलोमी परमप्रभु यावे आ डोंइती इस्साली थर डा खिं खिं डा मुर आन कली मेको रागी योक्शा गेप्टु।

बेन्यामीन आ मुर आन रागी

11 मिनु योव्रडमेनु, बेन्यामीन आ खिं खिं डा मुरपुकीमी आन रागी ताम्तेक्म। मेको आन रागी यहूदा थर नु योसेफ आस थर निक्शी आन दातेमी बाक्त। उत्पती ४९:२७

12 मेको सांद उत्तर गे यर्दन रे पा लाइशो यरीको आ उत्तर डा देम्सीलो लाक्शा, पच्छिम गे डा पहाड लाक्शा गोरशो रागी बेथ-अवेन सम्म जाक्दीशो बाक्त। यहोसु ७:२

13 मेकेर रे मेको सांद दक्खिन डा लुज डा देम्सीलो लाकशा, अतारोथ-अदार आ आइदी जाकदीशशो बाक्त। लुज कली बेथेल यो देंनीम। मेको आ दक्खिन गे जाकदीशशा, आइदी बेथ-होरोन आ दक्खिन गे डा पहाड रे पा लुकच लशो बाक्त। उत्पत्ती १२:८; उत्पत्ती २८:१९

14 मिनु मेको सांद मेकेर डा पहाड आ डोंइती बाकशो बेथ-होरोन आ दक्खिन पच्छिम रे पा दक्खिन गे हिरशो बाक्त। मिनु किरयथ-बाल सम्म जाकदीशशो बाक्त। किरयथ-बाल कली किरयथ-यारीम यो देंनीम। मेको यहूदा आ थर डा मुर आन सहर बाक्त। मेको पच्छिम गे बाकब। यहोसु १५:६-९, ६०

15 दक्खिन गे डा सांद चहिं किरयथ-यारीम आ एर ओंथ डा पच्छिम गे बाक्त। मिनु मेको सांद एफ्रोन रे नेप्तोआह आ ब्वाक्कु बुक्तीकेमी जाकदीशशो बाक्त। यहोसु १५:९

16 नोले मेको सांद बेन-हिन्नोम दिम आ डोंइती डा डांडा आ पुं रे लाइब। मेको रेफाइम आन दिम डा उत्तर गे बाकब। मेको सांद हिन्नोम दिम गे लशा, यबुसी आन सहर आ दक्खिन डा देम्सीलो रे पा लुकच लशा एन-रोगेलमी तोइशशो बाक्त।

17 मिनु उत्तर गे लशा, एन-शेमेश लाकशा, अदुम्मीम आ डोंइती बाकशो गेलीलोत रे रूबेन आ तौ बोहान आ फुल्लु सम्म जाकदीशशो बाक्त।

18 मेकेर रे पा लाकशा बेथ-अराबाह आ उत्तर डा देम्सीलो रे अराबाह रागीम जाकदीशशा नुष्शो बाक्त। यहोसु १५:६३; न्यायाधीस १:२१

19 मेको सांद बेथ-होग्ला आ उत्तर डा देम्सीलो लाकशा यर्दन आ दक्खिन गे बाकशो हिकसी समुन्द्र आ उत्तर डा ओन्नतीक सम्म लशो बाक्त। मेको दक्खिन गे डा सांद बाकब।

20 मिनु यर्दन खोला मेको आ पूब डा सांद बाकब। बेन्यामीन आ खिं खिं डा मुर आन रागी डा सांद नेल्ल एकोन बाक्नीम।

21 बेन्यामीन आ खिं खिं डा मुरपुकीमी तेको तेको सहर ताम्तेकम देशा हना, यरीको, बेथ-होग्ला, एमेक-केसीस,

22 बेथ-अराबाह, सेमाराडम, बेथेल,

23 आव्वीम, पारा, ओफ्रा,

24 केफार-अम्मोनी, ओप्नी, गेबा मेको आन के बाक्तीक नेल्ल पा १२ ओटा सहर नु मेको आन गाउंपुकी बाक्तेकम।

25 गिबोन, रामाह, बेयरोथ,

26 मिस्पा, केफीरा, मोचाह,

27 रेकेम, इरपेल, तरालाह,

28 जेला, हा-एलेफ, यबुसी आन सहर, मेको कली यरूसलेम यो देंनीम, गिबा नु किरयथ-यारीम बाक्नीम। मेको आन के बाक्तीक नेल्ल पा १४ ओटा सहर नु आन गाउंपुकी बाक्तेकम। मेको बेन्यामीन आन खिं खिं डा मुर आन रागी बाकब।

## 19

सिमियोन आ मुर आन रागी

1 मिनु नोले योव्रडमेनु, सिमियोन आ खिं खिं डा मुरपुकीमी आन रागी ताम्तेकम। मेको आन रागी यहूदा आ खिं खिं डा मुर आन रागी आ दातेमी बाक्त। उत्पत्ती ४९:५

2 मेको आन रागी तेको तेको बाक्त देशा हना, बेयर-शेबा, मेको कली शेबा यो देंनीम, मोलादा, उत्पत्ती २१:१४, ३१, ३३

3 हासार-शुआल, बलाह, एसेम,

4 एल्लोलद, बेथुल, होरमा,

5 सिकलाग, बेथ-मारकाबोथ, हासार-सूसाह,

6 बेथ-लेबाओथ नु शारूहेन मेको आन के बाक्तीक नेल्ल पा १३ ओटा सहर नु गाउंपुकी बाक्तेकम।

7 ऐन, रिम्मोन, एथेर नु आशान। मेको आन के बाक्तीक नेल्ल पा ४ ओटा सहर नु मेकेर डा गाउंपुकी बाक्तेकम। मेको आन एर ओंथ डा गाउं नेल्ल बालाथ-बेर, दक्खिन गे डा रामाह सम्म बाक्तेकम।

8 मेको सिमियोन आ थर डा खिं खिं डा मुर कोव्रशा, मेको सहर नेल्ल आन एर ओंथ डा गाउं बालाथ-बेर नु नेगेब डा रामाह सम्म बाकब।

9 मेको सिमियोन आ खिं खिं डा मुर आन रागी बाक्त। मिनु मेको आन रागी यहूदा आ खिं खिं डा मुर आन रे पा तशो बाक्तेकम। मारदे हना यहूदा थर आन रागी मालशो क्येडा यो शुश बाक्माक्त। मोपतीके सिमियोन आ खिं खिं डा मुरपुकीमी मेको आन रागी यहूदा आन रागीमी ताम्तेकम।

जबूलुन आ मुर आन रागी

10 मिनु नोले योव्रडमेनु, जबूलुन आ खिं खिं डा मुरपुकीमी आन रागी ताम्तेकम। मेको आन सांद सारीद सम्म बाक्त। उत्पत्ती ४९:१३

11 मिनु पच्छिम गे मरलाह सम्म लशा, दब्बेशेत लाकशा, योकनाम आ नेक्था डा खोला सम्म जाकदीत्त।

12 सारीद रे पा लशा, पूब नां दाप्तीक गे किस्लोथ-ताबोर रागी रे दाबेराथमी यूशा याफीया सम्म डोइशशा लशो बाक्त।

13 मेकेर रे मेको पूब गे लशा, गाथ-हेफेर नु एथ-कासीन सम्म जाकदीशशा, यो रिम्मोन सम्म यूशो बाक्त। मेको सांद नेआह सम्म जाकदीशशो बाक्त।

14 मिनु मेको सांद हन्नातोन उत्तर गे लशा, हिरशा इफताह-एल डा दिममी जाकदीशशा नुष्शो बाक्त।

15 मेको सांद आगाम कात्ताथ, नहालाल, शिमोन, इदलाह नु बेथलेहेम यो बाक्तेकम। मेको आन के बाक्तीक नेल्ल पा १२ ओटा सहर नु मेकेर डा गाउंपुकी बाक्तेकम। न्यायाधीस १:३०

16 जबूलून आ खिं खिं डा मुर आन सहर नु गाउंपुकी एकोन बाक्तेकम।

इस्साकार आ मुर आन रागी

17 मिनु नोले योवडमेनु, इस्साकार आ खिं खिं डा मुरपुकीमी आन रागी ताम्तेकम।

18 मेको आन सहर तेको तेको बाक्तेकम देशा हना, येजेल, केसुल्लोथ नु शुनेम, २राजा ४:८

19 हाफ्राइम, शीओन नु अनाहारथ,

20 रब्बीत, किशयोन नु एबेस,

21 रेमेथ, एन-गन्नीम, एन-हददाह नु बेथ-पस्सेस बाक्तेकम।

22 मेको सांद ताबोर, शहसूमा नु बेथ-शेमेश सम्म जाक्दीशशा, यर्दनमी नुप्शो बाक्त। मेको आन के बाक्तीक सहर नेल्ल पा १४ ओटा सहर नु मेकेर डा गाउंपुकी बाक्तेकम।

23 इस्साकार आ खिं खिं डा मुर आन सहर नु गाउंपुकी एकोन बाक्तेकम।

आशेर आ मुर आन रागी

24 मिनु नोले योवडमेनु, आशेर आ खिं खिं डा मुरपुकीमी आन रागी ताम्तेकम। मेको आन रागी तेको तेको बाक्तेकम देशा हना, उत्पत्ती ४९:२०

25 हेलकाथ, हाली, बेतेन नु आकशाफ,

26 अल्लाम्मेलेक, अमाद नु मिशाल बाक्तेकम। मिनु मेको सांद पच्छिममी कारमेल नु शीहोर-लिब्नाथ सम्म जाक्दीशशो बाक्त।

27 मिनु नोले पूबं गे बेथ-दागोन गे लशा, जबूलून नु इफताह-एल डा दिम सम्म जाक्दीशशो बाक्त। मेको उत्तर गे डा बेथ-एमेक नु नेडल लशा, पेरा गे काबुल रागीमी गूशो बाक्त।

28 मिनु एब्रोन, रेहोब, हम्मोन नु कानाह सहर रे पा ठेयब सीदोन सम्म जाक्दीशशो बाक्त।

29 मिनु मेको सांद रामाह नु गारो पाइशशो टायर सहर गे हिरशो बाक्त। मेको सांद लशा, होसाह गे समुन्द्र आ नेक्था डा अकजीब सहरमी नुप्शो बाक्त। यहोसु १५:४४; न्यायाधीस १:३१

30 उम्मा, अफेकाह नु रेहोब, नेल्ल पा मेको आन के २२ ओटा सहर नु मेकेर डा गाउंपुकी बाक्तेकम।

31 आशेर आ खिं खिं डा मुर आन सहर नु गाउंपुकी एकोन बाक्तेकम।

नाप्ताली आ मुर आन रागी

32 मिनु नोले योवडमेनु, नाप्ताली आ खिं खिं डा मुरपुकीमी आन रागी ताम्तेकम। उत्पत्ती ४९:२१

33 मेको आन सांद हेलेफ, सा-अनानीमीमी बाक्शो ठेयब रवा, अदामी-नेकेब लाक्शा, यब्नेल रे लक्कुम सम्म लशा, यर्दनमी नुप्शो बाक्त।

34 मेको सांद पच्छिममी अचनोथ-ताबोर रे लाइशशा, हुक्कोकमी गूशो बाक्त। मिनु मेको दक्खिन गे जबूलून सम्म, पच्छिम गे आशेर सम्म, नु पूबं गे यहूदा आ यर्दन सम्म जाक्दीशशो बाक्त।

35 मिनु गारो पाइशशो सहरपुकी चहिं सिददीम, सेर, हम्माथ, रक्कत, किन्नेरेथ,

36 आदामाह, रामाह, हासोर,

37 केदेश, एद्रेइ, एन-हासोर

38 इरोन, मिगदल-एल, होरेम, बेथ-अनात नु बेथ-शेमेश बाक्तेकम। मेको नेल्ल पा मेको आन के १९ ओटा सहर नु मेकेर डा गाउंपुकी बाक्तेकम। न्यायाधीस १:३३

39 मिनु मेको नाप्ताली आ खिं खिं डा मुर आन सहर नु गाउंपुकी एकोन बाक्तेकम।

दान आ मुर आन रागी

40 मिनु नोले योवडमेनु, दान आ खिं खिं डा मुरपुकीमी आन रागी ताम्तेकम। मेको आन रागी तेको तेको बाक्तेकम देशा हना, उत्पत्ती ४९:१६

41 सोराह, एशताओल नु इर-शेमेश,

42 शा-आलब्बीन, आइयालोन नु इथ्लाह,

43 एलोन, तिम्नाह नु एक्रोन, यहोसु १५:१०

44 एल-तेके, गिब्बेथोन नु बालाथ,

45 येहुद, बेने-बेराक नु गाथ-रिम्मोन,

46 मे-यारकोन, रक्कोन नु योप्पा आ डोंइती डा रागी बाक्तेकम। योना १:३

47 मिनु दान आ खिं खिं डा मुर मेको रागी ग्राचा कली श्येत जाम्तेकम। मिनु मेकोपुकीमी लेशेम सहरमी लशा, लडाइ पा तरवारमी मुर नेल्ल आन कली साइशशा ग्रातेकम। मेकोपुकी मेको सहरमी बाक्शा, मेको कली आंम किंकी आ नें दान वोइक्तेकम। न्यायाधीस १८:२७-२९

48 मिनु मेको दान आ खिं खिं डा मुर आन सहर नु गाउंपुकी एकोन बाक्तेकम।

यहोसु आ रागी

49 मिनु मेकोपुकीमी रागी नेल्ल योव्रशा, योक्ने शुम्मे नोले इसाएलीपुकीमी नून आ तौ यहोसु कली मेको आन दातेम रागी गेम्तेकम।



50 परमप्रभु यावेमी देशो खोदेशो पा यहोसुमी पुंडशो एफ्राइम डा पहाड रागी डा तिम्नाथ-सेराह सहर मेको कली गेम्तेकम। मिनु यहोसुमी सहर सेल्सा मेकेन बाकत। यहोसु २४:३०; न्यायाधीस २:९

51 मिनु चढेब एलाजर, नून आ तौ यहोसु नु इस्राएली आन थर थर डा ठेयब मुर नेल्ल परमप्रभु यावे आ डोंइती शिलोम गुम्तीक ताम्बु आ लाप्चोमी रागी नेल्ल योक्ने थुम्तेकम। मोपा मेकोपुकीमी रागी योक्तीके गेय यो थुम्तेकम। यहोसु १४:१; यहोसु १८:१

## 20

साइक्ब प्रोक्शा बाक्तीक सहर

1 मिनु नोले परमप्रभु यावेमी यहोसु कली

2 “गेम इस्राएली आन कली ‘प्रोक्शा बाक्तीक सहरपुकी वोइक्चा माल्लीनी’ दे देंचा माल्नेवे। गो मोसा रे पा इ कली देशो खोदेशो पा पावो। गन्ती ३५:९-२९

3 मजोक्थु, मतुडक्थु सुइमी सुइ कली साइक्तु हना, मेको साइक्ब मुर प्रोक्शा, मेको सहर लल। मेको सहर क्येक्क लेप्ब रे पा ब्रोंइतीक सहर दुम्ब।

4 मिनु मेको मोदेशो सहरमी मुर साइक्ब मुर प्रोक्त हना, मेको सहर डा ठेयब लाप्चोमी राप्शा बाक्चा माल्ब। मिनु सहर डा ठेयब मुर आन डोंइती आं लोव्र नेंपदल। मिनु नोले मेकोपुकीमी मेको मुर कली सहर ओव्रचा नु बाक्तीक खिं गेचा माल्लीम। मिनु मेको मुर मेकोपुकी नु बाक्चा माल्ब।

5 मिनु क्येक्क लेप्ब मुरुमी मेको मुर साइक्ब कली खेदा पाप्तु हना, मेको सहर डा मुरुमी मेको मुर साइक्ब मुर कली जिम्मा गेचा मदुम्ब। मारदे हना मेकोमी मजोक्थु मतुडक्थु साइक्तु।

6 मिनु निसाफ दुम नोले नु मेकेर डा नेल्ल क्येडा ठेयब चढेब मबेक्म सम्म मेको मुर मेको सहरमीन बाक्चा माल्ब। नोले मेको मुर आंम सहर आंम खिंमी, ते रे प्रोक्शा जाक्मे, मेकेन लेन्ने चाप्ब।

7 मिनु मेकोपुकीमी नाप्ताली आ पहाड रागी गालील डा केदेश सहर वोइक्तेकम। एफ्राइम पहाड रागी डा शेकेम नु यहूदा आ पहाड रागी डा किरयथ-अरबा सहर वोइक्तेकम। मेको कली हेब्रोन यो देंनीम। ग्रीक लोव्रम गिल्गाल कली गालील देंब। यहोसु १९:३७; यहोसु १५:१३

8 यर्दन नु यरीको आ पूर्व गे रूबेन आ थर आन गोरशो रागीमी बाक्शो दिंम डा बेसेर सहर वोइक्तेकम। गाद आ थर डा गिलाद रागीमी रामोथ सहर वोइक्तेकम। मनस्से थर आन बाशानमी गोलान सहर वोइक्तेकम। मेकोपुकी मोपा मुर बाक्तीक सेल्तेकम। ब्यवस्था ४:४१-४३

9 सुइ इस्राएली नु मेको आन दातेमी बाक्शो अर्को रागी डा मुरुमी मतुडक्थु मुर साइक्तु हना, मेको मोदेशो वोइक्तेक सहरमी प्रोक्ने चाप्ब। निसाफ दुम्चा क्येडा डोंइती क्येक्क लेप्ब मुर आन गुइ रे मेको मुर साइक्चा मपुंडसेक्कल” देत।

## 21

लेवी आन बाक्तीक सहरपुकी

1 मिनु लेवी थर डा ठेयब मुरपुकी, चढेब एलाजर, नून आ तौ यहोसु नु इस्राएल थर थर डा ठेयब मुर आन डोंइती बुक्तेकम। यहोसु १४:१; गन्ती ३५:२-८

2 मेको कनान रागी डा शिलोम बुक्शा, मेको आन कली “परमप्रभु यावेमी मोसा कली अरेशो खोदेशो पा, गे आंइ कली बाक्चा कली सहरपुकी नु आंइ बी ब्यफ आन कली योव्रतीक रूपुकी गेचा माल्लीनी” देतेकम।

3 मिनु परमप्रभु यावेमी अरेशो खोदेशो पा इस्राएलीपुकीमी लेवी आन कली आंम आंम रागी रे पा सहर नु बी ब्यफ, क्यारश भेडा योव्रतीक रूपुकी गेम्तेकम।

4 मिनु योव्रडमेनु, कोहाथ आ मुर आन खिं खिं डा गूतेकम। मेकोपुकी लेवी आ थर चढेब हारून आ चच युइ बाक्तेकम। मेकोपुकीमी यहूदा आ थर, सिमियोन आ थर नु बेन्यामीन आ थर रे पा १३ ओटा सहर ताम्तेकम। गन्ती ३:१७-३९

5 लीशो खिं खिं डा कोहाथ आ चच युइमी एफ्राइम आ थर, दान आ थर नु मनस्से आ उइक्थ थर रे पा १० ओटा सहर ताम्तेकम।

6 मिनु गोरशोन आ खिं खिं डा मुर आन चच युइमी इस्साकार आ थर, आशेर आ थर, नाप्ताली आ थर नु बाशानमी बाक्ब मनस्से आ उइक्थ थर रे पा १३ सहर ताम्तेकम।

7 मिनु मेरारी आ चच युइ आन खिं खिं डा मुरुमी रूबेन आ थर, गाद आ थर नु जबूलून आ थर रे पा १२ ओटा सहर ताम्तेकम।

8 मिनु परमप्रभु यावेमी मोसा कली अरेशो खोदेशो पा इस्राएलीपुकीमी लेवी थर डा मुर आन कली मेको सहरपुकी नु बी ब्यफ, क्यारश भेडा योव्रतीक रू गेम्तेकम।

9 मेकोपुकीमी यहूदा आ थर डा खिं खिं डा मुर नु सिमियोन आ थर डा खिं खिं डा मुरपुकीमी तेको तेको सहर ताम्तेकम देशा हना,

10 लेवी आ थर डा हारून आ चच युइ, कोहाथ आ खिं खिं डा मुरपुकीमी ताम्तेकम। मारदे हना नेल्ल क्येडा डोंइती योव्रडमेनु, मेको आन नें गूत।

11 मिनु मेकोपुकीमी मेको आन कली यहूदा आ पहाड रागीमी किरयथ-अरबा नु आ नेक्था डा योव्रतीक रूपुकी गेम्तेकम। किरयथ-अरबा कली हेब्रोन यो देंनीम। मेको अरबा अनाक आ आफ बाक्त। यहोसु २०:७

12 तन्न मेकोपुकीमी मेको सहर डा रूपुकी नु मेकेर डा गाउंपुकी चहिं यपुन्ने आ तौ कालेब कली गेशो बाक्तेकम। यहोसु १४:३४; यहोसु १५:१३

13 मिनु चढेब हारून आ चच युड आन खिं खिं डा मुरपुकीमी मुर साइक्ब मुर प्रोक्शा लशा बाक्तीक सहर हेब्रोन, लिब्ना,

14 यतीर, एशतेमोआ,

15 होलोन, देबीर,

16 ऐन, युत्ता नु बेथ-शेमेश नु आन बी ब्यफ, क्यारश भेडा योव्रतीक रू नेल्ल पा मेको निक्शी थर रे ९ ओटा सहर ताम्तेकम। १सामुएल ६:१२,१५

17 मिनु बेन्यामीन आ थर रे पा गिबोन नु गेवा,

18 अनाथोथ, अल्मोन नु आन बी ब्यफ, क्यारश भेडा योव्रतीक रू नेल्ल पा ४ सहर ताम्तेकम। येरमीया १:१

19 चढेब हारून आ चच युड आन खिं खिं डा मुर आन के नेल्ल पा १३ ओटा सहर नु आन बी ब्यफ, क्यारश भेडा योव्रतीके दुम्त।

20 लेवी आ थर डा कोहाथ आ खिं खिं डा लीशो मुर आन कली योव्रडमेनु, एफ्राइम आ थर आ रागी रे पा तेको तेको सहरपुकी ताम्तेकम देशा हना, यहोसु २०:७

21 एफ्राइम आ पहाड रागीमी मुर साइक्ब मुर बाक्तीक सहर शेकेम नु गेजेर,

22 किब्साइम नु बेथ-होरोन, नेल्ल पा ४ ओटा सहर नु आन बी ब्यफ, क्यारश भेडा योव्रतीक रू ताम्तेकम।

23 दान आ थर रे एल-तेके, गिब्बेथोन,

24 आइयालोन, गाथ-रिम्मोन, नेल्ल पा ४ ओटा सहर नु आन बी ब्यफ, क्यारश भेडा योव्रतीक रू ताम्तेकम।

25 मनस्से आ उडक्थ थर रे पा तानाक नु गाथ-रिम्मोन सहर निक्शी नु आन बी ब्यफ, क्यारश भेडा योव्रतीक रू ताम्तेकम।

26 कोहाथ आ खिं खिं डा लीशो मुर आन कली १० ओटा सहर नु आन बी ब्यफ, क्यारश भेडा योव्रतीक रू गेम्तेकम।

27 मेकोपुकीमी लेवी थर डा गेरशोन आ खिं खिं डा मुर आन कली मनस्से आ उडक्थ थर रे पा बाशानमी मुर साइक्ब मुर प्रोक्शा लशा बाक्तीक सेल्शो गोलान नु बेयश्तेराह, सहर निक्शी नु आन बी ब्यफ, क्यारश भेडा योव्रतीक रू गेम्तेकम। यहोसु २०:८

28 मिनु इस्साकार आ थर रे पा किश्योन, दावेराथ,

29 यरमुथ नु एन-गन्मी, नेल्ल पा ४ ओटा सहर नु आन बी ब्यफ, क्यारश भेडा योव्रतीक रू गेम्तेकम।

30 मिनु आशेर आ थर रे पा मिशाल नु अब्दोन,

31 हेल्काथ नु रेहोब, नेल्ल पा ४ ओटा सहर नु आन बी ब्यफ, क्यारश भेडा योव्रतीक रू गेम्तेकम।

32 मिनु नाप्ताली आ थर रे पा गालील रागीमी मुर साइक्ब मुर प्रोक्शा लशा बाक्तीक सहर केदेश, हम्मोथ-डोर नु कारतान, नेल्ल पा सहर सां नु आन बी ब्यफ, क्यारश भेडा योव्रतीक रू गेम्तेकम। यहोसु २०:७

33 मेको गेरशोनी आ सहर नेल्ल पा १३ ओटा सहर नु आन बी ब्यफ, क्यारश भेडा योव्रतीक रू गेम्तेकम।

34 मिनु लेवी आ थर डा लीशो मेरारी आ खिं खिं डा मुर आन कली जबूलून आ थर रे पा योकनाम, कारताह,

35 दीम्नाह नु नहालाल, नेल्ल पा ४ ओटा सहर नु आन बी ब्यफ, क्यारश भेडा योव्रतीक रू गेम्तेकम।

36 मिनु रूबेन आ थर डा बेसेर नु याहास, यहोसु २०:८

37 केदेमोथ नु मेफा-आथ, नेल्ल पा ४ ओटा सहर नु आन बी ब्यफ, क्यारश भेडा योव्रतीक रू गेम्तेकम।

38 मिनु गाद आ थर डा मुर साइक्ब मुर प्रोक्शा लशा बाक्तीक गिलाद रागी डा रामोथ, महा-नाइम, यहोसु २०:८

39 हेरबोन नु याजेर, नेल्ल पा ४ ओटा सहर नु आन बी ब्यफ, क्यारश भेडा योव्रतीक रू गेम्तेकम।

40 मिनु लेवी आ लीशो मेरारी आ खिं खिं डा मुर आन कली योव्रशा १२ ओटा सहर गेम्तेकम।

41 मिनु इस्राएली आन रागी आन दातेमी लेवी आन के ४८ ओटा सहर नु आन बी ब्यफ, क्यारश भेडा योव्रतीक रू दुम्तेकम।

42 एको सहर नेल्ल आन एर ओंथ बी ब्यफ, क्यारश भेडा योव्रतीक रू बाक्तेकम।

43 मोपा परमप्रभु यावेमी इस्राएली आन कली “गेनुड” दे मेको आन किक्की पिपी आन कली जशो कसम खाप्तु। मिनु इस्राएलीपुकीमी मेको रागी कली आंम के सेल्शा बाक्तेकम। उत्पत्ती १२:७

44 मिनु परमप्रभु यावेमी इस्राएली आन किक्की पिपी आन कली कसम जशो खोदेशो पा नेल्ल रे पा नाइक्चा गेप्तु। मेको आन जोरी सत्रु नेल्ल मेको नु बुम्तेकम। परमप्रभु यावेमी मेको आन जोरी सत्रु इस्राएली नेल्ल आन गुडमी गेप्तु। ब्यवस्था १२:९-१०

45 मिनु परमप्रभु यावेमी पशो रिम्शो लोत्र का सम्म यो मली, नेल्ल खाप्तु। यहोसु २३:१४; १राजा ८:५६

## 22

पूर्ब डा वोंइश मुरपुकी खिं लेशो

1 मिनु यहोसुमी रूबेन आ थर, गाद आ थर नु मनस्से आ उडक्थ थर डा वोंइश मुर आन कली ब्रेत्ताक्व।

2 मिनु मेको आन कली “परमप्रभु यावे आ गेय पाडब मोसामी इन कली अंरेशो नेल्ल पाडतीनी। आं अंरेशो लोत्र यो नेल्ल टीतीनी। गन्ती ३२:२०-२२; ब्यवस्था ३:१८-२०

3 गेपुकीमी शुश नाक्ती सम्म इन लोकब आन कली यो वारच पा मप्रोंइनी। मिनु परमप्रभु यावे, इन परमप्रभु कली अरेशो नेल्ल टीतीनी।

4 मुल परमप्रभु यावे, इन परमप्रभुमी आ देशो खोदेशो पा इन लोकब आन कली नाइक्चा गेशो बाक्त। मुल गेपुकी परमप्रभु यावे आ गेय पाइब मोसामी इन कली यर्दन आइक्ची हांबु गेशो इन खिं खिं लेतीन। हिबू ४:८

5 मुल गे परमप्रभु यावे आ गेय पाइब मोसामी अरेशो लोत्र होस पा पने। परमप्रभु यावे, इन परमप्रभु कली दाक्तीन। मेको आ लां गाक्कीन। आ अरेशो लोत्र टिने। मेको कली मप्रोनीन। गे इन थुं नेल्लेमी परमप्रभु यावे आ गेय पने” देंत। ब्यवस्था १०:१२

6 मिनु यहोसुमी मेको आन कली आसीक गेशा, सोइक्ताक्व। मिनु मेकोपुकी आंम आंम खिं लाप्तेक्म।

7 मनस्से आ उइक्थ थर कली मोसामी बाशानमी आंम रागी गेप्टु। तन्न अर्को उइक्थ थर कली यहोसुमी यर्दन आ पच्छिम गे मेको आन लोकब नु गेप्टु। मिनु यहोसुमी मेको आन कली आंम आंम खिंम सोइक्ची ना मेको आन कली आसीक गेप्टु।

8 मिनु मेको आन कली “इन जोरी सत्रु रे रोइशो शुश शोप नु शुश बी ब्यफ, क्यारश भेडा, शुश सुन चांदी, कांसा फलाम नु शुश वासी लाइशशा, इन लोकब आन कली यो योक्शा गेचा माल्लीनी” देंत। गन्ती ३१:२७

9 मोपा रूबेन आ थर, गाद आ थर नु मनस्से आ उइक्थ थर डा वोंइश मुर कनान रागी डा शिलो रे इस्राएलीपुकी नु ब्राशा, गिलाद रागी लेत्तेक्म। मेको रागी परमप्रभु यावे आ देशो नु मोसा आ पतीकेमी डोंइती रे ग्राशा, आंम के सेल्शा बाक्ने थुंशो बाक्तेक्म।

10 मिनु मेकोपुकी कनान रागी डा यर्दन खोला आ नेक्था गेलीलोत सहर जाक्दीत्तेक्म। मिनु मेको रूबेन आ थर, गाद आ थर नु मनस्से आ उइक्थ थरमी यर्दन खोला नेक्था थम ठेयब चढेतीक का सेल्तेक्म।

11 मिनु इस्राएलीपुकीमी “रूबेन आ थर, गाद आ थर नु मनस्से आ उइक्थ थरमी कनान रागी आ सांदमी यर्दन आ नेक्था इस्राएली आन रागीमी ठेयब चढेतीक का सेल्तेक्म” देशो नेतेक्म।

12 मिनु इस्राएलीपुकीमी मेको नेन्मे नोले, मेकोपुकी नु लडाइ पचा कली शिलोमी खुम्साक्म।

13 मिनु इस्राएलीपुकीमी चढेब एलाजर आ तौ फिनेहास कली गिलाद रागीमी रूबेन आ थर, गाद आ थर नु मनस्से आ उइक्थ थर आन बाक्तीकेमी सोइक्ताक्म। गन्ती २५:७

14 मेको नु काथा इस्राएल डा नेल्ल थर रे पा १० जना ठेयब मुर आन कली यो सोइक्ताक्म।

15 मिनु मेकोपुकी रूबेन आ थर, गाद आ थर नु मनस्से आ उइक्थ थर बाक्तीक गिलाद रागी जाक्दीशशा, मेको आन कली

16 “परमप्रभु यावे आ मुर नेल्लेमी ‘मारदे गेपुकीमी परमप्रभु यावे, इस्राएली आन परमप्रभु रे नोले शोंइसीनी? गे दोपा परमप्रभु यावे रे पा डोन लशा, मेको कली मटिथु, आंम कली चढेतीक सेल्नी? लेवी १७:८-९; ब्यवस्था १२:१३-१४

17 मार, पेओर नु पशो पापम आंइ कली मजाक्दीम्मे? मेना परमप्रभु यावे आ मुर शुश बेक्तेक्म हना यो, मेको आ पाप रे गो मुल सम्म आंम कली ठीक सेल्ने मचाप्यो बाक्नीक। गन्ती २५:१-९

18 मुलाक्त गेपुकी परमप्रभु यावे रे नोले शोंइसीनी? गे मुलाक्ती परमप्रभु यावे कली टिचा प्रोंइतीनी हना, मेको आ दीसा इस्राएली नेल्ल आन कली तशा, गाइक्ब, दे मतुइक्तीनी?

19 मिनु आंम इन रागी ग्रांशा दिशो बाक्त हना, ओंथ हांबु परमप्रभु यावे आ रागी नु आ बाक्तीक पिशा, गोपुकी नु रागी योक्कीन। तन्न गे परमप्रभु यावे नु आंइ कली मटिथु, परमप्रभु यावे, इ परमप्रभु आ चढेतीक क्येडा लाक्शा, आंम के चढेतीक मसेलीन।

20 मिनु जेराह आ तौ आकानमी मटिथु, खुइ पवानु, परमप्रभु यावे आ गाइशोमी नेल्ल आन कली मार दुम्मे? आकान ला मबे, इस्राएली नेल्लेमी श्येत जाप्तेक्म” देंतेक्म। यहोसु ७:६-१३

21 मिनु रूबेन आ थर, गाद आ थर नु मनस्से आ उइक्थ थरमी इस्राएल आ थर थर डा ठेयब मुर आन कली गन्ती १:१६; गन्ती १०:४

22 “परमप्रभु यावे, नेल्ल क्येडा सक्ति पाइशो परमप्रभु यावेमी नेल्ल तुइक्ब। गो परमप्रभु यावे कली मटिशो बाक्तय हना, इस्राएलीपुकीमी यो मेको तुइक्तमेक्ल। मुलाक्त आंइ कली सतीन।

23 गोपुकीमी परमप्रभु यावे आ नोले खोइक्चा प्रोंइशा, आंम कली चढेतीक सेल्शा, मेको चढेतीकेमी चोशा चढेशो, अन्न चढेशो, दुशा बाक्तीक चढेशो चढेतय हना, परमप्रभु यावेमी आंइ कली सजाइ गेवल।

24 तन्न ममाइ, गोपुकीमी मारदे एको चढेतीक सेल्तक देशा हना, इन चच युइमी आंइ चच युइ आन कली ‘गे परमप्रभु यावे, इस्राएली आन परमप्रभु नु मार पाइक्मुनी डा?

25 परमप्रभु यावेमी यर्दन कली गो आंइ सांद सेल्शा गेप्टु। गे रूबेन आ थर नु गाद आ थर परमप्रभु यावे के मबाक्नीनी। मिनु इन चच युइमी आंइ चच युइ आन कली परमप्रभु यावे कली मान पा हिंघा तेक्नीमी” देंनीमी को।

26 मोपतीके गोपुकीमी ‘चढेतीक का सेल्य। चोशा चढेतीक नु अरु चढेतीक चढेचा कली ममाइ।

27 तन्न मेको चढेतीक गे नु गो आंइ दातेमी नु आंइ चच युइ आन दातेमी एको चढेतीक सांक्छी दुम्ल। मिनु गोपुकीमी परमप्रभु यावे कली आ बाक्तीकेमी ठेयब सेल्शा। मिनु मेकर गो आंइ चोशा चढेशो नु दुशा बाक्तीक चढेशो चाक्शा चढैनय। मिनु इन चच युइमी गो आंइ चच युइ आन कली “गे परमप्रभु यावे आ मुर मबाक्नीनी” दे देंने मचाप्नीम, दे एको चढेतीक सेलतक। यहोसु २४:२७

28 मिनू गोपुकीमी मेकोपुकीमी खेयप का आंड कली कि आंड चच युड आन कली मोदेशो देतेकम हना, गोपुकीमी मेको आन कली मेको आंड किकी पिपीमी परमप्रभु यावे कली चढेतीक सेल्शो थोत्रक कोव्रडीन। चोशा चढेतीक नु अरु चढेतीक चढेचा कली ममाड, तन्न गे नु गो इं दातेमी सांकछी दुम्ल' दे सेल्लक।

29 मिनू गोपुकीमी थमा पा मुलाकती परमप्रभु यावे कली मटिथु, मेको आ नोले खोडकचा प्रॉडशा एको चढेतीक मसेल्लक। मेको चढेतीकेमी चोशा चढेतीक, अन्न चढेतीक नु अरु चढेतीक चढेचा कली यो मसेल्लक। परमप्रभु यावे, आंड परमप्रभु आ बाकतीक आ डोंडती बाकशो चढेतीके क्येडा लाकशा अरु मसेल्लनीकी" देतेकम।

30 मिनू चढेब फिनेहास, मेको नु बाकब इस्राएली आन ठेयब मुरपुकी नु थर थर डा ठेयब मुरपुकीमी रूबेन आ थर, गाद आ थर नु मनस्से आ उडकथ थर आन लोव्र नेंशा ग्येरसाकम।

31 मिनू चढेब एलाजर आ तौ फिनेहासमी रूबेन, गाद नु मनस्से आ थर डा मुर आन कली "परमप्रभु यावे गो आंड दातेमी बाकब, दे मुलाकती गोपुकीमी तुडकताकक। मारदे हना एको चढेतीक सेल्चा कली परमप्रभु यावे रे पा नोले मशोंइसीनी। मुल चहिं गोपुकीमी इस्राएली आन कली परमप्रभु यावे आ गुड रे प्रॉडतीनी" देत।

32 मिनू चढेब एलाजर आ तौ फिनेहास नु ठेयब मुर नेल्ल गिलाद रागी रे रूबेन नु गाद आ थर डा मुर युम्टीके रे कनान रागी गे लेल्लेकम। मिनू इस्राएली आन कली मेको लोव्र नेल्ल शेंताकम।

33 मेको लोव्र नेंशा नेल्ल ग्येरसाकम। मिनू परमप्रभु कली "गे रिम्लो पाइब बाकनीनी" दे ठेयब सेल्लेकम। मिनू मेकोपुकीमी लेंशा रूबेन नु गाद आस थर बाकशो रागी कली खतम सेल्लतीक नु लडाइ पतीक लोव्र गेनायो मपाम।

34 मिनू रूबेन नु गाद आस थर डा मुरुमी मेको चढेतीक आ नें "सांकछी" वोडकतेकम। मिनू मेको आ अर्थ मार बाकत देशा हना "गे नु गो इं दातेमी परमप्रभु यावे थमा पा परमप्रभु बाकब, दे मेको चढेतीक सांकछी बाकब" देतेकम।

## 23

यहोसु आ नोले डा लोव्र

1 मिनू शुश नाकत नोले परमप्रभु यावेमी इस्राएली आन कली आन जोरी सत्रु रे पा प्रॉडशा, नाइशशा बाकचा गेप्टु। मेना यहोसु खाल्पा दुम्ला, शुश बर्स दुम्लो बाकत। यहोसु २१:४४

2 मिनू यहोसुमी इस्राएली नेल्ल आन खाल्पा, आन ठेयब मुर, आन निसाफ पाइब नु मेको आन सासन पाइब आन कली ब्रेत्ताकव। मिनू मेकोमी मेको आन कली "गो मुल खाल्पा दुम्टी। शुश बर्स यो दुम्टी।

3 परमप्रभु यावे, इन परमप्रभुमी मेको रागी रागी डा मुर आन कली गे इन पर्वम मार मार पवा, गोपुकीमी मेको नेल्ल ताइतीनी। परमप्रभु यावे, इन परमप्रभुमी इन पचा डा लडाइ आंमान पाप्टु।

4 गोम योक्शा, लीशो रागी इन थर थर डा मुर आन कली गेता। मिनू गो यर्दन रे पच्छिम गे डा ठेयब समुन्द्र सम्म रागी नेल्ल ग्राती।

5 परमप्रभु यावे, इन परमप्रभुमी मेको लीशो मुर आन कली इन डोंडती रे गुंडब। मिनू मेकोमी मेको आन कली इन डोंडती रे खेरब। मिनू परमप्रभु यावे, इन परमप्रभुमी देशो खोदेशो पा, मेको आन रागी इन के सेल्लनीनी।

6 गे थम बोल्यो दुमीन। मिनू मोसा आ ब्रेकशो अरेशो लोव्र होस पा टिने। गे ग्युरा पेरा गे गेनायो मलने। ब्यवस्था ५:२९

7 गे इन दातेमी बाकशो अर्को रागी डा मुरपुकी नु मब्वॉडसीन। मेको आन देवता आन नें मथिने। मेको आन नेंमी कसम मजने। मेको आन कली पूजा मपने। मिनू मेको आन डोंडती बाप्शा सेउ मपने। प्रस्थान २३:१३-२४

8 तन्न गेपुकी मुलाकत डा नाकत सम्म पशो खोदेशो पा परमप्रभु यावे, इन परमप्रभु नु ला बाककीन।

9 परमप्रभु यावेमी इन डोंडती रे ठेयब सक्ति पाइशशो रागी डा मुर आन कली खेरशो बाकब। मिनू मुलाकत सम्म मेको रागी डा मुर सुडमी यो गे इन कली ग्राने मचाप्शो बाकतेकम। लेवी २६:७-८; ब्यवस्था २८:७

10 इन मुर कामी मेको आन के हजार का मुर आन कली खेरने चापब। मारदे हना आ देशो खोदेशो पा इन लडाइ पचा डा परमप्रभु यावे, इन परमप्रभुमी पाइब।

11 मोपतीके गे परमप्रभु यावे, इन परमप्रभु कली दाकतीन। मिनू होस पने।

12 तन्न गे नोले शोंइसाकनी हना नु मेको रागी डा इन दातेमी लीशो मुरपुकी नु गारपाइकतीनी हना, गे इन तमी मेको आन तौ कली गेतीनी हना, इन तौ कली मेको आन तमी चाकतीनी हना नु मेको मुरपुकी नु गारशा गेय पाइतीनी हना,

13 परमप्रभु यावे, इन परमप्रभुमी मेको रागी डा मुर आन कली इन डोंडती रे मखेरब, दे तुडकतीन। तन्न मेकोपुकी इन कली ग्याइल नु ब्वारद दुम्टीम। मेकोपुकी इन ची कली युक्तीक नु इन मिक्च कली चू दुम्टीम। परमप्रभु यावे, इन परमप्रभुमी इन कली गेशो रिम्लो रागी रे गे मबेकनी सम्म मोदेशो दुम्ब। गन्ती ३३:५५; ब्यवस्था ७:१६; न्यायाधीस २:३

14 न्रेनीन, गो मुल मुर नेल्ल खोदेशो पा बेकचा चिकताकड। मिनू परमप्रभु यावे, इन परमप्रभुमी इन कली देशो रिम्लो लोव्र मारेड मली। मेकोमी नेल्ल इन कली खाप्शो बाकब। मिनू का सम्म यो मखाइकथु पाप्टु, दे गे इन थुं डा मिम्टीकेमी तुडकनीनी। यहोसु २१:४५

15 दोपा परमप्रभु यावे, इन परमप्रभुमी इन कली देशो रिम्लो लोव्र नेल्ल खापबा, मोपा परमप्रभु यावेमी गे आ अरेशो लोव्र मटीतीनी हना, इन कली देशो हिंच कोंडतीक लोव्र यो खापब। मिनू परमप्रभु यावे, इन परमप्रभुमी इन कली एको रिम्लो रागी रे खेरशा, खतम सेल्ब। ब्यवस्था २८:१५-४७

16 गोपुकी परमप्रभु यावे, इन परमप्रभु आ कबल कली प्रॉडशा, अरु देवी देवता आन कली ठेयब सेल्थ लाइतीनी हना नु मेको आन कली बाप्शा सेउ पाइतीनी हना, परमप्रभु यावे शुश चुरशा, मेकोमी इन कली एको रिम्लो रागी रे रीब पा खेरशा खतम सेल्ब" देत।

## 24

शेकेम सहरम पशो कबल

1 मिनु यहोसुमी इस्राएली आन थर नेल्ल कली शेकेममी इस्राएली आन खाल्पा, आन ठेयब मुर, आन निसाफ पाइब नु मेको आन सासन पाइब आन कली ब्रेत्ताक्व। मिनु मेको नेल्ल परमप्रभु आ डोंडती जाक्शा बाक्तेक्म।

2 मिनु यहोसुमी मुर नेल्ल आन कली “परमप्रभु यावे, इस्राएली आन परमप्रभुमी ‘साइ नेसी इन किकी पिपी, अब्राहाम नु नाहोर आ आफ तेराह युफ्रेटीस खोला आ आइक्ची हांबुम बाक्शो बाक्तेक्म। मिनु मेकोपुकीमी अरु देवी देवता आन कली ठेयब सेल्लेक्म। उत्पत्ती ११:२६; उत्पत्ती ३१:१९; उत्पत्ती ३५:२

3 तन्न गो इन किकी पिपी अब्राहाम कली खोला आइक्ची हांबु रे पा पित्ता। मिनु मेको कली कनान रागी नेल्ल हिरताक्व। मिनु सोशा बोशा, इसहाक माइश्शो तौ का गेता।

4 मिनु इसहाक कली याकूब नु एसाव माइश्शो तौ निक्शी गेता। मिनु एसाव कली सेडर पहाडम बाक्चा कली गेता। मिनु याकूब नु आ तौपुकी चहिं इजीप्त रागी लाम्तेक्म। उत्पत्ती ३२:४; उत्पत्ती ४६:६

5 मिनु नोले गो मोसा नु हारून कली सोइक्ताक्वसी। मिनु गो इजीप्त डा मुर आन कली श्येत गेता। मिनु गो इन कली मेकेर रे गुंडताक्नी। प्रस्थान ३:१०

6 मिनु गो इन किकी पिपी आन कली इजीप्त रागी रे पा गुंडशा पित्ता। मिनु मेकोपुकी लल समुन्द्र सम्म जाक्तेक्म। इजीप्त डा मुरपुकीमी इन किकी पिपी आन कली शारा नु बग्गीमी लल समुन्द्र सम्म खेदा पाम्तेक्म। प्रस्थान १२:३३,५१

7 मिनु खेदा पाइब आन कली तशा मेकोपुकीमी परमप्रभु यावे, आं कली “वारच पाइय्यीकी” दे आं कली थोम्तेक्म। मिनु गो मेकोपुकी नु खेदा पाइब आन दातेमी छिडछिड सेल्ला। मिनु मेको खेदा पाइब नेल्ल आन कली ब्वाक्कुमी खुम्शा साइक्तामी। गो इजीप्त रागी डा मुर आन कली मार मार पडा, गे आंमा ताइतीनी। मिनु नोले गोपुकी शुश नाक्ती सम्म गोरशो रागीमी बाक्तीनी। प्रस्थान १४:-

8 मिनु गो इन कली यर्दन आ पूर्व एमोरी आन रागीमी चाक्ता। मिनु मेकोपुकीमी गोपुकी नु लडाइ पाम्तेक्म। मिनु गो मेको आन कली इन गुडमी गेता। गो मेको आन कली इन डोंडती खतम सेल्ला। मिनु गोपुकीमी मेको आन रागी आंम के सेल्लतीनी। गन्ती २१:२५,३१

9 मिनु मोआब डा पिप सिप्पोर आ तौ बालाकमी इस्राएलीपुकी नु लडाइ पचा मिम्शा, इन कली सराप पचा कली बेओर आ तौ बालाम कली ब्रेत्थ सोइक्ताक्व। गन्ती २२:-

10 तन्न गो बालाम आ लोन्न मनेनु। मोपतीके मेकोमी इन कली आसीक गेस डा गेस पाप्नु। मिनु गो इन कली बालाम आ गुड रे पा प्रोंडता। गन्ती २३:११,२०

11 मिनु नोले गोपुकी यर्दन शोक्शीशा यरीकोमी जाक्तीनी। मिनु यरीको डा मुरपुकी एमोरी, परिज्जी, कनानी, हिती, गिरगाशी, हिन्वी नु यबुसीपुकीमी गोपुकी नु लडाइ पाम्तेक्म। तन्न गो मेको आन कली इन गुडमी गेता। यहोसु ३:१०; यहोसु ६:१-२१

12 गो इन डोंडडोंडती हिकवा सोइक्ताक्व। मेकोमी एमोरी आन पिप निक्शी आस कली खेदा पाम्तेक्म। गे इन तरवार नु लिब्रामी खेदा पचा ममाल्नी। प्रस्थान २३:२८; यहोसु १०:१-२

13 गो इन कली इन मशोक्शो रू, रागी नु इन मसेल्शो सहर गेता। मिनु गोपुकी मेकेर बाक्तीनी। गोपुकीमी मखुम्शो अडगुर रू नु तेल रवा डा फल जना जन बाक्तीनी’ दे परमप्रभुमी दैत’ दे यहोसुमी मुर नेल्ल आन कली दैत। ब्यवस्था ६:१०-११

14 मिनु यहोसुमी “मोपतीके मुल परमप्रभु यावे कली मान पा हिंशा, मेको कली थमा पा मप्रोंडथु, गेय पने। इन किकी पिपीमी खोला आइक्ची हांबु नु इजीप्त रागीमी पूजा पशो देवी देवता आन कली ताइक्तीन। परमप्रभु यावे कली ठेयब सेलीन। यहोसु २४:२; प्रस्थान ३२:-

15 तन्न परमप्रभु यावे आ नें ठेयब सेल्चा मदाक्तीनी हना, सु कली ठेयब सेल्नीनी? मुलाक्ती योवडीन। गे इन किकी पिपीमी खोला आइक्ची हांबुम पूजा पशो देवी देवता आन कली ठेयब सेल्नीनी देय मुल बाक्शो एमोरी आन रागी डा देवी देवता आन कली ठेयब सेल्नीनी? योवडीन। तन्न गो नु आ खिं डा मुरुमी परमप्रभु यावे कली ला ठेयब सेल्नीकी” दैत। ब्यवस्था ६:१३-१४

16 मिनु मुरपुकीमी “गो गेनायो परमप्रभु यावे कली मप्रोंडनीकी। मिनु अरु देवी देवता आन कली पूजा मपाइनीकी।

17 मारदे हना परमप्रभु यावे, आंइ परमप्रभुमी आंइ कली नु आंइ किकी पिपी आन कली इजीप्त रागीम वाइल दुम्शो खिं रे गुंडशा पिश्शो बाक्त। मिनु मेकोमी आंइ डोंडती दुम्तीक ठेयब ठेयब छक लाक्चा डा गेय पाप्नु। गो ते लाइतक हना यो, परमप्रभु यावेमी आंइ कली कोन्नन कोन्नन बाक्त।

18 मिनु परमप्रभु यावेमी आंइ डोंडती रे एको रागीम बाक्ब एमोरी आन कली खेरतु। मोपतीके गोपुकीमी यो परमप्रभु यावे कली ठेयब सेल्नीक। मारदे हना मेको आंइ परमप्रभु बाक्ब” दैतेक्म।

19 मिनु यहोसुमी मुर आन कली “गोपुकीमी परमप्रभु यावे कली ठेयब सेल्ने मचाप्नीनी। मारदे हना मेको का ला परमप्रभु नु रुश पाइब परमप्रभु बाक्ब। मिनु मेकोमी इन मरिम्शो पशो नु इन पाप मक्याम्ब। ब्यवस्था २९:३; प्रस्थान २०:५

20 गोपुकीमी परमप्रभु यावे कली प्रोंडशा, अरु देवी देवता आन कली पूजा पाइतीनी हना, इन कली डोंडती रिम्शो पा, नोले मरिम्शो पचा गोइब। मिनु इन कली खतम पोक्ब” दैत।

21 मिनु मुरपुकीमी यहोसु कली “ममाड, गोपुकीम परमप्रभु यावे कली ठेयब सेल्नीकी” दैतेक्म।

22 मिनु यहोसुमी “गेपुकीमी परमप्रभु यावे कली ‘ठेयब सेल्नीक’ देशा, गे आंमा सांकछी दुम्तीनी” दैत। मिनु मेकोपुकीमी “गो थमा पा सांकछी दुम्तक” दैतेकम।

23 यहोसुमी “मुल गेपुकी नु बाक्शो देवी देवता ताइक्तीन। इन थुं परमप्रभु यावे, इस्राएली आन परमप्रभु गे हिरदीन” दैत। उत्पत्ती ३५:२;

24 मिनु मुरपुकीमी यहोसु कली “गो परमप्रभु यावे, आंइ परमप्रभु कली ठेयब सेल्नीकी। मेको आ लोत्र टीनीक” दैतेकम।

25 मेको नाक्ती यहोसुमी मुर आन कली कबल पाप्तु। शेकेममी मेको आन कली पतीक नु मपतीक नेल्ल ब्रेक्ताक्व। २राजा २५:३

26 मिनु यहोसुमी मेको ब्रेक्स नेल्ल परमप्रभु आ अरेशो लोत्र ब्रेक्तीक किताबमी ब्रेक्ताक्व। मिनु मेकोमी ठेयब फुल्लु का लाइशशा, परमप्रभु यावे आ बाक्तीक आ नेक्था डा ठेयब रवा आ पुंम खुक्तु। उत्पत्ती ३५:४; न्यायाधीस ९:६

27 मिनु यहोसुमी मुर नेल्ल आन कली “कोव्रडीन, एको फुल्लु आंइ सांकछी बाक्ब। परमप्रभु यावेमी आंइ कली देशो लोत्र नेल्ल एको फुल्लुमी यो तुइशो बाक्ब। मोपतीके गेपुकीमी इन परमप्रभु कली प्रॉइतीनी हना, गे जोल पाइब बाक्नीनी, दे एको फुल्लु सांकछी बाक्ब” दैत। यहोसु २२:२७; उत्पत्ती ३१:४८

28 मिनु यहोसुमी मेको आन कली मेको आन आंम आंम थेरशो रूमी सोइक्ताक्व।

यहोसु कली थिम्शो

29 मेको नेल्ल दुम नोले नून आ तौ, परमप्रभु यावे आ गेय पाइब यहोसु सहे का १० बर्समी बेक्त। गन्ती २७:१८-२३

30 मिनु मेकोपुकीमी यहोसु कली गाश डांडा आ उत्तर गे एफ्राइम आ पहाड तिम्नाथ-सेराह माइक्तीक, आंम आ रूमी थिम्तेकम। यहोसु १९:५०

31 इस्राएलीपुकीमी यहोसु आ ब्रॉइतीक नाक्त सम्म परमप्रभु यावे कली ठेयब सेल्लेकम। मिनु परमप्रभु यावेमी पशो नेल्ल तशा तुइक्ब खाल्पापुकी बाक्मा सम्म मेकोपुकीमी परमप्रभु यावे कली ठेयब सेल्लेकम। न्यायाधीस २:७

32 इस्राएलीपुकीमी योसेफ आ रुश कली इजीप्त रागी रे लाइशशा, शेकेम सहरम थिम्तेकम। याकूबमी मेको रू कली हमोर आ तौपुकी रे सहे का चांदी के शेकेलमी ग्याप्शो बाक्त। हमोर चहिं शेकेम सेल्ल बाक्त। शेकेम योसेफ आ चच युइ आन थेरशो रू दुम्त। शेकेल का ११.५ ग्राम खोदेशो बाक्ब। उत्पत्ती ५०:२५; उत्पत्ती ३३:१९

33 मिनु हारून आ तौ एलाजर यो बेक्त। मेको कली गिबा सहरमी थिम्तेकम। मेको एफ्राइम डा पहाड रागीमी बाक्शो सहर, मेको आ तौ फिनेहास कली गेम्तेकम। ब्यवस्था १०:६

## न्यायाधीस

**ब्रेक्ब मुर:** साइ डोंइती डा मुरपुकीमी “सामुएलमी एको किताब ब्रेक्शो बाक्ब” देशो बाक्तेक्म। तन्न सामुएल आ ब्रोंइची ना अर्को परमप्रभु यावे आ लोत्र पाइब यो बाक्तेक्म। मेकोपुकीमी यो एको किताब ब्रेक्शो बाक्म माइ, दे यो मिन्नीम।

**गेना ब्रेक्शो:** एको किताब ब्रेक्ब सामुएल बाक्त हना, मेको खाल्पा दुम्मेनु, ब्रेक्शो बाक्त। मारदे हना “मेना इस्राएलमी पिप मबाक्म” दे शुश खेयप एको किताबम ब्रेक्शो बाक्ब। न्यायाधीस १७:७; न्यायाधीस १८:१; न्यायाधीस १९:१; न्यायाधीस २१:२५

**मार ब्रेक्शो:** परमप्रभु यावे आ गेना हना यो दाक्तीके नु शिशि कोंइचा कली लोत्र ब्रेक्शो बाक्ब। दोपा कोंइब देशा हना:

१. इस्राएल डा मुरुम परमप्रभु आ डोंइती मरिम्शो पशो बाक्तेक्म। न्यायाधीस ३:७; न्यायाधीस ५:-
२. परमप्रभुमी मेको आन कली सजाइ गेब।
३. इस्राएलीपुकीमी परमप्रभु कली पुंडनीम।
४. परमप्रभुमी मेको आन कली श्येत रे प्रोंइब का सोइक्ब।
५. परमप्रभु गे लेशशो मुर आन कली गेना हना यो माफ गेब, दे शेशो बाक्ब।

अदोनी-बेसेक कली ग्याइशो

1 यहोसु बेक्म नोले इस्राएलीपुकीमी परमप्रभु यावे कली “डोंइती आंइ दाते डा तेको थरमी कुशा, कनानी आन कली लडाइ तोचा?” दे हिल्लो पामे बाक्त। उत्पत्ती ४९:८; न्यायाधीस १८:५; न्यायाधीस २०:१८; प्रस्थान २८:३०; गन्ती २७:२१

2 मिनु परमप्रभु यावेमी “यहूदा आ थर डा मुर कुचा माल्नीम। नेनीन, गो मेको रागी मेको आन कली गेनुड” देमाक्त।

3 मिनु यहूदा आ लोकब सिमियोन कली “गे आं कली गेशो रागी ग्राचा कली वारच पथ पिबो। मोपा गो कनानी नु लडाइ पाइनस। नोले गो गे नु इ कली गेशो रागी ग्राचा कली वारच पथ लाइनुड” देमाक्त। मिनु सिमियोन आ थर डा मुर यहूदा आ थर डा मुर नु लमां बाक्त।

4 मिनु यहूदा आ थर डा मुरपुकीमी लडाइ पा परमप्रभु यावेमी कनानी नु परिज्जी आन कली मेको आन गुडम गेवा बाक्त। मेकोपुकीमी मेको आन कली खेदा पामे बाक्त। बेसेक सहरमी १० हजार मुर आन कली साइशशा ग्रामा बाक्त।

5 मेकेर मेकोपुकीमी अदोनी-बेसेक माइशो पिप नु लडाइ पामे बाक्त। मेकोपुकीमी कनानी नु परिज्जी आन कली ग्रामा बाक्त।

6 मिनु अदोनी-बेसेक प्रोक्माक्त। तन्न यहूदा आ थर डा मुरपुकीमी मेको कली खेदा पा थिरशा, आ गुड खोइल डा बोंग्ये खोइशशा गेमे बाक्त।

7 मिनु अदोनी-बेसेकमी “गुड खोइल डा बोंग्ये खोइशशो ७० जना पिपमी आं निशशा जतीक रे दोक्शो जचा थोत्रक जाम्तेक्म। डोंइती गो दोदेशो पडा, मुल परमप्रभुमी आं कली यो मोदेशोन पाप्नु” देमाक्त। मिनु यहूदा डा मुरपुकीमी मेको पिप कली यरूसलेम चाक्गमे बाक्त। मिनु मेको मेकेर बेक्माक्त।

यरूसलेम नु हेब्रोन कली ग्राशो

8 यहूदा आ थर डा मुरपुकीमी यरूसलेम कली लडाइ पा ग्राशा, आंम के सेल्मे बाक्त। मेकोपुकीमी मेकेर डा मुर आन कली तरवारमी क्योरेशा सदमे बाक्त। मिनु सहर कली मी सुइक्ते बाक्त। न्यायाधीस १:२१

9 मिनु नोले यहूदा डा मुरपुकी पहाडी रागीमी, नेगेब नु दिंममी बाक्शो कनानी नु लडाइ पथ लमा बाक्त। यहोसु १०:४०; यहोसु ११:१६-२०

10 मिनु मेकोपुकीमी हेब्रोन डा कनानी नु लडाइ पामे बाक्त। मिनु शेशे, अहीमान नु तल्मै कली ग्रामा बाक्त। हेब्रोन आ डोंइती डा नें किरयथ-अरबा बाक्त। यहोसु १५:१३-१९

ओथ्नीएलमी देबीर कली ग्राशो

11 मिनु नोले देबीर डा मुरपुकी नु लडाइ पचा ठीक दुम्मा बाक्त। देबीर कली डोंइती किरयथ-सेफेर देबाक्तेक्म।

12 मिनु कालेबमी “सुम किरयथ-सेफेर कली लडाइ पा ग्राबा, मेको कली आं तमी अकसा ग्युबे पा गेनुड” देमाक्त। यहोसु १५:१६

13 मिनु कालेब आ लोकब केनाज आ तौ ओथ्नीएलमी किरयथ-सेफेर कली ग्रामाक्त। मिनु कालेबमी आ तमी अकसा कली मेको नु ग्युबे पा गेवा बाक्त। यहोसु १५:१६-१९

14 मिनु काबु ओथ्नीएलमी अकसा कली “आं आफ ‘रू का गेयी’ दे पुन” दे मदा बाक्त। मिनु अकसा आ गधा रे तोंइसे बाक्त। मोपा तोइशशो तशा कालेबमी “गे मार माल्दे?” दे हिल्लो पवा बाक्त।

15 मिनु अकसामी “आं कली मारिइ गेनीनी कों? गे आं कली नेगेबमी रू गेतीनी। मोपतीके मुल आं कली ब्वाक्कु बुक्तीक पाइशशो रू यो गेने” देमाक्त। मिनु कालेबमी मेको कली आइदी नु आइक्था डा ब्वाक्क बुक्तीके निक्शी गेवा बाक्त।

यहूदा नु बेन्यामीनम ग्राशो

16 मोसा आ शिउ आ खिं डा होबाब आ चच युड, केनीपुकी नु यहूदा डा मुरपुकी खजूर रवा आ सहर रे पा आराद सहर आ नेक्था डा नेगेबमी बाक्शो यहूदा डा गोरशो रागीमी लमा बाक्त। मिनु मेकेर बाक्ब अमालेक डा मुरपुकी नु बाक्चा गोव्रमे बाक्त। न्यायाधीस ४:११; गन्ती १०:२९; यहोसु १२:१४

17 मिनु यहूदा डा मुरपुकी आंम लोकब सिमियोन आ थर डा मुरपुकी नु लशा, सेफतमी बाक्ब कनानी आन कली लडाइ पा मेको आन सहर खतम पोक्गमे बाक्त। मोपतीके मेको सहर आ नें होरमा वोदमे बाक्त। ब्यवस्था २०:१२-१८

18 यहूदा आ थर डा मुरपुकीमी गाजा, अश्कलोन, एक्रोन सहर नु मेको आ नेक्था बाक्शो रू नेल्ल आंम के सेल्मे बाक्त।

19 मिनु परमप्रभु यावेमी यहूदा आ थर डा मुर आन कली वारच पतीके मेकेर डा पहाडी रागी नेल्ल आंम के सेल्मे बाक्त। तन्न मेकोपुकीमी दिंम डा मुर आन कली खेरने मचाप्बमे बाक्त। मारदे हना मेकोपुकी नु फलाम के बग्गी बाक्मा बाक्त।

20 मिनु मोसामी देशो खोदेशो पा कालेब कली हेब्रोन सहर गोमे बाक्त। मिनु मेकोमी अनाक आ तौ सां आन कली मेकेर रे खेरा बाक्त। यहोसु १४:६-१५

21 तन्न बेन्यामीन आ थर डा मुरपुकीमी यरूसलेम डा यबुसी आन कली मखेरमे बाक्त। मोपतीके यबुसीपुकी मुलाक्त सम्म यरूसलेममी बेन्यामीन आ थर डा मुरपुकी नु बाक्नीम। न्यायाधीस १:८; यहोसु १५:६३; यहोसु १८:२८

बेथेल सहर ग्राशो

22 योसेफ आ थर डा मुरपुकीमी बेथेल नु लडाइ पचा कली लमा बाक्त। परमप्रभु यावे योसेफ आ थर डा मुरपुकी नु बाक्माक्त।

23 मेकोपुकीमी बेथेलमी क्यारी पाडब मुर सोडक्तमे बाक्त। डोंइती बेथेल आ नें लूज बाक्माक्त। उत्पत्ती २८:१९; यहोसु १२:१६

24 मेको क्यारी पाडबपुकीमी मुर का कली बेथेल सहर रे यूशो तशा, मेको कली “सहर दोपा ओव्रचा? आंड कली शेंदीन। गो इन कली मारेड यो मरिश्शो मपाइनीकी” देमा बाक्त।

25 मिनु मेको मुर्कुमी सहर दोपा ओव्रचा, मेको नेल्ल कोंइदा बाक्त। मिनु योसेफ आ थर डा मुरपुकीमी मेको सहर ओव्रशा, मेकेर डा मुर नेल्ल आन कली तरवारमी क्योरशा सदमे बाक्त। तन्न मेको लां शोव्रब नु आ खिं डा मुर आन कली मारेड यो मपामे बाक्त। यहोसु ६:२५

26 मिनु मेको लां कोडब मुर हिती आन रागी लमाक्त। मिनु मेकेर सहर का सेल्शा, मेको सहर आ नें लूज वोदा बाक्त। मेको सहर कली मुलाक्त सम्म लूज देंनीम।

मनस्से नु एफ्राइमम लडाइ ग्राशो

27 मनस्से आ थर डा मुरपुकीमी बेथ-शेआन, तानाक, डोर, इब्लाम नु मेगीददो डा मुर आन कली नु मेकेर डा गाउं डा मुर आन कली मखेरमे बाक्त। मारदे हना कनानीपुकीमी मेकेर बाक्चा थुं पामे बाक्त। यहोसु १७:११-१३

28 नोले इस्राएलीपुकी बोल्यो दुम्शा, मेको आन कली वाइलीम वाइल सेल्ना सेल्न बाक्मा बाक्त। तन्न मेको आन कली गेनायो मखेरमे बाक्त।

अर्को थरपुकीमी ग्राना ग्रान लशो

29 एफ्राइम आ थर डा मुरपुकीमी यो गेजेर सहरमी बाक्ब कनानी आन कली मखेरमे बाक्त। मेकोपुकी गेना हना यो गेजेरमी बाक्मा बाक्त। यहोसु १६:१०

30 जबूलून आ थर डा मुरपुकीमी कित्रोन नु नहलोल सहरमी बाक्ब कनानी आन कली मखेरमे बाक्त। मिनु कनानी जबूलून डा मुर आन दातेमी बाक्शा, आन वाइलीम वाइल दुम्मा बाक्त। यहोसु १९:१५

31 आशेर आ थर डा मुरपुकीमी अक्को, सीदोन, अहलाब, अकजीब, हेल्बा, अफीक नु रेहोब सहरमी बाक्ब आन कली मखेरमे बाक्त।

32 मोपा आशेर आ थर डा मुरपुकी कनानी नु बाक्मा बाक्त। मारदे हना सुड कली मखेरमे बाक्त।

33 नाप्ताली आ थर डा मुरपुकीमी बेथ-शेमेश नु बेथ-अनात सहरमी बाक्ब आन कली मखेरमे बाक्त। मिनु मेकेर डा कनानी नु बाक्मा बाक्त। तन्न बेथ-शेमेश नु बेथ-अनातमी बाक्ब आन कली वाइलीम वाइल सेल्मे बाक्त। यहोसु १९:३८

34 मिनु एमोरीपुकीमी दान आ थर डा मुर आन कली पहाडी रागी मेर सोडक्तमे बाक्त। दिंममी यिचा मगमे बाक्त।

35 एमोरीपुकीमी हार-हेरेस, आइयालोन नु शा-आल्बीम सहरम बाक्चा थुं पामे बाक्त। तन्न योसेफ आ थर डा मुरपुकीमी मेको आन कली लडाइ पा ग्राशा, वाइलीम वाइल सेल्मे बाक्त। यहोसु १९:४२

36 एमोरी आन सांद दक्खिन अक्रब्बीम आइक्था, सेला सहर रे लाइश्शा, मेको क्येडा आइक्था सम्म लशो बाक्माक्त।

## 2

स्वर्ग डा गेय पाडबमी लोव्र पशो

1 मिनु परमप्रभु यावे आ स्वर्ग डा गेय पाडब गिल्याल रे बोकीम सहरमी कुमाक्त। मेकोमी “गो इन कली इजीप्त रे युंइताक्न्नी। इन किकी पिपी आन कली ‘इन कली गेनुड’ देशो रागीमी चाक्तन्नी। गो गे नु पशो कबल गेना हना यो खानुड। यहोसु २४:२९-३१

2 मिनु गे एको रागी डा मुरपुकी नु काइ कबल मपने। गे मेको आन चढ़ेतीक प्रेत्चा माल्नीनी। तन्न गे आं देशो मटिनी। लो कोव्रडीन, गे मार पनी?



3 मोपतीके 'इन डोंइती रे मेको आन कली मखेरनुड। मेकोपुकी इन कली चू खोदेशो दुम्नीम। मिनु मेको आन देवी देवता इन कली ग्याइल खोदेशो दुम्नीम' देनुड" देमाक्त।

4 मोपा परमप्रभु यावे आ स्वर्ग डा गेय पाइबमी देने थुमा नोले, मेकेर डा मुर नेल्ले डाकशा रोंका पामे बाक्त।

5 मोपतीके मेको आन बाक्तीक कली बोकीम ने वोदमे बाक्त। मिनु मेकोपुकीमी मेकेर परमप्रभु यावे कली मार मार चढ़ेमे बाक्त। बोकीम आ अर्थ डाक्या बाक्व।

यहोसु बेकशो

6 मिनु यहोसुमी नेल्ल आन कली लचा गेवा नोले, मेकोपुकी आंम आंम थेरशो रागी आंम के सेल्थ लमा बाक्त।

7 मिनु इसाएलीपुकीमी यहोसु मबेक्म सम्म परमप्रभु यावे कली ठेयब सेल्मे बाक्त। मिनु परमप्रभु यावेम इसाएली आन पर्वम पशो ठेयब गेय ताइब खाल्पापुकी बाक्मा सम्म यो परमप्रभु यावे कली ठेयब सेल्मे बाक्त।

8 मिनु नून आ तो यहोसु, परमप्रभु यावे आ वाइल सहे का १० बर्समी बेक्माक्त।

9 मिनु आ थेरशो रूम थिम्मे बाक्माक्त। आ रू ते बाक्त देशा हना, गाश डांडा आ उत्तर, एफ्राइम डा पहाडी रागीमी बाक्शो तिम्नाथ-हेरेसमी बाक्माक्त।

10 मेको पाला डा मुर नेल्ल बेक्मा बाक्त। मिनु मेको आन आल ठेयब दुम्मा बाक्त। मेकोपुकी परमप्रभु यावे कली मतुइक्व बाक्मा बाक्त। मिनु इस्राएल डा मुर आन कली ठेयब गेय पा वारच पशो यो मतुइश्शो बाक्मा बाक्त।

इसाएलीपुकीमी हेथे पशो

11 मिनु इसाएलीपुकीमी परमप्रभु यावे आ डोंइती मार मरिम्शो बाक्मे, मेको पामे बाक्त। मेकोपुकीमी बाल देवी देवता आन कली ठेयब सेल्मे बाक्त।

12 मिनु मेको आन कली इजीप्त रागी रे गुंडब, परमप्रभु यावे, आंम किकी पिपी आन परमप्रभु कली प्रोन्मे बाक्त। मेको आन दातेमी बाक्व जात जात डा मुर आन देवी देवता आन डोंइती बाम्मा बाक्त। मोपा परमप्रभु यावे कली चुरपदमे बाक्त।

13 मेकोपुकीमी परमप्रभु यावे कली प्रोंइशा, बाल नु अशतारोथ देवता कली ठेयब सेल्मे बाक्त।

14 मिनु परमप्रभु यावेमी इसाएली आन पर्वम गाइश्शा, मेको आन कली रोइक्व आन गुडमी गेमी बाक्त। मिनु मेकोपुकीमी मेको आन मारेड मारेड रोइक्वमे बाक्त। मिनु मेकोमी मेको आन कली आन नेक्था बाक्व जोरी सत्रु आन हुकुममी बाक्वा गेमे बाक्त। मोपा इसाएलीपुकीमी आन जोरी सत्रु आन कली ग्राने मचाप्बमे बाक्त।

15 गेना मेकोपुकी लडाइ पथ यूमा, मेना परमप्रभु यावेमी मेको आन कली श्येत गेमी बाक्त। मोपा परमप्रभु यावेमी मेको आन कली डोंइती देशो नु आ कबल पशो खबा बाक्त। मोपतीके मेकोपुकीमी शुश श्येत जामे बाक्त। लेवी २६:१७; ब्यवस्था २:१५; ब्यवस्था २८:२०; १सामुएल १२:१५

16 मिनु नोले परमप्रभु यावेमी मेको आन कली रोइक्व आन गुड रे प्रोंइचा कली निसाफ पाइब सोइक्ता बाक्त। मिनु मेको आन कली प्रोंइना प्रोंइन बाक्मा बाक्त। प्रेरित १३:२०

17 तन्न मेकोपुकीमी निसाफ पाइब आन देशो लोत्र मनेन्मे बाक्त। मेकोपुकीमी तेल्लेम पशो खोदेशो पा अरु देवी देवता आन नोले खोदमे बाक्त। मेको आन डोंइती बाम्मा बाक्त। मेकोपुकी परमप्रभु यावे आ शेंशो लोत्र टीब आन किकी पिपी आन गाक्शो लां प्रोंइशा, मटीब दुम्मा बाक्त।

18 गेना परमप्रभु यावेमी मेको आन कली निसाफ पाइब सोइक्ता, मेना परमप्रभु यावे मेको नु बाक्माक्त। मेको निसाफ पाइब मबेक्म सम्म आन जोरी सत्रु रे प्रोंइचा वोदा बाक्त। मारदे हना परमप्रभु यावेमी आन जोरी सत्रु रे श्येत जशो तशा शिशि पवा बाक्त।

19 तन्न निसाफ पाइब बेक्म चोटीन आन किकी पिपी क्येडा लाक्शा मरिम्शो पामे बाक्त। देवी देवता आन कली ठेयब सेल्शा, मेको आन डोंइती बाप्शा, मेको आन नोले खोदमे बाक्त। आन मरिम्शो पशो प्रोंइने मबिस्समा बाक्त। प्रस्थान ३२:९

20 मोपतीके परमप्रभु यावे इसाएलीपुकी नु गाइक्ता बाक्त। मिनु "गो मेको आन किकी पिपी आन कली देशो नु कबल पशो एकोपुकीमी खतम सेल्तेक्म। आं देशो लोत्र मटितीके

21 मुल यहोसुमी आ बेक्ची ना मखेरशो रागी रागी डा मुर कली यो इसाएली आन डोंइती रे मखेरनुड" दे परमप्रभु यावेमी देमाक्त।

22 इसाएली आन किकी पिपी परमप्रभु यावे आ लांम गाक्शो खोदेशो पा मेकोपुकी गाक्नीमी कों मगाक्नीमी, दे इसाएली आन कली नाक्चा कली मेको अर्को जात डा मुर मखेरशो बाक्माक्त। न्यायाधीस ३:१,४; ब्यवस्था ८:२

23 मोपा परमप्रभु यावेमी डोंइती यहोसु आ गुडमी मंगेशो रागी रागी डा मुर आन कली मोशीन प्रोंइशा वोइश्शो बाक्माक्त। न्यायाधीस १:२८; भजन संग्रह १०६:३४

### 3

इसाएली आन कली नाक्शो

1 मिनु परमप्रभु यावेमी इसाएली आन कली नाक्चा, दे रागी रागी डा मुर इसाएली आन डोंइती रे मखेरशो बाक्माक्त। मेना इसाएली आन नक पाला डा मुरपुकीम कनान रागीम लडाइ पचा आ पर्वम मारेड मतुइश्शो बाक्मा बाक्त। न्यायाधीस २:२२

2 मोदेशो मारेड मतुइक्व इसाएली आन कली दोपा लडाइ पचा, दे शेंचा कली परमप्रभुमी अर्को जात डा मुर आन कली वोइश्शो बाक्माक्त।

3 मेको तेको तेको जात बाक्मा बाक्त देंशा हना, ५ जना हुकुम पाइब पलिस्ती, कनानी नेल्ले, सीदोन डा मुर नेल्ले नु बाल-हेरमोन डांडा रे लाइशशा, लेबानोन डा पहाडम लेबो-हमाथ सम्म बाकब हिक्वीपुकी बाक्मा बाक्त। यहोसु १३:३

4 मिनु परमप्रभु यावेमी इस्राएली आन किंकी पिपीम मोसा कली गेशो शेंतीके मेकोपुकीमी पाइनीमी कां मपाइनीमी, दे नाक्चा कली मेको अर्को जात डा मुर आन कली बाक्चा गेवा बाक्त।

5 मोपा इस्राएलीपुकी कनानी, हिती, एमोरी, परिज्जी, हिक्वी नु यबुसी आन दातेमी बाक्शो बाक्मा बाक्त।

6 मिनु मेकोपुकीमी मेको आन तमीपुकी ग्युबे पा चाक्गमे बाक्त। मिनु आंम तमीपुकी यो मेको आन तौ आन कली ग्युबे पा गेमे बाक्त। मिनु मेकोपुकीमी मेको आन देवी देवता आन कली यो मार मार चढ़ेशा ठेयब सेल्मे बाक्त। ब्यवस्था ७:३

#### ओथनीएल

7 इस्राएलीपुकीमी परमप्रभु यावे आ डोंडती मार मरिम्शो बाक्मे, मेको पामे बाक्त। मेकोपुकीमी परमप्रभु यावे, आन परमप्रभु कली प्रेदमे बाक्त। मिनु बाल नु अशेराह देवी आस कली ठेयब सेल्मे बाक्त।

8 मिनु परमप्रभु यावेमी इस्राएली आन कली तशा गाइक्ता बाक्त। मिनु मेसोपोटामीया डा अराम-नहाराइम डा पिप कुशन-रिशतैम आ गुडमी लेयडा बाक्त। मेकोम इस्राएली आन कली ८ बर्स सम्म सासन पवा बाक्त।

9 मिनु इस्राएलीपुकीमी “वारच पाइय्की” दे परमप्रभु यावे कली थोत्रमेनु, इस्राएली आन कली प्रोंडचा, दे केनाज आ तौ ओथनीएल कली सोइक्ता बाक्त। मेको कालेब आ लोकब बाक्त। मिनु मेकोमी मेको आन कली प्रोना बाक्त। न्यायाधीस १:१३; यहोसु १५:१७-१८

10 परमप्रभु यावे आ सोक्त मेको तार जाक्माक्त। मिनु मेकोमी इस्राएली आन कली निसाफ पवा बाक्त। मिनु मेकोमी लडाइ पचा गोवा बाक्त। मिनु परमप्रभु यावेमी मेसोपोटामीया डा पिप कुशन-रिशतैम कली ओथनीएल आ गुडम गेवा बाक्त। मोपा ओथनीएलमी मेको पिप कली ग्रामाक्त। न्यायाधीस ६:३४

11 केनाज आ तौ ओथनीएल मबेक्म सम्म मेको रागी ४० बर्स सम्म लडाइ रे नांइसे बाक्त।

#### एहूद

12 मिनु इस्राएलीपुकीमी लेशा परमप्रभु यावे आ डोंडती मार मरिम्शो बाक्मे, मेको पामे बाक्त। मिनु मेको आन मरिम्शो पशो आ परबंम परमप्रभु यावेमी मोआब डा पिप एग्लोन कली इस्राएली क्येडा बोल्यो सेला बाक्त।

13 मिनु एग्लोनमी अम्मोनी नु अमालेक डा मुर आन कली लडाइ पचा कली खुप्तीमी बाक्त। मिनु इस्राएली नु लडाइ पचा गोत्रमे बाक्त। मिनु खजूर रवा बाक्शो सहर आंम के सेल्मे बाक्त। न्यायाधीस १:३६

14 इस्राएलीपुकी १८ बर्स सम्म मोआब डा पिप एग्लोन आ सासनमी बाक्मा बाक्त।

15 मिनु इस्राएलीपुकीमी लेशा “वारच पाइक्की” दे परमप्रभु यावे कली थोत्रमेनु, परमप्रभु यावेमी इस्राएली आन कली श्येत रे प्रोंडचा कली बेन्यामीन आ थर डा गेरा आ तौ एहूद कली सोइक्ता बाक्त। मेको पेरा गुडम गेय पाइब बाक्त। मिनु इस्राएलीपुकीमी मेको कली मोआब डा पिप एग्लोन आ बाक्तीकेम तिरो बाक्थ सोइक्तमे बाक्त।

16 मिनु एहूदमी आंम कली कुबीत का लाइशशो निकशी गे हेरशो क्योरतीक पाइशशो तरवार का सेल्शा, आ वा आगामी ग्युरा गे खुइशशा पिष्पा कुरा बाक्त। कुबीत का ०,५ मिटर कि ठेयब हात का खोदेंशो बाक्ब।

17 मिनु नोले मेकोमी तिरो कुरब लाइशशा, मोआब डा पिप एग्लोन आ बाक्तीके लमाक्त। एग्लोन साप्पा दोम्शो मुर का बाक्माक्त।

18 मिनु मेकोमी तिरो नेल्ल पोक्शा, कुरब मुर नु गाक्माक्त।

19 एहूद चहिं गिल्याल आ नेक्था बाक्शो फुल्लु के मूर्ति आन बाक्तीक रे लेशशा, पिप कली “पिप, गो इन कली खुइशशा लोत्र का पचा माल्नुड” देंमाक्त। मिनु पिप एग्लोनम “सिक्सी पने” दे आ नेक्था बाक्ब नेल्ल आन कली लाडगा सोइक्तीमी बाक्त।

20 मिनु मेको पिप आ दरवार डा तला तारी सितल कोठामी बाक्शो बाक्माक्त। मिनु एहूद मेको आ डोंडती जाक्शा “परमप्रभु रे पा गो इन कली लोत्र का देंचा माल्नुड” देंमाक्त।

21 मिनु एग्लोन आ निल्तीके रे बोक्शा राम्माक्त। मिनु एहूदमी आ पेरा गुडमी आ ग्युरा गे बाक्शो तरवार गुंइशा, मेको पिप आ कोत्रजमी तूदा बाक्त। २सामुएल २०:९-१०

22 मेको तरवार आ ग्याइक्तीक सम्म ओत्रमाक्त। मिनु कोत्रज डा बोंसोम मेको तरवार नेल्ल सुमा बाक्त। मिनु पिप आ कोत्रज रे ख्री गूमाक्त। मिनु एहूदमी तरवार मगुंइथु, प्रोंडशा वोदा बाक्त।

23 मिनु तला तारी डा कोठा डा लाप्चो चोक्शा, एग्लोन कली आगाम चोक्शा, सांचो पाइशशा वोइशशा, लाडगा गूमाक्त।

24 मिनु गूने थुमा नोले, एग्लोन आ गेय पाइब जाक्मा बाक्त। मिनु लाप्चो चोक्शो तशा “पिप डाइशशा बाक्म कों” दे मिन्तमे बाक्त।

25 मेकोपुकी शुश सम्म रिम्स डा रिम्स बाक्शा, मुने यो पामे बाक्त। तन्न पिपमी तला तारी डा कोठा डा लाप्चो यो मरोक्गा बाक्त। मोपतीके मेकोपुकीमी सांचो चाक्शा, लाप्चो रोक्गमे बाक्त। मिनु आन पिप कली खपीम गोल्शा बेक्शो तामे बाक्त।

26 मोपा मेकोपुकीमी शुश रिम्शा बाक्मानु, एहूद प्रोक्ने थुम्शो बाक्माक्त। मेको फुल्लु के मूर्ति आन बाक्तीक लाक्शा सेइरा माइक्तीकेमी जाक्दीम्माक्त।

27 मिनू एफ्राइम डा पहाड रागीम जाकदीम नोले, मेकेर रे मेकोमी तुराही तबा बाक्त। मिनू इस्राएली मेको नु पहाड रे तोइश्शा, आ नोले खोदमे बाक्त।

28 एहूदमी “आं नोले खोतीन। मारदे हना परमप्रभु यावेमी इन जोरी सत्रु मोआबी आन कली इन गुडमी गेशो बाक्ब” दे माइक्मी बाक्त। मोपतीके आ नोनोले तोइश्शा यिमा बाक्त। मिनू मोआबी मप्रोकमल, दे मेको आ नेक्था डा यर्दन खोला शोक्तीके आन के सेल्मे बाक्त। मिनू सुड आन कली मेक रे शोक्चा मगोमे बाक्त।

29 मेको नाक्ती १० हजार खोदेशो मोआबी आन कली सदमे बाक्त। मेको नेल्ल बोल्यो लडाइ पाइब बाक्मा बाक्त। मेको का यो प्रोक्चा मतामे बाक्त।

30 मोपा मेको नाक्ती रे इस्राएलीम मोआबी आन कली हुकुम पामे बाक्त। मिनू मेको रागी ८० बर्स सम्म लडाइ रे नाइसे बाक्त।

31 एहूद आ नोले अनाथ आ तौ शाम्गार इस्राएली आन निसाफ पाइब दुम्माक्त। मेकोमी ब्यफ वाक्तीक हरीसमी ६ सहे पलिस्ती आन कली तुष्पा साइक्मी बाक्त। मेकोमी यो इस्राएली आन कली आन जोरी सत्रु रे प्रॉइमी बाक्त। न्यायाधीस ५:६

## 4

देबोरा नु बाराक

1 एहूद बेक्म नोले इस्राएलीपुकीमी लेंशा परमप्रभु यावे आ डोंइती मार मरिम्शो बाक्मे, मेको पामे बाक्त।

2 मोपतीके परमप्रभु यावेमी मेको आन कली हासोरमी सासन पाइब कनानी आन पिप याबीन आ गुडमी गेवा बाक्त। मेको आ लडाइ पाइब आन टेयब मुर सीसेरा माइश्शो बाक्माक्त। मेको हरोशेथ-हा-गोयीममी बाक्माक्त। यहोसु ११:२

3 मिनू लेंशा इस्राएलीपुकीमी परमप्रभु यावे कली “वारच पाइय्यीकी” दे थोत्रमे बाक्त। मारदे हना सीसेरा के ९ सहे फलाम के बग्गी बाक्तेक्म। मिनू इस्राएली आन कली २० बर्स सम्म शुश श्येत गेशा, दिष्पा वोइश्शो बाक्माक्त।

4 मेना लप्पीदोथ आ मीश, देबोरा इस्राएली आन कली निसाफ पाइब दुम्शो बाक्माक्त। मेको परमप्रभु यावे आ लोत्र पाइब यो बाक्माक्त।

5 मेको एफ्राइम डा पहाडी रागी, रामाह नु बेथेल आ दातेमी बाक्शो देबोरा आ खजूर रवा आ पुंमी बाक्शो बाक्माक्त। मिनू इस्राएलीपुकी निसाफ पुंडथ मेक जाक्मा बाक्त। उत्पत्ती ३५:८

6 मेकोमी अबीनोअम आ तौ बाराक कली नाप्ताली डा केदेश सहर रे ब्रेथ सोइक्ता बाक्त। मिनू मेको कली परमप्रभु यावे, इस्राएली आन परमप्रभुम इ कली “गे लशा, नाप्ताली नु जबूलून आस थर डा १० हजार मुर आन कली योत्रशा, मेको आन कली ताबोर डांडामी पिश्शा पिबो। यहोसु २१:३२

7 गो चहिं याबीन आ लडाइ पाइब आन कप्तान सीसेरा आ मुर नु आ बग्गीपुकी गुंडशा, किशोन खोला आ नेक्था चाक्नुड। मिनू इन गुडमी गेनुड” दे मदा बाक्त।

8 मिनू बाराकमी देबोरा कली “गे गो नु लाइतीनी हना, गो लाइनुड। गे गो नु मलाइतीनी हना, गो मलाइनुड” दे लोत्र लेत्ता बाक्त।

9 मिनू देबोरामी “थमा पा, गो गे नु लाइनुड। तन्न एको टेयब गेय आ ततीक मान गे मताइनेवे। मारदे हना परमप्रभु यावेमी सीसेरा कली मीश मुर का आ गुडमी गेशो बाक्ब” देमाक्त। मिनू देबोरा बोक्शा डा मिन बाराक नु केदेश सहरमी लमाक्त।

10 बाराकमी जबूलून नु नाप्ताली आस थर डा मुर आन कली केदेश सहरमी ब्रेत्ता बाक्त। मोपा १० हजार लडाइ पाइबपुकीमी मेको आ नोले खोदमे बाक्त। मिनू देबोरा मेको नु लमाक्त।

11 मिनू केनी डा मुर, मोसा आ शिड होबाब आ चच युड बाक्मा बाक्त। केनी हेबेर चहिं केनी आन दाते रे ब्राशो बाक्माक्त। मोपा ब्राशा, केदेश सहर आ नेक्था एलोन-बे-सा-अनानीममी बाक्शो टेयब रवा आ नेक्था जाकदीश्शा, आ ताम्बु कीशा बाक्शो बाक्माक्त। न्यायाधीस १:१६; गन्ती १०:२९

12 मिनू सीसेरामी अबीनोअम आ तौ बाराक ताबोर डांडामी लशो बाक्ब देशो नेना बाक्त।

13 मिनू सीसेरामी आ ९ सहे फलाम के बग्गी नु आ लडाइ पाइब आन कली हरोशेथ-हा-गोयीम रे किशोन खोलाम खुप्ता बाक्त।

14 मिनू देबोरामी बाराक कली “बोक्को, मुलाक्त परमप्रभु यावेमी सीसेरा कली इ गुडमी गेशो बाक्ब। परमप्रभु यावे इ डोंइती मगाक्बा डा?” देमाक्त। मोपतीके बाराक नु आ १० हजार लडाइ पाइब ताबोर डांडा रे बुम्मा बाक्त।

15 मिनू परमप्रभु यावेमी सीसेरा नु आ बग्गी नेल्ले, आ लडाइ पाइब नेल्ल बाराक नु बुपदा बाक्त। सीसेरा चहिं आ बग्गी रे तोइश्शा प्रोक्माक्त। न्यायाधीस ५:२०; उत्पत्ती ३५:५; प्रस्थान २३:२७; ब्यवस्था २:२५; यहोसु २:९-११

16 मिनू बाराकमी बग्गीपुकी नु लडाइ पाइब आन कली हरोशेथ-हा-गोयीम सम्म खेदा पा, सीसेरा आ लडाइ पाइब नेल्ल आन कली तरवारमी क्योरशा सदा बाक्त। का यो ब्रोंइचा मतामे बाक्त।

17 सीसेरा चहिं खोइलीमी प्रोक्ना प्रोक्न, केनी हेबेर आ मीश याएल आ ताम्बुमी जाक्माक्त। मारदे हना हासोर डा पिप याबीन नु केनी हेबेर डा मुरपुकी लडाइ मपथु, वारच दुम्शो बाक्मा बाक्त।

18 मिनू याएल सीसेरा कली ग्रुम्चा, दे लाडगा ग्रुमाक्त। मिनू मेकोमी “हजुर ओव्रडीन। महिनीन” देमाक्त। मिनू सीसेरा ताम्बु आगा ओव्रमाक्त। मिनू याएलमी मेको कली खुइश्शा, वाम सुमा बाक्त।

19 सीसेरामी याएल कली “आं कली ब्वाक्क तूचा गेन। गो साप्पा तूत दाक्ती” देमाक्त। मिनू मेकोमी दूध वोइश्शो बोस का गुंडशा, मेको कली तूचा गेवा बाक्त। मिनू मेको कली वा फेक्ता बाक्त।

20 मिनु सीसेरामी मेको कली “ताम्बु आ लाप्चोमी राप्शा बाक्को, सुइ जाक्सा ‘एकेर सुइ मुर जाक्सा?’ दे हिल्लो पांम्तेक्म हना, मजाक्म देनो” देमाक्त।

21 तन्न हेबेर आ मीश याएलमी थाल्ला का नु ताम्बु डा किला का लाइश्या, निन्द्रा पशो सीसेरा आ नेक्था लमाक्त। मिनु याएलमी सीसेरा आ पियामी खप सम्म गुक्चा डा पा किला थोक्ता बाक्त। मिनु शुश दशा, निन्द्रा पा बाक्शो, सीसेरा बेक्माक्त।

22 मिनु बाराक सीसेरा कली खेदा पा मेक जाक्माक्त। मिनु याएलमी मेको कली गुम्शा “ओन्नडीन, गो इन माल्शो मुर इन कली कोइनुड” देमाक्त। मिनु बाराक मेको नु ताम्बु आगा ओन्नमाक्त। मिनु सीसेरा आ पियामी किला गुक्शा बेक्शो तवा बाक्त।

23 मेको नाक्ती परमप्रभुमी कनान डा पिप याबीन कली इस्राएलीपुकी नु बुपदा बाक्त।

24 मिनु इस्राएलीपुकीमी कनानी पिप याबीन कली शुश श्येत गेशा, मसदमे सम्म श्येत गेमे बाक्त।

## 5

देबोरा नु बाराक आस कुम्सो

1 मेको नाक्त देबोरा नु अबीनोअम आ तौ बाराकमी कुम्सो पांम्से बाक्त। मेको निक्शीमी मार कुम्सो पांम्से बाक्त, देशा हना

2 “इस्राएल डा ठेयब मुरुमी लडाइ पाइब आन कली खुल्मेनु, मेकोपुकीमी आन ठेयब मुर आन कली टिम्तेक्म। मोपतीके परमप्रभु यावे कली ठेयब सेलीन।

3 पिपपुकी, नेनीन। सासन पाइबपुकी, इन नोफा दाइक्तीन। नेनीन। गो परमप्रभु यावे कली कुम्सो पाइनुड। गो परमप्रभु यावे, इस्राएली आन परमप्रभु कली ताप्तीक का ताप्शा, कुम्सो का पाइनुड।

4 परमप्रभु यावे, सेइर रे पा गाक्नी ना, एदोम रागी रे लाइतीनी, मेना रागी नेल्ल खिखि पाप्तु। रेउ यित। गोस्सुमी रेउ यिपाइक्तु। ब्यवस्था ३३:२; हबकुक ३:३-६

5 मिनु सीने डांडा डा परमप्रभु यावे आ डोंइती पहाडमी खिनु कुत। परमप्रभु यावे, इस्राएली आन परमप्रभु आ डोंइती डांडा खिखि पाप्तु। भजन संग्रह ६८:९

6 अनाथ आ तौ शांमार आ पालामी, याएल बाक्म सम्म ग्याप्ब लेयब आन हुल ठेयब लां मगाक्ब दुम्तेक्म। मुरपुकी खुइशयो लांमी गाक्चा गोम्तेक्म। न्यायाधीस ३:३१

7 मिनु इस्राएलीपुकीमी आन रूमी शोक्ने खुप्ने मचबेम। देबोरा, गे मेको आन दातेमी मजाक्डे सम्म मारेइ पने मचबेम। गे इस्राएली आन ममा खोदेशो पा जाक्ते।

8 इस्राएलीपुकीमी नक देवी देवता आन कली ठेयब सेल्चा कली योन्नची ना सहर डा लाप्चोमी लडाइ दुम्त। मिनु ४० हजार इस्राएली आन के तेक्तीक नु तरवार मबा।

9 इस्राएली लडाइ पाइब आन ठेयब मुर दाक्नुड। मारदे हना मेकोपुकी महिंथु, लडाइ पचा कली, दे आंम कली जिम्मा गोम्तेक्म। परमप्रभु यावे ठेयब बाक्ब।

10 बुश गथा डोइश्या गाक्बपुकी, राडी तारी निप्बपुकी, खोइलीम गाक्ब नेल्लेमी यो परमप्रभु यावेम मेको लडाइ ‘दोपा पवा’ मेको शेदीन।

11 मिनु ब्वाक्कु बुक्तीकेमी बाजा ताप्शा ‘परमप्रभु यावे आ ग्रातीक ठेयब बाक्ब’ दे लेशा कुम्सो पाइनीम। ‘मिनु इस्राएल डा बोल्यो मुर आन ग्राशो आ पर्वम कुम्सो पाइनीम। मिनु परमप्रभु यावेमी रूम शोक्ब आन कली ग्रापाइक्तु’ दे कुम्सो पाइनीम। मिनु परमप्रभु यावे आ मुरपुकी उइ सहर डा ठेयब लाप्चोमी लांम्तेक्म।

12 बोक्को, देबोरा, बोक्को, बोक्शा डा मीन, कुम्सो पावो। अबीनोअम आ तौ बाराक, बोक्को, इ ग्याइशो मुर आन कली एक रे योल्दो।

13 मिनु ठेयब मुरपुकी उइ गाक्तेक्म। परमप्रभु यावे आ मुरपुकी डोंइती बारशा, बोल्यो मुर नु लडाइ पचा चिक्ताक्म।

14 एफ्राइम आ थर डा मुर दिंम जाक्तेक्म। बेन्यामीन आ थर डा मुरपुकीमी मेको आन नोले खोइक्तेक्म। माकीर रे आन ठेयब मुर यिम्तेक्म। जबूलून आ थर डा मुर आन रागी रे पिशा, आन थर डा कप्तानपुकी जाक्तेक्म। यहोसु १७:१

15 इससाकार आ थर डा हुकुम पाइबपुकी देबोरा नु जाक्तेक्म। मिनु इससाकार आ थर डा मुर बाराक कली मप्रोंइथु आ नोले खोइक्तेक्म। मेकोपुकी उइ दिंममी मेको आ नोले दोरशा लांम्तेक्म। मिनु रूबेन आ थर डा मुर चिंहिं आन दातेमी ‘लचा देय मलचा’ दे शुश लोव पा मिन्ना मिन् थुं नाक्मुम्तेक्म।

16 मारदे गोठम बाक्नीनी? मेको योन्नब आन ताप्शो नेंचा दाक्नीनी? मिनु रूबेन आ थर डा मुर आन दातेमी शुश मिन्ना मिन् बाक्तेक्म।

17 गिलाद डा मुरपुकी यर्दन आइक्ची हांबुमी बाक्तेक्म। दान आ थर डा मुरपुकी, मारदे डोंगा आन नेक्था रिम्शा बाक्नीनी? मिनु आशेर आ थर डा मुरपुकी समुन्द्र आ नेक्था देश पा बाक्तेक्म। मेकोपुकी डोंगा आन नाइक्तीकेमी मेक उइ बाक्शो बाक्तेक्म।

18 मिनु जबूलून आ थर डा मुरपुकीमी महिंथु लडाइ पांम्तेक्म। मिनु नाप्ताली आ थर डा मुरपुकीमी यो लडाइ पांम्तेक्म।

19 कनान डा पिपपुकी लडाइ पा जाक्तेक्म। मेगीददो आ नेक्था तानाक सहरमी लडाइ पांम्तेक्म। तन्न चांदी नु अरु रोइशो मारेइ यो लाइक्चा मताम।

20 मिनु सोरुलपुकीमी सरीड रे लडाइ पांम्तेक्म। मेको आन लतीक लां रे सीसेरा नु लडाइ पांम्तेक्म। प्रस्थान १४:२५; यहोसु १०:१४

- 21 मिनू किशोन खोलामी सीसेरा आ लडाइ पाइब आन कली योल्ताकव। मेको बारशो किशोन खोलाम मोदेशो पाण्टु। आं थुं महिंथु, बारशा, लडाइ पावो।
- 22 मिनू शारा आन खोइल रेयके पपाइशशा मेको साप्पा दोरतेकम। आन खोइल ताप्शा, मेको साप्पा दोरतेकम।
- 23 परमप्रभु यावे आ स्वर्ग डा गेय पाइबमी 'मेरोज कली सराप पावो। मिनू मेकेर बाकब मुर आन कली सराप पावो। मारदे हना मेकोपुकीमी परमप्रभु यावे कली मारेइ यो वारच मपाम' देंत।
- 24 केनी हेबेर आ मीश याएल मीश मुर नेल्ल आन क्येडा आसीक ताइब दुम्ब। ताम्बुमी बाकब मीश मुर नेल्ल आन क्येडा आसीक ताइब बाकब।
- 25 सीसेरामी ब्वाककु पुंडतु। तन्न मेकोमी दूध गेण्टु। मेको कली दारशो डप्कामी दहि खेल्ताकव। न्यायाधीस ४:१९
- 26 मिनू मेकोमी ताम्बु आ किला तुल्शा, थाल्ला का गुण्टु। मिनू सीसेरा आ पियाम थोक्ताकव। मेको कली आ रेक्त्रे खिरशा साइक्तु।
- 27 सीसेरा याएल आ खोइलीम बेक्त। मेको आ खोइलीमी गोल्शा बेक्त।
- 28 मिनू सीसेरा आ ममामी ड्ले ररे चिवा पा कोत्रतु। मोपा चिवा पा कोत्रशा 'मेको आ बग्गी मारदे मजाकमे? आ बग्गी आ रेयके मारदे मनसे?' दे वाइ ब्रेत।
- 29 मिनू मेकेर बाकब नेल्ल क्येडा अरेब मीश मुरुमी आ देशो लोत्र आंमान लेन्ना लेन्न
- 30 मेको आन रोइशशो नेल्ल योक्गमे कों? मुर नेल्ल कली मीश आल का कि निक्शी ताइनीम कों? मिनू सीसेरामी रिम्शो रड पाइशशो वा ताइबा कों? आं कली बुटा आप्शो दारशो कुन्पी निक्शी चाकबा कों? दे आंमा नु लोत्र पशो बाक्त।
- 31 मिनू परमप्रभु यावे, इन जोरी सत्रु नेल्ल मोपान खतम दुम्मल। इन कली दाकबपुकी चहिं सुनी दाप्शो नां खोदेशो पा ब्रशा सक्ति पाइशशो दुम्शा, बाकमल" दे कुम्सो पाम्से बाक्त। मिनू ४० बर्स सम्म मेको रागीमी लडाइ मडुम्माक्त। ब्यवस्था ६:५

## 6

मिदयानीपुकीम श्येत गेशो

- 1 मिनू इस्राएलीपुकीमी लेंशा परमप्रभु यावे आ डोंइती मार मरिम्शो बाकमे, मेको पामे बाक्त। मोपतीके परमप्रभु यावेमी मेको आन कली ७ बर्स कली मिदयान डा मुर आन गुइमी गेवा बाक्त।
- 2 मिनू मिदयान डा मुरपुकीमी इस्राएली आन कली शुश दिप्शा, सक्ति पाइशशो दुम्मा बाक्त। मोपतीके इस्राएलीपुकी पहाड डा पुक्खी, रेंगु इर लशा, आन खुइशशा बाक्तीक सेल्मे बाक्त।
- 3 इस्राएलीपुकीमी वांचेर शोकामे चोटीन मिदयान डा मुरपुकी, अमालेक डा मुरपुकी नु पूर्व डा मुरपुकी जाक्शा, इस्राएलीपुकी नु लडाइ पाइबाकमा बाक्त। ब्यवस्था २८:३३
- 4 मेको आन ताम्बु कीशा बाक्शा, गाजा सम्म डा बाली नाली कली खतम पोक्गमे बाक्त। मेकोपुकीमी इस्राएल डा मुर आन कली जचा थोत्रक काइ महेंदमे बाक्त। आन भेडा, ब्यफ नु गधा नेल्ल रोइशशा लदमे बाक्त।
- 5 मेकोपुकी आंम के बी ब्यफ नु ताम्बुपुकी चाक्शा, सलहा माले खोदेशो पा जाक्मा बाक्त। मुर नु मेको आन दलओंठ हिक्ने मचाप्शा डा पा शुश बाक्तीके, मोपा मेको रागी कली खतम पोक्गमे बाक्त।
- 6 मिनू मिदयान डा मुरपुकीमी इस्राएली आन कली शुश पुडग सेल्मे बाक्त। मिनू इस्राएलीपुकीमी "वारच पाइय्यीकी" दे परमप्रभु यावे कली थोत्रमे बाक्त।
- 7 मोपा इस्राएलीपुकीमी परमप्रभु यावे कली मिदयान डा मुर आन परबम थोत्रमे नोले
- 8 परमप्रभु यावेमी मेको आन कली आ लोत्र पाइब का सोइक्ता बाक्त। मिनू मेकोमी "परमप्रभु यावे, इस्राएली आन परमप्रभुम इन कली 'गो इन कली इजीप्ट रागी वाइलीम वाइल दुम्तीक रे प्रोंइशा गुंइशा पित्ता।
- 9 गो इन कली इजीप्ट डा मुर आन गुइ रे नु इन कली श्येत गेब मुर आन गुइ रे प्रोंइशा चाक्ता। मेको इन कली दिप्ब नेल्ल आन कली इन डोंइती रे खेरताकमी। मिनू मेको आन रागी इन कली गेता।
- 10 मिनू गो इन कली गो परमप्रभु यावे, इन परमप्रभु नड। गेपुकी एमोरी आन रागीमी बाक्तीनी हना यो, मेको आन देवी देवता आन कली टेयब मसेलीन'। तन्न गे आं लोत्र मनेनी" दे मेको परमप्रभु यावे आ लोत्र पाइबमी माइकमी बाक्त।
- गिदोन कली ब्रेशशो
- 11 मिनू परमप्रभु यावे आ स्वर्ग डा गेय पाइब जाक्शा, ओफ्रा सहर आ नेक्शा बाकशो टेयब रवा आ पुंम निस्से बाक्त। मेको रू अबीएजेर आ मुर योआश आ रू बाक्माक्त। योआश आ तौ गिदोन चहिं मिदयान डा मुरपुकी रे खुइक्का कली अडगुर खाक्तीकेमी चेरब तुम्ना तुम्न बाक्मा बाक्त। यहोसु १७:२
- 12 मिनू परमप्रभु यावे आ स्वर्ग डा गेय पाइब मेको आ डोंइती गूशा मेको कली "गे महिंथु लडाइ पाइब मुर, परमप्रभु यावे गे नु बाकब" देंमाक्त।
- 13 मिनू गिदोनमी मेको कली "हजुर, परमप्रभु यावे गोपुकी नु बाक्त हना, आंइ कली मारदे ओदेशो दुम्मे? मिनू मेको आ छक लाक्का डा गेय नेल्ले ते बाक्नीमी? आंइ किकी पिपीपुकीमी 'परमप्रभु यावेमी आंइ कली इजीप्ट रागी रे गुंइशा पिशशो' दे मदेंमा डा? तन्न मुल परमप्रभु यावेमी आंइ कली प्रोंइतु। मिनू आंइ कली मिदयान डा मुर आन गुइमी गेण्टु" देंमाक्त।
- 14 मिनू परमप्रभु यावे मेको गे लेशशा "गे महिब नु बोल्यो बाक्नेवे। मोपतीके लावो। इस्राएली आन कली मिदयान डा मुर आन गुइ रे प्रोनी। गो इ कली सोइक्नुड" देंमाक्त। न्यायाधीस ६:३२; १सामुएल १२:११; हिब्रू ११:३२

15 मिनू गिदोनमी “हजुर, गो दोपा इस्राएली आन कली प्रॉइने चानुडा? आं खिं मनस्से आ थरमी नेल्ल क्येडा आइक्च बाक्ब। मिनू गो आं आफ आ खिंमी यो नेल्ल क्येडा आइक्च मुर बाक्नुड” दैमाक्त।

16 मिनू परमप्रभु यावेमी मेको कली “गो गे नु बाक्नुड। मिनू गे मिदयानी नेल्ल आन कली साइक्नेवे” दैमाक्त। प्रस्थान ३:१२

17 मिनू मेकोमी “गो इन डोंइती शिशी ताता हना, नु गे थमा पा गो नु लोत्र पाइब बाक्तीनी हना, आं कली चिन्ड का कोंइदीनी।

18 गो इन कली जचा मखेत्तु सम्म, गे एक रे मलन” दैमाक्त। मिनू मेकोमी “गे मजाक्डे सम्म गो एकेन बाक्नुड” दैमाक्त। न्यायाधीस १३:१५-१६

19 मिनू गिदोन खिं ओत्रशा, क्यारश पाठा का ठीक पवा बाक्त। एफाह का फस के बोरब ओख्ती मसुप्शो शोब्ले चोवा बाक्त। मिनू श्ये डालोम कुर पा आ शेक्क चहिं बोस काम लुक्शा, ठेयब रवा आ पुंमी लाइश्शा, मेको कली खेत्ता बाक्त। एफाह का २२ लिटर पुक्तीक बाक्ब। एफाह का ५ पाथी खोंदेशो बाक्ब। लेवी ४:२८

20 मिनू परमप्रभु आ स्वर्ग डा गेय पाइबमी “मेको श्ये नु बोरब ओख्ती मसुप्शो शोब्ले एको फुल्लु तारी चोतो। आ शेक्क चहिं आ तार मोतो” दैमाक्त। मिनू मोदेशोन पवा बाक्त।

21 मिनू नोले परमप्रभु यावे आ स्वर्ग डा गेय पाइबमी मेको श्ये नु शोब्ले कली आ गुडम बाक्शो कोक्केमी थिवा बाक्त। मिनू मेको फुल्लु रे पा मी यूशा, मेको श्ये नु बोरब ओख्ती मसुप्शो शोब्ले नेल्ल नेक्मा बाक्त। मिनू परमप्रभु यावे आ स्वर्ग डा गेय पाइब यो लमाक्त। लेवी ९:१४

22 मिनू गिदोनमी “थमा पा परमप्रभु यावे आ स्वर्ग डा गेय पाइब बाक्माक्त” दे तुइक्ता बाक्त। मिनू “परमप्रभु, परमप्रभु यावे, आं कली वारच पाइय्तीनी। मुलाक्त परमप्रभु यावे आ स्वर्ग डा गेय पाइब कली आं नेक्थान ताता” दैमाक्त। न्यायाधीस १३:२२; प्रस्थान ३३:२०

23 मिनू परमप्रभु यावेमी “इ थुं नाइक्तो। महिनो। मारदे हना मबेक्नेवे” दैमाक्त।

24 मिनू गिदोनमी परमप्रभु यावे कली चढ़ेतीक का सेला बाक्त। मिनू आ नें “परमप्रभु यावे थुं नाइक्का गेब बाक्ब” दे नें वोदा बाक्त। मेको चढ़ेतीक मुलाक्त सम्म अबीएजेर आ मुर आन ओफ्रा सहरम बाक्ब।

25 मेको नाक्दो परमप्रभु यावेमी गिदोन कली “इ आफ आ गोठ रे ७ बर्स दुप्शो ब्यफ चाक्को। इ आफ आ बाल देवता नु आ नेक्था बाक्शो अशेराह देवी आ शी के थाम प्रेशा गेवो” दैमाक्त। २राजा ११:१८; २राजा २३:१२-१५

26 मिनू “मेकेर परमप्रभु यावे, इ परमप्रभु कली आं देशो खोंदेशो पा चढ़ेतीक का सेलो। मिनू नोले आं कली मेको ब्यफ कली इ प्रेशो अशेराह देवी आ शी के खोंलो थाम तारी चोशा चढ़ेतीक का चढ़ेवो” दैमाक्त।

27 मिनू गिदोनमी आंम के १० जना गेय पाइब कली लाइश्शा, परमप्रभु यावे आ देशो खोंदेशो पवा बाक्त। मिनू नाक्त मेको गेय पचा कली आं आफ आ खिं डा मुर नु मेको सहर डा मुर आन कली तशा शुश हिंमाक्त। मोपतीके मेकोमी गेय नेल्ले नाक्दोमी पवा बाक्त।

28 मिनू मेको सहर डा मुरपुकी सुनी कना बोक्शा, बाल देवता आ चढ़ेतीके प्रेशो, मेको आ नेक्था बाक्शो अशेराह देवी आ मूर्ति यो प्रेशो नु गिदोनमी सेल्लो चढ़ेतीकेम नोले डा ब्यफ चढ़ेशो तामे बाक्त।

29 मिनू मेकोपुकीमी “एको सुम पवा, माइ?” दे हिल्लो पमुमा बाक्त। शुश हिल्लो पामे नोले योआश आ तौ गिदोनमी पाप्टु, दे तुइक्त्मे बाक्त।

30 मिनू सहर डा मुरपुकीमी योआश कली “इ तौ कली लाडगा गुंडदो। मेको बेक्चा माल्ब। मेकोमी बाल देवता आ चढ़ेतीक प्रेदा बाक्त। मिनू आ नेक्था बाक्शो अशेराह देवी आ मूर्ति पाइश्शा थाम यो खोला बाक्त। मोपतीके मेको कली साइक्का माल्नीक” दैमा बाक्त।

31 मिनू योआशमी मेको आ नेक्था बाक्शो ग्रीब मुर नेल्ल आन कली “गेपुकी बाल देवता आ पर्बम ग्रीशो ननी? बाल देवता कली वारच पचा दाक्नीनी? सुम मेको कली वारच पाइबा, मेको दीसा सुनी सम्म साइक्का पुंडसीब। आ चढ़ेतीक प्रेत्चा पुंडसीशो बाल देवता थमा पा देवता बाक्त हना, मेकोमी आंमान आ सक्ति कोंइदल” दैमाक्त। १राजा १८:२१-३९

32 मेको नाक्त रे मेकोपुकीमी गिदोन आ नें येरूब-बाल, दे वोदमे बाक्त। मेको आ अर्थ “बाल देवता आंमान गिदोन कली आ सक्ति कोंइदल। मारदे हना गिदोनमी आ चढ़ेतीक प्रेशो बाक्ब” दैमा बाक्त। न्यायाधीस ७:१

33 मिनू मिदयानी, अमालेकी नु पूर्व डा मुरपुकी खुम्सीशा, हुल का दुम्मा बाक्त। मेकोपुकी यर्दन खोला शोक्शा, येजेल आ दिंमम ताम्बु कीडमे बाक्त।

34 मिनू परमप्रभु यावे आ सोक्तीम गिदोन कली सुमा बाक्त। मिनू तुराही ताप्शा, अबीएजेर आ मुर नेल्ल आन कली “आं नोले खोतीन” दे ब्रेत्ता बाक्त। न्यायाधीस ३:१०; न्यायाधीस ११:२९; न्यायाधीस १३:२५

35 मिनू मनस्से आ थर आन बाक्तीकेमी लोत्र कुरब मुर सोइक्ता बाक्त। मिनू मेको आन कली “आं नोले खोतीन” दे ब्रेत्ता बाक्त। मिनू मोपा आशेर, जबूलून नु नाप्टाली आन बाक्तीकेम यो लोत्र कुरब मुर सोइक्ता बाक्त। मिनू मेको नेल्ल गिदोन कली गुम्थ जाक्मा बाक्त।

36 मिनू गिदोनमी परमप्रभु कली “गे देंनी बुदी आं कली इस्राएली आन कली प्रॉइब सेल्लतीनी हना,

37 गो भेडा आ ऊन कली खलामी वोइक्नुड। मेको खला डा ऊन कली ला सीतमी जिश्शो नु एर ओंथ डा खप चहिं मजिश्शो बाक्त हना, इन देशो लोत्र, गे इस्राएली आन कली प्रॉइचा, दे आं कली ब्रेत्तीनी, देशो लोत्र थमा बाक्ब, दे तुइक्नुड” दैमाक्त।

38 मिनू मेको आ देशो खोंदेशोन दुम्माक्त। मेको आ सुनी बोक्शा मेको ऊन रे चिरशा, बोस का ब्वाक्कु गुंडा बाक्त। एर ओंथ डा खप चहिं मजिश्शो बाक्माक्त।

39 मिनु लेंशा गिदोनमी परमप्रभु कली “गो नु मगाइकतीन। मिनु आं कली चिनु लोत्र का देचा गेन। गो इन कली लेंशा पुंडुड। आं कली खेयप का मेको ऊन सोव्रशो नु एर ओंथ डा खप चहिं जिप्पाइशशा कोइदीन” देमाकत। उत्पती १८:३०  
40 मिनु परमप्रभुमी मेको नाकदो यो गिदोन आ देशो खोदेशो पवा बाकत। खप ला जिम्माकत, मेको ऊन चहिं सोव्रशो बाकमाकत।

## 7

गिदोन आ मुरपुकीमी ग्राशो।

1 गिदोन कली येरूब-बाल यो देंबाकतेकम। मिनु गिदोन नु आ मुर नेल्ले सुनी कना बोक्शा डा मिन हारोद सहर डा ब्वाक्कु बुक्तीके आ नेक्था ताम्बु कीडमे बाकत। मिदयान डा मुरपुकीमी चहिं मेको आन उत्तर गे डा मोरेह डांडा आ नेक्था डा दिंममी ताम्बु कीडमे बाकत। न्यायाधीस ६:३२

2 मिनु परमप्रभु यावेमी गिदोन कली “गे नु बाक्शो मुरपुकी माल्शो क्येडा शुश बाक्नीम। गो मिदयान डा मुर आन कली मोदेशो शुश मुर आन गुडमी गेता हना, इसाएलीपुकीमी आं कली प्रेंशा “गो आंमा आंड सक्तिमी मिदयान डा मुर आन कली ग्राशो नकी” दे ठेयब लेत्नीम।

3 मोपतीके मुल गे मेको नेल्ल आन कली “सुड मुर हिंशा खिंखि पाइब बाक्तेकम हना, मेको मुर आन खिं लेत्वा माल्नीम” दे नेंपतो” देमाकत। मिनु २२ हजार आन खिं लेशशा, १० हजार इसाएली ला लीमा बाकत। ब्यवस्था २०:८

4 मिनु परमप्रभु यावेमी गिदोन कली “मुल यो शुश मुर बाक्नीम। मोपतीके मेको आन कली उड खोलामी लतो। मेकेर गो मुर योवशा गेनुड। गो इ कली ‘एको मुर लाइब’ देती हना, ‘मेको मुर गे नु लचा माल्ब। एको मुर गे नु मलाइब’ देती हना, मेको गे नु लचा मलाइब” देमाकत।

5 मिनु गिदोनमी मुर आन कली उड खोलामी लाइकमी बाकत। मिनु परमप्रभु यावेमी गिदोन कली “सु सुमी बाप्शा, खोला डा ब्वाक्कु कुचुममी तुक्शो खोदेशो पा लेंमी तुक्शा तूनीमी, मेको आन कली एर वोतो। सु सुम चहिं खोला डा ब्वाक्कु पोक्च थेक्शा गुडम तूनीमी, मेको आन कली ओंथ वोतो” देमाकत।

6 मिनु कुचुम खोदेशो पा ब्वाक्कु तुक्शा तूबपुकी सहे सां दुम्मा बाकत। मिनु अरु नेल्लेमी पोक्च थेक्शा आन गुडमी तूडमे बाकत।

7 मिनु परमप्रभु यावेमी गिदोन कली “एको सहे सां ब्वाक्कु तुक्शा तूब मुर रे पा मिदयानी आन गुड रे प्रोइनुड। लीशो आन कली आंम आंम खिंमी लचा गेमी” देमाकत। १ सामुएल १४:६

8 मिनु मुरपुकीमी मेको आन बुत लाम्ज नु तुराही वोइशशा, मेको आन खिं गाक्मा बाकत। गिदोनमी मेको सहे सां कली वोइकमी बाकत। मिदयानी आन बाक्तीक चहिं मेको आन क्येडा उड दिंममी बाकमाकत।

9 मिनु मेको नाकदो परमप्रभु यावेमी गिदोन कली “बोक्को, मिदयानी आन बाक्तीके बुपो। मारदे हना गो मेको आन कली इ गुडमी गेता।

10 तन्न हिंनेवे हना, इ गेय पाइब पुराह कली लाइशशा बुपो।

11 मिनु लशा, मेको आन लोत्र पशो नेनो। मेको आन लोत्र नेंनी नोले, मेको आन कली लडाइ तोचा महिंनेवे” देमाकत। मिनु मेको आ गेय पाइब पुराह नु मिदयानी आन डोंइती डा ताम्बु आ नेक्था लमाकत। मेकेर लडाइ पाइबपुकी बाक्शो बाक्मा बाकत।

12 मेको मिदयानी, अमालेकी नु पूर्व डा थर डा मुर नेल्ल शुश सल्ला माले खोदेशो पा दिंममी बाक्शो बाक्मा बाकत। मेको आन दलओंठ ठेयब समुन्द्र डा बाल्वा खोदेशो हिक्ने मचाप्पा डा पा शुश बाक्मा बाकत।

13 मिनु गिदोन मेको आन ताम्बु आ नेक्था जाक्दीम्मेनु, मेकेर डा मुर कामी आ वारच कली आ डोमु शोव्रडा बाकत। मेकोमी “गो आ डोमुमी क्योव्रज शोब्ले का गुलुल पा लोकसीशा, मिदयानी आन बाक्तीकेमी जाक्शा, मेको आन ताम्बु चिप्शो ताता” देमाकत।

14 मिनु आ वारचमी “थमा पा, मेको इसाएली योआश आ तौ गिदोन आ तरवार बाक्ब। परमप्रभुमी मिदयान नु मुर नेल्ले आन कली मेको आ गुडमी गेपु” देमाकत।

15 मिनु गिदोनमी डोमु नु मेको आ अर्थ नेंशा डा मिन परमप्रभु यावे कली ठेयब सेला बाकत। मिनु इसाएली आन बाक्तीकेम लेशशा “बोक्कीन, परमप्रभु यावेमी मिदयानी नेल्ल आन कली इन गुडमी गेपु” देमाकत।

16 मिनु मेको सहे सां मुर आन कली, हुल सांमी योक्गा बाकत। मिनु नेल्ल आन कली का का पा तुराही नु आगा रांको वोइशशो शेत्थ गर का का गेमी बाकत।

17 मिनु “आं कली कोव्रडीन। आं खोदेशो पने। गो मेको आन ताम्बु आ नेक्था जाक्दीशा, मार मार पाइनुडा, गे यो मोदेशो पने।

18 मिनु गो नु बाक्ब हुलमी गेना तुराही ताप्नीमी, मेना गे यो आन बाक्तीक एर ओंथ इन तुराही ताप्शा ‘परमप्रभु यावे कली नु गिदोन कली’ दे ठेयब सेंदा पा ग्रीडीन” देमाकत।

19 गिदोन नु मेको नु बाक्ब सहे का मुरपुकी क्येर नाकदोमी मिदयान डा मुर आन बाक्तीक आ नेक्था जाक्दीम्मा बाकत। मेको आन खाल पाइब नक फांडसीशो बाक्मा बाकत। मिनु गिदोन आ मुरपुकीमी तुराही ताप्शा, आन गुडमी कुरशो शेत्थ गर प्रोल्मे बाकत।

20 मोपा मेको हुल सांमीन तुराही ताप्शा, आन कुरशो गर प्रोल्मे बाकत। आन पेरा गुडमी रांको नु ग्युरा गुडमी तुराही कुरशा “परमप्रभु यावे कली तरवार का नु गिदोन कली तरवार का” दे ग्रीमा बाकत।

21 मिनू गिदोन आ मुर नेल्ल मेको आन बाक्तीक एर ओंथ राप्शा बाक्मा बाक्त। मिदयान डा लडाइ पाइबपुकी चहिं नेल्ल वाइ ब्रेशशा प्रोकमा बाक्त।

22 मिनू मेको सहे सां मुरुमी तुराही ताप्पेनु, परमप्रभु यावेमी मेको मिदयान डा मुर आन दातेमी साइक्मुपाइक्मी बाक्त। मिनू मिदयान डा लडाइ पाइबपुकी सेरेराह गे बेथ-शित्ता सम्म प्रोकमा बाक्त। मेको आबेल-मेहोलाह आ सांद तब्बाथ सहर आ नेक्था सम्म प्रोकमा बाक्त। भजन संग्रह ८३:१०; यसैया ९:३; यसैया १०:२६

23 मिनू गिदोनमी नाप्ताली आ थर, आशेर आ थर नु मनस्से आ थर डा मुर आन कली ब्रेशशा, मिदयान डा मुर आन कली खेदा पपदा बाक्त।

24 मिनू गिदोनमी एफ्राइम डा पहाडी रागीम बाक्ब मुर आन कली लोत्र सोइक्ता बाक्त। मार लोत्र सोइक्ता बाक्त, देशा हना “उइ बुप्शा, मिदयानी आन कली सतीन। बेथ-बाराह सम्म यर्दन डा लामी प्रोकचा मगेन” दे लोत्र सोइक्ता बाक्त। मिनू मेको ब्रेशशा एफ्राइम आ थर डा मुरपुकीमी बेथ-बरा डा ब्वाक्कु रे यर्दन डा शोक्तीक सम्म डा लां तेक्गमे बाक्त।

25 मेकोपुकीमी मेको मिदयानी आन कली खेदा पस डा पस पा आन कप्तान निक्शी ओरेब नु जेयब कली ग्याइक्तमे बाक्त। मिनू मेकोपुकीमी ओरेब कली ओरेब आ फुल्लु तारी नु जेयब कली आ अडगुर खाक्तीक कोलमी सदमे बाक्त। मिनू नोले मेकोपुकीमी ओरेब नु जेयब आस पिया क्योरशा, यर्दन आइक्ची हांम गिदोन आ बाक्तीकेम चाक्गमे बाक्त।

## 8

गिदोन नु एफ्राइम आस मुर

1 मिनू एफ्राइम आ थर डा मुरपुकीमी गिदोन कली “मारदे आंड कली ओदेशो पाइनीनी? मिदयान डा मुरपुकी नु लडाइ पथ लनीनु, मारदे आंड कली मब्रेनी?” देमा बाक्त। मिनू गिदोन कली शुश दोस गेशा जिचा तोत्रमे बाक्त।

2 मिनू गिदोनमी “गो मार पडा डा? गे आं क्येडा टेयब गेय पाइतीनी। मार, अबीएजेर आ मुरपुकीम मिदयान डा मुर नेल्ल आन कली प्रोकपाइक्चा क्येडा एफ्राइम आ थर डा मुरपुकीमी मेको आन कली साइक्चा टेयब मबाक्बा डा?

3 परमप्रभुमी मिदयान डा कप्तान ओरेब नु जेयब आस कली इन गुइमी गेशो बाक्ब। गेपुकीमी पशो खोदेशो गो पडा डा?” देमाक्त। मिनू आ लोत्र नेशा आन गाइशो नांडसे बाक्त।

पिप आस कली ग्याइशो

4 मिनू गिदोन यर्दन खोला जाक्शा, शोक्से बाक्त। मिनू गिदोन नु मेको नु बाक्शो सहे सां मुरपुकी मिदयान डा मुर आन कली खेदा पा दशा योलक योलुक दुम्शा शोत्रलु बेक्शो बाक्मा बाक्त।

5 मिनू गिदोनमी सुक्कोथ डा मुर आन कली “आं मुर आन कली इक्का शोब्ले गेन। मारदे हना एकोपुकी दशा, शोत्रलु बेक्शो बाक्नीम। मिनू गो मिदयान डा पिप जेबाह नु साल्मुन्ना आस कली खेदा पना पन बाक्नुड” दे पुना बाक्त। उत्पती ३३:१७

6 तन्न सुक्कोथ डा टेयब मुरपुकीमी “मार, जेबाह नु साल्मुन्ना आस कली गे ग्याइक्ने थुमी डा? इ लडाइ पाइब आन कली मारदे शोब्ले गेनीकी?” दे लोत्र लेत्मे बाक्त।

7 मिनू गिदोनमी “परमप्रभु यावेमी जेबाह नु साल्मुन्ना आस कली आं गुइमी गेप्टु हना, गो गोरशो रागी डा चोंक चूमी युक्ननी” देमाक्त।

8 मिनू पेनुएल सहरमी लमाक्त। मिनू मेकेर डा मुर आन कली खाल का डा लोत्र पवा बाक्त। मिनू मेकेर डा मुरपुकीमी यो सुक्कोथ डा मुरपुकीमी खोदेशो पा लोत्र लेत्मे बाक्त।

9 मिनू पेनुएल डा मुर आन कली “गो रिम्शो पा लेडडा नोले, गो मेको इन लाइशो खिं प्रेशशा गेननी” देमाक्त।

10 मिनू जेबाह नु साल्मुन्ना १५ हजार लडाइ पाइब नु कारकोर सहरमी बाक्सा बाक्त। पूर्व डा लडाइ पाइब आन लीशो में मोशोन बाक्मा बाक्त। लाख का २० हजार लडाइ पाइब चहिं साइक्चा पुंडसमा बाक्त।

11 मिनू गिदोन नोबाह नु योग-बेहा आ पूर्वम बाक्शो ग्याप्ब लेयब आन गाक्तीक लां लशा, जेबाह नु साल्मुन्ना आस लडाइ पाइबपुकीमी लडाइ आ पबंम मारेइ ममिंथु बाक्मानु, गिदोनमी लडाइ तोवा बाक्त।

12 मिनू जेबाह नु साल्मुन्ना चहिं मेक रे प्रोक्सा बाक्त। गिदोनमी मेको मिदयानी पिप आस कली खेदा पा ग्याइक्ता बाक्त। मोपतीके मेको आन लडाइ पाइब नेल्ले वाम ग्याम दुम्मा बाक्त।

13 मिनू योआश आ तौ गिदोन लडाइ रे हेरेस इर गे लतीक लां रे लेम्माक्त।

14 मिनू सुक्कोथ डा ठिटा का कली ग्याइशशा, मेको कली “सुक्कोथ डा टेयब मुर नु खाल्पापुकी, सु सु बाक्नीमी?” दे हिल्लो पवा बाक्त। मिनू मेको ठिटामी सुक्कोथ डा ७० जना टेयब मुर नु खाल्पा आन नें ब्रेक्शा गेवा बाक्त।

15 मिनू नोले गिदोन सुक्कोथ सहरम जाक्शा, मेकेर डा मुर आन कली “जेबाह नु साल्मुन्ना एकेर बाक्नीस। मेको आस पबंम गेपुकीमी आं कली ‘मार, जेबाह नु साल्मुन्ना आस कली ग्याइक्ने थुमी डा? इ लडाइ पाइब आन कली गो मारदे शोब्ले गेनीकी डा?’ दे शुक्शी पाइतीनी” देमाक्त।

16 मिनू सुक्कोथ सहर डा टेयब मुर नु खाल्पा आन कली लाइशशा, गोरशो रागी डा चोंक चूम युक्मी बाक्त।

17 पेनुएल सहरम बाक्शो लाइशशा खिं कली प्रेशशा, मेकेर डा वोंइश मुर आन कली साइक्मी बाक्त।

18 मिनू गिदोनमी जेबाह नु साल्मुन्ना आस कली “गे निक्शीमी ताबोरमी साइशशो मुर दोदेशो बाक्मा?” दे हिल्लो पाप्सी बाक्त। मिनू “इन खोदेशो बाक्तेक्म। पिप आ तौ खोदेशो बाक्मा बाक्त” दे लोत्र लेत्मे बाक्त।



19 मिनु गिदोनमी “मेकोपुकी आं लोकबपुकी बाक्तेकम। आं आम आ तौपुकी बाक्तेकम। मिनु मेको आन कली मसाइक्नी हना, परमप्रभु यावे ब्रोंइशा, बाक्शो खोदेंशो पा, गो थमा पा, इस कली ब्रोंइचा गेड वा” दे माइक्सी बाक्त। गन्ती ३५:३१

20 मिनु आ जेठा तौ, येथेर कली “बोक्शा, एको आस कली सांडसी” देमाक्त। तन्न आ तौ आल बाक्तीके हिंशा, आ तरवार मशोदा बाक्त।

21 मिनु जेबाह नु साल्मुन्नामी “आंमान बोक्शा, आंस कली सतीन। मारदे हना गे नु वोंइश मुर आ बोल बाक्ब” देसा बाक्त। मिनु गिदोन बोक्शा, मेको निक्शी आस कली सांडसी बाक्त। मिनु मेको आस दलओठ आ शुरमी बाक्शो शुश क्येट लाइब गहनापुकी पुइशशा लदा बाक्त।

गिदोन आ गेय नेल्ल

22 मिनु इस्राएलीपुकीमी गिदोन कली “गो आंड कली मिदयानी रे पा प्रॉइतीनी। मुल आंड कली हुकुम पाइब दुमीन। मिनु इन तौ नु इन चच नेल्ल आंड सासन पाइब दुम्मल” देमा बाक्त।

23 मिनु गिदोनमी “गो नु आं तौ ममाइ, तन्न परमप्रभु यावेमी इन कली हुकुम पाइब” देमाक्त।

24 मेकोमी “गो इन कली थोव्रक का पुंडनुड, मार पुंडनुड देंशा हना, गेपुकीमी का का पा इन रोइशो रे पा नोफाम पांडतीक का का आं कली गेने” देमाक्त। मारदे हना मेको आन जोरी सनु इश्राएली बाक्मा बाक्त। मेकोपुकीमी सुन के नोफाम पांडतीक पाइबाक्मा बाक्त।

25 मिनु मेकोपुकीमी “दुम्ब, गो मेको इन कली गेनीकी” देमा बाक्त। मिनु वा का ब्रामे बाक्त। मिनु नेल्लेमी आंम के रोइशो सुन मेकेर चोदमे बाक्त।

26 मिनु अरु शुश क्येट लाइबक माला नु आन दलओठ आ शुरम रेल्लो सुन के माला, पिप आन फेक्तीक वा मनाक्थु, मेकोमी पुंडशो सुन हजार का ७ सहे शेकेल दुम्माक्त। शेकेल का ११.५ ग्राम खोदेंशो बाक्ब। गन्ती ३१:५०

27 मिनु गिदोनमी मेको सुन रे पा निसाफ पतीक ऊरीम नु थुम्मीम बाक्शो झोला का सेल्शा, मेको कली आ सहर ओफ्रामी वोदा बाक्त। मिनु इस्राएली नेल्लेमी मेको कली ठेयब सेल्शा, आंम कली दूली पाइब सेल्मे बाक्त। मेको गिदोन नु आ खिं डा मुर आन कली यो हेंथे पपाइक्चा कली बाक्माक्त। न्यायाधीस १७:५;

28 मोपा मिदयान डा मुरपुकी इस्राएली आन गुइमी दुम्शा, मेकोपुकीमी लेंशा लडाइ मपामे बाक्त। मिनु गिदोन बाक्म सम्म इस्राएल रागी ४० बर्स सम्म लडाइ रे नांडसे बाक्त। न्यायाधीस ३:११; न्यायाधीस ५:३१

गिदोन बेक्शो

29 मिनु नोले योआश आ तौ येरूब-बाल आ खिं लशा, बाक्शो बाक्माक्त।

30 गिदोन आ तौ ७० जना बाक्मा बाक्त। मारदे हना मेको आ मीश शुश बाक्मा बाक्त।

31 मेको आ कान्छी मीश शेकेम सहरमी बाक्माक्त। मेकोमी यो तौ का थिमाक्त। गिदोनमी आ तौ आ नें अबीमेलेक वोदा बाक्त।

32 मिनु योआश आ तौ गिदोन शुश खूशो दुम्शा बेक्माक्त। मेको कली आ आफ अबीएजेर आ तुरस ओफ्रा सहरमी थिम्मे बाक्त। न्यायाधीस ६:११

33 गिदोन बेक्म नोले इस्राएलीपुकीमी लेंशा बाल देवता कली ठेयब सेल्मे बाक्त। मेकोपुकीमी बाल-बेरीत कली आंम देवता सेल्मे बाक्त। न्यायाधीस २:११; न्यायाधीस ९:४

34 मिनु मेको आन कली एर ओथ डा जोरी सनु रे प्रॉइब परमप्रभु यावे, आन परमप्रभु कली प्रेंदमे बाक्त।

35 येरूब-बाल माइशो गिदोन आ पशो रिम्शो गेय प्रेंशा, मेको आन खिं डा मुर आन कली ममिम्थु, आइक्च सेल्मे बाक्त। न्यायाधीस ९:५, ९, २४

## 9

अबीमेलेक पिप दुम्शो

1 येरूब-बाल आ तौ अबीमेलेक आ ममा आ खिं डा मुर आन बाक्तीक शेकेम सहरमी लमाक्त। मेकोमी आ ममा आन खिं डा मुर मौली नेल्ल आन कली न्यायाधीस ८:३१

2 “शेकेम सहर डा मुर नेल्ल कली लोव्र का हिल्लो पन। मार लोव्र हिल्लो पन देंशा हना ‘येरूब-बाल आ ७० जना तौ नेल्लेमी इन कली सासन पशो रिम्शो दय गोम इन कली सासन पशो रिम्शो?’ गो इन हुश बाक्नुड, दे मिन्तीन” देमाक्त। न्यायाधीस ९:१८

3 मिनु आ मामापुकीमी मेको शेकेम डा मुर आन कली मेको लोव्र शोव्रडमे बाक्त। मिनु मुर नेल्लेमी “मेको आंड लोक्ब बाक्ब” दे अबीमेलेक आ नोले खोइक्चा थुं पामे बाक्त।

4 मिनु मेकोपुकीमी अबीमेलेक कली बाल-बेरीत आ मन्दीर रे पा ७० शेकेल चांदी के क्येट गेमे बाक्त। मिनु मेकोमी मेको क्येट लाइशशा, मरिम्शो पाइब मुर आन कली गेवा बाक्त। मिनु मेकोपुकी मेको आ नोले खोदमे बाक्त। न्यायाधीस ८:३३

5 मिनु मेको नेल्ल आ आफ आ खिं ओफ्रामी लमा बाक्त। मेकेर येरूब-बाल आ तौ नेल्ल आन कली फुल्लु का तारी क्योरशा सदमे बाक्त। तन्न येरूब-बाल आ कान्छा तौ योथाम खुइशशा ब्रोंइमाक्त।

6 मिनु शेकेम नु बेथ-मिल्लो डा ठेयब मुर नेल्ल खुम्सीशा, शेकेममी बाक्शो ठेयब थाम आ नेक्था बाक्शो ठेयब रवा आ पुंमी अबीमेलेक कली पिप सेल्मे बाक्त। उत्पती ३५:४; यहोसु २४:२६

योथाम आ कथा

7 मिनु ठेयब मुरपुकीमी मेको लोत्र योथाम कली नेंपदमे बाकत। मेको लशा गेरीजीम डांडामी राम्माकत। मिनु ठेयब सेंदामी “शेकेम सहरम बाकब ठेयब मुर नेल्ल, गे आं लोत्र नेंतीनी हना, परमप्रभुमी इन लोत्र नेंब।

8 काबु रवा नेल्ल खुम्शीशा, आंम कली पिप सेल्चा, दे लोत्र पमुमा बाकत। मिनु मेकोपुकीमी तेल रवा कली ‘आंड पिप दुमीन’ देंमा बाकत।

9 तन्न तेल रवामी ‘मार, देवी देवता नु मुर आन कली ठेयब सेल्पाइकब आंम के रिम्शो तेल सेल्चा प्रॉइशा, गो रवा आन कली सासन पाइनुडा?’ देंमाकत।

10 मिनु रवापुकीमी फोत्रशी रवा कली ‘गे आंड पिप दुमीन’ देंमा बाकत।

11 मिनु फोत्रशी रवामी ‘मार, आंम के रिम्शो जिज नु ब्रोत्रशो फल सेल्चा प्रॉइशा, गो रवा आन कली सासन पाइनुडा?’ देंमाकत।

12 मिनु रवापुकीमी अडगुर बोट कली ‘गे आंड पिप दुमीन’ देंमा बाकत।

13 मिनु अडगुर बोटमी ‘मार, देवी देवता नु मुर आन कली ग्येरपाइकब आं के अडगुर शांबु सेल्चा प्रॉइशा, गो रवा आन कली सासन पाइनुडा?’ देंमाकत।

14 मिनु नोले रवापुकीमी चू रवा कली ‘गे आंड पिप दुमीन’ देंमा बाकत। २राजा १४:९

15 मिनु चू रवामी ‘गेपुकीमी थमा पा, आं कली इन पिप सेल्चा दाकनीनी हना, आं नेक्था जाकशा, आं पुंम बाककीन। मबाकतीनी हना, चू रवा रे पा मी यूशा लेबानोन डा ठेयब रवा नेल्ल आन कली खतम सेल्ब’ देंमाकत” दे कथा सेल्शा ठेयब सेंदा पा देंमाकत।

16 मिनु योथाममी “मुल नेनीन, गे अबीमेलेक कली थमा सुइशा नु रिम्शो थुंमी पिप सेल्तीनी हना, दुम्ब। मिनु येरूब-बाल नु आ खिं डा मुरुम इन कली रिम्शो पशो खोदेशो पा, गेमी यो मेको आन कली रिम्शो पाइतीनी हना, दुम्ब।

17 आं आफोमी बेकनुड, दे महिंथु, लडाइ पा इं कली मिदयानी रे पा प्रॉइतु।

18 तन्न मुलाकत आं आफ आ खिं डा मुर आन कली थम मरिम्शो पाइतीनी। मेको आ ७० जना तौ आन कली फुल्लु तारी क्योरशा साइकतीनी। मेको आ वाइलीम आ तौ अबीमेलेक कली शेकेम डा पिप सेल्तीनी। मारदे हना मेको इन लोकब बाकब।

19 मिनु मुलाकत गेपुकीमी येरूब-बाल नु आ खिं डा मुर आन कली रिम्शो पा मान पशो बाकतीनी हना, गे अबीमेलेक नु ग्येरसीन। मिनु अबीमेलेक यो गेपुकी नु ग्येरसेकल।

20 तन्न मोदेशो मदुम्न हना, अबीमेलेक रे मी यूशा, शेकेम नु बेथ-मिल्लो डा मुर आन कली खतम पोक्गल। मिनु शेकेम नु बेथ-मिल्लो डा मुर रे मी यूशा अबीमेलेक कली खतम पोक्गल” देंमाकत। न्यायाधीस ९:५७

21 मिनु योथाम मेकेर रे प्रोक्शा, बेयर माइशो सहरमी जाकदीम्माकत। मिनु मेको आ लोकब अबीमेलेक तशा हिंशा, मेकेरेन बाक्माकत।

अबीमेलेक नु शेकेम डा मुरपुकी

22 अबीमेलेकमी इस्राएली आन कली बर्स सां सासन पवा बाकत।

23 मेना परमप्रभुमी अबीमेलेक नु शेकेम डा ठेयब मुर आन दातेमी जिपाइकचा कली मरिम्शो जिपाइकब वोल का सोइकता बाकत। मिनु शेकेम डा ठेयब मुरपुकीमी मेको कली जोल पा मरिम्शो पामे बाकत। १सामुएल १६:१४; १सामुएल १८:१०; १सामुएल १९:९

24 मिनु परमप्रभुमी येरूब-बाल आ ७० जना तौ आन कली हुश खाकश पोक्तीके, अबीमेलेक नु मेको कली वारच पाइब शेकेम डा ठेयब मुर आन कली क्येक्क लेत्चा कली मोदेशो जिप्पाइकब वोल का सोइशो बाक्माकत। उत्पत्ती ९:६

25 मिनु शेकेम डा ठेयब मुरपुकीमी अबीमेलेक कली काइ मदाक्थु, साइकचा, दे डांडाम बाप्या कली मुर सोइकतमे बाकत। मेकोपुकीमी लांम गाकब आन मारेइ मारेइ रोइकतमे बाकत। मिनु लांम बाप्यो बाक्नीम, दे अबीमेलेक कली तुइकपदमे बाकत।

26 मिनु एबेद आ तौ गाल नु आ खिं खिं डा मुर शेकेममी बाक्या कली जाक्मा बाकत। मिनु शेकेम डा ठेयब मुरपुकीमी गाल कली थमा सुइशा, दाक्या गोत्रमे बाकत।

27 शेकेम डा मुर आन अडगुर रूमी लशा, अडगुर सेक्शा कोलमी खाकगमे बाकत। मिनु आन देवता आ मन्दीरमी चाड मानेचा कली लमा बाकत। मिनु मेकेर जशा तूशा अबीमेलेक आ पर्बम शुक्शी लोत्र पामे बाकत।

28 मिनु एबेद आ तौ गालमी “अबीमेलेक सु बाकबा डा? मार, मेको येरूब-बाल आ तौ ममाइ डा? मेको नु आ लडाइ पाइब आन कप्तान जेबुलमी शेकेम आ आफ हमोर आ मुर आन कली गेय मपामे? गो शेकेम डा मुर, मारदे मेको कली गेय पाइनीकी? उत्पत्ती ३४:२

29 गो शेकेम डा मुर आन कली सासन पाइब बाकशो नड हना, गो अबीमेलेक कली क्याम्दु वा। गो मेको कली ‘लडाइ पाइब शुश सेल्शा, लडाइ पय’ देड वा” देंमाकत।

30 मिनु सहर डा सासन पाइब जेबुलमी एबेद आ तौ गाल आ देंशो नेंशा, शुश गाइकता बाकत।

31 मिनु मेकोमी खुइशोमी अबीमेलेक कली लोत्र सोइकता बाकत। मार लोत्र सोइकता बाकत देंशा हना “एबेद आ तौ गाल नु आ खिं खिं डा मुर शेकेममी जाकशा बाकशा, सहर डा मुर आन कली इन पर्बम मरिम्शो लोत्र पना पन बाक्नीम।

32 मोपतीके गे इन लडाइ पाइब नु नाकदोन बोक्शा, सहर डा लाडगा डा रूमी रिम्दीन।

33 मिनू सुनी कना नां दाप्ची ना सहर कली लडाइ तोन। मिनू गाल नु आ मुरपुकी लाडगा यूमानु, मेको आन कली मार पचा माल्नीनी, मेको पन” देमाक्त।

34 मिनू अबीमेलेक नु आ लडाइ पाइब नाक्दोन बोक्शा, ४ हुल दुम्शा, शेकेम आ लाडगाम लडाइ तोचा कली बाप्शा बाक्मा बाक्त।

35 मिनू एबेद आ तौ गाल सहर डा लाडगा लशा, सहर डा ओव्रतीक लाप्चोमी राप्शा बाक्माक्त। मिनू अबीमेलेक नु आ लडाइ पाइब आन बाप्तीक रे यूमा बाक्त।

36 मिनू गालमी मेको आन कली तशा, जेबुल कली “मुरपुकी डांडा रे बुम्ना बुम्न बाक्नीम” देमाक्त। मिनू जेबुलमी “मेको मुर ममाइ, डांडा आ वांकु बाक्ब। मेको मुर खोदेशो तांइसीनीम” दे लोव्र लेत्ता बाक्त।

37 मिनू लेशा गालमी “कोव्रडीन, मुरपुकी रागी आ दाते रे बुम्ना बुम्न बाक्नीम। मुर आ हुल का चहिं चिडगा कोइतीक रवा रे यिना यिन बाक्नीम” देमाक्त। इजीकीएल ३८:१२

38 मिनू जेबुलमी “इ डोंइती डा ठेयब लेशो लोव्र, ले लाक्गा? गे ‘अबीमेलेक सु बाक्बा? गो मारदे मेको कली गेय पाइनीकी?’ देशो नवे। इ मदाक्शो मुर मेको मनमी डा? मुल लावो। मेकोपुकी नु लडाइ पावो” देमाक्त।

39 मोपतीके गालमी शेकेम डा ठेयब मुर आन डोंइती लशा, अबीमेलेक नु लडाइ पवा बाक्त।

40 तन्न अबीमेलेकमी मेको लडाइ ग्रामाक्त। गाल चहिं प्रोक्माक्त। मिनू शुश मुर साइक्चा पुंडसमा बाक्त। सहर डा ठेयब लाप्चो सम्म शुश मुर शोल्मो पा बेक्शो बाक्मा बाक्त।

41 मिनू अबीमेलेक लशा, अरुमाह माइक्तीक सहरम बाक्माक्त। जेबुलमी चहिं गाल नु आ खिं खिं डा मुर आन कली शेकेम रे खेरमी बाक्त।

42 आ दीसा शेकेम डा मुरपुकी लाडगा रूमी लमा बाक्त। मिनू मुरपुकीमी मेको लोव्र अबीमेलेक कली नेंपदमे बाक्त।

43 मोपतीके आ लडाइ पाइब आन कली हुल सां पा योक्शा, सहर मेर डा रूमी बाप्शा, बाक्पदा बाक्त। मिनू मुरपुकी सहर रे यूशा पिशो तशा, मेको आन कली साइक्मी बाक्त।

44 अबीमेलेक नु आ हुल रीब पा डोंइती बारमा बाक्त। मिनू सहर ओव्रतीक ठेयब लाप्चोमी लडाइ पचा सासमा बाक्त। अरु हुल निक्शी चहिं पिशा, रूमी बाक्शोपुकी नु लडाइ पा मेको आन कली सदमे बाक्त।

45 अबीमेलेकमी सुनी रे नाक्दो सम्म लडाइ पा, मेको सहर कली आम के सेला बाक्त। मेकेर डा मुर नेल्ल आन कली साइक्मी बाक्त। मिनू सहर खतम पोक्शा, हिक्सी फ्रवा बाक्त।

46 मिनू शेकेम डा बोल्यो दरवार डा ठेयब मुरपुकीमी सहर खतम दुम्शो नेशा, मेकोपुकी एल-बेरीत देवता आ बोल्यो खिं आगा लमा बाक्त। न्यायाधीस ८:३३

47 मिनू मुरपुकीमी “शेकेम डा बोल्यो दरवार डा मुर नेल्ल बुक्शा बाक्नीम” दे अबीमेलेक कली नेंपदमे बाक्त।

48 मिनू अबीमेलेक नु आ लडाइ पाइब सल्मोन डांडामी लमा बाक्त। मेकोमी खा लाइश्शा, शाक्श क्योरशा, बालाम लाप्शा कुरा बाक्त। आ लडाइ पाइब आन कली “गे आं कली मार पशो तनी, रीब पा मोदेशो पन” देमाक्त।

49 मोपा लडाइ पाइब नेल्लेमी मोदेशो पा शाक्श क्योरशा, यित्मे बाक्त। मिनू अबीमेलेक आ नोले खोदमे बाक्त। मेको शाक्श लाइश्शा, एल-बेरीत आ बोल्यो खिंम तेल्ला, मी सुइक्तमे बाक्त। मिनू शेकेम डा बोल्यो दरवारम बाक्ब नेल्ल बेक्मा बाक्त। मेकेर हजार का खोदेशो वोंइश मुर नु मीश मुर बाक्शो बाक्मा बाक्त।

अबीमेलेक बेक्शो

50 मिनू मेकेर रे अबीमेलेक थेबेस गे लमाक्त। मिनू मेको थेबेस सहर कली लडाइ पा आम के सेला बाक्त।

51 मेको सहर आ दातेमी बोल्यो दरवार का बाक्माक्त। मिनू सहर डा मुर नेल्ले, वोंइश मुर नु मीश मुरपुकी मेकेर खुइश्शा, आन नोले लाप्चो चोक्शा, नेल्ल क्येडा तला तारी कौसीमी डोइश्शा बाक्मा बाक्त।

52 मिनू अबीमेलेक मेको बोल्यो दरवार आ नेक्था जाक्शा, लडाइ तोवा बाक्त। मिनू बोल्यो दरवार कली मी सुइक्चा, दे दरवार डा लाप्चो आ नेक्था जाक्दीम्माक्त।

53 मेना मीश मुर कामी तला डा यात तोक्शा, मेको आ पिया प्रोल्शा गेवा बाक्त।

54 मिनू अबीमेलेकमी रीब पा आ या कुरब कली ब्रेश्शा “मुरपुकीमी ‘मीश मुर कामी मेको कली साइक्तु’ दे मदेंमल, दे रीब पा इ तरवार शोइश्शा, साइय्यी” दे मदा बाक्त। मिनू आ या कुरबमी तूदान, अबीमेलेक बेक्माक्त। १सामुएल ३१:४; २सामुएल ११:२१

55 मिनू इस्राएल डा मुरपुकीमी अबीमेलेक बेक्शो तशा, नेल्ल आम आम खिं गे लेम्मा बाक्त।

56 मोपा परमप्रभुमी अबीमेलेक आ आफ कली पशो पाप, आ ७० जना लोकब आन कली साइश्शा आ क्येक्क लेत्ता बाक्त।

57 मिनू परमप्रभुमी शेकेम डा मुर आन मरिम्शो पशो आ पर्वम क्येक्क लेत्ता बाक्त। मेकोपुकीमी येरूब-बाल आ तौ योथाम आ सराप रमा बाक्त। न्यायाधीस १:२०

## 10

तोला नु याइर निसाफ पाइब दुम्शो

1 अबीमेलेक आ नोले इसाकार आ थर डा, पुआ आ तौ दोदो आ चच तोला माइश्शा मुर इस्राएली आन कली प्रोंइचा कली जाक्माक्त। मेको एफ्राइम डा पहाडी रागी शामीरमी बाक्शो बाक्माक्त। उत्पती ४६:१३; गन्ती २६:२३

2 तोलाम २३ बर्स सम्म इस्राएली आन कली निसाफ पशो बाक्माक्त मिनू नोले बेक्माक्त। मिनू मुरपुकीमी मेको कली शामीरमी थिम्मे बाक्त।

- 3 तोला आ नोले गिलाद डा मुर याइरम २२ बर्स सम्म इस्राएली आन कली निसाफ पशो बाक्माक्त। गन्ती ३२:४१  
 4 मेको आ तौ ३० जना बाक्मा बाक्त। मेकोपुकी ३० ओटा गधाम डोइक्बाक्मा बाक्त। मिनु गिलाद डा ३० ओटा सहर मेको आन के बाक्माक्त। मुल सम्म मेको सहर आन नें हव्वोथ-याइर देनीम। मेको गिलाद रागीम बाक्नीम। ब्यवस्था ३:१४  
 5 मिनु नोले याइर बेक्माक्त। मिनु मुरपुकीमी मेको कली कामोनमी थिम्मे बाक्त।

अम्मोनीपुकीमी श्येत गेशो

- 6 मिनु इस्राएलीपुकीमी लेशा परमप्रभु यावे आ डोंइती मार मरिम्शो बाक्मे, मेको पामे बाक्त। मेकोपुकीमी बाल, अशतारोथ नु देवी देवता आन कली ठेयब सेल्मे बाक्त। मिनु अराम, सीदोन, मोआब नु अम्मोनी नु पलिस्ती आन देवी देवता कली यो ठेयब सेल्मे बाक्त। मोपा परमप्रभु यावे कली प्रॉइशा, मेको कली ठेयब मसेल्मे बाक्त।  
 7 मोपतीके परमप्रभु यावे मेकोपुकी नु गाइश्शा मेको आन कली पलिस्ती नु अम्मोनी आन गुइमी गेवा बाक्त।  
 8 मेको बर्समी मेकोपुकीमी इस्राएली आन कली थाप्पा श्येत गेशा, साप्पा दिम्पे बाक्त। मिनु यर्दन खोला आ आइक्वी हांबु, पूर्व गे गिलाद माइश्शा एमोरी आन रागीमी बाक्ब इस्राएली आन कली १८ बर्स सम्म थाप्पा श्येत गेशा दिम्पे बाक्त।  
 9 अम्मोनीपुकीमी ओंथ हाम ला ममाइ, यर्दन आइक्वी हांबु यो शोक्शा, यहूदा आ थर, बेन्यामीन आ थर नु एफाइम आ थर डा मुर आन कली लडाइ तोत्रमे बाक्त। मिनु इस्राएलीपुकीमी शुश श्येत जामे बाक्त।  
 10 मिनु इस्राएलीपुकीमी परमप्रभु यावे कली “वारच पाइय्यीकी। पाप पाइतक। आंइ परमप्रभु, इन कली प्रॉइशा, बाल देवी देवता आन कली पूजा पाइतक” देमा बाक्त। १सामुएल १२:१०  
 11 मिनु परमप्रभु यावेमी इस्राएली आन कली “डोंइती इन कली इजीप्त डा मुर, एमोरी, अम्मोनी नु पलिस्ती आन गुइ रे प्रॉइतनी।  
 12 मिनु सीदोन डा मुर, अमालेक आ मुर नु मोआबीपुकीमी इन कली दिम्पेनु ‘वारच पाइय्यीकी’ दे ब्रेत्तीनी। मेना इन कली मेको आन गुइ रे प्रॉइता।  
 13 तन्न गेपुकीमी आं कली प्रॉइशा, अरु देवी देवता आन कली पूजा पा ठेयब सेल्तीनी। मोपतीके मुल रे गो इन कली मप्रॉइनुइ।  
 14 लने, इन योत्रशो देवी देवता आन कली थोन। मेकोपुकीमी इन कली इन श्येत रे प्रोन्मेकल” दे परमप्रभु यावेमी देमाक्त। ब्यवस्था ३२:३७-३८; येरमीया २:२८  
 15 तन्न इस्राएलीपुकीमी परमप्रभु यावे कली “गोपुकीमी पाप पाइतक। मोपतीके गे आंइ कली मार पचा दाक्नीनी, मेको पन। तन्न मुल आंइ कली प्रोनीन” दे पुन्मे बाक्त।  
 16 मिनु अरु देवी देवता आन कली ताइश्शा, परमप्रभु यावे कली ठेयब सेल्मे बाक्त। मिनु परमप्रभु यावेमी इस्राएली आन कली मेको क्येडा श्येत गेचा मगेमी बाक्त। यहोसु २४:२३; न्यायाधीस २:१८  
 17 मिनु अम्मोनी लडाइ पचा कली खुम्सीशा, गिलादमी ताम्बु कीशा बाक्शो बाक्मा बाक्त। मिनु इस्राएली यो खुम्सीशा, मिस्पामी बाक्शो बाक्मा बाक्त। न्यायाधीस ११:२९  
 18 मिनु गिलाद सहरम बाक्ब इस्राएली लडाइ पाइब आन कप्तान गुम्मुशा “सुम अम्मोनी आन कली लडाइ तोचा गोइबा, मेकोमी गिलादम बाक्ब आन कली हुकुम पाइब” दे लोत्र पमुमा बाक्त। न्यायाधीस ११:६-१०

## 11

येफता निसाफ पाइब दुम्शो

- 1 गिलाद सहर डा येफता ठेयब नु बोल्यो लडाइ पाइब मुर बाक्माक्त। मेको गिलाद आ तौ तेल्लेम रे पा थिशो बाक्माक्त।  
 2 मिनु गिलाद आ मीशेमी यो मेको के शुश तौ थिशो बाक्माक्त। मिनु मेकोपुकी कोल्शो दुम्शा, येफता कली खेरमे बाक्त। मेकोपुकीमी येफता कली “आंइ आफ आ खिंमी इ के मारेइ यो अडस मबाक्ब। गे अर्को मीश आ तौ नवे” देमा बाक्त। उत्पत्ती २१:१०  
 3 मोपतीके येफता मेको आ लोक्बपुकी रे पा ब्रॉइचा कली प्रोक्शा, तोब रागीमी लशा बाक्शो बाक्माक्त। मिनु मरिम्शो पाइब मुरपुकी मेको नु गारशा, रोइक्थ, लमा बाक्त। न्यायाधीस ९:४; १सामुएल २२:२  
 4 मिनु इच्का नोले अम्मोनीपुकीमी इस्राएली नु लडाइ पामे बाक्त।  
 5 मिनु लडाइ दुम्मेनु, गिलाद डा खाल्पापुकीमी तोब रागीमी बाक्शो येफता कली ब्रथ लमा बाक्त।  
 6 मेकोपुकीमी येफता कली “पिन, आंइ लडाइ पाइब आन ठेयब मुर दुमीन। मिनु गो अम्मोनी नु लडाइ पने चाप्नीकी” देमा बाक्त।  
 7 मिनु येफतामी मेको गिलाद डा खाल्पा आन कली “गेपुकीमी आं कली मदाक्थु, आं आफ आ खिं रे खेरतीनी। मुल श्येत जनी ना मारदे आं कली ब्रेत्तीनी?” देमाक्त।  
 8 मिनु मेको खाल्पापुकीमी येफता कली “मोपतीके गो इन कली युम्थ जाक्तक। मुल गोपुकी नु गाक्कीन। मिनु अम्मोनी नु लडाइ पा ग्राशा, गिलादमी बाक्ब नेल्ल आंइ ठेयब मुर दुमीन” देमा बाक्त। न्यायाधीस १०:१८  
 9 येफतामी मेको आन कली “गेपुकीमी आं कली अम्मोनी नु लडाइ पथ लेम्शा लाइक्तीनी नु परमप्रभु यावेमी मेको आन कली आं गुइमी गेप्टु हना, इन ठेयब मुर दुम्मुडा?” दे माइक्मी बाक्त।

10 मिनू गिलाद डा खाल्पापुकीमी येफता कली “परमप्रभु यावे गो आंइ दातेमी सांकछी बाक्ब। गो इन देशो खोदेशो पाइनीकी” देमा बाक्त।

11 मिनू येफता गिलाद डा खाल्पापुकी नु लमाक्त। मेकेर डा मुरपुकीमी मेको कली ठेयब मुर नु लडाइ पाइब आन ठेयब मुर सेल्मे बाक्त। मिनू येफतामी मिस्रामी परमप्रभु यावे आ डोंइती मेको लोत्र नेल्ल शोत्रडा बाक्त। न्यायाधीस ११:२९; न्यायाधीस १०:१७

12 मिनू येफतामी अम्मोनी आन पिप कली “गे मारदे आंइ रागी कली लडाइ तोथ पीनीनी? गे नु आंइ दातेमी मार मरिश्शो बाक्बा?” दे हिल्लो पचा कली मुर सोइक्ता बाक्त।

13 मिनू अम्मोनी आन पिपमी येफता आ मुर आन कली “इसाएलीपुकी इजीप्त रे जाक्शा, अरनोन खोला रे यब्बोक नु यर्दन खोला सम्म आंइ रागी लाइक्तेक्म। मेको रागी सिक्सी पा लेत्तीन” दे लोत्र सोइक्ता बाक्त।

14 मिनू येफतामी लेशा मुर सोइश्शा अम्मोनी आन पिप कली

15 “येफता आ लोत्र मार बाक्त देशा हना, इसाएलीपुकीमी गेनायो मोआबी आन रागी नु अम्मोनी आन रागी मलदेम। ब्यवस्था २:९, १९

16 इसाएलीपुकी इजीप्त रे कुशा, गोरशो रागी रे लल समुन्द्र गे कादेशे सहरम जाक्दीम्मा बाक्त।

17 मिनू एदोम डा पिप कली ‘इन रागी डा लां लचा गेकी’ दे लोत्र सोइक्तेक्म बाक्त। तन्न एदोम डा पिपमी मेको लोत्र नेंसीन मनेना बाक्त। मिनू मोआबी आन पिप कली यो लोत्र सोइक्तेक्म बाक्त। तन्न मेको यो मबिस्से बाक्त। मोपतीके इसाएलीपुकी कादेशमी बाक्मा बाक्त। गन्ती २०:१४-२१

18 मेकेर रे एदोम नु मोआब रागी हिरशा, गोरशो रागी रे मोआब आ नां दाप्तीक गे लमा बाक्त। मिनू अरनोन खोला आ नेक्था ताम्बु कीडमे बाक्त। मोआबी आन रागी मओत्रम। मारदे हना अरनोन मोआब आ सांद बाक्माक्त। गन्ती २१:१३

19 मिनू नोले हेरबोनम बाक्शो एमोरी आन पिप सीहोन कली ‘इन रागी डा लां रे पा आंइ रागी सम्म लचा गेकी’ दे लोत्र सोइक्तेक्म बाक्त। गन्ती २१:२१-३१

20 तन्न सीहोनमी इसाएली आन कली मेकेर रे लाइनीम, दे थमा मसुदा बाक्त। मिनू मुर नेल्ल कली खुप्शा, याहासमी आन ताम्बु कीशा, इसाएली नु लडाइ पामे बाक्त।

21 मिनू परमप्रभु यावे, इसाएली आन परमप्रभुमी सीहोन नु आ मुर आन कली इसाएली आन गुडमी गेमी बाक्त। मिनू मेकोपुकीमी मेको आन कली ग्राशा, आन रागीमी बाक्शो एमोरी आन रागी आंम के सेल्मे बाक्त।

22 मेकोपुकीमी अरनोन खोला रे पा यब्बोक खोला सम्म नु गोरशो रागी रे पा यर्दन खोला सम्म एमोरी आन रागी आंम के सेल्मे बाक्त।

23 मोपा परमप्रभु यावे, इसाएली आन परमप्रभुमी आंम मुर आन कली रिश्शो पचा, दे एमोरी आन कली खेरा बाक्त। मुल एको रागी लेशा ताक्चा मगारनीनी।

24 इन देवता केमोशमी इन कली गेशो ताइनीनी ममाइ डा? परमप्रभु यावे, आंइ परमप्रभुमी मार गेबा, गो यो मेको ताइनीकी। गन्ती २१:२९

25 मुल मार, गे मोआबी आन पिप सिप्पोर आ तौ बालाक क्येडा रिश्शो बाक्नीनी? मार, मेकोमी इसाएली नु जिशा, मेको नु लडाइ पचा डा? गन्ती २२:२; यहोसु २४:९

26 इसाएलीपुकी सहे सां बर्स सम्म हेरबोन नु आ एर ओंथ डा गाउंपुकी, आरोएर नु मेको आ एर ओंथ डा गाउंपुकी नु अरनोन आ नेक्था डा सहर नेल्लेम बाक्मा बाक्त। मारदे मेको क्येडा डोंइती इन के मसेल्नी?

27 गोपुकीमी इन कली मारेइ यो मरिश्शो मपशो। तन्न गेपुकीमी आं कली लडाइ तोशा, मरिश्शो पाइनीनी। मुलाक्ती परमप्रभु यावेमी इसाएली नु अम्मोनी आन दातेमी निसाफ पाइब” दे येफतामी अम्मोनी आन पिप कली लोत्र सोइक्ता बाक्त।

28 तन्न अम्मोनी आन पिपमी येफतामी सोइश्शो लोत्र मारेइ खोदेशो मलाक्माक्त।

येफतामी कसम पशो

29 मिनू परमप्रभु यावे आ सोक्तीम येफता कली सुमा बाक्त। मिनू गिलाद नु मनस्से आन रागी लाक्शा, गिलाद डा मिस्रा जाक्दीम्माक्त। मिनू मेकेर रे अम्मोनी आन रागी लमाक्त। न्यायाधीस ६:३४

30 येफतामी परमप्रभु यावे कली कबल का पचा बाक्त। मेकोमी मार कबल पचा बाक्त देशा हना “परमप्रभु यावे, गे अम्मोनी आन कली आं गुडमी गेतीनी हना, २सामुएल १५:८

31 गो अम्मोनी रे रिश्शो पा आं खिं लेत्ती हना, सु आं खिंमे लेत्ती हना, गो नु युग्थ जाक्बा, मेको इन के दुम्ब। गो मेको कली चोशा चढ़ेनुड” दे कसम जवा बाक्त। २राजा ३:२७

32 मिनू येफता अम्मोनी नु लडाइ पथ आइक्ची हांम शोक्शा लमाक्त। मिनू परमप्रभु यावेमी अम्मोनी आन कली येफता आ गुडमी गेवा बाक्त।

33 मेकोमी आरोएर रे रिन्नीथ नु आबेल-केरामीम सम्म २० ओटा सहर खतम सेला बाक्त। मोपा इसाएलीमी अम्मोनी आन कली ग्रामा बाक्त।

34 मिनू येफता आ खिं मिस्रामी लेम्माक्त। मिनू आ तमी खैजडी ताप्शा, सिल पना पन मेको कली युग्थ जाक्माक्त। मेको आ तमी का ला बाक्माक्त। अरु आल मबाक्मा बाक्त।

35 मिनू येफतामी आ तमी तवा चोटीन आ वा खाक्शा “आं तमी, आं थुं जिक्तीवी। शुश श्येत गेप्तीवी। गो परमप्रभु यावे कली कसम जाता। मिनू मेको कसम मखाप्थु मडुम्नुड” देमाक्त। गन्ती ३०:३

36 मिनू आ तमीमी “आं आफ, परमप्रभु यावे कली कसम जाइतीनी हना, कबल पशो खोदेशो पा आं कली पने। मारदे हना परमप्रभु यावेमी इन जोरी सत्रु अम्मोनी नु क्येकक लेशशो बाकब।

37 तन्न आं कली शिशी पन। महिना निकशी सम्म आं कली प्रोनीन। आं वारचपुकी नु एको डांडाम हिरनुड। गो कन्नेमी बेक्का माल्ताक्यी, दे रोंका पचा तडल” देमाकत।

38 मिनू येफतामी “लावो” देशा, आ तमी कली महिना निकशी सम्म प्रोना बाकत। मिनू मेको आ वारचपुकी नु डांडा लशा डा मीन आ कन्नेमीन बाक्शा बेक्का माल्शो आ परबंम डाक्माकत।

39 मिनू महिना निकशी नोले मेको लेशशा जाक्माकत। मिनू येफतामी परमप्रभु कली आ पशो कसम खबा बाकत। मिनू मेको मीश आल कन्नेन बेक्माकत। न्यायाधीस ११:३१; ब्यवस्था १२:२९-३१

40 मेना रे इस्राएल डा तमी नेल्लेमी बसं बसंमी ४ नाकत सम्म गिलाद सहर डा येफता आ तमी कली मिम्शा, रोंका पाइनीम।

## 12

येफता नु एफ्राइम

1 एफ्राइम आ थर डा मुरुमी आ लडाइ पाइब आन कली खुप्ता बाकत। मिनू मेकोपुकी यर्दन आडक्की हांबु साफोन गे शोकशा, येफता कली “अम्मोनी नु लडाइ पथ लनीनु, आंड कली मारदे मब्रेन्नी? मुल इन कली नु इन खिं कली मी सुइक्कीकी” देमा बाकत। न्यायाधीस ८:१

2 मिनू येफतामी “गो नु आं मुर अम्मोनी नु ठेयब लडाइ दुम्मेनु, गे इन कली ‘वारच पन’ दे ब्रेशशो नड। तन्न गेपुकीमी आंड कली मेको आन गुइ रे मप्रोंइनी।

3 मिनू गेपुकीमी आंड कली वारच मपाइनीनी, दे तुइक्तु नोले, महिंथु, खोला शोकशा, अम्मोनी नु लडाइ पथ गाकतक। मिनू परमप्रभु यावेमी मेको आन कली आंड गुइमी गेपु। मिनू मारदे मुलाकती गेपुकी गो नु जिथ जाक्नीनी?” देमाकत। न्यायाधीस ५:१८; न्यायाधीस ९:१७

4 मिनू येफतामी गिलाद डा मुर नेल्ल कली खुप्शा, एफ्राइम आ थर डा मुर नु लडाइ पवा बाकत। मिनू गिलाद डा मुरपुकीमी मेको आन कली ग्रामा बाकत। मेको जिचा मारदे बोक्शो बाकत देशा हना, एफ्राइम आ थर डा मुरपुकीमी “गे गिलादी एफ्राइम नु मनस्से आन दातेमी बाक्शो ला ननी” दे देशो बाक्मा बाकत।

5 मिनू गिलादीपुकीमी यर्दन डा शोक्तीक लां एफ्राइम रे रोइशशा, आंम के सेल्मे बाकत। मिनू गिलाद डा मुरपुकीमी खोला शोकब मुर आन कली “गे एफ्राइम आ थर डा मुर बाक्नीनी?” दे हिल्लो पामे बाकत। “गो मनड” देमा बाकत हना,

6 गिलाद डा मुरपुकीमी “मो हना, शिबबोलेथ देनो” देबाक्मा बाकत। मिनू मेकोमी ठीक पा देन मचाप्यु “शिबबोलेथ” देतेकम हना, मेकेर ग्याइशशा यर्दन आ नेक्था साइक्बाक्मा बाकत। मेना एफ्राइम आ थर डा मुर ४२ हजार साइक्वा पुंडसमा बाकत।

7 येफता ६ बर्स सम्म इस्राएली आन निसाफ पाइब दुम्शा बेक्माकत। मिनू मेको कली आ सहर गिलादमी थिम्मे बाकत।

इब्सान, एलोन नु अब्दोन

8 येफता आ नोले बेथलेहेम डा इब्सान इस्राएली आन निसाफ पाइब दुम्माकत।

9 मेको के ३० जना तौ नु ३० जना तमी बाक्मा बाकत। मेकोमी आ तमी आन कली अरु थर डा मुर नु ग्युंवे पा गोवा बाकत। मिनू आ तौ आन कली अरु थर डा ३० जना मीश आल ग्युंवे पा चाक्मा बाकत। मेको ७ बर्स सम्म इस्राएली आन निसाफ पाइब दुम्माकत।

10 मिनू इब्सान बेक्माकत। मिनू मेको कली बेथलेहेममी थिम्मे बाकत।

11 मेको बेकम नोले जबूलून आ थर डा एलोन १० बर्स सम्म इस्राएली आन निसाफ पाइब दुम्माकत। गन्ती २६:२६

12 मिनू जबूलून आ थर डा एलोन बेक्माकत। मिनू मेको कली जबूलून आ रागी डा आइयालोन सहरमी थिम्मे बाकत।

13 मेको आ नोले पिराथोन सहर डा हिल्लेल आ तौ अब्दोन इस्राएली आन निसाफ पाइब दुम्माकत।

14 मेको के ४० जना तौ नु ३० जना चच बाक्मा बाकत। मेको आन के ७० ओटा गधा बाक्माकत। मिनू मेकोपुकी आंम आंम गधामी डोइक्बाक्मा बाकत। मिनू अब्दोनमी ८ बर्स सम्म इस्राएली आन कली निसाफ पशो बाक्माकत।

15 मिनू नोले पिराथोन सहर डा हिल्लेल आ तौ अब्दोन बेक्माकत। मिनू अमालेकी आन पहाडी रागी डा एफ्राइम डा पिराथोन सहरमी थिम्मे बाकत।

## 13

सिम्सोन जर्मेशो

1 मिनू इस्राएलीपुकीमी लेशा परमप्रभु यावे आ डोंइती मार मरिम्शो बाक्मे, मेको पामे बाकत। मोपतीके परमप्रभु यावेमी मेको आन कली ४० बर्स सम्म पलिस्ती आन गुइमी गेमी बाकत।

2 मिनू दान आ थर डा मुर का बाक्माकत। मेको सोराह सहरमी बाक्शो बाक्माकत। मेको मुर आ नें मानोआह बाक्माकत। मिनू मेको आ मीश आल मथीब बाक्माकत।

3 मिनू परमप्रभु यावे आ स्वर्ग डा गेय पाइब मेको मीश मुर आ डोंइती गूशा, मेको कली “गे आल मथीब बाक्नेवे। तन्न मुल गे कोव्रज कुरशा तौ थीनेवे। उत्पत्ती १५:२; उत्पत्ती २५:२१; उत्पत्ती २९:३१

4 मोपतीके होस पा बाक्को, अडगुर शांबु नु अरु दुक्तीक काड मतूडो, मगारचा डा जचा थोवक मजावो। गन्ती ६:२-२१; लेवी ११:१; १सामुएल १:११

5 मारदे हना गे कोव्रज कुरशा, तौ थीनेवे। मेको आ चां गेनायो खोडक्या मदुम्ब। मारदे हना मेको वोंडश आल जरमेसे चोटीन परमप्रभु कली योव्रशो नाजिरी का दुम्ब। मिनु मेकोमी इस्राएली आन कली पलिस्ती आन गुड रे प्रोंडचा गोडब” देमाक्त।

6 मिनु मेको मीश मुरुमी आ वोंडश कली “परमप्रभु आ गेय पाडब मुर का आं बाक्तीक जाक्त। मेको आ कुल हिंचा डा परमप्रभु आ स्वर्ग डा गेय पाडब खोदेशो बाक्त। मिनु ‘सु बाक्नीनी?’ दे हिल्लो मपड। मिनु मेकोमी यो आ नें मदे।

7 तन्न मेकोमी आं कली ‘गे कोव्रज कुरशा तौ थीनेवे। मिनु अडगुर शांबु नु अरु दुक्तीक मतूडो, मगारचा डा जचा थोवक मजावो। मारदे हना मेको आल जरमेसे रे मबेक्म सम्म परमप्रभु आ योव्रशो नाजिरी का दुम्ब’ दे माडक्ती” देमाक्त।

8 मिनु मानोआहमी परमप्रभु यावे कली “परमप्रभु, इन सोडशो मुर लेशा आंस नेक्था सोडक्तीन। मेकोमी आंस कली मेको नोले जरमेसीब वोंडश आल कली दोपा कोल्पाडक्या, गो निक्शीमी मार पचा माल्बा, आंस कली शेंदल” दे पुना बाक्त।

9 मिनु परमप्रभुमी मानोआह आ पुंइशो लोव्र नेना बाक्त। मिनु आ मीश रूमी बाक्मेनु, परमप्रभु आ स्वर्ग डा गेय पाडब लेशा जाक्माक्त। मेना आ वोंडश मेको नु मबाक्शो बाक्माक्त।

10 मिनु आ मीश दोरशा लशा, आ वोंडश कली “मेको डोंइती जाक्शो मुर लेशा आं बाक्तीक जाक्त” देमाक्त।

11 मिनु मानोआह बोक्शा, आ मीश नु लशा, मेकेर जाक्दीशा, मेको कली “आं मीश नु लोव्र पाडब गे ननी?” दे हिल्लो पवा बाक्त। मिनु मेकोमी “गो नड” देमाक्त।

12 मिनु मानोआहमी “इन देशो लोव्र दुम डा मेरे मेको वोंडश आलमी मार मार पचा दुम्बा, मार मार पचा मदुम्बा” दे हिल्लो पवा बाक्त।

13 मिनु परमप्रभु यावे आ स्वर्ग डा गेय पाडबमी “गो मार मार देंडा, इ मीशेमी रिम्शो पा टिचा माल्ब।

14 अडगुर बोट रे सिशशो मारेड यो जचा मदुम्ब। मेकोमी अडगुर शांबु नु अरु दुक्तीक तूचा मदुम्ब। मगारचा डा मारेड यो जचा मदुम्ब। गो मार मार देंडा, मेकोमी नेल्ल टिचा माल्ब” देमाक्त। न्यायाधीस १३:४

15 मिनु मानोआहमी परमप्रभु यावे आ स्वर्ग डा गेय पाडब कली “गो इन कली पाठा का क्योरशा क्येनीकी। मोपतीके रिम्दीन” देमाक्त। न्यायाधीस ६:१८

16 मिनु परमप्रभु यावे आ स्वर्ग डा गेय पाडबमी “आं कली तेक्तीसी हना यो, गो इन क्येशो मजाडनुड। तन्न गेमी चोशा चढेतीक ठीक सेलतीनी हना, परमप्रभु यावे कली चढेवो” देमाक्त। मानोआहमी मेको परमप्रभु यावे आ स्वर्ग डा गेय पाडब बाक्ब, दे मतुडक्ता बाक्त।

17 मिनु मानोआहमी परमप्रभु यावे आ स्वर्ग डा गेय पाडब कली “इन नें मार बाक्बा? मारदे हना इन लोव्र थमा दुन्त हना, गो इन कली ठेयब सेल्चा दाक्नीकी” देमाक्त। उत्पत्ती ३२:३०

18 मिनु परमप्रभु यावे आ स्वर्ग डा गेय पाडबमी मेको कली “गे मारदे आं नें हिल्लो पाइनेवे? मेको मतुडक्ता डा बाक्ब” देमाक्त।

19 मिनु मानोआहमी अन्न नु पाठा लाइशशा, फुल्लु तारी छक लाक्चा डा गेय पाडब परमप्रभु यावे कली चढेवा बाक्त। न्यायाधीस ६:२१

20 मिनु मेको चढेतीक रे मी गूशा, सरीड गे लमेनु, परमप्रभु यावे आ स्वर्ग डा गेय पाडब मेको मी नु सरीड गे लमाक्त। मानोआह नु आ मीश कोव्रस डा कोव्रस बाक्शा, सेउ पाम्से बाक्त।

21 मिनु मेको नोले परमप्रभु यावे आ स्वर्ग डा गेय पाडब मानोआह नु आ मीश आ डोंइती गेनायो मयूमाक्त। मिनु मानोआहमी मेको परमप्रभु यावे आ स्वर्ग डा गेय पाडब बाक्माक्त, दे तुडक्ता बाक्त।

22 मिनु मेकोमी आ मीश कली “गो थमा पा बेक्नस। मारदे हना गो परमप्रभु कली ताइतस” देमाक्त। प्रस्थान ३३:२०

23 तन्न आ मीशेमी “परमप्रभु यावेमी इस कली साडक्चा दाक्शो हना, इस चढेशो चोशा चढेतीक नु अन्न चढेतीक मब्रव वा। इस कली मोदेशो लोव्र मदे वा, मकोडद वा” देमाक्त।

24 मिनु मानोआह आ मीशेमी तौ का थिवा बाक्त। मेको कली सिम्सोन नें वोदा बाक्त। मेको आल कोल्ना कोल्न लमाक्त। मिनु परमप्रभु यावेमी मेको कली आसीक गेवा बाक्त। उत्पत्ती २४:१; उत्पत्ती ३५:९; गन्ती २२:६

25 मिनु सोराह नु एशताओल सहर आस दातेमी बाक्शो माहनेह-दान सहरमी बाक्मेनु, परमप्रभु यावे आ सोक्तीमी मेको कली गेय पपाडक्चा गोवा बाक्त। न्यायाधीस ३:९-१०; न्यायाधीस ६:३४; न्यायाधीस १४:६,९; न्यायाधीस १५:१४; गन्ती २४:२-४; १सामुएल १०:६,१०; १सामुएल १६:१३; इजीकीएल ११:५

## 14

सिम्सोनमी मीश आल दाक्शो

1 काबु सिम्सोन तिम्नाह सहर ब्रूम्याक्त। मिनु मेकेर पलिस्ती मीश आल का तवा बाक्त। यहोसु १९:४३

2 मिनु आ खिं लेशशा, आ आम आफ आस कली “तिम्नाहमी पलिस्ती मीश आल का ताता। मेको नु ग्युबे पा गेयीनी” दे माडक्सी बाक्त।

3 मिनु आ आम आफोमी “मार, आंइ मुर नु इं थर डा मीश आल मबाक्बा? मिनु गे खोडक्तीक चिनु मखोइशशो, मेको पलिस्ती आ तमी का चाक्चा दाक्नेवे?” देसा बाक्त। तन्न सिम्सोनमी “मेको मीश आल आं कली चाक्कीन। मारदे हना गो मेको कली दाक्नुड” देमाक्त। उत्पत्ती ३४:१४; प्रस्थान ३४:१६

4 परमप्रभु यावेम सिम्सोन कली मेको मीश आल कली दाक्पाइशशो बाक्त, दे आ आम आफोमी मतुइशशो बाक्ताकस। परमप्रभुमी पलिस्ती आन कली खतम पचा कली मोदेशो पशो बाक्माकत। मेना पलिस्तीपुकीमी इस्राएली आन कली सासन पशो बाक्मा बाक्त।

5 मिनु नोले सिम्सोन आ आम आफ नु तिम्नाहमी बुम्माकत। मिनु मेकेर डा अडगुर रूमी जाकदीम्माकत। मिनु मेकेर ठिटा गुप्स का यूशा, मेको कली ग्राम्दा बाक्त।

6 मिनु परमप्रभु यावे आ सोक्तीम सिम्सोन कली ठेयब सक्तिम सुमा बाक्त। मिनु आ गुडमी मारेड यो या मबाक्त हना यो, मेको गुप्स कली पाठा खोदेशो पा सदा बाक्त। मिनु गुप्स साइशशो लोत्र आ आम आफ कली मशोव्रडा बाक्त। न्यायाधीस १३:२५

7 मिनु सिम्सोन मेकेर जाकदीशशा, मेको मीश आल नु लोत्र पवा बाक्त। मिनु मेको मीश आल कली दाक्शा लेम्माकत।

8 मिनु इच्का नोले सिम्सोन मेको मीश आल कली ग्युंवे पचा कली लेंशा तिम्ना बुम्माकत। मिनु लां प्रोइशा, साइशशो गुप्स कोत्रथ लमाकत। मिनु राक्शो गुप्स आ आगाम हुल का सुरब नु खुदो बाक्माकत।

9 मिनु खुदो गुंइशा, जना जन लमाकत। मेकोमी आ आम आफ आस कली यो जचा गेम्सी बाक्त। मिनु जाम्से बाक्त। तन्न मेको खुदो राक्शो गुप्स आ आगा रे गुंइशो, दे आ आम आफ कली मशोव्रडा बाक्त।

10 मिनु सिम्सोन आ आफ मेको मीश आल कोत्रथ लमाकत। मिनु सिम्सोनमी अरुम ग्युम्लेम पशो खोदेशो पा भोज का गेवा बाक्त।

11 मिनु मेकेर डा मुरपुकीमी सिम्सोन कली गुम्शा, ३० जना वोंइश मुर मेको कली वारच पचा कली चाकगमे बाक्त।

12 मिनु सिम्सोनमी मेको आन कली “इन कली लोत्र का हिल्लो पाइनन्नी। एको ७ नाक्त डा भोजमी मेको लोत्र लेन्ने चाप्टीनी हना, गो इन कली ३० ओटा बुश फेक्तीक वा नु ३० ओटा शुश क्येट लाइब फेक्तीक वा गेनन्नी।

13 तन्न आं हिल्लो पशो लोत्र लेन्ने मचाप्टीनी हना, गे आं कली ३० ओटा बुश फेक्तीक वा नु शुश क्येट लाइब फेक्तीक वा गेचा माल्नीनी” देमाकत। मिनु मेकोपुकीमी “लो दुम्ब, हिल्लो पन” देमा बाक्त।

14 मिनु सिम्सोनमी मेको आन कली “शुश ब्वाइब रे जचा थोत्रक गूत। बोल्यो रे जिज थोत्रक गूत। मेको मार बाक्बा?” दे हिल्लो पामी बाक्त। मिनु मेकोपुकीमी नाक्त सां सम्म मिम्ना मिम्न बाक्शा, मेको लोत्र मार बाक्बा, दे लेन्ने मचाप्वमे बाक्त।

15 मिनु ४ नाक्तीम मेकोपुकीमी सिम्सोन आ मीश कली “इ वोंइश कली लेम्शा, हिल्लो पावो। मिनु आंइ कली शोव्रडो। मोदेशो मपाप्टीवी हना, गो इ कली नु इ आफ आ खिं कली मी सुइक्नीकी। आंइ कली पुडग सेल्चा कली निम्तो पवी?” देमा बाक्त।

16 मिनु सिम्सोन आ मीश आ वोंइश आ डोंइती डाक्शा “गे आं कली काइ मदाक्नीनी। गे थमा पा आं कली मदाक्नीनी। गे आं मुर आन कली लोत्र का हिल्लो पाडतीनी। मिनु मेको लोत्र आ अर्थ चहिं आं कली मदेनी” देमाकत। मिनु सिम्सोनमी “मेको लोत्र आ अर्थ आं आम आफ कली लाइयो मदेइ। मिनु इ कली मारदे देनुंडा?” देमाकत।

17 मिनु भोज के ७ नाक्ती मनुम्म सम्म आ मीश सिम्सोन आ डोंइती डाक्स डा डाक्स बाक्माकत। मोपतीके ७ नाक्त सम्म शुश हिल्लो पा पुंइतीके सिम्सोनमी मेको लोत्र आ मीश कली शोव्रडा बाक्त। मिनु मेकोमी लशा, आ मुर आन कली देमाकत। न्यायाधीस १६:१६-१७

18 मिनु मेको ७ नाक्ती नां सोत्रचा क्येडा डोंइती सहर डा मुरपुकीमी सिम्सोन कली “खुदो क्येडा जिज, मार बाक्बा डा? गुप्स क्येडा बोल्यो सु बाक्बा डा?” देमा बाक्त। मिनु सिम्सोनमी “आं मीशोमी इन कली मेको लोत्र मशोव्रडा हना, गेपुकीमी लेन्ने मचाप्टीनी वा” देमाकत।

19 मिनु परमप्रभु यावे आ सोक्तीम सिम्सोन कली ठेयब सक्तिम सुमा बाक्त। मिनु मेको अश्कलोन सहरमी लशा, मेकेर ३० जना मुर साइक्मी बाक्त। मिनु मेको आन के मार मार थोत्रक नु वा पिशशा, मेको लोत्र लेप्ब आन कली शुश क्येट लाइब फेक्तीक वा गेवा बाक्त। मिनु सिम्सोन गाइशशा, आ आफ आ खिं लेम्माकत।

20 मिनु सिम्सोन आ मीश चहिं सिम्सोन कली वारच पाइब का कली गेमे बाक्त। न्यायाधीस १५:२

## 15

सिम्सोन आ मीश गुम्थ लशो

1 मिनु इच्का नोले चेरब रिक्वी ना सिम्सोन पाठा का कुरशा, आ मीश कली गुम्थ लमाकत। मिनु “गो आं मीश आ कोठामी ओत्रचा दाक्नुड” देमाकत। तन्न आ शिउमी ओत्रचा मंगेवा बाक्त।

2 मिनु आ शिउमी “आं तमी काइ मदाक्नीनी, दे मिम्ताकड। मोपतीके इन कली वारच पाइब कली गेता। मेको आ लोकब मेको क्येडा दारशो मबाक्बा डा? मुल इ मीश आ पा डा मेको कली लतो” देमाकत। न्यायाधीस १४:२०

3 मिनु सिम्सोनमी “गो मुल पलिस्ती आन कली थम मरिम्शो पाता हना यो, दोस मताइब दुम्ती” देमाकत।

4 मिनु सिम्सोनमी लशा, सहे सां सिवार ग्याइशशा, निक्निक्शी पा आस मीलु फ्रेंशा, आस दातेमी रांको का यो फ्रेंदा बाक्त।

5 मिनु रांको जेशशा, पलिस्ती आन रिक्शा वोइशशो चेरब, मीशो चेरब रू, अडगुर रू नु तेल रवा रू आगा सोइक्ता बाक्त।

6 मिनु पलिस्तीपुकीमी “एको सुम पवा?” दे हिल्लो पामे बाक्त। मिनु का निक्शीमी “तिम्ना डा मुर आ चांइवा सिम्सोनमी पापनु। मारदे हना आ शिउमी आ तमी, सिम्सोन आ मीश दुम्शा यो आ वारच कली गेप्टु” देमा बाक्त। मिनु पलिस्तीपुकी लशा, सिम्सोन आ मीश नु आ आफ कली मीम क्रोइशशा सदमे बाक्त।



7 मिनु सिम्सोनमी मेको आन कली “क्येक्क मलेत्थु मप्रोडनुड” दे कसम जवा बाक्त।  
 8 मिनु सिम्सोनमी मेको आन कली शुश श्येत गोशा, शुश मुर आन कली साइक्मी बाक्त। मिनु मेकेर रे लशा, एताम डा रोगु डा पुक्खीमी बाक्मावाक्त।

पलिस्ती आन कली साइशशो

- 9 मिनु पलिस्तीपुकी कुशा यहूदामी ताम्बु कीशा, लेही सहर आ नेक्था बाक्मा बाक्त।  
 10 मिनु यहूदा आ थर डा मुरपुकीमी मेको आन कली “गे मारदे आंड कली लडाइ तोइनीनी?” दे हिल्लो पामे बाक्त। मिनु मेकोपुकीमी “गो सिम्सोन कली ग्याइशशा, फ्रेंचा कली पीतक। मेकोमी आंड कली मार पवा, गो यो मेको कली मोदेशोन पाइनीक” देमा बाक्त।  
 11 मिनु यहूदा डा हजार सां मुर एताम डा रोगु डा पुक्खीमी यिमा बाक्त। मिनु मेकोपुकीमी सिम्सोन कली “पलिस्तीपुकी आंड सासन पाइब बाक्नीम, दे गे तुइक्नीनी। गे मारदे आंड कली मोदेशो पा मरिम्शो पनी?” देमा बाक्त। मिनु सिम्सोनमी “मेकोपुकीमी आं कली दोदेशो पामे, गो यो में मोदेशो ला पाता” देमावाक्त।  
 12 मिनु मेकोपुकीमी “गो दा इ कली फ्रेंशा पलिस्ती आन गुइमी गेचा कली जावतक” देमा बाक्त। मिनु सिम्सोनमी “मो हना आं कली मसाइक्नीक, देशा, कसम जने” देमावाक्त।  
 13 मिनु मेकोपुकीमी “इन कली फ्रेंशा ला पलिस्ती आन गुइमी गेनीक। गो इन कली मसाइक्नीक” देमा बाक्त। मिनु मेकोपुकीमी सिम्सोन कली नक डोरी निक्शीमी फ्रेंशा, पुक्खी क्येडा आइक्था कुत्मे बाक्त।  
 14 मिनु मेकोपुकी लेहीमी जाक्दीत्यामेनु, पलिस्तीपुकीमी मेको कली तथा ग्रीना ग्रीन पिमा बाक्त। मेना परमप्रभु यावे आ सोक्तीमी सिम्सोन कली सुमा बाक्त। मिनु सिम्सोनमी आ कली फ्रेंशो डोरी निक्शी मीम दुष्शो पले खोदेशो पा प्रोदा बाक्त। न्यायाधीस १३:२५  
 15 मिनु गधा आ पिया डा रुश खप रे गुष्शा, मेकोमी हजार का मुर आन कली तुष्शा सदा बाक्त।  
 16 मिनु मेकोमी “गो गधा आ पिया डा रुशेमी तुम्ना तुम्न शुश मुर साइक्ता। तेन्ना तेन्न हजार का मुर साइक्ता” देमावाक्त।  
 17 मेकोमी मो देने थुष्शा, मेको रुश ताइक्ता बाक्त। मोपतीके मेको टाउं कली रामाथ-लेही नें वोदमे बाक्त।  
 18 मिनु सिम्सोनमी ब्वाक्कु तूतू दाक्शा, परमप्रभु यावे कली पुंइशा, “गे इन वाइल कली ठेयब लडाइ ग्रापाइक्तीनी। मुल गो तूतू दाक्शा बेक्नुडा? एको खोइक्तीक चिनु मखोइशशो आन गुइमी बेक्नुडा?” देमावाक्त।  
 19 मिनु परमप्रभुमी लेही डा खाल्टा कली प्रोल्शा, मेक रे ब्वाक्क गुंइदा बाक्त। मिनु सिम्सोनमी ब्वाक्कु तूडा बाक्त। मिनु लेंशा, बोल्थो दुम्मावाक्त। मोपतीके लेही डा ब्वाक्कु बुक्तीक कली मुलावत सम्म एन-हाकोरे देनीम।  
 20 मिनु पलिस्तीपुकीमी इस्राएली आन कली दिष्शा सासन पामेनु, सिम्सोनमी २० बर्स सम्म इस्राएली आन निसाफ पशो बाक्मावाक्त।

## 16

सिम्सोनमी लाप्चो कुरशो

- 1 काबु सिम्सोन गाजा सहरमी लमावाक्त। मिनु मेकेर तेल्लेम का तथा, मेको नाक्दो मेको नु इप्थ लमावाक्त।  
 2 मिनु गाजेज सहर डा मुरपुकीमी “सिम्सोन मेकेर जाक्शो बाक्ब” दे गाजा डा मुर आन कली तुइक्पदमे बाक्त। मिनु मेकोपुकीमी सिम्सोन आ बाक्तीक पुम्तमे बाक्त। मिनु मुरपुकी नाक्दो सहर डा ठेयब लाप्चोमी बाष्शा बाक्मा बाक्त। नाक्दो मेकोपुकी सिक्सी पा बाक्मा बाक्त। मेकोपुकीमी “नां सोत्रचीना साइक्चा” दे सल्ला पशो बाक्मा बाक्त।  
 3 तन्न सिम्सोन क्येर नाक्दो सम्म ला आ ब्राख्येमी गोल्शा बाक्मावाक्त। मिनु बोक्शा लशा, सहर डा ठेयब लाप्चो नु आ थाम निक्शी आ दलीन नेल्ल तुल्शा बालाम लाष्शा, हेब्रोन आ नेक्था डा डांडाम लदा बाक्त।

सिम्सोन नु देलीलाह

- 4 मिनु नोले सिम्सोनम सोरेक डा दिंममी बाक्ब देलीलाह माइशशो मीश मुर का दाक्ता बाक्त।  
 5 मिनु पलिस्ती आन ठेयब मुरपुकी मेको मीश मुर कली ग्रुथ लमा बाक्त। मिनु मेको कली “सिम्सोन कली लेम्शा ‘इ कली सुमी बोल गेबा? दोपा इ कली फ्रेंने चाप्नीकी’ दे हिल्लो पावो। मिनु गो आंड कली शेंदो। मारदे हना गो ग्याइक्चा दाक्नीकी। मिनु ग्याइशशा गो का का पा इ कली ११, ११ सहे चांदी के शेकेल गेनीकी” देमा बाक्त।  
 6 मिनु देलीलाहमी सिम्सोन कली “सुमी इन कली शुश बोल गेबा? दोपा इन कली फ्रेंने चाम्सीबा? मुरपुकीम दोपा इन कली ग्याइक्ने चाप्नीकी? आं कली शेंदीन” दे हिल्लो पवा बाक्त।  
 7 मिनु सिम्सोनमी “आं कली लिब्रा आ ७ ओटा क्येख डोरीमी फ्रेंताक्थीमी हना, अरु मुर खोदेशो बोल मपाइशशो दुम्नुड” देमावाक्त।  
 8 मिनु पलिस्ती आन ठेयब मुरपुकीमी ७ ओटा लिब्रा आ क्येख डोरी चाक्शा, देलीलाह कली गेमे बाक्त। मिनु मेकोमी सिम्सोन कली फ्रेंदा बाक्त।  
 9 मेकोमी आगा डा कोठामी मुरपुकी खुइशशा वोइशशो बाक्मावाक्त। मिनु मेकोमी “सिम्सोन इन कली साइक्चा, दे पलिस्ती जाक्तेक्म” दे ग्रीमावाक्त। मिनु सिम्सोनमी मेको डोरी कली मीम किक्शो पले खोदेशो पा प्रोइशशा प्रोक्मावाक्त। मिनु आ बोल चहिं मारम बाक्बा, दे मतुइक्तमे बाक्त।  
 10 मिनु देलीलाहमी सिम्सोन कली “गे आं कली शुक्शी पा जोल पाइतीनी। तन्न मुल डा मेरे दोपा इन कली पाइक्ने चाम्सीबा, लो, देनीन” देमावाक्त।  
 11 मिनु सिम्सोनमी “आं कली नक मारेइ यो मफ्रेंशो डोरीमी फ्रेंताक्थीमी हना, अरु मुर खोदेशो दुम्नुड” देमावाक्त।

12 मोपतीके देलीलाहमी नक डोरी चाकशा, मेको कली फ्रेंदा बाकत। मेना यो मुरपुकी आ कोठामी खुइशशा बाकशो बाकमा बाकत। मिनु मेकोमी “सिम्सोन इन कली साइक्या, दे पलिस्ती जाकतेकम” दे ग्रीमाकत। मिनु सिम्सोनमी मेको डोरी कली श्येले प्रोइशशो खोदेशो पा प्रोदा बाकत।

13 मिनु देलीलाहमी लेंशा सिम्सोन कली “गे मुल सम्म आं कली शुक्शी पा जोल पाइतीनी। इन कली दोपा फ्रेंने चाम्सीबा?” दे हिल्लो पवा बाकत। मिनु सिम्सोनमी “गे आं चां डा ७ ओटा लामा कली तोत्र ओल्लीकेम पाइकताक्यी नु मेको तोत्र आ प्रोत्रशो हिरतीक ठीक पा वोइकतीवी हना, अरु मुर खोदेशो पा बोल मपाइशशो दुम्नुड” देमाकत।

14 मोपतीके मेकोमी सिम्सोन इम्मेनु, मेको आ चां डा ७ ओटा लामा कली तोत्र आ प्रोत्रशो हिरतीकेमी हिरशा फ्रेंशा वोदा बाकत। मिनु मेकोमी “सिम्सोन इन कली साइक्या, दे पलिस्ती जाकतेकम” दे ग्रीमाकत। मिनु सिम्सोन निन्द्रा रे सेंशा, तोत्र ओल्लीके, तोत्र नेल्ल नु प्रोत्रशो वा यो उइशशा बोक्माकत।

15 मिनु देलीलाहमी “आं कली दाक्नुड, दे दोपा देंने चान्नीनी डा? इन थुंमी आं कली मदाकशो बाक्नीनी। गे आं कली खेयप सां शुक्शी पा, इन ठेयब बोल मारम बाक्बा, मुल सम्म मशेंदीनी” देमाकत।

16 मिनु मेकोमी सिम्सोन कली नाकत किंत किंत हिल्लो पा श्येत गेवा बाकत। न्यायाधीस १४:१७

17 मोपतीके सिम्सोनमी आ खुइशशो थमा लोत्र मेको कली शेंदा बाकत। मेकोमी “मुल सम्म आं चां मप्रेकशो बाक्बा। मारदे हना गो जरमेसी डा रे परमप्रभु आ योत्रशो नाजिरी का नड। आं चां प्रेकतेकम हना, आं बोल लाइब। मिनु गो अरु मुर खोदेशो पा बोल मपाइशशो दुम्नुड” देमाकत। न्यायाधीस १३:५

18 मिनु सिम्सोनमी देलीलाह कली आ थुं डा लोत्र नेल्ल शोत्रशा, नोले देलीलाहमी पलिस्ती आन ठेयब मुर आन कली “रीब पा जाक्कीन। मारदे हना मेकोमी आ थुं डा लोत्र नेल्ल शेंताक्यी” दे ब्रेथ सोइक्ता बाकत। मिनु पलिस्ती आन ठेयब मुरपुकी चांदी कुरशा जाक्मा बाकत।

19 मिनु देलीलाहमी सिम्सोन कली आ थुकुमी इप्पदा बाकत। मिनु मुर का ब्रेशशा, आ ७ ओटा लामा प्रेक्पदा बाकत। मोपा देलीलाहमी सिम्सोन आ बोल जाम्पाइशशा सक्ति मपाइशशा सेला बाकत।

20 मिनु मेकोमी “सिम्सोन बोक्कीन, इन कली साइक्या, दे पलिस्ती जाकतेकम” दे ग्रीमाकत। मिनु मेको निन्द्रा रे बोक्माकत। मिनु गो आंम कली गेना हना यो प्रोइनुड, दे मिम्ता बाकत। तन्न “परमप्रभु यावेमी आं कली प्रोइने थुम्तु” दे मेकोमी मतुइक्ता बाकत। १सांमुएल १६:१४

21 मिनु पलिस्तीपुकीमी मेको कली ग्याइशशा, आ मिक्च पुक्तमे बाकत। मिनु गाजा सहरम चाक्गमे बाकत। मिनु कांसा के साइलोमी पाइशशा जेल्खानमी यात हिल्पदमे बाकत।

22 मिनु नोले आ प्रेक्शो चां लेंशा लाइशशो दुम्माकत।

### सिम्सोन बेक्शो

23 मिनु पलिस्ती आन ठेयब मुरपुकीमी “इं देवतामी इं सत्रु सिम्सोन कली इं गुइमी गेप्टु” देश, आन देवता दागोन कली ठेयब चढेतीक चढेचा कली नु ग्येरसीचा कली खुम्समा बाकत।

24 मिनु खुम्सीशो मुरपुकीमी सिम्सोन आ परबंम “इं देवतामी इं सत्रु, इं रागी डा सत्रु, इं रागी डा मुर साइकब मुर कली इं गुइमी गेशो बाक्ब” दे ग्रीशा, आन देवता कली ठेयब सेल्मे बाकत।

25 मिनु शुश ग्येरसीशा “सिम्सोन कली गुइदीन। मिनु मेकोमी आंइ कली सिल पा कोइदल” दे पुन्मे बाकत। मिनु सिम्सोन कली जेल्खान रे गुइदमे बाकत। मिनु मेकोमी मेको आन कली सिल पा कोइदा बाकत। मिनु मेकोपुकीमी सिम्सोन कली ठेयब थाम आस दातेमी राप्पदमे बाकत।

26 मिनु सिम्सोनमी आ गुइ ग्याइशशा खुल्ब टिटा कली “एको खिं कली तिक्ब नेल्ल क्येडा ठेयब थाम कली ग्याइक्या गेयी। मिनु गो मेकेर रक एशशा बाक्नुड” देमाकत।

27 मेको खिंम शुश वोंइश मुर नु मीश मुर बाक्मा बाकत। पलिस्ती आन ठेयब मुरपुकी यो नेल्ल मेकेर बाक्मा बाकत। हजार सां खोइ वोंइश मुर नु मीश मुर चहिं खिं डा नेल्ल क्येडा तला तार बाक्शा, सिम्सोन आ सिल कोत्रडमे बाकत।

28 मिनु सिम्सोनमी परमप्रभु यावे कली “परमप्रभु, परमप्रभु यावे, आं कली मिम्तीन। आं कली लेंशा खेयप का सक्ति गेयीनी। परमप्रभु, गो काले आं मिक्च निक्शी आ परबंम मेको आन कली क्येक्क लेत्ते चबुल” दे पुना बाकत।

29 मिनु सिम्सोनमी मेको खिं कली तिक्शा वोइकब खिं आ दातेमी वोइशशो थाम निक्शी कली पेरा गुइमी का नु ग्युरा गुइमी अर्को कली ग्याइक्ता बाकत।

30 मिनु सिम्सोनमी “आं कली पलिस्तीपुकी नु बेक्चा गेन” देश, आ सक्ति नेल्लेमी बोल पा मेको थाम निक्शी कली नेप्ता बाकत। मिनु मेको खिं ब्रेम्माकत। मोपा बाक्शो नेल्ल ठेयब मुर नु अरु मुर नेल्ले चिप्शा बेक्मा बाकत। मोपा सिम्सोनमी आ ब्रोंइशो क्येडा यो आ बेक्ची ना शुश मुर सदा बाकत। हिब्रू ११:३२-३४

31 मिनु सिम्सोन आ आफ आ खिं डा मुर नु आ लोकबपुकी मेकेर जाक्शा, आ रां आ आफ मानोआह आ तुरस सोराह नु एशताओल सहर आ दातेमी थिम्मे बाकत। सिम्सोन २० बर्स सम्म इस्राएली आन निसाफ पाइब दुम्शो बाक्माकत। न्यायाधीस १३:२५; न्यायाधीस १५:२०

## 17

### मीकाहमी मूर्ति सेल्पाइशशो

1 एफ्राइम डा पहाडम मीकाह नें पाइशशो मुर का बाक्माकत।

2 मिनु मेकोमी आ आम कली “इन जांमशो ११ सहे चांदी के शेकेल आ परबम सराप पशो, गो नेता। मेको चांदी के शेकेल गो नु बाक्नीम। गो लाइशो नड। मुल गो लेतन्नी” देमाक्त। मिनु मेको आ माममी “आं तौ, परमप्रभु यावेमी इ कली आसीक गेवल” देमाक्त। लेवी ५:१; हितोपदेस २९:२४

3 मिनु मेको ११ सहे चांदी के शेकेल आ ममा कली लेशशा गेवानु, आ माममी “एको चांदी आं तौ कली रिमशो दुम्ब, दे मुशो, चांदीम गिलशो मूर्ति सेल्पाइशशा परमप्रभु यावे कली गेनुड। मोपतीके गो मेको चांदी के शेकेल लेशा इ कली गेनन” देमाक्त। शेकेल का ११.५ ग्राम बाक्ब।

4 आ तौमी मेको चांदी आ ममा कली गेवानु, आ माममी सहे निक्शी चांदी के शेकेल लाइशशा, चेम्ब कली गेवा बाक्त। मिनु मेकोमी मुशो मूर्ति का सेल्शा मेको कली चांदीम गिला बाक्त। मिनु मेको मीकाह आ खिंमी वोदमे बाक्त।

5 मेको मीकाह के देवता थान का यो बाक्माक्त। मेकोमी चढेब आ डोंइती फेक्तीके निसाफ पतीक ऊरीम नु थुम्मीम बाक्शो झोला सेल्पाइशशा, खिं डा देवतापुकी यो सेल्पदा बाक्त। मिनु आ तौ का कली योत्रशा, चढेब सेला बाक्त। न्यायाधीस ८:२७; उत्पत्ती ३१:१९; प्रस्थान २८:४१

6 मेना इस्राएल रागीमी पिप मबाक्मा बाक्त। मोपतीके सुम मार पचा दाक्मा, मेको पाइक्बाक्मा बाक्त। न्यायाधीस १८:१; न्यायाधीस १९:१; न्यायाधीस २१:२५

7 मिनु यहूदा डा बेथलेहेम रे पा जाक्शो यहूदा आ थर डा रागीम बाक्ब लेवी टिटा का बाक्माक्त। न्यायाधीस १८:३; ब्यवस्था १८:६-८

8 मेको यहूदा डा बेथलेहेम सहर प्रोंइशा, अर्को सहरम बाक्चा कली बाक्तीक मालना मालन गाक्माक्त। मोपा गाक्मेनु, मेको एफ्राइम रागी डा पहाड मीकाह आ खिंमी जाक्दीम्माक्त।

9 मिनु मीकाहमी “ते रे जाक्शो नवे?” दे हिल्लो पवा बाक्त। मिनु मेकोमी “गो यहूदा डा बेथलेहेम रे पा जाक्शो लेवी का नड। मिनु बाक्चा कली बाक्तीक का मालना मालन गाक्ती” देमाक्त।

10 मिनु मीकाहमी “गो नु बाक्को। मिनु आं आफ नु आं चढेब दुमो। गो इ कली बर्स बर्समी १० ओटा चांदी के शेकेल गेनन। मिनु जचा फेक्चा यो गेनन” देमाक्त।

11 मोपतीके मेको लेवी मीकाह नु बाक्चा बिस्से बाक्त। मिनु मीकाहमी मेको कली आ तौ आन दाते डा का खोदेशो पा वोदा बाक्त।

12 मिनु मीकाहमी मेको लेवी टिटा कली आ गेय गेवा बाक्त। मिनु मेको टिटा आ चढेब दुम्शा, मेको आ खिंम बाक्माक्त। प्रस्थान २८:४१

13 मिनु मीकाहमी “मुल परमप्रभु यावेमी आं कली सोशो बोशो सेलती, दे तुइक्ताक्ड। मारदे हना लेवी का आं चढेब दुम्शो बाक्ब” देमाक्त।

## 18

दान आ मुरपुकीम रागी माल्शो

1 मेना इस्राएल रागीम पिप मबाक्मा बाक्त। मिनु मेना दान आ थर डा मुरपुकीमी बाक्चा कली रू मालना मालन बाक्मा बाक्त। मारदे हना इस्राएली आन दातेमी योक्शो रागी मथेरशो बाक्मा बाक्त। न्यायाधीस १३:४; यहोसु १९:४०-४८

2 मोपतीके दान आ थर डा मुरपुकीमी सोराह नु एशताओल रे ५ जना मुर आन कली क्यारी पथ सोइक्त्मे बाक्त। मिनु मेको आन कली “लन, मिनु मेको रागी कली क्यारी पन” देमा बाक्त। मिनु मेकोपुकी एफ्राइम आ पहाडी रागी, मीकाह आ खिंमी जाक्शा, बास बाक्मा बाक्त। न्यायाधीस १३:२५

3 मिनु मेकोपुकी मीकाह आ खिंम बाक्मानु, मेको लेवी टिटा आ लोत्र पशो नेशा तुइक्तमे बाक्त। मिनु मेको लेवी कली “सुम इ कली एकेर चाक्गा? एकेर मार पाइनेवे? मार गेय पाइनेवे?” दे हिल्लो पामे बाक्त। न्यायाधीस १७:७

4 मिनु मेकोमी “मीकाहमी गेय गेती। मेको आ चढेब दुम्ती” देमाक्त।

5 मिनु मेकोपुकीमी मेको लेवी कली “मो हना आंइ गेय रिमशो दुम्बा देय मदुम्बा, परमप्रभु कली हिल्लो पावो” देमा बाक्त।

6 मिनु लेवीमी “थुं नाइशशा लने, परमप्रभु यावेमी इन गेय दाक्शो बाक्ब” देमाक्त।

7 मिनु मेको ५ जना मुर लशा, लाइश सहरमी जाक्दीम्मा बाक्त। मेकोपुकीमी मेकेर डा मुर आन कली सीदोन डा मुरपुकी खोदेशो पा लडाइ मपथ, रिमशो नु क्येट थीब दुम्शा, बाक्शो तामे बाक्त। मेकोपुकी नु मारेइ मारेइ बाक्माक्त। मेको आन रागी सीदोनी आन रागी क्येडा डोन बाक्माक्त। मिनु मेकोपुकी आंमा ला बाक्शो बाक्मा बाक्त।

8 मिनु मेको ५ जना मुर सोराह नु एशताओल सहरमी लेशशा जाक्मा नोले आन लोकबपुकीमी “मार लोत्र चाक्नी?” दे हिल्लो पामे बाक्त।

9 मिनु क्यारी पाइबपुकीमी “लो, लय। मिनु मेकोपुकी नु लडाइ पय। मारदे हना मेको रागी थम रिमशो बाक्ब। मुल मार सिक्सी पा बाक्नीनी? मुल लचा कली देश मपने। मिनु मेको रागी कली आम के सेल्य।

10 गे मेकेर जाक्दीशशा, कोत्रनीनु, ठेयब रागीमी थम रिमशो पा बाक्शो जात का डा मुर आन कली ताइनीनी। मेको मुरपुकीमी लडाइ आ परबम मारेइ ममिम्शो बाक्नीम। मेको रागी परमप्रभुमी इन गुइमी गेशो बाक्ब। मेको रागीमी बाक्शो मारेइ मारेइ थीसीब” देमा बाक्त।

मीकाह आ मूर्ति रोइशशो

11 मिनु दान आ थर डा ६ सहे या कुरशो मुरपुकी सोराह नु एशताओल सहर रे पा गाक्मा बाक्त। न्यायाधीस १३:२, २५

12 मेकोपुकी कुशा, यहूदा डा किरयथ-यारीम आ नेक्था ताम्बु कीशा बाक्मा बाक्त। मोपतीके मुल सम्म मेको कली माहानेह-दान देंनीम। मेको किरयथ-यारीम आ पच्छिममी बाक्ब।

13 मिनु मेक रे गाक्शा, एफ्राइम डा पहाडी रागीम बाक्शो मीकाह आ खिंमी जाक्दीम्मा बाक्त।

14 मिनु डोंइती रागी क्यारी पथ पिशो ५ जना मुरुमी आन लोकब आन कली “एको खिं कामी चढ़ेब आ निसाफ पतीक ऊरीम नु थुम्मीम बाक्शो झोला नु खिं डा देवता, मुशा चांदीमी गिल्शो मूर्ति बाक्नीम। गेपुकीमी तुइक्चा माल्नीनी। मिनु मुल मार पचा माल्बा, मिन्चा माल्नीनी” देंमा बाक्त।

15 मिनु मेकोपुकी मीकाह आ खिं आ नेक्था जाक्शा, लेवी ठिटा आ बाक्तीक जाक्मा बाक्त। मिनु “दोदेशो बाक्नेवे?” दे हिल्लो पामे बाक्त।

16 या कुरशो ६ सहे दान आ थर डा मुरपुकी चहिं लाप्चोमी बाक्मा बाक्त।

17 मिनु डोंइती क्यारी पथ जाक्शो ५ जना मुर खिं आगा ओत्रमा बाक्त। मिनु मेकोपुकीमी मेको मुशा चांदीम गिल्शो मूर्ति, निसाफ पतीके ऊरीम नु थुम्मीम बाक्शो झोला नु खिं डा देवता नेल्ल लदमे बाक्त। मेना चढ़ेब यो मेको ६ सहे मुर नु लाप्चोम राप्शा बाक्शो बाक्माक्त। न्यायाधीस १७:५

18 मिनु मोपा मेको ५ जना मुरुमी मीकाह आ खिंमी ओत्रशा, मेको मुशा चांदीम गिल्शो मूर्ति, चढ़ेब आ डोंइती फेक्शो निसाफ पतीके ऊरीम नु थुम्मीम बाक्शो झोला नु खिं डा देवतापुकी लदमेन, चढ़ेबमी “मार पनी?” दे हिल्लो पामी बाक्त।

19 मिनु मेकोपुकीमी “ब्वालेइ पावो। लोत्र का यो मपावो। गो नु गाक्शा आंइ आफ नु चढ़ेब दुमो। मार, मुर का आ चढ़ेब दुम्चा रिम्शो देय इस्राएल डा थर का नु आन मुर आन चढ़ेब दुम्चा रिम्शो दुम्बा? लो, मिन्तो” देंमा बाक्त।

20 मिनु मेको चढ़ेब बिश्शा, मेको निसाफ पतीके ऊरीम नु थुम्मीम बाक्शो झोला खिं डा देवतापुकी नु मेको मुशा चांदीम गिल्शो मूर्ति कुरशा, मेकोपुकी नु गाक्माक्त।

21 मिनु मेकोपुकी मेकेर रे लेशशा, आन लां खोदमे बाक्त। मेकोपुकीमी आलपुकी, बस्तु भाव नु आन मारेइ मारेइ लाइश्शा, आन डोंइती खुल्शा गाक्मा बाक्त।

22 मिनु दान आ थर मा मुरपुकी मीकाह आ खिं रे इच्का डोन जाक्दीम्मानु, मीकाहमी आ नेक्था डा मुर आन कली ब्रेश्शा खुप्शा, खेदा पा थिम्मी बाक्त।

23 मिनु हुइक्तीमी बाक्त। मिनु दान आ थर डा मुरपुकीमी मीकाह कली “इ कली मार दुम्मे? मारदे मोदेशो पा शुश मुर खुप्तीमी?” देंमा बाक्त।

24 मिनु मीकाहमी “आं कली सेल्सीशो देवी देवता नु आं चढ़ेब मुर मारदे लाइक्नी? आं कली मारेइ महेंदीनी। मिनु आं कली ‘इ कली मार दुम्मे?’ दे हिल्लो पाइनीनी?” देंमाक्त।

25 मिनु दान आ थर डा मुरपुकीमी “ब्वाले पावो। मारदे हना आंइ दाते डा चुरब मुरपुकीमी चुरशा, इ कली नु इ खिं डा मुर आन कली साइक्नीमी” देंमा बाक्त।

26 मिनु मेको दान आ थर डा मुरपुकी मेकेर रे गाक्मा बाक्त। मीकाह यो आ क्येडा बोल्यो मुर तशा, मारेइ मपथ, आ खिं लेम्माक्त।

27 मोपा मेको चढ़ेब नु मीकाह आ सेल्सीशो मूर्ति लाइश्शा, मेकोपुकी गाक्मा बाक्त। मिनु मेकोपुकी लाइश्शा सहर नु लडाइ पामे बाक्त। मेकेर डा मुरपुकी थुं नाइश्शा, लडाइ ममिम्थु बाक्शो बाक्मा बाक्त। मिनु दान आ थर डा मुरपुकीमी मेको आन कली तरवारमी साइश्शा, मेको आन सहरम मी सुइक्तमे बाक्त।

28 मेको आन कली प्रोइब सुइ मबाक्मा बाक्त। मारदे हना मेको सहर सीदोन रे शुश डोन बाक्माक्त। मेको सहर बेथरेहोब आ नेक्था डा दिममी बाक्माक्त। मिनु दान आ थर डा मुरपुकीमी मेको सहर सेल्शा बाक्चा गोत्रमे बाक्त।

29 मिनु मेको सहर कली इस्राएल आ तौ, मेको आन किकी पिपी आ नें दान वोदमे बाक्त। मेको सहर आ नें डोंइती लाइश्शा बाक्माक्त। यहोसु १९:४७

30 मिनु दान आ थर डा मुरपुकीमी मेको मूर्ति पूजा पचा कली वोदमे बाक्त। इस्राएली नेल्ल ग्याइश्शा लाइक्चा मपुंडसीमा सम्म मोसा आ तौ गेरशोम, आ तौ योनाथन नु मेको आ चच युइ दान आ थर डा चढ़ेब दुम्मा बाक्त। १राजा १२:२९; आमोस ८:१४; प्रस्थान १८:३; २राजा १५:२९

31 परमप्रभु आ खिं शिलोमी बाक्म सम्म मेकोपुकीमी मीकाहमी सेल्सीशो मूर्ति कली पूजा पामे बाक्त। यहोसु १८:३; येरमीया ७:१२

## 19

गिबा सहरम मरिम्शो दुम्शो

1 मेना इस्राएल रागीम पिप मबाक्माक्त। मिनु लेवी का बाक्माक्त। मेको एफ्राइम डा नेल्ल क्येडा नोले डा पहाडी रागीम बाक्शो बाक्माक्त। मेकोमी यहूदा डा बेथलेहेम रे मीश का चाक्शो बाक्माक्त। न्यायाधीस १७:६

2 मिनु आ वोंइश नु गाइश्शा, मेको कली प्रोइशा आ माइत यहूदा डा बेथलेहेममी लशो बाक्माक्त। मिनु मेको मीश मुर मेकेर बाक्शो ४ महिना दुम्शो बाक्माक्त।

3 मिनु आ वोंइश आ कान्छी मीश कली लेम्शा बिप्पाइश्शा, मेको कली पित्वा कली लमाक्त। मेकोमी वाइल का नु गधा निक्शी यो लदा बाक्त। मिनु मेको आ शिउ आ खिंमी जाक्दीम्माक्त। मिनु आ शिउमी मेको कली तशा ग्येरसीशा युमा बाक्त।

- 4 मिनु आ शिउमी “बाक्कीन” दे नमो सिमो पवा बाक्त। मोपतीके नाक्त सां सम्म बाक्माक्त। मेकोपुकी जशा तूशा बाक्मा बाक्त।
- 5 मिनु ४ नाक्त नोले मेको लेवी सुनी कना बोक्शा, गाक्चा कली सासे बाक्त। तन्न आ शिउमी “लचा क्येडा डोंडती मारेड जने” देमाक्त।
- 6 मोपतीके जशा तूशा बाक्सा बाक्त। मिनु आ शिउमी “मुलाक्त नाक्टो का बाक्शा, चिनु ग्येरसीशा लने” देमाक्त।
- 7 मिनु मेको निक्शी जशा तूशा बाक्सा बाक्त। मिनु आ शिउमी “चिनु काब नाक्टो बाक्कीन” दे नमो सिमो पवा बाक्त।
- 8 मिनु ५ नाक्त मेको लचा कली सुनी कना बोक्माक्त। तन्न आ शिउमी “डोंडती जने, नां इच्छा चोक्तल। मिनु नोले लने” देमाक्त। मोपतीके मेको निक्शी नां चोक्चा सम्म बाक्शा, जशा तूशा, बाक्सा बाक्त।
- 9 मिनु मेको मुर, आ मीश नु आ वाइल नु लचा, दे बोक्मेनु, आ शिउमी “लो, कोवडीन, नां रिक्चाप्टु। मोपतीके मुलाक्त नाक्टो बाक्शा, इन थुं ग्येरपतीन। मिनु दीसा सुनी कना बोक्शा इन खिं लेतीन” देमाक्त। लूका २४:२९
- 10 तन्न मेको नाक्टो बाक्चा मबिस्से बाक्त। मेक रे बोक्शा, आ मीश, आ वाइल नु गधा निक्शी खुल्शा, मेकोपुकी यबुस आ आइदी जाकदीम्मा बाक्त। यबुस सहर कली यरूसलेम यो देबाक्मा बाक्त। न्यायाधीस १:२१; १इतिहास ११:४
- 11 मिनु यबुस आ नेक्था जाकदीम्मानु, नां रिक्चशो बाक्माक्त। मिनु वाइलमी “मुलाक्त नाक्टो लशा, यबुसी आन सहरमी बाक्च” देमाक्त।
- 12 तन्न लेवीमी “गो इस्राएली अरु मुर आन सहरम मलाइनीक। गिबा सहरमी लय।
- 13 लो, गाक्च, गिबा हना यो रामाह सहर हना यो का सम्म जाकदीशा, बास बाक्च” देमाक्त।
- 14 मिनु गाक्मा बाक्त। मोपा गाक्मा गाक्मा बेन्यामीन आन गिबा सहर जाक्चामेनु, नां रिक्माक्त। यहोसु १८:२८
- 15 मिनु मेकेर बास माल्शा लामा बाक्त। मिनु सहर डा चोकमी बाक्मा बाक्त। मारदे हना सुइमी मेको आन कली बास बाक्चा कली आन खिंमी मलदमे बाक्त।
- 16 मिनु खाल्पा का आ रूमी गेय पा नाक्टो खिं लेशशो बाक्माक्त। मेको खाल्पा एफ्राइम डा पहाडी रागी डा बाक्माक्त। तन्न गिबामी बेन्यामीन आ थर डा सहरम बाक्बाक्माक्त।
- 17 मिनु मेको खाल्पामी इर कोत्रशा सहर डा चोकमी बाक्चो लां गाक्ब मुर आन कली तवा बाक्त। मिनु लशा मेको आन कली “ते रे पिनी? ते लाइनीनी?” दे हिल्लो पवा बाक्त।
- 18 मिनु मेकोमी “गोपुकी यहूदा डा बेथलेहेम रे एफ्राइम डा नेल्ल क्येडा नोले डा पहाडी रागीम लाइनीकी। गो मेकेर डा नडा। गो यहूदा डा यबुस बेथलेहेममी लती। मुल मेक रे लेशशा, आं खिं लना लन बाक्नुडा। मिनु सुइमी आंइ कली बास बाक्चा मगेम।
- 19 गोपुकी नु आंइ गधा कली नल नु जचा थोत्रक बाक्ब। गो, आं मीश नु आं वाइल नेल्ल कली जचा तूचा थोत्रक यो बाक्ब। गो आंइ कली माल्शो मारेड मारेड गोपुकी नु बाक्ब” दे लोत्र लेता बाक्त।
- 20 मिनु खाल्पामी “थुं नाइक्तीन। आं खिंम बाक्कीन। इन माल्शो नेल्ल गेनन्नी। गेपुकीमी चोकमी बाक्शा, नां सोइंचा काड मतुम्ब” देमाक्त।
- 21 मिनु खाल्पामी आ खिंमी लाइक्मी बाक्त। गधा आस कली जचा गेवा बाक्त। मिनु आन खोइल चिक्शा, जशा तूशा बास बाक्मा बाक्त।
- 22 मेकोपुकी ग्येरसीशा बाक्चो बाक्मानु, सहर डा मरिम्शो मुरपुकीमी मेको खिं कली दि दा रे पा पुम्दमे बाक्त। मिनु खिं डा लाप्चो कली खोकोल पना पन “इ खिंमी ओत्रब मुर कली लाडगा गुंडदो। गोपुकी मेको नु इप्नीकी” दे ग्रीमा बाक्त। उत्पत्ती १९:५-८
- 23 मिनु खाल्पा लाडगा पूशा, मेको आन कली “आं लोकबपुकी, एको मुर आं वारच बाक्ब। मोदेशो मरिम्शो मपन। एको मुर आं पौना बाक्ब। मेको कली मारेड यो मपन।
- 24 एकेर आं कन्ने तमी नु एको पौना आ कान्छी मीश बाक्ब। मेको आस कली लतीन। मिनु इन दाक्चो पन। तन्न एको मुर कली मारेड यो मपन” देमाक्त।
- 25 तन्न मेको मुरपुकीमी खाल्पा आ लोत्र काड मबिस्समा बाक्त। मोपतीके मेको पौनामी आ कान्छी मीश मेको आन बाक्तीक सोइक्ता बाक्त। मिनु मेकोपुकी मेको नाक्टो नेल्ल मेको मीश मुर नु इम्मा बाक्त। मेको कली का का पा बिग्रेमे बाक्त। मिनु सुनी सोइक्तमे बाक्त।
- 26 मिनु सुनी कना आ वोंइश बाक्चो खिं डा लाप्चोमी जाक्शा गोल्माक्त। मिनु नां मसोक्म सम्म मेकेरेन गोल्शा बाक्माक्त।
- 27 मिनु आ वोंइश बोक्शा, मुल गाक्चा, दे लाप्चो रोक्गानु, आ मीश कली लाप्चो आ पुंम गोल्शो तवा बाक्त।
- 28 मिनु “बोक्को, गाक्च” देमेनु, मारेड लोत्र मलेत्ता बाक्त। मिनु आ मीश कली गधा तारी वोइशशा खिं लदा बाक्त।
- 29 मिनु खिं जाकदीशशा, आ छूरी गुंडशा आ मीश कली क्योरशा, १२ टुका पा इस्राएल आ थर नेल्ल आन कली सोइक्ता बाक्त। १ सामुएल ११:७
- 30 मेको ताइब नेल्लेमी “गो इस्राएलीपुकीम इजीप्ट रागी रे पिशो रे मुलाक्त सम्म ओदेशो मदुशो नु मतशो बाक्तय। मोपतीके मुल मार पचा मिम्तीन। मिनु सल्ला पने” देमा बाक्त। होसे १०:९

## 20

बेन्यामीनी आन कली क्येक्क लेशशो

- 1 मिनु इस्राएली नेल्ले दान रे पा बेयर-शेबा सम्म गिलाद रागी परमप्रभु यावे आ डोंडती मिस्रामी गुम्मा बाक्त। यहोसु १८:२६; १ सामुएल ७:५

2 इस्राएली आन थर थर डा ठेयब मुरपुकी नु तरवार कुरब ४ लाख लडाइ पाइबपुकी परमप्रभु आ मुर आन गुन्तीकेमी जाकमा बाक्त।

3 मिनु बेन्यामीन आ थर डा मुरपुकीमी इस्राएली नेल्ले मिस्पामी बुक्तेकम, दे तुडक्तेमे बाक्त। मिनु इस्राएलीपुकीमी मेको लेवी कली “एको मरिम्शो गेय दोपा दुम्मे?” दे हिल्लो पामे बाक्त।

4 मिनु मेको साइक्चा पुंडसीशो मीश मुर आ वोंइश लेवीमी “गो नु आं मीश बास बाक्चा कली बेन्यामीन आ थर डा गिबा सहरमी लशो नस्कु। न्यायाधीस १९:१४; यहोसु १८:२८

5 मिनु मेको नाकदो गिबा सहरम बाक्ब मुरपुकीमी आं कली मरिम्शो पचा कली आं बाक्शो खिं पुन्ताकम। मिनु मेकोपुकीमी आं कली साइक्चा माल्तेकम। मिनु आं मीश कली कीशा लाइशशा, मेको नु मबेकम सम्म का का पा इप्तेकम।

6 मिनु गो आं बेक्शो मीश कली टुक्रा टुक्रा पा चेक्ता। मिनु इस्राएल आ थर नेल्ल आन रागीम सोइक्ताकड। मेकोपुकीमी इस्राएलमी मोदेशो ग्रोग्रा दिशो नु मरिम्शो पामे बाक्त, दे तुडक्पाइक्चा कली गो मो पाता। उत्पत्ती ३४:७

7 मुल गे इस्राएली नेल्ल लोत्र पने। मार पचा माल्बा, इन मिम्शो शोत्रडीन” देमाक्त।

8 मिनु मुर का दुम्शो खोदेशो पा मुर नेल्ले बोक्मा बाक्त। मिनु मेकोपुकीमी “गोपुकी सुइ यो आंम खिं लेशशा मलय। का सम्म यो लेशशा मलय।

9 मुल गोपुकीमी गिबा सहर डा मुर आन कली मार पचा देशा हना, गो फेन्टे आप्शा, गिबा सहर लशा, लडाइ तोय।

10 इस्राएल आ थर नेल्ल डा सहे का रे १० जना, हजार का रे सहे का जना, १० हजार रे हजार का जना मुर लाइशशा, लडाइ पाइब आन कली जचा थोत्रक क्यापब नु कुरब सेल्य। मिनु मोपा गो गिबा सहरम बाक्ब बेन्यामीन आ थर डा मुरपुकीमी इस्राएलम पशो ग्रोग्रा दिशो गेय आ पबंम क्येक्क लेत्तय” देमा बाक्त।

11 मोपा इस्राएली नेल्ले थुं का दुम्शा, मेको सहर नु लडाइ पचा कली खुम्साकमा बाक्त।

12 मिनु इस्राएल आ थर डा मुरपुकीमी बेन्यामीन आ थर डा मुर नेल्ल आन कली “इन दातेमी पशो ग्रोग्रा दिशो गेय, मार बाक्बा?

13 मोदेशो मरिम्शो पाइब आन कली आंइ गुइमी गेन। मिनु गो मेको आन कली साइशशा, इस्राएल रागी कली मोदेशो ग्रोग्रा दिशो रे रिम्शो सेलनीकी” दे लोत्र पथ, मुर सोइक्तेमे बाक्त। तन्न बेन्यामीन आ थर डा मुरपुकीमी आंम लोकब इस्राएली आन लोत्र मनेन्ने बाक्त। प्रस्थान २१:१२; गन्ती ३५:३३-३४

14 मिनु बेन्यामीन आ थर डा मुरपुकीमी इस्राएलीपुकी नु लडाइ पचा कली गिबामी खुम्समा बाक्त।

15 बेन्यामीन आ थर डा मुरपुकीमी रीब पा २६ हजार तरवार कुरशो लडाइ पाइब मेको सहर रे खुप्तमे बाक्त। मेको आन क्येडा लाक्शा गिबा सहर डा मुर यो बाक्मा बाक्त।

16 मेको आन दातेमी ७ सहे पेरा गुइ चलेब, हुरद आप्चा शुश जोक्ब मुर यो बाक्मा बाक्त। आन सहर नु गिबा रे यो जाक्मा बाक्त।

17 मिनु इस्राएलीपुकीमी चहिं बेन्यामीन आ थर डा मुरपुकी नु लडाइ पचा कली तरवार कुरशो ४ लाख लडाइ पाइब ठीक पामे बाक्त।

18 मिनु इस्राएलीपुकी रीब पा बेथेल लशा, परमप्रभु कली “आंइ इस्राएली आन दातेमी तेको थरमी नेल्ल क्येडा डोंइती बेन्यामीन आ थर डा मुर नु लडाइ पचा?” दे हिल्लो पामे बाक्त। मिनु परमप्रभु यावेमी “यहूदा आ थर डा मुरपुकीमी डोंइती लडाइ पचा मालनीम” देमाक्त। न्यायाधीस १:१-२; गन्ती २७:२१

19 मिनु इस्राएलीपुकी सुनी कना बोक्शा लशा, गिबा आ नेक्था ताम्बु कीशा बाक्मा बाक्त।

20 मेकोपुकीमी बेन्यामीन आ थर डा मुरपुकी नु लडाइ पचा कली गिबा सहर आ नेक्था ठीक पा बाक्मा बाक्त।

21 मेको नाक्ती बेन्यामीन आ थर डा मुरपुकी गिबा सहर रे लशा, लडाइ पा २२ हजार इस्राएली आन कली सदमे बाक्त।

22 तन्न इस्राएल डा मुरपुकी थुं बारपाइशशा, डोंइती नाक्ती खोदेशो पा लेशा लडाइ पचा कली ठीक पा बाक्मा बाक्त।

23 मिनु इस्राएलीपुकी लशा, नाकदो सम्म परमप्रभु यावे आ डोंइती डाक्मा बाक्त। मिनु मेकोपुकीमी परमप्रभु यावे कली “आंम लोकब बेन्यामीन आ थर डा मुर नु लेशा लडाइ तोचा देय मतोचा” दे हिल्लो पामे बाक्त। मिनु परमप्रभु यावेमी “मेकोपुकी नु लडाइ पचा कली लन” देमाक्त।

24 आ दीसा नाक्त यो मेकोपुकीमी बेन्यामीन आ थर डा मुरपुकी नु लडाइ पचा गोत्रमे बाक्त।

25 मिनु बेन्यामीन आ थर डा मुरपुकी मेकोपुकी नु लडाइ पचा कली गिबा रे गूमा बाक्त। मिनु मेकोपुकीमी लेशा १८ हजार इस्राएली आन कली सदमे बाक्त। उत्पत्ती ४९:२७

26 मिनु इस्राएली नेल्ले बेथेल सहर लमा बाक्त। मिनु मेकोपुकीमी नाकदो सम्म परमप्रभु यावे आ डोंइती डाक्शा माइजा बाक्मा बाक्त। मेकोपुकीमी परमप्रभु यावे कली चोशा चढेतीक नु दुशा बाक्चा आ पबंम चढेतीक चढेमे बाक्त। न्यायाधीस २०:१८; यहोसु १८:२१-२२

27 मिनु इस्राएलीपुकीमी परमप्रभु यावे कली “मार पचा” दे हिल्लो पामे बाक्त। मारदे हना मेना परमप्रभु आ कबल पशो सन्दोस मेकेर बाक्माक्त।

28 मिनु हारून आ तौ एलाजर आ तौ फिनेहासमी मेको कली कोत्रब बाक्माक्त। मिनु इस्राएलीपुकीमी परमप्रभु यावे कली “मुल गो आंइ लोकब बेन्यामीन आ थर डा मुरपुकी नु लडाइ पथ लेशा लचा देय मलचा” दे हिल्लो पामे बाक्त। मिनु परमप्रभु यावेमी “लन, गो दीसा मेको आन कली इन गुइमी गेनन्नी” देमाक्त। गन्ती २५:७; यहोसु २४:३३

29 मोपतीके इस्राएल डा मुरपुकीमी लडाइ पाइब आन कली गिबा आ एर ओंथ बाप्पदमे बाक्त। यहोसु ८:१२,१४

30 मेको सां नाक्ती इस्राएलीपुकी बेन्यामीन आ थर डा मुरपुकी नु लडाइ पथ लमा बाक्त। डोंइती पशो खोदेशो पा लडाइ पचा कली गिबा सहर आ डोंइती ठीक पा बाक्मा बाक्त।

31 मिनु बेन्यामीन आ थर डा मुरपुकी चहिं इस्राएली आन लडाइ पाइब नु लडाइ पचा कली लाडगा ग्रूमा बाक्त। इस्राएलीपुकी सहर रे प्रोक्खु पा मेको आन कली गिबा सहर रे डोन लदमे बाक्त। मिनु बेन्यामीन आ थर डा मुर डोंइती खोदेशो पा इस्राएली सदमे बाक्त। मेकोपुकी ठेयब लांमी बाक्मा बाक्त। लां का बेथेल गे लाइब नु अरु चहिं गिबा नु अर्को रू गे लाइब लां बाक्माक्त। मेकेर ३० जना इस्राएली कली सदमे बाक्त।

32 मिनु बेन्यामीन आ थर डा मुरपुकीमी “गो डोंइती खोदेशो पा ग्राना ग्रान बाक्नय” दे मिम्तमे बाक्त। तन्न इस्राएलीपुकीमी “गो प्रोक्खु पा मेको आन कली सहर रे डोन ठेयब लां सम्म गुंड्या माल्नीक” देमा बाक्त।

33 मोपा इस्राएली आन लडाइ पाइब आन ठेयब हुल आंम आन लडाइ पतीके प्रॉइशा बाल-तामार गे प्रोक्खु पांमे बाक्त। मिनु बाप्शा बाक्बपुकी चहिं गेबा आ पच्छिम रे रीब पा ग्रूमा बाक्त। गेबा गिबा सहर दुम्ने चाव्।

34 मिनु इस्राएल डा १० हजार योव्रसीशो लडाइ पाइबपुकीमी गिबा गे बारशा ठेयब लडाइ तोमे बाक्त। तन्न बेन्यामीन आ थर डा मुरपुकीमी “ठेयब श्येत जाक्चा चिक्शो बाक्त” दे मतुइक्तमे बाक्त।

35 मिनु परमप्रभु यावेमी बेन्यामीन आ थर डा मुर आन कली इस्राएली आन गुड रे खतम सेला बाक्त। मेको नाक्ती इस्राएलीपुकीमी २५ हजार सहे का बेन्यामीन आ थर डा मुर आन कली सदमे बाक्त।

36 मिनु बेन्यामीन आ थर डा मुरपुकीमी “मुल गो बुइतक” दे तुइक्तमे बाक्त। मारदे हना इस्राएलीपुकीमी बुशो देखु पा गिबा आ नेक्था बाप्शा बाक्ब आन कली थमा सुइश्शा, प्रोक्खु पांमे बाक्त।

37 मिनु मेको बाप्शा बाक्बपुकीमी रीब पा लडाइ पा गिबा सहर ओव्रमा बाक्त। मिनु मेकोपुकीमी मोपा ओव्रशा, गिबा डा मुर नेल्ल कली तरवारमी क्योरशा सदमे बाक्त।

38 इस्राएली नु मेको बाप्शा बाक्ब मुर आन सल्ला मार बाक्त देशा हना, मेकोपुकीमी सहर ओव्रशा, प्राशा, मी मुइश्शा सरीड गे कुन सोइक्चा माल्बाक्मा बाक्त।

39 मिनु प्रोक्खु पशो इस्राएल डा ठेयब हुल मेको तशा लेत्चा, दे सल्ला पशो बाक्मा बाक्त। मिनु डोंइती बेन्यामीन आ थर डा मुरपुकीमी इस्राएली आन कली ३० जना साइश्शा “गो थमा पा ग्रानीक” दे मिम्शो बाक्मा बाक्त।

40 मिनु सहर आ दाते रे कुन ग्रूशो तशा, बेन्यामीन आ थर डा मुरपुकीमी नोले हिश्शा कोव्रडमे बाक्त। मिनु सहर नेल्लेमी मी व्रशो तांमे बाक्त।

41 मिनु प्रोक्खु पाइब इस्राएलीपुकी फ्रा लेशशा, बेन्यामीन आ थर डा मुर आन कली लडाइ तोव्रमे बाक्त। मिनु बेन्यामीन आ थर डा मुरपुकी “ला, मुल बेक्साक्व” दे हिंमा बाक्त।

42 मोपतीके बेन्यामीन आ थर डा मुर मेके रे गोरशो रागी गे प्रोक्मा बाक्त। तन्न सहर रे जाक्शो इस्राएलीपुकीमी मेको आन कली दाते पा क्योरशा साइक्चा गोव्रमे बाक्त।

43 मेकोपुकीमी बेन्यामीन आ थर डा मुर नेल्ल कली मनाइक्थु, खेदा पांमे बाक्त। मिनु नोहा रे गिबा आ नां दापतीके सम्म मेको आन कली खेदा पा साइश्शा ग्रामा बाक्त।

44 मिनु १८ हजार बेन्यामीन आ थर डा मुरपुकी साइक्चा पुंडसमा बाक्त। मेको नेल्ल बोल्यो लडाइ पाइब बाक्मा बाक्त।

45 मिनु लेशशा गोरशो रागी रिम्मोन माइश्शो ठेयब फुल्लु गे प्रोक्मानु, इस्राएलीपुकीमी ठेयब लांमी ५ हजार खोड बेन्यामीन आ थर डा मुर आन कली सदमे बाक्त। मेकोपुकीमी अरु आन कली गिदोम सहर सम्म खेदा पा हजार निक्शी आन कली सदमे बाक्त।

46 मेको नाक्ती २५ हजार या कुरशो बेन्यामीन आ थर डा मुरपुकी लडाइमी साइक्चा पुंडसमा बाक्त।

47 तन्न ब्रॉइशा लीशो ६ सहे जना बेन्यामीन आ थर डा मुरपुकी गोरशो रागी डा रिम्मोन फुल्लु मेर प्रोक्शा, ४ महिना मेकेर बाक्मा बाक्त। न्यायाधीस २१:१३

48 मिनु इस्राएलीपुकीमी बेन्यामीन आ थर डा मुर नेल्ल आन कली लडाइ पा सदमे बाक्त। सहर कली क्रोइश्शा, मुर नु बस्तु भाव मारोइ मारोइ सदमे बाक्त। मेकोपुकीमी लीशो सहर नेल्ल आन कली यो मी सुइक्तमे बाक्त। उत्पती ३४:२५-२९; गन्ती ३५:३०-३४; व्यवस्था १३:१३-१९

## 21

लीशो बेन्यामीनी

1 मिनु डोंइती मिस्पामी जाक्शो इस्राएलीपुकीमी मार कसम जशो बाक्मा बाक्त देशा हना “गोपुकीमी इं तमी आन कली बेन्यामीन आ थर डा मुर आन कली ग्युंवे पा मगेय” दे कसम जशो बाक्मा बाक्त। न्यायाधीस २०:१

2 मिनु मुरपुकी बेथेल लशा, नाक्दो सम्म परमप्रभु आ डोंइती बाक्शा, शुश डाक्मा बाक्त। न्यायाधीस २०:१८,२३,२६

3 मेकोपुकीमी “परमप्रभु यावे, इस्राएली आन परमप्रभु, मारदे ओदेशो दुम्मे? मुलाक्त मारदे इस्राएली आन थर का जाम्मे?” देमा बाक्त।

4 मिनु आ दीसा मुरपुकी सुनी कना बोक्शा, मेकेर चढ़ेतीके का सेल्शा, चोशा चढ़ेतीक नु दुशा बाक्चा आ पर्वम चढ़ेतीक चढ़ेमे बाक्त।

5 मिनु नोले इस्राएलीपुकीमी “तेको थर परमप्रभु यावे आ डोंइती मजाक्मा?” दे हिल्लो पमुमा बाक्त। मारदे हना मिस्पामी मेकोपुकीमी “परमप्रभु यावे आ डोंइती सु मजाक्बा, मेको कली साइक्चा माल्ब” दे कसम जशो बाक्मा बाक्त।

6 मिनु आंम लोकब बेन्यामीन आ थर डा मुर आन पर्वम डाक्शा “मुलाक्ती इस्राएल डा थर का क्याम्साक्व।

7 लीशो वोंइश मुर आन कली मीश आल चाक्चा कली मार पय? गोपुकीमी परमप्रभु यावे आ डोंइती मेको आन कली आंड तमी ग्युंवे पा मगेनीक, दे कसम जशो बाक्नीकी” देमा बाक्त।

8 मिनु मेकोपुकीमी “परमप्रभु यावे आ डोंइती इस्राएली आन थर डा मिस्रामी मजाकब, सु बाक्मे?” दे हिल्लो पशा, याबेश-गिलाद रे सुइ यो गुम्तीक ताम्बुमी मजाकमा बाक्त, दे तुइक्तमे बाक्त।

9 मारदे हना मेकोपुकीमी मुर हिकगामेनु, याबेश-गिलाद डा सुइ मुर मजाकशो तुइक्तमे बाक्त।

10 मोपतीके मेको गुम्शो मुरपुकीमी १२ हजार लडाइ पाइब आन कली याबेश-गिलाद डा वोंइश मुर, मीश मुर, आल ब्रेप्च नेल्ल कली तरवारमी क्योरशा सतीन, दे हुकुम पा सोइक्तमे बाक्त।

11 मिनु “वोंइश मुर नु मेको नु इप्शो मीश मुर नेल्ल आन कली सतीन। तन्न कन्ने आन कली प्रोनीन” दे हुकुम पामे बाक्त। गन्ती ३१:१७-१८

12 मिनु सोइशशोपुकीमी याबेश-गिलादमी ४ सहे सुइ नु मइप्शो कन्ने मीश आल थिरशा, मेको आन कली कनान डा शिलोम बाक्शो ताम्बुमी चाक्गामे बाक्त।

13 मिनु गुम्शो इस्राएली नेल्लेमी रिम्मोनमी खुइशशा बाक्शो बेन्यामीन आ थर डा मुर आन कली “गारचा” दे ब्रेत्थ सोइक्मे बाक्त। न्यायाधीस २०:४७

14 मिनु बेन्यामीन आ थर डा मुरपुकी लेशशा जाक्मा बाक्त। मिनु मेकोपुकीमी मेको आन कली याबेश-गिलादम सेस प्रोंइशो मीश आल गेमे बाक्त। तन्न बेन्यामीन आ थर डा वोंइश मुर आन कली मेको मीश आल मजाकदीम्माक्त।

15 मिनु इस्राएलीपुकीमी बेन्यामीन आ थर आ परबम सुर्ता पस डा पस बाक्मा बाक्त। मारदे हना परमप्रभु यावेमी इस्राएल डा बेन्यामीन आ थर हेररा क्याम्शो बाक्माक्त।

16 मोपतीके मेको गुम्तीक डा खाल्पापुकीमी “मुल लीशो वोंइश मुर आन कली मीश गेचा कली मार पय? मारदे हना बेन्यामीन आ थर डा मीश मुर नेल्ल बेक्तेक्म” देमा बाक्त।

17 मिनु मुरपुकीमी “प्रोक्शा ब्रोंइशो बेन्यामीन आ थर डा मुर आन कली चच युइ दुम्या माल्नीम। मोदेशो मदुम्त हना, इस्राएल रे थर का ग्याम्शा लाइब।

18 तन्न गो मेको आन कली इ तमी गेने मचाप्नय” देमा बाक्त। मारदे हना इस्राएलीपुकीमी “सुम बेन्यामीन आ थर डा मुर कली आ तमी गेबा, मेको सराप राइब” दे कसम जशो बाक्मा बाक्त।

19 मोपतीके “नेनीन, परमप्रभु यावे आ परबम बर्सम काले दुम्ब चाड शिलोमी पाइनीम। शिलो बेथेल आ उत्तर गे बाक्ब। मिनु मेको बेथेल रे शेकेम लतीक ठेयब लां आ पूर्व नु लेबोना सहर आ दक्खिनम बाक्शो बाक्ब” देमा बाक्त। यहोसु १८:१

20 मिनु बेन्यामीन आ थर डा मुर आन कली “गे लशा अडगुर रूमी खुइशशा बाक्कीन।

21 मिनु शिलो डा मीश आलपुकी सिल पथ जाक्मानु, अडगुर रू रे फो फु गूशा, आंम मीश सेल्चा कली का का पा मीश आल कीडीन। मिनु बेन्यामीन आ थर डा रागी लन। प्रस्थान २१:१६; ब्यवस्था २४:७

22 मिनु मेको मीश आल आन आफ नु लोकबपुकी जाक्शा, आंड कली लोत्र पाम्तेक्म हना, गो मेको आन कली ‘बेन्यामीन आ थर डा मुर आन कली शिशी पन। मेको आन कली ग्युंवे पचा गेन। मारदे हना गो लडाइमी मेको मिश डा वोंइश मुर आन कली मीश आल ग्याइक्ने मचाप्क। मिनु गे इन तमी गेशा यो दोस मताइनीनी। मारदे हना गे मेको आन कली इन तमी आंमन मगेनी’ देनीकी” देमा बाक्त।

23 मिनु बेन्यामीन आ थर डा मुरपुकीमी मोदेशो पामे बाक्त। मेको सिल पाइब मीश आल का का आंम मीश सेल्चा कली कीडमे बाक्त। मेको आन रागी लेशशा आंम सहर कली लेंशा सेल्शा, मेकेर बाक्मा बाक्त।

24 मेना इस्राएली नेल्ल मेकेर रे लशा ब्राशा, आंम आंम थर नु आंम आंम खिं लमा बाक्त।

25 मेना इस्राएल रागीम पिप मबाक्माक्त। मोपतीके सु सुमी मार मार पचा दाक्मा मेको पाइक्बाक्मा बाक्त। न्यायाधीस १७:६



## रूथ

**ब्रेक्ब मुर:** साइ डा टाल्मुत माइश्शो किताबमी “एको किताब ब्रेक्ब सामुएल बाक्ब” दे ब्रेक्शो बाक्ब।

**गेना ब्रेक्शो:** दारूद आ सासन पची ना ब्रेक्शो बाक्ब। मेको आ सासन ११०४-१६५ बि. सी.म बाक्शो बाक्त।

**मार ब्रेक्शो:** एको किताब डा लोत्र परमप्रभु यावेमी आ वोंइश बेक्शो मीश मुर नु रोम रोइक्च आन कली शिशी पशो सांकछी बाक्ब। रूथ मोआबी दुम्शा यो परमप्रभु यावे कली थमा सुइक्ब दुम्त। मेकोमी बोआज नु ग्युंवे पा येसु आ किकी पिपी दुम्त। मती १:५

नाओमी नु आ खिं डा मुर

1 निसाफ पाइबपुकीमी इस्राएली आन कली हुकुम पची ना, अन्काल दुम्माक्त। मोपतीके यहूदा रागी डा बेथलेहेम रे मुर का, आ मीश नु आ तौ निकशी लाइश्शा, मोआबी आन रागीम बाक्थ लमाक्त। गन्ती २५:१-५; १सामुएल २२:३-४

2 मेको मुर आ नें एलीमेलेक बाक्माक्त। आ मीश आ नें नाओमी नु आ तौ निकशी आस नें का के माहलोन, का के किल्योन बाक्माक्त। मेकोपुकी यहूदा रागी डा बेथलेहेम एफ्राथाह सहरम बाक्शो बाक्मा बाक्त। मिनु मोआबी आन रागी जाक्दीश्शा, मेक उइ बाक्मा बाक्त। उत्पती ४८:७; मीका ५:१

3 मिनु नाओमी आ वोंइश एलीमेलेक बेक्शा, नाओमी नु आ तौ निकशी प्रोंइचा पुंडसमा बाक्त। ब्यवस्था ७:३; ब्यवस्था २३:४; नेहेम्याह १३:२३

4 मिनु मेको आ तौ निकशीमी मोआबी मीश आल चाक्से बाक्त। का आ नें ओरपा, का आ नें रूथ बाक्माक्त। मेकोपुकी मेकेर १० बर्स बाक्मा बाक्त।

5 मिनु माहलोन नु किल्योन निम्फा बेक्सा बाक्त। मोपा आ वोंइश नु आ तौ निम्फा बेक्शा, नाओमी ला लीमाक्त।

रूथ नु आ शिमी

6 मिनु नोले नाओमी आ चाइमी निकशी नु मोआब रे आ रागी लेत्या चिकता बाक्त। मारदे हना मोआब रागीम बाक्मेनु, नाओमीमी “परमप्रभु यावेम आ मुर आन कली मिम्शा, मेको आन कली जचा गेप्टु” देशो लोत्र नेना बाक्त। २राजा ८:३

7 मिनु मेको आ चाइमी निकशी नु आ बाक्तीके रे गाक्शा, यहूदा रागी लमा बाक्त।

8 मिनु नाओमीमी आ चाइमी निकशी आस कली “इस इस माइत लेतीसे। गे दोपा बेक्शो आन कली नु आं कली रिम्शो पसी, मोपा परमप्रभु यावेमी इस कली रिम्शो पवल।

9 परमप्रभु यावेमी इस कली अर्को वोंइश गेशा, इस थुं नाइश्शा बाक्चा गेवल” देमाक्त। मिनु आ चाइमी आस कली पुक्पु पाइश्शा, नेल्ल डाक्मा बाक्त। रूथ ३:१

10 मिनु आ चाइमी निकशीमी “गो थमा पा इन मुर आन बाक्तीके लाइनस्कु” देसा बाक्त।

11 मिनु नाओमीमी “आं चाइमी निकशी लेतीसे। मारदे गो नु लचा दाक्नीसी? मार, गो इस वोंइश दुम्पाइक्चा कली तौ थोने चान्नुडा डा?

12 आं चाइमी निकशी लेतीस। गो खाल्पी दुम्शा, ग्युंवे पने मचान्नुड। गो आल मिम्शा, मुलाक्दोन वोंइश नु बाक्शा, तौ थिती हना यो, मेको मकोल्म सम्म

13 रिम्शा बाक्ने चान्नीसी? मेको आस कली रिम्शा, अर्को ग्युंवे मपथु बाक्नीसी? मदुम्ब, आं चाइमी निकशी। मारदे हना इस क्येडा गो परमप्रभु यावे आ गुइ रे श्येत जाइब बाक्ती” देमाक्त।

14 मिनु मेकोपुकी लेंशा डाक्मा बाक्त। मेको नोले ओरपामी आ शिमी कली पुक्पु पाइश्शा वोइश्शा, आ मुर आन बाक्तीके लेम्माक्त। रूथ चहिं आ शिमी नुन बाक्माक्त।

15 मिनु नाओमीमी “नेनो, इ देउरानी आ मुर आन बाक्तीके नु आ देवी देवताम लेत्त। गे इ देउरानी आ पशो खोदेशो पावो” देमाक्त।

16 मिनु रूथमी “इन कली प्रोंइपाइश्शा, आं कली लेशशा, सोइक्चा कली डिपी मपाइय्यीनी। गे ते लाइनीनी, गो यो मेकेन लाइनुड। गे ते बाक्नीनी, गो यो मेकेन बाक्नुड। इन मुरपुकी आं मुर दुम्नीम। इन परमप्रभु आं परमप्रभु दुम्ब।

17 गे ते बेक्नीनी, गो यो मेकेन बेक्नुड। मिनु मेकेन थिम्चा पुंडसीनुड। गो मबेक्थु इन कली प्रोंइतन्नी हना, परमप्रभु यावेमी सजाइ गेयील” देमाक्त।

18 मिनु नाओमीमी रूथमी आ कली प्रोंइसीन मप्रोंइब, दे तुइश्शा, अरु मारेइ मदेंमाक्त।

19 मिनु मेको निम्फा गाक्शा, बेथलेहेम जाक्सा बाक्त। मिनु बेथलेहेम जाक्सानु, सहर डा मुर नेल्लेमी मेको आस पबर्म लोत्र पामे बाक्त। मिनु मीश मुरपुकीमी “मार, एको नाओमीन बाक्बा?” देमा बाक्त।

20 मिनु नाओमीमी “आं कली नाओमी मदेंनीन। मारा देनीन। मारदे हना नेल्ल क्येडा सक्ति पाइश्शो परमप्रभु यावेमी आं कली मरिम्शो पाइश्शा, श्येत जपाइक्ती। नाओमी देशो दारशो रुम्सीब, मारा चहिं कशो रुम्सीब।

21 गो मारेइ मारेइमी गाप्शा लशो नड। मुल परमप्रभु यावेमी श्येत्थ लेशशा चाक्ती। गे मारदे आं कली नाओमी देनीनी? नेल्ल सक्ति पाइश्शो परमप्रभु यावेमी आं कली दोस गेशा, मरिम्शो पाइक्ती” देमाक्त।

22 मोपा नाओमी नु आ चाइमी मोआबी रूथ मोआब रागी रे बेथलेहेम जाक्सा बाक्त। मेको बेथलेहेमम जाक्सानु, क्योत्रज मीशो बाक्माक्त।

## 2

रूथ सिला माल्दीशो

- 1 मिनु नाओमी आ वोंइश एलीमेलेक आ खिं डा शुश शोंप पाइशो नु ठेयब मुर का बाक्माक्त। मेको आ नें बोआज बाक्माक्त।
- 2 मिनु मोआबी रूथमी नाओमी कली “गो रूम लशा, सु सुम आं कली शिशी पाइनीमी, मेको आन नोनोले सिला बाला गुप्दी डा?” दैमाक्त। मिनु आ शिमीमी “दुम्ब, आं चाइमी लावो” दैमाक्त।
- 3 मिनु रूथ लशा, रिक्ब आन नोनोले सिला बाला गुबा बाक्त। आ जाकदीशो रू चहिं एलीमेलेक आ खिं डा मुर बोआज आ रू बाक्माक्त।
- 4 मेना बोआज बेथलेहेम रे जाक्माक्त। मिनु मेकोमी रिक्ब आन कली “परमप्रभु यावे गेपुकी नु बाक्ल” दैमाक्त। मिनु रिक्बपुकीमी यो “परमप्रभु यावेमी इन कली आसीक गेवल” दैमा बाक्त। रूथ १:२
- 5 मिनु बोआजमी आ गेय पाइब आन कली कोव्रब कली “एको मीश आल सुम?” दे हिल्लो पवा बाक्त।
- 6 मिनु मेको गेय पाइब आन कली कोव्रब मुरुमी “एको मोआब रागी रे नाओमी नु जाक्शो मोआबी मीश आल बाक्ब।
- 7 एकोमी आं कली ‘रिक्ब आन नोनोले मुठा आन नेक्था यो सिला गुप्चा गेयीनी’ दे पुंडतु। मिनु एको सुनी रे इच्छका ला नाइशशा, सिला गुप्स डा गुप्स बाक्त” दैमाक्त।
- 8 मिनु बोआजमी रूथ कली “नेनो, गे अरु आन रू सिला गुप्थ मलावो। आं गेय पाइब मीश मुर आन नेक्थान बाक्को।
- 9 मुरपुकीम ते ते रिक्नीमी, मेके मेके लावो। आं गेय पाइब वोंइश मुर आन कली ‘इ कली मथिचा’ दे माइक्तामी। तूत दाक्ते हना, वोंइश मुर आन चाक्शो गर डा ब्वाक्कु तूडो” दैमाक्त।
- 10 मिनु रूथ मेको आ डोंइती बाप्शा, मेको कली “गो अर्को रागी डा मुर नड, दे तुइशशा यो मारदे आं कली इश डा शिशी पाइय्नीनी?” दैमाक्त। ब्यवस्था २३:४-६
- 11 मिनु बोआजमी “इ वोंइश बेक्म नोले इ शिमी कली दोदेशो रिम्शो पवी, मेको नेल्ल मुरपुकीम आं कली माइक्तीमी। गे इ आम आफ, इ जर्मेशो रागी प्रोंइशा, मतुइशशो मुर आंइ बाक्तीके जाक्ते। रूथ १:१६, १७
- 12 परमप्रभु यावेमी इ कली रिम्शो पवल। परमप्रभु यावे, इस्राएली आन परमप्रभुम इ कली वारच पवल, दे मेको आ नेक्था जाक्ते। मेकोमी इ माल्शो नेल्ल गेवल” दैमाक्त। भजन संग्रह ३६:८
- 13 मिनु रूथमी “प्रभु, इन डोंइती शिशी ताता। गे आं थुं नाइक्पाइक्तीनी। गो इन गेय पाइब मबाक्ती हना यो, गे आं कली रिम्शो लोव्र पाइतीनी” दैमाक्त।
- 14 मिनु लाम्ज जची ना, बोआजमी मेको कली “एक पिवो। शोब्ले जावो। इ शोब्ले अडगुर शांबुम तेप्लो” दैमाक्त। मिनु रूथ रिक्ब मुर नु निस्से बाक्त। मिनु बोआजमी मेको कली कारशो क्योव्रज गेवा बाक्त। रूथमी रूथ्री सम्म जशा, हेंशा वोदा बाक्त।
- 15 मिनु मेको बोक्शा, सिला गुप्थ लमाक्त। बोआजमी आ गेय पाइब वोंइश मुर आन कली “मेको कली मुठा आन नेक्नेक्था यो सिला गुप्चा गेने, महुइक्तीन।
- 16 इच्छका बाला तोक्शा गेने। मिनु गुबानु, महुइक्तीन” दे माइक्मी बाक्त। लेवी १०:९-१०
- 17 मोपा रूथ नां रिक्चावा सम्म सिला गुम्ना गुम्न बाक्माक्त। मिनु तुबानु, एफाह का क्योव्रज दुम्माक्त। एफाह का २२ लिटर पुक्तीके खोदेशो बाक्ब।
- 18 मिनु मेको कुरशा, सहर जाक्माक्त। आ शिमीमी मिश डा क्योव्रज गुप्शा, चाक्शो तवा बाक्त। मिनु रूथमी आ हेंशो जचा थोव्रक यो गुंडशा, आ शिमी कली गेवा बाक्त।
- 19 मिनु आ शिमीमी “मुलाक्ती सिला गुप्थ ते लवे? इ कली शिशी पाइब मुर आसीक तवल” दैमाक्त। मिनु रूथमी ते सिला गुबा आ शिमी कली शेंदा बाक्त। “मुलाक्ती आं सिला गुप्शो रू डा होव्रप आ नें बोआज बाक्त” दैमाक्त।
- 20 मिनु नाओमीमी आ चाइमी कली “परमप्रभु यावेमी मेको कली आसीक गेवल। मिनु बेक्शो नु ब्रोंइशो मुर आन कली शिशी पचा मप्रोन। मेको मुर इस खाल डा बाक्ब” दैमाक्त। रूथ ४:४
- 21 मिनु मोआबी रूथमी “मेकोमी आं कली ‘क्योव्रज नेल्ल ओइने मथुमु सम्म आं मुरपुकी नु सिला गुप्थ जाक्को’ दैत” दैमाक्त।
- 22 मिनु नाओमीमी “आं चाइमी, मेको आ गेय पाइब मीश मुर नु गाक्चा रिम्शो बाक्ब। इ कली सुइमी अर्को आन रूमी रयेत मगेमेक्ल” दैमाक्त।
- 23 मोपतीके क्योव्रज नु चेरब रिक्ने मनुम्म सम्म, रूथ बोआज आ गेय पाइब मीश मुरपुकी नु सिला गुबा बाक्त। मिनु आ शिमी नु बाक्बाक्माक्त।

## 3

रूथमी नाओमी आ लोव्र टिशो

- 1 मिनु रूथ आ शिमी नाओमीमी “आं चाइमी, इ कली रिम्शो दुम्चा कली इ खिं पशा बाक्शो तचा दाक्नुड।
- 2 बोआज इ खाल डा मुर बाक्ब। गे मेको आ गेय पाइब मीश मुरपुकी नु बाक्ते। मुलाक्दो मेकोमी आ क्योव्रज तुप्तीकेम गेय पाइब।
- 3 मोपतीके गे चिक्शा, तेल खेक्शा, रिम्शो वा फेक्शा, क्योव्रज तुप्तीकेम लावो। बोआजम मजवा मतूडा सम्म मतपांडसो।

- 4 मिनु मेको इप्दीमेनु, आ इप्तीके कोव्रशा वोतो। मिनु नोले लशा, आ खोइल गे डा फेक्शो वा हुक्शा गोलो। मिनु गे मार पचा माल्नेवे, मेकोमी इ कली देब” देमाक्त।
- 5 मिनु रूथमी “इन देशो, नेल्ल पाडनुड” देमाक्त।
- 6 मिनु रूथ क्योव्रज तुप्तीके लशा, आ शिमी आ देशो खोदेशो पवा बाक्त।
- 7 बोआज जशा, तूशा ग्येरसे बाक्त। मिनु क्योव्रज पुक्तीके आ नोले इप्थ लमाक्त। मिनु रूथ बोआज आ मतुइक्का डा पा जाक्शा, आ खोइली गे डा वा हुक्शा, गोल्माक्त।
- 8 मिनु नाक्दो उइक्थ दुम्मेनु, बोआज सेंसे बाक्त। मिनु आ खोइल गे मीश मुर का गोल्लो तवा बाक्त।
- 9 मिनु बोआजमी “गे सु नवे?” दे हिल्लो पवा बाक्त। मिनु मेकोमी “गो इन वाइलीम रूथ नड। गे आंइ खाल डा मुर बाक्नीनी, इन वा फेक्तीनी” देमाक्त। इजीकीएल १६:८
- 10 मिनु बोआजमी “परमप्रभु यावेमी इ कली आसीक गेवल। डोंइती पशो क्येडा मुल डा इ पशो रिम्शो बाक्ब। गे क्येद थीब नु मधीब सुइ ठिटा वोंइश मुर आन नोले मखोदी। रूथ २:११
- 11 गे महिंथु बाक्को। इ माल्लो गो नेल्ल पाडनुड। गे रिम्शो मीश मुर बाक्नेवे। सहर डा मुर नेलेमी तुइश्शो बाक्नीम।
- 12 गो थमा पा इ खाल डा मुर बाक्नुड। तन्न आं क्येडा यो आं नेक्था डा अर्को मुर का बाक्ब।
- 13 मुलाक्दो एके बाक्को। दीसा सुनी मेको मुरुमी इ नेक्था डा मुर आ पचा माल्लो गेय पाइब, मपापु हना, परमप्रभु यावे वोंइशा बाक्शो खोदेशो पा, गो एको गेय पाडनुड। नां मसोव्रम सम्म इपो” देमाक्त।
- 14 मिनु रूथ नां मसोव्रम सम्म इम्माक्त। मिनु रिम्शो पा नां मसोव्रथु बोक्माक्त। मिनु बोआजमी “क्योव्रज तुप्तीकेमी मीश मुर का बाक्त, दे सुइम मतुइक्कमेकल।
- 15 इ कुप्नी दाइक्तो” देमाक्त। मिनु रूथमी दाइक्तानु, ६ सेआह क्योव्रज गेशा कुरपदा बाक्त। मिनु रूथ सहर लेम्माक्त। सेआह का ७ लिटर खोदेशो बाक्ब। मिनु ६ पुक्तीके ४२ लिटर कि १० पाथी खोदेशो बाक्ब।
- 16 मिनु आ शिमी आ बाक्तीके जाक्दीम्मेनु, आ शिमीमी “आं चाइमी, मार दुम्मे?” दे हिल्लो पवा बाक्त।
- 17 मिनु रूथमी बोआजमी पशो नेल्ल शेशा “मेकोमी आं कली ‘इ शिमी आ बाक्तीके श्येत्थ मलेतो’ दे आं कली ६ सेआह क्योव्रज गेती” देमाक्त। सेआह का ७ लिटर खोदेशो बाक्ब।
- 18 मिनु नाओमीमी “आं चाइमी, एको दोदेशो दुम्बा, मतुइक्ती सम्म इ थुं नाइश्शा बाक्को। मारदे हना मेकोमी मेको गेय मुलाक्तीन मथुमा सम्म आ थुं यो नाइक्का मताइब” देमाक्त।

## 4

बोआजम आ नेक्था डा मुर गुम्शो

- 1 मिनु बोआज सहर डा गारो डा ठेयब लाप्चोम लशा, मेकेर निश्शा बाक्माक्त। मिनु याम का नोले रूथ आ नेक्था डा मुर जाक्शो तशा, बोआजमी आ नें थिशा “एके पिशा, निस्सो” दे ब्रेता बाक्त। मिनु मेको निस्से बाक्त।
- 2 मिनु बोआजमी १० जना सहर डा खाल्पा आन कली यो तेक्शा “निस्सीने” देमाक्त। मिनु मेकोपुकी निस्समा बाक्त।
- 3 मिनु बोआजमी रूथ आ नेक्था डा मुर कली “मोआब रागी रे जाक्शो नाओमीमी इं लोक्ब एलीमलेक आ रू लेयचा चिक्शो बाक्ब।
- 4 गो इ कली मो देंड, देशो नड। एको सहर डा मुरपुकी नु खाल्पा आन डोंइती गे ग्याप्चा दाक्नेवे हना, ग्यापो। ग्याप्चा मदाक्नेवे हना, आं कली तुइक्पाइय्यी। मारदे हना इ नेक्था डा मुर गो नड” देमाक्त। मिनु मेको मुरुमी “गो ग्याप्नुड” देमाक्त। लेवी २५:२५; येरमीया ३२
- 5 मिनु बोआजमी “नाओमी रे मेको रू ग्यबी नाक्ती, गे बेक्शो मुर आ मीश मोआबी रूथ यो ताइनेवे। मेको बेक्शो मुर आ नें आ थेरशो रू नु लील, दे मो दुम्चा मालब” देमाक्त। ब्यवस्था २५:५-६
- 6 मिनु रूथ आ नेक्था डा मुरुमी “गो ग्याप्ता हना, आं आंम थेरशो रू मरिम्शो दुम्ब। आं पचा माल्लो गेय गेन पावो। गो ग्याप्ने मचाप्नुड” देमाक्त।
- 7 इस्राएल रागीमी डोंइती रू ग्याप्मेनु, लेयडमेनु, रू डा होवप फांडसीमानु, रू लेयबमी ग्याप्ब कली आ जुता पुइश्शा गेचा माल्बाक्माक्त। इस्राएलमी लोव फाइक्का मततीके आ पर्बम मोदेशो पचा माल्बाक्माक्त। ब्यवस्था २५:७-१०
- 8 मिनु रूथ आ नेक्था डा मुरुमी बोआज कली “गे ग्याम्सो” दे आ जुता पुइश्शा गेवा बाक्त।
- 9 मिनु बोआजमी खाल्पापुकी नु मेकेर बाक्ब मुर आन कली “गो एलीमलेक, माहलोन नु किल्योन आन थेरशो रू नेल्ले नाओमी रे ग्याप्ता। गे मुलाक्ती सांकछी दुम्तीनी।
- 10 माहलोन आ मीश, मोआबी रूथ यो बेक्शो मुर आ नें, आ थेरशो रू नु लील, दे चाक्ता। मोपा आ लोक्ब आन दातेमी नु आ जरमेशो बाक्तीकेम आ नें लील, दे मो पाता। गेपुकी मुलाक्ती सांकछी दुम्तीनी” देमाक्त।
- 11 मिनु ठेयब लाप्चोम बाक्ब नु खाल्पा नेल्लेमी “गो सांकछी दुम्तक। परमप्रभु यावेम एको इ खिंम जाक्शो मीश मुर कली राहेल नु लेआ खोदेशो सेलल। मेको निकशीमी इस्राएल आ खिं सेल्लो बाक्ताक्से। बेथलेहेम एफ्राथाहम इ नें ठेयब दुम्ल।
- 12 तामारम यहूदा रे थिशो पेरस आ खिं खोदेशो पा, परमप्रभु यावेमी एको ठिटी मीश मुर रे थिशो आलम इ खिं सेलल” देमा बाक्त। उत्पत्ती ३८:२९

बोआजम रूथ कली ग्युबे पशो

13 मिनु बोआजमी रूथ चाकशा, मेको नु बाक्माक्त। मिनु परमप्रभु यावे आ आसीकमी रूथ कोत्रज कुरशा, तौ का थिमाक्त।

14 मिनु मीश मुरपुकीमी नाओमी कली “परमप्रभु यावे टेयब बाक्ब। मेकोमी इ कली मुल इ खाल डा मुर नु वोइक्ते। परमप्रभुम इ कली चच का गेते। एको आ नें इस्राएलम टेयब दुम्ल।

15 एकोमी इ कली मुल नक ब्रोंडतीक गेशा, खालपी दुमेनु, इ कली थुल्ब। मारदे हना ७ जना तौ आन क्येडा इ कली दाक्ब चाइमीमी रिमशो पशो बाक्ब” देंमा बाक्त।

16 मिनु नाओमीमी मेको आल ताकशा, आ थुकुम वोइरशा, मेको कली कोत्रब दुम्माक्त।

17 मिनु आ नेक्था डा मीश मुरपुकीमी “नाओमी के चच का दुम्ल। गो मेको आ नें ओबेद वोइय्य” देंमुमा बाक्त। मेकोन येस्से आ आफ, दाऊद आ बाजे बाक्माक्त। मत्ती १:५-६; लूका २:३२

दाऊद आ किकी पिपी

18 पेरैसम हेसोन थिमाक्त।

19 हेसोनम राम थिमाक्त। राममी अम्मीनादाब थिमाक्त। १इतिहास २:९-१५

20 अम्मीनादाबमी नहशोन थिमाक्त। नहशोनमी साल्मोन थिमाक्त। गन्ती १:७

21 साल्मोनमी बोआज थिमाक्त। बोआजमी ओबेद थिमाक्त।

22 ओबेदमी येस्से थिमाक्त। येस्सेमी दाऊद थिमाक्त। १सामुएल १६:१, ११-१३

## १ सामुएल

**ब्रेक्ब मुर:** नेल्ल क्येडा डोंडती एको सामुएल किताब निक्शी, राजा किताब निक्शी नु इतिहास के किताब निक्शी नेल्ल ठेयब किताब का बाक्शो बाक्त। नोले ला सेपुतुआगीन्त माइशशोमी एको किताब कली ६ ओटा किताब सेल्शो बाक्त। सामुएल नु राजा आन पालाम इतिहास ब्रेक्ब मुर बाक्शो बाक्तेकम। मेना सामुएल आ ब्रेक्शो तामेनु, परमप्रभु यावे आ लोत्र पाइब नाथान, गाद, येरमीया कि एज्जाम एको किताब ब्रेक्शो दुम्ने चाप्ब। १इतिहास २९:२९ पिप दाऊद आ पशो मार मार बाक्मे, मेको डोंडती रे नोले सम्म नेल्ल परमप्रभु यावे आ लोत्र पाइब सामुएल, नाथान नु गाद आन ब्रेक्शो किताबम ब्रेक्शो बाक्ब।

**गेना ब्रेक्शो:** सामुएल किताब निक्शी ९७५ बि. सी. नेबुकदनेसरम यरूसलेम खतम सेला नोले डा लोत्र तेम्शा ब्रेक्शो बाक्ब, दे तुडसीब।

**मारदे ब्रेक्शो:** परमप्रभु यावेमी आ देशो पाइब। चढेब एली, पिप सावल नु इस्राएल डा मुरपुकीम परमप्रभु यावे आ लोत्र मटिशो बाक्तेकम। परमप्रभुमी चढेब एली आ पा डा सामुएल चढेब नु पिप सावल आ पा डा दाऊद कली पिप सेला बाक्त। परमप्रभु यावेमी आ देशो गेनायो मप्रोंडब।

डोंडती डा लोत्र

1 रामाथाइम-सोफीम रे जाक्शो मुर का बाक्माक्त। मेको एफ्राइम डा पहाड डा सुफ आ खिं डा बाक्माक्त। मेको आ नें एल्काना बाक्माक्त। एल्काना येरोहाम आ तौ, एलीहु आ चच बाक्माक्त। मेको आ शेर बाजे तोहु नु आ किकी बाजे जूफ माइशशो एफ्राइम थर डा बाक्माक्त। १इतिहास ६:१; १इतिहास १२:१९-२०

2 एल्काना के मीश निक्शी बाक्सा बाक्त। का आ नें हान्नाह नु अर्को आ नें पेनीनाह बाक्माक्त। पेनीनाह के आल बाक्मा बाक्त, तन्न हान्नाह के आल मबाक्माक्त। उत्पत्ती २९:३१

3 एल्काना बर्स बर्सम आ सहर रे शिलो लाइबाक्माक्त। मेकेर मुर नेल्ल आन परमप्रभु यावे कली ठेयब सेल्शा, चढेतीक चढेचा कली लाइबाक्माक्त। मिनु मेकेर चढेब एली आ तौ निक्शी होफनी नु फिनेहास बाक्सा बाक्त। मेको परमप्रभु यावे कली चढेब बाक्सा बाक्त। यहोसु १८:१

4 मिनु एल्कानाम चदेशो नाकती आ मीश पेनीनाह आ तमी तौ नेल्ल आन कली चदेशो थोत्रक गेबाक्माक्त।

5 मिनु हान्नाह कली निक्शी भाग खोड गेबाक्माक्त। मारदे हना एल्कानाम हान्नाह कली शुश दाक्बाक्माक्त। तन्न परमप्रभु यावेमी हान्नाह कली आल मथीब सेल्शो बाक्माक्त।

6 हान्नाह के आल मबाक्तीके आ सौतामी मेको कली आ थुं शुश खाइक्पाइशरा, तोक्शा लोत्र पाइक्बाक्माक्त। मारदे हना परमप्रभु यावेमी हान्नाह कली आल मथीब सेल्शो बाक्माक्त।

7 मोपा एल्कानामी बर्स बर्सम परमप्रभु यावे कली चढेथ लमेनु, आ सौतामी हान्नाह कली श्येत गेस डा गेस पतीके हान्नाह डाक्शा, मारेड मजवा मब्ववा बाक्त।

8 मिनु आ वोंडश एल्कानामी मेको कली “हान्नाह, गे मारदे डाक्स डा डाक्स बाक्डे? मारदे मजवी मब्ववी? गे मारदे इ थुं खाइक्पाइक्नेवे? मार, गो इ कली १० जना तौ आन क्येडा यो शुश दाक्ब मनडा डा?” देमाक्त।

हान्नाह आ प्रार्थना

9 मिनु काले शिलोमी जने तूने थुम्मे नोले हान्नाह बोक्माक्त। मिनु परमप्रभु यावे आ डोंडती लशा राम्माक्त। मेना चढेब एली परमप्रभु यावे आ ताम्बु आ ओब्रतीक नेक्था आ निल्तीकेम निशशो बाक्माक्त।

10 मिनु हान्नाह आ थुं शुश खाइशरा, डाक्शा, परमप्रभु यावे कली पुना बाक्त।

11 मिनु मेकोमी कबल पा “मुर नेल्ल आन परमप्रभु यावे, गे इन वाइलीम, आं श्येत तशा, आं कली मिम्शा, मप्रेंताकनी हना, आं कली तौ का गेयीनी। गो मेको कली मबेक्म सम्म परमप्रभु यावे, इन कली जिम्मा गेनुड। मेको आ चां गेनायो मप्रेक्सीब मेकोम गेनायो अडगुर शांबु मतूब” दे कबल पवा बाक्त। आमोस २:११; न्यायाधीस १३:५

12 मिनु मेकोमी परमप्रभु यावे आ डोंडती पुंडस डा पुंडस बाक्मेनु, एलीम मेको आ शोत्र हिक्शो कोवशा बाक्माक्त।

13 हान्नाहमी आ थुंम ला पुंडशो बाक्माक्त। मिनु आ शोत्र हिक्साक्व हना यो, आ सेंदा मपूमाक्त। मिनु एलीम मेको कली दुक्शो मीश मुर का बाक्त, दे मिम्ता बाक्त।

14 मिनु एलीमी मेको कली “गे गेना सम्म मोपा दुक्शा बाक्नेवे? अडगुर शांबु तूचा प्रोनो” दे मदा बाक्त।

15 मिनु हान्नाहमी “आं प्रभु, गो थुं खाइशशो मीश मुर का बाक्नुड। गो मारेड अडगुर शांबु मतूड। गो परमप्रभु यावे आ डोंडती आं थुं डा श्येत नेल्ल शोत्रता।

16 आं कली मरिम्शो मीश मुर मसुइय्यीनी। आं थुं खाइक्तीके नु शुश श्येत जतीके गो मुल सम्म पुंडस डा पुंडसन बाक्ती” देमाक्त।

17 मिनु एलीम “इ थुं नाइशशा लावो। इस्राएली आन परमप्रभुम इ पुंडशो लोत्र गेवल” देमाक्त।

18 मिनु हान्नाहमी “गो इन शिशी ताइब दुम्डल” देमाक्त। मिनु नोले मेको लशा, आ वोंडश नु जवा तूडा बाक्त। मिनु नोले लेंशा आ थुं मखाइक्माक्त।

सामुएल जरमेशो

19 मिनु मेकोपुकी आ दीसा सुनी कना बोक्शा, परमप्रभु यावे कली ठेयब सेल्शा, आन खिं रामाह लेम्मा बाकत। मिनु एल्काना आ मीश हान्नाह नु इम्माकत। मिनु परमप्रभु यावेमी हान्नाह कली मिम्ता बाकत। उत्पत्ती ३०:२२

20 मिनु नोले हान्नाहम कोल्लज कुरशा, तौ का थिमाकत। मेकोमी आ नें सामुएल वोदा बाकत। मारदे हना मेकोम “गो मेको परमप्रभु यावे नु पुंइशो नड” देमाकत।

हान्नाहमी आ कबल खाप्शो

21 परमप्रभु यावे कली बर्स बर्स डा चढ़ेतीक चढ़ेशा, आंम कबल खाप्चा कली एल्काना आ खिं डा मुर नु इर शिलो लमाकत।

22 तन्न हान्नाह चहिं मेकोपुकी नु मलमाकत। मेकोमी आ वोंइश कली “आलम दूध प्रोना नोले गो एको कली परमप्रभु यावे आ बाकतीक चोवदीनुड। मिनु एको गेना हना यो परमप्रभु यावे आ डोंइती मेक उड बाकब” देमाकत।

23 मिनु मेको आ वोंइश एल्कानामी “गे मार दाकती, मेकोन पावो। मेकोम दूध मप्रोना सम्म खिं उड बाकको। परमप्रभु यावेम आ पशो लोव्र कबल” देमाकत। मिनु हान्नाह आलम दूध मप्रोना सम्म खिं उड बाक्शा, थुल्शा, मेको कली कोल्पदा बाकत।

24 मिनु दूध प्रोना नोले मेको आल लाइशशा, शिलो लमाकत। मिनु मेकोमी आ नु बर्स सां डा ब्यफ का, एफाह का फस नु गर का अडगुर शांबु यो इर परमप्रभु यावे आ ताम्बुम लदा बाकत। मेना मेको आल आइक्चन बाक्माकत। एफाह का २२ लिटर बाकब। मेको ५ पाथी खोदेशो बाकब गन्ती १५:३,८-११

25 मिनु मेकोपुकीम मेको ब्यफ साइशशा, चढ़ेमे बाकत। मिनु मेको आल कली एली आ बाकतीक चाकदीत्मे बाकत।

26 मिनु हान्नाहमी मेको कली “आं प्रभु, गे ब्रोंइशा बाक्शो खोदेशो पा, गो थमा लोव्र पाइनुड। गो परमप्रभु यावे कली पुंइशा, इन डोंइती राप्शा, बाकब मीश मुर नड।

27 गो एको वोंइश आल आ पबंम पुंइशो नड। मिनु परमप्रभु यावेमी आं पुंइशो गेती।

28 मोपतीके गो एको कली परमप्रभु यावे कली जिम्मा गेनुड। एको ब्रोंइशा बाक्म सम्म परमप्रभु यावे कली जिम्मा गेसीशो बाकब” देमाकत। मिनु मेकोपुकी यो परमप्रभु यावे आ डोंइती बाप्शा, मेको कली ठेयब सेल्मे बाकत। १सामुएल १:११

## 2

हान्नाहम आ प्रार्थना

1 हान्नाहमी “आं थुं परमप्रभु यावे नु ग्येरसीब। गो परमप्रभु यावे आ पबंम आं पिया पोक्नुड। गो आं जोरी सत्रु आन कली ग्राती। गेम आं कली प्रोंइतीके गो ग्येरसाकयी। लूका १:४६-५५

2 परमप्रभु यावे खोदेशो अरु सुइ मबाक्नीम। इन क्येडा लाक्शो अर्को सुइ मबाक्नीम। आंइ परमप्रभु, सेरथे फुल्लु खोदेशो अरु सुइ मबाक्नीम। ब्यवस्था ४:३५; उत्पत्ती ४९:२४; ब्यवस्था ३२:१८; भजन संग्रह १८:२२

3 ठेयब लेशो लोव्र नु मरिम्शो लोव्र पचा प्रोनीन। मारदे हना परमप्रभु यावे नेल्ल जोक्ब तुइक्ब बाक्ब। मेकोमी मुर आन पतीके नु लोव्र नेल्ले नाक्ब।

4 सक्ति पाइशशो मुर आन लिब्रा जिक्शो बाक्ब। तन्न सक्ति मपाइशशो बोल्यो दुम्शो बाक्नीम।

5 डोंइती मारेड मारेडम गाप्शो मुर यो मुल जचा आ पबंम गेय पाइनीम। तन्न शोव्रलु बेक्शोपुकी रूशो बाक्नीम। आल मथीब मीश मुरुमी ७ जना आल थिपुतु। तन्न शुश आल थीब ममा आ थुं बेक्ब।

6 परमप्रभु यावे बेक्पाइक्ब नु सेंपाइक्ब बाक्ब। मेकोमी मुर आन कली बेक्शो मुर आन बाकतीके सोइक्ब। मिनु मेकोमी सेंपाइक्बे यो चाप्ब। ब्यवस्था ३२:३९; भजन संग्रह ७१:२०

7 परमप्रभु यावे पुडग नु शोंप पाइशशो सेल्ब बाक्ब। मेकोमी आइक्च नु ठेयब यो सेल्ब। भजन संग्रह ७५:८

8 मेकोमी मारेड मथीब आन कली फुरक रे पोक्ब। प्रुडग आन कली धुरेन रे पोक्ब। मिनु मेको आन कली पिप आन तौ नु निप्पाइक्ब। मेको ठेयब मुर आन दातेम बाक्चा नु मान पाइक्तीक ताइनीम। मारदे हना रागी आ थाम परमप्रभु यावे केन बाक्नीम। मेकोम मेको तार रागी वोइक्तु। भजन संग्रह ११३:७-८

9 मेकोमी थमा सुइक्चा पुंइसीब मुर आन कली कोव्रब। तन्न आ अरेशो लोव्र मटीब आन कली छिडछिडमी खतम पोक्पाइक्ब। मारदे हना मुरपुकीम आन सक्तिमी मग्रानीम। भजन संग्रह ३३:१६

10 परमप्रभु यावे आ पबंम जोरी सत्रु साइक्चा पुंइसीनीम। नेल्ल क्येडा ठेयबमी मेको आन पबंम सरीड रे बुंबु पपाइक्ब। मिनु परमप्रभु यावेमी रागी नेल्ल आन कली निसाफ पाइब। मेकोम आ पिप कली सक्ति गेब। मिनु आ तेल लुक्शो आ पिया पोक्ब” देमाकत।

11 मिनु नोले एल्काना आ खिं डा मुरपुकी नु रामाह लेम्माकत। मेको वोंइश आल चहिं परमप्रभु यावे कली चढ़ेब एली आ डोंइती बाक्शा, परमप्रभु यावे आ गेय पवा बाकत।

एली आ तौ निक्शीम मरिम्शो पशो

12 एली आ तौ निम्फा हिंचा डा मरिम्शो पाइब बाक्सा बाकत। मेको निक्शी परमप्रभु यावे कली मान पा महिब बाक्सा बाकत।

13 मेको चढ़ेब निक्शीमी चढ़ेथ जाक्ब मुर आन कली मार पाइक्बाक्ताक्स देंशा हना, मुर आन चाक्शो चढ़ेशो श्ये क्येशा बुइक्तानु, मेको आस गेय पाइब कली ठेयब तूतीक सां पाइशशो काटा कुरपाइशशा, लेवी ३:२-५; लेवी ७:११-१७, २८-३४

14 कराड, ताप्के, दिउरे किं ठेयब बोसुम लोप्शो श्ये तूपाइशशा, दोशो गूमे मोशो आंम के सेल्बाक्सा बाकत। मोपा शिलोम चढ़ेथ जाक्शो इस्पाएली नेल्ल आन कली मो पाइक्बाक्सा बाकत।

15 मेको निक्शीमी नेल्ल क्येडा मरिम्शो मार पाडकबाकसा बाक्त देशा हना, मेको बोंसो चोशा चढेचा क्येडा डोंइती आस गेय पाडबपुकी सोइशशा “चढेब कली बाल्या कली श्ये गेवो। लोप्शो श्ये मताकब। क्येख ला ताकब” देपाइकबाकसा बाक्त।

16 मिनु मेको मुरुमी “ममाड, डोंइती बोंसो चोचा गेयी। मिनु नोले इ दाकशो लाइकने चापेनेवे” देंमेनु, मेको आस गेय पाडबमी “ममाड, मुलन गेयी। मगेपतीवी हना, गो रोइशशा लाइकनुड” देंबाकमाक्त।

17 मिनु मेको टिटा आस मरिम्शो पशो परमप्रभु यावे आ डोंइती ठेयब पाप दुम्माक्त। मारदे हना मुरपुकीमी परमप्रभु यावे कली चढेशो आइकच मिम्तसे बाक्त।

सामुएल नु आ आम आफ

18 मिनु सामुएल परमप्रभु यावे आ डोंइती गेय पाडकबाकमाक्त। मेको वोंइश आल सुती वा के कुचु तार चढेब आ फेकतीके फेकशा, गेय पाडबाकमाक्त। १सामुएल २२:१८; प्रस्थान २८:४-६हिबू लोवमी एफोद देशो कुचु आ फेकतीक बाक्त।

19 मिनु आ ममाम मेको कली बर्स बर्सम आइकच फेकतीक वा फेरबाकमाक्त। मिनु आ वोंइश नु बर्स बर्स डा क्योरशा चढेदीमेनु, मेको वा लाइशशा गेबाकमाक्त।

20 मिनु एलीमी एल्काना नु आ मीश आस कली आसीक गेशा “एको आल आ पा डा परमप्रभु यावेमी एको मीश रे इन कली आलपुकी गेवल। मारदे हना एको परमप्रभु यावे कली गेपतीवी” देंबाकमाक्त। मिनु नोले मेको आन खिं लेप्बाकमा बाक्त।

21 मिनु परमप्रभु यावेमी हान्नाह कली आसीक गेवानु, मेको आल थीब दुम्शा, तौ सां नु तमी निक्शी थिमाक्त। मिनु सामुएल चहिं परमप्रभु यावे आ डोंइती कोलना कोलन लमाक्त। लूका १:८०

एली आ तौ निक्शीम मटिशो

22 मिनु एली थम खूशो दुम्माक्त। आ तौ निक्शीमी इस्राएली आन कली दोदेशो पाम्से, मेको नेल्ल नेना बाक्त। मेकोमी आ तौ शुम्तीक ताम्बु आ डोंइती गेय पाडब मीश मुरपुकी नु इप्शो, यो नेना बाक्त। प्रस्थान ३८:८

23 मोपतीके मेकोमी मेको आस कली “गे निक्शीमी मारदे ओदेशो गेय पसी? गेमी ओदेशो मरिम्शो गेय पाइतीसी देशो लोव्र गो मुर नेल्ल आन शोव्र रे नेता।

24 आं तौ निक्शी ओदेशो गेय पचा प्रोनीस। मारदे हना, परमप्रभु यावे आ मुर आन दातेमी एको लोव्र ब्रशो नेता। एको थम मरिम्शो बाकब। गे परमप्रभु यावे आ मुर आन कली पाप पपाइकनीसी।

25 मुरुमी मुर आन कली पाप पाप्तु हना, परमप्रभुम निसाफ पाडब। तन्न मुरुमी परमप्रभु यावे कली पाप पाप्तु हना, सुम गारपाइकने चाप्बा डा” देंमाक्त। मेको लोव्र नेल्ल नेताक्स हना यो, मेको निक्शीमी आस आफ आ लोव्र मटिम्से बाक्त। मारदे हना परमप्रभु यावेम मेको निक्शी आस कली साइकचा माल्शो बाकमाक्त। अय्युब १६:२०-२१

परमप्रभुम एली आ पर्वम लोव्र घो

26 मिनु सामुएल कोलना कोलन लमेनु, परमप्रभु यावे नु मुर आन डोंइती दाकशो दुम्माक्त। लूका २:५२

27 मिनु परमप्रभु आ लोव्र पाडब का जाकशा, एली कली “परमप्रभु यावेमी इन कली लोव्र का पाडब। मेको मार बाकब देशा हना, गो इन आफ नु आ खिं डा मुर इजीप्त फाराओ आ रागीमी बाकमानु, गो मतपांइसीडा डा?

28 गो इस्राएल डा थर नेल्ल रे मेको कली आं कली चढेब दुम्पाइकचा कली योव्रता। आं कली चढेतीकेम चढेचा, आं कली धूप चोचा, नु आं डोंइती निसाफ पतीक ऊरीम नु थुम्मीम बाकशो झोला फेकचा कली योव्रता। इस्राएल डा मीम चढेशो नेल्ल इ आफ आ खिं डा मुर आन कली गेता। ब्यवस्था १८:१; गन्ती १८:८-२०

29 मारदे गे आं देशो चढेशो नु जचा थोव्रक चढेशो नेल्ल आइकच मिम्ती? मिनु आं क्येडा गे इ तौ आस कली ठेयब सेल्लेवे। आं मुर, इस्राएली आन चढेशो रे गे नेल्ल क्येडा रिम्शो मारदे आंम कली वोंइसीशा, इ तौ आस कली ठेयब सेल्लेवे?” देंमाक्त।

30 मोपतीके परमप्रभु यावे, इस्राएली आन परमप्रभुमी “इ किकी पिपी आन खिं डा मुर नेल्ल गेना हना यो आं डोंइती चढेब दुम्मीम, गो कसम जशो नड” देशो बाक्त। तन्न परमप्रभु यावेमी “मुल ओदेशो म्दुम्ब। मारदे हना आं कली ठेयब सेल्ल आन कली गो ठेयब सेल्लुड। आं कली आइकच सेल्ल नेल्ल आइकच सेल्ला पुंडसीनीम। प्रस्थान २८:१; मलाकी ३:१६-१८

31 मुल गे नु इ किकी पिपी आन खिं डा मुर आन सक्ति नेल्ल साम्नुड। इ खिं डा मुर सुइ खूशो दुम्चा मताइनीम। १ राजा २:२७

32 गे आं मुर इस्राएली आन कली गेशो रिम्शो थोव्रक तशा गेहे पाइनीनी। मिनु इ खिमी सुइ खूशो सम्म मलीनीम।

33 तन्न गो इ तौ चच युड आन दाते डा आं कली चढेतीकेम गेय पाडब, का कली मसाइकनुड। मेको शुश डाकशा, आ थुं लुक्च लाइकब। मारदे हना मेकोमी आ वोंइश मुर नेल्ल बेकची मजाकथु बेकशो ताइब।

34 मिनु इ तौ निक्शी होपनी नु फिनेहास काबुमीन बेकनीस। मेको आं देशो लोव्र थमा बाकब, देशो चिन्ड का बाकब। १सामुएल ४:११

35 गो आं कली थमा सुइकब चढेब का पोक्नुड। मेकोम आं कली टिशा, आं थुंम मिम्शो पाडब। गो मेको कली गेना हना यो लीब खिं का सेल्लुड। मिनु मेकोमी आं तेल लुक्शो आ डोंइती गेना हना यो गेय पाडब। १ राजा २:३५; हिबू ५:४-६

36 मिनु इ खिं डा ब्रोंइशा लीशोपुकी मेको आ डोंइती बाप्शा “दुक्रा का चांदी, शोब्ले का तचा कली, आं कली चढेतीक गेय गेयीनी। मिनु गो नु जचा थोव्रक बाकल” देंनीम” दे परमप्रभु यावेमी देत।

## 3

परमप्रभुम सामुएल कली ब्रेशो

- 1 मिनू सामुएल एली आ देशो टिशा, परमप्रभु यावे आ गेय पना पन बाक्माक्त। मेना परमप्रभु यावे आ लोत्र शुश मनेसीबाक्माक्त। मिनू ततीक यो शुश मतांडसीबाक्माक्त। आमोस ८:११
- 2 मिनू काबु नाकदो एली आ इप्तीकेमी गोल्शा बाक्माक्त। आ मिक्च ब्राबा दुग्शा, रिग्शो पा तने मचाचब दुग्शो बाक्माक्त।
- 3 मिनू सामुएल परमप्रभु यावे आ ताम्बु डा कबल पशो सन्दोस आ नेक्था इग्शो बाक्माक्त। मेना परमप्रभु आ बत्ती मकाग्शो बाक्माक्त। गन्ती ७:८९
- 4 मिनू परमप्रभु यावेमी “सामुएल, सामुएल” दे ब्रेत्ता बाक्त। मिनू सामुएलम “गो एक बाक्ती” देमाक्त।
- 5 मिनू एली आ बाक्तीकेम दोरशा लशा “गे आं कली ब्रेत्ताकयीनी। गो एक बाक्ती” देमाक्त। मिनू एलीमी “गो इ कली मब्रेत्तन, लावो। इपो” दे मदा बाक्त। मिनू मेको लशा इग्माक्त।
- 6 मिनू परमप्रभु यावेम लेंशा “सामुएल” दे ब्रेग्माक्त। मिनू मेको बोक्शा एली आ बाक्तीक लमाक्त। मिनू मेकोमी “गो एक बाक्ती। गे आं कली ब्रेत्ताकयीनी” देमाक्त। मिनू एलीमी “आं तौ, गो इ कली मब्रेत्तन। लावो। इपो” दे मदा बाक्त।
- 7 मेना सम्म सामुएलम परमप्रभु यावे कली मतुइग्शो बाक्माक्त। परमप्रभु यावे आ लोत्र मेको कली मतुइक्पाइग्शो बाक्माक्त।
- 8 मिनू परमप्रभु यावेमी मेको कली सां खेयप ब्रेग्माक्त। मिनू मेको लेंशा एली आ बाक्तीक लशा “गो एक बाक्ती। गे आं कली ब्रेत्ताकयीनी” देमाक्त। मेना एलीमी “परमप्रभु यावेम एको आल कली ब्रेत्ता बाक्त” दे तुइक्ता बाक्त।
- 9 मिनू मेकोमी सामुएल कली “लशा, गोल्शा, बाक्को। मेकोम लेंशा ब्रेत्ताक्व हना ‘परमप्रभु यावे, लोत्र पने। इन गेय पाइबम नेंशो बाक्नुड’ देनो” दे मदा बाक्त। मिनू सामुएल लशा, आ इप्तीकेम गोल्शा, बाक्माक्त।
- 10 मिनू परमप्रभु यावे मेकेर जाक्शा, राग्शा, डोंइती डा खोदेशो पा “सामुएल, सामुएल” दे ब्रेग्माक्त। मिनू सामुएलमी “देनीन, इन गेय पाइबम नेंशो बाक्नुड” देमाक्त।
- 11 मिनू परमप्रभु यावेम सामुएल कली “गो इस्राएलमी रीब पा गेय का पाइनुड। मेको आ परबम नेंबपुकी शुश हिनीम।
- 12 मेको नाक्ती गो एली नु आ खिं डा मुर आन कली आं देशो नेल्ल पाइनुड।
- 13 मारदे हना गो मेको कली ‘गो इ खिं डा मुर आन कली गेना हना यो सजाइ गेनुड। मारदे हना एलीमी आ तौ निक्शीमी मरिग्शो पशो तुइग्शा यो, मेको आस कली मतेक्ग। १सामुएल २:२७-३६
- 14 मोपतीके गो एली आ खिं डा मुर आन परबम कसम जशा, एली आ खिं डा मुर आन मरिग्शो पशो मक्याम्सीब। मेको मारेइ मारेइ चदेशोमी मक्याम्सीब’ देशो बाक्नुड” देमाक्त।
- 15 मिनू सामुएल नां सोव्रम सम्म इग्माक्त। मिनू बोक्शा परमप्रभु यावे आ खिं डा लाप्गो रोकगा बाक्त। मिनू मेकोम परमप्रभु यावे आ देशो नु कोंइशो लोत्र एली कली शेंचा हिंमाक्त।
- 16 मिनू एलीम सामुएल कली ब्रेशशा “ए आं तौ, सामुएल” देमाक्त। मिनू मेकोमी “गो एक बाक्ती” देमाक्त।
- 17 मिनू एलीमी “मेकोमी इ कली मार देमे? आं कली मेको नेल्ल मखुइक्थु, देनो। मेकोम इ कली देशो लोत्र का सम्म यो खुइक्ताक्वी हना, परमप्रभुम इ कली थम ठेयब सजाइ गेवल” देमाक्त।
- 18 मिनू सामुएलम परमप्रभु यावे आ देशो लोत्र नेल्ल शेंदा बाक्त। तेकोइ लोत्र मखुइक्ता बाक्त। मिनू एलीमी “मेको परमप्रभु यावे बाक्व। मेकोम आ दाक्शो पवल” देमाक्त। २सामुएल १५:२६
- 19 मिनू सामुएल कोल्ना कोल्न लमाक्त। परमप्रभु यावे मेको नु बाक्माक्त। मिनू मेकोम आ लोत्र नेल्ल खबा बाक्त।
- 20 मिनू दान रे बेयर-शेबा सम्म डा इस्राएली नेल्लेमी सामुएल परमप्रभु यावे आ लोत्र पाइब दुग्माक्त, दे तुइक्तमे बाक्त।
- 21 मिनू परमप्रभु यावेमी शिलोम आंम कली तुइक्पाइसीन सीन बाक्माक्त। मारदे हना परमप्रभु यावेमी सामुएल कली आ लोत्र नेंपदा बाक्त।

## 4

पलिस्तीपुकीमी लडाइ पशो

- 1 मिनू सामुएल आ लोत्र नेल्ल इस्राएलम ब्रमाक्त। मेना पलिस्ती इस्राएली नु लडाइ पचा कली लशो बाक्मा बाक्त। इस्राएलीपुकीम एबेन-एजेरमी आन बाक्तीक सेल्मे बाक्त। मिनू पलिस्तीपुकीम अफेकमी आन बाक्तीक सेल्मे बाक्त। यहोसु १५:५३
- 2 मिनू पलिस्तीपुकी इस्राएली आन डोंइती लडाइ पचा कली गारशा, बाक्मा बाक्त। मिनू लडाइ ठेयब दुग्शा, इस्राएलीपुकी ब्रमा बाक्त। पलिस्तीपुकीम मेकेर ४ हजार खोइ इस्राएली सदमे बाक्त।
- 3 मिनू लडाइ पाइब आन बाक्तीके लेग्शा जाक्मानु, इस्राएली आन खाल्पापुकीमी “मुलाक्ती मारदे परमप्रभु यावेमी आंइ कली पलिस्ती नु ब्रुपदा? गो शिलो रे परमप्रभु यावे आ कबल पशो सन्दोस एक चाक्व। मो पाइतय हना परमप्रभु यावे गोपुकी नु बाक्शा, इं जोरी सत्रु रे प्रोंइब” देमा बाक्त। प्रस्थान २५:१०; यहोसु ३:६,११
- 4 मोपतीके मुरपुकीमी शिलोम मुर सोइक्तमे बाक्त। मिनू करूब आस दातेम बाक्ब मुर नेल्ल आन परमप्रभु यावे आ कबल पशो सन्दोस चाक्गमे बाक्त। मिनू एली आ तौ होफनी नु फिनेहास परमप्रभु आ कबल पशो सन्दोस नु बाक्सा बाक्त। प्रस्थान २५:२२; २सामुएल ६:२



5 मिनू परमप्रभु यावे आ कबल पशो सन्दोस लडाइ पाइब आन बाक्तीकेम चाक्मेनु, इस्राएली नेल्ल ठेयब सेंदा पा ग्येरशा रेयके पामे बाक्त। मिनू मेको आन रेयके पशो सेंदामी रागी नेल्ल मुरदा बाक्त।

6 मिनू पलिस्तीपुकीम मेको ग्येरशा सेंदा नेंशा “हिबू आन बाक्तीकेम मार दुम्मे? मार रेयके नेंसे?” दे हिल्लो पमुमा बाक्त। मिनू परमप्रभु यावे आ कबल पशो सन्दोस आन बाक्तीकेमी चाक्तेकम, दे तुइकतमे बाक्त।

7 मिनू पलिस्तीपुकी हिंशा “परमप्रभु मेको आन बाक्तीकेम जाक्त।

8 आबी, मूल गो बेकनय। मो देशो डोंइती गोनायो मदुम्शो बाक्त” देमा बाक्त। “आबी, सुम आंड कली मेको शुश सक्ति पाइश्शो परमप्रभु रे प्रोंइबा? मेकोम इजीप्ती आन कली श्येत गेशा गोरशो रागीम बेक्तीक रोइ पपाइश्शा साइश्शो बाक्त।

9 गे पलिस्तीपुकी महिनीन। बोल्यो दुमीन। मेकोपुकी दोपा इं वाइल दुम्मा, मोपा गेपुकी यो हिबू आन वाइल मदुम्मा डा पा, इन थुं लुकच मलपाइक्थु, लडाइ पने। बोल्यो दुम्शा, लडाइ पने” देमा बाक्त। न्यायाधीस १३:१

10 मिनू पलिस्तीपुकीम लडाइ पामे बाक्त। मिनू इस्राएलीपुकी बुशा, आन आन ताम्बुम प्रोकमा बाक्त। मेको लडाइम शुश मुर साइक्चा पुंडसमा बाक्त। खोइलीम गाकब ३० हजार लडाइ पाइबपुकी बेक्मा बाक्त।

11 मिनू परमप्रभु आ कबल पशो सन्दोस रोइश्शा, एली आ तौ होफनी नु फिनेहास आस कली यो सदमे बाक्त। १सामुएल २:३४

एली बेक्शो

12 मिनू मेको नाक्ती बेन्यामीन आ थर डा मुर का लडाइ पतीक रे प्रोकशा, खाक्शो वा फेक्सीशा, आ पियाम फुरक फुंडसीशा, दोरशा शिलोम जाक्माक्त।

13 मेको जाक्मेनु, एली आ नित्तीकेम निश्शा, लां कोत्रशा बाक्शो बाक्माक्त। मारदे हना परमप्रभु आ कबल पशो सन्दोस आ पर्वम थाप्पा सुरता पवा बाक्त। मिनू मेको मुर दोरशा, जाक्शा सहर डा मुर नेल्ल आन कली मार दुम्मे, मेको नेल्ल शेंदा बाक्त। मिनू सहर डा मुर नेल्ल ग्रीशा वाइ ब्रेम्मा बाक्त।

14 मिनू एलीम आन वाइ ब्रेश्शो नेंशा “एको मार रेयके बाक्मे” देमाक्त। मेको मुर दोरोर पा दोरशा, एली आ बाक्तीक जाक्शा, लोत्र नेल्ल शेंदा बाक्त।

15 मेना एली ९८ बर्स दुम्शो बाक्माक्त। मिनू मिक्च मताइब दुम्शो बाक्माक्त। १सामुएल ३:२

16 मिनू मेको मुरुम मेको कली “गो लडाइ रे नक जाक्ती। गो लडाइ रे प्रोकशा जाक्ती” देमाक्त। मिनू एलीम “ए, आं तौ, मार दुम्मे” दे हिल्लो पवा बाक्त।

17 मिनू मेको दोरशा जाक्बमी “इस्राएली पलिस्ती आन क्येडा प्रोक्तेकम। लडाइ पाइब शुश साइक्चा पुंडसाकम। इन तौ होफनी नु फिनेहास निम्फा साइक्चा पुंडसाकस। मिनू परमप्रभु आ कबल पशो सन्दोस यो रोइक्ताकम” देमाक्त।

18 मिनू मेकोमी परमप्रभु आ कबल पशो सन्दोस आ पर्वम लोत्र पवानु, एली ठेयब लाप्चो आ नेक्था बाक्शो आ नित्तीक रे नोले गे गोल्माक्त। मिनू आ शुर जिक्शा, मेको बेक्माक्त। मारदे हना मेको खूशो नु ठेयब रां पाइश्शो मुर बाक्माक्त। मेकोम ४० बर्स सम्म इस्राएली आन कली निसाफ पशो बाक्माक्त।

19 मेको आ चाइमी, फिनेहास आ मीशेमी कोत्रज कुरशो बाक्माक्त। मिनू आ आल थिची ना दुम्शो बाक्माक्त। मिनू मेकोमी परमप्रभु आ कबल पशो सन्दोस रोइश्शा योल्लो नु आ शिउ नु आ वोंइश बेक्शो नेंशा, आ आल थितीक रोइम जेत्ता बाक्त। मिनू गोल्शा आल थिवा बाक्त।

20 मिनू मेको बेक्चा चिक्तानु, आ वारच पाइब मीश मुरुम “इ थुं ग्येत्थ लुकच मदुमो। गे तौ का थिप्तीवी” दे मदा बाक्त। तन्न मेकोम लोत्र मलेत्ता बाक्त। मेकोम आ नोफा मदाइक्ता बाक्त। उत्पती ३५:१७

21 मिनू मेकोमी आल आ नें इकाबोद वोदा बाक्त। मेको आ अर्थ “परमप्रभु आ छेडछेड इस्राएल रे जाम्त” देशो बाक्माक्त। मारदे हना परमप्रभु आ कबल पशो सन्दोस रोइश्शो नु आ शिउ नु आ वोंइश बेक्शो मिम्शा इकाबोद आ अर्थ “इस्राएल डा छेडछेड जाम्त” देशो बाक्त। १सामुएल १४:३; भजन संग्रह ७८:६१

22 “इस्राएल डा छेडछेड जाम्त। मारदे हना परमप्रभु आ कबल पशो सन्दोस रोइसाक्व” देमाक्त।

## 5

पलिस्तीपुकीमी श्येत जशो

1 पलिस्तीपुकीम परमप्रभु आ कबल पशो सन्दोस रोइश्शा लाइश्शा, एबेन-एजेर रे अश्दोद सहरम चाक्मामे बाक्त। यहोसु १५:४७

2 मिनू मेकोपुकीम मेको कली लाइश्शा दागोन मूर्ति आ थानम चाक्दीन्मे बाक्त। मिनू दागोन आ नेक्था वोदमे बाक्त। न्यायाधीस १६:२३

3 मिनू आ दीसा अश्दोद डा मुरपुकी सुनी कना बोक्शा कोत्रडमेनु, दागोन आ मूर्ति गोल्शा, परमप्रभु यावे आ कबल पशो सन्दोस आ डोंइती बाप्शो तामे बाक्त। मिनू मेकोपुकीम दागोन कली पोक्शा, आ बाक्तीकेम वोदमे बाक्त।

4 मिनू मेकोपुकी लेंशा आ दीसा सुनी कना बोक्शा कोत्रडमेनु, दागोन परमप्रभु यावे आ कबल पशो सन्दोस आ डोंइती गोल्शो तामे बाक्त। मिनू मेको मूर्ति आ पिया नु गुड निक्शी जिक्शा, लाप्चो डा शीम बाक्शो तामे बाक्त। दागोन आ रां ला लीशो बाक्माक्त।

5 मोपतीके मेको नाक्त रे अश्दोद सहरमी दागोन कली चढेबपुकी नु सु सु दागोन आ थानम ओत्रबाक्मा, मेकोपुकीम दागोन आ थान डा लाप्चो डा शी मदिम्थु, खाक्शा ओत्रबाक्मा बाक्त। सेफन्याह १:९

6 मिनु परमप्रभु यावेमी अशदोद डा मुर आन कली शुश श्येत गेमी बाक्त। मेकोमी मेको अशदोद डा नु मेको आ एर ओंथ डा मुर आन कली गार मुतीक रोइमी श्येत गेमी बाक्त। मिनु मेको आन रागीम शुश यिच ग्रूमा बाक्त। मिनु मेको आन सहर नेल्लेम मारेइ मारेइ खतम दुम्तीक नु बेक्तीकेम सुमा बाक्त। भजन संग्रह ७८:६६

7 मिनु अशदोद डा मुरपुकीम मोदेशो दुम्शो तशा “इसाएली आन परमप्रभु आ कबल पशो सन्दोस एक वोइक्चा मदुम्ब। मारदे हना मेको आ गाइशोमी इ कली नु इ देवता दागोन कली श्येत दुम्शो बाक्ब” देमा बाक्त।

8 मोपतीके मेकोपुकीम पलिस्ती आन ठेयब मुर आन कली ब्रेशशा खुष्शा “गो इसाएली आन परमप्रभु आ कबल पशो सन्दोस मार पय?” दे हिल्लो पामे बाक्त। मिनु मेकोपुकीमी “परमप्रभु आ कबल पशो सन्दोस गाथ सहरम लतीन” देमा बाक्त। मिनु मेकोपुकीम इसाएली आन परमप्रभु आ सन्दोस गाथम चाक्गमे बाक्त। यहोसु ११:२२

9 मिनु गाथम लदमे नोले परमप्रभु यावेम मेको सहर डा मुर आन कली शुश हिंचा डा श्येत गेमी बाक्त। मेकेर डा ठेयब रे आइक्च मुर नेल्ल आन कली गार मुतीक रोइ पपाइक्मी बाक्त।

10 मिनु मेकोपुकीमी परमप्रभु आ कबल पशो सन्दोस एक्रोनम सोइक्तमे बाक्त। मिनु इसाएली आन परमप्रभु आ कबल पशो सन्दोस एक्रोनमी चाक्दीत्मेनु, मेकेर डा मुरपुकीम “मारदे मेकोपुकीम इ कली नु इ खिं डा मुर आन कली साइक्चा कली इसाएली आन परमप्रभु आ कबल पशो सन्दोस एक चाक्मे?” दे ग्रीशा रेयके पामे बाक्त। यहोसु १५:४५

11 मोपतीके मेकोपुकीम पलिस्ती आन ठेयब मुर नेल्ल आन कली युष्शा लोत्र पचा कली ब्रेथ सोइक्तमे बाक्त। मिनु मेको आन कली “इसाएली आन परमप्रभु आ कबल पशो सन्दोस आ बाक्तीकेम लेशशा सोइक्तीन। मेको कली आ बाक्तीकेम चाक्दीतीन। मो मपाइतीनी हना, गो नेल्ल बेक्नय” देमा बाक्त। सहर डा मुर नेल्ल शुश हिंशो बाक्मा बाक्त। मारदे हना परमप्रभु शुश गाइशो बाक्माक्त।

12 मिनु मबेक्शो आन कली गार मुतीक रोइम श्येत जपाइशो बाक्माक्त। मेको सहर डा मुर आन डाक्शो सरीड सम्म जाक्दीमाक्त।

## 6

परमप्रभु आ सन्दोस लेशशो

1 परमप्रभु यावे आ कबल पशो सन्दोस पलिस्ती आन रागीम बाक्शो ७ महिना दुम्शो बाक्माक्त।

2 मिनु पलिस्तीपुकीम दागोन कली चढेब नु लिंक्यु कोत्रब आन कली ब्रेशशा, मेको आन कली “गो परमप्रभु यावे आ कबल पशो सन्दोस कली मार पय? गो मेको आ बाक्तीकेम दोपा सोइक्तय? आंइ कली शेंदीकी” दे हिल्लो पामे बाक्त।

3 मिनु मेकोपुकीम “गेपुकीम इसाएली आन परमप्रभु आ कबल पशो सन्दोस लेशशा सोइक्तीनी हना, मोशा मसोइक्तीन। परमप्रभु कली दोस आ पर्वम चढेतीक नु सोइक्तीन। मिनु नोले गे सानीनी। मिनु मेकोमी लेशा इन कली श्येत मगेब” देमा बाक्त।

4 मिनु मेकोपुकीम “गो दोस आ पर्वम मार चढेतीक सोइक्तीकी?” दे हिल्लो पामे बाक्त। मिनु मेकोपुकीम “५ ओटा सुन के कान नु ५ ओटा सुन के यिच, इन ५ जना ठेयब मुर खोदेशो पा नु इन कली श्येत गेब कान खोदेशो पा सोइक्तीन। यहोसु १३:३

5 गे इन कान खोदेशो सुन के कान नु रागी कली खतम पोक्ब यिच खोदेशो पा सुन के यिच सेलीन। मिनु इसाएली आन परमप्रभु कली मान पने। मिनु मेकोमी इन कली, इन देवी देवता आन कली नु इन रागी कली श्येत गेचा प्रॉइबा कों?

6 गे मारदे इजीप्त डा मुर नु फाराओ खोदेशो पा इन थुं खकटा सेलीनी? मेकोम आ सक्ति कोंइदा नोले मेकोपुकी मूर्ख दुम्शा इसाएली आन कली लचा मगेमे डा?” देमा बाक्त। प्रस्थान ४:२१; प्रस्थान १२:३१

7 मिनु “मुल गे नक बग्गी का सेलीन। मिनु गिक्शो नु गेनायो जुवा मलाप्शो बी निक्शी लतीन। मिनु मेको बी आस कली नारेशा, बग्गी कीपाइक्चा कली ठीक पने। मेको आस बाछा कली चहिं फ्राशा गोठम लतीन।

8 मिनु परमप्रभु यावे आ कबल पशो सन्दोस लाइशशा, बग्गी तारी वोतीन। मिनु मेको इन दोस आ पर्वम चढेशो सुन के थोत्रकी आइक्च सन्दोस काम कुर पा, मेको आ नेक्था वोतीन। मिनु मेको सोइक्तीन।

9 मिनु मेको बग्गी कली कोत्रशा बाक्कीन। मेको सन्दोस कुरशो बग्गी आ रागी, बेथ-शेमेश ग्येथ गे लत हना, परमप्रभुमी एको ठेयब श्येत दुम्पाइशो बाक्माक्त, दे तुइसीब। मो मदुम्त हना, एको श्येत मेकोमी मदुम्पाइशो बाक्माक्त। आंमा दुम्शो बाक्तेक्म, दे तुइसीब” देमा बाक्त।

10 मिनु मेको मुरपुकीमी मो पामे बाक्त। मिनु गिक्शो बी निक्शी चाक्शा, बग्गीम नारेमे बाक्त। मेको आस बाछा चहिं गोठ उइ पाइशशा, वोदमे बाक्त।

11 मिनु परमप्रभु यावे आ कबल पशो सन्दोस नु सुन के यिच नु सुन के कान बाक्शो आइक्च सन्दोस बग्गी तार वोदमे बाक्त।

12 मिनु मेको बी एर ओंथ मपथ, गाक्ची ना ग्रीना ग्रीन इर बेथ-शेमेश ठेयब लां गे लसा बाक्त। मिनु पलिस्ती आन ठेयब मुरपुकी मेको बी आस नोले बेथ-शेमेश डा सांद सम्म लमा बाक्त। यहोसु १५:१०

13 मेना बेथ-शेमेश डा मुरपुकी दिंम चेरब रिक्ना रिक्न बाक्मा बाक्त। मिनु मेकोपुकीम इर गे कोत्रडमेनु, सन्दोस तशा ग्येरशा मेको आ नेक्था लमा बाक्त।

14 मेको बग्गी बेथ-शेमेश डा यहोसु आ रूम जाक्शा, नांइसे बाक्त। मेको आ नेक्था ठेयब फुल्लु का बाक्माक्त। मिनु मेकोपुकीम मेको बग्गी खोइशशा, मेको बी साइशशा, परमप्रभु यावे कली चोशा चढेमे बाक्त।

15 मिनू लेवीपुकीम परमप्रभु यावे आ कबल पशो सन्दोस नु मेको आ नेक्था बाक्शो सुन के थोत्रक बाक्शो आडक्च सन्दोस शोल्शा, मेको ठेयब फुल्लु तारी वोदमे बाक्त। मिनू मेको नाक्त बेथ-शेमेश डा मुरपुकीम परमप्रभु यावे कली चोशा चढेतीक नु अरु चढेतीक चढेमे बाक्त।

16 मिनू पलिस्ती आन ५ जना ठेयब मुरुमी मेको नेल्ल तशा, मेको नाक्तीन एक्रोन लेम्मा बाक्त।

17 मिनू मेको पलिस्तीपुकीम मेको आन दोस आ पर्वम परमप्रभु यावे कली सोइशशो सुन के कान मार कली बाक्मा बाक्त देशा हना, अशदोद कली का, गाजा कली का, अशकलोन कली का, गाथ कली का नु एक्रोन कली का बाक्मा बाक्त।

18 मिनू सुन के यिच चहिं गारो हिरशो सहर आन कली नु आन हुकुम पाइब नु आन एर ओंथ डा सहर आन कली का का बाक्माक्त। मिनू मेकोपुकीमी परमप्रभु यावे आ कबल पशो सन्दोस कली लाइशशा, ठेयब फुल्लु तारी वोदमे बाक्त। मेको फुल्लु मुल सम्म बेथ-शेमेश डा यहोसु आ रूम सांकछी बाक्ब।

कबल पशो सन्दोस लाम बाक्शो

19 मिनू परमप्रभु यावेमी बेथ-शेमेश डा मुर आन दाते डा ७० जना आन कली सदा बाक्त। मारदे हना मेकोपुकीम परमप्रभु यावे आ कबल पशो सन्दोस आगा कोत्रडमे बाक्त। मिनू परमप्रभु यावेमी मोदेशो पशो आ पर्वम मुरपुकी रोंका पामे बाक्त। गन्ती ४:२०; २सामुएल ६:६-७

20 मिनू बेथ-शेमेश डा मुरपुकीम “मेको परमप्रभु यावे, का ला परमप्रभु आ डोंइती सु राप्ने चाप्बा डा? मिनू आंइ बाक्तीके रे मुल मेको सु आ बाक्तीके लाइक्चा माल्बा?” देमा बाक्त।

21 मिनू मेकोपुकीम किरयथ-यारीम डा मुर आन कली लोत्र कुरब सोइशशा, मेको आन कली “पलिस्तीपुकीम परमप्रभु यावे आ कबल पशो सन्दोस लेत्ताक्म। उइ यिशा, मेको इन बाक्तीकेम कुतीन” देमा बाक्त। १इतिहास १३:६; भजन संग्रह ३२:३-६

## 7

सन्दोस किरयथ-यारीम लाइशशो

1 मिनू किरयथ-यारीम डा मुर जाक्शा, परमप्रभु यावे आ कबल पशो सन्दोस लाइशशा, डांडाम बाक्ब अबीनादाब आ खिम चाक्दीत्मे बाक्त। मिनू मेको आ तो एलाजर कली परमप्रभु यावे आ कबल पशो सन्दोस कोत्रचा कली ठीक सेल्मे बाक्त। लेवी ८:-

मुरपुकी परमप्रभु यावे गे लेशशो

2 मिनू मेको सन्दोस किरयथ-यारीमम वोइशशो, शुश नाक्त दुम्शा, २० बर्स मेकेर बाक्माक्त। मिनू इस्राएली नेल्लेमी “परमप्रभु यावेम इं कली प्रोंइतु” दे सुर्ता पामे बाक्त। १सामुएल ६:२१; १सामुएल ४:२२; १इतिहास १३:६

3 मिनू सामुएलमी इस्राएली नेल्ल आन कली “गे इन थुं नेल्लेमी परमप्रभु यावे गे लेत्था दाक्ताक्नी हना, इन दाते रे अर्को रागी डा देवी देवता नु अशतारोथ माइशशो मूर्ति पाइशशो थाम नेल्ल गुंडदीन। मिनू इन थुं नेल्लेमी परमप्रभु यावे कली ला ठेयब सेलीने। मिनू मेकोम इन कली पलिस्ती आन गुड रे प्रोंइब” देमाक्त। उत्पत्ती ३५:२; यहोसु २४:२३

4 मिनू इस्राएलीपुकीमी बाल देवता नु मूर्ति पाइशशो थाम नेल्ल गुंडदमे बाक्त। मिनू परमप्रभु यावे कली ला ठेयब सेल्मे बाक्त। न्यायाधीस १०:१६

5 मिनू सामुएलमी इस्राएली नेल्ल आन कली “मिस्पाम बुक्कीने। मिनू गो परमप्रभु यावे कली इन पर्वम पुंडनुड” देमाक्त। १सामुएल १०:१७; यहोसु १८:२६; न्यायाधीस २०:१

6 मिनू मेकोपुकी मिस्पाम बुक्मा बाक्त। मिनू ब्वाक्कु चाक्शा, परमप्रभु यावे आ डोंइती मोदमे बाक्त। मिनू मेको नाक्ती माइजा बाक्शा, मेकोपुकीमी “गो परमप्रभु यावे आ डोंइती पाप पाइतक” देमा बाक्त। मिनू सामुएलम इस्राएली आन कली मिस्पा सहरम ब्रेशशा निसाफ पवा बाक्त। २सामुएल २३:१६

7 मिनू पलिस्तीपुकीमी इस्राएली मिस्पाम बुक्तेक्म देशो लोत्र नेन्मे बाक्त। मिनू मेको आन ठेयब मुरपुकी इस्राएली नु लडाइ पचा कली लमा बाक्त। मिनू इस्राएलीपुकी मेको नेंशा, पलिस्ती आन कली तशा शुश हिमा बाक्त।

8 मिनू इस्राएलीपुकीम सामुएल कली “आंइ कली पलिस्ती आन गुड रे प्रोंइचा कली परमप्रभु यावे, आंइ परमप्रभु कली पुंडचा मप्रोनीन। मिनू मेकोम पलिस्ती आन गुड रे प्रोंइबा कों, दे पुनीन” दे सामुएल कली देमा बाक्त। १सामुएल १२:२३; उत्पत्ती २२:१७; १राजा ३:३; येरमीया ३७:३; येरमीया ७:१६

9 मिनू सामुएलमी परमप्रभु यावे कली दूध तूब पाठा का चोशा चढेवा बाक्त। मिनू इस्राएली आन पर्वम ठेयब सेंदा पा परमप्रभु यावे कली पुना बाक्त। मिनू परमप्रभु यावेम मेको आ पुंइशो लोत्र नेना बाक्त।

10 सामुएलम चोशा चढेना ढेन बाक्मेनु, पलिस्तीपुकी इस्राएली नु लडाइ पचा कली आन नेक्था जाक्मा बाक्त। मिनू मेको नाक्ती परमप्रभु यावेमी पलिस्ती आन तारी ठेयब बुंबु पपदा बाक्त। मिनू पलिस्तीपुकी वाम ग्याम दुम्शा, इस्राएली आन डोंइती रे प्रोकमा बाक्त। उत्पत्ती ३५:५; प्रस्थान १४:२४; प्रस्थान २३:२७; यहोसु १०:१०; न्यायाधीस ४:१५

11 मिनू इस्राएलीपुकीम मेको आन कली मिस्पा रे खेदा पना पन, बेथ-कर आ दी सम्म साइक्ना साइक्न खेदा पामे बाक्त।

12 मिनू सामुएलमी फुल्लु का लाइशशा, मिस्पा नु येशाना आस दातेमी खुक्मा बाक्त। मेको कली एबेन-एजेर नें वोइशशा “परमप्रभु यावेम आंइ कली एक सम्म वारच पाण्टु” देमाक्त।

13 मोपा पलिस्ती ब्रुशा, इस्राएली आन रागी लेशा मओन्नमा बाक्त। मिनु परमप्रभु यावेम सामुएल बाक्म सम्म पलिस्तीपुकी रे इस्राएली आन कली श्येत मगेपदा बाक्त।

14 मिनु पलिस्ती आन डोंडती ग्राशो सहर एक्रोन रे गाथ सम्म नु आन एर ओथ डा गाउं नेल्ल इस्राएलीपुकीमी पलिस्ती आन गुड रे ताक्गमे बाक्त। मिनु इस्राएली नु एमोरीपुकी गारमा बाक्त।

15 मिनु सामुएल बाक्म सम्म इस्राएली आन कली निसाफ पवा बाक्त। न्यायाधीस १०:१-५; न्यायाधीस १२:७-१४

16 मेकोमी बर्स बर्सम बेथेल, गिल्याल नु मिस्राम हिरशा, इस्राएली आन कली निसाफ पाइक्बाक्माक्त।

17 मिनु मेको रामाह लेप्बाक्माक्त। मारदे हना मेको आ खिं मेकेर बाक्माक्त। मिनु मेकोमी मुर आन कली निसाफ पा, परमप्रभु यावे कली चढेतीक का सेला बाक्त। यहोसु १८:२५

## 8

इस्राएलीपुकीमी पिप पुंडशो

1 सामुएल खूशो दुम्तीके, आ तौ आन कली इस्राएली आन कली निसाफ पाइब सेल्मी बाक्त।

2 मेको आ डोंडती जरमेशो तौ आ नें योएल नु आ माइला तौ आ नें अबीयाह बाक्माक्त। मेको बेयर-शेबाम निसाफ पाइब बाक्सा बाक्त। १इतिहास ६:१३; आमोस ८:१४

3 तन्न मेको निक्शीमी आस आफोम पशो खोदेशो मपाम्से बाक्त। क्येत पाइशशो दुम्चा कली घूस जाम्से बाक्त। दूली निसाफ पाम्से बाक्त। ब्यवस्था १६:१९

4 मोपतीके इस्राएल डा खाल्पा नेल्ल युम्शा, रामाहम सामुएल आ बाक्तीक जाक्मा बाक्त। १सामुएल ७:१७

5 मिनु मेकोपुकीमी “गे मुल खूशो दुम्तीनी। इन तौ निक्शी इन देशो लाम मगाक्स। मोपतीके अर्को रागी रागी डा मुर आन खोदेशो पा आंइ कली सासन पचा कली पिप का सेल्शा, गेकी” देमा बाक्त। ब्यवस्था १७:१४-२०; होसे १३:१०; प्रेरित १३:२१

6 तन्न सामुएलम सासन पचा कली पिप पुंडशो लोव नेशा, काइ मदाक्ता बाक्त। मिनु सामुएलमी परमप्रभु यावे नु लोव पवा बाक्त।

7 मिनु परमप्रभु यावेमी सामुएल कली “मुरुम मार मार देमा, मेको नेल्ल नेनो। मारदे हना मेकोपुकीम इ कली प्रोंइशो ममाइ, आं कली प्रोंइशो नम। मेकोपुकीम आं कली आन पिप दुम्शो मदाक्शो नम। प्रस्थान १५:१८; गन्ती २३:२१; ब्यवस्था ३३:५; भजन संग्रह २४:७-१०; भजन संग्रह ७४:१२; यसेया ६:५

8 इजिप्त रे युंडशो नाक्त रे आं कली मार मार पाइय्यीमी, मुल मेकोपुकीम इ कली यो मो पाइनीम। मेकोपुकीम अरु देवी देवता आन नोले खोइशशा, आं कली प्रोंइशो बाक्नीम। मिनु मुल इ कली यो प्रोंइनीम।

9 मिनु मुल मार देना देन बाक्सा, मेको नेनो। मुल मेको आन कली हिपाइशशा शेदीमी। आन सासन पाइब पिपम दोदेशो पाइनीमी, मेको आन कली माइक्मी” देमाक्त।

10 मिनु सामुएलमी पिप पुंडब मुर आन कली परमप्रभु यावेम देशो लोव नेल्ल नेंपाइक्मी बाक्त।

11 मिनु सामुएलमी “इन कली सासन पाइब पिपमी मार पाइब देशा हना, इन तौ आन कली लाइशशा, आ बग्गी, शारा नु गेय पाइब सेल्ब। मेकोमी मेको आन कली आ बग्गी आ डोंडडोंडती दोरपाइक्ब।

12 मिनु का निक्शी आन कली हजार का जना आन ठेयब मुर सेल्ब। का निक्शी आन कली ५० जना आन ठेयब मुर सेल्ब। मेको आ रू वाक्शा, आ बाली नाली रूप्ब सेल्ब। मिनु मेको आन लडाइ पतीक या नु बग्गी सेल्पाइक्ब।

13 मेकोमी इन तमी आन कली राम खेक्तीक तेल सेल्पाइक्ब। जचा थोवक क्येब नु शोब्ले चोइब सेल्चा कली लाइक्ब।

14 मेकोमी इन नेल्ल क्येडा रिम्शो रू, अडगुर रू नु तेल रवा बाक्शो रू रोइशशा, आ गेय पाइब आन कली गेब।

15 मेकोमी इन अन्न १० भागमी भाग का लाइक्ब। इन अडगुर यो मोपान लाइक्ब। मिनु आ कप्तान नु आ खिं डा गेय पाइब आन कली गेब।

16 मेकोमी इन वाइलीम वाइल, इन नेल्ल क्येडा रिम्शो बी ब्यफ नु गधापुकी लाइशशा आ गेय पपाइक्ब।

17 मेकोमी इन क्यारश भेडा रे १० भाग डा भाग का लाइक्ब। मिनु गेपुकी यो मेको आ गेय पाइब दुम्नीनी।

18 मो दुम्मेनु, इन योव्रशो पिप आ पर्वम ठेयब सेदा पा पुंडनीनी। तन्न मेना परमप्रभु यावेम इन पुंडशो लोव मनेंब” देमाक्त।

19 तन्न मुरपुकीम सामुएल आ लोव नेने मबिस्समा बाक्त। मिनु मेकोपुकीम “ममाइ, आंइ कली पिप का माल्नीकी।

20 गो यो अर्को रागी डा मुर खोदेशो दुम्चा दाक्नीकी। आंइ कली सासन पाइब नु लडाइम आंइ डोंडती गाक्ब पिप का माल्नीकी” देमा बाक्त।

21 मिनु सामुएलम मेको मुर आन देशो लोव नेल्ल नेशा, परमप्रभु यावे कली नेंपदा बाक्त।

22 मिनु परमप्रभु यावेम “मेको आन देशो खोदेशो पावो। मेको आन कली पिप का गेमी” देमाक्त। मिनु सामुएलमी इस्राएल डा मुर नेल्ल आन कली आन खिं खिं सोइक्तीमी बाक्त।

## 9

सावलमी जाम्शो गधा माल्शो

1 बेन्यामीन आ थर डा मुर का बाक्माक्त। मेको आ नें कीश बाक्माक्त। मेको आ आफ अबीएल, मेको आ बाजे जरोर, आ शेर बाजे बेकोराथ नु आ किकी बाजे आफीयाह बेन्यामीन थर डा बाक्माक्त। कीश शोंप पाइशशो मुर का बाक्माक्त।

- 2 मिनु मेको आ तौ का बाक्माक्त। मेको आ नें सावल बाक्माक्त। मेको टिटा दारशो बाक्माक्त। मेना इस्राएल रागीमी मेको क्येडा दारशो अर्को सुइ मबाक्मा बाक्त। मुर नेल्ले मेको आ बला डा लुक्च ला बाक्मा बाक्त।
- 3 मिनु काबु सावल आ आफ कीश आ गधापुकी जाम्मा बाक्त। मिनु मेकोमी आ तौ सावल कली “गेय पाइब टिटा का लाइशशा, गधापुकी मालथ लावो” दे मदा बाक्त।
- 4 मिनु मेको निक्शी एफ्राइम डा पहाड लाक्शा, शालीशाह रागी रे पा लसा बाक्त। तन्न गधा मथित्से बाक्त। मेको निक्शी शालीम रागी लसा, बेन्यामीन आ रागी रे पा हिरशा, लसा बाक्त। मेकेर यो मथिदसे बाक्त।
- 5 मिनु मेको निक्शी जूफ रागी ओव्रसा बाक्त। मिनु सावलम आ गेय पाइब कली “मुल गो लेस्स। मुल मलेत्तस हना, आं आफोम गधा आन पबंम सुर्ता पचा प्रॉइशा, इस पबंम सुर्ता पाइब” देमाक्त। १सामुएल १०:२
- 6 मिनु मेको गेय पाइबम “एको सहरम परमप्रभु आ लोत्र पाइब का बाक्ब। मेको आ देशो नेल्ल गाप्तीके, मेको आ नें थाम्पा चलेशो बाक्ब। गो मेक लांडसाक्व हना, मेकोमी तेको लां लचा माल्बा, मेको शेंबा को?” देमाक्त।
- 7 मिनु सावलमी “गो मेक लशा हना, मेको कली मार गेचा? गो इस नु मारेइ जचा थोक्क मबाक्ब। परमप्रभु आ मुर कली मारेइ कोसेली यो मबाक्ब” दे आ गेय पाइब कली देमाक्त।
- 8 मिनु मेको गेय पाइबमी “गो नु ४ भाग डा भाग का शेकेल चांदी बाक्ब। इस कली लां कोइचा, दे गो मेको मुर कली एको चांदी गेनुड” देमाक्त। शेकेल का ११.५ ग्राम बाक्ब। मेको आ गेशो २.६ ग्राम चांदी के क्येट बाक्त।
- 9 डोंइती इस्राएल रागीम सुइम परमप्रभु आ लोत्र तुइक्चा माल्ताक्व हना, मार देबाक्मा बाक्त देशा हना “परमप्रभु यावे आ ततीक ताइब आ बाक्तीक लय” देबाक्मा बाक्त। तन्न सिनाक्त मुलाक्त परमप्रभु यावे आ ततीके ताइब कली परमप्रभु यावे आ लोत्र पाइब देनीम। गन्ती २४:३-४; २राजा १७:१३; १इतिहास ९:२२
- 10 मिनु सावलमी आ गेय पाइब कली “इ देशो रिम्शो बाक्ब। गो मेको आ बाक्तीक लस” देमाक्त। मिनु मेको निक्शी मेको परमप्रभु आ मुर बाक्तीक सहर लसा बाक्त।
- 11 मिनु मेको निक्शी इर सहर गे लना लन बाक्सानु, ब्वाक्कु दिथ यीब मीश आल आन कली गुम्से बाक्त। मिनु मेको आन कली “परमप्रभु यावे आ ततीक ताइब खिंम बाक्मे?” दे हिल्लो पाम्से बाक्त।
- 12 मिनु मेकोपुकीमी “ओं, इस डोंइती लना लन बाक्ब। रीब पा लने। मेको मुलाक्त सहर रे जाक्त। मारदे हना मुलाक्त डांडाम क्योरशा चढेतीक नाक्त बाक्ब।
- 13 मिनु गे सहरम ओव्रतीसी हना, गे मेको कली जचा कली इर लना लन पशो थिन्तीसी। मेको मजाक्म सम्म मुरपुकीम भोज मजाइनीम। मारदे हना, मुरुम जचा क्येडा डोंइती मेकोमी क्योरशा चढेतीकेम आसीक गेब। मिनु नोले ला ब्रेशो मुरपुकीम जाइनीम। मिनु इर लसे, गे मुलाक्ती मेको कली गुम्सीसी” देमा बाक्त।
- 14 मिनु इर सहर लसा बाक्त। मिनु सहर ओव्रसानु, सामुएल कली थिन्से बाक्त।

#### सावलमी सामुएल कली गुम्शो

- 15 मिनु परमप्रभु यावेमी सावल आ जाक्चा क्येडा नाक्त का डोंइती सामुएल कली आ मिम्शो लोत्र तुइक्पाइशो बाक्माक्त।
- 16 मेकोमी “दीसा गो बेन्यामीन रागी डा मुर का इ कली गुम्थ सोइक्नुड। मिनु गे मेको कली आं मुर, इस्राएली, आन पिप सेल्शा, तेल लुक्तो। मेकोमी आं मुर आन कली पलिस्ती आन गुइ रे प्रॉइब। मारदे हना गो आं मुर आन श्येत ताता। मेको आन पुंइशो नेंता” देमाक्त।
- 17 मिनु सामुएलम सावल कली जाक्शो तवा बाक्त। मेना परमप्रभु यावेम मेको कली “आं देशो मुर एकोन बाक्ब। एको आं मुर आन कली सासन पाइब दुम्ब” देमाक्त।
- 18 मिनु सावलमी टेयब लाप्चोम जाक्शा, सामुएल कली “परमप्रभु यावे आ ततीके ताइब आ खिं ते बाक्म, आं कली कोंइदीनी” देमाक्त।
- 19 मिनु सामुएलमी सावल कली “परमप्रभु यावे आ ततीके ताइब गो नड। आं डोंइडोंइती इर गाक्कीस। मारदे हना मुलाक्ती गे गो नु जचा माल्नीसी। मिनु दीसा सुनी इ कली लचा गेनुड। इ थुंम मार मार बाक्मे, गो मेको इ कली शेंनन। प्रस्थान २४:११
- 20 मिनु नाक्त सां डोंइती जाम्शो गधा आन पबंम सुर्ता मपावो। मेको थिन्ने थुम्तेक्म। नेल्ल क्येडा टेयब लोत्र मार बाक्ब देशा हना, इस्राएली नेल्लेमी इ कली नु इ किकी पिपी आन खिं डा मुर कली मिम्शो बाक्नीम” देमाक्त।
- 21 मिनु सावलमी “गो इस्राएली आन नेल्ल क्येडा आइक्च बेन्यामीन आ थर डा मुर का नड। मिनु आं खिं बेन्यामीन आ थर डा नेल्ल क्येडा आइक्च बाक्ब। मिनु गे मारदे आं कली एको लोत्र देनी?” दे हिल्लो पवा बाक्त। १सामुएल १५:१७
- 22 मिनु सामुएलमी सावल नु आ गेय पाइब आस कली जतीक कोठाम ओइदीम्सी बाक्त। मिनु ब्रेशो मुर आन दातेमी नेल्ल क्येडा टेयब नित्तीकेम निष्पदा बाक्त। मेकेर मेको नेल्ल पा ३० जना मुर बाक्मा बाक्त।
- 23 मिनु सामुएलमी क्येब कली “डोंइती गो इ कली तिल्ला वोइक्चा देशो भाग एक पितो” दे मदा बाक्त।
- 24 मिनु मेको क्येबमी फिला चाक्शा, सावल आ डोंइती वोदा बाक्त। मिनु सामुएलमी “इ कली वोइशो भाग एकोन बाक्ब। ब्वावो। मुर आन कली ब्रेशो भोजम एको इ कली वोइशो भाग बाक्ब” दे सावल कली देमाक्त। मिनु मेको नाक्ती सावल पौनापुकी नु भोज जवा बाक्त।
- 25 मिनु नोले मेकोपुकी डांडा रे सहर बुम्मा बाक्त। मिनु सामुएलमी सावल कली खिं तला तारी लाइशशा लोत्र पवा बाक्त।

26 मिनु नां सोव्वची ना सामुएलम सावल कली “बोक्को। मुल गो इ कली चोव्वदीनन” देमाक्त। मिनु सावल नु आ गेय पाइब बोक्सा नोले सामुएल नु काथ काथा गावमा बाक्त।

27 मिनु मेकोपुकी सहर लाग्मे नोले सामुएलम सावल कली “इ गेय पाइब कली डोंडती सोइक्तो” देमाक्त। मिनु मेकोमी मो पवा बाक्त। मिनु सामुएलमी “गे एकेर रिम्दो। गो इ कली परमप्रभु आ लोव्र नेंपाइक्वनन” देमाक्त।

## 10

सामुएलम सावल कली पिप सेल्शो

1 मिनु सामुएलमी तेल कुरतीकरे ते तेल गुंडशा, सावल आ पिया तार लुक्ता बाक्त। मिनु मेको कली पुक्पु पा “परमप्रभु यावेमी इ कली आ मुर इसाएली आन पिप सेल्लु। गे आ मुर आन कली सासन पाइक्नेवे। मिनु गे मेको आन एर ओंथ डा जोरी सत्रु आन गुइ रे प्रोंइनेवे। परमप्रभु यावेम थमा पा इन कली आ मुर आन कली सासन पाइब सेल्शो आ चिन्ड मार बाक्ब देंशा हना,

2 गे मुलाक्ती एक रे लाइनीसी। मिनु बेन्यामीन आ सांद सेल्साह सहर आ नेक्था राहेल कली थिम्तीकेमी मुर निक्शी युम्नीसी। मेको निक्शीमी इस कली “इन माल्शो गधा थित्तेक्म। इन आफोमी मेको आन परबंम सुर्ता पचा प्रोंइशा, इस परबंम सुर्ता पा “मुल आं तौ आ परबंम गो मार पाइनुडा?” देत” देनीस। उत्पती ३५:१९

3 मिनु मेकेर रे लाक्शा, ताबोर डा ठेयब रवा आ नेक्था सम्म लाइनीसी। मेकेर परमप्रभु कली चढेथ बेथेल गे लाइब मुर सां युम्नीसी। मेको डोंडती डा मुरुम पाठा सां, दाते डा मुरुम शोब्ले सां नु नोले डा मुरुम गर का अडगुर शांबु कुरशा गाक्शो बाक्नीम।

4 मिनु मेकोपुकीमी इस कली ‘रिम्शो बाक्नी?’ दे हिल्लो पाइनीम। मिनु इस कली शोब्ले निक्शी गेनीम। मिनु गे मेको ताक्चा माल्नीसी।

5 मिनु नोले गे परमप्रभु आ डांडा गिबेआथ-एलोहीम जाक्नीसी। मेकेर लडाइ पचा कली बाक्शो पलिस्ती बाक्नीमी। मिनु गे मेको सहर ओव्रतीसी हना, डांडा रे यिन यिन पशो परमप्रभु यावे आ लोव्र पाइब आन हुल का युम्नीसी। मेको आन डोंडती मार मार ताप्तीके ताक्बपुकी गाक्शो बाक्नीम। मिनु मेकोमी परमप्रभु यावे आ लोव्र पाइनीम।

6 मिनु परमप्रभु यावे आ सोक्त इन तार जुक्ब। मिनु गे यो परमप्रभु यावे आ लोव्र पाइनीनी। मिनु गे अर्को मुर दुम्नीनी। न्यायाधीस १३:२५

7 मिनु मोदेशो चिन्ड नेल्ल दुम नोले इ डोंडती मार गेय बाक्बा, मेको पावो। मारदे हना परमप्रभु गे नु बाक्ब।

8 मिनु गे आं डोंडती गिल्लाल यिवो। मिनु गो चोशा चढेचा नु दुशा बाक्चा आ परबंम चढेचा कली इ बाक्तीक जाक्नुड। गो इ बाक्तीक मजाकडा सम्म, ७ नाक्त सम्म आं कली रिम्शा बाक्को। मिनु गो जाक्शा गे मार पचा माल्नेवे, इन कली शेंनुड” दे सामुएलम सावल कली देमाक्त। १ सामुएल १३:८

सावल आ थुं नक सेल्शो

9 मिनु सावल गाक्चा कली सामुएल नु ब्रामेनु, परमप्रभुम सावल आ थुं नक सेला बाक्त। मिनु मेको नोले मेको चिन्ड नेल्ल दुम्माक्त।

10 मिनु मेको गिबा जाक्दीस्सानु, परमप्रभु यावे आ लोव्र पाइब हुल मेको कली गुम्थ, यिशो बाक्मा बाक्त। मिनु परमप्रभु आ सोक्तीम मेको कली सुमा बाक्त। मिनु सावल यो मेको आन दातेमी परमप्रभु यावे आ लोव्र पाइब दुम्माक्त। १ सामुएल १९:२०-२४

11 मिनु मेको कली डोंडती रे तुइक्ब मुरपुकीम, परमप्रभु यावे आ लोव्र पाइब आन दातेमी लोव्र पाइब दुम्शो तशा “कीश आ तौ कली मार दुम्मे? मार, सावल यो परमप्रभु यावे आ लोव्र पाइब आन दाते डा का बाक्मे” देमुमा बाक्त।

12 मिनु मेकेर डा मुर कामी “मेरे आन आफ सु बाक्मे?” दे हिल्लो पवा बाक्त। मेना रे मुरपुकीमी “सावल यो परमप्रभु यावे आ लोव्र पाइब आन दाते डा बाक्मे?” दे दैतीक लोव्र लीमाक्त।

13 मिनु मेकोमी परमप्रभु यावे आ लोव्र पने थुम्शा, आ खिं लमाक्त।

14 मिनु सावल आ बकान्छाम, सावल नु आ गेय पाइब आस कली “गे निक्शी ते लसी?” दे हिल्लो पवा बाक्त। मिनु सावलमी “जाम्शो गधा माल्दीशो नरक्कु। गो थिन्ने मचाप्स्कु। मिनु गो सामुएल आ बाक्तीक यो लाइतस्कु” देमाक्त।

15 मिनु सावल आ बकान्छाम “सामुएलम इ कली मार देमे? आं कली शेंदीसी” देमाक्त।

16 मिनु सावलमी “ गधा थित्तेक्म” देत” देमाक्त। तन्न पिप दुम्तीके आ परबंम देशो लोव्र मशेंदा बाक्त।

सावल इसाएली आन पिप दुम्शो

17 मेना सामुएलमी मुर आन कली परमप्रभु यावे आ बाक्तीके मिस्पामी युम्चा, दे ब्रेत्तीमी बाक्त। १ सामुएल ७:५

18 मिनु मेकोमी इसाएली आन कली “परमप्रभु यावे, इसाएली आन परमप्रभुमी मार देत देंशा हना ‘गो इसाएली इन कली इजीप्त रागी रे गुंडशा, एक चाक्तन्नी। इन कली श्येत गेब इजीप्ती आन गुइ रे प्रोंइतन्नी। मिनु नोले इन कली दिप्ब अर्को रागी डा मुर आन गुइ रे यो प्रोंइतन्नी” देत।

19 तन्न मुलाक्ती गे इन कली हिंचा डा श्येत नु मरिम्शो रे प्रोंइब इन परमप्रभु कली प्रोंइतीनी। मिनु गेपुकीमी ‘आंइ कली पिप का योव्रशा गेने’ देतीनी। मोपतीके मुल परमप्रभु यावे आ डोंडती इन थर नु खिं खिं डा मुर पा रपीन” दे माइक्मी बाक्त। १ सामुएल ८:७

20 मिनु सामुएलमी इस्राएली नेल्ल आन थर आन कली राप्पाइक्मी बाक्त। मिनु बेन्यामीन आ थर योत्रचा पुंडसे बाक्त। १सामुएल १४:४१-४२; यहोसु ७:१६

21 मिनु मेकोमी बेन्यामीन आ थर डा खिं खिं डा मुर आन कली राप्पादा बाक्त। मिनु मात्री आ खिं डा मुर योत्रचा पुंडसमा बाक्त। मिनु मेको नोले कीश आ तौ सावल योत्रचा पुंडसे बाक्त। मिनु मेको कली माल्शा, मथित्मे बाक्त।

22 मिनु मेकोपुकीम परमप्रभु यावे कली “मार, मेको मुर एक बाक्बा?” दे हिल्लो पामे बाक्त। मिनु परमप्रभु यावेमी “मेको मार मार आन दातेमी खुडशशा बाक्शो बाक्ब” देमाक्त।

23 मिनु मुरपुकी दौरशा लशा, मेको कली चाक्गमे बाक्त। मिनु मेको मुर आन दातेमी राम्मेनु, नेल्ल आन क्येडा लाइशशो बाक्माक्त। मुर नेल्ले मेको आ बला डा लुकच ला बाक्मा बाक्त।

24 मिनु सामुएलम मुर नेल्ल आन कली “परमप्रभु यावेमी योत्रशो मुर कली कोव्रडीन। मुर नेल्ल आन दातेमी एको खोदेशो सुइ मबाक्म” देमाक्त। मिनु मुर नेल्ल ग्येरशा “पिप शुश ब्रोंडल” दे ग्रीमा बाक्त। मती २१:९

25 मिनु सामुएलमी मुर आन कली पिप आ अधिकार आ परबम शेंदीमी बाक्त। मिनु मेको नेल्ल कागजम ब्रेक्शा, परमप्रभु यावे आ डोंडती वोदा बाक्त। मिनु नोले मेकोमी मुर आन कली आन खिं खिं सोडक्तीमी बाक्त।

26 मिनु सावल यो आ खिं गिबा लमाक्त। मिनु परमप्रभुम आन थुं थिशो रिम्शो लडाइ पाइबपुकी मेको नु लमा बाक्त।

27 मेकेर मरिम्शो मुर यो बाक्मा बाक्त। मेकोपुकीमी “एको मुरुम आंड कली आंड जोरी सत्रु रे दोपा प्रोंडने चाप्बा डा” देमा बाक्त। मिनु मेकोपुकीमी सावल कली शुक्शी पा मेको कली मान पतीके यो मारेइ मचाक्मे बाक्त। तन्न सावल सिकसी पा बाक्माक्त। १सामुएल ११:१२

## 11

सावलम अम्मोनी नु लडाइ पशो

1 मिनु महिना का नोले अम्मोन डा नाहाशमी याबेश-गिलादम लडाइ पा पुम्दमे बाक्त। याबेश डा वोंडश मुरपुकीम नाहाश कली “गोपुकी नु गरीन। मिनु गो इन गेय पाइब दुम्नीकी” देमा बाक्त। १सामुएल ३१:११

2 मिनु अम्मोन डा नाहाशमी मेको आन कली “गो गोपुकी नु गारचा कली नेल्ल इन ग्युरा मिक्च पुक्शा ला गोपुकी नु गारनुड। मोपा इस्राएली नेल्ल इन कली मुने तोक्नुड” देमाक्त।

3 मिनु याबेश सहर डा खाल्पापुकीमी “इस्राएली नेल्ल आन कली नेंपाइक्चा कली आंड कली ७ नाक्त सम्म रिम्दीन। मिनु नोले आंड कली सुइमी प्रोंडने मचाप्तेक्म हना, गो इन जिम्मा गेंसीनीकी” देमा बाक्त।

4 मिनु लोत्र कुरबपुकी सावल आ बाक्तीक गिबा जाक्मा बाक्त। मिनु मुर आन डोंडती मेको लोत्र शेंदमे बाक्त। मिनु मुर नेल्ले ठेयब सेंदा पा डाक्मा बाक्त।

5 मेना सावल रू रे पा ब्यफ खुल्शा जाक्ना जाक्न बाक्माक्त। मिनु मेकोमी “मुरपुकी मारदे ठेयब सेंदा पा डाक्मा” दे हिल्लो पामी बाक्त। मिनु याबेश-गिलाद डा मुरपुकीमी देशो लोत्र मेको कली शेंदमे बाक्त।

6 मिनु सावलम मेको लोत्र नेनानु, परमप्रभु आ सोक्तीम मेको कली सुमा बाक्त। मिनु सावल थाम्पा गाइक्ता बाक्त। न्यायाधीस १३:२५

7 मिनु मोपा गाइशशा, हाल का ब्यफ टुक्रा टुक्रा पा चक्गा बाक्त। मिनु मुर आन कली मेको टुक्रा कुरपाइशशा इस्राएल रागी नेल्लेमी “सु मुर लडाइ पथ सावल नु सामुएल आस नोले मखोइक्नीमी, मेको आन ब्यफ यो ओदेशो टुक्रा टुक्रान दुम्नीम देनीन” दे सोडक्तीमी बाक्त। परमप्रभु यावेमी मुर आन कली शुश हिंपाइशशो बाक्माक्त। मोपतीके मेकोपुकी थुं का दुम्शा, सावल नु सामुएल आस नोले खोदमे बाक्त। न्यायाधीस १९:२९

8 मिनु सावलम मेको आन कली बेसेकम लडाइ पचा कली ठीक पामी बाक्त। मेकेर इस्राएल डा लाख सां नु यहूदा डा ३० हजार मुर दुम्मा बाक्त।

9 मिनु मेको डोंडती लोत्र चाक्ब मुर आन कली “याबेश-गिलाद डा मुर आन कली ‘गे दीसा नाक्त उइक्थ दुम्मेनु, ब्रोंडचा ताडनीनी’ दे मतीन” देमाक्त। मिनु मेकोपुकीमी याबेश डा मुर आन कली मेको लोत्र शेंदमे बाक्त। मिनु मेको नेंशा, शुश ग्येरसमा बाक्त।

10 मिनु याबेश डा मुरपुकीमी अम्मोनी आन कली “गो दीसा इन बाक्तीक जाक्नीकी। मिनु गे मार पचा दाक्नीनी, मेको पने” देमा बाक्त।

11 मिनु आ दीसा सावलमी आ मुर आन कली हुल सां सेल्मी बाक्त। सुनी कना रिम्शो पा हाम्सो मदुम्थु, मेको आन जोरी सत्रु आन बाक्तीके ओत्रशा, नाक्ती उइक्थ दुम सम्म लडाइ पा अम्मोनी आन कली फ्रूमे बाक्त। मोपा मुरपुकी निक्शी सम्म काथा मदुम्चा डा पा ब्राशा प्रोक्मा बाक्त।

12 मिनु मुरपुकीम सामुएल कली “सावलम आंड कली सासन पने चाप्बा डा?” देब सु बाक्मा? मेको आन कली साइक्चा कली आंड गुडम गेने” देमा बाक्त। १सामुएल १०:२७

13 तन्न सावलमी “ममाड, मुलाक्ती परमप्रभु यावेमी इस्राएली इं कली ग्रापदा नाक्त सुइ साइक्चा मदुम्ब” देमाक्त। १सामुएल १४:४५

14 मिनु सामुएलम मुर आन कली “गो गिल्गालम लशा, एको राज्य कली लेंशा सेल्य” देमाक्त। १सामुएल १०:८

15 मोपतीके मेको नेल्ल गिल्गालम लशा, परमप्रभु यावे आ डोंडती सावल कली पिप सेल्मे बाक्त। मिनु परमप्रभु यावे आ डोंडती दुशा बाक्चा आ परबम चढेतीक चढेमे बाक्त। मिनु सावल नु इस्राएली नेल्ले शुश ग्येरसमा बाक्त।

## 12

सामुएलम निसाफ पचा प्रोइशो

1 मिनु सामुएलमी गुम्शा बाक्शो इसाएली नेल्ल आन कली “गो इन पुंडशो नेंता। मिनु गो इन कली सासन पपाइक्चा कली पिप का योव्रशा गेतन्नी। १ सामुएल ८:७,२२; १ सामुएल ११:१५

2 मुल एको पिप इन ठेयब मुर दुम्शो बाक्ब। मुल गो खूशो दुम्ती। आं चां बोइशो बाक्ब। आं तौ गेपुकी नु बाक्शो बाक्नीस। गो आं टिटो रेन इन कली लां कोंडब दुम्शो नड।

3 गो एक बाक्ती। आं पर्बम मारेइ मरिम्शो लोत्र पचा बाक्त हना, परमप्रभु यावे नु आ तेल लुकशो आ डोंइती देनीन। गो सुका आ ब्यफ, गधा रोइशो बाक्डा? गो सु सु कली श्येत गोडा? गो सु सु आन कली दिबुमी? मिनु सु सु आन निसाफ पची ना धूम जडा? आं कली देनीन। मिनु गो मेको थाप्नुड” दे माइक्मी बाक्त। गन्ती १६:१५

4 मिनु मेकोपुकीमी “आंड कली श्येत मगेनी। गे आंड कली मदिप्नी। गे सुइ रे मारेइ मलाइक्मी” देमा बाक्त।

5 मिनु सामुएलम मेको आन कली “गे आं कली दोसी सेल्ने मचाप्नी। मेको आ पर्बम परमप्रभु यावे नु आ तेल लुकशो सांकछी बाक्नीस” देमाक्त। मिनु मेकोपुकीमी “मेको सांकछी बाक्नीस” देमा बाक्त।

6 मिनु लेंशा सामुएलम मुर आन कली “परमप्रभु यावे सांकछी बाक्ब। मेकोमी मोसा नु हारून आस कली योव्रतु। मिनु इन किकी पिपी आन कली इजीप्त रागी रे गुंडशा, एक चाक्तु।

7 मिनु गे आं डोंइती बाक्कीन। गो परमप्रभु यावे आ डोंइती गेपुकी नु लोत्र पाडनुड। परमप्रभु यावेमी इन कली नु इन किकी पिपी आन कली दोपा प्रोना, मेको इन कली देनुड।

8 याकूब इजीप्त रागी बुमेनु, इजीप्त डा मुरपुकीमी मेको आन कली दिप्मे बाक्त। मिनु इन किकी पिपीपुकीमी परमप्रभु यावे कली ‘वारच पाइक्की’ दे पुन्मे बाक्त। मिनु परमप्रभु यावेमी मोसा नु हारून आस कली सोइक्ता बाक्त। मेको निक्शीमी इन किकी पिपी आन कली इजीप्त रे गुंडशा एक चाक्शा बाक्पदसे बाक्त। प्रस्थान ३:७

9 तन्न मेकोपुकीमी परमप्रभु यावे, आन परमप्रभु कली प्रेंताक्म। मेकोमी मेको आन कली प्रोइशा, सीसेरा आ गुडमी गेवा बाक्त। सीसेरा हासोर डा पिप याबीन आ नेल्ल क्येडा सक्ति पाइशो लडाइ पाइब आन कप्तान बाक्माक्त। परमप्रभुमी मेको आन कली पलिस्ती आन गुडमी गेवा बाक्त। मिनु मोआब डा पिप आन गुडमी यो गेवा बाक्त। मिनु मेकोपुकी मेको नु लडाइ पना पन बाक्मा बाक्त। न्यायाधीस ४:२; न्यायाधीस १०:७; न्यायाधीस १३:१; न्यायाधीस ३:१२

10 मिनु नोले मेकोपुकीमी परमप्रभु यावे कली ‘गो पाप पाइतक। गो परमप्रभु यावे कली प्रोइतक। गो बाल देवता नु अशतारोथ माइशो मूर्ति पाइशो थाम कली पूजा पाइतक। मिनु मुल आंड जोरी सत्रु आन गुड रे प्रोनीन। मिनु गो इन कली ला ठेयब सेल्नीकी’ देमा बाक्त। गन्ती २१:७; यहोसु ७:२०; न्यायाधीस १०:१०; दानीएल ९:१-१९

11 मिनु परमप्रभु यावेमी येरूब-बाल, बाराक, येपता नु सामुएल आन कली सोइक्ता बाक्त। मिनु मेकोपुकीमी इन एर ओंथ बाक्शो जोरी सत्रु रे प्रोन्मे बाक्त। मिनु गेपुकी थुं नाइशशा, मारेइ मदुम्थु बाक्चा तशो बाक्तीनी। न्यायाधीस ६:१४, ३२; न्यायाधीस ४:६; न्यायाधीस ११:२९; १ सामुएल ७:३

12 तन्न गे अम्मोनी आन पिप नाहाश कली लडाइ पथ पिपशो ताइतीनी। मिनु गेपुकीमी ‘परमप्रभु यावे, इन परमप्रभु इन पिप बाक्त हना यो, आंड कली सासन पपाइक्चा कली पिप का गेने’ देतीनी। १ सामुएल ११:१-२; १ सामुएल ८:१९

13 मुल इन पुंडशो पिप एक बाक्ब। गेपुकीमी एको कली माल्शा, योव्रतीनी। मिनु परमप्रभु यावेमी इन कली पिप का गेपुत्तु।

14 गेपुकीमी परमप्रभु यावे कली मान पा हिंशा ठेयब सेल्तीनी हना, मेको आ देशो टीतीनी हना, इन कली सासन पाइब पिपमी यो परमप्रभु यावे, इन परमप्रभु आ नोले खोइक्तु हना, परमप्रभु यावे गेपुकी नु बाक्ब।

15 तन्न गेपुकीमी परमप्रभु यावे आ देशो ममिम्ताक्नी नु आ देशो मटीतीनी हना, परमप्रभु यावेमी इन कली नु इन पिप कली यो प्रोइब। न्यायाधीस २:१५

16 मोपतीके गे बाक्कीन। मिनु परमप्रभु यावेमी इन डोंइती मार ठेयब गेय पाइबा, मेको कोव्रडीन।

17 मुल चेरब रिक्की जाक्शो बाक्ब। मिनु गो परमप्रभु यावे कली रेउ नु बुंबु पुंडनुड। मिनु मेकोम बुंबु पपाइशशा, रेउ यिपाइक्ब। मिनु गे परमप्रभु यावे आ डोंइती पिप पुंडशा, इन परमप्रभु यावे आ अरेशो लोत्र मटिशो ठेयब पाप बाक्ब, दे तुइक्नीनी” देमाक्त।

18 मिनु सामुएलमी परमप्रभु यावे कली पुना बाक्त। मिनु मेकोमी मेको नाक्ती बुंबु पपाइशशा रेउ यिपदा बाक्त। मिनु मुर नेल्ल परमप्रभु यावे नु सामुएल तशा, शुश हिंमा बाक्त।

19 मिनु मुर नेल्लेमी सामुएल कली “परमप्रभु यावे, इन परमप्रभु कली आंड पर्बम ‘गो मबेक्कल’ दे पुनीन। मारदे हना आंड मरिम्शो पशो ला ममाइ, आंड कली पिप का माल्नीकी, दे आंड मरिम्शो पतीक तेम्ताक्क” देमा बाक्त।

20 मिनु सामुएलम मुर आन कली “महिनीन। गेपुकी मेको मरिम्शो नेल्ल पाइतीनी हना यो, परमप्रभु यावे आ नोले खोइक्चा मप्रोनीन। मिनु इन थुं नेल्लेम परमप्रभु यावे कली ठेयब सेलीन।

21 मो मपाइतीनी हना, गे शोर गाक्शो दुम्नीनी। मेकोम इन कली वारच मपाइब। श्येत रे यो मप्रोइब। ब्यवस्था ३२:३७-३८; यसैया ४१:२९

22 मारदे हना परमप्रभु यावेमी आ ठेयब नें आ पर्बम आ मुर आन कली कोव्रशा मप्रोइब। परमप्रभु यावेमी इन कली आम आ मुर सेल्चा कली ग्येरसाक्व। प्रस्थान १९:६

23 मिनु गो इन पर्बम पुंडशा प्रोइचा यो परमप्रभु यावे आ डोंइती पाप बाक्ब। पुंडचा मप्रोइनुड। गो इन कली रिम्शो नु ठीक लां शेनुड। १ सामुएल ७:८-९; उत्पत्ती १८:२३-३२; प्रस्थान ३२:११-१४, ३२



24 मिनू परमप्रभु यावे कली मान पा हिनीन। इन थुं नेल्लेम थमा पा मेको कली ठेयब सेलीन। मेकोमी इन कली गिश ठेयब गेय पशो बाक्मे, मेको मिम्तीन। ब्यवस्था ६:१२-१५

25 तन्न गे मेको तुइश्या यो, मरिम्शो पाइतीनी हना, गोपुकी नु इन पिप मलीनीनी” देंमाक्त।

## 13

सावल पलिस्ती नु लडाइ पशो

1 सावल पिप दुम्मेनु, ३० बर्स खोदेशो दुम्शो बाक्माक्त। मेकोमी इस्राएल कली ४२ बर्स क्येडा शुश सासन पवा बाक्त। एको लोत्र मतुइसीब। मारदे हना माइत हिबू किताबमी क्याम्सीशो बाक्माक्त।

2 सावलमी इस्राएल डा हजार सां मुर आन कली योत्रमी बाक्त। मिनू हजार निक्शी आं नु मिकमाशम नु बेथेल डा पहाडीम बाक्मा बाक्त। मिनू हजार का मुर योनाथन नु बेन्यामीन डा गिबाम बाक्मा बाक्त। लीशो मुर आन कली चहिं आन खिं सोइक्तीमी बाक्त।

3 मिनू योनाथनम गेबा डा पलिस्ती आन ठेयब मुर कली सदा बाक्त। मिनू मेको लोत्र पलिस्ती आन दातेमी ब्रमाक्त। मिनू सावलमी “हिबू नेल्लेम नेन्मेकल” दे रागी नेल्लेमी तुराही ताप्पदा बाक्त। १ सामुएल १४:४९

4 मिनू सावलम पलिस्ती आन ठेयब मुर साइक्तीके, पलिस्तीपुकीम इस्राएली आन नें थिचा प्रांग्रा दीनीम देशो नेन्मे बाक्त। मिनू सावल कली वारच पा लडाइ पचा कली मुर नेल्ल गिल्यालमी ब्रेत्मे बाक्त।

5 मिनू पलिस्तीपुकी इस्राएली नु लडाइ पचा कली बुक्मा बाक्त। मेकोपुकी नु ३० हजार बग्गी, ६ हजार शारा डोइक्बपुकी नु समुन्द्र डा बाल्वा खोदेशो पा हिक्ने मचाप्चा डा पा खोइलीम गाक्ब लडाइ पाइब मुर बाक्मा बाक्त। मेकोपुकी इर यूशा, बेथ-आवेन आ पूर्व गे मिकमाशम आन बाक्तीके सेल्मे बाक्त।

6 मिनू इस्राएलीपुकीमी थम श्येत जामे बाक्त। मारदे हना लडाइ पाइबपुकी थाम्पा आइक्च सेल्चा पुंडसमा बाक्त। मोपतीके मेकोपुकी पुक्खी, काक्पे, सेरथे फुल्ल आन दातेम, बेक्शो मुर वोइक्तीके नु इनार आगाम खुंडसमा बाक्त।

7 का निक्शी हिबू यर्दन खोला शोकशा, गाद आन रागी गिलाद जाक्दीम्मा बाक्त। तन्न सावल चहिं गिल्याल उड बाक्माक्त। मेको आ नोले खोइक्ब नेल्ले थाम्पा हिंशा खिंखि पामे बाक्त।

8 मिनू सावलमी सामुएल कली ७ नाक्त सम्म रिम्दा बाक्त। तन्न सामुएल गिल्यालमी मजाक्माक्त। मोपतीके मुरपुकी सावल आ बाक्तीक रे नोले शोइसीमा बाक्त। १ सामुएल १०:८

9 मिनू सावलमी “चोशा चढेतीक नु दुशा बाक्चा आ पर्वम चढेतीक एक आं बाक्तीक चाक्कीन” देंमाक्त। मिनू आंमान चोशा चढेतीक चढेवा बाक्त।

10 सावलम चोशा चढेतीक चढेने थुमा नोले सामुएल जाक्माक्त। मिनू सावल मेको कली गुम्थ लमाक्त।

11 मिनू सामुएलमी “एको मार पवी” देंमाक्त। मिनू सावलमी “मुरपुकीम आं कली प्रोइशा, लशो तातामी। इन जाक्नुड देशो ना मजाक्नी। पलिस्तीपुकी मिकमाशम बुक्तेक्म।

12 पलिस्तीपुकी गो नु लडाइ पथ गिल्यालम जाक्नीम, दे मिम्ताकड। गो परमप्रभु यावेम शिशी पवल, दे मपुनु। मोपतीके गो आंमान एको चोशा चढेतीक चढेचा माल्ताक्वी” देंमाक्त।

13 मिनू सामुएलमी सावल कली “गे मूर्ख गेय पाप्तीवी। परमप्रभु यावे, इ परमप्रभुमी शेंशो लोत्र मटिवी। गे टिशो नवे हना, परमप्रभु यावेमी इ राज्य इस्राएलमी गेना हना यो लीपद वा।

14 तन्न मुल इ राज्य मली। परमप्रभु यावेम आ दाक्शो मुर का योत्रतु। परमप्रभु यावेमी मेको कली आ मुर आन पिप सेल्ब। मारदे हना, गे परमप्रभु यावे आ लोत्र मटिवी” देंमाक्त। १ सामुएल १६:१; प्रेरित १३:२२

15 मिनू सामुएल बोक्शा, गिल्याल प्रोइशा, बेन्यामीन आ गिबा गे खोदा बाक्त। लीशो मुरपुकी चहिं सावल आ नोले लडाइ पाइब दुम्चा कली खोदमे बाक्त। मिनू सावलमी मेको मुर आन कली हिक्गानु, मेको नेल्ल पा ६ सहे मुर बाक्मा बाक्त।

16 सावल, मेको आ तौ योनाथन नु मेको नु बाक्शो मुरपुकी नु बेन्यामीन आ रागी गेबाम लीमा बाक्त। पलिस्तीपुकी चहिं मिकमाशम आन बाक्तीक सेल्शा बाक्मा बाक्त।

17 मिनू पलिस्ती आन बाक्तीक रे रोइक्बपुकी हुल सां गूमा बाक्त। हुल का शुआल आ रागीम बाक्शो ओफ्रा गे लमा बाक्त।

18 अर्को हुल बेथ-होरोन गे लमा बाक्त। मिनू लीशो हुल चहिं डांडा गे लमा बाक्त। मेको डांडा रे सेबोयीम डा बेसी गोरशो रागी तांडसीबाक्माक्त।

19 मेना इस्राएल रागीमी तुप्तील का यो मथिंसीबाक्माक्त। मारदे हना पलिस्तीपुकीम हिबू आन कली तरवार नु तूतीक सेल्चा मगेशो बाक्मा बाक्त। न्यायाधीस ५:८

20 इस्राएलीपुकी आंम फाली, कोदाली, खा नु गुये शेप्थी यो पलिस्ती आन खिं लचा माल्बाक्मा बाक्त।

21 फाली का नु कोदाली का शेप्चा कली शेकेल का के भाग सांमी भाग निक्शी थाप्चा माल्बाक्मा बाक्त। खा नु ब्यफ खुल्तीक कोक्के शेप्चा कली शेकेल का के भाग सांमी भाग का थाप्चा माल्बाक्मा बाक्त। शेकेल का ११.५ ग्राम बाक्ब। मेको शेप्तीक गेय कली का का कली ३.५ ग्राम चांदी थाप्शो बाक्तेक्म।

22 मोपतीके लडाइ दुम्मेनु, सावल नु योनाथन नु बाक्शो लडाइ पाइब आन के तरवार नु तूतीक का यो मबाक्माक्त। तन्न सावल नु योनाथन आस के ला बाक्माक्त।

23 पलिस्तीपुकी मिकमाश डा लां मेर लमा बाक्त।

## 14

योनाथन पलिस्ती बाक्तीके लशो

- 1 काबु सावल आ तौ योनाथनमी, आ या कुरब कली “पिवो, गो लां खोइशशा, पलिस्ती आन बाक्तीक लस” देंमाक्त। तन्न मेकोमी मेको लोत्र आ आफ कली मशेंदा बाक्त।
- 2 मेना सावल गिबा सहर क्येडा लाडगा मिग्रोनम बाक्शो अनार रवा आ पुंमी बाक्शो बाक्माक्त। मेको नु ६ सहे मुर ला बाक्मा बाक्त।
- 3 मिनु परमप्रभु यावे कली चढ़ेब एली आ तौ फिनेहास, फिनेहास आ तौ अहीतुब नु आ लोकब इकाबोद मेकेर बाक्मा बाक्त। अहीतुब आ तौ अहीयाह शिलोमी चढ़ेब बाक्शा, निसाफ पतीक ऊरीम नु थुम्मी बाक्शो झोला यो फेक्शो बाक्माक्त। मेको मुरपुकीमी योनाथन पलिस्ती आन बाक्तीके लशो, मतुइक्तमे बाक्त। २सामुएल ८:१७; १सामुएल ४:१९-२१ प्रस्थान २८:६-३०
- 4 मिनु योनाथन पलिस्ती आन बाक्तीक लतीक लांमी ठेयब सेरथे फुल्लु निक्शी बाक्सा बाक्त। का एर गे नु अर्को ओंथ गे बाक्सा बाक्त। का आ नें बोसेस नु अर्को आ नें सेनेह बाक्माक्त।
- 5 मेको का उत्तर मिकमाश गे नु का दक्खिन गेबा गे बोक्शो बाक्सा बाक्त।
- 6 योनाथनमी आ या कुरब कली “पिवो, गो मेको खोइक्तीक चिनु मखोइशशो आन बाक्तीक लस। परमप्रभु यावेमी वारच पाइबा, कौ? परमप्रभु यावेमी शुश मुर बाक्तेकम हना यो, इच्का ला बाक्तेकम हना यो, इ कली प्रॉने चान्ब” दे मदा बाक्त। न्यायाधीस ७:७; २इतिहास १४:१०
- 7 मेको आ या कुरबमी “गे मार पचा दाक्नीनी, पने। गे मार पाइनीनी गो मेको वारच पाइनुड” देंमाक्त।
- 8 मिनु योनाथनमी “दुम्ब, गो आइक्वी गे लस। मिनु पलिस्ती आन कली तपांडसस।
- 9 मिनु मेकोपुकीमी इस कली ‘गो मजाक्का सम्म रिम्दीस’ देंतेकम हना, गो मेकेर राप्शा बाक्स। गो मेको आन बाक्तीके मलस।
- 10 तन्न मेकोपुकीमी ‘आंइ बाक्तीक कुस जाक्कीन’ देंतेकम हना, गो इर डोइशशा लस। मारदे हना परमप्रभु यावेम मेको आन कली इस गुइमी गेशो बाक्माक्त, दे तुइक्नस। मेको गो इस कली चिन्ड बाक्ब” देंमाक्त।
- 11 मोपतीके मेको निक्शी पलिस्ती आन कली तपांडससा बाक्त। मिनु पलिस्तीपुकीम “कोत्रडीन। हिबू आन खुइक्तीक पोत्रला रे गूमा बाक्त” देमुमा बाक्त।
- 12 मिनु पलिस्तीपुकीमी योनाथन नु आ या कुरब आस कली “गो आंइ बाक्तीक गे डोइशशा कुस। गो इस कली मारेइ कौइनीकी” देंमा बाक्त। मिनु योनाथनमी आ या कुरब कली “आं नोले कुवो। परमप्रभु यावेम मेको आन कली इसाएली आन गुइमी जिम्मा गेशो बाक्त” दे मदा बाक्त।
- 13 मिनु योनाथन गुइ खोइल थेक्शा डोंइसे बाक्त। मिनु मेको या कुरब आ नोले कुमाक्त। मिनु मेको पलिस्ती योनाथन आ डोंइती गोल्मा बाक्त। मिनु मेको आ नोले जाक्ब आ या कुरबमी मेको आन कली सदा बाक्त।
- 14 मेको डोंइती डा लडाइमी योनाथन नु आ या कुरबम २० जना खोइ सदसे बाक्त। मेको साइक्तीके रू ४ रोपानी खोदेंशो पा दिंम का बाक्माक्त।
- 15 मिनु नोले पलिस्तीपुकी शुश हिंमा बाक्त। मिनु लाडगा मेर बाक्ब मुर नु अरु मुर नेल्ल खिंखि पा हिंमा बाक्त। आन ठेयब मुर नु रोइक्ब नेल्ल शुश हिंमा बाक्त। मिनु खिनु कुशा ठेयब खल्बल दुम्माक्त। १सामुएल ७:१०
- 16 मिनु बेन्यामीन आ गिबाम खाल पाइब सावल आ मुरपुकीम पलिस्ती आन हुल खल्बल पा एर ओंथ दोरशो तामे बाक्त।
- 17 मिनु सावलमी सु सु मबाक्मा, दे हिक्पाइक्मी बाक्त। मिनु मेकोपुकीमी योनाथन नु आ या कुरब मबाक्शो तुइक्तमे बाक्त।
- 18 मिनु सावलमी अहीयाह कली “परमप्रभु आ कबल पशो सन्दोस एक चाक्को” देंमाक्त। मेना परमप्रभु आ कबल पशो सन्दोस इसाएलीपुकी नु बाक्माक्त। १सामुएल २१:१०
- 19 मिनु सावलम लोत्र पन पना पलिस्ती आन बाक्तीक डा खल्बल ठेयब दुम्ना दुम्न लमाक्त। मिनु मेकोमी चढ़ेब कली “याम का रिम्दो” देंमाक्त।
- 20 मिनु सावल नु आ मुरपुकी रेयके पना पन लडाइ पतीक गे लमा बाक्त। मेना आन जोरी सत्रु ब्रशा आंम आंमा साइक्मुशो तामे बाक्त। न्यायाधीस ७:२२; २इतिहास २०:२३
- 21 मेना सम्म हिबूपुकी पलिस्ती नु बाक्मा बाक्त। मेकोपुकीमी यो पलिस्ती आन बाक्तीकेम बाक्शा यो, इसाएली आन गे लशा सावल नु योनाथन आस कली वारच पदमे बाक्त।
- 22 एफ्राइम आ पहाडीम बाक्शो प्रोक्शो इसाएलीपुकीमी पलिस्ती प्रोक्शो लोत्र नेंमे बाक्त। मिनु मेकोपुकी यो गारशा पलिस्ती आन कली खेदा पामे बाक्त।
- 23 मेको नाक्ती परमप्रभु यावेमी इसाएली आन कली ग्रापदा बाक्त। मिनु मेको लडाइ बेथ-आवेन आ आइक्ची सम्म दुम्माक्त। सावल आ लडाइ पाइब १० हजार खोइ दुम्मा बाक्त। मेको लडाइ एफ्राइम डा पहाड नेल्लेम दुम्माक्त।
- 24 मेको नाक्ती सावलमी ममिम्थु, गेय पवा बाक्त। मेकोमी मुर आन कली “गो आं जोरी सत्रु आन कली क्येक्क लेन्ने मथुमु सम्म, सुम नाक्दो दुम्चा क्येडा डोंइती जाइबा, मेको सराप रल” देंशा कसम जपाइक्मी बाक्त। मोपा मेको नाक्ती इसाएली थाप्पा दशो बाक्मा बाक्त। सुइमी मारेइ मजामे बाक्त।
- 25 मिनु मेकोपुकी ब्वाक्कीम जाक्मानु, सुरब खुदो चाका तामे बाक्त।
- 26 तन्न मेकोपुकीमे मेकेर खुदो याप्शो तशा यो, कसम जतीके सुइमी खुदो थिसीन मथीमे बाक्त।

27 तन्न आ आफोम मुर आन कली कसम जपाइश्शो नु मजचा देशो योनाथनमी मनेशो बाक्माक्त। मेकोमी आ गुडमी बाक्शो कोक्के दिंशा, मेको आ डरीमी थोक्शा तुक्गा बाक्त। मिनू आ सक्ति बारमाक्त।

28 तन्न लडाइ पाइब कामी मेको कली “इन आफोमी मो पचा मदुम्ब देशो बाक्ब” देमाक्त। मेकोमी “मुलाक्त जचा थोक्क जाइब सराप रल देशो बाक्ब” देमाक्त। मुरपुकी चहिं शोत्रलुम बेक्चशो बाक्मा बाक्त।

29 मिनू योनाथनमी “आं आफोमी मुर आन कली श्येत गेतीक गेय डा लाक्शा अरु मपशो बाक्ब। कोत्रडीन गो एको खुदो थाम्शा दोशो सक्ति पाइश्शो दुम्डा।

30 मुरपुकीम जोरी सत्रु रे रोइश्शो मार मार जचा तशो नम हना, गिश रिम्शो दुम वा। पलिस्ती आन कली यो शुश साइक्ने चबेम वा” देमाक्त।

31 मेको नाक्ती मेकोपुकीम पलिस्ती आन कली ग्रामा बाक्त। मिनू मेको आन कली मिकमाश रे आइयालोन सम्म खेदा पामे बाक्त। मिनू मोपा लडाइ पाइबपुकी शुश दमा बाक्त।

32 तन्न मुरपुकी शोत्रलुम बेक्चा चिक्शा, मार मार रोइक्चा गोत्रमे बाक्त। मोपा भेडा बी ब्यफ नु बाछा ग्याइक्तमे बाक्त। मिनू खपीमीन साइश्शा हुश सुन्दा ब्वामे बाक्त। लेवी ३:१७

33 मुरपुकीम हुश सुन्दा श्ये ब्वशा “परमप्रभु यावे कली पाप पाप्तेक्म” दे मुरुमी सावल कली शेंदमे बाक्त। मिनू सावलमी “एको दा थम मरिम्शो दुम्त। टेयब फुल्लु का लोकशा एक चाक्कीन” देमाक्त।

34 मिनू सावलमी मेको मुर कली “मुर आन दातेमी लशा ‘ग्याइश्शो ब्यफ नु भेडापुकी एक चाक्शा ब्वामेक्ल। मिनू हुश सुन्दा ब्वशा परमप्रभु यावे कली पाप मपामेक्ल’ देनो” देमाक्त। मिनू मेको नाक्दो आन ग्याइश्शो ब्यफ खुल्शा जाक्शा मेकेर सदमे बाक्त।

35 मोपा सावलमी परमप्रभु यावे कली चढेतीक का सेला बाक्त। मेको सावलम परमप्रभु यावे कली सेल्शो नेल्ल क्येडा डोंइती डा चढेतीक बाक्माक्त।

36 मिनू सावलमी “मुल गो उइ लशा पलिस्ती आन कली नाक्दो लडाइ तोय। मिनू नां सोत्रम सम्म मेको आन मारेड मारेड रोइक्तय। मेको आन कली का यो महेंदय” देमाक्त। मिनू मुरपुकीम “गे मार पचा दाक्नीनी मेको पने” देमा बाक्त। मिनू चढेबमी “गो डोंइती परमप्रभु नु सल्ला पय” देमाक्त।

37 मिनू सावलमी परमप्रभु कली “मार गो पलिस्ती आन कली खेदा पका? गे मेको आन कली इस्राएली आन गुडमी गेनीनी?” दे हिल्लो पवा बाक्त। तन्न परमप्रभुमी मेको कली मारेड लोत्र मलेत्ता बाक्त। १सामुएल १४:१८; १सामुएल २३:९-१२

38 मिनू सावलम “इस्राएल डा टेयब मुर नेल्ल आं डोंइती जाक्कीन। मिनू मुलाक्त मार पाप दुम्मे तुइक्चा माल्ताक्व।

39 परमप्रभु यावे ब्रोंइशा बाक्शो खोदेशो पा नु इस्राएल श्येत रे प्रोंइब, गो मेको आ नेम कसम जशा देंनुड, आं तौ योनाथनम मेको पाप पशो बाक्त हना यो, मेको कली साइक्चा माल्ब” देमाक्त। मिनू सुइमी मेको कली लोत्र मलेत्ते बाक्त।

40 मिनू मेकोम इस्राएली नेल्ल आन कली “गे नेल्ल का पटटी बाक्कीन। गो नु आं तौ योनाथन का पटटी बाक्नस्कु” देमाक्त। मिनू मुरपुकीम “गे मार पचा दाक्नीनी मेकोन पने” देमा बाक्त।

41 मिनू सावलमी परमप्रभु यावे, इस्राएली आन परमप्रभु कली “मुलाक्ती गे इन गेय पाइब कली मारदे लोत्र मलेत्तेनी? मेको दोस गो नु आं तौ योनाथन नु बाक्त हना यो, तुइक्पतीन” देमाक्त। परमप्रभु यावे, इस्राएली आन परमप्रभु गे ऊरीम कोंइदीन। तन्न इन मुर दोस ताइब बाक्नीम हना, थुम्मीम कोंइदीन। मिनू मेको मो पामे नोले योनाथन नु सावल आस नेम ग्रूमाक्त। मुरपुकी चहिं ब्रोंइमा बाक्त। १सामुएल २८:६; प्रस्थान २८:३०; गन्ती २७:२१; ब्यवस्था ३३:८

42 मिनू सावलमी “गो नु आं तौ योनाथन आंस दातेमी ऊरीम आपीन” देमाक्त। मिनू योनाथन आ नेम ग्रूमाक्त।

43 मिनू सावलमी योनाथन कली “गे मार पवी आं कली देनो” दे हिल्लो पवा बाक्त। मिनू योनाथनमी “थमा पा गो आं कोक्के आ डरीमी इक्का खोइ खुदो थाम्ता। गो एक बाक्ती, गो बेक्चा कली ठीक बाक्नुड” देमाक्त। यहोसु ७:१९

44 मिनू सावलमी योनाथन बेक्चान माल्ब, दे कसम जवा बाक्त।

45 तन्न मुरपुकीम सावल कली “मार, योनाथन सांइसीबा? मेको योनाथनमी ओमो टेयब गेय पा इस्राएल कली मग्रापदा? मोदेशो मदुम्ल। गेना हना यो ब्रोंइशा बाक्ब परमप्रभु यावे आ नेमी गो कसम जशा देंनीकी, मेको के चां का यो महेम्ल। मारदे हना मेकोम मुलाक्ती परमप्रभु नु गेय पशो बाक्ब” देमा बाक्त। मोपा मुरपुकीम योनाथन कली प्रोन्मे बाक्त। मिनू मेको मसांइसे बाक्त।

46 मिनू सावलमी पलिस्ती आन कली खेदा पचा प्रोना बाक्त। मिनू पलिस्ती आन खिं लेम्मा बाक्त।

सावल आ राज्य डा लोत्र

47 मिनू सावलमी इस्राएली आ सासन पतीके बोल्यो सेल्ने थुमा बाक्त। मिनू मेकोमी मोआबी, अम्मोनी, एदोमी, सोबाह डा पिपपुकी नु पलिस्ती आंम एर ओथ डा जोरी सनु नु लडाइ पवा बाक्त। मेकोपुकी ते ते लमा मेक मेक ग्रामा बाक्त।

48 मेकोमी अमालेकी आन कली ग्रामा बाक्त। मिनू इस्राएली आन कली रोइक्ब हुल आन रे प्रोना बाक्त।

49 सावल आ तौपुकी योनाथन, इश्वी नु माल्कीशुआ बाक्मा बाक्त। मेको आ डोंइती जरमेशो तमी आ नें मेराब नु अर्को के मिकाल बाक्माक्त। १इतिहास ९:३९

50 मेको आ मीश चहिं अहीमाज आ तमी अहीनोआम बाक्माक्त। मेको आ लडाइ पाइब आन कप्तान मेको आ बकान्छा नेर आ तौ आब्नेर बाक्माक्त। १सामुएल १७:५५

51 सावल आ आफ कीश नु आब्नेर आ आफ नेर अबीएल आ तौ बाक्सा बाक्त। १इतिहास ९:३६,३९

52 सावल आ पालाम पलिस्तीपुकी नु लडाइ दुम्स डा दुम्स दुम्माक्त। मेकोमी आ थिरशो बोल्यो नु सक्ति पाइशशो मुर आ गेय पचा कली लाइक्बाक्माक्त।

## 15

सावलम अमालेकी आन कली ग्राशो

- 1 मिनु सामुएलम सावल कली “परमप्रभु यावेम इ कली आ मुर इस्राएली आन पिप सेल्शा तेल लुक्चा, दे आं कली सोइक्ताक्यी। मोपतीके परमप्रभु यावे आ लोत्र नोफा दाइशशा नेनो। १ सामुएल १०:१
- 2 मुर नेल्ल आन परमप्रभु यावेमी मार देंत, देशा हना ‘इस्राएली इजीप्त रे गूशा पिमानु, अमालेकीपुकीम मेको आन कली लडाइ तोम्मेक्म। मोपतीके अमालेकी आन कली थमा पा सजाइ गेनुडमी’ देंत। प्रस्थान १७:८-१६; ब्यवस्था २५:१७-१९
- 3 अमालेकी आन कली लडाइ तोशा, मेको आन कली सतीन। मेको आन शोंप नेल्ल खतम पोक्कीन। मारेड मप्रोनीन। नेल्ल आन कली खतम पोक्कीन। मेको आन मीश मुर, वोंडश मुर, मीश आल, वोंडश आल, दूध तूब आल, बी ब्यफ, क्यारश भेडा, दलओठ नु गधा नेल्ल आन कली खतम पोक्कीन” देंमाक्त।
- 4 मिनु सावलमी मुर नेल्ल आन कली तेलाम बाक्तीकेम जाक्चा कली ब्रेशो बाक्त। मेकेर लाख निक्शी खोइलीम गाक्ब लडाइ पाइब नु यहूदा डा १० हजार लडाइ पाइब बाक्मा बाक्त।
- 5 मिनु सावल अमालेक आ सहरमी जाक्माक्त। मिनु मेकेर बेसीम बाप्शा, इच्छा नाक्त बाक्मा बाक्त।
- 6 मेना सावलम केनी डा मुर आन कली “अमालेकी आन कली प्रोंइशा उइ यिने, दे लोत्र सोइक्ता बाक्त। मो पाइतीनी हना, गो इन कली नु मेको आन कली खतम पोक्नुड। मारदे हना इस्राएली इजीप्त रे गूशा पिमानु, गेपुकीमी चारच पाइशशो ननी” देंमाक्त। मोपतीके केनी डा मुरपुकी अमालेकी आन कली प्रोंइशा, उइ बुम्मा बाक्त। न्यायाधीस १:१६
- 7 मिनु सावलमी हवीलाह रे इजीप्त डा पूर्व डा सांद शुर सम्म डा अमालेकी आन कली साइक्मी बाक्त।
- 8 तन्न मेकोमी अमालेकी आन पिप अगाग कली सेसीन ग्याइक्ता बाक्त। अरु नेल्ल आन कली तरवारम सदमे बाक्त।
- 9 सावल नु मेको आ लडाइ पाइबपुकीमी पिप अगाग आ रिम्शो भेडापुकी, बी ब्यफ, दोम्शो बस्तु भाव, पाटापुकी नु वोइक्चा डा मारेड मारेड प्रोंइशा वोदमे बाक्त। मेकोपुकीम मेको आन कली खतम पोक्चा मदाक्तमे बाक्त।

परमप्रभुमी देशो सावलम मटिशो

- 10 परमप्रभु यावेमी सामुएल कली
- 11 “गो बिट्थीम ला सावल कली पिप सेलु बाक्त। मारदे हना मेकोमी आं नोले खोइक्चा प्रोंइतु। मिनु आं देशो मटीव” देंमाक्त। मिनु सामुएल गाइशशा नाक्दो रे परमप्रभु यावे कली पुंडना पुंडन बाक्माक्त। उत्पत्ती ६:६
- 12 मिनु सामुएल सुनी कना बोक्शा सावल कली युम्थ लमाक्त। तन्न मुरुमी “सावल कारमेल लत” दे मेको कली नैपदमे बाक्त। सावलम आंम कली मिम्तमेक्ल, दे आंम के मूर्ति का सेल्शा, गिल्यालम बुम्ने थुम्शो बाक्माक्त। यहोसु १५:५५
- 13 मिनु मेकोमी सावल कली युमा बाक्त। मिनु सावलम मेको कली “परमप्रभु यावे आ आसीक इन नु बाक्ल। गो परमप्रभु यावे आ देशो टीता” देंमाक्त।
- 14 तन्न सामुएलम मेको कली “आं नोफाम नेशो भेडा नु बी ब्यफ आन ग्रीशो चहिं मारम” दे हिल्लो पवा बाक्त।
- 15 मिनु सावलमी “मुरपुकीम मेको अमालेकी रे चाक्शो नम। मुरपुकीम भेडा नु बी ब्यफ रे रिम्शो चहिं परमप्रभु यावे, इन परमप्रभु कली चोशा चढ़ेचा कली प्रोंइशा वोइक्तेक्म। लीशो आन कली गो नेल्ल साइक्ताक” देंमाक्त।
- 16 मिनु सामुएलम सावल कली “मोक्ल दुम्त। सिनाक्दो परमप्रभु यावेम मार देंमे, मेको गो इ कली शेंनन” देंमाक्त। मिनु सावलमी “देनीन” देंमाक्त।
- 17 मिनु सामुएलमी “डोंइती गे आंमा कली आंमान शोर गाक्शो मुर मिम्शो ननी। तन्न मुल गे इस्राएली आन पिप बाक्नीनी। परमप्रभु यावेमी इन कली तेल लुक्शा इस्राएल डा पिप सेल्लु। १ सामुएल ९:२१
- 18 परमप्रभु यावेम इन कली मेको पाप पाइब अमालेकी आन कली खतम पोक्चा, दे थमा पा देशा सोइशशो बाक्त। मेको आन कली काइ मवोइक्थु मसाइक्नी सम्म गे लडाइ पस डा पस बाक्चा माल्लो ननी।
- 19 गे मारदे परमप्रभु यावे आ देशो मटिनी? गे मारदे रोइशशो मार मार ताक्नी? मिनु परमप्रभु यावे आ डोंइती मार मरिम्शो बाक्मे, मेको पनी” देंमाक्त।
- 20 तन्न सावलमी सामुएल कली “गो परमप्रभु यावे आ देशो टीता। गो परमप्रभु यावेम सोइशशो रागी लती। मिनु अमालेकी आन पिप अगाग कली ग्याइशशा चाक्ता। गो आ मुर नेल्ल आन कली खतम पोक्तामी।
- 21 मुरपुकीम रोइशशो मार मार भेडा नु बी ब्यफ नु रिम्शो थोत्रक गिल्यालम परमप्रभु यावे, इन परमप्रभु कली चढ़ेचा कली वोइशशो बाक्नीम” देंमाक्त।
- 22 मिनु सामुएलमी “परमप्रभु यावेमी चोशा चढ़ेशो नु अरु चढ़ेशो क्येडा आ देशो टिशो दाक्ब। थमा पा, चढ़ेशो क्येडा आ देशो टिचा रिम्शो बाक्ब। मिनु सांड आ बांसो चढ़ेचा क्येडा आ देशो टिचा रिम्शो बाक्ब। यसैया १:११-१७; येरमीया ७:२२; होसे ६:६; आमोस ५:२१-२२; मीका ६:६-८; जकरिया ७:५-७; मती १:१३; मती १२:७
- 23 मेको आ देशो मटिचा लिंक्यु कोत्रचा खोदेशो पाप बाक्ब। मटिचा हेंथे पतीके मूर्ति पूजा पशो खोदेशो बाक्ब। मारदे हना गे परमप्रभु यावे आ देशो टिचा प्रोंइतीनी। मेकोम इन कली यो पिप सेल्लतीक रे प्रोंइशो बाक्ब” देंमाक्त। १ सामुएल १६:१
- 24 मिनु सावलम सामुएल कली “गो पाप पाता। परमप्रभु यावे आ देशो नु इन लोत्र ममिम्तु। मारदे हना गो मुर आन क्येडा हितो। मिनु मुर आन देशो टीता।

- 25 तन्न गो मुल आं पाप माफ तडल, दे पुंडनुड। गो नु जाक्कीन। मिनु गो परमप्रभु यावे कली ठेयब सेल्लुड” देमाक्त।
- 26 मिनु सामुएलमी “गो गे नु मलेनुड। गे परमप्रभु यावे आ देशो प्रोइतीनी। मिनु परमप्रभु यावेमी यो इन कली इस्राएल डा पिप दुम्तीक रे प्रोइतु” देमाक्त।
- 27 मिनु सामुएल गाक्चवानु, सावलम आ वा आ सुर ग्याइक्ता बाक्त। मिनु मेको गाक्माक्त।
- 28 मिनु सामुएलम मेको कली “मुलाक्त रे परमप्रभु यावेम इस्राएल डा राज्य खाक्शा अर्को कली गेप्टु। इन नेक्था डा, इन क्येडा रिम्शो मुर का कली गेप्टु। १ सामुएल २८:१७
- 29 परमप्रभु यावे इस्राएल डा मान ताइब बाक्ब। मेकोमी आ लोत्र मफाइक्ब। आ थुं यो मफाइक्ब। मेको थुं फाइक्ब बेक्शा लाइब मुर खोदेशो ममाइ” देमाक्त। गन्ती २३:१९
- 30 मिनु सावलमी “गो पाप पाता। मो हना यो खुशो नु इस्राएली आन डोंइती आं मान ततीक गेने। गो नु लेतीन। मिनु गो परमप्रभु यावे, इन परमप्रभु कली ठेयब सेल्लुड” देमाक्त।
- 31 मोपतीके सामुएल सावल नु लेशशा लमाक्त। मिनु सावलमी परमप्रभु यावे कली ठेयब सेला बाक्त।
- 32 मिनु सामुएलमी “अमालेकी आन पिप अगाग कली एक चाक्कीन” देमाक्त। मिनु अगाग ओखां पा गाक्शा, मेक जाक्माक्त। मिनु अगागमी “थमा पा, एको बेक्चा डा श्येत बाक्ब” देमाक्त।
- 33 मिनु सामुएलमी “दोपा इ तरवारम मीश मुर आन कली आल मपाइशो सेला, मोपा इ ममा यो मीश मुर आन दातेमी आल मपाइशो दुम्ब” देमाक्त। मिनु सामुएलमी अगाग कली परमप्रभु यावे आ डोंइती गिल्गालम क्योरशा सदा बाक्त।
- 34 मिनु सामुएल रामाहम लमाक्त। सावल चहिं आ खिं गिबा लमाक्त।
- 35 मिनु सामुएल मबेकम सम्म गेनायो सावल कली गुम्थ मलमाक्त। तन्न परमप्रभु यावेम “सावल कली बिच्चीम ला इस्राएल डा पिप सेलु बाक्त” देशो, मिम्शा सुर्ता पस डा पस बाक्माक्त।

## 16

सामुएलम दाऊद कली पिप सेल्लो

- 1 परमप्रभु यावेमी सामुएल कली “गे सावल आ पर्वम गेना सम्म सुर्ता पा बाक्नेवे? गो मेको कली पिप दुम्तीक रे गुंडताक्ड। मुल गे नु बाक्शो ग्रोवमी तेल कुर पा लतो। गो इ कली बेथलेहेम डा येस्से आ बाक्तीक सोइक्वन। मारदे हना, गो मेको आ तौ का कली पिप सेल्ला कली योव्रता” देमाक्त। १ सामुएल १५:२३,३५
- 2 मिनु सामुएलमी “गो दोपा लने चाप्नुडा? एको लोत्र सावलम नेशा, आं कली साइक्ब” देमाक्त। मिनु परमप्रभु यावेम “गे मगिक्शो बी का लतो। मिनु परमप्रभु यावे कली क्योरशा चढेथ जाक्त, देनो।
- 3 येस्से कली यो मेको चढेतीक चाडम ब्रेल्लो। मिनु गे मार पचा माल्लेवे गो शेनन। गो सु कली कोंइनुडा मेको कली गे तेल लुक्तो” देमाक्त।
- 4 मिनु सामुएलमी परमप्रभु यावे आ देशो खोदेशो पवा बाक्त। मेको बेथलेहेम लमाक्त। मिनु सहर डा खूशोपुकी खिंखि पा गुम्थ जाक्शा, मेकोपुकीमी “गे मारदे जाक्नी? मार, नेल्ल रिम्शोन बाक्बा” देमा बाक्त।
- 5 मिनु सामुएलमी “नेल्ल रिम्शोन बाक्ब। गो परमप्रभु यावे कली चढेथ जाक्ती। गेपुकी आंम कली ठीक सेल्लीशा, चढेतीकेम जाक्कीन” देमाक्त। मिनु मेकोम चहिं येस्से नु आ तौ आन कली परमप्रभु यावे आ डोंइती ठीक सेल्ला चढेतीकेम ब्रेल्लीमी बाक्त।
- 6 मिनु मेको नेल्ल जाक्मा नोले सामुएलमी एलीआब कली तशा “परमप्रभु यावेम तेल लुक्चा देशो मुर एकोन बाक्ब” दे मिम्ता बाक्त।
- 7 तन्न परमप्रभु यावेम मेको कली “मेको दारशो नु लाइशो बाक्त हना यो, मेको कली ममिम्तो। गो मेको कली पिप मसेल्लुड। गो, परमप्रभु यावेम मुरुम खोदेशो पा मकोव्रनुड। मुरुम रां दारशो कोव्रशा मिम्नीम। गो मुर आ थुं कोव्रनुड” देमाक्त। येरमीया १७:१०; प्रकाश २:२३; प्रेरित १०:३४
- 8 मिनु येस्सेमी अबीनादाब कली ब्रेला बाक्त। मिनु सामुएल आ डोंइती गाक्पदा बाक्त। तन्न मेकोमी “ममाइ, परमप्रभु यावेम योव्रशो एको ममाइ” देमाक्त।
- 9 मिनु येस्सेमी शम्माह कली चाक्गा बाक्त। तन्न सामुएलमी “परमप्रभु यावेम एको कली यो मयोव्रड” देमाक्त।
- 10 मोपा येस्सेमी आ ७ जना तौ आन कली सामुएल आ डोंइती चाक्मी बाक्त। तन्न सामुएलमी “एको तेकोइ आन कली परमप्रभु यावेम मयोव्रमी” देमाक्त। १ इतिहास २:१३-१५; १ सामुएल १७:१२
- 11 मिनु सामुएलमी “मार इ तौ नेल्ल ओशोन नमी” देमाक्त। मिनु येस्सेमी “मुल यो कान्छा का नु बाक्ब। तन्न मेको दा भेडा गोठला बाक्ब” देमाक्त। मिनु सामुएलम येस्से कली “मेको कली ब्रेथ सोइक्वो। मेको मजाक्म सम्म गो मनिल्लु बाक्नय” देमाक्त। १ सामुएल १७:१४
- 12 मोपतीके मेकोमी मेको कली ब्रथ मुर सोइक्ता बाक्त। मेको लल चोव्रको पाइशो, दारशो मिक्च पाइशो नु दारशो ठिटा का बाक्माक्त। मिनु परमप्रभु यावेम सामुएल कली “बोक्शा, मेको कली तेल लुक्तो। एकोन बाक्ब” देमाक्त।
- 13 मिनु सामुएलमी तेल बाक्शो ग्रोव गुंडशा, आ लोक्ब आन डोंइती तेल लुक्ता बाक्त। मिनु परमप्रभु यावे आ सोक्त दाऊद तार जुक्ता बाक्त। मिनु मेना रे मेको नुन बाक्माक्त। मिनु सामुएल रामाह डा लां खोदा बाक्त। २ सामुएल २:४; २ सामुएल ५:३; भजन संग्रह ८९:२१

दाऊद सावल आ या कुरब दुम्शो

14 मिनू परमप्रभु यावे आ सोक्तीम सावल कली प्रोना बाकत। परमप्रभु यावे रे मरिम्शो पाइब सोक्तीम मेको कली श्येत गेवा बाकत।

15 मेको आ गेय पाइबपुकीम सावल कली “कोव्रडीन हजुर, परमप्रभुमी इन कली श्येत गेब सोक्त गेशो बाकब।

16 इन डोंइती बाकशो इन गेय पाइब आन कली इन पर्वम बीना ताप्ब का माल्शा चाक्कीन, दे मारदे मदेंनी? परमप्रभु रे मेको मरिम्शो पाइब सोक्तीम इन कली सुम्ब। मेना मेको मुरुम बीना ताप्ब। मिनू गे सानीनी” देमा बाकत।

17 मिनू सावलमी आ गेय पाइब आन कली “रिम्शो बीना ताप्ब मुर का मालीन। मिनू मेको कली आं बाक्तीक चाक्कीन” देमाकत।

18 मिनू मेको आ गेय पाइब आन दाते डा काम “बेथलेहेम डा येस्से आ तौ आन दातेमी, काम ताप्शो गो नेंशो बाक्नुड। मेको बोल्थो मुर बाकब। मिनू रिम्शो लडाइ पाइब, निप्स खाप्शा ब्वाक्ब नु दारशो यो बाकब। परमप्रभु यावे मेको नु बाक्शो बाकब” देमाकत।

19 मोपतीके सावलमी लोत्र कुरब मुर कली येस्से आ बाक्तीक सोइक्ता बाकत। मिनू मेकोम आ भेडा योत्रब तौ दाऊद कली सावल आ बाक्तीक सोइक्तीक हुकुम पवा बाकत।

20 मिनू येस्सेमी कुशुल के थैलो का शांबु, पाठा का इच्का खोइ शोब्ले कुर पा नु आ तौ दाऊद कली सावल आ बाक्तीक सोइक्ता बाकत।

21 मिनू दाऊद सावल आ बाक्तीक जाक्माकत। मिनू मेको आ गेय पतीकेमी योत्रसे बाकत। सावलम मेको कली थाम्पा दाक्चा गोवा बाकत। मिनू मेको सावल आ या कुरब दुम्माकत।

22 मोपतीके सावलम येस्से कली “दाऊद आं गेयमीन बाक्ल। मारदे हना गो मेको तशा ग्येरसाक्यी” दे लोत्र कुरब सोइक्ता बाकत।

23 मिनू परमप्रभु रे मरिम्शो श्येत गेब सोक्त सावल तार जुक्तानु, दाऊदमी बीना ताप्बाक्माकत। मिनू मरिम्शो पाइब सोक्तीम प्रोइशा लमेनु, सावल साबाक्माकत।

## 17

दाऊद नु गोल्याथ

1 पलिस्तीपुकीम लडाइ पचा कली आन लडाइ पाइब आन कली खुप्तमे बाकत। मिनू यहूदा डा सोकोहम बुक्मा बाकत। मेकोपुकीमी सोकोह नु आजेका आस दाते एफस-दाम्मीम आन बाक्तीके सेल्मे बाकत। यहोसु १५:३५

2 सावल नु इस्राएलीपुकी यो गुम्शा एलाह डा दिमम आन बाक्तीके सेल्मे बाकत। मेकोपुकी पलिस्ती आन डोंइती लहर पा राम्मा बाकत।

3 पलिस्तीपुकी डांडा का नु इस्राएलीपुकी अर्को डांडा पा बाक्मा बाकत। मेको आन दातेमी दिम का बाक्माकत।

4 मिनू पलिस्ती आन बाक्तीक रे गाथ डा गोल्याथ नें पाइशो बोल्थो लडाइ पाइब का मूशा, पिमाकत। मेको ६ कुबीत ३ इन्च लाइशो बाक्माकत। कुबीत का ०.५ मिटर बाकब। यहोसु ११:२२

5 मेको आ पियामी कांसा के टोपी बाक्माकत। ५ हजार शेकेल डा कांसा के फेक्तीक फेक्शो बाक्माकत। शेकेल का ११.५ ग्राम, तोला का खोदेशो बाकब।

6 मेको आ खोइलीम कांसा के मुइक्तीक मुइश्शो बाक्माकत। मेको आ बलाम ठेयब कांसा के या कुरशो बाक्माकत।

7 मेको आ तूतीक आ ग्याइक्तीके वा प्रोत्रब आन शी खोमो बाक्माकत। मेको आ तूतीके फलाम के बाक्माकत। मेको ६० शेकेल डा बाक्माकत। मेको आ या कुरब मेको आ डोंइडोंइती गाक्बाक्माकत। शेकेल का ११.५ ग्राम बाकब। मेको या ६९० ग्राम बाकत। इतिहास ११:२३

8 मेको मुर राप्शा, इस्राएल डा मुर नेल्ल आन कली ठेयब सेंदा पा “ए सावल आ गेय पाइबपुकी, गेपुकी मारदे लडाइ पथ जाक्नीनी? गो पलिस्ती नड। गो नु लडाइ पचा कली इन मुर योत्रडीन। मिनू लडाइ पथ पिन। गे सावल आ गेय पाइब मननी डा?

9 आ कान लडाइ पा मेकोम आं कली साइक्ने चाप्ती हना, गो इन वाइल दुम्नीकी। तन्न गो मेको कली ग्राती हना, गेपुकी आंइ वाइल दुम्शा, आंइ गेय पचा माल्नीनी” देमाकत।

10 मिनू लेंशा “गो मुलाक्ती इस्राएल डा लडाइ पाइब आन कली आइक्व मिम्नुड। मुर का सोइक्तीन। मिनू गो लडाइ पाइबक्स्कु” देमाकत। २राजा १९:१६; भजन संग्रह ७४:१८; सेफन्याह २:८

11 मिनू सावल नु इस्राएलीपुकी मेको पलिस्ती आ देशो नेंशा, थाम्पा हिंमा बाकत।

12 दाऊद बेथलेहेम, एफ्राथाह सहर डा यहूदा डा येस्से माइश्शो आ तौ बाक्माकत। मेको येस्से के ८ जना तौ बाक्मा बाकत। सावल आ पालाम मेको खाल्पा बाक्माकत। १सामुएल १६:१-११

13 येस्से आ तौ, जेठा, माइला नु साइला लडाइ पचा कली सावल आ नोले खोइश्शो बाक्मा बाकत। मेको जेठा एलीआब, आ माइला अबीनादाब नु आ साइला शम्माह बाक्मा बाकत।

14 दाऊद चहिं कान्छा बाक्माकत। मेको ठिटा सां चहिं सावल आ नोले खोइश्शो बाक्मा बाकत।

15 मेना दाऊद सावल आ बाक्तीके नु बेथलेहेम आ आफ आ क्यारश भेडापुकी कोत्रचा कली एर ओंथ पाइक्बाक्माकत।

16 मेको पलिस्ती ४० नाकत सम्म नाक्दो सुनी आन डोंइती जाक्शा आ राप्तीकेम राप्बाक्माकत।

17 काबु नाक्ती येस्सेमी आ तौ दाऊद कली “इ लोकब आन कली एको ४ पाथी तांब्रा नु १० ओटा शोब्ले लाइश्शा रीब पा चोत्रथ लावो।

18 एको १० ओटा दूध के सेल्लो जचा थोत्रक चहिं आन हजार का मुर आन कप्तान कली लतो। इ लोकबपुकी दोदेशो पा बाक्मा कोत्रडो। मिनु मेको आन रे मारेइ चिनु कुरशा जाक्को” दे मदा बाक्त।

19 मेना सावल, दाऊद आ लोकब सां नु इस्राएली नेल्ले एलाह डा दिमम पलिस्ती नु लडाइ पना पन बाक्मा बाक्त।

20 मिनु आ दीसा सुनी कना दाऊद आ भेडापुकी मुर आन कली “कोत्रडीन” दे येस्से आ देशो खोदेशो पा, मेको कोत्रथ गाक्माक्त। लडाइ पाइब नेल्ल आन आन राप्तीकेम राप्शा लडाइ के बाजा ताप्मे ना, मेको आन बाक्तीकेम जाक्दीम्माक्त।

21 इस्राएली पलिस्ती आन डोंइतीमी, पलिस्ती इस्राएली आन डोंइतीमी लहर पा राम्मा बाक्त।

22 मार मार वोइक्ब आन कली, मार मार गेशा, दाऊद आ लोकब आन राप्तीकेम मेको आन कली गुम्थ दोरशा लमाक्त।

23 मिनु मेको आ लोकबपुकी नु लोत्र पना पन बाक्मेनु, मेको गाथ डा पलिस्ती गोल्याथ आ हुल रे गूशा, डोंइती डा खोदेशो पा ग्रीमाक्त। मेको लोत्र दाऊदमे नेना बाक्त।

24 इस्राएलीपुकी मेको मुर कली तामे चोटीन प्रोक्बाक्मा बाक्त।

25 मेकोपुकीमी “कोत्रडीन, मेरे मुर नाक्त किंत किंत गूशा इस्राएली आन कली ग्रीशा हिंपाइक्ब। मेरे मुर कली साइक्ब कली पिपम शुश इनाम गेब। आ तमी यो मेको मुर कली गेशा ग्युंवे पाइब। मेको आ खिं डा मुर आन कली इस्राएलमी पिप आ गेय पतीक रे थमा पा प्रोंइब” देमा बाक्त।

26 मिनु दाऊदमी आ नेक्था बाक्ब आन कली “मेरे पलिस्ती कली साइक्ब नु इस्राएली आन कली मुने दोक्तीक रे प्रोंइबमी मार ताइबा? गेना हना यो ब्रोंइशा बाक्ब परमप्रभु आ लडाइ पाइब आन कली शुक्शी पाइब मेरे खोइक्तीक चिनु मखोइशो पलिस्तीम मार मिम्बा?” देमाक्त।

27 मिनु मेको आ पर्वम मार दुम्बा? मेको कली साइक्ब मुर कली मार पांइसीबा, दे मुरपुकीमी दाऊद कली शेंदमे बाक्त।

28 मेको कली मुरपुकी नु लोत्र पा बाक्शो आ लोकब एलीआबम नेना बाक्त। मिनु मेको गाइक्ता बाक्त। मेकोम दाऊद कली “गे मारदे एक बाक्डे? गोरशो रागीम बाक्शो मेको इच्का खोइ भेडापुकी यो सु कली कोत्रपाइक्मी? गो इ कली तुइक्नुड। गे मटीब नु हेंथे पाइब बाक्नेवे। गे एक लडाइ कोत्रथ ला जाक्शो नवे” दे मदा बाक्त।

29 मिनु दाऊदमी “मुल गो मार पडा डा? गो हिल्लो पचा यो मताइनुडा?” देमाक्त।

30 मिनु मेको ब्राशा अर्को मुर आन बाक्तीक लशा, मेको लोत्र हिल्लो पामी बाक्त। तन्न नेल्लेमी मेको कली मोदेशो लोत्र मदमे बाक्त।

31 मिनु दाऊदमे देशो लोत्र मुरपुकीम सावल कली शेंदमे बाक्त। मिनु मेकोमी दाऊद कली ब्रेथ सोइक्ता बाक्त। १सामुएल १७:३१

32 मिनु दाऊदमे मेको कली “गे ग्येथ लुक्च मदुमीन। गो इन गेय पाइब लशा मेको पलिस्ती नु लडाइ पाइक्नुड” देमाक्त।

33 मिनु सावलमी “गे लशा, मेको पलिस्ती नु लडाइ पने मचाप्नेवे। गे नक डा आलन बाक्नेवे। मेको साइ रेन लडाइ पाइब मुर बाक्ब” दे मदा बाक्त।

34 मिनु दाऊदमी सावल कली “गो आं आफ आ भेडा गोठला नड। जोइ वां जाक्शा। भेडा बगाल रे योल्नीम।

35 मेना गो मेको आन कली खेदा पा लशा, आन शोत्र रे मेको रोइशशा चाक्नुड। आं कली क्राइक्चा कली मेको लेत्तेक्म हना, मेको आन कली आन शापेम ग्याइशशा तुप्शा साइक्नुडमी

36 गो जोइ वांपुकी साइशो बाक्नुड। मेको खोइक्तीक चिनु मखोइशो पलिस्ती यो मेको आन खोदेशो दुम्ब। मेकोमी गेना हना यो ब्रोंइशा बाक्ब परमप्रभु आ लडाइ पाइब आन कली शुक्शी पशो बाक्ब।

37 आं कली जोइ नु वां आन शोत्र रे प्रोंइब परमप्रभु यावेमी मेको पलिस्ती आ गुइ रे यो प्रोंइब” देमाक्त। मिनु सावलमी “लावो, परमप्रभु यावे गे नु बाक्ल” देमाक्त।

38 मिनु सावलमी दाऊद कली आ लडाइम फेक्तीक फेक्पदा बाक्त। कांसा के टोपी आ पियाम गुप्ता बाक्त। मिनु आ कांसा के फेक्तीक यो फेक्ता बाक्त।

39 मेको नोले मेको आ तरवार पिप्ता बाक्त। मिनु दाऊद गाक्चा थुं पवा बाक्त। तन्न मचबा बाक्त। मारदे हना मेकोमी मेको गेना यो मफेक्शो, मपांइशो बाक्माक्त। मोपतीके मेकोम सावल कली “गो एको पांइशा, फेक्शा लने मचाप्नुड। मारदे हना गो एको गेनायो मपांइशो मफेक्शो नड” देमाक्त। मिनु मेकोमी मेको नेल्ल पुइक्मी बाक्त।

40 मेको नोले मेकोमी आ कोक्के कुरा बाक्त। मिनु खोला रे ५ ओटा सिल सिल देशो फुल्लु गुबा बाक्त। मिनु आ झोलाम कुर पवा बाक्त। मिनु आ हुरद शेशा, मेको पलिस्ती नु लडाइ पथ लमाक्त।

41 मेको पलिस्ती आ या कुरब कली डोंइती गाक्पाइशशा, दाऊद आ बाक्तीक गे पिमाक्त। मेको आ तेक्तीक कुरबमी मेको कली वारच पशो बाक्माक्त।

42 मिनु मेकोमी दाऊद कली तशा, रिस्से बाक्त। मिनु लल चोत्रचो, पाइशशो दारशो टिटा कली तशा, शुक्शी पचा गोवा बाक्त। १सामुएल १६:१२

43 मिनु मेको पलिस्तीम दाऊद कली “मार, गो कुचुम नडा? मिनु कोक्के शेशा, गो नु लडाइ पथ जाक्डे” मदा बाक्त। मिनु मेकोमी आ देवता आ नें थिशा दाऊद कली सराप पवा बाक्त।

44 मेकोमी “पिवो, गो इ श्ये चिक्ब नु ब्वाकी डा जन्तु आन कली ब्बचा गेनुड” दे मदा बाक्त।

45 मिनु दाऊदमी पलिस्ती कली “गे, गो नु लडाइ पचा कली तूतीक तरवार कुरशा, पिशो बाक्नेवे। तन्न गो गे नु लडाइ पचा कली मुर नेल्ल आन परमप्रभु यावे, इस्राएल डा लडाइ पाइब आन परमप्रभु आ नेमी पिशो बाक्नुड।

46 मुलाकती परमप्रभु यावेम इ कली आं गुडम गेब। गो इ कली साइक्नन। मिनु इ पिया खोइश्शा। इ रां नु पलिस्ती आन रां चिक्व नु ब्वाकी डा जन्तु आन कली ब्वचा गेनुड। मिनु इस्राएलम परमप्रभु का बाक्ब, दे रागी नेल्ल डा मुरुम तुइक्नीम।

47 मिनु एक बाक्शो मुर नेल्लेम परमप्रभु यावेम तूतीक नु तरवारम मप्रॉइब, दे तुइक्नीम। मारदे हना एको लडाइ परमप्रभु यावे केन बाक्ब। मेकोमी गे नेल्ल इन कली आंइ गुडमी गेब” दे मदा बाक्त। प्रस्थान १५:३; भजन संग्रह २०:८; जकरिया ४:६

48 मिनु मेको पलिस्ती दाऊद गे पिमाक्त। मिनु दाऊदम मेको नु लडाइ पचा कली, आ डोंइती गे दोरशा लमाक्त।

49 मेकोमी आ गुड झोलांम कुर पा फुल्लु का गुंडदा बाक्त। मिनु हुरदम वोदा बाक्त। मिनु हिरशा, मेको पलिस्ती आ कुप्फीम आबा बाक्त। मिनु मेको फुल्लुम कुप्फ होदा बाक्त। मिनु मेको खपीम गोल्माक्त।

50 मोपा दाऊद आ हुरद नु फुल्लुम ग्रामाक्त। मेको नु तरवार मबाक्त हना यो, पलिस्ती गोल्याथ कली सदा बाक्त।

51 मेको दोरशा मेको पलिस्ती गोल्याथ गे लमाक्त। मिनु आ नेक्था राम्माक्त। मेको आ तरवार खोत रे शोइश्शा, मेको कली साइश्शा आ पिया खोदा बाक्त। पलिस्तीपुकीमी आंम बोल्यो लडाइ पाइब साइश्शो तामे बाक्त। मिनु मेकोपुकी हिंशा प्रोक्मा बाक्त।

52 मिनु इस्राएली नु यहूदीपुकीमी लडाइ डा ग्रीतीक ग्रीमा बाक्त। गाथ नु एक्रोन डा टेयब लाप्यो सम्म मेको आन कली थाम्पा खेदा पामे बाक्त। शा-आराइम, गाथ नु एक्रोन लतीक लां सम्म आन बेक्शो रां नेल्ल थाम्पा ब्रमाक्त।

53 पलिस्ती आन कली खेदा पा लेम्मानु, मेकोपुकीमी मेको आन बाक्तीक डा मारेइ मारेइ खुप्तमे बाक्त।

54 दाऊदमी गोल्याथ आ या मेको आ ताम्बुमीन प्रॉइशा, मेको आ पिया चहिं कुरशा यरूसलेम चाक्मा बाक्त।

55 मिनु सावलमी दाऊद कली पलिस्तीपुकी नु लडाइ पथ लशो तशा, मेकोम आ लडाइ पाइब आन कप्तान आबेनर कली “मेको ठिटा सु का आ तौ बाक्मे?” दे हिल्लो पवा बाक्त। मिनु आबेनरी “गो इन नैमी कसम जशा देंनुड, गो मेको कली मतुइक्नुड” देंमाक्त।

56 पिपम आबेनर कली “मेको सुका आ तौ बाक्मे रुपो” देंमाक्त।

57 मिनु दाऊद मेको पलिस्ती कली साइश्शा, लेम नोले आबेनरी दाऊद कली सावल आ डोंइती चाक्दीदा बाक्त। दाऊदमी मेको पलिस्ती आ पिया गुडम ग्याइश्शो बाक्माक्त।

58 मिनु सावलम मेको कली “ए ठिटा, गे सुका आ तौ नवे” दे हिल्लो पवा बाक्त। मिनु दाऊदमी “गो इन गेय पाइब बेथलेहेम डा येस्से आ तौ नड” देंमाक्त।

## 18

दाऊद नु योनाथन वारचबु दुम्शो

1 मोपा दाऊदम सावल नु लोत्र पने थुमा बाक्त। नोले योनाथनमी, दाऊद कली आंम कली खोदेंशो पा आ थुं रेन दाक्चा गोवा बाक्त। मेको सावलम तुइक्ता बाक्त।

2 मिनु सावलमी दाऊद कली लदा बाक्त। आ आफ आ खिं लेशशा लचा मगेवा बाक्त। १सामुएल १६:२२; १सामुएल १७:१५

3 मिनु योनाथन नु दाऊद आस थुं रेन थमा पा वारच बु दुम्सा बाक्त। मारदे हना मेको निकशी काम अर्को कली आंम कली खोदेंशो पा दाक्मुसा बाक्त। मिनु कबल का पाम्से बाक्त। १सामुएल २३:१८; २सामुएल २१:७; १सामुएल १९:१; १सामुएल २०:१७; २सामुएल १:२६

4 मिनु योनाथनमी आ फेक्शो वा प्रुइश्शा दाऊद कली गेवा बाक्त। आ तरवार, लिब्रा नु पेटी सुन्दा प्रुइश्शा गेवा बाक्त।

5 दाऊदम सावल आ पथ सोइश्शो हिंचा डा गेय यो रिम्शो पा पवा बाक्त। मिनु सावलमी दाऊद कली नेल्ल क्येडा सक्ति पाइश्शो कप्तान सेला बाक्त। मोपा मेको कली मान बारपाइश्शोमी सावल नु आ टेयब मुरपुकी यो ग्येरसमा बाक्त।

दाऊद कली साइक्चा माल्शो

6 दाऊदम पलिस्ती आन कली साइश्शा लेम्मेनु, इस्राएल डा सहर नेल्ल डा मीश मुर नेल्ल कोव्रथ गूमा बाक्त। सिल पाइब मीश मुरपुकी खैजडी ताप्शा, कुम्सो पना पन, सिल पना पन पिप सावल कली गुम्थ जाक्मा बाक्त। न्यायाधीस ११:३४

7 मिनु मीश मुरपुकीम ग्येरसीशा “सावलम हजार हजार आन कली साइक्तीमी। तन्न दाऊदमी १० हजार, हजार आन कली साइक्तीमी” दे कुम्सो पामे बाक्त। १सामुएल २१:१२; १सामुएल २९:५

8 मिनु सावल थाम्पा गाइक्ता बाक्त। मेको लोत्र नेशा थाम्पा आ थुं खुरसे बाक्त। मेकोमी दाऊद कली चहिं “१० हजार, हजार तन्न आं कली चहिं हजार हजार ला देंतेकम। मुल मेको कली पिप सेल्चा का ला लीत” दे मिम्ता बाक्त।

9 मेको नाक्त रे सावलमी दाऊद कली गेहे पचा गोवा बाक्त।

10 आ दीसा परमप्रभु रे मरिम्शो पाइब सौक्त काम सावल कली सुमा बाक्त। मिनु सावलमी आ खिमी हेंथे पवा बाक्त। मिनु दाऊदमी डोंइती डा खोदेंशो पा सावल आ पर्वम बीना तबा बाक्त। सावल आ गुडमी तूतीक का बाक्माक्त। १सामुएल १६:१४, २३

11 मेकोम “गो दाऊद कली गारोम क्येप्नुड” दे मिम्शा, आ तूतीक आबा बाक्त। तन्न दाऊद निकशी खेयप दिल्ला मख्रपांडसे बाक्त। १सामुएल १९:१०; १सामुएल २०:३३

12 मिनु सावल दाऊद कली तशा हिंमाक्त। मारदे हना परमप्रभु यावेम आ कली प्रॉइशा दाऊद नु बाक्शो बाक्ब, दे तुइक्ता बाक्त।



- 13 मोपतीके सावलम दाऊद कली आ दरवार रे गुंडशा, हजार का मुर आन कप्तान सेला बाक्त। मिनु दाऊदमी आ मुर आन कली लडाइम लाइक्मी बाक्त।
- 14 मिनु परमप्रभु यावे मेको नु बाक्तीके आ पशो गेय नेल्लेमी मेको रिम्शो दुम्माक्त। १ सामुएल १८:५
- 15 सावलमी दाऊद आ गेय नेल्ल रिम्शो दुम्शो तशा, डोंइती क्येडा हिंमाक्त।
- 16 इस्राएल नु यहूदा डा मुर नेल्लेमी दाऊद कली दाक्तमे बाक्त। मारदे हना मेको लडाइ पतीकेम लां कोंइशा डोंइती गाकबाक्माक्त।
- 17 मिनु सावलम दाऊद कली “गो आं ठेयब तमी मेराब इ कली गेशा ग्युंवे पपाइक्नुड। तन्न गे मेको आ पर्बम बोल्यो पा आं गेय पचा माल्नेवे। मिनु परमप्रभु यावे आ पर्बम लडाइ पावो” दे मदा बाक्त। मारदे हना सावलम दाऊद कली आंम आ गुडम ममाइ पलिस्ती आन गुड रे साइक्पाइक्चा माल्शो बाक्माक्त।
- 18 मिनु दाऊदमी “गो सु नडा डा? आं आफ आ खिं डा मुर इस्राएली सु नमी डा? गो पिप आ चांइवा दुम्नुडा?” देमाक्त। २ सामुएल ७:१८
- 19 मो हना यो सावल आ तमी मेराब नु दाऊद आस ग्युंवे दुम्तीक नाक्त जाक्चा क्येडा डोंइती, मेराब कली मेहोला आ मुर अद्रीएल नु ग्युंवे पा सोइक्ता बाक्त।
- 20 तन्न सावल आ अर्को तमी मिकाल दाऊद नु दाक्मुसा बाक्त। मेको लोत्र सावलम नेनानु “आं मिम्शो गाप्ब दुम्त” दे मिम्ता बाक्त।
- 21 मेको आ थुंमी “गो मेको कली दाऊद नु ग्युंवे पपाइक्नुड। पलिस्ती आन गुडम बेक्पाइक्चा कली मेको वाल्पाइक्तीक गेय बाक्ब” देमाक्त। मोपतीके सावलमी आ चांइवा सेल्चा कली लोत्र पवा बाक्त।
- 22 मेकोमी आ गेय पाइब आन कली “एको लोत्र सुडम मतुइक्चा डा पा दाऊद कली मतीन” देमाक्त। मिनु मेकोपुकीम दाऊद कली “पिप इन क्येडा थाम्पा ग्येरशो बाक्ब। मिनु आ गेय पाइब नेल्ल आन दाक्शो यो गे बाक्नीनी। पिप आ खिं डा मुर नु ग्युंवे पतीक नाक्ती यो मुलन बाक्ब” देमा बाक्त। १ सामुएल २२:१४
- 23 सावल आ मुरपुकीम दाऊद कली मोदेशो लोत्र पामेनु, दाऊदम मेको आन कली “गेपुकीम पिप आ तमी नु ग्युंवे पचा आइक्च लोत्र मिम्तीनी? आं खोदेशो मारेइ मथीब मुरुम ओदेशो पने चाप्नुडा?” दे माइक्मी बाक्त।
- 24 मिनु दाऊद आ देशो लोत्र आ गेय पाइबपुकीम सावल कली शेंदमे बाक्त।
- 25 मिनु मेकोमी दाऊद कली “जोरी सत्रु आन क्येक्क लेत्चा कली पिपम ग्युम्ली आ पर्बम सहे का पलिस्ती आन खोइक्तीक चिनु खोइक्तीक डा कुशुल ला पुंडब मतीन” देमाक्त। मारदे हना पलिस्ती आन गुड रे दाऊद बेक्ल देशो बाक्माक्त।
- 26 मिनु सावल आ देशो लोत्र आ गेय पाइब मुरपुकीम दाऊद कली नेंपदमे बाक्त। मिनु मेको लोत्रमी मेको पिप आ तमी नु ग्युंवे पचा बिस्से बाक्त।
- 27 मिनु देशो नाक्त आ डोंइती, नाक्त दाऊद आ मुरपुकी नु लशा सहे निक्शी पलिस्ती आन कली सदमे बाक्त। मिनु मेकोम मेको आन खोइक्तीक चिनु खोइक्तीक डा कुशुल लाइइशा, चांइवा सेल्यीनी, दे पिप आ डोंइती हिक्शा, गेवा बाक्त। मिनु सावलमी आ तमी मिकाल दाऊद कली गेशा ग्युंवे पाइक्ता बाक्त।
- 28 मिनु सावलमी परमप्रभु यावे दाऊद नु बाक्ब, दे तुइक्ता बाक्त। आ तमी मिकालम मेको कली दाक्ब, दे यो तुइक्ता बाक्त।
- 29 मिनु सावल दाऊद क्येडा शुश हिंचा गोवा बाक्त। मिनु आ लीशो ब्रोंइतीक नाक्त सम्मन मेको दाऊद आ जोरी सत्रु दुम्माक्त। १ सामुएल १८:१२
- 30 पलिस्ती आन कप्तान का का पा लडाइ पथ जाक्बाक्मा बाक्त। मेकोपुकी मोपा जाक्मानु, सावल आ अरु गेय पाइब आन क्येडा दाऊदमी रिम्शो गेय पवा बाक्त। मोपा मेको आ नें ठेयब दुम्माक्त।

## 19

योनाथनम दाऊद कली प्रोंइशो

- 1 सावलमी दाऊद कली साइक्चा, दे आ तौ योनाथन नु आ गेय पाइब नेल्ल आन कली लोत्र पवा बाक्त। तन्न सावल आ तौ योनाथन दाऊद आ वारच बाक्माक्त। १ सामुएल १८:३
- 2 योनाथनमी आ आफ सावलमी दाऊद कली साइक्चा माल्शो बाक्ब, दे दाऊद कली शेंदा बाक्त। मेकोमी दाऊद कली “होस पा, दीसा सुनी सुडमी मतुइक्तीकेमी खुइइशा बाक्कीन।
- 3 सुनी गो ग्रूशा पीनुड। मिनु इन खुइइशा बाक्तीके आ नेक्था आं आफ नु युम्नुड। मिनु मेको नु इन पर्बम लोत्र पाइनुड। मारेइ तुइक्ताकड हना, गो इन कली शेंनुड” देमाक्त।
- 4 मिनु योनाथनम आ आफ कली दाऊद आ पर्बम रिम्शो लोत्र पा “इन गेय पाइब दाऊद कली मारेइ पाप मपने। मारदे हना मेकोमी इन कली मारेइ पाप मपावो। थमा पा, आ पशो गेय नेल्ल इन कली रिम्शो दुम्ब।
- 5 मेकोमी पलिस्ती कली सदानु, आंमा चहिं बेक्नुड देय ब्रोंइनुड, दे मतुइइशो बाक्त। मिनु परमप्रभु यावेम इस्राएल कली ठेयब सेल्शा ग्रापाइक्तु। गे मेको नेल्ल तशा शुश ग्येरशो बाक्तीनी। गे मारदे मेको दोस मताइब दाऊद कली मरिम्शो पचा माल्नीनी? बित्वीम मेको कली मारदे साइक्चा दाक्नीनी?” देमाक्त। १ सामुएल १७:५०
- 6 मिनु सावलमी योनाथन आ लोत्र नेशा “परमप्रभु यावे ब्रोंइशा बाक्शो खोदेशो पा, दाऊद मसाइक्नुड” दे कसम जवा बाक्त।

7 मिनू योनाथनमी दाऊद कली ब्रेशा, मेको लोव्र नेल्ल नेंपदा बाक्त। मिनू योनाथनमी दाऊद कली सावल आ बाक्तीके चाकदीदा बाक्त। मिनू मेकोम डोंइती डा खोदेशो पा सावल आ गेय पवा बाक्त।

8 मिनू लेंशा पलिस्तीपुकी नु लडाइ दुम्माक्त। दाऊदम मेकोपुकी नु लडाइ पवा बाक्त। मिनू मेकोमी हिंचा डा पा लडाइ पतीके मेको पलिस्ती प्रोकमा बाक्त।

9 मिनू काबु परमप्रभु यावे रे मरिश्शो पाइब सोक्तीम सावल कली सुमा बाक्त। मेना सावल आ खिंमी तूतीक शेशा बाक्शो बाक्माक्त। दाऊद चहिं बीना ताप्ना ताप्न बाक्माक्त। १सामुएल १८:१०-११

10 मिनू सावलम दाऊद कली गारोम क्येच्या डा पा तूतीकेम आबा बाक्त। तन्न दाऊद दिल्माक्त। मिनू मेको तूतीक गारोम युक्से बाक्त। दाऊद चहिं ब्रोंइशा प्रोकमाक्त।

11 सावलमी मेको कली सुनी साइक्या कली दाऊद आ खिंम क्यारी पाइब मुर वोदा बाक्त। तन्न दाऊद आ मीश मिकालमी मेको कली हिंपाइशा “गे मुल नाक्दोन प्रोकशा मगाक्तीनी हना, दीसा इन कली साइक्नीम” दे मदा बाक्त। भजन संग्रह ५९:१

12 मिकालमी दाऊद कली झेल रे उइ तोइक्पदा बाक्त। मिनू मेको सुइमी मतुइक्थु प्रोकमाक्त।

13 मिकालमी मूर्ति चाक्शा, दाऊद आ ब्राख्येम वोदा बाक्त। मिनू आ पिया थॉइसीतीकेम चहिं क्यारश आ चां वोदा बाक्त। उत्पत्ती ३१:१९

14 मिनू सावलमी दाऊद कली कोव्रथ मुर सोइक्तानु, मेकोम “रोइ पशो बाक्ब” देंमाक्त।

15 मिनू सावलमी मेको आन कली “गे आमा दाऊद कली कोव्रडीन” दे सोइक्तीमी बाक्त। मेकोमी “मेको कली आ खाट सुन्दा क्युक्शा एक चाक्कीन। मिनू गो साइक्नुड” दे सोइक्तीमी बाक्त।

16 मिनू मेकोपुकी जाक्मानु, ब्राख्येम मूर्ति नु पिया थॉइतीकेमी क्यारश आ चां ला थित्मे बाक्त।

17 मिनू सावलमी मिकाल कली “गे मारदे आं कली जोल पाइय्यी? आं जोरी सत्रु कली मारदे रिश्शो पा प्रोकपदी?” देंमाक्त। मिनू मिकालमी “मेकोम ‘आं कली रिश्शो पा मप्रोकपाइक्ती हना, गो इ कली साइक्नन’ दे माइक्ती” देंमाक्त।

18 मिनू दाऊद प्रोकशा लशा, रामाह सामुएल आ बाक्तीकेम जाक्दीम्माक्त। मिनू सावलमी मार मार पवा, मेको नेल्ल शेंदा बाक्त। मिनू मेको नु सामुएल लशा नायोथमी बाक्सा बाक्त।

19 मिनू मुर कामी सावल कली “दाऊद रामाह डा नायोथम बाक्ब” दे शेंदा बाक्त।

20 सावलमी दाऊद कली ग्याइक्चा, दे मुर आन कली सोइक्ता बाक्त। मेकोपुकीमी परमप्रभु यावे आ लोव्र पाइब आन हुल परमप्रभु यावे आ सोक्तीम लोव्र पा बाक्शो तामे बाक्त। मिनू सामुएल मेको आन ठेयब मुर बाक्माक्त। मिनू परमप्रभु आ सोक्तीम मेको आन कली सुमा बाक्त। मिनू मेकोपुकी यो परमप्रभु यावे आ सोक्तीम लोव्र पामे बाक्त। १सामुएल १०:१०-१२

21 मिनू सावलम मेको नेंशा, अर्को हुल का सोइक्ता बाक्त। मेकोपुकीम यो परमप्रभु यावे आ सोक्तीम लोव्र पामे बाक्त। मिनू सावलमी लेंशा अर्को हुल का सोइक्तीमी बाक्त। मिनू मेकोपुकी यो मोदेशो दुम्मा बाक्त।

22 मिनू नोले सावल आंमान रामाहम पिशा, सेकुम बाक्शो ठेयब कुवाम जाक्माक्त। मिनू मेकोमी “सामुएल नु दाऊद ते बाक्सा?” दे हिल्लो पवा बाक्त। मिनू “मेको निक्शी रामाह डा नायोथम बाक्नीसी” दे शेंदमे बाक्त।

23 मेको रामाह डा नायोथ लना लन पवानु, परमप्रभु आ सोक्तीम मेको कली यो सुमा बाक्त। मिनू रामाह डा नायोथ सम्मन, परमप्रभु यावे आ लोव्र पना पन जाक्दीम्माक्त।

24 मेकोमी यो आ वा प्रुइशा, सामुएल आ डोंइती परमप्रभु यावे आ सोक्तीम लोव्र पना पन नाक्त रे नु नाक्दो रे शिश्ना बाक्माक्त। मोपतीके मुरपुकीम “मार, सावल यो परमप्रभु यावे आ लोव्र पाइब आन दातेमी बाक्मे?” देंबाक्मा बाक्त।

## 20

योनाथनम दाऊद कली वारच पशो

1 मिनू दाऊद रामाह डा नायोथ रे प्रोकशा, योनाथन आ बाक्तीक जाक्दीम्माक्त। मिनू मेकोमी योनाथन कली “गो मार पडा? आं दोस मार बाक्बा? मारदे इन आफोम आं कली साइक्चा माल्बा?” दे हिल्लो पवा बाक्त।

2 मिनू योनाथनमी “मोदेशो मदुम्ल। गे मबेक्नीनी। आं आफोम आं कली मदेंथु, आइक्च नु ठेयब गेय मारेइ मपाइब। ओदेशो लोव्र आं आफोम आं रे दोपा खुइक्बा डा? मोदेशो मपाइब” देंमाक्त।

3 मिनू दाऊदमी “गे आं कली दाक्नीनी, दे इन आफोम तुइक्ब। मेकोमी ‘योनाथनम मतुइक्तल। तुइक्ताक्व हना, आ थुं खाइक्ब’ दे मिश्शो बाक्ब। थमा पा, परमप्रभु यावे ब्रोंइशा बाक्शो खोदेशो पा बेक्तीक आं नेक्था बाक्त” दे कसम जवा बाक्त।

4 मिनू योनाथनमी दाऊद कली “गे मार देंनीनी, गो मेको पाइनुड” देंमाक्त।

5 मिनू दाऊदमी योनाथन कली “दीसा औसी बाक्ब। गो पिप नु बाक्शा, जचा माल्नुड। गो नाक्त सां सम्म रू मेर लशा खुइशा बाक्नुड।

6 इन आफोम आं मजाक्शो आ परबम लोव्र गुंइताक्व हना, मेको कली ‘दाऊदमी बेथलेहेम आ खिंम रीब पा लचा माल्तीके, आं कली हिल्लो पती। मारदे हना मेकेर खिं डा मुर नेल्लेमी बर्सम चढ्हेतीक चढ्हेचा माल्बाक्माक्त’ देंनीन।

7 मिनू मेकोम ‘ठीक बाक्ब’ देंत हना, मेको रिश्शो बाक्ब। तन्न मेको गाइइशा चुरशा पाप्नु हना, मेकोमी आं परबम मरिश्शो मिश्शो बाक्ब, दे गे तुइक्नीनी।

8 मोपतीके गे इन गेय पाइब, गो नु थमा सुइक्का डा गेय पने। मारदे हना गे नु गो परमप्रभु यावे आ डोंइती कबल का पशो बाक्स। गो दोस ताइब बाक्ती हना, गे आं कली साइय्नीनी। इन आफ बाक्तीकेमी मलाइय्नीनी” देमाक्त। १सामुएल १८:३

9 मिनु योनाथनम “मोदेशो लोत्र मपन। आं आफोम इन कली साइक्का मिशो गो तुइक्ताकड हना, इन कली शेंनुड” देमाक्त।

10 मिनु दाऊदम योनाथन कली “इन आफोम मरिशो लोत्र पापु हना, मेको सुम आं कली तुइक्पाइक्का?” देमाक्त।

11 मिनु योनाथनमी “गो नु पिने” देमाक्त। मिनु मेको निम्फा हिरथ लसा बाक्त।

12 मिनु योनाथनम दाऊद कली “गो इन कली, परमप्रभु यावे, इस्राएली आन परमप्रभु आ डोंइती एको लोत्र पाइनुड। दीसा कि नित्थ नाक्त आं आफ आ थुं थामु नोले मेकोम इन पबंम रिशो मिशो बाक्त हना, गो इन कली तुइक्पाइक्नुड।

13 तन्न आं आफोम मरिशो मिशो बाक्त हना यो, गो इन कली तुइक्पाइक्नुड। गो इन कली मतुइक्पाइक्ता हना नु इन कली मप्रोंइता हना, परमप्रभु यावेमी आं कली सजाइ गेवल। परमप्रभु यावे आं आफ नु बाक्शो खोदेशो पा गे नु यो बाक्ल।

14 गो ब्रोंइडा सम्म परमप्रभु यावेम आ गेना हना यो दाक्शा मप्रोंइशो खोदेशो पा इन दाक्तीक आं कली कोंइदीन।

15 परमप्रभु यावेम रागी रे दाऊद आ जोरी सत्रु नेल्ल क्याम्ताक्व हना यो, गे इन गेना हना यो दाक्तीक आं खिं डा मुर आन रे मक्याम्दीन” दे योनाथनमी दाऊद कली देमाक्त।

16 मेना योनाथनमी दाऊद आ खिं डा मुर नु कबल पा “परमप्रभु यावेम दाऊद आ जोरी सत्रु आन कली माल्शा ग्रुंडदल” देमाक्त।

17 मेको नु दाक्मुशो आ पबंम योनाथनमी दाऊद नु कसम जवा बाक्त। मारदे हना, मेकोम मेको कली आंम कली खोदेशो पा दाक्बाक्माक्त।

18 मिनु योनाथनम दाऊद कली “दीसा औंसी बाक्ब। इन नित्तीक श्येत्थ बाक्शो तशा, गे मबाक्नीनी, दे तुंडसीब।

19 मोपतीके नित्थ नाक्त इन खुइक्तीके उइ मेर लने। इन डोंइती खुइक्तीकेम लशा, फुल्लु आ नेक्था बाक्कीन।

20 मिनु गो मेको फुल्लु आ नेक्था ब्रा सां आप्नुड।

21 मिनु गो मेको वोंइश आल कली ब्रा इ डोंइती बाक्नीम, दे माल्थ सोइक्ताकड हना, गे गूशा पिन। परमप्रभु यावे ब्रोंइशा बाक्शो खोदेशो पा गे ठीक बाक्नीनी।

22 तन्न गो मेको वोंइश आल कली ‘कोवडो, ब्रा इ नोले गे बाक्नीम। मेको खुप्शा चाक्को’ देती हना, गे प्रोक्कीन। मारदे हना परमप्रभु यावेम इन कली सोइशो बाक्ब।

23 गो निक्शी इस दातेम पशो लोत्र गेना हना यो लील, दे परमप्रभु यावे सांकछी बाक्ब” देमाक्त।

24 मोपतीके दाऊद रू मेर खुइशशा बाक्माक्त। मिनु औंसीमी भोज ठीक दुम नोले पिप जचा कली निस्से बाक्त।

25 सावल डोंइती खोदेशो पा आ नित्तीकेम निस्से बाक्त। आ नित्तीके गारो आ नेक्था बाक्शो बाक्त। आबनेर मेको आ नेक्था निस्से बाक्त। योनाथन चहिं राप्शा बाक्शो बाक्माक्त। तन्न दाऊद आ नित्तीक श्येत्थ बाक्माक्त।

26 मेको नाक्त सावलम मारेइ मदमाक्त। मेको ग्रॉग्रा दिशो दुम माइ। मोपतीके मजाकम माइ, दे मिम्ता बाक्त। लेवी १५:१६

27 औंसी आ दीसा दाऊद आ नित्तीक श्येत्थ बाक्माक्त। मिनु सावलम आ तौ योनाथन कली “सिनाक्त मुलाक्त येस्से आ तौ भोजम मारदे मजाकम” दे हिल्लो पवा बाक्त।

28 मिनु योनाथनम सावल कली “दाऊदमी ‘गो बेथलेहेम लाइनुड’ दे लोत्र पापु।

29 मेकोमी ‘आं खिं डा मुरपुकी चढ़ेचा कली सहर लशो बाक्नीम। आं लोकबम आं कली मेक जाक्का, दे ब्रेत्ताक्की। मिनु गे आ कली शिशो पाइनीनी हना, आं लोकब आन कली ग्रुम्थ लचा गेयीनी’ देत। मोपतीके मेको पिप नु जथ जाक्ने मचब” देमाक्त।

30 मिनु सावल योनाथन नु गाइशशा मेको कली “गे दूली पाइब नु मटीब मीश आ तौ, गे येस्से आ तौ कली वारच सेल्शा, मुने दोक्शो बाक्नेवे। मिनु इ ममा इ कली जरमेशो आ पबंम मुने दोक्त।

31 येस्से आ तौ रागीम ब्रोंइशा बाक्म सम्म गे मलीनेवे। इ राज्य यो मलीब। मेको कली रीब पा एक चाक्का कली ब्रेत्थ सोइक्तीमी। थमा पा मेको साइक्का पुंडसीब बाक्ब” देमाक्त।

32 मिनु योनाथनमी आ आफ कली “मेको मारदे साइक्का पुंडसीबा? मेकोम मार पवा डा?” देमाक्त।

33 मेको लोत्रम पतीके सावलमी आ तूतीक क्युक्शा, आ तौ कली साइक्का मला बाक्त। मिनु योनाथनमी आ आफोम दाऊद कली साइक्कान माल्शो बाक्माक्त, दे तुइक्ता बाक्त। १सामुएल १८:११

34 मिनु योनाथन गाइशशा चुरशा आ नित्तीक रे बोक्शा, मारेइ मजवा बाक्त। मारदे हना दाऊद कली साइक्का माल्शो आ पबंम सुर्ता पवा बाक्त। आ आफोम दाऊद कली मरिशो पचा मिशो बाक्माक्त।

35 मिनु आ दीसा सुनी देशो खोदेशो पा, योनाथन दाऊद कली ग्रुम्थ लमाक्त। मेको नु वोंइश आल का यो बाक्माक्त।

36 मेकोमी मेको वोंइश आल कली “गो आं आप्शो ब्रा माल्थ लावो” दे मदा बाक्त। मेको वोंइश आल दोरमेनु, योनाथनम आ नोले गे ब्रा आबा बाक्त।

37 मिनु मेको वोंइश आल योनाथनम ब्रा आप्तीकेम जाक्दीम्मेनु, योनाथनम “ब्रा इ नोले गे बाक्ब” दे ब्रेत्ता बाक्त।

38 मिनु योनाथनमी मेको वोंइश आल कली “रीब पा लावो। देश मपावो” दे ब्रेत्ता बाक्त। मिनु मेको वोंइश आल ब्रा गुप्शा आ ठेयब मुर आ बाक्तीक चाक्का बाक्त।

39 मेको वोंइश आलम मारेइ मतुइशो बाक्माक्त। योनाथन नु दाऊदम ला आस डोंइती देशो लोत्र तुइक्तासे बाक्त।

40 मिनु योनाथनम आ या मेको वोंइश आल कली गेशा “सहरम लतो” दे सोइक्ता बाक्त।

41 मिनु मेको वोंइश आल लम नोले, दाऊद आ खुइक्तीक फुल्लु आ नोले रे गूशा, खेयप सां बाप्शा मान पवा बाकत। मिनु मेको निक्शी पुक्पु पाइक्मुसा बाकत। मिनु निम्फा डाक्सा बाकत। दाऊद योनाथन क्येडा शुश डाक्माकत।

42 मिनु योनाथनम दाऊद कली “रिम्शो पा लावो। गे नु गो परमप्रभु यावे आ नैमी कसम जशा, परमप्रभु यावे गे नु गो इस दातेमी बाकल। मेको इ चच युइ नु आं चच युइ आन दातेमी गेना हना यो बाकल” देमाकत। मिनु दाऊद बोक्शा लमाकत। योनाथन चहिं सहर लेम्माकत।

## 21

दाऊद प्रोक्शा नोब नु गाथ लशो

1 मिनु दाऊद नोब डा चढेब अहीमेलेक आ बाक्तीक जाक्माकत। मिनु अहीमेलेक खिंखि पा दाऊद कली ग्रुम्शा “मारदे इन का ला जाक्नी? गे नु सुइ मबाक्मा” देमाकत। १सामुएल २२:९,१९

2 मिनु दाऊदम चढेब अहीमेलेक कली “गो पिप आ हुकुममी जाक्ती। मेको गो सुइ आन कली शेंचा मदुम्नुड। गो आं मुर आन कली सुइ मबाक्तीकेम ग्रुम्शा नड, दे माइक्तामी।

3 मुल इन नु मार बाक्बा आं कली ५ ओटा शोब्ले कि दोशो बाक्मे, मोशो गेयीनी” देमाकत।

4 मिनु चढेबम दाऊद कली “गो नु शोब्ले मबाक्ब। कोंइतीक शोब्ले ला बाक्नीम। तन्न मार, मेरे वोंइश मुरपुकी मीश मुर रे डोन बाक्शो बाक्नीमी?” दे हिल्लो पवा बाकत। लेवी २४:५-९; प्रस्थान १९:१५

5 मिनु दाऊदमी “गो इन कली थमा लोत्र पाइनुड, गेना हना यो गो लां गाक्ची ना मीश मुर रे डोन बाक्नीकी। एको वोंइश मुर ग्रान्ना मदिशो बाक्नीम। मुल मेको क्येडा ग्रान्ना मदिशो बाक्नीकी” देमाकत।

6 मोपतीके मेकेर अरु शोब्ले मबाक्तीके चढेबमी मेको परमप्रभु यावे आ डोंइती वोंइशो कोंइतीक शोब्ले गेवा बाकत। तेको नाक्ती कोंइतीक शोब्ले परमप्रभु यावे आ डोंइती रे लदमे, मेको नाक्ती अर्को होश शोब्ले वोंइक्चा माल्बाक्माकत। मत्ती १२:३-४

7 सावल आ गेय पाइब आन दाते डा गेय पाइब का यो मेको नाक्ती मेकेर परमप्रभु यावे आ डोंइती दिक्शा, बाक्शो बाक्माकत। मेको एदोम डा दोएग बाक्माकत। मेको सावल आ गोठला आन नेल्ल क्येडा ठेयब मुर बाक्माकत। प्रस्थान २१:१३; लेवी १३:४,३१; १सामुएल २२:९,१८

8 दाऊदम अहीमेलेक कली “गे नु तूतीक तरवारपुकी बाक्नीमी? मारदे हना पिप आ गेय रीब पा पचा माल्तीके गो तरवार नु अरु या कुरचा मतड” देमाकत।

9 मिनु चढेबमी “एलाह डा दिंम इन साइशो पलिस्ती गोल्याथ आ तरवार एक बाक्ब। मेको निसाफ पतीक ऊरीम नु थुम्मीम बाक्शो झोला आ नोले वाम गिल्शा वोंइशो बाक्ब। मेको लाइक्नीनी हना, लतीन। मेको डा लाक्शा एक अर्को या मबाक्ब” देमाकत। मिनु दाऊदमी “मेको खोंदेशो रिम्शो अर्को तरवार मबाक्ब। आं कली मेकोन गेयीनी” देमाकत। १सामुएल १७:५०-५१; न्यायाधीस ८:२-३

10 मेको नाक्ती दाऊद बोक्शा सावल रे प्रोक्माकत। मिनु गाथ डा पिप अकीश आ बाक्तीके जाक्माकत। भजन संग्रह ५६:१

11 अकीश आ गेय पाइबपुकीम मेको कली “थमा पा रागी डा पिप दाऊद एकोन बाक्ब। एको आ पर्वम सावलम हजार हजार आन कली साइक्तु। दाऊदम १० हजार हजार आन कली साइक्तीमी” दे कुम्सो मपामे डा? १सामुएल १८:७

12 दाऊदम मेको लोत्र आ थुंम वोंइशो बाक्माकत। मिनु मेको गाथ डा पिप अकीश तशा थाम्पा हिंमाकत।

13 मोपतीके मेकोमी मेको आन डोंइती आ निप्स ग्राइशो खोंदेशो दुम्बु पवा बाकत। मेकोम ठेयब लाप्चोमी रेन्ना रेन्नु आ राल आ गल शोक्रेम तोक्ना तोक्न बाक्माकत। भजन संग्रह ३४:१

14 मिनु अकीशमी आ गेय पाइब आन कली “एको मुर आ निप्स ग्राइशो बाकत। एको कली मारदे आं बाक्तीक चाक्नी?

15 गो अरु निप्स ग्राइशो मुर माल्नुडा? गे मारदे एको कली आं डोंइती हेंथे पपाइक्चा कली चाक्नी। मेको आं खिंमी बाकल, दे मिन्नीनी?” दे माइक्मी बाकत।

## 22

दाऊद अदुल्लाम पुक्खीम बाक्शो

1 दाऊद मेकेर रे प्रोक्शा, अदुल्लाम डा पुक्खीम लमाकत। मिनु मेको आ लोक्ब नु आ खिं डा मुर नेल्लेम मेको लोत्र नेंमे बाकत। मिनु मेकोपुकी आ बाक्तीक जाक्दीम्मा बाकत। भजन संग्रह ५७:१; यहोसु १५:३६

2 श्येत जशो, जेर दुम्शो नु आन थुं मनुशो मुरपुकी मेको आ बाक्तीकेम जाक्मा बाकत। मिनु दाऊद मेको आन कप्तान दुम्माकत। मेकोपुकी ४ सहे खोंइ बाक्मा बाकत। न्यायाधीस ११:३

3 मेकेर रे मेकोपुकी मोआब डा मिस्पे लमा बाकत। मिनु मोआब डा पिप कली “परमप्रभुम आं पर्वम मार पाइबा, मेको मतुडक्तु सम्म आं आंम आफ आस कली इन बाक्तीकेम बाक्चा गेने” देमाकत। २सामुएल ८:३; रूथ १:३

4 दाऊदमी आ आम आफ आस कली मोआब डा पिप नु वोदा बाकत। मेको आ बोल्यो खुइशशा बाक्तीकेम बाक्ची ना सम्म आ आम आफ मोआब डा पिप नु बाक्सा बाकत।

5 मिनु परमप्रभु यावे आ लोत्र पाइब गादमी दाऊद कली “गे मेको बोल्यो खुइशशा बाक्तीकेम मबाक्कीन। रीब पा यहूदा रागी लने” देमाकत। मोपतीके दाऊद हेरैथ डा ब्वाकीम लमाकत। भजन संग्रह ६३:१

सावल नु नोब डा चढ़ेब

6 मिनु सावलमी दाऊद नु आ मुरपुकी ते बाकशो बाक्मा मेको नेना बाक्त। सावल गिबा डा डांआम बाकशो, ठेयब रवा आ पुंम, गुडम तूतीक शेशा बाकशो बाक्माक्त। मेको आ गेय पाइब नेल्ल आ एर ओथ राप्शा बाकशो बाक्मा बाक्त।

7 मिनु सावलमी आ एर ओथ बाकशो मुर आन कली “गे बेन्यामीन आ थर डा मुर, आं लोत्र नेनीन। मार, येस्से आ तौमी नेल्ल इन कली रू नु अङगुर रू गेबा कों? नेल्ल इन कली सहे का डा नु हजार का लडाइ पाइब मुर आन कप्तान सेल्बा कों, दे आस पाइनीनी?

8 मोपतीके गे नेल्लेम आं कली मरिम्शो पशो बाक्तीनी। इन दातेमी सुडम आं कली आं तौ नु येस्से आ तौ कबल पमशो मशेंदीनी। सुडम आं कली आं तौमीन आं गेय पाइब कली जोंब पोक्शा, आं कली बाप्पाइशो लोत्र मशेंदीनी” देमाक्त। १सामुएल १८:३

9 मिनु सावल आ गेय पाइब नु राप्शा बाकशो एदोम डा दोएगमी “गो येस्से आ तौ कली नोब डा अहीतुब आ तौ अहीमेलेक आ बाक्तीकेम जाकशो ताता। भजन संग्रह ५२:२; १सामुएल २१:१-१०

10 अहीमेलेकम दाऊद आ पर्बम परमप्रभु यावे कली पुंडतु। मेको नोले जचा थोत्रक नु पलिस्ती गोल्याथ आ तरवार यो मेको कली गेपु” देमाक्त।

11 मिनु सावलमी नोब डा चढ़ेब अहीतुब आ तौ अहीमेलेक नु नोबम बाक्ब आ खिं डा चढ़ेब नेल्ल आन कली ब्रथ सोइक्तीमी बाक्त। मिनु मेको नेल्ल पिप आ डोंइती जाक्मा बाक्त।

12 मिनु सावलम “ए अहीतुब आ तौ नेनो” देमाक्त। मिनु मेकोमी “दुम्ब, आं प्रभु” देमाक्त।

13 मिनु सावलम मेको कली “गे नु येस्से आ तौमी आं पर्बम मारदे मरिम्शो पसी? गे मेको कली शोव्ले नु तरवार गेप्टीवी। मेको आ पर्बम परमप्रभु नु पुंडतीवी। मेको आं पर्बम मरिम्शो पचा कली ठीक दुम्शो बाक्ब। मुल आं कली बाप्शा बाक्चा कली मोदेशो पाइतीनी” देमाक्त।

14 मिनु अहीमेलेकमी “इन गेय पाइब नेल्लेमी थमा सुडक्चा पुंडसीशो इन चांइवा, इन गेय पाइब दुम्शो, इन खिंम मान पाइक्चा पुंडसीब दाऊद बाक्ब। १सामुएल १८:२२, २७

15 मोदेशो मुर आ पर्बम परमप्रभु नु डोंइती डा खेयप सल्ला पुंडशा, मार मरिम्शो पडा डा? मोदेशो लोत्र आं रे डोन बाक्ल। गो नु आं खिं डा मुर आन कली दोस मगेकी। मारदे हना, गो एको आ पर्बम मारेड मतुइशो बाक्नीकी” देमाक्त।

16 मिनु पिपम “अहीमेलेक गे थमा पा साइक्चा पुंडसीनेवे। गे नु इ खिं डा मुर नेल्ल साइक्चा पुंडसीनीम” देमाक्त।

17 मिनु सावलम आ नेक्था उड राप्शा बाकशो आ कली खाल पाइब कली “लशा परमप्रभु यावे कली चढ़ेब आन कली सतो। मारदे हना, मेकोपुकी दाऊद नु गारशो बाक्नीम। मेकोपुकीमी दाऊद प्रोक्शो बाक्ब, दे तुइशो यो, आं कली मशेंदीमी” देमाक्त। तन्न पिप कली खाल पाइबपुकीमी परमप्रभु यावे कली चढ़ेब आन कली साइक्चा थुं मपामे बाक्त।

18 मोपतीके पिपम एदोम डा दोएग कली “ए दोएग लशा चढ़ेब आन कली सतो” देमाक्त। मिनु दोएग लशा, चढ़ेब आन कली सदा बाक्त। मिनु मेकोमी मेको नाक्ती ८५ जना निसाफ पतीक ऊरीम नु थुम्मीम बाकशो झोला फेक्शो मुर आन कली साइक्मी बाक्त।

19 सावलमी चढ़ेब आन सहर नोब डा वोंइश मुर, मीश मुर, आलपुकी, ब्यफ गधा नु भेडा नेल्ल आन कली तरवारमी क्योरशा साइक्मी बाक्त। १सामुएल २१:२

20 अहीतुब आ तौ अहीमेलेक आ तौ का अबीयाथार चहिं प्रोक्शा दाऊद आ बाक्तीक जाक्दीमाक्त। १सामुएल २३:६; मर्कूस २:२६

21 मिनु अबीयाथारमी सावलम दोपा परमप्रभु यावे कली चढ़ेब आन कली सदा, मेको नेल्ल दाऊद कली शेंदा बाक्त।

22 मिनु दाऊदमी अबीयाथार कली “मेको नाक्ती एदोम डा दोएग मेकेर बाक्त। मेकोम सावल कली शेंब, दे गो तुइशो नड। इ आफ नु आ खिं डा मुर नेल्ल आन कली साइक्पाइक्ब दोस ताइब गो दुम्ती। १सामुएल २२:९

23 गे एक गो नु बाक्को। महिनो। इ कली साइक्चा माल्बम आं कली साइक्चा माल्शो बाक्ब। गे गो नु मारेड मद्मुथु बाक्नेवे” दे मदा बाक्त। १राजा २:२६-२७

## 23

दाऊद सावल रे पा प्रोक्शो

1 मुरपुकीम दाऊद कली “पलिस्तीपुकीम कैलाह नु लडाइ पा अन्न वोइक्तीक रोइक्ना रोइक्न बाक्नीम” देमा बाक्त। यहोसु १५:४४

2 मिनु दाऊदम परमप्रभु यावे कली “गो लशा पलिस्तीपुकी नु लडाइ पड देय मपड” दे हिल्लो पवा बाक्त। मिनु परमप्रभु यावेम “लशा, मेको आन कली लडाइ तोल्लमी कैलाह कली प्रोनो” देमाक्त।

3 तन्न दाऊद आ मुरपुकीम मेको कली “गो यहूदा रागीम बाक्शा ला यो हिंकी। कैलाह डा पलिस्तीपुकी नु लडाइ पाइतय हना, मेको क्येडा शुश हिंकी” देमा बाक्त।

4 मिनु लेंशा दाऊदमी परमप्रभु यावे कली हिल्लो पवा बाक्त। मिनु परमप्रभु यावेमी “कैलाहम लावो। गो पलिस्ती आन कली इन गुडमी गेनुड” देमाक्त।

5 मोपतीके दाऊद नु आ मुरपुकी कैलाहम लमा बाक्त। मिनु पलिस्तीपुकी नु लडाइ पामे बाक्त। मेकोपुकीम मेको आन बी ब्यफ रोइक्तमे बाक्त। मेको आन कली मरिम्शो पा फूमे बाक्त। मिनु कैलाह डा मुर आन कली प्रोन्मे बाक्त। १सामुएल २२:२०; न्यायाधीस ८:२७

6 अहीमेलेक आ तौ अबीयाथार दाऊद आ बाक्तीक, कैलाह सहर प्रोकमेनु, निसाफ पतीक ऊरीम नु थुम्मीम बाक्शो झोला यो लाइशशा लशो बाक्माक्त।

7 दाऊद कैलाह ओव्रशो बाक्ब, दे का निकशी मुरुमी सावल कली शेंदमे बाक्त। मिनु सावलमी “परमप्रभुम मेको कली आं गुडमी गेशो बाक्ब। मारदे हना मेको गारो हिरशो, आग्लो पाइशशो, सहरम ओव्रशो बाक्ब” दे मिम्ता बाक्त।

8 सावलम आ लडाइ पाइब नेल्ल आन कली कैलाहम लडाइ पा दाऊद नु आ मुर आन कली एर ओथ रे पुम्चा नम, दे हुकुम पवा बाक्त।

9 मिनु दाऊदमी आंम पर्वम मरिम्शो पचा चिक्शो तुइक्ता बाक्त। मिनु मेकोमी अबीयाथार चढ़ेब कली “निसाफ पतीक ऊरीम नु थुम्मीम बाक्शो झोला चाक्को” दे मदा बाक्त। १सामुएल ३०:७-८

10 मिनु नोले मेकोमी “परमप्रभु यावे, इस्राएली आन परमप्रभु सावल कैलाहम जाक्शा, आं पर्वम एको सहर खतम पोक्चशो बाक्ब, देशो लोव्र इन गेय पाइबम नेशो बाक्नुड।

11 मार, कैलाह सहरम बाक्ब मुरपुकीमी आं कली मेको आ गुडम गेनीमी? मार आं नेशो खोदेशो पा सावल एक जाक्बा? परमप्रभु यावे, इस्राएली आन परमप्रभु, इन गेय पाइब कली शेंदीन” देमाक्त। मिनु परमप्रभु यावेम “थमा पा मेको एक जाक्ब” देमाक्त।

12 मिनु दाऊदमी “मार कैलाह डा मुरपुकीमी गो नु आं मुर आन कली सावल आ गुडम गेनीमी?” देमाक्त। मिनु परमप्रभु यावेम “मो पाइनीम” देमाक्त।

13 मिनु दाऊदमी आ ६ सहे खोइ मुर लाइशशा, कैलाह रे गाक्माक्त। मिनु तेइ तेइ हिरना हिरन बाक्मा बाक्त। दाऊद कैलाह रे प्रोक्त, देशो लोव्र नेशा, सावल लेम्माक्त।

14 दाऊद जीफ डा गोरशो रागीमी बोल्यो खुइशशा बाक्तीकेमी खुइशशा बाक्माक्त। सावल मेको कली नाक्त किंत किंत माल्शा गाक्बाक्माक्त। तन्न परमप्रभुम दाऊद कली मेको आ गुडमी मगेवा बाक्त।

15 दाऊद जीफ डा गोरशो रागी डा होरेशम बाक्मेनु, सावलम थमा पा आ कली साइक्चा कली गूशा पिशो बाक्ब, दे तुइक्ता बाक्त।

16 मिनु सावल आ तौ योनाथन दाऊद आ बाक्तीक होरेश जाक्दीम्माक्त। मिनु मेको कली परमप्रभु आ नैमी आ थुं बारपदा बाक्त।

17 मेकोमी “गे महिनीन। गे आं आफ आ गुड रे मबेक्नीनी। मेकोम इन कली मथिष्व। गे इस्राएल डा पिप दुम्नीनी। गो इन दी डा दुनुड। मेको लोव्र आं आफोम तुइशशो बाक्ब” देमाक्त। १सामुएल २०:३०-३१; १सामुएल २४:२१

18 मिनु नोले मेको निकशीमी परमप्रभु यावे आ डोंडती कबल पाम्से बाक्त। मिनु दाऊद होरेशम बाक्माक्त। योनाथन चहिं आ खिं लेम्माक्त। १सामुएल १८:३

19 मिनु जीफ डा मुरपुकीम सावल गिबाम बाक्मेनु “दाऊद आंइ दाते डा बोल्यो खुइशशा बाक्तीक होरेशम बाक्ब। मेको हाकीलाह डांडा रे येशीमोन आ दक्खिन गे बाक्ब। १सामुएल २६:१; भजन संग्रह ५४:२

20 मुल गे गेना बुष्चा दाक्नीनी, मेना बुपीन। मिनु मेको कली इन गुडम गेनीकी” दे लोव्र पामे बाक्त।

21 मिनु सावलमी “थमा पा परमप्रभु यावेम इन कली आसीक गेवल। मारदे हना गो आं कली शिशी पाइतीनी।

22 मुल लशा, चिनु रुपीन। मिनु मेको ते बाक्मे? मेको कली सुम तवा तुइक्तीन। मेको मुर आन मिक्च सिल्व बाक्ब।

23 मेको तेको खुइक्तीकेम बाक्मे, रिम्शो पा रुपीन। मिनु आं बाक्तीक जाक्शा शेंदीनी। मिनु गो गेपुकी नु लाइनुड। मेको एको रागीम बाक्त हना, गो यहूदा आ खिं खिं डा मुर आन दाते रे माल्शा गुंडनुड” देमाक्त।

24 मिनु मेकोपुकी रीब पा सावल क्येडा डोंडती जीफ गे लमा बाक्त। दाऊद नु आ मुर चहिं अराबाह डा माओनम बाक्मा बाक्त। मेको येशीमोन आ दक्खिन गे डा गोरशो रागीम बाक्ब। यहोसु १५:५

25 सावल आ मुरपुकी नु मेको आन कली माल्थ गाक्माक्त। दाऊदम मेको लोव्र नेशा, रोंग लुक्च लशा, माओन डा गोरशो रागीम बाक्मा बाक्त।

26 सावल मेको डांडामी लमाक्त। दाऊद नु आ मुर मेको डांडा आ अर्को पटटी बाक्मा बाक्त। दाऊद नु आ मुरपुकी प्रोक्चा माल्ना माल्न बाक्मा बाक्त। सावल नु मेको आ नोले खोइक्बपुकीम चहिं मेको आन कली ग्याइक्चा कली आन नेक्था जाक्दीम्मा बाक्त।

27 मिनु लोव्र कुरब मुर का सावल आ बाक्तीक जाक्शा “रीब पा जाक्कीन। मारदे हना पलिस्तीपुकीम इन रागीम मारेइ मारेइ रोइक्ना रोइक्न श्येत गेशो बाक्नीम” देमाक्त।

28 मोपतीके सावल, दाऊद कली खेदा पचा प्रोंइशा, पलिस्तीपुकी नु लडाइ पथ लेम्माक्त। मोपतीके मेको कली “प्रोक्पाइक्ब रोंगु” देंनीम।

29 मेको नोले दाऊद डांडा डोइशशा एन-गेदी डा बोल्यो खुइशशा बाक्तीक मेर बाक्माक्त।

## 24

दाऊद एन-गेदी डा पुक्खीम बाक्शो

1 मिनु सावल पलिस्ती आन कली खेदा पा लेम्मेनु, मुरपुकीमी मेको कली “दाऊद एन-गेदी डा गोरशो रागीम बाक्ब” दे लोव्र पामे बाक्त। यहोसु १५:६२

2 मिनु सावलमी इस्राएल रे योव्रशो हजार सां मुर लाइशशा, दाऊद कली रोकोश आन रोंग गे मला बाक्त।

3 मेको लामी भेडा योव्रबपुकी बाक्मा बाक्त। मेको आ नेक्था पुक्खी का यो बाक्माक्त। मिनु सावल मेको आगा डाइक्चा कली ओव्रमाक्त। मेको पुक्खी आ नेल्ल क्येडा आगाम दाऊद नु आ मुरपुकी खुइशशा बाक्शो बाक्मा बाक्त।

4 मिनु दाऊद आ मुरपुकीम “परमप्रभु यावेम देशो खोदेशो पा इन जोरी सत्रु कली इन गुडमी गेतीक नाक्त मुलाक्त बाक्ब। एको कली मार पचा दाकनीनी मेको पने चापनीनी” देमा बाक्त। मिनु दाऊद सिक्सी पा लशा, सावल आ वा आ सुर का रिक्का बाक्त। भजन संग्रह १४२:१

5 मोपा रिक्का नोले “ला गो पिप आ वा रिक्ता” दे इच्छा हिंमाक्त।

6 मिनु दाऊदम आ मुर आन कली “गो आं टेयब मुर, परमप्रभु यावेम तेल लुकशो मुर कली मारेड मपाडनुड। गो मेको कली मसाइक्नुड। मारदे हना मेको परमप्रभु यावे आ तेल लुकशो मुर बाक्ब” देमाक्त।

7 मोपा दाऊदम आ मुर आन कली हुइशशा, सावल कली मारेड पाइक्का मगेमी बाक्त। मिनु सावल बोक्शा, पुक्खी रे आ लां खोदा बाक्त। १सामुएल १:३४

8 मेको नोले दाऊद यो पुक्खी रे लाडगा मूमाक्त। मिनु सावल कली “आं प्रभु, आं पिप” दे ब्रेत्ता बाक्त। मिनु सावल आ नोले लेशशा कोव्रडा बाक्त। मिनु दाऊद बाण्शा खुम्की पा सेउ पवा बाक्त।

9 मिनु दाऊदमी “गे मारदे आं परबंम मुर आन लोव्र नैनीनी? गो इन कली मरिम्शो पाइब, दे थमा सुइक्नीनी?

10 मुलाक्त गेन तुइक्ताकनी। मुलाक्त पुक्खी आगाम परमप्रभु यावेमी इन कली आं गुडम गेशो बाक्त। का निक्शीम ‘इन कली साइक्का’ थुं पांमतेकम। तन्न गो इन कली प्रॉइशा सोइक्ताकड। मिनु गो ‘आं प्रभु, इन कली मसाइक्नुड। मारदे हना मेको परमप्रभु यावे आ तेल लुकशो मुर बाक्ब’ देती।

11 कोव्रडीन, आं आफ एको आं गुडम बाक्शो वा कोव्रडीन। गो एको रिक्ता, तन्न इन कली मसदु। मोपतीके गो रुपीन। गो इन कली श्येत गेचा नु साइक्का ममिन्तु। गो इन कली मारेड पाप मपड। मो हना यो गे आं कली साइक्का दाकनीनी।

12 परमप्रभु यावेम इस दातेम निसाफ पवल। मेकोमी आं परबंम इन कली क्येक्क लेत्ताक्व हना यो, गो इन कली मारेड मपाडनुड।

13 साइ डोंइती डा लोव्रमी ‘मरिम्शोमी मरिम्शोन जाक्ब’ देशो बाक्ब। मो हना यो गो आं गुड इन परबंम मक्युकनुड। रोमी १२:१९; १ पत्रुस २:२३

14 इस्राएल डा पिप सु का आ परबंम बोक्शो बाक्बा? गे सु कली खेदा पना पन बाकनीनी? बेक्शो कुचुम, चुक्बे का कली खेदा पाइनीनी?

15 परमप्रभु यावे निसाफ पाइब बाक्ब। मिनु मेकोमी इस दातेम निसाफ पवल। परमप्रभु यावेम कोव्रडल। आं परमप्रभु यावेम आं कली इन गुड रे प्रॉइब” देमाक्त।

16 मिनु दाऊद ब्वाक्ने थुमा नोले, सावलम “मार, मेको इ सेंदा बाक्ब, आं तौ दाऊद?” देशा, डाक्माक्त।

17 मिनु मेकोमी दाऊद कली “गे आं क्येडा ठीक पाइब मुर बाक्नेवे। गे आं कली रिम्शो पाप्टीवी। गो चहिं इ कली मरिम्शो पाता।

18 मुलाक्त गे आं कली रिम्शो पाप्टीवी। परमप्रभु यावेमी मुलाक्त आं कली इ गुडम गेप्टु। तन्न गे आं कली मसाइय्यी।

19 सुइमी आंम जोरी सत्रु आन कली थिश्शा, रिम्शो पा लचा मगेब। मोपतीके मुलाक्त इ पशो गेय आ परबंम परमप्रभु यावेम इ कली इनाम गेवल।

20 मुल गो थमा पा तुइक्ताकड गे पिप दुम्नेवे। इ पालाम इस्राएलम थम रिम्शो दुम्ब।

21 मोपतीके परमप्रभु यावे आ नैम आं खिं डा मुर आन कली, आं चच युड आन कली खतम मपाडनुड। आं नें आं आफ आ खिं रे मक्याम्नुड, दे कसम जावो” देमाक्त। १सामुएल २३:१७

22 मिनु दाऊदमी सावल नु कसम जवा बाक्त। मिनु सावल आ खिं लेम्माक्त। दाऊद नु आ मुरपुकी चहिं आन बोल्यो खुइशशा बाक्तीक पुक्खीम लेम्मा बाक्त।

## 25

### सामुएल बेक्शो

1 मिनु सामुएल बेक्माक्त। मिनु इस्राएली नेल्ल बुक्शा, मेको आ परबंम रोंका पांमे बाक्त। मेको कली आ खिं रामाह उड थिम्मे बाक्त। मेको नोले दाऊद पारान डा गोरशो रागीम बुम्माक्त। १सामुएल २८:३

### दाऊद, नाबाल नु अबीगेल

2 माओनमी कारमेल डा मुर का बाक्माक्त। मेको शश शोप पाइशो मुर बाक्माक्त। मेको के हजार सां भेडा नु हजार का क्यारश बाक्मा बाक्त। मेको कारमेलम आ भेडा आन ऊन प्रेक्शो बाक्माक्त। यहोसु १५:५५

3 मेको आ नें नाबाल बाक्माक्त। आ मीश आ नें अबीगेल बाक्माक्त। अबीगेल दारशो नु निप्स पाइशो मीश मुर बाक्माक्त। मेको आ वोंइश, कालेब आ चच युड, खकटा थुं पाइशो मरिम्शो पाइब बाक्माक्त।

4 दाऊदमी गोरशो रागीम “नाबालमी आ भेडा आन ऊन प्रेक्शो बाक्ब” देशो लोव्र नेना बाक्त।

5 मिनु दाऊदमी आ १० ठिटा मुर आन कली “कारमेल लने। मिनु नाबाल कली युमीन। मिनु मेको कली आं नैमी ‘रिम्शो बाक्कीन’ मतीन।

6 मिनु मार देनीन देशा हना ‘इन थुं नाइसेक्ल। इन खिं डा मुर थुं नाइशशा बाक्का तामेक्ल। गे नु बाक्ब नेल्ले थुं नाइशशा बाक्मल।

7 गे नु भेडा आ ऊन प्रेक्ब मुर बाक्नीम, देशो लोव्र नेता। इन भेडा योव्रबपुकी गो नु बाक्शो बाक्तेकम। मिनु गो मेको आन कली मारेड मरिम्शो मपक। मेकोपुकी कारमेलम बाक्मानु, मेको आन के मारेड मजाम।

8 इन ठिटा आन कली हिल्लो पने। मिनु मेकोपुकीम इन कली शेनीम। मोपतीके आं मुर आन कली रिम्शो पा शिशी पा ब्रने। मारदे हना मुलाक्त चाड का बाक्ब। इन गेय पाइब नु इन तौ दाऊद कली मार गेने चाप्नीनी मेको गेने' दैत, दे मतीन" देमाक्त।

9 मिनु दाऊद आ ठिटा मुरपुकी लशा, नाबाल कली दाऊद आ नेमी मेको लोव नेल्ल मदमे बाक्त। मिनु रिम्मे बाक्त।

10 तन्न नाबालमी दाऊद आ मुर आन कली "दाऊद माइशो सु बाक्बा? येस्से आ तौ बाक्बा? सिनाक्त मुलाक्ती आन होवप रे प्रोक्शो वाइल शुश बाक्नीम।

11 आं शोब्ले, आं ब्वाक्कु नु ऊन प्रेक्ब आन कली सेल्शो श्ये लाइशशा, मतुइशशो मुर आन कली गेनुडा?" दे माइक्मी बाक्त।

12 मिनु दाऊद आ ठिटा मुरपुकी लेशशा, जाक्दीशशा, दाऊद कली मेको लोव नेल्ल शेंदमे बाक्त।

13 मिनु दाऊदम आ मुर आन कली "नेल्लेमी आंम आंम तरवार पिम्सीन" देमाक्त। दाऊदमी यो आ तरवार पिम्से बाक्त। मिनु ४ सहे जना खोइ मुर दाऊद आ नोले खोदमे बाक्त। सहे निक्शी मुर चहिं मार मार खाल पचा कली मेक उइ बाक्मा बाक्त।

14 मिनु नाबाल आ ठिटा मुर कामी नाबाल आ मीश अबीगेल कली "दाऊदम गोरशो रागी रे आ मुर आन कली आंइ होवप कली मान पा, मार मार पुंइथ सोइशशो बाक्त। तन्न आंइ होवपमी मेको आन कली हुइक्ताक्व।

15 मेको मुरपुकीम आंइ कली रिम्शो पशो नम। आंइ कली मारेइ श्येत मगेम। गोपुकी मेकोपुकी नु ब्वाकीम नाक्दो नाक्ती एर ओंथ पकानु, आंइ के मारेइ मजाम।

16 गो आंइ भेडा योवदीकानु, मेकोपुकी नाक्दो नाक्ती आंइ एर ओंथ गारो खोदेशो पा बाक्तेक्म।

17 गे मार पचा माल्नीनी मेको रिम्शो पा मिम्तीन। मारदे हना, आंइ होवप नु आ खिं थमा पा खतम दुम्ब। आंइ होवप थम मरिम्शो बाक्ब। मेको नु लोव पने सुइ मचाप्व" देमाक्त।

18 मोपतीके अबीगेलम रीब पा सहे निक्शी शोब्ले, थैलो निक्शी अडगुर शांबु, क्योरशा ठीक सेल्शो ५ ओटा भेडा, ५ एफाह तांब्रा, सहे का सोवपाइशशो अडगुर के शोब्ले नु सहे निक्शी सोवपाइशशो फोव्रशी गेडा के शोब्ले ठीक पा गधा आन कली कुरपदा बाक्त। एफाह का ७ लिटर खोदेशो पा रीब।

19 मिनु मेकोमी आ ठिटा गेय पाइब आन कली "गे आं डोंइती लने। गो इन नोले पीनुड" माइक्मी बाक्त। तन्न आ वोंइश नाबाल कली मेको मशेंदा बाक्त।

20 मिनु मेको डोंडाम फारतीक रे गधा लना लन बाक्मानु, दाऊद नु आ मुरपुकी मेको आन गे लुकच बुम्ना बुम्न बाक्मा बाक्त। मिनु अबीगेलमी मेको आन कली युमा बाक्त।

21 मिनु दाऊदमी "गोरशो रागीम मारेइ मजाम्चा डा पा, मेको मुर आ मार मार खाल पशो मोशा दुम्त। मेकोम आ कली रिम्शो पाइशशो आ पा डा, आं कली मरिम्शो पाइक्ती" देमाक्त।

22 मिनु दाऊदमी "दीसा सुनी सम्म गो मेको आ खिं डा वोंइश मुर नेल्ल मसाइक्ताक्मी हना, परमप्रभुम आं कली मोन पवल" दे कसम जवा बाक्त।

23 मिनु अबीगेलमी दाऊद कली तशा, आ गधा रे फु तोइशशा, दाऊद आ डोंइती बाम्माक्त।

24 मेको आ खोइलीम बाप्शा "आ प्रभु, दोस ताइब गो नड। इन वाइलीम कली ब्वाक्चा गेने। आं लोव नेनीन।

25 आ प्रभु, मेको शोर गाक्शो मुर आ परबम मगाइक्तीन। मेको आ नें दोपा नाबाल बाक्मे, मेको मो देशोन बाक्ब। आ नें नाबाल बाक्ब। मिनु मेको मूर्ख बाक्ब। तन्न गो, इन गेय पाइबम, इन सोइशशो ठिटा आन कली मतडमी।

26 आ प्रभु, परमप्रभु यावे ब्रोंइशा बाक्शो खोदेशो पा नु इन ब्रोंइशा बाक्शो खोदेशो पा, परमप्रभु यावेमी इन कली हुश खाक्श पोक्तीक नु क्येक्क लेत्तीक रे तेक्शो बाक्ब। इन जोरी सत्रु नु इन कली मरिम्शो पाइब नाबाल खोदेशो दुम्मल।

27 मिनु इन गेय पाइबम, आ प्रभु, इन कली चाक्शो कोसेली इन नोले खोइक्ब ठिटा आन कली गेन।

28 इन गेय पाइब आ मरिम्शो पशो डा आं कली माफ गेयीनी। परमप्रभु यावेमी आं प्रभु, इन खिं डा मुर आन कली गेना हना यो रिम्शो पवल। मारदे हना गे परमप्रभु यावे आ परबम लडाइ पशो बाक्नीनी। गे बाक्नी सम्म इन कली मारेइ मरिम्शो मदुम्ब। २सामुएल ७:१६

29 सुइ मुरुम इन कली खेदा पा साइक्चा माल्तु हना, परमप्रभु यावे, इन परमप्रभुमी इन कली कोवब। तन्न इन जोरी सत्रु आन कली चहिं हरुदम वोइशशा ताइशशो फुल्लु खोदेशो पा ताइक्ब। भजन संग्रह ६९:२९

30 परमप्रभु यावेम आं प्रभु, इन कली, आ देशो खोदेशो पा रिम्शो पाप्तु हना नु इन कली इस्राएल डा सासन पाइब सेल्लु हना, २सामुएल ५:२

31 गे मो हुश खाक्श पोक्तीक नु इन गाइशशोमी मरिम्शो पशो आ परबम सुर्ता पचा ममाल्नीनी। इन थुं खाइक्पाइक्चा ममाल्नीनी। मिनु परमप्रभु यावेमी इन कली रिम्शो पाप्तु हना, इन गेय पाइब, आं कली यो मिम्तीन" देमाक्त।

32 मिनु दाऊदमी अबीगेल कली "मुलाक्ती आं कली युम्पाइक्चा कली इन कली सोइक्ब परमप्रभु यावे, इस्राएली आन परमप्रभु थैयब बाक्ल।

33 इन मिम्तीक रिम्शो बाक्ब। गे मुलाक्ती आं कली हुश खाक्श पोक्तीक नु क्येक्क लेत्तीक रे तेक्तीके आसीक राइनीनी।

34 मिनु परमप्रभु यावेम आं कली इ कली श्येत गेतीके रे तेक्शो बाक्ब। मारदे हना गे रीब पा आं कली गुम्थ जाक्तीनी। मो मपशो ननी हना परमप्रभु यावे, इस्राएली आन परमप्रभु ब्रोंइशा बाक्शो खोदेशो पा, सुनी सम्म नाबाल आ खिं डा वोंइश मुर का सम्म यो मलीम वा" देमाक्त।



35 मिनू दाऊदमी अबीगेलमी आ कली चाकशो कोसेली ब्रवा बाकत। मिनू “इन थुं नाइशशा खिं लेतीन। गो इन लोत्र नेंशा बिस्साक्यी” देमाकत।

36 मिनू अबीगेल लेशशा जाकमेनु, नाबालमी आ खिंमी, पिपम खोदेशो पा ठेयब भोज सेल्शा भोज पशो तवा बाकत। नाबाल ग्येरसीशा शांबुम दुकशा बाकशो बाकमाकत। मेको थाम्पा दुकशा बाकतीके आ मीशेमी सुनी सम्म रिम्शो मरिम्शो मारेइ शेने मचबा बाकत।

37 सुनी शांबुम प्रोना नोले आ मीशेमी लोत्र नेल्ल शेंदा बाकत। मिनू मेको आ लुङगीर खाइशशा, फुल्लु खोदेशो दुम्माकत।

38 मिनू १० नाकत नोले परमप्रभु यावेमी मेको कली बेकपदा बाकत।

39 मिनू दाऊदम नाबाल बेकशो लोत्र नेंशा मेकोमी “परमप्रभु यावे ठेयब बाकब। मारदे हना मेकोमी आं कली मरिम्शो पशो आ परबम नाबाल कली सजाइ गेप्टु। मिनू आ गेय पाइब, आं कली मरिम्शो पतीक रे तेक्ती। नाबाल आ मरिम्शो पशो आ पियामीन मोइक्तु” देमाकत। मिनू दाऊदमी अबीगेल कली आ मीश सेल्चा कली लोत्र पथ मूर सोइक्ता बाकत।

40 मिनू दाऊद आ गेय पाइबपुकी अबीगेल आ बाकतीक कारमेल लशा, मेको कली “दाऊदमी गे नु ग्युंवे पचा कली आंइ कली ब्रथ सोइक्ताकव” देमा बाकत।

41 मिनू अबीगेल बोक्शा बाप्या सेड पा “गो इन गेय पाइब आन खोइल चिकब वाइलीम नड” देमाकत।

42 मिनू अबीगेल रीब पा सासे बाकत। गधा डोइशशा आ ५ जना गेय पाइब लाइशशा लोत्र चाकब दाऊद आ मुरपुकी नु लमाकत। मिनू मेको आ मीश दुम्माकत। १सामुएल २७:३; १सामुएल ३०:५; २सामुएल ३:३

43 दाऊदम मेको क्येडा डोंइती येजेल् डा अहीनोआम कली यो ग्युंवे पशो बाकमाकत। मिनू मेको निम्फा मेको आ मीश दुम्सा बाकत।

44 मेना सावलमी आ तमी, दाऊद आ मीश मिकाल कली गाल्लीम डा लाइश आ तौ पाल्ती कली गेवा बाकत। २सामुएल ३:१४-१५

## 26

दाऊदम सावल कली मसाइशशो

1 मिनू जीफ डा मुरपुकी सावल आ बाकतीक गिबाम जाकशा “दाऊद येसीमोन आ आइक्ची हाम हाकीलाह डांडाम खुइशशा बाकशो बाकब” दे शेंदमे बाकत। १सामुएल २३:१९-२४:२३; भजन संग्रह ५४:२

2 मिनू सावलमी दाऊद कली माल्चा, दे हजार सां इसाएल डा योत्रशो मुरपुकी लाइशशा, रीब पा जीफ डा गोरशो रागी गे लमाकत।

3 येसीमोन आइक्ची हाम डा हाकीलाह डांडा डा लां आ नेक्था आन बाकतीक सेल्मे बाकत। मेना दाऊद चहिं गोरशो रागीमी बाकमाकत। मिनू सावलम आ कली खेदा पचा कली गोरशो रागीम जाकशो बाकब देशो लोत्र नेंना चोटीन

4 दाऊदमी क्यारी पाइबपुकी सोइक्ता बाकत। मिनू सावल आ बाकतीके तुइशशा लेम्मा बाकत।

5 मिनू दाऊद सावल आ बाकतीक गे लमाकत। मिनू सावल नु आ लडाइ पाइब आन नेल्ल क्येडा ठेयब मूर, नेर आ तौ आबनेर इप्यो बाकशो थिदा बाकत। आ मूर नेल्लेम एर ओथ रे हिरतीकेमी सावल इप्यो बाकमाकत। १सामुएल १४:५०

6 दाऊदमी हिती अहीमेलेक नु सेरूयाह आ तौ योआब आ लोक्ब अबीशै गे लेशशा कोत्रशा “सावल आ बाकतीकेम गो नु सु लने चाप्या” देमाकत। मिनू अबीशैमी “गो लाइनुड” देमाकत।

7 मिनू नाकदो दाऊद नु अबीशै सावल आ बाकतीकेम ओत्रसा बाकत। मिनू सावल आ मूर आन दातेमी आ तूतीक आ पिया गे खुक्शा, इप्यो थित्से बाकत। आबनेर नु आ मुरपुकी चहिं सावल आ एर ओथ हिरशा इप्यो बाकमा बाकत।

8 मिनू अबीशैमी दाऊद कली “परमप्रभुम मुलाक्ती इन जोरी सत्रु आन कली इन गुइमी गेशो बाकमाकत। तूतीकेम कालेमीन खप सम्म युक्सीचा डा पा आप्या कली हुकुम गेयीनी। गो खेयप निक्शी आप्या ममाल्डल” देमाकत। २सामुएल १६:९

9 तन्न दाऊदमी अबीशै कली “पिप कली साइक्चा ममिम्तो। परमप्रभु यावे आ तेल लुकशो कली साइक्बपुकी सु चहिं सजाइ मतशो बाकबा डा?” देमाकत।

10 मिनू दाऊदमी लेंशा “परमप्रभु यावे ब्रोंइशा बाकशो खोदेशो पा, मेकोमीन मेको कली काबु साइक्ब कि आ बेक्ची नाकत जाकशा बेक्ब कि लडाइम लशा साइक्चा पुंडसीब। १सामुएल २४:१३

11 गो परमप्रभु यावे आ तेल लुकशो पिप कली गेनायो मरिम्शो मपाइनुड। तन्न मुल मेको आ पिया गे खुक्शो तूतीक नु आ ब्वाक्कु तूतीक ग्योब कुरशा गाक्स” देमाकत।

12 मिनू दाऊदम मेको आ पिया आ नेक्था बाकशो तूतीक नु आ ब्वाक्क तूतीक कुरशा गाक्सा बाकत। सुइमी मेको आस कली मतामे बाकत। मिनू सुइ मसेसीमा बाकत। मारदे हना परमप्रभु यावेम मेको आन कली मारेइ मतुइक्चा डा पा निन्द्रा पपदा बाकत। उत्पत्ती १५:१२

13 मिनू दाऊद आइक्ची हाम लशा, डांडा डोइशशा मेको आन क्येडा डोन रम्मामकत।

14 मिनू दाऊदम नेर आ तौ आबनेर आ नें थिशा “ए आबनेर, गे आं लोत्र लेत्ती” देमाकत। मिनू आबनेरमी “गे पिप कली हुइशशा लोत्र पाइब सु नवे” देमाकत।

15 मिनू दाऊदमी आबनेर कली “मार गे मूर मनवे। मार इसाएलमी अरु यो इ खोदेशो मूर बाक्नीमी? गे मारदे इ प्रभु, पिप कली रिम्शो पा खाल मपवी? मारदे हना आं मूर का इ प्रभु, इ पिप कली साइक्चा कली मेकेर जाकत।

16 इन पशो मरिश्शो बाक्ब। परमप्रभु यावे ब्रोंइशा बाक्शो खोदेंशो पा गे साइक्चा पुंडसीचा डा बाक्नीनी। मारदे हना गे इन प्रभु कली खाल मपनी। परमप्रभु यावे आ तेल लुक्शो कली खाल मपनी। लो कोइडीन, मेको इन पिप आ पिया गे बाक्शो आ तूतीक नु ब्वाक्कु तूतीक ग्योब ते बाक्म?" दैमाक्त।

17 मेना सावलमी दाऊद आ सेंदा नेशा "आं तौ दाऊद, मेको इ सेंदा बाक्बा?" दैमाक्त। मिनू दाऊदमी "आं प्रभु, आं पिप, आं सेंदा बाक्ब" दे लोत्र लेत्ता बाक्त

18 मिनू दाऊदम "आं प्रभु, मारदे गे इन गेय पाइब, आं कली, खेदा पाइनीनी? गो मार पडा डा? आं दोस मार बाक्बा?"

19 मोपतीके आं प्रभु नु आं पिप, इन गेय पाइब, आं लोत्र नेनीन। परमप्रभु यावेमी इन कली आं कली खेदा पपाइक्चा कली पोक्शो बाक्त हना, मेकोमी चढेतीक का ब्राइबा कों। तन्न बेक्शा लाइब मुरुम इन कली आं कली खेदा पचा कली पोक्शो बाक्त हना, मेको परमप्रभु यावे आ जोंइती सराप रल। मारदे हना मेकोपुकीम मुलाक्त आं कली परमप्रभु यावे आ गेशो रू रे खेरशा 'लावो, अरु देवी देवता आन कली सेउ पावो' दे लोत्र पाम्तेक्म। उत्पती ८:२१; ब्यवस्था ३२:९; २राजा ५:१७

20 मोपतीके परमप्रभु यावे क्येडा डोन आं हुश मशाइक्पतीन। मारदे हना इस्राएल डा पिप चुक्बे का कली माल्थ यूशो बाक्ब। मेको पहाडम थेलमी सिखार ग्यारशो खोदेंशो दुम्त" दे सावल कली दैमाक्त।

21 मिनू सावलमी "गो मरिश्शो पाता। आं तौ दाऊद, लेशशा जाक्को। मुलाक्ती गे आं कली ब्रोंइचा गेती मुल रे गो इ कली गेनायो श्येत मगेनुड। गो मूर्ख दुम्ती। गो थमा पा मरिश्शो पाता" दैमाक्त।

22 मिनू दाऊदमी "पिप आ तूतीक एक बाक्ब। इन टिटा मुर का कुशा लदल।

23 परमप्रभु यावेम ठीक पाइब नु थमा सुइक्चा पुंडसीब मुर आन कली इनाम गेब। मिनू मुलाक्ती परमप्रभु यावेमी इन कली आं गुइमी गेप्टु। तन्न गो परमप्रभु यावे आ तेल लुक्शो कली साइक्ने मबिस्सीड।

24 दोपा मुलाक्त गो इन ब्रोंइतीक ठेयब मिम्तु, मोपा परमप्रभु यावेम आं ब्रोंइतीक कली ठेयब मिम्तल। मिनू आं कली हिंचा डा श्येत नेल्ल रे प्रोंइयील" दैमाक्त।

25 मिनू सावलमी दाऊद कली "आं तौ दाऊद, गे आसीक रवेल। गे शुश गेय पशा, नेल्ल रिश्शो पाइनेवे। मिनू गे ग्रानेवे" दैमाक्त। मिनू दाऊद आ लां खोदा बाक्त। सावल चहिं आ बाक्तीक मेर लेम्माक्त।

## 27

दाऊदमी बाक्तीक पुंडशो

1 दाऊदमी "काबु सावलम आं कली साइक्ब। मोपतीके पलिस्ती आन रागीम आं कली प्रोक्शा लचा रिश्शो दुम्ब। मिनू सावलमी इस्राएल आगामी आं कली माल्चा प्रोंइब। मिनू गो मेको आ गुइ रे ब्रोंइनुड" दे मिम्ता बाक्त। १सामुएल २३:२३

2 मोपतीके दाऊद नु आ ६ सहे मुर रीब पा सांद लाक्शा, गाथ डा पिप माओक आ तौ अकीश आ बाक्तीकेम लमा बाक्त। १सामुएल २१:११-१६

3 दाऊद आ लडाइ पाइब मुर, मेको आन खिं डा मुर नु दाऊद नु आ मीश निक्शी, येजेल डा अहीनोआम नु कारमेल डा बेक्शो नाबाल आ मीश अबीगेल गाथम अकीश नु बाक्मा बाक्त। १सामुएल २५:४०-४३

4 दाऊद गाथम प्रोक्शा लत देंशो लोत्र मुरुमी सावल कली नैपदमे बाक्त। मिनू मेकोम दाऊद कली माल्चा प्रोना बाक्त।

5 दाऊदम अकीश कली "गे आं कली शिशी पाइतीनी हना, आं कली इन रागी डा तेंकोइ सहरम बाक्चा गेयीनी। गो दोपा पिप नु पिप आ सहरम बाक्नुडा?" दैमाक्त।

6 मिनू मेको नाक्ती अकीशम मेको कली सिकलाग गेवा बाक्त। मोपतीके मुल सम्म सिकलाग यहूदा डा पिप आन के बाक्ब। यहोसु १५:३१

7 दाऊद पलिस्ती आन रागीम बर्स का ४ महिना सम्म बाक्माक्त।

8 दाऊद नु मेको आ मुरपुकी लडाइ पथ यूमानु, गेशुरी, गिरजी अमालेकी आन मारेइ मारेइ रोइक्बाक्मा बाक्त। मारदे हना मेकोपुकी तेलाम रे शुर सम्म नु इजीप्ट सम्म बाक्बाक्मा बाक्त।

9 दाऊदमी मेको आन रागीम मार मार रोइक्तानु, मेकेर डा वोंइश मुर मीश मुर सुइ आन कली का यो मवोइक्थु साइक्बाक्माक्त। क्यारश भेडा, बी ब्यफ, गधा, दलओंठ वासी नेल्ल लाइश्शा अकीश आन बाक्तीक लेप्बाक्मा बाक्त।

10 मिनू अकीशमी मेको कली "मुलाक्त गे ते रोइक्तीनी" दे हिल्लो पाइक्बाक्माक्त। मिनू मेकोमी "यहूदा रागी डा नेगेब, येराहमेल आ मुर आन नेगेब नु केनी आन नेगेबम रोइक्ताक्क" दैबाक्माक्त।

11 दाऊदमी सेस मीश मुर वोंइश मुर आन कली गाथम मचाक्बाक्माक्त। मारदे हना मेको आन पशो गेय आ पर्बम दाऊद नु आ मुर आन कली मरिश्शो सेलनीम, दे दाऊद हिंबाक्माक्त। पलिस्ती नु बाक्म सम्म मेकोम मोदेंशो पवा बाक्त।

12 अकीशम "दाऊदम आंम रागी इस्राएलमी मरिश्शो पतीके मेक बाक्चा मताइब। मोपतीके गेना हना यो आं मुर दुश्शा गो नु बाक्ब" दे मिश्शो बाक्माक्त।

## 28

लडाइ दुम्चशो

1 मेना पलिस्तीपुकीम इस्राएल नु लडाइ पचा, दे आन लडाइ पाइब मुर आन कली खुप्तेम बाक्त। मिनू अकीशम दाऊद कली "गे नु इ मुरपुकी लडाइ पचा कली गो नु लडाइ पतीकेम लचा माल्नीनी। देंशो लोत्र तुइश्शो बाक्डे माइ" दैमाक्त।

2 मिनू दाऊदमी अकीश कली “दुम्ब इन गेय पाइबम मार पने चाप्बा, मेको गे तुइक्नीनी” देमाक्त। मिनू अकीशमी दाऊद कली “गो इ कली बाक्डे सम्म आं कली खाल पाइब सेलनन” देमाक्त।

सावल नु एन-डोर डा मीश मुर

3 सामुएल बेकने थुम्शो बाक्माक्त। मिनू इस्राएली नेल्लेमी मेको आ पबर्म रोंका पा मेको कली मेको आ सहर रामाहम थिम्शो बाक्मा बाक्त। सावलमी बेक्शो मुर रे लोत्र पाइब नु लिंक्यु कोत्रब आन कली मेको रागी रे गुंइने थुम्शो बाक्माक्त। १सामुएल २५:१; प्रस्थान २२:१७

4 पलिस्तीपुकीमी नेल्ल क्येडा सक्ति पाइशो आन लडाइ पाइब आन कली गुम्पाइशशा, शुनेम सहरम आन बाक्तीक सेल्मे बाक्त। सावलम इस्राएली नेल्ल आन कली गुम्पाइशशा गिलबोआम आन बाक्तीक सेल्शा बाक्मा बाक्त। यहोसु १९:१८

5 मिनू सावल पलिस्ती आन नेल्ल क्येडा सक्ति पाइशो लडाइ पाइब कली तशा, थाप्पा हिंशा खिंखि पवा बाक्त।

6 मिनू सावलम परमप्रभु यावे कली हिल्लो पवा बाक्त। तन्न परमप्रभु यावेम डोमुम, ऊरीम नु परमप्रभु यावे आ लोत्र पाइब आन रे लोत्र मलेत्ता बाक्त। १सामुएल १४:४१; प्रस्थान २८:३०

7 मोपतीके मेकोमी आ गेय पाइब आन कली “आं कली बेक्शो मुर नु लोत्र पाइब मीश मुर का मालीन। गो मेकेर लशा, मेको कली हिल्लो पाइनुड” देमाक्त। मिनू “एन-डोरम मोदेशो मीश मुर का बाक्ब” दे आ गेय पाइबपुकीमी देमा बाक्त। लेवी १९:३१

8 मिनू सावल अर्को वा फेक्शा, आ मुर निक्शी नु मेकेर लमाक्त। मिनू नाक्दो मेको मीश मुर आ बाक्तीक जाक्दीशा, मेको कली “आं कली मार दुम्बा बेक्शो मुर कली हिल्लो पा शेंदीनी। मिनू गो तेको बेक्शो मुर कली ब्रेत्चा देनुडा, मेको कली ब्रेत्तीन” देमाक्त।

9 मेको मीश मुरम मेको कली “सावलम मार पवा मेको गे तुइक्नीनी। मेकोमी बेक्शो मुर नु लोत्र पाइब नु लिंक्यु कोत्रब नेल्ल कली रागी रे गुंइशा खेरतु। मिनू गे मारदे आं कली साइक्पाइक्चा कली ओदेशो गेय पपाइक्चा मालनीनी?” देमाक्त।

10 मिनू सावलमी परमप्रभु यावे आ नेम कसम जशा, मेको कली “परमप्रभु यावे ब्रांइशा बाक्शो खोदेशो पा, गे एको गेय आ पबर्म मारेइ सजाइ मताइनीनी” देमाक्त।

11 मिनू मेको मीश मुरम “सु कली ब्रेत्चा” दे हिल्लो पवा बाक्त। मिनू सावलमी “सामुएल कली ब्रेत्चा” देमाक्त।

12 मिनू मेको मीश मुरमी सामुएल कली तशा ठेयब सेंदा पा ग्रीशा सावल कली “गे आं कली मारदे मरिम्शो पवी? गे सावल बाक्डे बाक्त” देमाक्त।

13 मिनू पिपम मेको कली “महिनो। गे मार तवी” देमाक्त। मिनू मेको मीश मुरम “गो स्वर्ग डा गेय पाइब खोदेशो खप रे यूशो ताता” देमाक्त।

14 मिनू सावलमी “मेको दोदेशो बाक्मे” दे हिल्लो पवा बाक्त। मिनू मेकोमी “खूशो मुर का यूशा कुत। मेकोमी दारशो वा फेक्शो बाक्त” देमाक्त। मिनू सावलमी मेको सामुएल बाक्ब, दे तुइशशा खुम्की पा बाप्शा सेउ पवा बाक्त।

15 मिनू सामुएलमी सावल कली “गे मारदे आं कली श्येत गेशा, गुंइदीनी?” देमाक्त। मिनू सावलमी “गो थम ठेयब श्येतम बाक्नुड। पलिस्तीपुकीम आं कली लडाइ तोशो बाक्नीम। परमप्रभुम आं कली प्रोंइती। मेकोम आं कली आ लोत्र पाइब नु डोमु रे लोत्र मलेत्ती। मोपतीके गो इन कली ‘मुल मार पचा माल्नुडा’ दे हिल्लो पचा कली ब्रेत्ताक्नीनी” देमाक्त।

16 मिनू सामुएलमी “परमप्रभु यावेम इ कली प्रोंइशा, इ जोरी सत्रु दुम्शो बाक्ब, दे तुइशशा यो, गे आं कली मारदे हिल्लो पयी।

17 परमप्रभु यावेम डोंइती आं कली देशो खोदेशो पा पाप्तु। परमप्रभु यावेमी मेको राज्य इ गुइ रे लाइशशा, इ नेक्था डा मुर दाऊद कली गेशो बाक्ब। १सामुएल १५:२८

18 मारदे हना गे परमप्रभु यावे आ देशो मटिवी। अमालेकी आन पबर्म परमप्रभु यावे आ गाइशशा गे मखबी। मोपतीके मेकोम मोदेशो पाप्तु। १सामुएल १५:१८-१९; प्रस्थान १७:१४,१६

19 मुल चिनु तेम्शा, परमप्रभु यावेमी इस्राएली नु इ कली पलिस्ती आन गुडमी गेब। दीसा गे नु इ तौपुकी गो नु बाक्नीनी। परमप्रभु यावेमी इस्राएल डा लडाइ पाइब नेल्ल आन कली पलिस्ती आन गुडमी गेब” देमाक्त। १सामुएल ३१:६

20 मिनू सावल सामुएल आ लोत्र नेंशा हिंशा, आ थुं ग्येत्थ लुकच दुम्शा, खपीम गोल्माक्त। मिनू नाक्त रे नाक्दो रे मारेइ मजतीके मेको आ बोल नेल्ल जाम्माक्त।

21 मिनू मेको मीश मुर सावल आ नेक्था लशा, सावल शुश हिंशो तशा, सावल कली “गो बेक्चा आ पबर्म महिथु, इन देशो टीता।

22 मोपतीके मुल गे आं लोत्र नेनीन। गो इन कली जचा थोत्रक गेनुड। बोल्यो दुम्शा इन लां गाक्चा कली मेको जने” देमाक्त।

23 मिनू सावलमी “गो मजाइनुड” देमाक्त। तन्न आ गेय पाइबमी यो मेको मीश मुर आ देशो लोत्रमी लोत्र तेम्दा बाक्त। मिनू मेको आन देशो लोत्र बिशशा, खप रे बोक्शा, खाटम निस्से बाक्त।

24 मेको मीश मुर आ खिंमी दोम्शो बाछा का बाक्माक्त। मेको मीश मुरम मेको बाछा क्योरशा क्येशा, फस निवा बाक्त। मिनू बोरब ओरुस्ती मसुप्शो शोब्ले चोवा बाक्त। प्रस्थान १२:३९

25 मिनू मेकोमी, सावल नु आ गेय पाइब आन कली खेत्तीमी बाक्त। मिनू मेकोपुकीम मेको जशा ब्वशा मेको नाक्दोन गाक्मा बाक्त।

## 29

दाऊद पलिस्ती नु ब्राशो

- 1 पलिस्तीपुकीमी लडाइ पाइब आन कली अफेकम पुकगमे बाक्त। इस्राएलीपुकीम चहिं येजेल डा ब्वाक्कु बुक्तीकेम आन बाक्तीक सेल्मे बाक्त। १सामुएल ४:१; यहोसु १५:५३
- 2 पलिस्ती आन ठेयब मुरुम आन नेल्ल क्येडा सक्ति पाइशो लडाइ पाइब आन कली सहे सहे नु हजार हजार डा हुल पा कप्तान दुम्मा बाक्त। दाऊद नु आ मुरपुकी नोले डा हुलमी अकीश नु गाकशो बाक्मा बाक्त। यहोसु १३:३
- 3 मिनु पलिस्ती आन ठेयब मुरपुकीम “एको हिवूपुकी मारदे पिमा?” देमा बाक्त। मिनु अकीशमी “एको इस्राएल डा सावल आ गेय पाइब दाऊद बाक्ब। एको गो नु बसं का क्येडा यो शुश बाक्त। एको गो नु बाक्म रे मारेड मरिम्शो मतड” देमाक्त। १सामुएल २७:७
- 4 तन्न पलिस्ती आन ठेयब मुरपुकी गाइशशा, अकीश कली “मेको मुर कली इन गेशो आ बाक्तीकेम सोइक्तीन। मेकोम आंइ कली वारच पा लडाइ मपवल। मो पाप्तु हना, मेकोम आंइ कली वारच पखु पा मरिम्शो पाइब। आंइ कली साइशशा आ प्रभु आ शिशो तचा मेको कली नेल्ल क्येडा रिम्शो बाक्ब।
- 5 एको दाऊद बाक्ब। एको आ परबंम डोंइती मुरपुकीम ‘सावलम हजार हजार आन कली साइक्तीमी। तन्न दाऊदमी १० हजार हजार आन कली साइक्तीमी’ दे कुम्सो पना पन, सिल पाम्तेक्म” देमा बाक्त। १सामुएल १८:७
- 6 मिनु अकीशमी दाऊद कली ब्रेशशा “परमप्रभु यावे ब्रोंइशा बाक्शो खोदेंशो पा, गे थमा सुइक्चा पुंडसीब मुर बाक्नेवे। मिनु गे गो नु लडाइ पचा कली आं कली ठीक बाक्ब। मारदे हना इ जाक्शो रे मुल सम्म गेम मारेड मरिम्शो पशो मतड। तन्न मेको कप्तानपुकीमी इ कली थमा मसुइक्नीम।
- 7 मोपतीके गे रिम्शो पा लेशशा खिं लावो। मेको पलिस्ती आन ठेयब मुर आन मिम्शो खोदेंशो पा मरिम्शो मपावो” देमाक्त।
- 8 मिनु दाऊदमी अकीश कली “गो मार पडा डा? गो इन गेय पचा गोडा रे गे आं कली मार मरिम्शो पशो तनी? गो आं प्रभु, आं पिप, आ जोरी सत्रु नु लडाइ पचा मताइक्नुडा?” देमाक्त।
- 9 मिनु अकीशम दाऊद कली “गे आं परबंम दोस मताइब नु परमप्रभु आ स्वर्ग डा गेय पाइब खोदेंशो बाक्नेवे। तन्न पलिस्ती आन कप्तानम ‘गे मेकोपुकी नु लडाइ पथ लचा मदुम्नेवे’ दैतेक्म। २सामुएल १४:१७
- 10 मोपतीके दीसा सुनी कना बोक्शा, गे नु इ नोले खोइक्ब मुरपुकी आं गेशो सहरम लेतीन। दीसा सुनी कना बोक्कीन। मिनु नां सोत्रम चोटीन लने” देमाक्त।
- 11 मोपतीके दाऊद नु आ मुरपुकी पलिस्ती आन रागी लेत्चा कली सुनी कना बोक्मा बाक्त। पलिस्तीपुकी चहिं येजेल डा लां खोदमे बाक्त।

## 30

दाऊदम सिकलाग डा मुर प्रोंइशो

- 1 मिनु लेम्मा आ निथ्थ नाक्ती सिकलाग जाक्दीम्मा बाक्त। मेना अमालेकीपुकीमी नेगेब रोइक्ने थुम्शा, सिकलागम लडाइ तोशा मी सुइशो बाक्मा बाक्त। १सामुएल २७:६
- 2 मेकोपुकीम मीश मुर, आइक्च नु ठेयब मुर नेल्ल आन कली मसाइक्थु सेसीन लाइशो बाक्मा बाक्त। मेकोपुकीमी मेको आन कली डोंइडोंइती गाकपाइशशा लाइक्ना लाइक्न बाक्मा बाक्त।
- 3 दाऊद नु आ मुरपुकी मेकेर जाक्दीम्मानु, सहर कली मीम क्रोइशो नु मेको आन मीश नु तमी तौ नेल्ल आन कली योल्शो तुइक्तमे बाक्त।
- 4 मिनु दाऊद नु मेको नु बाक्शो मुरपुकी डाक्ने मचाप्श्री डाक्मा बाक्त।
- 5 दाऊद आ मीश निम्फा येजेल डा अहीनोआम नु कारमेल डा बेक्शो नाबाल आ मीश अबीगेल निम्फा ग्याइशशा लाइक्चा पुंडसीसा बाक्त। १सामुएल २५:४२-४३
- 6 दाऊद कली हिंचा डा दुम्शो बाक्त। मारदे हना मुरपुकीम मेको आन तमी तौ नेल्ल योल्ने थुम्तीके, दाऊद कली फुल्लु आप्शा साइक्नीकी देशो बाक्मा बाक्त। तन्न दाऊदमी परमप्रभु यावे, आ परमप्रभु कली सक्ति पुना बाक्त।
- 7 मिनु दाऊदमी अहीमेलेक आ तौ चढेब अबीयाथार कली “निसाफ पतीक ऊरीम नु थुम्मीम बाक्शो एफोद चाक्को” दे मदा बाक्त। मिनु चाक्गा बाक्त। १सामुएल २३:९
- 8 मिनु दाऊदमी परमप्रभु यावे कली “मार, गो मेको रोइक्ब आन कली खेदा पडा? गो मेको आन कली थिन्ने चाप्नुडा?” देमाक्त। मिनु “मेको आन कली खेदा पावो। थमा पा, गे मेको आन कली थिश्शा, नेल्ल आन कली प्रोंइने चाप्नेवे” देशो नेना बाक्त।
- 9 मिनु दाऊद नु मेको आ ६ सहे मुर गाक्मा बाक्त। मिनु बेसोर डा खोल्सा सम्म जाक्दीम्मा बाक्त। मेकेर दशा गाक्ने मचाप्बपुकी बाक्मा बाक्त।
- 10 मिनु मेको आन दाते डा सहे निक्शी मुर थाम्पा दशा, बेसोर खोल्सा शोक्ने मचाप्शो बाक्मा बाक्त। मिनु मेकोपुकी मेकेर बाक्मा बाक्त। दाऊद चहिं ४ सहे मुर लाइशशा खेदा पचा कली लमाक्त।
- 11 मोपा गाक्ना गाक्न लमानु, मेकोपुकीमी इजीप्त डा मुर का थित्मे बाक्त। मिनु मेको कली दाऊद आ बाक्तीक चाक्गमे बाक्त। मिनु मेको कली जचा तूचा गेमे बाक्त। मिनु मेकोमी जवा तूडा बाक्त।

12 मेको कली डल्ला का फोव्रशी रोडा नु डल्ला निक्शी सोक्शो अडगुर यो गेमे बाक्त। मिनु मेको नेक्गा नोले मेको आ सोक्त पिमाक्त। मारदे हना मेकोम नाक्त सां नु नाक्टो सां सम्म मारेड मजशो बाक्माक्त।

13 मिनु दाऊदम मेको कली “गे ते रे जाक्शो नवे। सु आ मुर नवे?” दे हिल्लो पवा बाक्त। मिनु मेकोमी “गो इजीप्ट डा टिटा का नड। अमालेकी का आ वाइल नड। तन्न गो नाक्त सां डोंइती रे रोड पतीके आं होवपम आं कली प्रोंइशा गाक्त।

14 गो यहूदा रागी डा केरथी आन नेगेब डा मारेड मारेड नु कालेब आ नेगेब तेड तेड रोडक्ताक्क। मिनु सिकलाग सहरम मी सुइक्ताक्क” देमाक्त। २सामुएल ८:१८; यहोसु १४:१३

15 मिनु दाऊदमी “गे आंइ कली लां कोंइशा मेको आन बाक्तीके चाक्दीन्ने चाप्नेवे?” देमाक्त। मिनु मेकोमी “गे परमप्रभु आ डोंइती ‘आं कली मसाइक्नीकी नु आं होवप आ गुडम जिम्मा मगेनीकी’ दे कसम जने। मिनु गो लां कोंइशा मेको आन बाक्तीक चाक्दीन्नुड” देमाक्त।

16 मिनु मेकोम लां कोंइना कोंइन मेको आन कली उड चाक्दीदा बाक्त। मेकेर अमालेकी एर आंथ ब्रशा जशा तूशा सिल पा, आन रोइशो मार मार पुक्शा ग्येरशा बाक्शो बाक्मा बाक्त। मारदे हना मेकोपुकीम पलिस्ती नु यहूदा रे शुश मार मार रोइशो बाक्मा बाक्त।

17 मिनु दाऊदम मेको आन कली सुनी रे आ दीसा नाक्टो सम्म नेल्ल साइक्मी बाक्त। ४ सहे टिटा मुर ला दलओंठ डोइशशा प्रोकमा बाक्त।

18 दाऊदमी अमालेकी आन रोइशो नेल्ल लेशा थिदा बाक्त। मेको आ मीश निम्फा आस कली यो थिदा बाक्त।

19 मेको आन के मारेड यो मजाम्माक्त। आन खिं डा आइक्ची ठेयब, तमी तो रोइशशा लाइशो नेल्ल थोव्रक थित्मे बाक्त। मोपा दाऊदमी मारेड मारेड प्रोना बाक्त।

20 दाऊद नु आ मुरपुकीम मेकोपुकीम डोंइती रोइशो क्यारश भेडा, बी ब्यफ नेल्ल आन कली लदमे बाक्त। मिनु “एको नेल्ल दाऊद के बाक्ब” देमा बाक्त।

21 नोले दाऊदम बेसोर डा खोलसाम नाइशशा बाक्शो सहे निक्शी मुर आन बाक्तीक जाक्माक्त। मेकोपुकी दाऊद कली नु मेको आ मुर आन कली युम्थ जाक्मा बाक्त। मिनु दाऊदम मेको नेल्ल आन कली “मार दुम्मे? दोपा बाक्नी” दे हिल्लो पवा बाक्त।

22 तन्न दाऊद नु लाइब का निक्शी शोर गाक्शो मुरपुकीम मेको आ लोव्र खोइशशा दाऊद कली “एको मुरपुकी गो नु मलम। गोपुकीम लशा रोइशशा चाक्शो मार मार गो मेको आन कली योक्शा मगेनीकी। मेकोपुकीम आन मीश नु आन आलपुकी ला लदमेक्ल” देमा बाक्त।

23 मिनु दाऊदमी मेको आन कली “परमप्रभु यावेम इं कली प्रोंइतु। एको नेल्ल गेप्टु। इं जोरी सत्रु आन कली इं गुडमी गेप्टु।

24 सुम इन देशो लोव्र बिन्बा? खाल पाइब नु लडाइम लाइब नेल्लेम उइक्थ उइक्थ ताइनीम” देमाक्त। गन्ती ३१:२४

25 मिनु दाऊदमी इस्राएलम मेको फुल्लुम मुशा ब्रेक्शो खोंदेशो पा नु निसाफ पतीक लोव्र पवा बाक्त। मेको मेना रे मुल सम्म लीशो बाक्ब।

26 मिनु दाऊद सिकलागम जाक्शा, रोइशो मार मार रे यहूदा डा आ वारच खाल्पा आन कली “परमप्रभु यावे आ जोरी सत्रु रे रोइशो मार मार एको इन कली कोसेली बाक्ब” देशा, सोइक्ता बाक्त।

27 मेकोमी सु सु आन कली कोसेली सोइक्ता बाक्त देशा हना, बेथेल सहर, नेगेब डा रामोथ सहर, यतीर, सहर

28 आरोएर सहर, सिफमोथ सहर, एरतेमोआ सहर,

29 राकाल सहर, येराहमेल आ मुर आन सहरम बाक्ब आन कली, केनी आन सहरम बाक्ब आन कली, १सामुएल २७:१०

30 होरमा सहर, बोर-अशन सहर, अथाक सहर

31 हेब्रोन सहरम बाक्ब नेल्ल आन कली नु दाऊद नु आ मुर गाक्शो सहर गाउं नेल्ल आन कली कोसेली सोइक्तीमी बाक्त। डोंइती मेकेर दाऊद नु आ मुरपुकीम मार मार पामे बाक्त।

## 31

सावल नु योनाथन बेक्शो

१इतिहास १०:१-१२

1 पलिस्ती नु इस्राएली लडाइ पामे बाक्त। मिनु इस्राएली पलिस्ती आन क्येडा बुशा प्रोकमा बाक्त। शुश इस्राएली गिलबोआ डांडाम साइक्चा पुंडसमा बाक्त।

2 पलिस्तीपुकीम सावल नु आ तौ आन कली साप्पा खेदा पामे बाक्त। मिनु सावल आ तौ सां योनाथन, अबीनादाब नु माल्कीशुआ आन कली सदमे बाक्त।

3 लडाइम सावलमी थाम्पा श्येत जवा बाक्त। मारदे हना लिब्रा आप्बम मेको कली ख्रपाइशशा गार सेल्मे बाक्त।

4 मिनु मेकोम आ या कुरब कली “इ तरवार शोइशशा आं कली साइय्यी। मिनु मेको खोइक्तीक चिनु मखोइशशोपुकीम आं कली शुक्शी पचा मतामेक्ल” देमाक्त। तन्न मेको या कुरब हिंशा, मबिस्से बाक्त। मेको नोले सावलमी आ तरवार शोइशशा आंमा थोक्सीशा बेक्माक्त। न्यायाधीस ९:५४

5 मिनु मेको या कुरबमी सावल बेक्शो तशा, मेको यो आ तरवारम थोक्सीशा मेको नु बेक्माक्त।

6 मोपा सावल, आ तौ सांफा, आ या कुरब नु लडाइ पाइब नेल्ल काबुमीन बेक्मा बाक्त।

7 बेसी नु यर्दन आइक्की हांबुम बाक्ब इस्राएलीपुकीम लडाइ पाइब इस्राएली प्रोक्शो नु सावल नु आ तौ नेल्ल बेक्शो नेन्मे बाक्त। मोपतीके मेकोपुकी आंम आंम सहर प्रॉइशा प्रोक्मा बाक्त। मिनु पलिस्ती जाक्शा मेको सहर आन के सेल्मे बाक्त।

8 आ दीसा पलिस्तीपुकी बेक्शो आन मार मार रोइक्चा कली जाक्मा बाक्त। मिनु मेकोपुकीम गिलबोआ डांडाम सावल नु आ तौपुकी बेक्शो थिम्मे बाक्त।

9 मिनु मेकोपुकीम सावल आ पिया खोदमे बाक्त। मिनु आ यापुकी लदमे बाक्त। मेको नोले मेकोपुकीम मेको रिम्शो लोत्र रागी डा तेइ तेइ नु देवी देवता नेल्ल आन कली नेंपाइक्चा, दे मुर सोइक्तमे बाक्त।

10 मेकोपुकीम सावल आ यापुकी अशतारोथ माइश्शो मूर्ति पाइश्शो थाम आ खिमी वोदमे बाक्त। मिनु मेको आ बेक्शो रां बेथ-शान डा गारोम किला थोक्शा क्युक्शा वोदमे बाक्त। ब्यवस्था २१:२२-२३

11 पलिस्तीपुकीम सावल आ बेक्शो रां कली मार पामे, मेको याबेश-गिलाद डा मुरपुकीम नेन्मे बाक्त। १सामुएल ११:१-११

12 मिनु मेको आन बोल्यो मुरपुकी नेल्ल नाक्दो रे गाक्शा, सावल नु आ तौ आन बेक्शो रां बेथ-शान डा गारो रे शोल्शा, याबेशम चाक्गमे बाक्त। मिनु मेको आन कली थिम्मे बाक्त।

13 मिनु नोले आन रुश याबेश डा टेयब रवा आ पुंमी थिम्मे बाक्त। मिनु मेकोपुकी ७ नाक्त सम्म माइजा बाक्मा बाक्त। २सामुएल १:१२

## २ सामुएल

**ब्रेक्ब मुर:** डोंइती १सामुएल नु २सामुएल किताब कान बाक्ताक्स। १इतिहास २९:२९ पिप दाऊद आ पशो मार मार बाक्मे, मेको डोंइती रे नोले सम्म नेल्ल परमप्रभु यावे आ लोत्र पाइब सामुएल, नाथान नु गाद आन ब्रेक्शो किताबम ब्रेक्शो बाक्मा बाक्त।

**गेना ब्रेक्शो:** ९७५ बि. सी. क्येडा नोले परमप्रभु यावे आ लोत्र पाइब रे ब्रेक्शा एको किताब थुम्शो बाक्त।

**मार ब्रेक्शो:** परमप्रभुम इस्राएली आन कली दाक्चा मप्रोंइब आ सांकछी बाक्ब।

दाऊदम सावल बेक्शो लोत्र नेशो

१ सावल बेक्म नोले दाऊदम अमालेकी आन कली खेदा पशा, लेशशा नाक्त निक्शी सिकलाग सहरम बाक्शो बाक्माक्त। १सामुएल ३०:२६

२ मिनु आ नित्थ नाक्ती, आ वा खाक्शो नु पियाम खप फुंडसीशो मुर का सावल आ बाक्तीक रे जाक्माक्त। मिनु मेको दाऊद आ बाक्तीक जाक्शा, मेको आ डोंइती खुम्की पा बाक्माक्त।

३ दाऊदम मेको कली “गे ते रे जाक्डे?” दे हिल्लो पवा बाक्त। मिनु मेकोमी “गो इस्राएल डा लडाइ पाइब आन बाक्तीके रे प्रोक्शा जाक्ती” देमाक्त।

४ मिनु दाऊदमी मेको कली “मार दुम्मे? आं कली देंनो” देमाक्त। मिनु मेकोमी “लडाइ पाइबपुकी लडाइ रे प्रोक्तेक्म। शुश मुर साइक्चा पुंडसाक्म। मिनु सावल नु आ तौ योनाथन यो साइक्चा पुंडसाक्स” देमाक्त।

५ मिनु दाऊदम मेको लोत्र चाक्ब ठिटा कली “सावल नु आ तौ योनाथन साइक्चा पुंडसाक्स, दे दोपा तुइक्ती?” देमाक्त।

६ मिनु मेको ठिटामी “गो गिल्लोआ डांडाम बाक्शो नड। मेकेर सावल कली आ तूतीक तिकशा राप्शा बाक्शो ताता। बग्गी डोइक्ब नु शारा डोइक्बपुकीम मेको कली थित्चा चिक्ताक्म। १सामुएल ३१:१-३

७ मिनु मेकोमी नोले लेशशा कोत्रडानु, आं कली तती। मिनु ब्रेक्ताक्मी। मिनु गो ‘मार देंनी’ देती।

८ मिनु मेकोमी ‘गे सु नवे’ दे हिल्लो पती। मिनु ‘गो अमालेकी का नड’ देती।

९ मिनु मेकोमी ‘आं नेक्था जाक्को। आं कली साइय्यी। मारदे हना गो बेक्चा चिक्शो बाक्ती। आं सोक्त ला बाक्ब’ देत।

१० मोपतीके गो आ नेक्था लशा, मेको कली साइक्ता। मारदे हना मेको मप्रोंइब, दे गो तुइक्ताक्ड। मिनु गो मेको आ पिया रे सिरपेच नु आ गुड डा पांडतीके, आं प्रभु, इन बाक्तीकेम चाक्ता” देमाक्त।

११ मेको लोत्र नेशा, दाऊदम आ वा खाक्शा बाक्त। मेको नु बाक्ब मुर नेल्लेमी यो मो पामे बाक्त। १सामुएल ४:१२

१२ मेकोपुकी नां मरिक्म सम्म सावल नु आ तौ योनाथन आस पबंम डाक्शा रोंका पा माइजा बाक्मा बाक्त। मारदे हना परमप्रभु यावे आ लडाइ पाइबपुकी नु इस्राएल आ खिं डा मुरपुकी तरवारम साइक्चा पुंडसमा बाक्त। १सामुएल ३१:१३

१३ मिनु दाऊदम मेको लोत्र चाक्ब ठिटा कली “गे ते रे जाक्शो नवे?” दे हिल्लो पवा बाक्त। मिनु मेकोमी “गो अर्को रागी डा अमालेकी का आ तौ नड” देमाक्त।

१४ मिनु दाऊदमी “परमप्रभु यावे आ तेल लुक्शो मुर कली साइक्चा महिने?” देमाक्त। १सामुएल २४:७; १सामुएल २६:९

१५ मिनु दाऊदमी आ ठिटा मुर का कली ब्रेशशा “मेको कली सतो” दे अरेवा बाक्त। मिनु मेकोमी मेको कली तुप्शा सदा बाक्त। २सामुएल ४:१०-१२

१६ दाऊदमी मेको कली “इ हुश इ पिया तार मोंइसेक्ल। मारदे हना गे “गो परमप्रभु यावे आ तेल लुक्शो कली साइक्ता” देते। इ शोत्रमीन आंम इ कली दोसी सेल्साक्वे” देमाक्त।

दाऊदम रोंका पतीक कुम्सो सेल्शो

१७ मिनु दाऊदमी सावल नु आ तौ योनाथन आस पबंम रोंका पतीक कुम्सो पवा बाक्त।

१८ मिनु मेको रोंका पतीक कुम्सो यहूदा डा मुर आन कली शेंचा माल्ब, दे हुकुम पवा बाक्त। मेको कुम्सो याशार आ किताबम ब्रेक्शो बाक्ब। २सामुएल १:२२; यहोसु १०:१३

१९ “इस्राएल, इ छेडछेड डांडाम साइक्चा पुंडसाक्म। सक्ति पाइशशो मुरपुकी दोपा बेक्मा?

२० गाथम एको लोत्र मपने। अश्कलोन डा लांम एको लोत्र मपने। मो पाइतीनी हना, पलिस्ती आन तमी ग्येरसीनीम। खोइक्तीक चिनु मखोंइशशो आन तमी ग्येरसीनीम।

२१ गिल्लोआ नें पाइशशो डांडा, इ तार सीत नु रेउ मयिल। अन्न ग्रेल्ब रू मबाक्ल। मारदे हना सक्ति पाइशशो आ तेक्तीक ग्रांरा दिशो सेल्तेक्म। सावल आ तेक्तीक कली मुल रे तेल मखेक्नीम।

२२ योनाथन आ लिब्रा साइक्चा पुंडसीशो जोरी सत्रु आन हुश नु बोल्यो मुर आन बोंसो मलुम्सीथु, गेनायो मले। सावल आ तरवार यो मोशा मले।

२३ सावल नु योनाथन दाक्मुबाक्ताक्स। अरुम यो दाक्चा पुंडसाक्स। ब्रोंइसा नु बेक्सा नु यो काथा दुम्ताक्स। मेको निक्शी ककाकुली क्येडा यो रीब पा पाइब बाक्ताक्स। गुप्स क्येडा यो बोल्यो बाक्ताक्स।

२४ इस्राएल डा तमीपुकी सावल आ पबंम डाक्कीन। मेकोमी इन कली लल दारदारशो शुश क्येट लाइब वा फेक्पाइशशो बाक्त। मेकोमी इन कली सुन के गहना पांडपाइशशो बाक्त।

- 25 सक्ति पाइश्शो दोपा बेक्मा! मेको लडाइम बेक्तेकम। योनाथन साइक्चा पुंडसीशा, डांडाम गोल्लो बाक्व।  
 26 आं लोकब योनाथन, गो इ पर्बम रोंका पाइनुड। गो इ कली थाम्पा दाक्ताकन। इ आं कली दाक्शो ठेयब बाक्व।  
 मीश मुर आन कली दाक्तीक क्येडा यो लाक्शो बाक्व।  
 27 सक्ति पाइश्शो दोपा बेक्मा! मेको लडाइम आन या खतम दुम्तेकम” दे कुम्सो पशो बाक्व।

## 2

दाऊद यहूदा डा पिप दुम्शो

- 1 मेको नोले दाऊदमी परमप्रभु यावे कली “मार गो यहूदा डा सहर काम लडा?” दे हिल्लो पवा बाक्व। मिनु परमप्रभु यावेमी “लावो” देमाक्व। मिनु दाऊदमी “तेको सहरम लड” दे हिल्लो पवा बाक्व। मिनु “हेब्रोन सहरम लावो” देमाक्व।  
 १सामुएल २३:६,९; १सामुएल ३०:७-८  
 2 मोपतीके दाऊद आ मीश निक्शी येजेल डा अहीनोआम नु कारमेल डा बेक्शो नाबाल आ मीश अबीगेल नु मेकेर लमाक्व। १सामुएल २५:४२-४३  
 3 मिनु दाऊदमी आ नु गाक्ब मुर आन खिं डा मुर नेल्ल यो लाइक्मी बाक्व। मिनु मेकोपुकी हेब्रोन सहरमी बाक्मा बाक्व।  
 4 मिनु यहूदा डा मुरपुकी जाक्शा, दाऊद कली तेल लुक्शा, आन पिप सेल्मे बाक्व। मिनु मुरपुकीमी दाऊद कली “यावेश-गिलाद डा मुरपुकीम सावल कली थिम्तेकम” दे नेपदमे बाक्व। २सामुएल ५:३; १सामुएल १६:१३; १सामुएल ३१:११-१३  
 5 मिनु दाऊदम यावेश-गिलाद डा मुर आन कली लोत्र कुरब मुर सोइश्शा “परमप्रभु यावेम इन कली आसीक गोवल। मारदे हना गे इन प्रभु सावल कली रिम्शो पा थिम्तीनी।  
 6 मिनु परमप्रभु यावेमी इन कली गेना हना यो दाक्शा मप्रोनल। मिनु गो यो इन पशो गेय आ पर्बम इन कली इनाम गेनुड।  
 7 मोपतीके बोल्यो नु महिब दुमीन। मारदे हना इन प्रभु सावल बेक्शा लत। मिनु यहूदा डा मुरपुकीम आं कली आन पिप सेल्तीमी” दे लोत्र कुरब मुर सोइक्ता बाक्व।

इश-बोशेथ पिप दुम्शो

- 8 मेना सावल आ लडाइ पाइब मुर आन ठेयब मुर नेर आ तौ आब्नेरमी सावल आ तौ इश-बोशेथ कली यर्दन ओथ हांबु महा-नाइमम चाक्मा बाक्व। १सामुएल १४:५०; उत्पती ३२:२-३  
 9 मिनु गिलाद, अश्शुर, येजेल, एफ्राइम, बेन्यामीन आ थर डा मुर नु इस्राएली नेल्ल आन पिप सेला बाक्व।  
 10 सावल आ तौ इश-बोशेथ इस्राएल डा पिप दुम्मेनु ४० बर्स दुम्शो बाक्माक्व। मेकोमी बर्स निक्शी सम्म सासन पवा बाक्व। तन्न यहूदा डा मुर दाऊद आ नोले खोदमे बाक्व।  
 11 दाऊदमी हेब्रोन सहरम यहूदा डा मुर आन कली ७ बर्स ६ महिना सम्म सासन पवा बाक्व।

आसाहेल बेक्शो

- 12 नेर आ तौ आब्नेर, सावल आ तौ इश-बोशेथ नु आ गेय पाइबपुकी महा-नाइम रे गिबोन लमा बाक्व।  
 13 सेरूयाह आ तौ योआबमी दाऊद आ गेय पाइब आन कली लाइश्शा गिबोन डा दोम्लीम लडाइ पवा बाक्व। मेको निक्शी गिबोन डा दोम्लीम गुम्सा बाक्व। मिनु काम दोम्ली आ आइक्ची हांबुम, काम दोम्ली आ ओथ हांबुम आस लडाइ पाइब आन कली राप्पदसे बाक्व। १सामुएल २६:६; यहोसु ९:३,१७  
 14 मिनु आब्नेरम योआब कली “इ लडाइ पाइब मुर नु आं लडाइ पाइब का का पा गुम्शा इस डोइती लडाइ पामेक्ल” देमाक्व। मिनु योआबमी “दुम्ब, मो पामेक्ल” देमाक्व।  
 15 मोपतीके मेकोपुकी गृशा लशा, बेन्यामीन नु सावल आ तौ इश-बोशेथ आन मुर १२ जना नु दाऊद आ मुर १२ जना का का पा राम्मा बाक्व।  
 16 मिनु मेको नेल्लेमी आंम आंम जोरी सनु आन पियाम ग्याइश्शा कोखाम तरवारम आप्मे बाक्व। मोपा नेल्ल कालेम बेक्मा बाक्व। मोपतीके गिबोन आ नेक्था डा रू कली हेल्काथ-हच्युरीम देंनीम। मेको नें आ अर्थ तरवार आ क्योरतीक देसीब।  
 17 मेको नाक्व थम ठेयब लडाइ दुम्माक्व। मिनु आब्नेर नु इस्राएल डा मुर दाऊद आ मुर आन क्येडा बुमा बाक्व।  
 18 सेरूयाह आ तौ सांफा योआब, अबीशै नु आसाहेल मेकेर बाक्शो बाक्मा बाक्व। आसाहेल ब्वाकी डा दोरब किश्श खोदेशो रीब पा गेय पाइब बाक्माक्व। १इतिहास २:१६  
 19 मेकोम ग्युरा पेरा एर ओथ मारिड मकोवथु दोरशा आब्नेर कली खेदा पवा बाक्व।  
 20 मिनु आब्नेरम नोले लेशशा कोत्रशा “मार गे आसाहेल नवे?” दे हिल्लो पवा बाक्व। मिनु आसाहेलमी “गो नड” देमाक्व।  
 21 मिनु आब्नेरमी “ग्युरा गे कि पेरा गे लशा, लडाइ पाइब का कली आ मार मार रोइक्तो” देमाक्व। तन्न आसाहेलमी मेको कली खेदा पचा मप्रोना बाक्व।  
 22 मिनु आब्नेरमी लेशा “आं कली खेदा पचा प्रोइयी। गो इ कली मारदे साइक्नुडा? इ लोकब योआब आ डोइती दोपा आं कुल कौइनुडा?” देमाक्व।



23 तन्न आसाहेल एर ओंथ लने मबिस्से बाक्त। मिनु आब्नेरमी आ तूतीक नोले गे आप्शा मेको आ कोव्रज खिदा बाक्त। मिनु मेकेर गोल्शा बेक्माक्त। मिनु आसाहेल बेक्शो बाक्तीके जाक्शा मुर नेल्ल दिक्मा बाक्त। २सामुएल ३:२७

24 मिनु योआब नु अबीशैमी आब्नेर कली खेदा पस डा पस पाम्से बाक्त। मिनु नां मलाक्थु, मेकोपुकी अम्माह डांडा जाक्मा बाक्त। अम्माह डांडा गिअह आ डोंइती, गिबोन रे गोरशो रागी डा लॉम बाक्ब।

25 बेन्यामीन आ थर डा मुर आब्नेर गे बुक्मा बाक्त। मिनु हुल का दुम्शा, अम्माह डांडा तार लडाइ पचा कली ठीक दुम्मा बाक्त।

26 मिनु आब्नेरमी ठेयब सेंदा पा योआब कली “मार, गेना हना यो क्योरमुस डा मुस, साइक्मुस डा साइक्मुस बाक्चा? मेको नोले मरिम्शो दुम्ब, दे गे मतुडक्नेवे? आंम लोकब आन कली खेदा पचा प्रोंइचा, दे इ मुर आन कली ममाइक्नेवे?” देंमाक्त।

27 मिनु योआबमी “परमप्रभु ब्रोंइशा बाक्शो खोदेशो पा, गे मो मदेंशो नवे हना, मुरपुकीम दीसा सुनी सम्म यो आन लोकब आन कली खेदा पचा मप्रोनेम वा” देंमाक्त।

28 मिनु योआबम तुगही तबा बाक्त। मिनु मुर नेल्लेमी इसाएली आन कली खेदा पचा प्रोन्मे बाक्त। मिनु लडाइ नांइसे बाक्त।

29 आब्नेर नु आ मुरपुकी नाक्दो रे अराबाह रे गाक्शा यर्दन खोला शोक्समा बाक्त। मिनु सुनी रे गाक्शा महा-नाइमम जाक्दीम्मा बाक्त।

30 मिनु योआबमी आब्नेर कली खेदा पचा प्रोंइशा, लडाइ पाइब आन कली पुक्मी बाक्त। मिनु आसाहेल प्रोंइशा, दाऊद आ मुर १९ जना मबाक्मा बाक्त।

31 तन्न दाऊद आ लडाइ पाइबपुकीमी बेन्यामीन आ थर डा मुर नु आब्नेर आ नोले खोइक्ब ३ सहे ६० जना आन कली सदमे बाक्त।

32 मेकोपुकीम आसाहेल कली कुरशा लाइश्शा, आ आफ आ तुरस बेथलेहेम सहरम थिम्मे बाक्त। मेको नोले योआब नु आ मुरपुकी नाक्दो रे गाक्शा नां सोत्र सोत्र हेब्रोन सहरमी जाक्दीम्मा बाक्त।

### 3

दाऊद आ खिं डा मुर

1 सावल नु दाऊद आस खिं डा मुर शुश नाक्त सम्म लडाइ पस डा पस बाक्मा बाक्त। मिनु दाऊद बोल्थो दुम्ना दुम्न लमाक्त। सावल आ खिं डा मुर चहिं मचाप्ब दुम्ना दुम्न लमा बाक्त। २सामुएल ५:१०

2 हेब्रोनमी दाऊद आ तौपुकी जरमेसीमा बाक्त। मेको आ डोंइती जरमेशो तौ अम्नोन बाक्माक्त। मेको आ ममा येजेल डा अहीनोआम बाक्माक्त। १इतिहास ३:१-४; २सामुएल १३:१

3 मेको आ माइला तौ किलेआब बाक्माक्त। मेको आ ममा कारमेल डा बेक्शो नाबाल आ मीश अबीगेल बाक्माक्त। मेको आ साइला तौ अब्सालोम बाक्माक्त। मेको आ ममा गेशुर डा पिप तल्मै आ तमी माकाह बाक्माक्त। २सामुएल १५:१

4 काइला अदोनीयाह बाक्माक्त। मेको आ ममा हग्गीथ बाक्माक्त। ठाइला शेफत्याह बाक्माक्त। मेको आ ममा अबीतल बाक्माक्त। १राजा १:५

5 आ कान्छा इश्रेआम बाक्माक्त। मेको आ ममा दाऊद आ मीश एग्लाह बाक्माक्त। मेको नेल्ल हेब्रोनम जरमेशो दाऊद आ तौ बाक्मा बाक्त।

आब्नेरमी दाऊद नु कसम जशो

6 सावल नु दाऊद आस खिं डा मुर आन दातेमी लडाइ दुम्ना दुम्न लमेनु, आब्नेर सावल आ खिंमी बोल्थो दुम्ना दुम्न लमाक्त।

7 मिनु सावल आ कान्छी मीश का बाक्माक्त। मेको आइयाह आ तमी बाक्माक्त। मेको आ नें रिस्पाह बाक्माक्त। मिनु इश-बोशेथम आब्नेर कली “गे आं आफ आ कान्छी मीश नु मारदे इमे?” दे मदा बाक्त।

8 आब्नेरमी इश-बोशेथ आ लोत्र नेंशा गाइश्शा “मार, गो यहूदा आ गेय पाइब कुचुम नडा? मुल सम्म गो इ आफ सावल आ खिं डा मुर, आ लोकब नु आ वारच आन कली मानेब मुर बाक्ती। गो इन कली दाऊद आ गुडम मगेड। मो हना यो गे एको मीश मुर आ पर्बम आं कली दोस गेनीनी।

9 गो परमप्रभुमी दाऊद कली देंशो मपाता हना, आं कली सजाइ गेयील। परमप्रभु यावेमी दाऊद कली दोदेशो कसम जवा, गो मोदेशो पाइनुड।

10 “सावल आ खिं डा मुर आन राज्य रोइक्चा नु दाऊद कली इसाएल यहूदा नु दान रे बेयर-शेबा सम्म सासन पपाइक्नुड” दे परमप्रभु यावेमी देंशो बाक्ब” दे आब्नेरम इश-बोशेथ कली देंमाक्त।

11 मिनु इश-बोशेथ आब्नेर क्येडा हिंतीके मारेड लोत्र मलेत्ता बाक्त।

12 मेको नोले आब्नेरम हेब्रोनम बाक्ब दाऊद कली “एको रागी सु के बाक्बा? गे गो नु कबल का पने। मिनु गो इसाएल नेल्ल इन के सेल्चा कली वारच पाइनुड” दे लोत्र कुरब मुर सोइक्ता बाक्त।

13 मिनु दाऊदमी मेको आन कली “दुम्ब। गो गे नु कबल पाइनुड। तन्न गो इ कली लोत्र का पाइनुड। गे सावल आ तमी मिकाल कली मचाक्तीवी हना, आं डोंइती मजाक्को, दे मतीन” दे माइक्मी बाक्त।

14 मिनु दाऊदमी सावल आ तौ इश-बोशेथ कली यो “आं मीश मिकाल गेयी। गो मेको आ पर्बम सहे का जना पलिस्ती आन खोइक्तीक चिनु खोइश्शो कुशुल थाप्ताक्ड” देंपाइक्थ मुर सोइक्ता बाक्त। १सामुएल १८:२५-२७

15 मोपतीके इश-बोशेथम मुर सोइशशा मिकाल आ वोंइश लाइश आ तौ, पाल्तीएल आ बाक्तीक रे चाक्पदा बाक्त। १सामुएल २५:४४

16 मेको डाकना डाकन बाहुरीम सहर सम्म मिकल आ नोले खोइशशा पिमाक्त। मिनु आबनेरमी “लेशशा खिं लावो” दे मदा नोले लेम्माक्त।

17 मिनु नोले आबनेरम इस्राएल डा खाल्पा आन कली “शुश डोंइती रे गेपुकीम दाऊद कली पिप सेल्चा माल्शो ननी।

18 मुल मेको पची जाक्त। मारदे हना परमप्रभु यावेमी दाऊद कली ‘गो आं गेय पाइब दाऊद आ गुड रे आं मुर इस्राएली आन कली पलिस्ती नु आन जोरी सनु नेल्ल आन गुड रे प्रोंइनुड’ दे लोत्र थोकशो बाक्ब” देमाक्त।

19 आबनेरमी बेन्यामीन आ थर डा मुर नु यो लोत्र पवा बाक्त। नोले आबनेर दाऊद आ बाक्तीक हेब्रोन लमाक्त। मिनु इस्राएली नु बेन्यामीन आ थर डा मुर आन पचा देंशो लोत्र नेल्ल देमाक्त।

20 मिनु आबनेर २० जना मुर नु दाऊद आ बाक्तीक हेब्रोन जाक्दीम्माक्त। दाऊदम आबनेर नु मेको नेल्ल आन कली भोज गेमी बाक्त।

21 मिनु आबनेरमी दाऊद कली “मुल आं कली इस्राएली नेल्ल आन कली आं प्रभु, पिप इन डोंइती चाक्चा गेयीनी। मिनु मेकोपुकीम गे नु कबल का पाइनीम। गे इन दाक्शो राज्य कामी रागी नेल्ल डा पिप दुम्नीनी” देमाक्त। नोले दाऊदमी आबनेर नु गारशा सोइक्ता बाक्त।

योआबम आबनेर कली साइशशो

22 मेना योआब दाऊद आ मुरपुकी नु गारशा, लडाइ पा मार मार रोइशशा जाक्मा बाक्त। आबनेर चहिं गाकने थुम्तीके दाऊद नु हेब्रोन सहरम मबाक्माक्त। मारदे हना दाऊदम मेको नु गारशा, सोइक्ने थुम्शो बाक्माक्त।

23 मिनु योआब नु लडाइ पाइब हुल जाक्मानु, मुरुमी “नेर आ तौ आबनेर दाऊद आ बाक्तीक जाक्मेनु, दाऊदमी मेको नु गारशा सोइक्ताक्व” दे नैपदमे बाक्त।

24 मिनु योआबम पिप आ बाक्तीक लशा “गे एको मार पनी? आबनेर इन बाक्तीक जाक्माक्त। गे मारदे मेको कली मो लेशशा सोइक्तीनी?

25 गे नेर आ तौ आबनेर कली तुइक्नीनी। मेकोम इन कली जोल पा इन पबंम रुप्चा कली नु गे मार पा बाक्नी, मेको तुइक्चा कली जाक्शो बाक्ब” देमाक्त।

26 मिनु योआब दाऊद आ बाक्तीक रे गूशा, लोत्र कुरब मुर कली आबनेर आ नोले सोइक्ता बाक्त। मिनु मेकोम आबनेर कली सिराह डा कुवा रे लेशशा चाक्दीत्मे बाक्त। तन्न दाऊदम मेको नेल्ल मतुइक्ता बाक्त।

27 मोपा आबनेर हेब्रोनम लेशशा जाक्मेनु, योआबमी लोत्र पचा, दे सुइ मबाक्तीकेम लदा बाक्त। मिनु आ कोव्रजम थोक्या बाक्त। मोपा मेको आसाहेल साइशशो आ पबंम बेक्माक्त। १राजा २:५; २सामुएल २:२३

28 मिनु नोले दाऊदम मेको लोत्र नैशा “गो नु आं राज्य परमप्रभु यावे आ डोंइती गेनायो नेर आ तौ आबनेर साइशशो आ पबंम दोस मताइब दुम्नीकी।

29 मेको दोस योआब नु आ आफ आ खिं डा मुर आन पियाम दुम्ल। योआब आ खिंम ग्रांया यितीके रोइ पाइब कि कोव्र मुशो रोइ पाइब कि कोक्के तिकशा गाक्ब कि तरवारम साइक्चा पुंइसीब कि जचा मताइब मुर का गेना हना यो बाक्ल” देमाक्त।

30 मोपा योआब नु आ लोक्ब अबीशैमी आबनेर कली सदसे बाक्त। मारदे हना आबनेरमी मेको आस लोक्ब आसाहेल कली गिबोन डा लडाइम साइशशो बाक्माक्त। न्यायाधीस ८:१८-२१; २राजा १४:५

31 मिनु दाऊदमी योआब नु आ नु बाक्ब नेल्ल आन कली “इन वा खाक्कीन। मिनु भाडग्रा फेक्सीन। मिनु आबनेर आ पबंम रोंका पने” देमाक्त। मिनु पिप दाऊद बेक्शो आबनेर कुरब आन नोले गाक्माक्त।

32 मिनु आबनेर कली हेब्रोनम थिम्मे बाक्त। मिनु पिप आबनेर आ तुरसुम ठेयब सेंदा पा डाक्माक्त। मिनु मुर नेल्ल यो डाक्मा बाक्त।

33 मिनु पिपमी आबनेर आ पबंम रोंका पशो कुम्सो सेला बाक्त। मेकोमी “मार, आबनेर परमप्रभु यावे आ अरेशो मटीब खोदेशो दुम्शा, बेक्चा माल्दा?

34 इ गुड मफ्रेशो बाक्त। इ खोइलीम साडलो मपाइशशो बाक्त। गे परमप्रभु यावे आ अरेशो मटीब आन डोंइती मेकोपुकी खोदेशो पा गोल्ते” देमाक्त। मिनु मुर नेल्ल मेको आ पबंम लेंशा डाक्मा बाक्त।

35 मिनु मुरपुकीमी दाऊद कली “नां लाक्चा डोंइती जने” देमा बाक्त। तन्न दाऊदमी कसम जशा “नां मलाक्गा सम्म गो मारेइ जचा थोत्रक मथीनुड। थीता हना, परमप्रभुमी सजाइ गेयील” देमाक्त।

36 मुर नेल्लेम मेको लोत्र रुप्चा बिस्समा बाक्त। मिनु ग्येरसमा बाक्त। पिप आ पशो नेल्ल दाक्तमे बाक्त।

37 मेको नाक्ती इस्राएल डा मुर नेल्लेमी नेर आ तौ आबनेर साइशशोमी पिप आ दोस मबा, दे तुइक्तमे बाक्त।

38 मिनु पिपमी आ गेय पाइब आन कली “मुलाक्ती इस्राएलमी लडाइ पाइब नु ठेयब मुर का बेक्त, दे तुइक्चा माल्नीनी। १सामुएल २६:१५

39 गो तेल लक्शो पिप दुम्ती हना यो, मुलाक्ती सक्ति मपाइशशो दुम्शो बाक्नुड। एको हुश खाक्श पोकब सेरूयाह आ तौ गो नु मगारनीम। परमप्रभु यावेमी मरिम्शो पाइब आन कली आन पशो क्येक्क लेक्ब” देमाक्त। २सामुएल २:१८

1 सावल आ तौ इश-बोशेथम हेब्रोनम आब्नेर साइशशो लोत्र नेंशा आ थुं लुकच लमाक्त। मिनु इस्राएली नेल्ल हिंशा ग्येत्य लुकच दुम्मा बाक्त। २सामुएल ३:२७

2 सावल आ तौ के मार मार रोइकब आन हुल डा कप्तान निकशी बाकसा बाक्त। मेको का आ नें बानाह नु अर्को आ नें रेकाब बाक्माक्त। मेको बेयरोथ सहर डा बेन्यामीन आ थर डा रिम्मोन आ तौ बाकसा बाक्त। मारदे हना बेयरोथ यो बेन्यामीन आ रागीम बाक्माक्त। यहोसु ९:१७

3 मिनु बेयरोथ सहर डा मुर गिताइम सहर प्रोकशा लशो बाक्मा बाक्त। मिनु मेना रे मेकेर अर्को रागी डा मुर दुम्शा बाक्मा बाक्त। नेहेम्याह ११:१३

4 मिनु सावल आ तौ योनाथन के यो तौ का बाक्माक्त। मेको खोइल निम्फा मदुकब बाक्माक्त। मेको ५ बर्स दुम्मेनु, सावल नु योनाथन बेक्ताक्स देशो लोत्र येजेले रे नेंसे बाक्त। मेको लोत्र नेंशा आ खाल पाइब मीश मुरुमी मेको कली कुरशा प्रोकमेनु, थिरशा मेको आल आ खोइल मदुकब दुम्शो बाक्माक्त। मेको आ नें मेफी-बोशेथ बाक्माक्त। मेफी-बोशेथ आ नें मेरीब-बाल नु इश-बोशेथ देंनीम। २सामुएल ९:३; १इतिहास ८:३४; १इतिहास ९:४०

5 बेयरोथ सहर डा मुर रिम्मोन आ तौ निकशी रेकाब नु बानाह नाक्ती उडक्थ दुम्मेनु, इश-बोशेथ आ खिम जाक्सा बाक्त। मेना इश-बोशेथ इप्शो बाक्माक्त। २सामुएल २:८

6 मेको निकशी चेरब लाइक्चशो खोदेशो पखु पा, खिम ओव्रसा बाक्त। मिनु मेको कली कोवजम तूशा सदसे बाक्त। मिनु रेकाब नु आ लोकब बानाह सुइम मतुइक्थु प्रोकसा बाक्त।

7 मेको निकशीमी इश-बोशेथ कली दोपा सदसे बाक्त देशा हना, इश-बोशेथ इप्शा बाक्शो कोटा ओव्रशा, मेको कली तूशा साइशशा आ पिया खोइशशा लदसे बाक्त। मिनु नाक्दो रे अराबाह रे गाक्शा, हेब्रोन जाक्सा बाक्त।

8 मिनु मेको निकशीमी मेको पिया दाऊद आ बाक्तीक हेब्रोनमी चाक्गासे बाक्त। मिनु पिप कली “सावल आ तौ इश-बोशेथ आ पिया एको बाक्ब। इन कली साइक्चा माल्ब इन सत्रु बाक्त। मुलाक्ती परमप्रभु यावेमी सावल नु आ चच युड आन कली क्येक्क लेत्ताक्व” देंसा बाक्त।

9 मिनु दाऊदमी बेयरोथ सहर डा रिम्मोन आ तौ रेकाब नु बानाह आस कली “परमप्रभु यावे ब्रोइशा बाक्शो खोदेशो पा, मेकोमी आं कली आं श्येत नेल्ल रे प्रोइती।

10 ‘सावल बेक्शो रिम्शो लोत्र बाक्ब’ दे मिम्शा आं कली देंब मुर कली गो ग्याइशशा सिकलागामी साइक्ता। मेको आ लोत्र आ इनाम बाक्त। २सामुएल १:१५

11 मिनु परमप्रभु यावे आ अरेशो मटीब मुरुमी ठीक पाइब मुर कली आ आंम खिम बाक्शा, इप्तीकम इप्शो मुर कली साइक्ब आस कली मेको क्येडा यो क्येक्क लेत्चा ममाल्नुडा डा? मार, मुल गो मेको आ हुश आ क्येक्क लेशशा इस कली साइशशा, रागी रे मक्याम्नुडा?” देंसा बाक्त। २सामुएल ३:३२

12 मिनु दाऊदम ठिटा मुर आन कली “मेको आस कली सतीन” दे अरेवा बाक्त। मिनु मेको आस कली सदमे बाक्त। आस गुड खोइल खोइशशा, हेब्रोन डा दोम्ली आ नेक्था क्युक्गामे बाक्त। मिनु मुरपुकीमी इश-बोशेथ आ पिया लाइशशा, आब्नेर आ तुरस हेब्रोनमी थिम्मे बाक्त। ब्यवस्था २१:२२-२३

## 5

दाऊद पिप दुम्शो

१इतिहास ११:१-३

1 मिनु नोले इस्राएल आ थर डा मुर नेल्ल दाऊद आ बाक्तीक हेब्रोनम जाक्शा, मेको कली “गो इन हुश नकी।

2 डोंइती सावल आं पिप बाक्मेनु, गे लडाइ पाइब आन कली लाइक्तीक नु चाक्तीक पशो ननी। परमप्रभु यावेमी इन कली ‘गे आं मुर इस्राएली आन गोठला दुम्चा माल्नेवे। गे इस्राएली आन पिप दुम्मेवे’ देशो बाक्ब” देंसा बाक्त। १सामुएल १८:१३, १६; १सामुएल १३:१४; १सामुएल २५:३०

3 मिनु इस्राएल डा खाल्पा नेल्ल पिप आ बाक्तीक हेब्रोनम जाक्मा बाक्त। मेकेर पिप दाऊदमी मेकोपुकी नु परमप्रभु यावे आ डोंइती कबल का पवा बाक्त। मिनु मेकोपुकीम दाऊद कली तेल लुकशा, इस्राएल डा पिप सेल्मे बाक्त। २सामुएल २:४; १सामुएल १६:१३

4 दाऊद ३० बर्स दुम्मेनु, पिप दुम्माक्त। मिनु मेकोमी ४० बर्स सासन पवा बाक्त। १राजा २:११; १इतिहास ३:४; १इतिहास २९:२७

5 मेकोम हेब्रोनम बाक्शा, यहूदा कली ७ बर्स ६ महिना सासन पवा बाक्त। मिनु यरूसलेम सहरमी बाक्शा ३३ बर्स इस्राएल नेल्ल नु यहूदा कली सासन पवा बाक्त।

दाऊदमी यरूसलेम प्राशो

१इतिहास ११:४-९; १इतिहास १४:१-७

6 नोले पिप दाऊद नु आ मुरपुकी, यरूसलेम सहरम बाक्ब यबुसी नु लडाइ पचा कली यरूसलेम लमा बाक्त। मिनु यबुसीपुकीम दाऊद कली “गे एक जाक्ने मचाप्नीनी। मिक्च मताइब नु खोइल मदुकबम यो इन कली प्रोकपाइक्नीम” देंसा बाक्त। मोपा दाऊद जाक्ने मचाप्ब, दे मिम्तमे बाक्त। यहोसु १५:६३; न्यायाधीस १:२१; न्यायाधीस १९:१०-१२

7 मो हना यो दाऊदमी गारो हिरशो सियोन ग्रामाक्त। मिनु मेको दाऊद आ सहर दुम्माक्त।

8 मेको नाक्त दाऊदमी “सुम यबुसी आन कली साइक्वा, मेकोम ब्वाक्कु यितीक रे जाक्शा, दाऊद कली ग्रांया दीब मिक्च मताइब नु खोइल मदुकब आन कली सदमेक्ल” देमाक्त। मोपतीके “मिक्च मताइब नु खोइल मदुकब पिप आ खिं ओव्रचा मताइनीम” देशो बाक्मा बाक्त।

9 मिनु दाऊद मेको गारो हिरशो सहरम बाक्शा, मेको आ नें दाऊद आ सहर वोदा बाक्त। मिनु दाऊदमी मिल्लो रे पा आगा एर ओंथ नेल्ल सहर सेला बाक्त।

10 मिनु दाऊद शुश ठेयब दुम्ना दुम्न लमाक्त। मारदे हना परमप्रभु यावे मुर नेल्ल आन परमप्रभु मेको नु बाक्माक्त। २सामुएल ३:३

11 टायर डा पिप हीराममी आ लोव्र कुरब आन कली दाऊद आ बाक्तीके सोइक्ता बाक्त। हीरामम लेबानोन डा लाइशो रवा आ शी नु शी सेल्ब नु गारो प्रोव्रब यो सोइक्ता बाक्त। मिनु मेकोपुकीम दाऊद कली खिं का सेल्मे बाक्त।

12 मिनु दाऊदमी “परमप्रभु यावेम आं कली इस्राएल डा सक्ति पाइशो पिप सेल्यी बाक्त। मिनु आ मुर इस्राएली आन पर्वम मेको आन राज्य ठेयब सेला बाक्त” दे तुइक्ता बाक्त।

13 दाऊद हेब्रोन रे यरूसलेम याक्से नोले मेकोमी मेकेर शुश मीश चाक्गा बाक्त। मेको के अर्को तमी तौ यो जरमेसमा बाक्त। २सामुएल ३:२-५; १इतिहास ३:५-९

14 यरूसलेम सहरम जरमेशो दाऊद आ तौपुकी शम्मुआ, शोबाब, नाथान, सोलोमन, लूका ३:३१; मती १:६

15 इभार, एली-शुआ, नेफेग, याफीया

16 एली-शामा, एली-आदा नु एली-फेलेत बाक्मा बाक्त।

दाऊदम पलिस्ती आन कली फ़ुशो

१इतिहास १४:८-१७

17 पलिस्तीपुकीम दाऊद इस्राएल डा पिप दुम्त देशो लोव्र नेन्मे बाक्त। मिनु पलिस्ती नेल्ल लडाइ पाइब लाइशशा, दाऊद कली माल्थ लमा बाक्त। तन्न दाऊदम मेको लोव्र नेंशा उइ डा बोल्यो दरवार लशा बाक्माक्त। १सामुएल २२:१; २सामुएल २३:१४

18 मिनु पलिस्तीपुकी जाक्शा, रेफाइम डा बेसीम ब्रशा बाक्मा बाक्त। यहोसु १५:८; यहोसु १८:१६

19 मिनु दाऊदमी परमप्रभु यावे कली “गो पलिस्ती आन कली लडाइ तोतामी हना, गो मेको आन कली आं गुडमी गेनीनी?” दे हिल्लो पवा बाक्त। मिनु परमप्रभु यावेमी “लावो, गो थमा पा मेको आन कली इ गुडम गेनुड” देमाक्त। १सामुएल ३०:८

20 मिनु दाऊद लशा, बाल-पेराजीमम लडाइ तोमी बाक्त। मिनु मेको आन कली ग्रामाक्त। मिनु दाऊदमी “बारशो ब्वाक्कुम आ एर ओंथ प्रेशो खोदेशो पा, परमप्रभु यावेम आं जोरी सत्रु आन कली फ़ुप्तु” देमाक्त। मोपतीके मेकेर बाल-पेराजीम नें लीमाक्त। यसैया २१:२८

21 पलिस्तीपुकीम आन मूर्ति मेक उइ प्रोन्मे बाक्त। मिनु दाऊद नु आ मुरपुकीमी मेको लदमे बाक्त।

22 मिनु लेंशा पलिस्तीपुकी जाक्शा रेफाइम डा बेसीम ब्रशा बाक्मा बाक्त।

23 मिनु दाऊदम लेंशा परमप्रभु यावे कली हिल्लो पवा बाक्त। मिनु परमप्रभु यावेमी “मुल सोजो लडाइ मपावो। हिरशा, ठेयब रवा आ आइक्ची हांबु नोले रे लडाइ पावो।

24 रवा आन डरम लडाइ पाइब आन दोरशो नेंनी चोटी होस पावो। मारदे हना परमप्रभु यावे पलिस्ती आन कली फ़ुचा कली इ डोंइती गाक्ब” देमाक्त।

25 मिनु दाऊदमी परमप्रभु यावेम आ कली देशो खोदेशो पा पवा बाक्त। मिनु पलिस्ती आन कली गेबा रे गेजेर सहर डा लां सम्म शोल्मो पा सदमे बाक्त। न्यायाधीस १:२९

## 6

परमप्रभु आ सन्दोस चाक्शा

१इतिहास १३:५; १इतिहास १५:१६

1 मिनु दाऊदमी इस्राएल डा ३० हजार योव्रशो मुर आन कली खुप्तीमी बाक्त।

2 मिनु दाऊद नु मेको मुर नेल्ल परमप्रभु आ सन्दोस चाक्चा कली यहूदा डा बाले सहर रे लमा बाक्त। मेको सन्दोस तार आ नें बाक्त। मुर नेल्ल आन परमप्रभु यावे आ नें मेकेर बाक्ब। मेको करूब आस दातेम बाक्ब। बाले सहर आ अर्को नें किरयथ-यारीम बाक्त। यहोसु १५:९ प्रस्थान २५:२२

3 मेकोपुकीम परमप्रभु आ सन्दोस डांडाम बाक्शा अबीनादाब आ खिं रे गुंइशा, नक बग्गी काम वोदमे बाक्त। अबीनादाब आ तौ निक्शी उज्जाह नु अहीयोमी मेको नक बग्गी खुल्ना खुल्न लदसे बाक्त। १सामुएल ७:१

4 मेकोपुकीम परमप्रभु आ सन्दोस डांडाम बाक्शा अबीनादाब आ खिं रे लदमे बाक्त। अहीयो चहिं मेको बग्गी आ डोंइती गाक्माक्त।

5 मिनु दाऊद नु इस्राएली नेल्ल आन जोंब बोक्शा परमप्रभु यावे आ डोंइती कुम्सो पना पन बीना, तार पाइशो ठेयब ताप्तीक, खैजडी, मार मार ताप्तीक नु बुक्केल ताप्शा सिल पना पन गाक्मा बाक्त।

6 मेकोपुकी नाकोन आ खलाम जाक्मानु, ब्यफ दाइल पांडससा बाक्त। मिनु उज्जाहम आ गुइ दिंशा, परमप्रभु आ सन्दोस तिक्गा बाक्त।

7 मिनु परमप्रभु यावे उज्जाह कली तशा, गाइक्ता बाक्त। मिनु परमप्रभुमी मेको आ गुइ दिंशा, सन्दोस थिशो तशा, आ सन्दोस आ नेक्था उइ सदा बाक्त। १सामुएल ६:१९; गन्ती ४:१५

8 मिनु दाऊद गाडक्ता बाक्त। मारदे हना परमप्रभु यावेम उज्जाह आ परबम गाडशशा, मेको कली सदा बाक्त। मोपतीके मेकेर परेस-उज्जा नें वोदा बाक्त। मेको आ नें मुल सम्म मेकोन बाक्ब।

9 मेको नाक्ती दाऊद परमप्रभु यावे क्येडा हिमाक्त। मिनु “मुल गो परमप्रभु यावे आ सन्दोस दोपा लाइक्नुडा?” देमाक्त।

10 मिनु दाऊदमी परमप्रभु यावे आ सन्दोस आ बाक्तीके, दाऊद आ सहर, लाइक्ने मचबा बाक्त। मिनु आ खिं लाइक्चा आ पा डा मेको गित्त आ खिं डा मुर, ओबेद-एदोम आ खिंमी चाक्दीदा बाक्त।

11 मोपा परमप्रभु यावे आ सन्दोस ओबेद-एदोम आ खिंमी महिना सां सम्म बाक्माक्त। मिनु परमप्रभु यावेमी गित्त आ खिं डा ओबेद-एदोम नु आ खिं डा मुर नेल्ल आन कली आसीक गेमी बाक्त।

सन्दोस यरूसलेमम चाक्शो

12 मिनु मुरपुकीमी दाऊद कली “परमप्रभु यावेमी, परमप्रभु आ सन्दोस वोडशशा आ परबम ओबेद-एदोम आ खिं डा मुर नु आ मारेड मारेड आन कली आसीक गेप्तु” दे मदमे बाक्त। मिनु दाऊद लशा, ओबेद-एदोम आ खिं रे थाप्पा ग्येरीशा, मेको परमप्रभु आ सन्दोस आ सहरमी चाक्गा बाक्त।

13 परमप्रभु यावे आ सन्दोस कुरब मुर ६ पैला गाक्शा नोले, मेकोपुकीम ब्यफ का नु दोम्शो बाछा का क्योरशा चढ़ेमे बाक्त। १राजा ८:५

14 दाऊदम सुती के ऊरीम नु थुम्मी कुरतीके पांइशा, परमप्रभु यावे आ डोंइती आ जोंब बोक्शा सिल पवा बाक्त। प्रस्थान २८:६; १सामुएल २:१८; १सामुएल २२:१८

15 मिनु दाऊद नु इस्त्राएल आ खिं डा मुर नेल्ल रेयके पना पन तुराही ताम्ना ताम्न परमप्रभु यावे आ सन्दोस चाक्गमे बाक्त।

16 मिनु परमप्रभु यावे आ सन्दोस दाऊद आ सहरमी चाक्गमेनु, सावल आ तमी मिकालमी झेल रे कोव्रडा बाक्त। मिनु पिप दाऊद कली परमप्रभु यावे आ डोंइती प्रेक्ना प्रेक्न, सिल पशो तशा, आ थुंमी ग्रंथा दिमाक्त।

17 मिनु मेकोपुकीम परमप्रभु यावे आ सन्दोस वोडक्चा कली दाऊदम कीशो ताम्बुम ओइदमे बाक्त। मिनु दाऊदमी परमप्रभु यावे आ डोंइती चोशा चढ़ेतीक नु दुशा बाक्चा आ परबम चढ़ेतीक चढ़ेवा बाक्त।

18 दाऊदमी मेको चोशा चढ़ेतीक नु दुशा बाक्चा आ परबम चढ़ेतीके चढ़ेने थुम्शा, मुर नेल्ल आन परमप्रभु यावे आ नेंमी आ मुर नेल्ल आन कली आसीक गेमी बाक्त। १राजा ८:५५

19 मिनु दाऊदमी इस्त्राएली नेल्ल आन कली नु मेकेर देल्लो मीश मुर, वोडशा मुर नेल्ल आन कली शोब्ले का का, चोकटा का का श्ये, सोव्रशो अडगुर शोब्ले गेमी बाक्त। मिनु मुर नेल्ल आन खिं खिं लेम्मा बाक्त।

20 मिनु दाऊद आ खिं डा मुर आन कली आसीक गेथ लेम्मेनु, सावल आ तमी मिकाल मेको कली गुम्थ लाडगा गूशा पिमाक्त। मिनु मेकोम “मुलाक्ती इस्त्राएल डा पिप थम ठेयब मिम्सीशो बाक्त। मेको मुलाक्त आ गेय पाडब वाइलीम आन डोंइती शिशा दुम्शा, मुने मपाइशशो आइक्च मुर खोदंशो दुम्त” देमाक्त।

21 मिनु दाऊदम मिकाल कली “इ आफ नु आ खिं डा मुर आन पा डा आं कली इस्त्राएल डा आ मुर आन पिप सेल्ब परमप्रभु यावे आ डोंइती मो पाता। गो परमप्रभु यावे आ डोंइती ग्येरशा सिल पाइनुड। २सामुएल ५:२

22 गो थमा पा मुल यो मेको क्येडा यो आइक्च दुम्नुड। तन्न मेको आं वाइलीम आन परबम गे मार देने, मेकोपुकीमी आं कली मो पशो आ परबम मान पाइनीम” देमाक्त।

23 मोपतीके मेको सावल आ तमी मिकाल के आ बेक्ची नाक्त सम्म तमी तौ मदुम्मा बाक्त।

## 7

परमप्रभुमी दाऊद नु लोव्र पशो

१इतिहास १७:-

1 मिनु पिप आंम खिंम बाक्म नोले, परमप्रभु यावेम मेको कली आ एर ओंथ डा जोरी सत्रु नेल्ल आन रे नाइक्चा गेवा बाक्त।

2 मिनु पिपमी परमप्रभु यावे आ लोव्र पाडब नाथान कली “कोव्रडीन। गो लेबानोन डा लाइशशो रवा आ शी के सेल्लो खिंम बाक्शो बाक्नुड। तन्न परमप्रभु आ सन्दोस चहिं ताम्बुम बाक्ब” देमाक्त। भजन संग्रह १३२:३-५

3 मिनु नाथानमी पिप कली “दुम्ब, इन थुंम मार बाक्मे, मेको पने। मारदे हना परमप्रभु यावे गे नु बाक्ब” देमाक्त।

4 तन्न मेको नाक्दोन परमप्रभु यावेम नाथान कली लोव्र पवा बाक्त।

5 मार लोव्र पवा बाक्त देशा हना “गे लशा, आं गेय पाडब दाऊद कली ‘गे आं कली बाक्चा कली खिं सेल्लेवे डा?’ १इतिहास २२:८; १राजा ५:१७

6 गो इस्त्राएली आन कली इज्जीप्ट रे चाक्गुमी रे मुल सम्म गेनायो खिंम मबाक्ड। ताम्बु नु अरु बाक्तीकेम बाक्ती। १राजा ८:१६,२७; यसैया ६६:१

7 गो इस्त्राएल डा आं मुरपुकी नु ते ते गाक्डा, मेक मेक मार आं मुर इस्त्राएली आन कली कोव्रब, आन थर डा ठेयब मुर आन कली आं कली लेबानोन डा लाइशशो रवा आ शी के खिं मारदे मसेल्ली” देंदा डा?

8 मोपतीके गे आं गेय पाडब दाऊद कली मुर नेल्ल आन परमप्रभु यावेमी मार देत देशा हना “इ कली, आं मुर इस्त्राएली आन कली कोव्रब दुम्पाइक्चा कली भेडा योव्रतीक रे चाक्तन। १सामुएल १६:११-१३; २सामुएल ५:२

9 गे ते ते गाक्डे, मेक मेक गो गे नु बाक्ती। गो इ जोरी सत्रु नेल्ल आन कली इ डोंइती रे खेरतामी। गो इ नें रागी डा ठेयब मुर आन नें खोदंशो पा ठेयब सेल्लुड।

10 गो आं मुर इस्राएली आन कली बाक्तीक का योव्रनुड। मिनु मेकोपुकी आंम आंम रागीम बाक्नीम। मुल रे मेको आन कली सुइम श्येत मगेनीम। डोंइती डा खोदेशो पा मुल रे मेको आन कली सुइम मरिम्शो मपाइनीम, श्येत मगेनीम।

11 आं मुर इस्राएली आन कली निसाफ पाइब योव्रशो रे गो इ कली इ जोरी सत्रु नेल्ल रे नाइक्पाइकनन। मिनु परमप्रभु यावेमी इ कली चच युड गोब' दे मतो" देमाक्त।

दाऊदम आसीक तशो

12 परमप्रभु यावेम दाऊद कली "इ नाक्त नुप्त हना नु इ किकी पिपी नु बाक्थ लचा नोले गो इ खिं डा मुर आन दाते रे का कली इ पा डा पिप सेल्लुड। मिनु मेको आ राज्य बोल्यो सेल्लुड। १राजा ८:२०

13 मिनु मेकोमी आं नेमी खिं का सेल्लुड। गो मेको आ राज्य गेना हना यो बाक्ब सेल्लुड। १राजा ५:१९; १राजा ६:१२; भजन संग्रह ८९:४-५; यसैया ९:६

14 गो मेको आ आफ दुम्नुड। मिनु मेको आं तौ दुम्ब। मेकोम मरिम्शो पापु हना, गो मेको कली मुर खोदेशो पा कोक्केम तुप्नुड। भजन संग्रह २:७; भजन संग्रह ८९:२७; लुका १:३२; हिब्रू १:५

15 तन्न गो गेना हना यो आं दाक्तीकम मप्रॉइनुड। मेको इ डोंइती सावल कली प्रॉइशो खोदेशो पा मेको कली मप्रॉइनुड। १सामुएल १५:२३-२६

16 इ खिं नु इ राज्य गेना हना यो आं डोंइती लीब। इ सासन पतीक गेना हना यो लीब" देमाक्त। भजन संग्रह ७२:२; यसैया ५५:३

17 मिनु नाथानम मेको देशो लोत्र नु कोंइशो नेल्ल दाऊद कली देमाक्त।

दाऊदम परमप्रभु कली ठेयब सेल्लो

18 मिनु पिप दाऊद परमप्रभु यावे आ बाक्तीक ओव्रशा, मेको कली "परमप्रभु यावे, गो सु नडा? आं खिं डा मुर सु बाक्नीमी? मिनु गे आं कली एक सम्म चाक्यीनी?

19 आं कली पशो इन डोंइती आइक्च बाक्ब। गे इन गेय पाइब आ खिं आ पबंम नोले दुम्ब लोत्र यो पाइतीनी। परमप्रभु यावे, मेको इन मुर आन कली अरेशो लोत्र बाक्ब।

20 परमप्रभु यावे, मुल गो एको क्येडा शुश मार देने चान्नुडा डा? मारदे हना गे इन गेय पाइब कली रिम्शो पा तुइक्नीनी।

21 गे इन थुम मिम्शा, थोक्शा पशो लोत्र इन गेय पाइब, आं कली तुइक्पाइक्चा कली मोदेशो ठेयब गेय पाइतीनी।

22 मोपतीके परमप्रभु यावे, परमप्रभु गे ठेयब बाक्नीनी। इन खोदेशो अरु सुइ मबाक्नीम। अर्को परमप्रभु यो मबाक्नीम।

23 इन मुर खोदेशो अर्को सु बाक्नीमी? इस्राएली खोदेशो सु बाक्नीमी? रागी नेल्लेमी परमप्रभुम प्रॉइशो इस्राएली खोदेशो अर्को जात यो बाक्मा कों? गे इन नें ठेयब सेल्ल्या कली गे इन मुर आन कली ठेयब नु छक लाक्चा डा गेय पाइतीनी। गे इन मुर आन डोंइती रे रागी रागी डा मुर नु आन देवी देवता आन कली खेरतीनी। ब्यवस्था ४:७

24 गे इन मुर इस्राएली आन कली गेना हना यो इन मुर दुम्पाइक्चा कली बोल्यो सेल्लतीनी। मिनु परमप्रभु यावे, गे मेको आन परमप्रभु दुम्तीनी।

25 परमप्रभु यावे, मुल परमप्रभु, इन गेय पाइब नु मेको आ खिं डा मुर आन पबंम देशो गेना हना यो खपीन। इन थोक्शा पशो लोत्र खोदेशो पा पने।

26 मुर नेल्ल आन परमप्रभु यावे इस्राएली आन परमप्रभु बाक्ब। मिनु इन गेय पाइब दाऊद आ खिं गेना हना यो इन डोंइती लीब, दे इन नें गेना हना यो ठेयब सेल्लनीम।

27 मारदे हना गे, मुर नेल्ल आन परमप्रभु यावे, इस्राएल आ परमप्रभु, इन गेय पाइब कली 'गो इ खिं सेल्लुड' देतीनी। गो महिंथु, एको लोत्र पाता। यसैया ५०:५

28 परमप्रभु यावे, गे परमप्रभु बाक्नीनी। इन लोत्र थमा बाक्ब। गे इन गेय पाइब कली रिम्शो थोक्शा पशो लोत्र पाइतीनी। १राजा ८:२६

29 मोपतीके मुल इन गेय पाइब आ खिं कली आसीक गेने। मिनु मेको इन डोंइती गेना हना यो लील। परमप्रभु यावे मेको गे पाइतीनी। मिनु इन आसीकमी इन गेय पाइब आ खिं गेना हना यो आसीक राइब" दे परमप्रभु कली पुना बाक्त।

## 8

दाऊद आ पशो नु प्राशो लडाइ

१इतिहास १८:१-१३

1 मिनु इच्का नोले दाऊदमी पलिस्ती आन कली लडाइ तोशा ग्रामाक्त। दाऊदमी मेथेग-आम्माह सहर आंम के सेला बाक्त।

2 दाऊदम मोआबी आन कली यो फुवा बाक्त। मिनु मेको आन कली खपीम इप्पाइक्मी बाक्त। मिनु डोरी कामी थाप्शा भाग सां सेल्लमी बाक्त। भाग निक्शी डा मुर आन कली साइक्मी बाक्त। मिनु भाग का डा मुर आन कली प्रॉइमी बाक्त। मिनु मोआबीपुकी मेको आ वाइल दुम्मा बाक्त। मिनु मेकोपुकीम दाऊद कली तिर्रो थाप्चा माल्मा बाक्त। १सामुएल २२:३

3 मिनु दाऊद युफ्रेटीस खोला आ नेक्थाम आ अधिकार वोइक्चा कली लमेनु, सोबाह सहर डा रेहोब आ तौ पिप हादादेजेर कली यो लडाइ पा ग्रामाक्त।

4 दाऊदम मेको रे हजार का ७ सहे शारा डोइक्बपुकी नु २० हजार जना खोइलीम गाक्ब लडाइ पाइब आन कली य्याइक्तीमी बाक्त। मिनु दाऊदम बग्गी कीब शारा आन नारी खोदा बाक्त। मिनु आंम कली सहे का शारा बग्गी कीचा कली वोदा बाक्त। यहासु ११:९

5 मेना दमस्कस डा अराम डा मुर सोबाह सहर डा पिप हादादेजेर कली वारच पाइक्चा कली जाक्मा बाक्त। मिनु दाऊदम मेको आन दाते डा २२ हजार अरामी आन कली साइक्मी बाक्त।

6 मिनु दाऊदम मेको अराम डा मुर आन रागी दमस्कसम कोव्रब मुर वोइक्मी बाक्त। मिनु मेकोपुकी दाऊद आ वाइल दुम्शा, तिरो थाप्चा माल्मा बाक्त। मोपा परमप्रभु यावेम दाऊद ते ते गाक्मे, मेक मेक ग्रापदा बाक्त।

7 हादादेजेर आ गेय पाइब आन कुरशो सुन के तेक्तीके दाऊदम आइक्के सेला बाक्त। मिनु मेको यरूसलेम सहरम चाक्गा बाक्त।

8 मेकोमी हादादेजेर आ सहर, बेताह नु बेरोथाइ सहर रे शुश कांसा चाक्गा बाक्त।

9 मिनु हमाथ डा पिप तोइमी “दाऊदम हादादेजेर आ लडाइ पाइब नेल्ल आन कली फ्रुप्तु” देशो नेना बाक्त।

10 मिनु पिप तोइमी आ तौ योराम कली दाऊद कली युम्थ सोइक्ता बाक्त। मिनु मेकोमी दाऊद कली “गे लडाइम हादादेजेर कली फ्रुशा रिम्पो पाइतीनी” दॅथ नु मान पा ठेयब सेलतीक लोव्र पथ सोइक्ता बाक्त। मारदे हना हादादेजेर नु तोइ आस दातेमी लडाइ दुम्ना दुम्न बाक्शो बाक्माक्त। योराममी सुन चांदी नु कांसा के ग्योब यो चाक्गा बाक्त।

11 पिप दाऊदमी मेको यो परमप्रभु यावे कली गेवा बाक्त। आ फ्रुशो रागी नेल्ल डा सुन चांदी मोपा गेबाक्माक्त।

12 एदोम, मोआब, अम्मोन पलिस्ती नु अमालेक रे चाक्शो सुन चांदी, सोबाह सहर डा रेहोब आ तौ पिप हादादेजेर रे रोइशो मारेइ मारेइ परमप्रभु यावे कली गेवा बाक्त।

13 दाऊद लडाइ ग्राशा, आ नें चेम्शा लेम्मेनु, हिक्सी बाक्शो बेसीम १८ हजार एदोम डा मुर आन कली साइक्मी बाक्त। भजन संग्रह ६०:२

14 मेकोमी एदोम रागी नेल्लेम कोव्रब मुर वोइक्मी बाक्त। मिनु एदोम डा मुर नेल्ल दाऊद आ वाइल दुम्मा बाक्त। मोपा परमप्रभु यावेम दाऊद ते ते लमे, मेक मेक ग्रापदा बाक्त। उत्पत्ती २७:४०; गन्ती २४:१८

दाऊद आ गेय पाइबपुकी

१इतिहास १८:१४-१७

15 मिनु दाऊदमी इस्राएल रागी नेल्लेम सासन पवा बाक्त। मिनु आ मुर नेल्ल आन कली ठीक निसाफ पवा बाक्त।

16 सेरूयाह आ तौ योआब लडाइ पाइब आन ठेयब मुर बाक्माक्त। अहीलुद आ तौ येहो-शाफात मेको आ ब्रेक्ब बाक्माक्त। २सामुएल २:२३-२६

17 अहीतुब आ तौ सादोक नु अबीयाथार आ तौ अहीमेलेक चढेब बाक्सा बाक्त। सेरायाह ब्रेक्ब बाक्माक्त।

18 येहो-यादा आ तौ बेनायाह, केरेथी नु पेलेथी, पिप कली कोव्रब आन ठेयब मुर बाक्माक्त। दाऊद आ तौपुकी चहिं चढेब बाक्मा बाक्त। २सामुएल १५:१८

## 9

दाऊदमी शिशी पशो

1 मिनु दाऊदमी “मार, सावल आ खिं डा मुर सुइ ब्रोंइशो बाक्नीमी? मेको आन कली गो योनाथन आ पर्बम शिशी पाइक्ने चाप्नुडा?” दे हिल्लो पवा बाक्त।

2 सावल आ खिं डा सीबा नें पाइशो गेय पाइब मुर का बाक्माक्त। दाऊदम मेको कली ब्रेथ सोइक्ता बाक्त। मिनु पिपमी मेको कली “मार, गे सीबा नवे” देमाक्त। मिनु मेकोम “ओं, गो इन गेय पाइब सीबा नड” देमाक्त। २सामुएल १६:१

3 मिनु पिपमी “सावल आ खिं डा सुइ ब्रोंइशा लीशो बाक्नीमी? गो मेको कली परमप्रभु आ दाक्तीक कोइंचा दाक्नुड?” देमाक्त। मिनु सीबाम पिप कली “योनाथन आ तौ का ब्रोंइशा लीशो बाक्ब। मेको आ खोइल निम्फा मदुक्ब बाक्ब” देमाक्त।

4 मिनु पिपमी मेको कली “मेको ते बाक्म?” दे हिल्लो पवा बाक्त। मिनु सीबामी “मेको लो-देबार सहर डा अम्मीएल आ तौ माकीर आ खिंम बाक्ब” देमाक्त। २सामुएल १७:२७

5 मिनु पिप दाऊदमी लो-देबार डा अम्मीएल आ तौ माकीर आ खिंम मुर सोइशशा मेको कली चाक्पदा बाक्त।

6 मिनु योनाथन आ तौ सावल आ चच मेफी-बोशेथ दाऊद आ बाक्तीके जाक्माक्त। मिनु मेकोमी खुम्की पा बाप्शा पिप कली सेउ पवा बाक्त। मिनु दाऊदम मेको कली “मेफी-बोशेथ” देमाक्त। मिनु मेफी-बोशेथमी “गो इन गेय पाइब एक बाक्ती” देमाक्त।

7 मिनु दाऊदम मेको कली “महिंनो, गो इ कली इ आफ योनाथन आ पर्बम शिशी पाइक्नुड। गो इ कली इ बाजे सावल आ रू नेल्ल लेशशा गेनन। मिनु गे गेना हना यो गो नु बाक्शा जाइनेवे” देमाक्त।

8 मिनु मेफी-बोशेथम खुम्की पा बाप्शा “गो सु नडा डा? पिपमी गो बेक्शो कुचुम खोदेशो मुर, आं कली शिशी पाइय्यीनी?” देमाक्त।

9 मिनु दाऊदमी सावल आ गेय पाइब सीबा कली ब्रेशशा “सावल नु आं खिं डा शोप नेल्ल गो इ होव्रप आ चच कली गेता। २सामुएल १९:२९-३०

10 गे, इ तौपुकी नु इ गेय पाइब नेल्लेमी मेको आ रूम गेय पचा माल्नीनी। मिनु गे इ होव्रप आ चच आ खिं डा मुर आन कली गेचा माल्लेवे। तन्न इ होव्रप आ चच मेफी-बोशेथ गेना हना यो गो नु काथा बाक्शा जाइब” दे मदा बाक्त। सीबा के १५ जना तौ नु २० जना गेय पाइब बाक्मा बाक्त।

11 मिनु सीबाम पिप कली “आं प्रभुपिप, गो इन गेय पाइबमी इन देशो खोदेशो पा नेल्ल पाइक्नुड” देमाक्त। मेफी-बोशेथ पिप आ तौ का खोदेशो पा पिप दाऊद आ खिंम बाक्शा, जवा बाक्त।

12 मेफी-बोशेथ आ तौ का बाक्माक्त। मेको आ नें मीका बाक्माक्त। मिनु सीबा आ खिं डा मुर नेल्ल मेफी-बोशेथ आ गेय पाइब दुम्मा बाक्त।

13 तन्न मेफी-बोशेथ यरूसलेम बाक्माक्त। मारदे हना मेकोमी गेना हना यो पिप नु जवा बाक्त। मेको आ खोइल निम्फा मदुक्ब बाक्माक्त। २सामुएल ९:३

## 10

दाऊदमी लडाइ पशो

१इतिहास १९:१-१९

- 1 मिनु नोले अम्मोनी आन पिप बेक्माक्त। मिनु मेको आ पा डा आ तौ हानुन पिप दुम्माक्त।
- 2 दाऊदम “नाहाशमी आं कली रिम्शो पशो खोदेशो पा गो नाहाश आं तौ हानुन कली रिम्शो पाइनुड” दे मिम्ता बाक्त। मिनु मेकोमी आ आफ बेक्शो आ पबंम लेम्शो लोव्र नेंपाइक्थ लोव्र कुरब मुर आन कली सोइक्ता बाक्त। मिनु दाऊद आ मुरपुकी अम्मोनी आन रागीम ओव्रमानु, १सामुएल ११:१
- 3 अम्मोनी आन कली सासन पाइबम आन प्रभु हानुन कली “दाऊदमी इन आफ कली ठेयब सेल्चा आ पबंम इन कली लेम्शो लोव्र नेंपाइक्थ सोइश्शो बाक्ब, दे थमा सुइक्नीनी? एको मुरपुकी क्यारी पाइब नम। दाऊदमी एको आन कली इन सहर दोपा ओव्रचा, दे क्यारी पथ सोइश्शो बाक्ब” देमा बाक्त।
- 4 मोपतीके हानुनमी दाऊद आ सोइश्शो मुर आन कली ग्याइश्शा, आन गल शोक्रे उइक्थ उइक्थ खोइश्शा नु आन फेक्शो वा क्रातो सम्म खोइश्शा सोइक्तीमी बाक्त।
- 5 मेको आन कली मो पशो दाऊदम नेना बाक्त। मिनु दाऊदमी मेको आन कली ग्रुथ्थ मुर सोइक्ता बाक्त। मारदे हना मेकोपुकी थम मुने तोक्चा पुंइसमा बाक्त। मिनु दाऊदमी “मेको आन गल शोक्रे डोंइती डा खोदेशो मदुम सम्म यरीको सहरमी बाक्मल” देमाक्त।
- 6 मिनु अम्मोन डा मुरपुकीमी दाऊद कली गाइक्पाइश्शो तुइक्तमे बाक्त। मिनु अम्मोन डा मुरपुकीम बेथ-रेहोब, सोबाह डा २० हजार मुर नु अराम डा खोइलीम गाक्ब लडाइ पाइब आन कली गाल्च थाप्शा चाक्गमे बाक्त। मेकोपुकीम माकाह डा पिप नु हजार का मुर नु तोब रागी रे १२ हजार मुरपुकी गाल्च थाप्शा चाक्गमे बाक्त।
- 7 दाऊदम मेको लोव्र नेंशा, योआब नु लडाइ पाइब नेल्ल आन कली सोइक्तीमी बाक्त।
- 8 अम्मोन डा मुर जाक्शा सहर ओव्रतीक ठेयब लाप्शोमी ठीक दुम्मा बाक्त। तन्न सोबाह, रेहोब सहर डा, अराम डा मुरपुकी नु तोब नु माकाह रागी डा मुरपुकी चहिं दिंमम लडाइ पचा कली ठीक दुम्मा बाक्त।
- 9 योआबम आ डोंइती नु नोले निम्फा पटटी रे लडाइ तोचशो तवा बाक्त। मिनु मेकोमी इस्राएल डा योव्रशो मुर आन कली अरामी आन डोंइती वोइक्मी बाक्त।
- 10 लींशो मुर चहिं आ लोक्ब अबीशे आ हुकुममी गेमी बाक्त। मेकोपुकी अम्मोनी आन डोंइती लडाइ तोचा कली ठीक दुम्मा बाक्त।
- 11 योआबम “अराम डा मुरपुकीम आंइ कली ग्राना ग्रान पिम्तेक्म हना, आंइ कली वारच पने। अम्मोन डा मुरपुकीम इन कली ग्राना ग्रान पिम्तेक्म हना, गो इन कली वारच पाइनीकी।
- 12 सक्ति पाइश्शो बोल्यो दुमीन। गो आंम मुरपुकी नु आंम परमप्रभु आ सहर आ पबंम महिंथु, लडाइ पय। मिनु परमप्रभु यावेमी आ दाक्शो पवल” देमाक्त।
- 13 मिनु योआब नु आ मुरपुकी अरामी नु लडाइ पामे बाक्त। मिनु अरामी मेको आन डोंइती रे प्रोक्मा बाक्त।
- 14 मिनु अम्मोनीपुकीम अराम डा मुर आन कली प्रोक्शो तशा, आं यो अबीशे आ डोंइती रे प्रोक्शा, आन सहर ओव्रमा बाक्त। मिनु योआब अम्मोनी नु लडाइ पचा प्रोंइशा, लेश्शा यरूसलेम जाक्माक्त।
- 15 तन्न अरामी इस्राएली नु बुशो तशा, लेंशा बुक्मा बाक्त।
- 16 हादादेजेरमी युफ्रेटीस खोला आ आइक्वी हांबु रे अरामी आन कली ब्रेत्थ सोइक्तीमी बाक्त। मिनु मेकोपुकी हादादेजेर आ लडाइ पाइब आन ठेयब मुर शोबाक आ हुकुममी हेलाम सहरम जाक्मा बाक्त।
- 17 मिनु दाऊदमी मेकोपुकी लडाइ पथ पिशो लोव्र नेना बाक्त। मिनु मेकोम रीब पा इस्राएल डा लडाइ पाइब नेल्ल आन कली खुप्शा यर्दन आइक्वी हांबु शोक्से बाक्त। मिनु हेलाम सहरम जाक्मा बाक्त। मेकेर अरामीपुकी दाऊद नु लडाइ पचा कली ठीक दुम्मा बाक्त। मिनु लडाइ पामे बाक्त।
- 18 तन्न इस्राएलीपुकीम मेको आन कली प्रोक्पदमे बाक्त। मेकेर दाऊदमी ७ सहे बग्गी डोइक्ब नु ४० हजार शारा डोइक्ब अरामी आन कली सदा बाक्त। लडाइ पाइब आन ठेयब मुर शोबाक कली बेक्चा डा पा गार सेला बाक्त। मिनु मेको लडाइ पतीकेमीन बेक्माक्त।
- 19 मिनु हादादेजेर कली वारच पाइब पिप नेल्लेमी इस्राएली नु बुशो, दे तुइश्शा, इस्राएली नु गारचा गोव्रमे बाक्त। मिनु इस्राएली आन हुकुममी बाक्ने बिस्समा बाक्त। मेना रे अराम डा मुरपुकीम अम्मोनी आन कली लेंशा गेनायो वारच मपदमे बाक्त।

## 11

दाऊदमी पाप पशो



1 नक बर्स जाकमेनु, पिपपुकी लडाइ पथ गूमा बाकत। दाऊदमी योआब, लडाइ पाइब आन ठेयब मुर नु इसाएल डा लडाइ पाइब नेल्ल आन कली सोइकतीमी बाकत। मिनु मेकोपुकीम अम्मोन खतम पोक्गमे बाकत। रब्बाह सहर कली पुम्दमे बाकत। तन्न दाऊद चहिं यरूसलेम सहरमी बाक्माकत। १इतिहास २०:१

2 काबु नाकती नाक्माकदो दाऊद आ इप्तीक रे बोक्शा, खिं तार हिरसेनु, मेकोमी मीश मुर का चिकशो तवा बाकत। मेको थम दारशो बाक्माकत। मती ५:२८-२९

3 मेको सु बाकम, दे हिल्लो पथ, मुर का सोइकता बाकत। मिनु मेकोमी “मेको एलीआम आ तमी, हिती उरीयाह आ मीश बाथशेबा बाकत” देमाकत। २सामुएल २३:३९

4 मिनु दाऊदम मेको कली ब्रथ सोइकता बाकत। मिनु मेको जाक्माकत। मिनु दाऊद मेको नु इम्माकत। मेको मीश मुर मेना आ रां ब्रोल्शा चिकशो बाक्माकत। मिनु नोले बाथशेबा आ खिं लेम्माकत। प्रस्थान २०:१४; लेवी २०:१०; ब्यवस्था २२:२२; लेवी १५:१९

5 मिनु मेकोमी कोव्रज कुरा बाकत “गो कोव्रज कुरशो दुम्ती” दे दाऊद कली लोव्र सोइकता बाकत।

6 मिनु दाऊदमी योआब कली “मेको आ वोंइश हिती उरीयाह कली आं बाक्तीक सोइकतो” दे लोव्र कुरब सोइकता बाकत। मिनु योआबमी मेको कली दाऊद आ बाक्तीक सोइकता बाकत।

7 मिनु उरीयाह जाकमेनु, दाऊदमी “लडाइ दोदेशो दुम्मे, योआब नु अरु लडाइ पाइबपुकी मार पामे?” दे हिल्लो पवा बाकत।

8 मेको नोले दाऊदमी हिती उरीयाह कली “उइ इ खिं लशा नाइसो, इ खोइल चिकसो” दे मदा बाकत। मिनु मेको पिप आ खिं रे गूशा गाकमेनु, पिपमी मेको आ नोले कोसेली सोइकता बाकत।

9 तन्न उरीयाह उइ आ खिं मलथु, पिप आ ओव्रतीक लाप्चो आ नेक्था इम्माकत। मेकेर आ प्रभु आ गेय पाइबपुकी यो इप्चो बाक्मा बाकत।

10 मिनु दाऊदम उरीयाह उइ आ खिं मला देशो लोव्र नेना बाकत। मिनु मेको कली “गे लाइशशो लां गाक्शा जाक्शो बाक्नेवे। मारदे गे उइ इ खिं मलवे?” दे मदा बाकत।

11 मिनु उरीयाहमी “परमप्रभु आ सन्देस, इसाएल नु यहूदा डा मुर नेल्ल, आं प्रभु योआब नु इन गेय पाइब नेल्ल दिंम डा बाक्तीकेम बाक्शो बाक्नीम। मिनु गो दोपा जचा तूचा नु आं मीश नु इप्चा कली खिं लाइक्नुडा? गे इन ब्रोंइशा बाक्शो खोदेशो पा, गो मो पने मचानुड” देमाकत।

12 मिनु दाऊदमी उरीयाह कली “मो हना मुलाकत का एक बाक्को। मिनु दीसा लेशशा सोइक्नन” देमाकत। मोपतीके उरीयाह मेको नाक्ती यरूसलेम उइ बाक्माकत।

13 मिनु आ दीसा दाऊदमी मेको कली आ बाक्तीकेम जथ ब्रेत्ता बाकत। मिनु मेको कली दुक्पदा बाकत। तन्न नाकदो मेको लाडगा गूशा आ प्रभु आ गेय पाइबपुकी नु आ ब्रार्येम इम्माकत। तन्न मेको उइ आ खिं मलमाकत।

14 आ दीसा दाऊदमी योआब कली चिठी का ब्रेक्शा, उरीयाह आ गुइमी सोइकता बाकत।

15 मेको चिठीम “तेकेर ठेयब लडाइ दुम्मे मेकेर उरीयाह कली सोइशशा, गेपुकी चहिं नोले शोंइसीन। मिनु मेको बेक्ल” दे ब्रेक्ता बाकत। प्रस्थान २०:१३

16 योआब नु लडाइ पाइबपुकीमी सहर कली पुम्दमे बाकत। मिनु मेकोमी उरीयाह कली थम ठेयब लडाइ दुम्तीकेम सोइकता बाकत।

17 मिनु सहर डा मुरपुकी फो फु गूशा योआब नु लडाइ पामे बाकत। दाऊद आ मुरपुकी का निकशी बेक्मा बाकत। हिती उरीयाह यो साइक्था पुंइसे बाकत।

18 मिनु योआबमी लडाइ डा लोव्र नेल्ल देशा, मुर का दाऊद आ बाक्तीकेम सोइकता बाकत।

19 योआबमी लोव्र कुरब मुर कली “गे लडाइम मार मार दुम्मे, मेको लोव्र नेल्ल पिप कली शेने थुमी नोले,

20 पिप गाइशशा ‘लडाइ पनीनु सहर आ नेक्था मारदे लनी? गारो तार रे आप्नीम, दे मतुइक्नीनी?

21 येरूब-बाल आ तौ अबीमेलोक कली सुम सदा? मीश मुर कामी थेबेस डा गारो रे यात तोक्शा साइशशो बाक्ब। मारदे गे गारो आ नेक्था लनी?” दैत हना, गे मेको कली ‘इन गेय पाइब हिती उरीयाह यो बेक्त’ मतो” दे मदा बाकत। न्यायाधीस ९:५३-५४

22 मिनु मेको लोव्र कुरब मुर दाऊद आ बाक्तीक जाक्माकत। मिनु योआब आ देशो खोदेशो पा लोव्र नेल्ल शोव्रडा बाकत।

23 मिनु मेको लोव्र चाक्ब मुरुमी दाऊद कली “मुरपुकी आंइ कली लडाइ तोचा कली बुक्तेक्म। मिनु फो फु गूशा दिंमम आंइ कली लडाइ तोप्तेक्म। गोपुकीम मेको आन कली सहर आ लाप्चो सम्म खेदा पा लाइतक।

24 मिनु ब्रा आप्बपुकीम इन गेय पाइब आंइ कली गारो तार रे ब्रा आप्तेक्म। मिनु इन मुर का निकशी बेक्तेक्म। इन वाइल हिती उरीयाह यो बेक्त” देमाकत।

25 मिनु दाऊदम मेको कली “गे योआब कली ‘गे मेको साइशशो मुर आन पर्वम सुर्ता मपावो। मारदे हना तरवारम गेना हना यो मुर साइक्ब। गे सहर कली लडाइ तोस डा तोस बाक्शा, यानीनी” दे आ थुं बारपतीन” देमाकत।

26 मिनु उरीयाह आ मीशेम आ वोंइश बेक्शो लोव्र नेशा, मेको आ पर्वम रोंका पवा बाकत।

27 मिनु रोंका पतीक नाकत नुम नोले दाऊदम मुर सोइशशा आ खिं चाक्गा बाकत। मिनु मेको दाऊद आ मीश दुम्शा, तौ का थिमाकत। तन्न दाऊद आ पशो परमप्रभु यावे आ डोंइती थम मरिम्शो बाक्माकत।

## 12

नाथान आ कथा

1 परमप्रभु यावेमी आ लोव्र पाइब नाथान कली दाऊद आ बाक्तीक सोइक्ता बाक्त। मिनु मेको दाऊद आ बाक्तीक जाक्शा, मेको कली “सहर कामी मुर निक्शी बाक्सा बाक्त। मुर का शोप पाइशु नु का पुडग बाक्सा। प्रस्थान २०:१७

2 शोप पाइशु मुर के शुश क्यारश भेडा नु बी ब्यफ बाक्सा बाक्त।

3 मेको पुडग मुर के पाठी का ला बाक्सा। मेको कली ग्याप्शो बाक्सा। मेको पाठी कली थुल्शा, आ आलपुकी नु कोल्पदा बाक्त। मिनु मेकोमी मेको आ भाग जशा तूशा बाक्सा। मेको आ थुकुमीन इप्बाक्सा। मिनु मेको मुरुमी मेको पाठी कली आ तमी खोदेशो पाइक्बाक्सा।

4 काबु नाक्ती मेको शोप पाइशु मुर आ खिम पौना का जाक्सा। मेको शोप पाइशु मुरुम आ पौना कली थुल्शा कली आ क्यारश भेडा रे मारेड गेचा थु मपवा बाक्त। तन्न मेको पुडग मुर आ पाठी चाक्शा आ पौना कली जचा ब्वचा थोव्रक सेला बाक्त” दे मदा बाक्त।

5 मिनु दाऊद मेको लोव्र नेशा, मो पाइब मुर आ पर्वम थाप्पा गाइक्ता बाक्त। मिनु मेकोमी नाथान कली “परमप्रभु यावे ब्रोंडशा बाक्शो खोदेशो पा मेको मुर साइक्चा पुंडसीब।

6 मेकोम मोपा शिशी मकोइतीके मेको पाठी का के ४ ओटा पाठी गेचा माल्ब” देमाक्त। प्रस्थान २१:३७

7 मिनु नाथानम दाऊद कली “मेको मुर गेन ननी। इस्राएली आन परमप्रभु यावेमी मार देत देशा हना ‘गो इ कली तेल लुक्शा, इस्राएल डा पिप सेलतन। सावल आ गुड रे प्रोइतन। १राजा २०:४०

8 गो इ कली इ होव्रप आ खिं नु आ मीशपुकी गेतन। गो इस्राएल नु यहूदा डा मुर इ कली गेतन। मोशोम मगाप्ते हना यो, गो अरु शुश गेन वा।

9 गे मारदे आं लोव्र मटिवी? मारदे आं डोंइती मरिम्शो पवी? गे हिती उरीयाह कली तरवारम क्योरतीवी। मिनु मेको आ मीश लाइशशा, आ वोंडश कली अम्मोनी आन गुडम साइक्पाइक्तीवी। २सामुएल ११:५; १राजा १५:५

10 मोपतीके इ खिं गेना हना यो तरवार रे नाइक्चा मताइब। मारदे हना गे आं लोव्र मटिथु, हिती उरीयाह आ मीश चाक्तीवी” देत। २सामुएल १३:२८-२९; २सामुएल १८:१४; १राजा २:२४-२५; २राजा २५:७

11 परमप्रभु यावेमी ‘गो इ कली इ खिं रे श्येत दुम्पाइक्नुड। गो इ मीश आन कली इ डोंइती इ नेक्था डा मुर कली गेनुड। मिनु मेकोमी नाक्तीन मुर नेल्लेम तचा डा पा मेकोपुकी नु इप्ब। २सामुएल १६:२२; अय्युब ३१:९-१०

12 मारदे हना गे मेको खुइशशा पाप्तीवी। तन्न गो इस्राएली नेल्ल आन तचा डा पा नाक्तीन पाइनुड” देशो बाक्ब” दे नाथानमी देमाक्त।

13 मिनु दाऊदमी नाथान कली “गो परमप्रभु यावे आ डोंइती पाप पाता” देमाक्त। मिनु नाथानम मेको कली “परमप्रभु यावेमी इ पाप क्यान्ताक्ब। गे मबेक्नेवे। २सामुएल २४:१०; भजन संग्रह ५१:३; इजीकीएल १८:२१-२३

14 तन्न गे एको पाप पा परमप्रभु यावे कली गाइक्पाइक्तीवी। मोपतीके इ थिशो आल चहिं बेक्ब” देमाक्त। २सामुएल ११:२७

15 मिनु नाथान आ खिं लमाक्त। परमप्रभु यावेम उरीयाह आ मीश रे पा जरमेशो दाऊद आ आल कली रोइ पपदा बाक्त।

16 मोपतीके दाऊदम मेको आल आ पर्वम परमप्रभु कली पुना बाक्त। मेको मारेड मजथु खिंङगा लशा खपीम गोल्शा नां सोइदा बाक्त।

17 खिं डा खाल्पापुकीमी मेको कली “गे बोक्कीन” देमा बाक्त। तन्न मेको मबिस्से बाक्त। मिनु मेकोपुकी नु जने यो मबिस्से बाक्त।

18 मिनु ७ नाक्त नोले आल बेक्सा। मिनु दाऊद आ गेय पाइबपुकीम “आल बेक्त” दे दाऊद कली देंचा हिंमा बाक्त। मारदे हना मेकोपुकीमी “आल सेस बाक्मेनु ला यो इं लोव्र ननेन। मुल मेको कली ‘आल बेक्त’ दे दोपा देंचा? मेकोमी आंम आ कली मारेड मरिम्शो पाइक्बा को?” देमा बाक्त।

19 तन्न दाऊदम आ गेय पाइबपुकीम शिप शिप पा देशो लोव्र नेशा, आल बेक्सा, दे तुइक्ता बाक्त। मिनु दाऊदमी आ गेय पाइब आन कली “आल बेक्मे” दे हिल्लो पामी बाक्त। मिनु मेकोपुकीम “बेक्त” देमा बाक्त।

20 मिनु दाऊद खप रे बोक्शा, चिक्सीशा, तेल खेक्सीशा, अर्को वा फेक्से बाक्त। मिनु परमप्रभु यावे आ बाक्तीक लशा, परमप्रभु यावे कली ठेयब सेला बाक्त। मिनु नोले खिं जाक्शा, जचा थोव्रक पुंडशा, जवा बाक्त।

21 मिनु मेको आ गेय पाइबपुकीम मेको कली “गे मार पनी? आल सेस बाक्म सम्म गे मेको आ पर्वम मारेड मजथु डाक्शा बाक्तीनी। तन्न आल बेक्म नोले बोक्शा जाइतीनी” देमा बाक्त।

22 मिनु दाऊदमी “आल सेस बाक्म सम्म गो मारेड मजथु डाक्शा बाक्ती। परमप्रभु यावेमी आं कली शिशी पा, आल ब्रोंडबा, को? दे मिम्ताक्ड।

23 तन्न मुल मेको बेक्त। मारदे गो मारेड मजथु बाक्नुडा? मार गो मेको कली लेशशा चाक्ने चाप्नुडा डा? गो मेको आ बाक्तीक लाइनुड। तन्न मेको आं बाक्तीक लेशशा मजाक्ब” देमाक्त।

24 मिनु दाऊदमी आ मीश बाथशेबा कली लेम्दा बाक्त। मिनु मेको नु इम्माक्त। मिनु अर्को तौ का थिमाक्त। मेको आ नें सोलोमन वोदमे बाक्त। मिनु परमप्रभु यावेमी मेको कली दाक्ता बाक्त।

25 मिनु मेको आ नें येदीदीयाह वोइक्चा माल्ब, दे आ लोव्र पाइब नाथान रे पा दाऊद कली लोव्र सोइक्ता बाक्त। येदीदीयाह आ अर्थ चहिं “परमप्रभु यावे आ दाक्शो मुर” बाक्ब।

दाऊदम रब्बाह सहर ग्राशो

१ इतिहास २०:१-३

26 मेको नोले योआबमी लडाइ पा अम्मोनी आन पिप आ रब्बाह सहर, ग्रामाक्त।

27 मेकोमी “गो रब्बाहम लडाइ पा मेको शुश ब्वाक्कु बाकशो सहर ग्राती।

28 गेमी लीशो मुर आन कली खुष्पा, मेको सहर कली लडाइ तोशा ग्राडीन। मो पाइतीनी हना, गो आं के सेल्लुड।  
मिनु मेको सहर आं के दुम्ब” दे दाऊद कली लोव सोइक्ता बाक्त।

29 मोपतीके दाऊदम मुर नेल्ल आन कली खुप्तीमी बाक्त। मिनु रब्बाह सहर लमाक्त। मिनु लडाइ तोशा मेको आइक्के सेला बाक्त।

30 मेकोमी मिल्लोम आ पिया रे सिरपेच पुदा बाक्त। मेको टलेन्ट का सुन के बाक्माक्त। मेको तारी हीरा का यो क्येप्शो बाक्माक्त। मेको दाऊद कली गुक्त्मे बाक्त। मेकोम सहर रे शुश मार मार यो रोइशशा चाक्का बाक्त। टलेन्ट का ३४ किलो खोइ बाक्ब।

31 मेकोमी मेकर डा मुर आन कली लाइशशा आरा, खन्ती नु खामी गेय पपदा बाक्त। मिनु इंटा सेल्लिकेम गेय पपदा बाक्त। मेको अम्मोनी आन सहर नेल्लेम मोदेशो पवा बाक्त। मिनु नोले दाऊद नु आ मुर नेल्ल यरूसलेम लेम्मा बाक्त।

## 13

अम्मोनमी मरिम्शो पशो

1 मेको मो दुम्शो इच्का बर्स दुम्माक्त। मिनु दाऊद आ तौ अब्बालोम के थम दारशो समी का बाक्माक्त। मेको आ नें तामार बाक्माक्त। दाऊद आ अर्को तौ अम्मोनम मेको कली दाक्ता बाक्त। २सामुएल ३:२-३

2 अम्मोन आ सान्मा आ तमी तामार नु दाक्मुतीके, आ थुंम थम मरिम्शो दुम्माक्त। मिनु मेकोमी दाक्तीके मेको रोइ पवा बाक्त। मारदे हना मेको कन्ने मीश आल बाक्तीके, मेकोम मारेइ मरिम्शो पने मचवा बाक्त।

3 तन्न अम्मोन आ वारच का बाक्माक्त। मेको आ नें योनादाब बाक्माक्त। मेको दाऊद आ लोकब शिमेआह आ तौ बाक्माक्त। मेको मिक्च सिल्लब मुर का बाक्माक्त। १सामुएल १७:१३

4 मेकोम अम्मोन कली “ए पिप आ तौ, मारदे गे नाक्त किंत किंत मरिम्शो दुम्ना दुम्न लवे? मार दुमे आं कली देनो” दे मदा बाक्त। मिनु अम्मोनमी “गो आं लोकब अब्बालोम आ समी तामार कली दाक्नुड” देमाक्त।

5 मिनु योनादाबमी “रोइ पाता, देखु पा इप्शा बाक्को। मिनु इ आफ इ कली कोव्रथ जाक्त हना, गे मेको कली ‘आं समी तामारम आं कली जचा थोव्रक सेल्शा गेयील। मेकोम जचा थोव्रक आं डोंइती सेलल। मिनु गो मेको आ सेल्शो कोव्रनुड। मिनु मेको आ गुड रे जाइनुड’ देनो” देमाक्त।

6 मोपतीके अम्मोन “रोइ पाता” देखु पा इप्शा बाक्माक्त। मिनु पिप मेको कली कोव्रथ जाक्माक्त। मिनु अम्मोनमी पिप कली “आं समी तामारम आं डोंइती शोब्ले निक्शी चोशा गेयील। मिनु गो मेको आ गुड रे जाइनुड” देमाक्त।

7 मिनु दाऊदमी खिम लोव्र कुरब मुर का तामार आ बाक्तीक सोइक्ता बाक्त। मेकोमी “इ लोकब अम्मोन आ बाक्तीक लशा, मेको कली जचा थोव्रक सेल्शा गेवो” दे लोव्र पथ सोइक्ता बाक्त।

8 मिनु तामार आ लोकब अम्मोन आ खिं लमाक्त। मिनु मेको कली इप्शा बाक्शो थिदा बाक्त। मिनु तामारमी फस निशा, आ डोंइती शोब्ले चोशा गेवा बाक्त।

9 मिनु मेकोम तांइ शेशा अम्मोन आ बाक्तीक लशा, शोब्ले कुर पवा बाक्त। तन्न अम्मोन जने मबिस्से बाक्त। मिनु अम्मोनमी “नेल्ल आन कली लाइगा सोइक्ते” देमाक्त। मिनु मुर नेल्ल लमा बाक्त।

10 मिनु अम्मोनमी तामार कली “मेको जचा थोव्रक आं कोठाम पितो। मिनु गो इ गुड रे जाइनुड” दे मदा बाक्त। मिनु तामारमी आ चोशो शोब्ले आ लोकब अम्मोन आ कोठाम लदा बाक्त।

11 मिनु मेकोम शोब्ले गेवानु, अम्मोनम मेको कली ग्याइशशा “आं समी पिवो। गो नु इपो” देमाक्त। लेवी १८:९

12 तन्न तामारमी “ममाइ, आं लोकब, आं कली ओदेशो मपने। इस्राएलम ओदेशो गेय पचा मदुम्ब। ओदेशो मरिम्शो गेय मपने।

13 गो आं मुनेम आं कुल गुंडने मचाप्नुड। गे यो इस्राएलम काइ मरिम्शो मुर दुम्नीनी। आं पबंम पिप नु लोव्र पने। गो नु ग्युबे पचा कली पिप बिप्ब” देमाक्त।

14 तन्न मेकोम तामार आ लोव्र का यो मनेना बाक्त। मिनु मेको कली बोल पा ग्याइशशा, मेको नु इम्माक्त।

15 मिनु नोले अम्मोनम मेको कली मदाक्ता बाक्त। अम्मोन आ डोंइती डा दाक्शो क्येडा नोले डा ग्रांरा दिशो शुश बाक्माक्त। मिनु अम्मोनम मेको कली “बोक्शा लावो” दे मदा बाक्त।

16 मिनु तामारमी “ममाइ, आं लोकब, इ पशो गेय क्येडा यो आं कली गुंडशा सोइक्का थम मरिम्शो बाक्ब” देमाक्त। तन्न अम्मोनम मेको आ लोव्र मनेना बाक्त।

17 मिनु अम्मोनम आ गेय पाइब वोंइश आल कली ब्रेशशा “एको मीश मुर कली आं डोंइती रे गुंडदो। एको कली गुंडशा आग्लो पतो” देमाक्त।

18 तामारमी कन्ने मीश आल पिप आ तमीमी फेक्तीक लाइशशो वा फेक्शो बाक्माक्त। मिनु अम्मोन आ गेय पाइब वोंइश आलम तामार कली गुंडशा, आ नोले लाप्चोम आग्लो पदा बाक्त।

19 मिनु तामारमी आ पियाम पुलु फुंडसीशा, आ लाइशशो वा खाक्का बाक्त। मिनु आ पियाम गुड वोइशशा टेयब सेंदा पा डाक्ना डाक्न लमाक्त।

20 मेको आ लोकब अब्सालोमम “मार, इ लोकब अम्नोन गे नु इम्मे? मुल आं समी सिक्सी पा बाक्को। मेको इ लोकब बाक्ब। सुर्ता मपावो” देमाक्त। मोपतीके तामार आ लोकब अब्सालोम आ खिंमी प्रोइचा पुंडसीशो मीश मुर खोदेशो पा बाक्माक्त।

21 मिनु पिप दाऊदम मेको लोत्र नेशा थाम्पा गाइक्ता बाक्त। तन्न अम्नोन कली सजाइ मगेवा बाक्त। मारदे हना आ दाक्शो डोइती डा तौ बाक्माक्त।

22 अब्सालोमम अम्नोन कली रिम्शो मरिम्शो मारेइ लोत्र मपवा बाक्त। आ समी तामार कली बिथोलो सेल्टीके अब्सालोमम अम्नोन कली काइ मदाक्ता बाक्त।

अब्सालोममी क्येक्क लेशो

23 बर्स निकशी नोले अब्सालोमम आ भेडा आन ऊन प्रेक्चा कली मुर आन कली ब्रेत्ता बाक्त। मेको एफ्राइम आ नेक्था बाल-हजोरम बाक्माक्त। मिनु मेको भोजमी पिप आ तौ नेल्ल आन कली ब्रेत्तीमी बाक्त।

24 अब्सालोमम पिप आ बाक्तीक जाक्शा “गो, इन गेय पाइबम, ऊन प्रेक्तीक चाड मानेशो बाक्नुड। पिप नु इन गेय पाइबपुकी यो गो नु गाक्कीन” देमाक्त।

25 तन्न पिपमी “ममाइ, आं तौ, गो नेल्ल जाक्शा इ कली श्येत मगेनीकी” देमाक्त। अब्सालोमम “जाक्कीन कि जाक्कीन” देमाक्त। मिनु पिप मबिस्से बाक्त। तन्न आसीक गेशा सोइक्ता बाक्त।

26 मिनु अब्सालोमम “गे जाक्ने मचाप्नीनी हना यो, आं लोकब अम्नोन कली गो नु लचा गेनीनी कों?” देमाक्त। मिनु पिपमी “मारदे मेको गे नु लाइबा?” दे हिल्लो पवा बाक्त।

27 तन्न दाऊदम अम्नोन नु अरु आ तौ मसोइक्ता सम्म अब्सालोमम देस डा देस पवा बाक्त। मिनु अब्सालोमम पिप आन कली गारचा डा ठेयब भोज सेला बाक्त।

28 मेकोम आ गेय पाइब आन कली “रिम्शा बाक्कीन। अम्नोन अडगुर शांबुम दुक्त हना, गो ‘मेको कली सतीन’ देनुड। मिनु गे मेको कली सतीन। मारेइ हिंचा ममाल्नीनी। एको आं हुकुम बाक्ब। महिंथु बाक्कीन” दे माइक्मी बाक्त। लेवी २०:१७

29 मिनु अब्सालोम आ गेय पाइबपुकीम आ देशो खोदेशो पा अम्नोन कली पामे बाक्त। मिनु पिप आ तौ नेल्ल आन आन खच्चर डोइश्शा डांडा रे खिं प्रोकमा बाक्त।

अब्सालोम प्रोक्शो

30 मेकोपुकी लांम बाक्न बाक्ना पिप कली “अब्सालोमम पिप आ तौ नेल्ल आन कली साइक्तु। सुइ मब्रोंडम” देशो लोत्र चाक्दीत्मे बाक्त।

31 मिनु पिप बोक्शा आ वा खाक्गा बाक्त। मिनु खपमी निस्से बाक्त। मेको आ एर ओंथ बाक्ब आ गेय पाइब नेल्लेमी यो आन वा खाक्गमे बाक्त।

32 मिनु दाऊद आ लोकब शिमेआह आ तौ योनादाबम “आं प्रभु, मेकोमी पिप आ तौ नेल्ल साइक्तु, दे ममिम्तीन। अम्नोन कली ला साइश्शो बाक्ब। अम्नोनम तामार कली बिथोलो सेला नाक्त रे अब्सालोम आ कुल राव किक्शो तांइसीशो बाक्ब।

33 आं प्रभु, पिप आ तौ नेल्ल आन कली साइक्तु देशो जोल लोत्र मनेनीन। अम्नोन ला साइक्चा पुंडसाक्ब” देमाक्त।

34 मिनु अब्सालोम प्रोक्शा गाक्माक्त। मेना कोत्रब मुरुमी इर गे कोत्रडानु, होरोनाडम डांडा रे पा मुर आन हुल यिशो तवा बाक्त।

35 मिनु योनादाबम पिप कली “गो इन गेय पाइब, आं देशो खोदेशो पा पिप आ तौपुकी यिना यिन बाक्नीम” देमाक्त।

36 मेकोम लोत्र पने थुमानु, पिप आ तौपुकी खिंडगा ओत्रशा ठेयब सेंदा पा डाक्मा बाक्त। पिप नु आ गेय पाइब मुरपुकी यो हुइ हुइ पा डाक्मा बाक्त।

37 तन्न अब्सालोम प्रोक्शा गेशुर डा पिप अम्मीहुद आ तौ तल्मे आ बाक्तीक लशा बाक्माक्त। दाऊद आ तौ आ पर्बम शुर नाक्त सम्म रोंका पवा बाक्त।

38 अब्सालोम गेशुरम प्रोक्म रे बर्स सां सम्म मेक उइ बाक्माक्त।

39 अम्नोन बेक्शो शुर दुम नोले, पिपमी आ थुं अब्सालोम गे हिरदा बाक्त। २सामुएल ३:३; २सामुएल १४:२३; यहोसु १३:११

## 14

अब्सालोम कली लेशशा चाक्शो

1 मिनु सेरुयाह आ तौ योआबम पिप आ थुंम अब्सालोम कली दाक्चा गोप्तु, दे तुइक्ता बाक्त।

2 मिनु योआबम मुर का कली तेकोहा सहरम सोइश्शा जोक्ब तुइक्ब मीश मुर का कली चाक्पाइक्मी बाक्त। योआबम मेको मीश मुर कली “रोंका पशो मीश मुर खोदेशो पखु पावो। रोंका पतीक वा फेक्सो। पियाम तेल मखेक्सो। शुर नाक्त रे बेक्शो मुर आ पर्बम रोंका पशो मीश मुर खोदेशो पखु पावो।

3 मिनु पिप आ बाक्तीक लशा, आं शेशो लोत्र देंनो” दे मदा बाक्त। मिनु मार देंचा माल्बा, योआबम मेको कली शेंदा बाक्त।

4 मिनु तेकोहा सहर डा मीश मुर पिप आ बाक्तीक जाक्शा, खप सम्म बाप्शा सेउ पवा बाक्त। मिनु डाक्ना डाक्न “पिप वारच पाइय्नीनी” देमाक्त।

5 मिनु पिपमी मेको कली “इ कली मार श्येत दुम्मे?” दे मदा बाक्त। मिनु मेकोमी “गो वोंइश बेक्शो मीश मुर का नड। आं वोंइश बेक्त।

6 मेको इन वाइल आ तौ निक्शी बाक्ताक्स। मेको निक्शी दिंम राम्शी पाम्से बाक्त। मेको आस कली फ्राब सुड मबाक्मा बाक्त। मिनु काम आ लोकब कली तुप्शा सदा बाक्त।

7 मुल आ थर डा मुर नेल्लेमी, इन वाइलीम कली 'आ लोकब साइक्ब कली आंइ गुडम गेने। मिनु गो मेको कली साइक्नीकी। मारदे हना आ लोकब कली साइक्तु। गो इ अडस ताइब सुड मबाक्त हना यो, गो मेको कली साइक्नीक' दैतेक्म। मेकोपुकीम पो माप्तेक्म हना, आं लीशो मी यो काप्नीम। मिनु आं वोंइश आ नें नु चच युड यो रागी रे क्याम्सीनीम" दैमाक्त। ब्यवस्था १९:११-१३

8 मिनु पिपमी मेको मीश मुर कली "इ खिं लावो। इ निसाफ गो कोवनुड" दैमाक्त।

9 मिनु मेको तेकोहा सहर डा मीश मुरुमी पिप कली "आं प्रभु पिप, मेको दोस गो नु आं आफ आ खिं कली दुम्ल। पिप नु इन राज्य दोस मतवल" दैमाक्त।

10 मिनु पिपमी "मुल यो सुडम इ कली मारेइ दैतेक्म हना, मेको आन कली आं बाक्तीक चाक्को। मिनु मेकोपुकीम इ कली लेंशा श्येत मगेनीम" दे मदा बाक्त।

11 मिनु मेको मीश मुरुमी "पिप, गे परमप्रभु यावे, इन परमप्रभु कली मिष्शा गेय पने। मिनु हुश खाक्श पोक्चा नांइसेक्ल। मिनु आं तौ साइक्चा मपुंइसीब" दैमाक्त। मिनु पिपमी "परमप्रभु यावे ब्रोंइशो खोदेशो पा इ तौ के चां का यो महेम्ब" दैमाक्त। गन्ती ३५:१९-२१

12 मिनु मेको मीश मुरुमी "आं प्रभु पिप, गो इन वाइलीममी मुल यो लोत्र का दैचा ताइक्नुडा को?" दैमाक्त। मिनु पिपमी "दैनो" दैमाक्त।

13 मिनु मेको मीश मुरुमी "गे परमप्रभु आ मुर आन कली मारदे ओदेशो पचा मिम्तीनी? गे मोदेशो पाइतीनी हना, गे दोसी खोदेशो दुम्नीनी। गे रागी रे गुंइशा सोइश्शो मुर कली लेंशा जाक्चा गेने मबिस्सीनी।

14 गो नेल्ल बेक्चा माल्न्य। गो खपीम क्युप्शा हुडक्ने मचाप्चा डा ब्वाक्कु खोदेशो बाक्नय। तन्न परमप्रभुमी मुर कली मखेरब। मेकोमी आ डोंइती चाक्चा कली मिम्ना मिम्न बाक्ब। इजीकीएल १८:२३

15 गो, इन वाइलीम, एको लोत्र आं प्रभु पिप, इन कली दैथ जाक्ती। मारदे हना मुरपुकीम आं कली हिंच कोइताकयीमी। मिनु गो पिप नु लोत्र पाइनुड। मेकोमी आ वाइलीम कली आ पुंइशो गेबा को?

16 मिनु पिपमी आ गेय पाइब, आं लोत्र नेशा, गो नु आं तौ आंस कली श्येत गेब मुर रे प्रोंइबा को, दैती। मारदे हना मेको मुरपुकीमी आंस कली परमप्रभु आ गेशो रू रे क्याम्चा माल्तेक्म।

17 मिनु इन वाइलीम, आं प्रभु, आं पिप, आ लोत्रम आं थुं नाइक्चा गेब। मारदे हना गे, आं प्रभु पिप, परमप्रभु आ स्वर्ग डा गेय पाइब खोदेशो बाक्नीनी। रिश्शो नु मरिम्शो तिल्व बाक्नीनी। परमप्रभु यावे, इन परमप्रभु गो नु बाक्ब" दैमाक्त। २सामुएल १९:२८; १सामुएल २९:९

18 मिनु पिपमी मेको मीश मुर कली "आं डोंइती मारेइ लोत्र मखुडक्तो, इ कली लोत्र का हिल्लो पाइक्नुड" दैमाक्त। मिनु मीश मुरुमी "आं प्रभु पिप, दैनीन" दैमाक्त।

19 मिनु पिपमी "मार, एको नेल्ल योआब आ देशो बाक्मे?" दैमाक्त। मिनु मेको मीश मुरुमी "इन ब्रोंइशा बाक्शो खोदेशो पा, आं प्रभु पिप, गे मारेइ लोत्र हिल्लो पनीनु, लोत्र लेप्ब के य्युरा पेरा लतीक मबाक्ब। मारदे हना इन गेय पाइब योआबम आं कली मोदेशो लोत्र पचा शेंशा सोइक्ताकयी।

20 योआबमी इन थुं डा मिम्शो गेय फाइक्चा कली मोदेशो पपाइक्ती। तन्न गे, आं प्रभु, परमप्रभु आ स्वर्ग डा गेय पाइब खोदेशो पा रूतीक थुं पाइश्शो बाक्नीनी। रागीम मार दुम्शो बाक्बा, मेको नेल्ल तुइक्नीनी" दैमाक्त। २सामुएल १४:१७

21 मिनु पिपमी योआब कली "दुम्ब, गो एको लोत्र बिस्साकयी। लशा, मेको टिटा अब्सालोम कली लेशा चाक्कीन" दैमाक्त।

22 मिनु योआबमी आ कुल खप सम्म बाप्शा, सेउ पवा बाक्त। मेकोमी पिप कली "परमप्रभु यावेमी इन कली आसीक गेवल। मुलाक्ती गो आं प्रभु, पिप इन डोंइती शिशी ताता, दे तुइक्ताकड। मारदे हना गे आं पुंइशो गेतीनी" दैमाक्त।

23 मिनु योआब रीब पा गेशुर लशा, अब्सालोम कली यरूसलेमम चाक्मा बाक्त। २सामुएल १३:३७

24 तन्न पिपमी "मेको आ खिंमीन बाक्ल। आं डोंइती जाक्चा मदुम्ब" दैमाक्त। मोपतीके अब्सालोम आ खिंमीन बाक्शा, पिप आ डोंइती मजाक्माक्त।

25 इस्त्राएल नेल्लेमी अब्सालोम खोदेशो दारशो सुड मबाक्मा बाक्त। आ पिया रे खोइल सम्म मेको के मारेइ मरिम्शो मदुम्शो मबाक्माक्त।

26 मेकोम बर्स बर्सम आ चां खोइक्बाक्माक्त। मारदे हना हेल्बाक्माक्त। मिनु मेको आ चां पिप आ नाक्तीकेम नाक्शोनु, सहे निक्शी शेकेल डा दुम्बाक्त। २०० शेकेल २ किलो ३०० ग्राम खोदेशो बाक्ब।

27 अब्सालोम के तौ सां नु तमी का बाक्मा बाक्त। आ तमी आ नें तामार बाक्माक्त। मेको थाम्पा दारशो मीश मुर बाक्माक्त।

28 मिनु अब्सालोम बर्स निक्शी सम्म यरूसलेमम बाक्माक्त। मेको पिप आ डोंइती मजाक्थु बाक्माक्त।

29 मिनु अब्सालोममी पिप कली युम्चा कली योआब कली लोत्र सोइक्ता बाक्त। तन्न योआब जाक्ने मबिस्से बाक्त। लेंशा ब्रथ सोइक्तानु यो, जाक्ने मबिस्से बाक्त।

30 मिनु अब्सालोममी आ गेय पाइब आन कली "योआब आ रू का आं रू आ नेक्था बाक्ब। मेको के क्योत्रज वाशो बाक्ब, दे गे तुइक्नीनी। मेकेर मी सुइक्तीन" दे माइक्मी बाक्त। मोपतीके अब्सालोम आ गेय पाइबपुकीम मेकेर मी सुइक्तमे बाक्त।

31 मिनु योआब रीब पा अब्सालोम आ खिं लशा, मेको कली “मारदे इन गेय पाइबपुकीम आं रूम मी सुइक्तेमे?” दे हिल्लो पवा बाक्त।

32 मिनु अब्सालोममी योआब कली “गो इन कली ब्रथ सोइक्ताकड। गे आं पर्वम पिप कली लोत्र लाइक्नीनी कों, दे मिम्ताकड। गे पिप कली ‘गो मारदे गेशुर रे जाक्चा माल्डा? गो मेक उड बाक्शो नड हना, रिम्शो दुम वा’ देंचा कली ब्रेत्थ सोइक्ताकड। गो पिप आ डोंडती लचा तडल। गो मारेड मरिम्शो पशो बाक्ती हना, दोस ताइब बाक्ती हना, साइय्थील” देमाक्त।

33 मिनु नोले योआब पिप आ बाक्तीक लशा, अब्सालोम आ लोत्र नेंपदा बाक्त। मिनु पिपमी अब्सालोम कली ब्रेत्थ सोइक्ता बाक्त। मिनु मेको पिप आ डोंडती जाक्शा खप सम्म बाप्शा, सेउ पवा बाक्त। मिनु पिपमी अब्सालोम कली पुक्पु पदा बाक्त।

## 15

अब्सालोम पिप दुम्चा माल्शो

1 मिनु नोले अब्सालोमम बग्गी का, शारा नु आ डोंडडोंडती दोरचा कली ५० जना मुर आंम कली वोदा बाक्त। १राजा १:५

2 अब्सालोम सुनी कना बोक्शा, सहर ओव्रतीक टेयब लाप्चोमी बाक्बाक्माक्त। मिनु मुरपुकी पिप कली निसाफ पुंइथ जाक्बाक्तेकम। अब्सालोममी मेको आन कली का का पा “तेको सहर रे जाक्शो नवे” देंबाक्माक्त। मिनु मेकोमी “इन गेय पाइब इस्राएल डा एको थर रे जाक्शो नड” देंबाक्मा बाक्त।

3 मिनु अब्सालोमम मेको कली “इ लोत्र ठीक बाक्ब। तन्न पिपमी इ कली ठीक निसाफ पा मनेंपाइक्ब” देंबाक्माक्त।

4 मिनु नोले अब्सालोममी “गो एको रागी डा निसाफ पाइब दुम्शो नड हना, सु सु कली निसाफ माल्दा, गो मेको नेल्ल आन कली निसाफ गेड वा” देंबाक्माक्त।

5 सुइ मुर मेको कली सेउ पथ जाक्मेनु, मेको कली आ गुइ हाम्शा मुप्शा, पुक्पु पाइक्बाक्माक्त।

6 अब्सालोममी पिप आ निसाफ पतीकेम इस्राएली सु सु जाक्बाक्मा, मेको आन कली मोपा आन थुं खुइ पाइक्बाक्माक्त।

7 मिनु ४ बर्स नोले अब्सालोमम पिप कली “गे आं कली हेब्रोन लचा गेयीनी। गो परमप्रभु यावे कली पशो कबल खाप्चा दाक्नुड।

8 मारदे हना गो, इन गेय पाइबम अराम डा गेशुरम बाक्डानु, कबल का पाता। गो मार कबल पाता देंशा हना, ‘परमप्रभु यावे, गे आं कली थमा पा यरूसलेमम लेशशा चाक्ती हना, गो हेब्रोनम परमप्रभु यावे, इन कली टेयब सेल्लुड’ दे कबल पाता” देमाक्त। उत्पती २८:२०-२१; २सामुएल १३:३७-३८

9 मिनु पिपमी “गे इ थुं नाइश्शा लावो” देमाक्त। मिनु मेको बोक्शा, हेब्रोन लमाक्त।

10 मिनु अब्सालोमम इस्राएल डा थर नेल्ल आन कली सुडम मतुइक्चा डा पा, लोत्र कुरब सोइश्शा “तुराही ग्रीशो नेंनी चोटी, गेपुकीम ‘अब्सालोम हेब्रोनम पिप दुम्त’ देंनीन” देंपाइक्मी बाक्त।

11 यरूसलेम डा सहे निकशी जना मुर अब्सालोम आ नोले खोइक्ब दुम्मा बाक्त। मेको आन कली अब्सालोमम ब्रेशो बाक्माक्त। तन्न मेकोपुकी मारेड मतुइक्थु, लशो बाक्मा बाक्त।

12 अब्सालोमम आ क्योरशा चढेतीकेम चढेवानु, गिलोह सहर डा अहीथोफेल कली ब्रेत्थ सोइक्ता बाक्त। मेको अहीथोफेल चहिं गिलोह सहर डा दाऊद कली अर्ती गेब मुर बाक्माक्त। मोपा पिप कली मरिम्शो गेय पना पन लशा अब्सालोम आ मुर शुश दुम्ना दुम्न लमा बाक्त। २सामुएल २३:३४; यहोसु १५:५१

दाऊद प्रोक्शो

13 मिनु लोत्र कुरब मुर का दाऊद आ बाक्तीकेम जाक्शा “इस्राएल डा मुरपुकी अब्सालोम आ नोले खोइक्तेकम” देमाक्त।

14 मिनु दाऊदम यरूसलेमम आं नु बाक्ब आ टेयब गेय पाइब आन कली “बोक्कीन, गोपुकी रीब पा प्रोक्चा माल्नय। मो मपाइतय हना, गो सुइ अब्सालोम आ गुइ रे ब्रोंडचा मताइनय। रीब पा पने, मो मदुम्त हना, मेकोमी इ क्येडा लाक्शा, इ कली शुश श्येत गेशा, सहर कली लडाइ तोइब” देमाक्त।

15 मिनु पिप आ टेयब गेय पाइबपुकीमी “गे आइ प्रभु पिपमी, मार देंनी, गो इन गेय पाइबम मेको पाइनीकी” देमा बाक्त।

16 मिनु पिपमी आ खिं डा सुइ सुइ आन कली लाइश्शा गाक्माक्त। मेकोमी १० जना नोले चाक्शो मीश आन कली खिं कोत्रचा कली प्रोंडशा वोइक्मी बाक्त।

17 मिनु पिप गाक्माक्त। मिनु मुर नेल्ल आ नोले खोदमे बाक्त। मिनु नोले डा खिंम चहिं दिक्मा बाक्त।

18 मिनु पिप आ टेयब गेय पाइब, केरेथी नु पेलेथी नेल्ल, गाथ सहर रे जाक्शो ६ सहे गित्त आ खिं डा नु मुर नेल्ल पिप आ डोंडती लाक्गामे बाक्त। २सामुएल ८:१८; १सामुएल २७:२

19 मिनु पिपमी गित्त आ खिं डा इत्ताइ कली “मारदे गे यो गो नु पिवे? लेशशा लशा, पिप नु बाक्को। मारदे हना गे अर्को रागी डा मुर नवे। गे इ रागी रे गुंइचा पुंइसीशो मुर नवे।

20 गे सिनाक्त साबेर नाक्त ला जाक्शो मुर नवे। गो मुलाक्त इ कली दोपा गो नु गाक्को देंनुडा? गो ते लाइक्नुडा आंमाम मतुइक्नुडा। गे खिं लावो। मिनु इ मुर आन कली यो लाइक्मी। परमप्रभु यावेमी इ कली आ गेना हना यो दाक्शा मप्रोंडतीके कोंइदल” देमाक्त।

21 तन्न इत्ताइमी पिप कली “परमप्रभु यावे ब्रोंडशा बाकशो खोदेशो पा नु आं प्रभु पिप इन ब्रोंडशा बाकशो खोदेशो पा, गे ते लाइतीनी हना यो, गो मेक लाइकनुड। ब्रोंडतीनी हना यो, बेकतीनी हना यो, गो इन गेय पाइब, इन नु बाकनुड” दे मदा बाकत।

22 मिनु दाऊदमी इत्ताइ कली “लो, दुम्ब गाकको” दे मदा बाकत। मोपा गित आ खिं डा इत्ताइ, आ मुर नेल्ल नु आ आल नेल्ल नु गाकमा बाकत।

23 पिप मोपा गाकमेनु लाम बाकब मुर नेल्ल डाकमा बाकत। पिप किद्रोन खोला शोकशा गोरशो रागी गे लमा बाकत।

24 मिनु अबीयाथार, सादोक नु लेवी नेल्ल परमप्रभु आ कबल पशो सन्दोस कुरशा, जाकमा बाकत। मेकोपुकी चहिं सहर डा मुर नेल्ल यूशा मगाकमा सम्म सन्दोस नाइशशा रिम्शा बाकमा बाकत।

25 मिनु पिपमी सादोक कली “परमप्रभु आ सन्दोस सहर लेशशा लतीन। परमप्रभु यावेमी आं कली शिशी पाइवती हना, आं कली लेशशा जाकचा गेब। मिनु सन्दोस नु मेको वोइक्तीके लेशा कोवचा गेब।

26 तन्न परमप्रभु यावेमी ‘गो इ कली शिशी मपाइनुड’ दैत हना, गो एक उइ बाकनुड। मेकोम आं कली आ दाकशो पवल।

27 कोवडीन, गे नु इ तौ अहीमाज नु अबीयाथार नु आ तौ योनाथन एको टिटा निकशी आस कली लाइशशा, सहर लेतीन। १राजा १:४२

28 गो गोरशो रागी आ सुरमी इन लोव्र मनेनु सम्म रिम्शा बाकनुड। एको लोव्र मप्रेदीन” दैमाकत।

29 मिनु सादोक नु अबीयाथारम परमप्रभु आ सन्दोस यरूसलेम लेशशा लदसे बाकत। मिनु मेको मेक उइ बाकसा बाकत।

30 तन्न दाऊद जैतून डांडा डा ग्येथ लामी डाकना डाकन लमाकत। मेकोम आ पिया सुम्शो बाकमाकत। श्येथ खोइल गाकशो बाकमाकत। मेको नु गाकब नेल्ल यो आन पिया सुम्शा डाकना डाकन गाकमा बाकत।

31 मिनु दाऊद कली अहीथोफेल मरिम्शो पाइब आन दातेम अब्सालोम नु बाकत देशो लोव्र नैपदमे बाकत। मिनु दाऊदम “परमप्रभु यावे अहीथोफेल आ अर्ती शोर गाकशो सेलीन” दे पुना बाकत। २सामुएल १७:१४

32 मिनु दाऊद परमप्रभु कली ठेयब सेलतीक डांडा तार जाकमाकत। मेना अरकी आ खिं डा हुशाइ आ वा खाकशा, आ पियाम खप फुंडसीशा दाऊद कली युम्थ जाकमाकत। १राजा ३:२; यहोसु १६:२

33 दाऊदम मेको कली “गे गो नु गाकते हना, आं कली श्येत ला दुम्ब।

34 तन्न गे सहर लेशशा लशा अब्सालोम कली ‘गो इन आफ आ गेय पशो खोदेशो पा इन गेय पाइब दुम्नुड’ दैते हना, मिनु मेक बाकते हना, अहीथोफेल आ अर्ती खतम सेल्चा कली आं कली वारच पाइनेवे। २सामुएल १७:७

35 चढेब सादोक नु अबीयाथार गे नु मेक बाकनीस। पिप आ खिंम मार मार लोव्र नेनी, मेको नेल्ल मेको आस कली शेदीम्सी।

36 मेको निकशी नु आस तौ मेको नु बाकनीस। सादोक आ तौ अहीमाज नु अबीयाथार आ तौ योनाथन रे इन नेशो लोव्र नेल्ल आं कली नैपाइकने चाप्नीनी” दैमाकत। २सामुएल १७:१५-२१

37 मिनु दाऊद आ वारच हुशाइ, अब्सालोम यरूसलेमम ओव्रन ओव्रना, सहर जाकदीम्माकत। १इतिहास २७:३३

## 16

सीबामी दाऊद कली युम्शो

1 दाऊद डांडा तार रे इक्का आइकची जाकदीम्मेनु, मेफी-बोशेथ आ गेय पाइब सीबामी दाऊद कली युमा बाकत। मेकोम लगम पाइशशो गधा निकशीम सहे निकशी शोब्ले, सहे का मुठा सोव्रशो अडगुर, सहे का फल फुल नु मसक का अडगुर शांबु कुरपाइशशा, चाक्या बाकत। २सामुएल ७:२

2 पिपमी सीबा कली “गे एको नेल्ल मारदे चाक्या?” दे हिल्लो पवा बाकत। मिनु सीबाम “एको गधा पिप आ खिं डा मुर डोइक्चा कली बाकनीस। शोब्ले नु फल फुल चहिं टिटा आन कली जचा कली बाकब। अडगुर शांबु गोरशो रागीम दशा थशो आन कली तूचा कली बाकब” दैमाकत।

3 मिनु पिपमी “इ होव्रप आ तौ ते बाकम” दे हिल्लो पवा बाकत। मिनु सीबाम “मेको यरूसलेममीन बाकशो बाकब। मेकोमी ‘मुलाक्ती इसाएलीपुकीम आ बाजे आ राज्य लेशशा गेनीम’ दे रिम्शा बाकशो बाकब” दैमाकत। २सामुएल १९:२५-३१

4 मिनु पिपमी सीबा कली “मुल मेफी-बोशेथ आ मारेइ मारेइ इ के दुम्ब” दे मदा बाकत। मिनु सीबामी “आं प्रभु पिप, गो इन वाइल का नड। इन डोंडती शिशी तडल” दैमाकत। १राजा २:८-९; प्रस्थान २२:२७

शिमैडम दाऊद कली सराप पशो

5 मिनु पिप दाऊद बाहुरीम सहरम जाकमाकत। मिनु मेकेर सावल आ खिं डा मुर का, गेरा आ तौ शिमैड यूशा दाऊद कली सराप चीले पना पन पिमाकत।

6 मेकोम पिप दाऊद नु आ गेय पाइब नेल्ल, लडाइ पाइब नेल्ल नु अरु मुर नेल्ल आन कली एर ओथ नेल्ल फुल्लु क्रोन्दीमी बाकत। दाऊद आ ग्युरा नु पेरा आ लडाइ पाइब नु आ मुर बाकमा बाकत।

7 शिमैडमी “लावो, लावो, ए मुर साइकब नु मरिम्शो पाइब” दे ग्रीशा, सराप पवा बाकत।

8 मिनु “परमप्रभु यावेम सावल आ खिं डा मुर आन हुश आ क्येकक लेत्ताकवे। गे मेको आ पा डा सासन पाप्तीवी। मिनु परमप्रभु यावेमी एको राज्य इ तौ अब्सालोम कली गेप्तु। मुल गे खतम दुम्ते श्येत जाइनेवे। मारदे हना गे हुश खाकश पोक्ब बाकनेवे” दैमाकत।

9 मिनू सेरूयाह आ तौ अबीशैमी पिप कली “मारदे मेरे बेकशो कुचुममी आं प्रभु, पिप इन कली सराप पवा? गो आइक्की हांबु लशा मेरे आ पिया खोइक्नुड” देमाक्त। १सामुएल २६:८

10 तन्न पिपमी “ए सेरूयाह आ तौ, गे गो नु मगारचा डा बाक्नीसी। परमप्रभु यावेमी मेको कली “दाऊद कली सराप पावो” दे सोइश्शो बाक्त हना, सुम तेक्ने चाप्बा डा?” देमाक्त। २सामुएल १९:१७-२४

11 मिनू दाऊदम अबीशै नु आ गेय पाइब नेल्ल आन कली “आं तौमी आं कली साइक्का माल्ब हना, मेरे बेन्यामीन आ थर डा मुर के मार लोत्र पचा डा? मेरे कली प्रोनीन। मेरेमी सराप पवल। मारदे हना परमप्रभु यावेमीन मेरे कली सराप पचा गेशो बाक्म माइ।

12 परमप्रभु यावेम मेरे मुलाक्त डा सराप आ पा डा आं श्येत तशा आं कली रिम्शो पाइबा को” देमाक्त।

13 मिनू दाऊद नु आ मुर आन लां खोदमे बाक्त। शिमेइ चहिं दाऊद आ लां गे आइक्की हांबुड आइक्की हांबु लमाक्त। लमेनु दाऊद कली सराप पना पन फुल्लु आप्ना आप्न, खप ब्वारना ब्वारन लमाक्त।

14 मिनू पिप नु मेको नु गाक्ब मुर नेल्ल यर्दन खोला आ नेक्था जाक्दीम्मा बाक्त। मिनू मेको थाम्पा दशा नाइसमा बाक्त।

अब्सालोम यरूसलेम जाक्शो

15 अब्सालोम नु मेको नु बाक्ब इस्राएली नेल्ल यरूसलेम जाक्मा बाक्त। अहीथोफेल यो मेको नु बाक्माक्त।

16 मिनू अरकी आ खिं डा हुशाइ दाऊद आ वारचमी अब्सालोम कली युमा बाक्त। मिनू मेकोमी अब्सालोम कली “पिप गेना हना यो ब्रोंइशा बाक्ल। पिप गेना हना यो ब्रोंइशा बाक्ल” देमाक्त। २सामुएल १५:३७

17 तन्न अब्सालोममी हुशाइ कली “इ वारच कली मप्रोंइतीके, मोदेंशो बाक्बा डा? मारदे गे इ वारच नु मलवे” दे मदा बाक्त।

18 मिनू हुशाइमी अब्सालोम कली “ममाइ, परमप्रभु यावे मेकेर बाक्ब मुर नु इस्राएली नेल्लेमी योत्रशो मुर आ गेय पचा मिम्ताक्ड। गो एक बाक्नुड।

19 मुल गो सुका आ गेय पाइनुड डा? पिप आ तौ कली गेय पचा मदुम्बा डा? गो दोपा इन आफ आ गेय पडा, मोपा इन गेय यो पाइनुड” देमाक्त।

अहीथोफेलमी अर्ती गेशो

20 मिनू अब्सालोममी अहीथोफेल कली “आंइ कली इन अर्ती गेने। गो दोपा गेय पचा माल्नीकी?” दे हिल्लो पवा बाक्त।

21 मिनू अहीथोफेलमी अब्सालोम कली “इन आफोमी आ खिं कोत्रचा कली प्रोंइशा वोइश्शो आ नोले चाक्शो मीशपुकी नु इपो। मोपा इन आफ कली मरिम्शो पशो इस्राएल नेल्लेम नैनीम। मिनू इन नोले खोइक्ब आन थुं बारब” देमाक्त। २सामुएल १५:१६

22 मोपतीके मेकोपुकीम अब्सालोम कली खिं तार ताम्बु का कीडमे बाक्त। मिनू अब्सालोममी इस्राएली नेल्लेम तचा डा पा, आ आफ आ नोले चाक्शो मीशपुकी नु इम्माक्त।

23 मेना मुरपुकीम अहीथोफेल आ अर्ती परमप्रभु आ लोत्र खोदेंशो मिम्बाक्मा बाक्त। मोपतीके दाऊद नु अब्सालोमम अहीथोफेल आ अर्ती ठेयब मिम्बाक्सा बाक्त।

## 17

अहीथोफेल आ अर्ती क्याम्शो

1 अहीथोफेलम अब्सालोम कली “आं कली १२ हजार योत्रशो मुर गेयीनी। मिनू गो मुलाक्दो दाऊद कली खेदा पाइनुड।

2 मेको दशा, आ थुं लुकच लशा बाक्मेनु, मेको कली थित्तुड। मिनू मेको नु बाक्ब मुर नेल्ल ब्रशा प्रोक्नीम। मिनू गो पिप कली ला साइक्नुड, अरु सुइ मसाइक्नुड।

3 मिनू गो इस्राएली नेल्ल आन कली ग्युम्ली आ ग्युम्ले बाक्तीक जाक्शो खोदेंशो पा इन बाक्तीक चाक्नुडमी। गे मुर का आ सोक्त माल्ना माल्न बाक्नीनी। लीशो मुर मारिइ मदुम्नीम” देमाक्त।

4 मिनू अब्सालोम नु इस्राएल डा खाल्पा नेल्लेम अहीथोफेल आ अर्ती दाक्तमे बाक्त।

5 तन्न अब्सालोमम “अरकी आ हुशाइ कली ब्रेलतीन। मेकोमी मार देबा, मेको नैय” देमाक्त। २सामुएल १६:१६

6 मिनू हुशाइ अब्सालोम आ डोंइती जाक्मेनु, अब्सालोममी “अहीथोफेल आ देशो नेल्ल शेंदा बाक्त। मेको आ देशो पचा, दे मपचा? मपचा हना, गे मार मिम्नेवे देंनो” देमाक्त।

7 मिनू हुशाइमी अब्सालोम कली “एको मुल डा अहीथोफेल आ देशो ठीक मदुम्ब” देमाक्त।

8 मिनू हुशाइमी लेंशा “गे इन आफ नु मेको नु बाक्ब मुरपुकी थम जोक्ब लडाइ पाइबपुकी बाक्नीम, दे तुइक्नीनी। मेकोपुकी चाइक्ब रोइक्का पुंइसीशो वां खोदेंशो दुम्शो बाक्नीम। इन आफ लडाइ पतीकेम जोक्ब तुइक्ब बाक्ब। मेको नाक्दो आ लडाइ पाइब नु काथा मबाक्ब।

9 मुल यो मेको तेकोइ ढोडोडोगा नु अरु बाक्तीकेमी खुइश्शा बाक्म माइ? मिनू इ लडाइ पाइबपुकी डोंइती साइक्का पुंइसाक्म हना, मेको नैबपुकीमी ‘अब्सालोम आ नोले खोइक्बपुकी बेक्ना बेक्न बाक्नीम’ देंशो नैनीम।

10 मोदेंशो दुम्मेनु, महिब गुप्स खोदेंशो थुं पाइश्शो लडाइ पाइब मुर यो हिनीम। मारदे हना इस्राएली नेल्लेमी इन आफ बोल्यो लडाइ पाइब मुर बाक्ब, दे तुइक्नीम। मेको नु बाक्ब थम बोल्यो बाक्नीम, दे तुइक्नीम।



11 आं अर्ती चहिं मार बाकब देशा हना, दान रे बेयर-शेबा सम्म डा इस्राएली नेल्ल आन कली खुप्चा मालनीम। मेको समुन्द्र डा बाल्वा खोदेशो पा शुश बाकनीम। मिनु गे मोदेशो पा लडाइ पथ लने।

12 मिनु मेको ते बाकत हना यो, गो मेको कली थिरशा लडाइ तोडनय। गो सीत यिशो खोदेशो पा मेको तार जुकनय। मिनु मेको नु मेको कली खोडकब का यो ब्रोंडचा मताइनीम।

13 मेको प्रोकशा सहर लशा, बाकतीक पुंडशा बाकत हना यो गो इस्राएली नेल्ल मेकेर लशा मेको सहर कली डोरीम कीशा फुल्लु का यो खोप्शा मलीपाइकथु, दिंमम चाकनय” दे हुशाइमी देमाकत।

14 मिनु अब्सालोम नु इस्राएली नेल्लेमी “अहीथोफेल आ अर्ती क्येडा अरकी आ हुशाइमी गेशो अर्ती रिम्शो बाकब” देमा बाकत। मारदे हना परमप्रभु यावेमी अहीथोफेल आ अर्ती क्याम्शा, अब्सालोम कली खतम पोक्चा कली मो पवा बाकत। २सामुएल १५:३१-३४

15 मिनु नोले हुशाइमी चढेब सादोक नु अबीयाथार आस कली अहीथोफेलम अब्सालोम नु इस्राएल डा खाल्पा आन कली गेशो अर्ती नु आ गेशो अर्ती नेल्ल शेंदीम्सी बाकत।

16 मिनु गे दाऊद कली “गोरशो रागी आ सुरम बास मबाकथु, गोरशा रागी लाकशा गाक्कीन। मो मपाइतीनी हना, पिप नु आ नु बाकब नेल्ल साडकचा पुंडसीनीम” देमाकत।

17 मेना योनाथन नु अहीमाज एन-रोगेलमी रिम्शा बाकशो बाकसा बाकत। मिनु वाइलीम का लशा, मेको आस कली शेंबाकमाकत। मिनु मेको निकशीमी पिप दाऊद कली शेंबाकसा बाकत। मारदे हना सहर डा मुरुम मतामेकल, दे मो पाइकबाकमा बाकत। २सामुएल १५:३६; यहोसु १५:७-८

18 तन्न मेना वोंडश आल काम मेको आस कली तशा, अब्सालोम कली शेंदा बाकत। मोपतीके मेको निकशी रीब पा बाहुरीम डा मुर का आ खिं जाकदीम्सा बाकत। मेको आ लाडगाम इनार का बाकमाकत। मिनु मेको निकशी मेको आगा ओत्रसा बाकत।

19 मेको खिं डा मुर आ मीशेमी सुम्तीक का चाकशा, मेको तार बिस्कुन हामा बाकत। सुइम मारेड मतुइकतमे बाकत।

20 मिनु अब्सालोम आ गेय पाइब मुरपुकी जाकशा, मेको मीश मुर कली “अहीमाज नु योनाथन ते बाकसा” दे हिल्लो पांमे बाकत। मिनु मेकोमी “मेको निकशी आइकची हांबु लाकताक्स” देमाकत। मेको मुरपुकीम एर ओंथ माल्मे बाकत, तन्न मथिदमे बाकत। मोपतीके मेकोपुकी यरूसलेम लेम्मा बाकत।

21 मिनु मेकोपुकी लमा नोले मेको निकशी इनार रे गूसा बाकत। मिनु मेको लशा पिप दाऊद कली नेल्ल शोवडसे बाकत। मेको निकशीमी दाऊद कली “बोककीन, रीब पा खोला शोकसीन” देसा बाकत। अहीथोफेल आ देशो अर्ती डा लोत्र यो शेंदसे बाकत।

22 मोपतीके दाऊद नु आ मुरपुकी रीब पा यर्दन खोला शोकसीमा बाकत। बुरु रु पा हाम्मो दुम्मेनु, आइकची हांबु मजाकदीप्व, सुइ मलीमा बाकत।

23 मिनु अहीथोफेलमी आ अर्ती डा लोत्र मबिश्शो तुइश्शा, आ गधा ठीक पा आ सहर डा खिं लमाकत। मिनु आ खिं डा मुर आन कली देंचा माल्लो लोत्र देशा, आं चहिं ग्युकशा बेकमाकत। मेको मोपा बेकशा आ आफ आ तुरसुम थिम्चा पुंडसे बाकत। १सामुएल ३१:४; १राजा १६:१८; मती २७:५

24 मिनु दाऊद महा-नाइमम जाकदीम्माकत। मेना अब्सालोम नु मेको नु बाकशो इस्राएली यर्दन खोला शोकसीने थुम्मे बाकत। २सामुएल २:८

25 अब्सालोमम योआब आ पा डा इश्माएली इथा आ तौ आमासा कली कप्तान सेला बाकत। इथामी अबीगेल कली ग्युबे पवा बाकत। अबीगेल, नाहाश नु सेरूयाह आस समी आ तमी बाकमाकत। सेरूयाह योआब आ ममा बाकमाकत।

26 इस्राएलीपुकी नु अब्सालोमम गिलादमी आन बाकतीक सेल्मे बाकत।

27 मिनु दाऊद महा-नाइमम जाकमेनु, रब्बाहम बाकब अम्मोनी नाहाश आ तौ शोबी, लो-देबारम बाकब अम्मीएल आ तौ माकीर नु रोगेलीम बाकब गिलाद आ मुर बारजील्लाइम, १इतिहास १९:१; २सामुएल ९:४; १राजा २:७

28 ब्रतीक फेक्तीक, ग्योबपुकी, खप के ग्योबपुकी, क्योत्रज नु चेरब, फस, सिबी, दाल,

29 खुदो, दहि, भेडा नु दूध के सेल्शो जचा थोत्रक दाऊद नु मेको नु बाकब मुर आन कली चाकशा, गेमे बाकत। मारदे हना मेकोपुकीम दाऊद नु आ मुरपुकी गोरशो रागीम शोत्रलु बेकशो, तूत दाकशो नु थाम्पा दशो बाकनीम, दे तुडकतमे बाकत।

## 18

अब्सालोम साडकचा पुंडसीशो

1 दाऊदमी आं नु बाकशो मुर आन कली लडाइ पचा कली पुक्मी बाकत। मिनु हजार का नु सहे का डा मुर आन कप्तान योव्रमी बाकत।

2 मिनु नोले दाऊदमी आ लडाइ पाइब आन कली भाग सां सेल्मी बाकत। भाग का योआब आ हुकुममी, भाग का सेरूयाह आ तौ अबीशै योआब आ लोक्ब आ हुकुममी नु भाग का गित्त आ खिं डा मुर इत्ताइ आ हुकुममी गेमी बाकत। मिनु पिपमी “गो यो गेपुकी नु लडाइम लाइनुड” देमाकत। २सामुएल १५:१९

3 तन्न मेकोपुकीमी “ममाइ, गे चहिं मलने। बुशा प्रोकचा माल्ताक्क हना, आंइ कली सुइम मतुइक्नीम। गो उडकथ बेकतक हना यो, मेकोपुकीम आंइ कली मकोव्रनीम। तन्न गे आंइ १० हजार खोदेशो बाकनीनी। मोपतीके गे सहरम बाकशा, आंइ कली वारच पाइतीनी हना, रिम्शो दुम्ब” देमा बाकत।

4 मिनू पिपमी “मो हना गो, गे मार देंनी, मेको पाइनुड” देंमाक्त। मिनू मेको टेयब लाप्चोम राप्शा बाक्माक्त। मिनू लडाइ पाइबपुकी हजार का, सहे का डा हुल पा आ झोंइती रे लमा बाक्त।

5 पिपमी योआब, अबीशै नु इत्ताइ आन कली “गो आं पबंम मेको ठिटा अब्सालोम नु मरिम्शो मपने” दे अब्सालोम आ पबंम लडाइ पाइब आन कली अरेशो मुर नेल्लेम नेन्मे बाक्त। २सामुएल १८:१२

6 मिनू लडाइ पाइबपुकी इस्राएली नु लडाइ पथ जाकदीम्मा बाक्त। मेको लडाइ एफ्राइम डा ब्वाकीम दुम्माक्त।

7 मेकेर दाऊद आ मुरपुकीम इस्राएली आन कली फ्रूमे बाक्त। मेको नाक्ती थम टेयब लडाइ दुम्शा २० हजार मुर बेक्मा बाक्त।

8 लडाइ राज्य आ एर ओंथ नेल्ल ब्रमाक्त। तरवारम साइशो क्येडा ब्वाकीम साइशो मुर शुश दुम्मा बाक्त।

9 अब्सालोममी दाऊद आ मुर कली तवा बाक्त। अब्सालोम आ खचर झोइशो बाक्माक्त। मेको खचर शुश राशी पाइशो टेयब बोल्यो रवा का आगा रे ग्रीशा लमाक्त। मिनू अब्सालोम आ चां मेको बोल्यो रवा आ राशीम ब्वेक्ता बाक्त। मिनू मेको ग्युक्शा लीमाक्त। आ खचर चहिं ग्रीशा लाक्गा बाक्त।

10 मुर कामी मेको तशा योआब कली “गो अब्सालोम कली बोल्यो टेयब रवा काम ग्युक्शा लीशो ताता” मदा बाक्त।

11 योआबमी मेको मुर कली “गे मेको कली मोपा तशा, मारदे मसदी? गो इ कली १० टुक्रा चांदी नु काम्बरी का गेन वा” देंमाक्त।

12 मेको मुरुम योआब कली “गे आं कली हजार का टुक्रा चांदी गेतीनी हना यो, गो पिप आ तौ आ पबंम आं गुड मक्युक्नुड। मारदे हना पिपमी ‘मेको ठिटा अब्सालोम कली सुम थिप्बा, मेकोमी रिम्शो पने’ दे अबीशै, इत्ताइ नु इन कली देशो गो नेल्लेम नेंतक। २सामुएल १८:५

13 मिनू गो मेको कली मरिम्शो पा साइक्ता हना, मेको लोत्र पिपमी रीब पा नेंब। मिनू गे दोस मताइब दुम्नीनी” देंमाक्त।

14 मिनू योआबमी “गो गे नु लोत्र पा मग्योल्नुड” देंमाक्त। मिनू मेकोमी तूतीक सां शेशा, अब्सालोम मो पा रवाम ग्युक्शा बाक्मेनु, आ कुचुमी थोकगा बाक्त। मेना सम्म अब्सालोम सेस बाक्शो बाक्माक्त।

15 मिनू योआब आ या कुरब १० जना मुरुम अब्सालोम कली आ एर ओंथ बाक्शा, मेको कली आप्शा सदमे बाक्त।

16 मिनू योआबम तुराही तवा बाक्त। मिनू लडाइ पाइबपुकी इस्राएली आन कली खेदा पचा प्रोंइशा, लेम्मा बाक्त। मारदे हना योआबम लडाइ पाइब आन कली तेक्मी बाक्त।

17 मेकोपुकीम अब्सालोम आ बेक्शो रां लाइश्या, ब्वाकी डा टेयब ढोडोडगा काम ताइक्तमे बाक्त। मिनू मेको तार शुश फुल्ल पुक्गमे बाक्त। मिनू इस्राएली नेल्ल आन आन खिं प्रोकमा बाक्त। यहोसु ८:२९

18 झोंइती अब्सालोममी पिप आ बेंसीम थाम का खुक्शो बाक्माक्त। मारदे हना मेकोमी “आं नें वोइक्चा कली आं तौ मबाक्ब” देशो बाक्माक्त। मेकोमी मेको थाम कली आ नें वोइशो बाक्माक्त। मुल सम्म मेको थाम कली अब्सालोम आ थाम देंसीब। २सामुएल १४:२७

19 मिनू सादोक आ तौ अहीमाजम “परमप्रभु यावेम क्येक्क लेत्ताक्व। मिनू पिप कली आ जोरी सनु आन गुइ रे प्रोंइतु, देंचा कली आं कली दोरपा सोइक्तीनी” देंमाक्त। २सामुएल १५:३६; २सामुएल १७:१७

20 तन्न योआबमी मेको कली “मुलाक्ती इ लोत्र लाइक्तीक नाक्त ममाइ। अर्को नाक्ती गे लोत्र लाइक्चा माल्नेवे। मारदे हना मुलाक्ती पिप आ तौ बेक्शो बाक्ब” देंमाक्त।

21 मिनू योआबमी कूश आ खिं डा मुर का कली “लशा, इ तशो नेल्ल पिप कली नेंपतो” दे मदा बाक्त। मिनू मेको कूश आ मुर योआब कली बाप्शा सेउ पा दोरशा लमाक्त।

22 मिनू सादोक आ तौ अहीमाजम लेंशा, योआब कली “मार दुम्त हना यो आं कली कूश डा मुर आ नोनोले दोरशा लचा गेयीनी” देंमाक्त। मिनू योआबमी “आं तौ गे मारदे लाइनेवे? इ लोत्र आ पबंम गे मारेइ इनाम मताइनेवे” दे मदा बाक्त।

23 मिनू मेकोमी “मार दुम्त हना यो, गो दोरशा लाइनुड” देंमाक्त। मिनू योआबमी “मो हना लावो” देंमाक्त। मिनू अहीमाज यर्दन डा बेंसी रे पा दोरमाक्त। मिनू मेकोम कूश आ खिं डा मुर कली ग्रामाक्त।

24 मेना दाऊद लाप्चो निक्शी आस दातेमी बाक्शो बाक्माक्त। खाल पाइबमी गारो आ तार लशा कोत्रडा बाक्त। मिनू मुर का दोरशा पिशो तवा बाक्त।

25 मिनू मेको खाल पाइबम पिप कली टेयब सेंदा पा देंमाक्त। मिनू पिपमी “मेको आ का ला बाक्त हना, मारेइ लोत्र चाक्तु” देंमाक्त। मेको मुर आन नेक्शा जाक्माक्त।

26 मिनू मेको खाल पाइबमी अर्को मुर का यो दोरशा पिशो तवा बाक्त। मिनू लाप्चो खाल पाइब कली “कोव्रडीन, दे अर्को मुर का यो आ कान दोरशा पिन पिन बाक्ब” देंमाक्त। मिनू पिपमी “मेकोम यो लोत्र चाक्गा माइ” देंमाक्त।

27 मिनू मेको खाल पाइबमी “मेरे झोंइती दोरब सादोक आ तौ अहीमाज खोदेशो पा दोरत” देंमाक्त। मिनू पिपमी “मेको रिम्शो मुर बाक्ब, मेकोम रिम्शो लोत्र चाक्गा माइ” देंमाक्त।

28 मिनू अहीमाजम पिप कली टेयब सेंदा पा “नेल्ल रिम्शो बाक्ब” देंमाक्त। मिनू पिप आ झोंइती खुम्की पा बाप्शा, पिप कली “परमप्रभु यावे, इन परमप्रभु टेयब बाक्ब। मेकोम आं प्रभु, पिप इन कली मरिम्शो पाइब आन कली इन गुडमी गेशो बाक्ब” देंमाक्त।

29 मिनू पिपमी “मार मेको ठिटा अब्सालोम रिम्शोम बाक्मे?” देंमाक्त। मिनू अहीमाजम “इन गेय पाइब योआबम आं कली सोइक्तानु, गो टेयब ग्रांये माग्ये दुम्शो ताता। तन्न मार दुम्शो बाक्मे मतुइक्नुड” देंमाक्त।

30 मिनू पिपमी मेको कली “गे मेकेर राप्शा बाक्को” दे मदा बाक्त। मिनू मेको मेकेर राप्शा बाक्माक्त।

31 मिनु मेको कूश आ मुर जाक्शा मेकोमी “आं प्रभु, आ पिप, इन कली नेल्ल रिम्शो बाक्ब। मारदे हना मुलाक्ती परमप्रभु यावेमी इन कली मरिम्शो पाइब आन गुड रे प्रॉइशो बाक्ब” देंमाक्त।

32 मिनु पिपमी मेको कूश आ मुर कली “मेको ठिटा अब्सालोम रिम्शोन बाक्मे” दे हिल्लो पवा बाक्त। मिनु मेको कूश आ मुरुमी “आं प्रभु, पिप आ जोरी सत्रु नु मरिम्शो पाइब नेल्ल मेको ठिटा खोदेशो दुम्मल” देंमाक्त।

33 मिनु पिप आ थुं ग्येत्थ लुकच दुम्शा, मेको ठेयब लाप्चो आ तार डा कोठाम लशा डाक्माक्त। मिनु गाक्ना गाकन लमेनु “आं तौ अब्सालोम, आं तौ अब्सालोम, इ पा डा गो बेक्शो नड हना, दुम वा। अब्सालोम! आं तौ, आं तौ” दे डाक्माक्त।

## 19

अब्सालोम आ पर्वम रोंका पशो

1 मिनु योआबम “पिप दाऊद अब्सालोम आ पर्वम डाक्ना डाकन रोंका पा बाक्शो बाक्ब” देंशो लोव नेना बाक्त।

2 मेको नाक्त डा प्राशो नेल्ल लडाइ पाइब आन कली रोंका पतीक दुम्माक्त। मारदे हना लडाइ पाइबपुकीमी पिप आ तौ आ पर्वम रोंका पशो बाक्ब, दे नेन्मे बाक्त।

3 मेको नाक्ती लडाइ पाइबपुकी लडाइम बुशा आन कुल कोइने मचाप्थु, मुने दोक्शा प्रोक्शो मुर खोदेशो पा सिक्सी पा सहर ओवमा बाक्त।

4 पिप आ कुल सुम्शा ठेयब सेंदा पा डाक्ना डाक्ना “आं तौ अब्सालोम, अब्सालोम, आं तौ, आं तौ” देंमाक्त।

5 मिनु योआब पिप आ खिंम ओव्रशा मेको कली “गे मुलाक्ती इन कप्तान नेल्ल आन कली मुने तोक्तीनी। मारदे हना मुलाक्ती मेकोपुकीमी इन कली प्रॉइतेक्म। इन तमी तौ, इन मीशपुकी नु इन नोले चाक्शो मीश आन कली यो प्रॉइतेक्म।

6 इन कली काइ मदाक्ब कली गे दाक्नीनी। इन कली दाक्ब आन कली गे काइ मदाक्नीनी। मुलाक्ती गो लडाइ पाइब आन कप्तान नु ठेयब मुर इन डोंइती मारेड मनकी, दे रुप्पाइक्तीनी। मुलाक्ती अब्सालोम ब्रोंइशा, गो नेल्ल बेक्शो नकी हना, गे ग्येरसीनी वा।

7 मुल रीब पा लशा, इन गेय पाइब आन थुं बारपतीन। गे मो मपाइतीनी हना, गो परमप्रभु यावे आ नेमी कसम जशा ‘मुलाक्दो गे नु सुड मबाक्नीम’ देंनुड। मिनु डोंइती इन तशो श्येत क्येडा मुलाक्त डा श्येत ठेयब दुम्ब” देंमाक्त।

8 मिनु पिप बोक्शा, ठेयब लाप्चोम बाक्माक्त। मिनु पिप ठेयब लाप्चोम बाक्शो बाक्ब, दे लडाइ पाइब आन कली नेंपदमे बाक्त। मिनु लडाइ पाइब नेल्ल पिप आ डोंइती जाक्मा बाक्त। मेना सम्म इस्राएली नेल्ल आन आन खिं प्रोक्ने थुम्शो बाक्मा बाक्त।

दाऊद यरूसलेम लेशशो

9 इस्राएल डा थर नेल्ल डा मुरुम आंम आंम लोव्र पा “पिपमी आंइ कली आंइ जोरी सत्रु रे प्रॉइतु। पलिस्ती आन गुड रे यो प्रॉइतु। मुल अब्सालोमम पतीके आंम रागी रे प्रोक्शा गाक्शो बाक्ब।

10 मुल गो इ पिप सेल्शो अब्सालोम लडाइम बेक्त। मोपतीके गो मुल मारदे पिप कली लेशशा मचाक्नया?” देंमुमा बाक्त।

11 मिनु पिप दाऊदमी सादोक् नु अबीयाथार कली “यहूदा डा खाल्पा आन कली ‘मारदे गे पिप कली आ खिंमी लेशशा चाक्चा कली नेल्ल क्येडा नोले दुम्चा दाक्नीनी? इस्राएली नेल्लेम देंशो लोव्र पिपमी नेने थुम्शो बाक्ब।

12 गेपुकी आं मुर ननी। आं हुश ननी। पिप कली लाइक्चा कली गे मारदे नोले दुम्नी” मतीस। २सामुएल ५:१

13 मिनु आमामासा कली ‘गे आं मुर नु आं हुश मनवे? गे योआब आ पा डा गो बाक्डा सम्म कप्तान दुम्नेवे। मो मपाता हना, परमप्रभुमी सजाइ गेवल’ देंत मतीस” देंमाक्त। २सामुएल १:२५

14 मिनु आमामासी यहूदा डा मुर नेल्लेमी “दाऊद कली ब्रेत्था माल्ब” दे थुं का सेला बाक्त। मिनु मेकोपुकीम पिप कली “गे नु इन गेय पाइब नेल्ल नु लेशशा जाक्कीन” दे लोव्र सोइक्तमे बाक्त।

15 मोपतीके पिप लेशशा यर्दन जाक्माक्त। डोंइती यहूदा डा मुरपुकी गिल्यालम पिप युम्चा कली जाक्मा बाक्त। मेकोपुकीमी पिप कली यर्दन खोला शोक्पाइक्थ जाक्मा बाक्त।

16 बेन्यामीन आ थर डा मुर बाहुरीम डा गेरा आ तौ शिमेड यो यहूदा डा मुर नु रीब पा पिप दाऊद कली युम्थ जाक्माक्त।

17 मेको नु हजार का जना बेन्यामीन आ थर डा मुर यो बाक्मा बाक्त। सावल आ गेय पाइब सीबा यो आ १५ जना तौ नु आ २० जना गेय पाइब नु मेकेर बाक्शो बाक्माक्त। मेकोपुकी पिप आ डोंइती यर्दन खोलाम जाक्दीम्मा बाक्त। २सामुएल ९:२,१०; २सामुएल १६:१-४

18 मिनु मेको आइक्ची हांभुम लचा कली पिप आ खिं डा मुर आन कली शोक्चा कली नु पिप आ माल्शो पचा कली मेकेर जाक्मा बाक्त। मिनु गेरा आ तौ शिमेड पिप खोला शोक्ची ना पिप आ डोंइती बाम्माक्त।

19 मिनु शिमेडमी पिप कली “आं प्रभु, पिप, गे यरूसलेम प्रॉइची ना आं मरिम्शो पशो आ पर्वम दोस मगेथु ममिन्तीन।

20 मारदे हना गो, इन गेय पाइबम पाप पाता, दे तुइक्नुड। मोपतीके गो योसेफ आ खिं डा मुर नेल्ल आन क्येडा डोंइती आं प्रभु पिप इन कली युम्थ जाक्ती” देंमाक्त।

21 मिनु सेरूयाह आ तौ अबीशैमी “परमप्रभु यावे आ तेल लुकशो कली सराप पतीके शिमेड साइक्चा मपुंडसीबा डा?” देंमाक्त।

22 तन्न दाऊदमी “सेरूयाह आ तौ, गे आं कली काइ मगारब मुर बाक्नीसी। गे मुलाक्ती आं जोरी सत्रु दुम्तीसी? मुलाक्ती इस्राएलमी तेकोड मुर साइक्चा मदुम्ब। मुलाक्ती गो इस्राएल डा पिप दुम्ती, दे गो मतुइक्नुडा डा?” देंमाक्त। २सामुएल १६:१०

23 मिनु पिपमी शिमेइ कली “गे साइक्चा मपुंडसीनेवे” देमाकत। मिनु पिपमी मेको लोत्र थमा सेल्चा कली कसम जवा बाकत। १ राजा २:८-९

24 सावल आ चच मेफी-बोशेथ यो दाऊद पिप कली गुमथ उइ यिमाकत। मेकोम पिप गाकम रे ग्राशा मलेम्म सम्म आ खोइल डा ग्ये यो मखोदा बाकत। आ गल शोक्ने यो मप्रेक्का बाकत। आ वा यो ममुशो बाकमाकत। २सामुएल ९:६

25 मेको पिप कली गुमथ यरूसलेम रे जाकमेनु, पिपमी मेको कली “मेफी-बोशेथ गे मारदे गो नु मगाक्डे?” दे मदा बाकत।

26 मिनु मेकोमी “आं प्रभु पिप, आं गेय पाइबम आं कली मरिम्शो पाप्तु। गो आं गधाम लगम पाइशशा पिप नु गाक्चा ठीक दुम्शो नइ। मारदे हना गो इन गेय पाइब खोइल थेक्ने मचाप्ब मुर नइ।

27 मेको आ लोत्रमी आं प्रभु पिप इन कली आं पर्बम मरिम्शो दुम्पाइकतु। गे आं प्रभु पिप परमप्रभु आ स्वर्ग डा गेय पाइब खोदेशो बाकनीनी। गे मार पचा दाक्नीनी मेको पने। २सामुएल १६:३; २सामुएल १४:१७

28 आं आफ आ खिं डा मुर नेल्ल इन गुइमी बेक्चा डा नकी। तन्न गो इन गेय पाइब आं कली इन नु जचा बाक्चा गेतीनी। मेको क्येडा लाक्शा, गो मार शिशी ताइक्नुडा डा?” देमाकत। २सामुएल ९:७

29 मिनु पिपमी “मुल दुम्त। सीबा नु गे रू योक्सीस, देती” देमाकत। २सामुएल ९:९-१०; २सामुएल १६:३-४

30 मिनु मेफी-बोशेथमी पिप कली “नेल्ल मेकोम पांडसेक्ल। मारदे हना गे आं प्रभु पिप मारेइ मडुम्थु खिं लेशशा जाक्तीनी” देमाकत।

31 मिनु गिलाद आ मुर बारजील्लाड यो रोगेलीम रे उइ यिमाकत। मिनु पिप कली यर्दन शोक्चा कली पिप आ नेक्था जाक्माकत। २सामुएल १७:२७; १ राजा २:१७

32 बारजील्लाड ८० बर्स दुम्शो थम खूशो बाक्माकत। मेकोमी पिप महा-नाइमम बाकमेनु, पिप कली जचा थोत्रक गेशो बाक्माकत। मारदे हना मेको थम शोप पाइशशो मुर बाक्माकत।

33 पिपमी बारजील्लाड कली “गो नुन खोला शोक्शा लय। गो इन कली यरूसलेममी कोत्रशा थुल्शा वोइक्नुड” देमाकत।

34 मिनु बारजील्लाडमी पिप कली “गो शुश बर्स मब्रोइनुड। दोपा गो पिप नु यरूसलेम लाइनुड।

35 मुल गो ८० बर्स दुम्ती। मुल गो रिम्शो नु मरिम्शो दोपा तुइक्नुडा? आं जशो तूशो ब्रोत्रशो नु मब्रोत्रशो मारेइ मतुइक्नुड। वोंइश मुर मीश मरुम कुम्पो पशो, गो नेने मचाप्नुड। मोपतीके गो आं प्रभु पिप इन कली मारदे श्येत तेम्नुडा?

36 गो इन गेय पाइब यर्दन आइक्ची हांबु इक्का सम्म पिप इन नु लाइनुड। पिपमी आं कली मारदे ओदेशो रिम्शो इनाम गेयीनी?

37 आं कली लचा गेयीनी। मिनु आं आम सहरम आं आम आफ आस तुरस आ नेक्था आं लीशो नाकत थुम्चा गेयीनी। तन्न इन वाइल किम्हाम एक बाक्ब। मेको कली आं प्रभु पिप इन नु आइक्ची हांबु लतीन। गे मार रिम्शो लाक्नीनी, मेकोन पने” देमाकत। येरमीया ४१:१७

38 मिनु पिपमी “मो हना किम्हाम गो नु आइक्ची हांबु गाक्ल। मिनु गे मार पचा दाक्नीनी, मेको इन देशो खोदेशो पाइनुड। गे मार दाक्नीनी गो मेको पाइनुड” देमाकत।

39 मिनु मुर नेल्ल यर्दन आइक्ची हांबु शोक्समा बाकत। पिप यो शोक्से बाकत। मिनु पिपमी बारजील्लाड कली पुक्पु पा आसीक गोवा बाकत। मिनु बारजील्लाड आम आ खिं लेम्माकत।

40 पिप खोला शोक्शा गिल्याल जाक्माकत। किम्हाम मेको नु गाक्शो बाक्माकत। यहूदा डा मुर नेल्ल नु इस्सएल डा उइक्थ मुरुम पिप कली इक्का आइक्ची सम्म चाक्दीत्मे बाकत।

41 मिनु इस्सएल डा मुर नेल्ल काथा दुम्शा, पिप आ बाक्तीक जाक्मा बाकत। मिनु मेकोपुकीमी “मारदे आंइ लोकब यहूदा डा मुरपुकीम इन कली खुइ पा लदमे? पिप, आ खिं डा मुर नु इन मुर नेल्ल लाइशशा यर्दन आइक्ची हांबु चाक्दीत्मे?” देमा बाकत।

42 मिनु यहूदा डा मुर नेल्लेमी इस्सएल डा मुर आन कली “पिप आंइ नेक्था डा मुर बाक्ब। गे मारदे आंइ पर्बम गाइक्नीनी? मार, गो पिप आ शोप जका? मार पिपमी गो आंइ कली मारेइ गोवा?” देमा बाकत। २सामुएल १९:१२-१३

43 मिनु इस्सएल डा मुरपुकीम यहूदा डा मुर आन कली “पिप इन क्येडा १० खेयप शुश आंइ पिप बाक्ब। गे मारदे आइक्च सेल्नीनी? पिप दाऊद कली लेशशा चाक्ता, दे गोपुकीम डोंइती देशो बाक्नीकी, मेको मप्रेदीन” देमा बाकत। तन्न इस्सएल डा मुर क्येडा यहूदा डा मुरपुकीमी ठेयब लोत्र पामे बाकत। २सामुएल १९:१०-११

## 20

### शेबा आ मरिम्शो पशो

1 शेबा नें पाइशशो मरिम्शो पाइब मुर का बाक्माकत। मेको बेन्यामीन आ थर डा बिक्री आ तौ बाक्माकत। मेकोम तुराही ताप्शा ग्रीशा “दाऊद नु आंइ के मार बाक्बा डा? येस्से आ तौ नु आंइ के मारेइ मबाक्ब। ए इस्सएली, गे इन ताम्बु ताम्बुम लने” देमाकत। १ राजा १२:१६

2 मोपतीके इस्सएली नेल्लेमी दाऊद कली प्रोंइशा, बिक्री आ तौ शेबा आ नोले खोदमे बाकत। तन्न यहूदा डा मुरपुकी चहिं दाऊद कली मप्रोंइथु, यर्दन रे यरूसलेम सम्म आ नोले खोइक्स डा खोइक्स पामे बाकत।

3 मिनु दाऊद आ खिं यरूसलेमम जाक्माकत। मिनु मेकोम आ खिं कोत्रचा कली वोइशशो मेको १० जना नोले चाक्शो मीश आन कली खिं कामी कोत्रब मुर का वोइशशा वोइक्मी बाकत। मेकोमी आन माल्शो नेल्ल गेमी बाकत। तन्न मेको नु

गेनायो मइम्माक्त। मोपा मेको आन बेक्ची नाक्त सम्म यो मप्रोंडथु वोइक्मी बाक्त। मोपा मेकोपुकी वोंडश बेक्शो मीश मुर खोंदेशो पा बाक्मा बाक्त। २सामुएल १६:२१

4 पिपमी आमासा कली “यहूदा डा वोंडश मुर आन कली खुप्तीमी। मिनु नाक्त सांमी आं बाक्तीकेमी जाक्पाइक्मी। मिनु गे यो जाक्को” दे मदा बाक्त।

5 मोपतीके आमासा यहूदा डा मुर आन कली खुप्चा कली गाक्माक्त। तन्न पिपमी देशो क्येडा मेको कली शुश नाक्त माल्दा बाक्त।

6 मिनु दाऊदमी अबीशै कली “अब्सालोम क्येडा बिक्री आ तौ शेबामी इं कली शुश श्येत गेब। पिप आ गेय पाइब आन कली लाइशशा, मेको कली खेदा पावो। मेको गारो हिरशो सहरम ओव्रत हना, इं गुड रे ब्रोंडब” दे मदा बाक्त।

7 मिनु योआबम केरेथी, पेलेथी नु लडाइ पाइब नेल्ल यरूसलेम रे लाइशशा, बिक्री आ तौ शेबा कली खेदा पवा बाक्त। २सामुएल ८:१८

8 मिनु मेकोपुकी गिबोन डा ठेयब फुल्लु बाक्तीक जाक्मानु, आमासा, मेको आन कली गुम्थ जाक्माक्त। मिनु योआबम लडाइ पतीक वा फेक्शो बाक्माक्त। मेको तार किप्शुर किप्शो बाक्माक्त। मिनु खोतम शुइशशा तरवार किप्शुरम पिप्शो बाक्माक्त। मिनु मेको डोंइती गे लमेनु, मेको तरवार खोत रे दोक्माक्त। मती २६:४८-५०

9 योआबम आमासा कली “आं लोकब आमासा गे रिम्शोन बाक्डे?” दे हिल्लो पवा बाक्त। मिनु मेकोमी आमासा कली पुक्पु पाइक्चा कली आ ग्युरा गुइमी मेको आ गल शोक्रे ग्याइक्ता बाक्त।

10 आमासामी योआब आ गुइमी तरवार बाक्शो मतुइक्ता बाक्त। मिनु योआबमी मेको आ कोव्रजम तूदा बाक्त। मिनु मेको आ गा क्यी खपीम दोक्शा बेक्माक्त। मेकोमी खेयप निकशी तूचा ममाल्दा बाक्त। मिनु योआब नु आ लोकब अबीशै बिक्री आ तौ शेबा कली खेदा पना पन लसा बाक्त। १राजा २:५

11 मिनु योआब आ ठिटा मुर काम आमासा आ बेक्शो रां आ नेक्था राप्शा “योआब नु दाऊद आस नोले खोइक्बपुकीम योआब आ नोले खोदमेक्ल” देंमाक्त।

12 आमासा आ बेक्शो रां हुशेग गिल्शा ठेयब लांमी गोल्ला बाक्माक्त। मिनु मुर नेल्ल लांमी दिक्शा बाक्शो बाक्मा बाक्त। मिनु मेकोम आमासा आ बेक्शो रां कली लां रे लाइशशा आइक्ची खेतम ताइक्ता बाक्त। मिनु मेको कली वा कांम सुमा बाक्त।

13 मेको कली ठेयब लां रे लदमे नोले, मुर नेल्लेम बिक्री आ तौ शेबा कली खेदा पचा कली योआब आ नोले खोदमे बाक्त।

14 शेबा इस्राएल डा थर नेल्ल लाक्शा, आबेल डा बेथ-माकाहम जाक्मा सम्म बिक्री आ खिं डा मुर नेल्ल तेइ तेइ रे गुम्मा बाक्त। मिनु मेको आ नोले सहर ओव्रमा बाक्त।

15 योआब आ लडाइ पाइब मुर नेल्ल जाक्शा, आबेल डा बेथ-माकाह कली पुन्दमे बाक्त। मिनु सहर डा गारो गे मार मार तेल्ला, गारो डोंइक्तीक ठीक पांमे बाक्त। मिनु योआब आ लडाइ पाइबपुकीमी गारो प्रेट्या गोव्रमे बाक्त।

16 मिनु जोक्ब तुइक्ब मीश मुर काम सहर रे ब्रेशशा “नेनीन, नेनीन, योआब कली ब्रेशशा सोइक्तीन। मिनु गो मेको नु लोव्र पाइनुड” देंमाक्त।

17 मिनु योआब आ डोंइती जाक्माक्त। मिनु मेको मीश मुरुमी “मार, गे योआब ननी?” देंमाक्त। मिनु योआबम “ओं, गो नड” देंमाक्त। मिनु मेको मीश मुरुमी “इन गेय पाइब आं लोव्र रिम्शो पा नेनीन” देंमाक्त। मिनु मेकोमी “नेंता” देंमाक्त।

18 मिनु मेकोमी “साइ रे मुरपुकीमी लोव्र नेंचा कली ‘आबेल सहर लचा माल्नीम’ देशो बाक्ब। मिनु मोपा निसाफ दुम्बाक्त।

19 आं सहर इस्राएल डा सहरपुकीम लडाइ मपाइब, पिप कली दाक्शा मान पाइब सहरम हिक्सीब। मिनु गे एको सहर, इस्राएली आन कली कोव्रब ममा खोंदेशो सहर कली खतम सेल्चा माल्नीनी? मारदे गे परमप्रभु यावे आ शोंप कली खतम पोक्चा माल्नीनी?” देंमाक्त। ब्यवस्था ३२:९

20 मिनु योआबमी “गो खतम मपोक्नुड, मक्याम्नुड।

21 गो मो पचा माल्लो मनकी। तन्न एफ्राइम पहाड डा बिक्री आ तौ शेबामी पिप दाऊद कली मरिम्शो पचा माल्लो बाक्ब। मेको मुर कली आंइ कली गेने। मिनु गो सहर प्रोंडशा गाक्नीक” देंमाक्त। मिनु मेको मीश मुरुम योआब कली “मेको आ पिया सहर रे लाडगा ब्वारनीकी” देंमाक्त।

22 मिनु मेको मीश मुरुम आ लोव्र मुर नेल्ल आन कली नेंपाइक्मी बाक्त। मिनु मेकोपुकीम बिक्री आ तौ शेबा आ पिया खोइशशा, योआब कली ब्वारदमे बाक्त। मिनु योआबम तुराही तबा बाक्त। मिनु लडाइ पाइब नेल्ल सहर प्रोंडशा आन खिं खिं लेम्मा बाक्त। योआब चहिं पिप आ बाक्तीके यरूसलेम लेशशा लमाक्त।

ठेयब मुर आन नें

23 योआब इस्राएल डा लडाइ पाइब आन नेल्ल क्येडा ठेयब मुर बाक्माक्त। येहो-यादा आ तौ बेनायाह केरेथी नु पेलेथी पिप कली खाल पाइब आन ठेयब मुर बाक्माक्त। २सामुएल ८:१६-१८; १राजा ४:४-६

24 अदोराम वाइलीम वाइल आन ठेयब मुर बाक्माक्त। अहीलुद आ तौ येहो-शाफात ब्रेक्ब बाक्माक्त।

25 शेवा चहिं लडाइ पाइब आन ब्रेक्ब बाक्माक्त। सादोक नु अबीयाथार चहिं चढ़ेब बाक्सा बाक्त।

26 याइर आ मुर इरा चहिं दाऊद आ चढ़ेब बाक्माक्त।

1 पिप दाऊद आ पालाम बर्स सां सम्म अन्काल दुम्स डा दुम्स पवा बाक्त। मिनु दाऊदमी परमप्रभु यावे कली हिल्लो पवा बाक्त। मिनु परमप्रभु यावेमी “सावल नु आ खिं डा मुर आन तार हुश आ दोस बाकशो बाक्ब। मारदे हना मेकोम गिबोनी आन कली साइव्तु” देमाक्त।

2 मिनु पिपमी गिबोनी आन कली बेशशा, मेकोपुकी नु लोत्र पवा बाक्त। गिबोनी इस्राएली आन थर डा मुर मबाक्मा बाक्त। मेकोपुकी एमोरी रे ब्रोडशा लीशो बाक्मा बाक्त। इस्राएलीपुकीम मेको आन कली प्रॉइतीक कसम जशो बाक्मा बाक्त। मो हना यो सावलमी इस्राएल नु यहूदा आ पर्बम मेको आन कली क्याम्चा माल्लो बाक्माक्त। यहोसु ९:३, १५, १९

3 दाऊदमी गिबोनी आन कली “गो इन कली मार पड? परमप्रभु यावे आ मुर आन कली आसीक गेचा कली गो दोपा गारपाइव्नुडा?” दे हिल्लो पवा बाक्त। ब्यवस्था ३२:९

4 मिनु गिबोनीपुकीमी “सावल आ खिं नु आंइ खिं डा मुर आन दातेम सुन नु चांदीम गार पाइव्ने मचाम्सीब। इस्राएली का यो साइव्का मगारनीकी” देमा बाक्त। मिनु दाऊदम “मिनु मुल गोम इन कली मार पवल, दे मिन्नीनी?” देमाक्त।

5 मिनु मेकोपुकीम पिप कली “सुम आंइ कली खतम पोक्गा, आंइ कली रागी रे क्याम्दा, मेको कली खतम पोक्का कली आंइ गुडम गेने।

6 मेको आ ७ जना तौ चच आंइ कली गेने। मिनु गो मेको आन कली परमप्रभु यावे आ डोंइती आ डांडा गिबोन सहरमी साइव्नीकी” देमा बाक्त। मिनु पिपमी “गो मेको इन कली गेनुड” देमाक्त। ब्यवस्था २१:२२-२३

7 तन्न पिपमी परमप्रभु यावे आ नेम नु सावल आ तौ योनाथन नु कसम जतीके सावल आ चच योनाथन आ तौ मेफी-बोशेथ कली प्रॉइशा वोदा बाक्त। १सामुएल २०:१५-१७;

8 पिपमी आइयाह आ तमी रिस्पाहम सावल रे जरमेशो तौ निक्शी आरमोनी नु मेफी-बोशेथ चाक्गा बाक्त। मिनु सावल आ तमी मेराबम मेहोला आ मुर बारजील्लाड आ तौ अद्रीएल रे जरमेशो ५ जना तौ यो चाक्गा बाक्त। २सामुएल ३:७; १सामुएल १८:१९

9 मिनु मेको आन कली गिबोनी आन गुडमी गेमी बाक्त। मेकोपुकीम मेको आन कली परमप्रभु यावे आ डोंइती सदमे बाक्त। मिनु मेको ७ जना कालेम बेक्मा बाक्त। मेकोपुकी क्योत्रज रिक्तीक आ डोंइती डा नाक्त साइव्का पुंडसीमा बाक्त।

10 आइयाह आ तमी रिस्पाहम रोंगु तारी आंम कली बाक्तीक सेल्चा कली भाडग्रा ब्रवा बाक्त। मिनु क्योत्रज ओंइतीक आ डोंइती डा नाक्त रे रेउ यिचा सम्म मेकोमी आ तौ आन बेक्शो रां आन कली खाल पवा बाक्त। नाक्ती आन तार चिक्ब जुक्चा मगेथु, नाक्दो ब्वाकी डा जन्तुम ब्वचा मगेमी बाक्त।

11 मिनु दाऊदमी सावल आ नोले चाक्शो मीश आइयाह आ तमी रिस्पाह आ पशो नेंशा,

12 मेकोमी सावल नु आ तौ योनाथन आस रुश याबेश-गिलाद डा मुर आन गुड रे चाक्गा बाक्त। मेकोपुकीम सावल नु योनाथन आस बेक्शो रां बेथ-शान सहर डा चोक रे लदमे बाक्त। पलिस्तीपुकीमी मेको आस कली गिल्बोआम साइशशा, नोले मेकेर क्युक्शो बाक्मा बाक्त। १सामुएल ३१:१२

13 मेकोम मेकेर रे सावल नु योनाथन आस रुश चाक्गा बाक्त। मिनु मेको रिस्पाह आ तौ आन रुश यो खुप्तमे बाक्त।

14 मेकोपुकीम सावल नु आ तौ योनाथन आस रुश बेन्यामीन आ थर आन रागी डा जेला सहर सावल आ आफ कीश आ तुरसुम थिम्मे बाक्त। पिपमी मेको आन कली मार मार देमे, मेको पामे बाक्त। मेको नोले परमप्रभुम रागी आ पर्बम पुंडशो लोत्र नेना बाक्त। २सामुएल २४:२५

दाऊदम लडाइ ग्राशो

१इतिहास २०:४-८

15 पलिस्ती नु इस्राएली लडाइ पामे बाक्त। दाऊद आ मुर नु लडाइ पथ यिमाक्त। मिनु पलिस्ती नु लडाइ पामे बाक्त। मिनु दाऊद थाम्पा दमाक्त।

16 इशबी-बेनोब रेफाइम आ बोल्यो लाइशशो मुर का बाक्माक्त। मेको आ तूतीके सहे सां शेकेल कांसा के बाक्माक्त। मिनु नक या का यो पिम्सीशो बाक्माक्त। मेकोमी “दाऊद कली साइव्नुड” देमाक्त। शेकेल का ११.५ ग्राम बाक्ब। ३०० शेकेल ३ किलो आधा बाक्ब।

17 मेना सेरूयाह आ तौ अबीशे दाऊद कली वारच पाइक्थ जाक्शा, मेको पलिस्ती कली सदा बाक्त। मेना दाऊद आ लडाइ पाइबपुकीमी “मुल रे गो गो नु लडाइमी मगाक्कीन। मारदे हना गे इस्राएल डा छेडछेडन ननी। मेको मकाप्ल” दे कसम जामे बाक्त। २सामुएल २३:१८; २सामुएल २२:२९

18 मिनु नोले लेंशा, गोब सहरम पलिस्तीपुकी नु लडाइ दुम्माक्त। मेना हुशा डा मुर सिब्बेकैम साफ माइशशो रेफाइ आ मुर कली सदा बाक्त। रेफा थम लाइशशो रेफाइ माइशशो मुर आन किकी पिपी बाक्शो बाक्त।

19 मिनु लेंशा गोब सहरम पलिस्तीपुकी नु अर्को लडाइ का दुम्माक्त। बेथलेहेम डा यारे-ओरेगीम आ तौ एल्हानानम गाथ सहर डा गित्त आ खिं डा मुर गोल्याथ कली सदा बाक्त। मेको आ तूतीक आ बिड तोत्र प्रोत्रब आन प्रोत्रतीक शी खोमी बाक्माक्त। १सामुएल १७:७

20 मिनु नोले लेंशा गाथ सहरम लडाइ दुम्माक्त। मेकेर यो ठेयब लाइशशो मुर का बाक्माक्त। मेको आ गुड नु खोइलीम ६, ६ ओटा अम्ला, नेल्ल पा २४ ओटा अम्ला पाइशशो रेफाइ आन मुर बाक्माक्त।

21 मिनु मेकोम इस्राएली आन कली हिंच कोइदा बाक्त। मिनु दाऊद आ लोक्ब शिमेड आ तौ योनाथनमी मेको कली सदा बाक्त। १सामुएल १७:१०

22 मेको ४ जना मुर गाथम बाकब रेफाइ आन दाते डा बाक्मा बाक्त। मेको नेल्ल दाऊद नु आ मुर आन गुड रे बेक्मा बाक्त।

## 22

दाऊदम परमप्रभु कली ठेयब सेल्शो  
भजन संग्रह १८:-

- 1 परमप्रभु यावेमी दाऊद कली आ जोरी सत्रु नेल्ल नु सावल रे प्रोना नोले दाऊदमी परमप्रभु यावे कली कुम्सो पवा बाक्त।
- 2 मेकोमी “परमप्रभु यावे आं सेरथे फुल्लु, आं बोल्यो दरवार नु आं कली श्येत रे प्रॉइब बाकब।
- 3 आं परमप्रभु आं सेरथे फुल्लु आं खुडक्तीके बाकब। मेको आं तेक्तीक नु आं ब्रॉइतीक बाकब। मेको आं बोल्यो दरवार नु आं फाम्सीतीक बाकब। मेको आं कली हुश खाक्श पोक्तीके रे प्रॉइब बाकब।
- 4 गो परमप्रभु यावे कली थोइनुड। मेको ठेयब सेल्चा पुंडसीब बाकब। मिनु मेकोम आं कली आं जोरी सत्रु रे प्रॉइब।
- 5 बेक्पाइक्वम आं कली ब्वाक्कु आ छालम खोदेशो पा गिल्ली। खतम पोक्ब बारशो ब्वाक्कुम आं कली सुम्ती।
- 6 बेक्शो मुर आन बाक्तीकेम आं एर ओथ नेल्ल रे गिल्ली। बेक्पाइक्ब आ ब्वारद आं डोइती बाकब।
- 7 मिनु गो आं श्येत आ पर्वम परमप्रभु यावे कली थोव्रता। गो आं परमप्रभु कली ‘वारच पने’ दे पुंडता। मिनु मेकोमी आ बाक्तीके रे आं सेंदा नेंतु। आं पुंडशो नेंतु।
- 8 मिनु रागीमी खिनु कुत। सरीड डा जग हिम्साकम। मारदे हना, परमप्रभु यावे गाइशो बाक्त।
- 9 मेको आ नें रे कुन वूत। मेको आ शोत्र रे ग्राव गु दाक्ब मी वूत। मेकेर रे ब्रशो कोइला वूतेकम।
- 10 मेको सरीड रे तोंइसाक्व। मेको आ खोइली आगा क्येर गोस्स बाक्त।
- 11 मेको करूब डोइशशा बेरत। फश के फ्रॉम बेरशो तांडसाक्व।
- 12 मेको छिडछिडम सुम्साक्व। शुश ब्वाक्कु बाक्शो क्येर गोस्स आ एर ओथ बाक्तेकम।
- 13 मेको आ डोइती डा छेडछेड रे ब्रशो कोइला वूतेकम।
- 14 परमप्रभु यावेमी सरीड रे बुंबु पापतु। नेल्ल क्येडा ठेयबम आ सेंदा नेंपाइक्तु।
- 15 मेकोम ब्रा आप्शा, एर ओथ ब्रपाइक्तु। चिला आप्शा, सोइक्ताक्व।
- 16 समुन्द्र आ पुं तांडसाक्व। रागी आ जग हुक्साक्व। मेको परमप्रभु यावे आ हुइशशो नु आ सास रे मोदेशो दुम्त।
- 17 मेकोमी इर रे आ गुड दिंशा ग्याइक्ताक्यी। आं कली ठेयब समुन्द्र रे कीशा गुंडताक्यी।
- 18 मेकोमी आं कली आं बोल्यो जोरी सत्रु नु आं कली काइ मदाक्ब, रे प्रॉइती। मेको आं क्येडा शुश बोल्यो बाक्तेकम।
- 19 मेकोपुकीमी गो हिंचा डा श्येत जडा ना आं कली लडाइ तोम्तेकम। तन्न परमप्रभु यावेमी आं कली तिकती।
- 20 मेकोमी आं कली लाडगा डा ठेयब बाक्तीकेम गुंडशा, श्येत रे प्रॉइती। मारदे हना मेको आं कली तशा ग्येरशो बाक्त।
- 21 परमप्रभु यावेमी आं कली आं ठीक पशो डा इनाम गेती। आं गुडम हुश मशाइक्पाइक्तीके आं रिम्शो पशो डा गेती।
- 22 मारदे हना गो परमप्रभु यावे आ लांम गाक्शो बाक्ती। गो आ अरेशो लोत्र मटीब खोदेशो पा आं परमप्रभु रे डोन मलड।
- 23 मारदे हना आ ठीक पतीक लोत्र आं डोइती बाक्तेकम। गो मेको आ फुल्लुम मुशा ब्रेक्शो लोत्र नेल्ल टिशा पाता।
- 24 मेको आ डोइती गो दोस मताइब बाक्ती। गो मरिम्शो पतीक रे डोन बाक्ती।
- 25 मोपतीके परमप्रभु यावेमी आं कली आं ठीक नु रिम्शो पशो आ पा डा गेती।
- 26 गे मप्रॉइब आन कली मप्रॉइब बाक्नीनी। दोस मताइब आन कली दोस मताइब बाक्नीनी।
- 27 गे रिम्शो पाइब आन कली रिम्शो पाइब बाक्नीनी। दूली पाइब आन कली दूली पाइब बाक्नीनी।
- 28 गे ब्रेम्शो मुर आन कली प्रॉइनीनी। तन्न ठेयब लेशशो आन कली आइक्च सेल्नीनी।
- 29 परमप्रभु यावे गे थमा पा आं बत्ती खोदेशो बाक्नीनी। परमप्रभु यावेमी आं कली छिडछिडमी छेडछेड दुम्पाइक्ब।
- 30 इन पतीकेमी गो लडाइ पाइब आन कली ग्रानुड। आं परमप्रभु गो गारो खाक्शा लाक्ने चानुड।
- 31 परमप्रभु आ लां ठीक बाक्ब। परमप्रभु यावे आ थोशा पशो लोत्र थमा बाक्ब। मेको आ बाक्तीकेम खुंडसीब आन कली तेक्तीक बाक्ब।
- 32 परमप्रभु यावे क्येडा अर्को तेकोइ परमप्रभु मबाक्ब। आंइ परमप्रभु क्येडा लाक्शा अर्को तेकोइ सेरथे फुल्लु मबाक्ब।
- 33 परमप्रभुमी आं कली सक्ति गेती। आं गाक्तीक लां ब्रेम्शो सेल्लु।
- 34 मेकोम आं कली किशख खोदेशो पा दोरब सेल्लु। मेकोमी आं कली इर वोइशशा कोत्रब।
- 35 मेकोम आं गुड कली लडाइ पचा शेंब। मोपा आं गुडमी कांसा के लिब्रा खुक्ने चाप्ब।
- 36 गे आं कली इन तेक्शा ब्रॉइतीक गेतीनी। इन वारच पतीकेम आं कली ठेयब सेल्लु।
- 37 गे आं कली ठीक पा गाक्चा गेतीनी। मोपतीके आं खोइल गेनायो मयेक्ब।
- 38 गो आं जोरी सत्रु आन कली खेदा पा खतम पोक्तामी। गो मेको नेल्ल आन कली खतम मपोक्गुमी सम्म मलेडड।
- 39 गो मेको आन कली खतम पोक्शा साइक्नुडमी। मिनु मेकोपुकी गेनायो बोक्ने मचाप्नीम। मेकोपुकी आं खोइली आगाम गोल्लेकम।
- 40 गे आं कली लडाइ पचा कली सक्ति गेतीनी। आं जोरी सत्रु आन कली आं डोइती आइक्च सेल्लुनीनी।
- 41 गे आं जोरी सत्रु आन कली आं डोइती रे प्रोक्पाइक्नीनी। गो आं कली काइ मदाक्ब आन कली खतम पोक्तामी।

42 मेकोपुकीम कोवना कोवन बाक्तेकम। तन्न मेको आन कली प्रोंडब सुइ मबाक्ब। मेकोपुकीम परमप्रभु यावे कली पुंडतेकम। तन्न मेकोमी मेको आन कली लोत्र मलेत्त।

43 गो मेको नेल्ल आन कली रागी डा फुरक खोदेशो पा फस पोक्तामी। गो मेको आन कली लां डा हिलो खोदेशो पा दिम्ताक्डमी।

44 गे आं कली मुर आन जिचा पोक्तीक रे प्रोंडतीनी। गे आं कली रागी रागी डा मुर आन टेयब मुर सेल्शा वोइक्तीनी। आं मतुइशो मुरपुकीम आं कली गेय पांतेकम।

45 अर्को रागी डा मुर जाक्शा आं कली मान पांतेकम। आं लोत्र नेशा, मेकोपुकी आं देशो टिम्तेकम।

46 अर्को रागी डा मुर हिंशा खिंखि पा आन बोल्यो दरवार रे जाक्तेकम।

47 परमप्रभु यावे ब्रोंडशा बाक्ब। आं सेरथे फुल्लु टेयब बाक्ब। आं परमप्रभु मान ताइब बाक्ब। मेको आं कली प्रोंडब, सेरथे फुल्लु बाक्ब।

48 परमप्रभुम आं परबम क्येक्क लेत्ताक्व। मिनु मुर आन कली आं सासनम वोइक्तीमी।

49 मेकोम आं कली आं जोरी सत्रु रे प्रोंडतीनी। गे आं कली आं जोरी सत्रु आन क्येडा टेयब सेल्तीनी। गे आं कली हुश खाक्श पोक्ब रे प्रोंडतीनी।

50 मोपतीके परमप्रभु यावे, गो रागी रागी डा मुर आन दातेमी इन कली टेयब सेल्लुड। मिनु इन कली टेयब सेल्तीक कुम्सो पाइनुड।

51 परमप्रभु यावे पिप, आं ब्रोंडशा बाक्तीक बाक्ब। मेकोम आ तेल् लुक्शो दाऊद कली नु आ चच युइ आन कली गेना हना यो दाक्तीक कोइब” दे दाऊदमी परमप्रभु यावे कली टेयब सेला बाक्त।

## 23

दाऊद आ नोले डा लोत्र

1 एको दाऊद आ नोले डा लोत्र बाक्ब। येस्से आ तौ दाऊद आ नोले देशो लोत्र एको बाक्ब। परमप्रभुमी टेयब सेल्शो मुर आ पशो लोत्र एको बाक्ब। याकूब आ परमप्रभुमी मेको कली तेल लुक्शा, पिप सेल्शो बाक्त। इसाएली आन सक्ति पाइशो आन दातेमी दाऊद कली नेल्ल क्येडा दाक्ब बाक्ब। १सामुएल १६:१३

2 “परमप्रभु यावे आ सोक्त आं रे पा ब्वाक्शो बाक्ब। मेको आ देशो लोत्र आं शोत्रम बाक्ब।

3 इसाएली आन परमप्रभुम लोत्र पाप्तु। इसाएली आन सेरथे फुल्लुमी आं कली ‘सुमी मुर आन कली ठीक निसाफ पाइबा, सुम परमप्रभु कली मान पा हिंशा हुकुम पाइबा,

4 मेको सुनी डा नां खोदेशो बाक्ब। मेको गोस्स मबाक्शो सुनी दाप्शो नां खोदेशो बाक्ब। मिनु मेको रेउ यिम नोले वाशो घांस खोदेशो बाक्ब’ दैत। न्यायाधीस ५:३१

5 मोपा आं खिं परमप्रभु नु बाक्ब। मारदे हना मेकोमी गो नु गेना हना यो लीब कबल का पशो बाक्ब। मेको नेल्ल रिम्शो नु लीब। मिनु मेकोमी आं रिम्शो दुम्शो नु आं दाक्शो बारना बारना लपाइक्ब।

6 तन्न परमप्रभु यावे आ अरेशो मटीब फशेम बेरेशो चू खोदेशो बाक्नीम। सुइम मेको कली गुइम थिने मचाप्नीम।

7 सुम मेको कली ताइक्वा दाक्बा, मेकोमी फलाम नु कोक्के लाइशशा गुप्नीम। मेको मीम हुम्शा, रीब पा दाक्वा पुंडसीनीम” दैत।

दाऊद आ बोल्यो लडाइ पाइब

१इतिहास ११:१०-४७

8 दाऊद आ बोल्यो लडाइ पाइब मुर आन नें मार बाक्तेकम देशा हना, डोंडती ताह-केमोन आ खिं डा मुर योशेब-बाशेबेथ बाक्माक्त। मेको बोल्यो सां आन दाते डा कप्तान बाक्माक्त। मेकोमी ८ सहे मुर आन कली आ तूतीकेम कालेमी साइक्मी बाक्त।

9 मेको आ नोले डा बोल्यो सां लडाइ पाइब आन दाते डा अहोही आ चच दोदो आ तौ एलाजर बाक्माक्त। मेको दाऊद नु बाक्शो बाक्माक्त। मेकेर पलिस्तीपुकी लडाइ पचा कली बुक्शो बाक्मा बाक्त। मिनु इसाएलीपुकी प्रोकमानु, मेको कामीन लडाइ पतीकेम राप्शा,

10 मदम सम्म पलिस्ती आन कली तरवारम क्योरस डा क्योरस पामी बाक्त। मेको आ गुइमी तरवार खोक्शो बाक्माक्त। मोपा परमप्रभु यावेम मेको नाक्ती थाम्पा ग्रापदा बाक्त। मेको नोले मुरपुकी बेक्शो मुर आन मार मार रोइक्थ ला जाक्मा बाक्त।

11 मेको आ नोले डा हरारी आगी आ तौ शम्माह बाक्माक्त। पलिस्तीपुकी लेहीम बुक्शो बाक्मा बाक्त। मेकेर मस शोक्शो थम रिम्शो रू का बाक्माक्त। मिनु अरामीपुकी पलिस्ती आन डोंडती रे बुशा प्रोकमा बाक्त।

12 मिनु पलिस्तीपुकीमी मुर आन कली खेदा पा लदमेनु, मेको शम्मा मस शोक्शो रू आ दातेमी राप्शा, खाल पा बाक्शो बाक्माक्त। मिनु मेकोमी पलिस्ती आन कली साइक्मी बाक्त। मोपा परमप्रभु यावेमी मेको आन कली थाम्पा ग्रापदा बाक्त।

13 अन्न रिक्तीक डोंडती डा नाक्ती, मेको ३० जना कप्तान आन दाते डा मेको सां अदुल्लाम डा पुक्खी दाऊद आ बाक्तीकेम जाक्शो बाक्मा बाक्त। पलिस्ती आन हुल का चहिं रेफाइम डा बेसीम बाक्तीक सेल्शा बाक्शो बाक्मा बाक्त। १सामुएल २२:१

14 मेना दाऊद डांडा डा गारो हिरशो बोल्यो बाक्तीकेम बाक्शो बाक्माक्त। पलिस्ती आन लडाइ पाइब हुल बेथलेहेमम बाक्मा बाक्त।



15 मिनु काबु नाक्त दाऊद थाप्पा ब्वाक्कु तूत दाक्शो बाक्माक्त। मिनु मेकोमी तूत दाक्शा “सुइमी आं कली बेथलेहेम डा टेयब लाप्चो आ नेक्था बाक्शो इनार डा ब्वाक्कु तूचा गेयीमी हना, रिम्शो दुम वा” देमाक्त।

16 मिनु मेको बोल्यो लडाइ पाइब सां पलिस्ती आन दाते रे ग्रीशा लशा बेथलेहेम डा टेयब लाप्चो आ नेक्था बाक्शो इनार डा ब्वाक्कु चाक्शा दाऊद कली गेमे बाक्त। तन्न दाऊदम मेको तूने मबिस्से बाक्त। मेकोमी मेको ब्वाक्कु परमप्रभु यावे आ डोंइती मोदा बाक्त।

17 मेकोमी “परमप्रभु यावे आ नेमी गो एको ब्वाक्कु मतूनड। मार, गो एको मुर आन हुश तूनडा? एकोपुकीम एको ब्वाक्कु हेररा आन गिम सोइक्चा डा पा लशा चाक्तेकम” देमाक्त। मोपतीके दाऊदमी मेको ब्वाक्कु मतूडा बाक्त। मेको बोल्यो लडाइ पाइब सां आन टेयब गेय मेकोन बाक्त।

अरु बोल्यो लडाइ पाइब

18 मिनु सेरूयाह आ तौ योआब आ लोकब अबीशै मेको ३० जना आन दाते डा टेयब बाक्माक्त। मेकोमी सहे सां जना मुर आन कली आ तूतीकेम लडाइ पा साइक्मी बाक्त। मेको सांमी “मेको बोल्यो मुर बाक्ब” देमा बाक्त। २सामुएल २१:१७

19 मेको, मेको ३० जना आन दाते डा नेल्ल क्येडा हिक्सीशो मुर बाक्शो बाक्त। मिनु मेको आन कप्तान दुम्माक्त। तन्न मेको बोल्यो मुर सां खोदेशो दुम्ने मचबा बाक्त।

20 कब्सेल सहर डा येहो-यादा आ तौ बेनायाह यो बोल्यो लडाइ पाइब का बाक्माक्त। मेकोमी टेयब गेय पशो बाक्माक्त। मेकोम मोआब डा अरीएल आ तौ निक्शी साइशो बाक्माक्त। फुं यिम ना मेकोमी खाल्टाम लशा मेकेर गुप्स का साइशो बाक्माक्त। २सामुएल ८:१८; यहोसु १५:२१

21 मेकोमी दारशो बोल्यो इजीप्त डा मुर का कली साइशो बाक्माक्त। मेको इजीप्त डा मुर तूतीक का शेशो बाक्माक्त। तन्न बेनायाह कोक्के का शेशा लशा, मेको इजीप्त डा मुर आ तूतीक आ गुड रे रोइशशा, मेको कली सदा बाक्त।

22 येहो-यादा आ तौ बेनायाह आ पशो मेकोन बाक्ब। मेको सांमी “मेको बोल्यो लडाइ पाइब का बाक्ब” देमा बाक्त।

23 मेको, मेको ३० जना मुर आन दाते डा हिक्सीशो मुर का बाक्शो बाक्त। तन्न मेको बोल्यो सां खोदेशो दुम्ने मचबा बाक्त। मिनु दाऊदमी मेको कली आं कली खाल पाइब आन टेयब मुर सेला बाक्त।

24 मिनु मेको ३० जना आन दातेमी सु सु बाक्मा बाक्त देशा हना, योआब आ लोकब आसाहेल, बेथलेहेम डा दोदो आ तौ एल्हानान, २सामुएल २:१८

25 हारोद सहर डा शम्माह, हारोद सहर डा एलीका,

26 पाल्ती आ खिं डा हेलेस, तेकोहा सहर डा इक्केश आ तौ इरा,

27 अनाथोथ सहर डा अबीएजेर, हुशा डा मुर मेबुन्नाइ,

28 अहोही आ खिं डा मुर सल्मोन, नेतोफाह आ खिं डा माहाराइ,

29 नेतोफाह आ खिं डा बानाह आ तौ हेलेब, गिबा सहर डा बेन्यामीन आ थर डा रिबाइ आ तौ इत्ताइ,

30 पिराथोन सहर डा बेनायाह, गाश खोला डा हिदादाइ,

31 अरबा आ खिं डा मुर अबी-अल्बोन, बाहुरीम सहर डा अज्मावेथ,

32 शा-आल्बोन सहर डा एली-अहबा, याशेन आ तौ योनाथन,

33 हरारी सहर डा शम्माह, हरारी सहर डा शरार आ तौ अहीयाम, २सामुएल १५:१२

34 माकाह सहर डा अहास्बाइ आ तौ एली-फेलेत, गिलो डा अहीथोफेल आ तौ एलीआम,

35 कारमेल पहड डा हेसो, यहूदा डा अरब सहर डा पाराइ,

36 सोबाह सहर डा नाथान आ तौ इगाल, गाद आ थर डा बानी,

37 अम्मोनी जेलेक, बेयरोथ सहर डा नहाराइ, मेको सेरूयाह आ तौ योआब आ या कुरब बाक्माक्त।

38 इथ्री आ खिं डा इरा, इथ्री आ खिं डा गारेब नु २सामुएल ११:३

39 हिती आ मुर उरीयाह, मेको नेल्ल पा ३७ जना बाक्मा बाक्त।

## 24

मुर आन कली हिक्शो

१इतिहास २१:-

1 मिनु परमप्रभु यावे इस्राएली आन पर्बम लेंशा गाइक्ता बाक्त। मिनु मेकोमी दाऊद कली मेको आन पर्बम मरिम्शो पपाइक्चा कली क्युक्गा बाक्त। मिनु दाऊदमी “इस्राएल नु यहूदा डा मुर आन कली हिक्कीन” देमाक्त।

2 मिनु पिपमी योआब नु मेको नु बाक्ब लडाइ पाइब आन टेयब मुर नेल्ल आन कली “दान रे बेयर-शेबा सम्म डा इस्राएल आ खिं खिं डा मुर आन बाक्तीक तेइ तेइ लशा, नेल्ल आन कली हिक्शा, मेको दोशो बाक्मा, आं बाक्तीकेम ब्रेक्शा चाक्कीन” देमाक्त। प्रस्थान ३०:१२

3 तन्न योआबम पिप कली “परमप्रभु यावे, इन परमप्रभुम मुर आन कली सहे का खेयप हिक्शो क्येडा यो शुश सेलल। मेको तचा डा पा इन ब्रोंइची ना दुम्ल। तन्न मारदे आं प्रभु पिप मोदेशो पचा माल्नी?” दे हिल्लो पचा बाक्त।

4 तन्न पिप आ अरेशो योआब नु लडाइ पाइब आन टेयब मुरपुकीम पचा मात्मा बाक्त। मोपतीके योआब नु लडाइ पाइब आन टेयब मुर पिप आ डोंइती रे इस्राएल डा मुर आन कली हिक्चा कली लमा बाक्त।

5 मिनु मेकोपुकी यर्दन खोला शोक्शा, आरोएर सहर नु दिम आ दाते डा सहर रे गाद नु याजेर गे लमा बाक्त। ब्यवस्था २:३६

- 6 मिनू मेकोपुकी हित्ती आन रागी गिलाद नु कादेश जाकमा बाक्त। नोले दान लशा, सीदोन जाकदीम्मा बाक्त।
- 7 मिनू नोले गारो हिरशो सहर टायर, हिच्वी नु कनानी आन सहर नेल्ल लमा बाक्त। नोले यहूदा डा नेगेब डा बेयर-शेबा सहर सम्म लमा बाक्त।
- 8 मिनू ९ महिना नु २० नाक्त नोले मेकोपुकी रागी नेल्ल हिरशा, लेशशा यरूसलेम जाकमा बाक्त।
- 9 मिनू योआबम पिप कली “या चलने चाब लडाइ पाइब इस्राएलम ८ लाख नु यहूदाम ५ लाख बाक्तेकम” दे शेंदा बाक्त।
- 10 मिनू नोले दाऊद मुर आन कली हिक्शो आ पर्वम आ थुं मनुमाक्त। मिनू दाऊदमी परमप्रभु यावे कली “गो मुर आन कली हिक्शा ठेयब पाप पाता। मुल परमप्रभु यावे, इन वाइल आ मरिम्शो पशो क्याम्दीन। मारदे हना गो थम मूर्ख गेय पाता” देमाक्त। २सामुल १२:१३
- 11 मिनू दाऊद सुनी कना बोक्माक्त। मिनू परमप्रभु यावेमी आ लोत्र पाइब गाद कली लोत्र पवा बाक्त।
- 12 मार लोत्र पवा बाक्त देशा हना “गे दाऊद कली परमप्रभु यावेम इ कली मार देब देशा हना ‘गो इ कली लोत्र सां गेनन। मेको आन दाते डा का योत्रचा माल्लेवे। मिनू गो मेको इ कली पाडनुड’ देत” देमाक्त।
- 13 मिनू गाद दाऊद आ बाक्तीक जाक्शा “इन कली नु रागी कली बर्स सां सम्म अन्काल दुम्तीके, महिना सां सम्म इन जोरी सत्रुम खेदा पचा पुंडसीतीके नु इन रागीम नाक्त सां सम्म मुर बेक्तीक रोइ जाक्तीके, तेको योत्रनीनी मिम्शा देंनीन। मिनू आं कली सोइक्ब कली मार देंचा माल्लनुडा देंनीन” देमाक्त। येरमीया २४:१०; इजीकीएल ६:११-१२
- 14 मिनू दाऊदम गाद कली “गो शुश श्येत जशो बाक्नुड। आइ कली परमप्रभु यावे आ गुडम दुम्चान रिम्शो बाक्ब। मारदे हना आ शिशी ठेयब बाक्ब। गो मुर आन गुडम मदुम्डल” देमाक्त।
- 15 मोपतीके परमप्रभु यावेमी आ देशो नाक्तर रे इस्राएल नेल्लेम मुर बेक्तीक रोइ जाक्पदा बाक्त। मिनू दान रे बेयर-शेबा सम्म ७० हजार मुर बेक्मा बाक्त।
- 16 मिनू परमप्रभु यावे आ स्वर्ग डा गेय पाइबमी यरूसलेम खतम पोक्चा कली आ गुड मेक गे दिंदा बाक्त। मिनू परमप्रभु यावेमी मुर आन कली खतम सेल्ब आ स्वर्ग डा गेय पाइब कली तेक्शा “मोक्ल, मुल दुम्त” देमाक्त। मेना मेको परमप्रभु यावे आ स्वर्ग डा गेय पाइब यबुसी अरौनाह आ खलाम राप्शो बाक्माक्त। उत्पती १९:१३; प्रस्थान १२:२३; यसेया ५४:१६
- 17 मिनू दाऊदमी मेको मुर आन कली साइक्ब परमप्रभु आ आ स्वर्ग डा गेय पाइब कली तवा बाक्त। मिनू मेकोमी परमप्रभु यावे कली “पाप पाइब, गो आं का ला नड। इन अरेशो लोत्र मटीब यो गो नड। तन्न एको मुर मार पामे डा? गे आं कली नु आं खिं डा मुर आन कली श्येत गेने” देमाक्त। गन्ती १६:२२
- 18 मेको नाक्ती गाद दाऊद आ बाक्तीकेम जाक्शा, मेको कली “गे लशा, यबुसी अरौनाह आ खलाम परमप्रभु यावे कली चढेतीक का सेलो” देमाक्त।
- 19 मिनू परमप्रभु यावेमी अरेशो गादमी देशो खोदेशो पा दाऊद इर डोइशशा लमाक्त।
- 20 मिनू अरौनाहम पिप नु आ मुर आन कली आ बाक्तीक गे पिशो तशा, पिप आ डोंइती खुम्की पा बाप्शा सेउ पवा बाक्त।
- 21 मिनू अरौनाहमी “मारदे आं प्रभु पिप इन वाइल कली गुम्थ जाक्नी” दे हिल्लो पवा बाक्त। मिनू दाऊदमी “गो परमप्रभु यावे कली चढेतीक का सेल्चा, दे इ खला ग्याप्थ जाक्ती। मो पाता हना, एको मुर बेक्तीक रोइ दिक्बा कौ?” देमाक्त।
- 22 मिनू अरौनाहमी दाऊद कली “आं प्रभु पिप मेको इन के दुम्त। मिनू दोदेशो दाक्नीनी मोदेशो पा चढेन। चोशा चढेचा कली गो नु ब्यफ बाक्नीम। शी कली जुवा नु दांइ पतीक शी बाक्नीम।
- 23 पिप, गो इन कली मेको नेल्ल गेनुड। परमप्रभु यावे, इन परमप्रभुम इन चढेशो ब्रवल” देमाक्त।
- 24 तन्न पिपमी अरौनाह कली “ममाइ, गो मेको ग्याप्नुड। गो क्येट मथाप्शो थोत्रक परमप्रभु यावे, आं परमप्रभु कली मचढेनुड” देमाक्त। मोपतीके दाऊदम मेको खला नु ब्यफ डा ५० शेकेल चांदी थाप्शा ग्यबा बाक्त। शेकेल का ११.५ ग्राम बाक्ब।
- 25 मिनू दाऊदम मेकेर परमप्रभु यावे कली चढेतीक का सेला बाक्त। मिनू चोशा चढेतीक नु दुशा बाक्चा आ पर्वम चढेतीके चढेवा बाक्त। मिनू परमप्रभु यावेमी रागी आ पर्वम पुंडशो लोत्र नेना बाक्त। मिनू इस्राएलम मुर बेक्तीक रोइ दिक्माक्त। २सामुल २१:१४

## १ राजा

**ब्रेक्ब मुर:** नेल्ल क्येडा नोले ब्रेक्ब मुर मतुइक्नीम। एको ब्रेक्ब मुरुमी यहूदा डा पिप आन इतिहास नु इस्राएल डा पिप आन इतिहास डा किताब तुइश्शो बाक्त।

**गेना ब्रेक्शो:** एको किताब ५६१ बि. सी. मेर ब्रेक्शो दुम्या माल्ब। मारदे हना मेना पिप योयाकीन जेल्खान रे यूशो बाक्त।

**मार ब्रेक्शो:** डोंइती १ राजा नु २ राजा हिब्रू लोव्रमी ब्रेक्शो किताब का बाक्त। नेल्ल ग्रीक लोव्रमी सेप्टुआगीन्त माइश्शो किताबम निक्शी सेल्मे बाक्त। डोंइती राजा किताब निक्शी, सामुएल किताब निक्शी, यहोसु नु न्यायाधीस किताब कली “परमप्रभु यावे आ लोव्र पाइब आन किताब” देशो बाक्मा बाक्त। मेको किताबपुकीमी मोसा रे इस्राएली ग्याइश्शा लाइक्चा पुंइसीमा सम्म डा लोव्र नेल्ल ब्रेक्शो बाक्त। १ राजा किताबमी दाऊद खाल्पा दुम्यो रे आ तौ सोलोमन नोले डा यहूदा नु इस्राएल डा पिप आहाब नु आ तौ अहज्याह सम्म डा लोव्र ब्रेक्शो बाक्ब।

अबीशागम पिप कली काल्गी पशो

1 मिनू दाऊद पिप शुश बर्स दुम्या, थम खूशो दुम्माक्त। मिनू वा फेक्सेनु, यो महोमाक्त।

2 मोपतीके मेको आ गेय पाइबपुकीम मेको कली “आंइ प्रभु पिप इन कली कोव्रचा कली नु इन काल्गी पचा कली, गो कन्ने मीश आल का माल्नीकी। मिनू मेको आंइ प्रभु पिप, इन कली होपाइक्चा कली इन नु इप्ल” देमा बाक्त।

3 मिनू मेकोपुकीम इस्राएल रागी नेल्लेम दारशो मीश आल का माल्मेनु, शुनेम सहर डा अबीशाग, कन्ने मीश आल कली थित्मे बाक्त। मिनू मेको कली पिप आ बाक्तीक चाक्मे बाक्त।

4 मेको थम दारशो मीश आल बाक्माक्त। मिनू मेकोमी पिप कली कोव्रचा नु आ काल्गी पचा गोवा बाक्त। तन्न पिप मेको नु मबाक्माक्त।

अदोनीयाह पिप दुम्या माल्शो

5 मिनू हग्गीथ आ तौ अदोनीयाहम आंम कली ठेयब सेल्शा “गोन पिप दुम्नुड” देंचा गोवा बाक्त। मोपतीके मेकोम बग्गीपुकी, शारा डोइक्बपुकी नु आ डोंइडोंइती दोरपाइक्चा कली ५० जना मुर ठीक पवा बाक्त। २सामुएल ३:४; २सामुएल १५:१

6 मिनू मेको आ आफोम मेको कली “गे मारदे मोदेशो पवी?” दे गेनायो महुइक्ता बाक्त। अदोनीयाह यो थम दारशो मुर का बाक्माक्त। मेको अब्सालोम क्येडा नोले जर्मेशो बाक्माक्त।

7 मिनू मेकोमी सेरूयाह आ तौ योआब नु चढेब अबीयाथार नु लोव्र गारपदा बाक्त। मिनू मेको निक्शीमी अदोनीयाह कली वारच पदसे बाक्त। १ राजा २:२७

8 तन्न चढेब सादोक, येहो-यादा आ तौ बेनायाह, परमप्रभु यावे आ लोव्र पाइब नाथान, शिमेइ, रेइ नु दाऊद आ लडाइ पाइबपुकी चहिं अदोनीयाह नु मगारमा बाक्त।

9 मिनू अदोनीयाहमी एन-रोगेल आ नेक्था डा सोहेलेथ देशो फुल्लुम भेडा, ब्यफ नु दोमशो बस्तु भाव चढेवा बाक्त। मिनू मेकोमी आ लोक्ब नेल्ले, पिप आ तौ नेल्ले नु पिप आ ठेयब गेय पाइब यहूदा डा मुर नेल्ल आन कली ब्रेत्तीमी बाक्त। यहोसु १५:७-८

10 तन्न मेकोमी परमप्रभु यावे आ लोव्र पाइब नाथान, बेनायाह, लडाइ पाइबपुकी नु आ लोक्ब सोलोमन आन कली चहिं मब्रेत्ता बाक्त।

11 मिनू नाथानमी सोलोमन आ ममा बाथ्शेबा कली “मार गे हग्गीथ आ तौ अदोनीयाह आंइ प्रभु दाऊद आ मतुइक्थु पिप दुम्त देशो लोव्र मनैनी?

12 मोपतीके मुल नेनीन। आंम इन कली नु इन तौ सोलोमन कली दोपा प्रोइने चाम्सीबा, मेको आ पर्बम गो इन कली सल्ला गेनुड।

13 मुल रीब पा लशा, पिप दाऊद कली ग्रुमीन। मिनू मेको कली ‘आं प्रभु, मार, गे इन वाइलीम नु थमा पा इ तौ सोलोमन आं नोले पिप दुम्ब। मिनू मेको आं नित्तीकेम निप्ब देशो मननी डा? मिनू मुल मारदे अदोनीयाह कका पिप दुम्मे?’ देनीन। १इतिहास २८:५-१०

14 मिनू मोपा गे पिप नु लोव्र पना पन बाक्नीनु, गो जाक्नुड। मिनू गो इन देशो लोव्रम लोव्र तेम्नुड” देमाक्त।

15 मिनू बाथ्शेबा पिप आ बाक्तीक कोठाम ओव्रमाक्त। पिप थम खूशो दुम्यो बाक्माक्त। मेना शुनेम सहर डा अबीशागमी मेको आ काल्गी पना पन बाक्माक्त।

16 मिनू बाथ्शेबाम पिप आ डोंइती बाप्शा आ पोक्च थेक्शा सेउ पवा बाक्त। मिनू पिपम “गे मार पुनी” दे मदा बाक्त।

17 मिनू मेकोमी पिप कली “आं प्रभु, गे इन वाइलीम, आं कली परमप्रभु यावे, इन परमप्रभु आ डोंइती कसम जशा ‘इ तौ सोलोमन आं नोले पिप दुम्ब। मिनू आं नित्तीकेम निप्ब’ देशो ननी।

18 तन्न मुल अदोनीयाह कका पिप दुम्त। एको लोव्र आं प्रभु पिपम मतुइश्शो बाक्नीनी।

19 मेकोमी शुश ब्यफ नु दोमशो बस्तु भाव नु भेडा क्योरशा चढेशो बाक्ब। मिनू पिप आ आल नेल्ले, चढेब अबीयाथार नु लडाइ पाइब आन नेल्ल क्येडा ठेयब मुर योआब नेल्ल आन कली ब्रेश्शो बाक्ब। तन्न इन गेय पाइब सोलोमन कली चहिं मब्रेश्शो बाक्ब।

20 मिनू मुल आं प्रभु पिप, इन नोले सु पिप दुम्बा? मिनू इन नित्तीकेम सु निम्बा, दे तुइक्या कली इस्राएल डा मुर नेल्लेम इन लां कौल्लशो बाक्नीम।

21 मो मदुम्त हना, नोले गे आं प्रभु पिप इन किकी पिपी नु इप्नीनी। मिनू गो नु आं तौ सोलोमन आंस कली मरिम्शो पाइब खोदेशो सेल्नीम” दे बाथशेबाम देमाक्त।

22 मिनू मेको पिप नु लोत्र पना पन बाक्मेनु, परमप्रभु यावे आ लोत्र पाइब नाथान जाक्माक्त।

23 मिनू पिप कली “परमप्रभु यावे आ लोत्र पाइब नाथान जाक्शो बाक्ब” देशो लोत्र नैपदमे बाक्त। मिनू नाथान जाक्शा, खप सम्मन बाप्शा, पिप कली सेउ पवा बाक्त।

24 मिनू नाथानम “आं प्रभु पिपमी ‘अदोनीयाह आं नोले पिप दुम्ब। मिनू आं नित्तीकेमी निम्ब’ देशो ननी देय मननी?

25 मेको मुलाक्ती उइ ब्रुप्शा शुश ब्यफ, दोम्शो बस्तु भाव नु भेडा क्योरशा चढेशो बाक्ब। मिनू मेकोम पिप इन आल नेल्ले, लडाइ पाइब आन ठेयब मुर योआब नु चढेब अबीयाथार नेल्ल आन कली ब्रेशो बाक्ब। मिनू मुल मेको नेल्ल मेको आ डोंइती जना जन, तूना तून ‘पिप अदोनीयाह गेना हना यो ब्रोंइशा बाक्ल’ देना देन बाक्नीम।

26 तन्न मेकोम इन गेय पाइब आं कली, चढेब सादोक, येहो-यादा आ तौ बेनायाह नु इन गेय पाइब सोलोमन आंइ कली मब्रेत्तीकी।

27 मार, आं प्रभु पिप इन देतीके मो पशो नमी? मिनू गो इन गेय पाइब आंइ कली चहिं इन नोले सु पिप दुम्ब, दे मशेंदीनी” देमाक्त।

दाऊदम सोलोमन कली पिप सेल्शो

28 मिनू पिप दाऊदमी “बाथशेबा कली आं नेक्था ब्रेत्तीन” देमाक्त। मिनू मेको पिप आ डोंइती जाक्शा राम्माक्त।

29 मिनू पिपमी “गो आं कली आं श्येत नेल्ल रे प्रोंइब नु गेना हना यो बाक्ब परमप्रभु यावे ब्रोंइशा बाक्शो खोदेशो पा गो कसम जाइनुइ।

30 डोंइती गो परमप्रभु यावे, इस्राएली आन परमप्रभु आ नैमी इ कली ‘इ तौ सोलोमन आं नोले पिप दुम्ब। मिनू आं नित्तीकेम निश्शा, आं पा डा पिप दुम्ब’ देती। मुलाक्त गो मेको कसम जशो खान्पुइ” देमाक्त।

31 मिनू बाथशेबा पिप आ डोंइती आ पोक्च थैक्शा बाप्शा “आं प्रभु पिप दाऊद गेना हना यो ब्रोंइशा बाक्ल” देमाक्त।

32 मिनू पिप दाऊदम “चढेब सादोक, परमप्रभु यावे आ लोत्र पाइब नाथान नु येहो-यादा आ तौ बेनायाह आन कली ब्रेत्तीने” देमाक्त। मिनू मेको पिप आ डोंइती जाक्मा बाक्त।

33 मिनू पिपम मेको आन कली “गे इन प्रभु, आं ठेयब गेय पाइब आन कली लतीन। मिनू आं तौ सोलोमन कली आं खचरम डोइक्पाइश्शा गिहोन सम्म लतीन।

34 मिनू मेकेर चढेब सादोक नु परमप्रभु यावे आ लोत्र पाइब नाथानमी मेको कली तेल लुक्शा इस्राएल डा पिप सेल्सेक्ल। मिनू तुराही ताप्शा ‘पिप सोलोमन गेना हना यो ब्रोंइशा बाक्ल’ देमल।

35 मिनू मेको आ नोले खोतीन। मेको जाक्शा आं नित्तीकेम नित्था माल्ब। मिनू मेकोम आं पा डा सासन पचा माल्ब। मारदे हना गो मेको कली इस्राएल नु यहूदाम सासन पचा कली योत्रता” देमाक्त।

36 मिनू येहो-यादा आ तौ बेनायाहम पिप कली “आमेन। परमप्रभु यावे, आं प्रभु पिप आ परमप्रभुमी मोदेशोन पवल।

37 दोपा परमप्रभु यावे आं प्रभु पिप इन नु बाक्मे, मोपान सोलोमन नु यो बाक्ल। मिनू मेको आ राज्य आं प्रभु पिप दाऊद आ राज्य क्येडा यो सक्ति पाइश्शो सेलल” देमाक्त।

सोलोमन कली पिप सेल्शो

38 मिनू चढेब सादोक, परमप्रभु यावे आ लोत्र पाइब नाथान, येहो-यादा आ तौ बेनायाह नु केरेथी नु पेलेथी उइ ब्रुप्शा सोलोमन कली दाऊद पिप आ खचरम डोइक्पाइश्शा गिहोन सम्म लदमे बाक्त। २सामुएल ८:१८

39 मिनू चढेब सादोकमी परमप्रभु यावे आ ताम्बु रे तेल वोइश्शो ग्रोत्र गुंइशा सोलोमन कली लुक्शा पिप सेला बाक्त। मिनू मेकोपुकीम तुराही ताप्मे बाक्त। मिनू मुर नेल्लेम ठेयब सेंदा पा “पिप सोलोमन गेना हना यो ब्रोंइशा बाक्ल” देमा बाक्त। १इतिहास २३:१; २सामुएल २९:२२

40 मिनू मुर नेल्ल ठेयब सेंदा पा ग्येरशा बांसुरी ताप्शा, मेको आन नोनोले इर डोइश्शा लमा बाक्त। मिनू मेको आन ग्येरशा रेयके पशोम रागी नेल्ल मुरदा बाक्त।

41 मिनू अदोनीयाह नु आ मुरपुकीम मेको रेयके नेन्मे बाक्त। मेना मेकोपुकीमी नक भोज जने ला थुम्शो बाक्मा बाक्त। मिनू योआबमी तुराही ग्रीशो नैशा “सहरम मार रेयके पामे?” देमाक्त।

42 मिनू मेकोमी मो देन देना चढेब अबीयाथार आ तौ योनाथन जाक्माक्त। मिनू अदोनीयाहमी मेको कली “खिंडगा पिबो। गे रिम्शो मुर बाक्नेवे। मिनू गे थमा पा रिम्शो लोत्र चाक्गी माइ” देमाक्त। २सामुएल १५:२७,३६

43 मिनू योनाथनमी अदोनीयाह कली “ममाइ, इ प्रभु पिप दाऊदमी सोलोमन कली पिप सेल्लु।

44 पिपमी चढेब सादोक, परमप्रभु यावे आ लोत्र पाइब नाथान, येहो-यादा आ तौ बेनायाह नु केरेथी नु पेलेथी आन कली मेको नु सोइक्ताक्व। मिनू मेकोपुकीम मेको कली पिप आ खचरम डोइक्पाइश्शा लाइक्तेक्म।

45 मिनू चढेब सादोक नु परमप्रभु यावे आ लोत्र पाइब नाथानमी मेको कली गिहोनमी तेल लुक्शा, पिप सेल्लक्सा। मिनू मुल मेकोपुकीम मेको कली ग्येरशा इर खिं लाइक्तेक्म। मोपतीके सहरम रेयके दुम्शो बाक्ब। गेपुकीम मेको रेयके नैशो बाक्नीनी।

46 मुल सोलोमन पिप आ नित्तीकेम निम्ब।

47 मिनू पिप आ खिं डा ठेयब गेय पाइब मुरपुकीमी इं प्रभु पिप दाऊद कली 'इन परमप्रभुम इन तौ सोलोमन आ नें इन क्येडा यो सक्ति पाइशशो सेलल। मिनू मेको आ नित्तीक इन नित्तीक क्येडा यो सक्ति पाइशशो सेलल' देख लशो बाकनीम। मिनू पिपमी आ खाटमी बाप्शा

48 'परमप्रभु यावे, इस्राएली आन परमप्रभु ठेयब बाकब। मुलाकती मेकोमी आं सेस बाकना बाकन, आं कली तपाइक्या कली आं नित्तीकेम पिप का निप्पाइकतु' देत" देमाकत।

49 मोपतीके अदोनीयाह आ मुरपुकी हिंशा छुल छाल बोक्शा आन लां खोदमे बाकत।

50 मिनू अदोनीयाह आंमा यो सोलोमन क्येडा हिंशा लशा, चढेतीक डा ग्रोत्र ग्याइकता बाकत।

51 मेको नोले सोलोमन कली "अदोनीयाह पिप क्येडा हिंशा, चढेतीक डा ग्रोत्र ग्याइशशा 'पिप सोलोमनम आ गेय पाइब आं कली मक्योरनुड, दे कसम जवल' देशो बाकब" देशो लोत्र नेंपदमे बाकत। १राजा २:२८

52 मिनू सोलोमनमी "मेकोमी गो ओदेब पाइब मुर नड, देने चापुतु हना, मेको के आ चां का यो महेम्ब। तन्न मेकोम मरिम्शो पशो थिसाकव हना, मेको थमा पा साइक्या पुंडसीब" देमाकत। २सामुएल १४:११

53 मिनू पिप सोलोमनम मुर आन कली सोइशशा, मेको कली चढेतीक रे उड तोइकपदा बाकत। मिनू अदोनीयाह जाकशा, पिप सोलोमन कली सेउ पवा बाकत। मिनू सोलोमनम मेको कली "इ खिं लावो" दे मदा बाकत।

## 2

दाऊदमी सोलोमन कली अरेशो

1 मिनू दाऊद आ बेकची ना जाकमाकत। मिनू मेकोमी आ तौ सोलोमन कली आ बाकशो मारेइ मारेइ जिम्मा गेवा बाकत।

2 मिनू मेकोमी "गो रागी डा मुर नेल्ल आन खोदेशो पा बेकनुड। मोपतीके गे बोल्यो नु महिब दुमो।

3 मिनू गे परमप्रभु यावे, इ परमप्रभु आ देशो टिवो। मेको आ लांम गाकको। मिनू मोसा आ अरेशो लोत्रम गेशो खोदेशो पा परमप्रभु यावे आ फुल्लुम मुशा ब्रेकशो लोत्र, आ शेंशो, आ देशो पतीक लोत्र नु आ गेशो अर्ती नेल्ल पावो। मिनू गे मार मार पाइनेवे, ते ते लाइनेवे, मेको नेल्ल रिम्शो दुम्ल। ब्यवस्था १७:१४-२०; यहोसु १:७

4 परमप्रभु यावेमी आं कली "इ तौ चच नेल्लेम आंमा दोपा बाक्या माल्बा, दे मिन्ताकम हना नु आन थुं नु आन सोकत नेल्लेम आं कली मप्रोइथु आं डोइती गाकतेकम हना, गेना हना यो इस्राएलम हुकुम पचा कली इ तौ चच का लीब" दे लोत्र गेशो कबल पशो बाकब।

5 सेरूयाह आ तौ योआबम आं कली मार पवा? गे मेको तुइकनेवे। मेकोमी इस्राएल डा लडाइ पाइब आन ठेयब मुर नेर आ तौ आब्नेर नु येथर आ तौ आमासा आस कली साइकतीम्सी। मेको लोत्र गे आंमा तुइशशो बाकनेवे। मेकोमी मेको निम्फा आस कली लडाइ मदुम्थु, थुं नाइशशा बाकतीक ना साइकतीम्सी। मिनू मेको हुशेमीन आ किप्शुर नु आ जुता दोस ताइब सेल्लु। २सामुएल ३:२७; २सामुएल २०:१०

6 मोपतीके इ जोकब तुइकब थुंम मार पचा देंबा, मेको पावो। तन्न मेको आ बोइशशो चां थुं मनाइकथु बेकशो मुर आन बाकतीकेम लल।

7 गिलाद डा बारजील्लाड आ तौ आन कली चहिं मप्रोइथु रिम्शो पावो। मेको गे नु काथा जाइब आन दातेमी बाकमल। गो इ लोक्ब अब्बालोम क्येडा प्रोक्शा गाकडानु, मेकोपुकीम रिम्शो पांमतेकम। २सामुएल १७:२७; २सामुएल १९:३२-४१; २सामुएल १५:-

8 मिनू गे बाहुरीम डा बेन्यामीन आ थर डा गेरा आ तौ शिमेइ कली योत्रकी पावो। मेकोमी गो महा-नाइम लडा नाकत आं कली थाम्पा सराप पाइकती। नोले मेको यर्दन खोलाम आं कली ग्युम्थ जाकत। मिनू मेना गो मेको कली 'मसाइकनन' दे परमप्रभु यावे आ नें थिशा कसम जाता। २सामुएल १६:५; २सामुएल १९:१७-२४

9 तन्न मुल गे मेको कली दोस मताइब ममिन्तो। गे जोकब तुइकब मुर बाकनेवे। मोपतीके मेको कली मार पचा माल्बा, मेको तुइकनेवे। मेको आ बोइशशो चां हुश सुन्दा बेकशो मुर आन बाकतीकेम सोइकतो" देमाकत।

10 मिनू दाऊद बेकमाकत। मिनू दाऊद आ सहरम थिम्चा पुंडसे बाकत।

11 दाऊदम इस्राएलम ४० बर्स सम्म सासन पवा बाकत। मेकोम ७ बर्स हेब्रोनमी नु ३३ बर्स यरूसलेमम सासन पवा बाकत। २सामुएल ५:४-५; १इतिहास २९:२७

12 मिनू सोलोमन आ आफ दाऊद आ पा डा पिप दुम्माकत। मिनू मेको आ राज्य बोल्यो दुम्माकत।

सोलोमनमी अदोनीयाह साइशशो

13 मिनू हग्गीथ आ तौ अदोनीयाह, सोलोमन आ ममा बाथशेबा बाकतीक जाकमाकत। मिनू बाथशेबाम मेको कली "मार गे रिम्शो मिम्शा जाकडे" दे हिल्लो पवा बाकत। मिनू मेकोमी "ओ रिम्शो पान जाकती" देमाकत।

14 मिनू मेकोम लेंशा "गो इन कली लोत्र का देनुड" देमाकत। मिनू मेकोम "दुम्ब देंनो" देमाकत।

15 मिनू अदोनीयाहम "राज्य आं के बाकत। गे मेको तुइकनीनी। मिनू इस्राएली नेल्लेम आं कली पिप दुम्ब, दे मिम्शो बाकतेकम। तन्न मारेइ मारेइ दूली दुम्त। मुल राज्य आं लोक्ब के दुम्त। मारदे हना परमप्रभु यावे आ दाकशो मेकोन बाकत।

16 मुल गो इन कली लोत्र का पाइनुड। आं पशो लोत्र मदुम्ब मदेनीन" देमाकत। मिनू मेकोमी "मेको मार बाकबा? देंनो" देमाकत।

17 मिनू अदोनीयाहम "गो शुनेम सहर डा अबीशाग कली ग्युबे पचा तडल, दे पिप सोलोमन कली पुनीन। मेकोमी इन कली मदुम्ब मदेन" देमाकत। १राजा १:३; २सामुएल ३:७

18 मिनू बाथशेबाम "मेको रिम्शो बाकब। गो इ पर्वम पिप नु लोत्र पाइनुड" देमाकत।

19 मोपतीके बाधशेबा अदोनीयाह आ पर्वम लोत्र पथ पिप सोलोमन आ बाक्तीक लमाक्त। मिनु पिप मेको कली मान पथ बोक्माक्त। मिनु आ ममा आ डोंइती बाप्शा मान पा, आ नित्तीकेम निस्से बाक्त। पिप सोलोमनम आ ममा कली नित्या कली नित्तीक का चाक्पदा बाक्त। मिनु मेको पिप आ ग्युरा गे निस्से बाक्त।

20 मिनु मेकोमी “गो गे नु आइक्च लोत्र का पचा माल्नुड। मेको आं लोत्र मटुम्ब मदेनो” देमाक्त। मिनु पिपमी आ ममा कली “मार देंनीनी? आं ममा गो इन लोत्र मटुम्ब मदेनुड” देमाक्त।

21 मिनु मेकोमी “इ लोकब अदोनीयाह नु शुनेम सहर डा अबीशाग आस कली ग्युंवे पाइक्सी” देमाक्त।

22 मिनु पिप सोलोमनम आ ममा कली “गे मारदे शुनेम सहर डा अबीशाग नु अदोनीयाह आस कली ग्युंवे पाइक्चा कली पुंडनी? गे मेको कली राज्य पुंडतीनी हना यो टुम्ब। मारदे हना मेको आं टेयब लोकब बाक्ब। चढ़ेब अबीयाथार नु सेरूयाह आ तौ योआब आस पर्वम यो पुनीन” देमाक्त। १ राजा १:६-७

23 मिनु पिप सोलोमनम परमप्रभु यावे आ नें थिशा “एको आ पर्वम अदोनीयाह साइक्चा मपुंडसाक्व हना, परमप्रभुम आं कली थम मरिम्शो सजाइ गेयील” दे कसम जवा बाक्त।

24 मनु “मुल आं कली आं आफ दाऊद आ राज्यम वोइक्ब नु आ पाइनुड देशो लोत्र खाप्शा, आं थर आन कली सेल्ब परमप्रभु यावे ब्रोंइशा बाक्शो खोदेशो पा, गो कसम जशा देंनुड, अदोनीयाह मुलाक्तीन साइक्चा पुंडसीब” देमाक्त।

25 मेको नोले पिप सोलोमनम येहो-यादा आ तौ बेनायाह कली “अदोनीयाह कली तुप्शा सतो” दे हुकुम गेवा बाक्त। मिनु मेकोम अदोनीयाह कली तुप्शा सदा बाक्त।

26 मिनु पिपम चढ़ेब अबीयाथार कली “अनाथोथम बाक्शो इ खिम लावो। गे साइक्चा पुंडसीब बाक्नेवे। मो हना यो मुल गो इ कली मसाइक्नन। मारदे हना गे आं आफ दाऊद आ डोंइती परमप्रभु यावे आ सन्दोस कुरब बाक्ते। मिनु गे मेको आ श्येत नेल्लेम बाक्शो बाक्ते” देमाक्त। १ राजा १:७; १ सामुएल २२:२०-२३; १ सामुएल ३०:७; २ सामुएल १५:२४

27 मोपतीके सोलोमनम अबीयाथार कली परमप्रभु यावे कली चढ़ेतीक गेय रे ग्युंडदा बाक्त। मोपा परमप्रभु यावेमी शिलोम एली आ खिम आ पर्वम देशो लोत्र गाम्माक्त। १ सामुएल २:३१-३२

28 मिनु मेको लोत्र नेल्ल योआबम नेना बाक्त। मेको अब्बालोम गे ममाइ, तन्न अदोनीयाह गे बाक्शो बाक्माक्त। मिनु योआब प्रोक्शा परमप्रभु यावे आ ताम्बुम लमाक्त। मिनु चढ़ेतीक आ ग्रोत्र ग्याइश्शा बाक्माक्त। १ राजा १:५१

29 मिनु पिप सोलोमनम “योआब प्रोक्शा लशा, परमप्रभु यावे आ ताम्बुम चढ़ेतीक आ नेक्था जाक्दीश्शा बाक्शो बाक्ब” देशो लोत्र नेना बाक्त। मिनु मेकोम येहो-यादा आ तौ बेनायाह कली “योआब कली तुप्शा सतो” दे अरेशा सोइक्ता बाक्त। प्रस्थान २१:१२-१४

30 मोपतीके बेनायाह परमप्रभु यावे आ ताम्बुम ओत्रशा, योआब कली “पिपम लाइगा गूडो देशो बाक्ब” दे मदा बाक्त। तन्न मेकोम “गो एक उड बेक्नुड” देमाक्त। मिनु बेनायाहमी लशा पिप कली योआब आ लोत्र नेंपदा बाक्त।

31 मिनु पिपमी बेनायाह कली “मेको आ देशो खोदेशो पावो। मेको कली साइश्शा थिमीन। मोपा योआब आ मोशा हुश खाक्व पोक्शो दोस गो नु आं आफ आ खिम रे क्याम्दीन।

32 मिनु परमप्रभु यावेमी मेको आ हुश खाक्व पोक्शो मेको आ पियामीन मोइक्ब। मारदे हना मेकोमी आं आफ दाऊद आ मनुइक्थु आ क्येडा ठीक पाइब इस्त्राएल डा लडाइ पाइब आन टेयब मुर निक्शी नेर आ तौ आब्नेर नु येथेर आ तौ यहूदा डा टेयब मुर आमासा आस कली साइश्शा बाक्त। १ राजा २:५

33 मेको आस हुश आ दोस गेना हना यो योआब नु मेको आ तौ चच आन पिया तार लील। तन्न दाऊद नु मेको आ तौ चच आन तार, मेको आन खिम नु आन राज्यम परमप्रभु यावे आ डोंइती गेना हना यो थुं नाइश्शा बाक्तीक दुम्ल” देमाक्त।

34 मोपतीके येहो-यादा आ तौ बेनायाह इर लमाक्त। मिनु योआब कली तुप्शा सदा बाक्त। मिनु मेको कली गोरशो रागी, आ खिम आ नेक्था आ रूम थिम्मे बाक्त।

35 मिनु पिपमी येहो-यादा आ तौ बेनायाह कली योआब आ पा डा लडाइ पाइब आन टेयब मुर सेला बाक्त। मिनु चढ़ेब अबीयाथार आ पा डा सादोक कली चढ़ेब सेला बाक्त। १ राजा ४:४

36 मेको नोले पिपमी शिमेइ कली ब्रथ सोइश्शा, मेको कली “यरूसलेममी खिम का सेल्शा, मेक उड बाक्को। मिनु सहर प्रोंइशा तेइ मलावो।

37 सहर प्रोंइशा, किद्रोन खोल्ला शोक्साक्वे हना, गे थमा पा साइक्चा पुंडसीनेवे। मो पाप्तीवी हना, इ हुश आ दोस इ पियामीन मोंइसीब” दे मदा बाक्त।

38 मिनु शिमेइम पिप कली “गे मार देंनी मेको रिम्शो बाक्ब। आं प्रभु पिपम आ वाइल कली देशो खोदेशो पा गो पाइनुड” देमाक्त। मोपतीके शुश नाक्त सम्म शिमेइ यरूसलेममीन बाक्माक्त।

39 तन्न बर्स सां नोले मेको आ वाइल निक्शी प्रोक्शा, गाथ डा पिप माकाह आ तौ अकीश आ बाक्तीक लसा बाक्त। मिनु शिमेइम “इ वाइल निक्शी गाथ सहरम बाक्ताक्स” देशो लोत्र नेना बाक्त।

40 मिनु शिमेइ रीब पा आ गधाम लगम पाइश्शा, आ वाइल आस कली माल्थ गाथ डा अकीश आ बाक्तीक लमाक्त। मोपा शिमेइमी गाथ रे आ वाइल निक्शी आस कली चाक्सी बाक्त।

41 मिनु पिप सोलोमन कली शिमेइ यरूसलेम रे गाथ जाक्दीश्शा लेश्शा जाक्शो लोत्र नेंपदमे बाक्त।

42 मिनु पिपमी शिमेइ कली ब्रथ सोइक्ता बाक्त। मिनु मेको कली “मार, गो इ कली परमप्रभु यावे आ नें थिशा कसम जपाइश्शो मनडा डा? गे अर्को रागी लचा कली एको सहर रे गाक्ते हना, साइक्चा पुंडसीनेवे, देशो मनडा? मिनु मेना गे आं कली “इन देशो लोत्र रिम्शो बाक्ब देशो मनवे?” मेना गे “इन देशो टीनुड” देशो नवे।

- 43 मिनू मारदे गे परमप्रभु यावे आ नें थिशा कसम जशो नु आं देंशो लोत्र मटिवी? दे हिल्लो पवा बाक्त।
- 44 मिनू पिपम शिमेइ कली “आं आफ दाऊद आ पर्वम पशो मरिम्शो नेल्ल गे तुइश्शो बाक्नेवे। मुल परमप्रभु यावेमी मेको मरिम्शो पशो आ क्येकक इ पियामीन मोइक्ब। १ राजा २:८
- 45 तन्न पिप सोलोमन आसीक ताइब। मिनू परमप्रभु यावे आ डोंइती दाऊद आ राज्य गेना हना यो लीब” देंमाक्त।
- 46 मिनू पिपमी येहो-यादा आ तौ बेनायाह कली हुकुम गेवा बाक्त। मिनू मेको लशा, शिमेइ कली तुप्शा सदा बाक्त। मिनू मेको बेक्माक्त। मोपा पिप सोलोमन आ राज्य बोल्यो दुम्माक्त।

### 3

सोलोमनम तुइक्तीक थुं पुंइशो

२इतिहास १:१-१२

- 1 सोलोमन आ ग्युबेम पतीके इजीप्ट डा पिप फाराओ आ खिं डा मुर दुम्माक्त। मिनू सोलोमनम फाराओ आ तमी नु ग्युबे पवा बाक्त। मिनू मेको कली पिप आ खिं, परमप्रभु यावे आ खिं नु यरूसलेम डा गारो सेल्ले मथुमा सम्म दाऊद आ सहरम चाक्शा वोदा बाक्त। ब्यवस्था २३:८; १ राजा ११:१-२
- 2 मेना सम्म मुरपुकीम डांटा मेर चढ़ेबाक्मा बाक्त। मारदे हना परमप्रभु यावे आ नें कली मान पा तेकोइ खिं मसेल्यो बाक्माक्त।
- 3 सोलोमनम चहिं परमप्रभु यावे कली दाक्शा, मेको आ लांम गाक्शा आ आफ दाऊद आ पशो खोदेंशो पवा बाक्त। तन्न मेकोमी डांटा डा थानम चढ़ेशा, थूप चोइबाक्माक्त।
- 4 काले पिप सोलोमन गिबोन सहरम मार मार चढ़ेथ लमाक्त। मारदे हना मेको डांटा नेल्ल क्येडा ठेयब चढ़ेतीक बाक्माक्त। मिनू मेको चढ़ेतीकेम सोलोमनम हजार का मार मार चोशा चढ़ेतीक चढ़ेवा बाक्त। १इतिहास २१:२९; १ राजा ९:२
- 5 मिनू मेको नाकदो परमप्रभु यावे गिबोनम सोलोमन आ डोमुम जाक्शा “गे मार पुंइनेवे, मेको गेनन” देंमाक्त।
- 6 मिनू सोलोमनम “गे इन गेय पाइब, आं आफ दाऊद कली इन ठेयब गेना हना यो दाक्तीक कोइताक्नी। मारदे हना मेको इन कली मप्रोंइथु, ठीक पाइब नु रिम्शो थुं पाइश्शो इन नोले खोइक्ब मुर बाक्त। मिनू गे मेको कली इन ठेयब नु गेना हना यो दाक्तीके कोइशो बाक्तीनी। मिनू मुलाक्ती मेको आ नोले आ नित्तीकेम वोइक्चा कली मेको कली तौ का गेतीनी। १ राजा १:४८
- 7 मिनू मुल परमप्रभु यावे, आं परमप्रभु गे इन गेय पाइब, आं कली, आं आफ दाऊद आ पा डा पिप सेल्लतीनी। मो हना यो गो आइक्च आल का ला बाक्नुडा। मिनू गो दोपा लाडगा लचा माल्नुडा, दोपा जाक्चा माल्नुडा, मेको मतुइक्नुडा।
- 8 मुल गो इन गेय पाइब इन योत्रशो मुर इस्राएली आन दातेम बाक्शो बाक्नुडा। मेको शुश नु हिक्ने मचाप्चा डा बाक्नीम। १ राजा ४:२०
- 9 मोपतीके इन गेय पाइब, आं कली इन मुर आन कली ठीक पा सासन पचा कली रुप्तीक थुं गेयीनी। मिनू गो रिम्शो नु मरिम्शो तिल्लस जोक्नुडा। मो मदुम्त हना, एको इश्का इन मुर आन कली सुम सासन पने चाप्नीमी डा” देंमाक्त।
- 10 मिनू परमप्रभु यावे सोलोमनम मेको लोत्र पुंइशो तशा, ग्येरसे बाक्त।
- 11 मोपतीके परमप्रभुमी मेको कली “गेमी एको लोत्र पुंइतीके, तन्न आंम इ पर्वम शुश ब्रोंइतीक, शोंप चेम्तीके नु इ जोरी सत्रु आन कली साइक्तीक मपुंइतीके, मार ठीक बाक्म, दे रुप्तीक थुं पुंइतीके,
- 12 मुल गो इ पुंइशो गेनुडा। गो थमा पा इ कली जोक्तीक तुइक्तीक थुं नु रुप्तीक थुं गेनन। डोंइती इ खोदेंशो अर्को सुइ मबाक्म। मिनू नोले यो इ खोदेंशो सुइ मदुम्नीम। ब्यवस्था २६:१४
- 13 मेको प्रोंइशा यो, गो अर्को इ मपुंइशो यो गेनन। गे मबेक्डे सम्म इ कली शोंप नु मान ततीके यो गेनन। तेकोइ पिपपुकी गे नु उइक्थ मदुम्नीम। मती ६:३३
- 14 मिनू गे इ आफ दाऊदम खोदेंशो पा, आं लांम गाक्ते हना, आं फुल्लुम मुशा ब्रेक्शो लोत्र नु आं शेंतीके टिप्तीवी हना, गो इ कली शुश ब्रोंइचा गेनन” देंमाक्त।
- 15 मिनू नोले सोलोमन सेंसे बाक्त। मिनू एको दा डोमु कका बाक्त, दे तुइक्ता बाक्त। मिनू मेको नोले यरूसलेम लेम्माक्त। मिनू परमप्रभु यावे आ कबल पशो सन्दोस आ नेक्था राम्माक्त। मिनू मेकेर चोशा चढ़ेतीक नु दुशा बाक्तीक आ पर्वम चढ़ेतीके चढ़ेवा बाक्त। मिनू मेकोमी आ गेय पाइब नेल्ल आन कली भोज का गेमी बाक्त।
- सोलोमन आ निसाफ
- 16 मिनू नोले तेल्लेम मीश मुर निक्शी पिप आ डोंइती जाक्शा, राप्सा बाक्त।
- 17 मिनू मेको आस दाते डा काम “आं प्रभु, एको मीश मुर नु गो खिं कामीन बाक्नस्कु। मिनू गो एको नु बाक्डानु, आल का थीता।
- 18 मिनू गो आल थिडा आ नाक्त सां नोले एकोमी यो आल का थिप्नु। मेकेर गो निक्शी ला बाक्शो नस्कु। मेको खिंम आंस निक्शी डा लाक्शा, अर्को सुइ मबाक्म।
- 19 मिनू नाकदो एको मीश मुरुम आ तौ कली चिप्शा सदा बाक्त।
- 20 मिनू नाकदो उइक्थ दुम्मेनु, गो, इन वाइलीम निन्द्रा पडा ना एको बोक्शा जाक्शा, आं तौ लदा बाक्त। मिनू आ बेक्शो तौ चहिं आं थुकुम वोदा बाक्त।
- 21 मिनू आ दीसा सुनी गो बोक्शा ‘आल दूध तुइदु’ देंडानु दा, आल बेक्शो बाक्त। तन्न गो मेको कली सुनी रिम्शो पा शिरशा कोत्रडुनु, मेको आं थिशो तौ ममाइ बाक्त” देंमाक्त।

22 मिनु मेको अर्को मीश मुरुम “ममाइ सेस आल आं तौ बाकब। बेकशो इ के बाकब” देमाक्त। तन्न डोंइती डा मीश मुरुम “ममाइ बेकशो तौ इ के बाकब। सेस चहिं आं तौ बाकब” देमाक्त। मोपा मेको निक्शी पिप आ डोंइती जिम्से बाक्त।

23 मिनु पिपम “कामी ‘सेस तौ आं के बाकब। बेकशो चहिं इ के बाकब’ देत। मिनु अर्कोम ‘ममाइ बेकशो तौ इ के बाकब। सेस चहिं आं तौ बाकब’ देत” देमाक्त।

24 मिनु पिपम “आं कली तरवार का चाक्शा गेयीनी” देमाक्त। मिनु मेकोपुकीम पिप कली तरवार का चाक्शा गेमे बाक्त।

25 मिनु पिपम “मेको सेस आल कली उइक्थ पा क्योरीन। मिनु उइक्थ भाग का, का कली नु अर्को उइक्थ भाग का अर्को कली गेने” देमाक्त।

26 मिनु मेको सेस आल आ ममाम आ तौ कली शिशी पा पिप कली “ए प्रभु, एको सेस आल एकोमीन लदल। एको आल कली मसतीन” देमाक्त। मिनु अर्कोम चहिं “एको आल गे यो लाइक्चा मताइनेवे, गो यो लाइक्चा मताइनुड। एको कली उइक्थ पा क्योरीन” देमाक्त। यसैया ४९:१५

27 मिनु पिपम आ निसाफ डा लोत्र नैपाइश्शा “एको सेस आल डोंइती डा मीश मुरु कली गेने। एको आल कली मसतीन। आल आ ममा एकोन बाकब” देमाक्त।

28 मिनु पिप आ निसाफ नैशा, इस्राएली नेल्ल आन थुंमी रिम्शो पशो तुइश्शा, हिंमा बाक्त। मारदे हना मेकोपुकीम ठीक पा निसाफ पचा कली मेको आ थुंम परमप्रभु आ रुपाइक्तीक थुं बाक्त, दे तुइक्तमे बाक्त।

## 4

सोलोमन आ गेय पाइबपुकी

1 मोपा पिप सोलोमनम इस्राएल नेल्लेम सासन पवा बाक्त।

2 मेको आ टेयब गेय पाइब सु सु बाक्मा बाक्त देशा हना, सादोक आ तौ अजारयाह चढेब बाक्माक्त।

3 शीशा आ तौ एली-होरेफ नु अहीयाह ब्रेक्ब बाक्सा बाक्त। अहीलुद आ तौ येहो-शाफात हिक्शा ब्रेक्शा वोइक्ब मुरु बाक्माक्त।

4 येहो-यादा आ तौ बेनायाह लडाइ पाइब आन टेयब मुरु बाक्माक्त। सादोक नु अबीयाथार चढेब बाक्सा बाक्त। १राजा २:३४-३५; २सामुएल २३:२०

5 नाथान आ तौ अजारयाह सासन पाइब आन टेयब मुरु बाक्माक्त। नाथान आ तौ जाबुद चढेब नु पिप आ वारच बाक्माक्त।

6 अहीशार पिप आ खिं डा मारेइ मारेइ कोत्रब मुरु बाक्माक्त। अब्दा आ तौ अदोनीराम गेय पाइब आन कली कोत्रब बाक्माक्त। १राजा ५:२८

7 सोलोमनम इस्राएल नेल्लेम १२ जना सासन पाइब वोइश्शो बाक्माक्त। मेकोपुकीम पिप कली नु पिप आ खिं डा मुरु आन कली जचा थोत्रक गारपाइक्बाक्मा बाक्त। मेको नेल्लेमी बर्सम महिना का का कली जचा थोत्रक चाक्तीक गेय पाइक्बाक्मा बाक्त। १सामुएल ८:११-१८

8 मेको आन नें मार मार बाक्मा बाक्त देशा हना, बेन-हुर, एफ्राइम पहाड डा टेयब मुरु बाक्माक्त। बेन-हुर देशो हुर आ तौ बाक्ब।

9 बेन-देकेर, माकाज, शा-आल्बीम, बेथ-शेमेश नु एलोन-बेथ-हानान सहर डा टेयब मुरु बाक्माक्त।

10 बेन-हेसेद, अरुब्बीथ डा टेयब मुरु बाक्माक्त। मेको आ जिम्माम सोकोह नु हेफेर डा रागी नेल्ल बाक्मा बाक्त।

11 बेन-अबीनादाब नाफाथ-डोर डा टेयब मुरु बाक्माक्त। बेन-अबीनादाबम सोलोमन आ तमी थाफाथ कली ग्युबे पशो बाक्माक्त। १सामुएल १६:८

12 अहीलुद आ तौ बाना तानाक सहर, मेगीददो नु बेथ-शेआन डा टेयब मुरु बाक्माक्त। बेथ-शेआन चारेथन आ नेक्था नु येजेल आ दी बाक्ब। मेको बेथ-शेआन रे आबेल-मेहोलाह योकमाम सहर आ अर्को पटटी सम्म डा टेयब मुरु बाक्माक्त।

13 बेन-गेबेर रामोथ-गिलाद डा टेयब मुरु बाक्माक्त। मेको आ जिम्माम मनस्से आ तौ याइर आ गिलादम बाक्शो गाउंपुकी बाक्मा बाक्त। मेको के बाशान रागी डा अरगोब गारो हिरशो ६० ओटा टेयब सहर यो बाक्मा बाक्त। मेको गारो डा लाप्चोम कांसा के आगलो बाक्मा बाक्त। गन्ती ३२:४१

14 इददो आ तौ अहीनादाब महा-नाइम डा टेयब मुरु बाक्माक्त।

15 अहीमाज नाप्ताली डा टेयब मुरु बाक्माक्त। मेकोम सोलोमन आ तमी बासेमाथ नु ग्युबे पशो बाक्माक्त।

16 हुशाड आ तौ बाना आशेर नु बेआलोथ डा मुरु आन टेयब मुरु बाक्माक्त।

17 पारुआह आ तौ येहो-शाफात इस्साकार डा टेयब मुरु बाक्माक्त।

18 एला आ तौ शिमैड बेन्यामीन रागी डा टेयब मुरु बाक्माक्त।

19 ऊरी आ तौ गेबेर गिलाद डा टेयब मुरु बाक्माक्त। मेको एमोरी आन पिप सीहोन नु बाशान रागी डा पिप ओग आस रागी डा यो टेयब मुरु बाक्माक्त। मिनु यहूदा रागी कली कोत्रब अर्को मुरु मबाक्मा बाक्त।

सोलोमन आ राज्य

20 यहूदा नु इस्राएल डा मुरुपुकी समन्द्र डा बाल्वा खोदेशो पा शुश बाक्मा बाक्त। मेकोपुकी जशा तूशा ग्येरशा बाक्बाक्मा बाक्त। १राजा ३:८; उत्पत्ती १३:१६



21 सोलोमनम युफ्रेटीस खोला रे पलिस्ती आन रागी इजीप्त डा सांद सम्म डा राज्यम सासन पशो बाक्माक्त। मिनु मेको रागीम सोलोमन कली तिरो थाप्बाक्मा बाक्त। मिनु मेकोपुकी सोलोमन ब्रोंडम सम्म मेको आ गेय पाइब दुम्शा बाक्मा बाक्त। उत्पती १५:१८

22 सोलोमन आ खिंमी काबु डा जचा थोत्रक ३० कोर रिम्शो फस नु ६० कोर अरु फस बाक्मा बाक्त। कोर का २२० लिटर डा ठेयब पुक्तीके बाक्ब।

23 मिनु १० ओटा दोम्शो ब्यफ, २० ओटा खर्कम योत्रशो ब्यफ नु सहे का क्यारश भेडा बाक्मा बाक्त। मेको प्रोंडशा किशश, रोकशो नु दोम्शो हांसपुकी यो बाक्मा बाक्त।

24 मारदे हना मेकोम युफ्रेटीस खोला आ पच्छिम गे डा रागी तिफसाह रे गाजा सम्म युफ्रेटीस खोला आ पच्छिम गे बाक्ब पिप नेल्ल आन कली सासन पशो बाक्माक्त। मेको आ राज्य नेल्ल लडाइ मदुम्शु थुं नाइशशा बाक्शो बाक्मा बाक्त।

25 सोलोमन बाक्म सम्म दान रे बेयर-शेबा सम्म यहूदा नु इस्राएल रिम्शो दुम्शा बाक्सा बाक्त। मुर नेल्ल आंम आंम अडगुर नु फोत्रशी जशा बाक्मा बाक्त। लेवी २५:१८

26 सोलोमन के ४ हजार बग्गी कीब शारा आन कली वोइक्तीक खिं बाक्माक्त। मेको के १२ हजार शारा डोइक्ब बाक्मा बाक्त। २इतिहास ९:२५

27 मिनु मेको १२ जना सासन पाइबपुकीमी महिना महिनाम पाल्पालो पा सोलोमन नु मेको नु बाक्शा जाइब आन कली जचा थोत्रक चाक्बाक्मा बाक्त। मोपा चाक्मेनु, मेकोपुकीमी तेकोइ थोत्रक मख्राइक्थु चाक्बाक्मा बाक्त।

28 मेकोपुकीमी शारा नु बग्गी कीब शारा आन कली यो क्योत्रज नु नल चाक्बाक्मा बाक्त। नेल्लेम आन पचा डा गेय पाइबाक्मा बाक्त।

सोलोमन आ जोक्तीक तुइक्तीक

29 परमप्रभुमी सोलोमन कली शुश जोक्तीक तुइक्तीक थुं गेवा बाक्त। मेको आ रुप्तीके समुन्द्र डा बाल्वा खोदेशो पा शुश बाक्माक्त।

30 पूर्व डा मुर नेल्ल नु इजीप्त डा मुर नेल्ले आन दातेमी सोलोमन के खोदेशो जोक्तीक तुइक्तीक थुं सुइ के मबाक्मा बाक्त।

31 मिनु मेको अरु नेल्ल आन क्येडा जोक्ब तुइक्ब दुम्माक्त। मेको एज्राह आ खिं डा एथान नु माहोल आ तौ हेमान, कल्कोल नु दारदा आन क्येडा यो शुश जोक्ब तुइक्ब बाक्माक्त। मिनु मोपा आ जोक्तीके तुइक्तीके रागी रागी डा मुर नेल्ल आन दातेमी ब्रमाक्त।

32 मेकोमी हजार सां अर्ती ब्रेक्ता बाक्त। मिनु हजार का ५ ओटा कुम्सो सेला बाक्त। उपदेसक १२:९

33 मेकोमी रवा आन पर्वम लेबानोन डा लाइशशो रवा रे लाइशशा, गारोम वाब हिस्सोप माइशशो सुप्तीक बोट सम्म आन पर्वम ब्रेक्ता बाक्त। मिनु मेकोमी चिक्ब, जन्तु, खपीम ग्रेशा गाक्ब जन्तु नु डांड नेल्ल आन पर्वम यो ब्रेक्ता बाक्त।

34 रागी डा शुश मुर सोलोमन आ जोक्तीक तुइक्ती नेंचा तुइक्चा कली जाक्बाक्मा बाक्त। रागी डा पिपपुकीम सोलोमन आ पर्वम नेंशा, मेको आ लोत्र नेंचा कली मुर आन कली सोइक्बाक्मा बाक्त।

## 5

परमप्रभु आ खिं सेल्चा चिक्शो

२इतिहास २:-

1 टायर डा पिप हीराममी सोलोमन आ आफ आ पा डा पिप दुम्शो बाक्ब देशो लोत्र नेना बाक्त। मिनु मेकोमी आ गेय पाइब आन कली सोलोमन आ बाक्तीक सोइक्ता बाक्त। मारदे हना मेको गेना हना यो दाऊद आ वारच दुम्शा बाक्शो बाक्माक्त। २सामुएल ५:११

2 मिनु सोलोमनम हीराम कली लोत्र सोइक्ता बाक्त।

3 मार लोत्र सोइक्ता बाक्त देशा हना “परमप्रभु यावे, आं आफ दाऊदम आ परमप्रभु आ नें कली मान पा खिं का सेल्चा थुं पशा यो सेल्ले मचब। मारदे हना मेको आ एर ओंथ नेल्ल डा जोरी सत्रु नु लडाइ दुम्तीके नु परमप्रभु यावेमी मग्रापदा सम्म मोदेशो दुम्शो बाक्त। गे मेको लोत्र नेल्ल तुइक्नीनी।

4 तन्न मुल परमप्रभु यावे, आं परमप्रभुमी आं कली सुइ नु लडाइ मपपाइक्थु, थुं नाइशशा बाक्चा गेती। आं कली लडाइ तोशा श्येत गेब सुइ मबाक्नीम।

5 मोपतीके मुल परमप्रभु यावेमी आं आफ दाऊद कली देशो खोदेशो पा, गो परमप्रभु यावे, आं परमप्रभु आ नें कली मान पा, खिं का सेलु देंती। परमप्रभु यावेमी आं आफ दाऊद कली ‘गे इ पा डा पिप दुम्ब इ तौमी आं कली मान पा खिं का सेल्ब’ देशो बाक्त। २सामुएल ७:१३

6 मोपतीके गे आं कली लेबानोन रे लाइशशो रवा क्योरशा चाक्चा हुकुम गेयीनी। आं गेय पाइबपुकी, इन गेय पाइबपुकी नु गारशा गेय पाइनीम। मिनु गे इन गेय पाइब आन कली दोशो गाल्च गेचा देंनीनी, गो मेको गेनुडमी। सीदोनी खोदेशो पा शी क्योरस जोक्ब एक आंड दातेमी सुइ मबाक्नीम” दे लोत्र कुरब मुर सोइक्ता बाक्त।

7 मिनु हीरामम सोलोमन आ लोत्र नेंशा थाप्पा ग्येरसीशा “परमप्रभु यावे ठेयब बाक्ब। मारदे हना मेकोम दाऊद कली इश्का मुर आन कली सासन पाइब जोक्ब तुइक्ब तौ का गेप्तु” देंमाक्त। १राजा १०:९

8 मिनु हीरामम सोलोमन कली “गो इन सोइशशो लोत्र नेता। इन माल्शो नेल्ल गेनुड। लेबानोन डा लाइशशो रवा नु अरु रवा आन शी खाप्शा गेनुड।

9 आं गेय पाइबपुकीम मेको रवा लेबानोन रे समुन्द्र सम्म चाकनीम। मिनु गो मेको शी फ्रेपाइशशा, इन देंतीक सम्म समुन्द्रम योल्पाइशशा सोइक्पाइक्नुडमी। गो मेको आन कली इन देंतीकेम प्राक्पाइक्नुडमी। मिनु गे मेको लाइक्ने चापनीनी। मिनु गे आं खिं कली जचा थोव्रक सोइशशा आं मिशो खपीन” दे लोव्र कुरब मुर सोइक्ता बाक्त।

10 मोपा हीरामम सोलोमन कली मालशो लेबानोन डा लाइशशो रवा आ शी नु अरु शी नेल्ले सोइक्ता बाक्त।

11 मिनु सोलोमनम चहिं मेको आ पा डा हीराम आ खिं कली २० हजार कोर चेरब नु २० कोर रिशो तेल सोइक्ता बाक्त। मोपा सोलोमनम बर्स बर्सम मेको सोइक्ता बाक्त। कोर का २२० लिटर बाक्ब। १ राजा ५:२

12 मिनु परमप्रभु यावेमी कबल पा देशो खोदेशो पा सोलोमन कली जोक्तीक तुइक्तीक थुं गेवा बाक्त। मिनु हीराम नु सोलोमन आस दातेमी दुशा बाक्तीक दुम्माक्त। मिनु मेको निम्फा गारशा बाक्स, दे सल्ला पमुसा बाक्त।

13 मिनु पिप सोलोमनम इस्राएल नेल्ल रे मोशा गेय पाइब ३० हजार मुर आन कली खुप्तीमी बाक्त।

14 मिनु मेकोमी मेको आन कली महिना महिनाम १०, १० हजार पा लेबानोनम सोइक्तीमी बाक्त। मोपा मुरपुकी महिना का लेबानोनम नु महिना निक्शी आन खिंम बाक्मा बाक्त। मेको गेय पाइब आन कली कोव्रब अदोनीराम बाक्माक्त। १ राजा ४:६

15 सोलोमन के ७० हजार कुरब नु ८० हजार फुल्लु खोइक्ब मुर पहाडम बाक्मा बाक्त।

16 सोलोमन आ गेय पाइब आन कली कोव्रब ३३ सहे ठेयब मुर बाक्मा बाक्त।

17 मिनु पिप आ अरेशो खोदेशो पा, परमप्रभु यावे आ खिंम जग वोइक्चा कली रिशो पा फुल्लु खोइशशा गुंइदमे बाक्त।

18 मोपा सोलोमन नु हीराम आस मुरपुकी नु गेवाल डा मुरपुकीम खिं सेल्चा कली फुल्लु खोइशशा शी ठीक सेल्मे बाक्त। यहोसु १३:५; इजीकीएल २७:९

## 6

सोलोमनम परमप्रभु आ खिं सेल्शो

२इतिहास ३:१-१४

1 इस्राएली इजीप्ट रे यूशा जाक्शो ४ सहे ८० बर्स दुशो बाक्माक्त। मिनु सोलोमनम इस्राएली आन कली हुकुम पशो ४ बर्स नु महिना निक्शी डा जिव महिनाम परमप्रभु यावे आ खिं सेल्चा गोवा बाक्त। मती १:१७

2 सोलोमनमी परमप्रभु यावे कली सेल्शो खिं ६० कुबीत लाइशशो, २० कुबीत ब्रेमशो नु ३० कुबीत ग्येथ लाइशशो बाक्माक्त। कुबीत का ०.५ मिटर खोदेशो बाक्ब।

3 मेको परमप्रभु यावे आ खिं आ डोंइती डा पिंडी आ ब्रेमशो नु आ लाइशशो २० कुबीत बाक्माक्त। मेको खिं आ डोंइती गे १० कुबीत लाइशशो यूशो बाक्माक्त। कुबीत का ०.५ मिटर खोदेशो बाक्ब। १ राजा ७:१५-२१

4 मेकोमी खिं आ दी गे गारोम रोक्तीक पाइशशो झेलपुकी सेल्पदा बाक्त।

5 नोले मेकेर चोव्रखो नु नेल्ल क्येडा चोव्रखो बाक्शो खिं आ एर ओथ डा गारो नेल्लेम बोइशशो कोठापुकी सेल्पदा बाक्त।

6 मिनु नेल्ल क्येडा आगा डा तला ५ कुबीत ब्रेमशो बाक्माक्त। मिनु दाते डा तला ६ कुबीत ब्रेमशो नु नेल्ल क्येडा आ तार डा तला ७ कुबीत ब्रेमशो बाक्माक्त। मेकोमी ठेयब गारो आ एर ओथ नेल्ले लाडगा गे पाइद्रा वोइक्चा कली गारो पौव्रपदा बाक्त। मोपा पाइद्रा खिं डा गारो मओव्रचा डा पा सेल्पदा बाक्त।

7 खिं सेल्मेनु, फुल्लु खानीमीन खोदमे बाक्त। मेको खिं सेल्मेनु घन, खा नु मारेड फलाम के या आन रेयके मनेसे बाक्त।

8 नेल्ल क्येडा आगा डा तला डा ओव्रतीक दक्खिन गे बाक्माक्त। मिनु मेकेर रे दाते डा नु आ तार डा तला लचा कली हिरशो थेंकापुकी बाक्मा बाक्त।

9 मोपा मेकोम लेबानोन डा लाइशशो रवा के पाइद्रा नु फलेक साप्शा खिं सेल्ने थुम्पदा बाक्त।

10 मेकोम खिं आ एर ओथ नेल्ल आइक्च आइक्च कोठा सेल्पदा बाक्त। मेको कोठा नेल्ल ५, ५ कुबीत लाइशशो बाक्मा बाक्त। मिनु मेको कोठा नेल्ल लेबानोन डा लाइशशो रवा आ शीम खिं नु बोइशशो बाक्मा बाक्त।

11 मिनु परमप्रभु यावेम सोलोमन कली लोव्र पवा बाक्त।

12 मार लोव्र पवा बाक्त देशा हना “एको इ सेल्शो खिं आ पर्बम लोव्र पाइनुड। गे आं फुल्लुम मुशा ब्रेक्शो लोव्र पाप्तीवी हना, आं देशो पतीक लोव्र नु आं शेंशो नेल्ल पशा, आं लांम गाक्ते हना, इ आफ दाऊद नु थोक्शा पशो कबल गे नु पाइनुड। २सामुएल ७:१३

13 मिनु गो इस्राएल डा आं आल आन दातेम बाक्नुड। मिनु गो आं मुर इस्राएली आन कली गेनायो मप्रोंइनुडमी” देमाक्त। प्रस्थान २९:४५

14 मोपा सोलोमनम परमप्रभु यावे आ खिं सेल्ने थुमा बाक्त। प्रेरित ७:४७

15 मेकोमी खिं आगा गे डा गारोम लेबानोन डा लाइशशो रवा आ शी के फलेक गारपाइशशा क्येप्पदा बाक्त। खप रे इर डा शी सम्मन शी के फलेक गारपाइशशा क्येप्पदा बाक्त। मिनु खपीम चहिं अरु रवा डा फलेक ब्रपदा बाक्त।

16 सोलोमनमी मेको खिं आगा आ नोले गे २० कुबीत लाइशशो नेल्ल क्येडा चोव्रखो कोठा सेल्पदा बाक्त। मेको कोठा नेल्ले लेबानोन डा लाइशशो रवा आन फलेक गारपाइशशा क्येप्पदा बाक्त। कुबीत का ०.५ मिटर बाक्ब।

17 मेको नेल्ल क्येडा चोव्रखो कोठा आ डोंइती ४० कुबीत लाइशशो बाक्माक्त। १ कुबीत ०,५ खोदेशो बाक्ब।

18 मेको खिं आ आगा गे लेबानोन डा लाइशशो रवा आ शी के फलेकम चहिं लौका नु बोइशशो फू आ बुटा मुशा आप्शो बाक्मा बाक्त। मेको शी नेल्ल मोदेशो बाक्मा बाक्त। मेकेर फुल्लु का यो मताइसीशो बाक्माक्त।

19 मेको आ खिं आ नेल्ल क्येडा आगाम चहिं परमप्रभु यावे आ कबल पशो सन्दोस वोइक्का कली नेल्ल क्येडा चोत्रखो कोठा सेल्पदा बाक्त।

20 मेको नेल्ल क्येडा चोत्रखो कोठा पुक्शो नु २० कुबीत लाइशशो, २० कुबीत ब्रेम्शो नु २० कुबीत ग्येत्थ लाइशशो बाक्माक्त। मिनु मेकोमी मेकेर नेल्ल क्येख सुन क्येप्पदा बाक्त। मिनु मोदेशो पा मेकोमी लेबानोन डा लाइशशो रवा आ शी के सेल्शो चढेतीक कली यो सुनम गिल्पदा बाक्त। कुबीत का ०,५ खोदेशो बाक्ब। १ राजा ७:४८

21 सोलोमनम मेको खिं आगा गे नेल्ल क्येख सुन क्येप्पदा बाक्त। मिनु आगा डा नेल्ल क्येडा चोत्रखो कोठा नेल्ल सुन क्येप्पाइशश, आ डोंइती सुन के साडलीपुकी क्याइक्पदा बाक्त।

22 मोपा मेकोम खिं आगा नेल्ल सुन क्येप्पदा बाक्त। आगा बाक्तीक डा चढेतीक कली यो सुनम गिल्पदा बाक्त।

23 मेकोमी परमप्रभु यावे आ खिं आगा डा चोत्रखो बाक्तीकेम तेल रवा आ शी के करूब निक्शी सेल्पदा बाक्त। मेको निम्फा १०, १० कुबीत ग्येत्थ लाइशशो बाक्सा बाक्त। कुबीत का ०,५ खोदेशो बाक्ब। प्रस्थान ३७:७-९

24 करूब आ फ्रां का ५ कुबीत लाइशशो बाक्माक्त। मिनु अर्को यो ५ कुबीत लाइशशो बाक्माक्त। मिनु फ्रां का आ डर रे अर्को फ्रां आ डर सम्म १० कुबीत लाइशशो बाक्माक्त।

25 मोपान अर्को करूब आ फ्रां यो १० कुबीत लाइशशो बाक्माक्त। मारदे हना मेको करूब निम्फा उइक्थ उइक्थ पा खाल का डा बाक्सा बाक्त।

26 मेको करूब निम्फा खाल का डा पा १०, १० कुबीत लाइशशो बाक्सा बाक्त।

27 मिनु मेकोमी मेको करूब आस कली परमप्रभु यावे आ खिं डा नेल्ल क्येडा चोत्रखो कोठाम वोदा बाक्त। मेको करूब आस फ्रां प्राक्पाइशशा सेल्शो बाक्माक्त। मोपा करूब का आ फ्रां कामी गारो का कली नु अर्को करूब आ फ्रां कामी अर्को गारो कली थिशो बाक्माक्त। मिनु मेको आस अर्को फ्रां चहिं दातेम थिमुशो बाक्सा बाक्त।

28 मिनु मेकोमी मेको करूब आस कली यो सुनम गिल्पदा बाक्त।

29 मेकोमी परमप्रभु यावे आ खिं डा नेल्ल क्येडा चोत्रखो कोठा आ एर ओंथ नेल्ल, गारो नेल्ल करूब, खजूर रवा नु बोइशशो फु आन बुटा मुशा आप्पदा बाक्त। मेको चोत्रखो कोठा आगा नु लाडगा नेल्ल मोदेशो पा मुशा बुटा आप्पदा बाक्त।

30 मिनु मेकोमी परमप्रभु यावे आ खिं डा नेल्ल क्येडा चोत्रखो कोठा डा खप नेल्ल सुन ब्रपदा बाक्त।

31 मेकोमी नेल्ल क्येडा चोत्रखो कोठा ओत्रचा कली तेल रवा आ शी के लाप्चो निक्शी सेल्पदा बाक्त। मेको लाप्चो डा शी ५ सुर पाइशशो पा सेल्पदा बाक्त।

32 मिनु मेकोम तेल रवा आ शी के लाप्चो निक्शीम करूब, खजूर रवा नु बोइशशो फु आन बुटा मुशा आप्पदा बाक्त। मिनु सुनम गिल्पदा बाक्त।

33 मेको खिं डा लाप्चो डा शी यो तेल रवा आ शी के ४ पाटे पा सेल्पदा बाक्त।

34 मिनु मेकोमी अरु शी के लाप्चो निक्शी सेल्पदा बाक्त। मेको आगा नु लाडगा डा लाप्चो हिरब लाप्चो बाक्सा बाक्त।

35 मिनु मेकोमी मेकेर नेल्ल करूब, खजूर रवा नु बोइशशो फु आन बुटा मुशा आप्पदा बाक्त। मिनु सुनम गिल्पदा बाक्त।

36 मिनु मेकोमी खिं आगा डा गारो यो खोइशशो फुल्लु सां खेयप खोप्शा क्येप्शा, मेको आ तारी लेबानोन डा लाइशशो रवा के फलेकम सुप्पदा बाक्त।

37 सोलोमनमी सासन पवा आ ४ बर्स जिव माइशशो महिनामी परमप्रभु यावे आ खिं आ जग वोदमे बाक्त। १ राजा ६:१

38 मिनु ११ बर्स डा बुल माइशशो महिनामी मेको खिं नेल्ले सेल्ने थुमे बाक्त। मेको सेल्चा कली ७ बर्स माल्दा बाक्त।

## 7

सोलोमनम आ खिं सेल्शो

1 सोलोमन आ खिं सेल्चा कली १३ बर्स माल्दा बाक्त। मिनु मेकोमी आ खिं नु मारेड मारेड सेल्ने थुमा बाक्त। १ राजा ९:१०

2 मेकोमी लेबानोन डा ब्वाकी माइशशो खिं सेला बाक्त। मेको खिं सहे का कुबीत लाइशशो, ५० कुबीत ब्रेम्शो नु ३० कुबीत ग्येत्थ लाइशशो बाक्माक्त। मेको खिं ४ लहर लेबानोन डा लाइशशो रवा आ शी के थाम पाइशशो बाक्माक्त। मिनु मेको आ तार लेबानोन डा लाइशशो रवा आ पाइद्रा वोदा बाक्त। कुबीत का ०.५ मिटर खोदेशो बाक्ब। यसेया २२:८

3 मेको नेल्ल लेबानोन डा लाइशशो रवा आ शी के फलेकम साप्शो बाक्माक्त। मेको थाम लहर कामी १५ ओटा पा, लहर सांमी ४५ ओटा बाक्मा बाक्त।

4 मेकेर लहर सां पा डेलपुकी वोइशशो बाक्मा बाक्त। मेकोपुकी एर ओंथ पा कोत्रमुशो बाक्मा बाक्त।

5 लाप्चो डा शी नेल्ल ४ पाटे बाक्मा बाक्त। मेको यो नेल्ल लहर सां पा कोत्रमुशो बाक्मा बाक्त।

6 मेकोमी ५० कुबीत लाइशशो नु ३० कुबीत ब्रेम्शो थाम पाइशशो टेयब पिंडी सेल्पदा बाक्त। मिनु मेको आ डोंइती थाम पाइशशो ओत्रतीक बाक्माक्त। मेको आ डोंइती इप्तीक का यो बाक्माक्त।

7 मेकोमी निसाफ पचा कली टेयब नित्तीके बाक्शो कोठा का सेल्पदा बाक्त। मेको कली निसाफ पतीक कोठा, दे नें वोदा बाक्त। मिनु मेकोमी मेको कोठा नेल्ले डर रे उड सम्म लेबानोन डा लाइशशो रवा आ शी के फलेक क्येप्पदा बाक्त।

8 मेकोम मेको निसाफ पतीक खिं आ नोले आ बाक्तीक खिं सेल्पदा बाक्त। मेको खिं डोंइती डा खिं खोदेशो पा सेल्पदा बाक्त। मिनु सोलोमनमी आ ग्युवे पा चाक्शो फाराओ आ तमी कली यो मोदेशोन खिं सेल्पदा बाक्त। १ राजा ३:१

9 मेको खिं नेल्ल शुश क्येट लाइब फुल्लु रे पा सेल्लो बाकमा बाक्त। मेको फुल्लु नेल्ले गारपा अराम खोइश्शो बाकमाक्त। मेको खिं इर रे उइ सम्म नु खिंङगा रे लाइगा सम्म मोदेशो फुल्लु के सेल्लो बाकमा बाक्त।

10 मेको आ जग फुल्लु ठेयब नु शुश क्येट लाइब बाकमा बाक्त। मेको पुक्शोनु कोइ १० कुबीत लाइश्शो, कोइ ८ कुबीत लाइश्शो बाकमा बाक्त।

11 मेको आ तार शुश क्येट लाइब, थम गारपा खोइश्शो फुल्लु ब्रपदा बाक्त। मिनु मेको तार लेबानोन डा लाइश्शो रवा आ शी के फलेक गारपा ब्रपदा बाक्त।

12 मिनु ठेयब लाइगाम एर ओंथ नेल्ल खोइश्शो गारपाइश्शो फुल्लु सां खेयप ब्रशा, फुल्लु तार लेबानोन डा लाइश्शो रवा आ शी के फलेक ब्रशो बाकमाक्त। मिनु परमप्रभु यावे आ खिं आगा डा लाइगा नु आ पिडी यो मोदेशोन बाकमाक्त। १राजा ६:३६

हुराम आ गेय

२इतिहास ३:१५-५:१

13 पिप सोलोमनम हुराम कली टायर रे ब्रेथ सोइक्ता बाक्त। २इतिहास २:१३-१४

14 मेको आ ममा नाप्ताली आ खिं डा आ वोंइश बेक्शो मीश मुर का बाकमाक्त। मेको आ आफ टायर डा थाम्पा कांसा के गेय पस जोक्ब मुर बाकमाक्त। मोपतीके हुराम यो थाम्पा कांसा के गेय पस जोक्ब बाकमाक्त। मिनु मेको पिप सोलोमन आ बाक्तीक जाकमाक्त। मिनु आ कली गेशो गेय नेल्ल पवा बाक्त।

कांसा के थाम निक्शी

15 मेकोम यपाइश्शा कांसा के थाम निक्शी सेला बाक्त। मेको थाम का १८ कुबीत लाइश्शो बाकमाक्त। मेको आ एर ओंथ नेल्ल १२ कुबीत बाकमाक्त। मिनु अर्को यो मोदेशोन बाकमाक्त। कुबीत का ०.५ मिटर खोदेशो बाक्त। २राजा २५:१७

16 मिनु मेकोमी मेको थाम आस डरम पिया वोइक्चा कली यपाइश्शो कांसा के पिया निक्शी सेला बाक्त। मेको निम्फा ५, ५ कुबीत लाइश्शो बाक्सा बाक्त।

17 मेकोमी थाम आ पिया कली बुटा आप्शो जाली के ७ ओटा झुम्का सेला बाक्त। मिनु अर्को थाम कली यो मोदेशोन सेला बाक्त।

18 मिनु मेको थाम आ पिया ग्योम्चा कली कांसा के जाली नेल्ल आन एर ओंथ लहर निक्शी बुटा आप्शो दारीमपुकी सेला बाक्त। मिनु मेकोम अर्को कली यो मोदेशो पान सेला बाक्त।

19 मिनु मेको पिंटी डा थाम आन पिया ४, ४ कुबीत लाइश्शो लिली फू खोदेशो पा सेला बाक्त।

20 मिनु मेको थाम आ पियामी कचौरा खोदेशो बाक्तीकेम जाली थाम आ पिया आ एर ओंथ नेल्ल लहर लहर पा सहे निक्शी दारीम क्याइक्चा कली सेला बाक्त। मिनु अर्को थाम कली यो मोदेशोन सेला बाक्त।

21 मिनु मेकोमी परमप्रभु यावे आ खिं आ पिंटीम मेको थाम निक्शी राप्पदा बाक्त। मिनु दक्खिन गे डा थाम आ नें याकीन वोदा बाक्त। मिनु उत्तर गे डा थाम आ नें बोआज वोदा बाक्त।

22 मेको थाम आस पिया लिली फू खोदेशो बाकमा बाक्त। मोपा मेको थाम आस गेय नुम्माक्त।

कांसा के ठेयब बोस

23 मिनु मेकोमी कांसा के यपाइश्शा ब्वाक्कु वोइक्तीक ठेयब बोस का सेला बाक्त। मेको आ सुर कारे अर्को सुर सम्म १० कुबीत बाकमाक्त। मेको ५ कुबीत ग्येथ लाइश्शो बाकमाक्त। मेको आ एर ओंथ पुक्शोनु ३० कुबीत बाक्बाक्त।

24 मेको ठेयब बोस आ एर ओंथ नेल्ल डा सुरमी कुबीत काम १०, १० ओटा लौका आ बुटा आप्शा गुंइशो बाकमाक्त। मोपा मेको ठेयब बोसम लहर निक्शी लौका सेला बाक्त।

25 मेको ठेयब बोस १२ ओटा ब्यफ आन तार वोइश्शो बाकमाक्त। मेको ब्यफ सां उत्तर गे, सां पच्छिम गे, सां दक्खिन गे नु सां पूबं गे कोव्रशो बाकमा बाक्त। मेको ब्यफ नेल्ल लाइगा गे हिरशो बाकमा बाक्त।

26 मेको बोस ४ आंइची थांइशो बाकमाक्त। मिनु मेको आ शोत्र चहिं कचौरा नु बोइक्चशो लिली फू खोदेशो बाकमाक्त। मेकेर हजार निक्शी बाथ ब्वाक्कु रिक्बाकमाक्त। बाथ का २२ लिटर खोदेशो बाक्ब।

कांसा के १० ओटा चिक्तीक

27 मिनु मेकोमी कांसा के १० ओटा अरु निप्पाइक्तीक सेला बाक्त। मेको नेल्ल ४, ४ कुबीत लाइश्शो ४, ४ कुबीत ब्रेम्शो नु ३, ३ कुबीत ग्येथ लाइश्शो बाकमा बाक्त। कुबीत का ०.५ मिटर खोदेशो बाक्त।

28 मेको निप्पाइक्तीक आन खोइली आन दातेमी बोइक्तीके बाकमा बाक्त।

29 मेको वोइक्तीकेमी ब्यफ, गुप्स नु करूब आन बुटा आप्शो बाकमा बाक्त। मेको आन दी गे यो झुम्का क्याइश्शो बाकमा बाक्त।

30 मेको निप्पाइक्तीक नेल्लेम कांसा के ४, ४ ओटा गुगील बाकमा बाक्त। मेको बोस आन पुंमी तिक्तीक क्येप्शो बाकमा बाक्त। मेको झुम्का आन नेक्था बाकमा बाक्त।

31 मेको आन रोक्तीक कुबीत का ग्येथ लाइश्शो बाकमा बाक्त। मेको कुल कुल देशो बाकमा बाक्त। मेको कुबीत का नु आधा ब्रेम्शो बाकमा बाक्त। मिनु मेको आन रोक्तीकेमी बुटा आप्शो बाकमा बाक्त। मिनु मेको निप्पाइक्तीक चहिं कुल कुल देशो ममाइ ४ पाटे बाकमा बाक्त।

32 मेको ४ ओटा गुगील आगा गे बाकमा बाक्त। मिनु मेको गुगील आन बोइक्तीक नु बोइश्शो बाकमा बाक्त। मेको गुगील नेल्ल कुबीत का नु आधा डा बाकमा बाक्त।

33 मेको गुगील बग्गी आन गुगील खोदेशो पा सेल्शो बाक्मा बाक्त। मेको आन गुगील नु आन मारेड मारेड यपाइश्शा सेल्शो बाक्मा बाक्त।

34 मेको निप्पाइक्तीक आन तिक्तीक ४ पाटे बाक्मा बाक्त। मेको नेल्ल टुक्रा का के सेल्शो बाक्मा बाक्त।

35 मेको निप्पाइक्तीक आन तार आधा आधा कुबीत ग्येत्थ लाइश्शो कुल कुल देशो सुर बाक्मा बाक्त। मेको निप्पाइक्तीक आन तार बाक्शा, मेको नु टुक्रा का के बाक्मा बाक्त।

36 मिनु मेकोमी मेकेर तेक तेक श्येत्थ बाक्मा, मेक मेक गुप्स, करूब नु खजूर रवा आन बुटा आबा बाक्त। मेको आन एर ओंथ नेल्ल मुशा सेल्शो कांसा के मालापुकी सेला बाक्त।

37 मोपा मेकोमी मेको १० ओटा निप्पाइक्तीक सेला बाक्त। मेको नेल्ल खाल का डा पा सेला बाक्त।

38 मेको नोले मेकोम कांसा के १० ओटा चिक्तीक बोस सेला बाक्त। मेको नेल्लेमी ४०, ४० बाथ ब्वाक्कु रिक्बाक्मा बाक्त। मेको पुक्शोनु ४, ४ कुबीत डा बाक्मा बाक्त। मेको निप्पाइक्तीक नेल्ल आन कली का का बाक्मा बाक्त। बाथ का २२ लिटर खोदेशो बाक्ब।

39 मिनु मेकोमी ५ ओटा निप्पाइक्तीके खिं आ दक्खिन गे नु ५ ओटा खिं आ उत्तर गे वोदा बाक्त। मिनु ठेयब बोस चहिं परमप्रभु यावे आ खिं आ दक्खिन पूर्व गे वोदा बाक्त।

परमप्रभु आ खिं डा मार मार

40 हुराममी बोसपुकी, पुलु ताप्तीक नु ग्योबपुकी सेला बाक्त। मोपा हुराममी पिप सोलोमन आ देशो खोदेशो पा परमप्रभु यावे आ खिं डा मारेड मारेड सेल्ले थुमा बाक्त।

41 थाम निक्शी, मेको आस डर सुम्चा कली कचौरा खोदेशो पिया निक्शी, मेको थाम आस पिया ग्योम्तीक बुटा आप्शो जाली निक्शी,

42 मेको जाली निक्शी आस कली ४ सहे दारीम, मेको कचौरा खोदेशो पिया पाइश्शो थाम निक्शी आस कली सुम्तीक जाली आस कली लहर निक्शी दारीम,

43 मेको १० ओटा निप्पाइक्तीक आन कली १० ओटा बोस,

44 ठेयब बोस का मेको आगा डा १२ ओटा ब्यफ सेल्ले थुमा बाक्त।

45 हुराममी बोसपुकी, पुलु ताप्तीक नु ग्योबपुकी सेला बाक्त। मोपा हुराममी पिप सोलोमन आ देशो खोदेशो पा परमप्रभु यावे आ खिं डा मारेड मारेड सेल्ले थुमा बाक्त। मेको नेल्ल टल्केशो कांसा के बाक्मा बाक्त।

46 मेको नेल्ल पिपम यर्दन खोला डा दिम सुक्कोथ नु चारेथन आस दातेमी मार मार यपाइक्तीकेम यपाइश्शा, सेल्पाइश्शो बाक्माक्त।

47 सोलोमनम मेको मिश का थोव्रक सेल्लेके, मेको नेल्ल मनावथुन वोदमे बाक्त। मेको सेल्चा कली दोशो कांसा माल्दा, मेको यो मनाव्तमे बाक्त।

48 मिनु सोलोमनम परमप्रभु यावे आ खिं दारपाइक्चा कली मारेड मारेड थोव्रक नेल्ल सेल्पदा बाक्त। मेकोमी सुन के चढेतीके नु कोइतीक शोब्ले वोइक्तीक सुन के टेबल यो सेल्पदा बाक्त।

49 क्येख सुन के बत्ती दातीक सेल्पाइश्शा, नेल्ल क्येडा चोव्रखो बाक्तीक कोठाम दक्खिन गे ५ ओटा नु उत्तर गे ५ ओटा पा वोइक्पदा बाक्त। सुन के फू खोदेशो बुटा, सुन के बत्ती दातीक, सुन के थनारो,

50 क्येख सुन के ग्योब, सल्दो खोइक्तीक कांइची, बोसपुकी थनारो, कोइला कुरतीके, ब्वाक्कु बुइक्तीक डाडु, कचौरा, थनारो, नेल्ल क्येडा चोव्रखो कोठा डा लाप्चो नु अरु लाप्चो डा हेक्तीक नेल्ल क्येख सुन के सेल्पदा बाक्त।

51 मिनु पिप सोलोमनम परमप्रभु यावे आ खिं डा गेय नेल्ल थुम्पदा बाक्त। मिनु मेकोमी आ आफ दाऊदमी जिम्मा गेशो थोव्रकपुकी, सुन, चांदी नु दारपाइक्तीक चाक्पाइश्शा, परमप्रभु यावे आ खिं डा शोप वोइक्तीकेमी वोइक्पाइक्मी बाक्त।

## 8

कबल पशो सन्दोस चाक्शो

२इतिहास ५:७-७, १०

1 मिनु नोले सोलोमनम इस्त्राएल डा खाल्पा, इस्त्राएल डा थर थर डा ठेयब मुर नु इस्त्राएली आन खिं खिं डा मुर आन कली दाऊद आ सहर, सियोन रे परमप्रभु यावे आ कबल पशो सन्दोस चाक्चा कली यरूसलेम सहरम बुक्चा कली ब्रेप्पाइक्मी बाक्त।

2 मिनु एथानीम माइश्शो ७ महिना डा चाड नाक्ती, इस्त्राएल डा मुर नेल्ल पिप सोलोमन आ डोइती बुक्मा बाक्त।

3 मिनु इस्त्राएल डा खाल्पा नेल्ल जाक्ने थुम्मे नोले, चढेबपुकीमी परमप्रभु यावे आ सन्दोस कुरमे बाक्त।

4 मिनु चढेब नु लेवीपुकीमी परमप्रभु यावे आ सन्दोस नु ग्रुम्तीक ताम्बुम बाक्शो परमप्रभु आ मारेड मारेड कुरशा, डर लदमे बाक्त।

5 मिनु पिप सोलोमनम इस्त्राएल डा मुर नेल्ले नु मेको आ डोइती बुक्ब नेल्लेम, सन्दोस आ डोइती हिकने मचाप्चा डा पा भेडा नु ब्यफ क्योरशा चढेमे बाक्त। २सामुएल ६:१३

6 मिनु नोले चढेबपुकीमी परमप्रभु यावे आ कबल पशो सन्दोस खिं डा नेल्ल क्येडा चोव्रखो बाक्तीकेम चाक्शा करूब आस फ्रां आगाम वोदमे बाक्त। २सामुएल ६:१७; १राजा ६:२७

7 मारदे हना मेको करूब आस फ्रांम सन्दोस नु कुरतीक कोक्के कली सुम्शो बाक्सा बाक्त।

8 मेको कुरतीक कोक्के थम लाइशशो बाक्तीके, मेको आन सुर नेल्ल क्येडा चोत्रखो बाक्तीक आ डोंइती रे तांडसीबाक्मा बाक्त। तन्न नेल्ल क्येडा चोत्रखो बाक्तीक आ लाडगा रे मतांडसी बाक्मा बाक्त। मेको मुल सम्म मेकेर बाक्नीम। प्रस्थान २५:१३-१५

9 मिनु हारेब डांडाम परमप्रभु यावेमी इस्राएली आन कली इजीप्त रे गुंडची ना कबल पशो बाक्त। मेना मोसामी मेको कबल पशो लोत्र मुशा ब्रेक्शो फुल्लु निक्शी सन्दोसम कुर पा वोदा बाक्त। मेको सन्दोसम फुल्लु निक्शी डा लाकशा अर्को मारेड मबाक्माक्त। प्रस्थान २५:२१; ब्यवस्था १०:५

10 मिनु चढेब नेल्ल क्येडा चोत्रखो बाक्तीक रे ग्रामानु, परमप्रभु यावे आ खिं गोस्सुम ब्रीमाक्त।

11 मिनु मेकेर गोस्सुम सुन्तीके चढेबपुकीम गेय पने मचाप्मे बाक्त। मारदे हना परमप्रभु यावे आ छेडछेडम आ खिं ब्रीशो बाक्माक्त। प्रस्थान ४०:३४-३५

12 मिनु सोलोमनमी “परमप्रभु यावे क्येर गोस्सुम बाक्ब देशो बाक्ब। प्रस्थान २०:२१

13 गो इन कली गेना हना यो बाक्चा कली गारचा डा खिं का सेल्ला” देमाक्त।

14 मिनु पिपमी लेशशा कोत्रशा, इस्राएल डा बुक्शो मुर नेल्ल आन कली आसीक गेमी बाक्त। मेना मेकोपुकी चहिं राष्ट्रो बाक्मा बाक्त।

15 मिनु मेकोमी “परमप्रभु यावे, इस्राएली आन परमप्रभु ठेयब बाक्ल। मेकोमी आं आफ दाऊद नु कबल पा, मुल मेको खाप्तु।

16 मारदे हना मेकोमी ‘गो आं मुर आन कली इजीप्त रे गुंडशा चाक्गु रे मुल सम्म इस्राएल डा तेकोड थर डा मुर आन सहरम आं नें बाक्ल, दे आं खिं सेल्ला कली मयोत्रडु। तन्न गो आं मुर इस्राएली आन कली सासन पचा कली दाऊद कली योत्रता’ देत।

17 आं आफ दाऊदमी परमप्रभु यावे, इस्राएली आन परमप्रभु आ नें कली मान पा खिं का सेल्ला मिम्शो बाक्त। रसामुएल ७:-

18 तन्न परमप्रभु यावेमी आं आफ दाऊद कली ‘गे आं नें कली मान पा खिं का सेल्ला मिम्ताक्वी, मेको रिम्शो बाक्त।

19 मो हना यो गे मेको खिं मसेल्लेवे। तन्न इ तौमी आं नें कली मान पा खिं का सेल्ल’ देशो बाक्तीनी।

20 मुल परमप्रभु यावेमी ‘गो पाइनुड’ देशो लोत्र खाप्तु। गो आं आफ दाऊद आ पा डा पिप दुम्शो बाक्नुड। मिनु परमप्रभु यावेमी ‘पाइनुड’ देशो खोदेशो पा गो इस्राएल डा पिप दुम्ती। मिनु परमप्रभु यावे, इस्राएली आन परमप्रभु आ नें कली मान पा एको खिं सेल्ला।

21 गो मेकेर परमप्रभु यावे आ कबल पशो सन्दोस बाक्तीके का सेल्ला। परमप्रभु यावेमी इ किंकी पिपी आन कली इजीप्त रागी रे गुंडशा चाक्गानु, मेकोपुकी नु कबल पशो बाक्माक्त” देमाक्त।

सोलोमन आ प्रार्थना

22 मिनु सोलोमनम इस्राएल डा बुक्शो मुर नेल्ल आन दातेम परमप्रभु यावे कली चढेतीक आ डोंइती राष्ट्रो, आ गुड सरीड गे क्युक्गा बाक्त।

23 मिनु मेकोमी “परमप्रभु यावे, इस्राएली आन परमप्रभु इर स्वर्गम नु रागीम इन खोदेशो अर्को तेकोड परमप्रभु मबाक्नीम। इन कली आन थुं नेल्लेमी नोले खोइक्ब, इन गेय पाइब आन कली पशो कबल खाप्शा, मेको आन कली गेना हना यो दाक्नीनी।

24 गे इन गेय पाइब, आं आफ दाऊद नु पशो कबल खाप्तीनी। मुलाक्ती ‘गो पाइनुड’ देशो कबल थमा पा खाप्तीनी।

25 मोपतीके परमप्रभु यावे, इस्राएली आन परमप्रभु इन गेय पाइब आं आफ दाऊद नु पशो कबल खाप्पीन। गे मेको नु कबल पा ‘गेना हना यो इ तौ चच रे इस्राएलम पिप दुम्तीम। तन्न मेकोपुकी इ खोदेशो पा आं डोंइती होस पा गाक्तेकम हना, ला मोदेशो दुम्ब’ देशो बाक्तीनी।

26 मोपतीके इस्राएली आन परमप्रभु, इन गेय पाइब आं आफ दाऊद कली ‘गो पाइनुड’ देशो लोत्र खाप्पीन” देमाक्त।

27 मेकोमी “मार, थमा पा परमप्रभु रागीम बाक्बा डा? कोत्रडीन, इर डा ठेयब सरीडम ला यो गे मरिक्नीनी हना, एको आं सेल्लो खिंम दोपा रिक्नीनी डा? यसैया ६६:१; प्रेरित १७:२४

28 मो हना यो परमप्रभु यावे, आं परमप्रभु इन गेय पाइब आं प्रार्थना नु आं पुंडशो लोत्र नेनीन। मुलाक्ती इन गेय पाइबमी इन डोंइती ठेयब सेंदा पा पुंडशो लोत्र नेनीन।

29 मिनु नाक्दो नाक्ती एको खिं कली कोत्रडीन। गे ‘गो एको खिंम बाक्नुड’ देशो बाक्तीनी। मोपतीके इन गेय पाइब आं लोत्र नेनीन। जकरिया १२:४; प्रस्थान २:२४

30 इन गेय पाइब नु इन मुर इस्राएलीम एको खिं गे कोत्रशा पुंडतेकम हना, मेको आन पुंडशो गेन। मेको आन लोत्र इर इन बाक्तीक रे नेनीन। मिनु गे मेको आन पुंडशो गेशा, माफ गेने।

31 सुड मुरुमी आ नेक्था डा मुर आन पबंम मरिम्शो पा कसम जपाइक्तु हना, मेकोम मेको कसम एको इन खिं डा चढेतीक आ डोंइती जाप्तु हना,

32 गे इर स्वर्गम मेको आन लोत्र नेशा, निसाफ पने। मिनु दोस ताइब आ मरिम्शो पशो आ पियामी मोइक्तीन। मिनु ठीक पाइब कली दोस मताइब बाक्ब देंनीन। मोपा ठीक पाइब कली रिम्शो पाइब दुमीन।

33 मिनु इन मुर, इस्राएलीपुकीमी पाप पशा आन जोरी सत्रु नु बुशा, इन गे लेशशा ‘गे आंइ परमप्रभु यावे बाक्नीनी’ दे एको इन खिं गे कोत्रशा पुंडतेकम हना,

34 इर स्वर्ग रे मेको आन पुंडशो नेनीन। मिनु इन मुर इस्राएली आन पाप माफ गेन। मिनु मेको आन किंकी पिपी आन कली गेशो रागीम लेशशा चाक्कीन।

३५ मिनू इन मुरपुकीमी पाप पतीके सरीड चोक्सीशा रेड मयित हना, इन गेशो सजाड तुडशशा, 'गे आंड परमप्रभु यावे बाक्नीनी' दे आन पशो पाप प्रोडतेकम हना, १ राजा १७:१

३६ इर स्वर्ग रे मेको आन पुंडशो लोव्र नेशा, इन गेय पाडब, इन मुर इस्राएली आन पाप माफ गेने। मेको आन पचा माल्शो शेंदीन। मिनू मेको आन कली गेशो रागीमी रेड यिपतीन।

३७ मेको रागीम अन्काल दुप्त हना, मुर बेक्तीक रोड जाक्त हना, बाली नाली सोव्रतीक नु बुक्खी डाइक्तीक रोड जाक्त हना, सल्ला माले नु बुस्स जाक्तेकम हना, मेको आन तेकोड सहरम जोरी सत्रुम पुन्ताकम हना, मारेड श्येत नु मारेड रोड जाक्त हना,

३८ इन मुर इस्राएली सुडम आन थुंम श्येत जशा, एको इन खिं गे कोव्रशा आन गुड क्युकशा पुन्मेनु, इन बाक्तीक इर स्वर्ग रे मेको आन पुंडशो नेनीन।

३९ गे मुर नेल्ल आन थुं तुडक्तीके, इन बाक्तीक स्वर्ग रे मेको आन लोव्र नेशा, आन पशो कोव्रशा माफ गेने। मारदे हना गे ला मुर नेल्ल आन थुं तुडक्ब बाक्नीनी। भजन संग्रह १३९:१-२

४० मिनू मेकोपुकी इन कली मान पा हिंशा, आंड किकी पिपी आन कली इन गेशो रागीम बाक्नीम।

४१ मिनू इन मुर इस्राएली ममाड, तन्न अर्को रागी डा मुर सुडमी इन कली तुडशशा डोन डोन रागी रे जाक्तेकम हना, गन्ती १५:१४-१६

४२ मेकोपुकीम इन ठेयब नें, इन ठेयब सक्ति नु इन वारच पतीके नेशो बाक्तेकम। मोदेशो मुर जाक्शा, एको खिं गे कोव्रशा पुंडतेकम हना,

४३ गे मेको आन लोव्र इन बाक्तीक स्वर्ग रे नेशा, मेको अर्को रागी डा मुर आन पुंडशो नेल्ल गेने। मिनू इन मुर इस्राएली खोदेशो पा रागी डा मुर नेल्लेम इन नें तुडक्तेकम। मिनू इन कली मान पा हिंमल। गे एको आं सेल्शो खिंम बाक्नीनी, दे तुडक्तेकम।

४४ मिनू इन मुर आन जोरी सत्रु नु लाडाड पथ लाम्तेकम हना, गे मेको आन कली तेड सोडक्ताक्नी हना, मेकोपुकीम एको इन योव्रशो सहर नु गोम इन कली सेल्शो एको खिं गे कोव्रशा, पुंडतेकम हना,

४५ गे स्वर्ग रे मेको आन पुंडशो नेनीन। मिनू मेको आन कली वारच पतीन।

४६ मेकोपुकीम पाप पाम्तेकम हना, मारदे हना पाप मपाडब सुड मबाक्नीम। मिनू गे इन गाडशशोमी आन जोरी सत्रु आन गुडम गेतीनी। मिनू मेकोपुकीम मेको आन कली आन रागीम ग्याडशशा लाडक्तेकम हना, भजन संग्रह १४:३-४; रोमी ३:२३

४७ मिनू मेकोपुकीम आन कली ग्याडशशा लाडशशो रागीम श्येत जशा 'गो पाप पाडतक। दूली पा काड मरिम्शो पाडतक' दैतेकम हना, नेहेम्याह ९:३३; दानीएल ९:५

४८ मिनू मेको आन ग्याडशशा लाडशशो जोरी सत्रु आन रागीमी आन थुं नेल्लेम इन गे लेत्तेकम हना, मेको आन किकी पिपी आन कली इन गेशो रागी नु इन योव्रशो एको सहर नु इन नें कली मान पा आं सेल्शो खिं गे कोव्रशा, इन कली पुंडतेकम हना, दानीएल ६:११

४९ इन बाक्तीक इर स्वर्ग रे मेको आन पुंडशो लोव्र नेशा, आन माल्शो गेन। मिनू मेको आन कली वारच पतीन।

५० मिनू मेको इन मुर आन पाप नु हेंथे पशो नेल्ल माफ गेने। मिनू मेको आन जोरी सत्रुम शिशो पपतीन।

५१ मारदे हना मेकोपुकी इन खिं डा मुर बाक्नीम। गे मेको आन कली शुश श्येत गेतीके इजीप्ट रागी रे गुंडशा चाक्तीनी।

५२ मिनू गे इन गेय पाडब नु इन मुर इस्राएली आन कली कोव्रडीन। मेको आन पुंडशो लोव्र गेना हना यो नेनीन। मिनू मेकोपुकीम इन कली ब्रेम्मानु, मेको आन ब्रेशो नेनीन।

५३ मारदे हना गे मेको आन कली इन मुर सेल्चा कली, रागी नेल्ल डा मुर आन दाते रे योव्रशा तिल्लीनी। मोपा आंड किकी पिपी आन कली इजीप्ट रे गुंडशा चाक्नीनु, इन गेय पाडब मोसा कली मोदेशो लोव्र पशो बाक्तीनी" देमाक्त। प्रस्थान १९:५-६

५४ मोपा सोलोमनम परमप्रभु यावे कली प्रार्थना पा पुंडने थुमा बाक्त। मिनू मेको परमप्रभु यावे कली चढेतीक आ डोंडती रे बोक्माक्त। मेकेर सरीड गे कोव्रशा आ गुड क्युकशा आ पोकच थेक्शा प्रार्थना पशो बाक्माक्त।

५५ मिनू मेको राप्शा, ठेयब सेंदा पा बुक्शा बाक्शो इस्राएली नेल्ल आन कली आसीक गेमी बाक्त।

५६ मेकोमी "आ मुर इस्राएली आन कली आ देशो खोदेशो पा नाडक्का गेब परमप्रभु यावे ठेयब बाक्ल। मेकोम आ गेय पाडब मोसा रे पा पाडनुड देशो रिम्शो गेय नेल्ले का सम्म यो मखाइक्थु, पाप्नु। यहोसु २१:४५

५७ परमप्रभु यावे इं परमप्रभु इं किकी पिपी नु बाक्शो खोदेशो पा गोपुकी नु यो बाक्ल। मेकोमी इं कली गेनायो मप्रोनल।

५८ मेकोमी इं किकी पिपी आन कली शेंशो लोव्र, आ फुल्लुम मुशा ब्रेक्शो लोव्र नु आ ठीक पतीक लोव्र पना पन, इन थुं नेल्लेमी मेको आ लाम गाक्कीन।

५९ गो इं परमप्रभु यावे आ डोंडती पुंडशो लोव्र नाक्दो नाक्ती परमप्रभु यावे, इं परमप्रभु आ डोंडती बाक्ल। मिनू मेकोमी नाक्त किंत किंत आ गेय पाडब नु आ मुर इस्राएली इं माल्शो गेशा, वारच पवल।

६० मिनू रागी डा मुर नेल्लेमी परमप्रभु यावे ला परमप्रभु बाक्ब, दे तुडक्नीम। मिनू मेको डा लाक्शा अर्को सुड परमप्रभु मबाक्ब, दे यो तुडक्नीम।

६१ मोपतीके इं थुं नेल्लेमी परमप्रभु यावे, इं परमप्रभु कली जिम्मा गेसय। मुलाक्त खोदेशो पा गोपुकीमी आ फुल्लुम मुशा ब्रेक्शो लोव्र टिना टिन, आ शेंशो पना पन बाक्थ" देमाक्त।

परमप्रभु आ खिं जिम्मा गेशो

६२ मिनू नोले पिप नु इस्राएली नेल्लेमी परमप्रभु यावे आ डोंडती चढेतीक चढेमे बाक्त।

63 सोलोमनमी दुशा बाक्का आ पर्वम २२ हजार ब्यफ नु लाख का २० हजार भेडा चढेवा बाक्त। मोपा पिप नु इस्राएल डा मुर नेल्लेमी परमप्रभु यावे आ खिं कली जिम्मा गेमे बाक्त।

64 मेको नाक्त पिपमी परमप्रभु यावे आ खिं आ डोंइती बाक्शो लाडगा आ दाते डा लाडगा कली यो तिला बाक्त। मारदे हना मेकोमी मेकेर चोशा चढेतीके, अन्न चढेतीके नु दुशा बाक्का आ पर्वम चढेतीके आन बोंसो चढेवा बाक्त। अन्न चढेतीके, दुशा बाक्का आ पर्वम चढेतीके नु चोशा चढेतीके आन बोंसो वोडक्का कली मेको परमप्रभु यावे आ डोंइती बाक्शो कांसा के चढेतीके आडक्च दुम्माक्त।

65 मिनु सोलोमन नु मेको नु बुक्का बाक्शो इस्राएली लेबो-हमाथ रे इजीप्त डा खोला सम्म डा ठेयब हुल नेल्लेमी परमप्रभु यावे, इ परमप्रभु आ डोंइती मेको नाक्त रे ७ नाक्त सम्म नु अर्को ७ नाक्त तेम्शा, नेल्ल पा १४ नाक्त सम्म चाड मानेमे बाक्त।

66 मिनु आ दीसा मेकोमी मुर आन कली आन खिं सोइक्तीमी बाक्त। मिनु मेकोपुकीम पिप कली ठेयब सेल्मे बाक्त। मिनु परमप्रभु यावेमी आ गेय पाइब दाऊद नु आ मुर इस्राएली आन कली रिम्शो पशो तशा, ग्येरना ग्येरन आन आन खिं लमा बाक्त।

## 9

परमप्रभुमी लोत्र पशो

२इतिहास ७:११-२२

- 1 मिनु सोलोमनम परमप्रभु यावे आ खिं, पिप आ खिं नु आ सेल्चा दाक्शो मारेड मारेड नेल्ल सेल्ने थुमा बाक्त।
- 2 मेना परमप्रभु यावेम सोलोमन कली गिबोनम लोत्र पशो खोदेशो पा लेंशा लोत्र पवा बाक्त। १राजा ३:५
- 3 मिनु परमप्रभु यावेमी मेको कली “गो इ आं डोंइती पशो प्रार्थना नु इ पुंइशो लोत्र नेंता। गो एको इ सेल्शो खिं कली आं के सेल्ला। मिनु गो गेना हना यो एकेर बाक्नुड। आं थुं एकेर बाक्शा, गो एको खिं कली गेना हना यो कोव्रनुड। १राजा ८:२९
- 4 मिनु गे चहिं ब्रेम्शो दुम्शा, इ आफ दाऊद खोदेशो पा आं डोंइती गेना हना यो रिम्शो पाइब नु रिम्शो थुं पाइशो दुम्ते हना, आं इ कली शेंशो नेल्ल पना पन, आं फुल्लुम मुशा ब्रेक्शो लोत्र नु आं निसाफ पतीक लोत्र नेल्ल पाप्तीवी हना,
- 5 गो इ राज्य इस्राएल कली गेना हना यो बोल्यो दुम्पाइक्नुड। मिनु गो इ आफ दाऊद कली ‘इ तौ चच रे गेना हना यो इस्राएलम पिप दुन्मीम’ दे कबल पशो खोदेशो पा गे नु यो कबल पाइनुड। २सामुएल ७:१२; येरमीया ३३:१७
- 6 तन्न गे नु इ आलपुकी आं नोले खोडक्का प्रोंइशा, गो इन डोंइती वोइशो आं शेंशो नु आं फुल्लुम मुशा ब्रेक्शो लोत्र मपाइतीनी हना नु देवी देवता आन कली पूजा पाइतीनी हना,
- 7 गो इस्राएली आन कली आं गेशो रागी रे खेरनुडमी। मिनु एको आं कली सेल्शो खिं कली प्रोंइशा मकोव्रनुड। मिनु इस्राएली चहिं मुर नेल्ल आन दातेमी मुने दोक्का, ग्रॉग्रा दिल्तीक दुन्मीम। ब्यवस्था ४:२६; ब्यवस्था ८:१९-२०; मती २३:३८
- 8 एको खिं ब्रेशशा, फुल्लु देल्शो दुम्ब। मिनु नोले एकेर गाक्ब मुर नेल्ल छक लाक्नीम। मिनु मुरपुकीमी मेको तशा ‘मारदे परमप्रभु यावेमी एको खिं नु एको रागी कली ओं पवा, माइ?’ दे शुक्शी पाइनीम।
- 9 मिनु मुरपुकीमी ‘मेकोपुकीमी परमप्रभु यावे, आन परमप्रभुम मेको आन किंकी पिपि आन कली इजीप्त रागी रे गुंइशा चाक्तु हना यो, मेको कली प्रोंइशा, देवी देवता आन कली मानेशा, पूजा पाप्तेक्म। मोपतीके परमप्रभु यावेमी मेको आन कली मोदेशो श्येत गेप्तु’ देंनीम” देंमाक्त।

सोलोमन नु हीराम

२इतिहास ८:७-११

- 10 सोलोमन कली परमप्रभु यावे आ खिं नु आ बाक्तीक खिं सेल्चा कली २० बर्स माल्दा बाक्त। १राजा ६:३८; १राजा ७:१
- 11 टायर डा पिप हीराममी सोलोमन कली माल्शो लेबानोन डा लाइशो रवा आ शी, अरु शी, सुन नु आ माल्शो नेल्ल गेशो बाक्माक्त। मोपतीके पिप सोलोमनमी हीराम कली गालील रागी डा २० ओटा सहर गेवा बाक्त। २इतिहास ८:२
- 12 मिनु हीरामम टायर रे मेको सोलोमन आ गेशो सहरपुकी कोव्रथ लमाक्त। मिनु मेकोम मेको सहर मदाक्ता बाक्त।
- 13 मिनु मेकोमी सोलोमन कली “आं लोक्ब, मेको इ गेशो सहरपुकी दा दोकका देशो बाक्तेक्मे” देंमाक्त। मिनु मेकोम मेको सहर आन कली “काबुल रागी” देशो नें वोदा बाक्त। मेको सहर आन नें मुल सम्म मेकोन बाक्नीम।
- 14 मिनु हीराममी पिप सोलोमन कली सहे का २० टलेन्ट सुन सोइक्ता बाक्त। टलेन्ट का ३४ किलो बाक्ब।

सोलोमन आ गेय पाइब

15 पिप सोलोमनम पपाइशो गेय मार मार बाक्त देशा हना, परमप्रभु यावे आ खिं, आ बाक्तीक खिं, मिल्लो माइशो बोल्यो दरवार, यरूसलेम डा गारो, हासोर, मेगीददो नु गेजेर सहर सेल्पदा बाक्त।

16 इजीप्त डा पिप फाराओम गेजेर सहर कली लडाइ तोशा ग्राशा, मेकेर मी सुइशो बाक्माक्त। मेकोम मेकेर बाक्ब कनानी आन कली साइशशा, मेको सहर आ तमी, सोलोमन आ मीश कली दाइजो गेशो बाक्माक्त। यहासु १६:१०; १राजा ३:१

17 मिनु सोलोमनम गेजेर सहर, बेथ-होरोन,

18 बालाथ नु मेको गोरशो रागी डा तामार नु आ एर ओथ डा रागी,



19 सोलोमन आ मार मार वोइक्तीक सहरपुकी, आ बग्गी नु शारा वोइक्तीके नु शारा डोइक्ब आन कली बाक्चा कली सहरपुकी यो सेल्पदा बाकत। सोलोमनमी यरूसलेम, लेबानोन नु आ सासन पशो राज्य नेल्लेमी मार सेल्चा दाक्शो बाक्मे, मेको सेल्ले थुमा बाकत। १ राजा १०:२६

20 मिनु लीशो एमोरी, हिती, परिज्जी, हिब्वी नु यबुसी चहिं इस्राएली आन थर डा मुर मबाक्मा बाकत।

21 इस्राएलीपुकीमी मेको रागीमी लीशो मेको आन चच युड आन कली काड मवोइक्थु साइक्ने मचाप्शो बाक्मा बाकत। सोलोमनमी मेको आन कली गेय पाइब वाइल सेल्शा वोइक्मी बाकत। मेको मुल सम्म मोपान बाक्शो बाक्नीम। यहोसु १६:१०

22 तन्न सोलोमनम इस्राएली सुड आन कली वाइलीम वाइल मसेल्मी बाकत। मेकोपुकी चहिं लडाइ पाइब, लडाइ पाइब आन ठेयब मुर, कप्तान, बग्गी चलेब आन ठेयब मुर नु शारा डोइक्ब सेल्मी बाकत।

23 मिनु सोलोमन आ ठेयब गेय पाइब ५ सहे ५० जना बाक्मा बाकत। मेकोपुकी गेय पाइब आन कली कोत्रब बाक्मा बाकत।

24 मिनु फाराओ आ तमी दाऊद आ सहर रे पिप सोलोमनम सेल्शा गेशो आंम खिम लमाकत। सोलोमनमी मिल्लो माइशो बोल्यो दरवार यो सेल्पदा बाकत।

25 मिनु सोलोमनमी परमप्रभु यावे कली सेल्शो चढेतीकेमी बर्सम खेयप सां परमप्रभु यावे आ डोंइती चोशा चढेतीक नु दुशा बाक्चा आ पर्बम चढेतीक चढेशा धूप यो चोशा चढेवा बाकत। मोपा मेकोम परमप्रभु यावे आ खिं डा गेय नेल्ल पवा बाकत।

सोलोमनम जहाज सेल्पाइशो

26 मिनु पिप सोलोमनम लल समुन्द्र आ शुंडच एदोम रागी एलोथ आ नेक्था एस्योन-गेबेर सहरम जहाजपुकी यो सेल्पदा बाकत। गन्ती ३३:३५; २इतिहास ८:१७-१८

27 हीराममी समुन्द्र आ पर्बम तुइक्ब नु जहाजम गेय पाइब मुर सोलोमन आ गेय पाइबपुकी नु गेय पपाइक्चा कली सोइक्तीमी बाकत। १ राजा १०:११

28 मिनु मेकोपुकी जहाजम ओफीर लमा बाकत। मिनु मेकेर रे ४ सहे २० टलेन्ट सुन चाक्मे बाकत। मिनु मेको पिप सोलोमन कली गेमे बाकत। उत्पती १०:२९

## 10

शेबा डा पिपीम जाक्शो

२इतिहास ९:१-१२

1 शेबा डा पिपीममी सोलोमन आ रिम्शो पशो नेल्ल, परमप्रभु यावे आ ठेयब नें नु आ पशो नेल्ल नेना बाकत। मिनु लोत्र लेन्ने मचाप्चा डा लोत्र कुरशा सोलोमन कली नाक्चा कली जाक्माकत। मती १२:४२; १ राजा ५:१४

2 मेको शुश मुर नु शुश मस्ला, सुन नु शुश क्येट लाइब हीरा दलओंठम कुरपाइश्या यरूसलेम जाक्माकत। मिनु आ थुम बाक्शो लोत्र नेल्ल सोलोमन कली देंमाकत।

3 मिनु सोलोमनम मेको आ हिल्लो पशो लोत्र नेल्ल लेत्ता बाकत। मेको हिल्लो पशो लोत्र लेत्त्या कली पिप कली मारेइ श्येत मदुम्माकत।

4 मिनु शेबा डा पिपीममी सोलोमन आ जोक्तीक तुइक्तीक नेल्ले, मेको आ सेल्शो पिप आ खिं,

5 मेको आ जचा थोत्रक, मेको आ एर ओंथ बाक्ब आ ठेयब गेय पाइब आन बाक्तीके, आ गेय पाइब आन गेय पशो, मेको आन फेक्शो वा, आ ग्योबपुकी, परमप्रभु यावे आ खिम चोशा चढेतीकपुकी तशा, शुश छक लाक्माकत।

6 मिनु मेकोमी पिप कली “गो आं रागीमी इन गेय नु जोक्तीक तुइक्तीक आ पर्बम लोत्र नेता।

7 तन्न गो आंमा जाक्शा, मतडा सम्म थमा मसुदु। मेको आं कली नेंशो दा उइक्थ लाइ यो मनेंशो बाक्ती। इन जोक्तीक तुइक्तीक, इन पशो गेय नु इन शोंप आ पर्बम आं नेंशो क्येडा यो शुश बाकत।

8 इन मीशपुकी नु इन गेय पाइबपुकीमी गेना हना यो इन जोक्शो तुइशो लोत्र नेंशा ग्येरसीशो बाक्नीमी।

9 मिनु परमप्रभु यावे, इन परमप्रभु ठेयब बाक्ब। मेकोमी इन कली दाक्शा इस्राएल कली सासन पचा कली पिप सेल्लु। परमप्रभु यावेमी इस्राएली आन कली गेना हना यो दाक्ताक्व। मोपतीके मेकोमी इन कली ठीक निसाफ पचा नु ठीक पचा कली मेको आन पिप सेल्शो बाकत” देंमाकत। १ राजा ५:२१

10 मिनु नोले मेकोमी पिप कली सहे का २० टलेन्ट सुन, शुश मस्लापुकी नु शुश क्येट लाइब हीरापुकी गेवा बाकत। शेबा डा पिपीममी सोलोमन कली गेशो खोदेंशो पा शुश मस्ला डोंइती सुडम मचाक्गमे बाकत। टलेन्ट का ३४ किलो बाक्ब।

11 मेको नेल्ल प्रोंइशा यो हीराम आ जहाजपुकीम ओफीर रे सुन चाक्बाक्मा बाकत। मेकोपुकीमी जहाजम सिरी खन्ड के शुश क्येट लाइब शी नु हीरापुकी चाक्बाक्मा बाकत। १ राजा ९:२७-२८

12 मिनु पिपमी मेको सिरी खन्ड के शी रे परमप्रभु यावे आ खिं नु आ बाक्तीके खिं कली क्रेसी डा ग्याइक्तीक सेल्पदा बाकत। मिनु कुम्पो पाइब आन कली बीना नु तार पाइशो ताप्तीक यो मेको शी के सेल्पदा बाकत। मेको मोदेंशो पा सिरी खन्ड के शी गेना यो मचाक्शो बाक्मा बाकत। मिनु मेना रे मुल सम्म यो गेनायो मतांइसीशो बाक्ब।

13 मिनु पिप सोलोमनम शेबा डा पिपीम कली आ गेशो प्रोंइशा यो आ दाक्शा पुंइशो थोत्रक नेल्ल गेवा बाकत। मेको नोले मेको आ गेय पाइब नेल्ल लाइश्या आ रागी लेम्माकत।

सोलोमन आ शोंप

२इतिहास ९:१३-२८

- 14 सोलोमन आ बाक्तीकेम बर्स बर्सम जाक्शो सुन सहे सां ६६ टलेन्ट दुम्बाक्माक्त। टलेन्ट का ३४ किलो बाक्ब।
- 15 मेको प्रोइशा, ग्याप्ब लेयब आन चाक्शो, अराब रागी डा पिपुकी नु अर्को रागी डा सासन पाइबपुकी रे यो सुन जाक्बाक्माक्त।
- 16 मिनु पिप सोलोमन तुप्शा सेल्शो सुन के सहे निक्शी टेयब तेक्तीक सेल्पदा बाक्त। मेको का सेल्चा कली ६ सहे शेकेल सुन माल्दा बाक्त। शेकेल का ११.५ ग्राम खोदेशो बाक्ब। १राजा १४:२६
- 17 मेकोमी तुप्शो सुन के सहे सां आइक्च आइक्च तेक्तीक यो सेल्पदा बाक्त। मेको का सेल्चा कली सहे सां शेकेल सुन माल्दा बाक्त। मिनु पिपमी मेको नेल्ल लेबानोन डा ब्वाकी माइश्शो खिमं वोइक्पाइक्मी बाक्त। १राजा ७:२
- 18 मिनु पिपम हात्ती आ दारा के टेयब नित्तीक का सेल्शा, मेको कली क्येख सुनमी गिल्पदा बाक्त।
- 19 मेको नित्तीक तार डोइक्तीक ६ ओटा थेंका बाक्मा बाक्त। मेको नित्तीक आ नोले गे कुल कुल पा सेल्शो बाक्माक्त। मेको नित्तीक आ निम्फा गे गुड वोइक्तीक पाइश्शो बाक्माक्त। मेको गुड वोइक्तीक आस नेक्था गुप्स निक्शी सेल्शो बाक्माक्त।
- 20 मेको ६ ओटा थेंका नेल्लेम एर गे का, ओंथ गे का पा १२ ओटा गुप्स बाक्मा बाक्त। मेको मोदेशो नित्तीके तेकोड राज्य डा पिप आन पर्वम मसेल्शो बाक्माक्त।
- 21 पिप सोलोमन आ तूतीक कचौरा नेल्ल सुन के बाक्मा बाक्त। मिनु लेबानोन डा ब्वाकी माइश्शो पिप आ खिमं बाक्शो ग्योब नेल्ले क्येख सुन के बाक्मा बाक्त। चांदी के मारेड मबाक्मा बाक्त। मारदे हना सोलोमन आ पालाम चांदी मारेड खोदेशो मबाक्माक्त।
- 22 मिनु पिप नु हीराम आस जहाजपुकी टारसीस गे लाइबाक्मा बाक्त। मिनु बर्स सां सांमी मेको जहाजम काले टारसीस रे सुन, चांदी, हात्ती आन खुड, बुदी नु मजुर चाक्शा, जाक्बाक्मा बाक्त।
- 23 मोपा सोलोमन आ शोप नु आ जोक्तीक तुइक्तीकेमी पिप नेल्ल आन क्येडा टेयब दुम्माक्त।
- 24 रागी नेल्ल डा मुरपुकी परमप्रभुम सोलोमन कली गेशो जोक्शो तुइश्शो लोत्र नेंचा कली जाक्बाक्मा बाक्त।
- 25 मेको मोपा जाक्ब नेल्लेमी बर्स बर्सम कोसेली सुन चांदी के मार मार, फेक्तीक वा, यापुकी, मस्ला, शारा नु खचचर चाक्बाक्मा बाक्त।
- 26 सोलोमनम शुश बग्गी नु शारा तेलमी बाक्त। मेको के १४ सहे बग्गी नु १२ हजार शारा बाक्मा बाक्त। मेकोमी बग्गी आन कली बग्गी वोइक्तीक सहरम वोदा बाक्त। का निक्शी आन कली चहिं आं नुन यरूसलेमम वोइक्मी बाक्त। १राजा ५:६
- 27 पिपमी यरूसलेमम चांदी फुल्लु खोदेशो पा तेलमी बाक्त। मिनु लेबानोन डा लाइश्शो रवा आ शी चहिं शेफेलाह डा फोत्रशी रवा खोदेशो पा शुश तेलमी बाक्त।
- 28 सोलोमन आ शारा इजीप्त नु क्युए रे ग्याप्शा चाक्शो बाक्मा बाक्त।
- 29 मेकोपुकीम इजीप्त रे ६ सहे शेकेल चांदीम बग्गी नु सहे का ५० शेकेल चांदीम शारा ग्याप्बाक्मा बाक्त। मिनु पिप आ ग्याप्ब लेयबपुकीम हित्ती आन पिप नु अराम डा पिप नेल्ल आन कली लेयबाक्मा बाक्त। शेकेल का ११.५ ग्राम, तोला का खोदेशो बाक्ब।

## 11

### सोलोमन आ मीशपुकी

- 1 पिप सोलोमनम फाराओ आ तमी ग्युंवे पा यो, मेकोमी शुश अर्को रागी डा मीश मुर, मोआबी, अम्मोनी, एदोमी, सीदोनी नु हित्ती आन कली दाक्तीमी बाक्त। ब्यवस्था १७:१७
- 2 परमप्रभु यावेमी इस्राएली आन कली मेको रागी डा मुर आन पर्वम “गेपुकीम मेको आन कली ग्युंवे पचा मदुम्नीनी। मारदे हना मेकोपुकीम थमा पा इन थुं आन देवी देवता आन नोले खोइक्पाइक्नीम” देशो बाक्माक्त। तन्न सोलोमनम मेको आन कली दाक्तीमी बाक्त। प्रस्थान ३४:१६
- 3 मेको के ७ सहे ग्युंवे पशो मीश नु सहे सां अरु नोले चाक्शो मीश बाक्मा बाक्त। मिनु मेकोपुकीम आ थुं क्यल्पदमे बाक्त।
- 4 मिनु सोलोमन खूशो दुम्मेनु, मेको आ मीशपुकीम आ थुं अरु देवी देवता आन गे हिरपदमे बाक्त। मिनु मेको आ आफ दाऊद आ थुंम खोदेशो पा आ थुं नेल्लेम परमप्रभु यावे, आ परमप्रभु आ नोले मखोदा बाक्त।
- 5 मोपा सोलोमन सीदोनी आन अशतोरथ देवी नु अम्मोनी आन ग्रान्रा दिशो मूर्ति मोलोक आस नोले खोदा बाक्त। मोलोक नु मोलेक नें वोइश्शो देवता मिल्कोम यो बाक्त।
- 6 मोपा सोलोमनम परमप्रभु यावे आ डोंइती मार मरिम्शो बाक्मे, मेको पवा बाक्त। मेको आ आफ दाऊद खोदेशो पा आ थुं नेल्लेमी परमप्रभु यावे आ नोले मखोदा बाक्त।
- 7 मिनु सोलोमनम मोआब डा ग्रान्रा दिशो मूर्ति केमोश नु अम्मोनी आन ग्रान्रा दिशो मूर्ति मोलेक आस कली यरूसलेम आ पूर्व गे डा डांडा काम पूजा पतीक थान सेला बाक्त। गन्ती २१:२९; २राजा २३:१३
- 8 मेकोमी अर्को रागी डा आ मीश नेल्ल आन कली मोदेशो पवा बाक्त। मेकोपुकीमी आन देवी देवता आन कली धूप चोशा चढेमे बाक्त।
- 9 मिनु परमप्रभु यावे सोलोमन क्येडा गाइक्ता बाक्त। मारदे हना परमप्रभुमी मेको नु खेयप निक्शी लोत्र पशो बाक्त हना यो, मेको परमप्रभु यावे, इस्राएली आन परमप्रभु रे डोन लशो बाक्माक्त। १राजा ३:५; १राजा ९:२

10 परमप्रभु यावेमी सोलोमन कली “अरु देवी देवता आन नोले मखोतो” देशो बाक्माक्त। मो हना यो सोलोमनम परमप्रभु यावे आ शेंशो मपवा बाक्त।

11 मोपतीके परमप्रभु यावेम इस्राएली आन पिप सोलोमन कली “इ मो पशो, आं कबल प्रॉइशो नु इ कली पावो, दे आं फुल्लुम मुशा ब्रेक्शो लोत्र मटितीके गो थमा पा एको इ राज्य रोइशशा इ गेय पाइब कली गेनुड। १सामुएल १५:२८

12 मो हना यो इ आफ दाऊद आ पर्वम इ पालामी मो मपाइनुड। गो एको राज्य इ तौ आ पालाम रोइक्नुड। १राजा १२:१९

13 तन्न गो राज्य नेल्ल मरोइक्नुड। आं गेय पाइब दाऊद नु आं योत्रशो सहर यरूसलेम आस पर्वम इस्राएल डा थर का इ तौ कली गेनुड” देमाक्त।

सोलोमन आ जोरी सत्रु

14 मिनु परमप्रभु यावेमी इस्राएली आन मुर एदोम डा पिप आ खिं डा मुर हादाद कली सोलोमन आ जोरी सत्रु सेल्शा पोक्गा बाक्त।

15 डोंइती दाऊदम एदोमी नु लडाइ पवानु, मेको आ लडाइ पाइब आन टेयब मुर योआबमी मेकेर बेक्शो मुर आन कली थिम्थ लमेनु, मेको रागी डा वोंइश मुर नेल्ल आन कली साइशो बाक्माक्त। २सामुएल ८:१४

16 मेना योआब नु इस्राएली नेल्लेम एदोम डा वोंइश मुर नेल्ल आन कली साइक्ने मथुम्मे सम्म मेकेर ६ महिना बाक्मा बाक्त।

17 मेना हादाद आलन बाक्माक्त। मिनु आ आफ आ गेय पाइब का निक्शी एदोमी नु प्रोक्शा इजीप्त लशो बाक्माक्त।

18 मिनु मेकोपुकी मिदयान रे पारानम जाक्मा बाक्त। मिनु पारान रे सुइ मुर आन कली लाइशशा इजीप्त डा पिप फाराओ आ बाक्तीके लशो बाक्मा बाक्त। मिनु फाराओमी हादाद कली आ रागीम खिं का रू नु जचा तूचा थोत्रक गार पा गेशा वोंइशो बाक्माक्त।

19 फाराओमी हादाद कली शुश दाक्ता बाक्त। मिनु मेकोम आ मीश पिपीम तहपेनेस आ लोकब का गेशा ग्युंवे पदा बाक्त।

20 मिनु तहपेनेस आ लोकबमी हादाद रे गेनुबाथ नें पाइशशो तौ का थिवा बाक्त। मिनु तहपेनेसमी मेको आल कली दूध प्रॉइपाइशशा फाराओ आ खिंम थुला बाक्त। मिनु गेनुबाथ फाराओ आ आलपुकी नुन कोल्माक्त।

21 मिनु हादाद इजीप्तम बाक्मेनु, मेकोम दाऊद बेक्शो नु मेको आ लडाइ पाइब आन टेयब मुर योआब यो बेक्ने थुम्शो लोत्र नेना बाक्त। मिनु हादादम फाराओ कली “आं कली आं रागी लेत्वा गेयीनी” देमाक्त।

22 तन्न फाराओम मेको कली “आं रागीम इन कली मार मजाक्दीम्मे? मिनु ‘आं रागी लेशशा लाइनुड’ देंनी” दे हिल्लो पवा बाक्त। मिनु मेकोमी “मारिइ माल्लो मबाक्ब। तन्न आं कली लचा गेयीनी” देमाक्त।

23 मिनु परमप्रभुम सोलोमन आ पर्वम अर्को जोरी सत्रु का यो पोक्गा बाक्त। मेको एल-आदा आ तौ रेसोन बाक्माक्त। मेको आ होत्रप सोबाह डा पिप हादादेजेर रे प्रोक्शा लशो बाक्माक्त। २सामुएल ८:३

24 मिनु दाऊदम सोबाह डा लडाइ पाइब आन कली सदानु, मेको रेसोनमी आ मुर आन कली खुप्ता बाक्त। मिनु मेको मरिम्शो पाइब आन हुल डा टेयब मुर दुम्माक्त। मिनु मेको मरिम्शो पाइब आन हुल दमस्कस लमा बाक्त। मिनु मेकोपुकीम मेकेर ग्राशा दमस्कस आन के सेल्मे बाक्त। मिनु मेको मेकेर डा पिप दुम्माक्त। २सामुएल १०:१८

25 रेसोन सोलोमन बाक्म सम्मन इस्राएल आ जोरी सत्रु दुम्माक्त। मिनु हादाद आ मरिम्शो पशोम, मेकोम मरिम्शो तेम्दा बाक्त। मिनु अरामम हुकुम पवा बाक्त। मिनु मेको इस्राएल आ जोरी सत्रु दुम्माक्त।

येरोबाम जोरी सत्रु दुम्शो

26 एफ्राइम आ थर, सेरेदाह सहर डा नेबात आ तौ येरोबाम सोलोमन आ गेय पाइब बाक्माक्त। मेको आ ममा आ नें सेरूआह बाक्माक्त। मेको आ वोंइश बेक्शो मीश मुर बाक्माक्त। मेको येरोबाममी यो सोलोमन कली श्येत गेचा गोवा बाक्त।

27 मेकोमी पिप कली मार पवा बाक्त देशा हना, सोलोमनम मेको कली मिल्लो बोल्यो दरवार सेल्पाइशशो नु आ आफ दाऊद आ सहर डा ब्रेशो गारो सुपाइशशो बाक्माक्त। १राजा ९:१५,२४

28 येरोबाम थाम्पा गेय पाइब मुर का बाक्माक्त। मेको ठिटा मुर आ गेय पशो तशा, सोलोमनमी मेको कली योसेफ आ खिं डा गेय पाइब आन कली कोत्रब मुर सेला बाक्त।

29 मिनु येरोबाम यरूसलेम रे अर्को रागी लना लन बाक्माक्त। मेना परमप्रभु यावे आ लोत्र पाइब शिलो सहर डा अहीयाहमी मेको कली लॉम गुमा बाक्त। अहीयाहम नक वा फेक्शो बाक्माक्त। लॉम गुम्सानु मेको निक्शी ला बाक्सा बाक्त।

30 मिनु अहीयाहमी मेको आ फेक्शो नक वा खाक्शा १२ टुक्रा सेला बाक्त।

31 मिनु मेकोमी येरोबाम कली “१० टुक्रा गुम्सो। मारदे हना परमप्रभु यावे, इस्राएली आन परमप्रभुमी ‘गो एको राज्य सोलोमन आ गुइ रे रोइक्नुड। मिनु इ कली १० थर गेनन। १राजा १२:१५; १राजा १४:२

32 थर का मेको केन लीब। आं गेय पाइब दाऊद नु यरूसलेम आ पर्वम मोदेशो दुम्ब। मारदे हना गो यरूसलेम सहर इस्राएली आन थर नेल्ल आन दाते रे आं के दुम्पाइशशा योत्रता। भजन संग्रह १३२:१३

33 मेकोमी आं कली प्रॉइतीके, गो मो पाइनुड। मेकोमी सीदोनी आन देवी अशतोरेथ, मोआब डा देवता केमोश नु अम्मोनी आन देवता मोलेक कली पूजा पाप्नु। मेको आं लॉम मगा। मेकोमी आं डोंइती मार ठीक बाक्मे, मेको मपावो।

मेकोम आ आफ दाऊदम पशो खोदेशो पा, आं फुल्लुम मुशा ब्रेकशो लोत्र नु आं निसाफ पतीक लोत्र मपावो। मोलेक देवता कली मिल्कोम यो देशो बाक्त।

34 मो हना यो गो मेको आ राज्य नेल्ल मरोइक्नुड। गो मेको कली मबेक्म सम्म सासन पाइब सेल्लुड। मेको आं योत्रशो गेय पाइब नु आं शेंशो नु आं फुल्लुम मुशा ब्रेकशो लोत्र टीब दाऊद आ पबर्म मोदेशो पाइनुड। २सामुएल ७:१२

35 तन्न गो मेको आ राज्य आ तौ रे १० थर रोइशश इ कली गेनन।

36 थर का चहिं गो मेको आ तौ कली गेनुड। मोपा आं योत्रशा बाक्शो सहर यरूसलेमम आं गेय पाइब दाऊद आ मुर का लीमल। १राजा १५:४; २राजा ८:१९

37 गो इ कली सासन पपाइक्नुड। गे इ दाक्शो नेल्ल आन कली सासन पाइनेवे। गे इस्राएल डा पिप दुम्नेवे।

38 मिनु गे आं गेय पाइब दाऊद खोदेशो पा आं शेंशो नेल्ल पाप्तीवी नु आं लांम गाक्ते हना, आं डोंडती मार ठीक बाक्मे, मेको नेल्ल पाप्तीवी हना, आं फुल्लुम मुशा ब्रेकशो लोत्र नु आं शेंशो नेल्ल आं गेय पाइब दाऊदम खोदेशो पा टिप्तीवी हना, गो गे नु बाक्नुड। गो इ खिं कली गेना हना यो लीपाइक्नुड। मिनु इस्राएल इ कली गेनन। १राजा ९:४

39 मिनु गो दाऊद आ चच युइ आन कली सजाइ गेनुडमी। तन्न गेना हना यो कली ममाइ' दे परमप्रभुम देशो बाक्ब" देमाक्त।

40 मोपतीके सोलोमनमी येरोबाम कली साइक्वा मला बाक्त। तन्न येरोबाम इजीप्त डा पिप शीशक आ बाक्तीक प्रोक्शा लमाक्त। मिनु सोलोमन मबेक्म सम्म मेकेर बाक्माक्त। १राजा १४:२५

सोलोमन बेक्शो

41 मिनु सोलोमनम पशो अरु गेय, आ जोक्तीक तुइक्तीक, मार, मेको सोलोमन आ इतिहासम ब्रेकशो मबाक्बा डा? २इतिहास ९:२९-३१

42 सोलोमनमी यरूसलेमम बाक्शा, इस्राएली नेल्ल आन कली ४० बर्स सम्म सासन पवा बाक्त।

43 मिनु नोले मेको बेक्माक्त। मिनु आ आफ दाऊद आ सहरमी थिम्चा पुंइसे बाक्त। मिनु मेको आ पा डा आ तौ रेहोबाम पिप दुम्माक्त।

## 12

रेहोबामम इस्राएल कली मरिम्शो पशो

२इतिहास १०:-

1 रेहोबाम शेकेम सहर लमाक्त। मारदे हना इस्राएली नेल्ले मेको कली पिप सेल्चा कली मेकेर लशो बाक्मा बाक्त।

2 मिनु नेबात आ तौ येरोबामम मेको लोत्र नेना बाक्त। मेको मेना सम्म इजीप्त रागीमी बाक्शो बाक्माक्त। मेको सोलोमन पिप क्येडा प्रोक्शा, लशो बाक्माक्त। मिनु येरोबाम इजीप्त रे लेम्माक्त। १राजा ११:४०

3 मोपतीके मुरपुकीम येरोबाम कली ब्रेथ सोइक्तमे बाक्त। मिनु मेको नु इस्राएली नेल्ल जाक्शा रेहोबाम कली

4 “इन आफोमी आंइ कली शुश श्येत गेप्टु। मिनु मुल गे इन आफ खोदेशो मपथु, आंइ कली मोदेशो श्येत रे प्रोनीन। मिनु गो इन गेय पाइब दुम्नीकी” देमा बाक्त।

5 मिनु रेहोबामम मेको आन कली “आं कली नाक्त सां सम्म मिम्चा गेयीनी। मिनु लेंशा जाक्कीन” देमाक्त। मोपतीके मुरपुकी खिं लमा बाक्त।

6 मिनु पिप रेहोबाममी आ आफ सोलोमन आ पाला डा सल्ला गेब खाल्पापुकी नु सल्ला पुंइशा “एको मुर आन कली गो मार देंड, गे मार सल्ला गेनीनी?” दे हिल्लो पामी बाक्त।

7 मिनु मेकोपुकीमी “मुलाक्त गे मेको मुर आन कली रिम्शो पाइतीनी हना, गे मेको आन गेय पाइब खोदेशो दुमीन। मिनु मेको आन कली रिम्शो लोत्र पने। मिनु नोले मेकोपुकी गेना हना यो इन गेय पाइब दुम्नीम” देमा बाक्त।

8 तन्न मेकोमी मेको खाल्पा आन सल्ला मबिस्से बाक्त। मिनु मेकोमी आ खोदेशो आ नु कोल्शो सल्ला गेब टिटा आन कली सल्ला पुना बाक्त।

9 मिनु मेकोमी मेको आन कली “गे मार देंनीनी? मुरपुकीमी ‘इन आफोम शुश श्येत गेप्टु’ देंतेक्म। मुल गो मेको आन कली मार देंचा माल्नुडा?” दे हिल्लो पामी बाक्त।

10 मिनु मेको नु कोल्शो टिटापुकीम मेको कली “इन कली ‘इन आफोम शुश श्येत गेप्टु, मुल गे आंइ कली मेको श्येत रे प्रोनीन’ देंब आन कली गे मार देंचा माल्नीनी देंशा हना ‘आं आइक्च ब्रेप्चो आं आफ आ क्रातो क्येडा यो टेयब बाक्ब।

11 आं आफोम इन कली श्येत गेप्टु। मुल गो इन कली मेको क्येडा यो शुश श्येत गेनुड। आं आफोम इन कली कोक्केम तुप्पाइशो बाक्त। तन्न मुल गो इन कली बिच्छीम क्राइक्पाइक्नन्नी’ दे मतीन” देमा बाक्त।

12 मिनु पिपमी नाक्त सां नोले जाक्कीन, दे सोइशो येरोबाम नु मुर नेल्ले पिप रेहोबाम आ बाक्तीक जाक्मा बाक्त।

13 मिनु पिपमी मेको खाल्पा आन गेशो सल्ला मनंथु, मेको आन कली मरिम्शो लोत्र पाइक्मी बाक्त। हितोपदेस १५:१

14 मेको टिटा आन गेशो सल्ला बिरशा, मुर आन कली “आं आफोम इन कली श्येत गेप्टु। मुल गो इन कली मेको क्येडा यो शुश श्येत गेनुड। आं आफोमी इन कली कोक्केम तुप्पाइशो बाक्त। तन्न मुल गो इन कली बिच्छीम क्राइक्पाइक्नन्नी” दे माइक्मी बाक्त।

15 मोपा पिपम मेको मुर आन लोत्र मनेना बाक्त। मारदे हना, शिलो सहर डा अहीयाह रे पा नेबात आ तौ येरोबाम कली देशो लोत्र गाप्चा कली परमप्रभु यावेमी मोदेशो पशो बाक्माक्त। १राजा ११:२९-३१

येरोबाम कली पिप सेल्चशो

16 मिनू इस्राएली नेल्लेमी पिपम मेको आन लोव्र मनेशो तुइशशा, मेकोपुकीम पिप कली “दाऊद नु आंड के ततीक मार बाकबा डा? येस्से आ तौ नु आंड के ततीक मारेइ मबाकब। इस्राएली, आंम आंम खिं लेतीन। दाऊद गे आंम थुती थाती पांडसो” देंमा बाकत। मोपतीके इस्राएली आन आन खिं लेम्मा बाकत। २सामुएल २०:१

17 तन्न पिप रेहोबामम यहूदा डा सहरम बाकब इस्राएली आन कली सासन पना पन बाकमाकत।

18 मिनू पिप रेहोबामम वाइल आन गेय कोव्रब अदोराम कली सोइकता बाकत। तन्न इस्राएली नेल्लेम मेको कली फुल्लु आप्शा सदमे बाकत। मोपतीके पिप रेहोबाम रीब पा आ बग्गी डोइशशा यरूसलेम प्रोकमाकत।

19 मोपतीके मेको नाक्त रे मुल सम्म इस्राएलीपुकी दाऊद आ खिं डा मुर नु जोरी सनु दुम्शो बाक्नीम।

येरोबाम इस्राएल डा पिप दुम्शो

२इतिहास ११:१-४

20 मिनू इस्राएली नेल्लेमी “येरोबाम लेशशा जाकशो बाकब” देशो लोव्र नेशा, मेको कली ब्रेथ सोइकतमे बाकत। मिनू मेको कली इस्राएल डा पिप सेल्मे बाकत। यहूदा आ थर डा मुर ला दाऊद आ खिं डा मुर आ नोले खोदमे बाकत।

21 मिनू सोलोमन आ तौ रेहोबाम यरूसलेमम जाकशा, इस्राएली नु लडाइ पा आ राज्य लेत्चा कली यहूदा नु बेन्यामीन आस थर डा लाख का ८० हजार लडाइ पाइब आन कली खुप्टीमी बाकत।

22 तन्न परमप्रभुमी आ मुर शेमायाह कली लोव्र पवा बाकत।

23 मार लोव्र पवा बाकत देशा हना “सोलोमन आ तौ यहूदा डा पिप रेहोबाम, यहूदा नु बेन्यामीन आस थर डा मुर नेल्ल नु लीशो मुर आन कली,

24 परमप्रभु यावेमी ‘गेपुकी आंम लोक्ब इस्राएली नु लडाइ पचा कली इर मलने। गे नेल्ल इन खिं खिं लेशशा लने। मारदे हना एको आं मिष्शा पशो बाकब’ देंनो” देंमाकत। मोपतीके मेकोपुकी परमप्रभु यावे आ देशो खोदेशो पा लडाइ पथ मलथु, आन खिं खिं लेशशा लमा बाकत।

येरोबाम आ पाप

25 मेको नोले येरोबाममी एफ्राइम डा पहाडम बाकशो शेकेम सहर सेला बाकत। मिनू आ रागी बोल्यो सेल्शा, मेकेर बाकमाकत। मेकेर रे लशा मेकोम पेनुएल सहर सेला बाकत।

26 मिनू येरोबामम आ थुंमी “एको राज्य दाऊद आ खिं गेन लेशशा लाइब।

27 एको मुरपुकी गेना हना यो परमप्रभु यावे आ खिं यरूसलेमम चढेथ लाम्तेकम हना, मेको आन थुं आन टेयब मुर यहूदा आ खिं डा पिप रेहोबाम गे लेन्ब। मेकोपुकीम आं कली साइशशा यहूदा डा पिप रेहोबाम गे लेत्नीम” दे मिम्शो बाकमाकत।

28 मिनू पिपम सल्ला पा सुन के बाछा निकशी सेल्पदा बाकत। मिनू मेकोम मुर आन कली “गे मुल यरूसलेम लशा शुश श्येत जाइनीनी। इस्राएली, इन कली, इजीप्ट रे गुंडशा चाकब देवता एकेन बाक्नीम” दे माइक्मी बाकत। प्रस्थान ३२:४,८

29 मिनू मेकोमी मेको बाछा का बेथेल सहरम नु का चहिं दानम वोदा बाकत। न्यायाधीस १८:३०

30 मिनू मेको मो पशो इस्राएलमी पा दुम्माकत। मुरपुकी मेको देवता आस कली पूजा पचा कली बेथेल नु दान सम्म लाइबाक्मा बाकत। १राजा १४:१६

31 मिनू येरोबामम डांडा तार यो पूजा पतीक थानपुकी सेला बाकत। मिनू मेकेर लेवी आन मुर मबाक्तेकम हना यो अर्को थर डा मुर रे चढेबपुकी योव्रशा वोइक्मी बाकत।

32 मिनू येरोबामम ८ महिना डा १५ नाक्त यहूदा डा चाड खोदेशो पा चाड का मानेतीक नाक्त सेला बाकत। मिनू थानपुकीम क्योरशा चढेपपाइक्मी बाकत। मेकोमी आ सेल्शो बाछा आस कली यो मार मार क्योरशा चढेपपाइक्मी बाकत। मेकोमी बेथेलम आ सेल्शो डांडा डा थानपुकीमी यो चढेब आन कली योव्रशा वोइक्मी बाकत।

33 मेकोम ८ महिना डा १५ नाक्त आ देशो ना बेथेल डा आ सेल्शो चढेतीकेम मार मार चढेवा बाकत। मोपा मेकोम इस्राएली आन कली चाड का मानेतीक नाक्त सेला बाकत। मिनू मेकोमी धूप चोवा बाकत।

## 13

यहूदा रे जाकशो परमप्रभु आ मुर

1 मिनू येरोबाम धूप चोचा कली चढेतीक आ नेक्था राम्मेनु, परमप्रभु आ मुर का परमप्रभु यावे आ लोव्र कुरशा यहूदा रे बेथेलम जाकमाकत।

2 मिनू मेकोमी मेको चढेतीक आ पर्वम परमप्रभु यावे आ लोव्र पा “ए चढेतीके! ए चढेतीके! परमप्रभु यावेमी ‘दाऊद आ खिं रे योसीयाह ने पाइशशा आल का जरमेब। मिनू मेकोमी इर थान डा धूप चोइब चढेब आन कली क्योरशा इ तार चढेब। मेको आन रुश इ तार चोइब’ देशो बाकब” देंमाकत। २राजा २३:१६,२०

3 मेको नाक्त मेको मुरुमी चिन्ड का कोइदा बाकत। मेकोमी “परमप्रभु यावे आ लोव्र आ चिन्ड मार बाकब देशा हना, मेको चढेतीक ब्रेन्ब। मिनू मेकेर बाकशो पुलु चहिं लाडगाम ब्राइब” देंमाकत।

4 मिनू येरोबामम परमप्रभु आ मुरुम बेथेल डा चढेतीक आ पर्वम टेयब सेंदा पा देशो लोव्र नेना बाकत। मिनू मेकोम चढेतीक रे आ गुड दिशा “मेरे कली ग्याइक्तीन” देंमाकत। तन्न येरोबाम आ गुड मुक्ने मचबा बाकत।

5 परमप्रभु यावे आ लोव्रमी आ मुर रे देशो लोव्र गाप्शा, चढेतीक ब्रेम्माकत। पुलु यो लाडगाम ब्रमाकत।

6 मिनू पिपमी परमप्रभु आ मुर कली “आं गुड डोंइती डा खोदेशो दुम्ल, दे परमप्रभु यावे, इन परमप्रभु कली आं पबंम पुनीन” देमाक्त। मिनू पिप आ देशो खोदेशो पा मेको परमप्रभु आ मुरुम परमप्रभु यावे कली पुना बाक्त। मिनू पिप आ गुड डोंइती डा खोदेशो दुम्लाक्त। प्रस्थान ८:४

7 मिनू पिपम परमप्रभु आ मुर कली “गो नु आं खिं गाक्कीन। मिनू मारेड जचा थोत्रक जने। मिनू गो इन कली कोसेली गेनन्नी” देमाक्त।

8 तन्न मेको परमप्रभु आ मुरुमी पिप कली “गे आं कली इन राज्य उडक्थ पा योक्शा गेतीनी हना यो, गो इन खिं मलाइनुड। गो जचा थोत्रक यो मजाइनुड, ब्वाक्कु यो मतूनुड।

9 मारदे हना परमप्रभु यावेमी आं कली ‘गे मेकेर जचा थोत्रक मजावो। ब्वाक्कु यो मतूडो। मिनू इ लशो लां रे लेशशा मपिवो’ देशो बाक्ब” देमाक्त।

10 मोपतीके मेको अर्को लां रे पा लेम्लाक्त। डोंइती बेथेल जाक्शो लां रे मलेम्लाक्त।

11 मेना बेथेलमी खूशो परमप्रभु यावे आ लोत्र पाइब मुर का बाक्माक्त। मिनू मेको आ तौपुकी जाक्शा, मेको नाक्त परमप्रभु आ मुरुम बेथेलम पशो गेय नेल्ल शेंदमे बाक्त। मेकोपुकीम मेकोमी पिप कली देशो लोत्र यो आन आफ कली शेंदमे बाक्त।

12 मिनू मेको आन आफोमी मेको आन कली “मेको तेको लां रे लम?” दे हिल्लो पामी बाक्त। मिनू आ तौपुकीम यहूदा रे जाक्शो मेको परमप्रभु आ मुर लशो लां कोंइदमे बाक्त।

13 मिनू मेकोमी आ तौ आन कली “आं कली गधा काम लगम पाइइशा गेयीनी” दे माइक्मी बाक्त। मिनू मेकोपुकीम मेको कली गधा काम लगम पाइइशा गेमे बाक्त। मिनू मेको गधाम डोइइशा, मेको मुर आ नोले खोदा बाक्त।

14 मिनू मेकोमी परमप्रभु आ मुर मालशा, मेको कली रवा आ पुंमी नाइइशा बाक्शो थिदा बाक्त। मिनू मेकोमी मेको कली “यहूदा रे जाक्शो परमप्रभु आ मुर गेन ननी?” दे हिल्लो पवा बाक्त। मिनू मेकोम “ओं, गोन नड” देमाक्त।

15 मिनू मेकोमी मेको कली “गो नु आं खिं लशा, मारेड जचा थोत्रक जने” देमाक्त।

16 तन्न मेकोमी “गो गे नु लेशशा लने मचाप्नुड। इन खिम ओवने मचाप्नुड। गो एको रागीम मारेड जने तूने मचाप्नुड।

17 मारदे हना परमप्रभु यावेमी ‘गे मेको रागीम जचा थोत्रक मजावो। ब्वाक्कु यो मतूडो। इ लशो लां रे मलेतो’ देशो बाक्ब” देमाक्त।

18 मिनू मेको परमप्रभु यावे आ लोत्र पाइब खूशोमी मेको कली “गो यो इन खोदेशो परमप्रभु यावे आ लोत्र पाइब नड। मिनू परमप्रभु यावे आ स्वर्ग डा गेय पाइब काम गो नु जचा तूचा कली इन कली आं खिम चाक्चा माल्नेवे देत” देमाक्त। तन्न मेकोमी मेको कली जोल पाइइशा बाक्माक्त।

19 नोले मेको परमप्रभु आ मुर लेशशा, मेको नु लमाक्त। मिनू मेको आ खिम जवा तूडा बाक्त।

20 मिनू मेकोपुकी जना जन बाक्मानु, परमप्रभु यावेमी मेको लेशशा चाक्ब, आ लोत्र पाइब खूशो कली लोत्र पपदा बाक्त।

21 मिनू मेकोमी यहूदा रे जाक्शो, परमप्रभु आ मुर कली ठेयब सेंदा पा “परमप्रभु यावेमी ‘गे परमप्रभु यावे आ लोत्र मटिवी। मिनू गे परमप्रभु यावे, इ परमप्रभु आ अरेशो मटिवी।

22 मेको आ मजावो, मतूडो देशो रागीम लेशशा, जथ तूथ जाक्ते। मोपतीके मुल इ बेक्शो रां इ किकी पिपी आन तुरसुम मथिम्सीब’ देशो बाक्ब” देमाक्त।

23 मिनू मेको परमप्रभु आ मुरुम जने तूने थुमा नोले, मेको कली लेशशा चाक्ब परमप्रभु यावे आ लोत्र पाइब खूशोमी मेको कली आ लगम पाइइशा गधा गेवा बाक्त।

24 मिनू मेको लना लन बाक्मेनु लांम गुप्स का ग्रूशा मेको कली सदा बाक्त। मिनू मेको आ बेक्शो रां लांम गोल्शा लीमाक्त। गधा मेको आ नेक्थान राप्शा बाक्शो बाक्माक्त। मिनू गुप्स यो मेको आ नेक्था राप्शा बाक्शो बाक्माक्त। १राजा २०:३६

25 मिनू मेको लां रे पा गाक्ब मुरपुकीम मेको आ बेक्शो रां लांम गोल्शा बाक्शो नु गुप्स मेको आ नेक्थान बाक्शो तामे बाक्त। मिनू मेकोपुकीम मेको खूशो परमप्रभु यावे आ लोत्र पाइब आ सहर लशा, मेको लोत्र शोत्रडमे बाक्त।

26 मिनू मेको कली लां रे लेशशा चाक्ब मेको खूशो परमप्रभु यावे आ लोत्र पाइबमी मेको लोत्र नेना बाक्त। मिनू मेकोम “मेको परमप्रभु आ मुर बाक्ब। मेकोम परमप्रभु यावे आ लोत्र मटिशो बाक्त। मोपतीके परमप्रभु यावेमे मेको कली गुप्स कली गेवा बाक्त। मिनू परमप्रभु यावेमे मेको आ पबंम पशो लोत्र गाप्चा कली गुप्समे मेको कली सदा बाक्त” देमाक्त

27 मिनू मेको परमप्रभु यावे आ लोत्र पाइब खूशोमी आ तौ आन कली “आं कली गधा काम लगम पाइइशा गेयीनी” दे माइक्मी बाक्त। मिनू गधाम लगम पाइइशा गेमे बाक्त।

28 मिनू मेको लमेनु, मेको मुर बेक्शा लांम गोल्शा बाक्शो नु गधा नु गुप्स मेको आ नेक्था राप्शा बाक्शो थिदा बाक्त। मेको गुप्समे मेको बेक्शो मुर कली मब्वशो बाक्माक्त। गधा कली यो मसाइइशा बाक्माक्त।

29 मिनू मेको परमप्रभु यावे आ लोत्र पाइब खूशोमी मेको परमप्रभु आ मुर आ बेक्शो रां गुप्शा गधाम वोदा बाक्त। मिनू मेको आ पबंम रोंका पा थिम्चा कली आ सहरमी चाक्गा बाक्त।

30 मिनू मेकोम मेको बेक्शो मुर कली आ तुरसुमीन थिमा बाक्त। मिनू मेकोपुकीम “ए आंड लोकब, ए आंड लोकब” दे रोंका पामे बाक्त। येरमीया २२:१८

31 मिनू मेको कली थिम्ने थुम्शा, मेको परमप्रभु यावे आ लोत्र पाइब खूशोमी आ तौ आन कली “गो बेक्डा नोले आं कली यो मेकेर वोतीन। आं रुश मेको परमप्रभु आ मुर आ नेक्था लीमल।

32 मारदे हना मेको मुर आ देशो, बेथेलम बाकशो परमप्रभु यावे कली चढेतीक नु सामरीया सहर डा डांडा डा थान आन पर्वम देशो नेल्ल थमा पा गाण्ब” दैमाक्त।

33 मिनु मेको नोले यो यैरोबामम आ मरिम्शो पतीक मप्रोना बाक्त। मेकोम डांडाम बाकशो थानम थर नेल्ल डा मुर रे चढेब योत्रशा वोडकना वोडकन बाक्माक्त। सुड मुर चढेब दुम्चा दाक्ताक्व हना, मेको कली तेकोइ डांडा का डा चढेब सेल्शा वोदा बाक्त। १राजा १२:३१; प्रस्थान २८:४१

34 मेको यैरोबाम आ खिं डा पाप बाक्त। मोपतीके मेको आ खिं मलीथु, रागी रे क्याम्चा पुंडसे बाक्त।

## 14

यैरोबाम आ तौ बेकशो

1 मिनु यैरोबाम आ तौ अबीयाह रोड पवा बाक्त।

2 मिनु यैरोबाममी आ मीश कली “गे यैरोबाम आ मीश नवे, दे मुरुम मतुइक्पाइक्चा डा पा वा फेक्सो। मिनु शिलो सहरम लावो। मेकेर परमप्रभु यावे आ लोत्र पाइब अहीयाह बाक्ब। मेकोम आं कली एको मुर आन पिप दुम्चे देशो बाक्त। १राजा ११:२९-३१

3 मिनु गे १० ओटा शोब्ले, आइक्च बटुक नु गर का खुदो लाइशशा, मेको आ बाक्तीक लावो। मिनु मेकोमी आल कली मार दुम्बा, मेको इ कली शेंब” दे मदा बाक्त।

4 मोपतीके यैरोबाम आ मीशेम मेकोम देशो खोदेशो पवा बाक्त। मिनु मेको रीब पा शिलो अहीयाह आ खिं लमाक्त। मेना अहीयाह मिक्च मताइब दुम्शो बाक्माक्त। मारदे हना मेको खुशो दुम्शो बाक्माक्त।

5 तन्न परमप्रभु यावेमी अहीयाह कली “यैरोबाम आ मीश आ रोड पशो तौ आ पर्वम इ कली हिल्लो पथ जाक्ब। मिनु गे मेको कली आं देशो लोत्र मतो” दैमाक्त। मिनु मेको अर्को मीश मुर दुम्खु पा जाक्माक्त।

6 मिनु अहीयाहमी आ लाप्चोम खोइल थैक्शो नेंशा, मेको कली “ए यैरोबाम आ मीश खिंङगा पिवो। गे मारदे अर्को मीश मुर खोदेशो दुम्खु पवी? गो इ कली मरिम्शो लोत्र देचा माल्नुड।

7 गे यैरोबाम कली परमप्रभु यावे, इस्राएली आन परमप्रभुमी ‘गो इ कली मुर आन दाते डा ठेयब मुर सेल्ता। मिनु आं मुर इस्राएली, आन कली सासन पाइब सेल्तन। १राजा ११:३७

8 गो दाऊद आ खिं डा मुर रे राज्य खोइशशा, इ कली गेतन। तन्न गे आं गेय पाइब दाऊद खोदेशो मदुमे। मेकोमी आं डोंइती मार ठीक बाक्मे, मेको पना पन आं देशो टिप्नु। मिनु आ थुं नेल्लेम आं नोले खोइक्ती।

9 तन्न गे इ क्येडा डोंइती डा मुर नेल्ल आन क्येडा यो शुश मरिम्शो पाप्तीवी। गे इ कली यपाइशशा देवी देवता आन मूर्ति सेल्शा, आं कली गाइक्पाइक्ती। मिनु गे नोले शोंइसाक्वे।

10 मोपतीके गो यैरोबाम आ खिंम श्येत चाक्शा, मरिम्शो पाइनुड। गो इस्राएलम बाकशो यैरोबाम आ खिं डा वोंइश मुर, वाइल बाक्तेक्म हना यो, अरु मुर बाक्तेक्म हना यो, नेल्ल आन कली साइक्नुडमी। गो मेको आन कली मनुम्मा सम्म यैरोबाम आ खिं कली गोबर चोशो खोदेशो पा चोइनुड। १राजा १५:२९; १राजा २१:२१

11 सहरम बेकशो यैरोबाम आ खिं डा मुर आन कली कुचुमम ब्वाइनीम। मिनु रू मेर बेकशो आन कली चिकबीम ब्वाइनीम’ दे परमप्रभु यावेमी देशो बाक्ब। १राजा १६:४; १राजा २१:२४

12 मुल गे लेशशा इ खिं लावो। गे सहरम ओव्रडे चोटी इ आल बेक्ब।

13 मिनु इस्राएली नेल्लेमी मेको आ पर्वम रोंका पा, मेको कली थिन्मीम। मारदे हना मेको का ला रिम्शो पा थिम्चा पुंडसीब बाक्त। परमप्रभु यावे, इस्राएली आन परमप्रभुमी मेको आल कली दाक्ताक्व।

14 मिनु परमप्रभु यावेमी इस्राएलमी पिप का सेल्ब। मेकोमी यैरोबाम आ खिं कली क्याम्ब। मेको मुलाक्तीन बाक्ब। १राजा १५:२९

15 परमप्रभु यावेम इस्राएल कली ब्वाक्कुम एर ओंथ पा हिम्शो बुदी मीलु घांस खोदेशो सेल्ब। मेकोमी इस्राएली आन किकी पिपी आन कली गेशो, एको रिम्शो रागी रे खेरब। मिनु मेको आन कली युफ्रेटीस खोला आ आइक्ची हांबुम एर ओंथ ब्रपाइक्ब। मारदे हना मेकोपुकीम देवी आ मूर्ति पाइशशा थाम सेल्शा, परमप्रभु यावे कली गाइक्पाइक्तेक्म। २राजा १७:२३

16 मिनु मेकोमी यैरोबामम मरिम्शो पतीके नु इस्राएली आन कली मरिम्शो पपाइशशा आ पर्वम इस्राएल कली प्रोंइब” दैमाक्त। १राजा १२:२८-३०; १राजा १३:३४

17 मिनु यैरोबाम आ मीश बोक्शा, आ खिं तिरचा सहर लेम्माक्त। मिनु मेको आ खिं डा लाप्चो जाक्मेनु, आल बेक्माक्त।

18 मिनु परमप्रभु यावेम आ गेय पाइब, अहीयाह रे पा देशो खोदेशो पा इस्राएली नेल्लेमी मेको आ पर्वम रोंका पा थिम्मे बाक्त।

19 यैरोबाम आ पशो अरु गेय, मेको आ पशो लडाइपुकी, मेकोम दोदेशो पा सासन पवा, मेको नेल्ल इस्राएल डा पिप आन इतिहासम ब्रेक्शो बाक्ब।

20 यैरोबाममी २२ बर्स सासन पवा बाक्त। मिनु मेको बेक्माक्त। मिनु मेको आ पा डा आ तौ नादाब पिप दुम्माक्त। १राजा १५:२५

यहूदा डा पिप रेहोबाम

२इतिहास १२:-

21 मिनू सोलोमन आ तौ रेहोबाम यहूदा डा पिप दुम्माक्त। मेको ४१ बर्स दुम्शो बाक्माक्त। मेकोम यरूसलेम सहरम १७ बर्स सासन पवा बाक्त। परमप्रभु यावेमी इस्राएली आन थर नेल्ल आन दातेम बाक्चा कली मेको सहर योन्नशो बाक्माक्त। रेहोबाम आ ममा आ नें नामा बाक्माक्त। मेको अम्मोनी का बाक्माक्त। १राजा १२:१७

22 यहूदा डा मुरपुकीम परमप्रभु यावे आ डोंडती मार मरिम्शो बाक्मे, मेको पामे बाक्त। मेकोपुकीमी आन किकी पिपीम मरिम्शो पशो क्येडा यो शुश मरिम्शो पामे बाक्त। परमप्रभु यावे कली थाम्पा रुश पपदमे बाक्त।

23 मेकोपुकीम इर डांडा डांडा डा थानम, देवी आ मूर्ति पाइशशो थाम नु लाइशशो डांडा डा शुश सफा पाइशशो रवा आन आगाम थान सेल्समा बाक्त। २राजा १६:१-४

24 मेको रागी डा थानम तेल्लेम वोंइश मुरपुकी यो बाक्मा बाक्त। मेकोपुकीमी परमप्रभु यावेमी आन डोंडती रे खेरशो रागी रागी डा मुर आन ग्रान्रा दिशो नेल्ल पामे बाक्त।

25 मिनू रेहोबामम सासन पवा आ ५ बर्सम इजीप्त डा पिप शीशकमी यरूसलेम कली लडाइ तोवा बाक्त। १राजा ११:४०

26 मिनू मेकोमी परमप्रभु यावे आ खिं नु पिप आ खिं डा शुश क्येट लाइब मारेइ मारेइ रोइशशा लदा बाक्त। मेकोम सोलोमन आ सेल्शो सुन के तेक्तीक नेल्ल योल्दा बाक्त। १राजा १०:१६

27 मिनू पिप रेहोबामम मेको आ पा डा कांसा के तेक्तीक सेल्था, पिप आ खिं डा लाप्चो खाल पाइब आन टेयब मुर आन कली जिम्मा गोमी बाक्त।

28 मिनू पिप परमप्रभु यावे आ खिंम ओवमेनु, मेको खाल पाइबपुकीम मेको तेक्तीके कुरबाक्मा बाक्त। मिनू नोले लेशशा चाक्शा खाल पाइब आन कोठाम वोइक्बाक्मा बाक्त।

29 रेहोबाम आ पशो अरु गेय, मेको आ पशो नेल्ले मार, मेको यहूदा डा पिप आन इतिहासम ब्रेक्शो मबाक्वा डा?

30 रेहोबाम नु येरोबाम आस दातेम गेना हना यो लडाइ दुम्स डा दुम्स बाक्माक्त।

31 मिनू रेहोबाम बेक्माक्त। मिनू मेको आ किकी पिपी नु दाऊद आ सहरम थिम्चा पुंडसे बाक्त। मेको आ ममा आ नें नामा बाक्माक्त। मेको अम्मोनी बाक्माक्त। मिनू रेहोबाम आ पा डा आ तौ अबीयाम पिप दुम्माक्त।

## 15

यहूदा डा पिप अबीयाम

1 मिनू अबीयाम यहूदा डा पिप दुम्माक्त। मेना नेबात आ तौ येरोबाम पिप दुम्शो १८ बर्स दुम्शो बाक्माक्त। २इतिहास १३:-

2 मेकोमी यरूसलेमम बर्स सांसासन पवा बाक्त। मेको आ ममा आ नें माकाह बाक्माक्त। मेको अबीशालोम आ तमी बाक्माक्त।

3 मेकोमी आ आफ खोदेंशो पा मरिम्शो पवा बाक्त। मेको आ किकी दाऊद खोदेंशो पा, आ थुं नेल्लेमी परमप्रभु यावे, आ परमप्रभु आ नोले मखोदा बाक्त।

4 मो हना यो परमप्रभु यावे, मेको आ परमप्रभुमी दाऊद आ पर्वम अबीयाम आ पा डा पिप दुम्पाइक्चा कली तौ का गेवा बाक्त। मोपा यरूसलेम बोल्यो सेला बाक्त। १राजा ११:३६

5 मारदे हना दाऊदमी परमप्रभु यावे आ डोंडती ठीक पशो बाक्माक्त। मेको परमप्रभु यावे आ देंशो रे एर ओथ मपवा बाक्त। मेकोमी हिती उरीयाह कली मरिम्शो पशो डा लाक्शा अरु मारेइ मरिम्शो मपवा बाक्त। २सामुएल ११:-; २सामुएल १२:९

6 रेहोबाम नु येरोबाम आस दातेमी लडाइ दुम्स डा दुम्स बाक्माक्त। अबीयाम ब्रॉइम सम्म मोदेंशो दुम्माक्त।

7 अबीयाम आ पशो अरु गेय, मेको आ पशो नेल्ले, मार, मेको यहूदा डा पिप आन इतिहासम ब्रेक्शो मबाक्वा डा? अबीयाम नु येरोबाम आस दातेम गेना हना यो लडाइ दुम्स डा दुम्स बाक्माक्त।

8 मिनू अबीयाम बेक्माक्त। मिनू मेको दाऊद आ सहरमी थिम्चा पुंडसे बाक्त। मिनू मेको आ पा डा आ तौ आसा पिप दुम्माक्त।

यहूदा डा पिप आसा

9 आसा यहूदा डा पिप दुम्माक्त। मेना इस्राएल डा पिप येरोबाम पिप दुम्शो २० बर्स दुम्शो बाक्माक्त।

10 मिनू आसामी यरूसलेममी ४१ बर्स सासन पवा बाक्त। मेको आ बगे अबीशालोम आ तमी माकाह बाक्माक्त।

11 आसामी आ किकी दाऊद खोदेंशो पा, परमप्रभु यावे आ डोंडती मार ठीक बाक्मे, मेको पवा बाक्त।

12 मेकोमी थानम बाक्ब तेल्लेम वोंइश मुर आन कली रागी रे गुंडदीमी बाक्त। मिनू मेकोमी आ किकी पिपपुकीम सेल्शो मूर्ति नेल्ल ताइक्तीमी बाक्त। २राजा २३:७; २इतिहास १४:१-४

13 मिनू आ बगे माकाह कली राज्य डा ममा रे गुंडदा बाक्त। मारदे हना मेकोमी अशेराह देवी आ ग्रान्रा दिशो थाम पाइशशो मूर्ति का सेल्सीशो बाक्माक्त। आसामी मेको मूर्ति पाइशशो थाम क्योरशा खोल्शा किद्रोन खोल्साम चोपाइक्मी बाक्त।

14 मेकोमी इर डांडा डा थान चहिं मप्रेत्तीके लीमा बाक्त। तन्न आसा ब्रॉइम सम्म आ थुं नेल्लेमी परमप्रभु यावे आ नोले खोदा बाक्त। १राजा २२:४४

15 मेकोमी आं नु आ आफोम चढेशो सुन, चांदी नु अरु मार मार परमप्रभु यावे आ खिंम चाक्पाइक्मी बाक्त।

16 मेको पिप आसा नु इस्राएल डा पिप बाशा आस दातेम गेना हना यो लडाइ दुम्स डा दुम्स बाक्माक्त। २इतिहास १६:१-६



17 इस्राएल डा पिप बाशामी यहूदा कली लडाइ तोवा बाक्त। मिनु सुइ आन कली यहूदा डा पिप आसा आ रागी लचा मगेथु, रामाह सहरम गारो प्रोव्रशा तेक्गा बाक्त।

18 मोपतीके आसामी परमप्रभु यावे आ खिं नु दरवार डा लीशो सुन नु चांदी नेल्ल लाइश्शा, आ गेय पाइब आन कली गेमी बाक्त। पिप आसामी मेको नेल्ल आ गेय पाइब आन कली गेशा, पिप ताब्रीमोन आ लौ, अराम डा हेज्योन आ चच, पिप बेन-हादाद आ बाक्तीक सोइक्तीमी बाक्त। मेको दमस्कस सहरम बाक्शो बाक्माक्त। २राजा १२:१९

19 मिनु पिप आसामी पिप बेन-हादाद कली “इस आफ गारशो खोदेशो पा, गो यो गारस। गो एको सुन नु चांदी कोसेली सोइक्ताकड। मुल इस्राएल डा पिप बाशा नु पशो कबल प्रोनीन। मिनु मेकोमी आं रागी प्रोनल” दे सल्ला पचा कली मुर सोइक्ता बाक्त।

20 मिनु बेन-हादादमी पिप आसा आ देशो बिस्से बाक्त। मिनु मेकोमी आ लडाइ पाइब आन टेयब मुर आन कली इस्राएल डा सहर नु लडाइ पथ सोइक्ता बाक्त। मिनु मेकोपुकीम इयोन, दान, आबेल-बेथ-माकाह किन्नेरोथ नेल्ल नु नाप्टाली आ रागी नेल्ल ग्रामा बाक्त। २राजा १५:२९

21 मिनु बाशामी मेको लोव्र नेशा, रामाह सहर कली बोल्यो सेल्चा प्रोना बाक्त। मिनु तिरचा लेशशा लमाक्त।

22 मिनु पिप आसामी यहूदा डा मुर नेल्ल आन कली “बाशामी रामाह कली बोल्यो सेल्चा कली तेल्यो शी फुल्लु चाक्कीन” दे अरेमी बाक्त। मिनु पिप आसामी मेको शी फुल्लुमी बेन्यामीन डा गेबा नु मिस्पा सहर सेला बाक्त।

23 आसा आ पशो अरु गेय, मेको आ सक्ति, मेको आ पतीके, मेको आ सेल्शो सहर, मार, मेको यहूदा डा पिप आन इतिहासम ब्रेक्शो मबाक्बा डा? मिनु मेको खूशो दुम्मेनु, आ खोइल रोइ पवा बाक्त। २इतिहास १६:११-१४

24 मिनु आसा बेक्माक्त। मिनु मेको आ किंकी पिपी नु दाऊद आ सहरम थिम्चा पुंडसे बाक्त। मिनु मेको आ पा डा तौ येहो-शाफात पिप दुम्माक्त। १राजा २२:४१

इस्राएल डा पिप नादाब

25 येरोबाम आ तौ नादाब इस्राएल डा पिप दुम्माक्त। मेना आसा यहूदा डा पिप दुम्शो बर्स निकशी दुम्शो बाक्माक्त। मिनु पिप नादाबमी इस्राएलम बर्स निकशी सासन पवा बाक्त।

26 मेकोम परमप्रभु यावे आ डोंइती मार मरिम्शो बाक्मे, मेको पवा बाक्त। मेको आ आफोम खोदेशो पा पाप पा मेको आ लाम गक्माक्त। मिनु आ आफोमी इस्राएली आन कली पपाइश्शो पाप यो पवा बाक्त। १राजा १२:२८-३०

27 मिनु इस्साकार आ खिं डा मुर अहीयाह आ तौ बाशाम मेको कली मरिम्शो पचा गोवा बाक्त। मिनु बाशामी मेको कली गिब्बेथोन सहरम तुप्शा सदा बाक्त। मेको गिब्बेथोन सहर नादाब नु इस्राएली नेल्लेम पुम्शा वोइश्शो, पलिस्ती आन सहर बाक्माक्त। यहोसु १९:४४

28 मिनु यहूदा डा पिप आसा पिप दुम्शो बर्स सां दुम्मेनु, बाशामी नादाब कली सदा बाक्त। मिनु मेको आ पा डा पिप दुम्माक्त।

29 मिनु मेको पिप दुम चोटीन येरोबाम आ खिं डा मुर नेल्ल आन कली साइक्मी बाक्त। मेकोम येरोबाम आ खिं डा सेस बाक्शो नेल्ल आन कली साइक्मी बाक्त। मोपा परमप्रभु यावेमी आ गेय पाइब शिलो डा अहीयाह रे पा देशो लोव्र नेल्ल खबा बाक्त। १राजा १४:१०-११

30 येरोबाम आ पशो पाप, मेकोमी इस्राएली आन कली पपाइश्शो पापम पतीके नु मेकोमी परमप्रभु यावे, इस्राएली आन परमप्रभु कली गाइक्पाइक्तीके मो दुम्शो बाक्माक्त।

31 नादाबमी पशो अरु गेय, मेको आ पशो नेल्ल, मार, मेको इस्राएल डा पिप आन इतिहासम ब्रेक्शो मबाक्बा डा?

32 पिप आसा नु इस्राएल डा पिप बाशा आस दातेमी गेना हना यो लडाइ दुम्स डा दुम्स बाक्माक्त।

इस्राएल डा पिप बाशा

33 मिनु अहीयाह आ तौ बाशामी इस्राएलम सासन पवा बाक्त। मेना आसा यहूदा डा पिप दुम्शो बर्स सां दुम्शो बाक्माक्त। मिनु बाशा तिरचा सहरम बाक्शा २४ बर्स इस्राएल कली सासन पवा बाक्त।

34 मिनु मेको येरोबाम आ लाम गक्का, मेकोमी इस्राएली आन कली पपाइश्शो पाप पशा, परमप्रभु यावे आ डोंइती मार मरिम्शो बाक्मे, मेको नेल्ल पवा बाक्त।

## 16

1 मेको नोले परमप्रभु यावेम बाशा आ पर्बम हानानी आ तौ येहू कली लोव्र पवा बाक्त।

2 मार लोव्र पवा बाक्त देशा हना “गो इ कली फुरक रे पोक्शा आं मुर इस्राएली आन टेयब मुर सेल्लतन। तन्न गे येरोबाम आ लाम गक्का, आं मुर इस्राएली आन कली पाप पपाइक्तीवी। मिनु मेको आन पापम पतीके आं कली गाइक्पाइक्तीमी। १राजा १४:७

3 मोपतीके गो बाशा नु आ खिं कली खतम पोक्का चिक्शो बाक्नुड। मिनु गो इ खिं कली नेवात आ तौ येरोबाम आ खिं खोदेशो सेल्लुड। १राजा १५:२९

4 बाशा, इ खिं डा सहरम बेक्शो मुर आन कली कुचुमम ब्वाइनीम। मिनु रूम बेक्शो मुर आन कली चिक्बपुकीम ब्वाइनीम” दैमाक्त। १राजा १४:११

5 बाशा आ पशो नु अरु गेय, मेको आ सक्ति, मार, मेको इस्राएल डा पिप आन इतिहासम ब्रेक्शो मबाक्बा डा?

6 मिनु बाशा बेक्माक्त। मिनु तिरचा सहरम आ किंकी पिपी आ नेक्था थिम्चा पुंडसे बाक्त। मिनु मेको आ पा डा आ तौ एलाह पिप दुम्माक्त।

7 डोंडती परमप्रभु यावेमी हानानी आ तौ, आ लोत्र पाइब येहू कली बाशा नु आ खिं डा मुर आन पबंम लोत्र पशो बाक्माक्त। मेकोमी परमप्रभु यावे आ डोंडती मरिम्शो पा गाइक्पाइक्तीके, येरोबाम आ खिं डा मुर खोदेशो दुम्तीके नु येरोबाम नु आ खिं डा मुर आन कली खतम पोक्तीके हानानी आ तौ, आ लोत्र पाइब येहू कली मोदेशो लोत्र पशो बाक्माक्त।

इस्त्राएल डा पिप एलाह

8 बाशा आ तौ एलाह इस्त्राएल डा पिप दुम्माक्त। मेना आसा यहूदा डा पिप दुम्शो २६ बर्स दुम्शो बाक्माक्त। मिनु एलाहम तिरचा सहरम बाक्शा, बर्स निकशी इस्त्राएल कली सासन पवा बाक्त।

9 मिनु मेको आ लडाइ पाइब बग्गी चलेब, आन भाग निकशीमी भाग का डा ठेयब मुर जिप्तीमी मेको कली मरिम्शो पचा गोवा बाक्त। मेना पिप एलाह तिरचा सहरम आ खिं डा मारेड मारेड कोत्रब अरचा आ खिं तिरचा सहरम बाक्शा, तूशा दुक्शो बाक्माक्त।

10 मिनु जिप्ती आगा ओत्रशा, मेको कली तुप्शा सदा बाक्त। मिनु मेको आ पा डा पिप दुम्माक्त। मेना आसा यहूदामी पिप दुम्शो २७ बर्स दुम्शो बाक्माक्त। २राजा ९:३१

11 मिनु जिप्ती पिप दुम चोटीन बाशा आ खिं डा मुर नेल्ल आन कली साइक्मी बाक्त। मेकोम बाशा आ खिं डा मुर, मेको आ वारचपुकी नु आ नाता गोत्रता वोंडश मुर नेल्ल आन कली का यो मप्रोंडथु साइक्मी बाक्त।

12 परमप्रभु यावेमी बाशा आ पबंम आ लोत्र पाइब येहू रे देशो खोदेशो पा, जिप्तीमी बाशा आ मुर नेल्ल आन कली साइक्मी बाक्त।

13 बाशा नु मेको आ तौ एलाहमी पशो पाप नु इस्त्राएली आन कली पपाइश्शो पाप आ पतीके, आन शोर गाक्शो मूर्ति सेल्लीके नु परमप्रभु यावे, इस्त्राएली आन परमप्रभु कली गाइक्पाइक्तीके मोदेशो दुम्शो बाक्माक्त।

14 एलाह आ पशो नु अरु गेय नेल्ले, मार, इस्त्राएल डा पिप आन इतिहासम ब्रेक्शो मबाक्बा डा?

इस्त्राएल डा पिप जिप्ती

15 मिनु जिप्तीम तिरचा सहरम ७ नाक्त सासन पवा बाक्त। मेना आसा यहूदा डा पिप दुम्शो २७ बर्स दुम्शो बाक्माक्त। लडाइ पाइबपुकी चहिं पलिस्ती आन सहर गिब्बेथोन आ नेक्था बाक्तीक सेल्शा बाक्शो बाक्मा बाक्त। १राजा १५:२७

16 मिनु बाक्तीक सेल्शा बाक्ब इस्त्राएलीपुकीमी जिप्ती आ पशो नु पिप कली साइश्शो लोत्र नेंशा, मेको नाक्तीन मेकोपुकीमी आन बाक्तीक उड लडाइ पाइब आन ठेयब मुर ओप्ती कली इस्त्राएल डा पिप सेल्मे बाक्त।

17 मिनु ओप्ती नु इस्त्राएल डा लडाइ पाइब नेल्लेम गिब्बेथोन प्रोंडशा तिरचा कली पुद्दमे बाक्त।

18 मिनु जिप्तीमी सहर ग्राशो तवा चोटी पिप आ खिं ओत्रशा मी सुडश्शा, आंमा यो दुप्शा बेक्माक्त। २सामुएल १७:२३

19 मेकोम परमप्रभु यावे आ डोंडती मार मरिम्शो बाक्मे, मेको पशा, येरोबाम आ लॉम गाक्शो बाक्माक्त। मिनु येरोबाम आ पशो पाप नु इस्त्राएली आन कली पपाइश्शो पाप पतीकेम मेको मोदेशो दुम्शो बाक्माक्त।

20 जिप्ती आ पशो नु अरु गेय, एलाह कली मरिम्शो पशो, मार, मेको इस्त्राएल डा पिप आन इतिहासम ब्रेक्शो मबाक्बा डा?

इस्त्राएल डा पिप ओप्ती

21 मेको नोले इस्त्राएल डा मुरपुकी हुल निकशी दुम्मा बाक्त। हुल काम गिनाथ आ तौ तिब्नी कली पिप सेल्चा कली वारच पदमे बाक्त। मिनु हुल का चहिं ओप्ती आ नोले खोदमे बाक्त।

22 तन्न ओप्ती आ नोले खोइक्बपुकी गिनाथ आ तौ तिब्नी आ नोले खोइक्ब आन क्येडा बोल्यो बाक्मा बाक्त। मोपतीके तिब्नी कली साइश्शा, ओप्ती पिप दुम्माक्त।

23 मोपा ओप्ती इस्त्राएल डा पिप दुम्माक्त। मेना आसा यहूदाम पिप दुम्शो ३१ बर्स दुम्शो बाक्माक्त। ओप्तीमी नेल्ल पा १२ बर्स सासन पवा बाक्त। मेकोम ६ बर्स तिरचा सहरम बाक्शा, सासन पवा बाक्त।

24 मेकोम टलेन्ट निकशी चांदीम शेमेर आ गुड रे सामरीया डा डांडा ग्याप्शा, मेकेर गारो हिरशो सहर का सेला बाक्त। मिनु मेको सहर डा होत्रप शेमेर आ नें रे पा मेको आ नें सामरीया वोदा बाक्त। टलेन्ट का ३४ किलो बाक्ब।

25 तन्न ओप्तीमी परमप्रभु यावे आ डोंडती मार मरिम्शो बाक्मे, मेको पवा बाक्त। मेकोम आ डोंडती डा पिप नेल्ल आन क्येडा शुश मरिम्शो पवा बाक्त। मीका ६:१६

26 मेको नेबात आ तौ येरोबाम आ पाप डा लॉम गाक्माक्त। मेकोमी मेको पाप इस्त्राएली आन कली पपाइश्शो बाक्माक्त। मिनु मेकोपुकीम मेको पाप पा आन ग्रांशा दिशो मूर्ति आन पबंम परमप्रभु यावे, इस्त्राएली आन परमप्रभु कली गाइक्पाइश्शो बाक्मा बाक्त।

27 ओप्ती आ पशो नु अरु गेय, मेको आ सक्ति कोंडतीके नेल्ल, मार, मेको इस्त्राएल डा पिप आन इतिहासम ब्रेक्शो मबाक्बा डा?

28 मिनु ओप्ती बेक्माक्त। मिनु सामरीया सहरम थिम्चा पुंडसे बाक्त। मिनु मेको आ पा डा आ तौ आहाब पिप दुम्माक्त।

आहाब इस्त्राएल डा पिप दुम्शो

29 ओप्ती आ तौ आहाब इस्त्राएल डा पिप दुम्माक्त। मेना आसा यहूदा डा पिप दुम्शो ३८ बर्स दुम्शो बाक्माक्त। ओप्ती आ तौ आहाब सामरीया सहरम बाक्शा, इस्त्राएल कली २२ बर्स सासन पवा बाक्त।

30 मिनु ओप्ती आ तौ आहाबमी परमप्रभु यावे आ डोंडती पिप नेल्ल आन क्येडा मरिम्शो पवा बाक्त।

31 नेबात आ तौ येरोबाम आ पाप डा लॉम गाक्मा, मेको कली मारेड खोदेशो महुम्माक्त। मेकोम सीदोन डा पिप एथ-बाल आ तमी इजेबेल कली ग्युबे पवा बाक्त। मिनु बाल देवता कली पूजा पा ठेयब सेला बाक्त।

32 मेकोम सामरीयाम बाल आ खिंम बाल कली चढेतीक का सेला बाक्त। २राजा ३:२; २राजा १०:२७-२८; २राजा ११:१८

33 आहाबम अशेराह देवी आ मूर्ति पाइशशो थाम का यो सेल्पदा बाक्त। मिनु मेकोम आ क्येडा डोंइती डा इस्राएल डा पिप आन क्येडा परमप्रभु यावे, इस्राएली आन परमप्रभु कली शुश गाइक्पाइक्तीक गेय पवा बाक्त।

34 आहाबम सासन पवा ना बेथेल डा हीएलमी यरीको सहर लेंशा सेला बाक्त। मेको आ जग वोदमेनु, मेको आ डोंइती जरमेशो तौ अबीराम बेक्माक्त। मिनु मेको आ टेयब लाप्चो वोदमेनु, मेको आ कान्छा तौ सेगुब बेक्माक्त। मोपा परमप्रभु यावेमी नून आ तौ यहोसुरे पा देशो लोत्र खबा बाक्त। यहोसु ६:२६

## 17

खदपुकीम एलीया कली थुल्लो

1 मिनु गिलाद डा तिश्बे सहर डा एलीयाम आहाब कली “परमप्रभु यावे, इस्राएली आन परमप्रभु ब्रोंइशा बाक्शो खोदेशो पा, गो मेको आ डोंइती राप्शा गेय पाइनुड। इस्राएलम रेड नु सीत मारेड मयीब” देमाक्त। १राजा ८:३५; लूका ४:२५; याकूब ५:१७; प्रकाश ११:६

2 मिनु परमप्रभु यावेमी एलीया कली लोत्र पवा बाक्त।

3 मार लोत्र पवा बाक्त देशा हना “एको रागी प्रोंइशा, पूर्व गे लावो। मिनु यर्दन आ पूर्व गे बाक्शो केरीथ खोलाम लशा खुइशशा बाक्को।

4 गे मेको खोला डा ब्वाक्कु तूडो। मिनु गो इ कली थुल्चा कली मेकेर डा खद आन कली अरेता” देमाक्त।

5 मिनु मेकोमी परमप्रभु यावे आ देशो खोदेशो पवा बाक्त। मिनु मेको यर्दन आ पूर्वम बाक्शो केरीथ खोला लशा, खुइशशा बाक्माक्त।

6 मिनु खदपुकीम मेको कली नाकदो सुनी शोब्ले नु श्ये चाक्शा, गेमे बाक्त। मिनु एलीया मेको खोला डा ब्वाक्कु तूशा बाक्माक्त।

7 इच्का नाक्त नोले रेड मयितीके मेको खोला डा ब्वाक्कु सोत्रमाक्त।

चारेफाथ डा मीश मुर

8 मिनु परमप्रभु यावेमी मेको कली लोत्र पवा बाक्त।

9 मार लोत्र पवा बाक्त देशा हना “मुल गे सीदोन डा चारेफाथ सहर लावो। गो मेकेर इ कली थुल्चा कली आ वोंइश बेक्शो मीश मुर का कली अरेता” देमाक्त। लूका ४:२५-२६

10 मोपतीके मेको चारेफाथ सहरम लमाक्त। मिनु मेको चारेफाथ सहर डा टेयब लाप्चोम जाक्दीम्मेनु, आ वोंइश बेक्शो मीश मुर का शी खुम्ना खुम्न बाक्शो तवा बाक्त। मिनु मेको कली ब्रेशशा “आं कली शिशी पा लोटा का ब्वाक्कु तूचा गेयी। मिनु गो तूनुड” देमाक्त।

11 मिनु मेको मीश मुर ब्वाक्कु ब्रथ लन लना, लेंशा ब्रेशशा “आं कली शिशी पा टुक्रा का शोब्ले यो पिशशा गेयी” देमाक्त।

12 तन्न मेकोमी “परमप्रभु यावे, इन परमप्रभु ब्रोंइशा बाक्शो खोदेशो पा बोसुम मुठी का फस नु हुडग्रोम इच्का खोइ तेल डा लाक्शा, आं खिंम मारेड मबाक्ब। गो इच्का खोइ शी खुप्शा, खिं लशा, गो नु आ तौ आंस कली शोब्ले सेल्नुड। मिनु गो मेको जशा, बेक्नस्कु” देमाक्त।

13 मिनु एलीयाम मेको कली “महिनो, खिं लशा इ देशो खोदेशो पावो। तन्न मेको क्येडा डोंइती बटुक का सेल्शा, एक आं बाक्तीक चाक्को। मिनु मेको नोले इस कली जचा थोत्रक सेलो।

14 मारदे हना परमप्रभु यावे, इस्राएली आन परमप्रभुमी ‘गो रागीम रेड मयिपदु सम्म फस मनुप्ब। मिनु हुडग्रो डा तेल यो मनुप्ब’ देशो बाक्ब” देमाक्त। २राजा ४:२-४

15 मिनु मेको मीश मुर लशा एलीयाम देशो खोदेशो पवा बाक्त। मिनु मेको नेल्ल आन कली शुश नाक्त सम्म जचा थोत्रक गाम्माक्त।

16 मारदे हना एलीया रे पा परमप्रभु यावेम देशो खोदेशो पा बोस डा फस मनुम्माक्त। मिनु हुडग्रो डा तेल यो मनुम्माक्त।

17 इच्का नाक्त नोले मेको मीश मुर, मेको खिं डा होत्रपोक्म आ तौ रोइ पवा बाक्त। मिनु मेको नाक्त किंत किंत मरिम्शो दुम्ना दुम्न लमाक्त। मिनु नोले बेक्माक्त।

18 मिनु मेको मीश मुरुम एलीया कली “परमप्रभु आ मुर, गे नु गो इस दातेम मार मरिम्शो दुम्शो बाक्बा? मार, गे आं पाप कोंइशा, आं तौ कली साइक्थ जाक्नी?” देमाक्त।

19 मिनु एलीयाम “इ तौ आं कली गेयी” देमाक्त। मिनु मेकोमी मेको आ तौ आ गुइ रे ताक्शा आ बाक्तीक तला तार लदा बाक्त। मिनु मेको कली आ ब्राख्येम वोदा बाक्त।

20 मेको नोले मेकोमी टेयब सेंदा पा परमप्रभु यावे कली “परमप्रभु यावे, आं परमप्रभु, गो सुका आ खिंम बाक्डा, मेको आ तौ बेक्पा मेको वोंइश बेक्शो मीश मुर कली मारदे श्येत गेनी” देमाक्त।

21 मिनु मेको सां ख्येप मेको बेक्शो आल तार गोल्माक्त। मिनु टेयब सेंदा पा, परमप्रभु यावे कली “परमप्रभु यावे, आं परमप्रभु, एको आल कली लेंशा ब्रोंइपतीन” देमाक्त। २राजा ४:३४; प्रेरित २०:१०

22 मिनु परमप्रभु यावेमी एलीया आ पुंइशो लोत्र नेना बाक्त। मिनु मेको आल ब्रोंइमाक्त।

23 मिनू एलीयाम मेको कली पोक्शा तला तार रे आगा यिदा बाक्त। मिनू मेको आ ममा कली गेशा “कोव्रडो, इ तौ ब्रोंडत” दे मदा बाक्त। लूका ७:१५; हिब्रू ११:३५

24 मिनू मेको मीश मुरुमी एलीया कली “गे परमप्रभु आ मुर बाक्नीनी, दे मुल गो थमा पा तुइक्ताक्ड। मिनू इन देशो परमप्रभु यावे आ लोव्र थमा बाक्त” देमाक्त।

## 18

एलीया नु ओबदिया गुम्शो

1 मिनू परमप्रभु यावेम रागी सोव्रशो शुश नाक्त नोले बर्स सांमी एलीया कली लोव्र पवा बाक्त। मार लोव्र पवा बाक्त देशा हना “गे लशा, आहाब कली गुमो। मिनू गो रागीम रेउ यिपाइक्नुड” देमाक्त।

2 मोपतीके एलीया आहाब कली गुम्थ लमाक्त। मेना सामरीया सहरम ठेयब अन्काल दुम्शो बाक्माक्त।

3 मिनू आहाबमी आ खिं कोव्रब ओबदिया कली ब्रेत्थ सोइक्ता बाक्त। मेको ओबदिया परमप्रभु यावे कली शुश मान पा हिंशा, थमा सुइक्ब मुर का बाक्माक्त।

4 इजेबेलम परमप्रभु यावे आ लोव्र पाइब आन कली साइक्ना साइक्न बाक्मेनु, ओबदियामी मेको आन दाते डा सहे का जना आन कली लाइशशा, मेको आन कली प्रोंडचा कली जचा तूचा थोव्रक गेशा ५०, ५० जना डा हुल पा पुक्खी निक्शीम खुइशशा वोइशशो बाक्माक्त।

5 मिनू आहाबम ओबदिया कली “रागी डा ब्वाक्कु बुक्तीके, खोल्सा मेर लावो। गो शारा नु खचर आन कली प्रोंडचा कली घांस थिल्सा को? मोपा इ बस्तु भाव आन कली साइक्चा ममालनया को?” देमाक्त।

6 मिनू मेको निक्शीमी कोव्रचा कली रागी योक्ससा बाक्त। मिनू आहाब का गे नु ओबदिया अर्को गे लसा बाक्त।

7 मिनू ओबदिया लांम गाक्ना गाक्न बाक्मेनु, एलीयाम मेको कली गुमा बाक्त। मिनू ओबदियामी मेको कली तुइशशा खप सम्मन बाष्शा सेउ पा “आं प्रभु, गे थमा पा एलीयान ननी?” देमाक्त।

8 मिनू एलीयाम “ओं, गो नड। गे लशा इ होव्रप कली ‘एलीया एक बाक्त’ मतो” देमाक्त।

9 मिनू ओबदियामी “गे मार मरिम्शो पडा डा? गे इन गेय पाइब, आं कली साइक्पाइक्चा कली आहाब आ गुडम गेनीनी?”

10 परमप्रभु यावे, इन परमप्रभु गेना हना यो ब्रोंडशा बाक्शो खोदेशो पा, आं होव्रपम इन कली रागी रागी नु राज्य नेल्लेम माल्थ सोइक्ताक्व। तेकोइ रागी नु राज्य मलीशो बाक्ब। मिनू मेकोपुक्कीमी ‘एलीया एक मबाक्ब। गो थमा पा मेको कली थिन्ने मचाप्का’ देमानु, मेको कसम जचा माल्तेक्म।

11 तन्न मुल गे आं कली लावो, इ होव्रप कली ‘एलीया एक बाक्त, देंनो’ देतीनी।

12 गो इन कली प्रोनु चोटी परमप्रभु यावे आ सोक्तीम इन कली लाइक्ब। मिनू गो लशा आहाब कली मो देंडानु, मेकोमी इन कली मथित्तु हना, आं कली साइक्ब। मो हना यो, गो, इन गेय पाइब, आं आल रेन परमप्रभु यावे कली मान पा हिंशा, थमा सुइक्ब बाक्नुड।

13 आं प्रभु, इजेबेलम परमप्रभु यावे आ लोव्र पाइब आन कली साइक्ना साइक्न बाक्मेनु, गो मार पडा, मेको गे मनेनी डा? गो मेको आन दाते डा सहे का जना आन कली ५०, ५० जना पा पुक्खीम खुइशशा वोइक्तामी। मिनू मेको आन कली जचा तूचा गेतामी।

14 मिनू मुल गे आं कली लावो, इ होव्रप कली ‘एलीया एक बाक्त’ देंनो, देंतीनी। मेकोमी आं कली थमा पा साइक्ब” देमाक्त।

15 मिनू एलीयामी “गे मेको आ डोंडती बाक्शो मुर नेल्ल आन परमप्रभु यावे ब्रोंडशा बाक्शो खोदेशो पा, मुलाक्ती थमा पा आहाब कली गुम्नुड” देमाक्त।

16 मिनू ओबदिया आहाब कली गुम्थ लमाक्त। मिनू मेको कली मेको लोव्र शेंदा बाक्त। मिनू आहाब एलीया कली गुम्थ जाक्माक्त।

एलीया कारमेल डांडाम बाक्शो

17 मिनू आहाबमी एलीया कली तशा, मेको कली “इसाएल कली श्येत गेब गेन नवे?” दे मदा बाक्त। येरमीया ३८:४

18 मिनू एलीयाम “इसाएल कली श्येत गेब गो मनड। तन्न गे नु इन आफ आ खिं डा मुर इसाएल कली श्येत गेब ननी। मारदे हना गे परमप्रभु यावे आ शेंतीक प्रोंडशा, बाल देवता आ नोले खोइशशो बाक्तीनी। १ राजा १६:३१-३३

19 मोपतीके मुल कारमेल डांडाम इसाएल डा मुर नेल्ल आं कली गुम्पाइक्चा कली ब्रेत्तीन। मिनू इजेबेलम थुल्शा वोइशशो बाल देवता आ नोले दुम्ब लोव्र पाइब ४ सहे ५० जना मुर नु अशेराह देवी आ नोले दुम्ब लोव्र पाइब ४ सहे जना मुर नेल्ल आन कली यो ब्रेत्तीन” देमाक्त।

20 मोपतीके आहाबमी इसाएली नेल्ल आन कली लोव्र सोइक्तीमी बाक्त। मिनू बाल नु अशेराह देवी आस नोले दुम्ब लोव्र पाइब नेल्ल आन कली कारमेल डांडाम पुक्की बाक्त।

21 मिनू एलीया मुर नेल्ल आन डोंडती राष्ठा “गे गेना सम्म थुं निक्शी पा बाक्नीनी? परमप्रभु यावे, थमा परमप्रभु बाक्ब देंनीनी हना, मेको आ नोले खोतीन। बालन परमप्रभु बाक्ब देंनीनी हना, मेको आ नोले खोतीन” देमाक्त। तन्न मुरपुक्कीम लोव्र का यो मलेत्थु, सिक्सी पा बाक्मा बाक्त। यहोसु २४:१४; मत्ती ६:२४

22 मिनू एलीयाम मेको आन कली “परमप्रभु यावे आ लोव्र पाइब गो आं का ला लीती। तन्न बाल आ नोले दुम्ब लोव्र पाइब ४ सहे ५० जना बाक्नीम।

23 मुल आंड कली ब्यफ निक्शी चाक्शा गेने। मिनु मेकोपुकीम का योव्रसीशा मेको कली क्योरशा चेक्शा, शी तार वोइशशा, मी मसुइक्थु वोइक्चा माल्नीम। गो यो मेको अर्को कली क्योरशा मो पान शी तार वोइशशा मी मसुइक्थु वोइक्नुड।

24 मिनु गो इन देवता आ नें थिशा, मेको कली पुनीन। गो परमप्रभु यावे आ नें थिशा, मेको कली पुंडनुड। मिनु पुंडशो नेंशा, मी सोइक्ब, परमप्रभु बाक्ब” देंमाक्त। मिनु मुर नेल्लेमी “दुम्ब इन देंशो लोत्र ठीक बाक्ब” देंमा बाक्त। उत्पत्ती १५:१७

25 मिनु एलीयाम बाल आ लोत्र पाइब नेल्ल आन कली “गे डोंइती ब्यफ का योव्रशा, मेको कली क्योरीन। मारदे हना गे शुश बाक्नीनी। मिनु इन देवता आ नें थिशा पुनीन। तन्न मी मसुइक्तीन” दे माइक्मी बाक्त।

26 मोपतीके मेको आन योव्रशो ब्यफ लांडसीशा, क्योरशा चढ़ेशा, बाल आ नें थिशा सुनी रे नाक्त सम्म “ए बाल! आंड कली लोत्र लेत्तीकी” दे ग्रीमा बाक्त। तन्न मेकेर मारेइ मदुम्माक्त। मारेइ सेंदा यो मनसे बाक्त। मिनु मेकोपुकी मेको आन सेल्शो चढ़ेतीक आ एर ओंथ प्रेकना प्रेकन सिल पामे बाक्त।

27 मिनु नाक्त उइक्थ दुम्मेनु, एलीयाम मेको आन कली “मुल यो ठेयब सेंदा पा ग्रीडीन। मेको थमा पा देवता बाक्ब। मेको भिम्ना भिम्म बाक्म माइ, ना हिरथ गाक्म को? ना डोन लम को? ना इप्शा बाक्म को? मेको कली पोक्चा माल्ब” दे शुक्शी पा लोत्र पवा बाक्त।

28 मोपतीके मेको चिनु ठेयब सेंदा पा ग्रीमा बाक्त। मिनु मेकोपुकीम आन रिती थिती पा आंम आन रं तरवार नु भालाम चेस्सीशा, हुश चुंडसमा बाक्त।

29 मोपा नाक्त रे नाक्दो चढ़ेची ना सम्म ग्रीना ग्रीन बाक्मा बाक्त। तन्न मेकेर मारेइ मदुम्माक्त। मारेइ सेंदा यो मनसे बाक्त। मी यो मयिमाक्त।

30 मिनु एलीयाम मुर नेल्ल आन कली “आं नेक्था जाक्कीन” देंमाक्त। मिनु मेको नेल्ल मेको आ नेक्था जाक्मा बाक्त। मिनु मेकोम डोंइती ब्रेशो परमप्रभु यावे कली चढ़ेतीके लेंशा सेला बाक्त।

31 मिनु एलीयाम १२ ओटा फुल्लु चाक्मी बाक्त। मेको याक्ब आ १२ जना तौ आन थर का का पा १२ ओटा फुल्लु गुबा बाक्त। डोंइती परमप्रभु यावेमी याक्ब कली “इ नें इस्राएल दुम्ब” देंशो बाक्माक्त। प्रस्थान २४:४; उत्पत्ती ३२:२९

32 मिनु मेकोमी मेको फुल्लु रे परमप्रभु यावे आ नेंम चढ़ेतीक का सेला बाक्त। मिनु मेको चढ़ेतीक कली एर ओंथ हिरशा, कुला दोवा बाक्त। मेकेर सेआह अन्न पुक्तीक बोस निक्शी रिक्ब बाक्माक्त। सेआह का ७.३ लिटर बाक्ब।

33 मिनु नोले शी गार पाइशशा, मेको ब्यफ क्योरशा चेक्शा, मेको शी तार वोदा बाक्त। मिनु मेकोमी मुर आन कली “गे ४ गायी ब्वाक्कु चाक्शा, एको चोशा चढ़ेतीक नु शी तार लुक्तीन” दे माइक्मी बाक्त। मिनु मेकोपुकीम मो पामे बाक्त।

34 मिनु नोले मेकोमी “मेको लेंशा पने” देंमाक्त। मिनु मेकोपुकीम मो पामे बाक्त। मिनु मेकोम लेंशा “चीनु खेयप सां मो पने” देंमाक्त। मिनु मेकोपुकीम खेयप सां यो मो पामे बाक्त।

35 मिनु चढ़ेतीक आ एर ओंथ डा कुला नेल्ल ब्वाक्कु ब्रीशा क्युम्माक्त।

36 मिनु नाक्त किंत किंत डा नाक्दो डा चढ़ेची ना परमप्रभु यावे आ लोत्र पाइब एलीयामी मेको आ चढ़ेतीक आ डोंइती लशा “परमप्रभु यावे, अब्राहाम, इसहाक नु इस्राएल आ परमप्रभु, गे का ला इस्राएल रागीम परमप्रभु बाक्नीनी, दे मुलाक्ती एको आन कली तुइक्पतीन। मिनु गो इन गेय पाइब बाक्नुड। मिनु गो एको नेल्ल इन देंतीके पशो बाक्नुड, दे यो एको आन कली तुइक्पतीन।

37 आं लोत्र लेत्तीनी। परमप्रभु यावे, आं लोत्र लेत्तीनी। मिनु एको मुरपुकीम गेन परमप्रभु यावे, थमा परमप्रभु बाक्नीनी, दे तुइक्तमेक्ल। एको आन थुं लेप्पाइक्ब गेन बाक्नीनी” देंमाक्त।

38 मिनु इर रे परमप्रभु यावे आ मी यिशा चोशा चढ़ेतीके, चोशा चढ़ेतीक डा शी, फुल्लु नु खप नेल्ल नेक्गा बाक्त। मिनु मेको कुला डा ब्वाक्कु यो सोल्रमाक्त। लेवी ९:२४

39 मिनु मुर नेल्ल मेको तशा, खुम्की पा बाप्शा “परमप्रभु यावे, थमा पा परमप्रभु बाक्माक्त। परमप्रभु यावे, थमा पा परमप्रभु बाक्माक्त” देंमा बाक्त।

40 मिनु एलीयामी मेको आन कली “बाल आ लोत्र पाइब आन कली ग्याइक्तीन। का यो प्रोक्चा मतामेक्ल” दे माइक्मी बाक्त। मिनु मेकोपुकीम मेको आन कली ग्याइक्तमे बाक्त। मिनु एलीयाम मेको आन कली किशोन खोल्साम लाइशशा साइक्मी बाक्त। प्रस्थान २२:१९; ब्यवस्था १३:६-९

41 मिनु एलीयाम आहाब कली “लशा जने तूडीन। मारदे हना गो ठेयब रेउ आ रेयके नेंता” देंमाक्त। याक्ब ५:१८

42 मिनु आहाब जचा तूचा कली लमाक्त। तन्न एलीया चहिं कारमेल डांटा डोइशशा, मेकेर आ पिया पोक्चीम खेप्शा बाक्माक्त।

43 मिनु मेकोमी आ गेय पाइब कली “लशा, समुन्द्र गे कोव्रडो” दे मदा बाक्त। मिनु मेको लशा कोव्रडा बाक्त। मिनु मेकोमी “मेकेर मारेइ मबा” देंमाक्त। मिनु एलीयामी मेको कली “७ खेयप मेकेर लशा, कोव्रडो” दे सोइक्ता बाक्त।

44 मिनु ७ खेयप डा पाली मेकोमी “मुर आ गुइ खोमो गोस्स का समुन्द्र रे बोक्शो ताता” देंमाक्त। मिनु एलीयाम मेको कली “मुल लशा आहाब कली ‘इन बग्गी ठीक पा, उइ खिं लने। मो मपाइतीनी हना, इन कली रेउम तेक्ब’ दे मतो” देंमाक्त।

45 मिनु क्येर गोस्सुम सरीड सुम्शा, फश गिवार पा ठेयब रेउ यिचा गोवा बाक्त। मिनु आहाब आ बग्गी डोइशशा येज्जेल सहर लमाक्त।

46 मिनु परमप्रभु यावेमी एलीया कली थिवा बाक्त। मिनु मेको आ फेक्शो वा खाइशशा आहाब आ डोंइडोंइती येज्जेल डा ठेयब लाप्चो सम्म दौरशा लमाक्त।

## 19

एलीया प्रोक्शा, होरेब डांडा लशो

1 मिनू आहाबमी इजेबेल कली एलीया आ पशो गेय नेल्ल नु मेकोमी दोपा देवी देवता आन लोत्र पाइब नेल्ल आन कली तरवारम सदा, मेको नेल्ल शेंदा बाक्त।

2 मिनू इजेबेलम एलीया आ बाक्तीकम “गे दोपा मेको आन कली सदी, मोपा गो दीसा एं ना सम्म इ कली मसाइकतन हना, देवतापुकीम आं कली यो मोदेशोन पाइय्यीमील। मेको क्येडा यो शुश पाइय्यीमील” दंथ लोत्र कुरब मुर सोइक्ता बाक्त।

3 मिनू एलीया हिंशा, प्रोक्माक्त। मिनू मेको प्रोक्शा यहूदा डा बेयर-शेबा जाक्माक्त। मिनू मेकोमी आ गेय पाइब कली मेक उइ प्रोना बाक्त।

4 मिनू आं चहिं काबु डा लां डोन गोरशो रागीम ओव्रमाक्त। मिनू मेको बुटा आगाम निरशा, परमप्रभु यावे कली “मुल नुप्त। आ सोक्त बने। मारदे हना गो आं किकी पिपी आन क्येडा रिश्शो मनड” देंमाक्त। अय्युब ७:१५; योना ४:३

5 मिनू नोले बुटा आ आगामीन गोल्शा निन्द्रा पवा बाक्त। मेना परमप्रभु यावे आ स्वर्ग डा गेय पाइब कामी मेको कली ब्रा थिशा “बोक्शा जावो” देंमाक्त।

6 मिनू मेकोमी बोक्शा, एर ओथ कोव्रडानु, आ पिया गे चोशो होश शोब्ले का नु दुडुगो का ब्वाक्कु तवा बाक्त। मिनू मेकोम मेको जशा तूशा लेंशा इम्माक्त।

7 मिनू परमप्रभु यावे आ स्वर्ग डा गेय पाइब लेंशा जाक्शा, मेको कली थिशा “बोक्शा जावो। इ लां थम लाइशो बाक्ब” देंमाक्त।

8 मोपतीके मेको बोक्शा, जवा तूडा बाक्त। मिनू मेको आ बोलम मेको ४० नाक्त नु ४० नाकदो सम्म गाक्शा, परमप्रभु आ डांडा होरेब जाक्दीम्माक्त। प्रस्थान २४:१८

9 मिनू मेकेर डा पुक्खी काम ओव्रशा, मेक उइ नां सोइदा बाक्त। मेकेर बाक्मेनु, परमप्रभु यावेम मेको कली “एलीया, गे एक मार पा बाक्डे?” दे हिल्लो पवा बाक्त।

10 मिनू मेकोमी “परमप्रभु यावे, मुर नेल्ल आन परमप्रभु, गो इन पबंम शुश गेय पाता। इस्राएलीमी इन कबल प्रॉइतेक्म। इन कली चढेतीक प्रेत्तेक्म। मिनू इन लोत्र पाइब आन कली तरवारम क्योरशा साइक्तेक्म। गो आं का ला लीशो बाक्नुड। मिनू मुल मेकोपुकीमी आं कली यो साइक्का माल्शो बाक्नीम” देंमाक्त। भजन संग्रह ६९:१०; यसैया ४९:४; १राजा १८:२२; रोमी ११:३

11 मिनू परमप्रभु यावेमी “गूडो, आं डोंइती डांडाम रपो” देंमाक्त। मारदे हना परमप्रभु यावे मेकेर रे लन लन बाक्माक्त। मिनू परमप्रभु यावे आ डोंइडोंइती ठेयब फश गिवार डांडा आन कली प्रोल्ना प्रोल्न नु फुल्लु आन कली खिन्ना खिन्न जाक्माक्त। तन्न परमप्रभु यावे मेको फशेम मबाक्माक्त। मेको आ नोले ठेयब खिनु कुमाक्त। तन्न परमप्रभु यावे मेको खिन्नी यो मबाक्माक्त। प्रस्थान ३३:२२

12 मिनू मेको खिनु आ नोले मी का जाक्माक्त। तन्न मेको मीमी यो परमप्रभु यावे मबाक्माक्त। मिनू मी आ नोले इम्चीली सेंदा का जाक्माक्त।

13 मिनू एलीयामी मेको सेंदा नेंशा, आ वामी आ कुल सुम्से बाक्त। मिनू लाडगा यूशा पुक्खी आ डोंइती राम्माक्त। मिनू मेको आइक्च सेंदाम “एलीया गे एक मार पन पन बाक्डे?” देंमाक्त।

14 मिनू मेकोमी “परमप्रभु यावे, मुर नेल्ल आन परमप्रभु गो इन पबंम शुश गेय पाता। इस्राएलीमी इन कबल प्रॉइतेक्म। इन कली चढेतीक प्रेत्तेक्म। मिनू इन लोत्र पाइब आन कली तरवारम क्योरशा साइक्तेक्म। गो आं का ला लीशो बाक्नुड। मिनू मुल मेकोपुकीमी आं कली यो साइक्का माल्शो बाक्नीम” देंमाक्त।

15 मिनू परमप्रभु यावेम मेको कली “गे तेको लां रे जाक्शो बाक्डे, मेको लां रे पा लेशशा दमस्कस डा गोरशो रागीम लावो। मिनू गे मेको सहर जाक्दीरशा, हजाएल कली अराम डा पिप सेलो। २राजा ८:१३, १५

16 मिनू निम्शी आ तौ यहू कली यो इस्राएल डा पिप सेलो। आबेल-मेहोलाह डा शाफात आ तौ एलीशा कली इ पा डा आं लोत्र पाइब सेलो। २राजा ९:२-३

17 मिनू हजाएल आ तरवार रे ब्रोंइशो आन कली यहूमी साइक्ब। मिनू यहू आ तरवार रे ब्रोंइशो आन कली एलीशामी साइक्ब।

18 मो हना यो, गो ७ हजार जना आन कली इस्राएलम प्रॉइशा वोइक्नुडमी। मेकोपुकीमी बाल आ डोंइती आन पोक्च मथेक्शो बाक्नीम। मिनू मेकोपुकीम बाल कली पुक्पु मपाइशो बाक्नीम” देंमाक्त। रोमी ११:४

एलीयामी एलीशा कली ब्रेशशो

19 मिनू एलीया मेकेर रे लमाक्त। मिनू शाफात आ तौ एलीशा कली गुमा बाक्त। मेको १२ हाल ब्यफ वाक्ना वाक्न बाक्माक्त। मेको चहिं मेको नेल्ल क्येडा नोले डा हाल वाक्ना वाक्न बाक्माक्त। मिनू एलीया लशा, आ फेक्शो वा मेको आ तार कोप्ता बाक्त।

20 मिनू एलीशामी आ ब्यफ प्रॉइशा, एलीया आ नोनोले दोरमाक्त। मिनू मेकोम “आं कली आं आंम आफ आस कली पुक्पु पाइक्का गेयीनी। मिनू इन नोले खोइक्नुड” देंमाक्त। मिनू एलीयाम “लावो, गो इ कली मार पडा मेको मिन्तो” दे मदा बाक्त। लूका ९:६१-६२

21 मिनू एलीशाम एलीया कली प्रॉइशा लमाक्त। मिनू मेकोमी आ हाल ब्यफ लाइशशा क्योरा बाक्त। मिनू मेकोम हलो चोशा रथे क्येवा बाक्त। मिनू मुर आन कली ब्वचा गेमी बाक्त। मिनू मुरपुकीम ब्वामे बाक्त। मिनू मेको नोले एलीया आ नोले खोदा बाक्त। मिनू मेको आ गेय पाइब दुम्माक्त।

## 20

बेन-हादादम लडाइ तोशो

1 अराम डा पिप बेन-हादादम आ लडाइ पाइब नेल्ल आन कली खुपतीमी बाक्त। मिनु मेकोमी ३२ जना पिप, मेको आन शारा नु बग्गीपुकी लाइशशा, सामरीया सहर कली पुम्शा लडाइ तोवा बाक्त।

2 मेकोमी लोव कुरब आन कली सहरम सोइशशा, इस्राएल डा पिप आहाब कली “बेन-हादाद आ लोव नेनीन,

3 ‘इन सुन चांदी आं के नम। इन नेल्ल क्येडा दारशो मीश नु इन तमी तौ यो आं केन नम’ दैत” देनीन, दे सोइक्तीमी बाक्त।

4 मिनु इस्राएल डा पिपमी मेको आन कली “आं प्रभु, पिप इन देशो खोदेशो पा ‘गो नु बाकशो मारेइ मारेइ इन केन नम, दैत’ मतीन” दे सोइक्तीमी बाक्त।

5 मिनु लेशा बेन-हादादमी लोव कुरब सोइशशा “इन सुन चांदी, इन मीश नु इन तमी तौ नेल्ल आं कली गेन।

6 गो दीसा एं ना आं गेय पाइब आन कली, इन खिं नु इन ठेयब गेय पाइब आन खिंमी इन शुश क्येड लाइब थोवक ब्रथ सोइक्नुडमी। मेकोपुकीमी आन दाकशो मारेइ मारेइ लाइक्नीम” दे लोव कुरब सोइक्ता बाक्त।

7 मिनु इस्राएल डा पिपम आ रागी डा खाल्पा नेल्ल आन कली ब्रेशशा, मेको आन कली “गे तुइशशो बाक्नीनी। मेको मुरुम लडाइ पचा कली खुजी माल्ना माल्न बाक्ब। मेकोम आं मीश, आं आलपुकी नु आं सुन चांदी आ केन नम देंमेनु यो, गो मारेइ मरेंड” देमाक्त।

8 मिनु खाल्पा नु मुर नेल्लेमी मेको कली “मेको आ लोव मनेनीन। गे मेको आ देशो मबिस्सीन” देमा बाक्त।

9 मोपतीके मेकोमी बेन-हादाद आ लोव कुरब आन कली “आं प्रभु पिप कली ‘आं ठेयब पिप आ डोंइती पुंइशो नेल्ल गेनुड। तन्न मुल इन पुंइशो लोव गो गेने मचाप्नुड’ मुल लशा गेपुकीम बेन-हादाद कली एको लोव मतीन” दे माइशशा सोइक्तीमी बाक्त। मिनु मेको लोव कुरबपुकी लशा, आन होवप बेन-हादाद कली शोवडमे बाक्त।

10 मिनु बेन-हादादम आहाब कली “गो नु शुश लडाइ पाइब बाक्नीम। आं लडाइ पा प्राशो सामरीया डा फुरक, आं लडाइ पाइब आन कली योल का का गेचा कली यो मगाप्ब। मेको गात्त हना, देवतापुकीम आं कली खतम पोय्यीमील” दैथ मुर सोइक्ता बाक्त।

11 मिनु मेको आन कली इस्राएल डा पिपमी “मेको कली ‘लडाइ ग्राचा गेना गेना, मुल कना मार ठेयब लेशशो लोव पाइनेवे’ दैत, मतीन” दे सोइक्तीमी बाक्त।

12 मेना बेन-हादाद नु अरु पिप आन बाक्तीकेम शांबु दुक्शा बाक्मानु, मेको लोव नेना बाक्त। मिनु मेकोमी रीब पा आ लडाइ पाइब आन कली “लडाइ पचा ठीक दुमीन” दे हुकुम गेमी बाक्त। मिनु मेकोपुकी मेको सहर कली लडाइ तोचा कली ठीक दुम्मा बाक्त।

आहाबमी बेन-हादाद कली फुशो

13 मेना परमप्रभु यावे आ लोव पाइब का इस्राएल डा पिप आहाब आ बाक्तीक जाक्शा, मेको कली “परमप्रभु यावेमी ‘मार, गे एको ठेयब हुल लडाइ पाइब आन कली तवी? कोवडो, गो मुलाक्तीन मेको आन कली इ गुडमी गेनुड। मिनु गोन परमप्रभु यावे नड, दे तुइक्नेवे’ दैत” देमाक्त।

14 मिनु आहाबमी “तन्न मेको सुम पाइबा?” दे हिल्लो पवा बाक्त। मिनु परमप्रभु यावे आ लोव पाइबमी “परमप्रभु यावेम ‘हुकुम पाइब ठेयब मुर आन गेय पाइब ठिटापुकीम लडाइ पाइनीम’” देमाक्त। मिनु पिपमी “लडाइ सुम गोचा माल्बा?” दे हिल्लो पवा बाक्त। मिनु मेको परमप्रभु यावे आ लोव पाइबम “गे गोचा माल्नीनी” देमाक्त।

15 मिनु आहाबमी मेको हुकुम पाइब ठेयब मुर आन गेय पाइब सहे निक्शी ३२ जना ठिटा आन कली खुक्थ सोइक्तीमी बाक्त। मिनु नोले इस्राएली नेल्ल आन कली पुक्मी बाक्त। मेको नेल्ले ७ हजार बाक्मा बाक्त।

16 मिनु नाक्त उइक्थ दुम्मेनु, बेन-हादाद नु मेको आ वारच ३२ जना पिप आन बाक्तीकेमी दुक्शो बाक्मा ना मेकोपुकी ग्रूमा बाक्त।

17 मिनु मेको हुकुम पाइब आन गेय पाइब ठिटापुकी डोंइती बारमा बाक्त। मेना बेन-हादादमी क्यारी पाइबपुकी सोइशशा बाक्माक्त। मिनु मेकोपुकी जाक्शा “सामरीया रे मुरपुकी पिशो बाक्नीम” देमा बाक्त।

18 मिनु बेन-हादादम “मेकोपुकी गारचा कली जाक्शो बाक्तेक्म हना, मेको आन कली सेसीन ग्याइक्तीन। लडाइ पथ जाक्शो बाक्तेक्म हना यो, सेसीन ग्याइक्तीन” दे माइक्मी बाक्त।

19 मिनु मेको हुकुम पाइब ठेयब मुर आन गेय पाइब ठिटापुकी सहर रे लाडगा ग्रूमानु, आहाब आ अरु लडाइ पाइबपुकी मेको आन नोले खोइशशा ग्रूमा बाक्त।

20 मिनु नेल्लेमी आन जोरी सनु आन कली सदमे बाक्त। मिनु मो दुम्मेनु अरामी प्रोक्मा बाक्त। मिनु इस्राएलीपुकीम मेको आन कली खेदा पामे बाक्त। तन्न अराम डा पिप बेन-हादाद आ शारा डोइशशा, अरु शारा डोइक्बपुकी नु प्रोक्माक्त।

21 मिनु इस्राएल डा पिप डोंइती बारशा, शारा नु बग्गी आन कली ग्रामाक्त। मिनु अरामी शुश आन कली साइक्मी बाक्त।

22 मिनु नोले मेको परमप्रभु यावे आ लोव पाइब इस्राएल डा पिप आ बाक्तीक जाक्शा, मेको कली “इन लडाइ पाइब आन कली ठीक पा वोतीन। मार पचा माल्बा, मेको रिम्शो पा मिम्तीन। मारदे हना मुल जाक्शो बर्सम अराम डा पिपम लेशा गेपुकी नु लडाइ पाइब” देमाक्त।

23 मिनू अराम डा पिप आ गेय पाइबपुकीम आन पिप कली “मेको आन देवता पहाड डा देवता बाक्नीम। मोपतीके मेकोपुकी इ क्येडा शुश बोल्यो बाक्नीम। मुल गोपुकीम मेको आन कली दिंम लडाइ पाइतय हना, थमा पा गो मेको आन क्येडा बोल्यो दुमनय।

24 मुल गे मार पचा माल्नीनी देशा हना, एको पिप आन कली लडाइ पाइब आन ठेयब मुरे रे गुंडदीन। मिनू मेको आन पा डा अर्को मुर योत्रडीन।

25 डोंइती बेकशो लडाइ पाइब आन खोदेशो पा, अर्को लडाइ पाइब आन हुल का सेलीन। शारा डोइकब आन कली शारा नु बग्गी डोइकब आन कली बग्गी ठीक पने। मिनू नोले गो इस्राएली नु दिंम लडाइ पथ लय। मिनू गो थमा पा मेको आन क्येडा बोल्यो दुमनय” देमा बाक्त। मिनू बेन-हादादमी मेको आन सल्ला बिशरा, मेको आन देशो खोदेशो पवा बाक्त।

26 मिनू मेको जाक्शो बर्सम बेन-हादादम लडाइ पचा कली अरामी आन कली पुक्मी बाक्त। मिनू इस्राएली नु लडाइ पचा कली अफेक सहर गे लमा बाक्त।

27 मिनू इस्राएली यो खुम्सीशा, जशा तूशा, मेको नु लडाइ पचा कली हुल हुल पा यूमा बाक्त। इस्राएलीम अरामी आन डोंइती गे आन बाक्तीक सेल्मे बाक्त। मेकोपुकी क्यारश आन आइकच हुल निक्खी खोदेशो बाक्मा बाक्त। तन्न अरामी चहिं मेको रागी डा दिंम एर ओंथ नेल्ल ब्रीशा बाक्मा बाक्त।

28 मिनू परमप्रभु आ मुर का इस्राएल डा पिप आ बाक्तीकेम जाक्शा, मेको कली “परमप्रभु यावेम ‘अरामीपुकीम परमप्रभु यावे, इस्राएली आन परमप्रभु पहाड डा देवता ला बाक्ब। बेसी डा देवता ममाड, दे मिम्शो बाक्नीम। मोपतीके गो एको ठेयब हुल लडाइ पाइब आन कली इ गुडमी गेनुड। मिनू गे गोन परमप्रभु यावे नड, दे तुइक्नेवे’ दैत” देमाक्त। प्रस्थान ७:५

29 मिनू मेको आन डोंइती आन बाक्तीकेम कोत्रमुशा ७ नाक्त सम्म बाक्मा बाक्त। मिनू नोले ७ नाक्तीम लडाइ पामे बाक्त। मिनू इस्राएलीपुकीम काबुम अरामी आन खोइलीम गाक्ब लडाइ पाइब लाख का आन कली सदमे बाक्त।

30 मिनू मेको आन दाते डा लीशोपुकी अफेक डा सहरम प्रोक्मा बाक्त। मिनू मेकेर डा गारो ब्रेशरा १७ हजार आन कली चिप्ता बाक्त। बेन-हादाद चहिं सहर ओत्रशा, खुडरशा बाक्माक्त।

31 मिनू मेको आ गेय पाइबपुकीम मेको कली “गोपुकीमी इस्राएल आ खिं डा पिपपुकी दा शिशो पाइब बाक्नीम देशो लोत्र नेशो बाक्नीकी। मोपतीके क्रातोम अरन्डी फेक्सीय। मिनू पियाम डोरी फ्रेंसीशा इस्राएल डा पिप आ बाक्तीक लय। मिनू मेकोम इन कली ब्रोंडचा गेबा कों?” देमा बाक्त।

32 मोपतीके मेकोपुकीमी आन क्रातोम अरन्डी फेक्शा, आन पियाम डोरी फ्रेंसीशा इस्राएल डा पिप आ बाक्तीक लशा मेको कली “इन वाइल बेन-हादादम ‘गो आं कली ब्रोंडचा गेयीमी’ देशो बाक्ब” देमा बाक्त। मिनू पिपमी “मार, मेको मुल यो सेसीन बाक्मे? मेको आं लोकब बाक्ब” देमाक्त।

33 मिनू मेको मुरपुकीम पिप आ लोत्र रिम्शो बाक्माक्त दाप्शा “ओं, इन लोकब बेन-हादाद मुल यो सेसीन बाक्ब” देमा बाक्त। मिनू पिपमी मेको आन कली “लशा, मेको कली एक चाक्कीन” देमाक्त। मिनू बेन-हादाद गूशा जाक्मेनु, आहाबम मेको कली आ बग्गीम डोइकपदा बाक्त।

34 मिनू बेन-हादादमी मेको कली “आं आफोम इन आफ रे ग्राशो सहर नेल्ल गो लेशरा गेनन्नी। मिनू आं आफोम सामरीयाम पशो खोदेशो पा, गे यो दमस्कसम ग्याप्तीक लेयतीक सेल्ने चाप्नीनी” देमाक्त। मिनू इस्राएल डा पिप आहाबमी “मेको सल्लाम पतीके गो इ कली प्रोंइनन” देमाक्त। मोपा आहाबमी दुचा आ पर्वम लोत्र पा, मेको कली प्रोना बाक्त।

आहाब कली दोस गेशो

35 मिनू परमप्रभु यावे आ लोत्र पा, मेको आ लोत्र पाइब आन दाते डा काम आ वारच का कली “आं कली तुब्यी” देमाक्त। तन्न मेकोमी तुप्ने मबिस्से बाक्त।

36 मिनू मेको परमप्रभु यावे आ लोत्र पाइबमी “गे परमप्रभु यावे आ अरेशो लोत्र मटितीके आं कली प्रोंइशा लवे चोटीन इ कली गुप्स काम साइक्ब” देमाक्त। मिनू मेको लम नोले गुप्स काम थिरशा, मेको कली सदा बाक्त। १ राजा १३:२४

37 मिनू मेको परमप्रभु यावे आ लोत्र पाइबमी अर्को मुर का कली गुम्शा, मेको कली “आं कली तुब्यी” देमाक्त। मोपतीके मेकोमी मेको कली तुप्शा, गार सेला बाक्त।

38 मिनू मेको परमप्रभु यावे आ लोत्र पाइब लशा, मतुइक्पांडसीचा डा पा आ मिक्चीम वा फ्रेंशा पिप कली लाम रिम्दा बाक्त।

39 मिनू पिप मेको आ नेक्थारे लेमनु, मेकोमी पिप कली ब्रेशरा “गो इन वाइल लडाइ पतीकेम जाक्दीशशो नड। मिनू मेकेर लडाइ पाइब मुर काम फ्रेंशो मुर का चाक्शा आं बाक्तीक जाक्त। मिनू मेकोमी आं कली ‘एको मुर जिम्मा ब्रावो। एको मुर दोकका पा प्रोक्त हना, एको आ पा डा गे बेक्चा माल्नेवे कि टलेन्ट का चांदी थाप्चा माल्नेवे’ दैत। टलेन्ट का ३४ किलो बाक्ब। २ राजा १०:२४

40 मिनू गो, इन वाइल, गेय पा बाक्डा सम्म, मेको ग्याइशशो मुर प्रोक्माक्त” देमाक्त। मिनू इस्राएल डा पिपमी मेको कली “गे इ निसाफ आंमान पाप्तीवी। मेकोन इ कली पतीक निसाफ बाक्ब” देमाक्त।

41 मिनू मेको परमप्रभु यावे आ लोत्र पाइबमी रीब पा आ मिक्चीम फ्रेंशो वा पुदा बाक्त। मिनू इस्राएल डा पिपम मेको कली परमप्रभु यावे आ लोत्र पाइब का बाक्त, दे तुइक्ता बाक्त।

42 मिनू मेकोमी पिप कली “परमप्रभु यावेमी ‘गो साइक्चा कली ठीक पशो मुर कली गे प्रोंइतीवी। मोपतीके मेको आ पा डा गे बेक्चा माल्नेवे। मिनू मेको आ मुर आन पा डा इ मुर बेक्चा माल्नीम’ दैत” देमाक्त।

43 मिनू इस्राएल डा पिपमी “मार लोत्र पवा?” दे गाइशरा, आ खिं सामरीयाम जाक्माक्त।



## 21

नाबोथ आ अडगुर रू

1 इच्का नाक्त नोले मार दुम्माक्त देशा हना, येजेले सहर डा नाबोथ माइश्शो मुर का बाक्माक्त। मेको के अडगुर रू का बाक्माक्त। मेको अडगुर रू येजेले सहर सामरीया डा पिप आहाब आ दरवार आ नेक्था बाक्माक्त।

2 काबु नाक्ती आहाबमी नाबोथ कली “इ अडगुर रू आं कली गिग खाइ खुम्चा कली गेयी। मारदे हना मेको आं खिं आ नेक्था बाक्ब। मेको आ पा डा गो इ कली अर्को मेको क्येडा रिम्शो अडगुर रू का गेनन। क्येट देंनेवे हना यो, क्येट गेनन” देमाक्त।

3 तन्न नाबोथमी आहाब कली “परमप्रभु यावे आ डोंइती मोदेशो पने मचाप्नुड। गो आं किकी पिपी आन गेशो रू इन कली गेने मचाप्नुड” देमाक्त।

4 मोपतीके आहाब आ थुं खुरसीशा गाइश्शा आ खिं लमाक्त। मारदे हना येजेली नाबोथमी “आं किकी पिपी आन गेशो रू इन कली मगेनुड” देशो बाक्माक्त। मिनु मेको आ कुल किरशा आ ब्राख्येम इष्शा बाक्माक्त। जने यो मबिस्से बाक्त।

5 मिनु मेको आ मीश इजेबेल जाक्शा, मेको कली “गे मारदे इन थुं खुरसीनी? मारदे मारेड जने मबिस्सीनी?” दे हिल्लो पवा बाक्त।

6 मिनु मेकोम इजेबेल कली “गो येजेली नाबोथ कली ‘इ अडगुर रू ग्याप्चा गेयी कि इ दाक्शो रू नु फाइक्स’ माइक्ता। तन्न मेकोम ‘गो आं अडगुर रू इन कली मगेनन्नी’ देंत” देमाक्त।

7 मिनु मेको आ मीश इजेबेल मेको कली “गे इस्राएल डा पिप बाक्नीनी। मिनु गे मोदेशो पाइनीनी? बोक्शा, जने तूडीन। मिनु ग्येरसीने। गो येजेली नाबोथ आ अडगुर रू इन कली गेनन्नी” देमाक्त।

8 मिनु इजेबेलम आहाब आ नेंमी चिटी का ब्रेक्ता बाक्त। मिनु मेकेर पिप आ छाप थोक्ता बाक्त। मिनु मेको नाबोथ आ सहर डा खाल्पा नु ठेयब मुर आन कली सोइक्ता बाक्त।

9 मेकोम मेको चिटीमी “‘माइजा बाक्तीक नाक्त का बाक्ब’ देंनीन। मिनु नाबोथ कली मरिम्शो पाइब आन नित्तीकेम निप्पतीन।

10 मिनु मरिम्शो पाइब मुर निक्शी आस कली मेको आ डोंइती निप्पाइश्शा, एकोम ‘परमप्रभु नु पिप कली सराप पशो बाक्ब’ दे दोस गोपतीन। मिनु मेको नोले मेको कली लाडगा गुंइशा फुल्लु आप्शा सतीन” दे ब्रेक्ता बाक्त। ब्यवस्था १७:६; मली २६:५९-६१; प्रस्थान २२:२७

11 मिनु इजेबेलम मेको आन कली चिटीम ब्रेक्शो खोदेशो पा, मेको सहर डा मुर, खाल्पा नु मेकेर डा ठेयब मुरपुकीम पावे बाक्त।

12 मिनु मेकोपुकीम माइजा बाक्तीक नाक्त का सेल्मे बाक्त। मिनु नाबोथ कली मरिम्शो पाइब आन कली निप्पाइक्तीकेम निप्पदमे बाक्त।

13 मिनु मेको नोले मेको मरिम्शो पाइब मुर निक्शी जाक्शा, मेको आ डोंइती निस्ससा बाक्त। मिनु मेको निक्शीमी “नाबोथम परमप्रभु नु पिप कली सराप पशो बाक्ब” दे नेल्लेम नेंचा डा पा दोस गेम्से बाक्त। मिनु मेकोपुकीम मेको कली लाडगा गुंइशा फुल्लु आप्शा सदमे बाक्त।

14 मेको नोले मेकोपुकीमी इजेबेल कली “नाबोथ कली फुल्लु आप्शा साइक्तक” दे लोत्र कुरब मुर सोइक्तमे बाक्त।

15 मिनु इजेबेलम नाबोथ कली फुल्लु आप्शा साइक्तेकम देशो लोत्र नेंना चोटीन आहाब कली “मुल बोक्शा येजेले सहर डा नाबोथम इन कली लेयने मबिश्शो रू इन के सेलीन। मारदे हना मेको बेक्त” देमाक्त।

16 मिनु नाबोथ बेक्माक्त देशो लोत्र नेंशा, आहाब बोक्शा येजेले सहर डा नाबोथ आ अडगुर रू हिरशा आंम के सेल्थ लमाक्त।

17 मिनु परमप्रभु यावेमी तिश्बे सहर डा एलीया कली लोत्र पवा बाक्त।

18 मार लोत्र पवा बाक्त देशा हना “इस्राएल डा पिप आहाब कली युम्थ उड लावो। मेको सामरीयाम बाक्शो नाबोथ आ अडगुर रू आंम के सेल्थ लशो बाक्ब।

19 गे मेको कली परमप्रभु यावेमी ‘मार, गे मुर का कली साइश्शा, मेको आ रू इ के मसेली डा?’ देंत, मतो। मिनु मेको कली परमप्रभु यावेमी ‘नाबोथ आ हुश कुचुमम तुक्तीकेमीन इ हुश यो कुचुमम तुक्नीम’ देंत, मतो’ देमाक्त। १राजा २२:३८

20 मिनु आहाबमी एलीया कली “आं सनु, गे आं कली थिय्यी?” दे मदा बाक्त। मिनु मेकोम “आं, गो इ कली थित्तन। मारदे हना गे परमप्रभु यावे आ डोंइती मार मरिम्शो बाक्मे, मेको ला पना पन बाक्ते।

21 मोपतीके परमप्रभु यावेमी ‘मुल गो इ तार शुश श्येत कोप्नुड। गो इस्राएल रागीम बाक्ब, गे नु इ खिं डा वोंइश मुर नेल्ल आन कली साइक्नुडमी। वाइल बाक्मल कि प्रोंइचा पुंइसीशो बाक्मल, नेल्ल आन कली साइक्नुडमी। २राजा ९:७-८

22 मिनु गो इ खिं कली नेबात आ तौ येरोबाम नु अहीयाह आ तौ बाशा आस खिं कली पाइश्शो खोदेशो पाइनुड। मारदे हना गे आं कली गाइक्पाइक्तीके नु इस्राएल कली पाप पपाइक्तीके, मो पाइनुड’ देंत। १राजा १५:२९; १राजा १६:११-१२

23 मिनु परमप्रभु यावेम इजेबेल आ पर्वम ‘कुचुमपुकीम इजेबेल कली येजेले सहरम ब्वाइनीम। २राजा ९:३३-३६

24 सहरम बेक्शो आहाब आ खिं डा मुर आन कली कुचुमम ब्वाइनीम। मिनु रूम बेक्शो आन कली चिकबपुकीम ब्वाइनीम’ देंत” देमाक्त। १राजा १४:११; १राजा १६:४; १राजा २१:२४

25 आहाबम आ मीश इजेबेल आ लोत्र नेशा, परमप्रभु यावे आ डोंइती काइ मरिम्शो पवा बाक्त। मोदेशो मुर अर्को सुइ मबाक्मा बाक्त।

26 मेको परमप्रभु यावेमी इस्राएली आन डोंइती रे खेरशो एमोरी खोदेशो पा मेको आन ग्रॉग्रा दिशो मूर्ति आन नोले खोदा बाक्त।

27 मिनु आहाबम मेको लोत्र नेशा, आ वा खाक्गा बाक्त। मिनु अरन्डी फेक्शा माइजा बाक्माक्त। मेको अरन्डी फेक्शा आ थुं लुकच लशा इम्माक्त।

28 मिनु परमप्रभु यावेम तिश्बे सहर डा एलीया कली लोत्र पवा बाक्त।

29 मार लोत्र पवा बाक्त देशा हना “आहाब आं डोंइती ब्रेम्शो दुम्शो तवी? मारदे हना मेको ब्रेम्शो दुम्तीके गो मेको आ पालाम टेयब श्येत मदुम्पाइक्नुड। तन्न मेको आ तौ आ पालाम मेको आ खिंम टेयब श्येत चाक्नुड” देमाक्त। २राजा १:२६

## 22

मीकायामी लोत्र पशो

२इतिहास १८:-

- 1 मिनु बर्स सां सम्म अरामी नु इस्राएली आन दातेमी लडाइ मदुम्माक्त।
- 2 तन्न बर्स सां नोले यहूदा डा पिप येहो-शाफात इस्राएल डा पिप कली शुम्थ बुम्माक्त। १राजा २२:४१
- 3 मिनु इस्राएल डा पिपमी आ गेय पाइब आन कली “गे नेल्लेम रामोथ-गिलाद इं के बाक्ब, दे तुइक्नीनी। मो हना यो गो मेको अराम डा पिप रे लेशशा ताक्का कली मारेइ मपशो बाक्नय” देमाक्त। यहोसु २१:३८
- 4 मोपतीके मेकोम येहो-शाफात कली “रामोथ-गिलाद कली लडाइ तोचा कली गे आं कली वारच पाइक्नीनी?” दे हिल्लो पवा बाक्त। मिनु येहो-शाफातमी इस्राएल डा पिप कली “गो इन खोदेशो नड। आं मुरपुकी इन मुर नम। आं शारा नेल्ल इन केन नम” देमाक्त। २राजा ३:७
- 5 तन्न येहो-शाफातम इस्राएल डा पिप कली “डोंइती परमप्रभु यावे कली हिल्लो पने” देमाक्त।
- 6 मोपतीके इस्राएल डा पिपम ४ सहे जना खोइ परमप्रभु यावे आ लोत्र पाइब आन कली पुक्शा, मेको आन कली “गो रामोथ-गिलाद कली लडाइ तोड देय मतोड” दे हिल्लो पामी बाक्त। मिनु मेकोपुकीमी “तोन, परमप्रभु यावेम मेको इन गुइमी गेब” देमा बाक्त।
- 7 मिनु येहो-शाफातम “हिल्लो पचा कली परमप्रभु यावे आ लोत्र पाइब अर्को सुइ मबाक्नीमी” देमाक्त। २राजा ३:११
- 8 मिनु इस्राएल डा पिपम येहो-शाफात कली “परमप्रभु यावे कली हिल्लो पचा कली अर्को का बाक्ब। मेको इम्लाह आ तौ मीकाया बाक्ब। तन्न गो मेको मुर कली काइ मदाक्नुड। मारदे हना मेकोम आं पर्वम गेनायो रिम्शो लोत्र मपाइब। गेना हना यो मरिम्शो लोत्र ला पाइब” देमाक्त। मिनु येहो-शाफातमी पिप कली “पिपम मोदेशो लोत्र मपवल” देमाक्त। २इतिहास १८:७-२७
- 9 मिनु इस्राएल डा पिपम आ मुर आन दाते डा का कली ब्रेशशा “इम्लाह आ तौ मीकाया कली रीब पा चाक्को” दे मदा बाक्त।
- 10 मिनु इस्राएल डा पिप नु यहूदा डा पिप येहो-शाफात पिपम फेक्तीक वा फेक्शा सामरीया डा टेयब लाप्चो आ डोंइती आस आस नित्तीकेम निशशा बाक्शो बाक्सा बाक्त। मिनु परमप्रभु यावे आ लोत्र पाइब नेल्ले मेको आस डोंइती बाक्शा नोले दुम्ब लोत्र पना पन बाक्शो बाक्सा बाक्त।
- 11 मेको आन दाते डा का केनानाह आ तौ सिदकीयाहमी चहिं फलाम के ग्रोत्र सेल्सीशो बाक्माक्त। मिनु मेकोमी “परमप्रभु यावेमी ‘गे एको ग्रोत्रमी अरामी आन कली नेल्ल मबेक्मा सम्म खुइक्नीनी’ दैत” देमाक्त।
- 12 मिनु परमप्रभु यावे आ लोत्र पाइब नेल्लेमी मेको मोदेशोन लोत्र पशो बाक्मा बाक्त। मेकोपुकीमी “रामोथ-गिलाद कली लडाइ तोशा रीब पा ग्राडीन। मारदे हना परमप्रभु यावेम मेको पिप इन गुइमी गेब” देशो बाक्मा बाक्त।
- 13 मिनु मीकाया कली ब्रेशशा चाक्ब मुरुम मेको कली “परमप्रभु यावे आ लोत्र पाइब नेल्लेमी लोत्र का पा पिप कली गेरपाइशो बाक्नीम। गे यो मेको आन खोदेशो पा रिम्शो लोत्र पने” देमाक्त।
- 14 तन्न मीकायाम चहिं “गो परमप्रभु यावे गेना हना यो ब्रोइशा बाक्शो खोदेशो पा परमप्रभु यावेमी आं कली मार देबा, मेको ला देनुड” देमाक्त।
- 15 मिनु मीकाया पिप आ डोंइती जाक्मेनु, पिपमी मेको कली “मीकाया, गो रामोथ-गिलाद कली लडाइ तोड देय मतोड?” दे हिल्लो पवा बाक्त। मिनु मेकोमी “लडाइ तोने। मिनु ग्राडीन। मारदे हना परमप्रभु यावेमी मेको इन गुइमी गेब” देमाक्त।
- 16 मिनु पिपमी मेको कली “परमप्रभु यावे आ नेमी थमा लोत्र ला पचा, दे गिश खेयप कसम जपाइक्नना?” देमाक्त।
- 17 मिनु मीकायामी “गो इस्राएली नेल्ल आन कली गोठला मबाक्शो भेडा खोदेशो पा, डांडा मेर ब्रशो तातामी। मिनु परमप्रभु यावेमी ‘मेको मुर आन टेयब मुर मबाक्ब। मेको नेल्ल आन थुं नाइशशा आन खिं लमल’ देशो बाक्ब” देमाक्त। गन्ती २७:१७; मत्ती ९:३६
- 18 मिनु इस्राएल डा पिपम येहो-शाफात कली “मार एकोम आं पर्वम मरिम्शो लोत्र डा लाक्शा अर्को मारेइ मदेब, देंदा ममाइ डा?” देमाक्त।
- 19 मिनु मीकायामी लोत्र तेम्शा “एको परमप्रभु यावे आ लोत्र नेनीन। गो परमप्रभु यावे आ स्वर्ग डा गेय पाइब नेल्ल आन कली आ ग्युरा गे नु आ पेरा गे राप्पाइशशा, परमप्रभु यावे आ नित्तीकेम बाक्शो ताता। २इतिहास १८:१८; अय्युब १:६; यसेया ६:१

20 मिनू परमप्रभु यावेमी 'आहाब कली रामोथ-गिलाद नु लडाइ पपाइरशा, मेको कली साइक्पाइक्का कली सुम क्युकबा?' दैत। मिनू काम लोत्र का पापु, अर्कोम अर्को लोत्र पापु।

21 मिनू नोले का जाक्शा, परमप्रभु यावे आ डोंडती राप्शा 'गो मेको आ थुं क्यानुड' दैत। यसैया १९:१४

22 मिनू परमप्रभु यावेमी मेको कली 'दोपा?' दे हिल्लो पापु। मिनू मेकोमी 'गो लशा मेको आ नोले दुम्ब लोत्र पाइब नेल्ल आन शोत्रमी जोल पाइब सोक्त का दुम्नुड' दैत। मिनू परमप्रभु यावेम मेको कली 'गे थमा पा मेको कली क्युकने चाप्नेवे। गे लावो। मिनू इ देशो पावो' दैत। १यूहन्ना ४:६

23 मोपतीके परमप्रभु यावेम इन नोले दुम्ब लोत्र पाइब नेल्ल आन शोत्रमी जोल पाइब सोक्त कुर पशो बाक्ब। परमप्रभु यावेम इन कली खतम दुम्तीक नाक्त चाक्शो आ पबंम नैपाइक्ने थुम्शो बाक्ब" दैमाक्त।

24 मिनू केनानाह आ तौ सिदकीयाह, इर डोइरशा मीकाया आ चोत्रचो रबा बाक्त। मिनू मेको कली "दोपा परमप्रभु यावे आ सोक्त आं रे पा इ थुंम ब्वाक्थ जाक्मे?" दैमाक्त।

25 मिनू मीकायाम "गे आंमा आगा डा कोठाम खुडक्थ लवे नाक्त, तुडक्नेवे" दे मदा बाक्त।

26 मिनू इस्राएल डा पिपम "मीकाया कली ग्याइक्तीन। मिनू सहर डा ठेयब मुर आमोन नु पिप आ तौ योआश आस जिमाम गेने।

27 मिनू एको मुर कली चोक्शा वोतीन। गो रिम्शो पा लेरशा मजाक्डा सम्म एको कली शोब्ले नु ब्वाक्कु डा लाक्शा अरु मारेइ मगेने" दैमाक्त।

28 मिनू मीकायाम मेको कली "गे रिम्शो पा लेरशा जाक्तीनी हना, परमप्रभु यावे गो नु मब्वाक्शो बाक्माक्त, देंनुड" दैमाक्त। मिनू मेकोम चिनु लोत्र तेम्शा "गे नेल्लेम एको लोत्र नैशा, इन थुंम वोतीन" दैमाक्त।

आहाब साइक्का पुंडसीशो

29 मिनू इस्राएल डा पिप नु यहूदा डा पिप येहो-शाफात रामोथ-गिलाद लसा बाक्त।

30 मिनू इस्राएल डा पिपम येहो-शाफात कली "गो मतुडक्का डा वा फेक्शा लडाइ पथ लाइनुड। तन्न गे इन फेक्तीक वा फेक्शा बाक्कीन" दैमाक्त। मिनू इस्राएल डा पिप मतुडक्पाइसीका डा वा फेक्शा लडाइ पथ लमाक्त।

31 मिनू अराम डा पिपम आ ३२ जना बग्गी डोइरशा लडाइ पाइब आन ठेयब मुर आन कली "इस्राएल डा पिप डा लाक्शा अरु आइक्च ठेयब सुड नु लडाइ मपने" दे हुकुम गेशो बाक्माक्त।

32 मिनू बग्गी डोइरशा, लडाइ पाइब आन ठेयब मुरपुकीम येहो-शाफात कली तशा "थमा पा इस्राएल डा पिप मेकोन बाक्ब" दैशा, मेको नु लडाइ पचा कली लमा बाक्त। तन्न येहो-शाफात ठेयब सेंदा पा वाइ ब्रेम्माक्त।

33 मिनू मेको बग्गी डोइरशा, लडाइ पाइब आन ठेयब मुरपुकीम "एको दा इस्राएल डा पिप ममाइ बाक्माक्त" दे तुडक्तेमे बाक्त। मिनू मेको कली खेदा पचा प्रोइशा लेम्मा बाक्त।

34 तन्न मुर कामी आ लित्रा खुक्शा, हेंथे पा ब्रा आप्शा सोइक्ता बाक्त। मिनू मेको ब्रामी इस्राएल डा पिप आ कुचु तेक्तीक पाता आ बोंइसेम खवा बाक्त। मिनू पिपम आ बग्गी खुल्ब कली "बग्गी हिरशा लडाइ रे गुंडीदी। गो ठेयब गार दुम्शो बाक्नुड" दैमाक्त।

35 मिनू नाक्त रे ठेयब लडाइ दुम्माक्त। पिप चहिं आ बग्गीम अरामी आन डोंडती राप्शा बाक्शो बाक्माक्त। मेको आ गार रे ग्रूशो हुश बग्गी आगामीन शाइरशो बाक्माक्त। मिनू मेको पिप मेको नाक्दोन बेक्माक्त।

36 मिनू नां लाक्गा नोले लडाइ पाइब आन हुलम "मुर नेल्ल इन सहर सहर नु इन बाक्तीक लने" देशो लोत्र नेन्मे बाक्त।

37 मोपा पिप बेक्माक्त। मिनू मुरपुकीम मेको कली सामरीयाम चाक्शा थिम्मे बाक्त।

38 मिनू मेकोपुकीम मेको बग्गी सामरीया डा दोम्ली काम मुरमे बाक्त। मेकेर कुचुमपुकीम आ हुश तुक्गामे बाक्त। तेल्लेमपुकी मेकेर जाक्शा, चिक्सीमा बाक्त। मोपा परमप्रभु यावे आ देशो खोदेशो दुम्माक्त। १राजा २१:१९; २राजा १:२५-२६

39 आहाब आ पशो अरु गेय, मेको आ पशो नेल्ले, मेको आ सेल्शो हात्ती आन खुड के खिं नु मेको आ सेल्शो सहरपुकी, मार, मेको इस्राएल डा पिप आन इतिहासम ब्रेक्शो मबाक्बा डा?

40 मोपा आहाब बेक्माक्त। मिनू मेको आ पा डा आ तौ अहाज्याह पिप दुम्माक्त।

यहूदा डा पिप येहो-शाफात

२इतिहास २०:३१-२१:१

41 आसा आ तौ येहो-शाफात यहूदा डा पिप दुम्माक्त। मेना इस्राएल डा पिप आहाबम सासन पशो ४ बर्स दुम्शो बाक्माक्त। १राजा १५:२४

42 येहो-शाफात पिप दुम्मेनु ३५ बर्स दुम्शो बाक्माक्त। मिनू मेकोम यरूसलेमम २५ बर्स सासन पवा बाक्त। मेको आ ममा आ नें अजुबाह बाक्माक्त। मेको शिल्ही आ तमी बाक्माक्त।

43 मेको गेना हना यो आ आफ आसा आ लोम गाक्माक्त। मिनू मेको रे गेनायो मलेम्माक्त। मेकोमी परमप्रभु यावे आ डोंडती मार रिम्शो बाक्मे, मेको पवा बाक्त। मो हना यो मेकोम डांडा मेर सेल्शो थानपुकी मप्रेदा बाक्त। मिनू मेना सम्म मुरपुकीम मेकेर पूजा पना पन धूप चोना चोन बाक्मा बाक्त।

44 येहो-शाफात इस्राएल डा पिप नु यो गारशा बाक्माक्त। १राजा १५:१४; २राजा १२:४

45 येहो-शाफात आ पशो अरु गेय, आ सक्ति कोंइशो, मेको आ लडाइ पशो, मार, मेको यहूदा डा पिप आन इतिहासम ब्रेक्शो मबाक्बा डा?

46 मेकोमी आ आफ आसा आ पालाम लीशो थान डा तेल्लेम वोंइश मुर आन कली क्याम्दा बाक्त। २इतिहास १७:-२०:-

47 मेना एदोमम सुइ पिप मबाक्मा बाक्त। मिनु मेकेर सोइशशो मुर कामी मेको रागीम सासन पवा बाक्त। १राजा १५:१२

48 येहो-शाफातम ओफीर रे सुन चाक्चा कली टारसीस डा खोदेशो पा जहाजपुकी सेल्पदा बाक्त। तन्न मेकोपुकी एस्योन-गेबेरम बिग्रेतीके समुन्द्रम लने मचाप्मे बाक्त।

49 मेना आहाब आ तौ अहाज्याहम येहो-शाफात कली “इन गेय पाइबपुकी आं गेय पाइब नु जहाजम लचा गेने” देंमाक्त। तन्न येहो-शाफात मबिस्से बाक्त। १राजा ९:२८

50 मिनु नोले येहो-शाफात बेक्माक्त। मिनु मेको आ आफ दाऊद आ सहरम थिम्चा पुंडसे बाक्त। मिनु मेको आ पा डा आ तौ येहोराम पिप दुम्माक्त।

इसाएल डा पिप अहाज्याह

51 आहाब आ तौ अहाज्याह सामरीयाम इसाएल डा पिप दुम्माक्त। मिनु मेकोम बर्स निक्शी इसाएलम सासन पवा बाक्त। मेना यहूदा डा पिप येहो-शाफात पिप दुम्शो १७ बर्स दुम्शो बाक्माक्त। २राजा ८:१६

52 पिप अहाज्याहमी परमप्रभु यावे आ डोंइती मार मरिम्शो बाक्मे, मेको पवा बाक्त। मेको आ आंम आफ नु इसाएली आन कली पाप पपाइक्ब नेबात आ तौ येरोबाम आ लांम गाक्माक्त। १राजा २२:४०

53 मेकोम बाल देवता कली पूजा पवा बाक्त। मेकोमी आ आफोम परमप्रभु यावे, इसाएली आन परमप्रभु कली गाइक्पाइशो खोदेशो पा, मेकोमी यो परमप्रभु कली गाइक्पदा बाक्त। १राजा १२:२८-३०

## २ राजा

**ब्रेक्ब मुर:** नेल्ल क्येडा नोले ब्रेक्ब, सुडम मतुडक्नीम। एको ब्रेक्ब मुरुमी यहूदा डा पिप आन इतिहास डा किताब नु इस्राएल डा पिप आन इतिहास डा किताब तुइश्शो बाकत।

**गेना ब्रेक्शो:** ५६१ बि. सी. पिप योयाकीन जेल्खान रे प्रोइचा पुंडसीशो बरसम बाकत।

**मार ब्रेक्शो:** डोंइती १राजा नु २राजा हिबू लोत्र रे ब्रेक्शो किताब का बाकत। मेको ब्रेक्ब मुरुमी ग्रीक लोत्र डा सेप्तुआगीन्त माइश्शो किताब निक्शी सेल्मे बाकत। राजा किताब निक्शी, सामुएल निक्शी, यहोसु नु न्यायाधीस कली डोंइती डा परमप्रभु यावे आ लोत्र पाइब आन किताब देंनीम। मेको किताबपुकीमी मोसामी इस्राएली आन कली इजीप्ट रे प्रोइशा बेबीलोन डा मुर आन कली ग्याइश्शा लाइश्शो सम्म डा लोत्र नेल्ल ब्रेक्शो बाकब।

एलीयाम पिप कली लोत्र पशो

1 मिनु आहाब बेकम नोले मोआबमी इस्राएली आन कली मटिवा बाकत। २सामुएल ८:२; २राजा ३:४-२७

2 अहाज्याह सामरीया सहर डा आ खिं डा तला तार रे दोक्शा, गार दुम्माक्त। मोपतीके मेकोमी मुर आन कली “लशा, एक्रोन डा देवता बाल-जेबुब नु पुनीन। गो एको आं गार रे सानुडा देय मसानुडा?” दे हिल्लो पचा कली सोइक्तीमी बाकत। १राजा २२:५२-५४

3 तन्न परमप्रभु यावे आ स्वर्ग डा गेय पाइबमी तिश्बे सहर डा एलीया कली “बोक्शा लशा, सामरीया डा पिप आ लोत्र कुरब आन कली गुम्शा, मेको आन कली ‘मार, इस्राएलम परमप्रभु मबाक्बा डा? मिनु गेपुकी एक्रोन डा देवता बाल-जेबुब आ बाक्तीके हिल्लो पथ लनी?’ यसैया ८:१९

4 मोपतीके परमप्रभु यावेमी अहाज्याह कली ‘गे इ रोइ पा गोल्लीक रे मबोक्नेवे। गे थमा पा बेक्नेवे’ देशो बाकब, देनीन” देमाक्त। मिनु एलीया गाक्माक्त।

5 मिनु मेको लोत्र कुरब मुरपुकी पिप आ बाक्तीक लेश्शा जाक्मा बाकत। मिनु पिपमी “गे मारदे लेश्शा जाक्नी?” दे हिल्लो पामी बाकत।

6 मिनु मेकोपुकीमी “गो आंड कली गुम्शु मुर का जाक्त। मिनु मेकोमी ‘लेश्शा लशा इन कली सोइक्ब पिप आ बाक्तीक लने। मिनु मेको कली परमप्रभु यावेमी मार, इस्राएलम परमप्रभु मबाक्बा डा? गे एक्रोन डा देवता बाल-जेबुब कली हिल्लो पथ मुर सोइक्तीके, मसानीनी, बेक्नीनी” देत माइक्चा” देमा बाकत।

7 मिनु पिपमी मेको आन कली “इन कली गुम्शा, मेको लोत्र पाइब मुर दोदेशो बाकम” दे हिल्लो पामी बाकत।

8 मिनु मेकोपुकीमी “दलओठ आ चां के प्रोवशो वा फेक्सीशो नु कुशुल के पेटी किम्सीशो बाकत” देमा बाकत। मिनु मेकोमी “मेको तिश्बे सहर डा एलीया बाकब” देमाक्त। इतिहास १६:१७; मत्ती ३:४

9 मिनु पिपमी ५० जना लडाइ पाइब नु आन कप्तान आन कली एलीया आ बाक्तीक सोइक्तीमी बाकत। मिनु मेको टेयब मुर डांडा डोइश्शा एलीया आ बाक्तीक लमाक्त। मेना एलीया डांडाम बाक्शो बाक्माक्त। मिनु मेको कप्तानमी “परमप्रभु आ मुर, पिपमी इन कली ‘यिन’ देशो बाकब” देमाक्त।

10 मिनु एलीयामी मेको ५० जना डा लडाइ पाइब आन कप्तान कली “गो परमप्रभु आ मुर बाक्ती हना, सरीड रे मी दोक्शा, गे नु इ लडाइ पाइब ५० जना इन कली दाक्वाल” देमाक्त। मिनु सरीड रे मी दोक्शा, मेको कप्तान नु आ लडाइ पाइब ५० जना आन कली दाक्वा बाकत। लूका ९:५४; प्रकाश ११:५

11 मिनु मेको नोले पिपमी अर्को ५० जना लडाइ पाइब नु आन कप्तान कली एलीया आ बाक्तीक सोइक्तीमी बाकत। मिनु मेको लडाइ पाइब आन कप्तान डांडा डोइश्शा लशा “परमप्रभु आ मुर, पिपमी इन कली ‘रीब पा यिन’ देत” देमाक्त।

12 मिनु एलीयाम “गो परमप्रभु आ मुर बाक्ती हना, सरीड रे मी दोक्शा, गे नु इ ५० जना लडाइ पाइब इन कली दाक्वाल” देमाक्त। मिनु परमप्रभु आ मी सरीड रे दोक्शा, मेको नु मेको आ लडाइ पाइब ५० जना आन कली दाक्वा बाकत।

13 मिनु पिपमी लेंशा ५० जना लडाइ पाइब नु आन कप्तान कली सोइक्तीमी बाकत। मिनु मेको सोइश्शो लडाइ पाइब आन कप्तान डांडा डोइश्शा एलीया आ बाक्तीक लमाक्त। मिनु मेकोमी एलीया आ डोंइती पोक्ब थेंक्शा सेउ पा “परमप्रभु आ मुर, गो नु एको इन गेय पाइब ५० जना आंड कली शिशीं पा ब्रोंइचा गेने।

14 डोंइती डा ५०, ५० जना लडाइ पाइब नु आन कप्तान निक्शी आस कली सरीड रे मी दोक्शा, दाक्तु। तन्न मुल आंड कली शिशीं पा ब्रोंइचा गेने” देमाक्त।

15 मिनु परमप्रभु यावे आ स्वर्ग डा गेय पाइबमी एलीया कली “मेको नु उड बुपो। मेको क्येडा महिनो” देमाक्त। मोपतीके एलीया मेको लडाइ पाइब आन कप्तान नु पिप आ बाक्तीक लमाक्त।

16 मिनु मेकोमी पिप कली “परमप्रभु यावेमी इन कली ‘मार, इस्राएलम परमप्रभु मबाक्बा डा? मिनु गे मुर आन कली एक्रोन डा देवता बाल-जेबुब आ बाक्तीके हिल्लो पथ सोइक्तीमी? मोपतीके गे इन गोल्लीके रे मबोक्नीनी। गे थमा पा बेक्नीनी” देशो बाकब” देमाक्त।

17 मिनु एलीयामी देशो खोदेशो पा, परमप्रभु यावे आ लोत्र गाप्शा अहाज्याह बेक्माक्त। मिनु मेको आ पा डा आ लोक्ब येहोराम पिप दुम्माक्त। मारदे हना अहाज्याह के तौ मबाक्मा बाकत। मेना यहूदा डा पिप येहो-शाफात आ तौ येहोराम यहूदा डा पिप दुम्शो बर्स निक्शी दुम्शो बाक्माक्त। येहोराम कली ब्रेत्तीक नें योराम यो बाकत। १राजा ३:१

18 अहाज्याह आ पशो अरु गेय, मार, इस्राएल डा पिप आन इतिहासम ब्रेक्शो मबाक्बा डा?

## 2

परमप्रभुम एलीया कली लाइशशो

1 परमप्रभु यावेमी एलीया कली फश गिवारम क्युकशा स्वर्ग लाइकचा चिकशो बाक्माक्त। मेना एलीया नु एलीशा गिल्याल प्रॉइशा गाक्ना गाक्न बाक्सा बाक्त।

2 मिनु एलीयामी एलीशा कली “गे एक उइ बाक्को। मारदे हना परमप्रभु यावेमी आं कली बेथेल सोइशशो बाक्ब” देमाक्त। तन्न एलीशामी “परमप्रभु यावे ब्रॉइशा बाक्शो खोदेशो पा नु इन ब्रॉइशा बाक्शो खोदेशो पा, गो इन कली मप्रॉइनुड” देमाक्त। मोपतीके मेको निक्शी बेथेल बुप्सा बाक्त।

3 मिनु मेकेर परमप्रभु यावे आ लोत्र पाइब आन हुल का जाक्शा, एलीशा कली “परमप्रभु यावेमी मुलाक्ती इन होवप कली लाइकब, दे तुइक्नीनी?” दे हिल्लो पामे बाक्त। मिनु एलीशामी “गो तुइक्नुड। गे सिक्सी पने” देमाक्त।

4 मिनु एलीयामी मेको कली “एलीशा गे एक बाक्को। मारदे हना परमप्रभु यावेमी आं कली यरीको सोइशशो बाक्ब” देमाक्त। तन्न मेकोमी “परमप्रभु यावे ब्रॉइशा बाक्शो खोदेशो पा नु इन ब्रॉइशा बाक्शो खोदेशो पा, गो इन कली मप्रॉइनुड” देमाक्त। मोपतीके मेको निक्शी यरीको सम्म बुप्सा बाक्त।

5 मिनु यरीकोम परमप्रभु यावे आ लोत्र पाइब आन हुल का जाक्शा, एलीशा कली “परमप्रभु यावेमी मुलाक्ती इन होवप कली लाइकब, दे तुइक्नीनी?” दे हिल्लो पामे बाक्त। मिनु मेकोमी “गो तुइक्नुड। गे सिक्सी पने” देमाक्त।

6 मिनु एलीयामी मेको कली “गे एक उइ बाक्को। मारदे हना परमप्रभु यावेमी आं कली ‘यर्दन खोला लावो’ दे सोइक्ताक्यी” देमाक्त। तन्न एलीशामी “परमप्रभु यावे ब्रॉइशा बाक्शो खोदेशो पा नु इन ब्रॉइशा बाक्शो खोदेशो पा, गो इन कली मप्रॉइनुड” देमाक्त। मोपतीके मेको निम्फा गाक्सा बाक्त।

7 मिनु ५० जना परमप्रभु यावे आ लोत्र पाइबपुकीम एलीया नु एलीशा आस नोले खोदमे बाक्त। मिनु मेको निक्शी यर्दन खोला आ नेक्था राप्शा बाक्सानु, मेकोपुकी डोन रे कोवशो बाक्मा बाक्त।

8 मिनु एलीयामी आ फेक्शो वा पुइशशा ओल्शा यर्दन खोला डा ब्वाक्कु तुबा बाक्त। मिनु ब्वाक्कु ग्युरा गे नु पेरा गे ब्राशा, सोव्रशो लां दुम्माक्त। मेको निक्शी आइक्वी हांबु मजाक्दीस्सा सम्म मोपा ब्राशा बाक्माक्त। प्रस्थान १४:२१-२२; यहोसु ३:१६

9 मिनु खोला शोक्ससा नोले एलीयाम एलीशा कली “आं कली इ रे पा लाइकचा पुंडसीचा क्येडा डोंइती गो इ पर्बम मार पड?” देमाक्त। मिनु एलीशामी “इन सोक्त क्येडा भाग निक्शी आं कली गेयीनी” देमाक्त। ब्यवस्था २१:१७

10 मिनु एलीयामी “गे दा टेयब लोत्र कका पुंडतीवी। तन्न आं कली एक रे क्युकशा लाइशशो ताप्तीवी हना, मेको इ पुइशो गाप्ब। तन्न मताप्तीवी हना, मेको इ पुइशो मगाप्ब” देमाक्त।

11 मिनु मेको निक्शी लोत्र पना पन गाक्सा बाक्त। मिनु रीब पा मी ब्रशो बग्गी नु शारापुकी ग्यूमा बाक्त। मिनु मेकोपुकीमी मेको निक्शी आस कली फ्रादमे बाक्त। मिनु एलीया फश गिवारम क्युकशा इर सरीड लाइकचा पुंडसे बाक्त। उत्पत्ती ५:२४

12 मिनु एलीशाम मेको तशा, वाइ ब्रेशशा “ए आं आफ! ए आं आफ! इसाएल डा बग्गी नु शारा डोइक्बपुकी” देमाक्त। मिनु मेना रे एलीशाम एलीया कली लेंशा मतवा बाक्त। मिनु नोले मेकोमी आ वा जेर खाक्गा बाक्त। २राजा ६:२१; २राजा १३:१४

13 मिनु एलीशाम एलीया आ दोक्शो फेक्शो वा गुबा बाक्त। मिनु लेशशा यर्दन खोला आ नेक्था राम्माक्त।

14 मिनु मेकोमी एलीया आ फेक्शो वामी ब्वाक्कु तुप्शा “परमप्रभु यावे, एलीया आ परमप्रभु ते बाक्म?” देमाक्त। मिनु ब्वाक्कु तुबा बाक्त। मिनु ब्वाक्कु ग्युरा गे नु पेरा गे ब्रामेनु, मेको ओंथ हांबु शोक्से बाक्त।

15 मिनु मेको कोव्रशा बाक्ब यरीको डा परमप्रभु यावे आ लोत्र पाइब हुलमी “एलीया आ सोक्त एलीशा तार जाक्माक्त” देमा बाक्त। मिनु मेकोपुकी एलीशा कली युमथ जाक्मा बाक्त। मिनु मेको आ डोंइती खप सम्मन बाम्मा बाक्त।

16 मिनु मेकोपुकीम एलीशा कली “कोव्रडीन, गो इन गेय पाइबपुकी नु बोल्यो ५० जना मुर बाक्नीम। मेकोपुकी लशा, इन होवप कली माल्चा गेने। परमप्रभु यावे आ सोक्तीम क्युकशा लाइशशा, मेको कली तेकोइ पहाड, बेसीम वोइशशो बाक्म माइ” देमा बाक्त। तन्न एलीशाम “ममाइ, मेको आन कली मसोइक्तीन” देमाक्त।

17 तन्न मेकोपुकीम एलीशा कली सोइक्तीन कि सोइक्तीन देमा बाक्त। मिनु एलीशाम मेको आन कली “लो, मो हना सोइक्तीन” देमाक्त। मिनु मेकोपुकीम मेको ५० जना मुर आन कली सोइक्तमे बाक्त। मिनु मेकोपुकीम नाक्त सां सम्म माल्शा मथिदमे बाक्त।

18 मिनु एलीशा यरीकोम बाक्मेनु, मेकोपुकी लेशशा, मेको आ बाक्तीक जाक्मा बाक्त। मिनु एलीशाम मेको आन कली “मार, गो इन कली मलन मदेंडा डा?” दे माइक्मी बाक्त।

एलीशाम ब्वाक्कु रिमशो सेल्शो

19 मिनु मेको सहर डा मुरपुकीम एलीशा कली “एको आंड सहर रिमशो बाक्ब। तन्न एकेर डा ब्वाक्कु मरिमशो बाक्ब। मिनु एको ब्वाक्कुमी आल शाम्पाइक्ब” देमा बाक्त।

20 मिनु मेकोमी “आं कली नक बोस का गेयीनी। मिनु मेकेर हिक्सी कुर पने” देमाक्त। मिनु मेकोपुकीम मोपा चाक्गमे बाक्त।

21 मिनु एलीशा मेको ब्वाक्कु बुक्तीकेम लशा, मेको हिक्सी बुइशशा, मेकोमी “परमप्रभु यावेमी मार दैत देशा हना ‘गो एको ब्वाक्कु कली रिमशो सेल्ता। मुल एकोमी मबेक्पाइक्ब, मशाम्पाइक्ब’ दैत” देमाक्त।

22 मिनु एलीशा आ देशो खोदेशो पा मेको ब्वाक्कु मुल सम्म रिमशो बाक्ब।

एलीशा कली शाक्शो

- २३ मेको नोले एलीशा इर बेथेल लमाकत। मिनु लना लन बाकमेनु, सहर डा हुल का वोंइश आल जाकशा, मेको कली शाकशा “ए तालु खुइले, इर लावो। ए तालु खुइले, इर लावो” दे ग्रीमा बाकत।
- २४ मिनु मेकोम लेशशा कोव्रशा, मेको आन कली परमप्रभु यावे आ नेमी सराप पाइक्मी बाकत। मिनु ब्वाकी रे छाउरी वां निकशी यूशा, मेको आन दाते डा ४२ जना आन कली क्राइशशा साइक्मी बाकत।
- २५ मिनु मेको मेकेर रे कारमेल डांडा लमाकत। मिनु नोले सामरीया लेम्माकत।

### ३

येहोराम इस्राएल डा पिप दुम्शो

- १ आहाब आ तौ येहोराम सामरीयाम इस्राएल डा पिप दुम्माकत। मिनु मेकोमी १२ बर्स सासन पवा बाकत। मेना यहूदा डा पिप येहो-शाफात पिप दुम्शो १८ बर्स दुम्शो बाक्माकत। २राजा १:१७
- २ मिनु येहोराममी परमप्रभु यावे आ डोंइती मार मरिम्शो बाक्मे, मेको पवा बाकत। तन्न मेको आ आंम आफोम पशो खोदेशो चहिं ममाइ। मेकोमी आ आफ आ सेल्शो बाल आ थामपुकी प्रेदा बाकत। १राजा १६:३२
- ३ मो हना यो मेकोमी नेबात आ तौ येरोबामम इस्राएली आन कली पपाइशशा पाप मप्रोंइथु, पवा बाकत।
- ४ मोआब डा पिप मेशामी भेडा थुल्बाक्माकत। मिनु मेकोमी गेना हना यो इस्राएल डा पिप कली लाख का पाटा नु लाख का सांड आन ऊन गेबाक्माकत।
- ५ तन्न आहाब बेक्म नोले मोआब डा पिपमी इस्राएल डा पिप कली मटिवा बाकत।
- ६ मोपतीके पिप येहोराम सामरीया रे जाकशा, इस्राएली नेल्ल आन कली खुपतीमी बाकत।
- ७ मिनु मेकोमी यहूदा डा पिप येहो-शाफात कली “मोआब डा पिपम आं कली मटीयी। गे आं कली मोआब डा पिप नु लडाइ पचा कली वारच पाइक्नीनी” दे लोत्र कुरब मुर सोइक्तीमी बाकत। मिनु मेकोमी “गो वारच पाइनुड। गो गे नु बाक्नुड। आं मुर इन मुर नम। आं शारा नेल्ल इन के नम” देमाकत। १राजा २२:४
- ८ मिनु येहो-शाफातमी “गो ते रे लडाइ तोय?” दे हिल्लो पवा बाकत। मिनु येहोराममी “एदोम डा गोरशो रागी रे” देमाकत।
- ९ मोपतीके इस्राएल डा पिप, यहूदा डा पिप नु एदोम डा पिप गारशा, लडाइ पथ लमा बाकत। मिनु मेकोपुकी ७ नाकत सम्म गाक्मानु, लडाइ पाइब नु आन लाइशशा बी ब्यफ आन कली तूतीक ब्वाक्कु मबाक्माकत।
- १० मिनु इस्राएल डा पिपमी “आबी, परमप्रभु यावेमी गो पिप सां इं कली मोआबी आन गुडमी जिम्मा गेचा कली एक चाक्शो बाकत” देमाकत।
- ११ तन्न येहो-शाफातमी “मार एकेर परमप्रभु यावे आ लोत्र पाइब सुइ मबाक्नीमी? मेको रे पा गो परमप्रभु यावे कली हिल्लो पने चाप्नीक” देमाकत। मिनु इस्राएल डा पिप आ गेय पाइब आन दाते डा काम “एलीया आ गुडम ब्वाक्कु लुक्ब शाफात आ तौ एलीशा एक बाक्ब” देमाकत। १राजा २२:५,७; १राजा १९:१९-२१
- १२ मिनु येहो-शाफातमी “परमप्रभु यावे आ लोत्र मेको नु बाक्ब” देमाकत। मोपतीके इस्राएल डा पिप, येहो-शाफात नु एदोम डा पिप एलीशा आ बाक्तीक बुम्मा बाकत।
- १३ मिनु एलीशाम इस्राएल डा पिप कली “गे नु गो इस के मार बाक्बा डा? इन आम आफ आस नोले दुम्ब लोत्र पाइब आन बाक्तीक लने” देमाकत। तन्न इस्राएल डा पिपमी मेको कली “ममाइ, परमप्रभु यावेमी गो पिप सांफा आंइ कली मोआबी आन गुडमी जिम्मा गेचा कली एक चाक्शो बाक्ब” देमाकत।
- १४ मिनु एलीशामी “गो आं गेय पशो, मुर नेल्ल आन परमप्रभु यावे ब्रोंइशा बाक्शो खोदेशो पा यहूदा डा पिप येहो-शाफात कली मान मपशो नड हना, गो इन कली मसेत्तु वा, मारेइ मसुदु वा” देमाकत। १राजा १८:१५
- १५ मिनु मेकोमी “तन्न मुल आं कली तार पाइशशा ताप्तीके ताप्ब का चाक्कीन” देमाकत। मिनु मेकोमी तार पाइशशा ताप्तीक ताप्बमी तबानु, परमप्रभु यावे आ सक्तिम एलीशा कली सुमा बाकत। १सामुएल १६:१६
- १६ मिनु मेकोमी “परमप्रभु यावेमी ‘गे एको खोल्सा डा दिंम दोम्ली नु शुश खाल्टा दोन’” देमाकत।
- १७ मारदे हना परमप्रभु यावेमी “गे फश गिवार नु रेउ यिशो मताइनीनी। मो हना यो एको दिंम ब्वाक्कुम ब्रीब। मिनु गे, इन बी ब्यफ नु इन शाराम ब्वाक्कु तूनीनी।
- १८ एको परमप्रभु यावे आ डोंइती आइक्च गेय का ला बाक्ब। मेकोमी मोआबी आन कली यो इन गुडम गेब।
- १९ गेपुकीम गारो हिरशो सहर नेल्ल नु ठेयब दारशो सहर नेल्ल ग्रानीनी। गेपुकीम रिम्शो रवा नेल्ल तिम्नीनी। मिनु ब्वाक्कु यितीक नेल्ल तेक्नीनी। मिनु रू नेल्लेम फुल्लु तेलनीनी, देशो बाक्ब” देमाकत।
- २० मिनु आ दीसा सुनी चढ़ेची ना छक लाक्चा डा पा एदोम रे ब्वाक्कु शाइशशा यिचा गोवा बाकत। मिनु रागी नेल्ल ब्वाक्कुम ब्रीमाकत। गन्ती २८:४-५
- २१ मेना मोआबीपुकीम पिप नेल्ल गोपुकी नु लडाइ पथ जाक्शो बाक्नीम देशो लोत्र नेम्मे बाकत। मोपतीके या चलेने चाप्ब वोंइश मुर, ठिटा नु खाल्पा नेल्ल आन कली ब्रेत्मे बाकत। मिनु मेको आन कली लडाइ पचा कली ठीक पांमे बाकत।
- २२ मिनु मेकोपुकी आ दीसा सुनी कना बोक्मा बाकत। मिनु मेना ब्वाक्कुम नां टल्केशो तांइसीशो बाक्माकत। मिनु मोआबीपुकीम मेको आन डोंइती डा ब्वाक्कु नांम हुश खोदेशो लल तामे बाकत।
- २३ मिनु मेकोपुकीम “एको दा हुश बाकत। मेको पिपपुकी आंम आंमा लडाइ पा साइक्मुमा बाकत, थांका। मुल ए मोआबी, मार मार रोइक्थ लय” देमुमा बाकत।

24 मिनू मोआबी इस्राएली आन बाक्तीकेम जाक्मानु, इस्राएली यूशा मेको आन कली मप्रोक्पदमे सम्म लडाइ तोव्रमे बाक्त। मिनू इस्राएलीम मोआबी आन कली लडाइ तोस डा तोस पामे बाक्त।

25 मिनू मेकोपुकीम मेको आन सहर प्रेशशा श्येत्थ पोक्गामे बाक्त। मिनू मुर नेल्लेमी मेको आन रूम फुल्लु का का ताइशशा, तेइ तेइ फुल्लुम प्रिदमे बाक्त। मेकोपुकीम ब्वाक्कु यितीक नेल्ल तेक्वमे बाक्त। मिनू रिम्शो रवा नेल्ल तिम्मे बाक्त। मेकोपुकीम किर-हारेसेथ सहर डा गारो ला हेंदमे बाक्त। तन्न मेको सहर कली हुरद आप्बपुकीम तेक्शा लडाइ तोव्रमे बाक्त।

26 मिनू मोआब डा पिपमी लडाइ ब्रुडनुड, दे तुइशशा, तरवार शेब लडाइ पाइब ७ सहे जना आन कली लाइशशा, एदोम डा पिप आ बाक्तीक ओव्रचा कली लमाक्त। तन्न मेकोमी मो पने मचबा बाक्त।

27 मिनू मेकोमी आ पा डा पिप दुम्ब आ डोंडती जरमेशो तौ कली गारोम क्योरशा चोशा चढ़ेवा बाक्त। मिनू इस्राएली छक लाक्शा लेशशा आन रागी लमा बाक्त।

## 4

एलीशामी वारच पशो

1 मिनू परमप्रभु यावे आ लोत्र पाइब का आ मीश जाक्शा टेयब सेंदा पा एलीशा कली “इन गेय पाइब आं वोंइश बेक्त। मेको परमप्रभु यावे कली मान पा हिंब बाक्त, दे तुइक्नीनी। तन्न मुल मेको आ जेर जशो मुर जाक्शा आं आल निक्शी आस कली वाइल सेल्चा कली लाइक्चशो बाक्ब” देंमाक्त।

2 मिनू एलीशामी मेको कली “गो इ कली मार पाइनुडा? इ खिम मार बाक्बा? आं कली देनो” देंमाक्त। मिनू मेकोमी “गो, इन वाइलीम आं खिम गर का तेल डा लाक्शा अर्को मारेइ मबाक्ब” देंमाक्त। १राजा १७:१२

3 मिनू एलीशामी “इ नेक्था डा मुर आन खिं लशा, श्येत्थ गर का निक्शी ला ममाइ, शुश गर पुंइशा चाक्को।

4 मिनू गे विं ओव्रशा, इ आल आस कली यो आगा ओइशा, लाप्चो चोक्को। मिनू मेको गर डा तेल अर्को गर नेल्लेम कुर पाव्वा। मिनू ब्रीशो गार याक्शा वोंतो” देंमाक्त।

5 मिनू मेको मीश मुर एलीशा आ बाक्तीके रे गाक्माक्त। मिनू आ खिं जाक्दीशशा, आ आल आस कली खिंडगा ओइशा लाप्चो चोक्गा बाक्त। मिनू आ चाक्शो श्येत्थ गर शुशेमी तेल प्रिंदा बाक्त।

6 मिनू मेको गर तेलम ब्रीमा बाक्त। मिनू मेकोमी आ तौ कली “अर्को गर चाक्को” देंमाक्त। मिनू मेकोमी “मुल श्येत्थ गार का यो मबा” देंमाक्त। मिनू तेल यिचा यो देक्माक्त।

7 मिनू मेको लशा, मेको परमप्रभु आ मुर कली शेंदा बाक्त। मिनू मेकोमी “लशा मेको तेल लेयडो। मिनू इ जेर थाप्तो। मिनू लीशो क्येट चहिं इन खिं डा मुर आन कली थुल्चा कली दुम्ल” दे मदा बाक्त।

एलीशा नु शुनेम डा मीश मुर

8 काबु नाक्ती एलीशा शुनेम सहर लमाक्त। मेकेर शुश शोंप पाइशशो मीश मुर का बाक्माक्त। मिनू मेकोम एलीशा कली जथ तूथ ब्रेत्ता बाक्त। मिनू एलीशा मेको मेर गाक्मेनु, जथ तूथ ओव्रबाक्माक्त। यहोसु १९:१८

9 मिनू काबु नाक्त मेको मीश मुरुमी आ वोंइश कली “एको गेना हना यो इं लां रे गाक्ब मुर थमा पा परमप्रभु आ मुर बाक्ब, दे गो तुइक्नुड।

10 गो तला तार थरपु हिरशा मेको कली आइक्च कोठा का सेल्शा गेय। मिनू मेको कोठाम मेको कली खाट का, टेबल का, निक्तीक का नु बत्ती का वोइशशा गेचा। मिनू मेको एक जाक्मेनु, मेकेर बाक्तीक पवल” देंमाक्त।

11 मिनू काबु नाक्त एलीशा जाक्शा, नाइक्चा कली मेको कोठाम लशा गोल्माक्त।

12 मिनू मेकोम आ गेय पाइब गेहाजी कली “मेको शुनेम सहर डा मीश मुर कली ब्रेशशा कुतो” दे मदा बाक्त। मिनू मेकोम, मेको कली ब्रेत्ता बाक्त। मिनू मेको एलीशा आ डोंडती जाक्माक्त।

13 मिनू एलीशाम आ गेय पाइब कली “मेको कली ‘गे आं परबम इशका श्येत पाप्तीवी। मुल गो इ कली मार पने चान्पुडा? मार, गो इ परबम पिप नु लडाइ पाइब आन टेयब मुर नु मारेइ लोत्र पशा गेना?’ दे मेको कली हिल्लो पावो” दे मदा बाक्त। मिनू मेको मीश मुरुमी “गो एक आं मुर आन दातेमीन बाक्नुड” देंमाक्त।

14 मिनू एलीशाम गेहाजी कली “मो हना मुल गो मेको कली मार पने चान्पुडा?” देंमाक्त। मिनू गेहाजीम “मेको के तौ मबाक्ब। आ वोंइश खुशो दुम्शो बाक्ब” देंमाक्त।

15 मिनू एलीशामी “मेको कली ब्रेत्तो” देंमाक्त। मिनू गेहाजीम मेको कली ब्रेत्तानु, मेको लाप्चोम राम्माक्त। २राजा २:२५

16 मिनू एलीशामी “अर्को बर्स इ थुकुम तौ का बाक्ब” देंमाक्त। मिनू मेकोमी “ममाइ, आं प्रभु, गे परमप्रभु आ मुर बाक्नीनी। मोपा इन वाइलीम आं कली जोल मपने” देंमाक्त। उत्पत्ती १८:१०,१४

17 मिनू मेको कोव्रज कुरशो दुम्शा, एलीशाम देंम ना तौ का थिमाक्त।

18 मिनू मेको आल कोल्शा, काबु आ आफ नु खेत्ला आन अन्न खुप्तीकेम लमाक्त। २राजा ४:१६

19 मिनू मेकोमी आ आफ कली टेयब सेंदा पा “आं पिया ब्वती, आं पिया ब्वती” देंमाक्त। मिनू आ आफोम आ गेय पाइब का कली “एको कली आ ममा आ बाक्तीक लतो” दे मदा बाक्त। लूका १०:४

20 मिनू मेको गेय पाइब मुरुम मेको आल कली आ ममा आ बाक्तीक चाक्दीदा बाक्त। मिनू मेको आल आ ममा आ थुकुम नाक्ती उइक्थ दुम सम्म बाक्शा बेक्माक्त।

21 मिनू मेको मीश मुरुमी मेको आल कली इर परमप्रभु आ मुर आ ब्राव्येम लाइशशा खोल्शा वोइशशा लाप्चो चोक्शा यूशा गाक्माक्त।



22 मिनू मेकोमी आ वोंइश कली ब्रेशरा “आं कली गेय पाइब का नु गधा का सोइकतीनी। मिनू गो रीब पा परमप्रभु आ मुर बाक्तीक लशा लेत्तुड” देमाक्त।

23 मिनू आ वोंइशेमी “मुलाकत मारदे लचा माल्दे? औंसी यो ममाइ, नाइक्तीक नाक्त यो ममाइ” दे मदा बाक्त। मिनू मेकोमी “लचा माल्नुड” देमाक्त।

24 मिनू मेकोमी गधाम लगम पाइशरा, आ गेय पाइब कली “गो नाइक्तो मदेँडा सम्म खुलो देश मपावो” दे मदा बाक्त।

25 मोपा मेको गाक्शा, परमप्रभु आ मुर बाक्तीके कारमेल डांडाम जाक्माक्त। मिनू परमप्रभु आ मुरुम मेको कली डोन रेन तशा आ गेय पाइब गेहाजी कली “कोव्रड, दे मेरे जाक्ब शुनेम सहर डा मीश मुर बाक्ब।

26 गे दोरशा लशा मेरे कली “मार नेल्ल रिम्शोन बाक्बा? मार, इ वोंइश रिम्शोन बाक्मे? इ आल रिम्शोन बाक्मे?” दे हिल्लो पावो” दे मदा बाक्त। मिनू मेकोम हिल्लो पवानु “नेल्ल रिम्शोन बाक्नीम” देमाक्त।

27 मिनू मेको परमप्रभु आ मुर बाक्तीक डांडाम जाक्शा, एलीशा आ खोइल मुबा बाक्त। मिनू गेहाजी मेको कली फ्राचा कली जाक्मेनु, परमप्रभु आ मुरुम एको कली “मपावो, एको कली ठेयब श्येत दुम्शो बाक्ब। तन्न परमप्रभु यावेमी मेको लोव्र खुइशरा, आं कली मशेंदी” देमाक्त।

28 मिनू मेको मीश मुरुमी “ए आं प्रभु, मार गो तौ पुंइशो नडा डा? आं कली आस कोइशा मोशा मसेल्यीनी देश पुंइशो मनडा डा?” देमाक्त।

29 मिनू एलीशाम गेहाजी कली “इ किप्शुर किम्सो। एको आं कोक्के कुरशा दोरशा लावो। लाम सुइ युम्तीवी हना, मेकोपुकी नु लोव्र पचा कली मदिवको। सुइमी इ कली लोव्र पाम्तेक्म हना, मेको आन कली लोव्र मलेत्तो। एको आं कोक्के लाइशरा, मेको आल आ कुलुम वोतो” दे मदा बाक्त।

30 तन्न मेको आल आ ममामी “परमप्रभु यावे ब्रोंइशा बाक्शो खोदेशो पा नु इन ब्रोंइशा बाक्शो खोदेशो पा गो इन कली मप्रोंइनुड” देमाक्त। मोपतीके एलीशा बोक्शा, मेको मीश मुर आ नोले खोदा बाक्त।

31 गेहाजी चहिं डोंइती लशा मेको कोक्के मेको आल आ कुलुम वोदा बाक्त। तन्न मेको मारेड मदुम्माक्त। मोपतीके एलीशा कली युम्चा कली गेहाजी लेम्माक्त। मिनू मेको कली “मेको आल मसेस” देमाक्त।

32 मिनू एलीशा खिं जाक्मेनु, मेको आल कली आ ब्राख्येम बेक्शो थिदा बाक्त।

33 मिनू एलीशा आगा ओव्रशा लाप्यो चोक्शा, परमप्रभु यावे कली पुना बाक्त। प्रेरित ९:४०

34 मेको नोले मेको ब्राख्येम डोइशरा, मेको आल आ शोवम आ शोव, मेको आ मिक्चम आ मिक्ची नु मेको आ गुडम आ गुड वोंइशरा, मेको आल तार गोल्माक्त। मिनू मेको आल होना होन लमाक्त। १ राजा १७:२१

35 मिनू एलीशा बोक्शा कोठाम एर ओथ पवा बाक्त। मिनू मेको लेंशा खाट डोइशरा मेको आल कली कोव्रडानु, मेको आलम ७ खेयप हाक्च पा, आ मिक्च पाक्गा बाक्त।

36 मिनू एलीशाम गेहाजी कली “मेको शुनेम सहर डा मीश मुर कली ब्रेशरा, एक चाक्को” दे मदा बाक्त। मिनू मेकोमी मेको कली ब्रेत्ता बाक्त। मिनू मेको मीश मुर जाक्मेनु, एलीशामी मेको कली “इ तौ लतो” दे मदा बाक्त।

37 मिनू मेको आगा ओव्रशा एलीशा आ खोइलीम खप सम्मन बाम्माक्त। मिनू मेको नोले आ तौ लाइशरा गूशा लमाक्त।

बोसुम ओश्येर बाक्शो

38 मिनू एलीशा लेशरा गिल्लाल लमाक्त। मेना मेको रागीम ठेयब अन्काल दुम्शो बाक्माक्त। परमप्रभु यावे आ लोव्र पाइब आन हुल का मेको आ डोंइती बाक्मा बाक्त। मिनू मेकोम आ गेय पाइब कली “चुप्लुम ठेयब बोस का काशा एको परमप्रभु यावे आ लोव्र पाइब आन हुल आन कली खोले क्येवो” दे मदा बाक्त।

39 मेको आन दाते डा का चहिं गिग खाइ माल्थ रू मेर लमाक्त। मिनू ब्वाकी डा वोबीस थिदा बाक्त। मिनू मेकोम मेको सेक्शा पोल्टो का पा चाक्गा बाक्त। मेकोमी मेको मार बाक्मे, दे मतुइक्थु प्रेक्शा खोलेम सुप्ता बाक्त।

40 मिनू मुरपुकीम जामेक्ल, दे मेको तेम्शा खेत्तीमी बाक्त। मिनू मेकोपुकीम जशा, ठेयब सेंदा पा “ए परमप्रभु आ मुर, एको बोसुम दा ओश्येर कका बाक्त” देमा बाक्त। मिनू मेकोपुकीम मेको जने मचाप्मे बाक्त।

41 मिनू एलीशाम “इक्का खोइ फस चाक्कीन” देमाक्त। मिनू मेकोम मेको फस बोसुम कुर पवा बाक्त। मिनू मेकोमी “मुल मेको आन कली एको जचा गेने” देमाक्त। मेको नोले मेको बोसुम ओश्येर मबाक्माक्त।

सहे का मुर आन कली थुलो

42 मिनू बाल-शालीशा डा मुर काम परमप्रभु आ मुर कली आ डोंइती मीशो क्योव्रज के २० ओटा शोब्ले नु नक मीशो अन्न चाक्शा जाक्माक्त। मिनू एलीशाम “एको मुर आन कली जचा गेने” देमाक्त। मती १५:३३, ३७; मती १६:९-१०; यूहन्ना ६:९

43 मिनू मेको आ गेय पाइबमी “गो एको सहे का मुर आन कली जचा थोव्रक दोपा जचा गेनुइमी” देमाक्त। मिनू मेकोमी लेंशा “एको मुर आन कली जचा गेमी। मारदे हना परमप्रभु यावेम ‘मेको नेल्लेम जशा यो, इक्का हेंब’ देशो बाक्ब” देमाक्त।

44 मिनू मेकोमी मुर आन डोंइती खेत्तीमी बाक्त। मिनू परमप्रभु यावे आ देशो खोदेशो पा, मेको मुरपुकीम जशा यो हेंमाक्त।

## 5

नामान कोव्र पशो रे साशो

1 नामान अराम डा पिप आ लडाइ पाइब आन ठेयब मुर बाक्माक्त। मेको आ होत्रपम मेको कली शुश दाक्बाक्माक्त। मेको शुश हिक्सीशो मुर का बाक्माक्त। मारदे हना मेकोम पतीकेन परमप्रभु यावेम अराम कली ग्रापाइशो बाक्माक्त। मिनु मेको थम सक्ति पाइशो लडाइ पाइब मुर यो बाक्माक्त। तन्न मेको कोत्रर पशो बाक्माक्त।

2 मिनु अराम रे लडाइ पाइबपुकी लशा इस्राएल डा मीश आल का कली ग्याइशशा चाक्शो बाक्मा बाक्त। मिनु मेको नामान आ मीश आ गेय पाइब दुम्शो बाक्माक्त।

3 मिनु मेकोमी आ होत्रपोक्म कली “आं होत्रप, आं प्रभुमी सामरीयाम बाक्ब परमप्रभु यावे आ लोत्र पाइब कली गुम्शो हना, मेकोमी आ कोत्रर सापद वा” देमाक्त।

4 मिनु नामान आ प्रभु पिप बाक्तीक लशा, मेको इस्राएल रे चाक्शो मीश आल आ देशो लोत्र नेल्ल नैपदा बाक्त।

5 मिनु अराम डा पिपमी “दुम्ब, गे लावो। गो इस्राएल डा पिप कली चिठी का ब्रेक्नुड” देमाक्त। मोपतीके नामान १० टलेन्ट चांदी, ६ हजार शेकेल सुन नु १० जोर फेक्तीक वा कुरशा लमाक्त। टलेन्ट का ३४ किलो बाक्ब। शेकेल का ११.५ ग्राम बाक्ब।

6 मिनु मेकोमी मेको चिठी इस्राएल डा पिप आ बाक्तीक चाक्शा बाक्त। मेको चिठीम इस्राएल डा पिप कली “गो एको चिठी नु आं गेय पाइब ठेयब मुर नामान कली इन बाक्तीक सोइक्ताकड। गे मेको आ कोत्रर सापतीन” दे ब्रेक्शो बाक्माक्त।

7 मिनु इस्राएल डा पिपम मेको चिठी पढेवा चोटीन आ वा खाक्शा “मार, गो परमप्रभु नडा डा? मिनु बेक्पाइक्ने नु सेंपाइक्ने चाप्नुडा? मेको मुरुम मारदे एको मुर कली आ कोत्रर सापाइक्का कली आं बाक्तीक सोइक्ता? मेकोम गो नु खुज्जी माल्तु” देमाक्त।

8 मिनु इस्राएल डा पिपमी आ वा खाक्शो लोत्र परमप्रभु आ मुर एलीशाम नेना बाक्त। मिनु मेकोमी पिप कली “गे मारदे इन वा खाक्की? मेको मुर कली एक आं बाक्तीक सोइक्तीन। मिनु मेकोमी इस्राएलमी परमप्रभु यावे आ लोत्र पाइब मुर का बाक्ब, दे तुइक्ब” दे लोत्र कुरब मुर सोइक्ता बाक्त।

9 मोपतीके नामान आ बग्गी नु शारापुकी चाक्शा जाक्माक्त। मिनु एलीशा आ खिं आ लाप्चोमी राम्माक्त।

10 मिनु एलीशाम मेको कली “गे लशा, यर्दन खोलाम ७ खेयप चिक्सीचा माल्नेवे। मिनु इन श्ये डोंइती डा खोदेशो दुम्ब। मिनु गे ग्रांरा मदिशो दुम्नीन” दैथ मुर का कली सोइक्ता बाक्त।

11 तन्न नामान गाइशशा “गो मेको गूशा राप्शा, थमा पा, परमप्रभु यावे, आ परमप्रभु आ नें थिशा पुइशा, आं गार तार आ गुड वोइशशा, आं कोत्रर सापाइक्ब, दे मिम्शो नड।

12 मार, आबाना, फारपार नु दमस्कस डा खोला मेर डा ब्वाक्कु इस्राएल डा ब्वाक्कु नेल्ल क्येडा रिम्शो ममाइ डा? मार, गो मेकेर डा ब्वाक्कुम चिक्शा साने मचाप्नुडा डा?” दे गाइशशा गाक्माक्त।

13 तन्न नामान आ गेय पाइबपुकी जाक्शा मेको कली “ए, आंइ आफ, मार परमप्रभु यावे आ लोत्र पाइबमी इन कली ‘श्येत डा गेय का पने’ देशो हना, गे मेको मपाइनीनी डा? मेकोमी इन कली ‘ब्वाक्कुम चिक्शा ग्रांरा मदिशो दुमीन’ देमेनु, मेको मारदे मपाइनीनी?” देमा बाक्त।

14 मोपतीके मेको उड बुम्माक्त। मिनु परमप्रभु आ मुरुम देशो खोदेशो पा, यर्दन खोलाम ७ खेयप चिक्से बाक्त। मिनु मेको आ श्ये नु कुशुल डोंइती डा खोदेशो पा टिटा आन के खोदेशो दुम्माक्त। मिनु मेको ग्रांरा मदिशो दुम्माक्त। लेवी १४:७-९; लूका ४:२७

15 मिनु मेको नु आ मुर नेल्ल लेशशा परमप्रभु आ मुर बाक्तीके जाक्मा बाक्त। मिनु मेको एलीशा आ डोंइती राप्शा “इस्राएलम डा लाक्शा, अर्को तेकोइ रागीम परमप्रभु मबाक्माक्त। मुल गो तुइक्ताकड। इन गेय पाइब आं गुइ रे कोसेली का ताक्कीन” देमाक्त। २राजा ५:५

16 मिनु परमप्रभु यावे आ लोत्र पाइबमी “गो आ गेय पशो, परमप्रभु यावे ब्रोंइशा बाक्शो खोदेशो पा, गो मारेइ मब्राइनुड” देमाक्त। नामानम मेको कली ताक्कीन कि ताक्कीन देमाक्त। मो हना यो मेको मबिस्से बाक्त।

17 मिनु नामानमी “गे एको मताक्कीनी हना, इन गेय पाइब, आं कली भारी निक्शी गधाम कुरतीक खप लाइक्का गेयीनी। मारदे हना मुल गो इन गेय पाइबम, परमप्रभु यावे कली डा लाक्शा अरु तेकोइ देवी देवता आन कली चोशा चढेतीक नु अरु चढेतीक मचढेनुड।

18 तन्न एको गेय काम ला परमप्रभु यावेम इन गेय पाइब कली माफ गेवल। मेको आं होत्रप रिम्मोन कली पूजा पथ लमेनु, आं गुडमी ग्याइक्पाइशशा आगा ओत्रब। मिनु मेकोमी मेकेर पूजा पवानु, गो यो बाप्चा माल्नुड। मोपतीके मेको आ पर्वम परमप्रभु यावेमी आ गेय पाइब, आं कली माफ गेयील” देमाक्त।

19 मेको नोले एलीशाम मेको कली “इ थुं नाइशशा लावो” दे मदा बाक्त। मिनु नामान गाक्शा इक्का आइक्की जाक्दीम्मेनु,

20 परमप्रभु आ मुर एलीशा आ गेय पाइब गेहाजी आ थुंमी “एको आं होत्रपमी दा एको अरामी नामान आ चाक्शो मारेइ मब्रथु लेशशा कका सोइक्ताक्व। मुल गो परमप्रभु यावे ब्रोंइशा बाक्शो खोदेशो पा, गो मेको आ नोले लशा मारेइ थोत्रक ताक्नुड” दे मिम्ता बाक्त।

21 मोपतीके गेहाजी नामान आ नोले दोरशा लमाक्त। मिनु नामानम मेको कली आ नोनोले दोरशा पिशो तवा बाक्त। मिनु मेको कली युम्चा कली नामान आ बग्गी रे तोइशशा “मार नेल्ल ठीक बाक्बा?” दे हिल्लो पवा बाक्त।

22 मिनु गेहाजीम “मारेइ मरुम। तन्न आं होत्रपमी आं कली एफ्राइम पहाड डा परमप्रभु यावे आ लोत्र पाइब आन हुल रे टिटा निक्शी जाक्ताक्स। मिनु शिशी पा मेको आस कली ‘टलेन्ट का चांदी नु जोर निक्शी वा गेने’ दैथ सोइक्ताक्की” देमाक्त। टलेन्ट का ३४ किलो बाक्ब।

23 मिनू नामानमी मेको कली “थमा पा गे टलेन्ट निक्शी लतीन” देमाक्त। मिनू नामानमी गेहाजी कली “लतीन कि लतीन” दे मदा बाक्त। मिनू मेको कली टलेन्ट निक्शी चांदी नु जोर निक्शी वा थैलो निक्शीम कुर पा, फ्रेंशा गेवा बाक्त। मेकोमी मेको आ गेय पाइब निक्शी आस कली मेको कुरपाइशशा गेहाजी कली चोत्रथ सोइक्ता बाक्त। टलेन्ट का ३४ किलो बाक्ब।

24 मिनू मेको गेहाजी डांडाम जाक्शा, मेको गेय पाइब आस गुइ रे ताक्शो थोत्रक आ खिम वोदा बाक्त। मिनू मेको आस कली चहिं सोइक्तीम्मी बाक्त। मिनू मेको गाक्सा बाक्त।

25 मिनू मेको आगा लशा, आ होत्रप एलीशा आ डोंडती राम्माक्त। मिनू एलीशामी “गेहाजी गे ते लवे” दे हिल्लो पवा बाक्त। मिनू गेहाजीम “इन गेय पाइब, गो तेइ मलशो बाक्नुड” देमाक्त।

26 तन्न एलीशाम मेको कली “मार, मेको मुर आ बग्गी रे तोइशशा इ कली गुमथ पिमेनु, आं सोक्त गे नु मबाक्म डा? मल क्येट, वा, तेल रवा, अडगुर रू, भेडा, ब्यफ नु वाइलीम वाइलपुकी आंम के सेल्टीक ना बाक्बा डा?

27 मुल नामान आ कोत्रर पतीक रोइ गे नु इ चच युइ इन खिम गेना हना यो खोक्शा लीब” दे मदा बाक्त। मिनू गेहाजी मेको आ डोंडती रे लमाक्त। मिनू मेको फुं खोदेशो पा बुश पा कोत्रर मुमाक्त।

## 6

खा ब्वाक्कु तार यूशो

1 परमप्रभु यावे आ लोत्र पाइब आन हुल काम एलीशा कली “एको इ बाक्शो खिं इ कली थम आइक्च बाक्ब।

2 मुल गो यर्दन खोला आ नेक्था लय। मिनू मेकेर नेल्लेम शी चाक्शा खिं का सेल्सय” देमा बाक्त। मिनू एलीशाम “दुम्ब लने” देमाक्त।

3 मिनू मेको आन दाते डा काम “गे यो इन गेय पाइबपुकी नु लाइनीनी?” देमाक्त। मिनू एलीशाम “दुम्ब गो यो लाइनुड” देमाक्त।

4 मिनू एलीशा मेकोपुकी नु लमाक्त। मिनू मेकोपुकी यर्दन खोला जाक्दीशशा रवा तिम्चा गोत्रमे बाक्त।

5 मिनू मुर काम रवा तिम्ना तिम्न पवानु, आ खा बुइशशा ब्वाक्कुम ओत्रमाक्त। मिनू मेको टेयब सेंदा पा “आबी, आं प्रभु, मेको दा पुंडुशा चाक्शो खा कका बाक्ब” देमाक्त।

6 मिनू मेको परमप्रभु आ मुरुम “मेको ते दोक्म” दे हिल्लो पवा बाक्त। मिनू मेकोम एकेर दोक्त, दे कोइदा बाक्त। मिनू एलीशाम मेकेर शी का खोइशशा ब्वारदा बाक्त। मिनू मेको खा ब्वाक्कु तार यूमाक्त।

7 मिनू एलीशाम “शोलशा लतो” देमाक्त। मिनू मेको मुरुम आ गुइ दिंशा शोलशा लदा बाक्त।

एलीशाम मिक्च मताइब सेल्शो

8 काले अराम डा पिप इस्राएल नु लडाइ पना पन बाक्माक्त। मिनू मेकोम आ गेय पाइब लडाइ पाइब आन टेयब मुरपुकी नु सल्ला पा “गो आं बाक्तीक मेकेर सेल्लुड” देमाक्त।

9 मिनू परमप्रभु आ मुरुम इस्राएल डा पिप कली “मेकेर रे गाक्ची ना होस पा गाक्कीन। मारदे हना अरामी मेकेर लशो बाक्नीम” देमाक्त।

10 मोपतीके इस्राएल डा पिपमी आ मुर आन कली मेकेर गाक्कीनु “होस पा गाक्कीन” दे का निक्शी खेयप हिंच कोइदा बाक्त। मिनू मेकोपुकी होस पा बाक्मा बाक्त।

11 मोपतीके अराम डा पिपमी “इस्राएल डा पिपम इ बाक्तीक दोपा तुइक्ता” दे थाम्पा गाइक्ता बाक्त। मिनू मेकोम आ लडाइ पाइब आन टेयब मुर आन कली ब्रेशशा “गे इन दाते डा सुमी चहिं इस्राएल डा पिप कली लोत्र शेदीनी? लो, देनीन” देमाक्त।

12 मिनू मेको लडाइ पाइब आन टेयब मुर आन दाते डा काम “आं प्रभु पिप, आं प्रभु, गो सुइम मो मपक। तन्न इस्राएल डा परमप्रभु यावे आ लोत्र पाइब एलीशाम गे इन इप्तीक कोठाम ब्वाक्शो यो शेंब” देमाक्त।

13 मिनू पिपमी “मेको ते बाक्मे मालशा तुइशशा जाक्कीन। मिनू गो मुर आन कली सोइशशा, मेको कली ग्याइक्पाइक्नुड” देमाक्त। मिनू मेकोम “मेको दोथान सहरम बाक्ब” देमाक्त।

14 मिनू पिपम शारा नु बग्गी पाइशशा टेयब सक्ति पाइशशा लडाइ पाइब आन हुल का मेक सोइक्ता बाक्त। मिनू मेकोपुकी नाक्दो लशा, मेको सहर पुम्दमे बाक्त।

15 मिनू परमप्रभु आ मुर आ गेय पाइब सुनी कना बोक्शा लाडगा यूमाक्त। मिनू मेना शारा नु बग्गी पाइशशा लडाइ पाइब आन हुलमी सहर पुम्शो तवा बाक्त। मिनू मेको गेय पाइब लशा आ होत्रप कली “आबी, आं प्रभु, मुल मार पय” देमाक्त।

16 मिनू मेको परमप्रभु यावे आ लोत्र पाइबमी “महिनो। मेकोपुकी नु बाक्शो आन क्येडा गो नु बाक्शो शुश बाक्नीम” देमाक्त।

17 मिनू एलीशामी “परमप्रभु यावे, एको आ मिक्च ताइब सेलीन। मिनू एकोम तवल” दे पुना बाक्त। मिनू परमप्रभु यावेमे मेको गेय पाइब आ मिक्च ताइब सेला बाक्त। मिनू मेकोमी एलीशा आ एर ओंथ डा डांडा नेल्लेम मी ब्रशो शारा नु बग्गीम ब्रीशो तवा बाक्त। यहोसु ५:१३

18 मिनू अरामीपुकी तोइशशा मेको आ बाक्तीक पिमानु, एलीशाम परमप्रभु यावे कली “एको मुर आन कली मिक्च मताइब सेलीन” दे पुना बाक्त। मिनू एलीशाम पुंडुशो खोदेशो पा, परमप्रभु यावेमे मेको आन कली मिक्च मताइब सेल्मी बाक्त। उत्पत्ती १९:११

19 मिनू एलीशाम मेको आन कली “एको लां ममाइ। एको सहर यो ममाइ। गे आं नोले खोइय्यीनी। मिनू गो इन माल्शो मुर आ बाक्तीक चाक्दीत्ननी” दे माइक्मी बाक्त। मिनू एलीशाम मेको आन कली सामरीयाम चाक्दीम्मी बाक्त।

20 मिनू मेकोपुकी सामरीया सहरम जाक्दीम्मा नोले एलीशाम “ए परमप्रभु यावे, एको मुर आन कली मिक्च ताइब सेलीन। मिनू एकोपुकीम लेंशा तने चाप्मेकल” दे पुना बाक्त। मिनू परमप्रभु यावेमी मेको आन कली मिक्च ताइब सेल्मी बाक्त। मिनू मेकोपुकीम कोवडमेनु, सामरीया सहरम बाक्शो तामे बाक्त।

21 मिनू इस्राएल डा पिपमी मेको आन कली तशा, एलीशा कली “आं आफ, मार गो एको आन कली सदुमी। एको आन कली सदुमी?” दे हिल्लो पवा बाक्त।

22 मिनू एलीशाम “मेको आन कली मसतीन। मार, गे आंमा इन लिब्रा नु तरवारम ग्याइशशो आन कली साइक्ने चाप्नीनी डा? गे एको मुर आन कली जचा तूचा गेने। मिनू एकोपुकी जशा तूशा आन होत्रप बाक्तीक लमल” देमाक्त। लेवी १९:१८; २इतिहास २८:९-१५; हितोपदेस २५:२१-२२

23 मिनू पिपमी मेको आन कली ठेयब भोज का सेल्शा थुल्मी बाक्त। मिनू मेकोपुकी जशा तूशा पामे नोले मेको आन कली आन होत्रप बाक्तीक सोइक्तीमी बाक्त। मिनू मेको आन होत्रप बाक्तीक लेम्मा बाक्त। मेना रे अरामीपुकीमी इस्राएली आन कली लडाइ तोतीक नु मार मार रोइक्तीक मपामे बाक्त।

सामरीयाम अन्काल दुम्शो

24 तन्न इक्का नाक्त नोले अराम डा पिप बेन-हादादमी आ लडाइ पाइब आन कली खुप्शा सामरीयाम सोइशशा, मेको कली एर ओथ नेल्ल रे पुम्पदा बाक्त।

25 मिनू मोपा पुम्दमे नोले मेको सहरम थम ठेयब अन्काल दुम्माक्त। मेकेर गधा आ पिया का कली ८० शेकेल चांदी नु काब का डा ४ भाग, डा भाग का ढुकुर आन खी कली ५ शेकेल चांदी थाप्चा माल्दा बाक्त। शेकेल का ११.५ ग्राम बाक्ब। काब का १.२ लिटर खोदेशो पुक्तीके बाक्ब। काब डा ४ भाग डा भाग का, १/४ लिटर खोदेशो बाक्ब।

26 काबु नाक्त इस्राएल डा पिप सहर डा गारो तार हिरसे बाक्त। मिनू मीश मुर काम पिप कली “आं प्रभु पिप, आं प्रभु आं कली वारच पाइय्यीनी” देमाक्त।

27 मिनू पिपमी “परमप्रभु यावेमी इ कली वारच पवल। गो ते रे वारच पाइक्नना? अन्न तुप्तीक रे देय अडगुर खाक्तीक रे?” देमाक्त।

28 मिनू पिपम मेको कली “इ कली मार दुम?” दे मदा बाक्त। मिनू मेको मीश मुरुम “एको मीश मुरुम आं कली ‘मुलाक्ती इ तौ ब्वचा योक्को। मिनू दीसा चहिं आं तौ ब्वय’ देत। ब्यवस्था २८:५३

29 मिनू गो आं तौ कली ब्वाइतक। मिनू गो एको कली ‘मुलाक्त ब्वचा कली इ तौ चाक्को’ दे माइक्ता। तन्न एकोम आ तौ खुइशशा मयुंइद” देमाक्त।

30 मिनू पिपमी मेको मीश मुर आ लोत्र नेंशा, आ वा खाक्गा बाक्त। मुरपुकीम मेको कली आगाम अरन्डी फेक्शो तामे बाक्त। मारदे हना मेको सहर डा गारो तार गाक्शो बाक्माक्त।

31 मिनू मेकोम “मुलाक्त गो शाफात आ तौ एलीशा आ पिया मखोइक्ता हना, परमप्रभुम सजाइ ला ममाइ, मेको क्येडा यो शुश पाइय्यील” देमाक्त।

32 मिनू पिपम आ लोत्र कुरब मुर का कली एलीशा आ बाक्तीक सोइक्ता बाक्त। मेना एलीशा खाल्पापुकी नु आ खिम बाक्शो बाक्माक्त। तन्न मेको लोत्र कुरब मुर जाक्चा क्येडा डोंइती एलीशाम मेको खाल्पा आन कली “मेको मुर साइक्वम आं पिया खोइक्पाइक्चा कली मुर सोइशशो गे मतनी? कोवडीन, मेको आ लोत्र कुरब जाक्मेनु, लाप्चो चोक्कीन। मिनू थम बोल्यो पा नेप्शा बाक्कीन। मार मेको आ होत्रप मेको आ नोनोले मपिशो बाक्बा डा?” देमाक्त।

33 मिनू एलीशाम मेकोपुकी नु लोत्र पना पन बाक्मेनु मेको लोत्र कुरब मुर जाक्माक्त। मिनू पिपमी “एको खतम दुम्तीक परमप्रभु यावे रे जाक्शो बाक्ब। मुल गो मारदे परमप्रभु यावे कली आस पा बाक्नुडा?” देमाक्त। आमोस ३:६

## 7

जचा थोत्रक तांडसीब देशो

1 एलीशाम “परमप्रभु यावे आ लोत्र नेनीन। परमप्रभु यावेमी ‘दीसा सामरीया डा ठेयब लाप्चो आ डोंइती शेकेल का चांदीमी सेआह माइशशो पुक्तीक का रिम्शो फस नु शेकेल का चांदीम पुक्तीक निक्शी क्योवज लेयसीब’ देशो बाक्ब” देमाक्त। शेकेल का ११.५ ग्राम खोदेशो बाक्ब। सेआह का आगा ७, ३ लिटर रिक्शो ठेयब पाथी खोदेशो पुक्तीके बाक्ब। २राजा ७:१६-१९

2 मिनू पिप कली कुक्ब लडाइ पाइब आन ठेयब मुरुम परमप्रभु आ मुर कली “परमप्रभु यावेमी आ सरीड डा ड़ेल नेल्ल रोक्तु हना यो, मोदेशो गेनायो दुम्ने मचाप्ब” देमाक्त। मिनू एलीशाम “गे मेको इ मिक्चीमीन ताइनेवे। तन्न जचा चहिं मताइक्नेवे” देमाक्त।

सहर पुन्चा प्रोंइशो

3 मिनू मेको सहर डा लाप्चो आ डोंइती ४ जना कोव्र पशो मुर बाक्मा बाक्त। मिनू मेकोपुकीम “गो मबेक्या सम्म मारदे एकेर बाक्नया? लेवी १३:४६

4 गो सहर ओत्रतय हना, मेकेर डा अन्कालम बेक्नय। एक उइ बाक्तय हना यो, शोत्रलुम बेक्नय। मोपतीके गो अरामी आन लडाइ पाइब आन बाक्तीक लशा, जिम्मा गेसय। मिनू मेकोपुकीम इ कली प्रोंइक्वम हना, गो ब्रोंडनय। साइक्तेक्म हना, यो बेक्य” देमुमा बाक्त।

5 मिनू मेकोपुकी नाक्नाकवदो बोक्शा अरामी आन बाक्तीक गे लमा बाक्त। मिनू मेकोपुकी अरामी आन बाक्तीक आ नेक्था जाक्मानु, सुइ आन कली मतामे बाक्त।

6 मारदे हना परमप्रभुमी अरामी आन कली शारा बग्गी नु ठेयब लडाइ पाइब हुल आन रेयके नेंपाइश्शो बाक्माक्त। मिनू मेकोपुकीम आंम आंमा “इसाएल डा पिपम गोपुकी नु लडाइ पचा कली हित्ती नु इज्जीप्त डा पिप कली क्येट थाप्शा ब्रेत्तीमी बाक्त, थांका” देंमुमा बाक्त। २राजा १९:१७

7 मोपतीक मेकोपुकीम आन बाक्तीक ताम्बु यो मो हेंथे पा प्रोंइशा, शारा नु गधा यो प्रोंइशा, आन गिंम पोंइचा कली प्रोकमा बाक्त।

8 मिनू मेको कोन्नर पशो मुर अरामी आन बाक्तीक जाक्दीम्मा बाक्त। मिनू मेकोपुकी ताम्बु काम ओन्नशा जशा तूशा बाक्मा बाक्त। मिनू सुन चांदी वापुकी एर ओंथ लाइश्शा खुइश्शा वोदमे बाक्त। मेको नोले मेकोपुकी लेंशा अर्को बाक्तीकेम ओन्नमा बाक्त। मिनू मार मार लाइश्शा खुइश्शा वोदमे बाक्त।

9 मिनू मेकोपुकी आंम आंमा “गो मरिम्शो गेय पाइतय। मुलाक्ती रिम्शो लोन्न नेंपाइक्तीक नाक्त बाक्ब। गोपुकी चहिं सिक्सी पा बाक्शो बाक्नय। दीसा सम्म गो ओं पा बाक्तय हना, दोस ताइनय। मुल गो रीब पा लशा, पिप आ दरवारम एको लोन्न नेंपाइय्य” देंमुमा बाक्त।

10 मिनू मेकोपुकी लशा, सहर डा ठेयब लाप्चो खाल पाइब आन कली ब्रेशा “गोपुकी अरामी आन बाक्तीक लाइतक। मिनू मेकेर मुर का यो मतक। मारेइ चाल चुल मबा। शारा नु गधापुकी पाइक्स डा पाइक्स बाक्तेकम। मिनू मुर आन ताम्बु यो मो प्रोंइशो बाक्तेकम” देंमा बाक्त।

11 मिनू लाप्चो खाल पाइबपुकीम ठेयब सेंदा पा मेको लोन्न पिप आ खिंम नेंपदमे बाक्त।

12 मिनू पिप नाक्दो कना बोक्शा, आ गेय पाइब मुर आन कली “गो इन कली लोन्न का पाइनुइ। अरामीपुकीम गो इं कली मार पामे? गो मेको इन कली देंनुइ। गोपुकी शोवलु बाक्शो बाक्नय, दें मेकोपुकीम तुइश्शो बाक्नीम। मोदेशो मिम्शा आन बाक्तीक प्रोंइशा, एर ओंथ लशा खुइश्शा बाक्शो बाक्नीम। मेकोपुकीम ‘गोपुकी थमा पा ग्रूनीम। मिनू गो मेको आन कली सेसीन ग्याइश्शा, सहर ओन्ननय’ देंशो बाक्नीम” दे माइक्मी बाक्त।

13 मिनू मेको आ गेय पाइब काम “इं सहर डा ५ ओटा शारा आन कली कोन्नर सोइक्तीन। मेकोपुकी एको बेक्शो इसाएली खोदेशोन दुम्नीम। थमा पा मेकोपुकी एक बेक्ब इसाएली खोदेशोन दुम्नीम। मार दुम्शो बाक्मे, मेको तुइक्चा कली सोइक्तय” देंमाक्त।

14 मिनू मेकोपुकीम बग्गी निक्शी निक्निकशी शारा गुंइदमे बाक्त। मिनू पिपम मेको आन कली “अरामी लडाइ पाइब आन कली मार दुम्मे, मेको रुपीन” दे सोइक्तीमी बाक्त।

15 मिनू मेको यर्दन खोला सम्म कोन्नर कोन्नर लमा बाक्त। मिनू अरामी नेल्लेम रीब पा प्रोकमानु, लां नेल्ल मेको आन प्रोंइशो वासी नु यापुकी तामे बाक्त। मिनू क्यारी पथ लाइब मुरपुकी लेशशा जाक्शा, मेको लोन्न पिप कली शेंदमे बाक्त।

16 मिनू मुरपुकी ग्रूशा, अरामी आन बाक्तीक डा मार मार नेल्ल लदमे बाक्त। मिनू परमप्रभु यावे आ देंशो खोदेशो पा सेआह पुक्तीक का रिम्शो फस शेकेल का चांदीम नु पुक्तीक निक्शी क्योन्नर शेकेल का चांदीम लेयडमे बाक्त। शेकेल का ११.५ ग्राम चांदी के क्येट बाक्ब।

17 मिनू पिप कली कुक्शा गाक्ब लडाइ पाइब आन ठेयब मुर कली लाप्चोम कोन्नर सेल्शा वोदमे बाक्त। मिनू मेको कली मुरपुकीम दिम्शा सदमे बाक्त। मिनू पिप मेको कली गुम्थ आ खिंम लमेनु, परमप्रभु आ मुरुम देंशो खोदेशो पा मेको कली मुरपुकीम ठेयब लाप्चोम दिम्शा साइश्शो बाक्मा बाक्त।

18 परमप्रभु आ मुरुम पिप कली “दीसा सेआह पुक्तीक का रिम्शो फस शेकेल का चांदीम नु पुक्तीक निक्शी क्योन्नर शेकेल का चांदीम सामरीया डा ठेयब लाप्चो आ डोंइती लेयसीब” देंशो बाक्माक्त।

19 मिनू मेको लडाइ पाइब आन ठेयब मुरुम परमप्रभु आ मुर कली “परमप्रभु यावेम आ सरीड डा झेल रोक्तु हना यो, मोदेशो दुम्मे मचाप्ब” देंशो बाक्माक्त। मिनू परमप्रभु आ मुरुम “गे मेको मो पशो ताइनेवे, तन्न जचा चहिं मताइक्नेवे” देंशो बाक्माक्त।

20 मिनू मेको कली मोदेशोन दुम्माक्त। मारदे हना मेको कली मुरपुकीम लाप्चोम दिम्शा सदमे बाक्त। मिनू मेको बेक्माक्त।

## 8

शुनेम डा मीशेम आ रू तशो

1 तेको मीश मुर आ तौ कली एलीशाम बेक्शो रे सेंशो बाक्मे, मेको मीश मुर कली एलीशाम “इ खिं डा मुर नेल्ल मेकेर रे गाक्कीन। मिनू इक्का नाक्ती कली ते दुम्बा, मेक लशा बाक्कीन। मारदे हना परमप्रभु यावेम एको रागीम ७ बर्स सम्म अन्काल दुम्पाइक्ब” दे माइश्शो बाक्माक्त। २राजा ४:३५

2 मिनू मेको परमप्रभु आ मुरुम देंशो खोदेशो पा, मेको मीश मुरुम पवा बाक्त। मिनू मेको आ खिं डा मुर नेल्ल लाइश्शा लमाक्त। मिनू लशा पलिस्ती आन रागीम ७ बर्स सम्म बाक्मा बाक्त।

3 मिनू ७ बर्स नोले मेको पलिस्ती आन रागी रे लेशशा जाक्माक्त। मिनू मेको आ रू नु खिं लेशशा तचा कली पिप आ बाक्तीक लमाक्त।

4 मेना पिप चहिं परमप्रभु आ मुर आ गेय पाइब गेहाजी कली “एलीशाम पशो ठेयब ठेयब गेय नेल्ल आं कली शेंदी” दे मेको नु लोन्न पना पन बाक्शो बाक्माक्त।

5 मिनू गेहाजीम एलीशाम बेक्शो मुर आन कली दोपा संपदा, मेको नेल्ल पिप कली शेना शेन बाक्शो बाक्माक्त। मेना मेको आ तौ बेक्शो रे सेंपाइशो मीश मुर आ रू नु खिं लेशशा तडल, दे पिप आ बाक्तीकेम कागज ब्रेक्शा गेथ जाक्माक्त। मिनू गेहाजीम “ए आं प्रभु पिप, एलीशाम बेक्शो रे सेंपाइशो। एको मीश मुर आ तौ बाक्ब। मिनू बेक्शो रे सेंसीशो आ तौ एकोन बाक्ब” देमाक्त।

6 मिनू पिपमी मेको मीश मुर कली मेको आ पर्वम हिल्लो पवा बाक्त। मिनू मेकोमी यो शोवडा बाक्त। मिनू पिपम आ गेय पाइब ठेयब मुर का कली “एकोम आ रागी प्रॉइशा गाक्म नाक्त रे मुल सम्म डा मेको रू डा मारेइ मारेइ एको कली लेशशा गेने” देमाक्त।

हजाएलम बेन-हादाद साइशो

7 मिनू एलीशा दमस्कस लमाक्त। मेना अराम डा पिप बेन-हादाद रोइ पशो बाक्माक्त। मिनू मुरपुकीम पिप कली “परमप्रभु आ मुर एक जाक्शो बाक्ब” दे नेंपदमे बाक्त।

8 मिनू पिपमी हजाएल कली “कोसेली लाइशशा, परमप्रभु आ मुर कली ग्रुमथ लावो। मेको रे पा परमप्रभु यावे कली ‘गे एको रोइ रे सानुडा देय मसानुडा’ दे हिल्लो पपतो” दे अरेवा बाक्त।

9 मिनू हजाएलम दमस्कसम बाक्शो रिम्शो रिम्शो मारेइ मारेइ कोसेली ४० ओटा दलओठम कुरपाइशशा लमाक्त। मिनू मेको आगा ओव्रशा परमप्रभु यावे आ लोत्र पाइब आ डोंइती राम्माक्त। मिनू मेकोम “इन तौ, अराम डा पिप बेन-हादादमी आं कली ‘गे आं रोइ रे सानुडा देय मसानुडा’ दे हिल्लो पथ सोइक्ताकयी” देमाक्त।

10 मिनू एलीशाम मेको कली “लशा, पिप कली ‘गे थमा पा सानीनी’ दे मतो” देमाक्त। तन्न एलीशाहमी “परमप्रभु यावेम आं कली ‘मेको थमा पा बेक्ब’ देशो बाक्ब” देमाक्त।

11 मिनू मेकोमी पर डोशा, हजाएल कली कोव्रस डा कोव्रस बाक्माक्त। मिनू हजाएल मुने पवा बाक्त। मिनू मेको परमप्रभु आ मुर डाक्माक्त। लूका १९:४१-४४

12 मिनू हजाएलम “ए आं प्रभु, गे मारेदे डाक्नी?” दे हिल्लो पवा बाक्त। मिनू मेकोमी हजाएल कली “गेम इस्राएल डा मुर आन कली काइ मरिम्शो पशो तुइकुनुड। गे मेको आन दरवारम मी सुइक्नेवे। मिनू मेको आन ठिटा मुर आन कली तरवारम क्योरनेवे। मेको आन आइक्च आल आन कली खपीम राप्शा साइक्नेवे। मेको आन कोव्रज कुरशो मीश मुर आन कोव्रज पाक्नेवे” दे मदा बाक्त। २राजा १०:३२

13 मिनू हजाएलमी “गे महिक्शो, कुचुम खोदेशो मुरुम ओदेशो ठेयब गेय दोपा पने चापुनुड डा?” देमाक्त। मिनू एलीशाम “परमप्रभु यावेम गे अराम डा पिप दुम्नेवे, दे आं कली कोंइशो बाक्ब” देमाक्त। १राजा १९:१५

14 मेको नोले हजाएल एलीशा आ डोंइती रे गाक्माक्त। मिनू आ होत्रप बेन-हादाद आ बाक्तीक लेशशा जाक्माक्त। मिनू बेन-हादादम “एलीशाम इ कली मार देमे?” दे हिल्लो पवा बाक्त। मिनू मेकोमी “गे थमा पा सानीनी ने” दे मदा बाक्त।

15 तन्न आ दीसा हजाएलमी सुम्तीक वा का ब्वाक्कुम नुप्शा, पिप आ कुलुमी सुमा बाक्त। मिनू मोपा मेको पिप बेक्माक्त। मिनू बेन-हादाद आ पा डा हजाएल पिप दुम्माक्त।

यहूदा डा पिप येहोराम

२इतिहास २१:१, ५-१०; २इतिहास २२:१-६

16 येहो-शाफात आ तौ येहोराम यहूदा डा पिप दुम्शा, सासन पचा गोवा बाक्त। मेना इस्राएल डा पिप आहाब आ तौ येहोराम पिप दुम्शो ५ बर्स दुम्शो बाक्माक्त। मेको निक्शी आस नें येहोराम बाक्त। मेको आस कली योराम यो देमा बाक्त। १राजा २२:५१

17 येहोराम पिप दुम्मेनु, मेको ३२ बर्स दुम्शो बाक्माक्त। मिनू मेकोम यरूसलेममी ८ बर्स सासन पवा बाक्त।

18 मेको इस्राएल डा पिप, आहाब आ खिं डा मुर आन लांम गाक्माक्त। मारेदे हना मेकोम आहाब आ तमी ग्युवे पशो बाक्माक्त। मिनू मेकोम परमप्रभु यावे आ डोंइती मार मरिम्शो बाक्मे, मेको पवा बाक्त।

19 मो हना यो परमप्रभु यावेमी आ गेय पाइब दाऊद आ पर्वम यहूदा कली मक्याम्दा बाक्त। मेकोमी दाऊद कली इ तौ चच का गेना हना यो पिप दुम्शा बाक्ब, दे कबल पशो बाक्माक्त। २सामुएल ७:११-१६; १राजा ११:३६

20 येहोरामम पिप पवा ना एदोम डा मुरुमी यहूदा आ देशो मटिथु, आंम आन पिप का सेल्मे बाक्त।

21 मोपतीके यहूदा डा पिप येहोराम आ बग्गी नेल्ल लाइशशा, आइक्की हांबु जाइर सहरमी लमाक्त। मिनू एदोमीपुकीम येहोराम आ बग्गी नेल्ल नु आ लडाइ पाइब आन ठेयब मुर नेल्ल आन कली पुम्दमे बाक्त। मिनू मेको आ लडाइ पाइबपुकी चहिं प्रोक्शा, आन आन खिं लेम्मा बाक्त।

22 मोपतीके एदोम मुल सम्म यहूदा रे ब्राशो बाक्ब। मेना लिब्ना यो यहूदा आ देशो मटिथु ब्राशो बाक्माक्त।

23 मिनू यहूदा डा पिप येहोराम आ पशो अरु गेय, मेको आ पशो नेल्ल, मार, मेको यहूदा डा पिप आन इतिहासम ब्रेक्शो मबाक्बा डा?

24 यहूदा डा पिप येहोराम बेक्माक्त। मिनू मेको आ किकी पिपी नु दाऊद आ सहरमी थिम्चा पुंडसे बाक्त। मिनू मेको आ पा डा आ तौ अहाज्याह पिप दुम्माक्त।

यहूदा डा पिप अहाज्याह

25 मिनू यहूदा डा पिप येहोराम आ तौ अहाज्याह यहूदाम पिप दुम्माक्त। मेना इस्राएल डा पिप आहाब आ तौ येहोराम पिप दुम्शो १२ बर्स दुम्शो बाक्माक्त।

२६ अहाज्याह पिप दुम्मेनु २२ बर्स दुम्शो बाक्माक्त। मिनु मेकोम यरूसलेममी बर्स का सासन पवा बाक्त। मेको आ ममा आ नें अथाल्याह बाक्माक्त। मेको इस्राएल डा पिप ओम्री आ चच बाक्माक्त। २राजा ११:१

२७ अहाज्याह आहाब आ खिं डा मुर आन लाम गाक्माक्त। मिनु आहाब आ खिं डा मुरपुकीम खोदेशो पा परमप्रभु यावे आ डोंइती मार मरिम्शो बाक्मे, मेको पवा बाक्त। मारदे हना मेको आहाब आ चांडवा दुम्शो बाक्माक्त।

२८ यहूदा डा पिप अहाज्याह नु आहाब आ तौ इस्राएल डा पिप येहोराम नु गारशा, अराम डा पिप हजाएल नु लडाइ पचा कली रामोथ-गिलादम लमाक्त। तन्न अरामीपुकीम येहोराम कली गार सेल्मे बाक्त।

२९ मिनु अराम डा पिप हजाएल नु लडाइ पथ लमेनु, रामाहम गार दुम्शो रे साचा कली येहोराम येजेल सहरम लमाक्त। मिनु यहूदा डा पिप येहोराम आ तौ अहाज्याह इस्राएल डा पिप आहाब आ तौ येहोराम कली कोव्रथ येजेल सहर लमाक्त। मारदे हना मेको कली गार दुम्शो बाक्माक्त। २राजा ९:१४-१६

## ९

येहू इस्राएल डा पिप दुम्शो

१ परमप्रभु यावे आ लोत्र पाइब एलीशामी परमप्रभु यावे आ लोत्र पाइब आन हुल डा का कली ब्रेशा “इ किप्शुर किप्शा, एको तेल कुरशा रामोथ-गिलादम लावो।

२ मिनु मेक जाक्दीशशा, निम्शी आ चच, येहो-शाफात आ तौ येहू कली मालो। मिनु मेको कली आ चारचपुकी रे फ्राशा, आगा डा कोठाम लतो।

३ मिनु नोले मेको तेल मेको आ पियाम लुक्शा ‘परमप्रभु यावेम इ कली इस्राएल डा पिप सेल्ता’ देशो बाक्ब, दे मतो। मिनु लाप्चो यु रोक्शा प्रोक्को। देश मपावो” दे मदा बाक्त। १राजा १९:१६

४ मोपतीके परमप्रभु यावे आ लोत्र पाइब, ठिटा रामोथ-गिलादमी लमाक्त।

५ मिनु मेको मेक जाक्दीम्मेनु, येहू लडाइ पाइब आन ठेयब मुरपुकी नु गुम्शा काथा बाक्शो थिम्मी बाक्त। मिनु मेकोम येहू कली “लडाइ पाइब आन ठेयब मुरपुकी, गो इन नु लोत्र का पचा मालनुड” देमाक्त। मिनु येहूम “गो आंइ दाते डा सु नु लोत्र पचा मालनेवे?” देमाक्त। मिनु मेकोम “इन नु” देमाक्त।

६ मिनु येहू बोक्शा, आगा डा कोठाम ओव्रमाक्त। मिनु मेको ठिटा येहू आ पियाम तेल लुक्शा “परमप्रभु यावे, इस्राएली आन परमप्रभुमी ‘गो इ कली आं मुर इस्राएली आन पिप सेल्तन।

७ गे इ होत्रप आहाब आ खिं डा मुर आन कली साइक्चा मालनेवे। मिनु इजेबेलमी आं गेय पा आं लोत्र पाइबपुकी नु आं गेय पाइब मुर आन कली साइशशो आ क्येक्क लेत्नुड।

८ आहाब आ खिं डा मुर नेल्ल बेक्चा मालनीम। इस्राएलम मेको आ खिं डा वोंइश मुर वाइल बाक्मल कि मबाक्मल, गो नेल्ल आन कली साइक्नुडमी। १राजा १४:१०

९ गो आहाब आ खिं कली नेबात आ तौ येरोबाम नु अहीयाह आ तौ बाशा आस खिं खोदेशो सेल्नुड। १राजा १५:२९; १राजा १६:३, ११

१० इजेबेल कली चहिं येजेल डा रू काम कुचुम ब्वाइनीम। मेको कली सुडम मथिन्मीम’ देशो बाक्ब” देशा, मेको लाप्चो यु रोक्शा दोरशा प्रोक्माक्त। १राजा २१:२३

११ मिनु येहू मेको नोले लडाइ पाइब आन ठेयब मुर आन बाक्तीक जाक्माक्त। मिनु मेकोपुकीम मेको कली “मार नेल्ल रिम्शोन बाक्बा? मेको आ निप्स ग्यशो मुर इ बाक्तीक मारदे जाक्म?” दे हिल्लो पामे बाक्त। मिनु येहूमी मेको आन कली “गे मेको मुर कली तुडक्नीनी। मिनु मेकोम मार देंबा, मेको यो तुडक्नीनी” दे माइक्मी बाक्त।

१२ मिनु मेकोपुकीम “गे जोल पाइनीनी। आंइ कली थमा लोत्र पने” देमा बाक्त। मिनु येहूम “मेकोमी आं कली मार देंत देशा हना, परमप्रभु यावेमी ‘गो इ कली इस्राएल डा पिप सेल्नुड’ देशो बाक्ब” दे माइक्मी बाक्त।

१३ मिनु मेकोपुकीम रीब पा आन आ तार फेक्शो वा पुइशशा, तला डोइक्तीक थेंका डा फुल्लु तार ब्रामे बाक्त। मिनु मेकोपुकीम तुराही ताप्शा, ठेयब सेंदा पा “येहू पिप दुम्त” देमा बाक्त। मती २१:७

येहूमी येहोराम कली साइशशो

१४ मोपतीके निम्शी आ चच येहो-शाफात आ तौ येहूम येहोराम कली मरिम्शो पचा गोवा बाक्त। मिनु येहोराम नु इस्राएली नेल्ले अराम डा पिप हजाएल आ जोरी सत्रु दुम्शा रामोथ-गिलाद कली खाल पामे बाक्त।

१५ तन्न पिप येहोराम चहिं आ गार सापाइक्चा कली येजेल लशो बाक्माक्त। मेको गार अराम डा पिप हजाएल नु लडाइ पवानु, अरामीपुकीम सेल्शो बाक्मा बाक्त। मिनु येहूमी मेको लडाइ पाइब आन ठेयब मुर आन कली “गे गो नु बाक्तीनी हना, सुड मुर रामोथ-गिलाद सहर रे एको लोत्र शोत्रचा कली येजेल रे गूचा मतामेक्ल” देमाक्त। २राजा ८:२८-२९

१६ मिनु येहू आ बग्गीम डोइशशा येजेल लमाक्त। मारदे हना येहोराम मेकेर नाइशशा बाक्माक्त। मिनु यहूदा डा पिप अहाज्याह यो येहोराम कली कोव्रथ मेक उड बाक्शो बाक्माक्त।

१७ मिनु येजेल सहर कली कोव्रशा खाल पाइबमी येहू नु आ मुर आन कली जाक्शो तवा बाक्त। मिनु मेकोमी ठेयब सेंदा पा “गो हुल का लडाइ पाइब मुर पिशो तातामी” देमाक्त। मिनु येहोराममी “शारा डोइक्ब का मेको आन कली गुम्थ सोइशशा ‘मार, गे रिम्शो पथ जाक्शो बाक्नीनी?’ दे हिल्लो पपतो” देमाक्त।

१८ मिनु मेको शारा डोइक्ब मुर येहू कली गुम्थ लशा “पिपमी इन कली ‘मार, गे रिम्शो पथ जाक्नी?’ दे हिल्लो पाप्नु” देमाक्त। मिनु येहूम “रिम्शो पथ जाक्डल कि मरिम्शो पथ जाक्डल, गे मारदे माल्दे? आं नोले खोइय्यी” दे मदा बाक्त।

मिनु मेको कोव्रशा खाल पाइबमी पिप कली “मेको लोत्र कुरबम मेको आन कली गुम्चा दा युम्तु, तन्न मेको लेशशा मजा” देमाक्त।

19 मिनु पिपमी अर्को शारा डोइक्ब सोइक्ता बाक्त। मिनु मेको, मेको आन नेक्था जाकदीशशा “पिपमी ‘गे रिम्शो पथ जाकनी’ दे हिल्लो पाप्तु” देमाक्त। मिनु येहूम “रिम्शो पथ जाकडल कि मरिम्शो पथ जाकडल इ कली मारदे माल्दे, आं नोले खोइय्पी” दे मदा बाक्त।

20 मिनु मेको कोव्रशा खाल पाइबमी “मेको लोत्र कुरबमी मेको आन कली गुम्चा दा युम्तु, तन्न मेको यो लेशशा मजा। मेरे बग्गी दोरपाइक्ब दा निम्शी आ चच येहू बाक्त। मारदे हना मेकोम निप्स ग्यशो मुरुमी दोरपाइशशो खोदेशो पा दोरपाइक्ब” देमाक्त।

21 मिनु येहोराममी “आं बग्गी ठीक पने” देमाक्त। मिनु मेकोपुकीम मेको ठीक पामे बाक्त। मिनु इस्राएल डा पिप येहोराम नु यहूदा डा पिप अहाज्याह आस बग्गी डोइशशा येहू कली गुम्थ लसा बाक्त। मिनु मेको निक्शीम येहू कली “येजेल सहर नाबोथ आ रूम गुम्से बाक्त। १राजा २१:१

22 मिनु येहोरामम येहू कली तशा, मेको कली ‘येहू, गे मार रिम्शो मिम्शा गुम्थ जाकडे?’ दे हिल्लो पवा बाक्त। तन्न येहूम इ ममा इजेबेलम आ ग्रांघा दिशो मूर्ति पूजा पाइब, टुना मुना पाइब। मिनु मार रिम्शो पा गुम्थ जाकनुडा?” देमाक्त।

23 मिनु येहोराममी आ बग्गी लेशशा अहाज्याह कली “अहाज्याह मरिम्शो दुम्त” देना देन प्रोक्माक्त।

24 मिनु येहूम आ लिब्रा कीशा येहोराम आ बला आ दातेमी आबा बाक्त। मिनु मेको ब्राम मेको आ लुङगीर खिदा बाक्त। मिनु मेको आ बग्गीमी गोल्माक्त।

25 मिनु येहूम आ लडाइ पाइब आन टेयब मुर बिदकार कली “मेरे कली पोक्शा येजेली नाबोथ आ रूम ताइक्तो। गे नु गो मेको आ आफ आहाब नु शाराम काथ काथा लसानु, मेको आ पर्वम परमप्रभु यावेम लोत्र पशो गे तुइशशो बाक्नेवे। १राजा २१:१९; यसेया १३:१; येरमीया २३:३३-४०

26 परमप्रभु यावेमी ‘गो सिनाक्ती नाबोथ नु मेको आ आल आन हुश ताता। मिनु गो थमा पा इ कली एको रूमी क्येक्क लेत्तुड’ देशो बाक्त। मोपतीके मेरे कली पोक्शा परमप्रभु यावे आ देशो खोदेशो पा मेको रूमीन ताइक्तो” दे मदा बाक्त।

येहूमी अहाज्याह कली साइशशो

27 मिनु यहूदा डा पिप अहाज्याह मेको तशा, बेथ-हाग्गान लतीक लां गे प्रोक्माक्त। मिनु येहू मेको आ नोनोले खेदा पना पन लशा “मेरे कली यो सतीन” देमाक्त। मिनु मेको कली इब्लाम डा गुर डा ग्येत्थ लतीक लाम आप्शा गार सेलमे बाक्त। तन्न मेको प्रोक्शा मेगीददोम जाकदीम्माक्त। मिनु मेक उइ बेक्माक्त। २इतिहास २२:७-९

28 मिनु मेको आ गेय पाइब टेयब मुरपुकीम मेको आ बेक्शो रां यरूसलेमम लाइशशा दाऊद आ सहरम मेको आ किकी पिप नु आ तुरसुम थिम्मे बाक्त।

29 आहाब आ तौ येहोरामम सासन पवा आ ११ बर्सम अहाज्याह यहूदा डा पिप दुम्शो बाक्माक्त।

येहूमी इजेबेल कली साइशशो

30 मिनु येहू येजेल सहरमी जाक्माक्त। मार मार दुम्मे, मेको नेल्ल इजेबेलम नेशो बाक्माक्त। मिनु मेकोम आ मिक्चीम गाजल खेक्से बाक्त। मिनु चां मिंसीशा झेल रे उइ लां गे कोव्रडा बाक्त।

31 मिनु येहू टेयब लाप्चो रे ओव्रमाक्त। मिनु इजेबेलम “ए आंम होव्रप कली साइक्ब जिप्नी, मार, गे रिम्शो पथ जाकडे” दे मदा बाक्त। १राजा १६:९-१०

32 मिनु मेकोमी इर झेल गे कोव्रशा टेयब सेंदा पा “आं गे सु बाक्नी? सु बाक्नी?” देमाक्त। मिनु का निक्शी दरवार डा गेय पाइब मेको गे कोव्रडमे बाक्त।

33 मिनु येहूमी “मेको कली झेल रे ताइक्तीन” देमाक्त। मिनु मेकोपुकीम इजेबेल कली उइ ताइक्तमे बाक्त। मिनु मेको आ हुश प्रेक्शा कोइ गारोमी नु कोइ शारा आन कली जुक्तमे बाक्त।

34 मेको नोले येहू आगा ओव्रशा जचा तूचा थोव्रक जवा तूडा बाक्त। मिनु मेकोमी “मेको सराप रशो मीश मुर कली लाइशशा थिमीन। मारदे हना मेको पिप आ तामी बाक्ब” देमाक्त।

35 मिनु मुरपुकी मेको कली थिम्चा कली उइ बुम्मा बाक्त। तन्न मेकेर आ पिया, गुइ नु खोइल डा लाक्शा अरु मारोइ मथिदमे बाक्त।

36 मिनु मेकोपुकी लेशशा जाक्शा येहू कली शेंदमे बाक्त। मिनु मेकोमी “परमप्रभु यावेम आ गेय पाइब तिश्बे सहर डा एलीया रे पा ‘इजेबेल कली येजेल सहरम कुचुमम ब्वाइनीम। १राजा २१:२३

37 इजेबेल आ बेक्शो रां येजेल सहरम मोव्रल खोदेशो पा राक्ब। मिनु मेको कली एको इजेबेल बाक्ब, दे सुइम मतुइक्नीम’ देशो बाक्ब” देमाक्त।

## 10

आहाब आ तौपुकी साइशशो

1 आहाब आ ७० जना तौ सामरीया सहरम बाक्शो बाक्मा बाक्त। मोपतीके येहूमी चिठी का ब्रेक्शा सामरीयाम, येजेल डा हुकुम पाइब, खाक्पा नु आहाब आ तौ आन कली कोव्रब मुर आन कली सोइक्ता बाक्त।

2 मेको चिठीम “गे इन होव्रप आ तौ मेकेर बाक्तीके, इन बग्गी, शारा, गारो हिरशो सहर नु यापुकी बाक्तीके,



3 गेपुकीमी इन होत्रप आ तौ आन दातेमी नेल्ल क्येडा रिम्शो नु नेल्ल क्येडा निप्स पाइशशो, का कली आ आफ आ पा डा पिप सेलीन। मिनु मेको नोले इन होत्रप आ खिं आ पर्वम लडाइ पने” दे ब्रेक्शा सोइक्तीमी बाक्त।

4 तन्न मेकोपुकी थाप्पा हिंशा सुर्ता पा “पिप निक्शी ला यो मेको आ डोंइती राप्ने मचबेस हना, गो मार पने चापन्या डा?” देमुमा बाक्त।

5 मोपतीके पिप आ खिं डा खाल पाइबपुकी, सहर डा हुकुम पाइबपुकी, खाल्पापुकी नु आहाब आ तौ आन कली कोत्रब नेल्ल गारशा येहू कली “गेपुकी इन गेय पाइब नकी। गे आंइ कली मार देंनीनी, गो मेको पाइनीकी। गो सुइ कली पिप मसेलीनीकी। गे मार पचा दाक्नीनी, मेको पने” दे लोत्र कुरब मुर सोइक्तमे बाक्त।

6 मिनु येहूमी मेको आन कली अर्को चिटी का ब्रेक्शा “गेपुकी आं गे बाक्तीनी हना नु आं अरेशो बित्तीनी हना, दीसा एं खोइ ना इन होत्रप आ तौ आन पिया कुरशा येज्जेल सहरमी जाक्कीन” दे ब्रेक्शा सोइक्ता बाक्त। मेना मेको पिप आ ७० जना तौ चहिं आन कली कोत्रब मुर आन खिंमी बाक्शो बाक्मा बाक्त।

7 मिनु मेको चिटी मेक जाक्दीम्मेनु, मेकोपुकीम मेको ७० जना पिप आ तौ आन कली लाइशशा सदमे बाक्त। मिनु मेकोपुकीम मेको आन खोइशशो पिया थुन्सेपुकीम कुर पा येज्जेल सहरम सोइक्तमे बाक्त।

8 मिनु लोत्र कुरब मुर जाक्शा, येहू कली “मेकोपुकीम पिप आ तौ आन पिया चाक्तेक्म” देमाक्त। मिनु येहूमी मेको कली “मेको आन कली पुक्शी निक्शी पा पुक्शा, सहर डा ठेयब लाप्चो आ डोंइती दीसा सुनी सम्म वोतीन” देमाक्त।

9 मिनु आ दीसा सुनी येहू लाडगा गूमाक्त। मिनु मेकोम मेकेर राप्शा बाक्ब नेल्ल आन कली “गे दोस ताइब मननी। आंम होत्रप कली मरिम्शो पा साइक्ब मुर दा गो नड। तन्न एको नेल्ल आन कली चहिं सुम सदा?

10 आहाब आ खिं डा मुर आन कली परमप्रभु यावेम देशो लोत्र का यो मोशा मटुम्ब। परमप्रभु यावेम आ गेय पाइब एलीया रे पा देशो लोत्र नेल्ल गात्त” देमाक्त। १ राजा २१:२१

11 मोपा येहूमी येज्जेलम लीशो आहाब आ खिं डा मुर नेल्ल, मेको आ ठेयब गेय पाइब मुरपुकी, मेको आ वारच नु मेको आ चढेब, नेल्ल आन कली का यो मप्रोंइथु साइक्मी बाक्त। होसे १:४

12 मेको नोले येहू सामरीया गे लमाक्त। मिनु गोठला आन बाक्तीक बेथ-एकेद सहरम जाक्दीम्माक्त।

13 मिनु मेकेर येहूम यहूदा डा पिप अहाज्याह आ मुर आन कली गुमा बाक्त। मिनु येहूमी मेको आन कली “गे सु ननी?” दे हिल्लो पामी बाक्त। मिनु मेकोपुकीम “गो पिप अहाज्याह आ मुर नकी। मिनु गो पिप तौ आन कली नु ठेयब पिपीमी आ तौ आन कली गुम्थ लाइतक” देमा बाक्त। २इतिहास २२:८

14 मिनु येहूम “एको आन कली सेसीन ग्याइक्तीन” देमाक्त। मिनु मेकोपुकीम मेको आन कली सेसीन ग्याइशशा बेथ-एकेद सहरम सदमे बाक्त। मेकोपुकीम मेकेर ४२ जना वोंइश मुर आन कली का यो सेस मप्रोंन्मे बाक्त।

15 मिनु मेकोम मेकेर रेकाब आ तौ येहो-नादाब आ कली गुम्थ पिशो तवा बाक्त। मिनु येहूम मेको कली रिम्शो पा “मार गो आं थुं इ गे बाक्शो खोदेशो पा, गे यो इ थुं नेल्लेम आं गे बाक्नेवे?” दे मदा बाक्त। मिनु येहो-नादाबम “बाक्नुड” देमाक्त। मिनु येहूमी “मो हना इ गुड आं कली गेयी” दे मदा बाक्त। मिनु मेकोम आ गुड गेवा बाक्त। मिनु येहूम मेको कली लाइशशा आ बग्गीम निप्पदा बाक्त। येरमीया ३५:६

16 मिनु येहूम मेको कली “गे गो नु पिने। मिनु परमप्रभु यावे कली आं जोंब बोक्शा गेय पशो कोत्रडीन” दे मदा बाक्त। मिनु मेकोम मेको कली आ बग्गीम लदा बाक्त।

17 मिनु येहू सामरीयाम जाक्दीशशा, परमप्रभु यावेमी एलीया कली देशो खोदेशो पा, आहाब आ खिं डा लीशो मुर नेल्ल आन कली का यो मप्रोंइथु, साइक्मी बाक्त। १ राजा २१:२१

बाल कली चढेब आन कली साइशशो

18 मिनु येहूमी मुर नेल्ल आन कली ब्रेशरा, मेको आन कली “आहाबम दा इचका ला बाल आ पूजा पाप्तु। तन्न येहूमी मेको क्येडा यो थम ठेयब पा पूजा पाइब। १ राजा १६:३१-३३

19 मुल बाल आ लोत्र पाइब नेल्ले, मेको आ नोले खोइक्ब नेल्ल नु मेको कली चढेब नेल्ल आन कली ब्रेत्तीन। मेकोपुकी का यो मग्नाइक्मल। मारदे हना गो बाल कली ठेयब पूजा का पाइनुड। मेको पूजाम मजाक्ब सुइ ब्रोंइचा मताइनीम” देमाक्त। तन्न येहूम बाल आ नोले खोइक्ब नेल्ल आन कली साइक्चा कली मोपा जोल पशो बाक्माक्त।

20 मिनु येहूम “बाल आ पर्वम चाड का मानेचा माल्ब” देमाक्त। मोपतीके मेकोपुकीम मेको लोत्र नेल्ल आन कली नैपदमे बाक्त।

21 मिनु येहूम मेको लोत्र इसाएल नेल्लेम नैपाइक्चा कली लोत्र कुरब मुर सोइक्तीमी बाक्त। मिनु बाल आ नोले खोइक्ब नेल्ल जाक्मा बाक्त। का यो मलीमा बाक्त। मेकोपुकी बाल आ खिंम जाक्शा क्राक्शी चोक्शी दुम्शा एर डा गारो रे ओंथ डा गारो सम्म दुम्मा बाक्त।

22 मिनु मेकोमी वा वोइक्ब आन कली “बाल आ नोले खोइक्ब नेल्ल आन कली वा गुंडदीन” दे माइक्मी बाक्त। मिनु मेकोम मेको आन कली वा गुंडदमे बाक्त।

23 मिनु येहू, रेकाब आ तौ येहो-नादाब नु बाल आ खिं ओत्रमाक्त। मिनु येहूम बाल आ नोले खोइक्ब आन कली “होस पा एर ओंथ नेल्ल कोत्रडीन। मिनु थमा पा एकेर गे इन दातेम परमप्रभु यावे आ गेय पाइब सुइ मबाक्मल। बाल आ नोले खोइक्ब ला बाक्मल” देमाक्त।

24 मिनु मेको क्योरशा चढेचा नु चोशा चढेचा कली आगा ओव्रसा बाक्त। येहूमी लाडगाम ८० जना मुर आन कली योव्रशा, मेको आन कली “गो एको मुर आन कली इन जिम्मा गेशो बाक्नुड। सुडम का कली यो प्रोक्या गेप्टु हना, मेको आ पा डा मेको प्रोक्याइक्व मुर साइक्वा पुंडसीब” देंशो बाक्माक्त।

25 मिनु येहूम मार मार चढेने थुमा चोटी खाल पाइब नु आ दी डा योव्रशो मुर आन ठेयब मुर आन कली “ओव्रशा, मेको नेल्ल आन कली का यो मप्रोइथु, क्योरशा सतीन” दे हुकुम गेमी बाक्त। मोपतीके मेको खाल पाइबपुकी नु योव्रशो आन ठेयब मुरपुकीम सुड आन कली प्रोक्या मगेशु तरवारम क्योरशा सदमे बाक्त। मिनु मेको आन बेक्शो रां लाडगा गुंडशा बाल आ खिं आ लाडगाम ताइक्वते बाक्त। १राजा १८:४०

26 मिनु मेकोपुकीम बाल आ खिं डा थाम लाडगा गुंडशा चोव्रमे बाक्त।

27 मिनु नोले मेकोपुकीम बाल आ थाम प्रेत्मे बाक्त। मिनु आ खिं यो प्रेत्मे बाक्त। मिनु मेको डाइक्तीक खिं सेल्मे बाक्त। मेको मुल सम्म बाक्ब।

28 मोपा येहूमी इस्राएलमी बाल आ नोले खोइक्व नेल्ल आन कली क्याम्दा बाक्त। १राजा १२:२६-३३

29 मो हना यो येहूम इस्राएली आन कली पाप पपाइक्व नेबात आ तौ येरोबाम आ पतीक मप्रोना बाक्त। बेथेल नु दान डा सुन के बाछा आस कली पूजा पतीक गेय में डा में वोदा बाक्त।

30 मिनु परमप्रभु यावेम येहू कली “गे आं डोंइती मार रिम्शो बाक्मे, मेको पाप्तीवी। मिनु आं मिम्शो लोव्र आहाब आ खिं डा मुर नेल्ल आन कली पाप्तीवी। मोपतीके इ तौ चच ४ पाला सम्म इस्राएल डा पिप दुम्नीम” देंमाक्त।

31 मो हना यो येहूम आ थुं नेल्लेम होस पा परमप्रभु यावे, इस्राएली आन परमप्रभु आ अरेशो मटिवा बाक्त। मेकोमी इस्राएली आन कली पाप पपाइक्व येरोबाम आ पाप पतीक मप्रोना बाक्त।

32 मेना परमप्रभु यावेमी इस्राएल कली आइक्व सेल्चा गोवा बाक्त। मिनु हजाएलमी इस्राएल कली लडाइ पा ग्रामाक्त। २राजा ८१२

33 मिनु यर्दन खोला आ पूर्व गे गिलाद डा रागी नेल्ल, गाद, रूबेन नु मनस्से आन रागी, अरनोन खोला आ नेक्था आरोएर, गिलाद डा लां रे पा बाशन सम्म इस्राएली आन कली फूमी बाक्त।

34 येहू आ पशो अरु गेय, मेको आ पशो नेल्ल नु आ सक्ति मार, मेको इस्राएल डा पिप आन इतिहासम ब्रेक्शो मबाक्वा डा?

35 मिनु येहू बेक्माक्त। मिनु मेको सामरीयाम थिम्चा पुंडसे बाक्त। मिनु मेको आ पा डा आ तौ येहो-अहाज पिप दुम्माक्त। २राजा १३:१

36 येहू सामरीया सहरम बाक्शा २८ बर्स इस्राएल कली सासन पवा बाक्त।

## 11

अथाल्याह नु योआश

1 अहाज्याह आ ममा अथाल्याहम आ तौ कली साइशशो तशा, पिप आ खिं डा मुर नेल्ल आन कली साइक्वा गोवा बाक्त। २राजा ८:२६; २राजा १:२७

2 तन्न पिप येहोराम आ तमी, अहाज्याह आ समी येहो-शेबा बाक्माक्त। मेकोमी अहाज्याह आ तौ योआश कली मेको साइक्वा पुंडसीब पिप आ आल आन दाते रे लाइशशा, मेको आ खाल पाइब मीश मुर नु इप्तीके कोठा काम खुइक्वता बाक्त। मोपा अथाल्याहमी मेको आल कली साइक्वा मतवा बाक्त।

3 मिनु मेको आल ६ बर्स सम्म मेको नु परमप्रभु यावे आ खिंम खुइशशा बाक्माक्त। मेना अथाल्याहमी सासन पशो बाक्माक्त।

4 मिनु ७ बर्सम येहो-यादामी सहे, सहे जना पिप कली कोव्रब केरेती नु खाल पाइब आन ठेयब मुर आन कली परमप्रभु यावे आ खिंम ब्रेशशा चाक्मी बाक्त। मिनु येहो-यादाम मेको आन कली कबल का पपाइशशा, परमप्रभु यावे आ खिंम कसम जपाइक्मी बाक्त। मिनु मेको आन कली पिप आ तौ कोइदीमी बाक्त। केरेती परमप्रभु यावे आ खिं कोव्रब बाक्नीम।

5 मिनु येहो-यादामी मेको आन कली “गे मार पचा माल्नीनी देशा हना, सु सु नाइक्तीक नाक्ती गेय पथ जाक्नीनी, मेकोपुकीम भाग सां डा भाग का पिप आ खिं खाल पने।

6 मिनु अर्को भाग का सुर माइशशो लाप्चोम बाक्कीन। नोले डा भाग लाप्चो खाल पाइब आन नोले गे बाक्शा, दरवार कोव्रचा माल्नीम।

7 मिनु गे नाइक्तीक नाक्ती गेय मपाइब हुल निक्शी चहिं परमप्रभु यावे आ खिं खाल पा बाक्कीन।

8 गे नेल्ल आंम आंम गुडम या शेशा, पिप कली खाल पा आ एर ओंथ बाक्चा माल्नीनी। इन नेक्था जाक्ब नेल्ल आन कली सतीन। पिप ते लत हना यो, गे मेको आ नेक्था बाक्चा माल्नीनी” दे अरेमी बाक्त।

9 मिनु पिप कली कोव्रब आन ठेयब मुरपुकीमी चढेब येहो-यादा आ अरेशो नेल्ल पामे बाक्त। मेको नेल्लेमी आन आन मुर आन कली खुप्तमे बाक्त। नाइक्तीक नाक्ती गेय पचा माल्शो नु ममाल्शो नेल्ल चढेब येहो-यादा आ बाक्तीक जाक्मा बाक्त।

10 मिनु मेको चढेबम मेको आन कली परमप्रभु यावे आ खिंम बाक्शो दाऊद आ तूतीक नु तेक्तीक गेमी बाक्त। २सामुएल ८:७

11 मिनु मेको खाल पाइबपुकी आंम आंम या शेशा परमप्रभु यावे आ खिं आ दक्खिन रे उत्तर सम्म, खिं नु चढेतीक आ एर ओंथ पिप कली खाल पा बाक्मा बाक्त।

12 मिनु येहो-यादाम पिप आ तौ कली गुंडदा बाक्त। मिनु मेको आ पियाम सिरपेच गुक्ता बाक्त। मिनु येहो-यादामी मेको कली कबल डा कागज का गेवा बाक्त। मिनु मेको कली तेल लुक्शा पिप सेला बाक्त। मिनु मुरपुकीम गुड फ़ोकशा “पिप गेना हना यो ब्रॉइशा बाक्त” देमा बाक्त। ब्यवस्था १७:१८-१९; १ राजा १:३९

13 मिनु अथाल्याहमी खाल पाइब नु मुरपुकी ठेयब सेंदा पा रेयके पशो नेना बाक्त। मिनु मेको परमप्रभु यावे आ खिंम बाक्शो मुर आन नेक्था लमाक्त।

14 मिनु मेकोम कोब्रडानु, पिप थाम आ नेक्था राप्पाइशो तवा बाक्त। मेको आन पतीक पशा ठेयब मुरपुकी नु तुराही ताप्बपुकी पिप आ नेक्था बाक्मा बाक्त। मिनु रागी डा मुर नेल्ल तुराही ताप्ना ताप्न ग्येरसीशो बाक्मा बाक्त। मिनु अथाल्याहम आ वा खाक्गा बाक्त। मिनु ठेयब सेंदा पा “गो नु रागी नेल्ल खतम! गो नु रागी नेल्ल खतम!” दे वाइ ब्रेम्माक्त।

15 मिनु चढेब येहो-यादामी लडाइ पाइब आन ठेयब मुर आन कली “मेको कली खिं रे गुंडदीन। मेको आ नोले खोइक्ब नेल्ल आन कली तरवारम सतीन। मारदे हना ‘मेको परमप्रभु यावे आ खिंम साइक्चा मपुइसेक्ल’ ” देमाक्त।

16 मिनु मेको कली ग्याइशशा, शारा वोइक्तीक लाइशशा, सदमे बाक्त।

17 मेको नोले येहो-यादामी परमप्रभु यावे, पिप नु आ मुर कली कबल का पवा बाक्त। मेकोपुकी परमप्रभु यावे आ मुर दुम्नीम, दे कबल पवा बाक्त। मिनु मेकोम पिप नु मुर आन दातेम यो कबल का पवा बाक्त।

18 मिनु मेको रागी डा मुर नेल्ल बाल आ खिं लशा, मेको प्रेत्मे बाक्त। मेकोपुकीम मेको आ चढेतीक नु आ मूर्ति जिक्शा ताइक्तमे बाक्त। मिनु बाल कली चढेब मतान कली चढेतीक आ डोंइती सदमे बाक्त। मिनु चढेब येहो-यादाम परमप्रभु यावे आ खिं कली खाल पाइब मुर योव्रमी बाक्त। २ राजा १०:२६-२७; न्यायाधीस ६:२५

19 मिनु येहो-यादामी सहे का जना लडाइ पाइब आन कप्तानपुकी, केरेती, खाल पाइबपुकी नु रागी डा मुर नेल्ल आन कली लाइक्मी बाक्त। मिनु मेकोपुकीमी पिप कली परमप्रभु यावे आ खिं रे खाल पाइब आन लाप्चो लां पा पिप आ खिंम चाक्गमे बाक्त। मिनु पिप आ नित्तीकेम निप्पदमे बाक्त। करेती परमप्रभु यावे आ खिं कोव्रब बाक्तेकम।

20 मिनु रागी डा मुर नेल्ल ग्येरसमा बाक्त। मिनु सहरम थुं नाइशशा बाक्तीक दुम्माक्त। मारदे हना अथाल्याह तरवारमी साइक्चा पुंडसे बाक्त।

21 योआश पिप दुम्मेनु, मेको ७ बर्स दुम्शो बाक्माक्त। योआश नु येहो-आश नें का बाक्ब, येहो-आश कली योआश यो बाक्ब।

## 12

योआश यहूदा डा पिप दुम्शो

२इतिहास २४:-

1 योआश यहूदा डा पिप दुम्माक्त। मेना येहू इस्राएल डा पिप दुम्शो ७ बर्स दुम्शो बाक्माक्त। मिनु योआशमी यरूसलेमम ४० बर्स सासन पवा बाक्त। मेको आ ममा आ नें सिबीयाह बाक्माक्त। मेको बेयर-शेबा डा बाक्माक्त।

४० योआशमी चढेब येहो-यादाम शेंशो खोदेशो पा, ब्रॉइम सम्म परमप्रभु यावे आ डोंइती मार रिम्शो बाक्मे, मेको पवा बाक्त।

3 मो हना यो मेकोमी डांडाम बाक्शो थानपुकी मताइक्ता बाक्त। मेना सम्म मुरपुकीम मेकेर क्योरशा चढेतीक चढेशा, धूप चोव्रमे बाक्त।

4 मिनु योआशमी चढेब आन कली “परमप्रभु यावे आ खिंमी मुरपुकीमी आन दाक्शा गेशो क्येट, मुर आन कली हिक्शो नु बोक्शो क्येट नु मुरपुकीम ग्येरशा गेशो क्येट नेल्ले परमप्रभु यावे आ खिंम वोतीन। २ राजा १४:४; १ राजा २२:४४

5 चढेबपुकीमी मेको क्येट मुर रे ताक्चा माल्नीम। मिनु परमप्रभु यावे आ खिं डा बिग्रेशो मार मार बाक्मा, मेको सेल्पाइक्चा माल्नीम” देमाक्त।

6 तन्न योआशमी सासन पवा आ २३ बर्स सम्म यो चढेबपुकीम मेको बिग्रेशो मारिड मसेल्पदमे बाक्त।

7 मोपतीके पिप योआशमी चढेब येहो-यादा नु अरु चढेब आन कली ब्रेशशा “मारदे गे परमप्रभु यावे आ खिं डा ब्रेशशो मसेल्नी? मुल रे गेपुकीम इन कली गेशो क्येट मताक्कीन। तन्न मेको अरु परमप्रभु यावे आ खिं डा ब्रेशशो सेल्ब आन कली कोव्रब आ गुइमी गेचा माल्नीनी” देमाक्त।

8 मोपतीके चढेबपुकीमी “मुल गो क्येट यो मताक्क्य नु बिग्रेशो यो मसेल्य” दे सल्ला पामे बाक्त।

9 मिनु चढेब येहो-यादामी सन्दोस का सेल्शा, मेको आ सुम्तीकेम पोव्रला का सेला बाक्त। मिनु येहो-यादामी मेको सन्दोस परमप्रभु यावे आ खिं आगा ओव्रतीकेम चढेतीक आ नेक्था ग्युरा गे वोदा बाक्त। मिनु परमप्रभु यावे आ खिं डा लाप्चो कोव्रब चढेबपुकीम परमप्रभु यावे आ खिंम चाक्शो क्येट नेल्ल मेकेर कुर पामे बाक्त।

10 मिनु मेकोपुकीमी मेको सन्दोस “शुश क्येट बाक्ब” दे तुइक्तमेनु, पिप आ ब्रेक्ब नु नेल्ल क्येडा ठेयब चढेब जाक्शा, मेको परमप्रभु यावे आ खिं डा क्येट हिक्शा थैलोम कुर पा फ्रेंशा वोइक्बाक्मा बाक्त।

11 मिनु मेकोपुकीम मेको हिक्गमे नोले, मेको परमप्रभु यावे आ खिंम गेय पाइब आन कली कोव्रब मुर कली गेबाक्मा बाक्त। मिनु मेकोपुकीम मेको रे परमप्रभु यावे आ खिं सेल्ब आन कली गेबाक्मा बाक्त। मेकोपुकीम मेको क्येट शी के गेय पाइब नु सेल्ब आन कली गेबाक्मा बाक्त।

12 मेकोपुकीमी मेको क्येट गारो प्रोव्रब, फुल्लु खोइक्ब नु शी नु खोइशशो फुल्लु ग्याप्चा कली गेबाक्मा बाक्त। मिनु मेको क्येट परमप्रभु यावे आ खिं डा बिग्रेशो सेल्चा कली नु परमप्रभु यावे आ खिं डा अरु मार मार लेंशा सेल्चा कली चलेबाक्मा बाक्त।

13 मेकोपुकीम चांदी के बोस, सल्लो क्राम्तीक थनारो, ग्योब, तुराही नु अरु सुन चांदी के मारेइ मारेइ सेल्चा कली परमप्रभु यावे आ खिंम चाक्शो क्येट रे मसेल्पदमे बाक्त।

14 मारदे हना मेको क्येट परमप्रभु यावे आ खिंम डा बिगेशो लेशा सेल्ब मुर आन कली गेमे बाक्त।

15 मिनु मेको गेय पाइब आन कली गेचा कली, मेको आन कोत्रब मुर आन कली गेशो क्येट सु सु कली गेनी, मार मार पनी, दे हिल्लो मपाइक्वाक्मा बाक्त। मारदे हना मेकोपुकी थमा सुइक्चा पुंडसीशो मुर बाक्मा बाक्त। २राजा २२:७

16 मिनु दोस आ पर्वम नु पाप आ पर्वम चढ़ेशो क्येट चहिं परमप्रभु यावे आ खिंम डा क्येट नु मब्वाइक्तमे बाक्त। मेको चहिं चढ़ेब आन के दुम्बाक्माक्त।

17 मेना अराम डा पिप हजाएल इर कुशा, गाथ कली लडाइ तोशा मेको आ के सेला बाक्त। मेको नोले हजाएल यरूसलेम नु लडाइ पचा कली मेक गे लमाक्त।

18 तन्न यहूदा डा पिप योआशमी मेको आ किकी पिपी, यहूदा डा पिप येहो-शाफात, येहोराम नु अहाज्याहम चढ़ेशो परमप्रभु यावे आ खिंम डा क्येट नु आंम आ चढ़ेशो थोत्रक, परमप्रभु यावे आ खिंम बाक्शो थोत्रक नु आ दरवारम बाक्शो सुन नेल्ल अराम डा पिप हजाएल कली सोइक्ता बाक्त। मिनु हजाएल यरूसलेम रे लेम्माक्त। २राजा १०:३२

19 योआश आ पशो अरु गेय नु आ पशो नेल्ल, मार, मेको यहूदा डा पिप आन इतिहासम ब्रेक्शो मबाक्बा डा? १राजा १५:१८

20 मिनु नोले मेको आ गेय पाइब मुरपुकीम मेको कली साइक्चा माल्मे बाक्त। मिनु योआश कली सिल्ला सहर डा लुकच लतीक लां मिल्लो माइशो दरवारम सदमे बाक्त। २राजा १४:५

21 मेको कली साइक्ब, योआश आ गेय पाइब शिमेआथ आ तौ योजाकार नु शोमेर आ तौ येहो-जाबाद बाक्सा बाक्त। मिनु योआश बेक्शा आ किकी पिप नु दाऊद आ सहरम थिन्चा पुंडसे बाक्त। मिनु मेको आ पा डा आ तौ अमस्याह पिप दुम्माक्त। २राजा १४:१

## 13

इसाएल डा पिप येहो-अहाज

1 यहू आ तौ येहो-अहाज सामरीयाम इसाएल डा पिप दुम्माक्त। मेना यहूदा डा पिप अहाज्याह आ तौ योआशम सासन पशो २३ बर्स दुम्शो बाक्माक्त। मिनु येहो-अहाजम १७ बर्स सासन पवा बाक्त। २राजा १०:३५

2 मेकोमी परमप्रभु यावे आ डोंइती मार मरिम्शो बाक्मे, मेको पवा बाक्त। मिनु इसाएली आन कली पाप पपाइक्ब नेबात आ तौ येरोबाम आ लांम गाक्माक्त। मिनु मेकोमी येरोबाम आ लां मप्रोना बाक्त। १राजा १२:२८-३०

3 मोपतीके परमप्रभु यावेमी इसाएली आन कली तशा गाइक्ता बाक्त। मिनु मेकोमी मेको आन कली शुश खेयप अराम डा पिप हजाएल नु मेको आ तौ बेन-हादाद आस गुडमी गेमी बाक्त। २राजा १०:३२

4 तन्न येहो-अहाजमी परमप्रभु यावे कली पुना बाक्त। मिनु परमप्रभु यावेम मेको आ पुंडशो नेना बाक्त। मारदे हना अराम डा पिपमी इसाएली आन कली दिप्शा श्येत गेशो तवा बाक्त। उत्पत्ती १६:१३

5 मिनु परमप्रभु यावेमी इसाएली आन कली प्रॉइब का योत्रडा बाक्त। मिनु मेकोपुकी अरामी आन गुइ रे ब्रोंइमा बाक्त। मिनु इसाएली डोंइती डा खोदेशो पा आन आन खिंम बाक्चा तामे बाक्त। २राजा १४:२७

6 तन्न मेकोपुकीमी इसाएली आन कली पाप पपाइक्ब येरोबाम आ पाप पतीके मप्रोंइथु, पना पन बाक्मा बाक्त। मिनु मूर्ति पाइशशो थाम यो सामरीयाम बाक्स डा बाक्स दुम्माक्त। १राजा १६:३३

7 येहो-अहाज के ५० जना शारा डोइक्ब, १० ओटा बग्गी नु १० हजार खोइलीम गाक्ब लडाइ पाइब डा लाक्शा अर्को मारेइ मलीशो बाक्माक्त। मारदे हना अरु आन कली अराम डा पिपम साइशशा, खप डा फुरक खोदेशो सेल्शो बाक्माक्त।

8 येहो-अहाज आ पशो अरु गेय, मेको आ पशो नेल्ल नु आ सक्ति दोदेशो बाक्मे, मार, मेको इसाएल डा पिप आन इतिहासम ब्रेक्शो मबाक्बा डा?

9 मिनु येहो-अहाज बेक्माक्त। मिनु मुरपुकीम मेको कली आ किकी पिपी नु सामरीयाम थिम्मे बाक्त। मिनु मेको आ पा डा आ तौ योआश पिप दुम्माक्त।

इसाएल डा पिप योआश

10 मिनु येहो-अहाज आ तौ योआश सामरीयाम इसाएल डा पिप दुम्माक्त। मेना योआश यहूदा डा पिप दुम्शो ३७ बर्स दुम्शो बाक्माक्त। मिनु इसाएल डा पिप योआशमी १६ बर्स सासन पवा बाक्त। यहूदा डा पिप नु इसाएल डा पिप आस नें खाल का डा बाक्त। योआश नु येहो-आश नें का बाक्ब, येहो-आश कली योआश यो देशो बाक्त।

11 मेकोमी परमप्रभु यावे आ डोंइती मार मरिम्शो बाक्मे, मेको पवा बाक्त। मिनु इसाएली आन कली पाप पपाइक्ब नेबात आ तौ येरोबाम आ लांम गाक्माक्त। मिनु मेकोमी येरोबाम आ लां मप्रोना बाक्त।

12 योआश आ पशो अरु गेय, मेको आ पशो नेल्ल, यहूदा डा पिप अमस्याह नु लडाइ पा सक्ति कोंइशो, मार, मेको इसाएल डा पिप आन इतिहासम ब्रेक्शो मबाक्बा डा? २राजा १४:८-१६

13 मिनु योआश बेक्माक्त। मेको आ पा डा येरोबाम पिप दुम्माक्त। योआश इसाएल डा पिपपुकी नु सामरीयाम थिन्चा पुंडसे बाक्त। २राजा १४:२३

एलीशा बेक्शो

14 एलीशा रोड़ पवा बाक्त। मिनु नोले मेको रोड़ रे बेक्माक्त। मिनु इस्राएल डा पिप योआश मेको कली कोत्रथ लमाक्त। मिनु मेको आ डोंइती डाक्शा “ए, आं आफ! ए, आं आफ! इस्राएल डा बग्गी नु शारा डोइक्बपुकी” देमाक्त। २राजा २:१२

15 मिनु एलीशामी मेको कली “लिब्रा का नु ब्रा गुपो” देमाक्त। मिनु मेकोम लिब्रा नु ब्रा गुबा बाक्त।

16 मिनु मेकोमी इस्राएल डा पिप कली “लिब्रा खुक्को” देमाक्त। मिनु मेकोम खुक्का बाक्त। मिनु एलीशामी आ गुड़ पिप आ गुड़ तार वोदा बाक्त।

17 मिनु एलीशामी “पूर्ब गे डा झेल रोक्को” दे मदा बाक्त। मिनु रोकगा बाक्त। मिनु एलीशाम मेको कली “ब्रा आपो” दे मदा बाक्त। मिनु मेकोमी आबा बाक्त। मिनु एलीशाम “परमप्रभु यावे आ अराम रागी कली प्रातीक ब्रा बाक्त। गे अफेक सहरमी अरामी आन कली लडाइ पा ग्रानीनी” दे मदा बाक्त।

18 मिनु लेंशा मेकोम “ब्रापुकी गुपो” देमाक्त। मिनु मेकोमी गुबा बाक्त। मिनु मेकोमी इस्राएल डा पिप कली “खप तुपो” देमाक्त। मिनु पिपम खेयप सां तुप्शा नांडसे बाक्त।

19 मिनु परमप्रभु आ मुरुमी गाइश्शा मेको कली “गे खपीम ५, ६ खेयप तुप्चा माल्शो नवे। मिनु गे अराम कली गेना हना यो कली ग्राडे वा। तन्न मुल गे अराम कली खेयप सां ला ग्रानेवे” दे मदा बाक्त।

20 मेको नोले एलीशा बेक्माक्त। मुरपुकीम मेको कली थिम्मे बाक्त। मोआब डा रोइक्बपुकी बर्स बर्समी मेको रागी ओत्रबाक्मा बाक्त।

21 काले इस्राएलीपुकीम बेक्शो मुर का थिम्मेनु मोदेशो रोइक्ब मोआबी आन कली तामे बाक्त। मोपतीके मेकोपुकीम मेको बेक्शो मुर एलीशा वोइक्तीकेमी ताइश्शा, प्रोक्मा बाक्त। मिनु मेको बेक्शो मुरुम एलीशा आ रुश थिवा चोटी सेस दुम्शा बोक्माक्त।

22 मिनु अराम डा पिप हजाएलमी इस्राएल कली श्येत गेस डा गेस बाक्माक्त। मेना येहो-अहाजम इस्राएलम सासन पशो बाक्माक्त।

23 तन्न परमप्रभु यावेमी अब्राहाम, इसहाक नु याकूब नु पशो कबलम पतीके, मेको आन कली शिशी पाइक्मी बाक्त। मेकोम मेको आन कली मिम्तीमी बाक्त। मिनु परमप्रभु यावेमी मेको आन कली साइक्चा नु आ डोंइती रे तिल्चा थुं मपवा बाक्त। लेवी २६:४२

24 मिनु अराम डा पिप हजाएल बेक्माक्त। मिनु मेको आ पा डा आ तौ बेन-हादाद पिप दुम्माक्त।

25 मिनु येहो-अहाज आ तौ योआशमी आ आफ रे हजाएल आ तौ बेन-हादादम लडाइ पा प्राशो सहरपुकी लेंशा ताक्गा बाक्त। योआशमी खेयप सां मेको कली ग्रामाक्त। मिनु मोपा मेकोमी इस्राएल डा सहरपुकी लेंशा आं के सेला बाक्त। २राजा १३:१९

## 14

यहूदा डा पिप अमस्याह

२इतिहास २५:-

1 योआश आ तौ अमस्याह यहूदा डा पिप दुम्माक्त। मेना यो-आहाज आ तौ योआश इस्राएल डा पिप दुम्शो बर्स निकशी दुम्शो बाक्माक्त। योआश नु येहो-आश नें का बाक्ब, येहो-आश कली योआश यो देशो बाक्त। २राजा १२:२२

2 यहूदा डा पिप अमस्याह पिप दुम्मेनु २५ बर्स दुम्शो बाक्माक्त। मिनु मेकोमी यरूसलेमम २९ बर्स सासन पवा बाक्त। मेको आ ममा आ नें येहो-अददीन बाक्माक्त। मेको यरूसलेम डा बाक्माक्त।

3 अमस्याहमी परमप्रभु यावे आ डोंइती मार रिम्शो बाक्मे, मेको पवा बाक्त। तन्न मेको आ किकी दाऊदमी पशो खोदेशो चहिं मपवा बाक्त। मेकोमी आ आफ योआशमी पशो खोदेशो पवा बाक्त। २राजा १२:३-४

4 मो हना यो मेकोमी डांडाम बाक्शो थानपुकी मताइक्ता बाक्त। मेना सम्म मुरपुकीम मेकेर क्योरशा चढेतीक चढेशा, धूप चोवमे बाक्त।

5 मेकोमी आ राज्य डा गेय बोल्यो सेला नोले, आ आफ कली साइक्ब, आ गेय पाइब आन कली साइक्मी बाक्त। २राजा १२:२१:२२; २सामुएल ३:३०

6 तन्न मेकोमी मोसा आ अरेशो किताबम ब्रेक्शो खोदेशो पा “तमी तौ आन पाप आ पर्बम आन आम आफ आस कली मसतीन। मिनु आम आफ आस पाप आ पर्बम यो आन तमी तौ आन कली मसतीन। सुम पाप पाइनीमी मेको ला साइक्चा पुंडसमल” देशो, मेकोमी परमप्रभु यावे आ लोत्र टिशा, नेल्ल आंम आन पशो पापम ला साइक्चा पुंडसीनीम। ब्यवस्था २४:१६

7 मेकोम हिकसी के बेंसीम १० हजार एदोमी आन कली साइक्मी बाक्त। मिनु लडाइम सेला सहर प्राशा, मेको आ नें योक्तेल वोदा बाक्त। मेको सहर आ नें मुल सम्म मेकोन बाक्ब।

8 मेको नोले अमस्याहम इस्राएल डा पिप येहू आ चच येहो-अहाज आ तौ योआश कली लडाइ पतीक लोत्र पा “जाक्को, गो नु आं डोंइती राप्शा लडाइ पावो” दे लडाइ पचा कली लोत्र कुरब मुर सोइक्ता बाक्त।

9 तन्न इस्राएल डा पिप योआशम यहूदा डा पिप अमस्याह कली “लेबानोन डा चू बुटा काम लेबानोन डा लाइश्शो रवा का कली ‘इ तमी आं तौ नु ग्युंवे पचा गेवो’ देमाक्त। तन्न लेबानोन डा ब्वाकीमी बाक्ब जन्तु का मेको मेर पा पिमाक्त। मिनु मेकोम चू बुटा कली दिम्शा ताइश्शा पवा बाक्त। न्यायाधीस ९:१४

10 गे एदोम कली प्राशा, ठेयब लेशो दुम्तीनी। इन प्राशोम ग्येरसीने। तन्न इन खिंमी सिक्सी पा बाक्कीन। आंम इन कली नु यहूदा कली मारदे खतम सेल्वा दाक्नीनी?” देपाइक्थ लोत्र कुरब मुर का सोइक्ता बाक्त।

11 मो हना यो अमस्याहमी मेको लोत्र मनेना बाक्त। मोपतीके इस्राएल डा पिप योआशमी लडाइ तोवा बाक्त। मिनु मेको नु यहूदा डा पिप अमस्याह यहूदा डा बेथ-शेमेशम लडाइ पाम्से बाक्त। यहोसु १५:१०

12 मिनु यहूदा डा पिप इस्राएली आन क्येडा बुमाक्त। मिनु मुर नेल्ल प्रोक्मा बाक्त।

13 मिनु इस्राएल डा पिप योआशमी यहूदा डा पिप अहाज्याह आ चच, योआश आ तौ अमस्याह कली बेथ-शेमेशमी ग्याइक्ता बाक्त। मिनु मेको नोले योआश यरूसलेम लेशा जाक्माक्त। मिनु इस्राएल डा पिपमी यरूसलेम डा गारो एफ्राइम डा ठेयब लाप्चो रे कुना डा ठेयब लाप्चो सम्म ४ सहे कुबीत प्रेप्पदा बाक्त। कुबीत का आधा मिटर खोदेशो बाक्ब।

14 मेकोमी परमप्रभु यावे आ खिम बाक्शो नु पिप आ खिम थिश्शो सुन चांदी नु ग्योब नेल्ल नु मुर यो ग्याइश्शा लदा बाक्त। मिनु नोले सामरीया लेम्माक्त।

15 मेको योआश आ पशो अरु गेय, आ पशो नेल्ल, आ सक्ति नु यहूदा डा पिप अमस्याह नु पशो लडाइ, मार, मेको नेल्ल इस्राएल डा पिप आन इतिहासम ब्रेक्शो मबाक्बा डा?

16 मिनु योआश बेक्माक्त। मिनु इस्राएल डा पिपपुकी नु सामरीयाम थिम्चा पुंडसे बाक्त। मिनु मेको आ पा डा आ तौ येरोबाम पिप दुम्माक्त। २राजा १३:१३

17 यहूदा डा पिप योआश आ तौ अमस्याह, इस्राएल डा पिप येहो-अहाज आ तौ योआश क्येडा १५ बर्स शुश ब्रोंडमाक्त।

18 अमस्याह आ पशो अरु गेय, मार, मेको यहूदा डा पिप आन इतिहासम ब्रेक्शो मबाक्बा डा?

19 मिनु यरूसलेम सहरम मुरपुकीमी मेको कली साइक्चा माल्मे बाक्त। मोपतीके मेको लाकीश सहरम प्रोक्माक्त। तन्न मेको कली खेदा पाइब मुर सोइश्शा मेक उड साइक्पदमे बाक्त। २राजा १२:२१

20 मिनु मेको आ बेक्शो रां शाराम कुर पा यरूसलेम चाक्गमे बाक्त। मिनु मेको कली आ किकी पिपी नु दाऊद आ सहरम थिम्मे बाक्त।

21 मिनु यहूदा डा मुर नेल्लेम १६ बर्स दुम्शो अमस्याह आ तौ अजारयाह कली मेको आ पा डा पिप सेल्मे बाक्त। २राजा १५:१-२

22 मेकोमी अमस्याह बेक्ने थुमा नोले एलाथ सहर लेंशा सेल्शा लेशा ताक्गा बाक्त। २राजा १६:६

येरोबाम इस्राएल डा पिप दुम्शो

23 मिनु योआश आ तौ येरोबाम सामरीया सहरम इस्राएल डा पिप दुम्माक्त। मेना योआश आ तौ अमस्याह यहूदा डा पिप दुम्शो १५ बर्स दुम्शो बाक्माक्त। मिनु येरोबाम ४१ बर्स सासन पवा बाक्त। होसे १:१; आमोस १:१

24 मेकोमी परमप्रभु यावे आ डोंइती मार मरिम्शो बाक्मे, मेको पवा बाक्त। मिनु इस्राएली आन कली पाप पपाइक्ब नेबात आ तौ येरोबाम आ लांम गाक्माक्त। मिनु मेकोमी येरोबाम आ लां मप्रोना बाक्त। १राजा १२:२८-३०

25 मिनु परमप्रभु यावे आ गेय पाइब नु आ लोत्र पाइब इस्राएल डा गाथ-हफेर सहर डा अमीत्ते आ तौ योना आ पशो परमप्रभु यावे, इस्राएली आन परमप्रभु आ लोत्र गाम्माक्त। लेबो-हमाथर रे अराबाह डा समुन्द्र सम्म इस्राएल डा सांद लेंशा सेल्ब येरोबाम बाक्माक्त। योना १:१

26 मारदे हना परमप्रभु यावेमी इस्राएली आन कली शुश श्येत जशो तवा बाक्त। वाइल दुम्शो नु मदुम्शो सुइ मलीमा बाक्त। इस्राएली आन कली वारच पाइब सुइ मबाक्मा बाक्त।

27 परमप्रभु यावेमी इस्राएल कली रागी रे क्याम्चा मदेंतीके, मेकोमी योआश आ तौ येरोबाममी मेको आन कली प्रोंडमी बाक्त। २राजा १३:५

28 येरोबाम आ पशो अरु गेय, मेको आ पशो नेल्ल, आ सक्ति, मेको आ लडाइ पशो नु दोपा यहूदा डा दमस्कस नु हमाथ सहर लेंशा इस्राएल के सेला, मार, मेको इस्राएल डा पिप आन इतिहासम ब्रेक्शो मबाक्बा डा?

29 मिनु येरोबाम बेक्माक्त। मिनु इस्राएल डा पिप नु थिम्चा पुंडसे बाक्त। मिनु मेको आ पा डा आ तौ जकरिया पिप दुम्माक्त। २राजा १५:८

## 15

यहूदा डा पिप अजारयाह

1 मिनु अमस्याह आ तौ अजारयाह यहूदा डा पिप दुम्माक्त। मेना येरोबाम इस्राएल डा पिप दुम्शो २७ बर्स दुम्शो बाक्माक्त। २इतिहास २६:-; २राजा १४:२१

2 मिनु अजारयाह पिप दुम्मेनु १६ बर्स दुम्शो बाक्माक्त। मिनु मेकोम यरूसलेममी ५२ बर्स सासन पवा बाक्त। मेको आ ममा आ नें येकोल्याह बाक्माक्त। मेको यरूसलेम डा बाक्माक्त।

3 मेकोम आ आफ अमस्याह खोदेशो पा, परमप्रभु यावे आ डोंइती मार रिम्शो बाक्मे, मेको पवा बाक्त।

4 मो हना यो मेकोमी डांडाम बाक्शो थानपुकी मताइक्ता बाक्त। मेना सम्म मुरपुकीम मेकेर चढ्देतीक चढ्देशा थूप चोत्रमे बाक्त। २राजा १४:३-४

5 मिनु परमप्रभु यावेमी पिप कली कोत्र मुपदा बाक्त। मिनु मेको मबेक्म सम्म आ कान खिं काम बाक्चा माल्दा बाक्त। मिनु पिप आ तौ योथाममी पिप आ दरवार डा मारेइ मारेइ गेय पशा, राज्य डा मुर आन कली सासन पवा बाक्त। लेवी १३:४६

6 अजारयाह आ पशो अरु गेय, मेको आ पशो नेल्ल, मार, मेको यहूदा डा पिप आन इतिहासम ब्रेक्शो मबाक्बा डा?

7 मिनु अजारयाह बेक्माक्त। मिनु आ किकी पिपी नु दाऊद आ सहरम थिम्चा पुंडसे बाक्त। मिनु मेको आ पा डा आ तौ योथाम पिप दुम्माक्त। २राजा १५:३२

इसाएल डा पिप जकरिया

8 मिनु येरोबाम आ तौ जकरिया सामरीयाम इस्राएल डा पिप दुम्माक्त। मेना अजारयाह यहूदा डा पिप दुम्शो ३८ बर्स दुम्शो बाक्माक्त। मिनु जकरियामी ६ महिना सासन पवा बाक्त। २राजा १४:२९

9 मेकोमी आ किर्की पिपी खोदेशो पा, परमप्रभु यावे आ डोंइती मार मरिम्शो बाक्मे, मेको पवा बाक्त। मिनु इस्राएली आन कली पाप पपाइक्व नेबात आ तौ येरोबाम आ लांम गाक्माक्त। १राजा १२:२८-३०; आमोस ७:९

10 याबेश आ तौ शाल्लुममी जकरिया कली साइक्वा मला बाक्त। मिनु शाल्लुममी मेको कली मुर आन दातेमीन तुप्शा सदा बाक्त। मिनु मेको आ पा डा शाल्लुम पिप दुम्माक्त।

11 जकरिया आ पशो अरु गेय, मेको आ पशो नेल्ल, इस्राएल डा पिप आन इतिहासम ब्रेक्शो बाक्ब।

12 मोपा परमप्रभु यावेम येहू कली “इ मुर ४ पाला सम्म पिप दुम्मीम” देशो लोत्र गाम्माक्त। मिनु मोदेशोन दुम्माक्त। २राजा १०:३०

इसाएल डा पिप शाल्लुम

13 मिनु याबेश आ तौ शाल्लुम सामरीयाम पिप दुम्माक्त। मेना उज्जीयाह यहूदा डा पिप दुम्शो ३९ बर्स दुम्शो बाक्माक्त। मिनु शाल्लुममी सामरीया सहरम महिना का सासन पवा बाक्त।

14 मेको नोले गादी आ तौ मेनाहेम तिरचा सहर रे सामरीयाम कुमाक्त। मिनु मेकोमी याबेश आ तौ शाल्लुम कली तुप्शा सदा बाक्त। मिनु मेको कली साइश्शा, आ पा डा पिप दुम्माक्त।

15 शाल्लुम आ पशो अरु गेय, मेको आ पशो नेल्ल नु जकरिया कली साइश्शो मेको इस्राएल डा पिप आन इतिहासम ब्रेक्शो बाक्ब।

16 मेना मेनाहेममी तिरचा सहर रे लाइश्शा, तिफसाह नु मेको आ एर ओंथ बाक्शो रागी नेल्ल आन कली लडाइ तोव्रमी बाक्त। मारदे हना मेकोपुकीम मेको कली ठेयब लाप्चो रोक्शा मंगेमे बाक्त। मेकोम तिफसाह कली खतम सेला बाक्त। मिनु आल कुरशो मीश मुर नेल्ल आन कोव्रज पाक्मी बाक्त। तिफसाह ताप्पुआह सहर आ हिबू नें बाक्ब। यहोसु १२:२४; २राजा ८:१२

इसाएल डा पिप मेनाहेम

17 गादी आ तौ मेनाहेम इस्राएल डा पिप दुम्माक्त। मेना अजारयाह यहूदा डा पिप दुम्शो ३९ बर्स दुम्शो बाक्माक्त। मिनु मेनाहेम सामरीयाम १० बर्स सासन पवा बाक्त।

18 मेकोमी परमप्रभु यावे आ डोंइती मार मरिम्शो बाक्मे, मेको पवा बाक्त। मिनु मेकोमी ब्रोंडम सम्म इस्राएली आन कली पाप पपाइक्व नेबात आ तौ येरोबाम आ लां मप्रोना बाक्त।

19 मिनु अस्सुर डा पिप पुलमी मेको रागी कली लडाइ तोवा बाक्त। मिनु मेनाहेममी आ राज्य बोल्यो सेल्चा कली, पुल कली हजार का टलेन्ट, चांदी गेवा बाक्त। टलेन्ट का ३४ किलो बाक्ब। २राजा १५:२९

20 मेनाहेममी मेको क्येट इस्राएल डा शोंप पाइश्शो मुर रे पोक्गा बाक्त। मिनु मेकेर डा मुरपुकीमी अस्सुर डा पिप कली ५० शेकेल चांदी गेवा माल्बाक्मा बाक्त। मोपतीके अस्सुर डा पिप मेको रागीम मबाक्थु, आ रागी लेशशा लमाक्त। शेकेल का ११.५ ग्राम खोदेशो बाक्ब। २राजा २३:३५

21 मेनाहेम आ पशो अरु गेय, मेको आ पशो नेल्ल, मार, मेको इस्राएल डा पिप आन इतिहासम ब्रेक्शो मबाक्बा डा?।

22 मिनु मेनाहेम बेक्माक्त। मिनु मेको आ पा डा आ तौ पेकाहीयाह पिप दुम्माक्त।

इसाएल डा पिप पेकाहीयाह

23 मिनु मेनाहेम आ तौ पेकाहीयाहम सामरीयाम इस्राएल डा पिप दुम्माक्त। मेना अजारयाह यहूदा डा पिप दुम्शो ५० बर्स दुम्शो बाक्माक्त। मिनु पेकाहीयाह बर्स निक्शी सासन पवा बाक्त।

24 मेकोमी परमप्रभु यावे आ डोंइती मार मरिम्शो बाक्मे, मेको पवा बाक्त। मिनु इस्राएली आन कली पाप पपाइक्व नेबात आ तौ येरोबाम आ लांम गाक्माक्त।

25 मिनु मेको आ लडाइ पाइब आन कप्तान रेमाल्याह आ तौ पेकाहमी मेको पिप कली साइक्वा मला बाक्त। मिनु मेकोम गिलाद डा ५० जना मुर आन कली लाइश्शा सामरीया डा पिप पेकाहीयाह आ दरवारम ओत्रशा, मेको कली सदा बाक्त। मिनु अरगोब नु अरीएह आस कली यो सांडसी बाक्त। मोपा पेकाह आ पा डा पिप दुम्माक्त। २राजा १५:१०, १५:३०

26 पेकाहीयाह आ पशो अरु गेय, मेको आ पशो नेल्ल, इस्राएल डा पिप आन इतिहासम ब्रेक्शो बाक्ब।

इसाएल डा पिप पेकाह

27 रेमाल्याह आ तौ पेकाह सामरीयाम इस्राएल डा पिप दुम्माक्त। मेना अजारयाह यहूदा डा पिप दुम्शो ५२ बर्स दुम्शो बाक्माक्त। मिनु पेकाहमी २० बर्स सासन पवा बाक्त।

28 मेकोमी परमप्रभु यावे आ डोंइती मार मरिम्शो बाक्मे, मेको पवा बाक्त। मिनु इस्राएली आन कली पाप पपाइक्व नेबात आ तौ येरोबाम आ लांम गाक्माक्त। मिनु मेकोमी येरोबाम आ लां मप्रोना बाक्त।

29 इस्राएल डा पिप पेकाहमी सासन पवा ना अस्सुर डा पिप तिग्लात-पिलेसेरमी लडाइ तोशा, इयोन, आबेल-बेथ-माकाह, यानोह, केदेश, हासोर, गिलाद, गालील रागी नु नापताली आ रागी नेल्ल आ के सेल्शा, मेकेर डा मुर आन कली ग्याइश्शा अस्सुर लाइक्मी बाक्त। १इतिहास ५:२६

30 मिनू एलाह आ तौ होशेआमी रेमाल्याह आ तौ पेकाह कली साइक्चा मला बाक्त। मिनू पेकाह कली तुप्शा सदा बाक्त। मिनू मेको आ पा डा पिप दुम्माक्त। मेना यहूदामी उज्जीयाह आ तौ योथाम ससासन पशो २० बर्स दुम्शो बाक्माक्त। २राजा १७:१; २राजा १५:२५

31 पेकाह आ पशो अरु गेय, मेको आ पशो नेल्ल इसाएल डा पिप आन इतिहासम ब्रेक्शो बाक्ब।

यहूदा डा पिप योथाम

32 मिनू उज्जीयाह आ तौ योथाम यहूदा डा पिप दुम्माक्त। मेना रेमाल्याह आ तौ पेकाह इसाएल डा पिप दुम्शो बर्स निकशी दुम्शो बाक्माक्त। २इतिहास २७:१-७

33 योथाम पिप दुम्मेनु २५ बर्स दुम्शो बाक्माक्त। मिनू मेकोम यरूसलेमम १६ बर्स सासन पवा बाक्त। मेको आ ममा आ नें येरुशा बाक्माक्त। मेको सादोक आ तमी बाक्माक्त।

34 मेकोम आ आफ उज्जीयाह खोदेशो पा, परमप्रभु यावे आ डोंइती मार रिम्शो बाक्मे, मेको पवा बाक्त। २राजा १५:३,४

35 मो हना यो मेकोमी डांडा डा थानपुकी मताइक्ता बाक्त। मेना सम्म मुरपुकीमे मेकेर चढेतीक चढेशा, धूप चोत्रमे बाक्त। मेकोमी परमप्रभु यावे आ खिं डा उत्तर गे डा टेयब लाप्चो यो सेल्पदा बाक्त।

36 योथाम आ पशो अरु गेय, मेको आ पशो नेल्ल, मार, मेको यहूदा डा पिप आन इतिहासम ब्रेक्शो मबाक्बा डा?

37 मेना परमप्रभु यावेमी अराम डा पिप रेसीन नु रेमाल्याह आ तौ पेकाह आस कली यहूदा नु लडाइ पचा कली क्युकसी बाक्त। २राजा १६:५

38 मिनू योथाम बेक्माक्त। मिनू मेको दाऊद आ सहरम आ किकी पिपी नु थिम्चा पुंडसे बाक्त। मिनू मेको आ पा डा आ तौ आहाज पिप दुम्माक्त।

## 16

यहूदा डा पिप आहाज

1 मिनू योथाम आ तौ आहाज यहूदा डा पिप दुम्माक्त। मेना रेमाल्याह आ तौ पेकाह इसाएल डा पिप दुम्शो १७ बर्स दुम्शो बाक्माक्त। २इतिहास २८:१-६

2 आहाज पिप दुम्मेनु २० बर्स दुम्शो बाक्माक्त। मिनू मेकोमी यरूसलेमम १६ बर्स सासन पवा बाक्त। मेकोमी आ किकी दाऊदम खोदेशो पा परमप्रभु यावे, आ परमप्रभु आ डोंइती मार रिम्शो बाक्मे, मेको मपवा बाक्त।

3 मेको इसाएल डा पिप आन लॉम गाक्माक्त। मेकोमी आ तौ कली चोशा चढेवा बाक्त। मोदेशो ग्रॉग्रा दिशो गेय पशो आ पर्वम परमप्रभु यावेमी डोंइती रागी रागी डा मुर आन कली इसाएल रे गुंडशो बाक्माक्त। लेवी १८:२१

4 मेकोमी डांडा डा थानम, पहाड मेर नु गिग रवा आन पुं नेल्लेमी चढेतीक चढेशा धूप चोवा बाक्त।

5 मिनू अराम डा पिप रेसीन नु इसाएल डा पिप रेमाल्याह आ तौ पेकाहमी यरूसलेम कली लडाइ तोशा पुन्दमे बाक्त। तन्न मेकोम आहाज कली ग्राने मचाप्से बाक्त। यसेया ७:१-९

6 मेना अराम डा पिपमी रेसीन एलाथ डा यहूदी आन कली खेरशा, एलाथ सहर एदोमी आन कली गेवा बाक्त। मिनू एदोम डा मुर मुल सम्म मेकेर बाक्शो बाक्नीम। २राजा १४:२२

7 मिनू आहाजम अस्सुर डा पिप तिगलात-पिलेसेर कली “गो इन गेय पाइब नु इन तौ नड। आं कली लडाइ तोइब अराम नु इसाएल डा पिप रे प्रोंइचा नड। मेकोपुकीम आं कली लडाइ तोशो बाक्नीम” देशा लोत्र कुरब मुर सोइक्ता बाक्त। २इतिहास २८:१६-२७

8 मिनू आहाजमी परमप्रभु यावे आ खिंम बाक्शो नु पिप आ खिंम बाक्शो सुन नु चांदी नेल्ल अस्सुर डा पिप कली कोसेली सोइक्ता बाक्त। १राजा १५:१८

9 मिनू अस्सुर डा पिपमी मेको आ लोत्र नेना बाक्त। मिनू दमस्कस कली लडाइ तोशा मेको आ के सेला बाक्त। मेकोमी मेकेर डा मुर आन कली ग्याइश्शा कीर सहर लाइक्मी बाक्त। मिनू नोले रेसीन कली सदा बाक्त।

10 मिनू पिप आहाज, अस्सुर डा पिप तिगलात-पिलेसेर कली युम्थ दमस्कस लमाक्त। मिनू मेकोमी दमस्कसम चढेतीक का तवा बाक्त। मिनू मेको दोदेशो बाक्मे, मेको नेल्ल ब्रेक्शा चढेब उरीयाह आ बाक्तीक सोइक्ता बाक्त।

11 मिनू चढेब उरीयाहम दमस्कस रे पिप आहाजम सोइश्शो ब्रेक्स खोदेशो पा, चढेतीक का सेला बाक्त। मिनू मेकोमी मेको चढेतीक पिप आहाज दमस्कस रे जाक्चा क्येडा डोंइतीन सेल्ले थुमा बाक्त।

12 मिनू पिप दमस्कस रे लेश्शा जाक्शा, मेको चढेतीक कोत्रडा बाक्त। मिनू पिपम चढेतीक आ नेक्था लशा डोंइसे बाक्त।

13 मेकोम मेकेर चोशा चढेतीके नु अन्न चढेतीके चढेवा बाक्त। मिनू तूचा थोत्रक चढेतीक लुक्शा दुशा बाक्चा आ पर्वम चढेशो आ हुश मेको तार बुइक्ता बाक्त।

14 मेकोमी परमप्रभु यावे आ खिं आ डोंइती बाक्शो कांसा के चढेतीक परमप्रभु यावे आ खिं नु चढेतीक आस दातेम मबाक्ल, दे याक्ता बाक्त। नक चढेतीक लाइश्शा, मेकेर वोदा बाक्त। मेको माइत चढेतीक चहिं उत्तर गे वोदा बाक्त।

15 मेको नोले पिप आहाजमी चढेब उरीयाह कली “एको टेयब नक चढेतीकम सुनी चोशा चढेतीके नु नाकदो डा अन्न चढेतीके, पिप आ चोशा चढेतीके, मेको आ अन्न चढेतीके, रागी डा मुर नेल्ल आन चोशा चढेतीके नु मेको आन अन्न चढेतीके नु तूचा थोत्रक चढेतीके चढेवो। चढेतीकम चोशा चढेतीक नु चढेशो नेल्ल आन हुश बुइक्चा माल्लब। तन्न मेको कांसा के चढेतीके चहिं परमप्रभु यावे कली मारेड लोत्र हिल्लो पची ना गो मेकेर चढेशा हिल्लो पाइनुड” दे मदा बाक्त।

16 मिनू चढेब उरीयाहम पिप आहाज आ देशो नेल्ल पवा बाक्त।



17 मेको नोले पिप आहाजमी चिकतीक बोस आन निल्तीकपुकी मेको आन एर ओंथ डा चिकतीक बोस गुंडपदा बाक्त। मिनु मेको आ नेक्था बाक्शो ब्वाक्कु कुर पतीक टेयब बोस कली ब्यफ आन तार रे गुंडपदा बाक्त। मिनु मेको टेयब बोस कली फुल्लुम तिकशा वोडक्पदा बाक्त। १ राजा ७:२३-३९

18 मेकोमी परमप्रभु यावे आ खिम सेल्शो नाडक्तीक नाक्त कली सेल्शो टेयब कोठा नु परमप्रभु यावे आ खिं डा लाडगा पिप आ खिं रे ओव्रतीक अस्सुर डा पिप आ पब्रम अर्को सेला बाक्त।

19 आहाज आ पशो अरु गेय नु मेको आ पशो नेल्ल, मार, मेको यहूदा डा पिप आन इतिहासम ब्रेक्शो मबाक्बा डा?

20 मिनु आहाज बेक्माक्त। मिनु दाऊद आ सहरमी आ किकी पिपी नु थिन्चा पुंडसे बाक्त। मिनु मेको आ पा डा आ तौ हिज्कीयाह पिप दुम्माक्त। २ राजा १८:१

## 17

इसाएल डा पिप होशेआ

1 एलाह आ तौ होशेआ सामरीयाम इसाएल डा पिप दुम्माक्त। मेना यहूदा डा पिप आहाज पिप दुम्शो १२ बर्स दुम्शो बाक्माक्त। मिनु होशेआम ९ बर्स सासन पवा बाक्त। २ राजा १८:९-१२; २ राजा १५:३०

2 मेकोम परमप्रभु यावे आ डोंइती मार मरिम्शो बाक्मे, मेको पवा बाक्त। तन्न आ डोंइती डा इसाएल डा पिप आन पशो खोदेंशो चहिं मपवा बाक्त।

3 मिनु अस्सुर डा पिप शाल्मानेसेर होशेआ कली लडाइ तोथ जाक्माक्त। मिनु होशेआमी मेको कली तिरो थाप्या माल्दा बाक्त।

4 तन्न अस्सुर डा पिपमी होशेआम आ कली मटिशो तवा बाक्त। मारदे हना मेकोमी इजीप्त डा पिप सो कली लोव्र कुरब मुर सोडशशो तुडक्ता बाक्त। मिनु बर्स बर्सम गेतीक तिरो यो अस्सुर डा पिप कली मथाप्ता बाक्त। मोपतीके अस्सुर डा पिपमी मेको कली ग्याइशशा जेल्खानम चोक्गा बाक्त। होसे १२:२

5 मिनु अस्सुर डा पिपम रागी नेल्ल आन कली लडाइ तोशा, सामरीया जाक्माक्त। मिनु मेको कली लडाइ तोशा, बर्स सां सम्म पुम्दा बाक्त। यसैया २८:२

6 अस्सुर डा पिपमी होशेआम सासन पशो ९ बर्स दुम्मेनु, सामरीया कली ग्रामाक्त। मेकोमी इसाएल डा मुर आन कली ग्याइशशा अस्सुर लाइक्मी बाक्त। मिनु मेको आन कली हालाह सहर नु गोजान डा खोला हाबोर आ नेक्था नु मादी आन सहरम वोडक्मी बाक्त।

इसाएली ग्याइक्चा पुंडसीशो

7 मारदे मोदेंशो दुम्शो बाक्त देशा हना, परमप्रभु यावे, आन परमप्रभुम मेको आन कली इजीप्त रागी डा पिप फाराओ आ गुड रे गुंडशा चाक्गा रे इसाएलीपुकीम देवी देवता आन कली पूजा पशो बाक्मा बाक्त।

8 मेकोपुकीम परमप्रभु यावेमी आन डोंइती गुंडशो रागी रागी डा मुर आन पतीके पशो बाक्मा बाक्त। इसाएल डा पिप आन पशो मरिम्शो गेय नेल्ल पशो बाक्मा बाक्त। मेकोपुकीमी परमप्रभु यावे कली मटिशो बाक्मा बाक्त। २ राजा १६:३

9 इसाएल डा मुरपुकीम परमप्रभु यावे, आन परमप्रभु आ डोंइती खुडशशा मरिम्शो पशो बाक्मा बाक्त। खाल पतीक लाइशशो खिं रे सहर नेल्लेम आंम कली थान सेल्मे बाक्त।

10 मेकोपुकीम डांडा नेल्ल नु शुश गिग रवा आन पुंमी खुक्शो फुल्लु नु मूर्ति पाइशशो थामपुकी सेल्मे बाक्त। २ राजा १६:४; १ राजा १४:२३

11 मेकोपुकीम परमप्रभु यावेमी मेको आन डोंइती रे गुंडशो रागी रागी डा मुर खोदेंशो पा डांडा डा थानम धूप चोव्रमे बाक्त। मेकोपुकीम परमप्रभु यावे आ अरेशो काइ मटिथु, गाइक्पदमे बाक्त।

12 मेकोपुकीमी मूर्ति पूजा पामे बाक्त। डोंइती परमप्रभु यावेमी “मोदेंशो पचा मटुम्ब” देंशो बाक्माक्त।

13 मो हना यो परमप्रभु यावेमी आ लोव्र पाइब नु आ कोंइतीक ताइब नेल्ल रे पा इसाएल नु यहूदा डा मुर आन कली “गे इन मरिम्शो लां रे लेतीन। आं शेंशो, आं फुल्लुम मुशा ब्रेक्शो लोव्र नु इन किकी पिपी आन कली गेशा आं अरेशो नेल्ल पने” दे आ गेय पाइबपुकीमी मेको आन कली थाप्पा हिंच कोंइपदा बाक्त।

14 तन्न मेकोपुकीम आन थमा मसुडक्ब किकी पिपी खोदेंशो पा परमप्रभु यावे आ लोव्र मनेंथु, काइ मटीमे बाक्त।

15 मेकोपुकीम मेको आ फुल्लुम मुशा ब्रेक्शो लोव्र, मेको आन किकी पिपी नु पशो कबल नु हिंच कोंइशो ममिम्तमे बाक्त। मेकोपुकी शोर गाक्शो मूर्ति आन नोले खोइशशा, आंमा यो शोर गाक्शो दुम्शो बाक्मा बाक्त। मेको आन एर ओंथ बाक्ब रागी रागी डा मुर आन नोले खोदमे बाक्त। परमप्रभु यावेमी मेको आन कली “गे मेको आन पशो खोदेंशो मपने” देशा, अरेशो बाक्माक्त। प्रस्थान २३:२४

16 मेकोपुकीम परमप्रभु यावे, आन परमप्रभु आ शेंशो मटिथु, आंम कली यपाइशशा बाछा निक्शी नु मूर्ति पाइशशो थाम का सेल्समा बाक्त। मेकोपुकी नां, तास्ला नु सोरुल आन डोंइती बाक्मा बाक्त। मिनु बाल देवता कली पूजा पामे बाक्त। १ राजा १२:२८; १ राजा १६:३३

17 मेकोपुकीम आंम तमी तौ आन कली क्योरशा चोशा चढेमे बाक्त। मिनु लिंक्यु कोव्रशा, मन्तर तन्तर पामे बाक्त। मिनु परमप्रभु यावे आ डोंइती मार मरिम्शो बाक्मे, मेको पना पन बाक्मा बाक्त। मिनु मेको कली गाइक्पदमे बाक्त। लेवी १८:२१

18 मोपतीके परमप्रभु यावे इसाएल आ पब्रम थाप्पा गाइक्ता बाक्त। मिनु मेको आन कली आ डोंइती रे खेरमी बाक्त। यहूदा आ थर डा मुर ला प्रोइशा वोडक्चा पुंडसमा बाक्त।

19 मिनु यहूदा आ मुरपुकीम यो परमप्रभु यावे, आन परमप्रभु आ शेंशो लोत्र मटीमे बाक्त। मेकोपुकीम इस्राएली आन पशो पामे बाक्त।

20 मोपतीके परमप्रभु यावेम इस्राएल आ चच युड नेल्ल आन कली प्रॉइमी बाक्त। मिनु मेको आन कली सजाइ गेशा, रोइक्ब आन गुडमी गेमी बाक्त। आ डोंइती रे मखेरा सम्म मो पवा बाक्त।

21 मेकोमी “इस्राएली आन कली दाऊद आ खिं रे तिल्लुड” दे नेबात आ तौ येरोबाम कली पिप सेल्पदा बाक्त। मिनु येरोबामम इस्राएली आन कली परमप्रभु यावे कली प्रॉइपाइशशा, टेयब पाप पपाइक्मी बाक्त। १राजा १२:२०

22 मिनु इस्राएलीपुकीम येरोबाम आ पपाइशशा पाप नेल्ल पामे बाक्त। मिनु मेको मप्रॉन्मे बाक्त।

23 परमप्रभु यावेमी आ गेय पा, आ लोत्र पाइबपुकी रे डोंइती देशो खोदेशो पा इस्राएली आन कली आ डोंइती रे खेरमी बाक्त। मोपतीके इस्राएलीपुकी आंम आन रागी रे अस्सुर रागीम ग्याइशशा लाइक्का पुंडिसमा बाक्त। मिनु मुल सम्म मेक उइ बाक्शो बाक्नीमी। ब्यवस्था २८:६३-६४

सामरीयाम अर्को रागी डा मुर वोइशशा

24 मेको नोले अस्सुर डा पिपमी बेबीलोन, कूथाह, अक्वा, हमथ नु सेफारवाइम रे मुरपुकी चाक्मी बाक्त। मिनु मेको आन कली इस्राएली आन पा डा सामरीया डा सहरपुकीम बाक्पाइक्मी बाक्त। मेकोपुकी सामरीया आंम के सेल्शा मेकेर बाक्मा बाक्त।

25 मिनु डोंइती मेकोपुकी मेकेर बाक्मानु, परमप्रभु यावे कली ममानेमे बाक्त। मोपतीके परमप्रभु यावेमी मेको आन दातेमी गुप्स सोइक्तीमी बाक्त। मिनु मेको गुप्सपुकीम कोइ कोइ आन कली सदमे बाक्त। होसे १३:८

26 मिनु मेकोपुकीमी अस्सुर डा पिप कली “गे इन सोइशशा रागी रागी डा मुर सामरीया डा सहरम बाक्नीम। मेकोपुकीमी मेको रागी डा परमप्रभु आ अरेशो मतुइक्नीम। मोपतीके परमप्रभुम मेको आन दातेमी गुप्स सोइक्ताक्व। मारदे हना मेकोपुकी मेको रागी डा परमप्रभु कली मतुइक्तीके टेयब सेल्स मजोक्तीके, मेको गुप्समी मुर आन कली साइक्तेक्म” दे लोत्र कुरब मुर सोइक्तेमे बाक्त।

27 मिनु अस्सुर डा पिपमी “सामरीया रे ग्याइशशा लाइशशा अस्सुर रागीम चाक्शो तेकोइ चढेब का मेक बाक्का कली लेशशा सोइक्तेमक्व। मिनु मेकोमी मेको रागी डा परमप्रभु आ अरेशो लोत्र मुर आन कली शेंचा माल्ब” दे अरेवा बाक्त।

28 मोपतीके डोंइती सामरीया रे ग्याइशशा लाइशशा चढेब का बेथेलम लेशशा जाक्शा, मेकेर बाक्माक्व। मिनु मेकोमी मुर आन कली परमप्रभु यावे कली दोपा टेयब सेल्शा माल्नीमी मेको शेंदीमी बाक्त।

29 मो हना यो रागी रागी डा मुरपुकीम आंम आन बाक्तीके सहर सहरम आन देवी देवता सेल्शा, मेको डांडा डा थानम वोदमे बाक्त। मोपा आन बाक्शा सहर नेल्लेमी सामरीया डा मुर आन सेल्शो डांडा डा थान यो बाक्मा बाक्त।

30 बेबीलोन डा मुरपुकीम आन देवता सुक्कोथ-बेनोथ सेल्मे बाक्त। कूथ डा मुरपुकीम नेरगल सेल्मे बाक्त। हमथ डा मुरपुकीम अशीमा सेल्मे बाक्त।

31 अक्वा सहर डा मुरपुकीम निभाज नु तारतक सेल्मे बाक्त। मिनु सेफारवाइम डा मुरपुकीमी आन आल आन कली आन देवता अद्राम्मेलेक नु अनाम्मेलेक आस कली चोशा चढेमे बाक्त। २राजा १७:३१

32 मेकोपुकीम परमप्रभु यावे कली यो टेयब सेल्मे बाक्त। मिनु डांडा डा थानमी अरु मुर आन कली चढेब सेल्मे बाक्त। मेकोपुकीमी डांडा डा थानपुकीम मुर आन पर्वम चढेमे बाक्त। १राजा १२:३१

33 मिनु मोपा मेकोपुकीम परमप्रभु यावे कली टेयब सेल्शा, आंम आन देवी देवता आन कली यो पूजा पामे बाक्त। तेको रागी रे चाक्शो बाक्मा, मेको आन देवी देवता आन पतीक पशा, पूजा पामे बाक्त।

34 मेकोपुकीमी मुलाक्व सम्म मोदेशो पना पन बाक्नीम। मिनु मेकोपुकीमी परमप्रभु यावे कली मान पा महिंनीम। मेको आ फुल्लुम मुशा ब्रेक्शो लोत्र, आ निसाफ पतीक लोत्र, आ अरेशो नु आ शेंशो मपामे बाक्त। परमप्रभु यावेमी मोदेशो पचा माल्नीनी, दे इस्राएल माइशशा याक्ब आ आल आन कली अरेशो बाक्माक्व। उत्पती ३२:२९

35 परमप्रभु यावेमी इस्राएली नु कबल का पवा बाक्त। मिनु मेकोमी इस्राएली आन कली “गेपुकीम देवी देवता आन कली ममानेन। मेको आन डोंइती मबपीन। मेको आन गेय मपने। मेको आन कली मारेड मचढेन। प्रस्थान २३:२४

36 मिनु आ सक्ति नु आ क्युकशो गुडम इन कली इजीप्ट रे गुंइशा एक चाक्ब परमप्रभु यावे कली ला टेयब सेलीन। मेको आ डोंइती ला बाप्पीन। मेको कली ला चढेचा माल्नीनी” देमाक्व।

37 मेकोमी इन कली “आं फुल्लुम मुशा ब्रेक्शो लोत्र नु आं पतीके लोत्र, आं अरेशो नु आं शेंशो लोत्र नेल्ल शुश होस पा गेना हना यो पचा माल्नीनी। गेपुकीमी देवी देवता आन कली मानेचा मदुम्नीनी।

38 गेपुकीम गो नु पशो कबल मप्रेंदीन। मिनु देवी देवता आन कली मानेचा मदुम्नीनी।

39 नन्न गेपुकीम परमप्रभु यावे, इन परमप्रभु कली ला टेयब सेलीन। मेकोमी इन कली इन जोरी सत्रु आन गुड रे प्रॉइब” दे अरेशो बाक्माक्व। ब्यवस्था ६:१२-१९

40 मो हना यो मेकोपुकीम मेको लोत्र मनेन्मे बाक्त। मिनु मेको आन डोंइती डा पशो खोदेशो पामे बाक्त।

41 मेको रागी रागी डा मुरपुकीमी परमप्रभु यावे कली टेयब सेल्शा यो आन मुशा सेल्शो मूर्ति आन कली पूजा पामे बाक्त। मुल सम्म आन चच युडमी आन किकी पिपीम पशो खोदेशो पना पन बाक्नीम।

## 18

यहूदा डा पिप हिज्कीयाह

२इतिहास २९:-३१:-

1 आहाज आ तौ हिज्कीयाह यहूदा डा पिप दुम्माक्त। मेना एलाह आ तौ होशेआ इस्राएल डा पिप दुम्शो बर्स सां दुम्शो बाक्माक्त। २राजा १६:२०

2 मिनु हिज्कीयाह पिप दुम्मेनु, २५ बर्स दुम्शो बाक्माक्त। मेकोमी यरूसलेम २९ बर्स सासन पवा बाक्त। मेको आ ममा आ नें आबी बाक्माक्त। मेको जकरिया आ तमी बाक्माक्त।

3 मेकोम आ किंकी दाऊदम खोदेशो पा, परमप्रभु यावे आ डोंडती मार रिम्शो बाक्मे, मेको पवा बाक्त। २राजा २०:३

4 मेकोम डांडा डा थानपुकी प्रेशा, ताइक्तीमी बाक्त। खुक्शो फुल्लु जिक्शा, मूर्ति पाइश्शो थाम क्योरशा ताइक्तीमी बाक्त। मेकोमी मोसा आ सेल्शो कांसा के बुस्स कली टुक्रा टुक्रा पवा बाक्त। मारदे हना मेना सम्म इस्राएलीपुकीम मेको कली धूप चोइबाक्मा बाक्त। मेकोपुकीम मेको कली नहुश्तन देंबाक्मा बाक्त। २राजा १५:३५; गन्ती २१:८-९

5 हिज्कीयाहम परमप्रभु यावे, इस्राएली आन परमप्रभु कली थमा सुदा बाक्त। मेको आ क्येडा डोंडती डा नु आ क्येडा नोले डा यहूदा डा पिप नेल्ले मेको खोदेशो मदुम्मा बाक्त। २राजा २३:२५

6 मेकोमी परमप्रभु यावे आ नोले खोइक्चा गेनायो मप्रोना बाक्त। मिनु परमप्रभु यावेमी मोसा कली शेंशो लोत्र नेल्ल टिवा बाक्त।

7 मिनु परमप्रभु यावे मेको नु बाक्माक्त। मेको आ पशो गेय नेल्लेमी रिम्शो दुम्माक्त। मेको अस्सुर डा पिप कली मटीब दुम्माक्त। मिनु मेको आ देशो मपवा बाक्त।

8 मेकोमी पलिस्ती आन रागी गाजा रे खाल पाइब आन लाइश्शो खिं नु गारो हिरशो सहर नेल्ल ग्रामाक्त।

सामरीया खतम दुम्शो

9 हिज्कीयाहमी सासन पशो ४ बर्स दुम्माक्त। इस्राएल डा पिप एलाह आ तौ होशेआम सासन पशो ७ बर्स दुम्मेनु, अस्सुर डा पिप शाल्मानेसेरमी सामरीया कली लडाइ तोशा पुम्दा बाक्त। २राजा १७:३-६

10 मिनु अस्सुरीपुकीमी मेको सहर कली बर्स सां सम्म पुशा, आन के सेल्मे बाक्त। मेना हिज्कीयाह पिप दुम्शो ६ बर्स नु इस्राएल डा पिप होशेआ पिप दुम्शो ९ बर्स दुम्शो बाक्माक्त। मिनु अस्सुर डा पिपमी सामरीया ग्रामाक्त।

11 मिनु मेकोमी इस्राएली आन कली ग्याइश्शा अस्सुर लाइक्मी बाक्त। मिनु मेको आन कली हालाह, गोजान डा खोला हाबोर आ नेक्था नु मादी आन सहरम बाक्पाइक्मी बाक्त।

12 मारदे हना मेकोपुकीमी परमप्रभु यावे, आन परमप्रभु आ देशो मटिथु, आ कबल पशो हेंथे पशो बाक्मा बाक्त। परमप्रभु यावे आ गेय पाइब मोसामी शेंशो लोत्र मनेशो नु मटिशो बाक्मा बाक्त।

यरूसलेम कली लडाइ तोशो

२इतिहास ३२:१-१९; यसेया ३६:-

13 पिप हिज्कीयाहमी सासन पशो १४ बर्स दुम्मेनु, अस्सुर डा पिप सन्हेरीबमी यहूदा डा गारो हिरशो सहर नेल्ल कली लडाइ तोशा ग्रामाक्त।

14 मोपतीके यहूदा डा पिप हिज्कीयाहमी लाकीश सहरम बाक्ब अस्सुर डा पिप कली “गो मरिम्शो पाता। आं रागी रे लेतीन। मिनु गे आं कली मार देंनीनी, मेको पाइनुड” दे लोत्र कुरब मुर सोइक्ता बाक्त। मिनु अस्सुर डा पिपम हिज्कीयाह कली सहे सां टलेन्ट चांदी नु ३० टलेन्ट सुन थाप्पदा बाक्त। टलेन्ट का ३४ किलो बाक्ब।

15 मिनु हिज्कीयाहमी परमप्रभु यावे आ खिं नु पिप आ खिंम थिरशो चांदी नेल्ल मेको कली गेवा बाक्त। २राजा १६:८

16 मेना हिज्कीयाहमी परमप्रभु यावे आ खिं डा लाप्चो नु लाप्चो डा शीम आंम आ गिल्शो सुन नेल्ल शोल्शा, अस्सुर डा पिप कली गेवा बाक्त।

सन्हेरीबम हिंच कोंडिशो

17 मिनु अस्सुर डा पिपम लडाइ पाइब आन नेल्ल क्येडा ठेयब मुर तारतान, दरवार डा ठेयब मुर राब्सारीस, पिप आ ठेयब गेय पाइब राब्शाके नु ठेयब हूल का लडाइ पाइब आन कली लाकीश रे पिप हिज्कीयाह आ बाक्तीक यरूसलेम सहरम सोइक्तीमी बाक्त। मिनु मेकोपुकी यरूसलेम जाक्मा बाक्त। मिनु आइक्था दोम्ली डा ब्वाक्कु शाइक्तीक वा मुरब आन लॉमी जाक्शा राम्मा बाक्त। यसेया ७:३

18 मिनु मेकोपुकीम पिप कली ब्रेत्मे बाक्त। मिनु पिप आ खिं डा ठेयब मुर हिल्कीयाह आ तौ दरवार कोत्रब एल्याकीम, ब्रेक्ब शेब्ना नु आसाफ आ तौ पिप आ लोत्र कुरब योआह मेको आन कली गुम्थ जाक्मा बाक्त।

19 मिनु राब्शाकेमी मेको आन कली “हिज्कीयाह कली, ठेयब पिप, अस्सुर डा पिपमी, मार देंब देशा हना, गे सु कली तशा, महिंब बाक्नीनी?

20 गे लोत्र पा ला लडाइ ग्रानीनी डा? सुम इन कली वारच पा आं क्येडा महिंथु, आं कली मटिपदा?

21 गे इजीप्त रागीम इन कली वारच पाइब, दे मिम्नीनी। मेको जिक्शो किन्दा खोदेशो बाक्ब। मेकोमी ‘वारच पाइब’ देंब आन गुड थोक्ब। ‘मेकोमी वारच पाइब’ देंब नेल्ल आन कली इजीप्त डा पिप फाराओ मोदेशोम बाक्ब।

22 तन्न गे आं कली ‘गो परमप्रभु यावे, आंइ परमप्रभु आ मुर नकी। मेकोम आंइ कली वारच पाइब’ देंतीनी हना, मार, हिज्कीयाहम मेको डांडा डा थान नु चढेतीक प्रेशा यहूदा नु यरूसलेम सहर डा मुर आन कली ‘गेपुकीम यरूसलेमम बाक्शो चढेतीकम ला चढेचा मालनीनी’ मदेंम डा? ब्यवस्था १२:१४

23 मुल आं होत्रप अस्सुर डा पिप नु गारीन। इन के मिश डा शारा डोइक्ब बाक्तेकम हना, गो इन कली हजार निक्शी शारा गेनन्नी।

24 आं होत्रप आ नेल्ल क्येडा आइक्च लडाइ पाइब आन ठेयब मुर का कली ला यो दोपा नोले शोइक्पाइक्ने चाप्नीनी डा? गे बग्गी नु शारा डोइक्ब आन पर्वम इजीप्त कली थमा सुइश्शो बाक्नीनी।

25 मिनु अर्को लोत्र, मार गो एको रागीम परमप्रभु यावे नु सल्ला मपथु खतम पोक्थ जाक्डा डा? परमप्रभु यावेमी आं कली 'एको रागीम लडाइ पा खतम पोक्को' देशो बाक्ब" देमाक्त।

26 मिनु हिज्कीयाह आ तौ एल्याकीम, शेब्ना नु योआहमी मेको लडाइ पाइब आन टेयब मुर राब्शाके कली "शिशी पा, इन वाइल गोपुकी नु अरामी लोत्रम ब्वाक्कीन। मारदे हना गो मेको लोत्र रुप्नीकी। गारोम बाक्ब मुर नेल्लेम नेंचा डा पा यहूदी लोत्रम म्बवाक्कीन" देमा बाक्त।

27 तन्न राब्शाकेम मेको आन कली "मार, आं होत्रपमी एको लोत्र इन कली नु इन होत्रप कली ला नेंपाइक्चा कली सोइश्शो बाक्बा डा? मार, गारोम बाक्ब मुर नेल्ल आन कली यो ममाइ डा? गोपुकीम खोदेशो पा, मेकोपुकीम यो आन खी चारनाक जचा तूचा माल्नीम" देमाक्त।

28 मिनु मेको लडाइ पाइब आन टेयब मुर राब्शाके राप्शा यहूदी लोत्रमी टेयब सेंदा पा "टेयब पिप, अस्सुर डा पिप आ लोत्र नेनीन।

29 मेकोमी मार दैत देशा हना 'हिज्कीयाहमी इन कली जोल पशो थमा मसुतीन। मारदे हना मेकोमी इन कली आं गुड रे प्रोइने मचाप्ब' दैत।

30 हिज्कीयाहमी 'परमप्रभु यावेम थमा पा इं कली श्येत रे प्रोइब। मिनु एको सहर अस्सुर डा पिप आ गुडम मडुम्ब' दे इन कली परमप्रभु यावे कली थमा मसुइक्पदल।

31 हिज्कीयाह आ लोत्र मनेनीन। अस्सुर डा पिपम 'गो नु गारीन। मिनु ग्रूशा आं बाक्तीक जाक्कीन। मिनु गोपुकीमी इन अडगुर रू डा अडगुर नु इन रवा डा फोवशी जचा ताइनीनी। इन इनार डा ब्वाक्कु तूचा ताइनीनी। १राजा ५:५

32 गो जाक्शा इन कली आंम इन रागी खोदेशो रागीम लाइक्नन्नी। मेको रागी अन्न नु अडगुर शांबु, शोब्ले नु अडगुर रू, तेल रवा नु खुदो बाक्शो रागी बाक्ब। गोपुकी बेक्तीक आ पा डा ब्रोंडतीक योत्रडीन। हिज्कीयाह आ लोत्र मनेनीन, मेकोम इन कली "परमप्रभु यावेमी इं कली प्रोइब" दे जोल पाइब।

33 मार रागी रागी डा तेकोइ देवी देवताम आन रागी कली अस्सुर डा पिप आ गुड रे प्रोइने चाप्शो बाक्नीमी डा? यसैया १०:१०-११

34 हमाथ नु अरपाद डा देवी देवता ते लाक्गमे? सेफारवाइम, हेना नु इव्वाह डा देवी देवता ते बाक्मा? मार, मेकोपुकीम सामरीया कली आं गुड रे प्रोइने चाप्मे डा?

35 मार, मेको रागी डा देवी देवता आन दाते डा तेकोइमी आ रागी कली आं गुड रे प्रोइने चबा डा? मिनु परमप्रभु यावेमी यरूसलेम कली आं गुड रे दोपा प्रोइने चाप्बा डा?" " दे इस्राएली आन कली देमाक्त। दानीएल ३:१५

36 तन्न मुर नेल्ल सिकसी पा बाक्शा, लोत्र का यो मलेते बाक्त। मारदे हना पिपमी मेको आन कली "सुडम लोत्र मलेत्चा" दे अरेशो बाक्माक्त।

37 मिनु पिप, हिज्कीयाह आ तौ दरवार कोत्रब एल्याकीम, ब्रेक्ब शेब्ना नु आसाफ आ तौ पिप आ लोत्र कुरब योआहम आन वा खाक्गमे बाक्त। मिनु हिज्कीयाह आ बाक्तीक जाक्शा, राब्शाके आ लोत्र नेंपदमे बाक्त।

## 19

हिज्कीयाहम परमप्रभु नु लोत्र पशो

२इतिहास ३२:२०-२३; यसैया ३७:१-७

1 मिनु पिप हिज्कीयाहम मेको लोत्र नेंशा, आ वा खाक्गा बाक्त। मिनु अरन्डी फेक्शा, परमप्रभु यावे आ खिं लमाक्त।

2 मेकोमी दरवार कोत्रब एल्याकीम, ब्रेक्ब शेब्ना नु टेयब चढेब आन कली अरन्डी फेक्पाइश्शा, परमप्रभु यावे आ लोत्र पाइब आमोज आ तौ यसैया आ बाक्तीकेम सोइक्तीमी बाक्त।

3 मिनु मेकोपुकीमी यसैया कली "हिज्कीयाहमी 'मुलाक्ती श्येत जतीक, हुइक्चा पुंइसीतीक नु मुने दोक्तीक नाक्त बाक्ब। दोपा आल थिचा चिक्शो मीश मुर कली आल थिचा कली बोल मबाक्बा, मोदेशो दुम्शो बाक्ब।

4 परमप्रभु यावे, इन परमप्रभुमी अस्सुर डा पिपमी सोइश्शो मेको राब्शाके आ लोत्र नेल्ल नेंना माइ। आ होत्रप, अस्सुर डा पिपमी ब्रोंडशा बाक्शो परमप्रभु कली शुक्शी पथ सोइश्शो बाक्ब। मिनु परमप्रभु यावे, इन परमप्रभुमी आ नेंशो लोत्र आ पर्वम मेको कली हुइक्बा को। मोपतीके मुल लीशो मुर आन पर्वम प्रार्थना पने' दैत" देमा बाक्त। १सामुएल १७:१०; २राजा १८:३५

5 मिनु पिप हिज्कीयाह आ सोइश्शो गेय पाइबपुकी यसैया आ बाक्तीकेम बाक्मानु,

6 यसैयामी मेको आन कली "परमप्रभु यावेमी इन होत्रप कली 'इ नेंशो लोत्रम महिनो। अस्सुर डा पिप आ गेय पाइबपुकीमी आं कली शुक्शी पशो लोत्र नेंता।

7 गो मेको आ थुंम सोक्त का कुर पाडनुड। मिनु मेकोमी लोत्र का नेंब। मिनु मेको आ रागी लेशशा लाइब। मेकेर गो मेको कली तरवारम साइक्पाइक्नुड' दैत, दे मतीन" दे माइक्मी बाक्त। २राजा १९:९; २राजा १९:३५-३७

8 मिनु राब्शाकेमी "अस्सुर डा पिपमी लाकीश प्रोइतु" देशो लोत्र नेना बाक्त। मिनु मेको लेम्माक्त। मिनु मेकोमी पिप कली लिब्ना नु लडाइ पना पन बाक्शो थिदा बाक्त।

9 मिनु मेको पिपमी "एथीयोपीया डा पिप तिरहाकाह गे नु लडाइ पचा कली पिना पिन बाक्ब" देशो लोत्र नेना बाक्त। मोपतीके मेकोमी यहूदा डा पिप हिज्कीयाह आ बाक्तीकेम लोत्र कुरब मुर सोइश्शा,

10 यहूदा डा पिप हिज्कीयाह कली "यरूसलेम अस्सुर डा पिप आ गुडम मडुम्ब, दे थोक्शा लोत्र पाइब इ थमा सुइश्शो परमप्रभुमी इ कली जोल मपवल।

11 अस्सुर डा पिपमी रागी नेल्ल आन कली मार पवा, मेको आन कली दोपा खतम पोक्का, मेको थमा पा नेंतीनी। मिनु मार, 'गो ब्रॉडनुड' दे आस पाइनीनी?

12 मार, आं किकी पिपी आन क्यामशो रागी रागी डा देवी देवताम मेको आन कली प्रॉइने चाने डा? गोजान, हारान, रेचेफ नु तेलास्सार सहरम बाक्ब एदेन डा मुर आन देवी देवता ते लाकगमे?

13 हमाथ, अरपाद सेफारवाइम सहर, हेना नु इव्वाह डा पिप ते लाकगमे?" देपाइक्का कली मुर सोइक्ता बाक्त।

हिज्कीयाह आ पुंडशो लोत्र

14 मिनु हिज्कीयाह मेको चिठी चाक्ब मुर आन गुड रे ताक्शा पढेवा बाक्त। मिनु परमप्रभु यावे आ खिं लमाक्त। मिनु मेको परमप्रभु यावे आ डोंइती प्राक्शा वोदा बाक्त।

15 मिनु हिज्कीयाहम मेको परमप्रभु यावे आ डोंइती प्राक्शा वोइश्शा "परमप्रभु यावे, इस्राएली आन परमप्रभु गे करूब आन तार बाक्नीनी। रागी डा राज्य नेल्लेमे गे का ला परमप्रभु बाक्नीनी। गे रागी नु सरीड सेल्ब बाक्नीनी। प्रस्थान २५:२२; भजन संग्रह ८०:२

16 परमप्रभु यावे आं लोत्र नेनीन। परमप्रभु यावे कोत्रडीन, सन्हेरीबम ब्रॉइशा बाक्शो परमप्रभु, इन कली शुक्शी पा सोइश्शो लोत्र नेनीन।

17 परमप्रभु यावे, अस्सुर डा पिपपुकीम रागी रागी डा मुर नु आन रागी कली खतम पोक्तेक्म। एको थमा बाक्ब।

18 मेकोपुकीमी मेको आन देवी देवता आन कली मीम हुमशा नेक्पाइक्तेक्म। मारदे हना मेको परमप्रभु मनम। मेको मुरुमी सेल्शो शी नु फुल्लु के ला बाक्तेक्म। मोपतीके मेको खतम दुम्तेक्म।

19 मुल परमप्रभु यावे, आंइ परमप्रभु आंइ कली मेको आ गुड रे प्रोनीन, दे पुंडनुड। मिनु रागी नेल्ल डा मुरपुकीम परमप्रभु यावे, गे का ला परमप्रभु बाक्नीनी, दे तुडक्तेक्म" दे पुना बाक्त।

यसैयामी सन्हेरीब खतम दुम्ब देशो

20 मिनु आमोज आ तौ यसैयाम हिज्कीयाह कली "परमप्रभु यावे, इस्राएली आन परमप्रभुमी मार देत देश हना 'गो अस्सुर डा पिप सन्हेरीब आ पर्बम इ पुंडशो लोत्र नेंता' देत।

21 सन्हेरीब आ पर्बम परमप्रभु यावे आ देशो लोत्र मार बाक्ब देश हना 'सियोन डा तमीमी इ कली शुक्शी पाइब। मिनु गे प्रोक्शा लवेनु, यरूसलेम डा तमीमी आ पिया हिक्ब।

22 गे सु कली शाक्शा शुक्शी पवी? गे सुका आ पर्बम ठेयब लेशशा लोत्र पवी? मेको इस्राएली आन का ला बाक्शो परमप्रभु यावे आ पर्बम बाक्ब।

23 गे इ लोत्र कुरबपुकी सोइश्शा, परमप्रभु यावे कली शुक्शी पाप्तीवी'। मिनु गे 'गो आं शुश बग्गीम ठेयब पहाड डोंइसाक्की। गो लेबानोन डा नेल्ल क्येडा डोन डोंइसाक्की। गो मेकेर डा नेल्ल क्येडा लाइश्शो रवा नु मेकेर डा नेल्ल क्येडा रिमशो अरु रवा तिम्तामी। गो मेको आ सुर सम्म डा नेल्ल क्येडा ठेयब ब्वाकीम जाक्दीती।

24 गो इनार दोशा, अर्को रागी डा ब्वाक्कु तूता। गो आं खोइलीम दिम्शा इजीप्ट रागी डा खोला नेल्ल सोत्रपाइक्तामी' देशो बाक्नेवे।

25 गे 'गो साइ डोंइती रे मेको नेल्ल देशो नड। गो मेको साइ रे मो पाडनुड देशो नड। मुल गो मेको थुम्ता। मार, मेको मनेशो बाक्नीनी? गे गारो हिरशो सहर आन कली प्रेशशा, फुल्लु तेल्लो खोदेशो सेल्शो बाक्नेवे।

26 मिनु मेको सहर डा मुर आन सोक्त जाम्शा आन थुं लुकच लत। मेकोपुकी रू डा कल्लो घांस खोदेशो दुम्तेक्म। मेकोपुकी खिं तार वाशो घांस खोदेशो दुम्शा, वामा चोटीन सोत्रशो बाक्नीम।

27 गो इ बाक्शो बोक्शो नेल्ल तुइक्नुड। गो इ लाडगा खिंडगा पशो नेल्ल तुइक्नुड। मिनु आं पर्बम इ गाइश्शो तुइक्नुड।

28 मारदे हना गेम आं पर्बम गाइश्शा, इ ठेयब लेशशो लोत्र पशो नेंता। मोपतीके गो इ नेंमी आं बोल्सी ब्वेक्नुड। इ शोत्रमी लगम पाइक्नुड। मिनु गो इ जाक्शो लां रेन लेप्पाइक्नन' दे परमप्रभु यावेमी सन्हेरीब आ पर्बम देत" देमाक्त।

29 मिनु लेशा "मेको नेल्ल थमा दुम्ब, दे मार चिन्ड दुम्ब देश हना, गेपुकी एको बर्स आंमा वाशो जाइनीनी। मिनु नोले डा बर्स मेको रे वाशो जाइनीनी। मिनु बर्स सांमी गेपुकीम शोक्शा खुष्शा जने, अडगुर खुष्शा जने।

30 मिनु यहूदा आ खिं डा ब्रॉइशा लीशोपुकीम रागीम शाक्श थोक्नीम। मिनु रागी तार फल सिल्तीम।

31 मारदे हना यरूसलेम रे लीशो मुरपुकी लाइनीम। सियोन डांडा रे हुल का ब्रॉइशो मुर ग्रूशा जाक्नीम। मुर नेल्ल आन परमप्रभु यावेमी आ जोंब बोक्शा मेको पाइब" देमाक्त। यसैया ९:६

32 मिनु परमप्रभु यावेमी अस्सुर डा पिप आ पर्बम "सन्हेरीब एको सहरम मओत्रब। एको सहरम ब्रा का यो मआप्ब। मेको आ तेक्तीक कुरशा एको सहर आ डोंइती मजाक्ब। सहर ओत्रका कली गारो डोइक्तीक मसेल्ब।

33 मेको आ जाक्शो लां रेन लेशशा लाइब। मेको सहरम मओत्रब।

34 मारदे हना गो आंम आं पर्बम नु आं गेय पाइब दाऊद आ पर्बम मेको सहर कली वारच पा प्रॉइनुड" देमाक्त। २राजा २०:६

35 मिनु मेको नाक्दो परमप्रभु यावे आ स्वर्ग डा गेय पाइब का जाक्माक्त। मिनु मेकोमी अस्सुर डा पिप आ लडाइ पाइब आन बाक्तीकम ओत्रशा, लाख का ८५ हजार मुर आन कली साइक्मी बाक्त। मिनु आ दीसा सुनी मुरपुकी बोक्मानु मेकेर बेक्शो मुर ला तामे बाक्त। यसैया ३७:३६-३८

36 मोपतीके अस्सुर डा पिप सन्हेरीब ताम्बु पोक्शा लेशशा आ खिं निनवे लमाक्त।

37 मिनु मेको काबु आ देवता निष्कोक आ खिंमी पूजा पना पन बाक्मेनु, मेको आ तौ अद्राम्मेलेक नु शरेसेरमी मेको कली तरवारम क्योरशा सदसे बाक्त। मिनु प्रोक्शा आरारात रागी लसा बाक्त। मिनु मेको आ पा डा आ तौ एसर-हददोन पिप दुम्माक्त। २राजा १९:१७

## 20

हिज्कीयाह रोड पशो

२इतिहास ३२:२४-२६; यसैया ३८:१-८

1 मेना हिज्कीयाह रोड पा बेक्चा चिक्ता बाक्त। मिनु आमोज आ तौ परमप्रभु यावे आ लोत्र पाइब यसैया हिज्कीयाह आ बाक्तीक जाक्शा, “परमप्रभु यावेमी इन कली मार दंत देशा हना ‘इन खिं डा मुर आन कली इन अरेचा माल्शो लोत्र अरेने। मारदे हना गे बेक्नीनी। मसानीनी’ दंत” देमाक्त।

2 मिनु हिज्कीयाह गारो गे हिरशा, परमप्रभु यावे कली पुना बाक्त।

3 मेकोमी “परमप्रभु यावे, गो इन डोंइती रिम्शो पा बाक्ती। गो इन कली गेनायो मप्रोंइथु आं थुं नेल्लेमी इन नोले खोइक्ता। इन डोंइती मार रिम्शो बाक्मे, मेको पाता, मेको मिम्तीन” दे आ थुं खाइश्शा डाक्माक्त।

4 मिनु यसैया दाते डा लाडगा रे मूचा क्येडा डोंइती परमप्रभु यावेम मेको कली लोत्र पवा बाक्त।

5 मार लोत्र पवा बाक्त देशा हना “लेश्शा लशा, परमप्रभु यावे इ किकी दाऊद आ परमप्रभुमी ‘आं मुर आन कली सासन पाइब हिज्कीयाह कली “गो इ पुंइशो लोत्र नेंता। मिनु इ प्रेक्कु ताता। गो इ कली सापाइक्नुड। मिनु नाक्त सां नोले गे परमप्रभु यावे आ खिं लाइनेवे।

6 गो इ ब्रोंइतीक नाक्त १५ बर्स तेम्नुड। मिनु इ कली नु एको सहर कली अस्सुर डा पिप आ गुड रे प्रोंइनुड। गो आं पर्वम नु आं गेय पाइब दाऊद आ पर्वम एको सहर कली वारच पा प्रोंइनुड” दंत” देनो” देमाक्त। २राजा १९:३४

7 मिनु यसैयामी “मेको कली सापाइक्चा कली आ कानम फोत्रशी गेडा शेष्शा खेक्तीन” देमाक्त। मिनु मुरपुकीम मेको आ कानम फोत्रशी गेडा शेष्शा खेक्तीमे बाक्त।

8 मिनु हिज्कीयाहमी यसैया कली “गो सानुड, मिनु नाक्त सां नोले परमप्रभु यावे आ खिं लाइनुड, दे परमप्रभु यावेमी आं कली दोपा तुइक्पाइक्बा?” दे हिल्लो पवा बाक्त।

9 मिनु यसैयामी “परमप्रभु यावेमी आ देशो थमा पा पाइब, दे इन कली मार कोंइब देशा हना, नां आ वांकु १० खेयप डोंइती गे ग्रेल देय नोले गे लेल्ल?” दे हिल्लो पवा बाक्त।

10 मिनु हिज्कीयाहम “नां आ वांकु १० खेयप डोंइती ग्रेचा दा आ गेयन बाक्ब। मेको १० खेयप नोले गे लेत्चा माल्ब” देमाक्त।

11 मिनु परमप्रभु यावे आ लोत्र पाइब यसैयाम, परमप्रभु यावे कली पुना बाक्त। मिनु परमप्रभु यावेमी आहाज आ नां आ वांकु कोंइतीके १० खेयप नोले गे लेप्पदा बाक्त।

बेबीलोन डा पिप आ लोत्र

२इतिहास ३२:३१; यसैया ३९:-

12 मेना बेबीलोन डा पिप बालादान आ तौ मेरोदाक-बालादानमी हिज्कीयाह आ बाक्तीकेम कोसेली नु चिठी कुर पा मुर सोइक्ता बाक्त। मारदे हना मेकोम हिज्कीयाह रोड पा साशो बाक्ब देशो नेना बाक्त।

13 मिनु हिज्कीयाहम मेको चिठी चाक्ब मुर आन कली मान पाइक्मी बाक्त। मिनु मेको आन कली आ शोंप वोइक्तीकेम नेल्ल कोंइदा बाक्त। सुन चांदी, मस्ला, ब्रोंवशो रिना पाइश्शो खेक्तीक तेल, आ यापुकी नु आ मार मार वोइक्तीकेम बाक्शो मारेड मारेड थोत्रक कोंइदीमी बाक्त। हिज्कीयाह आ खिंम नु आ नेक्थाम बाक्शो मेको आन कली मकोइशो मारेड मलीमाक्त।

14 मिनु नोले परमप्रभु यावे आ लोत्र पाइब यसैया जाक्शा, पिप हिज्कीयाह कली “मेको मुरपुकीम मार देमा? मेकोपुकी ते रे जाक्शो नमी?” दे हिल्लो पवा बाक्त। मिनु हिज्कीयाहमी “एकोपुकी डोन रागी बेबीलोन रे जाक्शो नम” देमाक्त।

15 मिनु मेकोमी “मेकोपुकीम इन खिंम मार मार तामे?” दे हिल्लो पवा बाक्त। मिनु हिज्कीयाहम “एकोपुकीम आं खिंम बाक्शो नेल्ल ताम्तेक्म। आं मार मार वोइक्तीक खिंम बाक्शो मतशो मारेड मली” देमाक्त।

16 मिनु यसैयाम हिज्कीयाह कली “परमप्रभु यावे आ लोत्र नेनीन।

17 परमप्रभु यावेमी ‘काबु नाक्त इ खिंम बाक्शो मारेड मारेड थोत्रक नु इ किकी पिपी नु इन आंम तेल्लो थोत्रक नेल्ल बेबीलोनम चाक्दीत्लीम। मारेड मप्रोंइनीम। २राजा २४:१३-१४

18 मेकोपुकीम इन तौ का निक्शी यो लाइक्नीम। मिनु मेकोपुकी बेबीलोन डा पिप आ दरवारमी गेय पाइब दुम्नीम’ दे परमप्रभु यावे दंत” देमाक्त। दानीएल १:३-४

19 मिनु हिज्कीयाहम यसैया कली “इन देशो परमप्रभु यावे आ लोत्र रिम्शोन बाक्ब” देमाक्त। मारदे हना मेकोमी “आं पाला सम्म थुं नाइश्शा बाक्तीक दुम्ब” दे मिम्ता बाक्त। २राजा २२:२०

हिज्कीयाह बेक्शो

20 हिज्कीयाह आ पशो अरु गेय, मेको आ सक्ति, मेको आ दोम्ली नु ब्वाक्कु लतीके सेल्शो, सहर कली ब्वाक्कु चाक्शो, मार, मेको नेल्ल यहूदा डा पिप आन इतिहासम बेक्शो मबाक्बा डा?

21 मिनु हिज्कीयाह बेक्माक्त। मिनु मेको आ पा डा आ तौ मनस्से पिप दुम्माक्त।

## 21

यहूदा डा पिप मनस्से

२इतिहास ३३:-

1 मनस्से पिप दुम्मेनु, १२ बर्स दुम्शो बाक्माक्त। मिनु मेकोम यरूसलेम ५९ बर्स सासन पवा बाक्त। मेको आ ममा आ नें हेपसीबाह बाक्माक्त।

2 मेकोम परमप्रभु यावे आ डोंइती मार मरिम्शो बाक्मे, मेको पवा बाक्त। परमप्रभु यावेमी इस्राएली आन डोंइती रे खेरशो रागी रागी डा मुर आन ग्रांरा दिशो गेय पवा बाक्त।

3 मेकोमी आ आफ हिज्कीयाहमी खतम पोक्शो डांडा डा थानपुकी लेंशा सेला बाक्त। मेकोम इस्राएल डा पिप आहाब खोदेशो पा बाल कली चढेतीक नु मूर्ति पाइशो थाम सेला बाक्त। इस्राएल डा पिप आहाब खोदेशो पा मेकोमी नां तास्ला नु सोरुल आन कली खुम्की पा बाप्शा पूजा पवा बाक्त। १राजा १६:३३

4 मेकोमी परमप्रभु यावे आ खिंमी मेको देवी देवता आन कली चढेतीकपुकी सेला बाक्त। परमप्रभु यावेमी मेको खिं आ पर्वम “यरूसलेमम गो आं नें वोइक्नुड” देशो बाक्माक्त।

5 मिनु मेकोमी परमप्रभु यावे आ खिं आ लाडगा निम्फामी नां तास्ला नु सोरुल आन कली चढेतीक सेला बाक्त। २राजा २३:१२

6 मेकोमी आ तौ कली घोशा चढेवा बाक्त। मिनु मन्तर तन्तर, टुना मुना पा, बेक्शो मुर रे लोत्र पचा गेशा, लिंक्यु कोत्रडा बाक्त। मेकोम परमप्रभु यावे आ डोंइती शुश मरिम्शो पवा बाक्त। मिनु मेको कली थाम्पा गाइक्पदा बाक्त। २राजा १६:३; लेवी १८:२१

7 मेकोम आ मुशा सेल्शो अशेराह देवी आ मूर्ति परमप्रभु यावे आ खिंम वोदा बाक्त। परमप्रभु यावेमी मेको खिं आ पर्वम दाऊद नु आ तौ सोलोमन आस कली “गो एको इस्राएल आ थर नेल्ल आन रे आं योत्रशो यरूसलेम सहर डा एको खिंम आं नें गेना हना यो वोइक्नुड। १राजा ८:२९; १राजा ९:३

8 मिनु इस्राएलीम आं शेंशो होस पना पन बाक्तेक्म हना, मोसा रे पा, मेको आन कली आं अरेशो पना पन बाक्तेक्म हना, मेको आन किकी पिपी आन कली आ गेशो रागी प्रोइशा गाक्चा ममाल्नीम।

9 तन्न मुरपुकीम मेको नेंसीन मनेन्मे बाक्त। मनस्सेम मेको आन कली हेंथे लां खोइक्पाइशो बाक्माक्त। मिनु मेकोपुकीम परमप्रभु यावेम इस्राएली आन डोंइती रे खतम पोक्शो रागी रागी डा मुर आन क्येडा यो शुश मरिम्शो पामे बाक्त” देमाक्त।

10 मिनु परमप्रभु यावेम आ गेय पा आ लोत्र पाइब आन रे पा

11 “यहूदा डा पिप मनस्सेम एको ग्रांरा दिशो गेय पशो बाक्ब। मेकोम डोंइती बाक्शो एमोरी आन क्येडा यो शुश ग्रांरा दिशो गेय पशो बाक्ब। मिनु मेकोमी यहूदा डा मुर आन कली मूर्ति पूजामी पाप पपाइशो बाक्ब” देमाक्त।

12 मोपतीके परमप्रभु यावे, इस्राएली आन परमप्रभुमी “गो यरूसलेम नु यहूदाम शुश खतम दुम्तीक चाक्नुड। मेको नेंब आन नोफामी ग्रीब। यसेया १९:३

13 गो सामरीया कली पुक्तीकेमी यरूसलेम कली पुक्नुड। गो आहाब आ खिं कली थाप्शो डोरीम यरूसलेम कली थाक्नुड। मुरपुकीम दोपा थाल शेक्शा गुक्शा वोइक्नीमी, मोपा गो यरूसलेम कली शेक्शा गुक्शा वोइक्नुड।

14 गो आं लीशो मुर आन कली प्रोइशा सोइक्नुडमी। मिनु मेको आन कली आन जोरी सनु आन गुइमी गेनुडमी। मेको आन जोरी सनु ग्याइशला लाइक्चा पुंइसीनीम।

15 मारदे हना मेकोपुकीम आं डोंइती मार मरिम्शो बाक्मे, मेको पाम्तेक्म। मेको आन किकी पिपी आन कली इजीप्त रे गुंइशा चाक्गु रे मुल सम्म आं कली गाइक्पाइक्स डा गाइक्पाइक्स बाक्शो बाक्नीम” देमाक्त।

16 मेको क्येडा लाक्शा यो मनस्सेम दोस मताइब शुश मुर आन हुश शाइक्पाइशला, यरूसलेम आ सुर का रे अर्को सुर सम्म प्रिंदा बाक्त। मिनु मेकोम यहूदा कली पाप पपदा बाक्त। मिनु मेकोपुकीम परमप्रभु यावे आ डोंइती मार मरिम्शो बाक्मे, मेको पामे बाक्त। २राजा २४:४; भजन संग्रह १०६:३८

17 मनस्से आ पशो अरु गेय, मेको आ पशो नेल्ल, मेको आ पशो पाप, मार, मेको यहूदा डा पिप आन इतिहासम ब्रेक्शो मबाक्बा डा?

18 मिनु मनस्से बेक्माक्त। मिनु मेको उज्जा आ खिं डा रूम थिम्चा पुंइसे बाक्त। मिनु मेको आ पा डा आ तौ आमोन पिप दुम्माक्त।

यहूदा डा पिप आमोन

19 आमोन पिप दुम्मेनु २२ बर्स दुम्शो बाक्माक्त। मेकोम यरूसलेमम बर्स निकशी सासन पवा बाक्त। मेको आ ममा आ नें मेशुल्लेमेथ बाक्माक्त। मेको योत्बाह डा हारुच आ तमी बाक्माक्त।

20 मेकोम आ आफ मनस्से खोदेशो पा, परमप्रभु यावे आ डोंइती मार मरिम्शो बाक्मे, मेको पवा बाक्त।

21 मेको आ आफ आ लोम गाक्माक्त। मिनु आ आफोम पूजा पशो मूर्ति आन डोंइती खुम्की पा बाक्माक्त। मिनु मेको आन कली पूजा पवा बाक्त।

22 मेकोम परमप्रभु यावे, आ किकी पिपी आन परमप्रभु कली प्रोना बाक्त। मेको परमप्रभु यावे आ लांम मगाक्माक्त।

23 आमोन आ गेय पाइबपुकीम मेको कली साइक्चा माल्मे बाक्त। मिनु मेको कली पिप आ खिंमीन सदमे बाक्त।

24 मिनु मेको रागी डा मुरपुकीम मेको पिप आमोन कली साइक्ब मुर नेल्ल आन कली सदमे बाक्त। मिनु मेको आ तौ योसीयाह कली आ पा डा पिप सेल्मे बाक्त।

- 25 आमोन आ पशो अरु गेय, मेको आ पशो नेल्ल, मार, मेको यहूदा डा पिप आन इतिहासम ब्रेकशो मबाक्बा डा?  
26 मिनु मेको बेक्शा उज्जा आ तुरसुम थिम्चा पुंडसे बाक्त। मिनु मेको आ पा डा आ तौ योसीयाह पिप दुम्माक्त।

## 22

परमप्रभु आ अरेशो लोत्र थिश्शो

२इतिहास ३४:१-२८

- 1 योसीयाह पिप दुम्मेनु ८ बर्स दुम्शो बाक्माक्त। मिनु मेकोमी यरूसलेम ३१ बर्स सासन पवा बाक्त। मेको आ ममा आ नें येदीदाह बाक्माक्त। मेको बोस्कत डा अदायाह आ तमी बाक्माक्त।  
2 योसीयाहमी परमप्रभु यावे आ डोंइती मार रिम्शो बाक्मे, मेको पवा बाक्त। मेको ग्युरा पेरा मपथु, आ किकी दाऊद आ लाम गाक्माक्त। २राजा १८:३  
3 योसीयाह पिप दुम्मे आ १८ बर्सम मेकोमी मेशुल्लाम आ चच असाल्याह आ तौ ब्रेक्ब शाफान कली परमप्रभु यावे आ खिंम सोडक्ता बाक्त।  
4 योसीयाहमे मेको कली “ठेयब चढेब हिल्लीयाह आ बाक्तीक लावो। मिनु लाप्यो खाल पाइबपुकीम ताक्शो, मुरपुकीम परमप्रभु यावे आ खिंम चाक्शो क्येट ठीक पा वोडक्चा माल्नीम, दे मतो। २राजा १२:११  
5 मिनु मेको परमप्रभु यावे आ खिंम बाक्ब ठेयब गेय पाइब आन कली गेचा नम। मिनु मेकोपुकीम परमप्रभु यावे आ खिंम बिग्रेशो मार मार सेल्ब आन कली गेमेक्ल।  
6 मेकोपुकीम परमप्रभु यावे आ खिंम डा बिग्रेशो लेंशा सेल्चा कली शी सेल्ब, गारो प्रोत्रब नु मार मार सेल्ब आन कली गेमेक्ल। मिनु शी नु खोइश्शो फुल्लुपुकी ग्याप्मेक्ल।  
7 मेको आन कली गेशो क्येट ब्रेक्शा वोडक्चा ममाल्नीम। मारदे हना मेकोपुकी थमा सुइश्शो गेय पाइब बाक्नीम” दे मदा बाक्त। २राजा १७:१६  
8 मिनु ठेयब चढेब हिल्लीयाहमे ब्रेक्ब शाफान कली “गो परमप्रभु यावे आ खिंम अरेशो लोत्र ब्रेक्शो कागज थित्ता” देमाक्त। मिनु हिल्लीयाहमी मेको कागज शाफान कली गेवा बाक्त। मिनु शाफानमी मेको पढेवा बाक्त।  
9 मिनु मेको ब्रेक्ब शाफान पिप आ बाक्तीक लशा मेको कली “इन गेय पाइबपुकी परमप्रभु यावे आ खिंम लशा, मेकेर डा क्येट परमप्रभु यावे आ खिंम डा गेय कोत्रब आन कली गेम्तेक्म” देमाक्त।  
10 मिनु नोले मेको ब्रेक्ब शाफानमी पिप कली “चढेब हिल्लीयाहमे आं कली कागज का गेती” दे शेंदा बाक्त। मिनु नोले शाफानमे मेको ठेयब सेंदा पा पढेशा पिप कली नेंपदा बाक्त।  
11 मिनु पिपमी मेको कागज डा लोत्र नेंशा, आ वा खाक्गा बाक्त।  
12 मिनु नोले पिपमी चढेब हिल्लीयाह, शाफान आ तौ अहीकाम, मीकाया आ तौ आकबोर, ब्रेक्ब शाफान नु पिप आ गेय पाइब आसायाह आन कली येरमीया २६:२४  
13 “गे आं पबर्म, आं मुर आन पबर्म नु यहूदा आ पबर्म मेको थिश्शो कागजमी मार ब्रेक्शो बाक्मे, दे परमप्रभु यावे कली हिल्लो पथ लने। मारदे हना परमप्रभु यावे थाम्पा गाइश्शो बाक्ब। इ किकी पिपमी एको कागजमे ब्रेक्शो लोत्र मटीमे। मेकोपुकीम इ पबर्म मेकेर ब्रेक्शो लोत्र नेल्ल मपाम” देमाक्त।  
14 मोपतीके चढेब हिल्लीयाह, अहीकाम, आकबोर, शाफान नु आसायाह पिप आ खिंम वासी कोत्रब हारहास आ चच, तिकवाह आ तौ शाल्लुम आ मीश परमप्रभु यावे आ लोत्र पाइब हुल्दा आ बाक्तीके यरूसलेममे हिल्लो पथ लमा बाक्त। मेको आ खिंम यरूसलेम डा नक सहरम बाक्बाक्माक्त।  
15 मिनु हुल्दामी मेको आन कली “परमप्रभु यावे, इस्राएली आन परमप्रभुम इन कली आं बाक्तीके सोडक्ब कली मार देंत देशा हना  
16 मेकोमी ‘यहूदा डा पिपमे मेको कागजमे पढेशो श्येत डा लोत्र, गो मेको श्येत यहूदा नु मेकेर बाक्ब मुर आन कली थमा पा गेनुड।  
17 मारदे हना मेकोपुकीम आं कली प्रोइशा, देवी देवता आन कली धूप चोम्तेक्म। मिनु आन गुडम सेल्शो मूर्ति रे पा आं कली गाडक्पाइक्तीमी। मोपतीके गो एको रागी आ पबर्म गाडक्ताकयी। मिनु मेको गाइश्शो मनाइक्ब” देंत। ब्यवस्था ३१:२९; ब्यवस्था ३२:२१-२३  
18 परमप्रभु यावे कली हिल्लो पथ सोडक्ब यहूदा डा पिप कली परमप्रभु यावे, इस्राएली आन परमप्रभुमी मार देंत देशा हना ‘गे आं लोत्र नेंतीवी।  
19 गे आं कली टिचा दाक्शा, इ थुं आं डोंइती ब्रेम्शो दुम्शा, गे सुर्ता पा इ वा खाक्शो ताता। मारदे हना गो यहूदा रागी नु मेकेर डा मुर आन पबर्म सराप रशा, मुर मबाक्तीक दुम्ब, देंती। गे मेको आ पबर्म आं डोंइती डाक्शो नेंता।  
20 मिनु गे इ थुं नाइश्शा बेक्नेवे। मिनु गो यहूदा कली गेशो ठेयब श्येत गे तचा ममाल्नेवे’ दे मतो” दे परमप्रभुमी देमाक्त। मिनु मेकोपुकीम मेको लोत्र पिप आ बाक्तीकेम चाक्गामे बाक्त। २राजा २०:१९; यसेया ५७:१-२

## 23

योसीयाहमे परमप्रभु आ लोत्र टिश्शो

२इतिहास ३४:२९-३५:२५

- 1 मिनु नोले पिपमे यहूदा नु यरूसलेम डा खाल्पा नेल्ल आन कली आ डोंइती बुक्चा, दे ब्रेत्थ सोडक्तीमी बाक्त।



2 मिनू पिप परमप्रभु यावे आ खिं लमाक्त। मिनू मेको नु यहूदा डा मुर नेल्ल, यरूसलेम डा मुर, चढेबपुकी, परमप्रभु यावे आ लोत्र पाइबपुकी नु आइक्च नु टेयब मुर नेल्ल पिप नु परमप्रभु यावे आ खिं लमा बाक्त। मिनू पिपमी नेल्ल नेशा, परमप्रभु यावे आ खिंम थिरशो कबल डा लोत्र ब्रेक्शो कागज पढेवा बाक्त।

3 मिनू पिप थाम आ पुंम राप्शा, परमप्रभु यावे आ डोंडती कबल का पवा बाक्त। मेको कबल मार बाक्त देशा हना, “गो परमप्रभु यावे आ शंशो, आ देशो लोत्र, आ फुल्लुम मुशा ब्रेक्शो लोत्र आं थुं नु रां नेल्लेमी टिशा पाइनुड। मोपा एको कागजम ब्रेक्शो कबल डा लोत्र नेल्ल खाप्नुड” दैमाक्त। मिनू मेको नोले मुर नेल्लेमी “गोपुकीम यो मेको कबल खाप्नीकी” दैमा बाक्त। प्रस्थान २४:३-८; यहोसु २४:२५

4 मेको नोले पिपमी नेल्ल क्येडा टेयब चढेब हिल्कीयाह, मेको आ नोले डा अरु चढेबपुकी नु लाप्चो खाल पाइब आन कली “परमप्रभु यावे आ खिं रे बाल देवता, अशेराह देवी, नां तास्ला नु सोरुल आन कली सेल्शो मारेड मारेड बोसपुकी गुंडदीन” दे अरेवा बाक्त। मिनू मेकोपुकीमी मेको नेल्ल यरूसलेम डा किद्रोन खोल्साम चोत्रमे बाक्त। मिनू पुलु चहिं बेथेलम लदमे बाक्त। २राजा २१:३

5 डोंडती यहूदा डा पिपपुकीम यहूदा डा सहर नु यरूसलेम डा डांडा डा थानम बाक्शो देवी देवता आन कली चढेब आन कली वोइशो बाक्मा बाक्त। मेकोपुकीमी बाल, नां, तास्ला, सोरुल आन कली धूप चोइबाक्मा बाक्त। मिनू पिपम मेको आन कली गुंडपदा बाक्त।

6 मेकोमी अशेराह देवी आ मूर्ति पाइशो थाम परमप्रभु यावे आ खिं यरूसलेम रे गुंडशा, किद्रोन खोल्साम लाइशशा चोपाइक्मी बाक्त। मिनू मुपुकीम मेको कली फुरक सेल्मे बाक्त। मिनू मेको आइक्च मुर आन तुरसुम फ्रामे बाक्त। २राजा २१:७

7 मेकोमी तेल्लेम वोइश मुर आन बाक्तीक प्रेत्मे बाक्त। मेको खिं, अशेराह देवी आ मूर्ति कली नु मीश मुर आन तोत्र प्रोव्रतीके परमप्रभु यावे आ खिं आ नेक्था बाक्शो बाक्माक्त। १राजा १४:२४

8 योसीयाहमी यहूदा डा सहर रे चढेब नेल्ल आन कली गुंडदीमी बाक्त। मिनू गेबा सहर रे बेयर-शेबा सम्म डा डांडा डा थान आन कली ग्रंशा दिशो सेल्पदा बाक्त। मेकोमी सहर डा लाप्चो डा देवता थानपुकी प्रेप्पदा बाक्त। मेको सहर डा सासन पाइब यहोसु आ लाप्चो आ डोंडती गे बाक्माक्त। मेको सहर डा टेयब लाप्चो आ पेरा गे बाक्माक्त।

9 मेको डांडा डा थान डा गेय पाइब चढेबपुकीम यरूसलेम डा परमप्रभु यावे आ खिं डा चढेतीकेम जाक्ने मचाप्बमे बाक्त। तन्न मेकोपुकीम आन वारच चढेबपुकी नु बोरब ओरुली मसुप्शो शोब्ले जाइबाक्मा बाक्त।

10 मिनू पिप योसीयाहम मोलेक कली आन तमी तौ क्योरशा चढेथ मजाक्मल, दे बेन-हिन्नोम बेसीम बाक्शो तोफेथ थान कली ग्रंशा दिशो सेल्पदा बाक्त। २राजा १७:१७; लेवी १८:२१

11 मेकोम यहूदा डा पिपपुकीम परमप्रभु यावे आ खिं ओव्रतीक लाप्चो आ डोंडती नां कली मान पचा कली सेल्शो शारा प्रेशशा ताइक्पाइक्मी बाक्त। मेको चहिं नाथान-मेलोक नें पाइशो मुर आ कोठा आ नेक्था बाक्माक्त। मिनू योसीयाहम नां कली मान पचा कली सेल्शो बाग्गीपुकी क्रोइक्पाइक्मी बाक्त।

12 आहाज आ तार डा कोठा डा कौसीम यहूदा डा पिपपुकीम सेल्शो चढेतीकपुकी नु परमप्रभु यावे आ खिं डा लाडगा निम्फा गे डा मनस्सेम सेल्शो चढेतीकपुकी प्रेशशा, फस पोक्शा, मेको नेल्ल किद्रोन खोल्साम ताइक्पदा बाक्त। २इतिहास २८:२४; २राजा २१:४-५

13 मिनू पिपमी यरूसलेम आ पुर्व गे बाक्शो डांडा डा थान ग्रंशा दिशो सेल्पदा बाक्त। मेको खतम सेल्ब डांडा आ दक्खिन गे बाक्माक्त। मिनू मेकेर पिप सोलोमनमी सीदोनी आन ग्रंशा दिशो अशेतोरथ देवी आ मूर्ति, मोआब डा ग्रंशा दिशो देवता केमोश आ मूर्ति नु अम्मोनी आन ग्रंशा दिशो देवता मोलेक आ मूर्ति आन थान सेल्पाइशो बाक्माक्त। मिनू योसीयाहमी मेको आ सेल्शो पूजा पतीक थान प्रेशशा ग्रंशा दिशो सेल्पदा बाक्त। मेको मोलेक देवता कली मिलकोम यो देशो बाक्त। १राजा ११:७

14 मिनू योसीयाहमी थान डा खुक्शो फुल्लु जिक्शा फस पोक्पाइक्मी बाक्त। मिनू मूर्ति पाइशो थाम एशशा मेको आ बाक्तीकेम मुर आन रुशेम प्रिपाइक्मी बाक्त।

15 मिनू मेकोम इसाएली आन कली पाप पपाइक्ब नेबात आ तौ येरोबामम बेथेल डा डांडाम सेल्शो थान यो प्रेप्पदा बाक्त। मेकोम चढेतीक नु थाम यो खतम सेल्पदा बाक्त। मेको थान क्रोइशशा, पुलु सेल्पदा बाक्त। मेकोमी मेको मूर्ति पाइशो थाम यो चोपदा बाक्त। मिनू मेको कली फस पोक्पदा बाक्त। मेकोम अशेराह आ थाम यो चोपदा बाक्त। १राजा १२:३२

16 मेको नोले योसीयाहम एर ओंथ कोव्रडा बाक्त। मिनू मेकोमी डांडाम बाक्शो तुरसपुकी तवा बाक्त। मिनू मेकोमी तुरस रे रुश गुंडपदा बाक्त। मिनू मेकोम चढेतीक ग्रंशा दिशो सेल्चा कली मेको चढेतीकेम चोपाइक्मी बाक्त। परमप्रभु आ मुरुमी, येरोबाम चढेतीकेम बाक्मेनु, देशो परमप्रभु यावे आ लोत्र गाप्चा कली योसीयाहमी मो पवा बाक्त। मिनू पिपमी एर ओंथ कोव्रशा, मोदेशो नोले दुम्ब लोत्र पाइब परमप्रभु आ मुर आ तुरस तवा बाक्त। १राजा १३:२

17 मिनू पिपमी “मेरे आं तशो तुरस सु के बाक्मे?” दे हिल्लो पामी बाक्त। मिनू मेको सहर डा मुरपुकीमी “मेरे परमप्रभु आ मुर आ तुरस बाक्ब। मेको यहूदा रे जाक्शा, बेथेल डा चढेतीकमी येरोबाम आ डोंडती मुल इन पशो गेय आ पबंम नोले दुम्ब लोत्र पाइब, परमप्रभु आ मुर आ तुरस बाक्ब” दैमा बाक्त। १राजा १३:३०-३२

18 मिनू मेकोमी “मो हना बाक्चा गेन। सुइम मेको आ रुश मथिने” दैमाक्त। मोपतीके मुरपुकीम मेको सामरीया रे जाक्शो परमप्रभु यावे आ लोत्र पाइब आ रुश नु यहूदा रे जाक्शो परमप्रभु आ मुर आ रुश चहिं मशोल्मे बाक्त।

19 मिनू मेको प्रोंइशा पिप योसीयाहम इसाएल डा पिपपुकीम सामरीया डा सहरपुकीम सेल्पाइशो डांडा डा थान प्रेप्पदा बाक्त। मुरपुकीमी मेको थान सेल्शा पूजा पा परमप्रभु यावे कली गाइक्पाइशो बाक्मा बाक्त। मिनू योसीयाहमी मेको आन कली बेथेलम पशो खोंदेशो ग्रोंग्रा दिशो सेल्पाइक्मी बाक्त।

20 पिप योसीयाहमी मेको डांडा डा थानपुकीम बाक्शो चढेतीक तार आन चढेब नेल्ल साइक्पाइक्मी बाक्त। मिनू मेको चढेतीक आन तार मुर आन रुश चोपाइक्मी बाक्त। मिनू मेको नोले यरूसलेम लेम्माक्त।

पास्सा नाक्त डा चाड लेंशा मानेशो

21 मिनू पिपमी मुर नेल्ल आन कली “परमप्रभु यावे, इन परमप्रभु आ कबल डा लोत्र ब्रेक्शो खोंदेशो पा पास्सा नाक्त डा चाड मानेचा माल्नीनी” दे माइक्मी बाक्त। ब्यवस्था १६:१-८; यहोसु ५:१०-११

22 इस्राएली आन कली निसाफ पाइबपुकीम हुकुम पामे रे नु इस्राएल नु यहूदा डा पिपपुकीम सासन पामे ना रे मुल सम्म मोदेंशो पा पास्सा चाड ममानेशो बाक्मा बाक्त। न्यायाधीस २:१०, १६, १७

23 तन्न पिप योसीयाहम सासन पवा आ १८ बर्सम यरूसलेमम मेको परमप्रभु यावे आ पास्सा नाक्त डा चाड मानेमे बाक्त।

24 परमप्रभु यावे आ खिंमी चढेब हिल्कीयाहमी थिश्शो ब्रेक्शो लोत्र खाप्चा कली योसीयाहम बेक्शो मुर नु लोत्र पाइब, लिक्व कोत्रब नु खिं डा मूर्ति नेल्ल, यहूदा नु यरूसलेमम बाक्शो ग्रोंग्रा दिशो मारेइ मारेइ नेल्ल ताइक्पाइक्मी बाक्त।

लेवी २०:२७; ब्यवस्था २९:१६-१७

25 मोपा योसीयाह खोंदेशो पा आ थुं नेल्ले आ रां नेल्ले नु आ सक्ति नेल्लेमी मोसा आ ब्रेक्शो लोत्र टिशा गाक्शा परमप्रभु यावे गे लेब्ब मेको आ डोंइती नु नोले तेकोइ पिप म्दुम्मा बाक्त। २राजा १८:५; ब्यवस्था ६:५

26 मो हना यो परमप्रभु यावेम आ ठेयब पा गाइशो चुरशो मलेत्ता बाक्त। यहूदा आ पर्वम मेको आ गाइशो मनांइसे बाक्त। मिनू मनस्सेमी यो मेको कली थाप्पा गाइक्पाइशो बाक्माक्त। २राजा २१:११-१६

27 मिनू परमप्रभु यावेमी “गो दोपा इस्राएल कली गुंडु, मोपा यहूदा कली यो आं डोंइती रे गुंडुनुड। मिनू गो आं योत्रशो यरूसलेम सहर नु आं नें बाक्ब देशो आं खिं प्रोंइनुड” देशो बाक्माक्त। २राजा १७:१८; १राजा ८:२९

योसीयाह बेक्शो

२इतिहास ३६:१-८

28 योसीयाह आ पशो अरु गेय, मेको आ पशो नेल्ल, मार, मेको यहूदा डा पिप आन इतिहासम ब्रेक्शो मबाक्बा डा?

29 पिप योसीयाहम सासन पवा ना इजीप्त डा पिप फाराओ नेको अस्सुर डा पिप नु लडाइ पचा कली युफ्रेटीस खोला गे लमाक्त। मिनू पिप योसीयाह फाराओ नेको नु लडाइ पचा कली मेकेर लमाक्त। तन्न नेकोम योसीयाह नु लडाइ पा मेको कली मेगीददोम सदा बाक्त।

30 मिनू मेको आ गेय पाइबपुकीम मेको आ बेक्शो रां बग्गीम कुर पा मेगीददो रे यरूसलेमम चाक्वामे बाक्त। मिनू मेको कली आ तुरसुमीन वोदमे बाक्त। मिनू मेको रागी डा मुरपुकीम मेको आ तौ येहो-अहाज कली तेल लुक्शा, मेको आ पा डा पिप सेल्मे बाक्त।

यहूदा डा पिप येहो-अहाज

31 येहो-अहाज पिप दुम्मेनु २३ बर्स दुम्शो बाक्माक्त। मेकोम यरूसलेममी महिना सां सासन पवा बाक्त। मेको आ ममा आ नें हामुतल बाक्माक्त। मेको लिब्ना डा येरमीया आ तमी बाक्माक्त।

32 मेकोमी आ किकी पिपी खोंदेशो पा, परमप्रभु यावे आ डोंइती मार मरिम्शो बाक्मे, मेको पवा बाक्त।

33 मिनू फाराओ नेकोमी मेकोम यरूसलेमम सासन मपवल, दे साडल्लोम फ्रेशा हमाथ रागी डा रिब्लामी चोक्शा वोदा बाक्त। मिनू मेकोमी यहूदा कली सहे का टलेन्ट चांदी नु टलेन्ट का सुन तिरो थाप्पदा बाक्त। टलेन्ट का ३४ किलो बाक्ब। इजीकीएल १९:४

34 मिनू फाराओ नेकोमी योसीयाह आ तौ एल्याकीम कली मेको आ आफ योसीयाह आ पा डा पिप सेल्शा वोदा बाक्त। मिनू फाराओ नेकोमी मेको आ नें एल्याकीम रे येहो-याकीम वोदा बाक्त। तन्न मेकोमी येहो-अहाज कली इजीप्त रागी लदा बाक्त। मिनू मेको इजीप्त उड बेक्माक्त। १इतिहास ३:१५

35 मिनू फाराओ नेको आ पुंइशो सुन नु चांदी थाप्चा कली येहो-याकीमम आ रागी डा मुर आन कली तिरो थाप्पाइक्मी बाक्त। मिनू देशो खोइ तिरो थाप्चा कली मेकोमी आ रागी डा मुरपुकी रे सुन नु चांदी पोक्वा बाक्त। २राजा १५:२०

यहूदा डा पिप येहो-याकीम

36 येहो-याकीम पिप दुम्मेनु मेको २५ बर्स दुम्शो बाक्माक्त। मेकोम यरूसलेममी ११ बर्स सासन पवा बाक्त। मेको आ ममा आ नें जेबीदाह बाक्माक्त। मेको रूमाह सहर डा पेदायाह आ तमी बाक्माक्त।

37 मिनू मेकोमी आ किकी पिपी खोंदेशो पा, परमप्रभु यावे आ डोंइती मार मरिम्शो बाक्मे, मेको पवा बाक्त।

## 24

नेबुकदनेसरमी लडाइ तोशो

1 येहो-याकीममी सासन पवा ना बेबीलोन डा पिप नेबुकदनेसर मेको रागी नु लडाइ पथ जाक्माक्त। मिनू बर्स सां सम्म येहो-याकीम मेको आ सासनम बाक्माक्त। तन्न बर्स सां नोले मेकोमी आ थुं फाइश्या, नेबुकदनेसर कली मटिवा बाक्त। येरमीया २२:१३-१९

2 मिनू परमप्रभु यावेमी यहूदा नु लडाइ पचा कली कल्दी, अरामी, मोआबी नु अम्मोनी आन कली सोइक्तीमी बाक्त। परमप्रभु यावेमी आ गेय पा आ लोत्र पाइब आन देशो खोदेशो दुम्पाइशशा यहूदा कली खतम पोक्पाइक्चा कली मेको आन कली सोइक्तीमी बाक्त।

3 परमप्रभु यावेमी आ मिम्शो खाप्शा, मनस्से आ पशो मरिम्शो नु आ पाप आ पर्वम मेको आन कली आ डोंइती रे गुंड्या कली मो पशो बाक्माक्त। २राजा २१:१०-१६; २राजा २३:२६-२७

4 मारदे हना मनस्सेम दोस मताइब मुर आन कली साइशशा, यरूसलेम कली हुशेम प्रिंशो बाक्माक्त। मिनू परमप्रभु यावेमी मेको कली माफ गेने मबिश्शो बाक्माक्त।

5 मिनू येहो-याकीम आ पशो अरु गेय, मेको आ पशो नेल्ल, मार, मेको यहूदा डा पिप आन इतिहासम ब्रेक्शो मबाक्बा डा?

6 मिनू येहो-याकीन बेक्माक्त। मिनू मेको आ पा डा आ तौ येहो-याकीन पिप दुम्माक्त।

7 इजीप्त डा पिप आ रागी प्रोना नोले लेंशा मजाक्माक्त। मारदे हना बेबीलोन डा पिपम इजीप्त डा खोला रे युफ्रेटीस खोला सम्म डा रागी नेल्ल आ के सेल्शो बाक्माक्त।

यहूदा डा पिप येहो-याकीन

२इतिहास ३६:९-१०

8 येहो-याकीन पिप दुम्मेनु १८ बर्स दुम्शो बाक्माक्त। मेकोमी यरूसलेमम महिना सां सासन पवा बाक्त। मेको आ ममा आ नें नहुशता बाक्माक्त। मेको यरूसलेम डा एल्नाथान आ तमी बाक्माक्त। येरमीया २२:२४-३०

9 येहो-याकीनमी आ आफ खोदेशो पा, परमप्रभु यावे आ डोंइती मार मरिम्शो बाक्मे, मेको पवा बाक्त।

10 मेना बेबीलोन डा पिप नेबुकदनेसर आ लडाइ पाइबपुकी यरूसलेमम लडाइ पथ जाक्शा, मेको सहर कली पुम्शो बाक्मा बाक्त।

11 मिनू आ लडाइ पाइबपुकीम मेको सहर पुम्दमेनु, बेबीलोन डा पिप नेबुकदनेसर जाक्माक्त।

12 मिनू यहूदा डा पिप येहो-याकीन, नेबुकदनेसर कली जिम्मा गेसे बाक्त। मिनू मेको नु मेको आ ममा, आ गेय पाइबपुकी, आ टेयब मुरपुकी नु आ लडाइ पाइब आन टेयब मुर नेल्ल बेबीलोन डा पिप कली जिम्मा गेसमा बाक्त। मिनू बेबीलोन डा पिपम सासन पवा आ ८ बर्सम येहो-याकीन कली ग्याइशशा चोक्गा बाक्त।

13 मेकोमी परमप्रभु यावे आ खिं डा शोंप नु पिप आ खिं डा शोंप नेल्ल लदा बाक्त। मेकोमी सोलोमनम सेल्शो परमप्रभु यावे आ खिं डा सुन के बोस खोइशशा लदा बाक्त। मोपा परमप्रभु यावे आ देशो लोत्र गाम्माक्त। २राजा २०:१७

14 मेकोपुकीम यरूसलेम डा टेयब मुर, लडाइ पाइब आन टेयब मुर नेल्ल, लडाइ पाइब नेल्ल १० हजार मार मार सेल्स जोक्ब नु तुप्तील नेल्ल ग्याइशशा लदा बाक्त। थम पुडग आन कली ला प्रोंइशा वोदा बाक्त। येरमीया २४:१

15 नेबुकदनेसरमी येहो-याकीन कली ग्याइशशा बेबीलोनम लदा बाक्त। पिप आ ममा, पिप आ मीशपुकी, मेको आ टेयब गेय पाइबपुकी नु नेल्ल क्येडा जोक्ब तुडक्ब आन कली यरूसलेम रे ग्याइशशा बेबीलोन लदा बाक्त। येरमीया २२:२६

16 बेबीलोन डा पिपमी ७ हजार बोल्यो लडाइ पाइब नु हजार का मार मार सेल्स जोक्ब नु तुप्तील आन कली ग्याइशशा बेबीलोन लाइक्मी बाक्त। मेको नेल्ल लडाइ पचा कली बोल्यो मुर बाक्मा बाक्त।

17 बेबीलोन डा पिपमी येहो-याकीन आ बकान्छा मत्तन्याह कली मेको आ पा डा पिप सेला बाक्त। मिनू मेको आ नें सिदकीयाह वोदा बाक्त।

यहूदा डा पिप सिदकीयाह

२इतिहास ३६:११-२१; येरमीया ५२:१-३०

18 सिदकीयाह पिप दुम्मेनु, मेको २१ बर्स दुम्शो बाक्माक्त। मिनू मेकोमी यरूसलेमम ११ बर्स सासन पवा बाक्त। मेको आ ममा आ नें हामुतल बाक्माक्त। मेको लिब्ना सहर डा येरमीया आ तमी बाक्माक्त।

19 मेकोम येहो-याकीमम पशो खोदेशो पा परमप्रभु यावे आ डोंइती मार मरिम्शो बाक्मे, मेको पवा बाक्त। २राजा २३:३७

20 मिनू परमप्रभु यावे आ गाइशशोम पतीके यरूसलेम नु यहूदा डा मुर नेल्ल आन कली आ डोंइती रे गुंडदीमी बाक्त। मिनू नोले सिदकीयाहमी बेबीलोन डा पिप कली मटिवा बाक्त। २राजा २३:२७

## 25

यरूसलेम खतम दुम्शो

1 सिदकीयाहम सासन पशो ९ बर्स १० महिना डा १० नाक्त बेबीलोन डा पिप नेबुकदनेसर आ लडाइ पाइब नेल्ल चाक्शा यरूसलेम नु लडाइ पथ जाक्माक्त। मिनू यरूसलेम कली पुम्शा एर ओंथ गारो डोइक्तीक सेल्मे बाक्त। येरमीया ३४:१

2 पिप सिदकीयाहमी सासन पशो ११ बर्स दुम्मेनु, सहर पुम्दमे बाक्त।

3 मिनू मेको ४ महिना डा ९ नाक्त सहरम थम टेयब अन्काल दुम्माक्त। मिनू मेको रागीम मुर आन कली जचा थोत्रक मारेइ मबाक्माक्त।

4 मेना पिप नु लडाइ पाइब नेल्ल गारो होइशशा, नाक्दो प्रोक्मा बाक्त। मेको पिप आ रू रे गारो निकशी आस दाते डा लाप्चो रे कल्दीपुकी सहर आ एर ओंथ बाक्तेक्म हना यो, प्रोक्मा बाक्त। मोपा मेकोपुकी अराबाह गे प्रोक्मा बाक्त।

5 तन्न कल्दी डा लडाइ पाइबपुकीम पिप कली खेदा पामे बाक्त। मिनु मेको कली यरीको डा दिममी थित्मे बाक्त। आ लडाइ पाइब नेल्ल मेको कली प्रोइशा एर ओंथ ब्रमा बाक्त।

6 मिनु मेको कली ग्याइशशा बेबीलोन डा पिप आ डोइती रिब्ला सहरम चाकामे बाक्त। मिनु मेकोमी मेको आन कली निसाफ पवा बाक्त।

7 मेकोपुकीम सिदकीयाह आ तौ आन कली मेको आ डोइतीन सदमे बाक्त। मिनु नोले सिदकीयाह आ मिक्च पुक्तमे बाक्त। मिनु मेको कली कांसा के साडलोम पाइशशा बेबीलोन लदमे बाक्त। २सामुएल १२:१०

यहूदा डा मुर आन कली लाइशशो

8 बेबीलोन डा पिप नेबुकदनेसरमी सासन पशो १९ बर्स ५ महिना डा ७ नाक्त, नेबुकदनेसर कली खाल पाइब आन ठेयब मुर नेबुजरादान यरूसलेम जाकमाक्त।

9 मिनु मेकोमी परमप्रभु यावे आ खिं, पिप आ दरवार, यरूसलेम सहर डा खिं नेल्ल नु ठेयब खिं नेल्ल मी सुइक्ता बाक्त।

10 मेको पिप कली खाल पाइब आन ठेयब मुर आ हुकुमम बाक्शो कल्दी लडाइ पाइबपुकीम यरूसलेम आ एर ओंथ डा गारो नेल्ल प्रेत्मे बाक्त।

11 मेको पिप कली खाल पाइब आन ठेयब मुर नेबुजरादानमी सहरम प्रोइचा पुंडसीशो मुर नु अरु बेबीलोन डा पिप कली जिम्मा गेंसीशो मुर आन कली ग्याइशशा बेबीलोन लाइक्मी बाक्त।

12 तन्न मेको पिप कली खाल पाइब आन ठेयब मुरुम अडगुर रू रोक्चा नु रू दोचा कली थम पुडग आन कली चहिं प्रोइशा वोइक्मी बाक्त।

13 मिनु कल्दीपुकीमी परमप्रभु यावे आ खिंम बाक्शो कांसा के थामपुकी, निप्पाइक्तीकपुकी नु कांसा के ठेयब बोस प्रोल्शा आइक्च सेल्शा बेबीलोन लदमे बाक्त। येरमीया २७:१९-२२

14 मेकोपुकीम ग्योंबपुकी, बेल्लापुकी, सल्दो थेप्तीके थनारोपुकी, कचौरापुकी, थनारोपुकी नु चढेतीकेम चलेतीक कांसा के मारेइ मारेइ ग्योंब नेल्ल लदमे बाक्त।

15 मेकोपुकीमी मी कुरतीके नु बोस नेल्ले लदमे बाक्त। मिनु पिप कली खाल पाइब आन ठेयब मुरुमी सुन नु चांदीम सेल्शो मारेइ मारेइ लदा बाक्त।

16 सोलोमनमी परमप्रभु यावे आ खिं कली सेल्शो थाम निक्शी, ठेयब बोस नु निप्पाइक्तीक सेल्शो कांसा नाक्ने मचाप्चा डा बाक्मा बाक्त। १राजा ७:१५; १राजा ७:२३; १राजा ७:२७

17 मेको थाम का १८ कुबीत लाइशशो बाक्माक्त। मिनु मेको थाम का आ पिया कुबीत सां लाइशशो बाक्माक्त। मिनु मेको कांसा के जालीम आ एर ओंथ क्युक्शा हिरशो दारीम बाक्माक्त। अर्को थाम यो जालीम हिरशा मेको खोदेशो पा सेल्शो बाक्माक्त। कुबीत का आधा मिटर खोदेशो बाक्ब।

18 मिनु पिप कली खाल पाइब आन ठेयब मुरुम ठेयब चढेब सेरायाह नु मेको आ दी डा सेफन्याह नु लाप्चो कोव्रब सां आन कली यो ग्याइशशा लाइक्मी बाक्त।

19 मेकोमी सहरम मुल यो लीशो आन दाते डा लडाइ पाइब आन ठेयब मुर नु ५ जना पिप कली सल्ला गेब आन कली यो लाइक्मी बाक्त। मेकोम रागी डा मुर आन कली लडाइ पाइब मुर सेल्चा कली योव्रब ब्रेक्ब ठेयब मुर नु सहरम थिंशशो ६० जना मुर आन कली यो लाइक्मी बाक्त।

20 मेको पिप कली खाल पाइब आन ठेयब मुर नेबुजरादानमी मेको आन कली बेबीलोन डा पिप आ बाक्तीक रिब्ला सहरम चाक्मी बाक्त।

21 मिनु बेबीलोन डा पिपम मेको आन कली हमाथ आ रागीम रिब्लाम साइक्पाइक्मी बाक्त। मोपा यहूदा डा मुर आन रागी रे ग्याइशशा लाइक्चा पुंडसमा बाक्त। २राजा २३:३३

गेदाल्याहमी सासन पशो

येरमीया ४०:५; येरमीया ४१:३

22 बेबीलोन डा पिप नेबुकदनेसरमी शाफान आ चच अहीकाम आ तौ गेदाल्याह कली यहूदाम प्रोइशा वोइशशो इक्का खोइ मुर आन कली सासन पाइब सेल्शा वोदा बाक्त।

23 मिनु लडाइ पाइब आन ठेयब मुर नेल्ल नु मेको आन मुरपुकीम बेबीलोन डा पिपम गेदाल्याह कली सासन पाइब सेल्शो लोव्र नेम्मे बाक्त। मिनु मेको नेल्ल गेदाल्याह आ बाक्तीके मिस्पा सहरम जाक्मा बाक्त। मेको नेथन्याह आ तौ इश्माएल, कारेआह आ तौ योहानान, नेतोफाह सहर डा तन्हुमेथ आ तौ सेरायाह, माकाथी आ तौ याजन्याह नु मेको आन मुरपुकी जाक्मा बाक्त।

24 मिनु गेदाल्याहमी मेकोपुकी नु आन मुर आन कली कसम जशा रिंशो लोव्र पाइक्मी बाक्त। मिनु मेकोम “कल्दी डा ठेयब मुर आन कली तशा महिनीन। रागीम बाक्कीन। मिनु बेबीलोन डा पिप आ गेय पने। मिनु इन कली रिंशो दुम्ब” दे माइक्मी बाक्त।

25 तन्न ७ महिनाम पिप आ खिं डा मुर एली-शामा आ चच, नेथन्याह आ तौ इश्माएलम १० जना मुर आन कली चाक्शा जाक्माक्त। मिनु मेकोमी गेदाल्याह नु मेको नु मिस्पा सहरम बाक्ब यहूदा नु कल्दी डा मुर आन कली तुप्शा साइक्मी बाक्त।

26 मोपतीके कल्दी आन क्येडा हिंशा आइक्च रे ठेयब मुर नु लडाइ पाइब आन ठेयब मुर नेल्ल प्रोक्शा इजीप्त रागी जाक्दीम्मा बाक्त। ब्यवस्था २८:६८

येहो-याकीन कली प्रोइशो

येरमीया ५२:३१-३४

27 यहूदा डा पिप येहो-याकीन ग्याइशशा लाइशशो ३७ बर्स, १२ महिना डा २७ नाक्त दुम्मेनु, प्रोइचा पुंडसे बाक्त। मिनु एवील-मेरोदक बेबीलोन डा पिप दुम्शा सासन पशो आ डोंइती डा बर्सम मेको कली प्रोना बाक्त। २राजा २४:१५

28 मेकोमी येहो-याकीन कली रिम्शो लोइ पवा बाक्त। मिनु मेको कली बेबीलोनम बाक्शो पिप आन दातेमी नेल्ल क्येडा ठेयब सेला बाक्त।

29 मोपा येहो-याकीनमी आ चोक्सीशो वा पुदा बाक्त। मिनु आ लीशो नाक्त नेल्ल पिप नु बाक्शा जवा बाक्त।

30 बेबीलोन डा पिपमी मेको कली ब्रोंइम सम्म नाक्त किंत किंत आ माल्शो मारेइ मारेइ गेवा बाक्त।

## १ इतिहास

**ब्रेक्ब मुर:** एको इतिहास किताब निक्शी हिब्रू बाइबलम किताब का बाक्त। मेकेर राजा किताब निक्शी नु सामुएल किताब निक्शीम मन्नेक्शो लीशो लोत्र ब्रेक्शो बाक्ब। एको किताब आ ब्रेक्स एजा आ ब्रेक्शो खोदेशो तांडसीब। मिनु एजा किताब इतिहास किताब नु थम गारचा डा बाक्त। २इतिहास ३६:२२-२३ नु एजा १:१-३ तन्न एजा ब्रेक्ब मुर बाक्त हना यो, अर्को मुरुम यो लोत्र तेम्शो बाक्तेकम। १इतिहास ३:१९-२४

**गेना दुम्शो:** एको किताब रागी सेल्चा रे पिप कोरेस आ सासन पशो ५३६ बि. सी. सम्म डा बाक्ब। तन्न पिप दाऊद आ पर्वम शुश लोत्र बाक्ब।

**मार ब्रेक्शो:** एको किताब इस्राएली आन इतिहासम तेम्शो लोत्र बाक्ब।

१. आदम रे इस्राएल आ १२ थर १इतिहास १:- १इतिहास ९:-

२. पिप दाऊद आ सासनम इस्राएली आन इतिहास १इतिहास १०:- १इतिहास २९:-

आदम रे अब्राहाम सम्म डा मुर

1 आदम आ तौ सेथ बाक्माक्त। सेथ आ तौ एनोश बाक्माक्त। उत्पत्ती ५:-

2 एनोश आ तौ केनान बाक्माक्त। केनान आ तौ मा-हालालेल बाक्माक्त। मा-हालालेल आ तौ यरेद बाक्माक्त।

3 यरेद आ तौ हनोक बाक्माक्त। एनोक आ तौ मेथुसेलाह बाक्माक्त। मेथुसेलाह आ तौ लमेक बाक्माक्त।

4 लमेक आ तौ नोआह बाक्माक्त। नोआह आ तौ शेम, हाम नु यफेथ बाक्मा बाक्त।

यफेथ आ तौ चच

5 यफेथ आ तौ गोमेर, मागोग, मादै, यावान, तूबाल, मेशेक नु तिरास बाक्मा बाक्त। उत्पत्ती १०:२-५

6 गोमेर आ तौ अश्केनज, दिफाथ नु तोगरमाह बाक्मा बाक्त।

7 यावान आ तौ एलीशाह, टारशीश, कित्तीम नु रोदानीम बाक्मा बाक्त।

हाम आ तौ चच युड

8 हाम आ तौ कूश, इजीप्त, पूत नु कनान बाक्मा बाक्त। उत्पत्ती १०:६-२०

9 कूश आ तौ शेबा, हवीलाह, साब्ताह, रामाह नु साब्तेका बाक्मा बाक्त। रामाह आ तौ शेबा नु देदान बाक्सा बाक्त।

10 कूश निम्रोद आ आफ बाक्माक्त। निम्रोद रागी आ डोंडती सक्ति पाइशशो मुर का बाक्माक्त।

11 इजीप्त माइशशो मुर लूदीम अनामीम, लेहाबीम नु नफतुहीम,

12 पथ्रुसीम, कस्तुहीम, काफतोरीम आन आफ बाक्माक्त। मेको रे पलिस्ती दुम्शो बाक्मा बाक्त।

13 कनान माइशशो मुर आ डोंडती थिशो तौ सीदीन नु हेथ आस आफ बाक्माक्त।

14 मेको निक्शी रे यबुसी, एमोरी, गिरगाशी,

15 हिक्वी, अरकी, सिनी,

16 अरवादी, सेमारी नु हमार्थी दुम्शो बाक्मा बाक्त।

शेम आ तौ चच युड

17 शेम आ तौ एलाम, अश्शुर, अरपक्शाद, लूद, अराम, ऊज, हुल, गेथेर नु मेशेक बाक्मा बाक्त। उत्पत्ती १०:२१-३०

18 अरपक्शाद शेलाह आ आफ बाक्माक्त। मिनु शेलाह एबेर आ आफ बाक्माक्त।

19 मिनु एबेरमी तौ निक्शी थिवा बाक्त। का आ नें पेलेग बाक्माक्त। मेको थिशो ना रागी योक्शो बाक्माक्त। मेको आ लोक्ब आ नें योक्तन बाक्माक्त। उत्पत्ती ११:१-९

20 मिनु योक्तन आ चच युड अल्मोदाद, शेलोफ, हासार-मावेथ, येराह,

21 हदोराम, उजाल, दिकलाह,

22 एबाल, अबीमा-एल, शेबा,

23 ओफीर, हवीलाह नु योबाब बाक्मा बाक्त। मेको नेल्ल योक्तन आ चच युड बाक्मा बाक्त। उत्पत्ती ११:१०-२६

24 शेम रे अब्राम सम्म सु सु बाक्मा बाक्त देंशा हना, अरपक्शाद, शेलाह,

25 एबेर, पेलेग रेऊ, उत्पत्ती ११:१०-२६

26 सेरूग, नाहोर, तेराह,

27 नु अब्राम बाक्मा बाक्त। अब्राम कली अब्राहाम यो देंबाक्मा बाक्त।

अब्राहाम आ तौ चच युड

28 अब्राहाम आ तौ निक्शी इसहाक नु इश्माएल बाक्सा बाक्त। उत्पत्ती २१:३; उत्पत्ती १६:१५

29 इश्माएल आ डोंडती थिशो तौ नेबायोथ बाक्माक्त। मेको आ नोले डा तौ केदार, अदबेल, मिब्साम, उत्पत्ती २५:१३-१६

30 मिश्मा, दुमा, मस्सा, हादाद, तेमा,

31 येतुर, नाफीश नु केदमा बाक्मा बाक्त। मेको नेल्ल इश्माएल आ तौ बाक्मा बाक्त।

32 अब्राहाम आ नोले चाक्शो मीश केतुराहमी जिम्नान, योकशान, मेदान, मिदयान, इशबाक नु शुआह थीमी बाकत। मिनु योकशान आ तौ शेबा नु देदान बाक्सा बाकत। उत्पत्ती २५:१-४

33 मिदयान आ तौ एफाह, एफेर, हनोक, अबीदा नु एल्दाह बाक्सा बाकत। मेको नेल्ल केतुराह आ तौ चच बाक्सा बाकत।

34 अब्राहाम आ तौ इसहाक बाक्सा बाकत। मिनु इसहाक आ तौ निक्शी एसाव नु इस्राएल बाक्सा बाकत। उत्पत्ती २५:११-२६

35 एसाव आ तौ एलीफाज, रूएल, येऊश, यालाम नु कोराह बाक्सा बाकत। उत्पत्ती ३६:१०-१४, २०-२८

36 एलीफाज आ तौ तेमान, ओमार, सेफी, गाताम, केनाज, तिम्ना नु अमालेक बाक्सा बाकत।

37 रूएल आ तौ नाहाथ, जेराह, शम्माह नु मिज्जा बाक्सा बाकत।

एदोम आ डोंइती डा मुर

38 सेडर आ तौ लोतान, शोबाल, सिबोन, अनाह, दीशोन, एजेर नु दीशान बाक्सा बाकत।

39 लोतान होरी नु होमाम आ किकी पिपी बाक्सा बाकत। मिनु लोतान आ समी तिम्ना बाक्सा बाकत।

40 शोबाल अल्यान, मानाहाथ, एबाल, शेफी नु ओनाम आ थर डा किकी पिपी बाक्सा बाकत। सिबोन आ तौ आइयाह नु अनाह बाक्सा बाक्स।

41 अनाह आ तौ दीशोन बाक्सा बाकत। दीशोन आ तौ हाम्नान, एरबान, इथ्रान नु केरान बाक्सा बाकत।

42 एजेर आ तौ बिल्हान, जावान नु याकान बाक्सा बाकत। दीशान आ तौ ऊज नु अरान बाक्सा बाकत।

एदोम डा पिपपुकी

43 इस्राएल रागीम पिप दुम्या क्येडा डोंइती एदोम रागीमी बेओर आ तौ बेला पिप दुम्या बाक्शो बाक्सा बाकत। मेको आ सहर दिनहाबा बाक्सा बाकत। उत्पत्ती ३६:३१-४३

44 मिनु बेला बेकम नोले बोझा सहर डा जेराह आ तौ योबाब पिप दुम्मा बाकत।

45 मिनु योबाब बेकम नोले तेमान डा मुर आन रागी डा हुशाम पिप दुम्मा बाकत।

46 मिनु हुशाम बेकम नोले बेदाद आ तौ हादाद पिप दुम्मा बाकत। मेकोम मोआब रागीम मिदयानी आन कली लडाइ पा फ्रूमी बाकत। मेको आ सहर आ नें अवीथ बाक्सा बाकत।

47 मिनु हादाद बेकम नोले मासेकाह सहर डा सम्ला पिप दुम्मा बाकत।

48 मिनु सम्ला बेकम नोले युफ्रेटीस खोला आ नेक्था डा रेहोबोथ डा शावल पिप दुम्मा बाकत।

49 मिनु शावल बेकम नोले आकबोर आ तौ बाल-हनान पिप दुम्मा बाकत।

50 मिनु बाल-हनान बेकम नोले हादाद पिप दुम्मा बाकत। मेको आ सहर आ नें पाही बाक्सा बाकत। मेको आ मीश आ नें मेहेताबेल बाक्सा बाकत। मेको मात्रेद आ तमी, मे-जाहाब आ चच बाक्सा बाकत।

51 मिनु हादाद बेक्सा बाकत। एदोम रे दुम्यो थरपुकी तिम्ना, अल्याह, येथेथ,

52 ओहोली-बामा, एलाह, पिनोन,

53 केनाज, तेमान, मिब्सार,

54 मर्दीएल नु यिराम बाक्सा बाकत। मेको नेल्ल एदोम रे दुम्यो थर बाक्सा बाकत।

## 2

इस्राएल माइशो याकूब आ तौ

1 इस्राएल आ तौ रूबेन, सिमियोन, लेवी, यहूदा, इस्साकार, जबूलून,

2 दान, योसेफ, बेन्यामीन, नाप्ताली, गाद नु आशेर बाक्सा बाकत। उत्पत्ती ३५:२२-२६

यहूदा आ तौ चच

इतिहास ४:-

3 यहूदा आ तौ एर, ओनान नु शेलाह बाक्सा बाकत। मेको आन ममा कनानी मीश बाथ-शुआ बाक्सा बाकत। मिनु यहूदा आ डोंइती थिशो तौ एरमी परमप्रभु यावे आ डोंइती मरिम्शो पवा बाकत। मोपतीके परमप्रभु यावेमी मेको कली सदा बाकत। उत्पत्ती ३८:१-७

4 मिनु यहूदा आ चाइमी तामारमी यहूदा रे पा परेस नु जेराह थिम्सी बाकत। मिनु यहूदा आ तौ नेल्ल पा ५ जना दुम्मा बाकत। उत्पत्ती ३८:२७-३०

5 परेस आ तौ हेसोन नु हामुल बाक्सा बाकत। उत्पत्ती ४६:१२

6 जेराह आ तौ जिम्री, एथान, हेमान कल्कोल नु दारा बाक्सा बाकत। मेको नेल्ल ५ जना बाक्सा बाकत।

7 कारमी आ तौ आकान बाक्सा बाकत। मेकोमी इस्राएली आन कली शुश श्येत गेवा बाकत। परमप्रभु आ थोत्रक लदा बाकत। यहोसु ७:-

8 मिनु एथान आ तौ अजारयाह बाक्सा बाकत।

राम आ तौ चच

9 हेसोन आ तौ येराहमेल, राम नु कलूबै बाक्सा बाकत। रूथ ४:१९-२२; मत्ती १:३

- 10 राम अम्मीनादाब आ आफ बाक्माक्त। अम्मीनादाब नहशोन आ आफ बाक्माक्त। मेको यहूदा आ तौ आन दाते डा नेल्ल क्येडा टेयब बाक्माक्त। गन्ती १:१७; गन्ती २:३; गन्ती ७:११-१२
- 11 नहशोन साल्मा आ आफ बाक्माक्त। साल्मा बोआज आ आफ बाक्माक्त।
- 12 बोआज ओबेद आ आफ बाक्माक्त। ओबेद येस्से आ आफ बाक्माक्त।
- 13 येस्से एलीआब आ आफ बाक्माक्त। मेको आ डोंडती थिशो तौ बाक्माक्त। मेको आ माइला अबीनादाब, साइला शिमेआ, १सामुएल १६:५-१०
- 14 काइला नेथनेल, अन्तरे रदाइ,
- 15 जन्तरे ओसेम नु कान्छा दाऊद बाक्मा बाक्त। १सामुएल १७:१२
- 16 मेको आन समी सेरूयाह नु अबीगेल बाक्सा बाक्त। सेरूयाह आ तौ अबीशै, योआब नु आसाहेल सां बाक्मा बाक्त। २सामुएल २:१८
- 17 अबीगेलम आमासा थिवा बाक्त। मेको आ आफ इश्माएली येथेर बाक्माक्त। २सामुएल १७:२५

कालेब आ तौ चच

- 18 हेसोन आ तौ कालेबमी आ मीश अजुबाह नु येरीओथ रे पा तमी तौ थिवा बाक्त। मेको आ तौ येशेर, शोबाब नु अरदोन बाक्मा बाक्त। १इतिहास २:९, ४२
- 19 मिनु अजुबाह बेकम नोले कालेबमी एफ्राथ कली ग्युबे पवा बाक्त। मिनु मेकोमी हुर थिवा बाक्त। १इतिहास २:५०
- 20 मिनु हुर आ तौ ऊरी बाक्माक्त। ऊरी आ तौ बेजालेल बाक्माक्त। प्रस्थान ३१:२
- 21 मिनु हेसोन ६० बर्स दुम्मेनु, माकीर आ तमी नु ग्युबे पवा बाक्त। मेको गिलाद आ समी बाक्माक्त। मिनु हेसोन मेको नु बाक्शा सेगुब थिवा बाक्त।
- 22 मिनु सेगुब याइर आ आफ बाक्माक्त। याइरम गिलाद डा २३ सहर सासन पवा बाक्त। न्यायाधीस १०:३-६; १राजा ४:१३
- 23 तन्न गेशुर नु अराम आस राज्य निकशीमी मेको रे हव्वोथ-याइर, केनाथ नु आ नेक्था डा सहर ६० ओटा सहर लडाइ पा प्राशा आस के सेल्से बाक्त। मेको नेल्ल माकीर आ तौ बाक्मा बाक्त। माकीर चहिं गिलाद आ आफ बाक्माक्त।
- 24 हेसोन कालेब-एफ्राथाह सहरम बेकम नोले हेसोन आ मीश अबीयाहम मेको के अशहुर थिवा बाक्त। मेको तेकोहा आ आफ बाक्माक्त। १इतिहास ४:५

येराहमेल आ तौ चच

- 25 हेसोन आ डोंडती थिशो तौ येराहमेल बाक्माक्त। येराहमेल आ डोंडती थिशो तौ राम बाक्माक्त। मिनु नोले डा तौ बुनाह, ओरेन, ओसेम नु अहीयाह बाक्मा बाक्त। इतिहास २:९
- 26 येराहमेल के अर्को मीश का यो बाक्माक्त। मेको आ नें अतारा बाक्माक्त। मेकोमी ओनाम थिवा बाक्त।
- 27 येराहमेल आ डोंडती थिशो तौ राम आ तौ मास, यामीन नु एकेर बाक्मा बाक्त।
- 28 ओनाम आ तौ शम्माइ नु यादा बाक्सा बाक्त। मिनु शम्माइ आ तौ नादाब नु अबीशुर बाक्सा बाक्त।
- 29 अबीशुर आ मीश आ नें अबीहेल बाक्माक्त। मेकोमी अहबान नु मोलीद थिवा बाक्त।
- 30 नादाब आ तौ सेलेद नु अप्पाइम बाक्सा बाक्त। मिनु सेलेद आल मथिथु बेक्माक्त।
- 31 अप्पाइम आ तौ इशी बाक्माक्त। मिनु इशी आ तौ शेशान बाक्माक्त। शेशान आ तौ अहलै बाक्माक्त।
- 32 शम्माइ आ लोक्ब यादा आ तौ येथेर नु योनाथन बाक्सा बाक्त। मिनु येथेर आल मथिथु बेक्माक्त।
- 33 योनाथन आ तौ पेलेथ नु जाजा बाक्सा बाक्त। मेको नेल्ल येराहमेल आ तौ चच बाक्मा बाक्त।
- 34 मिनु शेशान के तौ मबाकम। तमी ला बाक्मा बाक्त। शेशान के इजीप्त डा यारहा माइशो वाइल का बाक्माक्त। १इतिहास २:३१; गन्ती २७:१७
- 35 मिनु शेशानमी आ तमी का कली आ वाइल यारहा नु ग्युबे पदा बाक्त। मिनु आ तमीमी अत्तै थिवा बाक्त।
- 36 अत्तै नाथान आ आफ बाक्माक्त। नाथान जाबाद आ आफ बाक्माक्त।
- 37 जाबाद एफलाल आ आफ बाक्माक्त। एफलाल ओबेद आ आफ बाक्माक्त।
- 38 ओबेद येहू आ आफ बाक्माक्त। येहू अजारयाह आ आफ बाक्माक्त।
- 39 अजारयाह हेलेस आ आफ बाक्माक्त। हेलेस एलेआसाह आ आफ बाक्माक्त।
- 40 एलेआसाह सिस्माइ आ आफ बाक्माक्त। सिस्माइ शाल्लुम आ आफ बाक्माक्त।
- 41 शाल्लुम येकाम्याह आ आफ बाक्माक्त। येकाम्याह एली-शामा आ आफ बाक्माक्त।

कालेब आ तौ चच युइ

- 42 येराहमेल आ लोक्ब कालेब आ डोंडती थिशो तौ मेशाह बाक्माक्त। मेको कली हिबू लोव्रमी मारेशा यो देसीब, मेको आ तौ जीफ बाक्माक्त। मारेशा आ तौपुकी हेब्रोन आ मुर बाक्मा बाक्त। १इतिहास २:१८
- 43 हेब्रोन आ तौ कोराह, ताप्पुआह, रेकेम नु शेमा बाक्मा बाक्त।
- 44 शेमा राहाम आ आफ बाक्माक्त। मिनु रहम योरकेआम आ आफ बाक्माक्त। रेकेम शम्माइ आ आफ बाक्माक्त।
- 45 शम्माइ आ तौ माओन बाक्माक्त। माओन आ तौ बेथ-सुर बाक्माक्त।
- 46 कालेब आ अर्को मीश एफाहमी हारान, मोचा नु गाजेज थिवा बाक्त। मिनु हारान गाजेज आ आफ बाक्माक्त।
- 47 याहदे आ तौ रेगेम, योथाम, गेशान, पेलेत, एफाह नु शाफ बाक्मा बाक्त।
- 48 कालेब आ अर्को मीश माकाहमी शेबेर नु तिरहानाह थिवा बाक्त।



49 मेकोमी मदमन्ना आ आफ शाफ, मकबेनाह आ आफ शेवा नु गिबा आ आफ थिवा बाक्त। कालेब आ तमी अकसा बाक्माक्त। यहोसु १५:१६; न्यायाधीस १:१२

50 मेको कालेब आ तौ चच युड बाक्मा बाक्त। कालेब आ मीश एफ्राथाह आ डोंडती थिशो तौ हुर बाक्माक्त। हुर आ तौ शोबाल किरयथ-यारीम डा मुर आन आफ बाक्माक्त। १इतिहास २:१९

51 साल्मा बेथलेहेम आ आफ बाक्माक्त। हारेफ बेथ-गादेर आ आफ बाक्माक्त।

52 किरयथ-यारीम आ किकी पिपी शोबाल के अर्को तौ यो बाक्मा बाक्त। मेको हारोए नु मेनुहोथ सहर डा आधा मुर बाक्मा बाक्त।

53 मिनु किरयथ-यारीम सहरम बाक्शो खिं खिं डा मुर इथी, पूथी, शुमाथी नु मित्री बाक्मा बाक्त। मेकोपुकी रे सोराथी नु एरताओली दुम्मा बाक्त। १इतिहास ४:२

54 साल्मा आ तौ बेथलेहेम, नेतोफाह अत्रोथ-बेथ-योआब नु मानाहाथ सहर डा आधा मुर नु सोराह सहर डा मुर बाक्मा बाक्त। १इतिहास ९:१६

55 याबेस सहरम बाक्ब मेको आन खिं खिं डा मुर तिराथी, शिमेआथ आ खिं डा मुरपुकी नु सुकाथी बाक्मा बाक्त। मेको हम्माथ सहर रे जाक्शो केनी बाक्मा बाक्त। मेको आन किकी पिपी रेकाब बाक्माक्त। येरमीया ३५:-

### 3

दाऊद आ तौपुकी

1 हेब्रोन सहरम थिशो दाऊद आ तौ सु सु बाक्मा बाक्त देशा हना, आ डोंडती थिशो तौ अम्मोन, दाऊद आ मीश येजेरल डा अहीनोआम के बाक्माक्त। नोले डा तौ दानीएल, दाऊद आ मीश कारमेल डा अबीगेरल के बाक्माक्त।

2 नोले डा तौ अब्सालोम, दाऊद आ मीश गेशुर डा पिप तल्मै आ तमी माकाह के बाक्माक्त। नोले डा तौ अदोनीयाह, दाऊद आ मीश हग्गीथ के बाक्माक्त। २सामुएल ३:२-५

3 नोले डा तौ शेफत्याह, दाऊद आ मीश अबीतल के बाक्माक्त। नोले डा तौ इथेआम, दाऊद आ मीश एलाह के बाक्माक्त।

4 मेको नेल्ल हेब्रोन सहरम थिशो दाऊद आ तौ बाक्मा बाक्त। दाऊदमी हेब्रोन सहरम ७ बर्स ६ महिना सासन पवा बाक्त। मिनु यरूसलेम ३३ बर्स सासन पवा बाक्त।

5 यरूसलेम सहरम थिशो दाऊद आ तौ सु सु बाक्मा बाक्त देशा हना, शिमेआ, शोबाब, नाथान नु सोलोमन बाक्मा बाक्त। मेको ४ जना अम्मीएल आ तमी बाथ-शुआम थिवा बाक्त। १इतिहास १४:५-७; २सामुएल ५:१४-१६

6 अरु यरूसलेम सहरम दाऊद आ थिशो तौ इभार, एली-शामा, एली-फेलेत,

7 नोगाह, नेफेग, याफीया,

8 एली-शामा, एली-आदा नु एली-फेलेत ९ जना तौ बाक्मा बाक्त।

9 अरु चाक्शो मीश आन तौपुकी प्रोंडशा, मेको दाऊद आ तौ बाक्मा बाक्त। मिनु मेको आन समी तामार बाक्माक्त। २सामुएल १३:१

सोलोमन आ तौ चच युड

10 सोलोमन आ तौ चच युड सु सु बाक्मा बाक्त देशा हना, रेहोबाम आ तौ बाक्माक्त। रेहोबाम आ तौ अबीयाह बाक्माक्त। अबीयाह आ तौ आसा बाक्माक्त। आसा आ तौ येहो-शाफात बाक्माक्त। मती १:७-१२

11 येहो-शाफात आ तौ योराम बाक्माक्त। योराम आ तौ अहाज्याह बाक्माक्त। अहाज्याह आ तौ योआश बाक्माक्त।

12 योआश आ तौ अमस्याह बाक्माक्त। अमास्याह आ तौ अजारयाह बाक्माक्त। अजारयाह आ तौ योथाम बाक्माक्त।

13 योथम आ तौ आहाज बाक्माक्त। आहाज आ तौ हिज्कीयाह बाक्माक्त। हिज्कीयाह आ तौ मनस्से बाक्माक्त।

14 मनस्से आ तौ आमोन बाक्माक्त। अम्मोन आ तौ योसीयाह बाक्माक्त।

15 योसीयाह आ डोंडती थिशो तौ योहानान बाक्माक्त। योसीयाह आ माइला येहो-याकीम, आ साइला सिदकीयाह नु आ कान्छा शाल्लुम बाक्माक्त।

16 येहो-याकीम आ तौ चच युड सु सु बाक्मा बाक्त देशा हना, आ तौ येकोन्याह बाक्माक्त। येकोन्याह आ तौ सिदकीयाह बाक्माक्त। २इतिहास ३६:९-१०

17 मिनु ग्याइश्शा लाइक्चा पुंडसीशो येकोन्याह आ तौ शाल्तीएल बाक्माक्त।

18 अरु ग्याइश्शा लाइक्चा पुंडसीशो माल्कीराम, पेदायाह, शेनास्सार, येकाम्याह, होशामा नु नेदाब्याह बाक्मा बाक्त।

19 पेदायाह आ तौ जेरूब-बाबेल नु शिमेइ बाक्सा बाक्त। जेरूब-बाबेल आ तौ मेशुल्लाम नु हनान्याह बाक्सा बाक्त। मेको आस समी शेलोमीथ बाक्माक्त। एजा ३:२,८

20 अर्को हशुबाह, ओहेल, बेरेक्याह, हासादीयाह नु युशब-हेसेद ५ जना तौ बाक्मा बाक्त।

21 हनान्याह आ तौ पेलात्याह नु येशायाह बाक्सा बाक्त। येशायाह आ तौ रेफायाह बाक्माक्त। रेफायाह आ तौ अरनान बाक्माक्त। अरनान आ तौ ओबदिया बाक्माक्त। ओबदिया आ तौ शेकन्याह बाक्माक्त।

22 शेकन्याह आ तौ शेमायाह बाक्माक्त। शेमायाह आ तौ हत्तुश, इगाल, बारयाह, नेआरयाह नु शाफात नेल्ल पा ६ जना तौ बाक्मा बाक्त।

23 नेआरयाह आ तौ एली-ओ-एनाइ, हिज्कीयाह नु अजीकाम सां बाक्मा बाक्त।

24 एली-ओ-एनाइ आ तौ होदावीयाह, एल्याशीब, पेलायाह, अक्कुब, योहानान, देलायाह नु अनानी नेल्ल ७ जना बाक्मा बाक्त।

## 4

यहूदा आ तौ चच युड

- 1 यहूदा आ तौ पेरस, हेसोन, कारमी, हुर नु शोबाल बाक्मा बाक्त। १इतिहास २:४-५; १इतिहास ७:१९, ५०
- 2 शोबाल आ तौ रेआयाह, याहाथ आ आफ बाक्माक्त। याहाथ अहुमै नु लाहाद आस आफ बाक्माक्त। मेको सोराथी आन चच युड बाक्मा बाक्त। १इतिहास २:५३
- 3 एताम आ तौ येजेल, इश्मा नु इदबाश बाक्मा बाक्त। मेको आन समी आ नें हास्सल-एल-पोनी बाक्माक्त।
- 4 पेनुएल गेदोर आ आफ बाक्माक्त। एजेर हुशाह आ आफ बाक्माक्त। मिनु कालेब आ मीश एफ्राथाह आ डोंडती थिशो तौ हुर बाक्माक्त। मेको आ तौ चच युड बेथलेहेम डा मुर बाक्मा बाक्त। १इतिहास २:१९, ५०
- 5 तेकोहा आ आफ अशहुर के मीश निक्शी बाक्सा बाक्त। मेको का आ नें हेलाह नु अर्को आ नें नाराह बाक्माक्त।
- 6 नाराहमी अहुज्जाम, हेफेर, तेमेनी नु हाहाशतारी थिवा बाक्त। एको नाराह आ तौ बाक्मा बाक्त।
- 7 हेलाह आ तौ सेरेथ, इचहार नु एथनान बाक्मा बाक्त।
- 8 कोस आनुब नु जोबेबा आस आफ बाक्माक्त। मिनु कोस हारुम आ तौ अहारहेल आ चच युड आन किकी पिपी बाक्माक्त।
- 9 मिनु याबेस माडशशो मुर का बाक्माक्त। मेको आ लोकब आन क्येडा शुश मान ताडब बाक्माक्त। मेको आ ममामी मेको कली श्येत पा थितीके मेको आ नें याबेस वोडशशो बाक्माक्त।
- 10 मिनु याबेसमी इस्राएली आन परमप्रभु कली “आं कली आसीक गेने। आं कली रू तेम्शा गेयीनी। गे गो नु बाक्कीन। आं कली श्येत रे डोन वोडय्यीनी” दे पुना बाक्त। मिनु परमप्रभुमी मेको आ पुंङशो गेवा बाक्त।
- 11 शुहाह आ लोकब केलुब मेहीर आ आफ बाक्माक्त। मेहीर एस्तोन आ आफ बाक्माक्त।
- 12 एस्तोन बेथ-राफा, पासओह नु तेहीन्नाह आन आफ बाक्माक्त। तेहीन्नाह इर-नाहाश आ आफ बाक्माक्त। मेको रेकाह आ मुर बाक्मा बाक्त।
- 13 केनाज आ तौ ओथनीएल नु सेरायाह बाक्सा बाक्त। ओथनीएल आ तौ हथाथ नु मेओनोथाड बाक्सा बाक्त। यहोसु १५:१७; १न्यायाधीस १:३३
- 14 मेओनोथाड ओफ्रा आ आफ बाक्माक्त। सेरायाह योआब आ आफ बाक्माक्त। योआब गे-हाराशीम आ आफ बाक्माक्त। मेको मुरपुकी मार मार सेल्स जोक्ब बाक्तीके मेको आन नें मेकोन बाक्माक्त।
- 15 यपुन्ने आ तौ कालेब आ तौ इरू, एलाह नु नाआम बाक्मा बाक्त। एलाह आ तौ केनाज बाक्माक्त। गन्ती १३:६; गन्ती १४:६
- 16 येहल्लेल आ तौ जीफ, जीफाह, तिरया नु असारेल बाक्मा बाक्त।
- 17 एज्जाह आ तौ येथेर, मेरेद, एफेर नु यालोन बाक्मा बाक्त। मेरेदमी फाराओ आ तमी बिथीयाह ग्युंवे पवा बाक्त। मेकोमी मिरयाम, शम्माड नु इश्बा थिवा बाक्त। इश्बा एस्तेमोआ आ आफ बाक्माक्त।
- 18 मेरेद आ यहूदी मीशमी येरेद, हेबेर नु येकुथीएल थिवा बाक्त। येरेद गेदोर आ आफ बाक्माक्त। हेबेर सोको आ आफ बाक्माक्त। येकुथीएल जानोह आ आफ बाक्माक्त।
- 19 होदीयाहम नाहाम आ समी ग्युंवे पवा बाक्त। मेको आ तौपुकी गारम डा कैलाह आ थर नु माकाथी एस्तेमोआ आ थर डा किकी पिपी बाक्मा बाक्त।
- 20 शिमोन आ तौ अम्मोन, रिन्नाह, बेन-हानान नु तिलोन बाक्मा बाक्त। इशी आ तौ जोहेथ नु बेन-जोहेथ बाक्सा बाक्त।

शेलाह आ तौ चच युड

- 21 यहूदा आ तौ का शेलाह बाक्माक्त। शेलाह आ तौ एर नु लेकाह सहरम बाक्बपुकी बाक्मा बाक्त। आ तौ लादाह नु मारेशा सहरम बाक्बपुकी बाक्मा बाक्त। बेथ-अशबेया सहरम बाक्ब रिम्शो सुती श्येले के वा प्रोत्रब नु गेय पाडब आ चच युड बाक्मा बाक्त। १इतिहास २:३
- 22 आ तौ योकीम नु कोजेबा सहरम बाक्ब मुर नु आ तौ योआश नु सारब बाक्मा बाक्त। योआश नु सारबमी मोआबी मीश आल ग्युंवे पाम्से बाक्त। तन्न लेहेम सहर लेशशा जाक्शो बाक्सा बाक्त। (एको लोत्र थम माडत बाक्त।) बेथलेहेम बाक्म को, लाशुबी-लाहेम सहर बाक्म, मेको मतुंडसीब।
- 23 मेकोपुकी खप के ग्योत्रब सेल्ब बाक्मा बाक्त। मिनु नेताइम नु गेदेराह सहरम बाक्शा, पिप आ गेय पाडब बाक्मा बाक्त।

सिमियोन आ तौ चच युड

- 24 सिमियोन आ तौपुकी नेमुएल, यामीन, यारीब, जेराह नु शावल बाक्मा बाक्त। उत्पत्ती ४६:१०
- 25 शावल आ तौ शाल्लुम बाक्माक्त। शाल्लुम आ तौ मिब्साम बाक्माक्त। मिब्साम आ तौ मिश्मा बाक्माक्त।
- 26 मिश्मा आ तौ हाम्मुएल बाक्माक्त। हाम्मुएल आ तौ जाक्कुर बाक्माक्त। जाक्कुर आ तौ शिमेड बाक्माक्त।
- 27 शिमेड के १६ जना तौ नु ६ जना तमी बाक्मा बाक्त। तन्न मेको आ लोकब के शुश आल मबाक्मा बाक्त। मोपतीके मेको आन खिं डा मुर यहूदा डा मुर खोदेशो पा शुश मद्दुम्मा बाक्त।
- 28 मेकोपुकी बेयर-शेबा, मोलादा, हासार-शुआल, यहोसु १९:२-८
- 29 बिल्हाह, एसेम नु तोलाद,
- 30 बेथुएल, होरमा नु सिकलाग,

- 31 बेथ-मारकाबोथ, हासार-सुसीम, बेथ-बीरी नु शा-आराइम सहरमी बाक्बाक्मा बाक्त। दाऊदम सासन मपवा सम्म सिमियोन आ थर डा मुर मेको सहरम बाक्शो बाक्मा बाक्त।
- 32 मेकोपुकी अर्को बाक्तीके एताम, ऐन, रिम्मोन, तोकेन नु आशान नेल्ल पा ५ सहर बाक्मा बाक्त।
- 33 मेको सहर आन एर ओंथ डा गाउंपुकीम बाल सहर सम्म आन बाक्तीके बाक्मा बाक्त। मिनु मेकोपुकीमी आन नें तौ चच युड आन नें ब्रेकना ब्रेकन बाक्शो बाक्मा बाक्त।
- 34 मेको आन खिं खिं डा ठेयब मुर सु सु बाक्मा बाक्त देशा हना, मेशोबाब, याम्लेक, अमस्याह आ तौ योशाह,
- 35 योएल, येहू योशीबीयाह आ तौ बाक्मा बाक्त। योशीबीयाह सेरायाह आ तौ बाक्मा बाक्त। सेरायाह असीएल आ तौ बाक्मा बाक्त।
- 36 एली-ओ-एनाड, याकोबाह, येशोहायाह, आसायाह, अदीएल, येसीमीएल बेनायाह,
- 37 जीजा शिफी आ तौ बाक्मा बाक्त। शिफी अल्लोन आ तौ बाक्मा बाक्त। अल्लोन येदायाह आ तौ बाक्मा बाक्त। येदायाह शिफ्री आ तौ बाक्मा बाक्त। शिफ्री शेमायाह आ तौ बाक्मा बाक्त।
- 38 मोदेशो आन नें ब्रेक्शो मुर आन खिं खिं डा ठेयब मुर बाक्मा बाक्त। मिनु आन खिं डा मुर सोशा बोशा शुश दुम्मा बाक्त।
- 39 मेको आन बस्तु भाव योव्रतीके मालना मालन दिम नेल्ल आ पूर्व गेदोर सहर सम्म लमा बाक्त।
- 40 मेकेर शुश नु रिम्शो बस्तु भाव योव्रतीके थित्मे बाक्त। मेकेर मारेड रेयके मनेसीब रिम्शो ठेयब दिम बाक्मा बाक्त। मेको क्येडा डोंइती हाम आ मुर बाक्शो बाक्मा बाक्त। इतिहास १:८-१६
- 41 यहूदा डा पिप हिज्कीयाहम सासन पवा ना मेको नें ब्रेक्शो मुरपुकीम गेदोर सहरम बाक्ब हाम नु मेउनीम आस मुर आन ताम्बु नु खिं खतम सेल्मे बाक्त। मुर आन कली सदमे बाक्त। मेकेर रिम्शो बस्तु भाव योव्रतीके बाक्शा, मेक उड आंमान बाक्शो बाक्मा बाक्त। २रजा १८:३
- 42 मिनु मेको सिमियोन आ थर डा ५ सहे खोड मुरुमी सेडर पहाड कली लडाइड तोमे बाक्त। मेको आन ठेयब मुर इशी आ तौ पेलात्याह, नेआरयाह, रेफायाह नु उज्जीएल बाक्मा बाक्त।
- 43 मेकोपुकीम प्रोक्शा लीशो अमालेकी नेल्ल आन कली साइशशो बाक्मा बाक्त। मिनु सिमियोन आ थर डा मुर मुल सम्म मेक उड बाक्शो बाक्नीम। १सामुएल १५:३-८

## 5

रूबेन आ तौ चच युड

- 1 इसाएल आ तौ आन दाते डा नेल्ल क्येडा डोंइती थिशो रूबेन बाक्मा बाक्त। नेल्ल क्येडा डोंइती थिशो बाक्त हना यो, आ आफ आ मीश नु इप्तीके, आ डोंइती थिशो तौ आ तचा डा अधिकार इसाएल आ तौ योसेफ आ तौ आस कली गेशो बाक्मा बाक्त। मिनु रूबेन आ नें, डोंइती डा तौ आ नें ब्रेक्तीकेम मब्रेक्शो बाक्मा बाक्त। उत्पत्ती ३५:२२; उत्पत्ती ४९:३-४
- 2 मिनु यहूदा आ लोक्ब आन दातेमी नेल्ल क्येडा ठेयब दुम्त हना यो, मेको रे पा सासन पाइब का गूत हना यो, डोंइती थिशो तौ आ अधिकार योसेफ केन दुम्शो बाक्मा बाक्त। उत्पत्ती ४९:८,१०; ब्यवस्था ३३:७; उत्पत्ती ४९:२२; ब्यवस्था ३३:१३-१७
- 3 इसाएल आ डोंइती थिशो तौ रूबेन बाक्त। रूबेन आ तौ हनोक, पल्लु, हेसोन नु कारमी बाक्मा बाक्त। प्रस्थान ६:१४
- 4 योएल आ तौ शेमायाह बाक्मा बाक्त। शेमायाह आ तौ गोग बाक्मा बाक्त। गोग आ तौ शिमेड बाक्मा बाक्त।
- 5 शिमेड आ तौ मीकाह बाक्मा बाक्त। मीकाह आ तौ रेआयाह बाक्मा बाक्त। रेआयाह आ तौ बाल बाक्मा बाक्त।
- 6 बाल आ तौ बेयराह बाक्मा बाक्त। मिनु मेको अस्सुर डा पिप तिल्याथ-पिलेसेरमी ग्याइशशा लाइक्का पुंडसे बाक्त। मेको रूबेन आ मुर आन दाते डा ठेयब मुर का बाक्मा बाक्त। इतिहास ५:२६
- 7 रूबेन आ थर डा खिं खिं डा मुर आन नें ब्रेक्तीकेमी ब्रेक्शो बाक्मा बाक्त। मेको आन ठेयब मुर यिएल, जकरिया नु आआजाज आ तौ बेला बाक्मा बाक्त। बेला आ तौ शेमा बाक्मा बाक्त। मेको योएल आ खिं डा मुर बाक्मा बाक्त। मेकोपुकी आरोएर सहरम बाक्शो बाक्मा बाक्त। आन रागी नेबो रे बाल-मेओन सम्म बाक्मा बाक्त।
- 9 मेकोपुकीम पूर्व गे गोरशो रागी आ डोंइती युफ्रेटीस खोला आ ओंथ हांबु सम्म आन के सेल्शो बाक्मा बाक्त। मारदे हना गिलादम बाक्मानु, आन बस्तु भाव शुश दुम्शो बाक्मा बाक्त।
- 10 मेकोपुकी सावल आ पालाम हाग्री नु लडाइ पा ग्राशो बाक्मा बाक्त। मिनु मेकोपुकीम गिलाद आ पूर्व नेल्लेमी आन ताम्बुमी बाक्शो बाक्मा बाक्त।

गाद आ तौ चच युड

- 11 गाद आ मुरपुकी रूबेन आ मुर आन नेक्था बाशान रागीम साल्का सम्म बाक्शो बाक्मा बाक्त।
- 12 मेको आन ठेयब मुर योएल बाक्मा बाक्त। मेको आ नोले डा शाफाम बाक्मा बाक्त। मेको आस नोले बाशान रागीम यानाइ नु शाफात बाक्सा बाक्त।
- 13 मिनु आन मुर, आन खिं खिं डा मुर सु सु बाक्मा बाक्त देशा हना, मिकाएल, मेशुल्लाम, शेबा, योराइ, याकान, जिआ नु एबेर नेल्ल पा ७ जना बाक्मा बाक्त।
- 14 मेकोपुकी अबीहेल आ तौ हुरी, हुदी आ तौ यारोआह, यारोआह आ तौ गिलाद, गिलाद आ तौ मिकाएल, मिकाएल आ तौ येशीशाड, येशीशाड आ तौ याहदो, याहदो आ तौ बूज,
- 15 अब्दीएल आ तौ आही, आही आ तौ गुनी मेको आ खिं खिं डा आन ठेयब मुर बाक्मा बाक्त।

16 गाद आ मुरपुकी गिलाद, बाशान नु मेको आ नेक्था डा सहर नेल्लेमी नु शारोन डा बस्तु भाव योन्नतीके सम्म बाक्मा बाक्त।

17 यहूदा डा पिप योथाम नु इस्राएल डा पिप येरोबामम सासन पाप्से ना मेको आन नें नेल्ल नें ब्रेक्तीकेम ब्रेक्शो बाक्मा बाक्त। २राजा १५:३२; २राजा १४:२३

18 रूबेन, गाद नु मनस्से आ उडक्थ थर डा मुर बोल्यो लडाइ पाइब बाक्मा बाक्त। मेको तेक्तीक नु या कुरमे बाक्त। मेको लिब्रा आप्ब नु लडाइ पाइब जोक्ब बाक्मा बाक्त। मेको ४४ हजार ७ सहे ६० जना बाक्मा बाक्त। लडाइ पचा कली ठीक दुम्शो बाक्मा बाक्त।

19 मिनु हाप्पी, येतुरी, नाफीशी नु नोदाब आ मुर नु लडाइ पामे बाक्त।

20 मेकोपुकीमी लडाइम परमप्रभु कली “वारच पाइक्की” दे पुंडतीके, मेको आन जोरी सत्रु हाप्पी नु अरु सु बाक्तेक्म हना यो, आन गुडमी गोवा बाक्त। मारदे हना मेकोपुकीमी थमा सुदमे बाक्त।

21 मेकोपुकीमी बस्तु भाव गिश लदमे बाक्त दैशा हना, ५० हजार दलओठ, लाख निक्शी ५० हजार भेडा, हजार निक्शी गधा नु लाख का मुर आन कली ग्याइश्शा लदमे बाक्त।

22 मेको लडाइम शुश मुर बेक्मा बाक्त। मारदे हना मेको लडाइ परमप्रभु रे पा दुम्शो बाक्मा बाक्त। मिनु मेकोपुकी ग्याइश्शा लाइक्चा मपुंडसामा सम्म मेको आन बाक्तीकेम बाक्मा बाक्त।

मनस्से आ उडक्थ तौ चच युड

23 मनस्से आ उडक्थ थर डा मुर शुश दुम्शो बाक्मा बाक्त। मेको बाशान रागी रे बाल-हेरमोन, सेनीर हेरमोन डांडा सम्म बाक्शो बाक्मा बाक्त। ब्यवस्था ३:८-९

24 मेको आन खिं खिं डा मुर आन ठेयब मुर सु सु बाक्मा बाक्त दैशा हना, एफेर, इशी, एलीएल, अज्जीएल, येरमीया, होदावीयाह नु याहदीएल बाक्मा बाक्त। मेको नेल्ल बोल्यो लडाइ पाइब मुर बाक्मा बाक्त। मेको आन खिं डा ठेयब मुर बाक्मा बाक्त।

25 तन्न मेकोपुकीमी आन किकी पिपी आन परमप्रभु आ पर्वम मरिम्शो पामे बाक्त। मिनु परमप्रभुम मेको आन डोइती खतम पोक्शो जात डा मुर आन देवता आन कली पूजा पा आन नोले खोदमे बाक्त।

26 मोपतीके इस्राएली आन परमप्रभुमी अस्सुर डा पिप पुल, तिल्गथ-पिलेसेरमी कली क्युकगा बाक्त। मिनु मेकोपुकीम रूबेन, गाद नु मनस्से आ उडक्थ थर डा मुर आन कली ग्याइश्शा लदमे बाक्त। मेको आन कली हालाह, हाबोर, हारा नु गोजान खोला सम्म लदमे बाक्त। मेको मुल सम्म मेकेर बाक्शो बाक्नीम। २राजा १५:१९; २राजा १५:२९

## 6

लेवी आ तौ चच युड

1 लेवी आ तौ गेरशोम, कोहाथ नु मेरारी बाक्मा बाक्त।

2 कोहाथ आ तौ अम्राम, इच्हार, हेब्रोन नु उज्जीएल बाक्मा बाक्त। प्रस्थान ६:२०; गन्ती २६:५९; मीका ६:४; प्रस्थान ६:२३; गन्ती २६:६०

3 अम्राम आ आल हारून, मोसा नु मिरयाम बाक्मा बाक्त। हारून आ तौ नादाब, अबीहू, एलाजर नु इथामार बाक्मा बाक्त। १इतिहास ६:३५-३८

4 एलाजर फिनेहास आ आफ बाक्मा बाक्त। फिनेहास अबीशुआ आ आफ बाक्मा बाक्त।

5 अबीशुआ बुक्की आ आफ बाक्मा बाक्त। बुक्की उज्जी आ आफ बाक्मा बाक्त।

6 उज्जी जेराहीयाह आ आफ बाक्मा बाक्त। जेराहीयाह मेरायोथ आ आफ बाक्मा बाक्त।

7 मेरायोथ अमारयाह आ आफ बाक्मा बाक्त। अमारयाह अहीतुब आ आफ बाक्मा बाक्त।

8 अहीतुब सादोक आ आफ बाक्मा बाक्त। सादोक अहीमाज आ आफ बाक्मा बाक्त। २सामुएल ८:१७; २सामुएल १५:२७, ३६

9 अहीमाज अजारयाह आ आफ बाक्मा बाक्त। अजारयाह योहानान आ आफ बाक्मा बाक्त।

10 योहानान अजारयाह आ आफ बाक्मा बाक्त। मेको अजारयाहम सोलोमनमी यरूसलेमम सेल्शो परमप्रभु यावे आ खिंम चढ्हेतीक गेय पाइबाक्मा बाक्त।

11 अजारयाह अमारयाह आ आफ बाक्मा बाक्त। अमारयाह अहीतुब आ आफ बाक्मा बाक्त।

12 अहीतुब सादोक आ आफ बाक्मा बाक्त। सादोक शाल्लुम आ आफ बाक्मा बाक्त।

13 शाल्लुम हिल्लीयाह आ आफ बाक्मा बाक्त। हिल्लीयाह अजारयाह आ आफ बाक्मा बाक्त।

14 अजारयाह सेरायाह आ आफ बाक्मा बाक्त। सेरायाह यहो-सादाक आ आफ बाक्मा बाक्त। २राजा २५:१८; एजा ७:१; नहेम्याह १२:२६

15 मेना परमप्रभु यावेमी यहूदा नु यरूसलेम कली नेबुकदनेसर आ गुडम गेशो बाक्मा बाक्त। मिनु यहो-सादाक यो ग्याइश्शा लाइक्चा पुंडसीशो बाक्मा बाक्त। २राजा २५:२१

लेवी आ खिं खिं डा मुर

16 लेवी आ तौ गेरशोम, कोहाथ नु मेरारी बाक्मा बाक्त। प्रस्थान ६:१६-१९

17 गेरशोम आ तौ आस नें लिब्नी नु शिमेइ बाक्सा बाक्त।

18 कोहाथ आ तौ अम्राम, इच्हार, हेब्रोन नु उज्जीएल बाक्मा बाक्त।

19 मेरारी आ तौ माहली नु मुशी बाक्सा बाक्त। चढ्हेब लेवी आ खिं खिं डा मुर मेको बाक्मा बाक्त।

- 20 गेरशोम आ तौ चच युड सु सु बाक्मा बाक्त देशा हना, लिब्नी, लिब्नी आ तौ याहाथ, याहाथ आ तौ जिम्माह,  
 21 जिम्माह आ तौ योआह, योआह आ तौ इददो, इददो आ तौ जेराह नु जेरह आ तौ येआथेराइ बाक्मा बाक्त।  
 22 कोहाथ आ तौ चच युड सु सु बाक्मा बाक्त देशा हना, अम्मीनादाब, अम्मीनादाब आ तौ कोराह, कोराह आ तौ  
 अस्सीर, १इतिहास ९:१९; प्रस्थान ६:२४  
 23 अस्सीर आ तौ एल्काना, एल्काना आ तौ एब्यासाफ, एब्यासाफ आ तौ अस्सीर,  
 24 अस्सीर आ तौ तहाथ, नाहाथ आ तौ उरीएल, उरीएल आ तौ उज्जीयाह, उज्जीयाह आ तौ शावल बाक्मा बाक्त।  
 25 एल्काना आ तौ सु बाक्सा बाक्त देशा हना, अमासै नु अहीमोथ बाक्सा बाक्त।  
 26 अहीमोथ आ तौ एल्काना, एल्काना आ तौ जोफाइ, जोफाइ आ तौ नाहाथ,  
 27 नाहाथ आ तौ एलीआब, एलीआब आ तौ येरोहाम, येरोहाम आ तौ एल्काना नु एल्काना आ तौ सामुएल बाक्मा  
 बाक्त। १सामुएल १:१  
 28 सामुएल आ डोंइती थिशो तौ योएल नु कान्छा अबीयाह बाक्सा बाक्त।  
 29 मेरारी आ तौ सु सु बाक्मा बाक्त देशा हना, माहली, माहली आ तौ लिब्नी, लिब्नी आ तौ शिमेड, शिमेड आ तौ  
 उज्जाह,  
 30 उज्जाह आ तौ शिमेआ, शिमेआ आ तौ हग्गीयाह नु हग्गीयाह आ तौ आसायाह बाक्मा बाक्त।

परमप्रभु कली कुम्सो पाइबपुकी

- 31 दाऊदमी परमप्रभु यावे आ बाक्तीकम सन्दोस वोदा नोले कुम्सो पाइब आन कली योव्रडा बाक्त। २सामुएल ६:१७  
 32 सोलोमनम यरूसलेमम परमप्रभु यावे आ खिं मसेला सम्म मेकोपुकीमी युम्तीक ताम्बु आ डोंइती कुम्सो पना पन  
 बाक्मा बाक्त। आन पालो पालोम कुम्सो पना पन बाक्मा बाक्त।  
 33 मेको कुम्सो पाइब नु आन तौ सु सु बाक्मा बाक्त देशा हना, कोहाथ आ खिं डा कुम्सो पाइब हेमान बाक्माक्त।  
 हेमान योएल आ तौ बाक्माक्त। योएल सामुएल आ तौ बाक्माक्त। १इतिहास १५:१७,१९  
 34 सामुएल एल्काना आ तौ बाक्माक्त। एल्काना येरोहाम आ तौ बाक्माक्त। येरोहाम एलीएल आ तौ बाक्माक्त।  
 एलीएल तोआह आ तौ बाक्माक्त। तोआह जूफ आ तौ बाक्माक्त।  
 35 जूफ एल्काना आ तौ बाक्माक्त। एल्काना माहाथ आ तौ बाक्माक्त। माहाथ अमासै आ तौ बाक्माक्त। अमासै  
 एल्काना आ तौ बाक्माक्त।  
 36 एल्काना योएल आ तौ बाक्माक्त। योएल अजारयाह आ तौ बाक्माक्त। अजारयाह सेफन्याह आ तौ बाक्माक्त।  
 37 सेफन्याह तहाथ आ तौ बाक्माक्त। तहाथ अस्सीर आ तौ बाक्माक्त। अस्सीर एब्यासाफ आ तौ बाक्माक्त।  
 एब्यासाफ कोराह आ तौ बाक्माक्त। कोराह इज्हार आ तौ बाक्माक्त।  
 38 इचहार कोहाथ आ तौ बाक्माक्त। कोहाथ लेवी आ तौ बाक्माक्त। लेवी इस्राएल आ तौ बाक्माक्त।  
 39 हेमान आ लोकब आसाफ आ ग्युरा गे बाक्शो बाक्माक्त। आसाफ बेरेक्याह आ तौ बाक्माक्त। बेरेक्याह शिमेआ  
 आ तौ बाक्माक्त। १इतिहास १५:१७,१९  
 40 शिमेआ मिकाएल आ तौ बाक्माक्त। मिकाएल बासैयाह आ तौ बाक्माक्त। बासैयाह माल्कीयाह आ तौ बाक्माक्त।  
 41 माल्कीयाह एथनी आ तौ बाक्माक्त। एथनी जेराह आ तौ बाक्माक्त। जेरह अदायाह आ तौ बाक्माक्त।  
 42 अदायाह एथान आ तौ बाक्माक्त। एथान जिम्माह आ तौ बाक्माक्त। जिम्माह शिमेड आ तौ बाक्माक्त।  
 43 शिमेड याहाथ आ तौ बाक्माक्त। याहात गेरशोम आ तौ बाक्माक्त। गेरशोम लेवी आ तौ बाक्माक्त।  
 44 हेमान आ लोकब मेरारी आ तौ आ पेरा गे बाक्शो बाक्मा बाक्त। अरु सु सु बाक्मा बाक्त देशा हना, एथान किशी  
 आ तौ बाक्माक्त। किशी अब्दी आ तौ बाक्माक्त। अब्दी माल्लुक आ तौ बाक्माक्त। १इतिहास १५:१९  
 45 माल्लुक हशाब्याह आ तौ बाक्माक्त। हशाब्याह अमास्याह आ तौ बाक्माक्त। अमस्याह हिल्कीयाह आ तौ  
 बाक्माक्त।  
 46 हिल्कीयाह अम्जी आ तौ बाक्माक्त। अम्जी बानी आ तौ बाक्माक्त। बानी शेमेर आ तौ बाक्माक्त।  
 47 शेमेर माहली आ तौ बाक्माक्त। माहली मुशी आ तौ बाक्माक्त। मुशी मेरारी आ तौ बाक्माक्त। मेरारी लेवी आ तौ  
 बाक्माक्त।  
 48 मेको आन लोकब लेवी आ मुर नेल्ल परमप्रभु आ बाक्तीक ताम्बु डा मार मार पचा कली योव्रशो बाक्मा बाक्त।  
 हारून आ चच युड  
 49 मिनु हारून नु आ तौपुकीमी ला चढेतीकम चोशा चढेतीक नु धूप चोशा चढेतीकम चढेमे बाक्त। मेकोम नेल्ल  
 क्येडा चोव्रखो कोठा डा गेय यो पामे बाक्त। इस्राएली आन पर्वम पाप क्याम्तीक गेय पामे बाक्त। परमप्रभु आ गेय  
 पाइब मोसामी दोदेशो पा अरेवा मोदेशो पा पामे बाक्त। प्रस्थान २८:१; लेवी १६:-  
 50 हारून आ तौपुकी सु सु बाक्मा बाक्त देशा हना, एलाजर, एलाजर आ तौ फिनेहास, फिनेहास आ तौ अबीशुआ,  
 १इतिहास ५:१०-३४  
 51 अबीशुआ आ तौ बुक्की, बुक्की आ तौ उज्जी, उज्जी आ तौ जेराहीयाह,  
 52 जेरह आ तौ मेरायोथ, मेरायोथ आ तौ अमारयाह, अमारयाह आ तौ अहीतुब,  
 53 अहीतुब आ तौ सादोक, सादोक आ तौ अहीमाज बाक्मा बाक्त।  
 लेवी आन सहरपुकी  
 यहोसु २१:-  
 54 हारून आ तौ कोहाथ आ खिं खिं डा मुर नेल्ल आन क्येडा डोंइती योव्रशा गेशो बाक्तीके तेको बाक्मा बाक्त देशा  
 हना,

- 55 मेको आन कली यहूदा आ थेरशो रू रे हेब्रोन सहर नु आ एर ओंथ डा बस्तु भाव योव्रतीके गेमे बाक्त।
- 56 तन्न मेको सहर डा रू नु आ एर ओंथ डा गाउपुकी यपुन्ने आ तौ कालेब कली गेमे बाक्त।
- 57 हारून आ तौ आन कली प्रोक्शा लशा ब्रोइशा बाक्तीक सहर हेब्रोन, लिब्ना नु आ एर ओंथ डा बस्तु भाव योव्रतीके, यत्तीर, एरतेमोआ, नु आ एर ओंथ डा बस्तु भाव योव्रतीके,
- 58 हीलेन नु आ एर ओंथ डा बस्तु भाव योव्रतीके, देबीर नु आ एर ओंथ डा बस्तु भाव योव्रतीके,
- 59 आशान नु आ एर ओंथ डा बस्तु भाव योव्रतीके, बेथ-शेमेश नु आ एर ओंथ डा बस्तु भाव योव्रतीके नेल्ल गेमे बाक्त।
- 60 मिनू बेन्यामीन आ थर डा मुर आन थेरशो रू रे मार गेमे बाक्त देशा हना, गेबा नु आ एर ओंथ डा बस्तु भाव योव्रतीके, आलेमेथ नु आ एर ओंथ डा बस्तु भाव योव्रतीके, अनाथोथ नु आ एर ओंथ डा बस्तु भाव योव्रतीके गेमे बाक्त। मिनू कोहाथ आ खिं खिं डा मुर आन कली योक्सीशो सहर नेल्ल १३ ओटा बाक्मा बाक्त।
- 61 मिनू कोहाथ आ लीशो मुर आन कली मनस्से आ आधा थर डा मुर आन रे बाजी आप्शा १० ओटा सहर गेमे बाक्त।
- 62 गेरशोम आ खिं खिं डा मुर आन कली बाजी आप्शा इस्साकार आ थर, आशेर आ थर, नाप्ताली आ थर नु बाशान रागीम बाक्ब मनस्से आ आधा थर डा मुर आन थेरशो रू रे १३ ओटा सहर गेमे बाक्त।
- 63 मेरारी आ खिं खिं डा मुर आन कली बाजी आप्शा रूबेन आ थर, गाद आ थर नु जबूलून आ थर आन थेरशो रू रे १२ ओटा सहर गेमे बाक्त।
- 64 मोपा इस्राएलीपुकीमी लेवी आन कली सहर नु आन एर ओंथ डा बस्तु भाव योव्रतीके गेमे बाक्त।
- 65 मेकोपुकीमी यो बाजी आप्शा, यहूदा आ थर, सिमियोन आ थर नु बेन्यामीन आ थर आन थेरशो रू रे मेको नें ब्रेक्शो सहरपुकी गेमे बाक्त।
- 66 कोहाथ आ तौ आन खिं डा का निक्शी मुर एफ्राइम आ थर डा मुर आन थेरशो रू रे सहरपुकी तामे बाक्त।
- 67 मेकोपुकीमी मेको आन कली पहाड रागी डा शेकेम सहर नु आ एर ओंथ डा बस्तु भाव योव्रतीके एफ्राइम पहाड नु गेजेर सहर नु आ बस्तु भाव योव्रतीके,
- 68 योक्माम सहर नु आ एर ओंथ डा बस्तु भाव योव्रतीके, बेथ-होरोन सहर नु आ एर ओंथ डा बस्तु भाव योव्रतीके,
- 69 आइयालोन सहर नु आ एर ओंथ डा बस्तु भाव योव्रतीके, गाथ-रिम्मोन सहर नु आ एर ओंथ डा बस्तु भाव योव्रतीके तामे बाक्त।
- 70 मनस्से आ उडक्थ थर डा मुर आन थेरशो रू रे आनेर सहर नु आ एर ओंथ डा बस्तु भाव योव्रतीके, बिलाम सहर नु आ एर ओंथ डा बस्तु भाव योव्रतीके मेको नेल्ल कोहाथ आ लीशो मुरपुकीमी तामे बाक्त।
- 71 मनस्से आ उडक्थ थर डा मुर आन थेरशो रू रे गेरशोम आ मुर आन कली मार गेमे बाक्त देशा हना, बाशानम बाक्ब गोलान सहर नु आ एर ओंथ डा बस्तु भाव योव्रतीके, अशतारोथ सहर नु आ एर ओंथ डा बस्तु भाव योव्रतीके गेमे बाक्त।
- 72 मिनू इस्साकार आ थर डा मुर आन थेरशो रू रे केदेश सहर नु आ एर ओंथ डा बस्तु भाव योव्रतीके, दाबेराथ सहर नु आ एर ओंथ डा बस्तु भाव योव्रतीके,
- 73 रामोथ सहर नु आ एर ओंथ डा बस्तु भाव योव्रतीके नु आनेम सहर नु आ एर ओंथ डा बस्तु भाव योव्रतीके गेमे बाक्त।
- 74 आशेर आ थर डा मुरपुकीमी आन थेरशो रू रे माशाल सहर नु आ एर ओंथ डा बस्तु भाव योव्रतीके नु अब्दोन सहर नु आ एर ओंथ डा बस्तु भाव योव्रतीके,
- 75 हुकोक सहर नु आ एर ओंथ डा बस्तु भाव योव्रतीके, रेहोब सहर नु आ एर ओंथ डा बस्तु भाव योव्रतीके गेमे बाक्त।
- 76 नाप्ताली आ थर डा मुर आन थेरशो रू रे गालील डा केदेश सहर नु आ एर ओंथ डा बस्तु भाव योव्रतीके, हम्मोन सहर नु आ एर ओंथ डा बस्तु भाव योव्रतीके नु किरयथ-थाइम सहर नु आ एर ओंथ डा बस्तु भाव योव्रतीके गेमे बाक्त।
- 77 जबूलून आ थर डा मुरपुकीमी आन थेरशो रू रे मेरारी आ लीशो मुर आन कली रिम्मोनो सहर नु आ एर ओंथ डा बस्तु योव्रतीके, ताबोर सहर नु आ एर ओंथ डा बस्तु भाव योव्रतीके गेमे बाक्त।
- 78 रूबेन आ थर डा मुरपुकीमी आन थेरशो रू रे यर्दन आ आइक्ची हांबु यरीको आ पूर्व गे गोरशो रागीम बाक्शो बेसेर सहर नु एर ओंथ डा बस्तु भाव योव्रतीके, याहसाह सहर नु आ एर ओंथ डा बस्तु भाव योव्रतीके,
- 79 केदमोथ सहर नु आ एर ओंथ डा बस्तु भाव योव्रतीके नु मेफा-आथ सहर नु आ एर ओंथ डा बस्तु भाव योव्रतीके गेमे बाक्त।
- 80 मिनू गाद आ थर डा मुरपुकीमी आन थेरशो रू रे गिलाद डा रामोथ नु सहर नु आ एर ओंथ डा बस्तु भाव योव्रतीके, महा-नाइम सहर आ एर ओंथ डा बस्तु भाव योव्रतीके,
- 81 हेरबोन सहर नु आ एर ओंथ डा बस्तु भाव योव्रतीके नु याजेर सहर नु आ एर ओंथ डा बस्तु भाव योव्रतीके गेमे बाक्त।

## 7

इस्साकार आ तौ चच युड

- 1 इस्साकार आ तौ तोला, पुआ, याशुब नु शिप्रोन ४ जना बाक्मा बाक्त। उत्पत्ती ४६:१३; गन्ती २६:२३-२४
- 2 तोला आ तौ उज्जी, रेफायाह, येरीएल, याहमाइ, इब्सांम नु शेमुएल बाक्मा बाक्त। मेको नेल्ले आन खिं खिं डा ठेयब मुर बाक्मा बाक्त। दाऊदम सासन पवा ना तोला आ खिं खिं डा मुर २२ हजार ६ सहे बोल्यो लडाइ पाइब बाक्मा बाक्त।

3 उज्जी आ तौ इजायाह बाक्माकत। इजायाह आ तौ मिकाएल, ओबदिया, योएल नु इस्सीयाह बाक्मा बाकत। मेको ५ जना नेल्ल ठेयब मुर बाक्मा बाकत।

4 मेको प्रोइशा यो अरु मुर आन पाला पाला डा खिं खिं डा मुर आन कली हिक्शोनु ३६ हजार लडाइ पाइब मुर बाक्मा बाकत। मारदे हना मेको आन के शुश मीश नु तौ बाक्मा बाकत।

5 मेको आन खिं खिं डा मुर नेल्ल इस्साकार आ थर डा मुर बाक्मा बाकत। मेको नेल्ल ८७ हजार बोल्यो लडाइ पाइब बाक्मा बाकत।

बेन्यामीन आ तौ चच युड

6 बेन्यामीन आ तौ बेला, बेकेर नु येदीएल सां बाक्मा बाकत। इइतिहास ८:१-२; उत्पत्ती ४६:२१

7 बेला आ तौ एस्बोन, उज्जी, उज्जीएल, येरीमोथ नु डरी ५ जना आन खिं खिं डा ठेयब मुर बाक्मा बाकत। आन नें ब्रेकशो २२ हजार ३४ जना बोल्यो लडाइ पाइब बाक्मा बाकत।

8 बेकेर आ तौ जेमीरा, योआश, एलीएजर, एली-ओ-एनाइ, ओम्री, येरेमोथ, अबीयाह, अनाथोथ नु आलेमेथ बाक्मा बाकत। मेको नेल्ल बेकेर आ तौ बाक्मा बाकत।

9 मेको आन नें पाला पालामी ब्रेकशो बाक्मा बाकत। आन खिं खिं डा मुर आन ठेयब मुर बाक्मा बाकत। मिनु आन दाते डा २० हजार सहे निक्शी बोल्यो लडाइ पाइब बाक्मा बाकत।

10 येदीएल आ तौ बिल्हान बाक्माकत। बिल्हान आ तौ येऊश बेन्यामीन, एहूद, केनानाह, जेथान, टारशीश नु अहीशाहार बाक्मा बाकत।

11 मेको नेल्ल येदीएल आ तौ नु मेको आन खिं खिं डा ठेयब मुर बाक्मा बाकत। मेको १७ हजार सहे निक्शी बोल्यो लडाइ पाइब बाक्मा बाकत। मेको लडाइ पचा कली ठीक दुम्शो बाक्मा बाकत।

12 इर आ तौ शुप्पीम नु हुप्पीम बाक्सा बाकत। आहेर आ तौ हुशीम बाक्माकत।

नाप्ताली आ तौ चच युड

13 नाप्ताली आ तौ याहसीएल, गुनी, येसेर नु शाल्लुम बाक्मा बाकत। मेको बिल्हाह आ चच युड बाक्मा बाकत। उत्पत्ती ४६:२४

मनस्से आ तौ चच युड

14 मनस्से आ तौ असीएल बाक्माकत। मेको आ नोले चाक्शो अरामी मीश रे थिशो तौ बाक्माकत। मेकोमी गिलाद आ आफ माकीर कली यो थिवा बाकत।

15 मिनु माकीरमी हुप्पीम नु शुप्पीम आस कली मीश आल का का माल्शा, ग्युंवे पदा बाकत। माकीर आ समी आ नें माकाह बाक्माकत। मेको आ माइला तौ आ नें सेलेफेहाद बाक्माकत। सेलोफेहाद के तमी ला बाक्मा बाकत। गन्ती २७:१

16 माकीर आ मीश माकाहमी तौ निक्शी थिवा बाकत। मेको आस नें परेश नु शेरेश वोदा बाकत। परेशम तौ निक्शी थिम्सी बाकत। आस नें ऊलाम नु रेकेम वोदा बाकत।

17 ऊलाम आ तौ बेदान बाक्माकत। मेको नेल्ले गिलाद आ तौ चच युड बाक्मा बाकत। गिलाद माकीर आ तौ नु मनस्से आ चच बाक्माकत।

18 गिलाद आ समी हम्मोलेकेथमी तौ सां थीमी बाकत। मेको इश्होद, अबीएजर नु महलाह बाक्मा बाकत।

19 शेमीदा आ तौ अहीयान, शेकेम, लिखी नु अन्याम बाक्मा बाकत।

एफ्राइम आ तौ चच युड

20 एफ्राइम आ तौ शुथेलाह बाक्माकत। शुथेलाह आ तौ बेरेद बाक्माकत। बेरेद आ तौ तहाथ बाक्माकत। तहाथ आ तौ एलेआदाह बाक्माकत। एलेआदाह आ तौ तहथ बाक्माकत। गन्ती २६:३५

21 तहथ आ तौ जाबाद बाक्माकत। जाबाद आ तौ शुथेलाह बाक्माकत। शुथेलाह आ अरु तौ एजेर नु एलेआद बाक्सा बाकत। मेको निक्शी गाथ डा मुर आन बस्तु भाव रोइक्थ लसानु, गाथ डा मुरपुकीमी मेको आस कली सदमे बाकत।

22 मेको आस आफ एफ्राइममी मेको आस पबंम शुश नाकत सम्म रोंका पवा बाकत। आ लोकबपुकी मेको कली लेम्थ जाक्मा बाकत।

23 मेको नोले एफ्राइम आ मीश नु बाक्माकत। मिनु मेकोमी कोव्रज कुरशा तौ का थिवा बाकत। मेको आ नें बेरीआ वोदा बाकत। मारदे हना मेना मेको खिंम श्येत दुम्शो बाक्माकत।

24 एफ्राइम के शेराह माइश्शो तमी का यो बाक्माकत। मेकोमी आइदी नु आइक्था बेथ-होरोन सहर नु उज्जेन-शेराह सहर सेल्शो बाक्माकत।

25 एफ्राइम के रेफाह माइश्शो तौ यो बाक्माकत। रेफाह आ तौ रेशेफ बाक्माकत। रेशेफ आ तौ तेलाह बाक्माकत। तेलाह आ तौ तहन बाक्माकत।

26 तहन आ तौ लादान बाक्माकत। लादान आ तौ अम्मीहुद बाक्माकत। अम्मीहुद आ तौ एली-शामा बाक्माकत। गन्ती १:१०

27 एली-शामा आ तौ नून बाक्माकत। नून आ तौ यहोसु बाक्माकत। गन्ती १३:८, १६

28 मेको मुर आन थेरशो रू नु आन बाक्तीके बेथेल सहर नु मेको आ एर ओंथ डा सहर, पूर्व गे नारान सहर नु आ एर ओंथ डा सहर, पच्छिम गे गेजर सहर नु आ एर ओंथ डा सहर नेल्ले, शेकेम सहर नु आ एर ओंथ डा सहर, अय्याह नु आ एर ओंथ डा सहर बाक्मा बाकत। यहोसु १६:१; यहोसु १६:१०

29 मनस्से आ मुर आन सांद बेथ-शेआन नु आ एर ओंथ डा सहर, तानाक नु आ एर ओंथ डा सहर, मेगीददो नु आ एर ओंथ डा सहर नु डोर नु आ एर ओंथ डा सहर बाकमा बाक्त। मेको सहर नेल्लेम इस्त्राएल आ तौ योसेफ आ चच युड बाकशो बाकमा बाक्त। यहाँसु १७:११

आशेर आ तौ चच युड

- 30 आशेर आ तौ इम्नाह, इश्वाह, इश्वी नु बेरीआ बाकमा बाक्त। मेको आन समी सेराह बाकमाक्त।
- 31 बेरीआ आ तौ हेबेर नु माल्कीएल बाकसा बाक्त। माल्कीएल बिरजाइथ आ आफ बाकमाक्त। उत्पत्ती ४६:१७
- 32 हेबेर याफलेत, शोमेर, होथाम नु मेको आन समी शुआ आन आफ बाकमाक्त।
- 33 याफलेत आ तौ पासाक, बिम्हाल नु अश्वाथ बाकमा बाक्त। मेकोपुकी याफलेत आ तौ बाकमा बाक्त।
- 34 शेमेर आ तौ आही, रोहगाह, हूब्बाह नु अराम बाकमा बाक्त।
- 35 आन लोकब हेलेम आ तौ सोफाह, इम्ना, शोलेश नु आमाल बाकमा बाक्त।
- 36 सोफाह आ तौ सुआह, हारनेफेर, शुआल, बेरी, इम्राह,
- 37 बेसेर, होद, शाम्मा, शिल्शाह, इथ्रान नु बेयरा बाकमा बाक्त।
- 38 येथेर आ तौ यपुन्ने, पिस्पान नु आराह बाकमा बाक्त।
- 39 उल्ला आ तौ आराह, हन्नीएल नु रिसीया बाकमा बाक्त।
- 40 मेको नेल्ल आशेर आ खिं डा मुर नु मेको आन खिं खिं डा ठेयब मुर, बोल्यो लडाइ पाइब नु योत्रशो जोकब तुडकब लां कौडब हिकचा पुंडसीशो मुर बाकमा बाक्त। मेको आन खिं खिं पा हिकशा, नें ब्रेक्तीकेमी नें ब्रेकशो लडाइ पाइब २६ हजार मुर बाकमा बाक्त।

## 8

बेन्यामीन आ तौ चच युड

- 1 बेन्यामीन आ डोंइती थिशो तौ बेला, माइला अश्बेल, साइला अहाराह, उत्पत्ती ४६:२१
- 2 काइला नोहा नु कान्छा रेफा आन आफ बाकमाक्त।
- 3 बेला आ तौ अददार, गेरा, अबीहुद,
- 4 अबीशुआ, नामान, अहोयाह,
- 5 गेरा, शेफुफान नु हुराम बाकमा बाक्त।
- 6 एहूद आ तौ आन खिं खिं डा ठेयब मुर बाकमा बाक्त। मेको गेबा सहरम बाकशो बाकमा बाक्त। ग्याइकब मुरपुकीमी मेको आन कली मानाहाथ सहरम बाकचा गेमी बाक्त। एहूद आ तौ सु सु बाकमा बाक्त देंशा हना,
- 7 नामान, अहीयाह नु गेरा बाकमा बाक्त। हेग्लाम माइशो गेरा उज्जा नु अहीहुद आस आफ बाकमाक्त। मेकोपुकी ग्याइशला लाइकचा पुंडसीमा बाक्त।
- 8 मिनु शाहारैमी आ मीश हुशीम नु बारा आस कली प्रोना नोले मोआब रागीम तौपुकी थिवा बाक्त।
- 9 आ मीश होदेशमी योबाब, सिबीया, मेशा, माल्काम,
- 10 येऊस, साकीया नु मिरमाह थीमी बाक्त। मेको शाहारैम आ तौ आन खिं खिं डा ठेयब मुर बाकमा बाक्त।
- 11 शाहारैम आ मीश हुशीमी यो अहीतुब नु एल्लाल थिम्सी बाक्त।
- 12 एल्लाल आ तौ एबेर, मिशाम नु शेमेद बाकमा बाक्त। मेकोपुकीम ओनो नु लोद सहर नु आस एर ओंथ डा सहर सेल्ले बाक्त।
- 13 मिनु बेरीआ नु शेमा आइयालोन सहरम बाकब आन खिं खिं डा मुर आन ठेयब मुर बाकसा बाक्त। मेको निक्शीमी गाथ सहरम बाकब मुर आन कली प्रोकपदसे बाक्त।
- 14 मिनु बेरीआ आ तौ अहीयो, शाशाक, येरेमोथ,
- 15 जेबदीयाह, आराद, एदेर,
- 16 मिनु बेरीआ तौ मिकाएल, इश्पाह नु योहा बाकमा बाक्त।
- 17 एल्लाल आ तौ जेबदीयाह, मेशुल्लाम, हिज्की, हेबेर,
- 18 इश्मेराइ, इज्लीयाह नु योबाब बाकमा बाक्त।
- 19 शिमेइ आ तौ याकीम, जिक्की, जब्दी,
- 20 एली-एनाइ, सिल्लेथाइ, एलीएल,
- 21 अदायाह, बेरायाह नु शिम्राथ बाकमा बाक्त।
- 22 शाशाक आ तौ इश्पान, एबेर, एलीएल,
- 23 अब्दोन, जिक्की, हानान,
- 24 हनान्याह, एलाम, अन्थोथीयाह,
- 25 इफदैयाह नु पेनुएल, बाकमा बाक्त।
- 26 येरोहाम आ तौ शाम्शेराइ, शेहारयाह, अथाल्याह,
- 27 योरेश्याह, एलीया नु जिक्की बाकमा बाक्त।
- 28 मेको आन पाला डा खिं खिं डा मुर आन ठेयब मुर बाकमा बाक्त। मिनु यरूसलेम सहरम बाकशो बाकमा बाक्त।

सावल आ खिं डा मुर



- 29 गिबोन आ आफ यिएल गिबोन सहरम बाक्माकत। मेको आ मीश आ नें माकाह बाक्माकत। १इतिहास ९:३५-४४
- 30 मेको आ डोंडती थिशो तौ अब्दोन बाक्माकत। मेको आ नोले डा तौ सुर, कीश, बाल, नादाब,
- 31 गेदोर, अहीयो, जेकेर नु मीक्लोथ बाक्मा बाकत।
- 32 मीक्लोथ शिमेआह आ आफ बाक्माकत। मेको नेल्ल यरूसलेम सहरम आन खिं खिं डा मुर आन नेक्था बाक्शो बाक्मा बाकत।
- 33 नेर कीश आ आफ बाक्माकत। कीश सावल आ आफ बाक्माकत। सावल योनाथन, माल्कीशुआ, अबीनादाब नु एश-बाल आन आफ बाक्माकत। १सामुएल १४:५१; २सामुएल २:८
- 34 योनाथन आ तौ मेरीब-बाल बाक्माकत। मेरीब-बाल मीकाह आ आफ बाक्माकत।
- 35 मीकाह आ तौ पिथोन, मेलेक, ताहरेआ नु आहाज बाक्मा बाकत।
- 36 आहाज येहो-अदाह आ आफ बाक्माकत। येहो-अदाह आलेमेथ, अज्मावेथ नु जिम्नी आन आफ बाक्माकत। जिम्नी मोचा आ आफ बाक्माकत।
- 37 मोचा बिनेआ आ आफ बाक्माकत। बिनेआ आ तौ रेफा बाक्माकत। रेफा आ तौ एलेआसाह बाक्माकत। एलेआसाह आ तौ आसेल बाक्माकत।
- 38 आसेल के ६ जना तौ बाक्मा बाकत। मेको आन नें अञ्जीकाम, बोकेरु, इश्माणेल, शेआरयाह, ओबदिया नु हानान बाक्मा बाकत। मेको नेल्ल आसेल आ तौ बाक्मा बाकत।
- 39 मेको आ लोक्ब एशेक आ डोंडती थिशो तौ ऊलाम, माइला येऊश नु कान्छा एली-फेलेत बाक्मा बाकत।
- 40 ऊलाम आ तौ रिश्नो पा लित्रा आप्ब नु बोल्यो लडाइ पाइब बाक्मा बाकत। मेको आन के शुश आल नु चच बाक्मा बाकत। मेको नेल्ल सहे का ५० जना बाक्मा बाकत। मेको नेल्ल बेन्यामीन आ थर डा मुर बाक्मा बाकत।

## 9

बाबेल रे लेशा, यरूसलेममी बाक्ब मुर

- 1 मोपा इस्राएली नेल्ल आन खिं खिं डा मुर आन नें ब्रेक्शो बाक्मा बाकत। मेको आन नें इस्राएल डा पिप आन किताबमी ब्रेक्शो बाक्मा बाकत। मिनु यहूदा डा मुर आन परमप्रभु आ देशो मटितीके बेबीलोनम ग्याइश्शा लाइक्चा पुइसीमा बाकत। २राजा २४:१५-१६
- 2 मिनु नेल्ल क्येडा डोंडती लेशा आंम थेरशो रू नु आंम आन सहरपुकीम बाक्ब सु सु बाक्मा बाकत देशा हना, इस्राएल डा मुर, चढ़ेब, लेवी नु परमप्रभु यावे आ खिंम गेय पाइबपुकी बाक्मा बाकत। यहोसु ९:२३, २७; एञ्जा ८:२०
- 3 मिनु यहूदा आ थर डा, बेन्यामीन आ थर डा, एफ्राइम आ थर डा नु मनस्से आ थर डा मुर का निक्शी यरूसलेम सहरम बाक्मा बाकत। नहेम्याह ११:३-१९
- 4 मेको सु सु बाक्मा बाकत देशा हना, उथाइ आ आफ अम्मीहुद, अम्मीहुद आ आफ ओम्नी ओम्नी आ आफ इम्नी, इम्नी आ आफ बानी बानी आ आफ पेरस नु पेरस आ आफ यहूदा बाक्मा बाकत।
- 5 मिनु शिलो डा मुर रे डोंडती थिशो तौ आसायाह नु आ तौपुकी बाक्मा बाकत।
- 6 जेराह आ डोंडती डा तौ येहुएल नु आ खिं खिं डा मुर बाक्मा बाकत। मेको नेल्ल पा ६ सहे ९० जना बाक्मा बाकत।
- 7 बेन्यामीन आ थर डा मुर रे सल्लु आ आफ मेशुल्लाम, मेशुल्लाम आ आफ होदावीयाह, होदावीयाह आ आफ हास्सेनुआ,
- 8 हास्सेनुआ आ आफ इन्नैआ, इन्नैआ आ आफ येरोहाम येरोहाम आ आफ एलाह, आ आफ उज्जी, उज्जी आ आफ मिक्नी, मिक्नी आ आफ मेशुल्लाम, मेशुल्लाम आ आफ शेफत्याह, शेफत्याह आ आफ रूएल, रूएल आ आफ इब्नीयाह बाक्मा बाकत।
- 9 मिनु आन पाला डा खिं खिं डा ९ सहे ५६ जना मुर बाक्मा बाकत। मेको नेल्ले आन खिं खिं डा टेयब मुर बाक्मा बाकत।
- 10 चढ़ेब आन दाते डा सु सु बाक्मा बाकत देशा हना, येदायाह, येहो-यारीब, याकीन,
- 11 अजारयाह आ आफ हिल्कीयाह, हिल्कीयाह आ आफ मेशुल्लाम, मेशुल्लाम आ आफ सादोक, सादोक आ आफ मेरायोथ, मेरायोथ आ आफ अहीतुब बाक्मा बाकत। अहीतुब परमप्रभु आ खिं डा नेल्ल क्येडा टेयब मुर बाक्माकत। १इतिहास ५:३८-३९
- 12 मिनु अदायाह आ आफ येरोहाम, येरोहाम आ आफ पाश्हुर, पश्हुर आ आफ माल्कीयाह, माल्कीयाह आ आफ मासाइ, मासाइ आ आफ अदीएल, अदीएल आ आफ याहजेराह, याहजेराह आ आफ मेशुल्लाम, मेशुल्लाम आ आफ मेशील्लेमीथ, मेशील्लेमीथ आ आफ इम्मर बाक्मा बाकत।
- 13 मेको आन खिं खिं डा टेयब मुर बाक्मा बाकत। मिनु नेल्ले परमप्रभु आ खिंम गेय पचा जोक्ब तुडक्ब हजार का ७ सहे ६० जना बाक्मा बाकत।
- 14 मिनु लेवी आ थर डा मुर सु सु बाक्मा बाकत देशा हना, शेमायाह आ आफ हाश्शुब, हाश्शुब आ आफ अञ्जीकाम, अञ्जीकाम आ आफ हशाब्ब्याह, हशाब्ब्याह आ आफ मेरारी बाक्मा बाकत।
- 15 मिनु बाकबाकार, हेरेश, गालाल नु मत्तन्याह आन आफ मीका, मीका आ आफ जिक्नी, आ आफ जिक्नी आ आफ आसाफ बाक्मा बाकत।
- 16 मिनु ओबदिया आ आफ शेमायाह, शेमायाह आ आफ गालाल, गालाल आ आफ येदुथून, येदुथून आ आफ बेरेक्याह, बेरेक्याह आ आफ आसा नु आसा आ आफ एल्काना बाक्मा बाकत। मेकोपुकी नेतोफाह डा मुर आन गाउंमी बाक्शो बाक्मा बाकत। १इतिहास २:५४

17 लाप्यो खाल पाइबपुकी शाल्लुम, अक्कुब, ताल्मोन नु अहीमान बाक्मा बाक्त। मिनु आन लोकब शाल्लुम आन ठेयब मुर बाक्माक्त।

18 मेको डोंडती पूर्व गे पिप आ लाप्यो खाल पाइब बाक्माक्त। मिनु अरु लेवीपुकी लेवी आन बाक्तीक डा लाप्यो खाल पाइब बाक्मा बाक्त।

19 शाल्लुम आ आफ कोरे, कोरे आ आफ एब्यासाफ, एब्यासाफ आ आफ कोराह बाक्मा बाक्त। कोराह आ खिं खिं डा मुर गेय आन ठेयब मुर बाक्तेकम। मिनु परमप्रभु यावे आ ताम्बु आ ओत्रतीक खाल पाइब आन किकी पिपी खोदेशो पाइब बाक्मा बाक्त। २इतिहास ३४:९

20 मेको क्येडा डोंडती एलाजर आ तौ फिनेहास मेको आन कली कोत्रब ठेयब मुर बाक्माक्त। मिनु परमप्रभु यावे मेको नु बाक्माक्त। गन्ती २५:७-१३

21 जकरिया मेशेलेम्याह आ तौ गुम्तीक ताम्बु डा ओत्रतीक खाल पाइब बाक्माक्त।

22 मेको नेल्ल लाप्यो खाल पाइब योत्रशो सहे निक्शी १२ जना मुर बाक्मा बाक्त। मेको आन नें आन गाउं गाउंमी ब्रेक्तीकम ब्रेक्शो बाक्मा बाक्त। दाऊद नु परमप्रभु यावे आ लोत्र पाइब सामुएलम थमा सुइक्चा पुंडसीशो मुर आन कली मेको गेय गेम्से बाक्त। १ सामुएल १:८-११

23 मेको नु आन तौ चच परमप्रभु यावे आ बाक्तीक डा ओत्रतीक खाल पाइब बाक्मा बाक्त। मेको बाक्तीक ताम्बु बाक्माक्त।

24 मेकोपुकी परमप्रभु यावे आ बाक्तीके खाल पाइब पूर्व, पच्छिम, उत्तर नु दक्खिन एर ओंथ गे बाक्मा बाक्त।

25 मेको आन खिं खिं डा मुर आन गाउंम बाक्मा बाक्त। मेकोपुकी ७, ७ नाक्त पा मेको नु बाक्थ जाक्चा माल्मा बाक्त।

26 मिनु मेको लाप्यो खाल पाइब आन कली कोत्रब ठेयब मुर लेवी आ मुर ४ जना बाक्मा बाक्त। मेकोपुकी परमप्रभु आ खिं डा कोठा नु शोंप वोइक्तीक कोठा खाल पाइब बाक्मा बाक्त।

27 मेकोपुकी नाकदो परमप्रभु आ बाक्तीके आ नेक्था बाक्बाक्मा बाक्त। मारदे हना मेको आन गेय नाकदो कोत्रतीक बाक्माक्त। मिनु सुनी कुस कुस परमप्रभु आ बाक्तीक रोक्चा माल्बाक्मा बाक्त।

28 मेको आन दाते डा का निक्शीमी परमप्रभु आ बाक्तीके डा गेय पतीक मार मार खाल पाइब बाक्मा बाक्त। मेकोपुकीमी मार मार आगा लदमेनु नु युंडदमेनु, हिक्शा वोइक्चा माल्बाक्मा बाक्त।

29 मेको आन दाते डा अरुमी परमप्रभु यावे आ ग्योब नेल्ल, फस, अडगुर शांबु, तेल, धूप नु मस्ला खाल पाइब बाक्मा बाक्त।

30 च्हेब आन तौ डा का निक्शीम मस्ला ब्वाइक्तीक गेय पाइबाक्मा बाक्त। प्रस्थान ३०:२३-२५

31 मिनु लेवी आ थर डा कोराह आ खिं डा मुर शाल्लुम आ डोंडती थिशो तौ मतीथ्याहमी शोब्ले सेल्टीक गेय पाइब बाक्माक्त।

32 मेको आन खिं खिं डा मुर कोहाथ आ मुर का निक्शीमी नाइक्तीक नाक्ती कोंडतीक शोब्ले ठीक पा वोइक्तीके गेय पाइबाक्मा बाक्त। लेवी २४:५-८

33 मिनु कुम्सो पाइब नु लेवी आन खिं खिं डा ठेयब मुर परमप्रभु यावे आ खिं डा कोठापुकीम बाक्बाक्मा बाक्त। मिनु अरु गेय पचा ममाल्बाक्मा बाक्त। मारदे हना मेको आन गेय नाकदो नु नाक्ती बाक्माक्त।

34 मेको नेल्ल आन पालामी लेवी आ थर डा खिं खिं डा ठेयब मुर बाक्मा बाक्त। मिनु यरूसलेम सहरम बाक्बाक्मा बाक्त।

सावल आ किक नु चच युड

१इतिहास ८:२८-३८

35 गिबोन आ आफ यिएल गिबोन सहरम बाक्शो बाक्माक्त। मेको आ मीश आ नें माकाह बाक्माक्त।

36 मेको आ डोंडती थिशो तौ अब्दोन बाक्माक्त। मिनु नोले डा तौ मुर, कीश, बाल, नेर, नादाब,

37 गेदोर, अहीयो, जकरिया नु मीक्लोथ बाक्मा बाक्त।

38 मीक्लोथ शिमे-आम आ आफ बाक्माक्त। मेकोपुकी यो यरूसलेमम आन खिं खिं डा मुर आन नेक्था बाक्बाक्मा बाक्त।

39 नेर कीश आ आफ बाक्माक्त। कीश सावल आ आफ बाक्माक्त। सावल योनाथन, माल्कीशुआ, अबीनादाब नु एश-बाल आन आफ बाक्माक्त।

40 योनाथन आ तौ मेरीब-बाल बाक्माक्त। मिनु मेरीब-बाल मीकाह आ आफ बाक्माक्त।

41 मीकाह आ तौ पिथोन, मेलेक, ताहरेआ नु आहाज बाक्मा बाक्त।

42 आहाज याराह आ आफ बाक्माक्त। मिनु याराह आलेमेथ अज्मावेथ नु जिम्री आन आफ बाक्माक्त। जिम्री मोचा आ आफ बाक्माक्त।

43 मिनु मोचा बिनेआ आ आफ बाक्माक्त। बिनेआ आ तौ रेफायाह बाक्माक्त। रेफायाह आ तौ एलेआसाह बाक्माक्त। एलेआसाह आ तौ आसेल बाक्माक्त।

44 आसेल के ६ जना तौ बाक्मा बाक्त। मिनु मेको आन नें अज़ीकाम, बोकेरु, इश्माएल, शेआरयाह, ओबदिया नु हानान बाक्मा बाक्त। मेको नेल्ल आसेल आ तौ बाक्मा बाक्त।

## 10

सावल नु आ तौपुकी बेक्शो

१ सामुएल ३१:-

- 1 पलिस्तीपुकीम इस्राएल नु लडाइ पामे बाक्त। मिनु इस्राएल डा मुर पलिस्ती आन डोंइती रे प्रोकमा बाक्त। मिनु गिल्बोआ डांडाम साइक्चा पुंडसामा बाक्त।
- 2 मिनु पलिस्तीपुकीम सावल नु आ तौ आन कली खेदा पामे बाक्त। मिनु सावल आ तौ सांफा योनाथन, अबीनादाब नु माल्कीशुआ सदमे बाक्त।
- 3 मेको लडाइम सावल कली थम श्येत दुम्माक्त। मारदे हना का निकशी ब्रा आप्बपुकीम मेको कली आप्मे बाक्त। मिनु सावल मेको रे गार दुम्माक्त।
- 4 मोपतीके सावलमी आ या कुरब कली “इ तरवार शोइश्शा साइय्यी। खोइक्तीक चिनु मखोइश्शोपुकीम आं कली ग्याइश्शा मरिश्शो मपाइय्यीमील” दे मदा बाक्त। तन्न आ या कुरब हिंशा, मबिस्से बाक्त। मिनु सावल आ या शोइश्शा, तूसे बाक्त।
- 5 मिनु मेको या कुरबम सावल कली बेक्शो तशा, आं यो आ या शोइश्शा आंम कली सांडसे बाक्त।
- 6 मोपा सावल नु आ तौ सांफा आ खिं डा मुर नेल्ल कालेम बेक्मा बाक्त।
- 7 मिनु बेंसीम बाक्शो इस्राएली नेल्लेमी लडाइ पाइब प्रोक्शो नु सावल नु आ तौ बेक्शो तशा, मेको आन सहर प्रोंइशा प्रोकमा बाक्त। मिनु पलिस्ती मेकेर जाक्दीश्शा, मेको सहर आन के सेल्मे बाक्त।
- 8 मिनु आ दीसा पलिस्तीपुकी बेक्शो मुर आन मार मार गुप्थ जाक्शा, सावल नु आ तौ आन कली गिल्बोआ डांडाम बेक्शो थित्मे बाक्त।
- 9 मिनु मेकोपुकीम मेको आ फेक्तीक फुइश्शा, आ पिया खोइश्शा लाइश्शा, आन रागी डा देवता नु मुर नेल्ल आन कली मेको लोत्र नेंपाइक्चा कली कुरब मुर आन कली सोइक्तमे बाक्त।
- 10 मेकोपुकीम सावल आ या आन देवी देवता आन थानम वोदमे बाक्त। आ पिया दागोन आ थानम क्युकगमे बाक्त।
- 11 मिनु याबेश-गिलाद सहर डा मुरपुकीमी पलिस्तीमी सावल कली मार मार पदमे, मेको नेंशा,
- 12 बोल्यो लडाइ पाइब नेल्ले बोकशा, सावल नु आ तौ आन रां ब्रथ लमा बाक्त। मिनु मेकोपुकीम मेको आन रां याबेश सहर चाक्गमे बाक्त। मिनु याबेश डा मुरपुकीमी मेको आन कली यावेश डा ठेयब रवा आ पुंम थित्मे बाक्त। मिनु ७ नाक्त सम्म माइजा बाक्मा बाक्त। २सामुएल २:४-५
- 13 मोपा सावल आ परमप्रभु यावे प्रोंइतीके आ परबंम बेक्चा माल्दा बाक्त। मेकोमी परमप्रभु यावे आ शेंशो मटिथु, बेक्शो मुर नु लोत्र पाइब आ लोत्र नेना बाक्त। १सामुएल १५:२३; १सामुएल २८:८
- 14 मिनु परमप्रभु यावे आ अर्ती ममाल्थु, मनेना बाक्त। मोपतीके परमप्रभु यावेमी मेको कली सदा बाक्त। मिनु आ राज्य येस्से आ तौ दाऊद कली गोवा बाक्त।

## 11

दाऊद इस्राएली आन पिप दुश्शो

२सामुएल ५:१-१०

- 1 मिनु मेको नोले इस्राएल डा मुर नेल्ल गुम्शा दाऊद आ बाक्तीक हेब्रोन सहरम बुक्मा बाक्त। मिनु मेकोपुकीम “गोपुकी इन मुर नकी। उत्पत्ती २९:१४
- 2 डोंइती सावल पिप बाक्मेनु, गे इस्राएल डा लडाइ पाइब आन ठेयब कप्तान बाक्तीनी। मिनु परमप्रभु यावे, इन परमप्रभुमी इन कली “गे आं मुर, इस्राएली आन गोठला नु आन पिप दुम्नेवे” देशो बाक्त” देमा बाक्त।
- 3 मिनु इस्राएल डा खाल्पा नेल्ल पिप आ बाक्तीक हेब्रोन सहरम जाक्मा बाक्त। मिनु दाऊदमी हेब्रोन सहरमी परमप्रभु यावे आ डोंइती मेकोपुकी नु कबल पवा बाक्त। दाऊद कली तेल लुकशा इस्राएल डा पिप सेल्मे बाक्त। दोपा परमप्रभु यावेम सामुएल कली दोदेशो देंमे, मोदेशो पामे बाक्त। १सामुएल १६:१, ३, ११, १२

दाऊदम यरूसलेम सहर ग्राशो

- 4 मिनु दाऊद नु इस्राएल डा लडाइ पाइब नेल्ले यरूसलेम लमा बाक्त। मेको यबुस सहर बाक्माक्त। मेकेर यबुसी बाक्शो बाक्मा बाक्त।
- 5 मिनु यबुसम बाक्ब मुरपुकीमी दाऊद कली “गे एक गेनायो जाक्ने मचाप्नेवे” देमा बाक्त। मो हना यो दाऊदम सियोन डा बोल्यो सहर ग्रामाक्त। मेको कली मुल सम्म दाऊद आ सहर देनीम।
- 6 दाऊदमी “सु यबुसी आन कली डोंइती लडाइ तोइबा, मेको नेल्ल क्येडा ठेयब कप्तान दुम्ब” देशो बाक्माक्त। मिनु मेकेर डोंइती सेरुयाह आ तौ योआब डोंइसे बाक्त। मोपतीके मेको ठेयब कप्तान दुम्माक्त।
- 7 मिनु दाऊद मेको बोल्यो सहरम बाक्शो बाक्माक्त। मोपतीके मुरुमी मेको सहर कली दाऊद आ सहर देमा बाक्त।
- 8 मिनु दाऊदमी मेको सहर आ एर ओथ डा गारो तिक्तीक रे सहर नेल्ल आ एर ओथ गारो हिरशा सेला बाक्त। मिनु योआबम लीशो ब्रेश्शो खिं लेशा सेला बाक्त।
- 9 मोपा दाऊद शुश बोल्यो दुम्ना दुम्न लमाक्त। मारदे हना मुर नेल्ल आन परमप्रभु यावे मेको नु बाक्माक्त।

दाऊद आ बोल्यो लडाइ पाइब

२सामुएल २३:८-३९

- 10 मिनु दाऊद आ राज्य बोल्यो सेल्ब नु आ लडाइ पाइब आन ठेयब कप्तान आन परबंम बेक्शो लोत्र एको बाक्माक्त। मेकोपुकी नु इस्राएली नेल्लेमी दाऊद कली आन पिप सेल्मे बाक्त। परमप्रभु यावेमी इस्राएली आन परबंम दोदेशो लोत्र पवा, मोदेशो पामे बाक्त।

11 दाऊद आ बोल्यो लडाइ पाइब सु सु बाक्मा बाक्त दॅशा हना, हाकमोनी आ तौ याशोबाम कप्तान सां आन ठेयब कप्तान बाक्माक्त। मेकोमी आ तूतीकेमी कालेमी सहे सां मुर आन कली सदा बाक्त।

12 मेको आ नोले अहोही डा मुर दोदो आ तौ एलाजर बाक्माक्त। मेको बोल्यो मुर सां आन दाते डा का बाक्माक्त। १इतिहास २७:४

13 मेको दाऊद नु पलिस्ती नु लडाइ पचा कली पास-दम्मीम बाक्शो बाक्माक्त। मेकेर क्योव्रज रू का बाक्माक्त। मिनु मुर नेल्ल पलिस्ती आन डोंइती रे प्रोकमा बाक्त।

14 तन्न एलाजर नु दाऊद ला रू आ दातेमी राप्शा बाक्सा बाक्त। मिनु मेको निक्शीमी पलिस्ती आन कली ग्राशा क्योव्रज रू कली मारेइ दुग्चा मगेम्से बाक्त। मोपा परमप्रभु यावेमी ठेयब पा ग्रापाइशा प्रोकपदा बाक्त।

15 मेको ३० जना कप्तान आन दाते डा सां दाऊद आ बाक्तीके अदुल्लाम डा पुक्खी आ नेक्था बाक्शो सेरथे फुल्लुम लमा बाक्त। मेना पलिस्ती आन लडाइ पाइब रेफाइम डा बेंसीम ताम्बु कीशा बाक्शो बाक्मा बाक्त। १सामुएल २२:१

16 दाऊद बोल्यो बाक्तीकेमी बाक्शो बाक्माक्त। मिनु पलिस्ती आन लडाइ पाइब बेथलेहेम सहरम बाक्शो बाक्मा बाक्त।

17 मिनु दाऊदमी थाम्पा तूतू दाक्शा “सुडम आं कली बेथलेहेम डा ठेयब लाप्चो आ डोंइती बाक्शो इनार डा ब्वाक्कु तूचा गेयीमी हना, दुम वा” देंमाक्त।

18 मेना मेको मुर सां पलिस्ती आन दाते रे ग्रीशा लशा बेथलेहेम डा ठेयब लाप्चो आ डोंइती डा इनार डा ब्वाक्कु ताप्शा, दाऊद आ बाक्तीकेम चाकगमे बाक्त। तन्न दाऊदम मेको तूने मबिस्से बाक्त। मिनु ब्वाक्कु परमप्रभु यावे आ डोंइती मोदा बाक्त।

19 मेकोमी “आं परमप्रभुम आं कली ओदेशो पचा मगेयील। गो एको मुर आन हुश तूनुडा? मारदे हना एको आन गिम खतम दुग्चा डा पा लशा ब्वाक्कु चाक्तेकम” देंमाक्त। मोपतीके मेकोमी मेको ब्वाक्कु मतूडा बाक्त। मेको बोल्यो लडाइ पाइब सां आन पशो गेय मेकोन बाक्माक्त।

20 योआब आ लोकब अबीशै मेको ३० जना आन कप्तान बाक्माक्त। मेकोमी आ तूतीकेमी कालेम सहे सां मुर आन कली लडाइ पा साइक्मी बाक्त। मिनु मोपा मेको सां आन दातेमी हिक्चा पुंडसे बाक्त।

21 मेको ३० जना आन दातेम ठेयब दुग्माक्त। मेको सां आन दातेमी मान तवा बाक्त। मिनु आन कप्तान दुग्माक्त। तन्न मेको डोंइती डा सां आन खोदेशो पा मान मतवा बाक्त।

22 येहो-यादा आ तौ बेनायाह कब्सेल सहर डा शुश बोल्यो लडाइ पाइब का बाक्माक्त। मेकोमी मोआब डा अरीएल आ तौ निक्शी आस कली सदा बाक्त। फु यिम नाक्त ढोडोडगाम बाक्ब गुप्स का सदा बाक्त।

23 मेकोमी ५ कुबीत लाइशो इजीप्त डा मुर का यो सदा बाक्त। मेको आ तूतीक वा प्रोवतीक शी खोमो बाक्माक्त। मेको बेनायाहमी कोक्के का कुरशा, मेको तूतीक इजीप्त डा मुर आ गुड रे रोइशशा, आम आ तूतीकेमी सदा बाक्त। कुबीत का ०.५ मिटर बाक्ब। १सामुएल १७:७

24 मेको येहो-यादा आ तौ बेनायाह आ पशो बाक्माक्त। मिनु मोपा बेनायाह मेको मुर सां आन दातेम हिक्से बाक्त। १इतिहास २७:५-६

25 मिनु ३० जना आन क्येडा मेकोमी शुश मान तवा बाक्त। तन्न मेको सां आन दातेम महिक्से बाक्त। दाऊदमी मेको कली आ कली खाल पाइब आन ठेयब मुर सेला बाक्त।

26 मिनु अरु मान तशो लडाइ पाइब सु सु बाक्मा बाक्त दॅशा हना, योआब आ लोकब आसाहेल, बेथलेहेम डा दोदो आ तौ एलहानान,

27 हारोद सहर डा शाम्मोथ, पेलोन डा मुर हेलेस, १इतिहास २७:१०

28 तेकोहा सहर डा इक्केश आ तौ इरा, अनाथोथ डा अबीएजेर,

29 हुशा डा मुर सिब्बेकै, अहोही आ मुर इलाइ,

30 नेतोफाह डा माहाराइ, नेतोफाह डा बानाह आ तौ हेलेद,

31 बेन्यामीन आ थर डा गिबा डा रिबाइ आ तौ इथाइ, पिराथोन डा बेनायाह,

32 गाश डा खोल्ला आ नेक्था बाक्ब हूरै, अरबा आ मुर अबीएल,

33 बाहारुम सहर डा अज्मावेथ, शा-आल्बोन सहर डा एली-अहबा,

34 गिजोन डा मुर हाशेम, हरारी शागे आ तौ योनाथन,

35 हरारी साकार आ तौ अहीयाम, ऊर आ तौ एलीफाल,

36 मेकारा सहर डा मुर हेफेर, पेलोन डा मुर अहीयाह,

37 कारमेल डा हेसो, एज्बाइ आ तौ नाराइ,

38 नाथान आ लोकब योएल, हाग्री आ तौ मिभार,

39 अम्मोनी जेलेक, बेयरोथ सहर डा नहाराइ, मेको नहाराइ डा सेरूयाह आ तौ योआब आ या कुरब बाक्माक्त।

40 इथ्री आ मुर इरा, इथ्री आ मुर गारेब, २सामुएल ११:३

41 हिन्ती उरीयाह, अहलै आ तौ जाबाद,

42 रूबेन आ थर डा शीजा आ तौ अदीना मेको रूबेन आ थर डा मुर आन ठेयब मुर का बाक्माक्त। मेको नु आ मुर नु ३० जना बाक्मा बाक्त।

43 माकाह आ तौ हानान, मिथनी आ मुर योशाफात,

44 अशतारोथ सहर डा मुर उज्जीया, आरोएर आ मुर होथाम आ तौ शामा नु यिएल,

45 शिम्री आ तौ येदीएल नु आ लोकब तिजी आ मुर योहा,

- 46 महाब आ मुर एलीएल, एलनाम आ तौ येरीबाइ नु योशावीयाह नु मोआबी इश्माह,  
47 एलीएल, ओबेद नु मेजोबी यासीएल बाकमा बाक्त।

## 12

दाऊद आ लडाइ पाइबपुकी

- 1 दाऊद सिकलाग सहरम बाकमेनु, आ बाक्तीक जाकब बोल्यो लडाइ पाइब नु लडाइम वारच पाइब बाकमा बाक्त। मेना दाऊद कीश आ तौ सावल आ डोंइती रे प्रोक्शो बाक्माक्त। १ सामुएल २७:६
- 2 मेकोपुकी लिबा कुरब बाकमा बाक्त। मिनु ग्युरा नु पेरा गुड निम्फामी ब्रा नु हुरद आप्ने चाप्ब बाकमा बाक्त। मेकोपुकी बेन्यामीन आ थर डा सावल आ खिं खिं डा मुर बाकमा बाक्त।
- 3 मिनु सु सु बाकमा बाक्त देशा हना, मेको आन दाते डा टेयब मुर अही-एजेर नु योआश निम्फा गिबा डा शेमाह आ तौ बाकसा बाक्त। मिनु अरु अज्मावेथ आ तौ येजीएल नु पेलेत बाकसा बाक्त। बेराकाह नु अनाथोथ डा येहू बाकसा बाक्त।
- 4 गिबोन डा इश्मायाह मेको ३० जना आन दाते डा बोल्यो लडाइ पाइब नु मेको आन टेयब मुर बाकमाक्त। अरु येरमीया, याहासीएल, योहानान नु गेदेराह सहर डा योजाबाद,
- 5 एलुजाइ, येरीमोथ, बेअल्याह, शेमारयाह, हारुफ आ मुर शेफल्याह बाकमा बाक्त।
- 6 कोराह आ खिं डा एल्काना, इश्शीयाह, अजारेल, योएजेर नु याशोबाम बाकमा बाक्त।
- 7 मिनु गेदोर डा येरोहाम आ तौ योएलाह नु जेबदीयाह बाकसा बाक्त।
- 8 मिनु गाद आ थर डा मुर यो गोरशो रागीम दाऊद आ बोल्यो बाक्तीकेम जाकशो बाकमा बाक्त। मेको तेक्तीक नु तूतीक कुरशो जोकब तुइकब लडाइ पाइब बाकमा बाक्त। मेको आन कुल गुप्स खोदेशो हिंचा डा बाकमा बाक्त। रोकोश खोदेशो पा दोरने चाप्ब बाकमा बाक्त।
- 9 मेको आन टेयब मुर एजेर बाक्माक्त। एजेर आ नोले डा ओबदिया बाक्माक्त। ओबदिया आ नोले डा एलीआब बाक्माक्त।
- 10 एलीआब आ नोले डा मिश्मन्नाह बाक्माक्त। मिश्मन्नाह आ नोले डा येरमीया बाक्माक्त।
- 11 येरमीया आ नोले डा अत्तै बाक्माक्त। अत्तै आ नोले डा एलीएल बाक्माक्त।
- 12 एलीएल आ नोले डा योहानान बाक्माक्त। योहानान आ नोले डा एल्जाबाद बाक्माक्त।
- 13 एल्जाबाद आ नोले डा येरमीया बाक्माक्त। येरमीया आ नोले डा माकबन्नाइ बाक्माक्त।
- 14 मेको मुरपुकी गाद आ थर डा लडाइ पाइब आन कप्तान बाक्मा बाक्त। मेको आन दाते डा नेल्ल क्येडा आइक्च सहे का नु लडाइ पने चाप्ब नु नेल्ल क्येडा टेयब हजार का नु लडाइ पने चाप्ब बाकमा बाक्त।
- 15 मेको नेल्ले डोंइती डा महिनाम यर्दन खोला शोक्सामा बाक्त। मेना खोला बारशा लशो बाक्माक्त। मिनु यर्दन खोला शोक्शा, मेको आ पूर्व नु पच्छिम डा बेसीम बाकब मुर नेल्ल आन कली खेदा पा खेरशो बाकमा बाक्त।
- 16 मिनु बेन्यामीन आ थर नु यहूदा आ थर डा का निक्शी मुर गोरशो रागीम दाऊद आ बोल्यो बाक्तीकेम जाकमा बाक्त।
- 17 मिनु दाऊद मेको आन कली गुम्थ लशा, मेको आन कली “गे गो नु वारचुब दुम्शा, आं कली वारच पाइक्च जाकशो ननी हना, गो इन कली दानुड। तन्न गेपुकीम आं कली क्यारी पथ नु आं जोरी सत्रु आन कली शेंथ जाक्तीनी हना, इं किकी पिपी आन परमप्रभुम एको तशा, इन कली निसाफ पवल” देंमाक्त।
- 18 मेना परमप्रभु आ सोक्तीम मेको ३० जना आन दाते डा कप्तान अमासै कली सुमा बाक्त।
- मिनु मेकोम “दाऊद, गो इन मुर नकी। येस्से आ तौ दाऊद गो गे नु बाक्नीकी। इन थुं नाइक्सेक्ल। मिनु इन कली वारच पाइब आ थुं नाइक्सेक्ल। इन परमप्रभु इन कली वारच पाइब बाकब” देंमाक्त।
- मिनु दाऊद म मेको आन कली ब्रावा बाक्त। मिनु मेको आन कली आ हुल डा कप्तान सेल्मी बाक्त।
- 19 मिनु दाऊद पलिस्ती नु गारशा, सावल नु लडाइ पथ लमाक्त। मेना मनस्से आ थर डा मुर का निक्शी सावल कली प्रोंइशा, दाऊद आ बाक्तीके जाक्मा बाक्त। तन्न पलिस्ती नु गारशा लडाइ चहिं मपामे बाक्त। मारदे हना पलिस्ती आन सासन पाइबपुकीमी आंम आंमा सल्ला पा दाऊद कली आ नु लडाइ मपपदमे बाक्त। मेकोपुकीम “मेकोमी आ होव्रप सावल कली वारच पा, गो इं कली प्रोंइब। मिनु मो दुम्पेनु, गो लडाइ बुइनय। गो बेक्नय” देमुमा बाक्त। १सामुएल २९:३-४
- 20 मिनु दाऊद सिकलाग सहरम लामेनु, मेको आ बाक्तीक जाकब मनस्से आ थर डा मुर आदनाह, योजाबाद, येदीएल, मिकाएल, योजाबाद, एलीहु नु सिल्लेथाइ बाक्मा बाक्त। मेकोपुकी मनस्से आ खिं डा हजार का का डा लडाइ पाइब आन कप्तान बाक्मा बाक्त।
- 21 मिनु मेकोपुकीमी दाऊद कली मार मार रोइकब आन पर्वम लडाइ पचा कली वारच पाइश्शो बाक्मा बाक्त। मारदे हना, मेको नेल्ल लडाइ पाइब नु कप्तान बाक्मा बाक्त।
- 22 थमा पा नाक्त किंत किंत दाऊद आ बाक्तीके अर्को लडाइ पाइब वारच पथ जाक्मा बाक्त। नोले परमप्रभु आ फौज खोदेशो शुश दुम्मा बाक्त।

दाऊद कली वारच पाइब मुर

- 23 दाऊद हेब्रोन सहरम बाकमेनु, या कुरशा, वारच पाइब लडाइ पाइब शुश जाक्मा बाक्त। परमप्रभु यावेम देंशो खोदेशो पा सावल आ राज्य रोइश्शा दाऊद कली गेचा, दे मो पामे बाक्त।

- 24 मेको सु सु बाक्मा बाक्त देशा हना, यहूदा आ थर डा ६ हजार ८ सहे तेक्तीक नु तूतीक कुरशो लडाइ पाइब बाक्मा बाक्त।
- 25 सिमियोन आ थर डा ७ हजार सहे का बोल्यो लडाइ पाइब बाक्मा बाक्त।
- 26 लेवी आ थर डा ४ हजार ६ सहे मुर बाक्मा बाक्त।
- 27 मेको हारून आ खिं डा ठेयब मुर येहो-यादा नु हजार सां ७ सहे मुर बाक्मा बाक्त।
- 28 मिनु ठिटा लडाइ पाइब सादोक नु मेको आ खिं खिं डा मुर २२ जना कप्तान बाक्मा बाक्त। १इतिहास ५:३४; २सामुएल १५:२४
- 29 सावल आ खिं डा मुर बेन्यामीन आ थर डा हजार सां मुर बाक्त। तन्न सावल आ खिं डा शुश मुर सावल कली मप्रोइथु बाक्मा बाक्त।
- 30 एफ्राइम आ थर डा २० हजार ८ सहे बोल्यो लडाइ पाइब नु आन खिं डा ठेयब मुर बाक्मा बाक्त।
- 31 मनस्से आ उइक्थ थर डा १८ हजार मुर बाक्मा बाक्त। मेको दाऊद कली पिप सेल्चा कली योव्रशो मुर बाक्मा बाक्त।
- 32 इस्साकार आ थर डा इस्राएल डा मुर तेको लां गाक्पाइक्चा माल्बा, मार मार पचा माल्नीम मारेइ मारेइ तुइक्ब सहे निकशी कप्तान बाक्मा बाक्त। मेको आन खिं खिं डा लडाइ पाइब मुर आन कप्तान बाक्मा बाक्त।
- 33 जबूलून आ थर डा ५० हजार लडाइ पस जोक्ब मारेइ मारेइ या कुरब बाक्मा बाक्त। मेको आन थु नेल्लेमी दाऊद कली वारच पाइब बाक्मा बाक्त।
- 34 नाप्ताली आ थर डा हजार का कप्तान नु ३७ हजार तेक्तीक नु तूतीक कुरब लडाइ पाइब मुर बाक्मा बाक्त।
- 35 दान आ थर डा २८ हजार ६ सहे या कुरब लडाइ पाइब बाक्मा बाक्त।
- 36 आशेर आ थर डा ४० हजार लडाइ पचा कली ठीक दुम्यो लडाइ पाइब बाक्मा बाक्त।
- 37 यर्दन खोला आइक्ची हांबु, पूर्व डा रूबेन आ थर, गाद आ थर नु मनस्से आ उइक्थ थर डा लाख का २० हजार मारेइ मारेइ या कुरब लडाइ पाइब बाक्मा बाक्त।
- 38 मेको लडाइ पाइब नेल्ले दाऊद कली इस्राएल डा पिप सेल्चा कली दाऊद आ बाक्तीक हेब्रोन सहरमी ठेयब फौज जाक्मा बाक्त। मिनु अरु इस्राएली नेल्लेमी यो दाऊद कली पिप सेल्चा, दे मिम्यो बाक्मा बाक्त।
- 39 मिनु मेको नेल्ले मेकेर जना जन, तूना तून नाक्त सां सम्म दाऊद नु बाक्मा बाक्त। मारदे हना मेको आन मुरपुकीम मेको आन कली जचा तूचा थोव्रक ठीक पशो बाक्मा बाक्त।
- 40 मिनु आन नेक्था डा मुर, इस्साकार आ थर, जबूलून आ थर नु नाप्ताली आ थर डा मुर डोन रे गधा, दलओठ, खच्चर नु ब्यफपुकीम जचा थोव्रक चाक्शो बाक्मा बाक्त। मेकोपुकीम शुश फस, सोव्रपाइश्शो फोव्रशी गेडा, सोव्रपाइश्शो अडगुर, अडगुर शांबु, तेल, बी ब्यफ, भेडा शुश चाक्शो बाक्मा बाक्त। मारदे हना, इस्राएली नेल्ल ग्येरशो बाक्मा बाक्त।

## 13

दाऊदम सन्दोस चाक्चा माल्शो

२सामुएल ६:१-११

- 1 दाऊदम मार पचा माल्ताक्व हना यो, आ हजार हजार डा लडाइ पाइब आन कप्तान नु सहे सहे डा लडाइ पाइब आन कप्तान आन कली लोव्र पा सल्ला पाइबाक्माक्त।
- 2 मिनु दाऊदम इस्राएल डा युम्यो मुर नेल्ल आन कली “गेपुकी रिम्यो मिन्नीनी हना, नु परमप्रभु यावे इं परमप्रभु आ दाक्शो बाक्त हना, गो इस्राएल रागी नेल्लेमी लीशो इं मुरपुकी ‘मुर नेल्ल जाक्कीन’ दे लोव्र कुरब सोइक्तय। मेको आन दातेमी सहर आ एर ओंथ डा बी ब्यफ योव्रतीकेम बाक्ब चढेब नु लेवीपुकी बाक्नीम। नेल्ल आन कली ‘जाक्कीन’ दे लोव्र कुरब मुर सोइक्तय।
- 3 गो इं परमप्रभु आ सन्दोस एक चाक्च। मारदे हना सावल बाक्म सम्म, गो मेको कली ममिन्तय” देमाक्त।
- 4 मिनु मेको युम्यो मुर नेल्लेमी मेको लोव्र बिस्समा बाक्त। मारदे हना मुर नेल्लेमी मोदेशो पचा दाक्तमे बाक्त।
- 5 मोपतीके दाऊद इजीप्त डा खोला शीहोर रे लेबो-हमाथ सम्म इस्राएली नेल्ल पुक्मी बाक्त। मेको नेल्लेमी परमप्रभु आ सन्दोस किरयथ-यारीम रे चाक्चा माल्मे बाक्त।
- 6 मिनु दाऊद नु इस्राएली नेल्ल बालाह डोइश्शा लमा बाक्त। बालाह सहर यहूदा डा किरयथ-यारीमम बाक्माक्त। मेकेर रे परमप्रभु, परमप्रभु यावे आ सन्दोस ब्रथ लमा बाक्त। परमप्रभु यावे सन्दोस तारी बाक्शो करूब आस दातेम बाक्शो बाक्माक्त। मेको परमप्रभु, परमप्रभु यावे आ सन्दोस बाक्माक्त। यहोसु १५:९
- 7 मिनु मेकोपुकीम परमप्रभु आ सन्दोस अबीनादाब आ खिं रे गुंइशा नक बग्गी कामी कुर पामे बाक्त। मिनु उज्जाह नु अहीयोमी मेको बग्गी खुल्ना खुलन लसा बाक्त।
- 8 मिनु दाऊद नु इस्राएली नेल्ले परमप्रभु आ डोंइती ग्येरशा कुम्सो पना पन आइक्च नु ठेयब तार पाइश्शो ताप्तीके, खैजडी, बुप्केल नु तुराही ताप्शा, जोंब बोक्शा, सिल पामे बाक्त।
- 9 मिनु मेकोपुकी किदोन आ चेरब तुप्तीकेम जाक्मानु, ब्यफोमी सन्दोस हिक्पदसे बाक्त। मिनु उज्जाहमी सन्दोस तिक्चा कली आ गुइ दिंदा बाक्त।
- 10 मिनु परमप्रभु यावे उज्जाह क्येडा गाइश्शा, मेको कली सदा बाक्त। मारदे हना मेकोमी सन्दोस ग्याइक्चा कली आ गुइ दिंदा बाक्त। मोपतीके मेको परमप्रभु आ डोंइती बेक्माक्त।

11 दाऊदमी परमप्रभु यावे उज्जाह आ पबंम गाइशशो तशा, चुरमाक्त। मिनु मेको बाक्तीके आ नें परेस-उज्जाह वोदा बाक्त। मेको आ नें मुल सम्म मेकोन बाक्ब।

12 मेको नाक्ती दाऊद परमप्रभु क्येडा हिंमाक्त। मेकोमी “मुल ओं दुम्मेनु, गो परमप्रभु आ सन्दोस दोपा कोव्रशा वोइक्नुडा?” देमाक्त।

13 मोपतीके दाऊदम मेको सन्दोस कोव्रशा वोइक्चा कली आ सहर मलदा बाक्त। आ कोव्रशा वोइक्चा आ पा डा गित्त आ खिं डा ओबेद-एदोम आ खिं लदमे बाक्त।

14 मोपा मेको परमप्रभु आ सन्दोस ओबेद-एदोम आ खिं महिना सां सम्म लीमाक्त। मिनु परमप्रभु यावेमी ओबेद-एदोम आ खिं डा मुर नु आ मारेइ मारेइ कली आसीक गेवा बाक्त।

## 14

दाऊद नु आ खिं डा मुरपुकी

२सामुएल ५:११-२५

1 टायर डा पिप हीराममी आ लोव्र कुरबपुकी दाऊद आ बाक्तीकेम सोइक्ता बाक्त। मेको कुरब मुर नु दाऊद आ खिं सेल्चा कली लेबानोन डा लाइशशो रवा आ शी, गारो प्रोव्रब नु शी के गेय पाइब सोइक्तीमी बाक्त।

2 मिनु दाऊदमी “मुल परमप्रभु यावेम आं कली इस्त्राएली आन पिप सेलती। मिनु आ मुर इस्त्राएली आन पबंम आ राज्य ठेयब नु मान ताइब सेल्शो बाक्ब” दे तुइक्ता बाक्त।

3 दाऊदमी यरूसलेमम बाक्मेनु, अर्को मीश चाक्मी बाक्त। मिनु शुश तमी तौ आन आफ दुम्माक्त।

4 यरूसलेमम थिशो आ आल आन नें मार मार बाक्मा बाक्त देशा हना, शम्मुआ शोबाब, नाथान, सोलोमन,

5 इभार, एली-शुआ नु एली-फेलेत,

6 नोगाह, नेफेग, याफीया,

7 एली-शामा, बेलीआदा नु एली-फेलेत बाक्मा बाक्त।

दाऊद नु पलिस्ती लडाइ पशो

8 मिनु पलिस्तीमी दाऊद इस्त्राएल नेल्ल डा पिप दुस्त देशो लोव्र नेशा, मेको नेल्ले दाऊद कली माल्थ लमा बाक्त। मिनु दाऊदम मेको लोव्र नेशा पलिस्ती नु लडाइ पथ लमाक्त।

9 मिनु पलिस्ती जाक्शा, रेफाइम डा बेसीम मार मार रोइक्तामे बाक्त।

10 मोपतीके दाऊदमी परमप्रभु कली “गो लशा, पलिस्ती आन कली लडाइ तोडमी? गे मेको आन कली आं गुइमी गेनीनी?” दे हिल्लो पवा बाक्त। मिनु परमप्रभु यावेमी “इर डोइशशा लावो, गो मेको आन कली इ गुइमी गेनन” देमाक्त।

11 मोपतीके दाऊद नु आ मुरपुकी इर डोइशशा लशा, बाल-पेराजीमम मेको आन कली लडाइ तोशा ग्रामा बाक्त। मिनु दाऊदमी “परमप्रभुमी खोला आ नेक्था डा रू प्रेशो खोदेशो पा, आं जोरी सनु आन कली साइक्मी बाक्त” देत। मोपतीके मेको बाक्तीक आ नें बाल-पेराजीम वोदमे बाक्त।

12 मेकेर पलिस्तीपुकीम आन देवी देवता प्रोइशा वोदमे बाक्त। मिनु दाऊदमी “मेको चोने” दे अरेवा बाक्त। ब्यवस्था ७:५-२५

13 मिनु पलिस्तीपुकीम लेंशा बेसीम मार मार रोइक्चा गोव्रमे बाक्त।

14 मिनु दाऊदमी लेंशा परमप्रभु कली हिल्लो पवा बाक्त। मिनु परमप्रभुम मेको कली “मुल गे इर डोइशशा मलने। गे नोले रे हिरशा, लचा माल्नेवे। शुश रवा बाक्तीके रे मेको आन नेक्था लशा लडाइ तोव्रमी।

15 गे रवा आन इर डरमी लडाइ पाइब आन गाक्शो नेनी चोटी मेको आन कली लडाइ तोव्रमी। मारदे हना परमप्रभु इन डोइती पलिस्ती आन लडाइ पाइब नु लडाइ पथ लाइब” देमाक्त।

16 मिनु दाऊदमी परमप्रभुम देशो खोदेशो पा लडाइ पवा बाक्त। मिनु मेकोम पलिस्ती आन लडाइ पाइब आन कली गिबोन रे गेजेर सम्म खेदा पा सदमे बाक्त।

17 मोपा दाऊद आ ठेयब दुम्तीके रागी नेल्ल ब्रमाक्त। मिनु परमप्रभु यावेमी रागी रागी डा मुर नेल्ल आन थुमी दाऊद क्येडा हिंतीक थुं वोदा बाक्त।

## 15

दाऊदमी सन्दोस चाक्शो

२सामुएल ६:१२-१६

1 दाऊदमी आ सहरमी आं कली खिंपुकी सेला बाक्त। मिनु परमप्रभु आ कबल पशो सन्दोस वोइक्चा कली बाक्तीक का सेल्शा, ताम्बु का कीडा बाक्त।

2 मिनु नोले दाऊदम “लेवी आ थर डा मरुमी ला परमप्रभु आ सन्दोस कुरचा माल्नीम” दे हुकुम पवा बाक्त। मारदे हना परमप्रभु यावेमी लेवी आन कली आ सन्दोस कुरचा नु गेना हना यो परमप्रभु आ गेय पचा कली योव्रशो बाक्मा बाक्त।

3 मिनु दाऊदम परमप्रभु यावे आ कबल पशो सन्दोस आ ठीक पशो बाक्तीकेम चाक्चा कली इस्त्राएली नेल्ल आन कली यरूसलेम सहरम पुक्मी बाक्त।

4 नोले दाऊदम हारून आ चच युइ नु लेवी नेल्ल आन कली खुप्तीमी बाक्त।

5 मेको सु सु बाक्मा बाक्त देशा हना, कोहाथ आ तौ आन ठेयब मुर उरीएल नु सहे का २० जना आन खिं खिं डा मुर बाक्मा बाक्त।

- 6 मेरारी आ तौ आन ठेयब मुर आसायाह नु सहे निक्शी २० जना आन खिं खिं डा मुर बाक्मा बाक्त।
- 7 गेरशोम आ तौ आन ठेयब मुर योएल नु सहे का ३० जना आन खिं खिं डा मुर बाक्मा बाक्त।
- 8 एली-जाफान आ तौ आन ठेयब मुर शेमायाह नु सहे निक्शी आन खिं खिं डा मुर बाक्मा बाक्त।
- 9 हेब्रोन आ तौ आन ठेयब मुर एलीएल नु ८० जना आन खिं खिं डा मुर बाक्मा बाक्त।
- 10 उज्जीएल आ तौ आन ठेयब मुर अम्मीनादाब नु सहे का १२ जना आन खिं खिं डा मुर बाक्मा बाक्त।
- 11 मिनु दाऊदमी चढ़ेब सादोक नु अबीयाथार नु लेवी उरीएल, आसायाह, योएल, शेमायाह, एलीएल नु अम्मीनादाब आन कली ब्रेत्तीमी बाक्त। २सामुएल १५:२९
- 12 मिनु मेको आन कली “गे लेवी आन खिं डा ठेयब मुर ननी। परमप्रभु यावे, इस्राएली आन परमप्रभु आ सन्दोस आं ठीक पशो बाक्तीके कुडक्चा, दे इन कली नु इन खिं खिं डा मुर आन कली ठीक सेलीन।
- 13 डोंडती गे मेको कली मकुरतीके परमप्रभु यावे, इं परमप्रभु गोपुकी नु गाडक्ताक्व। मारदे हना गो मेको सन्दोस कली ठीक पा मचाक्क” देमाक्त। १इतिहास १३:९-११
- 14 मोपतीके परमप्रभु यावे, इस्राएली आन परमप्रभु आ सन्दोस चाक्चा कली चढ़ेब नु लेवी आंम आंम कली ठीक सेल्समा बाक्त।
- 15 मिनु लेवीपुकीम परमप्रभु आ सन्दोस शुइश्शो कोक्केमी आन बलामी कुरमे बाक्त। परमप्रभु यावेम मोसा कली दोपा देमे, मोपा मोसा आ शेशो पामे बाक्त। प्रस्थान २५:१४; गन्ती ४:१५
- 16 मिनु दाऊदम लेवी आन ठेयब मुर आन कली “इन खिं खिं डा मुर कुम्सो पाइब योव्रशा, वोइक्चा माल्नीनी। मेकोपुकी तार पाइश्शो ताप्तीके, बीना नु बुक्केल ताप्शा, ग्येरशा ठेयब सेंदा पा कुम्सो पचा माल्नीम” दे अरेमी बाक्त।
- 17 मोपतीके लेवीपुकीम योएल आ तौ हेमान नु आ खिं खिं डा मुर बेरेक्याह आ तौ आसाफ, नु मेरारी आ तौ आन खिं खिं डा मुर रे कुशायाह आ तौ एथान आन कली योव्रडमे बाक्त।
- 18 मिनु मेको आन नोले जकरिया, याजीएल, शेमीरामोथ, येहीएल, उन्नी, एलीआब, बेनायाह, मासेयाह, मत्तीथ्याह, एली-फेलेहु, मीक्नैयाह नु लाप्चो खाल पाइब ओबेद-एदोम नु यिएल आन कली योव्रडमे बाक्त।
- 19 मिनु कुम्सो पाइब हेमान, आसाफ नु एथान कांसा के बुक्केल ताप्चा कली योव्रचा पुंडसमा बाक्त। १इतिहास ६:१८; १इतिहास ६:२४; १इतिहास ६:२९; १इतिहास २५:१
- 20 मिनु जकरिया, अजीएल, शेमीरामोथ, येहीएल, उन्नी, एलीआब, मासेयाह नु बेनायाह अलामोथ देशो आइक्च सेंदा पाइश्शो तार पाइश्शो ताप्तीके ताप्चा कली योव्रचा पुंडसमा बाक्त।
- 21 मिनु मत्तीथ्याह, एली-फेलेहु, मीक्नैयाह, ओबेद-एदोम, यिएल नु अजजीयाह शेमीनीथ देशो ठेयब सेंदा पाइश्शो बीना ताप्तीके ताप्चा कली योव्रचा पुंडसमा बाक्त।
- 22 लेवी आन ठेयब मुर केनानीयाह कुम्सो पचा नु ताप्चा जोक्ब तुइक्ब बाक्तीके मेको आन कली चलेब हुम्माक्त।
- 23 बेरेक्याह नु एल्काना सन्दोस बाक्तीके डा लाप्चो कोव्रब बाक्सा बाक्त।
- 24 मिनु चढ़ेब शेबान्याह, योशाफात, नेथनेल, अमासे, जकरिया, बेनायाह नु एलीएजर परमप्रभु आ कबल पशो सन्दोस आ डोंडती तुराही ताप्चा माल्बाक्मा बाक्त। ओबेद-एदोम नु येहीयाह यो सन्दोस बाक्तीके डा लाप्चो कोव्रब बाक्सा बाक्त।
- 25 मिनु दाऊद नु इस्राएल डा खाल्पा नु हजार हजार डा लडाइ पाइब आन कप्तानपुकी ओबेद-एदोम आ खिं लशा, ग्येरशा परमप्रभु यावे आ कबल पशो सन्दोस चाक्चामे बाक्त।
- 26 मिनु परमप्रभु यावेमी आ कबल पशो सन्दोस कुरब लेवी आन कली वारच पाइक्तीके मेकोपुकीम ७ ओटा ब्यफ नु ७ ओटा सांड चढ़ेमे बाक्त।
- 27 मिनु दाऊद नु सन्दोस कुरब लेवी, कुम्सो पाइब नु केनानीयाह ताप्ब नु कुम्सो पाइब आन कली चलेब नेल्ल रिम्शो सुती के वा फेक्शो बाक्मा बाक्त। दाऊदम रिम्शो सुती वा के कुचु तार फेक्तीके यो फेक्शो बाक्माक्त। प्रस्थान २५:७
- 28 मोपा इस्राएली नेल्लेमी ठेयब रेयके पा नु गोव्र, तुराही, बुक्केल, तार पाइश्शो ताप्तीके नु बीना ताप्चा परमप्रभु यावे आ कबल पशो सन्दोस कुइश्शा कुमा बाक्त।
- 29 मिनु परमप्रभु यावे आ कबल पशो सन्दोस दाऊद आ सहरम ओइदमेनु, सावल आ तमी, दाऊद आ मीश मिकालमी झेल रे कोव्रडा बाक्त। मिनु पिप दाऊद कली ग्येरशा सिल पशो तशा, आ थुंमी पिप कली आइक्च मिम्ता बाक्त।

## 16

दाऊदम मुर आन कली आसीक गेशो  
२सामुएल ६:१७-१९

- 1 मिनु मेकोपुकीमी परमप्रभु आ कबल पशो सन्दोस चाक्चा, दाऊदमी कीशो ताम्बु आगाम वोदमे बाक्त। मिनु मेकोपुकीमी परमप्रभु आ डोंडती चोशा चढ़ेतीक नु दुशा बाक्चा आ पर्वम चढ़ेतीक चढ़ेमे बाक्त।
- 2 मिनु दाऊदमी मेको चोशा चढ़ेतीके नु दुशा बाक्चा आ पर्वम चढ़ेतीके चढ़ेने थुम्शा, मुर आन कली परमप्रभु यावे आ नेमी आसीक गेवा बाक्त।
- 3 मिनु मेकोमी इस्राएली नेल्ल आन कली, मीश मुर नु वोंइश मुर आन कली शोब्ले का का, श्ये नु अडगुर शोब्ले का का जचा ब्वचा गेमी बाक्त।



4 मिनू दाऊदमी परमप्रभु यावे आ सन्दोस आ डोंडती गेय पचा, दे लेवी आन कली योवशा वोडकमी बाक्त। मेकोपुकीमी परमप्रभु कली पुंडतीक लोत्र “गे रिम्शो पाइब बाक्नीनी” दे नु परमप्रभु यावे, इस्राएली आन परमप्रभु कली ठेयब सेल्चा माल्बाक्मा बाक्त।

5 मेको आन ठेयब मुर आसाफ बाक्माक्त। मेको आ नोले डा जकरिया, यिएल, शेमीरामोथ, येहीएल, मत्तीथ्याह, एलीआब, बेनायाह, ओबेद-एदोम नु यिएल ठेयब नु आइक्च तार पाइश्शो ताप्तीके नु सितार ताप्ब बाक्मा बाक्त। आसाफ बुप्केल ताप्ब बाक्माक्त।

6 मिनू चढेब बेनायाह नु याहासीएलमी नाक्त कित कित परमप्रभु आ कबल पशो सन्दोस आ डोंडती तुराही तप्चा माल्बाक्सा बाक्त।

दाऊदमी कुम्सो पशो

भजन संग्रह १०५:१-१५; भजन संग्रह १६; भजन संग्रह १०६:१,४६,४८

7 मेको नाक्ती दाऊदमी नेल्ल क्येडा डोंडती आसाफ नु आ खिं खिं डा मुर आन कली परमप्रभु यावे कली ठेयब सेल्लिक कुम्सो पपाइक्मी बाक्त।

8 “परमप्रभु यावे, गे रिम्शो पाइब बाक्नीनी, आ नें थिशा मेको कली पुंनीन। मेको आ पशो जात जात डा मुर आन कली तुडक्पतीन।

9 मेको कली कुम्सो पने। मेको कली ठेयब सेल्लिक कुम्सो पने। मुर आन कली मेको आ छक लाक्चा डा गेय नेल्ल आन पर्वम लोत्र पने।

10 मेको आ ठेयब नें आ पर्वम ग्येरसीन। परमप्रभु यावे कली माल्बपुकीमी ग्येरसीन।

11 परमप्रभु यावे नु मेको आ सक्ति मालीन। मेको नु बाक्चा कली माल्ना माल्न बाक्कीन।

12 मेको आ रिम्शो गेय मप्रेदीन। आ पशो छक लाक्चा डा गेय नु आ निसाफ पतीके मप्रेदीन।

13 आ गेय पाइब इस्राएल आ चच युड, याकूब आ आल, आ योवशोपुकी परमप्रभु आ पशो गेय मप्रेदीन।

14 मेको परमप्रभु यावे, इ परमप्रभु बाक्ब। मेकोमी रागी नेल्ल आन कली निसाफ पाइब।

15 आ पशो कबल गेना हना यो मप्रेदीन। मेको कबल हजार हजार पाला डा मुर आन कली पशो बाक्त।

16 मेकोमी अब्राहाम नु कबल पशो बाक्त। मेकोमी इसहाक नु कसम जशा, थोकशो लोत्र पशो बाक्त।

17 मेको कबल याकूब कली फुल्लुम मुशा ब्रेक्शा गेशो बाक्त। इस्राएल कली गेना हना यो लीब कबल पशो बाक्त।

18 मेको कबल मार बाक्त देशा हना ‘गे इ कली कनान रागी गेनन। इ रागी नु इ थेरशो रू बाक्ब’ दे मेको कबल बाक्त।

19 मेकोपुकी शुश मुर मबाक्तीके, मान मताइब नु अर्को रागी डा मुर बाक्शा,

20 रागी रागी डा मुर आन दातेम हिरशा, राज्य कारे अर्को जात डा मुर सम्म हिरना हिरन गाक्बाक्तेक्म।

21 परमप्रभु यावेमी सुडमी मेको आन कली दिप्चा मगेमी। मेको आन पर्वम पिप आन कली यो हुडश्शा उत्पत्ती १२:१७; उत्पत्ती २०:३,७; उत्पत्ती २६:९

22 ‘आं तेल लुक्शो आन कली मथिने। आं नोले दुम्ब लोत्र पाइब आन कली श्येत मगेने’ देशो बाक्त।

23 रागी डा मुर नेल्लेमी परमप्रभु यावे कली कुम्सो पने। नाक्त कित कित आ श्येत रे प्रोंडशो आ पर्वम लोत्र पने।

24 रागी रागी डा मुर आन दातेमी मेको आ सक्ति आ पर्वम लोत्र पने। जात जात डा मुर आन दातेमी मेको आ पशो छक लाक्चा डा गेय आ पर्वम लोत्र पने।

25 मारदे हना परमप्रभु यावे ठेयब बाक्ब। ठेयब मान पाइक्चा पुंडसीब बाक्ब। देवी देवता नेल्ल आन क्येडा मान पाइक्चा पुंडसीब बाक्ब।

26 मारदे हना जात जात डा मुर आन देवी देवता नेल्ल मूर्ति बाक्नीम। तन्न परमप्रभु यावेमी सरीड सेल्शो बाक्ब।

27 ठेयब दुम्तीक नु मान ततीक मेको नु बाक्नीस। सक्ति नु ग्येरतीक मेको आ बाक्तीकेम बाक्नीस।

28 जात जात डा खिं खिं डा मुरपुकीमी परमप्रभु यावे कली ‘छेडछेड नु सक्ति इन के बाक्ब’ दे ठेयब सेलीन। भजन संग्रह २९:१२

29 परमप्रभु यावे कली आ नें शिरचा डा पा मान पने। चढेतीक चाक्शा, आ डोंडती जाक्कीन। आंम आन कली परमप्रभु यावे आ डोंडती ठीक सेल्शा मेको कली ठेयब सेलीन।

30 रागी नेल्ल मेको आ डोंडती थिर थिर पा खिंखिं पने। रागी नेल्ल कली गेना हना यो मदुक्चा डा पा वोइश्शो बाक्ब।

31 सरीड ग्येरसेक्ल। रागी थ्याप्पा ग्येरसेक्ल। मिनू रागी रागी डा मुर आन दातेमी ‘परमप्रभु यावे पिप बाक्ब’ दैमल।

32 समुन्द्र नु मेकेर बाक्ब मारेड मारेड नेल्ल ग्येरशा रेयके पामेक्ल। रू नु मेकेर बाक्ब मारेड मारेड ग्येरसीमल।

33 मेना ब्वाकी डा रवा परमप्रभु यावे आ डोंडती ग्येरशा कुम्सो पाइनीम। मारदे हना मेको रागी कली निसाफ पथ जाक्ब।

34 परमप्रभु यावे कली ‘गे रिम्शो पाइब बाक्नीनी’ देंनीन। मारदे हना आ दाक्तीक गेना हना यो लीब। २इतिहास २०:२१

35 मिनू गेपुकीम ‘आंड कली श्येत रे प्रोनीन। गे आंड कली प्रोंडब परमप्रभु बाक्नीनी। आंड कली रागी रागी रे खुप्शा, प्रोंडकी’ दे यो देनीनी। गोपुकीमी इन कली ‘गे रिम्शो पाइब बाक्नीनी’ देशा इन नें ठेयब सेल्शा, ग्येरशा बाक्नीकी।

36 परमप्रभु यावे, इस्राएली आन परमप्रभु गेना हना यो ठेयब बाक्ब। गेना हना यो मोदेंशो बाक्ब” दे कुम्सो पवा बाक्त।

मिनू नोले मुर नेल्लेमी “आमेन” देशा, परमप्रभु यावे कली ठेयब सेल्मे बाक्त। भजन संग्रह ४१:१४

नाक्त कित कित पचा माल्शो

37 मिनु दाऊदम आसाफ नु आ खिं खिं डा मुर आन कली परमप्रभु यावे आ कबल पशो सन्दोस आ डोंडती नाक्त कित कित पचा माल्शो गेय पचा, दे वोदा बाक्त।

38 ओबेद-एदोम नु आ खिं डा मुर मेको आन कली वारच पाइब बाक्मा बाक्त। येदुथून आ तौ ओबेद-एदोम नु होसाह लाप्यो कोत्रब आन ठेयब मुर बाक्सा बाक्त।

39 दाऊदम चढेब सादोक नु मेको आ खिं खिं डा चढेब आन कली गिबोनम बाक्शो डांडा डा परमप्रभु यावे आ बाक्तीकेम वोइश्शो बाक्माक्त। १इतिहास २१:२९

40 मेकोपुकीमी नाक्त कित कित नाक्दो नु सुनी चढेतीकेमी चोशा चढेतीक चढेचा माल्शो बाक्मा बाक्त। परमप्रभु यावेमी इस्राएली आन कली ब्रेक्शा आ अरेशो लोत्रम खोदेशो पा नेल्ल पचा माल्मे बाक्त। २प्रस्थान २९:३८-३९

41 हेमान, येदुथून नु आन नें ब्रेक्शो योत्रमो मुर मेको नु बाक्मा बाक्त। मेको परमप्रभु कली “गे रिम्शो पाइब बाक्नीनी। मारदे हना इन दाक्तीक गेना यो लीब” देंचा कली वोइश्शो बाक्मा बाक्त।

42 हेमान नु येदुथून आस ताप्तीक तुराही नु बुक्केल यो बाक्मा बाक्त। परमप्रभु कली कुम्सो पचा कली अरु ताप्तीके यो बाक्मा बाक्त। येदुथून आ तौपुकी लाप्यो खाल पाइब बाक्मा बाक्त।

43 मिनु नोले मुर नेल्ल आन खिं खिं लेम्मा बाक्त। मिनु दाऊद आ खिं डा मुर आन कली आसीक गेथ लमाक्त।

## 17

परमप्रभुमी दाऊद नु कबल पशो

२सामुएल ७:१-१६

1 मिनु दाऊद आ खिंम बाक्म नोले परमप्रभु यावे आ लोत्र पाइब नाथान कली “गो लेबानोन डा लाइश्शो रवा आ शी के खिंम बाक्शो बाक्नुड। तन्न परमप्रभु यावे आ कबल पशो सन्दोस ताम्बुम वोइश्शो बाक्ब” दे मदा बाक्त।

2 मिनु नाथानम दाऊद कली “गे इन थुंम मार बाक्मे, मेको पने। मारदे हना परमप्रभु गे नु बाक्ब” दे मदा बाक्त।

3 तन्न मेको नाक्दो परमप्रभु यावेमी नाथान कली लोत्र पवा बाक्त।

4 मेकोमी “आं गेय पाइब दाऊद कली ‘परमप्रभु यावेमी इ कली मार देंब देंशा हना, गे आं कली बाक्तीक खिंम मसेलो।

5 इस्राएली आन कली इजीप्ट रे गुंइशा एक चाक्शो नाक्त रे मुल सम्म गो गेनायो खिंम मबाक्ड। गो ताम्बुम, आं बाक्तीकेम बाक्शो बाक्ती।

6 मिनु गो इस्राएली आन दातेम नु ते ते गाक्डा, गो मेको आं मुर आन कली लां कोंइब इन निसाफ पाइब आन कली आं कली लेबानोन डा लाइश्शो रवा आ शी डा खिं सेलो, दे गेनायो मदेँडा’।

7 मोपतीके आं गेय पाइब दाऊद कली मुर नेल्ल आन परमप्रभु यावेमी इ कली मार देंब देंशा हना ‘गो क्यारश भेडा योत्रतीके रे आं मुर इस्राएली आन पिप दुम्चा कली योत्रतन।

8 गे ते ते लवे, गो यो मेक मेक बाक्शो बाक्ती। मिनु इ लांम बाक्शो इ जोरी सत्रु आन कली खतम पोक्तामी। मुल गो इ कली रागी डा थम ठेयब मुर खोदेशो पा ठेयब सेल्लन।

9 गो आं मुर इस्राएली आन कली रागी का योत्रनुड। मिनु गो मेको आन कली मेकेर बाक्पाइक्नुडमी। मिनु मेको आन रागीम बाक्नीम। मुल रे मेको आन कली श्येत गेबपुकी सुइम श्येत मगेनीम।

10 गोमी डोंडडोंडती आं मुर इस्राएली आन कली सासन पाइब निसाफ पाइबपुकी योत्रडुमी रे मेको आन कली मरिम्शो मुरपुकीम श्येत गेशो खोदेशो पा मुल गेनायो श्येत मगेनीम। गो इ जोरी सत्रु नेल्ल आन कली इ सासनम सेल्लनुडमी। गो इ परमप्रभु यावेम इ राज्य नु इ खिं बोल्यो सेल्लनुड।

11 मिनु इ नाक्त नुष्शा, गे बेक्शा इ किकी पिपपुकी नु लाइनेवे। मिनु नोले गो इ तौ का कली इ पा डा पिप सेल्लनुड। मिनु गो मेको आ राज्य महिम्सीब सेल्लनुड।

12 मिनु मेकोमीन आं कली खिं का सेल्चा माल्ब। गो मेको आ राज्य गेना हना यो लीपाइक्नुड। १इतिहास २२:१०-२८

13 गो मेको आ आफ दुम्नुड। मिनु मेको आं तौ दुम्ब। गो मेको आ डोंडती डा सासन पाइब रे आं गेना हना यो दाक्तीके प्रोंइशो खोदेशो पा दाऊद रे मप्रोंइनुड।

14 गो मेको कली आं खिं नु आं राज्जम गेना हना यो कली वोइक्नुड। मिनु मेको आ सासन पतीक गेना हना यो महिम्सीथु बाक्ब’ देशो लोत्र” नाथान कली तुइक्पदा बाक्त।

15 मिनु नाथानमी मेको कली देशो लोत्र नु कोंइशो नेल्ल दाऊद कली शेंदा बाक्त।

“गे रिम्शो पाइब बाक्नीनी” देशो

२सामुएल ७:१७-२९

16 मिनु पिप दाऊद परमप्रभु यावे आ बाक्तीक लशा “परमप्रभु यावे, परमप्रभु, गो सु नडा? मिनु आं खिं मार बाक्बा? मिनु गे आं कली एक सम्म चाक्यीनी। उत्पती ३२:११

17 मो हना यो परमप्रभु एको इन डोंडती शुश ममाइ। परमप्रभु यावे, परमप्रभु, गोमी इन कबल इन गेय पाइब आ खिं कली शुश नोले सम्म कली बारपाइश्शो बाक्नीनी।

18 इन गेय पाइब कली इन गेशो मान आ पब्रम दाऊदम अरु मार देने चाप्बा डा? गो इन गेय पाइब कली रिम्शो पा तुइश्शो बाक्नीनी।

19 परमप्रभु यावे, गो इन गेय पाइब आ पब्रम नु इन पत दाक्शो गेय खोदेशो पा गे थम ठेयब गेय पशो बाक्नीनी। मिनु एको इन पशो ठेयब कबल तुइक्पाइश्शो बाक्नीनी।

20 इन खोदेशो अर्को सुइ मबाकनीम। परमप्रभु यावे, इन डा लाकशा अर्को तेकोइ परमप्रभु मबाकनीम। डोंइती इन देशो नेशो नेल्ल मुल आंइ मिक्चीम ताइतक। यसैया ४४:६

21 मिनु इन मुर इस्राएली आन कली सु नु थाप्ने चाम्सीबा डा? मेको आन वाइल दुम्टीक रागी रे आंम मुर सेल्चा कली आंमन रागीम चाकब अर्को तेको जात डा मुर आन परमप्रभु बाकनीमी डा? गेमी ठेयब नु हिचा डा गेय पा इजीप्त रे प्रोंइशो इन मुर आन डोंइडोंइती अर्को जात डा मुर आन कली खेरशा इन मुर आन कली बाक्पाइशो बाकनीनी।

22 गेम इन मुर इस्राएली आन कली गेना हना यो कली इन के सेल्शो बाकनीनी। परमप्रभु यावे गे मेको आन परमप्रभु दुम्टो बाकनीनी।

23 मुल ए परमप्रभु यावे, गे इन गेय पाइब नु मेको आ खिं आ पबंम मार मिम्शा पशो बाकनी, मेको गेना हना यो लील। गे मार कबल पशो बाकनी, मेको गाप्त।

24 मिनु इन पशो गेय ठेयब दुम्ट्या कली मेको गेना हना यो लील। मिनु मुर नेल्ल आन परमप्रभु यावे, इस्राएली आन परमप्रभु बाकब। मिनु इन गेय पाइब दाऊद आ खिं इन डोंइती बोल्यो दुम्ट्या लीब।

25 गे आं परमप्रभुम इन गेय पाइब आं खिं सेल्चा कली इन मिम्शो शेशो बाकनीनी। मोपतीके गो इन गेय पाइबम इन डोंइती एको प्रार्थना पचा चिक्शो बाकुनुड।

26 ए परमप्रभु यावे, गेन परमप्रभु बाकनीनी। गे इन गेय पाइब नु एको रिम्शो कबल पशो बाकनीनी।

27 मेको गेना हना यो इन डोंइती बाकल, दे इन गेय पाइब आ खिं कली आसीक गेचा इन मिम्शो बाकब। मारदे हना गेन मेको कली आसीक गेशो बाकनीनी। मिनु मेको गेना हना यो आसीक रशो बाकब” दे दाऊदम परमप्रभु कली लोत्र पवा बाकत। उत्पती १२:३

## 18

दाऊद आ राज्य बारशो

२सामुएल ८:१-१४

1 मेको आ इक्का नोले दाऊदमी पलिस्ती नु लडाइ पा ग्राशा फूमि बाकत। मिनु पलिस्ती आन गाथ सहर नु मेको आ एर ओथ डा गाउं नेल्ल आइक्के सेला बाकत।

2 मेकोमी मोआबी आन कली यो फूमि बाकत। मिनु मेकोपुकी दाऊद आ सासनम दुम्ट्या, मेको कली तिरो थाप्या माल्मा बाकत।

3 मिनु दाऊदमी युफ्रेटीस खोला सम्म आ ग्राशो अधिकार ठीक वोइक्थ लमेनु, सोबाह डा पिप हादादेजेर नु हमाथ सम्म लडाइ पवा बाकत।

4 मिनु दाऊदम मेको रे पा हजार का बग्गी, ७ हजार शारा डोइक्ब नु २० हजार खोइलीम गाकब लडाइ पाइब आन कली ग्याइक्तीमी बाकत। मिनु मेकोम सहे का शारा प्रोंइशा अरु बग्गी डा शारा नेल्ल आन कली खोइल डा नारी खोदमे बाकत।

5 मिनु सोबाह डा पिप हादादेजेर कली वारच पाइक्चा कली दमस्कस डा अरामीपुकी जाकमे बाकत। मिनु दाऊदमी मेको आन दाते डा २२ हजार आन कली साइक्मी बाकत।

6 मिनु दाऊदम दमस्कस डा अराम सहरम आ ताम्बु कीडा बाकत। मिनु अरामीपुकी मेको आ सासनम दुम्ट्या मेको कली तिरो थाप्टमे बाकत। मोपा दाऊद ते लत हना यो परमप्रभु यावेम मेको कली ग्रापदा बाकत।

7 दाऊदम हादादेजेर आ लडाइ पाइब आन ठेयब मुरपुकीम कुरशो सुन के ब्रा, तेक्तीकपुकी रोइशशा यरूसलेमम चाकगमे बाकत।

8 दाऊदम हादादेजेर आ तिब्बहथ नु कुन सहर रे शुश कांसा चाकगमे बाकत। मेको रे पा सोलोमनम ठेयब चिक्तीक बोस, थामपुकी नु ग्योबपुकी सेला बाकत। १राजा ७:२३; १राजा ७:१५

9 मिनु हमाथ डा पिप तोऊमी दाऊदमी सोबाह डा पिप हादादेजेर आ लडाइ पाइब नेल्ल आन कली फुशो लोत्र नेना बाकत।

10 मिनु दाऊदमी हादादेजेर कली लडाइ फुशो आ पबंम मेको कली रिम्शो पाइतीनी दैथ तोऊम आ तौ हदोराम कली दाऊद आ बाक्तीक सोइक्ता बाकत। मारदे हना हादादेजेर नु तोऊ आस दातेमी लडाइ दुम्टो बाक्माकत। मिनु हदोराममी आं नु बाक्शो सुन चांदी नु कांसा के ग्योबपुकी चाकगा बाकत।

11 मिनु दाऊद पिपम मेको आ चाक्शो सुन नु चांदी के ग्योब नेल्ल परमप्रभु यावे कली चढेवा बाकत। मेकोमी अर्को जात नेल्ल एदोम, मोआब, अम्मोनी, पलिस्ती नु अमालेकी रे चाक्शो सुन चांदी यो चढेवा बाकत।

12 सेरूयाह आ तौ अबीशैमी हिक्सी आ बेंसीम १८ हजार एदोमी लडाइ पा सदा बाकत।

13 मिनु मेको आन रागीम ताम्बु कीडा बाकत। मिनु एदोमी नेल्ल दाऊद आ सासनम दुम्ट्या बाकत। मोपा दाऊद ते ते लमे, मेक मेक परमप्रभु यावेमी मेको कली ग्रापदा बाकत।

दाऊद आ कप्तानपुकी

२सामुएल ८:१५-१८

14 मिनु दाऊदम इस्राएल नेल्लेमी सासन पवा बाकत। मिनु आ मुर नेल्ल आन कली ठीक निसाफ पवा बाकत।

15 सेरूयाह आ तौ योआब कप्तान बाक्माकत। अहीलुद आ तौ येहो-शाफात ठेयब ब्रेकब बाक्माकत।

16 अहीतुब आ तौ सादोक नु अबीयाथार आ तौ अहीमेलक चढेब बाक्सा बाकत। शाव्शा लडाइ पाइब आन ठेयब ब्रेकब बाक्माकत। १इतिहास २:६

17 येहो-यादा आ तौ बेनायाह केरेथी नु पेलेथी पिप कली खाल पाइब आन कप्तान बाक्माक्त। दाऊद आ तौपुकी चहिं पिप आ गेय पाइब आन ठेयब मुर बाक्मा बाक्त।

## 19

दाऊद आ मुर आन कली मुने तोक्शो

२सामुएल १०:२; २सामुएल ११:१; २सामुएल १२:२६-३१

1 मिनु इच्का नाक्त नोले अम्मोनी आन पिप नाहाश बेक्माक्त। मिनु मेको आ पा डा आ तौ पिप दुम्माक्त। १सामुएल ११:१

2 मिनु दाऊदमी “आ आफोम आं कली रिम्शो पशो खोदेशो पा, गो नाहाश आ तौ हानुन नु थमा पा वारचबु दुम्चा माल्नुकु” देंमाक्त। मिनु मेको आ आफ बेक्शो आ पर्वम सुतां पशो लोव पथ लोव कुरब मुर सोइक्ता बाक्त। मिनु दाऊद आ लोव कुरबपुकी हानुन कली रिम्शो लोव पथ अम्मोनी आन रागीम जाकदीम्मा बाक्त।

3 मिनु अम्मोनी आन ठेयब मुरपुकीम हानुन कली “दाऊदमी इन कली रिम्शो लोव पथ मुर सोइक्ता, गे दाऊदमी इन आफ कली मान पा मुर सोइश्शो बाक्ब, दे मिन्नीनी? इन रागीम तेरे ओव्रशा खतम पोक्चा, दे कोव्रथ कका सोइश्शो बाक्ब। आ मुरपुकी क्यारी पथ जाक्शो मनमी डा?” दे मदमे बाक्त।

4 मिनु हानुनमी दाऊद आ सोइश्शो मुर आन कली ग्याइश्शा आन चां प्रेक्तमे बाक्त। आन वा इर रे आन देल्लो सम्म रिक्शा सोइक्तमे बाक्त।

5 मिनु दाऊदमी आ मुर आन कली मो पशो लोव नेना बाक्त। मिनु मेको आन कली गुम्चा, दे मुर सोइक्तमे बाक्त। मारदे हना मेकोपुकी थाम्पा मुने तोक्चा पुंडसीशो बाक्मा बाक्त। मिनु मेको आन गल शोक्त्रे डोंइती डा खोदेशो पा मबारम सम्म मेको आन कली “यरीको सहरम बाक्मल” दे अरेवा बाक्त।

अम्मोनी लडाइ पचा ठीक दुम्शो

6 मिनु अम्मोनीपुकीमी “दाऊद आ डोंइती मरिम्शो पाइतक” दे तुइक्तमे बाक्त। मिनु हानुन नु अम्मोनीपुकीम मेसोपोटामीया डा अराम-नाहाराइम, अराम-माकाह नु सोबाह रे बग्गीपुकी नु शारा डोइक्ब चाक्चा कली हजार का टलेन्ट चांदी सोइक्तमे बाक्त। टलेन्ट का ३४ किलो बाक्ब।

7 मिनु मेकोपुकीमी ३२ हजार बग्गी नु माकाह डा पिप नु आ लडाइ पाइब आन कली थाप्शा चाक्कामे बाक्त। मेकोपुकी जाक्शा मेदेबा सहर आ नेक्था ताम्बु कीडमे बाक्त। अम्मोनीपुकी आन सहर सहर रे गूशा लडाइ पचा कली ठीक पामे बाक्त।

8 मिनु दाऊदम मेको लोव नेंशा, योआब नु लडाइ पाइब नेल्ल आन कली सोइक्ता बाक्त।

9 अम्मोनीपुकी जाक्शा, सहर ओव्रतीकेमी लडाइ पचा कली ठीक दुम्मा बाक्त। मेको नु जाक्शो पिपपुकी सहर ओव्रतीकेम मबाक्थु, इच्का डोन राप्शा लडाइ पचा ठीक दुम्मा बाक्त।

10 मिनु योआबम आ नोले नु डोंइती निम्फा पटटी रे लडाइ तोचशो तवा बाक्त। मिनु मेकोमी कोइ कोइ योव्रशो हिक्सीशो लडाइ पाइब इसाएली आन कली अरामी नु लडाइ पथ सोइक्ता बाक्त।

11 मिनु लीशो लडाइ पाइब आन कली आ लोक्ब अबीशै आ हुकुममी गेवा बाक्त। मिनु मेको अम्मोनी नु लडाइ पचा कली ठीक दुम्माक्त।

12 मिनु योआबमी “अरामीपुकी आं क्येडा ग्राचा चिक्ताक्म हना, गे आं कली वारच पथ पिचो। अम्मोनी इं क्येडा ग्राचा चिक्ताक्म हना, गो इ कली वारच पथ पीनुड।

13 चक्ति पाइश्शो दुमीन। गोपुकी आंथ जात नु इं परमप्रभु आ सहर आ पर्वम महिंथु, लडाइ पय। परमप्रभु यावेम मार मिम्शो बाक्बा, मेको पाइब” देंमाक्त।

14 मिनु योआब नु मेको आ मुरपुकी अरामी आन नेक्था लशा, मेको आन कली खेदा पामे बाक्त। मिनु मेकोपुकी मेको आन क्येडा प्रोक्मा बाक्त

15 मिनु अम्मोनीपुकी यो अरामी प्रोक्शो तशा, योआब आ लोक्ब अबीशै आ डोंइती रे प्रोक्शा सहर ओव्रमा बाक्त। मोपतीके योआब यरूसलेम लेम्माक्त।

16 मिनु अरामी इसाएली आन क्येडा बुका बाक्त, दे तुइश्शा, युफ्रेटीस खोला आ आइक्ची हांबु डा हादादेजेर आ कप्तान शोफाक आ हुकुमम बाक्शो अरु अरामी आन कली ब्रेथ सोइक्तमे बाक्त।

17 मेको आन मो पशो लोव दाऊद कली नेंपदमे बाक्त। मिनु मेकोमी रीब पा इसाएली लडाइ पाइब नेल्ल आन कली खुप्शा यर्दन खोला शोक्शा लडाइ पचा कली सोइक्तीमी बाक्त। मिनु मेकोपुकी लशा लडाइ पचा कली ठीक दुम्मा बाक्त। अरामी यो मोपान दाऊद नु लडाइ पचा कली ठीक दुम्मा बाक्त। मिनु लडाइ पामे बाक्त।

18 तन्न इसाएलीपुकीम मेको आन कली फुशा खेदा पामे बाक्त। दाऊदमी ७ हजार अरामी आन बग्गी खुल्ब नु ४० हजार लडाइ पाइब नु मेको आन कप्तान शोफाक आन कली सदमे बाक्त।

19 मिनु हादादेजेरम आ मुरपुकी इसाएली आन क्येडा बुशो तशा गारचा कली सल्ला पथ मुर सोइक्ता बाक्त। मिनु दाऊद कली जिम्मा गेसमा बाक्त। मोपतीके मेको नोले गेनायो अरामीपुकीम अम्मोनी आन कली वारच मपामे बाक्त।

## 20

दाऊदम रब्बाह सहर ग्राशो

1 मिनु बर्सा जाकमेनु, पिपपुकी लडाइ पथ गूमा बाक्त। मिनु योआबमी लडाइ पाइबपुकी लाइशशा अम्मोनी आन रागी कली गोरशो सेला बाक्त। मिनु मेको रब्बाह सहर पुम्शा, आ एर ओथ नेल्ल हिरदा बाक्त। दाऊद चहिं यरूसलेम उड बाक्माक्त। मिनु योआबमी रब्बाह सहर कली लडाइ पा खतम सेल्शा ग्रामाक्त।

2 मिनु दाऊदमी मेको आन पिप आ पिया रे सिरपेच लदा बाक्त। मेको सुन नाक्शोनु, टलेन्ट का बाक्माक्त। मेको सिरपेचम शुश क्येट लाइब हीरा यो क्येप्लो बाक्माक्त। मेको सिरपेच दाऊद कली गुक्त्मे बाक्त। दाऊदमी मेको सहर रे शुश मार मार रोइशशा लदा बाक्त। टलेन्ट का ३४ किलो बाक्ब

3 मेको रागी डा मुर आन कली गुंइशा, मेको आन कली आरा, कोदाली नु खामी गेय पपदमे बाक्त। मोदेशो दाऊदमी अम्मोनी आन सहर नेल्लेमी पवा बाक्त। नोले दाऊद नु आ मुर नेल्ले यरूसलेम लेम्मा बाक्त।

पलिस्ती नु लडाइ पशो  
२सामुएल २१: १८-२१

4 मेको आ नोले पलिस्तीपुकी नु गेजेर सहरमी लडाइ दुम्माक्त। मेना हुशा डा मुर सिब्वेके माइशशो सिप्पाइ कली सदा बाक्त। सिप्पाइ चहिं रेफाइ आ चच युड का बाक्शो बाक्माक्त। पलिस्ती बुम्मा बाक्त। १इतिहास २७:११

5 नोले लेशा पलिस्ती नु लडाइ दुम्माक्त। याइर आ तौ एल्हानानमी गित्त आ खिं डा मुर गोल्याथ आ लोकब लाहमी कली सदा बाक्त। मेको आ तूतीक आ ग्याइक्तीक वा प्रोकब आन शी खोमो टेयब बाक्माक्त।

6 मिनु नोले लेशा गाथ सहरमी लडाइ दुम्माक्त। मेकेर लाइशशो मुर का बाक्माक्त। आ गुड नु खोइली नेल्लेम ६,६ ओटा ब्रेप्चो पाइशशो नेल्ल पा २४ ओटा ब्रेप्चो पाइशशो मुर का बाक्माक्त। मेको रेफाइ आ चच युड का बाक्माक्त।

7 मेकोमी इस्राएली आन कली शुक्शी पवा बाक्त। मिनु दाऊद आ लोकब शिमेआ आ तौ योनाथनमी मेको कली सदा बाक्त।

8 मेको गाथ डा लाइशशो मुर आन चच युड, रेफाइ आ मुर बाक्मा बाक्त। मिनु दाऊद नु आ मुरपुकीमी मेको आन कली सदमे बाक्त।

## 21

दाऊदम मुर आन कली हिक्शो  
२सामुएल २४:-

1 मिनु सैतानमी इस्राएली आन कली मरिम्शो पचा कली दाऊद कली आ मुर इस्राएली आन कली हिक्पाइक्मी बाक्त।

2 मोपतीके दाऊदम योआब नु आ कप्तान आन कली “बेयर-शेबा रे दान सम्म डा इस्राएली आन कली हिक्शा, आं कली शेंचा नड। मिनु मेकोपुकी दोशो बाक्मा, गो तुइक्चा माल्नुड” दे अरेमी बाक्त।

3 तन्न योआबमी “परमप्रभु यावेमी आ मुर आन कली एको क्येडा यो सहे खेयप हिक्शो खोइ सोशा बोशा शुश सेलल। मेकोपुकी आं पिप इन गेय पाइब मुर मदुम्नीमी डा? गे मारदे मो पचा माल्नीनी? गे मारदे इस्राएली आन कली दोस चाक्नीनी?” देमाक्त। प्रस्थान ३०:१२

4 तन्न पिपमी योआब आ लोत्र मनेना बाक्त। मिनु योआब लशा, इस्राएल नेल्ल हिरशा, यरूसलेमम लेशशा जाक्माक्त।

5 मिनु योआब यरूसलेम जाक्शा, दाऊद कली आ हिक्शो मुरपुकी ओशो बाक्तेक्म, दे शेंदा बाक्त। मेकोमी “इस्राएलम या चलने चाप्ब, लडाइ पाइब ११ लाख नु यहूदाम ४ लाख ७० हजार बाक्नीम” देमाक्त।

6 तन्न योआबमी लेवी आ थर डा मुर नु बेन्यामीन आ थर डा मुर आन कली महिकमी बाक्त। मारदे हना योआबमी पिप आ हुकुम पशो कली काइ मदाक्ता बाक्त।

दाऊदम सजाइ तशो

7 मिनु परमप्रभु दाऊद आ पशो तशा, गाइक्ता बाक्त। मिनु इस्राएली आन कली सजाइ गेवा बाक्त १इतिहास २७:२४

8 मिनु दाऊदम परमप्रभु कली “गो मोदेशो पा टेयब पाप पाता। मुल इन गेय पाइब आं दोस क्याम्दीन। मारदे हना गो थम मरिम्शो पाइब दुम्ती” देमाक्त।

9 मिनु परमप्रभु यावेमी आ लोत्र पाइब गाद कली “गे लशा दाऊद कली

10 परमप्रभु यावेमी इन कली मार लोत्र पाइब देशा हना ‘गो इ डोइती लोत्र सां वोइक्नुड। मेको रे का योत्रसो। मिनु मेको इ कली पाइनुड’ देत, मतो” देमाक्त।

11 मिनु गाद दाऊद आ बाक्तीके जाक्शा, मेकोमी “परमप्रभु यावेमी इन कली लोत्र पाइब। मिनु गे लोत्र का योत्रसो।

12 ‘गो इ डोइती लोत्र सां वोइक्नुड। मेको रे का योत्रसो’ देशो बाक्ब। मेको लोत्र सां तेको बाक्नीम देशा हना, डोइती डा बर्स सां सम्म अन्काल दुम्तीके, नोले डा महिना सां सम्म इन जोरी सत्रुमी खेदा पचा पुंइसीतीके, आन तरवारम इन कली ग्रातीके नु नेल्ल क्येडा नोले डा परमप्रभु यावेमी आ तरवार रे नाक्त सां सम्म रागी नेल्लेम बेक्चा डा रोइ पपाइशशा मुर साइक्तीक। मेको लोत्र सांमी का योत्रसो। परमप्रभु यावे आ स्वर्ग डा गेय पाइबमी नाक्त सां सम्म इस्राएल रागीम शुश मुर आन कली साइक्तीक। मेको लोत्र सां बाक्तेक्म। का योत्रसो। गो आं कली सोइक्ब कली मार देचा माल्नुड, देनीन” देमाक्त।

13 मिनु दाऊदम गाद कली “गो थम श्येत जाइब दुम्ती। परमप्रभु यावे आ गुडमी दुम्चा गेयीनी। मारदे हना मेको आ शिशी थम टेयब बाक्ब। तन्न मुर आन गुडमी दुम्चा मगेयीनी” दे मदा बाक्त।

14 मोपतीके परमप्रभु यावेमी इस्राएल रागीम बेक्चा डा रोइ पपाइक्मी बाक्त। मिनु ७० हजार बेक्मा बाक्त।

15 मिनू परमप्रभुमी आ स्वर्ग डा गेय पाइब का यरूसलेम सहर खतम पोक्चा कली सोइक्ता बाकत। तन्न मेकोमी खतम पोक्चा चिक्तानु, परमप्रभु यावेमी मेको खतम पोक्तीक तशा, शिशी पा तेक्गा बाकत। मेकोमी खतम पोक्ब आ स्वर्ग डा गेय पाइब कली “मुल दुम्त। इ गुड तेक्को” दे मदा बाकत। मेना परमप्रभु यावे आ स्वर्ग डा गेय पाइब यबुसी ओरनान आ खला आ नेक्था राप्शा, बाक्शो बाक्माकत।

16 मिनू दाऊदमी इर गे कोव्रडानु, परमप्रभु यावे आ स्वर्ग डा गेय पाइब का सरीडु नु रागी आस दातेमी राप्शा, आ गुडमी शोइश्शो तरवार का यरूसलेम गे दिशो तवा बाकत। मिनू दाऊद नु मेको नु बाक्शो खूशोपुकी भाडग्रा फेक्शा खुम्की पा बाम्मा बाकत।

17 मिनू दाऊदम परमप्रभु कली “मुर आन कली हिक्चा कली गो कका अरेतामी। गो कका पाप पा काइ मरिम्शो पाता। तन्न एको भेडापुकीम मार पांमे डा? परमप्रभु यावे, आं परमप्रभु, इन गेचा डा श्येत आं कली नु आं आफ आ खिं कली दुम्ल। तन्न इन मुर आन कली मोदेशो श्येत मगेन” देमाकत।

दाऊदम चढेतीक सेल्शो

18 मिनू परमप्रभु यावे आ स्वर्ग डा गेय पाइबमी गाद कली “गे दाऊद कली ‘यबुसी ओरनान आ खलामी परमप्रभु यावे कली चढेतीक का सेलो’ दे मतो” देमाकत।

19 मोपतीके दाऊदमी गादम परमप्रभु यावे आ नेमी अरेशो लोत्र खोदेशो पवा बाकत।

20 मेना ओरनान आ चेरब दांड पा लेशा कोव्रडानु, परमप्रभु यावे आ स्वर्ग डा गेय पाइब कली तवा बाकत। आ नु बाक्शो आ ४ जना तौ चहिं खुंडसमा बाकत। ओरनान चहिं चेरब तुप्स डा तुप्स बाक्माकत।

21 दाऊद मेको आ बाक्तीक जाक्दीम्मेनु, ओरनानम पिप कली तशा, आ डोंइती खुम्की पा बाम्माकत।

22 मिनू दाऊदम ओरनान कली “एको खला डा रू परमप्रभु यावे कली चढेतीक का सेल्चा कली गेयी। मेको गिश बाक्मे, मेको डा क्येत गेनुड। मुर आन कली गेशो बेक्तीक रोड नाइक्सेकल” देमाकत।

23 मिनू ओरनानमी दाऊद कली “मेको ताक्कीन। हजुर, पिपम मार पचा दाक्नीनी, मेको पने। चोशा चढेचा कली ब्यफपुकी गेनुड। शी कली दांड पशो शी बाक्ब। अन्न चढेचा कली चेरब बाक्ब। गो मो गेता” देमाकत।

24 तन्न पिप दाऊदमी ओरनान कली “ममाड, गो नेल्ल गिश बाक्मे गिश क्येत थाप्नुड। गो मोशा इ मार मार ताक्शा परमप्रभु यावे कली मचढेनुड” देमाकत।

25 मोपतीके दाऊदमी ओरनान कली मेको रू डा ६ सहे सुन के शेकेल नाक्शा गेवा बाकत। सेकेल का ११.५ ग्राम डा चांदी के क्येत बाक्ब।

26 मिनू दाऊदम मेकेर परमप्रभु यावे कली चढेतीक का सेला बाकत। मिनू चोशा चढेतीक नु दुशा बाक्चा आ पर्बम चढेतीक चढेवा बाकत। मिनू परमप्रभु यावे आ नें थिशा पुना बाकत। परमप्रभु यावेमी सरीडु रे चोशा चढेतीके तारी मी तोक्शा लोत्र लेत्ता बाकत। १ राजा १८:२४

27 मिनू परमप्रभु यावेमी आ स्वर्ग डा गेय पाइब कली “इ तरवार खोतम पिपतो” दे मदा बाकत।

28 मेना दाऊदम परमप्रभु यावेम यबुसी ओरनान आ खलाम आ लोत्र लेत्ताक्की, दे तुइश्शा मेकेर चढेवा बाकत।

29 मोसाम गोरशो रागीम सेल्शो परमप्रभु यावे आ बाक्तीक नु चढेतीके मेना सम्म गिबोन इर डा पूजा पतीकेम बाक्शो बाक्माकत। १ राजा ३:४; २इतिहास १:३,६

30 तन्न दाऊद परमप्रभु कली पुंडचा मेकेर लने मचाप्शो बाक्माकत। मारदे हना परमप्रभु यावे आ स्वर्ग डा गेय पाइब आ तरवार क्येडा हिंमाकत।

## 22

परमप्रभु यावे आ खिं सेल्चा चिक्शो

1 मिनू दाऊदमी “एकेर परमप्रभु आ खिं नु इस्राएलीपुकीमी परमप्रभु यावे कली चोशा चढेतीक सेल्चा माल्ब” देमाकत।

2 मिनू दाऊदमी “इस्राएलम बाक्ब अर्को रागी डा मुर आन कली बुक्कीन” दे अरेवा बाकत। मिनू मेको आन कली परमप्रभु आ खिं सेल्चा कली फुल्लु खोइक्तीक गेय गेमी बाकत।

3 दाऊदमी शुश फलाम नु कांसा गेवा बाकत। मेको लाप्चो नु लाप्चो डा शी आन कली कांटी नु ग्याइक्पाइक्तीके सेल्चा कली वोइश्शो बाकत। मेको नाक्ने मचाप्चा डा पा शुश बाक्शो बाकत।

4 मिनू हिक्ने मचाप्चा डा पा लेबानोन डा लाइश्शो रवा आन शी तेलपाइमी बाकत। मारदे हना सीदोन नु टायर डा मुरपुकीमी दाऊद कली लेबानोन डा रवा आन शी शुश चाक्गमे बाकत।

5 मिनू दाऊदमी “आं तौ सोलोमन मुल सम्म आइक्च नु मनुइक्ब बाक्ब। परमप्रभु यावे कली सेल्शो खिं थम दारशो, रागी नेल्लेमी मिम्चा डा पा नु टेयब दुम्चा माल्ब। मोपतीके गो मेको सेल्चा कली मारिड मारिड ठीक पचा माल्नुड” देमाकत। मिनू दाऊदम आ बेक्चा क्येडा डोंइती मार मार शुश तेलमी बाकत। १इतिहास २९:१

6 मिनू नोले दाऊदमी आ तौ सोलोमन कली ब्रेथ सोइक्ता बाकत। मेको कली “परमप्रभु यावे इस्राएली आन परमप्रभु कली खिं का सेलो” दे अरेवा बाकत।

7 मिनू सोलोमन कली “आं तौ, गो परमप्रभु यावे, आं परमप्रभु कली खिं का सेल्चा थुं पशो बाक्ती।

8 तन्न परमप्रभु यावेमी आं कली लोत्र पाप्नु। मेकोमी ‘गे शुश हुश खाक्श पोक्तीवी। गे टेयब टेयब लडाइ पाप्तीवी। मोपतीके आं कली खिं सेल्चा मदुम्ब। मारदे गे आं डोंइती रागीम शुश हुश खाक्श पोक्शो बाक्नेवे।

9 गे तौ का थीनेवे। मेको लडाइ मपाइब मुर दुम्ब। गो मेको आ एर ओंथ डा जोरी सनु नेल्ल आन कली लडाइ मपपाइबकुड। मिनु मेको आ नें सोलोमन दुम्चा माल्ब। आ सासन पची ना, गो इस्त्राएलम लडाइ मदुम्पाइबथु रिम्शो पा बाक्चा गेनुड।

10 मेकोमी आं नें टेयब सेल्चा कली खिं का सेल्चा माल्ब। मिनु मेको आं तौ दुम्ब। मिनु गो मेको आ आफ दुम्नुड। गो इस्त्राएलम मेको आ सासन पतीके गेना हना यो बोल्यो सेल्नुड' दे परमप्रभुम आं कली देंत।

11 आं तौ, परमप्रभु यावे गे नु बाक्ल। मिनु परमप्रभु यावे, इ परमप्रभुमी इ पर्बम देंशो खोदेंशो पा गे मेको कली खिं सेल्चा माल्नेवे। मेको गेय नेल्ल रिम्शो दुम्ल।

12 परमप्रभु यावेमी इ कली रूप्तीक नु जोक्ब तुडक्ब थुं गेवल। मेकोमी इ कली इस्त्राएल कली सासन पचा गेवानु, गे परमप्रभु यावे, इ परमप्रभु आ अरेशो लोत्र टिशा पाइब दुम्नेवे।

13 परमप्रभु यावेमी मोसा कली आ फुल्लुम मुशा ब्रेक्शो लोत्र नु निसाफ पतीक लोत्र इस्त्राएली आन कली टिशा पचा कली गेशो बाक्त। गे मेको नेल्ल पाप्तीवी हना, इ गेय रिम्शो दुम्ब। गे बोल्यो नु महिब दुमो। हिंशा इ थुं लुक्च लचा मगोवो। १राजा २:२-३

14 गो शुश श्येत पा परमप्रभु यावे आ खिं सेल्चा कली मार वोइक्ता देंशा हना, लाख का टलेन्ट सुन, १० लाख टलेन्ट चांदी नु नाक्ने मचाप्या डा पा कांसा नु फलाम खेक्शा वोइक्तामी। मारदे हना मेकेर शुश बाक्शो बाक्त। शी नु फुल्लुपुकी यो ठीक पा वोइक्तामी। गे अर्को यो तेम्चा माल्नेवे। टलेन्ट का ३४ किलो बाक्ब। १इतिहास २९:२

15 गे नु शुश गेय पाइब बाक्शो बाक्नीम। मार गेय पाइब बाक्शो बाक्नीम देंशा हना, फुल्लु खोइक्ब, गारो प्रोत्रब, शी के गेय पाइब, शुश दारशो गेय जोक्शा पाइब यो बाक्नीम।

16 मेकोपुकीमी सुन, चांदी, कांसा नु फलाम के मारेइ मारेइ गेय पाइब बाक्नीम। मुल गेय पचा गोवो। परमप्रभु यावे गे नु बाक्ल" दे दाऊदमी सोलोमन कली मदा बाक्त।

17 मिनु दाऊदमी इस्त्राएली आन टेयब मुर नेल्ल आन कली "आं तौ सोलोमन कली चारच पने।

18 परमप्रभु यावे, इन परमप्रभु गेपुकी नु बाक्ब। मेकोमी इन रागी नेल्लेमी काइ लडाइ मदुपद। इन थुं नाइक्पाइशशा वोइक्तु। मेकोमी एको रागी डा मुर आन कली आं गुइमी गेशो बाक्त। मारदे हना परमप्रभु यावेमी एको रागी डा मुर आं गुइम गेती। मेको रागीपुकी परमप्रभु यावे नु आ मुर आन सासनमी वोइक्तु। १इतिहास २३:२९

19 मुल इन थुं नेल्लेमी परमप्रभु यावे, इन परमप्रभु कली मालीन। मिनु परमप्रभु यावे, परमप्रभु आ बाक्तीक सेल्चा गोने। मिनु नोले परमप्रभु यावे आ कबल पशो सन्दोस नु परमप्रभु आ ग्योबपुकी परमप्रभु यावे कली सेल्शो खिंमी वोइक्चा माल्नीनी" दे माइक्मी बाक्त।

## 23

लेवी नु चढेब आन गेय

1 मिनु दाऊद खूशो नु शुश बर्स दुम्शा, आ तौ सोलोमन कली इस्त्राएल डा पिप सेला बाक्त। १राजा १:२८-४०

2 मिनु मेकोमी इस्त्राएली आन टेयब मुर नेल्ले नु चढेबपुकी नु लेवी आन कली गुम्पाइक्मी बाक्त।

3 मिनु ३० बर्स गाप्शो नु मेको क्येडा लाक्शो लेवी आन कली हिक्शोनु, मेको नेल्ल ३८ हजार बाक्मा बाक्त।

4 मिनु दाऊदमी लेवी आन पर्बम "मेको आन दाते डा २४ हजार परमप्रभु यावे आ खिं डा गेय कोत्रचा माल्नीम। ६ हजार मेको आन टेयब मुर नु निसाफ पाइब दुम्चा माल्नीम।

5 मिनु ४ हजार लाप्यो खाल पाइब दुम्चा माल्नीम। मिनु नोले डा ४ हजार आं गेशो बाजापुकी ताप्शा, परमप्रभु यावे कली टेयब सेल्तीक कुम्सो पचा माल्नीम" देमाक्त।

6 मिनु दाऊदम मेको आन कली लेवी आ तौ गेरशोम, कोहाथ नु मेरारी का का पा हुल पा योक्शा गेमी बाक्त। १इतिहास ६:१

7 गेरशोम आ तौ लादान नु शिमेइ बाक्सा बाक्त।

8 लादान आ डोंइती थिशो तौ येहीएल टेयब मुर बाक्माक्त। आ नोले डा जेथाम नु योएल नेल्ल पा सां बाक्मा बाक्त। १इतिहास २६:२१

9 शिमेइ आ तौ शेलोमोथ, हजीएल नु हारान सां बाक्मा बाक्त। मेकोपुकी लादान आ खिं डा टेयब मुर बाक्मा बाक्त।

10 मिनु शिमेइ आ तौ याहाथ, जीना, येऊश नु बेरीआ, ४ जना बाक्मा बाक्त।

11 याहाथ मेको आन टेयब मुर बाक्माक्त। मेको आ नोले डा जीजाह बाक्माक्त। तन्न येऊश नु बेरीआ आस के शुश तौ मबाक्तीके मेको आस कली खिं का डा मुर हुल का सेल्शा हिक्चा पुंडसमा बाक्त।

12 कोहाथ आ तौ अग्राम, इच्छार, हेब्रोन नु उज्जीएल ४ जना बाक्मा बाक्त।

13 अग्राम आ तौ हारून नु मोसा बाक्सा बाक्त। हारून नेल्ल क्येडा चोत्रखो चढेतीक गेय पाइब सेल्चा कली योत्रचा पुंडसे बाक्त। मेको नु आ तौपुकी गेना हना यो परमप्रभु यावे आ डोंइती चढेचा माल्दमे बाक्त। परमप्रभु आ डोंइती गेय पचा कली नु आ नैमी गेना हना यो आसीक गेचा कली योत्रशो बाक्मा बाक्त। १इतिहास ५:२९; १इतिहास ६:३४; ब्यवस्था १०:८; गन्ती ६:२४-२७

14 मोसा परमप्रभु आ मुर बाक्शो बाक्माक्त। मेको नु आ तौपुकी अरु लेवी आ थर डा मुर खोदेंशो पा हिक्शो बाक्मा बाक्त।

15 मोसा आ तौ गेरशोम नु एलीएजर बाक्सा बाक्त। प्रस्थान १८:३-४

- 16 गेरशोम आ तौ शेबुएल टेयब मुर का बाक्माकत। मेको डोंइती डा बाक्माकत। १इतिहास २६:२४
- 17 एलीएजर आ तौ रेहब्याह टेयब मुर बाक्माकत। मेको एलीएजर आ तौ का ला बाक्माकत। तन्न रेहब्याह के तौ शुश बाक्मा बाकत। १इतिहास २४:२१-३०
- 18 इच्छार आ तौ शेलोमीथ टेयब मुर बाक्माकत।
- 19 हेब्रोन आ तौ येरीयाह टेयब मुर बाक्माकत। मेको आ माडला अमारयाह, आ साडला याहासीएल, नु आ कान्छा येकामेआम बाक्मा बाकत।
- 20 उज्जीएल आ तौ मीकाह टेयब मुर बाक्माकत। मेको आ नोले डा तौ इस्शीयाह बाक्माकत।
- 21 मेरारी आ तौ माहली नु मुशी बाक्सा बाकत। माहली आ तौ एलाजर नु कीश बाक्सा बाकत। १इतिहास ६:४
- 22 एलाजर तौ मथिथु बेक्माकत। मेको के तमीपुकी ला बाक्मा बाकत। मेको आ लोकब कीश आ तौपुकीमी मेको आन कली ग्युंवे पामे बाकत।
- 23 मुशी आ तौपुकी माहली, एदेर नु येरेमोथ सां बाक्मा बाकत।
- 24 मेको लेवी आ थर डा खिं खिं डा मुर बाक्मा बाकत। मेको खिं खिं डा २० बर्स गाप्शो नु मेको क्येडा लाक्शो बाक्मा बाकत। मेको आन कली हिक्शा, आन नें ब्रेक्शो बाक्मा बाकत। मारदे हना मेकोपुकी परमप्रभु यावे आ खिंम गेय पचा माल्बाक्मा बाकत।
- 25 मिनु दाऊदमी “परमप्रभु यावे, इस्राएली आन परमप्रभुमी आ मुर आन कली थुं नाइक्चा गेशो बाक्ब। मिनु परमप्रभु यरूसलेम सहरम गेना हना यो बाक्ब।
- 26 मोपतीके मुल रे लेवी आ थर डा मुरपुकी परमप्रभु यावे आ बाक्तीके नु मेको आ मार मार ग्योबपुकी गेनायो कुरचा ममाल्नीम” देमाकत। योएल ४:२१
- 27 दाऊद आ नोले देशो लोव्र रे पा मेको २० बर्स गाप्शो नु मेको क्येडा लाक्शो लेवी आ थर डा मुर हिक्चा बाक्मा बाकत।
- 28 मेकोपुकीमी हारून आ तौ परमप्रभु यावे आ खिं डा गेय पतीकेम वारच पचा माल्मा बाकत। लाडगा नु कोठापुकी कोव्रचा, चोवखो थोवकपुकी सफा पचा, परमप्रभु आ खिं डा अरु गेय नेल्ल पचा माल्बाक्मा बाकत।
- 29 मिनु मेकोपुकीमी चढ़ेशो शोब्ले वोइक्चा कली, अन्न चढ़ेतीक डा रिम्शो फसी, बोरब ओख्ती मसुप्शो शोब्ले, तेल ब्वाइश्शो चढ़ेतीक, नेल्ल नाक्तीक गेयम वारच पचा माल्बाक्मा बाकत।
- 30 मिनु मेकोपुकी सुनी कुस कुस नु नाक्दो कुस कुस परमप्रभु यावे आ डोंइती “गे रिम्शो पाइब बाक्नीनी” दे टेयब सेल्चा माल्बाक्मा बाकत।
- 31 नाइक्तीक नाकत परमप्रभु यावे कली चोशो चढ़ेतीक चढ़ेचा कली, औंसी नाकत नु नेल्ल पचा डा चाड डा चढ़ेतीके गेय परमप्रभु यावे आ डोंइती वारच पचा माल्बाक्मा बाकत।
- 32 मोपा मेकोपुकीमी गुम्तीक ताम्बु नु चोवखो बाक्तीक नेल्ल कोव्रचा माल्मा बाकत। मिनु मेकोपुकीमी हारून आ तौ चच आन दी बाक्शा परमप्रभु यावे आ खिं डा गेय पचा माल्बाक्मा बाकत।

## 24

चढ़ेब आन गेय पाइब योव्रशो

- 1 मिनु योव्रशीशो हारून आ तौ चच सु सु बाक्मा बाकत देशा हना, आ तौ नादाब, अबीहु एलाजर नु इथामार बाक्मा बाकत। १इतिहास २३:६; १इतिहास ५:२९
- 2 नादाब नु अबीहु चहिं आस आफ बेक्चा क्येडा डोंइती तौ मथिथु, बेक्सा बाकत। मोपतीके एलाजर नु इथामार चढ़ेब दुम्शो बाक्सा बाकत।
- 3 मिनु दाऊदमी एलाजर नु आ तौ सादोक नु इथामार नु आ तौ अहीमेलेक नु मेको आन गेय पचा कली हुल सेल्शा गेमी बाकत।
- 4 मिनु इथामार आ खिं खिं डा टेयब मुर आन क्येडा एलाजर आ खिं खिं डा मुर शुश बाक्शो बाक्मा बाकत। मोपतीके एलाजर आ तौ आन खिं खिं डा टेयब मुर १६ जना आन कली हुल हुल सेल्मे बाकत। इथामार आ तौ आन खिं खिं डा टेयब मुर ८ जना आन कली हुल हुल सेल्मे बाकत।
- 5 मिनु आन दातेम बाजी आप्शा, आन हुल हुल सेल्मे बाकत। मारदे हना एलाजर नु इथामार आस तौ आस खिं खिं डा मुर नेल्ल खाल का डा टेयब मुर बाक्मा बाकत। मेको नेल्ले परमप्रभु नु आ बाक्तीक डा टेयब मुर बाक्मा बाकत।
- 6 नेथनेल आ तौ शेमायाह, लेवी आ थर डा ब्रेक्ब का बाक्माकत। मेकोमी पिप नु टेयब मुरपुकी, चढ़ेब सादोक, अबीयाथार आ तौ अहीमेलेक, चढ़ेब लेवी आन खिं खिं डा टेयब मुर आन डोंइती चढ़ेब आन नें ब्रेक्ता बाकत। एलाजर आ खिं खिं डा नु इथामार आ खिं खिं डा गेय पतीक हुल सेल्मे बाकत। १इतिहास १८:१६
- 7 मिनु डोंइती डा बाजी आप्शो येहो-यारीब आ नेंमी, मेको आ नोले डा बाजी येदायाह आ नेंमी,
- 8 मेको आ नोले डा बाजी हारीम आ नेंमी, मेको आ नोले डा बाजी सेओरीम आ नेंमी,
- 9 मेको आ नोले डा बाजी माल्कीयाह आ नेंमी, मेको आ नोले डा बाजी मियामीन आ नेंमी,
- 10 मेको आ नोले डा बाजी हककोस आ नेंमी, मेको आ नोले डा बाजी अबीयाह आ नेंमी, लूका १:५
- 11 मेको आ नोले डा बाजी येशुआ आ नेंमी, मेको आ नोले डा बाजी शेकन्याह आ नेंमी,
- 12 मेको आ नोले डा बाजी एल्याशीब आ नेंमी, मेको आ नोले डा बाजी याकीम आ नेंमी,
- 13 मेको आ नोले डा बाजी हुप्पाह आ नेंमी, मेको आ नोले डा बाजी येशेबे-आब आ नेंमी,



14 मेको आ नोले डा बाजी बिल्गाह आ नेमी, मेको आ नोले डा बाजी इम्मर आ नेमी,  
 15 मेको आ नोले डा बाजी हेजीर आ नेमी, मेको आ नोले डा बाजी हप्पीसेस आ नेमी,  
 16 मेको आ नोले डा बाजी पेथायाह आ नेमी, मेको आ नोले डा बाजी येहेजकेल आ नेमी,  
 17 मेको आ नोले डा बाजी याकीन आ नेमी, मेको आ नोले डा बाजी गामुल आ नेमी,  
 18 मेको आ नोले डा बाजी देलायाह आ नेमी नु मेको आ नेल्ल क्येडा नोले डा बाजी माजीयाह आ नेमी दुम्माक्त।  
 नेल्ल पा २४ हुल बाक्मा बाक्त।

19 मेको आन किकी हारूनमी गेशो पतीक लोत्र गेय बाक्माक्त। दोपा परमप्रभु यावे आ खिं लचा ब्रेकशो बाक्त।  
 परमप्रभु यावे, इस्राएली आन परमप्रभुमी हारून कली गेशा शेंशो लोत्र खोदेंशो बाकशो बाक्त। हारून आ खिं खिं डा लेवी  
 आन गेय पचा माल्मा बाक्त।

लेवी आ थर डा अरु मुरपुकी

20 मिनु लीशो लेवी आ थर डा मुर सु बाक्मा बाक्त देशा हना, अम्राम आ तौ आन दाते डा शुबाएल बाक्माक्त।  
 शुबाएल आ तौ आ दाते डा येहदयाह बाक्माक्त।

21 रेहब्याह आ तौ आन दाते डा मेको आन ठेयब मुर इस्थीयाह बाक्माक्त।  
 22 इच्छार आ तौ आन दाते डा शेलोमोथ बाक्माक्त। शेलोमोथ आ तौ आन दाते डा याहाथ बाक्माक्त।  
 23 हेब्रोन आ तौ आन दाते डा येरीयाह मेको आन ठेयब मुर बाक्माक्त। मेको आ माइला अमारयाह बाक्माक्त। आ  
 साइला याहासीएल बाक्माक्त। आ कान्छा येकामेआम बाक्माक्त।  
 24 उज्जीएल आ तौ आन दाते डा मीकाह बाक्माक्त। मीकाह आ तौ आन दाते डा शामीर बाक्माक्त।  
 25 मिनु मीकाह आ लोकब इस्थीयाह आ तौ आन दाते डा जकरिया बाक्माक्त।  
 26 मेरारी आ तौ आन दाते डा माहली नु मुशी बाक्माक्त। याजीयाह आ तौ बेनो बाक्माक्त।  
 27 मेरारी आ तौ चच आन दाते डा याजीयाह, बेनो, शोहाम, जाक्कुर नु इब्नी बाक्मा बाक्त।  
 28 माहली आ तौ आन दाते डा एलाजर बाक्माक्त। मेको के तौ मबाक्म।  
 29 कीश आ तौ आन दाते डा येराहमेल बाक्माक्त।  
 30 मिनु मुशी आ तौ आन दाते डा माहली, एदेर नु येरीमोथ बाक्मा बाक्त। मेको लेवी आ थर डा खिं खिं डा मुर बाक्मा  
 बाक्त।

31 मेकोपुकीमी पिप दाऊद, सादोक अहीमेलेक नु चढेब आन खिं खिं डा ठेयब मुरपुकी नु लेवी आ थर डा मुर आन  
 डोंइती बाजी आप्मे बाक्त। खिं खिं डा ठेयब मुर नु नेल्ल क्येडा आइक्च नेल्लेम खाल का डा पामे बाक्त। मिनु गेना गेय  
 पचा, दे यो बाजी आप्मे बाक्त। १इतिहास २५:८

## 25

कुम्सो पाइब नु ताप्ब योत्रशो

1 दाऊद नु आ कप्तानपुकीमी आसाफ आ तौपुकी, हेमान आ तौपुकी नु येदुथून आ तौ आन कली परमप्रभु यावे आ  
 सोक्तीम ब्रीशा आइक्च नु ठेयब तार पाइशो ताप्तीके नु बुप्केल ताप्चा कली योत्रडमे बाक्त। मेको गेय पाइब आन नें  
 ब्रेक्तमे बाक्त। १इतिहास १५:१९

2 मिनु सु बाक्मा बाक्त देशा हना, आसाफ आ तौ आन दाते डा जाक्कुर, योसेफ, नेथन्याह नु अशारेलाह बाक्मा  
 बाक्त। आसाफ मेको आन कली अरेब बाक्माक्त। आसाफमी पिप आ देशो परमप्रभु यावे आ सोक्तीम ब्रीशो कुम्सो  
 सेला बाक्त।

3 येदुथून आ तौ नु गेदाल्याह, सेरी, येशायाह, शिमेड, हशाब्याह नु मत्तीथ्याह ६ जना बाक्मा बाक्त। आन आफ येदुथून  
 मेको आन कली अरेब बाक्माक्त। मेकोमी बीना ताप्चा परमप्रभु यावे आ सोक्तीम ब्रीशा “गे रिम्शो पाइब बाक्नीनी” दे  
 ठेयब सेल्लिक कुम्सो पवा बाक्त।

4 हेमान आ तौपुकी बुक्कीयाह, मत्तन्याह, उज्जीएल, शेबुएल, येरीमोथ, हनान्याह, हानानी, एली-आथा, गिदाल्ती,  
 रोमाप्ती-एजेर, योशबे-काशाह, माल्लोथी, होथीर नु माहाजी-ओथ बाक्मा बाक्त।

5 मेको नेल्ल पिप कली परमप्रभु आ लोत्र पाइब हेमान आ तौ बाक्मा बाक्त। मेकोपुकीमी परमप्रभु आ देशो खोदेंशो  
 पा परमप्रभु कली ठेयब सेल्चा माल्मा बाक्त। मारदे हना परमप्रभुमी हेमान कली १४ जना तौ नु तमी सां गेशो बाक्माक्त।  
 २इतिहास ३५:१५

6 मिनु आन आफोमी परमप्रभु यावे आ खिं मेको नेल्ल आन कली बीना ताप्चा, तार पाइशो ताप्तीके ताप्चा नु  
 बुप्केल ताप्चा कली शेंशो बाक्माक्त। पिपमी आसाफ, येदुथून नु हेमान आन कली दोपा अरेवा, मोपा पामे बाक्त।

7 मेको नु आन खिं खिं डा मुरपुकी परमप्रभु यावे कली कुम्सो पचा शेंसीशो बाक्मा बाक्त। नेल्ल तुइक्ब जोक्ब बाकशो  
 बाक्मा बाक्त। कुम्सो पाइब नेल्ल सहे निक्शी ८८ जना बाक्मा बाक्त।

8 मिनु मेकोपुकीमी गेना गेय पचा, दे बाजी आप्मे बाक्त। आइक्च नु ठेयब, शेंसीब नु शेंब खाल का डा बाक्मा बाक्त।  
 १इतिहास २४:३१

9 मिनु डोंइती डा बाजी आप्शो आसाफ आ तौ योसेफ आ नेंम यूमाक्त। मिनु मेको आ नोले डा गेदाल्याह, आ  
 लोकबपुकी नु आ तौ आन नेंम दुम्माक्त। मेको नेल्ल १२ जना बाक्मा बाक्त।

10 मेको आ नोले डा बाजी जाक्कुर, आ तौपुकी नु आ लोकब आन नेंमी दुम्माक्त। मेको नेल्ल १२ जना बाक्मा बाक्त।  
 11 मेको आ नोले डा बाजी इब्नी, आ तौपुकी नु आ लोकब आन नेंमी दुम्माक्त। मेको नेल्ल १२ जना बाक्मा बाक्त।

- 12 मेको आ नोले डा बाजी नेथन्याह, आ तौपुकी नु आ लोकब आन नेमी दुम्माक्त। मेको नेल्ल १२ जना बाक्मा बाक्त।
- 13 मेको आ नोले डा बाजी बुक्कीयाह, आ तौपुकी नु आ लोकब आन नेमी दुम्माक्त। मेको नेल्ल १२ जना बाक्मा बाक्त।
- 14 मेको आ नोले डा बाजी येसारेला, आ तौपुकी नु आ लोकब आन नेमी दुम्माक्त। मेको नेल्ल १२ जना बाक्मा बाक्त।
- 15 मेको आ नोले डा बाजी येशायाह, आ तौपुकी नु आ लोकब आन नेमी दुम्माक्त। मेको नेल्ल १२ जना बाक्मा बाक्त।
- 16 मेको आ नोले डा बाजी मतन्याह, आ तौपुकी नु आ लोकब आन नेमी दुम्माक्त। मेको नेल्ल १२ जना बाक्मा बाक्त।
- 17 मेको आ नोले डा बाजी शिमेइ, आ तौपुकी नु आ लोकब आन नेमी दुम्माक्त। मेको नेल्ल १२ जना बाक्मा बाक्त।
- 18 मेको आ नोले डा बाजी अजारेल, आ तौपुकी नु आ लोकब आन नेमी दुम्माक्त। मेको नेल्ल १२ जना बाक्मा बाक्त।
- १इतिहास १२:७
- 19 मेको आ नोले डा बाजी हशाब्याह, आ तौपुकी नु आ लोकब आन नेमी दुम्माक्त। मेको नेल्ल १२ जना बाक्मा बाक्त।
- 20 मेको आ नोले डा बाजी शुबाएल, आ तौपुकी नु आ लोकब आन नेमी दुम्माक्त। मेको नेल्ल १२ जना बाक्मा बाक्त।
- 21 मेको आ नोले डा बाजी मतीथ्याह, आ तौपुकी नु आ लोकब आन नेमी दुम्माक्त। मेको नेल्ल १२ जना बाक्मा बाक्त।
- 22 मेको आ नोले डा बाजी येरेमोथ, आ तौपुकी नु आ लोकब आन नेमी दुम्माक्त। मेको नेल्ल १२ जना बाक्मा बाक्त।
- 23 मेको आ नोले डा बाजी हनान्याह, आ तौपुकी नु आ लोकब आन नेमी दुम्माक्त। मेको नेल्ल १२ जना बाक्मा बाक्त।
- 24 मेको आ नोले डा बाजी योशबे-काशाह, आ तौपुकी नु आ लोकब आन नेमी दुम्माक्त। मेको नेल्ल १२ जना बाक्मा बाक्त।
- 25 मेको आ नोले डा बाजी हानानी, आ तौपुकी नु आ लोकब आन नेमी दुम्माक्त। मेको नेल्ल १२ जना बाक्मा बाक्त।
- 26 मेको आ नोले डा बाजी माल्लोथी, आ तौपुकी नु आ लोकब आन नेमी दुम्माक्त। मेको नेल्ल १२ जना बाक्मा बाक्त।
- 27 मेको आ नोले डा बाजी एली-आथा, आ तौपुकी नु आ लोकब आन नेमी दुम्माक्त। मेको नेल्ल १२ जना बाक्मा बाक्त।
- 28 मेको आ नोले डा बाजी होथीर, आ तौपुकी नु आ लोकब आन नेमी दुम्माक्त। मेको नेल्ल १२ जना बाक्मा बाक्त।
- 29 मेको आ नोले डा बाजी गिदालती, आ तौपुकी नु आ लोकब आन नेमी दुम्माक्त। मेको नेल्ल १२ जना बाक्मा बाक्त।
- 30 मेको आ नोले डा बाजी डा माहाजी-ओथ, आ तौपुकी नु आ लोकब आन नेमी दुम्माक्त। मेको नेल्ल १२ जना बाक्मा बाक्त।
- 31 मेको आ नेल्ल क्येडा नोले डा बाजी रोमाप्ती-एजेर, आ तौपुकी नु आ लोकब आन नेमी दुम्माक्त। मेको नेल्ल १२ जना बाक्मा बाक्त।

## 26

लाप्चो खाल पाइब योत्रशो

- 1 मिनु लाप्चो खाल पतीक गेय पाइब सु सु बाक्मा बाक्त देशा हना, कोराह आ खिं खिं डा मुर आसाफ आ तौ रे कोराह आ तौ मेशेलेम्याह बाक्माक्त। २इतिहास ८:१४; २इतिहास ३५:१५
- 2 मेशेलेम्याह आ डोंडती थिशो तौ जकरिया, आ माइला येदीएल, आ साइला जेबदीयाह, आ काइला याथनीएल,
- 3 आ अन्तरे एलाम, आ जन्तरे येहो-हानानु नु आ कान्छा एली-ए-होएनाइ बाक्मा बाक्त।
- 4 ओबेद-एदोम आ डोंडती थिशो तौ शेमायाह, आ माइला येहो-जाबाद, आ साइला योआह, आ काइला साकार, आ अन्तरे नेथनेल, २सामुएल ६:११
- 5 आ जन्तरे अम्मीएल, आ खन्तरे इस्साकार नु आ कान्छा पेउल्लेथाइ ८ जना बाक्मा बाक्त। मारदे हना परमप्रभुमी ओबेद-एदोम कली आसीक गेशो बाक्माक्त।
- 6 मेको आ तौ शेमायाह के यो तौपुकी बाक्मा बाक्त। मेको आन खिं खिं डा टेयब मुर बाक्मा बाक्त। मारदे हना मेकोपुकी शुश जोक्ब तुइक्ब मुर बाक्मा बाक्त।
- 7 शेमायाह आ तौपुकी ओथनी, रेफाएल, ओबेद नु एल्जाबाद बाक्मा बाक्त। मेको आन लोकब एलीहु नु सेमक्याह यो जोक्ब तुइक्ब मुर बाक्सा बाक्त।
- 8 मेको ओबेद-एदोम आ तौपुकी, मेको आन तौ नु आन लोकब नेल्ले मेको गेय पचा कली जोक्ब तुइक्ब बाक्मा बाक्त। ओबेद-एदोम आ मुर नेल्ले पा ६२ जना बाक्मा बाक्त।
- 9 मेशेलेम्याह आ तौपुकी नु आ लोकबपुकी नेल्ल जोक्ब तुइक्ब मुर बाक्मा बाक्त। मेको नेल्ल १८ जना बाक्मा बाक्त।
- 10 मेरारी आ तौ होसाह आ तौपुकी सु सु बाक्मा बाक्त देशा हना, शिम्री आ डोंडती थिशो तौ मबाक्त हना यो, मेको आन टेयब मुर बाक्माक्त। आ आफोमी मेको कली टेयब मुर सेला बाक्त।
- 11 मिनु होसाह आ तौ माइला हिल्कीयाह, आ साइला तेबल्याह नु आ कान्छा जकरिया बाक्मा बाक्त। होसाह आ तौपुकी नु आ लोकबपुकी नेल्ल १३ जना बाक्मा बाक्त।
- 12 परमप्रभु यावे आ खिं डा लाप्चो खाल पाइब आन हुल नु आन टेयब मुर आन खिं खिं डा मुरपुकी खोदेशो पा परमप्रभु यावे आ खिं गेय पचा कली योत्रशो बाक्मा बाक्त।
- 13 मिनु मेकोपुकीमी आन खिं खिं डा मुर कली तेको लाप्चो खाल पचा, दे बाजी आप्मे बाक्त। खूशो नु ठिटा नेल्ल कली खाल का डा पा बाजी आप्मे बाक्त।

14 मिनू पूर्व डा लाप्यो खाल पचा कली शेलेम्याह आ नेम दुम्माक्त। मेकोपुकीमी आ तौ जकरिया आ पर्बम यो बाजी आप्मे बाक्त। मिनू उत्तर डा लाप्यो खाल पचा कली दुम्माक्त। जकरिया रिम्शो अर्ती गेब बाक्माक्त।

15 ओबेद-एदोम दक्खिन डा ठेयब लाप्यो खाल पाइब दुम्माक्त। आ तौ आन गेय मार मार वोइक्तीक खिं कोव्रतीक बाक्माक्त।

16 मिनू शुप्पीम नु होसाह पच्छिम डा लाप्यो नु शल्लेकेथ माइश्शो लाप्यो खाल पाइब दुम्सा बाक्त। मेको लाप्यो ग्येथ लतीक लाम नेक्नेक्था बाक्माक्त।

17 मिनू पूर्व गे नाक्त किंत किंत ६ जना लेवी, उत्तर गे नाक्त किंत किंत ४ जना, दक्खिन गे नाक्त किंत किंत ४ जना खाल पाइब बाक्मा बाक्त। मार मार वोइक्तीक खिं खाल पचा कली नाक्त किंत किंत निक्निकशी मुर बाक्सा बाक्त।

18 परमप्रभु यावे आ खिं डा पच्छिम गे डा लाम ४ जना खाल पाइब बाक्मा बाक्त। आ खिं आ नेक्था चहिं खाल पाइब निक्शी बाक्सा बाक्त।

19 मेको नेल्ल कोराह नु मेरारी आस खिं खिं डा लाप्यो खाल पाइब आन हुल बाक्मा बाक्त।

परमप्रभु आ मार मार कोव्रब मुर

20 मिनू अरु लेवी आ थर डा मुर आन गेय मार बाक्त देशा हना, परमप्रभु आ खिं डा मार मार शोंप वोइक्तीके नु मार मार परमप्रभु कली गेशो वोइक्तीके कोव्रब अहीयाह बाक्माक्त।

21 लादान आ तौपुकी, लादान आ खिं डा गेरशोनी नेल्ले, गेरशोनी आ खिं डा ठेयब मुर येहीएली बाक्मा बाक्त।  
१इतिहास २३:८

22 येहीएली आ तौ जेथाम नु आ लोकब योएल परमप्रभु यावे आ खिं डा मार मार शोंप वोइक्तीके कोव्रब बाक्मा बाक्त।

23 मिनू अग्राम आ खिं डा मुरपुकी, इच्छार आ खिं डा मुरपुकी, हेब्रोन आ खिं डा मुरपुकी नु उज्जीएल आ खिं डा मुरपुकी

24 मार मार वोइक्तीके कोव्रब आन ठेयब मुर शेबुएल बाक्माक्त। मेको मोसा आ चच, गेरशोम आ तौ बाक्माक्त।  
१इतिहास २३:१६

25 गेरशोम आ लोकब एलीएजर आ तौ रेहब्याह बाक्माक्त। मेको आ तौ येशायाह, येशायाह आ तौ योराम योराम आ तौ जिक्री नु जिक्री आ तौ शेलोमोथ बाक्मा बाक्त। १इतिहास २३:१७

26 शेलोमोथ नु आ लोकबपुकी पिप दाऊदमी गेशो, खिं खिं डा ठेयब मुरपुकीमी गेशो, हजार हजार लडाइ पाइब आन कप्तानपुकीमी गेशो नु सहे सहे डा लडाइ पाइब आन कप्तानपुकीमी गेशो शोंप वोइक्तीके कोव्रब बाक्मा बाक्त।

27 मेकोपुकीमी लडाइम रोइश्शा चाक्शो मार मार परमप्रभु यावे आ खिंम चालेचा कली गेशो बाक्मा बाक्त।

28 परमप्रभु यावे आ लोत्र पाइब सामुएल, कीश आ तौ सावल, नेर आ तौ आब्नेर नु सेरूयाह आ तौ योआवमी गेशो मारेइ मारेइ शेलोमोथ नु आ लोकबपुकी कोव्रब बाक्मा बाक्त।

लेवी आन गेय

29 इच्छार आ थर डा मुर आन दाते रे केनानीयाह नु आ तौ आन कली इस्राएली आन कली कोव्रब नु निसाफ पाइब बाक्मा बाक्त।

30 हेब्रोन आ खिं डा मुर आन दाते रे हशाब्याह नु आ लोकबपुकी हजार का ७ सहे जोक्ब तुइक्ब मुर यर्दन खोला आ पच्छिम गे डा इस्राएल रागी डा परमप्रभु यावे आ खिं डा गेय नु पिप आ गेय आ पर्बम कोव्रब बाक्मा बाक्त।

31 दाऊद ४० बर्सम पिप दुम्तीके हेब्रोन आ मुर रे तेको तेको खिं डा ठेयब जोक्ब तुइक्ब मुर माल्मे बाक्त। मिनू गिलाद डा याजेर सहरमी मेको आन कली शुश थित्मे बाक्त। मिनू येरीयाह मेको आन ठेयब मुर बाक्माक्त।

32 पिप दाऊदमी येरीयाह नु आ लोकबपुकी, हजार निक्शी ७ सहे जोक्ब तुइक्ब नु आंम आन खिं डा ठेयब मुर दुम्शो आन कली गेय पपाइक्मी बाक्त। मार गेय पपाइक्मी बाक्त देशा हना, मेकोपुकी रूबेन आ थर डा मुर, गाद आ थर डा मुर नु मनस्से आ आधा थर डा मुर आन कली परमप्रभु आ पर्बम मार गेय पचा नु पिप आ पर्बम मार गेय पचा मेको कोव्रब सेल्मी बाक्त।

## 27

लडाइ पाइब आन हुल

1 मिनू इस्राएली आन खिं खिं डा ठेयब मुरपुकी, हजार हजार लडाइ पाइब आन कप्तानपुकी, सहे सहे डा लडाइ पाइब आन कप्तानपुकी नु मेको आन ठेयब मुरपुकी बाक्मा बाक्त। मेकोपुकीमी लडाइ पाइब आन हुल हुल आन कली बर्सम महिना महिनामी पालो पा पिप आ गेय पपाइक्बाक्मा बाक्त। लडाइ पाइब आन हुल का का पालो पा बर्स डा महिना का गेय पपदमे बाक्त। हुल काम १४ हजार मुर बाक्मा बाक्त। पिप आ नेल्ल क्येडा ठेयब कप्तान सु सु बाक्मा बाक्त देशा हना,

2 बर्स आ डोंइती डा महिना डा डोंइती डा हुल आन कप्तान जब्दीएल आ तौ याशोबाम बाक्माक्त। मेको आ हुलम १४ हजार मुर बाक्मा बाक्त।

3 मेको परेस आ खिं खिं डा मुर बाक्मा बाक्त। मेको डोंइती डा महिना डा लडाइ पाइब नेल्ल आन कप्तान, क्येडा ठेयब मुर बाक्माक्त।

4 मेको आ नोले डा महिना डा हुल आन कप्तान अहोही आ मुर दोदाइ बाक्माक्त। मेको हुल नेल्ल आन कप्तान क्येडा ठेयब मुर मीक्लोथ बाक्माक्त। मेको आ हुलम १४ हजार मुर बाक्मा बाक्त।

- 5 मेको आ नोले डा महिना डा हुल आन नेल्ल क्येडा ठेयब कप्तान चढेब येहो-यादा आ तौ बेनायाह बाक्माक्त। मेको आ हुलम १४ हजार मुर बाक्मा बाक्त। १इतिहास ११:२२-२५
- 6 मेको बेनायाह शुश सक्ति पाइशो ३० जना मुर आन दाते डा का बाक्माक्त। मिनु मेको ३० जना सक्ति पाइशो मुर आन ठेयब मुर बाक्माक्त। मेको आ तौ अम्मीजाबाद बेनायाह आ लडाइ पाइब आ हुल डा मुर आन कप्तान बाक्माक्त।
- 7 मेको आ नोले डा महिना डा हुल आन कप्तान योआब आ लोकब आसाहेल बाक्माक्त। मेको आ नोले आ तौ जेबदीयाह कप्तान दुम्माक्त। मेको आ हुलम १४ हजार मुर बाक्मा बाक्त। १इतिहास ११:२६
- 8 मेको आ नोले डा महिना डा हुल आन कप्तान इज्जयाह आ मुर शाम्हुथ बाक्माक्त। मेको आ हुलम १४ हजार मुर बाक्मा बाक्त।
- 9 मेको आ नोले डा महिना डा हुल आन कप्तान तेकोहा आ मुर इक्केश आ तौ इरा बाक्माक्त। मेको आ हुलम १४ हजार मुर बाक्मा बाक्त। १इतिहास ११:२८
- 10 मेको आ नोले डा महिना डा हुल आन कप्तान एफ्राइम आ थर डा, पेलोन आ खिं डा मुर हेलेस बाक्माक्त। मेको आ हुलम १४ हजार मुर बाक्मा बाक्त। १इतिहास ११:२७
- 11 मेको आ नोले डा महिना डा हुल आन कप्तान जेराह डा हुशा डा मुर सिब्बेकै बाक्माक्त। मेको आ हुलम १४ हजार मुर बाक्मा बाक्त। १इतिहास ११:२९; १इतिहास २०:४
- 12 मेको आ नोले डा महिना डा हुल आन कप्तान बेन्यामीन आ थर डा अनाथोथ सहर डा अबीएजेर बाक्माक्त। मेको आ हुलम १४ हजार मुर बाक्मा बाक्त। १इतिहास ११:२८
- 13 मेको आ नोले डा महिना डा हुल आन कप्तान जेरह आ खिं डा नेतोफाह सहर डा मुर माहाराइ बाक्माक्त। मेको आ हुलम १४ हजार मुर बाक्मा बाक्त। १इतिहास ११:३०
- 14 मेको आ नोले डा महिना डा हुल आन कप्तान एफ्राइम आ थर डा पिराथोन सहर डा बेनायाहम बाक्माक्त। मेको आ हुलम १४ हजार मुर बाक्मा बाक्त। १इतिहास ११:३१
- 15 मिनु बर्स आ नेल्ल क्येडा नोले डा महिना डा हुल आन कप्तान ओधनीएल आ खिं डा नेतोफाह सहर डा हेल्दाइ बाक्माक्त। मेको आ हुलम १४ हजार मुर बाक्मा बाक्त।

थर थर डा ठेयब मुरपुकी

- 16 इस्राएली आन थर थर डा ठेयब मुरपुकी सु सु बाक्मा बाक्त देशा हना, रूबेन आ थर डा जिक्की आ तौ एलीएजर ठेयब मुर बाक्माक्त। सिमियोन आ थर डा माकाह आ तौ शेफत्याह बाक्माक्त।
- 17 लेवी आ थर डा केमुएल आ तौ हशाब्याह बाक्माक्त। हारून आ खिं डा सादोक बाक्माक्त।
- 18 यहूदा आ थर डा दाऊद आ लोकब एलीहु बाक्माक्त। इस्साकार आ थर डा मिकाएल आ तौ ओम्री बाक्माक्त।
- 19 जबूलून आ थर डा ओबदिया आ तौ इश्मायाह बाक्माक्त। नाप्ताली आ थर डा अजीएल आ तौ येरमोथ बाक्माक्त।
- 20 एफ्राइम आ थर डा अजजीयाह आ तौ होशेआ बाक्माक्त। मनस्से आ उडक्थ थर डा पेदायाह आ तौ योएल बाक्माक्त।
- 21 मिनु गिलादम बाक्शो मनस्से आ उडक्थ थर डा जकरिया आ तौ इददो बाक्माक्त। बेन्यामीन आ थर डा आब्नेर आ तौ यासीएल बाक्माक्त।
- 22 दान आ थर डा येरोहाम आ तौ अजारेल बाक्माक्त। मेको नेल्ल इस्राएली आन थर थर डा ठेयब मुर बाक्मा बाक्त।
- 23 मिनु दाऊदमी २० बर्स मगाशो आन कली महिकमी बाक्त। मारदे हना परमप्रभु यावेमी “इस्राएली आन कली सरीड डा सोरुल खोदेशो पा शुश सेल्लुडमी” दे कबल पशो बाक्माक्त। उत्पत्ती २२:१७
- 24 सेरूयाह आ तौ योआबमी मुर आन कली हिक्चा गोवा बाक्त। आ गेय मथुम्थु, परमप्रभु यावेमी इस्राएली आन पर्वम गाडक्ता बाक्त। मोपतीके मेना पिप दाऊद आ सासन पची ना मार मार दुम्शो बाक्मा ब्रेक्तीकेम गिश मुर हिक्शो बाक्मा मेको मब्रेक्शो बाक्माक्त। १इतिहास २१:७, १४

पिप आ मार मार कोव्रबपुकी

- 25 मिनु अदीएल आ तौ अज्मावेथ पिप आ मार मार वोइक्तीके कोव्रब आन ठेयब मुर बाक्माक्त। उज्जीयाह आ तौ योनाथन चहिं रूमी, सहरपुकीमी, गाउंपुकीमी नु वोइक्तीके लाइशो खिंमी बाक्शो पिप आ मार मार कोव्रब आन ठेयब मुर बाक्माक्त।
- 26 केलुब आ तौ एज़ी रूम गेय पा दोइब आन कली कोव्रब आन ठेयब मुर बाक्माक्त।
- 27 रामाह सहर डा शिमेइ अडगुर रूपुकी कोव्रब आन ठेयब मुर बाक्माक्त। शिफमी आ मुर जब्दी चहिं अडगुर शांबु वोइक्तीके कोव्रब आन ठेयब मुर बाक्माक्त।
- 28 गेदेराह सहर डा बाल-हनान शेफेलाह डा दिंममी बाक्शो तेल रवा नु फल सिप्ब फोव्रशी रवापुकी कोव्रब आन ठेयब मुर बाक्माक्त। योआश चहिं तेल वोइक्तीक कली कोव्रब आन ठेयब मुर बाक्माक्त।
- 29 शारोन दिंम डा शित्राइ मेकेर डा दिंममी जोइब बी ब्यफ आन कली कोव्रब आन ठेयब मुर बाक्माक्त। अदलाइ आ तौ शाफात चहिं अरु दिंम जोइब बस्तु भाव आन कली कोव्रब आन ठेयब मुर बाक्माक्त।
- 30 इश्माएली ओबील दलओठ आन कली कोव्रब आन ठेयब मुर बाक्माक्त। मेरोनोथ डा येहदयाह गधा आन कली कोव्रब आन ठेयब मुर बाक्माक्त। मिनु हाग्री आ मुर याजीज क्यारश भेडा आन कली कोव्रब आन ठेयब मुर बाक्माक्त।
- 31 मेको नेल्ले पिप दाऊद आ शोप कोव्रब आन ठेयब मुर बाक्मा बाक्त।

पिप दाऊद आ नेक्था डा मुरपुकी

32 दाऊद आ बकान्छा योनाथन दाऊद कली अर्ती गेब बाक्माक्त। मेको शुश जोक्ब तुडक्ब नु ब्रेक्स तुडक्ब मुर बाक्माक्त। हाकमोनी आ तौ येहीएल पिप आ तौ आन कली कोव्रब बाक्माक्त।

33 मिनु अहीथोफेल यो पिप कली अर्ती गेब बाक्माक्त। अरकी आ मुर हुशाइ पिप आ वारच बाक्माक्त।

34 अहीथोफेल आ नोले बेनायाह आ तौ येहो-यादा नु अबीयाथार पिप कली अर्ती गेब बाक्सा बाक्त। मिनु योआब पिप आ लडाइ पाइब आन ठेयब मुर बाक्माक्त। २सामुएल ८:१६

## 28

परमप्रभु आ खिं सेल्चा मिम्शो

1 मिनु दाऊदमी यरूसलेम सहरम इस्राएली आन ठेयब मुर नेल्ले आन कली गुम्पदा बाक्त। सु सु गुम्पदा बाक्त देशा हना, थर थर डा ठेयब मुर, पिप आ गेय पाइब हुल हुल आन ठेयब मुर, हजार हजार लडाइ पाइब आन कप्तानपुकी, सहे सहे लडाइ पाइब आन कप्तानपुकी, पिप नु आ तौ आन मार मार नु बी ब्यफ कोव्रब आन ठेयब मुरपुकी, दरवारमी गेय पाइब आन ठेयब मुरपुकी, शुश सक्ति पाइशशो लडाइ पाइबपुकी नु अरु महिब लडाइ पाइब आन कली गुम्पदा बाक्त।

2 मिनु पिप दाऊद बोक्शा मेको आन कली “आं लोक्ब नु आं मुर आं लोव्र नेनीन। गो परमप्रभु यावे आ कबल पशो सन्दोस कली नाइक्चा कली बाक्तीक का सेल्चा मिम्शो बाक्ती। परमप्रभु यावे, इ परमप्रभु आ खोइल थेक्तीक खोदेशो दुम्चा माल्ब। गो मेको सेल्चा कली ठीक पाता। १इतिहास २२:६-१०; भजन संग्रह ९९:५; भजन संग्रह १३२:७

3 तन्न परमप्रभुमी आं कली ‘गे आं नें ठेयब सेल्चा कली खिं सेल्चा मदुम्ब। मारदे हना गे लडाइ पा हुश खाक्श पोक्शो बाक्ते’ देत।

4 मो हना यो परमप्रभु यावे, इस्राएली आन परमप्रभुमी आं आफ आ खिं खिं रे आं कली गेना हना यो इस्राएलम पिप दुम्चा कली योव्रती। मारदे हना मेकोमी लां कोइचा कली यहूदा कली योव्रतु। मिनु यहूदा आ थर डा खिं खिं रे आं आफ आ खिं कली योव्रतु। मिनु आ आफ आ तौ आन दातेमी आं कली दाक्शा, इस्राएल डा पिप सेलती। उत्पत्ती ४९:१०; १सामुएल १६:१, १२

5 परमप्रभु यावेमी आं कली शुश तौ गेती। परमप्रभु यावेमी आ राज्य इस्राएलम पिप दुम्चा कली आं तौ सोलोमन कली योव्रतु।

6 मिनु आं कली ‘इ तौ सोलोमनी आं खिं नु आं लाइगा सेल्चा माल्ब। मारदे हना गो आं तौ दुम्चा, दे मेको कली योव्रता। गो आ आफ दुम्नुड। १इतिहास १७:११-१४

7 मेकोमी आं शेंशो नु निसाफ पतीक लोव्र टिना टिन बाक्ब। मुल खोदेशो पा रिम्शो टिप्नु हना, गो मेको आ राज्य गेना हना यो बोल्यो सेल्नुड’ देमाक्त।

8 मोपतीके गे परमप्रभु यावे आ नेंम गुम्शो इस्राएली नेल्ल आन डोंइती नु इ परमप्रभु आ डोंइती परमप्रभु यावे, इन परमप्रभु आ शेंतीके टिशा बिस्सीन। मिनु नोले मेको रिम्शो रागी इन के दुम्ब नु इन नोले इन आल आन कली गेना हना यो थेरशो रू दुम्ब।

9 आं तौ सोलोमन, इ आफ आ परमप्रभु कली तुइशशा मालो। इ थुं नेल्लेमी ग्येरशा मेको आ नोले खोतो। मारदे हना परमप्रभु यावेमी इ थुं कोव्रना कोव्रन, इन मिम्शो नु पशो नेल्ल तुडक्ब। गे मेको कली माल्तीवी हना, गे थित्नेवे। तन्न गे मेको कली प्रोंइतीवी हना, इ कली गेना हना यो कली प्रोंइब। येरमीया २९:१३-१४; १राजा ११:३१, ३३

10 मुल होस पावो। मारदे हना परमप्रभु यावेमी आंम आ बाक्तीक खिं सेल्चा कली इ कलीन योव्रतु। इ थुं ग्येत्थ लुकच मपथु, गेय पावो” दे पिप दाऊदमी आ तौ कली मदा बाक्त।

11 मिनु नोले दाऊदम आ तौ सोलोमन कली परमप्रभु यावे आ खिं सेलतीक ब्रेक्स गेवा बाक्त। मेको खिं डा ब्रेक्समी परमप्रभु आ बाक्तीक, आ पिंटी, अरु खिं, मार मार वोइक्तीक, खिं आ तार डा कोठापुकी, आगा डा कोठापुकी नु सन्दोस नु आ सुम्तीके आ कोठा बाक्शो बाक्माक्त। प्रस्थान २५:९

12 दाऊद आ मिम्शो नेल्ल मेको ब्रेक्सम बाक्शो बाक्त। मेकोमी परमप्रभु यावे आ खिं डा लाइगा, आ एर ओंथ नेल्ल डा कोठापुकी, परमप्रभु आ खिं डा मार मार वोइक्तीक कोठा नु नेल्ल गेशो थोव्रक कली वोइक्तीक कोठा आ तौ कली गेवा बाक्त।

13 मिनु लेवी नु चढ़ेब आन हुल हुल, परमप्रभु यावे आ खिंमी मार मार गेय पचा नु मेकेर मार मार ग्योबपुकी परमप्रभु यावे आ खिं डा गेय कली सेल्चा नेल्ल मेको ब्रेक्सम ब्रेक्शो बाक्माक्त।

14 मार मार गेय पचा कली सुन के ग्योब सेल्चा कली गिश सुन माल्बा, चांदी के ग्योब सेल्चा कली गिश चांदी माल्बा, मेको ब्रेक्शो बाक्माक्त।

15 मिनु सुन के बत्ती दातीक नु आ दियारी आन कली गिश सुन माल्बा, चांदी के बत्ती दातीक नु आ दियारी आन कली गिश चांदी माल्बा नु मार मार गेय कली मार मार माल्बा नेल्ल ब्रेक्शो बाक्माक्त।

16 लहर पा वोइशशो कोइतीक शोब्ले कली सुन के टेबल गिश सुन नु चांदी के टेबल आन कली गिश चांदी माल्बा मेको ब्रेक्शो बाक्माक्त।

17 मिनु कांटा, बुइक्तीक बोस, लोटा नु सुन के बोस आन कली गिश क्येख सुन माल्बा, मेको ब्रेक्शो बाक्माक्त। मिनु चांदी के बोस गिश चांदी माल्ब, मेको ब्रेक्शो बाक्माक्त।

18 क्येख सुन के धूप चोलीक कली गिश क्येख सुन माल्बा, मेको ब्रेक्सो बाक्माक्त। सुन के फ्रां प्राक्शा परमप्रभु यावे आ सन्देसो सुम्ब करूब आस कली कुरब बग्गी के यो ब्रेक्स यो सेल्शो बाक्माक्त। मिनु गिश सुन माल्बा, मेको ब्रेक्सो बाक्माक्त।

19 मिनु दाऊदमी “एको नेल्ल परमप्रभु यावेमी मार पचा, दोपा सेल्चा आं कली शेंताकयी। मोपा गो मेको नेल्ल गेय डा ब्रेक्स ब्रेक्ताक्ड” दे दाऊदमी देंमाक्त।

20 मिनु दाऊदमी आ तौ सोलोमन कली “बोल्यो नु महिब दुम्शा, एको गेय पावो। महिनो, इ थुं ग्येत्य लुकच मपावो। मारदे हना परमप्रभु यावे, आं परमप्रभु गे नु बाक्ब। परमप्रभु यावेमी आ खिमी गेय पचा कली मारेड मारेड सेले मथुमा सम्म इ कली मप्रोइथु वारच पाइब। १इतिहास २२:१३; ब्यवस्था ३१:६

21 परमप्रभु आ खिमी गेय पचा कली चढ़ेब नु लेवी आन हुल हुल ठीक दुम्शो बाक्नीम। मिनु मेको गेय पचा कली शुश जोक्ब तुइक्ब नु ग्येरशो गेय पाइब गे नु बाक्नीम। मिनु टेयब मुरपुकी नु मुर नेल्लेमी इ देंशो नेल्ल टीनीम” दे दाऊदम आ तौ सोलोमन कली देंमाक्त।

## 29

परमप्रभु कली मार मार गेशो

1 मिनु पिप दाऊदमी बुक्शा बाक्शो मुर नेल्ल आन कली “परमप्रभुमी आं तौ सोलोमन का ला योव्रतु। मेको मुल सम्म ठिटा बाक्ब। एको खिं सेल्चा चहिं थम टेयब गेय बाक्ब। मारदे हना एको खिं मुर आन कली ममाइ, परमप्रभु, परमप्रभु यावे आ खिं बाक्ब। १इतिहास २२:५

2 गो आं परमप्रभु आ खिं सेल्चा कली मार मार वोइक्ता देंशा हना, सुन के थोव्रक कली सुन, चांदी के थोव्रक कली चांदी, कांसा के थोव्रक कली कांसा, फलाम के थोव्रक कली फलाम, शी के थोव्रक कली शी, हीरा नु सुनम ग्याइशशो हीरा, दारपाइक्चा कली मार मार रड पाइशशो फुल्लु, मार मार हीरा नु अरु दारशो फुल्लु शुश तेल्ला वोइक्ता।

3 मेको आं परमप्रभु आ बाक्तीके सेल्चा कली खुप्शा वोइशशो मार मार प्रोइशा यो आं परमप्रभु आ खिं सेल्चा थाम्पा दाक्तीके गो आंम आं सुन नु चांदी परमप्रभु आ खिं सेल्चा कली गेता।

4 परमप्रभु यावे आ खिं डा आगा डा गारो गिल्या कली ४३ हजार टलेन्ट ओफीर डा सुन नु ७ हजार टलेन्ट याप्पाइशशो चांदी वोइशशो बाक्ब। टलेन्ट का ३४ किलो बाक्ब। १इतिहास २२:१४; प्रस्थान ३५:४-९

5 मिनु रिम्शो जोक्ब तुइक्ब गेय पाइब आन कली एको सुन के थोव्रक कली सुन नु चांदी के थोव्रक सेल्चा कली चांदी वोइशशो बाक्ब। मुल परमप्रभु यावे कली आं खोदेंशो पा सु सुम मार मार गेचा दाक्नीनी?” दे हिलो पवा बाक्त।

6 मिनु खिं खिं डा टेयब मुरपुकी, इस्राएली आ थर थर डा टेयब मुरपुकी, हजार हजार डा लडाइ पाइब आन कप्तानपुकी नु सहे सहे डा लडाइ पाइब आन कप्तानपुकी नु पिप आ गेय पाइब आन कली कोव्रब मुरपुकी हाइशशो दुम्शा मार मार गेमी बाक्त।

7 मेकोपुकीमी ग्येरशा परमप्रभु आ खिं सेल्चा कली मार मार गेमे बाक्त देंशा हना, ५ हजार टलेन्ट सुन, नु सुन के क्येट १० हजार दारीके, १० हजार टलेन्ट चांदी, १८ हजार टलेन्ट कांसा लाख का टलेन्ट फलाम गेमे बाक्त। दारीके का ८.४ ग्राम सुन के क्येट बाक्ब।

8 मिनु सु सु नु हीरा बाक्मा, मेकोमी परमप्रभु यावे आ शोप वोइक्तीक कली गेरशोन आ खिं डा मुर येहीएल आ गुडमी गेमे बाक्त। प्रस्थान ३५:२७

9 मिनु मुरपुकीमी हाइशशो थुंमी गेशा ग्येरसीशो बाक्मा बाक्त। मारदे हना मेकोपुकीमी ग्येरसीशा परमप्रभु यावे कली शुश गेशो बाक्मा बाक्त। पिप दाऊद यो थाम्पा ग्येरशो बाक्माक्त।

परमप्रभु कली टेयब सेल्शो

10 मिनु दाऊदमी मुर नेल्ल आन डोंइती परमप्रभु यावे कली “परमप्रभु यावे, आंइ किकी पिपी इस्राएल आ परमप्रभु, गे गेना हना यो टेयब बाक्नीनी।

11 परमप्रभु यावे, नेल्ल क्येडा टेयब दुम्तीके, सक्ति, छेडछेड, ग्रातीके नु मान तचा पुंइसीतीके नेल्ल इन के बाक्नीम। मारदे हना रागी नु सरीडम बाक्शो मारेड मारेड इन के नम। परमप्रभु यावे, मेको राज्य इन के बाक्ब। गे नेल्ल क्येडा टेयब बाक्नीनी। प्रकाश ४:११;५:१३

12 गे शोप नु मान ततीक गेब बाक्नीनी। गे नेल्ल आन कली सासन पाइनीनी। बोल नु सक्ति इन गुडमी बाक्ब। गे इन गुडमी टेयब सेल्शा, सक्ति गेनीनी। २इतिहास २०:६

13 मुल आंइ परमप्रभु, गो इन कली ‘गे रिम्शो पाइब बाक्नीनी’ दे इन नें टेयब सेल्की।

14 मिनु गो आंइ थुंम ग्येरशा सोम्शा ओपा शुश गेने चाप्नीकी? गो सु नडा? आं मुरपुकी सु बाक्नीमी? मारदे हना नेल्ल थोव्रक इन गुइ रे जाक्नीम। गोपुकीमी इन गेशो रे इन कली गेतक।

15 गोपुकी इन डोंइती शुश नाक्त मबाक्ब अर्को रागी डा मुर दुम्शो बाक्नीकी। आंइ किकी पिपी यो मोदेंशो बाक्मा बाक्त। आंइ रागीम बाक्तीके नाक्ती वांकु खोदेंशो बाक्नीम। शुश बाक्तीक आस मबाक्ब। भजन संग्रह ३९:१३; हिब्रू ११:१३; अय्युब १४:२

16 परमप्रभु यावे, आंइ परमप्रभु खिं सेल्चा, इन नें टेयब सेल्चा कली आंइ तेल्लो शोप नेल्ल इन गुइ रे जाक्शो बाक्ब।

17 आं परमप्रभु, गे मुर आन थुं नाक्शा कोव्रनीनी, दे तुइक्नुड। गे ब्रेम्शो थुं पाइशशो मुर तशा ग्येरनीनी। गो आं ब्रेम्शो थुं दुम्तीकेमी ग्येरशा एको नेल्ल इन कली चढ़ेता। मुल गो एक बाक्शो इन मुर आन कली ताता। ग्येरशो थुंमी एको नेल्ल चढ़ेम्तेक्म। भजन संग्रह ७:१०

18 परमप्रभु यावे, आंइ किकी पिपी अब्राहाम, इसहाक नु याकूब आन परमप्रभु, इन मुर आन थुंमी मोदेशो मिम्चा नु पचा गेना हना यो लीपतीन। मिनु मेको आन थुं इन गे कीडीन।

19 आं तौ सोलोमन कली इन शेंतीके, इन देशो नु फुल्लुम मुशा ब्रेकशो लोव्र आ थुं नेल्लेमी पपतीन। मेकोमी नेल्ल पने चबल। मिनु आं ठीक पा वोइशशो थोवकमी इन खिं सेल्ले चबल” दे दाऊदमी परमप्रभु कली देंमाक्त।

सोलोमन पिप दुम्शो

20 मिनु नोले दाऊदमी मुर नेल्ल आन कली “परमप्रभु यावे, इन परमप्रभु कली ठेयब सेलीन” देंमाक्त। मिनु मुर नेल्लेमी परमप्रभु यावे, आन किकी पिप आन परमप्रभु कली ठेयब सेल्ला बाम्मा बाक्त। मिनु परमप्रभु यावे नु पिप आ डोंइती बाप्शा, सेउ पामे बाक्त।

21 मिनु आ दीसा नाक्ती मेकोपुकीमी परमप्रभु यावे कली मार मार चढेतीके नु चोशा चढेतीक चढेमे बाक्त। मेकोपुकीमी हजार का ब्यफ, हजार का सांड, हजार का पाठा, तूचा थोवक चढेमे बाक्त। इस्राएली नेल्ल आन पर्वम शुश चढेमे बाक्त।

22 मेको नाक्त शुश ग्येरसीशा परमप्रभु यावे आ डोंइती जशा, तूडमे बाक्त। मिनु नोले मेकोपुकीमी दाऊद आ तौ सोलोमन कली लेंशा पिप सेल्ले बाक्त। मिनु सोलोमन कली तेल लुकशा पिप सेल्ले बाक्त। मिनु सादोक कली चढेब सेल्ले बाक्त। १इतिहास २३:१

23 नोले सोलोमन आ आफ दाऊद आ पा डा परमप्रभु यावे आ नित्तीकेमी निरशा, पिप दुम्शा, ठेयब दुम्माक्त। इस्राएली नेल्लेमी मेको आ देशो बिस्समा बाक्त। १इतिहास २८:५; १राजा १:३४, ३५, ३९

24 ठेयब मुर नेल्ले, सक्ति पाइशशो लडाइ पाइब नेल्ले नु पिप दाऊद आ तौ नेल्लेमी यो पिप सोलोमन कली आन पिप बाक्ब, दे कसम जामे बाक्त।

25 मिनु परमप्रभु यावेमी सोलोमन कली इस्राएली नेल्ल आन डोंइती ठेयब सेला बाक्त। मिनु मेको कली राज्य नु मान ततीके शुश गेवा बाक्त। इस्राएलम मेको क्येडा डोंइती डा तेकोइ पिप आन कली मोदेशो मान ततीके मगेशो बाक्माक्त।

दाऊद बेकशो

26 मोपा येस्से आ तौ दाऊदमी इस्राएल नेल्लेमी सासन पवा बाक्त।

27 मेकोमी इस्राएल कली ४० बर्स सासन पवा बाक्त। हेब्रोनम ७ बर्स नु यरूसलेममी ३३ बर्स सासन पवा बाक्त। १राजा २:११

28 मिनु शुश खूशो दुम्शा बेक्माक्त। मेको के शोंप नु मान ततीके शुश बाक्माक्त। मिनु आ तौ सोलोमन आ नोले पिप दुम्माक्त। उत्पत्ती २५:८; उत्पत्ती ३५:२९; २इतिहास २४:१५; अथ्युब ४२:१७

29 पिप दाऊद आ पशो मार मार बाक्मे, मेको डोंइती रे नोले सम्म नेल्ल परमप्रभु यावे आ लोव्र पाइब सामुएल, नाथान नु गाद आन ब्रेकशो किताबम ब्रेकशो बाक्ब। १इतिहास २१:९

30 दोपा सासन पवा, आ सक्ति नु आ पशो नेल्ल, इस्राएली आन तशो नु रागी रागी डा राज्यम मार मार दुम्मे, मेको लोव्र नेल्ल मेकेर ब्रेकशो बाक्ब।

## २ इतिहास

**ब्रेक्ब मुर:** एजा ब्रेक्ब मुर बाक्त हना यो, अर्को मुरपुकीम यो लोत्र तेमशो बाक्तेकम।

**गेना दुमशो:** १इतिहास खोदेशो पा ५३६ बि. सी. सम्म डा इस्राएली आन इतिहास बाक्ब।

**मार ब्रेक्शो:**

१. सोलोमन आ सासन पची ना डा इस्राएली आन इतिहास। २इतिहास १:- २इतिहास ९:-

२. यहूदा रागी डा पिप आन सासन पची ना डा इस्राएली आन इतिहास। २इतिहास १०:-२इतिहास ३६:-

सोलोमनम तुइक्तीक थुं पुंइशो

१राजा ३:१-१५

1 दाऊद आ तौ सोलोमन पिप दुमशा, आ राज्य बोल्यो दुम्माक्त। मारदे हना परमप्रभु यावे, आ परमप्रभु मेको नु बाक्शा, मेको कली थाम्पा ठेयब मान ताइब सेला बाक्त। १राजा २:१२,४६

2 मिनु सोलोमनम इस्राएली नेल्ल, हजार हजार नु सहे सहे डा लडाइ पाइब आन कप्तान, निसाफ पाइबपुकी, इस्राएली आन ठेयब मुरपुकी नु आन खिं खिं डा ठेयब मुर नेल्ल खुप्शा लोत्र पवा बाक्त।

3 मिनु सोलोमन नु मेको मुर नेल्ल गिबोन सहर आ नेक्था बाक्शो लाइशो डांडाम लमा बाक्त। मारदे हना परमप्रभु यावे आ गेय पाइब मोसाम गोरशो रागीम सेल्लो परमप्रभु आ युम्तीक ताम्बु मेकेर बाक्माक्त। १इतिहास १६:३९

4 मिनु दाऊदम डोंइती परमप्रभु आ कबल पशो सन्दोस कली किरयथ-यारीम रे आ ठीक पशो बाक्तीके यरूसलेमम चाक्शो बाक्माक्त। मारदे हना मेको कली मेकेर ताम्बु का कीशो बाक्माक्त। १इतिहास १३:६; १इतिहास १५:३,२; १इतिहास १६:१

5 मिनु हुर आ चच ऊरी आ तौ बेजालेलमी सेल्लो कांसा के चोशा चढेतीके परमप्रभु यावे आ बाक्तीके आ डोंइती गिबोनम बाक्शो बाक्माक्त। प्रस्थान ३८:३-८

6 मिनु सोलोमन नु आ खुप्शो मुर नेल्ल इर परमप्रभु यावे आ डोंइती जाक्मा बाक्त। मिनु सोलोमन मेको कांसा के चढेतीक सम्म डोइशशा लमाक्त। मेको युम्तीक ताम्बु आ डोंइती बाक्शो बाक्माक्त। मेको आ तारी हजार का चोशा चढेतीक चढेवा बाक्त।

7 मेको नाक्दो परमप्रभुम सोलोमन कली तपाइसे बाक्त। मिनु सोलोमन कली “गो इ कली मार गेन? लो पुनो” देमाक्त।

8 मिनु सोलोमनम परमप्रभु कली “गे आं आफ दाऊद कली ठेयब नु गेना हना यो दाक्तीक कोंइताक्नी। मिनु आं कली मेको आ पा डा पिप सेल्लो बाक्नीनी।

9 मूल आं परमप्रभु यावे, गे आं आफ दाऊद कली गेशो इन लोत्र खाप्पीन। मारदे हना गे आं कली एको रागी डा फुरक खोदेशो पा हिकने मचाप्चा डा शुश मुर आन पिप सेल्लतीनी।

10 आं कली एको मुर आन कली सासन पाइब सेल्लतीनी। मोपतीके आं कली रुप्तीक नु तुइक्तीक थुं गेयीनी। मिनु आं कली एको मुर नु रिमशो पा बाक्चा गेयीनी। मारदे हना एको इश्का इन मुर आन कली सुम सासन पने चाप्चा डा?” देमाक्त।

11 मिनु परमप्रभुम सोलोमन कली “गे आं मुर आन पिप दुमचा कली रुप्तीक नु तुइक्तीक थुं पुंइतीवी। तन्न गे शुश क्येट नु शोंप, मान ततीके, आम जोरी सत्रु आन कली साइक्तीके नु आम कली शुश ब्रोंडडल, दे मपुनी।

12 मोपतीके गो इ कली रुप्तीक नु तुइक्तीक थुं गेनन। मिनु गो इ कली शुश क्येट, शोंप नु मान ततीके यो गेनन। मेको इ क्येडा डोंइती नु इ क्येडा नोले डा तेकोइ पिपपुकीम मतशो बाक्नीम” दे मदा बाक्त।

13 मिनु सोलोमन गिबोन सहर आ नेक्था डा डांडा युम्तीक ताम्बु आ बाक्तीक रे यरूसलेमम जाक्शा, इस्राएली आन कली सासन पवा बाक्त।

सोलोमन आ शोंप

१राजा १०:२६-२९

14 मिनु सोलोमनम शुश बग्गी नु शारापुकी खुप्तीमी बाक्त। मेको के हजार का ४ सहे बग्गी नु हजार का सहे निक्शी शारा बाक्मा बाक्त। मिनु मेकोमी आ बग्गी आन कली बग्गी वोइक्तीक सहम वोइक्पदा बाक्त। तन्न का निक्शी चहिं आं सहर यरूसलेमम वोइक्पदा बाक्त।

15 सोलोमनम सुन नु चांदी यरूसलेमम बाक्शो फुल्लु खोदेशो पा शुश तेला बाक्त। मिनु लेबानोन डा लाइशशो रवा आ शी, शेफेलाह डा फोत्रशी रवा खोदेशो पा शुश तेला बाक्त।

16 सोलोमनम शारापुकी इजीप्त नु क्युए रे ग्याप्शा, चाक्पाइक्बाक्माक्त। मिनु मेको आ ग्याप्ब लेयबपुकीम क्युएम् क्येट थाप्शा ग्याप्शा चाक्बाक्मा बाक्त।

17 मेकोपुकीम इजीप्त रे ग्याप्शा अर्को रागी कली लेयबाक्मा बाक्त। बग्गी का कली ६ सहे चांदी के शेकेल नु शारा का कली सहे का ५० चांदी के शेकेलम लेयबाक्मा बाक्त। मिनु सोलोमन आ ग्याप्ब लेयबपुकीमी मेको हित्ती नु अरामी पिप आन कली लेयबाक्मा बाक्त।

## 2

परमप्रभु आ खिं सेल्लशो

१राजा ५:१-१८



- 1 मिनू सोलोमनम परमप्रभु यावे कली मान पचा, दे खिं का नु आंम कली दरवार का सेल्चा थुं पवा बाक्त।
- 2 मिनू सोलोमनमी ७० हजार कुरब मुर, ८० हजार पहाडम फुल्लु खोइक्चा कली नु मेको गेय पाइब आन कली कोव्रब हजार सां ६ सहे मुर आन कली योवमी बाक्त।
- 3 मिनू सोलोमनम टायर डा पिप हुराम कली “गे आं आफ दाऊद कली आ खिं सेल्चा कली लेबानोन डा लाइश्शो रवा आ शी सोइश्शो बाक्तीनी। १इतिहास १४:१
- 4 मिनू मुल गो परमप्रभु यावे, आं परमप्रभु कली मान पचा, दे मेको कली खिं का सेल्चा दाक्नुड। मिनू मेको खिं परमप्रभु यावे आ डोंइती ब्रोव्रशो रिना पाइश्शो धूप चोचा कली, मेकेर नाक्त कित कित डा कोंइतीक शोब्ले हार हार पा चढेचा कली, नाक्टो सुनी चोशा चढेचा कली, नाइक्तीक नाक्ती, औसी नाक्ती नु परमप्रभु यावेम, आंइ परमप्रभु गेना हना यो ‘मानेन’ दे इस्राएली आन कली गेशो चाड मानेचा कली जिम्मा गेचा दाक्नुड।
- 5 गो आं सेल्चा चिक्शो खिं थम ठेयब नु रिम्शो खिं दुम्चा माल्ब। मारदे हना आंइ परमप्रभु देवी देवता नेल्ल आन क्येडा ठेयब बाक्ब।
- 6 तन्न सरीड नु स्वर्गम मेको मरिक्ब हना, सुम मेको कली खिं सेल्चे चाप्बा डा? मेको कली मार मार चढेचा क्येडा लाक्शा, आ खिं सेल्ब गो सु नडा डा? २इतिहास ६:१८; १राजा ८:२७
- 7 मोपतीके गे आं कली सेल्स जोक्ब तुइक्ब मुर का सोइक्तीन। मेको मुरुम सुन, चांदी, कांसा नु फलाम चेम्शा, मार मार सेल्स जोक्चा माल्ब। मेकोमी प्याजी, लल नु नीलो श्येले रे मार मार प्रोव्रस जोक्चा माल्ब। मिनू मार मार मुशा, बुटा आप्चा शेंसीशो मुर दुम्चा माल्ब। मिनू मेकोमी आं आफ दाऊदम योव्रशो मारेइ मारेइ पस जोक्ब यहूदा नु यरूसलेमम गो नु बाक्ब मुरपुकी नु गेय पचा माल्ब।
- 8 गे आं कली यो लेबानोन डा लाइश्शो रवा आ शी नु लेबानोन डा अरु रवा आ शी सोइक्तीनी। मारदे हना इन लेबानोन डा मुरपुकीम रिम्शो पा शी खोइक्स जोक्ब बाक्नीम, दे गो तुइक्नुड। आं गेय पाइब इन गेय पाइब नु गेय पाइनीम।
- 9 आं कली शुश शी तिम्शा सोइक्तीन। मारदे हना गो ठेयब नु दारशो खिं सेल्चा दाक्नुड।
- 10 गो इन गेय पाइब रवा तिम्ब आन कली २० हजार कोर हिल्लो चेरब, २० हजार कोर क्योव्रज, २० हजार बाथ अडगुर शांबु नु २० हजार बाथ तेल गेनुडमी” दे लोव्र कुरब मुर सोइक्ता बाक्त। कोर का २२० लिटर पुक्तीके बाक्ब। बाथ का २२ लिटर बाक्ब।
- 11 मिनू टायर डा पिप हुराममी चिठी का ब्रेक्शा, सोलोमन कली सोइक्ता बाक्त। मिनू मेकोमी “परमप्रभु यावेमी आ मुर आन कली दाक्तीके, इन कली मेको आन पिप सेल्लु।
- 12 सरीड नु रागी सेल्ब परमप्रभु यावे, इस्राएली आन परमप्रभु ठेयब बाक्ब। मेकोमी पिप दाऊद कली रुपतीक नु तुइक्तीक थुं पाइश्शो तौ का गेप्लु। मेकोमी परमप्रभु यावे कली खिं का नु आंम कली दरवार का सेल्ब।
- 13 गो इन कली वारच पाइक्चा कली मार मार सेल्स शुश जोक्ब नु तुइक्ब हुराम-अबी कली सोइक्नुड। १राजा ७:१३
- 14 मेको दान आ थर डा मीश मुर आ तौ बाक्ब। मेको आ आफ चहिं टायर डा बाक्ब। मेको सुन, चांदी, कांसा, फलाम, हीरा, शी नु प्याजी, लल, नीलो श्येले नु रिम्शो पा किरशो सुती श्येले रे प्रोव्रशो वा रे मार मार सेल्चे चाप्ब। मुशा मार मार सेल्चा यो जोक्ब बाक्ब। इन कली मार मार ब्रेक्स माल्नीनी, मेकोमी पने चाप्ब। मेको मारेइ मारेइ जोक्ब मुरपुकी नु ठेयब पिप, इन आफ दाऊद आ मारेइ मारेइ सेल्बपुकी नु गेय पने चाप्ब। प्रस्थान ३१:२-६
- 15 इन ब्रेक्शो खोदेशो पाइन गेय पाइब आन कली चेरब, क्योव्रज, तेल नु अडगुर शांबु सोइक्तीन।
- 16 गो इन माल्शो शी नेल्ल लेबानोनम तिम्नीकी। मिनू फ्रेंशा योप्पा सहर सम्म ठेयब समुन्द्र रे पा सोइक्नीकी। मिनू गे मेकेर रे यरूसलेम सम्म लतीन” दे चिठी ब्रेक्शा सोइक्ता बाक्त।
- 17 मिनू सोलोमनम इस्राएलम बाक्शो अर्को रागी डा मुर आन कली हिक्पाइक्मी बाक्त। डोंइती आ आफ दाऊदमी मुर आन कली हिक्पाइश्शो बाक्माक्त। मुल मेकोपुकी लास का ५३ हजार ६ सहे वोंइश मुर बाक्मा बाक्त। १इतिहास २२:२
- 18 मेको रे ७० हजार आन कली कुरब, ८० हजार आन कली पहाडम फुल्लु खोइक्ब नु हजार सां ६ सहे आन कली मेको गेय पाइब आन कली कोव्रब सेल्मी बाक्त।

### 3

परमप्रभु यावे कली खिं सेल्शो

१राजा ६:-

- 1 मिनू सोलोमनमी यरूसलेम डा मोरीयाह डांडाम परमप्रभु यावे आ खिं सेल्चा गोवा बाक्त। डोंइती परमप्रभु यावेमी आ आफ दाऊद कली मेको मोरीयाह डांडाम कोंइशो बाक्माक्त। मिनू दाऊदमी “परमप्रभु आ खिं यबुसी ओरनान आ चेरब तुप्तीकेम सेल्चा माल्ब” दे माइश्शो बाक्माक्त। १इतिहास २१:१८-२६
- 2 मिनू सोलोमन पिप दुम्शो आ ४ बर्स डा महिना निक्शी डा नाक्त निक्शीमी मेको खिं सेल्चा गोवा बाक्त।
- 3 सोलोमनम परमप्रभु आ खिं दोमो सेल्चा थुं पशो बाक्माक्त देशा हना, माइत पुक्तीके रे आ लाइश्शो ६० कुबीत नु आ ब्रेम्शो २० कुबीत बाक्माक्त। कुबीत का ०.५ मिटर बाक्ब।
- 4 खिं आ डोंइती २० कुबीत लाइश्शो, २० कुबीत ब्रेम्शो नु सहे का २० कुबीत ग्येथ लाइश्शो पिंडी बाक्माक्त। मेको आगा डा गारोमी क्येख सुनम गिल्पदा बाक्त।
- 5 मेको खिं आ आगा नेल्ल सला के फलेक क्येप्पदा बाक्त। मिनू नेल्ल कली क्येख सुनम गिल्पदा बाक्त। मेको दारपाइक्चा कली मेको आ तार खजूर रवा नु सिक्नीपुकी बुटा आप्चा सेल्पदा बाक्त।

6 मेको खिं कली दारपाइक्चा कली हीरापुकी क्येप्पदा बाक्त। मेको आन माल्शो सुन पारवाइम माइक्तीके रे चाक्शो बाक्मा बाक्त।

7 मिनु मेको खिं आगा नेल्ले सुनम गिल्पदा बाक्त। मेको आ थाम, लाप्चो आ पुं डा शी, गारो नु लाप्चो नेल्ल गिल्पदा बाक्त। आन गारोम करूबपुकी मुशा सेल्पदा बाक्त।

8 मिनु मेकोमी नेल्ल क्येडा चोत्रखो कोठा सेल्पदा बाक्त। खिं आ ब्रेम्शो आ लाइश्शो यो खाल का डा पा २० कुबीत लाइश्शो नु २० कुबीत ब्रेम्शो सेल्पदा बाक्त। मिनु मेकोमी आ आगा नेल्ल ६ सहे टलेन्ट क्येख सुनम गिल्पदा बाक्त। टलेन्ट का ३४ किलो बाक्ब।

9 मेको कांटी डा सुन नाक्शोनु, ५० शेकेल बाक्मा बाक्त। मेकोमी आ इर गे डा कोठा यो सुनम गिल्पदा बाक्त। शेकेल का ११.५ ग्राम बाक्ब

10 मिनु मेकोमी नेल्ल क्येडा चोत्रखो कोठा कली करूब निक्शी मुशा, सुनम गिल्पदा बाक्त।

11 मेको करूब आस फ्रां नेल्ल प्राक्शा पुक्शोनु, २० कुबीत लाइश्शो बाक्मा बाक्त। मेको करूब आ फ्रां का ५ कुबीत लाइश्शो बाक्माक्त। मिनु मेको वोइश्शा, आ फ्रां काम परमप्रभु यावे आ खिं डा गारो थिशो बाक्माक्त। मिनु मेको आ अर्को ५ कुबीत लाइश्शो फ्रांम चहिं अर्को करूब आ फ्रां थिशो बाक्माक्त।

12 मोपान अर्को करूब आ फ्रां खिं आ अर्को गे डा गारो थिशा ५ कुबीत लाइश्शो बाक्माक्त। मिनु मेको आ अर्को फ्रांम अर्को डोंइती डा करूब आ फ्रांम थिशो बाक्माक्त, मेको यो ५ कुबीत लाइश्शो बाक्माक्त।

13 मेको करूब आस फ्रां नेल्ल पा २० कुबीत प्राक्शो बाक्मा बाक्त। मेको निक्शी राप्शो बाक्सा बाक्त। मिनु मेको निक्शीमी मेको खिं गे कोत्रशो बाक्सा बाक्त।

14 मिनु सोलोमनम फारतीक वा नीलो, प्याजी नु लल श्येले नु रिम्शो पा किरशो सुती श्येले रे प्रोत्रशो वा के सेल्पदा बाक्त। मिनु करूब आ बुटा आप्शा प्रोत्रपदा बाक्त। प्रस्थान २६:३१

परमप्रभु आ खिं डा थाम निक्शी

१राजा ७:१५-२२

15 मिनु खिं आ डोंइती ३५ कुबीत लाइश्शो कांसा के थाम निक्शी सेल्पदा बाक्त। मेको आस कली ५ कुबीत लाइश्शो गुप्तीके गुप्पदा बाक्त।

16 मेको थाम निक्शी आस गुप्तीके एर ओंथ हिरचा कली जाली खोदेशो साडली निक्शी सेल्पाइश्शा, सहे का दारीम सेल्शा, मेको दारीम साडलीम क्युकपदा बाक्त।

17 मेको थाम निक्शी परमप्रभु यावे आ खिं आ डोंइती का ग्युरा गे, का पेरा गे राप्पदा बाक्त। मिनु ग्युरा गे डा थाम आ नें याकीन वोदा बाक्त। पेरा गे डा थाम आ नें बोआज वोदा बाक्त। याकीन आ अर्थ “शुं बारपाइक्ब” बाक्ब। बोआज आ अर्थ “मेकोमी सक्ति गेब” बाक्ब।

## 4

खिं कली मार मार सेल्शो

१राजा ७:२३-५१

1 मिनु सोलोमनमी हुराम-अबी कली २० कुबीत लाइश्शो २० कुबीत ब्रेम्शो नु १० कुबीत ग्येथ लाइश्शो कांसा के चढ्ढेतीक का सेल्पदा बाक्त। कुबीत का ०.५ मिटर बाक्ब। १इतिहास ७:७

2 मिनु नोले यपाइश्शा कांसा के थम टेयब बोस का सेल्पदा बाक्त। मेको कली दोम्ली देमा बाक्त। मेको सुर का रे अर्को सुर सम्म १० कुबीत बाक्माक्त। मिनु मेको आ ग्येथ लाइश्शो ५ कुबीत बाक्माक्त। मेको आ एर ओंथ पुक्शोनु ३० कुबीत बाक्माक्त।

3 मेको दोम्ली आ लाडगा गे हार निक्शी ब्यफ दारपाइक्चा कली बाक्माक्त। कुबीत काम १० ओटा ब्यफ बाक्शो बाक्मा बाक्त। मेको बोस नु दारपाइक्तीक ब्यफ कांसा यपाइक्तीक गेय रे कालेमीन सेल्शो बाक्मा बाक्त।

4 मेको दोम्ली १२ ओटा ब्यफ आन तार वोइश्शो बाक्माक्त। ब्यफ सां उत्तर गे कोत्रशो, सां पच्छिम गे कोत्रशो, सां दक्खिन गे कोत्रशो नु सां पूर्व गे कोत्रशो बाक्मा बाक्त। मिनु मेको दोम्ली मेको ब्यफ आन तार वोइश्शो बाक्माक्त। मेको ब्यफ आन मीलु आगा गे बाक्शो बाक्मा बाक्त।

5 मेको दोम्ली आ सुर लिली फू आ सफा खोदेशो पा रोम्सीशो बाक्माक्त। मेको आ सुर लोटा के खोदेशो बाक्माक्त। मेको बोस इन्ची सां थोंइशो बाक्माक्त। मेको आ आगाम हजार सां बाथ ब्वाक्कु रिक्बाक्माक्त। बाथ का २२ लिटर बाक्ब।

6 मिनु सोलोमनम चिनु तेम्शा १० ओटा आइक्च कांसा के चिक्तीक बोस सेल्पदा बाक्त। मिनु मेको के ५ ओटा दोम्ली आ ग्युरा गे नु ५ ओटा आ पेरा गे वोइक्पाइक्मी बाक्त। मिनु चोशा चढ्ढेचा कली मार मार मुरचा माल्तेक्म हना, मेकेर मुरबाक्मा बाक्त। मेको दोम्ली चहिं चढ्ढेब आन चिक्तीक बाक्माक्त।

7 मिनु मोसामी डोंइती बत्ती दातीक सेल्शा शेंशो खोदेशो पा, १० ओटा सुन के बत्ती दातीक सेल्पदा बाक्त। मिनु मेको परमप्रभु यावे आ खिंम ५ ओटा दक्खिन गे नु ५ ओटा उत्तर गे पा वोइक्पदा बाक्त।

8 मेकोमी १० ओटा टेबल यो सेल्शा, परमप्रभु यावे आ खिंम ५ ओटा ग्युरा गे नु ५ ओटा पेरा गे पा वोइक्पदा बाक्त। मिनु सहे का सुन के बुइक्तीक बोस यो सेल्पदा बाक्त।

9 मेकोमी चढ्ढेब आन बाक्तीक लाडगा, टेयब लाडगा नु लाडगा डा लाप्चोपुकी सेल्पदा बाक्त। मिनु लाप्चो आन कली कांसाम गिल्पदा बाक्त।

10 मिनु मेको दोम्ली माइशो ठेयब ब्वाक्कु वोइक्तीके परमप्रभु यावे आ खिं आ दक्खिन पूर्व गे डा कुनाम वोइक्पदा बाक्त।

हुराममी मार मार सेल्शो

11 मिनु हुराममी ग्योब, बेल्ला नु बोसपुकी सेला बाक्त। मोपा हुराममी पिप सोलोमन आ गेशो परमप्रभु आ खिं डा गेय नेल्ल थुमा बाक्त।

12 हुराममी थाम निक्शी, बोस खोदेशो गुप्तीके, मेको आस एर ओंथ क्युकुशो दारपाइक्तीक जाली खोदेशो साडली सेल्शा थुमा बाक्त।

13 मेको साडलीम क्युकुचा कली ४ सहे दारीम सेला बाक्त। मेको थाम आस डरम बाक्शो गुप्तीक बोस आस कली सुम्चा कली सेल्शो जाली खोदेशो साडली नु मेको साडलीम हार निक्शी पा वोइक्चा कली दारीमपुकी,

14 बोसपुकी राप्पाइशो वोइक्तीके नु बोसपुकी,

15 मेको दोम्ली माइशो ठेयब चिकतीके नु मेको आ राप्पाइक्तीके डा १२ ओटा ब्यफपुकी,

16 ग्योबपुकी, बेल्लापुकी, श्ये गुंडतीक कांटापुकी नु मेकेर माल्शो मारेड मारेड सोलोमनम अरेशो खोदेशो पा हुराममी परमप्रभु यावे आ खिं कली सेल्शो नेल्ल टल्केपपाइशो कांसा के बाक्मा बाक्त।

17 मिनु पिपमी मेको नेल्ल यर्दन डा दिम डा खपीम, सुक्कोथ नु सेरेदाह सहर आस दातेम यपाइशो सेल्पाइशो बाक्माक्त।

18 मोपा सोलोमनमी मेकेर शुश कांसा के सेल्तीके सेल्पदा बाक्त। मेको कली दोशो कांसा माल्दमे, मेको मतुइशो बाक्मा बाक्त।

19 मिनु सोलोमनम परमप्रभु आ खिं कली माल्तीक मारेड मारेड सुन के चढेतीके, कोंडतीक शोब्ले वोइक्तीके टेबलपुकी सेल्पदा बाक्त।

20 मिनु मोसाम देशो खोदेशो पा नेल्ल क्येडा चोवखो कोठा आ डोंडती दाचा कली क्येख सुन के बत्ती दातीक नु आन तेल वोइक्तीके सेल्पदा बाक्त।

21 मेकोमी क्येख सुन के फू, तेल वोइक्तीके नु थनारोपुकी,

22 क्येख सुन के सल्दो क्योरतीके, बोसपुकी नु डाडुपुकी नु मी कुरतीके सेल्पदा बाक्त। मिनु परमप्रभु यावे आ खिं डा लाप्चो, आगा डा नेल्ल क्येडा चोवखो कोठा डा लाप्चो नु ठेयब बाक्तीक डा लाप्चो नेल्ल सुन के सेल्पदा बाक्त।

## 5

कबल पशो सन्दोस चाक्शो

1 मिनु सोलोमनम परमप्रभु यावे आ खिं कली पशो गेय नेल्ल थुमा नोले, आ आफ दाऊदमी परमप्रभु यावे कली गेशो नेल्ल चाक्गा बाक्त। मेको सुन चांदी नु ग्योब नेल्ल मारेड मारेड परमप्रभु आ खिं डा शोप वोइक्तीकेमी वोइक्पदा बाक्त। १इतिहास १८:११; १इतिहास २९:२-४

2 मिनु नोले सोलोमनम परमप्रभु यावे आ कबल पशो सन्दोस दाऊद आ सहर सियोन रे चाक्चा कली इस्राएल डा खाल्पापुकी, इस्राएली आन थर थर डा ठेयब मुर नेल्ले नु इस्राएली आन खिं खिं डा ठेयब मुर आन कली यरूसलेममी बुक्चा, दे ब्रेत्तीमी बाक्त।

3 मिनु इस्राएल डा खुम्सीशो मुर नेल्ल ७ महिना डा चाड नाक्ती पिप आ डोंडती जाक्मा बाक्त। लेवी २३:३४

4 मिनु इस्राएल डा खाल्पा नेल्ल जाक्मानु, लेवीपुकीम कबल पशो सन्दोस कुरमे बाक्त।

5 मिनु चढेबपुकी नु लेवीपुकीम सन्दोस, गुप्तीक ताम्बु नु ताम्बुम बाक्शो ग्योब परमप्रभु आ मारेड मारेड थोवक कुरशा, इर लदमे बाक्त।

6 मिनु पिप सोलोमन आ डोंडती बुक्शो इस्राएल डा मुर नेल्ले मेको कबल पशो सन्दोस आ डोंडती बाक्शो बाक्मा बाक्त। मिनु मेकोपुकीम हिकने मचाप्चा डा पा शुश ब्यफ नु भेडा चढेमे बाक्त।

7 मिनु नोले चढेबपुकीम परमप्रभु यावे आ कबल पशो सन्दोस आ बाक्तीक परमप्रभु यावे आ खिं आ आगा डा नेल्ल क्येडा चोवखो कोठाम चाक्शा करूब आस फ्रां आगाम वोदमे बाक्त।

8 मेको करूब आस फ्रां मेको कबल पशो सन्दोस बाक्तीक आ तारी प्राक्शो बाक्सा बाक्त। मोपा मेको करूब निक्शीमी आस प्राक्शो फ्रांम कबल पशो सन्दोस नु आ कोक्के सुम्शो बाक्सा बाक्त।

9 मेको कोक्के चहिं थम लाइशो बाक्तीके नेल्ल क्येडा चोवखो कोठा रे ठेयब बाक्तीकेम तांइसीशो बाक्माक्त। तन्न मेको लाइगा रे मतांइसीबाक्माक्त। मेको मुल सम्म यो बाक्नीम।

10 मोसामी होरेब डांडाम मेको कबल पशो सन्दोस आगा वोइशो फुल्लु निक्शी क्येडा लाक्शा, अरु मारेड मबाक्माक्त। मेना परमप्रभु यावेमी इस्राएली इजीप्ट प्रोंडशा गाक्मानु, कबल पशो बाक्माक्त। ब्यवस्था १०:५; हिब्रू ९:४

11 मिनु चढेबपुकी नेल्ल क्येडा चोवखो कोठा रे गूमा बाक्त। मेकेर बाक्शो चढेब नेल्ले आन पालो मरिम्थुन परमप्रभु यावे आ डोंडती जाक्चा कली ठीक सेल्सीशो बाक्मा बाक्त। १इतिहास ८:१४; लूका १:८-९

12 मिनु कुम्सो पाइब लेवी नेल्ल, आसाफ, हेमान, येदुथून नु मेको आन तोपुकी, मेको आन खिं खिं डा वोंडश मुर नेल्ल रिम्शो पा किरशो श्येले रे प्रोवशो सुती वा फेक्सीशा बुक्केल, ठेयब नु आइक्च तार पाइशो ताप्तीके कुरशा चढेतीक आ पूर्व गे राम्मा बाक्त। मिनु मेकोपुकी नु सहे का २० जना चढेब यो बाक्मा बाक्त। मिनु मेकोपुकी चहिं तुराही ताप्ब बाक्मा बाक्त। १इतिहास १५:१९; १इतिहास १६:३७; १इतिहास १६:४१-४२

13 मिनू तुराही तापबपुकी नु कुम्सो पाइबपुकीम खाल का डा सेंदा पा “परमप्रभु यावे, गे ठेयब बाक्नीनी। गे रिम्शो पाइब बाक्नीनी” दे कुम्सो पतीक मेको आन गेय बाक्माक्त। मिनू मेकोपुकीम तुराही, बुपकेल नु अरु तापतीक तापशा, परमप्रभु यावे कली “गे रिम्शो पाइब बाक्नीनी। इन दाक्तीके गेना हना यो लीब” दे कुम्सो पामे बाक्त। मिनू परमप्रभु यावे आ खिं गोस्सुम ब्रीमाक्त। ?इतिहास १६:३४; भजन संग्रह १०६:१

14 मिनू मेको गोस्सुम खिं ब्रीतीके चढेबपुकीम गेय पने मचापमे बाक्त। मारदे हना परमप्रभु यावे आ खिं आ छेडछेडम ब्रीशो बाक्माक्त। ?इतिहास ७:१-३; प्रस्थान ४०:३५

## 6

सोलोमनम परमप्रभु नु लोत्र पशो

१राजा ८:१२-५३

- 1 मिनू सोलोमनम “परमप्रभु यावे, गे ‘गो थम क्येर गोस्सुम बाक्नुड’ देशो बाक्तीनी।
- 2 गो इन कली गेना हना यो बाक्का कली थम दारशो खिं का सेल्ता” देमाक्त।
- 3 मिनू नोले पिप खुम्सीशो इस्त्राएली गे हिरशा, नेल्ल आन कली आसीक गेमी बाक्त। मेना मुर नेल्ले राप्शो बाक्का बाक्त।
- 4 मिनू मेकोमी “परमप्रभु यावे, इस्त्राएली आन परमप्रभु, गे ठेयब बाक्नीनी। गे आं आफ दाऊद नु देशो लोत्र मुल खापशो बाक्नीनी।
- 5 गे आं आफ दाऊद कली ‘गो आं मुर आन कली इजीप्त रागी रे ग्रुंइशा चाक्गुमी रे मुल सम्म आं नें चोइक्चा नु आं खिं सेल्चा कली इस्त्राएल डा तेकोड थर आन सहर मयोवडु। मिनू गो आं मुर इस्त्राएली आन कली सासन पपाइक्चा कली पिप मयोवडु।
- 6 तन्न गो आं नें कली मान पचा, दे यरूसलेम कली योव्रता। मिनू दाऊद कली आं मुर इस्त्राएली आन पिप दुम्चा कली योव्रता’ देशो बाक्तीनी।
- 7 आं आफ दाऊदम परमप्रभु यावे, इस्त्राएली आन परमप्रभु आ नें कली मान पा खिं का सेल्चा कली थुं पशो बाक्माक्त। रसामुएल ७:२-१३
- 8 तन्न परमप्रभु यावे, गे आं आफ दाऊद कली ‘गे आं नें कली मान पा खिं का सेल्चा थुं पाप्तीवी। मेको रिम्शो बाक्ब।
- 9 गो हना यो गे मेको सेल्चा मदुम्नेवे। तन्न इ तौम आं नें कली मान पा खिं का सेल्चा माल्ब’ दे माइशो बाक्तीनी।
- 10 मुल परमप्रभु यावे, गे इन देशो लोत्र खाप्तीनी। परमप्रभु यावे, गे इन लोत्र खोदेशो पा गो आं आफ दाऊद आ पा डा पिप दुम्ती। मिनू गो इस्त्राएल डा पिप आ ठेयब नित्तीकेम निशो बाक्नुड। मिनू गो परमप्रभु यावे, इस्त्राएली आन परमप्रभु, इन नें कली मान पा एको खिं सेल्ता। जकरिया ४:९
- 11 मिनू गो इन कबल पशो सन्दोस मेको आगाम वोइक्ता। परमप्रभु यावे, इन इस्त्राएली नु पशो कबल आगाम बाक्ब” देमाक्त। ब्यवस्था ९:९; ब्यवस्था १०:५

परमप्रभु आ खिं जिम्मा गेशो

- 12 मिनू सोलोमन परमप्रभु यावे कली चढेतीक आ डोंइती नु इस्त्राएल डा खुम्सीशो मुर नेल्ल आन डोंइती राप्शा, आ गुड निम्फा पोक्का बाक्त।
- 13 सोलोमनम ५ कुबीत लाइशो, ५ कुबीत ब्रेम्शो नु कुबीत सां ग्येत्थ लाइशो कांसा के राप्तीक का सेल्पाइश, लाडगा आ दातेम वोइशो बाक्माक्त। मिनू मेको तार राम्माक्त। मिनू नोले खुम्सीशो इस्त्राएली नेल्ल आन डोंइती आ पोक्च थैक्शा, आ गुड सरीड गे पोक्का बाक्त। कुबीत का ०.५ मिटर बाक्ब।
- 14 मिनू मेकोमी “परमप्रभु यावे, इस्त्राएली आन परमप्रभु, सरीड नु रागीम इन खोदेशो सुइ मबाक्नीम। गे कबल खापब बाक्नीनी नु इन कली नेल्ल थुंम खोइक्ब इन वाइल आन कली गे गेना हना यो दाक्नीनी।
- 15 गे इन वाइल, आं आफ दाऊद कली देशो लोत्र खाप्तीनी। इन देशो लोत्र मुलाक्त पाइतीनी।
- 16 मोपतीके परमप्रभु यावे, इस्त्राएली आन परमप्रभु इन गेय पाइब, आं आफ दाऊद कली देशो लोत्र खपीन। मार देशो लोत्र खपीन देशा हना, इस्त्राएली आन कली सासन पचा कली गेना हना यो इ मुर बाक्ब। गे आं डोंइती गाक्शो खोदेशो पा इ आलपुकीम आं अरेशो लोत्र पांमेक्म हना, इस्त्राएल डा ठेयब नित्तीकेम पिप दुम्चा कली गेना हना यो इ मुर का बाक्ब’ देशो बाक्तीनी। रसामुएल ७:१६
- 17 मिनू मुल परमप्रभु यावे, इस्त्राएली आन परमप्रभु, इन गेय पाइब दाऊद कली देशो लोत्र थमा दुम्पतीन।
- 18 मिनू मार, परमप्रभु थमा पा मुर नु रागीम बाक्का डा? सरीड नु स्वर्गम इन कली मरिक्ब हना, इन कली सेल्शो खिंम इन कली दोपा रिक्का डा? ?इतिहास २:५
- 19 इन गेय पाइब, आं पुंइशो, आं पशो लोत्र नेनीन। परमप्रभु यावे, आं परमप्रभु, आं ब्रेशो नु आं प्रार्थना नेनीन।
- 20 मिनू इन देशो लोत्र खोदेशो पा इन नें कली मान पचा कली सेल्शो बाक्तीक, एको खिं कली नाक्दो नाक्ती कोव्रडीन। मिनू इन खिं गे कोव्रशा पुनुनु, आं लोत्र नेनीन।
- 21 मिनू इन गेय पाइब नु इस्त्राएली, इन मुरुम एको खिं गे कोव्रशा पुन्नेनु, इन स्वर्ग डा बाक्तीक रे नेनीन। मिनू नेंशा मेको आन पाप क्याम्दीन।
- 22 सुइम अरु मुर कली पाप पशो बाक्त हना, कसम जचा माल्ताक्ब हना, मेको मुर कली इन कली चढेतीक नु इन खिं आ डोंइती कसम जपाइक्तेक्म हना, ब्यवस्था २७:२६; प्रस्थान २२:१०

23 गे स्वर्ग रे मेको नेंशा, मार पचा माल्वा, मेको पने। मिनु इन गेय पाइब आस दातेम निसाफ पने। दोस ताइब कली सजाइ गेने। मिनु दोस मताइब कली प्रोनीन। दोपा ठीक पवा, मेको आ पशो खोदेशो पा, मेको कली गेने।

24 मिनु इस्राएली, इन मुरपुकीमी इन कली पाप पशा, आन जोरी सत्रु नु लडाइ पा बुन्तेकम हना, तन्न एको इन खिं जाक्शा, इन नें थिशा, इन कली पुंइशा, इन गे लेतेकम हना, ब्यवस्था २८:२५

25 गे स्वर्ग रे मेको आन पुंइशो नेनीन। मिनु इस्राएल डा मुर आन पाप क्याम्दीन। मिनु गे मेको आन कली नु आन किकी पिपी आन कली गेशो रागीम लेशशा चाक्कीन।

26 मिनु मेकोपुकीम इन कली पाप पतीके, रेउ मयित हना, मेकोपुकीम इन बाक्तीक गे कोव्रशा, इन कली पुंइनीम। मिनु गे मेको आन कली सजाइ गेब परमप्रभु बाक्नीनी, दे तुडक्नीम। मिनु आन पाप रे लेशशा, इन कली पुंइतेकम हना, ब्यवस्था २८:२३-२४

27 गे, स्वर्ग डा बाक्तीक रे मेको आन पुंइशो लोव्र नेनीन। मिनु इन गेय पाइब, इस्राएली आन पाप क्याम्दीन। गे मेको आन गाक्चा माल्शो रिम्शो लां कोंइदीन। मिनु गे इन इस्राएल डा मुर आन कली गेशा आन थेशो रागीम रेउ थिपतीन।

28 मिनु रागीम अन्काल तुम्न हना, मुरपुकी बेक्तीक रोइ पाम्तेकम हना, चेरब सोव्रतीक रोइ जाक्त हना, बुंखी डाइक्ताक्व हना, सल्हा सोंपु जोम्तेकम हना, आन जोरी सत्रुम आन बाक्तीक पुम्ताकम हना, दोदेंब हिंचा डा श्येत नु रोइ बोक्त हना यो,

29 इन इस्राएल डा मुर नु अरु सुइम आन श्येत इन कली शोव्रशा, एको खिं गे कोव्रशा, आन गुइ पोक्शा, इन कली पुंइतेकम हना,

30 गे, इन मुर आन पुंइशो इन स्वर्ग डा बाक्तीक रे नेनीन। मिनु मेको आन पाप क्याम्दीन। गे इन मुर आन थुं तुइशो खोदेशो पा रिम्शो कली रिम्शो नु मरिम्शो कली मरिम्शो पने। मारदे हना गे ला मुर आन थुं तुइक्व बाक्नीनी। भजन संग्रह १३९:१-४, २३

31 मोपा इन कली मान पा हिंशा, मबेक्मा सम्म इन लां गाक्शा नु इन गेशो आन किकी पिपीम थेशो रागीम रिम्शो पा बाक्नीम।

32 मिनु इन मुर, इस्राएली मबाक्थु, अर्को रागी डा मुरपुकीम डोन रागी रे जाक्शा, इन ठेयब नें, इन सक्ति नु इन वारच पतीके नेंशा, एको खिं गे कोव्रशा, पुंइतेकम हना,

33 गे, इन स्वर्ग डा बाक्तीक रे मेको आन पुंइशो नेंशा, मेको अर्को रागी डा मुर आन पुंइशो गेने। मोपा इस्राएली खोदेशो पा रागी डा मुर नेल्लेमी इन कली तुइशशा, इन कली मान पा हिंनीम। मिनु मेकोपुकीम आं सेल्शो खिंम गे थमा पा बाक्नीनी, दे तुडक्नीम।

34 मिनु इन मुरपुकीम आन जोरी सत्रु नु लडाइ पचा कली तेको लां रे सोइक्ताक्नी हना यो, इन योव्रशो सहर नु गोम इन कली मान पा सेल्शो खिं गे कोव्रशा, पुंइतेकम हना, दानीएल ६:११

35 गे मेको आन पुंइशो लोव्र इन स्वर्ग डा बाक्तीक रे नेंशा आन माल्शो गेशा वारच पने।

36 मिनु मेकोपुकीमी इन कली पाप पाम्तेकम हना, मारदे हना पाप मपाइब सुइ मबाक्नीम। गे मेको आन कली तशा गाइशशा, मेको आन कली आन जोरी सत्रु आन गुइमी गेतीनी हना, मेकोमी मेको आन कली ग्याइशशा, डोन रागी हना यो, आन नेक्था डा रागी हना यो लाइशशा, चोक्तेकम हना,

37 मिनु मेको रागीमी मेको आन थुं इन गे लेशशा, मेकोपुकीम 'गो पाप पाइतक, गो दूली पाइतक, गो काइ मरिम्शो पाइतक' देशा, दानीएल ९:५

38 मिनु मेको रागीम आन थुं नेल्लेमी इन गे लेशशा, आन किकी पिपीम थेशो रागी, इन योव्रशो सहर नु गो इन कली मान पचा कली सेल्शो खिं गे कोव्रशा, इन कली पुंइतेकम हना,

39 इन स्वर्ग डा बाक्तीक रे मेको आन पुंइशो लोव्र नेनीन। मिनु मेको आन माल्शो गेन। आन पशो पाप नेल्ल क्याम्दीन।

40 मुल आं परमप्रभु, मेको खिं रे इन मुर आन लोव्र नेंशा कोव्रडीन। मिनु आन पुंइशो नेनीन।

41 परमप्रभु यावे, परमप्रभु, मुल बोक्कीन। गे नु इन सक्ति डा कबल पशो सन्दोस इन नाइशशा बाक्तीकम जाक्कीन। परमप्रभु यावे, परमप्रभु, इन कली चढेबपुकीम इन मुर आन कली पाप क्याम्तीक गेय पपतीन। मिनु इन कली थमा सुइक्व इन रिम्शो पशो तशा ग्येरसमल। भजन संग्रह १३२:८

42 परमप्रभु यावे, परमप्रभु, गे इन तेल लुक्शो मुर, आं कली मप्रोंइयीनी। इन गेय पाइब दाऊद कली पशो इन गेना हना यो दाक्तीक मिम्तीन” दे सोलोमनम परमप्रभु कली देंमाक्त। भजन संग्रह ८९:४-५

## 7

परमप्रभु आ खिमी चाड मानेशो

१ राजा ८:५४-६६

1 मिनु सोलोमनम मेको पुंइने थुमा नोले सरीड रे मी यिमाक्त। मिनु मेको मीम चोशा चढेशो नु अरु चढेशो नेल्ल नेक्गा बाक्त। मिनु परमप्रभु यावे आ छेडछेडम आ खिं कली ब्रीमाक्त। लेवी ९:२४; १ राजा १८:३८; प्रस्थान ४०:३४

2 मिनु परमप्रभु यावे आ खिं आ छेडछेडम ब्रीतीके, चढेबपुकी परमप्रभु यावे आ खिं ओवने मयबमे बाक्त।

3 इस्राएली नेल्लेमी मेको मी यिशा नु परमप्रभु यावे आ खिं आ तार छेडछेड बाक्शो तामे बाक्त। मेकोपुकीमी खप सम्मन बाप्शा “परमप्रभु यावे, गे रिम्शो पाइब बाक्नीनी। इन दाक्तीके गेना हना यो लीब” देशा, ठेयब सल्मे बाक्त। २इतिहास ५:१३-१४; भजन संग्रह १०६:१

4 मिनु नोले पिप नु मुर नेल्लेमी परमप्रभु यावे आ डोंइती चढेमे बाक्त।

5 मिनू पिप सोलोमनम २२ हजार ब्यफ नु लाख का, २० हजार भेडा चढेवा बाक्त। मोपा पिप नु मुर नेल्लेमी मेको खिं परमप्रभु कली जिम्मा गेमे बाक्त।

6 चढेब आन पालो खोदेशो पा बाक्मा बाक्त। लेवीपुकी परमप्रभु यावे कली ताप्तीक ताप्चा कली आन ताप्तीके शेशा बाक्मा बाक्त। पिप दाऊदम मेको ताप्तीकपुकी परमप्रभु यावे कली ठेयब सेल्चा कली “आ दाक्चा गेना हना यो लीब” दे कुम्सो पचा कली, परमप्रभु यावे कली ठेयब सेल्ची ना कली सेल्शो बाक्माक्त। मिनू लेवीपुकीमी कुम्सो पामे बाक्त। चढेबपुकी कोव्रमुशा तुराही ताप्मे बाक्त। मेना इस्राएली नेल्ल राप्शा बाक्मा बाक्त। २इतिहास ४:१

7 मिनू नोले सोलोमनम परमप्रभु यावे आ खिं आ डोंइती डा लाडगा परमप्रभु कली जिम्मा गेवा बाक्त। मिनू मेकेर चोशा चढेतीक चढेवा बाक्त। दुशा बाक्चा आ पबंम चढेशो आन बोंसो यो चढेवा बाक्त। मारदे हना मेको आ सेल्शो कांसा के चढेतीकेम चोशा चढेशो, अन्न चढेशो नु बोंसो चढेचा कली मरिक्ता बाक्त। २इतिहास ४:१

8 मेना सोलोमनम ७ नाक्ती सम्म चाड सेला बाक्त। मिनू इस्राएली नेल्ले मेको नु बाक्मा बाक्त। लेबो-हमाथ रे इजीप्त डा खोला सम्म शुश मुरुमी ७ नाक्त सम्म चाड मानेमे बाक्त।

9 मिनू मेकोपुकीमी ८ नाक्तीम परमप्रभु यावे कली ठेयब गुम्तीक का सेल्मे बाक्त। मारदे हना मेकोपुकीम चढेतीक डा जिम्मा गेतीके ७ नाक्त सम्म मानेमे बाक्त। मिनू नोले ७ नाक्त डा चाड यो मानेमे बाक्त। गन्ती ७:१०

10 मिनू ७ महिना डा २३ नाक्तीम सोलोमनम मुर आन कली आन खिं खिं सोडक्तीमी बाक्त। मेकोपुकी थुं नाइरशा, थम ग्येरसीशा लमा बाक्त। मारदे हना परमप्रभु यावेमी दाऊद, सोलोमन नु आ मुर आन कली थम रिम्शो पवा बाक्त।

11 मो पा सोलोमनम परमप्रभु यावे आ खिं नु आ दरवार सेल्ने थुमा बाक्त। मिनू परमप्रभु यावे आ खिं नु आ खिं सेल्चा थुं पा रिम्शो पा थुमा बाक्त।

परमप्रभुमी लोव्र पशो

१राजा १:१-९

12 मिनू नोले परमप्रभु यावे नाकदो सोलोमन आ डोंइती तपांडसीशा, मेको कली “गो इ पुंडशो लोव्र नेंता। मिनू गो मेको खिं मुरपुकीमी आं कली मेकेर चढेचा कली योव्रता। ब्यवस्था १२:५-६; यसैया ५६:७; मर्कूस ११:१७; यूहन्ना २:१६

13 गो सरीड कली चोक्शो खोदेशो पा रेड मपिपाइक्ता हना, गो रागी कली खतम पोक्चा कली सल्हा सोइक्ताकड हना, आं मुर आन दातेम बेक्तीक रोड पपाइक्ता हना,

14 मिनू आं मुरपुकी ब्रेम्शो दुम्शा, आं कली पुंडशा, आं कली माल्तेक्म हना, आन मरिम्शो लां रे लेत्तेक्म हना, गो स्वर्ग रे मेको आन पुंडशो नेंनुड। मिनू मेको आन पाप क्याम्नुड। मिनू गो मेको आन रागी कली डोंइती डा खोदेशो पा रिम्शो सेल्नुड।

15 मिनू मेको बाक्तीकेमी मुरपुकीम आं कली पुंडशो लोव्र गो कोव्रशा नोफा दाइक्नुड। २इतिहास ६:४०

16 मारदे हना गो आं नें गेना हना यो बाक्चा कली एको खिं कली योव्रता। एको आं के ला बाक्ब। गो मेको कली कोव्रनुड। आं थुं गेना हना यो मेकेर बाक्ब।

17 मिनू गे चहिं इ आफ दाऊद आं डोंइती गाक्शो खोदेशो पा गाक्तेवे नु आं इन कली शेंशो फुल्लुम मुशा ब्रेक्शो लोव्र नु आ निसाफ पतीक लोव्र नेल्ल पाप्तीवी हना,

18 गो इ राज्य बोल्यो नु ठेयब सेल्नुड। गो इ आफ दाऊद कली कबल पशो खोदेशो पा इ कली यो “गेना हना यो इस्राएली आन कली सासन पचा कली इ खिं डा मुर का बाक्ब” दे कबल पाइनुड। २इतिहास ६:१६

19 तन्न गे नोले शोंइसीशा, गो इ डोंइती वोइरशो आं फुल्लुम मुशा ब्रेक्शो लोव्र नु आं शेंतीके मटिप्तीवी हना, नु लशा अर्को देवी देवता आन कली सेड पा पूजा पाप्तीवी हना,

20 गो इन कली गेशो रागी रे गुंडनुड। मिनू गो आं नें बाक्शो खिं प्रोंइनुड, काइ मकोव्रनुड। मिनू गो एको कली जात जात डा मुर आन दातेमी खिसी नु शुक्शी पाइक्तीक सेल्नुड। ब्यवस्था २८:६३; १राजा १४:१५

21 मिनू एको खिं आ पबंम मार देनीमी? मुल ठेयब दारशो बाक्ब। तन्न नोले एको लां रे गाक्ब मुर नेल्ल छक लाक्शा ‘मारदे परमप्रभु यावेम एको रागी नु एको खिं ओदेशो सेला?’ दे हिल्लो पाइनीम। ब्यवस्था २९:२३-२८; येरमीया २२:८-९

22 मिनू लेंशा मुरपुकीम ‘मारदे हना मेकोपुकीमी परमप्रभु यावे, आन किकी पिपी आन परमप्रभुमी मेको आन कली इजीप्त रे गुंडशा चाक्ब परमप्रभु यावे कली प्रोंइतेक्म। मिनू अर्को देवी देवता आंम के सेल्शा, पूजा पा गेय पाम्तेक्म। मोपतीके परमप्रभु यावेमी मेको आन कली मोदेशो श्येत गेत्तु’ दे लोव्र लेत्तीम” देमा बाक्त।

## 8

सोलोमन आ अरु पतीके

१राजा १:१०-२८

1 मिनू सोलोमनम परमप्रभु यावे आ खिं नु आ दरवार सेल्चा कली २० बर्स माल्दा बाक्त।

2 मिनू पिप हुरामम सोलोमन कली सहरपुकी गेवा बाक्त। मिनू सोलोमन मेको सहर आन कली लेंशा सेला बाक्त। मेकेर इस्राएल डा मुर आन कली बाक्पाइक्मी बाक्त।

3 मिनू सोलोमन हमाथ-सोबा लशा, लडाइ पा मेको आ के सेला बाक्त।

4 मिनू गोरशो रागीमी तदमोर माइरशो सहर सेला बाक्त। मिनू हमाथम यो मार मार वोइक्तीक सहरपुकी सेला बाक्त।

5 मेकोमी आइक्था डा बेथ-होरोन नु आइदी डा बेथ-होरोन यो सेला बाक्त। मिनू गारो हिरशो, ठेयब लाप्चो वोइरशो नु आग्लो पाइरशो बोल्यो सहर दुम्मा बाक्त।

6 मेकोमी बालाथ सहर नु सोलोमन आ मार मार वोइक्तीक सहरपुकी सेला बाक्त। मिनु बग्गी वोइक्तीक सहर नु शारा आन कली वोइक्तीक सहरपुकी सेला बाक्त। मेकोमी यरूसलेम, लेबानोनम नु आ राज्य नेल्लेमी आ दाक्शो खोदेशो पा सहरपुकी सेला बाक्त।

7 हित्ती, एमोरी, परिज्जी, हिर्वी नु यबूसी इस्राएली मबाक्शो मुर,

8 आन चच युड इस्राएल रागीम लीशो बाक्मा बाक्त। मारदे हना मेको आन कली मसाइक्थु, ब्रोंडचा गेशो बाक्मा बाक्त। मिनु सोलोमनम मेको आन कली वाइल सेल्शा, गेय पपदा बाक्त। मेको मुल सम्म मोदेशोन बाक्नीम। यहोसु १६:१०

9 तन्न सोलोमनम इस्राएल डा मुर रे मोदेशो वाइल गेय पचा कली सुड मलदा बाक्त। मेको आन कली लडाइ पाइब, आन टेयब मुर, आ बग्गी चलेब नु शारा डोइक्ब आन कप्तान सेल्मी बाक्त।

10 पिप सोलोमन के सहे निक्की ५० जना अधिकार पाइश्शो मुर बाक्मा बाक्त। मेकोपुकी मुर आन कली कोव्रब बाक्मा बाक्त।

11 मिनु सोलोमनम फाराओ आ तमी कली दाऊद आ सहर रे मेको कली सेल्शो खिम चाक्गा बाक्त। मारदे हना मेकोमी “आं मीश इस्राएल डा पिप दाऊद आ खिमी बाक्चा मदुम्ब। मारदे हना मेको परमप्रभु यावे आ कबल पशो सन्दोस बाक्शो, परमप्रभु आ बाक्तीक ला बाक्ब” देंमाक्त। १राजा ३:३

12 मिनु नोले सोलोमनम परमप्रभु यावे आ खिं डा पिंडी आ डोंइती वोइश्शो आ सेल्शो चढेतीकेम परमप्रभु यावे कली चोशा चढेतीके चढेवा बाक्त। २इतिहास ४:१

13 मोसा आ अरेशो खोदेशो पा नाइक्तीक नाक्ती, औंसी नाक्ती, बर्स डा चाड सां बोरब ओरुस्ती मसुप्पो जिज शोब्ले जतीक चाड, ७ नाक्त डा चाड नु गोठ सेल्शा बाक्तीक चाड मानेतीक नु नाक्त किंत किंत चढेचा माल्शो चढेतीक चढेवा बाक्त। लेवी २३:-; गन्ती २८:२,४,११,१७,२६; गन्ती २९:१२

14 सोलोमन आ आफ दाऊदम ब्रेक्शो अरेशो लोत्र खोदेशो पा, तेको चढेबम गेना चढेचा माल्बा, आन पालोम पतीक गेय नेल्ल देशो बाक्माक्त। मिनु लेवीपुकीमी परमप्रभु यावे कली टेयब सेलतीक कुम्सो पचा कली नु चढेब आन कली वारच पचा कली बाक्मा बाक्त। मिनु लाप्चो खाल पाइब आन कली आन हुल हुल पा योव्रशा, तेको तेको लाप्चोम बाक्चा माल्दा मोपा वोइक्पाइश्शो बाक्माक्त। मारदे हना परमप्रभु आ मुर दाऊद मोदेशो अरेशो बाक्त। १इतिहास २३:- १इतिहास २६:-

15 मिनु चढेबपुकी नु लेवीपुकीम पिप आ अरेशो नेल्ल ठीक पा पामे बाक्त। मोपा मेकोपुकीमी शोंप वोइक्तीक कोठा यो कोव्रडमे बाक्त।

16 सोलोमनम परमप्रभु यावे आ खिं डा जग दोवा रे नेल्ल मथुमा सम्म मोदेशो दुम्माक्त।

17 मेको नोले सोलोमन टेयब समुन्द्र आ नेक्था एदोम रागी डा एर्योन-गेबेर नु एलोथ लमाक्त।

18 मिनु पिप हुराममी आ गेय पाइबपुकी, आ जहाजपुकी नु जहाज चलेब आन कली सोलोमन कली वारच पचा कली टेयब समुन्द्रम सोइक्ता बाक्त। मेकोपुकी सोलोमन आ गेय पाइबपुकी नु ओफीर लशा, ४ सहे ५० टलेन्ट सुन ग्याप्शा चाक्शा, पिप सोलोमन कली गेमे बाक्त। टलेन्ट का ३४ किलो बाक्ब।

## 9

शेबा डा पिपीम जाक्शो

१राजा १०:१-१३

1 शेबा डा पिपीममी सोलोमन आ शुश नें चलेशो नेना बाक्त। मिनु मेकोमी सोलोमन कली नाक्चा कली लेन्ने मचाप्चा डा लोत्र हिल्लो पथ यरूसलेमम जाक्माक्त। मेको शुश मुर नु जाक्शा, शुश दलओठम मस्लापुकी, शुश सुन नु हीरापुकी कुर पा जाक्माक्त। मिनु मेकोमी सोलोमन कली शुम्शा, आ थुम बाक्शो लोत्र नेल्ल हिल्लो पवा बाक्त। मत्ती १२:४२

2 मिनु सोलोमनमी आ हिल्लो पशो लोत्र नेल्ल लेत्ता बाक्त। मेकोमी तेको लोत्र हिल्लो पवा, मेको लोत्र सोलोमनम मारोइ श्येत मलाक्थु, लेत्ता बाक्त।

3 मिनु शेबा डा पिपीममी सोलोमन आ रुप्तीक थुं नेल्ल तशा, मेको आ सेल्शो खिं,

4 मेको आ टेबल डा जचा थोव्रक, मेको आ एर ओंथ निश्शो आ सरकार डा टेयब मुरपुकी, मेको आ गेय पाइब आन दारशो वा, अरु आन फेक्तीके नु पिप कली तूचा गेब आन वा कोव्रस डा कोव्रस दुम्माक्त। मिनु परमप्रभु यावे आ खिं लशा, मेको आ चोशा चदेशो तशा, शुश छक लाक्माक्त।

5 मिनु मेकोमी पिप कली “आं राग्मम इन पतीके नु शुश रुप्तीक थुं आ पबंम नेशो लोत्र नेल्ल थमा बाक्त।

6 तन्न गो जाक्शा, आमा मतडा सम्म मेको आन देशो लोत्र थमा मसुदु। मेकोपुकीमी आं कली इन रुप्तीक थुं आ पबंम नेल्ल लोत्र मशोव्रडमे बाक्त। इच्छा ला शोव्रडमे बाक्त। तन्न गो शुश रुप्तीक थुं पाइश्शो बाक्तीनी।

7 इन मुर ग्येरशो मुर बाक्नीमी। नाक्त किंत किंत इन डोंइती गेय पाइबपुकीम इन रुप्तीक थुं डा लोत्र नेशा, ग्येरसीशो बाक्नीमी।

8 परमप्रभु यावे, इन परमप्रभु टेयब बाक्ब। इन कली तशा ग्येरसीशा आ टेयब नित्तीकेमी इन कली निप्पाइश्शा, आ पा डा पिप सेल्लु। मारदे हना परमप्रभु यावे, इन परमप्रभुम इस्राएली आन कली दाक्शा, गेना हना यो बाक्पाइक्चा थुं पाप्तु। मोपतीके इन कली मेकेर ठीक निसाफ पचा नु ठीक पतीके शेंचा, दे आन पिप सेल्लु” देंमाक्त। १इतिहास २९:२३

9 मिनु नोले मेकोमी पिप कली सहे का २० टलेन्ट सुन शुश मस्ला नु शुश हीरा गेवा बाक्त। शेबा डा पिपीममी सोलोमन कली गेशो मस्लापुकी, थम रिम्शो बाक्शा तेइ मथिंसीब बाक्माक्त। टलेन्ट का ३४ किलो बाक्ब।

10 मिनू मेको नेल्ल प्रॉइशा, पिप हुराम नु सोलोमन आस गेय पाइबपुकीम ओफ्फीर रे सुन चाकगमे बाक्त। मिनू मेकोपुकीमी शुश क्येट लाइब शी नु हीरापुकी यो चाकगमे बाक्त।

11 मिनू पिपमी मेको शी रे परमप्रभु यावे आ खिं नु दरवार कली थेंका सेला बाक्त। कुम्सो पाइब आन कलीं टैयब नु आइक्च तार पाइशशो ताप्तीकपुकी सेला बाक्त। डोंइती मोदेशो रिम्शो शी यहूदा रागीम गेनायो मबाक्शो बाक्माक्त।

12 मिनू पिप सोलोमनम शेबा डा पिपीम कली आ चाक्शा गेशो कोसेली क्येडा यो शुश आ माल्शो मारेड मारेड गेवा बाक्त। मिनू नोले मेको आ गेय पाइबपुकी नु आ रागी लेम्माक्त।

सोलोमन आ शोंप नु आ मान तशो

१ राजा १०:१४-२९

13 सोलोमन आ बाक्तीकेम बर्स काम ६ सहे ६६ टलेन्ट सुन ताक्बाक्माक्त। टलेन्ट का ३४ किलो बाक्ब।

14 मेको प्रॉइशा, आ ग्याप्ब लेयबपुकीमी यो चाक्बाक्मा बाक्त। अराब रागी डा पिपपुकी नु रागी रागी डा सासन पाइबपुकीमी यो सोलोमन कली सुन नु चांदी चाक्बाक्मा बाक्त।

15 मिनू पिप सोलोमनमी तुप्शो सुन के सहे निक्शी लडाइ पाइब आन कलीं टैयब तेक्तीक सेला बाक्त। मेको तेक्तीक का सेल्या कली ६ सहे शेकेल सुन माल्मा बाक्त। शेकेल का ११.५ ग्राम डा चांदी के क्येट बाक्ब।

16 मेकोमी लेंशा तुप्शो सुन के सहे सां आइक्च तेक्तीक सेला बाक्त। मेको तेक्तीक का सेल्या कली सहे सां शेकेल सुन माल्मा बाक्त। मिनू पिपमी मेको नेल्ल लेबानोन ब्वाकी डा खिंम वोइक्पदा बाक्त। १ राजा ७:२

17 मिनू पिपम हात्ती आ दारा के टैयब नित्तीक का सेल्शा, मेको कली क्येख सुनम गिल्पदा बाक्त।

18 मेको टैयब नित्तीके आ डोंइती ६ ओटा थेंका नु सुन के खोइल वोइक्तीक बोंइसीशो बाक्माक्त। मेको टैयब नित्तीक आ निम्फा पटटी गुड वोइक्तीक बाक्माक्त। मेको गुड वोइक्तीक निम्फा पटटी गे राप्शो गुप्स का का सेल्शो बाक्माक्त।

19 मेको ६ ओटा थेंकामी थेंका कामी एर गे गुप्स का, ओंथ गे गुप्स का पा १२ ओटा गुप्स सेल्शो बाक्माक्त। तेकोइ राज्यम मोदेशो टैयब नित्तीके गेनायो मसेल्शो बाक्माक्त।

20 सोलोमन आ तूतीक बोस नेल्ल सुन के बाक्माक्त। मिनू लेबानोन ब्वाकी डा खिं डा बोस नेल्ले क्येख सुन के बाक्मा बाक्त। चांदी के मारेड मसेल्शो बाक्मा बाक्त। मारेदे हना सोलोमन आ पालाम चांदी मारेड खोदेशो मबाक्माक्त।

21 हुराम आ गेय पाइबपुकी पिप सोलोमन आ जहाजपुकी नु टारसीस डा बाक्त। मिनू बर्स सां सांमी मेको पिप आ जहाजपुकीम सुन, चांदी, हात्ती आ दारा, मोरपुकी नु मजुरपुकी चाक्बाक्मा बाक्त।

22 मोपा पिप सोलोमन शोंप पाइशशो नु रुप्तीक थुंम रागी डा पिप नेल्ल आन क्येडा टैयब दुम्माक्त।

23 मिनू परमप्रभुम सोलोमन कली गेशो रुप्तीक थुं डा लोत्र नेंचा कली रागी रागी डा पिप नेल्ले मेको कली गुप्थ जाक्बाक्मा बाक्त।

24 मिनू मेको कली गुप्थ जाक्ब नेल्लेमी सुन नु चांदी के मार मार, फेक्तीक वापुकी, यापुकी, मस्लापुकी, शारापुकी नु खचरपुकी बर्स बर्सम कोसेली चाक्बाक्मा बाक्त।

25 सोलोमन के ४ हजार शारा नु बग्गीपुकी वोइक्तीक खिं बाक्मा बाक्त। मिनू मेको के १२ हजार शारा बाक्मा बाक्त। मेकोमी शारा नु बग्गी आन कली बग्गी वोइक्तीक सहरम नु का निक्शी चहिं आं नु यरूसलेममी वोइक्पाइक्बाक्माक्त।

२ इतिहास १:१४-१७; १ राजा ५:६

26 मेकोमी युफ्रेटीस खोला रे पलिस्ती आन रागी नु इजीप्त आ सांद सम्म सासन पवा बाक्त।

27 पिपमी फुल्लु खोदेशो पा यरूसलेम सहरम चांदी तेला बाक्त। लेबानोन डा टैयब रवा आ शी शेफेलाहम बाक्शो फोव्रशी रवा खोदेशो पा शुश तेला बाक्त।

28 सोलोमन आ शारापुकी चहिं इजीप्त नु अरु नेल्ल रागी रे ग्याप्शा चाक्बाक्मा बाक्त।

सोलोमन बेक्शो

१ राजा ११:४१-४३

29 मिनू पिप सोलोमन आ डोंइती रे डा नोले सम्म पशो नेल्ल परमप्रभु यावे आ लोत्र पाइब नाथान आ इतिहासम मब्रेक्शो बाक्बा डा? मिनू शिलो डा नोले दुम्ब लोत्र पाइब अहीयाहम मब्रेक्शो बाक्बा डा? इददोमी नेबात आ तौ येरोबाम आ पर्वम तशो मब्रेक्शो बाक्बा डा?

30 सोलोमनम यरूसलेमम बाक्शा, इस्राएल नेल्ल कली ४० बर्स सासन पवा बाक्त।

31 मिनू सोलोमन बेक्माक्त। मिनू मुरपुकीम मेको कली आ आफ दाऊद आ सहरमी थिम्मे बाक्त। मिनू मेको आ पा डा आ तौ रेहोबाम पिप दुम्माक्त। १ राजा १४:२१

## 10

पिप रेहोबामम अर्ती मनेंशो

१ राजा १२:१-२४

1 रेहोबाम शेकेमम लमाक्त। मारेदे हना इस्राएली नेल्ल मेको कली पिप सेल्या कली शेकेमम जाक्शो बाक्मा बाक्त।

2 मिनू नेबात आ तौ येरोबामम मेको लोत्र नेनानु, इजीप्त उड बाक्शो बाक्माक्त। मेको सोलोमन पिप क्येडा प्रोक्शा इजीप्त लशो बाक्माक्त। मिनू येरोबाम इजीप्त रागी रे लेम्माक्त।

3 मिनू मुरपुकीम मेको कली ब्रेथ्स सोइक्तमे बाक्त। मिनू मेको नु इस्राएली नेल्ल रेहोबाम आ बाक्तीक जाक्शा, मेको कली



4 “इन आफोम आंड कली हेल्शो गेय पपाइश्शो बाक्त। मुल गे इन आफोम गेशो हेल्शो गेय इच्छा सोपी पाइतीनी हना, गो इन कली गेय पाइतीकी” दैमा बाक्त।

5 मिनु रेहोबामम “आं कली नाक्त सां सम्म मिम्चा गेयीनी। मिनु लेंशा जाक्कीन” दे सोइक्तीमी बाक्त। मोपतीके मुरपुकी लेशशा लमा बाक्त।

6 मिनु नोले पिप रेहोबामम आ आफ सोलोमन ब्रोंडशा बाक्मेनु, अर्ती गेब खाल्पापुकी नु अर्ती पुंडशा “एको मुर आन कली मार लोत्र लेत्तुमी? गे मार अर्ती गेनीनी?” दे हिल्लो पवा बाक्त।

7 मिनु मेकोपुकीम “गे एको मुर आन कली शिशो पा रिम्शो लोत्र पाइतीनी हना, मेकोपुकी गेना हना यो इन गेय पाइब दुम्नीम” दे अर्ती गेमे बाक्त।

8 तन्न मेकोमी मेको खाल्पा आन अर्ती मनेना बाक्त। मिनु आ नु कोल्शो टिटा आन अर्ती पुंडशा

9 “मेकोपुकीम आं आफोम आन कली गेशो हेल्शो गेय सोपी सेल्चा कली पुंडतेक्म। मिनु गो मेको आन कली मार लोत्र लेत्तुमी? गे मार अर्ती गेनीनी?” दे हिल्लो पवा बाक्त।

10 मिनु मेको नु काथा कोल्शो टिटापुकीम “इन आफोम आंड कली हेल्शो गेय गेशो बाक्त। मुल मेको सोपी सेल्शा गेकी, दे पुंडब मुर आन कली ‘आं आइक्च ब्रेप्यो आं आफ आ क्रातो क्येडा टेयब बाक्ब।

11 आं आफोम इन कली हेल्शो गेय पपाइश्शो बाक्माक्त। तन्न मुल गो मेको क्येडा हेल्शो गेय पपाइक्नुड। आं आफोम इन कली कोक्केम तुप्पाइश्शो बाक्माक्त। तन्न मुल गो इन कली बिच्छीम क्राइक्पाइक्वन्नी’ मतीन” दे अर्ती गेमे बाक्त।

12 मिनु येरोबाम नु मेको मुर नेल्ल पिप रेहोबामम देशो खोदेशो पा नाक्त सां नोले रेहोबाम आ बाक्तीकेम जाक्मा बाक्त।

13 मिनु पिपम मेको मुर आन कली मरिम्शो लोत्र पाइमी बाक्त। मारदे हना मेकोमी खाल्पा आन गेशो अर्ती मनेना बाक्त।

14 मिनु मेको टिटापुकीम गेशो अर्ती बिश्शा, मेको आन कली “आं आफोम इन कली हेल्शो गेय गेशो बाक्माक्त। तन्न मुल गो मेको क्येडा हेल्शो गेय गेनुड। आं आफोम इन कली तुप्पाइश्शो बाक्माक्त। तन्न मुल गो इन कली बिच्छीम क्राइक्पाइक्वन्नी” दे माइक्मी बाक्त।

15 मिनु पिपम मेको मुर आन लोत्र मनेना बाक्त। मारदे हना परमप्रभुमी शिलो डा अहीयाह रे पा नेबात आ तौ येरोबाम आ परवम देशो लोत्र खाप्चा कली परमप्रभु यावेम मोदेशो पपाइश्शो बाक्माक्त। १ राजा ११:२९-३१

यहूदा थर नु उत्तर डा इस्राएली ब्राशो

16 मिनु उत्तरम बाक्ब इस्राएलीपुकी नेल्लेमी “पिपम आंड देशो मबिप्ब” दे तुइक्तेम बाक्त। मिनु मेकोपुकीमी पिप कली “दाऊद नु आंड के मार भाग बाक्वा डा? येस्से आ तौ नु आंड के मार बाक्वा डा? गे इस्राएलीपुकी, आम ताम्बुम लने। मुल दाऊद आ खिं डा मुर, गे आंमा इन खिं कली कोवडीन” दैमा बाक्त। मोपतीके इस्राएली नेल्ल आन ताम्बुम लमा बाक्त।

17 तन्न रेहोबामम यहूदा डा सहरम बाक्ब इस्राएली आन कली सासन पा बाक्माक्त।

18 मिनु पिप रेहोबाममी आ गेय पाइब आन कली कोत्रब हदोराम कली मुर आन बाक्तीकेम सोइक्ता बाक्त। तन्न इस्राएलीपुकीम मेको कली फुल्लु आप्शा सदमे बाक्त। मिनु पिप रीब पा द्यु प्रेक्शा आ बग्गी डोइश्शा, यरूसलेम लमाक्त।

19 मिनु मेको नाक्ती रे मुल सम्म उत्तरम बाक्ब इस्राएलीपुकीम दाऊद आ खिं डा मुरपुकी नु मदुथु, सासन पचा मगेशो बाक्नीम।

## 11

रेहोबाम यरूसलेम लेशशो

1 मिनु रेहोबाम यरूसलेमम लेशशा, आम राज्य लेंशा ताक्चा कली यहूदा नु बेन्यामीन थर डा लाख का ८० हजार बोल्यो लडाइ पाइब मुरपुकी इस्राएली नु लडाइ पचा कली खुप्ता बाक्त। १ राजा १२:२१-२४

2 तन्न परमप्रभु यावे आ लोत्र परमप्रभु आ मुर शेमायाह कली जाक्माक्त।

3 मिनु परमप्रभुमी शेमायाह कली “सोलोमन आ तौ यहूदा डा पिप रेहोबाम, इस्राएलम बाक्ब यहूदा डा मुर नु बेन्यामीन डा मुर नेल्ल आन कली,

4 परमप्रभु यावेमी मार देब देशा हना ‘गे इन लोकपुकी नु लडाइ पथ डर डोइश्शा मलने। गे नेल्ल इन खिं लेशशा लने। मारदे हना एको नेल्ल आं रे पा पिशो बाक्ब’ दे माइक्मी” दैमाक्त। मोपतीके मेकोपुकीम परमप्रभु यावे आ लोत्र टिशा, येरोबाम नु लडाइ पचा थुं मपामे बाक्त।

रेहोबामम यहूदा कली बोल्यो सेल्शो

5 मिनु रेहोबाम यरूसलेमम बाक्शा, यहूदा डा सहरपुकी बोल्यो सेला बाक्त।

6 मेकोमी बेथलेहेम, एताम, तेकोहा,

7 बेथ-सुर, सोको, अदुल्लाम,

8 गाथु, मरेशा, जीफ,

9 अदोरैम, लाकीश, आजैका,

10 सोराह, आइयालोन नु हेब्रोन बोल्यो सेला बाक्त। मेको सहरपुकी यहूदा नु बेन्यामीनम बाक्मा बाक्त।

- 11 मिनु मेकोमी मेको सहरपुकी थम बोल्यो सेला बाक्त। मिनु मेकेर कप्तानपुकी योव्रशा वोदा बाक्त। मिनु जचा थोव्रक, तेल, अडगुर शांबु खेक्शा वोइक्पदा बाक्त।
- 12 मिनु मेकोमी सहर नेल्लेम टेयब तेक्तीक नु तूतीकपुकी, तेल्शा वोइक्पदा बाक्त। मिनु मेको सहर नेल्ल थम बोल्यो सेला बाक्त। मोपा मेकोमी यहूदा नु बेन्यामीन आ राज्य बोल्यो सेल्शा सासन पवा बाक्त।
- 13 इस्राएल रागीम ब्राशा बाक्शो चढेब नु लेवीपुकी नेल्ल आन बाक्तीक रे रेहोबाम आ बाक्तीक जाक्मा बाक्त।
- 14 लेवीपुकीम आन बाक्तीक नेल्ले प्रोइशा, यहूदा नु यरूसलेमम बाक्थ जाक्मा बाक्त। मारदे हना येरोबाम नु आ तौपुकीमी मेको आन कली परमप्रभु यावे कली चढेतीक गेय पचा मगेमे बाक्त। २इतिहास १३:९
- 15 मिनु येरोबाममी डांडा डा थानम आ सेल्शो क्यारश आ मूर्ति नु बाछा आन मूर्ति पूजा पचा कली आ चढेब वोइक्पदा बाक्त।
- 16 मिनु सु सुमी परमप्रभु यावे, इस्राएली आन परमप्रभु कली खोइक्चा थुं पशो बाक्मा, मेको इस्राएली नेल्ल परमप्रभु यावे, आन किकी पिपी आन परमप्रभु कली चढेथ यरूसलेम सहरम लमा बाक्त। मिनु लेवीपुकी मेको आन नोले खोदमे बाक्त। १राजा १२:२६-२७
- 17 मेकोपुकीम यहूदा डा राज्य बोल्यो सेल्शा, बर्स सां सम्म सोलोमन आ तौ रेहोबाम कली वारच पदमे बाक्त। मारदे हना मेकोपुकी बर्स सां सम्म दाऊद नु सोलोमन आस रिम्शो लांम गाक्मा बाक्त।
- 18 मिनु रेहोबामम महलाथ कली ग्युंवे पा चाक्गा बाक्त। मेको आ आफ दाऊद आ तौ येरीमोथ नु मेको आ ममा चहिं येस्से आ तौ एलीआब आ तमी अबीहेल बाक्माक्त। १सामुएल १६:६
- 19 मेकोमी रेहोबाम कली येऊशा, शेमारयाह नु चाहम तौ थिवा बाक्त।
- 20 मेको आ नोले रेहोबाममी अब्सालोम आ तमी माकाह कली ग्युंवे पवा बाक्त। मेकोमी अबीयाह, अत्तै, जीजा नु शेलोमीथ थीमी बाक्त।
- 21 मिनु रेहोबाममी आ ग्युंवे पशो मीशपुकी नु अरु मीश आन क्येडा अब्सालोम आ तमी माकाह कली शुश दाक्बाक्माक्त। मेको के १८ जना ग्युंवे पशो मीश नु ६० जना अरु मीश बाक्मा बाक्त। मेको के २८ जना तौ नु ६० जना तमी बाक्मा बाक्त।
- 22 रेहोबामम आ तौ नेल्ल आन दाते डा माकाह आ तौ अबीयाह कली आ नोले, आ पा डा पिप सेल्चा कली मिम्ता बाक्त।
- 23 मिनु मेकोमी रुप्तीक थुं पा अर्को तौ आन कली यहूदा नु बेन्यामीन डा रागी डा बोल्यो सहरम सासन पाइब सेला बाक्त। मेको आन कली मार मार माल्मा, शुश गेशा, मेको आन कली शुश मीश आल, मीश सेल्चा कली चाक्शा गेवा बाक्त। २इतिहास २१:३

## 12

यहूदा कली लडाइ तोशो

१राजा १४:२५-३१

- 1 रेहोबाम आ राज्य बोल्यो दुम नोले मेको सक्ति पाइश्शो दुम्माक्त। मिनु मेकोमी परमप्रभु यावे आ अरेशो लोव्र प्रोना बाक्त। मिनु मेको नु इस्राएली नेल्लेमी यो परमप्रभु यावे आ अरेशो लोव्र प्रोन्मे बाक्त।
- 2 मिनु रेहोबामम पिप पशो ५ बर्स दुम्मेनु, इजीप्त डा पिप शीशक यरूसलेम कली लडाइ तोचा कली जाक्माक्त। मारदे हना इस्राएलीपुकीमी परमप्रभु यावे कली प्रोइशो बाक्मा बाक्त।
- 3 पिप शीशक हजार का सहे निकशी बग्गी नु ६० हजार शारा डोइक्ब लडाइ पाइबपुकी चाक्शा जाक्माक्त। शीशक नु इजीप्त रे हिकने मचाप्चा डा पा लिबीया, सुक्कीम नु एथीयोपीया डा लडाइ पाइब मेको नु जाक्मा बाक्त।
- 4 मिनु मेकोमी यहूदा डा बोल्यो सहरपुकी ग्राना ग्रान यरूसलेम सम्म जाक्माक्त। २इतिहास ११:५-१०
- 5 मिनु परमप्रभु यावे आ लोव्र पाइब शेमायाह नु रेहोबाम यहूदा डा टेयब मुर आन बाक्तीक जाक्सा बाक्त। मेकोपुकी शीशक आ लडाइ तोशो रे ब्रोइचा कली प्रोक्शा, यरूसलेमम बुक्शो बाक्मा बाक्त। मिनु शेमायाहम मेको आन कली “परमप्रभु यावेमी मार दैत देशा हना ‘गेपुकीम आं कली प्रोइतीनी। मोपतीके गो इन कली प्रोइशा, शीशक आ गुडमी गेतन्नी’ देशो बाक्ब” दे माइक्मी बाक्त।
- 6 मिनु इस्राएल डा टेयब मुरपुकी नु पिप आन थुं ब्रेम्शो दुम्शा “परमप्रभु यावेम थमा लोव्र पवा बाक्त” देमा बाक्त।
- 7 मिनु परमप्रभु यावेमी मेको आन थुं ब्रेम्शो दुम्शो तशा, मेको शेमायाह कली “मेकोपुकी ब्रेम्शो दुम्तीके, गो मेको आन कली खतम मसेलनुडमी। तन्न गो मेको आन कली ब्रोइचा गेनुडमी। आं गाइश्शो शीशक आ पतीके रे पा यरूसलेमम ममोइक्नुड।
- 8 मो हना यो मेकोपुकी मेको शीशक आ गेय पाइब दुम्नीम। मोपा मेकोपुकीमी आं कली गेय पचा नु अर्को राज्य डा मुर आन कली गेय पचा गिश फरक दुम्बाक्मे, मेको तुइक्नीम” देशो बाक्माक्त।
- 9 मिनु इजीप्त डा पिप शीशकम यरूसलेम कली लडाइ तोशा ग्राशा, परमप्रभु यावे आ खिं डा शोंप नु पिप आ दरवार डा शोंप लदा बाक्त। मिनु सोलोमन आ सेल्शो सुन के तेक्तीकपुकी यो योल्दा बाक्त।
- 10 मिनु पिप रेहोबामम मेको सुन के तेक्तीक आन पा डा कांसा के तेक्तीक सेल्शा, पिप आ दरवार डा लाप्चो खाल पाइब आन टेयब मुर आन कली जिम्मा गेशा वोइक्पदा बाक्त।
- 11 मिनु पिप परमप्रभु यावे आ खिं ओव्रमेनु, मेको खाल पाइबपुकीम मेको तेक्तीक कुरशा, मेको नु आगा ओव्रबाक्मा बाक्त। मिनु नोले मेकोपुकीम मेको तेक्तीक खाल पाइब आन बाक्तीकेम वोइक्बाक्मा बाक्त।

12 मारदे हना परमप्रभु यावेमी रेहोबाम ब्रेम्शो दुम्शो तशा, मेको आ पर्वम गाडकतीके प्रोना बाक्त। मिनु नेल्ल खतम मसेला बाक्त। मिनु यहूदामी रिम्शो दुम्शो यो बारना बारन लमाक्त। २इतिहास ३२:२६

13 मोपा पिप रेहोबाममी यरूसलेममी आ राज्य बोल्यो सेल्शा, सासन पवा बाक्त। रेहोबाम पिप दुम्मेनु, ४१ बर्स दुम्शो बाक्माक्त। मिनु मेकोमी यरूसलेम सहरम १७ बर्स सासन पवा बाक्त। परमप्रभु यावेम इस्राएल डा थर नेल्ल आन दाते रे आ नें कली मान पा बाक्चा, दे यरूसलेम सहर योव्रशो बाक्माक्त। रेहोबाम आ ममा आ नें नामा बाक्माक्त। मेको अम्मोनी बाक्माक्त। २इतिहास ६:२०

14 रेहोबामम मरिम्शो पवा बाक्त। मारदे हना मेकोमी आ थुं नेल्लेमी परमप्रभु यावे आ नोले मखोदा बाक्त।

15 मिनु रेहोबाम आ डोंइती रे डा नोले सम्म पशो नेल्ल परमप्रभु यावे आ लोव पाइब शेमायाह नु इददोम इतिहासम मब्रेकशो बाक्बा डा? मेकोपुकीम मुर आन किकी पिपी ब्रेक्तसे बाक्त। रेहोबाम नु येरोबाम आस दातेमी गेना हना यो लडाइ दुम्ना दुम्न बाक्माक्त। २इतिहास १३:२२

16 मिनु रेहोबाम बेक्माक्त। मिनु मुरपुकीम मेको कली दाऊद आ सहर, यरूसलेममी थिम्मे बाक्त। मिनु आ तौ अबीयाह पिप दुम्माक्त।

## 13

अबीयाह यहूदा डा पिप दुम्शो

१ राजा १५:३-८

1 येरोबाम पिप पशो १८ बर्स दुम्मेनु, अबीयाह यहूदा डा पिप दुम्माक्त।

2 मेकोमी बर्स सां यरूसलेमम सासन पवा बाक्त। आ ममा गिबा सहर डा उरीएल आ तमी मीकाया बाक्माक्त। मिनु अबीयाह नु येरोबाम आस दातेम लडाइ दुम्ना दुम्न बाक्माक्त।

3 अबीयाहमी लडाइ पचा कली थम बोल्यो ४ लाख लडाइ पाइबपुकी ठीक पवा बाक्त। येरोबामम चहिं ८ लाख बोल्यो लडाइ पाइबपुकी खुप्ता बाक्त।

4 मिनु अबीयाह एफ्राइम डा पहाड रागी डा सेमाराइम डांडाम राप्शा, टेयब सेंदा पा “येरोबाम नु इस्राएल डा मुर नेल्ल, आं लोव्र नेनीन।

5 मार, गे परमप्रभु यावे, इस्राएली आन परमप्रभु दाऊद नु गेना हना यो लीब हिकसी कबल पशो मतुइक्नीनी? मेको कबल मार बाक्ब देशा हना, मेको इस्राएली आन राज्य नेल्ल दाऊद नु आ तौ आन कली गेना हना यो कली गेशो बाक्ब, दे मतुइक्नीनी? लेवी २:१३; गन्ती १८:१९

6 मो हना यो दाऊद आ तौ सोलोमन आ गेय पाइब नेबात आ तौ येरोबामम आ होव्रप कली मटिथु, मेको आ पर्वम मरिम्शो पाप्तु।

7 मिनु शोर गाक्शो मुरपुकी मेको नु बाक्शा, सोलोमन आ तौ रेहोबाम कली शुक्शी पाम्तेक्म। मेना रेहोबाम आइक्च बाक्माक्त। मोपतीके मारेइ पने मचाप्बा बाक्त।

8 मुल गे दाऊद आ तौम सासन पशो, परमप्रभु यावे आ राज्य नु लडाइ पचा कली मिम्शो बाक्नीनी? गेपुकी थमा पा टेयब हुल का बाक्नीनी। मार, गेपुकी नु येरोबामम सेल्शो सुन के बाछापुकी इन देवता दुम्चा कली गे नु बाक्नीमी? गे ग्रासीब, दे मिम्नीनी? १ राजा २२:२८

9 मार, गेपुकीम हारून आ चच युइ परमप्रभु यावे कली चढेब लेवी आन कली खेरशा, आंम मुर आन कली योव्रशा, अर्को रागी खोंदेशो पा चढेबपुकी मसेलीनी डा? सुइ मुरुम चढेब दुम्चा कली बाछा का नु ७ ओटा सांड चाक्शा जाक्त हना, गे मेको कली चढेब सेलीनी। मिनु मेको मारेइ पने मचाप्ब मूर्ति कली चढेब दुम्ब। प्रस्थान २१:४८; २इतिहास ११:१५

10 तन्न परमप्रभु यावे आंइ परमप्रभु बाक्ब। मिनु गोपुकीम मेको कली मप्रोंइक। मिनु परमप्रभु यावे कली चढेब हारून आ चच युइ बाक्नीम। मिनु लेवीपुकीमी मेको आन कली वारच पाइनीम।

11 मेकोपुकीम नाक्दो नु सुनी परमप्रभु यावे कली चोशा चढेतीक चढेनीम। मेकोपुकीम ब्रोव्रशो रिना पाइशशो धूप चोइनीम। मेकोपुकीम कोइतीक शोब्ले लहर पा क्येख सुन के टेबलम वोइक्नीम। मेकोपुकी नाक्दो कुस कुस सुन के बती दातीकेम बती दानीम। मोपा गोपुकीम आंइ परमप्रभु यावेम देशो नेल्ल थमा पा पाइनीकी। तन्न गेपुकीम मेको कली प्रोंइतीनी। गन्ती २८:३-८

12 परमप्रभु गोपुकी नु बाक्शा, आंइ डोंइती गाक्ब। मेको आ चढेब आन तुराही गे नु लडाइ पचा कली ताप्चा चिक्शो बाक्नीम। गे इस्राएली मुरपुकी, गे परमप्रभु यावे, इन किकी पिपी आन परमप्रभु नु लडाइ मपने। गे मग्रानीनी” देमाक्त। गन्ती १०:९

13 येरोबामम नोले रे जाक्शा लडाइ पचा कली हुल का बाप्पाइशशा वोइशशो बाक्माक्त। मिनु मेको आन लडाइ पाइब आन टेयब हुलम चहिं यहूदा नु लडाइ पामे बाक्त। येरोबाम आ बाप्पाइशशो हुल चहिं नोले रे जाक्मा बाक्त।

14 मिनु यहूदा डा मुरपुकीम लेशशा कोव्रडमेनु, लडाइ आन डोंइती नु नोले यो बाक्माक्त, दे तुइक्तमे बाक्त। मिनु मेकोपुकीम “वारच पाइक्की” दे परमप्रभु यावे कली वाइ ब्रेशशा थोव्रमे बाक्त। मिनु चढेबपुकीम आन तुराही ताप्मे बाक्त।

15 मिनु यहूदा डा मुरपुकी लडाइ पचा कली वाइ ब्रेशशा, ग्रीमा बाक्त। मोपा ग्रीमानु, परमप्रभुमी येरोबाम नु इस्राएली नेल्ल आन कली अबीयाह नु यहूदा डा मुर आन डोंइती बुपदा बाक्त।

16 मिनू इस्राएलीपुकी यहूदा डा मुर आन डोंइती रे प्रोकमा बाकत। मिनू परमप्रभुमी मेको आन कली यहूदा डा मुर आन गुडमी गेवा बाकत।

17 मोपा अबीयाह नु आ लडाइ पाइबपुकीम इस्राएली आन कली खतम पोकशा, ग्रामा बाकत। मिनू इस्राएल डा योव्रशो बोल्यो लडाइ पाइब ५ लाख मुर साइक्चा पुंडसमा बाकत।

18 मेना इस्राएलीपुकी बुशा, दिप्चा पुंडसमा बाकत। मिनू यहूदा डा मुरपुकी ग्रामा बाकत। मारदे हना मेकोपुकीमी परमप्रभु यावे, आन किकी पिपी आन परमप्रभु कली थमा सुइशो बाकमा बाकत।

19 अबीयाहमी येरोबाम कली खेदा पवा बाकत। मिनू मेकोमी बेथेल सहर नु आ एर ओंथ डा गाउंपुकी, येशाना सहर नु आ एर ओंथ डा गाउंपुकी नु एफ्रोन सहर नु आ एर ओंथ डा गाउंपुकी आम के सेला बाकत।

20 मिनू अबीयाह आ पालाम येरोबाम लेंशा लडाइ तोने मचबा बाकत। मिनू परमप्रभु यावेमी येरोबाम कली रोइ पपाइश, बेकपदा बाकत।

21 मिनू अबीयाह बोल्यो दुम्माकत। मेकोमी १४ जना मीश चाक्या बाकत। मिनू मेको २२ जना तौ नु १६ जना तमी आन आफ दुम्माकत।

22 अबीयाह आ पशो नेल्ले, दोपा बाकमे मार मार पवा, परमप्रभु यावे आ लोव्र पाइब इददो आ किताबम ब्रेकशो बाकब। २इतिहास १२:१५

## 14

आसा यहूदा डा पिप दुम्शो

१ राजा १५:९-१२

1 मिनू अबीयाह बेकमाकत। मिनू मुरपुकीम मेको कली दाऊद आ सहरमी थिम्मे बाकत। मिनू मेको आ पा डा आ तौ आसा पिप दुम्माकत। मेकोमी सासन पवानु, आ रागीमी १० बर्स सम्म लडाइ मटुम्माकत।

2 मिनू आसामी परमप्रभु यावे, आ परमप्रभु आ डोंइती मार रिम्शो नु ठीक बाकमे, मेकोन पवा बाकत।

3 मेकोमी यहूदामी अर्को रागी डा चढेतीकपुकी नु डांडा डा थानपुकी प्रेशा, खुक्शो फुल्लु नु मूर्ति पाइशो थाम खोल्पाइश ताइक्तीमी बाकत।

4 मिनू मेकोमी यहूदा डा मुर आन कली परमप्रभु यावे, आन किकी पिपी आन परमप्रभु आ माल्शा, आ अरेशो नु आ शेंशो लोव्र नेल्ल पचा, दे सासन पवा बाकत।

5 मेकोमी यहूदा डा नेल्ल सहरम बाक्शो डांडा डा थान नु धूप चोतीके यो प्रेशा गेवा बाकत। मेको आ सासनमी आ राज्य नाइक्चा तवा बाकत। २इतिहास १५:१५

6 मेकोमी रागीम लडाइ मटुम्तीके यहूदा डा सहर कली बोल्यो सेला बाकत। मेना मेको नु सुइम लडाइ मपामे बाकत। मारदे हना परमप्रभु यावेम मेको कली नाइक्चा गेशो बाकमाकत। २इतिहास १५:१५

7 मिनू आसामी यहूदा डा मुर आन कली “एको सहरपुकी सेल्य। एको आन एर ओंथ नेल्ल गारो हिरशा लाइशो खिं नु ठेयब आग्लो पाइशो लाप्चोपुकी सेलशा बोल्यो सेल्य। मारदे हना गोपुकीम परमप्रभु यावे, इं परमप्रभु कली माल्शा, मेको रागी इं के बाकब। मिनू मेकोमी इं कली थुं नाइक्चा गेप्टु” देमाकत। मोपतीके मेकोपुकीम सेलतीक गेय पा सोशो बोशो दुम्मा बाकत।

8 आसा के ठेयब तेक्तीक नु तूतीक बाकमा बाकत। यहूदा रे जाक्शो लाख सां लडाइ पाइब बाकमा बाकत। मिनू बेन्यामीन रे जाक्शो लाख निकशी ८० हजार आइक्च तेक्तीक नु लिबा आप्ब लडाइ पाइबपुकी बाकमा बाकत। मेको नेल्ल बोल्यो सक्ति पाइशो लडाइ पाइबपुकी बाकमा बाकत।

9 एथीयोपीया डा जेराहमी मेकोपुकी नु लडाइ पचा कली हजार हजार लडाइ पाइबपुकी नु सहे सां बग्गी चाकशा, मारेशा सम्म जाकमा बाकत।

10 मिनू मेकोपुकी जाकमानु, आसा मेको कली ग्रुम्थ लमाकत। मिनू मेकोपुकी मारेशा आ नेक्था सेफाथाह डा दिमम लडाइ पामे बाकत।

11 मिनू आसामी परमप्रभु यावे, आ परमप्रभु कली “परमप्रभु यावे, गे सक्ति पाइशो नु सक्ति मपाइशो मुर आन कली वारच पने चाप्नीनी। सु कली वारच पचा दाक्नीनी, मेकोन चाप्नीनी। परमप्रभु यावे, आंइ परमप्रभु, आंइ कली वारच पाइय्यीकी। मारदे हना गो इन कली थमा सुइक्नीकी। मिनू गोपुकी इन नेमी एको इश्का लडाइ पाइब नु लडाइ पथ जाकतक। परमप्रभु यावे, आंइ परमप्रभु, इन कली सुइ मुरुम ग्राने मचाप्नीम” दे पुना बाकत। १सामुएल १४:६

12 मिनू परमप्रभु यावेम आसा नु यहूदा डा मुर आन डोंइती एथीयोपीया डा मुर नु लडाइ पा ग्रापदा बाकत। मिनू एथीयोपीया डा मुर प्रोकमा बाकत।

13 मिनू आसा नु मेको आ लडाइ पाइबपुकीम मेको आन कली गेरार सम्म खेदा पामे बाकत। एथीयोपीया डा मुर नेल्ल साइक्चा पुंडसमा बाकत। मारदे हना परमप्रभु यावे आ लडाइ पाइबपुकीमी मेकोपुकी नु लडाइ पामे बाकत। मिनू यहूदा डा मुरपुकीम मारेइ मारेइ रोइशशा शुश लदमे बाकत।

14 मोपा लशा, मेकोपुकीम गेरार आ एर ओंथ डा सहर नेल्ल खतम पोकगमे बाकत। मारदे हना मेक डा मुरपुकी परमप्रभु यावे आ पशो तशा शुश हिंमा बाकत। मिनू यहूदा डा मुरपुकीमी मेको सहर डा मारेइ मारेइ रोइक्तमे बाकत। मारदे हना मेकेर शुश रोइक्चा डा मार मार बाकमा बाकत।

15 मेकोपुकीमी ताम्बुम बाक्शो बस्तु भाव थुल्ब आन कली यो खेदा पा मेको आन शुश क्यारश भेडा दलओठ रोइशशा, यरूसलेम लेम्मा बाकत।

## 15

आसा आ रिम्शो गेय

- 1 मिनु परमप्रभु आ सोक्तीम ओदेद आ तौ अजारयाह कली सुमा बाक्त।
- 2 मिनु मेको आसा कली गुम्थ लशा, मेको कली “आसा, यहूदा डा मुर नु बेन्यामीन डा मुर नेल्ले, आं लोव्र नेनीन। परमप्रभु यावे गे नु बाक्ब। मेको गे नु बाक्ब। गेपुकीम मेको कली माल्तीनी हना, गे थिल्तीनी। तन्न गेपुकीमी मेको कली प्रौइतीनी हना, मेकोमी यो इन कली प्रौइब।
- 3 इस्राएली शुश बर्स सम्म थमा डा परमप्रभु नु मबाक्शो बाक्तेकम। मेको आन कली शेंब चढेब का यो मबाक्शो बाक्माक्त। मिनु परमप्रभु आ अरेशो लोव्र यो मतुइक्तेम। होसे ३:४
- 4 तन्न मेकोपुकीम श्येत जामेनु, परमप्रभु यावे, इस्राएली आन परमप्रभु गे लेशशा, मालशा, मेको कली थित्तेकम। मिनु मेको आन कली वारच पाप्तु। येरमीया २९:१३-१४
- 5 मेना सुइ लाडगा लशा, रिम्शो पा जाक्ने मचाप्शो बाक्तेकम। मारदे हना मेकेर शोर गाक्शो शुश मुर बाक्मा बाक्त। मिनु रागीम बाक्ब नेल्लेमी श्येत जाम्तेकम।
- 6 मेको नेल्ल ठेयब श्येतम बाक्तेकम। रागी नु रागी लडाइ पाप्तेकम। सहर नु सहर यो लडाइ पाप्तेकम। मारदे हना परमप्रभुमी मेको आन कली मार मार श्येत गेना गेन बाक्त। लूका २१:१०
- 7 तन्न गे इन थुं बारपाइश्शा बोल्यो दुम्शा, गेय पने। मारदे हना गे इन पशो गेय डा इनाम ताइनीनी” देंमाक्त। १कोरिन्थी १५:५८
- 8 मिनु आसाम परमप्रभु यावे आ लोव्र पाइब ओदेद आ तौ अजारयाह आ लोव्र नेंशा, आ थुं बारपदा बाक्त। मिनु यहूदा, बेन्यामीन नु सहर नेल्लेमी नु आ ग्राशो एफ्राइम डा पहाड रागी डा सहरपुकीम बाक्शो ग्रांरा दिचा डा मूर्ति नेल्ल लाइश्शा, खतम पोक्गा बाक्त। मिनु परमप्रभु यावे आ खिं डा पिंडी आ डोइती बाक्शो परमप्रभु यावे कली चढेतीक यो लेंशा सेल्पदा बाक्त।
- 9 मिनु आसामी यहूदा डा मुर, बेन्यामीन डा मुर नु मेको नु बाक्ब एफ्राइम, मनस्से नु सिमियोन रे प्रोक्शो मुर नेल्ल खुप्ता बाक्त। मेकेर बाक्ब एफ्राइम, मनस्से नु सिमियोन डा मुरपुकी परमप्रभु यावे पिप आसा नु बाक्ब, दे तुइश्शा, इस्राएल रे प्रोक्शा, यहूदामी जाक्शो बाक्मा बाक्त। मारदे हना परमप्रभु यावे, आ परमप्रभु यावे मेको नु बाक्शो तुइश्शा, इस्राएल डा शुश मुरपुकी यहूदाम बाक्थ जाक्शो बाक्मा बाक्त। २इतिहास ११:१६; येरमीया ४१:५
- 10 आसा पिप दुम्शो १५ बर्स डा महिना सांम मेको नेल्ले यरूसलेममी बुक्मा बाक्त।
- 11 मिनु मेको नाक्ती मेकोपुकीमी लडाइम रोइश्शा चाक्शो ७ सहे ब्यफ नु ७ हजार क्यारश भेडा चढेमे बाक्त।
- 12 मिनु मेकोपुकीम आन थुं नेल्लेमी परमप्रभु यावे, आन किकी पिपी आन परमप्रभु आ नोले खोइक्चा, दे कबल पामे बाक्त। यहोसु २४:२५
- 13 मिनु सु सुमी परमप्रभु यावे, इस्राएली आन परमप्रभु आ नोले खोइक्चा मबिस्से, मेको साइक्चा पुंडसे बाक्त। खाल्पा बाक्त हना यो, ठिटा बाक्त हना यो, मीश मुर बाक्त हना यो, वोंइश मुर बाक्त हना यो साइक्चा पुंडसे बाक्त।
- 14 मिनु मेको मुर नेल्लेमी “परमप्रभु यावे आ नोले खोइक्चय” दे कसम जशा, ग्येरसीशा ठेयब सेंदा पा, तुराही नु ग्रोव्र ताप्मे बाक्त।
- 15 यहूदा डा मुर नेल्लेमी मेको कसम जतीके ग्येरसमा बाक्त। मारदे हना मेकोपुकीमी आन थुं नेल्लेमी परमप्रभु यावे कली खोइक्चा थमा पा दाक्तेम बाक्त। मिनु परमप्रभु कली थिश्शो बाक्मा बाक्त। मोपतीके परमप्रभु यावेमी मेको नेल्ल आन रागीमी लडाइ मदुम्पाइक्थु, आन थुं नाइक्चा गेवा बाक्त। २इतिहास १४:५-६; २इतिहास २०:३०
- 16 पिप आसामी आ बगे माकाह कली यो पिप आ ममा आ गेय रे गुंडदा बाक्त। मारदे हना मेकोमी अशेराह देवी आ ग्रांरा दिचा डा मूर्ति सेल्पदा बाक्त। आसामी मेको मूर्ति क्योरशा जिक्शा फस सेल्शा किद्रोन डा खोलाम चोवा बाक्त। १राजा १५:१३-१५
- 17 तन्न मेकोमी डांडा डा थान नेल्ल इस्राएल रे मगुंडदा बाक्त। मो हना यो आसा मबेकम सम्म आ थुं नेल्लेमी परमप्रभु यावे आ मुर दुम्शा बाक्माक्त।
- 18 मेकोमी आ आफ्रोम परमप्रभु कली गेशो थोव्रक नु आ गेशो थोव्रक सुन चांदी नु ग्योबपुकी परमप्रभु आ खिंम चाक्गा बाक्त।
- 19 आसा पिप दुम्मेनु, ३५ बर्स सम्म लडाइ का यो मदुम्माक्त।

## 16

पिप आसा आ नोले डा बर्सपुकी

१राजा १५:१६-२४

- 1 पिप आसाम सासन पशो ३६ बर्सम इस्राएल डा पिप बाशामी यहूदा कली लडाइ तोवा बाक्त। मिनु पिप बाशामी यहूदा डा पिप आसा आ रागी ओव्रतीक नु ग्रीतीक लां नेल्ल तेक्चा कली रामाह सहर कली बोल्यो सेला बाक्त।
- 2 मिनु आसामी परमप्रभु यावे आ खिं नु पिप आ दरवार डा शोप वोइक्तीक रे सुन नु चांदी गुंडशा, दमस्कस सहरम बाक्शो अराम डा पिप बेन-हादाद कली सोइश्शा, मेको कली
- 3 “इन आफ नु आं आफ आस दातेम गारशो खोदेशो पा, गे नु गो यो गारस। मुल गो इन कली सुन नु चांदी सोइक्ताक्ड। मोपतीके इस्राएल डा पिप बाशा नु गारशो लोव्र प्रोनीन। मिनु मेकोमी आं कली पचशो लडाइ मपवल” दे लोव्र सोइक्ता बाक्त।

4 मिनु बेन-हादादम पिप आसा आ लोत्र बिस्से बाक्त। मिनु मेकोमी आ लडाइ पाइब आन कप्तान आन कली “इसाएल डा सहर आन कली लडाइ तोन” दे हुकुम पवा बाक्त। मिनु मेकोपुकीम इयोन सहर, दान सहर, आबेल-मैम सहर नु नाप्ताली आन मार मार वोइक्तीक सहर आन के सेल्मे बाक्त।

5 मिनु बाशामी मेको लोत्र नेशा, रामाह कली बोल्यो सेल्चा प्रोइशा, आ गेय नेल्ल तेक्गा बाक्त।

6 मिनु नोले पिप आसामी यहूदा डा मुर नेल्ल आन कली खुप्शा, रामाह लाइश्शा, रामाह सहर डा सेल्तीक फुल्लु नु शी नेल्ल कुरपाइश्शा लदा बाक्त। बाशाम मेको फुल्लु नु शी रामाह सहर बोल्यो सेल्चा कली मेकेर वोइश्शो बाक्माक्त। मिनु पिप आसाम मेको चाक्शो फुल्लु नु शीम गेबा नु मिस्या सहर आस कली बोल्यो सेला बाक्त।

परमप्रभु आ लोत्र पाइब हानानी

7 मेना परमप्रभु यावे आ लोत्र पाइब हानानी यहूदा डा पिप आसा आ बाक्तीकेम जाक्शा, मेको कली “गे अराम डा पिप कली थमा सुइक्तीनी नु परमप्रभु यावे, इन परमप्रभु कली थमा मसुइक्नी। मोपतीके इसाएल डा पिप आ लडाइ पाइब इन डोंइती रे प्रोक्चा ताम्तेकम।

8 मार, डोंइती एथीयेपीया लिबीया डा लडाइ पाइबपुकी शुश मबाक्मा? बग्गी नु शारा डोइक्ब हिकने मचाप्चा डा शुश मबाक्मा? मेना गे परमप्रभु यावे कली थमा सुइक्तीनी। मिनु मेकोमी नेल्ल आन कली इन गुडमी गेण्टु। २इतिहास १४:८-१२

9 परमप्रभु यावेमी सु आन थुंम थमा पा मेको नु बाक्बा, मेकोमी रागी नेल्लेम माल्ना माल्न मेको कली कोत्रशा, मेको आन कली बोल्यो सेल्ब। गे अराम डा पिप नु गारशा मरिम्शो पाइतीनी। मुल रे गे लडाइ पस डा पस बाक्चा माल्नीनी” देंमाक्त। हितोपदेस १५:३

10 मिनु परमप्रभु यावे आ लोत्र पाइबम मोदेशो लोत्र पा, आसा कली शुश गाइक्पदा बाक्त। मिनु मेको कली फ्रेंशा चोक्शा वोइक्पदा बाक्त। मेना पिप आसामी का निक्शी अरु मुर आन कली यो काइ मरिम्शो पवा बाक्त। २इतिहास १८:२६; मत्ती १४:३

11 पिप आसा आ पशो, डोंइती नु नोले डा नेल्ल, मेको यहूदा नु इसाएल डा पिप आन इतिहास डा किताबम ब्रेक्शो बाक्नीम।

12 आसाम सासन पशो ३९ बर्स दुम्मेनु, आ खोइली राक्तीक रोइ पवा बाक्त। मिनु मेको रोइ शुश ठेयब दुम्माक्त। शुश रोइ पवा बाक्त हना यो परमप्रभु यावे आ वारच पशो कली ममाल्थु, ओरुत्ती खेक्ब आन कली मला बाक्त।

13 मिनु आसा आ सासन पशो ४१ बर्स दुम्मेनु मेको बेक्माक्त।

14 मिनु मुरपुकीमी दाऊद आ सहरम आसामी सेल्पांडसीशो बेक्शो मुर कली वोइक्तीक कोठामी वोदमे बाक्त। मेकेर जोक्ब मुरुमी थम ब्रोवशो मार मार ब्वाइश्शा ब्रोवशो रिना पाइब घांस सेल्शा, मेको आ तारी वोदमे बाक्त। मिनु मुरपुकीम मेको पिप कली मान पचा, दे थम ठेयब मी मुइक्तमे बाक्त। २इतिहास २१:१९; येरमीया ३४:५

## 17

यहूदा डा पिप येहो-शाफात

1 मिनु पिप आसा बेक्म नोले आ तौ येहो-शाफात पिप दुम्माक्त। मिनु मेकोमी “इसाएल कली तेक्नुड” दे आ लडाइ पाइब बोल्यो सेला बाक्त।

2 मेकोमी यहूदा डा बोल्यो सेल्शो सहर नेल्लेमी लडाइ पाइबपुकी वोदा बाक्त। मिनु यहूदा नेल्ल नु आ आफ आसाम प्राशो एफ्राइम डा सहरपुकी यो खाल पचा कली लडाइ पाइब वोदा बाक्त।

3 मिनु परमप्रभु यावे येहो-शाफात नु बाक्माक्त। मारदे हना मेको आ किक्की पिपी दाऊद आ डोंइती डा नाक्ती रिम्शो पा गाक्शो खोदेशो पा गाक्माक्त। मेकोमी वारच पचा कली बाल देवता आन कली ममला बाक्त।

4 तन्न मेको परमप्रभु यावे, आ आफ आ परमप्रभु आ नोले खोदा बाक्त। मिनु मेको आ शेंशो पवा बाक्त। मेको इसाएल डा पिप आन लांम मगाक्माक्त।

5 मोपतीके परमप्रभु यावेम मेको आ राज्य बोल्यो सेला बाक्त। मिनु यहूदा डा मुर नेल्लेमी येहो-शाफात कली मार मार चाक्गमे बाक्त। मिनु मेको शुश शोप पाइश्शो नु मान ताइब दुम्माक्त। २इतिहास १८:१

6 मेकोमी परमप्रभु यावे आ लांम गाक्चा कली काइ महिथु आ थुं बारपदा बाक्त। मेकोम यहूदाम बाक्शो डांडा डा थान नु मुर्ति पाइश्शो थाम प्रेशा ताइक्ता बाक्त।

7 मेकोमी सासन पशो आ बर्स सांमी आ राज्य डा ठेयब गेय पाइब बेन-हेल, ओबदिया, जकरिया, नेथनेल नु मीकाया आन कली यहूदा डा सहरपुकीम मुर आन कली शेंचा कली सोइक्तीमी बाक्त।

8 मेकोपुकी नु लेवीपुकी बाक्मा बाक्त। मेको लेवीपुकी सु सु बाक्मा बाक्त देशा हना, शेमायाह, नेथन्याह, जेबदीयाह, आसाहेल, शेमीरामोथ, येहो-नाथान, अदोनीयाह, तोबीयाह, तोबा-दोनीयाह बाक्मा बाक्त। मिनु मेको नु चढ़ेब एली-शामा नु येहोराम यो बाक्सा बाक्त।

9 मेकोपुकीम परमप्रभु यावे आ अरेतीक लोत्र डा किताब मेको नु बाक्शो बाक्त। यहूदा डा सहर नेल्ल डा मुर आन कली शेंदमे बाक्त।

येहो-शाफात आ सक्ति

10 मिनु यहूदा आ एर ओथ बाक्शो राज्य डा मुर नेल्ल परमप्रभु यावे क्येडा हिंमा बाक्त। मोपतीके मेकोपुकीम येहो-शाफात नु लडाइ मपामे बाक्त।

11 पलिस्ती आन दातेमी का निक्शीमी येहो-शाफात कली आन गेचा माल्शो चांदी चाकामे बाक्त। मिनु अराबीपुकीमी यो मेको कली ७ हजार ७ सहे सांड नु ७ हजार ७ सहे बोका चाकामे बाक्त। १राजा ५:१

12 मिनु येहो-शाफात शुश सक्ति पाइश्शो दुम्माक्त। मेकोमी यहूदामी गारो हिरशा, बोल्यो दरवार नु मार मार वोइक्तीक सहरपुकी सेला बाक्त।

13 मेकोमी यहूदा डा सहरपुकीम शुश सेलतीक गेय यो पवा बाक्त। यरूसलेम सहरम लडाइ पाइब नु थम बोल्यो लडाइ पस जोक्ब मुर बाक्मा बाक्त।

14 मेको यहूदा डा मुर आन खिं खिं डा हजार हजार लडाइ पाइब आन कप्तान आदनाह बाक्माक्त। मेको नु लाख सां सक्ति पाइश्शो लडाइ पाइब बाक्मा बाक्त।

15 मेको आ नोले डा येहो-हानान बाक्माक्त। मेको लाख निक्शी ८० हजार लडाइ पाइब आन कप्तान बाक्माक्त।

16 मेको आ नोले डा जिक्की आ तौ अमासीयाह बाक्माक्त। मेको परमप्रभु यावे आ गेय पाइब कली कोल्लब यो बाक्माक्त। मेको लाख निक्शी सक्ति पाइश्शो लडाइ पाइब आन कप्तान बाक्माक्त।

17 बेन्यामीन आ थर डा एली-आदा बोल्यो लडाइ पाइब बाक्माक्त। मेको नु लाख निक्शी लिबा आप्व नु तेतीक कुरब बाक्मा बाक्त।

18 मिनु मेको आ नोले डा येहो-जाबाद बाक्माक्त। मेको नु लाख का ८० हजार या कुरशो लडाइ पाइब बाक्मा बाक्त।

19 मिनु मेको नेल्ल पिप आ लडाइ पाइब बाक्मा बाक्त। मेको प्रोइशा अरु लडाइ पाइबपुकी यो यहूदा डा गारो हिरशो सहरम बाक्मा बाक्त।

## 18

मीकायाम आहाब कली लोत्र पशो

१राजा २२:-

1 मिनु पिप येहो-शाफात शुश शोंप पाइश्शो, मान ताइब नु थाम्पा ठेयब मुर दुम्माक्त। मिनु मेकोमी आहाब आ खिं डा मुर नु ग्युबे पा नाता सेला बाक्त।

2 मिनु इच्का बर्स नोले मेको आहाब कली युम्थ सामरीया लमाक्त। मिनु आहाबम मेको नु आ मुर आन कली थुल्चा, दे शुश भेडा नु ब्यफ क्योरा बाक्त। मिनु आहाबमी येहो-शाफात कली रामोथ-गिलाद नु लडाइ पचा कली क्युकगा बाक्त।

3 मिनु इस्राएल डा पिप आहाबमी यहूदा डा पिप येहो-शाफात कली “रामोथ-गिलाद नु लडाइ पचा कली गे आं कली वारच पाइक्नीनी?” देमाक्त। मिनु मेकोमी “गो गे नु बाक्नुड। आं मुर इन मुर यो बाक्नीम। एको लडाइम गो इन कली वारच पाइक्नीकी” देमाक्त।

4 तन्न येहो-शाफातमी इस्राएल डा पिप कली “गे डोंडती परमप्रभु यावेम मेको लडाइ आ पर्बम मार देबा? पुनीन” देमाक्त। २राजा ३:११

5 मिनु इस्राएल डा पिपमी ४ सहे आ नोले दुम्ब लोत्र पाइब आन कली पुक्शा, मेको आन कली “गो रामोथ-गिलाद कली लडाइ तोड देय मतोड?” दे हिल्लो पामी बाक्त। मिनु मेकोपुकीम “लडाइ तोने। मारदे हना परमप्रभुम मेको आन कली इन गुडम गेब” देमा बाक्त।

6 तन्न येहो-शाफातमी “परमप्रभु यावे कली हिल्लो पचा कली थमा पा परमप्रभु यावे आ लोत्र पाइब एकेर सुड मबाक्नीमी?” दे हिल्लो पवा बाक्त।

7 मिनु इस्राएल डा पिपमी येहो-शाफात कली “परमप्रभु यावे कली हिल्लो पचा कली मुर का बाक्ब। मेको इम्लाह आ तौ मीकाया बाक्ब। तन्न गो मेको कली काइ मदाक्नुड। मारदे हना आं पर्बम गेनायो रिम्शो लोत्र मपाइब। मेकोमी मरिम्शो लोत्र डा लाक्शा अरु मारेड मदेब” देमाक्त। मिनु येहो-शाफातमी “पिपम मोदेशो लोत्र पचा मडुम्ब” देमाक्त।

8 मिनु इस्राएल डा पिपम आ गेय पाइब का कली ब्रेशशा “इम्लाह आ तौ मीकाया कली रीब पा चाक्को” दे ब्रथ सोइक्ता बाक्त।

9 मेना इस्राएल डा पिप नु यहूदा डा पिप येहो-शाफात आस आस पिपम फेक्तीक वा फेक्शा, सामरीया डा ठेयब लाप्चो ओव्रतीक डा चेरब तुप्तीक दिंमम आस आस ठेयब नित्तीकेमी बाक्शो बाक्सा बाक्त। मिनु मेको नोले दुम्ब लोत्र पाइब नेल्ल मेको आस डोंडती नोले दुम्ब लोत्र पन पन बाक्शो बाक्सा बाक्त।

10 मेको आन दाते डा केनानाह आ तौ सिदकीयाहमी फलाम के ग्रोव सेल्सीशो बाक्माक्त। मिनु मेकोमी “परमप्रभु यावेम मार देत देशा हना ‘एको ग्रोवम गेम अराम डा मुर आन कली खुशा खतम पोक्नीनी’ देशो बाक्ब” देमाक्त।

11 मिनु अरु नोले दुम्ब लोत्र पाइब नेल्लेम यो मोदेशो लोत्र पशो बाक्मा बाक्त। मेकोपुकीम “रामोथ-गिलाद कली लडाइ तोशा ग्राडीन। मारदे हना मेको परमप्रभु यावेम पिप आ गुडमी गेब” देमा बाक्त।

12 मिनु मीकाया कली ब्रेशशा चाक्ब मरुम मीकाया कली “नेनीन, अरु नोले दुम्ब लोत्र पाइबपुकी नेल्ल थुं का दुम्शा, पिप कली रिम्शो लोत्र पशो बाक्नीम। मिनु इन लोत्र यो मेको आन देशो नु गारचा डा रिम्शो लोत्र पने” देमाक्त।

13 तन्न मीकायाम “परमप्रभु यावे ब्रोंइशा बाक्शो खोदेशो पा, आं परमप्रभुम मार देबा, मेको लोत्र ला पाडनुड” देमाक्त।

14 मिनु पिप आ बाक्तीक जाक्मेनु, पिप आहाबमी मेको कली “मीकाया, गो रामोथ-गिलाद कली लडाइ तोक देय मतोक” दे मदा बाक्त। मिनु मेकोमी “लडाइ तोने। मिनु ग्राडीन। मारदे हना परमप्रभु यावेमी मेको इन गुडम गेब” देमाक्त।

15 तन्न पिपम मेको कली “परमप्रभु यावे आ नेम थमा लोत्र ला पचा, दे गिश खेयप इ कली कसम जपाइक्नना?” दे मदा बाक्त।

16 मिनु नोले मीकायाम “गो इस्राएली नेल्ल आन कली गोठला मबाकशो भेडा खोदेशो पा पहाडम ब्रशो ताता। मिनु परमप्रभु यावेमी ‘मेको मुर आन के होत्रप मबा। मेको नेल्ल थुं नाइश्शा आन खिं लेम्मल’ देशो नेता” देमाक्त। मत्ती १:३६

17 मिनु इस्राएल डा पिपम येहो-शाफात कली “मार, एकोम आं पर्वम मरिश्शो लोत्र डा लाकशा अरु मारेइ मदंब, खतम लोत्र ला देंब, दे गो इन कली मदेंडा डा?” देमाक्त।

18 मिनु मीकायाम “मुल परमप्रभु यावे आ लोत्र नेनीन। गो परमप्रभु यावे कली आ ठेयब नित्तीकेम निश्शो ताता। मिनु आ स्वर्ग डा गेय पाइब नेल्ले आ ग्युरा गे नु आ पेरा गे राप्शो बाक्तेकम। यसैया ६:१

19 मिनु परमप्रभु यावेमी ‘इसाएल डा पिप आहाब कली रामोथ-गिलाद नु लडाइ पा साइक्या पुंडसीचा कली सुमी मेको कली जोल पाइबा?’ देशो नेता। मिनु काम लोत्र का पाप्तु, अर्कोमी अर्को लोत्र पाप्तु।

20 नोले सोक्त का परमप्रभु यावे आ डोंइती जाकशा ‘गो मेको कली जोल पाइनुड’ देंत। अय्युब १:६

21 मिनु परमप्रभु यावेमी ‘दोपा?’ दे हिल्लो पाप्तु। मिनु मेकोमी ‘गो लशा आहाब आ नोले दुम्ब लोत्र पाइब नेल्ल आन शोत्रम जोल पाइब सोक्त दुम्नुड’ देंत। मिनु परमप्रभु यावेमी ‘गे मेको कली जोल पावो। गे मेको पने चापेवे। लावो’ देंत।

22 लो कोव्रडीन, परमप्रभु यावेमी इन नोले दुम्ब लोत्र पाइब आन शोत्रम जोल पाइब सोक्त का वोइश्शो बाक्त। परमप्रभु यावेम इन कली खतम सेल्चा थुं पने थुश्शो बाक्ब” देमाक्त।

23 मिनु केनानाह आ तौ सिदकीयाह इर डोइश्शा लशा, मीकाया आ चोत्रचो राप्शा “दोपा परमप्रभु यावे आ सोक्त आं रे पा गे नु लोत्र पथ लम” देमाक्त।

24 मिनु मीकायाम “मेको गे हिंशा, आगा डा कोठामी खुंडसे नाक्ती कका तुइक्नेवे” देमाक्त।

25 मिनु नोले इस्राएल डा पिपम “मीकाया कली लाइश्शा, सहर कली हुकुम पाइब आमोन नु पिप आ तौ योआश आस कली गेन। मिनु मेको आस कली

26 ‘पिप आ देशो मार बाक्ब देशा हना, मेको मुर कली जेल्खानम चोक्शा वोतीन। रिश्शो पा लेश्शा मजाकडा सम्म, एको कली इच्का शोब्ले नु ब्वाक्कु ला गेने’ दे पिपम हुकुम पशो बाक्ब देनीन” देमाक्त। २इतिहास १६:१०

27 मिनु मीकायामी “गे रिश्शो पा लेश्शा जाक्तीनी हना, परमप्रभु यावे आं रे मब्वाकशो बाक्माक्त, देंनुड” देमाक्त। मिनु मेकोमी चिनु लोत्र तेम्शा “मुर नेल्लेमी आं लोत्र नोफा दाइश्शा नेनीन” देमाक्त।

आहाब साइक्या पुंडसीशो

28 मिनु इस्राएल डा पिप नु यहूदा डा पिप येहो-शाफात रामोथ-गिलाद ग्येतथ लसा बाक्त।

29 मिनु इस्राएल डा पिपम येहो-शाफात कली “गो मतुइक्चा डा पा अर्को वा फेक्शा, लडाइम लाइनुड। तन्न गे इन पिपम फेक्तीक वा फेक्शा बाक्कीन” देमाक्त। मोपा इस्राएल डा पिप अर्को वा फेक्शा, लडाइम लमाक्त।

30 मिनु अराम डा पिपम आ बग्गी चलेब आन कप्तान आन कली “इसाएल डा पिप कली डा लाकशा, अरु आइक्च ठेयब सुइ नु लडाइ मपने” दे माइश्शो बाक्माक्त।

31 मिनु बग्गी चलेब आन कप्तानमी येहो-शाफात कली तशा “मेकोन इस्राएल डा पिप बाक्ब” देमाक्त। मिनु मेको कली लडाइ तोथ लमा बाक्त। तन्न येहो-शाफात ठेयब सेंदा पा वाइ ब्रेम्माक्त। मिनु परमप्रभु यावेमी मेको कली वारच पशा, मेको बग्गी चलेब आन कली मेकेर रे लेप्पदा बाक्त।

32 मारदे हना बग्गी चलेब लडाइ पाइब आन कप्तानपुकीमी “एको इस्राएल डा पिप मबाक्माक्त” दे तुइश्शा, मेको कली खेदा पचा प्रोन्मे बाक्त।

33 तन्न मुर काम आ लिब्रा खुक्शा, हेंथे पा ब्रा आप्शा सोइक्ता बाक्त। मिनु मेको ब्रामी इस्राएल डा पिप आ कुचु सुम्तीके नु कुचु तेक्तीक आस दातेम ख्रवा बाक्त। मिनु पिपम आ बग्गी चलेब कली “बग्गी हिरशा लडाइ रे गुंडदी। आं कली ब्राम ख्रशा गार सेल्लती” दे मदा बाक्त।

34 मेको लडाइ नाक्त रेन दुम्ना दुम्न लमाक्त। मिनु इस्राएल डा पिप आ बग्गीम राप्शा, अरामी नु लडाइ पशो कोव्रडा बाक्त। मेको नाक्त रे मोपान बाक्माक्त। मिनु नां लाकगानु, मेको बेक्माक्त।

## 19

येहूमी येहो-शाफात कली लोत्र पशो

1 मिनु यहूदा डा पिप येहो-शाफात मारेइ मदुश्थु आ दरवार यरूसलेम लेश्शा जाक्माक्त।

2 मिनु परमप्रभु यावे आ नोले दुम्ब लोत्र पाइब हानानी आ तौ येहू मेको कली गुम्थ जाक्माक्त। मिनु मेकोमी येहो-शाफात कली “मार, मरिश्शो पाइब कली वारच पाइश्शा, परमप्रभु यावे आ जोरी सनु कली दाक्चा ठीक बाक्बा? इन पशो तशा परमप्रभु यावे इन पर्वम साइक्ताक्व।

3 मो हना यो गे का निक्शी रिश्शो गेय यो पशो बाक्नीनी। गे रागी रे मूर्ति थाम आन कली गुंडताक्नी। मिनु परमप्रभु आ नोले खोइक्चा थुं पाइतीनी” देमाक्त। २इतिहास १७:३,६

निसाफ पाइबपुकी वोइश्शो

4 येहो-शाफात आ दरवार यरूसलेमम बाक्माक्त। मिनु मेको लेंशा बेयर-शेबा रे एफ्राइम डा पहाड डा मुर आन बाक्तीक लशा, मेको आन कली लेंशा परमप्रभु यावे, आन किक्की पिपी आन परमप्रभु गे लेश्शा चाक्मी बाक्त।

5 मेकोमी यहूदा डा बोल्यो सहर नेल्लेमी निसाफ पाइबपुकी वोदा बाक्त।



6 मिनु मेकोमी मेको निसाफ पाइब आन कली “गेपुकीम मार पाइनीनी, मेको मिम्तीन। गेपुकीम निसाफ नेपाइक्नीनु, मुर आन कली ममाइ तन्न परमप्रभु यावे आ डोंइती निसाफ पाइनीनी। गे निसाफ पची ना मेको गे नु बाक्ब। ब्यवस्था १:१७

7 परमप्रभु यावे कली मान पा हिनीन। होस पा निसाफ पने। मारदे हना परमप्रभु यावे, इ परमप्रभुमी दूली निसाफ मपाइब। मेको कुल मकोव्रब नु घूस मताक्ब निसाफ पाइब बाक्ब” देमाक्त। प्रस्थान १८:२१; ब्यवस्था १०:१७; रोमी २:३१

8 येहो-शाफातम यरूसलेमी लैवीपुकी, चढेबपुकी नु इसाएल डा खिं खिं आन ठेयब मुर आन कली परमप्रभु यावे आ डोंइती निसाफ पचा कली नु जीब आन दातेमी गारपाइक्चा कली वोइश्शो बाक्माक्त। मिनु मेकोपुकी यरूसलेमम बाक्बाक्मा बाक्त। ब्यवस्था १७:८-९; ब्यवस्था १९:१७

9 मिनु मेकोमी मेको आन कली “इन गेय दोपा पचा देशा हना, इन पशो नेल्लेमी परमप्रभु यावे कली मान पा हिंशा, थमा सुइक्चा डा दुश्शा, इन थुं नेल्लेमी पचा माल्नीनी।

10 मिनु अरु सहर डा आइक्च निसाफ पाइब इन लोकब, इन बाक्तीक सहरम इन कली हिल्लो पचा कली जाक्नीमी। मार बाक्त हना यो, मुर साइश्शो आ परबम बाक्त हना यो, परमप्रभु यावे आ अरेशो लोत्र आ परबम बाक्त हना यो, शेंतीक लोत्र आ परबम बाक्त हना यो, फुल्लुम मुशा ब्रेक्शो लोत्र नु निसाफ पतीक लोत्र बाक्त हना यो, गे मेको आन कली शेंचा माल्नीनी। मोपा मेकोपुकीमी दूली मपथु, परमप्रभु यावे आ डोंइती पाप मपाइनीम। मेकोपुकीम मरिम्शो पांमतेक्म हना, परमप्रभु इन परबम नु इन लोकब, आइक्च निसाफ पाइब आन परबम गाइक्ब। पाप मपथु, रिम्शो शेंदीने।

11 परमप्रभु यावे आ परबम तुइक्ब नु इन कली वारच पाइब ठेयब चढेब अमारयाह बाक्ब। मिनु पिप नु राज्य आ परबम तुइक्ब यहूदा आ थर डा मुर आन ठेयब मुर इश्माएल आ तौ जेबदीयाह इन कली वारच पाइब बाक्ब। लैवीपुकीम चहिं इन निसाफ पची ना ब्रेक्ब नु मार मार वारच पाइब बाक्नीम। महिंथु इन गेय पने। परमप्रभु यावे रिम्शो पाइबपुकी नु बाक्ल” दे अर्ती गेमी बाक्त।

## 20

येहो-शाफातम ग्राशो

1 मिनु नोले मोआबी अम्मोनी नु का निकशी सेइर डांडा रे अर्को जात डा मेउनी माइश्शो मुरपुकी येहो-शाफात नु लडाइ पथ जाक्मा बाक्त।

2 मिनु मुरपुकीमी येहो-शाफात कली “थम ठेयब हुल का लडाइ पाइब एदोम रे इन कली लडाइ तोचा कली जाक्शो बाक्नीम। मेकोपुकी हिक्सी समुन्द्र आ आइक्ची हांबु रे पिना पिन बाक्नीम। मेको हासासोन-तामार जाक्दीत्तेक्म” दे लोत्र नैपदमे बाक्त। मेको रागी कली एन-गेदी यो देंनीम।

3 मिनु येहो-शाफातम हिंशा, परमप्रभु यावे कली पुंइचा, दे थुं पवा बाक्त। यहूदा रागी डा मुर नेल्ल कली “माइजा बाक्कीन” दे हुकुम पवा बाक्त।

4 मिनु यहूदा डा मुरपुकी परमप्रभु यावे कली “वारच पाइक्की” दे पुंइचा कली बुक्मा बाक्त। यहूदा रागी डा सहर नेल्ल डा मुरपुकी परमप्रभु यावे कली पुंइथ जाक्मा बाक्त। २इतिहास १५:९-१५

5 मिनु येहो-शाफात परमप्रभु यावे आ खिं डा नक लाइगामी यहूदा नु यरूसलेम डा खुम्सीशो मुर आन डोंइती राष्शा

6 “आंइ परमप्रभु यावे, आंइ किकी पिपी आन परमप्रभु गे स्वर्गम बाक्ब परमप्रभु मननी डा? गे रागी रागी डा राज्य सासन पाइब मननी डा? सक्ति नु अधिकार नेल्ल इन के बाक्ब। गे इन क्येडा ग्राब सुइ मबाक्नीम। उत्पती १८:२५; १इतिहास २९:१२

7 आंइ परमप्रभु, मार, गे इन मुर इसाएली जाक्मानु, एको रागी डा मुर आन कली मखेरनी डा? इन वारच अब्राहाम नु आ चच युइ आन कली मेको रागी गेना हना यो कली गेशो मननी डा?

8 मेकोपुकी मेकेर बाक्शो बाक्तेक्म। मिनु इन नें कली मान पचा, दे इन कली बाक्तीक खिं का सेल्शो बाक्तेक्म।

9 मेकोपुकीम “आंइ कली ठेयब श्येत दुम्त हना, लडाइ दुम्त हना, निसाफ पतीके, मुर बेक्तीक रोइ, अन्काल दुम्त हना, इन खिं इन डोंइती राप्नीकी। मारदे हना इन नें कली मान पशो खिं रे आंइ श्येत जशा पुंइशो लोत्र नेंशा, आंइ कली प्रॉइनीनी” दे पुंइतेक्म। २इतिहास ६:२८-३०

10 आंइ किकी पिपी इजीप्ट रे जाक्मानु, गे इसाएली आन कली ‘अम्मोनी, मोआबी नु सेइर डांडा डा मुर आन रागी मओव्रडीन’ देशो बाक्तीनी। मोपतीके मेकोपुकी एर ओंथ रे हिरशा, मेको आन कली खतम मसेल्थु लमा बाक्त। ब्यवस्था २:४, ५, ९, १९

11 तन्न मुल कोव्रडीन, एको मुरपुकीम आंइ कली दोदेशो पा क्येक्क लेत्नीमी। गे आंइ कली गेशो आंइ थेरशो रागी रे आंइ कली खेरचा कली जाक्शो बाक्नीम।

12 आंइ परमप्रभु, गे मेको आन कली निसाफ मपाइनीनी डा? मारदे हना गोपुकी एको शुश मुर आन डोंइती मारेइ पने मचाप्व बाक्नीकी। मुल गो मार पचा माल्नीकी मारेइ मतुइक्नीकी। तन्न गो इन गे कोव्रनीकी” दे पुना बाक्त।

13 मिनु यहूदा डा मुर नेल्ले, मेको आन मीशपुकी, आन आल ब्रेप्य नेल्ल परमप्रभु यावे आ डोंइती राम्मा बाक्त।

14 मिनु परमप्रभु यावे आ सोकतीम खुम्सीशो मुर नेल्ल आन दातेमी आसाफ आ खिं डा लैवी याहासीएल कली सुमा बाक्त। मेको जकरिया आ तौ, बेनायाह आ चच बाक्माक्त। आ अरु किकी पिपी यिएल नु मत्तन्याह बाक्सा बाक्त।

15 मिनू मेकोमी “यहूदा नु यरूसलेमम बाकब मुर नेल्ले नु पिप येहो-शाफात नेनीन। परमप्रभु यावेमी इन कली मार देब देशा हना ‘गे एको लडाइ पाइब आन टेयब हुल तशा महिनीन। इन थुं लुकच मलल। मारदे हना एको लडाइ परमप्रभु के बाकब। इन के ममाइ। प्रस्थान १४:१३-१४

16 दीसा मेकोपुकी नु लडाइ पथ बुपीन। मेकोपुकी जीज डा ग्येथ लतीक लां रे पा कुइनीम। मिनू गेपुकीम मेको आन कली येरूएल डा गोरशो रागी डा बरखे खोला क्येडा आइदी गुम्नीनी।

17 यहूदा नु यरूसलेम डा मुर, गेपुकीम एको लडाइ पचा ममाल्नीनी। आं देंतीकेम लने। मिनू रिम्शा बाककीन। इन पा डा गो परमप्रभु यावेम लडाइ पा प्राशो, कोव्रडीन। महिनीन। इन थुं लुकच मलल। गे गूशा, मेकोपुकी नु लडाइ पथ लने। मारदे हना परमप्रभु यावे गेपुकी नु बाकब” देमाक्त।

18 मिनू येहो-शाफातम खपीम बाप्शा सेउ पवा बाक्त। मिनू यहूदा नु यरूसलेमम बाकब मुर नेल्ल परमप्रभु यावे आ डोंइती बाप्शा, परमप्रभु यावे कली टेयब सेल्मे बाक्त।

19 मिनू लेवी, कोहाथ नु कोराह आन मुर बोक्शा परमप्रभु यावे, इस्राएली आन परमप्रभु कली टेयब सेंदा पा टेयब सेल्लतीक कुम्सो पामे बाक्त।

20 मिनू मेकोपुकी सुनी कना बोक्शा, तेकोहा सहर डा गोरशो रागीम लमा बाक्त। मिनू मेकोपुकी गूशा लमानु, येहो-शाफातम “यहूदा नु यरूसलेमम बाकब मुर नेल्लेम आं लोव्र नेनीन। गे परमप्रभु यावे, इन परमप्रभु कली थमा सुतीन। मिनू गे ग्रानीनी। परमप्रभु यावे आ लोव्र पाइब आन लोव्र थमा सुइश्शा बाककीन” देमाक्त। यसैया ७:९; यसैया १८:१६

21 मिनू मेकोमी मुरपुकी नु सुल्ला पशा, लडाइ पाइब आन डोंइती रिम्शो वा फेक्शा, परमप्रभु यावे कली टेयब सेल्लतीक कुम्सो पाइब योव्रमी बाक्त। मिनू मेकोपुकीम “परमप्रभु यावे कली ‘गे रिम्शो पाइब बाकनीनी। मारदे हना इन दाक्तीक गेना हना यो लीब’” दे कुम्सो पामे बाक्त। भजन संग्रह १०६:१

22 मिनू मेकोपुकीम कुम्सो पा परमप्रभु यावे कली टेयब सेल्मे चोटीन परमप्रभु यावेमी बाप्ब हुल का वोदा बाक्त। मिनू यहूदा नु लडाइ पथ जाकब अम्मोनी, मोआबी नु सेडर डांडा डा मुर आन कली क्याम्दा बाक्त।

23 मिनू मार दुम्माक्त देशा हना, अम्मोनी नु मोआबी गारशा सेडर डांडा डा मुर आन कली लडाइ पा सदमे बाक्त। मेको आन कली साइक्ने थुम्मे नोले, लीशो मुरपुकी आंम आंमा साइक्मुमा बाक्त।

24 मिनू यहूदा डा मुरपुकी गोरशो रागी डा कोव्रतीक लाइश्शो खिं जाक्शा, लडाइ पाइब आन कली कोव्रडमेनु, मेको आन कली शोल्मो पा खपीम गोल्शा बेक्शा तामे बाक्त। मेको आन दाते डा का सम्म यो प्रोक्ने मचाप्शो बाक्मा बाक्त।

25 मिनू येहो-शाफात नु आ मुरपुकी मार मार रोइक्थ जाक्मा बाक्त देशा हना, मार मार वासी, सुन चांदी के शोप मार मार थोव्रक थित्मे आंम कली कुरने मचाप्चा डा पा रोइक्तमे बाक्त। मिनू मेको आन बस्तु भाव यो लदमे बाक्त। मेकोपुकीम नाक्त सां सम्म मेको रोइश्शो मार मार खुप्तमे बाक्त। मारदे हना मेको थम शुश बाक्माक्त।

26 मिनू ४ नाक्ती मेकोपुकी बेराकाह डा दिमम गुम्मा बाक्त। मिनू मेकेर परमप्रभु यावे कली टेयब सेल्मे बाक्त। मुल सम्म मेको आं ने बेराकाह डा दिम लीशो बाकब। बेराकाह आ अर्थ आसीक बाकब।

27 मेको नोले यहूदा नु यरूसलेम डा मुर नेल्लेमी येहो-शाफात कली डोंइती गाक्पाइश्शा, ग्येरसीशा यरूसलेम लेम्मा बाक्त। मारदे हना परमप्रभु यावेमी मेको आन कली आन जोरी सत्रु रे ग्रापाइश्शा, थम ग्येरसीशो बाक्मा बाक्त।

28 मिनू मेकोपुकीम टेयब नु आइक्थ तार पाइश्शो ताप्तीके नु तुराही ताम्ना ताम्न यरूसलेमम परमप्रभु यावे आ खिं जाक्मा बाक्त।

29 परमप्रभु यावेमी इस्राएल आ जोरी सत्रु नु लडाइ पा ग्रामाक्त देशो लोव्र नेंशा, रागी रागी डा राज्य डा मुर नेल्ल परमप्रभु क्येडा हिंमा बाक्त।

30 मिनू येहो-शाफात आ राज्यम लडाइ मदुश्थु, नांइसे बाक्त। मारदे हना आ परमप्रभुमी मेको रागी कली एर ओंथ नेल्ल रे नाइक्पदा बाक्त। २इतिहास १५:१५

येहो-शाफात आ सासन

१राजा २२:४१-५०

31 मोपा येहो-शाफातम यहूदाम सासन पवा बाक्त। मेको पिप दुम्मेनु, ३५ बर्स दुम्शो बाक्माक्त। मेकोमी यरूसलेम मी २५ बर्स सासन पवा बाक्त। मेको आ ममा आं ने अजुबाह बाक्माक्त। मेको शिल्ही आ तमी बाक्माक्त।

32 येहो-शाफात आ आफ आसा आ लांम गाक्माक्त। मिनू मेको लां रे ग्युरा पेरा मपवा बाक्त। मेकोमी परमप्रभु यावे आ डोंइती मार ठीक बाक्मे, मेको पवा बाक्त।

33 मो हना यो मेकोमी डांडा डा थानपुकी नेल्ल मप्रेदा बाक्त। मिनू मुरपुकीम आन थुं आन किकी पिपी आन परमप्रभु गे मलेत्से बाक्त।

34 मिनू हानानी आ तौ येहूम येहो-शाफात आ पशो डोंइती रे नोले सम्म नेल्ल इस्राएल डा पिप आन इतिहासम ब्रेक्शा, चोइश्शो बाकब।

35 मिनू नोले यहूदा डा पिप येहो-शाफात, इस्राएल डा काइ मरिम्शो पाइब पिप अहाज्याह नु वारचबु दुम्माक्त। मेको काइ मरिम्शो पाइब बाक्माक्त। १राजा २२:५२-५४

36 मेकोमी टारशीश लशा ग्याप्तीक लेयतीक गेय पचा कली जहाजपुकी सेल्चा कली अहाज्याह नु गारमाक्त। मिनू मेको टेयब जहाजपुकी एस्योन-गेवेरम सेल्मे बाक्त।

37 मारेशा डा दोदा-वाहु आ तौ एलीएजेरमी येहो-शाफात आ पर्वम परमप्रभु आ लोत्र पवा बाक्त। मेकोमी “गे अहाज्याह नु वारचबु दुम्तीके, परमप्रभु यावेम इन गेय खतम सेल्व” देमाक्त। मिनु मेको ठेयब जहाजपुकी खतम दुम्मा बाक्त। टारशीश लचा मतामे बाक्त।

## 21

यहूदा डा पिप येहोराम

१रोजा २२:५१; २राजा ८:१६-२२

1 मिनु येहो-शाफात बेक्माक्त। मिनु मुरपुकीमी मेको आ किकी पिपी आन कली थिम्तीके दाऊद आ सहरम थिम्मे बाक्त। मिनु आ तौ येहोराम पिप दुम्माक्त।

2 येहो-शाफात आ तौपुकी, येहोराम नु आ लोकबपुकी अजारयाह, येहीएल जकरिया, अजारयाह, मिकाएल नु शेफल्याह बाक्मा बाक्त। मेको नेल्ल यहूदा डा पिप येहो-शाफात आ तौ बाक्मा बाक्त।

3 मेको आन आफोम मेको आन कली सुन, चांदी, शुश क्येट लाइब शोंप नु यहूदा डा बोल्यो सहरपुकी यो गेशो बाक्माक्त। तन्न मेको राज्य येहोराम कली गेवा बाक्त। मारदे हना मेको आ डोंइती थिशो तौ बाक्माक्त।

पिप येहोराम आ मरिम्शो पशो

4 मिनु येहोराम आ आफ आ पा डा सासन पा बोल्यो दुम्शा, मेकोमी आ लोकब नेल्ल नु इस्राएल डा का निक्शी ठेयब मुर आन कली तरवारम क्योरशा साइक्मी बाक्त।

5 येहोराम पिप दुम्मेनु, ३२ बर्स दुम्शो बाक्माक्त। मेकोमी यरूसलेम ८ बर्स सासन पवा बाक्त।

6 मेकोमी आहाब आ खिं डा मुर खोदेशो पा इस्राएल डा पिप आन लॉम गाक्माक्त। मारदे हना मेको आ मीश पिप आहाब आ तमी बाक्माक्त। मेकोमी परमप्रभु यावे आ डोंइती मार मरिम्शो बाक्मे, मेको पवा बाक्त।

7 मो हना यो परमप्रभु यावेमी दाऊद नु पशो कबल आ पतीके दाऊद आ खिं डा मुर आन कली साइक्वा मदाक्ता बाक्त। मारदे हना मेकोमी दाऊद नु आ तौ चच युइ आन कली “इ खिं रे गेना हना यो इस्राएली आन कली सासन पाइब का बाक्ब” देशो बाक्माक्त। २सामुएल ७:१२; १राजा ११:३६; भजन संग्रह १३२:१७

8 मिनु येहोराममी सासन पवानु, एदोम डा मुर यहूदा नु मदुथु, आंम आ राज्य सेल्शा, आंम पिप सेल्मे बाक्त।

9 मोपतीके येहोराम आ लडाइ पाइबपुकी, कप्तान नु आ बग्गी नेल्ल लाइशशा, एदोम गे लमाक्त। मेकोपुकी नाक्दो बोक्शा, आंम कली, आ कप्तान नु आ बग्गी कली पुम्ब एदोमी नु लडाइ पा खेरमे बाक्त।

10 एदोम मुल सम्म यहूदा डा सासन पाइब नु मदुशो बाक्ब। मेना लिब्ना यो येहोराम आ मरिम्शो सासन आ पर्वम बोक्माक्त। मारदे हना येहोराम परमप्रभु यावे, आ किकी पिपी आन परमप्रभु कली प्रोंइशो बाक्माक्त।

11 मेकोमी यहूदा डा पहाडमी डाडा डा थानपुकी सेला बाक्त। मिनु मेकोमी यरूसलेम बाक्ब मुर आन कली मूर्ति पूजा पा परमप्रभु कली प्रोंइपाइक्मी बाक्त। मिनु यहूदा कली दूली लॉम गाक्पदा बाक्त।

12 मिनु येहोराममी परमप्रभु यावे आ लोत्र पाइब एलीया रे चिटी का तवा बाक्त। मिनु मेको चिटीमी “परमप्रभु यावेमी मार देंत देशा हना, परमप्रभु यावे, इन किकी पिपी दाऊद आ परमप्रभुम “गे इ आफ येहो-शाफात नु यहूदा डा पिप आसा खोदेशो पा मेको आन लॉम मगाक्डे।

13 तन्न गे आहाब आ खिं डा मुर खोदेशो पा इस्राएल डा पिप आ लॉम गाक्शा, आहाबमी इस्राएली आन कली परमप्रभु प्रोंइपाइशो हेंथे गाक्शो खोदेशो पा, गे यहूदा नु यरूसलेम डा मुर आन कली मूर्ति पूजा पपाइशशा, परमप्रभु कली प्रोंइपाइक्तीवी। मिनु इ आफ आ तौपुकी, इ लोकब आन कली यो साइक्तीवी। मेकोपुकी इं क्येडा रिम्शो मुर बाक्तेक्म।

14 मेको इ पतीके परमप्रभु यावेमी इ खिं डा मुर, इ तौपुकी, इ मीशपुकी नु इ मुर नेल्ल आन कली मुर बेक्तीक रोइ पपाइक्नुड।

15 मिनु गे मसाब कोत्रज डा रोइ पाइनेवे। मिनु मेको रोइम पतीके इ कोत्रज राक्शा इ गा क्यी नाक्त किंत किंत यूनीम’ देशो बाक्ब” दे ब्रेक्शो बाक्माक्त।

16 मिनु मेको नोले परमप्रभु यावेमी येहोराम नु लडाइ पपाइक्वा कली पलिस्ती नु एथीयोपीया आ नेक्वा बाक्ब अराबी आन कली क्युक्मी बाक्त।

17 मिनु मेकोपुकीम यहूदा कली लडाइ तोशा, आ आगा ओत्रमा बाक्त। मिनु मेकोपुकीम पिप आ दरवारम थिश्शो शोंप नेल्ल, मेको आ तौपुकी नु मेको आ मीशपुकी नेल्ल लदमे बाक्त। मेको आ कान्छा तौ येहो-अहाज डा लाक्शा अर्को तौ मलीमा बाक्त। येहो-अहाज कली अहाज्याह यो देंनीम।

18 मेको नेल्ल दुम नोले परमप्रभु यावेमी येहोराम कली मसाक्ब कोत्रज राक्तीक रोइ पपदा बाक्त।

19 मिनु मेको रोइ पा बर्स निक्शी नोले आ कोत्रज राक्शा, आ गा क्यी गूशा, शुश श्येत जशा बेक्माक्त। मिनु मेको आ मुरपुकीम मेको आ किकी पिपी आन पर्वम पशो खोदेशो पा मेको कली मान पचा कली ठेयब मी ममुइक्तमे बाक्त। २इतिहास १६:१४

20 मेको पिप दुम्मेनु, ३२ बर्स दुम्शो बाक्माक्त। मेकोमी यरूसलेम ८ बर्स सासन पवा बाक्त। मेको बेक्मेनु सुइम रोका मपामे बाक्त। मिनु मुरपुकीमी मेको कली दाऊद आ सहरमी थिम्मे बाक्त। तन्न पिप आन कली थिम्तीकेम मथिम्मे बाक्त। २इतिहास २४:२५

## 22

यहूदा डा पिप अहाज्याह

२राजा ८:२५-२९

1 मेको नोले यरूसलेम डा मुरपुकीम मेको आ पा डा मेको आ कान्छा तौ अहाज्याह कली पिप सेल्मे बाक्त। मारदे हना अराबी नु जाक्शोपुकीम मेको अरु तौ आन कली साइशो बाक्मा बाक्त। मोपतीके येहोराम आ कान्छा तौ अहाज्याह यहूदा डा पिप दुम्माक्त।

2 अहाज्याह पिप तुम्मेनु, २२ बर्स दुम्शो बाक्माक्त। मेकोमी यरूसलेम बर्स का सासन पवा बाक्त। मेको आ ममा आ नें अथाल्याह बाक्माक्त। मेको ओप्पी आ चच बाक्माक्त।

3 मेको यो आहाब आ खिं डा मुर खोदेशो पा मेको आन लांम गाक्माक्त। मारदे हना आ ममामी मेको कली परमप्रभु यावे आ अरेशो मटिचा कली अर्ती गेवा बाक्त।

4 मेकोमी यो आहाब आ खिं डा मुर खोदेशो पा परमप्रभु यावे आ डोंडती मार मरिम्शो बाक्मे, मेको पवा बाक्त। मारदे हना आ आफ बेक्म नोले मेको मुरपुकीमी अर्ती गेशा, मेको कली खतम सेल्मे बाक्त।

5 मेकोमी आन गेशो अर्ती रामोथ-गिलादम अराम डा पिप हजाएल नु लडाइ पचा कली इस्राएल डा पिप आहाब आ तौ येहोराम नु वारचबु दुम्चा बिस्से बाक्त। मिनु अरामीपुकीम मेको कली गार सेल्मे बाक्त।

6 मिनु योराम रामाह सहरम अराम डा पिप हजाएल नु लडाइम दुम्शो गार साचा कली येजेरलम लेशशा लमाक्त। मिनु यहूदा डा पिप येहोराम आ तौ अहाज्याह, आहाब आ तौ, योराम कली गुम्थ येजेरलम लमाक्त। मारदे हना मेको रोइ पशो बाक्माक्त। येहोराम योराम यो देनीम।

7 तन्न परमप्रभु आ मिम्शो खोदेशो पा योराम नु अहाज्याह गुम्सानु, अहाज्याह आ बेक्तीक दुम्माक्त। मेको गुम्शा, अहाज्याह नु येहोराम निम्शी आ तौ येहू कली गुम्थ लसा बाक्त। परमप्रभु यावेमी आहाब आ खिं डा मुर आन कली थुम्पाइक्चा कली येहू कली योव्रशो बाक्माक्त। १राजा १९:१६; २राजा ९:६-७

8 मिनु येहूम आहाब आ खिं डा मुर आन कली सदानु, अहाज्याह आ गेय पाइब यहूदा डा ठेयब मुरपुकी नु मेको नु पिशो आ लोकब आन तौ आन कली यो थिरशा साइक्मी बाक्त। २राजा १०:१२-१४

9 मेको नोले मेकोमी अहाज्याह कली मला बाक्त। मिनु येहू आ मुरपुकीम मेको कली सामरीयाम थित्मे बाक्त। मिनु मेकोपुकीम अहाज्याह कली येहू आ बाक्तीक चाक्शा सदमे बाक्त। मिनु मुरपुकीम मेको आ पबंम “आ थुं नेल्लेमी परमप्रभु यावे आ नोले खोइक्ब येहो-शाफात आ चच एकोन बाक्ब” दे थिम्मे बाक्त। मेको नोले अहाज्याह आ खिं डा मुर सासन पाइब सुइ मलीमा बाक्त। २राजा ९:२७-२९

अथाल्याह नु योआश

२राजा ११:-

10 मिनु अहाज्याह आ ममा अथाल्याहम आ तौ साइशो तुइशशा, मेकोमी यहूदा डा पिप आ खिं डा मुर नेल्ल आन कली साइक्चा कली बोक्माक्त।

11 तन्न पिप येहोराम आ तमी येहो-शबेआथम अहाज्याह आ तौ योआश कली साइक्चा चिक्शो पिप आ तौ आन दाते रे प्रेंशा लदा बाक्त। मिनु मेको कली कोइब नु मेको आल आस कली इप्तीक कोठा कामी खुइशशा, वोइक्सी बाक्त। पिप येहोराम आ तमी येहो-शेबा च्ढेब येहो-यादा आ मीश बाक्माक्त। मारदे हना अहाज्याह आ दिदी बाक्तीके, मेकोमी योआश कली अथाल्याह आ गुइ रे प्रेंशा खुइशशा वोइक्पदा बाक्त। मिनु अथाल्याहम मेको कली साइक्चा मतवा बाक्त।

12 मेको रागीम अथाल्याहम सासन पवानु, योआश मेकोपुकी नु ६ बर्स सम्म परमप्रभु आ खिंम खुइशशा बाक्माक्त।

## 23

योआश यहूदा डा पिप दुम्शो

1 मिनु ७ बर्सम येहो-यादा महिब दुम्शा, सक्ति कोइदा बाक्त। मेकोमी सहे सहे डा लडाइ पाइब आन कप्तानपुकी, येरोहाम आ तौ अजारयाह, येहो-हानान आ तौ इश्माएल, ओबेद आ तौ अजारयाह, अदायाह आ तौ मासेयाह नु जिक्की आ तौ एली-शाफात नु सल्ला पवा बाक्त।

2 मिनु यहूदा डा सहरपुकी रे लेवीपुकी नु इस्राएल डा खिं खिं डा ठेयब मुर आन कली यरूसलेमम गुम्पाइक्चा कली यहूदा नेल्लेमी लोव्र सोइशशा, मेकोपुकी जाक्मा बाक्त।

3 मिनु मेकेर जाक्ब खुम्सीशो नेल्लेमी परमप्रभु आ खिंम पिप आ तौ योआश नु कबल पामे बाक्त। मिनु येहो-यादाम मेको आन कली “परमप्रभु यावेमी दाऊद आ तौ चच आन पबंम देशो लोव्र खोदेशो पा पिप आ तौ पिप दुम्चा माल्ब।

4 मुल गेपुकीम मार पचा माल्नीनी देशा हना, नाइक्तीक नाक्ती गेय पाइब च्ढेबपुकी नु लेवीपुकी भाग सांमी भाग का ठेयब लाप्चोमी बाक्कीन।

5 मिनु अर्को भाग का पिप आ दरवारम बाक्चा माल्नीम। अर्को भाग काम दरवार आ लाडगा डा ठेयब लाप्चो खाल पने। मिनु अरु मुर नेल्ल परमप्रभु यावे आ लाडगाम बाक्चा माल्नीम।

6 च्ढेबपुकी नु गेय पाइब लेवीपुकी डा लाक्शा, अरु सुइ आन कली परमप्रभु यावे आ खिं ओव्रचा मगेचा नम। मेकोपुकी ला ओव्रने चाप्नीम। मारदे हना मेकोपुकी परमप्रभु यावे आ डोंडती ठीक सेल्शो बाक्नीम। मिनु अरु मुर नेल्लेम परमप्रभु यावे आ ब्रेक्शो अरेशो लोव्र टिशा पचा माल्नीम।

7 लेवीपुकी नेल्ले आन आन या शेशा, पिप आ एर ओंथ बाक्चा माल्नीम। सुइ परमप्रभु यावे आ खिं ओव्रतेक्म हना, मेको कली साइक्चा माल्नीम। पिप ते लत हना यो, मेकोपुकी मेको नुन लचा माल्नीनी” दे माइक्मी बाक्त।

8 मिनु चढेब येहो-यादाम देशो खोदेशो पा लेवीपुकी नु यहूदा डा मुरपुकी नेल्लेमी पामे बाक्त। मेको नेल्लेम नाइक्तीक नाक्ती गेय पाइब आंम मुर आन कली नु गेय थुम्शा नाइश्शो आन कली चाक्गामे बाक्त। मारदे हना चढेब यहोयादाम सुइ आन कली मप्रोंइशो बाक्माक्त।

9 मिनु चढेब येहो-यादाम लडाइ पाइब आन कप्तान आन कली परमप्रभु आ खिंम बाक्शो दाऊद आ सेल्शो तूतीक नु आइक्च नु ठेयब तेक्तीकपुकी गेमी बाक्त।

10 मिनु मेकोमी मुर नेल्ल आन कली आन गुइ गुइमी या शेशा पिप कली खाल पचा कली वोइक्मी बाक्त। मेको आन कली दक्खिन रे उत्तर सम्म नु चढेतीक आ एर ओंथ हिरशा खिं नेल्ल कली खाल पपाइश्शा वोइक्मी बाक्त।

11 मेको नोले येहो-यादाम पिप आ तौ कली लाडगा गुंडदा बाक्त। मिनु मेको आ पियाम सिरपेच गुप्शा, पिप दुम्तीक कागज गेशा, यहोयादा नु आ तौपुकीम मेको कली पिप सेल्शा, तेल लुकतमे बाक्त। मिनु मेकोपुकीम ठेयब सेंदा पा “पिप शुश ब्रोंइशा बाक्ल” दे ग्रीमा बाक्त।

12 मिनु अथाल्याहमी मुरपुकीमी आन पिप कली ठेयब सेल्शा शुश रेयके पशो नेना बाक्त। मिनु मेको परमप्रभु यावे आ खिं मुर आन बाक्तीकेम जाक्माक्त।

13 मिनु कोव्रडानु, पिप कली थाम आ नेक्था लाप्चोम राप्शा बाक्शो तवा बाक्त। मिनु कप्तानपुकी नु तुराही ताप्बपुकी पिप आ एर ओंथ बाक्शो बाक्मा बाक्त। मिनु मेको रागी डा मुर नेल्ल पिप आ डोंइती ग्येरशा, तुराही ताप्ना ताप्न बाक्शो बाक्मा बाक्त। मिनु कुम्सो पाइबपुकी ताप्तीक ताप्शा, मुर नेल्ल आन डोंइती कुम्सो पना पन बाक्मा बाक्त। मिनु अथाल्याहमी आ वा खाक्शा, ठेयब सेंदा पा “गो नु रागी नेल्ल खतम! गो नु रागी नेल्ल खतम!” दे शुश गाइश्शा ग्रीमाक्त।

14 मिनु चढेब येहो-यादाम लडाइ पाइब आन कप्तान आन कली “मेको कली मुर आन दाते रे गुंडदीन। मेको आ नोले खोइक्ब नेल्ल आन कली तरवारम क्योरशा सतीन। मेको आन कली परमप्रभु यावे आ खिं आगाम मसतीन” दे अरेमी बाक्त।

15 मिनु मेकोपुकीम मेको कली ग्याइक्तमे बाक्त। मिनु पिप आ दरवार डा शारा लाप्चोम लाइश्शा, सदमे बाक्त।

16 मेको नोले येहो-यादामी, मुर नेल्ल नु पिप कली परमप्रभु यावे आ मुर दुप्चा माल्ब, दे कबल पवा बाक्त। २इतिहास १५:१२

17 मिनु मुरपुकी नेल्ल बाल देवता आ खिं ओव्रशा, प्रेत्मे बाक्त। मेको कली चढेतीक नु आ मूर्ति नेल्ल फस पोक्गामे बाक्त। मिनु बाल कली चढेब मत्तान कली चढेतीक आन डोंइती सदमे बाक्त।

18 मिनु येहो-यादामी “दाऊदमी देशो खोदेशो पा परमप्रभु यावे आ खिं कोव्रचा कली लेवी आ थर डा चढेब आन कली जिम्मा गेमी बाक्त। डोंइती दाऊदम मोसामी ब्रेक्शो परमप्रभु यावे आ अरेशो लोव्र खोदेशो पा कुम्सो पन पन ग्येरना ग्येरन परमप्रभु यावे कली चोशा चढेतीक चढेचा माल्नीम” दे अरेशो बाक्माक्त। २इतिहास ७:६; २इतिहास २९:१५-३०

19 येहो-यादाम मारेंड पा ग्रॉग्रा दिशो दुश्शो मुर आन कली ओव्रचा मंगेचा कली परमप्रभु यावे आ खिं डा लाप्चोम खाल पाइबपुकी वोइक्पदा बाक्त।

20 मिनु मेकोमी कप्तानपुकी, ठेयब मुरपुकी, मुर आन कली हुकुम पाइबपुकी नु रागी डा मुर नेल्ल आन कली लाइश्शा, पिप कली परमप्रभु यावे आ खिं रे पा आइक्था डा लाप्चो रे ओव्रशा, पिप आ दरवारम चाक्गा बाक्त। मिनु पिप कली पिप आ ठेयब नित्तीकेम निप्पदा बाक्त।

21 मिनु रागी डा मुर नेल्ल ग्येरसमा बाक्त। मिनु अथाल्याह तरवारम क्योरशा साइक्चा पुंडसे नोले सहरमी थुं नाइश्शा बाक्तीक दुम्माक्त।

## 24

परमप्रभु आ खिं लेंशा सेल्शो

२राजा १२:१-१७

1 योआश पिप दुम्मेनु, ७ बर्स दुश्शो बाक्माक्त। मेकोमी यरूसलेमम ४० बर्स सासन पवा बाक्त। मेको आ ममा आ नें बेयर-शेबा डा सिबीयाह बाक्माक्त।

2 मिनु योआशम चढेब येहो-यादा ब्रोंइम सम्म परमप्रभु यावे आ डोंइती मार ठीक बाक्मे, मेको पवा बाक्त।

3 येहो-यादामी मेको कली मीश निक्शी योव्रडा बाक्त। मिनु मेको तमी तौ आन आफ दुम्माक्त।

4 मेको आ इक्का नोले योआशम परमप्रभु यावे आ खिं लेंशा ठीक सेल्चा थुं पवा बाक्त।

5 मिनु मेकोमी चढेब नु लेवी आन कली ब्रेशशा “यहूदा डा सहरपुकीम लशा, इस्राएली नेल्ल आन रे परमप्रभु आ खिं लेंशा ठीक सेल्चा कली मेको आन बर्स बर्सम गेतीक क्येट पोक्कीन। एको गेय रीब पा पने” देंमाक्त। तन्न लेवीपुकीम मेको गेय रीब पा मपामे बाक्त।

6 मोपतीके पिपम ठेयब चढेब येहो-यादा कली ब्रेशशा “परमप्रभु यावे आ गेय पाइब मोसामी गोरशो रागीमी मुर आन कली “परमप्रभु यावेमी लोव्र पतीक ताम्बु कली क्येट गेचा माल्नीम” देशो बाक्ब। मारदे गे लेवीपुकी, यहूदा नु यरूसलेम डा मुर रे पोक्चा माल्शो क्येट रीब पा मचाक्नीनी?” दे हिल्लो पवा बाक्त।

7 डोंइती मेको काइ परमप्रभु कली मटीब मीश मुर अथाल्याह नु आ नोले खोइबपुकीम परमप्रभु आ खिं ओव्रशा, मेकेर डा परमप्रभु यावे आ थोव्रक नेल्ल बाल देवता आ पूजा पतीकेम चलेशो बाक्मा बाक्त। २इतिहास २२:३-४

8 मिनू पिपम मेको आन कली सन्दोस का सेल्पाइशशा “परमप्रभु यावे आ खिं डा ठेयब लापचो आ लाडगाम वीतीन” दे अरेमी बाक्त।

9 मिनू मेकोपुकीम यहूदा नु यरूसलेम डा मुर नेल्ल आन कली “परमप्रभु आ गेय पाइब मोसाम गोरशो रागीम इस्राएली आन कली देंशो थाप्या माल्लो क्येट मुरपुकीम परमप्रभु यावे आ खिंम चाक्चा माल्लीम” देंशा नैपदमे बाक्त।

10 मिनू ठेयब मुरपुकी नु मुर नेल्लेमी ग्येरशा, आन गेचा माल्लो क्येट चाक्शा, मेको सन्दोस मन्नीम सम्म मेकेर कुर पामे बाक्त।

11 मिनू लेवीपुकीम पिप आ सरकार डा गेय पाइब आन बाक्तीकेम सन्दोस चाक्गामेनु, मेकोपुकीम दोशो क्येट बाक्मे, मेको कोत्रबाक्मा बाक्त। मिनू पिप आ ब्रेक्ब मुरुम मेको ब्रेक्शा, ठेयब चढेब आ गेय पाइबपुकीम मेको सन्दोस श्येत्य सेल्शा, लेंशा आ बाक्तीकेम लाइशशा वोडक्बाक्मा बाक्त। मेकोपुकीम नाक्त किंत किंत मो पा शुश क्येट खुप्तमे बाक्त।

12 मिनू पिप नु येहो-यादाम मेको क्येट परमप्रभु यावे आ खिं डा गेय पाइब आन कली कोत्रब मुर कली गेमी बाक्त। मेकोपुकीम चहिं गारो प्रोक्ब मुर, शी के गेय पाइब नु फलाम नु कांसा के गेय पाइब आन कली ब्रेशशा, गाल्च गेशा, लेंशा परमप्रभु यावे आ खिं सेल्पदमे बाक्त।

13 मिनू मेको गेय पाइबपुकीमी शुश गेय पा लेंशा ठीक पतीके गेय रिम्शो दुम्ना दुम्न लमाक्त। मेकोपुकीम परमप्रभु आ खिं डोंइती डा खोदेंशो पा ठीक नु बोल्यो सेल्मे बाक्त।

14 मिनू मेकोपुकीम गेय थुम्मे नोले मेको लीशो क्येट पिप नु येहो-यादा आस कली लेशशा गेमे बाक्त। मिनू मेको क्येटीम परमप्रभु यावे आ खिं कली ग्योबपुकी सेल्मे बाक्त। गेय पचा कली, चोशा चढेचा कली माल्तीक थोत्रकपुकी नु सुन नु चांदी के डाडुपुकी नु ग्योबपुकी सेल्मे बाक्त। यहोयादा बाक्म सम्म परमप्रभु यावे आ खिंम नाक्त किंत किंत चोशा चढेतीक चढेमे बाक्त।

15 मिनू येहो-यादा शुश ब्रोंइशा खूशो दुम्शा, सहे का ३० बर्स दुम्मेनु, बेक्माक्त। १इतिहास २९:२८

16 मिनू मुरपुकीम मेको कली दाऊद आ सहरम पिप आन कली थिम्तीकेमी थिम्मे बाक्त। मारदे हना मेकोमी इस्राएलीम रिम्शो पवा बाक्त। परमप्रभु नु आ खिं कली यो थम रिम्शो पवा बाक्त।

पिप योआश आ मरिम्शो पशो

17 मिनू येहो-यादा बेक्म नोले यहूदा डा सरकार आ गेय पाइब पिप योआश कली गुम्थ जाक्शा, मेको कली सेउ पामे बाक्त। मिनू पिपम मेको आन लोत्र नेना बाक्त।

18 मिनू मेकोपुकीम परमप्रभु यावे, आन किकी पिपी आन परमप्रभु आ खिं प्रोंइशा, अशेराह आ मूर्ति पाइशशो थाम नु अरु मूर्ति आन कली पूजा पामे बाक्त। मोपतीके परमप्रभु यावे यहूदा नु यरूसलेम डा मुर आन पाप आ पबंम गाइक्ता बाक्त।

19 मो हना यो परमप्रभु यावेम मेको आन कली आ गे लेप्पाइक्चा कली आ लोत्र पाइबपुकी सोइक्तीमी बाक्त। मिनू मेकोपुकीम मेको आन मरिम्शो पशो कोंइदमे बाक्त। तन्न मुरपुकीम मेको आन लोत्र मनेमे बाक्त।

20 मिनू परमप्रभु आ सोक्तीम चढेब येहो-यादा आ तौ जकरिया कली सुमा बाक्त। मिनू मेको मुर आन डोंइती राप्शा मेको आन कली “परमप्रभुमी मार देंशो बाक्त, देंशा हना, ‘गे मारदे परमप्रभु यावे आ शेंशो मपाइनीनी? मोपतीके गे गेना हना यो श्येत जशा, रिम्शो मदुम्नीनी। गेपुकीम परमप्रभु यावे कली प्रोंइतीके, मेकोमी यो इन कली प्रोंइशो बाक्ब’ देंशो बाक्ब” देंमाक्त। मती २३:३५; हिब्रू ११:३७

21 तन्न मेकोपुकीम जकरिया आ पबंम गारशा, पिप आ हुकुम पतीकेमी जकरिया कली परमप्रभु यावे आ खिं डा लाडगाम फुल्लु आप्शा सदमे बाक्त।

22 पिप योआशम जकरिया आ आफ येहो-यादाम आ कली रिम्शो पशो नेल्ल प्रेंदा बाक्त। मिनू मेको आ तौ कली सदा बाक्त। मिनू आ बेक्ची ना जकरियामी “परमप्रभु यावेम एको तशा, क्येक्क लेत्तल” देंमाक्त। २इतिहास २३:-

23 मिनू मेको बर्स नुच्ची ना अराम रागी डा लडाइ पाइबपुकी योआश नु लडाइ पथ जाक्मा बाक्त। मिनू मेकोपुकीम यहूदा नु यरूसलेम जाक्शा, मेकेर डा मुर आन दाते डा सरकार डा गेय पाइब नु ठेयब मुर नेल्ले आन कली सदमे बाक्त। मिनू आन रोइशशो मारेइ मारेइ दमस्कस डा पिप कली सोइक्तमे बाक्त। २राजा १२:१८-२२

24 अराम डा लडाइ पाइब इक्का ला बाक्तेक्म हना यो, परमप्रभु यावेमी इस्राएल डा शुश लडाइ पाइब आन कली मेको आन गुडमी गेमी बाक्त। मारदे हना यहूदा डा मुरपुकीम परमप्रभु यावे, आन किकी पिपी आन परमप्रभु कली प्रोंइशो बाक्मा बाक्त। मोदेंशो पा योआशमी निसाफ नु सजाइ तवा बाक्त।

25 मिनू अराम रागी डा लडाइ पाइबपुकीमी पिप कली शुश गार सेल्शा, गाक्मा नोले, पिप आ ठेयब गेय पाइबपुकीमी गारशा, चढेब येहो-यादा आ तौ कली साइशशो आ क्येक्क लेत्चा कली पिप आ ब्राख्येम बाक्मेनु, सदमे बाक्त। मोपा मेको बेक्माक्त। मिनू मुरपुकीम मेको कली दाऊद आ सहरमी थिम्मे बाक्त। तन्न पिप आन कली थिम्तीकेम मथिम्मे बाक्त। २इतिहास २१:२०

26 मेको कली साइक्ब अम्मोनी मीश मुर शिमेआथ आ तौ जाबाद नु मोआबी मीश मुर शिमीथ आ तौ येहो-जाबाद बाक्सा बाक्त।

27 योआश आ चच युड आन पबंम ब्रेक्शो लोत्र, मेको आ थाप्या माल्लो क्येट आ पबंम लोत्र नु दोपा मेकोमी लेंशा परमप्रभु आ खिं सेला, मेको नेल्ल पिप आन किताबम ब्रेक्शो बाक्ब। मिनू मेको आ पा डा आ तौ अमस्याह पिप दुम्माक्त।

## 25

यहूदा डा पिप अमस्याह

२० राजा १४:१-२०

1 अमस्याह पिप दुम्मेनु, २५ बर्स दुम्शो बाक्माकत। मेकोमी यरूसलेममी २९ बर्स सासन पवा बाकत। मेको आ ममा आ नें येहो-अदान बाक्माकत। मेको यरूसलेम डा बाक्माकत।

2 मेकोमी परमप्रभु यावे आ डोंइती मार टीक बाक्मे, मेको पवा बाकत। तन्न आ थुं नेल्लेम ममाइ।

3 मेकोमी आ राज्य डा सासन बोल्यो दुम नोले, आ आफ कली साइक्ब, आ गेय पाइब आस कली सांडसी बाकत। २इतिहास २४:२५

4 तन्न मेको आस आल आन कली मसदा बाकत। मारदे हना मोसा आ किताबम ब्रेक्शो परमप्रभु यावे आ अरेशो “आम आफ आन तमी तौ आन पबर्म नु तमी तौ आन आम आफ आन पबर्म साइक्चा मदुम्ब। सुम पाप पाइबा, मेको साइक्चा पुंडसीब” देशो परमप्रभु यावे आ लोव्र टिवा बाकत। ब्यवस्था २४:६६

5 मिनु अमस्याहम यहूदा नु बेन्यामीन डा मुर नेल्ल आन कली गुम्पाइशशा, आन खिं खिं डा मुर हजार हजार आन कली कप्तान का का नु सहे सहे डा आन कली कप्तान का का वोइक्पदा बाकत। मेकोमी २० बर्स गाप्शो नु मेको क्येडा लाक्शो मुर नेल्ल आन कली पुक्मी बाकत। मेको आन कली हिक्शोनु, लाख सां बाक्मा बाकत। मेको नेल्ल लडाइ पने चापब बाक्मा बाकत। तूतीक नु तेक्तीक चलने चापब बाक्मा बाकत।

6 मेकोमी इस्राएल रे लाख का बोल्यो लडाइ पाइब आन कली ब्रेशशा, सहे का टलेन्ट चांदी गेवा बाकत। टलेन्ट का ३४ किलो बाक्ब।

7 तन्न परमप्रभु आ मुर का मेको आन बाक्तीक जाक्शा “आं पिप, इस्राएल डा लडाइ पाइब आन कली गे नु मलाइक्मी। मारदे हना परमप्रभु यावे इस्राएलीपुकी नु एफ्राइम आ थर डा मुर नेल्ल नु मबाक्ब।

8 गे मोपा बोल्यो दुम्शा बाक्शो मिम्तीनी नु इस्राएल डा लडाइ पाइब लाइक्तीनी हना, परमप्रभुम इन कली इन जोरी सत्रु आन डोंइती बुपाइक्ब। मारदे हना ग्रापाइक्तीक नु बुपाइक्तीक सक्ति परमप्रभु आ गुडम बाक्ब” देमाकत।

9 मिनु अमस्याहम परमप्रभु आ मुर कली “इस्राएली लडाइ पाइब आन पबर्म गेशो मेको सहे का टलेन्ट चांदी आ पबर्म गो मार पाइनुडा?” दे हिल्लो पवा बाकत। मिनु परमप्रभु आ मुरुम “परमप्रभु यावेम इन कली मेको क्येडा यो शुश गेने चापब” देमाकत।

10 मोपतीके पिप अमस्याहम एफ्राइम रे जाक्शो लडाइ पाइब आन कली आन खिं लेशशा सोइक्तीमी बाकत। मिनु मेकोपुकी यहूदा नु शुश गाइक्तमे बाकत। मिनु थाम्पा चुरशा, आन खिं लेशशा लमा बाक्मा बाकत।

11 मिनु अमस्याहम बोल पा महिंथु थुं बारपाइशशा, आ लडाइ पाइब आन कली हिक्सी दिंमम लाइक्मी बाकत। मिनु मेकेर सेडर डा १० हजार मुर आन कली साइक्मी बाकत।

12 मिनु यहूदा डा लडाइ पाइबपुकीम अर्को १० हजार मुर आन कली सेसीन ग्याइशशा, मेको आन कली टेयब सेरथे फुल्लु तार लाइशशा, नेप्शा ख्रीडमे बाकत। ख्रीशो नेल्ले चोकटा लाम्टा दुम्शा बेक्मा बाकत।

13 मेना अमस्याहम लडाइम मलाइक्थु, खिं लेशशा सोइशशा लडाइ पाइबपुकीम यहूदा डा सहरपुकी सामरीया रे बेथ-होरोन सम्म मारिड मारिड रोइक्तमे बाकत। मेकोपुकीम मेकेर हजार सां मुर आन कली सदमे बाकत। मिनु शुश मार मार रोइशशा लदमे बाकत।

14 मिनु अमस्याहम एदोमी आन कली ग्राशा लेम्मेनु, सेडर डा मुर आन देवतापुकी चाक्शा आ देवता सेला बाकत। मिनु मेकोमी मेको देवता आन कली पूजा पा मेको आन कली चढेवा बाकत।

15 मोपतीके परमप्रभु यावे अमस्याह नु गाइशशा, आ लोव्र पाइब का सोइक्ता बाकत। मिनु मेकोमी “गे मारदे आ मुर आन कली लायो इ गुड रे प्रोंइने मचापब देवता आन नोले खोदी?” दे हिल्लो पवा बाकत।

16 मिनु मेकोमी लोव्र पना पन, पिपमी “मार गोपुकीम इन कली पिप कली अर्ती गेब सेल्शो नकी डा? ब्वाले पावो। मारदे साइक्चा पुंडसीनेवे?” दे मदा बाकत। मिनु मेको परमप्रभु यावे आ लोव्र पाइबम सिक्सी पचा क्येडा डोंइती “गेम ओं पाइतीनी, आं लोव्र मनेंतीके परमप्रभुमी इन कली थमा पा खतम पोक्चा थुं पवा बाकत। गो तुइक्नुड” देमाकत।

17 मेको नोले यहूदा डा पिप अमस्याहम आ अर्ती गेबपुकी नु सल्ला पा इस्राएल डा पिप येहू आ चच येहो-अहाज आ तौ योआश कली “जाक्को। गे नु गो लडाइ पस” दे मदा बाकत।

18 तन्न इस्राएल डा पिप योआशमी यहूदा डा पिप अमस्याह कली कथा का देमाकत। मार कथा देमाकत देशा हना “लेबानोन डा चू बुटा कामी लेबानोन डा लाइशशा रवा का कली ‘इ तमी आं तौ नु ग्युबे पचा गेवो’ देमाकत। तन्न लेबानोन डा ब्वाकी डा जन्तु का मेको रे पा पिमेनु, मेको चू बुटा कली दिम्शा लाक्गा बाकत। न्यायाधीस ९:१४

19 गे एदोम कली ग्राती, दे बोरशा टेयब मलेतो। गे इ खिं उइ बाक्को। गे मारदे आम कली नु यहूदा कली खतम पोक्चा माल्नेवे?” दे लोव्र लेत्ता बाकत।

20 तन्न अमस्याहम मेको लोव्र मनेना बाकत। मोपतीके परमप्रभुमी मेको कली मुर आन गुडमी गेवा बाकत। मारदे हना मेकोपुकीम एदोम डा देवता आन कली खोइशशा बाक्मा बाकत।

21 मिनु इस्राएल डा पिप योआश डोंइती लमाकत। मिनु मेको नु यहूदा डा पिप अमस्याह यहूदा डा बेथ-शेमेशम लडाइ पाप्से बाकत।

22 मिनु यहूदा डा मुरपुकी इस्राएली आन क्येडा बुमा बाकत। मिनु मेको नेल्ल आन खिं प्रोक्मा बाकत।

23 मिनू इस्राएल डा पिप योआशमी योआश आ तौ, अहाज्याह आ चच, यहूदा डा पिप अमस्याह कली बेथ-शेशेम ग्याइशशा यरूसलेमम चाक्का बाक्त। मिनू मेकोमी एफ्राइम डा टेयब लाप्चो रे सुर डा टेयब लाप्चो सम्म डा ४ सहे कुबीत लाइशशो गारो प्रेदा बाक्त। कुबीत का ०.५ मिटर बाक्ब।

24 मेकोमी ओबेद-एदोम आ खाल पशो परमप्रभु आ खिंम बाक्शो सुन चांदी, ग्योबपुकी नु पिप आ खिंम बाक्शो सुन चांदी शुश क्येट लाइब थोत्रकपुकी नु मुर आन कली ग्याइशशा लाइशशा, सामरीया लेम्माक्त। पिप आ मुर आन कली यो ग्याइशशा लाइशशा, सामरीया लेम्माक्त। इतिहास २६:१३,१५

25 इस्राएल डा पिप येहो-अहाज आ तौ योआश क्येडा यहूदा डा पिप योआश आ तौ अमस्याह १५ बर्स शुश ब्रोंडमाक्त।

26 अमस्याह आ पशो, आ डोंइती रे नोले सम्म नेल्ल यहूदा नु इस्राएल डा पिप आन इतिहासम ब्रेक्शो बाक्ब।

27 मेको अमस्याह परमप्रभु यावे रे डोन दुम नाक्त रे यरूसलेमम मेको कली साइक्का, दे सल्ला पा गारशो बाक्का बाक्त। मेको प्रोक्शा ब्रोंइचा कली लाकीशम लमाक्त। तन्न मेकोपुकीम लाकीशम आ नोनोले खेदा पाइब मुर सोइशशा, मेको कली मेक उइ साइक्पदमे बाक्त। २इतिहास २४:२५

28 मेको नोले मेको आ बेक्शो रं शाराम कुर पा, यरूसलेम चाक्कामे बाक्त। मिनू मुरपुकीमी मेको कली आ किकी पिपी आन कली थिम्तीके दाऊद आ सहरम थिम्मे बाक्त।

## 26

यहूदा डा पिप उज्जीयाह

२राजा १४:२१-२२; २राजा १५:१-७

1 मिनू यहूदा डा मुरपुकी नेल्लेम १६ बर्स दुम्शो अमस्याह आ तौ उज्जीयाह कली मेको आ आफ आ पा डा पिप सेल्मे बाक्त।

2 मिनू अमस्याह बेक्म नोले उज्जीयाहमी एलोथ सहर लेंशा ताक्का, यहूदा कली लेशशा गेशा, रिम्शो सेला बाक्त।

3 उज्जीयाह पिप दुम्मेनु, मेको १६ बर्स दुम्शो बाक्काक्त। मेकोमी यरूसलेमम ५२ बर्स सासन पवा बाक्त। मेको आ ममा आ नें येकोल्याह बाक्काक्त। मेको यरूसलेम डा बाक्काक्त।

4 मेकोमी आ आफ अमस्याह खोदेशो पा परमप्रभु यावे आ डोंइती मार ठीक बाक्मे, मेको पवा बाक्त। २इतिहास २५:२

5 मेना जकरिया पिप कली परमप्रभु यावे कली मान पा हिंचा आ पर्वम शेंब बाक्काक्त। मिनू पिपमी जकरिया आ पालाम परमप्रभु यावे आ नोले खोइक्का खोइक्क बाक्काक्त। मोपा खोदा सम्म परमप्रभुम अमस्याह आ पशो नेल्ल रिम्शो दुम्पदा बाक्त।

6 मिनू मेको पलिस्ती नु लडाइ पचा कली लडाइ पतीकेम लमाक्त। मिनू मेकोमी गाथ, याब्नेह नु अशदोद कली ग्राशा, गारो प्रेशशा गेवा बाक्त। मिनू मेकोमी अशदोद नु आ नेक्था पलिस्ती रागी आन दातेम अरु सहरपुकी सेला बाक्त।

7 परमप्रभुमी मेको कली पलिस्ती, गुर-बालम बाक्ब अराबीपुकी नु मेउनीपुकी नु लडाइ दुम्तीकेम वारच पदा बाक्त।

8 मिनू अम्मोनीपुकीमी उज्जीयाह कली आन गेचा माल्शो मार मार गेमे बाक्त। मिनू मेको आ सोशो बोशो लोत्र इजीप्त आ नेक्था सम्म जाक्दीम्माक्त। मारदे हना मेको शुश सक्ति पाइशशो दुम्शो बाक्काक्त।

9 मेकोमी यरूसलेमम गारो डा सुर डा टेयब लाप्चो, बेंसी डा टेयब लाप्चो नु गारो आ सुर हिरतीकेमी यो लाइशशो खिंपुकी सेला बाक्त। मिनू मेको कली बोल्यो सेला बाक्त।

10 मेकोमी गोरशो रागीम अरु लाइशशो खिंपुकी सेला बाक्त। मिनू मेकोमी शुश इनारपुकी दोपाइक्मी बाक्त। मारदे हना मेको के शेफेलाह नु दिंममी शुश बी ब्यफ बाक्का बाक्त। मिनू मेको के पहाडम नु रिम्शो खप डा दिंमम रू दोइब नु अडगुर रू कोल्लब मुरपुकी बाक्का बाक्त। मारदे हना मेको खेतीपाती पचा दाक्ब मुर बाक्काक्त।

11 मेको प्रोंइशा, उज्जीयाह के बोल्यो लडाइ पाइब शुश बाक्का बाक्त। मेकोपुकी गेना हना यो लडाइ पचा कली ठीक दुम्शा बाक्बाक्का बाक्त। मिनू मेको लडाइ पाइब आन ब्रेक्ब यिएल नु पुक्ब मासेयाहम मेको आन कली हुल हुल सेल्शा, पिप आ कप्तान हनान्याहम देशो खोदेशो पा पाम्से बाक्त।

12 खिं खिं डा बोल्यो सक्ति पाइशशो लडाइ पाइब हजार निक्शी ६ सहे बाक्का बाक्त।

13 मेको टेयब मुर आन हुकुममी पिप कली आ जोरी सत्रु रे वारच पाइक्का कली लाख सां ७ हजार ५ सहे बोल्यो लडाइ पाइब आन हुल का यो बाक्काक्त।

14 मिनू उज्जीयाहमी लडाइ पाइब नेल्ल आन कली तेक्तीके, तूतीक, फलाम के टोपी, कुचुम पांडतीके, लिब्रा नु हुरद आप्तीक फुल्लु ठीक पा गेवा बाक्त।

15 मेकोमी यरूसलेम डा गारो डा लाइशशो खिं तारी नु सुरपुकीम जोक्ब मुर आन सेल्शो ब्रा आप्तीक नु टेयब फुल्लु आप्तीक वोइक्पदा बाक्त। आ टेयब दुम्तीके तेड तेड ब्रशो बाक्काक्त। मेको सक्ति पाइशशो दुम्माक्त। मारदे हना परमप्रभुमी मेको कली छक लाक्का डा पा वारच पवा बाक्त। मेको आ पर्वम शुश लोत्र ब्रशो बाक्काक्त।

16 मोपा मेको सक्ति पाइशशो दुम्तीके टेयब लेशशा, खतम दुम्माक्त। मेकोमी परमप्रभु यावे, आ परमप्रभु कली मटिथु, धूप चोतीकेम धूप चोचा कली परमप्रभु यावे आ खिं ओत्रमाक्त। २इतिहास २५:१९

17 तन्न चढेब अजारयाह नु अरु परमप्रभु यावे कली चढेब बोल्यो नु महिब ८० जना मुरुमी मेको आ नोले खोदमे बाक्त।



18 मिनू पिप उज्जीयाह कली तेक्चा, दे “पिप उज्जीयाह परमप्रभु यावे कली धूप चोतीक गेय इन के ममाइ। एको गेय पचा कली जिम्मा गेशो हारून आ चच युइ चढेब आन के बाक्ब। परमप्रभु यावे आ बाक्तीक रे गूडीन। मारदे हना गे दूली पाइतीनी। मिनू मुल परमप्रभु यावेमी इन कली मारेइ मान मगेपाइक्ब” दे मदमे बाक्त। गन्ती १८:७; प्रस्थान ३०:७

19 मिनू गुइम थनोरो शेशा धूप चोचा कली ठीक दुम्शो पिप गाइक्ता बाक्त। मिनू मेको चढेबपुकी नु गाइक्ता गाइक्त्तन आ कुप्फीम कोत्रर गूमाक्त। मेको नेल्ल चढेब आन डोंइती, परमप्रभु यावे आ खिं आगाम नु धूप चढेतीक आ डोंइती दुम्माक्त।

20 मिनू ठेयब चढेब अजारयाह नु अरु चढेबपुकीम मेको कली कोत्रना कोत्रन मेको आ कुप्फीम कोर गूशो तशा, मेको कली रीब पा परमप्रभु यावे आ खिं रे लाडगा गुइदमे बाक्त। मेको आंमा यो रीब पा लाडगा गूचा माल्शो बाक्माक्त। मारदे हना परमप्रभु यावेम मेको कली मेको रोइमी आप्शो बाक्माक्त।

21 मिनू पिप उज्जीयाह आ बेक्ची नाक्त सम्मन कोत्ररी दुम्शा बाक्माक्त। मेको कोत्ररी दुम्शा खिं काम आ कान बाक्चा माल्दा बाक्त। मेको परमप्रभु यावे आ खिं रे तिल्चा पुंइसे बाक्त। मिनू मेको आ तौ योथाममी दरवार कली कोत्रशा, मुर आन कली सासन पचा गोवा बाक्त। गन्ती ५:२

22 उज्जीयाह आ पशो नेल्ल डोंइती रे नोले सम्म डा गेय नेल्ल आमोज आ तौ परमप्रभु यावे आ लोत्र पाइब यसैयाम ब्रेक्शो बाक्ब। यसैया ६:१; यसैया १:१

23 मिनू उज्जीयाह बेक्माक्त। मिनू मेकोपुकीमी आ किकी पिपी आन कली थिम्तीके आ नेक्था डा रू काम थिम्मे बाक्त। मारदे हना मुरपुकीम “कोत्ररी का बाक्ब” देंमा बाक्त। मिनू मेको आ पा डा आ तौ योथाम पिप दुम्माक्त।

## 27

यहूदा डा पिप योथाम

२राजा १५:३२-३८

1 योथाम पिप दुम्मेनु, २५ बर्स दुम्शो बाक्माक्त। मेकोमी यरूसलेमम १६ बर्स सासन पवा बाक्त। मेको आ ममा आ नें येरुशाह बाक्माक्त। मेको सादोक आ तमी बाक्माक्त।

2 मेकोमी आ आफ उज्जीयाह खोदेशो पा परमप्रभु यावे आ डोंइती मार ठीक बाक्मे, मेको पवा बाक्त। तन्न मेको आ आफ खोदेशो पा परमप्रभु यावे आ खिं मओत्रमाक्त। मो हना यो मुर आन मरिम्शो गेय पस डा पस बाक्मा बाक्त। २इतिहास २६:२६

3 मेकोमी परमप्रभु यावे आ खिं डा आइक्था डा लाप्चो लेंशा सेला बाक्त। मिनू मेकोमी ओफेल डा गारोम शुश गेय पा बोल्यो पा सेला बाक्त।

4 मेकोमी यहूदा डा पहाडमी यो सहरपुकी सेला बाक्त। मिनू ब्वाकी डा डांडापुकीम बोल्यो दरवार नु लाइइशो खिंपुकी सेला बाक्त। २इतिहास २६:१०

5 मिनू योथाममी अम्मोनी आन पिप नु लडाइ पा मेको आन कली ग्रामाक्त। मिनू मेको बर्स अम्मोनीपुकीम मेको कली सहे का टलेन्ट चांदी, १० हजार कोर चेरब नु १० हजार कोर क्योत्रज गेमे बाक्त। मिनू मेकोपुकीम आ नोले डा बर्स नु मेको क्येडा नोले डा बर्सम यो मोपान तिरो थाप्तेम बाक्त। टलेन्ट का ३४ किलो बाक्ब। कोर का २२० लिटर खोदेशो बाक्ब।

6 मिनू योथामम परमप्रभु यावे, आ परमप्रभु आ डोंइती रिम्शो गेय पतीके मेको थम सक्ति पाइइशो दुम्माक्त।

7 योथामम मार मार पवा, मेको आ पशो लडाइ नेल्ले नु आ गाक्शो लां इसाएल नु यहूदा डा पिप आन इतिहासम ब्रेक्शो बाक्ब।

8 मेको पिप दुम्मेनु, २५ बर्स दुम्शो बाक्माक्त। मिनू मेकोमी यरूसलेमम १६ बर्स सासन पवा बाक्त।

9 मिनू योथाम बेक्माक्त। मिनू मुरपुकीमी मेको कली दाऊद आ सहरम थिम्मे बाक्त। मिनू आ नोले मेको आ तौ आहाज पिप दुम्माक्त।

## 28

यहूदा डा पिप आहाज

1 आहाज पिप दुम्मेनु, २० बर्स दुम्शो बाक्माक्त। मेकोमी यरूसलेमम १६ बर्स सासन पवा बाक्त। मेकोमी आ किकी पिपी दाऊद खोदेशो पा परमप्रभु यावे आ डोंइती मार ठीक बाक्मे, मेको मपवा बाक्त।

2 मेको इस्राएल डा पिप आन लांम गाक्माक्त। मिनू चेम्शा बाल देवता आ मूर्तिपुकी सेला बाक्त।

3 मिनू पिप आहाजम बेन-हिन्नीम आ बेसीम धूप चढेवा बाक्त। आहाजमी रागी रागी डा मुर आन ग्रॉग्रा दिशो गेय खोदेशो पा, आ तौ आन कली मीम चोशा चढेवा बाक्त। मोपतीके परमप्रभु यावेमी रागी रागी डा मुर आन कली इस्राएली आन डोंइती रे खेरशो बाक्माक्त। ब्यवस्था १८:१-१२

4 मेकोमी डांडा डा थानपुकीम चढेवा बाक्त। मिनू नेल्ल डांडाम नु ठेयब रवा आ पुंम चढेतीक चढेशा धूप चोवा बाक्त। १राजा १४:२२-२३

5 मोपतीके परमप्रभु यावे, आ परमप्रभुमी मेको कली अराम डा पिप नु बुपाइइशा, मेको आ गुइमी गेवा बाक्त। मिनू मेकोमी पिप आहाज आ शुश मुर आन कली ग्याइइशा, दमस्कसम लदा बाक्त। मेको इस्राएल डा पिप नु यो बुमाक्त। मिनू मेको पिपम शुश मुर आन कली सदा बाक्त।

6 रेमाल्याह आ तौ पेकाहमी काबुमीन यहूदा डा लाख का २० हजार मुर आन कली साइक्मी बाक्त। मेको नेल्ल बोल्यो लडाइ पाइब बाक्मा बाक्त। मारदे हना यहूदा डा मुरपुकीम परमप्रभु यावे, आन किकी पिपी आन परमप्रभु कली प्रॉइशो बाक्मा बाक्त।

7 एफ्राइम डा जिक्की माइशो बोल्यो लडाइ पाइब मुर काम पिप आ तौ मासेयाह, पिप आ दरवार कोत्रब कप्तान अज्रीकाम नु पिप आ ठेयब ब्रेक्ब एल्काना आन कली साइक्मी बाक्त।

8 इस्राएलीपुकीमी लाख निक्शी आन थर थर डा मुर ग्याइशशा लदमे बाक्त। मेको मीश मुर, तमी नु तौ बाक्मा बाक्त। मिनु मेकोपुकीम शुश मार मार यो रोइशशा, नेल्ल सामरीया लदमे बाक्त।

9 तन्न मेकेर ओदेद नें पाइशशो परमप्रभु यावे आ लोत्र पाइब का बाक्माक्त। मिनु लडाइ पाइबपुकी सामरीया लेम्मानु, मेको आन कली गुथ जाक्माक्त। मिनु मेकोमी मेको लडाइ पाइब आन कली “परमप्रभु यावे, इन किकी पिपी आन परमप्रभु यहूदा डा मुरपुकी नु गाइक्तीके, मेकोमी मेको आन कली इन गुडमी गेपु। तन्न गेपुकीम इन गाइक्तीकेम मेको आन कली साइक्तीनी। मेको मो पशो इर स्वर्ग सम्म जाक्दीशो बाक्ब। लेवी १९:१८

10 मुल गे यहूदा नु यरूसलेम डा मीश मुर, वॉइश मुर नेल्ल आन कली इन वाइलीम वाइल सेल्चा थुं पाइनीनी। गेपुकीम परमप्रभु यावे, इन परमप्रभु आ डोंइती पाप ला पाइनीनी। अरु मार पाइनीनी?

11 मुल आं लोत्र नेनीन। इन ग्याइशशो आंम मुर आन कली प्रॉइशा लेत्चा गेने। मारदे हना परमप्रभु यावे इन कली तशा शुश चुरशो बाक्ब” देमाक्त।

12 मिनु लेंशा का निक्शी एफ्राइम डा ठेयब मुर योहानान आ तौ अजारयाह, मेशील्लेमोथ आ तौ बेरेक्याह, शाल्लुम आ तौ येहीज्क्याह नु हादले आ तौ आमासाम लडाइ रे लेशशा जाक्शो आन कली गुश्शा,

13 मेको आन कली “गेपुकीम एको ग्याइशशो आन कली एक चाक्चा मटुम्ब। गेपुकीम मार मिम्शो बाक्नी? मेको आ पर्वम गोपुकीम परमप्रभु यावे आ डोंइती दोस ताइनीकी। मार, गेपुकीम इं मरिम्शो पशो नु इं पाप तेम्चा दाक्नीनी? मार, इं पाप ठेयब मबाक्बा डा? परमप्रभु यावे इस्राएल आ पर्वम डोंइती रे गाइक्ना गाइक्न बाक्ब” दे मदमे बाक्त।

14 मोपतीके लडाइ पाइबपुकीम ग्याइशशोपुकी नु आन रोइशशो मारिइ मारिइ मेको आन ठेयब मुर नु मेको देल्शा बाक्शो मुर आन डोंइती प्रोन्ने बाक्त।

15 मिनु ठेयब मुरपुकीमी नें थिशा का निक्शी मुर आन कली ब्रेत्मे बाक्त। मेको ब्रेशो मुरपुकीम ग्याइशशा चाक्शो शिश्रा मुर आन कली रोइशशो वा फेक्पदमे बाक्त। जुत्ता मुइक्पदमे बाक्त। जचा नु तूचा गेशा, तेल खेक्तमे बाक्त। मिनु थाम्पा दशो नु गाक्ने मचाप्ब मुर आन कली गधा डोइक्पा, खजूर रवा आ सहर, यरीको आन खिं खिं सम्म चोक्डमे बाक्त। मिनु मेकोपुकी सामरीया लेम्मा बाक्त। २राजा ६:२२; हितोपदेस २५:२१-२२

16 मेना पिप आहाजम अस्सुर डा पिप कली “वारच पाइक्की” दे पुंइथ मुर सोइक्ता बाक्त।

17 मारदे हना एदोमीपुकीम लेंशा लडाइ पा यहूदा कली ग्राशा, मेकेर डा मुर आन कली ग्याइशशा लाइशशो बाक्मा बाक्त।

18 पलिस्तीपुकीमी यो यहूदा डा शेफेलाह नु नेगेब डा सहरपुकी रोइक्तमे बाक्त। मिनु मेकोपुकीम बेथ-शेमेश, आइयालोन, गेदे-रोथ, सोको नु मेको आ गाउपुकी, तिम्नाह नु मेको आ गाउपुकी, गिम्जो नु मेको आ गाउपुकी आंम के सेल्शा बाक्मा बाक्त। यहोसु १५:१०

19 यहूदा डा पिप आहाजम पतीकेन परमप्रभु यावेम यहूदा कली थम आइक्च सेल्शो बाक्माक्त। मारदे हना पिप आहाजम थम मरिम्शो पा परमप्रभु यावे कली प्रॉइशो बाक्माक्त।

20 मिनु अस्सुर डा पिप तिल्याथ-पिलेसेर मेको कली वारच पाइक्थ जाक्माक्त। तन्न मेकोमी मेको कली वारच पाइक्चा आ पा डा श्येत कका गेवा बाक्त।

21 मिनु आहाजम परमप्रभु यावे आ खिं, पिप आ दरवार नु आ ठेयब मुर आन खिं रे मार मार लाइशशा, अस्सुर डा पिप कली “वारच पाइय्की” दे गेवा बाक्त। तन्न मेको नेल्ल मोशा दुम्माक्त।

22 मोपा पिप आहाज दोशो श्येत जवा, मोशोन परमप्रभु यावे क्येडा डोन दुम्माक्त।

23 मेकोमी आंम कली बुपाइक्ब दमस्कस डा देवता आन कली चढेवा बाक्त। मारदे हना मेकोमी “आराम डा पिप आ देवतापुकीम मेको आन कली वारच पाइक्तेक्म। गो यो मेको आन कली मार मार चढेनुड। मिनु आं कली यो वारच पाइय्कीमील” दे मिन्ता बाक्ता। तन्न मेको देवतापुकी मेको कली नु इस्राएली नेल्ल आन कली खतम पोक्तीक दुम्माक्त।

24 मेको नोले आहाजमी परमप्रभु आ खिं डा ग्योबपुकी खुप्शा, खोइशशा बिग्रेवा बाक्त। मिनु परमप्रभु यावे आ खिं डा लाप्यो चोक्गा बाक्त। मिनु मेकोमी यरूसलेम तेइ तेइ थानपुकी सेला बाक्त।

25 मिनु यहूदा डा सहर सहरमी डांडा डा थानपुकी सेला बाक्त। अरु देवता आन कली मार मार चढेवा बाक्त। मोपा मेकोमी परमप्रभु यावे, आंम किकी पिपी आन परमप्रभु कली थाम्पा गाइक्पदा बाक्त।

26 मिनु मेकोमी नोले सम्म मार मार पवा नु आ डोंइती नु नोले डा गाक्शो लां नेल्ल, यहूदा नु इस्राएल डा पिप आन किताबम ब्रेक्शो बाक्ब।

27 मिनु आहाज बेक्माक्त। मिनु मुरपुकीम मेको कली यरूसलेम सहरम थिम्मे बाक्त। तन्न मेकोपुकीम मेको कली इस्राएल डा पिप आन कली थिम्तीकेम मथिम्मे बाक्त। मिनु मेको आ पा डा आ तौ हिज्कीयाह पिप दुम्माक्त। २इतिहास २१:२०

## 29

यहूदा डा पिप हिज्कीयाह

1 हिज्कीयाह पिप दुम्मेनु २५ बर्स दुम्शो बाक्माक्त। मेकोमी यरूसलेमम २९ बर्स सासन पवा बाक्त। मेको आ ममा आ नें अबीयाह बाक्माक्त। मेको जकरिया आ तमी बाक्माक्त।

2 मेकोमी आ किकी पिपी दाऊदम पशो खोदेशो पा परमप्रभु यावे आ डोंइती मार ठीक बाक्मे, मेको पवा बाक्त।

परमप्रभु आ खिं डा गेय

3 मिनु मेको पिप दुम्शो डोंइती डा बर्स डा डोंइती डा महिनाम मेकोमी परमप्रभु यावे आ खिं डा लाप्चोपुकी रोकशा, मेको आन कली सेल्पदा बाक्त। २इतिहास २८:२४

4 मेकोमी चढेब नु लेवी आन कली पुक्शा पूर्व डा लाडगाम गुम्पाइक्मी बाक्त।

5 मिनु मेकोमी मेको आन कली “लेवीपुकी, आं लोव नैनीन। मुल गेपुकी आंम कली परमप्रभु यावे आ डोंइती ठीक सेल्सीन। मिनु परमप्रभु यावे, इन किकी पिपी आन परमप्रभु आ खिं ठीक सेलीन। मिनु परमप्रभु यावे आ बाक्तीक रे ग्रंथा दिशो नेल्ल युंइशा ताइक्तीन।

6 मारदे हना इं किकी पिपीम परमप्रभु यावे कली प्रोंइशा, परमप्रभु यावे, इं परमप्रभु आ डोंइती मार मरिम्शो बाक्मे, मेको पांन्तेक्म। मेकोपुकीम मेको कली प्रोंइशा, मेको आ बाक्तीक आ पर्वम मारेइ ममिन्तेम। मेकोपुकीम परमप्रभु यावे आ खिं कली हिरशान मकोवडेम।

7 मेकोपुकीम पिंडी डा लाप्चोपुकी यो चोक्तेक्म। बत्ती काप्ताक्म। मेकोपुकीम इसाएली आन परमप्रभु आ खिम धूप चोचा नु चोशा चढेचा प्रोंइतेक्म।

8 मोपतीके परमप्रभु यावे यहूदा नु यरूसलेम आस पर्वम गाइक्ताक्व। मिनु मेकोमी मेको आन कली आन रागी आ नेक्था डा मुर आन डोंइती ग्रंथा दिन्चा डा शुक्शी पचा डा नु तोक्चा पुंडसीब सेल्लु। मेको गे आंमा तशो बाक्नीनी।

9 मोपतीके इं आफ तरवारम क्योरशा साइक्चा पुंडसाक्म। मिनु इं तमी तौ नु इं मीश ग्याइशशा लाइक्चा पुंडसाक्म। २इतिहास २८:५-८

10 मिनु मुल गो परमप्रभु यावे, इसाएली आन परमप्रभु नु कबल पचा थुं पशो बाक्नुड। मोपा इं पर्वम गाइशशो बेक्वा कों?

11 मोपतीके आं तौपुकी, मुल देश मपने। मारदे हना गे परमप्रभु यावे आ डोंइती राप्शा आ गेय पचा कली नु मेको कली चढेचा कली योवसीशो बाक्नीनी” देमाक्त।

12 मिनु लेवीपुकी गेय पचा कली बोक्मा बाक्त। मेको सु सु बाक्मा बाक्त देशा हना, कोहाथी रे अमासै आ तौ माहाथ, अजारयाह आ तौ योएल, मेरारी रे अब्दी आ तौ कीश नु येहल्लेल आ तौ अजारयाह, गेरशोनी रे जिम्माह आ तौ योआह नु योआह आ तौ एदेन,

13 एली-जाफान रे शिग्री नु येहुएल, आसाफ रे जकरिया नु मत्तन्याह,

14 हेमान रे येहुएल नु शिमिड, येदुथून रे शेमायाह नु उज्जीएल, मेको लेवीपुकी बाक्मा बाक्त।

15 मिनु मेकोपुकीम आन आन लोकब आन कली खुप्तमे बाक्त। मिनु मेकोपुकीम आंम कली परमप्रभु यावे आ डोंइती ठीक सेल्सीमा बाक्त। मिनु पिपम परमप्रभु यावेमी देशो खोदेशो पा हुकुम पवा बाक्त। मिनु मेकोपुकीम परमप्रभु यावे आ खिं ओव्रशा, ग्रंथा दिशो मार मार गुंडदमे बाक्त।

16 मिनु चढेबपुकी परमप्रभु यावे आ खिं ओव्रमा बाक्त। मोपा ओव्रशा, मेकेर बाक्शो ग्रंथा दिशो थोव्रक नेल्ल गुंडशा लाडगाम तेल्ले बाक्त। मिनु लेवीपुकीम मेको गुप्शा, किद्रोन खोल्साम लाइशशा ताइक्तमे बाक्त।

17 मेकोपुकीम डोंइती डा महिना डा डोंइती डा नाक्ती ठीक सेल्तीक गेय पचा गोव्रमे बाक्त। मिनु ८ नाक्तीम मेकोपुकी पिंडी सम्म जाक्दीम्मा बाक्त। मिनु अर्को ८ नाक्ती नोले मेकोपुकीम परमप्रभु यावे आ खिं नेल्ले ठीक सेल्शो बाक्मा बाक्त। मिनु मेकोपुकीम डोंइती डा महिना डा १६ नाक्तीम मेको गेय थुम्मे बाक्त।

18 मेको नोले मेकोपुकी पिप हिज्कीयाह आ बाक्तीक लशा “गोपुकीम परमप्रभु यावे शोब्ले लहर पा वोइक्तीक टेबल नु मेको आ मारेइ मारेइ ठीक सेल्ले थुम्तक।

19 मिनु पिप आहाजम पिप पवा ना, परमप्रभु यावे कली प्रोंइशा, तिलशा वोइशशो थोव्रकपुकी नेल्ल ठीक सेल्शा, आन आन बाक्तीकेम वोइक्तक। मुल मेको परमप्रभु यावे कली चढेतीक आ डोंइती वोइशशो बाक्नीम” देमा बाक्त।

20 मिनु पिप हिज्कीयाह सुनी कना बोक्शा, सहर डा टेयब मुर आन कली पुक्पाइशशा, परमप्रभु यावे आ खिं ग्येत्थ लमा बाक्त।

21 मेकोपुकीम ७ ओटा ब्यफ, ७ ओटा सांड, ७ ओटा पाठा नु ७ ओटा बोका चाक्गमे बाक्त। मेको नेल्ले राज्य, परमप्रभु यावे आ बाक्तीक नु यहूदा आ पाप आ पर्वम चढेचा कली बाक्मा बाक्त। मिनु पिपम मेको नेल्ल हारून आ चच युड, चढेब आन कली परमप्रभु यावे आ चढेतीकेम चढेचा, दे हुकुम पवा बाक्त।

22 मेकोपुकीम मेको ब्यफ आन कली क्योरमे बाक्त। मिनु चढेबपुकीम मेको आन हुश ताक्शा चढेतीकेम बुइक्तमे बाक्त। मिनु मेकोपुकीम सांड आन कली क्योरमे बाक्त। मिनु मेको आन हुश ताक्शा चढेतीकेम बुइक्तमे बाक्त। मिनु पाठा आन कली क्योरशा, मेको आन हुश ताक्शा चढेतीकेम बुइक्तमे बाक्त।

23 मिनु मेको नोले मेकोपुकीम पाप आ पर्वम चढेतीक बोका आन कली पिप नु मुर आन डोंइती चाक्गमे बाक्त। मिनु पिप नु मुरपुकीम मेको आन तार आन आन गुड वोदमे बाक्त। लेवी १६:१५-२२

24 मिनू चढेबपुकीम मेको बोका क्योरशा, आन हुश पाप आ पबर्म चढेतीकेम चढेमे बाक्त। इस्राएली नेल्ल आन पबर्म पाप क्याम्तीक गेय पामे बाक्त। मारदे हना पिपम चोशा चढेतीक नु पाप आ पबर्म चढेतीक इस्राएली नेल्ल आन पबर्म चढेचा माल्ब, दे अरेशो बाक्माक्त।

25 मिनू पिपम लेवी आन कली परमप्रभु यावे आ खिम बुप्केल नु टेयब नु आडकच तार पाइशो ताप्तीके ताप्चा कली ठीक दुम्पाइक्मी बाक्त। मारदे हना डोंडती दाऊदम, परमप्रभु यावे आ लोत्र ताइब, गाद नु नाथान रे पा मोदेंशो शेंशो बाक्माक्त। १इतिहास २५:१

26 मिनू लेवीपुकीम दाऊद आ सेल्लो ताप्तीकपुकी नु चढेबपुकीम तुराही शेशा राम्मा बाक्त।

27 मिनू हिज्कीयाहम चोशा चढेशो चढेतीकेम चढेचा माल्मीम, दे हुकुम पवा बाक्त। मिनू चोशा चढेतीकेम चढेचा गोत्रमेनु, परमप्रभु यावे कली कुम्सो पामे बाक्त। तुराही नु इस्राएल डा पिप दाऊदमी सेल्लो ताप्तीक मेको कुम्सो नु ताप्मे बाक्त। १इतिहास २३:५

28 मिनू खुम्सीशो मुर नेल्ले बाप्शा, परमप्रभु यावे कली टेयब सेल्मे बाक्त। कुम्सो पाइबपुकीम कुम्सो पामे बाक्त। मिनू तुराही ताबपुकीम तुराही ताप्मे बाक्त। चोशा चढेतीक मनुम्म सम्म मोदेंशो पामे बाक्त।

29 मिनू चढेशो नुम नोले पिप नु मेकेर बाक्ब नेल्लेमी बाप्शा टेयब सेल्मे बाक्त।

30 मिनू पिप हिज्कीयाह नु मेको आ सरकार डा टेयब मुरपुकीम लेवी आन कली दाऊद नु परमप्रभु यावे आ लोत्र पाइब आसाफ आ ब्रेक्शो कुम्सो पा परमप्रभु यावे कली टेयब सेल्पदमे बाक्त। मोपा मेकोपुकीम थाम्पा ग्येरसीशा परमप्रभु यावे आ डोंडती बाप्शा टेयब सेल्मे बाक्त। २इतिहास २३:१८

31 मिनू हिज्कीयाहम “मुल गे आंमा परमप्रभु यावे कली जिम्मा गेसाक्नी। गेपुकीम चढेतीक नु ‘गे रिम्शो पाइब बाक्नीनी’ दे चढेतीक चाक्शा परमप्रभु यावे आ खिम जाक्कीन” देंमाक्त। मोपतीके खुम्सीशो मुरपुकीम चढेतीक नु “गे रिम्शो पाइब बाक्नीनी” दे चढेतीक कुरशा जाक्मा बाक्त। मिनू सुइमी ग्येरसीशा चोशा चढेतीके चाक्चा दाक्ताक्म हना, मेको पामे बाक्त।

32 मिनू मेको खुम्सीशो मुरपुकीम चाक्शो चोशा चढेतीक हिक्शोनु, ७० ओटा ब्यफ, सहे का सांड नु सहे निक्शी पाठा बाक्मा बाक्त। मिनू मेको नेल्ल परमप्रभु यावे कली चोशा चढेचा कली बाक्मा बाक्त।

33 मिनू परमप्रभु यावे कली चढेचा कली गेशो ६ सहे ब्यफ नु हजार सां भेडा बाक्मा बाक्त।

34 नन चढेबपुकी इक्चा ला बाक्तीके मेको चोशा चढेशो नेल्ल आन कुशुल उक्ने मचाप्मे बाक्त। मोपतीके मेको आन लोकब लेवीपुकीम मेको गेय नेल्ल मनुम्म सम्म नु अरु चढेबपुकीम आंम कली परमप्रभु यावे आ डोंडती ठीक मसेल्मे सम्म वारच पामे बाक्त। मारदे हना आंम कली परमप्रभु यावे आ डोंडती ठीक सेल्चामी चढेब आन क्येडा लेवीपुकी थम होस पाइक्बाक्मा बाक्त। २इतिहास ३:३,१६,१७

35 चोशा चढेतीक नेल्ल नु दुशा बाक्चा आ पबर्म चढेशो आ बोसो नु चोशा चढेशो कली तूचा थोत्रक चढेतीक शुश बाक्मा बाक्त। मोपा परमप्रभु यावे आ खिम डा पतीक गेय डोंडती डा खोदेंशो पा रिम्शो दुम्माक्त। लेवी ३:१६; गन्ती १५:४-१०

36 मिनू हिज्कीयाह नु मुर नेल्ल थाम्पा ग्येरसमा बाक्त। मारदे हना परमप्रभुम आ मुर आन कली पशो रीब पा छक लाक्चा डा पा दुम्माक्त।

## 30

### पास्सा चाड मानेशो

1 मिनू हिज्कीयाहम इस्राएली नु यहूदा डा मुर आन कली “यरूसलेमम बाक्शो परमप्रभु यावे आ खिम परमप्रभु यावे, इस्राएली आन परमप्रभु कली पास्सा चाड मानेश जाक्कीन” दे ब्रेत्ता बाक्त। मिनू मेकोमी एफ्राइम नु मनस्से डा मुर आन कली यो चिठी ब्रेक्शा ब्रेत्ता बाक्त। २इतिहास ३५:१

2 मिनू पिप, आ सरकार डा टेयब मुर नु यरूसलेमम खुम्सीशो मुर नेल्लेम निक्शी महिनाम पास्सा चाड मानेशा कली लोत्र गारपदमे बाक्त।

3 मेकोपुकीम डोंडती परमप्रभुम देंशो खोदेंशो पा मानेशे मचाप्शो बाक्मा बाक्त। मारदे हना शुश चढेबपुकीम आंम कली परमप्रभु यावे आ डोंडती ठीक मसेल्सीशो बाक्मा बाक्त। मिनू मुरपुकी यो यरूसलेमम मदेल्शो बाक्मा बाक्त।

4 मिनू पिप नु खुम्सीशो मुर नेल्लेमी मेको चाड मानेशीक लोत्र आ पबर्म “ठीक बाक्ब” देंमा बाक्त।

5 मिनू मेकोपुकीम दक्खिन डा बेयर-शेबा रे उत्तर डा दान सम्म डा इस्राएली नेल्ल आन कली परमप्रभु यावे, इस्राएली आन परमप्रभु आ पबर्म पास्सा चाड मानेशा कली यरूसलेमम जाक्चा माल्मा बाक्त। एको क्येडा डोंडती इश्का मुर दुम्शा, एको चाड ममानेशो बाक्मा बाक्त।

6 मिनू पिप नु आ सरकार डा टेयब मुरुम ब्रेक्शो चिठी चोक्ब मुरपुकी पिप आ देंशो खोदेंशो पा यहूदा नु इस्राएलम लमा बाक्त। मिनू मेको चिठीम मार ब्रेक्शो बाक्माक्त देंशा हना “इस्राएली परमप्रभु यावे, इन किकी पिपी अब्राहाम, इसहाक नु इस्राएल आन परमप्रभु गे लेत्तीन। मेना मेकोमी अस्सुर डा पिपम मलाइशो लीशो मुर आन कली लेंशा कोत्रब। इस्राएल याक्ब आ नें बाक्ब।

7 गेपुकी इन किकी पिपी नु आंम मुर खोदेंशो मदुमीन। मेकोपुकीम परमप्रभु यावे, इन किकी पिपी आन परमप्रभु कली प्रोइतेक्म। मोपतीके परमप्रभु यावेमी मेको आन कली खतम सेला बाक्त। मेको आंमा तशो बाक्नीनी।

8 गेपुकी इन किकी पिपी खोदेशो पा काइ मटीब मदुमीन। तन्न परमप्रभु यावे कली आ अरेशो टिशा, आ बाक्तीकेम जाक्कीन। मिनू 'मेको गेना हना यो आं बाक्तीकेम बाक्ब' देशो बाक्ब। गे परमप्रभु यावे कली गेय पने। मोपा इन पर्वम आ गाइशो बेक्बा, कों?

9 गे परमप्रभु यावे गे लेत्तीनी हना, ग्याइशला लाइक्चा पुंडसीशो इन खिं खिं डा मुर नु इन आलपुकीम ग्याइक्ब मुर रे शिशी तशा, मेकोपुकी एको रागीम लेशशा जाक्नीम। मारदे हना परमप्रभु यावे, इन परमप्रभु दाक्ब नु शिशी पाइब बाक्ब। गेपुकी मेको गे लेत्तीनी हना, मेको यो इन गे लेप्ब" दे ब्रेक्शो बाक्माक्त।

10 मिनू मेको चिठी चोक्बपुकी एफ्राइम नु मनस्से आस सहर सहर नेल्ल हिरशा जबूलून सम्म जाक्दीम्मा बाक्त। तन्न मुरपुकीम मेको आन कली रिशशा शुक्शी पामे बाक्त।

11 मो हना यो आशेर, मनस्से नु जबूलून डा मुर का निक्शी ब्रेम्शो दुम्शा यरूसलेम लमा बाक्त। २इतिहास ११:१६

12 परमप्रभु यावेमी यहूदा डा मुर यो थुं का दुम्पदा बाक्त। मिनू मेकोपुकीमी पिप नु सरकार डा ठेयब मुर आन कली देशो, परमप्रभु यावे आ लोत्र खोदेशो पा पामे बाक्त।

13 मिनू शुश मुर महिना निक्शीम बोरब ओरुखी मसुप्शो शोब्ले डा चाड मानेचा कली यरूसलेमम जाक्मा बाक्त। मेकेर शुश मुर खुम्सीशो बाक्मा बाक्त।

14 मिनू मेकोपुकीम यरूसलेम आ एर ओंथ बाक्शो चढेतीकपुकी नु धूप चोतीक प्रेशशा, किद्रोन खोल्साम लाइशशा ताइक्तमे बाक्त।

15 मिनू मेकोपुकीम महिना निक्शी डा १४ नाक्ती पास्सा चाड मानेतीक पाठा क्योरमे बाक्त। मिनू चढेब नु लेवी परमप्रभु यावे आ डोंइती आंम कली ठीक मसेल्लीके मुने दोक्शो बाक्मा बाक्त। मिनू मुल आंम कली ठीक सेल्शा, परमप्रभु यावे आ खिंम चोशा चढेतीक चढेमे बाक्त। गन्ती १:१०-१३

16 परमप्रभु आ मुर मोसा आ ब्रेक्शो अरेशो लोत्र खोदेशो पा मेको आन गेय पतीकेम बाक्मा बाक्त। मिनू लेवीपुकीम चाक्शो हुश चढेबपुकीम ताक्शा बुइक्तमे बाक्त।

17 तन्न मेको शुश खुम्सीशो मुर परमप्रभु यावे आ डोंइती आंम कली ठीक सेल्ने मचाप्शो बाक्मा बाक्त। मोपतीके लेवीपुकीमी मेको मुर आन पर्वम आन पास्सा चाड डा पाठा क्योरचा माल्मा बाक्त।

18 मिनू एफ्राइम, मनस्से, इस्साकार नु जबूलून रागी रे जाक्शो शुश मुरपुकी परमप्रभु यावे आ डोंइती आंम कली ठीक मसेल्सीशो बाक्मा बाक्त। मो हना यो मेकोपुकीम परमप्रभु यावे अरेशो मपथु, पास्सा चाड मानेमे बाक्त। प्रस्थान १२:-

19 तन्न हिज्कीयाहम मेको आन पर्वम "परमप्रभु यावे गे शिशी पाइब बाक्नीनी। सु सुमी आन थुं नेल्लेमी इन कली, परमप्रभु यावे, आन किकी पिपी आन परमप्रभु खोइक्चा दाक्बा नु इन देशो खोदेशो पा आंम कली ठीक सेल्ने मचाप्शो बाक्मा, मेको आन कली मारेड मपन" दे पुना बाक्त।

20 मिनू परमप्रभु यावेम हिज्कीयाह आ पुंडशो लोत्र नेना बाक्त। मिनू मुर आन कली सापाइक्मी बाक्त। २इतिहास ७:१४

21 मिनू यरूसलेमम जाक्ब इस्त्राएली नेल्लेमी ७ नाक्त सम्म थाम्पा ग्येरसीशा बोरब ओरुखी मसुप्शो शोब्ले डा चाड मानेमे बाक्त। मिनू लेवी नु चढेबपुकीम ठेयब सेंदाम कुम्सो पा, ताप्तीक ताप्शा, नाक्त किंत किंत परमप्रभु यावे कली ठेयब सेल्मे बाक्त।

22 मिनू हिज्कीयाहम परमप्रभु यावे आ गेय रिम्शो पस जोक्ब लेवी आन कली लोत्र पा आन थुं बारपाइक्मी बाक्त। मिनू मुरपुकीम मेको चाड डा जचा थोत्रक ७ नाक्ती सम्म जना जन बाक्मा बाक्त। मेकोपुकीम दुशा बाक्चा आ पर्वम चढेतीक चढेशा, परमप्रभु यावे, आन किकी पिपी आन परमप्रभु कली "गे रिम्शो पाइब बाक्नीनी" दे ग्येरसीशा बाक्मा बाक्त।

23 मिनू खुम्सीशो मुर नेल्लेमी अर्को ७ नाक्त सम्म चाड मानेचा कली लोत्र गारपदमे बाक्त। मोपतीके मेकोपुकीम अर्को ७ नाक्ती सम्म यो ग्येरशा मेको चाड मानेमे बाक्त।

24 यहूदा डा पिप हिज्कीयाहम मेको खुम्सीशो मुर आन कली हजार का ब्यफ नु ७ हजार भेडा चढेचा कली गेमी बाक्त। मिनू सरकार डा ठेयब मुरपुकीम मेको खुम्सीशो मुर आन कली हजार का ब्यफ नु १० हजार भेडा गेमी बाक्त। शुश चढेबपुकीम यो आंम कली परमप्रभु यावे आ डोंइती ठीक सेल्सीमा बाक्त।

25 मिनू यहूदा डा खुम्सीशो मुर नेल्ले, चढेब नु लेवीपुकी नेल्ल, इस्त्राएल रे जाक्शो मुरपुकी नु इस्त्राएल रे प्रोक्शो यहूदाम बाक्ब मुर नेल्ले ग्येरसीशो बाक्मा बाक्त।

26 मोपा यरूसलेमम थम ठेयब ग्येरसीतीक दुम्माक्त। मेको मोदेशो इस्त्राएल डा पिप दाऊद आ तौ सोलोमन आ पाला रे गेनायो मदुम्शो बाक्माक्त।

27 मिनू चढेबपुकी नु लेवीपुकी बोक्शा मुर आन कली आसीक गेमे बाक्त। मेको आन पुंडशो लोत्र परमप्रभु यावे आ बाक्तीक स्वर्ग सम्म नेंसे बाक्त।

## 31

मुरपुकीम थान प्रेशशो

1 मिनू मेको नेल्ल नुप्शा नोले यरूसलेम जाक्शो इस्त्राएली नेल्ल यहूदा डा सहरपुकीम लशा, पूजा पतीक खुक्शो फुल्लु प्रेत्ये बाक्त। मूर्ति पाइशशो थाम खोल्मे बाक्त। यहूदा, बेन्यामीन, एफ्राइम नु मनस्से रागी नेल्ल डा डांडा डा थान बुल बाल उइशशा ताइक्तमे बाक्त। मिनू नोले इस्त्राएली आन आन सहर नु आन आन बाक्तीकेम लेम्मा बाक्त। २इतिहास २९:५; ब्यवस्था ७:५; २राजा १८:४

चढेब आन भाग

2 पिप हिज्कीयाहमी चढेब नु लेवी आन कली आन गेय गेना पचा दे पालो पालो पा वोइक्पदा बाक्त। मिनु चढेब नु लेवी आन कली परमप्रभु यावे कली चोशा चढेतीक चढेचा नु दुशा बाक्चा आ परबम चढेचा, परमप्रभु यावे कली “गे रिम्शो पाइब बाक्नीनी” दे कुम्सो पा, टेयब सेल्ल्तीक कुम्सो नु परमप्रभु यावे आ बाक्तीक डा लाप्यो आ डोंइती गेय पचा कली आन पालो योक्शा गेशो बाक्त।

3 मिनु पिपम आ गोठे रे चोशा चढेचा कली मार गेशो बाक्माक्त देशा हना, नाक्दो डा चोशा चढेतीके, सुनी डा चोशा चढेतीके, नाइक्तीक नाक्त डा चोशा चढेतीके, औंसी डा चोशा चढेतीके नु देशो चाड नेल्ल कली चोशा चढेतीक गेशो बाक्माक्त। परमप्रभु यावे आ अरेशो लोव्र दोपा ब्रेक्शो बाक्मे, मोपा पवा बाक्त। गन्ती २८:-

4 मिनु चढेब नु लेवीपुकीम परमप्रभु यावे आ अरेशो लोव्र डा गेय पस डा पस बाक्मल, दे पिपम यरूसलेमम बाक्ब मुर आन कली मेको आन गेचा माल्लो भाग चढेब नु लेवी आन कली गेचा माल्लीम, दे हुकुम पवा बाक्त।

5 मिनु मुरपुकीम पिप आ हुकुम नेन्मे चोटीन आन नेल्ल क्येडा डोंइती डा मीशो नु सिशशो अन्न, नक अडगुर शांबु, तेल, खुदो नु आन रूम सिशशो मार मार शुश चाक्शा गेमे बाक्त। मेकोपुकीम आन मारेड मारेड के १० भागम भाग का चाक्गमे बाक्त। प्रस्थान २३:१९; ब्यवस्था १४:२२-२३

6 मिनु इस्राएल नु यहूदा डा सह्रपुकीम बाक्ब मुरपुकीम यो आन १० भाग डा भाग का बी ब्यफ नु क्यारश भेडा चाक्गमे बाक्त। परमप्रभु यावे, आन परमप्रभु कली गेशो थोव्रक रे १० भाग डा भाग का चाक्शा तेलमे बाक्त। लेवी २७:३२

7 मेकोपुकीम बर्स डा महिना सांमी चाक्शा तेलचा गोव्रमे बाक्त। मिनु ७ महिनाम चाक्ने थुम्मे बाक्त।

8 मिनु हिज्कीयाह नु मेको आ सरकार डा टेयब मुर जाक्शा, मेको तेल्लो थोव्रक तशा, परमप्रभु यावे नु आ मुर इस्राएली आन कली “गे रिम्शो पाइब बाक्नीनी” देमा बाक्त।

9 मिनु हिज्कीयाहमी मेको तेल्लो थोव्रक आन परबम चढेब नु लेवी आन कली हिल्लो हिक्सी पामी बाक्त।

10 मिनु सादोक आ खिं डा मुर, टेयब चढेब अजारयाहम “मुरपुकीम परमप्रभु यावे आ खिं कली आन भाग चाक्गमे रे आंइ कली जचा गाप्त। मिनु शुश मार मार हेंशो यो बाक्ब। मारदे हना परमप्रभु यावेम आ मुर आन कली शुश आसीक गेशो बाक्ब। मिनु एको इश्का मार मार हेंशो यो बाक्ब” देमाक्त।

11 मिनु नोले हिज्कीयाहमी “परमप्रभु यावे आ खिंमी मार मार वोइक्तीक कोटापुकी सेलीन” दे हुकुम पवा बाक्त। मिनु मेको सेल्मे बाक्त।

12 मिनु मुर नेल्लेमी जोल मपथु, आन १० भाग डा भाग का नु परमप्रभु कली गेशो नेल्ल चाक्गमे बाक्त। मेको १० भाग डा भाग का ताक्शो कोव्रब टेयब लेवी कोनन्याह बाक्माक्त। मिनु मेको आ लोक्ब शिमेड चहिं मेको आ दी डा टेयब मुर बाक्माक्त।

13 मिनु पिप हिज्कीयाह नु परमप्रभु आ खिं डा टेयब मुर अजारयाहमी कोनन्याह नु आ लोक्ब शिमेड आस कली वारच पाइब येहीएल, अजजीयाह, नाहाथ, आसाहेल, येरीमोथ, योजाबाद, एलीएल, इस्माक्याह, माहाथ नु बेनायाह आन कली योव्रशा वोइक्पदसे बाक्त।

14 मिनु इम्नाह आ तौ कोरे पूब डा लाप्यो खाल पाइब लेवी बाक्माक्त। मेकोमी मुर आन परमप्रभु कली ग्येरशा चढेतीक गेशो मारेड मारेड कोव्रब बाक्माक्त। मिनु चढेशो, चाक्शो मारेड मारेड परमप्रभु यावे कली नु सु सु कली योक्चा माल्बा, मेको नेल्ल कोव्रब बाक्माक्त।

15 मिनु कोरे कली चढेब आन सह्रम वारच पाइब एदेन, मीन्यामीन, येशुआ, शेमायाह, अमारयाह नु शेकन्याह बाक्मा बाक्त। मेकोपुकीम पालो पालो पा गेय पाइब चढेब खाल्पा नु टिटा नेल्ल आन कली खाल का डा पा थमा पा जोल मपथु, योक्तीक गेय पामे बाक्त।

16 मोपतीके सु सु आन भाग गेचा पुंडसीब बाक्मा, परमप्रभु यावे आ खिं डा गेय पाइब परमप्रभु यावे आ लोव्र खोदेशो पालो पालो पा आन नें ब्रेक्तीक कागजम ब्रेक्शो बाक्मा बाक्त। बर्स सां लाक्शो वोंइश आल आन नें ब्रेक्शो बाक्माक्त।

17 मेको चढेब आन खिं खिं कोव्रशा, ब्रेक्सीशो बाक्मा बाक्त। लेवीपुकी २० बर्स लाक्शो, आन पचा डा गेय नु पालो कोव्रशा ब्रेक्शो बाक्मा बाक्त।

18 चढेब, आन आइक्च आल, आन मीश, आन तमी तौ नेल्ल आन नें ब्रेक्शो बाक्माक्त। मारदे हना मेकोपुकीम “परमप्रभु यावे आ गेय ला पाइनीकी” दे थुं पशो बाक्मा बाक्त।

19 मिनु हारून आ तौ डा चढेब वोंइश मुरपुकी सह्र आन नेक्था डा योक्तीकेम बाक्शो, चढेब आन दातेमी सु सु वोंइश मुर आन नें ब्रेक्शो बाक्मा, मेको आन भाग गेचा पुंडसमा बाक्त। मिनु चढेब नु लेवी आन दातेमी सु सु आन नें ब्रेक्शो बाक्मा, मेको गेचा पुंडसमा बाक्त।

20 मिनु हिज्कीयाहम यहूदा नेल्लेमी मोदेशो पवा बाक्त। मेकोमी परमप्रभु यावे, आ परमप्रभु आ डोंइती मार रिम्शो, मार ठीक नु थमा सुइक्चा पुंडसीशो बाक्मे, मेको पवा बाक्त।

21 मेकोमी परमप्रभु यावे आ खिं डा गेय पतीके, परमप्रभु यावे आ अरेशो लोव्र नु आ शेंशो तुइक्तीकेमी आ परमप्रभु कली आ थुं नेल्लेमी मला बाक्त। मिनु आ पशो नेल्लेमी रिम्शो दुम्माक्त। भजन संग्रह १:३

## 32

सन्हेरीबम लडाइ पशो

२राजा १८:१३-१९, ३७; यसैया ३६:-; यसैया ३७:-

1 मिनू हिज्कीयाहम मेको रिम्शो गेय नेल्ले पने थुमा नोले, अस्सुर डा पिप सन्हेरीब यहूदा ओव्रशा “यहूदा डा बोल्यो सहरपुकी आंम के सेलुड” दे मिम्शा, मेको सहरपुकी आ नेकथा ताम्बु कीडा बाक्त।

2 मिनू हिज्कीयाहमी सन्हेरीब जाक्शा, यरूसलेम कली लडाइ तोचा चिक्शो तवा चोटीन

3 मेकोमी सहर डा लाडगा डा ब्वाक्कु बुक्तीके तेक्चा, दे सरकार डा ठेयब मुर नु कप्तानपुकी नु सल्ला पवा बाक्त। मिनू मेकोपुकीमी पिप कली वारच पामे बाक्त।

4 मेकोपुकीम शुश मुर खुप्शा, आन रागी रे ब्वाक्कु बुक्तीक नु खोल्ला नेल्ल तेक्गामे बाक्त। मिनू मेकोपुकीम “अस्सुर डा पिपपुकी एक जाक्शा, शुश ब्वाक्कु तूचा मतामेक्ल” देमा बाक्त।

5 मिनू हिज्कीयाहम शुश बोल पा सहर डा ब्रेशो गारो नेल्ल सेल्पदा बाक्त। मिनू आ तार लाइशो खिंपुकी सेल्पदा बाक्त। मिनू मेकोमी गारो डा लाडगा गे अर्को गारो सेल्पदा बाक्त। मिनू दाऊदा आ सहर डा गारो तिक्चा कली खप तेल्पदा बाक्त। मिनू मेकोमी शुश या नु तेक्तीक यो सेल्पदा बाक्त। २इतिहास २५:२३;

6 मेकोमी लडाइ पाइब आन कप्तान योव्रशा, मेको आन कली सहर डा ठेयब लाप्चो आ डोंइती डा दिममी पुक्शा, मेको आन कली आन थुं बारपाइश

7 “बोल्यो नु महिब दुमीन। अस्सुर डा पिप नु मेको आ चाक्शो शुश मुर तशा, महिनीन। मारदे हना मेकोपुकी नु बाक्शो क्येडा गोपुकी नु बाक्शो का थम ठेयब बाक्ब।

8 मेको नु शुश मुर ला बाक्नीम। तन्न गोपुकी नु परमप्रभु यावे, इ परमप्रभु बाक्ब। मेकोमी इ कली वारच पा इ पा डा लडाइ पाइब” दे यहूदा डा पिप हिज्कीयाहमी मुर आन थुं बारपदा बाक्त। येरमीया १७:५-६

9 मेको नोले अस्सुर डा पिप सन्हेरीबम आ लडाइ पाइब लाकीशम बाक्मानु, यहूदा डा पिप हिज्कीयाह नु यरूसलेम डा मुर नेल्ल आन कली लोव्र नेपाइक्चा कली मुरपुकी सोइक्ता बाक्त।

10 मिनू मेकोपुकीम “अस्सुर डा पिप सन्हेरीबम मार लोव्र पाइब देशा हना, गे एर ओंथ रे पुम्शो यरूसलेम सहरम दोपा ब्रोंइने चाप्नीनी, दे सु कली थमा सुइक्नीनी?

11 पिप हिज्कीयाहमी “परमप्रभु यावे, इ परमप्रभु कली अस्सुर डा पिप आ गुइ रे प्रोंइब, दे जोल मपवा? तन्न मेकोमी इन बाक्तीकेमीन अन्काल नु ब्वाक्कु तूतू दाक्पाइश, इन कली बेक्पाइक्चा कली मोदेशो लोव्र पशो बाक्ब।

12 मार, मेको हिज्कीयाहमी डांडा डा थान नु आ चढेतीक बुल बाल एशशा खतम मपोक्पदा? मिनू यहूदा नु यरूसलेम डा मुर नेल्ल आन कली, चढेतीक काम पूजा पा नु मेकेर ला चढेचा’ मदेंम डा?

13 गो नु आं किकी पिपीम अर्को रागी जात जात डा मुर आन कली मार पाइक्का, मेको गेपुकीम मतुइशो बाक्नीनी डा? मार, मेको रागी रागी डा मुर आन देवताम मेको रागी आन कली आं गुइ रे प्रोंइने चाप्मे डा?

14 आं किकी पिपीम खतम पोक्शो रागी रागी डा मुर आन देवता आन दाते डा तेको देवताम आं गुइ रे आ मुर आन कली प्रोंइने चबा डा? मिनू दोपा इन परमप्रभुमी इन कली आं गुइ रे प्रोंइने चाप्बा?

15 मोपतीके हिज्कीयाहम इन कली जोल पा दूली लां खोइक्पाइक्चा मगेन। मेको कली थमा मसुतीन। मिनू तेकोइ देवतापुकीम आन रागी नु राज्य डा मुर आन कली आं किकी पिपी नु आं गुइ रे प्रोंइने मचाप्शो बाक्तेक्म हना, इन परमप्रभुमी इन कली आं गुइ रे दोपा प्रोंइने चाप्बा डा? देशो बाक्ब मतीन” देमाक्त।

16 मिनू सन्हेरीब आ गेय पाइबपुकीमी परमप्रभु यावे नु मेको आ गेय पाइब हिज्कीयाह आ पबंम चिनू मरिम्शो लोव्र तेम्शा, लोव्र पामे बाक्त।

17 पिप सन्हेरीबम परमप्रभु यावे, इस्राएली आन परमप्रभु कली यो तोक्शा लोव्र पा चिठी ब्रेक्शो बाक्माक्त। मिनू मेको चिठीम मार ब्रेक्शो बाक्माक्त देशा हना “दोपा अर्को रागी रागी डा मुर आन देवतापुकीम आन मुर आन कली आं गुइ रे प्रोंइने मचाप्मे, मोपा हिज्कीयाह आ परमप्रभुमी यो आ मुर आन कली आं गुइ रे प्रोंइने मचाप्ब” दे ब्रेक्शो बाक्माक्त।

18 मिनू मेकोपुकीम सहर आन के सेल्चा कली यरूसलेम डा गारो तार राप्ब मुर आन कली हिंच कोइचा कली ठेयब सेंदा पा यहूदी आन लोव्रमी मेको चिठीम ब्रेक्शो लोव्र पा ग्रीमा बाक्त।

19 मेकोपुकीम मुर आन गुइम सेल्शो रागी डा देवता आन कली खोदेशो पा यरूसलेम डा परमप्रभु कली तोक्शा लोव्र पामे बाक्त।

सन्हेरीब कली मुने दोक्पाइशो

20 मेना पिप हिज्कीयाह नु आमोज आ तौ परमप्रभु यावे आ लोव्र पाइब यसैयाम परमप्रभु कली ठेयब सेंदा पा पुन्से बाक्त।

21 मिनू परमप्रभु यावेम आ स्वर्ग डा गेय पाइब का अस्सुर डा पिप आ बाक्तीकेम सोइशशा, आ बोल्यो लडाइ पाइबपुकी, आ कप्तानपुकी नु आ ठेयब मुरपुकी नेल्ल साइक्पदा बाक्त। मिनू सन्हेरीब मुने दोक्शा आ रागी लेम्माक्त। मिनू मेको आ देवता थान ओव्रमेनु, आ तौ का निक्शीमी तरवारम क्योरशा सदमे बाक्त।

22 मोपा परमप्रभु यावेम हिज्कीयाह नु यरूसलेमम बाक्ब मुर आन कली अस्सुर डा पिप सन्हेरीब नु मेको आन जोरी सत्रु नेल्ल आन गुइ रे प्रोना बाक्त। परमप्रभु यावेमी मेको रागी कली नाइक्चा गोवा बाक्त।

23 मिनू शुश मुरपुकीम यरूसलेमम परमप्रभु यावे कली मार मार चाक्गामे बाक्त। मिनू यहूदा डा पिप हिज्कीयाह कली शुश शोंप चाक्गामे बाक्त। मोपा रागी रागी डा मुर नेल्लेमी मेको कली मान पामे बाक्त।

हिज्कीयाह रोइ पशो

२राजा २०:-; यसैया ३८:-; यसैया ३९:-

24 मिनू नोले हिज्कीयाह शुश रोड पा बेक्चा चिकता बाक्त। मिनू मेकोमी परमप्रभु यावे कली पुना बाक्त। मिनू परमप्रभु यावेमी मेको कली लोत्र लेशशा, चिन्ड का गेवा बाक्त।

25 तन्न हिज्कीयाहमी परमप्रभु यावेमी मेको कली रिम्शो पशोमी “गे रिम्शो पाइब बाक्नीनी” मदेंथु टेयब लेशशो दुम्माक्त। मोपतीके परमप्रभु यहूदा नु यरूसलेम आ पर्बम गाइक्ता बाक्त।

26 मिनू हिज्कीयाह नु यरूसलेम डा मुर नेल्लेम ब्रेम्शो सेल्सीमे बाक्त। मोपतीके परमप्रभु यावे हिज्कीयाह आ पालाम मेकोपुकी नु मगाइक्ता बाक्त।

हिज्कीयाह आ नोले डा नाक्ती

27 हिज्कीयाह शुश शोप पाइशशो नु मान ताइब मुर दुम्शो बाक्माक्त। मेकोमी आ सुन चांदी, हीरापुकी, मस्लापुकी तेक्तीकपुकी नु अरु मार मार शुश क्येट लाइब वोइक्तीक खिंपुकी सेला बाक्त।

28 शुश अन्न, नक अडगुर शांबु नु तेल वोइक्तीक खिंपुकी सेला बाक्त। मिनू शुश बी ब्यफ नु क्यारश भेडा आन कली टेयब गोठपुकी सेला बाक्त।

29 मेकोमी आम कली सहरपुकी सेला बाक्त। मेको के बी ब्यफ नु क्यारश भेडा शुश बाक्मा बाक्त। मारदे हना परमप्रभुम मेको कली थमा पा शुश शोप गेशो बाक्माक्त।

30 मेको हिज्कीयाहमी गिहोन आ आइक्था डा बुक्शो ब्वाक्कु तेक्शा उड दाऊद आ सहर आ पच्छिम गे शाइक्पाइशशो बाक्माक्त। मेको आ पशो गेय नेल्ले रिम्शो दुम्शा, सोशो बोशो दुम्माक्त।

31 मिनू बेबीलोन डा सरकार डा टेयब मुर आन सोइशशो मुर मेको रागीम तांडीशो छक लाक्चा चिन्ड आ पर्बम हिल्लो पथ जाक्मा बाक्त। तन्न परमप्रभुम हिज्कीयाह कली नाक्शा कोत्रचा कली नु मेको आ थुंम बाक्शो मार बाक्वा, दे तुइक्चा कली वारच मपवा बाक्त।।

हिज्कीयाह बेक्शो

32 हिज्कीयाह आ नोले डा गेय नु आ रिम्शो पशो आमोज आ तौ परमप्रभु यावे आ लोत्र ताइब यसैया आ यहूदा डा पिप आन किताबम ब्रेक्शो बाक्ब।

33 मिनू हिज्कीयाह बेक्माक्त। मिनू मुरपुकीम मेको कली दाऊद आ चच युड आन कली थिन्तीक देम्सीलो मे थिम्मे बाक्त। मिनू मेको बेक्मेनु, यहूदा नु यरूसलेम डा मुर नेल्लेमी मान पामे बाक्त। मिनू मेको आ नोले आ तौ मनस्से पिप दुम्माक्त। २इतिहास १६:१४

### 33

यहूदा डा पिप मनस्से

२राजा २१:१-१८

1 मनस्से पिप दुम्मेनु, १२ बर्स दुम्शो बाक्माक्त। मेकोमी यरूसलेमम ५५ बर्स सासन पवा बाक्त।

2 मेको परमप्रभु यावेम इस्राएली आन डोंडती रे खेरशो रागी रागी डा मुर आन ग्रान्रा दिशो लाम गाक्माक्त। मिनू परमप्रभु यावे आ डोंडती मार मरिम्शो बाक्मे, मेको पवा बाक्त। ब्यवस्था १८:९

3 मेकोमी आ आफ हिज्कीयाहम खतम पोक्शो डांडा डा थान लेंशा सेला बाक्त। मिनू मेकोमी बाल देवता आन कली चढेतीक सेला बाक्त। मेकोमी मूर्ति पाइशशो थाम यो सेला बाक्त। मेकोमी सरीड डा सोरुल आन कली पूजा पा बाप्शा, सेउ पवा बाक्त। २राजा १८:४

4 मेकोमी परमप्रभु यावे आ खिम चढेतीकपुकी सेला बाक्त। मेको खिं आ पर्बम परमप्रभु यावेम “यरूसलेमम आं नें गेना हना यो लीब” देशो बाक्माक्त। ब्यवस्था १२:५, ११; १राजा ९:३

5 मेकोमी सरीड डा सोरुल आन कली परमप्रभु यावे आ खिं डा लाडगा निम्फाम चढेतीक सेला बाक्त।

6 मेकोमी आ तौ कली बेन-हिन्नोम आ बेसीम चोशा चढेवा बाक्त। मनन्तर तन्तर, तुना मुना पा नु लिक्कु कोत्रडा बाक्त। मेकोमी तुना मुना पा नु बेक्शो मुर नु लोत्र पवा बाक्त। मिनू जादू कली गेय पपदा बाक्त। मोपा परमप्रभु यावे आ डोंडती थम मरिम्शो पवा बाक्त। मिनू मेको कली गाइक्पदा बाक्त। २इतिहास २८:३; लेवी २०:६

7 मेकोमी मुपाइशशो मूर्ति परमप्रभु आ खिम वोइक्पदा बाक्त। मेको खिं आ पर्बम परमप्रभुम दाऊद नु आ तौ सोलोमन आस कली “गो इस्राएल डा थर नेल्ल आन दाते रे यरूसलेम कली योत्रता। मिनू यरूसलेमम बाक्शो एको खिम गेना हना यो आं नें वोइक्नुड।

8 मेकोपुकीम मोसामी गेशो आं शेंशो अरेशो लोत्र नेल्ल पशा, फुल्लुम मुशा ब्रेक्शो लोत्र नु निसाफ पतीक लोत्र होस पा रिम्शो पा पाम्तेक्म हना, गो आन किकी पिपी आन कली गेशो इस्राएल रागी रे इस्राएली आन कली मयुंडनुडमी” देशो बाक्माक्त।

9 मनस्सेम यहूदा नु यरूसलेम डा मुर आन कली थम दूली लां खोइक्पाइशशो बाक्माक्त। परमप्रभु यावेमी इस्राएली आन डोंडती खतम पोक्शो रागी रागी डा मुर आन क्येडा यो शुश मरिम्शो पपाइशशो बाक्माक्त।

10 परमप्रभु यावेम मनस्से नु आ मुर आन कली लोत्र पवा बाक्त। तन्न मेकोपुकी मबिस्समा बाक्त।

11 मोपतीके परमप्रभु यावेम मेकोपुकी नु लडाइ पपाइक्चा कली अस्सुर डा पिप आ लडाइ पाइब आन कप्तान आन कली चाक्मी बाक्त। मिनू मेकोपुकीम मनस्से कली ग्याइशशा मेको आ शोत्रम बोल्सी ब्वेक्तमे बाक्त। मिनू मेको कली कांसा के साडलोम पाइशशा बेबीलोन लदमे बाक्त।



12 मिनु मेको मोपा श्येत जवानु, परमप्रभु यावे, आ परमप्रभु आ शिशी मला बाक्त। मिनु आ किकी पिपी आन परमप्रभु आ डोंइती आ थुं ब्रेम्पदा बाक्त।

13 मिनु मेकोमी परमप्रभु कली पुना बाक्त। मिनु परमप्रभुम मेको आ पुंडशो नेंशा, लेंशा यरूसलेमम चाक्गा बाक्त। मिनु लेंशा मेकेर डा पिप सेला बाक्त। मिनु मोपा मनस्सेम परमप्रभु यावे, थमा परमप्रभु बाक्ब, दे तुइक्ता बाक्त। १ राजा १८:३९

14 मिनु मेको लेशशा नोले दाऊद आ सहर डा लाडगाम अर्को गारो गिहोन आ पच्छिम गे सेला बाक्त। मेको ओफेल हिरशा, डांड लापचो सम्म सेला बाक्त। मेकोमी मेको गारो शुश दुइश्शो सेला बाक्त। मिनु मेकोमी यहूदा डा बोल्यो सहर नेल्लेमी कप्तानपुकी वोइक्पदा बाक्त। २इतिहास २७:३

15 मेकोमी अर्को रागी डा देवतापुकी नु मुशा सेल्लो मूर्ति परमप्रभु यावे आ खिं रे गुंडदा बाक्त। मिनु आ परमप्रभु यावे आ खिं बाक्शो डांडाम नु यरूसलेमम सेल्लो चढेतीक नेल्ल ताइक्ता बाक्त। मिनु मेको नेल्ल आन कली सहर रे गुंडशा ताइक्ता बाक्त।

16 मिनु नोले मेकोमी परमप्रभु यावे कली चढेतीके लेंशा सेल्लशा, मेकेर दुशा बाक्चा आ पबंम चढेतीक नु “गे रिम्शो पाइब बाक्नीनी” दे चढेतीक चढेवा बाक्त। मिनु यहूदा डा मुर आन कली परमप्रभु यावे, इस्राएली आन परमप्रभु कली ला गेय पचा, दे हुकुम पवा बाक्त।

17 मेना सम्म मुरपुकीम डांडा डा थानम चढेमे बाक्त। तन्न परमप्रभु यावे, आन परमप्रभु कली चढेमे बाक्त।

18 मिनु मनस्सेम अरु मार पवा, आ परमप्रभु कली पशो पुंडतीक लोव, नु परमप्रभु यावे, इस्राएली आन परमप्रभु आ नेमी आ लोव पाइब आन लोव नेल्ल इस्राएल डा पिप आन इतिहासम ब्रेक्शो बाक्ब।

19 मेको आ पुंडतीक लोव नु परमप्रभुम आ पुंडशो दोपा नेना, आ ब्रेम्शो दुम्चा क्येडा डोंइती पशो पाप नेल्ल नु आ परमप्रभु कली थमा मसुइक्थु, डांडा डा थान ते ते सेला, मूर्ति पाइश्शो थाम नु मूर्ति वोइश्शो नेल्ल परमप्रभु यावे आ लोव पाइब आन इतिहासम ब्रेक्शो बाक्ब।

20 मिनु मनस्से बेक्माक्त। मिनु मुरपुकीम आ दरवार डा बाक्तीकेम थिम्मे बाक्त। मेको आ नोले आ तौ आमोन पिप दुम्माक्त।

यहूदा डा पिप आमोन

२ राजा २१:१९-२६

21 आमोन पिप दुम्मेनु, २२ बर्स दुम्शो बाक्माक्त। मेकोमी बर्स निक्शी यरूसलेमम सासन पवा बाक्त।

22 मेकोमी आ आफ मनस्से खोदेशो पा परमप्रभु यावे आ डोंइती मार मरिम्शो बाक्मे, मेको पवा बाक्त। आमोनमी आ आफ मनस्सेम सेल्लो मूर्ति नेल्ले आन कली चढेशा, पूजा पवा बाक्त।

23 तन्न मेकोमी आ आफ मनस्से खोदेशो पा परमप्रभु यावे आ डोंइती आम कली ब्रेम्शो मसेला बाक्त। आमोन आ पशो मरिम्शो शुश बारना बारन लमाक्त।

24 मिनु आमोन आ दरवारम गेय पाइबपुकीम लोव गारपाइश्शा, मेको कली सदमे बाक्त।

25 तन्न मेको रागी डा मुरपुकीम पिप आमोन कली साइक्ब आन कली यो सदमे बाक्त। मिनु आ तौ योसीयाह कली मेको आ आफ आ पा डा पिप सेल्ले बाक्त।

## 34

यहूदा डा पिप योसीयाह

२ राजा २२:१-२; २ राजा २३:४-१४

1 योसीयाह पिप दुम्मेनु, ८ बर्स दुम्शो बाक्माक्त। मेकोमी यरूसलेमम ३१ बर्स सासन पवा बाक्त।

2 मेकोमी परमप्रभु यावे आ डोंइती मार ठीक बाक्मे, मेको पवा बाक्त। मेको ग्युरा पेरा मपथु, आ किकी पिपी दाऊद आ लॉम गाक्माक्त। २इतिहास २९:२

मूर्ति पूजा थुम्पाइश्शो

3 मेकोमी सासन पशो ८ बर्स दुम्मेनु, ठिटा बाक्ना बाक्ना आ किकी पिपी दाऊद आ परमप्रभु कली माल्चा गोवा बाक्त। मिनु सासन पशो १२ बर्समी यहूदा नु यरूसलेम डांडा डा थानपुकी, मूर्ति पाइश्शो थामपुकी नु मुशा नु चेम्शा सेल्लो मूर्तिपुकी ताइक्चा गोवा बाक्त। लेवी २६:३०

4 मिनु पिप आ डोंइती बाल देवता आन चढेतीकपुकी प्रेप्पदा बाक्त। मिनु मेको इक्का इर बाक्शो धूप चोतीकपुकी नु चढेतीक प्रोल्शा खतम पोक्गा बाक्त। मिनु मेकोमी मूर्ति पाइश्शो थाम, चेम्शा सेल्लो मूर्तिपुकी फस पोक्मी बाक्त। मिनु मेको कली चढेब आन तुरस तारी फ्रवा बाक्त।

5 मिनु मेकोमी चढेब आन रुश यो आन चढेतीकेम चोवा बाक्त। मोपा मेकोमी यहूदा नु यरूसलेम कली ग्रांया मदिशो सेला बाक्त। १ राजा १३:२

6 मेकोमी मनस्से, एफ्राइम, सिमियोन नु नाप्ताली आन सहर सम्म नु मेको आन एर ओंथ ब्रेश्शो खिंम बाक्शो २इतिहास ३१:१

7 अशेराह आ चढेतीकपुकी प्रेशशा नु मूर्ति पाइश्शो थामपुकी नु मूर्ति नेल्ल फस पोक्गा बाक्त। मिनु मेकोमी इस्राएल रागी नेल्ल डा धूप चोतीक खतम पोक्गा बाक्त। मिनु नोले मेको यरूसलेम लेम्माक्त।

परमप्रभु आ खिं ठीक सेल्लो

२ राजा २२:३-२०; २३:१-३

8 मेकोमी आ सासन पशो १८ बर्सम रागी नु परमप्रभु यावे आ खिं ग्रॉग्रा मदिशो सेल्ने थुमा नोले, असाल्याह आ तौ शाफान, सहर डा हुकुम पाइब मासेयाह नु राज्य डा ब्रेक्ब यो-आहाज आ तौ योआह आन कली परमप्रभु यावे, आ परमप्रभु आ खिं बिग्रेशो सेल्थ सोडक्तीमी बाक्त।

9 मिनु मेकोपुकी टेयब चढेब हिल्कीयाह आ बाक्तीक जाक्शा, परमप्रभु आ खिंम चाक्शो क्येट मेको कली गेमे बाक्त। मेको क्येट लाप्यो खाल पाइब लेवीपुकीम मनस्से, एफ्राइम नु इस्राएल डा लीशो मुर नेल्ल रे, यहूदा, बेन्यामीन नु यरूसलेमम बाक्ब मुर नेल्ल रे खुप्यो बाक्मा बाक्त।

10 मिनु मेकोपुकीमी मेको क्येट परमप्रभु यावे आ खिंम गेय पाइब आन कली कोत्रब आन कली गेमे बाक्त। मिनु मेको कोत्रबपुकीमी गेय पाइब आन कली गेमे बाक्त। मेको क्येट बिग्रेशो सेल्तीक गेय नु मेको कली डोंडती डा खोदेंशो सेल्तीक गेय पचा कली माल्मा बाक्त।

11 मेकोपुकीम मेको यहूदा डा पिपपुकीम प्रोंडशो खिं लेंशा रिम्शो सेल्चा कली माल्मा बाक्त। मेको क्येट शी सेल्ब आन कली शी, दालीन, ग्रोवलो ग्याप्या कली गेमे बाक्त। मिनु गारो प्रोत्रब आन कली खोइशो फुल्लु ग्याप्या कली गेमे बाक्त।

12 मिनु मुरपुकीम रिम्शो गेय पामे बाक्त। मिनु लेवीपुकी मेरारी आ तौ याहाथ नु ओबदिया, कोहाथ आ तौ जकरिया नु मेशुल्लाम गेय पाइब आन कली कोत्रब वोइशो बाक्मा बाक्त। अरु लेवीपुकी ताप्तीक ताप्स शुश जोक्ब बाक्मा बाक्त।

13 मेकोपुकी कुरब मुर कोत्रचा कली नु गेय चलेचा कली वोइशो बाक्मा बाक्त। का निक्शी लेवीपुकी ब्रेक्ब, का निक्शी मार माल्बा, मार बाक्बा, तुडक्चा कली नु का निक्शी लाप्यो खाल पाइब बाक्मा बाक्त।

अरेशो लोत्र डा किताब थिरशो

14 मेकोपुकीम परमप्रभु यावे आ खिंम चाक्शो क्येट गुंडदमेनु, चढेब हिल्कीयाहम मोसा रे पा गेशो परमप्रभु यावे आ अरेशो लोत्र ब्रेक्शो किताब थिदा बाक्त।

15 मिनु हिल्कीयाहम ब्रेक्ब शाफान कली “गो परमप्रभु यावे आ खिंम आ अरेशो लोत्र ब्रेक्शो किताब थिरशो बाक्नुड” दे मदा बाक्त। मिनु हिल्कीयाहम मेको किताब शाफान कली गेवा बाक्त।

16 मिनु शाफानम मेको किताब पिप आ बाक्तीक चाक्शा “इन गेशो गेय नेल्ल इन गेय पाइबपुकीम पशो बाक्नीम।

17 मेकोपुकीम परमप्रभु यावे आ खिंम बाक्शो क्येट मेकेर डा कोत्रब मुर नु गेय पाइब आन कली गेशो बाक्नीम” देंमाक्त।

18 मिनु ब्रेक्ब शाफानम पिप कली “चढेब हिल्कीयाहम आं कली किताब का गेशो बाक्ब” दे शेंदा बाक्त। मिनु शाफानम मेको किताब पिप आ डोंडती पढेशा नेंपदा बाक्त।

19 मिनु पिपम मेको अरेशो लोत्र ब्रेक्शो किताबम ब्रेक्शो लोत्र नेना नोले थुं खाइशशा, आ वा खाक्गा बाक्त।

20 मिनु पिपमी हिल्कीयाह, शाफान आ तौ अहीकाम, मीकाह आ तौ अब्दोन, ब्रेक्ब शाफान नु पिप कली गेय पाइब आसायाह आन कली,

21 “गो नु इस्राएल नु यहूदाम लीशो मुर आन पर्बम परमप्रभु यावे कली हिल्लो पने। मेको थिरशो किताबम ब्रेक्शो लोत्र गो नु आंइ किकी पिपीम मटितीके परमप्रभु यावे गोपुकी नु शुश गाइशो बाक्माक्त। मेको ब्रेक्शो लोत्र गो मपक” देंमाक्त।

22 मोपतीके हिल्कीयाह नु पिपम सोइशो मुरपुकी परमप्रभु यावे आ लोत्र पाइब हुल्दा आ बाक्तीकेम हिल्लो पथ लमा बाक्त। मेको पिप आ दरवार डा वासी कोत्रब हासा आ चच तोखाथ आ तौ शाल्लुम आ मीशे बाक्माक्त। मेको यरूसलेम डा नक सहरम बाक्बाक्माक्त। मिनु मेको कली नेल्ल लोत्र देंमा बाक्त।

23 मिनु हुल्दाम मेको आन कली “परमप्रभु यावे, इस्राएली आन परमप्रभुम मार देंत देंशा हना, गे आं बाक्तीकेम सोइक्ब मुर कली

24 परमप्रभु यावेम ‘यहूदा डा पिप आ डोंडती पढेशो किताबम ब्रेक्शो सराप नेल्ल खाप्या कली, गो एको रागी नु एकेर बाक्ब मुर नेल्ल आन कली खतम पोक्नुडमी। ब्यवस्था २८:१५-६८

25 मारदे हना मेकोपुकीम आं कली प्रोंडशा, अर्को देवी देवता आन कली चढेशो बाक्नीम। मिनु मेकोपुकीम आंम आन गुडम सेल्शो मूर्तिम आं कली गाइक्पाइशो बाक्नीम। मोपतीके गो मेको रागी तशा गाइक्ताकड। मिनु आं गाइशो मबेक्ब’ देंत।

26 तन्न परमप्रभु यावे कली हिल्लो पथ इन कली सोइक्ब यहूदा डा पिप कली परमप्रभु यावे, इस्राएली आन परमप्रभुम मार देंत देंशा हना

27 ‘गो परमप्रभु यावेमी मेको रागी नु आ मुर आ पर्बम ब्रेक्शो लोत्र नेंशा, इ थुंम परमप्रभु आ डोंडती ब्रेम्शो सेल्शा, इ वा खाक्शा, डाक्शा, इ पशो लोत्र नेंता। २इतिहास ३३:१२-१३

28 मोपतीके गे एको खतम दुम्तीके मताइनेवे। गे थुं नाइशशा बेक्नेवे। मिनु इ किकी पिपी आन कली थिम्तीकेम थिम्चा पुंडसीनेवे’ दे मतीने” देंमाक्त। मिनु सोइशोपुकीमी हुल्दा आ देंशो पिप कली मदमे बाक्त।

29 मेको नोले पिपम यहूदा नु यरूसलेम डा खाल्पा नेल्ल आन कली गुम्चा, दे ब्रेल्थ सोइक्ता बाक्त।

30 मिनु पिप परमप्रभु यावे आ खिं लमाक्त। मिनु यहूदा डा मुर नेल्ल, यरूसलेमम बाक्ब मुरपुकी, चढेब नु लेवीपुकी, आइक्च नु टेयब मुर नेल्लेम मेको आ नोले खोदमे बाक्त। मिनु पिपम परमप्रभु यावे आ खिंम थिरशो आ कबल डा किताब पढेशा नेंपाइक्मी बाक्त।

31 मिनू पिप आ बाक्तीकेम राप्शा, परमप्रभु यावे नु कबल का पवा बाक्त। मार कबल पवा बाक्त देशा हना, परमप्रभु यावे आ नोले खोइक्या, मेको आ शेंतीके, आ देशो नु आ फुल्लुम मुशा ब्रेक्शो लोत्र थुं नेल्लेमी पचा नु मेको किताबम ब्रेक्शो कबल डा लोत्र नेल्ल पचा कली कबल पवा बाक्त। २इतिहास १५:१२

32 मेको नोले यरूसलेम नु बेन्यामीन रे जाक्शो मुर नेल्ल आन कली मेको ब्रेक्शो लोत्र खाप्पीकी, दे कसम जपाइक्मी बाक्त। मिनू यरूसलेमम बाक्ब मुरपुकीम आन किकी पिपी आन परमप्रभु आ कबल खाप्मे बाक्त।

33 मिनू योसीयाहम इस्त्राएली आन रागी नेल्ल रे ग्रॉग्रा दिशो मूर्ति नेल्ल युंडशा ताइकता बाक्त। मिनू इस्त्राएलम बाक्ब मुर नेल्ल आन कली परमप्रभु यावे, आंम परमप्रभु आ नोले ठेयब सेल्पदा बाक्त। मेको पिप ब्रोडम सम्म मुरपुकीम परमप्रभु यावे, आन किकी पिपी आन परमप्रभु कली खोदमे बाक्त।

## 35

योसीयाहम पास्सा चाड मानेशो

२राजा २३:२१-२३

1 योसीयाहमी यरूसलेममी परमप्रभु यावे कली पास्सा चाड मानेवा बाक्त। मिनू मुरपुकीमी डोंइती डा महिना डा १४ नाक्ती पास्सा चाड डा पाठा क्योरमे बाक्त। प्रस्थान १२:६

2 मिनू पिपमी चढेब आन कली आन आन गेय गेमी बाक्त। मिनू मेकोमी परमप्रभु यावे आ खिंम गेय पचा, दे आन थुं बारपाइक्मी बाक्त।

3 मिनू लेवीपुकी इस्त्राएली आन कली शेंब बाक्मा बाक्त। मेकोपुकी परमप्रभु यावे आ गेय ला पाइब बाक्मा बाक्त। मिनू पिपमी मेको आन कली “इस्त्राएल डा पिप दाऊद आ तौ सोलोमनम सेल्शो परमप्रभु यावे आ कबल पशो सन्दोस परमप्रभु यावे आ खिंम वोतीन। मुल रे गेपुकीमी मेको कली इन बालाम कुरचा ममाल्नीनी। मुल परमप्रभु यावे, इन परमप्रभु नु आ मुर इस्त्राएली आन गेय पने। २इतिहास ५:४-५; १इतिहास २३:२६, २८; प्रस्थान २५:१३-१५

4 इस्त्राएल डा पिप दाऊद नु आ तौ सोलोमनम ब्रेक्शा गेशो लोत्र टिने। १इतिहास २३:-

5 गे परमप्रभु यावे आ खिंम इन पालोम इन किकी पिपी आन खिं खिं डा मुर गारशा गेय पने। मिनू गेना हना यो खिं खिंमी परमप्रभु यावे कली गेय पाइब लेवी चढेब आन कली वारच पचा कली बाक्चा माल्नीनी।

6 मिनू गे परमप्रभु यावे आ डोंइती ठीक सेल्सीन। पास्सा डा पाठा क्योरीन। दाशो मुरुम मेको पाठा ब्वने चाप्नीम, मोशो ला ब्रेलतीन। मोसा रे पा परमप्रभु यावे आ देशो लोत्र टिशा, गेय पने” देमाक्त।

7 मिनू योसीयाहम मेकेर बुक्ब मुर नेल्ल आन कली पास्सा चाड मानेचा, दे ३० हजार क्यारश भेडा पाठा नु हजार सां ब्यफ गेमी बाक्त। पिपमी मेको नेल्ल आंम आ गोठ रे पा गेवा बाक्त।

8 मिनू मेको आ सरकार डा गेय पाइबपुकीमी थुं रे ग्येरशा मुर आन कली चढेब नु लेवी आन कली मार मार गेमे बाक्त। परमप्रभु यावे आ खिं डा ठेयब गेय पाइब हिल्कीयाह, जकरियामी नु येहीएलम, चढेब आन कली पास्सा चाड कली हजार निकशी ६ सहे क्यारश भेडा पाठा नु सहे सां ब्यफ गेमे बाक्त।

9 मिनू लेवी आन ठेयब मुरु कोनन्याह नु मेको आ लोक्बपुकी, शेमायाह नु नेथनेल, हशाब्याह, थिएल नु योजाबादमी ५ हजार क्यारश भेडा पाठा नु ५ सहे ब्यफ गेमे बाक्त।

10 मिनू चढेतीक गेय ठीक सेल्ने थुम्मे नोले चढेब आन बाक्तीकेम बाक्मा बाक्त। मिनू लेवी आन आन हुल पिपम देशो खोदेशो पा राम्मा बाक्त।

11 मिनू मेकोपुकीम पास्सा चाड डा पाठा क्योरमे बाक्त। मिनू लेवीपुकीम गेशो हुश चढेबपुकीम ताक्शा, चढेतीकेम बुइकतमे बाक्त। मिनू लेवीपुकीम चहिं मेको आ कुशुल उक्मे बाक्त।

12 मिनू मेकोपुकीम मोसा आ किताबम ब्रेक्शो खोदेशो पा मुर आन खिं खिं डा हुल आन कली योक्चा, दे परमप्रभु यावे कली चोशा चढेतीक रये तिल्शा वोदमे बाक्त। मिनू ब्यफ आन कली यो मो देशो पामे बाक्त। नोले चढेबपुकीमी मेको चढेचा माल्मा बाक्त।

13 मिनू पतीके लोत्रम ब्रेक्शो खोदेशो पा पास्सा चाड डा रये मीम चोत्रमे बाक्त। मिनू परमप्रभु यावे कली गेशो रये खरकुंदा, कराइ नु तस्लाम लोप्मे बाक्त। मिनू मेको मुर नेल्ले आन कली रीब पा योक्शा गेमे बाक्त। प्रस्थान १२:३-१०

14 मेको नोले आंम कली नु चढेब आन कली जचा थोत्रक ठीक पामे बाक्त। हारून आ खिं डा चढेबपुकी नाक्दो सम्मन चोशा चढेतीक नु बोंसो चढेतीक गेय पचा माल्मा बाक्त।

15 दाऊद आ देशो खोदेशो पा आसाफ आ चच युड कुम्सो पाइबपुकी आसाफ, हेमान नु पिप कली परमप्रभु यावे आ लोत्र पाइब येदुथून आन बाक्तीकेम बाक्मा बाक्त। पिप दाऊदम देशो खोदेशो पा मेकोपुकीम पामे बाक्त। लाप्चो खाल पाइबपुकीमी आन गेय प्रोंइचा ममाल्मा बाक्त। मारदे हना आन लोक्ब लेवीपुकीम मेको आन कली जचा थोत्रक चाक्शा गेमे बाक्त। १इतिहास २५:-; १इतिहास २६:१-९

16 मोपा पिप योसीयाह आ देशो खोदेशो पा परमप्रभु यावे कली पचा माल्लो गेय ठीक पशो बाक्माक्त। पास्सा चाड मानेचा नु परमप्रभु यावे आ चढेतीकेम चोशा चढेतीक चढेशो बाक्मा बाक्त।

17 मेना मेकेर बाक्ब इस्त्राएली नेल्लेमी पास्सा चाड मानेमे बाक्त। मिनू ७ नाक्त सम्म बोरब ओरुक्ती मसुप्शो शोब्ले डा चाड मानेमे बाक्त।

18 परमप्रभु यावे आ लोत्र पाइब सामुएल आ पाला रे मेना सम्म मोदेशो पा पास्सा चाड इस्त्राएलम गेनायो ममानेशो बाक्मा बाक्त। पिप योसीयाहम खोदेशो पा तेकोइ पिपम मोदेशो ठेयब पास्सा चाड ममानेशो बाक्मा बाक्त। चढेबपुकी, लेवीपुकी नु यहूदा नु यरूसलेमम बाक्ब मुरपुकी नु मेकेर जाक्शो इस्त्राएल डा मुरपुकीम मानेमे बाक्त। २इतिहास ३०:२६

19 योसीयाहम सासन पशो १८ बर्स दुम्मेनु, मेको पास्सा चाड मानेशो बाक्मा बाक्त।

योसीयाह बेक्शो

२राजा २३:२८-३०

20 मिनु योसीयाहम परमप्रभु यावे आ खिं डा गेय नेल्ल गारपदा नोले इजीप्त रागी डा पिप नेको, युफ्रेटीस खोला आ शुंडच डा कारकेमीश सहर कली लडाइ तोचा कली ग्युमाक्त। मिनु योसीयाह मेकोपुकी नु लडाइ पथ लमाक्त।

21 तन्न नेकोमी “यहूदा डा पिप, गे नु गो इस दातेम मार जितीक खेतीक दुम्शो बाक्बा डा? मुलाक्ती गो गे नु लडाइ पचा कली जाक्शो मनड। तन्न गो आं लडाइ तोशो मुरपुकी नु ला गाइश्शो बाक्नुड। परमप्रभुम आं कली ‘रीब पा लशा लडाइ पावो’ देशो बाक्ब। मोपतीके परमप्रभु आ पबर्म मरिम्शो पा मबोक्कीन। मेको गो नु बाक्शो बाक्ब। बोक्तीनी हना, मेकोमी इन कली खतम पोक्ब” दे आ लोव पाइब आन कली सोइक्ता बाक्त।

22 मो हना यो योसीयाहम मेको आ देशो लोव्र मनेना बाक्त। तन्न मेको नेको नु लडाइ पचा कली अर्को वा फेक्से बाक्त। मेकोमी नेको आ देशो परमप्रभु आ लोव्र मनेना बाक्त। मिनु मेको मेगीददो डा दिंमम मेको नु लडाइ पचा कली रीब पा लमाक्त।

23 मिनु लिब्रा आप्बपुकीम पिप योसीयाह कली आप्मे बाक्त। मिनु पिपम आ गेय पाइब मुर कली “आं कली लडाइ पतीक रे गुंडदो। मारदे हना गो ठेयब गार दुम्शो बाक्नुड” दे मदा बाक्त।

24 मोपतीके आ गेय पाइबपुकीम मेको कली आ बग्गी रे गुंडशा, अर्को बग्गीम कुर पा यरूसलेम सहरम चाक्गमे बाक्त। मिनु मेको मेकेर बेक्माक्त। मिनु मुरपुकीमी मेको कली आ किकी पिपी आन कली थिम्तीकेम थिम्मे बाक्त। मिनु यहूदा नु यरूसलेम डा मुरपुकीम योसीयाह आ पबर्म रोंका पामे बाक्त।

25 मिनु येरमीयाम यो योसीयाह आ पबर्म रोंका पशो कुम्सो सेला बाक्त। मिनु कुम्सो पाइब मीश मुर वोंडश मुर नेल्लेमी मुल सम्म मेको रोंका पतीक कुम्सो पा योसीयाह कली मिन्मीम। मिनु मेको रोंका पतीक कुम्सो इसाएली आन पतीके दुम्शो बाक्ब। मेको कुम्सो बिलाप किताबपुकी बाक्नीम।

26 मिनु योसीयाह आ पतीके, परमप्रभु यावे आ अरेशो टिशो,

27 मेको आ पशो डोंइती रे नोले सम्म इसाएल नु यहूदा डा पिपी आन ब्रेक्शो बाक्ब।

## 36

यहूदा डा पिप येहो-अहाज

२राजा २३:३०-२४:१७

1 मिनु मेको रागी डा मुरपुकीम योसीयाह आ तौ येहो-अहाज कली चाक्शा, यरूसलेमम मेको आ आफ आ पा डा पिप सेल्ले बाक्त।

2 येहो-अहाज पिप दुम्मेनु २३ बर्स दुम्शो बाक्माक्त। मेकोमी यरूसलेमम महिना सां सासन पवा बाक्त।

3 मिनु इजीप्त डा पिपम मेको कली पिप रे गुंडदा बाक्त। मिनु यरूसलेम कली सहे का टलेन्ट चांदी नु टलेन्ट का सुन तिरो थाप्पदा बाक्त। टलेन्ट का ३४ किलो बाक्ब।

4 मिनु इजीप्त डा पिपम येहो-अहाज आ लोक्ब एल्याकीम कली यहूदा नु यरूसलेम डा पिप सेला बाक्त। मिनु मेकोमी मेको आ नें फाइश्शा येहो-याकीम वोदा बाक्त। मिनु नेकोम आ लोक्ब येहो-अहाज कली इजीप्त रागी लदा बाक्त। येरमीया २२:४-१२

यहूदा डा पिप येहो-याकीम

5 मिनु येहो-याकीम पिप दुम्मेनु, २५ बर्स दुम्शो बाक्माक्त। मेकोमी यरूसलेमम ११ बर्स सासन पवा बाक्त।

6 मेकोमी आ परमप्रभु यावे आ डोंइती मार मरिम्शो बाक्मे, मेको पवा बाक्त। मिनु बेबीलोन डा पिप नेबुकदनेसरम मेको आ रागी कली लडाइ तोशा, मेको कली कांसा के साडलोम फ्रेंशा बेबीलोन लदा बाक्त। येरमीया २२:१८

7 नेबुकदनेसरम परमप्रभु यावे आ खिं डा ग्योबपुकी का निक्शी लाइश्शा, बेबीलोनम आ दरवारम वोदा बाक्त। एजा १:१७

8 मिनु येहो-याकीम आ पशो, आ पशो ग्रांया दिशो नु आ दोस तशो गेय नेल्ल इसाएल नु यहूदा डा पिप आन इतिहासम ब्रेक्शो बाक्ब। मिनु मेको आ नोले मेको आ तौ येहो-याकीन पिप दुम्माक्त।

यहूदा डा पिप येहो-याकीन

9 येहो-याकीन पिप दुम्मेनु, ८ बर्स दुम्शो बाक्माक्त। मिनु मेकोमी यरूसलेमम महिना सां नु १० नाक्ती सासन पवा बाक्त। मिनु मेकोमी परमप्रभु यावे आ डोंइती मार मरिम्शो बाक्मे, मेको पवा बाक्त। येहो-याकीन पिप दुम्मेनु, २राजामी १८ बर्स देब। २राजा २४:८

10 मिनु बर्खा जाक्चावानु, पिप नेबुकदनेसरम मुर सोइश्शा परमप्रभु यावे आ खिं डा रिम्शो रिम्शो ग्योबपुकी नु मेको पिप कली बेबीलोनम चाक्पदा बाक्त। मिनु मेकोमी मेको पिप आ खिं डा मुर का सिदकीयाह कली यहूदा नु यरूसलेम डा पिप सेला बाक्त। येरमीया २२:२४-३०

यहूदा डा पिप सिदकीयाह

२राजा १४:१८-२५; येरमीया ५२:१-३०

11 सिदकीयाह पिप दुम्मेनु २१ बर्स दुम्शो बाक्माक्त। मेकोमी यरूसलेमम ११ बर्स सासन पवा बाक्त।

12 मेकोमी आ परमप्रभु यावे आ डोंइती मार मरिम्शो बाक्मे, मेको पवा बाक्त। परमप्रभु यावे आ लोत्र पाइब येरमीयाम मेको कली परमप्रभु यावे आ लोत्र पशो बाक्माक्त। तन्न पिपमी मेको आ डोंइती आ थुं कली ब्रेम्शो मसेला बाक्त। येरमीया ३७:-; ३८:-

13 मिनु पिप नेबुकदनेसरमी मेको कली परमप्रभु आ नेम कसम जपदा बाक्त। तन्न मेको पिप कली यो मरिम्शो पवा बाक्त। मेको मरिम्शो पाइब नु काइ मटीब दुम्शा, परमप्रभु यावे, इस्राएली आन परमप्रभु गे लेन्ने मबिस्से बाक्त।

14 मेको प्रोंइशा, चढेब नु मुरपुकीम थाम्पा मरिम्शो पा, रागी रागी डा मुर आन ग्रांशा दिशो गेयपुकी नेल्ल पामे बाक्त। मोपा यरूसलेम डा परमप्रभु यावे आ खिं ग्रांशा दिशो सेल्मे बाक्त। ब्यवस्था १८:९

यरूसलेम खतम दुम्शो

15 मिनु परमप्रभु यावे, आन किकी पिपी आन परमप्रभुमी आ लोत्र पाइबपुकी मेको आन दातेम सोइक्ना सोइक्न बाक्शो बाक्माक्त। मारदे हना आ मुर नु आ बाक्तीक कली शिशी पाइक्बाक्माक्त।

16 तन्न परमप्रभु आ लोत्र पाइब आन कली शुक्शी पामे बाक्त। आ लोत्र मटिथु, आ लोत्र पाइब आन कली तोक्शा लोत्र पामे बाक्त। मोपतीके परमप्रभु यावे आ गाइशो मबेक्माक्त। लूका २०:१०-१२; प्रेरित ७:९२

यहूदा ग्याइक्चा पुंडसीशो

17 मिनु परमप्रभुम मेको आन कली लडाइ तोपाइक्चा कली कल्दी आन पिप कली चाक्गा बाक्त। मिनु मेकोपुकीमी मेको आन आल आन कली परमप्रभु यावे आ बाक्तीक खिंम तरवारम क्योरशा सदमे बाक्त। मेकोपुकीमी वोंइश आल नु मीश आल आन कली, खाल्पा नु खूशो आन कली काइ शिशी मपामे बाक्त। परमप्रभुम मेको नेल्ल आन कली पिप नेबुकदनेसर आ गुडमी गेमी बाक्त।

18 मिनु मेकोमी परमप्रभु आ खिं डा आइक्च ठेयब ग्योब नेल्ल, मेकेर डा शोंप नु दरवार नु सरकार डा गेय पाइब आन खिं डा शोंप नेल्ल बेबीलोन लदमे बाक्त।

19 मेकोपुकीम परमप्रभु आ खिंम मी सुइक्तमे बाक्त। यरूसलेम सहर डा गारो प्रेत्ये बाक्त। मिनु मेकोपुकीम सहर डा दरवार नेल्लम मी सुइशशा, आगा बाक्शो शोंप खतम सेल्मे बाक्त। येरमीया २६:६

20 मिनु मेकोमी तरवार रे ब्रोंइशो नेल्ल आन कली फ्रेंशा बेबीलोन लदमे बाक्त। मिनु पारसी आ राज्य मजाक्म सम्म मेकोपुकीम, मेको ग्याइक्चा पुंडसीब आन तमी तो आन कली वाइलीम वाइल सेल्मे बाक्त।

21 मिनु परमप्रभु यावे आ लोत्र पाइब येरमीया रे पा देशो परमप्रभु यावे आ लोत्र गाप्चा कली ७० बर्स मगाम सम्म इस्राएल रागीम आ नाइक्तीक नाक्ती मानेवा बाक्त। मेको रागीम ७० बर्स सम्म श्येत्थ दुम्मेनु, आ नाइक्तीक नाक्ती मानेवा बाक्त। येरमीया २५:११; लेवी २६:३४; बिलाप २:६

कोरेस आ देशो लोत्र

एज्जा १:१-३

22 मिनु पारसी डा पिप कोरेसमी पिप पवा आ डोंइती डा बर्सम येरमीया आ देशो परमप्रभु यावे आ लोत्र गाप्चा कली परमप्रभु यावेम पारसी डा पिप आ थुंमी लोत्र पवा बाक्त। मिनु मेकोमी आ ठेयब राज्य नेल्लेम लोत्र पा ब्रेक्शा, उरदी पपदा बाक्त। येरमीया २९:१०; यसैया ४४:२८

23 फारसी डा पिप कोरेसम मार उरदी पपदा बाक्त। देशा हना “परमप्रभु यावे, स्वर्ग डा परमप्रभुम रागी डा राज्य नेल्ल आं कली गेशो बाक्ब। मिनु मेकोमी आं कली यहूदा डा यरूसलेमम आ कली खिं का सेल्चा कली अरेशो बाक्ब। इन दातेम बाक्शो मेको आ मुर बाक्तेक्म हना ‘परमप्रभु यावे, आ परमप्रभु मेको नु बाक्ल। मिनु मेको यरूसलेम लमल’ देनुड” देमाक्त।

## एजा

**ब्रेकब मुर:** एको किताब एजा आमान इचका ब्रेकशो बाकत। तन्न नोले मेको नेल्ल सुम ब्रेकता, मतुइक्नीम। डोंइती एजा नु नेहेम्याह किताब का बाकत। मुरुमी ग्रीक लोत्रमी सेल्ची ना किताब का रे निक्शी सेल्शो बाक्तेकम।

**गेना दुम्शो:** एको किताब १०० बर्स डा इतिहास बाकब। जेरूब-बाबेल नु ५० हजार ग्याइशशा लाइक्का पुंडसीशो इस्राएली यरूसलेम लेशशो रे नेहेम्याह यरूसलेम जाक्शो सम्म डा लोत्र बाकब।

५३६ बि. सी. पिप कोरेसमी इस्राएली आन कली लेत्चा गेवा बाकत।

५३६ बि. सी. चढेतीक लेशा सेल्शा, गोठ सेल्तीक चाड मानेमे बाकत।

५३५ बि. सी. परमप्रभु यावे आ खिं लेशा सेल्चा गोत्रमे बाकत।

५२० बि. सी. परमप्रभु आ लोत्र पाइब हाग्गे नु जकरियाम आस गेय पचा गोम्से बाकत।

५१६ बि. सी. परमप्रभु यावे आ खिं जिम्मा गेशो बाकत।

५१५ बि. सी. पास्सा चाड मानेशो बाक्तेकम।

४५८ बि. सी. एजा नु १८ हजार इस्राएली लेशा यरूसलेम लेशशो बाक्तेकम।

४४६ बि. सी. नेहेम्याह यरूसलेम जाक्शो बाकत।

**मारदे ब्रेकशो:** एको १ इतिहास नु २ इतिहास किताबमी ब्रेकशो नेल्ल दुम्शो नोले डा इस्राएली आन इतिहास बाकब। परमप्रभु यावे आ खिं लेशा सेल्शो आ पर्वम ब्रेकशो बाकब।

यहूदीपुकी यरूसलेम लेशशो

२इतिहास ३६:२२-२३

1 पारसी रागीमी पिप कोरेस आ डोंइती डा बर्समी परमप्रभु यावेमी येरमीया रे पा देशो लोत्र खाप्चा कली पिप कोरेस आ थुं क्युक्का बाकत। मिनु मेको पिपमी आ राज्य नेल्लेमी मेको लोत्र नेंपाइक्का कली ब्रेकपदा बाकत। यसैया ४५:१; यसैया ४४:२८

2 मिनु पारसी डा पिप कोरेसमी मार लोत्र ब्रेकपदा बाकत देशा हना “परमप्रभु यावे, स्वर्ग डा परमप्रभुमी, रागी डा राज्य नेल्ल आं कली गेशो बाकब। मिनु मेकोमी आं कली ‘यहूदा रागी डा यरूसलेममी आं खिं सेलो’ दे माइक्ती।

3 मिनु इन दातेमी सु सु परमप्रभु आ मुर बाक्नीमी, मेको नु परमप्रभु बाक्ल। मिनु मेको मुरपुकी इर लशा, यहूदा रागी डा यरूसलेममी बाकब परमप्रभु यावे, इस्राएली आन परमप्रभु आ खिं सेलीन।

4 मिनु लीशो यहूदी ते ते बाक्ता, मेकोपुकीमी यरूसलेम परमप्रभु आ खिं सेल्चा कली सुन चांदी, अरु शोंप नु बी ब्यफ चाक्शा, आन आंम दाक्शो गेचा माल्नीम” दे पिप कोरेसमी ब्रेकशो बाकत।

5 मिनु नोले यरूसलेम सहरमी परमप्रभु यावे आ खिं लेशा सेल्चा कली परमप्रभुमी मुर आन थुं पोक्का पुंडसीशो यहूदा नु बेन्यामीन आस खिं खिं डा टेयब मुरपुकी, चढेबपुकी नु लेवी नेल्ल मेकेर लचा कली सासमा बाकत।

6 मिनु मेको आन नेक्शा बाकब नेल्लेमी आन डोंइती गेशो प्रोंइशा, चांदी के बोस, सुन के थोत्रक, अरु थोत्रक, बी ब्यफ नु शुश क्येट लाइब मार मार थोत्रक शुश तेम्शा गेशा, मेको आन कली वारच पाम्तेकम।

7 डोंइती नेबुकदनेसरमी यरूसलेममी परमप्रभु यावे आ खिं डा बोसपुकी रोइशशा चाक्शा, आ देवता आ खिंमी वोइशशो बाक्ताकत। मिनु पारसी डा पिप कोरेसमी मेको बोस नेल्ल मेकेर रे गुंडपाइक्कत। २इतिहास ३६:७,१८

8 मिनु पारसी डा पिप कोरेसमी मेको बोसपुकी आ शोंप कोत्रब मिश्रेंदाथ आ गुड रे पा यहूदा आ खिं डा नेल्ल क्येडा टेयब मुर शेश-बस्सार कली हिकपाइशशा, ब्रेक्शा गेपु। एजा ५:१४

9 मिनु मेको बोस मार मार बाक्तेकम देशा हना, सुन के बोस ३० ओटा, चांदी के बोस हजार का ओटा, क्योरतीके २९ ओटा,

10 सुन के आइक्च बोस ३० ओटा, अरु चांदी के आइक्च बोस ४ सहे १० ओटा अरु बोस हजार का ओटा गेशो बाकत।

11 सुन नु चांदी के बोस नेल्ल पा ५ हजार ४ सहे ओटा बाक्तेकम। मिनु ग्याइशशा लाइक्का पुंडसीशो मुरपुकी बेबीलोन रे यरूसलेम लेशशा जाक्मानु, शेश-बस्सारमी मेको बोस नेल्ल यरूसलेममी लेशशा चाक्तु।

## 2

लेशशो इस्राएल डा मुर

नेहेम्याह ७:५-७२

1 बेबीलोन डा पिप नेबुकदनेसरमी यहूदा नु यरूसलेम डा मुर आन कली ग्याइशशा बेबीलोन लाइशशो बाकत। मेको ग्याइशशा लाइक्का पुंडसीशो आन दाते डा यहूदा नु यरूसलेम आंम आंम सहरम लेशशा जाक्शो मुर आन नें मार बाक्तेकम देशा हना,

2 जेरूब-बाबेल नु बेबीलोन रे यरूसलेम जाक्ब येशुआ, नेहेम्याह सेरायाह, रेलायाह, मोरदेकै, बिल्शान, मिस्पार, बिग्वाड, रेहुम नु बानाह जाक्शो बाक्तेकम। मेको इस्राएली सु सु नु गिश मुर बाक्तेकम देशा हना,

3 पारोश आ चच युइ २,१७२

4 शेफत्याह आ चच युइ ३७२

- 5 आराह आ चच युड ७७५
- 6 पहाथ-मोआब आ चच युड आ तौ येशुआ नु योआब आस चच युड २,८१२
- 7 एलाम आ चच युड १,२५४
- 8 जत्तु आ चच युड १४५
- 9 जक्काड आ चच युड ७६०
- 10 बानी आ चच युड ६४२
- 11 बेबाइ आ चच युड ६२३
- 12 अज्गाद आ चच युड १,२२२
- 13 अदोनीकाम आ चच युड ६६६
- 14 बिग्वाइ आ चच युड २,०५६
- 15 आदीन आ चच युड ४५४
- 16 आतेर आ मुर हिज्कीयाह आ चच युड ९८
- 17 बेजाइ आ चच युड ३२३
- 18 योराह आ चच युड ११२
- 19 हाशुम आ चच युड २२३
- 20 गिब्बार आ चच युड ९५
- 21 बेथलेहेम डा १२३
- 22 नेतोफाह डा ५६
- 23 अनाथोथ डा १२८
- 24 अज्मावेथ डा ४२
- 25 किरयथ-यारीम केफीरा नु बेयरोथ डा ७४३
- 26 रामाह नु गेबा डा ६२१
- 27 मिक्मास डा १२२
- 28 बेथेल नु ऐ डा २२३
- 29 नेबो डा ५२
- 30 मग्बीश आ चच युड १५६
- 31 अर्को एलाम आ चच युड १,२५४
- 32 हारीम आ चच युड ३२०
- 33 लोद, हादीद नु ओनो सहर डा ७२५
- 34 यरीको सहर डा ३४५
- 35 नु सेनाह आ चच युड ३,६३० जना बाक्तेकम।

लेशो चढेब

- 36 लेशो चढेब सु सु बाक्तेकम देशा हना, येदायाह आ चच युड, येशुआ आ खिं डा मुर ९७३
- 37 इम्मेर आ चच युड १,०५२
- 38 पश्हुर आ चच युड १,२४७
- 39 नु हारीम आ चच युड १,०१७ जना बाक्तेकम।

लेशो लेवी नु कुम्सो पाइब

- 40 लेशो जाक्शो लेवी आ मुर सु सु बाक्तेकम देशा हना, येशुआ नु कदमीएल आस चच युड, नु होदावीयाह आ चच युड ७४ जना बाक्तेकम। नेहेम्याह १२:८
- 41 कुम्सो पाइबपुकीमी आसाफ आ चच युड १२८ जना बाक्तेकम।

लेशो लाप्चो खाल पाइब

- 42 लाप्चो खाल पाइब सु सु बाक्तेकम देशा हना, शाल्लुम, आतेर, ताल्मोन, अक्कुब, हतीता नु शोबाइ आन चच युड नेल्ल पा १३९ जना मुर बाक्तेकम।

लेशो परमप्रभु आ खिं डा वाइल

- 43 परमप्रभु यावे आ खिंमी गेय पाइब वाइल आन चच युड सु सु बाक्तेकम देशा हना, एजा ८:२० सीहा, हासुफा, तब्बाओथ,
- 44 केरोस, सीआहा, पादोन,
- 45 लेबानाह, हगावाह, अक्कुब,
- 46 हागाब, शाम्लाइ, हानान,
- 47 गिददेल, गहार, रेआयाह,
- 48 रेसीन, नेकोदा, गज्जाम,
- 49 उज्जा, पासेआह, बेसाइ,
- 50 अस्नाह, मेउनीम, नेफीसीम,
- 51 बाकबुक, हकुफा, हारहुर,

- 52 बस्लुथ, मेहीदा, हारशा,  
 53 बारकोस, सीसेरा, तेमाह,  
 54 नेसीयाह नु हतीफा आन चच युड बाक्तेकम।  
 55 सोलोमन आ गेय पाइब आन चच युड सु सु बाक्तेकम देशा हना, सोताड, हास्सोफेरेथ, पेरुदा, १राजा ९:२१  
 56 यालाह, दारकोन, गिददेल्,  
 57 शेफत्याह, हत्तिल, पोकिरेथ-हस्सेबाइम नु आमी आन चच युड बाक्तेकम।  
 58 परमप्रभु यावे आ खिं डा गेय पाइब नु सोलोमन आ गेय पाइब नेल्ल पा ३९२ मुर बाक्तेकम। यहोसु ९:२३  
 59 मिनु तेल-मेलाह, तेल-हारशा करुब, अददान नु इम्मेर रे लेशशा जाकब यो बाक्तेकम। तन्न मेकोपुकीमी आन किकी पिपी नु आन खिं डा मुर इस्राएल डा सु रे जाकशो बाकमा, मेको देने मचबेम।  
 60 मेकोपुकी देलायाह आ चच युड, तोबीयाह आ चच युड नु नेकोदा आ चच युड नेल्ल पा ६५२ जना बाक्तेकम।  
 61 परमप्रभु कली चढेब हबायाह आ चच युड, हककोस आ चच युड नु बारजील्लाड आ चच युड यो आन किकी पिपी नु आन खिं डा मुर इस्राएली सु रे बोशो बाकमा देने मचबेम। बारजील्लाड नें वोइशशो मुर गिलाद डा बारजील्लाड आ तमी कली ग्युंबे पवा बाक्त। मिनु आ शिउ आ नें वोदा बाक्त। २सामुएल १७:२७; २सामुएल १९:३२  
 62 मेकोपुकीमी मुर आन नें ब्रेक्तीकेमी आन नें माल्तेकम, तन्न मथिदेम। मोपतीके मेकोपुकीम चढेचा मताम। मिनु चढेतीक गेय रे तिल्ला पुंडसाकम।  
 63 मिनु ऊरीम नु थुम्मीममी गेय पने चाप्व चढेब का मग्रूम सम्म मेकोपुकीमी नेल्ल क्येडा चोत्रखो चढेतीक थोत्रक रे जचा मताम।  
 64 मिनु मेकेर जाकब मुर नेल्ल पा ४२,३६० बाक्तेकम।  
 65 मिनु मेको आन वाइलीम वाइल ७,३३७ मुर बाक्तेकम। मेको आन दातेमी २०० कुम्सो पाइब मीश मुर नु वोंइश मुर यो बाक्तेकम।  
 66 मिनु मेको नु ७३६ शारा नु २४५ खचर बाक्तेकम।  
 67 मिनु मेको नु ४३५ दलओठ नु ६,७२० गधा यो बाक्तेकम। गन्ती १८:९; प्रस्थान २८:३०; १सामुएल १४:४१  
 68 मिनु मेकोपुकी यरूसलेममी बाकशो परमप्रभु यावे आ खिं जाकमा नोले का निकशी खिं डा ठेयब मुरपुकीमी परमप्रभु आ खिं डोंइती डा आ बाक्तीके उइ लेंशा सेल्चा कली ग्येरशा आन दाक्स पा क्येट गेम्तेकम।  
 69 मेकोपुकीमी आन चाप्स पा सेल्तीक गेय कली ६१ हजार सुन के आदारकोन नु ५ हजार चांदी के मीना नु चढेब आन कली सहे का फेक्तीक वा गेम्तेकम। आदारकोन का ८.४ ग्राम सुन के क्येट बाकब। चांदी के मीना का ६०० ग्राम खोदेशो बाकब।  
 70 मिनु चढेबपुकी, लेवीपुकी नु का निकशी अरु मुर यरूसलेम नु आ एर ओथ डा गाउंपुकीमी बाक्तेकम। मिनु कुम्सो पाइबपुकी, लाप्चो खाल पाइबपुकी, परमप्रभु यावे आ खिंमी गेय पाइबपुकी नु लीशो इस्राएली नेल्ल आंम आन सहरम बाक्तेकम।

### 3

#### चोशा चढेशो

- 1 मिनु इस्राएली आंम आन गाउं गाउंमी नेल्ल गारपा बाकने थुम्सो बाक्तेकम। आन बाकशो ७ महिना दुम नोले मुर नेल्ल थुं का डा दुम्शा, यरूसलेममी बुक्तेकम।  
 2 मेना योसादाक आ तौ येशुआ नु मेको आ वारच चढेब, शाल्तीएल आ तौ जेरुब-बाबेल नु मेको आ खिं डा मुर नेल्लेमी इस्राएली आन परमप्रभु कली चढेतीके सेल्लेकम। परमप्रभु आ मुर मोसामी आ अरेशो लोत्रम दोपा ब्रेकशो बाकमे, मोपा चोशा चढेचा कली मेको चढेतीक सेल्लेकम। एजा २:२; प्रस्थान २७:१; लेवी ६:२  
 3 मेकोपुकीमी चढेतीक डोंइती ते बाकमे मेकेर लेंशा चढेतीक सेल्लेकम। मारदे हना मेको आन एर ओथ डा अर्को जात डा मुर आन कली तशा हिंशा, सुनी नु नाकनाकदो परमप्रभु यावे कली चढेतीकेम चोशा चढेतीक चढेम्तेकम।  
 4 मिनु मेकोपुकीमी गोठ सेल्शा बाक्तीक चाड मानेम्तेकम। मिनु दोपा पतीके ब्रेकशो बाकमे, मोपा नाक्त किंत किंत डा पचा माल्लो चोशा चढेतीके दोशो चढेचा माल्मा, मोशो चढेम्तेकम। लेवी २३:३४-४३  
 5 मिनु नाक्त किंत किंत डा चोशा चढेतीके, औसी नाक्त डा चढेतीके नु परमप्रभु यावेमी देशो चाड डा चढेतीके चढेम्तेकम। सु सुमी आन ग्येरशो थुं रे परमप्रभु यावे कली चढेचा दाक्तेम, मेको चढेम्तेकम।  
 6 मिनु परमप्रभु यावे आ खिं डा जग मवोइशशो बाक्त हना यो, ७ महिना डा डोंइती डा नाक्त रे परमप्रभु यावे कली चोशा चढेतीक चढेचा गोम्तेकम।  
 7 मिनु मेकोपुकीमी गारो प्रोत्रब नु शी के गेय पाइब आन कली क्येट गेम्तेकम। मिनु पारसी डा पिप कोरेसमी देशो खोदेशो पा सीदोन नु टायर डा मुर आन कली लेबानोन डा लाइशशो रवा आ शी समुन्द्र रे पा योप्पा सम्म चाक्चा कली जचा तूचा थोत्रक नु तेल गेम्तीमी। १राजा ५:१६-२५

#### परमप्रभु आ खिं लेंशा सेल्शो

- 8 मिनु मुरपुकी यरूसलेममी बाकशो परमप्रभु आ खिं जाकशो बर्स निकशी नु महिना निकशी दुम्माक्त। मिनु शाल्तीएल आ तौ जेरुब-बाबेल, योसादाक आ तौ येशुआ नु मेको आस लीशो लोकब, चढेबपुकी, लेवीपुकी नु बेबीलोन रे लेशशा यरूसलेम जाकब नेल्लेमी परमप्रभु आ खिं लेंशा सेल्चा गोम्तेकम। मिनु परमप्रभु यावे आ खिं सेल्तीक गेय कोत्रका कली २० बर्स जाकदीशो नु मेको क्येडा लाकशो लेवी आन कली योत्रशा चोइक्तीमी।



9 मिनु परमप्रभु आ खिं सेल्टीक गेय पाइब आन कली कोव्रब येशुआ नु आ तौपुकी नु आ लोकब, कदमीएल नु आ तौपुकी, बिन्नुइ नु होदावीयाह नु हेनादाद आ तौपुकी नु लेवी आन तौ नु खिं डा मुर नेल्ल गेय पाइब आन कली कोव्रब दुम्तेकम।

परमप्रभु आ खिं डा जग

10 मिनु परमप्रभु यावे आ खिं सेल्वपुकीमी जग वोइक्तेकम। चढेबमी आन वा फेकशा तुराही ताप्तेकम। आसाफ आ तौ लेवीपुकीम बुप्केल ताप्तेकम। इस्राएल डा पिप दाऊदमी अरेशो खोदेशो पा परमप्रभु यावे कली ठेयब सेल्चा कली आन आन बाक्तीकेमी राप्तेकम।

11 मिनु मेकोपुकीमी पालो पालो पा कुम्सो पाम्तेकम। परमप्रभु यावे कली ठेयब सेल्ना सेलन “गे रिम्शो पाइब बाक्नीनी” दे मान पा कुम्सो पाम्तेकम। मेकोपुकीमी “परमप्रभु यावे रिम्शो पाइब बाक्ब, नु आ गेना हना यो दाक्तीक इस्राएली नु लीब” दे कुम्सो पाम्तेकम। परमप्रभु यावे आ खिं डा जग वोइश्शो बाक्तीके मुर नेल्लेमी ठेयब सेंदा पा परमप्रभु यावे कली ठेयब सेल्लेकम। २इतिहास ५:१३; भजन संग्रह ११८:१

12 परमप्रभु यावे आ खिं डा जग वोइश्शो तशा, ठेयब सेंदा पा डाक्तेकम। मिनु अरु मुर चहिं ग्येरशा ठेयब सेंदामी रेयके पाम्तेकम। हागै २:३

13 मिनु नेब मुरपुकीमी ग्येरशा ग्रीशो नु डाक्शो मार बाक्मे मारेइ मरुबेम। मारदे हना मुर आन रेयके पशो सेंदा थम ठेयब बाक्त। मेको रेयके पशो डोन डोन सम्म नेसे बाक्त।

## 4

जोरी सत्रुमी श्येत गेशो

1 लेशशा जाक्शो ग्याइश्शा लाइक्चा पुंडसीशो यहूदा नु बेन्यामीन आस थर डा मुरपुकीमी परमप्रभु यावे, इस्राएली आन परमप्रभु आ खिं सेल्ना सेलन बाक्नीम देशो लोत्र आन जोरी सत्रुमी नेतेकम।

2 मिनु मेकोपुकीमी जेरूब-बाबेल, येशुआ नु खिं खिं डा ठेयब मुर आन बाक्तीकेमी जाक्शा “गो आंड कली यो गे नु गारशा, मेको खिं सेल्चा गेकी। गो यो गे इन खोदेशो पा इन परमप्रभु कली ठेयब सेल्ना सेलन बाक्नीकी। मिनु गो आंड कली एक चाक्ब अस्सुर डा पिप एसर-हददीन आ पाला रे गो यो इन परमप्रभु कली चढेन चढेन बाक्तेक” दैतेकम। येरमीया ४१:५; २राजा १७:२४-३३; २राजा १९:३७

3 तन्न जेरूब-बाबेल, येशुआ नु इस्राएली आन लीशो खिं खिं डा ठेयब मुरपुकीमी मेको आन कली “एको खिं गो इस्राएली आंड परमप्रभु कली सेल्नीकी। एकेर गे इन पचा माल्लो मारेइ मबाक्ब। पारसी डा पिप कोरिसमी आंड कली अरेशो खोदेशो पा, गो आंड परमप्रभु यावे, इस्राएली आन परमप्रभु आ खिं आंमान सेल्नीकी” दे माइक्तेकम।

4 मिनु नोले मेको रागी डा मुरपुकीमी यहूदी आन कली आन थुं तोक्शा गेम्तेकम। मिनु मेको खिं मसेल्पाइक्चा कली हिंच कोइताकम।

सेल्टीक गेय क्याम्चा माल्लो

5 मिनु यहूदी आन गेय नेल्ल क्याम्पाइक्चा कली, मेकोपुकीमी दरवार डा ठेयब मुर आन कली घूस गेम्तेकम। मिनु मेकोपुकीमी पिप कोरिस आ सासन पची ना रे पारसी डा पिप दारा आ सासन पची ना सम्म मोदेशो गेय पना पन बाक्तेकम। एजा ४:२४

6 मिनु अहासूरसमी सासन पचा गोवा आ डोंइती डा बर्स, मेको रागी डा मुरपुकीमी यहूदा नु यरूसलेम डा मुर आन कली दोस गेशो ब्रेक्स का ब्रेक्शा सोइक्ताकमी।

7 मिनु बिश्लाम, मिश्रेदाथ, ताबेल नु मेको आ वारच नेल्ल गारशा पारसी डा पिप आरता-सास्त कली ब्रेक्स का ब्रेक्ताकम। मेको ब्रेक्स अरामी आन लोत्रमी ब्रेक्शो बाक्त। मिनु मेको आ अर्थ यो ब्रेक्शो बाक्त।

8 पिप आ सोइश्शो रेहुम नु ब्रेक्तीक गेय पाइब शिम्शाइमी, पिप आरता-सास्त कली यरूसलेम आ पर्वम ब्रेक्स का ब्रेक्ताकस।

9 पिप आ सोइश्शो रेहुम, ब्रेक्तीक गेय पाइब शिम्शाइ नु मेको निक्शी नु गेय पाइबपुकी, निसाफ पाइबपुकी, पिप आ सोइश्शोपुकी, पारसी डा ठेयब मुरपुकी, एकेर नु बेबीलोनमी बाक्ब सुसा एलाम डा मुरपुकी

10 नु नेल्ल क्येडा ठेयब मान पचा पुंडसीशो ओम्नापरमी ग्याइश्शा लाइश्शो मुर आन रागी रे ग्युइशा सामरीया सहर नु आ एर अर्थ नु युफ्रेटीस खोला आ आइक्ची हांबुमी वोइश्शो मुरपुकीमी ब्रेक्ताकम।

11 मेको सोइश्शो ब्रेक्स डा लोत्र मार बाक्त देशा हना “पिप आरता-सास्त कली युफ्रेटीस आइक्ची हांबुमी बाक्ब गेय पाइबपुकीमी इन कली ‘रिम्शो बाक्कीन’ देनीम।

12 पिप इन कली मार लोत्र तुइक्पाइक्चा दाक्नीकी देशा हना, इन कली प्रोंइशा एको रागीमी जाक्ब यहूदीपुकी यरूसलेममी जाक्तेकम। मिनु मेकोपुकीमी काइ मटीब नु मरिम्शो पाइब आन सहर कली लेंशा सेल्ना सेलन बाक्नीम। मेकोपुकीमी मेको आ जग लेंशा सेल्शा, आ गारो यो प्रोवने थुम्चशो बाक्नीम।

13 पिप इन कली मार लोत्र तुइक्पाइक्चा दाक्नीकी देशा हना, मेको सहर कली लेंशा सेल्लेकम नु मेको आ गारो प्रोवने थुम्तेकम हना, मेकोपुकीमी पिप कली थाप्तीके, आन चेम्शो रे थाप्तीक नु आन रू डा थाप्तीके मारेइ मथाप्नीम। मिनु मो पामेनु, पिप इन कली मरिम्शो दुम्ब।

14 गो पिप इन गेशो जाइनीकी। मोपतीके सुइम इन कली मान मपशो कोव्रचा मदाक्नीकी। मोपतीके पिप इन कली एको लोव्र तुइक्पाइक्चा कली लोव्र कुरब मुर सोइक्ताक्क।

15 इन किंकी पिपीमी ब्रेक्शा वोइश्शो ब्रेक्स माल्शा, कोव्रडीन। मेकेर मार ब्रेक्शो बाक्मे थिल्तीनी। मेको सहरम काड मटीब मुर बाक्नीम। मेकोपुकी पिप नु रागी कली मरिम्शो पाइब बाक्नीम। मोपतीके एको सहर कली खतम पोक्शो बाक्त।

16 मिनु गो पिप इन कली मार लोव्र तुइक्पाइक्चा दाक्नीकी देंशा हना, एको सहर लेंशा सेल्लेक्म हना, नु मेको आ एर ओंथ डा गारो प्रोवने थुन्तेक्म हना, युफ्रेटीस आइक्ची हांबुम इन के मारेइ अधिकार मलीब” दे ब्रेक्शो बाक्त।

पिपमी लोव्र लेशो

17 मिनु पिपमी “आ सोइश्शो रेहुम, ब्रेक्तीक गेय पाइब शिम्शाइ नु सामरीया सहर नु आ एर ओंथ नु ठेयब खोला आइक्ची हांबु बाक्ब इन गेय पाइब आन कली ‘रिम्शो बाक्कीन’ दे ब्रेक्नुइ।

18 इन सोइश्शो ब्रेक्स आं कली रिम्शो पा पढेशा मेको आ अर्थ नेंपाइक्तीमी।

19 मिनु गे इन देंशो खोदेंशो पा ब्रेक्शा वोइश्शो लोव्रपुकी माल्पाइक्तामी। मिनु मार थिंसाक्व देंशा हना, मेको सहर डा मुरुमी पिप आ सासन पतीकेमी मटिशो आ पब्रम शुश लोव्रपुकी ब्रेक्शा वोइश्शो थिंसाक्व। मिनु साइ रे मोदेंशो मटितीके, पना पन पिशो बाक्तेक्म।

20 यरूसलेममी सासन पाइब सक्ति पाइश्शो पिपपुकी बाक्तेक्म। मेकोपुकीमी युफ्रेटीस आइक्ची हांबु डा रागी नेल्ल अधिकारम वोइश्शो बाक्तेक्म। मिनु मुरपुकीमी पिप कली थाप्तीके, आन चेम्शो रे थाप्तीके नु आन रू डा थाप्तीके नेल्ल थाप्शो बाक्तेक्म।

21 मोपतीके मेको मुर आन गेय तेक्चा माल्ब, दे मतीन। मिनु गो हुकुम मगेडा सम्म मेको सहर लेंशा मसेल्मेकल।

22 गेपुकीमी मेको आ पब्रम इन पचा माल्शो गेय हेंथे मपने। पिप आ गेय रिम्शो दुम्पाइक्चा कली मेको मरिम्शो गेय तेक्चा माल्ब” दे लोव्र कुरब मुर सोइक्ताक्व।

परमप्रभु आ खिं सेल्चा नाइश्शो

23 मिनु रेहुम, ब्रेक्तीक गेय पाइब शिम्शाइ नु मेको नु गेय पाइब आन डोंइती पिप आरता-सास्त आ ब्रेक्स पढेमे चोटीन रेहुम नु मेको नु बाक्ब छुल छाल बोक्शा दोरोर पा यरूसलेम लशा, मेकेर डा यहूदी आन आन सेल्लेक् गेय नेल्ल ग्रा यु तेक्तेक्म।

24 मे नोले यरूसलेममी परमप्रभु आ खिं सेल्लेक् गेय देक्त। मिनु मोदेंशो पा पारसी डा पिप दारा आ सासन पशो बर्स निक्शी जाक्दीम सम्म मेको सेल्लेक् गेय देक्शा लीत।

## 5

परमप्रभु आ खिं लेंशा सेल्शो

1 मिनु परमप्रभु यावे आ लोव्र पाइब हागै नु इददो आ तौ जकरियामी यहूदा नु यरूसलेममी बाक्ब यहूदी आन कली इस्राएली आन परमप्रभु आ देंशो लोव्र पाम्ताक्स। हागै १:१; जकरिया १:१

2 मिनु शाल्तीएल आ तौ जेरूब-बाबेल नु योसादाक आ तौ येशुआमी यरूसलेममी परमप्रभु आ खिं लेंशा सेल्चा गोम्सेनु, परमप्रभु यावे आ लोव्र पाइबपुकीमी यो मेको आन कली वारच पाम्तेक्म।

यहूदी आन गेय तेक्चा माल्शो

3 मिनु युफ्रेटीस आइक्ची हांबु डा रागीम सासन पाइब तत्तेनाइ, शेथार-बोजेनाइ नु मेको नु बाक्बपुकी रीब पा यहूदी आन बाक्तीकेम जाक्शा “एको खिं लेंशा सेल्चा नु थुम्चा कली इन कली सुम अधिकार गेवा?” देंतेक्म।

4 मिनु मेकोपुकीमी मेको खिं सेल्ब आन नें यो पुंइतेक्म।

5 तन्न परमप्रभुमी यहूदी आन खाल्पा आन कली वारच पाप्तु। मिनु मेकोपुकी पिप दारा आ बाक्तीकेम आन ब्रेक्स जाक्दीश्शा, पिपमी मार देंबा, मेको लोव्र मनेन्मे सम्म, मेको गेय तेक्ने मचबेम। ब्यवस्था ११:१२; १राजा ८:२९

तत्तेनाइमी पिप दारा कली ब्रेक्शो

6 युफ्रेटीस आइक्ची हांबु डा रागी कली हुकुम पाइब, तत्तेनाइ, शेथार-बोजेनाइ नु मेको नु बाक्ब सोइश्शोपुकीमी पिप दारा कली ब्रेक्स का ब्रेक्शा सोइश्शो बाक्तेक्म। मेको ब्रेक्स एको बाक्ब।

7 मेको आन सोइश्शो ब्रेक्समी मार ब्रेक्शो बाक्त देंशा हना “पिप दारा इन थुं नाइश्शा रिम्शो बाक्कीन।

8 पिप, इन कली लोव्र का तुइक्पाइक्चा दाक्नीकी। मार लोव्र तुइक्पाइक्चा दाक्नीकी देंशा हना, गो यहूदा रागीमी ठेयब परमप्रभु आ खिं बाक्तीक लाइतक। मेको ठेयब खोइश्शो फुल्लुमी सेल्लेक्म। आ गारो तार शी वोइक्ने थुन्तेक्म। शुश गेय पा, रीब पा सेल्ना सेल्ब बाक्नीम” दे ब्रेक्शो बाक्त।

9 मिनु मेको खाल्पा आन कली “इन कली एको खिं लेंशा सेल्चा नु थुम्चा कली सुम अधिकार गेवा? दे हिल्लो पाइतक।

10 मिनु इन कली ब्रेक्चा नु तुइक्पाइक्चा कली मेको आन ठेयब मुर आन नें यो हिल्लो पाइतक।

11 तन्न मेकोपुकीमी ‘गो सरीड नु रागी डा परमप्रभु आ गेय पाइब नकी। मिनु शुश बर्स डोंइती सेल्शो खिं लेंशा सेल्ना सेल्ब बाक्नीकी। मेको डोंइती डा खिं इस्राएल डा ठेयब पिप कामी सेल्शो बाक्त।

12 तन्न आंइ किकी पिपीमी स्वर्ग डा परमप्रभु कली चुरपाइशो बाक्तेक। मिनु मेकोमी मेको आन कली बेबीलोन डा कल्दी आन पिप नेबुकदनेसर आ गुइमी गेशो बाक्त। मिनु मेको पिपमी एको खिं कली प्रेशो बाक्त। मुर आन कली ग्याइशशा बेबीलोन रागीमी लाइशशो बाक्त। २राजा २४:१०-१४; २राजा २५:९

13 तन्न बेबीलोन डा पिप कोरेसमी आ सासन पशो डोंइती डा बर्समी एको परमप्रभु आ खिं लेंशा सेल्चा कली हुकुम गेशो लोत्र ब्रेक्शा गुंइशो बाक्त। एजा १:१-२

14 नेबुकदनेसरमी यरूसलेम डा सुन नु चांदी के बोसपुकी परमप्रभु आ खिं रे लाइशशा बेबीलोन डा मन्दीरम वोइशशो बाक्त। मिनु पिप कोरेसमी मेको बोसपुकी बेबीलोन डा मन्दीर रे गुंइशा शेश-बस्सार कली गेपु। पिप कोरेसमी शेश-बस्सार कली सासन पचा कली योवशो बाक्त'। एजा १:७-८

15 मिनु मेको कली 'एको बोसपुकी लाइशशा यरूसलेम डा परमप्रभु आ खिंमी वोतो' दैत। मिनु परमप्रभु आ खिं डोंइती आ बाक्तीक उइ लेंशा सेल्चा माल्नीम" दे माइक्तु।

16 मिनु मेको शेश-बस्सार जाक्शा, यरूसलेममी परमप्रभु आ खिं आ जग वोइक्तु। मेना रे मुल सम्म एको लेंशा सेल्चा सेल्न बाक्नीम। मिनु मेको मुल सम्म सेल्ने मथुमशो बाक्ब।

17 मोपतीके मुल पिप, गे दाक्नीनी हना, बेबीलोन डा पिप आन पालामी मार मार दुमशो बाक्मे, मेको ब्रेक्स वोइक्तीकेमी माल्पतीन। मिनु पिप कोरेसमी यरूसलेममी परमप्रभु आ खिं लेंशा सेल्चा कली हुकुम पशो लोत्र ब्रेक्शा गुंइशो बाक्म कों मबाक्म? मिनु मेको आ पर्वम इन दाक्शो मार बाक्बा, मेको आंइ कली तुइक्पतीन, दे ब्रेक्शो बाक्त। एजा ८:३६

## 6

पिप कोरेस आ ब्रेक्स थिशो

1 मिनु बेबीलोन रागीमी पिप दारामी सासन पा मार मार ब्रेक्स वोइक्तीकेमी पिप आन ब्रेक्स माल्तेकम।

2 मिनु मादी रागी डा ठेयब सहर एक-बतानामी तोल्शा वोइशशो ब्रेक्स का थित्तेकम। मिनु मेको ब्रेक्समी मार ब्रेक्शो बाक्त देशा हना

3 पिप कोरेसमी सासन पशो डोंइती डा बर्समी यरूसलेममी परमप्रभु आ खिं आ पर्वम हुकुम पशो ब्रेक्स का गुंइशो बाक्ब। मार लोत्र गुंइशो बाक्ब देशा हना "मेको खिं लेंशा सेलीन। मेको चढ़ेचा कली नु चोशा चढ़ेतीक चढ़ेचा कली बाक्ब। आ ग्येथ लाइशशो ६० कुबीत नु आ पित्थ ब्रेमशो ६० कुबीत दुमचा माल्ब। कुबीत का आधा मिटर खोदेशो बाक्ब।

4 मेको खोइशशो फुल्लु के लहर सां नु शी के लहर का पा सेल्चा। मिनु मेको सेल्चा कली आ माल्शो नेल्ल पिप आ क्येट वोइक्तीक रे गेचा।

5 पिप नेबुकदनेसरमी यरूसलेम डा परमप्रभु आ खिं रे गुंइशा बेबीलोन सहरम चाक्शो सुन नु चांदी के बोसपुकी यो लेंशा डोंइती डा आन बाक्तीक उइ वोइक्चा। मेको नेल्ल यरूसलेममी परमप्रभु आ खिंमी लाइशशा वोइक्चा नम" दे ब्रेक्शो बाक्त।

पिप दारामी वारच पशो

6 मिनु पिप दारामी "युफ्रेटीस आइक्ची हांबु डा रागीमी हुकुम पाइब ततेनाइ, शेथार-बोजेनाइ नु इन गेय पाइबपुकी नु युफ्रेटीस आइक्ची हांबुम बाक्ब सोइशशो नेल्ल इन कली

7 परमप्रभु आ खिं सेल्तीक गेय मतेक्कीन। यहूदी आन कली सासन पाइब नु मेको आन खाल्पा आन कली परमप्रभु आ खिं डोंइती डा आ बाक्तीक उइ सेल्चा गेने।

8 मिनु गो हुकुम का पाइनुड। गे यहूदी आन खाल्पा आन कली परमप्रभु आ खिं सेल्चा कली मार पचा माल्नीनी मेको यो इन कली हुकुम गेनन्नी। मेको सेल्तीक गेय पचा कली युफ्रेटीस आइक्ची हांबु डा रागी रे पोक्शो तितो रे पिप आ क्येट वोइक्तीक रे मेको आन कली माल्शो नेल्ल गेने।

9 मिनु मेको आन कली माल्शो, बाछा, सांड, पाठा स्वर्गम बाक्ब परमप्रभु कली चोशा चढ़ेतीक चढ़ेचा कली गेचा माल्नीनी। यरूसलेममी बाक्ब चढ़ेब आन माल्शो चेरब, हिकसी, अडगुर शांबु नु तेल मंत्रथु, नाक्त कित कित रीब पा गेचा माल्नीनी।

10 मिनु मेकोपुकीमी स्वर्ग डा परमप्रभु आ दाक्चा डा पा चढ़ेने चान्नीम। मिनु पिप नु आ तौपुकी शुश ब्रोंइशा बाक्ने चाप्मेकल, दे परमप्रभु कली पुंडनीम।

11 मेको प्रोंइशा यो गो एको हुकुम गेनन्नी सुमी एको आं अरेशो लोत्र फाइक्बा, मेको आ खिं डा थाम का गुंइशा, मेको थाममी क्युकचा पुंडसीब। मिनु मोशो ला ममाइ, आ खिं यो प्रेशा गेचा पुंडसीब।

12 परमप्रभुमी आ नें तुइक्पाइक्चा कली यरूसलेममी आ बाक्तीक सेल्पाइशशो बाक्त। परमप्रभुमी आ हुकुम फाइक्ब नु यरूसलेम आ खिं प्रेब पिप नेल्ल नु अरु मुर, सु बाक्तेकम हना यो, मेको आन कली खतम पोक्गाल। गो पिप दाराम हुकुम पाता। मेको रीब पा पचा माल्नीम" दे हुकुम पापुतु।

परमप्रभु आ लोत्र गाप्शो

13 मिनु पिप दारामी अरेशो लोत्र युफ्रेटीस आइक्ची हांबु डा रागीम हुकुम पाइब ततेनाइ, शेथार-बोजेनाइ नु मेको नु बाक्ब नेल्लेमी का यो मखाइक्थु पान्तेकम।

14 मिनु यहूदी आन खाल्पापुकीमी सेल्चा सेल्न बाक्तेकम। परमप्रभु यावे आ लोत्र पाइब हाग्गे नु इददो आ तौ जकरिया आस देशो खोदेशो पा रीब पा दुम्ना दुम्न लत। इस्राएली आन परमप्रभु आ देशो खोदेशो पा, पारसी रागी डा पिप कोरेस

आ हुकुम गेशो खोदेशो पा, पिप दारा आ वारच पतीकेमी नु पिप आरता-सास्त आन ब्रेकशा गुंडशो हुकुम खोदेशो पा मेकोपुकीमी मेको खिं लेशा सेल्ले थुम्तेकम।

15 पिप दारा आ सासन पशो ६ बर्स दुम्मेनु, अदार माइशो महिना डा सां नाक्तीम मेको खिं सेल्ले थुम्तेकम।

परमप्रभु आ खिं जिम्मा गेशो

16 मिनु नोले इस्राएल डा मुरपुकी, चढेबपुकी, लेवीपुकी नु लेशशा जाकशो ग्याइशशा लाइक्चा पुंडसीब नेल्लेमी परमप्रभु आ खिं परमप्रभु कली “इन के बाक्ब” दे ग्येरसीशा जिम्मा गोम्तेकम।

17 मोपा मेकोपुकीमी मेको खिं परमप्रभु कली जिम्मा गोमेनु, सहे का ब्यफ, सहे निक्शी सांड नु ४ सहे पाठा चढेम्तेकम। मिनु इस्राएली आन पाप आ परबम १२ थर आन कली, बोका का का पा, १२ ओटा बोका चढेम्तेकम। गन्ती ७:१०

18 मिनु मेकोपुकीमी मोसा आ किताबमी ब्रेकशो खोदेशो पा चढेब आन पालो पालो पा नु लेवी आन पालो पालो पा यरूसलेममी परमप्रभु आ गेय पचा कली लेशा वोइक्तेकम। गन्ती ३:६

पास्सा चाड मानेशो

19 मिनु लेशशा जाकशो ग्याइशशा लाइक्चा पुंडसीबपुकीमी डोंइती डा महिना डा १४ नाक्तीमी पास्सा चाड मानेम्तेकम।

20 चढेब नु लेवी नेल्लेमी आंम आन कली ठीक सेल्सीशो बाक्तेकम। मेको नेल्ल परमप्रभु कली गेय पचा कली ठीक दुम्शो बाक्तेकम। मेकोपुकीमी लेशशा जाकशो ग्याइशशा लाइक्चा पुंडसीब, चढेब आन लोकब आन कली नु आंम आन कली पास्सा चाड डा पाठा क्योरतेकम।

21 लेशशा जाकशो ग्याइशशा लाइक्चा पुंडसीब इस्राएलीपुकीमी मेको ब्वाम्तेकम। मिनु रागी डा मरिम्शो दुम्तीके रे दिल्लो परमप्रभु यावे, इस्राएली आन परमप्रभु कली ठेयब सेल्ल मुरपुकी मेको नु गारशा ब्वाम्तेकम। ब्यवस्था १६:१-८

22 मिनु मेकोपुकीमी ग्येरशा ७ नाक्त सम्म बोरब ओरली मसुप्शो शोब्ले डा चाड मानेम्तेकम। मारदे हना परमप्रभु यावेमी मेको आन कली ग्येरपाइशशो बाक्त। मेकोमी अस्सुर डा पिप आ थुं हिरशा, मेको आन कली दाक्पाइशशो बाक्त। मोपतीके मेको पिपमी इस्राएल डा परमप्रभु आ खिं सेल्चा कली मेको आन कली वारच पाइक्तीमी।

## 7

एज़ा यरूसलेममी जाकशो

1 मिनु मेको नोले, पारसी रागी डा पिप आरता-सास्तमी सासन पची ना, सेरायाह आ तौ एज़ा बेबीलोन रे कुत। मेको सेरायाह आ आफ अजारयाह बाक्त। अजारयाह आ आफ हिल्कीयाह बाक्त। १इतिहास ५:३१-४०

2 हिल्कीयाह आ आफ शाल्लुम बाक्त। शाल्लुम आ आफ सादोक बाक्त। सादोक आ आफ अहीतुब बाक्त।

3 अहीतुब आ आफ अमारयाह बाक्त। अमारयाह आ आफ अजारयाह बाक्त। अजारयाह आ आफ मेरायोथ बाक्त।

4 मेरायोथ आ आफ जेराह बाक्त। जेराहीयाह आ आफ उज्जी बाक्त। उज्जी आ आफ बुक्की बाक्त।

5 बुक्की आ आफ अबीशुआ बाक्त। अबीशुआ आ आफ फिनेहास बाक्त। फिनेहास आ आफ एलाजर बाक्त। एलाजर आ आफ नेल्ल क्येडा ठेयब चढेब हारून बाक्त।

6 मेको एज़ा बेबीलोन रागी रे जाक्त। मोसा रे पा गेशो, परमप्रभु यावे, इस्राएली आन परमप्रभु आ अरेशो लोव जोक्ब तुइक्ब बाक्त। मिनु पिपमी आ पुंडशो नेल्ल गेपु। मारदे हना आ परमप्रभु यावे आ गुड मेको आ तारी बाक्त। एज़ा ८:१८-२२; नेहेम्याह २:८

7 आरता-सास्त पिप दुम्शो ७ बर्स जाक्दीम्मेनु, का निक्शी इस्राएली, का निक्शी चढेब, लेवी, कुम्सो पाइब, लाप्चोम खाल पाइब नु परमप्रभु आ खिंमी गेय पाइब मेको नु यरूसलेम लाम्तेकम।

8 मिनु पिपमी सासन पशो ७ बर्स डा ५ महिना दुम्मेनु, मेकोपुकी यरूसलेममी जाक्दीत्तेकम।

9 मिनु डोंइती डा महिना डा डोंइती डा नाक्तीमी बेबीलोन रागी रे यरूसलेम लचा गोम्तेकम। मिनु मेकोपुकी ५ महिना डा डोंइती डा नाक्तीमी यरूसलेम जाक्तेकम। मारदे हना परमप्रभु यावे, आ परमप्रभु आ शिशी पतीक गुड मेको आन तारी बाक्त।

10 एज़ामी परमप्रभु यावे आ अरेशो लोव रुप्चा नु पचा कली आ थुं फ्रेशो बाक्त। मिनु परमप्रभु आ फुल्लुम मुशा ब्रेकशो नु आ ठीक पतीक लोव इस्राएलम शेंचा कली मिम्शो बाक्त।

पिपम एज़ा कली ब्रेक्स गेशो

11 मेको पिप आरता-सास्तमी चढेब एज़ा कली गेशो ब्रेक्स डा लोव एको बाक्ब “मेको एज़ा नेल्ल ब्रेक्स तुइक्ब, परमप्रभु यावेमी इस्राएली आन कली शेंशो नु फुल्लुम मुशा ब्रेकशो लोव रुप्चा जोक्ब बाक्त।

12 ‘पिप आन पिप आरता-सास्तमी स्वर्ग डा परमप्रभु आ अरेशो लोव जोक्ब तुइक्ब चढेब एज़ा कली थुं नाइशशा बाक्को!’

13 गो हुकुम का गेनन। मार हुकुम गेनन देशा हना, आं रागीम बाक्शो इस्राएल डा मुर, चढेबपुकी नु लेवीपुकी यरूसलेममी सु सु लचा दाक्नीमी, मेको गे नु लने चाप्नीम।

14 गो, पिप नु आं ७ जना अर्ती गेबपुकीमी इन कली यहूदा नु यरूसलेममी मार दुम्ना दुम्न बाक्मे, मेको कोव्रचा कली सोइशशो बाक्नीकी। गे नु बाक्ब इन परमप्रभु आ अरेशो लोव पशो बाक्मा कौं, मपशो बाक्मा, मेको कोव्रडो।

15 गो, पिप नु आं ७ जना अर्ती गेबपुकीमी ग्येरशा गेशो सुन चांदी यरूसलेममी बाक्ब इस्राएली आन परमप्रभु कली लतीन।

- 16 मिनु गे बेबीलोन रागी नेल्लेमी इ कली गेशो सुन चांदी लाइशशा लने। मुर नु चढेबपुकीमी यरूसलेम सहरम बाकब आन परमप्रभु आ खिं कली ग्येरशा गेशो मार मार यो लतीन।
- 17 मिनु मेको क्येटीमी यरूसलेममी इन परमप्रभु कली चढेतीकेमी चढेचा कली ब्यफ, सांड नु पाठापुकी ग्यापीन। मेको नु चढेचा कली अन्न नु तूचा थोवक यो ग्याप्या माल्नीनी।
- 18 मेको मोपा ग्याप्या यो सुन चांदी हेंत हना, इन परमप्रभु आ दाक्स पा, गे नु इन लोकबपुकीमी मार पशो नु रिम्शो लाकनीनी, मेको पने चाप्नीनी।
- 19 इन परमप्रभु आ खिंमी गेय पचा कली गेशो बोसपुकी, गे मेको यरूसलेममी परमप्रभु आ डोंडती वोइक्या माल्नीनी।
- 20 मिनु इन परमप्रभु आ खिं कली मारेइ माल्ताकव हना, मेको पिप आ क्येट वोइकतीक रे शोल्ला, गेय पने चाप्नीनी।
- 21 गो, पिप आरता-सास्तमी, युफ्रेटीस आइकची हांबु डा रागी डा क्येट कोव्रशा वोइकब आन कली हुकुम गेतामी। नेल्ल आन कली 'स्वर्ग डा परमप्रभु आ अरेशो लोव्र जोकब तुइकब चढेब एञ्जामी इन कली मार पुंडतु हना यो, रीब पा गेने।
- 22 सहे का टलेन्ट चांदी, सहे का कोर चेरब, सहे का बाथ अडगुर शांबु, सहे का बाथ तेल नु हिकसी दोशो माल्नीमी मोशो गेन। टलेन्ट का ३४ किलो बाकब। कोर का २२० लिटर, टेयब पुक्तीके बाकब। बाथ का २२ लिटर बाकब।
- 23 स्वर्ग डा परमप्रभुमी मार अरेशो बाकमे आ खिं कली मार माल्दा मेको रीब पा स्वर्ग डा परमप्रभु कली गेने। मो मदुम्त हना, आ गाइशो पिप आ राज्य नु आ तौ चच आन तार मोंडसीब।
- 24 मिनु गो इन कली मार तुइकपाइक्या दाक्नीकी देशा हना, चढेब, लेवी, कुम्सो पाइब, लाप्यो खाल पाइब, परमप्रभु आ खिंमी गेय पाइब नु अरु गेय पाइब आन कली पिप कली गेतीक क्येट नु तिरो पोक्चा मताइनीम' दे हुकुम गेनन्नी।
- 25 मिनु गे, एञ्जा इ परमप्रभुमी इ कली तुइकब थुं गेशो बाक्त। मोपतीके युफ्रेटीस आइकची हांबु डा रागी कली हुकुम पाइब नु निसाफ पाइब योव्रशा वोइक्या माल्नेवे। मेकोपुकीमी युफ्रेटीस आइकची हांबु डा मुर नेल्ल आन कली निसाफ पचा माल्नीम। मेको परमप्रभु आ अरेशो लोव्र तुइकब दुम्चा माल्नीम। गे मतुइकब आन कली शेंचा माल्नेवे।
- 26 इ परमप्रभु आ लोव्र मटीब नु पिप आ अरेशो मटीब, नेल्ल आन कली सजाइ गेचा माल्नीम। मेको आन कली साइक्या पुंडसीचा डा, रागी रे तिल्चा पुंडसीतीके, मेको आन शोंप नेल्ल रोइक्या पुंडसीतीके नु चोक्या पुंडसीतीके, मार सजाइ हना यो गेचा माल्नीम" दे ब्रेकशो बाक्त।
- 27 मिनु एञ्जामी "परमप्रभु यावे, आइ किकी पिपी आन परमप्रभु, गे टेयब बाक्नीनी। यरूसलेममी बाकशो परमप्रभु यावे, इन खिं आ मान नु छेडछेड बारपाइक्या कली पिप आ थुंमी मोदेशो रिम्शो पतीके कुर पाइतीनी।
- 28 मिनु पिप, आ अर्ती गेबपुकी नु गेय पाइब आन टेयब मुरपुकीमी आं कली दाकब सेल्लतीनी" देंत। मारदे हना परमप्रभु यावे, आं परमप्रभु आ गुड आं तारी बाकब, दे तुइशशा, आं थुं टेयब सेल्ला। मिनु गो नु यरूसलेम लचा कली बेबीलोनम बाकशो इसाएली आन टेयब मुर आन कली पुक्ताकमी।

## 8

बेबीलोन रे लेशशा जाकब आन नें

- 1 पिप आरता-सास्तमी सासन पवा ना बेबीलोन रे गो नु लाइब खिं खिं डा टेयब मुर आन नें ब्रेक्तीकेम ब्रेकशो सु सु बाक्तेकम देशा हना, एञ्जा ७:१,७
- 2 फिनेहास आ चच युइ रे गेरशोम, इथामार आ चच युइ रे दानीएल, दाऊद आ चच युइ रे हत्तुश, १इतिहास ३:२२
- 3 शेकन्याह आ चच युइ, पारोश आ चच युइ, जकरिया नु नें ब्रेक्तीकेम नें ब्रेकशो १५० जना वोंइश मुर,
- 4 पहाथ-मोआब आ चच युइ रे, जेराहीयाह आ तौ एली-ए-होएनाइ नु मेको नु २०० जना वोंइश मुर, एञ्जा २:६
- 5 जत्तु आ चच युइ रे याहासीएल आ तौ शेकन्याह नु ३०० जना वोंइश मुर,
- 6 आदीन आ चच युइ रे योनाथान आ तौ एबेद नु ५० जना वोंइश मुर,
- 7 एलाम आ चच युइ रे अथाल्याह आ तौ येशायाह नु ७० जना वोंइश मुर,
- 8 शेफत्याह आ चच युइ रे मिकाएल आ तौ जेबदीयाह नु ८० जना वोंइश मुर,
- 9 योआब आ चच युइ रे येहीएल आ तौ ओबदिया नु २१८ जना वोंइश मुर,
- 10 बानी आ चच युइ रे योसीफीया आ तौ शेलोमीथ नु १६० जना वोंइश मुर, एञ्जा २:१०
- 11 बेबाइ आ चच युइ रे आ तौ जकरिया नु २८ जना वोंइश मुर,
- 12 अज्जाद आ चच युइ रे हककातान आ तौ योहानान नु ११० जना वोंइश मुर,
- 13 नोले जाकशो अदोनीकाम आ चच युइ रे एली-फेलेत, येहुएल नु शेमायाह नु ६० जना वोंइश मुर,
- 14 मिनु बिग्वाइ आ चच युइ रे उथाइ, जाककुर नु ७० जना वोंइश मुर बाक्तेकम।

चढेब लेवी आन कली माल्शो

- 15 गो मेको मुर नेल्ल आन कली अहावा गे लाइब खोला आ नेक्थाम पुक्ताकमी। मिनु गो मेकेर नाक्त सां सम्म बाक्तीक सेल्ला बाक्तक। मिनु गो मुर नु चढेब आन कली कोव्रडुमीनु, लेवी आ चच युइ काइ मबाक्म।
- 16 मिनु गो मुर आन कली एलीएजर, अरीएल, शेमायाह, एलनाथान, यारीब, एलनाथान, नाथान, जकरिया नु मेशुल्लाम आन कली ब्रेत्थ सोइक्ताकड। मेको लेवी आन दातेमी टेयब मुर बाक्तेकम। जोकब तुइकब योयारीब नु एलनाथान आस कली यो ब्रेत्थ सोइक्ताकड।

17 मिनु गो कासीपीया डा ठेयब मुर इददो आ बाक्तीकेमी “लन” दे सोइक्ताकडमी। मिनु मेको आन कली कासीपीयाम लशा, इददो मेको आ मुरपुकी नु मेकेर डा परमप्रभु आ खिम गेय पाइब आन कली “आंड परमप्रभु आ खिमी गेय पचा कली गेय पाइबपुकी सोइक्तीन” दे माइक्थ सोइक्ताकडमी।

18 आंड परमप्रभु आ शिशी पतीके गुड आंड तारी बाक्त। मारदे हना मेकोपुकीमी जोक्ब तुइक्ब मुर का चाक्तेकम। मेको इसाएल आ तौ लेवी आ तौ माहली आ चच युड शेरब्याह माइशशो मुर बाक्त। मेको आ तौपुकी नु आ लोकब नेल्ल पा १८ जना वोंइश मुर चाक्तेकम। एज़ा ७:६

19 मिनु मेकोपुकीमी यो हशाब्याह, मेरारी आ चच युड येशायाह नु मेको आ लोकब नु मेको आन तौ २० जना यो चाक्तेकम।

20 मिनु मेको आन कली प्रोंइशा २२० जना परमप्रभु आ खिमी गेय पाइब यो चाक्तेकम। डोंइती दाऊद नु आ गेय पाइब ठेयब मुरपुकीमी लेवी आन कली वारच पचा कली योव्रशा वोइशशो बाक्त। मेको नेल्ल आन नें नें ब्रेक्तीकेम ब्रेक्शो बाक्तेकम। १इतिहास ९:२

माइजा बाक्शा, पुंडशो लोत्र

21 मिनु गो अहावा खोलाम बाक्कानु, गो मुर आन कली “परमप्रभु कली पुंडचा कली गो माइजा बाक्चा मालनय” देंती। “परमप्रभु आ डोंइती आंड दाक्शो मपथु, आंड कली, आंड आल आन कली नु आंड शोंप कली लाम रिमशो दुम्ल” दे परमप्रभु कली पुंडतक।

22 गो आंड कली लाम आंड जोरी सत्रु रे प्रोंइचा कली लडाइ पाइब नु शारा डोइक्बपुकी सोइक्तीकी, दे पिप कली पुंडचा मुने पाता। मारदे हना गोपुकीमी पिप कली “आंड परमप्रभुमी आ नोले खोइक्ब नेल्ल आन कली कोत्रब। तन्न मेको कली प्रोंइब आन कली आ गाइशशो कोंइब” देंशो नड।

23 मिनु गो आंड रिमशो पा गाक्तीक आ परबम माइजा बाक्शा, आंड परमप्रभु कली पुंडतक। मिनु परमप्रभुमी आंड पुंडशो नेंतु।

परमप्रभु आ शोंप जिम्मा गेशो

24 मिनु गो ठेयब चढ़ेब आन दाते रे १२ जना आन कली योव्रतामी। मेको सु सु बाक्तेकम देशा हना, शेरब्याह नु हशाब्याह नु मेको आस लोकब १० जना बाक्तेकम।

25 मिनु पिप आ अर्ती गेब, मेको आ गेय पाइब ठेयब मुरपुकी नु मेकेर बाक्ब इसाएली नेल्लेमी परमप्रभु आ खिं कली गेशो सुन चांदी नु अरु बोसपुकी नाक्शा, मेको आन कली गेतामी।

26 गो मेको आन कली ६ सहे ५० टलेन्ट चांदी, अरु सहे का टलेन्ट डा चांदी के बोस नु सुन सहे का टलेन्ट, टलेन्ट का ३४ किलो बाक्ब।

27 सुन के बोस २० ओटा, मेको नेल्ल हजार का आदारकोन डा बाक्नीम। नु सुन खोदेंशो रिमशो कांसा के बोस निक्शी यो गेतामी। आदारकोन सुन के क्येट बाक्ब। टुक्रा का ८.४ ग्राम बाक्ब।

28 मिनु गो मेको आन कली “गे परमप्रभु यावे आ मुर बाक्नीनी। एको बोस यो परमप्रभु यावे आ बोस बाक्नीम। मुरपुकीमी एको सुन नु चांदी इन किकी पिपी आन परमप्रभु कली ग्येरशा गेशो बाक्नीम।

29 गे मेको नेल्ल कली रिमशो कोत्रडीन। यरूसलेम परमप्रभु यावे आ खिंमी ठेयब चढ़ेबपुकी, लेवी नु इसाएली आन खिं खिं डा ठेयब मुर आन डोंइती नाक्शा मगेशो सम्म होस पा कोत्रडीन” दे माइक्तामी।

30 मिनु मेको चढ़ेब नु लेवीपुकीमी यरूसलेम बाक्शो आंड परमप्रभु आ खिंमी लाइक्चा कली मेको नाक्शो सुन चांदी नु बोसपुकी ताक्तेकम।

इसाएलीपुकी यरूसलेम जाक्शो

31 मिनु गो डोंइती डा महिना डा १२ नाक्तीमी यरूसलेम लचा कली अहावा खोला रे गाक्तक। मिनु आंड परमप्रभु आ गुड आंड तार बाक्त। मेकोमी पतीके जोरी सत्रु नु लाम बाप्शा बाक्ब रे ब्रोंइतक।

32 मिनु गो यरूसलेम जाक्शा नाक्त सां सम्म नांडसाक्क।

परमप्रभु आ खिं डा शोंप चाक्शो

33 मिनु आ दीसा मेको सुन चांदी नु बोसपुकी, आंड परमप्रभु आ खिंमी लाइशशा, चढ़ेब उरीयाह आ तौ मेरेमोथ कली नाक्शा गेतक। मेको नु फिनेहास आ तौ एलाजर यो बाक्त। मिनु मेको निक्शी नु लेवी आन दाते डा येशुआ आ तौ योजाबाद नु बिन्नुड आ तौ नोआदीयाह यो बाक्ताक्स।

34 मेको नेल्ल हिक्शा नाक्शा ब्रेक्शा वोइक्तेकम।

जाक्बपुकीमी चोशा चढ़ेशो

35 लेशशा जाक्शो ग्याइशशा लाइक्चा पुंडसीब इसाएलीपुकीमी आन परमप्रभु कली चोशा चढ़ेक्तेकम। इसाएली नेल्ल आन परबम १२ ओटा ब्यफ, ९६ ओटा सांड, ७७ ओटा पाठा नु पाप आ परबम चढ़ेतीके चढ़ेचा कली १२ ओटा बोका चढ़ेक्तेकम। मेको नेल्ल परमप्रभु यावे कली चोशा चढ़ेतीके बाक्तेकम। एज़ा ६:१७

36 मेकोपुकीमी पिपमी ब्रेक्शा अरेशो लोत्र युफ्रेटीस आइक्ची हॉबु डा रागी डा पिप आ गेय पाइब नु हुकुम पाइब आन कली गेक्तेकम। मिनु मेकोपुकीमी मुर आन कली नु परमप्रभु आ खिं कली ठेयब वारच पाइक्तेकम।

## 9

इसाएली आन मरिम्शो पशो

1 मिनू मेको नेल्ल पने थुम्शो नोले का निकशी योत्रचा पुंडसीशो मुरपुकी आं बाक्तीकेम जाक्शा “इसाएल डा मुरपुकी, चढेब नु लेवीपुकीमी, कनानी हित्ती, परिज्जी, यबुसी, अम्मोनी, मोआबी, इजीप्ती नु एमोरी आन ग्रान्ना दिशो गेय रे डोन मदुम्शो बाक्नीम।

2 मेकोपुकीमी मेको आन तमी आंम कली नु आन तौ आन कली मीश चाक्शो बाक्तेकम। मोदेशो पा परमप्रभु आ आंम मुरपुकी अर्को रागी डा मुरपुकी नु खाल्साकम। मिनू योत्रचा पुंडसीशो ठेयब मुर नु सासन पाइब आन परमप्रभु आ देशो मपथु, शुश दोस ताइब बाक्नीम” देतेकम। ब्यवस्था ७:३; ब्यवस्था २३:३; गन्ती ११:१७-२५; नेहेम्याह १३:२३

3 मिनू गो मेको लोत्र नेशा आं फेक्शो वा खाक्ता। आं चां नु गल शोक्के तुल्ला। मारेइ लोत्र पने मचापथु, सिक्सी पा बाक्ती।

4 मेको ग्याइश्शा लाइक्का पुंडसीब आन मरिम्शो पतीके आ पबंम इसाएली आन परमप्रभु आ लोत्र कली मान पा हिंबपुकी आं बाक्तीकेम एर ओंथ बुक्तेकम। मेकेर रे गो नाक्दो डा चढेतीक सम्म मारेइ लोत्र पने मचापथु, सिक्सी पा बाक्ती।

एजामी परमप्रभु कली पुंडशो

5 मिनू नाक्दो डा चढेतीक दुम्नेनु, आं खाक्शो वा फेक्शा, गो पोकच थेक्शा, आं गुइ परमप्रभु यावे, आं परमप्रभु गे दिशा

6 “आं परमप्रभु, गो इन कली आं कुल कौंडचा थाम्पा मुने पाता। मारेदे हना आंइ मरिम्शो पतीके आंइ पिया क्येडा यो लाक्शो बाक्ब। मिनू आंइ दोस सरीड सम्म जाक्दीशो बाक्ब। दानीएल ९:७-८

7 गो आंइ किकी पिपी रे मुलाक्त डा नाक्त सम्म आंइ दोस थम ठेयब बाक्ब। आंइ काइ मरिम्शो पतीके आंइ पिप नु चढेबपुकी अर्को रागी डा पिप आन गुइमी साइक्का, चोक्का, मारेइ मारेइ रोइक्का पुंडसीचा नु शुश मुने तोक्का पुंडसाकम। मिनू गोपुकी यो सिनाक्त मुलाक्त मोदेशो दुम्शो बाक्नीकी।

8 तन्न मुल परमप्रभु यावे, आंइ परमप्रभुमी आंइ कली का निकशी लीशो मुर गेतीनी। आंइ वाइल दुम्तीक रे इच्का नाक्त कली नाइक्का गेतीके आंइ परमप्रभु आ बाक्तीकेमी बाक्का ताइतक। याम का कली आंइ कली शिशी पा ग्येरपाइक्तीनी।

9 गो वाइलीम वाइल बाक्तक हना यो, आंइ परमप्रभुमी आंइ कली मप्रौइशो बाक्ब। पारसी रागी डा पिप आ डौंइती इन गेना हना यो दाक्तीके कौंडशो बाक्तीनी। आंइ कली नक ब्रौंडचा गेशा, आंइ परमप्रभु आ खिं लेंशा सेल्चा कली नु ब्रेश्शो नेल्ल लेंशा सेल्चा कली नु यहूदा नु यरूसलेम एर ओंथ गारो प्रोत्रचा गेतीनी।

10 मोदेशो बाक्त हना यो, आंइ परमप्रभु, मुल गो मार देने चाप्नीकी? गोपुकीमी इन शेंशो मटिथु, प्रौंडतक।

11 गे इन लोत्र पाइब रे मार लोत्र पपाइक्तीनी देशा हना ‘इन के सेल्चा कली ओव्रशो रागी ग्रान्ना दिशो बाक्त। मारेदे हना मेको रागी डा मुर आन ग्रान्ना दिक्का डा गेयमी मेको रागी डा कुना कुना नेल्ल ब्रीशो बाक्त। लेवी १८:२४-२५

12 मोपतीके गेपुकीमी इन तमी मेको आन तौ आन कली ग्युंवे पा मगेन। इन तौ आन कली मेको आन तमी नु ग्युंवे पा मचाक्कीन। मिनू गेपुकीमी मेको आन कली रिम्शो दुम्चा नु दारचा कली वारच मपने। मोपा गेपुकी शुश बोल्यो दुम्शा, मेको रागी डा रिम्शो थोत्रक जक्का ताइनीनी। मिनू गे मेको रागी इन चच युइ आन कली गेना हना यो आन के दुम्पाइश्शा वोइक्कीनी’ दे लोत्र पपाइक्तीनी।

13 गोपुकीमी आंइ मरिम्शो पतीके नु आंइ ठेयब दोस आ पबंम रयेत जशो बाक्तक। मो हना यो आंइ परमप्रभुमी आंइ तचा माल्लो क्येडा इच्का ला सजाइ गेतीनी। मिनू आंइ कली ब्रौंडचा गेतीनी।

14 गो लेंशा इन शेंशो लोत्र मटिथु, मेको ग्रान्ना दिशो गेय पाइब नु ग्युंवे पाइनीकी डा? गे गोपुकी नु चुरशा, आंइ कली मसाइक्कीनी डा? मिनू ब्रौंडशा बाक्ब सुइ मलीब।

15 परमप्रभु यावे, इसाएली आन परमप्रभु गे ठीक पाइब बाक्नीनी। मुल गो इच्का खोइ लीशो बाक्नीक। गो आंइ मरिम्शो पतीकेमी इन डौंइती बाक्नीकी। मो हना यो गो इन डौंइती पिया पोक्ने मचाप्नीकी” देती।

## 10

आन थुं परमप्रभु गे लेशो

1 एजा परमप्रभु आ खिं आ डौंइती गु बाप्शा, आन मरिम्शो पशो नेल्ल शोत्रशा, डाक्ना डाक्न बाक्शो बाक्त। मिनू ठेयब हुल का इसाएली वौइश मुर, मीश मुर नु आलपुकी एजा आ एर ओंथ बुक्तेकम। मिनू मेको यो शुश डाक्तेकम।

2 मिनू एलाम आ चच युइ डा येहीएल आ तौ शेकन्याहमी एजा कली “गो आंइ परमप्रभु कली मटिथु, एको रागी डा अर्को जात डा मीश आल ग्युंवे पा चाक्तक। मोदेशो पाइतक हना यो, इसाएली आन कली आस पतीके बाक्ब।

3 मोपतीके मुल आंइ परमप्रभु नु कबल का पय। आ प्रभु नु परमप्रभु आ शेंतीक मान पा हिंशा टीब आन देशो खोदेशो पा एको मीश मुर नु आन आल नेल्ल आन कली प्रौंडशा सोइक्का कली लोत्र थोक्तय। मिनू परमप्रभु आ अरेशो लोत्रम देशो खोदेशो पय।

4 मिनू मुल बोक्कीन। एको गेय नेल्ल इन के बाक्ब। गो इन कली वारच पाइनीकी। मोपतीके थुं बारपाइश्शा गेय पने” देत।

कसम जपाइश्शो

5 मोपतीके एजा बोक्शा, ठेयब चढेबपुकी, लेवीपुकी नु नेल्ल इसाएली आन कली “डोंइती देशो लोत्र पाइनीक” दे कसम जपाइक्तीमी। मिनु मेकोपुकीमी कसम जाम्तेकम।

6 मिनु नोले एजा परमप्रभु आ खिं आ डोंइती रे बोक्शा, एल्याशीब आ तौ येहो-हानान आ कोठाम लत। मिनु मेकोमी शोब्ले मजव ब्वाक्कु यो मतूड। मारदे हना ग्याइशशा लाइक्का पुंडसीब आन मटितीके आ परबम सुर्ता पना पन बाक्त।

7 मिनु यहूदा नु यरूसलेमम बाक्ब लेशशा जाक्शो ग्याइशशा लाइक्का पुंडसीब नेल्ल यरूसलेमम बुक्मल, दे नेंपाइक्तेकम।

8 मिनु हुकुम पाइब नु खाल्पापुकीमी “सुइ मुर नाक्त सां सम्ममी मजाक्त हना, मेको आ शोप नेल्ल रोइक्का पुंडसीब। मिनु लेशशा जाक्शो ग्याइशशा लाइक्का पुंडसीब आन दाते रे तिल्चा पुंडसीब” दे यहूदा नु यरूसलेम डा तेइ तेइ लोत्र सोइक्ताकम।

9 मिनु यहूदा नु बेन्यामीन डा मुर नेल्ल नाक्त सां यरूसलेममी बुक्तेकम। मेको ९ महिना डा २० नाक्तीम बाक्त। मुर नेल्ल परमप्रभु आ खिं डा लाइगाम निस्साकम। मेको नेल्ल लोत्र नु ठेयब ठेयब रेउ आ परबम खिंखिं पाम्तेकम।

10 मिनु चढेब एजा बोक्शा मेको आन कली “गेपुकीमी अर्को जात डा मीश आल ग्युंवे पा चाक्तीनी। इसाएली आन दोस तेम्ताक्नी।

11 मुल गे परमप्रभु यावे, इन किकी पिपी आन परमप्रभु आ डोंइती इन मरिम्शो पशो शोत्रडीन। मिनु आ दाक्शो पने। गे मेको रागी डा मुर नु अर्को जात डा मीश रे ब्राडीन” दे मेको आन कली माइक्तीमी।

12 मिनु मेकेर बुक्शो मुर नेल्लेमी ठेयब सेंदामी “इन देशो थमा बाक्ब। गोपुकीमी इन देशो खोदेशो पचा माल्नीकी।

13 तन्न गो एकेर शुश मुर बाक्नीकी। रेउ यिना यिन बाक्ब। मिनु गो हाक्सीतीकेमी राप्शा बाक्ने मचाप्नीकी। एको गेय काबु निक्बुम मथुम्सीब। मारदे हना आंइ दातेमी शुश मुरुम मोदेशो मरिम्शो पाम्तेकम।

14 गे आंइ ठेयब मुरपुकीमी यरूसलेमम मेको लोत्र नेंपतीन। मिनु सु सुमी आंइ सहरम अर्को जात डा मीश चाक्गमे, मेको सहर डा खाल्पा नु निसाफ पाइब आन डोंइती देशो ना जाक्का माल्नीम। आंइ परमप्रभु आ थाम्पा गाइशशो मनांइसे सम्म मोदेशो पने” दे ठेयब सेंदामी लोत्र लेत्ताकम।

15 मिनु आसाहेल आ तौ योनाथन नु तिकवाह आ तौ याहजैयाह मबिस्सस। मेशुल्लाम नु शब्बेथाइ लेवी निक्शीमी मेको आस कली वारच पाइक्ताकस।

16 मिनु नोले लेशशा जाक्शो ग्याइशशा लाइक्का पुंडसीबपुकीमी मार पाम्तेकम देशा हना, चढेब एजा कली खिं खिं डा ठेयब मुर आन कली मेको गेय पपाइक्का कली नें ब्रेक्शा योत्रपाइक्तेकम। मिनु मेकोपुकीमी १० महिना डा डोंइती डा नाक्त रे मेको गेय पचा गोम्तेकम।

17 मिनु डोंइती डा महिना डा डोंइती डा नाक्ती अर्को जात डा मीश नु ग्युंवे पाइब नेल्ल सु सु बाक्मा तुइक्ने थुम्तेकम।

अर्को जात डा मीश चाक्ब आन नें

18 मिनु अर्को जात डा मीश ग्युंवे पाइबपुकीमी, चढेबपुकीमी योसादाक आ तौ येशुआ आ चच युइ रे नु आ लोक्ब रे मासेयाह एलीएजर, यारीब नु गेदाल्याह बाक्तेकम। एजा ३:२

19 मेकोपुकी आन मीश रे ब्रातेकम। मिनु आन दोस क्याम्चा कली आन बगाल रे सांइ का का चढेचा कली चाक्तेकम।

20 इम्मेर आ चच युइ रे हनानी नु जेबदीयाह,

21 हारीम आ चच युइ रे मासेयाह, एलीया, शेमायाह, येहीएल, नु उज्जीयाह बाक्तेकम

22 परहुर आ चच युइ रे एली-ओ-एनाइ, मासेयाह, इश्माएल, नेथनेल, योजाबाद नु एलासाह बाक्तेकम।

23 लेवीपुकी रे योजाबाद, शिमेइ, केलीता माइशशो केलायाह, पेथायाह, यहूदा नु एलीएजर बाक्तेकम। नेहेम्याह ८:७; नेहेम्याह १०:११

24 कुम्सो पाइबपुकी रे एल्याशीब, लाप्चो खाल पाइबपुकीमी शाल्लुम, तेयलेम नु ऊरी बाक्तेकम।

25 मिनु इसाएल डा पारोश आ चच युइ रे राम्याह, इज्जीयाह, माल्कीयाह मियामीन, एलाजर, हशाब्बाह नु बेनायाह बाक्तेकम।

26 एलाम आ चच युइ रे मत्तन्याह, जकरिया, येहीएल, अब्दी, येरेमोथ, नु एलीया बाक्तेकम।

27 जत्तु आ चच युइ रे एली-ओ-एनाइ, एल्याशीब, मत्तन्याह, येरेमोथ, जाबाद नु अजीजा बाक्तेकम।

28 बेबाइ आ चच युइ रे येहो-हानान, हनान्याह, जब्बै नु आथलै बाक्तेकम।

29 बानी आ चच युइ रे मेशुल्लाम, माल्लुक, अदायाह, याशुब, शेआल नु येरेमोथ बाक्तेकम।

30 पहाथ-मोआब आ चच युइ रे अदना, केलाल, बेनायाह, मासेयाह, मत्तन्याह, बेचालेल, बिन्नुइ नु मनस्से बाक्तेकम।

31 हारीम आ चच युइ रे एलीएजर, इस्शीयाह, माल्कीयाह, शेमायाह, शिमेओन,

32 बेन्यामीन, माल्लुक नु शेमारयाह बाक्तेकम।

33 हाशुम आ चच युइ रे मत्तताह मतेनाइ, जाबाद, एली-फेलेत, येरेमाइ, मनस्से नु शिमेइ बाक्तेकम।

34 बानी आ चच युइ रे मा-अदाइ, अग्राम नु ऊएल,

35 बेनायाह, बेदैयाह, केलुही,

36 चान्याह, मेरेमोथ, एल्याशीब,

37 मत्तन्याह, मतेनाइ नु यासु बाक्तेकम।

38 बिन्नुइ आ चच युइ रे

39 शिमेइ, शेलेम्याह, नाथान नु अदायाह,

40 माक-नादेबाइ, शाशाइ, शाराइ,



- 41 अजारेल, शेलेम्याह, शेमारयाह,  
42 शाल्लुम, अमारयाह नु योसेफ बाक्तेकम।  
43 नेबो आ चच युड रे यिएल, मत्तीथ्याह, जाबाद, जेबीना, यददाइ, योएल नु बेनायाह बाक्तेकम।  
44 मेको नेल्लेमी अर्को जात डा मीश ग्युंभे पशो बाक्तेकम। मिनु मेकोपुकीमी आन मीश नु आन आल प्रोंडशा सोइक्ताकम।

## नेहेम्याह

**ब्रेकब मुर:** एको किताब नेहेम्याह आंमान इच्छा ब्रेकशो बाकत। तन्न नोले सुमी मेको आ ब्रेकशो नु एजा आ ब्रेकशो किताब का सेला मतुंडसीब। डोंइती एजा नु नेहेम्याह किताब का बाकशो बाकत। मेको कली ग्रीक लोत्रमी सेल्शा, मेको किताब का रे निक्शी सेल्शो बाकतेकम।

**गेना दुम्यो:** ४४६ बि. सी.म नेहेम्याहमी यरूसलेम आ पबर्म लोत्र नेशो। ४४५ बि. सी.म नेहेम्याह यरूसलेम लशो। ४४५-४३३ बि. सी.म सुसा सहर लेशो। ४३३ बि. सी.म नेहेम्याह लेंशा यरूसलेम लशो।

**मारदे ब्रेकशो:** एको किताबमी १ इतिहास नु २ इतिहासम ब्रेकशो नेल्ल दुम्यो नोले डा रागी डा इतिहास बाकब। यरूसलेम सहर डा ब्रेकशो गारो ५२ नाक्तीमी लेंशा प्रोत्रशो आ पबर्म ब्रेकशो बाकब।

नेहेम्याह आ पुंडशो लोत्र

- 1 एको हाकाल्याह आ तौ नेहेम्याह आ लोत्र बाकब। २० बर्स डा किस्लेव महिनामी गो सुसा डा दरवारम बाक्ती।
- 2 मेना आं लोकब हानानी, का निक्शी मुर नु यहूदा रागी रे जाकत। मिनु गो मेको आन कली “प्रोक्शा, गाकशो नु ग्याइशशा, लाइक्का मपुंडसीशो रे लीशो यहूदीपुकी दोदेशो बाक्नीमी? यरूसलेम दोदेशो तांडसीबा?” दे हिल्लो पातामी।
- 3 मिनु मेकोपुकीमी आं कली “ग्याइक्का मपुंडसीशो मेक उइ लीशोपुकीम शुश श्येत जशा, खेदा पचा पुंडसीना सीन बाक्नीम। यरूसलेम डा गारो ब्रेकशो बाकब। मेकेर डा ठेयब लाप्चोपुकी मीम दुप्शो बाक्नीम” दैतेकम। २ इतिहास ३६:१९
- 4 मिनु गो मेको लोत्र नेंशा निशशा, सुर्ता पा, शुश नाकत सम्म डाक्ना डाक्न बाक्ती। मजथु स्वर्ग डा परमप्रभु कली एजा ९:३
- 5 “परमप्रभु यावे, स्वर्गम बाकब परमप्रभु, गे नेल्ल क्येडा ठेयब नु मान पा हिंचा माल्शो परमप्रभु बाक्नीनी। इन कली दाक्शा, इन अरेशो लोत्र टीब आन कली शिशो पाइब नु कबल खाप्ब बाक्नीनी। दानीएल ९:४
- 6 गो, इन वाइल, इस्राएली आन पबर्म नाकदो नाकत पुंडनुड। आं पुंडशो लोत्र नेंचा कली गे इन नोफा दाइक्तीन। मिनु आं गे कोत्रडीन। गो, इस्राएली नु आं आफ आ खिं डा मुर नेल्लेमी इन डोंइती मरिम्शो पाइतक। मिनु गो यो पाप पाता।
- 7 गे इन वाइल मोसा कली शेंतीक गेतीनी। गोपुकीमी चहिं मेको इन गेशो फुल्लुम मुशा ब्रेकशो लोत्र नु इन ठीक पतीक लोत्र मटिथु, इन डोंइती मरिम्शो पाइतक।
- 8 मिनु गे इन वाइल मोसा कली ‘गे आं देशो मटीतीनी हना, गो इन कली रागी रागी डा मुर आन दातेमी फ्राइनन्नी’ दैतीनी। ब्यवस्था ४:२७
- 9 तन्न ‘आं गे लेत्तीनी, आं शेंतीक लोत्र नेंशा टीतीनी हना, गो इन कली डोन डोन रागी मेर फ्राइतन्नी हना यो, खुप्नन्नी। इन कली खुप्शा, आं नें ठेयब सेल्चा कली आं योत्रशो रागीमी चाक्नन्नी’ दे इन डोंइती पशो लोत्र मिम्तीन। ब्यवस्था ३०:४-९
- 10 मिनु मेकोपुकी इन वाइली नु इन रागी डा मुर बाक्नीमी। डोंइती गे मेको आन कली इन ठेयब सक्ति नु इन बोल्यो गुडमी प्रोइशो बाक्तीनी।
- 11 परमप्रभु, इन नोफा दाइक्तीन। मिनु इन नें कली मान पचा दाकब इन वाइल आन पुंडशो लोत्र यो नेनीन। मुलाक्ती आं पुंडशो खपीन। पिप आ डोंइती गो शिशो तडल” दे पुंडता। मेना गो पिप कली तूचा गेब आन ठेयब मुर बाक्ती।

## 2

नेहेम्याह आ पुंडशो तशो

- 1 आरता-सास्त पिप दुम्यो २० बर्स जाकदीशो बाकत। मिनु काबु निसान महिनामी पिप आ अडगुर शांबु ठीक पा लाइशशा, पिप कली खेत्ताकड। गो सुर्ता पशो नड। पिपमी मेको क्येडा डोंइती आं कली सुर्ता पशो गेनायो मतशो बाकत।
- 2 मिनु पिपमी “मारदे इ कुल राव किक्पदी? गे रोइ पशो मबाक्नेवे, इ थुं दोकशो तांडसीब” दैत। मो दैमेनु, गो शुश हिंती।
- 3 मिनु “हजुर, गेना हना यो ब्रोंइशा बाक्कीन। आं किकी पिपी आन कली थिम्शो सहर, खतम दुम्यो बाकब। मिनु गारो डा ठेयब लाप्चो मीम दुप्शो बाक्नीम। मिनु गो दोपा सुर्ता मपाइनुडा डा?” दैती।
- 4 मिनु पिपमी “गे मार माल्नेवे?” दे हिल्लो पती। मिनु गो आं थुंमी स्वर्गम बाकब परमप्रभु कली लोत्र पाता।
- 5 मिनु गो पिप कली “गे दाक्नीनी नु इन शिशो ताता हना, आं किकी पिपी थिम्शो, यहूदा रागी डा सहर कली लेंशा सेल्थ सोइक्तीनी” दैती।
- 6 मेना पिपीम पिप नु निशशो बाकत। मिनु पिपमी “मो पचा कली गिश नाकत माल्नेवे? मिनु गेना लेशशा जाक्नेवे?” दे हिल्लो पती। मिनु गो आं माल्शो नाकत दैती। मिनु पिपम आं देशो बिशशा लचा गेती।
- 7 मिनु गोमी पिप कली “गे रिम्शो लाक्नीनी हना, युफ्रेटीस ठेयब खोला आ आइक्की हांबुमी सासन पाइब मुर आन कली, आं कली यहूदा रागी सम्म ग्रीशा लचा गेचा कली ब्रेक्स का ब्रेक्शा गेयीनी।
- 8 मिनु परमप्रभु यावे आ खिं आ नेक्शा डा बोल्यो खिं कली लाप्चो कली, सहर डा गारो डा ठेयब लाप्चो आन कली, नु आं बाक्तीक खिं कली शी माल्नुड। इन व्वाकी कोत्रब आसाफ कली आं माल्शो शी गेचा, दे यो ब्रेक्स का ब्रेक्शा गेयीनी” दे पुंडता। मिनु पिपमी आं पुंडशो नेल्ल गेती। मारदे हना आं परमप्रभु आ शिशो आं तारी बाकत। एजा ७:६

9 पिपमी आं कली वारच पाइक्या कली सिपाड आन ठेयब मुरपुकी नु शारा डोइकबपुकी यो गो नु काथा सोइक्ताकव। मिनु युफ्रेटीस, ठेयब खोला आ आइकची हांबु डा ठेयब मुर आन बाक्तीक जाकदीशशा, पिप आ ब्रेक्सपुकी गेतामी।

10 मिनु होरोनी सान्बल्लत नु आ गेय पाइब अम्मोनी तोबीयाह, निम्फा “इसाएली आन कली रिम्शो पाइब का जाकशो बाकब” देशो नेशा, थाम्पा चुरताकस।

नेहेम्याह यरूसलेम जाकशो

11 मिनु गो यरूसलेम जाकशा, नाक्त सां सम्म मेकेर बाक्ती।

12 मिनु नोले गो नाकदो बोक्शा, का निकशी मुर नु गारो कोव्रथ लती। तन्न आं परमप्रभुमी आं थुंमी यरूसलेम आ पबंम वोइशशो लोव्र सुड आन कली मशेंदुमी। मिनु गो आं डोइशशो शारा डा लाकशा, अरु शारा मलदु।

13 मेको नाकदो गो बेसी लाप्यो रे ठेयब बुस्स माइशशो ब्वाक्कु बुक्तीके नु मोवल लाप्यो गे लती। मिनु यरूसलेम डा ब्रेशशो गारो नु मीम दुप्यो ठेयब लाप्योपुकी कोव्रतामी।

14 मेकेर रे पा ब्वाक्कु बुक्तीक लाप्यो नु पिप दोम्ली गे लती। तन्न आं शारा कली गाक्तीक लां मबा। नेहेम्याह ३:१५

15 मिनु गो मेको नाकदो बेसी रे ग्येथ डोइशशा, गारो कोव्रतामी। मिनु लेशशा, लेशा बेसी लाप्यो रे सहर जाकती।

16 मिनु सहर डा ठेयब मुरपुकीम गो ते लडा नु मार पडा, मारेड मतुइक्तेम। मारदे हना गो मेना सम्म यहूदी, चढेब, मान ताइब, ठेयब मुर नु अरु आन कली मारेड मशेंदुमी।

नेहेम्याहमी मुर आन थुं बारपाइशशो

17 मिनु मेको नोले गो सहर डा मुर नेल्ल आन कली “गे गो आंइ खतम दुम्यो नेल्ल तुइक्तीनी। यरूसलेम यो खतम दुम्यो बाकब। मिनु गारो डा ठेयब लाप्योपुकी मीम दुप्यो बाक्तीम। लो, गो नेल्ल गारशा, यरूसलेम डा गारो सेल्शा, आंइ मुने साम्य” दे माइक्तामी।

18 मिनु आं परमप्रभु आ शिशी आं तारी बाक्तीके नु पिपमी आं कली देशो लोव्र यो मेको आन कली शेंताकडमी। मिनु मेकोपुकीमी “लो, गो एको गेय पय” दे ग्येरशा, आन थुं बारपाइक्तेकम।

19 मिनु होरोनी सान्बल्लत, आ गेय पाइब अम्मोनी तोबीयाह नु अराबी गेशेममी चहिं एको लोव्र नेशा, आंइ कली शुक्शी पा ठेयब लेशशा “गे मार पाइनीनी, हां? पिप आ सासन प्रॉइचा माल्नी?” दे हुइक्ताक्की।

20 मिनु गो मेको आन कली “स्वर्गम बाकब परमप्रभुमी आंइ कली गारो सेल्चा गेब। मिनु गो परमप्रभु आ वाइलपुकीमी गारो प्रोव्रनीकी। यरूसलेममी इन खिं मबाकब, एकेर मारेड यो पशो मबाक्तीनी। मिनु इन कली ते खाइक्ती?” दे मेको आन कली माइक्तामी।

### 3

यरूसलेम डा गारो प्रोव्रचा गोशो

1 नेल्ल क्येडा ठेयब चढेब एल्याशीब नु चढेबपुकीमी भेडा लाप्यो सेल्लेकम। मिनु ठेयब लाप्यो सेल्ले थुम्शा “परमप्रभु के बाकब” दे थारतेकम। मिनु मेकोपुकीमी मेआ माइशशो लाइशशो खिं नु हानानेल माइशशो लाइशशो खिं सम्म गारो प्रोव्रना प्रोव्रन “परमप्रभु के बाकब” दे वोइक्तेकम। नेहेम्याह १२:१; येरमीया ३१:३८

2 मिनु मेकेर रे बोइशशा, यरीको डा मुरपुकीमी प्रोव्रतेकम। मिनु मेकेर रे बोइशशा, इम्री आ तौ जाकुरमी प्रोव्रतु।

3 मिनु हास्सेनाह आ तौपुकीमी डांइ लाप्यो सेल्लेकम। मेकोपुकीमी ठेयब लाप्यो डा शी वोइशशा, ठेयब लाप्यो थारशा, लाप्यो नु चोक्तीके आग्लो वोइक्तेकम।

4 मिनु मेकेर रे बोइशशा, हककोस आ तौ उरीयाह आ तौ मेरेमोथमी गारो प्रोव्रतु। मिनु मेकेर रे बोइशशा, मेशेजाबेल आ तौ बेरेक्याह आ तौ मेशुल्लाममी सेल्लु। मेकेर रे बोइशशा, बाना आ तौ सादोकमी प्रोव्रतु।

5 मेकेर रे बोइशशा, तेकोहा आ मुरपुकीमी प्रोव्रतेकम। मेको आन ठेयब मुरपुकीम चहिं “गो गारो प्रोव्रतीक गेय पचा आंइ कली मशिरब” दे गारो मप्रोव्रडेम।

6 माइत गारो डा ठेयब लाप्यो पासेआह आ तौ यो-यादा नु बेसोदेयाह आ तौ मेशुल्लाममी सेल्लेकस। मेकोमी ठेयब लाप्यो डा शी वोइशशा, लाप्यो थारशा, पाइक्तीक नु चोक्तीके आग्लो वोइक्तेकम।

7 मेकेर रे बोइशशा, गिबोन डा मेलत्याह नु मेरोनोथ डा मुर यादोन, गिबोन नु मिस्पा डा मुरपुकीमी प्रोव्रतेकम। मेकोपुकी युफ्रेटीस ऑथ हांबु डा जिल्ला डा सासन पाइब आ हुकुममी बाक्तेकम।

8 मेकेर रे बोइशशा, हारहायाह आ तौ सुन चेम्ब उज्जीएलमी प्रोव्रतु। मेकेर रे बोइशशा, ब्रोव्रशो रिना पाइब खेक्तीक सेल्ल हनान्याहमी गारो प्रोव्रतु। मेकोपुकीमी ब्रेम्शो गारो सम्म गारो सेल्शा प्रोव्रतेकम।

9 मेकेर रे बोइशशा, हुर आ तौ रेफायाहमी प्रोव्रतु। मेको रेफायाह चहिं आधा यरूसलेम कली हुकुम पाइब बाकत।

10 मेकेर रे बोइशशा, हरुमाफ आ तौ येदायाहमी आ खिं आ डोंइती डा गारो प्रोव्रतु। मिनु मेकेर रे बोइशशा, हशाब्नैयाह आ तौ हत्तुशमी प्रोव्रतु।

11 मेकेर रे बोइशशा, हारीम आ तौ माल्कीयाह नु पहाथ-मोआब आ तौ हाशशुबमी प्रोव्रताकस। मेको निकशीमी गारो नु मी मुडक्तीक लाइशशो खिं यो सेल्लेकस।

12 मेकेर रे बोइशशा, हल्लोहेश आ तौ, यरूसलेम डा अर्को आधा हुकुम पाइब शाल्लुम नु आ तमीपुकीमी प्रोव्रतेकम।

13 मिनू मेकेर रे बोइश्शा, हानुन नु जानोह डा मुरपुकीमी बेंसी लापचो सेलतेकम। मेकोपुकीमी ठेयब लापचो सेल्शा, थारशा, लापचो चोक्तीक आग्लो वोइक्तेकम। मिनू मेकोपुकीमी मोव्रल लापचो माइश्शो ठेयब लापचो सम्म, हजार का कुबीत गारो प्रोव्रतेकम। कुबीत का आधा मिटर खोदेशो बाकब।

14 मिनू मेको मोव्रल लापचो रेकाब आ तौ माल्कीयाहमी सेलतु। मेको बेथ-हक्केरेम जिल्ला डा सासन पाइब बाकत। मेकोमी ठेयब लापचो सेल्शा, थारशा, लापचो चोक्तीक आग्लो वोइक्तु।

15 मिनू कोल-होजे आ तौ, मिस्या सहर डा ठेयब हुकुम पाइब शाल्लुममी ब्वाकुकु बुक्तीक लापचो प्रोव्रतु। मेकोमी साप्शा ठेयब लापचो सेल्शा, थारशा, लापचो पाइक्तीके नु चोक्तीके आग्लो वोइक्तु। मेकोमी पिप आ फल फुल रू आ नेक्था डा शेलाह माइश्शो दोम्ली डा गारो प्रोव्रशा, दाऊद आ सहर रे बुप्तीके सम्म डा गारो प्रोव्रतु। नेहेम्याह २:१४; २राजा २०:२०; यूहन्ना ९:१७

16 मेकेर रे पा बोइश्शा, अचुकु आ तौ, उडक्थ बेथ-सुर सहर डा हुकुम पाइब, नेहेम्याहमी प्रोव्रतु। मेकोमी दाऊद नु आ किकी पिपी आन कली थिम्तीके आ आइक्ची रे मुर आन सेल्शो दोम्ली नु सिपाइ आन खिं सम्म गारो प्रोव्रतु।

17 मेकेर रे बोइश्शा, लेवीपुकीमी प्रोव्रतेकम। बानी आ तौ रेहुम मेको आन कली कोव्रब बाकत। मिनू मेकेर रे बोइश्शा, कैलाह सहर डा उडक्थ जिल्लामी हुकुम पाइब, हशाब्याहमी प्रोव्रतु।

18 मेकेर रे बोइश्शा, आन लोकबपुकीमी प्रोव्रतेकम। मेको कैलाह डा लीशो भाग डा हुकुम पाइब, हेनादाद आ तौ बिन्नुड बाकत।

19 मेकेर रे बोइश्शा, मेको येशुआ आ तौ, मिस्या डा हुकुम पाइब, एजेरमी प्रोव्रतु। मिनू कुना डा लडाइ पाइब आन या वोइक्तीक खिं रे ग्येथ लतीके आ डोंइती सम्म यो प्रोव्रतु।

20 मेकेर रे बोइश्शा, जब्बे आ तौ बारुकमी प्रोव्रतु। मेकोमी कुना रे नेल्ल क्येडा ठेयब चढेब एल्याशीब आ खिं डा ओव्रतीक सम्म प्रोव्रतु। नेहेम्याह ३:१

21 मेकेर रे बोइश्शा, हककोस आ तौ उरीयाह, आ तौ मेरेमोथमी एल्याशीब आ खिं डा ओव्रतीक रे खिं ची सम्म प्रोव्रतु। एजा ८:३३

22 मेकेर रे बोइश्शा, आ नेक्था बाकशो चढेबपुकीमी प्रोव्रतेकम।

23 मेकेर रे बोइश्शा, बेन्यामीन नु हाश्शुबमी आस खिं खिं आस डोंइती डा गारो प्रोव्रताकस। मेकेर रे बोइश्शा, अनान्याह आ चच, मासेयाह आ तौ, अजारयाहमी आ खिं आ नेक्था डा गारो प्रोव्रतु।

24 मेकेर रे बोइश्शा, हेनादाद आ तौ बिन्नुडमी अजारयाह आ खिं रे कुना सम्म प्रोव्रतु।

25 मेकेर रे बोइश्शा, उजाइ आ तौ पालालमी कुना नु पिप आ खिं आ नेक्था डा लाइश्शो खिं आइक्ची एरे सम्म डा गारो प्रोव्रतु। येरमीया ३२:२

26 मेकेर रे बोइश्शा, पारोश आ तौ पेदायाह नु ओफेलम बाकशो परमप्रभु यावे आ खिं डा गेय पाइबपुकीमी नां दाप्तीक गे, ब्वाकुकु लापचो आइक्ची नु गारो डा लाइश्शो खिं सम्म प्रोव्रतेकम।

27 मेकेर रे बोइश्शा, तेकोहा आ मुरपुकीमी ठेयब लाइश्शो खिं आ डोंइती रे ओफेल डा गारो सम्म प्रोव्रतेकम।

28 शारा लापचो आ ग्येथ गे चढेबपुकीमी आन खिं डोंइडोंइती डा गारो प्रोव्रतेकम। २राजा ११:३६

29 मेकेर रे बोइश्शा, इम्मरे आ तौ सादोकमी आ खिं डोंइती डा गारो प्रोव्रतु। मेकेर रे बोइश्शा, शेकन्याह आ तौ शेमायाहमी गारो प्रोव्रतु। शेकन्याह चहिं नां दाप्तीक लापचो डा खाल पाइब बाकत।

30 मेकेर रे बोइश्शा, शेलेम्याह आ तौ हनान्याह नु सालाफ आ जन्तरे तौ हानुनमी गारो प्रोव्रताकस। मेकेर रे बोइश्शा, बेरेक्याह आ तौ मेशुल्लाममी आ खिं आ डोंइती डा गारो प्रोव्रतु।

31 मेकेर रे बोइश्शा, सुन चेम्ब माल्कीयाहमी कुना डा खिं डा इर डा कोठा सम्म ग्याप्ब लेयब आन खिं रे गारो प्रोव्रशा, खाल पाइब लापचो आ डोंइती, कौसी पाइश्शो कुना डा तला तारी डा कोठा सम्म गारो प्रोव्रतु।

32 मेको गारो आ कुनाम बाकशो तला तारी डा कोठा नु भेडा लापचो आ दातेमी सुन चेम्ब नु ग्याप्ब लेयबपुकीम गारो प्रोव्रतेकम।

## 4

जोरी सत्रुमी गेय तेक्चा माल्लो

1 “गो गारो प्रोव्रना प्रोव्रन बाक्नीकी” देशो लोव्र सान्बल्लतमी नेंशा, उरशा, शुश गाइश्शा, यहूदी आन पर्वम शुक्शी पाप्तु। नेहेम्याह २:१०,१९

2 मिनू मेकोमी यहूदी आन पर्वम शुक्शी पा, आ लोकबपुकी नु सामरीया डा लडाइ पाइब आन डोंइती “एको मारेइ सोक्त मपाइश्शो यहूदीपुकीमी मार पना पन बाक्नीमी? मार, मेकोपुकीमी आन गारो लेंशा प्रोव्रने चाप्नीमी? मार, मेकोपुकीमी चढेनीमी? मार, मेकोपुकीम काबुमी थुन्नीमी? मेको मीम दुप्यो फुल्लुम गारो प्रोव्रने चाप्नीमी डा?” दे लोव्र पाप्तु।

3 मिनू अम्मोनी डा तोबीयाह सान्बल्लत आ नेक्था बाक्शा “मेकोपुकीमी मेको प्रोव्रतेकम हना यो, सिवार का मेको तारी डोंइसाक्व हना, नेल्ल ब्रेप्ब” देंत।

4 मिनू गो चहिं “आइ परमप्रभु, इन नोफा दाइश्शा, नेनीन। गो शुश शुक्शी पाइक्चा पुंडसाक्व। मेको आन पशो शुक्शी लेश्या, मेको आन तार कोप्तीन। मेको आन कली ग्याइश्शा, अरु आन रागी लाइक्पतीन।

5 मेको आन मरिम्शो पतीके नेल्ल क्याम्शा मगेने। मारदे हना मेकोपुकीमी गारो प्रोव्रब आन कली शुक्शी पा, आन थुं तोक्शा गेम्तेकम” दे परमप्रभु कली पुंडता।

6 मिनू गोपुकीमी आधा लाइशो सम्म गारो प्रोव्रशा, एर ओथ नेल्ल हिरने थुम्शो। मारदे हना प्रोव्रब मुरपुकीमी आन थुं नुशा, ग्येरशा, गारो प्रोव्रतेकम।

जोरी सत्रु आन कली तेक्शो

7 मिनू सान्बल्लत, तोबीयाह, अराबीपुकी, अम्मोनीपुकी नु अशदोदीपुकीमी “यरूसलेम डा गारो रिम्शो पा सेल्ना सेल्न बाक्नीम। आ पोव्रला यो सुना सुन बाक्नीम” दे तुइशशा, शुश गाइक्ताकम।

8 मिनू मेकोपुकी गारशा, यरूसलेम कली लडाइ पा, खतम सेल्चा, दे खुम्साकम।

9 गोपुकी चहिं आंइ परमप्रभु कली पुंइना पुंइन बाक्तक। मिनू गोपुकीमी “मारैड पाइनीमी, कों” दे मेको आन कली कोव्रशा, नाकदो नाक्त खाल पाइबपुकी वोइक्ताक।

10 मिनू यहूदा डा मुरपुकीमी “फुल्लु कुरब आन बोल जाम्ना जाम्न लत। मारदे हना शोर गाक्शो शी, फुल्लु नु खप शुश दुम्तीके, गोपुकी गारो प्रोव्रने मचाप्नीकी” दे गन गन पाम्तेकम।

11 मिनू आंइ जोरी सत्रुपुकीमी “मेको आन मतुइक्थु, मतथु, मेको आन दातेमी जाक्दीशशा, मेको आन कली साइशशा, आन गेय थुम्पाइय्य” देंमुमा बाक्त।

12 तन्न मेको आन नेक्था बाक्ब गाउं गाउं डा यहूदीपुकी आंइ बाक्तीक जाक्शा “आंइ जोरी सत्रु गोपुकी नु लडाइ पचा कली बुक्शा बाक्नीम” दे शुश खेयप देंतेकम।

13 मोपतीके गो गारो आ नेल्ल क्येडा आइक्च दुम्तीके, आंइ जोरी सत्रु आन शुश श्येत मजथु, ओव्रने चाप्तीकेम, मुर आन कली खुप्ताकडमी। मेको आन कली तरवार, तूतीक नु लिब्रा कुरपाइशशा मेकेर वोइक्तामी।

14 मिनू गो मेको आन कली हिंशो तशा “महिनीन। नेल्ल क्येडा ठेयब नु मान पा हिंचा माल्लो परमप्रभु कली मिम्तीन। मिनू आंम लोक्ब, तमी तौ, मीश नु आंम खिं आ पर्वम लडाइ पने” दे ठेयब मुरपुकी, सासन पाइबपुकी नु मुर नेल्ल आन कली माइक्तामी। नेहेम्याह १:५

15 आन मिम्शो गोपुकीमी तुइक्ताक नु परमप्रभुमी आन मिम्शो नेल्ल क्याम्शा गोवा बाक्त, दे आंइ जोरी सत्रुपुकीमी तुइक्तामे बाक्त। मोपतीके गो नेल्ल आंम आंम गेय पा गारो प्रोव्रथ लेत्तक।

16 मेको नाक्त डा मेरे गो आंइ उइक्थ मुरपुकीमी गारो प्रोव्रशा बाक्शो। मिनू लीशो उइक्थ मुरपुकीमी तूतीक, तेक्तीक नु लिब्रा कुरशा, फलाम के फेक्तीक फेक्शा बाक्तेकम। मिनू ठेयब मुरपुकीमी गारो प्रोव्रब यहूदा डा मुर नु गारशा, आन थुं बारपाइक्तेकम।

17 कुरब मुरपुकीमी आन गुड कामी कुरतीक नु अर्को गुडमी या कुरतेकम।

18 गारो प्रोव्रब मुरपुकीमी आन किप्शुरमी चुक्ब पिप्शा प्रोव्रतेकम। तुराही ताप्ब आं नेक्था बाक्शो बाक्त।

19 मिनू गोमी ठेयब मुर, हुकुम पाइब नु मुर नेल्ल आन कली “गेय थम ठेयब नु शुश ब्रशा बाक्शो बाक्ब। गोपुकी गारो आ नेक्था, तन्न डोन डोन बाक्नीकी।

20 तेकेर रे तुराही ग्रीशो नेंनीनी, मेकेर रीब पा बुक्कीन। आंइ परमप्रभुमी आंइ पर्वम लडाइ पाइब” दे माइक्तामी। प्रस्थान १४:१४

21 मोपा गो उइक्थ मुरपुकीमी गेय पस डा पस बाक्तक। मिनू उइक्थ मुरपुकी सुनी रे नाकदो सम्म या शेशा बाक्तेकम।

22 मेना गो मुर आन कली “नाकदो खाल पाइब, नाक्त गेय पाइब नु मेको आन कली वारच पाइब नेल्ल यरूसलेममीन नां सोइचा माल्नीम” दे यो माइक्तामी।

23 मोदेशो पा गो, आं लोक्बपुकी, आं गेय पाइबपुकी नु आं नेक्था बाक्ब खाल पाइबपुकी वा मपुइक्थु, आंइ या शेशान इप्तक।

## 5

पुडग आन कली वारच पशो

1 मिनू नोले मार दुम्त देशा हना, मुरपुकी नु आन मीशपुकीमी आंम आन यहूदी लोक्ब आन पर्वम लोव्र का ब्रपाइक्तेकम।

2 का निक्शीमी “गो, आंइ तमी तौ शुश बाक्नीमी। गो शुश बाक्तीके ब्रोंइचा कली अन्न माल्नीकी” देंतेकम।

3 मिनू का निक्शीमी “अन्कालमी अन्न ग्याप्चा कली आंइ रूपुकी, आंइ अडगुर रूपुकी नु आंइ खिंपुकी जाकट वोइक्चा माल्ताकक” देंतेकम।

4 मिनू का निक्शीमी “पिप कली तिरो थाप्चा कली आंइ रू नु अडगुर रूपुकी गेशा, जेर ताक्तक।

5 गो यो आंइ लोक्ब खोदेशो बाक्नीकी। आंइ तमी तौ मेको आन तमी तौ खोदेशो बाक्नीम। मिनू गो आंइ तमी तौ आन कली वाइलीम वाइल दुम्चा कली लेयचा माल्नीकी। आंइ तमी का निक्शी डोंइतीन लेयचा पुंइसाकम। गोपुकीमी मेको आन कली प्रोंइने मचाप्नीकी। मारदे हना आंइ रू नु अडगुर रू नेल्ल मुर आन के दुम्ने थुम्तु” देंतेकम। लेवी २५:३९; २राजा ४:१; यसैया ५०:१; मत्ती १८:२५

6 मोपा मेको आन लोव्र नेशा, आन डाक्शो तशा, शुश गाइक्ताकयी।

7 तन्न गो आं थुमी लोव्र पाता। मिनू गो मान ताइब नु ठेयब मुर आन कली हुइशशा “क्येट आ चाइक्ब ताक्चा, दे आंम लोक्ब आन कली जेर गेनीनी” दे माइक्ताकमी। मिनू मेको आन पर्वम मुर नेल्ल खुप्ताकडमी। प्रस्थान २२:२४

8 मिनू गो मेको आन कली “गोपुकीमी अर्को रागीम लेयशो वाइलीम वाइल दुम्शो आंइ लोक्ब यहूदी आन कली आंइ चाप्शो थाप्शा, मुर आन गुड रे प्रोंइतक। गेपुकी चहिं आंम इन लोक्ब रागी रागी डा मुर आन कली लेयनीनी?

मिनु मेकोपुकीम गो आंमान लेंशा ग्याप्या माल्नीकी?" दे शुश हुडक्ताक्ड। मिनु मेकोपुकी सिक्सी पा मारेड मदेंम। लेवी २५:४७-४९

9 मिनु लेंशा "इन पशो मरिम्शो बाक्ब। आंड जोरी सत्रुपुकीमी आंड कली शुक्शी मपपाडक्थु, आंड परमप्रभु कली मान पा हिंशा, गेय पचा ममाल्नीनी डा?"

10 गो आंमान, आं लोकबपुकी नु आं गेय पाडबपुकीमी यो मेको आन कली क्येट नु अन्न जेर गेतक। मुल गो चाडक्ब पुंडचा प्रोडय। ब्यवस्था १५:१-११

11 गे मुलाक्तीन मेको आन रू, अडगुर रू, आन तेल रवा रू नु आन खिं लेशशा गेने। मिनु क्येट, अन्न, नक अडगुर रस नु तेल, मार मार जेर पुन्मे, मेको नेल्ल मो गेने" दे माडक्तामी।

12 मिनु मेकोपुकीमी "गो नेल्ल लेशशा गेनीकी। मेकोपुकी रे मारेड मताक्नीकी। इन देशो खोदेशो पा नेल्ल पाडनीकी" देंतेक्म। मिनु गो चढेब आन कली ब्रेशा "आंड देशो खोदेशो पा पाडनीकी" दे कसम जपाडक्तामी।

13 मिनु नोले गो आं फेक्शो वा रे थुर थुर पा फुरक हेम्शा "आन देशो मखाप्व कली परमप्रभुमी आन खिं नु आन थेरशो रू रे ओं पान थुर थुर पा हेमल। मोपा थुर थुर पा श्येतथ दुम्मल" देंती। मिनु मेकेर बुक्शा बाक्ब नेल्लेमी "आमेन" देंतेक्म। मिनु मेकोपुकीमी परमप्रभु यावे कली ठेयब सेल्शा, आन देशो खोदेशो पाम्तेक्म। आमेन देबमी "गो यो मोदेशो मिम्नुड" देंब।

नेहेम्याहमी रिम्शो पशो

14 मिनु आरता-सास्त पिप दुम्शो २० बर्स दुम्मेनु, गो यहूदा रागीमी हुकुम पचा कली योत्रचा पुंडसाक्वी। मेना रे मुल १२ बर्स दुम्त। मेको आरता-सास्त पिप दुम्शो ३२ बर्स दुम्त। मेको १२ बर्स सम्म गो नु आं लोकबपुकीमी हुकुम पाडब आन ततीक जचा थोत्रक मजक।

15 आं क्येडा डोंइती डा आं खोदेशो पा हुकुम पाडबपुकीमी मुर आन कली ठेयब श्येत गेशो बाक्तेक्म। मेकोपुकीमी नाक्त कित कित डा जचा थोत्रक, शोब्ले, अडगुर शांबु नु ४० चांटी के शेकेल यो लाडशो बाक्तेक्म। मिनु मेको आन गेय पाडबपुकीमी यो मुर आन कली साप्पा दिप्शो बाक्तेक्म। तन्न गो परमप्रभु कली मान पा हिंशा मोदेशो मपड। चांटी के शेकेल का ११.५ ग्राम डा क्येट बाक्ब।

16 मिनु गो आंमा गारो प्रोत्रतीक गेय यो पाता। गोपुकीमी रू का यो मग्याप्व। आं गेय पाडब नेल्ल गारो प्रोत्रथ जाक्तेक्म।

17 मिनु गो नु सहे का ५० जना यहूदी आन ठेयब मुरपुकी काथा बाक्शा जाम्तेक्म। मिनु एर ओथ रागी रे आंड कली ग्रुथ जाक्बपुकी यो गो नु बाक्शा जाम्तेक्म।

18 नाक्त का कली मार जचा थोत्रक ठीक सेल्शो बाक्त, देशा हना, ब्यफ का, ६ ओटा रिम्शो दोम्शो भेडा नु ब्वापुकी ठीक सेल्शो बाक्तेक्म। मिनु १०, १० नाक्त कली मारेड मारेड अडगुर शांबु यो चाक्शो बाक्त। मोदेशो शुश माल्ती हना यो, गो गेनायो हुकुम पाडब आ तचा माल्शो जचा थोत्रक ममलु। मारदे हना मुरपुकी शुश श्येत जशो बाक्तेक्म।

19 गो परमप्रभु यावे कली "आं परमप्रभु, गो एको मुर आन कली मार मार रिम्शो पडा, मेको मप्रदेन" देंती। नेहेम्याह १३:१४, २२, ३१

## 6

जोरी सत्रुमी हिंच कोंडशो

1 मिनु नोले सान्बल्लत, तोबीयाह, अराबी गेशेम नु आंड जोरी सत्रुपुकीमी "गोपुकीमी गारो प्रोत्रशा, पोत्रला नेल्ल यो सुने थुम्तक" देशो नेंतेक्म। गो ठेयब लाप्यो थारने मथुम्शो बाक्ती।

2 मेना सान्बल्लत नु गेशेममी आं कली "ओनो दिंम डा गाउं काम युम्य" दे लोत्र सोडक्ताक्वीमी। तन्न मेकोपुकीमी आं कली मरिम्शो पचा माल्शो बाक्तेक्म।

3 मिनु गो मेको आन कली "मुल आं के ठेयब गेय का बाक्ब। मोपतीके यिने मचान्नुड। मेक यिशा, आं गेय क्योल्चा मदाक्नुड" दे लोत्र सोडक्ताक्ड।

4 मिनु मेकोपुकीमी आं कली ४ खेयप सम्म "यिने" दे लोत्र सोडक्ताक्वीमी। मिनु गो यो डोंइती डा खोदेशो पा लोत्र लेशशा सोडक्ताक्डमी।

5 मिनु सान्बल्लतमी लेंशा, ५ खेयपमी आं गेय पाडब मुर, नेल्ल आन कली पढेचा डा पा, ब्रेक्स का सोडक्ताक्व।

6 मिनु मेको ब्रेक्समी "अर्को जात डा मुरपुकीमी 'गे नु यहूदीपुकी गारशा सरकार कली तुल्चशो बाक्नीनी' देंतेक्म। गेशेममी यो मोन देंत। मोपतीके गे गारो सेल्ना सेल्न बाक्नीनी। गे चहिं मेको आन पिप दुम्शा माल्शो बाक्नेवे, देशो यो नेंसाक्व। नेहेम्याह २:१९; एजा ४:१२

7 मिनु 'यहूदामी पिप का बाक्ब' देपाडक्चा कली परमप्रभु यावे आ लोत्र पाडब आन कली यो योत्रशा, यरूसलेमम लोत्र पथ, वोंडशो बाक्ते। मिनु पिपमी एको लोत्र थमा पा नेंब। मोपतीके एको आ परबम लोत्रसी पचा कली रीब पा यिने" दे ब्रेक्शो बाक्त।

8 मिनु गो "इ देशो लोत्र नेल्ल जोल बाक्ब। आंम इ मिम्शो बाक्ब" दे लोत्र लेशशा, सोडक्ताक्ड।

9 मिनु मेको नेल्लेमी आंड कली हिंच कोंडचा माल्तेक्म। मेकोपुकीमी "एको गारो प्रोत्रचा प्रोंडनीम। मथुम्नीम" दे मिम्मे बाक्त। मिनु गो "परमप्रभु, आं थुं बारपतीन" दे पुंडता।

शेमायाहम रिम्शो लोत्र पखु पशो

10 मिनू काबु गो देलायाह आ तौ, मेहेताबेल आ चच शेमायाह आ खिमी लती। मेको आ खिमी चोक्सीशा बाक्शो बाक्त। मेकोमी आं कली “गो निक्शी परमप्रभु यावे आ खिं नेल्ल क्येडा आगा ओव्रशा, लाप्चोपुकी चोक्शा, बाक्स। मारदे हना मेकोपुकी इन कली साइक्थ पिना पिन बाक्नीम। नाकदो इन कली साइक्थ जाक्नीम” दे माइक्ती।

11 तन्न गो मेको कली “मार, आं खोदेशो मुर प्रोक्बा डा? गो परमप्रभु यावे आ खिं ओव्रशा, ब्रोंडनुडा डा? गो मलाडनुड” दे माइक्ता।

12 मिनू गो “परमप्रभु आ सोइश्शो ममाइ, आं कली मरिश्शो पचा, दे सान्बल्लत नु तोबीयाहमी मेको कली नोले दुम्ब लोव्र पपाइक्खु पशो बाक्ताक्स।

13 आं कली हिंच कोंडचा नु पाप पपाइक्का माल्ताक्से। मोपा मेकोमी आं पर्बम मरिश्शो लोव्र ब्रपाइक्का कली क्येट ताक्शो बाक्त” दे तुइक्ताकड।

14 मिनू गो “आं परमप्रभु, तोबीयाह नु सान्बल्लत आस पशो मिम्तीन। आं कली हिंच कोंडचा दाक्ब नोले दुम्ब लोव्र पाइब नोआदीयाह माइश्शो मीश मुर नु अरु नोले दुम्ब लोव्र पाइब, नेल्ल आन पतीके यो मिम्तीन” दे परमप्रभु कली पुंढता। नेहेम्याह ३:३३-३७

यरूसलेम डा गारो सेल्ले थुश्शो

15 एलुल महिना डा २५ नाक्त गोपुकीमी गारो सेल्ले थुम्तक। सेल्ले थुम्चा कली ५२ नाक्त माल्ताक्क।

16 मिनू आंइ जोरी सत्रपुकीमी एको लोव्र नेतेक्म, देशो नेंशा, आंइ एर ओंथ बाक्शो अर्को जात डा मुर नेल्ल शुश हितेक्म। मिनू मेकोपुकीमी “इ परमप्रभुम पशो बाक्त” दे तुइक्ताक्म।

17 मेना यहूदा डा ठेयब मुरपुकीमी तोबीयाह कली शुश ब्रेक्स ब्रेक्शा, सोइक्ना सोइक्न बाक्तेक्म। मिनू तोबीयाहमी यो मेको आन कली ब्रेक्स सोइक्ना सोइक्न बाक्त।

18 मिनू यहूदा डा शुश मुर्मी तोबीयाह आ लोव्र बिश्शा “इन मुर दुम्नीकी” दे कसम जशो बाक्तेक्म। मारदे हना तोबीयाह आ चांइवा आराह आ तौ शेकन्याह बाक्त। मिनू आ तौ येहो-हानानमी बरेक्याह आ तौ मेशुल्लाम आ तमी चाक्शो बाक्त।

19 मेको मुरपुकीमी आं डोंइती तोबीयाहमी मार मार रिश्शो गेय पाप्तु, दे आं कली लोव्र पाम्तेक्म। मिनू आं देशो लोव्र यो तोबीयाह कली शोव्रतेक्म। मिनू तोबीयाहमी आं कली हिंच कोंडचा चिठीपुकी सोइक्ताक्की।

## 7

नेहेम्याहम हुकुम पाइब सेल्लो

1 मिनू गारो प्रोवने थुम्शा, लाप्चोपुकी थारशा गारपाइश्शा वोइक्ताक्की। लाप्चो खाल पाइबपुकी, कुम्सो पाइबपुकी नु लेवी नेल्ल योव्रशा वोइक्तामी।

2 मिनू गो आं लोक्ब हानानी नु लडाइ पाइब आन नेल्ल क्येडा ठेयब मुर हनान्याह आस कली यरूसलेममी हुकुम पाइब सेल्लासी। मारदे हना शुश मुर आन क्येडा हनान्याह दीगो नु रिश्शो पाइब परमप्रभु कली मान पा हिंब बाक्त।

3 मिनू गो मेको आस कली “यरूसलेम डा ठेयब लाप्चोपुकी नां चोक्ता नोले ला रोक्पतीन। मिनू नोले खाल पाइबपुकी ठेयब लाप्चोम गेय पची ना लाप्चोपुकी चोक्शा, आग्लो शुइक्का माल्नीम। यरूसलेम डा मुरपुकी का का पा खाल पाइब सेल्ला माल्नीम। का निक्शी गारो कोव्रब सेल्ला, का निक्शी आंम आन खिं आ डोंइती खाल पचा माल्नीम” दे माइक्तामी।

4 साहर ठेयब बाक्ब। मिनू मुर शुश मबाक्तीक, ब्रशा बाक्शो बाक्तेक्म। मिनू सुइमी आन खिं लेंशा सेल्लो मबाक्म।

यरूसलेम लेश्शा जाक्ब आन नें

एञ्जा २:१-६

5 मिनू आं परमप्रभुमी आं कली “ठेयब मुर, सरकार डा अधिकार ताइब नु अरु मुर नेल्ल आन कली बुक्पाइश्शा, मेको नु आन खिं डा मुर आन नें ब्रेक्का माल्नुड” दे मिम्पाइक्ती। मिनू गो ग्याइश्शा लाइक्का पुंइसीशो रे, यरूसलेम लेश्शा जाक्ब आन नें ब्रेक्शो किताब थित्ता। मिनू मेको किताबम सु सु आन नें ब्रेक्शो बाक्तेक्म देशा हना,

6 डोंइती बेबीलोन डा पिप नेबुकदनेसरमी यरूसलेम नु यहूदा डा मुर आन कली ग्याइश्शा लाइश्शो बाक्त। मिनू सु सु नोले यरूसलेम नु यहूदा डा आंम आन साहर लेत्था तशो बाक्तेक्म देशा हना,

7 जेरूब-बाबेल, येशुआ, नेहेम्याह, अजारयाह, राम्याह, नाहामानी, मोरदैकै, बिल्शान, मिस्पेरथ बिग्वाइ, नेहुम नु बानाह लेत्था तशो बाक्तेक्म।

8 लेत्था ताइब इसाएली सु सु बाक्तेक्म देशा हना, पारोश नु आ खिं डा मुर २,१७२

9 शेफत्याह नु आ खिं डा मुर ३७२

10 आराह नु आ खिं डा मुर ६५२

11 पहाथ-मोआब नु आ खिं डा मुर नु येशुआ नु योआब आस खिं डा मुर नेल्ल २,८१८

12 एलाम नु आ खिं डा मुर १,२५४

13 जत्तु नु आ खिं डा मुर ८४५

14 जक्काइ नु आ खिं डा मुर ७६०

15 बिन्नुड नु आ खिं डा मुर ६४८

16 बेबाइ नु आ खिं डा मुर ६२८

- 17 अज्गाद नु आ खिं डा मुर २,३२२
- 18 अदोनीकाम नु आ खिं डा मुर ६६७
- 19 बिग्वाड नु आ खिं डा मुर २,०६७
- 20 आदीन नु आ खिं डा मुर ६५५
- 21 आतेर नु हिज्कीयाह नु आस खिं डा मुर ९८
- 22 हाशुम नु आ खिं डा मुर ३२८
- 23 बेजाड नु आ खिं डा मुर ३२४
- 24 हारीफ नु आ खिं डा मुर ११२
- 25 गिबोन नु आ खिं डा मुर ९५
- 26 बेथलेहेम नु नेतोफाह सहर डा मुर १८८
- 27 अनाथोथ सहर डा मुर १२८
- 28 बेथ-अज्मावेथ सहर डा मुर ४२
- 29 किरयथ-यारीम, केफीरा नु बेयरोथ सहर डा मुर ७४३
- 30 रामाह नु गेबा सहर डा मुर ६२१
- 31 मिकमास सहर डा मुर १२२
- 32 बेथेल नु ऐ सहर डा मुर १२३
- 33 अर्को नेबो सहर डा मुर ५२
- 34 अर्को एलाम आ तौ १,२५४
- 35 हारीम आ तौ ३२०
- 36 यरीको सहर डा वोंडश मुर ३४५
- 37 लोद, हादीद नु ओनो सहर डा वोंडश मुर ७२१
- 38 सेनाह सहर डा वोंडश मुर ३,९३० जना लेत्या ताइब बाक्तेकम।

#### चढ़ेबपुकी

- 39 येशुआ आ खिं डा येदायाह आ चच युड ९७३
- 40 इम्मर आ चच युड १,०५२
- 41 परहुर आ चच युड १,२४७
- 42 हारीम आ चच युड १,०१७ जना बाक्तेकम।

#### लेवीपुकी

- 43 होदेवाह आ खिं डा येशुआ नु कदमीएल आस चच युड ७४ जना लेत्या तशो बाक्तेकम।

#### कुम्सो पाइबपुकी

- 44 आसाफ आ चच युड १४८ जना लेत्या तशो बाक्तेकम।

#### लाप्चो खाल पाइबपुकी

- 45 शाल्लुम, आतेर, ताल्मोन, अक्कुब, हतीता नु शोबाड आन चच युड १३८ जना लेत्या तशो बाक्तेकम।

#### परमप्रभु आ खिम गेय पाइबपुकी

- 46 सीहा आ तौपुकी, हासुफा आ तौपुकी, तब्बाओथ आ तौपुकी,
- 47 केरोस आ तौपुकी, सीआ आ तौपुकी, पादोन आ तौपुकी,
- 48 लेबाना आ तौपुकी, हगाबा आ तौपुकी, शाल्माड आ तौपुकी
- 49 हानान आ तौपुकी, गिददेल आ तौपुकी, गहार आ तौपुकी,
- 50 रेआयाह आ तौपुकी, रेसीन आ तौपुकी, नेकोदा आ तौपुकी,
- 51 गज्जाम आ तौपुकी, उज्जा आ तौपुकी, पासेआह आ तौपुकी,
- 52 बेसाड आ तौपुकी, मेडनीम आ तौपुकी, नेफुशेसीम आ तौपुकी,
- 53 बाकबुक आ तौपुकी, हकुफा आ तौपुकी, हारहुर आ तौपुकी,
- 54 बास्लुथ आ तौपुकी, मेहीदा आ तौपुकी, हारशा आ तौपुकी,
- 55 बारकोस आ तौपुकी, सीसेरा आ तौपुकी, तेमाह आ तौपुकी,
- 56 नु नेसीयाह नु हतीफा आस तौपुकी परमप्रभु यावे आ खिं डा गेय पाइब लेत्या तशो बाक्तेकम।

#### सोलोमन आ गेय पाइबपुकी

- 57 सोताड आ तौपुकी, सोफेरेथ आ तौपुकी, परीदा आ तौपुकी,
- 58 याला आ तौपुकी, दारकोन आ तौपुकी, गिददेल आ तौपुकी,
- 59 शेफत्याह आ तौपुकी, हत्तील आ तौपुकी, पोकेरेथ-हस्सेबाइम आ तौपुकी नु आमोन आ तौपुकी,



60 परमप्रभु यावे आ खिं डा गेय पाइब नु सोलोमन आ खिं डा गेय पाइब आन तौ नेल्ल पा ३१२ जना लेत्चा तशो बाक्तेकम।

का निक्शी अर्को सहर डा मुर

61 तेल-मेल्लाह, तेल-हारशा, करूब, अददोन नु इम्मेर सहर रे कुडब मुर आन किकी पिपी इस्राएली बाक्नीम, दे ब्रेक्तीकेमी कॉडने मचबेम।

62 देलायाह, लोबीयाह नु नेकोदा आन तौ नेल्ल पा ६४२ जना बाक्तेकम।

63 चढेब आन दाते रे होबायाह, हककोस आस चच युड नु बारजील्लाड बाक्नीम। बारजील्लाडमी चहिं गिलादी बारजील्लाड आ तमी का ग्युबे पा आ शिउ आ नें बारजील्लाड माडक्चा पुंडसीशो बाक्त।

64 मेको आन नें ब्रेक्शो मथिलतीके, चढेतीक गेय पचा मशिरनीम, दे तिल्चा पुंडसीशो बाक्तेकम।

65 हुकुम पाइबमी ऊरीम नु थुमीम रे गेय पाइब चढेब मग्रूम सम्म मेको आन कली चढेशो थोवकी जचा मगमे बाक्त। प्रस्थान २८:३०; गन्ती १८:९; १सामुएल १४:४१

66 यरूसलेम लेशा जाक्ब नेल्ल ४२,३६० जना बाक्तेकम।

67 मेको आन वाइलीम वाइल ७,३३७ जना बाक्तेकम। मिनु कुम्सो पाइबपुकी २४५ जना मुर बाक्तेकम।

68 मिनु ७३६ ओटा शारा, २४५ ओटा खचचर,

69 दलओठ ४३५ नु ६,७२० ओटा गधा बाक्तेकम।

परमप्रभु कली ग्येरशा गेशो

एजा २:६८-६९

70 मिनु का निक्शी खिं डा ठेयब मुरपुकीमी गारो प्रोव्रचा कली मार मार गेम्तेकम। हुकुम पाइबमी सुन के आदारकोन माइशशो क्येट हजार का टुक्रा, ५० ओटा बोस नु ५ सहे ३० ओटा चढेब आन कली फेक्तीके वा गेप्टु। आदारकोन का ८.४ ग्राम सुन के क्येट बाक्ब।

71 मिनु का निक्शी खिं डा ठेयब मुरपुकीमी गेय कली सुन के आदारकोन २० हजार टुक्रा नु चांदी के मीना माइशशो क्येट हजार निक्शी सहे निक्शी टुक्रा गेम्तेकम। मीना का ६०० ग्राम खोदेंशो बाक्ब।

72 लीशो मुरपुकीमी सुन के आदारकोन २० हजार टुक्रा नु चांदी के मीना हजार निक्शी टुक्रा नु ६७ ओटा चढेब आन कली फेक्तीके वा गेम्तेकम।

73 मिनु चढेबपुकी, लेवीपुकी, लाप्यो खाल पाइबपुकी, कुम्सो पाइबपुकी, परमप्रभु यावे आ खिंमी गेय पाइबपुकी नु अरु नेल्ल इस्राएली आन आम आम सहरमी लशा बाक्शो बाक्तेकम।

## 8

एजामी परमप्रभु आ लोव्र पढेशो

1 मिनु ७ महिना थेक्चावानु, इस्राएली आम आन आन सहरमी बाक्मानु, मुर नेल्ल थुं का दुम्शा, ब्वाक्कु लाप्यो आ नेक्था डा ठेयब बाक्तीकेम बुक्तेकम। मिनु मेकोपुकीमी परमप्रभु यावे आ लोव्र जोक्ब तुडक्ब चढेब एजा कली “परमप्रभु यावेमी मोसा कली गेशो इस्राएली आन कली अरेशो लोव्र डा किताब चाक्को” देतेकम। एजा ७:६

2 मिनु ७ महिना डा डोंइती डा नाक्तीमी चढेब एजामी मेको किताब मुर आन डोंइती चाक्तु। मेकेर वोंइश मुर, मीश मुरपुकी नु सु सु रुप्ने चापब बाक्मा, मेको नेल्ल बुक्शो बाक्तेकम। ब्यवस्था ३१:१०-१३

3 मोपा एजामी ब्वाक्कु लाप्यो आ नेक्था डा बाक्तीकेमी सुनी रे नाक्त सम्म वोंइश मुर, मीश मुर नु लोव्र रुप्ने चापब नेल्ल आन डोंइती मेको किताब पढेप्टु। मिनु परमप्रभु यावे आ अरेशो लोव्र डा किताब पढेवानु, नेल्लेमी नोफा दाइशशा नेतेकम।

4 मिनु परमप्रभु यावे आ लोव्र जोक्ब तुडक्ब एजा मुर नेल्ल आन कली रिम्शो नेंपाडक्चा कली शी के सेल्शो लाइशशो राप्तीकेमी राप्शो बाक्त। मेको आ ग्युरा गे मन्तीथ्याह, शेमा, आनायाह, उरीयाह, हिलकीयाह नु मासेयाह राप्शो बाक्तेकम। मिनु आ पेरा गे पेदायाह, मीशाएल, माल्कीयाह, हाशुम, हरबादानाह, जकरिया नु मेशुल्लाम राप्शो बाक्तेकम।

5 मिनु एजामी आ लाइशशो बाक्तीकेमी राप्शा, नेल्लेम तचा डा पा मुर आन डोंइती मेको किताब प्राक्तु। मेको किताब प्राक्गानु, मुर नेल्ल बोक्तेकम।

6 मिनु एजामी नेल्ल क्येडा ठेयब परमप्रभु यावे कली “गे ठेयब ननी” दे मान पवानु, मुर नेल्लेमी आन गुड पोक्शा “आमेन, आमेन” देतेकम। मिनु नेल्लेमी आन पिया खुक्शा, परमप्रभु यावे आ डोंइती खप सम्म बाप्शा ठेयब सेल्तेकम।

7 मिनु येशुआ, बानी, शेरब्याह, यामीन, अक्कुब, शब्बेथाड, होंदीयाह, मासेयाह, केलीता, अजारयाह, योजाबाद, हानान, पेलायाह नु लेवीपुकीमी मुर आन कली परमप्रभु आ अरेशो लोव्र रुप्पाडक्तेकम। मिनु मुर आन बाक्तीकेम राप्शा बाक्तेकम।

8 मेकोपुकीमी परमप्रभु आ अरेशो लोव्र रुप्चा डा पा पढेम्तेकम। आन पढेशो रुप्मेक्ल, दे मुर आन कली आ अर्थ यो शेंताकम।

9 मिनु परमप्रभु यावे आ अरेशो लोव्र नेंशा, मुर नेल्ल शुश डाक्तेकम। मोपतीके पिप आ वोंइशशो हुकुम पाइब, नेहेम्याह, परमप्रभु यावे आ लोव्र जोक्ब तुडक्ब चढेब एजा नु मुर आन कली शेंब लेवीपुकीमी “मुलाक्ती परमप्रभु यावे, इन परमप्रभु आ ठेयब नाक्त बाक्ब। हिशेक मपने। मडाक्कीन” दे मुर आन कली माइक्तेकम।

10 मिनू मेकोपुकीमी मुर आन कली “मुल गे नेल्ल लने। ब्रोव्रशो ब्रोव्रशो जने ब्वने, तूडीन। मिनू मथीब आन कली यो मार मार सोइक्तीने। मारदे हना मुलाक्ती आंइ परमप्रभु आ ठेयब नाक्त बाक्ब। हिशेक मपने। मारदे हना परमप्रभु यावे आ गेशो ग्येरतीकेमी इन थुं बरपाइक्ब” दैतेक्म।

11 मिनू लेवीपुकीमी मुर नेल्ल आन कली “सिक्सी पा बाक्कीन। मुलाक्ती परमप्रभु आ ठेयब नाक्त बाक्ब। हिशेक मपने। मडाक्कीन” दैतेक्म। मारदे हना मुर नेल्ल परमप्रभु यावे आ लोव्र नेंशा डाक्तेक्म। नेहेम्याह ५:१४

12 मिनू मुर नेल्लेमी आन देंशो लोव्र रुप्शा, ठेयब ग्येरतीक चाड मानेचा कली जचा ब्वचा तूचा नु मथीब आन कली मार मार सोइक्चा कली लाम्तेक्म।

गोठ सेल्शा बाक्तीक चाड

13 मिनू आ दीसा खिं नेल्ल डा ठेयब मुर, चढेब नु लेवी नेल्ल परमप्रभु यावे लोव्र जोक्ब तुइक्ब एज्रा आ डोंइती परमप्रभु यावे आ अरेशो लोव्र शेंसीचा कली बुक्तेक्म।

14 मिनू परमप्रभु यावेमी मोसा कली “इसाएलीपुकीमी ७ महिना डा ७ नाक्त कली गोठ सेल्शा बाक्तीक चाड मानेचा माल्नीम” दे शेंशा, परमप्रभु यावे आ अरेशो लोव्रम ब्रेक्शो थित्तेक्म। लेवी २३:३४-३६; लेवी २३:४०

15 मिनू मेकोपुकीमी आंम बाक्तीक सह्र नेल्लेमी नु यरूसलेम डा मुर आन कली “गे इर ब्वाकी ग्येत्थ लशा, मार मार तेल रवा, मूर रवा, खजूर रवा नु शुश सफा पाइश्शो रवा आन राशी गोठ सेल्शा कली चाक्कीन। मिनू दोदेशो ब्रेक्शो बाक्मे, मोदेशो पने” दे नेंपतीन दैतेक्म। लेवी २३:४०

16 मिनू मुरपुकी लशा, सेउला चाक्तेक्म। मिनू आन खिं तारी, आन लाडगामी, परमप्रभु आ खिं डा लाडगामी, ब्वाक्कु लाप्चो आ नेक्थामी नु एफ्राइम लाप्चो आ नेक्थामी गोठ सेल्शा बाक्तेक्म। नेहेम्याह ८:१

17 मिनू मुर नेल्ल, सु सु ग्याइश्शा लेत्चा पुंडसीशो बाक्मा, मेको नेल्ल, गोठ सेल्शा, आगाम बाक्तेक्म। मिनू नून आ तौ यहोसु आ पाला रे मेको नाक्त सम्म इसाएलीपुकीमी मोदेशो मपशो बाक्तेक्म। मेको चाडमी मुर नेल्ल शुश ग्येरसाक्म।

18 मिनू डोंइती डा नाक्त रे नोले डा नाक्त सम्म एज्रा मी नाक्त किंत किंत परमप्रभु आ अरेशो लोव्र डा किताब पढेप्नु। मेकोपुकीमी मेको चाड ७ नाक्त सम्म मानेम्तेक्म। मिनू दोदेशो पा ब्रेक्शो बाक्मे, मोदेशो पा आ दीसा ८ नाक्तीमी चाड थुम्तीक नाक्त नेल्ल क्येडा ठेयब पा मानेम्तेक्म।

## 9

मुरपुकीमी मरिम्शो पशो

1 मिनू मेको महिना डा २४ नाक्त नोले इसाएलीपुकी माइजा बाक्शा, अरन्डी फेक्शा नु आन पियामी फुरक देप्शा खुम्साक्म।

2 इसाएलीपुकीमी अर्को जात डा मुरपुकी रे आंम कली तिल्लाक्म। मिनू आन बाक्तीकेम राप्शा, आन मरिम्शो पशो नु आन किक्की पिपी आन मरिम्शो पशो शोव्रतेक्म।

3 मिनू नेल्ल आन बाक्तीकेमी राप्शा, घन्टा सां सम्म परमप्रभु यावे, आन परमप्रभु आ अरेशो लोव्र डा किताब पदेशो नैतेक्म। मिनू अर्को घन्टा सां सम्म चहिं आंम आंम आन मरिम्शो पशो शोव्रना शोव्रन, परमप्रभु यावे आ डोंइती बाप्शा, परमप्रभु यावे, आन परमप्रभु कली ठेयब सेल्ना सेल्न बाक्तेक्म।

4 येशुआ, बानी, कदमीएल, शेबान्याह, बुनी, शेरब्याह, बानी नु केनानी लेवी आन शी के सेल्शो राप्तीके डा क्रेसीमी बाक्शा, ठेयब सेंदामी परमप्रभु यावे, आन परमप्रभु कली लोव्र पाम्तेक्म।

5 मिनू लेवी येशुआ, कदमीएल, बानी, हशाब्नेयाह, शेरब्याह, होदीयाह, शेबान्याह नु पेथायाहमी मुर आन कली “बोक्कीन, गेना हना यो बाक्ब परमप्रभु यावे, इन परमप्रभु कली ठेयब सेलीन। ‘इन नें ठेयब बाक्ब। नेल्ल आन ठेयब सेल्तीके आन क्येडा इन नें ठेयब सेल्चा पुंडसीशो बाक्ब’ दैचा माल्नीनी” दैतेक्म।

6 मिनू एज्रामी “गे का ला परमप्रभु यावे बाक्नीनी। गे सरीड सेल्तीनी। स्वर्ग नु मेकेर बाक्ब नेल्ल सेल्तीनी। गे रागी नु मेकेर डा मारेड मारेड, समुन्द्र नु मेकेर डा मारेड मारेड आन कली सेल्तीनी। मिनू मेको नेल्ल कली ब्रोंइचा गेतीनी। मिनू स्वर्ग डा गेय पाइबपुकीमी इन कली ठेयब सेल्तीम।

7 परमप्रभु यावे, गे परमप्रभुमी अब्राम कली योव्रशा, कल्दी आन रागी ऊर सह्र रे गुंडशा, अब्राहाम नें वोइक्तीनी। उत्पत्ती ११:३१; उत्पत्ती १७:५

8 मिनू मेको आ थुं इन कली मप्रोंइब, ठीक पाइब बाक्ब, दे तुइश्शा, मेको नु कबल का पाइतीनी। मार कबल पाइतीनी देंशा हना, मेको कली कनानी, हिती, एमोरी, परिज्जी, यबुसी नु गिरगाशी आन रागी आ चच युइ आन कली गेनुड, दे कबल पाइतीनी। मिनू गे इन कबल खाप्तीनी। मारदे हना गे ठीक पाइब बाक्नीनी। उत्पत्ती १५:१८-२१

9 मिनू आंइ किक्की पिपी इजीप्त रागीम बाक्मानु, मेको आन श्येत जशो ताइतीनी। लल समुन्द्रम बाक्शा आन डाक्शो नैतीनी। प्रस्थान ३:७

10 मिनू गेमी पिप फाराओ आ गेय पाइब नु आ रागी डा मुर नेल्ल आन डोंइती चिन्ड नु छक लाक्चा डा गेय पाइतीनी। मारदे हना मेकोपुकीमी आंइ किक्की पिपी आन कली ठेयब लेशशा, श्येत गेशो बाक्तेक्म, दे तुइक्ताक्नी। मोदेशो पा इन नें ठेयब सेल्साक्नी। मुल सम्म मेको मोदेशो बाक्ब। प्रस्थान १८:११

11 मेको आन डोंइती समुन्द्र कली चेशशा लां का सेल्तीनी। मेकोपुकी सोव्रशो खपीम गाक्शा, समुन्द्र शोक्साक्म। मेको खेदा पाइब आन कली चहिं ब्वाक्कुम खुम्तीनी। फुल्लु ब्वारशा, ब्वाक्कुम ताइश्शो खोदेशो पा खुम्तीनी। प्रस्थान १४:२१; प्रस्थान १५:५,१०

12 आंइ किकी पिपी आन कली नाक्त गोस्स के थामम लां कोइताकनी। मिनु नाक्टो आन लां तपाइक्चा कली मी के थाम दुम्शा लां कोइताकनी।

13 गे सीनै डांडामी यितीनी। मिनु स्वर्ग रे मेकोपुकी नु लोत्र पाइतीनी। गे मेको आन कली इन ठीक पतीक लोत्र, थमा शेंतीके, इन रिम्शो फुल्लुम मुशा ब्रेक्शो लोत्र नु इन शेंतीके गेतीनी। प्रस्थान १९:१८; प्रस्थान २०:१-१७

14 इन नाइक्तीक नाक्त नाइक्चा, दे मेको आन कली तुइक्पाइक्तीनी। मेको आन कली मोसा रे पा इन शेंतीके, इन फुल्लुम मुशा ब्रेक्शो लोत्र नु इन अरेशो लोत्र गेतीनी।

15 मेको आन कली शोव्रलु बेकमानु, सरीड रे शोब्ले गेतीनी। मेको आन कली तूत मदाक्चा डा पा, रूचा डा पा सेरथे फुल्लु रे ब्वाक्कु गुंडशा गेतीनी। मिनु मेको आन कली 'गेपुकी मेको रागी ओव्रशा, नेल्ल आंम के सेलीन' दे माइक्तीनी। मिनु मेको आन कली 'गे मेको नेल्ल गेनुड' दे कसम जाइतीनी। प्रस्थान १६:४,१४,१५; प्रस्थान १७:६

16 मिनु आंइ किकी पिपीमी ठेयब लेशशा, आन मिम्शो ला पशा, इन शेंशो मटीब दुम्शो बाक्तेकम। प्रस्थान ३२:१,९

17 इन कली टिने मबिस्सम। आन दातेमी पशो इन चिन्ड नु छक लाक्चा डा गेय ममिम्शो बाक्तेकम। मेकोपुकी इन देशो मटीब दुम्शो बाक्तेकम। मिनु आन काइ मटितीकेमी इजीप्त रागी लेशशा लशा, लेंशा वाइलीम वाइल दुम्चा कली थुंम वोइश्शो बाक्तेकम। गे चहिं आंइ मरिम्शो पशो क्याम्शा गेब परमप्रभु बाक्तीनी। शिशी पाइब नु गेना हना यो दाक्ब बाक्तीनी। गे ओखं पा चुर्ब बाक्शा, गेना हना यो दाक्तीके पाइश्शो बाक्तीनी। मोपतीके गे इन मुर आन कली दाक्शा मप्रॉइनी। प्रस्थान ३४:६

18 मेकोपुकीमी सुन के बाछा सेल्शा 'इजीप्त रागी रे प्रॉइशा कुइब, आंइ परमप्रभु एकोन बाक्ब' देमानु यो, इन कली ठेयब शुक्शी लोत्र पशो बाक्तेकम हना यो, प्रस्थान ३२:४

19 गे मेको आन कली शुश शिशी पशा, गोरशो रागीमी प्रॉइशा मसोइक्तीनी। आन लतीक लां तपाइक्चा कली नाक्त गोस्स के थाम नु नाक्टो मी के थाम दुम्शा गेनायो मप्रॉइनी।

20 मिनु मेको आन कली शेंचा, दे इन रिम्शो पाइब सोक्त गेतीनी। मेको आन कली मन्ना शोब्ले गेचा मप्रॉइनी। मिनु मेको आन कली रूथी पा ब्वाक्कु तूचा गेतीनी। प्रस्थान १६:३५; प्रस्थान १७:६; गन्ती ११:१७-२५; भजन संग्रह ७८:१५-१६; भजन संग्रह ७८:२३-२४

21 गे मेको आन कली ४० बर्स सम्म गोरशो रागीमी मारेइ ममाल्चा डा पा थुलतीनी। मेको आन वा मजेकम, आन खोइल यो गेनायो महोम्म। ब्यक्स्था ८:४

22 मेको आन कली राज्य नु जात जात डा मुरपुकी नु ग्रापाइक्तीनी। मेको आन बाक्तीके का का पा योव्रशा गेतीनी। मिनु सीहोन माइश्शो, हेरबोन रागी डा पिप नु ओग माइश्शो, बाशान रागी डा पिप आस रागी यो मेको आन कली गेतीनी। गन्ती २१:२३-२४; गन्ती २१:३३,३५

23 गे मेको आन तौ सरीड डा सोरुल खोदेशो पा हिक्ने मचाप्चा डा पा शुश सेलतीनी। मिनु आन किकी पिपी आन कली 'गे मेको रागी आंम के सेलीन' देशो रागीमी चाक्दीत्तीनी।

24 मिनु मेको आन तौ चच युइमी मेको रागी ओव्रशा, आंम के सेल्साकम। मिनु गे मेको रागीम बाक्ब कनानी नु आन पिपपुकी यो मेको आन गुइम गेतीनी। यहोसु १२:-

२५ मेकोपुकीमी एर ओंथ नेल्ल ठेयब गारो हिरशो सहरपुकी ग्राशो बाक्तेकम। शुश ग्रेल्ल रू आंम के सेल्शो बाक्तेकम। रिम्शो थोव्रकीम ब्रीशो खिंपुकी आंम के सेल्शो बाक्तेकम। फुल्लु मुशा सेल्शो इनार, अडगुर रू, तेल रवा रू नु मार मार फल फुल रू शुश तशो बाक्तेकम। मिनु मेकोपुकीमी जशा ब्वशा, रूशा, दोम्शा इन ठेयब शिशी तशा, ग्येरसीशो बाक्तेकम। ब्यक्स्था ६:१०-११; ब्यक्स्था ३२:१५

26 मेको नेल्ल तशा यो इन देशो मटिथु, ठेयब लेशशा, इन अरेशो लोत्र मटीमे बाक्त। इन लोत्र पाइबपुकीमी आन कली 'गे मरिम्शो पाइब बाक्तीनी। आं गे लेतीन' देमानु, मेको आन कली सदमे बाक्त। मिनु मेकोपुकीमी शुश शुक्शी पामे बाक्त।

27 मोपतीके गे मेको आन कली आन जोरी सत्रु आन गुइमी गेनी बाक्त। मेकोपुकीमी मेको आन कली शुश श्येत गेमे बाक्त। मिनु श्येत जामेनु 'वारच पाइक्की' दे इन कली पुन्मेनु, गे स्वर्ग रे आन पुंडशो नेंनी बाक्त। गे इन ठेयब शिशीमी मेको आन कली आन जोरी सत्रु रे प्रॉइचा कली मुर सोइक्तीनी बाक्त। मिनु मेकोपुकीमी मेको आन कली प्रोन्ने बाक्त। न्यायाधीस ३:९,१५; न्यायाधीस २:१४-२२

28 एर ओंथ डा आन जोरी सत्रु रे प्रॉइपाइसीशा, नाइश्शा बाक्मा नोले, लेंशा इन मदाक्शो पामे बाक्त। मिनु गे मेको आन कली आन जोरी सत्रु आन गुइमी गेनी बाक्त। आन जोरी सत्रुपुकीमी मेको आन कली हुकुम पामे बाक्त। मिनु लेंशा मेकोपुकीमी इन कली 'वारच पाइक्की' दे ग्रीमानु, गे स्वर्ग रे मेको आन पुंडशो नेंशा, मेको आन कली इन ठेयब शिशीमी शुश ख्येप प्रॉइनी बाक्त।

29 मिनु मेको आन कली इन अरेशो लोत्र गे लेत्या कली, मेको आन कली टिचा शेंदीनी बाक्त। तन्न मेकोपुकी ठेयब लेशशा, इन शेंतीके काइ मटिथु, इन पतीक लोत्र मपामे बाक्त। मुरपुकीमी इन पतीक लोत्र पशो नम हना, ब्रॉइचा ताम वा। तन्न मेकोपुकीम इन लोत्र मनंथु, मटिथु, इन गे आन ची हिरदमे बाक्त। लेवी १८:५

30 गे शुश बर्स सम्म मेको आन कली फाल्नी बाक्त। इन लोत्र पाइबपुकीमी मेको आन कली इन सोक्त रे पा शेंपाइक्ती बाक्त। तन्न मेकोपुकीमी नेंचा मबिस्समा बाक्त। मोपतीके गे मेको आन कली अर्को जात जात डा मुर आन गुइमी गेनी बाक्त। येरमीया ७:२५-२६; येरमीया ४४:४-६

31 मो पाम्तेकम हना यो, इन ठेयब शिशीमी मेको आन कली मसाइक्थु, आन श्येत रे प्रॉइनी बाक्त। मारदे हना गे शिशी पाइब नु शुश दाक्ब परमप्रभु बाक्तीनी।

32 मिनू आंइ परमप्रभु, गे नेल्ल क्येडा ठेयब सक्ति पाइश्शो नु मान पा हिंचा माल्लशो परमप्रभु बाक्नीनी। इन पशो कबल इन गेना हना यो दाक्तीक खाण्ब बाक्नीनी। अस्सुर डा पिप आन पाला रे मुलाक्त सम्म आंइ कली गेशो श्येत, आंइ पिप आन कली, आंइ ठेयब मुर आन कली, इन कली चढेब आन कली, इन लोत्र पाइब आन कली, आंइ किकी पिपी आन कली नु इन मुर नेल्ल आन कली गेशो श्येत कली आइक्च ममिम्तीन। ब्यवस्था ७:९,१२; १राजा ८:२३; नेहेम्याह १:५

33 आंइ कली दुम्तीके, गे ठीक पशो बाक्नीनी। मारदे हना गे आंइ कली रिम्शो पाइतीनी। गोपुकीमी चहिं इन कली थम मरिम्शो पाइतक। दानीएल ९:५,७

34 आंइ पिप, आंइ ठेयब मुरपुकी, इन कली चढेबपुकी नु आंइ किकी पिपीमी इन अरेशो लोत्र मपथु, इन शेंतीके नु इन गेशो होस पतीक लोत्र मनेथु, हिक्सीन महिक्मे बाक्त।

35 मिनू आन आंम राज्यमी, इन रिम्शो पतीकेमी नु आन बाली नाली शुश ग्रेल्व ठेयब रागीमी इन कली मान मपामे बाक्त। आन काइ मरिम्शो गेय मप्रोन्मे बाक्त।

36 मुलाक्ती गो वाइलीम वाइल दुम्शो बाक्नीकी। आंइ किकी पिपी आन कली मेको रागी डा फल फुल जचा नु मेकेर डा रिम्शो रिम्शो थोत्रक तचा कली गेशो बाक्तीनी। इन गेशो रागीमी गो वाइलीम वाइल दुम्शो बाक्नीकी।

37 मेको रागी डा मारेइ मारेइ रिम्शो थोत्रकी गे आंइ कली हुकुम पपाइक्ब पिप आन कली ताइब सेलतीनी। मेको आंइ मरिम्शो पतीके आ पबंम बाक्ब। मेकोपुकीमी आंइ कली नु आंइ बी ब्यफ नु क्यारश भेडा आन कली आन दाक्स पा पाइनीमी। मोदेशो पा गो शुश श्येत जशो बाक्नीकी” दे एजामी परमप्रभु कली लोत्र पाप्टु।

38 मिनू मेको आन पशो नेल्ल मिम्शा, गोपुकीमी परमप्रभु नु कबल का पाइतक। मिनू मेको कबल डा लोत्र नेल्ल ब्रेक्ताक। मेको छाप थोक्शो ब्रेक्सम आंइ ठेयब मुरपुकी, लेवीपुकी नु चढेब आन नें ब्रेक्शो बाक्तेक्म।

## 10

छाप थोक्शो ब्रेक्सम मुर आन ब्रेक्शो नें

1 मेको छाप थोक्शो ब्रेक्स आगाम सु सु आन नें ब्रेक्शो बाक्त देशा हना: हाकाल्याह आ तौ हुकुम पाइब नेहेम्याह नु सिदकीयाह आस नें ब्रेक्शो बाक्त।

2 मिनू चढेबपुकी: सेरायाह, अजारयाह, येरमीया,

3 पश्हुर, अमारयाह, माल्कीयाह,

4 हल्लतुश, शेबान्याह, माल्लुक

5 हारीम, मेरेमोथ, ओबदिया,

6 दानीएल, गिन्नेथोन, बारुक,

7 मेशुल्लाम, अबीयाह, मियामीन,

8 माजीयाह, बिल्लाड नु शेमायाह आन नें ब्रेक्शो बाक्त।

9 मिनू लेवीपुकी अजन्याह आ तौ येथुआ, हेनादाद आ खिं डा बिन्नुइ, कदमीएल

10 नु मेको आन लोकबपुकी शेबान्याह, होदीयाह, केलीता, पेलायाह, हानान,

11 मीका, रेहोब, हशाब्याह,

12 जाक्कुर, शेरब्याह, शेबान्याह,

13 होदीयाह, बानी नु बेनीनु आन नें ब्रेक्शो बाक्त।

14 ठेयब मुरपुकी पारोश, पहाथ-मोआब, एलाम, जल्लु, बानी,

15 बुन्नी, अज्गाद, बेबाइ,

16 अदोनीयाह, बिग्वाइ, आदीन,

17 आतेर, हिज्कीयाह, अज्जुर,

18 होदीयाह, हाशुम, बेजाइ,

19 हारीफ, अनाथोथ, नेबाइ,

20 माग्पीअश, मेशुल्लाम, हेजीर

21 मेशेजाबेल, सादोक, यादुअ,

22 पेलात्याह, हानान, आनायाह,

23 होशेआ हनान्याह, हाश्शुब

24 हल्लोहेश, पिल्ला, शोबेक,

25 रेहुम, हशाब्नाह, मासेयाह,

26 अहीयाह, हानान, आनान,

27 माल्लुक, हारीम नु बानाह आन नें ब्रेक्शो बाक्त।

इसाएली आन पशो कबल

28 मिनू लीशो मुरपुकी: चढेबपुकी, लेवीपुकी, लाण्चो खाल पाइबपुकी, कुम्सो पाइबपुकी, परमप्रभु यावे आ खिंमी गेय पाइबपुकी नु परमप्रभु आ अरेशो पचा कली अर्को रागी डा मुरपुकी रे तिल्लीशो वॉइश मुर, मीश मुर, आन तमी तौपुकी सु सु रुन्ने चाण्ब बाक्मा, मेको नेल्ल बाक्तेक्म।

29 मेको आन लोकब आन टेयब मुरपुकी नु गारशा, परमप्रभु यावे आ वाइल मोसामी गेशो परमप्रभु आ अरेशो लोव्र टिचा कली थुं का पान्तेकम। आइ परमप्रभु यावे आ शंशो, आ पतीक लोव्र नु आ फुल्लुम मुशा ब्रेकशो लोव्र तुइशशा पचा कली कसम जान्तेकम।

30 मिनु गोपुकीमी आइ तमी आन कली मेको रागी डा अर्को जात डा मुर आन कली मगेनीक। आइ तौ आन कली यो मेको आन तमीपुकी मचाक्नीकी। प्रस्थान ३४:१६; ब्यवस्था ७:३; एजा ९:२

31 मिनु मेको रागी डा मुरपुकीमी नाइक्तीक नाक्त मार मार लेयतीक थोव्रक नु अन्न लेयथ चाक्तेकम हना, गोपुकीमी नाइक्तीक नाक्त नु परमप्रभु आ टेयब नाक्तीम मेको आन के मारेइ मग्याप्नीकी। मिनु गोपुकी ६ बर्स आ नोले डा बर्सम मारेइ मखुम्नीकी। जेर गेशो बाक्तक हना यो, मेको बर्समी जेर नु आ चाइक्ब काइ मपोक्थु, प्रॉइनीकी। ब्यवस्था १५:१-११; नेहेम्याह ५:१०; नेहेम्याह १३:१५-१८; येरमीया १७:२१-२७

32 मिनु गोपुकीमी बर्स बर्स कली शेकेल का के भाग सां डा भाग का परमप्रभु यावे आ खिं डा गेय कली गेनीकी, दे आइ थुं फ्रेताक्क। शेकेल का ११.५ ग्राम डा क्येट बाक्ब। २इतिहास २४:६; मती १७:२४

33 मार पचा कली गेनीकी देशा हना, परमप्रभु आ डोंइती वोइशशो कोंइतीक शोब्ले कली अन्न चढेतीक नु चोशा चढेतीक कली, नाइक्तीक नाक्तीम चढेतीक, औसीम चढेतीक, अरु चाड डा चढेतीक, नेल्ल इं परमप्रभु आ खिं कली माल्शो थोव्रकी, पाप क्याम्पाइक्चा कली चढेतीक, मोदेशो पा इस्त्राएली आन मरिश्शो पशो क्याम्चा कली नु इं परमप्रभु आ खिंमी पतीक गेय नेल्ल कली गेनीकी।

34 मिनु गो, चढेबपुकी, लेवीपुकी नु मुर नेल्लेमी इं परमप्रभु आ खिं कली कचेत सु सुम क्याक्चा, दे फेन्टे आप्तक। खिं खिं डा मुरपुकी बर्स बर्समी परमप्रभु यावे आ अरेशो लोव्रम ब्रेकशो खोदेशो पा परमप्रभु यावे, इं परमप्रभु आ खिंम चढेचा कली शी चाक्चा माल्नीम। प्रस्थान २५:३०

35 मिनु बर्स बर्सम नेल्ल क्येडा डोंइती डा आइ रूम सिशशो, मार मार रवा आन फल फुल परमप्रभु यावे आ खिंम चाक्नय। लेवी ६:५

36 आइ नेल्ल क्येडा डोंइती जरमेशो तौ नु बस्तु भाव आन डोंइती जरमेशो परमप्रभु आ अरेशो खोदेशो पा परमप्रभु आ खिंमी चाक्चा कली आइ थुं फ्रेताक्क। आइ नेल्ल क्येडा डोंइती जरमेशो बी ब्यफ, क्यारश, भेडा आइ परमप्रभु आ खिंमी गेय पाइब चढेब आन कली चाक्नीक, दे थुं फ्रेताक्क। प्रस्थान १३:२

37 मिनु आइ निशो फस डा नेल्ल क्येडा डोंइती डा भाग, अन्न चढेतीक, मार मार रवा आन फल, अडगुर शांबु नु तेल चढेब आन कली गेचा, दे परमप्रभु आ खिं डा वोइक्तीक कोठाम चाक्नीकी। मोदेशो पा लेवी नेल्लेम रागी डा १० भाग डा भाग का ताइनीम। मेको लेवीपुकीमी आइ गेय पतीक सहर जाक्शा, १० भाग डा भाग का पोक्चा माल्नीम। गन्ती १५:२०-२१; गन्ती १८:२१

38 मोदेशो पा लेवीपुकी पोक्थ गाक्मानु, चढेब हारून आ चच युइ यो लेवीपुकी नु गाक्चा माल्नीम। मिनु लेवीपुकी मेको आन पोक्शो रे पा १० भाग डा भाग का परमप्रभु आ खिं डा वोइक्तीक कोठामी वोइक्चा माल्नीम। गन्ती १८:२६, २८

39 मिनु इस्त्राएली नु लेवीपुकीमी मेको चाक्शो अन्न, अडगुर शांबु नु तेल मार मार वोइक्तीक कोठाम चाक्चा माल्नीम। मारदे हना मेको परमप्रभु आ खिं डा बोसपुकी वोइक्तीके बाक्त। मिनु मेकेर गेय पाइब चढेबपुकी, लाप्चोम खाल पाइबपुकी नु कुम्सो पाइबपुकी यो मेकेर बाक्नीम। मिनु गोपुकीम “परमप्रभु आ खिं श्येथ मवोइय्य” दे आइ थुं फ्रेताक्क।

## 11

यरूसलेम सहरम बाक्ब मुर

१इतिहास ९:२-१७

1 मिनु इस्त्राएली आन टेयब मुरपुकी यरूसलेममी बाक्शो बाक्तेकम। लीशो मुर आन दाते रे सु परमप्रभु यावे आ सहर यरूसलेममी बाक्चा ताइबा, दे १० जना मुर आन दाते रे का योव्रचा कली फेन्टे आप्तेकम। अरु ९ जना मुर चहिं अरु बाक्तीकेमी बाक्तेकम।

2 मुरपुकीमी यरूसलेममी ग्येरशा लाइब नेल्ल आन कली आसीक गेम्तेकम।

3 गाउं गाउं डा टेयब मुर यरूसलेम सहरम बाक्शो बाक्तेकम। अरु मुरपुकी, चढेबपुकी, लेवीपुकी, परमप्रभु यावे आ खिंमी गेय पाइबपुकी नु सोलोमन आ खिं डा गेय पाइब आन चच युइ नेल्ल यहूदा डा सहर सहर, गाउं गाउंम आंम आंम बाक्तीक उइ बाक्चा माल्बाक्तेकम।

यरूसलेमम बाक्ब यहूदी

4 यरूसलेममी यहूदा नु बेन्यामीन आस थर डा मुर का निक्शी बाक्शो बाक्तेकम। यहूदा आ थर डा मुर सु सु बाक्तेकम देशा हना, उज्जीयाह आ तौ अथायाह, मेको उज्जीयाह आ आफ जकरिया बाक्त। जकरिया आ आफ अमारयाह बाक्त। अमारयाह आ आफ शेफत्याह बाक्त। मिनु शेफत्याह आ आफ मा-हालालेल बाक्त। मिनु मेको पेरिस आ चच युइ बाक्तेकम।

5 मिनु बारुक आ तौ मासेयाह बाक्त। बारुक आ आफ कोल-होजे बाक्त। कोल-होजे आ आफ हाजायाह बाक्त। हाजायाह आ आफ अदायाह बाक्त। अदायाह आ आफ योयारीब बाक्त। योयारीब आ आफ जकरिया बाक्त। मेको शिलो डा मुर आ खिं डा मुर बाक्तेकम।

6 यरूसलेमम बाक्ब पेरिस आ चच युइ नेल्ल पा ४ सहे ६८ जना बोल्यो नु महिंभ वोंइश मुर बाक्तेकम।

यरूसलेमम बाक्ब बेन्यामीनी

7 मिनू बेन्यामीन आ थर डा मुर सु सु बाक्तेकम देशा हना, मेशुल्लाम आ तौ सल्लु बाक्त। मेशुल्लाम आ आफ योएद बाक्त। योएद आ आफ पेदायाह बाक्त। पेदायाह आ आफ कोलायाह बाक्त। कोलायाह आ आफ मासेयाह बाक्त। मासेयाह आ आफ इथीएल बाक्त। इथीएल आ आफ येशायाह बाक्त।

8 मिनू मेको सल्लु आ नोले गब्बाइ नु सल्लाइ बाक्ताकसे। मेको नेल्ल पा ९ सहे २८ जना बाक्तेकम।

9 जिक्की आ तौ योएल मेको आन कली कोव्रब, ठेयब मुर बाक्त। हास्सेनुआ आ तौ यहूदा योएल नोले सहर डा ठेयब मुर दुम्शो बाक्त।

यरूसलेमम बाकब चढेबपुकी

10 मिनू चढेब सु सु बाक्तेकम देशा हना, योयारीब आ तौ येदायाह, याकीन,

11 हिल्लीयाह आ तौ सेरायाह, हिल्लीयाह आ आफ मेशुल्लाम, मेशुल्लाम आ आफ सादोक, सादोक आ आफ मेरायोथ, मेरायोथ आ आफ अहीतुब चढेब बाक्तेकम। मिनू अहीतुब परमप्रभु आ खिं डा ठेयब मुर बाक्त। २राजा २५:१८; एज्रा २:२

12 मिनू मेको नु परमप्रभु आ खिंम गेय पाइब लोकबपुकी ८ सहे २२ जना बाक्तेकम। मिनू येरोहाम आ तौ अदायाह, येरोहाम आ आफ पेलायाह, पेलायाह आ आफ अम्जी, अम्जी आ आफ जकरिया, जकरिया आ आफ पशहुर, पशहुर आ आफ माल्कीयाह बाक्त।

13 मिनू मेको आ लोकब आन खिं डा ठेयब मुरपुकी बाक्तेकम। मेको नेल्ल पा २४२ जना बाक्तेकम। मिनू अजारेल आ तौ अमाशै बाक्त। मेको असारेल आ आफ अहजाइ, अहजाइ, आ आफ मेशील्लेमोथ, मेशील्लेमोथ, आ आफ इम्मेर बाक्त।

14 मिनू मेको आन लोकबपुकी महिंब ठेयब थुं पाइशो लडाइ पाइब वोंइश मुर बाक्तेकम। मेको नेल्ल पा १२८ जना बाक्तेकम। मेको आन ठेयब मुर हग्गेदोलीम आ तौ जब्दीएल बाक्त।

यरूसलेमम बाकब लेवीपुकी

15 लेवीपुकी सु सु बाक्तेकम देशा हना, हरशुब आ तौ शेमायाह, हरशुब आ आफ अज्जीकाम, अज्जीकाम आ आफ हशाब्याह, हशाब्याह आ आफ बुन्नी बाक्त।

16 मिनू लेवी आन ठेयब मुरपुकी शब्बेशाइ नु योजाबाद बाक्ताकस। मेको निक्शी परमप्रभु आ खिं डा लाडगा माल्शो मारेइ मारेइ गेय पचा कली कोव्रब वोइशो बाक्ताकस।

17 मिनू मीका आ तौ मत्न्याह बाक्त। मीका आ आफ जब्दी बाक्त। जब्दी आ आफ आसाफ बाक्त। आसाफमी परमप्रभु कली पुंडची ना “गे रिम्शो पाइब ननी” दे ठेयब सेल्शा, कुम्सो पपाइकब बाक्त। मेको आसाफ आ नोले डा शेंब आ लोकब बाकबुकीयाह बाक्त। मिनू शम्मुआ आ तौ अब्दा, शम्मुआ आ आफ गालाल, गालाल आ आफ येदुथून बाक्त।

18 मेको सहरम बाकब लेवी नेल्ल पा २८४ जना बाक्तेकम।

लाप्चो खाल पाइबपुकी

19 लाप्चो खाल पाइब सु सु बाक्तेकम देशा हना, अक्कुब ताल्मोन नु आन लोकब नेल्ल पा सहे का ७२ जना बाक्तेकम।

20 मिनू लीशो इस्राएली, चढेबपुकी नु लेवीपुकी यहूदा डा सहरपुकीमी आंम आंम आन बाक्तीकेमी बाकशो बाक्तेकम।

21 मिनू परमप्रभु यावे आ खिं डा गेय पाइबपुकी यरूसलेम सहर ओफेल माडक्तीकेमी बाकशो बाक्तेकम। सीहा नु गिश्पा परमप्रभु यावे आ खिं डा गेय पाइब आन कली कोव्रब बाक्ताकसे।

22 यरूसलेममी बाकब लेवी आन कली कोव्रब सु सु बाक्तेकम देशा हना, बानी आ तौ उज्जी बाक्त। उज्जी आ आफ हशाब्याह बाक्त। हशाब्याह आ आफ मत्न्याह बाक्त। मत्न्याह आ आफ मीका बाक्त। मेको नेल्ले परमप्रभु आ खिंम कुम्सो पाइब शेंब आसाफ आ चच युइ बाक्तेकम।

23 मिनू पिपमी मेको कुम्सो पाइब आन परबम आन नाक्त किंत किंत डा पतीके आंमान ब्रेक्शा, अरेवा बाक्त। मेको आन कली मार मार गेचा, दे यो ब्रेक्शो बाक्त।

24 मिनू जेराह आ चच युइ रे मेशेजाबेल आ तौ पेथायाह बाक्त। मेको मेशेजाबेल आ आफ बाक्त। मिनू जेराह आ आफ यहूदा बाक्त। मेको पेथायाह चहिं मुरपुकीम मार मार माल्नीमी, दे कोव्रब, पिप आ खिंम गेय पाइब बाक्त।

यरूसलेम एर ओथ डा गाउ

25 मिनू यहूदा आ थर डा मुरपुकी का निक्शी आंम आंम आन खिंम नु रूम बाकशो बाक्तेकम। मेकोपुकी किरयथ-अरबा नु मेको मेर डा गाउंपुकी, दीबोन नु मेको मेर डा गाउंपुकीम, येकाब्सेल सहर नु मेको मेर डा गाउंपुकीम, यहोसु २०:७

26 येशुआ, मोलादा नु बेथ-पेलेत सहरम,

27 हासार-शुआल, बेयर-शेबा सहर नु मेको मेर डा गाउंपुकीम,

28 सिकलाग, मेकोनाह सहर नु मेको मेर डा गाउंपुकीम, यहोसु १५:३१

29 एन-रिम्मोन, सोराह, यरमुथ,

30 जानोह, अदुल्लाम सहर नु मेको मेर डा गाउंपुकीम, लाकीश नु मेको मेर डा रूपुकीम नु आजेका नु मेको मेर डा गाउंपुकीमी बाक्तेकम। मोपा बेयर-शेबा रे हिन्मोम बेसी सम्म बाकशो बाक्तेकम।

31 बेन्यामीन आ चच युइ गेबा सहर रे मिकमाश, अय्या, बेथेल नु मेको मेर डा गाउंपुकीम, यहोसु १८:२२

32 अनाथोथ, नोब, अनान्याह,

33 हासोर, रामाह, गित्ताइम,

- 34 हादीद, सेबोयीम, नेबल्लात  
 35 लोद नु ओनो सहरमी गेय पाइब आन बाक्तीक सम्म बाक्तेकम।  
 36 यहूदामी बाक्ब का निकशी लेवीपुकी बेन्यामीन थर नु बाक्थ लशो बाक्तेकम।

## 12

चढेब नु लेवीपुकी

- 1 शाल्तीएल आ तौ जेरूब-बाबेल नु येशुआ नु काथा लेशशा जाक्ब चढेब नु लेवीपुकी सु सु बाक्तेकम देशा हना, सेरायाह, येरमीया, एज़ा एज़ा २:२  
 2 अमारयाह, माल्लुक, हत्तुश,  
 3 शेकन्याह, रेहुम, मेरेमोथ,  
 4 इददो, गिन्नेथोइ, अबीयाह, लूका १:५  
 5 मियामीन, मा-अदीयाह, बिल्याह,  
 6 शेमायाह, योयारीब येदायाह,  
 7 सल्लु, अमोक, हिल्लीयाह नु येदायाह बाक्तेकम। मेकोपुकी येशुआ आ पाला डा चढेब नु आन लोकब आन ठेयब मुर बाक्तेकम।  
 8 मिनु लेवीपुकी सु सु बाक्तेकम देशा हना, येशुआ, बिन्नुइ, कदमीएल, शेरब्याह, यहूदा नु मत्तन्याह बाक्तेकम। मेको नु आन लोकबपुकी परमप्रभु यावे कली ठेयब सेल्टीक कुम्सो पपाइक्ब बाक्तेकम।  
 9 मेको आन लोकब बाकबुकीयाह नु उन्नो कुम्सो पची ना आन नेक्था बाक्बाक्ताक्स।  
 10 येशुआ योयाकीम आ आफ बाक्त। योयाकीम एल्याशीब आ आफ बाक्त। एल्याशीब यो-यादा आ आफ बाक्त। नेहेम्याह ३:१  
 11 यो-यादा योनाथन आ आफ बाक्त। मिनु योनाथन यादुअ आ आफ बाक्त।

चढेब आन ठेयब मुरपुकी

- 12 योयाकीम आ पालामी चढेब आन खिं खिं डा ठेयब मुर सु सु बाक्तेकम देशा हना, सेरायाह आ खिं डा ठेयब मुर मेरायाह, येरमीया आ खिं डा ठेयब मुर हनान्याह,  
 13 एज़ा आ खिं डा ठेयब मुर मेशुल्लाम, अमारयाह आ खिं डा ठेयब मुर येहो-हानान,  
 14 माल्लुक आ खिं डा ठेयब मुर योनाथन, शेबान्याह आ खिं डा ठेयब मुर योसेफ,  
 15 हारीम आ खिं डा ठेयब मुर अदना, मेरायोथ आ खिं डा ठेयब मुर हेल्काइ,  
 16 इददो आ खिं डा ठेयब मुर जकरिया, गिन्नेथोन आ खिं डा ठेयब मुर मेशुल्लाम,  
 17 अबीयाह आ खिं डा ठेयब मुर जित्री, मीन्यामीन आ खिं डा ठेयब मुर का, मोअदयाह आ खिं डा ठेयब मुर पिल्लाइ,  
 18 बिल्लाह आ खिं डा ठेयब मुर शम्मुआ, शेमायाह आ खिं डा ठेयब मुर येहो-नाथान,  
 19 योयारीब आ खिं डा ठेयब मुर मतेनाइ, येदायाह आ खिं डा ठेयब मुर उज्जी,  
 20 सल्लाइ आ खिं डा ठेयब मुर कल्लाइ, अमोक आ खिं डा ठेयब मुर एबेर,  
 21 हिल्लीयाह आ खिं डा ठेयब मुर हशाब्याह नु येदायाह आ खिं डा ठेयब मुर नेथनेल बाक्तेकम।  
 22 पारसी डा पिप दारा आ पालामी चढेब नु लेवी आन खिं डा ठेयब मुर आन नें ब्रेक्शा वोइश्शो बाक्त। चढेब आन नेल्ल क्येडा ठेयब चढेब एल्याशीब, यो-यादा, योहानान नु यादुअ आन पाला सम्म आन खिं डा ठेयब मुर आन नें ब्रेक्शो बाक्तेकम।  
 23 मिनु लेवी आन खिं डा ठेयब मुर आन नें एल्याशीब आ तौ योहानान आ पाला सम्म इतिहास डा किताबमी ब्रेक्शो बाक्तेकम।

परमप्रभु कली ठेयब सेल्लो

- 24 मिनु लेवी आन ठेयब मुरपुकी हशाब्याह, शेरब्याह नु कदमीएल आ तौ येशुआम परमप्रभु यावे कली ठेयब सेल्लेकम। आन लोकबपुकी परमप्रभु आ मुर दाऊदम देशो खोदेशो पा मेको आन आइक्ची गे राप्शा, पालो पा परमप्रभु यावे कली कुम्सो पा ठेयब सेल्लेकम। मोपा कुम्सो पाइब आन हुल का एर गे नु हुल का ओंथ गे बाक्तेकम। १इतिहास २५:२५; २इतिहास २९:२५  
 25 मत्तन्याह, बाकबुकीयाह, ओबदिया, मेशुल्लाम, ताल्मोन नु अक्कुब चहिं ठेयब लाप्चो आ नेक्था डा मार मार वोइक्तीक कोठा डा लाप्चो खाल पाइब बाक्तेकम। २इतिहास ८:१४  
 26 मेको नेल्लेमी योसादाक आ चच, येशुआ आ तौ योयाकीम नु हुकुम पाइब नेहेम्याह नु परमप्रभु यावे आ लोव्र जोक्ब तुइक्ब चढेब एज़ा आ पालामी मोदेशो गेय पाइब बाक्तेकम। १इतिहास ५:४०-४१

गारो सेल्ले थुम्शो

- 27 मिनु यरूसलेम डा गारो प्रोवने थुम्तीक चाड कली लेवी आन कली आन आन बाक्तीक तेइ तेइ रे माल्शा, यरूसलेममी चाक्तेकम। मारदे चाक्तेकम देशा हना, गारो थुम्तीके परमप्रभु यावे आ डोंइती ग्येरसीशा “गे रिम्शो पाइब ननी” दे ठेयब सेल्लीक कुम्सो पचा नु खैजडी, तार पाइश्शो ठेयब ताप्तीके नु बीना ताप्चा कली चाक्तेकम।  
 28 मिनु कुम्सो पाइबपुकी यरूसलेम नु आ एर ओंथ नु नेतोफाह आ मुर आन बाक्तीक रे यरूसलेममी खुम्साकम।

29 बेथ-गिल्गाल नु गेबा सहर नु अज्मावेथ रे यो जाक्तेक। मारदे हना कुम्सो पाइबपुकीमी यरूसलेम आ एर ओथम आम आम कली बाक्तीके सेल्शा बाक्शो बाक्तेक।

30 चढेब नु लेवीपुकीमी आम आम कली चोत्रखो सेल्सीशा, नोले मुर आन कली नु ठेयब लाप्चोपुकी नु गारो आन कली चोत्रखो सेल्तेक।

गारो थुम्शा चाड मानेशो

31 मिनु गो यहूदा रागी डा ठेयब मुर आन कली गारो तार डोइकपाइकतामी। परमप्रभु यावे कली ठेयब सेल्ब कुम्सो पाइब आन कली ठेयब हुल निकशी पा वोइकता। हुल का गारो तारी ग्युरा गे पा, मोत्रल लाप्चो गे लाम्तेक।

32 मिनु मेको कुम्सो पाइब आन नोले होशयाह नु यहूदा डा ठेयब मुर आन हुल का लाम्तेक।

33 मिनु मेको आन नोले अजारयाह, एजा, मेशुल्लाम,

34 यहूदा, बेन्यामीन, शेमायाह नु येरमीया लाम्तेक।

35 मिनु चढेब आन तो का निकशी तुराही ताप्बपुकी यो मेको आन नोले खोइक्तेक। योनाथन आ तौ जकरिया, योनाथन आ आफ शेमायाह, शेमायाह आ आफ मत्तन्याह, मत्तन्याह आ आफ मीकाया नु जाक्कुर आ आफ आसाफ बाक्त।

36 मिनु मेको आ लोकबपुकी शेमायाह, अजारेल, मिलालाइ, गिलालाइ, माइ, नेथनेल, यहूदा नु हानानी बाक्तेक। मेकोपुकीमी परमप्रभु आ मुर दाऊद आ ताप्तीकपुकी ताप्शा गाक्तेक। मिनु परमप्रभु यावे आ लोत्र जोकब तुइक्ब एजा मेको आन डोइती गाक्ब बाक्त।

37 मिनु मेकोपुकी ब्वाक्कु बुक्तीक लाप्चो गे लाम्तेक। मिनु क्रेसी डोइश्शा, ग्येतथ लशा, दाऊद आ सहर डा गारो डोइश्शा, दाऊद आ खिं लाक्शा, पूर्व गे बाक्शो ब्वाक्कु लाप्चो गे लाम्तेक।

38 मिनु परमप्रभु यावे कली “गे रिम्शो पाइब बाक्नीनी” दे कुम्सो पाइब आन अर्को हुल चहिं गारो तारी पेरा गे लाम्तेक। मिनु गो नु ठेयब मुर आन अर्को हुल मेको आन नोले खोइश्शा, मी मुइक्तीक माइश्शो लाइश्शो खिं लाक्शा, ब्रेम्शो गारो गे लाइतक।

39 मिनु नोले एफ्राइम लाप्चो, माइत गारो डा ठेयब लाप्चो, डांड लाप्चो, हानानेल माइश्शो लाइश्शो खिं, मेआ माइश्शो लाइश्शो खिं लाक्शा, भेडा लाप्चो गे लाइतक। मिनु मेकोपुकी जेल्खान लाप्चोम जाकदीशा नांडसाक।

40 मेकेर जाक्शा, परमप्रभु कली “गे रिम्शो पाइब बाक्नीनी” दे कुम्सो पाइब आन हुल निकशी परमप्रभु आ खिं आ डोइती राप्तेक। मिनु गो नु ठेयब मुर आन हुल का यो मेकेर बाक्तक।

41 मिनु चढेब एल्याकीम, मासेयाह, मीन्यामीन, मीकाया, एली-ओ-एनाइ, जकरिया नु हनान्याहमी तुराही ताप्तेक।

42 मिनु मासेयाह, शेमायाह, एलाजर, उज्जी, येहो-हानान, माल्कीयाह, एलाम नु एजेर यो मेको नु बाक्तेक। मिनु कुम्सो पाइबपुकीमी येजरायाह कुम्सो पाइब आन कली शेंब नु कुम्सो पाम्तेक।

43 मेको नाक्त ठेयब चढेतीक चढेशा, शुश ग्येरशो बाक्तेक। मारदे हना परमप्रभुमी मेको आन थुं थाम्पा ग्येरपाइक्तु। मीश मुरपुकी नु आलपुकी यो शुश ग्येरसाक। मिनु यरूसलेम डा मुर आन ग्येरसीशो सेंदा डोन डोन सम्म नेसाक।

खाल पाइब आन गेय

44 मिनु मेको नाक्त मार मार वोइक्तीक कोठा खाल पाइब मुर आन कली वोइक्तेक। मेकोपुकी मुर आन गेशो चढेशो, डोइती सिश्शो मार मार नु १० भाग डा भाग का चाक्शो ताक्शा साम्चा कली वोइश्शो बाक्तेक। मेकोपुकीमी सहर मेर डा रूरे चढेब नु लेवी आन भाग खुप्शा वोइक्तेक। मारदे हना यहूदा डा मुरपुकीम चढेब नु लेवी आन पशो तशा, दाक्शा, नेल्ल शुश ग्येरसीशो बाक्तेक।

45 चढेब नु लेवीपुकीमी परमप्रभु आ देशो खोदेशो पा चोत्रखेतीक गेय पाम्तेक। मिनु कुम्सो पाइब नु लाप्चो खाल पाइबपुकी यो दाऊद नु आ तौ सोलोमनमी देशो खोदेशो पा चोत्रखेतीके गेय पाइब बाक्तेक।

46 मारदे हना दाऊद नु आसाफ आस पालामी कुम्सो पाइब आन कली शेंब का बाक्शो बाक्त। मेना यो परमप्रभु कली ठेयब सेल्तीक नु “गे रिम्शो पाइब बाक्नीनी” दे कुम्सो पाइब बाक्शो बाक्तेक। इतिहास २५:-

47 मिनु इस्राएल डा मुर नेल्लेमी जेरूब-बाबेल नु नेहेम्याह आस पालामी कुम्सो पाइब नु लाप्चो खाल पाइब आन कली नाक्त किंत किंत डा माल्शो गेम्तेक। लेवी आन भाग वोइक्तेक। मिनु लेवीपुकीमी आन ताक्शो रे हारून आ चच युइ आन भाग वोइक्तेक। गन्ती १८:२६; नेहेम्याह १०:३९

## 13

अर्को रागी डा मुर तिल्लो

1 मेको नाक्ती मुर आन डोइती मोसा आ ब्रेक्शो किताब पदेशो बाक्त। मिनु मेकेर मार ब्रेक्शो बाक्त देशा हना “अम्मोन नु मोआब डा मुरपुकी रे सुइ परमप्रभु आ मुर आन गुम्तीकेमी गेनायो जाक्चा मताडनीम। ब्यवस्था २३:४-६

2 मारदे हना मेकोपुकी इस्राएली आन कली शोब्ले नु ब्वाक्कु गेचा कली गुम्थ मजाक्शो बाक्तेक। तन्न इस्राएली आन कली सराप पाइक्चा कली बालाम कली क्येट गेशा, ब्रेश्शो बाक्तेक। मो पाम्तेक हना यो, आइ परमप्रभुमी मेको सराप रे आसीक सेल्शो बाक्त” दे ब्रेक्शो बाक्त। गन्ती २२:५-६

3 मिनु मेको अरेशो लोत्र पदेशो नेंशा, अर्को रागी डा मुर नेल्ल आन कली तिल्लेक।

चढेब एल्याशीब कली हुइश्शो



4 मिनू मेको क्येडा डोंडती चढेब एल्याशीब आंइ परमप्रभु आ खिं डा ठेयब कोत्रब बाक्त। मेको तोबीयाह एल्याशीब आ नेक्था डा मुर बाक्त। नेहेम्याह २:१९

5 मिनू चढेब एल्याशीबमी आंम खिं डा मुर, तोबीयाह कली परमप्रभु यावे आ खिं डा वोइक्तीक ठेयब कोठा का गेशो बाक्त। डोंडती मेको कोठामी मार मार शेंशो खोदेशो पा चढेशो १० भाग डा अन्न, धूप, परमप्रभु यावे आ खिं डा बोसपुकी, मुर आन गेशो १० भाग डा भाग का अन्न, अडगुर शांबु नु तेल वोइश्शो बाक्त। मेको परमप्रभुमी शेंशो खोदेशो पा लेवी, कुम्सो पाइब, लाप्चो खाल पाइब नु चढेब आन तचा डा भाग वोइश्शो बाक्त।

6 मेको नेल्ल दुम्ची ना गो यरूसलेममी मबाक्शो बाक्ती। मारदे हना गो बेबीलोन डा पिप आरता-सास्त ३२ बर्स जाक्दीम्मेनु, पिप आ बाक्तीकेमी लेत्ती। मिनू इच्छा नोले “यरूसलेम लेशा, लचा गेयीनी” दे पिप कली पुडता।

7 मिनू गो यरूसलेम जाकडानु, एल्याशीबमी तोबीयाह कली परमप्रभु आ खिं डा कोठा गेशा, मरिम्शो पशो तुइक्ताक्ड।

8 मेको तुइश्शा, शुश गाइक्ताक्ड। मिनू गो तोबीयाह आ मार मार नेल्ल मेको कोठा रे गुंइशा ताइक्ताक्ड।

9 मिनू “मेको कोठा नेल्ल कली रिम्शो सेल्चा माल्नीम” दे अरेता। मिनू गो परमप्रभु आ खिं डा बोसपुकी, चढेशो अन्न नु ब्रोव्रशो रिना पाइब थोत्रक लेंशा वोइक्तामी।

10 मिनू लेवीपुकीमी आन तचा माल्लो भाग मतशो बाक्तेकम, दे आं कली तुइक्पाइक्तेकम। मोपा मेको लेवीपुकी नु ठेयब सेल्लिक कुम्सो पाइब आन गेय प्रोंइशा, आंम आंम रूमी लशा, गेय पाइबाक्तेकम। नेहेम्याह १२:४७

11 मोपतीके गो ठेयब मुर आन कली “परमप्रभु यावे आ खिं मारदे प्रोंइनी?” दे हुइक्ताक्डमी। मिनू गो लेवी नु कुम्सो पाइब आन कली ब्रेशशा, आन गेय पपाइक्तामी।

12 मिनू यहूदा रागीम बाक्ब नेल्लेमी १० भाग डा भाग का अन्न, नक अडगुर शांबु नु तेल परमप्रभु यावे आ खिं डा मार मार वोइक्तीक कोठामी चाक्तेकम। गन्ती १८:२१

13 मिनू गो चढेब शेलेम्याह, ब्रेक्ब सादोको नु लेवी आ थर डा पेदायाह मेको सांफा कली मार मार वोइक्तीक कोठा कोत्रब मुर सेल्लामी। मिनू मत्न्याह, आ चच नु जाक्कुर आ तौ हानान कली मेको आन कली वारच पाइब सेल्लता। मेकोपुकी थमा सुइक्चा पुइसीशो मुर बाक्तेकम। मिनू मेको आन लोक्ब आन तचा डा थोत्रक गेचा माल्लेकम।

14 गो परमप्रभु यावे कली “आं परमप्रभु, इन खिं कोत्रशा नु मेकेर डा पशो रिम्शो पतीक मप्रेदीन। आं कली मिम्तीन” देंती। नेहेम्याह ५:१९

#### नाइक्तीक नाक्त

15 मेना गो का निक्शी यहूदाम बाक्बपुकीमी नाइक्तीक नाक्ती कोल खाक्शो, चेरब खुप्शो गधा आन कली मार मार कुरपा नाइक्तीक नाक्त यरूसलेममी चाक्शो तातामी। मेकोपुकीमी नाइक्तीक नाक्त अडगुर शांबु, अडगुर नु फोव्रशी यो यरूसलेमम लेयचा कली चाक्तेकम। मिनू गो मेको आन कली “गे नाइक्तीक नाक्ती मेको मलेयडीन” दे हुइक्ताक्डमी। नेहेम्याह १०:३२

16 यरूसलेममी बाक्ब टायर डा मुरपुकीमी यो डांइ नु लेयतीक मार मार थोत्रक नाइक्तीक नाक्त चाक्शा, यरूसलेममी बाक्ब यहूदी आन कली लेयतेकम।

17 मिनू यहूदा डा ठेयब मुर आन कली हुइश्शा “नाइक्तीक नाक्त गे मार मरिम्शो गेय पनी? गे नाइक्तीक नाक्त अरु नाक्त खोदेशो सेल्लिनी। गे मतुइक्तीनी?

18 मार, इन किकी पिपीमी यो मोदेशोन मपामे डा? मो दुम्तीके, इं परमप्रभुमी एको सहर नु इं कली एको श्येत गेशो ममाइ डा? मिनू मुल गे नाइक्तीक नाक्त, गेय पतीक नाक्त खोदेशो सेल्शा, परमप्रभु आ गाइक्तीक तेम्नीनी?” दे हुइक्ताक्डमी। इजीकीएल २०:१२-१३

19 मिनू “यरूसलेम डा गारो डा ठेयब लाप्चोपुकी नाइक्तीक नाक्त नां रिक्चा क्येडा डोंडती चोक्चा माल्नीम। मिनू नाइक्तीक नाक्त मनुम्म सम्म रोकचा मतुम्ब” दे माइक्तामी। मिनू नाइक्तीक नाक्ती मार मार थोत्रक यरूसलेममी मचाक्गमेक्ल, दे आंम आंम गेय पाइब का निक्शी आन कली लाप्चोपुकी खाल पचा कली वोइक्तामी।

20 मिनू नाक्दो मेको मार मार ग्याप्ब लेयबपुकीमी यरूसलेम मेर नां सोंइक्ताकम। का निक्शी खेयप मोदेशो पाम्तेकम।

21 मिनू गो मेको आन कली “मारदे नाइक्तीक नाक्त गारो आ डोंडती उड नां सोंइदीनी? गे लेंशा मो पाइतीनी हना, इन कली मो मप्रोंइन्नी” दे हुइक्ताक्डमी। मेको नोले सुइ मुर नाइक्तीक नाक्ती मेकेर मजाकम।

22 मिनू गो लेवी आन कली ब्रेशशा “आंम कली ठीक सेल्सीने। नाइक्तीक नाक्त परमप्रभु यावे के बाक्ब, दे मानेचा कली ठेयब लाप्चोपुकी खाल पथ बाक्कीन” दे माइक्तामी। मिनू गो “आं परमप्रभु, आं ओदेशो पशो यो मिम्तीन। मिनू इन ठेयब नु गेना हना यो दाक्तीके कोंइदीनी” देंती।

#### अर्को रागी डा मीश चाक्शो

23 मिनू मेना यो गो अश्दोदी, अम्मोनी नु मोआबी मीश आन कली चाक्ब यहूदी आन कली गुम्तामी।

24 मेको आन आलपुकीमी का निक्शी अश्दोदी लोत्र पाइबाक्तेकम। यहूदी आन लोत्र मजोक्थु, अर्को रागी डा मुर आन लोत्र पाइबाक्तेकम।

25 मिनू गो मेकोपुकी नु जिशा, सराप पाइश्शा, का निक्शी आन कली तुप्शा, आन चां रोकताक्डमी। मिनू मेको आन कली परमप्रभु आ नेंमी लोत्र पाइक्तामी। “गे इन तमीपुकी मेको आन तौ कली गेतीनी नु आन तमी इन तौ आन कली चाक्तीनी हना, आंइ कली खतम दुम्पाइक्तीनी” देंती। ब्यवस्था ७:३

26 मिनू “इस्राएल डा पिप सोलोमनमी मोदेशो मीश चाक्शा पाप पवा, ममाइ? शुश रागी आन दातेमी मेको खोदेशो पिप सुइ मबाक्म। मिनू परमप्रभुमी मेको कली दाक्शा, इस्राएली नेल्ल आन पिप सेल्लो बाक्त। मोदेशो बाक्त हना यो, अर्को रागी डा मीश मुरपुकीमी मेको कली पाप पपाइशो बाक्तेक्म। १ राजा ११:३-८

27 मिनू मार, गोपुकीमी इन लोत्र नेशा, इन खोदेशो पा इ परमप्रभु कली शुश मरिम्शो पा, अर्को रागी डा मीश चाक्नीनी?” दे हुइक्ताक्डमी।

28 मिनू नेल्ल क्येडा ठेयब चढेब एल्याशीब आ चच, येहो-यादा आ तौमी होरोनी सान्बल्लत आ तमी का चाक्शो बाक्त। मोपतीके गो मेको कली आं डोंइती रे गुंइशा खेरता। नेहेम्याह २:१०, १९; नेहेम्याह १२:१०

29 “आं परमप्रभु, मेकोपुकीमी इन कली चढेतीक गेय नेल्ल मरिम्शो सेल्लेक्म। मोदेशो पा मेकोपुकीमी चढेब नु लेवी आन पशो कबल प्रोंइतेक्म। मेको मिम्तीन” देंती।

30 मिनू गो मेको आन कली अर्को रागी डा मारेइ मारेइ रे ठीक सेल्लतामी। मिनू गो चढेब नु लेवी आन पचा माल्लो गेय लेशा पपाइक्तामी। गन्ती २५:१२-१३; मलाकी २:८

31 मिनू परमप्रभु आ खिं कली शी नु नेल्ल क्येडा डोंइती सिशो फल चाक्चा आ पबर्म लोत्रसी गारपाइक्ता। मिनू गो “आं परमप्रभु, आं पशो मिम्शा, आं कली रिम्शो पाइय्यीनी” देंती।

## एस्तर

**ब्रेक्ब मुर:** ब्रेक्ब मुर सु बाकमे, मेको मतुंडसीब देंनीम। तन्न मोरदैकैमी एस्तर आ पर्वम नेल्ल ब्रेक्बो बाक्ब, देंनीम। एस्तर ९:२० का निकशी मुरुम “एज़ाम ब्रेक्बो बाक्ब” देंनीम।

**गेना डा लोव:** इस्राएलीपुकी ग्याइशशा बेबीलोन लाइक्चा पुंडसीशो नोले जेरुब-बाबेल नु इस्राएली यरूसलेम लेशशो बाक्तेक्म। मेको आन दातेमी एज़ा यो बाक्त। एको ५३६-४५८ बि. सी. डा लोव बाक्ब। मेना एज़ा नु नेहेम्याह यरूसलेम सहरमी गेय पशो बाक्ताक्स। हागै नु जकरिया यो बाक्सा बाक्त। मेना एस्तर आ किताब ब्रेक्बो बाक्त।

**मारदे ब्रेक्बो:** एको किताब परमप्रभुमी आ मुर आन कली दाक्शा, श्येत रे प्रोंइशो आ पर्वम कोंइशा ब्रेक्बो बाक्ब। मेना रे यहूदीपुकीमी पुरीम चाड मानेनीम। मेको पुरीम चाड एस्तरमी यहूदी आन कली श्येत रे प्रोंइशो आ पर्वम मिन्तीक चाड का बाक्ब।

पिप अहासूरस आ ठेयब दुम्तीके

1 एको लोव नेल्ल अहासूरस माइशशो पिप आ पालाम दुम्शो लोव बाक्ब। अहासूरसमी भारत रे एथीयोपीया माइशशो कृश रागी सम्म पा १२७ ओटा रागी आन कली सासन पाइब बाक्त।

2 मेना मेको पिप अहासूरसमी आ राज्य डा सुसा दरवारमी आ ठेयब निन्तीकेमी निशशा सासन पाप्तु।

3 मिनु मेको पिप दुम्शो ३ बर्स जाक्दीम्मेनु, आ हुकुम पाइब मुर नु सरकार डा गेय पाइब नेल्ल आन कली भोज का गेप्तु। मेको भोजमी मादी नु पारसी आन ठेयब मुर नु मेको रागी डा हुकुम पाइब नेल्ल जाक्बो बाक्तेक्म।

4 मिनु मेको पिपमी १८० नाक्त सम्म आ राज्य डा शुश शोंप, आ दारस नु आ ठेयब दुम्तीके मेको आन कली कोंइताक्मी।

5 मेको कोंइतीक नाक्त नुम्मेनु, मेको पिपमी आ दरवार डा ठेयब नु आइक्च मुर नेल्ल आन कली ठेयब भोज गेप्तु। मिनु मेको भोज सुसा दरवार डा लाडगाम ७ नाक्त सम्म दुम्त।

6 मिनु पिप आ दरवार नेल्ल दारपाइक्चा कली बुश नु नीलो वा क्याइशशो बाक्तेक्म। मेको वापुकी नीलो झुम्का पाइशशो दारशो मलमल के बाक्तेक्म। मिनु मेको वा आन कली बुश नु नीलो डोरी पाइशशो, चांदी के ग्याइक्तीकेमी शुश क्येट लाइब बुश फुल्लु के थामम क्युकशो बाक्तेक्म। मेकेर सुन नु चांदी के सेल्शो निन्तीके बाक्तेक्मे। मेको बुटा आप्शो शुश क्येट लाइब बुश, गिगी नु क्येर फुल्लुम साप्शो खप तारी वोइशशो बाक्तेक्म।

7 मिनु मेको मुर आन कली सुन के कचौरामी अडगुर शांबु तूचा गेशो बाक्तेक्म। मेको कचौरा का का पा अर्को अर्को खाल डा बुटा आप्शो बाक्तेक्म। मिनु पिपमी मेको आन कली शुश अडगुर शांबु तूचा गेप्तु।

8 मेको नेल्लेमी आंम आंम दाक्बो पा तूचा ताम्तेक्म। मारदे हना पिपम “नेल्ल आन कली आंम दाक्बो तूचा गेन” दे आ शांबु खेप्ब आन कली माइशशो बाक्त।

पिपीम वास्तीमी पिप कली मटिशो

9 मिनु वास्ती पिपीममी यो दरवार डा मीश मुर आन कली पिप अहासूरस आ दरवारमीन ठेयब भोज का गेप्तु।

10 मेको भोज दुम्शो ७ नाक्तीमी पिप अहासूरस अडगुर शांबुम रोंइशा, पिपम आ दरवार डा ७ जना शुश अधिकार पाइशशो गेय पाइब मेहूमान, बिश्था, हारबोना, बिग्थान, आबाग्था, जेथार नु कारकस आन कली

11 “पिपीम वास्ती कली आ सिरपेच गुम्सीशा, मुर नेल्ल नु हुकुम पाइब आन डोंइती आ दारस कोंइचा कली चाक्कीन” दे अरेशा सोइक्ताक्व। मारदे हना मेको पिपीम शुश दारशो बाक्त।

12 तन्न पिपीममी पिप आ सोइशशो मुर आन देशो मबिस्से। मोपा वास्तीम मबिश्शो तशा, मेको पिप हिंचा डा पा गाइक्ताक्व।

पिपीम वास्ती कली सजाइ गेशो

13 मिनु पिपमी “मुल मार पचा” दे जोक्ब तुइक्ब नु लोव पाप्तु। मेको जोक्ब तुइक्बमी डोंइती रे पिप कली अर्ती गेबाक्मा बाक्त। मिनु ऐन कानुन जोक्ब तुइक्ब नेल्लेमी “मुल मार पचा” दे सल्ला पाम्तेक्म।

14 मेको पिप कली सल्ला गेब सु बाक्मा बाक्त, देशा हना, पारसी नु मादी डा ७ जना हुकुम पाइब कारशेना, शेथार, अदमाथा, टारशीश, मेरेस, मारसेना नु मेमुकान बाक्मा बाक्त। मेकोपुकी पिप आ डोंइती बाक्शा, नेल्ल क्येडा ठेयब अधिकार पा गेय पाइब बाक्तेक्म।

15 मिनु पिप अहासूरसमी मेको आन कली “आं गेय पाइब रे पा आं सोइशशो लोव पिपीम वास्तीमी मटीव। मोपतीके मेको कली ऐन कानुन कोव्रशा मार पचा?” दे हिल्लो पाप्तु।

16 मिनु मेमुकानमी पिप नु आ सरकार डा हुकुम पाइब नेल्ल आन डोंइती “पिपीम वास्तीमी पिप कली ला ममाइ, तन्न हुकुम पाइब नेल्ल आन कली नु पिप अहासूरस आ रागी डा मुर नेल्ल आन कली मरिश्शो पाप्तु।

17 मुल पिपीम आ मरिश्शो पशो मीश मुर नेल्लेमी तुइक्नीम। मोपतीके मेकोपुकीमी यो आन वोंइश कली आइक्च सेल्शा मटीनीम। मेकोपुकीमी ‘पिप अहासूरसमी पिपीम वास्ती कली आ बाक्तीकेमी ब्रेत्ताक्व, तन्न पिपीममी मटीव’ दे लोव पाइनीम।

18 मिनु पिपीम आ पशो आ पर्वम नैब मादी नु पारसी डा सासन पाइब आन मीश मुरपुकीमी, पिप आ सासन पाइब नेल्ल आन कली मुलाक्त डा लोव पाइनीम। मिनु मीश मुरुमी आन वोंइश आन कली मटिथु, शुश जिचा पोक्नीम।

19 मोपतीके गे दाक्नीनी हना, पिपीम वास्ती गे इन डोंइती गेनायो जाक्ने मचबल। मिनु आ पिपीम दुम्तीके क्याग्शा, अर्को मेको क्येडा दारशो मीश आल कली पिपीम सेलीन। मेको इन सेल्शो कानुन पारसी नु मादी आन कानुनमी यो गेनायो मक्याम्सीचा डा पा ब्रेक्पतीन। दानीएल ६:९

20 मिनु एको पिप आ ब्रेक्पाइशो लोव्र एको राज्य नेल्लेमी नेंतेक्म हना, ठेयब नु आइक्च मीश मुर नेल्लेमी आन वोंइश कली मान पाइनीम” देंत।

21 मिनु मेमुकान आ लोव्र पिप नु सासन पाइबपुकीमी “रिम्शो बाक्ब” दे दाक्ताक्म। मिनु पिपमी मेमुकान आ देशो खोदेशो पाप्टु।

22 मिनु मेकोमी आ रागी नेल्ले डा मुर आन आंम आंम ब्रेक्स नु आंम आंम लोव्रमी “खिं डा ठेयब वोंइश मुरुमी आंम खिं डा मुर आन कली अधिकार पचा माल्नीम” दे मुर नेल्ल आन जात जात डा ब्रेक्स नु आंम आंम लोव्रम ब्रेक्पाइशो सोइक्ताक्व। एस्तर ३:१२; एस्तर ८:९

## 2

मीश आल खुप्शो

1 मिनु पिप अहासूरस आ गाइक्चा बेक्म नोले मेकोमी वास्ती आ पशो आ पबर्म नु मेको आ पबर्म ब्रेक्शो ब्रेक्स कली मिम्ताक्व।

2 मिनु पिप आ गेय पाइबपुकीमी पिप कली “इन कली दारशो नु कन्ने मीश आल माल्पतीन।

3 इन राज्य डा, रागी नेल्ल डा दारशो नु कन्ने मीश आल चाक्चा, दे मेकेर डा ठेयब मुर आन कली लोव्र सोइक्तीन। मिनु मेको मीश आल आन कली सुसा दरवार डा मीश मुर आन बाक्तीकेमी चाक्चा माल्नीम। मिनु मेको मीश मुर आन कली कोव्रब, इन गेय पाइब हेगे आ जिम्मामी वोइक्चा माल्नीम। मिनु मेको मीश आल आन कली खेक्तीक नु ब्रोवशो रिना पाइक्तीक मार मार यो गेचा माल्नीम।

4 मिनु गे तेको मीश आल कली दाक्नीनी, मेको कली वास्ती आ पा डा पिपीम सेलीन” देंतेक्म। मिनु पिपमी मेको लोव्र दाक्ताक्व। मिनु मोदेशो पाप्टु।

सुसा दरवारमी

5 मिनु सुसा दरवारमी मोरदेकै माइशो यहूदी मुर का बाक्माक्त। मेको बेन्यामीन थर डा याइर आ तौ, शिमेइ आ चच, कीश आ युइ बाक्माक्त। १समुएल ९:१

6 बेबीलोन डा पिप नेबुकदनेसरमी यरूसलेम रे यहूदा रागी डा पिप येकोन्याह नु ग्याइशो लाइक्चा पुंइसीशो आन दातेमी मोरदेकै आ किकी पिपी कीश यो बाक्माक्त। २राजा २४:१५

7 मिनु मोरदेकैमी आ बकान्छा आ तमी हदस्सा कली आ तमी खोदेशो सेल्शा, थुल्शा वोइशो बाक्माक्त। मेको के आ आम आफ निम्फा बेक्शो बाक्ताक्स। मेकोमी हदस्सा कली एस्तर नें यो वोइशो बाक्माक्त। एस्तर रिम्शो नु दारशो मीश आल बाक्माक्त। मेको आ आम आफ बेक्सा नोले मोरदेकैमी मेको कली आंम तमी खोदेशो पा दाक्शा, थुल्शो बाक्माक्त। एस्तर ८:१

एस्तर दरवारम लाइक्चा पुंइसीशो

8 मिनु पिप आ गुंइशो ब्रेक्स नेंन्मे नोले, शुश मीश आल आन कली सुसा दरवारमी चाक्तेक्म। मिनु एस्तर कली यो अरु मीश आल नु काथा मीश मुर कोव्रब हेगे कली जिम्मा गेम्तेक्म।

9 मिनु एस्तर कली तशा, मेको हेगे थाम्पान ग्येरसाक्व। मिनु मेकोमी एस्तर कली दारपाइक्चा कली ग्योम्तीक, किप्तीक, खेक्तीक नु रिम्शो जचा थोव्रक नेल्ल गेप्टु। मिनु पिप आ दरवार डा ७ जना नेल्ल क्येडा रिम्शो गेय पाइब मीश आल यो एस्तर कली गेप्टु। मिनु मीश मुर आन कली वोइक्तीक खिंमी एस्तर नु आ कली वारच पाइब आन कली नेल्ल आन क्येडा रिम्शो नु गारशो बाक्तीक गेप्टु।

10 मिनु डोंइती मोरदेकैमी एस्तर कली “इ जात नु इ किकी पिपी सु बाक्नीमी, मेको मशोव्रडो” देशो बाक्तीके, एस्तरमी सुइ आन कली मेको लोव्र मशोव्रशो बाक्त।

11 एस्तर कली दोदेशो बाक्मे? मार पवा, दे तुइक्चा कली मोरदेकै नाक्त किंत किंत मेको मीश आल बाक्तीक खिं आ लाडगा रे एर ओंथ गाक्तीक पाइबाक्त।

12 पिप अहासूरस आ बाक्तीकेम लचा क्येडा डोंइती मीश आलपुकीमी ६ महिना सम्म मूर तेल खेक्सीशा, अर्को ६ महिना ब्रोवशो रिना पाइशो तेल नु दारपाइक्तीक मार मार खेक्सीशा, १२ महिना आंम कली दारपाइक्तीक गेय पचा माल्बाक्तेक्म। मोपा १२ महिना जाक्दीम नोले पिप अहासूरस आ बाक्तीकेमी मीश आल का का पा लचा माल्बाक्तेक्म।

13 मिनु मीश आलपुकी पिप आ दरवारम लमानु, मेको आन बाक्तीके रे मार मार लाइक्चा दाक्ते मेको लाइक्चा ताइबाक्तेक्म।

14 मोपा मेकोपुकी नाक्दो का का पा पिप आ बाक्तीकेम लशा, सुनी मेको अरु मीश आल बाक्तीक खिं डा कोव्रब शा-आशगज माइशो पिप आ गेय पाइब आ जिम्मामी बाक्चा कली लेत्चा माल्बाक्तेक्म। मिनु पिपमी मेको कली दाक्शा आ नें थिशा मब्रेत्ता सम्म लेशा पिप आ बाक्तीकेम लचा मताइबाक्तेक्म।

एस्तर पिपीम दुम्शो

15 मिनू मोरदेकै आ बकान्छा अबीहेल आ तमी एस्तर पिप आ बाक्तीकेम लतीक पालो जाकत। एस्तर पिप आ बाक्तीकेम लमेनु, मीश आल आन कली कोव्रब ठेयब मुर हेगोम मार मार गेवा, मेको ला लाइशशा लमाकत। अरु मारेइ मपुंडदा बाकत। सु सुमी एस्तर कली तामे, मेको नेल्लेमी एस्तर कली दाकत्ते बाकत।

16 मिनू एस्तर कली पिप अहासूरस आ बाक्तीकेम लदमेनु, अहासूरस पिप दुम्शो ७ बर्स १० महिना जाकदीशो बाकमाकत। मेको महिना कली तेबेथ महिना देंबाक्तेकम।

17 मिनू पिपमी मीश आल नेल्ल आन क्येडा एस्तर कली दाक्ताकव। मिनू अरु आन क्येडा मेको कली योव्रतु। मिनू एस्तर कली पिपीम आ सिरपेच गुप्शा, वास्ती आ पा डा आ पिपीम सेल्लु।

18 मिनू नोले पिपमी एस्तर कली मान पचा कली हुकुम पाइब नेल्ल नु गेय पाइब आन कली ठेयब भोज का गेपु। मिनू रागी नेल्ल डा मुर आन कली गेय मपथु बाक्चा गेशा, पिपम गेचा माल्शो मुर आन कली शुश इनाम गेम्तीमी।

मोरदेकैमी पिप कली प्रोइशो

19 मेको कन्ने मीश आल आन कली लेशा पिप आ दरवारमी चाकामेनु, मोरदेकै यो दरवार डा ठेयब लाप्चोम बाक्शो बाकत।

20 मोरदेकै आ देशो खोदेशो पा एस्तरमी आ किकी पिपी मार जात डा बाक्मा, सु बाक्मा सुइ आन कली मशोव्रशो बाकत। मेकोमी आल बाक्म ना मोरदेकै कली टिशो खोदेशो पा, ठेयब दुम्शा यो टिपु।

21 मेना मोरदेकै पिप आ दरवार डा ठेयब लाप्चोमी बाक्शो बाकत। मिनू सु जाकम, दे कोव्रब, पिप आ ठेयब गेय पाइब बिग्रथान नु तेरेश माइशशो मुर चुरशा गारशा, पिप अहासूरस कली साइक्चा लोव्र पाम्से बाकत। एस्तर ६:१-२

22 मिनू मेको आस लोव्र मोरदेकैमी नेशा तुइशशा, एस्तर कली शेंदा बाकत। मिनू एस्तरमी मोरदेकै आ नेमी पिप कली लोव्र नेल्ल शोव्रतु।

23 मिनू मेको लोव्र हिल्लो हिकसी पामेनु, थमा बाकत, दे पिपमी तुइक्ताकव। मिनू मेको ठेयब गेय पाइब आस कली थामम क्युक्शा साइक्तेकम। मिनू नोले पिप आ डोंइती मेको लोव्र नेल्ल इतिहास ब्रेक्तीक किताबमी ब्रेक्ताकम।

### 3

हामान मोरदेकै नु गाइशशो

1 मिनू नोले पिप अहासूरसमी अगाग आ मुर हम्मदाता आ तौ हामान कली आ मान बारपाइकतु। मिनू मेको कली हुकुम पाइब नेल्ल आन क्येडा ठेयब सेल्शा, ठेयब मान गेशा वोइकतु। १सामुएल १५:३२; प्रस्थान १७:१४-१६

2 मिनू पिप आ लोव्र टिशा, दरवार डा गेय पाइब नेल्लेमी दरवार डा ठेयब लाप्चोमी हामान आ डोंइती बाप्शा पोक्च थेक्शा, सेउ पाम्तेकम। तन्न मोरदेकैमी मोदेशो पा पोक्च थेक्शा, सेउ मपावो। मत्ती ४:९-१०

3 मिनू पिप आ दरवार डा ठेयब लाप्चोम गेय पाइबपुकीमी मोरदेकै कली “गे मारदे पिप आ देशो मटीनीनी?” दे हिल्लो पाम्तेकम।

4 मिनू नाकत किंत किंत मेकोपुकीमी मेको कली मो पा लोव्र पाम्तेकम। तन्न मोरदेकैमी मेको आन लोव्र का यो मनेन। मोदेशो पशो हामानम फाल्ने चाप्बाकम कों मचाप्बाकम, दे कोव्रचा कली, मेकोपुकीमी मेको लोव्र हामान कली शोव्रतेकम। मारदे हना मोरदेकैमी मेको आन कली “गो यहूदी नड” देशो बाकत।

5 मिनू मोरदेकैमी आ डोंइती बाप्शा, सेउ पा मान मपशो तशा, हामान साप्पा चुरमाकत।

यहूदी नेल्ल साइक्चशो

6 मिनू हामानमी मोरदेकै आ जात, आ लोक्ब सु बाक्मा, दे तुइक्ता नोले, मेको कली ला ममाइ, तन्न पिप अहासूरस आ राज्य डा यहूदी, मोरदेकै आ जात डा मुर नेल्ल आन कली खतम सेल्लतीक लां माल्लु।

7 मिनू अहासूरस पिप दुम्शो १२ बर्स दुम्शा, आ डोंइती डा निसान माइशशो महिनामी हामान आ अर्ती गेब मेको नु गारशा, यहूदी आन कली गेना साइक्चा, दे हामान आ डोंइती जोक्ब तुइक्ब आन कली साहीत कोव्रपाइकतु। मेको साहीत कोव्रतीके कली पुर देंतेकम। मिनू मेको साहीत १२ महिना नोले अदार महिनामी व्रूत। प्रस्थान १३:४; प्रस्थान १२:२; एस्तर ९:२४

8 मिनू हामानमी पिप अहासूरस कली “इन राज्य डा रागी नेल्लेमी मुर आन दातेमी जात का डा मुर ब्रशा बाक्शो बाक्नीम। मेकोपुकी अरु मुर रे ब्राशा बाक्नीम। मिनू मेको आन पतीके गो नु मगारचा डा बाक्ब। मेकोपुकीमी इन ऐन कानुन मटीनीम। मिनू गेमी मेको आन कली मोदेशो पचा गेचा मदुम्ब। ब्यवस्था ४:५-८

9 मोपतीके गे दाक्नीनी हना, मेको आन कली खतम सेल्शा, दे ब्रेक्स का ब्रेक्पतीन। मिनू गो नोले मेको पिप आ क्येट वोइक्तीके डा गेय पाइब आन कली १० हजार टलेन्ट चांदी पिप आ क्येट वोइक्तीकेमी वोइक्चा कली गेनुड” देंत। टलेन्ट का चांदी ३४ किलो बाक्ब। एस्तर ४:७

10 मिनू पिपमी आ छाप पाइशशो औंटी पुइशशा, यहूदी आन जोरी सत्रु अगाग आ मुर हम्मदाता आ तौ हामान कली गेपु।

11 मिनू पिपमी हामान कली “मेको चांदी नु मेको मुरपुकी इन केन बाक्नीम। गे मार दाक्नीनी मेको पने चाप्नीनी” देंत।

12 मिनू डोंइती डा महिना डा १३ नाक्तीमी पिप आ ब्रेक्स पाइब आन कली ब्रेक्ताक्मी। मिनू हामानमी देशो खोदेशो पा रागी नेल्ल इन सरकार डा गेय पाइब नु जात जात डा मुर आन ठेयब मुर नु रागी रागी डा हुकुम पाइब आन कली मेको

मुर नेल्ल आन जात जात डा ब्रेक्स नु आंम आंम लोत्रम ब्रेक्पदा बाक्त। मेको ब्रेक्सम पिप अहासूरस आ छाप थोकशा, मेको आ नेमी ब्रेक्शो बाक्त।

13 मिनु मेको सोइश्शो मुरपुकीमी मेको ब्रेक्स रीब रीब पा पिप आ रागी डा मुर नेल्ल आन कली सोइक्वतमे बाक्त। मेको ब्रेक्समी मार ब्रेक्शो बाक्त देशा हना, अदार माइश्शो महिना डा १३ नाक्त, काबुमीन यहूदी नेल्ल आन कली साइक्वा माल्नीम। वोंइश आल रे खाल्पा सम्म नु मीश मुर नु आल ब्रेप्च नेल्ल आन कली यो साइक्वा माल्नीम। मिनु यहूदी आन शोंप नेल्ल रोइक्वा माल्नीम, दे ब्रेक्शो बाक्त।

14 मिनु मेको नाक्त कली सासीशा बाक्वा, दे जात नेल्ल डा मुर आन कली तुइक्पाइक्वा, दे लेंशा ब्रेक्स का ब्रेक्शा, रागी डा मुर नेल्ल आन कली का का पा गेशा, उरदी पचा कली सोइक्ताक्म।

15 पिपम मेको लोत्र चोत्रथ लाइक्ब आन कली रीब रीब पा सोइक्ताक्व। मिनु सुसा दरवारमी यो मेको लोत्र ब्रापाइक्तेक्म। मो पामे नोले पिप नु हामान तूचा कली निस्साक्स। तन्न सुसा सहरम चहिं खाल बाल बोक्त।

## 4

यहूदी आन कली प्रोंइचा माल्शो

1 मिनु मोरदेकैमी मेको लोत्र नेल्ल तुइश्शा, आ वा खाक्तु। मिनु अरन्डी फेक्शा, पुलु मोंइसीशा, ठेयब सेंदामी रोंका पना पन सहरम हिरसाक्व।

2 मिनु मोपा दरवार डा ठेयब लाप्चो आ डोंइती जाक्त। तन्न अरन्डी फेक्शो सुइ मुर दरवार डा ठेयब लाप्चो रे ओत्रचा मताइबाक्तेक्म।

3 पिप आ सोइश्शो मेको लोत्र नेंशा, रागी नेल्ल डा यहूदी माइजा बाक्शा, डाक्शा, रोंका पाम्तेक्म। मिनु मेको आन दाते डा शुश मुर अरन्डी फेक्शा, पुलु तारी निस्साक्म।

4 मिनु पिपीम एस्तर आ गेय पाइबपुकी जाक्शा, एस्तर कली मेको लोत्र शोत्रतेक्म। पिपीममी मेको नेंशा, शुश सुर्ता पाप्तु। मिनु “अरन्डी पुइश्शा वा फेक्सीन” दे मोरदेकै कली वा सोइक्ताक्व। तन्न मोरदेकैमी मेको वा ताकने मबिस्से।

5 मोपतीके एस्तरमी पिप आ वोइश्शो आ गेय पाइब हथाक कली ब्रेशा “मोरदेकै कली मार श्येत दुम्मे? मिनु मेको श्येत दोपा दुम्मे?” दे हिल्लो पथ सोइक्ताक्व।

6 मिनु हथाक पिप आ दरवार डा ठेयब लाप्चो आ डोंइती ठेयब लाइगामी मोरदेकै कली गुमथ लत।

7 मिनु मोरदेकैमी आंम कली मार दुम्मे, मेको नेल्ल हथाक कली देंत। मिनु हामानमी यहूदी नेल्ल आन कली साइक्वा, दे पिप आ क्येट वोइक्तीकेमी दोशो क्येट वोइक्वा, दे लोत्र पवा, मेको यो हथाक कली शेंताक्व। एस्तर ३:९

8 मिनु मोरदेकैमी सुसामी यहूदी आन कली साइक्वा, दे पिप आ लोत्र ब्रेक्शो ब्रेक्स यो एस्तर कली कोंइशा, तुइक्पाइक्वा, दे हथाक कली गेप्तु। मिनु मेकोमी हथाक कली “आंम मुरुम शिशी तामेक्ल, दे पिप कली नमो सिमो पचा कली एस्तर पिप आ बाक्तीकेमी लचा माल्ब देनीन” देंत।

9 मिनु हथाक एस्तर आ बाक्तीकेम लशा, मोरदेकै आ देशो नेल्ल देंत।

10 मिनु एस्तरमी हथाक कली मोरदेकै आ बाक्तीकेमी सोइश्शा,

11 “पिप आ गेय पाइब नु रागी डा मुर नेल्ल पिपीमी मब्रेत्थ, वोंइश मुर नु मीश मुर सुइ पिप आ डोंइती लाम्तेक्म हना, साइक्वा पुंइसीनीम। मेको ऐन कानुनम ब्रेक्शो बाक्ब। तन्न पिपीमी आ राज दन्ड मेको मुर गे दिंशा कोइताक्व हना ला, मेको मुर ब्राइंचा ताइब। मिनु गो ३० नाक्त सम्म मब्रेस्सीशो बाक्नुड” दे देंचा कली सोइक्ताक्व। एस्तर ५:२; एस्तर ८:४

12 मिनु मोपा हथाकमी मोरदेकै कली एस्तर आ सोइश्शो लोत्र नेल्ल शोत्रनु।

13 मिनु मोरदेकैमी हथाक कली पिपीम कली “गे पिप आ दरवारम बाक्ते हना यो, यहूदी नेल्ल आन दातेमी गे ला ‘साइक्वा मपुंइसीनुड’ दे ममिम्तो।

14 मो देशो दुम्मेनु, गे सिक्सी पा बाक्तीनी हना, यहूदी आन कली वारच पा प्रोंइचा कली अकों मुर रे यो जाक्ब। तन्न गे नु इं आफ आ खिं डा मुरपुकी चहिं खतम दुम्चा माल्नीम। गे यहूदी आन कली प्रोंइचा कली पिपीम दुम्शो बाक्नेवे, को?” दे एस्तर कली माइक्वा, दे हथाक कली सोइक्ताक्व। उत्पत्ती ४५:११

यहूदीपुकी माइजा बाक्शो

15 मिनु एस्तरमी मोरदेकै कली

16 “सुसा सहरमी लशा, यहूदी नेल्ल आन कली आं पबंम माइजा बाक्वा कली पुक्कीन। नाक्त सां नु नाक्दो सां सम्म मारेइ मजने, मारेइ मत्तडीन। मिनु गो नु आं गेय पाइबपुकी यो गे खोदेशो पा माइजा बाक्नीकी। मिनु में नोले ऐन कानुनमी मंगेशो बाक्त हना यो, गो पिप आ बाक्तीकेम लाइनुड। गो खतम दुम्ती हना, यो दुम्डल” दे लोत्र सोइक्ताक्व।

17 मिनु मोरदेकै लशा, एस्तर आ देशो खोदेशो पाप्तु।

## 5

एस्तर पिप आ डोंइती जाक्शो

1 मिनु नाक्त सां नोले एस्तरमी पिपीम आ फेक्तीके फेक्साक्व। मोपा लशा, पिप आ दरवार आ लाइगाम बाक्शा, खिं गे कोत्रशा, राप्त। मेना पिप आ खिंमी आ ठेयब निक्तीकेमी निश्शा, लाप्चो गे कोत्रशा, बाक्शो बाक्त।

2 मिनु पिपीमी पिपीम एस्तर कली दरवार डा लाइगामी राप्शा बाक्शो तशा, मेको कली शिशी पा, आ शेशा बाक्शो राज दन्ड एस्तर गे दिताक्व। मिनु एस्तर पिशा, मेको कोक्के आ डर थिप्तु। एस्तर ४:११

3 मिनू पिपमी मेको कली “पिपीम एस्तर, मारदे जाक्नी? गे मार माल्नीनी? आं रागी उडक्थ इन कली गेचा माल्ताक्यी हना यो, मेको इन कली गेनन्नी” दैत। मर्कुस ६:२३

4 मिनू एस्तरमी “हजुर, गे दाक्नीनी हना, मुल नाक्दो गो इन कली सेल्शो भोजमी गे हामान नु काथा जाक्कीने” दैत।

5 मिनू पिपमी एस्तर आ देशो पचा कली हामान कली ब्रेत्वा कली मुर सोडक्ताक्व। मिनू पिप नु हामान एस्तरमी सेल्शो भोज जथ लाम्ताक्स।

6 मिनू पिपमी अडगुर शांबु तूशा, एस्तर कली “गे मार दाक्नीनी? गो इन कली गेनन्नी। आं रागी उडक्थ पुंडतीनी हना यो, गो मेको इन कली गेनन्नी” दैत।

7 मिनू एस्तरमी सेउ पा “गो लोत्र का पुंड्या दाक्नुड।

8 मिनू गो इन शिशी ताता हना, गे आं पुंडशो गेचा दाक्ताक्नी हना, हजुर, दीसा यो गे निक्शी मुलाक्त डा खोदेशो पा, आं सेल्शो भोजम जाक्कीन। मेना गो इन हिल्लो पशो लोत्र लेत्तुड” दैत। एस्तर ६:१४

हामानम आंम कली ठेयब सेल्सीशो

9 मिनू मेको नाक्त हामान शुश ग्येरसीशा, आ थुं जाव बोरपा लत। तन्न हामानमी मोरदेकै कली दरवार डा ठेयब लाप्चोमी बाक्शो नु आ डोंइती बाप्शा मान मपशो तशा, चुरशा लां मताव।

10 मो दुम्त हना यो, हामानमी आ चुरशो मकोडथु, आ खिं लत। मिनू आ खिं जाक्दीशशा, आ वारच आन कली नु आ मीश जेरेश कली ब्रेत्थ सोडक्ताक्व।

11 मिनू मेको आन कली “आं शोंप, आं थेरशो रू नु शुश तौ बाक्नीम। मिनू पिपमी सासन पाइब नु गेय पाइब नेल्ल आन क्येडा आं कली शुश मान गेशो बाक्ब” दे आ ने बोरपाइशशा लोत्र पाप्तु।

12 मिनू हामानमी “मोशो ला ममाड, पिपीम एस्तरमी सेल्शो भोजमी आं कली ला ब्रेत्ताक्यी। मिनू दीसा यो पिप नु लचा कली आं कली ब्रेशो बाक्ब।

13 तन्न मेको यहूदी मोरदेकै कली दरवार डा लाप्चोम बाक्शो तडानु, आंम कली मारेड खोड मलाक्ड” दैत।

14 मिनू आ मीश जेरेश नु आ वारच नेल्लेमी “५० कुबीत लाइशशो थाम का युक्तीने। मिनू सुनी कना मोरदेकै कली मेकेर क्युक्शा साइक्चा कली पिप नु लोत्र पने। मिनू ग्येरशा, पिप नु भोज जथ लने” दैतेक्म। मिनू हामानमी मेको लोत्र दाक्ताक्व। मिनू मेकोमी मुर कली क्युक्शा साइक्तीक थाम का युक्पाइक्तु। कुबीत का आधा मिटर खोदेशो बाक्ब।

## 6

मोरदेकैमी ठेयब मान तशो

1 मिनू मेको नाक्दो पिप इप्चे मचब। मिनू पिपमी इतिहास ब्रेक्शो किताब चाक्पाइक्तु। मिनू मेको पढेपपाइशशा नेंतु। एस्तर २:२१-२२

2 मिनू मेको किताबमी पिप आ लाप्चोम बाक्ब बिग्थान नु तेरेश माइशशो ठेयब लाप्चोम गेय पाइब निक्शीमी चुरशा पिप अहासूरस कली साइक्चा माल्शो लोत्र नु मोरदेकैमी पिप कली तुडक्पाइशशो आ परबम ब्रेक्शो बाक्त।

3 मिनू पिपमी “एको ओं पशो आ परबम मोरदेकै कली मारेड मान नु दर्जा गेशो बाक्मे?” दे हिल्लो पाप्तु। मिनू मेकेर बाक्ब पिप आ गेय पाइबपुकीमी “मोरदेकै आ परबम मारेड मपशो बाक्ब” दैतेक्म।

4 मिनू पिपमी “लाडगाम सु बाक्मे?” दे हिल्लो पाप्तु। मेना हामानमी आ युक्शो, मुर कली क्युक्शा साइक्तीक थाममी “मोरदेकै कली साइक्चा गेयीनी” दे पिप कली पुंडथ लाडगामी नक जाक्शो बाक्त। एस्तर ५:१४

5 मिनू पिप आ गेय पाइबपुकीमी “हामान लाडगामी राप्शा बाक्त” दैतेक्म। मिनू पिपमी “मेको कली खिं गा ब्रेत्तीन” दैत।

6 मिनू हामान खिं गा ओत्रमेनु, पिपमी मेको कली “पिप आंमान मान गेचा दाक्शो मुर कली मार पचा माल्बा?” दे हिल्लो पाप्तु। मिनू हामानमी आ थुं थुंमी “आं डा लाक्शा, तेको मुर कली पिपमी मान गेचा दाक्बा डा?” दे मिम्ताक्व।

7 मिनू मेकोमी पिप कली “पिप सु कली मान गेचा दाक्नीनी,

8 मेको कली पिप आ डोंइती फेक्शो वा नु पिया ग्योम्सीशो पिप आ शारा चाक्पतीने। दानीएल ५:२९

9 मिनू मेको पिप आ डोंइती फेक्शो वा नु आ शारा नेल्ल आन क्येडा मान तशो मुर कली गेचा माल्ब। मिनू नेल्ल क्येडा अधिकार पाइशशो मुरुमी पिपमान मान गेचा दाक्शो मुर कली फेक्तल। मिनू मेको कली शारा डोइक्पाइशशा, सहर डा लांमी गाक्पाइक्चा माल्ब। मिनू नेल्लेमी ‘पिपमी मान गेचा दाक्शो मुर कली मार पवा, मेको कोव्रडीन’ दैना दैन हिरदमेक्ल” दैत। उत्पती ४१:४२-४३

10 मिनू पिपमी हामान कली “गे इ देशो खोदेशो पा फेक्तीक नु शारा मुल कना चाक्शा, लाप्चोम बाक्ब यहूदी मोरदेकै कली मोदेशो पावो। इ देशो का यो मखाइक्थ, पावो” दे माइक्तु।

11 मिनू हामानमी फेक्तीक वा नु शारा चाक्शा, मोरदेकै कली मेको वा फेक्शा, शाराम डोइक्पाइशशा, सहर डा लां मेर लाइशशा, आ डोंइती “पिपमी मान गेचा दाक्शो मुर कली मार पवा, मेको कोव्रडीन” दैना दैन मोरदेकै कली हिरताक्व।

12 मिनू नोले मोरदेकै पिप आ दरवार डा ठेयब लाप्चोम लेत्त। मिनू हामान चहिं मुने पा कुल सुम्शा दोरोर पा दोरशा, आ खिं लत।

13 मिनू मेकोमी आ मीश जेरेश नु आ वारच नेल्ल आन कली मार दुम्मे, मेको नेल्ल का का पा शोव्रतु। मिनू मेको आ वारचपुकी नु आ मीशेमी मेको कली “इन जोरी सत्रु मोरदेकै, यहूदी बाक्त हना, गे मेको कली मारेड पने मचाप्नीनी। मुल गे मेको आ डोंइती खतम दुम्नीनी” दैतेक्म।

14 मोपा लोत्र पना पन बाक्मेनु, पिप आ गेय पाइबपुकी जाक्शा, हामान कली पिपीम एस्तरमी सेल्शो भोज जचा कली लाइक्तेकम। एस्तर ५:८

## 7

एस्तरमी पिप कली पुंडशो लोत्र

- 1 मिनु पिप नु हामान, निम्फा पिपीम एस्तरमी सेल्शो भोज जथ लाम्ताक्स।
- 2 मिनु मेको नाक्त यो पिप अडगुर शांबु तूशा, एस्तर कली “गे मार दाक्नीनी? मेको इन कली गेनन्नी। आं रागी उइक्थ पा पुंडतीनी हना यो, गो मेको इन कली गेनन्नी” दैत।
- 3 मिनु पिपीम एस्तरमी “गोमी इन शिशी तशो बाक्ती नु गे दाक्ताक्नी हना, गो नु आं जात डा मुर आन कली साइक्चा रे प्रोनीन।
- 4 मारदे हना गो नु आं जात डा मुर नेल्ल क्याम्चा, साइक्चा नु खतम दुम्चा कली लेयसीशो बाक्नीकी। गो वाइलीम वाइल सेल्चा कली ला लेयसीशो बाक्तक हना, गो सिक्सी पा बाक्ड वा। मारदे हना मेको आइक्च लोत्रमी पिप कली मारैड श्येत मदुम वा” दैत।
- 5 मिनु पिप अहासूरसमी पिपीम एस्तर कली “मोदेशो पचा माल्ब मुर सु बाक्बा? मिनु मेको मुर ते बाक्बा?” दे हिल्लो पाप्तु।
- 6 मिनु एस्तरमी “मेको श्येत गेब, मरिम्शो मुर एको हामान बाक्ब” दैत। मिनु हामान पिप नु पिपीम आ डोंइती हिंशा, सेंदा का यो ग्रुंइने मचब।

हामानम साइक्चा पुंडसीशो

- 7 मिनु पिप चुरशा, भोज रे छुल बोक्शा, दरवार डा फू रूमी लत। हामानमी चहिं “पिपीम आ थुंमी आं कली खतम पचा मिम्ताक्ब” दे तुइश्शा, पिपीम एस्तर नु माफ पुंडचा कली आ बाक्तीक उइ बाक्त।
- 8 मिनु पिप फू रू रे लेशशा, भोज जतीक कोठाम जाक्मेनु, हामान चहिं एस्तर आ इप्तीकेम बाप्शा, आ नेक्था गुर ब्वेशा बाक्शो ताप्तु। मिनु पिपीम ठेयब सेंदामी “मार, मेकोमी पिपीम कली आं डोंइती थिचा मिम्बा?” दैत। मिनु पिपम मोदेशो देंम नोले, पिप आ गेय पाइबपुकीमी हामान आ कुल सुम्तेकम।
- 9 मिनु पिप नु बाक्शा, गेय पाइब आन दाते डा हारबोना माइश्शो कामी “हामान आ खिं आ नेक्था इन कली रिम्शो पाइब नु प्रोंइब मोरदेकै कली क्युक्शा साइक्चा कली ५० कुबीत लाइश्शो मुर साइक्तीक थाम युक्शा वोइश्शो बाक्ब” दैत। मिनु पिपीम “मुल हामान कली मेको थाममी क्युक्शा सतीन” दैत। कुबीत का आधा मिटर खोदेशो बाक्ब।
- 10 मिनु मेकोपुकीमी मोरदेकै कली साइक्चा, दे युक्शो थाममी, हामान कली लाइश्शा क्युक्तेकम। मिनु पिप आ थुं नांइसाक्ब।

## 8

यहूदीपुकीम अधिकार तशो

- 1 मिनु मेको नाक्त पिप अहासूरसमी यहूदी आन जोरी सनु हामान आ खिं पिपीम एस्तर कली गेप्तु। मारदे हना एस्तरमी पिप कली “गो मोरदेकै आ खिं डा मुर का नड” दे शेंतीके, मोरदेकै पिप आ बाक्तीकेम जाक्चा माल्ताक्ब। एस्तर २:७
- 2 मिनु पिपीम हामान रे रोइश्शो अधिकार डा छाप थोक्तीक औंठी पुइश्शा, मोरदेकै कली गेप्तु। मिनु एस्तरमी मोरदेकै कली हामान आ खिं कली अधिकार पाइब सेल्लु। एस्तर ३:१०

पिपीम एस्तरमी लेशा पुंडशो

- 3 मिनु एस्तरमी लेशा पिप आ खोइलीम बाप्शा, डाक्शा नमो सिमो पा “अगाग आ मुर हामानमी यहूदी आन पबंम ब्रेक्शो मरिम्शो ब्रेक्स क्याम्शा गेन” दे पुंडतु।
- 4 मिनु पिपीम आ राज दन्ड एस्तर गे युक्तु। मिनु एस्तर बोक्शा, पिप आ डोंइती राप्त। एस्तर ४:११; एस्तर ५:२
- 5 मिनु एस्तरमी “पिपम दाक्नीनी नु गो इन शिशी ताता नु आं देशो लोत्र गे दाक्नीनी नु आं देशो नेंनीनी हना, अगाग आ मुर हम्मदाता आ तौ हामानमी इन राज्य डा हुकुम पाइब नेल्ल आन कली ‘यहूदी नेल्ल आन कली साइक्चा’ दे ब्रेक्शा सोइश्शो ब्रेक्स नेल्ल क्याम्चा, दे ब्रेक्स का ब्रेक्शा सोइक्तीन।
- 6 मारदे हना आं जात नु आं खिं डा मुरपुकी खतम दुम्शो गो दोपा फाल्ने चाप्नुडा डा?” दैत।
- 7 मिनु पिप अहासूरसमी पिपीम एस्तर नु यहूदी मोरदेकै कली “हामानमी यहूदी आन कली खतम सेल्चा माल्तीके, मेको आ खिं पिपीम एस्तर कली गेता। मारदे हना हामान क्युक्शा साइक्चा पुंडसाक्ब।
- 8 मुल आं नेंमी इन दाक्स पा यहूदी आन कली रिम्शो दुम्चा आ पबंम नक ब्रेक्स का ब्रेक्तीन। मिनु मेकोमी आं छाप थोक्तीन। मारदे हना पिप आ नेंमी ब्रेक्शा, आं छाप थोक्शो हुकुम गेनायो क्याम्ने मचाम्सीब” दैत।

मोरदेकै आ सोइश्शो ब्रेक्स

- 9 मिनु सिवान माइश्शो ३ महिना डा २३ नाक्तीम पिपम आ ब्रेक्स पाइब मुर आन कली ब्रेक्ताक्मी। मेकोपुकीमी मोरदेकै आ देशो खोदेशो पा यहूदी, सरकार डा गेय पाइब, मान ताइब नु रागी रागी आन कली हुकुम पाइब भारत रे कूश माइश्शो एथीयोपीया सम्म डा १२७ ओटा रागी नेल्लेमी मुर नेल्ल आन ब्रेक्स नु आमं आमं लोत्रम नु यहूदी आन कली आमं आमं आन ब्रेक्स नु आमं आमं आन लोत्रम पिप आ अरेशो लोत्र ब्रेक्ताक्म।



10 मोपा मेको ब्रेक्स कली पिप अहासूरस आ नेमी ब्रेक्शा, पिप आ छाप थोक्ताक्व। मिनु मेको ब्रेक्स कली शारा दोरपाइक्व आन कली गेशा, थाम्पान दोरपा चोव्रथ सोइक्ताक्व। मेको आन डोइश्शो शारा पिप आ नेल्ल क्येडा रिम्शो शारा बाक्तेक्व।

11 मेको ब्रेक्समी मार ब्रेक्शो बाक्त देशा हना “सहर नेल्ल डा यहूदी बुक्शा, आंम कली खतम पाइबपुकी रे प्रोंइसीमल। मिनु मेकोपुकीमी तेको तेको जात डा नु तेको तेको रागी डा बुक्शो मुर, सु सुम आन मीश नु आन आल आन कली श्येत गेमे, मेको आन कली काबुमीन क्याम्चा, साइक्चा नु खतम सेल्चा कली बुक्चा माल्नीम। मिनु मेकोपुकीमी श्येत गेब मुर आन मारेइ मारेइ रोइक्ने चाप्नीम। एस्तर ३:१३; एस्तर ९:७-१०, १५, १६

12 पिप अहासूरसमी आ रागी नेल्लेमी मेको श्येत गेब आन कली अदार माइश्शो १२ महिना डा १३ नाक्तीम खतम सेल्चा माल्ब” दे ब्रेक्शो बाक्त।

13 मिनु मेको ब्रेक्स नेल्ल रागी डा मुर आन कली तुइक्पाइक्चा कली लेंशा मोदेशोन ब्रेक्स ब्रेक्शा, उरदी पपाइक्चा, दे लोव्र सोइक्ताक्व। मिनु यहूदी चहिं मेको नाक्त आन जोरी सत्रु आन कली क्येक्क लेत्चा कली सासीशा बाक्मल, दे यहूदी आन कली अरेशा ब्रेक्शा सोइक्ताक्व।

14 मिनु पिपमी मेको शारा डोइक्व आन कली आ देशो लोव्र चोव्रथ शारा डोइक्पा थाम्पान दोरपाइश्शा सोइक्ताक्व। मिनु मेको लोव्र सुसा दरवार रे योक्चा गोम्तेक्व।

यहूदी आन ग्येरतीक नाक्त

15 मिनु मोरदेके पिप आ बाक्तीक रे दरवार डा ठेयब नीलो नु बुश फेक्तीक वा फेक्शा, पियाजी रड डा बरखी रुक्शा, पियामी सुन के ठेयब सिरपेच गुप्शा, सहर लत। मिनु मोरदेके कली तशा, सुसा सहर डा मुरपुकी थाम्पान ग्येरसाक्म।

16 मिनु यहूदी आन कली मेको नाक्त आन थुं बारपाइक्तीके, शुश ग्येरतीके नु मान ततीके नाक्त दुम्त।

17 मिनु पिप आ ब्रेक्स नु आ हुकुम जाक्दीशो नेल्ल रागी नु सहर नेल्लेमी यहूदी साप्पा ग्येरसाक्म। मिनु मेको नाक्त चाड सेल्शा, भोज जाम्तेक्व। मिनु मेको रागी डा शुश मुर यहूदी दुम्तेक्व। मारदे हना मुर नेल्ल यहूदी आन कली तशा हिंतेक्व।

## 9

यहूदीपुकीम ग्राशो

1 मिनु अदार माइश्शो १२ महिना डा १३ नाक्त पिप आ ब्रेक्शो लोव्र खाप्तीक नाक्त जाक्त। मेको नाक्त यहूदी आन जोरी सत्रुमी यहूदी आन कली साइक्चा रिम्शो बाक्तेक्व। तन्न मुल यहूदीपुकीम कका आन जोरी सत्रु आन कली साइक्तीक नाक्त जाक्त।

2 मेको नाक्त पिप अहासूरस आ रागी नु सहर डा यहूदी नेल्ल आन जोरी सत्रु आन कली साइक्चा, दे बुक्तेक्व। मिनु मेको यहूदी आन कली सुइमी तेक्ने मचबेमे। मारदे हना यहूदी आन कली तशा, मुर नेल्ल शुश हिंतेक्व।

3 मिनु मोरदेके कली तशा, हिंतीके रागी नेल्ल डा हुकुम पाइबपुकी, सरकार डा गेय पाइबपुकी नु ठेयब मुर नेल्लेमी यहूदी आन कली वारच पाम्तेक्व।

4 मोरदेके पिप आ दरवारमी ठेयब मुर दुम्त। मिनु रागी नेल्लेमी आ नें तुइक्ताक्व। मोपा मेको आ सक्ति बारना बारन लत।

5 मिनु यहूदीपुकीम आन जोरी सत्रु आन कली तरवारम तूशा, क्योरशा साइश्शा थुम्तेक्व। यहूदीपुकीमी आन कली खेदा पाइब मुर आन कली मार पचा दाक्तेमे, मेको पाम्तेक्व।

6 यहूदीपुकीमी सुसा दरवारमी ५ सहे मुर आन कली साइक्तेक्व।

7 मिनु मेको हम्मदाता आ तौ हामान आ १० जना तौ पारशान-दाता, दाल्फोन, अस्पता,

8 पोराता, अदाल्या, अरीदाता,

9 पारमशता, अरीसाइ, अरीदाइ नु वाइजाता बाक्तेक्व। उत्पती १४:२१-२४

10 मिनु मेको यहूदी आन जोरी सत्रु हम्मदाता आ तौ हामान आ १० जना तौ कली यो साइक्तेक्व। मेको आन शोंप नु आन थेरशो रू चहिं मरोइक्तेम।

11 मिनु मेको नाक्त सुसा दरवारमी गिश मुर आन कली सदमे, मेको पिप कली शोव्रतेक्व।

12 मिनु पिपमी पिपीम एस्तर कली “सुसा दरवारमी यहूदीपुकीमी ५ सहे मुर नु हामान आ १० जना तौ नेल्ल आन कली साइक्तेक्व। मिनु अरु आं रागीपुकीमी मार मार पामे माइ? गे मार पुंडतीनी हना यो, मेको गेनन्नी। चिनु मार पुंडतीनी? मेको दुम्ब” देंत।

13 मिनु एस्तरमी “हजुर, गे दाक्नीनी हना, दीसा यो सुसा सहरमी यहूदीपुकीम मुलाक्त डा खोदेशो पचा तामेक्ल, दे हुकुम पने। मिनु हामान आ साइश्शो १० जना तौ आन कली क्युक्तीक थाममी क्युक्पतीन” देंत।

14 मिनु पिपमी “मोदेशोन पामेक्ल” दे हुकुम पाप्तु। मिनु सुसा सहरमी पिप आ हुकुम खोदेशो पा, हामान आ साइश्शो तौ नेल्ल आन कली थामम क्युक्तेक्व।

15 मिनु सुसा सहरम बाक्शो यहूदीपुकी अदार महिना डा १४ नाक्तीमी लेंशा बुक्तेक्व। मिनु सुसा सहरमी ३ सहे मुर साइक्तेक्व। तन्न मेको आन शोंप नु आन थेरशो रू मारेइ मरोइक्तेम।

16 मिनू पिप आ रागी डा यहूदीपुकी आंम कली आन जोरी सत्रु रे प्रोंडचा कली बुक्तेकम। मिनू मेकोपुकीमी आंम कली काइ मदाकब ७५ हजार जना मुर आन कली साइक्तेकम। मोपा मेकोपुकीमी आन जोरी सत्रु रे थुं नाइक्चा ताम्तेकम। तन्न मेको आन शोंप नु आन थेरशो रू चहिं मारेड मरोडक्तेम।

पुरीम चाड सेल्शा

17 मिनू मेको नेल्ल अदार माइश्शो महिना डा १३ नाक्तीम पाम्तेकम। मिनू मेकोपुकी आ दीसा १४ नाक्तीम नांइसाकम। मिनू मेको नाक्त चाड का सेल्शा, ग्येरतीक नाक्त सेल्तेकम।

18 सुसा सहरम बाकब यहूदीपुकी चहिं अदार महिना डा १३ नु १४ नाक्त बुक्तेकम। मिनू १५ नाक्त नांइसाकम। मिनू मेको नाक्त चाड का सेल्शा, ग्येरतीक नाक्त सेल्तेकम।

19 मोपतीके डोन डोन गांउं डा नु अर्को सहरम बाकब यहूदीपुकीमी अदार माइश्शो महिना डा १४ नाक्त, नाइक्तीक नाक्त, चाड नु ग्येरतीक नाक्त सेल्नीम। मेको नाक्त मेकोपुकीमी कोसेली गेमुडनीम।

20 मिनू मोरदेकैमी मार मार दुम्मे, मेको नेल्ल ब्रेक्ताकव। मिनू पिप अहासूरस आ नेक्था नु डोन डा रागीम बाकब यहूदी नेल्ल आन कली सोइक्ताकव।

21 मिनू मेकोमी मार ब्रेक्ताकव देशा हना “अदार महिना डा १४ नु १५ नाक्त यहूदी नेल्लेमी बर्स बर्समी चाड नु ग्येरतीक नाक्त सेल्चा माल्नीम।

22 मारदे हना मेको नाक्त यहूदी आन जोरी सत्रु रे नाइक्चा ताम्तेकम। मिनू मेको महिनामी आन थुं लुकच लतीक रे ग्येरशो थुं दुम्तेकम। मिनू आन रोंका पतीके रे टेयब ग्येरतीक नाक्त फांइसाकव। मेकोपुकीमी मेको नाक्त चाड का सेल्शा, ग्येरतीक नाक्त सेल्चा माल्नीम। मिनू कोसेली सोइक्मुशा, पुडग आन कली मार मार गेचा माल्नीम” दे ब्रेक्शो बाक्त।

23 मोपतीके यहूदीपुकीमी मोरदेके आ ब्रेक्शो खोदेशो पचा गोम्तेकम। मिनू मेको मोदेशो पा गेना हना यो पचा कली आन लोत्र थोक्ताकम।

24 डोंइती यहूदी आन जोरी सत्रु अगाग आ मुर हम्मदाता आ तौ हामानमी यहूदी आन कली खतम सेल्चा नु साइक्चा कली मेको पुर माइश्शो साहीत कोत्रपाइश्शो बाक्त। एस्तर ३:७

25 मिनू मेको लोत्र पिप कली तुइक्पदमे नोले पिपमी, ब्रेक्स पा यहूदी आन कली मरिम्शो नु श्येत गेचा मिम्शो नेल्ल हामान आंम आ पियामी कोप्ताकव। मिनू मेको नु आ तौ थामम क्युकशा साइक्चा पुंइसाकम, दे छाप आप्शो ब्रेक्तीक का ब्रेक्शा गुंइताकव। एस्तर ७:१०

26 मेको पुर माइश्शो साहीत कोत्रशा थोक्शो बाक्त। मिनू मेको नाक्त निक्शी कली पुरीम नें वोइक्तेकम। मिनू मोरदेके आ ब्रेक्शो, यहूदी आंमा आन तशो नु अरु आन देशो लोत्र नेशा,

27 यहूदीपुकीमी आंम आन कली नु आन चच युइ आन कली नु सु सु यहूदी दुम्चा दाक्नीमी, मेको नेल्ल आन कली गेना हना यो बर्स बर्समी मेको नाक्त निक्शी “पुरीम माइश्शो चाड मानेचा माल्ब” दे रिती थिती वोइक्तेकम। दोदेशो ब्रेक्शो बाक्मे, मोदेशो पचा माल्तेकम।

28 मिनू नेल्ल आन पालामी, नेल्ल आन खिं डा मुरपुकीमी, रागी नेल्लेमी नु सहर नेल्लेमी मेको नाक्त निक्शी कली मिम्शा, चाड सेल्चा माल्नीम। मिनू यहूदी आन दातेमी मेको पुरीम चाड कली गेनायो मप्रेंदमेकल। गेना हना यो मिम्तेकल।

29 मिनू अबीहेल आ तमी एस्तर पिपीम नु मेको यहूदी मोरदेकैमी दोपा नु गेना मेको पुरीम माइश्शो चाड सेल्चा, मेको आ पबर्म शुश ब्रेक्ताकस।

30 मिनू मोरदेकैमी पिप अहासूरस आ राज्य डा १२७ ओटा रागीम बाक्शो यहूदी आन कली चिटी ब्रेक्शा सोइक्ताकव। मार ब्रेक्शो बाक्त देशा हना “इन थुं नाइश्शा, आं डोंइती ब्रेक्शो पुरीम चाड मानेचा मप्रोनीन” दे ब्रेक्शो बाक्त।

31 मिनू मेको यहूदी मोरदेके नु पिपीम एस्तरमी दोदेशो देसा, मोदेशो पा पुरीम चाड ठीक नाक्तीमी पचा कली ब्रेक्शो बाक्त। मिनू यहूदीपुकीमी आंम कली नु आन चच युइ आन कली “मेको पुरीम चाड पचा माल्ब” दे आन थुंमी मिम्चा माल्नीम। मेको माइजा बाक्तीक नाक्त आन रोंका पशो नेल्ल मिम्चा माल्नीम।

32 मिनू एस्तर आ हुकुममी मेको पुरीम डा लोत्र नुत्त। मिनू मेको लोत्र किताबम ब्रेक्शा वोइक्तेकम।

## 10

मोरदेके आ पाला डा यहूदीपुकी

1 मिनू पिप अहासूरसमी आ रागी डा मुर आन कली नु समुन्द्र डा टापुपुकीम बाकब मुर आन कली तिरो थाप्पाइक्तु।  
2 पिप अहासूरस आ अधिकार नु सक्ति आन पबर्म नु दोपा मेकोमी मोरदेके कली टेयब गेय पपदा, मेको आ पबर्म मादी नु पारसी पिप आन इतिहास डा किताबमी ब्रेक्शो बाकब। एस्तर २:८, १५

3 मेको यहूदी मोरदेके पिप अहासूरस आ नोले, मेको आ रागी डा नेल्ल क्येडा टेयब मुर दुन्त। मेको यहूदी आन दातेमी यो नेल्ल क्येडा टेयब मान तशो मुर बाक्त। मिनू आ लोक्बपुकीमी मेको कली शुश दाक्ताकम। मारदे हना मेकोमी आ मुर आन कली रिम्शो नु आन थुं नुचा डा गेय पात्तु। मिनू मेकोमी नेल्ल रिम्शो दुम्ल, दे आ जात डा मुर आन पबर्म पिप कली लोत्र पात्तु।

## अय्युब

**ब्रेकब मुर:** साइ डा टाल्मुत माइशशो किताबम मोसा एको किताब ब्रेकब मुर बाकब, दे ब्रेकशो बाकब। तन्न अर्को जोकब तुइकब मोसा आ बाकची ना क्येडा नोले डा मुर ब्रेकब बाकनीम देनीम।

**गेना बाकशो:** अय्युब ठेयब मुर दुम्शा, मोसा आ क्येडा डोंइती, अब्राहाम, इसहाक नु याकूब आन बाकची ना ब्रोंइशो बाकत। एको काथा ला ममाइ, थमा पा अय्युब मुर का बाकत, दे उत्पत्ती रे यो तुइसीब। अय्युब किताबम ब्रेकशो नें उत्पत्तीमी यो बाकनीम।

ऊज	अय्युब १:१	उत्पत्ती १०:२३
साबा	अय्युब १:१५	उत्पत्ती १०:२८
कल्दी रागी	अय्युब १:१७	उत्पत्ती ११:३१
एलीफाज	अय्युब २:११	उत्पत्ती ३६:१५
शुआह	अय्युब २:११	उत्पत्ती २५:२ नु अर्को।

### मार ब्रेकशो:

१. अय्युब शुश शोप पाइशशो नु श्येत जाइब दुम्शो अय्युब १:-३:-
२. अय्युब आ वारच नु लोत्र पशो अय्युब ४:-३७:-
३. अय्युब परमप्रभु नु लोत्र पशो अय्युब ३८:-४२:६
४. अय्युब श्येत जवा नोले अय्युब ४२:७-१७

### अय्युब कली नाकशो

1 साइ नेसी ऊज रागीमी अय्युब नें पाइशशो मुर का बाकमाकत। मेको ब्रोंइम सम्म दोस मतथु नु रिम्शो थुं पाइशशो दुम्शा बाकचा माल्ब मुर बाकमाकत। मेको परमप्रभु कली मान पा हिंशा मरिम्शो पतीक रे डोन बाकब मुर बाकमाकत। येरमीया २५:२०; बिलाप ४:२१; इजीकीएल १४:२४,२०; याकूब ५:११

2 मेको के ७ जना तौ नु तमी सां बाकमा बाकत।

3 मेको के ७ हजार भेडा, हजार सां दलओठ, ५ सहे हाल ब्यफ नु ५ सहे गधा बाकमा बाकत। मिनु शुश वाइलीम वाइल यो बाकमा बाकत। मोपा अय्युब पूर्व डा नेल्ल क्येडा शोप पाइशशो नु ठेयब मुर बाकमाकत।

4 मेको आ तौपुकीम पाल्पालो पा आन आन खिंमी भोज पतीक पाइबाकमा बाकत। मिनु मेकोपुकीम जचा तूचा कली आन समी सांफा आन कली यो ब्रेण्बाकमा बाकत।

5 मिनु अय्युबम मेको आन भोज पतीक नाकत नेल्ल नुम नोले, आ तमी तौ आन कली “परमप्रभु आ डोंइती ठीक सेल्सीन” देथ, मुर सोइकबाकमाकत। मिनु अय्युबमी सुनी कना बोक्शा, मेको आन पर्वम चोशा चढेतीक का का चढेशा, मेको आन पाप क्याम्तीक गेय पाइबाकमाकत। मारदे हना मेकोमी “आ आलपुकीम मारेइ पा परमप्रभु आ पर्वम पाप पामे कों” दे मिम्शा, गेना हना यो मो पाइबाकमाकत।

### डोंइती डा खेयप नाकशो

6 मिनु काबु स्वर्गम बाकब परमप्रभु आ मुरपुकी परमप्रभु यावे आ डोंइती जाकमानु, सैतान यो मेकोपुकी नु जाकमाकत। अय्युब २:१; उत्पत्ती ६:२; १इतिहास २१:१

7 मिनु परमप्रभु यावेमी सैतान कली “गे ते रे जाकडे?” दे हिल्लो पवा बाकत। मिनु सैतानमी परमप्रभु यावे कली “रागी डा एर ओथ नेल्ल हिरशा जाकती” देमाकत।

8 मिनु परमप्रभु यावेमी सैतान कली “गे आं गेय पाइब अय्युब कली तवी? परमप्रभु कली मान पा हिंब, मरिम्शो पतीक रे डोन बाकब, रागीम मेको खोदेशो पा पाप मपाइब नु ब्रेम्शो मुर अरु सुइ मबाकनीम” दे मदा बाकत।

9 मिनु सैतानमी परमप्रभु यावे कली “मार, अय्युब परमप्रभु कली मो मान पा हिंशो बाकबा डा? भजन संग्रह ७३:१३

10 गे मेको कली मेको आ खिं, आ शोप नु आ मारेइ मारेइ नेल्ल एर ओथ तेइ तेइ रे थरपु हिरशा, मवोइशो बाकनीनी डा? मेको आ गेय नेल्लेम गे आसीक गेशा वोइशो बाकनीनी। मेको आ क्यारश भेडा नु बी ब्यफ शुश दुम्शो बाकनीम।

11 तन्न गे इन गुइ दिंशा, मेको आ मारेइ मारेइ थिने। मिनु मेकोमी इन कली इन डोंइतीन सराप चीले पाइब” देमाकत।

12 मिनु परमप्रभु यावेम सैतान कली “दुम्ब मोदेशोन दुम्ल। मेको के मार मार बाकमे, मेको नेल्ल इ मिम्शो पावो। तन्न अय्युब कली चहिं मारेइ मपतो” दे मदा बाकत। मिनु सैतान परमप्रभु यावे आ डोंइती रे गाकमाकत। ब्यवस्था ८:२

### अय्युब आ मारेइ मारेइ खतम दुम्शो

13 मिनु काबु अय्युब आ तमी तौ आन ठेयब लोकब आ खिंम, जन जन, तून तून बाकमा बाकत।

14 मेको नाकती लोत्र कुरब मुर का दोरशा जाकशा अय्युब कली “ब्यफपुकी वाकना वाकन बाकमानु नु गधापुकी मेको आन नेक्था जोना जोन बाकमानु,

15 साबा रागी डा मुरपुकी जाकशा, गोठला आन कली लडाइ तोशा साइक्तेकम। मिनु मेको मारेइ मारेइ योल्ताकम। इन कली एको लोत्र शोवचा कली गो का ला ब्रोंइती” देमाकत।

16 मेकोमी मेको लोत्र पन पना अर्को लोत्र कुरब मुर का जाक्शा, मेकोमी “परमप्रभु आ मी सरीड रे दोक्शा, भेडा नु गोठला नेल्ल आन कली नेक्तु। इन कली एको लोत्र शोत्रचा कली गो का ला ब्रोंडती” देमाक्त। भजन संग्रह ७८:४८

17 मिनु मेकोम लोत्र पन पना, अर्को लोत्र कुरब मुर का जाक्शा “हुल सां कल्दी रागी डा मुर जाक्शा, गोठला आन कली तरवारम क्योरशा दलओठ नेल्ल योल्ताक्म। इन कली एको लोत्र शोत्रचा कली गो का ला ब्रोंडती” देमाक्त। येरमीया ५१:२४

18 मेकोम लोत्र पन पना अर्को यो दोरशा जाक्शा “इन तमी तौ आन ठेयब लोकब आ खिमं जना जन तूना तून बाक्तेकम।

19 मेना गोरशो रागी रे फश गिवार जाक्शा, खिं आ एर ओथ नेल्ल रे थोक्ताक्व। मिनु मेको खिं मेको आन तार ब्रेशरा, मेको नेल्ल आन कली चिप्शा साइक्तु। इन कली एको लोत्र शोत्रचा कली गो का ला ब्रोंडती” देमाक्त।

20 मिनु अय्युब बोक्शा आ वा खाक्मा बाक्त। आ चां प्रेक्मा बाक्त। मिनु खुम्की पा बाप्शा,

21 “गो आं ममा आ कोत्रज रे शिन्ना यिती। शिन्ना लेशशा लाइनुड। गो ते रे श्येत्थी जाक्डा, मेकेन श्येत्थी लेशशा, लाइनुड। मेको नेल्ल परमप्रभु यावेमी गेती। मिनु मेकोमी नेल्ल लेशशा लाइक्तु। परमप्रभु यावे आ नें ठेयब बाक्ल” देमाक्त। उपदेसक ५:१४; १तिमोथी ६:७; याकूब ५:११

22 मेको नेल्लेमी अय्युबमी पाप मपवा बाक्त। परमप्रभु कली दोस मगेवा बाक्त।

## 2

निक्शी खेयप नाक्शो

1 मिनु काबु स्वर्गम बाक्ब परमप्रभु आ मुरपुकी परमप्रभु यावे आ डोंडती जाक्मानु, सैतान यो मेकोपुकी नु परमप्रभु यावे आ डोंडती जाक्माक्त। अय्युब १:६

2 मिनु परमप्रभु यावेम सैतान कली “गे ते रे जाक्डे?” दे हिल्लो पवा बाक्त। मिनु मेकोमी परमप्रभु यावे कली “रागी डा एर ओथ नेल्ल हिरशा जाक्ती” देमाक्त।

3 मिनु परमप्रभु यावेम सैतान कली “गे आं गेय पाइब अय्युब कली तवी? रागीमी मेको खोदेशो अरु सुड मबाक्नीम। मेको दोस मताइब, गेना हना यो ठीक पाइब नु आं कली मान पा हिंब बाक्ब। मेकोम मरिम्शो मपाइब। गे मेको कली श्येत गेचा कली आं कली क्युक्ती, हना यो मुल सम्म मेको आ थमा सुडक्तीके ग्येत्थ लुकच मदुम्शो बाक्ब” दे मदा बाक्त।

4 मिनु सैतानम परमप्रभु यावे कली “कुशुल आ पा डा कुशुल। मुरुम ब्रोंडचा कली आ मारेड मारेड मगेवा डा?

5 इन गुड दिंशा, मेको आ रुश नु श्ये थिने। मिनु मेकोम इन डोंडतीन इन कली सराप चीले पाइब” दे लोत्र लेत्ता बाक्त।

6 मिनु परमप्रभु यावेम सैतान कली “लो मो हना, मेको कली इ मिम्शो पावो। तन्न मेको कली मसतो” देमाक्त।

7 मिनु सैतान परमप्रभु यावे आ डोंडती रे गाक्माक्त। मेकोमी अय्युब आ पियार रे खोइल सम्म गार मुपदा बाक्त। ब्यवस्था २८:२७

8 मिनु अय्युबम ब्वाम्सीचा कली गर आ गम्टे का शेशा पुलु तार निस्से बाक्त।

9 मिनु मेको आ मीशेमी मेको कली “मार, गे मुल सम्म थमा सुडक्चा मप्रोंडनीनी? परमप्रभु कली सराप चीले पा बेक्कीन” दे मदा बाक्त।

10 तन्न अय्युबमी “गे मूर्ख मीश मुर खोदेशो पा लोत्र पाप्तीवी। परमप्रभु आ गेशो रिम्शो चहिं ताक्शा, मरिम्शो चहिं मताक्चा डा?” दे मदा बाक्त। मेको लोत्र नेल्लेम अय्युबमी मारेड पाप मपवा बाक्त। अय्युब १:२२

अय्युब आ वारच सां जाक्शो

11 मिनु अय्युब आ वारच सांम मेको कली मोदेशो श्येत दुम्शो लोत्र नेन्मे बाक्त। मेको आन नें तेमान डा एलीफाज, शुआह डा बिल्लाद नु नामा डा सोफार बाक्मा बाक्त। मिनु मेकोपुकीम मेको कली लेम्चा कली नु मेको आ थुं नाइक्पाइक्चा कली गारशा आन खिं प्रोंडशा अय्युब आ खिमं जाक्मा बाक्त। उत्पत्ती ३६:१५; येरमीया ४९:७; उत्पत्ती २५:२; यहोसु १५:४१

12 मिनु मेकोपुकीम अय्युब कली डोन रे तशा, अय्युब कली मतुडक्तेम बाक्त। मिनु मेकोपुकीम अय्युब कली तुडक्तेम नोले वाड ब्रेशरा डाक्शा, श्येत लाक्शा आन वा खाक्शा, आन पियाम फुरक फुंडसमा बाक्त।

13 मिनु मेकोपुकी ७ नाक्ती नु ७ नाक्दो मारेड लोत्र मपथु, मेको आ नेक्था खपीम निस्समा बाक्त। मारदे हना मेकोपुकीम अय्युब कली शुश श्येत दुम्शो तामे बाक्त।

## 3

अय्युबम लोत्र पशो

1 मिनु नोले अय्युबम आ जरमेशो नाक्ती कली सराप चीले पवा बाक्त। येरमीया २०:१४-१८

2 मिनु अय्युबम

3 “आं जरमेशो नाक्त खतम दुम्ल। ‘वोंडश आल का जोल्थो बाक्ब’ देशो नाक्दो खतम दुम्ल।

4 मेको नाक्त छिडछिड दुम्ल। परमप्रभुम मेको कली ममिम्तल। मेको नाक्ती हाम्सो मदुम्ल।

5 मेको नाक्ती कली क्येर छिडछिडम सुमल। मेको गोस्सुम सुमल। मेको आ छिडछिड हिंचा डा दुम्ल।

6 मेको नाक्दो कली थम छिडछिडम सुमल। बर्स डा नाक्त आन दातेम मेको ग्येरचा मतवल। महिना डा हिक्तीकेम मेको नाक्ती हिक्चा मपुंडसेक्ल।

7 मेको नाक्दो आल मथीब दुम्ल। मेको नाक्दोमी ग्येरशो सेंदा मनेसेक्ल।

- 8 नाक्त कली सराप चीले पाइब मुरुम, मेको नाक्ती कली सराप चीले पवल। मेकोम लेव्याथन कली पोक्चा कली ठीक दुम्शो बाक्ब।
- 9 मेको आ सुनी डा सोरुल आ हाम्सो मताइसेल। मेकोम नां सोव्रचा कली रिम्शो मोशा दुम्ल। नां दाप्शो गेनायो तचा मतवल।
- 10 मारदे हना मेकोम आं कली जरमेब ममा कली मतेक्गा। मिनु आं कली श्येत मजचा डा पा मखुइक्ती।
- 11 गो मारदे जरमेसी डा चोटीन मबेक्डा? गो मारदे कोव्रज रे ग्रूडानु मबेक्डा?
- 12 मारदे आं कली वोइक्चा कली थुकु बाक्मे? मारदे आं कली तुंड्या कली दूध बाक्मे?
- 13 मो दुम्शो हना, गो सिक्सी पा गोल्लो बाक्ड वा। गो इप्शा नाइश्शा बाक्ड वा। २सामुएल १८:१८
- 14 गो रागी डा पिपपुकी नु मेको आन कली अर्ती गेबपुकी नु बाक्ड वा। मेकोपुकीम आंम आन कली ब्रेशो दरवारपुकी लेशा सेल्नीम।
- 15 शुश सुन पाइश्शो तौ नु बाक्ड वा। मेकोपुकीम आन खिं चांदीम प्रिनीम।
- 16 मारदे गो शाम्शो आल खोदेशो पा थिम्चा मपुंडसीडा? मो दुम्शो हना गो हाम्सो गेनायो मतशो आल खोदेशो पा बाक्ड वा।
- 17 मेकेर परमप्रभु यावे आ अरेशो मटीबपुकीम ग्रंग्ये माग्ये पने मचाप्नीम। मेकेर दशो मुरपुकी नाइक्चा ताइनीम।
- 18 मेकेर चोक्शा वोइश्शोपुकी नाइक्चा ताइनीम। गेय पपाइक्ब आ सेंदा मनेसीब।
- 19 मेकेर टेयब नु आइक्च नेल्ल बाक्नीम। वाइलीम वाइल यो आन होवप रे ब्रोंइशो बाक्नीम।
- 20 श्येत जाइब कली मारदे हाम्सो तचा गेशो बाक्बा? आन थुं लुकच लशो कली मारदे ब्रोंइचा गेशो बाक्बा?
- 21 मेकोमी बेक्चा कली रिम्शो बाक्ब। तन्न मेको मबेक्ब। मेकोमी थिम्शा वोइश्शो शोप दोशा माल्लो क्येडा यो शुश माल्ल। प्रकाश ९:६
- 22 मेकोपुकी तुरसुम जाक्दीम्मानु आन थुं नाइश्शा, शुश ग्येरसीनीम।
- 23 परमप्रभुम लां मताइब आन कली मारदे हाम्सो गेशो बाक्बा? मेको आन एर ओंथ नेल्ल रे थरपु हिरशो बाक्ब। अय्युब १९:८
- 24 आं जचा थोव्रक आ पा डा हुकयी पतीके दुम्शो बाक्ब। आं हुकयी पशो ब्वाक्खो खोदेशो पा यीब।
- 25 गो मार मिम्शा हिंडा, मेकोमीन थित्ती। गो मार तशा शुश हिंडा, मेको आं तार जाक्त।
- 26 आं थुं मनाइसीब। गो सिक्सी पा मबाक्नुड। नाइक्चा मताइनुड। श्येत ला जाक्ब” देमाक्त।

## 4

एलीफाजम लोव्र पशो

- 1 मिनु तेमान डा एलीफाजमी अय्युब कली
- 2 “मार, सुइमी गे नु लोव्र पचा माल्तु हना, इन थुं खाइक्पाइक्नीनी? तन्न सु मब्वाक्थु बाक्ने चाप्नीमी डा?
- 3 गे शुश मुर आन कली शेंताक्नी। गे मचाप्ब मुर आन कली बोल्यो सेल्तीनी।
- 4 दाइल पा गोल्लो आन कली इन लोव्रमी आन थुं बारपाइक्तीनी। मिनु गे खोइल मथेक्ब आन कली खोइल थेक्ब सेल्तीनी।
- 5 तन्न मुल इन तार मोदेशो श्येत जाक्मेनु, गे फाल्ने मचाप्ब दुम्शो बाक्नीनी। मेको श्येतमी इन कली थिवानु, इन थुं लुकच लशो बाक्ब।
- 6 मार इन परमप्रभु कली मान पा हिंतीकेम थमा मसुइक्नीनी? इन ठीक पतीकेमी आस मगेबा?
- 7 मारिड दोस मताइब मुर खतम दुम्शो बाक्नीमी? मेको मिम्तीन। गेना हना यो रिम्शो पाइब मुर साइक्चा पुंडसीनीमी?
- 8 मरिम्शो पाइब नु ग्रंग्ये माग्ये पोक्ब आंम आन पशो ताइनीम। हितोपदेस २२:८
- 9 परमप्रभु आ मुइश्शोम मेकोपुकी खतम दुम्नीम। मिनु मेको आ गाइश्शो आ मीम नेक्चा पुंडसीनीम।
- 10 गुप्स ग्रीमल, बोल्यो गुप्स डरर डरर पामेक्ल। मो हना यो ठिटा गुप्स आन खुइ जिक्चा पुंडसाक्म।
- 11 बोल्यो गुप्सपुकी सिखार ब्वचा मतथु नुप्नीम। मिनु छाउरी गुप्स आन चाइक्ब एर ओंथ ब्राइनीम।
- 12 आइक्च लोव्र का आं नोफाम नेंता। मिनु गो शिप शिप पा लोव्र पशो नेंता।
- 13 नाक्दो डोमु ततीके बाक्ब। मुर टेयब निन्दा पशो बाक्नीम। अय्युब ३३:१५; उत्पती १५:१२
- 14 मोदुम्तीके गो शुश हिंशा खिंखि पाता। मिनु मेकोम आं पोक्च कली शुश खिंखि पपाइक्तु।
- 15 फश का आं डोंइती रे पा लत। मिनु आं रां डा चां बोक्तेक्म।
- 16 मेको दिक्चा बाक्त। तन्न मेको मार बाक्मे, गो मारिड मतुइक्तु। आं डोंइती मार कका राप्त। नोले सिक्सी दुम्शा, सेंदा का ग्रूत।
- 17 मेको सेंदामी ‘मार बेक्शा लाइब मुर परमप्रभु आ डोंइती नेल्लेम ठीक पाइब दुम्ने चाप्बा डा? मुर आ कली सेल्ब क्येडा रिम्शो दुम्ने चाप्बा डा?’ देंत। १राजा ८:४६; भजन संग्रह १४:३; हितोपदेस २०:९
- 18 परमप्रभुम आ गेय पाइब आन कली थमा मसुइक्ब। मिनु आ स्वर्ग डा गेय पाइब आन कली दोस गेब। अय्युब १५:१५
- 19 मिनु खप के खिंम बाक्ब मुर मेको आन क्येडा शुश दोस मताइनीमी डा? मुर आन जग फुरक बाक्ब। मेको तुम्ब खोदेशो पा दिप्शा साइक्चा पुंडसीनीम।
- 20 मेकोपुकी नाक्त काम साइक्चा पुंडसीनीम। सुइम मतुइक्थु बेक्नीम।

21 मेको आन ताम्बु डा डोरी गुंडशो बाक्ब। मेकोपुकी जोक्ब तुडक्ब मद्मुथु बेक्नीमी” देमाक्त।

## 5

एलीफाज आ लोव

- 1 मिनु एलीफाजमी “मुल ब्रेशशा कोवडीन। इन कली सुम लोव लेप्बाक्मा? गे सु कली “वारच पाइय्यीनी” दे ब्रेत्नीनी?
- 2 गाइक्तीकेम मूर्ख आन कली साइक्ब। मिनु गेहे पतीकेम मारेड मजोक्ब आन कली साइक्ब।
- 3 गो मूर्ख आन शाक्श थोक्शो तशो बाक्नुड। तन्न गो कालेमीन मेको आन खिं कली सराप चीले पाइक्ता। भजन संग्रह ३७:३५-३६
- 4 मेको आन आल कोवब मुर मबाक्नीम। मेकोपुकी ठेयब लाप्चोम साइक्चा पुंडसीनीम। मेको आन कली प्रॉडब सुड मबाक्ब।
- 5 शोव्रलु बेक्शोपुकीम मेको आन खुप्शो मारेड मारेड नेक्नीम। आन जचा थोवक चू आन दाते रे यो खुप्शा योल्नीम। तूतू दाक्शोपुकी मेको आन शोप तशा वालनीम।
- 6 मारदे हना श्येत जतीके फुरक रे मजाक्ब। खप रे श्येत मयूब।
- 7 मुरपुकी श्येत जचा कली जरमेसीनीम। मेकोपुकी मी आ फिलीडगो खोदेशो पा जाप्नीम।
- 8 गो मेको नड हना, गो परमप्रभु कली मलु वा। आं पुंडशो लोव परमप्रभु कली देंड वा।
- 9 मेकोमी ठेयब, रूप्ने मचाप्चा डा नु छक लाक्चा डा गेय हिकने मचाप्चा डा पा पाइब। अय्युब ९:१०
- 10 मेकोम खप कली रेड यिपाइक्ब। मिनु रू कली ब्वाक्कु सोइक्ब।
- 11 मेकोम महिक्सीशो मुर आन कली ठेयब सेल्व। मिनु रोंका पाइब आन कली लेंशा ग्येरपाइक्ब। भजन संग्रह ७५:८; लूका १:५२
- 12 मेकोम मरिम्शो मिम्शा पाइब आन कली आन मिम्शो मद्मुप्पाइक्ब। मिनु मेकोपुकीम आन मिम्शो पने मचाप्नीम।
- 13 मेकोमी आंम कली जोक्ब तुडक्ब मिम्शा गेय पाइब कली आंम गेयमी मेको कली ग्याइक्पाइक्ब। मिनु आन मरिम्शो मिम्शो रीब पा खतम दुम्ब। १कोरिन्थी ३:१९
- 14 मेको आन कली नाक्तीन छिडछिड दुम्ब। मिनु नाक्ती उडक्थ दुम्मेनु, मेकोपुकी नाक्दो खोदेशो पा सुल्शा गाक्नीम। यसैया ५९:९-१०
- 15 तन्न मेकोम मारेड मथीब आन कली आन मरिम्शो लोव रे प्रॉडब। मिनु सक्ति पाइशशो आन गुड रे प्रॉडब।
- 16 मोपतीके पुडग आन आस बाक्ब। मिनु ठीक मपाइबपुकीमी आन शोव्र खेप्चा मालनीम।
- 17 परमप्रभुमी ठीक सेल्चा पुंडसीशो मुर ग्येरसीशो बाक्नीम। मोपतीके नेल्ल क्येडा ठेयब सक्ति पाइशशो आ शेंशो आइक्च ममिम्तीन। भजन संग्रह ९४:१२; हितोपदेस ३:११
- 18 मारदे हना मेकोमी गार सेल्व। मिनु मेकोमीन फ्रेंब। मेकोमी तुप्ब। मिनु मेकोमीन सापाइक्ब। ब्यवस्था ३२:३९; होसे ६:१
- 19 मेकोमी इन कली ६ खेयप श्येत दुम्त हना यो, प्रॉडब। ७ खेयप डा श्येतमी इन कली मथीब। भजन संग्रह ३७:२४; हितोपदेस २४:१६
- 20 मेकोमी अन्काल दुम्मेनु, इन कली बेक्चा रे प्रॉडब। मिनु लडाइ दुम्मेनु, तरवार रे प्रॉडब।
- 21 मेकोम इन कली शुक्शी पाइब रे प्रॉडब। मिनु खतम दुम्तीक नाक्त जाक्मेनु गे हिंचा ममालनीनी।
- 22 खतम दुम्तीके नु अन्काल जाक्मेनु, गे रिशशा बाक्नीनी। मिनु गे ब्वाकी डा जन्तु आन क्येडा हिंचा ममालनीनी।
- 23 इन रूमी फुल्लु मबाक्नीम। मिनु ब्वाकी डा जन्तुपुकीम इन कली श्येत मगेनीम। यसैया ११:६-९; होसे २:२०
- 24 गे इन ताम्बु मारेड मद्मुथो बाक्ब दे तुडशो बाक्नीनी। मिनु गे इन क्यारश भेडा कली हिक्शा कोवनीनु, का यो मजाम्शो बाक्नीम।
- 25 इन चच युड शुश दुम्शो बाक्नीम। इन आल घांस खोदेशो पा शुश दुम्शो बाक्नीम।
- 26 गे खूशो दुम्शा बेक्नीनी। बाली नाली ओंइची ना खोदेशो पा, इन नाक्त जाक्ब।
- 27 गोपुकीम एको आन पर्बम हिल्लो हिक्सी पाइतक। मिनु नेल्ल थमा बाक्ब। मोपतीके एको नेनीन। मिनु तुडक्तीन” दे एलीफाजमी अय्युब कली मदा बाक्त।

## 6

अय्युबमी लोव लेशशो

- 1 मिनु अय्युबमी
- 2 “आं सुर्ता नाक्ने चाप्शो हना नु आ शुश हिंचा डा श्येत नाक्शो हना,
- 3 मेको समुन्द्र डा बाल्वा आन क्येडा यो शुश हेल्शो दुम वा। मोपतीके आं लोव रिम्शो मबाक्म कों।
- 4 नेल्ल क्येडा ठेयब सक्ति पाइशशो आ ब्राम आं कली गुक्शो बाक्नीम। आं सोक्तीम मेको आन बीख तूचा माल्व। परमप्रभुमी आं कली हिंपाइशशो बाक्ब। भजन संग्रह ३८:३
- 5 ब्वाकी डा गधा घांस ब्ववानु, ग्रीबा डा? ब्यफ आ खोले जवानु, ग्रीबा डा?
- 6 मब्रोव्रशो जचा थोवक हिक्सी मसुप्थु जने चाम्सीबा? मार ब्वोफु आ बुश ब्रोव्रशो बाक्बा डा?
- 7 गो मेको जचा मदाक्नुड। आं कली काइ मब्रोव्रब।
- 8 गो आं पुंडशो तड हना, परमप्रभुम आं माल्लो गेशो हना,

- 9 आं कली खतम सेल वा। परमप्रभुमी आं कली साइय्यी वा।
- 10 मेको मोदेशो दुग्शो हना, आं थुं नांडस वा। मिनु शुश खाइशशा यो ग्येरसीड वा। मारदे हना गो का ला परमप्रभु आ लोत्र मलाकशो बाक्नुड।
- 11 गो आं रिग्शा बाक्तीक सक्ति बाक्बा डा? गो दोपा बेक्नुडा। गो रिग्शा बाक्ने चाप्नुडा डा?
- 12 आं सक्ति फुल्लु खोदेशो बाक्बा डा? आं श्ये कांसा के बाक्बा डा?
- 13 थमा पा, गो आंम कली तिकशा वोइक्ने मचाप्नुड। आं सक्ति नेल्ल लत।
- 14 सुमी आन वारच कली शिशी मपाइनीमी, मेकोम नेल्ल क्येडा सक्ति पाइशशो कली मान पा हिंचा थुग्शो बाक्नीम।
- 15 आं लोकबपुकी बारशा यीब खोला खोदेशो बाक्नीम। सोव्रशो खोला खोदेशो बाक्नीम। भजन संग्रह ३८:१२
- 16 आन ब्वाक्कु मरिग्शो दुग्शा, फुं यशो खोदेशो पा जाम्ब।
- 17 मिनु नाप्शोमी मेको आ शाइक्तीक रे जाम्ब।
- 18 मिनु लां गाक्ब आन लां रे हिरना हिरन गाक्नीम। मिनु मेकोपुकी मुर मबाक्तीकेम गाक्शा, बेक्नीम।
- 19 तेमा डा लां गाक्बपुकीम तूचा कली मेको खोला डा ब्वाक्कु माल्तेक्म। साबा डा ग्याप्ब लेयबपुकीम मेको ब्वाक्कु तूचा कली आस पांमतेक्म। अय्युव १:१५
- 20 मेको आन आस सोव्रशो खोला तशा बेक्त। मेकेर जाक्दीशशा आन थुं बेक्त।
- 21 मुल गे आं कली मोदेशो दुग्तीनी। गे आं खतम दुग्तीके तशा हिनीनी।
- 22 गो इन कली 'आं कली कोसेली चाक्कीन' देंडा डा? गो इन कली 'इन शोप गेयीनी' देंडा डा?
- 23 मिनु 'आं कली आं जोरी सत्रु आन गुड रे प्रोंइयीनी' देंडा डा? 'आं कली दिक्ब आन गुड रे प्रोंइयीनी' दे गो इन कली गेनायो मर्देड।
- 24 आं कली शेदीनी। मिनु गो सिक्सी पा नेंनुड। गो मार दूली पडा, आं कली रूपतीन।
- 25 थमा लोत्र बोल्यो बाक्नीमी। तन्न इन देशो लोत्र मार रिग्शो बाक्बा डा?
- 26 गे आं लोत्र रिग्शो सेल्चा माल्नीनी? गे थुं लुकच लशो मुर आ लोत्र फश बाक्ब, दे मिन्नीनी?
- 27 गेपुकीमी रोम रोइक्च आन पर्वम फेन्टे आप्नीनी। मिनु इन वारच आन पर्वम मार मार फाइक्नीनी।
- 28 मुल आं कली कोव्रडीन। गो इन कली जोल मपाइनुड।
- 29 गे खिं लेतीन। मिनु आं पर्वम अरु मरिग्शो मपने। लेतीन। मारदे हना गो ठीक पाइब बाक्नुड।
- 30 मार, आं लोत्रम मारेड जोल बाक्बा? मार, आं लोत्रम रिग्शो नु मरिग्शो तिलने मचाप्बा डा?" दे अय्युबमी आ वारच कली लोत्र लेत्ता बाक्त।

## 7

अय्युबमी परमप्रभु नु लोत्र पशो

- 1 मिनु अय्युबमी "मुर रागीम बाक्मानु, शुश गेय पचा माल्नीम। मेको आन नाक्ती गेय पाइब आन नाक्त खोदेशो बाक्नीम। अय्युव १४:६
- 2 मेको नाक्दो डा वांकु रिग्शो वाइलीम वाइल खोदेशो पा बाक्नीम। आ गेय पशो डा गाल्च ताक्चा कली रिग्शा बाक्शो खोदेशो बाक्नीम।
- 3 गो महिना नेल्ल मोशीन सोइक्ताक्डमी। नाक्दो कुस कुस श्येत जतीके आं भाग बाक्ब।
- 4 गो नाक्दो इप्चा कली गोल्डानु, गेना नां सोव्रबा, दे मिन्नुड। तन्न नाक्दो शुश लाइशशो दुक्ब। मिनु गो नां मसोत्रम सम्म एर ओंथ लोकसीशा बाक्नुड।
- 5 आं रां लुप्सुम ब्रीशा, फुरक लुप्सीशो बाक्ब। मिनु आं कुशुल जेशशा नेने यूशो बाक्ब।
- 6 आं नाक्त वा प्रोव्रब आन थूरी क्येडा यो रीब पा लाइनीम। मेको नेल्ल आस मपाइशशो दुग्नीम। यसैया ३८:१२
- 7 आं ब्रोंइतीक नाक्ती का ले कीशो सोक्त खोदेशो बाक्नीम, दे मिन्नीन। गो लेशा रिग्शो नाक्त तचा मताइनुड।
- 8 आं कली ताइबमी लेशा गेनायो मताइब। गे आं कली कोव्रनीनु, गो लने थुग्शो बाक्नुड।
- 9 गोसस ब्रशा जाम्गो खोदेशो पा बेक्शो मुर आन बाक्तीक उड लाइबपुकी गेनायो लेशशा मजाक्नीम।
- 10 मेको आन खिंम लेशशा मजाक्नीम। मिनु मेको आन बाक्तीकेमी मेको आन कली मतुइक्नीम। अय्युव १०:२१; अय्युव १४:१२; भजन संग्रह १०३:१६
- 11 मोपतीके गो सिक्सी पा मबाक्नुड। गो आं थुं डा श्येतम लोत्र पाइनुड। गो आं लुकच लशो थुंम लोत्र पाइनुड।
- 12 मार, गो समुन्द्र नडा? गो समुन्द्र डा ठेयब जन्तु नडा? गे मारदे आं कली खाल पाइब वोइक्नीनी?
- 13 गो आं ब्रास्येम गोल्शा, आं थुं नाइक्ब, दे मिन्नुड। इप्डानु आं श्येत प्रेंनुड, दे मिन्नुड।
- 14 तन्न मेना गे आं कली आं डोमुम हिपाइक्नीनी। मिनु कोंइतीक कोंइशा आं कली हिंच कोइनीनी।
- 15 मोपतीके गो मेको रॉम ब्रोंइचा क्येडा सोक्त मकीथु बेक्चा दाक्नुड।
- 16 गो ब्रोंइशा बाक्चा मदाक्नुड। गो गेना हना यो ब्रोंइशा बाक्चा मदाक्नुड। गे आं कली प्रोंइयीनी। मारदे हना आं ब्रोंइशो का ले कीशो सोक्त खोदेशो बाक्ब। १ राजा १९:४
- 17 मुर मार नमी डा? गे मेको आन पर्वम शुश मिन्नीनी? मारदे गे मेको आन कली शुश दाक्नीनी। भजन संग्रह ८:४; भजन संग्रह १४४:३
- 18 गे मेको आन कली सुनी कुस कुस कोव्रनीनी। गे मेको आन कली गेना हना यो नाक्शा कोव्रनीनी
- 19 गिशा सम्म आं रे इन मिक्च हिरनीनी? शेप्चुक मदाक्गु सम्म आं कली प्रोंइयीनी।

20 गो पाप पाता हना यो, इन कली मार दुम्बा डा, गे मुर आ थुं नाक्शा कोवनीनी? गे मारदे आं कली खेदा पस डा पस बाकनीनी। गे मारदे आं कली तशा ब्रीनीनी?

21 गे मारदे आं हेंथे पशो माफ मगेयीनी? मारदे आं मरिम्शो पशो मक्यानीनी? मुल गो बेक्नुड। मिनु गे आं कली माल्तीनी हना यो, मथिल्लीनी” दे अय्युबमी परमप्रभु यावे कली देंमाक्त।

## 8

बिल्दाद आ डोंइती डा लोत्र

1 मिनु शुआह डा बिल्दादमी लोत्र लेशशा

2 “गे गेना सम्म ओदेंशो लोत्र पस डा पस बाकनीनी। इन लोत्र ठेयब फश ला बाकनीम।

3 मार, परमप्रभुम दूली निसाफ पाइबा डा? मार, नेल्ल क्येडा सक्ति पाइशो परमप्रभुम मार ठीक बाकबा, मेको मतुडक्वा डा? अय्युब ३४:१०

4 इन तमी तौपुकीम मेको आ पर्वम पाप पाप्तेक्म। मोपतीके मेकोम मेको आन कली आन हेंथे पशो मोडक्ताक्व। अय्युब १:४-५

5 गे नेल्ल क्येडा सक्ति पाइशो परमप्रभु कली माल्तीनी नु मेको कली पुंडतीनी हना,

6 गे ग्रांग्रा मदिचा डा नु गेना हना यो रिम्शो पाइब बाकतीनी हना, मेको थमा पा इन पोन बोक्व। मिनु मेकोम इन खिं लेशा, डोंइती डा खोदेंशो पा गेब। भजन संग्रह ३५:२३

7 मिनु इन डोंइती डा बाक्शो क्येडा, इन नोले डा बाक्शो शोंप शुश दुम्ब। अय्युब ४२:१०

8 डोंइती डा पाला डा मुर आन कली हिल्लो पने। मिनु मेको आन किकी पिपी आन मिम्शा पशो, मिम्तीन।

9 मारदे हना गोपुकी सिनाक्त ला जरमेशो बाकनीकी। मिनु गो मारेड मतुडक्व बाकनीकी। रागीम आंइ नाक्ती वांकु खोदेंशो ला बाक्व।

10 मेको किकी पिपीम इन कली मशेंनीमी? इन कली लोत्र मपाइनीमी? इन कली आन रुप्शो लोत्र मशेंनीमी?

11 ब्वाक्कु मबाक्तीकेम कागज सेल्टीक बोट मवानीम। ब्वाक्कु मबाक्तीकेम बुदी मीलु लाइशो मदुम्नीम।

12 मेको कोल्ला कोल्ल बाक्मानु, रिक्ची मजाक्थु, घांस क्येडा यो रीब पा सोल सुल बेक्नीमी।

13 परमप्रभु कली प्रेंबपुकी यो मोदेंशोन दुम्नीम। परमप्रभु कली मटीब मुर आन आस यो मोपा जाम्शा लाइब। अय्युब ११:२०; हितोपदेस १०:२८

14 मेको आन आंमा कली थमा सुइक्तीक थम आइक्च रयेले खोदेंशो बाक्व। मेको आन आस माखा आ जाल खोदेंशो बाक्व।

15 मेको आ जालम रक एशशा बाक्त हना, मेको कली मतिक्व। मेको कली ग्याइक्ताक्व हना यो, मेको ब्रेप्ब।

16 परमप्रभु यावे आ अरेशो मटीबपुकी नां तशो घांस सुवा खोदेंशो पा वानीम। मिनु मेको आन शाक्श तेड तेड ब्रशा लाइनीम।

17 मेको आन शाक्शम फुल्लु आन कली रुक्नीम। मिनु मेको फुल्लु आन दातेम बाक्नीम।

18 मेको आन बाक्तीक रे खतम दुम्मानु, आन बाक्तीकेम मेको आन कली ‘गो इन कली गेनायो मतशो नड’ देंब।

19 मेको आन ग्येरशा ब्रोंइतीक नाक्ती मोदेंशो बाक्नीम। मिनु अर्को तेड तेड खप रे वाशा घ्यूनीम।

20 नेनीन, परमप्रभुमी दोस मताइब मुर कली मतिल्लब। मेकोम मरिम्शो गेय पाइब मुर आन कली वारच मपाइब।

21 मो हना यो, मेकोमी इन कली रिप्पाइक्व। ग्येरशा ठेयब सेंदाम लोत्र मपाइक्व।

22 मिनु परमप्रभुमी इन कली काइ मदाक्व आन मुने दोक्पाइक्व। मिनु परमप्रभु यावे आ अरेशो मटीब आन ताम्बु जाम्शा लाइनीम” दे बिल्दादमी अय्युब कली देंमाक्त।

## 9

अय्युबमी लोत्र लेशशो

1 मिनु अय्युबम लोत्र लेशशा

2 “गो एको थमा बाक्व, दे तुडक्नुड। तन्न परमप्रभु आ डोंइती बेक्शा लाइब मुर दोपा ठीक बाक्ने चाप्वा डा? अय्युब ४०:३-५; भजन संग्रह १४३:२

3 सुइमी मेको नु लोत्र जिपाइक्वा मिम्ताक्व हना, मेकोम हजार का लोत्रम लोत्र का यो लेन्ने मचाप्व। भजन संग्रह १९:१३

4 मेको जोक्व तुडक्व नु सक्ति पाइशो बाक्व। मेको कली मटिथु, सु ग्येत्थ लने चाप्वा डा?

5 मेकोम डांडा आन कली आन मतुडक्थुन याक्व। मिनु गाइशशा, मेको आन कली लोक्व।

6 मेकोम रागी कली आ बाक्तीक रे हिक्व। मिनु मेको आ थाम नेल्ल खिंखि पाइनीम।

7 मेकोम नां कली ‘मदपो’ दे अरेब। मिनु सोरुल आन छेडछेड साम्ब।

8 मेको आ कामीन सरीड प्राक्शो बाक्व। मेको समुन्द्र आ छाल तार गाक्व।

9 मेकोमी सप्तबर्सी, मिर्गसीरा नु किरकिटी सोरुल नु दक्खिन डा सोरुल आन हुल सेल्लु। अय्युब ३८:३१; आमोस ५:८

10 मेकोम ठेयब नु मरुप्वा डा गेय पाइब। मिनु हिक्ने मचाप्वा डा छक लाक्वा डा गेय पाइब। अय्युब ५:९

11 मेको आं बाक्तीक रे पा लाइब। गो मेको कली मताइनुड। मेको आ लां खोइशशा गाक्मेनु, गो मतुडक्नुड।

12 मेकोम रोइक्ताक्व हना, मेको कली सुम तेक्ने चाप्वा डा? सुमी मेको कली ‘गे मार पनी’ दे हिल्लो पने चाप्वा डा?



13 परमप्रभुम आ गाडक्का मलेप्ब। राहाब माडशशो समुन्द्र डा ठेयब जन्तु कली वारच पाडबपुकी मेको आ खोइलीम बाप्नीम। अय्युब २६:१२; भजन संग्रह ८९:११

14 मोदेशो बाक्त हना, गो मेको कली दोपा लोत्र लेन्ने चाप्नुडा डा? गो मार लोत्र देनुडा डा?

15 गो दोस मतशो बाक्ती हना यो, मेको कली लोत्र लेन्ने मचाप्नुड। आं कली दोस गेब कली गो 'शिशी पाइय्यीनी' दे पुंइने ला चाप्नुड।

16 गो मेको कली ब्रेत्तुनु, लोत्र लेत्ताक्की हना यो, मेकोम आं लोत्र नेंतु, दे थमा मसुइक्नुड।

17 मारदे हना मेकोमी आं कली फश गिवारम खतम सेल्ब। मोशान आं गार शुश सेल्ब।

18 मेकोम आं कली लेशा सोक्त कीचा यो मगेब। श्येत जपाइशशा आं थुं लुकच लपाइक्ब।

19 एको सक्ति पाइशशो लोत्र बाक्त हना, मेको आं क्येडा बोल्यो बाक्ब। एको ठीक पतीके लोत्र बाक्त हना, मेको कली सुम सेन्ने चाप्बा डा? अय्युब ९:३३

20 गो दोस मताइब बाक्ती हना यो, आं लोत्रमीन आं कली दोस ताइब सेल्ब। गो दोस मपाइशशो बाक्ती हना यो, मेकोमी 'गे दोस ताइब बाक्नेवे' दे चिन्ड कोइब।

21 गो दोस मताइब बाक्नुड। मो हना यो गो आं परबम मारेइ मतुइक्नुड। गो ब्रोंइचा मदाक्नुड।

22 लोत्र नेल्ल कान बाक्ब। मोपतीके गो मेकोम दोस मताइब नु आ अरेशो मटीब निम्फा आस कली खतम सेल्ब, देनुड। अय्युब ८:२०; उपदेसक ९:२-३

23 हिंचा डा श्येतमी कालेमीन मुर कली साइक्ब। मेकोम दोस मताइब आन हिंचा डा श्येत जशो आ परबम शुक्शी पाइब।

24 रागी परमप्रभु यावे आ अरेशो मटीब आन गुइमी गेशो बाक्ब। मेकोम निसाफ पाइब आन मिक्च सिल्ब। मेकोम मो मपाप्तु हना, सुम पाइबा डा?

25 आं ब्रोंइतीक नाक्त दोरब आन क्येडा यो शुश दोरशो बाक्ब। मारेइ ग्येरीक मतथु, मेको नुम्ना नुम्न लाइनीम।

26 मेको बुदी मीलु के सेल्शो डोंगा खोदेशो पा, रीब पा शाइशशा लाइनीम। ब्वारदे आन सिखार तार जुक्शो खोदेशो पा लाइनीम।

27 गो आं श्येत प्रेनुड। गो ग्येरशो कुल कोइशा रिन्तुड, देती हना यो,

28 गो आं श्येत जचा माल्शो तशा हिंनुड। मारदे हना गे आं कली दोस मताइब मदेनीनी, दे तुडक्नुड।

29 गो दोस ताइब दुम्ने थुम्शो बाक्ती हना, मोशान मारदे श्येत पाइनुडा?

30 गो साबुनम चिक्साक्की हना यो, आं गुइ थम सफा पा चिक्साक्की हना यो, येरमीया २:२२

31 गे आं कली हिलोमीन ब्वारनीनी। मिनु आं वाम यो आं कली यांशा दिप्ब।

32 मेको आं खोदेशो बेक्शा लाइब मुर ममाइ। मिनु गो मेको कली लोत्र लेन्ने मचाप्नुड। मोदेशो दुम हना, निसाफ पाइब आन डोंइती लोत्र पने चबु वा। उपदेसक ६:१०

33 आंस दातेम गारपाइक्ब सुइ मबाक्म। आंस दातेम गुइ वोइक्ब सुइ मबाक्म।

34 परमप्रभुम आ कोक्के आं ची रे याक्त हना, आं कली महिंपद हना,

35 गो मेको नु महिंथु लोत्र पड वा। तन्न आ मिम्शो दुम्मेनु, गो तुडक्नुड" दे अय्युबमी शुआह डा बिल्दाद कली देमाक्त।

## 10

अय्युब आ थुं लुकच लशो

1 मिनु अय्युबम "गो ब्रोंइचा मदाक्नुड। गो आं श्येत आ परबम लोत्र पस डा पस बाक्नुड। गो आं कशो थुंमी लोत्र पाइनुड।

2 गो परमप्रभु कली 'आं कली सजाइ मगेयीनी' देनुड। आं कली मारदे निसाफ पाइनीनी, मेको शेंदीनी।

3 गे मुर आन कली दिप्शा, ग्येरनीनी? इन सेल्शो आन कली ममिम्चा रिम्शो लाक्नीनी? इन अरेशो लोत्र मटीबमी मरिम्शो पशो दाक्नीनी?

4 इन मिक्च मुर आन मिक्च खोदेशो बाक्बा? गे मुर आन कोव्रशो खोदेशो पा कोव्रनीनी? १सामुएल १६:७

5 इन नाक्ती बेक्शा लाइब मुर आन नाक्त खोदेशो बाक्नीमी? इन ब्रोंइतीक बर्स मुर आन बर्स खोदेशो बाक्नीमी?

6 गे आं मरिम्शो पशो माल्शा, आं पाप थिरशा गुंइनीनी?

7 गो दोस मताइब बाक्नुड, दे गे तुडक्ताक्नी हना यो, इन गुइ रे आं कली सुइम प्रोंइने मचाप्ब, दे यो तुडक्नीनी।

8 डोंइती गे आं कली सेल्तीनी। मुल आं कली खतम पोक्नीनी? भजन संग्रह १३९:१४

9 गे आं कली खप के सेल्तीनी। मेको मिम्तीन। मिनु मुल फुरक सेल्तीनी? अय्युब ३३:६; उत्पत्ती २:७; उत्पत्ती ३:१९

10 गे आं कली दूध मोइशशो खोदेशो पा आं ममा आ कोव्रजीम वोइक्तीनी। मोदेशो पा आं रां सेल्तीनी?

11 गे आं कली श्ये नु कुशुलम ग्योम्शा, रुश नु नाडीम बोइक्ताक्कीनी।

12 गे आं कली ब्रोंइतीक सोक्त गेतीनी। मिनु गेना हना यो दाक्ताक्नी। मिनु आं कली ब्रोंइचा गेचा कली कोव्रशा वोइक्तीनी।

13 आं कली श्येत गेचा कली डोंइती रे इन थुंम खुइशशा वोइक्तीनी। मेको इन थुंम बाक्त, दे तुडक्ताक्ड।

14 गो पाप पाता हना, गे आं कली कोव्रना कोव्रन बाक्नीनी। मिनु आं मरिम्शो पशो मक्याम्नीनी।

15 गो थमान इन अरेशो मटीब बाक्ती हना, आं कली हिंचा डा दुम्ल। गो ठीक पाइब बाक्ती हना यो, आं पिया पोक्ने मचाप्नुड। मारदे हना गो आं मुनेम ब्रीशा, आं श्येत तना तन बाक्नुड।

16 गो ठेयब लेशशो बाक्ती हना, गे गुप्स कली सिखार ग्यारशो खोदेशो पा आं कली माल्यीनी वा। मिनु लेशा इन ठेयब सक्ति श्येत गेयीनी वा। यसैया ३८:१३

17 गे आं मरिम्शो पशो आ पर्वम नक सांकछी चाक्नीनी। मिनु आं पर्वम इन गाइक्तीक तेम्नीनी। आं पर्वम इन हुल हुल लडाइ पाइबपुकी चाक्नीनी।

18 गे मारदे आं कली जरमेपपाइक्नी? आं कली सुइम मतथु, बेक्शो नड हना, रिम्शो दुम वा। अय्युब ३:११; येरमीया २०:१४

19 गो जरमेसीन मजरमेशो नड हना, शाम्सीशा तुरसुम जाक्दीशशो नड हना, दुम वा।

20 आं ब्रोंइतीक नाक्ती शुश मबाक्नीम। आं कली आं कान प्रोंइयीनी। मिनु आं थुं इच्का नांइसीबा कों?

21 लेशशा मजाक्तीक रागीम लचा क्येडा डोंइती, थम छिडछिड नु क्येर नाकदो

22 नु ग्राये माग्ये दुम्तीकेम लचा क्येडा डोंइती आं कली आं कान प्रोंइयीनी। मेकेर डा छेडछेड यो छिडछिड दुम्त” दे अय्युबम परमप्रभु कली देमाक्त। अय्युब ७:१०

## 11

सोफारमी अय्युब कली दोस गेशो

1 मिनु नामा डा सोफारमी

2 “मार, गो एको इश्का लोत्र आ पर्वम लोत्र मलेत्नुडा? मार एको लोत्रमाते आ लोत्र नेल्ल ठीक बाक्बा डा?

3 इन गेनायो मनुप्तीक लोत्रम मुर आन कली सिक्सी पपाइक्बा? गे शुक्शी पनीनु, इन कली मुने मदुम्बा?

4 गे ‘आं शेंशो ठीक बाक्ब। परमप्रभु, आ डोंइती गो ग्राय्रा मदिशो बाक्ती’ देंनीनी। अय्युब ९:२१; अय्युब १०:७

5 परमप्रभु ब्वाक्ल। मिनु इन कली लोत्र पवल दे आस पाइनुड।

6 मिनु मेकोमी खुइशशो तुइक्तीक इन कली शेंदल। मारदे हना तुइक्तीक शुश बाक्नीम। परमप्रभुम इन मरिम्शो पशो आ पा डा तचा मालशो सजाइ मगेव। इच्का ला गेप्टु।

7 मार, गे परमप्रभु आ खुइशशोम मिम्शो तुइक्ने चाप्नीनी? गे नेल्ल क्येडा ठेयब सक्ति पाइशशोम मार पने चाप्बा, मेको तुइक्ने चाप्नीनी?

8 मेको सरीड क्येडा यो इर बाक्ब। गे मार पने चाप्नीनी डा? मेको बेक्शो मुर आन बाक्तीक क्येडा यो लुकच लशो बाक्ब। गे मार तुइक्ने चाप्नीनी डा?

9 मेको पुक्शोनु रागी क्येडा यो लाइशशो बाक्ब। मिनु समुन्द्र क्येडा यो ब्रेम्शो बाक्ब।

10 मेको जाक्शा, मुर आन कली जेल्खानम चोक्शा, मुर आन कली निसाफ पचा कली खुप्ताक्व हना, सुम मेको कली तेक्ने चाप्बा डा?

11 सु सु शोर गाक्शो मुर बाक्मा, मेको परमप्रभुमी तुइक्ब। मेकोमी मरिम्शो पाइब आन कली तुइक्ब।

12 मूर्ख मुर रुन्ब दुम्ने मचाप्ब। मेको मो दुम्त हना, ब्वाकी डा गधा आ चाइक्ब मुर दुम्शा जरमेशो खोदेशो दुम्ब।

13 मो हना यो गे इन थुं परमप्रभु गे हिरनीनी, गे इन गुड पोक्शा, मेको कली पुंइनीनी।

14 मिनु गे मरिम्शो पाइन बाक्तीनी हना, मेको कली थुमीन। मिनु परमप्रभु यावे आ अरेशो मटितीक इन ताम्बुम बाक्चा मगेन।

15 नेले गे थमा पा मारेड दोस मतथु इन पिया पोक्नीनी। रिम्शो पा महिंथु बाक्नीनी।

16 मिनु गे इन श्येत प्रेंनीनी। गे मेको कली शाइशशा लशो ब्वाक्कु खोदेशो मिम्नीनी।

17 इन ब्रोंइतीक नाक्त डा छेडछेड खोदेशो दुम्ब। मिनु इन श्येत डा छिडछिड सुनी डा छेडछेड खोदेशो दुम्ब।

18 गे थमा सुइक्नीनी। मारदे हना मेकेर आस बाक्ब। गे कोत्रचा पुंइसीशा, महिंथु रिम्शो पा बाक्नीनी। भजन संग्रह ४:९

19 गे सुइ आन क्येडा महिंथु इप्नीनी। मिनु शुश मुरुम इन शिशी तचा कली आस पाइनीम।

20 तन्न परमप्रभु यावे आ अरेशो मटीब आन मिक्च मताइनीम। मेको आन प्रोक्तीक ला देक्ब। मिनु मेको आन आस बेक्चा बाक्ब” दे सोफारम अय्युब कली देमाक्त। अय्युब ८:१४

## 12

अय्युबम सोफार कली लोत्र पशो

1 मिनु अय्युबम लोत्र लेशशा

2 “गेपुकी थमा पा हिकसीशो मुर बाक्नीनी। मिनु तुइक्तीके गेपुकी नु बेक्शा लाइब। गो मेको तुइक्नुड।

3 तन्न इन खोदेशो रुप्तीक थुं आं के यो बाक्ब। गो यो इन खोदेशो जोक्ब तुइक्ब नड। मेको मुर नेल्लेम तुइक्नीम।

4 आं वारचपुकीमी आं पर्वम रिन्तीम। गो परमप्रभु कली पुंइता। मिनु मेकोमी लोत्र लेत्ताक्वी। गो ठीक पाइब दोस मताइब मुर बाक्ती हना यो, आं पर्वम रिन्तीम।

5 श्येत मजाइब, रिम्शो पा बाक्ब मुरपुकीम हिंचा डा श्येत जाइब आन कली तशा ग्राय्रा दीनीम। गे श्येत जशा ग्रेक्चा चिक्शो कली श्येत तेम्नीनी।

6 मिनु रोइक्ब आन ताम्बुम थुं नाइशशा बाक्नीम। मिनु परमप्रभु कली गाइक्पाइक्बपुकी रिम्शो पा ब्रोंइशा बाक्नीम। मेकोपुकीम आम सक्ति कली ठेयब सेल्नीम। हबकुक् १:११

7 मुल ब्वाकी डा जन्तु आन कली हिल्लो पने। मेकोपुकीम इन कली शेंनीम। सरीडम बेरब चिक्ब आन कली हिल्लो पने। मेकोपुकीम इन कली देंनीम।

8 गे खप कली हिल्लो पने। मेकोमी इन कली शेंब। समुन्द्र डा डांडपुकीम इन कली शेंनीम।

9 परमप्रभु यावेम मेको नेल्ल पशो बाक्ब, दे सुम मतुडक्नीमी डा?

10 ब्रॉडशा बाक्ब नेल्ल आन ब्रॉडतीक नु मुर नेल्ल आन ब्रॉडतीक सोक्त मेको आ गुडमी बाक्ब। गन्ती १६:२२; प्रेरित १७:२८

11 जचा थोत्रक ब्रोत्रशो नु मब्रोत्रशो लेंम तुडशशो खोदेशो पा, पशो लोत्र रिम्शो नु मरिम्शो नोफाम मनेंबा डा?

12 खाल्पा आन दातेम तुडक्तीक बाक्ब। खूशो आन दातेमी रुप्तीक बाक्ब। अय्युब ८:८

13 मिनु परमप्रभु नु तुडक्तीक नु सक्ति बाक्शो बाक्ब। मेको नु अर्ती गेतीके नु रुप्तीक थुं बाक्शो बाक्ब।

14 मेकोमी प्रेल्लु हना, मेको लेंशा सेल्ले मचाप्नीम। मेकोमी मुर कली जेल्लखानम चोक्तु हना, सुडमी मेको कली गुंडने मचाप्नीम। प्रकाश ३:७

15 मेकोमी ब्वाक्कु तेक्तु हना, रू नेल्ल सोवनीम। मेकोमी ब्वाक्कु प्रोंडतु हना, रागी खतम पोक्ब। १राजा १७:१,७; उत्पत्ती ७:११-२३

16 सक्ति नु तुडक्तीक परमप्रभु नु बाक्ब। दूली पाइब नु दूली पपाइक्ब, निम्फा आ केन बाक्नीस। १राजा १२:२८-३०; २राजा १९:१०-३७

17 मेकोमी अर्ती गेब आन कली मुने दोक्पाइक्ब। मिनु निसाफ पाइब आन कली मूर्ख सेल्ल।

18 पिप आन फेक्शो वा पुडक्ब। मिनु मेको आन कली किप्शुर क्विप्पाइक्ब।

19 चढेब आन कली मुने दोक्पाइक्ब सोइक्ब। डांडती रे गेय पाइब आन कली गुंडब। १सामुएल २:३०-३२; १सामुएल २२:१८-१९

20 थमा सुडक्चा पुंडसीशो शेंब आन कली सिक्सी पपाइक्ब। खाल्पा आन तुडक्तीक लोत्र शोर गाक्शो सेल्ल।

21 हुकुम पाइब आन कली शुक्शी पचा पुंडसीब सेल्ल। सक्ति पाइशो आन कली मचाप्ब सेल्ल। १सामुएल १७:५; १सामुएल ३१:९; २राजा १९:३७; दानीएल ४:२९, ३०

22 मेकोम छिडछिड आगाम बाक्शो गुंडब। मिनु थम छिडछिड कली छेडछेड सेल्ल।

23 रागी रागी आन कली हिक्सीशो सेल्ल। नोले मेको आन कली खतम सेल्ल। रागी रागी आन कली ठेयब सेल्ला, मेकेर डा मुर आन कली एर ओथ ब्रपाइक्ब।

24 रागी डा हुकुम पाइब आन कली मरुप्ब सेल्ल। मिनु नोले मेको आन कली लां मबाक्शो गोरशो रागीम एर ओथ हिरपाइक्ब।

25 मिनु मेकोपुकी हाम्सो मबाक्तीके, छिडछिडम सुल्ला गाक्नीम। मेको आन कली दुक्शो मुर खोदेशो पा गोल्चा चिक्शा गाक्पाइक्ब।

## 13

अय्युब आ लोत्र

1 गो मेको नेल्ल ताता। गो मेको नेंशा रुप्ता।

2 इन तुडशशो, गो यो तुडक्नुड। गो इन क्येडा मतुडक्ब मनड।

3 तन्न गो नेल्ल क्येडा ठेयब सक्ति पाइशशो आ डांडती लोत्र पाइनुड। मिनु गो परमप्रभु नु लोत्र पा, आं पर्वम हिल्लो पाइनुड।

4 गेपुकीम चहिं इन जोल लोत्र पा ठेयब सेल्लसीनीनी। गे शोर गाक्शो लेम्ब बाक्नीनी।

5 गेपुकी सिक्सी पा बाक्शो ननी हना, तुडक्ब मुर बाक्नीनी, दे तुंडस वा। हितोपदेस १७:२८

6 मुल आं लोत्र नेनीन। पचा माल्शो लोत्र इन नोफा दाइशशा नेनीन।

7 गेपुकी परमप्रभु आ लोत्र पखु पाइनीनी? मोदेशो जोल लोत्र कली थमा बाक्ब, दे थमा सेल्लनीनी?

8 मार गेपुकी परमप्रभु आ कुल कोत्रशा, मेको आ पा डा पचा माल्शो लोत्र देंनीनी?

9 परमप्रभुमी इन कली नाक्शा कोत्रडानु, गे नेल्ल ठीक बाक्नीनी? मार, मुर आन मिक्च सिल्लो खोदेशो पा, मेको आ मिक्च यो सिल्ले चाप्नीनी?

10 गे खुडशशोमी कुल कोत्रनीनी, परमप्रभुम इन कली थमा पा हुडक्ब।

11 परमप्रभु आ मान ततीकेम इन कली महिंपाइक्बा? मेको आ हिंच कौंडशोमी इन कली ग्येत्थ लुक्च मसेल्ला?

12 इन आं कली देशो लोत्र पुलु ला बाक्नीम। इन बोल्यो अर्ती खप के बाक्नीम।

13 सिक्सी पा बाक्कीन। मिनु गो लोत्र पाइनुड। मिनु आं पर्वम मार मार दुम्बा, दुम्ल।

14 गो ब्रॉडनुडा देय मब्रॉडनुडा। गो बेक्नुडा कौं ब्रॉडनुडा।

15 मेकोम आं कली साइक्ब। गो आस मपाइनुड। तन्न मुल गो आं लोत्र मेको आ डांडती वोइक्नुड।

16 परमप्रभु कली मटीब मुर मेको आ डांडती जाक्ने मचाप्नीम। मेको आं कली प्रॉडतीक दुम्ब।

17 नोफा दाइशशा, आं लोत्र नेनीन। मिनु आं शेंशो रिम्शो पा नेनीन।

18 गो आं देंचा माल्शो लोत्र ठीक पाता। मिनु नोले गो दोस मताइब बाक्नुड, दे तुडक्नुड।

19 सुमी आं कली कछडी बाक्शा, दोस गेने चाप्बा? मोदेशो दुम्त हना, गो सिक्सी पा फाल्ला बाक्शा, बेक्नुड।

20 परमप्रभु, गो इन कली थोत्रक निक्शी पुंडनुड। मिनु गो इन डांडती रे मखुडक्नुड।

- 21 आं कली श्येत मगेयीनी। मिनु इन हिंपाइक्तीकेमी आं कली महिंपतीन। अय्युब ९:३४
- 22 गे आं कली ब्रेत्तीनी। मिनु गो लोत्र लेत्नुड। डोंडती गो ब्वाक्नुड। मिनु गे आं कली लोत्र लेत्तीनी।
- 23 आं मरिम्शो पशो नु आ पाप गिश बाक्नीमी? आं हेंथे पशो नु आं पाप तुडक्पाइय्यीनी।
- 24 गे मारदे इन कुल खुइक्नीनी? मिनु आं कली इन जोरी सत्रु खोदेशो पाइनीनी। अय्युब १९:११
- 25 गे बेरशो सफा कली यो हिंच कोंडनीनी? गे सोत्रशो भूस आ नोले खोइक्नीनी?
- 26 गे आं पर्वम कशो लोत्र ब्रेक्नीनी। मिनु आं ठिटा ना डा मरिम्शो पशो आ पर्वम सजाइ गेतीनी। भजन संग्रह २५:७
- 27 आं खोइलीम ठेंडरो थोक्ताक्नी। आं लां नेल्ल कोव्रशा, वोइक्नीनी। अय्युब ३३:११
- 28 मोपतीके मुर राक्शो थोत्रक खोदेशो पा जाम्नीमी। तुम्बुम खोइश्शो वा खोदेशो पा नुप्शो बाक्नीमी” दे अय्युबमी देंमाक्त।

## 14

ब्रोंड्या नु बेक्चा आ पर्वम लोत्र

- 1 मिनु लेंशा अय्युबमी “मीश मुर रे जरमेशो बेक्शा लाइब मुर इच्का नाक्त ब्रोंडशा, श्येत ला जाइब।
- 2 मेको फू खोदेशो पा बोइश्शा, सोल सुल बेक्ब। वांकु जाम्शो खोदेशो पा जाम्शा लाइब। भजन संग्रह ९०:५
- 3 गे मोदेशो कोव्रनीनी? मिनु गे आं कली निसाफ पाइनीनी?
- 4 सुमी ग्रंया दिशो रे ग्रंया मदिशो सेल्ने चाप्बा? सुइमी मचाप्ब।
- 5 मुर आ ब्रोंडतीक नाक्ती हिक्शा वोइश्शो बाक्नीम। मिनु मेको गिश महिना ब्रोंडशो बाक्नीमी, मेको तुइक्नीनी। इन देंशो नाक्त लाक्ने मचाप्नीम। भजन संग्रह ३१:१६; भजन संग्रह ३९:५
- 6 गे मुर आन कली मकोव्रडीन। मिनु नाक्त किंत किंत गेय पाइब मुर खोदेशो गेरशा बाक्चा गेन। अय्युब ७१-२
- 7 रवा कली आस बाक्ब। तिम्शो नोले यो कोच्चा दाप्ब। मिनु वाना वान बाक्नीम।
- 8 मेको आ शाक्श खप आगाम चोक्ताक्व हना यो, मेको आ टुटा खप आगाम राक्त हना यो,
- 9 लेंशा इच्का ब्वाक्कु तवानु, वाब। मिनु टेयब रवा खोदेशो पा राशी दाप्ब।
- 10 तन्न बेक्शा लाइब मुर बेक्शा जाम्शा लाइनीम। मुर आ सोक्त लाइब। मिनु ते लाइबा मतुंडसीब?
- 11 दोपा दोम्ली डा ब्वाक्कु इच्का पा सोत्रना सोत्रन लाइबा, दोपा खोला आइक्च दुम्ना दुम्न लशा सोत्रबा,
- 12 मोपा बेक्शा लाइब मुर गोल्ब। मिनु मेको लेंशा गेनायो मबोक्ब। सरीड मक्याम्से सम्म, बेक्शो मुर लेंशा मबोक्नीम। मेको आन निन्द्रा रे मसेंसीनीम। अय्युब ७:१०
- 13 गे आं कली बेक्शो मुर आन बाक्तीकेम खुइक्तीन। इन गाइश्शो मनाइक्तीनी सम्म आं कली खुइक्तीन। मिनु नोले आं कली फ्रुक्शा, गो नु गुम्तीक नाक्त का वोतीन। यसैया २६:२०
- 14 मार, बेक्शो मुर लेंशा ब्रोंडनीमी डा? गो रिम्शो नाक्त कली रिम्शा बाक्नुड। आं श्येत मथुमु सम्म रिम्शा बाक्नुड।
- 15 मिनु गे आं कली ब्रेन्नी नोले, गो इन कली लोत्र लेत्नुड। मिनु गे इन आंम गुडम सेल्शो मुर, आं कली, शिशो पाइनीनी।
- 16 गे आं पशो नेल्ल मकोव्रनीनी। गे आं पाप हिक्शा मवोइक्नीनी।
- 17 आं हेंथे पशो नेल्ल ब्रेक्शा, इन थैलोम वोइश्शो बाक्ब। गे आं मरिम्शो पशो नेल्ल सुम्शा वोइश्शो बाक्नीनी। होसे १३:१२
- 18 मिनु डांडा ब्रेश्शा, जाम्शा लाइब। सेरथे फुल्लु मेको आ बाक्तीके रे याक्सीशो बाक्नीम।
- 19 ब्वाक्कुम फुल्लु आन कली योल्ब। बारशो ब्वाक्कुम रागी डा खप योल्ब। मोपा गे मुर आन आस थुम्पाइक्नीनी। रोमी ५:५
- 20 गे मेको आन कली गेना हना यो ग्रानीनी। मिनु मुर बेक्नीम। गे मुर आन रां फाइश्शा ताइक्नीनी।
- 21 मेको आन आल टेयब दुम्शा मान पाइक्चा पुंडसाक्म हना यो, मेकोपुकीम मतुइक्नीम। आइक्च सेल्चा पुंडसाक्म हना यो, मतुइक्नीम।
- 22 मेकोपुकीम आन रां डा श्येत ला तुइक्नीम। मिनु आन पर्वम ला रोंका पाइनीम” दे अय्युबमी देंमाक्त।

## 15

एलीफाजमी लोत्र पशो

- 1 मिनु तेमान डा एलीफाजमी
- 2 “मार, जोक्ब तुइक्ब मुरुम ओदेशो डर ना पुं डा लोत्र पा लोत्र लेत्चा दुम्बा? मेको आ कोव्रजीम फश लोत्रमी प्रिंचा दुम्बा?
- 3 जोक्ब तुइक्बमी इन कली शोर गाक्शो लोत्र लेत्चा दुम्बा? मारेड रिम्शो मपाइब लोत्र लेत्चा दुम्बा?
- 4 गे परमप्रभु कली मान पा हिंतीके तेक्नीनी। मिनु परमप्रभु कली मिम्शा पुंड्या यो तेक्नीनी।
- 5 इन देंशो नेल्ल इन मरिम्शो पतीके रे पिशो बाक्ब। गे मिलो शिलो पशो दाक्नीनी।
- 6 इन आंम लोत्रमी इन कली दोस ताइब सेल्ब। गो इन कली दोस मगेनुड। इन लोत्र इन पर्वम सांक्छी बाक्ब।
- 7 गे मुर आन दातेमी नेल्ल क्येडा डोंडती जरमेशो ननी? मार गे डांडा आन क्येडा डोंडती दुम्शो ननी?
- 8 गे परमप्रभु आ अर्ती गेतीकेमी बाक्शा नेंनी? तुइक्तीक इन के ला बाक्ब, दे मिम्नीनी? अय्युब ११:७; रोमी ११:३३
- 9 गो आंइ मतुइश्शो गे मार तुइक्नीनी डा? गो आंइ मरुप्शो गे मार रुप्नीनी डा? अय्युब १३:२
- 10 मिनु खाल्पा नु खूशोपुकी गो नु बाक्नीमी। इन आफ क्येडा यो खूशो मुर गोपुकी नु बाक्नीम।

- 11 परमप्रभुम इन कली लेम्शो आइक्च मिन्नीनी? इन कली आइक्च सेंदाम रिम्शो लोत्र पशोमी इन कली मगाम्मे?  
 12 मारदे इन थुंमी इन कली दूली सेल्बा? मिनू गे मारदे गाइश्शा, मिक्च केक्शा कोव्रनी?  
 13 मारदे गे इन गाइक्तीक परमप्रभु कली कौंइनीनी? मिनू गे ओदेंशो लोत्र पाइनीनी?  
 14 बेक्शा लाइब मुर नेल्ल दोस ताइब दुम्नीम। मीश मुर रे जरमेशो सु ठीक पाइब बाक्मे चाप्बा डा? अय्युब १४:४  
 15 परमप्रभुम आम आ मुर आन कली थमा मसुइक्ब। मिनू स्वर्गम बाक्ब यो मेको आ डोंइती दोस ताइब बाक्नीम। अय्युब ४:१८; अय्युब २५:५  
 16 मेको आन क्येडा ग्रान्रा दिशो नु खराप दुम्शो कली दोपा थमा सुइक्बा डा? मेकोमी मरिम्शो पतीक ब्वाक्कु तूशो खोदेंशो पा तूब कली दोपा थमा सुइक्बा डा?  
 17 मिनू गो इन कली शेंनन्नी। आं लोत्र नेनीन। गो आं तशो इन कली शेंनन्नी।  
 18 जोक्ब तुइक्बमी आन किकी पिपी रे आन तशो नेंशो लोत्र मखुइक्तमे बाक्त।  
 19 मेको आन कली रागी आम के सेल्चा कली गेशो बाक्माक्त। मेको आन दातेम अर्को रागी डा मुर सुइ मबाक्मा बाक्त।  
 20 परमप्रभु यावे आ अरेशो मटीब ब्रोंइमा सम्म श्येत जाइनीम। मरिम्शो मुर आन ब्रोंइतीक बर्स नेल्ल मोदेंशो बाक्नीम। उत्पत्ती ४:१४  
 21 मेकोपुकीम हिंचा डा रेयके नेंनीमी। मेको मारेइ मारेइ गाप्शा बाक्मानु, मेको आन कली खतम सेल्ब जाक्ब।  
 22 मेकोपुकीमी 'छिडछिड रे लेत्ने मचान्नीक' दे हिंनीम। मेकोपुकी तरवारम क्योरचा पुंडसीनीम।  
 23 मेकोपुकी जचा थोत्रक माल्शा, हिरना हिरन बाक्नीमी। मिनू आन श्येत जतीक नाक्ती जाक्चा चिक्शो बाक्ब, दे तुइक्नीमी।  
 24 मेकोपुकी श्येत नु हिंतीके आ पर्वम खिंखि पाइनीम। मेकोपुकीमी परमप्रभु कली लडाइ तोइनीम। लडाइ पचा चिक्शो पिप खोदेंशो पा सासीशो बाक्नीम।  
 25 मारदे हना मेकोपुकीम परमप्रभु आ पर्वम आन गुइ क्युकशो बाक्नीम। मिनू नेल्ल क्येडा टेयब सक्ति पाइश्शो कली 'गो इन क्येडा टेयब नकी' दे मेको कली मटीनीम।  
 26 मिनू टेयब नु बोल्यो तेक्तीक शेशा परमप्रभु कली लडाइ तोचा कली बारशो बाक्नीम।  
 27 मारदे हना मेकोपुकी शुर जशा, दोम्शो बाक्नीम।  
 28 मेकोपुकी ब्रेश्शो सहर नु मुर मबाक्चा डा खिंम बाक्नीम। मेको खिं ब्रेश्शा फुल्लु देल्शो बाक्नीम।  
 29 मेकोपुकी शोप पाइश्शो मदुम्नीम। मेको आन शोप मलीब। मेको रागीम मलीनीम।  
 30 मेकोपुकी छिडछिड रे ब्रोंइने मचान्नीम। मीम मेको आन ठोसा सोत्रपाइक्ब। मेको आन फु कली फशेम योल्ब।  
 31 मेकोपुकीम मबाक्शो लोत्र कली थमा मसुदमेक्ल। मोपा आम आन कली मरिम्शो मसेल्मेक्ल। मारदे हना मेकोपुकीम मेको आ पा डा मारेइ मताइनीम।  
 32 मेको आन नाक्त जाक्चा क्येडा डोंइतीन मेको आन मारेइ मारेइ नुब्ब। मिनू मेको आन राशी गिगी मदुम्नीम।  
 33 मेकोपुकी क्येखीन हेम्शो अङ्गुर बोट खोदेंशो दुम्नीम। मेको फू हेम्शो तेल रवा खोदेंशो दुम्नीम।  
 34 मारदे हना परमप्रभु आ अरेशो मटीब नु गाक्ब शोर गाक्शो बाक्ब। घूस जाइब आन ताम्बुपुकी मीम नेक्ब।  
 35 मेकोपुकीम आल कुरशो खोदेंशो पा मरिम्शो मिन्तीके कुरनीम। मिनू मरिम्शो पतीके जरमेनीम। मेको आन थुंम मरिम्शो पचा कली ठीक दुम्नीम" दे एलीफाजम अय्युब कली देंमाक्त। यसैया ५९:४

## 16

अय्युबमी लोत्र लेश्शो

1 मिनू अय्युबमी

- 2 "गो ओदेंशो लोत्र शुर नेता। गे नेल्ल मोशा लेम्बु पाइब ला बाक्नीनी।  
 3 मार मेको फश लोत्र गेनायो मनुप्बा? मारम इन कली ओदेंशो लोत्र पपाइक्बा?  
 4 गे आं खोदेंशो बाक्नी हना, गो यो इन खोदेंशो पा लोत्र पने चबु वा। गो इन कली यो मोदेंशो लोत्र पड वा। गो इन कली शुक्शी पा आं पिया हिक्शा कौंइदन्नी वा। भजन संग्रह २२:८  
 5 गो इन थुं बारपाइक्तीक लोत्र पड वा। मिनू आं शिशी पाइक्तीकेमी इन कली लेम्द वा।  
 6 गो ब्वाक्ती हना यो, आं खाइश्शो मसाब। गो सिक्सी पा बाक्ती हना यो, श्येत जस डा जस बाक्नुड।  
 7 थमा पा, परमप्रभुम आं कली थाम्पा दपाइक्ती। आं एर ओथ डा नेल्ल आन कली खतम सेल्लु।  
 8 मेकोम आं कली रोम्पाइक्ती। मिनू एको आं पर्वम सांकळी दुम्शो बाक्ब। गो रुश नु कुशुल ला लीशो बाक्नुड। एको यो आं पर्वम सांकळी दुम्शो बाक्ब।  
 9 परमप्रभुमी आ गाइश्शोमी आं कली एर ओथ फ्रशो बाक्ब। मिनू आं कली काइ मदाक्ब। मेकोम आं पर्वम आ खुइ शेप्शो बाक्ब। आं जोरी सत्रुमी आं कली सिम्ले पा कोव्रशो बाक्नीम।  
 10 मुरपुकीम आं कली शुक्शी पशो बाक्तेक्म। मेकोपुकीम आं चोत्रचो शुर राप्शो बाक्तेक्म। आं कली मरिम्शो पाइक्चा कली बुक्तेक्म।  
 11 परमप्रभुम आं कली थमा मसुइक्ब आन गुइमी गेशो बाक्ब। मिनू परमप्रभु यावेम आं कली आ अरेशो मटीब आन गुइम ब्वारशो बाक्ब।

12 गो रिम्शो पा बाक्शो नड। तन्न मेकोमी आं कली खोडक्तु। आं शुरम ग्याइशशा चोकटा लाम्टा सेल्लती। मेकोम आं कली आ मिक्च आ क्रिकबील सेल्लती। बिलाप ३:१२

13 आ लिब्रा आप्बपुकीम आं एर ओंथ नेल्ल हिरशो बाक्नीम। मेकोम आं कली शिशो मपथु, आं चिच खिल्लाक्की। मेकोम आं खाडल पुक्शा खपीम तोक्तु।

- 14 मेकोम आं कली पाक्ना पाक्न, लडाइ पाइब खोदेशो पा आं गे बारब।
- 15 गो आं रां सुम्चा कली भाडया फेक्साक्की। गो आं पिया फुरकुम पुम्ता। लेवी ३७:३४
- 16 डाक्शा डाक्शा आं कुल लल जिशो बाक्ब। आं मिक्च आ एर ओंथ नेल्ल क्येर दुम्शो बाक्ब।
- 17 मो हना यो आं गुडमी मरिम्शो मपशो बाक्ती। आं पुंइशो लोत्र रिम्शो बाक्ब।
- 18 ए खप, आं हुश मसुमो। आं पुंइशो लोत्र गेनायो मनांडसेक्ल। उत्पत्ती ४:१०; इजीकीएल २४:७-८
- 19 मो हना यो आं सांकछी स्वर्गम बाक्ब। आं पर्वम लोत्र पाइब इर बाक्शो बाक्ब। अय्युब १७:३
- 20 आं वाक्चम आं कली शुक्शी पाइनीम। गो डाक्शा परमप्रभु गे कोत्रनुड। १सामुएल २:२५
- 21 मेकोमी परमप्रभु नु आंस दातेमी निसाफ पवल। मुर नु आ वारच आन दातेमी दोपा निसाफ पाइबा, मोपा पवल।
- 22 इच्का बर्स नोले गो गेनायो मलेत्चा डा पा लाइनुड” देमाक्त। अय्युब १०:२१

## 17

परमप्रभु कली “वारच पने” दे पुंइशो

- 1 मिनु अय्युबमी “आं थुं जिक्शो बाक्ब। आं नाक्त नुष्शा लशो बाक्नीम। आं कली तुरस ठीक दुम्शो बाक्ब।
- 2 थमा पा, आं एर ओंथ शुक्शी पाइब बाक्नीम। मेको आन शुक्शी पशो मारिड ममिम्नुड। अय्युब १६:१९
- 3 परमप्रभु, गे आंमा आं जाकटी दुमीन। अरु सु आं पर्वम जमानी बाक्ने चाप्बा डा?
- 4 गे मेको आन थुं रे रुप्तीक थुंइताक्नी। मोपतीके गे मेको आन कली टेयब दुम्चा मगेनी।
- 5 सुमी आ शोप वारच आन कली कोइशा योक्चा कली ब्रेप्बा, मेको आ आल जचा मताइनीम।
- 6 मेकोमी आं कली मुर नेल्ल आन दातेम कथा पतीक का सेल्लो बाक्ब। मुरपुकीमी आं डोइती तोक्सीनीम। अय्युब ३०:९
- 7 आं मिक्च श्येत जतीके ब्रा ब्रा दुम्शो बाक्ब। आं गुड खोइल सोत्रशो बाक्नीम। गो वांकु खोदेशो बाक्नुड।
- 8 रिम्शो थुं पाइशशो मुर मेको तशा, छक लाक्नीम। दोस मताइबपुकी परमप्रभु यावे आ अरेशो मटीब आन कली तशा गाइक्नीम।
- 9 मिनु ठीक पाइब मुर आंम लां रिम्शो पा गाक्नीम। मोदेशो मुर बोल्यो क्येडा यो बोल्यो दुम्ना दुम्न लाइनीम।
- 10 मुल गे नेल्ल लेतीन। गो इन दातेमी निप्स पाइशशो मुर का यो मतडमी।
- 11 आं नाक्त नुप्तेक्म। आं मिम्शो नेल्ल मोशा दुम्न। मिनु आं थुं डा मिम्शो जाम्शा लत।
- 12 मेको मुरपुकीम नाक्दो कली नाक्त देनीम। मिनु सुनी दुम्मेनु ‘नां रिक्त’ देनीम।
- 13 गो आं आस पशो खिं बेक्शो मुर आन बाक्तीक बाक्त हना, आं ब्राख्ये छिडछिडम सेल्ला हना यो,
- 14 गो तुरस कली ‘गे आं आफ बाक्नीनी’ मिनु लुस्पु कली ‘आं ममा आं समी बाक्नीमी’ देती हना,
- 15 आं आस पशो ते लाक्गा? मिनु सुम आं पर्वम आस पाइबा?
- 16 मार एको बेक्शो मुर आन बाक्तीक आ नेक्था लाइबा? मार, गो नेल्ल उड फुरकुम काथा लाइनया?” दे अय्युबम देमाक्त।

## 18

बिल्दादम लोत्र पशो

- 1 मिनु शुआह डा बिल्दादमी
- 2 “गे एको लोत्र गेना थुम्नीनी? डोइती मिम्तीन। मिनु गो लोत्र पने चाप्नय।
- 3 मारदे आंड कली बी ब्यफ खोदेशो मिम्तीनी? गे मारदे आंड कली निप्स मपाइशशो सुइक्नीनी?
- 4 गे इन गाइशशोम आंम कली खतम सेल्लसीनीनी। मार, इन पर्वम गो रागी प्रोइनीकी? सेरथे फुल्लु आन बाक्तीक रे याक्चा?
- 5 थमा पा, परमप्रभु यावे आ अरेशो मटीब आन बत्ती काप्ब। मिनु मेको आन मी डा राप रे हाम्सो मयूब। हितोपदेस १३:९
- 6 मेको आन ताम्बुम छेडछेड, छिडछिड दुम्ब। मिनु मेको आन बत्ती काप्शो बाक्ब। अय्युब २१:१७
- 7 मेको आन लांमी आन खोइली ग्येतथ लुक्च पाइब। मिनु मेको आन थुंम मिम्शा पशोमी मेको आन कली खोल्ब।
- 8 आंम खोइलीम मेको आन कली ब्वारदम लपाइक्ब। मेको ब्वारदम गिल्लीशा बिक्तीकेमी दोक्नीम।
- 9 मेको आन खोइली ब्रिम्सोम रेट्चा पुंइसीनीम। क्येयलम रेट्चा पुंइसीनीम।
- 10 मेको आन पर्वम खपीम ब्वारद आ डोरी खुइशशो बाक्ब। मोपा आन लांमी ब्वारद दाइशशो बाक्ब।
- 11 शुश हिंतीकेम मेको आन कली खिंखिं पपाइक्ब। ते बाक्तेक्म हना यो, मेकेर हिंतीके यो बाक्ब। लेवी २६:३६
- 12 मेकोपुकी शोत्रलु बेक्तीके सक्ति मपाइशशो बाक्नीम। मिनु श्येत दुम्शा गोलीम।
- 13 रोड पतीकेमी मेको आन कुशुल नेल्ल नेक्शो बाक्ब। बेक्पाइक्ब रोइमी मेको आन गुड खोइली मदुक्ब सेल्ब। गन्ती १२:१०-१२

14 मेको आन ब्रोंडशा बाक्तीक रां आन परबम 'रिम्शो बाक्ब' दे थमा सुडशशा, मुल रां रे गुंडचा पुंडसीनीम। मिनु हिंपाइक्ब पिप आ बाक्तीके लाइक्चा पुंडसीनीम।

15 मेको आन ताम्बुम मारिड मलीब। मेको आन बाक्तीकेम गन्धक ब्रुडशो बाक्ब।

16 मेको आन शाक्श खप आगाम सोवनीम। मिनु आन राशी सोल सुल बेक्नीम।

17 रागी डा मुरुम मेको आन कली प्रेंनीम। मेको आन नें ममिम्नीम।

18 मेको छेडछेड रे छिडछिडम खेरचा पुंडसीनीम। मिनु रागी रे गुंडचा पुंडसीनीम।

19 मेको आन आल मबाक्नीम। आन चच युड यो मबाक्नीम। मेको आन डोंडती डा बाक्तीकेमी सुड ब्रोंडशा मबाक्नीम।

20 पच्छिम डा मुरपुकी मेको आन श्येत जशो नेशा हिनीम। पूर्व डा मुरपुकी शुश हिशा खिखि पाइनीम। भजन संग्रह ३७:१३

21 थमा पा, परमप्रभु आ अरेशो मटीब मुर आन बाक्तीके मोदेशो दुम्ब। परमप्रभु कली मतुइक्ब मोदेशोन दुम्नीम” दे बिल्दादम अव्युब कली लोत्र लेत्ता बाक्त।

## 19

अव्युबम लोत्र लेशो

1 मिनु अव्युबमी

2 “गे आं कली गेना सम्म श्येत गेनीनी? मिनु इन लोत्रमी आं कली मरिम्शो सेल्नीनी?

3 आं कली १० खेयप सम्म दोस गेतीनी। आं कली काइ मरिम्शो लोत्र पचा मुने मपाइनीनी?

4 गो थमा पा मरिम्शो पशो बाक्ती हना यो, मेको मरिम्शो पशो आं के बाक्ब।

5 थमा पा, गे आं क्येडा टेयब दुम्चा मिम्नीनी। मिनु आं श्येत तशा, आं कली मरिम्शो सुडक्नीनी।

6 परमप्रभुमी आं कली मोशा श्येत गेती। आं एर ओंथ नेल्ल व्वारद दाइशो बाक्ब।

7 गो ‘हुश खाक्श पोक्तीमी’ दे ग्रीती हना यो, आं कली लोत्र मलेप्ब। ‘वारच पाइय्यीनी’ दे पुंडता हना यो, निसाफ मताइनुड। येरमीया २०:८; हबकुक १:२; अव्युब ३०:२०

8 मेकोमी आं लां तेक्शो बाक्ब। मिनु यूशा लने मचाप्नुड। मिनु मेकोमी आं लां छिडछिडम सुम्तु। अव्युब ३:२३; बिलाप ३:७,९

9 मेकोमी आं मान ततीक रोइक्ताकयी। आं पिया रे आं सिरपेच पुइक्तु।

10 मेकोम आं कली लुकच लाइब सेल्ती। गो खतम दुम्ती। रवा तुल्शो खोदेशो पा आं आस नेल्ल नुप्पाइक्तु।

11 मेको आं परबम गाइक्ताक्ब। मिनु आं कली आ जोरी सत्रु खोदेशो मिम्ताकयी। अव्युब १३:२४; अव्युब ३३:१०

12 मेको आ लडाइ पाइबपुकी बुक्शा आं कली पुम्नीम। मेकोपुकीम आं ताम्बु आ एर ओंथ नेल्ल आन बाक्तीक सेल्नीम।

13 मेकोम आं खिं डा मुर आन कली आं क्येडा डोन वोइशो बाक्ब। आं वारच आं कली मतुइक्ब दुम्शो बाक्नीम। भजन संग्रह ३१:१२

14 आं नेक्था डा मुर नु गो नु गारब वारच आं क्येडा डोन दुम्तेक्म। भजन संग्रह ३८:१२

15 आं खिम पौना दुम्शा बाक्बपुकीम प्रेंताकयीमी। आं वाइलीमपुकीम आं कली अर्को रागी डा मुर खोदेशो पा मतुइशो खोदेशो पाइनीम।

16 गो आं वाइल कली ब्रेतुड। तन्न मेकोम लोत्र मलेप्ब। गो मेको कली शुश लेम्शा पुंडचा मालनुड।

17 आं सास आं मीश कली रिना नु ग्रॉग्रा दिशो दुम्शो बाक्ब। गो आं खिं डा मुर आन कली ग्रॉग्रा दिशो दुम्शो बाक्ती।

18 आइक्च आलपुकीमी यो आं कली तशा ग्रॉग्रा दित्नीम। मिनु आं कली तामेनु, मेकोपुकीम शुक्शी पाइनीम।

19 गो नु गारब वारच नेल्लेम आं कली ग्रॉग्रा दित्नीम। आं दाक्शो मुरपुकी आं परबम दूली पा बोक्शो बाक्नीम।

20 आं के रुश नु कुशुल ला लीशो बाक्ब। गो बेक्चा चिक्शो बाक्ती।

21 आं वारचपुकी, आं कली शिशी पाइय्यीनी, शिशी पाइय्यीनी। मारदे हना परमप्रभुम आं कली दिप्शा, श्येत गेशो बाक्ब।

22 गेपुकीमी यो परमप्रभुमी आं कली खेदा पशो खोदेशो पा मारदे खेदा पाइनीनी? मार, आं कली मिश डा श्येत गेशा मरूनी?

23 आं पशो लोत्र ब्रेक्शो हना, मेको किताबम ब्रेक्शो हना, रिम्शो दुम वा।

24 मेको फलाम के याम मुशा नु सिसाम ब्रेक्शो हना, फुल्लुम गेना हना यो लीचा डा पा मुशा ब्रेक्शो हना, रिम्शो दुम वा।

25 तन्न आं कली श्येत रे प्रोंडब का बाक्ब। मेको नोले डा नाक्त रागीम जाक्शा आं सांक्छी दुम्ब। मेको गो तुइक्नुड। यसैया ४१:१४; होसे १३:१४; अव्युब २६:६

26 मिनु आं कुशुल राक्शा खतम दुम नोले, गो आं रांमी परमप्रभु कली ताइनुड। भजन संग्रह १७:१५; भजन संग्रह ७३:२४

27 गो मेको कली आं मिक्चीमीन आं नेक्था ताइनुड। गो मेको तचा कली शुश रिम्ना रिम्न बाक्नुड।

28 गेपुकीम आं कली ‘एको कली दोपा खेदा पचा? मारदे हना श्येत आ शाक्श एको आ आगाम बाक्ब’ देंतीनी।

29 गेपुकी तरवार क्येडा हिनीन। मारदे हना गाइशो आ सजाइ तरवार रे पा जाक्ब। मिनु निसाफ का बाक्ब, दे तुइक्तीन” दे अव्युबम लोत्र लेत्तीमी बाक्त।

## 20

सोफारमी लोत्र पशो

अय्युब १५:-; १८:-

1 मिनू नामा डा सोफारमी

- 2 “नोफा दाइवतीन। आं मिम्शोम आं कली लोत्र लेप्पाइक्व सेलती। मारदे हना गो आं थुं काइ मनुशो बाक्नुड।
- 3 गो आं कली शुक्शी पशो लोत्र नेशो बाक्नुड। आं थुं डा रुप्तीकेम आं कली लोत्र लेप्ब सेल्शो बाक्ब।
- 4 गे एको माइत लोत्र तुइक्नीनी? मुर रागीम बाक्मा रे एको लोत्र बाक्शो बाक्ब।
- 5 एको मार लोत्र बाक्ब देशा हना, परमप्रभु यावे आ अरेशो मटीब आन टेयब लेशो इच्का नाक्त ला लीब। मेको आन ग्येरसीशो याम का ला लीब।
- 6 मेको आन टेयब लेत्तीक सरीड खोइ लाइव्त हना यो नु मेको आन पियाम गोस्स कली थिप्टु हना यो, भजन संग्रह ३७:३५-३६
- 7 मेको खी खोदेशो पा जाम्नीम। मिनू मेको आन कली ताइब नेल्लेम ‘मेको ते लाक्गमे, खोइ?’ देंनीम। मीका ७:१०
- 8 मेकोपुकी डोमु पशो खोदेशो पा जाम्शा लाइनीम। मेको आन कली मथिसीब। मेकोपुकी नाक्दो तशो ततीक खोदेशो पा जाम्शा लाइनीम।
- 9 मेको आन कली तुइक्वपुकीम लेंशा गेनायो मताइनीम। मिनू आन बाक्तीके रे यो जाम्शा लाइनीम। भजन संग्रह ३७:१०
- 10 मेको आन आलपुकीम पुडग आन शिशी माल्नीम। मिनू मेको आन तौपुकीमी पुडग आन शोंप लाइशा गेनीम।
- 11 मेकोपुकी ठिटा दुम्शा, सक्ति पाइशो बाक्तेक्म हना यो, बेक्शा, तुरस डा फुरकुम वोइक्चा पुंडसीनीम।
- 12 परमप्रभु यावे आ अरेशो मटीब आन मरिम्शो पशो मेको आन कली ब्रोत्रशो बाक्त हना, मेको आन लें आगाम खुइशशा वोइक्नीम।
- 13 मेको आंम कली वोइशशा, मप्रोंडब। मेको आन शोत्रम वोइक्तेक्म हना यो,
- 14 मेको आन जचा थोवक आन कोवजम फांडसीब। मिनू मेकेर बुस्स आन बीस दुम्ब।
- 15 मेकोपुकीम मेको आन नेक्शो शोंप लेंशा मेचा माल्नीम। परमप्रभुमी मेको आन कली मेपाइक्ब।
- 16 मेकोपुकीम बुस्स आ बीस युप्नीम। मिनू बीस पाइशो बुस्सुमी मेको आन कली कोक्शा साइक्ब।
- 17 मेको आन के तर नु खुदो शुश बाक्त हना यो, ग्येरशा जचा तूचा मताइनीम।
- 18 मेको आन श्येत पा चेम्शो मारेइ मारेइ मजथु लेशशा गेचा माल्नीम। मिनू आन ग्याप्शा लेयशा चेम्शो क्येट ग्येरशा जचा मताइनीम। ब्यवस्था २८:३०-३३
- 19 मारदे हना मेकोपुकीमी पुडग आन कली दिप्शा श्येत गेम्तेक्म। मेकोपुकीम आन मसेल्शो खिं आंम के सेल्शो बाक्नीम।
- 20 मेको आन शोत्रलु गेनायो मउइक्ब। मिनू मेको आन शोंप मलीब।
- 21 मेकोपुकीम जामे नोले मारेइ महेक्ब। मोपा आन शोंप नेल्ल नुप्शा लाइब।
- 22 मेको आन मिम्शो नेल्ल गाप्त हना यो, मेकोपुकी श्येत जाइनीम। मारेइ मारेइ श्येत मेको आन तार कोम्सीब।
- 23 मेकोपुकी रूने थुम्मे नोले, परमप्रभुम आ गाइशो मेको आन तार मोइक्ब। दोशो जामे मोशो परमप्रभुम सजाइ गेचा पुंडसीनीम।
- 24 मेकोपुकी फलाम के या रे प्रोक्तेक्म हना यो, कांसा के डर पाइशो ब्राम मेको आन कली खिप्ब।
- 25 मेको ब्रा मेको आन कली खिरशा शूनीम। मेको ब्रा आन टल्केशो डरम मेको आन खाइल पुक्शा गुंडब। मोपा मेको शुश हिनीम। ब्यवस्था ३२:४१
- 26 मेको आन शोंप कली थम छिडछिडमी रिम्शा बाक्शो बाक्ब। थाम्पा ब्रशो मीम मेको आन कली दाक्ब। मिनू आन ताम्बुम लीशो मारेइ मारेइ नेक्ब। ब्यवस्था ३२:२२
- 27 स्वर्गम मेको आन मरिम्शो पशो नेल्ल कोंडब। रागी मेको आन कली दोस गेचा कली ठीक दुम्शो बाक्ब।
- 28 मेको आन खिं डा शोंप नेल्ल योल्नीम। मेको गाइक्ता नाक्त मेको नेल्ल योल्नीम।
- 29 मेको परमप्रभु यावे आ अरेशो मटीब आन भाग बाक्ब। परमप्रभुमी गेशो इनाम मेकोन बाक्ब” दे लोत्र लेत्ता बाक्त।

## 21

मटीब आन पर्वम शेंशो

1 मिनू अय्युबमी

- 2 “इन नोफा दाइशशा, आं लोत्र नेनीन। मेको आं कली इन गेशो लेम्तीके बाक्ब।
- 3 गो लोत्र पडानु, आं कली फाल्शा नेनीन। गो लोत्र थुमु नोले आं कली शुक्शी पने चाप्नीनी।
- 4 मार, आं थुं मनुथु पशो लोत्र बेक्शा लाइब मुर आन कली ममाइ। मारदे गो फाल्शा बाक्चा माल्नुडा?
- 5 आं कली कोवयीनी। मिनू सिक्सी पने। मारदे हना गो ग्रांरा दिचा डा तांडसीनुड। इन शोत्र सुम्सीन। अय्युब ४०:४
- 6 गो आं कली ‘मार दुम्बा’ दे मिम्नुड। मिनू ग्रीचोक पा हिनुड। आं रां नेल्ल थुर थुर पा खिंखि पाइब।
- 7 परमप्रभु यावे आ अरेशो मटीब मुर मारदे ब्रोंडना ब्रोंडन बाक्नीमी? मारदे मेकोपुकी खूशो दुम्मानु यो बोल्थो नु सक्ति पाइशो दुम्नीमी? येरमीया १२:१
- 8 मेको आन तमी तौ मेकोपुकी नु बाक्नीमी। मिनू मेकोपुकीम आन चच युइ नेल्ल ताइनीम।



- 9 मेको आन खिंम महिथु बाक्नीम। परमप्रभुम मेको आन कली सजाइ मगेब।  
 10 मेको आन बी व्यफ सोशा बोशा दुम्नीम। बी नेल्ल गिक्नीमी, गेनायो मशाप्नीम।  
 11 मेको आन आल आन कली क्यारश भेडा आन पाठा खोदेशो पा ग्यारथ सोडक्नीम। मिनु मेको आन आइक्च आल सिल पना पन प्रेक्शो बाक्नीम।  
 12 मेकोपुकी खैजडी नु बीना ताप्शा कुम्सो पाइनीम। मिनु बांसुरी ताप्शा ग्येरसीनीम।  
 13 मेकोपुकीम आन नाक्त ग्येरशा सोडक्नीम। मिनु मेको आन थुं नाइश्शा बेक्शो मुर आन बाक्तीक लाइनीम।  
 14 मेकोपुकीम परमप्रभु कली आंड रे पा डोन लन। गो इन लाम गाक्चा मदाक्नीकी, देनीम। अय्युब २२:१७  
 15 'नेल्ल क्येडा ठेयब सक्ति पाइश्शो सु बाक्म? गो मारदे मेको आ गेय पचा माल्नीकी? गो मेको कली पुंडशा मार ताइनीकी डा?' देनीम। प्रस्थान ५:२; २ राजा १८:३५; भजन संग्रह १२:५; दानीएल ३:१५  
 16 परमप्रभु यावे आ अरेशो मटीब आन सोशा बोशा लशो, मेको आम आन पतीके ममाइ। मिनु आन मिम्शो तुइश्शा, गो ग्रांरा दीनुड। अय्युब २२:१८  
 17 परमप्रभु यावे आ अरेशो मटीब आन बत्ती गिश खेयप काम्सीबा? मेको आन पियाम गिश खेयप हिंचा डा श्येत जुक्बा? शुश खेयप मजुक्ब। परमप्रभु आ गाइश्शोमी मेको आन कली गिश खेयप श्येत गेबा? शुश खेयप मगेब।  
 18 गिश खेयप फशेम बेरशो पराल खोदेशो दुम्नीमी? मेकोपुकी गिश खेयप फश गिवारम बेरपाइश्शो भूस खोदेशो दुम्नीमी? शुश खेयप मदुम्नीम। भजन संग्रह १:४  
 19 गेपुकीम 'परमप्रभुमी मेको आन मरिम्शो पतीके आन तमी तौ आन कली खेक्शा वोडक्ब' देनीनी। मोदेशो मदुम्ल। तन्न मेकोमी मेको नेल्ल आन कली सजाइ गेवल। मिनु मेकोपुकीम तुइक्तमेक्ल। अय्युब २०:१०; प्रस्थान २०:५  
 20 मेकोपुकीम आंमा आन कली खतम दुम्तीक तामेक्ल। मेकोपुकीम नेल्ल क्येडा ठेयब सक्ति पाइश्शो आ गाइश्शो तुइक्तमेक्ल।  
 21 मुर आन ब्रोंइतीक नुम नोले मेको आन खिं कोवने चाप्नीमी डा? मेको आन ब्रोंइतीक नुपब।  
 22 मुरुम परमप्रभु कली जोक्तीक तुइक्तीक लोत्र शेंने चाप्नीमी डा? मेकोमी इर बाक्ब आन कली यो निसाफ पाइब। उपदेसक ५:७  
 23 का निक्शी मुर आन माल्शो नेल्ल गाप्शा बेक्नीम। मेको काइ महिथु रिम्शा बाक्नीम।  
 24 मेको आन रां दोम्शो बाक्नीमी। मेको आन रुशेम मासी बाक्ना बाक्न बेक्नीम।  
 25 का निक्शी चहिं श्येतम बीशा, आन थुं कशो दुम्शा बेक्नीम। मेकोपुकीम गेनायो ग्येरचा मतामे।  
 26 मिनु मेको नेल्ल काथा थिम्चा पुंडसीनीम। मिनु लुस्पुमी मेको आन कली सुम्नीम। अय्युब ३:१८-१९  
 27 गेपुकी मार मिम्ना मिम्न बाक्नी, गो मेको रिम्शो पा तुइक्नुड। मेको आं पर्वम दूली मिम्तीक लोत्र बाक्ब, दे गो तुइक्नुड।  
 28 गेपुकीम 'मेको सासन पाइब आ खिं ते बाक्म? मेको परमप्रभु यावे आ अरेशो मटीब मुर आन ताम्बु ते बाक्नीमी?' दे हिल्लो पाइनीनी।  
 29 मार, गेपुकीम लां गाक्ब आन कली गेनायो हिल्लो मपनी? गे मेको आन देशो मतुइक्नीनी?  
 30 शुश हिंचा डा श्येत दुम्मेनु, परमप्रभु यावे आ अरेशो मटीबपुकी ब्रोंइचा ताइनीम। मिनु परमप्रभु आ गाइक्ची नाक्त मेकोपुकी प्रोंइचा पुंडसीनीम।  
 31 सुइम मेको आन कली दोस मगेनीम। सुइमी मेको आन मरिम्शो पशो आ पा डा क्येक्क मलेत्नीम।  
 32 मिनु मेको बेक्शा, कुरशा तुरसुम लाइक्चा पुंडसीनीम। मिनु मेको आन तुरसुम खाल पाइब वोइक्नीम।  
 33 तुरस डा खप यो मेको आन कली रिम्शो बाक्ब। मिनु शुश मुर मेको आन नोले खोइक्नीम। मिनु हिक्ने मचाप्चा डा पा शुश मुर मेको आन क्येडा डोंइती लाम्नेक्म।  
 34 गेपुकी इन देशो फश लोत्रम दोपा आं कली लेम्नीनी डा?" दे अय्युबमी सोफार कली लोत्र लेत्ता बाक्त।

## 22

एलीफाजमी अय्युब कली दोस गेशो

1 मिनु तेमान डा एलीफाजमी

2 "बेक्शा लाइब मुरुम परमप्रभु कली मार पने चाप्वा डा? शुश जोक्ब तुइक्ब मुरुम यो मेको कली मार गेय पने चाप्वा डा?

3 गे ठीक पाइब बाक्तीनी हना, नेल्ल क्येडा ठेयब सक्ति पाइश्शो कली मार रिम्शो दुम्बा डा? इन पशो नेल्ल दोस मततीक बाक्त हना, मेको कली मार रिम्शो दुम्बा डा? अय्युब ३५:६-८

4 इन परमप्रभु कली मान पा हिंतीके आ पर्वम इन कली महुइक्ब। मेको आ पर्वम इन कली निसाफ मपाइब।

5 इन परमप्रभु यावे आ अरेशो मटितीके ठेयब बाक्ब। इन मरिम्शो पतीके गेनायो मनुपब।

6 गे मोशान इन लोक्ब आ वा जाकटी लाइक्तीनी। आन वा रोइश्शा शिस्त्रा सेलतीनी। प्रस्थान २२:२५-२६; अय्युब २४:९-१०

7 गे तूत दाक्शा, लकचा सोव्रशो मुर आन कली ब्वाक्कु मगेनी। मिनु शोत्रलु बेक्शो मुर आन कली जचा थोत्रक मगेनी। अय्युब ३१:१७; मत्ती २५:४२-४३

8 सक्ति पाइश्शो मुर आन के शुश रू बाक्नीम। मेको आन दाक्शो मुर आन कली मेकेर बाक्चा गेनीम।

9 गे आन वोइश बेक्शो मीश मुर आन कली श्येत्थ गुड सोइक्ताक्नी। मिनु रोम रोइक्च आन तचा माल्शो मगेनी। अय्युब २९:१२-१३

- 10 मोपतीके इन गाक्तीक लां आ एर ओंथ नेल्ल ब्वारद दाइशो बाक्नीम। मिनू इन कली इन मतुडक्चा डा पा शुश हिंतीके जाक्ब।
- 11 मिनू तने मचाप्या डा छिडछिडम इन कली सुम्ब। मिनू ब्वाक्कु बारशा यिशा इन कली सुम्ब।
- 12 परमप्रभु इर स्वर्गम बाक्ब। सोरुल आन कली कोव्रडीन। गिश इर बाक्नीमी।
- 13 मोपतीके गे 'परमप्रभुमी मार तुडक्चा डा? मेकोम गोस्स आ छिडछिड रे दोपा निसाफ पाइबा डा?
- 14 गोस्स आ छिडछिड मेको कली सुम्तीके, मेकोम आंइ कली तने मचाप्व। मिनू मेको सरीडम एर ओंथ गाक्शा बाक्ब' देतीनी।
- 15 गे परमप्रभु यावे आ अरेशो मटीब आन माइत लां मप्रॉइब बाक्नीनी?
- 16 मेको आन नाक्त मजाक्थु साइक्चा पुंडसाक्म। मेको आन जग ब्वाक्कुम योल्ताक्व। अय्युब १५:३२-३३; उत्पती ७:२१
- 17 मेको मुरपुकीम परमप्रभु कली 'आंइ रे पा डोन लन। नेल्ल क्येडा सक्ति पाइशोमी आंइ कली मार पने चाप्व डा?' दैतेक्म। अय्युब २१:१४
- 18 मो हना यो मेकोमी, मेको आन खिं रिम्शो थोव्रकमी प्रिताक्व। तन्न परमप्रभु यावे आ अरेशो मटीब आन मिम्शो काइ मदाक्नुड।
- 19 ठीक पाइबपुकी मेको आन कली तशा ग्येरसीनीम। दोस मताइबपुकीम मेको आन कली शुक्शी पा रितीम। भजन संग्रह १०७:४२
- 20 मेकोपुकीमी 'थमा पा, इं जोरी सत्रु साइक्चा पुंडसाक्म। मिनू मेको आन शोप मीम नेक्तु' देनीम।
- 21 परमप्रभु नु गारीन। मिनू थुं नाइक्तीन। मो पाइतीनी हना इन रिम्शो दुम्तीके लेशा ताइनीनी।
- 22 मेको आ शेशो पने। मिनू इन थुंम वोतीन।
- 23 गे नेल्ल क्येडा टेयब सक्ति पाइशो गे लेतीन। मिनू डोंइती डा खोदेशो दुम्नीनी। गे इन ठीक मपतीके इन क्येडा डोन वोतीन। अय्युब ८:५-७; अय्युब ११:१४-१५
- 24 गे सुन फुरक खोदेशो मिम्ताक्नी हना, ओफीर डा सुन कली खोला डा फुल्लु खोदेशो मिम्ताक्नी हना,
- 25 नेल्ल क्येडा टेयब सक्ति पाइशो इन शोप दुम्ब। मेको इन सुन चांदी दुम्त हना,
- 26 मेना नेल्ल क्येडा टेयब सक्ति पाइशो कली मिम्शा, ग्येरशा बाक्नीनी। मिनू गे इन पिया पोक्शा परमप्रभु गे कोव्रनीनी।
- 27 गे मेको कली पुंडनीनु, मेकोमी इन पुंडशो नेंब। मिनू गे इन जशो कसम खाप्नीनी। भजन संग्रह ५०:१४-१५
- 28 गे मार पाइनुड, दे मिम्नीनी, मेको दुम्ब। मिनू इन लांम छेडछेड दुम्ब।
- 29 मारदे हना मेकोमी टेयब लेशो लोव्र पाइब आन कली आइक्च सेल्ब। ब्रेम्शो मुर आन कली चहिं प्रॉइब। १ पत्रुस ५:५
- 30 मेकोमी दोस ताइब आन कली यो प्रॉइब। गे दोस मताइब बाक्तीके मेको आन कली प्रॉइब" दे एलीफाजमी अय्युब कली लोव्र लेत्ता बाक्त। भजन संग्रह १८:२१,२५; २कोरिन्थी ५:२

## 23

अय्युबम लोव्र पशो

1 मिनू अय्युबमी

2 "मुलाक्ती आं देशो लोव्र थुं मनुचा डा बाक्ब। गो हुकयी पना पन बाक्ती हना यो, परमप्रभुमी आं कली श्येत गेना गेन बाक्ब।

3 गो मेको कली ते बाक्बा, मेको तुडक्तु हना, गो मेको आ बाक्तीके लाड वा।

4 गो आं श्येत मेको आ डोंइती नेल्ल शोव्रडु वा। गो मेको कली आं देंचा माल्लो लोव्र नेल्ल देंड वा।

5 मेकोमी आं कली मार लोव्र लेप्बाक्मे गो मेको तुडक्तु वा। मिनू गो मेकोम आं कली मार देंबाक्मे मेको रुबु वा।

6 मेको आ टेयब सक्तिमी गो नु लोव्र पाइबा डा? ममाइ, परमप्रभुमी आं कली गेनायो दोस मंगेब।

7 रिम्शो थुं पाइशो मुरपुकीमी मेको नु लोव्र पने चाप्नीम। मिनू गो आं निसाफ पाइब रे गेना हना यो प्रॉइचा पुंडसीड वा।

8 गो डोंइती गे लती हना, मेको मेक मबाक्ब। गो नोले गे लेत्ती हना यो, मेको मेक मबाक्ब।

9 मेकोमी पेरा गे खुडक्ताक्व हना, गो मेको कली मताइनुड। गो ग्युरा गे हिरसीडानु यो मेको कली तने मचाप्नुड। अय्युब ४२:५

10 तन्न मेकोमी आं गाक्शो लां तुडक्ब। मेकोमी आं कली नाक्शा कोव्रयीनु, गो सुन खोदेशो दुम्नुड। भजन संग्रह १७:३; भजन संग्रह १३९:२३-२४

11 गो मेको आ नोले खोइशो बाक्नुड। गो मेको आ लांम ला गाक्शो बाक्ती। गो ग्युरा पेरा मपड।

12 गो मेको आ शेशो पाता। मेको आ लोव्र नाक्त कित कित डा आं जचा थोव्रक क्येडा यो शुश मिम्ताक्ड।

13 तन्न मेको आ कान बाक्ब। मिनू सुमी मेको कली तेक्ने चाप्व डा? मेकोमी आ मिम्शो खोदेशो पाइब।

14 मेकोमी आं कली मार पचा मिम्बा, मेको नेल्ल पाइब। मिनू मोदेशो शुश मिम्ब।

15 मोपतीके गो मेको नु गुम्चा शुश हिंनुड। गो मेको कली मिम्शा हिंशा खिंखि पाइनुड।

16 परमप्रभुम आं थुं थपाइशो बाक्ब। नेल्ल क्येडा टेयब सक्ति पाइशोमी आं कली हिंपाइक्ब।

17 छिडछिडमी आं कली सिकसी पपाइक्ने मचाप्व। मेको छिडछिडमी आं कली सुम्ने मचाप्व" दे अय्युबमी देमाक्त।

## 24

परमप्रभु कली मटीब

1 मिनू अय्युबमी “नेल्ल क्येडा ठेयब सक्ति पाइशशोमी निसाफ पतीके नाक्त मतुडक्पदा? आ नेक्था बाक्बपुकीम यो मेको आन नाक्त मारदे मतुडक्नीमी? उपदेसक ३:११; उपदेसक ८:६

2 परमप्रभु यावे आ अरेशो मटीब मुरपुकीम सांद डा फुल्लु याक्नीम। मेकोपुकीम क्यारश भेडा खुड पशा योवनीम। ब्यवस्था २७:१७

3 मेकोपुकीम रोम रोडक्च आन गधा खुल्शा लाइक्नीम। मिनू वोंडश बेक्शो मीश मुर आन ब्यफ जाकटी वोंडसीनीम।

4 मेकोपुकीम पुडग आन कली लां मेर चुशा थोक्शा गाक्नीम। रागी डा पुडग आन कली खुडक्पाइक्नीम।

5 ब्वाकी डा गधा गोरशो रागीम जचा थोव्रक माल्शा गाक्शो खोदेंशो पा, पुडगपुकी जचा थोव्रक माल्शा गाक्नीम। मिनू गोरशो रागीम मेको आन तमी तौ आन कली जचा थोव्रक माल्नीम।

6 पुडगपुकीम मुर आन रूम सिला माल्नीम। परमप्रभु यावे आ अरेशो मटीब मुर आन अडगुर रूम सिला पाइनीम।

7 वा मबाक्तीके मेकोपुकी शिन्ना इप्नीम। मेको आन के ग्यूमी फेक्तीक मबाक्ब।

8 मेको पहाडम बाक्शा रउम जिल्नीम। फाम्सीतीके मबाक्तीके, फुल्लु आ नेक्था फाम्सीनीम।

9 परमप्रभु यावे आ अरेशो मटीबपुकीम रोम रोडक्च आन कली आन ममा आ थुकु रे रोडशशा, लाइनीम। मिनू मारेड मथीब मुर आन आल आन कली आन जेर आ पा डा लाइनीम।

10 मेकोपुकी वा मबाक्तीके शिन्ना गाक्नीम। शोव्रलु बेक्शा यो, क्योव्रज चेरब आ मुठा कुरनीम। यसैया ५८:१७

11 मेकोपुकीम गारो आन दातेमी तेल खाक्नीम। अडगुर खाक्तेकम हना यो तूतू, दाक्शो बाक्नीम। याकूब ५:४

12 सहर रे बेक्चा चिक्शो मुर आन हुक्यी पशो नेंसीब। मिनू गार दुम्शो मुरुम ‘वारच पाइय्यीनी’ दे वाइ ब्रेप्ब। मो हना यो परमप्रभुम मेको आन पुंडशो मनेब।

13 का निक्शी मुर छेडछेड आ पर्वम मरिम्शो लोव्र पाइनीम। मेकोपुकीम छेडछेड डा लां मतुडक्थु, मगाक्नीम।

14 मुर साइक्ब मुर नां रिक्म नोले बोक्शा पुडग नु मारेड मथीब आन कली साइक्ब। मिनू नाक्दो मेको खुड खोदेंशो दुम्ब।

15 मुर आन मीश नु मुर आन वोंडश नु इक्ब नां रिक्चा रिम्ब। मिनू मेकोमी ‘नाक्दो सुडम आं कली मतुडक्तमेक्ल’ दे आ कुल फाइक्ब। भजन संग्रह १०:११

16 खुड्पुकी नाक्दो खिं प्रोल्शा ओव्रनीम। मिनू नाक्त खुंडसीनीम। मिनू मेकोपुकीम छेडछेड मतुडक्नीम।

17 मारदे हना क्येर नाक्दो मेको आन कली सुनी बाक्ब। क्येर नाक्दो डा शुश हिंतीके मेको आन वारच बाक्ब।

18 मेको मोदेंशो मुरपुकी ब्वाक्कु आ तार डा बोय्यो खोदेंशो बाक्नीम। मेको आन थेरशो रू सराप चीले तशो बाक्नीम। सुड मुर आन अडगुर रू गे मलाइनीम।

19 दोपा यशो फु कली नां नु होशोम सोव्रपाइक्बा, मोपा बेक्शो मुर आन बाक्तीकेमी पापी आन कली साम्पाइक्ब।

20 मेको आन कली जरमेब कोव्रजीम मेको आन कली प्रेंब। मिनू लुस्पुमी ‘मेको ब्रोव्रशो बाक्नीम’ दे मिन्नीम। मुरुम मेको आन कली प्रेंनीमी। मोपा परमप्रभु यावे आ अरेशो मटीबपुकी दिम्शो रवा खोदेंशो दुम्नीम।

21 मेकोपुकीमी आल मथीब मीश मुर आन कली श्येत गेनीम। मिनू आ वोंडश बेक्शो मीश मुर आन कली मारेड रिम्शो मपाइनीम।

22 मो हना यो परमप्रभु आ सक्तिमी मेको बोल्यो मुर आन कली ब्रोंडचा गेब। तन्न गेना बेक्नीमी मतुडक्नीम।

23 परमप्रभुम मेको आन कली प्रोंडतु हना यो, मेकोमी मेको आन कली गेना हना यो कोव्रशो बाक्ब।

24 याम का कली मरिम्शो पाइबपुकी ग्येत्थ क्युक्चा पुंडसीनीम। मिनू नोले मेको जाम्नीम। अरु खोदेंशो पा मेकोपुकी यो बेक्शा लाइनीम। मिनू मेकोपुकी चेरब पेशो खोदेंशो पा पेट्सीनीम।

25 सुडमी आं कली ‘गे जोल पाइब नवे’ दे देने मचाप्नीम। मिनू आं कली ‘फश लोव्र पाइब’ देने मचाप्नीम” देमाक्त।

## 25

बिल्दादमी लोव्र पशो

1 मिनू शुआह डा बिल्दादमी

2 “नेल्ल क्येडा ठेयब दुम्तीके नु मान पा हिंतीके परमप्रभु नु बाक्ब। मेकोमी इर स्वर्गम थु नाइशशा बाक्तीक सेल्ब।

3 मेको आ लडाइ पाइब हिकने मचाप्चा डा बाक्नीम। मेको आ छेडछेड नेल्ल आन बाक्तीके मजाक्बा डा?

4 बेक्शा लाइब मुर दोपा परमप्रभु आ डोंडती ठीक पाइब दुम्ने चाप्नीमी डा? मीश मुर रे जरमेशो मुर दोपा ग्रॉगा मदिचा डा दुम्ने चाप्नीमी डा? अय्युब १:२; भजन संग्रह १४३:२

5 मेको आ डोंडती तास्लाम ठीक पा छेडछेड मगेब। सोरुल आन छेडछेड मगारचा डा बाक्नीम। अय्युब १५:१५

6 मिनू लुस्पु खोदेंशो मुर, दोपा परमप्रभु आ डोंडती ठीक दुम्ने चाप्चा डा?” दे बिल्दादम देमाक्त। यसैया ४१:१४

## 26

अय्युबमी लोव्र लेशो

1 मिनू अय्युबमी

2 “गे दोपा बोल मपाइशशो मुर कली वारच पाइक्नी? योक्शो गुड कली गे दोपा नाइक्चा गेनी?

- 3 गे मतुडक्ब मुर कली, अर्ती गेतीनी। मिनू गे शुश रिम्शो लोत्र शेंताकनी।  
 4 ओदेशो लोत्र पचा कली गे ते शेंसीनी? मिनू तेको सोक्त रे पा ओदेशो लोत्र पनी?" दे अय्युबमी देंमाक्त।  
 5 "उड डा मुर आन वांकु खिंखि पाइनीम। ब्वाक्कु नु मेकेर बाक्बपुकी यो खिंखि पाइनीम।  
 6 परमप्रभु आ डोंडती बेक्शो मुर आन बाक्तीके मखुंडसीशो बाक्ब। मिनू जाम्शा लतीके मसुम्सीशो बाक्ब। भजन संग्रह  
 १३९:८; हितोपदेस १५:११; आमोस ९:२; प्रकाश ९:१  
 7 मेकोम श्येत्य बाक्तीकेमी उत्तर डा सरीड प्राक्ब। मिनू रागी कली मारेड मबाक्तीकेम क्युकब।  
 8 मेकोमी ब्वाक्कु कली क्येर गोस्सुम तेक्शा वोडक्ब। मिनू मेको गोस्स मप्रोल्ब। ब्वाक्कु मप्रूब।  
 9 मेकोमी पुर्न डा तास्ला कली सुम्ब। मिनू आ गोस्सपुकी मेको आ तारी प्राक्ब।  
 10 मेकोमी ब्वाक्कु आ सुरम सांद वोडशो बाक्ब। छिडछिड नु छेडछेड फ्राचा कली मो पशो बाक्ब।  
 11 मिनू सरीड डा थामपुकी हिम्सीनीम। परमप्रभु आ हुडशोमी हिंशा सिक्सी पाइनीम।  
 12 मेकोम आ सक्तिम समुन्द्र कली थेलतु। मिनू आ रुप्तीकेम राहाब माडशो समुन्द्र डा ठेयब जन्तु कली खतम सेलतु।  
 अय्युब ९:१३; भजन संग्रह ८९:११  
 13 मेको आ फश पतीकेमी सरीड हाक्साक्ब। मेकोम दोरशा प्रोक्ब ठेयब जन्तु कली साइक्तु। यसैया २७:१  
 14 मेको आ सक्ति डा आइक्च गेय ला बाक्नीम। मेको रे गो आइक्च सेंदा डा लोत्र ला नेंतक। मिनू मेको आ सक्तिम पशो बुंबु, सुम रुप्ने चाप्बा डा?" देंमाक्त।

## 27

अय्युबम लोत्र पशो

- 1 मिनू लेंशा अय्युबमी  
 2 "परमप्रभु यावे ब्रोंडशा बाक्शो खोदेशो पा आं ठीक पशो आ पब्रम मारेड मदे। नेल्ल क्येडा ठेयब सक्ति पाइशोम आं थुं खाइक्पाइशो बाक्ब।  
 3 गो आं राम सोक्त बाक्म सम्म, परमप्रभु आ सोक्त आं नेंम बाक्म सम्म,  
 4 गो मारेड जोल मपाइनुड। मिनू मिलो शिलो मपाइनुड। भजन संग्रह ३४:१४  
 5 गो गेपुकी ठीक बाक्नीनी, दे मदेनुड। गो मबेक्डा सम्म आं रिम्शो पतीक मप्रोंडनुड।  
 6 गो आं ठीक पतीके कली गेनायो मप्रोंडनुड। गो मबेक्डा सम्म दोस मताइब बाक्नुड। प्रेरित २४:१६; १कोरिन्थी ४:४  
 7 आं जोरी सत्रु परमप्रभु यावे आ अरेशो मटीब खोदेशो दुम्मल। आं कली मदाक्बपुकी ठीक मपाइब खोदेशो दुम्मल।  
 8 परमप्रभु यावे आ अरेशो मटीब मुर बेक्चामेनु, परमप्रभुम मेको आन सोक्त लाइक्चावानु, मेको आन के मार आस बाक्बा डा? लूका १२:२०  
 9 श्येत जचा चिक्तेमेनु, आन डाक्शो परमप्रभुमी नेंबा डा?  
 10 मार, मेकोपुकीम नेल्ल क्येडा ठेयब सक्ति पाइशो कली मिम्शा ग्येरसीनीमी? मेकोपुकीम गेना हना यो मेको कली मिम्शा पुंडनीमी डा?  
 11 गो इन कली परमप्रभु आ पशो आ पब्रम शेंनुड। गो नेल्ल क्येडा ठेयब सक्ति पाइशो आ मिम्शो मखुडक्नुड।  
 12 मेको गे नेल्लेम ताइतीनी। गेपुकी मारदे फश लोत्र पाइनीनी?  
 13 परमप्रभु यावे आ अरेशो मटीब आन कली गेशो भाग एकोन बाक्ब। नेल्ल क्येडा ठेयब सक्ति पाइशोम शिशी मपाइक्ब आन कली गेशो भाग एकोन बाक्ब। हितोपदेस १३:२२; उपदेसक २:२६  
 14 मेको आन तौ शुश बाक्तेक्म हना यो, मेकोपुकी तरवारम क्योरशा साइक्चा पुंडसीनीम। मिनू मेको आन चच युड रूशी जचा मताइनीम। अय्युब २१:१९  
 15 मिनू लीशोपुकी बेक्तीक रोड पा बेक्शा थिम्चा पुंडसीनीम। मिनू आन मीशपुकी रेंका मपाइनीम।  
 16 मेकोपुकीम फुरक खोदेशो पा चांदी खुप्ताक्म हना यो, खप खोदेशो पा शुश वासी तेल्लेक्म हना यो,  
 17 मेकोपुकीम तेल्लीमी, तन्न ठीक पाइबपुकीम फेक्नीम। मिनू मेको आन चांदी दोस मताइब आन कली योक्शा गेनीम।  
 18 मेको आन खिं ग्योत्र खोदेशो पा सेल्लो बाक्ब। अडगुर रू खाल पाइब मुर आन बाक्तीके खोदेशो दुम्ब।  
 19 मेको शोंप पाइशो दुम्शा इप्नीम। तन्न मुल रे मोदेशो मदुम्नीम। मेको बोक्मानु, मेको नेल्ल लने थुम्शो बाक्ब।  
 20 शुश हितीकेम मेको आन कली बारशो ब्वाक्कुम खोदेशो पा सुम्ब। मिनू नाक्दो फश गिवारमी मेको आन कली योल्ब।  
 21 पूब्र डा फशेमी मेको आन कली बेर पा योल्ब। मिनू मेको आन बाक्तीके योल्चा पुंडसीनीम।  
 22 फशेमी शिशी मपथु, मेको आन कली योल्ब। मिनू मेकोपुकी मेकेर रे प्रोक्चा माल्नीम।  
 23 मेको फशेमी मेको आन कली तशा, आन गुड फ्रेक्नीम। मेको आन बाक्तीकेम मेको आन कली शुक्शी पाइब" देंमाक्त।

## 28

सोफार आ लोत्र

- 1 मिनू अय्युबमी "चांदी आन खानी बाक्नीम। सुन यपाइशशा रिम्शो सेल्लतीक बाक्नीम।  
 2 फलाम दोशा खप रे गुंडनीम। फुल्लु रे तांबा यपाइशशा गुंडनीम।  
 3 मुरुम छिडछिड कली थुम्पाइक्नीम। मेकोपुकी रागी आगा डा छिडछिडम खानी माल्ना माल्ना गाक्नीम।

- 4 मुर आन बाक्तीक रे शुश डोन लाइनीम। मिनु मुरुम मथेक्तीक रागी लाइनीम। मेकोपुकीमी खानी आगा लतीक पोव्रला दोइनीम। मिनु मेकोपुकी सुइ मबाक्तीकेम डोरीम ग्युकशा बिक्तीकेम गेय पाइनीम।
- 5 मिनु अन्न रू आन आगाम खानी दोना दोन बाक्नीम। मिनु नेल्ल खल्बल सेल्नीम। खप कली मी सेल्नीम।
- 6 मेको फुल्लु रे साफीर माइशो हीरा नु सुन के फुरक गुंडनीम।
- 7 तेकोइ सिखार पाइब चिकबीम मेकेर लतीक लां मतुइक्ब। मिनु ब्वारदे आ शुश ताइब मिक्चीमी यो मेको मतशो बाक्ब।
- 8 ठेयब लेशो जन्तु यो मेकेर मजाक्दील्नीम। मिनु गुप्सपुकी मेको लां रे मलाइनीम।
- 9 मुरुम आन गुइमी सारो फुल्लु क्योरनीम। मिनु पहाड आन कली दिम सेल्नीम।
- 10 मेकोपुकीम रंगुम पोव्रला मुइनीम। मिनु शुश क्येट लाइब हीरापुकी ताइनीम।
- 11 मेकोपुकीम खोला आ बुक्तीक माल्नीम। मिनु रागीम थिम्शा वोंइशो शोंप गुंडनीम।
- 12 तन्न तुइक्तीक चहिं ते थिंसीबा? मिनु रुप्तीके ते बाक्बा?
- 13 बेक्शा लाइब मुरपुकीम मेको आ लां मतुइक्नीम। ब्रोंइशा बाक्ब मुर आन रागीम मेको मथिंसीब।
- 14 मिनु खप आ लुकच लशोमी 'मेको गो नु मबाक्ब' देंब। मिनु समुन्द्रमी यो 'मेको गो नु मबाक्ब' देंब।
- 15 मुरुमी सुनमी रुप्तीके ग्याप्ने मचाप्नीम। चांदी नाक्शा यो मेको कली थाप्ने मचाप्नीम। हितोपदेस ३:१३-१५
- 16 रुप्तीके कली ओफीर डा सुन, शुश क्येट लाइब ओनीक्स नु साफीर माइशो हीरामी यो ग्याप्ने मचाप्नीम।
- 17 सुन नु सिसा आस क्येडा तुइक्तीके नु रुप्तीके ठेयब बाक्ब। क्येख सुन के गहाना नु यो मेको फाइक्ने मचाम्सीब।
- 18 लल मूगा नु टल्केब फुल्लु आ पर्वम लोव्र पचा ममाल्ब। तुइक्तीक थुं मोती आन क्येडा यो शुश क्येट लाइब बाक्ब।
- भजन संग्रह १११:१०; हितोपदेस १:७, ९:१०
- 19 एथीयोपीया रागी डा पुशराज माइशो हीरा मेको नु उइक्थ दुम्ने मचाप्ब। मेको क्येख सुनम ग्याप्ने मचाप्नीम।
- 20 मिनु तुइक्तीक थुं ते रे जाक्बा? मिनु रुप्तीके ते बाक्बा?
- 21 मेको ब्रोंइशा बाक्ब नेल्ल आन डोंइती रे खुइशो बाक्ब। मेको सरीडम बेरब चिकब आन क्येडा यो खुइशो बाक्ब।
- 22 जाम्शा लतीके नु बेक्पाइक्बमी 'गो मेको आ पर्वम नेशो ला बाक्नस्कु' देनीस।
- 23 तन्न परमप्रभुमी मेको आ लां तुइक्ब। मेको ते रे जाक्बा मेको यो तुइक्ब। हितोपदेस ८:२२-३१
- 24 मारदे हना मेकोमी रागी आ एर ओथ नेल्ल ताइब। मिनु सरीड आगा डा मारेड मारेड नेल्ल आन कली कोव्रब।
- 25 मेकोमी फश कली सक्ति गेपु। मिनु समुन्द्र आ सांद वोंइक्तु।
- 26 मेकोम 'दोशो रेड थिचा माल्बा' मेको अरेपु। मिनु बंबु कली आ लां कोंइताक्व।
- 27 मेना मेकोम रुप्तीक नु तुइक्तीक कली तशा 'एकेर बाक्ब। मोदेशो दुम्शा माल्ब। मेको रिम्शो बाक्ब' देमाक्त।
- 28 मिनु मेकोमी मुर आन कली 'परमप्रभु यावे कली मान पा हितीके तुइक्तीक बाक्ब। मरिम्शो पतीक रे डोन बाक्चा रुप्तीके बाक्ब' देंत" दे अय्युबमी देमाक्त। भजन संग्रह १११:१०; हितोपदेस १:७

## 29

डोंइती डा ग्येरशा बाक्शो मिम्शो

1 मिनु लेंशा अय्युबमी

- 2 "गो डोंइती डा खोदेशो बाक्ड हना! मेना परमप्रभुमी आं कली कोव्रशो बाक्त।
- 3 मेना मेको आ छेडछेड आं पिया तार बाक्त। मिनु गो छिडछिडम मेको आ हाम्सोम गाक्ती। भजन संग्रह १८:२९
- 4 गो आं थम रिम्शो नाक्तीम परमप्रभु आं वारच दुम्शा, आं नेक्था बाक्त। भजन संग्रह २५:१४
- 5 मेना मेको नेल्ल क्येडा ठेयब सक्ति पाइशो गो नु बाक्शो बाक्त। मिनु आं तौपुकी आं एर ओथ बाक्तेक्म।
- 6 मेना आं लांम दूध शाइशो बाक्त। मिनु सेरथे फुल्लु रे तेल के खोला शाइशो बाक्त।
- 7 गो आं बाक्तीके रे सहर डा ठेयब लाप्चो रे पा लाइगा आं नित्तीकेमी नित्थ लडानु,
- 8 ठिटापुकीम आं कली तशा, लां प्रोंइशा गेतीमी। मिनु खूशोपुकी आं कली तशा मान पा राप्तेक्म।
- 9 ठेयब मुरपुकी सिक्सी पा बाक्तेक्म। मिनु मेकोपुकीम आन गुइमी आन शोव्र सुम्तेक्म।
- 10 सासन पाइब आन ब्वाक्चा देक्शा, सिक्सी पा बाक्तेक्म।
- 11 आं ब्वाक्शो नेंबपुकीम आं कली ठेयब सेल्तीमी। मिनु आं कली तशा 'रिम्शो बाक्ब' देंतेक्म।
- 12 मारदे हना गो 'वारच पाइक्की' देंब पुडग आन कली वारच पा प्रोंइतामी। वारच पाइब मबाक्शो रोम रोइक्च आन कली वारच पाइक्तामी। अय्युब ३१:१६; प्रस्थान २२:२१-२२
- 13 मारेड आस मबाक्शो मुरपुकीम आं कली आसीक गेतीमी। गो आन वोंइश बेक्शो मीश मुर आन थुं ग्येरपाइक्तामी।
- 14 गो ठीक पतीक कली वा फेक्सीशो खोदेशो पा फेक्साक्यी। आं ठीक निसाफ पतीके आ वा नु आं फेटा खोदेशो बाक्त।
- 15 गो मिक्च मताइब आन मिक्च दुम्ती। मिनु खोइल मदुक्ब आन खोइल दुम्ती।
- 16 मारेड मथीब आन कली आन आफ खोदेशो दुम्ती। गो अर्का रागी डा मुर आन कली आन मुददा कोव्रशा गेतामी। अय्युब ३१:१८
- 17 गो ठीक मपाइब आन सक्ति नेल्ल खतम पोक्तामी। मिनु मेको आन रोइशो लेप्पाइक्ता।
- 18 मेना गो आं खिम श्येत मजथु बेक्नुड, दे मिम्शो नड। मिनु गो शुश बर्स ब्रोंइनुड, दे मिम्शो नड।
- 19 आं शाक्श बारशा ब्वाक्कु बाक्तीक गे लाम्तेक्म। मिनु आं रागीम सीत बाक्त।

- 20 आं सक्ति गेना हना यो बाक्त। मिनु आं गुड डा लिब्रा गेना हना आप्ने चाप्शो बाक्ती।  
 21 गो लोत्र पडानु, मुर नेल्लेमी सिक्सी पा नेतेकम। मिनु नोफा दाइशशा आ अर्थ नेतेकम।  
 22 गो आं लोत्र थुमु नोले सुडमी अरु लोत्र तेम्चा ममाल्देम। आं लोत्र मेको आन थुमी सीत खोदेशो पा जिन्ना जिन्न लत।  
 23 मेकोपुकीम बर्खा डा रेउ रिम्शो खोदेशो पा आं कली रिम्ताक्वीमी। मिनु नोले डा रेउ रिम्शो खोदेशो आन शोत्र वोक पाक्शा आं लोत्र नेतेकम।  
 24 गो ज्याउ रिस्सीडानु, आन थुं वारत। आं ग्येशो कुल तशा, मेको आन कली लेम्तीक दुम्त।  
 25 गो मेको आन गाक्चा माल्लो लां योत्रशा गेतामी। मिनु गो 'ओं पने' दे अरेतामी। गो पिप आ लडाइ पाइब आन दातेम बाक्शो खोदेशो बाक्ती। गो रोंका पाइब आन कली लेम्ब खोदेशो दुम्ती" दे अय्युबमी देमाक्त।

## 30

अय्युब आ थुं लुकच लशो

- 1 मिनु अय्युबमी "मुल टिटापुकी आं कली तशा शुक्शी पा रिस्साकम। मेको आं क्येडा टिटा बाक्नीम। मेको आन आप आन कली गो आं क्यारश भेडा खाल पाइब कुचुमपुकी नु काथा वोइक्चा यो मशिरशो मिम्शो नड। अय्युब १९:१८  
 2 मेको आन गेय आं कली शोर गाक्शो बाक्त। मारदे हना मेको आन सक्ति ग्युम्ने थुम्शो बाक्त।  
 3 मेकोपुकी शुश पुडग नु शोत्रलु बेक्शो बाक्तेकम। मेकोपुकी गोरशो सोत्रशो रागीम आन जचा थोत्रक माल्तेकम।  
 4 मेकोपुकीम हिक्सी डाम्शो सुवा, बुटा आन सफा सेक्शा जाडनीम। मिनु मार मार आन शाक्शा दोम्तेकम।  
 5 मेकोपुकी मुर आन दाते रे तिल्चा पुंडसीशो बाक्तेकम। मुरपुकीम मेको आन कली खेदा पशो खोदेशो पा ग्रीतेकम।  
 6 मेकोपुकी सोत्रशो खोलामी, पुक्खी आगा नु ब्रोल्शो सेरथे फुल्लु मेर बाक्तेकम।  
 7 मेकोपुकीमी बुटा आन आगामी ग्रीतेकम। मिनु बुटा आगामी बुक्तेकम।  
 8 मेको निप्स मपाइशशो, महिक्सीशो मुर बाक्तेकम। रागी रे तिल्शा खेरचा पुंडसीशो बाक्तेकम।  
 9 मुल गो मेको आन शुक्शी पतीके कुम्सो दुम्ती। आं पर्वम शुक्शी लोत्र ला पाडनीम। भजन संग्रह ६९:१३; बिलाप ३:६३  
 10 मेकोपुकीम आं कली ग्रांरा दिशो मिन्मीम। आं क्येडा डोन बाक्नीम। आं कुलुम तोक्चा मुने मपाडनीम। अय्युब १७:६; मत्ती २६:६७  
 11 मारदे हना परमप्रभुमी आं लिब्रा प्राक्शा, आं कली श्येत गेतीके, मेकोपुकीम आं डोंइती 'मारेइ मारेइ पने चाप्नीक' दे मिन्मीम।  
 12 आं ग्युरा गे थम मरिम्शो मुर बोक्नीम। मिनु आं खोइली ग्रेकपाइक्नीम। मिनु मेकोपुकीम आं गाक्तीक लां तेक्नीम।  
 13 मेकोपुकीम आं लां प्रेलनीम। आं श्येत तेम्नीम। मिनु सुडमी मेको आन कली 'मोदेशो मपचा' दे मतेक्नीम।  
 14 मेकोपुकी टेयब पोत्रलाम रिक्शी मरिक्शी पा ओवनीम। मेकोपुकी ब्रेशो गारो रे नेम्मुशा जाक्नीम।  
 15 मिनु गो शुश हिंन हिंन बाक्नुड। मेकोम आं मान ततीक फशेम खोदेशो पा हरुर पा योल्पाइक्तु। आं शोंप बाक्शा रिम्शो दुम्तीके गोम्स खोदेशो पा जाम्शा लत।  
 16 मुल आं थुं बेक्ना बेक्न लशो बाक्ब। मिनु श्येत जतीक नाक्त ला लीशो बाक्नीम।  
 17 नाक्दो आं रुश शुश खाइक्नीम। मेको खाइक्तीके गेनायो मनाइक्ब।  
 18 परमप्रभुमी आं टेयब सक्तिमी आं वा फुप्ब। मिनु वाम शुरम खाइशशो खोदेशो पा खाइक्ब। अय्युब ७:५; अय्युब १६:८  
 19 मेकोमी आं कली हिलोम ब्वारशो बाक्ब। मिनु गो फुरक नु पुलु खोदेशो दुम्शो बाक्नुड।  
 20 गो इन कली 'वारच पाइय्यीनी' दे पुंडता। तन्न गे आं कली लोत्र मलेत्तीनी। गो इन कली राप्शा रिम्शा बाक्ती। तन्न गे आं कली मकोत्रयीनी। अय्युब १९:७; भजन संग्रह २२:३  
 21 गे आं कली टेयब श्येत गेब दुम्शो बाक्नीनी। इन टेयब सक्तिमी आं कली खेदा पाइनीनी।  
 22 गे आं कली क्युक्शा फश गिवारम बेरपाइक्तीनी। मिनु आं थुं लुकच लपाइक्तीनी।  
 23 गे आं कली साइक्नीनी, गो मेको तुइशशो बाक्नुड। ब्रोंइशो नेल्ल मेको लां लाइनीम।  
 24 थमा पा, मेकोमी पुडग आन कली श्येत मगेब। मुर श्येत जशा 'वारच पाइय्यीनी' दे ग्रीनीम।  
 25 मार, गो श्येत जशो मुर आन पर्वम मडाक्डा डा? मार, पुडग आन पर्वम आं थुं मखाइक्म डा?  
 26 मो हना यो गो रिम्शो दुम्तीक आस पाता। तन्न मरिम्शो कका जाक्त। छेडछेड रिम्शा बाक्ती। तन्न छिडछिड कका जाक्त।  
 27 आं थुं गेना हना यो ग्येथ लुकच दुम्ब। गो गेना हना यो श्येत जचा माल्लुड।  
 28 गो क्येर नाक्दोम गाक्नुड। गो गुम्तीकेमी 'वारच पाइय्यीनी' दे पुंडनुड।  
 29 गो सिवार आन लोक्ब दुम्शो बाक्नुड। हुहुचील आन वारच दुम्शो बाक्नुड।  
 30 आं कुशुल क्येर दुम्शा, आं रुश नेल्ल चोडनीम।  
 31 आं बीना रोंका पा ग्रीब। आं बांसुरी डाक्शो मुर आन कली ताप्शो बाक्ब" देमाक्त।

## 31

अय्युबमी "गो ठीक पाइब नड" देशो

- 1 मिनु अय्युबमी "गो सुइ मीश आल आन कली मरिम्शो थुंम मकोत्रचा कली, आं मिक्च नु कबल पाता। मती ५:२८-२९

- 2 मिनू परमप्रभुमी इर रे आं कली गेबा? नेल्ल क्येडा ठेयब सक्ति पाइश्शोमी मार शोंप गेबा?
- 3 मार, ठीक मपाइब आन कली शुश हिंचा डा श्येत मटुम्बा डा? मरिम्शो पाइब आन कली खतम दुन्तीकेम मसुम्बा डा?
- 4 परमप्रभुम आं पशो नेल्ल तुइक्व। मिनू आं गाक्शो नेल्ल कोव्वब। अय्युब २३:१०
- 5 गो हेंथे गाक्शो बाक्ती हना, दूली लां गाक्शो बाक्ती हना,
- 6 परमप्रभुमी आं कली ठीक नाक्तीकेमी नाक्तील। मिनू मेकोमी आं गेना हना यो रिम्शो पशो तुइक्व।
- 7 गो ठीक लां रे ग्येत्थ लुक्च लशो बाक्ती हना, आं थुंम आं मिक्चीम दाक्शो खोदेंशो पा पशो बाक्ती हना, आं गुइमी ग्रांग्रा दिशो गेय पशो बाक्ती हना,
- 8 आं खुम्शो अन्न अरुम जामेक्व। मिनू आं शोक्शो मारेइ मारेइ तुल्सीमल। उत्पती २६:१६
- 9 आं कली मीश मुरुम हेंथे गाक्पाइक्ती हना, गो आं नेक्था डा मुर आन लाप्चोमी बाप्शा बाक्शो बाक्ती हना,
- 10 आं मीश अरु मुर आन वाइलीम दुम्शा लल। मिनू अरु मुर मेको नु इम्मल। २सामुएल १२:३२
- 11 मारदे हना मेको थम मरिम्शो गेय बाक्व। मेको निसाफ पचा कली मरिम्शो बाक्व।
- 12 मेको जम्शा लतीकेम सोइक्व मी खोदेंशो बाक्व। मेकोमी आं बाक्शो मारेइ मारेइ खतम पोक्ब।
- 13 गो आं वाइलीम वाइल आन थुं मनुशो लोव्र पाता हना, सिक्सी पपाइक्तामी।
- 14 परमप्रभु आं पर्वम बोक्मेनु, गो मार पाइनुडा? मेकोमी आं कली लोव्र पथ ब्रेत्ताक्व हना, गो मार लोव्र लेत्नुडा?
- 15 आं ममा आ कोव्रजम आं कली सेल्वम मेको आन कली यो मसेला डा? मेकोमीन आंइ कली आंइ ममा आ कोव्रजीम मसेला डा? हितोपदेस १४:३१; मत्ती २५:४०
- 16 गो पुडग आन कली आन माल्शो थोव्रक मगेशो बाक्ती हना, आन वोंइश बेक्शो मीश मुर आन कली डाक्पाइश्शो बाक्ती हना, अय्युब २९:१२
- 17 गो आं जचा थोव्रक आं कान जशो बाक्ती हना नु रोम रोइक्च आन कली योक्शा मगेशो बाक्ती हना, मोदेंशो दुम्ल।
- 18 गो रोम रोइक्च आन कली आन आफोमी खोदेंशो पा थुल्तामी। गो जारमेसीड रेन आन वोंइश बेक्शो मीश मुर आन कली वारच पाइक्तामी। अय्युब २९:१६
- 19 गो पुडग आन कली वा मफेक्शो ताता हना, नाक्दो फेक्तीक मबाक्शो बाक्त हना,
- 20 मेको आन कली आं भेडा आन ऊन रे सेल्शो फेक्तीकेम महोपाइक्तीके मेकोपुकीम आं कली आसीक मगेशो बाक्तेक्म हना,
- 21 गो रोम रोइक्च आन कली मरिम्शो पशो बाक्ती हना, ठेयब लाप्चोम बाक्वपुकीमी 'गे ठीक पाइब बाक्नीनी' देंशो बाक्तेक्म हना, रूथ ४:१-१०
- 22 आं बला आं ची रे दोक्व। आं गुइ जिव्का दोक्व।
- 23 तन्न गो परमप्रभु आ गेशो हिंचा डा श्येत तशा हिंनुड। मिनू गो मेको आ ठेयब मान ततीके फाल्ने मचबु।
- 24 गो सुन कली थमा सुइश्शो नड हना, क्येख सुनमी आं कली रिम्शो ब्रोंइचा गेब, दे मिम्शो नड हना, भजन संग्रह ५२:९
- 25 गो आं ठेयब शोंप तशा शुश ग्येरसीशो बाक्ती हना, आं शुश मारेइ मारेइ बाक्शो आ पर्वम आं कली रिम्शो बाक्चा गेब, दे मिम्शो नड हना,
- 26 गो नां गे कोव्रशा मेको कली ठेयब सेल्शो नड हना, तास्ला आ दारस कली ठेयब सेल्शो नड हना, ब्यवस्था ४:१९
- 27 मेकोम आं थुं कली खुइश्शोमी हेंथे मिम्ब सेल्शो बाक्ती हना, मेको कली पुक्पु पाइक्चा कली आं गुइ क्युक्शो बाक्ती हना,
- 28 मेको नेल्ल सजाइ तचा डा पाप दुम वा। मारदे हना गो स्वर्गम बाक्व परमप्रभु आ पर्वम दूली लोव्र पाइब दुम्ड वा।
- 29 गो आं कली काड मदाक्वपुकीमी श्येत जशो तशा ग्येरशो बाक्ती हना, मेको आन कली मरिम्शो दुन्तीकेम सुमानु, ग्येरसीशो बाक्ती हना, हितोपदेस २४:१७; भजन संग्रह ५:५; भजन संग्रह ३५:१३-१४
- 30 गो 'मेकोपुकी बेक्मल' दे सराप चीले पा पाप मपड। १ पत्रुस ३:९
- 31 आं गेय पाइब नेल्लेम गेनायो 'अय्युब आ भोजम मुर मरूम' मदेंम।
- 32 अर्को रागी डा मुरपुकी गेनायो लांम इप्चा ममाल्म। लां गाक्ब आन कली गेना हना यो आं खिं डा लाप्चो रोक्शो बाक्त। न्यायाधीस १९:२०-२१; १ पत्रुस ४:९; हिब्रू १३:२
- 33 अरु मुरपुकीम आन हेंथे पशो खुइक्चा माल्शो खोदेंशो पा, गो आं थुंमी आं मरिम्शो पशो मखुइक्तु।
- 34 मारदे हना गो हुलपुकीम मार देंनीमी, दे हिंती। मिनू खिं खिं डा आन शुक्शी पतीक रे शुश हिंती। मोपतीके गो सिक्सी पा बाक्ती। गो खिं रे मग्रूड।
- 35 गो आं लोव्र नेंब का बाक्शो हना, नेल्ल क्येडा ठेयब सक्ति पाइश्शोमी आं लोव्र लेत्तल। आं कली दोस गेशा ब्रेक्शो ब्रेक्स ते बाक्बा? अय्युब २३:३-७
- 36 थमा पा, गो मेको आं बलाम लाम्सीड वा। गो मेको सिरपेच खोदेंशो पा गुक्सीड वा।
- 37 मिनू आं पशो गेय नेल्ल मेको कली शेंदु वा। गो मेको आ डोंइती ठेयब मुर कली ग्रुन्थ लशो खोदेंशो पा लड वा।
- 38 आं रू आं कली दोस गेशा ग्रीशो बाक्त हना, मेकेर डा खप नेल्ल डाक्शो नम हना,
- 39 मेकेर वाशो मार मार मथाप्थु, जशो बाक्ती हना, मेको रू आ होव्रप कली श्येत गेशो बाक्ती हना,
- 40 चेरब आ पा डा चोंक चू वामल। क्योव्रज आ पा डा सुवा वामल" देंमाक्त। मोपा अय्युबमी आ लोव्र थमा बाक्त।

## 32

एलीहु आ लोव्र

अय्युब ३२:- अय्युब ३७:-

1 मिनु मेको मुर सांमी अय्युब कली लोव्र पचा प्रोन्मे बाक्त। मारदे हना अय्युबम आंम कली “गो ठीक पाइब नड” देंस डा देंस पचा बाक्त।

2 मिनु राम आ खिं डा बूज डा बाराकेल आ तौ एलीहु गाइक्ता बाक्त। मारदे हना अय्युबमी आंम कली परमप्रभु आ डोंइती शुश पाप मपाइब खोदेंशो सेल्मे बाक्त। उत्पती २२:२१; अय्युब १३:१८; अय्युब १९:६-७; अय्युब २५:५-६

3 अय्युब आ वारच सां आन कली तशा यो गाइक्ता बाक्ब। मारदे हना मेकोपुकीमी अय्युब कली लोव्र लेत्ने मचाप्मे बाक्त। मो हना यो मेकोपुकीम अय्युब कली दोस ताइब सेल्मे बाक्त। अय्युब १५:४; अय्युब १८:२१; अय्युब २०:२९; अय्युब २२:५

4 मेकोपुकी अय्युब नु लोव्र पामेनु एलीहु चहिं सिकसी पा बाक्शो बाक्माक्त। मारदे हना, मेको आन क्येडा आल बाक्माक्त।

5 मिनु मेको सांमी अय्युब कली लोव्र लेन्ने मचाप्शो तशा, एलीहु गाइक्ता बाक्त।

6 मिनु बूज डा बाराकेल आ तौ एलीहुम “गो आइक्चीन बाक्नुड। गेपुकी खाल्पा बाक्नीनी। मोपतीके इन डोंइती आं तुइश्शो मदेड, दे सिकसी पा बाक्ती।

7 गो ‘खाल्पा मुर ब्वाक्चा माल्नीम। खूशोपुकीम आन तुइक्तीके शेंदमेक्ल’ देंती। अय्युब १२:१२

8 बेक्शा लाइब मुरपुकी नु नेल्ल क्येडा ठेयब सक्ति पाइश्शो आ सोक्त बाक्ब। मिनु मेकोमी मुर आन कली रुप्तीक थुं गेब।

9 खाल्पापुकी ला जोक्ब तुइक्ब मबाक्नीम। खूशोपुकी यो मार ठीक बाक्बा, मेको मरुप्नीम।

10 मोपतीके गो आं लोव्र नेनीन। गो आं मिश्शो देंचा गेयीनी।

11 नेनीन। गो इन लोव्र नेंस डा नेंस बाक्ती। गो इन लोव्र रिम्मा रिम्न बाक्ती। इन मिश्शा पशो जोक्तीक तुइक्तीक लोव्र नोफा दाइश्शा नेंशा बाक्ती।

12 गो इन देंशो लोव्र नेंना नेंन बाक्ती। तन्न गेपुकीम अय्युब कली शेने मचाप्नी। मेको आ लोव्र यो लेन्ने मचाप्नी।

13 ‘गोपुकीम तुइक्तीक थुं तशो बाक्नीकी’ मदेनी। ‘मुरपुकीम ममाइ परमप्रभुमीन मेको कली सजाइ गेवल’ मदेनी।

14 तन्न अय्युबम आं पबंम मारेइ मदे। गो इन लोव्र खोदेंशो पा मेको कली लोव्र मलेत्तु।

15 एकोपुकी श्येत्थ दुश्शो बाक्नीमी। मिनु एकोपुकीमी मारेइ लोव्र लेन्ने मचाप्नीम।

16 एकोपुकी मब्वाक्तेक्म हना यो, गो रिम्शा बाक्नुडा डा? मारदे हना एकोपुकी राप्शा बाक्नीम, लोव्र चहिं मलेत्नीम।

17 मुल गो लोव्र लेत्नुड। आं मिश्शो लोव्र पाइनुड।

18 मारदे हना गो शुश लोव्र पचा माल्शो बाक्नुड। आं आगा डा सोक्तीमी आं कली लोव्र पपाइक्ब।

19 गो लोव्र पचा मताता हना, नक शांबुम ब्रीशो कुशुल के थैलो खोदेंशो पा बुक्ने चान्नुड।

20 आं थुं नाइक्पाइक्चा कली गो ब्वाक्चान माल्नुड। गो लोव्र लेत्चा माल्नुड।

21 गो सुइ आन कुल कोव्रशा लोव्र मपाइनुड। गो सुइ नु मिलो शिलो मपाइनुड।

22 मारदे हना गो मिलो शिलो पस मजोक्नुड। मो पाता हना आं कली सेल्बम आं कली रीब पा खतम पोक्ब।

## 33

1 अय्युब, मुल आं लोव्र नेनीन। आं देंशो लोव्र नेल्ल नोफा दाइश्शा नेनीन।

2 कोव्रडीन, गो लोव्र लेत्चा कली ठीक दुश्शो बाक्नुड। आं शोव्र लोव्रम ब्रीशो बाक्ब।

3 गो आं लोव्रमी ‘गो रिम्शो थुं पाइश्शो मुर नड’ दे कोइनुड। गो मार लोव्र देंनुडा, मेको थमा बाक्ब।

4 परमप्रभु आ सोक्तीम आं कली सेल्ती। मिनु नेल्ल क्येडा ठेयब सक्ति पाइश्शोमी आ ब्रोंइतीक सोक्त गेती

5 गो चान्नीनी हना, आं लोव्र लेत्तीनी। इन देंचा माल्शो लोव्र डोंइतीन मिम्तीन। मिनु गो नु लोव्र पने।

6 परमप्रभु आ डोंइती गो यो इन खोदेंशेन नड। गो यो खप केन सेल्शो नड। अय्युब १०:९

7 गो आं कली तशा महिनीन। गो इन कली श्येत मगेनुड।

8 गो इन देंचा माल्शो लोव्र नेल्ल नेंता। मिनु इन ब्वाक्शो नेंता।

9 गो ‘गो दोस मताइब नु हेंथे मपाइब बाक्नुड। गो मरिम्शो मपाइब, गेना हना यो रिम्शो पाइब बाक्नुड’ अय्युब १६:१७; अय्युब २७:६; अय्युब ३१:१-४०

10 मो हना यो ‘परमप्रभुम आं दोस थिन्ना थिन्न बाक्ब। मेकोमी आं कली आ जोरी सत्रु मिश्शो बाक्ब। अय्युब १३:२६; अय्युब १९:११

11 आं खोइलीम ठेंडरो थोक्ताक्नी। आं लां नेल्ल कोव्रशा, वोइक्नीनी’ दे लोव्र पाइतीनी। अय्युब १३:२७

12 तन्न गे दूली मिम्ब बाक्नीनी। गो इन कली लोव्र लेत्नन्नी। बेक्शा लाइब मुर आन क्येडा परमप्रभु ठेयब बाक्ब।

13 गो मारदे परमप्रभु नु इन थुं मनुशो लोव्र पाइनीनी। मिनु गे ‘मेकोम आं लोव्र काइ मलेक्ब’ देंनीनी?

14 परमप्रभुमी खेयप का निक्शी लोव्र पाइब। तन्न मुरपुकीम मेको मरुप्नीम।

15 डोमुमी, नाक्दो ततीकेमी, निन्द्रा पशोनु, बेक्शा लाइब मुर ब्राख्येम गोल्शा इम्मानु, अय्युब ४:१२-१६

16 परमप्रभुम मेको आन नोफा नेंब सेल्ब। मिनु मेको आन कली शेंदानु, ‘परमप्रभु आ लोव्र बाक्माक्त’ दे तुइक्नीम। अय्युब ३६:१०



- 17 मेकोमी मुर आन कली आन मरिम्शो पशो रे रिम्शो सेल्चा कली नु मेको आन टेयब लेत्तीक तेक्चा कली लोत्र पाइब।
- 18 परमप्रभुम मेको कली बेक्चा रे प्रोंडचा दाक्ब। मेको आन कली तरवार रे प्रोंडचा दाक्ब।
- 19 मिनु मुर खाइक्स डा खाइक्स पा आन ब्राख्येम इप्शा, सजाइ ताइनीम। मिनु आन रुश गेना हना यो ख्रिंख्रि पाइनीम।
- 20 मोपा मेकोपुकीम आन जचा थोवक ग्रॉग्रा दीनीम। मिनु थम ब्रोवशो जचा थोवक यो मदाक्नीम।
- 21 मिनु मेको आन रां गेयशा सोवनीम। मिनु मेको आन खुइश्शो रुश तांडसीनीम।
- 22 मेको आन सोक्त लचा चिक्शो बाक्ब। मेको आन ब्रोंडतीक नाक्त नुप्चा चिक्शो बाक्ब।
- 23 मो हना यो मेको मुर आन दातेमी का कली परमप्रभु आ हजार हजार स्वर्ग डा गेय पाइब कामी वारच पा, मेकोमी 'मेको रिम्शो थुं पाइश्शो मुर बाक्ब' दैत हना,
- 24 मिनु मेकोमी मुर कली शिशी पा 'मेको मुर कली बेक्चा रे प्रोनीन। मेको कली प्रोंडतीक थोवक गो नु बाक्ब' दैत हना, भजन संग्रह ४९:८-११
- 25 मेको मुर आ रये टिटा के खोदेशो पा नक दुम्ब। मेको आ टिटा ना डा खोदेशो दुम्ब। भजन संग्रह १०३:५
- 26 मिनु मेकोमी प्रार्थना पवानु, परमप्रभुमी नेंब। मेको परमप्रभु आ डोंडती बाक्शा, ग्येरसीशा कुम्सो पाइब। परमप्रभुम मेको आ ठीक पतीक लेंशा डोंडती डा खोदेशो सेल्ब।
- 27 मिनु मेको मुरुम मुर आन बाक्तीक जाक्शा, मेको आन कली 'गो पाप पाता। गो ठीक पतीके कली दूली सेल्ता। गो आं तचा माल्शो सजाइ मतड।
- 28 मेकोमी आं सोक्त कली बेक्तीक रे प्रोंडतु। मिनु गो छेडछेड तचा कली ब्रोंडती' देंब।
- 29 परमप्रभुमी एको नेल्ल बेक्शा लाइब मुर आन पबंम पाइब। खेयप निक्शी, खेयप सां सम्म मो पाइब।
- 30 बेक्चा चिक्शो मुर आन कली तुरसुम लचा रे लेप्पाइक्ब। मोपा ब्रोंडतीक छेडछेड लेंशा ताइनीम। भजन संग्रह ५६:१४; भजन संग्रह १०३:४; भजन संग्रह ११६:९
- 31 नेनीन अय्युब आं लोत्र नोफा दाइश्शा नेनीन। गे सिक्सी पा बाक्कीन। गो लोत्र पाइनुड।
- 32 इन देंचा माल्शो मारेड लोत्र बाक्त हना, आं कली देनीन। गे ब्वाक्कीन। मिनु गो इन पोन बोक्नुड।
- 33 तन्न इन देंचा माल्शो लोत्र मबाक्त हना, सिक्सी पा आं लोत्र नेनीन। मिनु गो इन कली रुप्तीक लोत्र शेंनुड" दे एलीहम देंमाक्त।

## 34

“परमप्रभु ठीक पाइब बाक्ब” देशो

1 मिनु एलीहमी

- 2 “जोक्ब तुइक्ब मुरपुकी आं लोत्र नेनीन। शुश जोक्ब मुरपुकी आं लोत्र इन नोफा दाइश्शा नेनीन। अय्युब १२:११
- 3 मारदे हना दोपा नोफाम लोत्र नेंबा, मोपान लेंम जचा थोवक थाम्ब।
- 4 मोपतीके मार ठीक बाक्बा, मेको गो आंमा योव्रय। मिनु तेको लोत्र रिम्शो बाक्मे, मेको आंमा गारशा कोव्रय।
- 5 मारदे हना अय्युबम 'गो दोस मताइब मुर बाक्नुड। तन्न परमप्रभुम आं कली ठीक निसाफ मगेयी। अय्युब ३३:९; अय्युब २७:२
- 6 गो ठीक पाइब बाक्ती हना यो, आं कली जोल पाइब सुइक्ती। गो हेंथे मपाता हना यो, आं गार मसा' दैत। अय्युब ९:१५,२०; अय्युब ६:४
- 7 ब्वाक्कु तूशो खोदेशो पा शुक्शी पाइब, अय्युब खोदेशो अरु सुइ मबाक्नीम।
- 8 मेको मरिम्शो गेय पाइब नु बाक्ब। मिनु परमप्रभु यावे आ अरेशो मटीब नु गाक्ब। भजन संग्रह १:१
- 9 मारदे हना मेकोमी 'परमप्रभु कली ग्येरशा टिचा, शोर गाक्शो बाक्ब' देंब। अय्युब ९:२२
- 10 मोपतीके मारेड मारेड तुइक्ब मुरपुकी आं लोत्र नेनीन। परमप्रभुम गेनायो मरिम्शो मपाइब। नेल्ल क्येडा टेयब सक्ति पाइश्शोमी गेनायो दूली मपाइब। अय्युब ८:३; ब्यवस्था ३२:४; २इतिहास १९:७
- 11 मेकोमी मुर आन कली मेको आन पशो खोदेशो पा पाइब। मार पाइनीमी, मेकोन ताइनीमी।
- 12 एको थमा लोत्र बाक्ब। परमप्रभुम गेनायो मरिम्शो मपाइब। नेल्ल क्येडा टेयब सक्ति पाइश्शोमी दूली निसाफ मपाइब। अय्युब १९:६
- 13 सुम रागी मेको आ जिम्माम गेवा? सुम मेको कली रागी नेल्ल डा अधिकार गेवा?
- 14 मेकोमी ब्रोंडचा गेब सोक्त नु आ सास लेशशा लाइक्चा मिम्ताक्ब हना,
- 15 याम कामीन सोक्त पाइश्शो नेल्ल बेक्नीम। मिनु मुर लेंशा फुरकुम लेशशा लाइनीम। भजन संग्रह १०४:२९
- 16 गे इन के रुप्तीक थुं बाक्त हना, आं देशो नेनीन। गो मार देंडा, मेको नोफा दाइश्शा नेनीन।
- 17 ठीक निसाफ कली काइ मदाक्ब मुर सासन पने चाप्बा डा? मार, गे ठीक पाइब नु सक्ति पाइश्शो कली दोस ताइब मिम्नीनी?
- 18 सुमी पिप कली 'हिंचा डा मरिम्शो पाइब बाक्नीनी' देंबा? मिनु टेयब मुर आन कली 'परमप्रभु यावे आ अरेशो मटीब बाक्नीनी' देंबा?
- 19 मेकोम पिप आ तौ आन कुल मकोव्रब। मेकोम शोंप पाइश्शो नु पुडग नेल्ल आन कली उइक्थ मिम्ब। मारदे हना मेको नेल्ल आ सेल्शो नम।
- 20 मेकोपुकी याम कामीन बेक्शा लाइनीम। नाक्दो उइक्थ दुम्मेनु, मेकोपुकी ख्रिंख्रि पा बेक्नीम। सक्ति पाइश्शो मुर यो सुइम मारेड मपाइक्थु बेक्नीम।

- 21 मेकोमी मुर नेल्ल आन पतीके कोव्रशो बाक्ब। मिनु मेको आन गाक्शो नेल्ल कोव्रशो बाक्ब। अय्युब ३१:४; हितोपदेस ५:२१
- 22 मेकेर मरिम्शो पाइब आन खुंडसीतीक छिडछिड मबाक्ब। भजन संग्रह १३९:११-१२
- 23 परमप्रभुम आ डोंइती निसाफ पुंडथ जाक्ब मुर आन कली 'एको नाक्त जाक्कीन' मदेंशो बाक्ब।
- 24 मेकोम खुदील निदील मपथुन सक्ति पाइशो आन कली तिल्लब। मिनु मेको आन पा डा अरु आन कली वोइक्ब।
- 25 मारदे हना मेकोम मेको आन पशो गेय नेल्ल तुइक्ब। मिनु मेको आन कली काबु नाक्दोमीन तिल्लब। मिनु मेकोपुकी खतम दुम्नीम।
- 26 परमप्रभु यावे आ अरेशो मटिशो आ पबर्म मेको कली खतम पोक्ब। मिनु मेको मुर नेल्लेम ताइनीम।
- 27 मारदे हना मेकोपुकी मेको आ नोले खोइक्चा प्रोइतेक्म। मिनु आ कोंइशो लां ममिम्तेम।
- 28 मेकोपुकीम पृडग आन डाक्शो मेको आ डोंइती जाक्दीपपाइक्तेक्म। मेकोम मारैड मथीब आन पुंडशा ब्रेशो नेंतु।
- उत्पत्ती १६:११
- 29 तन्न मेको सिकसी पा बाक्त हना, सुम मेको कली दोस गेने चाप्बा डा? मेकोम आ कुल खुइक्ताक्व हना, सुम मेको कली तने चाप्बा डा? रागी डा मुर नेल्ल कली नु मुर का कली मेको कान बाक्ब।
- 30 मिनु परमप्रभु कली मटीब मुरुम सासन मपवल। मिनु मुर आन कली श्येत गेब सासन पाइब मदुमल।
- 31 मिनु मेकोमी परमप्रभु कली 'गो सजाइ फालता। गो मुल रे मरिम्शो गेय मपाइक्नुड।
- 32 आं मतुइशो आं कली शेंदीनी। गो मरिम्शो पाता हना यो, मुल रे मो मपाइक्नुड' देब।
- 33 मार, मेकोम इन देशो खोदेशो पा इन कली पचा माल्बा डा? मारदे हना गे आ देशो मबिल्लीनी। गे इन लां योवचा माल्लीनी। गो मो मपाइक्नुड। मोपतीके इन तुइशो आं कली शेंदीनी।
- 34 निप्स पाइशो मुर नेल्लेम नु जोक्ब तुइक्ब कामी आं लोव्र नेंशा
- 35 'अय्युब मजोक्थु, लोव्र पाइब बाक्ब। आ लोव्र मरुप्चा डा बाक्ब' देंनीम। अय्युब ३८:२
- 36 अय्युबम मेको क्येडा तेम्शा श्येत जवल। मारदे हना आ लोव्र परमप्रभु आ अरेशो मटीब आन लोव्र खोदेशो बाक्ब।
- 37 मेकोमी आ पाप तेम्ब। आंइ दातेमी शुश हेंथे पना पन बाक्ब। मिनु मेकोमी परमप्रभु आ पबर्म मरिम्शो लोव्र शुश तेम्ब" दे एलीहुमी देमाक्त।

## 35

एलीहु आ लोव्र

1 मिनु एलीहुमी

- 2 अय्युब कली "परमप्रभु आ डोंइती 'गो ठीक बाक्नुड' देंचा रिम्शो बाक्बा? अय्युब ३२:२
- 3 गे मेको कली 'गो पाप मपाता हना, मार दुम्बा डा? मिनु पाप मपथु आं कली मार रिम्शो दुम्बा डा?' देंतीनी। अय्युब ३४:९
- 4 गे नु इन वारच सां इन कली गो लोव्र लेत्नुड।
- 5 इर सरीड गे कोव्रडीन। इन क्येडा इर बाक्शो गोस्स कली कोव्रडीन।
- 6 गे पाप पाइतीनी हना, मेको कली मार दुम्बा डा? गे शुश हेंथे पाइतीनी हना यो, मेको कली मार दुम्बा डा?
- 7 गे ठीक पाइब दुम्तीनी हना, मेको कली मार गेनीनी डा? इन गुड रे मेकोम मार ताइबा डा? अय्युब २२:२-३; रोमी ११:३५
- 8 इन परमप्रभु यावे आ अरेशो मटितीके इन कली श्येत दुम्शो खोदेशो पा अरु मुर आन कली यो श्येत दुम्ब। मिनु इन ठीक पतीके रिम्शो दुम्शो खोदेशो पा अरु आन कली यो रिम्शो दुम्ब।
- 9 शुश दिप्चा पुंडसीतीके मुरपुकी वाड ब्रेल्लीम। मिनु सक्ति पाइशो आन पबर्म पुंडशा ग्रीनीम।
- 10 तन्न सुइमी 'आं कली सेल्ब परमप्रभु ते बाक्बा? नाक्दो आं कली ठेयब सेलतीक कुम्सो गेब, परमप्रभु ते बाक्बा? प्रेरित १६:२५
- 11 मेकोमी आंइ कली रागी डा जन्तु आन क्येडा शुश शेंताक्की। मिनु सरीड डा चिक्ब आन क्येडा आंइ कली जोक्ब तुइक्ब सेलतु?' मदेंनीम।
- 12 मिनु मुरपुकीम डाक्शा पुन्मेनु, मेको आन लोव्र मनेंब। मारदे हना मेको मरिम्शो पाइबपुकी ठेयब लेशो बाक्नीम।
- 13 थमा पा परमप्रभुमी मेको आन हेंथे पुंडशो लोव्र मनेंब। नेल्ल क्येडा ठेयब सक्ति पाइशोमी मेको लोव्र नोफा मदाइक्ब। यूहन्ना ९:३१
- 14 मिनु गे 'गो मेको कली मतड' देंनीनी। इन पशो नेल्ले मेको आ डोंइती बाक्ब। मोपतीके रिम्दीन। अय्युब २३:८-९
- 15 परमप्रभु आ गाइशोम सजाइ मगेब। मिनु हेंथे गाक्शो मकोव्रब। उपदेसक ८:११
- 16 मोपतीके अय्युबम फश लोव्र ला पाप्तु। शुश फश लोव्र ला पाप्तु" देमाक्त।

## 36

परमप्रभु आ गेय ठेयब बाक्ब

1 मिनु एलीहुमी लेंशा

- 2 "गो नु फालशा बाक्तीनी हना, इन कली मारैड कोंइनुड। गो मुल यो परमप्रभु आ पबर्म इन कली लोव्र पचा माल्नुड।
- 3 आं जोक्शो थुं डा लोव्र डीन रे चाक्नुड। आं कली सेल्ब ठीक पाइब बाक्ब।

- 4 थमा पा, आं लोत्र हेंथे मबाकब। आं लोत्र थम पा जोकब तुडकब मुर इन डोंडती बाकब।
- 5 थमा पा परमप्रभु सक्ति पाइशो बाकब। मेकोम सुइ आन कली आइकच मसेलब। मेको आ जोकतीक तुडकतीक ठेयब बाकब।
- 6 मेकोमी आ अरेशो मटीब आन कली ब्रोंडचा मगेब। आइकच मुर आन कली ठीक निसाफ पाइब। भजन संग्रह ७२:४,१२; भजन संग्रह १४६:७-९
- 7 मेकोम ठीक पाइब आन कली कोत्रब। मिनु मेको आन कली गेना हना यो पिप नु वोइकब। मिनु मेकोपुकी ठेयब सेल्चा पुंडसीनीम। भजन संग्रह ११३:७-८
- 8 तन्न मेको आन कली साडलोम पाइकताकम हना, श्येत जाम्तेकम हना,
- 9 मेको आन शुश हेंथे पशो नु ठेयब लेशो आ परबम परमप्रभुमी सजाइ गेशो बाकब।
- 10 मेकोमी मेको आन कली श्येत गेशा रुब मुर सेलब। मिनु मेको आन मरिम्शो पतीक रे लेप्पाइकचा कली अरेब। अय्युब ३३:१६
- 11 मिनु मेकोपुकीम मेको आ लोत्र नेंतेकम हना, मेको आ अरेशो टिशा आ गेय पाम्तेकम हना, मेकोपुकीम आन लीशो नाकती रिम्शो पा बाकचा ताडनीम। मिनु आन लीशो बर्स रिम्शो पा लाकनीम।
- 12 तन्न मेकोपुकीम मेको आ लोत्र नेंतेकम हना, मारेड मतुइकथु, तरवारम साइकचा पुंडसीनीम।
- 13 परमप्रभु कली मान मपाइब मुर गाइक्स डा गाइक्स बाकनीम। परमप्रभु रे पा सजाइ तामेनु, यो मेकोपुकीम 'वारच पाइकची' दे मपुंडनीम।
- 14 मेकोपुकी टिटा बाकची ना मुने दोकशा बेकनीम।
- 15 परमप्रभुमी श्येत जशो आन कली आन श्येत रे प्रोंडब। मोपा मेको आन श्येत तशा, रुब दुम्तीम।
- 16 मोपा इन कली यो श्येत रे गुंडब। इन कली रिम्शो बाकतीकेमी वोइकब। गे लेशा ब्रोवशो जचा थोव्रक जचा ताडनीनी।
- 17 गे मुल चहिं परमप्रभु यावे आ अरेशो मटीब आन ततीक सजाइ तन तन बाकनीनी। मोपान मेको आन दोस नु सजाइम इन कली यो ग्याइकब।
- 18 होस पा बाककीन। इन गाइकतीकेम इन कली शुक्शी मपपदल। मिनु शुश घूस जतीकेमी इन कली हेंथे पाइब मसेलल।
- 19 गे इन कली 'वारच पाइय्यीनी' दे ग्रीचा शोर गाकशो बाकब। इन शुश शोंप नु इन सक्तिम इन कली श्येत रे प्रोंडने चाप्बा डा?
- 20 गेना नां रिक्बा, मिनु इप्चा, दे ममिम्तीन। मारदे हना मुर आन इप्तीकेम साइकचा पुंडसीनीम।
- 21 मरिम्शो पतीक गे मलन। होस पा बाककीन। मारदे हना गे मेको आ परबम श्येत जाइब दुम्तीनी।
- 22 परमप्रभु आ सक्तिम पतीके ठेयब सेल्चा पुंडसीब। मेको खोदेशो शेंब अर्को सु बाकबा डा? भजन संग्रह २५:९
- 23 सुम मेको कली आ लां कोंडशो बाकबा? मिनु मेको कली 'गे दूली पाइतीनी' दे सुम देने चाप्बा डा?

एलीहु परमप्रभु कली ठेयब सेल्शो

- 24 गे मेको कली मेको आ गेय आ परबम ठेयब सेल्चा, मप्रेंदीन। मुरपुकीम मेको आ परबम कुम्सो पशो बाकतेकम।
- 25 मुर नेल्लेमी आ पशो तशा कोत्रतेकम। तन्न डोन रे ला ताम्तेकम।
- 26 परमप्रभु थमा पा ठेयब बाकब। मिनु गो मेको मतुइकनीकी। मेको आ बर्स हिकने मचाम्सीब।
- 27 मेकोम ब्वाक्कु आ तेप्का गुप्ब। मिनु आ सेल्शो गोस्सुम वोइकब।
- 28 मिनु सरीड रे रेड यीब। मेकोमी मुर आन कली शुश जिप्पाइकब।
- 29 सुम गोस्स आ ब्रशो रुप्ने चाप्बा डा? आ बाकतीक रे बुंबु पशो सुम रुप्ने चाप्बा डा?
- 30 मेकोमी सरीड आ एर ओथ आ चिला सोइकब। मिनु मेको समुन्द्र आगा सम्म लाइब।
- 31 मोपा मेकोम जात जात डा मुर आन कली सासन पाइब। मिनु मेको आन कली शुश जचा थोव्रक गेब।
- 32 मेको आ गुडम चिला बाकब। मिनु मेकोमी ख्रपाइकचा कली आप्ब।
- 33 मेको चिला आ पपाइशो रेयकेम मेको आ सक्ति आ परबम लोत्र पाइब। मेको हेंथे गाकब आन परबम रुश पा शुश गाइकब।

## 37

एलीहुम लेशा लोत्र पशो

- 1 मेको तुइशशा आं लुडगीर थाम्पा प्रेकब। मेको आ बाकतीक प्रोंडशा प्रेकब।
- 2 नेनीन, आ सेंदाम बुंबु पशो नेनीन। मिनु मेको आ शोव्रम ब्वाकशो ठेयब सेंदा नेनीन।
- 3 मेकोम सरीड आ एर ओथ आ सेंदा नेंपाइकब। आ चिला रागी डा सुर सम्म दाप्पाइकब।
- 4 मेको आ नोले मेको आ ठेयब सेंदा नेंसीब। मेको आ मान पाइकचा पुंडसीब सेंदा नेंसीब। मिनु मेकोम आ सेंदा नेंपाइकब। आ चिला पतीके मतेकब।
- 5 परमप्रभु आ सेंदा बुंबु पशो खोदेशो हिंचा डा पा नेंसीब। मेकोमी गोपुकीम मरुप्चा डा पा ठेयब गेय पाइब।
- 6 मेकोम फुं कली 'रागीम दोक्को' देंब। मिनु रेड कली 'धारा खोदेशो पा यीवो' देंब।
- 7 मेको मुर नेल्ल आन चिन्ड का बाकब। मिनु आ सेल्शो मुर नेल्लेम 'मेको परमप्रभुम पाप्तु' दे तुइकनीम।
- 8 मेना ब्वाकी डा जन्तु आन पुक्खी गे लाडनीम। मिनु मेकेर लशा बाकनीम। भजन संग्रह १०४:२१-२२
- 9 फश गिवार आ बाकतीक रे गूब। मिनु फश रे पा ग्यू जाकब।

- 10 परमप्रभु आ सासमी फुं दुम्ब। मिनू ठेयब ब्वाक्कु नेल्ल रीब पा फुं दुम्नीम।  
 11 मेकोमी ठेयब गोस्स कली ब्वाक्कु कुरपाइक्व। मिनू गोस्सपुकीमी आ चिला तेड तेड फ्राइनीम।  
 12 मेकोपुकी आ कोंडशो रागी आ एर ओथ डा लां नेल्ल गाक्नीम। मोपा मेकोपुकीमी परमप्रभु आ देशो मुर बाक्शो रागी आ तार नेल्ल पाइनीम।  
 13 परमप्रभुम रागी जिप्पाइक्वा कली रेउ यिपाइक्व। मेकोम मुर आन कली सजाइ गेचा कली नु आ रागी कली शिशी कोंडचा कली रेउ यिपाइक्व।  
 14 अय्युब, गे एको लोत्र नेनीन। सिकसी पा बाक्शा परमप्रभु आ छक लाक्वा डा गेय मिम्तीन।  
 15 परमप्रभुम गोस्स आन गेय दोपा पपाइक्वा? मिनू आ गोस्स रे दोपा चिला दाप्पाइक्वा, मेको गे तुइक्नीनी डा?  
 16 गोस्सपुकी दोपा सरीडम ग्युक्शा बाक्नीमी? मेको आ छक लाक्वा डा गेय बाक्व। मेको नेल्ल जोक्व बाक्व, दे गे मतुइक्नीनी?  
 17 दक्खिन डा फशेम इन फेक्शो वा होश सेल्व। रागी नेल्ल कली सिकसी पपाइक्व।  
 18 मार, गे परमप्रभु खोंदशो पा कांसा के ऐना खोंदशो सारो सरीड कली प्राक्ने चाप्नीनी डा?  
 19 मेको कली मार देचा माल्बा, गे मेको आंङ कली शेंदीन। मारदे हना गो छिडछिडम पतीके मारेइ मिन्ने मचाप्नीकी।  
 20 गो मार देंनुडा, मेको कली हिल्लो पचा माल्नुडा डा? सुइ मुरुम आंम कली दाक्वा पुंइसीचा मदाक्वा डा?  
 21 हाम्सो बाक्त हना यो, गोस्सुम सुम्शो नां कली मुरुम तने मचाम्सीब। फशेमी गोस्स आन कली योल्दा नोले ला नां कली तने चाम्सीब।  
 22 मेको उत्तर रे हो हो पा दाप्शा गूब। मेको परमप्रभु आ एर ओथ छक लाक्वा डा छेडछेड बाक्व।  
 23 तन्न गो नेल्ल क्येडा ठेयब सक्ति पाइशशो कली थिन्ने मचाप्नीकी। मेको आ नेल्ल क्येडा सक्तिम गेय पाइब बाक्व। मेकोमी निसाफ पशो नु ठीक पतीके गेनायो दूली मपाइब।  
 24 मोपतीके मुरपुकीम मेको कली तशा मान पा हिंनीम। मिनू आन थुंम 'गो जोक्व तुइक्व नड' दे मिम्ब आन कली ठेयब ममिम्ब" दे एलीहुम देंमाक्व।

## 38

परमप्रभुम अय्युब कली लोत्र पशो  
 अय्युब ३८:-४२:-

- 1 मिनू परमप्रभु यावेमी अय्युब कली फश गिवार रे पा लोत्र लेशशा, अय्युब ३१:३५  
 2 "दूली लोत्र पा अर्ती गेब सु बाक्म? मारेइ मजोक्थु मार लोत्र पवा? अय्युब ३४:३५  
 3 गे बोल्यो मुर खोंदशो दुम्शा रपो। मिनू गो इ कली लोत्र हिल्लो पाइनुड। मिनू गे लोत्र लेत्ती।  
 4 गो रागी आ जग वोदुनु, गे ते बाक्डे? गे रुप्नेवे हना आं कली देनो।  
 5 मेको कली दोमो सेल्चा, दे सुम देंमे? गे तुइक्नेवे? मेको पुक्का कली सुम डोरी कीडा। मेको गे तुइक्नेवे? हितोपदेस ३०:४  
 6 मेको आ जग मार तार वोदा? मेको आ सुर डा फुल्लु सुम वोदा?  
 7 मेना सुनी डा सोरुलपुकीमी कालेम कुम्सो पाम्तेक्म। मिनू स्वर्गम बाक्व नेल्ल ग्येरसीशा ग्रीतेक्म। भजन संग्रह १९:२; अय्युब १:६  
 8 समुन्द्र रागी आ कोत्रज रे बुक्शा गूमानु, मेको ब्वाक्कु तेक्वा कली सुम लाप्चो चोक्गा? भजन संग्रह १०४:८-९; हितोपदेस ८:२९  
 9 गो मेको कली गोस्स के फेक्तीक सेल्शा, क्येर नाक्दोम मेको कली गिल्शा वोइक्ता।  
 10 मेको आ सांद वोइशशा, थरपु हिरशा, लाप्चोपुकी वोइक्ता।  
 11 मिनू गो मेको कली 'गे ओशो सम्म ला जाक्ने चाप्नेवे। एंकेर सम्म ला जाक्नेवे। इन ठेयब छालपुकी मेक उइ देक्वा माल्नीम' दे माइक्तामी।  
 12 गे मुल सम्म 'सुनी दुमो' दे अरेवी? सुनी कली मेको आ बाक्तीके तुइक्पदी?  
 13 मेकोमी रागी आ सुर सम्म हाम्सो सेल्व। आं अरेशो मटीब आन कली खेरचा कली हिम्ब।  
 14 दोपा खप रे मार मार सेल्सीबा, मोपा रागी फांइसीब। मेको वा कली रडम नुप्शो खोंदशो बाक्व।  
 15 आं अरेशो मटीबपुकीम छेडछेड मताइनीम। मिनू मेको आन पोक्शो गुइ जिक्वा पुंइसीनीम।  
 16 गे समुन्द्र आ बुक्तीक सम्म जाक्दीने? आ नेल्ल क्येडा लुक्च डा बाक्तीकेम हिरशा गाक्डे?  
 17 बेक्पाइक्व आ ठेयब लाप्चो इ कली कोंइदमे? गे क्येर नाक्दो डा लाप्चोपुकी तवी?  
 18 गे रागी गिश ठेयब बाक्वा, दे तुइक्नेवे? गे मेको नेल्ल तुइक्नेवे हना, आं कली देनो।  
 19 छेडछेड आ लतीक लां ते बाक्बा? मिनू छिडछिड आ बाक्तीक ते बाक्बा?  
 20 गे मेको नेल्ल आन बाक्तीकेम लने चाप्नेवे? मिनू गे मेको आन बाक्तीक लतीक लां तुइक्नेवे?  
 21 थमा पा, गे मेको नेल्ल तुइक्नेवे। मारदे हना मेना गे जरमेने थुम्शो बाक्ते। मिनू गे शश बर्स ब्रॉइने थुम्तीवी।  
 22 गे शश फुं बाक्तीकेम ओत्रडे? गे शश मुप्स बाक्तीक तवी? यहोसु १०:११; यसेया ३०:३०  
 23 गो मेको श्येत डा नाक्ती नु लडाइ डा नाक्त कली खेक्शा वोइक्ता।  
 24 तेको लां रे छेडछेड ब्राइबा? मिनू पूर्व डा फश ते रे गूबा?  
 25 सुम ठेयब रेउ लतीक लां सेला? बंबु पतीक आ लां सुम सेला? अय्युब २८:२६

- 26 मेको मुर मबाकशो रागी नु गोरशो रागी जिप्पाइक्का कली बाक्ब।  
 27 मुर मबाकशो रागी नु सोत्रशो रागी गिगी सेल्चा कली सुम लां सेला।  
 28 मार रेउ आ आफ बाक्बा? सीत कली जरमेब सु बाक्बा?  
 29 सुका आ कोत्रज रे फु जरमेसे? सरीड रे दोक्ब फुरश आ ममा सु बाक्बा?  
 30 ब्वाक्कु फुल्लु खोदेशो सारो दुम्ब। फुरश समुन्द्र आ तार सारो दुम्ब।  
 31 गे किरकिटी सोरुल आन कली पाइक्ने चाप्नेवे? गे मिर्गसीरा सोरुल कली खिक्शो डोरी आ गाठो प्राक्ने चाप्नेवे? अय्युब ९:९  
 32 मार गे सोरुल आ हुल आन कली आन गाक्शो लां रे गुंइने चाप्नेवे? सप्तबर्सी सोरुल आन हुल कली लां कोइने चाप्नेवे?  
 33 मार गे स्वर्ग डा फुल्लुम मुशा ब्रेक्शो तुइक्नेवे? गे रागीम मेको मोदेशो सेल्ने चाप्नेवे? येरमीया ३३:२५  
 34 गे गोस्स कली 'रेउ यीवो' दे अरेने चाप्नेवे? मिनु मोपा आम कली जिप्पाइक्ने चाप्नेवे?  
 35 मार गे चिला कली आ लांम सोइक्ने चाप्नेवे? मार मेकोपुकीम 'गो एक बाक्तक' दे इ कली देंनीमी।  
 36 सुम थुं कली तुइक्तीक गेवा? सुम थुं कली रुप्तीक गेवा?  
 37 सरीड डा मारेइ मारेइ हिकने चाप्तीक तुइक्तीक थुं पाइशो सु बाक्बा? मिनु सरीड डा ब्वाक्कु वोइक्तीके रे सुम ब्वाक्कु थोक्ने चाप्बा?  
 38 मोदेशो दुम्त हना, फुरक हिलो दुम्शा, खप डल्ला दुम्शा ग्याइक्मुशा बाक्नीमी।  
 39 गे गुप्स कली आ सिखार माल्शा गेने चाप्नेवे? मेको आ शोत्रलु बेक्शो रूपाइक्ने चाप्नेवे?  
 40 मेको आन पुक्वीम बाक्नीम। खुइशशा सिखार बाप्शो बाक्नीम। गे मेको कली रूपाइक्ने चाप्नेवे?  
 41 एर ओथ हिशरो खद आन चाइक्बमी जचा मतथु परमप्रभु कली पुन्मे नोले सुम मेको आन कली थुल्बा?" दे परमप्रभुमी अय्युब कली देंमाक्त। भजन संग्रह १४७:९

## 39

परमप्रभु आ हिल्लो पशो लोत्र

- 1 परमप्रभुमी अय्युब कली "रोकोश गेना गिक्बा, गे तुइक्नेवे? छाउरी किशश गिक्मेनु मेको तशो बाक्नेवे?  
 2 मेकोपुकीम कोत्रजम चाइक्ब कुरमेनु, गे मेको आन महिना हिकने चाप्नेवे? गे मेको आन गिक्ची ना तुइक्नेवे?  
 3 मेकोपुकी गिक्का कली बाप्नीम। मिनु आन चाइक्ब जरमेनीम। मिनु आन चाइक्ब ब्रोइशा बाक्नीम।  
 4 मिनु मेको आन चाइक्ब बोल्यो दुम्नीम। ब्वाकीम कोल्नीम। काबु ब्वाकी मेर लशा, लेशशा मजाक्नीम।  
 5 सुम ब्वाकी डा गधा कली प्रोना। सुम मेको आ डोरी पुदा।  
 6 गो मेको आन कली 'बाक्कीन' दे गोरशो रागी गेता। मिनु हिकसी बाक्शो रागी मेको आन कली गेता।  
 7 मेको सहर डा रेयके रे डोन बाक्नीम। मिनु मेकोम शारा दोरपाइक्ब आन ग्रीशो मनेनीम।  
 8 मेकोम डांडा मेर आन जोतीक सेल्नीम। मिनु गिगी घांस नेल्ल माल्शा नेक्नीम।  
 9 मार ब्वाकी डा सांढे ब्यफोम इ गेय पने बिप्बा? मार मेको इ घांस लाप्तीकेम नां सोइबा?  
 10 गे मेको कली वाक्ने चाप्नेवे? मार मेकोमी दादे पा इ रू दिम सेल्बा?  
 11 मार गे मेको आ बोल तशा इ गेय पपाइक्नेवे? इन गेय नेल्ल पचा गेनेवे?  
 12 मेको इ अन्न कुरशा चाक्का कली लेशशा जाक्ब, दे थमा सुइक्नेवे?  
 13 टेयब चिक्बीम ग्येरशा आ फ्रां हाम्ब। तन्न मेको सारस खोदेशो पा बेरने मचाप्ब।  
 14 मेकोम आ ब्वोफु होल दे खपीम वोइक्ब। मिनु मेक उइ प्रोइब।  
 15 मिनु मेको कली खोइलीम दिम्नीम, दे प्रेब। ब्वाकी डा जन्तुपुकीम दिम्ने चाप्नीम, दे ममिम्ब।  
 16 मेकोम आम चाइक्ब, आ के ममाइ खोदेशो पा, आन कली शिशी मपाइब। मेको आ ब्वोफु पतीके मोशा लत हना यो, महिंब।  
 17 परमप्रभुमी मारदे हना मेको कली तुइक्तीक थुं मपाइशो सेल्शो बाक्ब। मिनु मेको कली मारेइ मरुप्ब सेल्शा प्रोइशो बाक्ब।  
 18 मिनु मेको दोरशा आ फ्रां प्राक्ब। मिनु शारा नु शारा डोइक्ब आन कली कोत्रशा रिप्ब।  
 19 गे शारा कली मेको आ बोल गेनेवे? मेको आ शुर चांम ग्योम्नेवे?  
 20 गे मेको कली सल्हा खोदेशो पा प्रेक्पाइक्नेवे? मेको आ टेयब सेंदा पा ग्रीशोम नेल्ल आन कली हिंपाइक्ब।  
 21 मेकोम आ गेंचम प्रेक्ना प्रेक्न राप्ब। मेकोम आ बोल नेल्ल कोइशा, लडाइ पतीकेम लाइब।  
 22 मेकोम हित्तीक आ परबम मारेइ ममिम्ब। मेको तरवार तशा मप्रोक्ब।  
 23 मेको आ ब्रा हरुर पा ग्रीब। मिनु मेकेर तूतीक नु तरवार हिरनीम।  
 24 तन्न मेको थाम्पा आ जॉब बोक्शा, दोरशा लाइब। तुराही ताप्शो नेनानु, मेको सिक्सी पा बाक्ने मचाप्ब।  
 25 मेकोम तुराही ताप्शो नेंशा 'आहा' देंब। मिनु मेकोम डोन रेन लडाइ पाइब आन हुल नु लडाइ डा रिना नेंब।  
 26 ब्वारदे आ फ्रां हाम्शा दक्खिन गे बेरचा कली इ रुप्तीकेमी शेंदी?  
 27 मार ककाकुलीम आ ग्योत्र इर रोगुम सेल्चा कली इ अरेशो बाक्बा?  
 28 मेको रोगुम बास बाक्ब। मिनु आ ग्योत्र मेकेन सेल्ब।  
 29 मेकेर रे आ सिखार कोत्रना कोत्रन बाक्ब। मेकोमी डोन डोन नेल्ल रिम्शो पा तने चाप्ब।

30 मेको आ चाइक्वपुकीम हुश तूनीम। मेको ते ते मार मार सिखार बाक्मा, मेको मेकेर बाक्नीम” दे परमप्रभुम अय्युब कली देंमाक्त। हबकुक १:८; मत्ती २४:२८

## 40

अय्युबमी परमप्रभु कली लोत्र लेशशो

1 मिनु परमप्रभु यावेमी लेशा अय्युब कली

2 “नेल्ल क्येडा सक्ति पाइशशो, गो आं कली दोस गेबमी आं कली लोत्र लेत्चा माल्ब” देंमाक्त। यसैया ४५:९

3 मिनु नोले अय्युबमी परमप्रभु यावे कली लोत्र लेशशो

4 “गो शोर गाक्शो मुरुम इन कली मार लोत्र लेन्ने चाप्नुडा डा? गो आं गुडम आं शोत्र सुम्नुड। उत्पत्ती ३२:९; यसैया ६:५; हितोपदेस ३०:३२

5 गो खेयप का लोत्र पने थुम्ता। मुल लेशा लोत्र मपाइनुड। गो खेयप निक्की ब्वाक्ती, मुल ब्वाक्तीक लोत्र मबाक्ब” देंमाक्त।

परमप्रभु यावेमी आ सक्ति कोंइशो

6 मिनु परमप्रभु यावेम अय्युब कली फश गिवार रे पा लोत्र लेशशो

7 “गे बोल्यो मुर खोदेशो दुम्शा रपो। मिनु गो इ कली लोत्र हिल्लो पाइनुड। मिनु गे लोत्र लेत्ती। अय्युब ३८:३

8 गो आं कली ‘दूली पाइब’ देंनेवे? मिनु गे आंमा ठीक पाइब बाक्नुड देंचा कली आं कली दोस गेनेवे?

9 मार इ सक्ति परमप्रभु के खोदेशो बाक्बा? गे बुंबु पशो सेंदा खोदेशो पा ग्रीने चाप्नेवे?

10 चाप्नेवे हना, मान ततीकेम नु टेयब दुम्तीकेम आंम कली ग्योम्सो। गे इ एर ओंथ दारस नु छेडछेड वोंइसो।

11 इ गाइक्तीक कोंइदो। मिनु टेयब लेशशो मुर आन कली कोत्रशा, मेको आन कली दिप्शा आइक्च सेलो।

12 टेयब लेशशो मुर नेल्ल आन कली कोत्रडा। मेको आन कली आइक्च सेलो। मिनु आं अरेशो लोत्र मटीब आन कली आन राप्तीकेमी दिम्दीमी।

13 मेको नेल्ल आन कली खपीम खुइक्तीमी। मिनु रागी आगाम मेको आन कुल खुइक्पाइक्मी।

14 मिनु गो ‘इ ग्युरा गुडमी गाने चाप्बाक्ते’ दें थमा सुइक्नुड।

15 गो इ कली सेल्थो खोदेशो पा बेहेमोथ माइशशो टेयब जन्तु कली सेल्ला। मेकोमी बी ब्यफ खोदेशो पा घांस ब्वाइब। बेहेमोथ ब्वाक्कु डा टेयब जन्तु बाक्ब।

16 मेको आ सक्ति आ फिलाम बाक्ब। मिनु आ बोल आ कोत्रजम बाक्ब।

17 मेको आ मीलु लेबानोन डा लाइशशो रवा खोदेशो खकटा बाक्ब। मेको आ फिला डा नाडी थम खांडसीशो बाक्नीम।

18 मेको आ रुश कांसा खोदेशो बाक्नीम। मिनु मेको आ खोइली फलाम खोदेशो बाक्नीम।

19 मेको परमप्रभु आ नेल्ल क्येडा डोंइती डा टेयब गेय बाक्ब। मो हना यो मेको कली सेल्ब तरवार शेंशा ला मेको आ नेक्था लने चाप्ब।

20 डांडामी मेको आ जोतीक बाक्ब। ब्वाकी डा जन्तु नेल्ल मेकेर ग्यारनीम।

21 मेको कमल फू आगाम इप्ब। मेको बुदी मीलु नु ब्वाक्कु बाक्तीक मेर खुइशशा बाक्ब।

22 कमल फूमी मेको कली आ वांकु गेब। मेको आ एर ओंथ डा खोला मेर बुटा बाक्नीम।

23 मेको खोला बारशा कुत हना यो महिंब। बारशो खोला आ गे पित हना यो दिल थिश्शा इप्शा बाक्ब।

24 सुइ मुरुम मेको कली आ बोल्सीम रेल्ले मचाप्ब। सुम मेको आ मिक्च थिने चाप्बा? सुम मेको कली ब्वारदम रेशशा आ नें खिन्ने चाप्बा डा?” दे परमप्रभुमी अय्युब कली देंमाक्त।

## 41

लेव्याथन आ पर्वम लोत्र

1 परमप्रभुमी “गे लेव्याथन माइशशो टेयब जन्तु कली बोल्सीमी रेल्ले चाप्नेवे? मेको आ लें डोरीम नेप्ने चाप्नेवे? भजन संग्रह ७४:१४

2 गे मेको आ नें खिश्शा डोरी लिक्ने चाप्नेवे? मेको आ शांपे बोल्सीम ब्वेक्ने चाप्नेवे।

3 मेकोमी ‘आं कली प्रोइयी, शिशी पाइय्यीनी’ दे पुंडबा? मेकोमी इ कली मिलो शिलो पाइबा डा?

4 मेकोम गे नु कबल पाइबा? ‘गो गेना हना यो वाइल दुम्नुड’ देंबा?

5 गे मेको नु चिक्ब खोदेशो पा ग्यारने चाप्नेवे? मार, मेको कली इ मीश आल नु ग्यारचा कली पाइशशा वोइक्चा दाक्नेवे?

6 मार, मेको आन पर्वम ग्याप्ब लेयबपुकीम ‘ओशो लाइब’ देंनीमी? ग्याप्ब लेयबमी आन दातेमी मेको कली भाग भाग सेल्नीमी?

7 मार, गे मेको आ कुशुल कली तूतीकेम तूने चाप्नेवे? मार, डांड साइक्तीक याम मेको आ पिया आप्ने चाप्नेवे?

8 गे ‘गो मेको नु लडाइ पाइनुड’ दे मिम्ताक्वी हना, मिनु राम्थी पाप्तीवी हना, गे मोदेशो लेशा गेनायो मपाइक्नेवे।

9 सुम मेको कली ‘ग्याइक्नुड’ दे मिम्बा, मेको मचाप्ब। सुम मेको कली ताइबा, मेको हिंशा गोल्ब।

10 मेको कली पोक्ने चाप्ब, सुइ मबाक्नीम। मोपा मेको आ डोंइती सु राप्ने चाप्बा डा?

11 गो आं कली लडाइ तोशा, सु ब्रोंइशा बाक्ने चाप्बा डा? सरीड आगा डा मरिड मारिड आं केन नम।

12 गो मेको आ खोइली आ पर्वम लोत्र पाइनुड। मेको आ सक्ति नु मेको आ दारस आ पर्वम इन कली लोत्र पाइनुड।

- 13 मेको आ फेकशो वा सुम पुडक्ने चाप्बा? मेको आ तेक्तीक कली सुम तूने चाप्बा?
- 14 सुम मेको आ शोत्र पाक्ने चाप्बा? मेको आ खुड हिंचा डा बाक्नीम।
- 15 मेको आ ची तेक्तीकपुकीम सेल्सीशो बाक्ब। मेको थम नेक्था नेक्था पा गार पाइशो वोइशो खोदेशो बाक्ब।
- 16 मेको का आ तार अर्को पा बाक्शो बाक्नीम। मोपतीके फश यो मेको आगा ओवने मचाप्ब।
- 17 मेकोपुकी का का पा अर्को नु खोम्सीशा मन्नाचा डा पा बाक्शो बाक्नीम।
- 18 मेकोम हाक्च पवानु, मी गूब। मिनु मेको आ मिक्च सुनी डा नां खोदेशो बाक्ब।
- 19 मेको आ शोत्र रे रांको नु मी आ फिलीडगो यूनीम।
- 20 मेको आ नें रे कुन गूब। मेको शुश बुइशो रे यूशो सोलोल खोदेशो बाक्ब।
- 21 मेको आ सासमी कौडला ब्रपाइक्ब। मिनु मेको आ शोत्र रे हुरुर पा ब्रशो मी गूब।
- 22 मेको आ शुर शुश बोल्यो बाक्ब। मेको आ एर ओंथ शुश हिंतीक बाक्ब।
- 23 मेको आ श्ये रोम्सीशो बाक्ब। मारेडम चिप्ताक्व हना यो, मेको कली मारेड मदुम्ब।
- 24 मेको आ थुं फुल्लु खोदेशो पा खकटा बाक्ब। मेको यात आ आगा डा फुल्लु खोदेशो पा खकटा बाक्ब।
- 25 मेको बोक्शा राम्मनु, बोल्यो नेल्ल हिंनीम। मेकोम लडाइ तोवानु, मेको नेल्ल नोले शोंडसीनीम।
- 26 तेकोइ तरवारमी मेको कली साइक्ने मचाप्ब। तूतीक, ब्रा नु अरु आप्तीकेम मेको कली मारेड मपाइब।
- 27 मेकोम फलाम कली पराल खोदेशो मिम्ब। कांसा कली राक्शो शी खोदेशो मिम्ब।
- 28 तेकोइ ब्राम मेको कली प्रोकपाइक्ने मचाप्ब। हुरद डा फुल्लु मेको कली भूस खोदेशो बाक्ब।
- 29 थाल्ला मेको कली भूस खोदेशो बाक्ब। तूतीक शेशा बाक्शोनु, मेकोम रिशशा कोत्रब।
- 30 मेको आ कोत्रजीम हेरशो गांटे खोदेशो बाक्ब। मेको गाक्मेनु दांदि पशो खोदेशो पा गाक्ब।
- 31 मेकोम समुन्द्र डा ब्वाक्कु कली बुइशो खोदेशो सेल्ब। मिनु समुन्द्र कली ग्योञुम मलम खाल्लो खोदेशो पा खाल्ल।
- 32 मेको गाक्मेनु आ नोले टल्केशो लां प्रोंडशा गाक्ब। मेको लां ठेयब समुन्द्र डा बुश चां खोदेशो तांइसीब।
- 33 रागीम मेको नु उडक्थ मारेड मबाक्नीम। मेको हिंतीक मपाइशो बाक्ब।
- 34 मेकोमी ठेयब लेशशो नेल्ल आन कली आइक्च मिम्ब। मेको ठेयब लेशशो नेल्ल आन पिप बाक्ब” देंमाक्त।

## 42

अय्युब परमप्रभु कली तुडक्ब दुम्शो

1 मिनु अय्युबम परमप्रभु यावे कली

2 “गे मारेड मारेड पने चाप्नीनी, दे गो तुडक्नुड। इन मिम्शो मारेड मारेड सुडम क्याम्ने मचाप्नीम।

3 “दूली लोत्र पा अर्ती गेब सु बाक्म? मारेड मजोक्थु मार लोत्र पवा?” देंतीनी गो थमा पा, आंमा मरुप्थु लोत्र पाता। मेको आं रुप्ने मचाप्शो थम छक लाक्चा डा बाक्नीम। अय्युब ३८:२

4 मुल गो लोत्र पाइनुड। नेनीन। गो इन कली लोत्र हिल्लो पाइनुड। मिनु गे आं लोत्र लेत्तीनी। अय्युब ३८:४

5 इन परबम नेशो ला बाक्ती। तन्न मुल गो इन कली ताता। अय्युब १९:२६-२७

6 मोपतीके गो आं कली आइक्च मिम्ताकड। मिनु गो फुरक नु पुलुम बाक्शा, माफ पुंडनुड” दे अय्युबमी देंमाक्त।

अय्युब आ रिम्शो नाक्ती लेशशो

7 मिनु परमप्रभु यावेम अय्युब नु लोत्र पने थ्युशा, मेकोम तेमान डा एलीफाज कली “गे नु इ वारच निक्शी इन कली तशा, गो गाइशो बाक्नुड। मारदे हना गे आं परबम थमा लोत्र मपनी। तन्न आं गेय पाइब अय्युबमी आं परबम थमा लोत्र पाप्नु।

8 मोपतीके गे ७ ओटा ब्यफ नु ७ ओटा सांड लाइशशा आं गेय पाइब अय्युब आ बाक्तीके लने। मिनु गेपुकीम इन परबम चोशा चढेतीक चढेने। मिनु आं गेय पाइब अय्युबमी इन परबम आं कली माफ पुंडुचा माल्ल। मिनु गो मेको आ पुंडुशो लोत्र नेंनुड। मिनु गे इन मूर्ख लोत्र पशो डा सजाइ मगेनन्नी। मारदे हना गे आं परबम थमा लोत्र मपनी। तन्न आं गेय पाइब अय्युबमी आं परबम थमा लोत्र पाप्नु” देंमाक्त। १इतिहास १५:२६; इजीकीएल १४:१४

9 मिनु तेमान डा एलीफाज, शुआह डा बिल्दाद नु नामा डा सोफारमी परमप्रभु यावेम देशो खोदेशो पामे बाक्त। मिनु परमप्रभु यावेमी अय्युब आ पुंडुशो लोत्र नेना बाक्त।

10 मोपा अय्युबम आ वारच आन परबम पुना नोले, परमप्रभु यावेम अय्युब आ शोंप नेल्ल लेशशा गेवा बाक्त। मिनु मेको आ शोंप नेल्ल, डोंइती डा क्येडा निक्शी खेयप शुश गेवा बाक्त। अय्युब १:२; अय्युब ८:७

11 मेको नोले अय्युब आ लोक्ब नेल्ले, आ समी नेल्ले नु मेको आ डोंइती डा तुइशो मुर नेल्ल जाक्शा, मेको आ खिंम भोज जामे बाक्त। मिनु मेकोपुकीमी अय्युब कली “गे परमप्रभु यावे आ गुइ रे शुश श्येत नु मरिम्शो दुम्तीके ताइतीनी” दे मेको कली थम रिम्शो लोत्र पामे बाक्त। मिनु नेल्लेम मेको कली सुन के क्येट नु सुन के औंटी गेमे बाक्त। अय्युब १९:१३-१४,१९

12 मिनु परमप्रभु यावेम अय्युब कली आ नोले डा ब्रोंडशो नाक्ती कली आ डोंइती डा ब्रोंडशो नाक्ती क्येडा शुश आसीक गेवा बाक्त। मिनु मेको के १४ हजार भेडा, ६ हजार दलओंठ, हजार का हाल ब्यफ नु हजार का गधा दुम्मा बाक्त।

13 मिनु मेको के ७ जना तौ नु तमी सां दुम्मा बाक्त। अय्युब १:२

14 मेकोमी आ डोंइती जरमेशो तमी आ नें येमीमाह, माइली आ नें केसीया नु कान्छी आ नें केरेन-हाप्पुक वोइक्मी बाक्त।

15 मिनु रागी नेल्लेम अय्युब आ तमी खोदेशो दारशो अरु सुइ मबाक्मा बाक्त। मिनु मेको आन आफोम मेको आन कली आन लोकबपुकी नु उइक्थ उइक्थ पा शोंप योक्शो गेमी बाक्त। गन्ती २७:८-११

16 मेको नोले अय्युब सहे का ४० बसं सम्म ब्रोंडमाक्त। मेकोम आ तौपुकी नु ४ पाला सम्म डा चच युइ नेल्ल तवा बाक्त। भजन संग्रह ९०:१०

17 मिनु नोले अय्युब आ नाक्त नेल्ल नेक्शा, शुश ब्रोंडशा खूशो दुम्शा बेक्माक्त। उत्पत्ती २५:८; उत्पत्ती ३५:२९; इतिहास २९:२८



## भजन संग्रह

**ब्रेक्ब मुर:** भजन संग्रह कली हिब्रू लोत्रमी “ठेयब सेल्टीक कुम्सो” देनीम। १५० ओटा कुम्सोमी ७३ ओटा कुम्सो पिय दाऊदम ब्रेक्शो बाक्ब। २ ओटा भजन संग्रह सोलोमनमी सेल्लो बाक्त। ५० ओटा कुम्सो आन ब्रेक्ब मुर मतुइसीब। लीशो २५ ओटा कुम्सो कोराह आ तौपुकी, आसाफ, मोसा, एथान नु हेमान आन सेल्लो बाक्नीम। भजन संग्रह आगामी ५ ओटा किताब बाक्नीम।

१. डोंइती डा किताब १-४१ सम्म मेको कली दाऊद आ किताब देने चाम्सीब।

२. मेको आ नोले डा किताब ४२-७२ सम्म कोराह आ तौ आन सेल्लो कुम्सो रे गोइब। एकेर आसाफ, दाऊद नु अरु मतुइशो मुर आन के यो बाक्नीम। मेको कली कोराह आ तौ आन किताब देनीम।

३. मेको आ नोले डा किताब ७३-८९ सम्म एकेर आसाफ आ ८ ओटा कुम्सो बाक्नीम। तन्न कोराह आ तौपुकी, दाऊद, हेमान नु एथान आन कुम्सो यो बाक्नीम। एको कली आसाफ आ किताब देनीम।

४. मेको आ नोले डा किताब ९०-१०६ सम्म मोसा आ कुम्सो, दाऊद आ कुम्सो निकी नु मतुइशो मुर आन के १४ ओटा कुम्सो बाक्नीम। मोपतीके मेको कली मतुइशो मुर आन ब्रेक्शो किताब देनीम।

५. नेल्ल क्येडा नोले डा किताबम १०७-१५० सम्म बाक्ब। एकेर २८ ओटाकुम्सो मतुइशो मुर, दाऊद आ १५ ओटा कुम्सो नु सोलोमन आ कुम्सो का बाक्नीम। एको किताब कली चाड डा कुम्सो किताब देनीम।

**गेना ब्रेक्शो:** एको कुम्सो नेल्ल गेना ब्रेक्शो बाक्नीमी, देने मचाप्सीब। तन्न पिय दाऊद रे इजीकीएल सम्म ३०० बर्समी ब्रेक्शो बाक्नीम। का निकी कुम्सो मेको क्येडा माइत यो बाक्नीम।

**मार ब्रेक्शो:** भजन संग्रह डा लोत्र नेल्ल क्येडा शुश माइत नु नक लोत्र डा किताबम यहूदी आन ठेयब किताब बाक्ब। मेको शुश मुर आन पर्वम लोत्र बाक्त हना यो, भजन संग्रह डा ठेयब लोत्र परमप्रभु यावे कली ठेयब सेल्टीक कुम्सो बाक्नीम।

## 1

परमप्रभु कली टीब नु मटीब

1 सु परमप्रभु आ अरेशो लोत्र मटीब नु मगाक्बा, पापी आन लां मखोइक्बा नु परमप्रभु आ पर्वम शुक्शी पाइब नु मबाक्बा, मेको ग्येरसीशो मुर दुम्ब। भजन संग्रह २६:४; भजन संग्रह ११९:१; हितोपदेस ४:१४; येरमीया १५:१७

2 मेको मुरुमी परमप्रभु यावे आ अरेशो लोत्र दाक्शा, नाक्दो नाक्ती मेको कली मिम्मा मिम्न बाक्ब। भजन संग्रह ११९:१४८; यहोसु १:८

3 मिनु मेको मुर खोला आ नेक्था खुम्शो रवा खोदेशो बाक्ब। दोपा मेको आ फल सिट्ची ना सिम्बा नु आ सफा यो महेम्थु बाक्बा, मोपा मेको मुर आ पतीक नेल्ल रिम्शो बाक्ब। भजन संग्रह ९२:१३-१५; येरमीया १७:८

4 परमप्रभु आ अरेशो मटीबपुकी चहिं मोदेशो मबाक्नीम। मेकोपुकी फशेमी बेरपाइशो भूस खोदेशो बाक्नीम।

5 मिनु मेको निसाफ दुम नाक्ती जाम्शा लाइनीम। पापीपुकी ठीक पाइबपुकी नु बाक्बा मताइनीम।

6 परमप्रभु यावेमी ठीक पाइब आन कली लां कोंइब। आ अरेशो मटीब आन लां चहिं जाम्शा लाइब।

## 2

परमप्रभु आ तौ आ सासन

1 मारदे रागी रागी डा मुर नेल्ल गारशा, परमप्रभु यावे आ पर्वम गाइक्नीमी? मारदे जात जात डा मुर जाम्शा लाइब मरिम्शो ला मिम्नीमी? प्रेरित ४:२५-२६; प्रकाश ११:१८

2 मारदे रागी डा पिपपुकी ठेयब मुरपुकी नु गारशा, परमप्रभु यावे नु आ तेल लुक्शा सोइशो आस पर्वम

3 “मेको आस देशो मपय, मेको आस कली मटिय” दे लोत्र पमुइनीमी? येरमीया ५:५

4 मिनु स्वर्गम बाक्ब परमप्रभु चहिं मेको मुर आन कली तशा, रिम्ब। मेको आन पशो तशा शुक्शी पाइब। भजन संग्रह ५९:९

5 मिनु नोले मेको गाइशशा, लोत्र पाइब। मोपा चुरशा, मेको आन कली हिंच कोंइब। यसैया ३४:२; प्रकाश ६:१५-१७

6 मिनु मेकोमी “गो आं सियोन डांडामी आं तेल लुक्शा सोइशो पिप कली वोइक्ता” देत। जकरिया ८:३

7 परमप्रभु यावेमी लोत्र पा आं कली “गे आं तौ नवे, मुलाक्ती गो इ कली सेल्ला” देत। भजन संग्रह ८९:२७-२८; २सामुएल ७:१४; प्रेरित १३:३३; हिब्रू १:५; हिब्रू १:५; हिब्रू ५:५

8 मिनु लेशा परमप्रभु यावेमी आं कली “गे आं कली पुंइतीवी हना, गो रागी रागी डा मुर इ कली गेनुड। रागी डा सुर सम्म नेल्ल इ कली गेनुड। दानीएल ७:१३-१४; हिब्रू १:२

9 गे मेको आन कली फलाम के कोक्केमी खप के सेल्लो ग्योब प्रोल्शो खोदेशो पा प्रोल्नेवे” दे लोत्र पाप्तु। प्रकाश २:२७; प्रकाश १२:५; प्रकाश १९:१५

10 मोपतीके गे पिपपुकी, जोक्ब तुइक्ब दुम्शा बाक्कीन। गे निसाफ पाइब हिंशा, होस पा रुप्ब दुमीन।

11 परमप्रभु यावे कली मान पा हिंशा, मेको आ देशो गेय पने। हिंशा खिंखि पा मेको आ डोंइती ग्येरशा बाप्पीन। फिलिप्पी २:१२; हिब्रू १२:२८

12 मिनू आ तौ आ डोंडती बाप्शा, आ खोइल पुक्पु पने। मेको गाडक्ताक्व हना, गेपुकी लाम्मीन जाम्शा लाइनीनी। मो मपाइतीनी हना, गाडक्चा चिक्शो बाक्ब। सु सु मेको कली थमा सुइश्शा, आ नेक्था लाइनीमी, मेको ग्येरसीशो मुर दुम्नीमी।

### 3

सुनी डा कुम्सो

आ तौ अब्सालोम रे प्रोक्म ना डा दाऊद आ कुम्सो। २सामुएल १५:-

- 1 परमप्रभु यावे, आं कली श्येत गेब शुश बाक्नीमी। आं जोरी सत्रु शुश बाक्नीमी।
- 2 मिनू मेकोपुकीमी आं पर्बम “परमप्रभुमी मेको कली श्येत रे मप्रॉइब” देंनीम। टेयब सेंदा पा।
- 3 परमप्रभु यावे, गे आं एर ओंथ वोइश्शो तेक्तीके खोदेंशो बाक्नीनी। गे आं कली टेयब सेल्पाइक्ब, आं थुं बारपाइक्ब नु आं पिया पोक्ब बाक्नीनी। उत्पत्ती १५:१
- 4 गो परमप्रभु यावे कली ब्रेत्नुड। मिनू आं कली आ योव्रशो डांडा रे लोव्र लेक्ब। टेयब सेंदा पा।
- 5 गो इप्शा, निन्द्रा पा, सेंसाक्यी, मारदे हना परमप्रभु यावे आं कली कोव्रब बाक्ब। भजन संग्रह ४:९
- 6 गो आं कली हजार हजार मुरपुकीमी पुम्ताक्यीमी हना यो, महिनुड। भजन संग्रह २७:३
- 7 आं परमप्रभु यावे, बोक्कीन। आं परमप्रभु, आं जोरी सत्रु रे प्रॉइयीनी। मिनू गे मेको आन चोव्रचो राप्तीने। इन अरेशो लोव्र मटीब आन खुइ जिक्तीने। गन्ती १०:३५
- 8 परमप्रभु यावे, गे मुर आन कली प्रॉइब बाक्नीनी। इन आसीक इन मुर नु बाक्ब। टेयब सेंदा पा।

### 4

नाक्दो डा पुंइशो लोव्र

कुम्सो पपाइक्ब कली तार पाइश्शो ताप्तीके ताप्शा पतीक दाऊद आ कुम्सो।

- 1 गो इन कली लोव्र पडानु, आं कली लोव्र लेत्तीने। गे आं कली ठीक सेल्ब परमप्रभु बाक्नीनी। गो श्येत जडानु, आं कली बाक्तीक गेतीनी। गे आं कली शिशी पने। आं पुंइशो नेंशा गेयीनी।
- 2 गे मुरपुकी, गेना सम्म आं कली मान मपाइनीनी? गेना सम्म गेपुकी जाम्शा लाइब थोव्रक दाक्नीनी नु जोल पाइनीनी? टेयब सेंदा पा।
- 3 परमप्रभु यावेमी आ कली टीब आन कली आ नेक्था वोइक्चा कली योव्रशो बाक्त, दे तुइक्तीन। मिनू परमप्रभु यावेमी आं पुंइशो लोव्र नेंब।
- 4 गेपुकी गाइश्शा, पाप मपने। इन ब्राख्येम इप्शा, इन थुं नु लोव्र पने। मिनू सिक्सी पा बाक्कीन। टेयब सेंदा पा। एफिसी ४:२६
- 5 मिनू परमप्रभु यावे कली ठीक पतीक चढेने। आ देंशो लोव्र थमा सुइश्शा पने। भजन संग्रह ५१:१९, २१; १पत्रुस २:५
- 6 शुश मुरुमी “सुमी आंइ कली रिम्शो बाक्चा गेबा” दे हिल्लो पाइनीम। परमप्रभु यावे, इन कुल छा छेछेछे आंइ तार ब्रपतीन। गन्ती ६:२५
- 7 मेकोपुकी नु अन्न नु अडगुर रस शुश बाक्त हना यो, गे आं कली मेको आन क्येडा ग्येरपाइक्तीनी।
- 8 गो हेम पा बाक्शा, इप्शा निन्द्रा पाइनुड। मारदे हना परमप्रभु यावे, गे आं कली श्येत मजपाइक्थु, बाक्चा गेनीनी। भजन संग्रह ३:६

### 5

सुनी डा पुंइशो लोव्र

कुम्सो पपाइक्ब कली मुराली ताप्शा पतीके। दाऊद आ कुम्सो।

- 1 परमप्रभु यावे, आं देंशो लोव्र नेनीने। आं हुकयी पशो नेनीन।
- 2 आं पिप, परमप्रभु, आं टेयब सेंदा नेनीने। मारदे हना गो इन कली लोव्र पा पुंइनुड।
- 3 परमप्रभु यावे, गे सुनी कना आं सेंदा नेनीनी। गो मार माल्नुडा, मेको इन कली पुंइशा, रिम्शा बाक्नुड।
- 4 मिनू गे मरिम्शो पाइब आन कली मदाक्ब परमप्रभु बाक्नीनी। इन अरेशो मटीब काइ यो गे नु बाक्ने मचाप्नीम।
- 5 टेयब लेश्शो मुरपुकी इन डोंडती राप्ने मचाप्नीम। गे मरिम्शो पाइब आन कली मदाक्नीनी।
- 6 गे जोल पाइब आन कली खतम पाइनीनी। मिनू हुश खाक्श पोक्ब नु थमा मसुइक्ब मुर आन कली ग्रॉग्रा दित्तीनी।
- 7 गो चहिं इन गेना हना यो टेयब दाक्तीकेमी इन खिं ओव्रचा ताइनुड। मिनू गो इन कली मान पा हिंशा, इन खिं गे कोव्रशा, पोक्च थेक्शा टेयब सेल्नुड। भजन संग्रह २६:८
- 8 आं जोरी सत्रु शुश बाक्नीमी। मोपतीके आं कली इन ठीक पतीके लां कोंइदीने। आं डोंडती इन लां ठीक सेलीन।
- 9 आं जोरी सत्रुमी जोल ला पाइनीम। आन थुंमी “दोपा खतम सेल्नुडा” दे ला मिन्नीम। आन लकचा मुर थिम्तीके खोदेंशो बाक्ब। मेकोपुकी मिलो शिलो पाइब बाक्नीम। रोमी ३:१३
- 10 परमप्रभु, मेको आन मरिम्शो पशो आम आन कली दुम्ल। मेको आन शुश मरिम्शो पशो आ पर्बम मेको आन कली इन डोंडती रे तिलीन। मारदे हना मेको इन कली मटीब बाक्तेक्म।
- 11 सुमी इन कली थमा सुइक्नीमी, मेको ग्येरसीनीम। मेकोपुकी गेना हना यो शुश ग्येरशा, इन खाल पतीकेमी ग्येरशा बाक्नीम। मिनू इन कली तुइश्शा, इन नें दाक्शा, ग्येरशा कुम्सो पाइनीम।

12 मिनू परमप्रभु यावे, गे मेको ठीक पाइब आन कली आसीक गेनीनी। इन दाक्तीके मेको आन कली एर ओंथ वोइशो तेक्तीक खोदेशो बाकब।

## 6

श्येत जाइब आ पुंडशो लोव

कुम्सो पपाइक्ब कली ८ ओटा तार पाइशो ताप्तीके ताप्शा पतीके दाऊद आ कुम्सो।

1 परमप्रभु यावे, गे आं कली तशा गाइक्ताकनी हना यो, सजाइ मगेयीनी। गे गाइक्ताकनी हना यो, आं कली श्येत मगेयीनी। येरमीया १०:२४

2 परमप्रभु यावे, गे आं कली शिशी पने। मारदे हना गो बेक्चा चिक्शो बाक्नुड। गे आं कली सापाइय्यीनी। मारदे हना आं खोइली खिंखि पाइब।

3 मिनू आं थुं यो हिंशो बाकब। परमप्रभु यावे, गे गेना सम्म आं कली मोदेशो पा बाक्पाइक्नीनी?

4 परमप्रभु यावे, गे आं गे लेतीने। इन गेना हना यो दाक्तीकेमी आं थुं बेक्चा रे प्रोइयीनी।

5 मारदे हना बेक्शो नोले सुड मुरुमी इन कली ममिम्मीम। मिनू बेक्शो मुर आन बाक्तीकेमी सुडमी इन कली ठेयब मसेलीमी। भजन संग्रह ३०:१०; भजन संग्रह ८८:११; भजन संग्रह ११५:१७-१८; यसैया ३८:१८

6 गो थुं खाइशशा, डाक्शा दती। गो नाक्दो आं खाट नेल्ल प्रेक्कुमी जिप्पाइक्नुड। आं इप्तीकेमी डाक्शा ला बाक्नुड।

7 सुर्ता पतीके मिक्च मताइब खोदेशो दुम्ती। मारदे हना आं जोरी सत्रु शुश बाक्नीम।

8 गे मरिम्शो पाइबपुकी, आं क्येडा डोन लने। मारदे हना परमप्रभु यावेमी आं डाक्शो नेंतु।

9 परमप्रभु यावेमी आं पुंडशो लोव नेंतु। मिनू परमप्रभु यावेमी आं पुंडशो गेब।

10 आं जोरी सत्रु नेल्ल मुने दोक्शा, शुश श्येत जाइब दुम्नीम। मिनू मुने दोक्शा, आन बाक्तीके लेतीम।

## 7

परमप्रभु ठीक निसाफ पाइब

दाऊदमी बेन्यामीन थर डा कूश माइशो मुर रे श्येत जशा, परमप्रभु यावे आ डोंइती पशो कुम्सो।

1 परमप्रभु यावे, आं परमप्रभु, गो इन कली जिम्मा गेंसीनुड। मिनू खेदा पाइब नेल्ल आन गुड रे आं कली प्रोइयीनी।

2 गे आं कली मप्रोइतीनी हना, मेकोपुकीमी आं कली गुप्सम खोदेशो पा दिप्शा ब्वाइनीम। मिनू सुडमी आं कली मेको आन गुड रे प्रोइने मचाप्नीम।

3 परमप्रभु यावे, आं परमप्रभु, मेको आन देशो खोदेशो पा, गो आं गुडमी मरिम्शो पाता हना, अय्युब ३१:७-३४

4 गो गे नु दुशा बाक्ब आन कली श्येत गेता हना, आं कली बिक्तीम श्येत गेमेनु, गो क्येक्क लेत्ताक्डमी हना,

5 आं जोरी सत्रुम आं कली खेदा पा ग्रामल। मिनू आं कली खपीम दिप्शा साइय्यीमील। मिनू आं नें जाम्शा लल। ठेयब सेंदा पा।

6 परमप्रभु यावे, गे गाइशशा, बोक्कीन। आं जोरी सत्रु आन पशो तशा, आं कली वारच पथ बोक्कीन। गे “गो निसाफ पचा माल्नुड” दे लोव पाइतीनी।

7 मिनू रागी रागी डा मुरपुकी इन डोंइती राप्नीम। मोपतीके इर डा इन बाक्तीकेम मेको आन कली निसाफ पचा कली इन ठेयब नित्तीकेमी निस्सीन।

8 परमप्रभु यावे जात जात डा मुर आन कली निसाफ पाइब बाक्ब। परमप्रभु यावे, आं ठीक पशो नु आं आगाम बाक्शो ठीक पाइब थुं तशा, आं कली निसाफ पने। भजन संग्रह १८:२१-२७

9 इन अरेशो मटीब आन मरिम्शो पतीके थुम्पतीन। मिनू नोले गे ठीक पाइब आन कली बोल्यो सेलीन। ठीक पाइब परमप्रभु, गे मुर आन थुं नु आन पतीके नाक्ब बाक्नीनी। भजन संग्रह १०४:३५; भजन संग्रह १३९:१; येरमीया ११:२०; प्रकाश २:२३

10 परमप्रभु आं तेक्तीके बाक्ब। मेकोमी रिम्शो थुं पाइशो आन कली श्येत रे प्रोइब।

11 परमप्रभु ठीक निसाफ पाइब बाक्ब। नाक्त किंत किंत मेको पापी आन कली तशा गाइक्ब।

12 थमा पा आ जोरी सत्रुम आन तरवार शेप्नीम। आन लिब्रा कीशा आप्चा कली ठीक पाइनीम। ब्यवस्था ३२:४१

13 मिनू आन साइक्तीक या आंम कली ठीक पशो बाक्नीम। आन ब्राम मी ब्रपाइशो बाक्नीम।

14 नेनीन, मेकोमी मरिम्शो ला मिम्नीम। मिनू श्येतम ब्रीशा, जोल पना पन बाक्नीम।

15 मेकोपुकीमी बिक्तीक दोइनीम। मिनू नोले आंम आन दोशो बिक्तीकेमी आंमा बिक्नीम। हितोपदेस २६:२७

16 मुर आन कली गेचशो श्येत आंमान जाइनीम। मेको आन हुश खाक्श पोक्शो आंम आन पियामीन मोंइसीब।

17 गो परमप्रभु यावे आ ठीक पशो तशा, मेको कली “गे रिम्शो पाइब बाक्नीनी” दे कुम्सो पाइनुड। गो परमप्रभु यावे, नेल्ल क्येडा ठेयब आ नें आ पर्वम कुम्सो पाइनुड।

## 8

परमप्रभुम आ रिम्स कोंइशो

कुम्सो पपाइक्ब कली गित्तीथ कुम्सो आ लायो डा दाऊद आ कुम्सो।

1 परमप्रभु यावे, आंइ परमप्रभु, रागी नेल्लेमी इन नें ठेयब बाक्ब। गे इन छेडछेड सरीड क्येडा आइक्था वोइक्तीनी। प्रस्थान ३:१३-१५

- 2 आडक्च आल नु बुकलु आलपुकीमी इन कली ठेयब सेल्पांडसाकनी। मोपा गे इन जोरी सत्रु नु क्येक्क लेप्ब आन कली ब्वालेड पपाइक्तीनी। मत्ती २१:१६
- 3 गो सरीड गे कोवडुनु, इन सेल्शो तास्ला नु सोरुल तातामी,
- 4 गे मोपा ठेयब थोवक सेल्तीनी हना, मुर आन परबम दोपा मिम्मे चाप्नीनी? दोपा मेको आन कली कोवनीनी। हिब्रू २:६-८
- 5 गे मुर आन कली इन स्वर्ग डा गेय पाइब आन क्येडा इचका ला आडक्च सेल्तीनी। मुर आन कली मान नु छेडछेडमी सिरपेच गुण्शो खोदेशो पा ग्योम्ताकनी। हिब्रू २:६-८
- 6 मिनु इन सेल्शो मारेड मारेड आन कली हुकुम पाइब सेल्तीनी। मोपा मुर इन सेल्शो आन दातेमी नेल्ल क्येडा ठेयब बाक्ब। उत्पत्ती १:२७
- 7 भेडा, बी ब्यफ, ब्वाकी डा जन्तु,
- 8 चिक्ब, समुन्द्रमी बाक्ब डांड नु समुन्द्रमी मार मार बाक्मा, मेको नेल्ल आन कली हुकुम पाइब सेल्तीनी। १कोरिन्थी १५:२७
- 9 परमप्रभु यावे, आंड परमप्रभु, रागी नेल्लेमी इन नें ठेयब बाक्ब।

## 9

“गे रिम्शो पाइतीनी” दे कुम्सो पशो

कुम्सो पपाइक्ब कली मुथ-लाब्बेन कुम्सो आ लायो। दाऊद आ कुम्सो।

- 1 परमप्रभु यावे, गो आं थुं नेल्लेमी इन कली “गे रिम्शो पाइतीनी” दे इन कली ठेयब सेल्नुड। इन पशो छक लाक्या डा गेय नेल्ल आन कली नेंपाइक्नुडमी। भजन संग्रह ४४:२
- 2 इन कली तुइशशा, ग्येरनुड। शुश ग्येरशा, गो इन कली ठेयब सेल्तीक कुम्सो पाइनुड। गे नेल्ल क्येडा ठेयब बाक्नीनी।
- 3 आं जोरी सत्रु इन कली तथा, आन जाक्शो लां रे लेशशा प्रोकशा लमानु, गुल गाल थिरशा, साइक्चा पुंडसाकम।
- 4 मारदे हना गे ठीक निसाफ पाइब बाक्शा, इन ठेयब नित्तीकेमी निशो बाक्तीनी। मिनु आं ठीक गेय पशो तुइशशा, गे आं कली निसाफ पाइतीनी।
- 5 मिनु गे रागी रागी डा मुर आन कली हुइक्ताकनी। इन अरेशो मटीब आन कली साइक्तीनी। मेको आन नें लेंशा ममिम्चा डा पा क्याम्ताकनी।
- 6 परमप्रभु, आं जोरी सत्रु आन खिं गेनायो मसेल्चा डा पा प्रेत्तीनी। गे मेको आन सहर हु हा प्रेत्तीनी। मिनु मेको आन नें यो काइ मलीथु, जाम्शा लत। भजन संग्रह ३४:१७
- 7 तन्न परमप्रभु यावे गेना हना यो बाक्ब। निसाफ पचा कली आ ठेयब नित्तीके ठीक पशो बाक्ब।
- 8 मिनु रागी रागी डा मुर आन कली आ ठीक पतीकेमी निसाफ पाइब। जात जात डा मुर आन कली आन कुल मकोवथु, निसाफ पाइब।
- 9 परमप्रभु यावे दिप्चा पुंडसीशो मुर आन कली बोल्यो दरवार खोदेशो बाक्ब। श्येत जशो आन कली बोल्यो खुइशशा बाक्तीक बाक्ब।
- 10 परमप्रभु यावे, इन नें तुइक्बपुकीमी इन कली थमा सुइक्नीम। मारदे हना गे इन कली मालब आन कली मप्रॉइनीनी।
- 11 सियोन डांडामी बाक्ब परमप्रभु यावे कली ठेयब सेल्तीक कुम्सो पने। जात जात डा मुर आन कली आ पशो शेंदीने।
- 12 मिनु परमप्रभुमी मुर साइक्ब आन कली आन क्येक्क लेप्ब। मिनु श्येत जशो आन डाक्शो मिम्ब। उत्पत्ती ४:१०; उत्पत्ती ९:५; भजन संग्रह ७२:४; उत्पत्ती १६:११
- 13 परमप्रभु यावे, आं कली शिशी पने, आं कली मदाक्बपुकीमी गेशो श्येत कोवडीन। गे आं कली बेक्चा चिक्शो रे प्रॉइतीनी।
- 14 मिनु ब्रॉइशा, गो परमप्रभु आ योव्रशो सियोन डा ठेयब लाप्चोम मुर आन कली “परमप्रभुमी आं कली श्येत रे प्रॉइती” दे इन कली ठेयब सेल्शा, ग्येरसीशा तुइक्पाइक्नुडमी। भजन संग्रह २२:२३; भजन संग्रह १३:६
- 15 रागी रागी डा मुरपुकी आंमा दोशो ठेयब खाल्टाम बिक्शो बाक्नीम। मिनु आन दाइशो ग्याइलीमी आंमा रेशो बाक्नीम।
- 16 परमप्रभु यावेमी मेको ठीक निसाफ पाइब बाक्ब, दे मुर नेल्ल कली तुइक्पाइशो बाक्ब। आ अरेशो मटीब मुर आंमा आन पशोमीन खतम दुम्नीम। ताप्तीकेमी ठेयब सेंदा पा।
- 17 परमप्रभु आ अरेशो मटीब रागी रागी डा मुरपुकी नु मटीबपुकी बेक्शो मुर आन बाक्तीकेम लाइब बाक्नीम।
- 18 परमप्रभुमी श्येत जाइब आन कली मप्रेंब। मिनु पुडग आन आस पशो गेना हना यो मिम्ब। भजन संग्रह २२:२५; भजन संग्रह १०:१७
- 19 परमप्रभु यावे, बोक्कीन। मुरपुकी मग्रामल। रागी रागी डा मुर इन डोंइती जाक्शा, निसाफ पचा पुंडसमल। गन्ती १०:३५
- 20 परमप्रभु यावे, मेको आन कली हिंपतीन। रागी रागी डा मुरपुकीमी “गो मुर ला बाक्नय” दे तुइक्तमेक्ल। ठेयब सेंदा पा।

## 10

थमा मसुइक्ब आन शुक्शी पशो

- 1 परमप्रभु यावे, गो आंड श्येत जची ना, मारदे डोन बाक्शा, खुइक्नीनी?

- 2 परमप्रभु आ अरेशो लोत्र मटीबपुकीमी टेयब लेशशो दुम्शा, पुडग आन कली खेदा पाइनीम। मेको आन मरिम्शो मिम्तीके नु आन पतीकेमी ग्याइक्चा पुंडसीनीम।
- 3 परमप्रभु आ अरेशो लोत्र मटीबपुकीमी “आं दला दाक्स नेल्ल पने चानुड” दे टेयब लेतीम। लोभी आन कली आसीक गेनीम। मिनु परमप्रभु यावे कली मान मपथु, महिथु, मेको आ पर्वम शुक्शी लोत्र पाइनीम।
- 4 मिनु टेयब लेशशा, आन थुमी “परमप्रभुमी आंड कली मरिम्शो मसुइक्ब। मारदे हना मेको मबाक्ब” दे मिम्नीम।
- 5 मोपा यो मारेड मारेडम गाप्शा श्येत मजाइनीम। मारदे मेकोपुकीमी इन निसाफ पशो मताइनीमी? मेकोपुकीमी आन जोरी सत्रु आन क्येडा महिथु मेको आन कली ग्रानीम। आमोस ६:३
- 6 मिनु मेकोपुकीमी आन थुमी “गो श्येत मजाइनुड। आं चच युड सम्म यो श्येत मजाइनीम” दे मिम्नीम। भजन संग्रह ७३:६-८
- 7 मेको मुरपुकीमी सराप नु जोल पना पन बाक्शा, अरु आन कली दिप्शो बाक्नीम। मेको आन लोत्रमी श्येत नु मरिम्शो ला दुम्पाइक्नीम। रोमी ३:१४
- 8 मेकोपुकीमी गाउं मेर खुइश्शा बाक्शा, दोस मताइब आन कली साइक्नीम। श्येत जाइब आन कली यो बाप्शा बाक्नीम।
- 9 गुप्स ब्वाकीम बाप्शो खोदेशो पा खुइश्शा, पुडग आन कली रिम्नीम। पुडग आन कली आन ब्वारदम रेशशा ग्याइक्नीम।
- 10 मिनु मेको गु बाप्शा बाक्नीम। श्येत जाइबपुकी मेको आन सक्तिमी गोल्नीम।
- 11 मेको आन थुमी “परमप्रभुमी आंड पशो मताइब। आ कुल खुइक्ताक्व, आंड पशो प्रेंब” दे मिम्नीम। भजन संग्रह ७३:११; भजन संग्रह ९४:७; यसेया २९:१५
- 12 परमप्रभु यावे, परमप्रभु, बोक्कीन। परमप्रभु, इन गुड क्युकशा मरिम्शो पाइब आन कली सजाइ गेने। दिप्चा पुंडसीशो आन कली मिम्शा, वारच पने। गन्ती १०:३५
- 13 मारदे मेको इन अरेशो मटीब मुरपुकीमी परमप्रभु कली शुक्शी पाइनीमी? मारदे मेकोपुकीमी “आं कली दोसी मसुइक्ब” दे मिम्नीमी?
- 14 परमप्रभु, गे नेल्ल ताइतीनी। गे श्येत जाइब नु मरिम्शो पाइक्चा पुंडसीब आन कली वारच पाइश्शा, क्येक्क लेप्ब बाक्नीनी। मेको श्येत जाइबपुकी इन कली जिम्मा गेसीशो बाक्नीम। गे रोम रोइक्च आन कली वारच पाइब बाक्नीनी। भजन संग्रह ६८:६; प्रस्थान २२:२२
- 15 गे इन अरेशो मटीब नु काड मरिम्शो पाइब आन गुड जिकतीन। मेको आन खुइश्शा मरिम्शो पशो कली निसाफ पने! मिनु मोदेशो नोले मलीनीम। अय्युब ३८:१५
- 16 परमप्रभु यावे गेना हना यो पिप बाक्ब। रागी रागी डा मुरपुकी आ राज्य रे दिल्शा, जाम्शा लाइनीम।
- 17 परमप्रभु यावे, गे बेम्शो मुर आन पुंडशो लोत्र नेतीनी। गे मेको आन थुं बारपाइश्शा, आन पुंडशो लोत्र नेंचा कली नोफा दाइश्शा बाक्तीनी।
- 18 गे रोम रोइक्च नु दिप्चा पुंडसीशो मुर आन पर्वम ठीक निसाफ पाइनीनी। मो दुम्मेनु, मुरपुकीमी अरु आन कली लेंशा श्येत मगेनीम।

## 11

परमप्रभु ठीक पाइब बाक्ब

कुम्सो पपाइक्ब कली दाऊद आ कुम्सो।

- 1 गो परमप्रभु यावे कली जिम्मा गेसाक्यी। गेपुकीम आं कली “चिक्ब खोदेशो पा पहाडम बेरो” दे दोपा देने चान्पीनी?
- 2 नेनीन, इन अरेशो मटीबपुकीमी आन लिब्रा कीशा, आन ब्रा डोरीम वोइश्शा, ठीक पाइब रिम्शो थुं पाइश्शो मुर आन कली खुइश्शा आप्नीम।
- 3 जगन ब्रेत्त हना, ठीक पाइबम मार पने चाप्बा डा?
- 4 परमप्रभु यावे आ खिंमी बाक्ब। आ टेयब निल्लीके स्वर्गम बाक्ब। मिनु उड कोवना कोवन मुर आन कली नाक्ब। हाबाकुक २:२०; यसेया ६६:१; भजन संग्रह ३३:१३-१४
- 5 परमप्रभु यावेमी ठीक पाइब नु आ अरेशो मटीब आन कली नाक्ब। मिनु हुश खाक्श पोक्चा दाक्ब आन कली काड मदाक्ब।
- 6 परमप्रभुमी आ अरेशो मटीब आन तारी मी नु गन्धक यिपाइक्ब। मिनु मेको आन तारी होश फश पपाइक्ब। मरिम्शो पाइब मोदेशो पाइक्चा पुंडसीशो बाक्नीम।
- 7 परमप्रभु यावे ठीक पाइब बाक्ब। मोपतीके ठीक पतीके दाक्ब। मिनु रिम्शो थुं पाइश्शो मुरपुकीमी आ कुल ताइनीम। मती ५:८

## 12

मरिम्शो पाइब आन पर्वम लोत्र

कुम्सो पपाइक्ब कली ८ ओटा तार पाइश्शो ताप्तीके ताप्शा पतीके दाऊद आ कुम्सो।

- 1 परमप्रभु यावे, वारच पाइक्की। इन लां खोइक्ब जाम्शा लाम्तेक्म। मुर आन दातेमी इन कली थमा सुइक्बपुकी यो मबाक्नीम।
- 2 नेल्लेमी आन नेक्था डा मुर नु जोल ला पमुइनीम। चिप्लो लोत्र पाइब थुं निकशी पाइश्शो ला बाक्नीम।

- 3 परमप्रभु यावेमी, मिलो शिलो पाइब नु ठेयब लेशशो लोत्र पाइब नेल्ल आन कली क्यामदल।
- 4 मोदेंशो ठेयब लेशशो लोत्र पाइबपुकीमी “आंड लोत्रमीन ग्रानीकी। गो जोक्ब तुइक्ब बाक्नीकी। आंड प्रभु सु बाक्बा डा?” देंनीम। भजन संग्रह ७३:८-९; अय्युब २१:१४-१५
- 5 परमप्रभु यावेमी “गो पुडग आन कली दिप्शो ताता। श्येत जाइब आन डाक्शो नेता। मोपतीके गो मुल बोक्नुड, मेको आन कली श्येत मजतीकेम वोइक्नुड” देंब।
- 6 परमप्रभु यावे आ लोत्र थमा बाक्ब। मेको ७ खेयप यपाइशशो क्येख चांदी खोदेंशो बाक्ब।
- 7 परमप्रभु यावे, गे इन मुर आन कली कोत्रशा, आंड कली मरिम्शो पाला डा मुर रे प्रॉइकी।
- 8 मारदे हना मुर आन दातेमी इन अरेशो मपाइब शुश दुम्शा, मरिम्शो पाइबपुकी तेइ तेइ ब्रशो बाक्नीम।

## 13

“वारच पने” दे पुंडशो

कुम्सो पपाइक्ब कली दाऊद आ कुम्सो।

- 1 परमप्रभु यावे, आं कली गेना सम्म प्रेनीनी? गेना सम्म इन कुल खुइक्नीनी? भजन संग्रह ७७:८; हाबाकुक १:२
- 2 गो गेना सम्म सुर्ता पा, नाक्त किंत किंत आं थुं खाइशशा बाक्चा माल्नुड? आं जोरी सत्रु गेना सम्म आं क्येडा बोल्यो बाक्नीमी?
- 3 परमप्रभु यावे, आं परमप्रभु, आं कली मिम्शा, आं लोत्र लेत्तीनी। आ बोल लेंशा गेयीनी। मो मपाइतीनी हना, गो वेक्नुड।
- 4 मोदेंशो दुम्मेनु, आं जोरी सत्रुम “गो मेको कली ग्रानीकी” दे आं कली हिम्सीशो तशा, ग्येरसीनीम।
- 5 तन्न गो “गे गेना हना यो दाक्ब बाक्नीनी” दे थमा सुइक्नुड। इन वारच पा प्रॉइतीके तशा, आं थुं ग्येरना ग्येरन बाक्ब।
- 6 परमप्रभु यावेमी आं कली रिम्शो वारच पाइक्ती। गो मेको कली कुम्सो पाइनुड।

## 14

थमा मसुइक्ब आन बुतीके

कुम्सो पपाइक्ब कली दाऊद आ कुम्सो। भजन संग्रह ५३:-

- 1 मूर्खपुकीमी “परमप्रभु मबाक्ब” दे मिन्मीम। मेकोपुकी ग्रांया दिचा डा दुम्शा, मरिम्शो गेय पाइनीम। मेको आन दातेमी रिम्शो पाइब सुइ मबाक्नीम।
- 2 परमप्रभु यावेमी स्वर्ग रे मुर आन कली कोत्रब। मारदे कोत्रब देंशा हना, मुर आन दातेमी जोक्ब तुइक्ब परमप्रभु कली माल्ब, सुइ बाक्मा कों, दे कोत्रब।
- 3 तन्न मुर नेल्ल परमप्रभु कली प्रॉइशा, दूली पाइब दुम्तेक्म। रिम्शो पाइब का यो मबाक्नीम। उत्पती ६:१२; रोमी ३:१०-१२
- 4 मरिम्शो पाइबपुकीमी परमप्रभु यावे कली मतुइक्नीम। आ मुर आन कली शोब्ले जशो खोदेंशो पा नेक्नीम। मेकोपुकीमी परमप्रभु यावे कली यो मपुंडनीम। मीका ३:३
- 5 मिनु नोले मेकोपुकी शुश हिंशा, खिंखि पाइनीम। मारदे हना परमप्रभु ठीक पाइब आन दातेमी बाक्ब।
- 6 मुरपुकीमी पुडग आन मिम्शो बिग्रेचा दाक्नीम। तन्न परमप्रभु यावे मेको आन खुइक्तीके बाक्ब।
- 7 सियोन रे इस्त्राएली आन ब्रॉइतीके तामेक्ल। परमप्रभु यावेमी आ मुर आन कली प्रोनानु, याक्ब आ चच युइ, इस्त्राएली नेल्ल ग्येरसीमल। भजन संग्रह १२६:१

## 15

सु परमप्रभु नु बाक्ने चाप्बा डा?

दाऊद आ कुम्सो। भजन संग्रह २४:२-६; यसेया ३३:१४-१६

- 1 परमप्रभु यावे, इन बाक्तीकेमी सु बाक्ने चाप्बा डा? इन डांडाम सु बाक्चा ताइबा डा? उपदेसक ४:१७
- 2 सुमी रिम्शो पना पन बाक्शा, ठीक गेय ला पाइबा नु आ थुं नेल्लेमी थमा लोत्र ला पाइबा,
- 3 सुमी अरु आन लोत्र मपाइबा, आ नेक्था डा मुर आन कली काइ मरिम्शो मपथु, शुक्शी मपाइबा,
- 4 सुमी परमप्रभु आ अरेशो मटीब आन कली महिक्थु, परमप्रभु यावे कली मान पा हिंब आन कली चहिं हिक्ना हिक्न बाक्बा, कसम जशा, श्येत दुम्मेनु यो, आ कसम जशो मप्रॉइथु बाक्बा,
- 5 सुमी क्येट जेर गेशा, चाइक्ब मताक्बा, सुमी दोस मताइब कली श्येत गेचा कली घूस मजाइबा, मोदेंशो मुर गेना हना यो महिम्सीथु, परमप्रभु यावे आ बाक्तीकेम बाक्चा ताइब। प्रस्थान २२:२४; ब्यवस्था २३:२०-२१

## 16

दाऊदमी परमप्रभु नु लोत्र पशो

दाऊद आ कुम्सो।

- 1 “परमप्रभु, आं कली कोत्रयीनी। मारदे हना गो इन कली जिम्मा गेसीशो बाक्नुड।

- 2 गो परमप्रभु यावे कली 'गे आं परमप्रभु बाक्नीनी। गो इन क्येडा अर्को मारेड रिम्शो मतुडकुनुड' देती। भजन संग्रह ७३:२५
- 3 रागीम बाक्ब इन योत्रशो मुर, थमा पा ठेयब मुर बाक्नीम। गो मेको मुर आन कली तशा ग्येरसीनुड।
- 4 मिनु देवी देवता आन नोले खोडक्ब आन श्येत बारना बारन लाइब। मेको आन तूतीक चढेतीक डा हुश गेनायो मचढेनुड। मेको आन नें यो मथीनुड।
- 5 परमप्रभु यावे, गे आं भाग बाक्नीनी। मिनु आं कचौरा प्रिनीनी। गे आं थेरशो रू कोत्रब बाक्नीनी। भजन संग्रह ७३:२६; गन्ती १८:२०; बिलाप ३:२४
- 6 इन गेशो रू रिम्शो बाक्ब। गो थम रिम्शो शोंप ताता।
- 7 आं कली अर्ती गेब, परमप्रभु यावे कली ठेयब सेल्लुड। नाकदो यो आं थुमी आं कली मोदेशो पचा शेंब।
- 8 गो परमप्रभु यावे कली गेना हना यो आं डोंइती वोडक्ता। मोपा मेको आं ग्युरा गे बाक्मेनु, गो महिम्सीनुड। प्रेरित २:२५-२८
- 9 मोपतीके आं थुं ग्येरसीब। गो आं थुंमी कुम्सो पाडनुड। गो महिंथु बाक्ने चाप्नुड।
- 10 मारदे हना गे आं कली बेक्चा मगेनीनी। इन योत्रशो कली राक्चा मगेनीनी। प्रेरित १३:३५
- 11 गे आं कली ब्रोंइतीक लां कोंइनीनी। गो इन डोंइती बाक्डानु, आं थुं ग्येरतीकेम ब्रीब। इन ग्युरा गे बाक्डानु, गेना हना यो थम रिम्शो दुम्नुड" दे लोत्र पाता।

## 17

परमप्रभु कली "वारच पने" देशो दाऊद आ पुंडशो लोत्र।

- 1 "परमप्रभु यावे, गे ठीक पशो आ पबंम आं लोत्र नेनीन। आं ब्रेशो नेनीन। आं जोल मपथु पुंडशो लोत्र इन नोफा दाइशशा नेनीन।
- 2 आं ठीक दुम्तीके इन लां रे जाक्मल। गे आं ठीक पतीके ताइनीनी। भजन संग्रह ४३:१
- 3 गे आं कली नाक्ताक्नी। नाकदो यो आं कली नाक्शा, आं आगामी मारेड मरिम्शो मथिन्नी। गो मरिम्शो लोत्र मपाडनुड, दे आं थुं फ्रेशा बाक्ती। भजन संग्रह १३९:१
- 4 मुर आन पतीके तशा, गो इन लोत्र मिम्शा, हुश खाक्श पोक्ब आन लां मखोडकुनुड।
- 5 आं खोइली मग्रेक्चा डा पा इन लांम थेक्शो बाक्ती।
- 6 गो इन कली लोत्र पाता, मारदे हना गे आं लोत्र नेनीनी। परमप्रभु, इन नोफा आं गे दाइशशा, आं लोत्र नेनीन।
- 7 आं कली इन गेना हना यो दाक्तीक इन ग्युरा गुडमी इन कली थमा सुडक्ब आन कली आन जोरी सत्रु रे प्रोंइनीनी।
- 8 मिक्च दोदेशो रिम्शो पा वोइशशो बाक्बा, मोदेशो पा आं कली यो रिम्शो पा वोतीन। इन फ्रां आगाम पुप्तीनी। ब्यवस्था ३२:१०; भजन संग्रह ६१:५; भजन संग्रह ६३:८; प्रस्थान ३७:७-९
- 9 मोपा इन अरेशो मटीब, आं कली साडक्चा कली पुम्बपुकीमी आं कली मथिन्तीम।
- 10 मेको आन थुं खक्ता पा, ठेयब लेशो लोत्र ला पाइनीम।
- 11 गो ते लती हना यो, मेकोपुकीमी आं कली पुम्नीम। आं कली साडक्चा माल्नीम।
- 12 मेकोपुकी शोत्रलु बेक्शो गुप्स खोदेशो बाक्नीम। टिटा गुप्सम बाप्शो खोदेशो पा बाप्शो बाक्नीम।
- 13 परमप्रभु यावे, बोक्कीन। मेको आन कली दोक्पतीन। आं कली इन तरवारमी इन अरेशो मटीब मुर रे प्रोंइयीनी। गन्ती १०:३५
- 14 परमप्रभु यावे, इन गुडमी रागी दाक्ब मुर आन गुड रे प्रोंइयीनी। मेकोपुकी मबेक्मा सम्म रिम्शो ला ताइनीम। गे मेको आन कोत्रब ब्रोंवशो थोत्रकम प्रिनीनी। मेको आन तौपुकी यो रूथ्री जाइनीमी। मिनु आन लीशो मारेड मारेड आन तौपुकीम ताइनीम।
- 15 गो चहिं ठीक पा बाक्शा, थमा पा इन कुल ताडनुड। सुनी सेंसीशा, इन कली तशा, रूशो खोदेशो दुम्शा, ग्येरसीनुड" देती।

## 18

परमप्रभु कली ठेयब सेल्लो

कुम्सो पपाडक्ब कली परमप्रभु यावे आ गेय पाडब दाऊद आ कुम्सो। परमप्रभु यावेमी दाऊद कली आ जोरी सत्रु नु सावल आ गुड रे प्रोना नोले दाऊद आ पशो कुम्सो।

२सामुएल २२:- 1 परमप्रभु यावे, गे आं सक्ति बाक्नीनी। गो इन कली दाक्नुड।

परमप्रभु यावे आं सेरथे फुल्लु, आं बोल्यो दरवार नु आं जोरी सत्रु रे प्रोंइब बाक्ब। आं परमप्रभु, गे आं खुडक्तीके सेरथे फुल्लु बाक्नीनी। परमप्रभु आं तेक्तीके नु आं कली ग्येरपाडक्ब, आं कली प्रोंइब नु आ बोल्यो दरवार बाक्ब। ब्यवस्था ३२:१८

3 गो परमप्रभु यावे नु लोत्र पाडनुड। मेको ठेयब सेल्ल्या पुंडसीब बाक्ब। मेकोम आं कली आं जोरी सत्रु रे प्रोंइब।

4 गो साडक्चा पुंडसीचशो दुम्शा, हेरा बेक्ती। आं कली साडक्ब ब्वाक्कु आ छाल खोदेशो पा जाक्शा, हिंपाडक्ती। भजन संग्रह ११६:३

5 थमा पा साडक्चा पुंडसीब दुम्ती। साडक्बमी आं कली ब्वारदम खोदेशो पा रुक्ताकयी।

6 गो श्येत जडानु, परमप्रभु यावे कली “वारच पने” दे आं परमप्रभु कली ठेयब सेंदा पा पुंडता। मिनु परमप्रभु आ बाक्तीकेम बाक्शा, आं सेंदा नेंतु। आं पुंडशो लोत्र रूप्तु।

7 रागी हिम्शा, खिनु कुत। मिनु डांडा नेल्ल हिम्साकम। मारदे हिम्साकम देशा हना, परमप्रभु आ गाडक्तीकेम हिम्साकम।

8 आ नें रे कुन कुत। आ शोत्र रे ठेयब मी यूशा, ब्रशो कोइला हुरुर पा बेरतेकम। प्रस्थान १९:१८

9 मिनु परमप्रभु सरीड रे यिता। आ खोइल आगामी क्येर गोस्स के छिडछिड बाक्त। भजन संग्रह १४४:५-७

10 मेको करूब का डोइशशा, फशेम बेरत। भजन संग्रह ९९:१

11 छिडछिडमी खुइशशा, आ एर ओथ नेल्ल ब्वाक्कु कुरशो क्येर गोस्स बाक्तेकम।

12 परमप्रभु आ छेडछेड रे मुप्स, मी ब्रशो कोइला नु चिला खोदेशो पा गोस्स यूतेकम।

13 परमप्रभु यावेमी सरीड रे बुंबु पशो खोदेशो पा आ सेंदा नेंपाइशशा बाक्त।

14 मिनु मेकोमी आ ब्रा आबानु, आं जोरी सत्रु ब्रपाइक्तीमी। ठेयब चिला पपाइशशा, प्रोक्पाइक्तीमी।

15 परमप्रभु यावे इन हुइक्तीकेमी नु इन नें रे यूशो सोक्तमी समुन्द्र नु रागी आ जग यूत।

16 परमप्रभुमी इर रे आं गुइ ग्याइशशा, ठेयब ब्वाक्कु रे कीशा गुंडताक्यी।

17 मिनु आं कली मदाक्बपुकी नु आं क्येडा बोल्यो जोरी सत्रु रे प्रोइती।

18 श्येत जडा नाक्त आं जोरी सत्रुम पुम्ताक्यीमी, तन्न परमप्रभु यावेमी वारच पाइक्ती।

19 मिनु आं कली प्रोइशा, रिम्शो ब्रॉइशा बाक्तीकेम चाक्ती। मारदे हना आं कली दाक्शो बाक्त।

20 गो दोदेशो पा ठीक पडा, मोदेशो पा परमप्रभु यावेमी आं कली पाप रे डोन बाक्शो तशा, आं कली रिम्शो पाइक्ती।

21 मिनु गो परमप्रभु यावे आ लां गाक्शा, आ अरेशो टिशा, आं परमप्रभु रे नोले मशोंइसीड।

22 आ पतीके लोत्र नेल्ल आं डोंइती बाक्तेकम। गो मेको आ फुल्लुम मुशा ब्रेक्शो लोत्र का यो मप्रोन।

23 मिनु मेको आ डोंइती गो दोस मताइब बाक्ती। मिनु गो ठीक मपतीके रे डोन बाक्ती।

24 गो दोदेशो पा ठीक पडा, मोदेशो पा परमप्रभु यावेमी आं कली आ डोंइती पाप रे डोन बाक्शो तशा, रिम्शो पाइक्ती।

25 गे जमान खाप्ब आन कली जमान खाप्ब बाक्तीनी। गे ठीक पाइब आन कली इन ठीक पतीके कोंइनीनी।

26 गे पाप रे डोन बाक्ब आन कली इन पाप रे डोन बाक्तीके कोंइनीनी। तन्न गे दूली पाइबपुकी नु काइ मगारनीनी।

27 गे दिप्चा पुंडसीशो मुर आन कली श्येत रे प्रोइनीनी। मिनु ठेयब लेशशो मुर आन कली आइक्च सेलनीनी। अय्युब २२:२९

28 गे आं बली ब्रपाइक्तीनी। परमप्रभु यावे, आं परमप्रभु, गे आं छिडछिड कली छेडछेड सेलनीनी।

29 इन वारच पाइक्तीके गो शुश जोरी सत्रु नु ग्रानुड। इन वारच पाइक्तीके गो ठेयब गारो प्रेक्शा खाक्ने चाप्नुड।

30 परमप्रभु आ लां ठीक बाक्ब। परमप्रभु यावे आ लोत्र क्येख सुन खोदेशो बाक्ब। सु सु मेको कली जिम्मा गेंसीनीमी, मेको आन कली तेक्तीक बाक्ब।

31 परमप्रभु यावे क्येडा अर्को सु परमप्रभु बाक्बा डा? आइ परमप्रभु क्येडा अर्को तेको सेरथे फुल्लु बाक्बा डा?

32 परमप्रभुमी आं कली शुश सक्ति पाइशशा सेलती। मेकोमी आं लां ठीक सेल्ब।

33 मेकोमी आं खोइली किरश आ खोइली खोदेशो सेल्शा, लाइशशा इर डा बाक्तीकेमी राप्पाइक्ती।

34 मेकोमी आं कली लडाइ पचा नु आं गुइ कली कांसा के लिब्रा खुक्चा शेंब।

35 गे ब्रॉइतीके डा इन तेक्तीक आं कली गेतीनी। इन ग्युरा गुइमी आं कली वारच पाइशशा, ठेयब सेलतीनी।

36 आं लां ठेयब सेलतीनी। मोपतीके आं खोइली मग्रेक्थु, गाक्ने चाप्नुड।

37 गो आं जोरी सत्रु आन कली खेदा पा थित्तामी। मेको आन कली साइक्ने मथुमु सम्म गो मलेडड।

38 गो मेको आन कली बोक्ने मचाप्चा डा पा तुप्तामी। मेकोपुकी आं खोइलीम गोल्तेकम।

39 मारदे हना गे आं कली लडाइ पचा कली शुश सक्ति गेतीनी। आं जोरी सत्रु आन कली आं खोइलीम बाप्पाइक्तीनी।

40 गे आं जोरी सत्रु आन कली प्रोक्पाइक्तीनी। मिनु गो आं कली काइ मदाक्ब आन कली साइक्तामी।

41 मेकोपुकीमी “वारच पाइक्की” दे ग्रीमानु, मेको आन कली प्रोइब सुइ मबा। परमप्रभु यावे कली पुंडतेकम हना यो, मेकोमी मेको आन कली लोत्र मलेत्त। हितोपदेस १:२८

42 मिनु गो मेको आन कली फशेम बेरपाइशशा फुरक खोदेशो पा फस सेलतामी। गो मेको आन कली लां डा ग्रांया खोदेशो पा ताइक्ताक्डमी।

43 गे मुर आन साइक्तीक रे आं कली प्रोइतीनी। रागी रागी कली सासन पाइब सेलतीनी। आं मतुइशशा जात डा मुरपुकी आं गेय पाइब दुम्तेकम।

44 आं अरेशो नेन्मेनु, मेकोपुकीम टिम्तेकम। अर्को रागी डा मुरपुकी आं डोंइती बाप्तेकम।

45 अर्को रागी डा मुरपुकी खिंखि पा हिंशा आन बोल्यो दरवार रे यूतेकम।

46 परमप्रभु यावे ब्रॉइशा बाक्ब आं सेरथे फुल्लु ठेयब दुम्ल। आं कली प्रोइब परमप्रभु मान ताइब बाक्ल।

47 परमप्रभुमी आं कली क्येक्क लेत्तीक सक्ति गेशा, जात जात डा मुर आन कली आं सासनम बाक्ब सेल्लु।

48 मेकोमी आं जोरी सत्रु रे प्रोइती। मेको आन क्येडा आं कली ठेयब सेलती। मिनु आं कली दिप्चा हुश खाक्श पोक्ब आन क्येडा प्रोइती।

49 मोपतीके परमप्रभु यावे, रागी रागी डा मुर आन दातेमी गो इन नें ठेयब सेल्शा, इन कली कुम्सो पाइनुड। रोमी १५:९

50 परमप्रभुमी आ पिप कली शुश ग्राब सेल्लु। आ तेल लुक्शो पिप दाऊद नु आ चच युइ आन कली गेना हना यो दाक्ब। २सामुएल ७:१२-१६



## 19

परमप्रभु आ सेल्शो नेल्ल रिम्शो बाक्ब  
कुम्सो पपाइक्ब कली दाऊद आ कुम्सो।

- 1 सरीडमी परमप्रभु आ छेडछेड आ पर्वम लोत्र पाइब। सरीड आ ठेयब दुम्तीकेमी परमप्रभु आ गेय आ पर्वम लोत्र पाइब। रोमी १:१९-२०
- 2 नाक्त कामी अर्को नाक्त कली शेंब। नाक्टो कामी अर्को नाक्टो कली देब।
- 3 मारेड लोत्र मबाक्ब। ब्वाक्शो यो मनैसीब।
- 4 मो हना यो रागी नेल्लेम तुडक्नीम। मेकोमी सरीडम नां कली बाक्तीक सेल्लु। रोमी १०:१८
- 5 मेको नां ग्युबे पचा चिक्शो ग्युम्ले खोदेशो बाक्ब। मेको ग्येरसीशा आ लां गाक्ब।
- 6 मेको पूर्व रे दाप्शा, तेड तेड हिरसीब। मेको आ नाप्शो रे मारेड खुड्रशा लीने मचाप्नीम।
- 7 परमप्रभु यावे आ अरेशो लोत्र नेल्ल आन कली गारब। मेकोमी लेशा ब्रोंडपाइक्ब। परमप्रभु यावे आ देंतीके थमा लोत्र बाक्ब। मेकोमी मतुडक्ब आन कली तुडक्ब सेल्ल।
- 8 परमप्रभु यावे आ ब्रेक्शा अरेशो लोत्र ठीक बाक्शा, मुर आन थुं ग्येरपाइक्ब। परमप्रभु यावे आ शेंशोमी मुर मिक्च ताइब दुम्नीम।
- 9 परमप्रभु यावे कली मान पा हिंचा रिम्शो दुम्शा, गेना हना यो लीब। परमप्रभु यावे आ निसाफ पतीक लोत्र थमा नु गेना हना यो ठीक बाक्नीम।
- 10 मेको सुन क्येडा यो शुश माल्चा डा, क्येख सुन क्येडा यो क्येट लाइब खोदेशो बाक्ब। मेको चाका रे याप्शो खुदो क्येडा यो जिज बाक्ब।
- 11 मेकोमी इन गेय पाइब कली होस पा बाक्पाइक्ब। मेको लोत्र टीबपुकीम ठेयब इनाम ताइनीम।
- 12 आ मतुडक्थु दूली पशो, सुम तुडक्बा डा? आं मतुडक्थु मरिम्शो पशो माफ गेयीनी। अय्युब ४२:३-६
- 13 इन गेय पाइब कली ठेयब लेशो दुम्तीक रे तेक्कीन। ठेयब लेशो दुम्तीकेमी आं कली हुकुम मपवल। मोपा गो दोस नु हेंथे पतीक रे ब्रोंडनुड।
- 14 परमप्रभु यावे, आं सेरथे फुल्लु नु आं कली श्येत रे प्रोंडब, आं पशो लोत्र नु आं मिम्शो ब्रने।

## 20

ग्राचा कली पुंडशो लोत्र  
कुम्सो पपाइक्ब कली दाऊद आ कुम्सो।

- 1 गे श्येत जनीनु, परमप्रभु यावेमी इन लोत्र लेत्तल। याक्ब आ परमप्रभु आ नें आ पर्वम इन जोरी सत्रुम थिन्ने मचाप्मेक्ल। हितोपदेस १८:१०
- 2 मेकोमी आ बाक्तीक रे इन कली वारच पाइब सोइक्तल। सियोन रे इन कली वारच पवल।
- 3 मेकोमी इन चढेशो नु चोशा चढेशो नेल्ल मिम्शा ब्रवल। ठेयब सेंदा पा।
- 4 मेकोमी इन दाक्शो नेल्ल गेवल। इन मिम्शो नेल्ल खबल। भजन संग्रह २१:३
- 5 गो इन प्राशो तशा, ग्येरशा ग्रीशा आंइ परमप्रभु आ नेमी छेदर पोक्नीकी। परमप्रभु यावेमी इन पुंडशो नेल्ल गेवल।
- 6 परमप्रभु यावेमी आ तेल लुक्शो पिप कली प्रोंडब, दे मुल तुडक्ताक्ड। आ स्वर्ग डा बाक्तीकेमी यो इन लोत्र नेंशा, आ सक्ति पाइरशो ग्युरा गुडमी वारच पाइब। प्रस्थान १५:६
- 7 कोड मुरपुकीमी शारा, बग्गी तशा, ग्रानीकी, दे मिन्नीम। तन्न गोपुकी परमप्रभु यावे, आंइ परमप्रभु आ नें मिम्शा, ग्रानीकी। भजन संग्रह ३३:१७; ब्यवस्था २०:१; यसेया ३१:१
- 8 मेकोपुकी गोलनीम। तन्न गोपुकी राप्स डा राप्स बाक्नीकी।
- 9 परमप्रभु यावे, आंइ पिप कली ग्रापतीन। गो पुंडकानु, आंइ लोत्र लेत्तीन।

## 21

परमप्रभुम पिप कली वारच पशो  
कुम्सो पपाइक्ब कली दाऊद आ कुम्सो।

- 1 परमप्रभु यावे, इन सक्ति तशा, पिप ग्येरसाक्ब। इन प्रोंडतीकेमी मेको शुश ग्येरसाक्ब।
- 2 गे आ थुं डा दाक्शो गेतीनी। आ पुंडशो “मगेनुड” मदेनी। ठेयब सेंदा पा। भजन संग्रह २०:५; भजन संग्रह ३७:४
- 3 गे मेको कली आसीक गेशा, रिम्शो पाइक्तीनी। मिनु आ पियाम क्येख सुन के सिरपेच गुप्ताक्नी।
- 4 मेकोमी “ब्रोंडचा गेयी” दे इन कली पुंडतु। मिनु गे मेको कली गेना हना यो ब्रोंडशा, बाक्चा गेतीनी। भजन संग्रह ६१:७
- 5 इन प्रोंडतीकेमी आ दारस ठेयब दुम्त। शोंप नु मान ततीके मेको तारी वोइक्तीनी।
- 6 गे मेको कली गेना हना यो आसीक राइब सेल्शा, इन डोंडती ग्येरपाइक्तीनी।
- 7 मारदे हना पिपमी परमप्रभु यावे कली थमा सुड्रशा, नेल्ल क्येडा ठेयब आ गेना हना यो दाक्तीकेमी पोक्च थेक्शा बाक्ब।
- 8 गे इन गुडमी इन जोरी सत्रु नेल्ल आन कली माल्शा ग्याइक्नीनी। इन कली काइ मदाक्ब आन कली इन ग्युरा गुडमी साइक्नीनी।

- 9 इन जाकची ना मेको आन कली ठेयब चुप्लुम हुम्शो खोदेशो पा हुम्नीनी। परमप्रभु यावे, गे चुरशा, मेको आन कली दाकशो खोदेशो पा मीम दाकपाइक्नीनी।
- 10 मेको आन चच युड आन कली रागी रे क्याम्नीनी। आन आल आन कली मुर आन दाते रे क्याम्नीनी।
- 11 मेकोपुकीमी इन कली मरिम्शो पचा, दे मिम्शो बाक्तेकम हना यो, आन मिम्शो पने मचाप्नीम। यसैया ८:१०
- 12 गे मेको आन कली प्रोक्पाइशशा, आन कुलम खपाइक्चा कली लिब्रा कीनीनी।
- 13 परमप्रभु यावे, इन सक्तिम बोक्नीनी। गोपुकीमी कुम्सो पशा, इन सक्ति ठेयब बाक्ब, दे इन कली ठेयब सेल्नीकी।

## 22

श्येत जाप्लु हना यो, छेडछेड ताइब

- कुम्सो पपाइक्ब कली सुनी डा किरशा आ लायो डा दाऊद आ कुम्सो। यसैया ५३:-; मती २७:३५-४६
- 1 आं परमप्रभु, आं परमप्रभु, गे मारदे आं कली प्रॉइयीनी? मारदे गे आं कली वारच मपथु, डोन बाक्नीनी। मारदे आं थोशो मनेनीनी। मती २७:४६
- 2 आं परमप्रभु, गो इन कली नाक्त ब्रेडडानु, गे लोत्र मलेल्तीनी। गो नाक्दो ब्रेडडानु यो, आं थुं नाइक्चा मतड।
- 3 मिनु इस्राएलीपुकीमी इन कली ठेयब सेल्तीक कुम्सो पामेनु, गे का ला मेको आन तार बाक्नीनी।
- 4 आंइ किक्की पिपीम इन कली थमा सुइक्ना सुइक्न बाक्शो बाक्मा बाक्त। गे मेको आन कली आन जोरी सत्रु रे प्रॉइशो बाक्तीनी।
- 5 इन कली पुंइशा ब्रेशशा, ब्रॉइचा तशो बाक्तेकम। इन कली जिम्मा गेंसीशा, थमा सुइशशा, मुने मदोक्म। भजन संग्रह २५:२-३
- 6 गो चहिं मुर मदुथु, लुस्पु खोदेशो दुम्ती। मुरपुकीमी आं कली शुक्शी पा ग्रॉग्रा दिल्तीम। अय्युब २५:६; यसैया ४१:१४
- 7 आं कली ताइब नेल्लेमी आं पबंम रिशशा, ठेयब लेशशो लोत्र पशा, आन पिया हिम्नीम। अय्युब १६:१०
- 8 मिनु मेकोपुकीमी “परमप्रभु यावे कली थमा सुइक्ब, परमप्रभु यावेमी इन कली श्येत रे प्रोनल। मारदे हना परमप्रभुमी इन कली दाक्ब” दे शुक्शी पाइनीम। मती २७:४३
- 9 गो मोदेंब दुम्ती हना यो, गे आं कली जरमेपपाइक्तीनी। गो आं ममा आ दूध तूडु रे आं कली कोव्रतीनी।
- 10 डोंइती रे गो इन के दुम्ती। आं ममामी थियी रे गे आं परमप्रभु बाक्नीनी।
- 11 गे आं रे डोन मबाक्कीन। मारदे हना गो श्येत जचा चिक्शो बाक्नुड। वारच पाइब सुइ मबाक्नीम।
- 12 ठेयब सांढेपुकीमी पुस्ताक्यीमी। बाशान रागी डा हिंचा डा सांढेपुकीमी यो पुस्ताक्यीमी।
- 13 शोत्रलु बेक्शा ग्रीशो गुप्स खोदेशो पा आन शोत्र पाक्शा, ग्राम्चा चिक्ताक्यीमी।
- 14 गो लुक्शो ब्वाक्कु खोदेशो दुम्ती। आं रुश नेल्ल गलाक गुलुक दुम्तेकम। आं लुडगीर मयीन खोदेशो दुम्शा, यशो बाक्ब।
- 15 आं सक्ति ग्युन्त। ब्रोल्लो खप के गर खोदेशो दुम्त। आं शोत्र सोव्रत। मिनु गे आं कली साइक्चा ठीक पाइतीनी। यूहन्ना १९:२८
- 16 कुचुमपुकीमी आं कली पुस्ताक्यीमी। काइ मरिम्शो पाइब आन हुल आं एर ओंथ बाक्नीम। आं गुड खोइली खिल्ताक्यीमी। यूहन्ना २०:२५, २७
- 17 गो आं रुश का का पा हिक्ने चाप्लुड। मेकोपुकीमी आं कली शुक्शी पा कोव्रस डा कोव्रस बाक्नीम।
- 18 आं वासी योक्सीशा, आं फेक्शो वा आ पबंम “सुम ताइबा” दे फेन्टे ग्यारनीम। यूहन्ना १९:२४
- 19 परमप्रभु यावे, गे आं क्येडा डोन मबाक्कीन। गे आं कली सक्ति गेब बाक्नीनी। गे रीब पा आं कली वारच पाइय्यीनी।
- 20 आं कली तरवार नु कुचुम रे प्रॉइयीनी।
- 21 गुप्स आ शोत्र नु ब्वाकी डा सांढे आन प्रोत्र रे प्रॉइयीनी। दानीएल ६:२३
- 22 गो “इन नें ठेयब बाक्ब” दे आं लोक्ब आन कली शेंनुडमी। मिनु थमा सुइक्ब आन गुम्तीकेमी इन नें ठेयब सेल्लुड। भजन संग्रह २६:१२; हिब्रू २:१२
- 23 गे परमप्रभु यावे कली मान पा हिंबपुकीमी, मेको कली ठेयब सेलीन। याकूब आ चच युड, मेको कली “गे नेल्ल क्येडा ठेयब बाक्नीनी” देनीन। इस्राएल आ चच युड नेल्ल मेको कली मान पा हिनीन।
- 24 मारदे हना मेकोमी श्येत जाइब आन श्येत तशा, आ कुल मखुडक्थु, आं ब्रेशो नेंतु। हिब्रू १५:७
- 25 ठेयब गुम्तीकेमी आं इन कली ठेयब सेल्तीक कुम्सो इन लां रे जाक्ब। आं कसम जशो इन कली मान पा हिंब आन डोंइती खाप्लुड।
- 26 पुडग मुरपुकी जशा रूनीम। मिनु परमप्रभु यावे कली माल्बपुकीमी “परमप्रभु यावे ठेयब बाक्ब” देंनीम। गेपुकी गेना हना यो ब्रॉइशा बाक्चा ताइनीनी। भजन संग्रह ६९:३३
- 27 रागी रागी डा मुरपुकीमी आं कली मिम्शा, परमप्रभु यावे गे लाइनीम। मिनु रागी डा खिं खिं डा मुरपुकी परमप्रभु आ डोंइती बाप्नीम।
- 28 मारदे हना मेको राज्य परमप्रभु यावे केन बाक्ब। मिनु मेकोमी रागी रागी डा मुर आन कली सासन पाइब।
- 29 रागी रागी डा जाइब तूब, शुश क्येट थीबपुकी परमप्रभु आ डोंइती बाप्नीम। मिनु बेक्शा, फुरक दुम्ब नेल्ले मेको आ डोंइती बाप्नीम।
- 30 मिनु मेको आन चच युडपुकीमी मेको कली सेवा पाइनीम। मिनु आन नोले डा पाला डा मुर परमप्रभु यावे आ पबंम शेंचा पुडसीनीम।

31 मेकोपुकीम नोले जरमेशो मुर आन कली परमप्रभु आ ठीक पतीके आ पर्वम शेंनीम। मेकोमी प्रोंडतु, दे नेल्ल आन कली तुडक्पाइक्नीम।

## 23

रिम्शो गोठला

दाऊद आ कुम्सो।

- 1 परमप्रभु यावे आं गोठला बाक्ब। आं माल्लो नेल्ल बाक्ब। उत्पत्ती ४८:१५; यसैया ४०:११; यूहन्ना १०:११-३०
- 2 आं कली रिम्शो घांस बाक्तीकेम इप्पाइक्ब। ब्रोव्रशो ब्वाक्कु आ नेक्था चाक्दीप्ब। इजीकीएल ३४:१३-१४; प्रकाश ७:१७
- 3 मेकोमी आं थुं बारपाइक्ब। आं कली आंम आ नें आ पर्वम ठीक लां कोंडब।
- 4 मिनु गो बेक्चा डा बेसीम गाक्ती हना यो, महिंनुड। मारदे हना गे गो नु बाक्नीनी। इन कोक्के तशा आं थुं नाइश्शा ग्येरनुड। भजन संग्रह ४६:३
- 5 गे आं कली आं जोरी सत्रु आन डोंडती थुल्नीनी। आं पिया तार तेल लुक्नीनी। आं कचौरा क्युप्चा डा पा प्रिताक्नी। भजन संग्रह ३६:९
- 6 थमा पा गो मबेक्डा सम्म परमप्रभु आ रिम्शो पतीके नु आ दाक्तीके गो नु बाक्ब। मिनु गो गेना हना यो परमप्रभु यावे आ खिंम बाक्नुड। भजन संग्रह ८४:५

## 24

परमप्रभु आ बाक्तीक ओव्रशो

दाऊद आ कुम्सो।

- 1 रागी नेल्ल, मेकेर डा मारेड मारेड नु मेकेर डा ब्रोइशा बाक्ब नेल्ल परमप्रभु यावे केन बाक्नीम। यूहन्ना १:११;
- १कोरिन्थी १०:२६
- 2 मारदे हना परमप्रभुमी मेको नेल्ल आन कली ब्वाक्कु तारी सेल्शा, शुश ब्वाक्कु तारी लीमल, दे सेल्शो बाक्त।
- 3 सु परमप्रभु यावे आ डांडा डोइक्चा ताइबा डा? सु आ योव्रशो बाक्तीकेम बाक्ने चाप्बा डा? भजन संग्रह १५:-
- 4 आन गुडमी काड मरिम्शो मपाइबपुकी, रिम्शो थुं पाइश्शोपुकी, मूर्ति आन डोंडती सेड मपाइबपुकी नु जोल पा कसम मजाइबपुकी ला मेकेर डोइक्ने चाप्नीम।
- 5 मेकोपुकीमी परमप्रभु यावे आ आसीक ताइनीम। मिनु पाप रे प्रोंडब परमप्रभुमी मेको आन कली आ ठीक पतीके गेब। यसैया ४८:१८
- 6 मोदेशो मुरपुकी परमप्रभु कली माल्ब बाक्नीम। मिनु “याकूब आ परमप्रभु, इन कुल तचा दाक्नीक” देनीम। ठेयब सेंदा पा।
- 7 मिनु “गे ठेयब लाप्चोपुकी इन पिया पोक्कीन। माइत लाप्चोपुकी रोक्सीन। मिनु मेकेर रे छेडछेड डा पिप ओव्रल। रसामुएल ६:१-१९; यसैया ४०:३-४
- 8 मेको छेडछेड डा पिप सु बाक्मे? मेको मारेड मारेड पने चाप्ब ठेयब सक्ति पाइश्शो परमप्रभु यावे बाक्ब। परमप्रभु यावे लडाइम ग्राब बाक्ब।
- 9 गे ठेयब लाप्चोपुकी इन पिया पोक्कीन। माइत लाप्चोपुकी रोक्सीन। मिनु मेकेर रे छेडछेड डा पिप ओव्रल।
- 10 मेको छेडछेड डा पिप सु बाक्मे? मेको मुर नेल्ल आन परमप्रभु यावे बाक्ब। मेको छेडछेड डा पिप बाक्ब”। ठेयब सेंदा पा।

## 25

परमप्रभुमी माफ गेशा, लां कोंडब

दाऊद आ कुम्सो।

- 1 परमप्रभु यावे, गो आं थुंमी इन नेक्था दुम्नुड।
- 2 आं परमप्रभु, गो इन कली मिम्शा, महिंथु बाक्शो बाक्नुड। गो मुने मदोक्डल। आं जोरी सत्रु आं क्येडा मग्रामल।
- 3 इन लां कोव्रब नेल्ल मुने मदोक्मल। मोशान श्येत गेबपुकी चहिं मुने दोक्मल।
- 4 परमप्रभु यावे, आं कली इन लां कोंडदीनी। इन गाक्तीक लां शेंदीनी।
- 5 इन थमा पतीकेम आं कली गाक्चा, शेंदीनी। मारदे हना गे आं कली श्येत रे प्रोंडब परमप्रभु बाक्नीनी। गो नाक्तर रे इन लां कोव्रशा, बाक्नुड।
- 6 परमप्रभु यावे, इन शिशी नु गेना हना यो दाक्तीके कली मिम्तीन। मारदे हना मेको साड डोंडती रेन बाक्त।
- 7 गो टिटा बाक्डा ना आं पशो पाप नु आं मरिम्शो पशो प्रेदीन। परमप्रभु यावे, इन गेना हना यो दाक्तीके नु रिम्शो पतीकेम आं कली मिम्तीन।
- 8 परमप्रभु यावे रिम्शो नु रिम्शो थुं पाइश्शो बाक्ब। मोपतीके मेकोमी पाप पाइब आन कली आ लां आ पर्वम शेंब।
- 9 ब्रेम्शो आन कली ठीक लां कोंडशा, आ लां शेंब।
- 10 परमप्रभु यावे आ कबल नु आ देशो टीब नेल्ल परमप्रभु आ गेना हना यो दाक्तीके नु आ दाक्शा मप्रोंडतीकेमी ब्रीशो बाक्नीम।
- 11 परमप्रभु यावे, आं पाप ठेयब बाक्त हना यो, इन नें आ पर्वम आं ठीक मपशो माफ गेयीनी। प्रस्थान ३४:६-७

- 12 सु सुमी परमप्रभु यावे कली मान पा हिंनिमी, मेको आन कली तेको लां लचा माल्नीमी, मेको शेंब।  
 13 मिनु मेको आन माल्शो नेल्ल तशा, आन थुं नाडक्नीम। मेको आन आलपुकीम मेको रागी ताडनीम। भजन संग्रह ३७:९  
 14 परमप्रभु यावे आ कली मान पा हिंब आन वारच बाक्ब। मिनु मेको आन कली आ कबल शेंब।  
 15 गो गेना हना यो परमप्रभु यावे गे ला कोव्रनुड। मारदे हना मेकोमी आं खोडली ब्वारद रे प्रॉडब।  
 16 गे आं गे हिरसीने। मिनु आं कली शिशो पाइय्यीनी। मारदे हना गो आं का दुम्शा, श्येत जशो बाक्नुड।  
 17 आं थुं डा श्येत बारशो बाक्नीम। मेको श्येत रे प्रॉडय्यीनी।  
 18 आं श्येत जशो नु आ थुं खाइशो कोव्रडीन। मिनु आं पशो पाप नेल्ल क्याम्दीने।  
 19 आं जोरी सत्रु आन कली कोव्रडीन, मारदे हना मेको शुश बाक्नीम। मिनु मेकोपुकीमी आं कली काइ मदाक्नीम।  
 भजन संग्रह ३५:१९  
 20 आं कली खाल पा प्रॉडय्यीनी। गो मुने मदोक्डल। मारदे हना इन कली जिम्मा गेसाक्वी।  
 21 रिम्शो पतीके नु रिम्शो थुं बाक्तीकेमी आं कली खाल पर्यील। मारदे हना गो इन लां कोव्रशो बाक्नुड।  
 22 परमप्रभु, इस्राएल कली आ श्येत नेल्ल रे प्रोनीन। भजन संग्रह १३०:८

## 26

परमप्रभु आ डोंइती लोत्र पशो

दाऊद आ कुम्सो।

- 1 परमप्रभु यावे, आं कली निसाफ पने। गो मारेड दोस तचा डा गेय मपड। परमप्रभु यावे, गो इन कली जिम्मा गेंसीशा, महिम्सीथु बाक्ती।  
 2 परमप्रभु यावे, गे आं कली नाक्तीन। आं थुं नु मिम्तीक नाक्शा कोव्रडीन।  
 3 इन गेना हना यो दाक्तीक आं डोंइती बाक्ब। मिनु गो इन कली मप्रॉडथु, गाक्शो बाक्नुड।  
 4 गो दूली पाइब मुरपुकी नु मबाक्ड। मिनु जोल पाइबपुकी नु गारशा गेय मपड। भजन संग्रह १:३  
 5 मरिम्शो पाइब आन देल्लतीके ग्रांशा दीनुड। मिनु इन अरेशो मटीब नु मबाक्नुड।  
 6 आं गुडमी मारेड मरिम्शो मपड। परमप्रभु यावे, इन कली ठेयब सेल्शा, इन चढेतीके आ एर ओथ हिरशा बाक्नुड।  
 ब्यवस्था २१:६-७; मती २७:२४  
 7 मेना इन नें ठेयब सेल्शा सेल्न कुम्सो पा, इन पशो छक लाक्चा डा गेय नेल्ल ठेयब सेंदाम शेनुड।  
 8 परमप्रभु यावे, इन बाक्तीक खिं नु इन छेडछेड दाक्नुड। भजन संग्रह २२:४; भजन संग्रह १२२:१-२  
 9 आं कली मरिम्शो पाइब नु हुश खाक्श पोक्ब नु मसाइय्यीनी।  
 10 मेकोपुकीम मरिम्शो ला पशा, घूस जाडनीम।  
 11 गो चहिं, मारेड दोस तचा डा गेय मपथु, बाक्शो बाक्नुड। आं कली शिशो पचा मप्रॉडय्यीनी।  
 12 परमप्रभु यावे, गो दिंममी राप्शा, शुश मुर आन गुम्तीकेमी इन कली ठेयब सेल्नुड। भजन संग्रह २२:२३

## 27

परमप्रभु यावे नु थुं का दुम्शो

दाऊद आ कुम्सो।

- 1 परमप्रभु यावे आं छेडछेड नु आं कली श्येत रे प्रॉडब बाक्ब। गो सु नु हिंचा माल्नुडा डा? परमप्रभु यावे आं ब्रोंडतीक सक्ति नु आं खुडक्तीक बाक्ब। आं कली सुम हिंच कोंइने चाप्बा डा? मीका ७:८; भजन संग्रह ५६:५  
 2 मरिम्शो मुरपुकी आं श्ये ब्वचा कली आं नेक्था जाक्मानु, आं कली खेदा पाइब नु आं जोरी सत्रु दाइल पपाइशशा खोल्चा पुंडसाक्म।  
 3 मिनु ठेयब लडाइ पाइब हुलम पुम्ताक्वीमी हना यो, गो महिंनुड। जिचा पोक्तेकम हना यो “परमप्रभुमी आं कली प्रॉडब” दे थमा सुइशशा बाक्नुड। भजन संग्रह ३:७  
 4 गो परमप्रभु यावे नु लोत्र का पुंडनुड। मिनु मेको माल्ना माल्न बाक्नुड। मेको मार बाक्ब देशा हना “गो मबेक्डा सम्म परमप्रभु यावे आ बाक्तीकेमी बाक्शा, परमप्रभु यावे आ रिम्शो पतीके तचा नु आ खिंम मेको कली माल्शा तुइक्चा दाक्नुड। भजन संग्रह २६:८; भजन संग्रह ४२:५; भजन संग्रह ६३:३; भजन संग्रह ८४:४, ५, ११  
 5 मारदे हना श्येत दुम नाक्ती, मेकोमी आं कली आ बाक्तीकेमी खुइशशा वोइक्ब। मिनु आं कली सेरथे फुल्लु तारी वोइक्ब। भजन संग्रह ३१:२१  
 6 मोपा आं एर ओथ बाक्शो जोरी सत्रु आन डोंइती आं पिया पोक्ब। मिनु गो ग्येरशा ठेयब सेंदामी परमप्रभु यावे कली चढेशा, कुम्सो पाइनुड।  
 7 परमप्रभु यावे, गो इन कली ब्रेडडानु, गे आं लोत्र नेशा, शिशो पा आं पुंडशो गेयीनी।  
 8 परमप्रभु यावे, इन लोत्रमी ‘आं कली मालीन’ दे ब्रेक्शो खोदेशो पा, आं थुंमी इन कली माल्नुड। ब्यवस्था ४:२९  
 9 इन कुल आं क्येडा मखुइक्तीन। इन गाइक्तीकेमी इन गेय पाइब, आं कली, मतिल्थीनी। गे आं कली वारच पाइब बाक्नीनी। गो नु बाक्शा, मप्रॉडय्यीनी। गे आं कली श्येत रे प्रॉडब बाक्नीनी।  
 10 आं आम आफोमी आं कली प्रॉइतीसी हना यो, परमप्रभु यावेमी आं कली कोव्रब।

11 परमप्रभु यावे, आं कली इन लां शेंदीनी। मिनु आं जोरी सत्रु आन पबंमी आं कली ठीक लां कोइदीनी। भजन संग्रह ८६:११; भजन संग्रह १३९:२४

12 आं कली खेदा पाइब आन गुइमी मगेयीनी। मारदे हना मेको जोल पा सांकछी बाकशो बाकनीम। मेकोपुकी हुश खाकश पोक्ब बाकनीम।

13 गो ब्रौइशा बाक्ब आन बाक्तीकेमी, परमप्रभु यावे आ रिम्शो पतीके ताइनुड, दे थमा सुइक्नुड” दे लोत्र पाता। यसैया ३८:११

14 गो इ कली “परमप्रभु यावे आ वारच पतीके रिम्दो। बोल्यो दुमो। इ थुं बारपतो। मिनु परमप्रभु यावे आ वारच पतीके रिम्दो” दे कुम्सो पाता।

## 28

शिशी नु वारच पतीके पुंइशो

दाऊद आ कुम्सो।

1 परमप्रभु यावे, गो इन कली लोत्र पाइनुड। गे आं सेरथे फुल्लु बाकनीनी। आं कली लोत्र मलेत्थु, आं क्येडा डोन मलने। मो पाइतीनी हना, गो बेकशो मुर खोदेशो दुम्नुड।

2 आं पुंइशो लोत्र नेनीन। गो इन योत्रशो बाक्तीके रे आं गुड पोक्शा “वारच पाइय्यीनी” दे आं ब्रेशो लोत्र नेनीन।

3 आं कली इन अरेशो मटीब नु मरिम्शो पाइब मुर नु मक्याम्दीन। मेको आन नेक्शा डा मुर नु गारशो लोत्र पाइनीम। तन्न आन थुं मरिम्शो पतीकेमी ब्रीशो बाकनीम। २सामुएल २०:९-१०

4 मेको आन पशो नु थाम्पा मरिम्शो पशो आ पबंम क्येक्क लेत्तीन। दोदेशो पा पामे, मोदेशो पा क्येक्क लेत्तीन।

5 मेकोपुकीमी परमप्रभु यावे आ पशो नु आ गुइमी सेल्लो मारइ ममिन्मीम। परमप्रभुमी मेको आन कली गेनायो मबोक्चा डा पा क्याम्शा, लेशा मसेल्ब। यसैया ५:१२-१३

6 गो परमप्रभु यावे कली ठेयब सेल्नुड। मारदे हना “आं कली वारच पाइय्यीनी” दे आं पुंइशो नेंतु।

7 परमप्रभु यावे आं सक्ति नु आं तेक्तीके बाक्ब। गो मेको कली थमा सुइक्ता। मोपा आं कली वारच पाइक्ती। मोपतीके गो थाम्पा ग्येरसीशो बाक्नुड। गो आं कुम्सोमी मेको कली ठेयब सेल्नुड।

8 परमप्रभु यावे आ मुर आन सक्ति बाक्ब। आ तेल लुकशो पिप कली प्रौंइब बाक्ब।

9 इन मुर आन कली प्रोनीन। इन रागी कली आसीक गेने। मिनु मेको आन कली गेना हना यो गोठला खोदेशो पा योत्रशा, गुप्शा, कुरशा पने।

## 29

परमप्रभु कली ठेयब सेल्लो

दाऊद आ कुम्सो।

1 गो सक्ति पाइशो आन तौपुकी, परमप्रभु यावे कली “गे सक्ति नु छेडछेड पाइशो बाकनीनी” देनीन। भजन संग्रह १०३:२०-२१

2 गो परमप्रभु यावे कली “इन नें नेल्ल आन क्येडा ठेयब बाक्ब” देनीन। गे परमप्रभु यावे आ दाक्तीकेमी ग्येम्सीशा परमप्रभु यावे आ डोंइती बाप्पीन।

3 परमप्रभु यावे आ सेंदा ब्वाक्कु तारी बाक्ब। छेडछेड डा परमप्रभुमी ठेयब ब्वाक्कु तारी बुंबु पपाइक्ब। परमप्रभु यावे ब्वाक्कु तारी बाक्ब।

4 परमप्रभु यावे आ सेंदा सक्ति पाइशो बाक्ब। परमप्रभु यावे आ सेंदा नेल्ल मान ततीक बाक्ब।

5 परमप्रभु यावे आ सेंदामी लेबानोन डा लाइशो रवा आन कली जिक्ब। परमप्रभु यावे आ लोत्रमी लेबानोन डा लाइशो रवा आन कली जिक्ब।

6 मेकोमी लेबानोन डांडा कली बाछा नु हेरमोन डांडा कली ब्वाकी डा ब्यफ खोदेशो पा प्रेक्पाइक्ब। ब्यवस्था ३:८-९

7 परमप्रभु यावे आ सेंदा चिला खोदेशो बाक्ब।

8 परमप्रभु यावे आ सेंदामी गोरशो रागी हिम्पाइक्ब। परमप्रभु यावेमी कादेश माइशो गोरशो रागी हिम्पाइक्ब।

9 परमप्रभु यावे आ सेंदामी ठेयब रवा कली जिक्पाइक्ब। ब्वाकी डा रवा नेल्ल शोल्मो पा खोल्ब। मिनु नेल्लेमी “परमप्रभु ला ठेयब बाक्ब” दे आ बाक्तीकेमी लोत्र पाइनीम।

10 परमप्रभु यावे आ ठेयब नित्तीके ब्वाक्कु तारी बाक्ब। मेको आ ठेयब नित्तीकेम निरशा, गेना हना यो सासन पाइब।

11 परमप्रभु यावेमी आ मुर आन कली सक्ति गेब। परमप्रभु यावेमी आ मुर आन कली आसीक गेशा, थुं नाइक्पाइक्ब।

## 30

बेक्चा रे प्रौंइशो

परमप्रभु यावे आ खिं सेल्ले नुम्मेनु पतीक, दाऊद आ कुम्सो।

1 परमप्रभु यावे, गो इन कली मान पाइनुड। मारदे हना गे आं कली उइ रे ग्येत्थ पोक्तीनी। मिनु आं जोरी सत्रु आन कली आं पबंम ग्येरचा मगेनी।

2 परमप्रभु यावे, आं परमप्रभु, इन कली “वारच पाइय्यीनी” दे ब्रेडडानु, गे आं कली सापाइक्तीनी।

- 3 परमप्रभु यावे, गे आं कली बेक्शो मुर आन बाक्तीक रे गुंडताक्यीनी। बेक्शो मुर आन दातेमी आं कली ब्रोंडतीक सोक्त गेशा, प्रोंडतीनी। भजन संग्रह ११६:३,४, ७-९
- 4 परमप्रभु यावे कली टीबपुकी, मेको कली कुम्सो पने। मिनु आ नें ठेयब सेलीन।
- 5 मारदे हना आ गाडक्तीक डचका ला बाक्ब। तन्न आ शिशी पतीके ब्रोंडशो सम्म लीब। मुर नाक्दो रे डाक्का मालताक्व हना यो, सुनी ग्येरपाइक्का पुंडसीब। यसैया ५४:७-८
- 6 गो थुं नाइशशा बाक्डानु “गो गेनायो महिम्सीनुड” देंती।
- 7 परमप्रभु यावे गेमी शिशी पा आं डांडा बोल्यो सेलतीनी। मिनु नोले इन कुल खुडक्तीनीनु, गो हिंती।
- 8 परमप्रभु यावे, गो इन कली पुंडता। गो इन कली ब्रेलती।
- 9 गो बेक्डानु, इन कली मार रिम्शो दुम्बा डा? फुरकुमी इन कली ठेयब सेल्बा डा? मार, इन दाक्का गेनायो मप्रोंडतीक आ पर्वम शेंबा डा? भजन संग्रह ६:६
- 10 परमप्रभु यावे, आं लोव्र नेनीन। आं कली शिशी पाइय्यीनी। आं कली वारच पाइब दुमीन।
- 11 गो रोंका पाइब मुर, सिल पाइब दुम्ती। आं रोंका पतीक अरन्डी प्रुइशशा, ग्येरतीक किप्शुर खोदेशो पा किप्ताक्यीनी।
- 12 गो सिक्सी पा मबाक्थु, इन पर्वम कुम्सो पाइनुड। परमप्रभु यावे, गेना हना यो बाक्ब आं परमप्रभु, गो इन कली ठेयब सेलनुड।

## 31

परमप्रभु कली जिम्मा गेंसीशो

कुम्सो पपाइक्ब कली दाऊद आ कुम्सो।

- 1 परमप्रभु यावे गो इन कली जिम्मा गेंसीनुड। गो गेनायो मुने मदोक्डल। इन ठीक पतीकेमी आं कली प्रोंडयीनी।
- 2 इन नोफा दाइक्तीने, आं कली रीब पा प्रोंडयीनी। गे आं खुडक्तीक सेरथे फुल्लु नु आं कली प्रोंडब बोल्यो दरवार दुमीन। भजन संग्रह ७१:३
- 3 इन नें आ पर्वम आं कली शेंशा, लां कोंइदीनी। मारदे हना गे आं सेरथे फुल्लु नु आं बोल्यो दरवार बाक्नीनी।
- 4 मेकोपुकीमी आं कली मत्वा डा पा ब्वारद दाइक्ताक्म। आं कली प्रोंडयीनी। मारदे हना गे आं सक्ति बाक्नीनी।
- 5 आं सोक्त इन गुडमी जिम्मा गेनुड। परमप्रभु यावे, गे आं कली श्येत रे प्रोंडतीनी। गे इन मुर आन कली दाक्का मप्रोंडब परमप्रभु बाक्नीनी। लुका २३:४६
- 6 गो शोर गाक्शो मूर्ति आन कली सेउ पाइब आन कली ग्रांग्रा दित्नुडमी। गो परमप्रभु यावे इन कली जिम्मा गेसाक्यी।
- 7 इन गेना हना यो दाक्तीक तशा, ग्येरना ग्येरन बाक्ती। मारदे हना गे आं श्येत तशा, आं थुं लुक्च लशो तुइशशो बाक्नीनी।
- 8 गे आं कली आं जोरी सत्रु आन गुडमी मगेनी। गे आं कली रिम्शो ठेयब बाक्तीकेमी बाक्पाइक्तीनी।
- 9 परमप्रभु यावे, आं कली शिशी पाइय्यीनी। मारदे हना गो श्येत जशो बाक्नुड। आं थुं लुक्च दुम्तीके आं मिक्च ओव्रशो नु आं रॉ सोव्रशो बाक्ब।
- 10 आं थुं ग्येत्य लुक्च लतीके, गो बेक्का चिक्शो बाक्ती। हुकयी पतीकेमी आ ब्रोंडतीक नाक्ती योल्तेक्म। आं ठीक मपशोमी आं बोल नेल्ल ग्युम्शो बाक्ब। मिनु आं रुश नेल्ल मुक्शो बाक्नीम।
- 11 आं जोरी सत्रु आन क्येडा आं नेक्था डा मुरपुकीमी शुश शक्शी पाइक्का पुंडसीब दुम्ती। आं तुइशशो मुर आं कली तशा हिंनीम। आं कली लांम गुम्ब मुरपुकी आं कली तशा हिंशा प्रोक्नीम।
- 12 बेक्शो मुर खोदेशो पा सुइमी आं कली ममिम्नीम। गो ब्रौल्लो गर खोदेशो दुम्ती।
- 13 गो ते लती हना यो हिंतीके ला बाक्ब। मारदे हना शुशेमी आं पर्वम जोल पा लोव्र पशो नेता। मेकोपुकी बुक्का, आं कली साइक्का कली सल्ला पाम्तेक्म। येरमीया २०:३
- 14 तन्न परमप्रभु यावे, इन कली जिम्मा गेंसीशो बाक्नुड। गो “गे आं परमप्रभु बाक्नीनी” देंती।
- 15 आं ब्रोंडतीक नाक्ती इन गुडमीन बाक्ब। आं जोरी सत्रु नु आं कली खेदा पाइबपुकी रे प्रोंडयीनी। भजन संग्रह १३९:१६; उपदेसक ३:१-८
- 16 इन छेडछेड डा कुल इन वाइल तारी वोतीन। इन शिशी पतीकेमी आं कली प्रोंडयीनी। भजन संग्रह ८०:४; गन्ती ६:२५
- 17 परमप्रभु यावे, गो मुने मदोक्डल। मारदे हना गो इन कली “वारच पने” दे पुंडता। इन अरेशो मटीबपुकी मुने दोक्मल। मेकोपुकी बेक्शो मुर आन बाक्तीकेम सिक्सी पा बाक्मल।
- 18 ठेयब लेशशो मुरपुकीम ठीक पाइब आन कली आइक्च सेल्शा, मरिम्शो पाइनीम। जोल पा लोव्र पाइनीम। मेको आन शोव्र खेपतीन।
- 19 गे इन कली मान पा हिंब आन कली गेना हना यो शुश दाक्नीनी। इन कली जिम्मा गेंसीब आन कली दाक्तीके मुर आन डोंडती कोंइनीनी।
- 20 इन मुर आन कली मरिम्शो मुर आन क्येडा प्रोंडचा, दे इन बाक्तीकेमी खुडक्तीनी। गे इन मुर आन कली मरिम्शो लोव्र पाइब आन क्येडा खुडक्तीनी। भजन संग्रह २७:५
- 21 परमप्रभु यावे ठेयब बाक्ब। आं कली बोल्यो सहरम पुम्शो खोदेशो पा आ छक लाक्का डा दाक्तीके कोंइताक्यी।
- 22 डोंडती गो हिंशा “गे आं कली मताइनीनी” देंती हना यो “वारच पाइय्यीनी” दे आं पुंडशो लोव्र नेतीनी।

- 23 परमप्रभु यावे आ मुर नेल्लेमी परमप्रभु कली दाक्तीन। परमप्रभु यावेमी आ कली थमा सुडक्व आन कली कोव्व।  
 ठेयब लेशो आन कली आन क्येक्क लेप्ब।  
 24 परमप्रभु यावे आ लां कोव्वशा रिम्बपुकी, सक्ति पाइश्शा, ठेयब थुं पाइश्शो दुमीन।

## 32

मरिम्शो पशो क्याम्चा पुंडसीशो  
 शेतीक लोव्व डा दाऊद आ कुम्सो।

- 1 सु सु आन हेंथे पशो क्याम्चा पुंडसीशो बाक्मा, मेको ग्येरसीशो मुर बाक्नीम। मारदे हना आन पाप सुम्शो बाक्ब।  
 रोमी ४:६-८  
 2 परमप्रभु यावेमी सु सु आन मरिम्शो पशो ममिम्बा, मेको ग्येरसीशो बाक्नीम। मेको आन थुमी जोल पतीक काड  
 मबाक्ब।  
 3 गो आं मरिम्शो पशो आ पबंम सिक्सी पा बाक्शा, नाक्त रे आं श्येत जशोमी हुकयी पाता। मिनु आं रुश नेल्ल  
 मुक्ताक्मे।  
 4 मारदे हना नाक्दो नाक्ती इन गुडमी चिप्ताक्कीनी। गो नाप्शो नांम किक्शो खोदेशो दुम्ती। ठेयब सेंदा पा। भजन संग्रह  
 ३८:१९; हितोपदेस २८:१३; याकूब ५:१६; यसैया ३८:१७  
 5 मिनु “गो परमप्रभु यावे कली आं पाप शोव्वनुड” देशा, गो आं मरिम्शो पशो इन डोंइती मखुडक्तु। मिनु गे आं मरिम्शो  
 पशो क्याम्ताक्नी। ठेयब सेंदा पा।  
 6 मोपतीके इन कली टीब मुर नेल्लेम श्येत जशा, इन कली लोव्व पाइनीम। मिनु ब्वाक्कु बारशा जाक्त हना यो, मेको  
 आन बाक्तीके मजाक्दीप्ब।  
 7 गे आं खुड्शशा बाक्तीके बाक्नीनी। गे आं कली श्येत रे प्रोंइनीनी। गे आं कली श्येत रे प्रोंइतीक कुम्सो पपाइक्नीनी।  
 ठेयब सेंदा पा।  
 8 मिनु परमप्रभुमी “गे तेको लांम गाक्चा माल्नीनी, मेको इन कली शेंननी। गो इन कली कोव्वशा, लां कोंइननी।  
 9 गे मिम्तीके मपाइश्शो शारा नु खच्चर खोदेशो मदुमीन। मेको आन कली बिप्पाइक्चा कली लगम नु चलेतीके माल्ब।  
 मो मदुम्त हना, मेकोपुकी इन नेक्था मजाक्नीम” देंत।  
 10 इन अरेशो मटीबपुकी शुश श्येत जाइनीम। तन्न परमप्रभु यावे कली थमा सुडक्वपुकी आ गेना हना यो दाक्तीक  
 ताइनीम।  
 11 गे ठीक पाइबपुकी, परमप्रभु यावे कली मिम्शा ग्येरसीने। रिम्शो थुं पाइश्शोपुकी ग्येरशा, कुम्सो पने।

## 33

परमप्रभु कली ठेयब सेल्शो कुम्सो

- 1 ठीक पाइबपुकी परमप्रभु यावे कली मिम्शा ग्येरसीने। रिम्शो थुं पाइश्शोपुकीमी परमप्रभु यावे कली ठेयब सेल्तीक  
 कुम्सो पचा शिरनीम।  
 2 बीना ताप्शा, परमप्रभु यावे कली ठेयब सेलीन। १० ओटा तार पाइश्शो ठेयब ताप्तीक ताप्शा, मेको कली कुम्सो  
 पने।  
 3 मेको कली नक कुम्सो का पने। रिम्शो पा ताप्शा, ग्येरसीने। भजन संग्रह ४०:४; भजन संग्रह ९६:१; भजन संग्रह  
 ९८:३; भजन संग्रह १४४:९; भजन संग्रह १४९:१; यसैया ४२:१०; प्रकाश ५:९  
 4 मारदे हना परमप्रभु यावे आ लोव्व थमा बाक्ब। मिनु मेको आ गेय नेल्ल आ दाक्शा मप्रोंइतीकेमी पाइब।  
 5 मेकोमी ठीक पतीके नु ठीक निसाफ दाक्ब। रागी नेल्ल परमप्रभु यावे आ गेना हना यो दाक्तीकेमी ब्रीशो बाक्ब।  
 6 परमप्रभु यावेमी लोव्व पशा, सरीड सेल्लु। आ मुड्शोमी सोरुल नेल्ल दुम्तेक्म। उत्पत्ती १:६, १४  
 7 मेकोमी समुन्द्र डा ब्वाक्कु कली गारो खोदेशो पा राप्पाइश्शो बाक्त। मिनु मेको कली वोइक्तीकेमी वोइश्शो बाक्त।  
 भजन संग्रह १०४:९  
 8 रागी नु मेकेर बाक्ब मुर नेल्ले परमप्रभु यावे कली मान पा हिंमल।  
 9 मारदे हना परमप्रभुमी लोव्व पा मारेड मारेड दुम्शो बाक्त। मेकोमी अरेवानु, दुम्शो बाक्तेक्म। भजन संग्रह १४८:५  
 10 परमप्रभु यावेमी रागी रागी डा मुर आन मिम्शा पशो खतम सेल्ब। मेकोमी जात जात डा मुर आन मिम्शो गेय शोर  
 गाक्शो सेल्ब।  
 11 परमप्रभु यावे आ मिम्शो गेना हना यो लीब। आ थुंम मिम्शो नेल्ल पाला सम्म लीब।  
 12 तेको रागीम परमप्रभु, आं परमप्रभु यावे बाक्बा, मेको ग्येरसीशो रागी बाक्ब। मारदे हना मेको योव्वसीशो रागी  
 बाक्ब। ब्यवस्था ३३:२९  
 13 परमप्रभु यावेमी स्वर्ग रे कोव्वशा, मुर नेल्ल आन कली ताइब।  
 14 मेकोमी आ बाक्तीके रे रागीम बाक्ब मुर नेल्ल आन कली कोव्वब।  
 15 मेकोमी मुर नेल्ल आन थुं डा मिम्तीके सेल्ब। मुर नेल्ल आन पशो यो कोव्वब। हितोपदेस २१:१  
 16 मिनु सुड पिप लडाइ पाइब आन पतीकेमी ब्रोंइने मचाप्नीम। लडाइ पाइब मुर आन ठेयब बोलम ब्रोंइने मचाप्नीम।  
 १सामुएल १७:-  
 17 मिनु “लडाइम शुश शारा बाक्तीके ब्रोंइनीकी” देंचा जोल बाक्ब। मेको आन ठेयब सक्तिम यो प्रोंइने मचाप्ब। भजन  
 संग्रह २०:८

- 18 परमप्रभु यावेमी आ कली मान पा हिंब नु आ गेना हना यो दाक्तीक कली रिम्ब आन कली कोव्रब।
- 19 मिनु मेको आन कली बेक्चा रे प्रॉइब। मिनु अन्काल दुम्पेनु, ब्रोंइपाइक्ब।
- 20 गोपुकी परमप्रभु यावे आ लां कोव्रशो बाक्नीक। मेको आंड कली वारच पाइब नु तेक्तीके बाक्ब।
- 21 मिनु परमप्रभु आ पर्वम आंड थुं ग्येरब। मारदे हना गोपुकी मेको आ नेमी जिम्मा गेसाक्क।
- 22 परमप्रभु यावे, गो दोपा इन लां कोव्रका, मोपा इन गेना हना यो दाक्तीके गोपुकी नु बाक्ल।

## 34

परमप्रभुमी कोव्रशो

दाऊद आ कुम्सो। दाऊदमी पिप अबीमेलेक क्येडा हिंशा, निप्स ग्यशो दुम्ची ना पशो कुम्सो। अबीमेलेकमी दाऊद कली खेरानु, दाऊद लशो। १सामुएल २१:१४-१६

- 1 गो परमप्रभु यावे कली गेना हना यो ठेयब सेल्नुड। मेको कली ठेयब सेल्तीक लोव्र गेना हना यो आं शोत्रम बाक्ब।
- 2 परमप्रभु यावे कली मिम्तीके आं थुं बारशा, ग्येरब। ब्रेम्शो थुं पाइशोपुकी यो एको नेशा, ग्येरसीनीम।
- 3 गे गो नु परमप्रभु यावे कली ठेयब सेलीन। मिनु गो नेल्ल गारशा, आ नें ठेयब सेल्य।
- 4 मिनु गो परमप्रभु यावे कली मालता। मेकोमी आं लोव्र लेत्ताक्यी। मेकोमी आं कली हिंतीक नु श्येत रे प्रॉइती।
- 5 मेको आ लां कोव्रबपुकी ग्येरशो दुम्नीम। मेकोपुकी मुने मदोक्मल।
- 6 एको श्येत जाइबम पुंडतु। मिनु परमप्रभु यावेमी आ लोव्र नेशा, आ श्येत रे प्रॉइतु।
- 7 परमप्रभु यावे आ स्वर्ग डा गेय पाइबम परमप्रभु कली मान पा हिंब नेल्ल आन एर ओंथ बाक्शा, खाल पाइब। मिनु मेको आन कली आन श्येत रे प्रॉइब। भजन संग्रह ९१:११; उत्पत्ती ३२:२-३; २राजा ६:१७
- 8 परमप्रभु यावे कली कोव्रडीन, मेको रिम्शो बाक्ब। मेको कली जिम्मा गेंसीबपुकी ग्येरसीशो बाक्नीम। १ पत्रुस २:३
- 9 परमप्रभु यावे आ मुरपुकी मेको कली मान पा हिंनीन। मारदे हना मेको कली मान पा हिंबपुकी मारेड मारेडम गाप्शो बाक्नीम।
- 10 शुश क्येट थीब आन तमी तौ जचा ब्वचा मतथु, शोव्रलु बेक्नीम। तन्न परमप्रभु यावे कली मालब मारेड मारेडम गाप्शो बाक्नीम। लूका १:५३
- 11 आलपुकी, एक जाक्कीन। मिनु आं लोव्र नेनीन। गो इन कली परमप्रभु यावे कली मान पा हिंतीके आ पर्वम शेंनन्नी।
- 12 सु सुमी शुश नाक्ती ब्रोंइचा नु रिम्शो तचा दाक्नीमी,
- 13 मेको मरिम्शो लोव्र नु जोल पतीके रे डोन बाक्चा माल्नीम।
- 14 मरिम्शो पतीके रे लेशशा, रिम्शो पने। थुं नाइशशा बाक्तीके मालशा बाक्कीन।
- 15 परमप्रभु यावेमी ठीक पाइब आन गे कोव्रशा, मेको आन पुंडशो नेंब।
- 16 परमप्रभु यावेमी मरिम्शो पाइब आन कली कोव्रना कोव्रन बाक्ब। मिनु मेको आन कली मिम्तीके का यो मवोइक्थु रागी रे क्याम्ब। हितोपदेस १०:७
- 17 ठीक पाइबपुकीमी पुंडनीम। मिनु परमप्रभु यावेमी मेको आन पुंडशो नेशा, आन श्येत नेल्ल रे प्रॉइब।
- 18 परमप्रभु यावे थुं लुकच लशो आन नेक्था बाक्ब। आन थुं बेक्शो आन कली प्रॉइब। भजन संग्रह ५१:१९
- 19 ठीक पाइबपुकी शुश श्येत जाइनीम। तन्न परमप्रभु यावेमी मेको आन कली श्येत नेल्ल रे प्रॉइब। २कोरिन्थी १:५
- 20 मिनु मेकोमी आन रुश नेल्ल कोव्रब। मुरुम का यो मजिक्नीम। यूहन्ना १९:३६; प्रस्थान १२:४६
- 21 मिनु परमप्रभु आ अरेशो मटीब आन मरिम्शो पतीकेमी साइक्चा पुंडसीनीम। ठीक पाइब आन कली मदाक्बपुकी दोस तशा सजाड ताइनीम।
- 22 परमप्रभु यावेमी आ गेय पाइब आन कली श्येत रे प्रॉइब। मेको कली जिम्मा गेंसीबपुकी दोस मतथु, काइ सजाड मताइनीम।

## 35

जोरी सत्रु कली निसाफ पने, देशो

दाऊद आ कुम्सो।

- 1 परमप्रभु यावे, आं कली जिचा तोइब आन कली जिचा तोने। आं कली लडाइ तोइब आन कली लडाइ तोने।
- 2 ठेयब तेक्तीक नु या शेशा, आं कली वारच पथ बोक्कीन।
- 3 इन तूतीक नु तरवार शेशा, आं कली खेदा पाइब आन लां तेक्कीन। मिनु आं थुं कली “गो इ कली प्रॉइब नड” देनीन।
- 4 आं कली साइक्चा मालबपुकी खतम दुम्शा, मुने दोक्मल। आं कली मरिम्शो पाइक्चा, दे मिम्बपुकी नोले लेशशा, मुने दोक्मल।
- 5 मेकोपुकी फशेम योल्शो भूस खोदेशो दुम्मल। मिनु परमप्रभु यावे आ स्वर्ग डा गेय पाइबमी मेको आन कली खेदा पस डा पस पवल।
- 6 मेको आन लां छिडछिड नु ग्रेक्शा थित्तीके दुम्ल। मोपा यो परमप्रभु यावे आ स्वर्ग डा गेय पाइबमी खेदा पवल।
- 7 मारदे हना मेकोपुकीमी मोशान आं कली ब्वारद दाइक्ताक्यीमी। मिनु मोशान आं कली साइक्चा कली बिक्तीक दोम्तेक्म।
- 8 मेको आन मतुइक्थु, हिंचा डा ठेयब श्येत दुम्ल। मिनु मेको आन खुइशशा दाइशो ब्वारदम आंमान रेम्मल। मेको आन दोशो बिक्तीकेमी आंमान बिक्शा, बेक्मल।



- 9 गो चहिं परमप्रभु यावेमी आं कली प्रॉइशो तशा ग्येरसीनुड।
- 10 मिनु गो आं रां नेल्लेमी “परमप्रभु यावे, इन खोदेंशो सु बाक्वा?” दैनुड। गे मचापब नु श्येत जाइब आन कली बोल्यो मुर आ गुड रे प्रॉइनीनी।
- 11 जोल पाइब सांकळीपुकी गूनीम। मिनु आं मतुइशो लोत्र हिल्लो पाइनीम।
- 12 गो मेको आन कली रिम्शो पाता। मेकोपुकीम चहिं मरिम्शो पाइक्तीमी। गो का ला दुम्ती, सुडम आं कली वारच मपाइय्यीमी।
- 13 मेकोपुकी रोड पामेनु, गो अरन्डी फेक्शा, माइजा बाक्शा, सुरतां पाता। गो बाप्शा मेको आन पर्वम परमप्रभु कली पुंडता। अय्युब ३१:२९
- 14 आं वारच नु आं लोक्ब आन पर्वम खोदेंशो पा, मेको आन पर्वम रोंका पाता। आं ममा आ पर्वम खोदेंशो पा आं पिया खुक्शा, रोंका पाता। रोमी १२:१५
- 15 तन्न गो दाइल पांडसीडानु, मेकोपुकी रिश्शा, आं पर्वम शुक्शी पचा कली बुक्तेक्म। आं मतुइशो शुक्शी पाइबपुकी आं कली मरिम्शो पचा कली बुक्तेक्म। मिनु मेकोपुकीम आं कली शुक्शी पस डा पस पतीमी।
- 16 मेकोपुकी नेल्ल क्येडा मरिम्शो दुम्शा, शुक्शी पा, आन खुड शेनीम।
- 17 परमप्रभु, गे गेना सम्म मेको आन कली कोत्रशा बाक्नीनी? परमप्रभु मरिम्शो पाइबपुकी रे आं कली प्रॉइयीनी। आं कली नेल्ल क्येडा बोल्यो मुर रे प्रॉइयीनी?
- 18 मिनु गो शुश मुर आन डोंइती इन कली “गे ठेयब बाक्नीनी” दैनुड। ठेयब हुल आन दातेमी इन कली कुम्सो पा ठेयब सेल्लुड।
- 19 मेकोपुकी मोशान आं जोरी सत्रु दुम्शा, आं पर्वम ग्येरचा मतामेक्ल। मोशान खेदा पाइबपुकी आं पर्वम आन मिक्च रिक्चा मतामेक्ल। भजन संग्रह २५:१९; भजन संग्रह ६९:५
- 20 मारदे हना मेकोपुकी थुं नाइश्शा बाक्तीक आ पर्वम लोत्र मपाइनीम। रागीम थुं नाइश्शा बाक्ब आन कली जोल पा दोस गेचा कली मिन्नीम।
- 21 मेकोपुकीमी ठेयब शोत्र सेल्शा, आं पर्वम “आहा आहा, आंइ मिक्चीम तचा ताइतक” देनीम।
- 22 परमप्रभु यावे, गे एको ताइतीनी। मिनु सिक्सी पा मबाक्कीन। परमप्रभु यावे आं क्येडा डोन मतुमीन।
- 23 बोक्कीने। मिनु आं कली वारच पाइय्यीनी। परमप्रभु, आं परमप्रभु यावे, आं पोन बोक्कीन।
- 24 परमप्रभु यावे, आं परमप्रभु, इन ठीक पतीकेम आं कली निसाफ पने। आं पर्वम मेकोपुकी ग्येरचा मतामेक्ल।
- 25 मेकोपुकीमी आन थुंमी “आहा, आंइ मिम्शो दुम्त” देंचा मतामेक्ल। मेकोपुकीमी “गो मेको कली खतम पोक्तक” देंचा मतामेक्ल।
- 26 गो श्येत जडानु, आं पर्वम रिपब नेल्ले मुने दोक्मल। मिनु मेको “क्येडा ठेयब नकी” दंबपुकी मुने दोक्शा आइक्च सेल्चा पुंडसीमल।
- 27 आं कली दाक्बपुकी आं ठीक पशो तशा, ग्येरसीशा कुम्सो पामेक्ल। मिनु मेकोपुकीमी गेना हना यो “परमप्रभु यावे आ नें ठेयब बाक्ल। मेकोमी आ गेय पाइब कली रिम्शो दुम्शो तचा दाक्ब” दैमल।
- 28 मिनु गो नाक्त रे इन ठीक पतीके नु इन ठेयब दुम्तीके आ पर्वम लोत्र पाइनुड।

## 36

परमप्रभु आ रिम्शो पतीके

कुम्सो पपाइक्ब कली परमप्रभु यावे आ गेय पाइब दाऊद आ कुम्सो।

- 1 परमप्रभु आ अरेशो मटीब आन थुंमी हेंथे पतीक लोत्र बाक्ब। मार लोत्र बाक्ब देंचा हना “मेकोपुकीम परमप्रभु कली मान पा महिनीम” देंचो लोत्र बाक्ब। रोमी ३:१८
- 2 मेकोपुकी ठेयब लेश्शा “आंइ मरिम्शो पशो गेनायो मतुइसीब, गो दोस मताइनय” दे मिन्नीम। रोमी ३:१८
- 3 मेको आन लोत्र मरिम्शो नु जोल ला बाक्ब। मेकोपुकीमी रुपब थुंम मिम्शा, रिम्शो पचा प्रॉइने थुम्शो बाक्नीम।
- 4 मेको आन ब्राख्येम बाक्मानु, आन मरिम्शो पतीक ला मिम्ना मिम्न बाक्नीम। मेको मरिम्शो लां खोइक्नीम। मेकोमी आन थुंमी “मरिम्शो पशो ग्रांरा दिशा मपाइनीकी” दे मदेंनीम। मीका २:१
- 5 परमप्रभु यावे, इन गेना हना यो दाक्तीके सरीड सम्म जाक्दीशो बाक्ब। इन दाक्शा मप्रॉइतीके गोस्स क्येडा इर बाक्ब।
- 6 इन ठीक पतीके ठेयब डांडापुकी खोदेंशो नु इन निसाफ पशो शुश लुक्च लशो समनुद खोदेंशो बाक्ब। गे मुरपुकी, बी ब्यफ, क्यारश भेडा नु जन्तु आन कली कोत्रशा, श्येत रे प्रॉइनीनी।
- 7 परमप्रभु, इन गेना हना यो दाक्तीक थम रिम्शो बाक्ब। मिनु मुरपुकी इन फ्रां आगाम फास्मीनीम।
- 8 मेकोपुकी इन खिं डा जचा तूचामी रूनीम। गे मेको आन कली इन ग्येरतीकेमी ग्येरपाइक्नीनी।
- 9 मारदे हना गे नु ब्रॉइतीके बाक्ब। मिनु गो इन छेडछेडमी हाम्सो ताइनीकी। येरमीया २:१३; यूहन्ना ४:१४
- 10 इन गेना हना यो दाक्तीके इन कली तुइक्ब आन तार मोतीन। इन ठीक पतीके रिम्शो थुं पाइश्शो आन तार मोतीन।
- 11 मिनु ठेयब लेश्शो मुर आन खोइलीम आं कली मदिम्दीमील। इन अरेशो मटीबपुकीमी आं कली मखेरयीमील।
- 12 मरिम्शो पाइबपुकी गोल्शा, खतम दुम्शो बाक्नीम। मेकोपुकी बोक्ने मचाप्चा डा पा गोल्शो बाक्नीम।

## 37

टीब नु मटीब आन पबंम

दाऊद आ कुम्सो।

1 परमप्रभु आ अरेशो मटीब आन कली तशा, गाइश्शा, चुरशा मपने। दूली पाइब आन कली तशा, गेहे मपने। हितोपदेस २४:१९

2 मारदे हना मेकोपुकी घांस खोदेशो पा रीब पा सोत्रनीम। गिग खाइ खोदेशो पा सोल सुल बेक्नीम।

3 परमप्रभु यावे कली जिम्मा गेंसीशा, रिम्शो पने। रागीम रिम्शो दुम्शा बाक्चा ताइनीम।

4 परमप्रभु यावे कली तुइश्शा, ग्येरसीने। मेकोमी इन थुंम पुंइशो गेब। भजन संग्रह २०:५

5 गे परमप्रभु यावे कली जिम्मा गेसीने। मिनु मेकोमी इन पबंम गेय पाइब।

6 मेकोमी इन ठीक दुम्तीके छेइछेइ खोदेशो पा गूपाइक्ब। इन ठीक पतीके नाक्ती खोदेशो दुम्पाइक्ब। मीका ७:९

7 परमप्रभु यावे आ डोंइती सिक्सी पा बाक्शा, मेकोमी पाइब, दे रिम्दीन। आन दला दाक्स पाइब नु मरिम्शो मिम्शा पाइब आन पबंम मचुरीने।

8 गाइक्चा नु चुरचा प्रोनीन। मगाइक्तीन। मारदे हना मो पतीकेमी इन कली मरिम्शो पपाइक्ब।

9 परमप्रभु आ अरेशो मटीब क्याम्चा पुंइसीनीम। तन्न परमप्रभु यावे आ लां कोव्रबपुकी रागीम बाक्चा ताइनीम।

10 इक्का नाक्त नोले परमप्रभु आ अरेशो मटीब मलीनीम। गेपुकीमी मेको आन कली माल्तीनी हना यो, मथिल्तीनी। मेको आन बाक्तीके श्येत्थ बाक्ब।

11 ब्रेशोपुकी रागीम बाक्चा ताइनीम। मारेइ मारेइ तशा ग्येरशा, ठेयब थुं पा बाक्चा ताइनीम। मती ५:५

12 मिनु परमप्रभु आ अरेशो मटीबपुकीमी ठीक पाइब मुर आन पबंम “दोपा श्येत गेचा नमी” दे मिम्शा, आन खुइ शेप्शो बाक्नीम।

13 तन्न परमप्रभु मेको आन कली तशा, रिप्ब। मारदे हना मेको आन नाक्त नुप्शो तुइश्शो बाक्ब। अय्युब १८:२०

14 परमप्रभु आ अरेशो मटीबपुकीमी पुडगु नु श्येत जाइब आन कली साइक्चा कली तरवार शोइक्नीम। आन लिब्रा कीनीम। रिम्शो थुं पाइश्शो मुर आन कली साइक्चा माल्नीम।

15 तन्न मेको आन तरवारमी आंमा आन लुइगीर तूचा पुंइसीनीम। आन लिब्रा जिक्नीम।

16 परमप्रभु आ अरेशो मटीब आन शुश शोंप क्येडा ठीक पाइब आन इक्का खोइ शोंप रिम्शो बाक्ब। हितोपदेस १५:१६

17 मारदे हना परमप्रभु यावे आ अरेशो मटीब आन गुइ जिक्चा पुंइसीनीम। परमप्रभु यावेमी ठीक पाइब आन कली रिम्शो पा बाक्चा गेब।

18 परमप्रभु यावेमी दोस मताइब आन नाक्ती तुइक्ब। मिनु मेको आन शोंप गेना हना यो लीब। उपदेसक ८:१२

19 ठेयब श्येत दुम नाक्ती मेकोपुकी मुने मदोक्नीम। मिनु अन्काल दुम नाक्ती मेकोपुकी जशा रूचा ताइनीम। हितोपदेस १०:३

20 परमप्रभु आ अरेशो मटीबपुकी खतम दुम्नीम। मिनु परमप्रभु यावे आ जोरी सत्रु दिम डा रिम्शो घांस खोदेशो बाक्नीम। मिनु मेकोपुकी सोल सुल बेक्शा, कुन खोदेशो पा जाम्शा लाइनीम।

21 परमप्रभु आ अरेशो मटीबपुकीमी जेर जशा, मथाप्नीम। मिनु ठीक पाइबपुकीमी हाइश्शो दुम्शा गेनीम।

22 परमप्रभु रे आसीक ताइबपुकीमी रागी ताइनीम। परमप्रभु रे सराप ताइबपुकी जाम्शा लाइनीम।

23 परमप्रभु यावेमी आ मुर आन थेक्तीक बोल्यो सेल्ब। मेको आन कली तशा ग्येरब।

24 मेको दाइल पांइसाक्म हना यो, मगोल्नीम। मारदे हना परमप्रभु यावेमी मेको आन गुइ ग्याइश्शा, तिक्ब। हितोपदेस २४:१६

25 गो ठिटा बाक्ती, मुल खाल्पा दुम्ती। तन्न ठीक पाइबपुकी नु आन तमी तौ नु चच युइमी मुल सम्म पुंइशा जशो गेनायो मतडमी।

26 मिनु मेकोपुकीमी नेल्ल नाक्ती हाइश्शो दुम्शा, पुडगु आन कली मार मार गेनीम। मिनु मेको आन आलपुकीमी आसीक ताइनीम।

27 मरिम्शो पतीके रे डोन बाक्कीन। रिम्शो पने। मिनु गे गेना हना यो ब्रोंइचा ताइनीम।

28 मारदे हना परमप्रभु यावेमी ठीक निसाफ दाक्ब। आ कली मप्रोंइब आन कली नेल्ल नाक्त गेना हना यो कोव्रब। ठीक पाइब गेना हना यो रिम्शो बाक्चा ताइनीम। तन्न आ अरेशो मटीब आन तमी तौ नु चच युइ तिल्चा पुंइसीनीम।

29 ठीक पाइबपुकीमी रागी ताइनीम। मिनु गेना हना यो मेकेर बाक्नीम। यसैया ६०:२१

30 ठीक पाइबपुकीमी जोक्तीक तुइक्तीक लोत्र पाइनीम। मिनु मेकोपुकीमी ठीक पतीके शेंनीम।

31 आन परमप्रभु आ अरेशो लोत्र मेको आन थुंमी बाक्ब। मिनु हेंथे मपथु, परमप्रभु आ लांम गाक्नीम।

32 परमप्रभु आ अरेशो मटीबपुकीमी बाप्शा, ठीक पाइब आन कली साइक्चा माल्नीम।

33 तन्न परमप्रभु यावेमी ठीक पाइब आन कली मेको आन गुइम दुम्चा मगेब। ठीक पाइब आन निसाफ दुम्मेनु, दोस मताइब दुम्पाइक्ब।

34 परमप्रभु यावे कली रिम्दीन। मेको आ लांम गाक्कीन। मेकोमी इन कली ठेयब सेल्शा, रागी इन कली गेब। मिनु गे परमप्रभु आ अरेशो मटीब आन कली खतम सेल्चा ताइनीनी।

35 गो परमप्रभु आ अरेशो मटीब लेबानोन डा ठेयब रवा खोदेशो दुम्शो ताता। १सामुएल ३५:२-३८; इजीकीएल ३१:३-१४

- 36 मिनू गो आ बाक्तीक कोव्रता, मेको मुर मबा। गो मेको कली माल्ता, मथिदु।  
 37 दोस मताइब आन कली कोव्रडीन। रिम्शो थुं पाइशशो मुर कली कोव्रडीन। मारदे हना मेकोपुकी थुं नाइशशा बाक्शो बाक्नीम। उत्पती ३९:७-९  
 38 तन्न हेंथे पाइब नेल्ल खतम दुम्नीम। परमप्रभु आ अरेशो लोव्र मटीब नेल्ल खतम दुम्नीम। आन तमी तौ चच युड यो तिल्ला पुंडसीनीम।  
 39 परमप्रभु यावे ठीक पाइब आन कली वारच पाइब बाक्ब। मिनू मेको आन कली श्येत दुम्मेनु, मेको आन फाम्सीतीके दरवार बाक्ब।  
 40 परमप्रभु यावेमी मेको आन कली वारच पा प्रोंइब। मिनू आ अरेशो मटीब आन गुइ रे प्रोंइब। मारदे हना मेकोपुकी परमप्रभु कली जिम्मा गेंसीशो बाक्नीम। लूका १८:७-८

## 38

मरिम्शो पशो क्याम्चा, दे पुंडशो  
 मप्रेंथु मिम्चा कली दाऊद आ कुम्सो।

- 1 परमप्रभु यावे इन गाइक्तीकेमी आं कली महुइक्तीनी। इन चुरतीकेमी आं कली सजाइ मगोयीनी।
- 2 मारदे हना इन ब्राम आं कली देशशो बाक्नीम। मिनू इन गुइमी आं कली चिप्शो बाक्ब। अय्युब ६:४
- 3 इन गाइक्तीकेमी आं रां नेल्ल खाइशशो बाक्ब। आं मरिम्शो पतीकेम आं रुश नेल्ल मुक्शो खोदेशो बाक्नीम।
- 4 आं मरिम्शो पशोमी आं पिया सम्म गुम्शो बाक्ब। मेको आं कुरने मचाप्या डा पा हेल्लो बाक्नीम। बिलाप १:१४;
- 5 आं निप्स काप्शो आ पर्वम आं गार राक्शा, रिना पाइशशो बाक्नीम।
- 6 गो नाक्त रे आं पिया खुक्शा, रोंका पा गुर ब्वेशा गाक्शो बाक्नुड।
- 7 आं ची नेल्ल खाइशशो बाक्ब। आं रां नेल्ल सेस मबाक्ब।
- 8 गो गलाक गुलुक दुम्शा, काइ सक्ति मपाइशशो दुम्शो बाक्ती। आं थुं डा श्येतम शुश हुकयी पाइनुड।
- 9 आं परमप्रभु, गे आं दाक्शो नेल्ल तुइशशो बाक्नीनी। आं हुकयी पतीके यो तुइशशो बाक्नीनी।
- 10 आं लुङ्गीर प्रेक्शा, आं सक्ति जांमत्। आं मिक्च ब्रा ब्रा दुम्शो बाक्ब।
- 11 आं वारच नु आं खिं डा मुर आं श्येत तशा, डोन बाक्नीम। मिनू आं नेक्था डा मुरपुकीमी डोन रे कोव्रनीम। भजन संग्रह ६९:९; भजन संग्रह ८९:९; अय्युब १९:१३-१९
- 12 आं कली साइक्चा माल्बपुकीमी ब्वारद दाइशशा, वोइशशो बाक्नीम। आं कली श्येत दुम्शो कोव्रकोव्र दाक्बपुकीमी “मेको कली दोपा श्येत गेचा, दोपा मेको आ पर्वम जोल पचा” दे नाक्त रे लोव्र पाइनीम।
- 13 गो नोफा मनेब मुर खोदेशो दुम्ती, मनेनुड। ब्वाक्ने मचाप्य मुर खोदेशो दुम्ती, काइ लोव्र मपाइनुड। भजन संग्रह ३९:९३
- 14 गो थमा पा नोफा मनेब खोदेशो दुम्शा, मारेइ लोव्र मलेत्नुड।
- 15 परमप्रभु यावे, गो इन कली रिम्नुड। गे आं लोव्र लेत्नीनी। गे परमप्रभु यावे, आं परमप्रभु बाक्नीनी।
- 16 मिनू गो “मेकोपुकीमी आं पर्वम शुक्शी पा ग्येरचा मतामेक्ल। आं कली ग्रेक्शो तशा, बोरचा मतामेक्ल” देंती।
- 17 मारदे हना गो दाइल पांडसीचा चिक्शो बाक्नुड। गो श्येत जस डा जस बाक्नुड।
- 18 गो आं काइ मरिम्शो पशो शोव्रनुड। आं मरिम्शो पशो मिम्शा सुर्ता पाइनुड। भजन संग्रह ३२:५;
- 19 आं जोरी सत्रु चहिं रिम्शो पा ब्रोंइशा, बोल्यो दुम्शो बाक्नीम। आं कली मोशान मदाक्ब शुश बाक्नीम।
- 20 मुरपुकीमी आं रिम्शो पशो आ पा डा आं कली मरिम्शो पाइनीम। मारदे हना गो रिम्शो पाइब बाक्ती हना यो, आं कली खेदा पाइनीम।
- 21 परमप्रभु यावे, आं परमप्रभु, आं कली मप्रोंइयीनी। आं क्येडा डोन मदुमीन।
- 22 परमप्रभु, आं कली वारच पाइशशा, श्येत रे प्रोंइचा कली रीब पा जाक्कीन।

## 39

मुर आ ब्रोंइतीक इक्का ला बाक्ब  
 कुम्सो पपाइक्ब येदुथून कली। दाऊद आ कुम्सो।

- १इतिहास २५:१,३ १ मिनू गो “गो आं गेय नेल्ल होस पा पाइक्नुड। गो लोव्र पचा यो होस पा पाइक्नुड। मरिम्शो पाइबपुकी आं नेक्था बाक्तेक्म हना, गो सिक्सी पा बाक्नुड” देंती।
- 2 गो मन्वाक्थु, सिक्सी पा बाक्ती। मिनू रिम्शो लोव्र यो मपथु, आं थुं डा श्येत बारत। भजन संग्रह ३८:१४
- 3 आं थुं चोशो बाक्त। शुश मिम्शा, मी ब्रशो खोदेशो दुम्ती।
- 4 “परमप्रभु यावे, आं बेक्तीक नाक्त कोंइदीनी। आं ब्रोंइचा गिश नाक्त लीमे तुइक्पाइय्यीनी। गो रीब पा जाम्शा लाइब मुर बाक्नुड। भजन संग्रह ९०:१२; अय्युब १४:५
- 5 गो आं ब्रोंइतीक नाक्त बिक्ता का निकशी खोदेशो सेल्तीनी। आं ब्रोंइतीक नाक्त इन डोंइती मारेइ ममाइ। मुर नेल्ले आन ब्रोंइतीके जाम्शा लाइब फश खोदेशो बाक्नीम” देंती। भजन संग्रह ९०:५-६ठेयब सेंदा पा।
- 6 मुरपुकी वांकु खोदेशो पा गाक्शो बाक्नीम। मेकोपुकी मोशा सुर्ता पाइनीम। शुश शोप तेलनीम। मेको सुम जाइबा मतुइक्नीम। भजन संग्रह ४९:१७-२१; उपदेसक २:१८-२१; लूका १२:१५-२१
- 7 “परमप्रभु, गो मार कली रिम्मा रिम्म बाक्नुडा? गो इन लां ला कोव्रशा बाक्नुड।

- 8 आं मरिम्शो पशो रे प्रोंइयीनी। मूर्खपुकीम आं कली शुक्शी मपामेक्ल।  
 9 गो सिक्सी पा बाक्शा मब्वाक्ड। मारदे हना गे मो पपाइक्तीनी।  
 10 इन याम पाइश्शो लेत्तीन। गो इन तुप्शोमी जाम्शा लाइब दुम्ती।  
 11 गे मुर आन कली पाप पशो आ पर्वम तुप्तीनी। आ दाक्शो तुम्बुम वा नेक्शो खोदेशो पा जाम्शा लाइब। थमा पा मुर नेल्ले आन ब्रोंइतीक जाम्शा लाइब फश खोदेशो बाक्नीम। ठेयब सेंदा पा।  
 12 परमप्रभु यावे, आं पुंडशो लोत्र नेनीन। आं वाइ ब्रेशो नेनीन। आं डाक्शो तशा, वारच पाइय्वीनी। मारदे हना गो इन डोंइती आं किकी पिप खोदेशो पा, रागी डा पौना खोदेशो बाक्नुड। भजन संग्रह ११९:१९; लेवी २५:२३; १ पत्रुस २:११; हिब्रू ११:१३  
 13 आं बेक्चा डोंइती आं पर्वम गाइक्चा प्रोनीन। मिनु गो लेंशा ग्येरशा बाक्चा तडल” दे पुंडता।

## 40

- “परमप्रभुमी वारच पाप्तु” देशो  
 कुम्सो पपाइक्ब कली दाऊद आ कुम्सो।  
 1 गो परमप्रभु यावे कली रिम्स डा रिम्स बाक्ती। मेकोमी आं गे कोवशा, आं वाइ ब्रेशो, पुंडशो लोत्र नेंतु।  
 2 मेकोमी आं कली ग्रान्रा दिचा डा हिलोम बिक्शा बेक्तीक रे ग्रुंडताक्यी। मिनु आं कली सेरथे फुल्लु का तार राप्पाइक्ती। मिनु महिम्सीचा डा पा नाइक्पाइक्ती।  
 3 मेकोमी आं कली नक कुम्सो का पपाइक्ती। आंइ परमप्रभु कली ठेयब सेल्ल्तीक कुम्सो पपाइक्ती। मिनु शुश मुरुम एको तशा, नेंशा, परमप्रभु यावे कली मान पा हिंशा, मेको कली थमा सुइक्नीम। भजन संग्रह ३३:३  
 4 सु सुमी परमप्रभु यावे कली थमा सुइक्नीमी, मेको ग्येरसीशो मुर बाक्नीमी। मेकोपुकी ठेयब लेश्शो नु जोल डा सक्ति पाइश्शो देवी देवता गे लाइब नु मबाक्नीम।  
 5 मिनु गो “परमप्रभु यावे, आं परमप्रभु, गे आंइ पर्वम पशो छक लाक्चा डा गेय नु इन मिम्शो कोइताक्की। मेको शुश बाक्नीम। इन खोदेशो सुइ मबाक्नीम। गो मेको आन कली शेंशें दाक्ती, देती हना यो, नेल्ल शेंने मचबु। मारदे हना मेको शुश बाक्नीम। भजन संग्रह १३९:१७-१८  
 6 गे मार मार क्योरशा च्छेशो नु जचा च्छेशो तशा मग्येरसीनी। तन्न इन अरेशो लोत्र नेंचा कली नोफा दाइक्ब सेल्ल्तीनी, चोशा च्छेशो नु पाप आ पर्वम च्छेशो मपुंडनी। भजन संग्रह ५०:८-१३; भजन संग्रह ५१:१८; १सामुएल १५:२२; हिब्रू १०:५-१०  
 7 मिनु गो ‘गो एक बाक्ती, दे परमप्रभु यावे आ लोत्रमी आं पर्वम ब्रेक्शो बाक्ब’ देती।  
 8 परमप्रभु, गो इन दाक्शो पशोमी आं कली ग्येरपाइक्ब। इन अरेशो लोत्र आं थुंम बाक्ब।  
 9 गो ठेयब गुम्तीकेमी इन रिम्शो ब्रोंइतीक लोत्र आ पर्वम लोत्र पाइनुड। परमप्रभु यावे, गो सिक्सी पा मबाक्नुड। मेको गे तुइक्नीनी।  
 10 गो इन मुर आन कली श्येत रे प्रोंइतीके आं थुंम खुइश्शा मवोइक्थ, इन दाक्शा मप्रोंइतीके नु मुर आन कली श्येत रे प्रोंइतीके आ पर्वम लोत्र पाता। गो इन गेना हना यो दाक्तीके नु दाक्शा मप्रोंइतीके आ पर्वम मखुइक्थ, ठेयब गुम्तीकेमी शेंताक्डमी।  
 11 परमप्रभु यावे, गे इन शिशी पतीके मतेक्कीन। इन गेना हना यो दाक्तीक नु दाक्शा गेनायो मप्रोंइतीकेम आं कली गेना हना यो खाल पर्यीसील।  
 12 मारदे हना हिक्ने मचाप्चा डा श्येतपुकीमी आं कली पुम्शो बाक्नीम। आं मरिम्शो पतीकेम आं पिया खुक्शो बाक्ती। मेकोपुकी आं पिया डा चां क्येडा यो शुश बाक्नीम। मोपा आं थुं लुक्च लशो बाक्ब।  
 13 परमप्रभु यावे, श्येत रे प्रोंइयीनी। परमप्रभु यावे, आं कली वारच पाइक्चा कली रीब पा जाक्कीन। भजन संग्रह ७०:-  
 14 आं कली साइक्चा माल्ब नेल्ले मुने दोक्शा, ग्येत्थ लुक्च दुम्मल। आं कली श्येत जशो दाक्ब नेल्ल लेश्शा लशा, खतम दुम्मल।  
 15 आं कली शुक्शी पाइबपुकीमी ‘आहा, आहा’ देशो, नेल्ल रे मुने दोक्मल।  
 16 तन्न सु सुमी इन कली माल्नीमी, मेको नेल्ले इन पर्वम शुश ग्येरसमल। आन श्येत रे प्रोंइचा पुंडसीब नेल्लेमी गेना हना यो ‘परमप्रभु यावे ठेयब बाक्ब’ देमल।  
 17 गो पुडग नु श्येत जाइब बाक्ती हना यो, परमप्रभु आं कली मिम्ब। गे आं कली वारच पाइब नु आं कली श्येत रे प्रोंइब बाक्नीनी। आं परमप्रभु देश मपने” दे लोत्र पाता।

## 41

- रोइ पाइबमी परमप्रभु कली पुंडशो  
 कुम्सो पपाइक्ब कली दाऊद आ कुम्सो।  
 1 सु सुमी पुडग मुर आन पर्वम सुर्ता पा, वारच पाइनीमी, मेको आन कली परमप्रभु यावेमी आन श्येत रे प्रोंइब। हितोपदेस १४:२१; मती ५:७  
 2 परमप्रभु यावेमी मेको आन कली कोत्रशा, खाल पा प्रोंइब। मेको रागीम बाक्मानु, ग्येरसमल। गे मेको आन कली आन जोरी सत्रु आन गुडम मगेनीनी।  
 3 मेकोपुकी रोइ पा गोल्शा बाक्मानु, परमप्रभु यावेमी मेको आन रोइ सापाइक्ब।

- 4 गो “परमप्रभु यावे आं कली शिशी पा सापाइय्यीनी। मारदे हना गो इन कली मरिम्शो पाता” देंती।  
 5 आं जोरी सत्रुमी “मेको गेना बेक्वा डा, आ नें क्याम्सीबा?” देंनीम।  
 6 मिनु आं कली सु सुम कोव्रथ जाकनीमी, मेकोमी आं कली रिम्शो लोव्र पखु पाइनीम। मिनु नोले आं पर्वम “मार, मरिम्शो लोव्र पड” दे मिम्शा, मरिम्शो लोव्र ब्रपाइकनीम।  
 7 आं कली ग्रंग्रा दिम्ब नेल्ल गुम्शा, आं पर्वम “मार मरिम्शो पाइक्वा” दे नोफा मुडकुमुडकनीम।  
 8 मेकोपुकीमी “मेको कली बेक्तीक रोडमी ग्याइशशो बाक्व, आ गोल्तीक रे मबोक्व” देंनीम।  
 9 गो आं नेक्था डा वारच, आं शोब्ले जाइबमी यो, आं कली ताइक्वा कली आ खोइल क्युकुतु।  
 10 परमप्रभु यावे, गे आं कली शिशी पाइशशा, पोक्यीनी। मिनु गो मेको आन कली क्येक्क लेन्ने चबुल। भजन संग्रह ५५:१३-१५; यूहन्ना १३:१८; प्रेरित १:१६  
 11 मोदेशो पाइतीनी हना, गे आं कली दाकनीनी, दे तुइकुनुड। मारदे हना आं जोरी सत्रु आं पर्वम ग्येरचा मताइनीम।  
 12 आं रिम्शो थुं आ पर्वम गे आं कली ग्योम्ताक्यीनी। मिनु गे आं कली गेना हना यो इन डोंइती राप्पाइकतीनी।  
 13 परमप्रभु यावे, इस्पाएली आन परमप्रभु कली “गे गेना हना यो ठेयब बाकनीनी। मेको थमा बाक्व” देंमल। आमेन आमेन। भजन संग्रह ७२:१८; भजन संग्रह ८९:५३; भजन संग्रह १०६:४८; भजन संग्रह १५०:६

## 42

ठेयब श्येतम परमप्रभु कली मिम्शो

- कुम्सो पापाइक्व कली शेंतीक कुम्सो। कोराह आ तौ आन कुम्सो। १इतिहास ६:१६,२२; २इतिहास २०:१९  
 1 दोपा रोकेशेमी खोला डा ब्वाक्कु तूत दाक्शा ब्वाक्कु मिम्बा, मोपा आं थुंमी यो परमप्रभु, इन कली मिम्बा।  
 2 मोपा आं थुं ब्रोंइशा बाक्व परमप्रभु आ नेक्था बाक्वा दाक्व। गो गेना परमप्रभु आ डोंइती बाक्वा ताइनुडा? भजन संग्रह ६३:२; भजन संग्रह ८४:३; भजन संग्रह १४३:६  
 3 आं प्रेक्कु नाक्दो नाक्ती आं जचा थोव्रक दुम्शो बाक्व। मारदे हना मुरपुकीमी नाक्त किंत किंत “इ परमप्रभु ते बाक्मे?” दे शुक्शी पा हिल्लो पस डा पस बाकनीम। भजन संग्रह ७९:१०  
 4 मिनु गो मेको नेल्ल मिम्शा, परमप्रभु, इन खिं लाइब शुश मुर आन कली लां कोंइशा, मेकोपुकी नु लना लन बाक्डानु, ग्येरसीशा “गे रिम्शो पाइब बाकनीनी” दे गो नेल्लेमी कुम्सो पा चाड मानेतक। भजन संग्रह २७:४  
 5 आं थुं, गे मारदे लुकच लाइनेवे? मारदे ग्येत्थ लुकच दुम्नेवे? परमप्रभुमी मार पाइबा, मेको रिम्दो। मिनु नोले मेकोमी आं कली श्येत रे प्रोंइशो तशा, गो परमप्रभु कली ठेयब सेल्लुड। मारदे हना मेको आं कली श्येत रे प्रोंइब नु आं परमप्रभु बाक्व।  
 6 आं परमप्रभु, आं थुं, ग्येत्थ लुकच दुम्त। गो यर्दन डा दिंम नु हेरमोन डा मिसार डांडा रे इन कली मिम्नुड।  
 7 मिनु इन बारशो ब्वाक्कु आ ग्रीशोमी अर्को ब्वाक्कु कली ब्रेप्व। मेको इन ब्वाक्कु आ छालमी आं कली सुम्शो बाक्व।  
 8 मिनु गो नाक्ती परमप्रभु यावे आ गेना हना यो दाक्तीके तुइकुनुड। मिनु नाक्दो आ कुम्सो आं थुंमी बाक्व। मेको आं कली ब्रोंइचा गेब परमप्रभु नु लोव्र पतीके बाक्व।  
 9 गो परमप्रभु, आं सेरथे फुल्लु कली “गे मारदे आं कली प्रेंदीनी? गो मारदे आं जोरी सत्रु रे पा खेदा पचा पुंइसीशा, थुं ग्येत्थ लुकच दुम्शा, गाक्वा मालडा?” देंती। ब्यवस्था ३२:४  
 10 आं कली दिम्बपुकीमी आं रुश जिक्शो खोंदेशो पा शुक्शी पाइनीम। मिनु मेकोपुकीमी गेना हना यो “इ परमप्रभु ते बाक्मे” दे शुक्शी पा, हिल्लो पस डा पस बाकनीम।  
 11 आं थुं, गे मारदे लुकच लाइनेवे? मारदे ग्येत्थ लुकच दुम्नेवे? परमप्रभुमी मार पाइबा, मेको रिम्दो। मिनु नोले आं कली श्येत रे प्रोंइशो तशा, गो परमप्रभु कली ठेयब सेल्लुड। मारदे हना मेको आं कली श्येत रे प्रोंइब नु आं परमप्रभु बाक्व।

## 43

“वारच पाइय्यीनी” दे पुंइशो

- 1 परमप्रभु, आं कली वारच पाइय्यीनी। इन कली थमा मसुडक्व मुर आन पर्वम आं पोन बोक्कीन। मिनु जोल पाइब नु मरिम्शो पाइब मुरपुकी रे आं कली प्रोंइयीनी।  
 2 परमप्रभु, गे आं कली प्रोंइब बोल्यो दरवार बाकनीनी। गे आं कली मारदे प्रोंइयीनी? गो मारदे आं जोरी सत्रुम खेदा पचा पुंइसीशा, रोंका पचा मालडा?  
 3 इन छेडछेड नु इन थमा पतीके सोइक्तीन। मिनु मेकोमी आं कली लां कोंइशा इन डांडा नु इन बाक्तीकेमी चाक्यील।  
 4 मेना गो परमप्रभु कली चढेतीकेम जाकुनुड। मिनु परमप्रभुमी आं कली शुश ग्येरपाइशशा, आं थुं नाइक्वाइक्व। परमप्रभु, आं परमप्रभु, गो ठेयब ताप्तीक ताप्शा, कुम्सो पा इन कली ठेयब सेल्लुड।  
 5 आं थुं, गे मारदे लुकच लाइनेवे? मारदे ग्येत्थ लुकच दुम्नेवे? परमप्रभुम मार पाइबा, मेको रिम्दो। मिनु नोले आं कली श्येत रे प्रोंइशो तशा, गो परमप्रभु कली ठेयब सेल्लुड। मारदे हना मेको आं कली श्येत रे प्रोंइब नु आं परमप्रभु बाक्व।

## 44

“लेशा वारच पने” दे पुंडशो

कुम्सो पपाइक्व कली सेल्शो शेंतीक कुम्सो। कोराह आ तौ आन कुम्सो।

1 परमप्रभु, साइ आइ किकी पिपीमी आन पालामी पशो इन गेय नेल्ल आइ कली शेंताक्म। मिनु गो मेको नेल्ल नेंतक। ब्यवस्था ६:२०-२५

2 गे रागी रागी डा मुर आन कली खेरशा, आइ किकी पिपी आन कली बाक्पाइशो बाक्तीनी। गे मेको मुर आन कली क्याम्शा, आइ किकी पिपी आन कली सोशा बोशा ब्रपाइशो बाक्तीनी। मोपा मेको आन कली प्रॉइशो बाक्तीनी।

3 मेको आन तरवारम मेको रागी मग्ग्राशो बाक्तेक्म। आन सत्किमी यो मग्ग्राशो बाक्तेक्म। इन सत्कि नु इन कुल डा छेडछेडमी ग्रातेक्म। मारदे हना गे मेको आन कली दाक्शो बाक्तीनी।

4 गे आं पिप नु आं परमप्रभु बाक्तीनी। याकूब कली ग्रापतीन।

5 इन पतीकेमी आइ जोरी सत्रु आन कली ग्रानीकी। इन नेंमी आइ जोरी सत्रु आन कली दिम्शा साइक्नीकी।

6 गो आं लिब्राम ग्राती, मदेंनुड। मिनु आं तरवारम यो आं कली ग्रापाइक्ने मचाप्ब।

7 तन्न गे आइ कली आइ जोरी सत्रु आन क्येडा ग्रापाइक्तीनी। मिनु आइ कली काइ मदाक्ब आन कली वाम ग्याम सेल्टीनी।

8 गोपुकीमी नाक्त किंत किंत परमप्रभु कली मिम्शा, आइ नें बोरपाइक्नीकी। मिनु गोपुकीमी गेना हना यो “इन नें ठेयब बाक्ब” दे ठेयब सेल्टीनी। ठेयब सेंदा पा।येरमीया ८:२२-२३

9 तन्न गे आइ कली प्रॉइशा, श्येत जपाइक्तीनी। मिनु गे आइ लडाइ पाइब नु मलनी।

10 मिनु गे आइ कली आइ जोरी सत्रु आन क्येडा ब्रुपाइक्तीनी। मिनु आइ कली मदाक्बपुकीमी आइ मार मार रोइशशा लाइक्तेक्म।

11 गे आइ कली क्योरचा पुंडसीब भेडा खोदेशो पा प्रॉइतीनी। मिनु आइ कली रागी रागी ब्रपाइक्तीनी।

12 गे इन मुर आन कली मोशा लेयतीनी। मिनु मेको आन कली लेयशा, मारेइ ताक्चा थुं मपनी।

13 आइ नेक्था डा मुर आन डोंइती आइ कली गाइशशा, शुक्शी पाइक्चा पुंडसीब सेल्टीनी। गे मुर आन कली आइ पर्बम तोक्शो नु मरिम्शो लोत्र पपाइक्तीनी। १कोरिन्थी १५:३१; रोमी ८:३६; भजन संग्रह ७९:४; १राजा ९:७

14 गे आइ कली रागी रागी डा मुर आन दातेम शुक्शी पाइक्चा पुंडसीब सेल्टीनी। मुरपुकीमी आइ कली तशा, आन पिपा हिन्मीम।

15 गो नाक्त किंत किंत मुने दोक्नुड। आं मुनेमी आं कुल सुम्सीशो बाक्नुड।

16 आं कली शुक्शी पाइब, मरिम्शो लोत्र पाइब, जोरी सत्रुमी पतीके नु क्येक्क लेप्ब आन पतीके मोदेशो दुम्शो बाक्नुड।

17 मोदेशो दुम्त हना यो, गो इन कली मप्रेंदक। मिनु इन कबल यो मप्रॉइक।

18 गो नोले मशॉइसक। इन लां रे ग्येत्थ लुकच मपक।

19 तन्न गे आइ कली फस पोक्शा, सिवार आन बाक्तीक खोदेशो पा छिडछिडमी सुम्तीनी।

20 गो आइ परमप्रभु आ नें प्रेशो नकी नु अरु देवी देवता आन कली पूजा पशो नकी हना,

21 मार, परमप्रभुमी मतुइक्वा डा? मारदे हना परमप्रभुमी मुर आन थुं डा खुइशो नेल्ल तुइक्व।

22 मो हना यो गो इन पर्बम नाक्त रे साइक्चा पुंडसीनीकी। मिनु क्योरचा चिक्शो भेडा खोदेशो पा हिक्सीशो बाक्नीकी।

१कोरिन्थी १५:३१; रोमी ८:३६

23 बोक्कीन, परमप्रभु, गे मारदे इप्नीनी? सेंसीने। आइ कली मो पा मप्रोनीने।

24 गे मारदे इन कुल खुइक्नीनी? मिनु आइ श्येत नु आइ कली दिप्शो प्रेंनीनी?

25 आइ थुं लुकच लशो बाक्ब। आइ रां खपीम गोल्शो बाक्ब।

26 बोक्कीन। मिनु आइ कली वारच पने। इन गेना हना यो दाक्तीकेमी आइ कली एको श्येत रे प्रॉइकी।

## 45

पिप आ ग्युंबे कली कुम्सो

कुम्सो पपाइक्व कली लिली फू डा कुम्सो आ लायो। शेंतीक कुम्सो। कोराह आ तौ आन कुम्सो। ग्युंबे डा कुम्सो।

1 आं थुं रिम्शो लोत्रमी ब्रीतीके गो पिप कली कुम्सो पाइक्नुड। आं लें थाम्पा ब्रेक्स जोक्ब मुर आन कलम खोदेशो दुम्शो बाक्ब।

2 गे वॉइश मुर आन दातेमी नेल्ल क्येडा रिम्शो बाक्तीनी। इन लोत्र यो शुश रिम्शो बाक्ब। मारदे हना परमप्रभुमी इन कली गेना हना यो लीब आसीक गेशो बाक्ब।

3 गे बोल्यो मुर, इन किप्शुर् किप्शा इन तरवार पिम्सीन। मिनु इन दारस नु इन मान ततीके कोंइदीन।

4 इन मान ततीकेमी, थमा पतीके, ब्रेम्शो थुं दुम्तीके नु इन ठीक पतीकेमी गाक्शा, इन सत्किमी छक लाक्चा डा गेय कोंइदीन।

5 गे इन हेशो ब्रामी इन जोरी सत्रु आन लुङगीरमी देत्नीम। जात जात डा मुर इन डोंइती साइक्चा पुंडसीनीम।

6 परमप्रभु, इन ठेयब नित्तीके गेना हना यो लीब। इन ठीक पतीके इन राज दन्ड खोदेशो बाक्ब। हिबू १:८-९ हिबू १:८,९

7 गे ठीक पतीके दाक्नीनी। इन अरेशो मटीब आन कली चहिं काइ मदाक्नीनी। मोपतीके परमप्रभु, इन परमप्रभुमी इन वारच नेल्ल आन क्येडा इन कली दाक्शा, इन कली तेल लुकशो खोदेशो पा ग्येरपाइक्नु।

- 8 इन वा नेल्ल एलोत्र, मुरे नु ब्रोत्रशो रिना पाइशशो बाक्नीम। हात्ती आ दारामी दारपाइशशो दरवारम बाक्शा, तार पाइशशो ताप्तीके ताप्शा इन कली ग्येरपाइक्व।
- 9 इन कली मान पाइब आन दातेमी पिप आन तमी यो बाक्नीम। इन ग्युरा गे ओफीर डा सुनम ग्योम्सीशो पिपीम राप्ब।
- 10 आं तमी, नोफा दाइशशा, नेनो। इ रागी नु इ खिं डा मुर आन कली प्रेंदो।
- 11 पिपमी इ दारस तशा, इ कली दाक्शो बाक्ब। मेको कली जिम्मा गेंसीशा मान पावो। मारदे हना मेको इ प्रभु बाक्ब।
- 12 टायर सहर डा मीश आलपुकी कोसेली चाक्शा, जाक्नीम। रागी रागी डा शुश क्येट थीब मुरपुकीम इन शिशी माल्नीम।
- 13 पिप आ तमी थम दारशो नु सुन के श्येलेम प्रोत्रशो वा फेक्शा, आ बाक्तीकेम बाक्ब।
- 14 मिनु बुटा आप्शो वा फेक्पाइशशा, मेको कली पिप आ बाक्तीके चाक्नीम। मेको आ गेय पाइब मीश आल आ नोले खोइक्पाइशशा, पिप आ बाक्तीकेमी जाक्नीम।
- 15 मिनु मुरपुकीमी मेको आन कली ग्येरशो कुम्सो पा लां कोइनीम। मिनु पिप आ खिं ओइनीम।
- 16 मिनु इन आफ आ पा डा इन तौपुकी दुम्नीम। गे मेको आन कली रागी डा सासन पाइब सेल्नीनी।
- 17 गो इन नें इन चच युइ आन पाला नेल्ल मिम्पाइक्नुड। मोपतीके जात जात डा मुरपुकीमी इन कली गेना हना यो टेयब सेल्नीम।

## 46

परमप्रभु आंइ नेक्था बाक्ब

कुम्सो पपाइक्व कली अलामोथ कुम्सो आ लायो। कोराह आ तौ आन कुम्सो।

- 1 परमप्रभु आंइ खुइशशा बाक्तीके नु आंइ सक्ति बाक्ब। गो श्येत जकानु, गेना हना यो आंइ नेक्था बाक्शा वारच पाइब बाक्ब।
- 2 मोपतीके गो महिनीकी। रागी नु डांडापुकी हिम्सीशा समुन्द्रम गुम्तेकम हना यो गो महिनीकी।
- 3 मिनु समुन्द्र ग्रीशा, बोग्यो पोक्तु हना यो नु बुइशशा कुशा, डांडापुकी हिम्ताक्व हना यो गो महिनीकी। टेयब सेंदा पा।
- 4 मिनु टेयब खोला का बाक्ब। मेको रे पा ब्राशो आइक्च खोलापुकीमी परमप्रभु आ बाक्तीके सहर कली ग्येरपाइक्नीम। मेको नेल्ल क्येडा टेयब आ बाक्तीके सहर बाक्त। यसैया १२:५
- 5 मिनु परमप्रभु मेको सहरम बाक्ब। मिनु मेको महिम्सीब। परमप्रभुमी मेको सहर कली नां सोत्रम रेन वारच पाइब।
- 6 मिनु रागी रागी डा मुरपुकी जिशा खेशा पाइनीम। राज्यपुकी क्याम्चा पुंइसीनीम। परमप्रभुमी आ सेंदा नेंपाइक्तु हना, रागी नेल्ल याइनीम।
- 7 मुर नेल्ल आन परमप्रभु यावे गोपुकी नु बाक्ब। याकूब आ परमप्रभु आंइ बोल्यो दरवार बाक्ब। टेयब सेंदा पा।
- 8 परमप्रभु यावे आ टेयब गेय कोत्रथ जाक्कीन। मेकोमी रागी खतम पोक्शो कोत्रडीन। २राजा १९:३५
- 9 मेकोमी नेल्ल क्येडा डोन रागी सम्म डा लडाइ तेक्ब। मेकोमी लिब्रा जिक्शा नु तूतीक नेल्ल टुक्रा टुक्रा सेल्ब। तेक्तीके नेल्ल मीम हुम्ब। भजन संग्रह ७६:४
- 10 मेकोमी “सिक्सी पा बाक्कीन। गो परमप्रभु नड, दे तुइक्तीन। गो रागी रागी डा मुर आन दातेमी टेयब दुम्नुड। गो रागी नेल्लेमी नेल्ल क्येडा टेयब दुम्नुड” देत।
- 11 मुर नेल्ल आन परमप्रभु यावे गोपुकी नु बाक्ब। याकूब आ परमप्रभु आंइ बोल्यो दरवार बाक्ब। टेयब सेंदा पा।

## 47

परमप्रभु रागी नेल्ल डा पिप बाक्ब

कुम्सो पपाइक्व कली कोराह आ तौ आन कुम्सो।

- 1 जात जात डा मुर नेल्लेमी इन गुइ फ्रोक्तीन। गे ग्येरशा, परमप्रभु कली कुम्सो पने।
- 2 मारदे हना परमप्रभु यावे, नेल्ल क्येडा टेयब नु हिंचा डा बाक्ब। मेको रागी नेल्ल डा टेयब पिप बाक्ब।
- 3 मेकोमी रागी आन कली आंइ के सेल्शा, शुश मुर आन कली आंइ कली हुकुम पचा गेप्टु।
- 4 मेकोमी आंइ कली शोंप योत्रशा गेप्टु। मेको याकूब आ दाक्शो रागी बाक्त। मारदे हना परमप्रभुमी याकूब कली शुश दाक्ताक्व। टेयब सेंदा पा। ब्यवस्था ३२:९
- 5 मुरपुकी शुश ग्येरसमानु, परमप्रभु आ नित्तीकेम लाइब। परमप्रभु यावे तुराही ताप्शो नेंशा लाइब।
- 6 परमप्रभु कली टेयब सेल्तीक कुम्सो पने। लेंशा टेयब सेल्तीक कुम्सो पने। आंइ पिप कली टेयब सेल्तीक कुम्सो पने। लेंशा टेयब सेल्तीक कुम्सो पने।
- 7 मारदे हना परमप्रभु रागी नेल्ल डा पिप बाक्ब। मेको कली टेयब सेल्तीक कुम्सो का पने। भजन संग्रह ९३:१
- 8 परमप्रभुमी रागी रागी नेल्ल आन कली सासन पाइब। मिनु परमप्रभु आंम आ टेयब नित्तीकेमी निप्ब।
- 9 मिनु जात जात डा सासन पाइबपुकी नु अब्राहाम आ परमप्रभु आ मुर नेल्ल मेकेर गुम्शो बाक्नीम। मारदे हना रागी रागी डा पिपपुकी परमप्रभु आ गुडमी बाक्नीम। मेको थम टेयब बाक्ब।

## 48

सियोन आ दारस नु सक्ति

कोराह आ तौ आन कुम्सो।

- 1 परमप्रभु यावे ठेयब बाकब। परमप्रभु आ बाक्तीक सहरम बाक्शा, मान पाइक्चा पुंडसीब बाकब। भजन संग्रह ४६:५-६
- 2 आ डांडा दारशो नु लाइशो बाकब। मुर नेल्ले मेको तशा ग्येरसीनीम। सियोन डांडा उत्तर गे बाकब। मेको ठेयब पिप आ बाक्तीक सहर बाकब। बिलाप २:१५; मत्ती ५:३५
- 3 मिनु परमप्रभु मेको सहर डा बोल्यो दरवारम बाकब। मेको ठेयब नु सक्ति पाइशो बाकब, दे नेल्लेम तुइक्नीम।
- 4 पिप नेल्ले गुम्शा, हुल हुल पा लडाइ पचा कली आ डोंडती बारतेक्म। २राजा १८:१७-१८; मलाकी १:११
- 5 मिनु मेकोपुकीमी मेको तशा, छक लाक्शा, हिशा, प्रोक्तेक्मे।
- 6 मिनु मेक उइ गिक गिक पा खिंखि पाम्तेक्म। आल थिची ना डा रोइ पशो मीश मुर खोदेशो दुम्तेक्म।
- 7 गे टारसीस डा जहाज आन कली पूर्ब डा फश पतीकेमी खतम सेलतीनी।
- 8 आंड डोंडती नेंशो लोत्र, मुर नेल्ल आन परमप्रभु यावे आ सहरम ताइतक। मार ताइतक देशा हना, आंड परमप्रभुमी आ सहर गेना हना यो लीपाइक्चा कली बोल्यो सेल्लु। ठेयब सेंदा पा।
- 9 परमप्रभु, गो इन खिंमी बाक्शा, इन गेना हना यो दाक्तीके मिम्शा, बाक्नीकी।
- 10 परमप्रभु इन नें नु इन कली ठेयब सेलतीके रागी आ सुर सम्म बाकब। गे इन सक्तिमी ग्राना ग्रान बाक्नीनी।
- 11 सियोन डांडा ग्येरसेक्ल। यहूदा डा सहर नेल्ले इन निसाफ पशोमी ग्येरसमल।
- 12 सियोन आ एर ओंथ हिरशा, मेकेर डा लाइशो खिं हिक्कीन।
- 13 मेकेर डा बोल्यो गारोपुकी रिम्शो पा कोवडीन। आ बोल्यो दरवार यो रिम्शो पा कोवडीन। मिनु नोले गे इन चच युइ आन कली मेको आन परबंम शेने चाप्नीनी।
- 14 मारदे हना मेको परमप्रभु, आंड परमप्रभु बाकब। मेकोमी गेना हना यो आंड कली लां कोंडब। यसेया २५:९

## 49

शुश क्येटीम बेक्चा रे प्रोंइने मचाप्ब

कुम्सो पपाइक्ब कली कोराह आ तौ आन कुम्सो।

- 1 जात जात डा मुर नेल्ले, नेनीन।
- 2 ठेयब नु आइक्च, क्येट थीब नु पुडग नेल्लेमी नोफा दाइशशा, नेनीन।
- 3 मिनु गो जोक्शा तुइशशा लोत्र पाइनुड। आं थुंमी मिम्शा पशो लोत्रमी मुर आन कली रुप्ब सेल्ब।
- 4 गो अर्ती डा लोत्र का नेंता। गो ठेयब ताप्तीके ताप्शा, आं लोत्र रुप्पाइक्नुड।
- 5 मिनु श्येत जतीक नाक्ती जाक्मेनु, श्येत गेबपुकीमी आन टीक मपशोमी आं एर ओंथ रे पुम्दीमीनु, गो मारदे हिनुडा डा?
- 6 मेकोपुकीमी आन शुश क्येटीम थमा सुइक्नीमी। आन शुश क्येटीम ठेयब लेत्नीमी।
- 7 सुइमी आंम लोकब कली क्येट थाप्शा, बेक्चा रे प्रोंइने मचाप्ब। मोपा मेकोमी परमप्रभु कली शुश क्येट थाप्शा आ गिम प्रोंइने मचाप्ब। मीका ६:६-८; मत्ती १६:२६
- 8 बेक्चा रे ब्रोंडतीक शुश ठेयब बाकब। मेको मुरुम गेनायो ग्याप्ने मचाप्नीम। मत्ती १६:२६
- 9 गेना हना यो ब्रोंडशा बाकब, सुइ मबाक्नीम। मुर नेल्ले थिम्चा पुंडसीनीम।
- 10 मिनु नेल्लेमी जोक्ब तुइक्ब मुर, मूर्ख नु मिम्तीक मपाइशो नेल्ल बेक्नीम, दे तुइशशो बाक्नीम। मिनु आन शुश क्येट नेल्ल अरु आन कली प्रोंडशा लाइनीम। उपदेसक २:१६; उपदेसक ६:२
- 11 मिनु आन तुरस गेना हना यो मेको आन खिं दुम्ब। मोदेशो पाला नेल्ल आन कली दुम्ब। मिनु मेकोपुकीमी आन नें आन रू कली चोइशशो बाक्तेक्म हना यो, मोदेशो दुम्नीम।
- 12 गिश क्येट थीब बाक्तेक्म हना यो, मुरपुकी मलीनीम। मेकोपुकी बेक्शा लाइब जन्तु खोदेशो बाक्नीम। उपदेसक ३:१९
- 13 आंम आन मिम्शो थमा सुइक्ब नु मेको आन लोत्र नेंशा, ग्येरसीब मेको आन नोले डा मुर यो मोदेशो दुम्नीम। ठेयब सेंदा पा।
- 14 मेकोपुकी भेडा खोदेशो पा बेक्चा कली बाक्नीम। बेक्पाइक्बमी मेको आन कली दाक्ब। सुनी कना रिम्शो थुं पाइशशो मुरपुकीमी मेको आन कली हुकुम पाइनीम। मेको आन बाक्तीके रे डोन दुम्शा, आन रां तुरसुम राक्शा लाइनीम।
- 15 तन्न परमप्रभुमी आं कली तुरस रे प्रोंडब। मेकोमी थमा पा आ बाक्तीकेम लाइक्ब। ठेयब सेंदा पा। होसे १३:१४; भजन संग्रह ७३:२४
- 16 मिनु गे शुश क्येट चेम्शा, आन खिं दारपाइक्ना पाइक्न बाकब मुर आन कली तशा, महिनीन। अय्युब २१:७-१५
- 17 मारदे हना मेको बेक्मानु, मारेड मलाइक्नीम। मेको आन मार मार आन नोले खोइशशा, मलाइनीम। उपदेसक ५:१४; १त्तिमोथी ६:७
- 18 मिनु मेको ब्रोंडमा सम्म “गो आसीक ताइब नकी” देंनीम। मुरपुकीमी थीब मुर आन कली ठेयब सेलनीम। १त्तिमोथी ६:७ लूका १२:१६-२१; लूका १६:१९-३१
- 19 मो हना यो मेको बेक्शा, आन किकी पिपी आन बाक्तीके लाइनीम। मेकोपुकीमी गेनायो हाम्सो मताइनीम।
- 20 मुर गिश क्येट थीब बाक्तेक्म हना यो, मेको बेक्शा लाइब बस्तु भाव खोदेशो बाक्नीम।



## 50

परमप्रभु रिम्शो निसाफ पाइब

आसाफ आ कुम्सो।

1 ठेयब सक्ति पाइइशो, परमप्रभु, परमप्रभु यावेमी लोत्र पाप्तु। नां दाप्तीक रे नां पेरतीक सम्म डा रागी कली लोत्र पाप्तु। १इतिहास २५:१

2 परमप्रभु सियोन रे आ दारसम ग्योम्सीशा छेडछेड दुम्शा, गूशो बाक्ब। यसैया ६२:१

3 आंइ परमप्रभु जाक्शा, सिक्सी पा मबाक्ब। मेको आ डोइती ग्राव यु दाक्ब मी ब्राइब। मिनु आ एर ओंथ नेल्ले कुमीर गिमीर पा फश गिवार पाइब।

4 मेकोमी आ मुर आन कली निसाफ पचा कली सरीड नु रागी डा नेल्ल आन कली ब्रेक्ब। ब्यवस्था ३२:१; यसैया १:२

5 परमप्रभुमी “आं कली थमा सुइक्ब आन कली खुप्तीन। मेकोपुकीमी मार मार क्योरशा चढ़ेशा, गो नु कबल पाम्तेक्म” देंब। प्रस्थान २४:४-११

6 मिनु स्वर्गम बाक्बपुकीमी “एको ठीक पाइब बाक्ब। मारदे हना परमप्रभुमी एको मुर आन कली निसाफ पाइब” देंनीम। ठेयब सेंदा पा।

7 मिनु परमप्रभुमी “आं मुरपुकी, नेनीन। गो इन कली लोत्र पाइनुड। गो इस्राएली इन कली दोस गेशा, लोत्र पाइनुड। गो परमप्रभु, इन परमप्रभु नड। प्रस्थान २०:२

8 इन मार मार चढ़ेशो आ पर्वम गो इन कली दोस मगेनुड। इन चोशा चढ़ेशो गेना हना यो आं डोइती बाक्नीम। भजन संग्रह ४०:७; १सामुएल १५:२२; यसैया १:११

9 गो इन खिं डा ब्यफ नु इन गोठ डा बोकापुकी ममाल्लुड।

10 मारदे हना ब्वाकी डा जन्तु नेल्ल नु हजार हजार डांडा डा बी ब्यफ नेल्ल आं केन नम।

11 मिनु गो सरीड डा चिक्ब नेल्ल आन कली तुइक्नुड। मिनु रागी डा सोक्त पाइइशो नेल्ल आं केन नम।

12 गो शोत्रलु बाक्शो नड हना यो, इन कली मदेड वा। मारदे हना रागी नु रागीम बाक्शो मारेड मारेड आं केन नम।

13 मार, गो ब्यफ आन श्ये ब्वाइनुडा डा? बोका आन हुश तूनुडा डा?

14 गे आं कली ‘गे रिम्शो पाइब बाक्नीनी’ देनीन। मिनु नेल्ल क्येडा ठेयब, आं कली इन कसम जशो खपीन। योना २:१०

15 मिनु श्येत जनी नाक्त आं कली पुनीन। मिनु गो इन कली श्येत रे प्रॉडनन्नी। मिनु आं कली ‘गे ठेयब बाक्नीनी’ देंनीनी” देंत। भजन संग्रह ९१:१५

16 तन्न परमप्रभुमी आ अरेशो मटीब आन कली “आं फुल्लुम मुशा ब्रेक्शो लोत्र मारदे पढेनी? आं कबल आ पर्वम मारदे लोत्र पनी? रोमी २:२१-२३

17 गे आं शेशो लोत्र ग्रांया दीतीनी। मिनु आं लोत्र प्रॉइतीनी।

18 गे खुड आन कली गुम्नीनु, खुड आन वारच दुम्तीनी। मिनु गे खुड नु हेंथे गाक्ब नु गारतीनी।

19 गे मरिम्शो लोत्र पाइब नु जोल पाइब बाक्नीनी।

20 मिनु गे इन लोक्ब आन कली दोस गेशा बाक्नीनी। मिनु क्यी का रे जरमेशो इन लोक्ब आन कली शुक्शी पाइनीनी। उत्पत्ती २:२१

21 गे मेको नेल्ल पाइतीनी हना यो, गो सिक्सी पा बाक्ती। गे आं खोदेशो मिम्साक्नी। तन्न गो इन कली हुइशशा, इन दोस कोइनन्नी।

22 गे परमप्रभु कली प्रेंबपुकी तुइक्तीन। मो मपाइतीनी हना, गो इन कली साइक्नन्नी। मिनु इन कली सुइमी प्रॉइने मचाप्नीम।

23 सु सुमी ‘गे रिम्शो पाइब बाक्नीनी’ देंनीमी, मेकोपुकीमी आं कली ठेयब सेल्नीम। मिनु गो मेको आन कली लां सेल्नुड। गो मेको आन कली आं पाप रे प्रॉइतीके कोइनुडमी” दे परमप्रभुमी देंत।

## 51

आं पाप क्याम्दीन, दे पुंइशो

कुम्सो पपाइक्ब कली दाऊदमी बाथ्शेबा नु हेंथे पवा नोले नाथान जाक्मेनु, पशो दाऊद आ कुम्सो। २सामुएल १२:१-१५

1 परमप्रभु इन गेना हना यो दाक्तीकेमी आं कली शिशी पने। इन शुश शिशीमी आं हेंथे पशो क्याम्दीन। लूका १८:१७

2 परमप्रभु, इन शिशी पतीकेमी आं मरिम्शो पशो नेल्ल मुरशा गेयीनी। मिनु आं कली पाप रे प्रॉइयीनी।

3 मारदे हना गो आं मरिम्शो पशो तुइक्नुड। मिनु आं पाप गेना हना यो मिन्नुड।

4 गो इन डोइती ला पाप पाता। इन डोइती इन मदाक्शो पाता। गे आं कली निसाफ पा, ठीक पाइब बाक्नीनी। आं कली निसाफ पा सजाइ गेतीनी, गे मेको आ पर्वम दोस मताइब बाक्नीनी।

5 थमा पा, गो जर्मसी डा रेन मरिम्शो पाइब बाक्ती। आं ममा आ कोत्रजम जोल्ला रेन मरिम्शो पाइब बाक्ती। रोमी ३:४; यूहन्ना ३:६

6 गे आंम पर्वम आंम थुं डा थमा मिम्तीकेम दाक्नीनी। मोपतीके गे आं थुं कली जोक्तीक तुइक्तीक शेंदीने।

7 गे हिस्सोप के ब्राक्सुमी आं पाप क्याम्दीन। मिनु आं पाप क्याम्सीशो बाक्ब। मिनु आं कली चिक्तीनी। मिनु गो फु क्येडा बुश दुम्नुड। प्रस्थान १२:२२-२३; यसैया १:१८

8 आं कली ग्येरतीके नु थुं नाइक्तीके लोत्र नेंपाइय्यीनी। मिनु इन फस पोक्शो आं रुश लेंशा ग्येरसमल। भजन संग्रह ३२:३-४

9 इन कुल आं पाप रे खुइक्तीन। मिनु आं मरिम्शो पशो नेल्ल क्याम्दीन।

10 परमप्रभु, आं थुं क्येख सुन खोदेशो सेलीन। मिनु नक नु ठीक पाइब सोक्त गेयीनी। मत्ती ५:८; इजीकीएल ३६:२६-२७

11 आं कली इन डोंइती रे मखेरयीनी। इन सोक्त आं रे मलतीन।

12 इन पाप रे प्रोंइतीके आ पर्वम ग्येरशो लेंशा गेयीनी। आं थुं इन देशो खोदेशो सेलीन।

13 मिनु गो मरिम्शो पाइब आन कली इन लां कोंइनुडमी। मिनु पाप पाइबपुकी इन गे लेलीम।

14 परमप्रभु, गे आं कली पाप रे प्रोंइब परमप्रभु बाक्नीनी। आं हुश खाक्श पोक्शो पाप रे प्रोंइयीनी। मिनु गो इन प्रोंइतीके आ पर्वम कुम्सो पाइनुड।

15 परमप्रभु आं कली लोत्र पपाइय्यीनी। मिनु गो इन कली ठेयब सेल्लनुड।

16 गे मार मार क्योरशा, चढ़ेशोमी मग्येरनीनी। ग्येरसीनी हना, गो क्योरशा चढ़ेड वा। गे चोशा चढ़ेशोम मग्येरसीनीनी। भजन संग्रह ४०:७

17 परमप्रभु, गे मरिम्शो पशो आ पर्वम जिक्शो थुं नु ब्रेम्शो मुर आन थुं दाक्नीनी। भजन संग्रह ३४:३९

18 इन दाक्शो खोदेशो पा सियोन कली रिम्शो दुम्तीक गेने। यरूसलेम डा गारो लेंशा सेलीने।

19 मिनु नोले मुरपुकीमी ठीक पा चढ़ेनीम। मुरपुकीमी इन कली ग्येरपाइक्चा कली चोशा चढ़ेतीक नेल्ल चढ़ेनीम। मिनु इन कली ब्यफ चढ़ेनीम।

## 52

परमप्रभु आ शिशी नु निसाफ

कुम्सो पपाइक्ब कली। शेंतीक कुम्सो एदोमी दोएगमी सावल कली “दाऊद अहीमेलिक आ बाक्तीकेम खुंडसाक्व” देंचा नोले डा दाऊद आ कुम्सो। १सामुएल २२:९-१९

1 गे थम बोल्यो मुर, मारदे मरिम्शो पचा आ पर्वम बोरनीनी? परमप्रभु आ शिशी नाक्त रे लीब।

2 गे नाक्त रे खतम सेल्चा आ पर्वम मिम्नीनी? इन शोत्र शेप्शो करद खोदेशो बाक्ब। गे जोल पाइब ला बाक्नीनी।

3 गे रिम्शो पचा क्येडा मरिम्शो पचा ला दाक्नीनी। थमा लोत्र पचा क्येडा जोल पचा ला दाक्नीनी। ठेयब सेंदा पा।

4 गे जोल पाइब मुर, मारेइ मारेइ खतम सेल्लतीक लोत्र ला दाक्नीनी।

5 परमप्रभुमी थमा पा इन कली गेना हना यो कली खतम सेल्ल। मेकोमी इन कली इन बाक्तीके रे कीशा, युंडब। मिनु मेकोमी इन कली ब्रोंइशा बाक्तीक रागी रे इन शाक्श सुन्दा उइरशा, ताइक्ब। ठेयब सेंदा पा।

6 ठीक पाइबपुकी मेको आन कली तशा, हिनीम। मिनु मेकोपुकीमी रिश्शा कोत्रशा भजन संग्रह ९१:८

7 एको मुर कली कोत्रडीन। एकोमी परमप्रभु कली जिम्मा मंगेसे। आ शुश शोंपोम “गो मारेइ मारेइ पने चापुनुड देशा, अरु आन कली खतम पोक्शा, बोल्यो दुम्त” दे रिश्शा, कोत्रनीम।

8 तन्न गो परमप्रभु आ खिमी गिग तेल रवा खोदेशो बाक्नुड। गो आं कली गेना हना यो दाक्ब परमप्रभु कली थमा सुइक्नुड। भजन संग्रह ९२:१३-१६

9 गो “इन पशो आ पर्वम गेना हना यो इन कली ठेयब सेल्लनुड। गो इन नें ‘पाप रे प्रोंइब बाक्ब’ दे आस पाइनुड। मारदे हना इन नें रिम्शो बाक्ब। गो इन कली थमा सुइक्ब आन दातेमी ठेयब सेल्लनुड” देती।

## 53

मुर आन मरिम्शो पशो

कुम्सो पपाइक्ब कली महलाथ नें पाइरशो कुम्सो आ लायो। दाऊद आ शेंतीक कुम्सो। भजन संग्रह १४:-

1 मूर्खपुकीमी आन थुमी “परमप्रभु मबाक्ब” देनीम। मेकोपुकी काइ मरिम्शो दुम्शा ग्रान्रा दिचा डा गेय पाइनीम। रिम्शो पाइब का यो मबाक्नीम।

2 मिनु परमप्रभुमी स्वर्ग रे मुर आन कली कोत्रब। मारदे कोत्रब देशा हना, आ कली माल्ब, रुपब मुर का बाक्म कों, दे कोत्रब।

3 मुर नेल्ले हेंथे लां खोइरशो बाक्नीम। मेको नेल्ले दूली पाइब बाक्नीम। रिम्शो पाइब का यो मबाक्नीम।

4 मार, मरिम्शो पाइबपुकी मारेइ मशेंसीनीमी? मेकोपुकीमी शोब्ले जशो खोदेशो पा आं मुर आन कली नेक्नीम। मेकोपुकीमी परमप्रभु कली काइ मपुंडनीम।

5 मिनु नोले मेकोपुकी थाम्पा हिनीम। डोंइती मोपा हितीके मबा। मारदे हना परमप्रभुमी थमा मसुइक्ब आन रुश फ्राइब। मिनु मेकोपुकी मुने दोक्नीम। मारदे हना परमप्रभुमी मेको आन कली तिल्लो बाक्ब।

6 इस्त्राएल कली श्येत रे प्रोंइब सियोन रे जाक्शो हना, गिश रिम्शो दुम वा। परमप्रभुमी आ मुर आन कली थुं नाइरशा, रिम्शो पा बाक्तीक लेंशा गेपुतु हना, याक्ब आ मुर कुम्सो पाइनीम। मिनु इस्त्राएल डा मुर ग्येरसीनीम।

## 54

“जोरी सत्रु रे प्रोनीन” दे पुंडशो

कुम्सो पपाइक्व कली तार पाइशो ताप्तीके ताप्शा, शेंतीक कुम्सो। जीफ डा मुरपुकीमी सावल कली “दाऊद आंड दातेमी खुंडसीब” देशो ना डा दाऊद आ कुम्सो। १सामुएल २३:१९; १सामुएल २६:१

- 1 परमप्रभु, इन नेमी आं कली प्रोइयीनी। इन ठेयब सक्तिमी आं कली दोस मताइब बाक्व, दे कोइदीन।
- 2 परमप्रभु, आं लोव नेनीन, आं पुंडशो लोव नेनीने।
- 3 मरिम्शो पाइबपुकी आं गे बारतेक्म। हुश खाक्श पोक्वपुकीमी साइक्चा माल्तीमी। मेकोपुकी परमप्रभु कली ममिम्थु, महिनीम। ठेयब सेंदा पा।
- 4 परमप्रभु थमा पा आं कली वारच पाइब बाक्व। मेको आं कली ब्रोंइचा गेब बाक्व।
- 5 सु सुम आं कली मरिम्शो पाइनीमी, मेको आन कली मरिम्शो दुम्ल। इन दाक्शा मप्रोंइतीकेमी मेको आन कली खतम पोक्कीन।
- 6 परमप्रभु, गो इन कली आं दाक्तीके चढेनुड। परमप्रभु यावे, गो इन कली “गे रिम्शो पाइब बाक्नीनी” दे इन नें ठेयब सेल्लुड। मारदे हना परमप्रभु यावे रिम्शो पाइब बाक्व।
- 7 गे आं श्येत नेल्ल रे प्रोंइतीनी। मिनु गो आं जोरी सत्रु आन कली ग्राती।

## 55

“आ वारचम प्रोनानु” पुंडशो

कुम्सो पपाइक्व कली तार पाइशो ताप्तीके ताप्शा शेंतीक। दाऊद आ कुम्सो।

- 1 परमप्रभु, आं लोव नेनीन। आं डोंइती रे इन कुल मखुइक्तीन।
- 2 आं पुंडशो नेंशा, लोव लेल्तीनी। गो श्येत जशा, आं थुं ग्येत्थ लुकच दुम्शा, मारदे रोंका पा गाक्ती देशा हना,
- 3 गो आं जोरी सत्रु आन लोव नेंशा, इन अरेशो मटीबपुकीम श्येत गेंतीके रोंका पा गाक्ती। मारदे हना मेकोपुकी गाइशशा आं जोरी सत्रु दुम्शा, श्येत गेंतीमी।
- 4 आं थुं ग्येत्थ लुकच पशो बाक्व। आं कली बेक्चा डा हिंतीकेमी सुम्ती।
- 5 गो हिंशा ख्लिखि पाता। गो साप्पा हिनुड।
- 6 गो आं के “ढुकुर खोदेशो पा फ्रां बाक्शो हना, बेरशा लशा, नांडसीड वा” देंती।
- 7 गो थमा पा बेरशा डोन लशा, गोरशो रागीम बाक्ड वा। ठेयब सेंदा पा।
- 8 गो फश गिवार रे प्रोक्शा, रीब पा फाम्सीड वा।
- 9 परमप्रभु, मरिम्शो पाइब आन मिम्शो खतम पा गेने। मेको आन लोव खाल्शा गेने। मारदे हना गो सहरमी हुश खाक्श पोक्शो नु जिशो खेशो ला ताता।
- 10 मेकोपुकी नाक्दो नाक्ती सहर डा गारो डोइशशा एर ओंथ हिरशो बाक्नीम। मेको सहरम मरिम्शो पतीके नु श्येत ला बाक्व।
- 11 मेको सहरम मारेड मारेड खतम पोक्व बाक्व। मुर आन कली दिप्तीके नु जोल पतीके सहर प्रोंइशा मलाइनीम।
- 12 आं कली काइ मदाक्बमी शुक्शी पाइय्यी हना, गो फाल्ने चबु वा। जोरी सत्रुमी आं कली लडाइ तोशो नम हना, गो मेको आन क्येडा प्रोक्शा खुंडसीड वा। भजन संग्रह ४१:१०
- 13 तन्न गे आ खोदेशो मुर बाक्ते। गो नु बाक्व आं वारच बाक्नेवे।
- 14 डोंइती गो गे नु ग्येरशा बाक्शो बाक्ती। गो मुरपुकी नु परमप्रभु आ खिंम काथा गाक्शो नय।
- 15 बेक्पाइक्वमी आं जोरी सत्रु आन कली आन मतुइक्चा डा पा जाक्शा दाक्गल। मेकोपुकी सेलीन बेक्शो मुर आन बाक्तीके लमल। मारदे हना मेको आन दातेमी मरिम्शो पतीके बाक्व। गन्ती १६:३१-३३
- 16 तन्न गो परमप्रभु कली पुंडनुड। मिनु मेकोमी आं कली प्रोंइब।
- 17 गो सुनी, नाक्दो, नाक्ती श्येत जडानु, परमप्रभु कली आं श्येत आ पर्वम पुंडनुड। मिनु मेकोमी आं लोव नेंब।
- 18 मेकोमी आं कली लडाइ रे मारेड दुम्पाइक्थ, प्रोंइब। शुश मुरुमी आं कली मदाक्ताक्कीमी हना यो, प्रोंइब।
- 19 परमप्रभु गेना हना यो ठेयब नित्तीकेमी निशो बाक्व। मेकोमी मेको आन लोव नेंशा, श्येत गेब। ठेयब सेंदा पा। मारदे हना मेकोपुकीमी आन लां गेनायो ठीक मसेल्नीम। परमप्रभु कली मान पा महिनीम।
- 20 आं वारचमी आं कली जोल पा श्येत गेंती। मेकोमी आ कबल प्रोंइतु।
- 21 मिनु मेकोमी मिलो शिलो लोव पाप्तु। तन्न मेको आ थुंमी जिचा खेचा ला बाक्व। मेको आ लोव तेल खेक्शो खोदेशो बाक्व। तन्न आ आगाम शोइशशो तरवार बाक्व। येरमीया ९:७
- 22 इन थुं डा श्येत नु मार पचा दो पचा देंतीके परमप्रभु यावे आ डोंइती वोतीन। मिनु मेकोमी इन कली कुक्व। मेकोमी ठीक पाइब आन कली गेनायो हिम्सीचा मगेब। १पत्रुस ५:७
- 23 तन्न परमप्रभु, गे मरिम्शो पाइब आन कली खतम दुम्तीकेमी ताइक्नीनी। हुश खाक्श पोक्व नु जोल पाइब आन ब्रोंइतीक नाक्त उइक्थ यो मब्रोंइनीम। तन्न गो इन कली थमा सुइशशा बाक्नुड। भजन संग्रह १०२:२५

## 56

थमा सुडक्ब थुं महिब थुं बाक्ब

कुम्सो पपाइक्ब कली डोन डा रवाम बाक्शो ढुकरु आ कुम्सो आ लायो। पलिस्तीपुकीमी गाथ सहरम दाऊद कली ग्याइक्ची ना डा दाऊद आ कुम्सो। १सामुएल २१:१०-१५

1 परमप्रभु आं कली शिशी पाइय्यीनी। मारदे हना मुरपुकीमी आं कली शुश खेदा पाइनीमी। नाक्त रे आं कली दिप्शो बाक्नीम।

2 नेल्ल क्येडा ठेयब, नाक्त रे आं कली दिप्बपुकीमी आं कली श्येत गेनीमी। आं कली खेदा पाइब शुश बाक्नीम।

3 गो हिंडानु, इन कली थमा सुडक्नुड।

4 मिनु गो परमप्रभु आ लोव्र ठेयब सेल्लुड। मेकोमी प्रॉइब, दे थमा सुडशशा, महिथु बाक्नुड। मुरपुकीमी आं कली मार पाइक्ने चाप्नीमी डा? भजन संग्रह २७:१; भजन संग्रह ११८:६; यसैया १२:२; यसैया ५१:१२; मती १०:२८

5 नाक्त रे मेकोपुकीमी आं लोव्र दूली सेल्शा लोव्र पाइनीम। मेको आन मिम्शो नेल्ले आं कली श्येत गेचा कली ला बाक्ब।

6 मिनु मेकोपुकीमी आं कली क्यारी पा बाप्शा साइक्चा मालनीम।

7 परमप्रभु, मेको आन कली काइ प्रोक्चा मंगेन। इन गाइक्चामी मेको मुर आन कली खतम पोक्कीन।

8 आं रोंका पशो मिम्तीन। आं प्रेक्कु इन ग्योबुम कुर पा वोतीन। मार, मेको इन लोव्र ब्रेक्शो किताबम ब्रेक्शो मबाक्वा डा?

9 मिनु गो इन कली “वारच पाइय्यीनी” दे पुनुनु, आं जोरी सत्रु लेशशा प्रोक्नीम। मिनु परमप्रभुमी आं कली दाक्ब, दे तुडक्नुड।

10 गो परमप्रभु आ लोव्र ठेयब सेल्लुड। गो परमप्रभु यावे आ लोव्र आ पबर्म ग्येरशा लोव्र पाइनुड।

11 गो “परमप्रभुमी श्येत रे प्रॉइब” दे थमा सुडशशा, महिथु बाक्नुड। मुरपुकीमी आं कली मार पाइक्ने चाप्नीमी डा?

12 परमप्रभु, गो गे नु कसम जशो, खाप्चा माल्लुड। गो इन कली “गे रिम्शो पाइब बाक्नीनी” दे चढेतीके चढेनुड।

13 मारदे हना गे आं कली बेक्चा रे प्रॉइतीनी। मिनु आं कली गोल्चा रे प्रॉइतीनी। परमप्रभु, गो ब्रॉइशो आन छेडछेडम गाक्चा तडल। अय्युब ३३:३०

## 57

श्येत रे प्रॉइब, दे पुंडतीक

कुम्सो पपाइक्ब कली खतम मसेलो देशो कुम्सो आ लायो। दाऊद सावल रे प्रोक्मेनु, पुक्सीम बाक्शा, पशो कुम्सो। १सामुएल २२:१

1 परमप्रभु शिशी पने। आं कली शिशी पाइय्यीनी। मारदे हना आं थुं गे नु खुंडसीब। एको खतम पोक्ब फश गिवार मनुम्म सम्म गो इन फ्रां आगामी खुंडसीशा बाक्नुड। भजन संग्रह १७:८; भजन संग्रह ९१:१-२

2 गो नेल्ल क्येडा ठेयब, परमप्रभु कली ब्रेल्लुड। परमप्रभुमी आं पबर्म आ मिम्शो खाप्ब।

3 मेकोमी स्वर्ग रे वारच पाइब सोइशशा, आं कली प्रॉइब। मिनु आं कली खेदा पाइब आन कली हुडक्ब। ठेयब सेंदा पा। परमप्रभुमी आं कली गेना हना यो दाक्ब। आ दाक्शा मप्रॉइतीकेमी आं कली कोव्रब।

4 गो गुप्स आन दातेमी बाक्शो बाक्नुड। गो मुर ब्वाइब जन्तु आन दातेमी गोल्शो बाक्नुड। मेको मुर आन खुइ तूतीक नु ब्रा खोदेशो बाक्नीम। मेको आन लें हेशो तरवार खोदेशो बाक्ब।

5 परमप्रभु, गे सरीड क्येडा ठेयब बाक्नीनी। मिनु रागी इन सक्तिम प्रिदीन।

6 मेकोपुकीमी आं खोइली रेप्पाइक्चा कली ब्वारद दाइक्ताक्म। गो श्येत जशा गुर ब्वेशो बाक्नुड। मेकोपुकीमी आं लांम खाल्टा दोम्तेक्म। तन्न मेकोपुकी मेकेर आंमा बिक्तेक्म। ठेयब सेंदा पा।

7 परमप्रभु, आं थुं ग्येत्थ लुक्च मपथु बाक्ब। गो ताप्तीक ताप्शा कुम्सो पाइनुड। भजन संग्रह १०८:२-६

8 आं थुं सेशा बोक्को। ताप्तीकपुकी ठीक पा बाक्कीन। मारदे हना गो नां सोव्रचा क्येडा डोंइती कुम्सो पाइनुड।

9 परमप्रभु, गो जात जात डा मुर आन दातेमी इन कली ठेयब सेल्लुड। गो रागी रागी आन दातेमी इन पबर्म कुम्सो पाइनुड।

10 मारदे हना इन गेना हना यो दाक्तीके सरीड सम्म जाक्दीशशो ठेयब बाक्ब। मिनु इन दाक्शा मप्रॉइतीके गोस्स सम्म जाक्दीशशो ठेयब बाक्ब।

11 परमप्रभु, गे सरीड क्येडा ठेयब बाक्नीनी। मिनु रागी इन सक्तिम प्रिदीन।

## 58

मरिम्शो पाइब कली सजाड

कुम्सो पपाइक्ब कली कुम्सो आ लायो, खतम मसेलो देशो दाऊद आ सेल्शो कुम्सो। भजन संग्रह ८२:२-४

1 गे निसाफ पाइबपुकी, ठीक लोव्र पाइनीनी? गे मुर आन कली ठीक निसाफ पाइब बाक्नीनी?

2 ममाइ, गे इन थुंमी ठीक ममिम्नीनी। मिनु गे रागीम हुश खाक्श पोक्नीनी।

3 परमप्रभु आ अरेशो मटीबपुकी जरमेसमान रे मरिम्शो पाइनीम। कोव्रज रेन मरिम्शो पाइब दुम्शो बाक्नीम। मिनु जोल पाइनीम।

4 मेको आन बीस बुस्स आन बीस खोदेशो बाक्ब। मेको थम ठेयब बुस्स आन नोफा सुशो खोदेशो बाक्नीम।

- 5 मिनु मन्तर तन्तर पाइब नु नु टुना मुना पाइब आन लोत्र मनेनीम।
- 6 परमप्रभु, मेको आन खुइ जिकतीन। परमप्रभु यावे, गुप्स आन खुइ तुल्दीन।
- 7 मेकोपुकी शाइशो ब्वाक्कु खोदेशो पा जाम्शा, लमल। मेकोपुकीमी लिब्राम ब्रा आप्मेनु, मेको आन ब्रा हेथे लमल।
- 8 मेकोपुकी गाकना गाकन यशा, दे खोदेशो दुम्मल। मेकोपुकीमी शाम्शो आलपुकीम खोदेशो पा नां मतामेक्ल।
- 9 इन ग्योबपुकी सोत्रशो चूमी ब्रशो मीम होचा क्येडा डोंइती, मरिम्शो पाइबपुकी जाम्शा लाइनीम।
- 10 मिनु ठीक पाइबपुकी मरिम्शो पाइब आन कली क्येक्क लेशो तशा, ग्येरीसीनीम। मिनु मेको आन हुशेम गाक्नीम।
- 11 मिनु मुरपुकीमी “ठीक पाइबपुकीमी थमा पा इनाम ताइनीम। थमा पा, परमप्रभु रागीम निसाफ पाइब बाक्ब” देनीम।

## 59

“जोरी सत्रु रे प्रोनीन” दे पुंइशो

कुम्सो पपाइक्ब कली खतम मसेलो देशो कुम्सो आ लायो। दाऊद आ कुम्सो। सावलमी दाऊद आ खिम बाक्म कों, मेको कली साइक्चा, दे क्यारी पथ सोइशो बाक्त। १सामुएल १९:११

- 1 आं परमप्रभु, आं जोरी सत्रु रे प्रोइयीनी। आं कली मरिम्शो पाइब आन क्येडा प्रोइयीनी।
- 2 आं कली मरिम्शो पाइब नु हुश ख्वाक्श पोक्ब आन रे प्रोइयीनी।
- 3 कोत्रडीन, मेकोपुकीमी आं कली साइक्चा कली बाप्शा बाक्शो बाक्नीम। परमप्रभु यावे, गो मारेइ मरिम्शो मपथु, मेको मुर साइक्बपुकीमी आं कली जिचा तोशो बाक्नीम।
- 4 गो मारेइ मरिम्शो मपथु, मेकोपुकीमी आं कली साइक्चा चिक्शो बाक्नीम। आं श्येत जशो कोत्रडीन। मिनु वारच पाइक्चा कली बोक्कीन।
- 5 परमप्रभु यावे, मुर नेल्ल आन परमप्रभु, इसाएल आ परमप्रभु, रागी रागी आन कली सजाइ गेचा कली बोक्कीन। इन कली प्रोइशा, मरिम्शो पाइब आन कली काइ शिशी मपने। टेयब सेंदा पा।
- 6 नाक्दो कुस कुस मेकोपुकी सहर आ एर ओथ कुचुम खोदेशो पा डरर डरर पा हिरसीनीम।
- 7 मेकोपुकीमी आन शोत्र रे मार गुंडबाक्मा? मेकोपुकीमी साइक्चा डा लोत्र पाइनीम। मिनु मेकोपुकीमी “सुम नेंबा डा” देनीम।
- 8 तन्न परमप्रभु यावे, गे मेको आन पर्वम रित्नीनी। गे रागी रागी नेल्ल आन पर्वम रित्नीनी।
- 9 गे आं सक्ति बाक्नीनी। गो इन कली टेयब सेल्शा कुम्सो पाइनुड। परमप्रभु, गे आं बोल्यो दरवार बाक्नीनी। भजन संग्रह ९:१०-११
- 10 परमप्रभुम आं कली गेना हना यो दाक्तीकेम ग्युम्ब। मिनु मेकोमी आं कली आं जोरी सत्रु आन कली ग्रापाइक्ब।
- 11 मेको आन कली मसतीन। मो पाइतीनी हना, आं मुरपुकीमी प्रेनीमी। परमप्रभु, गे आंइ तेक्तीक बाक्नीनी। गे मेको आन कली इन सक्तिमी एर ओथ ब्रपाइशशा, आइक्च सेलीन।
- 12 मेको आन पशो लोत्रमी, आन टेयब लेशो कोइनीमी। गे गाइशशा मेको आन सराप पतीके नु जोल पतीके खतम पोक्कीन।
- 13 मेको आन कली इन गाइक्तीकेमी सतीन। गे मेको आन कली रागी रे क्याम्ताक्नी हना, मुर नेल्लेमी परमप्रभुमी याक्कूब कली सासन पाइब, दे तुइक्नीम। टेयब सेंदा पा।
- 14 नाक्दो कुस कुस मेकोपुकी सहर आ एर ओथ कुचुम खोदेशो पा डरर डरर पा हिरसीनीम।
- 15 मेकोपुकी जचा थोत्रक माल्थ गाक्नीम। मिनु मरूतेक्म हना, ग्रीनीम।
- 16 तन्न गो चहिं इन सक्ति आ पर्वम कुम्सो पाइनुड। सुनी कना गो इन गेना हना यो दाक्शो आ पर्वम कुम्सो पाइनुड। मारदे हना गे आं ब्रोंइशा बाक्तीक बोल्यो दरवार बाक्नीनी। मिनु श्येत जडानु, आं खुइक्तीक बाक्नीनी।
- 17 गे, आं सक्ति बाक्नीनी, गो इन कली टेयब सेल्तीक कुम्सो पाइनुड। गे आं बोल्यो दरवार नु आं कली गेना हना यो दाक्ब परमप्रभु बाक्नीनी।

## 60

लडाइ ब्रुशा पुंइशो

कुम्सो पपाइक्ब कली कबल डा फू आ लायो। दाऊद आ सेल्शो शेंतीक कुम्सो। मेकोमी अराम-नहाराइन नु अराम-सोबाह नु लडाइ पवानु, योआब लेशशा, १२ हजार एदोमी कली हिक्सी दिमम साइक्तु। २सामुएल ८:३,१३; २सामुएल १०:१३,१८

- 1 परमप्रभु, गे आंइ कली वारच पाइक्चा प्रोइशो बाक्तीनी। गे आंइ लडाइ पतीके कली प्रोइशो बाक्तीनी। गे आंइ पर्वम थाम्पा गाइक्ताक्नी। मुल आंइ कली डोंइती डा खोदेशो पा रिम्शो सेलीन।
- 2 गे खिनु कुपाइक्तीनी। मिनु रागी कली चेलतीनी। मेको जेशो लेशा सेलीन। मारदे हना हिम्सीन सीन बाक्ब।
- 3 परमप्रभु, गे इन मुर आन कली टेयब श्येत जपाइक्तीनी। गे आंइ कली दिड दाड गोल्ब तूचा थोत्रक तूपाइक्तीनी। भजन संग्रह ७५:९
- 4 मिनु इन क्येडा मान पा हिंब आन कली प्रोक्तीक लां कोइंचा कली चिन्ड का वोइक्तीनी। मेकेर लमानु, ब्राम मखाइनीम। टेयब सेंदा पा।प्रस्थान १७:१५
- 5 इन सक्तिमी आंइ कली प्रोनीन। मिनु इन दाक्शो मुरपुकी ब्रोंइचा तामेक्ल। भजन संग्रह १०८:७-१४
- 6 परमप्रभुमी आ बाक्तीक रे “ग्येसपाइक्तीकेमी, गो शेकेम कली योक्नुड। सुक्कोथ डा दिम पुक्नुड।

- 7 गिलाद नु मनस्से आं के बाक्नीस। एफ्राइम आं पियाम गुप्तीक बाक्ब। यहूदा आं राज दन्ड बाक्ब। उत्पती ४९:१०
- 8 मोआब आं चिकतीके बोस बाक्ब। गो एदोम तार आं जुता ब्वारनुड। गो पलिस्ती आन कली ग्रानुड।
- 9 सुम आं कली गारो हिरशो सहर सम्म चाक्दीप्वा? सुम आं कली लां कौंइशा, एदोम सम्म चाक्दीप्वा?" दैत।
- 10 परमप्रभु, गे आंड क्येडा डोन मलनी? गे आंड कली प्रौइतीनी। गे आंड लडाइ पाइबपुकी नु मलाइनीनी।
- 11 मिनु आंड जोरी सनु क्येडा ग्राचा कली आंड कली वारच पने। मारदे हना मुर आन वारच पशो शोर गाक्शो बाक्ब।
- 12 गो परमप्रभु आ वारच पाइशोमी ग्रानीकी। मिनु मेकोमी आंड जोरी सनु आन कली दिम्ब।

## 61

परमप्रभुमी वारच पशो

कुम्सो पपाइक्ब कली तार पाइशो ताप्तीके ताप्शा पतीक, दाऊद आ कुम्सो।

- 1 परमप्रभु, आं ब्रेशो नेनीन। आं पुंडशो लोत्र नेनीन।
- 2 गो डोन रागी रे इन कली ब्रेलुड। आं थुं ग्येत्थ लुक्च दुम्मेनु, ब्रेलुड। आं कली लाइशो सेरथे फुल्लु तार लाइय्यीनी।
- 3 मारदे हना गे आं खुइक्तीके बाक्नीनी। गे डौंइती रे आं जोरी सनुमी मथित्तीके बोल्यो लाइशो खिं बाक्नीनी। भजन संग्रह ७१:३; हितोपदेश १८:१०
- 4 गे आं कली इन ताम्बुमी गेना हना यो बाक्चा गेने। मिनु इन फ्रां आगाम खुइसीनुड ठेयब सेंदा पा। भजन संग्रह १७:८
- 5 परमप्रभु, गे आं कसम जशो नेतीनी। गे इन नें कली मान पा हिंब आन कली गेशो खोदेशो पा, आं कली यो गेतीनी।
- 6 पिप कली शुश ब्रौइतीक नाक्त गेने। शुश पाला सम्म आ ब्रौइतीक नाक्त बारपतीन। भजन संग्रह २१:५
- 7 मेको परमप्रभु आ डौंइती गेना हना यो आ निल्तीकेम बाक्चा तवल। इन गेना हना यो दाक्तीके नु इन दाक्शा मप्रौइतीकेमी मेको कली खाल पपतीन। २सामुएल ७:१६
- 8 मेना गो इन नें गेना हना यो ठेयब सेल्टीक कुम्सो पाइनुड। मिनु नाक्त किंत किंत गो आं कसम जशो खाप्नुड।

## 62

परमप्रभुमी प्रौइब, देशो

कुम्सो पपाइक्ब येदुथून कली दाऊद आ कुम्सो।

- 1 आं थुंम सिक्सी पा परमप्रभु कली रिम्ब। मेकोमी आं कली प्रौइब। यसैया ३०:१५
- 2 मेको ला आं सेरथे फुल्लु नु आं कली वारच पाइब बाक्ब। मेको आं बोल्यो दरवार बाक्ब। गो गेनायो महिम्सीनुड। भजन संग्रह १८:३
- 3 गे नेल्लेमी मुर का कली गेना सम्म बाप्शा साइक्चा माल्नीनी? गे गोल्ला चिकशो गारो नु ब्रेत्चा चिकशो थरपु खोदेशो मुर कली खोल्नीनी?
- 4 मेकोपुकीमी ठेयब मुर कली साइक्चा माल्शो बाक्नीम। मेकोपुकी जोल पतीकेमी ग्येरसीनीम। मिनु शोत्रम आसीक गेखु पाइनीम। तन्न आन थुंमी चहिं सराप पाइनीम। ठेयब सेंदा पा।
- 5 आं थुंम सिक्सी पा परमप्रभु कली ला रिम्ब। मारदे हना गो मेको कली आस पाइनुड।
- 6 मेको ला आं सेरथे फुल्लु नु आं कली वारच पाइब बाक्ब। मेको आं बोल्यो दरवार बाक्ब। गो महिम्सीनुड।
- 7 आं कली श्येते रे प्रौइतीके नु मान ततीके परमप्रभु रे जाक्ब। परमप्रभु आं खुइक्तीक सेरथे फुल्लु नु आं बोल्यो दरवार बाक्ब।
- 8 मुर नेल्ले, गेना हना यो परमप्रभु कली थमा सुतीन। मेको आ डौंइती इन थुं डा लोत्र देनीन। मारदे हना परमप्रभु इं खुइक्तीके बाक्ब। ठेयब सेंदा पा।
- 9 महिक्सीशो मुरपुकी फश ला बाक्नीम। हिक्सीशो मुर आन ठेयब दुम्तीके जोल ला बाक्ब। मेकोपुकी नाक्सीमानु, मारिड मबाक्नीम। हिक्सीशो नु महिक्सीशो मुर नेल्ल मुठी का सोक्त डा ला बाक्नीम।
- 10 मुर आन कली दिप्शा "रिम्शो दुम्नुड" दे ममिम्तीन। खुइ पशो मार मार तथा, ठेयब मलेतीन। इन शोप शुश दुम्त हना यो, मेको कली थमा मसुतीन। मत्ती १९:२२; लूका १२:१५-२१; १तिमोथी ६:९, १७
- 11 परमप्रभुमी लोत्र पाप्तु। गो लोत्र निक्शी नेंता "परमप्रभु के सक्ति बाक्ब।
- 12 परमप्रभु यावे गेना हना यो दाक्ब बाक्ब" देशो नेंता। गे थमा पा मुर नेल्ल आन कली आन पशो खोदेशो पा गेनीनी। रोमी २:६-११

## 63

परमप्रभु नु बाक्चा दाक्शो

यहूदा आ गोरशो रागीम बाक्शो ना डा दाऊद आ कुम्सो। १सामुएल २२:५

- 1 परमप्रभु, गे आं परमप्रभु बाक्नीनी। गो इन कली थमा पा माल्लुड। गो ब्वाक्कु तूतू दाक्शो खोदेशो पा आं थुंमी इन कली माल्लुड। गो ब्वाक्कु मबाक्शो रागीम ब्वाक्कु माल्लो खोदेशो पा इन कली माल्स डा माल्स बाक्नुड। भजन संग्रह ४२:३
- 2 गो इन कली इन बाक्तीकेमी ताता। मिनु इन सक्ति नु छेडछेड ताता।
- 3 आं ब्रौइतीके क्येडा इन गेना हना यो दाक्तीके ठेयब बाक्ब। मोपतीके गो इन कली ठेयब सेल्लुड।
- 4 गो मवेक्डा सम्म इन कली ठेयब सेल्लुड। मिनु गो आं गुड पोक्शा, इन कली प्रार्थना पाइनुड।

- 5 ब्रोत्रशो जशो खोदेशो पा इन कली मिम्शा ग्येरनुड। गो कुम्सो पा इन कली ठेयब सेल्लुड।
- 6 गो आं ब्राख्येम बाक्डानु, इन कली मिम्नुड। मिनु नाकदो यो इन कली मिम्शा बाक्नुड। येरमीया २६:९
- 7 मारदे हना गे आं कली वारच पाइब बाक्नीनी। मोपतीके गो इन प्रौडतीके तुइशशा, कुम्सो पाइनुड। भजन संग्रह १७:८
- 8 आं थुं गे नु बाक्ब। गे आं कली कोवब बाक्नीनी।
- 9 तन्न आं कली साइक्चा माल्बपुकी खतम दुम्शा, खप आगा ओवनीन।
- 10 मेकोपुकी तरवारम साइक्चा पुंइसीनीम। मिनु सिवारम मेको आन कली ब्वाइनीम।
- 11 तन्न पिप चहिं परमप्रभु नु थुं नाइशशा ग्येरशा बाक्ब। परमप्रभु आ नेम कसम जाइबपुकीमी मेको कली ठेयब सेल्लनीम। तन्न जोल पाइबपुकी ब्वाक्चा मताइनीम।

## 64

परमप्रभुमी निसाफ पवल

कुम्सो पपाइक्ब कली दाऊद आ कुम्सो।

- 1 परमप्रभु, आं कली श्येत गेशो आ पर्बम इन कली शेदुनु, आं लोव नेनीन। आं कली आं जोरी सत्रु आन क्येडा प्रौइयीनी।
- 2 इन अरेशो मटीब आन क्येडा खुइक्तीनी। मरिम्शो पाइब आन खुइशशा मिम्शो रे खुइक्तीनी।
- 3 मेकोपुकीमी तरवार खोदेशो पा आन लें हेप्पाइक्नीम। मेको आन लोवमी साइक्ब ब्रा खोदेशो पा आप्नीम।
- 4 मेकोपुकीमी बाप्चा, दोस मपाइशशो मुर आन कली आप्नीम। मेकोपुकीमी मेको आन कली महिंथु ब्रा बु आप्नीम।
- 5 मिनु मेकोपुकीमी आन मरिम्शो पशो आ पर्बम आंम आंमा टीक पाइतीनी, देमुइनीम। खुइशशा ब्वावद दाइक्तीक आ पर्बम लोव पाइनीम। मेकोपुकीमी “इं कली सुम ताइबा डा” देंनीम। भजन संग्रह ९४:७
- 6 मेकोपुकीमी मरिम्शो पतीक आ पर्बम गारशा “गो शुश मिम्शा, गेय पाइतय” देंनीम। थमा पा मुर आन मिम्तीके नु थुं मरिम्शो बाक्ब।
- 7 तन्न परमप्रभुमी मेको आन कली ब्रा आप्ब। मिनु मेको आन मतुइक्थु गोल्नीम।
- 8 परमप्रभुमी मेको आन कली आन लोव आ पर्बम खतम सेल्लब। मेको आन कली साइक्ब। मिनु मेको आन कली ताइब नेल्लेमी हिंशा आन पिया हिकनीम।
- 9 नोले मुर नेल्ल हिनीम। मिनु परमप्रभु आ पशो आ पर्बम लोव पाइनीम। मिनु मेको आ पशो मिम्नीम। प्रस्थान ८:१५
- 10 टीक पाइबपुकी परमप्रभु यावे आ पर्बम ग्येरसीने। मिनु मेको नु खुंइसीन। रिम्शो थुं पाइशशो मुर नेल्ले ग्येरसीन।

## 65

परमप्रभु कली ठेयब सेल्लो

कुम्सो पपाइक्ब कली। दाऊद आ कुम्सो।

- 1 परमप्रभु, सियोनीमी इन कली ठेयब सेल्लीक कुम्सो पाइनीमी। मिनु आंइ कसम जशो नेल्ल इन डोंइती खाप्नीकी।
- 2 गे प्रार्थना नेब बाक्नीनी। मोपतीके मुर नेल्ल इन डोंइती जाक्नीम।
- 3 गो आंइ पापमी युम्कानु, आंइ मरिम्शो पशो माफ गेतीनी।
- 4 सु सु इन योत्रचा पुंइसीशो बाक्नीमी, मेकोपुकी ग्येरसीशो बाक्नीमी। मेको आन कली इन खिम बाक्पाइक्चा कली चाक्नीनी। गो इन खिं, इन आंम बाक्तीके डा ब्रोत्रशो थोव्रकमी रूनीकी। भजन संग्रह ६३:३-४; भजन संग्रह ८४:२-५; ब्यवस्था ४:७
- 5 आंइ पुंइशो लोव इन ठेयब गेयमी आंइ कली प्रौइशा लोव लेत्नीनी। परमप्रभु, आंइ कली श्येत रे प्रौइब बाक्नीनी। गे डोन बाक्ब रागी नु नेल्ल क्येडा डोन डा समुन्द्र आ नेक्था बाक्ब आन आस बाक्नीनी।
- 6 गे इन सक्तिमी डांडा नेल्ल सेल्लतीनी। गे ठेयब सक्ति पाइशशो बाक्नीनी।
- 7 गे समुन्द्र आन ग्रीशो सिक्सी पपाइक्तीनी। गे समुन्द्र आन बोक्शो नाइक्पाइक्तीनी। मिनु जात जात डा मुर आन जिचा खेचा साम्नीनी। भजन संग्रह ८९:१०
- 8 मिनु डोन डोन रागीम बाक्बपुकी इन छक लाक्चा डा गेय तशा हिनीम। परमप्रभु, गे नां दाप्तीके नु नां पेरतीकेम बाक्ब आन कली ग्येरसीशा कुम्सो पपाइक्तीनी।
- 9 गे रागी हिरशा, रेउ यिपाइक्तीनी। गे मेको कली शुश ग्रेल्पाइक्तीनी। परमप्रभु आ खोला ब्वाक्कुम ब्रीशो बाक्नीम। मोपा मुर आन कली शुश अन्न खेल्तीनी। मारदे हना मेकोन इन मिम्शो बाक्ब। भजन संग्रह ६७:७
- 10 गे रू नेल्ल ब्वाक्कुम जिप्पाइक्तीनी। मेको कली थेल्लीनी। रेउ यिपाइशशा, मेको कली मार मार वापाइक्ब सेल्लनीनी। मिनु मेकेर सिशशो अन्न कली आसीक गेनीनी। भजन संग्रह १०४:१३-१६
- 11 गे इन गेना हना यो दाक्तीकेमी शुश अन्न ग्रेल्ल सेल्लतीनी। इन बगी मारेड मारेडम ब्रीशो बाक्नीम।
- 12 गोरशो रागी डा बी ब्यफ योव्रतीके गिग दुम्नीम। पहाड थाम्पा ग्येरसीशो बाक्नीम।
- 13 योव्रतीके नेल्ल क्यारश भेडापुकीमी ब्रीशो बाक्नीम। दिमपुकी अन्नमी सुम्सीशो बाक्नीम। मेकोपुकी शुश ग्येरसीशा कुम्सो पाइनीम।

## 66

परमप्रभु वारच पाइब बाक्ब  
कुम्सो पपाइक्ब कली कुम्सो का।

- 1 ए रागी डा मुर नेल्ले, ग्येरशा परमप्रभु कली कुम्सो पने।
- 2 गे परमप्रभु कली “इन नें ठेयब बाक्ब” दे कुम्सो पने। मेको कली रिम्शो कुम्सो पने।
- 3 मिनु परमप्रभु कली “इन गेय ठेयब नु हिंचा डा बाक्नीमी। इन जोरी सनु इन डोंडती हिंशा, खिंखि पा बाप्नीम। मारदे हना इन सक्ति थम ठेयब बाक्ब” देनीन।
- 4 रागी डा मुर नेल्ल इन डोंडती बाप्नीम। मेकोपुकीमी इन कली ठेयब सेल्शा, कुम्सो पाइनीम। मिनु इन नें कली ठेयब सेल्शा, कुम्सो पाइनीम। ठेयब सेंदा पा।
- 5 जाक्कीन, परमप्रभु आ गेय कोवडीन। मेकोमी मुर आन दातेमी ठेयब नु हिंचा डा गेय पाप्तु।
- 6 मेकोमी समुन्द्रम सोत्रशो लां सेल्लु। मुरपुकी सोत्रशो लांम गाक्शा, खोला शोक्साक्म। मेकेर गो मेको आ पर्वम ग्येरसाक्क। प्रस्थान १४:२१-२२; यहोसु ३:१६-१७
- 7 मेकोमी आ सक्तिमी गेना हना यो सासन पाइब। मेकोमी रागी रागी आन कली कोवब। मेको कली मटीब ठेयब मलेम्मल। ठेयब सेंदा पा।
- 8 जात जात डा मुरपुकी, आंइ परमप्रभु कली ठेयब सेलीन। मेको कली ठेयब सेल्शो लोव्र नेंसेक्ल।
- 9 मेकोमी आंइ कली बेक्चा रे प्रोंडतु। आंइ कली ग्रेक्चा मगेव।
- 10 मारदे हना परमप्रभु, गे आंइ कली नाक्ताक्नी। गे आंइ कली चांदी यपाइश्शो खोदेशो पा यपाइक्तीनी। हितोपदेस १७:३
- 11 गे आंइ कली जेल्खानम चोक्पाइक्तीनी। मिनु हेल्शो भारी कुरपाइक्तीनी।
- 12 गे मुर आन कली आंइ पियाम थेक्पाइक्तीनी। गो मी नु ब्वाक्कुम गाक्तक। तन्न गे आंइ कली ठेयब रागीम चाक्तीनी। यसैया ४३:२
- 13 गो इन खिंमी चोशा चढ़ेचा कली जाक्नुड। मिनु आं पशो कसम खाप्नुड।
- 14 गो श्येत जडानु, कसम जाता। मिनु मुल खाप्नुड।
- 15 गो इन कली दोम्शो बस्तु चढ़ेनुड। गो बोका चढ़ेनुड। गो ब्यफपुकी नु क्यारश चढ़ेनुड। ठेयब सेंदा पा।
- 16 परमप्रभु कली मान पा हिंबपुकी, नेल्ल जाक्शा नेनीन। मेकोमी आं पर्वम मार पवा, मेको गो इन कली शेंनुड।
- 17 गो मेको कली ठेयब सेंदा पा पुडता। गो मेको कली ठेयब सेल्ला।
- 18 आं थुंमी पाप बाक्शो हना, परमप्रभुमी आं लोव्र मनेन वा। हितोपदेस २८:९
- 19 तन्न परमप्रभुमी आं लोव्र थमा पा नेंतु। मेकोमी आं पुंडशो लोव्र नेंतु।
- 20 परमप्रभु ठेयब बाक्ल। मारदे हना मेकोमी आं पुंडशो लोव्र गेती। मिनु आं कली गेना हना यो दाक्ब।

## 67

- “रिम्शो पाइतीनी” दे कुम्सो पशो  
कुम्सो पपाइक्ब कली तार पाइश्शो ताप्तीके ताप्शा पतीक कुम्सो।
- 1 परमप्रभुमी इं कली शिशी पा आसीक गेवल। मिनु इं कली आ शिशी कोइदल। ठेयब सेंदा पा गन्ती ६:२४-२५
  - 2 रागी रागी डा मुरपुकीमी इन लां नु इन प्रोंडतीक सक्ति तुडक्तमेक्ल।
  - 3 परमप्रभु, जात जात डा मुरपुकीमी इन कली ठेयब सेल्मेक्ल। मिनु मुर नेल्लेमी इन कली ठेयब सेल्मेक्ल।
  - 4 रागी रागी डा मुरपुकी ग्येरशा सोम्शा, कुम्सो पामेक्ल। मारदे हना गे जात जात डा मुर आन कली कुल मकोव्रथु निसाफ पाइनीनी। मिनु रागी रागी डा मुर आन कली इन लां कोइनीनी। ठेयब सेंदा पा।
  - 5 परमप्रभु, जात जात डा मुरपुकीमी इन कली ठेयब सेल्मेक्ल। मिनु जात जात डा मुर नेल्लेमी इन कली ठेयब सेल्मेक्ल।
  - 6 मिनु रूम अन्न खेल्ब। इं परमप्रभुमी इं कली आसीक गेब। भजन संग्रह ६५:१०
  - 7 परमप्रभुम, इं कली आसीक गेना गेन बाक्ब। मिनु रागी डा मुर नेल्ले मेको कली मान पा हिंनीम।

## 68

- परमप्रभु कली कुम्सो पशो  
कुम्सो पपाइक्ब कली दाऊद आ कुम्सो।
- 1 परमप्रभु बोक्ब। मिनु आ जोरी सनु ब्रशा, आ डोंडती रे प्रोक्नीम। गन्ती १०:३५
  - 2 दोपा फशेमी कुन बेरपाइश्शा योल्बा, मोपा मेको आन कली बेरपाइश्शा योल्पतीन। मी आ नेक्था मयीन यशो खोदेशो पा परमप्रभु आ अरेशो मटीबपुकी मेको आ डोंडती जाम्शा लाइनीम।
  - 3 तन्न ठीक पाइबपुकी परमप्रभु आ डोंडती ग्येरसमल। मेकोपुकी ग्येरशा सोम्शा बाक्मल।
  - 4 परमप्रभु कली कुम्सो पने। मेको आ नें आ पर्वम कुम्सो पने। गोस्स तार गाक्ब कली ठेयब सेल्लतीक कुम्सो पने। मेको आ नें परमप्रभु यावे बाक्ब। गे मेको आ डोंडती ग्येरशा सोम्शा बाक्कीन। यसैया ५७:१४
  - 5 परमप्रभु आ बाक्तीकेमी बाक्शा, रोम रोडक्च आन आफ बाक्ब। वोंडश बेक्शो मीश मुर आन कली वारच पाइब यो बाक्ब। भजन संग्रह १०:१४



- 6 परमप्रभुमी आ का ला बाक्शो मुर कली बाक्तीक खिं गेब। मेकोमी चोक्सीशो आन कली प्रोइशा रिम्शो सेल्ब। तन्न मटीबपुकी चहिं नांम दुष्शा सोत्रशो रागीम बाक्चा माल्नीम।
- 7 परमप्रभु, गे इन मुर आन डोंडोइती गाक्तीनी। गे मेको आन कली गोरशो रागीम खुल्नीनी। ठेयब सेंदा पा।प्रस्थान १३:२१
- 8 परमप्रभु सीनैम बाक्ब। इस्राएली आन परमप्रभु आ डोंडती खिनु कुत। मिनु शुश रेउ यित। प्रस्थान १९:१६-१८
- 9 परमप्रभु, गे ठेयब रेउ यिपाइक्तीनी। इन सोत्रने थुम्शो रागी जिप्पाइक्तीनी।
- 10 इन मुर आन कली मेको रागीम बाक्पाइक्तीनी। मिनु गे, परमप्रभु, इन दाक्तीकेमी श्येत जाइब आन कली थुल्तीनी।
- 11 परमप्रभुमी आ लोत्र नेंपाइक्तु। मिनु मेको लोत्र शेंब मीश मुर शुश दुम्तेक्म। यसैया ५२:७
- 12 लडाइ पाइब आन पिप हिंशा दाम दाम पा प्रोक्नीम। मिनु मीश मुरपुकीमी मेको प्रोक्ब आन प्रोइशो मारेइ मारेइ योक्सीनीम।
- 13 गे चहिं भेडा आन दातेमी इप्चा दाक्नीनी? चांदीम गिल्शो फ्रां पाइश्शो डुकुर बाक्ब। मिनु आ ओफलापुकी टल्केशो सुनमी गिल्शो बाक्नीम।
- 14 मिनु नेल्ल क्येडा सक्ति पाइश्शोमी पिप आन कली ब्रपाइक्ची ना सल्मोन डांडामी फुं यिपाइक्तु। न्यायाधीस ५:१६
- 15 बाशान डा डांडा परमप्रभु आ डांडा बाक्ब। मेको थम ठेयब बाक्ब। मेकेर डांडा शुश बाक्नीम।
- 16 गे शुश डांडा पाइश्शो पहाड, मारदे गे परमप्रभु आ सासन पचा कली योत्रशो डांडा गे कोत्रशा, गेहे पाइनीनी? मेकेर परमप्रभु गेना हना यो बाक्ब। भजन संग्रह १३२:१३
- 17 परमप्रभु आ बग्गी हजार हजार क्येडा शुश बाक्नीम। मिनु परमप्रभु सीने रे आ बाक्तीकेम जाक्शो बाक्ब।
- 18 गे इर डोइश्शा लाइतीनी। ग्याइश्शो मुर आन कली लाइक्तीनी। मुर आन दातेमी गे मारेइ मारेइ ताइतीनी। डोंडती मटीब आन दातेमी यो ताइतीनी। परमप्रभु यावे मेकेर बाक्ब। एफिसी ४:८-१०
- 19 परमप्रभु कली नाक्त किंत किंत ठेयब सेल्मेक्ल। मेको आंइ श्येत कुरशा, आंइ जोरी सत्रु रे प्रोंइब बाक्ब। ठेयब सेंदा पा।१कोरिन्थी १०:१३
- 20 आंइ परमप्रभु श्येत रे प्रोंइब बाक्ब। मिनु परमप्रभु यावेमी बेक्चा रे प्रोंइब।
- 21 परमप्रभुमी थमा पा आ जोरी सत्रु आन पिया प्रोल्ब। मेको मुर आन चां पाइश्शो पिया पापम ब्रीशो बाक्ब।
- 22 मिनु परमप्रभुमी “गो मेको आन कली बाशान रे चाक्नुडमी। मेको आन कली समुन्द्र आगा रे गुंनुडमी।
- 23 गेपुकीमी इन खोइली इन जोरी सत्रु आन हुशेम खुम्नीनी। मिनु इन कुचुमपुकीमी यो आन भाग ताइनीम” देत।
- 24 परमप्रभु, मुरपुकीमी इन कली ताइनीम। आं परमप्रभु, आं पिप कली आ बाक्तीकेम लशो ताइनीम। भजन संग्रह २४:७; २सामुएल ६:१३-१५
- 25 डोंडोइती कुम्सो पाइबपुकी गाक्नीम। मेको आन नोले मार मार ताप्बपुकी गाक्नीम। मिनु मेको आन एर ओंथ खैजडी ताप्ब मीश आलपुकी गाक्नीम। प्रस्थान १५:२०
- 26 परमप्रभु कली गुम्तीकेमी ठेयब सेलीन। परमप्रभु यावे कली इस्राएली आन गुम्तीकेमी ठेयब सेलीन। यसैया ४८:१
- 27 नेल्ल क्येडा आइक्च थर बेन्यामीन आ खिं डा मुरपुकीमी मेको आन कली लां कोइनीम। यहूदा आ थर डा ठेयब मुर, जबूलून आ थर नु नाप्ताली आ थर डा ठेयब मुर मेको हुलम बाक्नीम।
- 28 परमप्रभु इन सक्ति कोइदीन। डोंडती पशो खोदेशो पा परमप्रभु, इन सक्ति कोइदीन।
- 29 मिनु पिपपुकीमी इन कली यरूसलेम डा इन खिं आ पर्बम मार मार चाक्नीम। भजन संग्रह ७२:१०
- 30 बुदी मीलु आन दातेम बाक्ब जन्तु खोदेशो मुर आन कली हुइक्तीन। जात जात डा बाछा आन दातेम बाक्ब ब्यफ खोदेशो मुर आन हुल कली खेरीन। मेकोपुकी बुमा नोले चांदी चाक्चा माल्नीम। लडाइ पचा दाक्ब जात जात डा मुर आन कली ब्रपतीन।
- 31 इजीप्त रे मुर जाक्नीम। एथीयोपीया डा मुरपुकी परमप्रभु कली जिम्मा गेंसीनीम। यसैया १८:७; यसैया १९:२१; यसैया ४५:१४ प्रेरित ८:२७
- 32 ए रागी डा राज्यपुकी, परमप्रभु कली कुम्सो पने। परमप्रभु यावे कली ठेयब सेल्तीक कुम्सो पने। ठेयब सेंदा पा।
- 33 परमप्रभु डोंडती रे स्वर्गम बाक्ब। मेको आ सेंदा बुंबु पशो खोदेशो सक्ति पाइश्शो बाक्ब।
- 34 परमप्रभु सक्ति पाइश्शो बाक्ब। मेको कली इस्राएलीम मान पाइनीम। मेको आ सक्ति सरीडम बाक्ब।
- 35 परमप्रभु, इन बाक्तीकेमी हिंचा डा बाक्नीनी। इस्राएली आन परमप्रभुम आ मुर आन कली सक्ति नु बोल गेब। परमप्रभु ठेयब बाक्ब।

## 69

“वारच पने” दे पुंइशो

कुम्सो पपाइक्ब कली लिली फू आ लायो। दाऊद आ कुम्सो।

1 “परमप्रभु, आं कली श्येत रे प्रोंइयीनी। मारदे हना ब्वाक्कु आं शुर सम्म जाक्शो बाक्ब।

2 गो थेक्तीक मबाक्शो हिलो आगाम गुम्ना गुम्न बाक्नुड। शुश लुक्च लशो ब्वाक्कुमी गुम्ना गुम्न बाक्नुड। आं एर ओंथ ब्वाक्कु ला बाक्ब।

3 गो ‘वारच पने’ दे प्रवा किवा पा दती। आं सेंदा सोत्रती। आं परमप्रभु कली मालशा आं मिक्च ब्रात्रा दुम्ती।

4 आं कली मोशा काइ मदाकबपुकी आं चां क्येडा यो शुश बाक्नीम। मिनु मेकोपुकी मोशा आं जोरी सत्रु दुम्शो बाक्नीम। मेकोपुकीमी आं कली साइक्चा माल्शो बाक्नीम। आं मरोइश्शो मार मार थोव्रक, मेकोपुकीमी 'लेत्तो' देंनीम। यूहन्ना १५:२५

5 परमप्रभु, गे आं दूली पशो तुइश्शो बाक्नीनी। आं दोस इन डोंइती मखुइश्शो बाक्ब।

6 इन कली आस पाइबपुकी आं पतीके मुने मदोक्मल। परमप्रभु, मुर नेल्ल आन परमप्रभु यावे, इन कली माल्बपुकी आं पतीके मुने मदोक्मल। गे इस्साएली आन परमप्रभु बाक्नीनी।

7 गो इन परबंम शुक्शी पाइक्चा पुंडसीनुड। मिनु मुनेमी आं कुल सुम्सीशो बाक्नुड। भजन संग्रह ४४:२३

8 गो आं लोकब आन दातेमी मतुइश्शो मुर खोदेशो दुम्शो बाक्नुड। गो आं ममा आ तौ आंइ दातेमी अर्को रागी डा मुर खोदेशो दुम्ती। भजन संग्रह ३८:१२

9 मारदे हना इन खिं कली दाक्तीके नाक्त् कित कित आं डोंइती बाक्ब। इन कली पशो शुक्शी आं कली दुम्त्। भजन संग्रह ११९:१३९; यूहन्ना २:१७; रोमी १५:३

10 गो डाक्शा, माइजा बाक्डानु, मुरपुकीमी रिताक्कीमी।

11 गो भाडग्रा फेक्सीडानु, मुरपुकीमी आं कली शुक्शी पाइक्तीमी।

12 ठेयब लाप्चोम बाक्बपुकीमी आं कली शुक्शी पाइनीम। दुक्शो मुरपुकीमी आं परबंम कुम्सो पाइनीम। अय्युब ३०:९

13 तन्न परमप्रभु यावे, गो इन कली इन शिशो पाइक्ची ना लोत्र पाइनुड। इन गेना हना यो दाक्तीकेमी आं पुंडशो श्येत रे प्रोंइतीके गेयीनी। परमप्रभु आं कली लोत्र लेत्तीनी। यसैया ४९:८

14 आं कली हिलोमी गुम्तीक रे प्रोंइयीनी। आं कली गुम्चा मगेयीनी। आं कली काइ मदाकबपुकी रे प्रोंइयीनी। मेको बारशो ब्वाक्कु रे प्रोंइयीनी।

15 बारशो ब्वाक्कुम आं कली मसुम्पील। ब्वाक्कुम मयोल्दील। बेक्शो मुर आन बाक्तीकेमी आं कली मब्रेत्तील। उत्पत्ती २९:३

16 परमप्रभु यावे, इन गेना हना यो दाक्तीकेमी आं कली लोत्र लेत्तीनी। इन ठेयब शिशो आं गे लेत्तीन। गन्ती ६:२६

17 इन कुल इन गेय पाइब रे मखुइक्तीन। गो श्येत जशो बाक्नुड। आं कली रीब पा लोत्र लेत्तीनी।

18 आं नेक्था जाक्कीन। मिनु आं कली प्रोंइयीनी। आं जोरी सत्रु रे आं कली प्रोंइयीनी।

19 मुरपुकीमी आं परबंम दोपा रिक्तीमी, मुने तोक्कीमी नु शुक्शी पाइय्यीमी, गे मेको नेल्ल तुइक्नीनी। आं जोरी सत्रु नेल्ल इन डोंइती बाक्नीम।

20 आं कली रिश्शा कोव्रशो आ परबंम आं थुं जिक्शो बाक्ब। मिनु गो मारोइ पने मचाप्ब दुम्शो बाक्ती। आं कली शिशो पाइब 'सुइ बाक्मा को' दे कोव्रता, तन्न सुइ मबाक्म। लेम्ब यो सुइ मबाक्म।

21 मेकोपुकीमी आं जचा थोव्रकमी खाइल कुर पा गेतीमी। गो तूतू दाक्डानु, ग्युरशो तूचा थोव्रक गेतीमी। मत्ती २७:३६, ४८

22 मेको आन जचा थोव्रक आन ब्वारद दुम्ल्। मेको आन कली वारच पाइब आन बेक्तीक दुम्ल्। रोमी ११:९-१०

23 मेको आन मिक्ची ब्राब्रा दुम्शा, मताइब दुम्मल। मेको आन ची गेना हना यो गुर ब्वेशो दुम्ल्।

24 गे इन गाइक्चा मेको आन कली मोइक्तीन। इन गाइश्शो मेको आन कली दुम्ल्।

25 मेको आन बाक्तीके श्येत्थ दुम्ल्। मेको आन ताम्बुम सुइ मलीमल। प्रेरित १:२०

26 मारदे हना इन तुप्शो मुर कली खेदा पाइनीम। मेकोपुकीमी इन खाइक्पाइश्शो मुर आन कली लडाइ तोइनीम।

27 मेको आन ठीक मपतीकेम ठीक मपतीक तेम्दीन। मेकोपुकीम इन पाप रे प्रोंइतीके मतामेक्ल।

28 ब्रोंइतीक किताब रे मेको आन नें क्याम्सेक्ल। ठीक पाइब आन नें ब्रेक्शो किताबमी मेको आन नें मबाक्ल। प्रस्थान ३२:३२-३३; दानीएल १२:१; लूका १०:२०; फिलिप्पी ४:३

29 परमप्रभु, गो श्येत जशा, रोइ पशो बाक्नुड। इन प्रोंइतीकेमी आं कली खाल पयील" दे परमप्रभु कली लोत्र पाता।

30 गो कुम्सो पा, परमप्रभु आ नें ठेयब सेल्नुड। "गे रिश्शो पाइब बाक्नीनी" दे मेको कली ठेयब सेल्नुड।

31 मार मार क्योरशा, चढेशो क्येडा एको कुम्सो नेशा, परमप्रभु यावे ग्येरसीब। प्रोत्र नु गेंच पाइश्शो ब्यफ चढेशो क्येडा यो शुश ग्येरसीब। भजन संग्रह ५०:८-१३

32 दिक्चा पुंडसीशो मुरपुकी मेको तशा ग्येरसीनीम। परमप्रभु यावे कली माल्बपुकी, इन थुं ग्येत्थ लुक्च मदुम्ल्।

33 परमप्रभु यावेमी वूडग आन पुंडशो नेंब। मिनु ग्याइक्चा पुंडसीशो आ मुर आन कली आइक्च ममिम्ब।

34 सरीड नु रागीमी मेको कली ठेयब सेल्सेक्ल। समुन्द्र नु मेकेर बाक्शो नेल्लेमी मेको कली ठेयब सेल्मेक्ल।

35 मारदे हना परमप्रभुमी सियोन कली प्रोंइब। मिनु यहूदा डा सहरपुकी लेंशा सेल्ब। मिनु मुरपुकी मेकेर बाक्शा, मेको आन के दुम्ब।

36 मिनु मेको आ गेय पाइब आन आल आन के यो दुम्ब। मेको आ नें दाक्बपुकी मेकेर बाक्नीम।

## 70

“आं कली राइक्तीनी” दे पुंडशो

कुम्सो पपाइक्ब कली मिम्पाइक्चा कली दाऊद आ कुम्सो। भजन संग्रह ४०:१४-१८

1 “परमप्रभु, आं कली राइक्चा कली रीब पा जाक्कीन। परमप्रभु यावे आं कली वारच पचा कली रीब पा जाक्कीन।

- 2 आं कली साइक्या मालबपुकी मुने दोक्शा, वाम ग्याम दुम्मल। आं कली मरिम्शो दुम्शो दाकबपुकी प्रोक्शा, टेयब मुने दोक्मल।  
 3 मिनु सुमी आं पर्वम 'ठीक दुम्त!' देमा, मेको मुने पा लल गोगो जिमल।  
 4 तन्न सु सुमी इन कली माल्नीमी, मेकोपुकी इन पर्वम ग्येरशा सोम्शा बाक्मल। सु सुमी इन पाप रे प्रोंइतीक दाक्नीमी, मेकोपुकीमी गेना हना यो 'परमप्रभु टेयब बाक्ब' देमल।  
 5 गो पुडग नु श्येत जाइब बाक्ती हना यो, परमप्रभु रीब पा आं बाक्तीक जाक्कीन। गे आं कली वारच पाइब नु आं कली राइक्ब बाक्नीनी। परमप्रभु यावे, रीब पा जाक्कीन" दे पुंडता।

## 71

- खाल्पा दुम्शो ना डा पुंडशो  
 1 परमप्रभु यावे, गो इन कली जिम्मा गेंसीशो बाक्नुड। गो गेनायो मुने मदोक्डल।  
 2 इन ठीक पतीकेम आं कली राइश्शा प्रोंइयीनी। आं लोत्र नेशा, आं कली प्रोंइयीनी।  
 3 आं प्रोक्शा लशा खुइश्शा बाक्तीके सेरथे फुल्लु दुमीन। गे आं कली प्रोंइया कली ब्रोंइशा बाक्तीक दरवार बाक्नीनी। मारदे हना गे आं सेरथे फुल्लु नु आं ब्रोंइशा बाक्तीक दरवार बाक्नीनी। भजन संग्रह ३१:३-४  
 4 आं परमप्रभु, गे आं कली इन अरेशो मटीब आन गुड रे राइक्तीनी। ठीक मपाइब नु तुप्शा दिक्ब मुर आन गुड रे राइक्तीनी।  
 5 मारदे हना परमप्रभु यावे, गे आं आस बाक्नीनी। गो आ ठिटा दुम्डा रेन इन कली थमा सुइक्ता।  
 6 गो जरमेसीडा रेन इन कली थमा सुइक्ता। गे आं ममा आ कोत्रज रेन आं कली कोत्रब बाक्तीनी। गो इन कली गेना हना यो टेयब सेल्लुड।  
 7 शुश मुरपुकीमी आं कली तशा "परमप्रभुमी मेको कली ताइक्ताक्ब" दे मिन्नीम। तन्न गे आं खुइश्शा बाक्तीक बाक्नीनी।  
 8 गो इन कली गेना हना यो टेयब सेल्लुड। गो नाक्तर रे इन नें टेयब सेल्लुड।  
 9 गो खूशो दुम्डानु, आं कली मप्रोंइयीनी। आं सक्ति जाम्मेनु यो आं कली मप्रोंइयीनी।  
 10 मारदे हना आं जोरी सत्रुमी आं पर्वम मरिम्शो लोत्र पाइनीम। आं कली साइक्या मालबपुकीमी लोत्र गारपाइक्नीम।  
 11 मेकोपुकीमी "परमप्रभुमी मेको कली वारच पचा प्रोंइशो बाक्ब। मेको कली खेदा पा ग्याइक्तय। मारदे हना मेको कली राइक्ब सुड मबाक्नीम" देंनीम।  
 12 परमप्रभु, आं क्येडा डोन मबाक्कीन। आं परमप्रभु, आं कली राइक्या कली रीब पा जाक्कीन।  
 13 आं कली दोस गेबपुकी मुने दोक्शा खतम दुम्मल। आं कली साइक्या मालबपुकी तोक्शा लोत्र पाइक्का, शुक्शी पाइक्का नु आइक्च सेल्चा पुंडसमल।  
 14 तन्न गो चिहं इन कली आस पस डा पस बाक्नुड। गो इन कली डोंइती क्येडा टेयब सेल्लुड।  
 15 गो इन ठीक पतीके आ पर्वम लोत्र पाइनुड। गे आं कली गिश खेयप प्रोंइयीनी, मतुडक्ताक्ड हना यो, गो इन श्येत रे प्रोंइतीके आ पर्वम नाक्तर रे लोत्र पाइनुड।  
 16 परमप्रभु, गो इन सक्ति पाइश्शो गेय आ पर्वम शेंना शेंन गाक्नुड। मिनु इन ठीक पतीके आ पर्वम इन कली टेयब सेल्लुड।  
 17 परमप्रभु, गो ठिटा बाक्डा रेन, गे आं कली शेंताक्यीनी। मिनु गो मुल सम्म इन छक लाक्का डा गेय आ पर्वम लोत्र पाइनुड।  
 18 परमप्रभु, गो खूशो दुम्शा, आं चां बोइक्म सम्म यो, आं कली मप्रोंइयीनी। मिनु गो आं नोले डा पाला डा मुर आन कली इन सक्ति नु इन ठीक पतीके आ पर्वम शेंनुड। यसैया ४६:४  
 19 मिनु इन ठीक पतीके टेयब दुम्शा, इर सरीड थीब। गे थम टेयब गेय पाइतीनी। परमप्रभु, इन खोदेंशो अरु सु बाक्नीमी डा?  
 20 गे आं कली शुश नु टेयब श्येत जपाइक्तीनी हना यो, लेंशा ब्रोंइचा गेनीनी। गे आं कली लुक्च लतीक रे लेंशा ग्येत्थ लपाइक्तीनी। १ सामुएल २:६  
 21 गे आं कली लेंशा मान ताइब सेल्शा लेम्नीनी।  
 22 आं परमप्रभु, गो इन दाक्शा गेनायो मप्रोंइतीके आ पर्वम टेयब तार पाइश्शो ताप्तीके ताप्शा, टेयब सेल्लुड। गे इस्राएली आन का ला परमप्रभु बाक्नीनी। गो बीना ताप्शा इन कली कुम्सो पाइनुड। गे इस्राएली आन का ला परमप्रभु बाक्नीनी। २राजा १९:२२; यसैया ४३:३  
 23 गे आं कली श्येत रे प्रोंइब बाक्तीनी। मोपतीके गो ग्येरशा सोम्शा इन कली कुम्सो पा टेयब सेल्लुड।  
 24 गो इन ठीक पतीके आ पर्वम नाक्तर रे लोत्र पाइनुड। मारदे हना आं कली खती पचा मालबपुकी मुने दोक्शा, मार पचा ना मार पचा दुम्तेक्म।

## 72

पिप आ पर्वम पुंडशो  
 सोलोमन आ कुम्सो।

- 1 परमप्रभु, पिप कली इन निसाफ डा लोत्र गेने। पिप आ तौ कली इन ठीक पतीके गेने।

- 2 मेकोमी इन मुर आन कली ठीक पतीकेमी निसाफ पवल। इन पुडग मुर आन कली ठीक पा निसाफ पवल।
- 3 मोदेशो ठीक पतीके तशा, डांडा नु पहाड डा रूपुकी अन्न ग्रेलब दुम्मल।
- 4 मेकोमी मुर आन दातेमी पुडग आन कली कोव्रडल। मिनु श्येत जाइब आन तमी तौ आन कली प्रोनल। मेकोमी दिप्व आन कली खतम पोकागल।
- 5 नां तास्ला बाक्सा सम्म नु मुर नेल्ल आन पाला सम्म मेको ब्रोंडशा बाक्ल।
- 6 मिनु मेको घांस रिक्शो दिंममी रेउ यिश्नो खोदेशो दुम्मल। रेउमी रागी कली जिप्पाइश्नो खोदेशो दुम्मल।
- 7 मेको आ पालामी मुर आन दातेमी ठीक पतीके ठेयब दुम्मल। मिनु तास्ला लीम सम्म मुर आन थुं नाइक्तीक दुम्मल।
- 8 मेकोमी समुन्द्र कारे अर्को समुन्द्र सम्म नु ठेयब खोला रे रागी आ सुर सम्म सासन पवल। जकरिया ९:१०
- 9 गोरशो रागी डा मुरपुकी मेको आ डोंडती बाम्मल। मिनु आ जोरी सयुमी फुरक तुक्कामेक्ल।
- 10 टारशीश नु डोन डा टापु डा पिपपुकीमी मेको कली तिरो थाप्टमेक्ल। शेबा नु सेबा डा पिपपुकीमी मेको कली कोसेली चाक्कामेक्ल। यसैया ६०:९; भजन संग्रह ६८:३०; १राजा १०:१-२
- 11 पिप नेल्ल मेको आ डोंडती बाम्मल। मिनु रागी रागी डा मुर नेल्लेमी मेको कली गेय पामेक्ल।
- 12 मारदे हना मेकोमी आ कली पुंडब श्येत जाइब आन कली प्रोंडब। वारच पाइब मबाक्शो पुडग आन कली वारच पाइब। अय्युब ३६:१५
- 13 मचाप्व नु श्येत जाइब आन कली शिशी पाइब। मेकोमी पुडग आन कली साइक्तीक रे प्रोंडब।
- 14 मेको आन कली दिप्टीक नु हुश खाक्श पोक्तीक रे प्रोंडब। मारदे हना मेको आ डोंडती हिक्कीशो बाक्नीम। भजन संग्रह ९:१३; भजन संग्रह ११६:१५
- 15 मेको शुश नाक्त ब्रोंडल। शेबा डा सुन मेको कली चाक्कामेक्ल। मुरपुकीमी मेको आ पबंम प्रार्थना पस डा पस पामेक्ल। नाक्त रे मेको कली आसीक गेमेक्ल।
- 16 मिनु रागी शुश अन्नम ब्रील। डांडा तार यो अन्न ग्रेल्ल। मिनु फल फुल लेबानोन डा खोदेशो पा सिल्ल। सहरम बाक्ब मुर घांस खोदेशो पा सोशा बोशा शुश दुम्मल।
- 17 मेको आ नें गेना हना यो लील। नां बाक्म सम्म आ नें ठेयब बाक्ल। रागी रागी डा मुर नेल्लेम मेको रे पा आसीक तामेक्ल। मिनु मेकोपुकीमी मेको आ पबंम “ग्येरसीशो मुर बाक्ब” देंमल। उत्पती १२:३; उत्पती २२:१८
- 18 परमप्रभु, परमप्रभु यावे, इस्राएली आन परमप्रभु ठेयब बाक्ब। मेकोमी ला छक लाक्का डा गेय पाइब। भजन संग्रह ४१:१४
- 19 मेको आ नें गेना हना यो ठेयब बाक्ब। रागी नेल्ल आ सक्तिमी ब्रील। आमेन, मेको थमा बाक्ब। यसैया ६:३
- 20 येस्से आ तौ दाऊद आ प्रार्थना एकोन बाक्नीम।

## 73

“परमप्रभु, गो इन मुर नड” देशो  
आसाफ आ कुम्सो।

- 1 परमप्रभु इस्राएल डा मुर आन कली थमा पा रिम्शो पाइब बाक्ब। आन पाप क्याम्चा पुंडसीशा, रिम्शो थुं पाइश्नो आन कली रिम्शो पाइब बाक्ब। अय्युब २१:७
- 2 तन्न गो ग्रेक्शा, आं थेक्तीक साम्चा चिक्शो बाक्ती।
- 3 मारदे हना गो परमप्रभु आ अरेशो मटीब आन रिम्शो दुम्शो तशा नु मेको आन ठेयब लेश्नो तशा, गेहे पाता।
- 4 मेको आन कली श्येत मबाक्ब। मेकोपुकी रोड मपशो नु बोल्यो बाक्नीम।
- 5 मेकोपुकी अरुपुकीम खोदेशो पा श्येत मजाइनीम। मेकोपुकी अरु खोदेशो पा श्येत मदुम्नीम।
- 6 मोपतीके ठेयब लेत्तीके मेको आन माला खोदेशो दुम्ब। आन दिप्शा हुश खाक्श पोक्तीके आन फेक्तीक वा खोदेशो दुम्ब।
- 7 मेको आन खकटा थुंम मरिम्शो पतीके बाक्ब। मेको आन थुं डा मरिम्शो पतीके मिम्शा, मिम्ने मजाप्शो बाक्ब।
- 8 मेकोपुकीमी शुक्शी पा मरिम्शो लोत्र पाइनीम। मिनु आन ठेयब लेत्तीकेमी मुर आन कली हिंच कोंडनीम।
- 9 मेकोपुकीमी “स्वर्ग नेल्ल आंड के बाक्ब” देंनीम। मिनु रागी नेल्ल आंम के सेल्नीम।
- 10 मोपतीके मुरपुकी मेको आन गे लेत्नीम। मिनु आन लोत्र थमा सुइश्शा आन नोले खोइश्शा मेको आन कली ठेयब सेल्नीम।
- 11 मिनु मेकोपुकीमी “परमप्रभुमी दोपा तुइक्का डा? मार मेको नेल्ल क्येडा ठेयब तुइक्क बाक्का डा?” देंनीम। भजन संग्रह १०:११
- 12 परमप्रभु आ अरेशो मटीबपुकी मोदेशो बाक्नीम। मेकोपुकी महिंथु, क्येत चेम्ना चेम्न बाक्नीम।
- 13 गो आयेसो ला रिम्शो थुं पाइश्नो दुम्डा बाक्त। मिनु मोशा दोस मताइब दुम्डा बाक्त। मलाकी ३:१४
- 14 गो नाक्त रे हिंचा डा श्येत जाता। मिनु सुनी कुस कुस सजाइ ताता।
- 15 गो मेको आन खोदेशो पाता हना, गो इन मुर आन कली मरिम्शो पदुमी वा।
- 16 गो एको नेल्ल रुप्चा माल्ता, आं कली थम श्येत दुम्त।
- 17 मिनु गो परमप्रभु आ खिं ओव्वती। मेना गो मेको आन कली नोले मार दुम्बा, मेको नेल्ल तुइक्काक्ड।
- 18 गे मेको आन कली थमा पा ग्रेक्तीके लांम गाक्पाइक्नीनी। गे मेको आन कली खतम पोक्नीनी।
- 19 मेको मतुइक्थु रीब पा खतम दुम्नीम। मेकोपुकी हित्तीकेमी योल्चा पुंडसीशो बाक्नीम।

- 20 दोपा मुरपुकी सुनी सेंसीमानु, डोमो पशा, थमा ममाड, दे तुडक्नीमी, मोपा परमप्रभु, गे बोक्ची ना मेको आन कली क्याम्नीनी।
- 21 डोंडती आ थुं लुक्च लशा, कशो दुम्शो बाक्त।
- 22 गो ममिम्ब नु मारेड मतुडक्ब बाक्ती। इन डोंडती जन्तु खोदेशो बाक्ती।
- 23 मो हना यो गो गेना हना यो गे नु काथा बाक्नुड। गे आं ग्युरा गुड ग्याडशो बाक्नीनी। रोमी ८:३५-३९
- 24 गे आं कली इन लोत्रमी लां कोंडनीनी। मिनु नोले गे आं कली छेडछेडम ताक्नीनी। भजन संग्रह ४९:१६
- 25 स्वर्गम इन डा लाक्शा, अरु आं के सु बाक्नीमी डा? रागीमी यो आं माल्शो इन डा लाक्शा अरु सुड मबाक्नीम।
- 26 आं रां नु आं थुं निम्फा ग्येत्थ लुक्च दुम्शो बाक्नीस। तन्न परमप्रभु गेना हना यो आं सक्ति नु आं भाग बाक्ब। भजन संग्रह १६:५
- 27 इन क्येडा डोन बाक्बपुकी थमा पा जाम्शा लाडनीम। गे इन क्येडा नोले शोंडसीशो नेल्ल आन कली खतम पोक्नीनी।
- 28 तन्न गो चहिं परमप्रभु आ नेक्था बाक्चा दाक्नुड। परमप्रभु यावे आं प्रोक्शा लशा बाक्तीक बाक्ब। गो इन पशो गेय नेल्ल आन पबर्म लोत्र पाडनुड।

## 74

“श्येत रे प्रोंडयीकी” दे पुडशो

शेंतीक कुम्सो। आसाफ आ कुम्सो।

- 1 परमप्रभु, गे मारदे आंइ कली मदाक्थु, गेना हना यो प्रोंडनीनी? इन भेडा आन कली तशा मारदे गाडक्नीनी?
- 2 साड इन ग्याप्शो मुर आन कली मिम्तीन। इन के सेल्चा कली श्येत रे प्रोंडशो मुर आन कली मिम्तीन। गे इन बाक्तीक सियोन डांडा कली मिम्तीन। भजन संग्रह ७६:३
- 3 मिनु गे इन ब्रेशो खिं कली कोत्रथ लने। इन जोरी सत्रुमी इन खिं मोदेशो पा खतम पोक्तेक्म।
- 4 इन जोरी सत्रुमी इन बाक्तीक नेल्ल खतम पोक्तेक्म। मेकोपुकीमी मेकेर आन छेदर युक्ताक्मे।
- 5 मेकोपुकीमी रवा तिम्शा, नेल्ल श्येत्थ पोक्ब मुर खोदेशो पा पान्तेक्म।
- 6 मेकोपुकीमी ग्येत्थ डा लाप्चो डा बुटा आप्शो गारो डा शी नेल्ल आन खा नु घनमी खतम पोक्तेक्म।
- 7 मेकोपुकीमी इन खिं कली मी सुडक्ताक्म। रागीमी इन गुम्तीक खिं नेल्ल मी सुडशशा खतम सेल्लेक्म। २राजा २५:९
- 8 मेकोपुकीमी आन थुंमी “गो एको आन कली नेल्ल खतम पोक्नीकी” दैतेक्म। मेकोपुकीमी रागीम बाक्शो इन नैम बुक्तीके खिं नेल्ले मी सुडक्ताक्म।
- 9 गोपुकीमी मारेड छक लाक्चा डा गेय मतक। मुल परमप्रभु आ लोत्र पाडब सुड मलीम। गेना सम्म एको ओदेशो दुम्बा, गो सुडम मतुडक्नीकी।
- 10 परमप्रभु, इन जोरी सत्रुमी इन कली गेना सम्म शाक्नीमी? मार, जोरी सत्रुमी इन नें आ पबर्म गेना हना यो शुक्शी पस डा पस बाक्नीमी?
- 11 गे मारदे इन सक्ति मकोंडनीनी? इन गुड इन वा आगा रे गुंडदीन। मिनु मेको कली खतम पोक्कीन।
- 12 परमप्रभु, गे साड नेसी रे डा आं पिप बाक्नीनी। गे रागी रागी आन कली प्रोंडनीनी।
- 13 गे इन सक्तिमी समुन्द्र कली फ्राताक्नी। गे समुन्द्रमी बाक्ब ठेयब जन्तु आन पिया प्रोल्तीनी। भजन संग्रह १०४:६-८; प्रस्थान १४:२१-२२; यसेया २७:१
- 14 गे लेव्याथन आ पियापुकी प्रोल्तीनी। मिनु मेको कली गोरशो रागी डा जन्तु आन कली ब्वचा गेतीनी। अय्युब ४०:२५
- 15 ब्वाक्कु बुक्पाडक्ब नु खोल्सा सेल्ब गे बाक्नीनी। मिनु गे गेना हना यो यिस डा यिस बाक्ब ठेयब खोला आन कली सोत्रपाडक्तीनी।
- 16 नाक्दो इन के बाक्ब। मिनु नाक्ती यो इन के बाक्ब। गे नां नु तास्ला सेल्तीनी। भजन संग्रह १०४:१९
- 17 गे रागी रागी आन सांद वोडक्तीनी। गे हिंडु नु बर्खा सेल्तीनी।
- 18 परमप्रभु यावे इन जोरी सत्रुमी इन कली दोपा शाक्मे। मिनु इन कली मटीबपुकीमी दोपा इन नें आ पबर्म शुक्शी पामे? मेको मिम्तीन।
- 19 गे इन टुकुर ब्वाकी डा जन्तु आन कली मगेने। गे इन श्येत जशो मुर आन कली गेना हना यो मिम्शा बाक्कीन।
- 20 गे इन कबल खपीन। मारदे हना रागी डा खुडक्तीके नेल्ले हिंतीके नु हुश खाक्श पतीकेमी ब्रीशो बाक्नीम।
- 21 दिप्चा पुंडसीब आन कली मुने दोक्चा मगेने। पुडग नु श्येत जाडबपुकीमी इन नें ठेयब सेल्मेक्ल।
- 22 परमप्रभु, बोक्कीन। मिनु इन पबर्म लडाइ पने। मटीबपुकीमी नाक्तर रे इन कली शाक्शो, मिम्तीन। भजन संग्रह १४:१-३
- 23 इन पबर्म दूली लोत्र पाडब आन रेयके नु इन जोरी सत्रु आन लडाइ पस डा पस पशो मप्रेदीन।

## 75

परमप्रभुमी निसाफ पशो

कुम्सो पपाडक्ब कली खतम मसेलो देशो कुम्सो आ लायो। आसाफ आ कुम्सो।

- 1 परमप्रभु, गो इन कली “गे आंइ कली रिम्शो पाडतीनी” देंनीकी। मारदे हना इन नें आ पबर्म नेशो बाक्नीकी। मुरपुकीमी इन छक लाक्चा डा गेय आ पबर्म लोत्र पना पन बाक्नीम। यसेया ४६:१३

- 2 गे “गो आं देशो नाक्ती गो ठीक निसाफ पाइब नड।
- 3 रागी रागीम खिनु कुमेनु, मुर नेल्ले खिंखि पाइनीम। तन्न रागी डा जग वोइक्ब गो नड” देतीनी। ठेयब सेंदा पा।
- 4 गे ठेयब लेशो आन कली “ठेयब लेशो मदुमीन” देशा, इन अरेशो मटीब आन कली “मबोरीन” देतीनी।
- 5 गे “स्वर्ग आ परबम ठेयब लोत्र मपने। मिनु इन शुर किरशा लोत्र मपने” देतीनी।
- 6 पूर्व, पच्छिम नु गोरशो रागी तेइ रे सुइमी मुर आन कली ठेयब सेल्ने मचाप्नीम।
- 7 तन्न परमप्रभुमी मुर आन कली निसाफ पाइब। मेकोमी का निक्शी आन कली दिप्ब, का निक्शी आन कली क्युक्ब।  
१सामुएल २:७
- 8 परमप्रभु यावे आ गुइमी बोटको का बाक्ब। मेकेर मार मार सुप्शो बोग्यो बोक्शो अडगुर शांबु बाक्ब। परमप्रभुमी मेको तूचा गेब। मिनु रागी रागी डा आ अरेशो मटीबपुकीमी मेको तूचा मालनीम। भजन संग्रह ६०:५; येरमीया २५:१५-१६
- 9 तन्न गो चहिं मुर आन दातेमी शुश ग्येरसीशो लोत्र पाइनुड। गो याकूब आ परमप्रभु कली ठेयब सेल्शा, कुम्सो पाइनुड।
- 10 गे इन अरेशो मटीब नेल्ल आन कली आइक्च सेल्नीनी। तन्न ठीक पाइबपुकी ठेयब सेल्चा पुंडसीनीम।

## 76

सक्ति पाइशो परमप्रभु यावेमी ग्राब

कुम्सो पपाइक्ब कली तार पाइशो ताप्तीके ताप्शा पतीके, आसाफ आ कुम्सो।

- 1 यहूदा आ रागीमी परमप्रभु कली तुइक्नीम। मेको आ नें इस्राएल रागीमी ठेयब बाक्ब।
- 2 आ ताम्बु सालेम सहरमी बाक्ब। आ बाक्तीके सियोनमी बाक्ब। भजन संग्रह १३२:१३
- 3 मेकोमी मेकेर ब्रशो ब्रापुकी, तेक्तीकपुकी, तरवार नु लडाड पतीक मारेड मारेड जिक्तीमी। ठेयब सेंदा पा। भजन संग्रह ४६:१०
- 4 गे छेडछेडमी नां खोदेशो तांडसीनीनी। गे गेना हना यो लीब पहाड क्येडा यो ठेयब बाक्नीनी।
- 5 महिब मुरपुकी रोइक्चा पुंडसाक्म। मेकोपुकी साइक्चा पुंडसाक्म। लडाड पाइब आन दातेमी कामी यो आन गुइ क्युक्ने मचबेम।
- 6 याकूब आ परमप्रभु, इन हुइशोमी शारा नु शारा डोइक्ब निम्फा बेक्ताक्स।
- 7 गे मान पा हिंचा माल्लो बाक्नीनी। गे गाइक्तीनीनु, इन डोंइती सु राप्ने चाप्बा डा?
- 8 गे स्वर्ग रे इन निसाफ नेंपाइक्तीनी। मिनु रागी हिंशा, सिक्सी पाप्तु। भजन संग्रह ४६:१; हबकुक् २:२०
- 9 मेना परमप्रभु, गे रागीम दिच्चा पुंडसीशो नेल्ल आन कली प्रोंइचा कली निसाफ पथ बोक्तीनी। ठेयब सेंदा पा।
- 10 थमा पा, मुर आन गाइक्तीकेमी इन कली ठेयब सेल्ब। मिनु इक्का लीशो गाइक्तीकेमी इन कली ठेयब सेल्ब।
- 11 परमप्रभु यावे, इन परमप्रभु आ नें थिशा कसम जशो खपीन। मेको आ नेक्शा बाक्ब नेल्लेमी मान पा हिंचा डा परमप्रभु कली कोसेली चाक्मेक्ल।
- 12 मेकोमी सासन पाइब आन ठेयब लेत्तीके फस पोक्ब। मेको रागी डा पिप आन कली हिंपाइक्ब बाक्ब।

## 77

श्येत दुम्मेनु, लेम्शो

कुम्सो पपाइक्ब शेंब येदुथून कली आसाफ आ कुम्सो।

- 1 गो परमप्रभु कली “वारच पाइय्नीनी। आं लोत्र नेनीन” दे ठेयब सेंदा पा ब्रेत्ती।
- 2 गो श्येत जडानु, परमप्रभु कली माल्ता। गो नाक्दो यो मदथु, परमप्रभु कली पुंडता। आं थुं खाइक्स डा खाइक्स बाक्त।
- 3 गो परमप्रभु कली मिम्ताक्ड, गो रोंका पाता। गो आं श्येत मिम्ता मिम्न बाक्ती। मिनु आं थुं लुक्च लत। ठेयब सेंदा पा।
- 4 “गे आं कली निन्द्रा पचा यो मगेनीनी। मिनु गो शुश श्येत जशा, ब्वाक्ने यो मचबु।
- 5 गो डोंइती डा नाक्त नु साइ डा बर्सपुकी मिम्ताक्ड। भजन संग्रह १४३:५
- 6 गो नाक्दो आं थुंमी रिम्शो बाक्बा देय मरिम्शो बाक्बा” दे मिम्स डा मिम्स बाक्ती।
- 7 मार, परमप्रभुमी गेनायो आं कली मब्राइबा? मिनु मेकोमी गेनायो शिरी मपाइबा?
- 8 मेको आ गेना हना यो दाक्तीक जाम्शो बाक्बा? मेको आ थोक्शा पशो लोत्र शोर गाक्शो दुम्शो बाक्बा?
- 9 मार, परमप्रभुमी शिरी पचा प्रेंशो बाक्बा? मेको गाइशशा, आ शिरी पतीके तेक्शो बाक्बा? ठेयब सेंदा पा।
- 10 मिनु गो “नेल्ल क्येडा ठेयबमी आ थुं फाइक्तीके आं कली श्येत दुम्त” दे मिम्ताक्ड।
- 11 मिनु “परमप्रभु यावे, गो इन पशो मिम्नुड। गो इन साइ डोंइती डा पशो छक लाक्चा डा गेय मप्रेंनुड।
- 12 गो इन पशो नेल्ल मिम्स डा मिम्स बाक्नुड। साइ डोंइती डा इन छक लाक्चा डा गेय आ परबम मिम्नुड।
- 13 परमप्रभु, इन लां ठीक बाक्ब। आं परमप्रभु खोदेशो ठेयब अरु तेको देवता बाक्बा डा? प्रस्थान १५:११
- 14 गे छक लाक्चा डा गेय पाइब परमप्रभु बाक्नीनी। गे जात जात डा मुर आन दातेमी इन सक्ति कोइताक्नी।
- 15 गे इन सक्तिमी इन मुर आन कली प्रोंइतीनी। गे याकूब, योसेफ नु आ चच युइ आन कली प्रोंइतीनी। ठेयब सेंदा पा।
- 16 परमप्रभु, समुन्द्र डा ब्वाक्कु इन कली तशा हितेक्म। शुश लुक्च लशो समुन्द्र खिंखि पाप्तु।
- 17 मिनु गोस्सुमी रेउ यिपाइक्तेक्म। सरीड रे ठेयब बुंबु पाप्तु। इन चिला तेइ तेइ ब्रत।

- 18 फश गिवारम इन बुंबु पशो नेंसाक्व। इन चिलामी रागी नेल्ल छेडछेड दुम्त। रागी खिंखि पा हिम्साक्व।  
 19 इन लां समुन्द्र रे पा लशो बाक्त। इन गाक्शो लां ठेयब समुन्द्र आ दातेमी बाक्त। मो हना यो इन खोडलीम दिम्शो मारेड मतांइसे। प्रस्थान १४:२१-३१  
 20 मोसा नु हारून आस गुड रे पा, गे इन मुर आन कली भेडा आन हुल खुल्शो खोदेशो पा गाक्पाइक्तीनी” दे परमप्रभु कली लोत्र पता।

## 78

- परमप्रभुमी मार मार पवा  
 शेतीक कुम्सो। आसाफ आ कुम्सो।  
 भजन संग्रह १०६:- 1 आं मुरपुकी, आं शेंशो लोत्र नेनीन। इन नोफा दाइशशा आं लोत्र नेनीन।  
 2 गो कथा पा लोत्र शेंनुड। साइ डोंइती डा लोत्र पाइनुड। मत्ती १३:३५  
 3 एको लोत्र आंइ किकी पिपीमी आंइ कली नेंपाइशशो नु तुइक्पाइशशो बाक्नीम। प्रस्थान १३:१४; ब्यवस्था ४:९-१०  
 4 गोपुकी एको लोत्र मेको आन तौ चच आन क्येडा मखुइक्नय। मिनु नोले दुम्ब पाला डा मुर आन कली यो परमप्रभु यावे आ ठेयब नु सक्ति पाइशशो छक लाक्चा डा गेय आ पर्बम शेनीकी।  
 5 मेकोमी याकूब आ मुर आन कली दोपा बाक्चा माल्बा, मेको देंत। मेकोमी इस्राएलमी मेको आ अरेशो लोत्र वोइक्तु। मिनु परमप्रभुमी आंइ किकी पिपी आन कली “इन आल आन कली शेंदीने” दे माइक्तीमी।  
 6 मेको आन नोले डा पाला डा मुरपुकीमी एको लोत्र नेल्ल तुइक्तमेक्ल। मिनु मेको आन क्येडा नोले जरमेशो आल कोल्शा तुइशशा, मेकोपुकीमी आन आल आन कली शेंदमेक्ल।  
 7 मोपा मेकोपुकीमी परमप्रभु कली थमा सुदमेक्ल। मिनु आ पशो मप्रेंदमेक्ल। मिनु आ शेंशो टीमेक्ल।  
 8 मेको आन किकी पिपी खोदेशो मडुम्मल। मेकोपुकी खकटा थुं पाइशशो नु मटीब पाला डा मुर बाक्तेक्म। मेकोपुकी नोले शोंइसीशा, परमप्रभु कली प्रोंइतेक्म। ब्यवस्था ३२:५-६  
 9 एफ्राइम डा मुपुकी लिब्रा शेशा, ठीक दुम्शा, लडाइ दुम्मेनु, प्रोक्तेक्म। न्यायाधीस २:११-१३  
 10 मेकोपुकीमी परमप्रभु आ कबल पशो मटीम। मिनु मेको आ अरेशो लोत्र मटीम।  
 11 मेकोपुकीमी परमप्रभु आ गेय नु आन डोंइती पशो छक लाक्चा डा गेय प्रेताक्म।  
 12 मेकोमी मेको आन किकी पिपी आन डोंइती इजीप्त नु सोआन रागीमी छक लाक्चा डा गेय पशो बाक्त।  
 13 मेकोमी समुन्द्र कली फ्राशा, लां सेल्लु। मिनु मेको लां रे पा मेको आन कली आइक्की हांबु शोक्ताक्मी। मेकोमी ब्वाक्कु कली गारो खोदेशो पा एर ओंथ राप्पाइक्तु। प्रस्थान १४:२१-२२  
 14 मेकोमी मेको आन कली नाक्त गोस्सुम नु नाक्दो मी आ हाम्सोमी लां कोंइताक्व। प्रस्थान १३:२१  
 15 मेकोमी गोरशो रागीमी सेरथे फुल्लु कली प्रोल्शा ब्वाक्कु बुक्पाइक्तु। मिनु शुश ब्वाक्कु तूचा गेम्तीमी। प्रस्थान १७:६; गन्ती २०:७-११; ब्यवस्था ३२:१८  
 16 सेरथे फुल्लु रे पा ब्वाक्कु बुक्पाइक्तु। मिनु खोला खोदेशो पा शाइक्पाइक्तु।  
 17 तन्न मेकोपुकीमी गोरशो रागीमी माल्ल क्येडा ठेयब कली मटिथु, मरिम्शो पा डोंइती क्येडा शुश पाप पान्तेक्म।  
 18 मेकोपुकीमी आन दाक्शो पा जचा थोत्रक पुंइशा, परमप्रभु आ थुं नाक्ताक्म। प्रस्थान १६:३; गन्ती ११:४  
 19 मेकोपुकीमी थमा मसुइक्थु “मार, परमप्रभुम गोरशो रागीम जचा थोत्रक गेने चाप्बा डा?  
 20 मेकोमी सेरथे फुल्लु तुप्पा प्रोल्शा ब्वाक्कु बुक्पाइशशा, शुश खोला सेल्लु। मार, मेकोमी आ मुर आन कली शोब्ले नु श्ये यो गेने चाप्बा डा?” देंतेक्म।  
 21 मिनु परमप्रभु यावे मेको आन लोत्र नेंशा, थाम्पा गाइक्ताक्व। मिनु परमप्रभुमी याकूब कली दाक्पाइक्चा कली मी सोइक्ताक्व। मिनु इस्राएली आन पर्बम शुश चुरत। गन्ती ११:१  
 22 मारदे हना मेकोपुकीमी परमप्रभु कली थमा मसुदेम। मिनु “परमप्रभुमी आंइ कली प्रोंइने मचाप्ब” देंतेक्म।  
 23 मो हना यो मेकोमी सरीड कली अरेशा सरीड डा लाप्यो रोक्पाइशशा गेण्टु।  
 24 मेकोमी मुर आन कली थुल्चा कली सरीड रे मन्ना यिपाइक्तु। मेको आन कली स्वर्ग डा अन्न गेण्टु। प्रस्थान १६:४, १४, १५  
 25 मुर नेल्लेमी परमप्रभु आ स्वर्ग डा गेय पाइब आन शोब्ले जाम्तेक्म। परमप्रभुमी मेको आन कली शुश जचा गेण्टु।  
 26 मेकोमी सरीडमी पूर्ब डा फश सोइक्ताक्व। मिनु मेको आ सक्तिमी दक्खिन रे फश पपाइक्तु। गन्ती ११:३१-३३  
 27 मेकोमी फुरक खोदेशो पा श्ये यिपाइक्तु। समुन्द्र डा बाल्वा खोदेशो पा चिक्ब यिपाइक्तु।  
 28 मेको चिक्ब आन कली आन बाक्तीके एर ओंथ दोक्पाइक्तु।  
 29 मिनु मेकोपुकी मेको ब्वशा रूतेक्म। मारदे हना परमप्रभुमी मेको आन कली आन पुंइशो खोदेशो पा गेण्टु।  
 30 तन्न मेकोपुकीमी ब्वना ब्वन, आन ब्वशो श्ये आन शोत्रम बाक्ना बाक्न,  
 31 परमप्रभु शुश गाइक्ताक्व। मिनु मेको आन दातेम नेल्ल क्येडा बोल्यो मुर आन कली साइक्तीमी। इस्राएल डा टिटा नेल्ल आन कली साइक्तीमी।  
 32 मो पा यो मेकोपुकीम पाप पस डा पस बाक्तेक्म। मेको आ छक लाक्चा डा गेय तशा यो, मेकोपुकीमी थमा मसुदेम।  
 33 मोपतीके परमप्रभुमी मेको आन नाक्त मोशा नु मेको आन बर्सपुकी श्येत जपाइशशा साम्तु। गन्ती १४:२२-२३; १कोरिन्थी १०:५  
 34 परमप्रभुमी मेको आन दातेमी का निक्शी सदानु, मेको लीशोपुकी मेको गे लेशशा, मेको कली थाम्पा माल्तेक्म।

35 मिनू मेकोपुकीमी परमप्रभु आन सेरथे फुल्लु नु नेल्ल क्येडा ठेयब परमप्रभु मेको आन कली श्येत रे प्रोडब बाक्माक्त्, दे तुडक्ताक्म।

36 तन्न मेकोपुकीमी आन शोत्रम ला लोत्र पाम्तेक्म। मेकोपुकीमी जोल ला पाम्तेक्म।

37 आन थुमी थमा पा मेको आ नोले मखोदेम। आ पशो कबल मटीमे।

38 मो हना यो परमप्रभु शिशि पाइब बाक्तीके मेको आन ठीक मपशो माफ गेम्तीमी। मेको आन कली मसद। खेयप खेयप मेको आन परबम आ गाइशो तेक्तु। मेकोमी आ गाइशो नेल्ल मयुंडद।

39 परमप्रभुमी “मेको मुर ला बाक्नीम। फश खोदेशो पा लाक्नीम। मिनू लेशशा मजाक्नीम” दे मिम्ताक्व। भजन संग्रह १०३:१४-१६

40 मेकोपुकीमी गोरशो रागीम शुश खेयप परमप्रभु कली मटीमे। परमप्रभु कली मुर मबाक्तीकेमी श्येत गेम्तेक्म।

41 मेकोपुकीमी लेना लेन आ थु नाक्ताक्म। मिनू इस्राएली आन का ला बाक्शो परमप्रभु कली गाइक्पाइक्तेक्म।

42 मेकोपुकीमी आ सक्ति ममिम्तेम। मेको आन कली आन जोरी सत्रु रे प्रोडशो यो ममिम्तेम।

43 परमप्रभुमी इजीप्तमी आ चिन्ड कोंडशा, सोआन रागीमी छक लाक्चा डा गेय पची ना

44 खोला डा ब्वाक्कु हुश सेल्लो बाक्त्। मिनू इजीप्तीपुकीमी मेको ब्वाक्कु तूने मचबेम। प्रस्थान ७:१९-२०

45 मेकोमी मेको आन बाक्तीकेमी चुरमु बोपाइशो बाक्त्। मिनू मेकोपुकीमी मेको आन कली क्राइक्तेक्म। मिनू परमप्रभुमी क्कुक्कु यूपाइक्त्। मेकोपुकीमी मेको आन कली खतम सेल्लेक्म। प्रस्थान ८:२०; प्रस्थान ८:२

46 परमप्रभुमी मेको आन बाली नाली माले आन कली गेम्तीमी। मेको आन शुश गेय पा वापाइशो बाली नाली सल्लापुकीम नेक्पाइक्त्। प्रस्थान १०:१३

47 मेकोमी मेको आन अडगुर बोट मुप्सीमी नु आन फोव्रशी फुरशेम खतम पोक्पाइक्त्। प्रस्थान ९:२५

48 मेकोमी मेको आन बी ब्यफ मुप्सीम नु क्यारश भेडा आन कली चिलामी आप्तु।

49 मेको आन परबम गाइशशा, चुरशा, श्येत गेपाइक्चा कली खतम सेल्ल स्वर्ग डा गेय पाइब आन कली सोइक्ताक्व।

50 मेकोमी आ गाइक्तीक कली लां का सेल्लु। मिनू मेको आन कली बेक्चा रे मप्रोन। मेको आन कली मुर बेक्तीक रोड पपाइक्तीमी। प्रस्थान ९:८-१२

51 मेकोमी इजीप्त डा मुर, हाम आ चच युइ आन डोंडती जरमेशो तौ नेल्ल साइक्त्। प्रस्थान १२:२९

52 मिनू नोले आ मुर आन कली भेडा खोदेशो पा गुंडताक्व। मिनू मेको आन कली भेडा आन हुल खोदेशो पा गोरशो रागीमी लां कोंडशा गाक्पाइक्तीमी। भजन संग्रह ७७:२१

53 मेकोमी मेको आन कली मारेड श्येत मदुम्पाइक्थु गाक्पाइक्तीमी। मोपतीके मेकोपुकी काइ महिम। आन जोरी सत्रु समुन्द्रम युम्शा बेक्तेक्म। प्रस्थान १४:१९,२२,२७

54 मोपा परमप्रभुमी आ मुर आन कली आ रागीमी चाक्त्। आ सक्तिमी ग्राशो डांडाम चाक्त्। प्रस्थान १५:१७

55 रागी रागी डा मुर आन कली मेको आन डोंडती रे खेरतु। मिनू इस्राएली आन कली मेको रागी योक्शा, गेम्तीमी। मिनू इस्राएल आ थर थर डा मुर आन कली आन ताम्बुमी बाक्चा गेम्तीमी।

56 तन्न मेकोपुकीमी परमप्रभु आ थु थाम्तेक्म। नेल्ल क्येडा ठेयब परमप्रभु कली मटीम। मिनू मेको आ अंरेशो लोत्र मबिस्सम।

57 मेको आन किक्की पिपी खोदेशो पा नोले शोंडसाक्म। मिनू मेकोपुकी ब्रोइक्चशो लिब्रा खोदेशो पा दूली पाइब दुम्तेक्म।

58 मेकोपुकीमी आन मूर्ति वोइशो डांडामी परमप्रभु कली गाइक्पाइक्तेक्म। मेको आन सेल्लो मूर्तिमी मेको कली गेहे पपाइक्तेक्म। ब्यवस्था ३२:२१

59 परमप्रभुमी मेको नेशा, थाम्पा गाइक्ताक्व। मिनू इस्राएली आन कली थमा पा वारच मपाइक्थु प्रोंडतीमी।

60 मेकोमी शिलो डा आ बाक्तीके प्रोंडतु। मेको ताम्बु मुर आन बाक्तीके आन दातेमी वोइशो बाक्त्। १सामुएल १:३; १सामुएल ४:११; येरमीया ७:१२

61 मेकोमी आ कबल पशो सन्दोस आ जोरी सत्रु आन गुडमी गेप्त्। मोपा सक्ति पाइशो कली रोइक्पाइक्त्। भजन संग्रह १३२:८; १सामुएल ४:२१

62 मेकोमी आ मुर आन कली तरवारम साइक्पाइक्चा कली गेप्त्। मिनू आ योव्रशो मुर आन कली तशा, थाम्पा गाइक्ताक्व।

63 मिनू मीम मेको आन टिटा वोइश मुर आन कली दाक्तीमी। मिनू आन तमी आन कली ग्युंभे पाइक्चा मतामे।

64 मेको आ चढेबपुकी तरवारम क्योरचा पुंडसाक्म। मिनू मेको आन मीश रोंका पने मचबेम। १सामुएल ४:१७-२०

65 मिनू नोले परमप्रभु निन्द्रा रे सेंसीशो खोदेशो पा सेंसाक्व। लडाइ पाइब मुर अडगुर शांबू तूशा नोले रिम्शो दुम्शो खोदेशो पा, ठेयब सेंदाम ग्रीत।

66 मिनू मेकोमी आ जोरी सत्रु आन कली एर ओंथ ब्रपाइक्त्। मेकोमी मेको आन कली गेना हना यो मुने दोक्पाइक्त्। १सामुएल ५:६-१२

67 मेकोमी योसेफ आ थर डा मुर आन कली प्रोंडतु। एफ्राइम आ खिं डा मुर आन कली यो मयोव्रड।

68 तन्न मेकोमी यहूदा आ खिं डा मुर आन कली योव्रतु। मेकोमी आ दाक्शो सियोन डांडा कली यो योव्रतु। २इतिहास ६:६

69 मेकोमी आ बाक्तीके लाइक्पाइशशा, इर स्वर्ग खोदेशो सेल्लु। आ गेना हना यो कली सेल्लो रागी खोदेशो पा सेल्लु।

70 मेकोमी आ गेय पाइब दाऊद कली भेडा गोठ रे योव्रतु।



71 परमप्रभुमी दाऊद कली गिक्शो भेडा आन कली योव्रतीक गेय रे गुंडताकव। मेकोमी दाऊद कली याकूब आ थर डा, परमप्रभु आ मुर आन कली कोव्रचा कली गुंडताकव। मेको इसाएल डा मुर परमप्रभु आ शोंप बाक्नीम। १सामुएल १६:११-१२; २सामुएल ७:८

72 दाऊदमी आ थुं डा रिम्शो पतीकेमी मेको आन कली कोव्रतीमी। मेकोमी जोक्ब तुडक्ब दुम्शा, मेको आन कली लां कोइताकमी।

## 79

यरूसलेम आ पबंम रोंका पशो आसाफ आ कुम्सो।

1 परमप्रभु, रागी रागी डा मुरपुकी इन योव्रशो रागीम जाक्तेक। मेकोपुकीमी इन खिं कली ग्रंया दिशो सेल्लेक। यरूसलेम कली प्रेशा, फुल्लु देल्लो खोदेंशो सेल्लेक।

2 मेकोपुकीमी इन गेय पाइब आन बेक्शो रां चिक्ब आन कली ब्वचा गेम्तेक। मिनु इन योव्रशो मुर आन रये ब्वाकी डा जन्तु आन कली ब्वचा गेम्तेक।

3 मेकोपुकीमी मेको आन हुश ब्वाक्कु खोदेंशो पा यरूसलेम आ एर ओंथ नेल्ल शाइक्पाइक्तेक। मिनु मेको आन कली थिम्ब सुइ मबाक।

4 आंइ नेक्था बाक्ब मुरपुकीमी आंइ कली शुक्शी पाइक्नीम। मिनु आंइ एर ओंथ डा मुरपुकीमी आंइ कली रिशशा तोक्शा लोव्र पाइनीम। भजन संग्रह ४४:१४

5 परमप्रभु यावे, गे गेना सम्म गाइक्स डा गाइक्स बाक्नीनी? इन गेहे पतीके गेना सम्म मी खोदेंशो पा ब्रस डा ब्रस बाक्बा?

6 इन कली मतुडक्ब रागी रागी डा मुर नु इन नें मथीब राज्य आन तार इन गाइक्चा मोतीन। येरमीया १०:२५

7 मारदे हना मेकोपुकीमी याकूब आ थर डा मुर आन कली खतम सेल्लो दाक्तेक। मिनु आन बाक्तीक खिं प्रेशशा खतम सेल्लेक।

8 आंइ किकी पिपी आन पशो पाप आ क्येक्क आंइ कली मलेत्तीन। आंइ कली रीब पा इन शिशी गेकी। मारदे हना आंइ थुं लुक्च लशो बाक्ब।

9 आंइ कली श्येत रे प्रोंडब परमप्रभु, इन नें डा सक्तिमी आंइ कली वारच पने। इन नें आ पबंम आंइ कली प्रोनीन। मिनु आंइ पाप क्यान्दीने।

10 मारदे रागी रागी डा मुरपुकीमी “मेको आन परमप्रभु ते बाक्म?” दे हिल्लो पाइनीमी। रागी रागी डा मुरपुकीमी इन मुर आन कली आन डोंइती साइशो आ क्येक्क लेप्ब, दे तुडक्तमेक। भजन संग्रह ११५:२; योएल २:१७

11 चोक्चा पुंडसीशो आन हुकयी पशो इन डोंइती जाक्ल। साइक्चा पुंडसीब दुम्शो आन कली इन सक्तिमी प्रोनीन।

12 परमप्रभु आ पबंम शुक्शी पा मुरपुकीमी मुने तोक्चा माल्लो बाक्नीमी। मेको मो पशो डा आंइ नेक्था डा मुर आन कली ७ खेयप क्येक्क लेत्तीन। भजन संग्रह १३७:७-९

13 गो इन मुर, इन योव्रशो भेडा खोदेंशो नकी। गो इन कली “गे रिम्शो पाइब बाक्नीनी” दे आंइ चच युइ आन पाला सम्म टेयब सेल्लेकी। मिनु इन पबंम लोव्र पाइनीकी।

## 80

परमप्रभु, आंइ कली लेंशा सेल्लेकी

कुम्सो पपाइक्ब कली लिली फू आ लायो डा कबल पतीक, आसाफ आ कुम्सो।

1 इसाएल डा गोठला, आंइ लोव्र नेनीन। गे योसेफ कली भेडा आन हुल खोदेंशो पा खुल्लतीन। गे करूब आन तार टेयब नित्तीकेमी निल्लीनी। भजन संग्रह १८:११; २सामुएल ६:२

2 एफ्राइम, बेन्यामीन नु मनस्से आन डोंइती इन छेडछेड कोइदीन। मिनु इन सक्ति कोइशा, आंइ कली प्रोंइथ जाक्कीन।

3 परमप्रभु, आंइ कली लेंशा सेल्लेकी। इन कुल डा छेडछेड आंइ तार वोतीन। मिनु गो ब्रोंइने चाप्कल।

4 परमप्रभु यावे, मुर नेल्ल आन परमप्रभु, इन मुर आन पुंडशो आ पबंम गेना सम्म गाइक्नीनी?

5 गे मेको आन कली श्येत डा शोब्ले जपाइक्तीनी। मिनु आन प्रेक्कु तूचा ब्वाक्कु खोदेंशो पा शुय दुम्त।

6 गे आंइ कली आंइ नेक्था डा मुर आन कली जीब सेल्लो बाक्तीनी। मिनु आंइ जोरी सत्रुमी आंइ कली शुक्शी पाइब सेल्लतीनी।

7 मुर नेल्ल आन परमप्रभु, आंइ कली लेंशा सेल्लेकी। इन कुल डा छेडछेड आंइ तार वोतीन। मिनु गो ब्रोंइने चाप्कल।

8 गे इजीप्त् रे अडगुर बोट का चाक्तीनी। मिनु रागी रागी डा मुर आन कली खेरशा, मेको खुम्तीनी। यसैया ५:१-७; येरमीया २:२१

9 गे मेकेर मेको कली खुम्तीक रू का सेल्लतीनी। मिनु मेको शाक्श थोक्शा, रागी नेल्ल ब्रीत।

10 पहाड नेल्ल मेको आ वांकुम सुम्साक। मिनु मेको आ लाइशो परमप्रभु आ राशीम रवा नेल्ल सुम्साक।

11 मेको आ राशी समुन्द्र सम्म जाक्दील्लेक। मिनु मेको आ कोच्वा चहिं टेयब खोला सम्म जाक्दील्लेक। होसे १०:१

12 मारदे गे मेको आन गारो प्रेन्नी? मेकेर गाक्ब नेल्लेमी मेको आ फल सेक्नीम।

13 ब्वाकी डा पोव्रपुकीमी मेको कली खतम पोक्नीम। मिनु ब्वाकी डा जन्तुपुकी मेकेर जोइनीम।

14 मुर नेल्ल आन परमप्रभु, आंइ कली कोव्रडीन। सरीड रे उइ कोव्रडीन। मेको अडगुर बोट कली कोव्रडीन। होसे ११:१

- 15 इन सक्तिमी खुम्शो बोट कली कोव्रडीन। गे इन तौ इन कली कोल्पाइक्तीनी।
- 16 आंड जोरी सत्रुमी मेको कली तुल्शा, मीम चोम्तेक्म। मेकोपुकी इन हुइशोमी खतम दुम्मल। इजीकीएल १५:२-४
- 17 इन ग्युरा गे बाक्ब मुर आ तारी इन गुइ लील। मेको कली थुल्शा कोल्पाइक्तीनी।
- 18 मिनु गो इन डोंइती रे गेनायो नोले मशोंइसीनीकी। आंड कली ब्रोंइचा गेकी। मिनु गो इन नें थिशा, प्रार्थना पाइनीकी।
- 19 परमप्रभु यावे, मुर नेल्ल आन परमप्रभु, आंड कली लेंशा सेल्की। इन कुल डा छेडछेड आंड तार वोतीन। मिनु गो ब्रोंइनीकी।

## 81

इसाएलीपुकीमी मटिशो

कुम्सो पपाइक्ब कली गित्तीथ ताप्शा पतीके, आसाफ आ कुम्सो।

- 1 आंड कली सक्ति गेब परमप्रभु कली कुम्सो पने। ग्येरशा सोम्शा ठेयब सेंदा पा याकूब आ परमप्रभु कली कुम्सो पने।
- 2 खैजडी ताप्शा, कुम्सो पने। रिम्शो बीना नु तार पाइशो ठेयब ताप्तीक ताप्शा कुम्सो का पने।
- 3 औसी, पूर्ने नु इं ठेयब चाड नाक्त तुराही तापीन। लेवी २३:२४
- 4 मारदे हना मोदेशो चाड मानेचा इस्राएल डा गेना हना यो पतीके बाक्ब। मेको याकूब आ परमप्रभु आ अरेशो बाक्ब।
- 5 मेको लोव्र परमप्रभुमी इजीप्त रे गुंइशो योसेफ आ मुर आन कली अरेशो लोव्र बाक्ब। गो मतुइशो सेंदा का नैतक।
- 6 मेको सेंदामी “गो इन बला रे भारी शोल्ता। गे भारी कुरचा ममाल्नीनी। प्रस्थान ६:६; यसेया ९:३
- 7 गे श्येत जनीनु, आं कली ब्रेत्ताक्नी। मिनु गो इन कली प्रोंइतन्नी। गो इन कली बूंबु रे लोव्र लेत्ताक्नी। गो मेरीबा डा ब्वाक्कुमी इन कली थुं थाम्शा कोव्रतन्नी। ठेयब सेंदा पा। प्रस्थान १९:१६; प्रस्थान १७:२-७; गन्ती २०:१३
- 8 आं मुरपुकी, आं अरेशो नेनीन। इस्राएलीपुकी, गे आं लोव्र नेशो ननी हना, रिम्शो दुम वा।
- 9 इन दातेमी देवी देवता आन कली बाक्चा मंगेने। अर्को रागी डा देवी देवता आन डोंइती बाप्शा, सेउ मपने। प्रस्थान २०:२-३
- 10 गो परमप्रभु यावे, इन परमप्रभु नड। गो इन कली इजीप्त रे गुंइशा एक चाक्तन्नी। इन शोव्र पाक्कीन, मिनु गो प्रिनन्नी।
- 11 तन्न आं मुरपुकीमी आं लोव्र मनेनेम। इस्राएल आ मुरपुकीमी आं कली मदाक्थु, आं देशो मबिस्सम।
- 12 मोपतीके गो ‘आन दाक्स पामेक्ल’ दे आन दला दाक्स पचा गेतामी।
- 13 आं मुरपुकीमी आं लोव्र नेशो नम हना, इस्राएल डा मुर आं लांम गाक्शो नम हना,
- 14 गो मेको आन कली रीब पा आन जोरी सत्रु रे प्रोनुमी वा। मेको आन जोरी सत्रु आन कली खतम पोक्गुमी वा।
- 15 परमप्रभु यावे कली काइ मदाक्बपुकी हिंशा आं डोंइती बांबा पा गाक्म वा। मिनु मोदेशो गेना हना यो दुम वा।
- 16 मिनु गो इस्राएल डा मुर, इन कली नेल्ल क्येडा रिम्शो चेरब जचा गेन्नी वा। मिनु रोका खुदोमी रूपाइक्नी वा” दे परमप्रभुमी देंत। ब्यवस्था ३२:१३

## 82

हुकुम पाइब आन कली हुइशो

आसाफ आ कुम्सो।

- 1 परमप्रभु आ मुर आन गुन्तीकेमी बाक्शो बाक्ब। मेकोमी आ मुर आन दातेमी निसाफ पाइब। १राजा २२:१९
- 2 मेकोमी “गे गेना सम्म ठीक निसाफ मपाइनीनी? गे गेना सम्म परमप्रभु यावे आ अरेशो मटीब आन कुल कोव्रनीनी? ठेयब सेंदा पा। ब्यवस्था १:१७
- 3 गे मचाप्ब नु रोम रोइक्च आन कली ठीक पा निसाफ पने। पुडग नु दिप्चा पुंडसीशो आन कली ठीक निसाफ पने। यसेया १:१७
- 4 मचाप्ब नु श्येत जाइब आन कली, परमप्रभु यावे आ अरेशो मटीब आन गुइ रे प्रोनीन।
- 5 हुकुम पाइबपुकीमी मारेइ मजोक्नीम, मतुइक्नीम। मेकोपुकी छिडछिडम गाक्शो बाक्नीम। रागी आ जग नेल्ल हिम्सीशो बाक्नीम।
- 6 गो इन पर्वम ‘गे अधिकार पाइशो बाक्नीनी। गे नेल्ल क्येडा ठेयब आ तौ बाक्नीनी। यूहन्ना १०:३४
- 7 मो हना यो गे मुर खोदेशो पा बेक्नीनी। अरु मरिम्शो पा हुकुम पाइब खोदेशो पा खतम दुम्नीनी” दे परमप्रभुम देंत। उत्पत्ती १८:२५
- 8 परमप्रभु बोक्कीन। मिनु रागी कली निसाफ पने। मारदे हना रागी नेल्ल इन के बाक्नीम।

## 83

लडाइ पची ना पुंइशो लोव्र

आसाफ आ कुम्सो।

- 1 “परमप्रभु, गे सिक्सी पा मबाक्कीन। मारेइ पने मचाप्ब खोदेशो मदुमीन।
- 2 इन जोरी सत्रु शुश ग्याल्शो बाक्नीमी। कोव्रडीन, मेकोपुकी बारशा, ग्राचा चिक्शो बाक्नीम।
- 3 मेकोपुकीमी इन मुर आन कली दोपा साइक्चा, दे लोव्र गारपाइक्नीम। इन कोव्रशो मुर आन कली मरिम्शो पचा कली खुइशशा लोव्र गारपाइक्नीम। भजन संग्रह ३५:२०

- 4 मेकोपुकीमी 'जाक्कीन, गो मेको आन रागी मलीचा डा पा क्यामदय। मिनू इस्राएल आ नें मलील' देंनीम।  
 5 मेकोपुकी थुं का दुम्शा, इन कली मरिम्शो पचा कली लोव्न गारपाडक्कीम।  
 6 मेको एदोम, इश्माएल, मोआब नु हाग्री आ मुरपुकी,  
 7 गेबाल, अम्मोन, अमालेक, पलिस्ती नु टायर डा मुरपुकी बाक्कीम।  
 8 अस्सुर यो मेकोपुकी नु गारशो बाक्ब। मेको नेल्ल लोत आ खिं डा सक्ति पाइश्शो मुर बाक्कीम। ठेयब सेंदा पा।  
 9 मिदयानी आन कली पाइश्शो खोदेशो पा मेको आन कली पतीन। सीसेरा नु याबीन कली किशोन खोलाम पाइश्शो खोदेशो पतीन। न्यायाधीस ७:१४; यसैया ९:३; न्यायाधीस ४:२  
 10 मेकोपुकी एन-डोर सहरम खतम दुम्शा, रू कली मोव्नल खोदेशो दुम्तेक्म।  
 11 गे मेको आन कली नु मेको आन ठेयब मुर आन कली ओरेब नु जेयब आस कली खोदेशो सेलीन। मेको आन सासन पाइब नेल्ल कली जेबाह नु साल्मुन्ना खोदेशो सेलीन। न्यायाधीस ७:२५; न्यायाधीस ८:२१  
 12 मेकोपुकीमी 'परमप्रभु आ रिम्शो रागी इं के सेल्य' देमुम्तेक्म।  
 13 आं परमप्रभु, मेको आन कली फशेम योल्शो फुरक नु फशेम बेरपाइश्शो भूस खोदेशो सेलीन।  
 14 दोपा मीम ब्वाकी नेक्बा नु आ होशेमी पहाड जेप्बा,  
 15 मोपा इन फश गिवारम मेको आन कली खेदा पने। इन फश गिवारम मेको आन कली हिंच कोइदीन।  
 16 मेको आन कली मुने तोक्कीन। मोपा मुरपुकीमी परमप्रभु यावे, इन कली मालमेक्ल।  
 17 मेकोपुकी गेना हना यो मुने दोक्मल। आन थुं लुक्च लमल। मेकोपुकी मुने दोक्शा, खतम दुम्मल।  
 18 मेकोपुकीमी इन नें परमप्रभु यावे बाक्ब, दे तुइक्तमेक्ल। गे रागी डा नेल्ल क्येडा ठेयब बाक्कीनी" दे परमप्रभु कली ठेयब सेल्ला। होसे १२:१६

## 84

परमप्रभु आ खिं कली दाक्शो

कुम्सो पपाइक्ब कली गित्तीथ ताप्शा पतीके कोराह आ तौ आन कुम्सो। ?इतिहास २६:१

- 1 "मुर नेल्ल आन परमप्रभु यावे, इन बाक्तीके गिश रिम्शो बाक्ब।
- 2 गो आं थुं नेल्लेमी परमप्रभु यावे आ खिं डा लाडगा लचा दाक्नुड। गो ग्येरशा सोम्शा ब्रॉइशा बाक्ब परमप्रभु कली कुम्सो पाइनुड। भजन संग्रह ४२:३
- 3 मिनू चिक्बपुकीमी यो इन चढ्ढेतीके आ नेक्थामी ग्योत्र सेल्शा, आन चाइक्ब पुक्कीम। गे, मुर नेल्ल आन परमप्रभु यावे, आं पिप नु आं परमप्रभु बाक्कीनी।
- 4 इन खिंम बाक्चा ताइब आसीक तशो बाक्कीम। मेकोपुकीमी गेना हना यो इन कली कुम्सो पा ठेयब सेल्लीम। ठेयब सेंदा पा। भजन संग्रह ६५:५
- 5 गे इन सक्ति ताइब नेल्ल ग्येरसीशो बाक्कीम। मेको आन थुंमी सियोन कली मिम्ना मिम्न बाक्कीम।
- 6 मेकोपुकी बाका माइश्शो गोरशो रागी डा दिंम रे पा लमानु, मेकोपुकीमी मेकेर ब्वाक्कु बुक्शो रागी सेल्लीम। डोंइती रेउ यिशा, ब्वाक्कु देम्ब।
- 7 मेकोपुकी शुश बोल्यो दुम्नीम। मेकोपुकी परमप्रभु आ डोंइती सियोनम जाक्कीम।
- 8 परमप्रभु यावे, मुर नेल्ल आन परमप्रभु, आं पुंइशो लोव्न नेनीन। याक्ब आ परमप्रभु आं लोव्न नेनीन! ठेयब सेंदा पा।
- 9 परमप्रभु, आंइ कली कोव्नब कली कोव्नडीन। इन आंइ कली गेशो पिप कली कोव्नडीन।
- 10 मिनू हजार का नाक्त ते ते बाक्चा क्येडा काबु नाक्त इन खिंम बाक्चा रिम्शो बाक्ब। इन अरेशो मटीब आन ताम्बुम बाक्चा क्येडा आं परमप्रभु आ खिं डा लाप्चो खाल पाइब दुम्चा दाक्नुड। भजन संग्रह २७:४
- 11 मारदे हना परमप्रभु, परमप्रभु यावे नां नु तेक्तीक बाक्ब। परमप्रभु यावेम ठेयब दुम्तीक नु मान गेब। मेकोमी ठीक लां खोइक्ब आन कली रिम्शो पाइब।
- 12 मुर नेल्ल आन परमप्रभु यावे, इन कली जिम्मा गेंसीशो थमा सुइक्बपुकी ग्येरसीशो बाक्कीम" देती।

## 85

थुं नाइक्तीक लोव्न

कुम्सो पपाइक्ब कली कोराह आ तौ आन कुम्सो।

- 1 परमप्रभु यावे, गे इन रागी कली शिशी पाइतीनी। याक्ब आ रिम्शो दुम्तीके लेंशा सेल्लीनी।
- 2 गे इन मुर आन ठीक मपशो माफ गेतीनी। मेको आन पाप नेल्ल सुम्तीनी। ठेयब सेंदा पा।
- 3 गे इन गाइक्चा नेल्ल साम्तीनी। मिनू चुरचा प्रॉइतीनी।
- 4 आंइ कली पाप रे प्रॉइब परमप्रभु, आंइ कली लेंशा डोंइती डा खोदेशो सेल्की। मिनू इन आंइ कली मदाक्तीके समीन।
- 5 मार, गे गेना हना यो गोपुकी नु गाइक्स डा गाइक्स बाक्कीनी? गे गोपुकी नु आंइ चच युड आन पाला सम्म गाइक्स डा गाइक्स बाक्कीनी?
- 6 मार, गे इन मुर आंइ कली गे नु ग्येरसीचा कली लेंशा, मबोक्पाइक्कीनी?
- 7 परमप्रभु यावे, गे इन गेनायो मनुप्ब दाक्तीके कोइदीकी। मिनू आंइ कली श्येत रे प्रॉइकी।

- 8 परमप्रभु, परमप्रभु यावेमी मार देबा, आं कली नेंपतीन। मेकोमी आ मुर, आ लोत्र टीब नु आंम कली जिम्मा गेंसीशो मुरपुकी नु थुं नाइक्तीक लोत्र पाइब। मेको आन कली लेंशा दूली गाक्चा मगेने। येरमीया २९:११; मीका ५:४
- 9 परमप्रभु कली मान पा हिंब मुर ब्रोंइचा ताइनीम। मेको आ छेडछेड इं रागीम बाक्ल।
- 10 गेना हना यो दाक्तीक नु थमा पा दाक्शा मप्रोंइतीक गारनीस। ठीक पतीक नु थुं नाइक्तीक पुक्पु पमुइनीस।
- 11 थमा पा दाक्शा मप्रोंइतीके खप रे वाशो खोदेशो पा यूब। मिनु ठीक पतीकेमी सरीड रे कोत्रब।
- 12 परमप्रभु यावेमी मार रिम्शो बाक्मे, मेको गेब। मिनु आंइ रागीम बाली नाली ग्रेल्पाइक्ब।
- 13 ठीक पतीकेमी मेको आ डोंइती गाक्शा, आन लां सेल्ब।

## 86

श्येत जशोनु, पुंइशो लोत्र

दाऊदमी परमप्रभु कली पुंइशो लोत्र।

- 1 परमप्रभु यावे, आं पुंइशो लोत्र नेनीन। मिनु लोत्र लेत्तीनी। मारदे हना गो प्रुडग नु श्येत जशो बाक्नुड।
- 2 आं कली खाल पा साइक्चा मगेयीनी। मारदे हना गो इन कली थमा सुइश्शा, इन गेय पाइब नड। गे आं परमप्रभु बाक्नीनी।
- 3 परमप्रभु, आं कली शिशी पाइय्यीनी। मारदे हना गो नाक्तर रे इन कली ब्रेश्शो बाक्नुड।
- 4 इन गेय पाइब आ थुं ग्येरपतीन। मारदे हना गो आं थुं परमप्रभु, इन कली जिम्मा गेनुड।
- 5 परमप्रभु, गे रिम्शो पाइब नु माफ गेब बाक्नीनी। इन कली पुंइब नेल्ल आन कली गेना हना यो दाक्नीनी।
- 6 परमप्रभु यावे आं पुंइशो लोत्र नेनीने। मिनु शिशी पाइक्चा कली आं पुंइशो नेनीन।
- 7 गो श्येत जडानु इन कली पुंइनुड। मिनु गे आं लोत्र लेत्तीनी। भजन संग्रह ५०:१५
- 8 परमप्रभु, देवी देवता आन दातेमी इन खोदेशो अरु तेकोइ मबाक्नीम। इन पशो गेय खोदेशो पा अरु सुडम मपाइनीम। भजन संग्रह १३५:५; प्रस्थान १५:११
- 9 परमप्रभु, इन सेल्शो रागी रागी डा मुर इन डोंइती बाप्शा, इन नें थिशा, इन कली ठेयब सेल्चा माल्नीम।
- 10 मारदे हना गे ठेयब बाक्नीनी। मिनु छक लाक्चा डा गेय पाइनीनी। गे ला परमप्रभु बाक्नीनी।
- 11 परमप्रभु यावे, आं कली इन लां खोइक्चा शेंदीनी। मिनु गो इन थमा पतीकेमी गाक्नुड। आं कली थुं का पा इन कली मान पा हिंब सेल्यीनी। यूहन्ना १४:६
- 12 परमप्रभु यावे, आं परमप्रभु, गो आं थुं नेल्लेमी “गे रिम्शो पाइब बाक्नीनी” देनुड। मिनु गो गेना हना यो इन नें ठेयब सेल्नुड।
- 13 मारदे हना इन गेना हना यो आं कली दाक्तीके ठेयब बाक्ब। गे आं कली बेक्शो मुर आन नेल्ल क्येडा आगा डा बाक्तीके रे प्रोंइतीनी।
- 14 परमप्रभु, शिशी मपाइब मुरपुकीमी आं कली खेदा पतीमी। मरिम्शो पाइब आन हुलमी साइक्चा माल्तीमी। मेकोपुकीमी इन कली ममिन्नीम।
- 15 तन्न परमप्रभु, गे दाक्ब नु शिशी पाइब परमप्रभु बाक्नीनी। रीब पा मगाइक्ब, गेना हना यो दाक्शा मप्रोंइब बाक्नीनी। भजन संग्रह १०३:८; प्रस्थान ३४:६
- 16 आं कली कोत्रशा, शिशी पाइय्यीनी। इन गेय पाइब कली इन सक्ति गेने। इन वाइलीम आ तौ कली श्येत रे प्रोनीन।
- 17 गे इन दाक्तीके चिन्ड का गेयीनी। मिनु आं कली काइ मदाक्बपुकी मेको तशा, मुने दोक्मल। मारदे हना परमप्रभु यावे, गे आं कली वारच पाइतीनी। मिनु लेम्ताक्यीनी।

## 87

मुर आन नें आ किताबम ब्रेक्शो

कोराह आ तौ आन कुम्सो।

- 1 परमप्रभुम आ डोंडामी आ सहर सेल्लु।
- 2 परमप्रभु यावेमी याक्ब आ मुर आन बाक्तीके क्येडा सियोन सहर डा गारो डा लाप्चो दाक्ब।
- 3 परमप्रभुम आ सहर आ पबंम रिम्शो लोत्र पशो बाक्ब। ठेयब सेंदा पा।
- 4 राहाब नु बेबीलोनम आं कली तुइक्नीस। पलिस्ती आन रागी, टायर नु एथीयोपीया यो मेको नु बाक्नीम। मिनु मेको आन पबंम “एको नु मेको मेकेर जरमेशो नम” देनीम। इजीप्ट रागी कली राहाब यो देनीम। भजन संग्रह ६७:४-५
- 5 सियोन आ पबंम चाहिं “मुर नेल्ल मेकेर रेन जरमेशो बाक्नीम। मारदे हना नेल्ल क्येडा ठेयबमी मेको कली रिम्शो सेल्शा कोत्रब” देनीम।
- 6 परमप्रभु यावेमी जात जात डा मुर आन नें का का पा आ किताबमी ब्रेक्ब। मिनु “एको नु मेको सियोनमी जरमेशो बाक्ब” दे ब्रेक्ब। ठेयब सेंदा पा।
- 7 कुम्सो पाइब नु सिल पाइबपुकीमी “आंइ आसीक नेल्ल सियोनम बाक्ब” दे कुम्सो पाइनीम। भजन संग्रह ३६:१०

## 88

“वारच पाइय्यीनी” दे पुंइशो

कुम्सो पपाइक्ब कली महलेथ आ कुम्सो। कोराह आ तौ आन कुम्सो। एजाह आ मुर हेमान आ सेल्शो शेंतीक कुम्सो।

- १ इतिहास ६:१८ १ परमप्रभु यावे, आं परमप्रभु, गे आं कली श्येत रे प्रोंडब बाक्नीनी। नाक्टो नाक्त गो इन डोंडती पुंडशो बाक्नुड।
- २ आं पुंडशो लोव इन डोंडती जाक्ल। आं लोव नेनीन।
- ३ मारदे हना आं थुं श्येतम व्रीशो बाक्ब। मिनू गो बेक्चा चिक्शो बाक्नुड।
- ४ गो बेक्शा लाडब मुर नु हिकसीशो दुम्ती। गो सक्ति मपाडशो मुर खोंदेंशो दुम्ती।
- ५ गो बेक्शो मुरपुकी नु तिल्चा पुंडसीशो बाक्नुड। तुरसुम बाक्शो साडक्चा पुंडसीशो मुर खोंदेंशो दुम्ती। मोपा इन क्येडा डोन बाक्शो इन मफुकशो मुर खोंदेंशो दुम्ती।
- ६ गे आं कली बेक्शो मुर आन बाक्तीके छिडछिड डा नेल्ल क्येडा आगा डा बाक्तीकेमी वोडक्तीनी।
- ७ इन गाडक्तीकेमी आं कली दिप्शो बाक्ब। मिनू इन छालम आं कली सुम्तीनी। ठेयब सेंदा पा।
- ८ गे आं वारच आन कली गो नु गुम्चा हिंपाडक्तीनी। गो आं वारच आन कली हिंचा डा दुम्ती। गो चोक्सीशो, श्येत रे ब्रोंडशा, प्रोक्ने मचाप्नुड। भजन संग्रह ३८:१२
- ९ सुर्ता पतीके आं मिक्च ब्रा डा दुम्ती। परमप्रभु यावे, गो नाक्त किंत किंत इन कली पुंडना पुंडन बाक्नुड। मिनू इन नेमी आं गुड पोक्नुड।
- १० मार, गे बेक्शो मुर आन कली छक लाक्चा डा गेय पाडनीनी? मार, मेको बेक्शो मुरपुकीम बोक्शा, इन कली ठेयब सेल्नीमी? ठेयब सेंदा पा। भजन संग्रह ६:६; यसैया ३८:१८
- ११ मार, गे इन गेना हना यो दाक्तीके आ पर्वम बेक्शो मुर आन बाक्तीकेमी लोव पाडनीमी? इन दाक्शा मप्रोंडतीके आ पर्वम तुरसुम शेंनीमी?
- १२ मार, इन छक लाक्चा डा गेय छिडछिडमी तुडक्नीमी? इन श्येत रे प्रोंडतीके बेक्शो मुर आन दातेमी तुडक्नीमी डा?
- १३ परमप्रभु यावे, गो चहिं सुनी कना इन कली लोव पाडनुड।
- १४ परमप्रभु यावे, गे आं कली मारदे प्रोंडयीनी? मारदे इन कुल खुडक्तीनी?
- १५ गो ठिटा रेन श्येत जशा, बेक्चा चिक्शो बाक्नुड। इन हिंच कोंडशोमी गो श्येत जशो बाक्नुड। मिनू आं थुं लुकच लशो बाक्ब।
- १६ गे आं पर्वम गाडक्ताक्नी। इन हिंच कोंडशोमी आं कली खतम पोक्शो बाक्ब।
- १७ मेकोपुकीम नाक्त रे ब्वाक्कु खोंदेंशो पा आं एर ओंथ नेल्ल हिरशो बाक्नीम। मेकोपुकीम आं कली पुम्शा हिंच कोंडताक्यीमी।
- १८ गे आं कली दाक्ब नु आं वारच आन कली आं कली तशा हिंपाडक्तीनी। मिनू छिडछिड आं नेक्था डा वारच दुम्शो बाक्ब।

## 89

परमप्रभुम आ दाक्तीके मप्रोंडब  
एजाह आ मुर एथान आ कुम्सो।

- १ परमप्रभु यावे, गो इन गेना हना यो दाक्तीके आ पर्वम कुम्सो पाडनुड। गो नेल्ल पाला डा मुर आन कली इन दाक्तीकेम गेनायो मप्रोंडब बाक्नीनी, दे शेनुड।
- २ गे इन दाक्तीके गेना हना यो लीपाडक्चा कली वोडक्तीनी। इन दाक्शा गेनायो मप्रोंडतीके सरीड खोंदेंशो ठेयब बाक्ब।
- ३ गे “गो आं योवशो नु कबल पाता। आं गेय पाडब डाऊड नु कसम जाता। मार कसम जाता देंशा हना, यसैया ५५:३; भजन संग्रह १३२:११
- ४ गो गेना हना यो इ चच युड रे पिप का सेल्लुड। मिनू इ पिप दुम्तीके नेल्ल आन पाला सम्म लीपाडक्नुड” देंतीनी। ठेयब सेंदा पा। २सामुएल ७:१६; प्रेरित २:३०
- ५ परमप्रभु यावे, स्वर्गम बाक्ब नेल्लेमी इन छक लाक्चा डा गेय आ पर्वम इन कली ठेयब सेल्नीम। इन मुर आन गुम्तीकेमी इन दाक्शा गेनायो मप्रोंडतीके आ पर्वम इन कली ठेयब सेल्नीम।
- ६ सरीडमी परमप्रभु यावे कली सु नु थाप्ने चाम्सीबा डा? मिनू स्वर्गम बाक्ब आन दातेमी सु परमप्रभु यावे खोंदेंशो बाक्बा डा? १राजा २२:१९
- ७ आं मुर आन बुक्तीकेमी परमप्रभु कली मान पा हिंनीम। मेको आ एर ओंथ बाक्ब नेल्ल आन क्येडा मेको शुश ठेयब नु मान पा हिंचा माल्लो बाक्ब।
- ८ परमप्रभु यावे, मुर नेल्ल आन परमप्रभु, इन खोंदेंशो ठेयब सक्ति पाडशो सु बाक्बा डा? इन दाक्शा मप्रोंडतीके इन एर ओंथ बाक्ब।
- ९ गे बारशो समुन्द्र कली हुकुम पाडनीनी। मिनू मेको आन छाल बोक्मेनु गे नाडक्पाडक्नीनी। भजन संग्रह ६५:८; मती ८:२६
- १० गे राहाब कली बेक्शो जन्तु खोंदेंशो पा साडक्तीनी। इन जोरी सतु आन कली इन सक्तिमी एर ओंथ ब्रापाडक्तीनी। इजीप्त रागी कली राहाब यो देंनीम। भजन संग्रह ८७:४अय्युब ९:१३; अय्युब २६:१२; यसैया ३०:७; यसैया ५१:९
- ११ सरीड नु रागी निम्फा इन के बाक्नीस। रागी नु मेकेर बाक्शो नेल्ल इन सेल्लो बाक्नीम। भजन संग्रह २४:१
- १२ उत्तर नु दक्खिन इन सेल्लो बाक्नीस। ताबोर नु हेरमोन इन नेम ग्येरशा कुम्सो पाडनीस।
- १३ गे सक्ति पाडशो बाक्नीनी। गे बोल्यो नु ठेयब बाक्नीनी।
- १४ ठीक पतीक नु कुल मकोव्रथु निसाफ पतीके इन राज्य डा सक्ति बाक्ब। इन दाक्शा गेनायो मप्रोंडतीके इन डोंडती बाक्ब।

15 इन कली ग्येरशा ठेयब सेल्वपुकी ग्येरसीशो मुर बाक्नीम। मारदे हना मेकोपुकी, परमप्रभु यावे, इन डोंइती डा छेडछेडमी गाक्नीम।

16 मेकोपुकी नाक्त रे इन नेमी ग्येरसीनीम। मिनु इन ठीक पतीकेमी थुं नाइशशा बाक्नीम।

17 मारदे हना गे मेको आन सक्ति गेब बाक्नीनी। मिनु गो इन शिशीमी आंइ पिया पोक्शो बाक्नीकी।

18 आंइ तेक्तीके, आंइ पिप इसाएल डा परमप्रभु यावे केन बाक्ब।

19 साइ डोंइती गे इन कली मप्रोंइब मुर आन कली कोंइतीक कोंइशा, लोत्र पाइतीनी। मिनु गे “गो लडाइ पाइब का कली सक्ति गेता। गो मुर आन दाते रे का कली ठेयब सेल्ला। १ सामुएल १३:१४; १ सामुएल १६:१३

20 गो आं गेय पाइब, दाऊद कली थित्ता। गो मेको तारी तेल लुक्ताक्ड।

21 मिनु गो मेको कली कोव्नुड। मिनु सक्ति गेनुड।

22 आ जोरी सत्रुमी मेको कली ग्राने मचाप्नीम। परमप्रभु आ अरेशो मटीबपुकीमी मेको कली दिप्ने मचाप्नीम।

23 मेको आ जोरी सत्रु आन कली मेको आ डोंइती खतम पोक्नुड। मिनु मेको कली काइ मदाक्ब आन कली साइक्नुडमी।

24 आं दाक्शा मप्रोंइतीके नु आं गेना हना यो दाक्तीके मेको नु बाक्ब। मिनु आं नेमी मेकोमी आ पिया पोक्ने चाप्ब। आ सक्ति बारब।

25 गो मेको कली समुन्द्र नु ठेयब खोला नेल्ल कली हुकुम पाइब सेल्लुड। भजन संग्रह ७२:८

26 मेकोमी आं कली ‘गे आं आफ बाक्नीनी। आं परमप्रभु, आं कली श्येत रे प्रोंइब सेरथे फुल्लु बाक्नीनी’ देब। २ सामुएल ७:१४

27 गो मेको कली आं डोंइती जरमेशो तौ सेल्लुड। रागी डा पिप नेल्ल आन पिप सेल्लुड।

28 गो मेको कली गेना हना यो दाक्नुड। मिनु मेको नु पशो कबल खाप्नुड।

29 गो मेको आ चच युइ आन कली गेनायो मग्याम्चा डा पा वोइक्नुड। मिनु मेको आ सासन पतीके सरीड लीम सम्म बाक्ब।

30 तन्न मेको आ चच युइपुकीमी आं अरेशो लोत्र प्रोंइतेक्म हना, आं निसाफ पतीके लोत्र मटिम्तेक्म हना,

31 आं पचा देंशो, आं फुल्लुम मुशा ब्रेक्शो लोत्र मपाम्तेक्म हना, आं शेंशो मटिम्तेक्म हना,

32 गो मेको आन पाप आ परबंम कोक्केमी सजाइ गेनुडमी। गो मेको आन ठीक मपशो आ परबंम तुप्शा सजाइ गेनुडमी।

33 तन्न गो मेको आन कली आं गेना हना यो दाक्तीकेम मप्रोंइनुड। आं दाक्शा मप्रोंइतीके मेको नु लीब।

34 गो आं कबल नेल्ल खाप्नुड। आं डोंइती देंशो लोत्र थमा पा पाइनुड।

35 गो आं नेमी काले कसम जाता, गो दाऊद कली जोल मपाइनुड।

36 मेको आ चच युइ गेना हना यो लीनीम। मिनु मेको आ सासन पतीके आं डोंइती नां बाक्म सम्म बाक्ब। भजन संग्रह ७२:१७

37 तास्ला खोदेंशो पा मेको आ सासन पतीके गेना हना यो बाक्ब। सरीड बाक्शो खोदेंशो पा गेना हना यो बाक्ब” देंतीनी। ठेयब सेंदा पाउत्पती ९:१३

38 तन्न गे इन तेल लुक्शो कली प्रोंइशो बाक्तीनी। गे इन तेल लुक्शो आ परबंम शुश गाइक्ताक्नी।

39 गे इन गेय पाइब नु पशो कबल प्रोंइशो बाक्तीनी। गे मेको आ सिरपेच खपीम ताइशशा, ग्रॉया दिशो सेल्लतीनी।

40 आ गारो नेल्ल प्रेशशा, आ दरवार नेल्ल खतम पोक्तीनी।

41 मेको लां रे पा लाइब नेल्लेमी मेको आ मार मार रोइशशा लाइक्तेक्म। मेको आ नेक्था डा मुरपुकीमी मेको कली शुक्शी पाइक्तेक्म।

42 गे मेको आ जोरी सत्रु आन कली बोल्यो सेल्लतीनी। गे मेको आ जोरी सत्रु नेल्ल आन कली ग्येरपाइशो बाक्तीनी।

43 गे मेको कली बुपाइक्तीनी। मिनु लडाइमी चारच मपाइक्नी।

44 गे मेको आ ठेयब दुम्तीके खतम पोक्तीनी। मिनु मेको आ सासन पतीके साम्शा गेतीनी।

45 मेको आ ब्रोंइतीके नाक्त इच्का ला सेल्लतीनी। गे मेको कली मुनेम सुम्पाइक्तीनी। ठेयब सेंदा पा।

46 परमप्रभु यावे, गे गेना सम्म खुइशशा बाक्नीनी? इन गाइक्चा गेना सम्म मी खोदेंशो पा ब्राइबा?

47 परमप्रभु, आं ब्रोंइशा बाक्तीक नाक्त इच्का ला बाक्ब। गे मुर नेल्ल आन कली जाम्शा लाइब सेल्लो बाक्नीनी।

48 मार, मुर गेनायो मबेक्थु, ब्रोंइशा बाक्नीमी? सुम आंम कली बेक्तीक रे प्रोंइने चाप्बा डा? ठेयब सेंदा पा।

49 परमप्रभु यावे, इन साइ डा गेना हना यो दाक्तीके ते लाक्गा? गे दाऊद कली कसम जशा, इन दाक्शा मप्रोंइतीकेमी लोत्र पाइतीनी।

50 परमप्रभु यावे, दोपा इन गेय पाइब, गो शुक्शी पा रिशशा कोत्रचा पुंइसीडा, मेको मिम्तीन। गो मारदे जात जात डा मुरपुकीमी शुक्शी पाइशो फाल्चा माल्डा? मेको यो मिम्तीन। भजन संग्रह ४४:१-२५

51 परमप्रभु यावे, मारदे इन जोरी सत्रुमी आं कली शुक्शी पाइय्यीमी? मेकोपुकीमी मारदे इन तेल लुक्शो, आं कली ते ते थेक्तु, मेक मेक शुक्शी पाइय्यीमी?

52 परमप्रभु यावे गेना हना यो ठेयब बाक्ब। मेको थमा बाक्ब, आमेन। भजन संग्रह ४१:१४

- 1 परमप्रभु गे नेल्ल पाला सम्म आंड बाक्तीके दुम्शो बाक्नीनी।
- 2 मिनु पहाड दुम्चा क्येडा डोंडती नु रागी सेल्चा क्येडा डोंडती गे गेना हना यो बाक्ब परमप्रभु बाक्तीनी।
- 3 गे मुर आन कली लेंशा फुरक दुम्पाइक्नीनी। मिनु गे “मुरपुकी, आं गे लेतीन” देंनीनी। भजन संग्रह १४६:४; उपदेसक १:४
- 4 हजार का बर्स इन कली सिनाक्त खोदेशो बाक्ब। नाक्दो का इन कली याम का खोदेशो बाक्ब। २पत्रुस ३:८
- 5 गे मुर आन कली फिक्शा, लाइक्नीनी। मुर आन ब्रोंडतीक डोमु तशो खोदेशो बाक्ब। मेकोपुकी सुनी नक वाशो घांस खोदेशो बाक्नीम। भजन संग्रह १०२:१२; भजन संग्रह १०३:१५; अय्युब १४:२; यसैया ४०:६; १पत्रुस १:२४-२५
- 6 मेको सुनी गिग दुम्नीम। मिनु नाक्दो सोल सुल बेक्नीम।
- 7 गो इन गाइश्शोमी खतम दुम्शो बाक्नीकी। मिनु इन चुरशो तशा हिनीकी।
- 8 आंड मरिम्शो पशो इन डोंडती वोइश्शो बाक्तीनी। आंड खुइश्शा पशो इन कुल डा छेडछेड आ डोंडती बाक्ब।
- 9 गो आंड नाक्त नेल्ले इन गाइश्शोमी लाक्शो बाक्नीकी। आंड नाक्त नेल्ल हुकयी पशो खोदेशो पा लाक्नीम।
- 10 आंड ब्रोंडतीके ७० बर्स ला बाक्ब। बोल पा ब्रोंडतक हना, ८० बर्स सम्म ब्रोंडनीकी। मो हना यो आंड ब्रोंडतीक नाक्ती नेल्ल श्येत नु मरिम्शो दुम्तीके ला बाक्ब। ब्रोंडतीक नाक्ती रीब पा नुप्ब। मिनु गो बेक्शा लाइनीकी। उपदेसक १:३
- 11 इन गाइक्तीक सक्ति सुम तुइक्बा? गो इन गाइक्तीके आ परबम इन क्येडा हिनीकी।
- 12 मोपतीके आंड ब्रोंडतीक नाक्ती गिशा बाक्नीमी मिम्शा, हिक्चा शेंदीकी। मिनु गो जोक्ब तुइक्ब थुं पाइश्शो दुम्कल। भजन संग्रह ३९:५-७
- 13 परमप्रभु यावे, गेना सम्म डोन बाक्नीनी? आंड गे लेतीन। इन गेय पाइब आंड कली शिशी पने।
- 14 सुनी आंड कली इन गेना हना यो दाक्तीकेमी ग्येरपाइक्की। मिनु गो ब्रोंडका सम्म ग्येरशा कुम्सो पा बाक्ने चाप्कल।
- 15 गे गिशा नाक्त सम्म आंड कली श्येत गेनी? मिश नाक्त सम्म आंड कली ग्येरपाइक्की। गो शुश बर्स श्येत जाइतक।
- 16 इन गेय पाइबपुकीमी इन गेय तुइक्तमेक्ल। मिनु मेको आन आल आन कली इन छेडछेड डा सक्ति कोंडदीन। यसैया ५:१२
- 17 परमप्रभु यावे, आंड परमप्रभु, इन शिशी आंड तार बाक्ल। मिनु आंड गुड डा गेय रिम्शो दुम्ल। थमा पा, आंड पशो नेल्ल रिम्शो सेलीन।

## 91

श्येत रे प्रोंडतीके

- 1 सु नेल्ल क्येडा टेयब आ फाप्तीकेम बाक्बा नु नेल्ल क्येडा सक्ति पाइश्शो आ नेक्था बाक्बा,
- 2 मेकोमी परमप्रभु यावे कली “गे आं खुइक्तीक नु आं बोल्यो दरवार बाक्नीनी। गे आं परमप्रभु बाक्नीनी। गो इन कली थमा सुइक्नुड” देब।
- 3 मेकोमी इ कली चिक्ब ग्याइक्ब मुर आ ब्वारद नु मुर साइक्ब रोइ रे प्रोंडब।
- 4 मेकोमी इ कली आ फ्रांमी फाप्ब। मिनु गे मेको आ फ्रां आगागी खुइश्शा बाक्नेवे। मेको आ दाक्शा गेनायो मप्रोंडतीके इ तेक्तीक नु गारो दुम्ब।
- 5 मिनु गे नाक्दो डा हिंतीके नु नाक्ती बेरशा जाक्ब ब्रा तशा महिनेवे।
- 6 छिडछिडम जाक्ब मुर साइक्ब रोइ नु नाक्ती याक्सीब रोइ तशा महिनेवे।
- 7 मिनु हजार का जना मुर इ डोंडती साइक्चा पुंडसीनीम। मिनु इ ग्युरा गे १० हजार मुर साइक्चा पुंडसाक्म हना यो, गे साइक्चा मपुंडसीनेवे।
- 8 परमप्रभु कली मटीबपुकी दोपा क्येक्क लेत्चा पुंडसीनीमी, गे मेको ताइनेवे।
- 9 मारदे हना गे “परमप्रभु यावे आं खुइक्तीके बाक्ब” देते। मिनु गे नेल्ल क्येडा टेयब कली इ बाक्तीक सेल्लतीवी।
- 10 इ कली मारेड मरिम्शो मटुम्ब। इ बाक्तीक आ नेक्था मारेड हिंचा डा मटुम्ब।
- 11 मारदे हना मेकोमी आ स्वर्ग डा गेय पाइब आन कली इ लां नेल्लेमी इ कली वारच पपाइक्ब। मती ४:६
- 12 मेकोपुकीमी इ कली आन गुड गुडम ताक्शा कुरनीम। इ खोइली फुल्लुम मथोक्पाइक्चा कली मोदेशो पाइनीम।
- 13 गे गुप्स नु बीस पाइश्शो बुस्स दिम्नेवे। मेको बोल्यो बाक्तेक्म हना यो, मेको आन कली दिम्शा साइक्नेवे। लूका १०:१९
- 14 मिनु परमप्रभुमी “मेकोमी आं कली दाक्तीके, गो मेको कली श्येत रे प्रोंडनुड। मेकोमी आं नें तुइक्तीके, गो मेको कली फाप्नुड।
- 15 मेकोमी आं कली थोइब। मिनु गो आ लोत्र लेत्नुड। मेको श्येत जवानु, गो मेको नु बाक्नुड। मेको कली श्येत रे प्रोंडशा, मान ताइब सेल्लुड। भजन संग्रह ५०:१५
- 16 गो मेको कली शुश ब्रोंडचा गेशा, आं प्रोंडतीके तपाइक्नुड” दे परमप्रभुमी देंत। यसैया ५२:१०

## 92

परमप्रभु कली पुंडशो

नाइक्तीक नाक्त पतीक कुम्सो।

- 1 परमप्रभु यावे कली “गे रिम्शो पाइब बाकनीनी” देंचा रिम्शो बाक्ब। मिनु “इन नें नेल्ल क्येडा ठेयब बाक्ब” दे कुम्सो पचा रिम्शो बाक्ब। भजन संग्रह १४७:१
- 2 सुनी इन गेना हना यो दाक्तीके नु नाक्दो इन दाक्शा मप्रोंडतीके आ पर्वम लोत्र पचा रिम्शो बाक्ब।
- 3 बेन्जो नु तार पाइश्शो ठेयब ताप्तीक ताप्शा, बीना आ लायोमी मोदेंशो कुम्सो पचा रिम्शो बाक्ब।
- 4 मिनु गो “परमप्रभु यावे, इन पशोमी आं कली ग्येरपाइक्तीनी” दे इन पशो तशा, ग्येरशा कुम्सो पाइनुड।
- 5 परमप्रभु यावे, इन गेय थम ठेयब बाक्नीम। इन मिम्तीके यो थम ठेयब बाक्ब। भजन संग्रह १०४:२४; यसैया ५५:९
- 6 निप्स मपाइश्शो मुरपुकीमी मेको तुडक्ने मचाप्नीम। मूर्खपुकीमी मेको रुप्ने मचाप्नीम।
- 7 मिनु परमप्रभु आ अरेशो मटीबपुकी घांस खोदेंशो पा बारनीम। मरिम्शो पाइबपुकी फू खोदेंशो पा बोइक्नीम। नोले मेकोपुकी गेनायो मलीचा डा पा क्याम्चा पुंडसीनीम।
- 8 तन्न परमप्रभु यावे, गे गेना हना यो ठेयब सेल्चा पुंडसीनीनी।
- 9 परमप्रभु यावे, इन जोरी सत्रु क्याम्चा पुंडसीनीम। मरिम्शो पाइब नेल्ल एर ओथ ब्राइनीम।
- 10 गे आं कली ब्वाकी डा ब्यफ खोदेंशो पा सक्ति गेतीनी। आं कली नेल्ल क्येडा रिम्शो तेल लुक्ताक्यीनी। भजन संग्रह २३:५
- 11 गो आं जोरी सत्रु बुशो तशा ग्येरसीनुड। आं कली मरिम्शो पाइबपुकी खतम दुम्शो लोत्र नेंशा, ग्येरसीनुड।
- 12 ठीक पाइबपुकी चहिं खजूर रवा खोदेंशो पा बारनीम। मेकोपुकी लेबानोन डा लाइश्शो रवा खोदेंशो पा लाइक्नीम। भजन संग्रह १:३; भजन संग्रह ५२:१०
- 13 मेकोपुकी आंइ परमप्रभु यावे आ खिंमी खूम्शो दुम्शा, आंइ परमप्रभु आ लाइगाम बोइक्नीम।
- 14 मिनु मेकोपुकी शुश बर्स दुम्मानु यो, फल सिल्तीम। मेकोपुकी गिग नु नक डा नक लीनीम।
- 15 मिनु गो “परमप्रभु यावे गेना हना यो ठीक पाइब बाक्ब। मेको आं सेरथे फुल्लु बाक्ब। मेको नु मारेइ मरिम्शो मबाक्ब” देंनुड। ब्यवस्था ४२:४

## 93

परमप्रभु आ ठेयब दुम्तीके

- 1 परमप्रभु यावेमी सासन पाइब। मेको पिप आ वाम ग्योम्सीशो बाक्ब। परमप्रभु यावेमी आ सक्ति किम्सीशो बाक्ब। रागी आ जग बोल्यो बाक्ब, मेको गेनायो महिम्सीब। भजन संग्रह ४७:८; भजन संग्रह ९६:१०; भजन संग्रह ९७:१; भजन संग्रह ९८:६; भजन संग्रह ९९:१; भजन संग्रह १४६:१०; प्रस्थान १५:१८
- 2 इन ठेयब नित्तीके साइ डोंडती रे चोइश्शो बाक्त। गे साइ रेन बाक्शो बाक्तीनी।
- 3 परमप्रभु यावे, समुन्द्र बारशा कुशो बाक्ब। मेको आ छाल आ रेयके ठेयब दुम्शो बाक्ब।
- 4 ठेयब समुन्द्र आ रेयके नु समुन्द्र आ बोल्यो छाल क्येडा इरीम बाक्ब। परमप्रभु यावे नेल्ल क्येडा ठेयब सक्ति पाइश्शो बाक्ब।
- 5 इन देशो लोत्र गेना हना यो बाक्नीम। परमप्रभु यावे, इन खिं गेना हना यो इन सक्तिमी ब्रीशो बाक्ब।

## 94

ब्रोइचा आ पर्वम पुंडशो लोत्र

- 1 परमप्रभुमी क्येक्क लेप्ब। परमप्रभु यावे, परमप्रभु, इन छेडछेड कोंडदीन। ब्यवस्था ३२:३५
- 2 रागी कली निसाफ पाइब, बोक्कीन। मिनु ठेयब लेश्शो आन कली आन पशो डा क्येक्क लेत्तीन। उत्पत्ती १८:२५
- 3 परमप्रभु यावे, इन अरेशो मटीबपुकी गेना सम्म ठेयब लेत्तीमी?
- 4 मेकोपुकीमी ठेयब लेश्शो लोत्र ला पाइनीम। मरिम्शो पाइब नेल्लेम आन नें बोरपाइक्नीम।
- 5 परमप्रभु यावे, मेकोपुकीमी इन मुर आन कली दिम्शा ताइश्शा पशो बाक्नीम। इन योत्रशो रागी खतम पोक्शो बाक्नीम।
- 6 मेकोपुकीमी आन वोंइश बेक्शो मीश मुर नु अर्को रागी डा मुर आन कली साइश्शो बाक्नीम। मिनु रोम रोइक्च आन कली यो साइश्शो बाक्नीम।
- 7 मिनु मेकोपुकीमी “परमप्रभु यावेमी मताइब। याकूब आ परमप्रभुमी मतुइक्ब” देंनीम। भजन संग्रह १०:११
- 8 गे, निप्स मपाइश्शो मुरपुकी रूपीन। गे, मूर्खपुकी गेना जोक्ब तुडक्ब दुम्नीनी?
- 9 इन नोफा सेल्बमी मनंबा डा? मिक्च सेल्बमी मताइबा डा? प्रस्थान ४:११
- 10 रागी रागी डा मुर आन कली सजाइ गेबमी इन कली सजाइ मगेबा डा? मेकोमी मुर आन कली मारेइ मारेइ तुडक्पाइक्ब।
- 11 परमप्रभु यावेमी मुर आन मिम्शो तुडक्ब। मेकोमी इ मिम्शो नेल्ल जाम्शा लाइब, दे यो तुडक्ब। १कोरिन्थी १:२०
- 12 परमप्रभु यावे, गे सु सु कली सजाइ गेशा, शेंदीनी, मेको ग्येरसीशो मुर दुम्नीम। मारदे हना मेको आन कली इन अरेशो लोत्र शेंनीनी। अय्युब ५:१७
- 13 इन अरेशो मटीब मबेक्मा सम्म, गे मेको इन शेंशो आन कली श्येत रे नाइक्चा गेनीनी।
- 14 मारदे हना परमप्रभु यावेमी आ मुर आन कली मप्रोंइब। मिनु आ योत्रशो रागी यो मप्रोंइब। यसैया ३७:३३-३५
- 15 ठीक मुर लेंशा ठीक पतीके ताइनीम। ब्रेम्शो थुं पाइश्शो मुर ठीक लां खोइक्नीम।
- 16 परमप्रभु आ अरेशो लोत्र मटीब आन पर्वम सु पोन बोक्बा? मरिम्शो पाइब आन पर्वम सु पोन बोक्बा? भजन संग्रह ११५:१७
- 17 परमप्रभु यावेमी आं कली चारच मपाइश्शो हना, गो बेक्शो मुर आन बाक्तीके जाक्दीड वा।



- 18 गो “आं खोइल ग्रेकत” देंती। मिनु परमप्रभु यावे, इन गेना हना यो दाक्तीकेमी तिव्कीनी।  
 19 गो आं थुमी थाम्पा सुर्ता पाता। इन लेम्शोमी आं थुं नांइसाक्ब। २कोरिन्थी १:४-५  
 20 मार, इन अरेशो मटीब हुकुम पाइबपुकी गे नु गारनीमी डा? मेकोपुकीमी इन फुल्लुम मुशा ब्रेकशो लोत्र दूली सेल्शो बाक्नीमी।  
 21 मेकोपुकीमी ठीक पाइब आन पर्वम दोपा मरिम्शो पचा, दे लोत्र गारपाइक्नीम। मिनु दोस मताइब आन कली साइक्नीम।  
 22 तन्न परमप्रभु यावे आं बोल्यो दरवार नु आं खुइक्तीक सेरथे फुल्लु बाक्ब।  
 23 मेकोमी मेको आन मरिम्शो पशो आन पिया तार मोइक्ब। मिनु मेको आन अरेशो मटितीके मेको आन कली साइक्ब। परमप्रभु यावे, आंइ परमप्रभुमी मेको आन कली खतम पोक्ब।

## 95

ठेयब सेल्तीक कुम्सो पय

- 1 जाक्कीन, ग्येरसीशा परमप्रभु यावे कली कुम्सो पय। इं कली श्येत रे प्रॉइब सेरथे फुल्लु कली ठेयब सेंदा पा कुम्सो पय।  
 2 “गे रिम्शो पाइब बाक्नीनी” देंना देंन, मेको आ डोंइती लय। कुम्सो पा मेको कली ठेयब सेल्य।  
 3 मारदे हना परमप्रभु यावे ठेयब परमप्रभु बाक्ब। देवी देवता नेल्ल आन ठेयब पिप बाक्ब। प्रस्थान १५:११  
 4 मिनु रागी डा उइ रे डांडा डा इर सम्म नेल्ल मेको आ गुडम बाक्ब।  
 5 समुन्द्र नु सोत्रशो रागी नेल्ल मेको आ सेल्शो बाक्ब।  
 6 जाक्कीन, मेको कली बाप्शा ठेयब सेल्य। इं कली सेल्ब, परमप्रभु यावे आ डोंइती पोक्ब थैकतय।  
 7 मारदे हना मेको इं परमप्रभु बाक्ब। गो मेको आ योत्रशो भेडा नय। मिनु मुलाक्त मेको आ सेंदा नेनीन। भजन संग्रह १००:३; यूहन्ना १०:२७-२८  
 8 गेपुकी मेरीबाम पशो खोदेशो पा इन थुं खकटा मसेलीन। गेपुकी गोरशो रागी मास्साह माइशोमी बाक्ची ना पशो खोदेशो मपने। हिब्रू ३:७-८; हिब्रू ४:७  
 9 परमप्रभुमी “इन किर्की पिपीमी आं पशो गेय नेल्ल ताम्तेक्म हना यो, मेकोपुकीमी आं कली नाक्शा कोव्रतीमी। प्रस्थान १७:२,७  
 10 गो ४० बर्स सम्म मेकोपुकी नु गाइक्ताक्ड। एको दूली पाइब मुर बाक्नीम। आं कली मटीब बाक्नीम।  
 11 मोपतीके गो आं गाइक्तीकेमी ‘एको आन कली आं थुं नाइक्पाइक्तीके मगेनुड’ दे कसम जाता” दे परमप्रभुम देंत। गन्ती १४:२२-२३; हिब्रू ४:३

## 96

परमप्रभु रागी नेल्ल डा पिप बाक्ब

१इतिहास १६:२३-३३

- 1 परमप्रभु यावे कली नक कुम्सो का पय। रागी रागी डा मुर नेल्लेमी परमप्रभु यावे कली कुम्सो पने।  
 2 परमप्रभु यावे कली कुम्सो पने। आं नें ठेयब सेलीन। गे नाक्त किंत किंत मेको मुर आन कली श्येत रे प्रॉइशो आ पर्वम रागी रागी डा मुर आन कली शेंदीने।  
 3 रागी रागी डा मुर आन दातेमी मेको आ सक्ति आ पर्वम लोत्र पने। जात जात डा मुर आन दातेमी आ छक लाक्चा डा गेय आ पर्वम लोत्र पने।  
 4 मारदे हना परमप्रभु यावे ठेयब बाक्ब। ठेयब सेल्शा मान पाइक्चा पुइसीब बाक्ब। मेको देवी देवता नेल्ल आन क्येडा मान पा हिंचा माल्शो बाक्ब।  
 5 मारदे हना जात जात डा मुर आन देवी देवता शोर गाक्शो मूर्ति ला बाक्नीम। तन्न परमप्रभु यावेमी सरीड सेल्लु।  
 6 मान ततीके नु नेल्ल क्येडा ठेयब दुम्तीके मेको नु बाक्ब। मेको आ बाक्तीक सक्ति नु छेडछेडम ब्रीशो बाक्ब।  
 7 गे रागीम बाक्ब खिं खिं डा मुरपुकीमी परमप्रभु यावे कली “गे सक्ति नु छेडछेड पाइशो बाक्नीनी” दे ठेयब सेलीन।  
 8 गेपुकीमी परमप्रभु यावे आ नें थिशा, मेको कली “गे ठेयब बाक्नीनी” देनीन। चह्वेतीक चाक्शा, मेको आ बाक्तीक डा लाडगाम जाक्कीन।  
 9 रिम्शो पतीकेमी ग्योम्सीशा, परमप्रभु यावे कली “गे ठेयब बाक्नीनी” दे लोत्र पने। रागी डा मुर नेल्ले मेको आ डोंइती मेको कली मान पा खिंखि पने।  
 10 गे रागी रागी डा मुर आन दातेमी “परमप्रभु यावे पिप बाक्ब” दे शेंदीन। रागी महिम्सीचा डा पा सेल्शो बाक्ब। मेको मयाक्सीब। मेकोमी जात जात डा मुर आन कली कुल मकोव्रथु निसाफ पाइब। भजन संग्रह ९३:१  
 11 सरीड नु रागी ग्येरसीसल। समुन्द्र नु मेकेर बाक्ब नेल्ल रेयके पामेक्ल। भजन संग्रह ९८:७-९; यसैया ४९:१३  
 12 रू नु मेकेर वाशो नेल्ल ग्येरसीमल। मिनु ब्वाक्कीम बाक्शो रवा नेल्ल ग्येरशा,  
 13 परमप्रभु यावे आ डोंइती कुम्सो पाइनीम। मारदे हना परमप्रभु यावे जाक्ब। मेको रागी कली निसाफ पथ जाक्ब। मेकोमी रागी नेल्ल कली ठीक पतीकेमी निसाफ पाइब। मिनु जात जात डा मुर आन कली थमा पा आन कुल मकोव्रथु निसाफ पाइब। भजन संग्रह ८२:८; प्रेरित १७:३

## 97

परमप्रभु नेल्ल क्येडा ठेयब बाक्ब

- 1 परमप्रभु यावे पिप बाक्ब। रागी ग्येरसेक्ल। डोन डोन डा रागी डा मुरपुकी यो ग्येरसीमल। भजन संग्रह ९३:१
- 2 मेको आ एर ऑथ गोस्स नु ठेयब छिडछिड बाक्ब। ठीक पतीके नु ठीक निसाफ मेको आ सासन पतीक जग बाक्ब।
- 3 मेको आ डोंडडोंडती मी लशा, आ एर ऑथ डा जोरी सत्रु नेल्ल आन कली दाक्ब। हबकुक् ३:४
- 4 मेको आ चिलामी रागी नेल्ल हाम्सो दुम्ब। रागी रागी डा मुर मेको तशा खिंखि पाइनीम।
- 5 परमप्रभु यावे आ डोंडती डांडा मयीन खोदेशो पा याइनीम। रागी नेल्ल परमप्रभु यावे आ डोंडती मोदेशो दुम्ब। यहोसु ३:१३
- 6 मिनु स्वर्गम मेको आ ठीक पतीके नेल्ल कोंडब। जात जात डा मुर नेल्लेमी मेको आ छेडछेड ताइनीम। भजन संग्रह ६७:५-६; यसैया २४:२१-२२
- 7 मूर्ति पूजा पाइब नेल्ल मुने तोक्चा पुंडसीनीम। मूर्ति कली थमा सुइक्बपुकी मुने दोक्नीम। देवी देवता नेल्ल परमप्रभु आ डोंडती बाप्पीन। येरमीया ४६:२५; हिब्रू १:६
- 8 परमप्रभु यावे आ निसाफ पशो नेंशा, सियोन नु यहूदा डा सहर नेल्ल ग्येरसीनीम।
- 9 मारदे हना परमप्रभु यावे, गे रागी डा नेल्ल क्येडा ठेयब बाक्नीनी। देवी देवता नेल्ल आन क्येडा गे शुश ठेयब बाक्नीनी। प्रस्थान १५:११
- 10 परमप्रभु यावेमी मरिम्शो पतीक कली काड मदाक्ब मुर आन कली दाक्ब। आ कली थमा सुइक्ब आन कली कोत्रब। मेको आन कली आ अरेशो मटीब आन गुड रे प्रोंडब।
- 11 ठीक पाइब आन कली छेडछेड बाक्ब। मिनु ब्रेम्शो थुं पाइशशो मुर आन कली ग्येरतीक बाक्ब।
- 12 ठीक पाइबपुकी परमप्रभु यावे नु ग्येरसीन। मेको कली “गे रिम्शो पाइब बाक्नीनी” देनीन।

## 98

परमप्रभुमी वारच पाइब

कुम्सो का।

- 1 परमप्रभु यावे कली नक कुम्सो का पय। मारदे हना मेकोमी छक लाक्चा डा गेय पाप्टु। मेको आ ठेयब सक्तिमी प्रात। भजन संग्रह ३३:३; यसैया ५९:१६; यसैया ६३:५
- 2 परमप्रभु यावेमी आ प्रातीके कोंडशा, आ श्येत रे प्रोंडतीके रागी रागी आन डोंडती कोंडताक्ब।
- 3 मेकोमी इस्राएली आन कली आ गेना हना यो दाक्तीके नु आ दाक्शा मप्रोंडतीके कोंडताक्ब। रागी नेल्ल डा मुरपुकीमी आंइ परमप्रभुम मेको आन कली श्येत रे प्रोंडशो ताम्तेक्म। यसैया ५२:१०
- 4 रागी रागी डा मुर नेल्ल परमप्रभु यावे कली ग्येरसीशा कुम्सो पने। साप्पा ग्येरसीशा मेको कली ठेयब सेलीन।
- 5 गे ठेयब नु आइक्च तार पाइशशो ताप्तीक ताप्शा परमप्रभु यावे कली कुम्सो पा ठेयब सेलीन।
- 6 आंइ पिप, परमप्रभु यावे आ डोंडती ग्येरसीशा तुराही नु ग्योत्र ताप्पीन। भजन संग्रह ९३:१
- 7 समुन्द्र नु मेकेर बाक्ब नेल्लेमी परमप्रभु कली ठेयब सेलीन। रागी नु रागीम बाक्ब नेल्लेमी यो परमप्रभु कली ठेयब सेलीन। भजन संग्रह ९६:११-१३
- 8 समुन्द्र डा छालपुकीमी आन गुड फ्रोक्चा माल्नीम। डांडा नेल्ल ग्येरसीशा परमप्रभु यावे आ डोंडती कालेम कुम्सो पने।
- 9 मारदे हना परमप्रभु यावे रागी कली निसाफ पथ जाक्ब। मेकोमी ठीक पा जात जात डा मुर आन कुल मकोत्रथु निसाफ पाइब।

## 99

परमप्रभु यावे पिप बाक्ब

- 1 परमप्रभु यावे पिप बाक्ब। जात जात डा मुरपुकी खिंखि पामेक्ल। मेको करूब आन तारी बाक्ब। रागीम खिनु कुल। भजन संग्रह ९३:१; भजन संग्रह १८:११
- 2 परमप्रभु यावे सियोनम ठेयब बाक्ब। जात जात डा मुर नेल्ल आन क्येडा ठेयब बाक्ब।
- 3 मेको नेल्लेमी इन ठेयब नु हिंजा डा नें कली ठेयब सेल्लेक्ल। परमप्रभु यावे का ला बाक्ब।
- 4 सक्ति पाइशशो पिपम, ठीक निसाफ दाक्ब, गे कुल मकोत्रथु, याक्ब आ रागीमी ठीक पतीके नु ठीक निसाफ वोइक्तीनी। यसैया ९:६
- 5 परमप्रभु यावे, आंइ परमप्रभु कली ठेयब सेलीन। आ खोइल थेक्तीकेमी मान पने। मारदे हना मेको का ला परमप्रभु बाक्ब। भजन संग्रह १३२:७-८; १इतिहास २८:२; बिलाप २:१
- 6 मोसा नु हारून मेको कली चढेब बाक्ताक्स। परमप्रभु यावे कली पुंडशा लोत्र पाइब आन दातेमी सामुएल का यो बाक्त। मेकोपुकीमी परमप्रभु यावे कली पुंडशा लोत्र पामेनु, मेकोमी मेको आन कली लोत्र लेशशो बाक्त।
- 7 मेकोमी गोस्स के थाम रे पा मेकोपुकी नु लोत्र पशो बाक्त। मेकोपुकीमी मेको आ देशो नु आ फुल्लुम मुशा ब्रेक्शो लोत्र टिशो बाक्तेक्म।
- 8 परमप्रभु यावे, आंइ परमप्रभु, गे मेको आन कली लोत्र लेशशो बाक्तीनी। गे मेको आन कली माफ गेब परमप्रभु बाक्तीनी। गे मेको आन मरिम्शो पशो आ क्येक्च यो लेशशो बाक्तीनी। प्रस्थान ३४:७

9 परमप्रभु यावे, आंइ परमप्रभु कली ठेयब सेलीन। मेको कली आ डांडाम मान पने। मारदे हना परमप्रभु यावे, आंइ परमप्रभु का ला बाक्ब।

## 100

“रिम्शो पाइब बाक्ब” दे पशो कुम्सो  
परमप्रभु कली “गे रिम्शो पाइब बाक्नीनी” दे चढेतीकेम पशो कुम्सो।

- 1 रागी रागी डा मुर नेल्ल परमप्रभु यावे कली ग्येरसीशा कुम्सो पने।
- 2 ग्येरसीशा परमप्रभु यावे कली ठेयब सेलीन। गे कुम्सो पना पन आ नेक्था लने।
- 3 परमप्रभु यावे का ला परमप्रभु बाक्ब, दे रूपीन। मेकोमी इं कली सेल्शो बाक्त, गो मेको आ मुर बाक्नय। गो मेको आ योव्रतीक डा भेडा बाक्नय। भजन संग्रह १५:१७
- 4 मिनु “गे रिम्शो पाइब बाक्नीनी” दे आ ठेयब लाप्चो रे ओव्रडीन। आ कली मान पा आ लाडगाम ठेयब सेल्तीक कुम्सो पने। मेको कली “गे रिम्शो पाइब बाक्नीनी” दे आ नें कली मान पा ठेयब सेलीने। भजन संग्रह १०६:१
- 5 मारदे हना परमप्रभु यावे रिम्शो पाइब बाक्ब। मिनु आ गेना हना यो दाक्तीके लीब। मिनु आ दाक्शा मप्रोंइतीके नेल्ल पाला सम्म बाक्ब।

## 101

पिप आ मिम्शो लोत्र  
दाऊद आ कुम्सो।

- 1 परमप्रभु यावे, गो इन दाक्शा मप्रोंइतीक नु इन ठीक निसाफ पतीक आ पर्वम इन कली कुम्सो पाइनुड।
- 2 गो दोस मततीक लां शेंसीचा दाक्नुड। गो मेको गेना पने चाप्नुड? गो आं खिंमी रिम्शो थुं पाइशो मुर दुम्शा बाक्चा दाक्नुड।
- 3 गो मारेड मरिम्शो मिम्शा कोव्रचा मदाक्नुड। नोले शोंइसीब आन पतीके काइ मदाक्नुड। गो मोदेशो मदुडल। हितोपदेस २०:८,२८
- 4 दूली पतीक थुं आं क्येडा डोन बाक्चा मालब। मिनु गो मरिम्शो पतीके यो तुडक्चा मदाक्नुड।
- 5 सु आ नेक्था डा मुर आन पर्वम मरिम्शो लोत्र पाइबा, गो मेको कली खतम सेल्नुड। ठेयब लेशो नु बोरोशु थुं पाइशो मुर आन कली आं नेक्था बाक्चा मगेनुड।
- 6 गो रागी डा थमा सुडक्चा पुंडसीब मुर आन कली दाक्शा कोव्रनुड। मिनु गो नु बाक्चा गेनुडमी। सु सु दोस मततीक लां गाक्नीमी, मेको आन कली आं गेय पाइब सेल्नुडमी। हितोपदेस २२:११
- 7 दूली पाइब आन कली आं खिंम बाक्चा मगेनुडमी। जोल पाइबपुकी आं डोंइती बाक्चा मताइनीम।
- 8 गो सुनी कुस कुस रागीम बाक्ब परमप्रभु आ अरेशो लोत्र मटीब आन कली खतम सेल्नुडमी। मोपा परमप्रभु यावे आ सहरम बाक्ब मरिम्शो पाइब मलीनीम। हितोपदेस २०:२६

## 102

श्येत जशा आस पशो  
श्येत जाइबमी परमप्रभु यावे आ डोंइती पुंडशो।

- 1 परमप्रभु यावे आं पुंडशो नेनीन। आं डाक्शा पुंडशो इन बाक्तीकेम जाक्ल।
- 2 गो श्येत जडा नाक्ती इन कुल मखुडक्तीन। गो ब्रेडडा नाक्ती आं लोत्र फ्रा लेल्तीनी।
- 3 मारदे हना आं नाक्त कुन बुद पा जाम्नीम। मिनु आं रुश नेल्ल ठेयब मीम नाप्शो खोदेशो पा चोशो बाक्नीम।
- 4 आं थुं घांस खोदेशो पा बेक्ब। मोपतीके गो आं शोब्ले यो जने मचबु।
- 5 हुकयी पा आं कुशुल नेल्ल रुशेम क्येप्शो बाक्नीम।
- 6 गो गोरशो रागी डा हुहुचील खोदेशो दुम्शो बाक्नुड। गो ब्रेशो खिं आन दातेम बाक्ब बुक्स खोदेशो दुम्शो बाक्नुड।
- 7 गो डन्ने मचाप्यु, खिं तार आ का ला बाक्शो चिक्ब खोदेशो दुम्शो बाक्नुड।
- 8 नेल्ल नाक्त आं जोरी सत्रुमी आं कली शुक्शी पा बाक्नीम। आं कली शुक्शी पाइबपुकीमी आं नें थिशा साराप पाइनीम।
- 9 मारदे हना गो शोब्ले खोदेशो पा पुलु जाइनुड। मिनु प्रेक्कु ब्वाइशो ब्वाक्कु तूनुड।
- 10 एको नेल्ल इन गाइक्तीकेमी दुम्शो बाक्ब। मारदे हना गो आं कली क्युकशा, ताइक्ताकयीनी।
- 11 आं ब्रोंइतीक नाक्त पेरचा चिक्शो नां खोदेशो बाक्ब। मिनु गो घांस खोदेशो पा बेक्शो बाक्नुड। भजन संग्रह १०:५-६
- 12 परमप्रभु यावे, गे गेना हना यो पिप बाक्नीनी। मिनु गे नेल्ल पाला सम्म बाक्नीनी। भजन संग्रह १३५:१३
- 13 गे बोक्शा, सियोन कली थमा पा शिशी पाइनीनी। मेको कली शिशी पतीक नाक्त जाक्शो बाक्ब।
- 14 मारदे हना इन गेय पाइबपुकीमी मेकेर डा फुल्लु यो दाक्नीम। मिनु मेकेर डा फुरक कली यो शिशी पाइनीम।
- 15 रागी रागी डा मुरपुकी परमप्रभु यावे आ नें नेंशा हिनीम। रागी डा पिप नेल्ले मेको आ सक्ति तशा हिनीम।
- 16 मारदे हना परमप्रभु यावेमी सियोन कली लेंशा सेल्ब। मिनु आ छेडछेडमी गूब।
- 17 मेकोमी श्येत जाइब आन पुंडशो नेंब। मिनु आन पुंडशो गेब।
- 18 एको लोत्र मुल जाक्ब पाला आन कली ब्रेक्चा मालब। मिनु नोले जरमेबपुकीमी परमप्रभु यावे कली ठेयब सेलीनीम।

- 19 मारदे हना परमप्रभु यावेमी इर आ बाक्तीक रे कोत्रशो बाक्ब। परमप्रभु यावेमी स्वर्ग रे कोत्रशो बाक्ब। भजन संग्रह १४:२
- 20 मेकोमी ग्याइशशा चोक्चा पुंडसीशो आन हुकयी पशो नेंब। मिनु साइक्चा पुंडसीब आन कली प्रोइब।
- 21 मोपा “परमप्रभु यावे ठेयब बाक्ब” दे सियोन डा मुर आन कली शेंदमेक्ल। मिनु यरूसलेम डा मुरपुकीम मेको कली ठेयब सेल्मेक्ल।
- 22 मिनु जात जात नु राज्य राज्य डा मुर बुक्शा, परमप्रभु यावे कली ठेयब सेल्नीम। भजन संग्रह ८७:४; येरमीया ६०:३-१०; लूका १३:२९-३०
- 23 गो टिटा बाक्ना बाक्न, परमप्रभुमी आं सक्ति क्युम्ताकयी, आं ब्रोंइतीक नाक्त क्युम्ताकयी।
- 24 मिनु गो “आं परमप्रभु, आं कली बेक्ची मजाक्थु, मलाइय्यीनी। इन नाक्त नेल्ल पाला सम्म लीनीम” देंती। भजन संग्रह ५५:२४
- 25 साइ डोंइती गे रागी आ जग सेल्शो बाक्तीनी। मिनु सरीड इन गुड डा गेय बाक्ब। हिबू १:१०-१२
- 26 मेको नेल्ल जाम्शा लाइनीम। तन्न गे गेना हना यो बाक्नीनी। मेको रागी नु सरीड वा खोदेंशो पा माइत दुम्शा जेक्नीम। गे फेक्तीके वा फाइशशो खोदेंशो पा, मेको आन कली फाइक्नीनी। मिनु मेकोपुकी जाम्शा लाइनीम। २पत्रुस ३:१०
- 27 तन्न गे गेना हना यो खाल का डा बाक्नीनी। मिनु इन नाक्त गेनायो मनुप्नीम।
- 28 इन गेय पाइब आन चच युइ रिम्शो पा बाक्चा माल्नीम। मिनु आन चच युइ इन डोंइती बोल्यो दुम्शा बाक्नीम।

## 103

परमप्रभु कली ठेयब सेल्शो

दाऊद आ कुम्सो।

- 1 आं थुं, परमप्रभु यावे कली ठेयब सेलो। मिनु गो आं थुं नेल्लेमी आ नें ठेयब सेल्नुड।
- 2 आं थुं, परमप्रभु यावे कली ठेयब सेलो। मिनु इ कली रिम्शो पशो नेल्ल मप्रेंदो। ब्यवस्था ४:९
- 3 मेकोमी इ मरिम्शो पशो नेल्ल क्याम्शा गेशो बाक्ब। मिनु इ रोइ नेल्ल सापाइक्ब। भजन संग्रह ३२:१
- 4 मेकोमी इ कली खतम दुम्तीक रे प्रोइब। इ कली आ गेना हना यो दाक्तीके नु शिशी पतीकेमी कोइब।
- 5 मेकोमी इ ब्रोंइतीक नाक्त नेल्ल इ माल्शो खाप्शा गेब। मिनु इ ब्रोंइतीके ककाकुली के खोदेंशो पा लेंशा टिटा सेल्ब। यसैया ४०:३१
- 6 परमप्रभु यावेमी दिप्चा पुंडसीशो नेल्ल आन कली वारच पा ठीक निसाफ पाइब।
- 7 मेकोमी मोसा कली आ लां नु इस्त्राएल डा मुर आन कली आ गेय कोंइताक्व। प्रस्थान ३३:१३
- 8 परमप्रभु यावे शिशी पाइब नु रिम्शो पाइब बाक्ब। मेको रीब पा मगाइक्थु, आ गेना हना यो दाक्तीके शुश कोइब। भजन संग्रह ८६:१५
- 9 मेकोमी गेना हना यो “गे दूली पाइतीनी” मदेब। मिनु गेना हना यो मगाइक्ब। यसैया ५७:१६
- 10 मेकोमी इ पशो पाप आ परबम सजाइ मगेब। मिनु इ मरिम्शो पशो डा क्येक्क मलेप्ब।
- 11 रागी रे सरीड दोशो इर बाक्बा, मोशोन आ गेना हना यो दाक्तीके आ कली मान पा हिंब आन कली पशो बाक्ब। भजन संग्रह ३६:६; यसैया ५५:८-९
- 12 नां दाप्तीक रे नां परतीक दोशो डोन बाक्बा, मोशोन आंइ मरिम्शो पशो नेल्ल डोन तिल्लो बाक्ब।
- 13 आफोमी आ तमी तौ आन कली दोदेंशो पा शिशी पाइबा, मोदेंशो पा परमप्रभु यावेमी आ कली मान पा हिंब आन कली शिशी पशो बाक्ब। लूका १५:११-२४
- 14 मारदे हना गो दोपा सेल्सीशो बाक्नीकी, मेकोमी तुइक्ब। मेकोमी गो फुरक ला बाक्नीक, दे यो तुइक्ब। उत्पत्ती २:७; उत्पत्ती ३:१९
- 15 मुर आन ब्रोंइतीके घांस खोदेंशो बाक्ब। रूमी बोइशशो फू खोदेंशो पा बोइक्ब। भजन संग्रह ९०:५-६; अय्युब ७:१०
- 16 मिनु फश पवानु, मेको जाम्शा लाइब। मिनु आ बाक्तीक यो मतुइक्ब।
- 17 तन्न परमप्रभु यावे आ गेना हना यो दाक्तीक आ कली मान पा हिंब नु गेना हना यो लीब। मिनु आ ठीक पतीके आन तौ चच आन पाला सम्म लीब। लूका १:५०
- 18 सु सुमी कबल पा, आ शेंशो टीनीमी, मेकोपुकी नु आ गेना हना यो दाक्तीक लीब।
- 19 परमप्रभु यावेमी आ ठेयब नित्तीके स्वर्गम वोइशशो बाक्ब। मिनु स्वर्ग नु रागीम बाक्शो नेल्ल कली सासन पाइब।
- 20 परमप्रभु यावे आ स्वर्ग डा गेय पाइबपुकी, परमप्रभु यावे कली ठेयब सेलीन। गे सक्ति पाइशशो, आ देंशो टीबपुकी मेको कली ठेयब सेलीन। यसैया ६:१-४; भजन संग्रह २९:१; भजन संग्रह १४८:२; दानीएल ७:१०
- 21 गे स्वर्ग डा गेय पाइबपुकी परमप्रभु यावे कली ठेयब सेलीन। आ गेय पाइब नेल्ल परमप्रभु यावे आ दाक्शो पने।
- 22 परमप्रभु यावे आ सासन पतीकेमी बाक्शो, आ सेल्शो नेल्लेमी परमप्रभु यावे कली ठेयब सेलीन। आं थुं, परमप्रभु यावे कली ठेयब सेलो।

## 104

परमप्रभु ठेयब बाक्ब

- 1 आं थुं, परमप्रभु यावे कली ठेयब सेलो। परमप्रभु यावे, आं परमप्रभु गे थम ठेयब बाक्नीनी। ठेयब दुम्तीके नु मान ततीके इन के बाक्ब।
- 2 गे छेडछेड कली वा फेक्शो खोदेंशो पा फेक्शो बाक्नीनी। मिनु सरीड कली ताम्बु खोदेंशो पा प्राक्शा कीशो बाक्नीनी।

- 3 गे इन बाक्तीक डा थाम ब्वाक्कु तारी सेल्शो बाक्नीनी। गे गोस्स कली इन बग्गी सेल्शो बाक्नीनी। मिनु गे फश आ फ्रां तार डोइशशा गाक्ब बाक्नीनी। उत्पत्ती १:६-८; भजन संग्रह १८:१०-१२
- 4 मिनु गे फश कली इन लोत्र चोत्रब नु मी कली इन गेय पाइब सेल्शो बाक्नीनी। हिबू १:७
- 5 रागी गेना यो महिमसेक्ल, दे आ जग वोइक्तीनी। मत्ती २४:३५; प्रकाश २१:१
- 6 गे मेको कली वा बुद पा ब्वाक्कुमी सुम्तीनी। मिनु ब्वाक्कु डांडा तार सम्म जाक्दीशो बाक्त।
- 7 गे हुइक्तीनीनु, मेको प्रोक्ब। इन बुंबु पशो सेदामी मेको दोरोर पा लाइब।
- 8 मेको ब्वाक्कु डांडा ग्येथ बारशा, दिंम मेर शाइक्ब। मिनु इन देशो बाक्तीके सम्म लाइनीम।
- 9 मेको लेंशा रागी कली सुम्थ मजाक्मल, दे गे सांद सेल्तीनी। अय्युब ३८:८-११; हितोपदेश ८:२९
- 10 गे दिम मेर ब्वाक्कु बुक्तीक सेल्तीनी। मिनु मेको डांडा आन दाते रे शाइशशा लाइनीम।
- 11 गे ब्वाकी डा जन्तु नेल्ल आन कली तूचा गेनीनी। ब्वाकी डा गधापुकीमी यो मेकेर डा ब्वाक्कु तूशा, ब्रोंडनीम।
- 12 मेको खोला आन नेक्था चिक्बपुकीमी आन ग्योत्र सेल्तीम। मिनु राशीम बाक्शा कुम्सो पाइनीम।
- 13 इन इर डा बाक्तीक रे रेउ यिपाइशशा डांडा आन कली जिप्पाइक्नीनी। इन गेय पशोमी रागी नेल्ल ग्येरसीनीम।
- 14 गे बी ब्यफ आन कली घांस वापाइक्नीनी। मिनु खप रे मुर आन कली जचा थोत्रक वापाइक्नीनी।
- 15 मिनु गे मुर आन थुं ग्येरपाइक्चा कली अडगुर सिप्पाइक्नीनी। मिनु आन कुल दारपाइक्चा कली तेल नु आन रां बोल्यो सेल्चा कली शोब्ले गेनीनी।
- 16 परमप्रभु यावे आ खुम्शो लेबानोन डा लाइशशो रवा शुश ब्वाक्कु ताइब बाक्नीमी।
- 17 मेकेर चिक्बमी आन ग्योत्र सेल्तीम। मिनु ठेयब बुश चिक्बपुकीमी सला रवाम आन ग्योत्र सेल्तीम।
- 18 लाइशशो डांडापुकी ब्वाकी डा क्यारश आन कली बाक्नीम। सेरथे फुल्लु आइक्च जन्तु आन खुइक्तीके बाक्नीम।
- 19 मिनु गे बर्खा नु हिंडद कोंडचा कली तास्ला सेल्तीनी। नांमी आ दाप्तीक पेरतीक तुइक्ब। भजन संग्रह ७४:१६
- 20 गे छिडछिड सेल्तीनी। मिनु नाक्दो दुम्ब। मेना ब्वाकी डा जन्तु ग्रीनीम।
- 21 मिनु गुप्स आ चाइक्बपुकीमी सिखार माल्शा, ग्रीशा आन जचा थोत्रक परमप्रभु आ गुइ रे पुंडनीम।
- 22 मिनु नां दाप्मेनु, मेको आन पुक्खीम लशा, खुइशशा गोल्नीम।
- 23 मुरपुकी चहिं आन गेय पथ लाइनीम। मिनु नाक्दो सम्म गेय पाइनीम।
- 24 परमप्रभु यावे, इन गेय ठेयब नु शुश बाक्नीम। गे जोक्ब तुइक्ब दुम्शा, नेल्ल सेल्तीनी। रागी नेल्ल इन सेल्शो मारेइ मारेइम ब्रीशो बाक्ब। उत्पत्ती १:३१
- 25 मेकेर ठेयब नु ब्रेम्शो समुन्द्र बाक्ब। मिनु मेकेर हिक्ने मचाप्चा डा पा ठेयब नु आइक्च जन्तु रमल ग्यमल पा बाक्नीम।
- 26 मेकेर रे जहाजपुकी यो गाक्नीम। मिनु गे मेकेर ग्यारचा कली लेव्याथन यो सेल्तीनी।
- 27 मिनु मेको नेल्लेमी “जचा थोत्रक गेकी” दे इन कली कोत्रनीम। भजन संग्रह १४५:१५-१६
- 28 गे मेको आन कली गेनीनु, मेकोपुकीमी खुप्नीम। इन मुठी प्राक्नीनु, मेकोपुकी ब्रोत्रशो नु रिम्शो थोत्रकीमी रूनीम।
- 29 मिनु इन कुल खुइक्तीनीनु, मेकोपुकी श्येत जाइनीम। मेको आन सोक्त लाइक्नीनु, मेकोपुकी बेक्नीम। मिनु लेंशा फुरक दुम्नीम। उत्पत्ती ३:१९
- 30 मिनु इन सोक्त सोइशशा, मेको आन कली सेल्तीनी। मिनु गे रू आन कली लेंशा सेल्तीनी।
- 31 परमप्रभु यावे आ सक्ति गेना हना यो लीशा बाक्ल। परमप्रभु यावे आ गेय तशा, आंमा ग्येरसेक्ल।
- 32 गे रागी कली कोत्रनीनु, मेको खिंखि पाइब। गे डांडा कली थिनीनु, कुन यूब।
- 33 गो ब्रोंडडा सम्म परमप्रभु यावे कली कुम्सो पना पन बाक्नुड। गो मबेक्डा सम्म आं परमप्रभु कली ठेयब सेल्शा, कुम्सो पना पन बाक्नुड।
- 34 मेकोमी आं मिम्शो दाक्तल। मारदे हना गो परमप्रभु यावे कली मिम्शा ग्येरसीनुड।
- 35 पाप पाइबपुकी रागी रे क्याम्चा पुंडसीमल। मिनु आ अरेशो मपाइबपुकी मलीमल। आं थुं परमप्रभु यावे कली ठेयब सेलो। परमप्रभु यावे कली ठेयब सेलो।

## 105

परमप्रभु कली मान पतीके

- 1 परमप्रभु यावे कली “गे रिम्शो पाइब बाक्नीनी” दे लोत्र पने। जात जात डा मुर आन कली परमप्रभु आ पशो तुइक्पतीन। इतिहास १६:८-२२
- 2 मेको कली कुम्सो पने। मेको कली ठेयब सेल्तीक कुम्सो पने। मुर आन कली आ पशो छक लाक्चा डा गेय शेंदीन।
- 3 गे परमप्रभु आ नें तुइक्तीके ग्येरसीन। परमप्रभु यावे कली माल्ब आन थुं ग्येरसीमल।
- 4 गे परमप्रभु यावे नु आ सक्ति मालीन। गे गेना हना यो मेको आ नेक्था बाक्चा मालीन।
- 5 गे मेको आ पशो रिम्शो गेय मिम्तीन। आ छक लाक्चा डा गेय नु आ निसाफ पशो मिम्तीन।
- 6 मेको आ गेय पाइब अब्राहाम आ चच युइ नु याक्कुब आ तौपुकी, आ योत्रशो नेल्ल मिम्तीन।
- 7 मेको परमप्रभु यावे, आंइ परमप्रभु बाक्ब। मेको आ निसाफ रागी नेल्ल कली बाक्ब।
- 8 मेकोमी आ पशो कबल गेना हना यो मिम्ब। आ देशो लोत्र हजार हजार पाला सम्म मिम्ब। ब्यवस्था ७:९
- 9 मेकोमी अब्राहाम नु मेको कबल पशो बाक्त। मिनु इसहाक नु यो थोक्शा लोत्र पशो बाक्त।

- 10 मेकोमी आ फुल्लुम मुशा ब्रेकशो लोत्र याकूब कली गेशो बाक्त। मिनु मेको इसाएल कली गेना हना लीब कबल बाक्ब।
- 11 मेकोमी “गो इ कली कनान रागी गेनुड। मेको इन के दुम्ब” देशो बाक्त। उत्पत्ती १२:७
- 12 मेना मेको आन कली हिक्शोनु, इच्का खोइ ला बाक्मा बाक्त। मिनु मेकेर अर्को रागी डा मुर यो बाक्मा बाक्त।
- 13 मेकोपुकी रागी का रे अर्को रागी नु राज्य का रे अर्को राज्य पा हिरना हिरन बाक्बाक्मा बाक्त।
- 14 परमप्रभुमी मेको आन कली सुइमी श्येत गेचा मगेमी बाक्त। मिनु मेको आन पबंम पिप आन कली हुइकतीमी बाक्त। गन्ती २३:७-१०
- 15 मेकोमी “आं तेल लुकशो आन कली मथिने। आं लोत्र पाइब आन कली मारेइ मपतीन” दे हुइकतीमी बाक्त।
- 16 मिनु परमप्रभुमी मेको रागीमी अन्काल सोइश्शा, अन्न नेल्ल खतम सेल्शा, उत्पत्ती ४१:५४
- 17 मुर का कली मेको आन डोंइती सोइक्ता बाक्त। मेको योसेफ वाइल सेल्चा कली लेयचा पुंडसीशो बाक्त। उत्पत्ती ३७:२८
- 18 मिनु मेको कली आ खोइलीम साडलो पाइश्शा, आ शुरमी फलाम के साडलो पाइक्तामे बाक्त।
- 19 मिनु योसेफ आ लोत्र थमा मदुम सम्म, परमप्रभु यावेमी मेको कली वारच पवा बाक्त।
- 20 मिनु पिपमी मुर सोइश्शा, मेको कली प्रोना बाक्त। जात जात डा मुर आन कली सासन पाइबमी मेको कली प्रोना बाक्त। उत्पत्ती ४१:१४
- 21 मिनु मेकोमी योसेफ कली आ दरवार डा ठेयब मुर सेल्शा, आ शोंप नेल्ल आन होत्रप सेला बाक्त।
- 22 मिनु आ आइक्च हुकुम पाइब आन कली शेंचा नु खाल्पा आन कली तुइक्ब सेल्चा कली योसेफ कली वोदा बाक्त।
- 23 मिनु इसाएल डा मुर इजीप्तमी ओत्रमा बाक्त। मिनु याकूब हाम आ रागीमी बाक्ब दुम्माक्त। उत्पत्ती ४६:१,७
- 24 मिनु परमप्रभु यावेमी आ मुर आन कली शुश सोशा बोशा सेल्मी बाक्त। मिनु मेको आन कली आन जोरी सनु आन क्येडा बोल्यो सेल्मी बाक्त। प्रस्थान १:७,१२
- 25 परमप्रभुमी इजीप्ती आन थुं इसाएली आन कली काइ मदाक्ब सेल्मी बाक्त। मिनु इसाएली आन कली काइ मरिम्शो पाइब सेल्मी बाक्त।
- 26 मिनु परमप्रभुमी आ योत्रशो गेय पाइब मोसा नु हारून आस कली मेकेर सोइक्ता बाक्त। प्रस्थान ३:१०; प्रस्थान ४:१४-१६
- 27 मेको निकशीमी हाम आ रागी डा मुर आन दातेमी परमप्रभु आ चिन्ड नु छक लाक्चा डा गेय कोंइदसे बाक्त। प्रस्थान ७:१२-
- 28 मेकोमी छिडछिड सोइक्ता बाक्त। मिनु मेकेर छिडछिड दुम्माक्त। तन्न मेकोपुकीमी मेको आ लोत्र मटीमे बाक्त।
- 29 मेकोमी मेको आन ब्वाक्कु हुश सेलानु, मेकेर डा डांड नेल्ल बेक्मा बाक्त।
- 30 आन रागीमी कृक्कपुकी जाक्शा, आन पिप आन बाक्तीके सम्म जाक्दीम्मा बाक्त।
- 31 परमप्रभुमी लोत्र पवानु, आन रागी भुस्ना नु चुरमुमी ब्रीमा बाक्त।
- 32 मेकोमी रेट आ पा डा मुप्स यिपदा बाक्त। मिनु मेको रागी नेल्लेमी चिला दाप्पदा बाक्त।
- 33 मिनु मेकोमी आन अडगुर बोट नु फोत्रशी रवा नेल्ल खतम सेल्शा, रागी नेल्ल डा रवा फस पोक्मा बाक्त।
- 34 मेकोमी लोत्र पवानु, माले जाक्मा बाक्त। हिक्ने मचाप्चा डा पा माले नु आन चाइक्ब शुश जाक्मा बाक्त।
- 35 मेकोपुकीमी मेको रागी डा बाक्शो गिग नु फल फुल नेल्ल नेक्गमे बाक्त।
- 36 मिनु मेकोमी आन डोंइती थिशो तौ सदा बाक्त। आन डोंइती डा बोल डा आल खतम सेला बाक्त।
- 37 मिनु नोले परमप्रभुमी इसाएली आन कली सुन चांदी कुरपाइश्शा मेक रे गुंडदीमी बाक्त। मिनु मेको रे गूब नेल्ल बोल्यो बाक्मा बाक्त। प्रस्थान १२:३५
- 38 मिनु इजीप्त रागी डा मुरपुकी इसाएलीपुकी यूशा लमानु, शुश ग्येरसामा बाक्त। मारदे हना मेको आन कली तशा शुश हिंशो बाक्मा बाक्त।
- 39 मिनु परमप्रभुमी आ मुर आन कली सुम्चा कली गोस्स सोइक्ता बाक्त। मिनु नाक्दो गाक्चा कली मी के थाम गेमी बाक्त। प्रस्थान १४:२०
- 40 मेको आन पुंडतीके मेको आन कली चिक्ब गेमी बाक्त। मिनु सरीड रे जचा थोत्रक यिपदा बाक्त। प्रस्थान १६:१३-१५
- 41 मेकोमी सेरथे फुल्लु रे ब्वाक्क बुक्पदा बाक्त। मिनु मेको गोरशो रागीमी खोला खोदेशो पा शांडसे बाक्त। प्रस्थान १७:६
- 42 मारदे हना परमप्रभुमी आ थोक्शा पशो लोत्र नु आ गेय पाइब, अब्राहाम कली मिन्ता बाक्त।
- 43 मोपा परमप्रभुमी आ योत्रशो मुर आन कली ग्येरपाइश्शा गुंडदीमी बाक्त। मिनु मेकोपुकी कुम्सो पा यूमा बाक्त।
- 44 मिनु परमप्रभुमी रागी रागी डा मुर आन रागी नु आन शोंप मेको आन कली गेमी बाक्त।
- 45 मेकोपुकीमी परमप्रभुमी फुल्लुम मुशा ब्रेकशो लोत्र, आ अरेशो लोत्र टीमेक्ल, दे मोदेशो पवा बाक्त। परमप्रभु यावे कली ठेयब सेलीन।

## 106

### ठेयब सेलतीके

- 1 परमप्रभु यावे कली ठेयब सेलीन। गेपुकीमी “गे रिम्शो पाइब बाक्नीनी” दे लोत्र पने। मारदे हना मेको रिम्शो पाइब बाक्ब। मिनु आ दाक्तीके गेना हना यो लीब। भजन संग्रह १००:४-५; प्रस्थान १०७:१; प्रस्थान ११८:१; १इतिहास १६:३४

- 2 सुमी परमप्रभु यावे आ सक्ति पाइशो गेय आ पबंम देने चाप्वा डा? सुमी मेको कली ठेयब सेल्लतीक नेल्ल देने चाप्वा डा? यूहन्ना २१:२५; हिब्रू ११:३२
- 3 सु सुमी ठीक पा निसाफ पाइनीमी नु गेना हना यो ठीक बाक्नीमी, मेको ग्येरसीशो मुर बाक्नीमी।
- 4 परमप्रभु यावे, गे इन मुर आन कली शिशी पनी ना, आ कली यो मिम्तीन। मेको आन कली प्रॉइनीनु, आ कली यो वारच पन।
- 5 मिनु मोपा गो इन योत्रशो मुर आन रिम्शो पा बाक्शो तने चाप्नुड। मिनु इन मुर ग्येरसीशा बाक्शो तशा, ग्येरसीनुड। गो इन योत्रशो मुर दुम्शा ग्येरसीनुड।
- 6 गोपुकी नु आंइ किकी पिपीम पाप पाइतक। गोपुकीमी मरिम्शो पा इन अरेशो लोत्र मटिक। दानीएल ९:५
- 7 इजीप्त रागीम बाक्शो आंइ किकी पिपीम इन छक लाक्वा डा गेय ममिम्शो बाक्तेकम। मिनु इन शुश गेना हना यो दाक्तीके प्रेशो बाक्तेकम। मिनु लल समुन्द्रमी नेल्ल क्येडा ठेयब कली गाइशो लोत्र पशो बाक्तेकम। प्रस्थान १४:११-१२
- 8 मोदेशो पाप्तेकम हना यो, परमप्रभुमी आ नें आ पबंम मेको आन कली श्येत रे प्रॉइशो बाक्त। मोदेशो पा आ ठेयब सक्ति कौंइशो बाक्त।
- 9 मेकोमी लल समुन्द्र कली हुइकतानु, सोत्रशो बाक्त। मिनु मेको आन कली गोरशो रागी खोदेशो पा, समुन्द्र डा लां रे खुल्लो बाक्त।
- 10 मिनु मेको आन कली आन जोरी सत्रु आन गुइ रे प्रॉइशो बाक्त। मोपा आ प्रॉइशो मुर दुम्शो बाक्तेकम।
- 11 मेको ब्वाक्कुमी आन जोरी सत्रु आन कली सुम्शा साइशो, का यो मलीशो बाक्तेकम।
- 12 मिनु नोले आ देशो थमा सुइशो बाक्तेकम। मिनु परमप्रभु कली ठेयब सेल्लतीक कुम्सो पशो बाक्तेकम। प्रस्थान १५:२१
- 13 तन्न मेकोपुकीमी परमप्रभु आ पशो रीब पा प्रेशो बाक्तेकम। मेको आ अर्ती नेंचा मबिश्शो बाक्तेकम।
- 14 मिनु मेकोपुकी गोरशो रागीम बाक्मानु, आन शोत्र रक सुइशो बाक्त। मिनु परमप्रभु कली गोरशो रागीम नाक्शा कोत्रशो बाक्तेकम। गन्ती ११:४-६
- 15 मिनु परमप्रभुमी मेको आन पुइशो गेशो बाक्त। तन्न मेको आन दातेमी बेक्तीक रोइ सोइशो बाक्त।
- 16 मिनु मेकोपुकीमी परमप्रभु यावे रे पा योत्रसीशो मोसा नु हारून आस कली गेहे पशो बाक्तेकम। गन्ती १६:१-३
- 17 मिनु रागी जेशा, दाथान कली दाक्शो बाक्त। मिनु अबीराम आ हुल कली सुम्शो बाक्त। गन्ती १६:३१-३५
- 18 मिनु मेको आन दातेमी मी गूशा, परमप्रभु आ अरेशो मपाइब आन कली ग्राव गु दाक्शो बाक्त।
- 19 मेकोपुकीमी हारेब डांडाम बाछा का सेल्शा, मेको मूर्ति कली पूजा पशो बाक्तेकम। प्रस्थान ३२:१-६
- 20 मेकोपुकीमी आन मान पशो परमप्रभु आ पा डा घांस ब्वाइब ब्यफ आ मूर्ति कली ठेयब सेल्लो बाक्तेकम। रोमी १:२३
- 21 मेकोपुकीमी आन कली श्येत रे प्रॉइब नु इजीप्तम ठेयब गेय पाइब आन परमप्रभु कली प्रेशो बाक्तेकम। ब्यवस्था ३२:१८
- 22 मेकोमी हाम आ रागीमी छक लाक्वा डा गेय नु लल समुन्द्र आ नेक्था शुश हिंचा डा गेय पशो बाक्त।
- 23 मोपतीके मेकोमी “मेको आन कली खतम सेल्लनुड” दे मिम्शो बाक्त। तन्न आ योत्रशो मुर मोसामी “मेको आन कली मोदेशो मपचा” दे पुंइशो बाक्त। मिनु आ गाइशो नाइशो बाक्त। प्रस्थान ३२:११, ३२; ब्यवस्था ९:२५-२९; इजीकीएल १३:४-५
- 24 मिनु नोले मेकोपुकीमी परमप्रभु आ गेशो रागी मदाक्शो बाक्तेकम। आ थोक्शा पशो लोत्र थमा मसुइशो बाक्तेकम। गन्ती १४:२-४; ब्यवस्था ८:७-१०
- 25 मेकोपुकीमी आन ताम्बुम गन गन पशो बाक्तेकम। मिनु परमप्रभु यावे आ देशो मटिशो बाक्तेकम।
- 26 मोपतीके मेको आन कली “गो इन कली गोरशो रागीम साइक्नुड।
- 27 मिनु इन चच युइ आन कली रागी रागीम फ्राइनुड” दे कसम जशो बाक्त।
- 28 मिनु मेकोपुकीमी पेओर डा बाल कली पूजा पशो बाक्तेकम। मिनु बेक्शो मुर आन कली चढ़ेशो जशो बाक्तेकम। गन्ती २५:३
- 29 मेकोपुकीमी आन पतीकेमी परमप्रभु कली गाइक्पाइशो बाक्तेकम। मिनु मेको आन दातेम बेक्तीक रोइ गूशो बाक्त।
- 30 मिनु फिनेहास बोक्शा परमप्रभु कली पुंइशो बाक्त। मिनु मेको मुर बेक्तीक रोइ नांइसीशो बाक्त। गन्ती २५:१२-१३
- 31 मेको आ पुंइतीके इस्राएलीपुकीमी “फिनेहास ठीक पाइब बाक्ब” दे शुश पाला सम्म मिम्शो बाक्तेकम।
- 32 मेकोपुकीमी मेरीबा डा ब्वाक्कु आ नेक्था परमप्रभु कली गाइक्पाइशो बाक्तेकम। मोपतीके मेको आन पबंम मोसा कली मरिम्शो दुम्शो बाक्त। गन्ती २०:२-१३
- 33 मेकोपुकीमी मोसा कली गाइक्पदमेनु, मोसाम मरिम्शो लोत्र पशो बाक्त।
- 34 मिनु मेकोपुकीमी परमप्रभु यावे आ देशो खोदेशो पा जात जात डा मुर आन कली मसदमे बाक्त। ब्यवस्था ७:१२; ब्यवस्था १२:२-३; न्यायाधीस १:२८; न्यायाधीस २:२३-३:६
- 35 मेकोपुकीमी रागी रागी डा मीश आल आन कली ग्युबे पामे बाक्त। मिनु रागी रागी डा मुर आन पशो यो पामे बाक्त।
- 36 मेकोपुकीमी मेको आन मूर्ति आन कली पूजा पामे बाक्त। मिनु मेको आन कली ग्याइल खोदेशो दुम्माक्त।
- 37 मेकोपुकीमी आम तमी तौ वोल आन कली चढ़ेमे बाक्त। २राजा २१:६, १६
- 38 मेकोपुकीमी आन पाप मपशो तमी तौ आन कली कनानी आन मूर्ति कली चढ़ेशा, आन हुश जारदमे बाक्त। मेको आन हुशेमी मेको रागी ग्रांया दिशो दुम्माक्त।

- 39 मोपा मेको आन गेयम पतीके ग्रांरा दिशो दुम्शा, तेल्लेम खोदेशो दुम्मा बाक्त।  
 40 मोपतीके परमप्रभु यावे आ मुर नु गाडक्ता बाक्त। आ योत्रशो मुर आन कली तशा ग्रांरा दिमाक्त।  
 41 मिनु मेकोमी मेको आन कली रागी रागी डा मुर आन गुडम गेमी बाक्त। मिनु मेको आन जोरी सत्रुम मेको आन कली सासन पामे बाक्त। न्यायाधीस २:१४  
 42 मिनु आन जोरी सत्रुमी मेको आन कली दिप्शा, आन सक्तिम हुकुम पामे बाक्त।  
 43 मिनु परमप्रभुमी मेको आन कली शुश खेयप प्रॉइमी बाक्त। तन्न मेकोपुकीमी गेनायो परमप्रभु कली मटीमे बाक्त। मेको आन मरिम्शो पतीकेमी खतम दुम्मा बाक्त।  
 44 तन्न परमप्रभुमी मेको आन डाक्शो नेशा, आन श्येत जशो रे प्रॉइमी बाक्त।  
 45 मिनु मेकोमी मेको आन कली पशो कबल मिम्ता बाक्त। मिनु मेको आ गेना हना यो शुश दाक्तीक डा शिशी कोंइदीमी बाक्त।  
 46 मिनु परमप्रभुमी इस्राएली आन कली सासन पाइब आन थुंमी शिशी पतीक कुर पवा बाक्त।  
 47 मिनु गे “परमप्रभु यावे, आंड परमप्रभु, आंड कली प्रोनीन। मिनु इन कली ‘गे रिम्शो पाइब बाक्नीनी’ देंचा कली नु इन नें ठेयब सेल्शा ग्येरसीचा कली आंड कली रागी रागी रे खुप्तीन। ब्यवस्था ३०:३; १इतिहास १६:३५  
 48 परमप्रभु यावे, इस्राएली आन परमप्रभु गेना हना यो ठेयब बाक्ल। मिनु मुरपुकीमी ‘मोदेशो दुम्ल। आमेन’ देनीन” परमप्रभु यावे ठेयब बाक्ब। भजन संग्रह ४१:१४; १इतिहास १६:३६

## 107

“गे रिम्शो पाइब बाक्नीनी” देशो

- 1 गे परमप्रभु यावे कली “गे रिम्शो पाइब बाक्नीनी” दे कुम्सो पने। मारदे हना मेको आ दाक्तीके गेना हना यो लीब। भजन संग्रह १०६:१  
 2 परमप्रभु यावेमी श्येत रे प्रॉइचा पुंडसीशोपुकीमी मोपा कुम्सो पचा मालनीम।  
 3 मेको आन कली रागी रागी रे खुप्ताक्मी। पूर्व, पच्छिम, उत्तर, दक्खिन नु ब्वाक्कु बुक्तीके रे नु ब्वाक्कु शाइक्तीक रे खुप्ताक्मी।  
 4 का निक्शी गोरशो रागी मेर हिरशा, मुर बाक्तीक सहर मथिदेम।  
 5 मेकोपुकी जचा तूचा मतथु बेक्चा चिक्ताक्मे।  
 6 मोपा श्येत जशा, परमप्रभु यावे कली पुंडतेक्म। मिनु मेकोमी मेको आन कली आन श्येत रे प्रॉइतु।  
 7 मेकोमी मेको आन कली पित्थ लाम खुल्तीमी। मिनु मुर बाक्तीक सहरम चाक्दील्तीमी।  
 8 मेकोपुकीमी परमप्रभु यावे कली “गे रिम्शो पाइब बाक्नीनी” देंचा मालनीम। मारदे हना मेकोमी मुर आन कली गेना हना यो दाक्शा, मेको आन कली वारच पा, छक लाक्चा डा गेय पाइब।  
 9 मेकोमी तूत दाक्ब आन कली तूपाइक्ब। मिनु शोत्रलु बेक्शो आन कली ब्रोत्रशो जचा थोत्रकमी रूपाइक्ब। लूका १:५३  
 10 का निक्शी श्येत जशा छिडछिडम बाक्तेक्म। चोक्चा पुंडसीशोपुकी साडलाम पाइक्चा पुंडसीशा, श्येत जशो बाक्तेक्म।  
 11 मारदे हना मेकोपुकीमी परमप्रभु आ लोत्र मटिशो बाक्तेक्म। नेल्ल क्येडा ठेयब आ अर्ती मनेनेम।  
 12 मोपतीके मेकोपुकीमी शुश गेय पचा माल्तेक्म। मेकोपुकी गोल्लेक्म। तन्न मेको आन कली वारच पाइब सुड मबाक्म।  
 13 मोपा श्येत जशा, परमप्रभु यावे कली पुंडतेक्म। मिनु मेकोमी मेको आन कली आन श्येत रे प्रॉइतु।  
 14 मेकोमी मेको आन कली आन श्येत नु छिडछिड रे गुंडताक्मी। मिनु मेको आन साडलो प्रॉइक्तु।  
 15 मेकोपुकीमी परमप्रभु यावे कली “गे रिम्शो पाइब बाक्नीनी” देंचा मालनीम। मारदे हना मेकोमी मुर आन कली गेना हना यो दाक्शा, मेको आन कली वारच पा, छक लाक्चा डा गेय पाइब।  
 16 मेकोमी कांसा के लाप्चोपुकी प्रोल्ब। मिनु फलाम के बार जिक्ब।  
 17 का निक्शी मूर्ख दुम्शा, आम आन मरिम्शो पतीकेमी श्येत जाम्तेक्म।  
 18 मेकोपुकीमी जचा थोत्रक ग्रांरा दिशा, मारेड जत मदाक्म। मिनु बेक्चा चिक्ताक्म।  
 19 मोपा श्येत जशा, परमप्रभु यावे कली पुंडतेक्म। मिनु मेकोमी मेको आन कली आन श्येत रे प्रॉइतु।  
 20 मेकोमी आ लोत्र सोइशशा, मेको आन कली सापाइक्तु। मेको आन कली बेक्चा रे प्रॉइतु।  
 21 मेकोपुकीमी परमप्रभु यावे कली “गे रिम्शो पाइब बाक्नीनी” देंचा मालनीम। मारदे हना मेकोमी मुर आन कली गेना हना यो दाक्शा, मेको आन कली वारच पा, छक लाक्चा डा गेय पाइब।  
 22 मेकोपुकीमी “गे रिम्शो पाइब बाक्नीनी” दे चढेमेक्ल। मिनु परमप्रभु आ पशो नेल्ल ग्येरशा कुम्सो पा शेंदमेक्ल।  
 23 का निक्शी जहाज डोइशशा, समुन्द्रम लाम्तेक्म। मेकोपुकी ग्याप्ब लेयब दुम्शा, ठेयब समुन्द्रम गाक्तेक्म।  
 24 परमप्रभु यावेमी ठेयब समुन्द्रम मार मार छक लाक्चा डा गेय पवा, मेको ताम्तेक्म।  
 25 मिनु मेकोमी अरेशा, ठेयब फश गिवार पपाइक्तु। मिनु ठेयब समुन्द्र आ छाल पोक्तु।  
 26 मेकोपुकी सरीड सम्म जाक्दीत्तेक्म। मिनु लेशा ठेयब समुन्द्रमी दोक्तेक्म। मिनु मेकोपुकी शुश हिंशा वाम ग्याम दुम्तेक्म।  
 27 मिनु मेकोपुकी दुक्शो मुर खोदेशो पा गोल्ला चिक्शा गाक्तेक्म। मिनु मारेड पने मचाप्ब दुम्तेक्म।  
 28 मोपा श्येत जशा, परमप्रभु यावे कली पुंडतेक्म। मिनु मेकोमी मेको आन कली आन श्येत रे प्रॉइतु।



- 29 मेकोमी फश गिवार दिक्पाइव्तु। मिनु ठेयब समुन्द्र आ छाल दिक्तेकम।  
 30 मिनु फश गिवार दिक्मेनु, मेकोपुकी ग्येरसाक्म। मिनु मेकोमी मेको आन कली आन जहाज नाइक्तीकेम चाक्दीत्तु।  
 31 मेकोपुकीमी परमप्रभु यावे कली “गे रिम्शो पाइब बाक्नीनी” देंचा माल्नीम। मारदे हना मेकोमी मुर आन कली गेना हना यो दाक्शा, मेको आन कली वारच पा, छक लाक्चा डा गेय पाइब।  
 32 मेकोपुकीमी मुर आन गुम्तीकेमी परमप्रभु कली ठेयब सेल्मेकल। खाल्पा आन दातेमी “परमप्रभु ठेयब बाक्ब” देंमल।  
 33 मेकोमी खोला आन कली गोरशो रागी सेल्ब। ब्वाक्कु बुक्तीके आन कली सोत्रशो रागी दुम्पाइक्ब।  
 34 मेकोमी ग्रेल्ब रू कली हिक्सी रू सेल्ब। मारदे हना मेकेर बाक्ब मुर आ अरेशो मटीब बाक्नीम। उत्पती १९:२४-२५  
 35 मेकोमी गोरशो रागी कली दोम्ली बाक्शो रागी सेल्ब। मिनु थाम्पा सोत्रशो रागीम शुश ब्वाक्कु बुक्पाइक्ब।  
 36 मेकेर शोत्रलु बेक्शो मुर आन कली बाक्चा गेब। मिनु मेकोपुकीमी मेकेर बाक्तीक सहर सेल्नीम।  
 37 मेकोपुकीमी रूमी वांचेर शोक्नीम। अडगुर खुम्नीम। मिनु मेको नेल्ल शुश ग्रेल्नीम।  
 38 मेकोपुकी परमप्रभु आ आसीक तशा, सोशा बोशा दुम्नीम। मिनु आन बी ब्यफ आन कली यो शुश दुम्पाइक्ब।  
 39 मिनु मेकोपुकी दिप्चा पुंडसीतीके नु श्येत जतीके शुश मलीशो बाक्तेकम।  
 40 मिनु परमप्रभुमी मेकेर डा हुकुम पाइब आन कली लां मबाक्शो गोरशो रागीम गाक्पाइक्तीमी। अय्युब १२:२१  
 41 तन्न मेकोमी श्येत जाइब आन कली श्येत रे प्रोइब। मिनु मेको आन खिं डा मुर आन कली भेडा आन हुल खोदेशो पा शुश सेल्ब।  
 42 मिनु रिम्शो थुं पाइशो मुरपुकी मेको तशा, ग्येरसीनीम। मिनु परमप्रभु आ अरेशो मटीब कोत्रस डा कोत्रस दुम्शा ब्वाक्ने मचाप्नीम। अय्युब २२:१९-२०  
 43 सु जोक्ब तुइक्ब बाक्मे, मेकोमी एको लोत्र रूबल। मिनु परमप्रभु यावे आ गेना हना यो दाक्तीके आ पर्वम मिम्तल।

## 108

ठेयब सेल्तीक कुम्सो

दाऊद आ कुम्सो।

- 1 परमप्रभु, गो थमा सुइक्ब दुम्ती। गो थमा पा इन नोले खोइक्ब दुम्ती। गो ताप्तीक ताप्चा कुम्सो पाइनुड। आं थुं मुल सेसो! भजन संग्रह ५७:८-१२  
 2 ठेयब तार पाइशो ताप्तीके नु बीना बोक्कीस। गो सुनी कली सेंपाइक्नुड।  
 3 परमप्रभु यावे गो जात जात डा मुर आन दातेमी इन कली “गे रिम्शो पाइब बाक्नीनी” देंनुड। मिनु रागी रागी डा मुर आन दातेमी इन कली ठेयब सेल्शा कुम्सो पाइनुड।  
 4 मारदे हना इन गेना हना यो दाक्तीक सरीड खोदेशो ठेयब बाक्ब। मिनु इन दाक्शा मप्रोइतीके गोस्स खोदेशो पा इर डोन लाइब। भजन संग्रह ३६:६; भजन संग्रह ५७:११  
 5 परमप्रभु, गे सरीड क्येडा यो ठेयब बाक्नीनी। इन छेडछेड रागी नेल्ल आन तार बाक्ल।  
 6 मिनु इन सक्तिमी आंड कली वारच पने। मिनु आं लोत्र लेत्तीनी। इन दाक्शोपुकी ब्रोंडमल। भजन संग्रह ६:७-१४  
 7 परमप्रभुमी आ बाक्तीक रे “गो ग्येरसीशा शेकेम कली योक्नुड। मिनु सुक्कोथ डा दिंम पुक्शा, योक्नुड।  
 8 गिलाद आं के बाक्ब। मिनु मनस्से यो आं केन बाक्ब। एफ्राइम आं फलाम के ताकी बाक्ब। यहूदा आं राज दन्द बाक्ब।  
 9 मोआब आं ब्वाक्कु तेम्तीक बोस बाक्ब। गो एदोम तार आं जुत्ता ब्वारनुड। गो पलिस्ती आन कली ग्राशा, ग्येरशा ग्रीनुड” देंत।  
 10 सुम आं कली गारो हिरशो सहर सम्म चाक्दीप्बा? सुम आं कली लां कोंडशा एदोम सम्म चाक्दीप्बा?  
 11 परमप्रभु गे आंड कली प्रोंडतीनी। मुल गे आंड लडाड पाइब नु मगाक्नीनी।  
 12 गे आंड जोरी सत्रु आन कली फ्रुचा कली वारच पने। मारदे हना मुर आन वारच पशो शोर गाक्शो बाक्ब।  
 13 गो परमप्रभु आ वारच पशोम ला ग्रानीकी। मिनु मेकोमी आंड जोरी सत्रु आन कली दिम्ब।

## 109

क्येक्क लेत्चा कली पुंडशो लोत्र

कुम्सो पपाइक्ब कली दाऊद आ कुम्सो।

- 1 “परमप्रभु, गो इन कली ठेयब सेल्नुड। गे सिक्सी पा मबाक्कीन।  
 2 मारदे हना इन अरेशो मटीब नु जोल पाइबपुकीमी आं पर्वम जोल पा लोत्र पाइनीम।  
 3 मेकोपुकीमी आं कली काइ मदाक्थु, लोत्र पा, आं कली जिचा तोशा मोशा ग्राम्नीम।  
 4 मेकोपुकीमी आं दाक्शो आ पा डा, आं कली दोस गेनीम। मो हना यो गो मेको आन पर्वम पुंडनुड।  
 5 मोपा मेकोपुकीमी आं रिम्शो पाइशो आ पा डा मरिम्शो पाइनीम। आं दाक्शो आ पा डा आं कली काइ मदाक्नीम।  
 6 मेकोपुकीमी मेको कली दोस गेचा कली परमप्रभु आ अरेशो मटीब का वोतीन। मेको कली दोस गेचा कली मेको आ ग्युरा गे राप्चा माल्ब। मत्ती ५:४३,४४; लूका २३:३४  
 7 मिनु मेको आ निसाफ दुम्मेनु, मेको दोस ताइब दुम्ल। मिनु मेको आ परमप्रभु कली पुंडतीक लोत्र पाप दुम्ल।

- 8 मेको आ ब्रोंडतीके नाक्त इच्का ला दुम्ल। मिनु मेको आ गेय अर्कोम पवल। प्रेरित १:२०
- 9 मेको आ तमी तौ रोम रोडक्च दुम्मल। मिनु मेको आ मीश वोंडश बेक्शो मीश दुम्ल।
- 10 मिनु आ तमी तौ हिरशा पुंडशा जाइब दुम्मल। मेको आन ब्रेशो खिं रे यो खेरचा पुंडसीमल।
- 11 मेको कली जेर गेबमी मेको आ मारेड मारेड नेक्गल। अरु मुरुमी मेको आ चेम्शो नेल्ल रोडक्चमेक्ल।
- 12 सुडमी मेको कली शिशी मकोडदमेक्ल। आ तमी तौ आन कली यो शिशी मपामेक्ल।
- 13 मेको आ खिं डा मुर नेल्ल क्याम्सीमल। मिनु आ तमी तौ आन पालाम मेको आन नें क्याम्सेक्ल। इजीकीएल १८:२०-२३
- 14 मिनु परमप्रभु यावेमी मेको आ किकी पिपी आन पशो पाप मिम्चा माल्ब। मेको आ ममा आ पशो पाप मक्याम्सेक्ल। प्रस्थान २०:५
- 15 मेको आन पाप गेना हना यो परमप्रभु यावे आ डोंडती लील। मिनु सुडमी मेको आन कली रागीम ममिम्तमेक्ल।
- 16 मारदे हना मेकोमी काइ शिशी मपव। तन्न पुडग, श्येत जाइब नु थुं लुक्च लशो मुर आन कली साइक्चा कली खेदा पाप्तु।
- 17 मेकोमी सराप चीले पचा दाक्ताक्व। मिनु मेको सराप चीले रल। मेकोमी आसीक गेचा मदाक्त। मोपतीके आसीक मेको रे डोन बाक्ल।
- 18 मेकोमी सराप चीले वा फेक्सीशो खोदेशो पा फेक्साक्व। सराप आ रांम ब्वाक्कु खोदेशो पा बाक्ल। तेल खोदेशो पा मेको आ रुशेम ब्रील। गन्ती ५:२४
- 19 मेकोमी सराप चीले आ वा खोदेशो पा फेक्सेक्ल। मिनु किप्शुर खोदेशो पा नाक्त किंत किंत किम्सेक्ल।
- 20 परमप्रभु यावेमी आं कली दोस गेब नु आ परबं मरिम्शो लोत्र पाइब कली मोदेशो सजाइ गेवल।
- 21 तन्न परमप्रभु यावे, परमप्रभु, गे इन नें आ परबं आं कली वारच पाइय्यीनी। मारदे हना इन गेना हना यो दाक्तीके ठेयब बाक्ब।
- 22 गो पुडग नु श्येत जाइब दुम्ती। मिनु आं थुं खाइशो बाक्ब।
- 23 गो नां लाक्शो ना डा वांक्कु खोदेशो पा जाम्शो बाक्नुड। थुर थुर पाइशो सल्हा खोदेशो बाक्नुड।
- 24 गो माइजा बाक्डानु, आं खोइली योक्शो बाक्ब। मिनु गेयशो बाक्नुड।
- 25 आं कली दोस गेबपुकी आ कली तशा गाइक्नीम। मिनु आन पिया हिम्नीम।
- 26 परमप्रभु यावे, आं परमप्रभु, वारच पाइय्यीनी। इन गेना हना यो दाक्तीकेमी आं कली प्रोंडयीनी।
- 27 मेकोपुकीमी 'परमप्रभु यावेम आं कली वारच पाइब' दे तुडक्तमेक्ल।
- 28 मेकोपुकीमी सराप चीले पामेक्ल। तन्न गे आसीक गेने। मेकोपुकी बोक्मानु, मुने दोक्मल। तन्न इन गेय पाइब ग्येरसीब। लुका ६:२७-२८
- 29 आं कली दोस गेब आन कुल मुनेम सुम्सीमल। मिनु आन मुने दोक्तीके फेक्तीके वा खोदेशो पा फेक्सीमल।
- 30 गो परमप्रभु यावे कली 'गे थम रिम्शो पाइब बाक्नीनी' देनुड। शुश मुर आन दातेमी गो मेको कली ठेयब सेल्लुड" देंती।
- 31 मारदे हना मेको श्येत जाइब आन कली साइक्ब आन गुइ रे प्रोंडशा वारच पाइब बाक्ब।

## 110

परमप्रभुम पिप कली अधिकार गेब

दाऊद आ कुम्सो।

1 परमप्रभु यावेमी, आं परमप्रभु कली "गे आं ग्युरा गे निस्सो। मिनु गो इ जोरी सत्रु आन कली इ खोइल थेक्तीके सेल्लुडमी। मत्ती २२:४४; प्रेरित २:३४; हिब्रू १:१३; १कोरिन्थी १५:२५; फिलिपी २:८-११; हिब्रू १०:१२-१३

2 परमप्रभु यावेमी सियोन रे पा इन सक्ति डा राज दन्द दिंब। मिनु गे इन जोरी सत्रु आन कली सासन पने" दैत। भजन संग्रह २:६

3 गे लडाइ पनी नाक्ती इन मुर आन थुंम ग्येरशा इन नोले खोइक्नीम। सुनी डा सीत खोदेशो पा इन रागी डा ठिटापुकी खुम्सीशा इन नेक्था जाक्नीम।

4 मिनु परमप्रभु यावेमी "गे मेल्कीसेदेक खोदेशो पा गेना हना यो चढेब दुम्नेवे" दे कसम जाप्तु। मेकोमी आ थुं मफाइक्ब। उत्पत्ती १४:१८-२०; हिब्रू ५:६,१०; हिब्रू ६:२०; हिब्रू ७:१७,२१

5 परमप्रभु इन ग्युरा गे बाक्ब। मेको गाइक्ता नाक्ती पिप आन कली खतम पोक्ब। भजन संग्रह २:२,५,९

6 मेकोमी रागी रागी डा मुर आन कली निसाफ पाइब। मिनु मेको आन रागी बेक्शो मुरुम प्रिंब। मिनु बेक्शो मुर आन पिया रागी मेर फ्राइब। दानीएल २:४४

7 मेकोमी लां आ नेक्था डा खोला डा ब्वाक्कु तूब। मोपतीके मेको सक्ति पाइशो दुम्शा प्राब।

## 111

परमप्रभु कली ठेयब सेल्लिक कुम्सो

1 परमप्रभु यावे कली ठेयब सेलीन। गो रिम्शो थुं पाइशो मुर आन दातेमी आं थुं नेल्लेमी "परमप्रभु, गे रिम्शो पाइब बाक्नीनी" दे गुम्तीकम देनुड।

2 परमप्रभु यावे आ गेय थम ठेयब बाक्नीम। सु सुम मेको कली दाक्नीमी, मेकोपुकीमी मेको शेसीनीम।

- 3 मेको आ गेय ठेयब नु मान पाइक्का पुंडसीब बाक्नीम। मिनु परमप्रभु आ ठीक पतीके गेना हना यो लीब।
- 4 मेकोमी आ छक लाक्का डा गेय मिम्पाइश्शो बाक्ब। परमप्रभु यावे दाक्ब नु शिशी पाइब बाक्ब। प्रस्थान १२:१-२२
- 5 मेकोमी आ कली मान पा हिंब आन कली जचा गेब। मिनु आ पशो कबल गेना हना यो मिम्ब। भजन संग्रह १४५:१५
- 6 मेकोमी आ मुर आन कली रागी रागी डा मुर आन शोंप गेशा, आ सक्ति कोंइशो बाक्ब।
- 7 मेको आ गेय नेल्ल आ देशो खोदेशो नु ठीक बाक्नीम। आ अरेशा ब्रेक्शो लोव नेल्ल थमा सुइक्का माल्लो बाक्नीम।
- 8 मेको गेना हना यो लीब बाक्नीम। मुरपुकीमी मेको मप्रोंइथु, आन थुं नेल्लेमी टिचा माल्लीम।
- 9 मेकोमी आ मुर आन कली श्येत रे प्रोंइतु। मेकोमी आ पशो कबल गेनायो मक्क्यान्चा कली सेल्लो बाक्ब। मेको आ नें का ला मान पा हिंचा डा बाक्ब।
- 10 परमप्रभु यावे कली मान पा हिंचा तुइक्ब दुम्चा कली गोतीक बाक्ब। मिनु सु सुमी मेको पाइनीमी मेको शुश रूप्ब दुम्नीम। परमप्रभु कली ठेयब सेल्लीके गेना हना यो लीब। हितोपदेस १:७

## 112

दाक्का मप्रोंइब आन ग्येरशो

- 1 परमप्रभु यावे कली ठेयब सेलीन। सु परमप्रभु यावे कली मान पा हिंबा, मेको ग्येरसीशो मुर बाक्ब। मेकोमी परमप्रभु आ शेशो शुश दाक्ब। भजन संग्रह १:२; हितोपदेस २०:७
- 2 मेको आ चच युइ रागीम ठेयब मुर दुम्नीम। रिम्शो थुं पाइश्शो मुर आन पाला आसीक राइनीम।
- 3 मेको आन खिंमी शोंप बाक्ब। मेको आन ठीक पतीके गेना हना यो लीब।
- 4 रिम्शो थुं पाइश्शो मुर छिडछिडम बाक्तेक्म हना यो, छेडछेड दुम्ब। मेको मुर आन कली दाक्ब, शिशी पाइब नु ठीक पाइब बाक्नीम।
- 5 हाइश्शो दुम्शा, गेब मुर आन कली रिम्शो दुम्ब। मेकोपुकीमी आन गेय ठीक पतीकेमी पाइनीम।
- 6 ठीक पाइबपुकी गेनायो मप्रेंसीनीम। मेको आन कली मिम्तीके गेना हना यो लीब।
- 7 मेको मरिम्शो लोव नेशा, महिनीम। मेको आन थुं नेल्लेमी परमप्रभु यावे सक्ति पाइश्शो बाक्ब, दे तुइक्नीम।
- 8 मेको आन थुं ग्येत्थ लुक्क मपथु, महिनीम। मिनु नोले आन जोरी सनु आन कली बुशो ताइनीम। भजन संग्रह ९१:८
- 9 मेकोपुकीमी हाइश्शो थुं पा पुडग आन कली मार मार गेम्तेक्म। मेको आन ठीक पतीके गेना हना यो लीब। मेको मान ताइब बाक्नीम। २कोरिन्थी १:९
- 10 मिनु परमप्रभु आ अरेशो मटीबपुकीमी मेको नेल्ल तशा आन थुं खुरसीनीम। मेको आन खुइ शेप्शा, थाम्पा गाइक्नीम। मेको आन मिम्शो गेनायो मजाक्दीन्ब।

## 113

परमप्रभु आ मान ततीके

- 1 परमप्रभु यावे कली ठेयब सेलीन। परमप्रभु यावे आ गेय पाइबपुकी परमप्रभु यावे आ नें ठेयब सेलीन। गे “परमप्रभु यावे आ नें ठेयब बाक्ब” देनीन।
- 2 परमप्रभु यावे आ नें मुर रे गेना हना यो ठेयब सेल्लेक्ल।
- 3 नां दाप्तीक रे नां पेरतीक सम्म परमप्रभु यावे आ नें ठेयब सेल्ला माल्लीम। भजन संग्रह ५०:१
- 4 परमप्रभु यावे रागी रागी डा नेल्ल आन क्येडा ठेयब बाक्ब। मेको आ छेडछेड स्वर्ग क्येडा यो इर बाक्ब।
- 5 परमप्रभु यावे, आंइ परमप्रभु खोदेशो अर्को सु बाक्बा डा? सु नेल्ल क्येडा इर निरशो बाक्बा डा? प्रस्थान १५:११; यसैया ५७:१५
- 6 मेकोमी सरीड नु रागी कोवब।
- 7 मेकोमी पुडग आन कली फुरकुम निरशो रे पोक्ब। मिनु श्येत जाइब आन कली ग्राम्रा दित्तीक रे पोक्ब। १सामुएल २:८; लूका १:४८; उत्पत्ती ४१:४०-४१
- 8 मेको आन कली आ मुर आन ठेयब मुर नु निष्पाइक्का कली पोक्ब।
- 9 मिनु मेकोम आल मथीब मीश मुर आन कली ग्येरसीशो ममा सेल्ल। परमप्रभु यावे कली ठेयब सेलीन। उत्पत्ती २१:२ १सामुएल १:२०; लूका १:५७-५८

## 114

इसाएलीपुकी इजीप्तर रे ब्रोंइशो

- 1 इसाएली इजीप्तर रे ब्रोंइशा जाक्मानु, याक्ब आ खिं डा मुर अर्को जात डा लोव ब्वाक्तीक रे गूशा जाक्मानु, प्रस्थान १२:४१
- 2 यहूदा परमप्रभु आ बाक्तीक नु इसाएल आ राज्य दुम्त।
- 3 मोदेशो दुम्शो तशा समुन्द्र प्रोक्त। यर्दन खोला दूली पा शाइक्त। प्रस्थान १४:२१-२२; यहोसु ३:१३, १६
- 4 डांडा बोका खोदेशो पा प्रेक्तेक्म। पहाड भेडा खोदेशो पा प्रेक्तेक्म।
- 5 समुन्द्र, गे मारदे प्रोक्डे? यर्दन खोला, मारदे दूली गे शांइसे? यहोसु ४:२३-२४
- 6 डांडा गे मारदे बोका खोदेशो पा प्रेक्नी? पहाड गे मारदे भेडा खोदेशो पा प्रेक्नी?
- 7 रागी, परमप्रभु आ डोंइती खिंखि पावो। याक्ब आ परमप्रभु आ डोंइती खिंखि पावो। प्रस्थान १९:१८

8 मेकोमी सेरथे फुल्लु कली फाइशशा, ब्वाक्कु देम्टीके सेल्लु। मिनु शेराल फुल्लु फाइशशा, ब्वाक्कु बुक्तीके सेल्लु। प्रस्थान १७:६

## 115

परमप्रभु यावे ला परमप्रभु बाक्ब

भजन संग्रह १३५:१५-२०

1 परमप्रभु यावे, आंड कली ममाइ, इन नें ठेयब सेल्चा गेने। इन गेना हना यो दाक्तीके नु दाक्शा मप्रोंइतीके आ परबम इन नें ठेयब सेल्चा माल्लो बाक्ब।

2 रागी रागी डा मुरपुकीमी “मेको आन परमप्रभु ते बाक्म?” दे मारदे हिल्लो पाइनीमी? भजन संग्रह ४२:४

3 आंड परमप्रभु स्वर्गम बाक्ब। मेकोमी मार दाक्ता, मेको पाइब।

4 मेको आन मूर्तिपुकी मुर आन गुइम सेल्लो सुन नु चांदी के बाक्नीम। ब्यवस्था ४:२८; यसैया ४४:९-२०

5 मिनु मेको आन के शोत्र बाक्नीम, तन्न ब्वाक्ने मचाप्नीम। मिक्च बाक्नीम, तन्न तने मचाप्नीम।

6 मिनु मेको आन के नोफा बाक्नीम। तन्न नेने मचाप्नीम। नें बाक्नीम, तन्न नाम्ने मचाप्नीम।

7 मेको आन के गुइ बाक्नीम, तन्न सुल्ले मचाप्नीम। खोइल बाक्नीम, तन्न गाक्ने मचाप्नीम। मेकोपुकीमी आन शोत्र रे मारिइ सेंदा गुंइने मचाप्नीम।

8 मेको आन कली सेल्ब यो मोदेशोन बाक्नीम। मिनु मेको आन कली थमा सुइक्ब यो मोदेशोन दुम्नीम।

9 गो इस्राएलीपुकी, परमप्रभु यावे कली थमा सुतीन। मेको इन कली वारच पाइब नु तेक्तीक बाक्ब।

10 हारून आ खिं डा मुरपुकी, परमप्रभु यावे कली थमा सुतीन। मेको इन कली वारच पाइब नु तेक्तीक बाक्ब।

11 सु सुम परमप्रभु यावे कली मान पा हिंशा, थमा सुइक्नीमी, मेको आन कली वारच पाइब नु तेक्तीक बाक्ब।

12 परमप्रभु यावेमी आंड कली मिम्ब। मिनु आसीक गेब। मेकोमी इस्राएल डा मुर आन कली आसीक गेब। मेकोमी हारून आ खिं डा मुर आन कली आसीक गेब।

13 मेकोमी परमप्रभु यावे कली मान पा हिंब आइक्च ठेयब नेल्ल आन कली आसीक गेब।

14 परमप्रभु यावेमी इन कली नु इन आल आन कली सोशा बोशा दुम्पदल।

15 सरीड नु रागी सेल्ब परमप्रभु यावेमी इन कली आसीक गेवल। भजन संग्रह १३४:३

16 स्वर्ग परमप्रभु यावे केन बाक्ब। तन्न रागी चहिं मुर आन कली गेशो बाक्ब।

17 बेक्शो मुर नु बेक्शो मुर आन बाक्तीकेम लाइबपुकीमी परमप्रभु यावे कली ठेयब मसेल्नीम। यसैया ३८:१८

18 तन्न गो दा मुल रे गेना हना यो परमप्रभु यावे कली ठेयब सेल्नीकी। परमप्रभु यावे कली ठेयब सेलीन।

## 116

परमप्रभु कली ठेयब सेल्लो

1 गो परमप्रभु यावे कली दाक्नुड। मारदे हना मेकोमी आं पुंइशो नु ब्रेशो नेंशो बाक्ब।

2 मेकोमी आं लोत्र नेंतु। मोपतीके गो ब्रोंइडा सम्म मेको कली पुंइशा लोत्र पाइनुड।

3 गो बेक्चा चिक्शो बाक्ती। हेररा तुरसुम लाइक्चा पुंइसीशो बाक्ती। सुर्ता पतीके नु हिंतीके थुंम सुम्शो बाक्ती।

4 मेना गो परमप्रभु यावे आ नें थोशा “परमप्रभु यावे, आं कली ब्रोंइचा गेयीनी” दे पुंइता।

5 परमप्रभु यावे शिशी पाइब नु ठीक पाइब बाक्ब। आंड परमप्रभु शुश दाक्ब बाक्ब।

6 परमप्रभु यावेम आइक्च थुं पाइशो आन कली कोत्रब। आं थुं लुक्च लमेनु, मेकोमी आं कली श्येत रे प्रोंइती।

7 आं थुं लेंशा नांडसो। मारदे हना परमप्रभु यावेमी इ कली रिम्शो पाइशो बाक्ब। भजन संग्रह ४२:६

8 गे आं सोक्त कली बेक्चा रे प्रोंइशो बाक्तीनी। आं कली डाक्तीक नु दाइल पाइक्तीक रे प्रोंइतीनी।

9 गो ब्रोंइशो मुर आन बाक्तीक रागीमी परमप्रभु यावे आ डोंइती गाक्नुड। भजन संग्रह १४२:६

10 गो शुश श्येत जशा यो, आं थमा सुइक्तीक मप्रोंनु।

11 गो सुर्ता पा श्येत जडानु “मुर नेल्ले जोल पाइब ला बाक्नीम” देंती। रोमी ३:४

12 परमप्रभु यावेमी आं कली गिश रिम्शो पाइय्यी, गो मेको आ पा डा मेको कली मार गेनुडा?

13 गो “गे आं कली श्येत रे प्रोंइतीनी” देंशा, परमप्रभु यावे आ नें थिशा, मेको कली ठेयब सेल्लुड।

14 गो परमप्रभु यावे आ डोंइती मुर आन दातेमी आं जशो कसम खान्नुड।

15 परमप्रभु यावे आ मुर बेक्चा मेको कली थम ठेयब बाक्ब। भजन संग्रह ७२:१४

16 परमप्रभु यावे, गो इन गेय पाइब नड। गो इन गेय पाइब मीश मुर आ तौ, इन वाइल नड। गे आं कली बेक्तीक रे प्रोंइतीनी।

17 गो इन कली “गे रिम्शो पाइब बाक्नीनी” दे चढ़ेतीक चढ़ेनुड। मिनु परमप्रभु यावे, इन नें थिशा, इन कली ठेयब सेल्लुड। योना २:१०

18 गो परमप्रभु यावे आ मुर नेल्ल आन डोंइती आं जशो कसम खान्नुड।

19 परमप्रभु यावे आ खिं डा लाडगा नु यरूसलेमम बाक्बपुकी परमप्रभु यावे कली ठेयब सेलीन।

## 117

परमप्रभु कली ठेयब सेलीन

- 1 रागी रागी डा मुर नेल्लेम परमप्रभु यावे कली ठेयब सेलीन। जात जात डा मुर नेल्लेम मेको कली मान पने! रोमी १५:११
- 2 मारदे हना परमप्रभु यावे आ गेना हना यो दाक्तीके नु आ दाक्शा गेनायो मप्रोंडतीके ठेयब बाक्ब। मिनु आ दाक्शा गेनायो मप्रोंडतीके गेना हना यो लीब। मोपतीके परमप्रभु यावे कली ठेयब सेलीन। प्रस्थान ३४:६

## 118

ठेयब सेल्लिक कुम्सो

- 1 परमप्रभु यावे कली “गे रिम्शो पाइब बाक्नीनी” देनीन। मारदे हना मेको रिम्शो पाइब बाक्ब। मिनु आ दाक्तीके गेना हना यो लीब। भजन संग्रह १०६:१
- 2 इस्राएलीपुकीमी “मेको आ दाक्तीके गेना हना यो लीब” देंमल।
- 3 हारून आ खिं डा मुरपुकीमी “मेको आ दाक्तीके गेना हना यो लीब” देंमल।
- 4 परमप्रभु यावे कली मान पा हिंबपुकीमी “मेको आ दाक्तीके गेना हना यो लीब” देंमल।
- 5 गो श्येत जडानु, परमप्रभु यावे कली पुंडता। मिनु मेकोमी आं लोत्र लेत्ताक्यी। मिनु आं कली श्येत रे प्रोंडती।
- 6 परमप्रभु यावे गो नु बाक्तीके गो महिनुड। मुरपुकीमी आं कली मार पाइक्ने चान्नीमी डा? रोमी ८:३१; भजन संग्रह ५६:५; हिब्रू १३:६
- 7 परमप्रभु यावे गो नु बाक्शा, आं कली वारच पाइब बाक्ब। गो आं कली काइ मदाक्ब आन कली ग्राशा कोइनुडमी।
- 8 मुर आन कली तशा “मेकोमी वारच पाइनीम” देंचा क्येडा परमप्रभु यावे नु फाम्सीचा रिम्शो बाक्ब। भजन संग्रह १४६:३
- 9 मिनु हुकुम पाइब मुर आन कली तशा “मेकोमी वारच पाइनीम” देंचा क्येडा परमप्रभु यावे नु फाम्सीचा रिम्शो बाक्ब।
- 10 रागी रागी डा मुर नेल्लेमी आं कली पुम्ताक्यीमी। तन्न गो परमप्रभु यावे आ नेमी नेल्ल आन कली खतम पोक्ताक्यी।
- 11 मेकोपुकीमी आं कली तेइ तेइ रे पुम्ताक्यीमी। तन्न गो परमप्रभु यावे आ नेमी नेल्ल आन कली खतम पोक्ताक्यी।
- 12 मेकोपुकीमी आं कली सुरबुम खोदेशो पा गिलतीमी। मेकोपुकी चूम ब्रशो मी खोदेशो पा ब्राम्तेक्म। तन्न गो परमप्रभु यावे आ नेमी मेको आन कली खतम पोक्ताक्यी।
- 13 गो नेच्चा पुंडसीशा, गोल्चा चिक्शो नड। तन्न परमप्रभु यावेमी वारच पाइक्ती।
- 14 परमप्रभु यावे आं बोल नु सक्ति बाक्ब। मिनु मेको आं कली श्येत रे प्रोंडब दुम्शो बाक्ब। प्रस्थान १५:२
- 15 ठीक पाइब आन ताम्बुमी ग्येरशो नु ग्राशा कुम्सो पशो नेसीब। परमप्रभु यावेमी सक्ति पाइशो गेय पाइब।
- 16 परमप्रभु यावेमी “गो ग्राती” दे आ ग्युरा गुड पोक्शो बाक्ब। परमप्रभु यावेमी सक्ति पाइशो गेय पाइब।
- 17 गो मबेक्नुड, तन्न ब्रोंडशा बाक्शा, परमप्रभु यावे आ पशो नेल्ल शेंनुडमी।
- 18 परमप्रभु यावेमी आं कली शुश सजाइ गेती। तन्न बेक्चा मगेयी। २कोरिन्थी ६:९
- 19 आं कली परमप्रभु यावे आ खिं डा लाच्यो रोक्कीन। मिनु गो ओत्रशा, परमप्रभु यावे कली “गे रिम्शो पाइब बाक्नीनी” देंनुड।
- 20 एको परमप्रभु यावे आ लाच्यो बाक्ब। ठीक पाइबपुकी एको लाच्यो रे ओत्रनीम। यसैया २६:२
- 21 गे आं पुंडशो नेंशा, लोत्र लेत्ताक्यीनी। मोपतीके गो इन कली “गे रिम्शो पाइब बाक्नीनी” देंनुड। गे आं कली श्येत रे प्रोंडब दुम्तीनी।
- 22 खिं सेल्लपुकीमी गारो प्रोत्रडमेनु “एको फुल्लु मगार” दे ताइक्तमे बाक्त। मिनु मेको मगारथु ताइशो फुल्लु चहिं जग डा सुरे फुल्लु दुम्माक्त। यसैया २८:१६; मत्ती २१:४२
- 23 मेको परमप्रभु यावेमी पशो बाक्ब। गो मेको तशा, छक लाक्नीकी।
- 24 परमप्रभु यावेमी मुलाक्ती डा नाक्ती सेल्लशो बाक्ब। गोपुकी कुम्सो पा ग्येरसय।
- 25 परमप्रभु यावे आं कली श्येत रे प्रोंडकी। परमप्रभु यावे आं गेय रिम्शो दुम्ल।
- 26 परमप्रभु यावे आ नेमी जाक्ब आसीक रशो बाक्ब। गो परमप्रभु यावे आ खिं रे पा इन कली आसीक गेनीकी। मत्ती २१:९; मत्ती २३:३९
- 27 परमप्रभु यावे ला परमप्रभु बाक्ब। मेकोमी आ छेडछेड आंइ तार दाप्पाइशो बाक्ब। रवा आ राशी शेशा, ग्येरशा, चढेतीक आ ग्रोत्र ग्योम्दीन। प्रस्थान २७:१-२
- 28 गे आं परमप्रभु बाक्नीनी। गो इन कली “गे रिम्शो पाइब बाक्नीनी” देंनुड। गे आं परमप्रभु बाक्नीनी। मिनु गो इन कली मान पा ठेयब सेल्लुड।
- 29 गे परमप्रभु यावे कली “गे रिम्शो पाइब बाक्नीनी” देनीन। मारदे हना मेको रिम्शो पाइब बाक्ब। मिनु आ दाक्तीके गेना हना यो लीब। भजन संग्रह १०६:१; भजन संग्रह १०७:१; भजन संग्रह ११८:१; भजन संग्रह १३६:१

## 119

परमप्रभु आ अरेशो लोत्र ठेयब सेल्लशो

- एको भजन संग्रह कली सुन के हिब्रू आकछेर यो देंनीम। मारदे हना मेको आ टुक्रा टुक्रा हिब्रू लोत्र डा आल्फाबेट रे पा गोइनीम। डोंइती डा टुक्रा आलेफ देंसीब, अध्याय नेल्ल आन डोंइती डा हिब्रू आकछेर लोत्रमी आलेफ बाक्ब।

## आलेफ

- 1 सु सु रिम्शो पाइनीमी नु दोस मताइब बाक्नीमी, मेको ग्येरसीशो मुर बाक्नीम। मारदे हना मेकोपुकीमी परमप्रभु यावे आ अरेशो टिशो बाक्नीम। भजन संग्रह ११२:१-२
- 2 सु सुमी परमप्रभु आ देशो मिम्शा पाइनीमी नु आन थुं नेल्लेमी मेको कली माल्नीमी, मेकोपुकी ग्येरसीशो मुर बाक्नीम।
- 3 मेको मुरपुकी काइ मरिम्शो मपथु, परमप्रभु आ लाम गाक्नीम।
- 4 गो इन ब्रेक्शा अरेशो आंइ कली होस पा पचा कली गेशो बाक्तीनी।
- 5 गो गेना हना यो इन फुल्लुम मुशा ब्रेक्शो लोत्र पशा गाकडल।
- 6 गो इन शेंतीके नेल्ले होस पा पशो नड हना, मुने मदोक्ड वा।
- 7 गो इन निसाफ पतीक लोत्र शेंसाक्यी हना, इन कली रिम्शो थुंमी ठेयब सेल्ले चाप्नुड।
- 8 गो इन फुल्लुम मुशा ब्रेक्शो लोत्र टीनुड। आं कली काइ मप्रॉइयीनी।

## बेथ

- 9 टिटा वोंइश मुर दोपा हेंथे मपथु, आन लाम गाक्ने चाप्नीमी? मेको इन लोत्र टिशा ला मो पने चाप्नीम।
- 10 गो आं थुं नेल्लेमी इन कली माल्नुड। आं कली इन शेंतीके रे डोन लचा मगेयीनी।
- 11 गो मरिम्शो मपडल, दे इन लोत्र आं थुंम वोइशो बाक्नुड।
- 12 परमप्रभु यावे, इन नें ठेयब बाक्ब। आं कली इन फुल्लुम मुशा ब्रेक्शो लोत्र शेंदीनी। भजन संग्रह ११९:२६,६४,६८
- 13 गो इन देशो पतीक लोत्र नेल्ल शेंनुडमी।
- 14 गो शुश शोंप तशा ग्येरसीशो मुर खोदेशो पा इन देशो लां तशा ग्येरसाक्यी।
- 15 गो इन ब्रेक्शा अरेशो मिम्ना मिम्न, इन लां कोत्रशा गाक्नुड।
- 16 गो इन फुल्लुम मुशा ब्रेक्शो लोत्र तुइशशा, ग्येरसाक्यी। इन लोत्र मप्रेंनुड।

## गिमेल

- 17 इन गेय पाइब कली रिम्शो पने। मिनु गो इन लोत्र टिशा ब्रॉइडल।
- 18 गे आं कली मिक्च ताइब सेल्यीनी। मोपा गो इन अरेशो लोत्र डा छक लाक्चा डा गेय तने चबुल।
- 19 गो रागीम पौना का बाक्नुड। गे इन शेंतीके लोत्र आं मतुइक्चा डा पा मखुइक्तीन। भजन संग्रह ३९:१३
- 20 आं थुं गेना हना यो इन पतीक लोत्र तुइक्चा कली माल्स डा माल्स बाक्ब।
- 21 गे इन शेंशो प्रॉइब ठेयब लेशनो नु सराप रशो मुर आन कली हुइक्नीनी। ब्यक्स्था २७:२६; गलाती ३:१०
- 22 गे मेको आन शुक्शी पतीके नु दोस गेतीके आं क्येडा डोन वोतीन। मारदे हना गो इन देशो टीब मुर बाक्ती।
- 23 मिनु सासन पाइबपुकी बुक्शा, आं कली मरिम्शो पाइक्चा कली लोत्र गारपाइक्नीम। मो हना यो गो, इन गेय पाइबमी, इन फुल्लुम मुशा ब्रेक्शो लोत्र मिम्स डा मिम्स बाक्नुड।
- 24 इन देशो लोत्र आं थुं ग्येरपाइक्ब नु आं कली अर्ती गेब बाक्नीम।

## दालेथ

- 25 आं थुं लुक्च लशो बाक्ब। इन लोत्र पतीकेमी आं थुं बारपाइय्यीनी।
- 26 गो इन कली आं पशो तुइक्पाइक्तन्नी। मिनु गे आं लोत्र लेत्ताक्नी। इन फुल्लुम मुशा ब्रेक्शो लोत्र शेंदीनी।
- 27 गे इन ब्रेक्शा अरेशो लोत्र रुप्पाइय्यीनी। मिनु गो इन छक लाक्चा डा गेय मिम्स डा मिम्स बाक्नुड।
- 28 आं थुं सुर्ता पा लुक्च लत। इन लोत्र पतीकेमी आं कली ब्रॉइचा गेयीनी।
- 29 दूली लां आं क्येडा डोन वोतीन। मिनु गे शिशो पा इन अरेशो लोत्र शेंदीनी। भजन संग्रह ११९:१०४,१२८
- 30 गो इन कली मप्रॉइतीक लां योत्रता। गो इन पतीक लोत्र आं डोंइती वोइक्ता।
- 31 परमप्रभु यावे, गो इन देशो थमा पा पाइनुड। आं कली मुने मदोक्पाइय्यीनी।
- 32 गो इन शेंशो पना पन बाक्ती। मिनु गे आं रुपतीक थुं बारपाइक्नीनी।

## हे

- 33 परमप्रभु यावे, इन फुल्लुम मुशा ब्रेक्शो लोत्र शेंदीनी। मिनु गो मेको नोले सम्म मप्रॉइनुड।
- 34 गे आं कली रुपतीक थुं गेयीनी। मिनु गो इन अरेशो लोत्र आं थुं नेल्लेमी पाइनुड।
- 35 इन शेंतीके लाम गाक्पाइय्यीनी। मारदे हना गो मेको कली दाक्नुड।
- 36 आं थुं कली इन देशो ला मिम्पतीन। शुश क्येट चेम्तीके ममिम्पतीन।
- 37 मरिम्शो थोक्क मकोत्रपाइय्यीनी। इन दाक्चा डा पा ब्रॉइचा गेयीनी।
- 38 गे इन गेय पाइब कली इन थोक्शा पशो लोत्र खाप्पीन। इन थोक्शा पशो लोत्र इन कली मान पा हिंब आन कली बाक्ब।
- 39 हिंचा डा शुक्शी पाइक्चा पुंडसीतीक आं क्येडा डोन वोतीन। मारदे हना इन पतीक लोत्र रिम्शो बाक्नीम।
- 40 इन ब्रेक्शा अरेशो लोत्र शुश दाक्नुड। इन निसाफ पतीकेमी आं कली ब्रॉइचा गेयीनी।

## वाव

- 41 परमप्रभु यावे, इन गेना हना यो दाक्तीक आं कली दुम्ल। इन थोक्शा पशो लोत्र खोदेशो पा आं कली श्येत रे प्रॉइयीनी।
- 42 मिनु गो आं कली शुक्शी पाइब आन कली लोत्र लेन्ने चाप्नुड। मारदे हना गो इन लोत्र थमा सुइक्नुड।
- 43 गे इन थमा लोत्र पचा कली मतेक्यीनी। मारदे हना गो इन पतीक लोत्र आस पा बाक्नुड।

- 44 गो इन अरेशो लोत्र थमा पा गेना हना यो टीनुड।  
 45 मिनू गो सुड क्येडा महिंथु बाक्नुड। मारदे हना इन ब्रेक्शा अरेशो लोत्र माल्ता।  
 46 गो पिप आन डोंइती इन देशो लोत्र आ पबंम लोत्र पाडनुड। मिनू मुने मदोक्नुड। मत्ती १०:१८  
 47 गो इन शेंतीके तुइश्शा ग्येरसीनुड। मारदे हना गो मेको कली दाक्नुड।  
 48 गो इन शेंशो लोत्र ठेयब सेल्चा दाक्नुड। मोपा इन फुल्लुम मुशा ब्रेक्शो लोत्र मिम्ना मिम्म बाक्नुड।

#### चायीन

- 49 इन गेय पाइब कली पशो लोत्र मिम्तीन। आं कली मेको आ लां कोव्रपाइय्यीनी।  
 50 गो श्येत जडानु, इन थोक्शा पशो लोत्रमी आं कली लेम्शा ब्रोंइचा गेब।  
 51 ठेयब लेशशो मुरुमी आं कली शुश शुक्शी पाडनीम। तन्न गो इन अरेशो लोत्र मप्रोंडनुड।  
 52 परमप्रभु यावे, गो इन साइ डोंइती डा पतीक लोत्र मिम्शा, आं थुं नाइक्नुड।  
 53 इन अरेशो लोत्र प्रोंडब मुर आन पबंम गो गाइश्शा चुरशा बाक्ती।  
 54 गो ते बाक्ती हना यो, इन फुल्लुम मुशा ब्रेक्शो लोत्र आं कुम्सो दुम्शो बाक्तेक्म।  
 55 परमप्रभु यावे, गो नाक्दो इन कली मिम्शा, इन अरेशो लोत्र पाडनुड।  
 56 गो आसीक राइब दुम्ती। मारदे हना गो इन ब्रेक्शा अरेशो लोत्र टिशा बाक्ती।

#### हेथ

- 57 परमप्रभु यावे, गे आं परमप्रभु बाक्नीनी। गो इन लोत्र टिना टिन बाक्नुड।  
 58 गो आं थुं नेल्लेमी इन कली पुइता। इन थोक्शा पशो लोत्र खोदेशो पा, आं कली शिशी पाइय्यीनी।  
 59 गो इन पतीके मिम्शा, इन देशो लोत्र डा लॉम गाक्नुड।  
 60 गो इन शेंतीके रीब पा टीनुड। गो देश मपाडनुड।  
 61 इन अरेशो लोत्र मटीबपुकीमी आं कली फ्रेंताक्यीमी हना यो, गो इन अरेशो लोत्र मप्रेंनुड।  
 62 गो नाक्दो बोक्शा, इन निसाफ पतीक लोत्र आ पबंम इन कली ठेयब सेल्लुड। भजन संग्रह ४२:९  
 63 गो इन कली मान पा हिंब नु इन ब्रेक्शा अरेशो लोत्र टीब आन वारच नड।  
 64 परमप्रभु यावे, रागी इन गेना हना यो दाक्तीकेमी व्रीशो बाक्ब। इन फुल्लुम मुशा, ब्रेक्शो लोत्र शेंदीनी।

#### टेथ

- 65 परमप्रभु यावे, इन लोत्र खोदेशो पा गे इन गेय पाइब कली रिम्शो पाइक्तीनी।  
 66 आं कली रुप्व नु तुइक्ब सेलीन। मारदे हना गो इन शेंतीके थमा सुइक्नुड।  
 67 गो श्येत जचा क्येडा डोंइती हेंथे लां खोइश्शो नड। तन्न मुल इन लोत्र टीनुड।  
 68 गे रिम्शो पाइब नु दाक्ब बाक्नीनी। मोपतीके आं कली इन फुल्लुम मुशा, ब्रेक्शो लोत्र शेंदीनी।  
 69 ठेयब लेशशो मुपुकीमी आं पबंमी जोल पाडनीम। गो चहिं आं थुं नेल्लेमी इन ब्रेक्शा अरेशो लोत्र पना पन बाक्नुड।  
 70 मेको आन थुं थांइशो बाक्ब। तन्न गो इन अरेशो लोत्र तुइश्शा ग्येरसीशो बाक्नुड।  
 71 गे आं कली श्येत जपाइक्तीनी, मेको रिम्शो बाक्त। मोपा इन फुल्लुम मुशा ब्रेक्शो लोत्र शेंसाक्यी।  
 72 मिनू हजार हजार टुक्रा सुन चांदी क्येडा इन अरेशो लोत्र आं कली रिम्शो बाक्ब।

#### योध

- 73 गे आं कली सेल्लेमी। मिनू इन शेंशो लोत्र शेंसीचा कली रुप्वीक थुं गेयीनी।  
 74 इन कली मान पा हिंबपुकी आं कली तशा ग्येरसीनीम। मारदे हना गो इन लोत्र डा लां कोव्रना कोव्रन बाक्नुड।  
 75 परमप्रभु यावे, इन निसाफ पतीके ठीक बाक्नीम। गो मेको तुइक्नुड। गे आं कली इन दाक्शा मप्रोंइतीकेमी श्येत गेतीनी।  
 76 इन गेय पाइब, आं कली इन गेना हना यो दाक्तीकेमी इन थोक्शा पशो लोत्र खोदेशो पा लेम्दीनी।  
 77 गे आं कली शिशी पाइतीनी हना, गो ब्रोंडनुड। मारदे हना इन अरेशो लोत्र तुइश्शा, ग्येरसाक्यी।  
 78 ठेयब लेशशो मुर मुने दोक्मल। मारदे हना मेकोपुकीमी आं कली मो दिम्ताक्यीमी। गो चहिं इन अरेशा ब्रेक्शो लोत्र मिम्ना मिम्म बाक्नुड।

- 79 इन कली मान पा हिंब आं नेक्शा जाक्मल। मोपा इन देशो लोत्र रुप्वेक्ल।  
 80 गो इन फुल्लुम मुशा ब्रेक्शो लोत्र पशा दोस मतडल। मोपा मुने मदोक्डल।

#### काफ

- 81 गो आं श्येतम इन प्रोंइतीक शुश माल्नुड। मिनू गो इन लोत्र डा लां कोव्रना कोव्रन बाक्नुड।  
 82 गो इन थोक्शा पशो लोत्र शुश रिम्ना रिम्म बाक्नुड। मिनू “आं कली गेना लेम्नीनी?” दे हिल्लो पाइनुड।  
 83 मारदे हना गो कुनम वोइश्शो कुशुल के थेलो खोदेशो बाक्नुड। मो हना यो गो इन फुल्लुम मुशा ब्रेक्शो लोत्र मप्रेंनुड।  
 84 गो, इन गेय पाइब, दोशो सम्म फाल्चा माल्नुड? गे आं कली खेदा पाइब आन कली गेना निसाफ पाइनीनी?  
 85 ठेयब लेशशोपुकीमी आं कली खाल्टा दोम्तेक्म। मेकोपुकी इन अरेशो काइ मपाइब बाक्नीम।  
 86 इन शेंतीके नेल्ले गेना हना यो लीनीम। मिनू मेकोपुकीमी आं कली मोशा खेदा पाडनीम। आं कली वारच पाइय्यीनी।  
 87 मेकोपुकीमी आं कली रागी रे हेररा क्याम्ताक्यीमी। गो चहिं इन ब्रेक्शा अरेशो लोत्र मप्रेंनुड।  
 88 इन गेना हना यो दाक्तीकेमी ब्रोंडपाइय्यीनी। मोपा गो इन देशो टिना टिन बाक्नुड।

## लामेध

- 89 परमप्रभु यावे गेना हना यो बाक्ब। इन लोव्र स्वर्गम वोइश्शो बाक्ब। यसैया ४०:८  
 90 इन मुर आन कली दाक्शा मप्रोंइतीके पाला पाला सम्म लीब। गे रागी सेल्था वोइक्तीनी। मिनु मेको महिम्सीब।  
 91 इन लोव्र पतीकेमी मेको महिम्सीब। मारदे हना नेल्लेमी इन लोव्र टीनीम।  
 92 इन अरेशो लोव्रम आं कली मय्येरपाइश्शो हना, गो आं श्येतम बेक्ड वा। येरमीया १५:१६  
 93 गो इन अरेशा ब्रेक्शो लोव्र गेनायो मप्रेंनुड। मारदे हना गे मेको आ पतीकेमी आं कली ब्रोंडपाइक्तीनी।  
 94 गो इन मुर नड। आं कली प्रोंइयीनी। मारदे हना गो इन ब्रेक्शा अरेशो लोव्र माल्ता।  
 95 इन अरेशो लोव्र मटीबपुकीमी आं कली साइक्चा कली बाप्शो बाक्नीमी। गो चहिं इन देशो मिम्शा बाक्नुड।  
 96 मुरुमी नेल्ल क्येडा रिम्शो मारेइ सेल्ने मचाप्नीम। गो मेको तुइक्नुड। तन्न इन शेंशो लोव्र नेल्ल क्येडा रिम्शो बाक्ब।

## मेम

- 97 गो इन अरेशो लोव्र शुश दाक्नुड। गो नाक्त किंत किंत मेको आ पर्वम मिम्नुड। भजन संग्रह १:२  
 98 गे इन शेंशो लोव्रम आं जोरी सनु आन क्येडा आं कली तुइक्ब सेल्ब। मारदे हना मेको गेना हना यो गो नु बाक्ब।  
 99 मिनु आं कली शेंब आन क्येडा गो जोक्ब तुइक्ब दुम्ती। मारदे हना इन देशो मिम्ना मिम्न बाक्ती।  
 100 गो खाल्पा आन क्येडा यो जोक्ब तुइक्ब दुम्ती। मारदे हना इन ब्रेक्शा अरेशो लोव्र टिना टिन बाक्नुड।  
 101 गो इन लोव्र टिचा कली मरिम्शो लां मखोइक्थु बाक्नुड।  
 102 गो इन देशो पतीक लोव्र रे डोन मलड। मारदे हना गे आं कली शेंताक्वीनी।  
 103 इन देशो लोव्र ब्रोंव्रशो बाक्ब। मेको खुदो क्येडा यो जिजी बाक्ब।  
 104 इन ब्रेक्शा अरेशो लोव्र रे रुप्व दुम्ती। मोपतीके गो दूली पतीक नेल्ल काइ मदाक्नुड। भजन संग्रह ११९:२९

## नुन

- 105 इन लोव्र आं खोइली कली छेडछेड बाक्ब, आं लां तचा कली रांको खोदेशो बाक्ब। २पत्रुस १:१९  
 106 गो इन निसाफ पतीक लोव्र पाइनुड, दे कसम जशा खाप्ता।  
 107 परमप्रभु यावे, गो शुश श्येत जाइनुड, इन लोव्रम देशो खोदेशो पा आं कली ब्रोंइचा गेयीनी।  
 108 परमप्रभु यावे, गो इन कली टैयब सेल्थो, चढ़ेतीक खोदेशो पा ब्रने। मिनु आं कली इन पतीक लोव्र शेंदीनी। भजन संग्रह १९:१५  
 109 गो गेना हना यो बेक्चा चिक्शा बाक्ती। मो हना यो गो इन अरेशो लोव्र मप्रेंनुड।  
 110 इन अरेशो लोव्र मटीबपुकीमी आं कली ब्वारद दाइश्शो बाक्नीम। मो हना यो इन ब्रेक्शा अरेशो लोव्र मप्रोंइनुड।  
 111 इन देशो लोव्र गेना हना यो आं शोंप बाक्ब। मारदे हना मेकोमी आं थुं शुश ग्येरपाइक्ब।  
 112 गो इन फुल्लुम मुशा ब्रेक्शो लोव्र मबेक्डा सम्म पाइनुड, दे आं थुं क्रेंशा बाक्ती।

## सामेख

- 113 गो थुं निक्शी पाइश्शो मुर आन कली काइ मदाक्नुड। मिनु इन अरेशो लोव्र दाक्नुड। भजन संग्रह ३१:७; १राजा १८:२१  
 114 गे आं खुइक्तीक नु तेक्तीक बाक्नीनी। गो इन लोव्र डा लां कोव्रना कोव्रन बाक्नुड।  
 115 गो आं परमप्रभु आ शेंतीके पने चबुल, गे मरिम्शो पाइबपुकी, आं क्येडा डोन लने।।  
 116 इन थोक्शा पशो लोव्र खोदेशो पा आं कली ब्रोंइचा गेयीनी। मिनु गो इन लां कोव्रशा, मुने मदोक्डल।  
 117 आं कली प्रोंइचा कली वारच पाइय्यीनी। गो गेना हना यो इन फुल्लुम मुशा ब्रेक्शो लोव्र दाक्नुड।  
 118 इन फुल्लुम मुशा ब्रेक्शो लोव्र डा लां रे हेंथे गाक्ब नेल्ल आन कली तिल्लीनी। मारदे हना मेको आन लां जोल बाक्त।  
 119 रागी डा इन अरेशो मटीब नेल्ल आन कली पुलु खोदेशो पा फिक्तीनी। मोपतीके गो इन देशो लोव्र दाक्नुड। यसैया १:२५  
 120 गो इन कली मान पा हिंशा खिंखि पाइनुड। मिनु गो इन निसाफ पतीक मिम्शा हिंनुड।

## आयीन

- 121 गो टीक निसाफ पाता। आं कली दिप्ब आन कली जिम्मा मगेयीनी।  
 122 इन गेय पाइब कली वारच पा, रिम्शो पने। इन कली मटीबपुकीमी आं कली दिप्चा मगेने।  
 123 गो इन प्रोंइतीक नु इन टीक निसाफ पा पशो लोव्र कली शुश कोव्रशा रिम्नुड।  
 124 इन गेय पाइब कली इन गेना हना यो दाक्तीकेमी वारच पने। मिनु आं कली इन फुल्लुम मुशा ब्रेक्शो लोव्र शेंदीनी।  
 125 गो इन गेय पाइब नड। आं कली रुप्तीक थुं गेयीनी। मोपा गो इन देशो रुप्ने चबुल।  
 126 परमप्रभु यावे, इन गेय पची ना दुम्शो बाक्ब। मारदे हना मुरपुकीम इन अरेशो लोव्र मटीम।  
 127 गो सुन नु क्येख सुन क्येडा इन शेंतीके दाक्नुड।  
 128 मोपतीके गो आं लां नेल्लेमी इन ब्रेक्शा अरेशो लोव्र मिम्नुड। मिनु दूली लां नेल्ल काइ मदाक्नुड। भजन संग्रह ११९:२९

## पे

- 129 इन देशो लोव्र शुश रिम्शो बाक्नीम। मोपतीके गो मेको टिना टिन बाक्नुड।  
 130 इन लोव्र नेशोन, रुप्तीक थुं गेब। मतुइक्ब आन कली तुइक्ब सेल्ब।  
 131 गो ब्वाक्कु तूतू दाक्शो खोदेशो पा इन शेंशो लोव्र माल्ना माल्न बाक्नुड।



- 132 गे आं गे लेशशा शिशी पने। इन नें दाकब आन कली शिशी पशो खोदेशो पा आं कली यो शिशी पने।  
 133 आं कली इन थोकशा पशो लोत्र डा लां गाकपाइय्यीनी। मरिम्शो पतीकेम आं कली हुकुम पचा मगेने।  
 134 आं कली मुर आन दिप्तीकरे प्रोइयीनी। मिनु गो इन ब्रेकशा अरेशो लोत्र पने चबुल।  
 135 इन कुल इन गेय पाइब तार नां खोदेशो पा ब्रपतीन। मिनु इन फुल्लुम मुशा ब्रेकशा लोत्र आं कली शेंदीनी।  
 136 गो डाकनुड। मारदे हना मुरपुकीमी इन अरेशो लोत्र मटीम।

चाधे

- 137 परमप्रभु यावे, गे रिम्शो पाइब बाकनीनी। मिनु इन पशो निसाफ ठीक बाकनीम।  
 138 गे इन देशो लोत्र ठीक निसाफ पतीकेमी वोइक्तीनी। गो मेको कली थमा सुइक्तीकी।  
 139 गो चुरना चुरन बाकनुड। मारदे हना आं कली खेदा पाइबपुकीमी इन लोत्र प्रंताकम। भजन संग्रह ६९:१०  
 140 इन थोकशा पशो लोत्र शुश रिम्शो बाकब। मिनु गो, इन गेय पाइबमी मेको दाकनुड।  
 141 गो आइक्च बाकनुड। आं कली सुइमी महिक्नीम। मो हना यो गो इन ब्रेकशा अरेशो लोत्र मप्रेंनुड।  
 142 इन निसाफ पतीके गेना हना यो ठीक बाकब। मिनु इन अरेशो लोत्र थमा लोत्र बाकब।  
 143 गो हिंती नु श्येत जाइब दुम्ती हना यो, इन शेंतीकेम आं कली ग्येरपाइक्च।  
 144 इन देशो गेना हना यो ठीक बाकनीम। आं कली रुप्तीक थुं गेतीनी हना, गो ब्रोंडनुड।

क्वोफ

- 145 गो आं थुं नेल्लेमी इन कली पुंडनुड। परमप्रभु यावे आं लोत्र लेत्तीनी। गो इन फुल्लुम मुशा ब्रेकशा लोत्र टिना टिन बाकनुड।  
 146 गो इन कली “गे आं कली श्येत रे प्रोइयीनी” दे पुंडनुड। मिनु गो इन देशो पाइनुड।  
 147 गो नां मदापथु बोक्शा, इन कली “वारच पाइय्यीनी” दे पुंडनुड। गो इन लोत्र डा लां कोवना कोवन बाकनुड।  
 148 गो इन थोकशा पशो लोत्र मिम्चा कली नाकदो सेंना सेंन बाक्ती।  
 149 इन गेना हना यो दाक्तीकेमी आं पुंडशो नेनीन। परमप्रभु यावे, इन निसाफ पतीकेमी आं कली ब्रोंड्या गेयीनी।  
 150 आं कली खेदा पाइबपुकी आं कली साइक्चा कली आं नेक्था जाक्नीम। मेकोपुकी इन अरेशो लोत्र रे डोन बाकनीम।  
 151 तन्न परमप्रभु यावे, गे आं नेक्था बाकनीनी। इन शेंशो लोत्र नेल्ल थमा बाकब।  
 152 गो डोंइती रे इन देशो लोत्र पढेशा, मेको गेना हना यो कली सेल्लो बाकब, दे तुइक्ताक्च।

रेश

- 153 आं श्येत जशो कोवडीन, गो श्येत जाइनुड। मिनु आं कली प्रोइयीनी। मारदे हना गो इन अरेशो लोत्र मप्रेंनुड।  
 154 गे आं निसाफ पाइब दुमीन। मिनु आं कली प्रोइयीनी। इन थोकशा पशो लोत्र खोदेशो पा ब्रोंड्या गेयीनी।  
 155 इन अरेशो लोत्र मटीब आन कली गे श्येत रे मप्रोंडनीनी। मारदे हना मेकोपुकीमी इन फुल्लुम मुशा ब्रेकशा लोत्र पचा ममलेम।  
 156 परमप्रभु यावे, इन शिशी ठेयब बाकब। इन निसाफ पतीक लोत्र खोदेशो पा आं कली ब्रोंड्या गेयीनी।  
 157 आं कली खेदा पाइब नु आं जोरी सत्रु शुश बाकनीम। मो हना यो गो इन देशो लोत्र मप्रोनु।  
 158 मेको नोले शोंइसीशो आन कली तशा ग्रांग्रा दीती। मारदे हना मेकोपुकीमी इन शेंशो टिचा प्रोंइतेकम।  
 159 गो इन ब्रेकशा अरेशो लोत्र दाकनुड, दे मिम्तीन। परमप्रभु यावे, इन गेना हना यो दाक्तीकेमी आं कली ब्रोंड्या गेयीनी।  
 160 इन लोत्र नेल्ले थमा बाकब। मिनु इन निसाफ पतीक लोत्र गेना हना यो ठीक बाकनीम। यूहन्ना १७:१७

सिन नु शिन

- 161 ठेयब मुरपुकीमी आं कली बिक्चीम खेदा पाइनीमी। तन्न आं थुं इन लोत्र क्येडा हिंब।  
 162 गो शुश शोप तशा, ग्येरसीचा क्येडा इन लोत्र तशा ग्येरसाक्थी।  
 163 दूली पतीके नु जोल पतीक काइ मदाक्थु, ग्रांग्रा दीनुड। तन्न इन अरेशो लोत्र दाकनुड।  
 164 गो इन निसाफ पतीक लोत्र आ परबम इन कली नाक्त किंत किंत ७ खेयप ठेयब सेल्लुड।  
 165 इन अरेशो लोत्र दाकबपुकी थुं नाइशशा बाक्चा ताइनीम। मेको आन कली मारेइ श्येत मदुम्ब।  
 166 परमप्रभु यावे, गो इन श्येत रे प्रोंइतीक कली रिम्शा बाकनुड। मिनु इन शेंशो पाइनुड।  
 167 गो इन देशो लोत्र टिना टिन बाक्ती। मिनु गो मेको कली थाम्पा दाकनुड।  
 168 इन ब्रेकशा अरेशो लोत्र नु इन देशो लोत्र टिना टिन बाकनुड। मारदे हना आं पशो नेल्ल इन डोंइती बाकनीम।

थाव

- 169 परमप्रभु यावे, आं पुंडशो लोत्र नेनीन। इन लोत्रम देशो खोदेशो पा आं कली रुम्ब थुं गेयीनी।  
 170 आं पुंडशो लोत्र नेनीन। इन थोकशा पशो लोत्र खोदेशो पा श्येत रे प्रोइयीनी।  
 171 गे आं कली इन फुल्लुम मुशा, ब्रेकशो लोत्र शेंताक्थीनी। मोपतीके गो इन कली ठेयब सेल्ला सेल्ल बाकनुड।  
 172 गो इन थोकशा पशो लोत्र आ परबम कुम्सो पाइनुड। मारदे हना इन शेंशो लोत्र नेल्ल ठीक बाकब।  
 173 गे आं कली वारच पाइय्यीनी। मारदे हना गो इन ब्रेकशा अरेशो लोत्र योत्रशा, आं के सेल्लाती।  
 174 परमप्रभु यावे, गो इन श्येत रे प्रोंइतीक कली रिम्नुड। इन अरेशो लोत्र दाक्था ग्येरसीनुड।

175 गे आं कली ब्रोंडचा गेयीनी। मिनू गो इन कली ठेयब सेल्लुड। मिनू इन पतीक लोव्वमी आं कली वारच पवल।  
176 गो जाम्शो भेडा खोदेंशो पा लां जाम्शो बाक्नुड। इन गेय पाइब, आं कली माल्यीनी। मारदे हना गो इन शेंशो लोव्व मप्रेंनुड। यसैया ५३:६

## 120

“वारच पाइय्यीनी” दे पुंडशो  
लां डा कुम्सो।

- 1 गो श्येत जडानु, परमप्रभु यावे कली पुंडनुड। मिनू मेकोमी आं लोव्व लेण्व।
- 2 परमप्रभु यावे, आं कली जोल पाइब नु लें निक्शी पाइशो मुर रे प्रोंडयीनी।
- 3 मिनू गे जोल पाइब, इ कली मार पचा? गे लें निक्शी पाइशो मुर इ कली अरु मार पाइक्या माल्बा?
- 4 लडाइ पाइबमी आ हेशो ब्रा आप्व। मिनू ब्रशो कोइला इ तार जुक्पाइक्नीम।
- 5 गो श्येत जाइब दुम्नी। गो मेशेक रागीम बाक्चा माल्लुड। केदार आ ताम्बु आन दातेम बाक्चा माल्लुड।
- 6 गो थुं नाइशशा बाक्चा काइ मदाक्ब आन दातेमी शुश बाक्ती।
- 7 गो थुं नाइशशा बाक्चा दाक्ब मुर नड। तन्न गो लोव्व पडानु, मेकोपुकी लडाइ पचा कली ठीक दुम्नीम। रोमी १२:१८

## 121

परमप्रभुम वारच पा, श्येत रे प्रोंडशो  
लां डा कुम्सो।

- 1 गो डांडा गे कोव्वनुड। आं कली वारच पाइब ते रे जाक्बाक्मे?
- 2 सरीड नु रागी सेल्व परमप्रभु यावेमी आं कली वारच पाइब।
- 3 मेकोमी इ खोइल ग्रेक्चा मगेब। इ कली कोव्वब गेनायो मडण्व।
- 4 इस्राएली आन कली वारच पाइब थमा पा गेनायो मनाइसीब, गेनायो मडण्व।
- 5 परमप्रभु यावे इ कली खाल पाइब बाक्ब। परमप्रभु यावे इ ग्युरा गे डा फाम्सीतीके बाक्ब।
- 6 मिनू नाक्ती नांम इ कली मनाण्व। नाक्दो तास्लाम इ कली मारेइ मरिम्शो पने मचाण्व।
- 7 परमप्रभु यावेमी इ कली श्येत नेल्ल रे प्रोंडब। मेकोमी इ कली ब्रोंडचा गेब। गन्ती ६:२४-२६
- 8 परमप्रभु यावेमी गे लाडगा खिंडगा पवीनु यो इ कली खाल पाइब। मुल रे गेना हना यो मो पाइब। ब्यवस्था २८:६

## 122

यरूसलेम आ पर्बम पुंडशो  
लां डा कुम्सो। दाऊद आ कुम्सो।

- 1 मेकोपुकीमी आं कली “परमप्रभु यावे आ खिं लय” देंतेक्म। मिनू गो ग्येरसाक्यी। भजन संग्रह २६:८; इजीकीएल ४८:३५
- 2 गोपुकीमी “यरूसलेम, इ ठेयब लाण्चोपुकीमी राण्शो बाक्नीकी” देंतेक।
- 3 यरूसलेम रिम्शो पा सेल्लो सहर बाक्ब। मेकेर खिं नेक्नेक्था बाक्नीम।
- 4 मिनू इस्राएल आ थर थर डा मुरपुकी परमप्रभु यावे आ मुर दुम्तीके मेकेर लाइनीम। परमप्रभु यावेमी इस्राएली आन कली दोपा अरेवा, मोपा मेकोपुकीमी मेकेर लशा “गे रिम्शो पाइब बाक्नीनी” दे आ नें ठेयब सेल्लनीम।
- 5 मेकेर निसाफ पाइब आन नित्तीक बाक्नीम। मेकेर दाऊद आ चच युइ आन नित्तीके बाक्नीम।
- 6 यरूसलेम कली “रिम्शो दुम्ल” दे आसीक गेने। मिनू “यरूसलेम, इ कली दाक्बपुकी रिम्शो दुम्मल। जकरिया ४:१५
- 7 इ गारो आगामी थुं नाइशशा बाक्तीक दुम्ल। इ गारो डा लाइशशो खिंमी मारेइ श्येत मदुम्ल” देनीन।
- 8 मिनू गो आं लोकब नु आं वारच आन पर्बम “इ आगामी थुं नाइशशा बाक्तीक दुम्ल।
- 9 मिनू परमप्रभु यावे, आंइ परमप्रभु आ खिं आ पर्बम इन कली रिम्शो दुम्शो तचा दाक्नुड” देंती।

## 123

“शिशी पने” दे पुंडशो  
लां डा कुम्सो।

- 1 इर स्वर्ग डा नित्तीकेम बाक्ब, गो इन गे कोव्वशा इन कली पुंडनुड।
- 2 दोपा वाइलपुकीम आन होव्वप आन गुइ गे कोव्वनीमी नु वाइलीमपुकीमी आन होव्वपोकम आन गुइ गे कोव्वनीम, मोपा गोपुकीमी परमप्रभु यावे गे कोव्वनीकी। आंइ कली शिशी मपवा सम्म मोपा कोव्वनीकी।
- 3 परमप्रभु यावे, आंइ कली शिशी पने। आंइ कली शिशी पने। मारदे हना गो शुश दिण्चा पुंडसीशो बाक्नीकी।
- 4 ठेयब लेशोपुकी नु मरिम्शो पाइबपुकीमी आंइ कली महिक्थु शुश श्येत गेतीके गो ब्रीताक्क।

## 124

परमप्रभु यावेमी वारच पशो  
लां डा कुम्सो। दाऊद आ कुम्सो।

- 1 परमप्रभु यावे गोपुकी नु मबाक्शो हना,
- 2 मुरपुकीमी आंइ कली लडाइ तोवमेनु, परमप्रभु यावे गोपुकी नु मबाक्शो हना,
- 3 मेकोपुकीमी आंइ कली तशा गाइव्तमेनु, आंइ कली सेलीन दाकगेम वा।
- 4 मिनु बारशा जाक्शो ब्वाक्कुम आंइ कली योल्द वा। मिनु मेको ब्वाक्कुम आंइ कली सुम वा। भजन संग्रह ६९:१६; भजन संग्रह ४२:८
- 5 मेको बारशो ब्वाक्कुम आंइ कली मोशा योल्शा लद वा।
- 6 परमप्रभु यावे ठेयब बाक्ब। मारदे हना मेकोमी आंइ कली क्रिम्चा मगेव।
- 7 मिनु गोपुकी सिखारी आन ब्वारद रे ब्रोइशो चिक्ब खोदेशो पा प्रोक्तक। मेको ब्वारद ब्रोइव्त। मिनु गोपुकी प्रोक्तक।
- 8 सरीड नु रागी सेल्ब परमप्रभु यावेमी आंइ कली वारच पशो बाक्ब।

## 125

परमप्रभु आ मुर नु बाक्ब  
लां डा कुम्सो।

- 1 परमप्रभु यावे कली थमा सुइक्बपुकी सियोन डांडा खोदेशो बाक्नीमी। मेको याक्ने मचाप्सीब। गेना हना यो बाक्ब।
- 2 यरूसलेम आ एर ओथ नेल्ल पहाड बाक्नीम। मिनु मुल रे गेना हना यो परमप्रभु यावेमी मेको खोदेशो पा आ मुर आन एर ओथ बाक्ब।
- 3 परमप्रभु आ अरेशो मटीब आन हुकुम पतीके ठीक पाइब आन रागीम मदुम्ब। मिनु ला ठीक पाइबपुकीमी दूली मपाइनीम।
- 4 परमप्रभु यावे, रिम्शो पाइब नु रिम्शो थु पाइशो मुर आन कली रिम्शो पने।
- 5 तन्न परमप्रभु यावेमी नोले शोइसीशा मरिम्शो लां खोइक्ब आन कली मरिम्शो पाइशशा खतम पोक्ब। इस्राएलमी थु नाइशशा बाक्तीक दुम्ल। भजन संग्रह १२८:६; गलाती ६:१६

## 126

“वारच पने” दे पुंइशो  
लां डा कुम्सो।

- 1 परमप्रभु यावेमी ग्याइशशा लाइक्चा पुंइसीशो आन कली सियोनम लेशशा चाक्गानु, गोपुकी डोमु तशो खोदेशो दुम्तक। भजन संग्रह १४:७
- 2 मिनु गोपुकी शुश ग्येरसीशा रिस्साक्क। थाम्पा ग्येरशा ग्रीतक। मिनु रागी रागी डा मुरपुकीमी “परमप्रभु यावेमी मेको आन कली वारच पा, ठेयब गेय पाप्तु” देमुम्तेक्म।
- 3 परमप्रभु यावेमी आंइ कली थमा वारच पा ठेयब गेय पाप्तु। मिनु गो शुश ग्येरसाक्क।
- 4 परमप्रभु यावे, दोदेशो पा नेगेब रागी डा बारशो खोला शाइशशा लाइनीमी, मोदेशो पा आंइ रिम्शो दुम्तीके लेशशा चाक्कीन।
- 5 मिनु डाक्ना डाकन शोक्बपुकीमी ग्येरसीशा खुप्नीम। मती ५:४
- 6 डाक्ना डाकन शोक्थ लाइनीम। तन्न ग्रेल्लो क्योत्रज चेरब कुरशा, ग्येरसीशा कुम्सो पा खिं लेत्नीम। यसैया ३५:१०

## 127

परमप्रभु रिम्शो नाक्त गेब बाक्ब  
लां डा कुम्सो। सोलोमन आ कुम्सो।

- 1 परमप्रभु यावेमी खिं मसेल्लो हना, खिं सेल्ब आन गेय मोशा दुम वा। परमप्रभु यावेम सहर खाल मपशो हना, खाल पाइब आन खाल पशो मोशा दुम वा।
- 2 गे सुनी कना बोक्शा, नाक्दो सम्म शुश गेय पाइनीनी। मिनु इन शोब्ले सुर्ता पा जाइनीनी। मेको मोशा बाक्ब। मारदे हना परमप्रभुमी आ दाक्शो मुर आन कली इप्ची ना आन माल्लो गेब। हितोपदेस १०:२२
- 3 तमी तौ परमप्रभु यावे आ गेशो बाक्नीम। आलपुकी मेको आ गेशो इनाम बाक्नीम। भजन संग्रह १२८ ३-४; उत्पत्ती ३०:२; उत्पत्ती ३३:५
- 4 मिनु ठिटा ना थिशो तौपुकी लडाइ पाइब आन गुडम बाक्शो ब्रा खोदेशो बाक्नीम।
- 5 सु सु आन ब्रा कुरतीके मेकोमी ब्रीशो बाक्नीमी, मेको मुर ग्येरसीशो बाक्नीम। मिनु मेकोपुकी ठेयब लाप्चोमी आन जोरी सत्रुमी लोत्र पा जिचा पोक्गमेनु, मुने मदोक्नीम।

## 128

परमप्रभु आ आसीक  
लां डा कुम्सो।

- 1 परमप्रभु यावे कली मान पा हिंबपुकी आसीक तशो बाक्नीम। मेकोपुकी परमप्रभु यावे आ लांम गाकशो बाक्नीम।
- 2 गे इ पशो गेय रे जाइनेवे। गे ग्येरसीशा मारेइ मारिइमी दारनेवे।
- 3 मिनु इ मीश इ खिंमी सिशशो अडगुर बोट खोदेशो बाक्ब। इ आल इ खिंम तेल रवा आ कोच्वा दाप्शो खोदेशो बाक्नीम। भजन संग्रह १२७:३
- 4 मोपा परमप्रभु यावे कली मान पा हिंब मुर आसीक ताइब।
- 5 परमप्रभु यावेमी इ कली सियोन रे आसीक गेब। गे मबेक्थु नाक्त कित कित यरूसलेममी रिम्शो दुम्शो ताइनेवे।
- 6 मिनु गे इ चच युइ आन कली ताइनेवे। इस्राएली आन थुं नाइश्शा बाक्मल। उत्पती ४८:११; भजन संग्रह १२५:५

## 129

जोरी सत्रु आन पर्वम पुंइशो

लां डा कुम्सो।

- 1 इस्राएलमी “मेकोपुकीमी गो ठिटा बाक्डा रेन आं कली थाम्पा श्येत गेतीमी” दैत।
- 2 मिनु लेशा “मेकोपुकीमी गो ठिटा बाक्डा रेन आं कली थाम्पा श्येत गेतीमी। मो हना यो आं क्येडा ग्राने मचबेम।
- 3 ब्यफ वाक्बपुकीमी आं चीमी वाक्ताकम। मिनु आं ची नेल्ल चेत्लेकम” दैत। यसैया ५१:२३
- 4 परमप्रभु यावे टीक पाइब बाक्ब। मेकोमी आ अरेशो मटीब आन डोरी प्रोइश्शा गेप्टु।
- 5 सियोन कली काइ मदाक्बपुकी मुने दोक्शा, लेशशा लमल।
- 6 मेकोपुकी खिं तार वाशो घांस खोदेशो दुम्मल। मेको बारचा क्येडा डोंइती सोव्रनीम।
- 7 घांस रिक्बपुकीम मेको मुठी का यो रिक्ने मचाप्नीम। मुठा फ्रेंबपुकीम मेको अडला का यो प्रिने मचाप्नीम।
- 8 मिनु मेको रे पा लाइबपुकीमी “गे परमप्रभु यावे आ आसीक रावो। परमप्रभु यावे आ नेंम इ कली आसीक गेनीकी” मदेंनीम। रूथ २:४

## 130

शुश श्येत दुम्ची ना पुंइशो

लां डा कुम्सो।

- 1 परमप्रभु यावे, गो हिंचा डा श्येत जडानु, इन कली पुंइनुड।
- 2 परमप्रभु यावे, आ लोत्र नेनीन। “शिशी पाइय्यीनी” दे आं पुंइशो लोत्र इन नोफा दाइक्तीन।
- 3 परमप्रभु यावे, गे आंइ मरिम्शो पशो मिम्ताक्नी हना, इन डोंइती राप्ने चाप्नीमी डा?
- 4 गे माफ गेनीनी। मोपतीके मुर इन कली मान पा हिंचा माल्नीम। यसैया ५५:१७; रोमी ६:१-२
- 5 गो परमप्रभु यावे कली रिम्नुड। आं थुं नेल्लेमी यो रिम्नुड। मिनु गो इन लोत्र आस पाइनुड। यसैया २१:११; लूका १२:३५-३६
- 6 नाकदो खाल पाइबमी गेना नां सोव्रबा, दे रिम्शो क्येडा यो, गो आं थुं नेल्लेमी परमप्रभु कली शुश रिम्नुड।
- 7 इस्राएल, परमप्रभु यावे कली आस पा बाक्को। मारदे हना परमप्रभु यावेमी गेना हना यो दाक्ब। मेको नु मरिम्शो पशो रे प्रोंइतीक शुश बाक्ब।
- 8 मिनु मेकोमी इस्राएली आन कली आन मरिम्शो पशो नेल्ल रे प्रोंइब। मती १:२१

## 131

ब्रेम्शो थुं पाइश्शो मुर ग्येरसीशो

लां डा कुम्सो। दाऊद आ कुम्सो।

- 1 परमप्रभु यावे, गो ठेयब मलेश्शो बाक्नुड। गो मबोरशो बाक्नुड। गो आं मचाप्चा डा नु ठेयब गेयम मग्योल्लुड।
- 2 मिनु आं थुं ग्येत्थ लुकच मपथु, नाइश्शा बाक्ब। आं थुं आ ममा नु बाक्शो आइक्च आल खोदेशो दुम्ब। आं थुं सिक्सी पा बाक्ब आल खोदेशो बाक्ब। भजन संग्रह ६२:२
- 3 इस्राएल, गो मुल रे गेना हना यो परमप्रभु यावे कली आस पा बाक्को।

## 132

परमप्रभु आ खिं आ पर्वम पुंइशो

लां डा कुम्सो।

- 1 परमप्रभु यावे दाऊद कली फ्रुककीन। मेको आ श्येत फाल्लो नेल्ल मिम्तीन।
- 2 मेकोमी परमप्रभु यावे आ नेंम कसम जशो बाक्त। मिनु याकूब आ नेल्ल क्येडा सक्ति पाइश्शो आ नेंम कसम जाप्टु।
- 3 गो आं खिं मओव्रनुड। मिनु आं ब्राख्येम मडप्नुड। २सामुएल ७:२; प्रेरित ७:४६
- 4 गो निन्द्रा मपाइनुड। गो मडप्नुड।
- 5 मारदे मोदेशो पाइनुड देंशा हना, गो याकूब आ नेल्ल क्येडा सक्ति पाइश्शो आ बाक्तीक मथिदु, सम्म मो पाइनुड।
- 6 गोपुकीमी एफ्राथाहमी परमप्रभु यावे आ कबल पशो सन्दोस आ पर्वम नेंतय। मिनु गोपुकीमी मेको यार सहर डा दिंम थित्तय। १सामुएल ७:१; १इतिहास १३:५-६
- 7 गो मेको आ बाक्तीक लय। मिनु मेको आ खोइल थेक्तीक आ डोंइती बाप्य।

- 8 परमप्रभु यावे बोक्कीन, इन नाइश्शा बाक्तीके नु इन सक्ति पाइश्शो कबल पशो सन्दोस बाक्तीकेम जाक्कीन। गन्ती १०:३५; २इतिहास ६:४१; भजन संग्रह ७८:६१
- 9 इन कली चढेबपुकीमी ठीक पतीके वा फेक्शो खोदेशो पा फेक्समल। मिनु इन मुरपुकी ठेयब सेंदा पा ग्येरसमल।
- 10 इन गेय पाइब दाऊद आ पर्वम इन तेल लुक्शो कली मप्रोनीन।
- 11 परमप्रभु यावेमी दाऊद नु लोत्र पा कसम जशो बाक्त। मेकोमी “गो इ सासन पतीकेमी इ तौ का वोइक्नुड” दे लोत्र पशो बाक्त। परमप्रभु यावेमी आ पशो लोत्र खाण्ब। भजन संग्रह ८९:४-५; हिब्रू ६:१७
- 12 मेकोमी “इ तोपुकीमी आं कबल नु आं देशो पाम्तेक्म हना, मेको आन तोपुकी यो इ सासन पतीकेम सासन पचा ताइनीम” देशो बाक्त।
- 13 परमप्रभु यावेमी सियोन कली योत्रशो बाक्ब। “आं बाक्तीके मेकेर बाक्ब” दे मिश्शो बाक्ब। भजन संग्रह ६८:१७; भजन संग्रह ७६:३
- 14 मिनु परमप्रभुमी “एकेर नाइक्नुड। एकेर गेना हना यो बाक्नुड, मारदे हना गो मेको दाक्नुड।
- 15 मिनु गो मेकेर डा मुर आन कली शुश जचा तूचा गेशा, आसीक गेनुडमी। प्रुडग आन कली रूथ्री जचा गेनुडमी।
- 16 गो मेकेर डा चढेब आन कली मरिश्शो पतीके रे ब्रोंइतीक दोदेशो बाक्बा तुइक्पाइक्नुडमी। मेकेर डा थमा सुइक्बपुकी कुम्सो पा ग्येरसीनीम।
- 17 गो मेकेर दाऊद आ खिं डा मुर आन मान बारपाइक्नुड। आं तेल लुक्शो मुर कली रिश्शो तौ का गेता। १सामुएल २:१०; १राजा ११:३६
- 18 गो मेको आ जोरी सत्रु आन कली मुने तोक्नुडमी। मिनु मेको रिश्शो पा सासन पाइब दुम्ब” दे परमप्रभुमी देंत।

### 133

लोक्बपुकी गारशो

लां डा कुम्सो। दाऊद आ कुम्सो।

- 1 लोक्बपुकी गारशा बाक्चा शुश रिश्शो बाक्ब। उत्पती १३:८
- 2 मेको पियाम लुक्शो शुश क्येट थाप्शो तेल खोदेशो बाक्ब। मेको हारून आ गल शोक्त्रे रे शाइश्शा, आ वा सम्म जाक्दीण्ब।
- 3 मेको हेरमोन डांडा डा सीत सियोन डांडाम यिशो खोदेशो बाक्ब। मेको गेना हना यो ब्रोंइतीक परमप्रभु यावे आ आसीक बाक्ब।

### 134

नाक्दो डा कुम्सो

लां डा कुम्सो।

- 1 नाक्दो परमप्रभु यावे आ खिंम बाक्शा, परमप्रभु यावे आ गेय पाइब नेल्लेमी परमप्रभु यावे कली ठेयब सेलीन।
- 2 मिनु परमप्रभु यावे आ खिंमी इन गुड पोक्शा, परमप्रभु यावे कली ठेयब सेलीन।
- 3 सरीड नु रागी सेल्ब परमप्रभु यावेमी सियोन रे इन कली आसीक गेवल। भजन संग्रह ११५:१५

### 135

परमप्रभु यावे आ ठेयब गेय

- 1 परमप्रभु यावे कली ठेयब सेलीन। परमप्रभु यावे आ नें ठेयब सेलीन। परमप्रभु यावे आ गेय पाइबपुकी, मेको कली ठेयब सेलीन।
- 2 गे परमप्रभु यावे आ खिंमी गेय पाइबपुकी नु आ खिं डा लाडगाम बाक्बपुकी, आंइ परमप्रभु कली ठेयब सेलीन।
- 3 परमप्रभु यावे कली ठेयब सेलीन। मारदे हना परमप्रभु यावे रिश्शो पाइब बाक्ब। मेको कली कुम्सो पने। मारदे हना मेको रिश्शो बाक्ब।
- 4 परमप्रभु यावेमी याकूब कली आ मुर दुम्पाइक्चा कली नु इसाएल कली आंम के सेल्चा कली योत्रशो बाक्ब। प्रस्थान १९:५-६
- 5 परमप्रभु यावे थम ठेयब बाक्ब। मेको गो तुइक्नुड। मिनु आंइ परमप्रभु देवी देवता नेल्ल आन क्येडा ठेयब बाक्ब। भजन संग्रह ७६:८
- 6 परमप्रभु यावेमी सरीड, रागी, समुन्द्र नु समुन्द्र आ आगामी मार दाक्बा, मेको पाइब।
- 7 मेकोमी रागी आ सुर सुर रे गोस्स पोक्ब। मेकोमी चिला दाप्पाइश्शा, रेउ यिपाइक्ब। मिनु मेकोमी आ बाक्तीक रे फश पपाइक्ब। येरमीया १०:१३
- 8 मेकोमी इजीप्त रागीमी मुर नु बी ब्यफ, क्यारश भेडा मारेइ मारेइ आन डोंइती जरमेशा नेल्ल आन कली साइक्तीमी। प्रस्थान १२:२९
- 9 मेकोमी इजीप्त रागीमी फाराओ नु आ गेय पाइब मुर नेल्ल आन डोंइती चिन्ड नु छक लाक्चा डा गेय कोंइताक्ब। भजन संग्रह ७८:४२-५२
- 10 मेकोमी शुश रागी आन कली खतम पोक्तीमी। मिनु मेकोमी बोल्यो पिप आन कली साइक्तीमी। गन्ती २१:२१-३५
- 11 मेकोमी एमोरी आन पिप सीहोन, बाशान डा पिप ओग नु कनान डा पिप नेल्ल आन कली साइक्तीमी।
- 12 मिनु मेकोमी मेको आन रागी आ मुर, इसाएली आन कली आन के सेल्चा कली गेम्तीमी। यहोसु १२:१-६
- 13 परमप्रभु यावे इन नें गेना हना यो बाक्ब। परमप्रभु यावे इन नें गेनायो मक्वाम्सीब। भजन संग्रह १०२:१३

- 14 मारदे हना परमप्रभु यावेमी आ मुर आन कली निसाफ पतीकेमी वारच पाइब। मिनु आ गेय पाइब आन कली शिशी पाइब। ब्यवस्था ३२:३६
- 15 रागी रागी डा मुर आन मूर्ति सुन नु चांदी के बाक्नीम। मेको नेल्ले मुर आन सेल्शो ला बाक्नीम। भजन संग्रह ११५:४-११
- 16 मेको आन के शोत्र बाक्ब, तन्न मब्बाक्नीम। मिक्च बाक्ब, तन्न मताइनीम।
- 17 नोफा बाक्ब, तन्न मनेनीम। मेकोपुकीमी आन सोक्त कीने मचाप्नीम।
- 18 मेको आन कली सेल्बपुकी यो मोदेशो दुम्मल। मिनु मेको आन कली थमा सुडक्बपुकी यो मोदेशो दुम्मल।
- 19 इस्राएल आ खिं डा मुरपुकी, परमप्रभु यावे कली ठेयब सेलीन। हारून आ खिं डा मुरपुकी परमप्रभु यावे कली ठेयब सेलीन।
- 20 लेवी आ मुरपुकी, परमप्रभु यावे कली ठेयब सेलीन। परमप्रभु यावे कली मान पा हिंबपुकी, परमप्रभु यावे कली ठेयब सेलीन।
- 21 सियोन रे परमप्रभु यावे कली ठेयब सेल्मेक्ल। यरूसलेमम बाक्बपुकीमी परमप्रभु यावे कली ठेयब सेल्मेक्ल। परमप्रभु यावे कली ठेयब सेलीन।

## 136

परमप्रभु आ दाक्तीके लीब

- 1 परमप्रभु यावे कली “गे रिम्शो पाइब बाक्नीनी” देनीन। मारदे हना मेको रिम्शो पाइब बाक्ब। मेको आ दाक्तीके गेना हना यो लीब। भजन संग्रह १०१:६
- 2 मिनु देवी देवता आन परमप्रभु कली “गे रिम्शो पाइब बाक्नीनी” देनीन। मारदे हना मेको आ दाक्तीके गेना हना यो लीब।
- 3 मिनु परमप्रभु, आन परमप्रभु कली “गे रिम्शो पाइब बाक्नीनी” देनीन। मारदे हना मेको आ दाक्तीके गेना हना यो लीब।
- 4 मेकोमी ला ठेयब छक लाक्चा डा गेय पाइब। मारदे हना मेको आ दाक्तीके गेना हना यो लीब।
- 5 मेकोमी जोक्ब तुडक्ब दुम्तीकेमी सरीड सेल्लु। मारदे हना मेको आ दाक्तीके गेना हना यो लीब।
- 6 मेकोमी ब्वाक्कु तार रागी सेल्लु। मारदे हना मेको आ दाक्तीके गेना हना यो लीब।
- 7 मेकोमी नां तास्ला सेल्लु। मारदे हना मेको आ दाक्तीके गेना हना यो लीब। उत्पत्ती १:१४-१८
- 8 मेकोमी नाक्ती कली नां सेल्लु। मारदे हना मेको आ दाक्तीके गेना हना यो लीब।
- 9 मेकोमी नाक्दो कली तास्ला नु सोरुल सेल्लतीमी। मारदे हना मेको आ दाक्तीके गेना हना यो लीब।
- 10 मेकोमी इजीप्त रागीमी डोंइती जरमेशो नेल्ल आन कली साइक्तीमी। मारदे हना मेको आ दाक्तीके गेना हना यो लीब। भजन संग्रह १३५:८-१२
- 11 मेकोमी इस्राएली आन कली इजीप्ती आन दाते रे गुंइशा चाक्तीमी। मारदे हना मेको आ दाक्तीके गेना हना यो लीब।
- 12 मेकोमी आ ठेयब सक्तिमी मेको आन कली गुंइशा चाक्तीमी। मारदे हना मेको आ दाक्तीके गेना हना यो लीब।
- 13 मेकोमी लल समुन्द्रमी लां सेल्लु। मारदे हना मेको आ दाक्तीके गेना हना यो लीब।
- 14 मेकोमी इस्राएली आन कली मेको लां रे पा शोक्पाइक्तीमी। मारदे हना मेको आ दाक्तीके गेना हना यो लीब।
- 15 मेकोमी फाराओ नु आ लडाइ पाइब आन कली लल समुन्द्रमी योल्पाइक्तु। मारदे हना मेको आ दाक्तीके गेना हना यो लीब।
- 16 मेकोमी आ मुर आन कली गोरशो रागीम लां कोइताक्मी। मारदे हना मेको आ दाक्तीके गेना हना यो लीब।
- 17 मेकोमी ठेयब पिप आन कली साइक्तीमी। मारदे हना मेको आ दाक्तीके गेना हना यो लीब। गन्ती २१:२३-३५
- 18 मेकोमी सक्ति पाइशो पिप आन कली साइक्तीमी। मारदे हना मेको आ दाक्तीके गेना हना यो लीब।
- 19 मेकोमी एमोरी आन पिप सीहोन कली साइक्तु। मारदे हना मेको आ दाक्तीके गेना हना यो लीब।
- 20 मेकोमी बाशान डा पिप ओग कली साइक्तु। मारदे हना मेको आ दाक्तीके गेना हना यो लीब।
- 21 मेकोमी मेको आस रागी आ मुर आन कली योक्शा, गेम्तीमी। मारदे हना मेको आ दाक्तीके गेना हना यो लीब।
- 22 मेकोमी मेको रागी आ गेय पाइब इस्राएली आन कली गेम्तीमी। मारदे हना मेको आ दाक्तीके गेना हना यो लीब।
- 23 मेकोमी गो श्येत जकानु, आंड कली मिम्ताक्ब। मारदे हना मेको आ दाक्तीके गेना हना यो लीब।
- 24 मेकोमी आंड कली आंड जोरी सत्रु आन गुड रे प्रोंइतु। मारदे हना मेको आ दाक्तीके गेना हना यो लीब।
- 25 मेकोमी ब्रोंइब नेल्ल आन कली जचा गेब। मारदे हना मेको आ दाक्तीके गेना हना यो लीब। भजन संग्रह १४५:१५
- 26 स्वर्ग डा परमप्रभु कली “गे रिम्शो पाइब बाक्नीनी” देनीन। मारदे हना मेको आ दाक्तीके गेना हना यो लीब।

## 137

बेबीलोनम बाक्ब आन कुम्सो

- 1 गो बेबीलोन डा खोला आ नेक्था बाक्शा, सियोन कली मिम्शा डाक्तक।
- 2 गोपुकीमी आंड तार पाइशो ताप्तीके मेकेर डा रवामी क्युक्तक।
- 3 मारदे हना आंड कली ग्याइशशा लाइक्बपुकीमी मेकेर कुम्सो पपाइक्तेक्म। मिनु आंड कली श्येत गेबपुकीमी ग्येरीक्ती कुम्सो पपाइक्तेक्म। मेकोपुकीमी आंड कली “सियोन डा कुम्सो का पने” दैतेक्म।
- 4 गो आंड मतुइशशो रागीमी परमप्रभु यावे आ कुम्सो दोपा पने चाप्नीकी?

- 5 गो यरूसलेम, इ कली प्रेंताकड हना, आं ग्युरा गुड मदुक्ब दुम्ल। येरमीया ५१:५०  
 6 गो इ कली ममिम्शो नड हना, गो यरूसलेम कली आं नेल्ल क्येडा टेयब ग्येरतीके बाक्ब, दे ममिम्शो नड हना, आं लें आं कुकुम क्येपतल।  
 7 परमप्रभु यावे, यरूसलेम खतम दुम नाक्ती एदोम डा मुर मार पामे, मेको मिम्तीन। मेकोपुकीमी “एको कली प्रेतीन। जग रेन खतम पोक्कीन” दे वाड ब्रेतेक्म। भजन संग्रह ७९:१२; ओबदिया १०:१५  
 8 बेबीलोन सहर, गे मुल खतम पोक्चा पुंडसीनेवे। गे मार पवी मेको आ क्येक्क लेप्ब ग्येरसीशो मुर बाक्ब।  
 9 इन आल आन कली ग्याइश्शा, फुल्लु तार राप्शा साइक्ब, ग्येरसीशो बाक्नीम। यसैया १३:१६; रोमी १२:१९

## 138

ठेयब सेल्टीक कुम्सो

दाऊद आ कुम्सो।

- 1 परमप्रभु, गो आं थु नेल्लेमी इन कली ठेयब सेल्लुड। गो देवी देवता आन डोंडती इन कली ला ठेयब सेल्टीक कुम्सो पाइनुड।  
 2 गो इन खिं गे बाप्शा, इन कली “गे रिम्शो पाइब बाक्नीनी” देनुड। मारदे हना इन गेना हना यो दाक्तीकेमी दाक्शा मप्रोंइनीनी। मिनु इन नें नु इन लोत्र नेल्ल आन क्येडा ठेयब बाक्नीम।  
 3 गो इन कली ब्रेडडानु, आं लोत्र लेत्ताक्यीनी। गे आं कली महिं थुं गेशा, बोल्यो सेल्टीनी।  
 4 परमप्रभु यावे, रागी डा पिप नेल्लेमी इन लोत्र नेतेक्म। मोपतीके मेकोपुकीमी इन कली ठेयब सेल्मेक्ल। यसैया २:३  
 5 मिनु मेकोपुकीमी परमप्रभु यावे आ लां आ पर्वम कुम्सो पामेक्ल। मारदे हना परमप्रभु यावे आ सक्ति थम ठेयब बाक्ब।  
 6 परमप्रभु यावे नेल्ल क्येडा ठेयब बाक्त हना यो, मेकोमी आइक्च मुर आन कली कोत्रब। तन्न ठेयब लेशशो मुर आन क्येडा डोन बाक्ब।  
 7 मिनु गो शुश श्येत जाता हना यो, गे आं कली प्रोंइनीनी। गे आं कली तशा आं जोरी सत्रु आन गाइश्शो रे प्रोंइनीनी। गे इन सक्तिमी आं कली प्रोंइनीनी।  
 8 परमप्रभु यावेमी आं पर्वम आ पचा माल्लो नेल्ल पाइब। परमप्रभु यावे इन दाक्तीके गेना हना यो लीब। इन सेल्लो मुर, आं कली मप्रोनीन।

## 139

परमप्रभुम मुर आन थुं तुइक्ब

कुम्सो पपाइक्ब कली दाऊद आ कुम्सो।

- 1 परमप्रभु यावे, गे आं कली नाक्शा तुइश्शो बाक्नीनी। भजन संग्रह ७:१०; येरमीया १७:१०  
 2 गे आं निश्शो बोक्शो तुइश्शो बाक्नीनी। आं मिम्शो नेल्ल तुइक्नीनी।  
 3 गे आं गाक्शो इप्शो थमा पा तुइक्नीनी। आं पशो नेल्ल गे तुइश्शो बाक्नीनी।  
 4 परमप्रभु यावे, गे आं ब्वाक्चा क्येडा डोंडती आं लोत्र नेल्ल तुइक्नीनी।  
 5 गे आं एर ओंथ नेल्ल बाक्शा, इन गुड आं तार वोइक्तीनी।  
 6 मेको तुइक्तीके आं कली थम ठेयब बाक्ब। मिनु गो मेको रुपे मचाप्नुड।  
 7 मिनु गो इन सोक्त क्येडा ते लशा खुइक्ने चाप्नुडा डा? गो इन डोंडती रे ते प्रोक्ने चाप्नुडा डा?  
 8 गो सरीड लती हना यो, गे मेके बाक्नीनी। गो बेक्शो मुर आन बाक्तीकेम आं बाक्तीक सेल्ला हना यो, गे मेके बाक्नीनी। आमोस ९:२  
 9 गो नां दाप्तीक सम्म बेरशा लती हना यो, शुश डोन समुन्द्र तार लती हना यो, योना १:३  
 10 गे मेकेर यो आं कली लां कोंइनीनी। मिनु गे इन सक्तिमी आं कली वारच पाइनीनी।  
 11 मिनु गो “छिडछिडम आं कली सुम्शा, आ एर ओंथ डा छेडछेड नेल्ल नाक्दो खोदेशो दुम्ल” देंती हना यो, अय्युब ३४:२२  
 12 छिडछिड इन कली छिडछिड मदुम्ब। नाक्दो नाक्त खोदेशो पा छेडछेड दुम्ब। मारदे हना छिडछिड इन कली छेडछेड खोदेशो बाक्ब।  
 13 मिनु गे आं आगा डा मारेड मारेड सेल्टीनी। गे आं कली आं ममा आ कोत्रजम सेल्टीनी।  
 14 गो इन कली ठेयब सेल्लुड। मारदे हना गे आं कली छक लाक्चा डा नु रिम्शो पा सेल्टीनी। इन गेय नेल्ल छक लाक्चा डा बाक्नीम। गे आं कली थमा पा तुइश्शो बाक्नीनी।  
 15 गो खुइश्शा जोल्ना जोल्न बाक्डानु, गे आं कली तशो बाक्तीनी। मेना गो रागी आगाम जोल्ना जोल्न बाक्शो नड।  
 16 गे आं मजोल्शो रां तशो बाक्तीनी। मिनु आं कली गेशो ब्रोंडतीक नाक्ती नेल्ले इन किताबम ब्रेक्शो बाक्तेक्म। मेको दुम्चा क्येडा डोंडतीन ब्रेक्शो बाक्त। भजन संग्रह ३१:१६  
 17 परमप्रभु, इन मिम्शो आं कली थम ठेयब बाक्ब। इन मिम्तीके शुश बाक्नीमी। भजन संग्रह ४०:६  
 18 गो मेको आन कली हिक्चा माल्लो नड हना, मेको बाल्वा क्येडा यो शुश दुम वा। गो सेंसीडानु, गो गे नु बाक्शो बाक्नुड। भजन संग्रह ६३:१७  
 19 परमप्रभु, गे इन अरेशो मटीब आन कली साइक्नी हना, रिम्शो दुम वा। हुश खाक्श पोक्ब आं क्येडा डोन लमल।

- 20 मेकोपुकीमी इन पर्वम मरिम्शो लोत्र पाइनीमी। मिनु ठेयब लेशशा, शुश मरिम्शो पाइब बाक्नीमी।  
 21 परमप्रभु यावे, इन कली काइ मदाक्ब आन कली गो यो काइ मदाक्नुडमी। मिनु गो इन कली मरिम्शो पचा कली बोक्ब आन कली तशा ग्रांग्रा दित्नुडमी।  
 22 गो मेको आन कली थमा पा काइ मदाक्नुडमी। मिनु गो मेको आन कली आं जोरी सत्रु मिम्नुडमी।  
 23 परमप्रभु, गे आं कली नाक्शा, आं थुं कोवयीनी। मिनु आं कली कोवशा आं मिम्शो तुइक्तीन।  
 24 गो आं थुंम इन अरेशो मटितीके बाक्म कौं? कोवडीन। मिनु गे आं कली गेना हना यो ब्रोंइशा बाक्तीक लांम खुल्यीनी।

## 140

ब्रोंइचा आ पर्वम पुंइशो

कुम्सो पपाइक्ब कली दाऊद आ कुम्सो।

- 1 परमप्रभु यावे, आं कली मरिम्शो पाइब आन गुइ रे प्रोंइयीनी। आं कली हुश खाक्श पोक्ब आन गुइ रे प्रोंइयीनी।  
 2 मेकोपुकीमी आन थुंमी मरिम्शो पतीक मिम्ना मिम्न बाक्नीम। मिनु जिचा पोक्नीम।  
 3 मेकोपुकी कोक्चा चिक्शो बुस्स खोदेशो बाक्नीम। मेको आन लोत्र बुस्स आन बीस खोदेशो बाक्ब। ठेयब सेंदा पा। रोमी ३:१३  
 4 परमप्रभु यावे, इन अरेशो मटीब नु हुश खाक्श पोक्ब मुर आं क्येडा डोन वोतीन। मेकोपुकीमी आं कली दाइल पपाइक्चा माल्नीम।  
 5 ठेयब लेशशो मुरपुकीमी खुइश्शा आं कली ब्वारद दाइक्ताक्म। डोरी के ब्वारद दाइक्ताक्म। मेकोपुकीमी आं लांमी ब्वारद दाइक्ताक्म। ठेयब सेंदा पा  
 6 मिनु गो परमप्रभु यावे कली “गे आं परमप्रभु बाक्नीनी। परमप्रभु यावे, गे आं पुंइशो लोत्र नेनीन। भजन संग्रह २२:११  
 7 परमप्रभु यावे, आं परमप्रभु, गे इन सक्तिमी आं कली प्रोंइनीनी। लडाइ दुम्मेनु, गे आं कली प्रोंइनीनी।  
 8 परमप्रभु यावे, इन अरेशो मटीब आन मिम्शो दला दाक्स दुम्चा मगेने। मो दुम्त हना, मेकोपुकी ठेयब लेत्नीम। ठेयब सेंदा पा।  
 9 मेको ठेयब लेशशोपुकी आं एर ओंथ बाक्शो बाक्नीम। मेको आन मरिम्शो पशो आंमा रमल। ठेयब सेंदा पा।  
 10 गे मेको आन तारी ब्रशो कोइला मोतीन। मेकोपुकी गेनायो यूने मचाप्चा पा खाल्टाम बिक्मल।  
 11 मुर आन पर्वम जोल पाइब रागीम मदुम्मल। हुश खाक्श पोक्बपुकी रीब पा खतम दुम्मल।  
 12 परमप्रभु यावे, श्येत जशो आन कली वारच पाइब नु पुडग आन कली ठीक निसाफ पाइब बाक्नीनी, दे तुइक्नुड।  
 13 ठीक पाइबपुकीमी, थमा पा इन नें ठेयब सेल्नीम। मिनु रिम्शो थुं पाइश्शो मुर इन डोंइती बाक्नीम” देंती।

## 141

“आं कली कोवयीनी” दे पुंइशो

दाऊद आ कुम्सो।

- 1 परमप्रभु यावे, गो इन कली पुंइनुड। मिनु गे रीब पा जाक्कीन। गो इन कली पुंइशा ब्रेडडानु, आं ब्रेशो नेनीन।  
 2 आं पुंइशो लोत्र इन डोंइती थूप खोदेशो दुम्ल। मिनु आं गुइ क्युक्शो नाक्दो डा चढ़ेशो खोदेशो दुम्ल। प्रस्थान ३०:७; प्रस्थान २९:३९  
 3 परमप्रभु यावे, आं शोत्रमी खाल पाइब का वोतीन। आं कली मरिम्शो लोत्र पचा मगेयीनी। भजन संग्रह ३९:२; याकूब ३:५-६  
 4 आं थुं कली मरिम्शो मिम्चा मगेने। मरिम्शो पाइब नु गारशा, इन मदाक्शो गेय पचा मगेने। मिनु गो मेको आन ब्रोंइशो जचा थोत्रक जचा मदाक्नुड।  
 5 ठीक पाइबमी आं कली तुप्यील। मेको आं शिशी बाक्ब। मेकोमी आं कली हुइक्तील। मेको आं पियाम लुक्शो तेल खोदेशो दुम्ब। तन्न इन अरेशो मटीब आन तेल आं पियाम मलुम्सेक्ल। मो हना यो गो मेको आन मरिम्शो पशो आ पर्वम पुंइना पुंइन बाक्नुड। लेवी १९:१७; हितोपदेस २७:५-६  
 6 मेको आन निसाफ पाइब रोंगु रे तोक्चा पुंइसामानु, मरिम्शो पाइबपुकीमी आं लोत्र “थमा बाक्त” दे रुप्नीम।  
 7 दोपा फुल्लु प्रोल्शा रू मेर फ्राइनीमी, मोपान मेको आन रुश बेक्शो मुर आन बाक्तीकेमी ब्रशो बाक्नीम।  
 8 तन्न परमप्रभु यावे, आं परमप्रभु, गो इन गे कोवनुड। गो गे नु फाम्सीनुड। गे आं कली बेक्चा मगेयीनी।  
 9 गे आं कली मेको आन दाइश्शो ब्वारद रे प्रोंइयीनी। आं कली मरिम्शो पाइब आन दाइश्शो ब्वारद रे प्रोंइयीनी।  
 10 इन अरेशो मटीब नेल्ले आम आन दाइश्शो ब्वारदम रेम्मल। गो चहिं मारेइ मदुम्थु लाक्नुड।

## 142

“श्येत जशोनु, वारच पाइय्यीनी”

शेंतीक कुम्सो। पुक्खीम बाक्शा, दाऊद आ सेल्शो कुम्सो। १सामुएल २४:४

- 1 गो परमप्रभु यावे कली वाइ ब्रेत्नुड। गो परमप्रभु यावे कली पुंइनुड।  
 2 आं लोत्र नेल्ल मेको आ डोंइती वोइक्नुड। गो मेको कली आं श्येत नेल्ल देंनुड।  
 3 आं थुं लुक्च लत हना, गो मार पचा माल्नुडा, गे मेको तुइक्नीनी। मुरपुकीमी आं गाक्तीक लांमी ब्वारद दाइक्ताक्म।



4 गो आं ग्युरा गे कोव्रता, मिनु आं कली मिम्ब सुइ मबाक्म। आं कली खुइक्तीके तेइ मबाक्ब। सुइमी आं कली वारच मपाइय्यीमी।

5 परमप्रभु यावे गो इन कली ब्रेत्ताकड। गो “गे आं खुइक्तीके बाक्नीनी। ब्रोंइशा बाक्ब आन रागीमी गे आं भाग बाक्नीनी” देती। भजन संग्रह २७:१३

6 आं पुंइशो लोव्र नेनीन। मारदे हना आ थुं शुश लुकच लत। आं कली खेदा पाइब रे प्रोंइयीनी। मारदे हना मेकोपुकी आं क्येडा बोल्यो बाक्नीम।

7 आं कली आं चोकसीतीके रे प्रोंइयीनी। मिनु गो इन कली “गे रिम्शो पाइब बाक्नीनी” देने चबुल। मिनु आं कली रिम्शो पशो तशा, ठीक पाइबपुकी आं एर ओथ बाक्शा ग्येरसीनीम।

## 143

श्येत जामेनु, पुंइशो

दाऊद आ कुम्सो।

1 परमप्रभु यावे, आं पुंइशो लोव्र नेनीन। “गो शिशी तडल” दे इन दाक्शा मप्रोंइतीकेमी आं पुंइशो लोव्र नेनीन। मिनु इन ठीक पतीकेमी आं लोव्र लेत्तीनी।

2 मिनु इन गेय पाइब कली निसाफ पा दोस मगेने। मारदे हना ब्रोंइशोपुकी इन डोंइती ठीक पाइब सुइ मबाक्नीम। भजन संग्रह १३०:३; अय्युब १:२; रोमी ३:२०

3 आं जोरी सत्रुमी आं कली खेदा पतीमी। आं कली खपीम खोल्या, साइक्चा चिकताक्यीमी। मेकोपुकीमी आं कली बेक्शो मुर आन बाक्तीकेम खोदेशो पा छिडछिडम बाक्पाइक्तीमी।

4 मोपतीके आं थुं लुकच लत। मिनु गो वाम ग्याम दुम्ती।

5 गो साइ डोंइती डा नाक्त मिम्नुड। मिनु इन गेय नेल्ल मिम्ना मिम्न बाक्नुड। इन गुडम पशो नेल्ल मिम्नुड। भजन संग्रह ७७:६

6 गो आं गुड इन गे दिनुड। मिनु कोक्त रूमी ब्वाक्कु माल्शो खोदेशो पा, आं थुंमी इन कली माल्ब। ठेयब सेंदा पा। भजन संग्रह ४२:२-३

7 परमप्रभु यावे, गे आं कली रीब पा लोव्र लेत्तीनी। आं थुं लुकच लशो बाक्ब। इन कुल आं क्येडा मखुइक्तीन। मो दुम्त हना, गो बेक्शो मुर आन बाक्तीक लाइब मुर खोदेशो दुम्नुड।

8 आं कली सुनी इन गेना हना यो दाक्तीके आ पबर्म नेपाइय्यीनी। मारदे हना गो इन कली थमा सुइक्नुड। गो तेको लां गाक्चा माल्नुडा, मेको आं कली शेंदीनी। गो इन लां कोव्रशा बाक्नुड।

9 परमप्रभु यावे, गे आं कली आं जोरी सत्रु रे प्रोंइयीनी। मारदे हना गो इन बाक्तीकेमी खुइक्थ जाक्नुड।

10 आं कली इन दाक्शो पचा कली शेंदीनी। मारदे हना गे आं परमप्रभु बाक्नीनी। इन रिम्शो सोक्तीम आं कली ठीक लांम गाक्पाइय्यीनी।

11 परमप्रभु यावे, इन नें आ पबर्म आं कली ब्रोंइचा गेयीनी। इन निसाफ पतीकेमी आं कली श्येत रे प्रोंइयीनी।

12 इन गेना हना यो दाक्तीकेमी आं जोरी सत्रु आन कली खतम पोक्कीन। मिनु आं जोरी सत्रु नेल्ल आन कली सतीन। मारदे हना गो इन गेय पाइब बाक्नुड।

## 144

ग्राचा कली पुंइशो लोव्र

दाऊद आ कुम्सो।

1 परमप्रभु यावे, आं सेरथे फुल्लु, ठेयब बाक्ब। मेकोमी आं कली लडाइ पचा शेंब।

2 गो आं कली दाक्ब, आं दरवार, आं खुइइशा ब्रोंइशा बाक्तीके, आं कली श्येत रे प्रोंइब नु आं तेक्तीक बाक्नीनी। गो इन बाक्तीकेमी खुइइशा बाक्नुड। गे आं कली मुर आन कली सासन पाइब सेल्नीनी। भजन संग्रह १८:३

3 परमप्रभु यावे, मुर आइक्च बाक्तेकम हना यो, गे मेको आन कली कोव्रनीनी। बेक्शा लाइब मुर मार नमी डा? तन्न गे मेको आन कली मिम्नीनी।

4 मुर कीशो सोक्त खोदेशो बाक्नीम। मेको आन ब्रोंइतीक नाक्ती जाम्शा लाइब वांकु खोदेशो बाक्नीम। अय्युब १४:२

5 परमप्रभु यावे, इन सरीड रे तोइइशा यिने। डांडा आन कली थिशा, कुन गूपतीन। भजन संग्रह १८:१०-१७

6 चिला दाप्पाइइशा, मेको एर ओथ ब्रपतीन। इन ब्रा आप्शा मेको आन कली खेदा पने।

7 इर रे इन गुड दिंदीन। मिनु आं कली बारशो खोला नु अर्को रागी डा मुर आन गुइ रे प्रोंइयीनी।

8 मेकोपुकीमी जोल नु मरिम्शो ला पाइनीम।

9 परमप्रभु, गो इन कली नक कुम्सो का पाइनुड। १० ओटा तार पाइइशो ताप्तीक ताप्शा, इन कली कुम्सो पाइनुड। भजन संग्रह ३३:३

10 गे पिप आन कली ग्रापाइक्नीनी। गे इन गेय पाइब दाऊद कली बेक्चा रे प्रोंइतीनी।

11 आं कली मुर साइक्ब तरवार रे प्रोंइयीनी। अर्को रागी डा मुर आन गुइ रे प्रोंइयीनी। मेकोपुकीमी जोल नु मरिम्शो ला पाइनीम।

12 मिनु आंइ तौपुकी कोल्मानु, रवा खोदेशो दुम्मल। आंइ तमीपुकी दरवारम बाक्शो मुशो थाम खोदेशो दुम्मल।

13 आंइ अन्न वोइक्तीके शुश खाल डा अन्नमी ब्रीमल। आंइ भेडा हजार हजार दुम्मल। आंइ भेडा आंइ रूम लाख लाख दुम्मल।

14 आंइ बीपुकी गिक्ब दुम्मल। आंइ गारो मब्रेल्ल। आंइ कली सुइमी ग्याइशशा मलदमेक्ल। मिनु आंइ लामी सुइ डाक्शो मनैसीब।

15 मोदेशो आसीक ताइब मुर ग्येरसीशो बाक्नीम। सु मुर आन परमप्रभु, परमप्रभु यावे बाक्बा, मेको ग्येरसीशो मुर बाक्नीम। ब्यवस्था ३३:२९

## 145

ठेयब सेल्लिक कुम्सो

परमप्रभु कली “ठेयब बाक्नीनी” देशो दाऊद आ कुम्सो।

- 1 आं परमप्रभु, गे आं पिप बाक्नीनी। गो इन कली मान पाइनुड। इन नें गेना हना यो ठेयब सेल्लुड।
- 2 गो इन कली नाक्त किंत किंत ठेयब सेल्लुड। गो इन नें गेना हना यो ठेयब सेल्लुड।
- 3 परमप्रभु यावे ठेयब बाक्ब। मेको ठेयब सेल्ला शिरशो बाक्ब। मिनु मेको आ ठेयब दुम्तीके सुइमी रुपने मचाप्नीम।
- 4 पाला का डा मुरुम आन नोले डा पाला डा मुर आन कली “इन गेय ठेयब बाक्नीम” दे शेंचा माल्नीम। मेकोपुकीमी इन सक्ति पाइशशो गेय आ परबम लोत्र पचा माल्नीम।
- 5 आं पिप, गो इन शुश दारस डा मान ततीके नु इन छक लाक्का डा गेय आ परबम मिम्ना मिम्न बाक्नुड। भजन संग्रह १९:२-७
- 6 मुरपुकीमी इन ठेयब सक्ति आ परबम लोत्र पचा माल्नीम। मिनु गो इन ठेयब दुम्तीके आ परबम शेनुइमी।
- 7 मेकोपुकीमी इन शुश रिम्शो पतीके आ परबम चाड मानेचा माल्नीम। मिनु इन ठीक पतीके आ परबम ठेयब सेंदा पा कुम्सो पचा माल्नीम।
- 8 परमप्रभु यावे दाक्ब नु शिशी पाइब बाक्ब। मेको रीब पा मगाइक्ब। मिनु मेको आ गेना हना यो दाक्तीके ठेयब बाक्ब। प्रस्थान ३४:६
- 9 परमप्रभु यावे नेल्ल आन कली रिम्शो पाइब बाक्ब। मिनु आ सेल्लो नेल्ल आन कली शिशी पाइब।
- 10 परमप्रभु यावे, इन सेल्लो मारेड मारेडमी इन कली “गे रिम्शो पाइब बाक्नीनी” देचा माल्नीम। मिनु इन कली थमा सुइक्बपुकीमी ठेयब सेल्ला माल्नीम।
- 11 मेकोपुकीमी इन राज्य डा रिम्शो दुम्तीके आ परबम लोत्र पचा माल्नीम। इन सक्ति आ परबम लोत्र पचा माल्नीम।
- 12 मेकोपुकीमी इन ठेयब सक्ति पाइशशो गेय नु इन राज्य डा दारस आ परबम मुर आन कली तुइक्पाइक्का माल्नीम।
- 13 इन राज्य गेना हना यो लीब राज्य बाक्ब। इन सासन पतीके पाला पाला सम्म बाक्ब। परमप्रभु यावेमी आ देशो नेल्ल पाइब। मिनु आ पशो मारेड मारेड शिशीम पाइब।
- 14 मिनु परमप्रभु यावेमी गोल्शो नेल्ल आन कली पोक्ब। मेकोमी आन थुं लुक्च लशो आन कली आन थुं बारपाइक्ब। भजन संग्रह १४६:८
- 15 मारेड मारेडमी इन गे कोव्रनीम। मारदे हना गे मेको आन कली आन जची ना जचा थोत्रक गेनीनी। भजन संग्रह १०४:२७-२८; भजन संग्रह १३६:२९
- 16 गे हाइशशो दुम्शा, ब्राइब नेल्ल कली रूपाइक्नीनी।
- 17 परमप्रभु यावे नेल्ल ठीक पाइब बाक्ब। मिनु आ गेय नेल्ले शिशीम पाइब।
- 18 परमप्रभु यावे आ कली पुंइब नेल्ल आन नेक्था बाक्ब। सु सुमी मेको कली थमा पा पुंइनीमी, मेको आन नेक्था बाक्ब।
- 19 मेकोमी आ कली मान पा हिंब नेल्ल आन दाक्शो गेब। मेकोमी मेको आन पुंइशो नेंब। मिनु मेको आन कली श्येत रे प्रॉइब। हितोपदेस १०:२४
- 20 परमप्रभु यावेम आ कली दाक्ब नेल्ल आन कली कोव्रब। तन्न मेकोमी आ अरेशो मटीब नेल्ल आन कली खतम पोक्ब।
- 21 गो परमप्रभु यावे कली ठेयब सेल्ला, लोत्र पाइनुड। सोक्त पाइशशो नेल्लेमी मेको कली गेना हना यो ठेयब सेल्लनीम।

## 146

मचाप्ब कली वारच पाइशशो

- 1 परमप्रभु यावे कली ठेयब सेलो। आं थुं, परमप्रभु यावे कली ठेयब सेलो।
- 2 गो ब्राइडा सम्म परमप्रभु यावे कली ठेयब सेल्लुड। गो मबेक्का सम्म आं परमप्रभु कली कुम्सो पा ठेयब सेल्लुड।
- 3 गे रागी डा सासन पाइब मुर आन कली थमा मसुतीन। मारदे हना मेकोपुकीमी अरु आन कली वारच पने मचाप्नीम। भजन संग्रह ११८:८-९; येरमीया १७:५
- 4 मेको आन सोक्त लाइब। मिनु मेकोपुकी खप दुम्नीम। मेना मेको आन मिम्शा पशो नेल्ल जाम्शा लाइब। उत्पती ३:१९; उपदेसक ३:२०
- 5 याक्ब आ परमप्रभु वारच पाइक्का पुंइसीब मुर, ग्येरसीशो बाक्नीम। मेकोपुकीमी परमप्रभु यावे, आन परमप्रभु आ लां कोव्रशो बाक्नीम। येरमीया १७:१७
- 6 मेको सरीड नु रागी समुन्द्र नु मेकेर बाक्ब आन कली सेल्ल बाक्ब। मेकोमी आ देशो गेना हना यो पाइब।
- 7 मेकोमी दिप्चा पुंइसीब आन कली ठीक निसाफ पाइब। शोत्रलु बेक्शो आन कली जचा गेब। परमप्रभु यावेमी चोक्चा पुंइसीशो आन कली प्रॉइब।

8 परमप्रभु यावेमी मिक्च मताइब आन कली ताइब सेल्व। मिनु आन थुं लुकच लशो मुर आन कली आन थुं बारपाइक्व। परमप्रभु यावेमी ठीक पाइब आन कली दाक्व। भजन संग्रह १४५:१४

9 मिनु परमप्रभु यावेमी अर्को रागी डा मुर आन कली कोव्रब। मेकोमी वोंडश बेक्शो मीश मुर नु रोम रोइक्च आन कली यो कोव्रब। तन्न आ अरेशो मटीब आन मिम्शो दुम्चा मगेब। प्रस्थान २२:२०-२१

10 परमप्रभु यावेमी गेना हना यो सासन पाइब। सियोन, इ परमप्रभुमी पाला पाला सम्म सासन पाइब। परमप्रभु यावे कली ठेयब सेलीन। भजन संग्रह ९३:१

## 147

परमप्रभु कली ठेयब सेल्लो

1 परमप्रभु यावे कली ठेयब सेलीन। मारदे हना आंड परमप्रभु कली ठेयब सेल्लिक कुम्सो पचा रिम्शो नु शिरशो बाक्व। भजन संग्रह ९२:२

2 परमप्रभु यावेमी यरूसलेम कली सेल्व। मेकोमी इस्राएल रे खेरशो ब्रशा बाक्शो मुर आन कली खुप्च।

3 मेकोमी थुं जिक्शो आन कली सापाइक्व। मिनु मेको आन कली वाम फ्रेंब। यसेया ६१:१

4 मेकोमी सोरुल आन कली हिक्शा, का का पा आन नें वोंडक्व। यसेया ४०:२६

5 आंड परमप्रभु ठेयब बाक्व। मेको आ सक्ति नेल्ल क्येडा ठेयब बाक्व। आ रुप्तीक सक्ति सुइम तुइक्ने मचाप्नीम। लूका १:५२

6 परमप्रभु यावेम श्येत जाइब आन कली कोव्रब। तन्न आ अरेशो मटीब आन कली खपीम ताइक्व।

7 गे परमप्रभु यावे कली ठेयब सेल्लिक कुम्सो पने। तार पाइशो ताप्तीके ताप्शा आंड परमप्रभु कली कुम्सो पा ठेयब सेलीन।

8 मेकोमी सरीड कली गोस्सुम सुम्पाइक्व। रागी कली रेउ यिपाइक्व। मिनु डांडाम घांस वापाइक्व।

9 मेकोमी जन्तु नु बी ब्यफ आन कली थुल्व। खद आन चाइक्व आन कली यो जचा गेब। अय्युब ३८:४१

10 मेको शारा आन सक्ति तशा मग्येरसीब। मुर आन रीब पा दोरशो मारेड ममिम्ब।

11 तन्न परमप्रभु यावेमी आ कली मान पा हिंब नु आ गेना हना यो दाक्तीके कली रिम्ब आन कली दाक्व।

12 यरूसलेम, परमप्रभु यावे कली ठेयब सेलो। सियोन, इ परमप्रभु कली ठेयब सेलो।

13 मारदे हना मेकोमी इ सहर डा लाचोपुकी बोल्यो सेल्लो बाक्व। मिनु इ आगाम बाक्व आल आन कली आसीक गेब।

14 मेकोमी इ सांदमी लडाइ मटुम्पाइक्व। मेकोमी इ कली रिम्शो चेरबीम रूपाइक्व।

15 मेकोमी आ शेंतीके रागीम सोइक्व। मेको आ लोव्र रीब पा तेड ते ब्राइब। अय्युब ३८:२२-३०

16 मेकोमी ऊन खोदेशो पा फुं यिपाइक्व। मिनु पुलु खोदेशो पा फुरश यिपाइक्व।

17 मेकोमी फुल्लु खोदेशो पा मुप्स यिपाइक्व। मेको आ काइशो फशेमी सु राप्ने चाप्बा डा?

18 मेकोमी लोव्र पा फुरश यपाइक्व। मेकोमी फश यपाइक्व। मिनु ब्वाक्कु शाइक्पाइक्व।

19 मेकोमी आ लोव्र याक्व कली शेंब। मिनु इस्राएल कली आ फुल्लुम मुशा ब्रेक्शो लोव्र नु आ पतीक लोव्र शेंब।

ब्यवस्था ४:८; प्रेरित १४:१६; रोमी ३:२

20 मेकोमी अर्को रागी डा सुइ मुर आन पर्वम मोदेशो मपावो। मिनु मेकोपुकीमी आ पतीक लोव्र मटुइक्नीम। परमप्रभु यावे कली ठेयब सेलीन।

## 148

परमप्रभु कली ठेयब सेल्लो

1 परमप्रभु यावे कली ठेयब सेलीन। परमप्रभु यावे कली सरीड रे ठेयब सेलीन। इर रे मेको कली ठेयब सेलीन। भजन संग्रह १०३:२०-२२

2 आ स्वर्ग डा गेय पाइबपुकी, मेको कली ठेयब सेलीन। आ स्वर्गम बाक्व नेल्लेमी मेको कली ठेयब सेलीन।

3 नां नु तास्ला मेको कली ठेयब सेलीस। छेडछेड पाइशो सोरुल नेल्लेमी मेको कली ठेयब सेलीन। उत्पत्ती १:१-२७

4 नेल्ल क्येडा इर सरीड नु मेको आ तार बाक्व ब्वाक्कु नेल्लेमी मेको कली ठेयब सेलीन।

5 मेकोपुकीमी परमप्रभु यावे कली ठेयब सेल्लेक्व। मारदे हना मेकोमी लोव्र पवानु, मेको दुम्तेक्म। भजन संग्रह ३३:९

6 मेकोमी मेको आन कली गेना हना यो बाक्मल, दे वोंडक्व। मिनु मेकोमी मेको आन कली अरेवानु, आन बाक्तीकेम बाक्शा टिम्तेक्म।

7 रागी रे पा ब्वाक्कुम बाक्व ठेयब जन्तु नु शुश लुकच लशो ब्वाक्कु, परमप्रभु यावे कली ठेयब सेलीन।

8 मी नु मुप्स, फुं नु फुरश नु फश गिवारमी आ देशो टीनीम।

9 पहाड नु डांडा, फल फुल सिम्ब रवा नु लाइशो रवा नेल्ले,

10 ब्वाक्की डा जन्तु नु बी ब्यफ नेल्ले, आइक्च खपीम ग्रेशा गाक्व जन्तु नु बेरब चिक्व नेल्ले

11 रागी डा पिपपुकी नु जात जात डा मुर नेल्ले, रागी डा सासन नु हुकुम पाइब नेल्ले,

12 वोंडश आल नु मीश आल, खाल्पा खाल्पी नु आल नेल्लेमी परमप्रभु यावे कली ठेयब सेलीन।

13 मेको नेल्लेमी परमप्रभु यावे आ नें ठेयब सेल्लेक्व। मारदे हना मेको आ नें ला ठेयब बाक्व। मेको आ मान ततीक डा छेडछेड रागी नु सरीड तार बाक्व।

14 मेकोमी आ मुर आन कली सक्ति पाइशशो नु ठेयब सेल्लु। आ कली थमा सुइक्ब नेल्ले नु आ नेक्था बाक्ब इस्त्राएलीपुकीमी परमप्रभु यावे कली ठेयब सेलीन। ब्यवस्था ४:७-८

## 149

परमप्रभु कली ठेयब सेल्लो

- 1 परमप्रभु यावे कली ठेयब सेलीन। परमप्रभु यावे कली नक कुम्सो का पने। थमा सुइक्ब आन गुम्तीकेमी मेको कली ठेयब सेलीन। भजन संग्रह ३३:३
- 2 इस्त्राएल आ कली सेल्लब आ पर्वम ग्येरसेक्ल। सियोन डा मुर आन पिप आ पर्वम ग्येरसमल। भजन संग्रह १००:३; भजन संग्रह ९३:१
- 3 मेकोपुकीमी सिल पना पन मेको आ नें ठेयब सेल्लेक्ल। खैजडी नु बीना ताप्शा, मेको कली कुम्सो पामेक्ल।
- 4 मारदे हना परमप्रभु यावे आ मुर आन पर्वम ग्येरसीशो बाक्ब। आइक्च मुर आन कली ग्रातीकेमी ग्योम्ब।
- 5 थमा सुइक्बपुकी शुश ग्येरसमल। मिनु आन ब्राख्येमी यो ग्येरशा कुम्सो पामेक्ल।
- 6 मेकोपुकीमी परमप्रभु कली ठेयब सेल्लेक्ल कुम्सो पामेक्ल। मेको आन गुडमी निम्फा गे क्योरतीक पाइशशो तरवार बाक्ल।
- 7 मेकोपुकीमी रागी रागी डा मुर आन कली सजाइ गेशा, क्येक्क लेत्नीम।
- 8 मिनु मेको आन पिप आन कली साडलो नु मेको आन ठेयब मुर आन कली फलाम के फ्रेंतीकेम फ्रेंने चाप्नीम।
- 9 मिनु मेकोपुकीमी ब्रेक्शा अरेशो कोव्रशा, मेको आन कली निसाफ पाइनीम। मेको परमप्रभु आ मुर आन रिम्शो बाक्ब। परमप्रभु यावे कली ठेयब सेलीन। यसैया ३४:-; यसैया ६३:४-६; योएल ४:२-२४

## 150

परमप्रभु कली ठेयब सेल्लो

- 1 परमप्रभु यावे कली ठेयब सेलीन। परमप्रभु कली आ बाक्तीकेमी ठेयब सेलीन। परमप्रभु यावे कली आ सरीड डा ठेयब बाक्तीकेमी ठेयब सेलीन।
- 2 मेको कली आ सक्ति पाइशशो गेय आ पर्वम ठेयब सेलीन। मेको कली आ नेल्ल क्येडा ठेयब दुम्तीके आ पर्वम ठेयब सेलीन।
- 3 तुराही ताप्शा, मेको कली ठेयब सेलीन। तार पाइशशो ताप्तीक नु ठेयब ताप्तीक ताप्शा, मेको कली ठेयब सेलीन।
- 4 खैजडी ताप्शा, सिल पा मेको कली ठेयब सेलीन। तार पाइशशो ताप्तीक नु बांसुरी ताप्शा, मेको कली ठेयब सेलीन।
- 5 आइक्च बुप्केल ताप्शा, मेको कली ठेयब सेलीन। ठेयब सेंदा पा मुरब बुप्केल ताप्शा, मेको कली ठेयब सेलीन।
- 6 सोक्त पाइशशो नेल्लेमी परमप्रभु यावे कली ठेयब सेलीन। परमप्रभु यावे कली ठेयब सेलीन। भजन संग्रह ४१:१४; प्रकाश ५:१३

## हितोपदेश

**ब्रेक्ब मुर:** सोलोमनमी मुर आन देशो लोत्र खुप्शा नु आं थुं डा तुडक्तीक लोत्र एको किताबम ब्रेक्शो बाक्ब। गेना ब्रेक्शो: एको किताब सोलोमोन आ सासन पची ना १६५-१२६ बि. सी.म ब्रेक्शो बाक्ब।

**गेना ब्रेक्शो:** एको किताब सोलोमोन आ सासन पची ना १६५-१२६ बि. सी. ब्रेक्शो बाक्ब।

**मार ब्रेक्शो:**

१. सोलोमनम “जोक्ब तुडक्ब थुं मालीन” हितोपदेश १:- ९:-
२. सोलोमोनम “हेंथे मगाक्कीन” हितोपदेश १०:-२४:३४
३. अरु जोक्ब तुडक्बम ब्रेक्शो रिम्शो पतीक लोत्र हितोपदेश २२:१७-२४:३४
४. सोलोमनम “मुर आन दातेमी रिम्शो बाक्कीन” हितोपदेश २५:-२९:-
५. आगुर नु लेमुएलम “खिं डा मुर ग्येरसीशो दुम्चा माल्नीम” दे ब्रेक्शो बाक्ब। हितोपदेश ३०:-३१:-  
हितोपदेश किताब डा शेंसीचा माल्शो लोत्र: परमप्रभु यावे कली मान पा हिंब मुर जोक्ब तुडक्ब दुम्शा, रिम्शो दुम्नीम।

एको किताब आ शेंशो लोत्र

- 1 एको दाऊद आ तौ इसाएली आन पिप सोलोमोन आ देशो लोत्र बाक्ब। १राजा ५:९-१२
- 2 एको किताबम तुडक्तीके नु अर्ती टिचा आ परबम शेंसीतीके लोत्र बाक्ब। मेको शेंसाक्नी हना, गे रुप्ब नु जोक्ब तुडक्ब दुम्नीनी।
- 3 मिनु ब्रेक्ब मुर आ अर्ती सुमी टीबा, मेकोमी तुडश्शा गेय पने चाप्ब। ठीक पतीके, ठीक निसाफ पतीके नु कुल मकोव्रथु रिम्शो पने चाप्ब।
- 4 मारेड मजोक्ब आन कली निप्स खाप्शा गेय पचा शेंब। टिटा आन कली जोक्ब नु होस पाइब सेल्ब।
- 5 जोक्ब तुडक्ब नेल्लेमी एको लोत्र रिम्शो पा नेबमी तेम्शा शुश रुप्ब दुम्नीम। निप्स पाइश्शो मुर जोक्ब दुम्शा,
- 6 एको दैतीक लोत्र, कथा, जोक्ब तुडक्ब आन लोत्र नु खुडश्शो लोत्र रुप्नीम।
- 7 परमप्रभु यावे कली मान पा हिंचा तुडक्तीक दुम्चा कली गोतीक बाक्ब। मूर्खपुकीमी तुडक्तीके नु अर्ती मदाक्नीम।  
हितोपदेश ८:१३; हितोपदेश ९:१०; अय्युब २८:२८; भजन संग्रह १११:१०

मरिम्शो पाइब नु मगाक्को

- 8 आं तौ, इ आफ आ अर्ती नेनो। इम्मा आ शेंशो मप्रोनो। हितोपदेश ६:२०; ब्यवस्था २१:१८-२१
- 9 मारदे हना मेको इ पिया डा ग्योम्तीके नु इ कली सुन के माला नस।
- 10 आं तौ, मरिम्शो पाइब मुरुम इ कली “हेंथे पय” दे लोत्र पाप्तेक्म हना, मेको आन लोत्र मबिस्सो। हितोपदेश १६:२९;  
ब्यवस्था १३:७-९
- 11 मेकोपुकीमी “पिवो, मुर साइक्चा कली बाप्शा बाक्ब। रिम्शो पाइब कली बाप्शा,
- 12 मेको कली बेक्शो मुर आन बाक्तीकेम सोइक्तय। गो मेको कली सेसीन तुरसुम सोइक्तय।
- 13 मिनु गोपुकीमी आ बाक्शो शोप नेल्ल रोइक्नय। मेको रोइश्शोमी आंम आंम खिं प्रिनय।
- 14 गे, गोपुकी नु लते हना, नेल्ल गारशा योक्सय” दैतेक्म हना यो,
- 15 आं तौ, गे मेकोपुकी नु मलावो। मेकोपुकी नु मगाक्को।
- 16 मारदे हना मेकोपुकी मरिम्शो गेय पचा कली रीब पा दोरनीम। हुश खाक्श पोक्चा कली चुइक्नीम।
- 17 चिक्बीमी तचा डा पा ब्वारद दाइश्शो शोर गाक्शो गेय बाक्ब।
- 18 मेको मुरपुकी साइक्चा पुंडसीचा कली बाप्शो बाक्नीम। आंमान खतम दुम्चा कली बाप्शा बाक्नीम।
- 19 मुर आन मार मार रोइश्शा, तेल्लीबपुकी मोदेंशो पा साइक्चा पुंडसीनीम।

तुडक्तीकेमी मुर आन कली अरेब

- 20 लां मेर तुडक्तीके लोत्र नेंसीब। सहर मेर आ सेंदा गूब। हितोपदेश ८:१-३
- 21 मेको शुश मुर आन देलतीके मेर ब्रेन्ना ब्रेन्न बाक्ब। सहर ओव्रतीक ठेयब लाप्चोमी आ लोत्र पाइब।
- 22 मार लोत्र पाइब देश हना “गे मारेड मजोक्बपुकी, गेना सम्म मारेड मजोक्ब दुम्चा दाक्नीनी? गे शुक्शी पाइबपुकी,  
गेना सम्म शुक्शी पचा दाक्नीनी? गे मूर्खपुकी, गेना सम्म तुडक्तीके कली काइ मदाक्नीनी?
- 23 गे आं हुडश्शो लोत्र नेनीन। आं मिम्शो इन कली देंनुड। आं लोत्र इन कली तुडक्पाइक्नुड।
- 24 मिनु गो इन कली ब्रेत्तनु, गेपुकीम मनेंनी। गो आं गुड हामुनु, सुइ मपिनी। यसैया ६५:२,१२
- 25 आं अर्ती नेल्ल मटितीके, आं हुडश्शो नेंचा मदाक्तीके,
- 26 गो यो गे श्येत जनी ना, रिश्शा बाक्नुड। मिनु गे शुश हिंनीना, गो शुक्शी पाइनुड” दे लोत्र पाइब। ब्यवस्था २८:६३
- 27 शुश हिंतीके ठेयब फश खोदेशो पा इन तारी जाक्त हना, श्येत फश गिवार खोदेशो पा इन तार जाक्त हना, श्येत नु  
हिंतीकेम इन कली सुम्तु हना,
- 28 मेना आं कली थोनीनु, गो इन कली लोत्र मलेत्नुड। गेपुकीमी आं कली शुश माल्तीनी हना यो, मथित्नीनी। यसैया  
५९:२; मीका ३:४
- 29 मेकोपुकीम जोक्तीक कली काइ मदाक्तीके नु परमप्रभु यावे कली मान मपथु महितीके,

- 30 आं अर्ती मनैतीके, आं हुइशो नेंचा मदाक्तीके,
- 31 मेकोपुकीमी आन आन पशो मरिम्शो गेय आन इनाम तचा माल्नीम। मिनु आन आन मरिम्शो पतीकेमी ब्रीमल।
- 32 मारदे हना मारेड मजोक्ब आन मटितीके साइक्चा पुंडसीनीम। मूर्ख आन मारेड ममिम्तीके खतम दुम्नीम।
- 33 तन्न सु सुम आं लोव नैनीमी, मेकोपुकी श्येत मजाइनीमी। महिंथु, रिम्शो दुम्शा बाक्नीमी।

## 2

तुइक्तीकेमी बेक्तीक रे प्रोंडब

- 1 आं तौ, गे आं लोव नैनी, आं शेंशो इ थुंम वोइक्तीवी हना,
- 2 गे इ नोफा दाइशशा, तुइक्तीक लोव नैतीवी नु रुप्तीके दाक्तीवी हना,
- 3 गे जोक्तीके तुइक्तीक माल्शा, रुप्तीके कली टेयब सेंदा पा पुंडतीवी हना, याकूब १:५
- 4 गे मेको कली चांदी खोदेशो पा माल्तीवी नु थिम्शा वोइशशो शोंप माल्शो खोदेशो पा दोप्तीवी हना,
- 5 गे परमप्रभु यावे कली दोपा मान पा हिंचा माल्बा, मेको तुइक्ने चाप्नेवे। मिनु गे परमप्रभु कली तुइशशा शेंसीने चाप्नेवे।
- 6 मारदे हना परमप्रभु यावे तुइक्तीक थुं गेब बाक्ब। आ शोव रे जोक्तीक नु रुप्तीक लोव गूब। दानीएल २:२०-२३
- 7 मेकोमी रिम्शो थुं पाइशशो मुर आन कली तुइक्तीक थुं गेब। मेको दोस मताइब आन कली तेक्तीके बाक्ब। भजन संग्रह ७:११
- 8 परमप्रभु यावेमी ठीक निसाफ बाक्बा देय मबाक्बा मेको कोव्रब। आ लां गाक्ब आ मुर आन कली कोव्रब।
- 9 मिनु गे ठीक पतीके नु ठीक निसाफ, कुल मकोव्रथु रिम्शो पतीके नु रिम्शो लां मार बाक्मे रुप्नेवे।
- 10 मेना तुइक्तीके इ थुंमी ओव्रब नु इ जोक्तीकेमी इ थुं कली ग्येरपाइक्ब। १कोरिन्थी १:३०
- 11 मिनु होस पतीकेमी इ कली खाल पाइब। रुप्तीकेमी इ कली कोव्रब।
- 12 मेकोमी इ कली मरिम्शो लां नु दूली लोव पाइब मुर रे प्रोंडब।
- 13 मेकोपुकी रिम्शो थुं पाइशशो मुर आन लांम गाक्चा प्रोंडशा, छिडछिड डा लांम गाक्नीमी,
- 14 मेकोपुकी थम मरिम्शो पचा कली ग्येरसीनीम। शुश दूली नु मरिम्शो पतीकेमी ग्येरसीनीम।
- 15 मेको आन पतीक काइ मरिम्शो बाक्ब। हेंथे लां गाक्ब बाक्नीम।
- 16 होस पतीके नु रुप्तीकेमी इ कली हेंथे पाइब मीश मुर नु आ वाल्चा डा लोव रे यो प्रोंडब।
- 17 मेकोमी आ ग्युंवे पशो वोंडश कली प्रोंडशा, परमप्रभु यावे आ डोंइती पशो कबल प्रेंताक्ब।
- 18 मेको आ खिं ओव्रब नेल्ल बेक्तीक लां लाइनीम। मेको आ खिं डा लां बेक्शो मुर आन बाक्तीक लतीक लां बाक्ब।
- 19 मोदेशो मीश मुर आ बाक्तीक लाइबपुकी गेनायो लेन्ने मचाप्नीम। मिनु ब्रोंइतीक लां यो मताइनीम।
- 20 मोपतीके रिम्शो मुर आन लां गाक्को। ठीक पाइब आन लां गाक्को।
- 21 मारदे हना रिम्शो थुं पाइशशो मुर रागीम बाक्चा ताइनीम। दोस मताइबपुकी रागीम लीनीम। भजन संग्रह ३७:९; मती ५:५
- 22 तन्न परमप्रभु यावे आ अरेशो मटीबपुकी आन शाक्श रेन रागी रे तुल्चा पुंडसीनीम। थमा मसुइक्बपुकी सुवा खोदेशो पा ताइक्चा पुंडसीनीम। भजन संग्रह ३७:१०

## 3

थमा सुइक्बमी आसीक ताइनीम

- 1 आं तौ, आं अरेशो मप्रेंदो। मिनु आं शेंशो लोव इ थुंमी वोतो। लेवी १८:५
- 2 मारदे हना मेकोमी इ कली शुश बर्स ब्रोंइतीक नु थम रिम्शो बाक्चा गेनीस।
- 3 गेना हना यो दाक्शा गेनायो मप्रोंडथु, बाक्को। मेको निक्शी कली माला खोदेशो पा रेल्ला, इ थुंम ब्रेक्शो खोदेशो पा वोतो। ब्यवस्था ६:८; येरमीया ३१:३३
- 4 मो पाप्तीवी हना, गे परमप्रभु आ आसीक ताइनेवे। मुर नेल्लेमी इ कली रिम्शो देंनीम।
- 5 गे इ थुं नेल्लेमी परमप्रभु यावे आ देशो मिम्शा, थमा सुतो। इ आंम जोक्शो तुइशशो थमा मसुतो।
- 6 इ पतीक नेल्लेमी “परमप्रभु यावेमी मार दाक्बा” दे मिम्तो। मो पाप्तीवी हना, परमप्रभु यावेमी इ कली ठीक लां कोंडब।
- 7 गे “गो जोक्ब तुइक्ब मुर नड” दे ममिम्तो। तन्न परमप्रभु यावे कली मान पा हिनो। मरिम्शो पतीके रे डोन बाक्को। यसैया ५:२१
- 8 मो पाप्तीवी हना, मेको इ रां कली सापाइक्तीके बाक्ब। मिनु इ गुइ खोइल बोल्यो दुम्नीम।
- 9 इ शोंपोमी परमप्रभु यावे कली मान पावो। मिनु इ बाली नाली रे नेल्ल क्येडा डोंइती सिशशोमी आ नें टेयब सेलो। प्रस्थान २३:१९
- 10 मो पाप्तीवी हना, इ कोटो भकारी अन्नमी शुश ब्रीशो बाक्नीम। इ अडगुर खाक्तीके अडगुर रसम ब्रीशो बाक्नीम।
- 11 आं तौ, परमप्रभु यावेमी इ कली देशो रिम्शो पावो। आ हुइशो नेंचा, मरिम्शो मसुतो। हिब्रू १२:५-६; अय्युब ५:१७-१९
- 12 मारदे हना परमप्रभु यावेमी आ दाक्शो मुर आन कली ला हुइक्ब। मेकोमी रिम्शो आफोमी आ दाक्शो तौ कली खोदेशो पा सजाइ गेब। १कोरिन्थी ११:३२; प्रकाश ३:१९

तुइक्तीकेमी मुर कली रिम्शो सेल्ब

- 13 तुडक्तीके ताडब नु रुप्बपुकी ग्येरसीशो मुर बाक्नीम।  
 14 मारदे हना तुडक्तीके चेम्शो चांदी क्येडा शुश रिम्शो बाक्ब। मिनु आ चेम्शो सुन क्येडा यो शुश क्येट लाडब बाक्ब।  
 हितोपदेश ८:१०  
 15 तुडक्तीके हीरा क्येडा शुश क्येट लाडब बाक्ब। इ माल्शो मारेड मारेड नेल्ल मेको क्येडा आडक्च बाक्नीम।  
 16 मेको आ ग्युरा गुडमी शुश ब्रोंडतीक नाक्त बाक्नीम। आ पेरा गुडमी शोंप नु मान ततीके बाक्ब।  
 17 मेको आ लां रिम्शो नु थुं नाडक्तीके बाक्नीम।  
 18 मेको नु बाक्बपुकी शुश नाक्त ब्रोंडनीम। मेको कली मुप्शा बाक्ब आन पर्बम मुरपुकीमी “मेकोपुकी ग्येरसीशो मुर बाक्नीम” देनीम। हितोपदेश ११:३०; हितोपदेश १३:१२; हितोपदेश १५:४  
 19 परमप्रभु यावेमी आ तुडक्तीकेमी रागी सेल्लु। आ रुप्तीकेमी सरीड वोडक्तु। हितोपदेश ८:२२-३१  
 20 आ जोक्तीकेमी ब्वाक्कु बुक्पाडक्तु। मिनु गोस्स रे फुरश यिपाडक्तु।  
 21 आं तौ, आं देशो गेय पचा क्येडा डोंडती मिम्शा, गेनायो मप्रोनो। ठीक तुडक्तीके नु होस पतीके गे नु बाक्ल।  
 22 मारदे हना मेको इ ब्रोंडतीक नु इ दारस बाक्नीस।  
 23 मिनु गे इ लांम रिम्शो पा गाक्डे नु इ खोडल दाडल मपाडब।  
 24 गे निस्सेनु, हिंचा ममाल्नेवे। इमेनु ब्रोंडशो निन्द्रा पाडनेवे। भजन संग्रह ३:६  
 25 शुश हिंचा डा डुम्मेनु, महिनो। फश पवानु, परमप्रभु यावे आ अरेशो मटीबपुकी खतम दुम्मानु, गे महिनो।  
 26 मारदे हना परमप्रभु यावे गे नु बाक्ब, मेकोमी इ खोडल कली रेततीक रे प्रोडब। हितोपदेश १०:२९

मुर आन कली चारच पावो देशो

- 27 मिनु मुर आन कली गेचा डा गेवो। इ गुडमी बाक्त हना, शिम मदुमो।  
 28 गे नु बाक्त हना “दीसा जाक्को। मिनु गेनन” दे इ नेक्था डा मुर आन कली मदेनो।  
 29 इ नेक्था बाक्ब कली मरिम्शो पचा ममिम्तो। मारदे हना इ कली थमा सुडशशा, इ नेक्था बाक्ब।  
 30 इ कली मारेड मरिम्शो मपथु जिचा मपोक्को।  
 31 रोडक्ब मुर आ मारेड मारेड तशा, मवलो। मेको आ लांम काड मगाक्को।  
 32 मरिम्शो दूली पाडब तशा, परमप्रभु यावे ग्राना दीब। रिम्शो थुं पाइशशोपुकी चहिं मेको नु बाक्चा ताडनीम। भजन संग्रह २५:१४  
 33 परमप्रभु यावेमी आ अरेशो मटीब आन खिं डा मुर आ सराप राडब। तन्न ठीक पाडब आन खिंम आसीक राडब।  
 34 मिनु परमप्रभु यावेमी ठेयब लेशशो शुक्शी पाडब मुर आन कली शुक्शी पाडब। ब्रेम्शो थुं पाइशशो आन कली चहिं शिशी पाडब। १ पट्टुस ५:५  
 35 तुडक्ब मुरपुकी मान पाडक्चा पुंडसीनीम। तन्न मटीब मूर्खपुकी मुने दोक्नीम।

## 4

तुडक्तीक थुं रिम्शो बाक्ब

- 1 आं तौपुकी, आं अर्ती नेनीन। गे जोक्ब तुडक्ब दुम्चा कली इन नोफा दाडशशा नेनीन।  
 2 गो इन कली रिम्शो पा अरेनुड। आं शेंशो लोत्र मप्रोनीन।  
 3 गो यो आं आफ नु बाक्शो बाक्ती। गो आं ममा आ दाक्शो तौ बाक्ती।  
 4 मिनु आं आफोमी आं कली “आं लोत्र इ थुंमी वोतो। मिनु आं शेंशो टिशा ब्रोनो। लेवी १८:५  
 5 तुडक्तीके मालो नु जोक्ब तुडक्ब दुमो। आं देशो लोत्र मप्रोनो।  
 6 मेको कली मप्रोंडतीवी हना, इ कली कोत्रब। मेको कली दाक्ताक्वी हना, इ कली खाल पाडब।  
 7 तुडक्तीके आ गोतीक मार बाक्त देशा हना, तुडक्तीके शुश माल्चा माल्नेवे। मार ताप्तीवी हना यो, नेल्ल क्येडा ठेयब जोक्ब तुडक्ब दुमो।  
 8 मेको कली ठेयब सेल्लतीवी हना, इ कली ठेयब सेल्लब। गे मेको कली मुप्तीवी हना, इ कली मान ततीक गेब।  
 9 मेकोमी इ पिया दारशो पा ग्योम्पाडक्ब। इ पिया तारी रिम्शो सिरपेच गुक्ब” दे शेंताक्वी।

तुडक्तीकेमी ब्रोंडचा गेब

- 10 आं तौ, इ नोफा दाडशशा, आं लोत्र नेशा, ब्रावो। मो पाप्तीवी हना, गे शुश ब्रोंडनेवे। हितोपदेश ३:२  
 11 गो इ कली तुडक्तीक लां शेंताक्न। गो इ कली रिम्शो थुं डा मुर आन लांम गाक्पाडक्तन।  
 12 गे गाक्डेनु, इ कली सुडम मतेक्नीम। मिनु दोरते हना, दाडल मपांडसीनेवे।  
 13 अर्ती कली मिम्शा, मेको कली मप्रेंदो। मेको कली टिवो। मारदे हना मेको इ ब्रोंडतीक बाक्ब।  
 14 परमप्रभु यावे आ अरेशो मटीब नु मगाक्को। मरिम्शो पाडब आन लां मगाक्को भजन संग्रह १:१  
 15 मेकोपुकी नु मगाक्को। आन लां मलावो। आन लां हेरशा लावो।  
 16 मारदे हना मेकोपुकी मरिम्शो मपामे सम्म इप्ने मचाप्नीम। मुर कली मथिपदमे सम्म निन्द्रा मपाडनीम। भजन संग्रह ३६:५; मीका २:१  
 17 परमप्रभु यावे आ अरेशो मटितीके मेको आन जचा थोत्रक खोदेशो बाक्ब। हुश खाक्श पोक्तीके आन तूचा थोत्रक खोदेशो बाक्ब।

18 तन्न ठीक पाइब आन लां सुनी डा छेडछेड खोदेशो बाक्ब। मेको नाक्ती उइक्थ दुम सम्म बारना बारन शुश छेडछेड दुम्ब। हितोपदेश २४:२०

19 परमप्रभु यावे आ अरेशो मटीब आन लां क्येर नाक्दो डा छिडछिड खोदेशो बाक्ब। मेकोपुकीम मारिइमी दाइल पाइक्नीम, दे मतुइक्नीम।

20 आं तौ, आं लोव्र नेनो। इ नोफा दाइरशा, आं देशो नेनो।

21 आं लोव्र कली गेना हना यो मिम्तो। मिनु मेको कली इ थुमी वोतो।

22 मारदे हना सु मेको ताइब, मेको आ ब्रोइतीक दुम्ब। मिनु मेको आ रां नेल्ल कली सापाइक्तीक बाक्ब। हितोपदेश ३:८

23 नेल्ल आन क्येडा इ थु कली कोव्रडो। मारदे हना मेको रे इ ब्रोइतीक जाक्ब।

24 इ सोव्र कली मरिम्शो लोव्र पचा मगेवो। हेंथे लोव्र इ क्येडा डोन वोतो।

25 इ मिक्ची मरिक्थु ठीक पा डोंइती कोव्रडो। सिका मपथु डोंइती गे कोव्रडो। हितोपदेश १७:२४

26 ठीक लां ला गाक्को। मिनु इ पतीके नेल्ल रिम्शो दुम्नीम।

27 ग्युरा पेरा मलावो। मरिम्शो पतीक नेल्ल रे डोन बाक्को। यहोसु १:७

## 5

तेल्लेम क्येडा होस पचा

1 आं तौ, आं तुइक्तीक नेशा शुश मिम्तो। आं रुपतीक तुइक्चा कली इ नोफा दाइक्तो।

2 मोपा गे होस पा बाक्शा, जोक्शा लोव्र पने चाप्नेवे।

3 हेंथे पाइब मीश मुर आ शोव्र रे खुदो याप्ब। मिनु मेको आ लोव्र तेल क्येडा ग्रेन्देल बाक्ब। हितोपदेश २:१६-१९

4 नोले मेको मीश मुर ककीर खोदेशो कशो नु निम्फा गे हेरशो धार पाइरशो तरवार खोदेशो दुम्ब।

5 मेको आ लां बेक्चा कली लुकच लाइब। मेको बेक्शो मुर आन बाक्तीके लचा कली आंम कली तेक्ने मचाप्ब।

6 मिनु मेको ब्रोइचा गेब लां रे डोन लाइब। मेको आ लां हेंथे बाक्त हना यो, मेकोमी मारिइ मतुइक्ब।

7 मुल आं तौपुकी, आं लोव्र नेनीन। आं देशो लोव्र मनेशो खोदेशो मपने।

8 मोदेशो मीश मुर क्येडा डोन बाक्कीन। मिनु आ खिं डा लाप्चो आ नेक्था मलने।

9 लाइतीनी हना, गे इन मान अरु आन कली गेशा, साइक्ब आ गुइमी दुम्नीनी।

10 मिनु अरु मुरुमी इन शोंप नेल्ले जाइनीम। इन श्येत पा चेम्शो मारेइ मारेइ अरु आन खिं लाइब।

11 मिनु नोले गे श्येत जशा, बेक्चा चिक्शा हुकयी पा, रां नेल्ल सोव्रशा गेयशो दुम्नीनी।

12 मिनु गे “यो मारदे परमप्रभु आ शेशो मपडा, माइ? मारदे आ हुइरशो मटिडा माइ?

13 गो आं कली शेंब आन लोव्र मनैनु। आं कली अर्ती गेब आन लोव्र मटिडा।

14 मुल गो खतम दुम्ती। मुर नेल्ल आन तुइक्चा डा पा खतम दुम्ती” देनेवे। ब्यवस्था २२:२८-२९

15 मिनु गे आंम कुचा डा ब्वाक्कु नु आंम बुक्तीके डा ब्वाक्कु तूशो खोदेशो पा गे इ मीश नु बाक्को।

16 इ बुक्शो ब्वाक्कु, लां मेर लचा गेनेवे? अरु मीश रे थिशो आल लांमी बाक्मानु, इ कली रिम्शो दुम्बा?

17 इ आल इ के ला दुम्ल। मेको अरु आन के मदुम्ल।

18 इ बुक्शो ब्वाक्कुम आसीक तवल। इ ठिटा बाक्ची ना ग्युबे पशो मीश आल नु ग्येरसीशा बाक्को। उपदेशक ९:९

19 मेको दारशो किश्र नु रिम्शो रोकोश खोदेशो बाक्ब। मेको आ दारस नु दाक्तीकेमी गे गेना हना यो ग्येरशा बाक्को।

20 आं तौ, गे मारदे मारेइ मतुइक्थु हेंथे मीश मुर नु गाक्नेवे? गे मारदे अरु मुर आ मीश कली मुप्नेवे?

21 मारदे हना परमप्रभु यावेमी मुर आ पशो नेल्ल ताइब। मेकोमी मुर आन लां नाक्ब।

22 परमप्रभु यावे आ अरेशो मटीब मुर आ मरिम्शो पशोमी ग्याइक्चा पुइसीब। मेको आ पाप आ ग्याइलीमी रेत्या पुइसीब।

23 आंम कली चलने मचाप्थु, हुइरशो मटितीके मेको बेक्ब। आ मरिम्शो पतीकेम मेको जाम्शा लाइब।

## 6

४ ओटा होस पतीके

1 आं तौ, इ नेक्था डा मुर आ जमानी दुम्ते हना, सल्ला पने थुम्शो बाक्ते हना, हितोपदेश ११:१५; हितोपदेश २०:१६; हितोपदेश २२:२६

2 गे इ लोव्रमी फ्रैसीशो बाक्ते हना, गे गुम्चशो बाक्नेवे।

3 मुल मार पचा माल्नेवे देशा हना, गे आंम कली प्रोनो। मारदे हना गे इ नेक्था डा मुर आ गुइमी बाक्नेवे। मेको कली नमो सिमो पा आ डोंइती बाप्पो।

4 इप्शा मबाक्को। काइ निन्द्रा मपावो।

5 किश्र सिखारी आ गुइ रे ब्रोइशो नु चिक्ब ग्याइक्ब आ गुइ रे बेरशो खोदेशो पा, गे यो आंम कली प्रोनो।

6 गे अल्से, रकमिक्च आन कली कोव्रडो। आन पशो कोव्रडो। मिनु जोक्ब तुइक्ब दुमो। हितोपदेश १०:४; हितोपदेश २०:४

7 मेको आन कली अरेब, सासन पाइब नु हुकुम पाइब मबाक्तेक्म हना यो,

8 मेकोपुकीमी जचा थोव्रक खेक्चा कली खुप्ची ना खुप्नीम।



- 9 गे अल्से, गेना सम्म इप्शा बाक्नेवे? गेना निन्द्रा रे सेंसीशा बोक्नेवे?  
 10 याम का डा निन्द्रा पतीके, याम का डा मुकु जिशा बाक्तीके नु याम का कुचुमी गुड वोडशशा, नाइशशा बाक्तीकेमी,  
 हितोपदेश २४:३३-३४  
 11 पुड्या दुम्तीके खुड खोदेशो पा जाक्ब। इन मार मार माल्तीके या कुरशो लडाइ पाइब खोदेशो पा जाक्ब।  
 12 हिंचा डा मरिम्शो पाइब नु शोर गाक्शो मुर हेंथे लोत्र पा गाक्नीम। हितोपदेश १०:३१-३२  
 13 मिक्च रिक्शा, खोइलीमी चाल पा, ब्रेप्चोमी यो चाल पाइनीम। हितोपदेश १०:१०  
 14 मेको आन दूली थुमी मरिम्शो मिम्नीम। मेकोपुकीमी गेना हना यो मुर आन कली जिपाइक्नीम।  
 15 मोपतीके मेको आन मतुइक्चा डा पा मेको आन तार श्येत जाक्ब। मिनु मारेइ पचा मतथु, खतम दुम्नीम।  
 16 परमप्रभु यावेमी ६ ओटा थोत्रक काइ मदाक्ब। ७ ओटा थोत्रक पशो तशा ग्रांणा दीब।  
 17 मेको मार बाक्नीम देशा हना, ठेयब लेत्तीके, जोल पतीके, दोस मताइब मुर आन कली हुश खाक्शा पोक्तीके,  
 18 मरिम्शो पचा कली मिम्ब थु, मरिम्शो पचा चुइक्तीके,  
 19 जोल पाइब सांकछी बाक्तीके नु वोबु आन दातेम जिचा पोक्ब काइ मदाक्ब। मेको ७ ओटा थोत्रक बाक्नीम।

वोंइश मुर आन कली अर्ती

- 20 आं तौ, इ आफ आ अरेशो टिवो, इम्मा आ शेंशो लोत्र मप्रोनो। हितोपदेश १:८  
 21 मेको गेना हना यो इ थुम वोतो। मेको कली माला खोदेशो पा रेल्सो।  
 22 मिनु गे ते लते हना यो, मेकोमी इ कली लां कोइनीस। गे इप्ते हना, मेकोमी इ कली खाल पाइनीस। गे सेंसेनु, गे नु लोत्र पाइनीस। भजन संग्रह १११:१७२  
 23 मारदे हना मेको अरेशो बत्ती नु शेंशो छेडछेड बाक्नीस। ठीक पचा कली हुइक्तीके ब्रोंइचा गेब लां बाक्ब।  
 24 मेकोमी हेंथे गाक्ब मीश मुर रे डोन बाक्पाइक्नीम। मिनु हेंथे गाक्ब ग्युंवे पशो मीश मुर आन ग्रेन्देल लोत्र रे डोन बाक्पाइक्नीम। हितोपदेश २:१६  
 25 मेको आ दारशो कुल तथा इ थुमी मवल्लो। मेको आ कोत्रशोमी इ कली हेंथे मगाक्पदल।  
 26 तेल्लेम आ गाल्च शोब्ले का डा ला बाक्ब। तन्न ग्युंवे पशो मीश मुर नु बाक्चा वोंइश मुर आ ब्रोंइतीक नेल्ल रोइक्ब।  
 27 मुरुमी आ कुचुमी मी वोइक्तु हना, आ वा मदुप्बा डा?  
 28 मुर ब्रशो कोइला तार गाक्त हना, मेको आ खोइली मचोइबा डा?  
 29 अरु मुर आ मीश नु इप्ब मुर मोदेशो दुम्शा, सु मेको मीश मुर कली थीबा, मेको सजाइ मतथु, मब्रोंइब। हितोपदेश ५:८-१४  
 30 खुइमी शोत्रलु बेक्शा, जचा थोत्रक खुइ पाप्तु हना, मेको मुने मदोक्ब।  
 31 तन्न मेको ग्याइक्चा पुंडसाक्ब हना, आ खुइ पशो ७ खेयप तेम्शा थाप्चा माल्ब। मेकोमी आ खिं आ शोंप नेल्ल थाप्चा माल्ब। प्रस्थान २१:३७  
 32 मोपा मुर आन मीश नु इप्ब, निप्स मपाइशशो मूर्ख बाक्ब। मोदेशो पाइबमी आंम कली खतम सेल्ब।  
 33 मेको तुप्चा नु मुने तोक्चा पुंडसीब। मेको आ मुने गेनायो मक्याम्सीब।  
 34 मिनु मेको मीश मुर आ वोंइश शश गाइक्ब। मिनु मेकोमी क्येक्क लेत्ची नाक्ती मेको कली मारेइ शिशि मपाइब।  
 35 मेको कली गिश क्येट गेप्तीवी हना यो, मेकोमी मताक्ब।

## 7

हेंथे पाइब मीश मुर

- 1 आं तौ, आं लोत्र टिवो। आं शेंशो लोत्र इ थुम वोतो।  
 2 गे आं अरेशो मप्रेंताक्वी हना, गे ब्रोंइनेवे। आं शेंशो इ मिक्च खोदेशो पा होस पा वोतो।  
 3 मेको कली इ ब्रेप्चोम फ्रेंदो। इ थुमी ब्रेक्शा वोतो।  
 4 गे तुइक्तीक कली “आं समी ननी” देनो। मिनु जोक्तीक तुइक्तीके कली “आं नेल्ल क्येडा गारब वारच बाक्नीनी” दे लोत्र पावो।  
 5 मो पाप्तीवी हना, मेकोमी इ कली हेंथे पाइब ग्युंवे पशो मीश मुर आ ग्रेन्देल लोत्र रे प्रोंइब।  
 6 मिनु गोमी आं खिं डा झेल रे कोंवता। गोमी लां गे कोंवता।  
 7 मिनु गो मार ताता देशा हना, मारेइ मजोक्ब नु ठिटा आन दातेमी निप्स मपाइशशो ठिटा का कली ताता।  
 8 मेको वोंइश आल लां मेर गाक्शो ताता। मेको हेंथे गाक्ब मीश मुर आ खिं गे लना लन पशो ताता।  
 9 गो मेको कली नां रिचावानु, छिडछिड दुम्ची ना ताता।  
 10 मेको मीश मुर मेको कली युम्चा कली गूत। तेल्लेम खोदेशो पा फेक्शा “मेको कली हेंथे खोइक्पाइक्नुड” दे मिम्शो बाक्त।  
 11 मेको मीश मुर मारेइ महिंब नु मुने मपाइब बाक्ब। मेको गेनायो आ खिंम बाक्चा मदाक्ब।  
 12 मिनु मेको लां एर आंथ, शश मुर बाक्तीके मेरे हिरशा, कुना मेर रिम्ना रिम्न बाक्ब।  
 13 मिनु मेको मीश मुरुमी मेको कली ग्याइशशा, पुक्पु पा मुने मपथु  
 14 “गो मुलाक्ती दुशा बाक्चा आ पबंम चढ़ेतीके चढ़ेचा माल्शो नड। मेको आं कसम मुलाक्ती खाप्ता। लेवी ७:१५-१७  
 15 मोपतीके गो इ कली युम्थ जाक्ती। गो इ कली शश माल्शा थित्ता।

- 16 गो आं ब्राख्येमी बरखी ब्राता। मेको इजीप्त रागी डा श्येलेम प्रोवशो बाक्ब।
- 17 गो आं ब्राख्येमी मूरे, एलोत्र नु सिन्कौलीमी ब्रोवशो रिना पपाइक्ता।
- 18 पिबो। गो निक्शी इप्स। नेल्ल नाक्दो काथा ग्येरसीशा इप्स।
- 19 मारदे हना आं वोंइश खिमी मबाक्ब। मेको डोन लत।
- 20 मेको शुश क्येट कुरसीशा लत। मोपतीके पूर्न सम्म मजाक्ब” दैत।
- 21 मोपा शुश लेम्शा, मेकोमी वोंइश आल कली लाइक्तु। आ मिलो शिलो लोव्रमी मेको कली हेंथे खोइक्पाइक्तु।
- 22 मिनु मेको वोंइश आल मेको मीश मुर आ नोले रीब पा खोइक्तु। क्योरचा कली खुल्लशो ब्यफ खोदेशो पा गाक्त।
- ब्वारदमी रेत्चा कली प्रेक्शो किश्श खोदेशो पा मेको आ नोले लत।
- 23 मिनु ब्राम ख्रशा, बेक्चा सम्म रिम्ब। चिक्ब ब्वारदम रेत्चा चिक्शो खोदेशो पा “बेक्नुड” दे मतुडक्ब।
- 24 मुल आं तौपुकी, आं लोत्र नेनीन। इन नोफा दाइश्शा, आं लोत्र नेनीन।
- 25 इन थुं मोदेशो मीश मुर आ लांम लचा मगेने। मेको आ हेंथे लां मलने।
- 26 मेकोमी शुश मुर आन कली खतम सेल्लु। आ साइश्शो शुश बाक्नीम।
- 27 मेको आ खिं बेक्शो मुर आन बाक्तीक लतीक लां खोदेशो बाक्ब। मेको लां बेक्तीक कोठा जाक्दीप्ब।

## 8

### तुइक्तीके ठेयब बाक्ब

- 1 तुइक्तीकेमी लोत्र मपाइबा डा? रुप्तीकेमी ठेयब सेंदा पा मन्ब्रेप्बा डा? हितोपदेश १:२०-२३
- 2 मेको लां आ नेक्था डा डां डा तारी नु ब्रालाम दोक राप्ब।
- 3 ठेयब लाप्चो आ नेक्था सह्र आ डोंइती, मेको आ ओत्रतीकेमी ठेयब सेंदामी ग्रीब।
- 4 मार देशा ग्रीब देशा हना, मुरपुकी, गो इन कली लोत्र पाइनुड। मुर नेल्ल आन कली लोत्र पाइनुड।
- 5 मारेड मजोक्बपुकी होस पतीके शेंसीन। निप्स मपाइश्शो बाक्तीनी हना, निप्स पाइश्शो दुमीन।
- 6 नेनीन, गो रिम्शो लोत्र पाइनुड। आं लोत्र ठीक बाक्ब।
- 7 गो थमा लोत्र ला पाइनुड। परमप्रभु यावे आ अरेशो मटितीके तशा, गो ग्रांग्रा दीनुड।
- 8 गो ठीक लोत्र ला पाइनुड। दूली नु हेंथे लोत्र मपाइनुड।
- 9 मिनु मेको आं लोत्र रुप्ब आन कली मखुइश्शो लोत्र बाक्ब। जोक्ब आन कली ठीक लोत्र बाक्ब।
- 10 चांदी आ पा डा आं अर्ती खुप्तीन। क्येख सुन आ पा डा जोक्ब थुं मालीन। हितोपदेश ३:१४
- 11 मारदे हना हीरा क्येडा तुइक्तीके रिम्शो बाक्ब। इ माल्लो मारेड मारेड नेल्ल मेको क्येडा आइक्च बाक्नीम।
- 12 गो तुइक्तीके नड। गो होस पतीक नु बाक्नुड। गो जोक्ब नु मिम्ब दुम्नुड।
- 13 परमप्रभु यावे कली मान पा हिंचा, मरिम्शो पचा कली काइ मदाक्चा बाक्ब। फुरती कोंइचा, ठेयब लेशो दुम्चा, मरिम्शो थुं डा गेय पचा नु दूली लोत्र पचा काइ मदाक्नुड।
- 14 अर्ती नु ठीक पा तुइक्तीक गो नु बाक्नीस। गो नु जोक्तीक तुइक्तीक नु बोल यो बाक्नीम।
- 15 गो रे पा पिपुकीमी सासन पाइनीम। हुकुम पाइबपुकीमी ठीक पा अरेंतीक लोत्र पाइनीम। हितोपदेश १६:१२
- 16 आं पतीकेमी रागी रागी डा हुकुम पाइबमी हुकुम पाइनीम।
- 17 सुमी आ कली दाक्नीमी, गो यो मेको आन कली दाक्नुड। सुम आं कली शुश मालनीमी, मेकोमी आं कली थिन्लीम।
- 18 शोंप नु मान गो नु बाक्नीस। मिनु मनुप्ब शोंप नु सोशा बोशा ग्येत्थ लतीक गो नु बाक्नीस।
- 19 सुन नु क्येख सुन क्येडा आं गेशो फल रिम्शो बाक्ब। आं रे पा ग्रूशो मारेड मारेड चांदी क्येडा रिम्शो बाक्नीम।
- 20 गो ठीक पतीक लां गाक्नुड। ठीक निसाफ पाइनुड।
- 21 आं कली दाक्ब आन कली गो शुश शोंप गेनुड। गो मेको आन मार मार वोइक्तीक नेल्ल प्रिंशा गेनुड।
- 22 मिनु मेकोमी “परमप्रभु यावेमी नेल्ल सेल्चा क्येडा डोंइती आं कली सेल्लती। अय्युब २८:२३-२८
- 23 नेल्ल क्येडा डोंइती डा गो नड। रागी क्येडा डोंइती यो गो नड।
- 24 समुन्द्र दुम्चा क्येडा डोंइती गो नड। ब्वाक्कु बुक्चा क्येडा डोंइती गो बाक्ती।
- 25 डांदापुकी दुम्चा क्येडा डोंइती नु पहाड दुम्चा क्येडा डोंइती गो नड।
- 26 मेकोमी रू नु रागी सेल्चा क्येडा डोंइती गो नड। खप सेल्चा क्येडा डोंइती गो नड।
- 27 मेकोमी सरीड प्राक्शा वोइक्ची ना गो नड।
- 28 गोस्स कली सरीडमी वोइक्ची ना नु खप आगा डा ब्वाक्कु बुक्तीके कली ठीक पा वोइक्चा ना,
- 29 ठेयब समुन्द्र आ शुंइच वोइक्ची ना नु रागी आ जग वोइक्ची ना गो नड। भजन संग्रह १०४:९
- 30 मेना गो परमप्रभु यावे आ नेक्था जोक्ब तुइक्ब गेय पाइब खोदेशो पा बाक्शो नड। मेकोमी नाक्त कित कित आं कली तशा ग्येरसाक्ब। गो यो मेको नु ग्येरसीशा बाक्ती।
- 31 मिनु आ मुरपुकीम ब्रीशो रागी तशा ग्येरसाक्ची। गो मुर आन कली तशा ग्येरसाक्ची।
- 32 आं तौपुकी, मुल आं लोत्र नेनीन। आं कोंइशो लां गाक्बपुकी ग्येरसीशो मुर दुम्नीम।
- 33 आं अर्ती नेंशा जोक्ब तुइक्ब मुर दुमीन। मेको कली मप्रोनीन।
- 34 सुम आं लोत्र नेंबा, मेको ग्येरसीशो मुर दुम्ब। मेको मुरुम नाक्त कित कित आं लाप्चो कोव्रशा आं कली रिम्ब।
- 35 सुम आं कली थिप्बा, मेको ब्रोंइचा ताइब। मिनु परमप्रभु यावेमी मेको कली दाक्ब।

36 आं कली मथिपुकी चहिं आंम कली खतम सेल्नीम। आं कली काइ मदाकब नेल्ले बेक्चा दाक्नीम” देंत।

## 9

तुइक्तीके नु मारेइ मतुइक्तीके

- 1 तुइक्तीकेमी आंम खिं सेल्शा, ७ ओटा थाम खुक्तु।
- 2 मेकोमी भोज सेल्लु अडगुर शांबु ब्रोवपाइशशा, राडी ब्रशा, जचा कली ठीक पशो बाक्त।
- 3 आ वाइलीम आन कली “सहर डा डांडा रे मुर आन कली ब्रेलतीन” दे सोइक्ताक्व।
- 4 “मारेइ मजोक्ब नेल्ल एक जाक्कीन” देंत। निप्स मपाइशशा आन कली
- 5 “जाक्कीन, आं शोब्ले जने। आं ब्रोव पा सेल्शो शांबु यो तूडीन” देंत।
- 6 क्येख मुर आन लां गाक्चा प्रोनीन। मिनु जोक्ब तुइक्ब आन लां गाक्शा, ब्रोइशा बाक्कीन।
- 7 सुमी शुक्शी पाइब आन कली “रिम्शो दुमो” देंबा, मेको दिप्चा पुंडसीब। सुमी परमप्रभु यावे आ अरेशो मटीब आन कली हुइक्बा, मेको मरिम्शो पाइक्चा पुंडसीब।
- 8 सुमी शुक्शी पाइब आन कली हुइक्बा, मेको काइ मदाक्चा पुंडसीब। सुमी चहिं जोक्ब तुइक्ब आन कली हुइक्बा, मेको दाक्चा पुंडसीब।
- 9 जोक्ब तुइक्ब आन कली अर्ती गेशोन, डोंइती क्येडा जोक्ब तुइक्ब दुम्नीम। ठीक पाइब आन कली शेशोन, मेको क्येडा ठीक पचा शेंसीनीम।
- 10 परमप्रभु यावे कली मान पा हिंचा जोक्तीक तुइक्तीक गोतीक बाक्ब। मिनु सुमी मेको का ला परमप्रभु यावे कली तुइक्बा, मेको रुप्ब दुम्ब। हितोपदेश १:७
- 11 मारदे हना आं पतीकेमी गे शुशा नाक्ती ब्रोइनेवे। इ ब्रोइतीक शुश बर्स तेम्चा पुंडसीनेवे।
- 12 गे जोक्ब तुइक्ब दुम्ते हना, मेको इ कलीन दुम्ब। गे शुक्शी पाइब दुम्ते हना, मेको रे पिशो दोस नेल्ल इ केन बाक्ब।
- 13 मूर्ख मीश मुर शुश रेयके पाइब। मेको मारेइ मजोक्ब नु मारेइ मतुइक्ब बाक्ब।
- 14 मेको आ खिं डा लाप्चोमी निप्ब। सहर आ इर डा निल्तीकेमी निप्ब।
- 15 सु सु आन गेय पा मेको लां गाक्नीमी, मेकोमी मेको आन कली ब्रेक्ब।
- 16 मिनु “सु सु मारेइ मजोक्ब बाक्नी, एक जाक्कीन” देंब। मिनु मेकोमी निप्स मपाइशशा आन कली
- 17 “खुइ पशो ब्वाक्कु ब्रोवशो बाक्ब। मिनु खुइशशा जशो जचा थोवक यो थाम्पा ब्रोवब” देंब। हितोपदेश २०:१७
- 18 मिनु मेको लां गाक्ब मुरपुकीमी “मेको आ खिं बेक्शो मुर आन बाक्तीके बाक्ब” दे मतुइक्नीम। मिनु मेको आ पौनामी आन कली बेक्शो मुर आन बाक्तीकेमी ब्रेशशा बाक्नीम, दे मतुइक्नीम।

## 10

सोलोमन आ ब्रेक्शो लोव

- 1 जोक्ब तुइक्ब तौमी आ आफ कली ग्येरपाइक्ब। तन्न मूर्ख तौमी चहिं आ ममा कली सुर्ता पपाइक्ब।
- 2 परमप्रभु यावे कली मटिथु, चेम्शो शोंप शोर गाक्ब। सु ठीक पाइब बाक्मे मेको बेक्तीक रे ब्रोइब।
- 3 परमप्रभु यावेमी ठीक पाइब मुर आन कली शोव्रल्लु बेक्पाइशशा मवोइक्ब। तन्न आ अरेशो मटीब आन कली आन जत दाक्शो मगेब। भजन संग्रह ३७:१९, २५
- 4 सु अल्से बाक्मे, मेको प्रुडग दुम्ब। शुश गेय पाइब मुर चहिं शोंप पाइशशा दुम्ब। हितोपदेश ६:६
- 5 सु अन्न खुप्ची ना खुप्चा, मेको होस पाइब तौ का बाक्ब। अन्न रुप्ची ना इप्ब तौमी आ आफ कली मुने तोक्ब।
- 6 ठीक पाइब मुर आसीक राइनीम। तन्न परमप्रभु यावे आ अरेशो मटीब आन कली आन मरिम्शो पशोमी सुम्ब।
- 7 ठीक पाइब कली मिम्शा आसीक गेब। परमप्रभु यावे आ अरेशो मटीब आन नें चहिं जाम्शा लाइब। अय्युब १८:१७; भजन संग्रह ९:६
- 8 जोक्ब तुइक्ब थुं पाइशशा मुरुमी शेशो लोव्र टीब। तन्न हेंथे लोव्र पाइब मूर्ख खतम दुम्ब।
- 9 गेना हना यो रिम्शो पाइब मुर कली सुइमी मारेइ मपाइनीम। सु चहिं दूली लां गाक्बा, मेको आ पर्बम नेल्लेमी “मरिम्शो पाइब” दे तुइक्नीम।
- 10 मिक्च रिक्बपुकीमी मुर आन कली श्येत गेनीम। तन्न सुमी महिंथु हुइक्बा मेकोमी थुं नाइशशा बाक्चा गेब। हितोपदेश ६:१२-१३
- 11 ठीक पाइब मुर आन लोव्र पतीकेमी ब्रोइनीम। तन्न परमप्रभु यावे आ अरेशो मटीब आंम आन लोव्र पतीकेमी खतम दुम्नीम।
- 12 मुर आन कली काइ मदाक्शोन, जिचा बोक्ब। मुर आन कली दाक्शोन चहिं, आन मरिम्शो पशो नेल्ल सुम्सीब। १पत्रुस ४:८
- 13 मिम्ब मुर आन लोव्र रुप्चा डा बाक्ब। तन्न ममिम्ब मुरपुकी तुप्चा पुंडसीनीम।
- 14 जोक्ब तुइक्ब मुर नु जोक्तीक बाक्ब। तन्न हेंथे लोव्र पाइब मूर्खमी खतम दुम्तीक चाक्ब।
- 15 शोंप पाइशशा मुर आन शोंप मेको आन बोल्यो दरवार खोदेंशो बाक्ब। प्रुडग मुर आन श्येत दुम्तीकेम मेको आन कली खतम सेल्ब। हितोपदेश १८:११
- 16 ठीक पाइब मुर आन गेय पतीकेमी ब्रोइनीम। परमप्रभु यावे आ अरेशो मटीब आन चेम्शो नेल्ल मरिम्शो गेय पा नुप्शा लाइब।

- 17 सु सुमी अर्ती टीनीमी, मेको ब्रोंडचा गेब लां गाकनीम। हुइश्शो मनेब चहिं हेंथे लां गाकनीम।
- 18 सुमी मुर काइ मदाकबा, तन्न “दाकनुड” देबा, मेको मुर जोल्फे बाकब। सुम मुर आन पर्वम जोल फ्राइबा, मेको मूर्खे बाकब।
- 19 शुश लोत्र पाइब मुरपुकीमी शुश गलती पाइनीम। होस पाइब मुर शुश मब्वाकनीम।
- 20 ठीक पाइब मुर आन लोत्र रिम्शो चांदी खोदेशो बाकब। परमप्रभु यावे आ अरेशो मटीब आन थुं शोर गाकशो बाकब।
- 21 ठीक पाइब मुर आन लोत्रमी शुश मुर आन कली रिम्शो दुम्ब। तन्न मूर्खे आन निप्स मपाइक्तीके बेक्शा लाइनीम।
- 22 परमप्रभु यावे आ आसीकम मुर आन कली शोंप पाइश्शो सेल्ब। मेकोमी मारेइ श्येत मतेम्ब। भजन संग्रह १२७:२
- 23 मूर्खे मरिम्शो पचा कली ग्येरसीनीम। रुप्ब मुर जोकब तुइक्ब गेय तशा ग्येरसीनीम।
- 24 परमप्रभु यावे आ अरेशो मटीब मुर आन हिंशोम श्येत जाइनीम। तन्न ठीक पाइब मुर आन दाकशो ताइनीम।
- हितोपदेश १:२७; भजन संग्रह ३७:४
- 25 श्येत फश गिवार खोदेशो पा जाकमेनु परमप्रभु यावे आ अरेशो मटीबपुकी जाम्शा लाइनीम। तन्न ठीक पाइब मुर गेना हना यो ब्रोंडशा बाकनीम। हितोपदेश १२:७
- 26 दोपा ग्युरशोमी खुइ ग्रिम्बा नु कुनमी मिक्च दुक्बा, मोपा अल्सी पाइब आन होत्रप आन कली दुम्नीम।
- 27 परमप्रभु यावे कली मान पा हिंतीकेमी ब्रोंडतीक नाक्त तेम्सीब। तन्न परमप्रभु यावे आ अरेशो मटीब आन ब्रोंडतीक नाक्ती खोंडसीब।
- 28 ठीक पाइब आन आस पतीके तशा ग्येरसीनीम। तन्न परमप्रभु यावे आ अरेशो मटीब आन आस पतीके जाम्शा लाइब। भजन संग्रह ९:१९; अय्युब ८:१३
- 29 परमप्रभु यावे आ लां रिम्शो थुं पाइश्शो मुर आन कली खुइश्शा ब्रोंडशा बाक्तीक बाकब। तन्न मरिम्शो पाइब आन कली मेको लां खतम दुम्तीक बाकब।
- 30 ठीक पाइब मुर गेनायो ग्येथ लुकच मदुम्नीम। परमप्रभु यावे आ अरेशो मटीबपुकी चहिं रागीमी मलीनीम। हितोपदेश २:२२
- 31 ठीक पाइब मुरुमी तुइक्तीक लोत्र पाइब। तन्न दूली लोत्र पाइब मुर आ लें फेत्चा पुंइसीब। भजन संग्रह ३७:३०
- 32 ठीक पाइब मुरुमी रिम्शो लोत्र पस जोक्ब। तन्न परमप्रभु यावे आ अरेशो मटीबपुकी दूली ला ब्वाक्स जोक्नीम।

## 11

गेब मुरुमी तेम्शा गेचा पुंइसीब

- 1 परमप्रभु यावेमी जोल पा नाक्तीक तशा, ग्रांघा दीब। तन्न ठीक नाक्तीक तशा शुश ग्येरसीब। लेवी १९:३५-३६
- 2 ठेयब लेशो मुर मदाक्या पुंइसीब। तन्न तुइक्तीक ब्रेम्शो मुर नु बाकब। हितोपदेश १६:१८
- 3 रिम्शो थुं पाइश्शो मुर आन कली गेना हना यो आन रिम्शो पतीकेमी लां कोइब। तन्न थमा सुइक्चा मपुंइसीब मुर आन कली आन मरिम्शो पतीकेमी खतम सेल्ब।
- 4 गाइश्शो नाक्ती शुश शोंप शोर गाकशो दुम्ब। तन्न ठीक पतीकेमी बेक्तीक रे प्रोंडब। लूका १२:२०; हितोपदेश १०:२
- 5 दोस मताइब आन ठीक पतीकेमी मेको आन लां थेलब। तन्न परमप्रभु यावे आ अरेशो मटीब आन मटितीकेमी खतम दुम्नीम।
- 6 रिम्शो थुं पाइश्शो मुर आन ठीक पतीकेम ब्रोंडचा ताइनीम। तन्न थमा सुइक्चा मपुंइसीब मुर आन मरिम्शो पतीकेमी ग्याइक्चा पुंइसीनीम।
- 7 परमप्रभु यावे आ अरेशो मटीब मुर बेकमानु, आन आस यो जाम्शा लाइब। मेको आन मिम्शो नेल्ल मदुम्ब। हितोपदेश १०:२८
- 8 ठीक पाइब मुर हिंचा डा श्येत रे प्रोंडचा पुंइसीनीम। तन्न परमप्रभु यावे आ अरेशो मटीबपुकी मेको श्येतमी हुम्सीनीम।
- 9 मरिम्शो मुर आन लोत्रमी आन नेक्था डा मुर आन कली खतम सेल्नीम। तन्न ठीक पाइब मुर मेको आन जोक्तीकेमी प्रोंडचा पुंइसीनीम।
- 10 ठीक पाइब मुर आन कली रिम्शो दुम्त हना, सहर डा मुर नेल्ल ग्येरसीनीम। परमप्रभु यावे आ अरेशो मटीब खतम दुम्मानु, मुर नेल्ल थाम्पा ग्येरसीनीम।
- 11 रिम्शो थुं पाइश्शो मुर आसीक तामेनु, सहर कली रिम्शो दुम्ब। तन्न परमप्रभु यावे आ अरेशो मटीब आन लोत्रमी सहर कली मरिम्शो दुम्ब। हितोपदेश २८:१२
- 12 सुमी अरु मुर आन कली आइक्च सेल्बा, मेको निप्स मपाइश्शो बाकब। तन्न निप्स पाइश्शो मुर सिक्सी पा बाकब। भजन संग्रह १५:३
- 13 लोत्र क्याल्बमी खुइश्शो लोत्र यो फ्राइनीम। तन्न थमा सुइक्चा पुंइसीब मुरुमी मोदेशो लोत्र खाप्शा वोइक्नीम।
- 14 लां कोइब मबाक्त हना, रागी खतम दुम्ब। तन्न अर्ती गेब शुश बाक्तेकम हना, मेको लीब।
- 15 अरु मुर आन जमानी बाकशोनु, मरिम्शो दुम्ब। तन्न जमानी मबाकशो रिम्शो दुम्ब। हितोपदेश ६:१-२
- 16 रिम्शो थुं पाइश्शो मीश मुर कली मान पाइनीम। तन्न मरिम्शो पाइब मीश मुनेमी सुम्सीशो बाकब। गेय मपाइब मुर पुडग दुम्ब। तन्न आंट पा गेय पाइबमी क्येट चेम्ब।
- 17 रिम्शो पाइब मुरपुकीमी आंम कली रिम्शो पाइनीम। तन्न मरिम्शो पाइबपुकी श्येत गेंसीनीम।
- 18 परमप्रभु यावे आ अरेशो मटीब मुरुमी क्येट चेम्ब, तन्न मलीब। तन्न ठीक पाइब मुरुमी इनाम ताइनीम।

- 19 सु गेना हना यो ठीक पाइब बाकबा, मेको ब्रोंडब। तन्न सु मरिम्शो पचा कली चुडकबा, मेको बेकब। हितोपदेश १९:२३
- 20 मरिम्शो थुं परमप्रभु यावे कली ग्रॉग्रा बाकब। तन्न दोस मताइब रिम्शो थुं पाइश्शो मुर आन लां गाकशो तशा ग्येरसीब।
- 21 मरिम्शो पाइब मुर सजाइ मतथु मब्रोंडनीम। मेको थमा बाकब। तन्न ठीक पाइब आन चच युइ ब्रोंडचा ताइनीम।
- 22 निप्स मपाइश्शो दारशो मीश मुर सुन के मुन्नी पाइश्शो पोत्र खोंदेंशो बाकब। हितोपदेश ३१:३०
- 23 ठीक पाइब मुर आन दाकशो थमा पा ताइनीम। परमप्रभु यावे आ अरेशो मटीबम गाइकपाइकनीम।
- 24 का निकशी मुरुम शुश गेनीम हना यो, आन शोंप मेको क्येडा बारब। का निकशी चहिं आन गेचा माल्लो मगेथु, पुडग दुम्नीम। मती २५:२९; २कोरिन्थी ९:६
- 25 हाइश्शो मुरुमी शुश ताइब। सुम अरु आन कली वारच पाइकबा, मेकोमी आंमा यो वारच पाइकचा पुंडसीब।
- 26 अरु आन कली अन्न मगेथु खेकशा वोइकब मुर सराप पाइकचा पुंडसीब। तन्न अन्न लेयब मुर आसीक ताइब।
- 27 सुम रिम्शो पतीके माल्ला पाइबा, मेकोमी शिशो माल्ब। सुम मरिम्शो पतीके माल्बा, मेको मरिम्शो पाइकचा पुंडसीब।
- 28 सुमी आ शोंप कली थमा सुइकबा, मेको रीब पा बेकब। ठीक मुर चहिं गिग घांस खोंदेंशो पा बारशा लाइब। भजन संग्रह ५२:९-१०
- 29 आंम खिं डा मुर आन कली श्येत चाकबमी मारेइ मथेरब। मिनु मूर्खपुकी जोकब तुइकब आन वाइल दुम्नीम।
- 30 ठीक पाइब मुर आन पतीके ब्रोंडचा गेब रवा खोंदेंशो बाकब। तन्न हुश खाकश पोक्बमी मुर आन कली साइकब। हितोपदेश ३:१८
- 31 ठीक पाइब मुरपुकीम रागीम बाकमानु, आन ठीक पशो डा इनाम ताइनीम। परमप्रभु यावे आ अरेशो मटीब नु मरिम्शो पाइबपुकीमी यो आन मरिम्शो पशो डा इनाम ताइनीम। १ पत्रुस ४:१७-१८

## 12

परमप्रभु आ अरेशो टिचा माल्लो

- 1 सु सुमी शेंसीतीके दाकनीमी, मेकोमी जोक्तीक दाकनीम। सुमी हुइक्तीक काइ मदाकनीमी, मेको निप्स मपाइश्शो बाकनीम। हितोपदेश १३:१; हितोपदेश १३:१८
- 2 परमप्रभु यावेमी रिम्शो पाइब मुर आन कली दाकब। दूली मिम्शा हेंथे पाइब आन कली चहिं दोस गेब।
- 3 परमप्रभु यावे आ अरेशो मटीब रिम्शो मबाकनीम। तन्न ठीक पाइब बोल्यो शाकश पाइश्शो रवा खोंदेंशो बाकनीम।
- 4 रिम्शो मीश आ वोंडश आ सिरपेच खोंदेंशो बाकब। मुने तोकब मीश चहिं आ वोंडश कली राकशो रुश खोंदेंशो बाकब। हितोपदेश ३१:१०-३१
- 5 ठीक पाइब मुर आन मिम्शो ठीक बाकब। तन्न परमप्रभु यावे आ अरेशो मटीब आन अर्ती चहिं दूली बाकब।
- 6 परमप्रभु यावे आ अरेशो मटीब आन लोत्र मुर साइक्तीक बाकब। तन्न रिम्शो थुं पाइश्शो मुर आन लोत्रमी मेको आन कली प्रोंडब।
- 7 परमप्रभु यावे आ अरेशो मटीबपुकी बेकशा जाम्शा लाइनीम। ठीक पाइब नु मेको आन खिं डा मुर नोले सम्म लीनीम। हितोपदेश १०:२५
- 8 निप्स पाइश्शो मुरपुकी मान ताइनीम। दूली थुं पाइश्शो मुर आन कली चहिं महिकनीम।
- 9 “ठेयब मुर नड” देखु पा जचा मताइब मुर दुम्चा क्येडा महिकसीशो दुम्शा, वाइल का बाकशो रिम्शो बाकब।
- 10 ठीक पाइब मुरपुकीमी आंम बी ब्यफ, क्यारश भेडा आन कली रिम्शो कोवनीम। तन्न परमप्रभु यावे आ अरेशो मटीबपुकीमी शिशो मपाइनीम। प्रस्थान २३:५
- 11 सु सुमी आंम रूम शोक्नीमी, मेकोमी जचा शुश ताइनीम। तन्न सु सुमी शोर गाकशो लोत्र पा गाकनीमी, मेको निप्स मपाइश्शो बाकनीम। हितोपदेश २८:१९
- 12 परमप्रभु यावे आ अरेशो मटीबपुकी रोइश्शो थोवकीम आस पाइनीम। तन्न ठीक पतीके आ शाकशम फल सिप्पाइकब।
- 13 मरिम्शो पाइब मुर आंम मरिम्शो लोत्रमी ग्याइकचा पुंडसीनीम। तन्न ठीक पाइब मुर श्येत रे ब्रोंडचा ताइनीम।
- 14 मुरपुकी आंम लोत्रम पतीके मान ताइनीम। मिनु गेय पाइब मुरपुकीमी आन गेय डा इनाम ताइनीमी। हितोपदेश १८:२०
- 15 मूर्खपुकी आंम लां नेल्ले “ठीक बाकब” दे मिम्नीम। तन्न जोकब तुइकबमी अर्ती नेंनीम।
- 16 मूर्खपुकीमी आन गाइकचा रीब पा कोंडनीम। तन्न होस पाइश्शो मुर कली मरिम्शो लोत्र पाम्तेकम हना यो, सिक्सी पा बाकब।
- 17 सुमी थमा लोत्र पाइबा, मेकोमी ठीक पतीके कोंडब। तन्न जोल पाइब सांकछीमी गेना हना यो दूली लोत्र पाइब।
- 18 मुर आन ममिम्शु पशो लोत्रमी तरवार खोंदेंशो पा थोकब। तन्न जोकब तुइकब मुर आन लोत्रमी सापाइकब। हितोपदेश १३:३
- 19 थमा लोत्र पाइब मुर गेना हना यो लीनीम। तन्न जोल पाइब मुर याम का ला लीनीम।
- 20 मरिम्शो मिम्ब आन थुंमी जोल ला बाकब। तन्न थुं नाइक्तीक अर्ती गेब ग्येरशा बाकनीम।
- 21 ठीक पाइब मुर आन कली श्येत मदुम्ब। तन्न परमप्रभु यावे आ अरेशो मटीब आन कली श्येतम गिल्लो बाकनीम।
- 22 परमप्रभु यावेम जोल पाइब आन कली तशा ग्रॉग्रा दीब। जोल मपथु, आ अरेशो टीब आन कली तशा ग्येरसीब।
- 23 निप्स पाइश्शो मुरुमी आ तुइश्शो मकोंडब। तन्न मूर्खमी मूर्ख लोत्र पाइब।
- 24 शुश गेय पाइब मुर हुकुम पाइब दुम्नीम। तन्न अल्सी पाइब चहिं वाइल दुम्नीम।

- 25 सुर्ना पतीकेम मुर आन थुं लुकच लपाइक्व। तन्न रिम्शो लोत्रमी मेको आन कली ग्येरपाइक्व। हितोपदेश १६:२४  
 26 ठीक पाइबपुकीमी आन वारच आन कली रिम्शो अर्ती गेनीम। तन्न परमप्रभु यावे आ अरेशो मटीबपुकीमी दूली लां कोइनीम।  
 27 अल्से सिखारीम सिखार मताइनीम। तन्न शुश गेय पतीकेमी मुर आन कली शोंप पाइशशो सेल्ब।  
 28 ठीक पतीक लामी ब्रोंडतीक बाक्व। मेको लां गाक्वपुकी मबेक्नीम।

### 13

- ब्रोंडचा गेब मार बाक्वा?  
 1 जोक्व तुइक्व तौमी आ आफ आ शेंशो दाक्व। तन्न शुक्शी पाइबमी हुइशशो मनेंब। हितोपदेश १:८; १२:३  
 2 आन लोत्रम पतीके मुरपुकीम मारेइ मारेइ रिम्शो ताइनीम। तन्न थमा मसुइक्वा डा मुरपुकी दूली पचा ला दाक्नीम।  
 3 मिम्शा लोत्र पाइब मुरम आंम कली ब्रोंडपाइक्नीम। तन्न ममिम्शु ब्वाक्वपुकीमी आंम कली खतम सेल्नीम। हितोपदेश १२:१८; हितोपदेश २१:२३  
 4 अल्सेपुकी वालनीमी। मिनु मारेइ मताइनीम। तन्न शुश गेय पाइब मुरपुकीमी मारेइ मारेइ ताइनीम।  
 5 ठीक पाइब मुरुमी जोल मदाक्नीम। तन्न परमप्रभु यावे आ अरेशो मटीब मुरुमी मुने दोक्वा डा नु दोस तचा डा गेय ला पाइनीम।  
 6 ठीक पतीकेमी रिम्शो थुं पाइशशो मुर आन कली कोत्रब। तन्न परमप्रभु यावे आ अरेशो मटीब आन पाप पतीकेमी मेको आन कली खतम सेल्ब।  
 7 का निक्शी मुर पुडग बाक्वा यो “क्येट थीब नड” देखु पाइनीम। का निक्शी मुर चहिं क्येट थीब बाक्वा यो “पुडग नड” देखु पाइनीम। प्रकाश २:९; प्रकाश ३:१७  
 8 शुश शोंप बाक्शो मुरुमी आंम कली प्रॉइने चाप्ब। तन्न पुडगपुकी हिंच कोइचा मपुंडसीनीम।  
 9 ठीक पाइब मुर बत्ती खोदेशो छेडछेड पा ब्राइनीम। तन्न परमप्रभु यावे आ अरेशो मटीब आन बत्ती काप्शा लाइब। अय्युब १८:५-६  
 10 ठेयब लेशशो नु सुइ कली ममिम्ब मुर जिचा पोक्व बाक्व। तन्न अर्ती नेंब मुर तुइक्तीके नु बाक्व। हितोपदेश १:५  
 11 मरिम्शो पा चेम्शो शोंप नुप्शा लाइब। तन्न इच्का इच्का पा चेम्शो शोंप बारना बारन लाइब।  
 12 शुश आस पा यो मदुन्त हना, थुं लुकच लाइब। तन्न आ मिम्शो गाप्त हना, ब्रोंडचा गेब रवा बाक्व।  
 13 अर्ती डा लोत्र मदाक्व मुरम आंम कली श्येत चाक्व। तन्न अरेशो टीबपुकीमी इनाम ताइनीम।  
 14 जोक्व तुइक्व मुर आन शेंशो ब्रोंडचा गेब ब्वाक्कु बुक्तीके खोदेशो बाक्व। मेको रे पा मुर मबेक्नीम।  
 15 रिम्शो मिम्ब मुर कली नेल्लेमी दाक्नीम। तन्न खराप मुर आन लां हिंचा डा बाक्व।  
 16 जोक्व तुइक्व मुरुमी निप्स खाप्शा नेल्ल गेय पाइब। तन्न मूर्खमी आंम मूर्ख दुम्तीके कोइब।  
 17 मरिम्शो लोत्र कुरबमी श्येत चाक्व। तन्न थमा सुइक्वा डा लोत्र कुरब मुरम थुं नाइक्वा डा लोत्र चाक्व।  
 18 सुमी अर्ती मनेंबा, मेको पुडग नु सुइम मदाक्शो मुर दुम्ब। तन्न हुइशशो नेंब मुरम मान ताइब।  
 19 मुर आंम दाक्शो तामेनु, आन थुं कली रिम्शो दुम्ब। तन्न मूर्खमी आन मरिम्शो पतीके रे लेत्चा मदाक्नीम।  
 20 सु जोक्व तुइक्व नु गाक्वा, मेको जोक्व तुइक्व दुम्ब। तन्न मूर्ख नु गाक्व श्येत जाइब।  
 21 मरिम्शो पाइब आन कली श्येतम खोइक्व। तन्न ठीक पाइब आ माल्लशो मारेइ मारेइ जाक्दीप्ब। हितोपदेश २८:८; अय्युब २७:१३-१७; उपदेसक २:२६  
 22 रिम्शो मुरुमी आ चच युइ आन कली शोंप हेंशा वोइक्व। तन्न मरिम्शो पाइब आन शोंप ठीक पाइबपुकीम ताइनीम।  
 23 पुडग आन रूमी शुश अन्न खेल्ब। तन्न ठीक मपाइबमी मेको रोइशशा लाइक्व। हितोपदेश २२:१५  
 24 सुमी आ तौ कली शेंशा मत्पुबा, मेकोमी आ तौ कली मदाक्व। तन्न सुमी आ तौ कली दाक्वा, मेकोमी आ तौ कली शेंब।  
 25 ठीक पाइबमी रूत्री जचा ताइनीम। तन्न परमप्रभु यावे आ अरेशो मटीब शोत्रलुन बाक्वा माल्नीम।

### 14

- ठीक पतीकेमी रागी बारपाइक्व।  
 1 जोक्व तुइक्व मीश मुरुमी आंम खिं रिम्शो सेल्ब। तन्न मूर्ख मीश मुरुमी आ खिं कली आंम गुइमी प्रेप्ब।  
 2 सु रिम्शो थुं पाइशशो मुर बाक्मे, मेकोमी परमप्रभु यावे कली मान पा हिंब। तन्न सु हेंथे गाक्वा, मेको मुरुमी परमप्रभु यावे कली मदाक्व।  
 3 मूर्ख आन लोत्रमी आंम आन कली तेप्ब। तन्न जोक्व तुइक्व मुर आन लोत्रमी मेको आन कली कोत्रब।  
 4 ब्यफ मबाक्त हना, अन्न वोइक्तीके श्येत्थ बाक्व। तन्न बोल्यो ब्यफ पाइशशो मुर के शुश अन्न बाक्व।  
 5 थमा लोत्र पाइब सांकछीमी जोल मपाइब। तन्न जोल पाइब सांकछीमी जोल पना पन बाक्व। प्रस्थान २०:१६; प्रस्थान २३:१  
 6 शुक्शी पाइबमी तुइक्तीके मालना मालन बाक्त हना यो, मथिप्ब। रुप्ब मुर मोशा जोक्व दुम्नीम।  
 7 मूर्खपुकी नु मगाक्को। मारदे हना मेकोपुकी नु जोक्तीक लोत्र मबाक्व।  
 8 निप्स पाइशशो मुर आन तुइक्तीकेमी तेको लां गाक्वा माल्नीमी तुइक्नीम। तन्न मूर्ख आन मूर्ख पतीकेमी हेंथे लां कोइब।

- 9 मूर्खमी पाप आ पबंम चढेतीके कली शुक्शी पाइनीम। तन्न रिम्शो थुं पाइशो मुरुमी परमप्रभु आ दाकशो तशा ग्येरब।  
 10 थुं डा श्येत थुंम ला तुइक्व। मिनु थुं आ ग्येरसीशो थुंमी ला तुइक्व। रोमी १२:१५  
 11 परमप्रभु यावे आ अरेशो मटीब आ खिं प्रेत्चा पुंडसीब। तन्न रिम्शो थुं पाइशो मुर आन ताम्बु सोशो बोशो दुम्शा लाइब। हितोपदेश १२:७  
 12 मुर आन कली आंम पशो लां ठीक तांडसीब हना यो, नोले मेको बेक्पाइक्व लां बाक्व।  
 13 मुर आ कुल रिस्साक्व हना यो, आ थुं खाइशो बाक्ने चाप्ब। ग्येरसीशो थुं नोले सुर्ता पाइब बाक्व।  
 14 दूली पाइब आन दूली पशो डा ताइनीम। मिनु रिम्शो पाइबमी आन रिम्शो पशो डा ताइनीम।  
 15 मारेड मजोक्व मुरुमी मारेड मारेड लोत्र थमा सुडक्व। तन्न निप्स पाइशो मुरुमी आन पशो नेल्ल मिन्नीम।  
 16 जोक्वपुकी होस पा मरिम्शो पतीक रे डोन लाइनीम। तन्न मूर्ख मारेड ममिम्शु, होस मपाइब।  
 17 रीब पा गाइक्व मुरुमी मूर्ख गेय पाइब। मिनु मुर आन कली दोपा श्येत गेडा, दे मिम्ब। मेको सुडम मदाक्वा पुंडसीब।  
 18 मारेड मजोक्व मूर्ख गेयम ग्योम्सीशो बाक्नीम। तन्न निप्स पाइशो मुर जोक्तीके सिरपेच गुप्शो खोदेशो बाक्नीम।  
 19 मरिम्शो पाइब मुरपुकी रिम्शो मुर आन डोंइती बाप्नीम। मिनु परमप्रभु यावे आ अरेशो मटीबपुकी ठीक पाइब आन लाप्चोमी बाप्नीम।  
 20 आंम नेक्था डा मुरुमी पुडग कली मदाक्नीम। तन्न शोप पाइशो मुर आन के वारच शुश बाक्नीम।  
 21 सुम आ नेक्था डा मुर कली दिप्वा, मेकोमी पाप पाइब। तन्न सुमी पुडग आन कली वारच पाइबा, मेको ग्येरसीशो मुर बाक्व। भजन संग्रह ४१:२  
 22 मार, मरिम्शो मिम्शा पाइब हेंथे लां मगाक्नीमी, डा? रिम्शो पचा मिम्शा पाइबमी गेना हना यो दाकशा मप्रोंइचा पुंडसीनीम।  
 23 गेय पतीक नेल्लेमी दारतीक बाक्व। तन्न लोत्र पा ला बाक्व मुर पुडग दुम्ब।  
 24 जोक्व मुर आन तुइक्तीके आन सिरपेच खोदेशो बाक्व। तन्न मूर्ख आन पशो आन माला खोदेशो बाक्व।  
 25 थमा सांकळीमी मुर आन कली प्रोंडब। तन्न जौल पाइब सांकळीमी जौल ला पाइब।  
 26 परमप्रभु यावे कली मान पा हिंचा, मेको मुर आ खुइशो ब्रोंइशा बाक्तीक बाक्व। मेको आ आलपुकीमी यो मेको ताइनीम। हितोपदेश १८:१०  
 27 परमप्रभु यावे कली मान पा हिंचा ब्वाक्कु बुक्तीक खोदेशो पा ब्रोंइतीक बाक्व। मेको रे पा मुरपुकी बेक्पाइक्व आ ब्वारद रे ब्रोंइनीम।  
 28 पिप आ दारस आ रागी डा शुश मुर बाक्नीम। तन्न मुर नुप्तेक्म हना, हुकुम पाइब जाम्शा लाइब।  
 29 रीब पा मगाइक्व शुश रुप्ब मुर बाक्व। तन्न रीब पा गाइक्व मुर मूर्ख दुम्शा लाइब। हितोपदेश १६:३२; हितोपदेश १९:११  
 30 नांडसीशो थुंमी मुर आन कली ब्रोंइचा गेब। तन्न गेहेमी मुर आन रुश मुपाइक्व।  
 31 सुम पुडग आन कली दिप्वा, मेकोमी पुडग आन कली सेल्ब कली शुक्शी पाइब। तन्न सुमी पुडग आन कली शिशी पाइबा, मेकोमी परमप्रभु यावे कली मान पाइब। हितोपदेश १७:५; अय्युब ३१:१३-१५; मती २५:४०  
 32 परमप्रभु यावे आ अरेशो मटीबपुकी मरिम्शो पतीकेमी जाम्शा लाइनीम। तन्न ठीक पाइब मुर आंम आन गेना हना यो रिम्शो पतीकेमी ब्रोंइशा बाक्वा ताइनीम।  
 33 रुप्ब मुर नु तुइक्तीक बाक्व। तन्न मूर्ख आन थुंमी तुइक्तीक मथिसीब।  
 34 रागीम ठीक पाइब शुश बाक्तेक्म हना, मेकोपुकीम मेको रागी ठेयब नु रिम्शो सेल्नीम। तन्न मरिम्शो पाइब शुश बाक्तेक्म हना, मेको रागी कली महिक्सीशो सेल्नीम।  
 35 पिपमी जोक्शा गेय पाइब कली दाक्व। तन्न मुने पचा डा गेय पाइबमी पिप आ गाइशो डा सजाइ ताइब। उत्पत्ती ४१:३७-४०

## 15

हाकशो कुलम ग्येरपाइक्व

- 1 ब्रोंवशो पा लोत्र लेशोनु, गाइक्तीके तेक्व। तन्न हुइशो पशो लोत्रमी मुर आन कली गाइक्पाइक्व। हितोपदेश २५:१५; १राजा १२:१३-१६  
 2 जोक्व तुइक्व मुरपुकीमी लोत्र पाम्तेक्म हना, नेंबपुकी जोक्व दुम्शा दाक्नीम। तन्न मूर्ख आन लोत्र शोर गाक्शो बाक्व।  
 3 परमप्रभु यावेमी नेल्ल ताइब। मेकोमी रिम्शो पाइब नु मरिम्शो पाइब नेल्ल आन कली ताइब। २इतिहास १६:९  
 4 रिम्शो लोत्र मुर आन कली ब्रोंइचा गेब रवा खोदेशो बाक्व। तन्न दूली लोत्रमी मुर आन थुं जिक्व।  
 5 मूर्खमी आ आम आफ आस शेंशो लोत्र मपाइब। तन्न सुमी शेंशो नेंशा पाइबा, मेको होस पाइब बाक्व।  
 6 ठीक पाइब मुर आन खिंमी शुश शोप बाक्व। तन्न परमप्रभु यावे आ अरेशो मटीबपुकी श्येत जाइनीम।  
 7 जोक्व तुइक्व मुर आन लोत्रमी जोक्तीक फ्राइब। मूर्ख आन लोत्र मोदेशो मबाक्व।  
 8 परमप्रभु यावे आ अरेशो मटीब आन चढेशो तशा, परमप्रभु यावे ग्रांघा दीब। तन्न रिम्शो थुं पाइशो मुर आन पुंडशो नेंशा ग्येरसीब। हितोपदेश २१:२७; यसेया १:११,१५; हितोपदेश २८:९; लूका १८:९-१४  
 9 परमप्रभु यावे आ अरेशो मटीब मुर आन लां परमप्रभु यावे कली ग्रांघा बाक्व। तन्न सुमी ठीक पाइबा, मेको कली दाक्व।  
 10 नोले शोंइसीशो मुर हिंचा डा सजाइ ताइनीम। तन्न हुइशो काइ मदाक्व मुर बेक्वा माल्ब।

11 दोदेशो पा परमप्रभु यावेमी बेक्शो मुर आन बाक्तीके नु जाम्शा लतीके तुडक्वा, मोदेशो पा मुर आन थुं कली यो तुडक्व। अय्युब २६:६; भजन संग्रह १३९:८; प्रकाश ९:१,११; येरमीया १७:१०

12 मुरुम शुक्शी पाइब आन कली “मोदेशो मपावो” दे अरेशो काइ मदाक्नीम। मेकोपुकी जोक्व तुडक्व मुर आन नेक्था मलाइनीम।

13 ग्येशो थुं पाइश्शो मुर आ कुल हाक्सीशो तांडसीब। तन्न सुर्ता पाइब आन थुं लुकच लाइब।

14 रुक्म थुं पाइश्शो मुरुमी जोक्तीके माल्ब। तन्न मूर्खमी मूर्ख पचा ला दाक्नीम।

15 श्येत जाइब आन नाक्ती मरिम्शो बाक्नीम। तन्न ग्येशीशो थुं पाइश्शो मुर आन नाक्ती नेल्ल चाड खोदेशो बाक्नीम। हितोपदेश १७:२२

16 शुश शोपु नु मेको आ पर्वम श्येत जचा क्येडा इच्का ला शोपु बाक्शा परमप्रभु यावे कली मान पा हिंचा रिम्शो बाक्ब।

17 काइ मदाक्शो मुर नु ब्रोव्रशो श्ये खमे जचा क्येडा, दाक्मुशा चूले खमे जशो रिम्शो बाक्ब।

18 शुश गाइक्व मुरुमी जिचा पोक्ब। तन्न रीब पा मगाइक्व मुरुमी जितीके तेक्ब।

19 अल्सी आन लां चूम ब्रीशो बाक्ब। तन्न रिम्शो थुं पाइश्शो मुर आन लां थेल्लो बाक्ब।

20 जोक्व तुडक्व थुं पाइश्शो तौमी आ आफ कली ग्येशपाइक्व। तन्न मूर्ख तौमी चहिं आ ममा कली महिक्व। हितोपदेश १०:१

21 निप्स मपाइश्शो मुर मूर्खे गेय पचा ग्येशीनीम। तन्न रुक्म मुर गेना हना यो आंम लांम गाक्नीम।

22 अर्ती मनंथु गेय पाइब आन गेय शोर गाक्शो बाक्ब। तन्न अर्ती गेब शुश बाक्तेक्म हना, मेको आन गेय रिम्शो दुम्ब।

हितोपदेश ११:१४

23 मुरुम ठीक पा लोव्र लेन्ने चाप्टु हना, ग्येशपाइक्व। माल्ची ना माल्लो लोव्र पचा, गिश रिम्शो बाक्ब।

24 जोक्व तुडक्व मुर ब्रोइचा गेब ग्येथ्ल लां लाइब बाक्नीम। मोपा बेक्शो मुर आन बाक्तीक लतीक लुकच लां मलाइनीम।

25 परमप्रभु यावेमी टेयब लेशो मुर आन खिं प्रेशा गेब। तन्न वोंइश बेक्शो मीश मुर आन के रू डा सांद एर ओंथ दुम्चा मगेब।

26 परमप्रभु यावेमी मरिम्शो मुर आन मिम्शो लोव्र ग्रंथा दीब। तन्न रिम्शो मुर आन लोव्र तशा ग्येशीब।

27 शिममी आंम खिं डा मुर आन कली श्येत गेनीम। तन्न घूस मजाइबपुकी ब्रोइनीम। भजन संग्रह १५:५

28 ठीक पाइब मुरपुकीमी लोव्र लेत्चा क्येडा डोंइती मिम्नीम। तन्न परमप्रभु यावे आ अरेशो मटीबपुकीम हेथे लोव्र पाइनीम।

29 परमप्रभु यावे आ अरेशो मटीब आन क्येडा डोन बाक्ब। तन्न ठीक पाइब आन पुंइशो लोव्र नेब। हितोपदेश १५:२९; यूहन्ना ९:३१

30 ब्रशो कुलमी थुं कली ग्येशपाइक्व। रिम्शो लोव्रमी रां कली बोल्यो सेल्व।

31 सुमी रिम्शो अर्ती नेशा पाइबा, मेको जोक्व तुडक्व मुर आन दातेम बाक्ब।

32 सुमी रिम्शो अर्ती नेशा मपाइबा, मेकोमी आंम कली यो मदाक्ब। तन्न अर्ती नेबमी आ रुप्तीके बारपाइक्व।

33 परमप्रभु यावे कली मान पा हिंतीके तुडक्तीक कली शेंसीतीक बाक्ब। मिनु मान तचा क्येडा डोंइती ब्रेम्शो थुं पाइश्शो दुम्चा माल्ब। हितोपदेश १८:१२; हितोपदेश २२:४

## 16

परमप्रभुम मुर आन कली लां कोंइब

1 मुर आन थुंमी मिम्ना मिम्न बाक्नीम। तन्न लोव्र लेत्तीक परमप्रभु यावे रे जाक्ब।

2 आंमा पशो गेय आंमा कली ठीक मिम्सीब। तन्न परमप्रभु यावेमी मुर आन थुं नाक्ब।

3 इन पशो नेल्ल परमप्रभु यावे कली जिम्मा गेन। मिनु इन मिम्शो जाक्दीप्ब। भजन संग्रह ३७:३

4 परमप्रभु यावेमी मारेइ मारेइ नेल्ल गेय पचा कली सेल्लु। आ अरेशो मटीब कली यो नोले डा श्येत नाक्त कली सेल्लु। रोमी ९:२२

5 परमप्रभु यावे टेयब लेशो आन कली तशा ग्रंथा दीब। मेकोपुकी सजाइ मतथु मब्रोंइनीम।

6 दाक्शा गेनायो मप्रोंइतीकेमी मरिम्शो पतीक क्याम्सीब। मिनु सु परमप्रभु यावे कली मान पा हिंबा, मेको मरिम्शो रे डोन लाइब।

7 परमप्रभु यावेमी मुर आन पशो तशा ग्येशाक्व हना, मेको कली आ जोरी सत्रु नु यो गारपाइश्शा वोइक्व। उत्पत्ती ३१:२४; उत्पत्ती ३३:४

8 मरिम्शो पा चेम्शो शुश क्येट क्येडा रिम्शो पा चेम्शो इच्का खोइ क्येट ठीक बाक्ब। हितोपदेश १५:१६

9 मुरुमी आंम आ लां आंमान मिम्नीम। तन्न परमप्रभु यावेमी मेको आन गाक्तीक लां कोंइब। हितोपदेश १९:२१; येरमीया १०:२३

10 परमप्रभु यावेमी पिप कली ब्वाक्पाइक्व। मेकोमी निसाफ पशोनु, दूली निसाफ मपाइब।

11 ठीक पा नाक्तीक नु पुक्तीक परमप्रभु यावे केन बाक्ब। झोलाम बाक्शो नाक्तीक फुल्लु नेल्ल आ सेल्लो बाक्नीम। हितोपदेश ११:१

12 पिपमी मरिम्शो पाइब आन कली तशा ग्रंथा दीब। मारदे हना ठीक पतीकेमी आ राज्य बोल्यो सेल्व।

13 पिपमी ठीक लोव्र पाइब आन कली तशा ग्येशीब। थमा लोव्र पाइब आन कली दाक्ब।



- 14 पिप गाडक्ताक्व हना, मुर साडक्ने चाण्व। रुण्व मुरुमी आ गाडक्चा नाडक्पाडक्ने चाण्व। हितोपदेश १९:१२; हितोपदेश २०:२
- 15 पिप आ कुल हाक्को बाकत हना, ब्रोंड्या गेब। मेको आ दाक्को सोव्रशो रू कली रेउ खोदेशो बाक्ब।
- 16 क्येख मुन तचा क्येडा तुडक्तीक तचा रिम्शो बाक्ब। चांदी तचा क्येडा रुप्तीक तचा रिम्शो बाक्ब।
- 17 रिम्शो थुं पाइशो मुर मरिम्शो लां रे डोन बाक्ब। मिनु मरिम्शो मपथु, होस पा बाक्ब ब्रोंड्या ताडनीम।
- 18 मुर खतम दुम्चा क्येडा डोंडतीं टेयब लेत्नीम। नुप्चा क्येडा डोंडतीं मुर बोर्नीम। हितोपदेश १८:१२
- 19 टेयब लेशो आन रोडशो थोव्रक योक्सीचा क्येडा ब्रेम्शो दुम्शा, श्येत जशो आडक्च मुरपुकीं नु बाक्चा रिम्शो बाक्ब।
- 20 सुम शेशो लोव्र नोफा दाइश्या नेंबा, मेको मुर सोशा बोशा ग्येत्थ लाइब। सु परमप्रभु यावे कली थमा सुडक्बा, मेको ग्येरसीशो बाक्ब।
- 21 जोक्ब तुडक्ब थुं पाइशो मुर कली रुण्व मुर देंनीम। ब्रोंव्रशो लोव्रम शेंतीक कली बारपाडक्ब।
- 22 सु नु तुडक्तीके बाक्बा, मेको ब्रोंड्या गेब ब्वाक्कु बुक्तीके खोदेशो बाक्ब। तन्न मूर्ख आन मूर्ख पतीकेमी सजाड ताडनीम।
- 23 जोक्ब तुडक्ब मुरुमी लोव्र पचा क्येडा डोंडती मिन्मीम। मोपा आन जोक्तीक बारना बारन लाइब।
- 24 ब्रोंव्रशो लोव्र खुदो खोदेशो बाक्ब। मेकोमी थुं कली ब्रोंव्रशो नु रां कली बोल्यो सेल्ब। हितोपदेश १२:२५
- 25 मुरुमी का निक्शी लां रिम्शो बाक्ब, दे मिन्मीम। तन्न नोले मेको लां बेक्तीक लां बाक्ब।
- 26 गेय पाइब आन कोव्रजमी मेको कली गेय पपाडक्ब। मेको आ शोव्रलुमी गेय पतीक थुं गेब।
- 27 हिंचा डा पा मरिम्शो पाइब मुरुमी मरिम्शो ला मिम्ब। मेको आ लोव्र मी खोदेशो पा व्रशो बाक्ब।
- 28 दूली मुरुमी जिचा पोक्ब। मिनु नोफा मुडक्वमी गारशो वारच आन कली फ्राब।
- 29 हुश खाक्श पोक्ब मुरुमी आ नेक्था डा मुर आन कली यो हेंथे पपाडक्ब। मिनु मेको आन कली मरिम्शो लां खोडक्पाडक्ब।
- 30 मिक्च रिक्बमी दूली गेय पचा मिम्शो बाक्नीम। मोदेशो मिम्शा सिक्सी पा बाक्बमी मरिम्शो पचा चिक्को बाक्ब।
- 31 बोइशो चां मान ततीक सिरपेच खोदेशो बाक्ब। मेको ठीक पाइब मुर आन लांम ला थीसीब। हितोपदेश २०:२९
- 32 लडाइ पाइब बोल्यो मुर दुम्चा क्येडा फाल्व मुर दुम्चा रिम्शो बाक्ब। मिनु सहर कली प्राब क्येडा आंम गाडक्चा कली तेक्ब रिम्शो बाक्ब। हितोपदेश १४:२९
- 33 मुरुम फेन्टे आण्शा, परमप्रभु यावे कली हिल्लो पाडनीम। मिनु परमप्रभु यावेमी लोव्र लेण्व।

## 17

### ग्येरशो थुं

- 1 जिना जिन ब्रोंव्रशो जचा क्येडा सिक्सी पा थुं नाइश्या पोक्को खमे जचा रिम्शो बाक्ब। हितोपदेश १५:१७
- 2 जोक्ब तुडक्ब वाइलमी आ होव्रप आ मरिम्शो पाइब तौ कली अरेब। मिनु मेको वाइलमी खिं डा तौ खोदेशो पा रू ताइब।
- 3 सुन चांदी यपाइश्या नाक्चा कली ग्योबं नु मी माल्व। तन्न परमप्रभु यावेमी मुर आन थुं नाक्ब भजन संग्रह ६६:१०
- 4 मरिम्शो पाइब मुरुमी परमप्रभु यावे आ अरेशो मटीब आ लोव्र नेंब। जोल पाइबमी खतम सेल्तीक लोव्र नेंचा कली नोफा दाइक्ब।
- 5 सुम वुडग आन कली शुकशी पाइबा, मेकोमी आ कली सेल्ब, परमप्रभु यावे कली आडक्च सेल्ब। सु मुर आन कली श्येत जशो तशा ग्येरसीबा, मेको सजाड मतथुं मब्रोंडब। हितोपदेश १४:३१
- 6 खाल्पा खाल्पी आन सिरपेच आन चच युड नमी। मिनु आल आन ग्योम्सीशो आन आम आफ बाक्नीम।
- 7 मूर्खपुकीमी रिम्शो लोव्र पचा मशिरनीम। मेको क्येडा टेयब मुरपुकीमी जोल पचा मशिरब।
- 8 घूस गेबमी आ घूसमी मारेड मारेड पने चाण्व, दे मिम्ब। मेको ते लत हना यो आ देशो खाण्व।
- 9 सुमी अरु आन मरिम्शो पशो सुम्बा, मेकोम वारच सेल्ब। तन्न मुर आन मरिम्शो पशो देंना देंन बाक्बमी वारच आन कली फ्राब।
- 10 मूर्ख मुर कली सहे खेयप तुप्चा क्येडा जोक्ब तुडक्ब मुर खेयप का देशोनु रुण्व।
- 11 मरिम्शो मुरपुकीमी गेना हना यो जिचा पोक्नीम। तन्न मेको कली सजाड गेचा कली शिशो मपाइब मुर सोइशो बाक्ब।
- 12 मूर्ख मुरुमी मूर्ख पचा ना गुम्चा क्येडा आ चाडक्ब रोंडसीशो वां कली गुम्चा रिम्शो बाक्ब।
- 13 सुमी रिम्शो पाइब आन कली मरिम्शो पाइबा, मेको आ खिं रे मरिम्शो गेनायो मलाइब।
- 14 दोपा प्रोंडशो ब्वाक्कु बोल पा शाडक्बा, मोपा जिचा पोक्तीक बाक्ब। मोपतीके जिचा टेयब दुम्चा क्येडा डोंडती मेको कली तेक्कीन।
- 15 सुमी परमप्रभु यावे आ अरेशो मटीब आ पर्वम “ठीक पाइब बाक्ब” देंबा, मिनु ठीक पाइब आ पर्वम “ठीक पाइब मबाक्ब” देंबा, मेको निम्फा आस कली परमप्रभु यावेमी ग्रॉग्रा दीब। यसेया ५:२३
- 16 मूर्ख आ गुडमी तुडक्तीक थुं ग्याण्चा कली क्येट मारदे माल्बा डा?। मेको के शेंसीतीक थुं मबाक्ब।
- 17 वारचमी गेना हना यो दाक्ब। लोक्बपुकीं चहिं श्येत जशो ना वारच पचा कली जरमेशो बाक्नीम।
- 18 सु आ नेक्था डा मुर आ पर्वम जमानी बाक्चा कली सल्ला पाइबा, मेको मरुण्व मुर बाक्ब। हितोपदेश ६:१-५

- 19 जिचा दाकबमी पाप कली यो दाकब। लाइशो लापचो सेल्लमी मुर आन रुश जिक्पाइकब।
- 20 मरिश्शो थुं पाइशो मुर आन कली मारेडम मगापब। दूली पा जोल पाइब मुर हिंचा डा श्येत जाइब।
- 21 मूर्ख तौमी आ आम आफ आस कली सुर्ता पपाइकब। मूर्ख आ आफ गेनायो ग्येरचा मताइब।
- 22 ग्येरसीशो थुमी रां कली सापाइकब। तन्न लुकच लशो थुमी मुर कली सोवपाइकब। हितोपदेस १५:१३-१५
- 23 परमप्रभु यावे आ अरेशो मटीब मुरुमी निसाफ दूली सेल्चा कली खुइशशा घूस जाइब। प्रस्थान २३:८
- 24 रुबब मुरुम आ तुइक्तीके माल्ब। तन्न मूर्खमी रागी आ सुर सम्म कोव्रशो बाकब। हितोपदेस ४:२५
- 25 मूर्ख तौमी आ आफ कली सुर्ता पपाइकब। आ आम कली गेना हना यो डाकपाइकब।
- 26 दोस मताइब मुर कली सजाइ गेचा क्येडा ठेयब मुर आन कली रिश्शो पचा कली तुप्या मरिश्शो बाकब।
- 27 जोकब थुं पाइशो मुर शुश मब्वाक्नीम। रुबब मुर आन गेय पचा डोंइती मिश्शा, बाक्नीम। हितोपदेस १०:१९; याकूब १:१९
- 28 मूर्ख ब्वाल्लेड पा बाक्त हना, मूर्ख मुर यो रुबब मुर खोदेशो तांडसीब। लोव्र मपाम्तेकम हना निप्स पाइशो खोदेशो तांडसीनीम। अय्युब १३:५

## 18

लोव्रमी बेक्तीक नु ब्रोंइतीक बाकब

- 1 सु मुर रे ब्राशा बाकबा, मेकोमी आंम कली ला रिश्शो पचा दाकब। मेकोमी रुप्तीक थुं पाइशो मुर आन लोव्र काइ मनैब।
- 2 मूर्खमी मारेड लोव्र रुप्या थुं मपाइब। तन्न “गो जोक्नुड” दे आ मिश्शो लोव्र ला पाइब।
- 3 परमप्रभु यावे आ अरेशो मटितीक नु महिकमुतीके यो जाकब। मिनु मुने दोक्तीक नु मान मततीके यो जाकब।
- 4 मुर आन लोव्र शुश लुकच लशो ब्वाक्कु खोदेशो बाकब। तुइक्तीके शुश ब्वाक्कु बुक्शा गूशो खोदेशो बाकब।
- 5 दोस ताइब आ कुल कोव्रशा, दोस मताइब कली दूली सेल्चा, ठीक निसाफ ममाइ। ब्यवस्था १:१७
- 6 मूर्ख आ लोव्रमी जिचा पोक्ब। मिनु मेको तुप्या पुंडसीब।
- 7 मूर्ख आ लोव्र पतीकेमी आंमान खतम दुम्ब। आ लोव्रमी मेको कली साइकब।
- 8 नोफा मुइकब आन लोव्र शुश ब्रोव्रशो जचा थोव्रक खोदेशो बाकब। मेको मुर आन थुं सम्म जाकदीपब। हितोपदेस २६:२२
- 9 अल्सी पाइब मुर हेंथे पाइब आ लोक्ब बाकब। हितोपदेस १०:४
- 10 परमप्रभु यावे आ नें बोल्यो लाइशो खिं खोदेशो बाकब। ठीक पाइबपुकी मेकेर दोरशा लशा, ब्रोंइशा बाक्नीम। हितोपदेस १४:२६; भजन संग्रह ६१:४
- 11 थीब मुर आन शोंप मेको आन कली बोल्यो सहर खोदेशो बाकब। मेकोपुकीमी आन शोंप कली ठेयब गारो खोदेशो मिन्मीम। हितोपदेस १०:१५
- 12 खतम दुम्चा क्येडा डोंइती मुर ठेयब लेत्नीम। मान तचा क्येडा डोंइती मुर ब्रेम्शो दुम्नीम। हितोपदेस १६:१८
- 13 सुमी लोव्र नेंचा क्येडा डोंइती लोव्र लेप्या, मेको मूर्ख दुम्तीके मुने दोक्ब मुर बाकब।
- 14 मुर आ थुमी रां डा रोड फाल्ने चापब। तन्न आ थुं लुकच लत हना, सुम फाल्ने चाप्या डा?
- 15 निप्स पाइशो मुर आ जोक्तीके बारना बारन लाइब। जोकब तुइक्ब मुरुमी मेको क्येडा जोक्चा कली नोफा दाइकब।
- 16 सुमी कोसेली गेबा, मेकोमी ठेयब मुर नु लोव्र पचा यो ताइब। उत्पत्ती ४३:११
- 17 सुमी जितीकेमी डोंइती ब्वाकबा, मेको कली नोले डा मुर मब्वाकम सम्म नेल्लेमी ठीक मिश्शा थमा सुइक्नीम।
- 18 फेन्टे आशोनो, जिचा खेचा देक्ब। मिनु ठेयब मुर आन जिचा नाइक्पाइकब।
- 19 थुं खाइक्पाइशो लोक्ब कली लेम्चा गारो हिरशो सहर ग्राचा क्येडा श्येत बाकब। मुर आन जितीक खेतीके बोल्यो खिं डा आगलो खोदेशो बाकब।
- 20 मुर आन लोव्रमी ब्रोंइनीम। मेको आन रिश्शो लोव्र पशोमी जचा ताइनीम। हितोपदेस १२:१४
- 21 मुर आन लोव्रमी बेक्तीक नु ब्रोंइतीक बाकब। तेको कली दाक्नीनी, मेको आ ततीक ताइनीनी।
- 22 सुमी मीश ताइबा, मेको कली रिश्शो दुम्ब। मेको मुर परमप्रभु यावे आ दाक्शो मुर दुम्ब। हितोपदेस १९:१४; हितोपदेस ३१:१०
- 23 पुडग मुरुमी ब्रेम्शो लोव्र पा पुंडनीम। तन्न शुश शोंप पाइशो मुरुमी ठेयब लेशो लोव्र लेत्नीम।
- 24 का निकशी मुरुमी “वारच नड” देंखु पाइनीम। तन्न आंम लोक्ब क्येडा थमा पा दाकब वारच गेना हना यो आ वारच नु काथा बाकब। हितोपदेस १७:१७

## 19

पुडग आन कली वारच पावो

- 1 दूली लोव्र पा गाक्ब मूर्ख दुम्चा क्येडा पुडग नु गेना हना यो रिश्शो पाइब मुर दुम्चा रिश्शो बाकब। हितोपदेस २८:६
- 2 गे मार मार माल्नीनी मेको आ परबम मतुइक्ताक्नी हना, मेको शोर गाक्शो बाकब। सु रीब पा गाक्बा, मेको आ लॉ जाम्ब।
- 3 मुर आन मूर्ख पतीकेमी खतम दुम्नीम। मो हना यो मेकोपुकीमी परमप्रभु यावे कली दोस गेनीम। बिलाप ३:३९

- 4 शुश क्येट बाकब मुर नु शुश वारच बाकनीम। तन्न पुडग आन कली आन बाकशो वारचमी यो प्रॉइनीम। हितोपदेश १४:२०
- 5 जोल पा सांकछी बाकब मुर सजाइ मतथु मब्रॉइब। मिनु जोल पाइब यु बुडशशा प्रोक्ने मचापब। हितोपदेश २१:२८; ब्यवस्था १९:१८-२१
- 6 शुश मुरुमी ठेयब मुर आन शिशी दाकनीम। मिनु सुमी अरु कली गेबा, मेको आ वारच शुश बाकनीम।
- 7 पुडग मुर कली आ लोकबपुकीमी यो पॉइनीम। मेको आन क्येडा आ वारचपुकीमी प्रॉइनीम। मेकोमी मेको आन कली ब्रेपब, तन्न सुडम मननीम।
- 8 सुम आम कली दाकबा मेकोमी तुइक्तीक मालब। रूपब मुर सोशा बोशा ग्येथ लाइब।
- 9 जोल पा सांकछी बाकब मुर सजाइ मतथु मब्रॉइब। मिनु जोल पाइब मुर खतम दुम्नीम
- 10 मूर्ख मुर क्येट थीब मुर खोदेशो पा बाकचा मशिरब। मिनु वाइलमी ठेयब मुर आन कली हुकुम पचा यो मशिरब।
- 11 निप्स पाइशशो मुर ओखां पा गाइकनीम। मिनु अरुमी थुं खाइक्तीक लोत्र पाम्तेकम हना यो, मेको सिक्सी पा बाकचा आ मान बाकब। हितोपदेश १४:२९
- 12 पिप आ गाइशशो गुप्स आ ग्रीशो खोदेशो बाकब। आ दाक्तीक चहिं घांस तार दोकशो सुनी डा सीत खोदेशो बाकब। हितोपदेश १६:१४-१५
- 13 निप्स मपाइशशो तौ आ आफ कली श्येत बाकब। मिनु गेना हना यो जिचा पोक्ब मीश, तप तप पा याप्शो ब्वाक्कु खोदेशो बाकब। हितोपदेश २७:१५-१६
- 14 खिं नु शोप आम आफ रे तांडसीब। तन्न होस पाइब मीश चहिं परमप्रभु यावे रे तांडसीब। हितोपदेश १८:२२
- 15 अल्सी पतीकेमी निन्दा पपाइक्ब। अल्से शोत्रलुन बाकचा मालनीम।
- 16 सुमी परमप्रभु यावे आ शेंशो टीनीमी, मेको ब्रॉइचा ताइनीम। सुमी मटीनीमी मेको बेक्चा मालनीम। हितोपदेश १६:१७
- 17 सुमी पुडग कली शिशी पा गेबा, मेकोमी परमप्रभु यावे कली गेब। मिनु परमप्रभु यावेमी मेको कली नेल्ल लेपब। हितोपदेश १४:३१; भजन संग्रह ४१:२-४; दानीएल ४:२४; मत्ती ५:७; मत्ती २५:४०; २कोरिन्थी ९:६
- 18 आस बाकम सम्म इ तौ कली शेंशा तुपो। तन्न मेको कली तुप्शा मसतो। ब्यवस्था २१:१८-२१
- 19 रीब पा शुश चुरब मुर सजाइ ताइब। गे मेको कली तेक्चा माल्तीवी हना, मेको क्येडा शुश गाइक्ब।
- 20 नोफा दाइशशा अर्ती नेंशा, शेंतीक टिने। मो पाइतीनी हना, तुइक्तीक पाइशशो मुर दुम्नीनी।
- 21 मुर आ थुमी शुश मिन्तीक बाकनीम। तन्न परमप्रभु यावे आ मिम्शो ला दुम्ब। हितोपदेश १६:९
- 22 शिशी पाइब मुर दुम्चा रिम्शो बाकब। जोल पाइब दुम्चा क्येडा पुडग दुम्चा रिम्शो बाकब।
- 23 परमप्रभु यावे कली मान पा हिंचा ब्रॉइतीक बाकब। मो दुम्त हना, गे महिंथु, श्येत मजथु बाकनीनी।
- 24 अल्सेपुकीमी आन गुड खमेम खुम्नीम। तन्न आन गुड शोत्र सम्म मचाकनीम। हितोपदेश २६:१५
- 25 शुक्शी पाइब आन कली तुप्शोनु, मारेइ मजोक्बपुकी होस पा बाकचा शेंसीनीम। निप्स पाइशशो मुर कली हुइशशोनु, मेको क्येडा जोक्ब दुम्ब। हितोपदेश २१:११
- 26 सुमी आ आफ कली श्येत गेबा नु आ आम कली खेरबा, मेको ग्रंथा दिशो नु मुने तोक्ब तौ बाकब।
- 27 आं तौ, गे जोक्ब मुर आन लोत्र रे हेंथे लचा प्रोनो। मो पाप्तीवी हना गे शेंशो लोत्र नेंने चाप्नेवे। याकूब १:२२
- 28 शोर गाकशो सांकछीमी निसाफ पतीक आ पबर्म शुक्शी पाइब। मेकोमी परमप्रभु यावे आ अरेशो मटीब। मरिम्शो पतीके जचा शोत्रक खोदेशो पा दाकब।
- 29 सजाइ शुक्शी पाइब आन कली बाकब। तुप्तीके मूर्ख आन ची कली मालब। हितोपदेश २६:३

## 20

जोल पा नाक्तीक

- 1 अडगुर शांबुमी हेंथे ब्वाक्पाइक्ब। राकसीमी राम्शी पपाइक्ब। सु मेको तूशा दुक्नीमी, मेको जोक्ब तुइक्ब मदुम्नीम। हितोपदेश २३:२९-३५; हितोपदेश ३१:५; होसे ४:११
- 2 पिप आन शुश गाइशशो गुप्स आन ग्रीशो खोदेशो बाकब। सुम मेको कली गाइक्पाइक्बा, मेको साइक्चा पुंडसीब। हितोपदेश १६:१४
- 3 राम्शी पतीके रे डोन बाकब मुरुमी मान ताइब। तन्न मूर्ख नेल्ल रीब पा राम्शी पाइब बाकनीम।
- 4 ग्यु दुम्तीके अल्सेमी ब्यफ मवाक्ब। मिनु अन्न रिक्ची ना मारेइ यो मताइब। हितोपदेश ६:६-११;
- 5 मुर आन थुं डा मिम्शो लुकच लशो ब्वाक्कु खोदेशो बाकब। तन्न निप्स पाइशशो मुरुमी ला मेको कीशा गुंइने चापब।
- 6 शुश मुरुमी “गो रिम्शो मुर नड” दे अरु आन कली तुइक्पाइक्नीम। तन्न थमा सुइक्चा डा मुर सु थिन्ने चाम्सीबा डा?
- 7 ठीक पाइब मुर गेना हना यो रिम्शो पाइब बाकब। मेको आ आलपुकी ग्येरसीशो बाकनीम। भजन संग्रह ११२:१२
- 8 निसाफ पाइब निक्तीकेम निरशो पिपमी कोत्रशा, रिम्शो नु मरिम्शो नेल्ल तिलब। भजन संग्रह १०१:३
- 9 मिनु सुमी “गो आं थुं रिम्शो सेल्ला। आं पाप क्याम्ताक्ड” देंने चापबा डा? हितोपदेश ३०:१२; अय्युब ४:१७; अय्युब ९:२-३
- 10 जोल पा नाक्तीक नु मगारशो पुक्तीक निम्फा परमप्रभु यावे कली ग्रंथा बाकब।
- 11 मिनु आल यो आन पतीकेमी दोदेशो दुम्नीमी मेको कौइनीम। ठीक पाइब नु रिम्शो थुं पाइशशो आल बाकब, दे तुंडसीब। हितोपदेश २२:६
- 12 नेंचा कली नोफा नु कोत्रचा कली मिक्च मेको निम्फा परमप्रभु यावेमी सेल्लु।

- 13 शुश मडप्पो, मारदे हना गे पुडग दुम्नेवे। सेंसीशा बाक्को। मिनु शुश जचा ताइनेवे।  
 14 ग्याक्ब मुरुमी “एको मरिम्शो बाक्ब। मरिम्शो बाक्ब” दे इच्का आइक्ची लशा “गो सस्तो ग्याप्ता” दे आ नें बोरपाइक्ब।  
 15 शुश सुन नु शुश क्येट लाइब हीरा बाक्नीम। तन्न मेको आन क्येडा जोक्तीक लोत्र पाइब मुर रिम्शो बाक्ब।  
 16 अर्को रागी डा मुर आ पर्वम जमानी दुम्शो मुर, आ वा रोइशशा लतीन। मुर आ पर्वम जमानी बाक्शो आ मारेइ मारेइ नेल्ले लतीन। हितोपदेश ६:१-२; हितोपदेश २७:१३  
 17 खुड पा जशो शोब्ले डोंडती शुश ब्रोत्रब। नोले मेको फुल्लु नाक्शो खोदेशो दुम्ब। हितोपदेश ९:१७  
 18 अर्ती नेंब मुर आ मिम्शो रिम्शो दुम्ब। जोक्ब तुइक्ब आन लोत्र नेंशा ला लडाइ पावो। हितोपदेश २४:६  
 19 लोत्र क्याल्ब मुरुमी खुइशशा पशो लोत्र यो फ्राइब। मोपतीके शुश लोत्र पाइब मुर नु वारच मदुमो।  
 20 सुम आ आम आफ आस कली सराप पाइबा, मेको आ बत्ती नेल्ल क्येडा छिडछिडमी काप्ब। हितोपदेश ३०:१७; प्रस्थान २१:१७  
 21 डोंडती रीब पा थेशो रू नोले आसीक मराइब।  
 22 गे मरिम्शो पाइब कली क्येक्क लेलुड मदेनो। परमप्रभु यावेमी पाइब, दे रिम्दो। मिनु इ कली वारच पाइब। हितोपदेश २४:२९; रोमी १२:१७  
 23 जोल पा नाक्तीक तशा परमप्रभु यावे ग्रांया दीब। मिनु दूली नाक्तीक ठीक मबाक्नीम।  
 24 परमप्रभु यावेमी मुर आन कली लां कोइब। सुमी आंम लां रुप्ने चाप्बा डा?  
 25 मुरुमी ममिम्शु “परमप्रभु यावे केन बाक्ब” देशा, कसम जचा, थम हिंचा डा बाक्ब। मारदे हना नोले मिम्शा, मार दुम्बा डा?  
 26 जोक्ब तुइक्ब पिपमी परमप्रभु यावे आ अरेशो मटीब आन कली तिल्ब। मिनु मेको आन कली साइक्ब।  
 27 मुर आन थुं परमप्रभु यावे आ बत्ती बाक्ब। मिनु मेकोमी रां नेल्ल कली कोत्रब। १कोरिन्थी २:११  
 28 गेना हना यो दाक्शा गेनायो मप्रोंडतीकेमी पिप कली खाल पाइब। आ ठीक पतीकेमी आ सासन पतीके मजाम्ब। हितोपदेश १६:१२  
 29 ठिटा आन दारस आन बोल्यो रां बाक्ब। मिनु खाल्पा आन दारस आन बोइशशो चां बाक्ब।  
 30 तुप्शो गारमी लेंशा मरिम्शो मपपाइक्ब। मिनु तुप्शोमी यो मुर आन थुं कली रिम्शो पाइब सेल्ब।

## 21

परमप्रभु कली टीबम रिम्शो पाइब

- 1 पिप आ थुं परमप्रभु यावे आ गुडमी खोला डा ब्वाक्कु खोदेशो बाक्ब। दोथ गे लाइक्चा दाक्ता, मोथ गे लाइक्ब। भजन संग्रह ३३:१५  
 2 मुरुमी आंम कली गेना हना यो “ठीक पाता” दे मिन्मीम। तन्न परमप्रभु यावेमी मुर आन थुं नाक्ब।  
 3 परमप्रभु यावे आ डोंडती मार मार चढ़ेचा क्येडा ठीक पतीके नु रिम्शो निसाफ पतीके आ दाक्शा ब्रतीक बाक्ब। १सामुएल १५:२२; होसे ६:६  
 4 ठेयब लेशो नु बोरशो मुर दुम्चा, परमप्रभु यावे आ अरेशो मटीब आन छेडछेड बाक्ब। मेको पाप बाक्ब।  
 5 शुश गेय पाइब आन मिन्तीकेमी सोशा बोशा ग्येत्थ लां खोइक्पाइक्ब। तन्न रीब पा ममिम्शु गेय पाइब मुर पुडग दुम्ब।  
 6 जोल पा शुश शोंप चेम्तीके फशेमी योल्शा जाम्शो कुन खोदेशो बाक्ब। मोदेशो पाइबपुकी साइक्चा पुंइसीनीम।  
 7 परमप्रभु यावे आ अरेशो मटीब आन हुश खाक्श पोक्तीकेमी साइक्चा पुंइसीनीम। मारदे हना मेकोपुकीमी मार ठीक बाक्मे, मेको पचा मबिल्लीम।  
 8 दोस ताइब मुर आन लां हिरशो बाक्ब। दोस मताइब मुर आन पतीक चहिं ठीक बाक्ब।  
 9 गेना हना यो जिचा पोक्ब मीश नु ठेयब खिम बाक्चा क्येडा, तला डा कुना कामी बाक्चा रिम्शो बाक्ब।  
 10 परमप्रभु यावे आ अरेशो मटीबपुकीमी मरिम्शो ला पचा दाक्नीम। मेकोपुकीमी आन नेक्था डा मुर आन कली यो शिशो मपाइनीम।  
 11 शुक्शी पाइब कली सजाइ गेशोन, मारेइ मजोक्ब मुर इच्का जोक्ब तुइक्ब दुम्नीम। मिनु जोक्ब तुइक्ब मुर आन कली शेंशोन, आन जोक्तीके बारब। हितोपदेश १९:२५  
 12 ठीक पाइबमी परमप्रभु यावे आ अरेशो मटीब मुर आन खिं कोत्रना कोत्रन बाक्ब। मिनु परमप्रभुमी आ अरेशो मटीब आन कली खतम पोक्ब।  
 13 सुमी पुडग आन पुंइशो मनेंबा, मेकोमी यो पुनानु, सुइमी यो मनेंनीम।  
 14 खुइशशोमी मार मार गेशोन, चुरब मुर यो मचुरनीम। मिनु वा आगामी खुइशशा गेशोमी ठेयब गाइक्तीक तेक्ब। १सामुएल २५:१८-३५  
 15 निसाफ दुम्मेनु ठीक पाइब ग्येरसीनीम। तन्न मरिम्शो पाइबपुकी हिंनीम।  
 16 सुइ मुर रुप्तीक लां प्रोंडतु हना, मेको बेक्शो मुर आन बाक्तीक लशा नाइक्ब।  
 17 सुम आंम दाक्शो पना पन बाक्बा, मेको पुडग दुम्ब। सुमी अडगुर शांबु नु तेल दाक्बा, मेको मुर यो पुडग दुम्ब। हितोपदेश २३:२१  
 18 ठीक पाइब आन पा डा परमप्रभु यावे आ अरेशो मटीबपुकीम सजाइ ताइनीम। मिनु गेना हना यो रिम्शो पाइब आन पा डा थमा सुइक्चा मपुइसीब मुर सजाइ ताइनीम।

- 19 शुश जिचा पोकब नु चुरब मीश नु बाक्या क्येडा गोरशो रागीमी बाक्या रिम्शो दुम्ब ।  
 20 जोकब तुडक्ब मुर आन खिंम शुश क्येट लाडब शोंप नु तेल बाक्ब । तन्न मूर्खमी आ बाकशो नेल्ल थुम्ब ।  
 21 सु मुरुमी ठीक पतीके नु शिशो पतीके आ नोले खोडक्बा, मेको ब्रोंडशा, सोशा बोशा दुम्शा मान ताडब दुम्ब ।  
 22 जोकब तुडक्ब मुर कामी बोल्यो लडाइ पाडब आन सहर कली लडाइ तोप्नु । मिनु मेकोमी आन बोल्यो, थमा सुडशो, ब्रोंडशा बाक्तीक सहर ग्रात ।  
 23 सुमी मिम्शा ठीक लोत्र पाडबा, मेकोमी आंम कली श्येत रे प्रोंडब । हितोपदेश १३:३  
 24 ठेयब लेशो, बोरशो मुर आ नें शुक्शी पाडब बाक्ब । मेकोमी ठेयब लेशो नु बोरशो गेय ला पाडब ।  
 25 अल्से गेय मपतीके बेक्नीम । मारदे हना अल्से आन गुडम गेय पने मबिक्ब । हितोपदेश १३:४  
 26 नाक्त रे अल्सेमी मारेड मारेड माल्ब । तन्न ठीक पाडबमी मखेक्थु, गेब ।  
 27 परमप्रभु यावे आ अरेशो मटीब आन चढेशो ग्रांरा दिशो बाक्ब । मेकोमी मरिम्शो मिम्शा चढेशो शुश ग्रांरा बाक्ब ।  
 हितोपदेश १५:८  
 28 जोल पाडब सांकछी जाम्शा लाडनीम । तन्न रिम्शो पा नोफा दाडशशा नेंब मुर थमा डा सांकछी बाक्ब । हितोपदेश १९:५,९  
 29 परमप्रभु यावे आ अरेशो मटीब मुर बोल्यो मुर खोदेशो पा गाक्नीम । तन्न गेना हना यो रिम्शो थुं पाडशशो मुर मिम्ना मिन्न गाक्नीम ।  
 30 मुर आन तुडक्तीक, रुप्तीके अर्ती गेतीके परमप्रभु यावे आ डोंडती थम आडक्ब बाक्ब । भजन संग्रह ३३:१०-११  
 31 लडाइ पची नाक्त कली शारा ठीक पशो बाक्ब । तन्न ग्रातीक परमप्रभु यावे आ गुडमी बाक्ब । भजन संग्रह ३३:१७

## 22

- श्येत गेबम श्येत जाडब  
 1 शुश क्येट शोंप क्येडा मान पाडशशो रिम्शो बाक्ब । सुन चांदी क्येडा दाक्या पुंडसीचा रिम्शो बाक्ब । उपदेशक ७:१  
 2 क्येट थीब नु पुडग मुर के गारतीक का बाक्ब । मेको मार बाक्ब देशा हना, परमप्रभु यावेमी मेको निम्फा आस कली सेल्लु । हितोपदेश २९:१३  
 3 निप्स पाडशशो मुर श्येत जाक्चा चिक्शो तशा, खुंडसीनीम । तन्न मारेड मजोक्ब मुरुमी मारेड मतुडक्थु श्येत जाडनीम । हितोपदेश २७:१२  
 4 ब्रेशो थुं पाडशशो नु परमप्रभु यावे कली मान पा हिब मुर आन इनाम शोंप, मान ततीक नु ब्रोंडतीक बाक्ब । हितोपदेश १५:३३  
 5 दूली पाडब आन लॉम चू नु ग्याडल बाक्नीम । होस पाडबपुकी मेको आन क्येडा डोन बाक्नीम ।  
 6 इ तौ कली गारचा डा पा रिम्शो शेंदो । मेकोमी खाल्पा दुम्चा सम्म मेको लां मप्रोंडब । हितोपदेश २०:११  
 7 क्येट थीबमी पुडग कली अधिकार पाडब । जेर ताक्ब मुर जेर गेब आ वाडल बाक्ब ।  
 8 मुरुमी ठीक मपतीके शोक्तेक्म हना, ठेयब श्येत खुप्नीम । मिनु आ गाडक्तीके आ कोक्के जिक्ब । अय्युब ४:८  
 9 हाडशशो मुरुमी आसीक ताडब । मारदे हना मेकोमी आ जचा थोत्रक पुडग नु योक्ब । हितोपदेश १९:१७  
 10 शुक्शी पाडब कली खेरो । मिनु जिचा खेचा नुप्ब । जिचा नु तुम्मुचा तेक्सीब । हितोपदेश २६:२०  
 11 सु रिम्शो थुं नु ठीक लोत्र पचा दाक्नीमी, मेको पिप आ वारच दुम्नीम । कलस्सी ४:६; भजन संग्रह १०१:६  
 12 परमप्रभु यावेमी तुडक्ब मुर आन कली कोत्रब । तन्न हेंथे पाडब आन थमा सुडक्चा मपुंडसीब लोत्र थुम्पाडक्ब ।  
 13 अल्सेमी “लाडगामी गुप्स का बाक्ब । गो लाडगा लती हना, आं कली साडक्ब” देंब । हितोपदेश २६:१३  
 14 हेंथे गाक्ब मीश मुर आ लोत्र ठेयब खाल्ता खोदेशो बाक्ब । परमप्रभु यावे आ गाडशशो ताडबपुकी मेको खाल्टाम बिक्नीम । हितोपदेश ५:३  
 15 वोंडशा आल आन थुंमी मरिम्शो पतीक यो बाक्ब । तन्न शेंशा इक्का तुप्शोनु, आ मरिम्शो पतीके प्रोंडब । हितोपदेश १३:२४; हितोपदेश २३:१३-१४; हितोपदेश २९:१७  
 16 आंम कली शोंप पाडशशो सेल्चा कली पुडग आ थोत्रक लाडक्चा नु क्येट थीब कली कोसेली गेचा, मेको निम्फा पुडग दुम्तीक गेय बाक्ब ।  
 जोक्ब तुडक्ब मुर आ लोत्र  
 17 इ नोफा दाडशशा जोक्ब तुडक्ब दुम्शा, आं लोत्र नेनो । मिनु आं लोत्र इ थुंम चोतो! हितोपदेश २४:२३  
 18 मारदे हना मेको लोत्र इ थुंमी चोडक्तीवी हना, इ कली रिम्शो दुम्ब । मिनु गे मेको गेना हना यो शेंने चाप्नेवे ।  
 19 गे परमप्रभु यावे कली थमा सुतो, दे मुलाक्ती गो इ कली एको लोत्र शेंताक्ड ।  
 20 गो इ कली ३० ओटा देंतीके, अर्ती नु जोक्तीक लोत्र मब्रेक्तु डा?  
 21 मारदे ब्रेक्ताक्ड देशा हना, इ कली मार ठीक बाक्बा नु मार थमा बाक्बा, दे कोंडचा कली ब्रेक्ताक्ड । मोपा गे इ कली सोडक्ब आन कली थमा लोत्र लेन्ने चाप्नेवे ।  
 22 पुडग आन के मारेड मबाक्ब, दे मेको आन के मारेड मरोडक्तो । मिनु श्येत जाडब कली ठीक निसाफ पावो । प्रस्थान २३:६  
 23 मारदे हना परमप्रभु यावेमी मेको आन कली वारच पाडब । मेकोमी मेको रोडक्ब आन ब्रोंडतीक रोडक्ब ।  
 24 गाडक्ब मुर नु वारच मडुमो । मिनु शुश चुरब नु मगाक्को । हितोपदेश १५:१८  
 25 मेको नु गाक्ते हना, मोदेशोन दुम्शा, ग्याडक्चा पुंडसीनेवे ।

- 26 मुर आन जेर आ पर्वम कसम जशा जमानी मबाक्को। हितोपदेस ६:१  
 27 मारदे हना गे थाप्ने मचाप्तीवी हना, इ ब्राख्ये यो रोइक्चा पुंडसीनेवे।  
 28 इ किकी पिपीमी वोइशशो सांद डा फुल्लु गेनायो मयाक्तो। हितोपदेस २३:१०; ब्यवस्था २७:१७  
 29 जोक्ब गेय पाइब आन कली तनी? मेकोपुकी पिप आन कली गेय पाइब दुम्नीम। मेकोपुकीमी आइक्च मुर आन कली गेय मपाइनीम।

## 23

- आल आन कली रिम्शो पा शेंदीन  
 1 सासन पाइब नु जथ बाक्डेनु, इ डोंइती मार बाक्मे, मेको रिम्शो पा कोव्रडो।  
 2 गे शुश जचा ब्वचा दाक्ताक्वी हना, इ लाकचामी झूरी वोतो।  
 3 मेको आ ब्रोत्रशो जचा थोत्रक तशा मवलो। मारदे हना मेकोम इ कली खल्लब सेल्ब।  
 4 क्येट थीब मुर खोदेशो दुम्चा कली मिम्शा बोल मपावो। जोक्ब तुइक्ब दुम्शा मोदेशो मिम्चा प्रोनो। हितोपदेस २८:२२  
 5 मेको याम का तशा नोल, चिक्ब खोदेशो पा बेरशा लाइब। मेको ककाकुली खोदेशो पा सरीड गे बेरशा लाइब।  
 6 शिम आ खिमी भोज जथ मलावो। मेको आन ब्रोत्रशो जचा थोत्रक तशा मवलो।  
 7 मारदे हना मेकोम इ लाकचामी चांम खोदेशो पा कारब। मेकोमी इ कली जने तूडीने देंत हना यो, मेको आ थुं गे नु मबाक्ब।  
 8 इ इक्का जशो नेल्ल मेचा कुइब। मेको कली इ ठेयब सेल्शा देशो लोत्र नेल्ल मोशीन लाइब।  
 9 मूर्स आ डोंइती लोत्र मपावो। मारदे हना इ जोक्ब तुइक्ब लोत्र नेंशा, शुक्शी ला पाइब।  
 10 गे साइ डोंइती वोइशशो सांद डा फुल्लु मयाक्तो। मिनु रोम रोइक्च आन रू मचाइक्तो। हितोपदेस २२:२८  
 11 मारदे हना मेको आन कली श्येत रे प्रोंइब बोल्यो बाक्ब। मेकोमी मेको आन पर्वम इ कली श्येत गेब।  
 12 रिम्शो शेंतीक नेनो। जोक्तीक लोत्र नेंचा कली इ नोफा दाइक्तो।  
 13 इ आल आन कली रिम्शो पा शेंचा मप्रोनो। मेको आन कली सजाइ गेशा तुप्तीवी हना, मेको मबेक्नीम। हितोपदेस २२:१५  
 14 गे मेको कली इक्का तुप्तीवी हना, मेको आन कली बेक्शो मुर आन बाक्तीक लतीक लां रे प्रोंइनेवे।  
 15 आं तौ, गे जोक्ब तुइक्ब दुम्ते हना, आं थुं यो ग्येरसीब।  
 16 गे ठीक लोत्र पवीनु, गो आं थुं रेन साप्पा ग्येरसीनुड।  
 17 पापी आन कली गेहे मपावो। तन्न नाक्त कित कित परमप्रभु यावे कली मान पा हिनो।  
 18 मो पाप्तीवी हना, इ ब्रोंइतीक नु इ मिम्शो नेल्ल जाक्दीप्ब।  
 19 आं तौ, आं लोत्र नेनो। जोक्ब तुइक्ब दुमो। मिनु इ थुं कली ठीक लांमी ग्येतथ गाक्पतो।  
 20 शांबु तूब नु शुश श्ये ब्वाइबपुकी नु मबाक्को।  
 21 मारदे हना दुक्ब नु शुश जाइब ब्वाइब मुरपुकी पुडग दुम्नीम। शुश दुक्शा बाक्तीकेमी जेक्शो वा फेक्पाइक्ब।  
 हितोपदेस २१:१७  
 22 इ आफ आ लोत्र नेनो। इ आम खाल्पी दुम्मेनु, मेको कली आइक्च मसेलो। हितोपदेस १:८  
 23 थमा पतीक कली ग्यापो। मेको कली गेनायो मलेयडो। तुइक्तीक, शेंतीक नु रुप्तीक ग्यापो।  
 24 ठीक पाइब तौ तशा, आ आफ ग्येरसीब। जोक्ब तुइक्ब थुं पाइशशो तौ तशा आ आफ शुश ग्येरसीब। हितोपदेस १०:१  
 25 इ आम आफ ग्येरसीसल। इ कली थीब गेना हना यो ग्येरशा बाक्ल।  
 26 आं तौ, इ थुं आं कली गेयी। आं पशो कोव्रडो।  
 27 तेल्लेम मीश मुर ठेयब खाल्टा खोदेशो बाक्ब। ग्युंवे पा यो हेंथे पाइब मीश मुर लुकच लशो इनार खोदेशो बाक्ब।  
 हितोपदेस २२:१४; हितोपदेस ७:१०-१४  
 28 मेको खुइ खोदेशो पा लांमी बाप्शा बाक्ब। मिनु हेंथे गाक्ब वोंइश मुर शुश सेल्ब।  
 29 सु श्येत जाइबा? सु सुर्ता पाइबा? सुम राम्शी पोक्बा? सुम गाली पाइबा? सु बिल्चीम गार दुम्बा? सु का आ मिक्च लल जिशो बाक्बा? हितोपदेस २०:१; यसेया ५६:१२  
 30 मेको नाक्दो सम्म शुश अङ्गुर शांबु तूब बाक्नीम। ब्वाइशशो अङ्गुर शांबु तूब बाक्नीम।  
 31 गे लल अङ्गुर शांबु कोव्रस डा कोव्रस मबाक्को। गिश दारशो बाक्मे, दे मकोव्रडो। मेको रिम्शो पा कोव्रजम लाइब।  
 32 मिनु मेकोमी नोले बुस्सुमी खोदेशो पा कोक्ब। मेको बीस पाइशशो कोक्ब बुस्स खोदेशो बाक्ब।  
 33 मिनु इ मिक्चीमी मार मार ताइनेवे। मिनु दूली लोत्र पाइनेवे।  
 34 मिनु गे समुन्द्र आ दातेमी इप्शो खोदेशो दुम्नेवे। पला आ डल तारी इप्शो खोदेशो दुम्नेवे।  
 35 मिनु गे मार देंनेवे, देशा हना “आं कली तुप्तीमी, तन्न मखाइक्ड। तुप्तीमी तन्न मतुइक्तु। मुल गेना सेंशीशा, लेंशा तूनुडा?” देंनेवे।

## 24

रुप्ब मुर बोल्यो बाक्नीम

- 1 मरिम्शो पाइब मुर आन मार मार तशा, गेहे मपने। मिनु मेको नु मबाक्कीन।

- 2 मारदे हना मेको आन थुमी हुश खाकश पोक्का ला मिम्नीम। मिनु मेकोपुकीमी मरिम्शो आ पबर्म ला लोत्र पाइनीम।  
 3 तुइक्तीकेमी खिं सेल्सीबा। रूप्ब मुरुमी आ खिं सेल्शा रिम्शो पा बाकब।  
 4 जोक्तीकेमी मेको खिं डा कोठापुकी शुश क्येट लाइब नु रिम्शो थोव्रकीमी प्रिब। हितोपदेश ३१:१०-३१  
 5 बोल्थो लडाइ पाइब आन क्येडा जोक्ब तुइक्ब लडाइ पाइब रिम्शो बाक्नीम। मिनु बोल पाइशशो मुर आन क्येडा जोक्ब तुइक्ब मुरुमी अधिकार ताइब।  
 6 मारदे हना रिम्शो लां कोइब बाक्त हना, लडाइ पने चाप्नीनी। अर्ती गेब शुश बाक्तेक्म हना, लडाइ ग्रानीनी। हितोपदेश २०:२८; हितोपदेश ११:१४  
 7 मुखेपुकीमी तुइक्तीके रूप्बे मचाप्नीम। मेकोपुकीमी ठेयब लाप्चो डा ग्रुम्तीकेमी लोत्र पने मचाप्नीम।  
 8 सुमी काइ मरिम्शो पचा मिम्बा, मेको कली मरिम्शो पाइब देंनीम।  
 9 मूर्खें गेय पाप बाकब। मिनु शुक्शी पाइब कली तशा मुर नेल्ल ग्रान्रा दीनीम।  
 10 श्येत नाक्ती गोल्चा चिकताक्वी हना, इ बोल दोशो बाक्म डा?  
 11 मुर कली साइक्चा, दे कीशा लाइशशो ताप्तीवी हना, मेको आन कली प्रोइथ लावो। मिनु साइक्चा पुंडसीचा चिकशो कली वारच पावो। भजन संग्रह ८२:४  
 12 मिनु गे “गो मेको मतुइक्तु” देंते हना, थुं नाक्बम इ मरिम्शो पशो तुइक्ब। इ कली कोत्रबमी नेल्ल तुइक्ब। मेकोमी मुर आ मरिम्शो पशो डा क्येक्क लेप्ब।  
 13 आं तौ, खुदो जावो। मारदे हना मेको रिम्शो बाकब। चाका रे याप्शो खुदो जीजी पा ब्रोव्रब।  
 14 मार मिम्बा माल्नेवे देंशा हना, जोक्तीक तुइक्तीक इ थुं कली खुदो खोदेशो जिज बाकब। मेको ताप्तीवी हना, इ कली नोले सम्म रिम्शो दुम्ब। इ मिम्शो जाक्दीप्ब।  
 15 गे परमप्रभु यावे आ अरेशो मटीब ठीक पाइब आन खिं खतम पोक्का कली बाप्शा मबाक्को। मेको ठीक पाइब आ बाक्तीकेमी हुश खाकश मपोक्को।  
 16 ठीक पाइब मुरपुकी ७ खेयप गोल्तेक्म हना यो, लेंशा बोक्नीम। तन्न परमप्रभु यावे आ अरेशो मटीबपुकी मबोक्का डा पा गोलनीम। भजन संग्रह ३७:२४  
 17 इ जोरी सत्रु जाम्शा लाम्तेक्म हना, मग्येरसो। मेकोपुकी दाइल पा थिस्साक्म हना, मरिस्सो। अय्युब ३१:२९  
 18 गे मेको तशा ग्येरसाक्वे हना, परमप्रभु यावेमी इ पशो मदाक्ब। मिनु इ जोरी सत्रु आन पबर्म गाइशशो नाइशशा मेको आन कली वारच पाइब।  
 19 काइ मरिम्शो पाइब आन पबर्म मगाइक्को। परमप्रभु यावे आ अरेशो मटीब आन पबर्म गेहे मपावो। भजन संग्रह ३७:१  
 20 मारदे हना काइ मरिम्शो पाइब शुश नाक्त मलीनीम। मिनु परमप्रभु यावे आ अरेशो मटीब आन बती काप्शा लाइब। हितोपदेश १३:९  
 21 आं तौ, परमप्रभु यावे नु पिप कली मान पा हिनो। मेको आस कली मटीब नु मगाक्को। १ पत्रुस २:१७  
 22 मारदे हना मेको आस पतीके रे गे मतुइक्थु श्येत जने चाप्नेवे। मिनु मेको आस खतम पोक्तीक सुम तुइक्बा?

अरु अर्ती

- 23 एको लोत्र जोक्ब तुइक्ब मुर आन देशो बाकब। निसाफ पतीकेमी कुल कोत्रमुचा मरिम्शो बाकब। लेवी १९:१५  
 24 सुमी पाप पाइब कली “गे ठीक पाइब बाक्नीनी” देंबा, जात जात डा मुरपुकीमी मेको कली सराप पाइनीम। रागी रागी डा मुरपुकी मेको आ पबर्म ग्रान्रा दीनीम।  
 25 तन्न सुमी मरिम्शो पाइब कली अरेबा, मेको ग्येरसीनीम। मिनु मेको शुश आसीक ताइनीम।  
 26 थमा लोत्र लेत्चा, मुर कली पुक्पु पशो खोदेशो बाकब। हितोपदेश १५:२३  
 27 डोंइती इ लाडगा डा गेय थुमो। इ रूमी मार मार शोक्को। मिनु नोले इ खिं सेलो।  
 28 गे इ नेक्था डा मुरुम मारेइ मपथ, मेको आ पबर्म सांकछी मबाक्को। गे जोल मपावो। प्रस्थान २०:१६  
 29 गे “मेकोम आं कली मार पवा, मेको कली यो मोदेशोन पाइनुड। गो मेको कली क्येक्क लेत्नुड” मदेनो। हितोपदेश २०:२२  
 30 गो अल्से मुर का आ रू रे पा लती। निप्स मपाइशशो मुर आ अडगुर रू रे पा कोव्रना कोव्रन लती।  
 31 मिनु गो मार ताता देशा हना, मेको रू नेल्ल चूम सुम्शो बाक्त। खप नेल्ल चूले वाशो बाक्तेक्म। मिनु रू एर ओंथ डा गारो यो ब्रेशशो बाक्त।  
 32 मिनु गो नेल्ल कोव्रशा, मिम्ताक्ड। मिनु शेंतीक लोत्र का रूप्ता। मार रूप्ता देशा हना,  
 33 याम का डा इप्चा। याम का डा निन्द्रा पचा। याम का गुइ फिम्ला पा बाक्चामी हितोपदेश ६:९-११  
 34 पुडगा दुम्तीके नु श्येत जतीके या कुरब मुर खोदेशो पा रीब पा मेको मुर तारी जाक्ब, दे रूप्ता।

## 25

सोलोमन आ अरु ब्रेक्शो लोत्र

- 1 एको सोलोमन आ अरु देंतीक लोत्र बाक्नीम। मिनु यहूदा डा पिप हिज्कीयाह आ मुरपुकीमी मेको ब्रेक्शो बाक्तेक्म। हितोपदेश १:१; हितोपदेश १०:१  
 2 परमप्रभुमी का निक्शी लोत्र खुइशशा आ सक्ति कोइब। तन्न पिपमी नेल्ल तुइक्पाइशशा, आ सक्ति ठेयब सेल्ब।  
 3 सरीड गिश ग्येत्थ बाक्बा, रागी गिश लुक्च लाइबा नु पिप आ थुमी मार मिम्बा, मेको सुइमी यो तुइक्ने मचाप्नीम।

- 4 चांदी यपाइश्शा, आ कस गुंडताकम हना, चेम्बमी रिम्शो थोत्रक चेम्ने चापब।
- 5 मोपा पिप आ डोंडती रे परमप्रभु यावे आ अरेशो मटीब आन कली तिलीन। मिनु पिप आ हुकुम पतीके बोल्यो दुम्ब।
- हितोपदेश १६:१२
- 6 पिप आ डोंडती आंम कली ठेयब मसेलो। मिनु पिप आ ठेयब गेय पाइब आन बाक्तीक लचा ममालो।
- 7 मारदे हना ठेयब आन दातेमी इ कली “याक्सो”, माइक्चा पुंडसीचा क्येडा “एक कुने, निस्सीन” दे ब्रेशो रिम्शो बाक्ब।
- 8 गे मार मरिम्शो ताप्तीवी हना यो, रीब पा निसाफ पतीकेमी मलावो। मारदे हना इ नेक्था डा मुरुम इ कली मुने तोक्ते हना, मार पाइनेवो। लूका १४:७-११
- 9 गे इ नेक्था डा मुरु नु आंमा रीब पा लोत्र पावो। मेको मुरु आ मरिम्शो पशो मफ्रावो। हितोपदेश २०:१९
- 10 मिनु इ फ्रशो लोत्र नेंबमी इ कली मुने तोक्डे। मिनु इ नें गेना हना यो मरिम्शो लीब।
- 11 रिम्शो गारचा डा लोत्र पशोन, चांदी के थालम वोइश्शो सुन के स्याउ खोदेशो बाक्ब। हितोपदेश १५:२३
- 12 जोक्ब तुइक्ब मुरु आ हुइक्तीक लोत्र नेंब मुरु कली सुन के औंठी नु गहना खोदेशो बाक्ब।
- 13 थमा लोत्र क्याक्ब मुरु, आ होत्रप कली हुप्शो नाक्त अन्न रुप्ची ना डा फु खोदेशो पा रिम्शो बाक्ब। मेको लोत्रम आ होत्रप आ थुं बारपाइक्ब।
- 14 सु मुरुमी मारेइ मगेथु, गेता, दे ठेयब लोत्र पाइबा, मेको मुरु रेउ मयिपाइक्ब गोस्स नु फश खोदेशो बाक्ब।
- 15 फाल्तीकेमी हुकुम कली बिप्पाइक्ने चाप्नीम। ब्रोत्रशो लोत्रमी रुश जिकने चापब। हितोपदेश १५:१
- 16 खुदो थिल्लीवी हना, शुश मजावो, इ कली गाप्चा डा पा जावो। मारदे हना शुश जाप्तीवी हना, मेचा कुइक्ब।
- 17 इ नेक्था डा मुरु आ खिं शुश मलावो। मारदे हना मेकोमी इ कली शुश जाक्शो तशा ब्रीब।
- 18 आंम नेक्था डा मुरु कली जोल पा सांकछी गेब मुरु कोक्के तरवार नु हेश्शो ब्रा खोदेशो बाक्ब।
- 19 श्येत जशो ना थमा मसुइक्चा डा मुरु कली थमा सुइक्चा खाइश्शो खुइ नु मदुक्ब खोइल खोदेशो बाक्ब।
- 20 सुमी थुं खाइश्शो मुरु आन डोंडती कुम्सो पाइबा, मेको ग्यूमी वा रोइश्शो नु गारमी हिकसी खेक्शो खोदेशो बाक्ब।
- मिनु वा खोइक्ब तुम्बु नु शी खोइक्ब बुस्स खोदेशो मेको सुर्ता पाइब मुरु आ थुं बाक्ब।
- 21 इ जोरी सत्रु शोत्रलु बेक्तेकम हना, मेको आन कली थुलो। तूत दाक्तेकम हना, मेको आन कली ब्वाक्कु तूचा गेवो। रोमी १२:२०
- 22 मो पाप्तीवी हना, मेको आन पिया तारी ब्रशो कोइला मोइश्शो खोदेशो दुम्ब। मिनु परमप्रभु यावेमी इ कली इनाम गेब।
- 23 उत्तर रे पा फशेमी रेउ यिपाइश्शो खोदेशो पा, खुइश्शो लोत्र फ्राइबमी मुरु आन कुल राव किक्पाइक्ब।
- 24 गेना हना यो जिचा पोक्ब मीश नु बाक्चा क्येडा खिं आ तला तारी कुना कामी लशा सिकसी पा बाक्चा रिम्शो दुम्ब।
- 25 तूत दाक्ब मुरु कली ब्रोत्रशो ब्वाक्कु खोदेशो पा डोन रागी रे जाक्शो रिम्शो लोत्र बाक्ब। हितोपदेश १५:२५
- 26 ठीक पाइब मुरु परमप्रभु यावे आ अरेशो मटीब नु गारत हना, मेको हिलोम बुक्शो ब्वाक्कु नु शुश ग्रॉगा बाक्शो कुवा खोदेशो बाक्ब।
- 27 शुश खुदो जचा नु आंम कली ठेयब मिम्शा मान पाइक्चा पुंडसीचा, निम्फा मुरु कली मरिम्शो बाक्ब।
- 28 सुमी आंम कली ठीक पा चलेने मचाप्बा, मेको गारो ब्रेशो सहर खोदेशो बाक्ब। हितोपदेश २९:११

## 26

मुरु आन दाते डा मरिम्शो गेय

- 1 हुप्शो महिनाम फुं नु अन्न रुप्ची ना रेउ यिशो खोदेशो पा मूर्ख आन कली मान पशो मगारचा डा बाक्ब।
- 2 फुर फुर पा बेरब भडगेरा नु हुरुर पा बेरब बेल्लुम खोदेशो पा मगारचा डा सराप शोर गाक्शो बाक्ब।
- 3 शारा कली सिरकाना, गथा कली करेली नु मूर्ख आ ची कली कोक्के माल्ब। हितोपदेश १९:२९
- 4 मूर्ख कली मूर्ख खोदेशो पा लोत्र मलेत्तो। मो पाप्तीवी हना, गे यो मूर्ख दुम्बेव।
- 5 मूर्ख कली आ मूर्ख खोदेशो पा लोत्र मपाप्तीवी हना, मेकोमी आंम कली निप्स पाइश्शो मिम्सीब।
- 6 सुम मूर्ख कली लोत्र चोत्रथ सोइक्बा, मेकोमी आंम खोइली खोइश्शो नु हुश खाक्चा पोक्शा श्येत जशो खोदेशो बाक्ब।
- 7 मूर्ख आन देंतीके लोत्र खोरन्डे मुरु आ खोइल खोदेशो पा शोर गाक्शो बाक्ब।
- 8 मूर्ख कली मान पचा, फुल्लु कली श्येलेमी फ्रेंशा आप्चा माल्शो खोदेशो बाक्ब।
- 9 शांबु दुक्शो मुरु आ गुइमी चू ओत्रशो खोदेशो पा मूर्ख कली देंतीक लोत्र बाक्ब।
- 10 मूर्ख मुरु नु लां गाक्ब मुरु आन कली गेय पपाइक्चा, हेंथे लिब्रा आप्चा गार सेल्ब मुरु खोदेशो बाक्ब।
- 11 कुचुममी मेशा लेंशा जशो खोदेशो पा, मूर्ख मुरुमी मूर्ख गेय लेंशा पना पन बाक्ब। २ पयुस २:२२
- 12 आंम कली “जोक्ब तुइक्ब मुरु नड” दे मिम्ब मुरु क्येडा मूर्खन रिम्शो बाक्ब। हितोपदेश ३:७
- 13 अल्से मुरुमी “लाडगामी गुप्स का बाक्ब। लां मेर गुप्स हिरशो बाक्ब” देंब। हितोपदेश २२:१३
- 14 लाप्चो रोक्शो चोक्शो खोदेशो पा, अल्से मुरु आ ब्राख्येमी एर ओंथ लोकसीशा इप्ब। हितोपदेश ६:९-११
- 15 अल्से मुरुमी आ गुइ खमेम खुम्ब। मिनु मेको गुइ आ शोत्र सम्म लाइक्चा यो अल्सी पाइब। हितोपदेश १९:२४
- 16 शुश रुप्या लोत्र लेक्ब ७ जना मुरु क्येडा मूर्खमी आंम कली “रुप्ब जोक्ब नड” दे मिम्सीब।



- 17 सु मुर आन जितिके मखेतीकेम ओव्रबा, मेको लाम गाकशो कुचुम आ नोफा ग्याइशशा कीशो खोदेशो बाकब।  
 18 दोपा निप्स ग्यशो मुरुमी ब्रशो लिब्रा हेंथे पा आप्बा,  
 19 मोपा आ नेक्था डा मुर कली जोल पशा नोले “गो इ कली शाक्ता ला” देब।  
 20 शी मबाक्त हना, मी कापब। मोदेशो पा नोफा मुइक्ब मुर मबाक्त हना, जिचा खेचा मबोक्ब। हितोपदेश २२:१०  
 21 दोपा मी मुइक्चा कली कोइला नु ब्रचा कली शी माल्बा, मोपा रीब पा गाइक्ब मुर जिचा पोक्ब बाकब। हितोपदेश १५:१८  
 22 नोफा मुइक्ब आन लोत्र शुश ब्रोव्रशो जचा थोत्रक खोदेशो बाकब। मेको मुर आन थुं सम्म जाक्दीपब। हितोपदेश १८:८  
 23 मरिम्शो थुं डा ब्रोव्रशो लोत्र खप के बोसुम चांदी खेकशो खोदेशो बाकब।  
 24 जोरी सत्रुमी शोव्रमी रिम्शो लोत्र पाइनीम। तन्न आन थुंमी मरिम्शो मिन्नीम। मती १२:४५  
 25 इ जोरी सत्रुमी गे नु ब्रोव्रशो लोत्र पापुतु हना यो, मेको कली थमा मसुतो। मारदे हना मेको आ थुंमी ७ ओटा ग्रांया दिचा डा लोत्र खुइशशा बाक्नीम।  
 26 सुमी काइ मदाक्शो मुर कली “गो इ कली दाक्नुड” देखु पाइबा, मेको आ देखु पतीके मुर आन गुम्तीकेमी गूब।  
 27 सुमी मुर पिक्चा, दे खाल्ता दोइबा, मेको आंमान बिक्ब। सुमी मुर कली चिप्पाइक्चा, दे फुल्लु लोकबा, मेको आंमा लोकसीशा थिशशा लाइब। भजन संग्रह ६:१६; उपदेसक १०:८  
 28 जोल पाइबमी सु कली जोल पवा, मेको कली काइ मदाक्ब। मिलो शिलो लोत्र पाइब मुरुमी नेल्ल खतम सेल्ब।

## 27

- आंम कली ठेयब मसेलो  
 1 “दीसा पाइनुड” दे ठेयब लेशशो लोत्र मपावो। मारदे हना मेको नाक्त मार दुम्बा गे मतुइक्नेवे। याकूब ४:१३,१४  
 2 अरु मुरुमी इ कली ठेयब सेल्मेक्ल। गे आंमा आंम कली ठेयब मसेलो। अरु आन शोत्र रे ठेयब देंमल, इ आंम शोत्रमी “गो ठेयब नड” मदेनो।  
 3 फुल्लु नु बाल्वा हेल्शो बाक्नीम। तन्न मूर्खमी गेशो श्येत मेको निम्फा आस क्येडा हेल्शो बाकब।  
 4 गाइक्चा मरिम्शो बाकब। चुरचा मेको क्येडा मरिम्शो बाकब। रुश पतीके कली सु फाल्ने चाप्बा डा?  
 5 खुइशशा दाक्चा क्येडा नेल्लेमी तुइक्चा डा पा हुइक्चा रिम्शो बाकब। लेवी १९:१७  
 6 वारचमी हुइशशो रिम्शो पचा कली बाकब। तन्न मदाक्ब मुर आन पुक्पु पाइशशो हिंचा डा बाकब। भजन संग्रह १४१:५; मती २६:४९  
 7 साप्पा रूशो कोव्रजमी खुदो यो मदाक्ब। तन्न शोत्रलु बेक्शो मुर कली मब्रोव्रशो जचा थोत्रक यो ब्रोव्रब।  
 8 खिं रे डोन लशो मुर ग्योत्र रे डोन बेरशो चिक्ब खोदेशो बाकब।  
 9 ब्रोव्रशो रिना पाइशशो तेल नु धूपमी मुर आन थुं ग्येरशो सेल्ब। तन्न वारच आ अर्ती मेको क्येडा रिम्शो बाकब।  
 10 इ वारच कली नु इ आफ आ वारच कली मप्रोनो। श्येत जवी ना, इ लोकब आ खिं मलावो। मारदे हना डोन बाक्शो लोकब क्येडा नेक्था बाकब मुर रिम्शो बाकब। हितोपदेश १८:२४  
 11 आं तौ, जोक्ब तुइक्ब दुमो। मिनु गो ग्येरनुड। मोपा गो इ पर्वम लोत्र पा आं कली आइक्च सेल्ब आन कली लोत्र लेन्ने चाप्नुड।  
 12 निप्स पाइशशो मुर श्येत जाक्चा चिक्शो तशा, खुंइसीनीम। तन्न मारेइ मजोक्ब मुरुमी मारेइ मतुइक्थु श्येत जाइनीम। हितोपदेश २२:३  
 13 अर्को रागी डा मुर आन पर्वम जमानी दुम्शो मुर, आ वा रोइशशा लतीन। मुर आ पर्वम जमानी बाक्शो आ मारेइ मारेइ नेल्ले लतीन। हितोपदेश २०:१६  
 14 सुमी सुनी कना बोक्शा, आ नेक्था डा मुर कली ठेयब सेंदामी आसीक पाइबा। मेको आसीक ताइबमी “सराप पाइक्ती” देब।  
 15 गेना हना यो जिचा पोक्ब मीश रेउ यिमेनु तप तप पा यापब ब्वाक्कु खोदेशो बाकब। हितोपदेश १९:२३  
 16 मेको कली अरेचा फश गिवाार कली नाइक्पाइक्चा खोदेशो नु ग्युरा गुइमी तेल गुप्चा खोदेशो बाकब।  
 17 फलाममी फलाम कली शेप्शो खोदेशो पा, मुर कामी अर्को कली शेपब।  
 18 सुमी फोत्रशी रवा खाल पाइबा, मेकोमी फल जचा ताइब। सुम आ होत्रप कली रिम्शो पा कोव्रबा, मेको मान पाइक्चा पुंइसीब।  
 19 दोपा ब्वाक्कुम कुल तांइसीबा, मोपा मुर आ थुं दोदेशो बाक्बा, मेको अर्काम तुइक्बा।  
 20 बेक्शो मुर आन बाक्तीके नु जाम्शा लतीके गेनायो मरूशो खोदेशो पा, मुर आ मिक्च यो गेनायो मरूब। उपदेसक १:८  
 21 चांदी यपाइक्चा कली गारचा डा ग्योब नु सुन यपाइक्चा कली यो गारचा डा ग्योब माल्शो खोदेशो पा, मुर आ पतीक अर्को मुर आन ठेयब सेलतीक रे पा तुंइसीब।  
 22 मूर्ख कली अन्न नु चुन्लुम वोइशशा तुलीमी चुशा हना यो, आ मूर्ख पचा गेनायो मगूब।  
 23 इ क्यारश भेडा दोदेशो तांइसीनीमी रिम्शो पा कोव्रडो। इ बी ब्यफ आन कली होस पा कोव्रडो।  
 24 मारदे हना शोप गेना हना यो मलीब। सिरपेच यो नेल्ल पाला कली मलीब।  
 25 घांस जाम्शा लाइब। मिनु नक कोचवा दापब। मिनु पहाड रे घांस खुप्नीमी,  
 26 पाठा आ ऊन इन कली वा फेक्चा दुम्ब। बोका लेयशा रू ग्याप्ने चाप्नीनी।

27 क्यारश आ दूध इ कली, इ खिं डा मुर आन कली नु इ गेय पाइब आन कली तूचा गाप्ब।

## 28

परमप्रभु कली टीब ग्येरशो बाक्ब

1 परमप्रभु यावे आ अरेशो मटीब सुइम खेदा मपथु यो प्रोकनीम। ठीक पाइबपुकी गुप्स खोदेशो पा महिंथु बाक्नीम।  
यसैया ५७:२१

2 रागी डा मुरपुकीमी मरिम्शो पाम्तेक्म हना, हुकुम पाइब शुश दुम्नीम। तन्न निप्स पाइशशो हुकुम पाइब बाक्त हना, गेना हना यो रिम्शो बाक्ब।

3 हुकुम पाइब मुरुमी पुडग आन कली दिप्तु हना, मेको बाली नाली बिग्रेब ठेयब रेउ खोदेशो बाक्ब।

4 परमप्रभु यावे आ अरेशो प्रॉइबपुकीमी अरु अरेशो मटीब आन कली ठेयब सेल्नीम। तन्न परमप्रभु यावे आ अरेशो टीब मुरपुकीमी मरिम्शो पाइब आन कली तशा, मेको आन परबम सुर्ता पाइनीम।

5 मरिम्शो मुरपुकीमी निसाफ पतीके मार बाक्बा, दे मरुप्नीम। तन्न परमप्रभु यावे आ देशो पचा दाक्बपुकीमी नेल्ल रिम्शो पा रुप्नीम।

6 हेंथे गाक्ब, थुं निक्शी पाइशशो नु शुश क्येट थीब मुर दुम्चा क्येडा रिम्शो थुं पाइशशो ठीक लां गाक्ब पुडग मुर दुम्चा रिम्शो बाक्ब। हितोपदेश १९:१

7 सुमी परमप्रभु यावे आ अरेशो टीबा, मेको जोक्ब तुइक्ब तौ बाक्ब। सु चहिं शुश जाइब नु दुक्ब मुर आ वारच दुम्बा, मेकोमी आ आफ कली मुने तौक्ब।

8 सुम आ क्येट मुर कली शुश चाइक्ब ताक्चा कली गेबा, मेको आ क्येट पुडग आन कली शिशी पाइब मुर कली हेक्ब।

9 सुमी परमप्रभु यावे आ अरेशो लोत्र नेंशा मटीबा, मेको आ परमप्रभु कली पुंडतीक लोत्र यो ग्रॉग्रा दिशो बाक्ब।  
हितोपदेश १५:८

10 सुमी रिम्शो थुं पाइशशो मुर कली मरिम्शो लां हेंथे गाक्पाइक्बा, मेको आंमा दोशो खाल्टामी बिक्ब। तन्न दोस मताइबपुकीमी रिम्शो ताइनीम।

11 शॉप पाइशशो मुरुमी आंम कली “गो जोक्ब तुइक्ब नड” दे मिम्ब। तन्न निप्स पाइशशो पुडग मुरुमी मेको कली दोदेशो बाक्ब, दे रिम्शो पा तुइक्ब।

12 ठीक पाइबपुकी ग्रामानु, नेल्ल ग्येरसीनीम। तन्न परमप्रभु यावे आ अरेशो मटीबपुकी ठेयब दुम्तेक्म हना, मुरपुकी खुंडसीनीम। हितोपदेश ११:११

13 सुमी आंम पशो मरिम्शो पतीके खुइक्बा, मेको सोशो बोशो मदुम्ब। तन्न सुमी आंम पशो मरिम्शो शोत्रबा नु प्रॉइबा, मेको शिशी ताइब। भजन संग्रह ३२:३-५; १यूहन्ना १:८-९

14 परमप्रभु यावे कली मान पा हिंब मुर गेना हना यो ग्येरशा बाक्चा ताइब। तन्न मरिम्शो थुं पाइशशो मुर श्येत जाइनीम।

15 परमप्रभु यावे आ अरेशो मटीबमी पुडग आन कली सासन पाप्तु हना, मेको ग्रीब गुप्स नु प्रेक्शा ग्राम्ब वां खोदेशो बाक्ब।

16 मरुप्ब हुकुम पाइब मरिम्शो दिप्ब मुर बाक्ब। तन्न जोल पा चेम्शो क्येट काइ मदाक्ब मुर शुश नाक्ती ब्रॉइब।

17 सुमी मुर साइक्बा, मेको मबेक्म सम्म प्रोकशा गाक्चा माल्ब। सुइमी यो मेको कली वारच मपामेक्ल। उत्पत्ती ४:१४

18 सु गेना हना यो रिम्शो पाइब बाक्बा, मेको रिम्शो बाक्ब। तन्न सु लां निक्शी हेंथे पा गाक्बा, मेको कालेम जाम्शा लाइब।

19 सुमी आंम रूमी गेय पाइबा, मेको मुर आ खिंमी शुश अन्न बाक्ब। शुश लोत्र पा बाक्ब मुर चहिं पुडग दुम्शा लाइनीम।

20 थमा सुइक्ब मुर शुश आसीक ताइनीम। तन्न सुम रीब पा क्येट चेम्चा दाक्बा, मेको सजाइ मतथु, मब्रॉइब। हितोपदेश १३:११

21 कुल कोत्रमुचा मरिम्शो बाक्ब। तन्न मुरुमी आइक्च शोब्ले तचा कली मरिम्शो पाइनीमी कों। हितोपदेश १८:५; ब्यवस्था १:१७

22 कुंडद मुर रीब पा क्येट थीब दुम्चा दाक्ब। मिनु “नोले थमा पा पुडग दुम्नुड” दे मेकोमी ममिम्ब। हितोपदेश २३:४; १तिमोथी ६:९

23 मिलो शिलो पाइब मुर आन क्येडा मुर कली हुइक्ब नोले मान पाइक्चा पुंडसीब।

24 सुमी आ आम आफ आस मार मार रोइशशा “आं शॉप बाक्ब” देबा, मेको खतम पोक्ब आ वारच बाक्ब। मती १५:५

25 शिंम मुरुमी जिचा पोक्ब। तन्न सुमी परमप्रभु यावे कली थमा सुइक्बा मेको आसीक ताइब।

26 सुमी आंम निप्स कली थमा सुइक्बा, मेको मूर्ख बाक्ब। तन्न सु तुइक्तीक थुं डा लां गाक्बा, मेको ब्रॉइचा ताइब।  
हितोपदेश ३:५-६

27 सुमी पुडग कली गेबा, मेको आंमा यो श्येत मजाइब। तन्न सुमी पुडग आन परबम शिशी मपाइबा, मेको शुश सराप ताइब।

28 परमप्रभु यावे आ अरेशो मटीबपुकी ठेयब मुर दुम्तेक्म हना, मुरपुकी खुंडसीनीम। मिनु मेको बेक्तेक्म हना, ठीक पाइब मुर सोशा बोशा शुश दुम्नीम।

## 29

तुप्शो नु हुडशशोम वारच पाइनीस

- 1 शुश हुडक्चा पुंडसीशा यो, काइ मटीब दुम्तेकम हना, मेको आन मतुडक्थु वारच पाइक्चा मपुंडसीथु, खतम दुम्नीम। हितोपदेश १५:१०
- 2 ठीक पाइबपुकी सासन पाइब दुम्तेकम हना, मुर नेल्ल ग्येरसीनीम। तन्न परमप्रभु यावे आ अरेशो मटीब मुरुमी सासन पाप्तु हना, मुर श्येत जाइनीम। हितोपदेश ११:१०
- 3 सुमी तुडक्तीक थुं दाक्बा, मेकोमी आ आफ कली ग्येरपाइक्ब। तन्न तेल्लेम नु गाक्ब मुरुम आ शोंप नेल्ल खेरब। लूका १५:१३, ३०
- 4 पिप आ ठीक पतीकेमी आ रागी लीब। तन्न मेकोमी शुश तिरो पोक्तु हना, आ रागी खतम सेल्ब।
- 5 सुमी आ नेक्था डा मुर कली क्युकशा लोत्र पाइबा, मेकोमी मेको कली ग्याइल दाइशशो बाक्ब।
- 6 मरिम्शो पाइब मुर आ मरिम्शो पतीकेमी श्येत जाइब। ठीक पाइब मुर चहिं शुश ग्येरसीशा कुम्सो पाइनीम।
- 7 ठीक पाइब मुरुम पुडग आन कली दोपा ठीक पचा, दे तुडक्नीम। तन्न परमप्रभु यावे आ अरेशो मटीबपुकीमी मारेइ मरुप्नीम।
- 8 शुक्शी पाइब मुरपुकीमी सहर खलबल सेल्नीम। तन्न जोक्ब तुडक्ब मुरपुकीमी जिचा खेचा तेक्नीम।
- 9 जोक्ब तुडक्ब मुर मूर्ख नु निसाफ पतीकेमी लत हना, मेको मूर्खमी जिचा पोक्शा, रिशशा मगारब।
- 10 हुश खाक्शा पोक्ब मुरुमी दोस मताइब मुर आन कली काइ मदाक्ब। मेकोमी रिम्शो थुं पाइशशो मुर कली साइक्चा माल्ब।
- 11 मूर्ख मुरुमी आ गाइक्चा नेल्ल कोंडब। जोक्ब तुडक्ब मुरुम चहिं आ गाइशशो तेक्शा, मकोंडब। हितोपदेश १२:२३; हितोपदेश २५:२८
- 12 सासन पाइबमी जोल लोत्र नेंतु हना, मेको आ गेय पाइब नेल्ल परमप्रभु यावे आ अरेशो मटीब दुम्नीम।
- 13 पुडग नु मेको आन कली दिप्ब आन के थोवक का गारशो बाक्ब। मेको मार बाक्ब देशा हना, परमप्रभु यावेमी मेको निम्फा आस कली मिक्च ताइब सेल्शो बाक्त्। हितोपदेश २२:२; अय्युब ३३:३०; भजन संग्रह १३:४
- 14 पुडग आन कली ठीक पा निसाफ पाइब पिप आ सासन गेना हना यो लीब। हितोपदेश १६:१२
- 15 वोंइश आल आन कली तुप्शा, हुडशशोनु, जोक्ब तुडक्ब दुम्नीम। मारेइ मशेशो वोंइश आलम चहिं आ आम कली मुने तोक्ब। हितोपदेश २२:१५; १राजा १:६
- 16 परमप्रभु यावे आ अरेशो मटीब मुरपुकी शुश दुम्तेकम हना, मरिम्शो पतीक बारशा लाइब। तन्न ठीक पाइबपुकीम मेको आन खतम दुम्शो ताइनीम। भजन संग्रह ३७:३५-३६
- 17 इ तौ कली रिम्शो पा शेंदो। मिनु मेकोमी इ थुं नाइक्पाइशशा इ कली ग्येरपाइक्ब। हितोपदेश २३:१३
- 18 परमप्रभु यावे आ लोत्र पाइब मुर मबाक्तेकम हना, मुर नेल्ल हेंथे पाइब दुम्नीम। तन्न मेकोपुकीम आन परमप्रभु यावे आ अरेशो टिम्तेकम हना, ग्येरसीशो मुर दुम्नीम।
- 19 इ गेय पाइब कली लोत्रम ला शेंने मचाप्नेवे। मारदे हना मेकोमी इ लोत्र रुप्तु हना यो मटीब।
- 20 ममिम्थु लोत्र पाइब क्येडा मूर्खन रिम्शो बाक्ब। उपदेसक १:२; याकूब १:१९
- 21 इ वाइल कली आल रे नम पाइशशा थुलतीवी हना, नोले मरिम्शो दुम्ब।
- 22 चुरब मुरुमी राम्शी पोक्ब। गाइशशा बाक्ब मुरुमी शुश मरिम्शो पपाइक्ब। हितोपदेश १५:१८; हितोपदेश २२:२४
- 23 मुर आन ठेयब लेशशोमी मेको कली आइक्च सेल्ब। ब्रेम्शो थुं पाइशशो मुर चहिं मान ताइब।
- 24 खुइ नु वारचु दुम्ब मुरुमी आंम आ कली मदाक्ब। खुइ पचा पुंडसीब मुर आ सराप नेंबमी यो मारेइ मदेब। लेवी ५:१
- 25 मुर क्येडा हिंचा ब्वारद खोदेंशो बाक्ब। तन्न परमप्रभु यावे कली थमा सुइक्चा ब्रोंइतीक बाक्ब। मती १०:२८
- 26 शुश मुरुमी सासन पाइब नु शुच्चा दाक्नीम। तन्न परमप्रभु यावे रे मुरपुकीम ठीक निसाफ ताइनीम।
- 27 ठीक पाइबपुकीमी मरिम्शो पाइब तशा ग्रांगा दीनीम। तन्न परमप्रभु यावे आ अरेशो मटीबपुकीमी ठीक पाइब आन कली तशा ग्रांगा दीनीम।

## 30

आगुर आ लोत्र

- 1 एको मास्सा डा याकेह आ तौ आगुर आ देशो लोत्र बाक्ब। मेकोमी इथीएल नु उकल कली एको लोत्र पाप्तु। मेकोमी “गो परमप्रभु कली माल्ना माल्न बाक्ती, तन्न मथिदु। उत्पती २५:१२-१४
- 2 थमा पा गो मुर आन दातेमी निप्स मपाइशशो मुर दुम्ती। गो नु मुर आन के खोदेंशो रुपतीक मबाक्ब।
- 3 गो जोक्ब तुडक्ब दुम्चा मशेंसीड। मिनु का ला बाक्शो परमप्रभु यावे कली मतुडक्नुड।
- 4 सु स्वर्ग लशा, लेशशा यिशो बाक्बा डा? सुम फश कली आ गुइमी ग्याइक्ने चाप्वा डा? सुम समुन्द्र डा ब्वाक्कु कुम्लो पने चाप्वा डा? सुम रागी आ सुर सेला? मेको आ नें मार बाक्बा? मेको आ तौ आ नें मार बाक्बा? गे तुडक्नेवे हना” देनो। अय्युब ३८:२८-३४
- 5 परमप्रभु आ लोत्र नेल्ल थमा बाक्ब। सु मेकेर लशा खुइसीबा, मेको कली श्येत रे तेक्ब। भजन संग्रह १२:७

6 मेको आ लोवमी मारेइ यो मतेम्दो। तेम्ताक्वी हना, इ कली हुइशशा, गे जोल पाइब मुर देंचा पुंडसीनेवे। ब्यवस्था ४:२

7 मिनू “गो इन कली थोव्रक निक्शी पुंडनुड। आं बेक्चा क्येडा डोंइती मेको आं कली गेयीनी।

8 हेंथे पतीके नु जोल पतीक आं क्येडा डोन वोतीन। आं कली पुडग मसेल्यीनी नु शुश क्येट थीब यो मसेल्यीनी। आं कली माल्चा डा जचा थोव्रक गेयीनी। तिमोथी ६:६-८

9 मारेदे हना गो नु मारेइ मारेइ बाकत हना, गो इन कली प्रेनुड। मिनू ‘परमप्रभु यावे सु बाक्बा?’ देनुडा कों? मिनू गो पुडग दुम्ती हना, खुइ पा आं परमप्रभु आ नें आइक्च सेल्शा मुने तोक्नुडा कों?” देती। प्रस्थान ५:२

10 गेय पाइब आ पर्वम आ होव्रप नु मरिम्शो लोव्र मपावो। मो पाप्तीवी हना, मेकोमी इ कली सराप पाइब। मिनू गे श्येत जाइनेवे।

11 का निक्शी मुरुमी आन आफ कली सराप पाइनीम। मिनू आन आम कली आसीक मगेनीम।

12 का निक्शी मुरुमी आम कली “गो गेना हना यो रिम्शो पाइब मुर नड” देनीम। तन्न मेको आन मरिम्शो पशो मक्याम्सीशो बाक्ब। हितोपदेश २०:९

13 का निक्शी मुर ठेयब लेशशो बाक्नीम। मेको शुश बोरशो बाक्नीम।

14 का निक्शी मुर आन खुइ तरवार नु छूरी खोदेशो बाक्ब। मेकोपुकीमी पुडग आन कली नाक्शा, श्येत जाइब आन कली ब्वाइनीम।

15 मिनू याफे आ तमी निक्शी बाक्नीस। मेको निक्शीमी “गेयी, गेयी” देनीस। मिनू अरु थोव्रक सां बाक्नीम। मेकोपुकी गेनायो मरुनीम। अर्को ४ ओटा थोव्रक बाक्नीम। मेकोमी गेनायो “मोक्ल” मदेनीम।

16 बेक्शो मुर आन बाक्तीके, आल मथीब कोव्रज, ब्वाक्कु मतशो सोव्रशो रू नु मी, एको ४ ओटा थोव्रकमी गेनायो “गाप्ती” मदेनीम।

17 आफ कली शुक्शी पाइब नु आम कली मटीब मुर आन मिक्च खदीमी कोक्शा ग्रुंडनीम। मिनू गिदपुकीमी ब्वाइनीम। हितोपदेश २०:२०

18 थोव्रक सां बाक्नीम। मेको तशा गो छक लाक्ती। ४ ओटा थोव्रक कली यो रुप्ने मचबु।

19 मेको मार बाक्तेकम देशा हना, ककाकुली आ सरीडम बेरतीके, रोगु मेर बुस्स आन गाक्तीके, ठेयब समुन्द्री जहाज आन गाक्तीके नु वोंइश मुर नु मीश आल आस लां मेको रुप्ने मचबु।

20 हेंथे गाक्ब मीश मुरुमी जाइब। मिनू आ शोव्र शोप्शा “गो मारेइ मरिम्शो मपड” देंब।

21 मिनू थोव्रक सांमी रागी कली खिखि पपाइक्नीम। ४ ओटा थोव्रक मेको फाल्ने मचाप्चा डा बाक्नीम। उपदेशक १०:६-७

22 मेको ४ ओटा थोव्रक मार बाक्तेकम देशा हना, वाइल पिप दुम्शो, मूर्ख जशा ब्वशा रूशो,

23 मरिम्शो मीश आल कली ग्युबे पशो नु वाइलीम आ होव्रपोक्म आ पा डा मेको खिं डा होव्रपोक्म दुम्शो, एको ४ ओटा फाल्ने मचाप्चा डा थोव्रक बाक्नीम। ब्यवस्था २४:१-४

24 रागीम ४ ओटा आइक्च थोव्रक बाक्नीम। तन्न मेकोपुकी थम जोक्ब तुइक्ब बाक्नीम।

25 रकमिक्च शुश बोल मपाइशो बाक्तेकम हना यो, आन जचा थोव्रक खुप्ची ना खुप्शा तेलनीम। हितोपदेश ६:६-८

26 ब्विल्ली खोदेशो जन्तु शुश बोल मपाइशो बाक्नीम। मो हना यो मेकोमी आन खिं रोगुम सेलनीम।

27 मिनू माले आन के पिप मबाक्ब। मोदेशो बाक्तेकम हना यो, मेकोपुकी लडाइ पाइब खोदेशो पा तांती खिक्शा गाक्नीम।

28 खोते आन कली गुडम ग्याइक्ने चाम्सीब हना यो, मेकोपुकी पिप आ दरवारमी बाक्नीम।

29 मिनू थोव्रक सां बाक्नीम। मेको ठेयब मुर खोदेशो पा गाक्नीम। मिनू ४ ओटा थोव्रक बाक्नीम। मेको ठेयब लेशशा हिरनीम।

30 मेको मार बाक्नीम देशा हना, गुप्स, जन्तु नेल्ल आन दातेमी नेल्ल क्येडा बोल्यो बाक्ब। मेको सुइ क्येडा महिब।

31 ठेयब लेशशा गाक्ब भाले, बोका नु आ सेना आन डोंइती गाक्ब पिप बाक्नीम।

32 गे मूर्ख दुम्शा, आम कली ठेयब सेलतीवी हना, गे मरिम्शो पचा मिम्शो बाक्ते हना, इ कुल सुम्सो।

33 मिनू दूध खाक्शोनु नौनी घ्यू गूब। नें तुप्शोनु, हुश यीब। मोपान गाइक्चा बोक्त हना, राम्शी बोक्ब।

## 31

लेमुएल आ देशो लोव

1 पिप लेमुएल आ लोव्र। मिनू पिप आ ममामी एको लोव्र पिप कली शेंशो बाक्त। हितोपदेश ३०:१

2 मेकोमी “आं तौ, गो इ कली मार देनुडा डा? गो इ पर्वम परमप्रभु यावे कली पुंडता।

3 इ बोल मीश मुर आन कली मगेवो। मेको हेंथे गाक्बपुकीमी पिप आन कली खतम सेलनीम। ब्यवस्था १७:१७; १राजा ११:१,४

4 लेमुएल, पिप कली अडगुर शांबु तूचा मशिरब। मिनू सासन पाइबमी रकसी काइ तूचा मदुम्ब। हितोपदेश २०:१

5 ठेयब मुरपुकी तूशा दुक्तेकम हना, अरेशो लोव्र प्रेनीम। मिनू श्येत जाइब आन कली निसाफ पतीकेमी दूली पाइनीम। मेको काइ मदुम्ब।

6 खतम दुम्चा चिक्शो मुर आन कली रकसी तूचा गेवो। मिनू अडगुर शांबु थुं लुक्च लशो आन कली गेवो।

7 मोपा तूशा, मेकोपुकीमी आन पुडग दुम्तीके प्रेनीम। मिनू आन श्येत ममिम्नीम।

8 ब्वाक्ने मचाप्च नु मग्येरसीशो नेल्ल आन पर्वम ठीक निसाफ पावो। अय्युब २४:१२

9 श्येत जशो नु पुडग आन कली ठीक निसाफ पशा वारच पावो” देंमाक्त।

रिम्शो गेय पाइब मीश मुर

10 रिम्शो गेय पाइब मीश आल सुम थिन्ने चाप्बा डा? मेको हीरा मोती क्येडा शुश क्येट लाइब बाक्ब। हितोपदेस १८:२२

11 मेको आ वोंइशेमी मेको कली रिम्शो पा थमा सुइक्ने चाप्ब। मिनु आस माल्शो मारेइ मारेइ गाप्ब।

12 मेको ब्रोंडम सम्म आ वोंइश कली रिम्शो पाइब। मरिम्शो गेनायो मपाइब।

13 मेकोमी ऊन नु रुवा खुप्शा, पांइशा शुश गेय पाइब।

14 शुश लेयतीक मारेइ मारेइमी ब्रीशो जहाज खोदेशो पा मेकोमी खिमी जचा थोत्रक चाक्ब।

15 मेको सुनी कना बोक्शा मार मार जचा तूचा क्येपाइक्ब। आ वाइलीम आन कली मार गेय पचा माल्बा, नेल्ल अरेब।

16 शुश मिम्शा नोले मेकोमी रू का ग्याप्ब। मिनु मेकेर आंमा चेम्शो क्येटीमी अडगुर खुम्ब।

17 मेको आ रिम्शो गेय पतीके आ गुड बोल्यो बाक्नीम।

18 मेकोमी आ लेयतीक थोत्रक रिम्शो पा लेयसीशो ताइब। नाक्दो आ बत्ती मकाप्ब।

19 मेकोमी प्यूरी लाइशशा, पांइतो पांइब। आ वा आंमा प्रोत्रब।

20 मेकोमी पुडग आन कली वारच पाइब। मिनु श्येत जाइब आन कली आन माल्शो गेब।

21 मेको ग्यू पची ना महिब। मारदे हना आ मुर नेल्लेमी होशो वा फेक्शो बाक्नीमी।

22 मेकोमी आ ब्रतीक रिम्शो पा सेल्ब। मेको आ फेक्तीक प्याजी रड डा रिम्शो पा किरशो सुती वा के बाक्नीम।

23 मेको आ वोंइश ठेयब मुर दुम्शा, सहर डा ठेयब लाप्चोमी बाक्मेनु, रागी डा खाल्पा आन दातेमी बाक्ब।

24 मेकोमी सुती के फेक्तीक वा सेल्शा लेयब। किप्शुर यो ग्याप्ब लेयब आन कली लेयब।

25 मेको नु सक्ति नु मान ततीके बाक्ब। मेकोमी दीसा मार दुम्बा, दे रिशशा सुर्ता मपाइब।

26 मेकोमी लोत्र पवानु, जोक्ब तुइक्ब लोत्र ला पाइब। मिनु मुर आन कली शिशी पचा कली शेंब।

27 मेकोमी आ खिं डा मुर आन कली रिम्शो पा कोत्रब। गेय मपथु, हेंथे पा मजाइब।

28 मेको आ आलपुकीमी “आंइ आम ग्येरसीशो बाक्ब” देंनीम। आ वोंइशेमी यो मेको कली मान पाइब।

29 मेकोमी “शुश मीश मुरपुकीमी रिम्शो पाइनीम। मेको आन क्येडा गे रिम्शो पाइब बाक्नेवे” देंब।

30 मुर आन दारस जोल बाक्ब। मेको दारस जाम्शा लाइब। तन्न परमप्रभु यावे कली मान पा हिंब मीश मुर मान पाइक्चा पुंइसीब। हितोपदेस ११:२२

31 मेको मीश मुर कली आ गेय पा चेम्शो गेवो। सहर डा ठेयब लाप्चोमी मुर नेल्लेमी मेको कली मान पामेक्ल।

## उपदेसक

**ब्रेक्ब मुर:** सोलोमनम ब्रेक्शो बाक्ब देंसीब।

**गेना ब्रेक्शो:** सोलोमनमी एको किताब १३० बि. सी. क्येडा डोंइती, आ सासन पशो थुम्ची ना ब्रेक्शो बाक्ब, दे मिन्मीम।

**मार ब्रेक्शो:** मारेड मारेड जाम्शा लाइब। मुर ब्रोंइशो सम्म परमप्रभु आ गेशोम ग्येरशा बाक्चा माल्ब। थमा पा जोक्तीक तुइक्तीक थुं परमप्रभु कली मान पा हिंशा आ देंशो टिशा पचा माल्ब।

नेल्ल जाम्शा लाइब बाक्नीम

- 1 एको दाऊद आ तौ, यरूसलेम डा पिप आ शेंशो लोत्र बाक्ब।
- 2 मेको शेंबमी “जाम्शा लाइनीम, मारेड मारेड जाम्शा लाइब बाक्नीम। जाम्शा लाइनीम, नेल्ल जाम्शा लाइब बाक्नीम।
- 3 मुरुम रागीम श्येत पा गेय पा, मार ताइनीमी डा? नाम दुप्शा श्येत पा गेय पा, मार दुम्बा डा? उपदेसक २:२३
- 4 पाला का लाइब। मिनु अर्को पाला जाक्ब। तन्न रागी गेना हना यो लीब। भजन संग्रह १०:३
- 5 नां दाप्ब। मिनु नां परेब। मेको लेंशा आ दाप्तीकेम रीब पा जाक्ब।
- 6 फश दक्खिन गे पाइब। मिनु उत्तर गे लाइब। मेको गेना हना यो आ हिरतीकेम हिरशा लेप्ब।
- 7 खोला नेल्ल शाइशशा समुन्द्रम लाइनीम। तन्न समुन्द्र गेनायो मब्रीब। खोला ते गे शाइक्नीमी, मेक गेन शांडस डा शांडस बाक्नीम।
- 8 तेकोइ आइदी रे आइक्था सम्म रिम्शो मबाक्नीम। सुइमी देंशा देने मचाप्नीम। कोव्रशा मिक्च गेनायो मरूब। नेंशा नोफा गेनायो मदाइब। भजन संग्रह १०:१०; हितोपदेस २७:२०
- 9 मार मार दुप्शा बाक्मे, मेको लेंशा दुम्ब। मार पशो बाक्मे, मेको लेंशा पांडसीब। रागीम मारेड नक मबाक्नीम” देंत।
- 10 मारेड आ परबंम सुइमी “कोव्रडीन, एको नक बाक्ब” देने चाप्नीमी? मेको दा डोंइती रेन मेकेर बाक्त। मेको साइ डोंइती रेन बाक्त।
- 11 साइ डोंइती डा मुर आन कली सुइम ममिन्मीम। मिनु मुल जाक्ब मुर कली नोले डा मुरुम यो ममिन्मीम।

जोक्तीक तुइक्तीक जाम्शा लाइब

- 12 गो, एको लोत्र शेंबमी यरूसलेममी इस्राएल डा पिप दुप्शा सासन पाता।
- 13 गो आं जोक्तीक तुइक्तीकेम रागीमी मार मार पांडसीबा, मेको नेल्ल तुइक्चा दाक्ताकड। परमप्रभुमी मुर आन कली मोदेंशो तुइक्चा माल्तीक थुं गेशा, श्येत गेप्नु।
- 14 गो रागीमी पशो गेय नेल्ल ताता। मेको नेल्ल जाम्शा लाइब बाक्नीम। मेको फश कली खेदा पशो खोदेंशो बाक्ब।
- 15 मार रोम्सीशो बाक्बा, मेको कली दिंपाइक्ने मचाप्नीम। मबाक्शो थोत्रक हिकने मचाप्नीम। उपदेसक ७:१३
- 16 गो आं थुमी “कोव्रडीन, गो आं क्येडा डोंइती यरूसलेममी सासन पाइब नेल्ल आन क्येडा शुश जोक्ब तुइक्ब थुं पाइशो मुर दुम्ती। गो मारेड मारेड तथा तुइक्ताकड।
- 17 गो जोक्तीक तुइक्तीक रुप्चा, बौला दुम्तीक नु मूर्ख दुम्तीक तुइक्चा थुं पाता। तन्न मेको दा फश कली खेदा पशो खोदेंशो ला बाक्त, दे तुइक्ताकड। उपदेसक २:१२; उपदेसक ७:२५
- 18 मारदे हना शुश जोक्तीक तुइक्तीकेम शुश श्येत जपाइक्ब। गे दोशो जोक्ब तुइक्ब दुम्नीमी, मोशो श्येत जाइनीनी” दे तुइक्ताकड।

## 2

नेल्ल जाम्शा लाइब बाक्ब

- 1 मिनु गो आंम कली “मुल गो ग्येरसीनुड। मिनु ग्येरसीशो थुं कली कोव्रशा दाक्नुड। तन्न मेको यो जाम्शा लाइब ला बाक्त, दे तुइक्ताकड।
- 2 रिस्सीचा यो मूर्ख गेय बाक्ब। मिनु ग्येरसीशा बाक्शोनु, मार रिम्शो दुम्बा डा?
- 3 गो आंम कली ग्येरपाइक्चा कली इक्का अडगुर शांबू तूता। मो पडानु आं थुंम बाक्शो जोक्तीक तुइक्तीक मला। मूर्ख आ गेय रुप्चा कली मोदेंशो पाता। मिनु गो मुर आन कली इक्का नाक्त रागीम ब्रोंइचा कली रिम्शो गेय मार बाक्बा, दे रुप्चा माल्ता। हितोपदेस ३१:४
- 4 गो ठेयब गेय पाता। गो आंम कली खिंपुकी सेल्शा, अडगुर रू यो सेल्तामी।
- 5 गो फल फुल रूपुकी नु बाक्तीकपुकी यो सेल्शा मेकेर नेल्ल खाल डा फल फुल रवापुकी खुम्तामी।
- 6 रिम्शो पा बारना बारन लशो रवा आन कली ब्वाक्कु लुक्चा कली ठेयब दोम्ली सेल्तामी।
- 7 गो वाइलीम वाइलपुकी ग्याप्तामी। आं खिंमी जरमेशो वाइलीम वाइल यो बाक्तेकम। गो शुश बी ब्यफ नु क्यारश भेडा थुल्तामी। गो आं क्येडा डोंइती यरूसलेमम बाक्ब सुइ आन के आं के खोड बी ब्यफ नु क्यारश भेडा मबाक्म।
- 8 गो आं कली सुन चांदी नु रागी रागी डा पिप रे शुश शोप तेल्तामी। गो कुम्सो पाइब मीश मुर नु वोंइश मुर वोइक्ताकमी। आंम कली ग्येरपाइक्चा कली शुश मीश चाक्तामी।
- 9 यरूसलेममी आं क्येडा डोंइती डा मुर नेल्ल आन क्येडा गो ठेयब दुम्ती। आं जोक्तीक तुइक्तीके गो नुन लीत। १राजा १०:२३

10 गो मार कोत्रचा दाकडा, मेकोन कोत्रता। आं दाकशो नेल्ल पाता। मोपा आं पशो गेय नेल्लेमी आं थुं कली ग्येरपाडव्तु। मेको आ श्येत पा पशो गेय रे ताता।

11 मो हना यो मेको आं पशो गेय नेल्ले नु आं मार मार तचा कली श्येत पा पशो गेय नेल्ल कोत्रडुनु, मेको नेल्ल जाम्शा लाइब बाक्तेकम। मेको नेल्ल फश कली खेदा पशो खोदेशो शोर गाकशो गेय ला बाक्तेकम।

तुइक्तीक नु मूर्ख जाम्शा लाइब

12 मिनु गो जोक्तीक तुइक्तीक, निप्स ग्यशो दुम्तीक नु मूर्ख दुम्तीके रुपचा थुं पाता। पिपम डोंइती थुम्शो गेय आ क्येडा नोले जाक्बम मार पने चाप्या डा? डोंइती नेल्ल पशो बाक्त।

13 मिनु गो मार ताता देशा हना, दोपा छिडछिड क्येडा छेडछेड रिम्शो बाक्बा, मोपान मूर्ख दुम्चा क्येडा जोक्तीक तुइक्तीक रिम्शो बाक्ब।

14 रुपच मुर मारेड मारेड ताइनीम। तन्न मूर्ख चहिं छिडछिडमी गाक्नीम। तन्न नोले मेको नेल्ल खाल का पा लाइनीम।

15 मिनु मूर्ख कली दुम्तीक आं कली यो दुम्ब। गो मारदे जोक्ब तुइक्ब दुम्डा? मिनु गो आंमा कली 'मेको यो जाम्शा लाइब बाक्ब' रे देंती।

16 मारदे हना जोक्ब तुइक्ब नु मूर्ख निम्फा आस कली नोले सुडम ममिन्मी। मेको निम्फा आस कली प्रेसीब। जोक्ब तुइक्ब दोदेशो पा बेक्बा, मूर्ख यो मोदेशो पा बेक्ब। भजन संग्रह ४९:११

17 मोपतीके गो ब्रोंइचा मदाव्तु। मारदे हना रागीमी पशो गेय नेल्ल श्येत ला बाक्त। मेको नेल्ल जाम्शा लाइब बाक्तेकम। मेको फश कली खेदा पशो खोदेशो ला बाक्त।

गेय पशो नेल्ल जाम्शा लाइब

18 रागीमी आं श्येत पशो गेय नेल्ल आन कली गो काइ मदाव्तु। मारदे हना मेको गो आं नोले जाक्ब आन कली प्रोंइचा माल्नुड। उपदेसक २:२१; भजन संग्रह ३९:७

19 मिनु मेको आ नोले जाक्ब जोक्ब तुइक्ब बाक्म कों मूर्ख बाक्म, दोपा तुइक्बा? मो हना यो आ श्येत पा पशो गेय नेल्ले मेको केन दुम्ब। मेको यो जाम्शा लाइब बाक्त।

20 मिनु आं श्येत पा मिम्शा पशो गेय नेल्लेम आं थुं लुकच लत।

21 मारदे हना सुइमी जोक्ब तुइक्ब दुम्शा शुश गेय पाप्तु हना यो, मेको आ पशो नेल्ल अरु मुर आन कली प्रोंइशा वोइक्चा माल्ब। मेको ताइब मुरुमी मेको आ परबम मारेड श्येत मपशो बाक्ब। एको यो जाम्शा लाइब नु थम मरिम्शो बाक्ब।

22 मुरुमी रागीम बाक्शा शुश श्येत गेय पा, मार ताइनीमी डा?

23 मेको नाक्त कित कित श्येत जाइनीम। मिनु नाक्दो यो आन थुं नाइक्चा मताइनीम। मेको यो जाम्शा लाइब बाक्ब।

24 मुरुमी जचा, तूचा नु आंम गेयमी ग्येरशा बाक्चा क्येडा लाक्शा अरु मारेड रिम्शो मबाक्ब। मेको यो परमप्रभु रे जाक्शो तशो बाक्नुड। उपदेसक ३:१२, २२; उपदेसक ५:१७; उपदेसक ८:१५; उपदेसक ९:७

25 मारदे हना परमप्रभु रे मजाक्त हना, सुम जचा नु रिम्शो पा बाक्चा ताइबा डा?

26 परमप्रभुमी आ दाकशो मुर कली जोक्तीक तुइक्तीके नु रुपचा ग्येरतीक थुं गेब। तन्न मरिम्शो पाइब आन कली खुप्तीक नु तेलतीक गेय पपाइक्ब। मिनु नोले मेको नेल्ल आ दाकशो मुर आन कली गेब। मेको यो जाम्शा लाइब नु फश कली खेदा पशो खोदेशो ला बाक्ब। हितोपदेस १३:२२; हितोपदेस २८:८

### 3

मारेड मारेड आन पतीक ना बाक्ब

1 मारेड मारेड के पतीक ना बाक्ब। रागीमी मारेड मारेड आन के पतीक ना बाक्ब। उपदेसक ८:६; भजन संग्रह ३१:१६

2 जरमेतीक ना बाक्ब। मिनु बेक्तीक ना बाक्ब। खुम्तीक ना बाक्ब। मिनु तुलतीक ना बाक्ब।

3 साइक्तीक ना बाक्ब। मिनु सापाइक्तीक ना बाक्ब। प्रेलतीक ना बाक्ब। मिनु सेलतीक ना बाक्ब।

4 डाक्तीक ना बाक्ब। मिनु रितीक ना बाक्ब। रोंका पतीक ना बाक्ब। मिनु सिल पतीक ना बाक्ब।

5 फुल्लु फ्रतीक ना बाक्ब। मिनु मेको खुप्तीक ना बाक्ब। मुप्तीक ना बाक्ब। मिनु ममुप्तीक ना बाक्ब।

6 मालतीक ना बाक्ब। मिनु सामतीक ना बाक्ब। चोइक्तीक ना बाक्ब। मिनु ताइक्तीक ना बाक्ब।

7 खाक्तीक ना बाक्ब। मिनु फेरतीक ना बाक्ब। सिकसी पा बाक्तीक ना बाक्ब। मिनु लोत्र पतीक ना बाक्ब।

8 दाक्तीक ना बाक्ब। मिनु मदाक्तीक ना बाक्ब। लडाइ पतीक ना बाक्ब। मिनु दुशा बाक्तीक ना बाक्ब।

9 गेय पाइबमी आन श्येत पा गेय पशो रे मार ताइनीमी डा?

10 परमप्रभुमी मुर नेल्ल आन कली श्येत डा गेय गेप्तु। गो मुर मेको गेय पस डा पस तातामी।

11 मेकोमी मारेड मारेड आन कली गारपाइशशा सेल्लु। मेकोमी गेना हना यो ब्रोंइशा बाक्तीके मुर आन थुंम वोइव्तु। मो हना यो मेकोपुकीमी परमप्रभुमी डोंइती रे नोले सम्म मार पवा, मेको रुपे मचाप्नीम। उपदेसक ८:१७

12 मुर ब्रोंइमा सम्म ग्येरशा नु रिम्शो पा बाक्चा माल्नीम। मेको क्येडा रिम्शो अरु मारेड यो मबाक्ब, दे तुइक्नुड। उपदेसक २:२४

13 परमप्रभु आ दाकशो मार बाक्ब देशा हना, मुर नेल्लेमी जशा, तूशा आन गेयम ग्येरशा बाक्मल, देशो बाक्ब।

14 परमप्रभुमी मार पाइबा, मेको गेना हना यो लीब, दे गो तुइशशो बाक्नुड। मेकेर मारेड तेम्ने नु गुंइने मचाप्नीम। मुर नेल्लेमी परमप्रभु कली हिंशा मान पामेक्ल, दे मोदेशो पाप्तु।

15 मार बाक्मे, मेको डोंडती रेन बाक्त। मेको मुल दुम्ब डोंडती रेन बाक्त। मिनु परमप्रभुमी डोंडती दुम्शो लेंशा दुम्पाइक्व।

रागी डा ठीक निसाफ पतीके

16 मिनु गो रागीम अर्को का यो ताता। मार ताता देंशा हना, ठीक निसाफ पतीक आ पा डा काइ मरिम्शो पतीक बाक्बाक्त। ठीक पतीक आ पा डा जोल पतीक बाक्बाक्त।

17 गो आं थुमी “परमप्रभुमी ठीक पाइब नु आ अंरेशो लोत्र मटीब निम्फा आस कली निसाफ पाइब। मारदे हना मेकोमी मारेड मारेड नेल्ल कली नु गेय नेल्ल कली आ पतीक ना सेल्लतु। उपदेसक १२:१४

18 गो आं थुमी मुरपुकी बस्तु भाव खोदेशो नकी, दे तुइक्वमेक्ल, दे परमप्रभुमी मेको आन कली नाक्शा कोत्रब” दे यो मिम्ताक्व।

19 मुर नु बस्तु भाव आन लां खाल का डा बाक्ब। मेको खाल का डा पा बेक्नीम। का दोपा बेक्बा, अर्को यो मोपान बेक्ब। मेको नेल्ल खाल का डा पा सोक्त कीनीम। मुर आन ततीके बस्तु भाव आन क्येडा रिम्शो मबाक्ब। मारदे हना नेल्ल जाम्शा लाइब बाक्नीम। भजन संग्रह ४९:१३, २१

20 मेको नेल्ल बेक्नीम। मारदे हना मेको नेल्ल खप रे दुम्शो नम। मोपतीके मेको नेल्ल लेंशा खप दुम्नीम।

21 मिनु मुर आन सोक्त चहिं ग्येत्थ नु बस्तु भाव आन सोक्त चहिं खप लुक्च लाइब, दे सुम तुइश्शो बाक्बा डा?

22 मोपतीके मुर नेल्ले आमं गेयमी ग्येरसीशा बाक्कीन। मेको नेल्ल क्येडा रिम्शो बाक्ब। मारदे हना मुरुमी आ नोले मार दुम्बा, दोपा तुइक्वे चाप्बा डा?

## 4

दिप्चा पुंडसीब नु श्येत जाइब

1 मिनु गो रागीम कोत्रडुनु, मेकेर थम मरिम्शो पशो ताता। गो दिप्चा पुंडसीशो आन डाक्शो ताता। मेको आन कली लेम्ब सुइ मबाक्म। मेको मरिम्शो पाइब सक्ति पाइश्शो बाक्तेक्म। दिप्चा पुंडसीब आन कली चहिं लेम्ब सुइ मबाक्म।

2 बेक्शो मुर, ब्रोंडशो आन क्येडा ग्येरसीशो बाक्नीम, दे तुइक्वाक्व।

3 तन्न मेको निम्फा आस क्येडा मुल मजरमेशो मुर ग्येरसीशो बाक्ब। मारदे हना मेकोमी रागीम मरिम्शो दुम्शो मतशो बाक्ब। उपदेसक ६:३

4 मिनु गो मार ताता देंशा हना, मुरपुकी श्येत पा अरु आन कली गेहे पतीके रे जोक्व दुम्नीम। मेको यो जाम्शा लाइब नु फश कली खेदा पशो खोदेशो ला बाक्ब।

5 मूर्खं मुर फिम्ला पा बाक्ब। मिनु आ खतम दुम्तीक आमंन चाक्ब।

6 फश कली खेदा पशो खोदेशो पा, शुश श्येत पा शुश चेम्चा क्येडा, थुं नाइश्शा इक्का खोइ चेम्चा रिम्शो बाक्ब। हितोपदेस १५:१६

7 मिनु गो लेंशा रागीम अरु जाम्शा लाइब थोत्रक तातामी।

8 मेको मार ताता देंशा हना तमी तौ नु सुइ लोक्ब मपाइश्शो मुर का बाक्त। तन्न मेकोमी शुश श्येत पा गेय पाइबाक्त। आ गेय गेनायो मथुश्थु, आ शोंपोम थुं मनुइबाक्त। मिनु काबु मेकोमी आमं कली “गो मारदे मोदेशो श्येत डा गेय पना पन बाक्नुड? गो मारदे आमं कली मारेड रिम्शो मपाइनुडा?” देंत। मेको यो जाम्शा लाइब नु श्येत जतीक ला बाक्ब।

9 मिनु का क्येडा निक्शी दुम्शो रिम्शो बाक्ब। मारदे हना मेकोपुकीमी आमं श्येत पा पशो गेय रे पा रिम्शो ततीक ताइनीम। उत्पती २:१८

10 दोकका पा का थिस्साक्व हना, मेको आ वारचमी मेको कली पोक्ब। तन्न आबी, का ला दुम्शा थिश्शोनु, पोक्शा वारच पाइब मबाक्त हना, मरिम्शो दुम्ब।

11 मोदेशो पा मुर निक्शी काथा इप्ताक्स हना, मेको निक्शी जेनीस। तन्न का ला इप्शोनु, दोपा जेचा डा?

12 का कली अरुमी फुइनीम। तन्न निक्शी दुम्ताक्स हना, आमं कली प्रोंइने चाप्नीस। थमा पा पोया सांमी किरशो डोरी रीब पा मब्रोंडक्व।

रिम्शो दुम्चा यो जाम्शा लाइब

13 अर्ती मनंनं खूशो मूर्खं पिप क्येडा जोक्ब तुइक्व पुइग ठिटा का दुम्चा रिम्शो बाक्ब।

14 मेको जेल्लखान रे गूशा पिप दुम्शो बाक्म कौ? मेको पुइग बाक्त हना यो पिप दुम्ने चाप्ब।

15 गो रागी डा मुर नेल्ल मेको पिप आ गेय पाइब ठिटा आ नोले खोइश्शो तातामी।

16 मेकोमी शुश मुर आन कली वारच पाप्तु। तन्न मेको क्येडा नोले जाक्बपुकी मेको तशा मग्येरसम। मेको थमा पा जाम्शा लाइब नु फश कली खेदा पशो खोदेशो बाक्ब।

## 5

परमप्रभु कली मान पा हिनीन

1 परमप्रभु आ खिं लनीनु, मूर्खं आन क्योरशा चढेशो चढेचा क्येडा परमप्रभु आ लोत्र होस पा नेंचा रिम्शो बाक्ब। मारदे हना मूर्खमी मरिम्शो पचा प्रोंइस मजोक्नीम। भजन संग्रह १५:१; यसैया ३३:१४-१६; मती ५:२३-२४; १सामुएल १५:२२

2 ब्वाक्चा कली मचुइक्तीन। परमप्रभु आ डोंडती रीब पा लोत्र मपन। परमप्रभु स्वर्गमी बाक्ब। गे चहिं रागीम बाक्नीनी। मोपतीके शुश मन्वाक्कीन।

3 दोपा शुश सुर्ता पतीकेम डोमु ताइनीमी, मोपा मूर्खमी शुश लोत्र पाइब। याक्ब १:१९; मती ६:७



4 गे परमप्रभु आ डोंडती कसम जनीनु, मेको खाप्चा कली देश मपने। परमप्रभु मूर्ख आन कली तशा मग्येरब। गे इन कसम जशो खाप्चीन। ब्यवस्था २३:२२; १सामुएल १:११, २८; भजन संग्रह ५०:१४

5 कसम जशा मखाप्चा क्येडा, कसम मजशो रिम्शो दुम्ब।

6 इ लोत्रमी इ कली पाप मपपदल। मिनु परमप्रभु आ खिं डा लोत्र कुरब कली “आं कबल पशो प्रेंदु बाक्त” मदेनीन। इ लोत्रमी पतीके परमप्रभु गाइरशा इ गेय नेल्ल खतम पोक्ब।

7 शुश लोत्र नु शुश डोमुमी जाम्शा लाइब सेल्ब। मोपतीके परमप्रभु कली मान पा हिनीन। येरमीया २३:२७-२८

शोंप यो जाम्शा लाइब बाक्ब

8 राज्य कामी पुडग आन कली दिप्शो नु मेको आन कली ठीक निसाफ मपशो ताइतीनी हना, छक मलाक्कीन। मारदे हना मेको आन क्येडा अधिकार पाइरशो का बाक्ब। मिनु मेको नेल्ल आन क्येडा ठेयब अर्को का बाक्ब। प्रस्थान २३:६

9 पिपमी रू डा गेय पाइब आन कली अरेशा रिम्शो कोत्रतु हना, मेको रागी रिम्शो दुम्ब।

10 सुमी क्येट दाक्बा, मेको कली क्येटीमी गेनायो मजाक्दीप्ब। सुम शोंप दाक्बा, मेको मुआ आ चेम्शोमी गेनायो मरूब। मेको यो जाम्शा लाइब बाक्ब। हितोपदेस २८:२२; लूका १२:१५

11 शोंप शुश बारमेनु, मेको जाइबपुकी यो बारनीम। मिनु मेको होत्रप कली कोत्रचा डा लाक्शा, अरु मार रिम्शो दुम्बा डा?

12 शुश गेय पाइब मुर दोशो जाप्टु हना यो, निन्द्रा पचा दाक्ब। तन्न शोंप पाइरशो मुर आ शुश शोंपोम पतीके मेको कली निन्द्रा मजाक्ब।

13 गो रागीमी थम श्येत लाक्चा डा मरिम्शो पशो का तशो बाक्नुड। मेको मार बाक्ब देंशा हना मुरुमी आंमा खतम दुम्बा कली शोंप तेल्लो बाक्ब। मती १९:२२

14 मेकोमी दोकका पा आ शोंप थुमा नोले, मेको के आल दुम्ब। मेना मेको आ गुइमी मारेइ मबाक्ब।

15 मुर ममा आ कोत्रज रे पा शिन्ना जाक्ब। मिनु मेको दोपा जाक्मे, मोपान लेरशा लाइब। मेकोमी आ श्येत पा चेम्शो मारेइ लाइक्चा मताइब। अय्युब १:२१; भजन संग्रह ४९:१८; १तिमोथी ६:७

16 एको यो श्येत लाक्चा डा मरिम्शो का बाक्ब। मुर दोपा जाक्बा, मोपान लेरशा लाइब। मिनु मेको कली मार रिम्शो दुम्बा डा? मारदे हना मेको आ पशो श्येत नेल्ल फश खोदेशो दुम्ब।

17 मुरुमी आन ब्रोंडतीक नाक्त सम्म श्येत पा जशा तूशा, हिंशा, रोइ पा, सुर्ता पाडनीम।

18 मिनु गो मार ताता देंशा हना, परमप्रभुमी गेशो एको इच्छा नाक्ती ब्रोंडतीकेमी रागीम जचा, तूचा नु आंम श्येत पा पशो गेयमी ग्येरसीचा मुर कली रिम्शो बाक्त। मारदे हना मेकोन, मेको आ भाग बाक्ब।

19 मेको क्येडा लाक्शा परमप्रभुमी मुर आन कली शुश शोंप नु रूपुकी गेब। मिनु मेको कली मेको नेल्ल ताक्चा नु आंम गेयमी ग्येरशा बाक्चा गेब। मेको परमप्रभु आ गेतीक बाक्ब।

20 मेकोमी आ ब्रोंडतीक नाक्त शुश ममिम्ब। मारदे हना परमप्रभुमी मेको कली आ थुमी ग्येरपाइरशा वोइक्ब। भजन संग्रह ७३:२६

## 6

परमप्रभुमी मारेइ मारेइ गेब

1 गो रागीमी अर्को मरिम्शो का यो तशो बाक्नुड। मेकोमी मुर आन कली थाम्पा दिप्शो बाक्ब।

2 परमप्रभुमी मुर आन कली शोंप, रू नु मान ततीक गेब। मोपा मेको कली आ दाक्शो पचा कली मारेइ श्येत मदुम्ब। तन्न परमप्रभुम मेको कली मेको ग्येरशा जचा मगेशु, अर्को मुर कली ग्येरशा जचा गेब। मेको यो जाम्शा लाइब बाक्ब।

3 सुइ मुर का के सहे का जना आल बाक्शा, मेको शुश बर्स ब्रोंडशा यो आ चेम्शो जशा मग्येरसीब, रिम्शो पा थिम्चा यो मपुइसीब। मेको क्येडा शाम्शा लशो आल कली रिम्शो बाक्ब। उपदेसक ४:३

4 शाम्शा लशो आल जाम्शा लचा कली जरमेसीशो बाक्ब। मिनु मेको छिडछिडमी जाम्शा लाइब। मिनु छिडछिडमीन मेको आ नें सुम्ब।

5 मेकोम गेनायो नां मतशो बाक्ब। मेकोम मारेइ मजोक्शो यो बाक्ब। मो हना यो मेको मुर क्येडा मेको आल आ नाइरशो रिम्शो बाक्ब।

6 मेको मुर हजार का बर्स ब्रोंडशा यो आ दाक्शो पने मचाप्टु हना, मेको मार नाइक्चा ताइबा डा? मेको नेल्ल मबेक्नीमी डा?

7 मुर आ श्येत पशो नेल्ल आ कोत्रज प्रिंचा कली ला बाक्ब। मो हना यो मेको आ शोत्रलु बेक्तीक गेनायो मनुप्ब। उपदेसक १:८

8 मूर्ख मुर क्येडा जोक्ब तुइक्ब मारम रिम्शो बाक्नीमी? पुडग मुर अर्को आन डोंडती रिम्शो पस जोक्शा, मार ताइबा डा?

9 मार मार माल्नुड, दे शुश मिम्चा क्येडा आ तशोम ग्येरसीशा बाक्चा रिम्शो बाक्ब। मेको यो जाम्शा लाइब नु फश कली खेदा पशो खोदेशो बाक्ब।

10 मार बाक्बा, मेको नेल्ल आन नें वोइक्ने थुम्शो बाक्ब। मिनु मुर आ थुंम मार बाक्बा, मेको तुंडसीब। आंम क्येडा बोल्थो मुर कली सुइमी मारेइ देंने मचाप्ब। अय्युब ९:२-४, ३२

11 मेको शुश लोत्र पाप्टु हना यो, मेको क्येडा शोर गाक्शो बाक्ब। मिनु तेको रिम्शो बाक्बा?

12 मुर इच्का नाक्त ब्रोंडब बाक्ब, मार रिम्शो बाक्मे, मेको सुम तुडक्बा डा? मुर आ नाक्त वांकु खोदेशो पा लाक्ब। मेको बेक्शा लम नोले मार तुम्बा, दे सुम देने चाप्बा डा? १इतिहास २९:१५; भजन संग्रह १४४:४

## 7

नेल्ल क्येडा ठेयब रुप्तीक

1 शुश क्येट लाइब खेक्तीक क्येडा रिम्शो नें ठेयब बाक्ब। मिनु जरमेशो नाक्त क्येडा बेक्तीक नाक्त रिम्शो बाक्ब। हितोपदेस २२:१

2 भोज जतीक खिम लचा क्येडा रोंका पशो खिम लचा रिम्शो बाक्ब। मारदे हना मुर नेल्ल मोदेशो पा लाइनीम। मिनु मुल सम्म ब्रोंडशो मुरपुकीमी मेको आ पबंम मिन्मीम।

3 रिच्चा क्येडा सुर्ता पचा रिम्शो बाक्ब। मारदे हना सुर्ता पतीकेम थुं कली रिम्शो सेल्ब।।

4 जोक्ब तुडक्ब मुर आ थुं रोंका पतीक खिम बाक्ब। तन्न मूर्ख आ थुं आंम दला दाक्स पतीक खिम बाक्ब।

5 मूर्ख आ कुम्सो नेंचा क्येडा, जोक्ब तुडक्ब आ हुइशो नेंचा रिम्शो बाक्ब।

6 मूर्ख आ रिश्शो, चू चोशानु बुक्शो मी खोदेशो बाक्ब। मेको यो जाम्शा लाइब बाक्ब।

7 थमा पा दिक्बपुकीम जोक्ब तुडक्ब मुर आन कली मूर्ख सेल्नीम। घूसमी मुर आन थुं मरिम्शो सेल्ब।

8 गेय पचा गोशो क्येडा थुम्शो रिम्शो दुम्ब। ठेयब लेशशो थुं पाइशो दुम्चा क्येडा फाल्तीक थुं पाइशो दुम्चा रिम्शो बाक्ब।

9 रीब पा मगाइक्तो। मारदे हना गाइक्तीक मूर्ख आन थुंम बाक्ब। याकूब १:१९

10 गेपुकीम “डोंइती डा नाक्त, मुल डा नाक्त क्येडा मारदे रिम्शो बाक्मा?” दे मदेनीन। मारदे हना जोक्ब तुडक्बपुकीम मोदेशो लोत्र हिल्लो मपाइनीम।

11 जोक्तीक तुडक्तीके किर्की पिपी आन गेशो शोंप खोदेशो पा रिम्शो बाक्ब। मिनु मेकोमी ब्रोंडब आन कली रिम्शो पाइब।

12 दोपा क्येटीम मुर आन कली वारच पाइबा, मोपा जोक्तीक तुडक्तीकेम यो मुर आन कली वारच पाइब। मिनु जोक्तीक तुडक्तीकेमी मुर आन कली ब्रोंडचा गेब। हितोपदेस ३:१-२

13 परमप्रभु आ गेय मिन्तीन। मेको आ रोप्शो थोक्क कली सुमी दिंपाइक्ने चाप्बा डा? उपदेसक १:१५

14 नाक्त रिम्शो दुम्मेनु ग्येरसीन। तन्न नाक्त मरिम्शो दुम्मेनु मिन्तीन। मेको निम्फा परमप्रभुमी सेल्शो बाक्ब। मोपा मुरुमी नोले आंम कली मार दुम्बा, दे मतुइक्नीम।

15 गो आं इच्का नाक्त ब्रोंडतीकेमी ठीक पाइब मुर आ ठीक पशोमी खतम दुम्शो नु मरिम्शो मुर आ मरिम्शो पशोमी शुश बर्स ब्रोंडशो ताता। उपदेसक ८:१४; भजन संग्रह ७३:१२-१४

16 शुश ठीक पाइब मदुमो। मिनु शुश जोक्ब तुडक्ब यो मदुमो। गे मारदे आंमा खतम सेल्सीनेवे? लुका १८:११-१२

17 गे परमप्रभु आ अरेशो मटीब नु शुश मूर्ख यो मदुमो। गे मारदे बेक्ची मजाक्थु बेक्चा दाक्नेवे?

18 का कली वोतीन नु अर्को कली यो मप्रोनीन। मारदे हना परमप्रभु कली मान पा हिंब, मेको नेल्ल रे डोन बाक्नीम।

19 जोक्तीक तुडक्तीकेमी जोक्ब तुडक्ब मुर कली सहर डा १० जना हुकुम पाइब आन क्येडा यो सक्ति पाइशो सेल्ब।

20 थमा पा रागीमी मारेइ मारेइ ठीक पाइब नु गेनायो पाप मपाइब सुइ मबाक्नीम। भजन संग्रह १४:३

21 मुरपुकीमी देशो लोत्र नेल्ल मनेनो। मो पाप्तीवी हना इ वाइलीमी इ कली सराप पशो नेनेवे।

22 मारदे हना गे गिश खेयप अरु आन कली सराप पवी, मेको इ थुंम बाक्ब।

23 गो मारेइ मारेइ जोक्तीक तुडक्तीकेम नाक्शा कोवता। मिनु गो “थमा पा जोक्ब तुडक्ब दुम्नुड” देती। तन्न रुपे मचबु।

24 शुश डोन बाक्ब नु शुश लक्च लशो थोक्क सुम तुडक्ने चाप्बा डा?

25 मोपतीके गो जोक्तीक तुडक्तीक नु नेल्ल तुडक्चा थुं पाता। मिनु परमप्रभु आ अरेशो मटिचा मूर्ख गेय बाक्ब। मिनु मूर्ख गेयमी निप्स ग्यशो दुम्शो बाक्ब। भजन संग्रह १४:१

26 मेको बेक्तीक क्येडा मरिम्शो ब्वारद दाइशो खोदेशो मीश मुर बाक्त। मेको आ थुं थेंप्लु नु मेको आ गुड चहिं पाइक्तीक साडलो बाक्त। सुम परमप्रभु कली ग्येरपाइक्बा, मेको रे ब्रोंडब। तन्न मेकोमी पाप पाइब कली चहिं आ ग्याइलीम रेक्ब। हितोपदेस २:१६-२२

27 शेंबमी “गो मार तुडक्तु, मेको नेनीन। गो नेल्ल रिम्शो पा तुडक्चा कली नाक्ताक्ड।

28 गो रिम्शो मुर माल्ना माल्न बाक्डानु हजार का वोंइश मुर आन दातेमी मुर का ला रिम्शो पाइब थित्ता। तन्न मीश मुर आन दातेमी का यो मथिदु।

29 परमप्रभुमी मुर आन कली ठीक पाइब सेल्लु। तन्न मुरपुकीम आन दाक्शो पाइनीम” दैत। उत्पती १:२७

## 8

पिप आ देशो टिने

1 जोक्ब तुडक्ब मुर खोदेशो सु बाक्बा? एको लोत्र आ अर्थ सुम तुडक्बा डा? जोक्तीक तुडक्तीकेमी मुर आन कुल हाक्शो सेल्ब। मिनु मेको आ किक्शो कुल फाइशशा रिम्शो सेल्ब।

2 पिप आ देशो टिवो। मारदे हना गे परमप्रभु आ डोंइती कसम जाप्तीवी।

3 पिप आ बाक्तीक रे गाक्चा कली मचुइक्तो। गे मरिम्शो मपावो। मारदे हना पिपमी मार पचा दाक्बा, मेको पाइब।

- 4 पिप आ लोवनी सक्ति बाकब। सुम मेको कली “हजुर, गे मार पनी” देने चाप्बा?
- 5 सुम परमप्रभु आ शेशो टीबा, मेको कली मारेइ मरिम्शो मटुम्ब। मिनु जोकब तुइक्ब मुरुमी ठीक गेय पची ना गेय पस जोकब।
- 6 मुरुमी मार मार पाइनीमी, मेको पतीके ना नु निसाफ पची ना बाकब। मुर आन मरिम्शो पतीकेम मुर आन कली दिप्ब। उपदेसक ३:१
- 7 नोले डा लोव सुइमी मतुइक्नीम। मोपतीके सुइम मुर आन कली नोले मार दुम्बा, मेको देने मचाप्नीम। उपदेसक १०:१४
- 8 फश कली तेक्शा चोइक्तीक सक्ति सुइ के मबाक्ब। मोपान आंम बेक्तीक नाक्त कली सुइमी तेकने मचाक्ब। दोपा लडाइ पची ना सुइ खिं लचा मताइनीमी, मोपान मरिम्शो पतीकेमी मरिम्शो पाइब कली गेनायो मप्रोंडब।
- 9 गो रागीम पशो नेल्ल कोवडुनु, नेल्ल ताता। सक्ति पाइशो मुरुमी अरु आन कली दिप्शा चोइक्नीम।

ठीक पाइब नु ठीक मपाइब

- 10 मिनु गो परमप्रभु आ अरेशो मटीब मुर थिम्चा पुंडसीशो ताता। ठीक पाइब चहिं परमप्रभु आ सहर रे गुंडचा पुंडसीशो बाक्तेक। मिनु सहरमी सुइमी मेको आन कली ममिम्बाक्तेक। मेको यो जाम्शा लाइब बाक्ब।
- 11 मुरुमी मरिम्शो पाप्तु हना, रीब पा सजाइ मताप्तु हना, मेकोमी मरिम्शो पना पन बाक्ब। अय्युब ३५:१५-१६; मलाकी ३:१४-१५
- 12 मरिम्शो पाइब मुर सहे का खेयप मरिम्शो पशा यो शुश नाक्त सम्म ब्रोंइशा बाक्नीम। मो हना यो परमप्रभु कली मान पा हिंब नु आ डोंइती बाक्ब आन कली रिम्शो दुम्ब, दे गो तुइक्नुड। भजन संग्रह ३७:१८; भजन संग्रह ७३:१७-२६
- 13 तन्न परमप्रभु यावे आ अरेशो मटीब आन कली गेनायो रिम्शो मटुम्ब। मिनु शुश ब्रोंइचा यो मताइनीम। मारदे हना मेकोपुकीमी परमप्रभु कली मान पा महिनीम।
- 14 रागीम अर्को जाम्शा लाइब गेय का यो दुम्ना दुम्न बाक्ब। ठीक पाइब बाक्नीम। मेकोम परमप्रभु आ अरेशो मटीब खोदेशो पा ताइनीम। मिनु परमप्रभु आ अरेशो मटीब बाक्नीम। मेको ठीक पाइब खोदेशो पा बाक्चा ताइनीम। एको यो जाम्शा लाइब बाक्ब। उपदेसक ७:१५
- 15 मोपतीके गे ग्येरसीशा बाक्नीन। मारदे हना रागीमी मुर आन कली जचा तूचा नु ग्येरशा बाक्चा डा लाक्शा, अरु मारेइ रिम्शो मबाक्ब। परमप्रभुमी गेशो ब्रोंइतीकेमी गिश श्येत बाक्त हना यो, मेको पने चाप्नीम। उपदेसक २:२४
- 16 मिनु गो रागीमी मुरपुकीमी मइप्थु नाक्दो नाक्ती गेय पशो कोवचा कली नु जोक्तीक तुइक्तीक मार बाक्मे, मेको तुइक्चा कली आं थुं हिरताक्ड।
- 17 मिनु परमप्रभुमी पशो गेय नेल्ल ताता। रागीम मार दुम्बा, मेको सुइमी तुइक्ने मचाप्नीम। मुरपुकीमी मेको तुइक्चा कली शुश श्येत पाप्तेक हना यो, मेको नेल्ल रुप्ने मचाप्नीम। तेकोइ जोकब तुइक्ब मुरुमी “गो मेको तुइक्नुड” दैत हना यो, मेकोम थमा पा मटुइशो बाक्ब। उपदेसक ३:११; यसैया ५५:८-९

## 9

मुर आन दुम्तीक का बाक्ब

- 1 एको लोव नेल्ल रे पा गो मार मिम्ताक्ड देशा हना, ठीक पाइब नु जोकब तुइक्ब आन पतीक मारेइ मारेइ परमप्रभु आ गुइमी बाक्बाक्त। तन्न मुरुमी आंम कली दाक्तीक नु काइ मदाक्तीक ताइनीम। तन्न मेको मतुइक्बाक्तेक।
- 2 मारदे हना जाम्शा लतीक नु मरिम्शो दुम्तीके मुर नेल्ल आन कली दुम्ब। ठीक पाइब नु परमप्रभु आ अरेशो मटीब, रिम्शो पाइब नु मरिम्शो पाइब, ग्रॉग्रा मदिशो नु ग्रॉग्रा दिशो, चढेतीक चढेब नु मचढेब, पाप पाइब नु मपाइब नु कसम जाइब नु मजाइब, नेल्ल नोले खाल का डा पा जाम्शा लाइनीम। उपदेसक २:१४; अय्युब ९:२२
- 3 रागीम दुम्तीक गेय नेल्लेमी मरिम्शो पतीक बाक्ब। मेको नेल्ल बेक्शा लाइनीम। मुर नेल्ल आन थुं मरिम्शो पतीकेमी ब्रीशो बाक्ब। मिनु मेकोपुकी ब्रोंइशा सम्म आन थुं हेंथे पतीकेम ब्रीशो बाक्ब। मिनु मेको नोले मेको बेक्शोपुकी नु बाक्थ लाइनीम। उपदेसक ८:११
- 4 तन्न ब्रोंइशा बाक्बपुकी नु बाक्ब आन के आस बाक्ब। बेक्शो गुप्स क्येडा ब्रोंइशा बाक्शो कुचुम रिम्शो बाक्ब।
- 5 ब्रोंइशा बाक्शोपुकीमी “गो बेक्नीकी” दे तुइशो बाक्नीम। तन्न बेक्शोपुकीमी मारेइ मतुइक्नीम। मेको आन कली मारेइ इनाम मबाक्ब। मेको आन कली मिम्तीक यो जाम्शा लाइब।
- 6 मेको आन दाक्तीके, काइ मदाक्तीक नु गेहे पतीक नेल्ल जाम्शा लत। मेकोपुकीम रागीम मार दुम्शो बाक्मे, मेको मारेइ ममिम्नीम।
- 7 आंम इ लां गाक्को, इ जतीक थोवक ग्येरशा जावो। ग्येरशा इ अडगुर शांबु तूडो। मारदे हना परमप्रभुमी इ पशो गेय दाक्ब। उपदेसक २:२४
- 8 गेना हना यो रिम्शो वा फेक्शा इ ब्रोवशो तेल खेक्सो।
- 9 परमप्रभुमी गेशो इक्का नाक्त ब्रोंइशा बाक्तीकेमी आंम दाक्शो मीश नु ग्येरशा बाक्को। मारदे हना रागीमी इ श्येत पा पशो गेय डा भाग मेको बाक्ब। हितोपदेस ५:१८-१९
- 10 इ डोंइती मार गेय बाक्मे, मेको इ सक्ति नेल्लेमी पावो। मारदे हना बेक्शो मुर आन बाक्तीकेम मारेइ मिम्तीके, जोक्तीके नु तुइक्तीके मबाक्ब।

11 गो रागीमी अर्को थोत्रक का यो तशो बाक्नुड। रीब पा दोरब मग्राब। सक्ति पाइशशो लडाइ पाइबमी लडाइ मग्राब। जोक्ब तुइक्बमी जचा मताइब। शुश निप्स पाइशशो मुरुमी क्येट मचेम्ब। जोक्ब मुरुमी मान मताइब। तन्न नेल्लेमी आन गेय पतीक ना नु रागी दोपा बाक्बा, मुर आन गेय दुम्बा देय मदुम्बा मेको ताइनीम। हितोपदेस १६:९

12 मिनु हिंचा डा श्येत गेना जाक्बा, सुइम मतुइक्नीम। शिशो मपाइब आन ग्याइलीम डाइ रेशशो नु ब्वारदम चिकब रेशशो खोदेशो पा मुरपुकी यो ममिम्थु हिंचा डा श्येत जशा बेक्नीम।

जोक्तीक तुइक्तीक ठेयब बाक्ब

13 गो रागीमी जोक्तीक तुइक्तीक का यो ताता। मेको थम ठेयब बाक्त।

14 साइ डोंइती शुश मुर मबाक्शो आइक्च सहर का बाक्त। मिनु मेको कली शुश सक्ति पाइशशो पिपमी लडाइ तोवा बाक्त। मेको सहर कली पुम्शा, गारो डोइक्तीक यो सेला बाक्त।

15 मेको सहरमी जोक्ब तुइक्ब पुडग मुर का बाक्माक्त। मिनु मेकोमी आ जोक्तीक तुइक्तीकेमी मेको सहर कली प्रोना बाक्त। तन्न मेको पुडग मुर कली सुइमी ममिम्तेम बाक्त।

16 मिनु गो “सक्ति क्येडा जोक्तीक तुइक्तीक ठेयब बाक्ब” देती। तन्न मेको पुडग मुर आ जोक्तीक तुइक्तीक कली आइक्च मिम्ताक्म। मेको आ लोत्र कली सुइमी यो ममिम्तेम।

17 ठेयब सेंदा पा मूर्ख सासन पाइब आ लोत्र क्येडा, जोक्ब तुइक्ब आ ओंखां पा देशो लोत्र टीनीम।

18 लडाइ पतीक या क्येडा जोक्तीक तुइक्तीक रिम्शो बाक्ब। तन्न पाप पाइब कामी शुश रिम्शो गेय आन कली खतम सेल्ब।

## 10

मूर्ख नु जोक्ब तुइक्ब

1 मिनु दोपा बेक्शो चुरमुमी ब्रोत्रशो रिना पाइशशो खेक्तीक कली राक्पाइक्बा, मोपा इक्का खोइ मूर्ख दुम्तीकेमी जोक्तीक तुइक्तीक नु मान ततीक नेल्ल खतम पोक्ब।

2 जोक्ब तुइक्ब मुर टीक लांमी गाक्शो बाक्ब। तन्न मूर्ख मुर दूली लांम गाक्शो बाक्ब।

3 मूर्ख मुर लांम गाक्मेनु, मारेड ममिम्ब। मिनु नेल्ल आन कली आ मूर्ख दुम्तीके कोइब।

4 इ ठेयब मुर इ तशा गाइक्ताक्व हना यो, इ गेय पचा मप्रोनो। सिक्सी पा बाक्शोनो, ठेयब मरिम्शो पशो यो जाम्शा लाइब।

5 गो रागीमी मरिम्शो का तशो बाक्नुड। मेको ठेयब दूली गेय सासन पाइबम ला पने चाप्ब।

6 मूर्ख आन कली ठेयब मुर सेल्नीम। तन्न शोप पाइशशोपुकी आइक्च दुम्शा बाक्नीम।

7 गो वाइलपुकी चहिं शारा डोइशशा नु सासन पाइब आ तौ चहिं वाइल खोदेशो पा खोइलीम गाक्शो तशो बाक्नुड।

8 बिक्तीक दोइब मुर मेको आंमान बिक्ने चाप्ब। मिनु गारो प्रेप्ब कली बुस्सुमी कोक्ने चाप्ब। हितोपदेस २६:२७

9 फुल्लु खोइक्ब मुर गार दुम्ने चाक्ब। मिनु शी खोइक्ब मुर आ गेय रे श्येत जने चाप्ब।

10 खा महेशशो बाक्त हना, मेको कली शुश बोल माल्ब। तन्न जोक्तीक तुइक्तीकेम मेको कली रिम्शो सेल्ब।

11 बुस्स कली लाटा सेल्चा क्येडा डोंइती कोक्तु हना, बुस्स चलैब कली मारेड रिम्शो मदुम्ब। बजन संग्रह ५८:५-६

12 जोक्ब तुइक्ब मुर ब्वाक्मेनु, मान ताइब। तन्न मूर्ख चहिं आ लोत्रमीन खतम दुम्ब।

13 मेकोमी डोंइती मूर्ख लोत्र पाइब। मिनु नोले बौला नु निप्स ग्यशो लोत्र पाइब।

14 मूर्ख मुर ब्वाक्स डा ब्वाक्स पाइब। मार दुम्बा, सुइम मतुइक्नीम। मेको आ नोले मार दुम्बा, मेको सुम देने चाप्बा डा? उपदेसक ५:२; उपदेसक ८:७

15 मूर्ख आ श्येत पा पशो गेयमी दाइब। मेकोमी सहर लतीक लां यो मतुइक्ब।

16 आबी, तेको रागी डा पिप आल का बाक्बा, तेको रागी डा सासन पाइबपुकीमी सुनी कना भोज जाइनीमी, मेको रागी खतम दुम्शा लाइब। यसैया ३:४; यसैया ५:११

17 तेको रागीमी रिम्शो खिं डा मुर पिप दुम्बा, मेको रागी ग्येरसीशो बाक्ब। मेको रागी डा सासन पाइब भोज जची ना जाइनीम। मेकोपुकी दुक्चा कली ममाइ बोल तचा कली जाइनीम।

18 सुइ मुर अल्से बाक्त हना मेको आ खिं ब्रेप्ब। मेको फिम्ला पा बाक्त हना, मेको आ खिं याप्ब।

19 ग्येरसीचा कली भोज सेल्नीम। मिनु अङगुर शांबुमी मुर कली ग्येरपाइक्ब। तन्न मेको नेल्ल पचा कली क्येट माल्ब। बजन संग्रह १०४:१५

20 इ मिन्तीकेमी यो पिप कली सराप मपावो। शोप पाइशशो मुर कली इ कोठाम सराप मपावो। मारदे हना सरीड डा चिकबीम इ लोत्र लद। मिनु बेरशो चिकबीम इ लोत्र शेंद।

## 11

मार पचा माल्ब

1 इ क्येट डोन सोइक्तो। मिनु शुश नाक्त नोले मेको लेंशा ताइनेवे।

2 गे इ के बाक्शो क्येट ७, ८ जना आन कली वोइक्चा गेमी। मारदे हना रागीम दोदेशो ठेयब श्येत जाक्बा, मेको गे मतुइक्नेवे।

3 गोस्सुम ब्वाक्कु ब्रीत हना, मेकोमी रागीम रेउ यिपाइक्व। रवा दक्खिन गे गोल्ल हना यो, उत्तर गे गोल्ल हना यो, मेको ते गे गोल्मे, मेकेरन लीब।

4 फश कली मिम्बमी गेनायो मशोक्व। मिनु गोस्स कोव्वबमी गेनायो मखुप्ब।

5 गे फश ते रे जाक्वा नु ममा आ कोव्वजमी आल दोपा ब्रोंइतीक सोक्त् ताइबा, मेको मतुइक्नेवे। मोपा मारेइ मारेइ सेल्ब परमप्रभु आ गेय रूप्ने मचाप्नेवे। यूहन्ना ३:८; भजन संग्रह १३९:१३; उपदेसक ८:१७

6 गे सुनी इ वांचेर शोक्को। मिनु नाकदो यो गेय पचा मप्रोनो। मारदे हना मुल शोक्को नु आपो शोक्को तेको ग्रेल्बा, मतुइक्नेवे। निम्फा ग्रेलीसी कों? मतुइक्नेवे।

ठिटा आन कली अरेशो

7 हाम्सो रिम्शो बाक्व। मुरुमी नां कली तचा दाक्व।

8 मुर शुश बर्स ब्रोंइत हना यो, मेको आ ब्रोंइतीकेमी ग्येरसेक्ल। तन्न मेकोमी छिडछिड डा नाक्त् कली यो मिम्तल। मारदे हना मेको शुश बाक्नीम। मुल दुम्बा मारेइ मारेइ जाम्शा लाइब बाक्नीम।

9 ए ठिटा मुर, गे ठिटा बाक्डेनु ग्येरसो। इ थुमी गे ठिटा बाक्डेनु ग्येरपदल। इ तशो नु इ थुमी मिम्शो आस नोले खोतो। तन्न परमप्रभुमी मेको नेल्ल तुइश्शा निसाफ पाइब, दे मिम्तो। उपदेसक २:२४

10 मोपतीके सुर्ता पतीक कली इ थुं रे पा डोन वोतो। मिनु मरिम्शो नेल्ल इ रां रे डोन वोतो। मारदे हना ठिटा दुम्तीके नु बोल यो जाम्शा लाइब बाक्व।

## 12

डोंइतीन पचा माल्ब देंशो

1 इ ठिटा बाक्ना बाक्न इ कली सेल्ब कली मिम्तो। श्येत जतीक नाक्ती नु इ खूशो दुम्तीक बर्स जाक्मेनु “गो मेको नाक्त् मदाक्नुड” देंचा क्येडा डोंइती मिम्तो।

2 नां नु नाक्त् डा छेडछेड कली छिडछिडमी सुम्चा क्येडा डोंइती, तास्ला नु सोरुल ब्राबा दुम्चा क्येडा डोंइती नु गोस्सुम रेउ यिपाइश्शा लेत्चा क्येडा डोंइती

3 खिं खाल पाइबपुकी खिंखि पाइनीम। बोल्यो मुरपुकी खूशो दुम्नीम। यात हिल्ब मीश मुर शुश मबाक्तीके, आन गेय नाइक्नीम। मिनु झेल रे कोव्वब आन मिक्च ब्राबा दुम्ब।

4 मेना लां डा लाप्पो चोक्सीब। यात हिल्शो सेंदा आइक्च दुम्ना दुम्न लाइब। मुरपुकी चिक्व आन ग्रीशो नेशा बोक्नीम। मीश आल आन कुम्सो नेल्ल आइक्च सेंदा पा नेंसीब।

5 मुरपुकी लाइश्शो खिं डोइक्चा नु लांम श्येत दुम्बा कों, दे हिंनीमी। बदाम बोइश्शा सिप्ब। घांस ब्वाइब माले आ कोव्वजमी गेशा गाक्व। मारेइ ममाल्ब दुम्चा क्येडा डोंइती इ कली सेल्ब परमप्रभु कली मिम्तो। मारदे हना मुर नेल्ल बेक्नीम। मिनु रोंका पाइब लांम गाक्नीम।

6 चांदी के तार ब्रोंइक्चा क्येडा डोंइती नु सुन के कचौरा ब्रोंइक्चा क्येडा डोंइती, खप के गर ब्वाक्कु बुक्तीकेम प्रोल्चा क्येडा डोंइती नु इनार डा गुगील जिक्चा क्येडा डोंइती

7 खप रे बोक्को फुरक खपीमीन लेत्चा क्येडा डोंइती नु सोक्त् गेब परमप्रभु आ बाक्तीकेम सोक्त् लेत्चा क्येडा डोंइती परमप्रभु कली मिम्तो। उपदेसक ३:२०; उत्पती ३:१९

8 शेंबमी “जाम्शा लाइब! जाम्शा लाइब! नेल्ल जाम्शा लाइब बाक्नीम” देंब।

परमप्रभु कली मान पा हिनीन

9 मेको शेंब जोक्व तुइक्व मुर ला ममाइ, मेकोमी मुर आन कली जोक्व तुइक्व सेल्लु। मेकोमी कोव्वशा नाक्शा, दोदेशो लोव्व बाक्वा, दोपा शुश देंतीक ब्रेक्चा माल्बा, मेको शेंताक्व।

10 मिनु शेंबमी ठीक लोव्व माल्शा गुंइताक्व। मिनु मेकोम मार ब्रेक्ता, मेको ठीक नु थमा बाक्नीम।

11 जोक्व तुइक्व आन लोव्व गोठला आन कोक्के खोदेशो बाक्व। मिनु मेको आन खुप्शो लोव्वपुकी बोल्यो पा थोक्को कांटी खोदेशो बाक्व। मेको नेल्ल गोठला का रे पान दुम्शो बाक्व। यसैया २२:२३

12 ए आं तौ, मेकेर तेम्शो लोव्व रे होस पा बाक्को। शुश किताब ब्रेक्तीक गेय गेनायो मनुप्ब। मिनु शुश पढेशोनु रां कली दपाइक्व।

13 नेनो, नेल्ल क्येडा नोले डा लोव्व मार बाक्व देंशा हना, परमप्रभु कली मान पा हिनो। मिनु मेको आ शेंशो टिवो। मारदे हना मुर नेल्ल आन पचा माल्शो एकोन बाक्व। ब्यवस्था ६:२

14 मारदे हना परमप्रभुमी इं पशो रिम्शो नु मरिम्शो गेय नेल्ल नु खुइश्शा पशो नेल्ल निसाफ पाइब। रोमी २:१६; २कोरिन्थी ५:१०

## ठेयब कुम्सो

**ब्रेक्ब मुर:** एको कुम्सो सोलोमनमी ब्रेक्शो बाक्ब।

**गेना ब्रेक्शो:** सोलोमनमी १५६-१२६ बि. सी. आ सासन पची ना ब्रेक्शो बाक्त।

**मार ब्रेक्शो:** एको किताबम शुनाम सहर डा गोठाल्नी मीश आल आ कथा बाक्ब। मेको सोलोमन आ दरवार चाक्का पुंडसीशो बाक्त। तन्न मेकोमी सोलोमन आ शोंप नु दारस तशा, यो आ दाक्शो नु ग्युंवे पचा चिक्शो गोठला मप्रोंइथु दाक्ना दाक्न बाक्त। एको किताबम भाग सां बाक्ब:

१. पिप आ दरवारम वोडक्चा पुंडसीशो, ठेयब कुम्सो १:-३:५ मेकेर डा मीश आलम पिप आ ठेयब दुम्तीके कुम्सो पशो, सोलोमनमी शुलामीथ नु लोत्र पशो आ दाक्शो मुर कली मिम्ना मिन्न बाक्शो,
२. आ दाक्शो गोठला हेरा प्रोंइशो, ठेयब कुम्सो ३:६-८:४ सोलोमनम शुलामीथ कली ग्युंवे पचा मिम्शो शुलामीथम आ दाक्शो गोठला कली मिम्शो सोलोमन आ नोले डा पशो लोत्र
३. आ गोठला कली मप्रोंइथु, आ दाक्तीकेम ग्राशो ठेयब कुम्सो ६:५-८:१४ शुलामीथ खिं लेरशा, दरवार डा शोंप मिम्शो आ दाक्शो गोठलामी शुलामीथ आ सेंदा नेंचा दाक्शो

“पिप ठेयब बाक्ब” दे कुम्सो पशो

- 1 सोलोमन आ नेल्ल क्येडा ठेयब कुम्सो।
- 2 मेकोमी आं कली पुक्पु पवल। मारदे हना इन दाक्तीके अडगुर शांबु क्येडा यो रिम्शो बाक्ब।
- 3 इन खेक्तीक तेल ब्रोव्रशो रिना पाइशो बाक्ब। इन नें ब्रोव्रशो रिना पाइशो तेल मोइशो खोदेंशो बाक्ब। मोपतीके मीश आलपुकीमी इन कली दाक्नीमी।
- 4 गे आं कली लाइय्यीनी। गो रीब पा लय। पिपमी आं कली आ बाक्तीकेम लाइक्ती। गो इन कली तशा ग्येरसीनीकी। गोपुकी अडगुर शांबु क्येडा यो, इन दाक्तीक कली ठेयब सेल्नीकी। मेकोपुकीम गे दारशो दुम्तीके इन कली दाक्नीमी।

आं कली आइक्च ममिम्तीन

- 5 गो क्येर बाक्ती हना यो, दारशो बाक्नुड। ए यरूसलेम डा तमीपुकी, गो केदार आ ताम्बु नु सोलोमन आ फारतीक वा खोदेंशो क्येर बाक्नुड। आं कली आइक्च ममिम्तीन।
- 6 आं कली क्येर तशा, मकोव्रयीनी। मारदे हना चोकशो नांमी आं कली क्येर सेल्ती। आं ममा आ तौपुकी गो नु गाइक्तीके आं कली अडगुर रू कोव्रब सेल्तीमी। तन्न गो आंम अडगुर रू कली चहिं मकोव्रडु।
- 7 ए आं दाक्शो मुर, इन क्यारश भेडा आन कली ते योव्रनीनी? मिनु नाक्त मेको ते नाइक्नीमी? गो मारदे हेंथे गाक्ब मीश मुर खोदेंशो पा इन वारच आन बगाल आ नेक्था लचा माल्नुडा?

सोलोमनम शुलामीथ नु लोत्र पशो

- 8 मीश आल आन दाते डा नेल्ल क्येडा दारशो मीश आल, गे क्यारश भेडा आन गाक्तीक लां खोइशशा, गोठला आन गोठ आ नेक्था इ पाठा आन कली योव्रडो।
- 9 आं दाक्शो मीश आल, गो इ कली फाराओ आ बग्गी डा नेल्ल क्येडा दारशो छाउरी शारा नु थाप्शो बाक्नुड।
- 10 गहना पांडसीशो इ चोव्रचो गिश दारशो बाक्ब। सिक्री पांडसीशो इ शुर थम दारशो बाक्ब।
- 11 गो इ कली सुन नु चांदी खाक्शा सिक्री सेल्नीकी।
- 12 पिप आ इप्तीकेमी बाक्मेनु, आं तेल थम ब्रोव्रशो रिना पाइक्तु।
- 13 आं दाक्शो मुर आं कुकु आ दातेम ब्रोव्रशो रिना पाइब मूरम बीशो थैली खोदेंशो बाक्ब।
- 14 आं दाक्शो मुर एन-गोदी डा अडगुर रूमी वाशो हेन्ना फू खोदेंशो बाक्ब।
- 15 ए, आं दाक्शो मीश आल गे दारशो बाक्नेवे? शुश दारशो बाक्नेवे। इ मिक्च दुकुर के खोदेंशो बाक्ब।
- 16 ए आं दाक्शो मुर, गे यो दारशो बाक्नेवे। थमा पा दारशो बाक्नेवे। इस ब्राख्ये गिग बाक्ब।
- 17 इस खिं डा पैद्रा लेबानोन डा लाइशो रवा के बाक्नीम। सला के फलेकम साप्शो बाक्ब।

## 2

गे अर्को खोदेंशो मबाक्नीनी

- 1 गो शारोन डा गुलाफ नु बेसी डा लिली फू नड।
- 2 चू आन दातेमी लिली फू बोइशो खोदेंशो पा आं मीश आल, अरु मीश आल आन दातेम बाक्ब।
- 3 आं वोंइश मुर अरु ठिटा आन दातेमी ब्वाकीम बाक्शो रवा आन दाते डा स्याउ रवा खोदेंशो बाक्ब। गो मेको आ वांकुम थुं नाइशशा बाक्नुड। मेको आ फल ब्रोव्रशो बाक्नीम।
- 4 मेकोमी आं कली भोज जतीक खिम लाइक्ती। मेको आ दाक्तीके छेदर खोदेंशो पा कोंइताक्यी।

5 आं कली ठीक सेल्य़ा कली सोवपाइश्शो अडगुर नु स्याउ गेयीनी। मारदे हना गो दाक्तीकेम थशो बाक्नुड। ठेयब कुम्सो ५:८

6 मेको आ पैरा गुड आं पिया आगाम बाक्ब। मिनु मेको आ ग्युरा गुडमी आं कली मुष्पो बाक्ब।

7 मेकोमी “ए, यरूसलेम डा तमीपुकी, गो इन कली, किश्श नु रोकोश आन नेमी अरेनुड। आंम दाक्चा क्येडा डोंइती दाक्तीक कली मपोक्कीन” देंत। ठेयब कुम्सो ८:३-४

शुलामीथम आ दाक्शो कली मिम्शो

8 लो आं दाक्शो मुर, आ सेंदा नेनीन। कोव्रडीन, मेको पहाड मेर प्रेक्ना प्रेक्न, डांडा मेर दोरना दोरन जाक्शो बाक्ब।

9 आं दाक्शो मुर किश्श नु ठिटा रोकोश खोदेशो बाक्ब। कोव्रडीन, मेको आंइ गारो आ नोले राप्शा बाक्शो बाक्ब। मेकोमी झेल रे आगा कोव्रना कोव्रन बाक्ब। मेकोमी झेल आगा रे कोव्रना कोव्रन बाक्ब।

10 आं दाक्शो मुरुमी आं कली “आं नेल्ल क्येडा दाक्शो नु आं दारशो मीश आल बोक्को। मिनु गो नु गाक्को” देंत। ठेयब कुम्सो २:१३

11 मारदे हना मुल हिंडद लाक्तु। मिनु बर्खा यो लाक्ने थुम्तु।

12 रागीम फू बोइक्चा गोम्तेक्म।

13 फोव्रशी रवाम फोव्रशी सिन्ना सिन्न बाक्नीम। अडगुर फू बोइक्नीम। मेको ब्रोव्रशो रिना पाइब। मेकोमी “आं नेल्ल क्येडा दाक्शो नु आं दारशो मीश आल बोक्को। मिनु गो नु गाक्को” देंत। ठेयब कुम्सो २:१०

14 पहाड मेर डा पोव्रला मेर, सेरथे फुल्लु मेर बाक्ब आं दाक्शो ढुकुर, इ कुल कोंइदी। इ सेंदा नेंचा तडल। मारदे हना इ सेंदा रिम्शो बाक्ब। मिनु इ कुल दारशो बाक्ब।

15 आंइ कली फ्यउरे ग्याइश्शा गेकी। मेको आइक्च फ्यउरेपुकीम अडगुर रू बिग्रेनीम। मारदे हना मुल अडगुर बोइक्नीम।

16 आं दाक्शो वोंइश आल आं केन बाक्ब। मिनु गो मेको के बाक्नुड। मेकोमी आ क्यारश भेडा लिली फू आन दातेम योव्रब। ठेयब कुम्सो २:१६

17 ग्यू दुम्चा नु वांकु जाम्शा लचा क्येडा डोंइती लेश्शा जाक्कीन। आं दाक्शो वोंइश मुर रोंगु मेर बाक्ब किश्श नु ठिटा रोकोश खोदेशो दुमीन। ठेयब कुम्सो ४:६

### 3

आ दाक्शो कली मिम्शो

1 गो नाक्दो रे आं ब्राख्येम आं दाक्शो वोंइश मुर कली माल्ता। गो मेको कली ब्रेत्ताक्ड। तन्न मेकोम लोव्र मलेत्ती। ठेयब कुम्सो ५:६

2 गो बोक्शा, सहर गे लती। मिनु गो आं दाक्शो वोंइश मुर कली सहर नु लां मेर माल्ता। मोपा माल्ना माल्न बाक्ती, तन्न मथिदु।

3 सहर डा खाल पाइबपुकीम थित्तीमी। मिनु गो “मार, गेपुकीमी आं दाक्शो वोंइश मुर कली थिन्नी?” दे हिल्लो पाता।

4 मिनु गो मेको आन कली प्रोंइशा इक्का आइक्ची ला जाक्दीश्शो नड। गो आं दाक्शो वोंइश मुर कली थित्ता। मिनु गो मेको कली आं ममा आ खिं, आं जरमेसीशो कोठा मचाक्गु सम्म मेको कली ग्याइश्शा मप्रोनु। ठेयब कुम्सो ८:२

5 ए यरूसलेम डा तमीपुकी, गो इन कली, किश्श नु रोकोश आन नेमी अरेनुड आंम दाक्चा क्येडा डोंइती दाक्तीक कली मपोक्कीन।

सोलोमनम ग्युंभे पचा मिम्शो

6 गोरशो रागी रे मार जाक्बा? कुन के थाम खोदेशो तांडसीब। मिनु मेको मूरे नु धूप खोदेशो ब्रोव्रशो रिना पाइब। मेको ग्याप्ब लेयब आन मस्ला खोदेशो पा रिना पाइक्तु।

7 कोव्रडीन, एको सोलोमन कली कुरतीक बाक्ब। मेको आ एर ओंथ ६० जना इसाएल डा बोल्यो लडाइ पाइबम मेको कली खाल पशो बाक्तेक्म।

8 मेको नेल्लेमी या कुरशो बाक्तेक्म। मेको लडाइ पस जोक्ब बाक्तेक्म। नाक्दो लडाइ दुम्मेनु, आन तरवार पिम्सीशो बाक्तेक्म।

9 पिप सोलोमनम आंम कली कुरतीक का सेल्लु। मेको लेबानोन डा लाइश्शो रवा आ शी के सेल्लो बाक्त।

10 मेकोमी मेको आ गुड वोइक्तीक चांदी के नु आ नोले सुन के सेल्लु। आ नित्तीके प्याजी रड के बाक्त। यरूसलेम डा तमीपुकीमी, मेको आ आगा शुश क्येट लाइब शीम साप्शो बाक्तेक्म।

11 ए सियोन डा तमीपुकी, लाडगा गूशा पिने। मिनु पिप सोलोमनम सिरपेच गुक्शो कोव्रडीन। मेको सिरपेच मेको आ ममामी ग्येरसीशा मेको आं ग्युंभे नाक्ती गेशो बाक्त।

### 4

सोलोमन शुलामीथ नु लोव्र पशो

1 आं दाक्शो मीश आल, गे दारशो बाक्नेवे। गे थाम्पा दारशो बाक्नेवे। इ मिक्च इ सुम्तीके आगाम खुइश्शो ढुकुर आ मिक्च खोदेशो बाक्ब। इ चां गिलाद डांडा रे पा ब्रुप्शो क्यारश आन हुल खोदेशो बाक्ब।

2 इ खुइ चां प्रेक्शा चिकशो भेडा आन हुल खोदेशो बाकब। मेको नेल्ल आन के जौले पाठा बाकब। नेल्ल मोदेशो बाकनीस। ठेयब कुम्सो ६:५-६

3 इ शुंइच लल डोरी खोदेशो बाकब। इ शोत्र थम दारशो बाकब। इ सुम्तीके आगाम इ चोत्रचो चेशो दारीम खोदेशो बाकनीस। ठेयब कुम्सो ६:७

4 इ शुर दाऊद आ लाइशो खिं खोदेशो बाकब। मेकेर हजार का तेक्तीक क्युकशो बाकनीम। मेको नेल्ल लडाइ पाइब आन तेक्तीक बाकनीम।

5 इ दूध निकशी क्यारश पाठा खोदेशो बाकनीस। मेको लिली फू आन दातेमी जोइब किशश आ जौले पाठा खोदेशो बाकनीस। ठेयब कुम्सो ७:३

6 ग्यू दुम्चा नु चांकु जाम्शा लचा क्येडा डोंइती, गो ब्रोवशो रिना पाइब डांडा नु धूप बाकशो डांडा लाइनुड। ठेयब कुम्सो २:१७

7 आं दाकशो मीश आल गे नेल्लेम दारशो बाकनेवे। इ के मारेइ मरिम्शो मबाकब।

आं दारशो मीश आल, आं ग्युम्ली!

8 आं ग्युम्ली, लेबानोन रे पा गो नु गाकको। लेबानोन रे पा गाकको। आमाना डांडा रे पा यीवो। सेनीर आ डर नु हेरमोन डांडा रे पा गाकको। गुप्स आन पुक्खी नु जोइ आन बाक्तीक डांडा रे पा गाकको।

9 ए आं समी, आं ग्युम्ली, गे आं कली कोत्रशा, आं थुं खुइ पाप्तीवी। इ माला के गेडा कामीन आं थुं खुइ पाप्तीवी।

10 ए, आं समी, आं ग्युम्ली इ दाक्तीक थम रिम्शो बाकब। तेकोइ अडगुर शांबु क्येडा यो, इ दाक्तीक रिम्शो बाकब। मस्ला नेल्ल आन क्येडा इ खेक्तीक ब्रोवशो रिना पाइशो बाकब।

11 इ शोत्र रे फू आ रस खोदेशो याब्व। ए आं ग्युम्ली, इ लें आगाम दूध नु खुदो बाकब। इ वा डा ब्रोवशो रिना लेबानोन डा रिना खोदेशो बाकब।

12 ए आं समी, आं ग्युम्ली, गे चोक्शा वोइशो रू नु सुशा वोइशो ब्वाक्कु बुक्तीक खोदेशो बाकनेवे।

13 इ रू दारीम रू खोदेशो बाकब। मेकेर नेल्ल क्येडा रिम्शो फल फुल बाकनीम। हेन्ना बुटा नु ब्रोवशो रिना पाइब तेल बाकनीम।

14 ब्रोवशो रिना पाइब तेल, हाव सुप्तीके, सुप्तीक बोट, सिन्कौली, शुश खाल डा ब्रोवशो रिना पाइशो धूप रवा, मूरे, ब्रोवशो रिना पाइशो शी के रवा नु नेल्ल खाल डा ब्रोवशो रिना पाइशो मस्ला बाकनीम।

15 मेको रू डा ब्वाक्कु बुक्तीक ब्रोवशो ब्वाक्कु बुक्तीक बाकब। मिनु लेबानोन रे पा शाइशो खोला बाकनीम।

16 उत्तर डा फश, बोक्को। ए दक्खिन डा फश, कुवो। आं रूमी फश पावो। मेको आ ब्रोवशो रिना डोन सम्म जाक्दील्ल। आं दाकशो वोंइश मुर आ रूमी जाक्क। मिनु मेकेर डा नेल्ल क्येडा ब्रोवशो फल जवल।

## 5

1 ए आं समी, आं ग्युम्ली, गो आं फल फुल रूमी जाक्ती। गो आं ब्रोवशो रिना पाइशो मूरे नु मस्ला खुप्ताक्डमी। गो आं सुरबु चाका नु आं खुदो जाइनुड। गो आं अडगुर शांबु नु आं दूध तनुड। ए वारचपुकी, जने तूडीन। वारचपुकी दाक्तीकेम दुक्शो खोदेशो दुमीन।

डोमु पा आ गोठला कली माल्शो

2 गो गोल्ली, तन्न मडम्ड। नेनीन, आं दाकशो मुरुमी लाप्चो खोकोल पाप्तु। “आं समी, आं दाकशो मीश आल, आ दुकुर, मारेइ मारेइम रिम्शो बाकशो मीश आल लाप्चो रोक्को। आं पिया सीतम जिशो बाकब। आं चां नाकदो डा सीतम जिशो बाकब” देंत।

3 गो आं वा पुइक्ने थुम्ता। मिनु मार मेको लेंशा फेक्नुडा? गो आं खोइल चिक्ने थुम्ता। मिनु मार मुल लेंशा खप दिम्नुडा? ठेयब कुम्सो ३:१

4 आं दाकशो वोंइश मुरुमी लाप्चो रोक्का कली गुइ पिदानु, मेको तशा आं लुङगीर प्रेक्त।

5 मिनु गो आं दाकशो वोंइश मुर कली लाप्चो रोक्का कली बोक्ती। आं गुइ रे ब्रोवशो रिना पाइशो मूरे याप्त। मिनु आं ब्रेप्चो रे ब्रोवशो रिना पाइशो मूरे याप्शा आग्लोम लुम्साक्व।

6 मिनु गो आं दाकशो मुर कली लाप्चो रोक्ता, तन्न मेको गाक्ने थुमा बाक्त। मेको मेकेर मबा। मेको गाक्तीके गो सुर्ता पाता। गो मेको कली माल्ता। तन्न मथिदु। गो मेको कली ब्रेत्ताक्ड। तन्न मेकोम लोइ मलेत्ती।

7 सहमर हिरशा खाल पाइबपुकीम आं कली थित्तीमी। मिनु मेकोपुकीम आं कली तुष्णा गारे गार सेल्लतीमी। गारोम बाक्शा खाल पाइबपुकीमी आं फेक्शो वा यो रोइशला लाइक्तेक्म।

8 ए यरूसलेम डा तमी “गो इन कली ‘गेपुकीम आं दाकशो मुर कली ग्युम्तीनी हना, मेको कली इन कली दाक्ब मुर दाक्तीकेम थशो बाक्ब’ देनीन” देंत। ठेयब कुम्सो २:५

9 मिनु मेकोपुकीमी “गे नेल्ल क्येडा दारशो मीश आल, इ दाकशो वोंइश मुर दोपा अरु आन क्येडा दाकशो दुम्मे? मारदे मेको इ दाकशो वोंइश मुर ठेयब दुम्मे? मारदे आंइ कली मोदेशो पा अरेनेवे?” देंतेक्म।

10 मिनु १० हजार आन दातेम यो आं दाकशो मुर नेल्ल क्येडा दारशो नु आ कुल हाक्सीशो बाकब।

11 मेको आ पिया क्येख सुन के खोदेशो बाकब। मेको आ चां हिरशो नु खद खोदेशो क्येर बाकब।

12 मेको आ मिक्च खोला आ नेक्था बाकब दुकुर आ मिक्च खोदेशो बाकब। मेको दूधमी मुरशा केप्शो हीरा खोदेशो बाकब।



13 मेको आ चोत्रचो ब्रोव्रशो रिना पाइब मस्ला खोदेशो बाकब। मेको आ शुंडच ब्रोव्रशो रिना पाइशशो मूरे याप्व लिली फू खोदेशो बाकब।

14 मेको आ गुड हीरा केपशो सुन के खोदेशो बाकब। मेको आ रां हाती आ दाराम नीलो हीरा क्येपशो खोदेशो बाकब।

15 मेको आ खोइल क्येख सुन के नित्तीक पाइशशो बुश थाम खोदेशो बाकब। मेको कोव्रशोनु, लेबानोन डा लाइशशो रवा खोदेशो पा दारशो बाकब।

16 ए यरूसलेम डा मीश आलपुकी, मेको आ शोव्र ब्रोव्रशो लोव्रमी व्रीशो बाकब। मेको थम दारशो बाकब। मेकोन आं दाकशो वोंइश मुर नु आं वारच बाकब।

## 6

1 ए नेल्ल क्येडा दारशो मीश आल, इ दाकशो वोंइश मुर ते लमे? गो गारशा मेको कली मालथ लय?

2 आं दाकशो वोंइश मुर आंम फल फुल रू लत। मेको आ ब्रोव्रशो रिना पाइशशो मस्ला रू मेर लत। मेको क्यारश भेडा योव्रचा कली नु लिली फू खुप्या कली लत।

3 आं दाकशो वोंइश मुर आं केन बाकब। मिनु गो मेको के बाकनुड। मेकोमी आ क्यारश भेडा लिली फू आन दातेम योव्रब। ठेयब कुम्सो २:१६

सोलोमन आ नोले डा लोव्र

4 आं दाकशो मीश आल, गे तिरचा सहर खोदेशो बाकनेवे। यरूसलेम सहर खोदेशो रिमशो तांडसीनेवे। गे छेदर क्युकशो लडाइ पाइब खोदेशो सक्ति पाइशशो बाकनेवे।

5 इ मिक्चीम आं कली मकोव्रयी। मारदे हना इ मिक्चीम आं कली मार पचा ना मार पचा सेल्व। इ चां गिलाद डांडा रे पा बुप्यो क्यारश आन हुल खोदेशो बाकब।

6 इ खुड ऊन प्रेक्या चिक्शो भेडा आन हुल खोदेशो बाकनीम। मेको नेल्ल आन के जौले पाठा बाकब। नेल्ल मोदेशो बाकनीम। ठेयब कुम्सो ४:१-२

7 इ सुम्तीके आगाम इ चोत्रचो चेशशो दारीम खोदेशो बाकनीस। ठेयब कुम्सो ४:३

8 मिनु ६० जना पिपीम बाक्तेकम हना यो, ८० जना नोले चाक्शो मीश बाक्तेकम हना यो, नु शुश मीश आल बाक्तेकम हना यो,

9 आं मीश आल, आं ढुकुर, आं नेल्ल क्येडा दारशो मीश आल, आ ममामी दाकशो तमी बाकब। आ ममामी “थम दारशो मीश आल बाकब” देब। मिनु मीश आलपुकीम मेको कली तशा “ग्येरसीशो मीश आल बाकब” देतेकम। पिपीम नु नोले चाक्शो मीशपुकीम मेको कली ठेयब सेल्वेकम।

10 सुनी खोदेशो पा दारशो, तास्ला खोदेशो पा दाप्यो, नां खोदेशो पा छेडछेड देशो, हिंचा डा लडाइ पाइब खोदेशो सु बाकबा?

आ मीश आल लशो

11 गो फोरो रवा डा रू मेर दोशो कोच्वा दम्मा, दे कोव्रथ लती। अडगुर बोटमी कोच्वा दम्मा कों, दारीम फू बोइशशो बाकमा कों मबाकमा, दे कोव्रथ लती।

12 मिनु गो आं तुइक्या क्येडा डोंइती आं मिमशोमी आं कली आं दाकशो मुर आ नेक्था बग्गीम लाइक्ती।

13 शुलामीथ लेशशा पिवो! लेशशा पिवो! लेशशा पिवो। मिनु गो इ कली कोवने चाफकल। गे मारदे शुलामीथ कली लडाइ पाइब आन डोंइती सिल पपाइशशो खोदेशो पा कोव्रस डा कोव्रस बाक्या दाकनीनी?

## 7

गे नेल्लेम दारशो बाकनेवे देशो

1 पिप आ तमी, जुत्ता लिक्शो इ खोइल गिश दारशो बाकब। इ क्रातो थाम्पा मार मार सेल्व जोकबमी सेल्यो खोदेशो बाकब। मेको हीरा खोदेशो बाकब।

2 इ सपु कुल कुल देशो बोस खोदेशो बाकब। मेकेर ब्वाइशशो अडगुर शांबुम व्रीशो बाकब। इ कोव्रज लिली फूपुकीमी हिशो पुक्शो चेरब खोदेशो बाकब।

3 इ दूध किशश आ जौले पाठा खोदेशो बाकनीस। ठेयब कुम्सो ४:३

4 इ शुर हाती आ खुड के सेल्यो लाइशशो खिं खोदेशो बाकब। इ मिक्च बाथ-राबबीम डा लाप्यो आ नेक्था बाकशो हेरबोन डा दोम्ली खोदेशो बाकनीस। इ नें दमस्कस सहर गे कोव्रशो लेबानोन डा लाइशशो खिं खोदेशो बाकब।

5 इ पिया कारमेल डांडा खोदेशो बाकब। इ चां पिप आ रड खोदेशो बाकब। मोपतीके पिपम इ कली दाकशो बाकब।

6 आं दाकशो मीश आल, गिश दारशो बाकनेवे। गे नेल्ल क्येडा दारशो बाकनेवे।

7 इ रां खजूर रवा खोदेशो बाकब। इ दूध अडगुर सिशशो खोदेशो बाकब।

8 मिनु गो “गो खजूर रवा डोइक्नुड। मिनु मेको आ राशी ग्याइक्नुड” देती। इ दूध अडगुर सिशशो खोदेशो नु इ सास स्याउ आ रिना खोदेशो बाकब।

9 इ पुक्पु पाइशशो ब्रोव्रशो अडगुर शांबु खोदेशो बाकब। अडगुर शांबु शोव्र नु खुड रे ओंखां पा शाइशशो खोदेशो बाकब।

10 गो आं दाकशो मीश आल के नड। मेकोमी आं कलीन मिमशा बाकब।

11 आं दाकशो मुर जाक्कीन। मिनु रू मेर हिशथ लस। मिनु नाक्दो गाउं मेर बास बाक्स।

12 गो सुनी कना अडगुर रू लस। अडगुर कोच्वा दाप्या फू बोइशशो बाकम कों? मिनु दारीम फू बोइशशो बाकम कों। गो मेकेर इ कली आं दाक्तीक गेनन्नी।

13 आल थिपाइक्ब फलम ब्रोव्रशो रिना फ्रशो बाक्नीम। नेल्ल खाल डा रिमशो फल आंइ लापचो आ तार बाक्नीम। आं दाक्शो मुर, नक नु सोव्रशो फल इ कली खेक्शा वोइश्शो बाक्नुड।

## 8

गो आं दाक्शो नु बाक्चा दाक्नुड

1 आं ममामी इ कली दूध तुंइशो आं लोकब नवे हना, इ कली लाडगाम गुमुनु, पुक्पु पड वा। मिनु सुइमी आं कली मरिम्यो मदेंम वा।

2 मिनु गो इ कली आं ममा आ खिं, आं जरमेसीशो कोठाम चाक्गु वा। मेकेर लाइश्शा ब्रोव्रशो मार मार सुप्शो दारीम शांबु तूचा गेड वा। मेको आं दारीम रे सेल्शो बाक्ब। ठेयब कुम्सो ३:४

3 मेको आ पेरा गुड आं पिया आगाम बाक्ब। मिनु मेको आ ग्युरा गुइमी आं कली मुप्शो बाक्ब।

4 ए यरूसलेम डा तमीपुकी, गो इन कली, अरेनुड। आंम दाक्चा क्येडा डोंइती दाक्तीक कली मपोक्कीन। ठेयब कुम्सो २:६-७

आ गोठला कली दाक्तीक सक्ति

5 आंम दाक्शो मुर नु क्येम्सीशा, गोरशो रागी रे जाक्ब सु बाक्बा? गो स्याउ रवा आ पुंमी इन कली सेंताक्ड। मेकेर इन ममामी इन कली कुरतु। मेकेर इन कली थिचा कली आल थितीक रोइ पाप्तु।

6 आं कली इन थुंमी छाप थोक्शो खोदेशो पा वोतीन। इन गुइमी यो छाप थोक्शो खोदेशो पा वोतीन। मारदे हना दाक्तीके, बेक्पाइक्ब खोदेशो पा सक्ति पाइश्शो बाक्ब। मेको आ दाक्शो तुरस खोदेशो मटीब नु शुश ब्रशो मी क्येडा यो शुश ब्राइब बाक्ब। मत्ती २२:३०; रोमी ७:२; उत्पत्ती २:२४; मत्ती १९:५-६; एफिसी ५:२८-३३

7 शुश ब्वाक्कुमी दाक्तीक कली क्याम्ने मचाप्ब। बारशो खोलामी यो मेको कली योल्ने मचाप्ब। सुइ मुरुमी आंम दाक्तीक आ पा डा खिं नु आ शोंप नेल्ल गेप्तु हना, मुरुमी मेको कली शुक्शी पाइनीम।

आ खिं लेशशो

8 इं के आइक्च समी का बाक्ब। मेको आ दूध मुल सम्म मबाक्ब। मेको कली ग्युंवे पचा कली पुंइथ जाक्तेक्म हना, गो मार पय?

9 मेको गारो खोदेशो बाक्त हना, मेको तारी चांदी के दरवार सेल्य वा। मेको लापचो खोदेशो बाक्शो हना, मेको कली लेबानोन डा लाइश्शो रवा आ फलेकमी सुशा वोइ वा।

10 गो गारो खोदेशो नड। मिनु आ दूध लाइश्शो खिं खोदेशो बाक्ब। मोपतीके गो मेको कली आ थुं नाइक्पाइक्ब दुप्शो बाक्नुड।

11 सोलोमन के बाल-हामोनमी अडगुर रू का बाक्त। मिनु मेकोम आ रू खाल पाइब मुर आन कली गेवा बाक्त। मिनु मेको बुमथा पाइब नेल्लेमी फल फुल आ पा डा हजार का चांदी के शेकेल थापचा माल्बाक्मा बाक्त। शेकेल का ११.५ ग्राम चांदी के क्येट बाक्ब।

12 तन्न आं के यो अडगुर रू का बाक्ब। ए सोलोमन, मेको हजार का चांदी के शेकेल इन केन बाक्ल। मिनु सहे निकशी शेकेल चहिं मेको फल फुल खाल पाइब आन के बाक्ल।

आं कली ला माल्शा ब्रेत्तो

13 अडगुर रूमी बाक्ब आं वारचपुकीम इ सेंदा नेंचा दाक्नीम। इ सेंदा आं कली नेंपाइय्यी।

14 आं दाक्शो मुर रे गीब पा मस्ता बाक्शो डांडा डा किश्श खोदेशो नु ठिटा रोकेश खोदेशो दुमो।

## यसैया

**ब्रेक्ब मुर:** एको किताब यसैयामी ब्रेक्शो बाक्त। का निकशी मुरुम चहिं रे अर्को मुर काम ब्रेक्शो बाक्त देनीम। मारदे हना मस्सीह आ पर्वम ब्रेक्शो लोत्र बाक्ब। तन्न परमप्रभु यावे आ सोक्तीम मेको लोत्र पपाइक्ब। मेको ब्रेक्ब यसैया आंमा यो दुम्ने चाप्ब।

**गेना ब्रेक्शो:** यसैया पिप उसीजाह ७४०-७३९ बि. सी. परमप्रभु यावे आ लोत्र पाइब दुम्शा ब्रेक्शो बाक्त। आ नोले डा ब्रेक्स पिप सन्हेरीब आ लडाइ पचा आ पर्वम बाक्ब। मेको ७०१ बि. सी.म बाक्शो बाक्त। यसैया ४० बर्स परमप्रभु यावे आ लोत्र पाइब बाक्शो बाक्त। मेकोमी पिप उज्जीयाह ७६७-७४०/३९ बि. सी., पिप योथाम ७४०/७३९-७३२/३१ बि. सी., पिप आहास ७३२/३१-७१६/१५ बि. सी. नु पिप हिज्कीयाह ७१६/१५-६८७/८६ बि. सी. आन सासन पची ना गेय पशो बाक्त।

**मारदे ब्रेक्शो:** यसैया आ लोत्र:

१. मेना बाक्शो मुर आन कली बाक्त। यसैया १:- ३९:-
२. मस्सीह, येसु खीस्त आ पर्वम बाक्त। यसैया ४०:-५५:-
३. रागी नेल्ल क्येडा नोले मार दुम्बा मेको आ पर्वम लोत्र। यसैया ५६:-६६:-

डोंइती डा लोत्र

१ परमप्रभुमी आमोज आ तौ यसैया कली कोंइशो लोत्र एको बाक्ब। मार लोत्र कोंइशो बाक्त देशा हना, यहूदा नु यरूसलेम आस पर्वम तशो कोंइताक्ब। मेना पिप उज्जीयाह, योथाम, आहाज नु हिज्कीयाहमी सासन पशो बाक्तेक्म। २इतिहास २६:२२

यहूदाम परमप्रभु आ अरेशो मटिशो

२ सरीड नु रागीम बाक्बपुकी नोफा दाइश्या नेनीन। मारदे हना परमप्रभु यावेमी “गो आं आल आन कली थुल्शा, कोल्पाइक्तामी। मेकोपुकीम चहिं आं कली मटीयीमी। ब्यवस्था ३२:१; ब्यवस्था ३२:५-६

३ ब्यफोमी आ होत्रप कली तुइक्ब। गधामी आ होत्रप आ शुंगु तुइक्ब। तन्न इस्राएल डा मुर मतुइक्ब बाक्नीम। आं मुर मरुक्ब बाक्नीम।

४ आबी, पापम ब्रीशो रागी, मुरपुकी मरिम्शो पतीकेम ब्रीशो बाक्नीम। मेको आन आल काइ मरिम्शो पाइब दुम्तेक्म। मेकोपुकी शोर गाक्शो बाक्नीम। परमप्रभु यावे कली प्रोंइशो बाक्नीम। इस्राएली आन का ला बाक्शो परमप्रभु आ पर्वम ‘ममालनीकी’ देशो बाक्नीम। मेकोपुकी नोले शोंइसीशो बाक्नीम।

५ मारदे गो इन कली लेंशा, तुप्चा माल्डा? मारदे गो डोंइती क्येडा मटीब दुम्नी। इन पिया नेल्ल रोइ पशो खोदेशो बाक्ब। गे थशो खोदेशो बाक्नीमी। येरमीया २:३०

६ पिया रे खोइल सम्म तेइ सेस मबाक्ब। राक्शो गार नु तुप्चा हुश यिशो गार ला बाक्नीम। मेको नेने मपुक्शो, मफ्रेशो नु तेल मखेक्शो बाक्नीम। ब्यवस्था २८:३५

७ इन रागी गोरशो रागी दुम्बा। इन डोंइती इन सहर मीम क्रोइक्तेक्म। इन डोंइती इन रू डा मारेइ मारेइ अर्को रागी डा मुरपुकीम नेक्तेक्म। मिनु मेकोपुकीम इन रागी लडाइम खोदेशो पा ग्रांये माग्ये सेल्लेक्म।

८ सियोन आ तमी, यरूसलेम, चहिं अडगुर रू खाल पतीक खिं, वोबीस रू खाल पतीक गोठ नु एर ओंथ रे जोरी सत्रुम पुम्चा पुंडसीशो सहर खोदेशो बाक्ब” दे लोत्र पाप्नु।

९ मुर नेल्ल आन परमप्रभु यावेमी “का निकशी मुर महेंशो हना, गेपुकी सोदोम नु गोमोररा खोदेशो दुम्नी वा” देत। उत्पत्ती १९:२४-२५; रोमी ९:२९

१० सोदोम डा सासन पाइबपुकी, परमप्रभु यावे आ लोत्र नेनीन। गोमोररा डा मुरपुकी आंइ परमप्रभु आ शेशो लोत्र नेनीन।

११ परमप्रभु यावेमी “इन शुश चढ़ेशो आं कली शोर गाक्शो बाक्ब। गो चोशा चढ़ेशो सांड नु थुल्शो बस्तु भाव आन बोंसोमी रूती। गो ब्यफ, पाठा नु क्यारश आन हुश मदाक्नुड। भजन संग्रह ४०:७-९; हितोपदेस १५:८; येरमीया ६:२०; आमोस ५:२२

१२ गे आं डोंइती जाक्शा, मोदेशो चढ़ेचा, दे सुम देंम? आं लाडगा मथेक्तीन।

१३ इन चढ़ेतीके मचाक्कीन। इन धूप चढ़ेशो तशा, गो ग्रांया दीती। औसी नु नाइक्तीक नाक्ती डा ग्रुम्तीके डा मरिम्शो पाइब आन हुल तचा मदाक्नुड। गन्ती १०:१०

१४ इन औसी नु अरु चाडपुकी काइ मदाक्नुड। मेको आं थुंम ग्रांया दिप्ब। मेको आं कली श्येत बाक्नीम। गो फाल्ने मचाप्नुड।

१५ इन गुड क्युक्शा, गो नु लोत्र पनीनु, आं कुल खुइक्नुड। गेपुकीम शुश पुंडतीनी हना यो, गो मनेनुड। मारदे हना इन गुडम हुश खाक्श पशो बाक्ब। हितोपदेस १:२८; हितोपदेस १५:२९; यहन्ना ९:३१

१६ गेपुकी चिकसीन। ग्रांया मदिशो दुमीन। मिनु आं डोंइती इन नाक्ती किंत किंत डा मरिम्शो पतीके प्रोनीन।

१७ रिम्शो पचा शेंसीन। ठीक निसाफ पतीक मालीन। दिप्चा पुंडसीशो आन कली वारच पने। रोम रोइक्च आन कली वारच पने। वोंइश बेक्शो मीश मुर आन कली वारच पतीन” देत। येरमीया ७:५-६

- 18 मिनू परमप्रभु यावेमी “जाक्कीन, गोपुकी बुक्शा, लोव्रसी पय। इन पाप हश खोदेशो लल बाक्त हना यो, फु खोदेशो बुश दुम्ब। शुश लल बाक्त हना यो, मेको उन खोदेशो बुश दुम्ब। यसैया ४४:२२; भजन संग्रह ५१:९
- 19 आं लोव्र नेंशा टीतीनी हना, एको रागी डा ब्रोवब्रोवशो थोव्रक जचा ताडनीनी। लेवी २५:१८-१९
- 20 तन्न आं लोव्र मनैतीनी नु मटीतीनी हना, तरवारम क्योरचा पुंडसीनीनी” दे परमप्रभु यावेमी देंत। लेवी २६:२५

खतम दुम्शो सहर

- 21 परमप्रभु यावेमी “आं थमा सुइश्शो सहर दोपा तेल्लेम दुम्मे? ठीक निसाफ नु ठीक पतीके मेको नु बाक्त। मुल मेको मुर साइक्ब मुरुम ब्रीतेकम।
- 22 इ चांदी पुलु खोदेशो दुम्त। इ ब्रोवशो अडगुर शांबुम ब्वाक्कु ब्वाइक्ताकम। इजीकीएल २२:१८-२२
- 23 इ सासन पाइबपुकी मटीब नु खुइ आन वारच दुम्शा, घूस जशा, क्येट ताक्चा दाक्नीम। मेकोपुकीम रोम रोइक्च आन कली ठीक निसाफ मपाइनीम। वोंइश बेक्शो मीश मुर आन लोव्र मनैनीम” देंत।
- 24 मोपतीके परमप्रभु, मुर नेल्ल आन परमप्रभु यावे, इस्राएली आन सक्ति पाइश्शो परमप्रभु यावेमी “गो आं जोरी सत्रु आन तारी आं गाइश्शो मोइश्शा, क्येक्क लेलुडमी।
- 25 गो इन पर्वम आं गुइ क्युकुनुड। गो इन मरिम्शो पतीके पुलु खोदेशो पा फिक्शा, इन ग्रांया दिशो नेल्ले गुंडुनुड। भजन संग्रह ११९:१९
- 26 मिनू गो इ निसाफ पाइब, सासन पाइब नु अर्ती गेब आन कली डोंइती डा खोदेशो सेल्लुड। नोले इ कली ‘ठीक पाइब नु परमप्रभु कली मप्रोंइब सहर’ दे नें वोइक्नीम। जकरिया ८:३
- 27 मिनू सियोन ठीक निसाफ पतीकेमी पाप रे प्रोंइचा पुंडसीब। सहरम बाक्ब ठीक पतीकेमी पाप रे प्रोंइचा पुंडसीनीम। यसैया ४६:३३
- 28 तन्न परमप्रभु यावे आ देशो लोव्र मटीब, मेको कली प्रोंइबपुकी कालेमीन खतम दुम्नीम। परमप्रभु यावे कली प्रोंइबपुकी क्याम्चा पुंडसीनीम।
- 29 गे रचा आगाम पूजा पशो आ पर्वम मुने दोक्नीनी। इन दाक्शा योव्रशो रवा रू आ पर्वम शुश मुने दोक्नीनी। यसैया ५७:५; यसैया ६५:३
- 30 गे सोव्रशो रवा डा सफा पाइश्शो नु ब्वाक्कु मतशो रू खोदेशो दुम्नीनी।
- 31 बोल्यो मुर झुलो खोदेशो दुम्ब। मेको आ गेय मी आ झिल्ला खोदेशो दुम्ब। मेको निम्फा कालेमीन ब्रसानु, सुइम मकाप्नीम” देंत।

## 2

परमप्रभु आ नोले डा राज्य

- 1 आमोज आ तौ यसैयामी यहूदा नेल्ल नु यरूसलेम आ पर्वम कोंइशो नु तशो लोव्र एको बाक्ब।
- 2 नोले डा नाक्ती परमप्रभु यावे आ खिं सेल्लो डांडा, डांडा नेल्ल आन क्येडा लाइश्शो दुम्ब। पहाड नेल्ल आन क्येडा यो लाइश्शो दुम्ब। मिनू रागी रागी डा मुर नेल्ले मेको डांडाम जाक्नीम। मीका ४:१-३; यसैया १९:२३; येरमीया ३:१७
- 3 रागी रागी डा शुश मुर जाक्शा “जाक्कीन, गोपुकी परमप्रभु यावे आ डांडा डोइश्शा, याक्ब आ परमप्रभु आ खिं लय। मेकोमी इ कली आ लां शेंब। मिनू गोपुकी मेको आ लांम गाक्नय। मारदे हना परमप्रभु यावे आ शेंशो सियोन डांडा रे नु आ लोव्र यरूसलेम रे नैसीब” देनीम। व्यवस्था ४:६; यूहन्ना ४:२२
- 4 मिनू मेकोमी रागी रागी डा नु जात जात डा मुर आन कली निसाफ पाइब। मिनू मेकेर डा मुर आन कली अरेब। मेकोपुकीमी आन तरवार चेम्शा, फाली सेल्लनीम। आन तूतीक चहिं गुये सेल्लनीम। रागी का डा मुर अर्को रागी डा मुर नु लडाइ मपाइनीम। लडाइ पचा मशेंसीनीम। यसैया ९:४

मूर्ति पूजा पाइबपुकी

- 5 याक्ब आ खिं डा मुर जाक्कीन। गोपुकी परमप्रभु यावे आ छेडछेडम गाक्कय।
- 6 याक्ब आ खिं डा मुर, गे इन डोंइती डा लां प्रोंइतीनी। गे इन थुं पूब डा मुर आन पतीक गेयम ब्रीशो बाक्ब। गे पलिस्ती खोदेशो पा लिंक्कु कोव्रब दुम्तीनी। अर्को जात डा मुर नु खाल्लाक्नी।
- 7 मेको आन रागी सुन चांदीम ब्रीशो बाक्ब। मेको आन शोंप हिक्ने मचाप्चा डा बाक्ब। मेको आन रागीमी शुश शारा बाक्नीम। मेको आन बग्गीपुकी हिक्ने मचाप्चा डा बाक्नीम। मीका ५:९
- 8 मेको आन रागी मूर्तिम ब्रीशो बाक्ब। मेकोपुकी आंमा सेल्लो मूर्ति आ डोंइती बाप्नीम। आंमा गुइमी सेल्लो मूर्ति आ डोंइती पोक्च थेक्नीम।
- 9 मोपतीके मुरपुकी ब्रेम्शो सेल्ला पुंडसीनीम। मुर नेल्ल आइक्च दुम्नीम। गे मेको आन कली माफ मगेन।
- 10 परमप्रभु यावे आ हिं च कोइतीक नु आ छेडछेड रे पुक्खी आगाम खुंडसीन। फुरक आगाम खुंडसीन।
- 11 मुर नेल्ल आन ठेयब लेशो आइक्च सेल्ला पुंडसीनीम। बोरशो मुर नेल्ल ब्रेम्शो सेल्ला पुंडसीनीम। मेको नाक्ती परमप्रभु यावे ला ठेयब दुम्ब। यसैया २:११

ठेयब नेल्ल आइक्च सेल्लो

- 12 मिनू मुर नेल्ल आन परमप्रभु यावेमी काबु नाक्ती ठेयब लेशो, बोरशो मुर नु “गो ठेयब नड” देंब आन कली आइक्च सेल्ल। येरमीया ४६:१०; इजीकीएल ३०:३; योएल १:१५; आमोस ५:१८; सफन्याह १:१४

- 13 लेबानोन डा लाइशो रवापुकी, बाशान डा बोल्यो रवापुकी,  
 14 लाइशो डांडा नेल्ल नु ठेयब पहाड,  
 15 लाइशो खिं नु बोल्यो गारो,  
 16 टारसीस डा जहाज नेल्ल, रिमशो नु शुश क्येट लाइब सेल्शो थोत्रकपुकी  
 17 नु मुर नेल्ल आन ठेयब लेशो आइक्च सेल्चा पुंडसीनीम। बोरशो मुर नेल्ल ब्रेमशो सेल्चा पुंडसीनीम। मेको नाक्ती परमप्रभु यावे ला ठेयब दुम्ब। यसैया २:१  
 18 मेना मूर्ति नेल्ल जाम्नीम।  
 19 परमप्रभु यावेमी शुश रागी डा मुर आन कली हिंच कौंडब नु आ छेडछेड डा ठेयब सक्ति जाक्मेनु, गे पुक्खीम नु खपी आगा डा ढोडोडगाम ओत्रशा खुंडसीन।  
 20 मेको नाक्ती मुरपुकीम आन पूजा पचा कली सुन चांदी के सेल्शो मूर्ति थाक्यु नु पकातिकती आन डोंइती ताइक्नीम। यसैया ३१:७  
 21 परमप्रभु यावे रागी डा मुर आन कली हिंच कौंडचा कली जाक्मेनु, मुरपुकी आ हिंच कौंडतीक छेडछेड डा ठेयब सक्तिम मतचा डा पा पुक्खी नु सेरथे फुल्लु डा कापम खुंडसीनीम। २थिस्सलोनिकी १:९-१०  
 22 मोपतीके नेम सास मुडक्चा पुंडसीशो बेक्शा लाइब मुर रे डोन लने। मेको मारेड मनम।

### 3

यरूसलेम नु यहूदा कली निसाफ

- 1 मुल परमप्रभु, मुर नेल्ल आन परमप्रभु यावेमी यहूदा नेल्ल नु यरूसलेम रे मारेड मारेड लाइक्ब। मारेड मारेड जचा थोत्रक नु ब्वाक्कु नेल्ल यो लाइक्ब। लेवी २६:२६; इजीकीएल ४:१६  
 2 मिनु बोल्यो मुर, लडाइ पाइब मुर, निसाफ पाइब, परमप्रभु यावे आ लोत्र पाइब, लिंक्यु कोत्रब, खाल्पापुकी,  
 3 मिनु ५० जना आन कप्तान, मान पाइक्चा पुंडसीब, सल्ला गेब, जोक्ब तुडक्ब, मन्तर तन्तर पाइब नु नेल्ल क्येडा जोक्ब नेल्ल सहर रे योल्ब।  
 4 मिनु गो वोंइश आल आन कली मेको आन ठेयब मुर सेल्लुड। मिनु आइक्च आलमी मेको आन कली हुकुम पाइनीम। उपदेसक १०:६  
 5 मिनु मुरपुकी दिप्चा पुंडसीनीम। दिम्मुइनीम। आन नेक्था डा मुर आन कली दिप्नीम। आलपुकीमी खाल्पी खाल्पा आन कली मान मपाइनीम। महिक्सीशो मुरपुकीमी ठेयब मुर आन कली मान मपाइनीम।  
 6 मिनु मुर कामी आ खिं डा मुर का कली ग्याइशशा “इ के फेक्तीक वा बाक्ब। मोपतीके आंड हुकुम पाइब दुमो। मिनु मेको ब्रेशो खिं नेल्ल इ अधिक्कारम बाक्नीम” देंब।  
 7 तन्न मेको मुरुमी “गो वारच पाइब मनड। आं खिंमी जचा फेक्चा थोत्रक मबाक्ब। गे आं कली मुर आन कली हुकुम पाइब मसेल्यीनी” देंब।  
 8 मिनु यरूसलेम दाइल पांडसीशा गोलत। यहूदा खतम दुम्त। मारदे हना मेकेर डा मुर आन लोत्र नु आन पतीके परमप्रभु यावे कली काइ मगारचा डा बाक्त। परमप्रभु आंमा मेको आन दातेमी बाक्शा यो, मेकोपुकीम महिंथु मरिंमशो पना पन बाक्नीम।

परमप्रभुमी निसाफ पशो

- 9 मेको आन कुलमी आन मरिंमशो पशो तुडक्पाइक्ब। सोदोम डा मुर खोदेशो पा मेकोपुकीम आन पाप मखुडक्थु शोत्रनीम। आबी, मेकोपुकीमी आंम कली ग्याइशशा लाइक्चा पुंडसीब सेल्सीनीम। उत्पती १९:५-९  
 10 दोस मताइब मुर आन कली रिंमशो दुम्ब। मारदे हना मेकोमी आ गेय पशो रे जाइब।  
 11 आबी, दोस ताइब कली हिंचा डा दुम्ब। मारदे हना दोपा मरिंमशो पवा, मोपा आ मरिंमशो पशो ताइब।  
 12 मिनु वोंइश आलपुकीमी आं मुर आन कली दिप्नीम। मीश मुरपुकीम मेको आन कली हुकुम पाइनीम। आं मुरपुकी, इन ठेयब मुरपुकीम इन कली दूली लां खोइक्पाइशशा, हेंथे गाक्पाइक्नीम।  
 13 परमप्रभु यावेमी निसाफ पचा चिक्शो बाक्ब। मेकोमी मुर आन कली निसाफ पाइब।  
 14 मिनु परमप्रभु यावेमी आ मुर आन दाते डा खाल्पापुकी नु हुकुम पाइब आन कली निसाफ पाइब। मेकोमी “गे अडगुर रू नेल्ल आंम के सेल्लतीनी। पुडग आन के रोइशो मार मार इन खिंम बाक्नीम। यसैया ५:७  
 15 दोपा गेपुकीमी आं मुर आन कली मो पने चाप्नी? पुडग आन कली चिनु पुडग सेल्लतीनी” दे परमप्रभु, मुर नेल्ल आन परमप्रभु यावेमी देंत।

मीश मुर आन कली दोस गेशो

- 16 मिनु परमप्रभु यावेमी “मारदे हना सियोन डा तमीपुकी ठेयब लेशो बाक्नीम। मेको आन पिया पोक्शा, आन मिक्च हिरशा, कल्ली लिक्शा, ग्रीपाइशशा गाक्नीम। १तिमोथी २:९  
 17 मोपतीके गो सियोन डा तमी आन पिया श्येत्थ सेल्शा, आन खुडशो कौंडशा मुने तोक्नुडमी” दे परमप्रभुम देंत।  
 18 मेना गो मेको आन खोइली डा पांडतीके, मेको आन सुन फू, सुन के गहना,  
 19 आन नोफा सुन, चुरा, कुल सुन्तीके,  
 20 कुप्नी, खोइलीम पांडतीके, काम्बरी, ब्रोवशो रिना पाइशशा खेक्तीके नु आन जन्तर,

- 21 छाप थोक्तीक औंठी नु मुन्नी,  
 22 आन शुश क्येट लाइब वा, आ तार फेक्तीक वा, सुम्तीक वा, थैली,  
 23 पाल्लो वा, रिम्शो सुती वा, आन पियाम गुप्तीक वा नु आन सुम्तीकीक वा नेल्ल लाइबकुनुड।  
 24 मिनु “नोले ब्रोइशो रिना पाइश्शो, ग्राग्रा दिशो रिना पाइश्शो दुम्ब। काम्बरी किप्तीकेमी, डोरी किप्चा माल्नीम। मेको आन रिम्शो सेल्शो चां, श्येत्थ पिया दुम्नीम। आन दारशो शुश क्येट लाइब फेक्तीकेमी, रां सुम्चा कली अरन्डी फेक्चा माल्नीम। मेको आन दारस नेल्ले लशा, मीम ग्रोइश्शो खोदेशो दुम्शा मुने दोक्नीम।  
 25 इन वोंइश तरवारम साइक्चा पुंइसीनीम। इन लडाइ पाइबपुकी लडाइम बेक्नीम।  
 26 सहर डा लापचो सुर्ता पा रोंका पाइनीम। सहर श्येत्थ दुम्शा, खपीम निश्शो मीश मुर खोदेशो दुम्ब” दे परमप्रभु यावेमी देत।

#### 4

1 मेना ७ जना मीश मुरपुकीमी वोंइश मुर का कली ग्याइश्शा “गो आंइ जचा थोत्रक जाइनीकी। आंइ वा फेक्नीकी। आंइ कली इन नें गेशा, आंइ मुने साम्शा, आल थिपाइक्की” देनीम।

यरूसलेम लेंशा रिम्शो दुम्शो

- 2 मेको नाक्ती परमप्रभु यावे आ राशी दारशो नु थम रिम्शो बाक्ब। मिनु रागी आ दारसम ब्रोंइशा लीशो इस्राएली आन कली आन थुं बारपाइश्शा, ग्येरपाइक्ब दुम्ब। येरमीया ३३:१५  
 3 मिनु सु सु सियोन नु यरूसलेम लीशो बाक्मा, मेकोपुकी “परमप्रभु के बाक्नीम” दे माइक्नीम। मेको आन नें यरूसलेम ब्रोंइशा कली बेक्सीशो बाक्नीम। यसैया ६:१३; प्रस्थान ३२:३२; भजन संग्रह ६९:२९; मलाकी ३:१६  
 4 परमप्रभु यावेमी सियोन डा तमी नु यरूसलेम डा मुर आन पाप निसाफ पतीक नु क्याम्तीकेमी क्याम्ताक्ब हना,  
 5 मेना परमप्रभु यावेमी सियोन डांडाम आ बाक्तीके खिं नु आ मुर युम्तीक सेल्ब। मेकेर नाक्ती गोस्स नु कुन वोंइश्शा, नाक्दो मी ब्रशो छेडछेड वोइक्ब। मिनु मेको छेडछेडम रागी नेल्ल कली सुम्ब। प्रस्थान १३:२१  
 6 मेको सुम्तीकेम नाक्ती नांम मनाप्पाइक्तीके, फश गिवार पवानु नु रेउ यिमेनु, फाम्सीतीके दुम्ब।

#### 5

अडगुर रू डा कुम्सो

- 1 गो आं दाक्शो कली कुम्सो का पाइनुड। आ अडगुर रू आ पर्वम कुम्सो का पाइनुड। आ दाक्शो के अडगुर रू का बाक्ब। आ अडगुर रू शुश ग्रेल्ब डांडाम बाक्ब। यसैया ३:१४; येरमीया २:२१; मर्कूस १२:१-९  
 2 मिनु मेकोमी रू दोशा, फुल्लु गुप्चा ताइक्ताक्ब। मिनु नेल्ल क्येडा रिम्शो अडगुर बोट खुम्तु। मेकोमी रू आ दातेमी खाल पतीक खिं का सेल्लु। मिनु मेकेर कोल का यो सेल्लु। मिनु अडगुर सिप्ब दे आस पाप्तु। तन्न ब्वाकी डा अडगुर कका सित्तेक्म।  
 3 यरूसलेम बाक्ब नु यहूदा डा मुरपुकी, गो नु आं अडगुर रू आंस दातेमी निसाफ पने।  
 4 आं अडगुर रू कली गो नेल्ल पाता। गो मार मपडा डा? गो अडगुर सिप्ब, दे आस पा बाक्ती। तन्न मारदे ब्वाकी डा अडगुर कका सिम्मे?  
 5 मिनु मुल गो आं अडगुर रू कली मार पाइनुडा, इन कली देंनुड। आ थरपु नेल्ल गुंइनुड। मिनु मार मार ओत्रनीम। आ गारो नेल्ल प्रेशा ताइक्नुड। मिनु दिम्शा ताइश्शा पाइनीम।  
 6 गो मेको कली खतम सेल्लुड। मेको कली ममुंइनुड, मरोक्नुड। मिनु चू नु चोंक वाशा, सुम्नीम। गो गोस्स कली “रेउ मयिपतो” दे माइक्नुड।  
 7 मारदे हना मुर नेल्ल आन परमप्रभु यावे आ दाक्शो अडगुर रू इस्राएल आ खिं डा मुर नु यहूदा डा मुरपुकी बाक्नीम। मिनु मेकोम ठीक निसाफ पतीके रिम्ताक्ब। तन्न दूली निसाफ पाप्तेक्म। ठीक पतीके रिम्ताक्ब, तन्न मरिम्शो पतीके ला दुम्त।

मुर आन मरिम्शो पशो

- 8 आबी, गो शुश खिं नु रू ग्याप्ब। नोले सुइ मुर इ नेक्था मबाक्नीम। मारदे हना रू नु खिं नेल्ल इ के बाक्नीम। ब्यवस्था ५:२१  
 9 मुर नेल्ल आन परमप्रभु यावेमी “थमा पा इन खिं नेल्ल ब्रेलीम। मेको ब्रेश्शो खिं दारशो नु टेयब बाक्तेक्म हना यो, मुर मबाक्नीम।  
 10 मिनु ५ बिगा अडगुर रूमी बाथ का अडगुर रस यूब। मिनु होमेर का वांचेरम एफाह का अन्न यूब” देत। बाथ का २२ लिटर बाक्ब। होमेर का २२० लिटर बाक्ब। एफाह का २२ लिटर पुक्तीक का बाक्ब।  
 11 आबी, गे राकसी तूचा कली सुनी कना बोक्बपुकी, नाक्दो सम्म शांबु तूना तून दुक्शा बाक्नीनी।  
 12 बीना, तार पाइश्शो टेयब ताप्तीके, खैजडी नु बांसुरी नेंशा, शांबु दुक्नीनी। तन्न परमप्रभु यावे आ पशो प्रेशा ममिम्नीनी। आ गुइ डा गेय मताइनीनी। आमोस ६:५-६; भजन संग्रह ४४:२  
 13 मोपतीके आं मुर मारेइ मतुइक्थु आन रागी रे ग्याइश्शा लाइक्चा पुंइसीनीम। मेको आन टेयब मुरपुकी शोत्रलुम बेक्नीम। आन हल शुश ब्वाक्कु तूतू दाक्नीम।

- 14 बेकशो मुर आन बाक्तीकेम मेको आन कली दाक्चा कली आ शोत्र पाकशो बाक्ब। मिनु यरूसलेम डा ठेयब मुर नेल्ल नु मेकेर रेयके पा बाक्ब नेल्ल नरक आ शोत्रम ओलनीम।
- 15 मुरपुकी बाप्शा, ब्रेम्शो दुम्नीम। ठेयब लेशशो मुर आइक्च सेल्चा पुंडसीनीम।
- 16 तन्न मुर नेल्ल आन परमप्रभु यावे ठीक निसाफ पतीकेम ठेयब बाक्ब। मिनु आ का ला बाक्शो परमप्रभुम आ ठीक पतीके कौंडब। यसैया २:११, १७
- 17 मिनु पाठापुकी आंम रागीम खोदेशो पा जोइनीम। अर्को रागी डा मुरपुकीमी शोप नु लीशो मारेड मारेड जाइनीम।
- 18 आबी, गे मरिम्शो पतीके कली जोल के डोरीम नु पाप कली ठेयब डोरीम पाइशशा, इन नोले कीनीनी।
- 19 गेपुकीमी “मेकोम आ गेय रीब पा पवल। मिनु गो ताइनय। आंड तचा डा पा इस्राएली आन का ला बाक्शो परमप्रभु आ पचशो दुम्ल” देनीनी। येरमीया १७:१५; २पत्रुस ३:४
- 20 आबी, मरिम्शो कली रिम्शो नु रिम्शो कली मरिम्शो देबपुकी, छिडछिड कली छेडछेड नु छेडछेड कली छिडछिड देबपुकी नु कशो कली जिज नु जिज कली कशो देबपुकी श्येत जाइब बाक्नीनी।
- 21 आबी “गो जोक्ब तुइक्ब नु निप्स पाइशशो नड” देबपुकी श्येत जाइनीनी। हितोपदेस ३:७ रोमी १२:१६
- 22 गेपुकी शांबु तूचा कली बोल्यो दुम्सु पाइनीनी। राकसी ब्वाइक्स जोक्ब बाक्नीनी।
- 23 गेपुकीमी घूस जशा, ठीक मपाइब कली “ठीक पाइब बाक्ब” नु ठीक पाइब कली “ठीक मपाइब बाक्ब” देनीनी। प्रस्थान २३:८
- 24 मोपतीके दोपा मीम ठुटा नु सोल्लशो घांस नेक्बा, मोपा मेको आन शाक्श राक्ब। मिनु आन फू फुरक खोदेशो पा बेरशा लाइब। मारदे हना मेकोपुकीमी मुर नेल्ल आन परमप्रभु यावे आ लोत्र मटीम। मिनु इस्राएली आन का ला बाक्शो परमप्रभु आ लोत्र आ पर्वम शुक्शी पांम्तेकम।
- 25 मोपतीके परमप्रभु यावे आ मुर आन पर्वम गाइक्ताक्ब। मिनु आ गुड क्युकशा, मेको आन कली तुप्तु। मिनु डांडापुकी खिनु कुशा हिम्साक्म। शुश मुर आन बेकशो रां लांमी ताइशशो खोदेशो दुम्तेक्म। मोपा आ गाइक्चा मबेक्थ, मुल सम्म आ गुड क्युकस डा क्युकस बाक्ब। यसैया ९:१; यसैया १६:२०; यसैया १०:४
- 26 मेकोमी छेदर क्युकशा डोन रागी डा मुर आन कली ब्रेप्ब। मिनु रागी आ सुर डा मुर आन कली लाप पा ब्रेप्ब। मिनु मेकोपुकी रीब पा जाक्नीम।
- 27 मिनु मेको आन दातेमी सुड मदाइनीम। दाइल मपांडसीनीम। मगोल्नीम। मिनु मडप्नीम। मेको आन किप्शुर मबुइक्ब, आन जुत्ता डा डोरी यो मब्रोइक्नीम।
- 28 मेको आन ब्रा हेरशो बाक्नीम। आन लिब्रा आप्चा कली खुक्शो बाक्नीम। आन शारा मी आ झिल्ला खोदेशो बाक्नीम। आन बग्गी आन गुगील फश गिवार खोदेशो बाक्नीम।
- 29 मेको आन रेयके गुप्स आन ग्रीशो खोदेशो बाक्ब। मेको गुप्स आ चाइक्ब खोदेशो पा डरर डरर पाइनीम। मेको आन सिखार कली सुइम प्रॉइने मचाप्नीम।
- 30 मेको नाक्ती समुन्द्र डा ब्वाक्कु ग्रीशो खोदेशो पा, इस्राएल डा मुर आन तारी रेयके पाइनीम। सुइम मेकेर कोवतेक्म हना, छिडछिड नु श्येत ला ताइनीम। गोस्सुमी छेडछेड कली सुम्ब।

## 6

परमप्रभुमी यसैया कली ब्रेशो

- 1 मिनु पिप उज्जीयाह बेकशो बर्सम, गो परमप्रभु यावे कली इर डा ठेयब नित्तीकेमी निशशो ताता। आ वा आ सुरमी आ खिं नेल्ल बीशो बाक्त। २इतिहास २६:२२
- 2 मेको आ इर गे स्वर्ग डा गेय पाइब सेराफ बाक्शो बाक्तेक्म। मेको आन के ६, ६ ओटा फ्रां बाक्तेक्म। मिनु फ्रां निक्शीमी आन कुल सुम्शो बाक्तेक्म। फ्रां निक्शीम आन खोइली सुम्शो बाक्तेक्म, फ्रां निक्शीमी बेरबाक्तेक्म। १राजा २२:१९
- 3 मिनु सेराफ कामी अर्को सेराफ कली “मुर नेल्ल आन परमप्रभु यावे का ला ठेयब सक्ति पाइशशो बाक्ब। रागी नेल्ले आ छेडछेडम बीशो बाक्ब” देत। प्रकाश ४:८
- 4 मेको आन ब्वाक्शो रेयकेमी परमप्रभु यावे आ खिं डा जग हिम्सीशा, कुनम बीत।
- 5 मिनु गो “आबी, मुल बेक्ब दुम्ती। मारदे हना गो मरिम्शो लोत्र पाइब बाक्ती। मिनु मरिम्शो लोत्र पाइब आन दातेमी बाक्शो बाक्नुड। मो हना यो गो मुर नेल्ल आन परमप्रभु यावे, पिप कली ताता” देती। प्रस्थान ३३:२०
- 6 मिनु सेराफ का थनारोम चहेतीक डा मी गुप्शा, आं नेक्था जाक्त।
- 7 मिनु मेकोमी आं शोत्र मीम थिपाइशशा “मुल एको मीम इ शोत्र थिप्तु, इ दोस ततीक लोत्र नु इ पाप क्याम्साक्ब” देत।
- 8 मिनु परमप्रभु यावेमी “गो सु कली सोइक्नुडा? आंड पर्वम सु लाइबा?” दे लोत्र पशो नेता। मिनु “गो बाक्ती। आं कली सोइक्तीनी” देती।
- 9 मिनु आं कली “लावो। मेको मुर आन कली ‘नोफा दाइशशा नेंशा यो, मरुप्ब दुमीन। कोवशा यो, मतुइक्ब दुमीन’ देनो। मती १३:१०-१५; युहन्ना १२:४०; प्रेरित २८:२६-२७
- 10 मेको आन थुं खकटा सेलो। आन नोफा मनेंब नु आन मिक्च मताइब सेलो। मोदेशो दुम्शा, मेको आन मिक्च मताइब नु नोफा मनेंब दुम्नीम। मोदेशो मद्दुन्त हना, मेको आं गे लेत्नीम। मिनु गो मेको आन कली सापाइक्चा माल्नुड” देत। ब्यक्स्था २९:३; रोमी ११:८

11 मिनु गो “परमप्रभु, गेना सम्म मो पचा माल्नुडा?” देंती। मिनु मेकोमी “सहर ब्रेशशा मुर मबाक्तीके मदुम सम्म, खिं नेल्ल श्येत्थ नु रागी नेल्ल मुर मबाक्शो मदुम सम्म मोदेंशो पावो।

12 गो मुर आन कली डोन मखेरुमी सम्म नु सहर शुश प्रॉइशो मदुम सम्म मो पचा माल्नुड।

13 मिनु १० भागम भाग का मुर लीतेक्म हना, मेकोपुकी यो चोचा पुंडसीनीम। ठेयब नु बोल्यो रवा तिम्शा हना यो, आन ठुटा लीब। मेको लीशो ठुटा आं मुर, इस्राएल आ वांचेर बाक्नीम” देंत। आमोस ५:३; यसैया ७:३; यसैया १०:२०-२१

## 7

यसैयाम आहाज आ थुं बारपाइशो

1 आहाज यहूदा डा पिप बाक्त। मेको योथाम आ तौ नु उज्जीयाह आ चच बाक्त। आहाज आ सासन पची ना अराम डा पिप रेसीन नु इस्राएल डा पिप रेमाल्याह आ तौ पेकाह लडाइ पथ यरूसलेम जाक्ताक्स। तन्न ग्राने मचाप्बेम। २राजा १६:५

2 मिनु मुरपुकीम दाऊद आ खिं डा मुर आहाज कली “अराम डा लडाइ पाइबपुकी एफ्राइम नु गारशा जाक्तेक्म” दे शेंताक्म। मेको नेंशा आहाज नु आ मुर, फशेम रवा हिम्शो खोदेंशो पा आन थुं हिम्सीमा बाक्त।

3 मिनु परमप्रभु यावेमी यसैया कली “गे नु इ तौ शेआर-याशुब आहाज कली गुम्थ लसे। गे मेको कली आइक्था दोम्ली रे ब्वाक्कु यितीके, वा मुरब आन गेय पतीके डा ठेयब लांम थिल्लीसी।

4 मिनु गे मेको कली ‘होस पा, सिक्सी पा बाक्कीन। महिनीन। इन थुं ग्येत्थ लुकच मपपतीन। मेको कुन पाइब बुल्सी रेसीन, अराम नु रेमाल्याह आ तौ पेकाह, आन गाइशो तशा, महिनीन। इन थुं ग्येत्थ लुकच मपपतीन। यसैया ३०:१५;

5 मारदे हना अराम, एफ्राइम आ मुर नु रेमाल्याह आ तौ पेकाह नु गारशा, इ कली मरिम्शो पचा कली मिम्शो बाक्नीम। 6 मेकोपुकीमी गोपुकी यहूदा लशा, यरूसलेम कली पुम्शा, ग्राशा ताबेल आ तौ कली मेकेर डा पिप सेल्य” देंतेक्म।

7 मोपतीके परमप्रभु, परमप्रभु यावेमी मार देंब देंशा हना ‘मेको आन मिम्शो मदुम्ब। मो पचा मताइनीम।

8 मारदे हना अराम आ पिया दमस्कस बाक्ब। मिनु दमस्कस आ पिया रेसीन बाक्ब। मिनु ६:५ बर्स नोले एफ्राइम खतम दुम्शा, मलीब।

9 एफ्राइम आ पिया सामरीया बाक्ब। सामरीया आ पिया रेमाल्याह आ तौ बाक्ब’ गे थमा मसुइक्तीनी हना, थमा पा मलीनीनी” दे परमप्रभु यावेमी देंत। २इतिहास २०:२०

परमप्रभु आ चिन्ड इम्मानुएल

10 मिनु परमप्रभु यावेमी लेंशा आहाज कली

11 “इन परमप्रभु यावे, इन परमप्रभु कली चिन्ड का पुंडदीन। उइ बेक्शो मुर आन बाक्तीकर रे हना यो, इर सरीड रे हना यो चिन्ड का पुनीन” देंत।

12 तन्न आहाजमी “गो मपुंडनुड। परमप्रभु यावे आ थुं मथाम्नुड” देंत।

13 मिनु यसैयामी “दाऊद आ खिं डा मुरे नेनीन। मुर आन कली दपाइशो खोदेंशो पा, आं परमप्रभु कली यो दपाइक्नीनी?

14 मोपतीके परमप्रभुमी इन कली चिन्ड का गेब। मेको चिन्ड मार बाक्ब देंशा हना, कन्ने मीश आलम कोव्रज कुरशा तौ का थीब। मेको आ नें इम्मानुएल वोइक्नीम। मती १:२३

15 मेको दहि नु खुदो जची ना रेन रिम्शो पचा नु मरिम्शो मपचा तुइक्ब दुम्ब।

16 मिनु मेको वोंइश आलम मरिम्शो मपचा, रिम्शो पचा तुइक्चा क्येडा डोंइती, इन कली हिंपाइक्ब पिप आस रागी श्येत्थ दुम्ब।

17 परमप्रभु यावेमी अस्सुर डा पिप आ गुइ रे इन कली, इन मुर आन कली नु इन खिं डा मुर आन कली हिंचा डा श्येत गेपाइक्ब। मोदेंशो श्येत एफ्राइम यहूदा रे ब्राम रे गेनायो मदुम्शो बाक्ब” देंत।

यहूदा कली श्येत गेशो

18 मेको नाक्ती परमप्रभु यावेमी इजीप्त डा नील खोला डा चुरमु नु अस्सुर रागी डा सुरब आन कली लाप पा ब्रेप्ब।

19 मेकोपुकी जाक्शा, बेसीम, रोंगु आ कापम, चू बुटा तारी नु बस्तु भाव योव्रतीक नेल्लेम बाक्नीम।

20 मेको नाक्त परमप्रभुमी युफ्रेटीस खोला आइक्ची हांबु रे क्येट थाप्शा चाक्शो छूराम, अस्सुर डा पिपमी पिया डा चां नु गिरशी प्रेक्पाइक्ब। मेको छूरामी गाल शोक्ने यो प्रेक्पाइक्ब। २राजा १५:२९

21 मेना मुर कामी बी का नु भेडा निक्शी थुल्ब।

22 मिनु शुश दूध चिम्शा दहि जाइब। मारदे हना मेको रागीम लीशो मुर नेल्लेमी दहि नु खुदो जाइनीम।

23 मेना हजार का शेकेल चांदी लाइब हजार का अडगुर बोट खुम्शो रूम चू नु चोंक वानीम। शेकेल का ११.५ ग्राम डा चांदी के क्येट बाक्ब।

24 मोपा चू नु चोंक बाक्तीके, मुरपुकी लिब्रा कुरशा मेकेर लाइनीम।

25 डोंइती डोंडा डा दोशा खुम्शो रूपुकी मेना चू चोंकम सुम्तीके मुरपुकी हिंशा, मेकेर मलाइनीम। बी ब्यफ नु क्यारश भेडा आन कली दिम्पाइक्चा कली सोइक्नीम।

## 8

परमप्रभु आ लोत्र पाइब आ तौ



1 मिनु परमप्रभु यावेमी आं कली “गे ठेयब कागज का चाक्को। मिनु रिम्शो पा रुप्चा डा पा ‘माहेर-शालाल-हाश-बाज’ ब्रेक्तो” दैत। माहेर-शालाल-हाश-बाज आ अर्थ गा पा शुश रोडक्चा बाक्ब।

2 मिनु गो जोल मपाइब सांकछी निक्शी चढेब उरीयाह नु येबेरेकीयाह आ तौ जकरिया आस कली चोइक्तासी।

3 मिनु गो आं मीश नु बाक्ती। मिनु मेकोमी कोव्रज कुरशा तौ का थिप्तु। मिनु परमप्रभु यावेमी आं कली “मेको आ ने माहेर-शालाल-हाश-बाज वोतो।

4 मारदे हना मेको आलम आम आफ दैस जोक्चा क्येडा डोंइती दमस्कस डा शोप नु सामरीया डा रोइशो नेल्ले अस्सुर डा पिपम लाइक्ब” दैत। यसैया ७:१८; २राजा १६:९

5 मिनु परमप्रभु यावेमी आं कली लेशा

6 “मेको मुरपुकीम शीलोआ डा रिम्शो ब्वाक्कु प्रोंइनीम। रेसीन नु रेमाल्याह आ तौ आस क्येडा हिंशा, मेको आस नोले खोइक्तेक्म।

7 मोपतीके गो यहूदा डा मुर आन कली श्येत गेपाइक्चा कली युफ्रेटीस खोला डा ब्वाक्कु खोदेशो पा अस्सुर डा पिप नु आ लडाइ पाइब शुश आन कली चाक्नुडमी। मिनु मेको खोला बारशो खोदेशो पा आ एर ओथ नेल्ल सुम्नीम।

8 मिनु मेको बारशा, यहूदा आ शुर सम्म जाक्दीत्नीम। आ लडाइ पाइबपुकीमी हाम्शो फ्राम खोदेशो पा इन रागी नेल्ल सुम्नीम। तन्न इम्मानुएल, परमप्रभु यावे गे नु बाक्ब” दैत। इम्मानुएल आ अर्थ “परमप्रभु यावे गे नु बाक्ब” देशो बाक्ब। यसैया ७:१४

यहूदा नु रागी डा मुर आन कली शेशो

9 गे रागी रागी डा मुर गारशा सुर्ता पने। गे खतम दुम्पाइक्चा पुंडसीनीनी। गे डोन रागी डा मुर नोफा दाइशशा नेनीने। लडाइ पचा कली किप्शुर किम्सीन। मिनु हिनीन। लडाइ पचा कली ठीक दुमीन। मिनु सुर्ता पने।

10 गे सल्ला पा लोव्रसी गारपाइक्नीनी, तन्न मेको शोर गाक्शो दुम्ब। लोव्र पने, तन्न इन लोव्र मगाप्ब। मारदे हना परमप्रभु गो नु बाक्ब।

11 मिनु परमप्रभु यावेमी आं गुड ग्याइशशा आं कली लोव्र पा “गे मेको मुर आन खोदेशो मपावो। मेको आन लाम मगाक्को।

12 मुरपुकीम अरु आन पर्वम खुइशशा मरिम्शो गेय पाइनीम। गे मोदेशो मपने। मेको मार तशा हिनीमी, गे मेको तशा महिनीन। इन थुं ग्येथ लुक्च मपपतीन।

13 मुर नेल्ल आन परमप्रभु यावे ला मिम्शा, मेको क्येडा हिनीन। मेको कली मान पा हिनीन। मत्ती १०:२८

14 परमप्रभु इन कली नेल्ल क्येडा डोंइती डा मिम्तीके दुम्ब। तन्न इस्राएल आ खिं निक्शी डा मुर आन कली दाइल पाइक्तीके नु लां तेक्तीके फुल्लु दुम्ब। मेको यरूसलेम डा मुर आन कली रेप्पाइक्ब ब्वारद दुम्ब। रोमी ९:३३

15 मिनु मुर शुश दाइल पाइशशा गोल्शा, ब्वारदम रेशशा, ग्याइक्चा पुंडसीनीम।

16 आं देशो लोव्र आं शेंसीब आन कली ला नेंपाइक्चा कली छाप थोक्शा, वोतो” दे माइक्ती। दानीएल १२:४

17 मिनु गो याक्ब आ खिं डा मुर आन क्येडा आ कुल खुइक्ब परमप्रभु यावे आ लां कोव्रशा, रिम्शा बाक्नुड।

18 मुर नेल्ल आन परमप्रभु यावे सियोन डां डाम बाक्ब। परमप्रभु यावेमी आं कली नु आं कली गेशो आलपुकी इस्राएली आन दातेमी चिन्ड नु कोंइतीक सेलतीकी। यसैया ८:३; यसैया ७:३; हिब्रू २:१३

19 मिनु मुरपुकीमी इ कली “बेक्शो मुर आन कली हिल्लो पावो। लिक्व कोव्रब चाक्को। वोल आन कली लोव्र पपतो” दे लोव्र पाइनीम। मेको वोल आन रेयके नेंसीब। मिनु मार, सेस मुर आन पर्वम बेक्शो मुर आन कली हिल्लो पचा? मुरपुकीमी आन परमप्रभु कली हिल्लो पचा ममालनीमी डा? २राजा १:३

20 गे शेंतीक नु अरेशो लोव्र आ पर्वम परमप्रभु कली हिल्लो पचा मालनीनी। अरु लोव्र पाइब मुर काइ मरुप्ब बाक्नीम।

21 मेकोपुकी एको रागीम श्येत जशा, शोव्रलु बेक्शा हिरनीम। मिनु शोव्रलुमी गाइशशा, ग्येथ गे कोव्रशा, आन पिप नु परमप्रभु कली सराप पाइनीम।

22 मेकोपुकीमी खप गे कोव्रशा, आन पिपा खुक्नीम। मिनु मेकेर श्येत नु छिडछिड ताइनीम। हिंचा डा श्येत थम क्येर नाक्दो ला ताइनीम। मेको आन दातेम छेडछेड मबाक्ब। मिनु आन थुं लुक्च लाइब।

## 9

श्येत रे प्रोंइशो

1 शुश हिबपुकी नोले छिडछिडम मगाक्नीम। डोंइती परमप्रभु यावेमी जबूलन नु नाप्ताली आस रागी महिक्सीशो सेल्लु। तन्न नोले मेकोमी यर्दन आ आइक्ची हांबु, समुन्द्र आ नेक्था डा नु रागी रागी डा मुर आन गालील रागी रिम्शो सेल्ल। भजन संग्रह १०७:१०-१४; २राजा १५:२९; मत्ती ४:१२-१६

2 छिडछिडम गाक्बपुकीम ठेयब छेडछेड ताइनीम। थम छिडछिड डा रागीम बाक्ब आन तार थम छेडछेड दुम्ब।

3 परमप्रभु, गे रागी रागी डा मुर आन कली सोशा बोशा दुम्पाइक्तीनी। मेको आन कली थाम्पान ग्येरपाइक्तीनी। मेको आन कली इन डोंइती बाली नाली ओइची ना खोदेशो पा ग्येरपाइक्तीनी। लडाइ ग्राशा, आन रोइशशो मार मार योक्सीची ना खोदेशो पा ग्येरपाइक्तीनी।

4 मेको आन हेल्शो जुवा, मेको आन बला डा भार नु मेको आन कली दिप्ब मुर आन कोक्के जिक्ताक्नी। गे मिदयान रागी डा लडाइम खोदेशो पा मेको आन कली युक्ब आन युक्तीके जिक्तीनी। भजन संग्रह ८१:७; न्यायाधीस ७:१४; न्यायाधीस १५:२२

5 मारदे हना लडाइ पाइब आन जुत्ता नु आन फेक्तीक वा नेल्ल हुश लुम्सीशो बाक्नीम। मेको मीम चोतीक दुम्नीम।  
 6 मारदे हना आंड कली आल का थिशो बाक्ब। तौ का गेशो बाक्ब। मेको आंड कली रिम्शो पा सासन पाइब दुम्ब।  
 मेको आ नें मार बाक्ब देंशा हना, छक लाक्चा डा गेय पाइब, जोक्तीक तुइक्तीक अर्ती गेब, सक्ति पाइश्शो परमप्रभु,  
 गेना हना यो बाक्ब आफ नु थुं नाइश्शा बाक्चा गेब पिप बाक्ब। यसैया २२:२२; मीका ५:१; मीका ४:३  
 7 मेको आ अधिकार गेना हना यो बारब। दाऊद आ राज्य कली गेना हना यो थुं नाइक्तीके दुम्ब। मेको आ राज्य गेना  
 हना यो ठीक निसाफ नु ठीक पतीकेमी बाक्ब। मेको मुर नेल्ल आन परमप्रभु यावेमी पाइब। २सामुएल ७:१२-१३; लूका  
 १:३२; यसैया ११:१-५; भजन संग्रह ७२:३-४

परमप्रभु इस्राएल आ पर्वम गाइश्शो

8 परमप्रभुमी याक्ब कली लोत्र का सोइश्शो बाक्त। मेको इस्राएल रागी कली दुम्त।  
 9 मिनु मेको एफ्राइम नु सामरीयाम बाक्ब नेल्लेम तुइक्ताकम।  
 10 मेकोपुकीमी ठेयब लेशा “इंटांम सेल्लो विं नेल्ल ब्रेत्तेकम। तन्न गोपुकीम चेम्शो फुल्लुम लेशा सेल्लनीकी। आइक्च  
 रवा नेल्ल तिम्तेकम। तन्न मेकेर ठेयब दुम्ब रवा खुम्नीकी” देनीम।  
 11 मोपतीके परमप्रभु यावेमी मेको आन कली श्येत गेब पोक्ब। मिनु मेको आन जोरी सत्रु आन कली “गो लडाइ  
 ग्रानीकी” दे मिम्पाइक्ब।  
 12 मिनु अराम डा मुर नु रेसीन पूर्व रे नु पलिस्ती डा मुर पच्छिम रे जाक्शा, मेकोपुकीमी शुश पाक्शो शोत्रमी खोदेशो  
 पा इस्राएली आन कली दाक्नीम। मोपा यो परमप्रभु आ गाइश्शो मनाइक्थु, आ गुइ दिस डा दिस बाक्त।  
 13 मो हना यो मुर आन कली तुप्ब गे मलेम्म। मिनु मेकोपुकीमी मुर नेल्ल आन परमप्रभु यावे कली ममालनीम। यसैया  
 १०:३३  
 14 मोपतीके परमप्रभु यावेमी इस्राएल रे पिया नु मीलु क्योरतु। खजूर रवा आ राशी नु बुदी मीलु घांस काबुमीन क्योरतु।  
 15 खाल्पा नु हुकुम पाइबपुकी पिया नम। जौल पा परमप्रभु यावे आ लोत्र पाइबपुकी चहिं मीलु नम।  
 16 मारदे हना इस्राएल डा मुर आन कली शेंबपुकीमी हेंथे लां गाक्पाइक्तेकम। मिनु आन शेशो नेंबपुकी लां मतुइक्ब  
 दुम्तेकम।  
 17 मोपतीके परमप्रभु यावेम मेको आन वोंइश आल आन कली तशा, शिशी मपावो। मेको आन रोम रोइक्च नु वोंइश  
 बेक्शो मीश मुर आन कली तशा यो शिशी मपावो। मारदे हना मेको नेल्ल परमप्रभु आ अरेशो मटीब दुम्शा, काइ मरिम्शो  
 पाइब ला बाक्तेकम। मिनु नेल्लेमी मरिम्शो लोत्र पाम्तेकम। मोपा यो परमप्रभु आ गाइश्शो मनाइक्थु, आ गुइ दिस डा दिस  
 बाक्त।  
 18 परमप्रभु यावे आ अरेशो लोत्र मटीब मी खोदेशो पा ब्राइब। मिनु मेकोमी चू नु चोंक नेल्ल नेक्ब। मिनु मेको ब्वाकीमी  
 कोक्त बुद पा ब्राइब। आ कुन गोस्स खोदेशो पा रोम्मीशा सरीड गे लाइब।  
 19 मुर नेल्ल आन परमप्रभु यावे आ गाइश्शोमी रागी नेल्ल ग्रोइश्शो बाक्ब। मिनु मुरपुकी चोतीक शी खोदेशो दुम्तेकम।  
 सुइम सुइ आन कली वारच मपामे।  
 20 मेकोपुकीमी ग्युरा गे डा रोइक्ताकम। तन्न शोत्रलु बेक्तेकम। आन पेरा गे डा ब्वाम्तेकम। तन्न मरूम। मिनु आंम  
 आन विं डा मुर आन श्ये ब्वाम्तेकम।  
 21 मनस्सेमी एफ्राइम कली ब्वाप्टु। मिनु एफ्राइममी मनस्से कली ब्वाप्टु। मिनु मेको निक्शी यहूदा नु लडाइ पाम्ताक्स।  
 मोपा यो परमप्रभु आ गाइश्शो मनाइक्थु, आ गुइ दिस डा दिस बाक्त।

## 10

1 आबी, सु सुमी ठीक मदुम्शो ऐन कानुन सेल्लनीमी, मुर आन कली दिप्चा डा अरेशो लोत्र ब्रेक्नीमी, यसैया ५:८-२३  
 2 क्येट मथीब आन कली ठीक निसाफ मपाइनीमी, आन मुर आन दाते डा प्रुडग आन कली ठीक मपाइनीमी,  
 मेकोपुकीम वोंइश बेक्शो मीश मुर आन मार मार योल्नीमी, रोम रोइक्च आन बाक्शो नेल्ल रोइक्नीम।  
 3 मिनु सजाइ गेतीक नाक्तीमी मार पाइनीनी? डोन रे जाक्शो हिंचा डा श्येतमी मार पाइनीनी? “वारच पाइय्यीनी” दे  
 सु आ बाक्तीके प्रोक्नीनी? इन शोंप ते वोइक्नीनी?  
 4 मेको नाक्ती पाइश्शो मुर आन दातेमी मबाक्चा नु साइक्चा मपुंडसीचा कली ते प्रोक्नीनी? परमप्रभु आ गाइश्शो  
 मनाइक्थु, आ गुइ दिस डा दिस बाक्त।

अस्सुर कली सजाइ

5 आबी, अस्सुर रागी, गे आं गाइक्तीक डा कोर्रा, आं गाइक्तीके कोक्के कुरब दुम्ते। यसैया १०:१५  
 6 गो अस्सुर कली आं कली मटीब रागी कली लडाइ पथ सोइक्नुड। अस्सुर कली आं कली गाइक्पाइक्ब मुर नु  
 सोइक्नुड। मारेड मारेड रोइक्पाइक्चा कली सोइक्नुड। मिनु मेको आन कली लॉम दिम्पाइक्चा कली सोइक्नुड।  
 7 तन्न अस्सुरम मेको आ थुंम मवोइक्थु, मोदेशो ममिम्त। आ थुंमी खतम पोक्चा नु रागी रागी क्याम्चा ला बाक्त।  
 8 मिनु अस्सुरमी “आं कप्तान नेल्ल पिप मनमी डा?  
 9 मार, काल्लो सहर कारकेमीश खोदेशो ममाइ? हमाथ, अरपाद खोदेशो ममाइ? मिनु सामरीया दमस्कस खोदेशो  
 ममाइ डा?  
 10 मिनु गो दोपा मूर्तिम ब्रीशो रागी ग्राडा, मोपा गो मेको आन क्येडा आइक्च मूर्ति बाक्शो रागी यरूसलेम नु सामरीया  
 कली ग्रानुड। २राजा १८:३२-३५

11 मिनु गो सामरीया नु आ मूर्ति आन कली दोदेशो पडा, मोदेशो यरूसलेम नु आ मूर्ति आन कली मपाइनुडा डा?" दैत।

12 मिनु परमप्रभुमी सियोन डांडा नु यरूसलेमम पशो गेय थुमा नोले मेकोमी अस्सुर डा ठेयब लेशशो नु बोरशो पिप कली सजाइ गेब। यसैया ३७:३६

13 मारदे हना मेकोमी "गो आं सक्तिमी पाता। गो आं तुइक्तीके नु रूप्तीक थुमी मोदेशो पाता। गो रागी रागी डा सांद याक्ताकड। मेकेर डा मुर आन शोंप नु मारेइ मारेइ रोइक्ताकड। गो आं ठेयब सक्तिमी मेको आन पिप आन कली लुकच सोइक्ताकडमी।

14 मिनु गो प्रॉइशो चिक्ब आन ग्योत्र खोदेशो पा बाक्तीक नु मुर आन शोंप थित्ता। गो चिक्बीम प्रॉइशो ब्वोफु खुप्शो खोदेशो पा, रागी रागी कली खुप्ताकड। मिनु फ्रां हिक्शा, तेक्ब सुइ मबाक्म। मिनु सुइम मारेइ मदेंम" दैत।

15 खा क्येडा खा चलेब ठेयब बाक्बा डा?। आरा क्येडा आरा कीब ठेयब बाक्बा डा?। मोदेशो मदुस्त हना कोक्केमी कोक्के गुप्ब कली याम्पाइक्बा डा?। मिनु शीमी शी कली गुप्ने चाप्बा डा?। यसैया १०:५

16 मोपतीके परमप्रभु, मुर नेल्ल आन परमप्रभु यावेमी अस्सुर डा दोम्शो लडाइ पाइब मुर आन कली बेक्तीक रोइ सोइक्नुड। मिनु मेको आन रां चोशो खोदेशो पा जेशशा नुप्ब।

17 मिनु इस्राएली आन छेडछेड मी दुम्ब। मिनु आन का ला बाक्शो परमप्रभु नाप्पाइक्ब दुम्ब। मिनु मेकोमी आन चू नु चोंक काबुमी नेक्पाइक्ब। ब्यवस्था ४:२४

18 मिनु ब्वाकी डा दारस नु फल फुल नेल्ले मुर खोदेशो पा सोवना सोवन लाइनीम। मेको आन रां नु थुं निम्फा खतम दुम्नीम। रोइ पाइब मुर ओंखां पा बेक्शा लशो खोदेशो पा बेक्शा लाइनीम।

19 मिनु मेको आ ब्वाकी डा लीशो रवा शुश मबाक्नीम। मेको आल कामी यो हिक्शा ब्रेक्ने चाप्ब।

मुर का निक्शी ला लेत्नीम

20 मिनु मेको नाक्ती इस्राएल डा लीशो मुरपुकी नु याकूब आ खिं डा प्रोक्शा ब्रॉइशो मुरपुकी लेंशा, आंम कली तुप्ब गे मलाइनीम। तन्न मेकोपुकी थमा पा परमप्रभु यावे, इस्राएली आन का ला बाक्शो परमप्रभु आ नोले खोइक्नीम। यसैया ६:१३; यसैया ७:३

21 मिनु का निक्शी याकूब आ मुरपुकी सक्ति पाइशशो परमप्रभु गे लेत्नीम।

22 इन इस्राएल डा मुर समुन्द्र डा बाल्वा खोदेशो पा शुश बाक्तेक्म हना यो, का निक्शी ला लेत्नीम। अरु चहिं नेल्ल साइक्चा पुंइसीनीम। मिनु ठीक पतीक ठेयब दुम्ब। रोमी ९:२७

23 मारदे हना परमप्रभु, मुर नेल्ल आन परमप्रभु यावेमी डोंइती आ देशो खोदेशो पा रागी नेल्ल खतम सेल्ब। यसैया २८:२७

24 मोपतीके परमप्रभु, मुर नेल्ल आन परमप्रभु यावेमी "सियोनम बाक्ब, आं मुरपुकी अस्सुर डा मुर क्येडा महिनीन। इन कली इजीप्तम खोदेशो पा कोक्केम तुप्तेक्म हना यो, महिनीन।

25 मारदे हना इक्का नोले इन परबंम आं गाइशशो नुप्ब। मिनु अस्सुर डा मुर आन कली गाइशशा साइक्नुडमी" दैत।

26 मुर नेल्ल आन परमप्रभु यावेमी मेको आन कली कोरॉम युक्ब। मेको ओरेब डा सेरथे फुल्लु आ नेक्था डा लडाइम मिदयान कली फुशो खोदेशो दुम्ब। मेकोम इजीप्तम खोदेशो पा आ कोक्के समुन्द्र तार दिब। न्यायाधीस ७:२५; भजन संग्रह ८३:१०; प्रस्थान १४:२६-२७

27 मेना इन कली गेशो श्येत नुप्ब। मिनु इन शुर डा जुवा दोक्शा जिक्ब।

28 इन जोरी सत्रु रिम्मोन रे जाक्शो आइयाथम जाक्दीत्तेक्म। मिग्रोन लशा, मिकमाश सहरम आन मार मार वोइक्नीम।

29 मिनु डांडा रे पा लशा, गिबाम बास बाक्नीम। रामाह हिशा ख्रिंख्रि पाइब। सावल आ सहर गेबा डा मुर प्रोक्नीम।

30 गाल्लीम डा तमीपुकी ठेयब सेंदा पा ग्रीडीन। गे लाइशाह डा मुर नेनीन। अनाथोथ डा मुर मेको आन कली लोत्र लेत्तीन। १सामुएल २५:४४

31 मादमेनाह नु गेबीम डा मुर ब्रॉइचा कली प्रोक्नीम।

32 मेकोपुकी मुलाक्ती नोबम बाक्नीम। मिनु मेकोपुकीमी सियोन डांडा डा तमी नु यरूसलेम आ डांडा गे आन गुइ क्युक्शा, हिच कोइनीम। १सामुएल २१:२

33 मिनु परमप्रभु, मुर नेल्ल आन परमप्रभु यावेमी मेको आ राशी हिंचा डा सक्तिम खोइक्ब। नेल्ल क्येडा लाइशशो रवा तिम्ब। ठेयब लेशशो आन कली आइक्च सेल्ब।

34 मेकोमी ब्वाकी डा रवा आन कली खाम तिम्ब। लेबानोन डा ठेयब लाइशशो रवा नेल्ल दिम्नीम।

## 11

यावे आ सोइशशो पिप

1 येस्से आ ठुटा रे ठोसा का दाप्ब। मेको आ शाक्श रे वाशो राशीम फल फुल सिप्ब।

2 मिनु परमप्रभु यावे आ सोक्त मेको तारी नाइशशा बाक्ब। मेको जोक्ब तुइक्ब नु रूप्तीक सोक्त बाक्ब। अर्ती गेब नु सक्ति गेब सोक्त बाक्ब। मेको जोक्तीक तुइक्तीक थुं गेब नु परमप्रभु यावे कली मान पा हिंब सोक्त बाक्ब।

3 मेको आ दाक्शो परमप्रभु यावे कली मान पा हिंचा बाक्ब। मेकोमी मुर आन थुं कोक्शा निसाफ पाइब। सुइ आन लोत्र मनैथु निसाफ पाइब।

4 ठीक पतीकेमी पुडग आन कली निसाफ पाइब। रागी डा आइक्च नु टेयब मुर नेल्ल आन कली उइक्थ पा निसाफ पाइब। मिनू रागी डा मुर आन कली आ लोव्रमी तुब्ब। परमप्रभु यावे आ अरेशो लोव्र मटीब आन कली मुइश्शा साइक्ब। रथिस्सलोनिकी २:८

5 मेको आ ठीक पतीके आ किप्शुर किप्शो खोदेशो बाक्ब। मेको थमा पा थमा सुइक्तीक आ किप्तीक बाक्ब।

6 मेना फर नु पाठा काथा बाक्नीम। जोइ क्यारश आ पाठा नु इप्ब। बाछा नु गुप्स आ चाइक्ब काथा जोइनीम। आइक्च आलमी मेको आन कली योव्रब। यसैया ६५:२५

7 बी नु वां काथा जोइनीम। मेको आन चाइक्बपुकी काथा बाक्नीम। गुप्समी ब्यफ खोदेशो पा नल ब्वाइब।

8 मिनू दूध तूब आल बुस्स आन पोव्रलाम ग्यारनीम। दूध प्रोइशो आलमी बीस पाइश्शो बुस्स आन बाक्तीकेम गुइ शुइक्नीम।

9 आं डांडामी मारेइ श्येत नु खतम दुम्तीके मबाक्ब। मारदे हना दोदेशो पा ब्वाक्कुम समुन्द्र ब्रीबा, मोदेशो पा परमप्रभु यावे कली तुइक्तीकेम रागी नेल्ल ब्रीब।

इसाएल नु यहूदा डा लीशो मुर

10 मिनू मेको नाक्ती येस्से आ शाक्श जात जात डा मुर आन कली चिन्ड दुम्ब। मिनू रागी रागी डा मुर नेल्लेमी मेको कली हिल्लो पाइनीम। मेको आ बाक्तीके छेडछेडम बाक्ब। रोमी १५:१२

11 मेना परमप्रभुमी आ लीशो मुर आन कली लेंशा प्रोइशा चाक्ब। मिनू ते रे प्रोइशा चाक्ब देशा हना, अस्सुर, इजीप्त, पथ्रोस, एथीयोपीया, एलाम, शिनार, हमाथ नु समुन्द्र आ नेक्था रे प्रोइशा चाक्ब। इजीकीएल ३७:२१-२२

12 मेकोमी रागी रागी डा मुर आन कली चिन्ड का वोइक्ब। मिनू इसाएल डा प्रोक्शो मुर आन कली खुब्ब। यहूदा डा ब्रशो मुर आन कली यो तेइ तेइ रे खुब्ब।

13 एफ्राइम आ गेहे पतीके जाम्शा लाइब। यहूदा कली श्येत गेब साइक्चा पुंइसीनीम। मेना एफ्राइममी यहूदा कली गेहे मपाइब। मिनू यहूदामी यो एफ्राइम कली श्येत मगेब।

14 मिनू मेको निक्शी पलिस्ती नु लडाइ पचा कली पच्छिम गे बारनीस। मेकोपुकी गारशा, पूर्ब डा मुर आन मारेइ मारेइ रोइक्नीम। एदोमी नु मोआबी आन कली लडाइ तोइनीम। अम्मोनीपुकीमी मेको आन देशो टीनीम।

15 मिनू परमप्रभु यावेमी इजीप्त डा समुन्द्र डा ब्वाक्कु नेल्ल सोव्रपाइक्ब। मेकोमी युफ्रेटीस तारी यो आ गुइ क्युक्शा, मेको रे ७ ओटा खोला सेल्ब। मिनू मुरपुकी गाक्शा शोक्शा लाइनीम।

16 अस्सुर डा लीशो आ मुर इसाएली आन कली जाक्चा कली टेयब लां का दुम्ब। मेको लां इसाएली इजीप्त रे गूशा गाक्शो लां खोदेशो दुम्ब। प्रस्थान १४:२९

## 12

श्येत रे प्रोइशोपुकीम कुम्सो पशो

1 मेको नाक्ती गेपुकीमी “परमप्रभु यावे, गे रिम्शो पाइब बाक्नीनी। गे आंइ पर्बम गाइक्ताक्नी हना यो, इन गाइक्चा नाइक्साक्ब। मुल गे आंइ कली लेम्नीनी।

2 थमा पा, परमप्रभु आं कली पाप रे प्रोइब बाक्ब। गो मेको कली थमा सुइश्शा महिनुड। मारदे हना परमप्रभु यावे आं कली सक्ति नु बोल गेब बाक्ब। मेको आं कली श्येत रे प्रोइब बाक्ब” दे कुम्सो पाइनीनी। प्रस्थान १५:२

3 मेको नाक्ती गेपुकी ग्येरशा, पाप रे ब्रोंडतीके इनार रे ब्वाक्कु कीशा प्रिनीनी। यसैया ५५:१; जकरिया १३:१

4 मेको नाक्ती गेपुकीमी “परमप्रभु यावेमी रिम्शो पाप्तु” दे मुर आन कली देनीन। मेकोपुकी नु लोव्र पने। मेको आ गेय रागी रागी डा मुर आन कली तुइक्पतीन। आ नें नेल्ल क्येडा टेयब बाक्ब, दे शेंदीने। १इतिहास १६:८; भजन संग्रह १०५:१

5 परमप्रभु यावे कली टेयब सेलतीक कुम्सो पने। मारदे हना मेकोमी थम सक्ति पाइश्शो गेय पशो बाक्ब। एको लोव्र रागी नेल्लेमी ब्रपतीन।

6 सियोमम बाक्बपुकी टेयब सेंदा पा ग्येरशा परमप्रभु कली टेयब सेल्शा कुम्सो पने। मारदे हना इसाएली आन का ला बाक्शो परमप्रभु इन दातेमी टेयब बाक्ब।

## 13

बेबीलोन सहर कली निसाफ पशो

यसैया २१:१-१०; यसैया ४७:५; येरमीया ५०:५

1 आमोज आ तौ यसैयामी बेबीलोन आ पर्बम तशो नु तुइश्शो लोव्र एको बाक्ब। येरमीया २३:३३

2 रवा मबाक्शो डांडामी छेदर का खुक्कीन। मिनू टेयब सेंदा पा गुइ हिक्शा, मेको आन कली टेयब मुर आन लाप्चो रे ओव्रपतीन।

3 परमप्रभुमी “गो आं मुर आन कली पोक्शा, आं ग्येरसीशो, बोल्यो लडाइ पाइब मुर आन कली आं गाइश्शो कोंइचा कली ब्रेत्ताक्डमी” देंत।

4 नेनीन, शुश रागी डा मुरपुकी डांडामी रेयके पाइनीम। मेको रेयके शुश राज्य डा खुम्सीशो मुर आन रेयके बाक्ब। मुर नेल्ल आन परमप्रभु यावेमी टेयब हुल लडाइ पाइब पोक्ब।

- 5 मेकोपुकी डोन रागी रे जाकनीम। रागी डा सुर रे पा जाकनीम। मिनु परमप्रभु यावेमी गाइशशा, या शेशा रागी नेल्ल खतम सेल्पाइक्ब। योएल १:१५
- 6 ठेयब सेंदा पा डाक्कीन। मारदे हना परमप्रभु यावे आ नाक्त जाक्चशो बाक्ब। नेल्ल क्येडा ठेयब सक्ति पाइशशो परमप्रभु मेको नाक्ती खतम पोक्थ जाक्ब।
- 7 मोपतीके मुर नेल्ल आन थुं लुकच लशा, मारेड पने मचाप्नीम।
- 8 मिनु मुरपुकी शुश हिंशा, आन थुं लुकच लशा, शुश सुरता पाइनीम। फालने मचाप्चा डा पा खाइशशा, आल थिचशो मीश मुर खोदेशो पा नकचुर पाइनीम। हिंशा आन कुल कौत्रमुमानु, ब्रशो मी खोदेशो तमुइनीम।
- 9 नेनीन, परमप्रभु यावे आ नाक्ती हिंचा डा श्येतम जाक्ब। आ गाइशशो चुरशोमी रागी नेल्ल मुर मबाक्तीके सेल्ब। मिनु पाप पाइब आन कली क्याम्ब।
- 10 सरीड डा सोरुलपुकीम आन छेडछेड साम्नीम। नां दाप्ना दाप्न छिडछिड दुम्ब। तास्लाम छेडछेड मगेब।
- 11 परमप्रभुमी “गो रागी कली आ मरिम्शो पशो आ पर्वम सजाड गेनुड। आं अरेशो लोत्र मटिथु, मरिम्शो पाइब आन कली सजाड गेनुडमी। मिनु ठेयब लेशशो आन ठेयब लेत्तीके साम्पाइक्नुडमी। ठेयब श्येत गेशा हुकुम पाइब आन कली ब्रेम्पाइक्नुडमी।
- 12 गो मुर आन कली क्येख सुन क्येडा यो रिम्शो सेल्नुडमी। मेको आन कली ओफीर डा सुन क्येडा रिम्शो सेल्नुडमी।
- 13 मिनु आं गाइक्तीक नाक्ती गो सरीड कली हिम्पाइक्नुड। रागी यो आं गाइशशोमी आ बाक्तीक रे प्रेक्शा गूब” दे मुर नेल्ल आन परमप्रभु यावेमी देंत।
- 14 मुरपुकी खेदा पचा पुंडसीशो किशश नु गोठला मबाक्शो भेडा खोदेशो दुम्नीम। मेकोपुकी आंम आंम मुर बाक्तीके लाइनीम। आंम आंम रागी मेर प्रोक्नीम।
- 15 खेदा पा थित्वा पुंडसीशोपुकी तूशा साइक्चा पुंडसीनीम। मिनु ग्याइक्चा पुंडसीशोपुकी तरवारम क्योरचा पुंडसीनीम।
- 16 आन आल आन कली आन डोंइती खपीम राप्शा साइशशो ताइनीम। मेको आन खिं डा मारेड मारेड योल्नीम। मेको आन मीश बिथोलो पाइनीम। भजन संग्रह १३७:८-९
- 17 मिनु परमप्रभुमी “नेनीन, गो मादी आन कली गेपुकी नु लडाइ पपाइक्चा कली पोक्नुडमी। मेकोपुकीमी सुन चांदी ठेयब ममिम्नीम।
- 18 वोंइश आल आन कली लिब्राम साइक्नीम। आइक्च आल नु ठेयब आल नेल्ल आन कली शिशी मपथु साइक्नीम।
- 19 ठेयब लेशशो कल्दी आन दाक्शो नु राज्य राज्य डा नेल्ल क्येडा दारशो बेबीलोन कली सोदोम नु गोमोररा खोदेशो सेल्नुड। उत्पत्ती १९:२४-२५
- 20 मिनु मेको सहरम गेनायो लेंशा मुर मबाक्नीम। पाला पाला सम्म मुर मबाक्नीम। मेकेर अराबीपुकीम आन ताम्बु मकीनीम। गोठलापुकीमी आन बस्तु भाव मनाइक्पाइक्नीम।
- 21 तन्न मेको ब्वाकी डा जन्तु आन बाक्तीक दुम्ब। मेको आन खिंम बुक्स व्रीशो बाक्नीम। मेकेर ब्वाकी डा ग्रीब जन्तु, ठेयब चिक्ब बाक्नीम। मिनु ब्वाकी डा क्यारश सिल पाइनीम। यसैया २३:१३
- 22 मेको आन श्येत्थ खिंम फर ग्रीनीम। आन दारशो दरवारमी सिवार ग्रीनीम। मोदेशो दुम्तीक नाक्ती जाक्चशो बाक्ब। मुल रीब पा जाक्ब” देंत।

## 14

इसाएली कली ग्येरपाइशशो

- 1 मिनु परमप्रभु यावेमी याक्ब कली शिशी पा, इस्राएल कली योव्रशा लेंशा मेको आन कली आन रागीमी वोइक्ब। मिनु अर्को रागी डा मुरपुकी याक्ब आ खिं डा मुर नु गारशा बाक्नीम। जकरिया १:१७
- 2 मेना रागी रागी डा मुरपुकीमी इस्राएली आन कली आन रागी चोवदीनीम। इस्राएलीपुकीमी मेको रागी डा मुर आन कली परमप्रभु यावे आ रागीमी बाक्शा, आन वाइलीम वाइल सेल्नीम। डोंइती आन कली ग्याइशशा चोक्ब आन कली ग्याइशशा चोक्नीम। मिनु आन कली दिप्ब आन कली हुकुम पाइनीम। यसैया ४९:२२; लेवी २५:२३
- बेबीलोन डा पिप साइशशो
- 3 मिनु परमप्रभु यावेमी इन कली श्येत जतीके, खेदा पचा पुंडसीतीके नु शुश गेय पतीक रे नाइक्चा गेप्टु हना,
- 4 गेपुकीमी बेबीलोन डा पिप आ पर्वम “मुर आन कली दिप्ब, दोपा थुम्से? आ श्येत गेशा हुकुम पतीके, दोपा बेक्मे?” दे शुक्शी लोत्र पाइनीनी।
- 5 परमप्रभु यावेमी आ अरेशो लोत्र मटीब आन कोक्के जिक्तु। मिनु श्येत गेब पिप आ सासन पतीक कोक्के रोइक्ताक्ब।
- 6 डोंइती मेकोमी गाइशशा, मुर आन कली तुप्ना तुप्न बाक्त। मेको पिपपुकीमी रागी रागी कली आन गाइक्तीकेमी मनाइक्थु खेदा पा श्येत गेम्तेक्म।
- 7 मुल रागी डा मुर नेल्ल सिक्सी पा नाइशशा बाक्चा ताइनीम। मिनु ग्येरशा कुम्सो पाइनीम।
- 8 तोव्रशी रवापुकी नु लेबानोन डा लाइशशो रवापुकीमी यो ग्येरशा “गे खतम दुमे रे आंइ कली क्योरब सुड मजाक्म” देंनीम।
- 9 मिनु बेक्शो मुर आन बाक्तीकेमी इ जाक्दीशशो आ पर्वम ग्रांग्ये माग्ये दुम्नीम। रागी डा मुरपुकीमी “इन कली ताक्चा कली बोक्नीम। रागी रागी नु जात जात डा पिप आन कली आन नित्तीक रे पोक्शा राप्पाइक्नीम।
- 10 मेको नेल्लेमी इ कली ‘गे यो आंइ खोदेशो पा सक्ति मपाइशशो दुमे बाक्त। गे यो आंइ खोदेशो दुम्ने।

11 इ दारस नु इ ठेयब ताप्तीके नेल्ले यो बेकशो मुर आन बाक्तीके जाक्तेकम। लुस्पु इ ब्राख्ये दुम्नीम। बुस्स इ फेक्तीक दुम्ब'। इजीकीएल ३२:१८-१९

12 गे सुनी आ तौ, सुकुर सोरुल, दोपा सरीड रे दोक्डे? रागी रागी डा मुर आन कली ग्राब, दोपा क्योरचा पुंडसीशा दोक्डे?" देनीम।

13 गे इ थुमी "गो स्वर्ग डोइश्शा लाइनुड। परमप्रभु आ सोरुल आन क्येडा आइक्था आं नित्तीके वोइक्नुड। मिनु गो उत्तर डा देवी देवता युन्तीक डांडाम नित्तुड। भजन संग्रह ४८:३; इजीकीएल २८:१४

14 गो गोस्स क्येडा ग्येत्थ डोइश्शा लाइनुड। मोपा गो नेल्ल क्येडा ठेयब नु उडक्थ दुम्नुड" देते।

15 तन्न गे बेकशो मुर आन बाक्तीकेम तोक्चा पुंडसाक्वे। तुरस क्येडा यो उड तोक्चा पुंडसाक्वे।

16 इ कली ताइबपुकीमी "मार, मेरे मुरुम रागी हिम्पाइश्शा, राज्यपुकी खिंखि पपदा?

17 मेरेम रागी नेल्ल गोरशो रागी सेल्शा, सहर नेल्ल खतम पोक्मा? चोक्सीशो मुर आन कली आन खिं लेत्चा मगेब मुर मेरेन बाक्बा?" देनीम।

18 मिनु रागी नेल्ल डा बेकशो पिपपुकी बेकशो पिप आन कली वोइक्तीकेम वोइश्शो बाक्नीम।

19 तन्न गे सोत्रशो राशी खोदेशो पा इ तुरस रे डोन ताइक्चा पुंडसाक्वे। तरवारम तूशा साइश्शो मुर बाक्तीके लशो मुरपुकी इ सुन्तीके दुम्तेकम। गे बेकशा दिम्शो खोदेशो दुम्ते। यसैया ३४:३

20 गे अरु पिप खोदेशो पा थिम्था मपुंडसे। मारदे हना गे इ रागी खतम सेल्शा इ मुर आन कली साइक्तीवी। मोपतीके मरिम्शो पाइब आन चच युड आन नें गेनायो ममिम्सीब।

21 आन आफ आन मरिम्शो पशो आ परबम आन तौ आन कली क्योरचा कली ठीक दुमीन। मुर आन रागी कली आंम के सेल्ब नु रागी कली सहरम प्रिब कली बोक्चा मगेन। प्रस्थान २०:५

22 मुर नेल्ल आन परमप्रभु यावेमी "गो बेबीलोन डा मुर आन नें, लीशो नु आन आल नु खिं डा मुर नेल्ल क्याम्नुड।

23 गो मेको आन सहर काश्श आन बाक्तीके नु ब्वाक्कु देम्तीके सेल्नुड। गो मेको आन कली खतम सेल्ब ब्राक्सुम फिक्नुड" दे मुर नेल्ल आन परमप्रभु यावेम देत।

अस्सुर आ सक्ति नुष्शो

24 मिनु मुर नेल्ल आन परमप्रभु यावेमी कसम जशा "थमा पा, आं डोंइती मिम्शो खोदेशो पा दुम्पाइक्नुड। गो आं देशो पाइनुड।

25 गो अस्सुर डा मुर आन कली आं रागीम साइश्शा, आं डांडा दिम्पाइक्नुडमी। मोपा आं जुवा गुंडनुड। मिनु आन श्येत आन बला रे फेल्लुड।

26 एको रागी नेल्ल कली देशो लोत्र बाक्ब। एको रागी रागी नेल्ल तार दिंशो गुड बाक्ब।

27 मारदे हना मुर नेल्ल आन परमप्रभु यावेमी मोदेशो पचा कली मिम्शो बाक्ब। सुम मेको कली तेक्ने चाप्बा डा? आ दिंशो गुड सुम लेप्पाइक्ने चाप्बा डा? सुडम मचाप्नीम" देत।

पलिस्ती आन कली लोत्र पशो

येरमीया ४७:-

28 मिनु पिप आहाज बेकशो बर्सम परमप्रभु यावेमी लोत्र पाप्तु। मार लोत्र पाप्तु देशा हना, २राजा १६:२०

29 "ए पलिस्तीपुकी, इन कली तुब्ब कोक्के जिक्त, दे मग्येरसीन। मारदे हना बुस्स आ चच युड रे बीस पाइश्शो बुस्स का गूब। मेको रे बीस पाइश्शो बेरब बुस्स का गूब।

30 नेल्ल क्येडा डोंइती जर्मेशो, प्रुडग आन दाते डा मुरुम जचा ताइनीम। मारेड मथीब मुरपुकी यो महिंथु बाक्ने चाप्नीम। तन्न इन खिं डा मुर आन कली अन्कालम बेक्पाइक्नुड। मिनु इन लीशो मुर आन कली साइक्नुड।

31 सहर डा ठेयब लाप्चोपुकी, डाक्कीन। सहर नु पलिस्ती नेल्ल हिंशा खिंखि पने। मारदे हना उत्तर रे कुन कुशा, ठेयब हुल, नेल्ल काथा जाक्नीम।

32 मिनु रागी रागी डा लोत्र कुरब आन कली मार देनीनी? परमप्रभु यावेमी सियोन सेल्लु। मिनु आ मुर आन दाते डा क्येड मथीब मेकेर रिम्शो पा बाक्नीम" देत।

## 15

मोआबी आन कली श्येत

येरमीया ४८:-; सेफन्याह २:८-११

1 मिनु परमप्रभु यावेम मोआब आ परबम यसैया कली "मारदे हना काबु नाक्दोमी आर-मोआब सहर खतम दुम्त। मिनु मोआब ग्रांगे माग्ये दुम्त। काबु नाक्दोमी कीर-मोआब सहर खतम दुम्त। मिनु मोआब ग्रांगे माग्ये दुम्त।

2 दीबोन डा मुर देवी देवता आन थान लाम्तेकम। डांडा डा थानमी डाक्थ लाम्तेकम। मोआबीपुकीमी नेबो नु मेदेबा सहर आस परबम रोंका पाइनीम। मेको नेल्लेम आन चां नु आन गाल शोक्रे प्रेक्शो बाक्नीम।

3 मेकोपुकी सहर डा लांमी अरन्डी फेक्शा, खिं तारी नु बजारम युम्शा रोंका पा डाक्ना डाक्न बाक्नीम।

4 हेशबोन नु एलेआले सहर डा मुर वाइ ब्रेश्शा डाक्नीम। मेको आन डाक्शो याहास सम्म नेंसीब। मोपतीके मोआब डा लडाइ पाइबपुकी खिंखि पा आन थुं लुकच लाइब। यसैया १६:९-११

5 आं थुं मोआब आ परबम वाइ ब्रेश्शा डाक्ब। मेकेर डा मुरपुकी सोआर नु एगलाथ-शेलीशीया प्रोक्नीम। मेकोपुकी डाक्ना डाक्न लुहीथ डा डांडा डोइक्नीम। मेकोपुकीमी होरोनाइम डा लांमी खतम दुम्चा आ परबम रोंका पाइनीम।

- 6 निग्रीम डा ब्वाक्कु सोवनीम। घांस नेल्ल सोवनीम, नक खुम्शो मवानीम। गिगी नेल्ल सोवनीम।  
 7 मोपतीके मेकोपुकीमी आन लीशो मारेड मारेड लाइशशा रवा पाइशशा खोलसा आइक्की हांबु लाइक्कीम।  
 8 मारदे हना मोआब रागी नेल्लेमी मेको आन डाक्शो नेंसीब। मेको आन रोंका पशो एग्लाडम नु बेयर-एलीम सम्म जाक्दीशशो बाक्ब।  
 9 मारदे हना दीबोन खोला डा ब्वाक्कु हुशेम ब्रीशो बाक्त्त। मोपा यो मेको आन कली चिनु श्येत गेनुड। मोआब रे प्रोक्शा ब्रोंडशो नु लीशो मुर आन नोले गुप्स का सोइक्नुड” दैत।

## 16

मोआबीम “वारच पने” देशो

- 1 गेपुकीम सेला सहर रे पा सियोन डा तमी आ डांडा डा पिप कली पाठा सोइक्तीन।  
 2 आन ग्योत्र रे खेरशो एर आंथ ब्रशा बेरशो चिक्ब खोदेशो पा मोआब डा तमीपुकी अरनोन खोला आ नेक्था बाक्नीम।  
 3 गे अर्ती गेशा, ठीक निसाफ पने। नाक्त बाक्त्त हना यो, इन वांकु नाक्दो डा खोदेशो सेलीने। गुंडशो मुर आन कली खुइक्तीन। प्रोक्ब आन पर्वम मशेंदीन।  
 4 मोआब रे प्रोक्शो मुर आन कली गेपुकी नु बाक्चा गेने। मेको आन कली साइक्ब रे प्रोंडशा, वारच पने। मुर आन कली दिप्बपुकी मबाक्तेक्म हना, खतम दुम्तीके नुप्त हना, श्येत गेबपुकी रागी रे फिक्चा पुंडसाक्म हना,  
 5 गेना हना यो दाक्ब आ नित्तीक वोंडसीब। मेको दाऊद आ ताम्बुम बाक्ब। मिनु मेको नित्तीकेमी थमा सुइक्चा पुंडसीब ठीक निसाफ पा हुकुम पाइब का निस्सीब। मेकोमी रीब पा कुल मकोवथु, निसाफ पाइब।  
 6 गो मोआब आ ठेयब लेशशा पशो लोव्र नेतय। मेको थम ठेयब लेशशो बाक्ब। मेको आ ठेयब लेत्तीके नु बोरशा लोव्र पतीके फश खोदेशो बाक्ब।  
 7 मोपतीके मोआबी रोंका पामेक्ल। मोआब आ पर्वम रोंका पामेक्ल। थाम्पा रोंका पने। किर-हारेसेथ डा अडगुर शोब्ले आ पर्वम रोंका पने।  
 8 हेरबोन डा रू खतम दुम्तेक्म। सिब्मा डा अडगुर बोट मलीनीम। मेको आ अडगुर शांबुमी रागी रागी डा हुकुम पाइब आन कली दुक्पाइक्तु। मेको आ अडगुर बोट याजेर सम्म लशा, गोरशो रागी सम्म जाक्दीत्त। मेको आन शाक्श ब्रशा, समुन्द्र आ आइक्की हांबु सम्म जाक्दीत्तेक्म।  
 9 मोपतीके गो सिब्मा डा अडगुर बोट आ पर्वम याजेर खोदेब पा डाक्नुड। गो इस कली आं प्रेक्कुम जिप्पाइक्नुड। मारदे हना हेरबोन नु एलेआले, इस अडगुर नु अन्न ओंडची नाक्त मजाक्ब। यसैया १५:४-९  
 10 मिनु ग्रेल्लो रू रे ग्येरशो सेंदा मनेंसीब। इस अडगुर रूमी ग्येरशा कुम्सो मपाइनीम। सुइमी अडगुर मखाक्नीम। आन ग्येरशा कुम्सो पतीके जाम्त। येरमीया ४८:३३  
 11 मोपतीके मोआब आ पर्वम आं थुं डाक्ब। मिनु कीर-हेरेस आ पर्वम आ थुं खाइक्ब।  
 12 मिनु मोआबी आन देवी देवता बाक्शो डांडा डाइशशा, शुश प्रार्थना पाम्तेक्म हना यो, मेको शोर गाक्शो दुम्ब।  
 13 एको परमप्रभु यावेमी मोआब आ पर्वम डोंडती देशो लोव्र बाक्ब।  
 14 मुल चहिं परमप्रभु यावेमी “गाल्च ताइबम आ बर्स हिकशो खोदेशो पा बर्स सांमी मोआब आ दारस जाम्शा लाइब। मिनु आ ठेयब हुल शुश मलीनीम। मेको आ लीशो मुर शुश मडुम्थु, सक्ति मपाइशशो दुम्नीम” दैत। यसैया २१:१६

## 17

दमस्कस नु इस्राएल कली श्येत

येरमीया ४९:२३-२७; आमोस १:३-५

- 1 मिनु परमप्रभु यावेम दमस्कस आ पर्वम यसैया कली “दमस्कस सहर खतम दुम्शा मलीब। मेकेर ब्रेशो खिं ला बाक्नीम।  
 2 आरोएर डा सहरपुकी प्रोंडसीशो दुम्शा, क्यारश भेडा योव्रतीके दुम्ब। मेको काइ महिक्सीशो नाइक्तीक दुम्ब।  
 3 एफ्राइम डा बोल्यो दखार नुप्नीम। दमस्कस डा राज्य मलीब। अराम डा लीशो मुरपुकी इस्राएली आन जाम्शो छेडछेड खोदेशो दुम्नीम” दे मुर नेल्ल आन परमप्रभु यावेम दैत। २राजा १६:९  
 4 मिनु परमप्रभु यावेमी “मेको नाक्ती याकूब आ मुर आन रिम्स नेल्ल लाइब। मेको नेल्ल गेयनीम।  
 5 मिनु दोदेशो पा चेरब रिक्ब मुरुमी गुड कामी चेरब ग्याइशशा, अर्को गुइमी रिक्बा, मोदेशो पा रेफाइम डा बेसीम सिला गुप्तीक बाक्ब।  
 6 तेल रवा हिकशा गेडा नेल्ल तोक्शा यो का निक्शी लीशो खोदेशो पा, मेको आ डल नु राशीमी का निक्शी ला लीनीम” दे परमप्रभु यावे, इस्राएली आन परमप्रभुमी दैत।  
 7 मेको नाक्ती मुरपुकीमी आंम कली सेल्ब कली मिम्नीम। मिनु इस्राएली आन का ला बाक्शो परमप्रभु यावे गे कोवनीम।  
 8 मेकोपुकीम आंम आन गुइमी सेल्लो देवी देवता आन कली चढेचा ममिम्नीम। आंमा आन सेल्लो मूर्ति पाइशशो थाम नु धूप चोतीके कली मकोवनीम।  
 9 मेको नाक्ती आन बोल्यो सहरपुकी हिब्वी नु एमोरी आन प्रोंडशो सहर खोदेशो दुम्नीम। मेको आन सहर इस्राएली आन पर्वम प्रोंडशो बाक्तेक्म। मेकेर डा मारेड मारेड नेल्ल खतम दुम्शो बाक्तेक्म।

10 मारदे हना गे इन कली पाप रे प्रौडब परमप्रभु कली प्रेंताकनी। मिनु इन खुडकतीक सेरथे फुल्लु कली मफुकनी। गे अर्को रागी डा रिम्शो अडगुर खुम्तीनी। यसैया ६:२-३; ब्यवस्था ३२:१५

11 गे दारशो बोट खुम्तीनी हना यो, मिनु आ दीसा सुनी बोइक्पाइकतीनी हना यो, मेकेर खुप्चा कली मारेड मलीब। श्येत जतीके नु खाइशो मसातीके नाक्त मोदेशो दुम्ब।

शुश रागी डा मुर आन हुल

12 आबी, शुश रागी डा मुर आन रेयके, समुन्द्र डा ब्वाक्कु खोदेशो पा नेंसीब। आबी, रागी रागी डा मुर आन ग्रीशो बारशो खोला आ रेयके खोदेशो बाक्ब।

13 रागी रागी डा मुरपुकी ठेयब ब्वाक्कु ग्रीशो खोदेशो पा ग्रीनीम। तन्न परमप्रभुमी मेको आन कली हुडक्ब। मिनु मेकोपुकी डोन प्रोकनीम। मेको डांडा डा फश गिवारम बेरपाइशो भूस फुरक खोदेशो दुम्नीम।

14 नाकदो हिंचा डा श्येत जाइनीम। नां सोवत्रा क्येडा डोंइती मेको नेल्ल बेकनीम। आंइ मार मार रोडक्ब नु खुड पाइबपुकी मोदेशो दुम्नीम। यसैया ३७:३६

## 18

कूश रागी आ पबर्म लोत्र पशो

1 आबी, शुश बेरशो रेयके नेंसीशो एथीयोपीया खोला आ आइक्की हांबुम बाक्शो रागी। सेफन्याह ३:१०

2 गे लोत्र कुरब मुर आन कली रीब पा डोंगाम समुन्द्रम सोइकताक्वी। गे लोत्र कुरबपुकी, लाइशो मुर नु रीब पा गेय पाइब मुर आन रागी लन। डोन नु नेक्था डा मुर नेल्ल मेको आन कली तशा हिंनीम। मेको सक्ति पाइशो नु ग्राब रागी डा मुर बाक्नीम। आन रागी शुश खोलाम चेशो बाक्ब।

3 गे रागी रागीम बाक्ब मुरपुकी, रागी नेल्लेम ब्रोंडबपुकी डांडाम छेदर खुक्शो ताइतीनी हना, कोत्रडीन। तुराही ताप्शो बाक्त हना, नेनीन।

4 मारदे हना परमप्रभु यावेमी आं कली “गो आं बाक्तीके रे पा सिकसी पा कोत्रनुड। नाप्शो नां डा नाक्त खोदेशो नु बाली नाली रिक्वी ना हुप्शो नांमी गोस्स का यूशो खोदेशो पा सिकसी पा कोत्रशा बाक्नुड।

5 अडगुर मीचा क्येडा डोंइती फू बोइशशा, गेडा सिप्ब, मिनु मीब। मेना मेकोमी अडगुर कली गुयेम मुंइशा, आ बरशो राशी खोइशशा ताइक्ब।

6 मिनु डांडा डा ठेयब चिक्ब नु रागी डा जन्तु आन कली ब्वचा गेब। होश दुम्तीके ठेयब चिक्ब मेको तारी नित्तीम। मिनु हिंडदम ब्वाकी डा जन्तुपुकीम मेको ब्वशा, मेको आ तारी इप्नीम” देत।

7 मेना लाइशो नु दारशो मुरपुकीमी मुर नेल्ल आन परमप्रभु यावे कली मार मार चाक्नीम। मिनु मेको आन कली तशा डोन नु नेक्था डा मुरपुकी हिंनीम। मेकोपुकी सक्ति पाइशो नु ग्राब रागी डा मुर बाक्नीम। मेको आन रागी खोलाम चेशो बाक्ब। मेको आन मार मार मुर नेल्ल आन परमप्रभु यावे आ बाक्तीके सियोन डांडाम चाक्नीम। भजन संग्रह ६८:३०-३२; प्रेरित ८:२७

## 19

इजीप्त कली निसाफ पशो

येरमीया ४६:-; इजीकीएल २९:-३२:-

1 मिनु परमप्रभु यावेम इजीप्त आ पबर्म यसैया कली “कोत्रडीन, परमप्रभु यावे रीब पा बेरब गोस्सुम इजीप्त रागी जाक्ब। मेकेर डा मूर्तिपुकी हिंशा ख्रिंख्रि पाइनीम। इजीप्त डा मुर आन थुं लुकच लाइब।

2 गो इजीप्त डा मुर आन कली आंम आंमा लडाइ पपाइक्नुडमी। मोपा मेको आन लोक्ब नु लडाइ पाइनीम। आन नेक्था डा मुर लडाइ पमुइनीम। सहर सहर लडाइ तोमुइनीम। राज्य राज्य लडाइ तोमुइनीम।

3 मिनु इजीप्त डा मुर आन थुं लुकच लाइब। गो मेको आन मिम्शो खतम सेल्लुड। मिनु मेकोपुकीमी आन मूर्ति नु बेक्शो मुर आन सल्ला नेंचा माल्नीम।

4 गो इजीप्त डा मुर आन कली शिशी मपथु, सासन पाइब आ गुइमी जिम्मा गेनुडमी। मिनु हिंचा डा पिपमी मेको आन कली सासन पाइब” दे परमप्रभु, मुर नेल्ल आन परमप्रभु यावेमी देत।

5 मिनु नील खोला डा ब्वाक्कु सोत्रना सोत्रन लशा, ब्वाक्कु मबाक्शो दुम्ब।

6 मेकेर डा ब्वाक्कु रिना पाइब। मिनु इजीप्त डा नील खोला डा आइक्च खोलापुकी सोत्रशा शुश मलीनीम।

7 नील खोला आ नेक्था दिंम दुम्शा, मुरपुकीम रू सेल्नीम। तन्न आन शोक्शो मारेड मारेड सोत्रशा, फशेम योल्ब।

8 मिनु डांड साइक्ब मुर नेल्ल रोंका पाइनीम। बोल्सी ग्यारबपुकी नु ग्याइल आप्बपुकी “मार पचा, दो पचा” देंनीम।

9 श्येले सेल्ब नु चा प्रोत्रबपुकीम सुर्ता पाइनीम। चा प्रोत्रब हिंनीम।

10 प्रोत्रना प्रोत्रन बाक्बपुकी राव किक्नीम। मिनु गाल्च ताक्शा गेय पाइबपुकी रोंका पाइनीम।

11 सोआन डा ठेयब मुरपुकी मूर्ख बाक्नीम। फाराओ कली अर्ती गेबपुकीम दूली अर्ती गेनीम। गे दोपा फाराओ कली “गो जोक्ब तुइक्ब नड। गो साइ डोंइती डा पिप आ खिं रे पिशो बाक्नुड” देंने चाप्नीनी?

12 गे, निप्स पाइशो मुरपुकी ते बाक्नी? गेपुकीम मुर नेल्ल आन परमप्रभु यावेमी इजीप्त कली मार पचशो बाक्मे, मेको लोत्र पा मुर आन कली तुइक्पतीन।



13 सोआन डा ठेयब मुरपुकी मूर्ख दुम्तेकम। मेम्फीस डा ठेयब मुरपुकीम जोल लोत्र कली थमा सुइक्नीम। मिनु मेको आन नेल्ल क्येडा ठेयब मुरपुकीमी इजीप्त डा मुर आन कली हेंथे लां खोइक्पाइक्नीम।

14 परमप्रभु यावेमी मेको आन कली प्रांग्ये माग्ये पोक्तीक सोक्तीम प्रिताक्मी। मेकोपुकीम इजीप्त रागी कली दुक्शो मुर आन मेशो तार गाक्शो खोदेशो सेल्लेक्म।

15 इजीप्त रागी कली सुइमी वारच पने मचाप्नीम।

16 मेको नाक्ती इजीप्त डा मुर आन थुं मीश मुर आन थुं खोदेशो दुम्ब। मेकोपुकी मुर नेल्ल आन परमप्रभु यावेमी आ गुइ क्युक्शो तशा ख्रिंख्रि पा हिनीम।

17 इजीप्त रागी डा मुरपुकी यहूदा डा मुर आन क्येडा हिनीम। मुर नेल्ल आन परमप्रभु यावेमी इजीप्त रागी कली मार पचशो बाक्बा, मेको लोत्र नेंब नेल्ल हिनीम।

रागी सां आन कली आसीक

18 मिनु मेको नाक्त इजीप्त रागी डा ५ ओटा सहरमी कनानी आन लोत्र ब्वाक्नीम। मिनु सहर डा मुरपुकीमी, मुर नेल्ल आन परमप्रभु यावे आ नेंमी कसम जाइनीम। मेको सहर का आ नें इर-हेरेस बाक्ब। इर-हेरेस आ अर्थ नां आ सहर देसीब। यसैया ६५:१६; येरमीया १२:१६

19 मेको नाक्ती इजीप्त रागी आ दातेमी परमप्रभु यावे कली चढेतीके का सेल्नीम। मिनु मेको आ सांदमी परमप्रभु यावे कली थाम का सेल्नीम। लेवी २६:१

20 मेको थाम इजीप्त रागीमी मुर नेल्ल आन परमप्रभु यावे कली मिम्तीक चिन्ड का दुम्ब। मारदे हना मेकोपुकीमी श्येत गेचा पुंइसीतीके परमप्रभु यावे कली “वारच पाइक्की” दे लोत्र पाइनीम। मिनु परमप्रभु यावेमी मेको आन कली आन श्येत रे प्रॉइब का सोइक्ब। मेकोमी लडाइ पा मेको आन कली श्येत रे प्रॉइब।

21 मिनु परमप्रभु यावेमी आम कली इजीप्त डा मुर आन डोंइती तुइक्पाइसीब। मिनु मेको नाक्त इजीप्त डा मुरपुकीमी परमप्रभु यावे कली थमा सुइक्नीम। मिनु मार मार चोशा चढेतीक चढेशा, कबल पा, आन पशो कबल खाप्नीम। यसैया ६६:१९

22 परमप्रभु यावेमी इजीप्त डा मुर आन कली तुब्ब। मिनु सापाइक्ब। मिनु मेकोपुकी परमप्रभु यावे आ नोले खोइक्नीम। मिनु मेको आन पुंइशो लोत्र नेंशा। मेको आन कली सापाइक्ब।

23 मिनु मेको नाक्ती इजीप्त रे अस्सुर सम्म ठेयब लां का दुम्ब। मिनु अस्सुर रागी डा मुरपुकी इजीप्त जाक्नीम। इजीप्त डा मुरपुकी अस्सुर लाइनीम। मिनु इजीप्त नु अस्सुर डा मुर गारशा परमप्रभु यावे कली ठेयब सेल्नीम।

24 मिनु मेको नाक्ती इजीप्त, अस्सुर नु इस्साएल नेल्ल क्येडा नोले डा इस्साएल रागी दुम्ब। मेको रागी रागी आन दातेमी मेको सांफा आसीक ताइब दुम्नीम। ब्यवस्था ४:२०; रोमी १५:१०

25 मिनु मुर नेल्ल आन परमप्रभु यावेमी आसीक गेशा मेको आन कली “आं इजीप्त डा मुर, आं सेल्शो अस्सुर रागी नु आं योत्रशो इस्साएल डा मुरपुकी आसीक रमल” देब।

## 20

अस्सुरमी प्राशो

1 मिनु अस्सुर डा पिप सारगोन आ सासनमी आ कप्तान लडाइ पथ लशा, अशदोद सहर ग्रात। २राजा १८:१७

2 मेना परमप्रभु यावेमी आमोज आ तौ यसैया कली “इ फेक्शो अरन्डी नु जुत्ता पुतो” देत। मिनु मोपा यसैया जुत्ता मलिकथु, वा मफेक्थु, शिन्ना गाक्चा गोप्तु।

3 मिनु परमप्रभु यावेमी “आं गेय पाइब यसैया दोपा शिन्ना नु जुत्ता मलिकथु बर्स सां सम्म इजीप्त नु एथीयोपीयाम चिन्ड कोंइचा कली गाक्मे,

4 मोपा अस्सुर डा पिपमी इजीप्त रागी नु एथीयोपीया डा मुर आन कली ग्याइश्शा लाइक्ब। ठिटा नु खूशो नेल्ल आन कली शिन्ना, जुत्ता मलिकपाइक्थु नु देल्लो तपाइश्शा लाइश्शा, इजीप्त कली मुने तोक्ब।

5 मिनु सु सुमी ‘एथीयोपीया डा मुरुम आंइ कली वारच पाइनीम। इजीप्त बोल्यो बाक्ब’ देनीमी, मेको नेल्ल मुने दोक्नीम।

6 मिनु मेको नाक्ती समुन्द्र आ नेक्था बाक्ब मुरपुकीमी ‘कोत्रडीन, डोंइती वारच पा अस्सुर नु लडाइ पन, दे ब्रेश्शो रागी आस कली अस्सुर डा पिपम ग्याइश्शा लाइक्तु। गो मुल दोपा ब्रोंइचा’ देनीम” देत।

## 21

बेबीलोन आ परबम लोत्र पशो

यसैया १३:-; यसैया १४:-

1 मिनु परमप्रभु यावेम समुन्द्र आ नेक्था डा गोरशो रागी आ परबम यसैया कली “नेगेब रे फश पिना पिन बाक्ब। मेको गोरशो रागी रे पीब। मेको हिंचा डा रागी बाक्ब।

2 गो हिंचा डा लोत्र का नेंता। श्येत गेबपुकीम श्येत ला गेनीम। खतम पोक्बपुकीमी खतम ला पोक्नीमी। एलाम, गे कुवो। गे लशा, मादी रागी डा मुर पुन्दिने। गो मेको आन हुकयी पचा तेक्नुड” देत।

3 मोपतीके आं पोक्च ख्रिंख्रि पाइनीम। गो सुत्केरी रोइ पशो आल थिचशो मीश मुर खोदेशो दुम्ती। गो राप्ने मचाप्थु, नेंने नु तने मचाप्चा डा श्येत जशो बाक्नुड।

4 गो प्रांग्ये माग्ये दुम्शो बाक्नुड। आं दाक्शो हाम्सोमी नाइक्चा मलनु, आं कली ख्रिंख्रि पपाइक्ती।

5 मेकोपुकीमी जचा कली ठीक सेलनीम। वा ब्राइनीम। जाइनीम, तूनीम। ए, कप्तानपुकी, बोक्कीन इन तेक्तीक तेल खेक्तीन।

6 मारदे हना परमप्रभुमी आं कली “कोव्रब मुर का वोतो। मेकोम मार ताइबा, शोव्रडल।

7 मेकोमी शारा डोइक्ब आन कली जोड जोड पा जाकना जाकन ताइब, गधा डोइक्ब नु दलओंठ डोइक्ब ताप्तु हना, शुश कोव्रशा, नोफा दाइश्शा नेनल” दैत।

8 मिनु कोव्रब मुरुमी गुप्स खोदेशो पा, ठेयब सेंदा पा “परमप्रभु, गो नाकदो नाक्ती खाल पतीकेमी खाल पा राप्शा बाक्शो बाक्नुड।

9 कोव्रडीन, शारा डोइक्ब जोर जोर पा जाकना जाकन बाक्नीम” दैत। मिनु मेकोमी “बेबीलोन ब्रुत। मेको आन देवी देवता आन मूर्ति नेल्ले खपीम ताइक्चा पुंडसाक्म” दैत। प्रकाश १८:२

10 गे आं तुप्शो नु क्राप्शो रागी डा मुरपुकी, मुर नेल्ल आन परमप्रभु यावे, इस्राएली आन परमप्रभु रे नेशो लोव्र गो इन कली दैती।

एदोम आ पर्वम पशो लोव्र

येरमीया ४९:१७-२२, २८-३३

11 मिनु परमप्रभु यावेमी दुमा आ पर्वम यसैया कली ब्यवस्था २:५

12 गो सेइर रे सेंदा का नेता। मेको सेंदामी “ए, खाल पाइब मुर, नाकदो दोशो दुम्मे? दोशो लीमे? ए, खाल पाइब नाकदो दोशो दुम्मे? दोशो लीमे?” दैत। मिनु खाल पाइबमी “नां सोव्रब, मिनु नां रिक्ब। मारेड हिल्लो पचा बाक्त हना, आं बाक्तीक जाक्कीन। मिनु हिल्लो पचीनी” दैत।

अराब रागी आ पर्वम पशो लोव्र

13 मिनु परमप्रभु यावेमी गोरशो रागी आ यसैया कली “ए, अराब रागी डा मुरपुकी गे अराब डा मुर मबाक्तीकेमी बाक्स बाक्चा मालनीनी। गे दलओंठ डोइश्शा देदान आ थर डा ग्याप्ब लेयब पिने।

14 तेमा रागी डा मुरपुकी, ब्वाक्कु तूतू दाक्ब आन कली ब्वाक्कु चाक्कीन। प्रोक्शा जाक्ब आन कली शोब्ले कुरशा, गुप्थ लने।

15 मारदे हना मेकोपुकी शोइश्शो तरवार, खुक्शो लिब्रा नु ठेयब लडाइ रे ब्रोंइशा जाक्शो बाक्नीम” दैत।

16 मिनु परमप्रभुमी आं कली “गाल्च ताइबम आ बर्स हिक्शो खोदेशो पा बर्स का नोले केदार आ दारस नेल्ल जाम्ब। यसैया १६:१४

17 मिनु केदार डा लडाइ पाइब लिब्रा आप्ब मुर का निक्शी ला लीनीम। मारदे हना एको परमप्रभु यावे, इस्राएली आन परमप्रभु आ देशो लोव्र बाक्ब” दैत।

## 22

यरूसलेम आ पर्वम लोव्र पशो

1 मिनु परमप्रभु यावेमी कौंडतीक बेसी आ पर्वम यसैया कली “गे नेल्ल मार दुम्नी डा मीन, नेल्ल इन खिं तार डोंइसीनी?

2 गे, ग्रांये माग्ये नु रेयकेम ब्रीशो सहर, इ बेक्शो मुरपुकी तरवारम क्योरशा साइश्शो मनम। लडाइम साइश्शो यो मनम।

3 इ सासन पाइब कालेम प्रोक्तेक्म। लिब्रा मआप्थु ग्याइक्चा पुंडसाक्म। डोंइती सु सु डोन प्रोक्तेक्म हना यो, मेको कालेम ग्याइक्चा पुंडसाक्म।

4 मोपतीके गो आं कली मकोव्रयीनी। गो हुइ हुइ पा डाक्नुड। आं कली लेम्चा थुं मपने। मारदे हना आं दाक्शो मुर खतम दुम्तेक्म” दैत। येरमीया ८:२३

5 मिनु नाक्त काम परमप्रभु, मुर नेल्ल आन परमप्रभु यावेमी कौंडतीक बेसीम दिम्शा ताइश्शा नु ग्रांये माग्ये पपाइक्ब। गारो प्रेशो डांडा सम्म “बारच पने” दे वाड ब्रेश्शो सेंदा नैसीब।

6 एलाममी ब्रा कुरतीके कुरतु। मुरपुकी बग्गी डोइश्शा गाक्चा गोम्तेक्म। कीर सहर डा मुरपुकीमी तेक्तीके शोल्तेक्म।

7 इ रिम्शो बेसी बग्गीम ब्रीशो बाक्नीम। शारा डोइक्ब सहर डा ठेयब लाप्चो आ डोंइती ठीक दुम्शो बाक्नीम।

8 परमप्रभुमी यहूदा आ सुम्तीके हुक्तु। मेको नाक्ती गेपुकी पिप आ या वोइक्तीके, ब्वाकी डा खिं मिम्ताक्नी।

9 मिनु गेपुकीमी दाऊद आ सहर डा खिं शुश रेक्शो ताइतीनी। मिनु आइदी दोम्ली डा ब्वाक्कु ताप्तीनी। यसैया ७:३

10 मिनु गे यरूसलेम डा खिं हिक्शा, प्रेशा, सहर डा गारो बोल्यो सेलतीनी। येरमीया ३३:४

11 मिनु गे सहर डा गारो निक्शी आस दातेमी माइत दोम्ली डा ब्वाक्कु तेम्तीनी। तन्न इन कली मोदेशो पपाइक्ब कली ममिम्तीनी। डोंइती रे नेल्ल सेल्ब कली चहिं मान मपनी।

12 मेको नाक्ती परमप्रभु, मुर नेल्ल आन परमप्रभु यावेमी डाक्चा, रोंका पचा, चां खोइक्चा नु अरन्डी फेक्पाइक्चा कली इन कली ब्रेत्ताक्व। आमोस ८:१०

13 तन्न गेपुकीमी ग्येरशा, ब्यफ नु भेडा क्योरशा, ब्वशा, अडगुर शांबु तूशा “लो, जय ब्वय, तूय, मारदे हना दीसा बेक्नय” दैतीनी। १कोरिन्थी १५:३२

14 मुर नेल्ल आन परमप्रभु यावेमी आं कली “मेको इन मरिम्शो पशो मवेक्नी सम्म लीब” दे परमप्रभु, मुर नेल्ल आन परमप्रभु यावेमी दैत।

एल्याकीम कली योव्रशो

15 मिनु परमप्रभु, मुर नेल्ल आन परमप्रभु यावेमी “गे खिं नेल्ल कली कोव्रब शेब्ना आ बाक्तीकेम लावो। यसैया ३६:३

- 16 मिनु मेको कली 'गे मार पना पन बाक्नीनी? गे इ के एकेर मार बाक्बा ड। एकेर इ मुर सु बाक्नीमी। मारदे डांडामी तुरस मुपदी? मारदे सेरथे फुल्लु आगाम मुर बाक्तीके सेल्नी?' दैत
- 17 परमप्रभु यावेमी इन कली एक रे मरिश्शो पा डोन ताइक्व। इन कली बोल्यो पा ग्याइक्व।
- 18 इ कली हिरशा हुरद आप्शो खोदेशो पा ठेयब रागीमी ताइक्व। मिनु गे मेक उइ बेक्नेवे। इ दारशो बग्गी यो मेक उइ लीनीम। गे इ होवप आ खिं कली मुने तोक्ब बाक्नेवे
- 19 गो इ कली इ गेय रे गुंइशा, आइक्च सेल्नन।
- 20 मेको नाक्ती गो हिल्कीयाह आ तौ आं गेय पाइब एल्याकीम कली ब्रेतुड।
- 21 मिनु गो मेको कली इ वा फेक्पाइक्नुड। इ किप्शुर किप्पाइक्नुड। मिनु इ अधिकार मेको कली गेनुड। मिनु मेको यरूसलेम नु यहूदा डा मुर आन आफ दुम्ब। उत्पत्ती ४५:८
- 22 गो दाऊद आ खिं डा सांचो मेको कली गेनुड। मेकोमी रोक्ब, सुडम मचोक्नीम। मेकोमी चोक्ब सुडम मरोक्नीम। प्रकाश ३:७
- 23 मिनु गो मेको कली किला खोदेशो पा सारो खपीम युक्नुड। मेको आ किकी पिपी आन खिं डा मान पाइक्चा पुंडसीब दुम्ब।
- 24 मिनु आ आफ आ खिं डा ठेयब मुर नु आल चच युइ नेल्ले मेको आ अधिकारम बाक्नीम। खिं डा बोस नेल्ल मेको आ अधिकारम बाक्नीम" दैत।
- 25 मेको नाक्ती मुर नेल्ल आन परमप्रभु यावेमी "मेको सारो खपीम युक्शो किला हिम्पाइक्व। मेको कली क्योरशा ताइक्नीम। मिनु आ पतीक अधिकार नेल्ल जाम्ब" दे परमप्रभु यावेमी दैत।

## 23

टायर आ परबम लोत्र पशो  
इजीकीएल २६:-२८:-

- 1 मिनु परमप्रभु यावेमी टायर आ परबम यसैया कली "गे, टारसीस डा जहाजपुकी रोंका पने। मारदे हना टायर खतम दुम्शो बाक्ब। मेकेर खिं नु जहाज नाइक्तीके मलीब। साइप्रस टापु रे जाक्ब आन कली नैपाइश्शो बाक्तेक्म। इजीकीएल २७:१२
- 2 समुन्द्र आ नेक्था बाक्बपुकी रोंका पने। गे सीदोन डा ग्याप्ब लेयबपुकी इन मुर समुन्द्र शोक्साक्म।
- 3 इन मुर ठेयब ब्वाक्कु शोक्शा, लशो बाक्तेक्म। शीहोरम शोक्शो अन्न नु नील खोला आ एर ओंथ खुप्शो इन ग्याप्तीक लेयतीक बाक्त। मिनु गे रागी रागी डा मुर आन ग्याप्ब लेयब बाक्तीनी।
- 4 सीदोन, गे मुने पावो। मारदे हना समुन्द्र डा बोल्यो टायर सहरमी 'गे सुत्केरी रोइ मपड। गो आल मथिड। गो वोंइश आल नु मीश आल आन कली मथुलु' दैतीनी।
- 5 इजीप्त रागीम टायर आ परबम लोत्र जाक्दीम्मेनु, मेकेर डा मुर हिनीम।
- 6 गेपुकी टारशीश शोक्शा, लने। समुन्द्र आ नेक्था बाक्ब मुरपुकी रोंका पने।
- 7 मार, मेको इन ठेयब सहर बाक्बा डा? मेको साइ डोंइती रेन बाक्शो सहर बाक्त। मेकेर डा ग्याप्ब लेयब मुरपुकी डोन डोन सम्म लाम्तेक्म।
- 8 सुमी टायर कली मोदेशो पचा मिम्ता? डोंइती टायर सिरपेच योक्ब बाक्त। आ ग्याप्ब लेयब मुर पिप आ तौ खोदेशो बाक्तेक्म। आ ग्याप्ब लेयबपुकी रागीम मान पाइक्चा पुंडसीब बाक्तेक्म।
- 9 मिनु मुर नेल्ल आन परमप्रभु यावेमी मेको मिम्ताक्व। आ शुश दारस आ परबम ठेयब लेत्तीके खतम सेल्चा नु आ मान पाइक्चा पुंडसीब आन कली मुने तोक्चा कली मिम्ताक्व।
- 10 टारशीश डा जहाजपुकी इन रागी लने। मुल रे मेकेर जहाज नाइक्तीके मबाक्ब। इजीकीएल २७:१२
- 11 परमप्रभु आ गुड समुन्द्र तार दिंशो बाक्ब। मिनु राज्य राज्य आन कली हिम्पाइश्शो बाक्ब। परमप्रभु यावेमी कनान रागी डा बोल्यो दरवार आन कली खतम सेल्चा" दे अरेशो बाक्ब।
- 12 मिनु मेकोमी "गे दिप्चा पुंडसीशो कन्ने तमी सीदोन, मुल रे ठेयब लेशो मबाक्नेवे। बोक्को, साइप्रस टापु गे लावो। गे मेकेर यो इ थुं नाइश्शा बाक्चा मताइनेवे" दैत।
- 13 कल्दी डा मुर आन रागी कोत्रडीन। अस्सुरम ममाइ, कल्दीपुकीम सहर नेल्ल मुर मबाक्तीके सेल्तेक्म। मेको टायर सहर ब्वाकी डा जन्तु आन बाक्तीक सेल्तेक्म। मेको सहर पुम्चा कली लाइश्शो खिं सेल्तेक्म। सहर डा दरवार प्रेल्तेक्म। सहर नेल्ल खतम सेल्तेक्म।
- 14 टारशीश डा जहाजपुकी रोंका पने। मारदे हना इन बोल्यो दुम्तीके प्रेल्तेक्म।
- 15 मिनु नोले टायर ७० बर्स, पिप का आ ब्रोंइतीके बर्स खोदेशो, मदुम्म सम्म प्रेंचा पुंडसीब। मिनु मेको ७० बर्स नोले टायर सहर तेल्लेम आ कुम्सो देशो खोदेशो दुम्ब।
- 16 गे प्रेंसीशो तेल्लेम, इ बीना रिम्शो पा ताप्शा, सहरम हिरसो। शुश कुम्सो पावो। मिनु इ कली फुकनीमी कों?
- 17 मिनु ७० बर्स नोले परमप्रभु यावेमी टायर सहर कली मिम्ब। मिनु मेकोम लेंशा आ तेल्लेम पशो डा क्येट ताइब। मिनु मेकोमी तेको तेको रागी डा राज्य डा पिपपुकी नु तेल्लेम पाइब।
- 18 मिनु आ तेल्लेम पा चेम्शो क्येट परमप्रभु यावे के दुम्ब। मेको क्येट महेनीम। आ चेम्शो क्येट परमप्रभु यावे आ डोंइती बाक्ब। मेको क्येट मुर आन कली जचा फेक्चा कली गेनीम।

## 24

रागी नेल्ल आन कली निसाफ

1 परमप्रभु यावेमी रागी नेल्ल मुर मबाक्तीक सेल्व। नेल्ल श्येत्थ सेल्व। रागी कली ग्येत्थ लुक्च पा मेकेर डा मुर नेल्ल आन कली ब्रपाइक्ब।

2 मुर आन कली दोदेशो दुम्बा, चढेब आन कली यो मोदेशो दुम्ब। वाइल आन कली दोदेशो दुम्बा, आन होत्रप आन कली यो मोदेशो दुम्ब। वाइलीम आन कली दोदेशो दुम्बा, आन होत्रपोक्म आन कली यो मोदेशो दुम्ब। ग्याप्ब आन कली दोदेशो दुम्बा, लेयब आन कली यो मोदेशो दुम्ब। जेर थुइक्ब आन कली दोदेशो दुम्बा, जेर गेब आन कली यो मोदेशो दुम्ब।

3 रागी थमा पा श्येत्थ नु मुर मबाक्तीके दुम्ब। मारदे हना मेको परमप्रभु यावे आ देशो लोत्र बाक्ब।

4 रागी फू खोदेशो पा सोल सुल बेक्ब। रागी नेल्ले मोदेशो दुम्नीम। रागी डा मान पाइक्चा पुंडसीब नेल्ल बेक्नीम।

5 रागीम बाक्ब मुरपुकीमी रागी कली खतम सेल्नीम। मारदे हना मेकोपुकीमी परमप्रभु यावे आ अरेशो मटीम। परमप्रभु आ फुल्लुम मुशा ब्रेक्शो लोत्र कली ममिम्तेम। आ गेना हना यो लीब कबल पशो मखबेम।

6 मोपतीके सरापमी रागी कली खतम सेल्लो बाक्ब। मिनु मेकेर बाक्ब आन पापम पतीके श्येत जाइनीम। का निकशी ला लीनीम।

7 अडगुर शांबु ग्युरब। अडगुर बोट सोत्रनीम। डोंइती ग्येरसीशा बाक्ब मुर नेल्ल हुकयी पाइनीम।

8 बाजा ताप्ब आन ग्येरशो रेयके मनंसीब। ग्येरशो मुर आन सेंदा मलीब। बीना ताप्ब आन रेयके जाम्ब।

9 मुल रे अडगुर शांबु तूडमेनु, कुम्सो मपाइनीम। राकसी तूब आन कली राकसी काइब।

10 मेको ग्रांये माग्ये सहर खतम दुम्ब। मेको खिं डा लाप्चो नेल्ल चोक्सीशा, सुइ ओवने मचाप्नीम।

11 लां गाक्ब मुरपुकी अडगुर शांबु मबाक्तीके सुर्ता पाइनीम। ग्येरसीतीके नेल्ल नुप्ब। रागी डा ग्येरसीतीके जाम्त।

12 सहर मुर मबाक्तीक दुम्शा, आ गारो डा ठेयब लाप्चो ब्रेत्तेक्म।

13 मोदेशो रागी नु रागी रागी डा मुर आन कली दुम्चा माल्ब। तेल रवा आन फल थेष्चा नु अडगुर सेक्शा यो सीला लीशो खोदेशो पा रागी नेल्ल मोदेशो दुम्चा माल्ब।

14 मिनु मेको लीशो मुरपुकी ग्येरशा ठेयब सेंदा पा “परमप्रभु यावे ठेयब बाक्ब” दे पच्छिम रे कुम्सो पाइनीम।

15 मोपतीके पूब डा मुर “परमप्रभु यावे ठेयब बाक्ब” दे मेको कली ठेयब सेलीन। समुन्द्र आ नेक्था बाक्ब आन कली “परमप्रभु यावे, इस्राएली आन परमप्रभु आ नें कली मान पने” देंमानु, मेको कली मान पाइनीम।

16 गो रागी आ सुर रे परमप्रभु कली ठेयब सेल्लतीक कुम्सो पशो नेंतय। ठीक पाइब, परमप्रभु कली ठेयब सेल्लतीक कुम्सो बाक्नीम। तन्न गो शुश श्येत जाइब दुम्ती। आवी, गो श्येत जाइब दुम्ती। मारदे हना दूली पाइबम, मुल सम्म दूली पाइनीम। मिनु मेको क्येडा यो दूली पाइनीम।

17 गे रागी डा मुरपुकी, इन डोंइती शुश हिंचा डा बाक्ब। इन डोंइती बिक्तीके नु ब्वारद बाक्नीम।

18 मिनु सु सु शुश हिंचा डा रेयके नेंशा प्रोक्नीमी, मेको बिक्तीकेम बिक्नीम। सु सु बिक्तीके रे गूनीमी, मेको ब्वारदम रेल्नीम। मारदे हना सरीड डा झेल रोक्सीशो बाक्नीम। मिनु रागी आ जग हिम्सीशो बाक्ब। येरमीया ४८:४३-४४; आमोस ५:१९; उत्पती ७:११

19 मिनु रागी एशशा, ब्रोल्ब। खिनुम हिम्सीब। २पत्रुस ३:१०

20 रागी अडगुर शांबुम दुक्शो मुर खोदेशो पा एर ओथ हिम्सीब। खिनुम हिम्शो कटेरा खोदेशो पा हिम्सीब। मुर आन हेंथे पतीकेमी मेको मोदेशो सेल्लु। मिनु रागी गेनायो मबोक्चा डा पा गोल्ब।

21 मेको नाक्ती परमप्रभु यावेमी स्वर्गम बाक्ब सक्ति पाइशशो आन कली सजाइ गेब। मिनु रागी कली सासन पाइब पिप आन कली सजाइ गेब। दानीएल १०:१३; येरमीया ४६:२५

22 जेल्खानम खुम्सीशो मुर खोदेशो पा बिक्तीकेमी खुम्सीचा पुंडसीनीम। मेको जेल्खानम चोक्चा पुंडसीशा, शुश नाक्त नोले सजाइ ताइनीम।

23 मेना तास्ला लल जीब, नां आ छेडछेड जाम्ब। मारदे हना मुर नेल्ल आन परमप्रभु यावेमी सियोन डांडा नु यरूसलेमम सासन पाइब। खाल्पा आन डोंइती आ छेडछेड कोइब।

## 25

ग्येरशा कुम्सो पशो

1 परमप्रभु यावे, आं परमप्रभु बाक्नीनी। गो इन कली मान पशा, इन नें ठेयब बाक्ब, दे कुम्सो पाइनुड। मारदे हना गे छक लाक्चा डा गेय पाइतीनी। इन डोंइती मिम्शो मप्रोंइथु, थमा पा थुम्तीनी।

2 मारदे हना गे सहर कली फुल्लु तेल्लीके खोदेशो सेल्लतीनी। गारो हिरशो सहर कली प्रेत्तीनी। अर्को रागी डा मुर आन दरवार मुल मली। मिनु मेको गेनायो मसेल्नीम।

3 मोपतीके बोल्यो मुरपुकीम इन कली मान पाइनीम। बोल्यो राज्यपुकी इन क्येडा हिंनीम।

4 मारदे हना गे पुडग नु मारेड मथीब आन कली वारच पाइब बाक्तीनी। फश गिवार पवानु, फाम्सीतीके नु नां पवानु, सितल थेरतीके बाक्तीनी। मारदे हना मेको शिशी मपाइक्ब आन गाइक्चा, फश गिवार गारोम थोक्सीशो खोदेशो बाक्ब। यसैया ४:६

5 सोत्रशो रागीमी नांम नाप्पाइशशो खोदेशो पा, अर्को रागी डा मुर आन रेयके पतीक साम्तीनी। नां कली गोस्सुम सुम्शो खोदेशो पा, शिशी मपाइब आन ग्राशा ग्येरशा पतीके कुम्सो तेक्तीनी।

परमप्रभु आ गेशो भोज

6 मिनू मुर नेल्ल आन परमप्रभु यावेमी सियोन डांडामी रागी नेल्ल डा मुर आन कली थम ठेयब भोज का सेल्व। ब्रोव्रशो नु चोक्शो अडगुर शांबु नु ब्रोव्रशो जचा थोव्रक के भोज गेब। मती २२:२-४

7 मिनू मेकोमी मेको डांडामी जात जात डा मुर आन थुं डा सुमतीके हुक्ब। रागी रागी डा मुर आन सुमतीके हुक्ब। मेना मेकोमी मुर आन कली मबेक्पाइक्ब।

8 मेना परमप्रभु, परमप्रभु यावेमी मुर नेल्ल आन प्रेक्कु फिक्ब। आ मुर आन कली मदाक्तीके रागी नेल्ल रे गुंडब। मारदे हना परमप्रभु यावेमी मेको लोत्र पाप्तु। १कोरिन्थी १५:५५; प्रकाश ७:१७

9 मिनू मेको नाक्ती मुरपुकीमी “कोव्रडीन, मेको आंड परमप्रभु बाक्ब। गो मेको आ लां कोव्रतक। मिनू मेकोम आंड कली श्येत रे प्रॉडतु। मेको आंड रिम्शा बाक्शो परमप्रभु यावे बाक्ब। गोपुकी आ प्रॉडशो तशा ग्येरसाक्क। भजन संग्रह ४८:१५

10 मारदे हना परमप्रभु यावे आ गुड मेको डांडा तार बाक्ब। मिनू मोआब रागी डा मुर आन बाक्तीके दिम्चा पुंडसीनीम। मेको नेल्ल मोव्रल वोडक्तीके खोदेशो पा दिम्चा पुंडसीनीम।

11 मिनू दोपा दोम्ली ग्यारब मुरपुकीमी आन गुड दिनीमी, मोपा मेकोपुकीमी आन गुड दिनीम। मिनू परमप्रभुमी मेको आन ठेयब लेशो नु आन सक्ति आइक्च सेल्व।

12 मिनू आ बोल्यो नु लाइशो गारो प्रेशा, आइक्च सेल्शा, खप नु उडक्थ सेल्व। मिनू फुरक दुम्पाइक्ब” देनीम।

## 26

परमप्रभु आ मुर आन कुम्सो

1 मेको नाक्ती यहूदा रागी डा मुरपुकीम मार कुम्सो पाइनीम देशा हना “आंड सहर बोल्यो बाक्ब। परमप्रभुमी आंड कली ग्राचा गेब। लडाड पाइब आन कली ओव्रने मचाप्तीके गारो हिरब।

2 मेको सहर डा गारो डा लाप्चो रोक्कीन। ठीक पाइब नु परमप्रभु यावे कली थमा सुइक्चा मप्रॉडब ओव्रने चाप्मेक्ल। भजन संग्रह ११८:२०

3 गे ग्येत्थ लुक्च मटुम्ब थुं पाइशो मुर आन कली थुं नाइक्चा गेनीनी। मारदे हना मेकोपुकी इन कली थमा सुइक्ब बाक्नीम।

4 गे परमप्रभु यावे कली गेना हना यो थमा सुतीन। मारदे हना परमप्रभु यावे गेना हना यो बाक्ब, सेरथे फुल्लु का बाक्ब। ब्यवस्था ३२:४

5 मारदे हना मेकोमी ठेयब लेशो मुर ब्रेम्पाइक्तु। आन सहर कली आइक्च सेल्शा, खपीम वोइशशा, फुरक नु उडक्थ सेल्लु।

6 मुरपुकीम मेको कली दिम्नीम। पुडग मुरपुकीमी मेको कली दिम्नीम। क्येट मथीबम यो मेको कली दिम्नीम।

7 ठीक निसाफ पाइब आ लां ग्येत्थ बाक्ब। गे ठीक पाइब आ लां थेल्लीनी।

8 परमप्रभु यावे, गो इन निसाफ पतीके कली रिम्नीकी। आंड थुं नेल्लेमी इन नें नु इन कली मिम्शा बाक्नीकी।

9 गो नाक्दो इन कली शुश मिम्नुड। गो आं थुंमी इन कली माल्ना माल्न बाक्नुड। मारदे हना गे रागी डा मुर आन कली निसाफ पाइतीनी हना, रागीम बाक्बपुकीमी ठीक पतीके शेंसीनीम। भजन संग्रह ६३:७

10 परमप्रभु यावे आ अरेशो लोत्र मटीब मुरपुकीमी शिशो ताम्तेक्म हना यो, ठीक पतीके मशेंसीनीम। मेकोपुकीम ठीक पाइब आन रागीमी दूली पाइनीम। मिनू परमप्रभु यावे कली मान मपाइनीम।

11 परमप्रभु यावे, इन गुड मेको आन परबम क्युक्शो बाक्तीनी हना यो, मेकोपुकीमी मतुइक्नीम। गे इन मुर आन कली दाक्शो तशा, मेकोपुकी मुने दोक्मल। इन जोरी सत्रु आन कली नेक्ब मीमी मेको आन कली यो नेक्गल। यसैया ३७:३२

12 परमप्रभु यावे, गे आंड कली थुं नाइक्चा गेनीनी। मारदे हना मार रिम्शो पका, मेको नेल्ल इन रे पा पिशो बाक्ब। यसैया ९:६

13 आंड परमप्रभु यावे अरु ठेयब मुरुम आंड कली हुकुम पाम्तेक्म। तन्न गे का ला आंड कली अरेब बाक्नीनी।

14 बेक्शो मुर मब्रॉइनीम। वांकु मबोक्नीम। मारदे हना गे मेको आन कली साइशशा, मेको आन कली मिम्तीक यो क्याम्ताक्नी।

15 तन्न गे रागी डा मुर आन कली सोपाइशशा बोपाइशशा शुश सेल्लतीनी। गे मान ताइब बाक्नीनी। गे मेको रागी कली ठेयब सेल्लतीनी।

16 परमप्रभु यावे, मेको मुरपुकीमी श्येत जशा, इन कली माल्तेक्म। इन गेशो सजाइ तशा, आइक्च सेंदाम इन कली पुंडतेक्म। होसे ५:१५

17 दोपा आल थिचा चिक्शो मीश मुरुम आ आल थिची ना वाड ब्रेशशा, रोम्सीबा, मोपा परमप्रभु यावे, गो इन डोंइती बाक्तक। यूहन्ना १७:२१; प्रकाश १२:२

18 मिनू गोपुकी यो कोव्रज कुरशा रोम्साक्क। तन्न फश ला थीतक। गोपुकी आंड रागी कली प्रॉइने मचाप्क। मिनू आल थिशा यो शुश हुम्ने मचाप्क।

19 इन बेक्शो मुरपुकी लेशा ब्रॉइनीम। आन बेक्शो रां सेंसीनीम। गे फुरकुम बाक्बपुकी, बोक्कीन। ग्येरसीशा कुम्सो पने। मारदे हना इन सुनी डा सीत छेडछेडम ब्रशो बाक्ब। मिनू रागीमी शुश डोंइती बेक्शो मुर आन कली गुंडब। इजीकीएल ३७:१-१४; मती २७:५२-५३

20 आं मुरपुकी जाक्शा, इन खिं ओव्रडीन। मिनु इन नोले लाप्चो चोक्कीन। गाडक्चा मनुम्म सम्म इच्का नाक्ती खुंडसीन। मत्ती ६:६  
 21 मारदे हना परमप्रभु यावे आ बाक्तीके रे जाक्ब। मिनु रागीम बाक्ब मरिम्शो पाइब आन कली सजाइ गेब। मिनु रागी तार देश्शो हुश नु साइश्शो मुर नेल्ल मखुडक्थु कौंडोब” दे कुम्सो पाइनीम। उत्पत्ती ४:१०-११; प्रकाश १८:२४

## 27

इसाएल कली श्येत रे प्रौंडशो

1 मेको नाक्ती परमप्रभु यावेमी आ हिंचा डा, ठेयब नु सक्ति पाइश्शो तरवारमी खेदा पना पन लेव्याथन माइश्शो बुस्स कली सजाइ गेब। ग्रेशा गाक्ब बुस्स लेव्याथन नु समुन्द्रम बाक्ब ठेयब जन्तु कली साइक्ब। भजन संग्रह ७४:१४

अडगुर रू आ पर्वम नक कुम्सो

- 2 मिनु मेको नाक्ती “नेल्ल क्येडा रिम्शो अडगुर रू का बाक्ब” दे कुम्सो पने। यसैया ५:१-७  
 3 गो, परमप्रभु यावेमी मेको कली गेना हना यो कोव्रशा, ब्वाक्कु लुक्नुड। मरिम्शो मदुम्ल, दे गो मेको कली नाक्दो नाक्ती कोव्रनुड।  
 4 गो मगाइक्नुड। चू चोंक वाम हना, गो मेको आन कली लडाइ तोशो खोदेशो पा, तुल्शा चोडमी वा।  
 5 मोदेशो मदुम्ल हना, मेको गो नु गारशा, आं कली वारच सेल्ब। आं कली वारच सेल्ब।  
 6 मिनु नोले डा नाक्तीमी याक्बम आ शाक्श थोक्ब। इसाएल फू बोइश्शा, नक राशी दाप्ब। मिनु रागी नेल्ल मेको आन फल फुलमी ब्रीब।  
 7 मार, परमप्रभुमी आ कली तुप्ब आन कली तुप्शो खोदेशो पा मेको आन कली यो तुप्बा? परमप्रभुम आ कली साइक्ब आन कली साइश्शो खोदेशो पा मेको यो साइक्चा पुंडसमा? येरमीया ३०:११  
 8 ग्याइश्शा लाइक्चा पुंडसीशो रागी रे गुंडशो मुर नु लडाइ पाइतीनी। परमप्रभुमी मेको आन कली मुइश्शा, पूर्ब डा फश पवानु, ठेयब फश गिवारमी योल्पाइक्ब।  
 9 मोपतीके मेको रे पा याक्ब आ मुर आन दोस क्याम्सीब। मेको आन पाप पशो आ पर्वम मो पचा पुंडसीशो बाक्तेकम। मेकोमी चढेतीके डा फुल्लु खरी खोदेशो पा फस सेल्ब। मिनु मूर्ति पाइश्शो थाम नु धूप चोशा चढेतीक काड मलीपाइक्ब। लेवी २६:३०  
 10 मारदे हना गारो हिरशो सहर मुर मबाक्तीके दुम्त। मेकेर गोरशो रागी खोदेशो पा मुर मबाक्नीम। मेकेर बाछा जोशा नांडसीनीम। मिनु आ राशी ब्वाइनीम।  
 11 मिनु मेको आ राशी सोव्रशा, जिक्नीम। मिनु मीश मुरपुकी जाक्शा, चोचा कली शी खुणीम। मारदे हना मेकोपुकी रुप्तीक मपाइश्शो थर डा मुर बाक्नीम। मोपतीके मेको आन कली सेल्बमी मेको आन कली शिशी मपाइब। येरमीया ४:२२; ब्यवस्था ३२:१८  
 12 मिनु मेको नाक्ती परमप्रभु यावेमी युफ्रेटीस खोला रे इजीप्त डा ब्वाक्कु मबाक्शो खोला सम्म अन्न तुप्ब। गे इसाएल डा मुरपुकी का का पा खुप्चा पुंडसीनीनी।  
 13 मेको नाक्ती ठेयब तुराही का ग्रीब। मिनु अस्सुर रागीम जाम्शो नु इजीप्त रागीम खेदा पचा पुंडसीशो मुरपुकी जाक्नीम। मिनु यरूसलेम डा परमप्रभु यावे आ डांडामी आ कली ठेयब सेल्नीम। यसैया ११:११-१२; योएल ३:५

## 28

सामरीया कली निसाफ

- 1 आबी, गे एफ्राइम डा दुक्शो ठेयब लेश्शो मुरपुकी, इन दारस फू खोदेशो पा बेक्ब। मेकेर ब्रोव्रशो जाइब नु दुक्शो मुर ला बाक्नीम। अडगुर शांबुम मेको आन कली नेक्शो बाक्ब।  
 2 कोव्रडीन, परमप्रभु नु बोल्यो नु सक्ति पाइश्शो का बाक्ब। मेको मुप्स ब्वाइसीशो फश गिवार खोदेशो बाक्ब। शुश रेड ब्वाइसीशो फश गिवार खोदेशो बाक्ब। परमप्रभुमी मेको कली रागी तार तोक्ब। २राजा १७:५-६  
 3 एफ्राइम डा दुक्शो मुर आन दारशो माला कली दिम्शा ताइश्शा पाइनीम।  
 4 मिनु मेको आ पिया डा दारस, फू खोदेशो पा बेक्ब। मेकेर ब्रोव्रशो जाइब ला बाक्नीम। मेको नेल्ल क्येडा डौंडती मीशो फोव्रशी खोदेशो बाक्नीम। सुम मेको ताइबा, मेकोम सेक्शा ब्वाइब।  
 5 मेको नाक्ती मुर नेल्ल आन परमप्रभु यावे आ लीशो मुर आन कली छेडछेड पा ब्रशो सिरपेच नु पियाम चुइक्तीके दुम्ब।  
 6 निसाफ पाइब कली ठीक पतीक सोक्त दुम्ब। मिनु लडाइ पाइब आन कली सहर डा लाप्चो रे खेरतीक सक्ति गेब दुम्ब।

चढेब नु परमप्रभु आ लोव्र पाइब

- 7 चढेब नु परमप्रभु यावे आ लोव्र पाइबपुकी यो अडगुर शांबुम दुक्नीम। राकसीम दुक्शा, दिड दाड गोल्चा चिक्शा गाक्शो बाक्नीम। चढेब नु परमप्रभु यावे आ लोव्र पाइबपुकी राकसीम दुक्शा गाक्नीम। अडगुर शांबुम दुक्तीके आन मिम्तीके ग्रांये माग्ये दुम्त। मेकोपुकी राकसीम दुक्शा, दिड दाड गोल्चा चिक्शा गाक्शो बाक्नीम। मेकोपुकीम फश लोव्र ला पाइनीम। मतुडक्थु दूली निसाफ पाइनीम।  
 8 मेको आन जतीक मेर नेल्ले आन मेशोम ब्रीशो बाक्नीम। नेल्ल ग्रांया दिशो बाक्ब।

9 मेकोपुकीमी सु आन कली जोक्तीक तुडक्तीक लोत्र रुप्पाइक्नीमी? सु कली आन देशो लोत्र शेंनीमी डा? मेकोपुकीमी नक दूध प्रोइशो आल आन कली शेंचा चिकन्ते?

10 मेकोपुकीमी “परमप्रभु आ ब्रेक्शा अरेशो पावो कि पावो, पावो कि पावो, पावो कि पावो, पावो कि पावो। इच्का एकेर इच्का मेकेर” देनीमी।

11 थमा पा, मेकोमी अर्को रागी डा मरुप्चा डा लोत्र पा, आ मुर आन कली शेंब। ब्यवस्था २८:४९; येरमीया ५:१५; १कोरिन्थी १४:२१

12 मिनू परमप्रभुमी मेको आन कली “मेको थुं नाइक्तीक बाक्ब। गे दशो मुर आन कली नाइक्चा गेने। थुं बारपाइक्तीक एकोन बाक्ब” देत। मो हना यो मेकोपुकीमी मनंथु मटीमे। यसैया ३०:१५; मती ११:२८-२९

13 मोपतीके परमप्रभु यावे आ लोत्र मेको आन कली यो आन खोदेशो पा मरुप्चा डा लोत्र दुम्ब। मिनू “ब्रेक्शो, अरेशो पावो कि पावो, पावो कि पावो, पावो कि पावो। इच्का एकेर, इच्का मेकेर” देशो बाक्ब। मिनू मेकोपुकी लशा, नोले गे गोल्शा आन गुड खोइली जिक्नीम। मिनू ब्वारदम रेशशा, ग्याइक्चा पुंइसीनीम।

14 मोपतीके गे शुक्शी पाइबपुकी, परमप्रभु यावे आ लोत्र नेनीन। गे यरूसलेम डा मुर आन कली हुकुम पाइनीनी।

15 मिनू गेपुकीमी “गोपुकीमी बेक्पाइक्ब नु कबल पमुशो बाक्नीकी। बेक्शो मुर आन बाक्तीके नु सल्ला पाइतक। ठेयब श्येत जाक्त हना यो, आंइ कली मारेड मडुम्ब। मारदे हना जोल पतीके नु गारशा खुइशो बाक्नीकी। दूली पतीकेमी फाम्सीशो बाक्नीकी” देतीनी।

16 मोपतीके परमप्रभु, परमप्रभु यावेमी “कोत्रडीन गो सियोन डांडाम जग फुल्लु का वोइक्नुड। मेको रिम्शो नु बोल्यो सुर डा फुल्लु बाक्ब। मेको शुश क्येट लाइब थम बोल्यो जग डा फुल्लु बाक्ब। सु सु मेको कली थमा सुइक्नीमी, मेको आन थुं लुकच मलाइब। भजन संग्रह ११८:२२; एफिसी २:२०; यसैया ७:९

17 गो ठीक निसाफ कली गारो प्रोत्रची ना क्युक्तीक डोरी खोदेशो सेल्लुड। मिनू ठीक पतीके कली घन्टी खोदेशो सेल्लुड। मिनू मुप्सीम मेको जोल पा खुइक्तीके खतम सेल्लुब। ब्वाक्कुमी फाम्सीतीके योल्ब।

18 मेना इन बेक्पाइक्ब नु पशो कबल नुप्ब। इन बेक्शो मुर आन बाक्तीक नु पशो सल्ला जाम्ब। मिनू मेको हिंचा डा श्येत जतीक जाक्शा, इन कली सुम्ब।

19 मेको गिश खेयप जाक्त हना यो, इन कली सुम्ब। मारदे हना मेको सुनी कुस कुस जाक्ब। नाक्दो नाक्ती यो जाक्ब। मेको लोत्र रुप्चा चहिं शुश हिंचा डा बाक्ब।

20 मुर दिसामानु ‘इप्तीके आइक्च दुम्ब। फेक्तीक वामी सुम्समानु’ आन रां मसुम्ब” देत।

21 मारदे हना परमप्रभु यावे पेराजीम डांडाम बोक्शो खोदेशो पा बोक्ब। मेको गिबोन डा बेसीम गाइशो खोदेशो पा गाइक्ब। मोपा मेकोम आ गेय पाइब। मेको आ गेय छक लाक्चा डा बाक्ब। मिनू मरुप्चा डा बाक्ब। २सामुएल ५:२०; १इतिहास १४:११; १इतिहास १४:१६

22 शुक्शी लोत्र मपने। मो पाइतीनी हना इन कली फ्रेशो डोरी खांडसीब। मारदे हना परमप्रभु, मुर नेल्ल आन परमप्रभु यावेमी “रागी नेल्ल खतम सेल्लुड” देशो नेता। यसैया १०:२२-२३

23 नेनीन, आं लोत्र नेनीन। नोफा दाइशशा, होस पा बाक्शा आं लोत्र नेनीन।

24 मार, शोक्चा कली ब्यफ वाक्ब मुरुमी गेना हना यो ब्यफ वाक्बा? मार, गेना हना यो कुटीम दोशा, रू थेलनीनी?

25 डल्ला प्रोल्चा कली लेडको पशा, सोप नु मस्ला मशोक्नीमी? चेरब मशोक्नीमी? क्योत्रज रूम क्योत्रज शोक्नीम। मिनू मोत्रल कली भूस फ्राइनीम।

26 मारदे हना आन परमप्रभुमी मेको आन कली रिम्शो पा शेंताक्ब।

27 सोप कली दांड मपाइनीम। मस्ला कली तूलीमी मतुप्नीम। सोप कली आइक्च कोक्के नु मस्ला कली सिरकनामी तुप्नीम।

28 शोब्ले चोचा कली चेरब हिल्लीम। तन्न मतुप्नीम। फस सेल्चा कली दांड मपाइनीम।

29 मेको मोदेशो नेल्ल मुर नेल्ल आन परमप्रभु यावेमी शेंशो बाक्ब। मेको अर्ती गेतीकेम छक लाक्चा डा नु तुडक्तीकेम नेल्ल क्येडा ठेयब बाक्ब।

## 29

अरीएल सहर कली श्येत दुम्शो

1 आबी, अरीएल, अरीएल सहर। दाऊद मेकेर बाक्शो बाक्त। गे मेकेर बर्स बर्स बाक्शा, चाड मानेन मानेन बाक्तीनी। अरीएल चढेतीक बाक्तीके यरूसलेम आ याइनी नें बाक्ब।

2 मो हना यो, गो मेको कली श्येत गेनुड। मेकेर डाक्शा, रोका पाइनीम। यरूसलेम आं कली अरीएल का बाक्ब।

3 गो दाऊदम खोदेशो पा इ कली पुम्पाइक्नुड। गारो डोइक्चा कली लाइशो खिं सेल्पाइक्नुड। गो मोदेशो गेय शुश पपाइक्नुड। लूका १९:४३

4 गे उड खप रे लोत्र पाइक्नेवे। मिनू फुरक रे पा ब्वाक्नेवे। इ लोत्र फुरक रे नेंसीब। इ सेंदा वोल आन सेंदा खोदेशो पा खप आगा रे यूब। इ लोत्र फुरक आगा रे पा आइक्च सेंदा पा नेंसीब।

5 तन्न इ जोरी सत्रु आन हुल फुरक खोदेशो पा शुश दुम्नीम। सक्ति पाइशोपुकी बेरशो भूस खोदेशो दुम्नीम। मेको नेल्ल याम कामी दुम्ब।

6 मिनू मुर नेल्ल आन परमप्रभु यावे इ कली गुम्थ जाक्ब। मेको बुंब, खिनु ठेयब रेयके नु जाक्ब। मेको हिरशो फश गिवार नु ठेयब मी नु जाक्ब।

7 रागी रागी डा शुश मुरुमी अरीएल नु लडाइ पाइनीम। लडाइ पाइब नेल्लेमी मेको आन बोल्यो दरवार प्रेशा, श्येत गेनीम। मेको डोमु तशो नु नाकदो कोइतीक तशो खोदेशो पा दुम्ब।

8 दोदेशो पा शोत्रलु बेकशो मुर आन डोमुम जशो ताइनीमी, मिनु सेंसीमानु शोत्रलुम बाक्नीमी। दोदेशो पा तूत दाकब मुरुमी डोमुम तूशो ताइनीमी, मिनु सेंसीमानु आन लाक्चा सोत्रशो बाक्बा, मोदेशो पा सियोन डांडा नु लडाइ पाइब रागी रागी डा मुरपुकी दुम्नीम।

परमप्रभु यावे आ गेय

9 छक लाक्शा कोत्रडीन। मिक्च क्रिप्शा, मिक्च मताइब दुमीन। दुक्शो दुमीन। तन्न अडगुर शांबुम ममाइ। गोल्चा चिकशा गाक्कीन, तन्न राकसीम ममाइ।

10 मारदे हना परमप्रभु यावेमी इन तार शुश निन्द्रा पपाइक्ब सोक्ती मोइश्शो बाक्ब। मेकोमी गे परमप्रभु यावे आ लोत्र पाइब इन कली मिक्च मताइब सेल्लु। मिनु इन पिया सुम्तु।

11 मेको इन कली कोइशो लोत्र नेल्ले, इन कली छाप थोक्शो किताब खोदेशो दुम्त। मेको पढेस जोक्ब कली “पढेवो” दे गेतीनी हना, मेकोमी “गो पढेने मचाप्नुड, मारदे हना एको छाप थोक्शो किताब बाक्ब” देब।

12 मेको पढेस मजोक्ब कली गेशा “एको पढेवो” देंतीनी हना, मेकोमी “गो पढेस मजोक्नुड” देब।

13 परमप्रभु यावेमी “एको मुरपुकी लोत्र पशा आं नेक्था जाक्नीम। मिनु आन शोत्रमी आं कली ठेयब सेल्लनीम। तन्न आन थुंम चहिं आं क्येडा डोन बाक्नीम। मेको आन आं कली मान पतीके मुर आन शेंशो ला बाक्ब। यसैया १:१५; यसैया ५८:२-३; मती १५:८-९

14 मोपतीके गो एको मुर आन दातेमी छक लाक्चा डा, हिंचा डा नु मरुप्चा डा गेय पाइनुड। मेको आन जोक्ब तुइक्ब मुर आन तुइक्तीके जाम्शा लाइब। निप्स खाप्शो गेय पाइब आन निप्स खाप्तीके खुइक्चा पुंडसीनीम। १कोरिन्थी १:१९; मती ११:२५

15 गे सु सुमी आंमा मिम्शा पशो गेय परमप्रभु यावे आ डोंइती खुइक्नीनी नु छिडछिडम गेय पशा, इं कली सुम ताइबा डा? इं कली सुम तुइक्बा डा?” देंतीनी। भजन संग्रह १०:११

16 गे दूली पाइबपुकी, खप के ग्योब सेल्ल मुर खप खोदेशो मिम्सीबा? मिनु सेल्लो थोत्रकमी आ कली सेल्ल कली “मेकोम आं कली मसेल्यी” देबा डा? सेल्लशीशोमी सेल्ल कली “मेको मारेड मरुक्ब बाक्ब” देने चाप्बा? यसैया ४५:९

नोले रिम्शो दुम्ब, दे आस पशो

17 मिनु इक्का नोले लेबानोन फल फुल रू दुम्ब। फल फुल रू चहिं ब्वाकी खोदेशो दुम्ब।

18 मेको नाक्ती नोफा मनेबपुकी किताब डा लोत्र नेंनीम। गेना हना यो छिडछिडम बाक्ब, मिक्च मताइबपुकी मिक्च ताइब दुम्नीम। यसैया ३५:५; मती ११:५

19 मिनु ब्रेम्शो मुर परमप्रभु यावे कली मिम्शा ग्येरसीनीम। मिनु क्येट मथीबपुकी इस्राएली आन परमप्रभु यावे कली मिम्शा थाम्पा ग्येरसीनीम।

20 मारदे हना हिंचा डा मरिम्शो पाइब मलीनीम। शुक्शी पाइबपुकी जाम्शा लाइनीम। मरिम्शो पचा माल्बपुकी साइक्चा पुंडसीनीम।

21 मेकोपुकीमी मुर आन कली निसाफ पतीकेमी ब्रुपाइक्नीम। मिनु ठीक पाइब नु निसाफ पाइब कली ब्वारदम रेप्पाइक्नीम। मारेड मरिम्शो मपाइब कली मोशा दोस गेपाइक्नीम। आमोस ५:१०

22 मोपतीके अब्राहाम कली प्रोइब परमप्रभु यावेमी याकूब आ खिं डा मुर आन कली “मुल रे याकूब आ खिं डा मुर मुने मदोक्नीम। आन कुल ग्येरसीशो तांडसीनीम।

23 मिनु मेकोमी आन आल आन दातेम, आं पशो गेय, ताइनीम। मिनु आं नें ठेयब सेल्लनीम। याकूब आ का ला बाक्शो परमप्रभु यावे कली तशा मान पा हिंनीम। इस्राएली आन परमप्रभु कली तशा मान पा हिंनीम।

24 मिनु काइ मरुक्ब मुरपुकी रूक्ब दुम्नीम। मिनु गन गन पाइबपुकी परमप्रभु आ शेंतीके लोत्र नेंनीम” देत।

## 30

मुरुम इजीप्त कली थमा सुइश्शो

1 मिनु परमप्रभु यावेमी “आबी, गे काइ मटीब आलपुकी, गे आंम इन मिम्शो पाइनीनी। तन्न आं देशो मटीनीनी। गे कबल का पाइनीनी। तन्न आं दाक्शो मिम्शो कबल ममाइ। पाप तारी पाप तेम्नीनी। यसैया १:२

2 मेकोपुकीमी आं अर्ती आ पर्वम हिल्लो मपथु, इजीप्त रागी लाइनीम। मिनु मेकेर डा पिप फाराओम वारच पपाइसीनीम। मेकोपुकीमी इजीप्त रागीम फाम्सीचा माल्नीम। २राजा १८:२१

3 मिनु फाराओ आ वारच पतीकेम इन कली मुने तोक्ब। मिनु इजीप्त रागीम फाम्सीचा माल्तीके इन कली थम आइक्च सेल्लब।

4 मिनु इजीप्त डा ठेयब मुरपुकी सोआन नु मेको आन सोइश्शोपुकी हानेस जाक्दीश्शो बाक्नीम।

5 मेको नेल्ल मुने दोक्नीम। मारदे हना इन कली वारच पने मचाप्थु, शोर गाक्शो दुम्नीम। तन्न इन कली मुने दोक्ब नु शिशी मताइब सेल्लनीम।

6 मिनु परमप्रभु यावेमी दक्खिन डा नेगेब डा जन्तु आन पर्वम यसैया कली मेको रागी हिंचा डा नु श्येत डा रागी बाक्ब। मेकेर गुप्सनी नु ग्रीब गुप्स, बुप्स नु बीस पाइश्शो बेरब बुप्स बाक्नीम। मिनु मुरपुकीमी आन शोप गधा आन तारी नु शुश



क्येट लाइब थोत्रक दलओठ आन तारी कुरपाइशशा गाक्नीम। मेको शोर गाक्शो नु वारच मपाइब आन कली गेचा कली कुरपाइक्नीम। ब्यवस्था ८:१५

7 मारदे हना इजीप्त डा मुर आन वारच पतीके शोर गाक्शो नु थमा पा वारच मपतीके बाक्ब। मोपतीके गो मेको कली लोत्र मपाइब, राहाब, दे नें वोइक्ता” दैत। भजन संग्रह ८९:११

परमप्रभु कली मटीबपुकी

8 मिनु परमप्रभु यावेमी यसैया कली “मुल गे लावो, मेको मुर आन डोंइती आं लोत्र फुल्लु तार ब्रेक्टो। मिनु किताबम ब्रेक्टो। नोले सम्म लील, दे नु गेना हना यो सांकछी दुम्पाइक्चा कली ब्रेक्टो।

9 मारदे हना एको मुर काइ मटीब बाक्नीम। थमा मसुइक्ब आल बाक्नीम। मेको आलपुकीमी परमप्रभु यावे आ शेंतीक लोत्र नेंचा मदाक्नीम।

10 मेकोपुकीमी नोले दुम्ब लोत्र ताइब आन कली ‘मतने। मकोइडीन’ देंनीम। मिनु परमप्रभु यावे आ लोत्र पाइब आन कली ‘ठीक पचा आ पबंम आंड कली लोत्र मपने। जोल पा हना यो, आंड दाक्शो लोत्र ला पने। आमोस २:१२

11 परमप्रभु यावे आ लां प्रोनीन। एर ओथ लने। इस्राएली आन का ला बाक्शो परमप्रभु आ पबंम मशेंदीन’ देंनीम” दैत।

12 मोपतीके इस्राएली आन का ला बाक्शो परमप्रभुम “मारदे हना गेपुकीमी आं दंशो नेंचा मदाक्नीनी, मुर आन कली दिप्तीके नु दूली पतीके कली ला थमा सुइक्नीनी। मिनु मेको पाइनीनी।

13 मोपा इन मरिम्शो पशो ब्रेत्चा चिक्शो लाइशशो गारो खोदेशो दुम्शो बाक्ब। मेको इन मतुइक्थु याम काम ब्रेप्ब।

14 दोदेशो पा मुरुमी खप के ग्योब बोल्यो पा प्रोलीनी, मेको के चुप्लु रे मी कोइला गुप्चा नु कुवा रे ब्वाक्कु ताप्चा डा टुक्रा का यो मलीबा, मोदेशो पा प्रोल्चा पुंडसीनीनी” दैत।

15 मिनु परमप्रभु, इस्राएली आन का ला बाक्शो परमप्रभु यावेमी “आं गे लेशशा, सिक्सी पा बाक्नी हना, ब्रोंइनी वा। सिक्सी पा बाक्तीनी नु थमा सुइक्तीनी हना, गे बोल्यो दुम्नी वा। तन्न गे मटिनी। यसैया ७:४; प्रस्थान १४:१४

16 गेपुकीमी ‘ममाइ, गो शारा डोइशशा प्रोक्नीकी’ देंनीनी ‘मोपतीके गे प्रोक्चा माल्नीनी” दैत। मिनु गेपुकीमी ‘रीब पा दोरब शारा डोइक्नीकी’ देंनीनी। मोपतीके इन कली खेदा पाइबपुकी यो दोरनीम।

17 मिनु मुर कामी हिंच कोइशोमी, हजार का मुर प्रोक्नीम। ५ जना मुर्म हिंच कोइशोमी नेल्ल प्रोक्शा, डांडा तारी कोक्के का खुक्शो खोदेशो पा लीनीनी। डांडा तार डा छेदर का खोदेशो पा लीनीनी” दैत। ब्यवस्था ३२:३०

परमप्रभुम सियोन नु कबल पशो

18 मुल सम्म परमप्रभु यावेमी इन कली शिशी पचा कली रिम्ब। इन कली आ दाक्तीके कोइचा कली बोक्ब। मारदे हना परमप्रभु यावे ठीक निसाफ पाइब परमप्रभु बाक्ब। सु सुम मेको कली रिम्मीमी, मेको ग्येरसीशो बाक्नीम।

19 यरूसलेमम बाक्ब सियोन डा मुरपुकी, गे लेशा मडाक्नीनी। मेकोमी इन ब्रेशशो नेंशा, इन कली थमा पा शिशी पाइब। इन लोत्र नेंशा, लोत्र लेप्ब। यसैया ६५:२४

20 परमप्रभुमी इन कली श्येत डा शोब्ले नु श्येत डा ब्वाक्कु गेप्तु हना यो, मुल रे इन कली शेंब मखुइसीब। गेपुकीमी इन कली शेंब कली ताइनीनी।

21 मिनु गेपुकीमी “ग्युरा लां लड कों, पेरा लां लड” देंनीनु, इन नोले लोत्र कामी “लां मेकोन बाक्ब, मेको लां गाक्कीन” दंशो नेंनीनी। ब्यवस्था ५:३२

22 मेना इन मुशा सेल्शो चांदी नु सुनम गिल्लो मूर्तिपुकी ग्रंथा दीनीनी। गे मेको आन कली ग्रंथा दिचा डा वा खोदेशो पा ताइक्नीनी। मिनु मेको आन कली “डोन लने” दे ताइक्नीनी। यसैया २७:९

23 मिनु परमप्रभुमी इन शोक्शो रू कली रेउ यिपाइशशा, अन्न सिप्पाइक्ब। मिनु अन्न ग्रेल्शा, शुश जचा ताइनीनी। मेना इन बी ब्यफ टेयब दिंममी जोइनीम।

24 इन गेय पपाइशशो ब्यफ नु गधापुकीमी ग्योलोम क्राप्शा, हिक्सी सुप्शो जचा थोत्रक जाइनीम।

25 आइक्च नु टेयब डांडा नेल्ल रे ब्वाक्कु बुक्शा, खोल्सा नु खोला यिशा, टेयब लडाइ दुम नाक्ती गारो डा लाइशशो खिं यो ब्रेत्नीम।

26 मिनु तास्ला आ छेडछेड नां आ छेडछेड खोदेशो दुम्ब। नां आ छेडछेड चहिं ७ ओटा नां आ छेडछेड खोदेशो दुम्ब। मेको ७ नाक्त डा छेडछेड दुम्ब। मेना परमप्रभु यावेमी आ मुर आन गार फ्रेंब। तुप्शो गार सापाइक्ब।

अस्सुर कली निसाफ पशो

27 कोत्रडीन, परमप्रभु यावे डोन रे जाक्ना जाक्न बाक्ब। आ गाइशशो मी खोदेशो पा ब्रशा, शुश कुन गूब। आ शोत्र चुरचामी ब्रीशो नु आ लें ग्राव गु दाक्ब मी खोदेशो बाक्ब।

28 आ सास शुर सम्म खुम्ब बारशो खोला खोदेशो बाक्ब। मिनु मेकोमी रागी रागी डा मुर आन कली खतम सेल्तीक ग्योलोम क्राप्शा, आन शोत्रमी हेंथे लां कोइब लगम पाइक्ब।

29 गेपुकी चाड मानेतीक नाक्दोम कुम्सो पशो खोदेशो पा ग्येरसीनीनी। गेपुकी बांसुमी ताप्बपुकी नु परमप्रभु यावे, इस्राएली आन सेरथे फुल्लु आ डांडा लाइब खोदेशो पा ग्येरसीशो मुर बाक्नीनी। ब्यवस्था १६:१४

30 मिनु परमप्रभु यावेमी आ टेयब सेंदामी लोत्र पशा नेंपाइक्ब। मेकोमी गाइशशा चुरशा, आ गुइ याम पाइशशा, मारेइ मारेइ नेक्ब मी ब्रपाइशशा, बुंबु पपाइशशा, रेउ नु मुप्स यिपाइशशा कोइब।

31 मिनु परमप्रभु यावेमी अस्सुर डा मुर आन कली कोक्केम तेप्ब। मेको आ सेंदा नेंशा, अस्सुर डा मुर साप्पान हिंनीम। रराजा १९:३५-३७

32 मिनु परमप्रभु यावेमी गिश खेयप तुप्बा, मीश खेयप खैजडी नु बीना ताप्शो नेंसीब। परमप्रभु आंमा अस्सुर डा मुरपुकी नु लडाइ पाइब।

33 मारदे हना डोंइती रे ठेयब चोतीके का सेल्शो बाक्त। मेको थमा पा पिप कली सेल्शो बाक्त। मेको शुश लुक्च लशो नु ब्रेम्शो बाक्त। मेकेर मी नु शुश शी बाक्त। परमप्रभु यावे आ मुइश्शो गन्धक खोदेंशो पा मेको मी ब्राइब।

## 31

परमप्रभुमी यरूसलेम कली कोव्रब

1 आबी, इजीप्त रागी कली “चारच पाइक्की” दे लाइबपुकी, मेकोपुकी शारा कली थमा सुइक्ब बाक्नीम। बग्गी कली थमा सुइक्नीम। मारदे हना मेकेर शुश बाक्नीम। शारा डोइक्ब आन कली थमा सुइक्नीम। मारदे हना मेको शुश बोल्थो बाक्नीम। तन्न मेकोपुकीम इस्राएली आन का ला बाक्शो परमप्रभु यावे कली ममिम्थु, हिल्लो मपाइनीम। यसैया ३०:१-२; भजन संग्रह २०:८

2 मो हना यो परमप्रभु तुइक्ब बाक्ब। मिनु श्येत दुम्पाइक्ब। आ मिम्शो पशा, मरिम्शो पाइब आन खिं नु मेको आन कली चारच पाइब नु लडाइ पाइब। आमोस ३:६; गन्ती २३:१९

3 इजीप्त डा मुर, मुर ला बाक्नीम। मेको परमप्रभु मनम। आन शारा बेक्ब बाक्नीम। सोक्त मनम। परमप्रभु यावेमी आ गुइ दिंदानु, चारच पाइब दाइल पांडसीनीम। मिनु चारच पपांडसीब नेल्ले कालेमी बेक्नीम।

अस्सुर कली निसाफ

4 मिनु परमप्रभु यावेमी आं कली “गुप्स कि गुप्स आ चाइक्ब आन सिखार तारी डरर डरर पाइनीमी। गोठलापुकीमी मेको आन सिखार रोइक्चा, दे जाक्तेकम हना, गुप्स मेको आन ग्रीशो नेंशा महिंनीम। मेको आन पशो रेयकेमी गुप्स आन कली मप्रोक्पाइक्ब। मोपा मुर नेल्ल आन परमप्रभु यावे सियोन डांडा नु आ आइक्च डांडामी लडाइ पथ यीब।

5 दोपा चिक्बपुकीमी आन चाइक्ब आन तार फिल फिल पा कोव्रथ बेरनीमी, मोपा मुर नेल्ल आन परमप्रभु यावेमी यरूसलेम कली कोव्रब। मेको कली कोव्रशा, प्रॉइशा, आ नेक्था बाक्शा खाल पाइब। मत्ती २३:३७

6 ए इस्राएली, गे हेंथे पा शुश डोन लाइबपुकी, परमप्रभु गे लेतीन। येरमीया ७:३-५

7 मारदे हना मेको नाक्ती गे नेल्लेमी इन सुन नु चांदी के मूर्ति नेल्ल बेरपाइक्नीमी। गे मेको पाप पा इन आंम गुइमी सेल्लतीनी। यसैया २:२०

8 मेना अस्सुर तरवारम साइक्चा पुंडसीब। तन्न मेको तरवार बेक्शा लाइब मुर के ममाइ। मेकोमी नेल्ल आन कली खतम सेल्ब। मेको तरवार तशा मुर नेल्ल प्रोक्नीम। मिनु आन ठिटापुकी वाइल दुम्नीम। यसैया ३७:३६

9 अस्सुर डा पिप, सेरथे फुल्लु खोदेंशो बोल्थो बाक्त हना यो, हिंशा प्रोक्ब। आ कप्तान आन छेदर प्रॉइशा प्रोक्नीम। परमप्रभु यावेमी आं चुप्लु सियोनम नु आं मी यरूसलेमम बाक्ब” दंत। ब्यवस्था ३२:३१

## 32

नोले डा राज्य

1 कोव्रडीन, नोले ठीक पाइब पिप काम सासन पाइब। ठेयब मुर नेल्लेमी ठीक निसाफ पाइनीम। यसैया ३३:१७; येरमीया २३:५

2 मिनु मेको मुर नेल्ल फश रे खुंडसीतीके, रेउ यिमेनु फाम्सीतीके, सोव्रशो रागीमी ब्वाक्कु यितीके नु थम होश रागीमी ठेयब सेरथे फुल्लु आ वांकु खोदेंशो बाक्नीम।

3 कोव्रब मुर आन मिक्च ब्राब्रा मदुम्नीम। नेंबपुकीमी नोफा दाइश्शा नेंनीम।

4 रिम्शो पा रुप्ने मचाप्बपुकीमी तुइक्तीक शेंनीम। लेम्से पाइबपुकी रिम्शो पा ब्वाक्ने चाप्नीम। यसैया ३५:६

5 मेना मुरुमी मूर्ख आन कली रिम्शो थुं पाइश्शो मुर मदेंनीम। खुइ नु जोल पाइब आन कली हाइश्शो मुर मदेंनीम। हितोपदेस २८:१६

6 मारदे हना मूर्ख मुर मूर्ख लोव्र ला पाइनीम। मेको आन थुमी मरिम्शो पचा ला मिम्शा बाक्नीम। परमप्रभु यावे कली मटीनीम। मेको आ पर्वम दूली शेंनीम। शोव्रलु बेक्ब आन थुं श्येत्थ लीपाइक्नीम। मिनु तूतू दाक्ब आन कली तूचा मगेनीम।

7 मोदेंशो मरिम्शो पाइब आन गेय मरिम्शो बाक्ब। परमप्रभु यावे आ अरेशो मटीबम “दोपा आं दाक्शो पने चाप्नुडा?” दे प्रुडग आन कली जोल पा नु मारदे मथीबम ठीक लोव्र पाम्तेकम हना यो, मेको आन कली खतम सेल्लनीम।

8 तन्न रिम्शो थुं पाइश्शो मुरपुकीमी रिम्शो गेय ला मिम्नीम। मिनु गेना हना यो रिम्शो गेय पा बाक्नीम।

परमप्रभु आ सोक्त जाक्ब

9 गे ठेयब लेश्शो मीश मुरपुकी बोक्कीन। मिनु आं लोव्र नेनीन। गे काइ महिंथु बाक्ब तमीपुकी इन नोफा दाइश्शा, आं लोव्र नेनीन। यसैया ३:१६-४:१

10 गे काइ महिंथुपुकी बर्स का नोले श्येत जशा खिंखि पाइनीनी। मारदे हना अडगुर सेक्चा मताइनीनी। फल फुल मसिल्लीम।

11 गे ठेयब लेश्शो मीश मुर खिंखि पने। गे काइ महिंथुपुकी खिंखि पा हिनीन। इन वा प्रुइश्शा अरन्डी फेक्सीन।

12 इन रिम्शो रू नु अडगुर बोट आन पर्वम इन कुचु तुप्शा डाक्कीन।

13 आं मुर आन रूम चू नु चोंक वानीम। ग्येरसीशो मुर आन खिं नु सहर नेल्ल मोदेंशो दुम्ब।

14 मारदे हना दरवार डा मुर नेल्ल प्रोक्नीम। शुश मुर बाकशो सहर श्येत्थ दुम्ब। ओफेल माइशशो ग्येत्थ लुकच गाक्तीक लां नु मेकेर खाल पाइब मुर आन बाक्तीक गेना हना यो पुक्खी दुम्नीम। मेकेर ब्वाकी डा गधा ग्येरसीशा बाक्नीम। मिनु क्यारश भेडा आन जोतीक दुम्ब।

15 मिनु नोले परमप्रभु यावेमी आ सोक्ती ई तार मोइक्ब। मेना मुर मबाक्तीके गोरशो रागी ग्रेल्शो रू दुम्ब। मिनु मेको ग्रेल्शो रू ब्वाकी खोदेशो दुम्ब। यसैया ४४:३; यसैया २९:१७

थुं नाइशशा बाक्तीक राज्य

16 मेना मुर मबाक्तीके रागीमी ठीक निसाफ पाइनीम। ठीक पाइबपुकी ग्रेल्शो रूमी बाक्नीम।

17 ठीक पतीकेम थुं नाइक्चा गेब। ठीक पतीके आ सित्तीके सिक्सी पा बाक्चा नु गेना हना यो थमा सुइक्चा बाक्ब।

18 आं मुरपुकी थुं नाइशशा, महिंथु बाक्तीकेम बाक्नीम। लडाइ मदुम्थु, रिम्शो बाक्तीकेमी सिक्सी पा बाक्नीम। येरमीया ३३:१६

19 तन्न ब्वाकी नेल्ल जाम्शा लाइब। सहर श्येत्थ दुम्ब।

20 ब्वाक्कु आ नेक्था वांचेर शोकबपुकी गे ग्येरसीशो मुर बाक्नीनी। गे गधा नु बी ब्यफ आन कली जोथ मो सोइक्ने चाप्नीनी।

### 33

सियोन कली खतम पोक्ब रे प्रोंइशो

1 आबी, गे खतम पोक्ब, मुल सम्म गे खतम पोक्चा मपुंडसीशो बाक्नेवे। गे रोइक्ब बाक्नेवे। तन्न सुइमी मारेइ मरोइक्थ, गे खतम पोक्चा पुंडसीनेवे। मिनु इ रोइक्चा नुप्त हना, इ मारेइ मारेइ रोइक्चा पुंडसीनेवे। मती ७:२

2 परमप्रभु यावे, आंइ कली शिशो पाइक्की। गो इन कली रिम्ना रिम्न बाक्नीकी। गे सुनी कुस कुस आंइ सक्ति दुमीन। श्येत जची ना आंइ कली प्रोंइब दुमीन।

3 शुश रेयके नेशा, जात जात डा मुर प्रोक्नीम। इन सक्ति तशा, रागी रागी डा मुर एर ओथ ब्राइनीम।

4 मेकोपुकीमी सल्ला खोदेशो पा शुश मारेइ मारेइ रोइक्नीम। दोपा सल्ला प्रेक्शा दोरनीमी, मोपा मुरपुकी प्रेक्शा रोइक्चा कली दोरनीम।

5 परमप्रभु यावे मान ताइब बाक्ब। मेको इर, आ बाक्तीकेमी बाक्ब। मेकोमी सियोन डा मुर आन कली ठीक निसाफ नु ठीक पतीके पपाइक्ब।

6 मिनु सियोन इ नाक्ती नेल्ल रिम्शो दुम्ब। मेना शुश पाप रे प्रोंइतीके, तुइक्तीके नु जोक्तीक गे नु बाक्ब। सियोन डा मुर आन शोंप परमप्रभु यावे कली मान पा हिंचा बाक्ब।

7 नेनीन, मेको आन बोल्यो मुरपुकी लांम ग्रीनीमी। गारपइक्तीक लोत्र चाक्ब मुर हुइ हुइ पा डाक्नीम। यसैया २९:१

8 टेयब लां श्येत्थ दुम्शो बाक्नीम। मुर मेको लांम मगाक्नीम। गारपाइक्तीक लोत्र क्याम्सीशो बाक्ब। सांक्छीपुकी महिक्सीब दुम्शो बाक्नीम। आन कसम जशो जाम्त। आन पचा माल्शो गेय मपाइनीम।

9 रागी रोंका पशा, गोरशो दुम्शो बाक्ब। लेबानोन मुने दोक्शा, बेक्त। शारोन गोरशो रागी खोदेशो दुम्त। बाशान नु कारमेलम आस सफा तोक्नीस।

10 परमप्रभु यावेमी “मुल गो बोक्नुड। गो गेय पचा गोइनुड। गो मान पाइक्चा पुंडसीनुड।

11 गेपुकीम भूस के कोव्रज कुरशा, पराल थीनीनी। इन सास मी बाक्ब। मेकोमी इन कली दाक्ब।

12 मिनु जात जात डा मुर बुलु खोदेशो पा ब्राइनीम। मेकोपुकी क्योरशो चू मीम जेशो खोदेशो पा जेत्या पुंडसीनीम।

13 गे डोन रागी डा मुरपुकी, गो मार पशो बाक्नुडा, मेको नेनीन। गे आं नेक्था बाक्बपुकी आं सक्ति तुइक्तीन।

14 सियोनम बाक्ब पाप पाइबपुकी हिंनीम। परमप्रभु यावे आ अरेशो मटीब खिंखि पाइनीम। सु खतम पोक्ब मी नु ब्रोंइशा बाक्ने चाप्बा? आंइ दातेमी सु गेना हना यो ब्रशो मी नु ब्रोंइशा बाक्ने चाप्बा?” दैत। यसैया १०:१७; येरमीया २३:२९

15 सु ठीक पाइबा, रिम्शो थुं डा लोत्र पाइबा, गेयी कि गेयी, दे क्येट मताक्बा, सुम घूस मजाइबा नु “हुश खाक्श पोक्थ” दैमानु, मेको आन लोत्र मटीबा नु मरिम्शो पाइब आन पशो काइ तचा मदाक्बा। भजन संग्रह १५:२; भजन संग्रह २४:३-४

16 मेको इर डा मुर बाक्नीम। मेको आन खुंडसीतीके सेरथे फुल्लु के सेल्शो दरवार बाक्ब। मेकोमी आन जचा थोत्रक ताइनीम। मेको आन ब्वाक्कु बुक्तीके शुश दुम्ब।

मान ताइब पिप आ रागी

17 गेपुकीमी पिप कली आ दारसम ग्योम्सीशा ताइनीनी। मिनु मेकोपुकीमी टेयब रागी कली ताइनीम।

18 मिनु गेपुकी इन डोंइती डा हिंतीके मिम्नीनी। हिक्ब मुर ते लमा? क्येट पोक्ब मुर ते लाक्गमे? मिनु मेको लाइशशो खिं हिक्ब ते बाक्मा?

19 गेपुकीम मेको मटीब मुर आन कली मुल रे मताइनीनी। मरुप्चा डा लोत्र पाइब मुर आन कली लेशा मताइनीनी। यसैया २८:११; ब्यवस्था २८:४९-५०

20 गो आंइ दैशो ना डा चाड मानेतीक सहर सियोन कली कोव्रडीन। गे सिक्सी पा बाक्ब मुर आन सहर यरूसलेम कली ताइनीनी। यरूसलेम गेनायो मयाक्सीब ताम्बु खोदेशो बाक्ब। मेको आ किला गेनायो मतुल्सीब। आ डोरी गेनायो मप्रोंइसीब।

21 मेकेर आंइ मान तशो, परमप्रभु यावे गो नु बाकब। मेकेर ठेयब खोला नु नादी बाक्नीम। मेकेर दाप्लोम शाक्तीक डोंगा मगाक्नीम। मेकेर ठेयब जहाजपुकी यो लने मचाप्नीम।

22 मारदे हना परमप्रभु यावे आंइ कली निसाफ पाइब बाकब। परमप्रभु यावे आंइ कली सासन पाइब बाकब। परमप्रभु यावे आंइ पिप बाकब। मेकोमी आंइ कली श्येत रे प्रॉइब।

23 गे इन जहाज डा डोरी शुंडसीशो बाक्नीम। मुगपुकीम मेको डोंगा आ दातेम बाकशो थाम बोल्यो पा राप्पाइशशा सेलने मचबेम। मेकोपुकीम मेको आ वा क्युक्ने मचबेम। मेना रोइशशो मार मार शुश योक्सीनीम। खोइल मदुकबपुकीम यो रोइशशो मार मार रे आन भाग ताक्नीम।

24 सियोनम बाकब सुइमी “गो रोइ पशो बाक्नुड” मदेनीम। मेकेर बाकब मुर आन मरिम्शो पशो क्याम्चा पुंडसीशो बाक्नीम। जकरिया १२:८

## 34

एदोम कली निसाफ

1 गे रागी रागी डा मुर, आं नेक्था जाक्कीने। जात जात डा मुर नोफा दाइशशा नेनीन। रागी नु रागीम बाकशो मारेड मारेडम नेन्मेक्ल।

2 मारदे हना परमप्रभु यावे रागी रागी नेल्ल आन पर्वम गाइक्ब। मेको आन लडाइ पाइब आन पर्वम चुरब। मेको आन कली क्याम्चा कली साइक्ब कली गेशो बाकब।

3 मेको साइशशो मुर आन कली ताइक्नीम। मेको आन रिना कुइब। डांडापुकी मेको आन हुशेम जिल्लीम।

4 सरीड डा मारेड मारेड जाम्नीम। सरीड कागज खोदेशो पा ओल्सीब। सोरुल अडगुर बोट आ सोत्रशो सफा नु फोत्रशी रवा आ सोत्रशो गेडा खोदेशो दुम्नीम। प्रकाश ६:१३-१४

5 परमप्रभुमी “आं तरवारम सरीडमी गेय थुम्शा नोले, गो एदोम तारी लाइनुड। गो मेकेर डा मुर आन कली निसाफ पाइनुड” देत। ब्यवस्था ३२:४१-४२; येरमीया ४९:७-२२

6 परमप्रभु यावे आ तरवार हुशेम गुम्शो बाकब। बोंसो लुम्सीशो बाकब। मेको क्यारश भेडा आन हुश नु बोका आन चिच डा बोंसो लुम्सीशो बाकब। मारदे हना बोझामी परमप्रभु यावेमी ठेयब चढेतीक गेय पाइब। एदोम रागीमी शुश मुर आन कली साइक्ब। यसैया ६३:१

7 ब्वाकी डा ब्यफ मुरपुक नु गोल्लीम। बाछापुकी बोल्यो सांढे ब्यफपुक नु गोल्लीम। मेको आन रागी हुशेम जारशो बाकब। मेकेर डा खप बोंसोम ब्रीशो बाकब।

8 काबु परमप्रभु यावे आ क्येक्क लेत्तीक नाक्त बाकब। सियोन आ पर्वम ठीक सेल्चा कली क्येक्क लेत्तीक बर्स का बाकब। यसैया ६३:४

9 मेना एदोम डा खोलापुकी अलकत्रा दुम्नीम। मिनु आ खप चहिं गन्धक दुम्ब। एदोम रागी ब्रशो अलकत्रा दुम्ब। उत्पत्ती १९:२४

10 मेको नाकदो नाक्त गेनायो मकाप्ब। आ कुन गेना हना यो कुस डा कुस बाकब। मेको पाला पाला सम्म गोरशो रागी दुम्शा बाकब। मेकेर रे सुइ मगाक्नीम। मलाकी १:४

11 तन्न मेकेर ठेयब चिक्ब नु काइशशा आन बाक्तीके दुम्ब। मेकेर हुहुचील नु खदपुकी बाक्नीम। परमप्रभुमी मेको रागी कली ग्रांग्ये माग्ये सेल्ब। आ ठेयब मुर मार पचा दो पचा दुम्नीम।

12 मेको रागी कली राज्य मदेनीम। मेकेर हुकुम पाइब सुइ मलीम।

13 मेको आन दरवारम चू वानीम। मेको आन बोल्यो दरवारम चूले नु चोंक वानीम। मेकेर सिवार नु ठेयब चिक्ब आन बाक्तीके दुम्ब। यसैया १३:२१-२२

14 मेकेर वां नु फर गुन्नीम। वोल ब्रेम्मुइनीम। ब्वाकी डा वोलम आ वारच कली ब्रेप्ब। नाकदो डा वोल मेकेर बास बाक्नीम।

15 मेकेर बुक्सम ग्योत्र सेल्शा, ब्वोफु पा पुक्शा, चाइक्ब गुंडब। मेकेर ब्वारदे गुम्शा, निक्शी निक्शी पा बाक्नीम।

16 परमप्रभु यावे आ किताबम माल्शा पढेने। मेकेर नेल्ल ब्रेक्शो बाकब। मेको नेल्ल निक्शी निक्शी बाक्नीमी। मारदे हना परमप्रभु यावेमी लोत्र पा मेको आन कली अरेप्टु। आ सोक्तीमी मोदेशो दुम्पाइशशो बाकब। प्रस्थान ३२:३२

17 परमप्रभुमी मेको आन कली मेको रागी पुक्शा योक्शा, गेशो बाकब। मेको रागी गेना हना यो मेको आन के दुम्शा, पाला पाला सम्म मेकेर बाक्नीम।

## 35

परमप्रभु आ मुर ग्येरसीशो

1 मुर मबाक्शो नु ब्वाक्कु मबाक्शो रागी ग्येरसीनीम। गोरशो रागी ग्येरसीशा शुश फू बोइक्पाइक्ब। यसैया ३२:१५

2 मिनु मेको थाम्पा बोइशशा, ग्येरसीशा कुम्सो पना पन बाक्नीम। लेबानोन, आ दारस मेकोम ताइब। कारमेल नु शारोन आन मान ततीक मेको कली गेशो बाकब। मेकोपुकीमी परमप्रभु यावे आ मान ततीके नु आंइ परमप्रभु आ छेडछेड ताइनीम।

3 इन मारेड पने मचाप्ब गुइ बोल्यो सेलीन। इन ख्रिंख्रि पाइब पोक्च बोल्यो सेलीन। हिब्रू १२:१२

4 हिब्रू थुं पाइशशो मुर आन कली “इन थुं फ्रेदीन। महिनीन” दे मतीन। इन परमप्रभु एक बाकब। मेको क्येक्क लेत्त्या कली जाकब। परमप्रभुमी हिंचा डा सजाइ गेब। मेको जाक्शा इन कली प्रॉइब।

- 5 मेना मिक्च मताइबपुकीमी ताइनीम। नोफा मनेबपुकीमी नेनीम। यसैया २९:१८
- 6 खोइल मदुक्ब मुर किश्श खोदेशो पा प्रेक्नीम। मब्वाक्बपुकीम ग्येरसीशा कुम्सो पाइनीम। मारदे हना मुर मबाक्तीकेम ब्वाक्कु बुक्नीम। गोरशो रागीमी खोला यीनीम।
- 7 मिनु थम होश बाल्वा दोम्ली दुम्ब। सोव्रशो खप रे ब्वाक्कु बुक्ब। मिनु सिवार आन बाक्तीकेमी घांस नु बुदी मीलु वानीम। यसैया ४१:१८
- 8 मेकेर ठेयब लां का दुम्ब। मेको लां कली “परमप्रभु यावे आ लां बाक्ब” दे नें वोइक्नीम। ग्रंथा दिशो मुर मेको लां लचा मताइनीम। परमप्रभु आ मुर ला मेको लां लचा ताइनीम। सु सु मेको लां लाइनीमी, मेकोपुकी मूर्ख बाक्तेक्म हना यो, मजामीम। यसैया ५६:३-८; येरमीया ३१:८
- 9 मेकेर गुप्स मबाक्नीमी। मुर ब्वाइब जन्तु यो मलाइनीम, मबाक्नीम। तन्न पाप रे प्रोइशो मुर ला मेको लां गाक्नीम।
- 10 परमप्रभु यावेमी श्येत रे प्रोइशो मुर ला लेशशा जाक्नीम। मिनु सियोनमी कुम्सो पना पन ओव्रनीम। मेकोपुकी गेना हना यो ग्येरसीशा बाक्नीम। ग्येरसीना सीन बाक्नीम। आन श्येत जशा, हुक्वी पतीके लेशशा मजाक्ब। यसैया ५१:११; प्रकाश २१:४

## 36

सन्हेरीबम यहूदा नु लडाइ पशो

२राजा १८:१३-२राजा १९:३७; २इतिहास ३२:१-२३

- 1 पिप हिज्कीयाहम सासनम पवा आ १४ बर्सम, अस्सुर डा पिप सन्हेरीबम यहूदा डा गारो हिरशो सहर आन कली लडाइ पा ग्रात।
- 2 मिनु अस्सुर डा पिपम लाकीशा डा राब्शाके माइश्शो, आ कप्तान नु लडाइ पाइब शुश पिप हिज्कीयाह आ बाक्तीके यरूसलेममी सोइक्ताक्व। मिनु मेको आइक्था दोम्ली डा ब्वाक्कु यितीके वा मुरब आन रू डा लांमी राप्तेक्म। यसैया ७:३
- 3 मिनु दरवार कोव्रब, हिल्कीयाह आ तौ एल्याकीम, पिप आ ब्रेक्ब शेब्ना नु आसाफ आ तौ योआह लाडगा यूशा मेको आन बाक्तीक लाम्तेक्म। यसैया २२:२०
- 4 मिनु राब्शाकेमी मेको आन कली “गे हिज्कीयाह कली अस्सुर डा ठेयब पिपमी इन कली मार दैत देशा हना, ‘गे मार कली आस पा थमा सुइक्नीनी?’
- 5 गे इन फश लोव्रम लडाइ दोपा पचा तुइक्तीक नु लडाइ पतीक सक्ति बाक्बा? गे आं कली मदिथु, सु कली आस पा थमा सुइक्नेवे?
- 6 गे जिक्शो कोक्के खोदेशो इजीप्त कली थमा सुइक्नेवे? सु सु मेको कोक्के तिवशा गाक्नीमी, मेको आन गुइ थोक्ब। सु सुमी इजीप्त डा पिप फाराओ कली थमा सुइक्नीमी, मेको कोक्केम थोक्शो खोदेशो दुम्नीम। इजीप्त डा फाराओ मोदेशो बाक्ब’ दे मतीन। इजीकीएल २९:६-७
- 7 तन्न गो, आं कली ‘गोपुकी परमप्रभु यावे, आंइ परमप्रभु कली थमा सुइक्नीकी’ देतीनी हना, हिज्कीयाहमी मेको आ थान नु आ चढ़ेतीकेपुकी मप्रंदा डा? मिनु यहूदा नु यरूसलेमम बाक्ब आन कली ‘गे एको चढ़ेतीके आ डोंडती चढ़ेचा माल्नीनी’ मदेमे? २राजा १८:४
- 8 गे आं होव्रप, अस्सुर डा पिप नु बाजी पावो। मिनु इ के शारा डोइक्ब मुर बाक्तेक्म हना, गो इ कली हजार निकशी शारा गेनन।
- 9 गे बग्गी नु शारा डोइक्ब आन पर्बम इजीप्त कली थमा सुइक्नेवे। गे आं होव्रप आ नेल्ल क्येडा आइक्च कप्तान का कली यो खेरने मचाप्नेवे।
- 10 मार, गो एको रागी खतम सेल्चा कली परमप्रभु यावे कली हिल्लो मपथु, जाक्डा डा? परमप्रभु यावेम आं कली ‘लावो, मेको रागी कली खतम सेलो’ दे माइक्ती” दैत।
- 11 मिनु एल्याकीम, शेब्ना नु योआहमी मेको राब्शाके कली “इन गेय पाइबपुकी नु अरामी लोव्र ब्वाक्कीन। गो मेको लोव्र रुप्नीकी। गारोम बाक्ब मुर नेल्ल आन नेंचा डा पा यहूदी लोव्र पा मब्वाक्कीन” दैतेक्म।
- 12 तन्न राब्शाकेमी “मार, आं होव्रपमी इन होव्रप नु इन कली ला लोव्र पथ सोइक्ती डा? गारोम बाक्ब मुरपुकीम यो रुप्या माल्नीमी। मारदे हना मेकोपुकीम यो इन खोदेशो पा आन खी जचा नु आन चारनाक तूचा माल्नीम” दैत।
- 13 नोले मेको राब्शाकेमी मुर आन नेक्था राप्शा यहूदी आन लोव्रमी ठेयब सेंदा पा “अस्सुर डा ठेयब पिप आ लोव्र नेनीन।
- 14 मेकोमी मार दैत हना ‘हिज्कीयाह आ जोल लोव्र थमा मसुतीन। मेकोम इन कली प्रोइने मचाप्ब।
- 15 हिज्कीयाहमी इन कली “परमप्रभु यावेम इन कली रिश्शो पाइब। परमप्रभु यावेमी इन कली थमा पा श्येत रे प्रोइब। एको सहर अस्सुर डा पिप आ गुडमी मदुम्ब” देशो लोव्र थमा मसुतीन।
- 16 हिज्कीयाह आ लोव्र मनेनीन, मारदे हना अस्सुर डा पिपमी इन कली “गो नु गारीन। मेकेर रे यूशा आं बाक्तीके जाक्कीन। मो पाइतीनी हना, गे नेल्ल इन रू डा अडगुर बोट नु इन फोव्रशी रवा ताइनीनी। मिनु इन आंम कुवा डा ब्वाक्कु तूचा ताइनीनी। १राजा ५:५; मीका ४:४
- 17 मिनु नोले गो इन कली आंम रागी खोदेशो अर्को रागी काम लाइक्वनीनी। मेको रागीम शुश अन्न नु अडगुर शांबु बाक्ब। मेको शोब्ले नु अडगुर रूम ब्रीशो रागी बाक्ब” दैत।

18 हिज्कीयाहमी इन कली “परमप्रभु यावेमी इं कली श्येत रे प्रॉइब” देशा, हेंथे लां कोंइचा मग्ने। मार, रागी रागी डा देवी देवता काम यो आन रागी अस्सुर डा पिप आ गुड प्रॉइने चाप्मे डा? यसैया ३७:१२

19 हमाथ नु अरपाद डा देवी देवता ते लाकगमे? सेफारवाइम डा देवी देवता ते लाकगमे? मेकोपुकीमी सामरीया कली अस्सुर आ पिप गुड रे प्रॉइने चाप्मे डा?

20 एको रागी नेल्ले डा तेको देवी देवताम आ रागी आं गुड रे प्रॉइने चाप्मा डा? मार, परमप्रभु यावेमी यरूसलेम कली आं गुड रे प्रॉइने चाप्मा डा?’ ” दैत।

21 तन्न मेकोपुकी सिक्सी पा बाक्शा, राब्शाके कली काइ लोत्र मलेत्तेम। मारदे हना पिपमी मेको आन कली “लोत्र मलेत्तीन” दे माइशो बाक्त।

22 मिनू दरवार कोत्रब, हिल्लीयाह आ तौ, एल्याकीम, ब्रेक्ब शेब्ना नु इतिहास ब्रेक्ब आसाफ आ तौ, योआहम आन वा खाक्शा हिज्कीयाह आ डोंइती जाक्शा, मेको राब्शाके आ लोत्र नेल्ल शोत्रतेकम।

## 37

यरूसलेम कली प्रॉइशो

1 मिनू पिप हिज्कीयाहमी मेको लोत्र नेंशा, आ वा खाक्शा, अरन्डी फेक्शा परमप्रभु यावे आ खिं लत।

2 मिनू मेकोमी आ दरवार कोत्रब एल्याकीम, ब्रेक्ब शेब्ना नु चढेब आन दाते डा खूशो आन कली अरन्डी फेक्पाइशशा, आमोज आ तौ यसैया आ बाक्तीक सोइक्ताक्व।

3 मिनू मेकोपुकीमी यसैया कली “हिज्कीयाहमी ‘मुलाक्ती श्येत जतीके, तुप्पाइसीतीके नु शुक्शी पाइक्चा पुंडसीतीके नाक्त बाक्ब। आल थिचशो मीश मुरुमी आल थिचावानु, थिचा कली बोल मबाक्शो खोंदेशो दुम्त।

4 इन परमप्रभु यावे, इन परमप्रभुमी राब्शाके आ लोत्र नेंना माइ। अस्सुर डा पिपमी मेको कली गेना हना यो ब्रॉइशा बाक्ब परमप्रभु कली शुक्शी पथ सोइक्ताक्व। मेको आ लोत्र नेंशा, परमप्रभु यावे, इन परमप्रभुमी मेको कली सजाइ गेबा कों? मोपतीके लीशो मुर आन परबम पुनीन’ दैत” दे मेकोपुकीमी दैतेकम।

5 मोपा हिज्कीयाह आ मुरपुकी यसैया आ बाक्तीक जाक्मानु,

6 यसैयामी मेको आन कली “गेपुकीमी पिप कली ‘परमप्रभु यावेम इन कली मार देशो बाक्ब देशा हना, इन नेंशो अस्सुर डा पिप आ मुरुमी आं कली शुक्शी पशो लोत्र आ परबम महिनीन।

7 गो मेको कली हिंब थुं का गेनुड। मिनू हिंचा डा लोत्र नेंशा, मेको आ रागी लेशशा लाइब। मिनू गो मेको कली आ रागीम क्योरशा साइक्पाइक्नुड दैत’ दे मतीन” दे माइक्तीमी।

8 मिनू राब्शाके आ पिप बाक्तीके लेम्मेनु “पिपम लाकीश प्रॉइतु” देशो लोत्र नेंना बाक्त। मिनू लमेनु, अस्सुर डा पिप लिब्ना डा मुर नु लडाइ पना पन बाक्शो थिदा बाक्त।

9 अस्सुर डा पिपमी एथीयोपीया डा पिप तिरहाकाह “गे नु लडाइ पथ जाक्ना जाकन बाक्ब” देशो लोत्र नेंना बाक्त। मिनू मेको लोत्र नेंशा, हिज्कीयाह आ बाक्तीकेमी आ मुर आन कली लोत्र कुरब पा सोइक्ताक्व।

10 मार लोत्र सोइक्ताक्व देशा हना, यहूदा डा पिप हिज्कीयाह कली “इन थमा सुइशशो परमप्रभुमी इन कली दूली लां मखोइक्पांइसीन। ‘यरूसलेम अस्सुर डा पिप आ गुडमी मदुम्ब’ देनीनी।

11 गे अस्सुर डा पिपपुकीमी रागी नेल्ल आन कली क्याम्शो, लोत्र नेंशो बाक्नीनी। मार गे चहिं ब्रॉइनीनी डा?

12 आं किकी पिपीम क्याम्शो रागी रागी गोजान, हारान, रेचेफ नु तेलास्सारम बाक्शो एदेन डा मुर आन देवी देवतामी मेको रागी प्रॉइने चाप्मे डा? यसैया ३६:१८

13 हमाथ, अरपाद, सेफारवाइम, हेना नु इब्वाह डा पिपपुकी ते लाकगमे? दे मतीन” दैत।

हिज्कीयाह आ पुंडशो

14 मिनू हिज्कीयाहमी मेको लोत्र कुरब मुर आन गुड रे मेको चिठी ताक्शा, पढेप्टु। मिनू मेको चिठी परमप्रभु यावे आ खिं लाइशशा, परमप्रभु यावे आ डोंइती प्राक्शा वोइक्तु।

15 मिनू हिज्कीयाहमी परमप्रभु यावे कली

16 “मुर नेल्ल आन परमप्रभु यावे, इस्राएली आन परमप्रभु, गे करूब आस तार बाक्ब बाक्नीनी। गे ला रागी नेल्ल डा राज्य डा परमप्रभु बाक्नीनी। सरीड नु रागी इन सेल्लो बाक्नीस।

17 परमप्रभु यावे, आं लोत्र नेनीन। परमप्रभु यावे, कोत्रडीन। सन्हेरीबमी गेना हना यो ब्रॉइशा बाक्ब परमप्रभु, इन कली शुक्शी पथ सोइशशो लोत्र नेनीन।

18 परमप्रभु यावे, थमा पा अस्सुर डा पिपपुकीमी रागी रागी नेल्ल क्याम्ताक्म।

19 मेको आन देवी देवता मीम हुम्ताक्म। मारदे हना मेकोपुकी मुर आन गुडमी सेल्लो, शी नु फुल्लु के बाक्नीम। मेकोपुकी इन खोंदेशो मनम। मोपतीके खतम सेल्चा पुंडसाक्म।

20 परमप्रभु यावे, आंइ परमप्रभु, मुल आंइ कली सन्हेरीब आ गुड रे प्रोनीन। रागी नेल्ल डा मुरपुकीम गे ला परमप्रभु यावे बाक्नीनी, दे तुइक्तेमक्ल” दे पुंडशा, लोत्र पाप्टु। यसैया ४०:५; दानीएल ६:२७

यसैयामी पिप कली लोत्र पशो

21 नोले आमोज आ तौ यसैयामी हिज्कीयाह कली “परमप्रभु यावे, इस्राएली आन परमप्रभुमी ‘अस्सुर डा पिप सन्हेरीब आ परबम इ पशो लोत्र गो नेता’ दैत।

22 परमप्रभु यावेमी सन्हेरीब आ परबम मार दैत देशा हना 'सियोन डा कन्ने तमी इ परबम शुक्शी पा रिशशो बाक्व। यरूसलेम डा तमीमी इ नोले कोव्रशा, आ पिया हिकशो बाक्व।

23 गे सु कली शुक्शी पवी? सु आ परबम गे टेयब लेशशो लोव्र पवी? गे इस्राएली आन का ला बाक्वशो परमप्रभु आ डोंइती टेयब लेशशो दुमे?

24 मिनु इ सोइशशो गेय पाइब मुर रे पा परमप्रभु कली शुक्शी लोव्र पपाइक्तीवी' दैत। मिनु गे 'आं शुश बग्गीमी डांडा डोंइसाक्वी। लेबानोन नेल्ल डोंइसाक्वी। गो मेकेर डा लाइशशो रवा नु रिमशो रवा नेल्ले आन कली तिम्तामी। गो नेल्ल क्येडा इर नु डोन नु टेयब ब्वाकी सम्म जाक्दीत्ती। यसैया १४:८

25 गो इनार दोशा ब्वाक्कु तूता। आ खोइलीमी इजीप्त डा टेयब खोला नेल्ल सोव्रपाइक्ता, दे शुक्शी पपाइक्तीवी।

26 गो आं डोंइती मिमशो, गे मतुइक्ती? आं डोंइती मिमशो गो मुल पाइनुड। गे गारो हिरशो सहर आन कली फुल्लु तेल्लीक सेल्चा माल्नेवे।

27 मेकेर डा मुर आन सक्ति जाम्शा, हिंब दुम्शा, मुने पा, मारेइ पने मचबेम। मेकोपुकी रू डा घांस नु खिं तार वाशो घांस खोदेशो दुम्तेक्म। मेको वाचा क्येडा डोंइती सोव्रब।

28 गो इ बोक्शो, इ निशशो नेल्ल तुइक्नुड। इ लशो, पिशो तुइक्नुड। मिनु गे आं परबम गाइक्ताक्वी।

29 मारदे हना गे आं परबम गाइक्तीनु, इ टेयब लेशशो नेंता। मोपतीके गो इ नेम बोल्सी का ब्वेक्नुड। मिनु इ शोव्रमी लगम पाइशशा इ जाक्शो लां लेप्पाइशशा सोइक्नन' दैत, दे मतीन" दे मुर सोइताक्वी।

30 मिनु परमप्रभु यावेमी हिज्कीयाह कली "इ कली एको चिन्ड दुम्ब। मुलाक्त थोचे आंमा वाशो बाली नाली जाइनीनी। माइक्शी आंमा दोक्शा वाशो बाली नाली जाइनीनी। तन्न न्युं चहिं आंमा शोक्शा खुप्तीन। अडगुर खुम्शा जने।

31 यहूदा आ खिं डा लीशोपुकी लेशा, सोशा बोशा, शाक्श थोक्शा, फल सिल्लीम। शुश दुम्मीम।

32 मारदे हना यरूसलेम रे लीशोपुकी लाइनीमी। सियोन डांडा रे हुल का ब्रोइशोपुकी यूनमी। मुर नेल्ल आन परमप्रभु यावेमी, गो मेको पाइनुड" दैत। यसैया ९:६

33 मोपतीके परमप्रभु यावेमी अस्सुर डा पिप आ परबम "मेको सहरम मजाक्व। ब्रा का यो मआप्व। सहर आ डोंइती ब्रा तेक्तीके मकुरनीम। सहर ओव्रचा कली गारो डोइक्तीक मसेलीम।

34 मेको तेको लां जाक्मे, मेको लां लेप्ब। सहर मओव्रब।

35 गो मेको सहर कली आं परबम नु आं गेय पाइब दाऊद आ परबम आन गुइ रे प्रोंइशा, वोइक्नुड" दैत।

36 मिनु परमप्रभु यावे आ स्वर्ग डा गेय पाइब का अस्सुर डा मुर आन बाक्तीकेम लशा, लाख का ८५ हजार जना मुर सदा बाक्त। मिनु मुरपुकी सुनी बोक्शा कोव्रडमेनु, बेक्शो मुर ला ताम्तेक्म। यसैया १७:१४; यसैया ३१:८

37 गो दुम्मेनु अस्सुर डा पिप सन्हेरीब लेशशा लशा निनवे सहरम बाक्त।

38 मिनु आ देवता निमोक आ खिंमी बाष्णा पूजा पना पन बाक्मेनु, आ तौ अद्राम्मेलेक नु शरैसेरमी मेको कली तरवारमी क्योरशा साइक्ताक्स। मिनु मेको निकशी प्रोक्शा, आरारात रागी लाम्ताक्स। मिनु मेको आ पा डा आ तौ एसर-हददेन पिप दुम्त।

## 38

हिज्कीयाह रोइ पशो

२राजा २०:१-११; २इतिहास ३२:२४

1 मेना हिज्कीयाह रोइ पा बेक्चा चिकता बाक्त। मिनु परमप्रभु यावे आ लोव्र पाइब आमोज आ तौ, यसैया जाक्शा, पिप कली "परमप्रभु यावेमी इन कली 'गे बेक्नेवे, मब्रोंइनेवे। इ खिं नेल्ल ठीक सेलो' दैत" दे माइक्तु।

2 मिनु हिज्कीयाहमी, आ कुल गारो गे हिरशा, परमप्रभु यावे कली

3 "परमप्रभु यावे, गो इन डोंइती थमा पा थुं निकशी मपथ, बाक्ती। मेको मिम्तीने। गो इन डोंइती नेल्ल रिमशो पाता" दैत। मिनु हिज्कीयाह शुश डाक्त। २राजा १८:२-६

4 मिनु परमप्रभु यावेमी यसैया कली

5 "हिज्कीयाह आ बाक्तीक लावो। मेको कली परमप्रभु यावे, इ किकी दाऊद आ परमप्रभुमी इ कली 'गो इ पुइशो लोव्र नेंता। इ प्रेक्कु ताता। नेनो, गो इ ब्रोंइतीक नाक्ती १५ बर्स तेम्नुड।

6 मिनु गो इ कली नु एको सहर कली अस्सुर डा पिप आ गुइ रे प्रोंइनुड। एको सहर कली वारच पाइनुड।

7 परमप्रभु यावेमी आ देशो पाइब दे इ कली आ गेशो चिन्ड मार बाक्ब देशा हना,

8 आहाज आ घरी आ वांक्कु उइ लने थुम्शो बाक्ब। मेको कली परमप्रभु यावेमी १० खेयप नोले लेप्पाइक्ब' दे मतो" दैत। मिनु आं आ वांक्कु लाक्ने थुम्शा यो, १० खेयप नोले लेत्त।

हिज्कीयाह आ ब्रेक्शो लोव्र

9 यहूदा डा पिप हिज्कीयाह रोइ पा साम नोले आ ब्रेक्शो लोव्र मार बाक्त देशा हना,

10 गो थम रिमशो पा बाक्ना बाक्न, बेक्शो मुर आन बाक्तीके लचा माल्नुड।

11 मिनु गो परमप्रभु यावे कली "गो परमप्रभु यावे, इन कली ब्रोंइशो मुर आन रागी मताइनुड। गो मुल मुर आन कली मताइनुड। रागीम बाक्ब आन कली मताइनुडमी। भजन संग्रह २७:१३

12 आं बाक्तीक खिं, गोठ खोदेशो पा, प्रेशशा आं रे डोन याक्ताक्म। तोत्र प्रोत्रबमी वा तोल्लशो खोदेशो पा, गो आं ब्रोइतीक नाक्त तोल्लशो बाक्नुड। गो तोत्र रे खोइक्चा पुंडसाक्ड। नाक्दो नाक्ती आं कली बेक्पाइक्नीनी” दे परमप्रभु कली लोत्र पाता।

13 सुनी सम्म आं थुं कली रिम्पाइक्ना पाइक्न बाक्ती। गुप्सम खोदेशो पा आं खोइल जिक्ताक्वीनी। काबु नाक्दो नाक्तीमी गे आं कली खतम पोक्तीनी।

14 गो बेल्लुम नु बोकुला खोदेशो पा ग्रीती। ढुकुर खोदेशो पा रोंका पाता। गो शुश ग्येत्थ कोत्रतीके आ मिक्च पारताक्वी। आं थुं लुकच लत। गो “परमप्रभु, गो श्येत जाइनुड। आं कली वारच पाइय्यीनी।

15 तन्न गो मार देनुडा डा? मारदे हना गे आं कली लोत्र पाइतीनी। मोदेशो आंमा पाइतीनी। आं निन्द्रा नेल्ल प्रोक्त। आं थुं लुकच लत हना यो गो इन कली ठेयब सेल्लुड।

16 परमप्रभु, मोदेशो श्येत रे मुर ब्रोइनीम। आं थुं यो मेको रे ब्रोइब। गे आं कली सापाइशशा, ब्रोइचा गेतीनी।

17 एको श्येत थमा पा आं कली ब्रोइचा कली बाक्त। गे आं कली दाक्शा, श्येत रे गुंडताक्वीनी। मारदे हना गे आं पाप नेल्ल क्याम्ताक्नी। भजन संग्रह ३२:५; मीका ७:१८-१९

18 बेक्शो मुर आन बाक्तीकेमी इन कली ठेयब मसेल्ल। बेक्पाइक्बम इन कली ठेयब सेल्ले मचाप्ब। बेक्शो मुरुम इन वारच पाइक्तीक आस मपाइनीम। भजन संग्रह ६:६; भजन संग्रह ११५:१७

19 ब्रोइशोपुकीम ला इन कली ‘गे रिम्शो पाइब बाक्नीनी’ देनीमी। मिनु गो मुलाक्ती मोदेशो पाइनुड। आफपुकीमी गे थमा सुइक्चा माल्लशो बाक्नीनी, दे आन आल आन कली शेंनीम” दे हिज्कीयाहमी देंत।

20 परमप्रभु यावेमी आं कली श्येत रे प्रोइब। मोपतीके गोपुकीमी तार पाइशशो ताप्तीके ताप्शा कुम्सो पाइनीकी। गो ब्रोइका सम्म मोदेशो पाइनीकी। परमप्रभु यावे आ खिंमी कुम्सो पा ताप्शा बाक्नीकी, दे हिज्कीयाहमी बेक्शो बाक्त।

21 मिनु यसैयामी “सापाइक्चा कली फोत्रशी रवा आ फल रे सेल्लो ओरुखी चाक्शा, एको गार तार खेक्चा माल्लीनी” देंत। यसैया ३८:२१-२२, यसैया ३८:६ नु ७ आन दातेमी वोइक्चा माल्ल। २राजा २०:७-८ मोदेशो बाक्ब।

22 डोंइती हिज्कीयाहमी “गो परमप्रभु यावे आ खिं लचा ताइनुड, देशो चिन्द, मार दुम्बा डा?” दे हिल्लो पशो बाक्त।

## 39

बेबीलोन रे मुर जाक्शो

२राजा २०:१२-१९; २इतिहास ३२:२७-३१

1 मेना बेबीलोन डा पिप बालादन आ तो मेरोदाक-बालादानमी हिज्कीयाह कली चिटी नु कोसेली कुर पाइशशा, मुर आन कली सोइक्ता बाक्त। मारदे हना मेकोमी “हिज्कीयाह रोइ पशा, छक लाक्चा डा पा सात” देशो लोत्र नेना बाक्त। 2 मिनु हिज्कीयाहमी मेको आन कली तशा, ग्येरशा आ शोंप वोइक्तीके खिं नेल्ल कोइदा बाक्त। मार कोइदा बाक्त देशा हना, सुन चांदी, मस्तापुकी, रिम्शो शुश क्येट लाइब थोत्रक, तेल, आ या वोइक्तीके नेल्ल नु आ शोंप नेल्ले कोइदा बाक्त। आ खिं नु आ रागीमी मेको आन कली मकोइशो मारेइ मलीमाक्त।

3 मिनु परमप्रभु यावे आ लोत्र पाइब यसैया, पिप हिज्कीयाह आ बाक्तीके जाक्शा “मेको मुरपुकीम मार देमा, ते रे जाक्मा?” देंत। मिनु हिज्कीयाहमी “एकोपुकी डोन रागी बेबीलोन रे जाक्शो नम” देंत।

4 मिनु “मेकोपुकीम इन खिंमी मार मार तामे?” दे हिल्लो पाप्तु। मिनु हिज्कीयाहमी “आं खिंमी बाक्शो मारेइ मारेइ ताम्तेक्म। मेको आन कली मारेइ मारेइ कोइताक्ड” देंत।

5 मिनु यसैयामी हिज्कीयाह कली “मुर नेल्ल आन परमप्रभु यावे आ लोत्र नेनीन

6 ‘इ खिंम बाक्शो, इ किकी पिपीमी तेल्ला वोइशशो मुल सम्म बाक्शो मारेइ मारेइ काबु बेबीलोन चाक्दीत्नीम। मारेइ मलीनीम’ दे परमप्रभु यावेमी देंत। २राजा २४:१३

7 मिनु इ तौ कोइ कोइ आन कली लाइशशा, बेबीलोन डा पिप आ दरवारमी गेय पाइब सेल्लनीम” देंत।

8 मिनु हिज्कीयाहमी यसैया कली “इ देशो परमप्रभु यावे आ लोत्र रिम्शो बाक्ब” देंत। मारदे हना मेकोम “गो ब्रोइडा सम्म लडाइ मदुम्ब रिम्शो दुम्ब” दे मिम्शो बाक्माक्त।

## 40

इसाएली आन थुं बारपाइशशो

1 इन परमप्रभुमी “आं मुर आन कली लेम्दीन, लेम्दीन।

2 यरूसलेम कली आ थुं बारपाइक्तीके लोत्र पेने आ श्येत नुप्त। आ मरिम्शो पशो क्याम्शो बाक्ब। मारदे हना परमप्रभु यावे रे पा आ मरिम्शो पशो आ पर्वम निक्शी खेयप सजाइ ताप्तु” देंत। होसे २:१६; येरमीया १६:१८

3 मिनु ब्रेप्ब मुर आ सेंदा कामी “मुर मबाक्तीकेमी परमप्रभु यावे आ लां सेलीन। गोरशो रागीमी इ परमप्रभु कली लां रिम्शो पा फुल्लु प्रोक्शा थेलीन। लूका ३:४-६; यूहन्ना १:२३

4 बेसी नेल्ले ग्येत्थ पोक्चा पुंडसीनीम। डांडा नु पहाड फ्रेम्चा पुंडसीनीम। दिम मदुम्शो बाक्तीके दिम दुम्चा माल्ल। फुल्लु बाक्तीके रिम्शो दुम्चा माल्लीम। यसैया ४९:११

5 मेना परमप्रभु यावे आ छेडछेड यूब। मेको मुर नेल्लेम ताइनीम। मारदे हना परमप्रभु यावेमी एको लोत्र देशो बाक्ब” दे लोत्र पाप्तु।

6 मिनु लोत्र पाइब कामी आं कली “शेंदो” देंत। मिनु गो “मार शेंनुडा?” दे हिल्लो पाता। मिनु मेकोमी “मुर नेल्ले धांस खोदेशो बाक्नीम। मेको आन दारस नेल्ल रू डा फू खोदेशो बाक्ब। भजन संग्रह ९०:५-६; याकूब १:१०-११



7 घांस सोत्रब, मिनु आ फू हेम्ब। मारदे हना परमप्रभु यावेमी मेको आन कली मुडक्ब। मुर थमा पा घांस खोदेशो बाक्नीम।

8 घांस सोत्रब, आ फू हेम्ब। तन्न आंड परमप्रभु आ लोत्र गेना हना यो लीब” दैत। भजन संग्रह ११९:८५; लूका २१:३३

9 “गे ठेयब डांडा डोंडसीन। सियोन रिम्शो लोत्र कुरब बाक्ब। ठेयब सेंदा पा शेंदो। यरूसलेम रिम्शो लोत्र कुरब बाक्ब। महिंथु, ठेयब सेंदा पा शेंदो। यहूदा सहर डा मुर आन कली ‘इन परमप्रभु एकेर बाक्ब’ देनो।

10 कोत्रडीन, परमप्रभु, परमप्रभु यावे सक्ति पाइशशो दुम्शा जाक्ब। मिनु हुकुम पाइब। आ इनाम आ नु बाक्ब। आ गेतीके आ डोंडती बाक्ब। यसैया ६२:११

11 आ बगाल कली गोठलाम खोदेशो पा योत्रब। मेकोमी आ पाठा पाठी आन कली मुष्ठा कुरब। दूध तुंडब आन कली आन चाप्चा डा पा गाक्पाइशशा खुल्ब। यूहन्ना १०:११

परमप्रभु यावे आ पशो

12 सुमी ब्वाक्कु नेल्ल आ योलम पुक्गा? सुमी सरीड बित्ताम थाप्ता? सुमी रागी डा फुरक पुक्तीकेम पुक्गा? सुमी डांडा आन कली नाक्शा, पहाड आन कली नाक्तीक तारी वोदा?

13 परमप्रभु यावे आ सोक्त कली सुम शेंदा? आ कली अर्ती गेब सु बाक्बा? रोमी ११:३४; १कोरिन्थी २:१६

14 सुम मेको कली मेको नेल्ल रुप्चा कली अर्ती गेवा? सुम मेको कली ठीक निसाफ पचा कली शेंदा?

15 रागी रागी डा मुर नेल्ले चिरशो गर डा लीशो ब्वाक्कु खोदेशो नु नाक्तीकेम लीशो फुरक खोदेशो बाक्नीम। टापु आन कली फुरक खोदेशो पा बेरपाइक्ब।

16 लेबानोन डा ब्वाकी डा शी मी मुडक्चा कली मगारब। मेकेर डा जन्तुपुकी चोशा चढ़ेचा कली मजाक्दीत्नीम।

17 रागी रागी डा मुरपुकी मेको आ डोंडती मारेड मनम। मेको श्येत्थ नु मारेड मबाक्शो बाक्नीम, दे मिम्ब।

18 मिनु गे परमप्रभु कली सु नु थाप्नीनी? मिनु सु आं नेक्था वोडक्ने चाप्नीनी। यसैया ४६:५; प्रस्थान २०:४; प्रेरित १७:२९

19 मूर्ति का? मूर्ति चेम्बमी मूर्ति कली यपाइक्ब। सुन चेम्बमी मेको सुनम खुम्ब। मेको कली चांदी के साडली सेल्ब।

20 का निक्शीमी कोसेली गेचा कली बोल्यो, मराक्चा डा शी योत्रनीम। शी के गेय पाइब जोक्ब मुर का माल्ब। मिनु मेकोमी महिक्सीचा डा पा मूर्ति सेल्पाइक्ब।

21 गेपुकी मतुडक्तीनी, मनैनी? डोंडती रे इन कली मशेंदमे? रागी सेल्चा रे गे मरुप्नी?

22 एको रागी नेल्ल आन तार बाक्ब, मेकोन बाक्ब। रागीम बाक्बपुकी माले खोदेशो बाक्नीम। मेकोमी सरीड कली वा खोदेशो पा प्राक्ब। मिनु मेको मुर आन कली ताम्बु खोदेशो तुम्ब।

23 मेकोमी सासन पाइब आन कली शोर गाक्शो सेल्ब। हुकुम पाइब जाम्शा लाइनीम।

24 मेकोपुकी का निक्शी ला शोक्सीशो बाक्नीम। का निक्शी ला खुम्सीशो बाक्नीम। शाक्श थोक्ची ना दुम्मेनु, मेको आन तार मुडक्ब। मिनु मेको बेक्नीमी। मिनु फश गिवारमी पराल खोदेशो पा योल्ब।

25 आं कली सु नु थाप्नीनी। मिनु गो नु उडक्थ सु बाक्बा?” दे का ला बाक्शो परमप्रभुम दैत।

26 गेपुकी ग्येत्थ कोत्रडीन। मेको आन कली सुम सेला? मेकोमी शुश राप्पाइशशा, मेको आन कली हिक्ब। मेको आन नें थिशा, ब्रेप्ब। मारदे हना मेको आ ठेयब सक्तिम पतीके का यो मजाम्नीम। भजन संग्रह १४७:४; उत्पत्ती १:१४-१८

27 गे मारदे ए याक्कब, देंनीनी? इस्राएलीपुकी “मारदे आं लां परमप्रभु यावे, आं परमप्रभु आ डोंडती खुडइशशो बाक्ब देंनीनी? मारदे आं कली पशो दूली निसाफ मतुडक्ब” देंनीनी?

28 मिनु “मार, गे मतुडक्तीनी, मनैनी? परमप्रभु यावे गेना हना यो बाक्ब परमप्रभु बाक्ब। मेको रागी रागी कली सेल्ब बाक्ब। मेको मथाइब नु मदाइब। आ तुडक्तीके नेल्ल क्येडा ठेयब बाक्ब।

29 मेकोमी दाइब आन कली बोल गेब। मचाप्ब आन कली सक्ति गेब।

30 ठिटापुकी यो दशा थाइनीम। मिनु मचाप्थु गोल्नीम।

31 तन्न परमप्रभु यावे आ लां कोत्रबपुकी नक सक्ति ताइनीम। ककाकुली खोदेशो पा आन फ्रां प्राक्शा बेरशा ग्येत्थ लाइनीम। मेकोपुकी दोरशा, मदाइनीम। गाक्शा यो मथाइनीम” दैत। भजन संग्रह १०३:५

## 41

परमप्रभुमी मुर आन कली ब्रेशशो

1 परमप्रभु यावेमी “समुन्द्र आ नेक्था बाक्ब मुरपुकी सिक्सी पा आं लोत्र नेनीन। जात जात डा मुरपुकीम आन सक्ति लेंशा तामेक्ल। मिनु मेकोपुकी आं नेक्था जाक्शा, लोत्र पामेक्ल। गो काथा निसाफ पतीकेम बुक्क्य।

2 सुमी पूर्व रे आ गेय पचा कली ग्राब का कली पोक्गा? मेकोमी रागी रागी डा मुर आन कली आ गुडम गेब। मेकोमी पिप आन कली दिम्शा, आ तरवारम मेको आन कली फुरक खोदेशो सेल्ब। आ लिब्रामी फशेम बेरशो भूस खोदेशो सेल्ब। यसैया ४४:२८; यसैया ४५:१, १३; यसैया ४८:१४-१५

3 मेकोमी मेको आन कली खेदा पवानु, मारेड मदुम्थु आ खोडलीम लां कली हेरा मथीनीम।

4 मेको सुमी पपाइशशा पवा? सुम साड डोंडती रे पाला पाला डा मुर आन कली ब्रेत्ता? गो परमप्रभु यावे, नेल्ल क्येडा डोंडती डा नु नेल्ल क्येडा नोले डा नड। यसैया ४४:६; यसैया ४८:१२; प्रकाश १८:१७

5 समुन्द्र आ नेक्था बाक्ब मुरपुकी मेको तशा, हिनीम। रागी आ सुर सम्म हिम्सीब। मिनु मेकोपुकी जाक्शा, आं नेक्था पिम्तेक्म।

6 वारच पमुशा, आन थुं बारपाइक्मुशा 'ठेयब थुं पावो' देमुइनीम।  
7 मिनु दारशो थोव्रक सेल्स जोक्वमी चेम्ब आ थुं बारपाइक्व। घन तुप्वमी चेम्ब आ थुं बारपाइश्शा 'एको रिम्शो दुम्त' देंशा, महिम्सेक्व, दे कांटी थोक्व" देंत।

इसाएली आन कली लोत्र पशो

8 मिनु परमप्रभु यावेमी "आं गेय पाइब इसाएल, आं योव्रशो याकूब, आं वारच अब्राहाम आ चच युइ बाक्व। यसैया ४२:१९; यसैया ४३:१०; यसैया ४४:१, २१; यसैया ४५:४; भजन संग्रह १३५:४; याकूब २:२३

9 इ कली रागी आ सूर रे ब्रेत्ताक्न। नेल्ल क्येडा डोन रे चाक्शा, गो इ कली 'गे आं गेय पाइब बाक्नेवे' देती। गो इ कली योव्रता। मिनु गो गे नु बाक्नुड।

10 महिनो, मारदे हना गो गे नु बाक्नुड। आइक्च थुं मपावो। मारदे हना गो इ परमप्रभु नड। गो इ कली बोल्यो सेल्शा, वारच पाइनुड। गो इ कली आं ग्राब ग्युरा गुइमी वारच पाइनुड। यसैया ४३:१

11 गे नु गाइक्व नेल्ल मुने दोक्शा, शिशी मताइनीम। इ जोरी सत्रु नेल्ल फश खोदेशो दुम्शा, जाम्शा लाइनीम।

12 गे मेको आन कली माल्तीवी हना यो, मथित्नेवे। इ कली लडाइ तोइबपुकी फश खोदेशो दुम्शा, जाम्शा लाइनीम।

13 मिनु गो परमप्रभु यावे, इ परमप्रभुमी इ ग्युरा गुइ ग्याइक्नुड। मिनु गो इ कली 'महिनो' देंशा, वारच पाइनुड।

14 गे महिक्सीशो याकूब महिनो। इक्कका ला लीशो इसाएलीपुकी महिनीन। गो इ कली वारच पाइनुड, दे परमप्रभु यावेमी देंत। इ कली पाप रे प्रोइब इसाएली आन का ला बाक्शो परमप्रभु, गो नड। यसैया ४३:३

15 मुल गो इ कली हेल्शो अन्न तुप्तीके सेल्नुड। मेको हेश्शो, नक नु खुइ पाइश्शो बाक्व। गे डांडा आन कली तुप्शा, फस सेल्नेवे। पहाड आन कली भूस खोदेशो सेल्नेवे।

16 गे मेको आन कली हारशा, फशेम योल्पाइक्नेवे। मिनु फश गिवारम मेको आन कली एर आंथ फ्रशा योल्ब। मेना गे परमप्रभु यावे कली तुइश्शा, ग्येरेनेवे। इसाएली आन का ला बाक्शो परमप्रभु आ मुर दुम्शा, ग्येरसीनेवे" देंत।

17 मेकोमी लेशा "पुडग नु क्येट मथीबम ब्वाक्कु माल्नीम। तन्न मथित्नीम। मेकोपुकी तूतू दाक्शा, आन लाकचा सोव्रब। गो, परमप्रभु यावेमी, मेको आन लोत्र नेंनुड। मिनु गो, इसाएली आन परमप्रभुमी मेको आन कली मप्रोइथु, मेको नु बाक्नुड।

18 गो गोरशो डांडामी ब्वाक्कु गूपाइक्नुड। बेंसीमी ब्वाक्कु बुक्पाइक्नुड। गो मुर मबाक्तीकेम ब्वाक्कु देम्शो नु सोव्रशो रागीम ब्वाक्कु बुक्पा गूपाइक्नुड। यसैया ३५:१,७; यसैया ४३:१९; प्रस्थान १७:६; भजन संग्रह १०७:३५

19 मुर मबाक्तीकेमी लेबानोन डा लाइश्शो रवा वापाइक्नुड। बोल्यो रवा, तेल रवा नु शुश अरु रवा खुम्नुड। गोरशो रागीमी तोव्रशी नु अरु रवा यो खुम्नुड।

20 मुर नेल्लेमी परमप्रभु यावे आ पशो बाक्व, दे तशा, तुइश्शा, मिम्शा रुप्चा माल्नीम। इसाएली आन का ला बाक्शो परमप्रभुमी मोदेशो सेल्तु" देंत।

मूर्तिमी सक्ति कोइदमेक्व, देंशो

21 परमप्रभु यावेमी "इन लोत्र मार बाक्वा, देनीन। थमा बाक्व, दे कोइदीन, दे गो, याकूब आ पिपमी देंनुड।

22 मेको आन कली चाक्गमेक्व। मिनु मार मार दुम्मे, मेको देनीन। डांइती मार दुम्मे, मेको लोत्र पने। गे मेको आन कली मिम्शा, नोले मार दुम्बा, तुइक्वा कली शेंदीन। यसैया ४३:८,९; यसैया ४४:७

23 नोले मार दुम्बा आइ कली तुइक्पतीन। मोपा ला गे गेय पने चाप्ब बाक्नीनी, दे तुइक्नीकी। गे रिम्शो पने कि मरिम्शो पने। मोपा गो इन कली तशा तुइश्शा शुश हिंनीकी।

24 गे मारेइ मननी। इन पशो नेल्ल फश बाक्व। सु सुमी इन कली योव्रनीमी मेकोपुकी ग्रांग्रा दिशो बाक्नीम।

25 गो उत्तर रे का कली ब्रेत्ताक्ड। मिनु मेको जाक्त। नां दाप्तीके रे आं नेंमी लोत्र पाइब ब्रेत्ताक्ड। मेकोम ठेयब मुर आन तारी खप दिम्शो खोदेशो पा दिम्ब। खप के ग्योब सेल्बम दोदेशो पा खप नीबा, मोदेशो पा मेको आन कली नीब।

26 सुमी डांइती रे आइ कली तुइक्पदा? मेको गो तुइक्वा माल्नीकी। मिनु सुमी डांइती शेंदा? 'मेको ठीक बाक्व' देने चाप्नीकी। सुइमी मशेंदेम, सुइमी लोत्र मपामे। मिनु सुइमी इन पशो लोत्र मननेम।

27 मिनु गो डांइती सियोन कली शेंताक्ड। गो यरूसलेम कली ग्येरपाइक्व लोत्र पाइब का सोइक्ताक्ड। यसैया ५२:७

28 तन्न गो कोव्रडुनु, सुइ मथिदु। अर्ती गेब सुइ मबाक्म। गो हिल्लो पाता, सुइम लोत्र मलेत्तीनी।

29 मेको नेल्ल फश बाक्नीम। आन गेय नेल्ल फश बाक्व। मिनु देवी देवता आन मूर्ति फश बाक्नीम" देंत।

## 42

परमप्रभु यावे आ गेय पाइब

1 परमप्रभुमी "आं गेय पाइब कली कोव्रडीन। गो मेको कली सक्ति गेनुड। आं योव्रशो गेय पाइब तशा, आं थुं ग्येरसीब। गो मेको कली आं सोक्तीम प्रिताक्ड। मेकोमी रागी रागी डा मुर आन कली ठीक निसाफ पाइब। यसैया ४९:१-६; यसैया ५०:४-११; यसैया ५२:१३-यसैया ५३:१२; मत्ती १२:१८-२१; मत्ती ३:१७

2 मेकोमी जिचा मपोक्व। शुश रेयके मपाइब। लां पित्थ आ सेंदा मनेसीब।

3 मेकोमी जिक्चशो किन्दा मजिक्व, काप्चशो मी यो मकाप्ब। मेकोमी थमा पा ठीक निसाफ पाइब। भजन संग्रह ३४:१९

4 मेकोम रागी नेल्लेम मुर आन कली ठीक निसाफ पतीक लां मकोइदा सम्म ग्युम्शा मगोलब। समुन्द्र आ नेक्थाम बाक्ब मुरपुकी आ शेशो नेचा दाक्शा, मेको कली रिन्नीम” देत।

5 मेको परमप्रभु, परमप्रभु यावे आ लोत्र बाक्ब। मेकोमी सरीड कली सेल्शा प्राक्तु। मिनु रागी खप फ्राशा, मेकेर मार मार वापाइवतु। मेकोमी मेकेर बाक्शो मुर आन कली आ ब्रोंइतीक गेब। मेकेर बाक्ब आन कली यो आ सोक्त गेब। उत्पत्ती १:-

6 मेकोमी “गो, परमप्रभु यावे नड। गो इ कली आं ठीक पतीकेमी ब्रेत्ताक्न। गो इ गुड ग्याइश्शा, इ कली कोत्रशा बाक्नुड। गो मुर आन पा डा इ कली आं कबल खाप्ब सेल्लतन। रागी रागी डा मुर आन कली छेडछेड दुम्पाइक्चा कली सोइक्ताक्न। यसैया ४९:६,८

7 मारदे सोइक्ताक्न देशा हना, मिक्च मताइब आन कली तपाइक्चा, जेल्खानम बाक्ब आन कली प्रोंइचा नु छिडछिड रे गुंइचा कली सोइक्ताक्न। यसैया ३५:५; यसैया ४५:१९; भजन संग्रह १२६:१-४

8 गो, परमप्रभु यावे नड। आं नें मेकोन बाक्ब। आं मान ततीक अरु आन कली मगेनुडमी। आं ठेयब दुम्तीके मूर्ति आन कली मगेनुडमी। प्रस्थान ३:१५; यसैया ४८:११

9 कोत्रडीन, डोंइती डा देशो लोत्र दुम्ने थुन्तु। गो दुम्चा क्येडा डोंइती नक लोत्र शेंनुड। मेको दुम्चा क्येडा डोंइती इन कली तुइक्पाइक्नुड” देत। यसैया ४८:६

रागी डा मुरपुकीम कुम्सो पामेक्ल

10 परमप्रभु यावे कली नक कुम्सो का पने। रागी आ सुर डा मुरपुकी परमप्रभु यावे कली कुम्सो पशा ठेयब सेलीन। समुन्द्र नु समुन्द्रम बाक्बपुकी परमप्रभु कली ठेयब सेलीन। समुन्द्र आ नेक्था बाक्ब नेल्लेमी मेको कली ठेयब सेलीन। भजन संग्रह ३३:३

11 गोरशो रागी नु मेकेर डा सहर कुम्सो पने। केदार आ बाक्तीक डा मुर नेल्ले कुम्सो पने। सेला डा मुरपुकी ग्येरशा कुम्सो पने। डाडा तार रे ठेयब सेंदा पा ग्रीडीन।

12 मेकोपुकीमी परमप्रभु यावे कली मान पामेक्ल। मिनु “परमप्रभु यावे गिश ठेयब बाक्बा” दे समुन्द्र आ नेक्था बाक्ब मुर आन कली शेंदमेक्ल।

13 परमप्रभु यावे बोल्यो लडाइ पाइब खोदेशो पा यूब। लडाइ पाइब खोदेशो पा आ जोंब बोक्पाइक्ब। मेको ठेयब रेक्के पा ग्रीब। मिनु आ जोरी सत्रु आन कली आ ठेयब सक्ति कोंइब।

14 मिनु “गो शुश सिकसी पा बाक्ती, ब्वालैड पा आंम कली तेक्शा बाक्ती। मुल आल थिचशो मीश मुर बुदी, वाइ ब्रेल्लुड। आं सोक्त कीनुड।

15 गो डांडा नु पहाड आन कली गोरशो सेल्लुड। गिगी मारेड मारेड सोत्रपाइक्नुड। गो ब्वाक्कु बाक्तीक कली सोत्रशो रागी सेल्लुड। दोम्ली सोत्रपाइक्नुड।

16 मिनु मिक्च मताइब आन कली आन मतुइश्शो लांमी खुल्लुडमी। आन मतुइश्शो गाक्तीक लांमी गाक्पाइक्नुडमी। मेको आन डोंइती बाक्शो छिडछिड कली छेडछेड सेल्लुड। मिनु फुल्लु बाक्तीक कली दिंम सेल्लुड। एको मप्रोंइथु पाइनुड। यसैया ४०:४

17 मुशा सेल्शो मूर्ति नु चेम्शा सेल्शो मूर्ति आन कली थमा सुइश्शा ‘गे आं देवी देवता बाक्नीनी’ दैंबपुकी गिम्सीशा, मुने दोक्नीम” देत।

18 परमप्रभु यावेम “गे नोफा मनेंबपुकी नेनीन। गे मिक्च मताइबपुकी एक कोत्रडीन। यसैया ४३:८

19 आं गेय पाइब खोदेशो पा मिक्च मताइब सु बाक्नीमी? आं सोइश्शो लोत्र कुरब खोदेशो नोफा मनेंब सु बाक्नीमी? सु आं कली जिम्मा गेंसीशो खोदेशो मिक्च मताइब बाक्नीमी? सु परमप्रभु यावे आ गेय पाइब खोदेशो मिक्च मताइब बाक्नीमी डा? यसैया ४१:८

20 मेकोमी शुश मार मार ताइब। तन्न मकोत्रब। मेको नोफा नेंब बाक्ब, तन्न मनेंब” देत। यसैया ५३:१

21 परमप्रभु यावेमी आ ठीक पतीके तशा, ग्येरसीशो बाक्त। मेकोमी आ शेंतीके ठेयब सेल्शा नु थम रिम्शो दुम्पाइक्ब।

22 तन्न मेको मुरपुकी रोइश्शो नु खुड पचा पुंडसीशो बाक्नीम। मेको नेल्ल बिक्तीकेमी बिक्शो नु जेल्खानमी खुइश्शो बाक्नीम। मेको सिखार खोदेशो दुम्शो बाक्नीम। मेको आन कली प्रोंइब सुड मबाक्ब। मेको रोइक्चा पुंडसीब दुम्शो बाक्नीम। मिनु “मेको आन कली लेंशा गेने” दैंब सुइ मबाक्ब।

23 इन दातेमी मेको नेंशा वारच पाइब, सु बाक्बा? मुल रे नोफा दाइश्शा, होस पा बाक्ब, सु बाक्बा?

24 सुमी याक्ूब आ मुर आन कली रोइक्ब आन गुडमी गेवा? सुमी इसाएली आन कली खुइ आन गुडमी गेवा? मेको पपाइक्ब परमप्रभु यावे ममाइ? मेकोपुकीम मेको कली पाप पाम्तेक्म। मेकोपुकी मेको आ लाम गाक्न मबिस्सम नु आ अरेशो मटीम।

25 मोपतीके परमप्रभु यावे मेको आन पर्वम शुश गाइक्ताक्व। मेको आन कली लडाइ डा श्येत दुम्पाइक्व। मेको आन एर ओथ नेल्ल मी जेत्ताक्व। मो हना यो मेकोपुकीमी काइ मरुबेम। मी जेशशा यो आन थुं परमप्रभु यावे गे मलेत्तेम।

## 43

परमप्रभुमी पाप रे प्रोंइशो

1 याक्ूब, इ कली नु इसाएल कली सेल्ब परमप्रभु यावेमी “महिनीन। इन कली पाप रे प्रोंइता। गो इन नें थिशा ब्रेत्ती। गे आं मुर बाक्नीनी।

2 गे ब्वाक्कु शोक्शा, गाक्चा माल्ते हना यो, गो गे नु बाक्नुड। खोला शोक्साक्वे हना यो, मेकोम इ कली मयोल्ब। मीम गाक्शा लवेनु, मेकोम इ कली मजेप्ब। मेको मीम इ कली मदाक्ब। प्रस्थान १४:२१; भजन संग्रह ६६:१२; दानीएल ३:२५-२७

3 मारदे हना गो परमप्रभु यावे, इ परमप्रभु नड। गो इस्राएली आन का ला बाक्शो परमप्रभु नड। गो इ कली पाप रे प्रोडब नड। गो इजीप्त रागी इ पा डा गेता। मिनू एथीयोपीया नु सेबा रागी इ कली प्रोडचा कली गेता। यसैया ४१:१४

4 मारदे हना गे आं योत्रशो मुर बाक्नीनी। गे मान ताडब दुम्नीनी। गो इन कली दाक्नुड। मोपतीके गो इन पा डा अरु मुर आन कली गेनुड। इन बेक्चा आ पा डा रागी रागी डा मुर आन कली गेतामी।

5 महिनीन, गो गेपुकी नु बाक्नुड। गो इन आल आन कली नां दाप्तीक पूर्व रे चाक्नुड। मिनू नां पेरतीके पच्छिम रे खुप्शा तेल्लुड। यसैया ११:११-१६; येरमीया ३०:१०

6 गो उत्तर कली 'प्रोडशा सोडक्तीमी' माडक्नुड। दक्खिन कली 'मतेक्मी' आं तौ आन कली डोन रागी रे चाक्कीन। मिनू आं तमी आन कली रागी आ सुर रे चाक्कीन।

7 आं नैम ब्रेत्या पुंडसीशो मुर नेल्ल चाक्कीन। गो मेको आन कली आं कली ठेयब सेल्चा कली वोडक्तामी। मेको आन कली सेल्ब गो नड। येरमीया १४:९

8 मेको मिक्च बाक्शा यो मताडब, नोफा बाक्शा यो मनेब आन कली गुंडदीन।

9 रागी रागी डा मुर नेल्ल खुम्समल। जात जात डा मुर नेल्ल बुक्मल। मेको आन दातेमी सुमी एको लोत्र पवा? मुल मार दुम्मे? सुम डोंडती मेको नोले दुम्ब लोत्र पवा? आ सांकछी ब्रेशा, चाक्गल। मिनू मुरुमी मेको नेशा 'थमा बाक्ब' देंमल" देंत। यसैया ४१:२२, २६

10 परमप्रभु यावेमी "गेपुकी आं सांकछी बाक्नीनी। मिनू गे आं योत्रशो गेय पाडब बाक्नीनी। गे आं कली तुडशशा थमा सुडक्ब दुम्शो बाक्नीनी। मिनू गो परमप्रभु नड, दे रुपनीनी। आं डोंडती सुड परमप्रभु मबा, आं नोले यो सुड परमप्रभु मदुम्नीम। यसैया ४४:३

11 गो परमप्रभु यावे नड। आं क्येडा लाक्शा पाप रे प्रोडब मबाक्ब। यसैया ४५:२१; ब्यवस्था ३२:३९

12 इन दातेमी देवी देवता मबाक्थु, गो इन कली शेंशा, पाप रे प्रोडशा, लोत्र नैपाडक्ता। गे आं सांकछी बाक्नीनी।

13 गो परमप्रभु नड। नोले सम्म गो मेको नड। सुडमी आं गुड रे प्रोडने मचाप्ब। गो गेय पडानु, सुडमी आं कली तेक्ने मचाप्ब" देंत।

14 मिनू परमप्रभु यावे, इन कली पाप रे प्रोडब, इस्राएली आन का ला बाक्शो परमप्रभुमी "इन पा डा गो बेबीलोन सहर कली लडाइ पाडब सोडक्नुड। मेको आन ठेयब लाप्चो डा आग्लो जिक्नुड। गो कल्दी आन ग्रीतीक कली रोंका पपाडक्नुड।

15 गो, इन परमप्रभु यावे, इन का ला बाक्शो परमप्रभु नड। गो इस्राएल कली सेल्ब, इन पिप नड" देंत।

16 मिनू परमप्रभु यावेमी "सुमी समुन्द्रमी लां का सेल्बा? सुमी ठेयब ब्वाक्कुमी गाक्तीक लां सेल्बा डा? प्रस्थान १४:२२; यहोसु ३:१६

17 सुमी बागी नु शारा, लडाइ पाडब नु बोल्यो मुर आन कली मेको लाम सोडक्ता? मेकोपुकी गोल्शा, बोक्ने मचाप्नीम। मेकोपुकी सल्दो खोदेशो पा ग्याडशशा काप्चा पुंडसीनीम। प्रस्थान १४:२३-२८

18 डोंडती डा दुम्शो ममिम्तीन। साइ डोंडती मार दुम्मे, मेको ममिम्तीन।

19 गो नक गेय का पचा चिक्शो बाक्नुड। मुल मेको दुम्चशो बाक्ब। गे मेको मतुडक्नीनी? गो मुर मबाक्तीकेम लां का सेल्लुड। यसैया ४१:१८

20 मिनू ब्वाकी डा जन्तु, सिवार नु ठेयब चिक्बपुकीमी आं कली मान पाडनीम। मारदे हना गो मुर मबाक्तीकेमी रेड यिपाडक्नुड। गोरशो रागीमी खोला शाडक्पाडक्नुड। आं योत्रशो मुर आन कली तूचा गेचा, दे गो गोरशो रागीमी खोला शाडक्पाडक्नुड।

21 आं कली ठेयब सेल्चा कली मेको मुर आन कली सेल्लामी। १पत्रुस २:९

22 तन्न याक्ब, गे आं कली ठेयब मसेली। इस्राएल, गे आं नोले खोडक्चा आ पर्वम मारेड ममिम्ती।

23 गे इ भेडा आं कली चोशा मचढेयी। इ चढेशोमी आं कली मान मपवी। गो इ कली जचा थोत्रक चढेचा माल्लेवे, दे श्येत मगेड। धूप चोचा माल्लेवे, दे मदेंड। यसैया १:११-१५

24 गे आं कली ब्रोत्रशो रिना पाडब थोत्रक ग्याप्शा मचाक्गी। इ चढेशो आन बोंसो मगेयी। तन्न इ पाप पतीकेमी गे आं कली श्येत गेप्तीवी। इ मरिम्शो पतीकेमी आं कली श्येत जपाडक्ती। २कोरिन्थी ५:२१

25 गो नड, इ हेंथे पशो क्याम्नुड। गो मेको आं पर्वम पाडनुड। गो इ पाप लेंशा ममिम्नुड। यसैया ४४:२२; येरमीया ३१:३४

26 आं कली दोस गेयी। निसाफ पथ लय। दोपा गे आं डोंडती ठीक बाक्नेवे, मेको लोत्र पावो।

27 इ डोंडती डा किकीम पाप पाप्तु। गे नु गारशा लोत्र पाडबम आं कली मरिम्शो पाम्तेक्म। यसैया ४१:८; उत्पत्ती ३५:११-१२

28 मोपतीके गो आं खिम चढेब आन कली 'गेय पचा मदुम्ब' सेल्लामी। गो याक्ब कली खतम सेल्लता। मिनू इस्राएल शुकशी पाडक्चा पुंडसीब सेल्लता" दे परमप्रभुमी देंत।

- 1 मिनू “याकूब, आं गेय पाइब, मुल नेनो। आं योत्रशो इसाएल, नेनो।  
 2 इ कली कोव्रजीम सेल्शा, वारच पाइब परमप्रभु यावेमी ‘आं गेय पाइब याकूब महिनो। येशुरुन गो इ कली योत्रता। येशुरुन इसाएल आं नें का बाकब। ब्यवस्था ३२:१५  
 3 मारदे हना गो सोत्रशो रागी तारी ब्वाक्कु लुक्नुड। सोत्रशो खपीम खोला शाइकपाइक्नुड। गो इ चच युड आन तारी आं सोक्त मोइक्नुड। इ आल आन कली आसीक गेनुड’। यसैया ३२:१५; योएल ३:१  
 4 मेकोपुकी घांस खोदेशो पा शुश बारनीम। ब्वाक्कु आ नेक्था वाशो रवा खोदेशो दुम्नीम।  
 5 मिनू कामी ‘गो परमप्रभु यावे आ मुर नड’ देंब। अर्कोमी ‘आ नें याकूब बाकब’ देंब। मिनू अर्कोमी ‘गो परमप्रभु यावे आ मुर नड’ दे आ गुडम ब्रेक्शा ‘आं नें इसाएल बाकब’ देंब” देंत।  
 6 मिनू परमप्रभु यावे, इसाएली आन पिप नु मेको आन कली पाप रे प्रॉइब, मुर नेल्ल आन परमप्रभु यावेमी “गो नेल्ल क्येडा डोंइती नु नेल्ल क्येडा नोले डा नड। गो आं डा लाकशा, अरु परमप्रभु मबाक्नीम। यसैया ४१:४; यसैया ४३:११; प्रकाश १:१७  
 7 सु आं खोदेशो बाकबा? मेकोमी ‘गो परमप्रभु खोदेशो नड’ दे उरदी पवल। मेकोमी आं डोंइती देंल। सुम साइ डोंइती नोले दुम्नीक लोत्र पवा? मुल मार दुम्बा? मेकोमी देंल। यसैया ४१:२२; ब्यवस्था १८:२२  
 8 गे ख्लिखि पा महिनीन। गो साइ रे इन कली मदेंडा डा? गेपुकी आं सांकछी बाक्नीनी। गो आं डा लाकशा अरु परमप्रभु बाक्नीनी? आं क्येडा लाकशा अरु सेरथे फुल्लु मबाकब। गो मेको मतुडक्नुड” देंत। १सामुएल २:२

मूर्ति शोर गाकशो बाक्नीम

- 9 मिनू “मूर्ति सेल्ब नेल्ल फश खोदेशो बाक्नीम। मेको आन सेल्चा दाकशो मूर्ति शोर गाकशो बाक्नीम। मेको आन परबम शेंबपुकी मिक्च मताइब खोदेशो दुम्शा, मारेड मतुडक्नीम। मोपतीके मेको मुने दोक्नीम। यसैया ४५:१६; भजन संग्रह ११५:४-८; येरमीया १०:३-१६  
 10 सुम यपाइशशा मुशा रिम्शो गेय पने मचाप्ब देवता आ मूर्ति सेल्बा?  
 11 मेको आ नोले खोइक्ब नेल्ल मुने दोक्नीम। मेको मूर्ति सेल्चा जोक्ब मुर ला बाक्नीम। मेकोपुकी बुक्शा, राम्मल। ग्रीचोक पा हिमल। मिनू गेना हना यो मुने दोक्मल। यसैया ४२:१७  
 12 तुप्तीलमी मूर्ति चेम्ब। मेकोमी मीम गेय पाइब। बोल्यो गुडमी घनमी तुप्शा सेल्ब। मेको शोत्रलु बेक्शा, आ बोल साम्ब। ब्वाक्कु मतूथु, गेय पने मचाप्ब। यसैया ४०:१८-२०  
 13 शी मुडबमी शी कली श्येलेम थाप्शा, ब्रेक्स पा बस्लाम क्योक्शा, लेंशा थाप्शा, कोत्रशा ब्रेक्स पाइब। मिनू मुर खोदेशो पा सेल्ब। दारशो मुर खोदेशो पा सेल्ब। मिनू नोले मन्दीरम निप्पाइक्ब।  
 14 मेकोमी लेबानोन डा लाइशशो रवा तिम्ब। ब्वाकी डा बोल्यो शी के रवा का योत्रशा ब्वाकी डा अरु रवा नु कोल्पाइक्ब। लेबानोन डा लाइशशो रवा का खुम्ब। मेको तारी रेड यिशा, मेको ठेयब दुम्ब। मिनू मेकोमी सला रवा का खुम्ब। रेडम मेको कली कोल्पाइक्ब।  
 15 मेको रवा आ शी चोचा कली दुम्ब। मेको शी रे मी मुइशशा थेरब। मेको शी चोशा, शोब्ले चोइब। मेको शी रेन मूर्ति यो सेल्शा, आ डोंइती सेड पा बाप्ब।  
 16 मेकोमी आधा शी चोशा, मेको तार श्ये चोइब। मेको ब्वशा रूशा, मी थेरब। मिनू मेकोमी ‘गो होती, मी थेरचा ताता’ देंत।  
 17 मिनू आ लीशो शी रे मूर्ति का सेल्ब। मिनू मेको आ डोंइती बाप्शा पूजा पाइब। मिनू मेको कली ‘आं कली श्येत रे प्रॉइयीनी। मारदे हना गे आं परमप्रभु बाक्नीनी’ दे पुंइब” देंत।  
 18 मेको मुरपुकीमी मारेड मतुडक्थु, मरुन्नीम। मारदे हना मेको मिक्च मताइनीमी। आन थुं मरोक्सीशो बाकब। मेकोपुकी मारेड मरुप्ब बाक्नीम।  
 19 सुइमी मारेड ममिम्ब कामी “गो मेको शी आधा मीम चोता। मेको मी तारी शोब्ले चोशा, श्ये वालशा ब्वाता। मुल गो मेको आ लीशो टुटा रे ग्राना दिशो मूर्ति सेल्चा दुम्बा डा? गो मेको आ डोंइती बाप्शा दुम्बा डा?” देंब सुइ मबाकब।  
 20 सु सुमी पुलु कली सेड पाइनीमी, मेको आन दूली थुंमी दूली मिम्पाइशशा बाक्नीम। मेकोमी आम कली प्रॉइने मचाप्ब। मिनू “आंइ सेल्शो मूर्ति जोल बाकब” मदेंनीम।

इसाएली आन कली प्रॉइशो

- 21 याकूब गे एको लोत्र मिम्तो। इसाएल मिम्तो। मारदे हना गे आं गेय पाइब बाक्नेवे। गो इ कली सेल्लन, गे आं गेय पाइब बाक्नेवे। इसाएल इ कली मप्रेनन। यसैया ४१:८  
 22 गो इ पाप गोस्स खोदेशो पा जाम्पाइक्ता। इ हेंथे पशो यो क्याम्ताक्ड। गे आं गे लेतो। मारदे हना गो इ कली पाप रे प्रॉइतन। यसैया ४३:२५  
 23 गे सरीड कुम्सो पावो। रागी नेल्ल रेयके पा, शुश कुम्सो पने। गे डांडा, ब्वाकी नु रवा नेल्लेमी कुम्सो पने। मारदे हना परमप्रभु यावेमी याकूब कली श्येत रे प्रॉइतु। इसाएल रागीमी आं नें ठेयब सेल्शो बाकब। यसैया ४९:१३; यसैया ५५:१२; भजन संग्रह ९६:११-१३

पिप कोरेस कली गोठला वोइशशो

- 24 मिनू परमप्रभु यावे, इ कली श्येत रे प्रॉइब, इ कली कोव्रजीम सेल्बमी “गो मारेड मारेड सेल्ब परमप्रभु यावे नड। गो आं कामी सरीड प्राक्ता। रागी वोइक्ता। यसैया ४५:१२

25 गो जोल पाइब आन नोले दुम्ब लोत्र शोर गाक्शो सेल्लुड। लिंक्यु कोत्रब आन निप्स क्यातामी। जोक्ब तुइक्ब आन कली दिप्शा, मेको आन जोक्तीके तुइक्तीके नेल्ल मूर्ख सेल्ला। यसैया २९:१४

26 गो आं गेय पाइब आ लोत्र थमा बाक्ब। मिनु आं सोइश्शो लोत्र कुरबम आं देशो पाइब। गो यरूसलेम आ पर्वम 'मेकेर शुश मुर दुन्मीम' देनुड। मिनु यहूदा डा सहर लेशा सेल्चा पुंडसीनीम। मेको आन प्रेशशो खिं नक सेल्लुड।

27 गो शुश लुक्च लशो ब्वाक्कु सोत्रपाइक्नुड। गो इ खोला आन कली सोत्रपाइक्नुड। यहोसु ४:२३

28 कोरेस आं गोठला बाक्ब। मेकोमी आं मिम्शो गेय पाइब। मेकोमी 'यरूसलेम लेशा सेल्चा माल्ब' देंब। आं खिं आ पर्वम 'नक जग सेल्लुड' देंत। २इतिहास ३६:२३; एज्रा १:१-४

## 45

परमप्रभुमी कोरेस कली योत्रशो

1 मिनु परमप्रभु यावेमी कोरेस कली तेल लुक्शा, आ ग्युरा गुइ ग्याइक्ता बाक्त। मारदे मो पवा बाक्त देशा हना, रागी रागी डा मुर आन कली फुपाइक्चा, रागी रागी डा पिप आन कली मुने तोक्चा नु आ डोंइती लाप्चो रोक्शा, मचोक्चा कली बाक्त। यसैया ४१:२

2 परमप्रभु यावेमी मेको कली "गो इ डोंइडोंइती गाक्नुड। डांडा आन कली दिंम सेल्लुड। कांसा के लाप्चो जिक्नुड। फलाम के आग्लो जिक्नुड।

3 गो इ कली हिंचा डा छिडछिडम वोइश्शो शोंप गेनुड। इ कली खुइश्शा वोइश्शो सुन चांदी गेनुड। मिनु गे, परमप्रभु यावेमी इ कली नें थिशा ब्रेप्ब, इस्राएली आन परमप्रभु, गो नड, दे तुइक्नेवे।

4 आं गेय पाइब, याक्ब, आ योत्रशो इस्राएल कली गो इ नें थिशा, ब्रेत्तुड। गो इ कली ठेयब नें गेशा ब्रेत्ताक्ड हना यो, गे आं कली मतुइक्ती।

5 गो परमप्रभु यावे नड। गो आं डा लाक्शा सुइ परमप्रभु मबाक्ब। गे आं कली मतुइक्ताक्वी हना यो, गो इ कली ठीक सेल्लन। प्रस्थान २०:३

6 इ कली मार पचा कली ठीक सेल्लन देशा हना, नां दाप्तीक रे नां पेरतीक सम्म गो आं डा लाक्शा अरु सुइ परमप्रभु मबाक्ब, दे मुर नेल्ल आन कली तुइक्पाइक्चा कली ठीक सेल्लन। गो परमप्रभु यावे नड, गो आं डा लाक्शा अरु सुइ परमप्रभु मबाक्ब।

7 गो छेडछेड नु छिडछिड सेल्ब नड। गो थुं नाइक्पाइक्ब नु श्येत जपाइक्ब सेल्ब नड। गो, परमप्रभु यावेमी, मेको नेल्ल पाइनुड। आमोस ३:६

8 सरीड, रेड यिपतो। ठीक पतीके रेड खोदेशो पा यिल। रागी रोक्सेक्ल, पाप रे प्रोंइतीके ठोसा खोदेशो पा यूब। मेको ठीक पतीके नु कालेमीन कोल्सल। मेको नेल्ल सेल्ब, गो, परमप्रभु यावे नड।

9 आबी, सुमी आ कली सेल्ब कली दोस गेबा, मेको गर आ गम्टे का खोदेशो बाक्ब। मार, खपीमी खप के ग्योब सेल्ब कली 'मार पवी?' देंबा डा? गेयमी गेय पाइब कली 'मजोक्ब बाक्ते' देंबा डा? अय्युब ४०:२; यसैया २९:१६; येरमीया १८:६; रोमी ९:२०

10 आबी, सुमी आ आफ कली 'मारदे आं कली सेल्यी?' मिनु मीश मुर कली 'गे मारदे आल थितीक रोइ पाइनेवे?' देंब।

11 मिनु परमप्रभु यावे, इस्राएली आन का ला बाक्शो परमप्रभु यावे नु इस्राएल कली सेल्बमी, मार देंब देशा हना "गे आं कली 'आं आल ते लाइनीनी' दे हिल्लो पाइनेवे? आं गेय आ पर्वम आं कली अरेचा माल्नेवे?

12 गो रागी नु रागीम बाक्ब मुर आन कली सेल्ला। गो आं गुइमी सरीड प्राक्ता। मिनु मेकेर मार मार बाक्मा, मेको नेल्ल सेल्लामी। यसैया ४४:२४

13 गो कोरेस कली ठीक पचा कली पोक्ता। गो मेको आ लां नेल्ल दिंम सेल्लुड। मेकोमी आं सहर सेल्चा माल्ब। मिनु मेकोमी ग्याइश्शा लाइश्शो मुर आन कली प्रोंइड। मेकोम क्येट नु मारेड कोसेली मताक्ब" दे मुर नेल्ल आन परमप्रभु यावेमी देंत। यसैया ४१:२

परमप्रभुम श्येत रे प्रोंइब देशो

14 मिनु परमप्रभु यावेमी "इजीप्ट डा शोंप, एथीयोपीया डा मारेड मारेड नु साबा रागी डा लाइश्शो मुरपुकी इ के दुन्मी। मेको इ नोले खोइक्नीम। मेकोपुकी फ्रेंशो दुम्शा, इ गे जाक्शा, इ डोंइती बाप्शा 'थमा पा परमप्रभु गे नु बाक्ब। मेको डा लाक्शा अरु सुइ परमप्रभु मबाक्ब' दे पुंडनीम" देंत।

15 थमा पा, गे परमप्रभु बाक्नीनी। गे खुइसीशो बाक्नीनी। गे इस्राएली आन परमप्रभु, श्येत रे प्रोंइब बाक्नीनी। रोमी ११:३३; यसैया ४३:११

16 मूर्ति सेल्ब नेल्ल मुने दोक्शा, कालेम आन कुल राव किक्शा लाइनीम। यसैया ४४:९-११

17 तन्न परमप्रभु यावेमी इस्राएल कली श्येत रे प्रोंइब। मेको गेना हना यो लीब श्येत रे प्रोंइतीकेमी बाक्ब। गे गेना हना यो मुने मदोक्थु, इन कुल मक्किपाइक्नीनी।

18 मिनु परमप्रभु यावे सरीड नु रागी सेल्ब बाक्ब। मुर मबाक्तीके मसेल्थु, मुर आन कली बाक्तीक सेल्लु। मेकोमी "गो परमप्रभु यावे नड। आं डा लाक्शा अरु सुइ परमप्रभु मबाक्ब।

19 गो छिडछिड डा रागीमी खुइश्शो लोत्र मपड। गो याक्ब आ आल आन कली 'गे आं कली खल्बलम मालीने' मदेंड। गो, परमप्रभु यावेमी थमा नु ठीक लोत्र ला पाइनुड" देंत। यसैया ४८:१६

मूर्तिम बेबीलोन प्रॉइने मचाप्नीम

20 मिनु परमप्रभु यावेमी “गे नेल्ल खुम्सीशा बुक्कीन। गे रागी रागी डा लीशो मुर आं नेक्था जाक्कीन। शी के मूर्ति कुरबपुकी मारेड मतुडक्ब बाक्नीमी। मेकोपुकीमी आन मूर्ति कली पुंडना पुंडन बाक्नीमी। तन्न मेकोपुकीमी श्येत रे प्रॉइने मचाप्नीम।

21 इ लोत्र शंशा, लोत्र पावो। लोत्र पमने। साइ डोंइती एको लोत्र सुम देंमे? सुमी तुडक्पदा? मेको नोले दुम्ब लोत्र सुम पवा? गो, परमप्रभु यावे मनडा डा? आं डा लाक्शा, अरु सुइ परमप्रभु मबाक्ब। गो ठीक पाइब नु श्येत रे प्रॉइब परमप्रभु यावे नड। आं डा लाक्शा, अरु सुइ परमप्रभु मबाक्ब।

22 आं गे लेतीन। मिनु पाप रे प्रॉइचा पुंडसीन। रागी डा सुर सम्म मो पने। मारदे हना गो परमप्रभु नड। आं डा लाक्शा अरु सुइ परमप्रभु मबाक्ब।

23 गो आं नेमी कसम जाता। गो ठीक लोत्र पाता। एको लोत्र मक्याम्सीब। मुर नेल्ले आं डोंइती पोक्च थेक्चा माल्नीम। आं नेमी कसम जचा माल्नीम। रोमी १४:११; फिलिप्पी २:१०-११

24 ‘परमप्रभु यावे ला ठीक पतीके नु सक्ति गेब बाक्ब’ दे कसम जाइनीम। परमप्रभु यावे कली मटीब नेल्ल आं बाक्तीकेम जाक्शा मुने दोक्चा माल्नीम। येरमीया २३:६

25 इस्राएल आ चच युइ नेल्लेम ‘परमप्रभु यावेमी इ कली ठीक सेल्लब। गोपुकी आ मुर दुम्तय’ दे ग्येरसीनीम” देत। येरमीया ९:२२-२३

## 46

बेबीलोन डा मूर्ति खतम दुम्शो

1 बेल गुर ब्वेत। नेबो दिड गोल्त। मेको आन मूर्तिपुकी बी ब्यफ आन कली कुरपाइक्नीम। इन कुरशो थोत्रक गे दशो बी ब्यफ आन कली कुरपाइक्नीनी। येरमीया ५०:२

2 मिनु मेकोपुकी कालेम दिड गोल्शा, गुर ब्वेनीम। आन भारी प्रॉइने मचाप्नीम। मिनु आंमा ग्याइशशा लाइक्चा पुंडसीनीम।

3 “याक्ब आ खिं डा मुर, आं लोत्र नेनीन। इस्राएल आ खिं डा लीशो मुरपुकी आं लोत्र नेनीन। गे जरमेसीनी रे इन कली कुरता। गे कोत्रजीम बाक्नी रेन इन कली कुरता।

4 गेपुकी खूशो दुम्नी सम्म गो खाल का डा बाक्नुड। इन चां बोइक्म सम्म यो इन कली कुरनन्नी। गो इन कली सेल्शा, कुरनुड। इन कली कुरशा, पाप रे प्रॉइनन्नी। भजन संग्रह ७१:१८

5 गेपुकी आं कली सु नु थाप्नीनी, सु नु उडक्थ बाक्त देंनीनी? यसैया ४४:१-२०

6 मिनु शुश सुन थीब नु चांदी नाक्बपुकीमी चेम्ब कली ब्रेत्नीम। मिनु मेको रे मूर्ति सेल्पाइक्नीम। मेको आ डोंइती बाप्शा पूजा पाइनीम।

7 मिनु मेको कली गुप्शा, बलाम कुरशा, लाइशशा, आ बाक्तीकेम वोदमेनु, मेकेर मडक्थ, मगाक्थ बाक्ब। सुइमी मेको आ डोंइती जाक्शा ‘प्रॉइयीनी’ देत हना, मेकोमी लोत्र मलेप्ब। सुइ आन कली श्येत रे प्रॉइने मचाप्ब” देत। १राजा १८:२६

परमप्रभुम आ मिम्शो पाइब

8 मिनु “गे हेंथे गाक्बपुकी, आं देशो मिम्तीन। साइ डा लोत्र इन थुंम वोतीन।

9 साइ डोंइती डा माइत लोत्र मिम्तीन। मारदे हना गो परमप्रभु नड, आं डा लाक्शा, अरु सुइ परमप्रभु मबाक्नीम। गो परमप्रभु नड, आं खोदेशो सुइ मबाक्नीम। यसैया ४४:६

10 गो साइ डोंइती रे नोले सम्म मार दुम्मे, नेल्ल शंनुड। डोंइती रे मुल सम्म मडुम्शो यो देंनुड। मिनु गो आं मिम्शो मफाइक्थु, नेल्ल पाइनुड। आ मिम्शो नेल्ल खाप्नुड।

11 गो पूर्व रे सिखार ग्यारब चिक्ब का ब्रेत्नुड। मिनु डोन रागी रे आं मिम्शो नेल्ल पाइब मुर का कली ब्रेत्नुड। गो आं देशो लोत्र खाप्नुड। आं मिम्शो पाइनुड। यसैया ४१:२

12 गे खकटा थुं पाइशशोपुकी नेनीन। गे पाप रे प्रॉइतीके रे शुश डोन बाक्नीनी।

13 आं पाप रे प्रॉइतीक चाक्नुड, मेको डोन मबाक्ब। गो इन कली रीब पा पाप रे प्रॉइनुड। गो आं पाप रे प्रॉइतीक सियोनम वोडक्नुड। इस्राएल कली आं छेडछेड गेनुड” देत।

## 47

बेबीलोन सहर खतम दुम्शो

1 मिनु “गे कन्ने तमी बेबीलोन तोइशशा फुरकुम निस्सो। बेबीलोन डा कल्दी आ तमी, टेयब नित्तीक मबाक्थु, खपीम निस्सो। मारदे हना मुल रे इन कली ‘दारशो नु अरु आन क्येडा शुश दाक्शो तमी’ मदेनीम।

2 फस हिल्लो। इ कुल सुम्सीशो वा हाक्सो। इ गुने ग्येत्थ क्युक्सो फिला कोंइशा खोला शोक्सो।

3 इ वा हुक्शा, इ शिन्ना रां कोंइचा माल्नेवे। इ मुने दोक्तीके तांडसीब। गो इ कली क्येक्क लेत्नुड। गो सुइ कली मप्रॉइनुडमी। नहुम ३:५

4 आंइ कली श्येत रे प्रॉइब, मुर नेल्ल आन परमप्रभु यावे, इस्राएली आन का ला बाक्शो परमप्रभु बाक्ब।

5 कल्दी आ तमी ब्वालैइ पा छिडछिडम लशा निस्सो। मारदे हना गे मुल रे राज्यपुकी डा पिपीम माइक्चा मप्रॉइसीनेवे।

6 गो आं मुर आन कली तशा गाइश्शा, मेको आन कली 'आं मुर मनम' खोदेशो सेलतामी। मेना इ गुइमी गेतामी। मिनु मेको आन कली काइ शिशो मपदी। खूशो आन कली यो श्येत गेशा, हेल्शो जवा लाप्ताकवी। जकरिया १:१५

7 मिनु गे 'गो गेना हना यो पिपीम बाक्नुड' देते। गे आं मुर आन कली मरिम्शो पाप्तीवी। नोले मार दुम्बा, मेको ममिम्ती।

8 मोपतीके गे दला दाक्स पाइब, नेनो। गे रिम्शो पा महिंथु बाक्ते। इ थुमी 'गो ठेयब नड, आं क्येडा लाकशो अरु सुइ मबाक्ब। गो वोंइश बेकशो मीश मुर मदुम्नुड। आं आल बेकशो मताइनुड' देते। सेफन्याह २:१५; प्रकाश १८:७

9 वोंइश बेकशो मीश मुर दुम्तीके श्येत नेल्ल ताइनेवे। इ आल बेकशो ताइनेवे। नाक्ती का, याम कामीन एको श्येत निक्शी इ कली दुम्नीस। शुश मन्तर तन्तर, ठेयब सक्ति पाइश्शो टुना मुना पाप्तीवी हना यो, मो दुम्शो ताइनेवे।

10 गे, परमप्रभु यावे आ अरेशो मटिथु 'आं कली सुइम मताइब' दे हेम्मा पा बाक्शा, मिम्ताकवी। मिनु इ शुश तुइक्तीके नु जोक्तीकेम इ कली दूली लां खोइक्पाइक्तु। इ थुमी 'गो नड। आं क्येडा लाकशो अरु सुइ मबाक्नीम' देते। भजन संग्रह १०:११

11 तन्न मुल गे शुश श्येत जाइनेवे। इ मन्तर तन्तरमी तिवने मचाप्नेवे। गे शुश हिंचा डा श्येत जाइनेवे। गे मेको तेक्ने मचाप्नेवे। मुल सम्म मतुइश्शो जाम्तीक नु नुप्तीक इ तारी जाक्ब।

12 गे इ टुना मुना नु मन्तर तन्तर शुश पावो। गे आल रेन मोदेशो पाप्तीवी। मेको पवीनु, ठीक दुम्बा को? मेको श्येत मजाक्बा को? दानीएल २:२

13 गे शुश अर्ती नेशा दशो बाक्नेवे। मिनु कल्दीपुकीमी सरीड कोव्रशा, इ कली पाप रे प्रोन्मेकल। मिनु सोरुल कोव्रबमी औंसीमी इ कली मार दुम्बा, मेको देंमल।

14 मेकोपुकी टुटा दुम्नीम। मिनु मीम मेको आन कली नेक्ब। आंमा मेको मी रे प्रोंइसीने मचाप्नीम। मेको मी थेरचा डा मदुम्थु, आ डोंइती बाक्ने मचाप्नीम।

15 गे नु गेय पाइब मुरपुकी मोदेशो मुर बाक्नीमी। गे आल रेन मेकोपुकी नु ग्याप्तीक लेयती गेय पाप्तीवी। मेको का का पा आन आंम लां खोइक्नीम। मिनु इ कली प्रोंइब सुइ मबाक्नीम" देत।

## 48

परमप्रभुम नोले दुम्ब लोव्र शेंशो

1 मिनु परमप्रभु यावेमी "याकूब आ खिं डा मुर, नेनीन। इन कली इस्राएल नें वोइश्शो बाक्ब। गे यहूदा आ चच युइ बाक्नीनी। गे परमप्रभु यावे आ नें थिशा, कसम जाइनीनी। गे इस्राएली आन परमप्रभु कली ठेयब सेल्लु पाइनीनी। यसैया ५१:१

2 मेकोपुकी आंम आंमा 'गोपुकी परमप्रभु आ योव्रशो सहर डा नकी' देंनीम। इस्राएली आन परमप्रभु आ परबम मेकोम आंइ कली कोव्रब" दे मिम्नीनी। मेको आ नें मुर नेल्ल आन परमप्रभु यावे बाक्ब।

3 गो इन कली साइ डोंइती डा लोव्र डोंइती रेन शेंताक्नीनी। गो लोव्र पा नेंपाइक्तनीनी। नोले गो मेको याम काम पाता। मिनु दुम्तेक्म।

4 गे मटीब बाक्नीनी। इन शुर फलाम खोदेशो बाक्ब। इन कुप्फी कांसा खोदेशो बाक्ब। गो मेको तुइश्शो बाक्नुड।

5 मोपतीके गो इन कली मेको दुम्चा क्येडा डोंइती शेंताक्नीनी। मिनु गे "मेको आं मूर्तिम पाप्तु। आं मुशा सेल्लो मूर्तिम नु आं चेम्शा सेल्लो मूर्तिमी मेको पाप्तु" देने मचाप्नी।

6 गे मेको नेल्ल नेशो बाक्नीनी। मुल गे नेल्ल कोव्रडीन। मिनु मेको आ परबम लोव्र मपाइनीनी? मुल रे गो इन कली नक लोव्र नेंपाइक्नन्नी। इन मतुइश्शो खुइश्शो लोव्र शेंनन्नी।

7 मेको डोंइती डा ममाइ, गो मेको मुल पाता। डोंइती मनेशो ननी। मिनु गोपुकीमी "गो डोंइती रे तुइश्शो नकी" देने मचाप्नीनी।

8 गे मेको मनेशो मतुइश्शो बाक्नीनी। साइ डोंइती रे नोफा मनेंब बाक्तीनी। गे जोल पा गेय पाइब बाक्नीनी। मेको गो तुइक्ताक्ड। आल रेन गे काइ मटीब बाक्तीनी, दे तुइक्ताक्ड।

9 आं नें आ परबम आं गाइक्तीके तेक्नुड। आं कली ठेयब सेल्लतीके, गो इन परबम आं गाइक्तीके तेक्नुड। इन कली मसाइक्चा कली मो पाइनुड।

10 कोव्रडीन, गो इन कली यपाइक्ता, तन्न चांदी खोदेशो पा ममाइ। शुश श्येत जपाइश्शा, नाक्ताक्नीनी। ब्यवस्था ४:२०

11 गो आं परबम पाइनुड। मारदे आं नें प्रांरा दिशो सेल्ल्या गेनुडा? आं छेडछेड नु सक्ति अरु आन कली मगेनुडमी। यसैया ४२:८

इस्राएल कली पाप रे प्रोंइशो

12 याकूब आं लोव्र नेनो। आं ब्रेश्शो इस्राएल नेनो। "गो, गो नड। गो नेल्ल क्येडा डोंइती नु नेल्ल क्येडा नोले डा नड।

13 गो रागी आ जग वोइक्ता। आं ग्युना गुइमी सरीड प्राक्ता। मेको आन कली ब्रेल्लतुनेल्ल गूशा राप्नीम।

14 गे नेल्ले खुम्सीशा, आं लोव्र नेनीन। मेको आन दातेमी सुम मोदेशो शेंदा? परमप्रभु यावेम मेको आन कली दाक्ब। मिनु मेको बेबीलोन आ परबम बोक्ब। कल्दी डा मुर आन कली लडाइ तोइब। यसैया ४१:२

15 गो एको लोव्र पाता। गो मेको कली ब्रेश्शा, चाक्ता। मिनु मेकोमी आं मिम्शो गेय रिम्शो पा पाइब।

16 आं नेक्था जाक्ता, एको लोव्र नेनीन। गो डोंइती रे खुइश्शो लोव्र काइ मपड। एको गोशो रे गो बाक्शो नड। मुल परमप्रभु, परमप्रभु यावेमी आ सोक्त गेशा, आं कली सोइक्ताक्यी" देत। यसैया ४५:१९



बेबीलोन रे गूडीन देंशो

17 इन कली श्येत रे प्रॉडब इस्त्राएली आन का ला बाक्शो परमप्रभुमी “गो परमप्रभु यावे, इन परमप्रभु नड। गो इन कली रिम्शो दुन्चा कली शेंनुड। मिनु तेको लां लचा माल्नीनी, मेको कौंडनुड।

18 गेपुकी आं शेशो टिशो ननी हना, इन सोशा बोशा लतीके टेयब खोला खोदेशो दुम वा। इन रिम्शो दुम्तीके समुन्द्र खोदेशो दुम वा। ब्यवस्था ५:२९

19 मिनु इन आल समुन्द्र डा बाल्वा खोदेशो पा शुश दुम वा। मिनु इन चच युड अन्न खोदेशो पा शुश दुम वा। आन नें गेनायो मक्याम्स वा। मिनु आं डोंडती रे खतम मदुम वा। उत्पत्ती २२:१७

20 ‘बेबीलोन रे गूडीन। कल्दी आन रागी रे प्रोक्कीन’ दे टेयब सेंदा पा नेल्ल आन कली नेंपतीन। रागी डा सुर सम्म नेंपतीन। गेपुकीमी ‘परमप्रभु यावेमी आ गेय पाइब याकूब कली पाप रे प्रॉडतु’ दे नेंपतीन” देत। येरमीया ५१:६; प्रकाश १८:४

21 मेकोमी मेको आन कली गोरशो रागीम लदानु, मेकोपुकी ब्वाक्कु तूत मदाक्म। मारदे हना मेकोमी सेरथे फुल्लु रे ब्वाक्कु बुक्पाइक्कु। सेरथे फुल्लु प्रोलानु, शुश ब्वाक्कु गूत।

22 परमप्रभु यावेमी “आं अरेशो लोत्र मटीब आन थुं नाइक्चा मताइनीम” देत। यसैया ५७:२१

## 49

परमप्रभु यावे आ गेय पाइब

यसैया ४२:१-४

1 गे समुन्द्र आ नेक्था बाक्बपुकी, होस पने। गे डोन रागी डा मुरपुकी, होस पने। परमप्रभु यावेमी आं कली आ जरमेचा क्येडा डोंडती रेन ब्रेशो बाक्त। गो आं ममा आ कोव्रजीम बाक्डानु, मेकोमी आं कली नें गेती।

2 मेकोमी आं शोत्र हेरशो तरवार खोदेशो सेल्लु। आं कली आ गुडमी सुम्शा, खुइक्ताक्यी। मेकोमी आं कली हेरशो ब्रा खोदेशो सेल्शा, आ ब्रा कुरतीकेम कुर पा खुइश्शा वोइक्ती। हिब्रू ४:१२; प्रकाश १:१६; यसैया ५१:१६

3 मिनु आं कली “गे आं गेय पाइब बाक्नेवे। गे इस्त्राएल नवे। इ पतीकेमी आं सक्ति कौंडनुड” देत।

4 मिनु गो “गो मो गेय पाता। आं बोल मो खेरता। गो मार पचा माल्नुडा। मेको परमप्रभु यावे नु बाक्ब। आं परमप्रभुमी आं तचा माल्लो गेब” देती। १कोरिन्थी १५:५८

5 मुल परमप्रभु यावेम आं गेय पाइब सेल्लु। मिनु गो याकूब कली आ गे लेप्पाइक्चा कली नु इस्त्राएल मेको आ नेक्था खुष्शा वोइक्चा कली मेकोमी आं कली आं ममा आ कोव्रजीम सेल्लु। मारदे हना गो परमप्रभु यावे आ डोंडती मान ताइब दुम्ती। आं परमप्रभु आं सक्ति दुम्त।

6 मिनु मेकोमी “याकूब आ थर डा मुरपुकी नु इस्त्राएल डा लीशो मुर आन कली डोंडती डा खोदेशो सेल्चा कली इ कली आइक्च गेय का बाक्ब। गो इ कली रागी रागी डा मुर आन कली छेडछेड दुम्पाइक्नुड। मिनु मेको आं पाप रे प्रॉडतीके रागी डा सुर सम्म ब्रल” देत। यसैया ४२:६; यसैया ६०:३; लूका २:१२; प्रेरित १३:४७

7 परमप्रभु यावेम, इस्त्राएली आन श्येत रे प्रॉडब, इस्त्राएली आन का ला बाक्शो परमप्रभु यावेमी काइ मदाक्शो नु रागी डा मुरुम खेदा पचा पुंडसीशो नु हुकुम पाइब आन वाइल आन कली “पिपपुकी मेको कली तशा, राप्नीम। हुकुम पाइबम आ देशो पाइब परमप्रभु यावे आ डोंडती बाप्नीम। इ कली योत्रब इस्त्राएली आन का ला बाक्शो परमप्रभु आ डोंडती बाप्नीम” देत।

इस्त्राएली कली पाप रे प्रॉडब

8 मिनु परमप्रभु यावेमी “शिशी पतीक नाक्त गो इ लोत्र नेंशा, लोत्र लेत्ताक्न। प्रॉडतीके नाक्त गो इ कली वारच पाता। गो इ कली कोव्रशा, आं कबल डा मुर सेल्लु। गो रागी लेंशा सेल्चा कली मोदेशो पाता। इन थेरशो रू लेंशा इन कली गेचा कली मो पाता। भजन संग्रह ६९:१४; २कोरिन्थी ६:२; यसैया ४२:६

9 गो जेल्खानम बाक्ब आन कली ‘गूडीन’, छिडछिडम बाक्ब आन कली ‘छेडछेडम गूडीन’ देंचा कली ब्रेत्ताक्न। मेकोपुकी आं भेडा बाक्नीम। लांमी जोचा ताइनीम। गोरशो डांडा मेको आन रिम्शो पा जोतीके बाक्तीके दुम्ब।

10 शोत्रल्लु मबेक्नीम, तूत मदाक्नीम। नां नु होश फश नु नांमी मेको आन कली मनाप्ब। मारदे हना मेको आन कली शिशी पाइबमी मेको आन कली खुल्ब। प्रकाश ७:१६

11 मिनु गो आं डांडा नेल्ले लां सेल्लुड। आं टेयब लां रिम्शो पा सेल्पाइक्नुड। यसैया ४०:४

12 नेनीन, मेकोपुकी डोन रे जाक्नीम। मेकोपुकी उत्तर रे पच्छिम रे नु स्येने रागी रे जाक्नीम” देत। स्येने रागी इजीप्त आ दक्खिनम यहूदी आन बाक्तीके का बाक्ब। मेको कली आस्वान यो देंनीम। लूका १३:२९

13 सरीड, ग्येरसीशा कुम्सो पावो। रागी, ग्येरसो। डांडापुकी ग्येरशा, कुम्सो पने। मारदे हना परमप्रभु यावेमी आ मुर आन कली लेम्ताक्व। मेकोमी श्येत जाइब आन कली शिशी पाइब। यसैया ४४:२३

सियोन डा शुश मुर

14 तन्न सियोनमी “आं परमप्रभु यावे, परमप्रभुम आं कली प्रॉडशा प्रेंताक्यी” देत।

15 मिनु परमप्रभुम “सुड मीश मुरुम आ दूध तूब आल कली प्रेंबा डा? आंम आ आल कली शिशी मपाइबा डा? मेकोम आ आल कली प्रेंन चान्तु हना यो, गो इ कली मप्रेंनुड। उत्पत्ती २१:१६; १राजा ३:२६; येरमीया ३१:२०

16 कोव्रडो, गो इ कली आं गुडमी ब्रेक्ताक्न। इ गारोपुकी गेना हना यो आं डोंडती बाक्नीम।

- 17 इ तमी तौ रीब पा जाक्नीम। इ कली खतम पोक्ब गूशा लाइनीम” दैत।
- 18 कोव्रडो, मिक्च हिरशा कोव्रडो। मेको नेल्ल गुम्शा, इ बाक्तीक जाक्नीम। परमप्रभु यावेमी “गो ब्रोंडशा बाक्शो खोदेशो पा, गे मेको लेशशा जाक्ब आन कली माला खोदेशो पा रेलसीचा माल्नेवे। ग्युम्ली खोदेशो पा मेकोपुकीमी ग्योम्सीचा माल्नेवे। यसैया ६०:४
- 19 थमा पा इ प्रेशशो खिं, मुर मबाक्शो रागी नु इ खतम दुम्शो रागीम मुर मरिक्शी दुम्नीम। इ जोरी सनु डोन लाइनीम।
- 20 इन ब्राची ना डा जरमेशो आलपुकीमी इ कली ‘एको रागीम आंइ कली मरिक्त, अर्को बाक्तीक रू गेकी’ देनीम। यसैया ५४:१
- 21 मिनु गे इ थुमी ‘एको आलपुकी आं कली सुम थिशा गेयी? गो आल मथीब दुम्शो बाक्ती। आं रागी रे ग्याइश्शा लाइक्चा पुंडसाक्यी। सुम मेको आन कली थुल्शा कोल्पदा? गो दा आं का ला लीशो बाक्ती। एको ते रे जाक्मा?’ दे मिम्नेवे” दैत।
- 22 मिनु परमप्रभु, परमप्रभु यावेमी “गो आं गुड रागी रागी गे दिनुड। गो जात जात डा मुर आन डोंडती आं छेदर खुक्शा कोंडनुड। मिनु मेकोपुकीमी इ तौ आन कली कुचुम मुप्शा नु इ तमी आन कली चीम कुरशा चाक्नीम। यसैया ६०:४
- 23 मिनु पिपपुकी इ कली कोव्रब आफ नु पिपीमपुकी इ कली दूध तुंडब ममा दुम्नीम। मेकोपुकी इ डोंडती बाप्शा, इ फुरक लुम्सीशो खोडली तुक्नीम। मिनु गो परमप्रभु यावे नड, दे तुडक्नेवे। आं लां रिम्शा बाक्बपुकी मुने मदोक्नीम” दैत। भजन संग्रह ७२:९; यसैया ६०:१६
- 24 बोल्यो मुर आन रोइश्शो सिखार सुम रोइक्ने चाप्नीमी डा? हिंचा डा पिपम चोक्शो मुर आन कली सुम प्रॉइने चाप्नीमी डा?
- 25 तन्न परमप्रभु यावेमी “बोल्यो मुर आन ग्याइश्शो मुरपुकी यो लाइक्चा पुंडसीनीम। हिंचा डा पिपम चोक्शोपुकी प्रॉइचा पुंडसीनी। गे नु लडाइ पाइबपुकी नु गो लडाइ पाइनुड। इ आल आन कली गो कोव्रशा प्रॉइनुड। मत्ती १२:२९
- 26 इ कली श्येत गेब आन कली आंम आन श्ये ब्वपाइक्नुड। मेकोपुकी अडगुर शांबुम दुक्शो खोदेशो पा आंम आन हुशेम दुक्नीम। मिनु मुर नेल्लेमी ‘गो इ कली श्येत रे प्रॉइब, इ परमप्रभु यावे नड। गो इ कली पाप रे प्रॉइब, याक्ब आ सक्ति पाइश्शो परमप्रभु नड’ दे तुडक्नीम” दैत।

## 50

परमप्रभुम इस्राएली कली हुइश्शो

- 1 मिनु परमप्रभु यावेमी “गोम इन ममा कली प्रॉइशा गेशो छोड पत्र ते बाक्म? गो तेको आं कली जेर गेब कली इन कली लेयन्नी? ममाइ, गे इन पापम पतीके लेयसीशो ननी। इन हेंथे पतीकेमी इन ममा प्रॉइचा पुंडसीशो बाक्ब। यसैया ५४:६; ब्यवस्था २४:१; यसैया ५२:३
- 2 गो जाक्डानु, मारदे सुइ मबाक्मा? गो ब्रेडडानु, मारदे सुइमी लोव्र मलेत्ता? आं गुड इन कली पाप रे प्रॉइने मचाप्चा डा दुम्शो बाक्मे? इन कली प्रॉइने चाप्तीक सक्ति गो नु मबाक्बा? गो हुइक्तुनु, समुन्द्र सोव्रब। खोलापुकी ब्वाक्कु मबाक्शो गोरशो रागी सेल्लुड। ब्वाक्कु मबाक्तीके डाइपुकी बेक्शा, राक्शा, रिना पाइनीम। यसैया ५९:१; गन्ती ११:२३; प्रस्थान १४:२१
- 3 गो सरीड कली छिडछिडम गिल्शा, अरन्डी फेक्पाइक्नुड” दैत।

परमप्रभु आ गेय पाइबमी टिश्शो

यसैया ४२:१-४

- 4 परमप्रभु, परमप्रभु यावेमी आं कली शेंब सेलती। गो मचाप्शो मुर आन कली लोव्र पा आन थुं बारपाइक्ब दुम्ती। मेकोम आं कली सुनी कुस कुस पोक्ब। आं कली शेंसीब खोदेशो पा नोफा दाइश्शा नेंब सेल्लब।
- 5 परमप्रभु, परमप्रभु यावेमी आं कली आ लोव्र नेंपाइक्ती। मिनु गो आ लोव्र टिश्शा, नोले मशोंडसीड। भजन संग्रह ४०:७
- 6 गो आं ची तुप्ब आन कली तुप्चा गेतामी। गाल शोक्के ब्विप्ब आन कली चोव्रको दाइश्शा गेतामी। गो शुक्शी पाइक्चा नु तोक्चा पुंडसीतीक रे आं कुल मखुइक्तु। यूहन्ना १९:१; मत्ती २६:६७-६८
- 7 तन्न परमप्रभु, परमप्रभु यावेमी आं कली वारच पाइक्ती। मोपतीके गो शिशी मताइब मदुम्ड। आं कुल शेराल फुल्लु खोदेशो सेल्ला। गो मुने मदोक्नुड, दे तुइश्शो नड। इजीकीएल ३:८-९
- 8 “गे रिम्शो पाइब बाक्नेवे” दैब आं नेक्था बाक्ब। गो नु सु लडाइ पाइबा? कालेमी बोक्शा राप्य। दोस गेब, सु बाक्मा? मेको आं डोंडती जाक्मल। रोमी ८:३३
- 9 परमप्रभु, परमप्रभु यावेमी आं कली वारच पाइब। आं कली दोस गेब, सु बाक्नीमी? मेको नेल्ले फेक्शो वा खोदेशो पा माडत दुम्नीम। मिनु तुम्बुम मेको कली नेक्नीम।
- 10 इन दातेमी परमप्रभु यावे कली मान पा हिंब सु बाक्नी? मिनु आं गेय पाइब आं देशो टीब सु बाक्नी? मेको छिडछिडम गाक्शा, छेडछेड काइ मताइब बाक्त हना यो, परमप्रभु यावेम “आं कली श्येत रे प्रॉइब” दे थमा सुइश्शा, आ परमप्रभु कली जिम्मा गेंसीशो बाक्ब।
- 11 गे नेल्ल खिं सुइक्ब बाक्नीनी। कोक्त सुइक्ब बाक्नीनी। इन सुइश्शो मीम गाक्कीन। गे आं गुड रे मार ताइनीनी? गे गोल्शा शुश श्येत जाइनीनी।

## 51

सियोन आ थुं बारपाइशशो

1 परमप्रभु यावे कली माल्ब नु ठीक पचा दाक्ब आन कली “आं लोव्र नेनीन। तेको सेरथे फुल्लु रे मुचा पुंडसीशो बाकनी नु तेको खप रे दोशा गुंडचा पुंडसीनी, मेको कली कोव्रडीन। यसैया ४८:१; ब्यवस्था ३३:२८

2 इन किकी पिपी अब्राहाम नु इन कली थीब सारा आस कली कोव्रडीन। मारदे हना गो मेको कली आ का बाकमेनु, ब्रेताक्वड। मिनु मेको कली आसीक गेशा, आ चच युड आन कली सोपाइशशा बोपाइशशा शुश सेल्लाक्मी” देत। यसैया ४१:८; उत्पत्ती १२:१-२

3 परमप्रभु यावेमी सियोन आ थुं बारपाइक्ब। आ खतम सेल्लो बाक्तीके नेल्ल नक सेल्व। आ मुर मबाक्तीके कली एदेन खोदेशो सेल्व। आ गोरशो रागी कली परमप्रभु यावे आ रू खोदेशो सेल्व। मेकेर शुश ग्येरनीम। “गे रिम्शो पाइब बाक्नीनी” दे कुम्सो पशो नेंसीब। उत्पत्ती २:८

4 मिनु परमप्रभुमी “आं मुरपुकी, आं लोव्र नेनीन। आं रागी डा मुरपुकी इन नोफा दाइक्तीन। मारदे हना गो आं लोव्र शेनुड। आं ठीक निसाफ जात जात डा मुर आन कली तुइक्पाइक्नुड। मेको आन कली छेडछेड दुम्ब।

5 गो आं ठीक पतीके रीब पा चाक्नुड। गो ग्राचा चिक्शो बाक्नुड। मिनु गो जात जात डा मुर आन कली निसाफ पाइनुड। समुन्द्र आ नेक्था बाक्ब मुरपुकीम आं लां कोव्रनीम। आं वारच पतीके रिम्नीम। यसैया ४२:४

6 मिनु सरीड गे कोव्रडीन। खप गे कोव्रडीन। मारदे हना सरीड कुन खोदेशो पा जाम्ब। रागी वा खोदेशो पा जेक्ब। रागीम बाक्ब मुर नेल्ल भुस्ना खोदेशो पा बेक्नीम। आं पाप रे प्रोंडतीके चहिं गेना हना यो लीशा बाक्ब। आं ग्रातीके गेनायो मनुप्ब। भजन संग्रह १०२:२६-२७; मत्ती २४:३५

7 गे ठीक पतीके तुइक्बपुकी आं लोव्र नेनीन। आं शेशो थुंमी वोइक्ब मुर आं लोव्र नेनीन। मुर आन शुक्शी पशो नेंशा महिनीन। मेको आन तोक्शा पशो लोव्र नेंशा सुर्ता मपने। यसैया मत्ती ५:११

8 मारदे हना तुम्बुम वा नेक्शो खोदेशो पा, मेको आन कली नेक्नीम। बुस्सुम ऊन खोइशशो खोदेशो पा खोइक्नीम। आं ग्राचा चहिं गेना हना यो लीशा बाक्ब। आं पाप रे प्रोंडतीके पाला पाला नेल्ल आन कली लीब” देत।

परमप्रभु यावे आ गेय

9 परमप्रभु यावे सेंसीन, सेंसीन। सक्ति पाइशशो दुमीन। साइ डोंडती आंइ किकी पिपी आन कली पशो खोदेशो पा, पने। साइ गे राहाब माइशशो समुन्द्र डा जन्तु कली मसाइक्नी डा? ठेयब बुस्स कली मत्तीनी डा? भजन संग्रह ८९:११

10 समुन्द्र सोव्रपाइक्ब, गे मननी डा? गे समुन्द्र कली चेशशा आ पुंम लां मसेल्नी डा? इन पाप रे प्रोंडशो, इन मुर आन कली शोक्पाइक्चा कली मोदेशो पाइतीनी। प्रस्थान १४:२१-२२

11 परमप्रभु यावे आ प्रोंडशोपुकी लेल्नीम। मेकोपुकी कुम्सो पना पन सियोनम जाक्नीम। मिनु गेना हना यो ग्येरशा बाक्नीम। शुश ग्येरतीके, मेको आन श्येत नु हुकयी पतीके जाम्शा लाइब। यसैया ३५:१०

12 परमप्रभुमी “गो इन कली थुं बारपाइक्ब नड। गे मुर तशा, मारदे हिंनीनी? मुरपुकी घांस खोदेशो पा बेक्नीम। भजन संग्रह ५६:५; मत्ती १०:२८; यसैया ४०:१,६

13 गे इन कली सेल्व परमप्रभु यावे कली प्रेंताक्नी। मेकोमी सरीड प्राक्तु। रागी आ जग वोइक्तु। इन कली श्येत गेब मुर गाइक्वतेनु, गे नाक्त कित कित हिंनीनी। मेकोमी इन कली खतम सेल्ला चिक्शो बाक्त। तन्न मुल आ गाइशशो ते लाक्सा? यसैया ४४:२४

14 मिनु चोक्सीशा गु बाप्शो मुर कली रीब पा प्रोंडनीम। मेकोपुकी मबेक्नीम। गेना हना यो जचा ताइनीम।

15 मारदे हना गो परमप्रभु यावे, इन परमप्रभु नड। गो समुन्द्र डा छाल पोक्नुड। आं नें मुर नेल्ल आन परमप्रभु यावे बाक्ब। येरमीया ३१:३५

16 गो इ कली आं लोव्र पपाइक्ता। गो इ कली आं गुड डा वांकुमी सुम्शा वोइक्तन। सरीड प्राक्ब नु रागी आ जग वोइक्ब गो नड। मिनु सियोन कली “गे आं मुर बाक्नीनी” देशो बाक्नुड” देत।

दिप्चा पुंडसीशो यरूसलेम बोक्को

17 यरूसलेम बोक्को। परमप्रभु यावे इ पर्वम गाइशशा, श्येत तूचा गेप्तु। गे दिड दाड गोल्पाइक्ब कचौरा तूशा श्येल्ल सेल्लतीवी। भजन संग्रह ६०:५; भजन संग्रह ७५:९; येरमीया १३:१२-१३; प्रकाश १६:१९

18 मेको आ थिशो आल आन दातेमी, मुर आन कली शेंब सुड मबाक्म। आ कोल्शो आल आन दातेमी मेको आन कली लां कोइब सुड मबाक्म।

19 इ कली श्येत निक्शी जाक्ताक्स। मेको लां नेल्लेम गोल्शो बाक्नीम। डोंडती डा श्येत इन सहर प्रेशशा, खतम दुम्तीके नु नोले डा श्येत अन्काल नु लडाइम, बेक्तीके बाक्त। सुम इ थुं बारपाइक्बा?

20 इ आलपुकी थाम्तेक्म। मेको लाम गोल्शो बाक्नीम। मेको ब्वारदम रेशशो रोकोश खोदेशो दुम्शो बाक्नीम। परमप्रभु यावे आ गाइक्तीके नु हुइक्तीके मोदेशो दुम्शो बाक्नीम। बिलाप २:११,१९

21 मोपतीके गे गार पाइशशो मुर नेनीन। गे दुक्शो बाक्नीनी, तन्न अडगुर शांबुम ममाड।

22 परमप्रभु यावे, इ होव्रप दुम्शा परमप्रभुमी “गो आं मुर आन कली वारच पाइब बाक्नुड। गो इ दिड दाड गोल्पाइक्ब कचौरा इ गुड रे लाइक्ता। मुल रे गे आं गाइक्तीक कचौरा लेंशा तूचा ममाल्नेवे।

23 मिनु इ कली श्येत गेब आ गुडमी मेको कचौरा गेनुड। डोंडती मेकोपुकीमी इ कली लाम बाप्पो। “इ तारी गाक्नीक” देतेक्म। मिनु गे इ ची गाक्तीक लां खोदेशो सेल्लतीवी” देत। भजन संग्रह १२९:३

## 52

परमप्रभुम सियोन कली ब्रेशो

1 मिनु परमप्रभुमी “बोक्को। सियोन बोक्को। सक्ति पाइशो दुमो। इ दारशो वा फेक्सो। यरूसलेम, गे परमप्रभु यावे आ सहर बाकनेवे। मुल रे खोइकतीक चिनु मखोइशशो नु ग्रांघा दिचा डा मुर मेकेर ओवने मचान्नीम।

2 यरूसलेम, इ फुरक थुर थुर पांडसो। बोक्को। गे ग्याइशशा चोक्चा पुंडसीशो सियोन आ तमी, इ शुर डा साडलो पुतो” दैत।

3 परमप्रभु यावेमी “गे मोशान लेयसाक्नी। मिनु मोशान प्रोइचा पुंडसीनीनी। यसैया ५०:१

4 साइ डोइती आं मुर उइ इजीप्ट रागीम अकां रागी डा मुर दुमथ लाम्तेक्म। मिनु अस्मुर डा मुरपुकीमी यो मेको आन कली मोशान श्येत गेम्तेक्म” दे परमप्रभु, परमप्रभु यावेमी दैत। उत्पत्ती ४६:५-६; २राजा १७:६

5 मिनु परमप्रभु यावेमी “गे मार पाइनुडा डा? आं मुर आन कली मोशान लाइक्तेक्म। मेको आन कली हुकुम पाइबपुकीमी ठेयब लेशो लोत्र पा नाक्तर रे आं नें आ पबंम शुक्शी पाइनीम। इजीकीएल ३६:२०

6 मोपतीके आं मुर आन कली आं नें तुइक्पाइक्नुडमी। काबु नाक्ती मेकोपुकीमी ‘गे मेको लोत्र पाइब बाक्नुड’ दे तुइक्चा माल्नीम” दैत।

ग्येरपाइक्ब लोत्र

7 डांडा मेरे ग्येरपाइक्ब लोत्र शेशा गाक्ब आन खोइली शुश रिमशो बाक्नीम। मेकोपुकीमी थुं नाइक्चा आ पबंम लोत्र शेनीम। मेकोपुकी रिमशो लोत्र पाइब बाक्नीम। पापर रे प्रोइतीक शेनीम। सियोन कली “इ परमप्रभुम सासन पाइब” देनीम। यसैया ४१:२७; नहुम २:१; रोमी १०:१५

8 नेनीन, इ कली कोत्रब नेल्लेमी ठेयब सेंदा पा ग्येरशा कुम्सो पाइनीम। मारदे हना मेकोमी परमप्रभु यावे सियोन गे लशा लेशशा पिशो ताइनीम। यसैया ६२:६; इजीकीएल ३:१७

9 यरूसलेम डा ब्रेशो खिं ग्येरशा कुम्सो पने। मारदे हना परमप्रभु यावेमी आ मुर आन थुं बारपाइक्तु। मिनु मेकोमी यरूसलेम कली श्येत रे प्रोइतु।

10 परमप्रभु यावेमी रागी रागी डा मुर आन डोइती आ सक्ति कौइताक्व। मिनु रागी आ सुर सम्म डा मुर नेल्लेमी आंइ परमप्रभुमी दोपा पापर रे प्रोइबा, मेको ताइनीम।

11 यूडीन, यूडीन, मेकेर रे यूडीन। ग्रांघा दिशो थोत्रक मथिने। मेको आन दाते रे यूडीन। परमप्रभु यावे आ खिं डा मार मार कुरबपुकी परमप्रभु आ डोइती जाक्शा, इन कली ठीक सेलीन।

12 मारदे हना गे रीब पा लचा ममाल्नीनी। प्रोक्शा लचा यो ममाल्नीनी। मारदे हना परमप्रभु यावे इन डोइती गाक्ब। मिनु मेको इस्त्राएली आन परमप्रभुमी इन कली लां कौइशा खुल्ब। प्रस्थान १२:११; ब्यवस्था १६:३; प्रस्थान १३:२१

परमप्रभु आ गेय पाइब

यसैया ४२:१-४

13 कोत्रडीन, आं गेय पाइबम ग्रांघा ग्रांघा गाक्ब। मेको मान पा ठेयब सेल्चा पुंडसीशा, थम ठेयब दुम्ब।

14 मिनु शुश मुर मेको कली तशा हितेक्म। मारदे हना मेको काइ मरिम्शो तांडसीशो बाक्त। मुर मोदेशो मरिम्शो मतांडसीनीम। आं रं यो मुर आन रं क्येडा मरिम्शो बाक्त। मिनु मेको कली तशा, मुरपुकी हितेक्म।

15 मिनु मेकोमी रागी रागी डा शुश मुर आन कली छक लाक्पाइक्ब। मिनु पिपपुकी मेको कली तशा, सिक्सी पा बाक्नीम। मारदे हना मेको आन डोइती गेनायो मशेंसीशो ताइनीम। मेको आन मनेशो लोत्र आ पबंम शुश मिम्चा माल्नीमी। यसैया ६५:१; रोमी १५:२१

## 53

परमप्रभु यावे आ गेय पाइब

1 आंइ नेशो लोत्र सुम थमा सुदमे डा? मिनु परमप्रभु यावे आ सक्ति सुम तामे डा? यूहन्ना १२:३८; रोमी १०:१६; यसैया ५२:१०

2 मेको आ डोइती बिरवा खोदेशो पा कोलत। सोल्लशो खपीम शाक्श खोदेशो पा कोलत। मिनु मुरुम मेको कली कोल्लचा थुं मपाम। मेको दारशो नु मान ताइब खोदेशो काइ मतांडसीशो बाक्त। मेको मदारशो ममाल्चा डा मुर खोदेशो बाक्त। यसैया ११:१

3 मिनु अरुमी मेको कली ग्रांघा दिशा प्रोइतेक्म। मेको श्येत जाइब नु रोइ पाइक्ब बाक्त। मेको कली तशा, मुरुम आन कुल खुइक्ताक्म। मेको ग्रांघा दित्चा पुंडसेनु, सुइम महिक्गोम। भजन संग्रह २२:७-८; मर्कूस ९:१२

4 थमा पा मेकोमी आंइ श्येत कुरतु, आंइ रोइ पतीक नेल्ल लाइक्तु। मो हना यो गोपुकीमी मेको कली परमप्रभुमी सजाइ गेशा, तुप्शा, दिप्शो खोदेशो लाक्ताक। मती ८:१७

5 तन्न मेको आंइ हेंथे पतीके आ पबंम तुप्शा गार सेल्चा पुंडसाक्व। आंइ मरिम्शो पशो आ पबंम साइक्चा पुंडसाक्व। आंइ कली पापर रे प्रोइचा कली सजाइ ताप्तु। मेको कली तुप्शो गारमी गोपुकी सातक। रोमी ४:२५; १पत्रुस २:२४

6 गो नेल्ले भेडा खोदेशो दुम्शा लां साम्तक। गो नेल्ले आंम आंम लां खोइक्ताक। परमप्रभु यावेमी आंइ मरिम्शो पशो नेल्ले मेको आ तारी वोइक्तु। १पत्रुस २:२५; १यूहन्ना ३:५

7 मिनू मुरपुकीमी मेको कली दिप्शा श्येत गेम्तेकम। मिनू श्येत जशा यो सिक्सी पा मारेइ मदे। साइक्चा चिकशो पाठा खोदेशो पा सिक्सी पा बाकत। मिनू ऊन खोइक्ब आन डोंइती बाक्शो भेडा खोदेशो पा सिक्सी पाप्टु। मेको आन कली लोत्र का यो मपव। मर्कूस १४:६५; यूहन्ना १:२९; प्रेरित ८:३२

8 मिनू मेको कली दूली निसाफ पा साइक्तेकम। नोले मेको कली मार दुम्बा, सुम मेको मिम्ने चाप्बा डा? मेको ब्रोंइशो मुर आन बाक्तीक रे साइक्चा पुंडसाक्व। मुर आन हेंथे पतीके मेको सजाइ तथा साइक्चा पुंडसाक्व।

9 मुरपुकीमी मेको कली परमप्रभु यावे आ अरेशो मटीब आन कली थिम्तीकेमी थिम्तेकम। आ तुरस क्येट थीब नु बाकत। मेकोमी गेना हना यो ठीक ला पाप्टु। मिनू जोल मपव हना यो मेको कली मो पाम्तेकम। १पत्रुस २:२२; १यूहन्ना ३:५

10 परमप्रभु यावेमी मेको कली मोदेशो पा तुप्शा, श्येत गेचा दाक्ताक्व। मेकोमी आ रां पाप क्याम्चा कली चढेप्टु। मो हना यो मेको कली आ आल खोदेशो शुश थमा सुइक्ब आन कली ताइब। मिनू शुश नाकत सम्म ब्रोंइब। मेको आ पतीके नेल्ल परमप्रभु यावे आ दाक्शो गेय दुम्ब। लेवी ५:१५; मती २०:२८; भजन संग्रह २०:३१

11 मेको आ श्येत जशो रे मेकोमी छेडछेड ताइब। मेको आ तुइक्तीकेमी शुश मुर आन कली ठीक पतीके तुइक्पाइक्ब। मेकोमी आन मरिम्शो पशो कुरब। १कोरिन्थी १:३०; यूहन्ना १:२५

12 मोपतीके गो मेको कली टेयब नु सक्ति पाइशो नु वोइक्नुड। मेकोमी बोल्यो मुर नु मार मार योक्सीब। मारदे हना मेको साइक्ब नु मरिम्शो मुरपुकी नु हिक्सीचा पुंडसाक्व। शुश पापी आन पाप कुरतु। मिनू हेंथे गाक्ब मुर आन पबंम परमप्रभु यावे कली पुंडतु। मर्कूस १५:२८; लूका २२:३७; लूका २३:३३-३४

## 54

### परमप्रभुम सियोन कली दाक्शो

1 मिनू परमप्रभु यावेमी “गे आल मथीब मीश मुर, कुम्सो पावो। आल थितीक रोइ गेनायो मपशो मीश मुर, कुम्सो पा ग्येरसो। मारदे हना ग्युंभे पशो मीश मुर आ आल क्येडा, आ का ला बाक्ब मीश मुर आ आल शुश दुम्नीम। यसैया ४९:२०; गलाती ४:२७

2 इ ताम्बु टेयब सेलो। इ बाक्तीक डा ब्रतीक ब्रावो। शिम मदुमो। इ ताम्बु डा डोरी लाइशो सेलो। आ किलापुकी रिम्शो पा खुक्को।

3 मारदे हना गे शुश दुम्शा, ग्युरा पेरा गे ब्राइनीनी। मिनू इ चच युइमी रागी रागी डा मुर आन कली हुकुम पाइनीम। मिनू मुर मबाक्तीके मुर शुश दुम्शा ब्रीनीम।

4 गे महिनो। मारदे हना गे मुने मदोक्नेवे। इ थुं लुक्च लचा मगेवो। गे शिशी ताइनेवे। गे इ ठिटी बाक्डे ना डा मुने प्रेनेवे। इ वोंइश बेक्शो ना डा श्येत लेंशा ममिम्नेवे। भजन संग्रह २५:७; येरमीया ५१:५

5 मारदे हना इ कली सेल्ब इ वोंइश बाक्ब। मेको आ नें मुर नेल्ल आन परमप्रभु यावे बाक्ब। इ कली श्येत रे प्रोंइब इसाएली आन का ला बाक्शो परमप्रभु बाक्ब। मेको आ नें रागी नेल्ल डा परमप्रभु बाक्ब।

6 मारदे हना परमप्रभु यावेमी इ कली प्रोंइसीशो नु थुं लुक्च लशो मीश मुर कली खोदेशो पा ब्रेत्ताक्व। मुल गे ठिटी ना चाक्शा नोले प्रोंइशो मीश आल खोदेशो बाक्नेवे। यसैया ५०:१

7 गो इ कली याम का प्रोंइतन। तन्न गो इ कली शुश शिशी पा लेंशा खुप्ताक्न। भजन संग्रह ३०:६

8 गो शुश गाइशशा, याम का आं कुल इ डोंइती रे खुइक्ताक्ड। तन्न आं गेना हना यो दाक्तीकेमी इ कली शिशी पाइनन” दे इ कली पाप रे प्रोंइब परमप्रभु यावेमी देंत। यसैया ६०:१०; बिलाप ३:३१-३२

9 मिनू लेंशा “मेको आं कली नोआह आ नाक्ती खोदेशो बाक्ब। दोपा गो नोआह आ पाला डा ब्वाक्कुम लेंशा रागी कली मसुम्ब, दे कसम जडा, मोपा गे नु मगाइक्नुड, दे कसम जाता। मिनू गो इ कली महुइक्नुड। उत्पती ९:११-१७

10 डांडापुकी याक्सीनीम, पहाडपुकी हिम्सीनीम। तन्न आं गेना हना यो दाक्तीक इ क्येडा डोन मलाइब। इ थुं नाइक्चा गेब कबल मक्याम्सीब” दे इ कली शिशी पाइब परमप्रभु यावेमी देंत। इजीकीएल ३७:२६

11 मिनू लेंशा “गे श्येत जाइब, फश गिवारम राप्चा पुंडसीशा, थुं बारपाइक्चा मपुंडसीशो, गो इ गारो बोल्यो सेल्लुड। मिनू इ जग साफ़ीर माइशो नीलो हीरा के सेल्लुड। प्रकाश २१:१८-२१

12 इ खिं रूबीन माइशो लल हीराम साप्नुड। इ सहर डा टेयब लाप्चो सिसा खोदेशो हीराम सेल्लुड। इ कली हिरशो गारो नेल्ले हीरा के सेल्लुड” देंत।

13 मिनू परमप्रभु यावेमी इ तमी तौ नेल्ल आन कली शेंब। मेको आन थुं नाइशशा हेम्मा पा बाक्चा ताइनीम। यूहन्ना ६:४५

14 मिनू ठीक पतीकेमी इ कली बोल्यो सेल्ब। गे श्येत गेब आन क्येडा डोन बाक्नेवे। मिनू गे काइ महिनेवे। मारदे हना हिंचा डा श्येत इ नेक्था मजाक्ब।

15 मिनू “सुइ इ कली श्येत गेचा कली खुम्साक्म हना, आं पशो ममाइ। सुमी इ कली लडाइ तोइबा, मेको इ पबंम साइक्चा पुंडसीनीम।

16 कोव्रडीन, गो तुप्तीलपुकी सेल्लामी। मेकोपुकीमी मी मुइशशा, लडाइ पचा कली या सेल्लामी। गो खतम सेल्चा कली खतम सेल्ब कली यो सेल्लता। गो मारेइ मारेइ खतम सेल्ब आन कली यो सेल्लतामी। २सामुएल २४:१६

17 गे नु लडाइ पचा कली सेल्शो यामी मग्रानीम। इ कली सुमी निसाफ पची ना दोस गेबा, मेको नेल्ल फुचा पुंडसीनीम। मोपा शातीके परमप्रभु यावे आं गेय पाइब आन अडस बाक्ब। मेको आं गेशो ठीक पतीके बाक्ब” दे परमप्रभु यावेमी दैत।

## 55

रागी नेल्ल डा मुर आन कली ब्रेशो

1 मिनू परमप्रभु यावेमी “तूतू दाक्बपुकी ब्वाक्कु बाक्तीकेम जाक्कीन। क्येट मथीबपुकी यो जाक्कीन। मिनू ग्याप्शा जने। क्येट मथाप्थु, मोशा अडगुर शांबु नु दूध ग्यापीन। यूहन्ना ७:३७; प्रकाश २२:१७

2 मारदे जचा मदुमशो थोत्रक कली क्येट थाप्नीनी? मारदे मरूपाइक्ब थोत्रक कली इन चेम्शो क्येट थाप्नीनी? आं लोत्र नोफा दाइशशा नेनीन। रिम्शो थोत्रक जने। मिनू ब्रोत्रशो जशा, ग्येरसीने।

3 इन नोफा दाइशशा, आं गे जाक्कीन। नेशा, ब्रोइनीनी। गे ब्रोइशा बाक्चा कली आं लोत्र नेनीन। मिनू गो गेपुकी नु गेना हना यो लीब कबल का पाडनुड। दाऊद कली खोदेशो पा इन कली यो गेना हना यो दाकुनुड। २सामुएल ७:८-१६; येरमीया ३१:३१-३४; प्रेरित १३:३४

4 नेनीन, गो मेको कली जात जात डा मुर आन कली सांकछी सेल्ला। जात जात डा मुर आन कली ठेयब मुर नु हुकुम पाइब सेल्ला।

5 नेनीन, गे इन मतुइशो रागी रागी डा मुर आन कली ब्रेल्नीनी। मिनू इन कली मतुइशो रागी रागी डा मुरपुकी इन गे जाक्कीन। परमप्रभु यावे, इन परमप्रभु, इस्राएली आन का ला बाक्शो परमप्रभु आ पबंम मेकोपुकी जाक्कीन। मारदे हना मेकोमी इन कली आ खोदेशो रिम्शो पा सेल्शो बाक्त” दैत।

6 परमप्रभु यावे कली मथिन्नी सम्म मालीने। मेको आ नेक्था बाक्मेनु, मेको कली पुनीन। येरमीया २९:१३-१४; आमोस ५:४

7 परमप्रभु यावे आ अरेशो मटीबमी आन लां प्रोन्मेक्ल। मिनू ठीक मपाइबमी आन मरिम्शो मिम्शो प्रोन्मेक्ल। परमप्रभु यावे गे लेम्मल। मिनू मेकोमी मेको आन कली शिशो पाइब। मेकोपुकी आंइ परमप्रभु गे लेम्मल। मारदे हना मेकोमी शुश माफ गेब। इजीकीएल १८:२७; इजीकीएल ३३:१; भजन संग्रह १३०:४

8 परमप्रभु यावेमी “आं मिम्शो इन मिम्शो खोदेशो ममाइ, इन लां आं लां खोदेशो ममाइ। रोमी ११:३३

9 सरीड, रागी क्येडा इर बाक्शो खोदेशो पा आं लां, इन लां क्येडा इर बाक्ब। मिनू आं मिम्शो इन मिम्शो, क्येडा इर बाक्ब।

10 सरीड रे रेउ नु फु यिशा, मोशीन मलेप्ब। मेकोमी खप जिप्पाइशशा बाली नाली ग्रेल्पाइक्ब। शोक्ब कली वांचेर गेशा, मुर आन कली जचा गेब।

11 आ लोत्र यो मोदेशो बाक्ब। मेको श्येत्थ मलेप्ब। गो मेको कली मार पथ सोइक्तु, मेको पाइब। आं दाक्शो थमा पा पाइब। आं मिम्शो पाइब। मती १३:८

12 मिनू गेपुकी ग्येरसीशा लाइनीनी। रिम्शो पा लेत्नीनी। इन डोंइती डांडा नु पहाड कुम्सो पाइनीम। मिनू ब्वाकी डा रवा नेल्लेमी गुइ फ्रोक्नीम। यसैया ४४:२३

13 मिनू चू आन पा डा सला रवा नु चूले आन पा डा दारशो आइक्च फू रवा वानीम” दैत। मेको परमप्रभु यावे कली मिम्तीके नु गेना हना यो मजाम्थु, चिन्ड का दुम्शा बाक्ब। यसैया ४१:१९-२०

## 56

नाइक्तीक नाक्ती आसीक ताइनीम

1 मिनू परमप्रभु यावेमी “ठीक निसाफ पने। मार ठीक बाक्मे मेको पने। मारदे हना आं पाप रे प्रोंइतीक रीब पा जाक्ब। मेना गो ग्राब बाक्नुड, दे नेल्लेम तुइक्नीम।

2 सु मेको पाइबा, मेको ग्येरसीशो मुर दुम्ब। आं नाइक्तीक नाक्ती नाइक्ब नु अरु नाक्ती खोदेशो पा गेय मपाइब नु मरिम्शो मपाइब, ग्येरसीशो मुर बाक्ब” दैत। यसैया ५८:१३; उत्पत्ती २:२-३; प्रस्थान १६:२३; प्रस्थान २०:८; येरमीया १७:२१-२२

3 परमप्रभु यावे आ लोत्र टीब अर्को रागी डा मुरुम “परमप्रभु यावेमी आं कली आ मुर रे तिल्ल” दैचा मगेने। मिनू आल मथीबपुकीमी “गो सोत्रशो रवा खोदेशो नकी” दैचा मगेने। यसैया १४:१; ब्यवस्था २३:२

4 मारदे हना परमप्रभु यावेमी “आल मथीब मुरुमी आं नाइक्तीक नाक्ती नाइशशा, आं दाक्शो पाम्तेक्म नु आं कबल मप्रोंइथु बाक्तेक्म हना,

5 गो मेको आन कली आं खिमी नु आ गारोमी मिम्तीके नु ठेयब नें गेनुडमी। आं तमी तौ आन क्येडा मेको आन कली रिम्शो नें गेनुडमी। मेको आन कली गेना हना यो लीब नें गेनुडमी। मेको आन नें मखोंइसीब दुम्ब।

6 मिनू परमप्रभु यावे आ नोले खोइक्ब, अर्को रागी डा मुरपुकी, सु सुमी आं कली ठेयब सेल्नीमी, आं कली दाक्नीमी, आं गेय पाइब दुम्नीमी, नाइक्तीक नाक्ती नाइशशा, अरु नाक्त खोदेशो गेय मपाइनीमी नु आं कबल पना पन बाक्नीमी।

7 मेको नेल्ल आन कली आं योत्रशो डांडाम चाक्नुडमी। आं प्रार्थना पतीक खिं ओइशा, ग्येरपाइक्नुडमी। मेको आन चोशा चढ़ेशो नु अरु चढ़ेशो आं कली चढ़ेतीकेम ब्राइनुड। मारदे हना आं खिं रागी डा मुर नेल्ल आन कली प्रार्थना पतीक खिं देनीम” दैत। मर्कूस ११:१७

8 मोदेशो लोत्र पाइब परमप्रभु, परमप्रभु यावेमी खेरशो इस्राएली आन कली खुब। मिनु “गो मेको आन कली अरु खुप्शो मुर नु देल्पाइक्नुड। मेकोपुकी नु बाक्पाइक्का कली तेम्नुडमी” दैत।

कोव्रब आन कली हुइशशो

9 परमप्रभु यावेमी “गे जन्तु नेल्ल नु ब्वाकीम बाक्ब जन्तु नेल्लेम, जाक्शा ब्वने। येरमीया १२:९

10 इस्राएली आन कली कोव्रब मुर मिक्च मताइब खोदेशो बाक्नीम। मेको मारेइ मजोक्ब मतुइक्ब बाक्नीम। मेकोपुकी सिक्सी पा बाक्शा, होक्ने मचाप्ब कुचुम खोदेशो बाक्नीम। मेको डोमु तचा, इप्चा नु निन्द्रा पचा ला दाक्नीम। इजीकीएल ३:१७; इजीकीएल ३३:६-९

11 कुचुमपुकी शुश जचा ब्वाचा दाक्नीम। गेनायो मरुनीम। मेको गोठला यो मोदेशो मरुप्ब बाक्नीम। मेको नेल्ल आंम आन लां खोइक्ब बाक्नीम। मारेइ मारेइ आंम के सेल्चा दाक्नीम। मेको नेल्ल खाल का डा बाक्नीम। येरमीया ६:१३

12 मेकोपुकीमी ‘जाक्कीन, अडगुर शांबु ग्याप्य। राकसी तूशा, दुक्व। दीसा यो मुलाक्त डा खोदेशो दुम्ब। मेको क्येडा यो रिम्शो दुम्ब’ दैनीम” दैत।

## 57

परमप्रभु कली मटीबपुकी

1 ठीक पाइब बेक्नीम। सुइमी मेको आन पर्वम सुर्ता मपाइनीम। परमप्रभु यावे कली मप्रोंइथु, दाक्बपुकी लाइक्का पुंडसीनीम। मारदे मो पाइनीमी, मेको सुइमी मरुप्नीम। ठीक पाइब हिंचा डा श्येत दुम्चा क्येडा डोंइती लाइक्का पुंडसीनीम। मीका ७:२

2 मेकोपुकी थुं नाइशशा बाक्तीकेम लाइनीम। रिम्शो थुं पाइशशो मुर आंम आन बाक्तीकेम नाइशशा बाक्नीम। २राजा २२:२०; दानीएल १२:१३

मूर्ति पूजा पाइबपुकी

3 “तन्न गेपुकी एक जाक्कीन। गे मन्तर तन्तर पाइब आ तमी तौ नु हेंथे गाक्ब वोंइश मुर नु तेल्लेम आ आलपुकी एक जाक्कीन। होसे २:४

4 गे सुका आ पर्वम शुक्शी लोत्र पनी। सुका आ पर्वम इन शोत्र रोक्नी? मारदे इन लें गुंडनीनी? मार, गे हेंथे पाइब आन तमी तौ मननी डा? गे जोल पा थिशो आल बाक्नीनी। २राजा १६:२-४; येरमीया २:२०,२३,२४

5 गे ठेयब रवा आन पुंमी तेल्लेम खोदेशो पा, मूर्ति पूजा पाइनीनी। गे गिगी रवा नेल्ल आन पुंमी मोदेशो पाइनीनी। गे इन आल आन कली खोल्सा नु सेरथे फुल्लुमी चढेनीनी।

6 बेंसी डा खोला डा रिम्शो फुल्लु इन कली वारच पाइब बाक्नीम। मेको आन कली तूचा थोव्रक चढेतीनी। मिनु अन्न यो चढेतीनी। मार, गो मेको कोव्रशा इन पर्वम सिक्सी पा बाक्नुडा डा?

7 गे लाइशशो नु ठेयब डांडामी इन ब्राख्ये सेल्लतीनी। गे मेकेर चढेथ लाइतीनी।

8 मिनु इन लाप्चो डा शीम नु लाप्चो आ नोलेमी इन देवी देवता आन चिन्ड वोइक्तीनी। गे आं कली प्रोंइशा, इन ब्राख्ये हुक्तीनी। गे मोदेशो पशा, इन ब्राख्ये ठेयब सेल्लतीनी। गे इन पर्वम मेको नु कबल पाइतीनी। गे मेकोपुकी नु बाक्का दाक्ताक्नी। मिनु मेको आन शिश्रा रां कोव्रतीनी।

9 गेपुकी तेल कुरशा मोलेक आ बाक्तीक लाइतीनी। ब्रोव्रशो रिना पाइब तेल शुश सेल्लतीनी। गेपुकीमी इन लोत्र कुरब आन कली डोन सम्म सोइक्ताक्नी। बेक्शो मुर आन बाक्तीके सम्म सोइक्ताक्नी।

10 गेपुकी इन लाइशशो लां गाक्तीके दाइतीनी। मो हना यो मेको शोर गाक्शो दुम्त मदेंनी। गेपुकी नक सक्ति ताइतीनी। मोपतीके मेको आन नोले खोइक्का मप्रोंइनी। येरमीया २:२५

11 गे सु क्येडा शुश हिंशा, जोल पनी? मिनु आं कली मफुकथु ममिम्तीनी। गो सिक्सी पा बाक्शा, आं मिक्च क्रिप्ताक्ड। मिनु गे आं कली तशा महिंनी? भजन संग्रह ५०:२१

12 गो इन ठीक पशो नु इन गेय तुइक्पाइक्नन्नी। तन्न मेको इन कली मारेइ रिम्शो मदुम्ब।

13 गेपुकी श्येत जशा, थोनीनु, इन खुप्शो मूर्तिपुकीम इन कली प्रोन्मेक्ल। तन्न फशेमी मेको आन कली बेरपाइशशा योल्ब। मुइशशोमी मेको जाम्शा लाइनीम। तन्न सु सु आं गे जाक्शा पुंडसीनीमी, रागी मेको आन के दुम्ब। मिनु आं डांडा मेको आन के दुम्ब” दैत। भजन संग्रह ३७:९-११

परमप्रभुम पाप रे प्रोंइब

14 मिनु परमप्रभुमी “सेलीन, सेलीन। रिम्शो लां सेलीने। आं मुर आन गाक्तीक लां डा दाइल पाइब फुल्लु याक्तीन” दैत। यसैया ४०:३; यसैया ६२:१०

15 मिनु ठेयब नु इर डा, गेना हना यो बाक्ब आ नें का ला बाक्शो परमप्रभुमी “गो नेल्ल क्येडा इर डा आं बाक्तीकेमी बाक्नुड। मिनु गो थुं लुक्च लशो नु दिप्चा पुंडसीशो मुर नु बाक्नुड। गो दिप्शो मुर नु आन थुं लुक्च लशो आन थुं बारपाइक्का कली मेकोपुकी नु बाक्नुड। भजन संग्रह ११३:५-९; यसैया ६६:१-२; भजन संग्रह ५०:१९

16 मिनु गो गेना हना यो दोस मगेनुड। गाइक्स डा गाइक्स मबाक्नुड। मोपा बाक्ती हना, आंम आं सेल्शो मुर आन थुं थाइब। भजन संग्रह १०३:९

17 मेको आन परमप्रभु यावे आ अरेशो मटिथु, शिम दुम्तीके गाइक्ताक्ड। गो मेको आन कली तुप्शा थाइशशा गाइक्ताक्ड। तन्न मेकोपुकी नोले शोंइसीशा आंम आन लां लाम्तेक्म।

18 गो मेको आन पशो ताता। तन्न गो मेको आन कली सापाइक्नुडमी। मेको आन कली कुक्शा, आन थुं बारपाइक्नुडमी। मेको आन दाते डा रोंका पाइब आन कली थुं बारपाइक्तीक लोत्र पाइनुड” देंत। प्रस्थान १५:२६

19 मिनु परमप्रभु यावेमी “डोन नु नेक्था बाक्ब नेल्ल आन थुं नाइश्शा बाक्मील। मिनु गो मेको आन कली सापाइक्नुडमी। गन्ती ६:२६; लूका २:१४; एफिसी २:१७; प्रस्थान १५:२६-२८; येरमीया १७:१४; यहूदा १:१३; यसैया ४८:२२; हितोपदेस २८:१

20 तन्न आं अरेशो लोत्र मटीबपुकी समुन्द्र डा फशेम क्युकुशो समुन्द्र डा ब्वाक्कु खोदेशो बाक्नीम। गेना हना यो रेयके पाइब ब्वाक्कु खोदेशो बाक्नीम। मेको ब्वाक्कुमी ग्रांग्रा दिचा डा थोत्रक नु हिलो गुंडब” देंत।

21 आं परमप्रभुमी “आं अरेशो मटीब आन थुं नाइश्शा बाक्चा मताइनीम” देंत।

## 58

माइजा बाक्चा आ पर्वम शेशो

1 मिनु परमप्रभु यावेमी “ठेयब सेंदा पा ग्रीडो। तुराही खोदेशो पा ठेयब सेंदा पावो। आं मुर आन काइ मटिशो नु याकूब आ खिं डा मुर आन पाप तुइक्पाइक्मी। मीका ३:८

2 मेकोपुकी मटीब बाक्तेकम हना यो, आं कली नाक्त कित कित माल्नीम। आं लां तुइक्चा दाक्नीम। मेकोपुकी ठीक पाइब रागी डा मुर खोदेशो दुम्शा, आन परमप्रभु, आं ठीक पतीक लोत्र मप्रोंइशो खोदेशो बाक्नीम। मिनु आं कली ठीक निसाफ पुंडनीम। परमप्रभु आ नेक्था जाक्चा दाक्नीम। यसैया २९:१३-१४

3 मेकोपुकीमी ‘गो मारदे माइजा बाक्का? गो मताइनीनी। गो मारदे आंम कली ब्रेम्शो सेल्का? गो मतुइक्तीनी’ देंतेकम। गो इन माइजा बाक्ची ना इन आंम मिम्शो पाइनीनी। मिनु इन गेय पाइब नेल्ल आन कली दिप्नीनी। येरमीया १४:१२

4 गेपुकी जिशा खेशा तुम्मुचा कली ला माइजा बाक्नीनी। इन मुडकीमी तुप्चा कली ला माइजा बाक्नीनी। मोदेशो माइजा बाक्शा, इन सेंदा इर सम्म मजाक्दीन्ब।

5 आं योत्रशो माइजा बाक्तीक मोदेशो बाक्बा डा? मार, आंम कली काबु ला ब्रेम्शो सेल्चा? बुदी मीलु घांस गुक्शो खोदेशो पा इन पिया खुक्शा, अरन्डी फेक्शो नु पुलु तार निरशो कली माइजा बाक्शो देंनीनी? मेको परमप्रभु यावे आ दाक्शो बाक्ब, देंनीनी? जकरिया ७:५-६; मत्ती ६:१६-१८

6 आं दाक्शो माइजा बाक्तीक मार बाक्ब, देशा हना, ठीक निसाफ मतशो आन कली प्रोंइचा नु दिप्शा श्येत गेचा पुंडसीशो आन जुवा पुइक्चा बाक्ब।

7 आंम जचा थोत्रक शोत्रलु बेक्ब नु योक्चा, खिं मबाक्शो नु पुडग आन कली इन खिंम बाक्चा गेचा, शिश्रा बाक्ब आन कली वा फेक्चा गेचा नु इन लोकब आन कली वारच पचा, आं दाक्शो माइजा बाक्तीक बाक्ब। ब्यवस्था १५:११; इजीकीएल १८:७; मत्ती २५:३५-३६

8 मो पाइतीनी हना, गो सुनी डा नां दाप्शो खोदेशो दुम्नीनी। मिनु गे रीब पा सानीनी। इन कली वारच पाइब इन डोंइती गाक्ब। परमप्रभु यावे आ छेडछेडमी इन नोले खोइक्ब। भजन संग्रह ३७:६; यसैया ५२:१२

9 मेना गो पुंडनीनी। मिनु परमप्रभु यावेमी लोत्र लेक्ब। मिनु गो ‘वारच पने’ दे थोइनीनी। मिनु मेकोमी ‘गो एके बाक्ती’ देंब। गो इन दाते रे मरिम्शो पतीक जुवा ताइक्ताक्नी हना, ब्रेप्चो पोक्शा, मरिम्शो लोत्र पचा प्रोंइतीनी हना, रिम्शो दुम्ब। यसैया ३०:१९

10 गो शोत्रलु बेक्ब आन कली इन जचा थोत्रक गेतीनी हना, श्येत जाइब आन माल्शो गेतीनी हना, इन छेडछेड छिडछिडम ब्राइब। इन नाक्दो डा छिडछिड नाक्ती डा छेडछेड खोदेशो दुम्ब।

11 मिनु परमप्रभु यावेमी इन कली गेना हना यो लां कोंइब। गो श्येत जनी ना इन माल्शो नेल्ल गेब। मिनु इन रुश बोल्यो सेल्ब। गो ब्वाक्कु लाब्वेशो फल फुल रू खोदेशो बाक्नीनी। गो गेनायो मसोत्रब ब्वाक्कु बुक्तीके खोदेशो दुम्नीनी। येरमीया ३१:१२

12 मिनु गे इन साइ डा ब्रेरशो खिंपुकी लेंशा सेल्नीनी। साइ डोंइती डा सेल्शो जग लेंशा वोइक्नीनी। मिनु इन कली गारो सेल्ब, खिं सेल्ब नु लां लेंशा सेल्ब, दे नें वोइक्नीम। यसैया ६१:४

13 गो नाइक्तीक नाक्ती अर्को नाक्त खोदेशो मसेल्लतीनी हना, मेको आं नाक्तीमी इन गेय मपाइतीनी हना नु आं योत्रशो नाक्त कली रिम्शो नाक्त बाक्ब देंतीनी हना, परमप्रभु यावे आ नाक्त ठेयब बाक्ब देंतीनी हना, गो मेको नाक्ती कली ठेयब सेल्शा, इन गेय मपाइतीनी हना, इन दला दाक्स मपाइतीनी हना, यसैया ५६:२-४

14 गेपुकी परमप्रभु यावे कली मिम्शा ग्येरसीनी वा। मिनु गो इन माल्शो नेल्ल गेन्नी वा। मिनु गो इन किकी याकूब आ शोप जचा गेनन्नी वा” दे परमप्रभु यावे आ देंशो बाक्ब।

## 59

परमप्रभुम पाप क्याम्ब

1 कोत्रडीन, परमप्रभु यावे आ मुर आन कली पाप रे प्रोंइतीक सक्ति मपाइश्शो मडुम्शो बाक्ब। आ नोफा मथांइशो बाक्ब। यसैया ५०:२

2 इन मरिम्शो पतीकेमी इन कली इन परमप्रभु रे फ्राशो बाक्ब। इन पाप आ पर्वम इन डोंइती रे आ कुल खुइश्शो बाक्ब। मोपतीके इन लोत्र मनेंब।

3 इन गुइ हुश लुम्सीशो बाक्नीम। गो नेल्ल मरिम्शो पाइब बाक्नीनी। गो जोल पना पन बाक्तीनी। गो ओल ओल लोत्र पाइनीनी। यसैया १:१५



4 सुइमी ठीक निसाफ मपाइनीम। सुइमी ठीक निसाफ पाइक्चा मपुंडसीनी। गे जाम्शा लाइब कली थमा सुइश्शा, जोल पाइनीनी। मेकोपुकीम हेंथे पतीकेम ब्रीशा, मरिम्शो पतीके ला थीनीम। भजन संग्रह ७:१५

5 बीस पाइश्शो बुस्स आ ब्वोफु रे चाइक्ब पुक्नीम। माख्ना आ जाल प्रोव्रनीम। मेको ब्वोफु जाइब बेक्नीम। ब्वोफु दिम्शा पुक्तेक्म हना, बुस्स यूब।

6 मेको जाल फेक्सीचा नु सुम्सीचा मटुम्ब। मेको आन सेल्शो थोवकमी आन रां सुम्ने मचाप्नीम। मेको आन गेय मरिम्शो पतीक गेय बाक्ब। मेको हुश खाक्श पोक्ब बाक्नीम।

7 मेकोपुकी मरिम्शो पचा कली ला दोरनीम। दोस मताइब आन कली साइक्चा कली चुइक्नीम। मेको आन मिम्शो मरिम्शो बाक्ब। आन लांमी बिप्रेतीक नु खतम पोक्तीक बाक्ब। रोमी ३:१५-१७; हितोपदेस १:१६; येरमीया २:३४

8 मेकोपुकीम थुं नाइक्पाइक्तीक आ पर्वम मारेइ मटुइक्नीम। मेको आन लांम ठीक निसाफ मबाक्ब। मेकोपुकी हेंथे लां खोइक्नीम। सु सु मेको हेंथे लां गाक्नीमी, मेको यो थुं नाइश्शा बाक्चा मताइनीम।

9 मोपतीके ठीक निसाफ पतीके आंइ क्येडा डोन बाक्ब। गो ठीक पतीके मताइनीकी। गोपुकी छेडछेड डा लां कली कोइनीकी, तन्न छिडछिड ला बाक्ब। गो नाक्त डा हांम्सो माल्नीकी, तन्न छिडछिड ला बाक्ब।

10 मिक्च मताइब खोदेशो पा गारो सुल्शा गाक्नीकी। मिक्च मपाइश्शो मुर खोदेशो पा सुल्नीकी। नाक्दो खोदेशो पा नाक्ती यो दाइल पाइसीनीकी। गो बोल्यो मुर आन दातेम बेक्शो मुर खोदेशो दुम्तक। ब्यवस्था २८:२९

11 गो नेल्ल वां खोदेशो पा ग्रीनीकी। हुकुर खोदेशो पा रोंका पाइनीकी। गो ठीक निसाफ माल्ना माल्न बाक्नीकी, तन्न मथित्नीकी। पाप रे ब्रोंइतीक माल्नीकी, तन्न मेको आंइ क्येडा डोन बाक्ब।

12 इन डोंइती आंइ हेंथे पशो शुश बाक्ब। आंइ पशो पापमी इन कली तुइक्पाइक्ब। गो मरिम्शो पाइब बाक्नीकी, दे तुइक्नीकी। आंइ हेंथे पशो थमा पा गोपुकी नु बाक्ब। गोपुकी आंइ मरिम्शो पशो तुइक्नीकी। येरमीया १४:७

13 गोपुकी हेंथे गाक्शा, परमप्रभु यावे रे नोले शोंइसाक्क। आंइ परमप्रभु आ नोले खोइक्चा प्रोंइतक। आंइ लोव्र मुर आन कली दिप्चा नु परमप्रभु यावे कली मटिचा डा बाक्ब। गोपुकी जोल कली थमा सुइश्शा, ब्रपाइश्शो बाक्तक।

14 मिनु ठीक निसाफ मबाक्ब। ठीक पतीके डोन बाक्ब। सुइ सुइमी जोल पाइनीम। मिनु रिम्शो थुं पाइश्शो मुर बाक्ने मचाप्नीम।

15 थमा पतीक तेइ मथिंसीब। रिम्शो पाइब आन मारेइ मारेइ रोइक्चा पुंडसीनीम। मिनु परमप्रभु यावेमी मेको ताप्तु। मिनु ठीक निसाफ मबा, दे थम गाइश्शो बाक्त।

16 मिनु वारच पाइब सुइ मबाक्शो तशा, छक लाक्त। मोपतीके मेकोमी आंम आ सक्तिम ग्रात। आ ठीक पतीकेम आ कली चारच पाइक्तु। इजीकीएल १३:४-५

17 मेकोमी ठीक पतीके कांसा के फेक्तीके खोदेशो पा फेक्शा, पाप रे प्रोंइतीक ताकी खोदेशो पा गुक्साक्ब। क्येक्क लेत्तीक वा खोदेशो पा फेक्साक्ब। आ थुंमी थमा पा पाइनुड, दे वा खोदेशो पा रुक्साक्ब।

18 परमप्रभुमी मेको आन पशो खोदेशो पा मेको आन कली क्येक्क लेप्ब। आ जोरी आन कली आ गाइश्शो कोंइब। आ सत्रु आन कली क्येक्क लेप्ब। समुन्द्र आ नेक्था बाक्ब आन कली क्येक्क लेप्ब।

19 मिनु नां पेरतीकेमी बाक्ब मुरपुकीमी परमप्रभु यावे कली मान पा हिंनीम। नां दाप्तीक डा मुरपुकी परमप्रभु यावे आ छेडछेड तशा, मान पा हिंनीम। मारदे हना मेको परमप्रभु यावे बारशो खोला खोदेशो पा जाक्ब। मिनु आ फशेमी मेको आन कली मुइश्शा खेरब।

20 मिनु सियोनम का जाक्ब। मिनु मेकेर डा मुर आन कली पाप रे प्रोंइब। मेकोमी हेंथे पतीके रे लेप्ब याक्ब आ खिं डा मुर आन कली रोमी ११:२६

21 “गो नु पशो कबल मार बाक्त देशा हना, आं सोक्त इन तार बाक्ब। गो आं लोव्र इन शोव्रम कुर पाता। मेकेर गेना हना यो बाक्शा इन आलपुकीम मेको लोव्र पना पन बाक्नीमी। मेको लोव्र गेना हना यो इन चच युइम यो पना पन बाक्नीम” दे परमप्रभु यावेमी देंत। येरमीया १:९

## 60

सियोन आ छेडछेड जाक्शो

1 परमप्रभुम “बोक्को। मिनु ग्येरसो। मारदे हना इ छेडछेड जाक्शो बाक्ब। परमप्रभु यावे आ छेडछेड इ तार जाक्शो बाक्ब।

2 छिडछिडम रागी कली सुम्तु। क्येर नाक्दोमी जात जात डा मुर आन कली सुम्तु। तन्न परमप्रभु यावे इ तारी यूब। आ छेडछेड इ तारी तांइसीब।

3 रागी रागी डा मुरपुकी इ छेडछेडम जाक्नीम। पिपपुकी इ सुनी डा छेडछेडम जाक्नीम। यसैया २:२-३; प्रकाश २१:२४

4 इ मिक्च हिरशा, कोव्रडो। इ मुर नेल्ल गुम्शा, इ बाक्तीके जाक्नीम। इ तौपुकी डोन रागी रे जाक्नीम। इ तमी आन कली मुप्शा कुरशा चाक्नीम। यसैया ४९:१८; यसैया ४९:२२; यसैया ६६:१२

5 गे मेको तशा थाम्पा ग्येरनेवे। इ थुं ग्येरसीशा प्रेक्ब। मारदे हना समुन्द्रम चाक्शो मारेइ मारेइ इ के दुम्ब। रागी रागी डा शोंप नेल्ल इ के दुम्नीम।

6 गे शुश दलओठ ताइनेवे। मिदयान नु एफाह डा दलओठ आन चाइक्बपुकीमी इ रागी ब्रीनीम। मिनु शेबा रे यो चाक्नीम। मेकोपुकीमी सुन नु धूप चाक्शा ‘परमप्रभु यावे ठेयब बाक्ब’ दे ग्येरशा आं पर्वम शेंनीम। भजन संग्रह ७२:१०; मती २:१-११

7 केदार डा क्यारश भेडा नेल्ल इ बाक्तीकेमी देल्नीम। नेबायोथ डा सांडपुकीमी इ गेय पाइनीम। मेकोपुकी आं कली चढ्तेकीमेम गारचा डा बाक्नीम। मिनु गो आं दारशो खिं ग्योम्नुड।

8 गोस्स खोदेशो पा बेरब नु दुकुर आ बाक्तीकेम बेरशा लशो खोदेशो पा बेरबपुकी सु बाक्मा?

9 समुन्द आ नेक्था डा मुरपुकीम आं लां कोवनीम। डोंइती टारसीस डा जहाजम इ आल आन कली डोन रागी रे चाक्नीम। मेको आन सुन चांदी यो मेकोपुकी नु बाक्ब। मेको परमप्रभु यावे, इ परमप्रभु आ नेमी जाक्नीम। इस्राएली आन का ला बाक्शो परमप्रभु आ पर्वम चाक्ब। मारदे हना मेकोमी इन कली दारशो सेल्शो बाक्ब। यसैया ४२:४; यसैया ५५:५

10 मिनु अर्को रागी डा मुरपुकीम इ गारो प्रोइशा हिरनीम। मेको आन पिपपुकीमी इ गेय पाइनीम। डोंइती गाइशशा, इ कली तुप्तन। तन्न मुल आं दाक्तीकेमी शिशी पाइक्तन। यसैया ५४:८

11 इ सहर डा गारो डा लाप्यो रोक्स डा रोक्स बाक्नीम। नाकदो नाक्ती इ लाप्यो मचोक्शो बाक्नीम। मोपा रागी रागी डा मुरपुकीमी आन शोप चाक्नीम। मेको आन पिप आन डोंइती गाक्नीम। प्रकाश २:२५-२६

12 मिनु तेक तेको रागी नु तेक तेको राज्य डा मुरपुकीमी इ गेय मपाइनीमी, मेकोपुकी खतम दुम्नीम। थमा पा क्याम्चा पुंडसीनीम।

13 लेबानोन डा दारस इ बाक्तीके चाक्नीम। मेकेर डा लाइशशो रवा आन शी आं बाक्तीके दारपाइक्चा कली चाक्नीम। मोपा गो आं बाक्तीके दारपाइक्नुड।

14 इ कली दिप्ब आन चच युड इ बाक्तीकेम जाक्शा बाप्नीम। इ कली ग्रांया दीब नेल्ल इ खोइलीम बाप्नीम। मिनु मेकोपुकीमी इ कली 'परमप्रभु यावे आ सहर नु इस्राएली आन का ला बाक्शो परमप्रभु आ सियोन' देनीम। यसैया १४:२

15 डोंइती गे प्रोइचा पुंडसीशो नु काइ मदाक्चा पुंडसीशो बाक्ते। इ रागी रे पा सुइ मगाक्बाक्तेक्म। मुल गो इ कली गेना हना यो मान तपाइशशा, पाला पाला सम्म ग्येरसीतीके सेल्नन। यसैया ४९:१४

16 गे रागी रागी डा दूध तूनेवे। मिनु गे पिप आन दूध तूनेवे। मिनु गो इ कली श्येत रे प्रोइब बाक्नुड। याकूब आ सक्ति पाइशशो परमप्रभु इ कली पाप रे प्रोइब बाक्नुड, दे तुइक्नेवे। यसैया ४९:२०

17 मिनु गो कांसा आ पा डा सुन चाक्नुड। फलाम आ पा डा चांदी चाक्नुड। शी आ पा डा कांसा नु फुल्लु आ पा डा फलाम चाक्नुड। मिनु गो थुं नाइक्तीके इ कली कोवब सेल्नुड। ठीक पतीके इ टेयब मुर सेल्नुड।

18 मो दुम नोले इ रागीमी हुश खाक्श पोक्शो आ पर्वम मनंसीब। इ सांदम खतम दुम्शो लोव मनंसीब। तन्न गे इ गारो कली पाप रे प्रोइतीके नें वोइक्नेवे। गारो डा टेयब लाप्यो आन कली टेयब सेल्तीक नें वोइक्नेवे।

परमप्रभु सियोन डा छेडछेड बाक्ब

19 मेना इ कली नाक्त डा नां छेडछेड मदुम्ब। नाकदो तास्ला हाम्सो मदुम्ब। मारदे हना इ परमप्रभु इ कली गेना हना यो छेडछेड बाक्ब। मिनु इ परमप्रभु इ दारस बाक्ब। यसैया २४:२३; प्रकाश २१:२३; प्रकाश २२:५

20 मिनु मेना रे इ नां गेनायो मलाक्ब। मिनु इ तास्ला यो मलाक्ब। मारदे हना परमप्रभु यावे गेना हना यो इ छेडछेड बाक्ब। इ रोंका पतीक नाक्ती नुप्त। यूहन्ना ८:१२; याकूब १:१७

21 इ रागी डा मुर नेल्ल ठीक पाइब दुम्नीम। मेको आन बाक्तीके रागी गेना हना यो आन के दुम्ब। मेकोपुकी आं खुम्शो बाक्नीम। मेकोपुकी आं सेल्शो मुर दुम्शा, आं कली टेयब सेल्नीम।

22 मेको नेल्ल क्येडा महिक्सीशो थर का दुम्नीम। मिनु नेल्ल क्येडा आइक्च मुरपुकी टेयब रागी ब्रीशा, सक्ति पाइशशो दुम्नीम। मेना गो, परमप्रभु यावेमी मेको रीब पा पाइनुड" देत।

## 61

सियोन कली श्येत रे प्रोइतीके

1 "परमप्रभु, परमप्रभु यावे आ सोक्त आं तार बाक्ब। मारदे हना परमप्रभु यावेमी तेल लुक्ताक्यी। मेकोमी आं कली दिप्शो पुडगा मुर आन कली ग्येरपाइक्ब लोव नेंपाइक्चा कली, थुं जिक्शो आन कली आन थुं बारपाइक्चा कली, चोक्चा पुंडसीशो मुर आन कली प्रोइचा कली नु जेल्खान बाक्ब आन कली गुंइचा कली सोइक्ताक्यी। यसैया १:२; मती ११:५; लूका ४:१८-१९

2 मिनु आं कली परमप्रभु यावे आ शिशी पाइब बर्स नु आंइ परमप्रभु आ क्येक्क लेत्तीक नाक्त नु रोंका पाइब आन थुं बारपाइक्तीक नाक्त बाक्ब, दे तुइक्पाइक्चा कली यो सोइक्ताक्यी। लेवी २५:१०,१३; यसैया ६३:४

3 मेकोमी आं कली सियोनम रोंका पाइब आन कली पुलु आ पा डा दारशो पियाम ग्योम्नीके ग्योम्पाइक्चा कली, हिशेक आ पा डा ब्रोव्रशो रिना पाइब तेल खेक्चा कली नु आइक्च थुं दुम्तीके आ पा डा टेयब सेल्तीक थुं फेक्तीक खोदेशो पा फेक्पाइक्चा कली सोइक्ताक्यी। मेको मुर आन कली 'ठीक पतीके रवा' दे नें वोइक्तेक्म। मेको परमप्रभु यावे आ खुम्शो आ दारस कोंइतीके बाक्नीम।

4 मिनु मेकोपुकीमी साइ डोंइती खतम दुम्शो ब्रेशो माइत खिंपुकी लेंशा सेल्नीम। मेकोमी ब्रेशो सहर लेंशा सेल्नीम। मिनु शुश पाला रे मुर मबाक्थु, श्येत्थ दुम्शो सहर लेंशा सेल्नीम। यसैया ५८:१२

5 मिनु अर्को रागी डा मुर जाक्शा, इन क्यारश भेडा योवनीम। मेकोपुकीमी इन रू दोइनीम। इन अडगुर बोट मुंडनीम। यसैया ६०:१०

6 तन्न इन कली 'परमप्रभु यावे कली चढ्बे नम' देनीम। मिनु 'आंइ परमप्रभु आ गेय पाइब नम' दे यो देनीम। गेपुकीमी रागी रागी डा मुर आन शोप ताइनीनी। मिनु मेको आन शोपोम ग्येरनीनी। प्रस्थान १९:६; १पत्रुस २:५,९

7 मारदे हना गे अरु क्येडा निक्शी खेयप मुने दोक्तीनी। मिनु इन कली ग्रांघ्रा दित्ताक्म। मोपतीके गे इन रागीमी निक्शी खेयप रू ताइनीनी। मिनु गेना हना यो ग्येरसीतीके गे नु बाक्ब।

8 गो, परमप्रभु यावेमी, ठीक पतीके दाक्नुड। रोडक्तीक नु हेंथे पतीक गेय काड मदाक्नुड। गो मेको आन कली थमा पा आन पशो खोदेशो पा गेनुडमी। गो मेकोपुकी नु गेना हना यो लीब कबल पाइनुड। यसैया ५४:१०; यसैया ५५:३

9 मिनु रागी रागी डा मुरुम मेको आन चच युड आन कली तुडक्नीम। मिनु जात जात डा मुरुम मेको आन आल आन कली तुडक्नीम। मेको आन कली ताइब नेल्लेमी 'मेरे परमप्रभु यावे रे पा आसीक तशो मुर बाक्नीम' देंनीम।

10 गो परमप्रभु यावे कली मिम्शा, ग्येरसीनुड। आं थुं नेल्लेमी आं परमप्रभु कली मान पाइनुड। मारदे हना मेकोमी आं कली पाप रे प्रोइतीके वा खोदेशो पा फेक्पाइश्शा, ठीक पतीकेमी सुम्ती। दोदेशो पा ग्युम्लेम माहुर चुडक्सीबा नु ग्युम्लेमी ग्योम्सीबा, मोदेशो पा परमप्रभु यावेमी आं कली ग्योम्ताक्यी। मती २२:११-१२

11 दोपा रूमी बाली नाली वापाइक्बा नु मेकेर वांचेर वापाइक्बा, मोपा परमप्रभु, परमप्रभु यावेमी ठीक पतीके नु ठेयब सेल्लेतीके रागी रागी डा मुर आन डोंइती दुम्पाइक्ब" देंत।

## 62

सियोन आ नोले डा दारस

1 परमप्रभु यावेमी "गो सियोन आ पर्वम सिक्सी पा मबाक्नुड। यरूसलेम आ पर्वम गो मनाइसीनुड। मेको आ ठीक पतीके सुनी डा छेडछेड खोदेशो पा मग्रूम सम्म नु आ पाप रे प्रोइचा पुंडसीतीके ब्रशो तोव्रशी खोदेशो मदुम सम्म मनाइसीनुड।

2 मिनु रागी रागी डा मुरुमी इ ठीक पशो ताइनीम। मिनु पिप नेल्लेमी इ छेडछेड ताइनीमी। मिनु इ कली नक नें थिशा ब्रेत्नीमी। मेको नें परमप्रभु यावेमी वोइश्शो बाक्ब। यसैया ६५:१५; प्रकाश २:१७

3 गो परमप्रभु यावे आ गुडमी दारशो सिरपेच का दुम्नेवे। मिनु इ परमप्रभु आ गुडमी गे पिपीम आन सुन फू खोदेशो दुम्नेवे। २तिमोथी ४:८

4 मिनु गे मेना रे 'ताइक्चा पुंडसीशो' माइक्चा मपुंडसीनेवे। इ रागी मुर मबाक्तीके रागी माइक्चा मपुंडसीब। 'गो इ कली तशा ग्येरसाक्यी' दे नें वोइक्चा पुंडसीनेवे। इ रागी ग्युंवे पशो खोदेशो दुम्ब। मारदे हना परमप्रभु यावे इ कली तशा ग्येरसीब। इ रागी ग्युंवे पशो खोदेशो दुम्ब। यसैया ५४:६; यसैया ६०:१५; होसे २:२१

5 दोपा टिटा वोंइश मुरुम मीश आल कली ग्युंवे पाइबा, मोपा इ कली सेल्लेमी इ कली ग्युंवे पाइब। मिनु दोपा ग्युम्ले आ ग्युम्लेमी कली तशा ग्येरसीबा, मोपा परमप्रभु इ कली तशा ग्येरसीब।

6 यरूसलेम, गो इ गारो तार खाल पाइब मुर वोइक्ता। मेकोपुकी नाक्दो नाक्ती सिक्सी पा मबाक्नीम। परमप्रभु यावे कली मिम्पाइक्बपुकी, मनाइसीन" देंत। यसैया ५२:८

7 परमप्रभु यावेम यरूसलेम कली बोल्यो नु ठेयब मसेला सम्म मेको कली यो नाइक्चा मगेन। मिनु रागी नेल्ल डा मुर आन डोंइती तुडक्पाइक्चा कली मेको पने।

8 परमप्रभु यावेमी आ ग्युरा गुड क्युक्शा, कसम जाप्तु। मार कसम जाप्तु देंशा हना "मुल रे गो इ अन्न इ जोरी सत्रु आन कली जचा मगेनुड। मिनु अर्को रागी डा मुर आन कली इ अडगुर शांबू तूचा मगेनुड। मारदे हना गे मेको आ पर्वम शुश श्येत पाप्तीवी। यसैया ६५:२१-२२

9 सु सुमी अन्न ओइनीमी, मेकोपुकीमी जचा ताइनीम। मिनु आं कली ठेयब सेल्लेमी। मिनु सु सुमी खुप्नीमी, मेकोपुकीमी आं खिं डा लाडगाम तूनीम" दे कसम जाप्तु।

10 ओव्रडीन, ठेयब लाप्यो रे ओव्रडीन। मिनु मुर आन गाक्तीके लां थेल्ला, सेलीन। ठेयब लां रे फुल्लु याक्तीन। जात जात डा मुर आन कली चिन्ड वोतीन। यसैया ५७:१४

11 परमप्रभु यावेमी रागी आ सुर सम्म डा मुर नेल्ल आन कली "सियोन आ तमी कली 'इ कली पाप रे प्रोइब जाक्ना जाक्न बाक्ब। इ कली गेतीक इनाम मेको नु बाक्ब। मेको इ ततीक इनाम आ डोंइती गाक्ब' देशो बाक्ब। जकरिया ९:९; यसैया ४०:९-१०

12 मिनु मेको आन कली 'परमप्रभु यावे आ मुर नम। परमप्रभु यावे आ पाप रे प्रोइशो मुर नम' दे ब्रेत्नीम। मिनु इ कली 'माल्ला, थिश्शो नु गेनायो मप्रोइसीब सहर' माइक्चा पुंडसीनेवे" दे कसम जशा, लोत्र पशो बाक्ब। यसैया ३५:१०

## 63

परमप्रभुमी एदोम कली सजाइ गेशो

1 एदोम रे सु जाक्ना जाक्न बाक्बा? लल जिशो वा फेक्शा, बोझा रे जाक्ब सु बाक्मे? मेको दारशो वा फेक्शा, ठेयब सक्तिमी गाक्ब सु बाक्म। "गो ठीक पतीके लोत्र पाइनुड। गो पाप रे प्रोइतीक सक्ति पाइश्शो नड" देंत। यसैया ३४:६

2 मिनु गो "इन फेक्शो वा मारदे लल जिशो बाक्मे? मारदे इन वा अडगुर खाक्ब आन के खोदेशो दुम्मे?" देंती। प्रकाश १९:१३

3 मिनु मेकोमी "गो आं कान अडगुर खाक्ता। गो नु जात जात डा मुर सुड मबाक्म। मिनु गो गाइश्शा, मेको आन कली खाक्ता। चुरशा मेको आन कली दिम्ताक्डमी। मेको आन रस आं वाम बुंडसाक्व। मिनु आं वा नेल्ल लल दुम्त। योएल ४:१३; प्रकाश १४:२०

4 मारदे हना आं थुंम क्येक्क लेत्तीक नाक्त बाक्त। मिनु आं मुर आन कली प्रोंडतीके बर्स जाक्शो बाक्ब। यसैया १३:९; यसैया ३४:८; यसैया ६१:२

5 मिनु एर ओथ कोवडुनु, वारच पाइब सुइ मबाक्म। मिनु गो नु गेय पाइब सुइ मबाक्म। मोपतीके गो आं सक्तीमी प्राती। आं गाइक्तीकेमी आं कली वारच पाइक्ती।

6 मिनु गो गाइश्शा जात जात डा मुर आन कली दिम्ताक्डमी। गो चुरशा मेको आन कली खतम सेल्लामी। गो मेको आन हुश खपीम जारताक्ड” देत। यसैया ५१:१७

परमप्रभु आ शिशी पशो मिम्शो

7 गो परमप्रभु यावे आ मुर आन कली शिशी पतीक गेय मिम्नुड। मारदे हना मेको आ पबर्म परमप्रभु यावे कली टेयब सेल्चा माल्नीकी। मिनु आंइ कली मार मार पशो आ पबर्म, इस्त्राएल आ खिं डा मुर आन कली शुश दाक्ताक्ब। मिनु मेको आन कली शिशी कोंइशा, गेना हना यो दाक्शो बाक्त। मोपतीके मेको कली टेयब सेल्चा माल्नीकी।

8 मेकोमी “मेकोपुकी थमा पा आं मुर बाक्नीम जोल मपाइब आल बाक्नीम” देत। मोपतीके परमप्रभु यावे मेको आन कली श्येत रे प्रोंडब दुम्त। ब्यवस्था ३२:५, २०

9 मेको आन श्येत तशा, आं सोइश्शो मुर ममाइ, परमप्रभु यावे आ स्वर्ग डा गेय पाइब यो ममाइ, परमप्रभुमी मेको आन कली प्रोंइतु। आ दाक्तीके नु शिशी पतीकेमी मेको आन कली साइ डोंइती रे पाप रे प्रोंइशा, मेको आन कली मुष्शा, कुरशो बाक्त। प्रस्थान ३३:१४-१५

10 तन्न मेकोपुकीमी काड मटिथु, आ सोक्त कली थुं खाइक्पाइक्तेक्म। मोपतीके परमप्रभु यावे मेको आन जोरी सत्रु दुम्शा, आंमा मेकोपुकी नु लडाइ पाप्तु।

11 मिनु नोले मेकोपुकीमी साइ डोंइती डा नाक्ती मिम्ताक्म। मेको आ गेय पाइब मोसा आ पाला ना डा नाक्ती मिम्ताक्म। मिनु मेकोपुकीमी “समुन्द्र रे पा गोठला नु आ बगाल गुंडब ते बाक्म? मेको आन कली परमप्रभु यावे आ सोक्त वोइक्ब, ते बाक्मे? प्रस्थान २:५; गन्ती ११:१७

12 सुमी आ सक्ति पाइश्शो गुइ मोसा आ ग्युरा गे गाक्चा कली वोदा? सुमी आंम कली गेना हना यो आ नें लीपाइक्चा कली समुन्द्रम लां सेला? प्रस्थान १४:२९

13 सुम मेको आन कली समुन्द्र आगा डा लां रे पा खुला? मेकोमी गोरशो रागीम शारा आन कली गाक्पाइश्शो खोदेशो पा दाइल मपपाइक्थु, गाक्पाइक्तु।

14 बी ब्यफ बेसी बुष्शो खोदेशो पा परमप्रभु यावे आ सोक्तीम मेको आन कली नाइक्पाइक्तु। इन नें टेयब सेल्चा कली इन मुर आन कली मोदेशो पा खुल्लतीनी।

15 सरीड डा इन छेडछेड डा बाक्तीके रे उड कोवडीन। इन वारच पचा दाक्तीके नु इन सक्ति ते बाक्मे? इन थुं डा आंइ कली दाक्तीके नु इन शिशी पतीके ते बाक्म? गो मेको मतक। ब्यवस्था २६:१५

16 गे आंइ आफ बाक्नीनी। मिनु अब्राहाममी आंइ कली मतुइश्शो बाक्त। इस्त्राएलम आंइ कली मतव। गे, परमप्रभु यावे, आंइ आफ, आंइ श्येत रे प्रोंडब बाक्नीनी। मेको साइ रे इन नें बाक्ब। ब्यवस्था ३२:६

17 परमप्रभु यावे, गे मारदे आंइ कली इन लां रे हेथे गाक्चा गेकी। गे मारदे आंइ कली इन कली मान पा महिब दुम्चा कली आंइ थुं खकटा सेल्लनी? गे इन गेय पाइब आन पबर्म नु इन जात डा मुर आन पबर्म लेतीन। यसैया ५७:१७

18 इन योव्रशो मुरपुकी इक्का नाक्त सम्म ला एको रागीम बाक्चा ताम्तेक्म। तन्न मुल आंइ जोरी सत्रुमी इन योव्रशो बाक्तीके खतम सेल्लेक्म। बजन संग्रह ७९:१

19 गोपुकी डोंइती रे इन सासन पशो मुर खोदेशो मदुम्क। इन नेमी ब्रेत्या पुंडसीशो मुर खोदेशो मदुम्क” देतेक्म।

## 64

1 परमप्रभु यावे, गे सरीड रोक्शा, यिनी हना, रिम्शो दुम वा। इन डोंइती डांडा हिम्सीम वा।

2 मिनु दोपा मीम सोव्रशो राशी जेप्बा, मिनु ब्वाक्कु बुइक्पाइक्बा, मोपा इन जोरी सत्रु आन कली इन नें तुइक्पतीन। मिनु रागी रागी डा मुर इन डोंइती हिंशा खिंखि पाइनीम।

3 मिनु गे आंइ ममिम्शो हिंचा डा टेयब गेय पाइनीनी। गे यिनीनु, इन डोंइती डांडा खिंखि पाइनीम। १कोरिन्थी २:९

4 सु सुमी मेको कली रिम्नीमी, मेकोमी, मेको आन पबर्म गेय पाइब। मारदे हना साइ डोंइती रे गे डा लाक्शा अरु परमप्रभु बाक्ब, दे सुइम मनेशो नु मतशो बाक्तेक्म। प्रस्थान ३२:५-१०

5 गे ग्येरशा ठीक पतीके मिम्शा पाइब आन कली वारच पाइब बाक्नीनी। मेको मुरपुकी इन लांम गाक्शा, इन कली मिम्ब बाक्नीम। गे आंइ पाप पशो आ पबर्म गाइक्ताक्नी। मारदे हना गे खुंडसाक्नी। मिनु गो हेथे गाक्तक।

6 गो नेल्ल ग्रॉया दिशो मुर खोदेशो दुम्तक। आंइ ठीक पतीके नेल्ल ग्रॉया दिशो लुम्सीशो वा खोदेशो दुम्त। गो सफा खोदेशो पा सोल मुल बेक्नीकी। आंइ मरिम्शो पशो फश खोदेशो दुम्शा, आंइ कली बेरपाइक्ब।

7 मिनु इन नें थीब सुइ मबाक्नीमी। इन कली थिचा माल्ब सुइ मबाक्नीम। मारदे हना गे आंइ डोंइती रे इन कुल खुइक्ताक्नी। आंइ मरिम्शो पतीके मतेक्नी। यसैया ६३:१६; यसैया ४५:९; बिलाप ४:२; रोमी ९:२१

8 मो हना यो परमप्रभु यावे, गे आंइ आफ बाक्नीनी। गो खप नकी, गे खप के ग्योब सेल्ल बाक्नीनी। गो नेल्ले इन सेल्लो नकी।

9 परमप्रभु यावे, शुश मगाइक्तीने। आंइ मरिम्शो पशो गेना हना यो ममिम्तीन। आंइ कली कोवडीन, गो नेल्ल इन मुर बाक्नीकी।

10 इन योत्रशो सहरपुकी गोरशो रागी दुम्शो बाक्ब। सियोन यो गोरशो रागी दुम्शो बाक्ब। यरूसलेम मुर मबाक्तीके दुम्शो बाक्ब। भजन संग्रह २४:७

11 आंइ योत्रशो नु दारशो, आंइ किकी पिपपुकीमी इन कली ठेयब सेल्शो खिं मीम ग्रोइक्त। आंइ दाक्शो खिं नेल्ले ब्रेन्ने थुम्तेक्म।

12 परमप्रभु यावे, गे मेको तशा यो, सिक्सी पा बाक्नीनी? ब्वालेड पा बाक्शा, आंइ कली सजाइ जपाइक्नीनी?

## 65

परमप्रभुमी सजाइ गेशो

1 परमप्रभु यावेमी “गो आं कली मतुइक्ब आन कली माल्ब सेलतामी। आं कली ममाल्बमी आं कली थित्तीमी। आं नें मथीब रागी डा मुर आन कली गो ‘गो एके बाक्ती। गो एके बाक्ती’ दे माइक्तामी। रोमी १०:२०

2 गो काइ मटीब मुर आन कली नाक्तरें आं गुड हाम्शा वारच पाइक्चा मालता। मेकोपुकी आंम आन दला दाक्स पा मरिम्शो लां ला खोइक्तेक्म। रोमी १०:२१

3 मेको मुरपुकीमी आं कली गेना हना यो गाइक्पाइक्स डा गाइक्पाइक्स पा फू बारीम चढेनीम। इंटा तारी धूप चोइनीम।

4 मेकोपुकी तुरस आगाम बाक्शा, खुंइसीशा नां सोंइताम। मेकोपुकीमी पोत्र श्ये ब्वाइनीम। आन ग्योबुम ग्रांग्रा दिशो श्ये क्येनीम। यसैया ६६:१७; लेवी १:७

5 मेकोपुकीमी ‘गे मेके उइ बाक्कीन। आंइ नेक्था मपिने। मारदे हना इन थिशो मजाइनुड’ देंनीम। मेकोपुकी आं कली मरिम्शो रिना पाइशो कुन खोदेंशो दुम्शा, गेना हना यो ब्रशो मी बाक्नीमी।

6 कोव्रडीन, आं डोंइती मार ब्रेक्शो बाक्त देंशा हना ‘गो सिक्सी पा मबाक्नुड। तन्न गो क्येक्क लेत्नुड। गो थमा पा क्येक्क लेत्नुड’।

7 गो इन मरिम्शो पशो नु इन किकी पिपी आन मरिम्शो पशो कालेमी क्येक्क लेत्नुड। मेकोपुकीमी डांडा तार धूप चोशा, आं कली शुक्शी पाइक्तीमी। मिनु गो इन पशो आ क्येक्क लेत्नन्नी” दे परमप्रभु यावेमी देंत। मारदे हना मेकोपुकीमी डांडाम धूप चोशा, पहाड मेर आं पबंम शुक्शी लोत्र पाम्तेक्म। मेको आन पशो पाप आन थुकुम प्रिंशा क्येक्क लेत्नुडमी।

8 मिनु परमप्रभु यावेमी “दोपा अडगुर आगाम रस बाक्बा, मिनु ‘मेको कली मताइक्चा, रस बाक्ब’ देंनीमी, मोपा मबिग्रेचा कली आ आगाम आसीक बाक्ब। गो मेको आं गेय पाइब आन पबंम मोदेंशो पाइनुड। यसैया ६:१३; उत्पत्ती १८:२६-३२

9 मिनु गो याक्ब आ चच युड रे जाक्पाइक्नुड। मिनु यहूदा आ थर डा आं डांडा ताइब मुर गुंनुड। मेको आं योत्रशो मुर आन के दुम्शा, आं गेय पाइब आन बाक्तीके दुम्ब।

10 मिनु शारोन आं मुर आन क्यारश भेडा योत्रतीके नु आकोर माइशो दिंमम बी ब्यफ जोपाइक्तीके दुम्ब। मेको आं कली माल्ब आन कली दुम्ब। यसैया ३३:९; यहोसु ७:२६

11 तन्न गे परमप्रभु यावे कली प्रॉइबपुकी, आं योत्रशो डांडा प्रेंबपुकी गाद देवता कली चढेतीके सेलनीनी। मिनु गे मेनी देवी कली ब्वाइशो तूतीके चढेनीनी।

12 गो इन कली तरवारम साइक्पाइक्चा कली जिम्मा गेनन्नी। गे क्योरपाइसीचा कली गुर ब्वेनीनी। मारदे हना गो इन कली ब्रेत्तनु, गे आं लोत्र मलेत्तीनी। गो लोत्र पडानु, गे मनेंनी। गो आं डोंइती मरिम्शो नु आं मदाक्शो गेय ला योत्रशा, पाइतीनी” देंत। यसैया ६६:४; येरमीया ७:१३

13 मोपतीके परमप्रभु यावेमी “आं गेय पाइबपुकी जचा ताइनीम। गे चहिं शोत्रलु बेक्नीनी। आं गेय पाइब तूचा ताइनीम। गे चहिं तूतू दाक्शा बाक्नीनी। आं गेय पाइबपुकी ग्येरनीमी, गे चहिं मुने दोक्नीनी। यसैया ५५:१

14 आं गेय पाइबपुकी थुंम ग्येरसीशा, कुम्सो पाइनीमी। गेपुकी चहिं श्येत जशा, इन थुं लुकच लशा खाइशशा, वाइ ब्रेशशा डाक्नीनी।

15 आं योत्रशोपुकीमी सराप पची ना इन नें थीनीम। मिनु नोले गो परमप्रभु, परमप्रभु यावेमी इन कली साइक्नन्नी। तन्न आं गेय पाइब आन कली नक नें वोइक्नुडमी। यसैया ६२:२

16 मिनु सु सुम रागीमी आसीक पुंडनीमी, मेकोपुकी थमा सुइक्चा पुंडसीब परमप्रभु आ नेमी आसीक ताइनीम। मिनु रागीमी सु सुमी कसम जाइनीमी, मेकोपुकीमी थमा सुइक्चा पुंडसीब परमप्रभु आ नेमी कसम जाइनीमी। मारदे हना डोंइती डा श्येत नुष्शा, प्रेंने थुम्शो बाक्नीम। मिनु आं डोंइती रे खुंइसीशो बाक्नीम। यसैया १९:१८; येरमीया ४:२

नक सरीड नु नक रागी

17 मिनु गो नक सरीड नु नक रागी सेलनुड। डोंइती डा नेल्ल प्रेंशा, लेंशा मारेड ममिम्सीब। यसैया ६६:२२; २पत्रुस ३:१३; प्रकाश २१:१

18 गेपुकी आं सेल्शोमी शुश ग्येरसीने। मारदे हना गो यरूसलेम कली कुम्सो पपाइशशा, आ मुर नेल्ल आन कली ग्येरपाइक्नुडमी। यसैया ६६:२२; यसैया ३५:१०; यसैया २५:८; प्रकाश २१:४

19 गो यरूसलेम तशा ग्येरसीनुड, आं मुर आन कली तशा, आं थुं ग्येरशा प्रेक्ब। मेना मेकेर डाक्शो नु श्येत जशा डाक्शो मनेंसीब।

20 का निक्शी नाक्त ला ब्रॉइब आल मेकेर मबाक्नीम। मिनु मेकेर सुइ यो खूशो दुम्चा क्येडा डोंइती मबेक्नीम। सहे का बर्स ब्रॉइशा बेक्ब कली ठिटा देंनीम। मिनु सहे का बर्स मगाप्थु, बेक्ब मुर कली ‘सराप रशो मुर का बाक्त’ देंनीम। जकारिया ८:४

- 21 मेकोपुकी खिं सेल्शा, बाक्नीम। मिनु मेकेर अडगुर खुम्शा, ग्येरशा ब्वाइनीम। यसैया ६२:८  
 22 आंम आन सेल्शो खिंमी अरु मबाक्नीम। आन खुम्शो अडगुर अरुम मब्वाइनीम। आं मुरपुकी रवा खोदेशो पा शुश बर्स ब्रोंइनीम। आं योव्रशो मुरपुकीम आंम आन गुड डा गेय ग्येरशा जाइनीम। ब्यवस्था २८:३०; अय्युब १४:१७  
 23 मेकोपुकीमी मोशा गेय मपाइनीम। श्येत जपाइक्का कली आल मथीनीम। मारदे हना मेकोपुकी परमप्रभु यावे आ आसीक ताइब आन आल बाक्नीम। मिनु आन आल मेको नु बाक्नीम।  
 24 मिनु गो मेको आन पुंडुचा क्येडा डोंइती, लोत्र लेत्नुडमी। आन लोत्र पन पना नेंनुड। यसैया ३०:१९; यसैया ५८:९  
 25 मेना फर नु पाठा काथ काथा जोइनीसी। गुप्सम चहिं ब्यफोम खोदेशो पा पराल ब्वाइब। बुस्सुम खप जाइब। आं योव्रशो डांडामी मारेइमी मरिम्शो मपाइनीम” दे परमप्रभु यावेमी देत। यसैया ११:६-९; उत्पत्ती ३:१४

## 66

### निसाफ पशो

- 1 मिनु परमप्रभु यावेमी “स्वर्ग आं नित्तीके नु रागी आं खोइल वोइक्तीक बाक्ब। गे आं कली दोदेशो खिं सेल्ने चाप्नीनी? तेकेर नाइक्नुडा? १राजा ८:२७; बिलाप २:१; प्रेरित ४:४९; प्रेरित १७:२४  
 2 मारेइ मारेइ आं सेल्शो मनमी डा? मोपतीके मेको नेल्ल आं के नम” दे परमप्रभु यावेम देत। मिनु लेंशा “मो हना यो गो आं लोत्र नेंशा, हिंशा, खिंखि पा श्येत जाइब नु आ थुं जिकशो मुर आन कली कोव्रनुड।  
 3 मिनु सुमी ब्यफ साइक्बा, मेको मुर साइक्ब खोदेशो बाक्ब। सुमी पाठा का चढ़ेबा, मेको कुचुम आ शुर जिकब खोदेशो बाक्ब। सुमी अन्न चढ़ेबा, मेको पोत्र आ हुश चढ़ेब खोदेशो बाक्ब। सुमी मिम्शा चढ़ेतीके धूप चोइब, मेको मूर्ति पूजा पाइब खोदेशो बाक्ब। मेको आन दला दाक्स पाइनीमी। आन ग्रान्रा दिशो गेयमी ग्येरसीनीमी। १सामुएल १५:२२-२३  
 4 गो मेको आन कली शुक्शी पाइनुड। मिनु आन हिंशो श्येत आन तार मोइक्नुड। मारदे हना गो मेको आन कली ब्रेडडानु, लोत्र मलेत्तेम। गो लोत्र पाता। तन्न मेकोपुकीम आं लोत्र मननेम। आं डोंइती मरिम्शो पाम्तेक्म। आं मदाक्शो ला पाम्तेक्म” देत। यसैया ६५:१२

### परमप्रभुम सियोन कली ठीक सेल्शो

- 5 परमप्रभु यावे आ लोत्र क्येडा हिंशा, खिंखि पाइबपुकीम “आं लोत्र नेनीन। इन लोकबपुकीमी गेपुकी आं मुर दुम्तीके इन कली काड मदाक्थु, तिल्लीम। मेकोपुकीमी ‘परमप्रभु यावे कलीं ठेयब सेलल। मिनु गो इन ग्येरशा बाक्शो तकल’ देनीम। तन्न मेकोपुकी मुने दोक्नीम। लूका ६:२२  
 6 नेनीने, सहर रे ठेयब रेयके नेंसीब। परमप्रभु यावे आ खिं रे सेंदा का नेंसीब। मेको परमप्रभु यावे आ सेंदा बाक्ब। आ जोरी सत्रु आन कली क्येक्क लेत्चा कली ठेयब सेंदा पा लोत्र पाइब” देतेक्म।  
 7 मिनु परमप्रभु यावेमी “सियोनमी सुत्केरी रोइ पचा क्येडा डोंइती आल थिप्नु। सुत्केरी रोइ पचा क्येडा डोंइती तौ का थिप्नु।  
 8 मोदेशो लोत्र सुम नेन्मे, सुम तामे? मार, नाक्त कामी रागी का दुम्बा डा? याम कामी रागी का जरमेसीबा डा? सियोनमी सुत्केरी रोइ पचा चिकतानु, आलपुकी थिप्नु।  
 9 गो आल थिचा चिक्पाइशशा डा मीन, थिचा मगेनुडा डा? गो आल थिचा गेबमी, तेक्नुडा डा?” दे इन परमप्रभुमी देत। यसैया ३७:३  
 10 मिनु गे यरूसलेम कली दाक्ब नेल्लेमी मेको नु ग्येरसीन। गे मेको आ पर्वम रोंका पाइब नेल्ल ग्येरसीन।  
 11 गेपुकी मेको आ दूध युप्शा, रूशा, इन थुं बारपतीन। मेको आ रिम्स तशा ग्येरसीने। यसैया ६०:१६  
 12 मारदे हना परमप्रभु यावेमी “गो ठेयब खोला खोदेशो पा मार मार गेनुड। मिनु बारशो खोला खोदेशो पा रागी रागी डा मुर आन शोप गेनुड। मिनु गे जाइनीनी। गेपुकी मुष्णा, कुरचा पुंडसीनीनी। थुकुम ग्यारपाइक्का पुंडसीनीनी। यसैया ६०:४  
 13 दोपा आल आ ममामी आल आ थुं बारपाइक्बा, मोपा गो इन कली इन थुं बारपाइक्बन्नी। गे यरूसलेम सहरमी इन थुं बारपाइक्का पुंडसीनीनी। बजन संग्रह १३१:२  
 14 गेपुकी मेको कली तशा, शुश ग्येरशा, इन थुं बारपाइक्नीनी। गे घांस बारशो खोदेशो पा बारनीनी” देत। परमप्रभु यावेमी आ गेय पाइब आन कली वारच पाइब, दे मुर नेल्लेमी तुइक्नीम। मेको आ जोरी सत्रु आन पर्वम गाइक्ब।  
 15 परमप्रभु यावे मी नु जाक्ब। आ बगीपुकी फज गिवार खोदेशो पा गाक्नीम। आ गाइशो चुशोमी क्येक्क लेप्ब। आ हुइक्तीके हुहर पा ब्रशो मी खोदेशो बाक्ब। बजन संग्रह ५०:३; प्रकाश १९:११-१५  
 16 मारदे हना परमप्रभु यावेमी मीमी निसाफ पाइब। मुर नेल्ल आन कली आ तरवारम निसाफ पाइब। मिनु परमप्रभु यावेमी मोपा साइशो शुश दुम्नीम।  
 17 मिनु “सु सु देवी देवता आन डोंइती जाक्का कली चोव्रखेसीशा, आंम कली ठीक सेल्नीमी, फू रू लशा, मेको रू आ दातेमी बाक्ब पोत्र श्ये ब्वाइब आ नोले खोइशशा, मेको यो पोत्र श्ये ब्वशा, ग्रान्रा दिचा डा थोत्रकपुकी नु यिच ब्वाइनीमी, मेकोपुकी कालेमी साइक्का पुंडसीनीम” देत। यसैया ६५:३-५; इजीकीएल ८:११  
 18 परमप्रभु यावेमी “गो मेको आन पतीके नु आन मिम्तीके तुइक्नुड। मिनु रागी रागी डा मुर नेल्ल नु नेल्ल खाल डा लोत्र पाइब मुर आन कली खुनुड। मिनु मेको मुर जाक्का, आं छेडछेड ताइनीम।  
 19 मिनु गो मेको आन दातेमी चिन्ड का वोइक्नुड। मिनु मेको आन दाते डा प्रोंइशो आन कली रागी रागीम सोइक्नुडमी। गो मेको आन कली टारशीश, पूत नु लूद सोइक्नुडमी। लूद डा मुर चहिं लिब्रा आप्ब बाक्नीम। गो तूबल, यावान नु समुन्द्र

आ नेक्था डा रागी मेर सोइक्नुडमी। मेकोपुकीमी आं नें मतुइक्ब आं छेडछेड मताइब रागी रागी डा मुर आन कली आं पबर्म शेंनीम। मत्ती १८:१९तूबल नु यवान ग्रीस रागी बाक्ब।

20 मिनु इन लोकब नेल्ल आन कली रागी रागी रे परमप्रभु यावे आ डोंइती चढ़ेशो खोदेशो पा यरूसलेमम चाक्नीम। मेकोपुकी शारा, बग्गी, कुरतीके, गधा नु दलओंठम डोइक्पाइश्शा, आं योत्रशो डांडाम चाक्चा पुंइसीनीम। दोपा इस्राएलीपुकीमी आन अन्न चढ़ेतीके सफा ग्योबुम परमप्रभु यावे आ खिं चाक्नीमी, मोपा मेकोपुकीमी पाइनीम। यसैया ६०:३-७

21 गो मेको आन दाते रे चढ़ेब नु लेवी योत्रनुडमी” दे परमप्रभु यावेमी देंत।

22 मिनु “दोपा आं सेल्शो नक सरीड नु नक रागी आं डोंइती गेना हना यो बाक्बा, मोपा इन नें नु इन चच युइ आन नें गेना हना यो लीनीम। यसैया ६५:१७

23 मिनु नोले औंसी रे औंसी सम्म नु नाइक्तीक नाक्ती रे नाइक्तीक नाक्ती सम्म मुर नेल्ले आं कली टेयब सेल्चा कली आं डोंइती जाक्नीम। गन्ती १०:१०

24 मिनु मेकोपुकी गूशा आं कली काइ मटीब आन बेक्शो रां कोव्रथ लाइनीम। मेको आन लुस्पु मबेक्नीम, आन मी यो मकापब। मेको मुर नेल्ल आन कली ग्रांरा दितीके दुम्नीम” दे परमप्रभु यावेमी देंत। मर्कूस ९:४८

## येरमीया

**ब्रेक्ब मुर:** एको किताब येरमीयाम ब्रेक्शो बाक्ब। पिप योयाकीमम आ हुकुम पची ना येरमीयामी आ लोत्र नेल्ल आ ब्रेक्ब मुर बारुक कली ब्रेक्पाइक्तु। साइ डोंइती रे यहूदी नु खीस्तीयन नेल्लेम मेको किताब येरमीया आ ब्रेक्शो बाक्ब, दे तुइक्नीम।

**गेना ब्रेक्शो:** मेना अस्सुर रागी खतम दुम्त। मेदी नु कल्दी डा मुरपुकीमी अस्सुर डा ठेयब सहर निनवे कली लडाइ पा ग्रातेक्म। मिनु मेको रागी आस दातेमी योक्साक्स। ६०९-६०६ बि. सी. मेर पिप नेबुकदनेसरमी इजीप्त कली लडाइ पा ग्रात। नोले डोंइती डा यहूदी आन कली ग्याइश्शा लाइक्तीके बाक्त। मेको ६०६ बि. सी.म बाक्त। मेको आ नोले डा ग्याइश्शा लाइक्तीक ५९८ बि. सी.म बाक्त। मिनु नेल्ल क्येडा नोले डा ग्याइश्शा लाइक्तीके ५८६ बि. सी.म बाक्त।

**मारदे ब्रेक्शो:** यहूदा डा मुर परमप्रभु गे मलेत्तेम हना, निसाफ पचा पुंडसीनीम। यरूसलेम सहर फुचा पुंडसीब। मिनु नोले थु बारपाइक्तीके लोत्र शुश ताइब। मिनु इसाएली मदुम्शो अर्को रागी डा मुर यो मेको नक कबल डा शिशी ताइब दुम्ने चाप्नीम।

### येरमीया सु बाक्म

1 एको चढेब हिल्कीयाह आ तौ येरमीया आ लोत्र बाक्ब। मेको बेन्यामीन आ रागी अनाशोथ सहरम बाक्शो बाक्त। येरमीया ११:२१; यहोसु २१:१८; ब्यवस्था ३३:३२

2 यहूदा डा आमोन आ तौ पिप योसीयाहम सासन पवा आ १३ बर्समी परमप्रभु यावेमी येरमीया कली लोत्र पाप्तु। २राजा २१:२४; २राजा २२:१

3 मिनु यहूदा डा योसीयाह आ तौ येहो-याकीम आ पाला नेल्ले नु यहूदा डा योसीयाह आ तौ सिदकीयाहम सासन पवा आ ११ बर्स डा ५ महिनाम परमप्रभु यावेम येरमीया कली लोत्र पना पन बाक्त। मेना यरूसलेम डा मुर ग्याइश्शा लाइक्चा पुंडसीशो बाक्तेक्म। २राजा २३:३४; २राजा २४:१७; २राजा २५:२-२१; येरमीया ३९:९

### येरमीया कली ब्रेशो

4 मिनु परमप्रभु यावेमी आं कली मार लोत्र पाप्तु देश हना,

5 “गो इ कली कोत्रजीम जोल्चा क्येडा डोंइती तुइक्ताक्ड। गो इ कली जरमेचा क्येडा डोंइती योत्रशा तिल्लन। मिनु इ कली रागी रागी डा मुर आन कली आं लोत्र पाइब सेल्लन” देंत। यसैया ४९:१; गलाती १:१५

6 मिनु गो “परमप्रभु, परमप्रभु यावे, गो दोपा ब्वाक्चा माल्नुडा, मजोक्नुडा। गो आलन बाक्नुड” देंती। प्रस्थान ४:१०; यसैया ६:५-७

7 तन्न परमप्रभु यावेमी आं कली “गो आल बाक्नुड मदेनो। गो इ कली सु सु आन बाक्तीक सोइक्नना, मेकेर लचान माल्लेवे। मिनु गो इ कली मार अरेडा, मेको देंचा माल्लेवे।

8 गे मेको आन क्येडा महिनो। मारदे हना गो इ कली प्रोंइचा कली गे नु बाक्नुड” दे परमप्रभु यावेमी देंत। प्रस्थान ३:१२

9 मिनु नोले परमप्रभु यावेम आ गुड दिंशा, आं शोत्र थिप्तु। मिनु आं कली “मुल आं लोत्र इ शोत्रम कुर पाता। प्रस्थान ४:१२

10 नेनो, मुलाक्ती गो इ कली रागी रागी नु राज्य आन पर्वम लोत्र पाइब सेल्लन। तुल्या नु प्रेत्या कली, खतम पोक्चा, प्रांग्ये माग्ये पपाइक्चा नु सेल्चा नु खुम्चा कली वोइक्तन” देंत। येरमीया १८:७-१०

11 मिनु परमप्रभु यावेमी आं कली “येरमीया, गे मार, तवी?” देंत। मिनु गो “देसी बदाम रवा आ राशी का ताता” देंती।

12 मिनु परमप्रभु यावेमी “गे ठीक ताप्तीवी। मारदे हना गो आं लोत्र नेल्ल दुम्ल, दे योत्रकी पा बाक्ती” देंत। येरमीया ३१:२८

13 मिनु परमप्रभु यावेमी लेंशा आं कली “गे मार, तवी?” दे हिल्लो पाप्तु। मिनु गो “बुइश्शो मार, मार बाक्शो ग्योब का उत्तर रे याक्सीशा यिशो ताता” देंती।

14 मिनु परमप्रभु यावेमी आं कली “उत्तर रे एको रागीम बाक्ब मुर नेल्ल आन कली श्येत जाक्ब। येरमीया ४:६; येरमीया ६:१, २२; येरमीया १०:२२; येरमीया २५:९; येरमीया ५०:४१

15 गो उत्तर डा राज्य डा जात जात डा मुर आन कली ब्रेत्नुड। मिनु मेको नेल्ल जाक्शा, यरूसलेम डा ठेयब लाप्चो ओत्रतीक लोमी, एर ओथ डा गारो नेल्ल नु यहूदा डा सहर आ डोंइती आन पिप आन निल्लीक वोइक्नीम। मेकोपुकी मेको आन पर्वम लडाइ पचा कली जाक्नीम।

16 मेकोपुकीमी आं कली प्रोंइशा, आं अरेशो मटितीके, गो मेको आन पर्वम आं निसाफ नेंपाइक्नुडमी। मेकोपुकीमी अरु देवी देवता आन कली धूप चोम्तेक्म। मिनु आन गुडमी सेल्लो देवी देवता आन कली पूजा पाप्तेक्म।

17 गे चहिं बोक्शा, ठीक दुमो। मिनु गो इ कली मार, मार, अरेडा, मेको आन कली माइक्मी। गे मेको आन क्येडा महिनो। मो पाप्तीवी हना, गो इ कली मेको आन डोंइती हिंपाइक्नन।

18 मुलाक्ती गो इ कली गारो हिरशो बोल्यो सहर, फलाम के थाम नु कांसा के थरपु खोदेशो सेल्लन। मोपा गे यहूदा डा पिपी, हुकुम पाइबपुकी, चढेबपुकी नु रागी डा मुर नेल्ले आन मरिम्शो पशो आ पर्वम लोत्र पने चाप्नेवे। येरमीया १५:२०; इजीकीएल ३:८-९



19 मेकोपुकीमी इ कली लडाइ तोइनीम। तन्न इ क्येडा ग्राने मचाप्नीम। मारदे हना इ कली प्रोंइचा कली गो गे नु बाक्नुड" दे परमप्रभु यावेमी दैत।

## 2

इसाएली आन कली प्रोंइशो

1 मिनु परमप्रभु यावेमी आं कली

2 "लावो, परमप्रभु यावेमी यरूसलेम कली मार दैत देशा हना 'गे इ ठिटी बाक्वी ना आं कली ग्युम्लीम खोदेशो पा दाक्ताक्वी। गे आं कली मारेड मशोक्शो गोरशो रागीमी आं नोले खोइक्ती। गो मेको मिन्नुड। होसे २:१६; होसे १३:५

3 इसाएल आंम परमप्रभु यावे कली आ का ला बाक्शो ग्युम्ली खोदेशो बाक्त। मेको, आ गेय डा डोंइती डा फल खोदेशो बाक्त। मेको कली नेक्ब नेल्ल दोस ताइब दुम्तेक्म। मेको श्येत जाम्तेक्म' देनो" दे माइक्ती। प्रस्थान २८:३६; आमोस ६:१; याकूब १:१८

4 गे याकूब आ खिं डा मुर नु इसाएल आ खिं डा मुर नेल्ले, परमप्रभु यावे आ लोव्र नेनीन।

5 परमप्रभु यावेमी मार दैत देशा हना "इन किकी पिपीम आं कली मार, दोस गेयीमी? मारदे आं कली प्रोंइशा, डोन लमा? मेकोपुकी शोर गाक्शो मूर्ति आन नोले खोइक्तेक्म। मिनु मेको यो शोर गाक्शो दुम्तेक्म। मीका ६:३

6 मेकोपुकीमी 'आंइ कली इजीप्त रागी रे गुंडब परमप्रभु यावे ते बाक्बा? मेकोमी आंइ कली गोरशो रागीम लां कोंइशा गाक्पाइक्तु। मेको मुर मबाक्तीक गोरशो रागी नु शुश खाल्टा बाक्शो रागी बाक्त। ब्वाक्कु मबाक्शो नु छिडछिड डा रागी बाक्त। मेको सुइ मगाक्तीक नु सुइ मुर मबाक्तीक रागी बाक्त' दैतेक्म। ब्यवस्था ८:१५

7 गो इन कली रिम्शो रागीम चाक्तन्नी। मेकेर डा फल नु रिम्शो थोव्रक जपाइक्चा कली चाक्तन्नी। तन्न गेपुकी जाक्शा, आं रागी मरिम्शो सेलतीनी। आं रागी कली ग्रांरा दिशो सेलतीनी। ब्यवस्था १:२५; न्यायाधीस २:१-२

8 च्हेबपुकीम 'परमप्रभु यावे ते बाक्बा?' मदेंम। आं अरेशो लोव्र शेंबपुकीम आं कली मतुइक्तीमी। सासन पाइबपुकी आं कली मरिम्शु, हेंथे गाक्तेक्म। आं लोव्र पाइबपुकीम बाल देवता आ नेम नोले दुम्ब लोव्र पाम्तेक्म। मिनु शोर गाक्शो मूर्ति आन नोले खोइक्तेक्म" दैत।

9 मोपतीके परमप्रभु यावेमी "गो इन कली लेंशा दोस गेचा माल्नुड। गो इन चच युइ आन कली दोस गेनुड।

10 किन्तीम माइश्शो साइप्रस डा समुन्द्र आ नेक्था बाक्ब आन कली कोव्रडीन। केदारमी क्यारी पाइब मुर सोइश्शा कोव्रडीन। मार, मेकेर मोदेशो गेय दुम्शो बाक्बा?

11 मार, तेकोइ रागी डा मुरुम आन देवी देवता फाइश्शो बाक्नीमी डा? मेको परमप्रभु मनम हना यो, मफाइक्नीम। तन्न आं मुरपुकीम आन टेयब सक्ति पाइश्शो कली शोर गाक्शो मूर्तिपुकी नु फाइक्तेक्म। रोमी १:२३

12 गे सरीडम बाक्बपुकीम एको लोव्र नेंशा हिंशा, छक लाक्कीन। मिनु थाम्पा हिंशा थिर थिर पा खिंखि पने।

13 मारदे हना आं मुरपुकीम निक्शी खेप मरिम्शो पाम्तेक्म। मेकोपुकीमी, ब्रोंइतीक ब्वाक्कु बुक्तीके, आं कली प्रोंइतेक्म। मिनु आंम कली सोव्रशो रागीमी ब्वाक्कु मदेम्तीक इनार दोम्तेक्म। येरमीया १७:१३; भजन संग्रह ३६:१०; यूहन्ना ७:३८

14 मार, इसाएल वाइल का बाक्बा? आ होव्रप आ खिंम जरमेशो वाइल का बाक्बा डा? मेको मारदे रोइक्चा पुंडसे?

15 गुप्सपुकी मेको कली तशा ग्रीनीम। टेयब सेंदा पा ग्रीनीम। मेकोपुकीमी आ रागी कली मुर मबाक्तीके सेलतेक्म। मेको आ सहर नेल्ल ब्रेतेक्म। मिनु मेकेर मुर मबाक्नीम। येरमीया ४:७

16 मेम्फीस नु ताहपनेस डा मुरपुकीम इन पिया डा सिरपेच पुइक्तेक्म। येरमीया ४४:१

17 इन कली लां कोंइब, इन परमप्रभु यावे कली प्रोंइशा, गे मोदेशो श्येत आंमा इन कली मचाक्नी डा?

18 गे मारदे इजीप्त रागी लाइनीनी? नील खोला डा ब्वाक्कु तूथ लाइनीनी? गे अस्सुर रागी लनीनु, मार रिम्शो दुम्बा डा? गे युफ्रेटीस खोला डा ब्वाक्कु तूथ लाइनीनी?

19 इन परमप्रभु यावे आ अरेशो लोव्र मटितीकेमी इन कली सजाइ गेब। इन प्रोंइशोमी इन कली हुइक्ब। गेपुकीम इन परमप्रभु यावे कली प्रोंइशो थम मरिम्शो नु इन थुं कशो दुम्शो बाक्ब, दे तुइक्तीन। मिनु आं कली मान पा हिंतीके गे नु मबाक्ब" दे परमप्रभु, मुर नेल्ल आन परमप्रभु यावेमी दैत।

20 परमप्रभु यावेमी "साइ डोंइती रे गे इ जुवा जिकतीवी। मिनु इ डोरी प्रोइक्तीवी। मिनु गे 'गो इ गेय मपाइनुड' दैते। गे डांडा नु रवा नेल्ल आन पुंम तेल्लेम पाप्तीवी। यसैया ५७:५५; इजीकीएल ६:१३

21 गो इ कली नेल्ल क्येडा रिम्शो अडगुर बोट खुम्ता। गे दोपा मरिम्शो दुम्शा ब्वाकी डा अडगुर बोट खोदेशो दुमे?

भजन संग्रह ८०:९; यसैया ५:१-४

22 गे इ कली मार, मार, हिक्सी नु शुश साबुनम चिक्साक्वे हना यो, इ दोस ततीके लुम्सीशो आं डोंइती बाक्ब" दे परमप्रभु, परमप्रभु यावेमी दैत।

23 मिनु "गे 'गो ग्रांरा मदिशो नड' दे दोपा देने चाप्नेवे? 'गो बाल देवता आ नोले मखोइश्शो बाक्नुड' दे गे दोपा देने चाप्नेवे? गे बेंसीम मार, पवी? मेको मिम्तो। गे थाम्पा पर ओंथ दोरशा गाक्ब दलओंठ बाक्नेवे।

24 गे गोरशो रागीम बाक्चा दाक्ब, फश नाम्शा गाक्ब ब्वाकी डा गधैनी बाक्नेवे। मेको आ डागो माल्तीके सुम तेवने चाप्बा डा? सु सुमी मेको कली माल्नीमी, मेको मदाइनीम। मारदे हना ब्वांइसीतीक महिनाम मेको कली थिन्नीम।

25 इ खोइल शिन्ना मगाक्को। गे तूतू दाक्शा खिं रे मलावो। तन्न गे 'एको मोशा बाक्ब। मारदे हना गो अर्को रागी डा देवता आन कली दाक्ताक्ड। मिनु मेको आन नोले खोइक्नुड' दैते।

26 दोपा खुड ग्याइक्चा पुंडसेनु, मुने दोक्बा, मोपा इस्राएल आ खिं डा मुरपुकी मुने दोक्नीम। मेकोपुकी, आन पिपी, आन टेयब मुरपुकी, आन चढेबपुकी नु मेको आन जोल पा परमप्रभु यावे आ लोत्र पाइबपुकी मुने दोक्नीम।

27 मेकोपुकीमी रवा कली 'गे आं आफ नवे' मिनु फुल्लु कली 'गे आं कली जरमेब नवे' देंनीम। मेकोपुकीमी आं कली आन ची हिरशा कोंइशो बाक्नीम। आन कुल ममाड। मो हना यो मेको श्येत जामे नाक्ती जाक्शा 'आंइ कली प्रोंइकी' देंनीम। येरमीया ७:२४; येरमीया १८:१७; येरमीया ३२:३३

28 तन्न आंम इन सेल्शो देवी देवता ते लाक्वामे? मेकोपुकीमी इन कली प्रोंइने चाप्टेक्म हना, इन श्येत जची ना मेको आन कली जाक्पतीन। मारदे हना यहूदा, गे इ के गिश सहर बाक्मा, मिश देवी देवता बाक्नीम। ब्यवस्था ३२:३७-३८; न्यायाधीस १०:१४; येरमीया ११:१३

29 गेपुकीम मारदे आं कली गन गन पाइनीनी? गे नेल्ल आं कली काइ मटीब दुम्शो बाक्नीनी।

30 गो इन आल आन कली मोशा तुप्तामी। गो मेको आन कली शेंचा दाक्ताक्ड। तन्न मबिस्सम। इन कली सोइशो आं लोत्र पाइब इन तरवारमी साइक्चा पुंडसाक्म। गेपुकी गु दाक्ब गुप्स खोदेशो बाक्नीनी। यसैया १:५; मत्ती ५:१२; मत्ती २२:६; मत्ती २३:३७; मर्कूस १२:५

31 मिनु गे, मुल डा पाला डा मुरपुकी, परमप्रभु यावे आ लोत्र मिम्तीन। मार, गो इस्राएली आन कली मुर मबाक्शो रागी नु थम छिडछिड डा रागी दुम्डा डा? मारदे आं मुरपुकीम 'गो आंइ कली हिरचा कली सुइम तेक्ने मचाप्व। गो इन डोंइती गेनायो लेशा मजाक्नीकी' देमा?

32 मार, मीश आलम आ सुन चांदी नु ग्युम्लीम आ ग्युंवे पशो दारशो वा प्रेने चाप्नीमी डा? तन्न आं मुरपुकीम दा आं कली शुश नाक्ती रे प्रेंताक्वीमी।

33 गे दाक्मुतीक माल्शा गाक्चा कली शुश जोक्ब बाक्नेवे? मिनु गे परमप्रभु यावे आ अरेशो लोत्र मटीब मीश मुर अरु लां शेंशा गाक्पाइक्तीवी।

34 इ फेक्शो वाम दोस मताइब नु पुडग आन हुश लुम्सीशो बाक्ब। मिनु गेमी मेको आन कली खिं प्रोल्शा खिं ओव्रशो मथिदी। मेको मोदेशो नेल्ल दुम्ना दुम्न यो, येरमीया २६:२०-२३; प्रस्थान २३:७

35 गे 'गो दोस मताइब बाक्नुड। मेको थमा पा गो नु मगाइक्ब' देनेवे। मारदे हना गेमी 'गो पाप मपड' देतीके गो इ कली निसाफ पाइनुड। यसैया ४३:२५-२६

36 गे इ गाक्तीक लां फाइक्ना फाइक्न एर ओंथ पाइक्नेवे? दोपा अस्सुरम इ कली मुने दोक्पदा। मोपान इजीप्टमी यो इ मुने तोक्ब। २राजा २२:३३-३५; यसैया ३०:३

37 गे मेकेर रे यो हिंचा डा पा प्रोक्चा माल्नेवे। मारदे हना परमप्रभु यावेमी थमा सुइक्चा कली योव्रशो आन कली आ नेक्था मजाक्चा डा पा तिल्लु। मेको आन वारच पतीके इ कली शोर गाक्शो बाक्ब" दे परमप्रभुम देंत।

### 3

नाता खोइशो

1 मिनु परमप्रभु यावेमी "वोंइश मुरुमी आ मीश कली प्रोंइशा, छोड पत्र गेप्टु हना, मेको मीश मुर अर्को वोंइश मुर आ मीश दुम्त हना, मेको वोंइश मुरुम लेंशा आ मीश कली चाक्बा को? मो दुम्त हना मेको रागी ग्रंशा दिशो मदुम्बा डा? गे चहिं तेल्लेम का खोदेशो पा शुश आन बाक्तीके जाक्दीशो बाक्ते। मिनु मार, गे आं गे लेशा जाक्नेवे?" दे परमप्रभु यावेमी देंत। ब्यवस्था २४:१-४

2 परमप्रभु यावेम "इर कोव्रडो। गोरशो डांडा मेर कोव्रडो। गे सु नु मडमे? गे मुर मबाक्तीके अराब खोदेशो पा लांमी बाक्शा, गे नु इप्व मुर आन कली रिम्ना रिम्न बाक्ते। गे इ तेल्लेम पतीके नु आं अरेशो मटितीकेम मेको रागी ग्रंशा दिशो सेल्लतीवी। होसे ४:१३

3 मोपतीके रेउ मयिशो बाक्त। मिनु बर्खा डा रेउ मयी। मो हना यो गे मुने मपाइशो बाक्नेवे। गे इ मुनेम लल मजिनेवे। येरमीया ३:१९; येरमीया ३१:९; यसैया ६३:१६

4 मार, गे मुल नक आं कली 'आं आफ, आं ठिटी रे डा वारच, देंते।

5 मार, मेको गेना हना यो गाइक्स डा गाइक्स बाक्बा डा? मार, इन गाइक्चा गेना हना यो बाक्बा डा? दे आं कली ब्रेत्ते। मिनु गे ओदेशो लोत्र पाइनेवे। तन्न मार मरिम्शो बाक्मे, मेको नेल्ल पाप्तीवी" दे परमप्रभु यावेमी देंत।

थमा मसुइक्ब इस्राएली

6 योसीयाहम सासन पची ना परमप्रभु यावेमी आं कली "थमा सुइक्ने मचाप्व इस्राएलम मार, पवा, मतवी? मेकोमी डांडा नेल्ल छोइशशा, गिगी रवा नेल्ल आन पुंम तेल्लेम पाप्टु। येरमीया २:२०

7 मेकोमी मोदेशो नेल्ल पा आं गे लेप्व, दे मिम्ताक्ड। तन्न मेको मले। मिनु मेको नेल्ले जोल पाइब आ लोक्ब यहूदाम ताप्टु। २कोरिन्थी ७:८-९; इजीकीएल २३:२,४१

8 मेको थमा सुइक्ने मचाप्व इस्राएल कली आ शुश तेल्लेम पतीके, गो छोड पत्र गेशा, सोइक्ताक्ड, दे तुइशो बाक्त। मो हना यो आ लोक्ब देंखु पशो यहूदामी मेको तशा महिंथु। मेकोमी यो तेल्लेम पाप्टु।

9 इस्राएलमी आ तेल्लेम पतीके थम आइक्च मिम्ताक्व। मेकोमी फुल्लु नु रवापुकी नु यो लशा तेल्लेम पा रागी ग्रंशा दिशो सेल्लु।

10 मेको नेल्ल दुम्त हना यो, मेको आ लोक्ब देंखु पशो यहूदा आ थुं नेल्लेमी आं गे मले। आं गे लेशो खोदेशो ला पखु पाप्टु" दे परमप्रभु यावेम देंत।

11 मिनू नोले परमप्रभु यावेमी आं कली “थमा सुडक्ने मचाप्ब इस्राएल, जोल पा मरिम्शो पाइब यहूदा क्येडा ठीक पाइब दुम्त।

12 ‘गे लावो। मिनू एको लोत्र उत्तर गे शेंदीमी। थमा सुडक्ने मचाप्ब इस्राएल, परमप्रभु यावेम लेतो। गो इ कली तशा मगाइक्नुड। मारदे हना गो शिशी पाइब नड। गो गेना हना यो मगाइक्नुड’। प्रस्थान ३४:६;

13 गे ‘गो पापी नड। गो आं परमप्रभु यावे कली काड मटीब दुम्ती। मिनू गिगी रवा नेल्ल आन पुंमी अरु देवी देवता आन कली दाक्ताकड’ दैते। मिनू आं देशो मटिवी। इ पाप शोत्रडो, दे मतो” दैत।

14 मिनू परमप्रभु यावेम मेको आन कली “लेतीन। थमा सुडक्ने मचाप्ब आलपुकी लेतीन। मारदे हना गो इन होवप नड। गो सहर रे मुर का कली नु खिं रे मुर निकशी आस कली योव्नुडमी। मिनू इन कली सियोनम चाक्नन्नी। यसैया ६:१३

15 मिनू गो इन कली आं थुं नु गारब गोठलापुकी गेनुड। मिनू मेको जोकब नुरु रूब दुम्शा, इन कली थुल्नीम। येरमीया २३:३-४; यसैया ४४:२८; इजीकीएल ३४:२३

16 गे रागीम सोशा बोशा शुश दुम्तीनी हना, मुरपुकीम गेनायो ‘परमप्रभु यावे आ कबल पशो सन्दोस’ मदेनीम” दैत। मिनू परमप्रभु यावेम “मेकोपुकीमी मेको कली ममिन्नीम। मेको कली सुडमी ममाल्नीम। मेको खोदेशो लेंशा अर्को यो मसेल्नीम। गन्ती १०:३३-३६; २राजा २५:८-९; हिब्रू ४:१४-१६

17 मेना यरूसलेम कली ‘परमप्रभु यावे आ ठेयब नित्तीके’ देनीम। मिनू रागी रागी डा मुर नेल्ल मेकेर देल्नीम। मुर नेल्ल परमप्रभु यावे आ नेक्था यरूसलेमम देल्नीम। मेना रे आन थुं डा मरिम्शो लोत्र मपाइनीम। प्रस्थान १७:१६; यसैया २:२-४; मत्ती ४:२

18 मेको नाक्ती यहूदा आ खिं डा मुर, इस्राएल आ खिं डा मुरपुकी नु गारनीम। मिनू मेकोपुकी कालेम उत्तर रे पा इन किकी पिपी आन कली गेशो रागीम जाक्नीम। यसैया १:१-१३

19 मिनू गो इन कली आंम आल आन दातेमी बाक्चा गेनुड। गो इन कली रिम्शो रागी का गेनुड। मेको रागी नेल्ल आन दाते डा नेल्ल क्येडा दारशो रिम्शो रागी बाक्ब। मिनू गे आं कली ‘आं आफ’ देनीनी। गे नोले मशोइक्ब दुम्नीनी, दे मिम्ताकड। ब्यवस्था ७:६; ब्यवस्था ३२:६; ब्यवस्था ८:७; येरमीया ३:४

20 तन्न दोपा थमा सुडक्ने मचाप्ब मीश मुरुम आ वोंडश कली प्रोंडबा, मोपा गे थमा सुडक्ने मचाप्ब, इस्राएल, गे आं कली प्रोंडती” दे परमप्रभु यावेम दैत।

21 गोरशो डांडाम वाइ ब्रेशो सेंदा का नेंसीब। मेको इस्राएल आ आल आन शुश डाक्शो सेंदा बाक्ब। मारदे हना मेकोपुकी दूली लांम गाक्शो बाक्तेक्म। मेकोपुकीमी परमप्रभु यावे, आन परमप्रभु कली प्रेंशो बाक्तेक्म। येरमीया ३:२

22 मिनू मेकोमी “थमा सुडक्ने मचाप्ब आलपुकी लेतीन। इन थमा सुडक्ने मचाप्तीके सापाइक्नन्नी” दैत। मिनू मेकोपुकीमी “दुम्ब, गो इन गे लेशशा, जाक्नीकी। मारदे हना गे परमप्रभु यावे, आंइ परमप्रभु बाक्नीनी।

23 थमा पा, पहाड डा देवी देवता आन थान जोल बाक्नीम। डांडा मेर ठेयब चाड सेल्टीके नेल्ल जोल बाक्नीम। थमा पा परमप्रभु यावे, आंइ परमप्रभु इस्राएल कली पाप रे प्रोंडब बाक्ब।

24 गोपुकी आंइ ठिटा ठिटी रेन मेको मुने तोक्ब गेयमी आंइ किकी पिपी रे श्येत पा गेय पशो नेल्ल नेक्तु। मेको आन क्यारश भेडा, आन बी ब्यफ नु आन तमी तौ आन कली नेक्तु।

25 मुल गो इं मुनेम गुम्प्य। मिनू इं दोस ततीकेमी इं कली सुमल। मारदे हना गो परमप्रभु यावे, इं परमप्रभु कली पाप पाइतया। इं किकी पिपी नु गो इं ठिटा ठिटी रेन मुल सम्म परमप्रभु यावे, इं परमप्रभु आ देशो मटिशो बाक्तय” दैतेक्म। येरमीया १४:७,२०

## 4

परमप्रभुमी इस्राएल कली ब्रेशो

1 परमप्रभु यावेम “गे इस्राएलीपुकी, आं गे लेशशा जाक्तीनी हना, गेपुकीम इन ग्रांया दिशो थोत्रक आं डोंडती रे ताइक्ताक्नी हना, गेपुकी हेंथे मगाक्ब दुम्नीनी।

2 कसम जची ना गेपुकीम ‘परमप्रभु यावे ब्रोंडशा बाक्शो खोदेशो पा’ दे कसम जाइतीनी हना, गे थमा लोत्र पा, ठीक निसाफ पाइब नु रिम्शो थुं पाइब मुर दुम्तीनी हना, रागी रागी डा मुर परमप्रभु आ नें थिशा आसीक पमुइनीम। मिनू मेकोपुकी आ आल दुम्तीके ग्येरसीनीम” दैत। ब्यवस्था १०:२०; यसैया ६५:१६

3 मिनू परमप्रभु यावेमी यहूदा डा मुर नु यरूसलेमम बाक्ब आन कली “इन कोक्त रूमी डल्ला थोक्तीन। चू आन दातेमी मशोक्कीन। इजीकीएल १०:१२

4 परमप्रभु यावे आ पर्वम खोइक्तीक चिनु खोंडसीन। तन्न इन थुंम खोइक्तीक चिनु खोंडसीन। गे यहूदा डा मुरपुकी नु यरूसलेममी बाक्ब वोंडशमुरपुकी, मो मपाइतीनी हना, इन मरिम्शो पतीके आं गाइक्चा मी खोदेशो पा ब्रशा गूब। मिनू सुडम कान्ने मचाप्चा डा पा मेकोमी जेक्ब” दैत। येरमीया ९:२५; ब्यवस्था १०:१६; रोमी २:२९; कलस्सी २:११; येरमीया ६:७,१०

उत्तर रे श्येत जाक्शो

5 परमप्रभु यावेमी “यहूदामी शेंदीन। मिनू यरूसलेमम उरदी पने। गे रागी नेल्लेमी तुराही तपीन। ठेयब सेंदा पा ‘नेल्ल गुम्प्य। मिनू गो ठेयब गारो हिरशो सहरमी प्रोक्य’

6 सियोन गे लचा कली छेदर क्युक्कीन। ब्रोंडचा आ पर्वम देश मपथु रीब पा प्रोकशा लने। मारदे हना गो उत्तर रे ठेयब श्येत नु खतम दुम्तीके चाक्नुड। येरमीया १:१४

7 गुप्स का आ पुक्खी रे गूशा, जाक्शो बाक्ब। रागी रागी कली खतम पोक्ब का गूब। मेको आ बाक्तीक रे गूशा, इन रागी कली मुर मबाक्तीके सेल्ब। इन सहर डा खिं नेल्ल ब्रेत्नीम। मेकेर मुर बाक्ने मचाप्नीम। येरमीया २:१५; येरमीया ५:६; येरमीया २५:३८; येरमीया ४९:१९; येरमीया ५०:४४

8 मोपतीके अरन्डी फेक्शा रोंका पने। मिनु डाक्कीन” देंत। मारदे हना परमप्रभु यावे आ हिंचा डा पा गाडशो इं रे मयाक्सीशो बाक्ब। येरमीया ६:२६

9 मिनु परमप्रभु यावेम “मेको नाक्ती पिप नु हुकुम पाइब नेल्ल आन थुं लुकच लाइब। चढ़ेबपुकी हिंशा ग्येत्थ लुकच दुम्नीम। मिनु परमप्रभु यावे आ लोत्र पाइबपुकी ग्रीचोक पा हिंनीम” देंत।

10 मिनु गो “परमप्रभु, ए परमप्रभु यावे, गो आंड शुर्मी तरवार जाक्मेनु यो, गे ‘इन थुं नाडशशा बाक्कीन’ दे गे एको मुर नु यरूसलेम कली मरिम्शो पा जोल पाइशो बाक्तीनी” देंती। येरमीया ६:१४

11 परमप्रभुमी “मेना मार लोत्र पाइनीम देशा हना ‘एको मुर नु यरूसलेम कली गोरशो रागी डा डांडा रे होश फश आं पुडग मुर आन बाक्तीक जाक्ब। तन्न मेको फशेम क्राप्चा यो म्दुम्ब, हारचा यो म्दुम्ब।

12 मेको फशेम मेको पने मचाप्ब। मारदे हना मेको शुश बोल्यो फश गिवार बाक्ब। मिनु गो मेको आन कली निसाफ पतीक लोत्र पाइनुडमी।

13 कोवडीन, मेको गोस्स खोदेशो पा गाक्शो बाक्ब। मेको आ बग्गी फश गिवार खोदेशो पा जाक्नीम। मेको आ शारा ककाकुली आन क्येडा रीब पा दोरनीम। आबी, गो खतम दुम्तय’ दे लोत्र पाइनीमी” देंत।

14 मिनु परमप्रभु यावेम “ए यरूसलेम, गे पाप रे ब्रोंडचा तचा कली इ थुं इ परमप्रभु यावे कली मटितीके रे चिकसो। गेना सम्म इ मरिम्शो मिम्तीक इ थुंम बाक्चा गेनेवे? येरमीया ६:८; यसैया १:१४

15 दान रे सेंदा कामी ‘एफ्राइम डांडा रे खतम दुम्तीके जाक्ब’।

16 रागी रागी डा मुर आन कली एको लोत्र पावो। एक जाक्तेकम। यरूसलेम कली डोन रागी रे सहर पुम्चा कली लडाइ पाइब जाक्शो बाक्नीम। मिनु यहूदा डा सहर आन पर्वम लडाइ पा ग्रीनीमी।

17 मेकोपुकी रू खाल पाइक्बपुकी खोदेशो पा, एर ओंथ नेल्ल हिरशा बाक्शो बाक्नीम। मारदे हना मेकेर डा मुरपुकी आं कली काइ मटीब बाक्नीम” दे परमप्रभु यावेमी देंत। येरमीया १:१५; येरमीया ६:३

18 मिनु परमप्रभु यावेमी “इ दूली लां गाक्तीके नु इ पतीके इ कली मोदेशो दुम्शो बाक्त। इ सजाइ मेकोन बाक्ब। मेको शुश कशो बाक्ब। मिनु मेकोमी इ थुं खाइक्पाइक्तु” देंत।

19 मिनु गो हिंती, हिंती। गो श्येत जशा हुकयी पाइनुड। आं लुडगीर खाइशशा, तुक तुक पापुतु। गो सिक्सी पा बाक्ने मचाप्नुड। मारदे हना गो तुराही ताप्शो नेंता। मेको लडाइ डा रेयके बाक्ब।

20 खतम दुम्तीक तार खतम दुम्तीक जाक्ब। रागी नेल्ल मुर मबाक्तीक दुम्त। आं ताम्बु नु फारतीक वा नेल्ल याम काम खतम दुम्तेकम।

21 गो गेना सम्म लडाइ डा छेदर तचा माल्नुडा? मिनु गेना सम्म तुराही ताप्शो नेंचा माल्नुडा?

22 आं मुर मूर्ख बाक्नीम। मेकोपुकीमी आं कली म्दुम्ब। मेको निप्स मपाइशो आल बाक्नीम। मेको आन के रुप्तीक मबाक्ब। मेको मरिम्शो पचा कली जोक्ब बाक्नीम। तन्न रिम्शो पस मजोक्नीम। यसैया २७:११

23 मिनु “गो रागी कली कोव्रता। मेको मारेइ मबा। मिनु मेकेर नेल्ल श्येत्थ बाक्त। मिनु सरीड गे कोव्रडुनु, मेकेर मारेइ छेडछेड मबाक्म। उत्पत्ती १:२

24 मिनु गो डांडा आन कली कोव्रडुनु, मेकोपुकी खिंखि पशो बाक्तेकम। पहाड नेल्ल एर ओंथ हिम्सीशो बाक्तेकम।

25 मिनु गो कोव्रडुनु, सुइ मबाक्शो बाक्त। सरीड डा चिक्ब नेल्ल बेरशा प्रोक्ने थुम्शो बाक्तेकम।

26 मिनु कोव्रडुनु, रिम्शो खप बाक्शो रू नेल्ल गोरशो रागी दुम्तेकम। मिनु मेकेर डा सहर नेल्ल ब्रेशो बाक्तेकम। मोदेशो पा परमप्रभु यावेमी आ शुश गाइक्तीकेमी पापुतु” देंती।

27 मिनु परमप्रभु यावेम मार, देंत देशा हना “रागी नेल्ल मुर मबाक्तीके दुम्त हना यो, गो मेको नेल्ल मक्याम्नुडमी। येरमीया ५:१८; येरमीया १०:२४; येरमीया १८:३-८; आमोस ९:८

28 मोपतीके रागीम रोंका पचा माल्ब। मिनु सरीड छिडछिड दुम्चा माल्ब। मारदे हना गो लोत्र पाता। गो डोंइती मिम्ताक्ड। आं थुं मलेप्ब। आं थुं महिरब।

29 शारा डोइक्बपुकी नु लिब्रा आप्ब आन सेंदा नेंशा, सहर नेल्ल डा मुरपुकी प्रोक्शो बाक्नीम। मिनु मेको ब्वाकीम प्रोक्शा खुडक्नीम। का निक्शी फुल्लु तार डोइशशा लाइनीम। सहर नेल्ल प्रोंडशो बाक्नीम। मेकेर सुइ मबाक्नीम।

30 गे गोरशो सेल्चा पुंडसीशो रागी मार, पना पन बाक्डे? गे लल वाम ग्योम्सीशा, सुन के गहना पांडसीशा, आम कली ग्योम्सीशो आ अर्थ मार, बाक्बा? गे मारदे गाजल खेक्सीशा इ मिक्च ठेयब सेल्नेवे? आम कली दारशो सेल्चा मोशान बाक्ब। इ कली दाक्ब मुरपुकीम इ कली ग्रान्रा दिशो बाक्नीम। इ कली साइक्चा माल्शो बाक्नीम।

31 गो सुत्केरी रोइ पशो मीश मुर आ सेंदा खोदेशो नेंता। मेको डोंइती डा आल थिचा चिक्शो मीश मुर आ सेंदा खोदेशो बाक्त। सियोन आ तमीमी आ गुइ दिंशा आ सास कीशा ‘आबी, आं कली साइक्ब आन डोंइती थाइनुड’ देंत” दे परमप्रभु देंत।

1 परमप्रभुमी “यरूसलेम डा लां आ एर ओंथ कोव्रशा गावको। नेल्ल कोव्रशा इ तशो नेल्ल ब्रेक्टो। आ लाडगा मेर माल्शा कोव्रडो। मिनु मेकेर ठीक गेय पाइब नु थमा लोत्र माल्ब मुर का यो थित्तीवी हना, गो यरूसलेम कली माफ गेनुड। उत्पती १८:२२-३२

2 मेकोपुकीमी ‘परमप्रभु यावे ब्रोंडशा बाक्शो खोदेशो पा’ दे कसम जाइनीम। मो हना यो मेकोपुकीमी जोल लोत्र पाइनीम” दैत। येरमीया ४:२

3 मिनु “परमप्रभु यावे, गे थमा लोत्र तचा ममाल्नीनी डा? गे मेको आन कली तुप्तीनी। तन्न मेकोपुकी मखाइक्म। गे मेको आन कली खतम सेलतीनी। तन्न मेकोपुकीमी इन देशो पचा मबिल्लीम। मेकोपुकीम आन कुल फुल्लु क्येडा यो खकटा सेल्लेक्म। मेकोपुकी लेशशा जाक्ने मबिस्सम। येरमीया २:३०; येरमीया ७:२८; येरमीया ९:२; यसैया ४८:४

4 मेकोपुकी दा पुडुग ला बाक्नीम। मेकोपुकी मूर्ख बाक्नीम। मारदे हना मेकोपुकीम परमप्रभु यावे आ लां मतुइक्नीम। आन परमप्रभु आ अरेशो मतुइक्नीम।

5 गो शुश क्येट थीब मुर आन बाक्तीके लशा, मेको आन कली लोत्र पाइनुड। मेकोपुकीम थमा पा परमप्रभु यावे आ लां, आन परमप्रभु आ अरेशो यो तुइक्नीम” दैती। तन्न मेकोपुकी खाल का डा दुम्या, जुवा जिक्शो बाक्तेक्म। मिनु डोरी यो प्रोंडशो बाक्तेक्म। येरमीया २:२०

6 मोपतीके परमप्रभुमी “ब्वाकी डा गुप्स कामी मेको आन कली ग्राम्शा साइक्ब। गोरशो रागी डा फर कामी मेको आन कली खतम सेल्ल। जोड का मेको आन सहर कोव्रना कोव्रन बाक्शो बाक्ब। सु मेकेर रे गूबा, मेकोमी मेको कली क्राइशशा चोकटा लाम्टा सेल्ल। मारदे हना मेकोपुकी शुश हेंथे गाक्ब बाक्नीम। मेको आन मटित्तीके ठेयब बाक्ब” दैत। येरमीया ४:७

7 मिनु परमप्रभु यावेम “गो इन कली दोपा माफ गेने चाप्नुडा डा? इन आलपुकीम आं कली प्रोंडतेक्म। मिनु परमप्रभु आ नेंम ममाइ, अर्को देवी देवता आन नेंमी कसम जाप्तेक्म। गो मेको आन माल्शो नेल्ल खाप्ता हना यो, मेकोपुकीम तेल्लेम पाप्तेक्म। मिनु तेल्लेम आन खिंम क्राक्थ्री चोक्थ्री दुप्तेक्म।

8 मेकोपुकी थाप्पा दोम्यो, गेय मपाइब शारा खोदेशो बाक्नीम। मेको आंम नेक्वा डा मुर आन मीश आन पबंम ग्रीनीम। इजीकीएल २२:११

9 मार, गो एको आ पबंम मेको आन कली सजाइ मगेनुडमी डा? मार, गो ओदेशो रागी डा मुर आन कली क्येक्क मलेत्तुडमी?” दे परमप्रभु यावेम दैत। येरमीया ५:२९; येरमीया ९:८

10 परमप्रभु यावेम आं कली “गे मेको आन अडगुर बोट दिम्या ताइशशा पावो। तन्न नेल्ल श्येत्थ मपोक्को। मेको आ राशी इल्लो। मारदे हना मेको परमप्रभु यावे आ मुर मनम।

11 मारदे हना इस्राएल नु यहूदा डा मुरपुकीम थमा पा प्रोंडतीमी” दैत।

12 मेकोपुकीमी परमप्रभु यावे आ पबंम “मेको मतुइक्नीकी। मेकोमी मारेइ मपाइब। गो मारेइ मरिम्शो मताइनीक। गो लडाइ नु अन्काल मताइनीक।

13 परमप्रभु यावे आ लोत्र पाइबपुकी फश बाक्नीम। मारदे हना परमप्रभु यावे आ लोत्र मेकोपुकी नु मबा। तन्न मेको लोत्र मेको मो दैब आन कली दुम्ब” दैतेक्म।

14 मोपतीके परमप्रभु यावे, मुर नेल्ल आन परमप्रभुमी मार दैत देशा हना “मेकोपुकीमी मोदेशो लोत्र पतीके, गो आं लोत्र इ शोत्रम मी खोदेशो सेल्लुड। मेको मुर आन कली शी सेल्लुड। मिनु मेको मीम नेल्ल आन कली दाक्ब सेल्लुडमी।

15 ए इस्राएल, इन कली खतम सेल्चा कली डोन रागी डा मुर चाक्नुड। मेको रागी डा मुरपुकी शुश बोल पाइशशो बाक्नीम। आन रागी साइ डोंडती डा बाक्ब। गे मेको मुर आन लोत्र मतुइक्नीनी। आन ब्वाक्शो मरुप्नीनी। येरमीया ६:२२; यसैया २८:१

16 मेको आन ब्रा कुरतीके रोक्शो तुरस खोदेशो बाक्नीम। मेको मुर नेल्ल थम सक्ति पाइशशो लडाइ पाइब बाक्नीम।

17 मेकोपुकीमी इन खुप्शो अन्न नु जचा थोत्रक नेल्ल नेक्नीम। मिनु इन तमी तौ नेल्ल आन कली यो लाइक्नीम। मेकोपुकीमी इन क्यारश भेडा नु बी ब्यफ नेल्ल नेक्नीम। मेकोपुकीमी इन अडगुर नु फोत्रशी नेल्ल नेक्नीम। मिनु इन थमा सुइशशो बोल्यो गारो हिरशो सहर नेल्ल तरवारम क्याम्नीम।

18 मो हना यो, गो मेको नाक्ती इन कली नेल्ल मसाइक्पाइक्नुड। येरमीया ४:२७

19 मिनु इन मुरपुकीम ‘मारदे इं परमप्रभु यावे, इं परमप्रभुमी इं कली ओदेशो पवा?’ दे हिलो पाप्तेक्म हना, गे मेको आन कली ‘गेपुकीम दोपा आं कली प्रोंडशा, आंम रागीम अरु देवी देवता आन कली पूजा पनी, मोपा मुल गेपुकीम इन मतुइशशो रागीम अर्को रागी डा मुर आन गेय पाइनीनी’ देशो बाक्ब माइक्मी। येरमीया १६:१०-१४

20 याक्कूब आ मुर आन कली एको लोत्र माइक्मी। यहूदामी एको लोत्र ठेयब सेंदा पा नेल्ल आन कली नेंपाइक्मी। यसैया ६:९-१०; मत्ती ८:१८

21 गे मूर्ख नु मिन्तीक मपाइशशो मुरपुकी, एको लोत्र नेनीन। इन मिक्ची बाक्ब, तन्न मताइनीनी। इन नोफा बाक्ब, तन्न मनेनीनी।

22 मार, गे आं कली मान पा हिंचा ममाल्नीनी डा? गे आं डोंडती खिंखि मपाइनीनी? गो समुन्द्र आ सांद कली बाल्वा वोइक्ता। आ डाल बोक्तेक्म हना यो, मेको कली ख्वाक्ने मचाप्नीम। मेकोपुकी शुश बोल पाप्तेक्म हना यो, मेको कली लाक्ने मचाप्नीम। ठेयब रेयके पाप्तेक्म हना यो, लाक्ने मचाप्नीम। बजन संग्रह १०४:९

23 तन्न मेको मुर आन थुं खकटा नु काइ मटीब बाक्ब। मेकोपुकी हिरशा लाम्तेक्म।

24 मेकोपुकीमी ‘गेपुकी परमप्रभु यावे, इं परमप्रभु कली मान पा हिंचा। मेकोमी माल्ची ना रेड गेब। मेकोम बर्खां नु हिंडद डा रेड गेब। मिनु अन्न रिक्शा खुप्ची ना डा नाक्ती गेब’ मदेंम” दैत। ब्यवस्था ११:१४

25 परमप्रभु यावेमी “इन मरिम्शो पशोम एको नेल्ल मरिम्शो दुम्त। इन पाप आ पबंम गे मेको रिम्शो मताइनीनी। यसैया ५९:२

26 आं मुर आन दातेमी मरिम्शो पाइब मुर बाक्नीम। मेकोपुकी चिक्ब साइक्ब मुर खोदेशो पा, बाप्शा बाक्शो बाक्नीम। मेकोपुकीम मुर आन कली ग्याइक्चा कली ब्वारद दाइक्नीम।

27 चिक्बीम ब्रीशो ओगील खोदेशो पा, मेको आन खिं खुइ पशो थोव्रकम ब्रीशो बाक्ब। मोपतीके मेको ठेयब मुर नु शुश क्येट थीब दुम्तेक्म।

28 मेकोपुकी दोम्शा लल जिशो नु शोंप पाइश्शो दुम्शो बाक्नीम। मेको आन परमप्रभु यावे आ अरेशो मटितीके कली तेक्तीक मारेइ मबाक्ब। मेकोपुकीम रोम रोइक्च आन कली रिम्शो दुम्ल, दे मेको आन कली ठीक निसाफ मगेनीम। मेकोपुकीमी क्येट मथीब आन कली वारच पा ठीक निसाफ मपाइनीम। प्रस्थान २२:२१; यसैया १:१७

29 मार, एको आ पबंम, गो मेको आन कली सजाइ मगेनुडमी? मिनु गो एको रागी डा मुर आन कली क्येक्क मलेत्नुडमी?” दे परमप्रभु यावेमी दैत। येरमीया ५:९

30 मिनु परमप्रभु यावेम “एको रागीम ग्रांघा दिचा डा नु शुश हिंचा डा श्येत दुम्त।

31 परमप्रभु यावे आ लोव्र पाइबपुकीम जोल पा लोव्र पाइनीम। दोपा परमप्रभु यावे आ लोव्र पाइबपुकीम जोल पा लोव्र पाइनीमी, मोपा चढेबपुकीम मुर आन कली हुकुम पाइनीम। मिनु आं मुरपुकी चहिं मोदेशोम दुम्चा दाक्नीम। तन्न नोले डा नाक्ती मार, पाइनीनी?” दैत। इजीकीएल १३:६

## 6

यरूसलेम कली पुम्शो

1 परमप्रभु यावेमी “बेन्यामीन आ आलपुकी ब्रोंइशा बाक्चा कली यरूसलेम रे प्रोक्कीन। तेकोहा सहरमी तुराही ताप्पीन। बेथ-हक्केरेम तार चिन्ड कोइशा वोतीन। मारदे हना उत्तर रे मरिम्शो पतीक नु खतम दुम्तीके यिशो बाक्ब। आमोस १:१; येरमीया १:१४

2 सियोन सहर दारशो योव्रतीके खोदेशो बाक्ब। तन्न सियोन आ तमी क्याम्चा पुंडसीब।

3 गोठला आन हल सुन्दा मेको नु लडाइ पचा कली जाक्नीम। मेकोपुकीमी आन ताम्बु आ एर ओंथ कीनीम। मिनु नेल्लेम मेको आन हल योव्रशा खतम सेल्नीम” देशो बाक्ब। येरमीया ४:१७

4 मिनु मेकोपुकीम “मेको नु लडाइ पचा कली ठीक दुमीन। बोक्कीन। गोपुकीम नाक्त उइक्थ दुम्मेनु, मेको कली लडाइ तोय। नाक्ती लाक्ना लाक्न बाक्ब। नाक्दो डा वांकु लाइश्शो दुम्ना दुम्न बाक्ब।

5 बोक्कीन। गो नाक्दो मेको कली लडाइ तोय। मिनु मेको आ दरवार प्रेय्य” देनीम।

6 मुर नेल्ल आन परमप्रभु यावेम “मेको आ रवापुकी क्योरशा तिमीन। मिनु यरूसलेम डा गारो डोइक्तीक सेलीन। मेको सहर कली सजाइ गेचा माल्ब। मेको सहर मरिम्शो पतीकेम ब्रीशो बाक्ब।

7 इनारम दोपा आ ब्वाक्कु बारपाइक्बा, मोपा मेकोमी आ परमप्रभु यावे आ अरेशो मटितीके बारपाइक्ब। मेको आ आगाम काइ मरिम्शो पतीक नु मारेइ मारेइ खतम पोक्तीक आ पबंम लोव्र नेसीब। मेको आ रोइ नु आ सेल्शो गार गेना हना यो आं डेंइती बाक्नीम।

8 गे यरूसलेम, एको इ कली अरेशो मपाप्तीवी हना, गो इ कली तशा ग्रांघा दिशा प्रोंइनुड। गो इ कली गोरशो नु मुर मबाक्शो सेल्नुड” दैत।

9 मुर नेल्ल आन परमप्रभु यावेमी मार दैत, देशा हना “गे अडगुर रिम्शो पा सिला पशो खोदेशो पा इस्राएल डा लीशो मुर आन कली सिला पने। अडगुर सेक्ब मुर खोदेशो पा राशी ग्याइश्शा, फल सिला पने।

10 गो सु कली लोव्र पा हिंच कोइदु? आं लोव्र सुम नेबा? मेकोपुकीम नेने मचाप्नीम। मेको आन नोफा सुशो बाक्नीम। परमप्रभु यावे आ लोव्र आ पबंम गाइक्नीम। मेको नेंचा मदाक्नीम” दैत। येरमीया ४:४; प्रेरित ७:५१

11 तन्न गो परमप्रभु यावे आ गाइक्तीकेम ब्रीशो बाक्नुड। गो मेको हेरा तेक्ने मचाप्नुड। मिनु मेकोमी “मेको लां मेर गाक्ब आल आन तार मोतो। बुक्शा बाक्शो ठिटा आन तार मोतो। मीश वोंइश निम्फा लाइक्चा पुंडसीनीस। खाल्पा नु खूशो लाइक्चा पुंडसीनीम।

12 मारदे हना गो आं गुइ मेको रागीम बाक्ब आन तार दिनुड, मेको आन खिं अर्को आन के दुम्नीम। आन रू नु आन मीश यो अरु आन के दुम्नीम” दे परमप्रभु यावेम दैत।

13 परमप्रभु यावेमी “नेल्ल क्येडा आइक्च मुर रे नेल्ल क्येडा ठेयब सम्म ठीक पा मचेम्शो क्येट तचा कली शिम दुम्शो बाक्नीम। परमप्रभु यावे आ लोव्र पाइब रे चढेब सम्म नेल्ल जोल पाइब दुम्शो बाक्नीम। येरमीया ८:१०-१२; इजीकीएल १३:१०-१६; १थिस्सलोनिकी ५:३

14 मेकोपुकीमी आं मुर आन कली ममिम्थु, आन गार सापाइक्खु पशो बाक्नीम। मेकोपुकीमी थुं नाइक्तीक मबाक्त हना यो “नाइसीन, नाइसीन” देनीम।

15 मेकोपुकीमी मुने दोक्चा डा गोय पाम्तेक्म। ग्रांघा दिशो गेय पाम्तेक्म। तन्न मेकोपुकी मुने मदोक्म। मुनेम लल जिचा देशो मार, बाक्बा, दे मतुइक्तेम। मोपतीके साइक्चा पुंडसीशो आन दातेमी साइक्चा पुंडसीनीम। गो मेको आन कली सजाइ गेडानु, मेको खतम दुम्नीम” दे परमप्रभु यावेमी दैत।

16 मिनू परमप्रभु यावेम मार, दैत देशा हना “लां ब्रातीकेम राप्शा कोव्रडीन। माइत लां आ परबम हिल्लो पने। मेको रिम्शो लां ते बाक्बा, दे हिल्लो पने। मिनू मेको लांमीन गाक्कीन। मिनू इन थुं नाइक्वा ताइनीनी। तन्न मेकोपुकीम ‘गो मेक मगाक्नीकी’ दैनीम। मती ११:२९

17 गो इन कली खाल पाइबपुकी योव्रतामी। मिनू गो इन कली ‘तुराही ताप्शो नोफा दाइश्शा नेनीन’ दैती। तन्न मेकोपुकीम ‘गो मनैनीकी’ दैतेक्म।

18 मोपतीके गे रागी रागी डा मुर नेनीन। बुक्तीक डा मुर नेल्लेमी मेको आन कली मार, दुम्बा, दे तुइक्तीन।

19 रागी नेल्ल नेनीन। गो एको मुर आन कली ठेयब श्येत चाक्नुड। मेको श्येत आन पशो आ पा डा बाक्ब। मारदे हना मेकोपुकीमी आं पचा देशो लोव्र मपामे। मिनू आं शेंशो लोव्र काइ मटीम। यसैया १:२

20 गो शेबा रे चाक्शो धूप ममाल्नुड। डोन रागी रे चाक्शो बिक्च यो ममाल्नुड। गो इन चोशा चद्देशो मब्राइनुड। गो इन क्योरशा चद्देशोम मग्येरनुड” दैत। भजन संग्रह ४०:७; यसैया १:११-१५

21 मोपतीके परमप्रभु यावेम मार, दैत देशा हना “कोव्रडीन, गो एको मुर आन डोंडती दाइल पाइक्तीके थोव्रक वोइक्नुड। मिनू आम आफ, आलपुकी कालेम नु आन नेक्था डा मुर नु आन वारच कालेम खतम दुम्नीम” दैत।

22 परमप्रभु यावेमी “कोव्रडीन, उत्तर डा रागी रे हुल का मुर जाक्नीम। रागी आ सुर रे ठेयब रागी डा मुर बारशा जाक्नीम। येरमीया ५:१५; ब्यवस्था २८:४९

23 मेकोपुकी लिब्रा नु तरवार शेशा ठीक दुम्शो बाक्नीम। मेकोपुकी मरिम्शो पाइब नु काइ शिशी मपाइब बाक्नीम। आन रेयके समुन्द्र ग्रीशो खोदेशो बाक्ब। मेकोपुकी शारा डोइश्शा सियोन आ तमी, इ कली लडाइ तोचा कली ठीक दुम्शो बाक्नीम” दैत। येरमीया ५०:४२

24 गोपुकीम मेको आन परबम मारोइ मारोइ लोव्र नैतक। मिनू आंइ गुड खोइली योक्त। गो शुश हितक। गो सुत्केरी रोइ पशो मीश मुर खोदेशो दुम्तक।

25 “रू मेर मलने। लां मेर मगाक्कीन। मारदे हना इन जोरी सत्रु आन गुइमी तरवार बाक्ब। मिनू एर ओंथ नेल्ल शुश हित्तीक बाक्ब” देशो नैतक। येरमीया २०:३

26 मिनू “आं श्येत जाइब मुरपुकी अरन्डी फेक्सीन। मिनू इन पिया तारी पुलु कुंइसीन। का ला बाक्शो आल बेक्शो आ परबम खोदेशो पा रोंका पने। मारदे हना आंइ कली साइक्ब याम काम जाक्ब” दैत। येरमीया ४:८; आमोस ८:१०

27 परमप्रभु यावेमी “गो इ कली आं मुर आन पशो नाक्ब नु रिम्शो सेल्व सेल्वतन। मोपा गे मेको आन पशो तुइश्शा, मार, पाइनीमी, दे नाक्ने चाप्नेवे।

28 मेको नेल्ल आन थुं खकटा बाक्शा, काइ मटीब बाक्नीम। मेकोपुकी जोल पा सांकछी बाक्ब नु गाक्नीमी। मेकोपुकी कांसा नु फलाम खोदेशो खकटा बाक्नीम। मेको नेल्ल मरिम्शो बाक्नीम। इजीकीएल २२:१८

29 मुरुमी यपाइक्वा कली भाटी कीना कीन मी ठेयब सेल्वनीम। तन्न यपाइक्तीक गेय मोशा दुम्त। मारदे हना परमप्रभु यावे आ अरेशो मटीब आन कली तिल्लो बाक्नीम।

30 तन्न मेको आन कली मरिम्शो तिल्लो चांदी, दे नें वोइक्नीम। मारदे हना परमप्रभु यावेम मेको आन कली तिल्लो बाक्ब” दैत। १राजा ९:७

## 7

येरमीया कली लोव्र पपाइश्शो

येरमीया २६:-

1 परमप्रभु यावेम येरमीया कली,

2 “गे आं खिं डा लाप्चोम राप्शा ‘गे यहूदा डा मुर नेल्ल परमप्रभु यावे आ लोव्र नेनीन। गे परमप्रभु यावे कली ठेयब सेल्चा कली एक जाक्ब यहूदा डा मुर परमप्रभु यावे आ लोव्र नेनीन’ देनो” दैत।

3 मुर नेल्ल परमप्रभु यावे, इस्राएली आन परमप्रभुमी मार, दैत देशा हना “इन गाक्तीक लां नु इन पशो नेल्ल रिम्शो सेलीन। मो पाइतीनी हना, गो गेपुकी नु एकेर बाक्नुड। येरमीया १८:११; येरमीया २५:५; येरमीया २६:१३; यसैया १:१६

4 मिनू ‘एको परमप्रभु यावे आ खिं बाक्ब। एको परमप्रभु यावे आ खिं बाक्ब। एको परमप्रभु यावे आ खिं बाक्ब’ देशो जोल लोव्र थमा मसुतीन।

5 गेपुकीम थमा पा इन गाक्तीक लां नु इन पशो रिम्शो सेल्वतीनी हना, गे थमा पा अरु मुर आन कली ठीक नु रिम्शो पाइतीनी हना,

6 गेपुकीमी अर्को रागी डा मुर आन कली, रोम रोइक्च नु आन वोंइश बेक्शो मीश मुर आन कली मदिप्तीनी हना, दोस मताइब मुर आन कली मसाइक्तीनी हना नु आम इन कली श्येत सेल्चा, दे देवी देवता आन नोले मखोइक्तीनी हना, येरमीया ५:२८

7 गो गेपुकी नु एक बाक्नुड। साइ डोंडती इन किकी पिपी आन कली गेशो रागीम गेना हना यो गेपुकी नु बाक्नुड।

8 तन्न गेपुकी दा जोल लोव्र कली थमा सुइक्नीनी। मेको नेल्ल मोशा बाक्नीम।

9 गेपुकीम खुड पाइनीनी, मुर साइक्तीनी, मुर आन मीश नु इप्नीनी, जोल पा कसम जाइनीनी, बाल देवता कली पूजा पाइनीनी नु इन मतुइश्शो देवी देवता आन नोले खोइक्तीनी। होसे ४:२

10 मो हना यो आं डोंडती आं नें बाक्शो खिंम राप्शा बाक्नीनी। आं डोंडती राप्शा ‘गो रिम्शो बाक्नीकी’ दैनीनी। मेकेर रे लेश्शा इन ग्रोग्रा दिचा डा गेय लेशा पाइनीनी।

11 मार, आं नेंमी बाकशो आं खिं इन डोंइती रोइकब आन बाक्तीक खिं दुम्मे? गो यो इन कली कोव्रना कोव्रन बाक्नुड।

मत्ती २१:१३

12 मुल आं बाक्तीक शिलो लने। गो मेकेर डोंइती आं नेंमी बाक्तीक सेल्शो नड। मिनु गो इस्राएल डा मुर आन कली आं अरेशो मटितीके मार पदु? मेकेर लशा कोव्रडीन। यहोसु १८:१; १सामुएल ४:४, १२; भजन संग्रह ७८:६०

13 मिनु गेपुकीम एको नेल्ल पना पन बाक्नीनु। गो इन कली गोना हना यो लोव्र पाता। तन्न गेपुकीम मनेनी। गो इन कली ब्रेत्ताक्नी, तन्न गेपुकीम लोव्र मलेत्तीनी। येरमीया २५:३; यसैया ६५:१२

14 मोपतीके गो मेको आं नेंम सेल्शो खिं कली नु इन किकी पिपी नु इन कली गेशो रागी कली शिलो खोदेशो सेल्लुड। गे मेको खिं कली थमा सुइक्तीनी।

15 मिनु गो इन कली आं डोंइती रे गुंइननी। गो इन कली, इन लोकब एफ्राइम आ आल नेल्ल आन कली खोदेशो पा खेरननी” दे परमप्रभु यावेमी दैत। २राजा १७:१८, २०, २३

16 परमप्रभु यावेम आं कली “गे मेको मुर आन परबम मपुनो। मेको मुर आन परबम मारेड मपुनो। मेको आन परबम आं कली लोव्र मपावो। मारदे हना गो इ पुंइशो मनेनुड। येरमीया ११:१४; येरमीया १४:११; येरमीया ३७:३; येरमीया ४२:२; प्रस्थान ३२:१-११; १सामुएल १२:२३

17 गे मेको यहूदा डा सहर नु यरूसलेम डा लां मेर पशो मतवी? येरमीया १९:१३; येरमीया ४४:१७-१९; यसैया ६:५, ११

18 मेको आन आलपुकीम शी खुप्नीम। आन आफपुकीम मी मुइक्नीम। मिनु मीश मुरपुकीम सरीड डा पिपीम कली बटुक चोचा कली फस नीनीम। अरु देवी देवता आन कली तूचा थोव्रक चढ़ेनीम। आं कली गाडक्पाइक्चा कली मो पाइनीम।

19 मिनु मार, मेकोपुकीमी आं कली गाडक्पाइक्चा कली मो पशो मनमी डा? मिनु मार, मेकोपुकीमी श्येत जचा कली मो पशो मनमी डा?” दैत

20 मोपतीके परमप्रभु, परमप्रभु यावेम “आं गाइशो नु आं चुरशो मेकेर मोइक्चा माल्ब। मुर, बी ब्यफ, क्यारश भेडा, रू डा रवा नु रागी डा मारेड मारेड आन तारी मोइक्चा माल्ब। मेको मकाप्ब मीम नेल्ल दाक्ब” दे परमप्रभु यावेमी दैत।

21 मिनु मुर नेल्ल आन परमप्रभु यावे, इस्राएली आन परमप्रभुमी मार दैत देशा हना “इन चोशा चढ़ेतीकेम क्योरशा चढ़ेतीके तेम्दीन। मिनु मेको श्ये ब्वने। १सामुएल १५:२२; भजन संग्रह ५०:७-१५; होसे ८:१३; मीका ६:६-८

22 मारदे हना इन किकी पिपी आन कली इजीप्ट रे गुंइशा चाक्शो नाक्ती, गो मेको आन कली चोशा चढ़ेतीक नु क्योरशा चढ़ेतीक आ परबम लोव्र मपड। मिनु मेको आन कली मअरेडमी।

23 तन्न गो मेको आन कली मार अरेतीक का गेतामी देशा हना ‘आं देशो टिने। मिनु गो इन परमप्रभु नड। मिनु गे आं मुर दुम्नीनी। गो इन कली तेको लां लचा, दे अरेनुडा, मेको लां गाक्कीन। मो पाइतीनी हना, इन कली रिम्शो दुम्ब’ दैती। येरमीया ११:४; येरमीया २४:७; येरमीया ३०:२२; येरमीया ३१:१, ३३; येरमीया ३२:३८; लेवी २६:१२; इजीकीएल ११:२०; इजीकीएल १४:११; इजीकीएल ३४:३०; इजीकीएल ३७:२७

24 तन्न मेकोपुकीमी आं अरेशो मटीम। आं लोव्र मनेनेम। मेको आन खकटा थुं डा मरिम्शो पतीकेमी आंम दला दाक्स पाप्तेक्म। आन ची हिरताक्म, आं कुल गे मकोव्रयीमी। येरमीया ११:८; यसैया ६५:२

25 इन किकी पिपी इजीप्ट रे गूशा जाक्मा रे मुल सम्म नाक्त कित कित आं गेय पाडब, आं लोव्र पाडब नेल्ल आन कली मेको आन बाक्तीके सोइक्ताक्डमी। येरमीया २५:४

26 तन्न मेकोपुकीमी आं लोव्र मनेनेम। आं लोव्रमी आन नोफा मदाइक्तेम। मटीब ला दुप्तेक्म। मिनु मेकोपुकीमी आन किकी पिपी आन क्येडा यो शुश मरिम्शो पाप्तेक्म। येरमीया १६:१२

27 मिनु गे मेको आन कली एको लोव्र नेल्ल दैचा माल्नेवे। तन्न मेकोपुकीमी इ लोव्र मनेनीम। गे मेको आन कली ब्रेत्तीनु, यो मेकोपुकीमी इ लोव्र मलेत्तीम।

28 गे मेको आन कली ‘एको परमप्रभु यावे, आन परमप्रभु आ लोव्र मटीब रागी डा मुर बाक्नीम। सजाइ ताप्तेक्म हना यो, मरुबेम। मिनु मेको आ पचा माल्ब देशो मपामे। थमा लोव्र जाप्त। मेकोपुकीम जोल ला पाइनीम। येरमीया ५:१

29 गे इ चं प्रेक्शा ताइक्तो। मिनु गोरशो डांडा मेर रोक पा गाक्को। मारदे हना परमप्रभु यावेमी आ कली गाडक्पाइक्ब आन पाला डा मुर आन कली प्रोइशा तिल्लु’ दैतो” दैत। मीका १:३६

### मुर साइक्तीक बेंसी

30 परमप्रभु यावेम “यहूदा डा मुरपुकीम आं डोंइती मरिम्शो पशो बाक्नीम। मेकोपुकीमी आं नेंम सेल्शो खिंम आन ग्रांरा दिशो थोव्रक वोइक्तेक्म। मोपा आं खिं ग्रांरा दिशो दुन्त। येरमीया ३४:३२; २राजा २१:४-५

31 मिनु मेकोपुकीमी तोफेथम आन थान सेल्तेक्म। मेको हिन्नोम आ तौ आ बेंसी बाक्ब। मेकेर आंम तमी तौ आन कली मीम चोशा चढ़ेत्तेक्म। गो मोदेशो गेनायो ममिन्तु, मेको आन कली यो मअरेडमी। येरमीया १९:५-७; येरमीया ३२:३६; लेवी १८:३१

32 मोपतीके होस पा बाक्कीन। मेको बेंसी कली तोफेथ नु हिन्नोम आ तौ आ बेंसी दैचा प्रोइनीम। शुश नाक्त रिम्चा ममाल्नीनी। तन्न मुर साइक्तीक बेंसी, दे नें वोइक्नीम। मारदे हना तोफेथमी आन बेक्शो मुर मरिक्थी थिन्नीम। येरमीया १९:६

33 मिनु मेको मुर आन बेक्शो रं सरीड डा चिक्बपुकी नु रागी डा जन्तु आन कली ब्वतीक दुम्ब। मेको आन कली हिंच कोइशा, प्रोक्पाइक्ब सुइ मबाक्नीम। येरमीया ९:२१



34 मिनु गो यहूदा डा सहर नु यरूसलेम डा लां रे थुं नाइश्शा बाक्तीक, ग्येरशो सेंदा नु ग्युम्ली ग्युम्ले आन सेंदा क्यामुनुड। मारदे हना रागी मुर मबाक्तीके दुम्ब” दे परमप्रभु यावेमी देंत। येरमीया १६:९; येरमीया २९:१०; येरमीया ३३:११

## 8

“मारैड मारैड मोशा दुम्नीम” देशो

1 परमप्रभु यावेम “मेना यहूदा डा पिप आन रुश, सरकार आ गेय पाइब आन रुश, चढेब आन रुश, परमप्रभु यावे आ लोत्र पाइब आन रुश नु यरूसलेममी बाक्ब मुर आन रुश मेको आन तुरस रे याक्नीम।

2 मिनु मेको रुश नेल्ल, नां, तास्ला नु सोरुल आन डोंइती फ्रचा माल्नीम। मारदे हना मेको मुरपुकीमी मेको आन कली गेय पा शुश दाक्ताक्म। मेको आन नोले खोइक्ब दुम्तेक्म। मेको आन कली लां कोइब सेल्शा पूजा पाम्तेक्म। मेको रुश आन कली खुष्पा थिम्चा मदुम्ब। मेको खप कली मोत्रल दुम्चा माल्नीम। ब्यवस्था ४:१९

3 एको मरिम्शो खिं डा लीशो मुर नेलेमी, ते प्रोक्पाइक्तामी हना यो, मार देंनीम देश हना ‘गो ब्रोंइचा क्येडा यो बेक्चा दाक्नीकी’ देंनीम” दे मुर नेल्ल आन परमप्रभु यावेमी देंत।

पाप कली सजाइ

4 गे मेको आन कली परमप्रभु यावेमी मार देंत, देश हना “मुरपुकी गोल्नीमी। मिनु मार, मेको लेशा मबोक्नीमी डा? मिनु सुइ लां जाम्शा ग्युरा पेरा गे लमानु, मेकोपुकी लेशशा मजाक्नीमी डा?

5 मो हना यो एको मुरपुकी मारदे ची हिरशा गाक्मा? मारदे मेको नोले शोंइसीना सीन बाक्नीमी? आन मरिम्शो पतीके मप्रोंइथु, लेशशा जाक्ने मबित्नीम।

6 गो, आं नोफा दाइश्शा नेंनु, मेकोपुकीम आं कली ठीक लोत्र मपाइनीम। आन मटिशो आ पर्वम माफ मपुंडनीम। मेकोपुकीमी ‘गो मरिम्शो पाता’ मदेनीम। नेल्ल आन दला दाक्स पाइनीम। मेकोपुकी शारा खोदेशो पा लडाइम दोरनीम।

7 सरीडम बेरब सारसम आ लची ना नु लेत्ची ना तुइक्ब। मिनु ढुकुर, बेल्लुम नु बोकुला आन लची ना नु लेत्ची ना तुइक्नीम। तन्न आं मुरपुकीमी आंम परमप्रभु यावे आ देशो पतीक लोत्र मतुइक्नीम। यसैया १:३

8 मिनु गेपुकीम दोपा ‘गो जोक्ब तुइक्ब बाक्नीकी। मिनु परमप्रभु यावे आ अरेशो लोत्र गो नु बाक्ब’ देंने चाप्नीनी? थमा पा देश हना, सास्त्री आन जोल पा ब्रेक्शोम मेको आन कली जोल सेल्शो बाक्ब। सास्त्री ब्रेक्चा जोक्ब मुर बाक्नीम

9 जोक्ब तुइक्ब मुरपुकी मुने तोक्चा पुंडसीनीम। मेकोपुकी हिनीम। मेकोपुकी लाइक्चा पुंडसीनीम। मारदे हना मेकोपुकी परमप्रभु यावे आ लोत्र मटीनीम। मेको आन जोक्तीक तुइक्तीक मार बाक्म माइ?

10 मोपतीके गो मेको आन मीश अरु आन कली नु मेको आन रू लडाइ ग्राब आन कली गेनुडमी। नेल्ल क्येडा आइक्च मुर रे नेल्ल क्येडा ठेयब सम्म ठीक पा मचेम्शो क्येट तचा कली शिम बाक्नीम। परमप्रभु यावे आ लोत्र पाइब रे चढेब सम्म नेल्ल जोल पाइब दुम्शो बाक्नीम। येरमीया ६:१३-१५; यसैया ५६:११

11 मेकोपुकीमी आं मुर आन कली ममिम्थु, आन गार सापाइक्खु पशो बाक्नीम। मेकोपुकीमी थुं नाइक्तीक मबाक्त हना यो ‘नांइसीन, नांइसीन’ देंनीम।

12 मेकोपुकीमी मुने दोक्चा डा गेय पाम्तेक्म। गांग्रा दिशो गेय पाम्तेक्म। तन्न मेकोपुकी मुने मदोक्म। मुनेम लल जिचा देशो मार, बाक्बा, दे मतुइक्तेम। मोपतीके साइक्चा पुंडसीशो आन दातेमी साइक्चा पुंडसीनीम। गो मेको आन कली सजाइ गेनुड। मिनु मेको खतम दुम्नीम” दे परमप्रभु यावेमी देंत।

13 परमप्रभु यावेम “गो, अडगुर सेक्नुड देंडानु बोटम अडगुर मबाक्म। फोत्रशी रवाम फोत्रशी मबाक्म। मेको आन सफा यो सोत्रतेक्म। मेकोपुकी आं गेशो यो रोइक्चा पुंडसीनीम” दे परमप्रभु यावेमी देंत।

14 मुरुमी “गो मारदे एकेर निश्शा बाक्चा। मुर आन कली पुक्शा, गो गारो हिरशो सहर आ आगा मेर प्रोक्य। मिनु मेकेरेन बेक्च। मारदे हना परमप्रभु इं परमप्रभु यावेम इं कली बेक्पाइक्चा कली सोइश्शो बाक्ब। मिनु इं कली बीस ब्वाइश्शो ब्वाक्कु तूचा गेपुतु। मारदे हना गो परमप्रभु यावे कली पाप पाइतय। येरमीया ९:१४

15 गोपुकीम थुं नाइश्शा बाक्तीक आस पाइतय। तन्न मारैड रिम्शो मदुम। साचा आ पर्वम रिम्ताक्च। तन्न शुश हिंतीक ला दुम्त” देंतेक्म। येरमीया १४:१९

16 मिनु “दान रे जोरी सत्रु आन शारा आन सोंव सोंव पशो नेंसाक्व। मेको आन शारा आन ग्रीशो आ पर्वम रागी नेल्ल खिंखि पाइब। मेकोपुकी रागी नु मेकेर बाक्शो मारैड मारैड, सहर नु मेकेर बाक्ब नेल्ल आन कली दाक्चा कली जाक्शो बाक्नीम। येरमीया ४:१५

17 कोत्रडीन, गो इन दातेम बीस पाइश्शो बुस्सपुकी सोइक्नुडमी। मेको बुस्स आन कली मारैड मन्तर तन्तर मराइब। मिनु मेकोपुकीमी इन कली कोक्नीम” दे परमप्रभु यावेम देंत।

18 मिनु “गो आं ग्येरसीतीक नेल्ल जाम्त। गो आं थुं खाइक्ती। येरमीया ४:१९

19 श्येत जशो आं मुर आन डाक्शो नेनीन। डोन रागी रे नेनीन। मार, परमप्रभु यावे सियोनम मबाक्शो बाक्बा डा? मेको आ पिप मेकेर मबाक्शो बाक्बा? मारदे मेकोपुकीमी आं कली आन मूर्ति नु आन शोर गाक्शो अर्को रागी डा देवी देवता आन पर्वम गाइक्पाइय्यीमी?

20 बाली नाली रिक्ची ना लाक्तु। बर्खा नुप्त। मो हना यो इं श्येत रे ब्रोंइची ना मजा।

21 आं श्येत जशो मुर आ पर्वम गो रोंका पा थुं खाइक्ती।

22 मिनू गिलादमी मारिड खेक्तीक मबाक्बा? मार, मेकेर इ कली ओरुती पाइब मबाक्बा? मारदे आं श्येत जशो मुर मसामा?" दैत। येरमीया ४६:११

## 9

परमप्रभुमी लोत्र पशो

1 परमप्रभुमी “आं पिया ब्वाक्कु बुक्तीक दुम्शो हना, नु आं मिक्ची प्रेक्कु बुक्तीक दुम्शो हना, गो नाक्दो नाक्ती डाक्ड वा। श्येत जशो साइशो आं मुर आन पर्वम डाक्ड वा। येरमीया १३:१७; लूका १९:४१

2 गोरशो रागीम मुर आन कली बास बाक्तीक बाक्शो हना, गो आं मुर आन कली प्रॉइशा, मेकेर लशा बाक्ड वा। मिनू मेको आन रे डोन लड वा। मारदे हना मेको नेल्ल आन नाता खोइशशा अरु नु इप्नीम। मेको नेल्ल मरिम्शो हुल का बाक्नीम।

3 मेकोपुकीम जोल पस ला जोक्नीम। मोपा जोल पतीकेमी रागी डा ठेयब मुर दुम्तेक्म। थमा लोत्र पतीकेमी ममाड। मेकोपुकी मरिम्शो पशो का रे अर्को मरिम्शो पाइनीम। मिनू आं कली मतुइक्नीम। येरमीया ५:१

4 आंम नेक्था डा मुरपुकी रे होस पा बाक्कीन। आंम लोक्ब आन कली यो थमा मसुतीन। मारदे हना इन लोक्ब नेल्ल मिक्च सिल्ल बाक्नीम। मिनू इन नेक्था डा मुरपुकी हिरशा, इन पर्वम जोल पा दोस गेना गेन बाक्नीम। येरमीया १२:६; भजन संग्रह ४१:१०; मीका ७:५-६

5 मेको नेल्लेम आन नेक्था डा मुर आन कली जोल पाइनीम। सुइमी थमा लोत्र मपाइनीम। मेकोपुकीम जोल पचा शेंसीशो बाक्नीम। मेकोपुकीम मरिम्शो ला पाइनीम।

6 मेकेर दिम्तुतीके नु जोल पमुतीके ला बाक्ब। मेकोपुकीमी आं कली तुइक्चा मदाक्नीम” दे परमप्रभुमी यावे, मुर नेल्ल आन परमप्रभुमी दैत।

7 मोपतीके मुर नेल्ल आन परमप्रभु यावेम “गो मेको आन कली यपाइशशा नाक्नुडमी। पाप पाइब आं मुर आन कली गो अरु मार पने चाप्नुडा डा?

8 मेको आन लें बीस पाइशशो ब्रा खोदेशो बाक्ब। मेकोपुकीम जोल लोत्र ला पाइनीम। मुर नेल्लेम आन नेक्था डा मुर नु रिम्शो लोत्र पखु पाइनीम। तन्न आन थुमी दोपा मेको कली ब्वारद दाइक्चा, दे मिन्मीम। बजन संग्रह १२:३

9 मार, मोदेशो पशो आ पर्वम गो मेको आन कली सजाइ मगेनुडमी? ओदेशो रागी डा मुर आन कली गो सजाइ गेचा माल्नुड” दे परमप्रभु यावेम दैत। येरमीया ५:९, २९

10 गो डांडा आन पर्वम डाक्शा रोंका पने। मिनू गोरशो रागी डा योत्रतीक आन पर्वम बिलाना पने। मेको गोरशो सेल्शो बाक्नीम। मेकेर सुइ मगाक्नीम। मिनू मेकेर बी ब्यफ क्यारश भेडा आन ग्रीशो मनेंसीब। सरीड डा चिक्ब नु जन्तु नेल्ल प्रोक्शा लाम्तेक्म। येरमीया ४:२५; येरमीया १२:४

11 गो यरूसलेम कली खिं ब्रेशशा देलतीके सेल्नुड। सिवार आन बाक्तीके सेल्नुड। गो यहूदा डा सहर आन कली मुर मबाक्तीके सेल्नुडमी। मिनू मेकेर सुइ मबाक्नीम। येरमीया २६:१८

12 मेको लोत्र रुक्चा कली जोक्ब तुइक्ब सु बाक्बा डा? परमप्रभु यावेम सु कली लोत्र पवा, मेकोमी एको शेंने चाप्ब। मारदे मेको रागीम ब्रेशशो खिं ला बाक्नीमी? मारदे मेको मुर मबाक्तीके खोदेशो दुम्शा, सुइ लने मचाप्चा डा पा, श्येतथ दुम्शो बाक्बा? लूका १९:४२

13 मारदे हना मेकोपुकीमी आन डोंइती वोइशशो आं अरेशो लोत्र प्रॉइतेक्म। आं देशो मटिथु आन दला दाक्स पाम्तेक्म।

14 मेको आन खकटा थुमी आन दला दाक्स पा बाल देवता आ नोले खोइक्तेक्म। मेको आन किकी पिपी शेंशो लांम गाक्तेक्म। येरमीया ७:२४

15 मोपतीके परमप्रभु यावे, मुर नेल्ल आन परमप्रभु, इस्राएली आन परमप्रभुमी “गो एको मुर आन कली कशो थोत्रक उम्नुडमी। मिनू तूचा कली बीस ब्वाइशशो ब्वाक्कु तूपाइक्नुडमी। येरमीया २३:१५; येरमीया ८:१४

16 गो मेको आन कली रागी रागी डा मुर आन दातेमी फ्राइनुडमी। मेकेर आन मतुइशशो नु आन किकी पिपी आन मतुइशशो मुर बाक्नीम। मिनू गो मेको आन कली मसदुमी सम्म मेको आन नोनोले तरवार सोइक्नुड” दैत। लेवी २६:३३

17 मिनू मुर नेल्ल आन परमप्रभु यावेमी “मुल मिन्तीन। रोंका पाइब मीश मुर आन कली ब्रेलतीन। मेको आन दाते डा नेल्ल क्येडा रोंका पस जोक्ब कली ब्रेथ सोइक्तीन” दैत

18 मेकोपुकीमी “रीब पा जाक्मल। मिनू आंइ पर्वम रोंका पामेक्ल। इ मिक्च नेल्ल प्रेक्कु मदुम सम्म नु इ मिक्च आ पारला रे ब्वाक्कु खोदेशो पा प्रेक्कु मदोक्म सम्म, मेकोपुकीमी रोंका पामेक्ल।

19 सियोन रे रोंका पशो नेंसाक्व। गोपुकी खतम दुम्तय। गोपुकी मुनेम सुम्सीशो बाक्नय। गोपुकीम आंइ रागी प्रॉइचा माल्नीकी। मारदे हना मेकोपुकीम आंइ खिं प्रेत्तेक्म” दैतेक्म।

20 मिनू गे मीश मुरपुकी परमप्रभु यावे आ लोत्र नेनीन। मेको आ लोत्र नेंचा कली इन नोफा दाइक्तीन। इन तमी आन कली रोंका पचा शेंदीन। आंम नेक्था डा मुर नु रोंका पतीक शेंमुने।

21 बेक्पाइक्ब झेल रे डोइशशा आंइ बाक्तीकेम ओव्रत। मेको आंइ आल आन कली लां रे नु आंइ ठिटा आन कली बुक्शा बाक्तीक रे साइक्चा कली जाकत।

22 परमप्रभु यावेमी “गे मुर आन कली मोदेशो लोत्र पावो ‘मुर आन बेक्शो रां रूम मोव्रल खोदेशो पा दोक्नीम। अन्न खुप्ब मुर आन नोले प्रॉइशो अन्न खोदेशो पा, गोल्शा लीशो बाक्नीम। मिनू मेको आन कली सुइम सिला मपाइनीम’ दैने” दैत। येरमीया ७:३३; येरमीया १४:१६; येरमीया १६:४; येरमीया २५:३३; भजन संग्रह ७९:२

मार आ पर्वम नें बोरपाइक्चा

23 परमप्रभु यावेम “जोक्ब तुडक्ब मुरपुकी आन जोक्तीक तुडक्तीक आ पर्वम ठेयब मलेम्मल। सक्ति पाइश्शो मुरपुकी आन सक्ति आ पर्वम ठेयब मलेम्मल। शुश शॉप पाइश्शो मुरपुकी आन शुश शॉपोम ठेयब मलेम्मल।

24 तन्न सु ठेयब लेत्नीमी, मेकोपुकीम ‘गो परमप्रभु यावे कली तुडक्नुड’ देंमल ‘मेको थमा पा परमप्रभु यावे बाक्ब, दे तुडक्नुड, दे नें बोरपाइक्चे चाप्नीम। परमप्रभु यावेमी रागी कली शिशो पाइब, ठीक निसाफ नु ठीक पाइब बाक्ब’ देंमल। मारदे हना मेको आं दाक्शो बाक्ब, दे ग्येरसीनुड” दे परमप्रभु यावेम देंत। १कोरिन्थी १:३१; २कोरिन्थी १०:१७

चिनु मखोइश्शो खोदेशो दुम्शो

25 परमप्रभु यावेम “राम ला खोइक्तीक चिनु खोइश्शो मुर आन युम्तीक नाक्ती थमा पा जाक्ब।

26 गो इजीप्त, यहूदा, एदोम, अम्मोन, मोआब नु गोरशो रागीम बाक्ब, आन चां एर ओंथ खोइक्ब मुर नेल्ल आन कली युम्नुड। मारदे हना मेको नेल्ल खोइक्तीक चिनु मखोइश्शो बाक्नीम। मिनु इस्राएल आ खिं डा मुर नेल्ल यो आन थुंम खोइक्तीक चिनु मखोइश्शो बाक्नीम” देंत। लेवी १९:२७; येरमीया ४:४; लेवी २६:४१; ब्यवस्था ३०:६

## 10

परमप्रभु नु मूर्ति

1 गो इस्राएल आ खिं डा मुरपुकी, परमप्रभु यावेम इन कली मार, देंमे, मेको नेनीन।

2 परमप्रभु यावेम “रागी रागी डा मुर आन पतीक मशेंसीने। सरीड डा चिन्ड तशा, महिनीन। रागी रागी डा मुरपुकी मेको तशा हिनीम। प्रस्थान २३:२४; २राजा २१:६

3 मारदे हना जात जात डा मुर आन पतीक जोल बाक्ब। मेकोपुकीमी ब्वाकी डा रवा का तिन्नीम। मिनु शी के मार, मार, सेल्ब जोक्बमी मुशा मूर्ति सेल्नीम। यसैया ४४:१३-१७

4 मिनु मुरपुकीमी, मेको कली सुन नु चांदीम गिलनीम। मिनु मेको महिम्सेक्ल दे घनमी कांटी थोक्नीम। मिनु मेको महिम्सीब।

5 मेको आन मूर्ति वोबीस रूम वोइश्शो खेरच खोदेशो बाक्नीम। मेको ब्वाक्चे मचाप्नीम। मेको आन कली कुरचा मालनीम। मारदे हना मेकोपुकी गाक्चे मचाप्नीम। मेको तशा महिनीन। मारदे हना मेकोपुकीमी मारेड मरिम्शो पने मचाप्नीम। मारेड रिम्शो यो पने मचाप्नीम” देंत। भजन संग्रह ११५:७; यसैया ४६:७

6 परमप्रभु यावे, इन खोदेशो सुड मबाक्नीम। गो ठेयब बाक्नीनी। मिनु इन सक्तिमी इन नें ठेयब सेल्तीनी। भजन संग्रह ८६:८

7 गो रागी रागी डा पिप, इन कली सुम मान पा महिनीमी डा? गो मान पाइक्चा शिरशो बाक्नीनी। रागी रागी डा मुर आन जोक्ब तुडक्ब नु मेको आन राज्य नेल्लेमी इन खोदेशो सुड मबाक्नीम।

8 मूर्ति आन शेंतीक निप्स मपाइश्शो नु मूर्ख लोत्र बाक्ब। मेको शी क्येडा रिम्शो मबाक्ब।

9 टारशीश रे तुप्शो चांदी चाक्नीम। मिनु उफाज रागी रे सुन चाक्नीम। मेको मार मार सेल्स जोक्ब नु सुन चेम्बपुकी आन गेय बाक्ब। मिनु मेको आन कली नीलो नु प्याजी रड डा वा फेक्पाइक्नीम। मेको नेल्ल मार मार सेल्स जोक्ब मुर आन गेय बाक्नीम।

10 तन्न परमप्रभु यावे थमा डा परमप्रभु बाक्ब। मेको ब्रोंइशा बाक्ब परमप्रभु नु गेना हना यो लीब पिप बाक्ब। मेको गाइक्तानु, रागीम खिनु कुडब। मिनु रागी रागी डा मुरपुकीमी मेको आ गाइश्शो फाल्ने मचाप्नीम। येरमीया ५:२

11 गो मेको आन कली “मेको सरीड नु रागी मसेल्ब देवी देवता रागी नु सरीड आगा रे क्याम्चा पुंडसीनीम।

12 तन्न मेकोमी आ सक्तिमी रागी सेल्लु। मेकोमी आ जोक्तीक तुडक्तीकेमी रागी रागी कली वोइक्तु। मिनु मेकोमी आ रुप्तीकेम सरीड प्राक्तु। येरमीया ५१:१५-१९

13 मेकोमी लोत्र पवानु, सरीड रे रेड यीब। मेकोमी रागी आ सुर रे गोस्स आन कली पोक्ब। मेकोमी रेड नु चिला पपाइक्ब। मिनु फश आ बाक्तीक रे फश पपाइक्ब। भजन संग्रह १३५:७

14 मुर नेल्ल निप्स मपाइश्शो नु मारेड मतुडक्ब बाक्नीम। सुन चेम्ब नेल्ल आन मूर्तिम पतीके मुने दोक्नीम। मेको आन मूर्तिपुकी जोल बाक्नीम। मेको आन के सोक्त मबाक्ब। यसैया ४५:१६

15 मेको शोर गाक्शो ला बाक्नीम। मुर आन मिम्शो ला बाक्नीम। मेको आन कली सजाइ गेशोनु, जाम्नीम।

16 परमप्रभु यावे, याक्ब आ भाग बाक्ब। मेको मारेड मारेड सेल्ब बाक्ब। मिनु इस्राएल मेको आ शॉप बाक्ब। मेको आ नें मुर नेल्ल आन परमप्रभु यावे बाक्ब” देनो। ब्यवस्था ३२:९

सजाइ जाक्ब देशो

17 गो पुम्चा पुंडसीशो सहर इ कुम्लो खप रे गुपो।

18 मारदे हना परमप्रभु यावेम “गो मेको रागी डा मुर आन कली ताइक्नुडमी। मेको आन कली शुश श्येत गेनुडमी। मिनु मेकोपुकीम तुडक्नीम” देंत।

19 आबी, तन्न आं गार आ पर्वम हिंती। आं गार मसाब। तन्न गो आंम कली “थमा पा, एको आं सजाइ बाक्ब। गो एको फाल्चा माल्नुड” देंती।

20 आं ताम्बु ब्रेलत। मेको आ डोरी नेल्ल ब्रोंइक्तेक्म। आं आलपुकी गाक्तेक्म। मुल मेकोपुकी मबाक्नीम। मुल आं ताम्बु कीशा गेब नु आं बाक्तीकेम फारतीक वा वोइश्शा गेब सुड मबाक्नीम।

21 गोठलापुकी निप्स मपाइशो बाक्नीम। मेकोपुकीमी परमप्रभु यावे कली हिल्लो मपाइनीम। मोपतीके मेकोपुकी रिम्शो मदुम्नीम। मेको आन क्यारश भेडा नेल्ल ब्रान्तेक्म। येरमीया २३:१

22 रेयके का जाक्शो बाक्ब। मेको नेनीन। उत्तर रागी रे ठेयब प्रांग्ये माग्ये दुम्शो बाक्ब। मेकोमी यहूदा इन सहरपुकी मुर मबाक्तीके सेल्ब। मेको सिवार आन बाक्तीक दुम्नीम। येरमीया १:१४

येरमीया आ पुंडशो लोत्र

23 परमप्रभु यावे, मुर आन ब्रोंइतीक आंम आन गुडम मबाक्ब, गो मेको तुडक्नुड। बेक्शा लाइब मुरपुकीम आंम लां आंमा सेल्ने मचाप्नीम। हितोपदेस १६:९

24 परमप्रभु यावे, आं कली रिम्शो सेल्थीनी। तन्न ठीक निसाफ पतीकेम ला रिम्शो सेल्थीनी। इन गाइक्तीकेम ममाइ। मो दुम्त हना, गे आं कली साइक्नीनी। येरमीया ३०:११; येरमीया ४६:२८; भजन संग्रह ६:२; हबकुक् १:१२

25 इन कली मतुइक्ब रागी रागी डा मुर नु इन नें थिंचा मदाक्ब जात जात डा मुर आन तार इन गाइक्तीक मोतीन। मारदे हना मेकोपुकीमी याक्ब कली नेक्शा दाक्शा पशो बाक्नीम। मेकोपुकीमी मेको कली थमा पा दाक्शो बाक्नीम। मिनु मेको आ बाक्तीक मुर मबाक्तीके सेल्शो बाक्नीम।

## 11

कबल क्याम्शो

1 परमप्रभु यावेम येरमीया कली,

2 “गे एको कबल डा लोत्र नेनो। मिनु यहूदा डा मुरपुकी नु यरूसलेममी बाक्ब आन कली लोत्र पावो।

3 गे मेको आन कली ‘इसाएली आन परमप्रभु यावेम मार दंत देशा हना, सु सुमी एको कबल मखाप्नीमी, मेको सराप राइनीम। ब्यवस्था २७:२६;

4 गो मेको कबल डा पचा माल्शो गेय इन किकी पिपी आन कली श्येत जतीक इजीप्त रागी रे युंडची ना अरेशो नडमी। गो मेको आन कली आं अरेशो यो टिने। इन कली अरेशो लोत्र नेल्ल पा आं मुर दुम्नीनी। मिनु गो इन परमप्रभु दुम्नुड। येरमीया ७:२३

5 गो इन किकी पिपी आन कली दूध नु खुदो शुश बाक्शो रागी का गेनन्नी, दे कसम जशो खान्नुड। मिनु मेको रागी मुल इन अधिकारम बाक्ब’ देतो” दंत। मिनु गो “परमप्रभु यावे, मोदेशो दुम्त” दे लोत्र लेत्ताक्ड। प्रस्थान ३:८

6 मिनु परमप्रभु यावेम आं कली “यहूदा डा सहर नेल्लेम नु यरूसलेम डा लां मार एको कबल डा लोत्र उरदी पा, मेको कबल डा लोत्र नेंशा पने।

7 गो इन किकी पिपी आन कली इजीप्त रे प्रोंइशा चाक्गुमी रे मुल सम्म ‘आं लोत्र टिने’ दे अरेना अरेन बाक्ती। येरमीया २५:४

8 तन्न मेकोपुकीमी आन नोफा मदाइक्तेम। आं देशो लोत्र मटीमे। मेको आ पा डा मेकोपुकीमी आन खकटा थुमी मरिम्शो पा काइ मटीमे। गो मेको आन कली आं कबल डा लोत्र नेल्ल पने, दे अरेता। तन्न मेको पने मबिस्सम” दंत। येरमीया ३:१७; येरमीया ७:२६; येरमीया १३:१०; येरमीया १८:१२; ब्यवस्था २८:१५-६८

9 मिनु परमप्रभु यावेम आं कली “यहूदा डा मुरपुकी नु यरूसलेममी बाक्बपुकीम मरिम्शो पचा मिन्मीन।

10 मेको आन किकी पिपी आन मरिम्शो पतीक गे लेशशा लाम्तेक्म। आं अरेशो मटीम। पाप गे लेशशा लाम्तेक्म। अरु देवी देवता आन कली पूजा पा, मेको आन नोले खोइक्तेक्म। गो मेको आन किकी पिपी नु पशो कबल इस्राएल आ खिं डा मुर नु यहूदा आ खिं डा मुर नेल्लेमी क्याम्ताक्म” दंत।

11 मोपतीके परमप्रभु यावेमी “गो थमा पा, मेको आन कली ठेयब श्येत गेनुडमी। मिनु मेको रे प्रोक्ने मचाप्नीम। आं कली पुंडतेक्म हना यो, गो मेको आन लोत्र मनंनुड। भजन संग्रह १८:४२; यसैया १:१५; इजीकीएल ८:१८

12 मिनु नोले यहूदा सहर डा मुरपुकी नु यरूसलेमम बाक्ब मुरपुकीमी लशा, मेको आन पूजा पशो देवी देवता आन कली पुंडनीम। तन्न मेकोपुकीमी मेको आन कली आन श्येत रे गेनायो मप्रोंइनीम। येरमीया २:२८; ब्यवस्था ३२:३७-३८

13 यहूदा, इ के दोशो सहर बाक्मा, मोशो इ देवी देवता दुम्तेक्म। यरूसलेममी गिश लां बाक्मा, मीश मुने दोक्तीक बाल देवता कली चढेतीक सेल्तेक्म।

14 येरमीया, गे मेको जात डा मुर आन पबंम मपुनो। मेको आन पबंम डाक्शा प्रार्थना पा मपुनो। मारदे हना मेकोपुकी श्येत जामे ना मेको आन पुंडशो मनंनुड। येरमीया ७:१६

15 आं दाक्शो मुरपुकी आं खिं ओत्रचा मार अधिकार बाक्बा? मेको नेल्ल मरिम्शो पाइब बाक्नीम। आं कली चढेशो श्येम इन कली सजाइ गेतीक रे तेक्ने चाप्बा डा? मिनु गे ग्येरने चाप्नीनी” दे परमप्रभु यावेमी दंत। रोमी ११:२८; होसे ८:१३

16 परमप्रभु यावेम इन कली रिम्शो फल सिप्ब दारशो गिगी तेल रवा, दे नें वोइक्तु। तन्न मेकोम ठेयब फश गिवार पपाइशशा, मेको कली मी सुइक्ब। मिनु मेकोम आ राशी आन कली दाक्ब।

17 मुर नेल्ल आन परमप्रभु यावेम इन कली खुम्तु। मिनु मेकोमी इन कली मरिम्शो पचशो बाक्ब। मारदे हना इस्राएल आ खिं डा मुर नु यहूदा आ खिं डा मुरुम मरिम्शो पाम्तेक्म। परमप्रभुमी “मेकोपुकीमी बाल देवता कली मार मार चढेशा आं कली गाइक्पाइक्तीमी” दंत।

येरमीया कली साइक्चा माल्शो

18 परमप्रभु यावेम आं कली मेको मुरपुकीम मार पचा माल्शो बाक्मा, मेको कोंइशा तुडक्पाइक्ती। गे आं कली, आन मरिम्शो पचशो कोंइताक्थीनी।

19 गो साइक्चा कली लाइश्शो मारेइ पने मचाप्व पाठा का खोदेशो बाक्ती। मेकोपुकीमी आं पर्वम “एको रवा कली आ फल सुन्दा तिम्प्य। एको कली ब्रोंइशा बाक्ब आन रागी रे क्योरशा ताइक्तय। मिनु एको आ नें गेनायो ममिम्सेक्ल” देंशा मरिम्शो पशो गो मतुइक्तु। यसैया ५३:७

20 तन्न गे, मुर नेल्ल आन परमप्रभु यावे, ठीक पा निसाफ पाइनीनी। मिनु थुं नु सोक्त नाक्शा कोव्रनीनी। गेमी मेको आन कली क्येक्क लेशशो गो कोव्रचा तडल। मारदे हना गो इन कली आं निसाफ पतीक जिम्मा गेशो बाक्नुड। भजन संग्रह ७:१०; येरमीया १७:१०; येरमीया २०:१२

21 मोपतीके आं कली साइक्चा माल्ब अनाथोथ डा मुर आन पर्वम परमप्रभु यावेम “मेको मुरपुकीम इ कली ‘परमप्रभु यावे आ नेमी लोव्र मपावो। लोव्र पाप्तीवी हना, गे आंइ गुइ रे बेक्नेवे’ देंनीम। येरमीया १:१

22 मोपतीके मुर नेल्ल आन परमप्रभु यावेम ‘गो मेको आन कली सजाइ गेनुडमी। मेको आन टिटा मुरपुकी तरवारम क्योरशा साइक्चा पुंडसीनीम। मिनु मेको आन तमी तौ चहिं अन्कालम बेक्नीम।

23 मेकोपुकी सुइ मब्रोंइनीम। मारदे हना मेको आन कली सजाइ गेतीक बर्सम गो अनाथोथ डा मुर आन तार ठेयब श्येत चाक्नुड।” देंशो बाक्ब।

## 12

येरमीयामी लोव्र पशो

1 परमप्रभु यावे, गो इन कली दोस गेता हना, गे ठीक पाइब बाक्नीनी। तन्न गो आं निसाफ इन डोंइती वोइक्नुड। दोस ताइबपुकी मारदे सोशा बोशा लाइनीमी? थमा मसुइक्ब मुर मारदे रिम्शो दुम्ना दुम्न बाक्नीमी? भजन संग्रह ७:३

2 गे मेको आन कली खुम्तीनी। मिनु मेकोपुकीमी शाक्श थोक्शा, बारशा, फल गेनीम। मेको आन लोव्रमा ला इन नेक्था बाक्नीम। तन्न मेको आन थुंमी इन क्येडा डान बाक्नीम।

3 मो हना यो परमप्रभु यावे, गे आं कली तुइक्नीनी। गे आं कली कोव्रशा, नाक्नीनी। आं थुं गे नु बाक्ब। मेको आन कली साइक्चा कली लाइश्शो भेडा खोदेशो पा, कीशा लतीन। मिनु साइक्तीक नाक्त कली तिल्शा बोतीन। भजन संग्रह १३९:१

4 रागीम गेना सम्म गेंका पाइबा? मिनु रू डा घांस गेना सम्म सोल सुल बेक्नीमी? मेकेर बाक्बपुकीम परमप्रभु यावे आ अरेशो लोव्र मटितीके, मेकेर डा जन्तु नु चिक्ब नेल्ल बेक्तेक्म। मोपा मेकोपुकीमी “आंइ कली मार, दुम्शो बाक्बा, मेकोमी मारेइ मतुइक्ब” देंनीम। येरमीया ९:९

परमप्रभुम लोव्र लेशशो

5 परमप्रभु यावेम “गे दोरब मुरपुकी नु दोरते हना, मेकोपुकीमी इ कली दपाइक्तेक्मी हना, गे शारा नु दोपा दोरने चाप्नेवे? गे मारेइ मदुम्तीकेमी गोल्ते हना, यर्दन खोला डा ब्वाकीम मार पाइनेवे?

6 इ लोक्बपुकी नु इ खिं डा मुरपुकीमी इ कली मरिम्शो पाम्तेक्म हना, मेकोपुकी इ पर्वम ठेयब सेंदा पा रेयके पा जाक्नीम। मेकोपुकीमी गे नु रिम्शो लोव्र पाम्तेक्म हना यो, मेको आन कली थमा मसुइक्मी।

7 गो आं खिं प्रोंइता। आं थेरशो रू प्रोंइता। मिनु आं दाक्शो कली आ जोरी सन्तु आन गुइमी गेता।

8 आ थेरशो रू ब्वाकी डा गुप्स खोदेशो दुम्त। मेको आं कली कोव्रशा ग्रीब। मोपतीके गो मेको कली काइ मदाक्नुड।

9 मार, मेको सिवार आं थेरशो रू तशा गेहे पाइबा डा? आं डोंइती छिर छिर पाइश्शो सिखारी चिक्ब खोदेशो मदुम डा? मेको कली अर्को सिखारी चिक्बपुकीम पुम्शा राम्शी तोव्रमेक्ल। लावो, लशा ब्वाकी डा जन्तु नेल्ल आन कली पुक्मी। मिनु मेको कली ब्वपाइक्चा कली चाक्मी। यसैया ५६:९

10 शुश गोठलापुकीम आं अडगुर रू खतम सेल्लेक्म। मेकोपुकीमी आं भाग दिम्शा ताइश्शा पाम्तेक्म। मेकोपुकीमी आं दारशो भाग कली गोरशो रागी खोदेशो पा मुर मबाक्तीक सेल्लेक्म। येरमीया ६:३

11 मेकोपुकीम रागी गोरशो सेल्लेक्म। मेको रागी कली आं डोंइती सोव्रशो नु सुइ मबाक्तीक सेल्लेक्म। रागी नेल्ल गोरशो सेल्लेक्म। मिनु सुइ आन थुं मखाइ” देंत।

12 गोरशो रागी डा डांडा मेर नेल्ल श्येत्थ पोक्बपुकी क्राक्शी चोक्शी पा जाक्शो बाक्नीम। मारदे हना परमप्रभु यावे आ तरवारम रागी आ सुर का रे अर्को सुर सम्म क्योरब। मिनु सुइ मब्रोंइनीम।

13 मेकोपुकीमी चेरब शोक्नीम। मिनु चू सिप्पाइक्नीम। मेकोपुकीमी श्येत पा गेय पाइनीम, तन्न नेल्ल शोर गाक्ब। मोपतीके मेको आन खुम्शा मुने दोक्शो आंमा फाल्मेक्ल। मारदे हना परमप्रभु यावे आ ठेयब पा गाइश्शो इन तार जुक्शो बाक्ब। होसे ८:७

14 परमप्रभु यावेमी आं कली मरिम्शो पाइब आं नेक्था डा मुर आन पर्वम “गो आं मुर इस्राएली आन कली गेशो, मेको आन किकी पिपी आन शोंप रोइश्शो बाक्नीम। मोपतीके गो मेको आन कली आन रागी रे तुल्शा ताइक्नुडमी। मिनु गो यहूदा आ खिं डा आ मुर आन कली मेको आन दाते रे तिल्नुडमी।

15 तन्न गो मेको आन कली तुलुमी नोले लेंशा शिशी पाइक्नुडमी। मिनु मेको नेल्ल आन कली आन आन किकी पिपी आन शोंप गेशा, आन रागीम लेंशा चाक्नुडमी।

16 मिनु मेकोपुकीमी मोपा बाल आ नेंम कसम जाम्तेक्म, मोपा आं मुर आन लां थमा पा शेंताक्म हना, मेकोपुकीम परमप्रभु यावे ब्रोंइशा बाक्शो खोदेशो पा, आं नेंम कसम जाइनीम। आं मुर आन पतीके रिम्शो पा शेंसाक्म हना, मेकोपुकी आं मुर आन दातेमी बाक्चा ताइनीम। ब्यवस्था ६:१८; येरमीया ४:२

17 तन्न तेकोड जात डा मुरुम मेको लोव्र मनैतेकम हना, गो मेको आन कली तुलशा ताइक्नुडमी” दे परमप्रभु यावेम देशो बाकब।

## 13

सुती के धोती

1 परमप्रभु यावेम आं कली “लशा सुती के धोती का ग्यापो। मिनु मेको पांडसो। तन्न मेको कली ब्वाक्कुम जित्या मगेवो” दे माइक्ती।

2 मोपतीके गो परमप्रभु यावेम देशो खोदेशो पा, सुती के धोती का ग्याप्शा पांडसाक्यी।

3 मिनु लेंशा परमप्रभु यावेम आं कली

4 “बोक्को, इ ग्याप्शा पांडसीशो धोती कुरशा मुल युफ्रेटीस लावो। मिनु सेरथे फुल्लु आ आगाम बाकशो जेशो फुल्लुम मेको खुइश्शा वोतो” दे माइक्ती।

5 मोपतीके गो परमप्रभु यावेम देशो खोदेशो पा, मेको युफ्रेटीसम खुइश्शा वोइक्ता।

6 मिनु शुश नाक्त नोले परमप्रभु यावेम आं कली “बोक्को, युफ्रेटीस लावो। मिनु मेकेर गो डोंइती इ कली खुइश्शा वोतो देशो धोती चाक्को” दे माइक्ती।

7 मिनु गो युफ्रेटीसम लती। मिनु आं खुइश्शा वोइक्तीक रे मेको धोती दोशा गुंडताकड। तन्न मेको धोती नेल्ल मुक्ने थुमा बाक्त। मेको थमा पा, शोर गाकशो दुम्माक्त।

8 मिनु परमप्रभु यावेम आं कली मार दैत देशा हना,

9 “ओदेशो पा गो यहूदा आ ठेयब लेत्तीक नु यरूसलेम आ थाम्पा ठेयब लेत्तीक खतम पोक्नुड।

10 मेको मरिम्शो पाइब मुरपुकीम आं लोव्र नैने मबिस्सम। मेकोपुकीमी आन खकटा थुमी आन दला दाक्स पतीकेमी अरु देवी देवता आन कली पूजा पचा कली नु मेको आन गेय पचा कली लाम्तेकम। मिनु मेकोपुकी एको धोती खोदेशो दुम्नीम। मेको थमा पा शोर गाकशो बाकब। येरमीया ११:८

11 मारदे हना दोपा मुरुम आ धोती रांम पांडसीशो बाकबा, मोपा गो इस्राएल आ खिं डा मुर नेल्ल नु यहूदा आ खिं डा मुर नेल्ल आन कली आं मुर दुम्मल, दे आं नेक्था वोइक्तामी। आं कली मान पामेक्ल, आं कली ठेयब सेलमेक्ल, आं दारसम ग्याम्सीमल, दे पांडसाक्यी। तन्न मेकोपुकीमी आं देशो लोव्र आन नोफा मदाइक्तेम” दे परमप्रभु यावेम दैत।

अडगुर शांबुम ब्रीशो गर

12 परमप्रभु यावे, इस्राएली आन परमप्रभुमी “गर नेल्ल अडगुर शांबुम ब्रीचा माल्नीम देशो बाकब” दे माइक्ती। मिनु मेकोपुकीम “गर नेल्ल अडगुर शांबुम ब्रीचा माल्ब, दे गो मतुइक्नीकी डा?” दैतेकम हना,

13 गो मेको आन कली परमप्रभु यावेम इन कली मार दैत देशा हना “गो एको रागी नेल्ल डा मुर आन कली, दाऊद पिप आ बाक्तीकेम बाकब पिप आन कली, चढेबपुकी, परमप्रभु यावे आ लोव्र पाइबपुकी नु यरूसलेममी बाकब नेल्ल आन कली दुक्पाइक्नुडमी। येरमीया २५:१५-२८; यसैया ५१:१७

14 गो मुर आन कली जिपाइक्नुडमी। गो आम आफ नु आन तमी तौ आन दातेमी जिपाइक्नुडमी। गो मेको आन कली दाक्शा, शिशो पा साइक्तीक रे आं थुं मलेलुड, दे परमप्रभु यावेम” दैत।

15 नोफा दाइश्शा नेनीन। ठेयब लेशशो मदुमीन। मारदे हना परमप्रभु यावेम लोव्र पाप्तु।

16 मिनु “गे परमप्रभु यावे, इन परमप्रभुम छिडछिड चाक्का क्येडा डोंइती मेको कली ‘ठेयब सेलीन’। नां रिक्का क्येडा डोंइती डांडा मेर इन खोइल दाइल पाइक्का क्येडा डोंइती मेको कली ‘परमप्रभु यावे ठेयब बाकब’ देनीन। गे हाम्सो आस पाइनीनी, तन्न मेकोमी छिडछिड सेल्शा थम क्येर सेल्ब।

17 तन्न गेपुकीम मेको मनैतीनी हना, गो इन ठेयब लेशशो आ पतीके, गो आं थुंम सुइ आन मतुइक्का डा पा डाक्नुड। परमप्रभु यावे आ हुल ग्याइश्शा लाइक्का पुंडसीतीके गो हुइ हुइ पा डाक्नुड। मिनु आं मिक्च रे प्रेक्कु दोक्ब। येरमीया ८:२३; येरमीया १४:१७; लूका १९:४१

18 पिप नु पिप आ ममा आस कली ‘इन नित्तीक रे उड तोंइसीन। मारदे हना इन पिया रे इन ठेयब दुम्तीक सिरपेच दोक्ब’ माइक्ती” दैत। २राजा २४:१-१६; यसैया ६२:३; बिलाप ५:१६

19 नेगेब रागी डा सहर आन लाप्चो चोक्सीनीम। मिनु मेको आन कली रोक्ब सुइ मबाक्नीम। यहूदा डा मुर नेल्ल ग्याइश्शा लाइक्का पुंडसीशो बाक्नीम। मेको आन कली थमा पा ग्याइश्शा लाइक्तेकम।

20 ए यरूसलेम, उत्तर रे जाक्ब जोरी सनु आन कली कोव्रडो। इ कली गेशो बगाल, इ दारशो भेडा ते बाक्नीमी?

21 गेमी आम मुर सेल्चा कली इ लेम्शो मुर आन कली परमप्रभु यावेम इ कली हुकुम पाइब सेल्ब। मिनु गे मार, दैनेवे? मार, सुत्केरी दुम्चशो मीश मुर खोदेशो पा, इ कली श्येत मदुम्बा डा?

22 “मिनु गे इ थुंम ‘आं कली मारदे ओदेशो श्येत दुम्मे’ दैनेवे। गेमी शुश मरिम्शो पतीके इ गुने क्युक्साक्वे। मिनु इ रांमी मरिम्शो पाइक्का पुंडसाक्वे। यसैया ४७:२-३; इजीकीएल १६:३७

23 मार, एथीयोपीयामी आ कुशल डा रड फाइक्ने चाप्वा डा? मार, जोइमी आ चां डा थोप्ला फाइक्ने चाप्वा डा? गे मरिम्शो पचा बानी दुम्तीके रिम्शो पने मचाप्नेवे।

24 गो इ कली गोरशो रागी रे जाक्शो फशेम योल्शो भूस खोदेशो पा फ्राइनन।

25 इ कली वोइश्शो आं गेशो भाग मेकोन बाक्ब” देशो बाक्ब। परमप्रभु यावेम “गेमी आं कली प्रेशो बाक्नेवे। मिनु जोल आन कली थमा सुइश्शो बाक्नेवे।

26 गो आंमा इ गुने इ शोत्र सम्मन क्युकनुड। मिनु मोपा इ मुने नेल्ल तांडसीब।

27 गो पहाडीम नु रू मेर इ पशो ग्रांया दिशो गेय ताता। इ मुरपुकी नु इप्शो, इ रेयके पशो नु इ मुने मपथु, तेल्लेम दुम्शो तशो बाक्नुड। आबी आबी, यरूसलेम गे ग्रांया दिशो दुम्नेवे। गेना सम्म मोदेशो बाक्नेवे?” दैत।

## 14

रागी नेल्ल सोव्रशो

1 परमप्रभु यावेमी रेउ मयिचा आ पर्वम येरमीया कली मार, लोत्र पाप्तु देशा हना,

2 “यहूदा रोंका पाइब। मेको आ सहर डा ठेयब लाप्चोपुकी सक्ति मपाइश्शो दुम्शो बाक्नीम। मेकोपुकी रू आ पर्वम सुतां पाइनीम। मिनु यरूसलेम आ वाइ ब्रेशो सरीड सम्म जाक्दीश्शो बाक्ब।

3 मेकेर डा ठेयब मुरपुकीम आन वाइल आन कली ब्वाक्कु ब्रथ सोइक्नीम। मिनु मेकोपुकी कुवाम लमानु ब्वाक्कु मथित्नीम। मिनु मेकोपुकी श्येथ ग्योब कुरशा लेशशा जाक्नीम। मिनु मेकोपुकी मुने दोक्शा मारेइ पने मचाप्ब दुम्शा, आमाइ, दे हिंशा आन पिया सुम्सीनीम।

4 रागीम रेउ मयितीके रागी नेल्ल सोव्रशा जेशो बाक्ब। रू डा गेय पाइबपुकी मारेइ पने मचाप्ब दुम्शा, आमाइ, दे आन कुल सुम्सीनीम। योएल १:११

5 घांस मबाक्तीके ब्वाकी डा किश्शेमी यो आ नक जरमेशो पाठा प्रोइशा गाक्ब।

6 ब्वाकी डा गधापुकी गोरशो डांडाम राप्शा सिवार खोदेशो पा ग्रीनीम। गिगी जोतीक ठाउं मबाक्तीके मेको आन मिक्ची ब्रा ब्रा दुम्नीम।

7 मिनु आंइ मरिश्शो पशोम आंइ पर्वम सांकळी गेम्तेक्म हना, परमप्रभु यावे, गे इन नें आ पर्वम शिशी पने। मारदे हना गो इन कली प्रोइशा, थम मरिश्शो दुम्तक। गोपुकीम इन पर्वम पाप पशो बाक्तक। दानीएल ९:४-९

8 ए इसाएल आ आस पतीके, श्येत जवानु मेको कली प्रोइब, गे एको रागीम मारदे अर्को रागी डा मुर खोदेशो दुम्नीनी? गे मारदे नाक्दो का ला बाक्ब, लां गाक्ब मुर खोदेशो दुम्नीनी?

9 गे मारदे इन थुं ग्येथ लुक्च दुम्शा बाक्शो मुर खोदेशो दुम्नीनी? मारदे प्रोइने मचाप्ब सक्ति मबाक्शो लडाइ पाइब खोदेशो दुम्नीनी? परमप्रभु यावे, गे आंइ दातेम बाक्शो बाक्नीनी। गो इन नेमी ब्रेत्चा पुंडसीशो बाक्नीकी। आंइ कली मप्रोनीन” दैनीम। येरमीया १५:१६; यसेया ४३:७

10 परमप्रभु यावेमी मेको मुर आन पर्वम “मेकोपुकी थमा पा हिरना हिरन बाक्नीम। हेंथे गाक्चा दाक्नीमी। थमा पा ठीक लां मगाक्नीम। मोपतीके परमप्रभु यावेम मेको आन कली मब्राइब। मुल मेकोमी आन मरिश्शो पशो आ पर्वम मिम्ब। मिनु मेको आन कली आन पाप आ पर्वम सजाइ गेब” दैत।

11 मिनु परमप्रभु यावेम आं कली “एको जात डा मुर आन कली रिम्शो दुम्पाइक्चा कली मपुनो। येरमीया ११:१४; येरमीया ७:१६

12 मेकोपुकी माइजा बाक्तेक्म हना यो, गो मेको आन पुंडशो मनेनुड। मेकोपुकीमी चोशा चढेतीके, अन्न चढेतीके चढेतेक्म हना यो, गो मेको आन कली मब्राइनुडमी। मेको आ पा डा गो मेको आन कली, तरवार, अन्काल नु बेक्तीक रोइम साइक्नुडमी” दे माइक्ती। यसेया ५८:३; येरमीया ६:२०

परमप्रभु आ लोत्र जोल पाइबपुकी

13 मिनु गो “परमप्रभु यावे, कोव्रडीन। इन लोत्र पाइबपुकीम दा मेको आन कली ‘गे तरवारम साइक्चा मपुंडसीनीनी। अन्काल मपाइनीनी। मिनु शुश नाक्ती सम्म एको रागीम थुं नाइश्शा बाक्चा ताइनीनी” देशो बाक्नीम” दैती।

14 मिनु परमप्रभु यावेम आं कली “आं लोत्र पाइबपुकीम दा आं नेम जोल पा लोत्र पशो बाक्नीम। गो मेको आन कली मसोइक्नुमी। गो मेको आन कली लोत्र मपड। मेकोपुकीमी इन कली जोल पा, लिंक्नु कोव्रशा, फश लोत्र पाइनीम। आन थुं डा जोल लोत्र पाइनीम। येरमीया २३:२१-२२; येरमीया २७:९,१४,१५; येरमीया २९:८-९; इजीकीएल १३:६

15 मोपतीके परमप्रभु यावेम मेको आ लोत्र पाइब आन पर्वम, सुम आ नेम लोत्र पाइनीमी, मेको आन कली सोइश्शो मनड। मो हना यो मेकोपुकीम ‘तरवार नु अन्कालम एको रागी कली मताइब’ देशो बाक्नीम। मुल तरवार नु अन्कालमीन जोल पा आं लोत्र पाइबपुकी साइक्चा पुंडसीनीम। ब्यवस्था १८:२०

16 मिनु जोल पा आं लोत्र नेंपाइक्चा पुंडसीबपुकी चहिं तरवार नु अन्कालम पतीके यरूसलेम डा लां मेर ताइक्चा पुंडसीनीम। मेको, मेको आन मीश नु मेको आन तमी तौ आन कली थिम्ब सुइ मबाक्नीम। मारदे हना गो मेको आन तचा डा श्येत मेको आन तारी मोइक्नुड” दे माइक्ती। येरमीया ९:२१

17 गे मेको आन कली “आं मिक्च रे नाक्दो नाक्ती प्रेक्कु यिशा बाक्ल। मारदे हना आं मुर, ग्युंवे मपशो तमी थाम्पा श्येत जशो बाक्ब। ठेयब गार दुम्चा डा पा मेको तुप्चा पुंडसीशो बाक्ब। येरमीया ३:१७

18 गो मेको रागी लती हना, तरवारम साइक्चा पुंडसीशोपुकी ताइक्नुडमी। गो मेकेर डा सहरम ओव्रती हना, मेकेर अन्काल पशो मुरपुकी ताइक्नुडमी। परमप्रभु यावे आ लोत्र पाइबपुकी नु चढेब नेल्ल मारेइ मतुइक्थु, आन गेय पना पन बाक्नीम” दे माइक्ती।

19 मिनू गो “मार, गे यहूदा कली थमा पा प्रॉइने थुम्शो बाक्नीनी? मार, गे सियोन कली ग्रॉग्रा दिश्शो बाक्नीनी? गे आंड कली मारदे मसापाइक्चा डा पा तुप्नी? गोपुकी थुं नाइश्शा बाक्तीक आस पाइतक, तन्न मारेड रिम्शो मदुम। सानीकी कों दे आंस पाइतक, तन्न हिंतीक कका जाकत। येरमीया ८:१५

20 परमप्रभु यावे, गोपुकीम इन अरेशो लोत्र मटिशो नु आंड किकी पिपी आन मरिम्शो पशो शोत्रनीकी। गोपुकीम थमा पा इन डोंइती पाप पशो बाक्नीकी। येरमीया ३:२५; भजन संग्रह ५१:५-७; भजन संग्रह १०६:६

21 इन नें आ पबंम आंड कली शोर गाक्शो ममिम्तीन। गो इन सक्ति पाइश्शो निल्तीक कली आइक्च मसेल्पाइक्नीकी। इन पशो कबल मिम्तीन। गे मेको मक्याम्दीन।

22 रागी रागी डा मुर आन देवी देवता आन दाते डा तेकोइमी रेउ यिपाइक्ने चाप्नीमी डा? मार, सरीड आमा रेउ यिपाइक्ने चाप्बा डा? मेको पाइब गे परमप्रभु यावे, आंड परमप्रभु मननी डा? मोपतीके गो इन कली आस पाइनीकी। मारदे हना गे ला एको नेल्ल पने चाप्नीनी” देंती।

## 15

परमप्रभुम लोत्र लेशशो

1 मिनू परमप्रभु यावेमी आं कली “मोसा नु सामुएलमी आं डोंइती जाक्शा पुंडताक्स हना यो, आं थुं एको जात डा मुर आन गे मलेप्ब। मेको आन कली आं डोंइती रे गुंडदीमी। मेको आन कली लचा गेमी। प्रस्थान ३२:११; १सामुएल ७:९; इजीकीएल १४:१४

2 मिनू मेकोपुकीमी ‘गो ते लाइनीकी?’ दे इ कली हिल्लो पाप्तेकम हना, गे मेको आन कली परमप्रभु यावेमी ‘बेक्तीक रोड पा बेक्चा ब्रेक्सीशो बाक्तीनी हना, बेक्तीक गेन लने। तरवारम साइक्चा पुंडसीचा ब्रेक्सीशो बाक्तीनी हना, तरवार गेन लने। शोत्रलुम बेक्चा ब्रेक्सीशो बाक्तीनी हना, शोत्रलुमीन बेक्कीन। ग्याइश्शा लाइक्चा पुंडसीचा ब्रेक्सीशो बाक्तीनी हना, ग्याइश्शा लाइक्चा पुंडसीन’ देनो। येरमीया ४३:११; जकरिया ११:९

3 गो मेको आन कली ४ ओटा साइक्तीक श्येत सोइक्नुडमी। गो साइक्चा कली तरवार, कीशा लाइक्चा कली कुचुम, दाक्पाइक्चा कली नु खतम सेल्चा कली सरीड डा चिक्ब नु रागी डा जन्तु सोइक्नुडमी। इजीकीएल १४:२१; येरमीया ७:३३

4 यहूदा डा पिप हिज्कीयाह आ तौ मनस्सेम यरूसलेममी मार पशो बाक्मे, मेको आ पबंम गो मेको कली खतम पोक्नुड। मिनू मेको तशा रागी डा राज्य नेल्लेम ‘आबी, आबी’ दे हिंनीम। २राजा २१:११-१६; २राजा २३:२६

5 गे यरूसलेम, सुमी इ कली शिशी पाइबा? इ पबंम सुम रोंका पाइबा? गे दोदेशो बाक्नी? दे हिल्लो पचा कली सु दिक्बा?

6 गे आं कली प्रॉइशो बाक्नेवे। गे नोले शोंइसीन सीन बाक्नेवे। मोपतीके गो आं गुड क्युकशा इ कली साइक्नुड। मुल गो आं गाइश्शो मतेक्नुड।

7 गो मेको आन कली राज्य डा सहर डा ठेयब लाप्चोमी ग्योलोम हारशो खोदेशो हारताकड। गो आं मुर आन कली शुश श्येत गेशा खतम सेल्ता। मारदे हना मेको आन मरिम्शो पतीक रे मलेम्म। मत्ती ३:१२

8 मेको आन वोंइश बेक्शो मीश मुरपुकी समुन्द्र डा बाल्वा क्येडा शुश दुप्तेकम। नाक्ती उडक्थ दुम्मेनु, तौ नु आन ममा आन पबंम साइक्ब का चाक्नुड। गो कालेम मेको आन तार सुर्ता पतीक नु ग्रीचोक पा हिंतीके चाक्नुड।

9 मिनू ७ जना बेक्शो तौ आन ममा थत। नाक्ती बाक्ना बाक्न मेको आ नां लाक्तु। मिनू मेको मुने दोक्शा शुक्शी पाइक्चा पुंडसाक्वा। मेको क्येडा यो ब्रोंइशो आन कली आन जोरी सत्रुम तरवारम क्योरपाइश्शा, साइक्पाइक्नुडमी” दे परमप्रभु यावेम देंत। आमोस ८:९

10 आं ममा, मारदे आं कली जरमेनी। गो आं कली रागी नेल्लेम सुइ सुइम जिचा पोक्शा, गो नु सुइ मदुइनीम। गो मेको आन कली ना जेर गेशो बाक्नुडा, ना मेको आन रे जेर जशो बाक्नुडा। मो हना यो मुर नेल्लेम आं कली सराप पाइनीम। येरमीया २०:१४

11 परमप्रभु यावेम आं कली “थमा पा, गो इ कली रिम्शो पा, प्रॉइनन। गो थमा पा श्येत नु मरिम्शो दुम्मेनु इ जोरी सत्रु आन कली, इ गेय पपाइक्नुडमी।

12 मार, मुरुमी उत्तर डा फलाम नु कांसा जिक्ने चाप्बा डा?

13 इन पापम पतीके इन रागी नेल्लेम इन शोंप नु इन मारेड मारेड गो मोशान रोइश्शो मार मार खोदेशो पा योक्शा गेनुडमी। येरमीया १७:३

14 गो इन कली आंम इन मतुइश्शो रागीम इन जोरी सत्रु आन वाइल सेल्लुड। मारदे हना आं गाइश्शोम मी का जेप्ब। मेको गेना हना यो ब्रशा बाक्ब” दे परमप्रभु यावेमी देंत।

15 मिनू गो “परमप्रभु यावे, गे नेल्ल तुइश्शो बाक्नीनी। आं कली मिम्तीन। मिनू आं कली कोत्रडीन। आं कली श्येत गेब आन कली क्येक्क लेत्तीन। गे मेको आन पबंम शुश फाल्शा बाक्नीनी। आं कली मसाइय्यीनी। गो इन पबंम शुक्शी पाइक्चा पुंडसाक्वी, गे मेको तुइक्नीनी।

16 इन लोत्र बाक्त हना, गो नोफा दाइश्शा नेता। मेको आं कली ग्येरतीक नु आं थुं कली नाइक्पाइक्ब दुम्त। मारदे हना परमप्रभु यावे, मुर नेल्ल आन परमप्रभु, गो इन के नड। ब्यवस्था ८:३; ब्यवस्था ३२:४६-४७; इजीकीएल ३:१-३; प्रकाश १०:८-९

17 गो दला दाक्स पा बाक्ब आन हुलम गेनायो मलड। गो मेकोपुकी नु मायेरसीड। गो आं कान बाक्ती। मारदे हना इन गुड आं तार बाक्त। मिनू गे आं कली गाइक्तीकेम प्रिंशो बाक्तीनी।



18 आं श्येत जतीक मारदे मनुम्मे? मिनु आं गार मारदे मसाब दुम्मे? गे आं कली मरिम्शो नु ब्वाक्कु मबाक्शो खोला खोदेशो दुम्तीनी” देंती।

19 मोपतीके परमप्रभु यावेम “गे थमा पा लेत्ते हना, गो इ कली लेंशा ब्राइनुड। गे आं डोंइती रपो। रिम्शो लोत्र ला पाप्तीवी हना नु फश लोत्र मपाप्तीवी हना, गे आं लोत्र पाइब दुम्नेवे। मिनु एको मुरपुकी इ गे लेत्तीम। तन्न गे मेको आन गे मलेतो।

20 गो इ कली, एको मुर आन डोंइती कांसा के बोल्यो गारो सेल्लन। मेकोपुकीमी इ कली लडाइ तोइनीम। तन्न इ क्येडा मग्रानीम। मारदे हना गो इ कली प्रोंइचा कली नु वारच पाइक्का कली गे नु बाक्नुड। येरमीया १:१८-१९

21 गो इ कली आं अरेशो मटीब आन गुड रे प्रोंइनन। मिनु शिशी मपाइक्क आन गुड रे यो प्रोंइनन” दे परमप्रभु यावेमी देंत।

## 16

परमप्रभुम निसाफ पशो

1 मिनु परमप्रभु यावेमी आं कली मार देंत देशा हना

2 “गेमी एको रागीम ग्युबे पचा नु तमी तौ थिचा मदुम्नेवे” देंत।

3 मारदे हना एको रागीम जरमेशो तमी तौपुकी नु आन आम आफ आन पर्वम परमप्रभु यावेम

4 “मेकोपुकी मसाब रोडम बेक्नीम। मेको आन पर्वम सुडम रोंका मपाइनीम। मेको आन कली सुडम मथिम्नीम। मेकोपुकी खपीम मोवल खोदेशो पा बाक्नीम। मेको तरवार नु अन्कालम बेक्नीम। आन बेक्शो रां सरीड डा चिक्ब नु रागी डा जन्तु आन ब्वतीक थोत्रक दुम्नीम” देंत। येरमीया ९:२१

5 मारदे हना परमप्रभु यावेम “गे मुर बेक्शो खिंमी रोंका पथ नु रोंका पाइब आन कली लेम्थ मलावो। मारदे हना गो मेको जात डा मुर रे थुं नाइक्तीक, गेना हना यो दाक्तीके नु शिशी पतीके लाइक्ने थुम्ता।

6 एको रागीम आइक्च नु ठेयब नेल्ल बेक्नीम। मेको आन कली सुडम मथिम्नीम। मेको आन पर्वम सुडम रोंका मपाइनीम। आम रां रिक्सीब नु चां प्रेक्ब सुड मबाक्नीम। येरमीया ४१:५; येरमीया ४७:५; येरमीया ४८:३७८; लेवी १९:२७-२८; ब्यवस्था १४:१

7 मिनु बेक्ब आन पर्वम रोंका पाइब नु आम आफ आस कली लेम्चा कली सुडम तूचा थोत्रक मगेनीम।

8 गे भोज पशो खिंम मओत्रडो। मिनु मेकोपुकी नु जचा तूचा कली मनिस्सो।

9 मारदे हना मुर नेल्ल आन परमप्रभु यावे, इस्त्राएली आन परमप्रभुमी “गो एको रागी रे इन पालाम, इन डोंइती रे थुं नाइशशा बाक्तीक, ग्येरेशो सेंदा नु ग्युम्ली ग्युम्ले आस सेंदा क्याम्नुड”। येरमीया ७:३४

10 मिनु गे एको मुर आन कली एको लोत्र नेल्ल देंनेनु, मेकोपुकीमी इ कली ‘मारदे परमप्रभु यावेम आंइ कली ओदेशो ठेयब मरिम्शो दुम्तीक देंमे? आंइ मरिम्शो पशो मार बाक्बा? गो परमप्रभु यावे, आंइ परमप्रभु कली मार पाप पका डा?’ देंनीम। येरमीया ५:१९

11 मिनु गे मेको आन कली “इन किकी पिपीमी आं कली प्रोंइशा, देवी देवता आन नोले खोइशशा, मेको आन कली पूजा पा ठेयब सेल्लेक्म। मोपा आं कली प्रोंइशा आं अरेशो मपामे।

12 गेपुकीमी इन किकी पिपी आन क्येडा शुश मरिम्शो पाइतीनी। नेनीन, गे एकेर बाक्ब नेल्लेमी इन खकटा थुमी इन दला दाक्ब पाइनीनी। मिनु गे आं लोत्र नेंचा मदाक्नीनी। येरमीया ७:२६

13 मोपतीके गो इन कली इन मतुइशशो रागी नु इन किकी पिपी आन मतुइशशो रागीम ताइक्नन्नी। मिनु गेपुकीम मेकेर नाक्दो नाक्ती देवी देवता आन कली पूजा पाइनीनी। मारदे हना गो इन कली शिशी मपाइनुड” देनो” दे परमप्रभुमी आं कली देंत। ब्यवस्था २८:६४

14 मिनु परमप्रभु यावेमी “परमप्रभु यावे ब्रोंइशा बाक्शो नु मुर आन कली इजीप्त रागी रे युंइशा एक चाक्शो खोदेशो पा मदेंतीक नाक्ती थमा पा जाक्नीम।

15 तन्न मार देनीम देशा हना, मेकोपुकीमी ‘परमप्रभु यावे ब्रोंइशा बाक्शो नु इस्त्राएली आन कली उत्तर डा रागी नु तेको तेको रागी रे चाक्शो खोदेशो पा’ देंनीम। मारदे हना गो मेको आन कली आन किकी पिपी आन कली गेशो रागीम चाक्नुडमी। येरमीया २३:७-८

16 मुल गो शुश ग्याइल आप्ब आन कली ब्रेशशा सोइक्नुडमी। मिनु मेकोपुकीमी मेको आन कली ग्याइक्नीम। नोले गो लेंशा शुश सिखारी आन कली ब्रेशशा सोइक्नुडमी। मिनु मेकोपुकीमी, मेको आन कली तेकोइ डांडा नु तेकोइ पहाड नु सेरथे फुल्लु डा काक्पे रे माल्शा गुंइनीम।

17 मारदे हना गो मेको आन लां नेल्ल तुइक्नुड। मेको आं डोंइती मखुइशशो बाक्नीम। मेको आन मरिम्शो पशो यो आं डोंइती मखुइशशो बाक्ब। अय्युब ३४:२१

18 गो मेको आन मरिम्शो पशो नु आन पाप आ पर्वम मेको आन कली निक्शी खेयप सजाइ गेनुडमी। मारदे हना मेकोपुकीमी सोक्ती मपाइशशो मूर्तिपुकीम आं रागी ग्रांगा दिशो सेल्लेक्म। मिनु आं थेरशो रू आन ग्रांगा दिशो देवी देवताम प्रिताक्म” देंत। यसैया ४०:२

19 मिनु मेकोपुकीमी “परमप्रभु यावे, गे आं सक्ति नु आं खुइशशा, ब्रोंइशा बाक्तीक बाक्नीनी। गे श्येत जची ना आं खुइक्तीके बाक्नीनी। रागी रागी डा मुर रागी डा मुर रे इन डोंइती जाक्नीम। मिनु मेकोपुकीमी ‘आंइ किकी पिपी आन देवी देवता जोल ला बाक्तेक्म। मेको शोर गाक्शो बाक्तेक्म। भजन संग्रह ३६:७

20 मार, बेक्शा लाइब मुरपुकीम आम देवी देवता सेल्ले चाप्नीमी डा? तन्न मेकोपुकी देवी देवता मनम’ देंनीम।

21 मोपतीके गो मेको आन कली थमा पा रूपाइक्नुडमी। गो मेको आन कली आं सक्ति नु आं ठेयब दुम्तीके आ पबर्म शेंनुडमी। मिनू मेकोपुकीमी आं नें यावे बाक्ब, दे तुडक्नीम” दे परमप्रभु यावेमी देंत। प्रस्थान ३:१२

## 17

पाप रे प्रॉइतीके नु निसाफ

1 परमप्रभु यावेमी “यहूदा आ पाप फलाम के मुतीकेम मुशा ब्रेकशो बाक्ब। मेको हीरा पाइशो मुतीकेमी आन थुं नु आन चढेतीक डा ग्रोवपुकीम मुशा ब्रेकशो बाक्ब। २राजा २३:४-१८

2 मेको आन आलपुकीमी यो आन चढेतीक नु आन मूर्ति पाइशो थाम आन कली मिन्मी। मेको नेल्ल गिगी रवा आन पुंम नु लाइशो पहाड तार बाक्तेकम।

3 मेको डांडा तार नु रूम बाक्तेकम। मिनू इन रागी डा शोंप नु इन रिम्शो मारेइ मारेइ थोवक नेल्ल इन पाप पतीकेम रोड्कपाइक्नुड। येरमीया १५:१३

4 इन पाप पतीकेम गो इन कली गेशो, इन थेरशो रू साम्नीनी। मिनू गो इन कली इन मतुइशो रागीम इन जोरी सनु आन वाइल दुम्पाइक्नन्नी। मारदे हना आं गाइक्तीके मी ब्रशो खोदेशो बाक्ब। मिनू मेको गेना हना यो ब्रस डा ब्रस बाक्ब” देंत।

5 परमप्रभु यावेम मार देंत देशा हना “सु सुमी मुर आन कली थमा सुइक्नीमी, मेको सराप राइनीम। आन रं डा सक्तिम थमा सुइक्ब यो सराप राइनीम। मारदे हना मेको आन थुं परमप्रभु यावे रे डोन लशो बाक्ब। भजन संग्रह ११८:८; भजन संग्रह १४६:३; २इतिहास ३२:८

6 मेको गोरशो रागी डा पोथा रवा खोदेशो बाक्नीम। मेकोमी रिम्शो दुम्मेनु यो, मारेइ मताइनीम। मेको मुर मबाक्तीक रागी डा नेल्ल क्येडा सोव्रशो खपीम नु हिकसी बाक्शो रागीम बाक्नीम। येरमीया ४८:६

7 परमप्रभु यावे कली थमा सुइक्ब मुर आसीक रशो बाक्नीम। मेकोपुकीम परमप्रभु यावे कली आस पशो बाक्नीम। भजन संग्रह १४६:५

8 मेको ब्वाक्कु आ नेक्था खुम्शो रवा खोदेशो बाक्नीम। मेकोमी आन शाकश खोला आ सुर सम्म चाक्दीत्नीम। मेको हुप्तानु, महिनीम। मेको आन सफापुकी गेना हना यो गिगी बाक्नीम। नां पवानु मेको मारेइ सुर्ता मपाइनीम। मेको गेना हना यो फल सिब्ब बाक्नीम” देंत। भजन संग्रह १:३

9 मुर आन थुं नेल्ल क्येडा जोल पाइब बाक्ब। गेना हना यो दूली पाइब बाक्ब। मेको कली सुम रुपे चाप्बा डा? १सामुएल १६:७; भजन संग्रह ७:१०; हितोपदेश १५:११; रोमी २:६

10 गो, परमप्रभु यावेमी मुर आन कली नाक्नुड। आन थुंम मार बाक्मे, मेको कोव्रनुड। आन गाक्शो लां नु आन पशो कोव्रशा, इनाम गेनुडमी।

11 मुर, आंम आ मपशो ब्वोफु पुब्ब क्येने खोदेशो बाक्ब। मेकोमी हेंथे पा शोंप चेम्ब। मेको आ ब्रॉइतीक नाक्ती उडक्थ दुम्मेनु, मेको आ शोंपोम मेको मुर कली प्रॉइब। मिनू आ बेक्ची ना मेको कली मूर्ख मिम्सीब। लूका १२:२०

12 डोंइती रे मान तशा बाक्शो इन सक्ति पाइशो नित्तीके आंइ ब्रॉइशा बाक्तीक बाक्ब। येरमीया ३:१७

13 गे इस्त्राएली आन आस पशो परमप्रभु यावे, इन कली प्रॉइब नेल्ल मुने दोक्नीम। इन कली प्रॉइशा गाक्ब मुर नेल्ल फुरकुम नें ब्रेकशो खोदेशो ला बाक्नीम। मारदे हना मेकोपुकीमी गेना हना यो ब्रॉइचा गेब ब्वाक्कु, परमप्रभु यावे कली प्रॉइशो बाक्नीम। येरमीया २:१३

येरमीया आ पुंइशो

14 मिनू गो “परमप्रभु यावे आं कली सापाइय्यीनी। मिनू गो सानुड। आं कली प्रॉइय्यीनी। मिनू गो ब्रॉइनुड। मारदे हना गे आं सक्ति बाक्नीनी। प्रस्थान १५:२६; भजन संग्रह ६:३

15 मेकोपुकीमी आं कली ‘परमप्रभु यावे आ लोव ते बाक्म? मुल मेको नेल्ल गाप्प’ देंतेकम। भजन संग्रह ५:१९

16 तन्न गो इन गोठला दुम्तीक रे मप्रोक्ड। गे तुडक्नीनी। गो नोले डा नाक्ती सुर्ता पचा ममाल्नुड, दे मिम्शो बाक्नुड। गो मार देंडा, मेको इन डोंइती बाक्ब।

17 गे आं कली हिपाइक्ब मदुमीन। गो खतम दुम्चा डा नाक्ती गेन आं खुंइसीतीके बाक्नीनी।

18 आं कली खेदा पाइब आन कली मुने तोक्कीन। तन्न आं कली चहिं मुने मतोक्यीनी। मेकोपुकी हिंमल। तन्न आं कली चहिं हिंतीक रे प्रॉइय्यीनी। मेको आन ठेयब श्येत डा नाक्त चाक्कीन। मेको आन कली निक्शी खेयप डा श्येतम सतीन” देंती। भजन संग्रह ३५:४

नाइक्तीक नाक्त आ पबर्म लोव

19 परमप्रभु यावेम आं कली “गे मुर आन ओवतीक ठेयब लाप्चो आ नेक्था रपो। मेको लाप्चो रे यहूदा डा पिप लाडगा खिंडगा पाइब। यरूसलेम डा गारो डा लाप्चो नेल्ल आन डोंइती लशा रपो। नेहेम्याह १३:१५-२२

20 मिनू मेको आन कली ‘एको ठेयब लाप्चो रे पा आगा ओव्रब यहूदा डा पिप, मेकर डा मुर नेल्ल नु यरूसलेममी बाक्ब मुर नेल्ल परमप्रभु यावे आ लोव नेनीन’ देंतो” देंत।

21 परमप्रभु यावेमी “गेपुकी होस पा बाक्कीन। मिनू गे नाइक्तीक नाक्त ठेयब लाप्चो आगाम मारेइ भारी मकुरीन। यरूसलेम डा गारो डा ठेयब लाप्चो रे पा आगा मारेइ मओइदीन। प्रस्थान २०:८-१०

22 ‘गेपुकी नाइक्तीक नाक्ती इन खिं रे भारी मकुरीन। मेको नाक्ती मारेइ गेय मपने। गो इन किकी पिपी आन कली शेंशो खोदेशो पा नाइक्तीक नाक्त कली अरु नाक्ती खोदेशो मपने। मारदे हना मेको आं नाक्त बाक्ब’ देंती। यसेया ५६:२

23 तन्न मेकोपुकीमी मनेनेम। आन नोफा मदाइक्तेम। मिनु मेको आन थुं खकटा दुम्तीके मटीमे नु शेंशो नेने मबिस्सम। येरमीया ११:८

24 तन्न गेपुकीम आं लोव नेंतीनी हना, नाइक्तीक नाक्ती सहर नु ठेयब लाप्चो रे मारेइ भारी आगा मओइताक्नी हना नु नाइक्तीक नाक्त आं नाक्त मिम्शा, मारेइ गेय मपाइतीनी हना,

25 दाऊद आ नित्तीकेम निम्ब पिप, आन गेय पाइब मुरपुकी एको सहर डा ठेयब लाप्चो रे शाराम कीशो बग्गीम डोइशशा ओवनीम। यहूदा डा मुर नु यरूसलेममी बाक्ब जाक्नीम। मिनु एको सहरमी गेना हना यो मुर शुश बाक्नीम। येरमीया २२:४

26 मिनु यहूदा डा सहर रे नु यरूसलेम आ एर ओंथ डा गाउं रे, बेन्यामीन आ रागी रे, शेफेलाह डा दिंम रे, पहाड रे नु नेगेब रे चोशा चढेतीके, क्योरशा चढेतीके, अन्न चढेतीके, धूप चढेतीक नु 'गे रिम्शो पाइब बाक्नीनी' दे चढेतीके चाक्शा, परमप्रभु यावे आ खिंम जाक्नीम।

27 तन्न गेपुकीम आं लोव मनेंतीनी हना, नाइक्तीक नाक्ती आं नाक्त बाक्ब, दे ममिस्ताक्नी हना नु नाइक्तीक नाक्त भारी कुरशा यरूसलेम डा ठेयब लाप्चो आगा ओवनीनी हना, आं देशो मबिस्साक्नी हना, गो यरूसलेम डा ठेयब लाप्चोमी गेनायो मकाप्ब मी जेतुड। मिनु मेकोमी यरूसलेम डा दरवार दाक्ब" दे परमप्रभु यावेमी देंत। इजीकीएल २०:१-२-३

## 18

खप के ग्योब सेल्ब

1 परमप्रभु यावेमी आं कली मार लोव्र पाप्तु देंशा हना

2 मेकोमी "उड खप के ग्योब सेल्ब आ खिं लावो। मिनु गो इ कली आं लोव्र नेंपाइक्नुड" देंत।

3 मोपतीके गो उड खप के ग्योब सेल्ब आ खिं लती। मिनु मेकेर मेकोमी आ गुगील हिरशा गेय पाप्तु।

4 मिनु मेको आ सेल्शो खप के ग्योब आ गुडम वारसाक्व। मिनु मेकोमी मेको खप के आ दाक्शो अर्को ग्योब का सेल्लु।

5 मिनु परमप्रभु यावेमी आं कली

6 "इसाएल आ खिं डा मुर, एको खप के ग्योब सेल्बमी खोदेंशो पा गो इन कली पाइक्ने मचाप्नुडा डा? इसाएल आ खिं डा मुर, मेको खप के ग्योब सेल्ब आ गुडम खप बाक्शो खोदेंशो पा, गे यो आं गुडम खप खोदेंशो बाक्नीनी। यसैया ४५:९; रोमी ९:२१

7 गो याम कामीन तेकोइ रागी, तेकोइ राज्य आन कली तुल्शा ताइशशा, जिक्शा खतम सेल्लुड। गो मेको पने चाप्नुड। येरमीया १:१०

8 तन्न मेको आ देशो रागी डा मुर आन मरिम्शो पतीके रे आं गे लेत्तेक्म हना, गो आं मिम्शो मेको आन कली ठेयब श्येत गेतीक रे फाइक्नुड। श्येत मगेनुडमी। येरमीया २६:३; इजीकीएल ३३:११; जोना ३:१०

9 मिनु अर्को याम काम गो तेकोइ रागी, तेकोइ राज्य आन कली सेल्शा वोइक्ने चाप्नुड।

10 तन्न मेकोपुकीम आं लोव्र मनेंथु, आं डोइती मरिम्शो पाम्तेक्म हना, गो मेको आन कली रिम्शो मसेल्लुडमी।

11 मोपतीके गे यहूदा डा मुर आन कली नु यरूसलेममी बाक्ब मुर आन कली परमप्रभु यावेम इन कली मार देंत देंशा हना 'नेनीन, गो इन कली मरिम्शो पाइनुड। गो इन कली श्येत गेनुड। मोपतीके गे इन मरिम्शो लां रे लेतीन। मिनु इन लां नु इन पतीके रिम्शो सेलीन' देंनो। येरमीया ७:३

12 तन्न मेकोपुकीमी 'मो पचा मोशा बाक्ब। गो आंइ मिम्शो पाइनीकी। गो आंइ थुं खकटा सेल्लीकी, दे लोव्र लेत्ताक्म' देंनीम" देंत। येरमीया ६:६; येरमीया ११:८

13 मोपतीके परमप्रभु यावेम "रागी रागी डा मुर आन दातेम लशा हिल्लो पावो। ओदेशो लोव्र सुम नेंशो बाक्नीमी? ग्युंवे मपशो मीश आल इसाएलम थम ग्रंया दिशो गेय पशो बाक्ब।

14 मार, लेबानोन डा फु सिरीयोन रोगु आ काक्पे रे जाम्बा?। मार, आ बुक्तीके पहाड रे गूशा यिशो खोला डा शाइशशो ब्वाक्कु सोव्रबा डा?।

15 तन्न आं मुरपुकीम आं कली प्रेंताक्म। मेकोपुकीमी शोर गाक्शो मूर्ति आन कली चोशा चढेन्तेक्म। मेको माइत लांम दाइल पपाइसाक्म। मिनु मेकोपुकी मेको माइत ठेयब लां प्रोइशा, आइक्च लां मेर गाक्तेक्म।

16 मेकोपुकीम आन रागी हिंचा डा सेल्लेक्म। मिनु मेको रागी गेना हना यो शुक्शी पतीक दुम्त। मेकेर रे सु सु गाक्मा मेको ग्रीचोक पा हिंनीम। मिनु 'आबी, आबी' देंनीम। येरमीया १९:८

17 गो मेको आन कली पूर्व डा फशेम खोदेंशो पा आन जोरी सत्रु आन डोइती एर ओंथ ब्रपाइक्नुडमी। मेको आन हिंचा डा नाक्ती गो मेको आन कली आं ची कौडनुडमी। आं कुल मकोइनुडमी" देंत। येरमीया २:२७

18 मिनु मेकोपुकीम "मुल गोपुकीम येरमीया कली दोस गेय। मारदे हना चढेब आन शेंशो लोव्र मग्याम्ब। जोक्ब तुडक्ब आन अर्ती यो मग्याम्ब। मिनु परमप्रभु यावे आ लोव्र पाइब आन देशो लोव्र यो मजाम्ब। मोपतीके मुल गो येरमीया कली दोस गेय। मिनु मेको आ देशो तेकोइ लोव्र मनेय" देंतेक्म।

19 मिनु येरमीयामी "परमप्रभु यावे आं लोव्र नेनीन। आं कली दोस गेबपुकीम मार देंनीमी, मेको नेनीन।

20 मार, रिम्शो आ पा डा मरिम्शो पांइसीबा डा? मो हना यो आं कली खालटा दोशो बाक्तेक्म। गो मेको आन परबंम पुंडना पुंडन बाक्ती, मेको मिम्तीन। मेको आन कली वारच पचा कली नु इन गाइशशो तेक्चा कली पुंडता।

21 मोपतीके मेको आन आल आन कली अन्काल पपतीन। मेको आन कली तरवारम साइक्पतीन। मेको आन मीश आल मबाक्शो नु आन वोंइश बेक्शो मीश मुर दुम्मल। मेको आन वोंइश मुर बेक्तीक रोइम बेक्मल। मेको आन टिटा वोंइश मुरपुकी लडाइम तरवारम साइक्का पुंडसमल।

22 गेमी मेको आन कली आन मतुइक्थु साइक्ब चाक्नीनु, मेको आन खिं रे डाक्शो ब्रेशो नेंसेक्ल। मारदे हना मेकोपुकीमी आं कली ग्याइक्का कली खाल्टा दोशो बाक्तेक्म। मिनु आं खोइल फ्रिन्चा कली खुइशशा ब्वारद दाइशो बाक्तेक्म।

23 मिनु परमप्रभु यावे, आं कली साइक्का माल्शो नु मरिम्शो पाइब नेल्ल आन कली तुइक्ताक्नी। मेको आन मरिम्शो पशो माफ मग्ने। इन डोंइती रे मेको आन पाप मतिलीन। मेको इन डोंइती दाइल पांडसीमल। गे गाइक्तीनीनु, मेको आन कली मार पचा माल्बा, मेको पने” दैत। मत्ती ६:१५

## 19

ब्रॉल्शो गर

1 परमप्रभु यावेमी “लशा खप के ग्योब सेल्व रे ब्वाक्कु कुर पतीक ग्योब का ग्यापो। मिनु का निक्शी मुर आन दाते डा खाल्पा नु का निक्शी चढेब आन कली लाइक्मी।

2 मिनु गे हिन्नोम आ तौ आ बेंसीम बाक्शो गम्टे लाप्चोम लावो। गो इ कली मार शेंदु, मेको लोत्र मेकेर ठेयब सेंदा पा नेंपाइक्मी। येरमीया ७:३१

3 यहूदा डा पिप नु यरूसलेम बाक्ब मुरपुकी परमप्रभु यावे आ लोत्र नेनीन। मुर नेल्ल आन परमप्रभु यावे, इस्राएली आन परमप्रभुमी ‘आं लोत्र नेनीन। गो एको रागीम थम मरिम्शो दुम्पाइक्नुड’ मेको आ पर्वम लोत्र नेंब नेल्ल आन नोफा दाइक्नीम। २राजा २१:१२

4 मेको मुरपुकीमी आं कली प्रोंइतीमी। मिनु एकेर अर्को रागी डा देवी देवता आन कली चढेशा, एको रागी ग्रॉग्रा दिशो सेल्लेक्म। मेको देवी देवता आन किकी पिपी नु यहूदा डा पिपम यो मतुइशो बाक्तेक्म। मिनु मेकोपुकीमी रागी कली दोस मताइब आन हुशेम प्रिताक्म।

5 मेकोपुकीमी आंम आल आन कली बाल देवता कली मीम चोशा चढेचा कली डांडाम थान सेल्ला सेल्ल बाक्तेक्म। मेको मो पन, दे गो मअरेडमी। गो मेको मशेंदुमी। मोदेशो गेनायो ममिन्तु। येरमीया ७:३१-३३; लेवी १८:२१

6 मोपतीके होस पा बाक्कीन। मेको बेंसी कली तोफेथ नु हिन्नोम आ तौ आ बेंसी, दे वोइशो नें प्रोंइनीम। मेको शुश नाक्त रिन्चा ममाल्नीनी। तन्न मेको कली मुर साइक्तीक बेंसी, दे नें वोइक्नीम। येरमीया ७:३२

7 गो एको रागीमी यहूदा नु यरूसलेम आस मिम्शो मदुम्पाइक्नुड। गो मेको आन कली आन जोरी सत्रु आन डोंइती तरवारम साइक्पाइक्नुडमी। सु सुम मेको आन कली साइक्का दाक्नीमी, मेको आन गुडम गेनुडमी। आन बेक्शो रां चहिं सरीड डा चिक्ब नु रागीम बाक्ब ब्वाकी डा जन्तु आन कली ब्वचा गेनुडमी।

8 मिनु गो मेको सहर कली हिंचा डा सेल्लुड। मिनु मेको सहर गेना हना यो शुक्शी पतीक दुम्ब। मेकेर रे सु सु गाक्मा, मेको ग्रीचोक पा हिंनीम। मिनु आ खतम दुम्तीके आ पर्वम आबी, आबी देनीम। येरमीया १८:१६

9 मेको आन कली आन तमी तौ आन श्ये ब्वपाइक्नुडमी। सहर पुम्तीके मुर नेल्ल आन नेक्था डा मुर आन श्ये ब्वाइनीम। आन जोरी सत्रु नु मेको आन कली साइक्का माल्ब आन गेशो श्येतम मोदेशो पाइनीम। लेवी २६:२९; ब्यवस्था २८:५३

10 मिनु नोले गे मेको ब्वाक्कु कुर पतीक खप के ग्योब, गे नु लाइब आन डोंइती प्रोलो।

11 मिनु गे मेको आन कली मुर नेल्ल आन परमप्रभु यावेमी ‘दोपा खप के ग्योब सेल्व आ ग्योब गेनायो मबोंइसीचा डा पा ब्रॉल्मे, मोपा गो मेको मुर आन कली नु एको सहर आन कली प्रोल्लुड। तोफेथमी मुर थिम्तीक मनुम्म सम्म बेक्शो मुर थिम्नीम। यसैया ३०:१२-१४; येरमीया ७:३२

12 गो एको सहर नु एकेर बाक्ब मुर आन कली मो पाइक्नुडमी। गो एको सहर कली तोफेथ खोदेशो सेल्लुड।

13 यरूसलेम डा खिंपुकी नु यहूदा डा पिप आन खिंपुकी तोफेथ खोदेशो पा ग्रॉग्रा दिचा डा दुम्नीम। तेको तेको खिं तारी सरीड डा नां, तास्ला नु सोरुल आन कली चढेशा, अरु देवी देवता आन कली तूचा थोव्रक चढेमे, मेको खिं नेल्ल ग्रॉग्रा दिचा डा दुम्नीम देनो” दे परमप्रभु यावेमी दैत। येरमीया ३२:२९; २राजा २३:१२; सेफन्याह १:३

14 मिनु परमप्रभु यावेमी येरमीया कली लोत्र पथ, तोफेथ सोइक्ताक्व। मिनु येरमीया मेकेर रे जाक्शा, परमप्रभु यावे आ खिं डा लाङ्गाम बाक्शा, मुर नेल्ल आन कली

15 मुर नेल्ल आन परमप्रभु यावे, इस्राएली आन परमप्रभुमी मार दैत देशा हना “गो एको सहर नु आ नेक्था डा सहर डा मुर नेल्ल आन कली आं डोंइती देशो ठेयब श्येत जपाइक्नुडमी। मारदे हना मेको आन थुं खकटा बाक्ब। मिनु आं लोत्र नेंचा मदाक्नीम” दे माइक्तीमी।

## 20

येरमीया नु चढेब पशहुर

1 मिनु इम्मेर आ तौ चढेब पशहुर परमप्रभु यावे आ खिंम गेय पाइब आन ठेयब मुर बाक्त। मेकोमी येरमीया आ लोत्र पशो नेतु।

2 मिनू पशहुरमी परमप्रभु यावे आ लोव्र पाइब येरमीया कली तुप्तु। मिनू परमप्रभु यावे आ खिम बाकशो बेन्यामीन आ इर तला डा लाप्चोम बाकशो ठेंडरो थोक्ताकव। प्रेरित १६:२४

3 मिनू आ दीसा पशहुरमी येरमीया कली ठेंडरो रे गुंडदानु, येरमीयामी मेको कली “परमप्रभु यावेम इ नें पशहुर मवोडक्थु ‘एर ओंथ नेल्ल रे हिंतीक’ दे इ नें वोडक्तु। येरमीया २०:१०; येरमीया ६:२५; येरमीया ४६:५; येरमीया ४९:२९; बजन संग्रह ३१:१४

4 मारदे हना परमप्रभु यावेमी गो इ कली नु इ वारच नेल्ल आन कली शुश हिंचा डा सेल्लुड। मेकोपुकी इ डोंडती आन जोरी सत्रु आन तरवारम साइक्चा पुंडसीनीम। गो यहूदा नु मेको आ मुर नेल्ल आन कली बेबीलोन डा पिप आ गुडम गेनुडमी। मेकोमी मेको आन कली ग्याइशशा बेबीलोन लाइक्ब। मिनू तरवारम साइक्ब।

5 गो एको सहर डा शोंप नेल्ल, आ चेम्शो क्येट नेल्ल, आ शुश क्येट लाइब थोव्रक नेल्ल नु यहूदा डा पिप आन शोंप नेल्ल आन जोरी सत्रु आन कली गेनुडमी। मेकोपुकीमी आन मारेड मारेड रोडशशा, मेको आन कली ग्याइशशा बेबीलोन लाइक्नीम। यहोसु ३९:६

6 पशहुर, गे नु इ खिम बाकब नेल्ल ग्याइक्चा पुंडसीशा बेबीलोनम लाइनीनी। गे बेबीलोन लशा, मेकेर बेक्नीनी। इन कली मेकेर थिम्नीम। गे परमप्रभु आ लोव्र दूली सेल्शा, शेंताक्वी। इ लोव्र नेंब इ वारच नेल्ल इ खोदेशो पा थिम्चा पुंडसीनीम” देत।

येरमीयाम उजुर पशो

7 मिनू येरमीयाम “परमप्रभु यावे, गे आं कली लेम्शा, इन लोव्र पाइब सेलतीनी। मिनू गो इन लेम्शो लोव्र नेंशा बिस्साक्यी। इन सक्तिमी आं कली प्रातीनी। मुल नाक्त रेन मुरुम आं कली शुक्शी पाइनीम। मुर नेल्लेमी आं कली शुक्शी पाइनीमी। येरमीया १:५-७

8 गो लोव्र पची ना ठेयब सेंदा पा लोव्र पचा माल्लुड। गो हुश खाक्श बोक्चा नु खतम दुम्चा आ पर्वम ला ग्रीनुड। परमप्रभु यावे आ लोव्र नाक्त रेन आं कली शुक्शी पाइक्तीक नु मरिम्शो पाइक्तीके दुम्त।

9 गो मेको आ पर्वम लोव्र मपाइनुड। आ नें थिशा लेंशा लोव्र मपाइनुड देंती हना यो, आ थुंमी ब्रशो मी खोदेशो दुम्त। आं रुशपुकीम तेक्शा वोदुनु, मी खोदेशो दुम्त। गो मेको कली तेक्शा दती। गो थमा पा, मेको कली तेक्ने मचाप्नुड। १कोरिन्थी ९:१६

10 गो शुश मुरपुकीम नोफा मुडक्मुशा लोव्र पशो नेंता। मेकोपुकीमी ‘एर ओंथ नेल्ल हिंचा डा श्येत बाक्ब। येरमीया कली दोस गेय। मेको आ पर्वम उजुर पय’ देंतीम। आं नेक्था डा वारच नेल्लेमी ‘गेना दाइल पांडसीबा’ दे आं कली कोव्रनीम। मिनू लेंशा ‘गो मेको आ पर्वम लोव्र पा मेको कली ग्राने चाप्नीकी। गो मेको क्येडा प्राशा क्येक्क लेत्नय’ देंतेक्म” देत। येरमीया २०:३; येरमीया १८:१८

11 तन्न परमप्रभु यावे बोल्यो लडाइ पाइब का खोदेशो पा गो नु बाक्ब। मोपतीके आं कली खेदा पाइबपुकी दाइल पांडसीशा, गोल्नीम। मिनू मेकोपुकीम आं कली मग्रानीम। मेको थाम्पा मुने दोक्नीम। मारदे हना मेको आन मरिम्शो पशो गेनायो मप्रेंसीब। येरमीया १:८, १९

12 मुर नेल्ल आन परमप्रभु यावे, गे ठीक पाइब आन कली नाक्शा कोव्रनीनी। गे मुर आन थुं नु आन मिम्तीके कोव्रनीनी। आं कली मेको आन कली क्येक्क लेशो तचा गेयीनी। मारदे हना गो आं निसाफ पतीके इन कली जिम्मा गेता। येरमीया ११:२०

13 मिनू “परमप्रभु यावे कली कुम्सो पने। परमप्रभु यावे ठेयब बाक्ब” दे कुम्सो पने। मेकोमी क्येट मथीब आन कली मरिम्शो पाइब आन गुड रे प्रोंडतु।

14 गो आं जरमेशो नाक्त सराप रल। आं ममाम आं कली जरमेशो नाक्त आसीक मतवल। येरमीया १५:१०; अय्युब ३:३-११; अय्युब १०:१८

15 आं आफ कली “इ के आल का जरमेसाक्व। तौ का जरमेसाक्व” दे लोव्र शेंब सराप रल। मेकोमी आं आफ कली ग्येरपाइक्तु।

16 परमप्रभु यावेमी मेको मुर कली शिशी मपथु, मेको मुर खतम पोक्शो सहर खोदेशो दुम्ल। मेकोमी सुनी डाक्शो ब्रेशशो नु नाक्ती लडाइ डा तुराही ताप्शो नेनल। उत्पत्ती १९:२४-२८

17 मारदे हना मेकोमी आं कली आं ममा आ कोव्रज उड मसाइय्यी। मो दुम्शो हना, आं ममा, आं तुरस दुम वा। मिनू आ कोव्रज गेना हना यो ठेयब दुम वा।

18 गो मारदे कोव्रज रे गूडा? गो शुश गेय नु सुर्ता पचा कली जरमेसाक्वी। मिनू नाक्त कित कित मुने दोक्चा कली जरमेसाक्वी।

## 21

पिप सिदकीयाह आ पुंडशो मनेंशो

1 मिनू पिप सिदकीयाहम माल्कीयाह आ तौ पशहुर नु मासेयाह आ तौ चढेब सेफन्याह आस कली लोव्र कुर पा येरमीया आ बाक्तीकेम सोडक्ताक्सी। मेना परमप्रभु यावेमी येरमीया कली लोव्र पाप्नु। येरमीया ३९:१-१०; येरमीया २९:२५-२६; येरमीया ३७:३; येरमीया ५२:२४

2 मेको निक्शीमी “हजुर, परमप्रभु यावे कली आंइ पर्वम हिल्लो पने। मारदे हना बेबीलोन डा पिप नेबुकदरेसरमी आंइ कली लडाइ तोन तोन बाक्ब। साइ डोंडती शुश खेयप पशो खोदेशो पा परमप्रभु यावेमी आंइ पर्वम छक लाक्चा डा गेय पाइबा को? मिनू मोपा मेकोपुकी आंइ रे पा लेशशा लाइनीमी को?” देताक्से।

- 3 मिनू येरमीयामी मेको आस कली
- 4 “परमप्रभु यावे, इस्राएली आन परमप्रभुमी मार लोत्र पाप्तु देशा हना, गे सिदकीयाह कली ‘गारो आ लाडगाम बाकशो इन कली पुम्ब बेबीलोन डा पिप नु कल्दी नु लडाइ पशो इन गुड डा यापुकी इन गे लेप्पाइक्नुड। मिनू गो मेको आन कली खुप्शा, एको सहर आगाम ओइनुडमी।
- 5 गो आं दिशो गुड, सक्ति नु आं थाम्पा गाइरशा, चुरशा नु ग्युश्रा बोक्शा, गे नु लडाइ पाडनुड।
- 6 गो एको सहरम बाकब मुर नु बस्तु भाव नेल्ल आन कली साइक्नुडमी। मिनू मेकोपुकी ठेयब बेक्तीक रोइम बेक्नीम’ दैत, दे मतीस।
- 7 मिनू नोले परमप्रभु यावेमी ‘गो यहूदा डा पिप सिदकीयाह, मेको आ गेय पाइबपुकी नु मेको सहर डा बेक्तीक रोइ, तरवार नु अन्काल रे ब्रॉइशो मुर आन कली बेबीलोन डा पिप नेबुकदरेसर आ गुडम गेनुडमी। गो मेको आन कली साइक्वा माल्ब आन जोरी सतु आन गुडम जिम्मा गेनुडमी। मिनू मेकोमी मेको आन कली तरवारम साइक्पाइक्ब। मेकोमी मेको आन कली शिशी मपथु, मप्रॉइब नु दाक्तीके मकोइथु, साइक्पाइक्ब’ मतीस” दे माइक्तीम्सी।
- 8 मेकोमी “गेमी मेको मुर आन कली ‘परमप्रभु यावेमी “गो इन डोंइती ब्रॉइशा बाक्तीक नु बेक्तीक लां वोइक्ता। ब्यवस्था ३०:१५
- 9 मेको सहरम बाकब मुर तरवार, अन्काल नु मुर बेक्तीक रोइम बेक्वा माल्नीम। तन्न सु लाडगा यूशा, इन कली पुम्ब कल्दी आन कली जिम्मा गेंसीबा, मेको ब्रॉइब। मेकोम आ सोक्त ला प्रॉइब। येरमीया ३८:२
- 10 गो एको सहर कली थमा पा क्याम्नुड। रिम्शो पचा कली ममिम्नुड। एको सहर बेबीलोन डा पिप आ गुडम गेनुड। मेकोमी एको सहर कली मीम क्रोइक्ब” दैत’ देनो” दैत। येरमीया ३४:२
- 11 परमप्रभु यावेम “यहूदा डा पिप आ खिं डा मुर आन कली ‘परमप्रभु यावे आ लोत्र नेनीन।
- 12 गे दाऊद आ खिं डा मुर सुनी कुस कुस ठीक निसाफ पने। रोइक्वा पुंडसीशो आन कली मरिम्शो पाइब आन गुड रे प्रोनीन। मो मपाइतीनी हना, इन मरिम्शो पतीके आं गाइक्तीके मी खोदेशो पा ब्राइब। मेको सुडम कान्पे मचाप्चा डा पा ब्राइब। येरमीया २२:३; येरमीया ७:२०
- 13 एको दिमम बाकबपुकी रोंगु तार सेल्शो सहर गो इन कली लडाइ तोडनुड। गे आंइ कली जाक्शा, सुम लडाइ तोडबा डा? “आंइ खुइक्तीके सु ओवने चाप्बा डा? आंइ बाक्तीकेम सु ओवने चाप्बा डा?” देनीनी।
- 14 गो इन कली इन पशो खोदेशो पा कोत्रशा, सजाइ गेनन्ती। गो इन ब्वाकीम मी सुइक्नुड। मिनू मेकोमी इन एर ओथ बाकशो मारेड मारेड नेक्ब, दे परमप्रभु यावेमी दैत’ देनो” दैत। गलाती ६:७; इजीकीएल २१:३

## 22

पिप शाल्लुम येहो-याकीम नु कोन्याह

- 1 परमप्रभु यावेम “उइ यहूदा डा पिप आ दरवारम लशा, मेकेर मार लोत्र पचा माल्नेवे देशा हना,
- 2 ‘दाऊद आ नित्तीकेम निप्ब, यहूदा डा पिप, इन गेय पाइबपुकी नु मेको ठेयब लाप्चो रे ओत्रबपुकी परमप्रभु यावे आ लोत्र नेनीन।
- 3 परमप्रभु यावेमी मार दैत देशा हना “गे ठीक निसाफ पने। ठीक गेय पने। रोइक्वा पुंडसीशो आन कली मरिम्शो पाइब आन गुड रे प्रोनीन। अर्को रागी डा मुर, रोम रोइक्च नु आन वोंइश बेक्शो मीश मुर आन कली मरिम्शो मपने। मिनू एको रागीम मारेड दोस मताइब आन हुश मशाइक्पतीन। येरमीया २१:१२
- 4 मारदे हना गेपुकीम थमा पा एको आं लोत्र पाइतीनी हना, एको दरवार डा ठेयब लाप्चो रे पा ओवत्रशा, दाऊद आ नित्तीकेम निप्ब पिप गेना हना यो बाकब। मेको बग्गी नु शाराम जाक्शा, मेको आ गेय पाइब मुरपुकी नु अरु मुरपुकी नु ओवत्रब”। येरमीया १७:२३
- 5 तन्न गेपुकीम एको आं लोत्र मपाइतीनी हना, परमप्रभु यावेम “गो आं नेमी कसम जशा, एको दरवार क्याम्नुड” दे मतो ” दैत। १राजा ९:८
- 6 मारदे हना यहूदा डा पिप आ दरवार आ पर्वम परमप्रभु यावेमी “गे आं कली गिलाद नु लेबानोन डा डांडा खोदेशो बाक्नेवे। गो इ कली गोरशो रागी नु मुर मबाक्शो सहर खोदेशो सेल्लुड, दे कसम जाता।
- 7 गो इ कली या कुरशा, खतम सेल्ब आन कली ठीक पाइनुड। मेकोपुकीम इ नेल्ल क्येडा रिम्शो लाइरशो लेबानोन डा रवा तिन्नीम। मिनू मीम हुन्नीम।
- 8 मिनू शुश रागी रागी डा मुरपुकी एको सहर रे पा लाइनीम। मिनू मेको नेल्लेमी ‘परमप्रभु यावेम, मारदे एको ठेयब सहर कली ओदेशो पवा?’ देमुडनीम।
- 9 मिनू मेको आन कली ‘मारदे हना मेकोपुकीमी परमप्रभु यावे, आन परमप्रभु आ कबल पशो प्रोंइशा, देवी देवता आन कली पूजा पा, मेको आन कली गेय पाप्तेक्म’ देशा लोत्र लेत्वा पुंडसीनी” देनीम।
- 10 बेक्शा लशो आन पर्वम मडाक्कीन। मेको आन पर्वम रोंका मपने। मेको क्येडा यो ग्याइरशा लाइरशो मुर आन पर्वम डाक्कीन। मारदे हना मेको गेनायो मलेप्ब। मेकोमी आ रागी गेनायो मताइब। २राजा २३:२९-३४

पिप शाल्लुम आ पर्वम लोत्र

- 11 परमप्रभु यावेम यहूदा डा पिप योसीयाह आ तौ शाल्लुम आ पर्वम लोत्र पाइब। मेको आ आफ आ पा डा यहूदा डा पिप दुम्त। मिनू मुल मेको एकर रे लत। मेको एक लेरशा मजाक्ब। शाल्लुम कली योआहास यो देनीम। १इतिहास ३:१५; २इतिहास ३६:१-४

12 मेको कली तेको रागीम ग्याइश्शा लदमे। मेको मेक उइ बेक्ब। मेकोमी एको रागी लेंशा गेनायो मताइब।

13 “आबी, आबी, सुमी पाप पतीकेमी आ खिं सेल्बा, सुम आ खिं डा आइक्था डा कोठा ठीक मपतीकेमी सेल्बा, मेकोमी आ नेक्था डा मुर आन कली मोशा गेय पपाइक्ब। मिनु मेको आन कली आन गेय पशो डा गाल्च मगेब। २राजा २४:१४; मीका ३:१०; लेवी १९:१३; याकूब ५:४

14 मेकोमी ‘गो आं कली तला तार शुश ठेयब कोठा पाइश्शो खिं का सेल्लुड’ देंब। मेकोमी झेलपुकी सेल्ब। मेको कली लेबानोन डा लाइश्शो रवा आ शीम क्येप्शा, मेको कली लल रड खेक्ब।

15 मार, गे पिप नवे? मारदे हना गे गारो नेल्ल बोल्यो शीम क्येप्नेवे? इ आफ नु जचा तूचा थोत्रक बाक्त। मेकोमी ठीक निसाफ नु ठीक गेय पाप्तु। मिनु मेको कली रिम्शोन दुम्त।

16 मेकोमी पुडग नु मारेइ मशीब आन कली ठीक निसाफ पाप्तु। मिनु मेको कली रिम्शोन दुम्त। मेको आं कली तुडक्ब मुरुम पाइनीम” दे परमप्रभु यावेम देंत।

17 तन्न इ मिक्च नु इ थुंम ठीक पा मचेम्शो क्येठ ला बाक्ब। गे दोस मताइब आन हुश शाइक्पाइक्नेवे। गे मुर आन कली दिप्शा हुश खाक्श पोक्नेवे। मरिम्शो पचा नु रोइक्चा ला दाक्नेवे।

18 मोपतीके परमप्रभु यावेम “यहूदा डा पिप योसीयाह आ तौ येहो-याकीम आ पर्वम ‘आबी, मुरपुकीमी मेको आ पर्वम रोंका पची ना आं लोकब, आबी, आ समी मदेनीम’ मेको आ पर्वम मडाक्नीम। मिनु ‘आबी, आं प्रभु, आबी, मान ताइब पिप’ दे मेको आ पर्वम मडाक्नीमी। २राजा २३:३४

19 मेको कली गधा का थिम्शो खोदेशो पा, कीशा लाइश्शा यरूसलेम डा ठेयब लाप्चो आ डोंइती गुंइशा ताइक्नीम” देंत। येरमीया ३६:३०

20 लेबानोनम लशा ठेयब सेंदा पा ग्रीडो। इ सेंदा बाशानम नेंपाइक्मी। अबारीम पहाड रे ठेयब सेंदा पा ग्रीडो। मारदे हना इ दाक्शो मुर नेल्ल बेक्तेक्म।

21 गे रिम्शो पा बाक्डेनु, गो इ कली लोत्र पाता। तन्न गे “गो मेको मनेनुड” देंते। गे ठिटा बाक्डे ना रेन मोदेशो बाक्ते। गे आं देशो मटिवी।

22 इ गोठला नेल्ल आन कली फशेम बेर पाइश्शा योल्ब। मिनु इ वारच नेल्ल ग्याइश्शा लाइक्चा पुंइसीनीम। मेना गे इ मरिम्शो गेयम पतीके मुने दोक्शा, आमाइ, मेको श्येत नेल्ल परमप्रभु यावे आ अरेशो मटितीके दुम्शो बाक्ब।

23 लेबानोनम बाक्ब मुर, लेबानोन डा लाइश्शो रवा आन दातेमी खिं सेल्ब मुरपुकी, श्येत नु सुत्केरी रोइ पशो खोदेशो दुम्तीनी हना, दोपा हुकयी पाइनीनी।

24 परमप्रभु यावेम “गो दोपा ब्रोंइशा बाक्डा, मोपा यहूदा डा पिप येहो-याकीम आ तौ कोन्याह माइश्शो येहो-याकीम कली ‘गो आं ग्युरा गुड डा छाप थोक्तीक औंठी नवे हना, गो इ कली गुंइशा ताइक्तन वा।कोन्याह कली योयाकीम यो देंनीम। २राजा २४:८-१६; येरमीया २४:१

25 गो इ कली साइक्चा माल्ब मुर आन गुडम गेनन। गे मेको आन कली तशा हिनेवे। गो इ कली मेको बेबीलोन डा पिप नेबुकदरेसर नु कल्दी आन गुडम गेनन।

26 गो गे नु इ कली जरमेब इ ममा इस कली अर्को रागीम ताइक्नन्सी। मिनु गे निम्फा मेकेर बेक्नीसी।

27 तन्न मेको आस लेत्वा माल्शो रागीम, लेत्वा मताइनीस।

28 मार, एको कोन्याह माइश्शो मुर सुडम मदाक्शो ब्रोल्लो ग्योब खोदेशो बाक्बा डा? मेको मोदेशो ग्योब कली सुडम ममाल्नीम। मोपतीके मेको नु मेको आ आल आन मतुइश्शो रागीम ताइक्चा पुंइसीनीमी?” देंत। कोन्याह माइश्शो येहो-याकीम आ तौ कली येकोन्याह यो देंनीम। येरमीया २४:१

29 ए रागी, रागी डा मुर नेल्ल, परमप्रभु यावे आ लोत्र नेनीन।

30 परमप्रभु यावेमी “मेको मुर आ नें क्याम्सीब, दे ब्रेक्शा वोतो। मेको मुर बाक्म सम्म मारेइ पने मचाप्ब। मेको आल मपाइश्शो मुर दुम्ब। मारदे हना मेको के तेकोइ मुर रिम्शो मदुम्नीम। मेको आ चच युइ दाऊद आ नित्तीकेम नित्चा मताइनीम। मेकोपुकीमी यहूदा आ नित्तीकेम निश्शा हुकुम पचा मताइनीम” देंत। १इतिहास ३:१७-२४

## 23

मरिम्शो गोठला आन पर्वम लोत्र

1 परमप्रभु यावेमी “आबी, गे आं भेडा आन कली एर ओंथ ब्रपाइक्ब गोठला” देंत। इजीकीएल १४:५; येरमीया १०:२१; जकरिया ११:५

2 मोपतीके परमप्रभु यावे, इस्राएली आन परमप्रभुमी आ मुर आन कली योत्रब गोठला आन पर्वम “गेपुकीम आं बगाल आन कली फ्राइतीनी। मिनु मेको आन कली खेरतीनी। मेको आन कली मकोत्रनी। मोपतीके गो इन मरिम्शो पशो आ पर्वम कोत्रनुड। इन कली सजाइ गेनुड” दे परमप्रभु यावेमी देंत।

3 परमप्रभु यावेमी “गो आं लीशो बगाल नेल्ल आन कली इन खेरशो रागी रे खुप्शा लेशशा, आन बगालम चाक्नुडमी। मिनु मेकोपुकी मेकेर सोशा बोशा शुश दुम्नीम।

4 गो मेको आन कली योत्रब गोठलापुकी वोइक्नुडमी। मिनु मेको आन कली योत्रनीम। मेना भेडा महिनीम। सुर्ता मपाइनीम। मेको आन दाते डा का यो मजामीम” दे परमप्रभु यावेमी देंत। येरमीया ३:१५

5 परमप्रभु यावेम “गो दाऊद आ मुर रे ठीक पाइब राशी का वापाइक्नुड। मेको नाक्त थमा पा जाक्ना जाक्न बाक्ब। पिप कामी आ जोक्तीक तुइक्तीकेम सासन पाइब। मिनु मेकोमी आ रागीमी ठीक निसाफ नु ठीक गेय पाइब। जकरिया ३:८; यसैया ३२:१

6 मेकोम ससन पवा ना यहूदा श्येत रे प्रॉइचा पुंडसीब। मिनु इस्राएल मारेड मद्दुश्थु बाक्ब। मेको आ नेंम मेकोपुकी तुडक्चा पुंडसीनीमी। मेको आ नें 'परमप्रभु यावे आंड कली ठीक पाडब बाक्ब' देंनीम" देंत। ब्यवस्था ३३:२८; येरमीया ३३:१६; यसैया ४५:२४

7 मिनु परमप्रभु यावेमी "परमप्रभु यावे ब्रोइशा बाक्शो खोदेंशो नु मुर आन कली इजीप्त रागी रे गुंडशा एक चाक्शो मदेतीक नाक्ती थमा पा जाक्नीम।

8 तन्न मार देंनीम देंशा हना, मेकोपुकीमी 'परमप्रभु यावे ब्रोइशा बाक्शो खोदेंशो नु इस्राएली आन चच युड आन कली उत्तर डा रागी नु तेको तेको रागी रे चाक्शो' देंनीम। मारदे हना मेको आन रागीम बाक्चा ताडनीम" देंत। येरमीया १६:१४-१५

दूली लोत्र पाडब  
इजीकीएल १३:२-१६

9 परमप्रभु यावेम आ लोत्र पाडब आन पर्वम लोत्र पशो बाक्ब। मेको नेंशा आं थुं जिक्त। आं रुश नेल्ल खिंखि पाडनीम। गो दुक्शो मुर खोदेंशो दुम्ती। गो अडगुर शांबु शुश तूशा दुक्शो खोदेंशो दुम्ती। गो परमप्रभु यावे आ पर्वम नु आ लोत्र आ पर्वम मोदेंशो दुम्ती।

10 मारदे हना एको रागी तेल्लेम पतीकेम व्रीशो बाक्ब। सराप रतीके, रागीम रोंका पाडब। मुर मबाक्तीके बस्तु योत्रतीके सोत्रतेक्म। परमप्रभु यावे आ लोत्र पाडब आन पतीके काड मरिश्शो बाक्ब। आन सक्ति दूली पा चलेनीम। येरमीया १२:४

11 परमप्रभु यावेमी "आं लोत्र पाडब नु चढेब नेल्ल आं कली ममानेब दुम्तेक्म। मेकोपुकीमी आं खिंमी यो आं अरेशो लोत्र मटीनीम। येरमीया ५:३१

12 मोपतीके मेको आन लां छिडछिड दुम्शा ग्रेक्ब दुम्ब। मिनु मेकोपुकी मेकेर गाक्मानु, ग्रेक्शा गोल्नीम। मारदे हना गो मेको आन कली सजाड ततीक बर्सम ठेयब श्येत गेनुड। येरमीया १३:१६; बजन संग्रह ३५:६

13 गो सामरीया डा आं लोत्र पाडब आन दातेमी ग्रांरा दिशो गेय ताता। मेकोपुकीमी बाल देवता आ नेंम नोले दुम्ब लोत्र पांम्तेक्म। मिनु आं मुर इस्राएली आन कली हेंथे लां खोडक्पाडक्तेक्म। ब्यवस्था १८:२०-२२; यसैया १:१०; इजीकीएल १३:२३

14 तन्न यरूसलेम डा आं लोत्र पाडब आन दातेम सामरीया क्येडा यो ग्रांरा दिचा डा गेय ताता। मेकोपुकीम तेल्लेम पशा जोल ला पाडनीम। मरिश्शो पाडब आन कली बोल्यो सेल्नीम। मोपतीके सुड मुर परमप्रभु यावे आ अरेशो मटितीक रे मलेत्नीम। मेको नेल्ल आं कली सोदोम खोदेंशो नु यरूसलेम डा मुरपुकी चहिं गोमोरा खोदेंशो दुम्तेक्म" दे परमप्रभु यावेमी देंत।

15 मोपतीके मुर नेल्ल आन परमप्रभु यावेम आ लोत्र पाडब आन पर्वम "गो मेको आन कली कशो थोत्रक उम्नुडमी। मिनु तूचा कली बीस ब्वाइशो ब्वाक्कु तूचा गेनुडमी। मारदे हना यरूसलेम डा परमप्रभु यावे आ लोत्र पाडब रेन रागी नेल्लेम परमप्रभु यावे कली थमा मसुइशो बाक्नीम" देंत। येरमीया ९:१५

16 मुर नेल्ल आन परमप्रभु यावेम "गेपुकी आं लोत्र पाडब आन लोत्र मनेनीन। मेकोपुकीमी जोल लोत्र पा इन कली हेंथे गाक्पाडक्नीम। परमप्रभु यावे आ लोत्र ममाड, तन्न आन थुंम मिश्शो लोत्र नु आन डोमु तशो ना डा लोत्र शेंनीम। आन खकटा थुं कली खोइशो गाक्ब आन कली 'गे ठेयब श्येत मताडनीनी' देंनीम। येरमीया ६:१३-१४; येरमीया १४:१४

17 मेकोपुकीम आं लोत्र मदाक्ब आन कली गेना हना यो 'परमप्रभु यावे इन कली थुं नाइशशा बाक्तीक दुम्ब' देंनीम। मिनु मेकोपुकीम मटिथु आन थुं डा मिश्शोम गाक्ब आन कली 'इन कली मारेड हिंचा डा श्येत मद्दुम्ब' देंनीम।

18 तन्न सु परमप्रभु यावे आ लोत्र नेंचा नु रुप्या कली मेको आ अर्ती गेतीकेम बाक्म डा? सुम मेको आ लोत्र शेंचा कली नोफा दाइशशा नेंशो बाक्म डा?

19 कोत्रडीन परमप्रभु यावे आ गाइशशो फश गिवार खोदेंशो पा बोक्ब। परमप्रभु यावे आ अरेशो लोत्र मटीब आन पियामी फश गिवार जुक्ब।

20 परमप्रभु यावे आ गाइशशो मलेप्ब। आ मिश्शो नेल्ल पने थुमा नोले ला लेप्ब। नोले डा नाक्ती एको लोत्र रिश्शो पा रुप्नीनी।

21 मेको आं लोत्र पाडब आन कली गो मसोइक्तुमी। मो हना यो मेकोपुकी आन लोत्र कुरशा दोरशा लांम्तेक्म। गो मेकोपुकी नु लोत्र मपड। मो हना यो मेकोपुकीमी लोत्र पांम्तेक्म। येरमीया १४:१४

22 मेकोपुकी आं अर्ती गेतीकेमी बाक्शो हना, मेकोपुकीमी आं मुर आन कली आं लोत्र नेंचा डा पा देंम वा। मिनु मेको आन कली आन मरिश्शो लां नु आन मरिश्शो गेय रे लेत्तेक्म वा" देंत।

23 परमप्रभु यावेम "मार, गो नेक्था डा ला परमप्रभु यावे नडा डा? डोन डा चहिं परमप्रभु मनडा डा?

24 मिनु मुर आं डोइती रे खुइशशा बाक्ने चाप्नीमी डा? मिनु गो मेको आन कली तने मचाप्नुडमी डा? मार, सरीड नु रागी निम्फा कली गो प्रिने मचाप्नुडा डा?" दे परमप्रभु यावेमी देंत। बजन संग्रह १३९:७-१६

25 मिनु मेकोमी "गो आं नेंमी जोल पाडब आन लोत्र नेंता। गो डोमु ताता। गो डोमु ताता।

26 गेना सम्म मोदेंशो दुम्बा? मेको आं लोत्र पाडब आन थुं गेना आं गे लेप्बा? मेको जोल पाडब आम थुं डा दूली लोत्र पाडबपुकी गेना आं गे लेत्नीमी।

27 मेकोपुकीमी आन डोमु आन पर्वम लोत्र पा आं नें प्रेपाइक्चा माल्नीम। आन किक्की पिपी खोदेंशो पा आं नें आ पा डा बाल आ नें ठेयब सेल्शा, आन डोमु डा लोत्र शेंमुम्तेक्म। न्यायाधीस ३:७



28 सुइ आं लोत्र पाइबम डोमु ताप्तु हना, आ डोमु शोत्रडल। तन्न सुइ नु आं लोत्र बाक्त हना, मेकोमी थमा पा आं लोत्र शेंदल। पराल नु चेरब मगारनीस” दैत।

29 परमप्रभु यावेमी “मार, आं लोत्र मी खोदेशो मबाकबा डा? मेको सेरथे फुल्लु कली प्रोल्ब घन खोदेशो मबाकबा डा?” दे परमप्रभु यावेमी दैत। हिब्रू ४:१२

30 मिनु परमप्रभु यावेमी “कोत्रडीन, गो मेको आन कली देशो लोत्र खोदेशो पा, मेकोपुकीमी अरु आन कली देशो आं लोत्र आम के सेल्शा, खुइ पा शेंनीम। मोदेशो पा आं लोत्र पाइब आन कली काइ मदाक्नुड।

31 कोत्रडीन, मेकोपुकीमी आम थुं डा लोत्र पशा ‘परमप्रभु यावे आ लोत्र बाकब’ देंनीम। गो मोदेशो लोत्र पाइब आन कली काइ मदाक्नुड।

32 कोत्रडीन, मेकोपुकी जोल पा डोमु डा लोत्र पाइब बाक्नीम। गो मोदेशो पा आं लोत्र पाइब आन कली काइ मदाक्नुड। मेको आन जोल शेंतीकेमी आं मुर आन कली हेंथे लां खोइक्पाइक्नीम। मेकोपुकी काइ महिब बाक्नीम। गो मेको आन कली मसोइक्तुमी। गो मेको आन कली मयोत्रडुमी। मोपतीके मेको आन लोत्र मुर आन कली शोर गाक्शो बाकब” दे परमप्रभु यावेमी दैत। येरमीया १४:१४

जोल पाइब आन लोत्र

33 मिनु मुर का, आं लोत्र पाइब का कि चढेब काम इ कली “परमप्रभु यावे आ देशो श्येत लोत्र मार बाकबा?” दे इ कली हिल्लो पाप्तु हना, गे मेको कली “मेको श्येत गे बाक्नीनी” देनो। मिनु परमप्रभु यावेमी “गो इन कली ताइक्ननी, दैत, माइक्मी” दैत। २राजा ९:५५; यसेया १३:१

34 परमप्रभु यावेम “तेकोइ आं लोत्र पाइब, तेकोइ चढेब नु अरु सुइमी ‘एको परमप्रभु यावे आ देशो श्येत बाकब’ दैतेक्म हना, गो मेको आन कली नु मेको आन खिं डा मुर आन कली सजाइ गेनुइमी” दैत, दे माइक्मी।

35 मिनु इन दातेम अर्को कली “परमप्रभु यावेम मार लोत्र पवा? दे हिल्लो पचा माल्नीनी।

36 तन्न गे लेशा ‘परमप्रभु यावे आ देशो श्येत लोत्र बाकब’ मदेनीन। मारदे हना मुर नेल्ल आन पशो लोत्र श्येत दुम्ब। मोपा गेपुकीम ब्रांडशा बाकब परमप्रभु, मुर नेल्ल आन परमप्रभु यावे, इ परमप्रभु आ लोत्र दूली सेल्नीनी।

37 मिनु गे आं लोत्र पाइब नेल्ल आन कली ‘परमप्रभु यावेम इन कली मार, लोत्र लेत्ता? परमप्रभु यावेम मार लोत्र पवा?’ दे हिल्लो पचा माल्नेवे।

38 तन्न गेपुकीमी ‘एको परमप्रभु यावे आ देशो श्येत डा लोत्र बाकब’ देंनीनी। मोपतीके परमप्रभु यावेमी ‘मारदे हना गे परमप्रभु यावे आ देशो श्येत डा लोत्र बाकब’ देंतीनी। तन्न गो इन कली ‘एको परमप्रभु यावे आ देशो श्येत बाकब, मदेनीन’ देंती।

39 मोपतीके गो थमा पा इन कली क्युक्शा, आं डोंइती रे ताइक्नुड। इन कली नु इन किकी पिपी आन कली गेशो सहर पोक्शा ताइक्नुड।

40 मिनु गो इन कली गेना हना यो शिशी मपथु, गेना हना यो मुने दोक्पाइक्ननी। मेको गेना यो मप्रेंसीब” दे परमप्रभु यावेमी दैत। येरमीया २०:११

## 24

रिम्शो नु मरिम्शो फोत्रशी गेडा

1 बेबीलोन डा पिप नेबुकदरेसरमी यहूदा डा पिप येहो-याकीम आ तौ येकोन्याह, यहूदा डा पिप आ गेय पाइब, मार मार सेल्स जोक्ब नु तुप्तील आन कली यरूसलेमम ग्याइशशा बेबीलोन लदा बाक्त। मेको नोले परमप्रभु यावेमी आं कली आ खिं आ डोंइती डालो निकशी फोत्रशी गेडा कोंइताक्यी। येहो-याकीम आ नें २राजा २४:६ योयाकीन बाकब। तन्न येरमीया किताबम २२:२४ आ नें कोन्याह बाकब। मिनु येरमीया २४:१ येकोन्याह यो देंनीम। २राजा २४:१४-१६

2 मिनु डालो कामी डोंइती डा थम रिम्शो मीशो फोत्रशी गेडा बाक्तेक्म। तन्न अर्को डालोम काइ मरिम्शो फोत्रशी गेडा बाक्तेक्म। मेको जचा यो मद्मुचा डा थम मरिम्शो बाक्तेक्म।

3 मिनु परमप्रभु यावेम आं कली “येरमीया गे मार, तवी” दे माइक्ती। मिनु गो “फोत्रशी गेडा तातामी। थम रिम्शो फोत्रशी गेडा नु थम मरिम्शो फोत्रशी गेडा बाक्तेक्म। मेको मरिम्शो फोत्रशी गेडा जचा यो मद्मुचा डा बाक्नीम” देंती।

4 मिनु परमप्रभु यावेमी आं कली इजीकीएल ११:१४-२१

5 परमप्रभु यावे, इस्त्राएली आन परमप्रभुमी “मेको रिम्शो फोत्रशी गेडा खोदेशो पा, गो यहूदा रे बेबीलोन रागीम ग्याइशशा लाइक्चा पुंडुसीशो आन कली मिम्नुड। गो मेको आन कली एकेर रे कल्दी आन रागीम सोइक्ताक्ड।

6 गो मेको आन कली रिम्शो दुम्पाइक्चा कली कोत्रनुड। मिनु गो मेको आन कली एको रागीम लेशशा चाक्नुडमी। गो मेको आन थुं बारपाइक्नुडमी। आन थुं लुकच मलपाइक्नुडमी। गो मेको आन कली खुम्नुडमी। मतलुडमी। येरमीया १:१०; येरमीया ३१:२८

7 मिनु गो मेको आन कली ‘गो परमप्रभु यावे नड’ दे आं कली तुइक्तीक थुं गेनुडमी। मेकोपुकी आं मुर दुम्नीम। मिनु गो मेको आन परमप्रभु दुम्नुड। मारदे हना मेको आन थुं नेल्लेमी आं गे लेत्तीम। येरमीया ३१:३३-३४; येरमीया ७:२३

8 तन्न गो मेको जचान मद्मुचा डा काइ मदारशो फोत्रशी गेडा खोदेशो पा यहूदा डा पिप सिदकीयाह, मेको आ सरकार डा गेय पाइब, यरूसलेम डा लीशो मुरपुकी नु इजीप्त रागीमी बाकब आन कली मरिम्शो पाइनुड। २राजा २४:१७-२०; ब्यवस्था २:३१; येरमीया २९:१६-१९

9 गो मेको आन कली रागी डा राज्य नेल्लेमी शुश हिंचा डा नु काइ मरिम्शो सेल्लुड। मेको आन कली शिशी मताइब, शुक्शी लोत्र नु सराप पाइक्चा पुंडसीब सेल्लुडमी। मेको आन कली खेरशो रागी नेल्लेम मोदेंशो पाइनुडमी। १राजा ९:७  
10 गो मेको आन कली तरवार, अन्काल नु मुर बेक्तीक रोड सोडक्नुड। मेको आन कली नु आन किकी पिपी आन कली गेशो रागी रे मेको नेल्ल मबेक्मा सम्म मो पाइनुड” दे परमप्रभु यावेमी देंत।

## 25

ग्याइश्शा लाइक्चा पुंडसीब

1 मिनू परमप्रभु यावेमी येरमीया कली यहूदा डा मुर आन पर्वम लोत्र पाप्तु। मेना यहूदा डा पिप योसीयाह आ तौ येहो-याकीमपिप दुम्शो ४ बर्स दुम्मेनु, बेबीलोन डा पिप नेबुकदरेसर पिप दुम्शो बर्स का दुम्शो बाक्त। येरमीया ३६:१

2 मिनू परमप्रभु यावे आ लोत्र पाइब येरमीयामी यहूदा डा मुर नेल्ल नु यरूसलेममी बाक्ब मुर नेल्ल आन कली मेको लोत्र पाप्तु।

3 यहूदा डा पिप आमोन आ तौ योसीयाह पिप दुम्शो १३ बर्स रे मुल २३ बर्स सम्म परमप्रभु यावेमी आं कली लोत्र पना पन बाक्त। मिनू गो मेको लोत्र इन कली शेंस डा शेंस बाक्शो बाक्ती। तन्न गेपुकीम इन नोफा मदाइक्तीनी। येरमीया १:२; येरमीया ३६:२

4 मिनू परमप्रभु यावेम आ लोत्र पाइब आन कली मोदें लोत्र पथ सोइक्स डा सोइक्स पाप्तु हना यो, गेपुकीम मेको आन लोत्र मनेनी। इन नोफा मदाइक्तीनी। येरमीया ७:२५-२६; येरमीया ११:७; येरमीया २६:५; येरमीया २८:८; येरमीया २९:१९; येरमीया ४४:४; २इतिहास ३६:१५-१६

5 मेकोमी “गे नेल्ल इन मरिम्शो पशो नु परमप्रभु यावे आ अरेशो मटितीके रे लेतीन। मिनू परमप्रभु यावेम इन कली नु इन किकी पिपी आन कली गेना हना यो कली गेशो रागीम बाक्चा ताइनीनी। येरमीया ७:३

6 अर्को रागी डा देवी देवता आन कली पूजा पशा, टेयब सेल्चा कली मेको आन नोले मखोतीन। इन गुडम सेल्शोमी आं कली मगाइक्पाइय्यीनी। मिनू गो इन कली मारेड श्येत मगेनुड” देशो बाक्त।

7 परमप्रभु यावेमी “तन्न गेपुकीम आं लोत्रमी नोफा मदाइक्तीनी। इन गुडम सेल्शोमी आं कली गाइक्पाइक्तीनी। मिनू गेपुकी आंमान सजाइ ताइब सेल्सीशो बाक्नीनी” देंत।

8 मोपतीके मुर नेल्ल आन परमप्रभु यावेमी “मारदे हना गेपुकीम आं लोत्र मटिनी।

9 गो उत्तर डा जात नेल्ल नु आं गेय याइब बेबीलोन डा पिप नेबुकदरेसर कली ब्रेश्शा चाक्नुडमी। गो मेको आन कली एको रागी डा मुर नु एर ओंथ डा जात नेल्ल आन पर्वम चाक्नुडमी। मिनू गो मेको नेल्ल आन कली साइक्पाइक्नुडमी। गो मेको आन कली शुश हिंचा डा, शुक्शी पाइक्चा पुंडसीब नु शिशी मताइब सेल्लुडमी। दानीएल ३:३१-३३

10 मिनू गो मेको आन रे थुं नाइश्शा बाक्तीके, ग्येरशो सेंदा नु ग्युम्ली ग्युम्ले आन सेंदा क्याम्नुड। यात ग्रीशो नु बती आ हाम्सो नेल्ल योल्नुड। येरमीया ७:३४

11 एको रागी डा खिं नेल्ल ब्रेश्शो नु मुर मबाक्शो दुम्नीम। मिनू एको जात डा मुरपुकी ७० बर्स सम्म बेबीलोन डा पिप आ वाइल दुम्नीम। २इतिहास ३६:२१; येरमीया २९:१०; एजा १:१-२

12 तन्न ७० बर्स गाम नोले, गो बेबीलोन डा पिप नु कल्दी आन रागी कली मेको आन मरिम्शो पशो डा सजाइ गेनुड। मेको आन रागी गेना हना यो मुर मबाक्तीके सेल्लुडमी” दे परमप्रभु यावेमी देंत।

13 परमप्रभु यावेमी “मेको रागी कली आं देशो लोत्र नेल्ल, एको किताबम ब्रेक्शो लोत्र नु आं लोत्र पाइब येरमीयामी रागी रागी नेल्ल डा मुर आन कली पशो नोले दुम्ब लोत्र नेल्ल मेको रागीम मोइक्नुड।

14 मिनू रागी रागी डा मुर नु टेयब पिपमी यहूदा डा मुर आन कली वाइल सेल्नीम। गो मेको आन पशो नु आन गुडमी सेल्शो कोत्रशा, मेको आन कली क्येक्क लेत्नुडमी” देंत। येरमीया २७:७

परमप्रभु आ गाइश्शो कचौरा

15 मिनू परमप्रभु यावे, इस्राएली आन परमप्रभुमी आं कली “आं गुइ रे आं गाइश्शोमी ब्रीशो अडगुर शांबु बाक्शो कचौरा ताक्को। मिनू ड कली सोइश्शो रागी रागी डा मुर नेल्ल आन कली तूपाइक्मी। येरमीया ५१:७; यसैया ५१:१७; प्रकाश १४:१०

16 मेकोपुकीमी मेको तूशा, दिड दाड गोल्शा, मारेड मिम्ने मचाप्नीम। मारदे हना गो मेको आन दातेमी तरवार सोइक्नुड” देंत।

17 मोपतीके गो मेको कचौरा परमप्रभु यावे आ गुइ रे ताक्ता। मिनू गो परमप्रभु यावेमी सोइश्शो रागी नेल्ल नु मुर नेल्ल आन कली तूपाइक्तामी।

18 मिनू मुलाक्ती तशो खोदेंशो या यरूसलेम नु यहूदा डा सहर नेल्ल आन कली श्येत्थ नु मुर मबाक्तीके सेलो। मेकेर डा पिप नु आन सरकार आ गेय पाइब मुर खतम दुम्नीम। मेको सहर शुक्शी पाइक्चा नु सराप पाइक्चा पुंडसीब दुम्त।

19 मेको प्रोइशा यो इजीप्त डा पिप फाराओ, मेको आ गेय पाइब मुर नेल्ले, मेको आ सरकार डा मुरपुकी नु मेको आ मुर नेल्ल आन कली,

20 मेकेर बाक्ब अर्को रागी डा मुर नेल्ले, ऊज रागी डा पिप नेल्ले, पलिस्ती आन पिप नेल्ले, अश्कलोन, गाजा, एक्रोन नु अश्दोद सहरम लीशा बाक्शो मुर नेल्ल आन कली,

21 एदोम, मोआब नु अम्मोन डा मुर नेल्ल आन कली,

22 टायर नु सीदोन डा पिप नेल्ले, समुन्द्र आइक्वी हांबु डा पिप नेल्ल आन कली,

- 23 देदान, तेमा, बूज नु आन चां एर ओथ खोइक्ब नेल्ल आन कली, येरमीया ९:२५
- 24 अराब रागी डा पिप नेल्ल, गोरशो रागीम बाक्ब अर्को रागी डा मुर आन पिप नेल्ल आन कली,
- 25 जिम्री डा पिप, एलाम डा पिप नु मादी डा पिप नेल्ल आन कली,
- 26 मिनु उत्तर गे आ नेक्था नु डोन बाक्ब पिप नेल्ल आन कली का का पा तूपाइक्तामी। मिनु नोले अर्को रागीम बाक्बो राज्य नेल्ल डा मुर आन कली तूपाइक्तामी। मिनु मेको नेल्ल आन नोले शेशाक डा पिपमी यो मेको तूचा माल्ब। शेशाक बेबीलोन आ अर्को नें बाक्ब। येरमीया ५१:४१
- 27 मिनु नोले गे मेको आन कली “मुर नेल्ल आन परमप्रभु यावे, इस्राएली आन परमप्रभुमी मार देत देशा हना ‘गे मेको तूचा दुक्शा मेने। मिनु गेना यो मबोक्चा डा पा गोलीन। गो इन दातेम सोइशो तरवार आ परबम मो दुम्ब’ दे माइक्मी।
- 28 तन्न मेकोपुकीमी इ गुड रे मेको कचौरा तूने मबिस्साक्म हना, गे मेको आन कली मुर नेल्ल आन परमप्रभु यावेमी ‘गेपुकीम मेको तूचान माल्नीनी’ देशो बाक्ब” दे माइक्मी।
- 29 मेकोमी “कोव्रडीन, मुल गो आं नेंम वोइशो सहर कली श्येत गेचा चिक्शो बाक्नुड। मिनु मार, गेपुकी चहिं सजाइ मतथु ब्रोइनीनी डा? इन कली सजाइ मगेथु मप्रोइसीब। मारदे हना गो रागीम बाक्ब मुर नेल्ल आन परबम तरवार का ठीक पशो बाक्ती, दे मुर नेल्ल आन परमप्रभु यावेमी देत” दे माइक्मी। इजीकीएल ९:६; १पत्रुस ४:१७; येरमीया ४९:१२
- 30 परमप्रभु यावेमी “मुल गे मेको नेल्ल आन परबम एको आं लोव्र पावो। मेको आन कली ‘परमप्रभु यावे इर आ बाक्तीक रे ब्वाक्ब। आ बाक्तीक रे आ सेंदा गुंडब। मिनु आंम रागी आ परबम मेको ठेयब सेंदा पा ब्वाक्ब। रागीम बाक्ब नेल्ल आन परबम अडगुर खाक्ब खोदेशो पा ग्रीब। होसे ११:१०; योएल ४:१६; आमोस १:२
- 31 मेको रेयके पा, थोप्ला दाइशो, रागी डा सुर सम्म नेंसीब। मारदे हना परमप्रभु यावेम रागी रागी आन कली दोस गेब। मिनु मेकोमी मुर नेल्ल आन कली निसाफ पाइब। मिनु दोस ताइब तरवारम क्योरचा पुंडसीनीम’ दे माइक्मी” देत।
- 32 मुर नेल्ल आन परमप्रभु यावेमी “कोव्रडीन शुश श्येत दुम्तीक रागी का रे अर्को रागी सम्म ब्रना ब्रन लाइब। रागी आ सुर रे हिंचा डा फश गिवार जाक्ना जाक्न बाक्ब” देत।
- 33 मेको नाक्ती परमप्रभु यावे आ साइशोपुकी रागी आ सुर का रे अर्को सुर सम्म बाक्नीम। मेको आन परबम सुइ रोक मपाइनीम। मेको बेक्शो मुर आन कली सुइमी खुप्शा मथिन्मीम। मेको आन कली सुइम मथिन्मीम। मेकोपुकी खपीम मोव्रल खोदेशो दुम्नीम। येरमीया ९:२१
- 34 गे गोठलापुकी रोक पावे। मिनु वाइ ब्रेशरा डाक्कीन। गे मेको बगाल डा लां कोंइबपुकी पुलुम दिड दाड गोलीन। मारदे हना इन कली क्योरशा साइक्तीक नाक्त जाक्शो बाक्ब। गेपुकी गोल्नीनी। मिनु शुश क्येट लाइब ग्योब खोदेशो पा प्रोल्चा पुंडसीनीनी। येरमीया २३:१
- 35 गोठला आन कली प्रोक्तीक तेड मबाक्ब। बगाल डा लां कोंइब आन ब्रोइतीक लां तेड मबाक्ब।
- 36 गोठला आन डाक्शो नेनीन। बगाल आन कली लां कोंइब आन हिंमा क्येम्स पशो नेनीन। मारदे हना परमप्रभु यावेम मेको आन बस्तु योव्रतीके क्याम्चा चिक्शो बाक्ब।
- 37 परमप्रभु यावे आ ठेयब पा गाइशोम मेको रिम्शो बस्तु योव्रतीके खतम दुम्नीम।
- 38 गुप्सम खोदेशो पा मेकोमी आ बाक्तीके प्रोइतु। मारदे हना मेको आन रागी साइक्ब तरवार नु परमप्रभु आ गाइक्तीक आ परबम मुर मबाक्तीके दुम्त। येरमीया ४:७

## 26

येरमीया कली हिंच कोंइशो  
येरमीया ७:-

- 1 यहूदा डा पिप योसीयाह आ तौ येहो-याकीममी सासन पवा आ डोंइती डा बर्सम परमप्रभु यावेमी आं कली लोव्र पापतु। २राजा २३:३४-३७
- 2 परमप्रभु यावेमी मार देत, देशा हना “आं खिं डा लाइगाम रपो। मिनु आं कली ठेयब सेल्चा कली जाक्ब यहूदा सहर डा मुर नेल्ल आन कली गो इ कली देशो लोव्र नेल्ल मेको आन कली देनो। लोव्र का यो मफेवो।
- 3 मिनु मेको नेंशा, मेको नेल्ल आन मरिम्शो लां रे लेल्नीमी, कों? मिनु मेको आन मरिम्शो पशो आ परबम मेको आन कली ठेयब श्येत चाक्तीक रे आं थुं फाइक्नुडा, कों? गो मेको आन तार चाक्चशो खतम दुम्तीक मचाक्नुडा, कों? येरमीया १८:८; येरमीया ३६:३
- 4 गेमी मेको आन कली ‘परमप्रभु यावेम आं लोव्र मार बाक्ब देशा हना, गे आं लोव्र पशो नोफा दाइशरा मनेंतीनी हना, गो इन डोंइती वोइशो आं अरेशो मपाइतीनी हना,
- 5 गो गेना हना यो इन बाक्तीकेम सोइशो आं गेय पाइब, आं लोव्र पाइब आन लोव्र नोफा दाइशरा मनेंतीनी हना, गेपुकीम मेको रिम्शो पा मनेशो बाक्तीनी हना, येरमीया २५:४
- 6 गो मेको खिं कली शिलो खोदेशो सेल्नुड। मिनु मेको सहर कली रागी नेल्ल डा मुर नेल्ल आन दातेमी सराप राइब सेल्नुड’ देनो” देत। २राजा २५:९; येरमीया ७:१२
- 7 मिनु चढेबपुकी, परमप्रभु यावे आ लोव्र पाइबपुकी नु मुर नेल्लेमी परमप्रभु यावे आ खिं येरमीयामी देशो लोव्र नेंतेक्म।
- 8 मिनु परमप्रभु यावे आ अरेशो लोव्र नेल्ल, येरमीयाम मुर नेल्ल आन कली नेंपाइक्ने थुमा चोटी चढेबपुकी, परमप्रभु यावे आ लोव्र पाइबपुकी नु मुर नेल्लेम मेको कली ग्याइशरा “गे साइक्चान पुंडसीनेव।

9 गे मारदे परमप्रभु यावे आ नेम लोत्र पा 'एको खिं शिलो खोदेशो दुम्ब। मिनु एको सहर चहिं श्येत्थ नु मुर मबाक्तीके दुम्ब' देने" देशा, परमप्रभु यावे आ खिंम येरमीया आ एर ओथ मरिक्शी पा मुर देल्लेक्म।

10 मिनु यहूदा डा सरकार आ गेय पाडब मुरपुकीम मेको लोत्र नेशा, मेकोपुकी पिप आ खिं रे परमप्रभु यावे आ खिंम जाक्तेक्म। मिनु परमप्रभु यावे आ खिं डा नक लाप्चो आ डोंइती बाक्तेक्म।

11 मिनु चढेबपुकी नु परमप्रभु यावे आ लोत्र पाडबपुकीम, सरकार आ गेय पाडब मुरपुकी नु मुर नेल्ल आन कली "एको मुर कली साडक्चान मालब। मारदे हना एकोमी एको सहर आ पबंम मरिम्शो पा परमप्रभु यावे आ लोत्र पाप्तु। मेको गेपुकीम आंमा यो नेंतीनी" देतेक्म। प्रेरित ६:१३

12 मिनु येरमीयामी सरकार आ गेय पाडब नु अरु मुर नेल्ल आन कली "परमप्रभु यावेम आं कली एको खिं नु एको सहर आ पबंम इन नेशो लोत्र पचा कली सोइश्शो बाक्ब।

13 मुल गेपुकीम इन पतीक नु इन गेय रिम्शो सेलीन। मिनु आंम परमप्रभु यावे, इन परमप्रभु आ अरेशो टिने। मिनु परमप्रभु यावेम इन कली खतम पोक्तीक रे आ थुं लेप्ब। येरमीया ७:३

14 गो इन गुडम बाक्शो बाक्नुड। इन कली मार रिम्शो नु ठीक दुम्बा, मेको पाइय्वीनी।

15 तन्न गे एको तुडक्तीन। गेपुकीम आं कली साडक्तीनी हना, आंम इन तारी, एको सहर तारी नु एकेर बाक्ब आन तारी दोस मताडब मुर का आ हुश शाडक्पाइश्शो दोस चाक्नीनी। मारदे हना परमप्रभु यावेम इन कली एको लोत्र नेल्ल नेंपाडक्चा कली आं कली सोइश्शो बाक्त" देत। प्रस्थान २३:७; मत्ती २७:४, २५

16 मिनु सरकार आ गेय पाडब मुर नु अरु मुर नेल्लेम, चढेबपुकी नु परमप्रभु यावे आ लोत्र पाडब आन कली "एको मुर साडक्चा पुंडसीचा डा मुर ममाड। एको मुरुम इं कली परमप्रभु यावे, इं परमप्रभु आ नेम एको लोत्र नेंपाडक्कु" देतेक्म।

17 मिनु मेको रागी डा शेंब खाल्पा का निक्शी बोक्शा, मेको देल्शा बाक्शो मुर आन कली

18 "यहूदा डा पिप हिज्कीयाह आ पालाम मोरेशेथ डा मीकाहम परमप्रभु यावे आ लोत्र पशो बाक्त। मेकोमी यहूदा डा मुर नेल्ल आन कली 'मुर नेल्ल आन परमप्रभु यावेम सियोन कली रू खोदेशो पा वाक्सीब। यरूसलेम चहिं फुल्लु तेल्लो खोदेशो दुम्ब। परमप्रभु यावे आ खिं चहिं रवापुकी वाशा सुम्शो डांडा खोदेशो दुम्ब' देशो बाक्त" देतेक्म। मीका १:१; मीका ३:१२; येरमीया ९:१०

19 मिनु मेकोपुकीमी "मार, यहूदा डा पिप हिज्कीयाह नु यहूदा डा अरु सुड मुरुम मेको कली सदमे डा? मिनु मार, परमप्रभु यावे क्येडा हिंशा हिज्कीयाहम मेको आ शिशी ममला डा? मिनु परमप्रभु यावेम मेको आन तार चाक्चशो खतम पोक्तीक रे आ थुं मलेत्ता डा? तन्न गोपुकीम आंम इं तार टेयब खतम दुम्तीक चाक्चा चिक्शो बाक्तय" देतेक्म। येरमीया १८:८

20 मेकोपुकी नु अर्को मुर का यो बाक्त। मेकोमी परमप्रभु यावे आ नेमी लोत्र पाप्तु। मेको किरयथ-यारीमम बाक्ब शेमायाह आ तौ उरीयाह बाक्त। मेकोमी यो मेको रागी नु मेको सहर आस पबंम येरमीयामी खोदेशो पा परमप्रभु यावेम मरिम्शो पचशो आ पबंम लोत्र पाप्तु। यहोसु १:५९

21 मिनु पिप येहो-याकीम नु मेको आ टेयब मुरपुकी, आ कप्तान नेल्लेम उरीयाह आ पशो लोत्र नेंतेक्म। मिनु पिपम मेको कली साडक्चा माल्लु। तन्न मेको लोत्र नेशा उरीयाह हिंत। मिनु प्रोक्शा इजीप्त रागी लत।

22 मो हना यो येहो-याकीममी आकबोर आ तौ एल्नाथान नु मेको नु अर्को मुरपुकी इजीप्त रागीम सोइक्ताक्ब।

23 मिनु मेकोपुकीमी उरीयाह कली इजीप्तर रे चाक्तेक्म। मिनु पिप येहो-याकीम आ डोंइती राप्पाइक्तेक्म। मिनु पिपम मेको कली साडक्चा कली तरवार आप्पाइक्तु। मिनु मेको आ बेक्शो रां आइक्च आइक्च मुर आन कली ताइक्तीकेम ताइक्पाइक्तु।

24 तन्न शाफान आ तौ अहीकामम मुल यो येरमीया आ पोन बोक्शा लोत्र पाप्तु। मोपतीके येरमीया साइक्पांडसीचा कली मुर आन गुडम जिम्मा गेचा मपुंडसे। २राजा २२:१२

## 27

यहूदामी नेबुकदनेसर आ गेय पशो

1 यहूदा डा पिप योसीयाह आ तौ सिदकीयाहम सासन पवा आ डोंइती डा बसंम परमप्रभु यावेम आं कली लोत्र पाप्तु। २राजा २४:१७-१८

2 परमप्रभु यावेमी मार लोत्र पाप्तु देशा हना "कुशुल के डोरी नु थरपु डा शी के जुवा का सेलो। मिनु मेको इ शु्रम लाम्सो। येरमीया २८:१०

3 मिनु यहूदा डा पिप सिदकीयाह आ बाक्तीके यरूसलेममी जाक्ब लोत्र कुरब आन कली एदोम, मोआब, अम्मोन, टायर नु सीदोन डा पिप आन बाक्तीकेम मेको लोत्र सोइक्तीमी। येरमीया २५:२१-२२

4 मेको आन होत्रप आन कली एको लोत्र पा 'मुर नेल्ल आन परमप्रभु यावे इस्त्राएली आन परमप्रभुम गेपुकीम इन होत्रप आन कली

5 एको रागी, एको रागीम बाक्ब मुरपुकी, बस्तु भाव नु जन्तु नेल्ल आन कली आं टेयब सक्ति नु आं बोलम सेल्शो नडा। मिनु गो सु कली गेचा दाक्नुड, मेको कली गेनुड। येरमीया १२:१७

6 मुल गेपुकी नु इन रागी नेल्ल आं गेय पाडब बेबीलोन डा पिप नेबुकदनेसर आ गुडम गेता। ब्वाकी डा जन्तु आन कली यो सासन पाडब सेल्ता। येरमीया २५:९; यसेया ४५:१, ८; इजीकीएल २६:७; दानीएल २:३८

7 मेको आंम इन रागी आ रिम्शो दुम्ची मजाक्म सम्म रागी रागी नेल्ल डा मुरपुकीम मेको आ तौ नु मेको आ चच आन गेय पचा माल्नीम। मेको नोले शुश रागी नु टेयब पिपपुकीमी मेको कली आन वाइल सेल्नीम।

8 तन्न तेकोड रागी तेकोड राज्य नु पिपम बेबीलोन डा पिप नेबुकदनेसर आ वाइल दुम्चा नु मेको आ जुवा आन शुरम वोइक्ने मबिस्साक्म हना, गो मेको रागी डा मुर आन कली तरवार, अन्काल नु मुर बेक्तीक रोइम सजाइ गेनुडमी। गो मेको आन कली मसाइक्पदुमी सम्म मो पाइनुड' दे परमप्रभु यावेम देंत।

9 मोपतीके गेपुकी 'बेबीलोन डा पिप आ वाइल दुम्चा माल्नीनी' देंब, इन नोले दुम्ब लोत्र पाइबपुकी, लिंक्नु कोवबपुकी, डोमु डा लोत्र शेंबपुकी, टुना मुना नु मन्तर तन्तर पाइक्ब आन लोत्र मनेनीन। येरमीया १४:१३-१४

10 मारदे हना मेकोपुकीमी इन कली देंशो नोले दुम्ब लोत्र जोल बाक्ब। मेको लोत्र पतीके इन रागी रे डोन खेरचा पुंडसीनीनी। गो इन कली खेरनुड। मिनु गेपुकी बेक्नीनी।

11 तन्न तेको रागी आ शुर बेबीलोन डा पिप आ जुवा आगाम वोइक्बा, मेको आ वाइल दुम्बा, मेको रागी डा मुर आन कली गो आन रागीमीन दोचा कोक्चा नु बाक्चा गेनुडमी" दे परमप्रभु यावेम देंत।

12 मिनु गो मेको लोत्र यहूदा डा पिप सिदकीयाह कली देंती। मेको कली "बेबीलोन डा पिप आ जुवा इन शुरम वोतीन। मिनु मेको नु मेको आ मुर आन वाइल दुमीन। मिनु गे ब्रोंडनीनी।

13 परमप्रभु यावेम बेबीलोन डा पिप आ वाइल मडुम्ब, रागी डा मुर आन कली गे तरवार, अन्काल नु मुर बेक्तीक रोइम बेक्चा माल्नीनी। मारदे गे नु इन मुर बेक्चा दाक्नीनी?

14 गेपुकीमी 'बेबीलोन डा पिप आ वाइल दुम्चा ममाल्नीनी देंब जोल पा परमप्रभु यावे आ लोत्र पाइब आन लोत्र मनेनीन। मारदे हना मेकोपुकीमी इन कली जोल पना पन बाक्नीम' देंनीनी। येरमीया १४:१४

15 परमप्रभु यावेम 'गो मेको आन कली मसोइक्तुमी। तन्न मेकोपुकीमी आं नेंम जोल पा लोत्र पाइनीम। मेको आन लोत्र नेंतीनी हना, गो इन कली एको रागी रे खेरनन्नी। मिनु गे बेक्नीनी। गेपुकी नु इन कली जोल पा लोत्र पाइब मो दुम्नीनी' देंती" देंत।

16 मिनु गो चढेब नु मेको मुर नेल्ल आन कली "परमप्रभु यावेमी 'गेपुकी इन कली जोल पा आं लोत्र पाइब आन लोत्र मनेनीन। मेकोपुकीमी परमप्रभु यावे आ खिं डा ग्योब नु बोसपुकी रीब पा बेबीलोन रे चाक्सीब' देंनीम। मेकोपुकीमी इन कली जोल पा नोले दुम्ब लोत्र पाइनीम। येरमीया २८:३; २इतिहास ३६:१०

17 मेको आन लोत्र मनेनीन। बेबीलोन डा पिप आ वाइल दुमीने। मिनु गेपुकी ब्रोंडनीनी। मारदे गेपुकीमी एको सहर कली मुर मबाक्तीके दुम्पाइक्नीनी?

18 मेकोपुकी थमा पा परमप्रभु यावे आ लोत्र पाइब बाक्तेक्म हना नु मेकोपुकी नु परमप्रभु यावे आ लोत्र बाक्त हना, परमप्रभु यावे आ खिंम बाक्शो, यहूदा डा पिप आ खिंम बाक्शो नु यरूसलेममी बाक्शो मार मार बेबीलोन मलदमेक्ल, दे मुर नेल्ल आन परमप्रभु यावे कली पुन्मेक्ल।

19 मारदे हना मुर नेल्ल आन परमप्रभु यावेमी थाम, कांसा के ठेयब चिक्तीके बोस, मेको आ कांसा के नित्तीके नु सहरम लीशो बोस आन पबंम लोत्र पाप्तु। १ राजा ७:१५-३९; २ राजा २५:१३-१७

20 मेको बेबीलोन डा पिप नेबुकदनेसरमी यहूदा डा पिप येहो-याकीम आ तौ येकोन्याह माइशशो येकोन्याह नु यहूदा नु यरूसलेम डा ठेयब मुर नेल्ल आन कली यरूसलेम रे ग्याइशशा लदमेनु, मेको बोस मलद। येहो-याकीम आ नें २ राजा २४:६ योयाकीन बाक्ब। तन्न येरमीया किताबम २२:२४ आ नें कोन्याह बाक्ब। मिनु येरमीया २४:१ येकोन्याह यो देंतीम।

21 मिनु मुर नेल्ल आन परमप्रभु यावे, इस्राएली आन परमप्रभुमी 'आं खिंमी लीशो बोसपुकी, यहूदा डा पिप आ दरवारमी वोइशशो बोसपुकी नु यरूसलेममी प्रोंडशो ग्योबपुकी बाक्नीम।

22 मेको नेल्ल आन कली बेबीलोनम चाक्दीलीम। मिनु गो मेको आन पबंम मकोवडु सम्म मेको मेकेर बाक्चा माल्नीम' देंशो बाक्ब। मिनु 'गो मेको आन कली लेंशा लेशशा चाक्नुडमी। मिनु लेंशा आन बाक्तीकेमी वोइक्नुडमी' दे परमप्रभु यावेमी देंत" दे माइक्ती। एजा १:१, ११

## 28

हनन्याहम जोल पशो

1 मेको बर्समीन यहूदा डा पिप सिदकीयाहम सासन पशो ४ बर्स ५ महिनाम गिबोनम बाक्ब अज्जुर आ तौ परमप्रभु यावे आ लोत्र पाइब हनान्याहम परमप्रभु यावे आ खिंम चढेब नु मुर नेल्ल आन डोंडती लोत्र पा, आं कली २इतिहास १:३, १३

2 "मुर नेल्ल आन परमप्रभु यावे, इस्राएली आन परमप्रभुमी 'गो बेबीलोन डा पिप आ जुवा जिक्ता।

3 बेबीलोन डा पिप नेबुकदनेसरमी आं खिं डा मार मार नु ग्योब एकेर रे बेबीलोनम लाइशशो बाक्मे, मेको नेल्ल बर्स निकशी क्येडा डोंडती गो लेशशा एक चाक्नुडमी। येरमीया २७:१६

4 मिनु गो यहूदा डा पिप येहो-याकीम आ तौ येकोन्याह नु यहूदा रे ग्याइशशा लाइक्चा पुंडसीशो नेल्ल आन कली बेबीलोन रे चाक्नुडमी। मारदे हना गो बेबीलोन डा पिप आ जुवा जिक्शा गेनुड" दे परमप्रभु यावेमी देंत। येरमीया २७:२०

5 मिनु नोले परमप्रभु यावे आ लोत्र पाइब येरमीयाम परमप्रभु यावे आ खिंम राष्शा बाक्शो चढेब नु मुर नेल्ल आन डोंडती मेको परमप्रभु यावे आ लोत्र पाइब हनान्याह कली

6 "आमेन, परमप्रभु यावेमो पवल। परमप्रभु यावेमी इ पशो लोत्र खबल। परमप्रभु यावे आ खिं डा मार मार ग्योबपुकी नु ग्याइशशा लाइक्चा पुंडसीशो नेल्ल आन कली बेबीलोन रे लेशशा चाक्गल।

7 तन्न इ डोंडती नु मुर नेल्ल आन डोंडती नेंचा डा पा आं देंशो लोत्र नेनो।

8 गे नु गो इस डोंडती जाकब साइ डा परमप्रभु यावे आ लोत्र पाइबपुकीमी शुश रागी नु टेयब राज्य आन परबम लडाइ, अन्काल नु मुर बेक्तीक रोइ आन परबम लोत्र पावे बाकत।

9 तेको परमप्रभु यावे आ लोत्र पाइबम थुं नाइशशा बाक्तीक आ परबम लोत्र पवा, मेको आ लोत्र गाप्त हना ला, मेको थमा पा परमप्रभु यावेम सोइशशो आ लोत्र पाइब बाकब, दे तुंडसीब” दे माइकतु। ब्यवस्था १८:२१-२२

10 मिनु नोले परमप्रभु यावे आ लोत्र पाइब हनान्याहम परमप्रभु यावे आ लोत्र पाइब येरमीया आ शुर रे मेको जुवा शोलशा जिकतु।

11 मिनु हनान्याहम मुर नेल्ल आन डोंडती “परमप्रभु यावेमी मार दैत देशा हना ‘गो मोपा बर्स निक्शी क्येडा डोंडती रागी रागी डा मुर नेल्ल आन शुर रे बेबीलोन डा पिप नेबुकदनेसर आ जुवा जिकशा गेनुड’” दैत। मेना परमप्रभु यावे आ लोत्र पाइब येरमीया आ लां खोइकतु। येरमीया २९:१०

12 मिनु परमप्रभु यावे आ लोत्र पाइब हनान्याहम, परमप्रभु यावे आ लोत्र पाइब येरमीया आ शुर डा जुवा जिकशा गेवा आ इच्का नोले परमप्रभु यावेम येरमीया कली लोत्र पाप्तु।

13 मार लोत्र पाप्तु देशा हना “लशा, हनान्याह कली परमप्रभु यावेमी इ कली मार दैत देशा हना ‘गे शी के जुवा जिकतीवी। तन्न गो मेको आ पा डा फलाम के जुवा चाकनुड’ देशो बाकब मतो” दैत।

14 मिनु मुर नेल्ल आन परमप्रभु यावे, इस्राएली आन परमप्रभुमी “बेबीलोन डा पिप नेबुकदनेसर आ वाइलीम वाइल दुम्पाइक्या कली गो रागी नेल्ल डा मुर नेल्ल आन शुरम फलाम के जुवा लाफुडमी। थमा पा, मेको आ वाइलीम वाइल दुम्मीम। गो ब्वाकी डा जन्तु आन कली यो आ सासनमी गेतामी, देशो बाकब, देनो” दैत। ब्यवस्था २८:४८; येरमीया २७:६

15 मिनु परमप्रभु यावे आ लोत्र पाइब येरमीयाम, परमप्रभु यावे आ लोत्र पाइब हनान्याह कली “ए हनान्याह, नेनो। परमप्रभु यावेमी इ कली मसोइकत। मिनु गे एको मुर आन कली जोल लोत्र पा थमा सुइक्पाइशशो बाक्नेवे।

16 मोपतीके परमप्रभु यावेम ‘गो इ कली एको रागी रे तिल्या चिकशो बाकनुड। गे एको बर्सम बेक्नेवे। मारदे हना गे परमप्रभु यावे कली काइ मटिशु जोल लोत्र पाप्तीवी” दैत” दैत।

17 मिनु मेको बर्स डा ७ महिनाम जोल पा परमप्रभु यावे आ लोत्र पाइब हनान्याह बेकत।

## 29

### येरमीया आ ब्रेक्स

1 परमप्रभु यावे आ लोत्र पाइब येरमीयामी, यरूसलेम डा ग्याइशशा लाइक्या पुंडसीशो आन दाते डा ब्रोंडशा लीशो खाल्पा आन कली एको चिठी ब्रेक्शा सोइक्ताकव। बेबीलोन डा पिप नेबुकदनेसरम यरूसलेम रे चढ़ेब, परमप्रभु यावे आ लोत्र पाइब नु मुर नेल्ल आन कली ग्याइशशा बेबीलोन लाइशशो बाकत।

2 पिप येकोन्याह आ ममा, दरवार डा टेयब मुरपुकी, यहूदा नु यरूसलेम डा सरकार आ गेय पाइब, रिम्शो पा मारेइ मारेइ सेल्स जोल्ब मुर नु तुप्तीलपुकी यरूसलेम रे ग्याइशशा लाइक्या पुंडसीमा नोले मेको चिठी ब्रेक्शो बाकब। येहो-याकीम आ नें २राजा २४:६ योयाकीन बाकब। तन्न येरमीया २२:२४ आ नें कोन्याह बाकब। मिनु येरमीया २४:१ येकोन्याह यो देनीम। २राजा २४:१४-१५

3 मेकोमी मेको चिठी शाफान आ तौ एलासाह नु हिल्लीयाह आ तौ गेमारायाह आस गुडम सोइक्ताकव। मेको यहूदा डा पिप सिदकीयाहम पिप नेबुकदनेसर कली गेन, दे बेबीलोनम सोइशशो बाकत। मेको चिठीम मार ब्रेक्शो बाकत देशा हना,

4 मुर नेल्ल आन परमप्रभु यावे, इस्राएली आन परमप्रभुमी मार ब्रेक्पाइशशो बाकत, देशा हना “यरूसलेम रे बेबीलोनम ग्याइशशा लाइक्या पुंडसीशो नेल्ल आन कली

5 गेपुकी मेकेर खिं सेल्शा बाक्कीन। रूम मार मार शोकशा जने।

6 ग्युंवे पा, तमी तौ थिने। इन तौ आन कली चाइमी चाक्कीन। इन तमी आन कली ग्युंवे पा गेने। मिनु मेकोपुकीमी तमी तौ थीमेक्ल। मेकेर गेपुकी सोशा बोशा शुश दुमीन। जाम्शा मलने।

7 गो इन कली ग्याइशशा लाइक्पाइशशो सहर कली रिम्शो मिम्तीन। मिनु मेको आ परबम परमप्रभु यावे कली पुनीन। मारदे हना मेको कली रिम्शो दुम्चा इन कली यो रिम्शो दुम्चा बाकब” देशो बाकत।

8 मुर नेल्ल आन परमप्रभु यावे, इस्राएली आन परमप्रभुमी “इन दातेम बाकब परमप्रभु यावे आ लोत्र पाइबपुकी नु लिंक्यु कोत्रबपुकीम इन कली जोल पा थमा मसुइक्पदमेक्ल। आन डोमु डा लोत्र मनेनीन। येरमीया १४:१४

9 मेकोपुकीमी जोल पा आं नैमी नोले दुम्ब लोत्र पाइनीम। मेको आन कली गो मसोइकतुमी” दे परमप्रभु यावेम देशो बाकब।

10 परमप्रभु यावेमी “बेबीलोनम मो पशो ७० बर्स गाम नोले गो इन बाक्तीक जाकनुड। मिनु इन कली एको रागीम लेशशा चाकनुड, दे आं शिशी पा देशो लोत्र खानुड। येरमीया २५:११-१३

11 मारदे हना गो इन परबम शुश मिम्शो बाकनुड। गो मेको मिम्शो तुइकनुड। आं मिम्शो इन कली रिम्शो दुम्चा कली बाकब। मरिम्शो दुम्पाइक्या कली ममाइ।

12 गेपुकीम आं नेक्था जाक्शा पुंडनीनु, गो इन पुंडशो नेंनुड।

13 गेपुकीम इन थुं नेल्लेमी आं कली माल्तीनी हना, थिल्लीनी। येरमीया ३०:३; ब्यवस्था ४:२९; यसैया ५५:६

14 मिनु गो इन कली थिप्पांडसीनुड। इन जाम्शो शोंप इन कली गेनुड। गो इन कली ग्याइशशा लाइक्पाइशशो रागी नेल्ल रे खुनुड। तेको रागी रे इन कली ग्याइक्पदु, मेको रागीमी लेशशा चाक्नन्नी” दैत। येरमीया ३०:३; येरमीया ३३:२६

- 15 गेपुकीमी “परमप्रभु यावेम आंइ पबंम बेबीलोनमी आ लोत्र पाइबपुकी योव्रतु” देतीनी।
- 16 परमप्रभु यावेमी दाऊद आ निल्तीकेम निप्ब पिप नु एको सहरम बाक्ब मुर नेल्ल, इन नेक्था डा मुरपुकी नु ग्याइश्शा लाइक्चा मपुंडसीशो आन पबंम मार देंत देंशा हना,
- 17 मुर नेल्ल आन परमप्रभु यावेमी “गो मेको आन पबंम तरवार, अन्काल नु मुर बेक्तीक रोइ सोइक्नुड। मिनु गो मेको आन कली राक्शो फोव्रशी गेडा खोदेशो सेल्लुडमी। मिनु मेको थाम्पा राक्शा ब्वचा मदुम्चा डा बाक्नीम। येरमीया २४:८-१०
- 18 गो मेको आन कली तरवार, अन्काल नु बेक्चा डा रोइमी खेदा पाइनुडमी। मिनु गो मेको आन कली राज्य नेल्लेमी शुश हिंचा डा सेल्लुडमी। मेकोपुकी आं खेरशो रागी नेल्ल आन दातेमी, सराप पाइक्तीके, शुश हिंतीके, शुक्शी पाइक्तीके नु मुने तोक्तीके सेल्लुडमी। ब्यवस्था २८:३७
- 19 मारदे हना मेकोपुकीमी आं लोत्र मनेनेम। गो आं गेय नु आं लोत्र पाइब आन कली सोइक्ना सोइक्न बाक्ती हना यो मेको आन लोत्र मनेनेम” दे परमप्रभु यावेमी देंत। येरमीया २५:४
- 20 मोपतीके गे यरूसलेम रे बेबीलोनम सोइश्शो ग्याइश्शा लाइक्चा पुंडसीशो मुल परमप्रभु यावे आ लोत्र नेनीन।
- 21 मुर नेल्ल आन परमप्रभु यावे, इस्राएली आन परमप्रभुमी “कोलायाह आ तौ आहाब नु मासेयाह आ तौ सिदकीयाहम आं नेंमी जोल पाम्ताक्स। ‘गो मेको आस कली बेबीलोन डा पिप नेबुकदनेसर आ गुडमी गेनुडसी। मिनु मेकोमी इन डोंइती मेको आस कली साइक्ब।
- 22 मेको आस पतीकेन यहूदा रे बेबीलोनम ग्याइश्शा लाइक्चा पुंडसीशो आन दातेमी सराप पाइनीम। परमप्रभु यावेम इ कली सिदकीयाह नु आहाब आस कली खोदेशो सेलल। बेबीलोन डा पिप नेबुकदनेसरमी मेको आस कली मीम हुम्शो बाक्त’ देनीम।
- 23 मारदे हना मेको निक्शीमी इस्राएलम थम ग्रान्रा दिशो गेय पशो बाक्ताक्स। मेको निक्शी आस नेक्था डा मुर आन मीश नु इप्शो बाक्ताक्स। मिनु मेकोम आं मअरेशो लोत्र पाम्ताक्स। गो मेको नेल्ल तुडक्नुड। मिनु गो मेको आ सांक्छी बाक्नुड” दे परमप्रभु यावेम देंत।

शेमायाह कली लोत्र सोइश्शो

24 मिनु गे नेहेलाम डा शेमायाह कली

- 25 “मुर नेल्ल आन परमप्रभु यावे, इस्राएली आन परमप्रभुमी ‘गे इ नेंमी यरूसलेम डा मुर नेल्ल आन कली, मासेयाह, चढेब आ तौ सेफन्याह नु अरु चढेब नेल्ल आन कली चिठी ब्रेक्ताक्वी। गे सेफन्याह कली येरमीया २१:१
- 26 परमप्रभु यावेम इ कली चढेब येहो-यादा आ पा डा चढेब सेल्लु’ मोपतीके गे परमप्रभु यावे आ खिं डा टेयब मुर दुम्शा, मेको जिम्मा ताक्नेवे। गे मेकेर आन निप्स ग्राइश्शो नु जोल पा परमप्रभु यावे आ लोत्र पखु पाइब आन कली ठेंडरो थोक्शा, आन शुरम फलाम क्युक्शा वोतो। येहो-यादा कली यो-यादा यो ब्रेक्शो बाक्ब। इजीकीएल १:७; येरमीया २०:२
- 27 मिनु गे ‘इन दाते डा परमप्रभु यावे आ लोत्र पखु पाइब अनाथोथ डा येरमीया कली मारदे महइक्तीनी?’
- 28 मेकोमी बेबीलोनम आंइ कली ओदेशो लोत्र सोइक्ताक्व। गे शुश बर्स मेकेर बाक्चा माल्नीनी। मोपतीके खिं सेल्शा बाक्कीन। मिनु रूम मार मार शोक्शा जने” दे ब्रेक्शो बाक्त।
- 29 मिनु चढेब सेफन्याहम मेको चिठी पढेशा परमप्रभु यावे आ लोत्र पाइब येरमीया कली नेंपाइक्तु।
- 30 मिनु मेना परमप्रभु यावेम येरमीया कली लोत्र पाप्तु।
- 31 नेहेलाम डा शेमायाह आ पबंम मार लोत्र पाप्तु देशा हना “ग्याइश्शा लाइक्चा पुंडसीशो नेल्ल आन कली एको लोत्र सोइक्तो। शेमायाहम इन कली नोले दुम्ब लोत्र पाप्तु। तन्न गो मेको कली मसोइक्तु। मेकोमी आं लोत्र पा, इन कली जोल लोत्रमी थमा सुइक्पाइक्तु।
- 32 मोपतीके गो नेहेलाम डा शेमायाह नु मेको आ चच युड आन कली सजाइ गेनुडमी। मेको आ मुर सुइमी आं मुर रिम्शो दुम्शो तचा मताइनीम। मारदे हना मेकोमी आं कली मटिथु आं पबंम दूली लोत्र पाप्तु” दे परमप्रभु यावेमी येरमीया कली देंत।

### 30

इस्राएल कली लेंशा सेल्शो

- 1 मिनु परमप्रभु यावेम येरमीया कली लोत्र पाप्तु।
- 2 परमप्रभु यावे, इस्राएली आन परमप्रभुमी येरमीया कली मार लोत्र पाप्तु देशा हना “गो इ कली देशो लोत्र नेल्ल किताबमी ब्रेक्तो।
- 3 आं मुर इस्राएली नु यहूदा डा मुर आन थुं लेशशा नाइक्चा गेतीक नाक्त थमा पा जाक्ब। मिनु गो मेको आन किकी पिपी आन कली गेशो रागीम लेंशा लाइक्नुडमी। मिनु मेकोपुकीमी मेको रागी आंम के सेल्लनीम” देंत। येरमीया २९:१४
- 4 इस्राएल नु यहूदा आस पबंम परमप्रभु यावे आ लोत्र मार बाक्त देशा हना
- 5 “शुश हिंब नु ग्रीब आन सेंदा नेंसीब। थुं नाइश्शा बाक्तीक जाम्त।
- 6 मार, वोंइश मुरुम आल थिने चाप्नीमी डा? दे हिल्लो पने। मारदे वोंइश मुर नेल्ल सुक्केरी रोइ पशो खोदेशो पा आन गुडम आन क्रातो दिप्शो ताइनुडमी? मारदे मुर नेल्ल आन कुल बुश दुम्शो बाक्नीमी?

7 आबी, मेको नाक्त दोदेशो हिंचा डा नाक्त दुम्बा। मेको नाक्ती खोदेशो अर्को तेकोड नाक्ती मडुम्नीम। मेको नाक्ती याकूब कली शुश हिंचा डा श्येत जतीक नाक्ती दुम्बा। तन्न मेको श्येत रे प्रोंड्या पुंडसीब” देंत। योएल २:११; सेफन्याह १:१४-१५

8 मुर नेल्ल आन परमप्रभु यावेमी “गो मेको नाक्ती मेको आन बला रे जुवा जिकनुड। मिनू गो मेको आन कली फ्रेशो रे प्रोंडनुडमी। मिनू अर्को रागी डा मुरपुकीम मेको आन कली गेनायो वाडल मसेल्नीम। येरमीया २३:५; येरमीया २७:१२; इजीकीएल ३४:२३; होसे ३:५

9 तन्न मेकोपुकीम परमप्रभु यावे, आन परमप्रभु, आं कली नु आं सेल्शो पिप दाऊद आ गेय पाडनीम।

10 गे आं गेय पाडब याकूब महिनो। गे इस्राएल सुर्ता मपावो। गो इ कली डोन रागी रे चाक्नुड। इ आल आन कली ग्याइश्शा लाइश्शो रागी रे प्रोंड्या चाक्नुड। याकूब कली लेंशा थुं नाइश्शा, हेम्मा पा बाक्तीक दुम्बा। मेको कली सुडम हिंच कोडने मचाप्नीम। येरमीया ४६:२७; यसैया ४३:५-६

11 मारदे हना गो इ कली प्रोंड्या कली गे नु बाक्नुड। इन कली फ्रशा वोइश्शो रागी रागी डा मुर नेल्ल आन कली साइक्नुडमी। तन्न गो इ कली गेनायो मक्याम्नुड। गो इ कली ठीक सजाइ गेनुड। गो इ कली थमा पा सजाइ मगेथु, मप्रोंडनुड” दे परमप्रभु यावेमी देंत। येरमीया १०:२४; ब्यवस्था ८:५

12 मिनू परमप्रभु यावेम “इ गार मसाब। मेको मरिम्शो बाक्ब। येरमीया १५:१८

13 सुड इ पोन मबोक्ब। इ गार सापाइक्तीक ओरूती मबाक्ब। इ कली सापाइक्तीक मारेइ मबाक्ब।

14 इ चारच नेल्लेम इ कली प्रेने थुन्तेकम। मेकोपुकीमी इ कली गेनायो ममिम्नीम। गो इ ठेयब दोस तशो नु इ शुश पाप आ परबम पतीके जोरी सत्रुम खोदेशो पा तुप्तन। मिनू शिशी मपाइक्बम खोदेशो पा गो इ कली सजाइ गेतन।

15 मारदे गे इ मसाब गार आ परबम वाइ ब्रेशडा डाक्नेवे? इ खाइश्शो मसाब। मारदे हना इ दोस तशो नु इ शुश पाप पशो आ परबम गो इ कली मो पाइश्शो बाक्नुड।

16 मोपतीके गे इ कली दाक्ब नेल्ल दाक्चा पुंडसीनीम। इ जोरी सत्रु नेल्ल ग्याइश्शा लाइक्चा पुंडसीनीम। इ कली रोइक्बपुकी रोइक्चा पुंडसीनीम। इ कली खतम पोक्ब आन कली गो खतम पोक्नुडमी। यसैया ३३:१; इजीकीएल ३९:१०

17 गो इ कली लेंशा डोंडती डा खोदेशो मारेइ मडुम्शो सेल्नुड। मिनू इ गारपुकी सापाइक्नुडमी। मारदे हना इ कली ‘प्रोंड्या पुंडसीशो नु सुडम मिम्चा मपुंडसीशो सियोन’ देंनीम” दे परमप्रभु यावेमी देंत। येरमीया ३३:६; यसैया ५७:१८-१९

18 परमप्रभु यावेमी “गो याकूब आ ताम्बु डा शोंप लेंशा गेनुड। मिनू मेको आ बाक्तीक रागी कली शिशी पाडनुड। मेको सहर डा ब्रेशो नेल्ल आ डांडामी लेंशा सेल्सीब। मिनू आ दरवार लेंशा डोंडती डा आ बाक्तीकेमी सेल्सीब।

19 मेकेर ‘गे रिम्शो पाइब बाक्नीनी’ दे कुम्सो पशो नु थुं नाइश्शा बाक्शो ग्येरशो सेंदा नेसीब। गो मेको आन कली शुश सेल्नुडमी। मिनू मेकोपुकी इक्का का ला मडुम्नीम। गो मेको आन कली मान ताइब सेल्नुडमी। मिनू मेको आन कली सुडम शुक्शी मपाडनीम।

20 मेको आन आलपुकी डोंडती डा खोदेशोन दुम्नीम। मिनू मेको आन गुन्तीके आं डोंडती बाक्ब। मेको आन कली दिप्ब नेल्ल आन कली गो सजाइ गेनुडमी।

21 मेको आन कली हुकुम पाइब मेको आन दाते डा का दुम्बा। मेको आन कली सासन पाइब आंम आन मुर बाक्ब। गो मेको कली आं नेक्था चाक्नुड। मिनू मेको आं नेक्था जाक्ब। मारदे हना आं नेक्था आंमा सु जाक्बा डा?” दे परमप्रभु यावेमी देंत। येरमीया ३०:९

22 परमप्रभु यावेम “गे आं मुर दुम्नीनी। मिनू गो इन परमप्रभु दुम्नुड” देंत। येरमीया ७:२३

23 नेनीन, परमप्रभु यावे आ गाइश्शोम फश गिवार बोक्ब। मेको आ अरेशो मटीब आन पियाम जुक्ब। येरमीया २३:१९-२०

24 परमप्रभु यावे आ थुंम मिम्शो मगाम्म सम्म मेको आ चुरशो मनाइसीब। गेपुकीमी नोले डा नाक्ती मेको रुप्नीनी।

## 31

परमप्रभुम इस्राएल कली दाक्शो

1 परमप्रभु यावेमी “गो इस्राएली आन खिं नेल्ल डा मुर आन परमप्रभु दुम्नुड। मिनू मेकोपुकी आं मुर दुम्नीम” देशो बाक्ब। येरमीया ७:२३

2 परमप्रभु यावेमी “तरवार रे ब्रोंडशो मुरपुकीम गोरशो रागीम शिशी ताम्तेकम। इस्राएल कली नाइक्पाइक्चा दाक्ताक्व हना,

3 परमप्रभु यावे डोन आ बाक्तीके रे जाक्ब। मिनू मेकोमी ‘गो इ कली गेना हना यो लीब दाक्तीकेम दाक्ताक्व। मोपतीके गो इ कली दाक्चा मप्रोंडनुड।

4 गो इ कली लेंशा सेल्नुड। गे लेंशा सेल्चा पुंडसीनेवे। मिनू गे कन्ने मीश आल, इस्राएल, गे लेंशा इ खैजडी शेशा, ग्येरसीशोपुकी नु सिल पथ लाइनेवे।

5 गे सामरीया डा डांडा मेर लेंशा अडगुर खुम्नेवे। मेको रू डा गेय पाइबपुकीम खुम्नीम। मिनू मेको आ फल जशा ग्येरसीनीम।

6 मेना एफ्राइम पहाड डा खाल पाइबपुकीम जाक्कीन, गोपुकी सियोनम बाक्ब परमप्रभु यावे, इ परमप्रभु आ बाक्तीक लय” दे ब्रेलतीक नाक्त जाक्ब” देंत।



7 परमप्रभु यावेमी “याकूब आ पर्वम ग्येरशा ठेयब सेंदा पा कुम्सो पने। मिनु रागी रागी डा नेल्ल क्येडा ठेयब रागी आ पर्वम ठेयब सेंदा पा ग्रीडीन। मिनु परमप्रभु यावेम आ मुर आन कली श्येत रे प्रॉइतु। इस्राएल डा लीशो आन कली प्रॉइतु।

8 नेनीन, गो मेको आन कली उत्तर डा रागी रे चाकनुडमी। मिनु गो मेको आन कली रागी डा मुर रे खुपनुडमी। मेकोपुकी आन दातेमी मिक्च मताइब, गुड खोइल मदुकब, कोव्रज कुरशो मीश मुर नु सुत्केरी रोड पशो मीश मुर यो बाक्नीम। मेको आन ठेयब हल लेशशा एकेर जाक्चा माल्नीम। यसैया ३५:८-१०; इजीकीएल ३४:१६

9 मेकोपुकी डाक्ना डाक्न जाक्नीम। गो मेको आन कली शिशो पा लेशशा चाकनुडमी। गो मेको आन कली खोला आ नेक्था गाक्पाइक्नुडमी। दाइल मपांडसीचा डा पित्थ लांम खुल्लुडमी। मारदे हना गो इस्राएल आ आफ दुम्शो बाक्नुड। मिनु एफ्राइम आं डोंइती जरमेशो तौ बाक्ब।

10 गे रागी रागी डा मुरपुकी, परमप्रभु यावे आ लोव्र नेनीन। डोन डा समुन्द्र आ नेक्था डा रागी नेल्ल आन कली नॅपतीन। मेको आन कली ‘इस्राएल कली ब्रपाइक्बम मेको आन कली गुम्पाइक्ब। मिनु गोठलाम आन बगाल आन कली खाल पशो खोदेशो पा, मेकोमी इस्राएली आन कली कोव्रब’ दैत।

11 मारदे हना परमप्रभु यावेम याकूब आ मुर आन कली प्रॉइतु। मिनु मेकोम आन कली आन क्येडा बोल्यो मुर आन गुड रे प्रॉइतु।

12 मेकोपुकी जाक्चा इर सियोमन ठेयब सेंदा पा कुम्सो पाइनीम। मेकोपुकीम परमप्रभु यावे आ रिम्शो पशो आ पर्वम ग्येरनीम। अन्न, अडगुर शांबु नु तेल तशा, क्यारश भेडा आन पाठा नु बी ब्यफ आन कली तशा ग्येरनीम। मेको ब्वाक्कुम जिशशो फल फुल रू खोदेशो दुम्नीम। मेकोपुकी लेशा गेनायो सुर्ता मपाइनीम। येरमीया ५८:१

13 मेना ठिटी मीश मुर ग्येरशा सिल पाइनीम। ठिटा नु खाल्पा ग्येरनीम। गो मेको आन रोंका पतीके ग्येरतीकेम फाइक्नुड। गो मेको आन थुं बार पाइशशा, सुर्ता पतीक आ पा डा ग्येरतीक थुं गेनुडमी।

14 गो चढेब आन कली शुश गेशा रूपाइक्नुडमी। मिनु आं मुरपुकी आं शुश गेशोम रूशा ग्येरनीम” दे परमप्रभु यावेम दैत।

15 परमप्रभु यावेम “रामाम सेंदा का नेंसाक्व। मेको रोंका पशो नु हिशेक पा डाक्शो बाक्ब। राहेल आ आल आन पर्वम डाक्ब। मेको लेम्शोन, मबिस्से। मारदे हना मेको आ आल बेक्तेक्म” दैत। उत्पत्ती ३५:१६-२०; १सामुएल १०:२; मती २:१८

16 परमप्रभु यावेमी “डाक्चा नाइक्तीन। इन मिक्च रे प्रेक्कु मतोककीन। मारदे हना इन गेय डा इनाम ताइनीनी। मेको आन जोरी सत्रु आन रागी रे लेशशा जाक्नीम।

17 नोले इन रिम्शो दुम्तीक लां कोव्रनीनी। इन तमी तौ आंम आन रागीम लेशशा जाक्नीम” दैत।

18 परमप्रभु यावेम “गो एफ्राइम आ डाक्चा पुंडशो नेंता” दैत। मिनु एफ्राइममी “गे आं कली शेंताक्यीनी। गो इन शेंशो रुप्ता। गो मटीब बोहोर खोदेशो बाक्ती। आं कली लेत्वा गेयीनी। गो लेत्वा ताइनुड। मारदे हना गे परमप्रभु यावे, गे आं परमप्रभु बाक्नीनी।

19 गो नोले शोंइसीशा, इन गे लेत्ती। आं हेंथे पशो तुइक्तु नोले आं कुचु तुप्ता। गो मुने दोकती। मारदे हना गो आं ठिटा ना डा पाप कुरशो बाक्ती” दे डाक्चा दैत।

20 मिनु “मार, एफ्राइम आं दाक्शो तौ ममाइ डा? मेको आ पर्वम गो मग्येरनुडा? गो मेको कली हुडक्ताक्ड हना यो, मेको कली मिम्ना मिम्न बाक्ती। मोपतीके गो मेको कली मुल सम्म दाक्नुड। गो मेको कली थमा पा शिशो पाइक्नुड” दे परमप्रभु यावेम दैत। यसैया ४९:१५; होसे ११:८

21 लां तुइक्तीक चिन्ड वोतो। लां कोइतीक थाम खुक्को। गे तेको ठेयब लां रे लाइनेवे, मेको लां रिम्शो पा मिम्तो। गे कन्ने मीश आल इस्राएल, लेतो। इ सहरम लेतो।

22 गे काइ मटीब तमी, गे गेना सम्म रिम्नेवे? मारदे हना परमप्रभु यावेम मेको रागी डा मुर आन पशो नक सेल्लु। मेको मीश मुरुम वोइश मुर कली दाक्ब।

23 मुर नेल्ल आन परमप्रभु यावे, इस्राएली आन परमप्रभुमी “गो मेको आन शोंप लेशशा गेता हना, मेकोपुकीमी लेशा यहूदा रागी नु मेको आ सहरपुकीम ‘गे ठीक पाइब नु परमप्रभु यावे आ डांडा, परमप्रभु यावेमी इ कली आसीक गेक्व’ दैनीम। जकरिया ८:३

24 यहूदा नु मेको आ सहर नेल्ले काथा बाक्नीम। रू डा गेय पाइब नु आन बगाल नु हिरब गोठला नेल्ल काथा बाक्नीम।

25 गो दशो आन कली लेशा बोल्यो सेल्लुडमी। मिनु थशो आन कली लेशा बोल गेनुडमी” दैत।

26 गो ओशोमीन सेंसाक्यी। मिनु एर ओंथ कोव्रशा, गो रिम्शो पा इप्ती, दे तुडक्ताक्ड।

27 मिनु परमप्रभु यावेमी “गो इस्राएल आ खिं डा मुर, यहूदा आ खिं डा मुर नु क्यारश भेडा, बी ब्यफ आन कली सोशा बोशा दुम्पाइक्तीक नाक्त थमा पा चाक्नुड।

28 गो दोपा मेको आन कली तुल्चा, प्रेत्चा, ताइक्चा नु खतम पोक्चा कली मरिम्शो पडा, मोपा गो मेको आन कली सेल्चा नु खुम्चा कली कोव्रनुड। येरमीया १:१०

29 मेको नाक्ती मुरपुकीम लेशा “आम आफोम ग्युरशो अडगुर ब्वाम्तेक्म। मिनु आन आल आन खुइ ग्रिम्तेक्म’ मदेंनीम। इजीकीएल १८:२; प्रस्थान २०:५; बिलाना ५:७

30 तन्न मुर नेल्ल आन पाप आ पर्वम बेक्नीम। सुम ग्युरशो अडगुर ब्वाइबा, मेको आ खुइ ग्रिम्ब” दैत।

31 परमप्रभु यावेमी “गो इस्राएल आ खिं डा मुर नु यहूदा आ खिं डा मुर नु नक कबल का पाइनुड। मेको नाक्ती थमा पा जाक्ना जाकन बाक्नीम। हिबू ८:८-१२

32 मेको कबल मेको आन किकी पिपी आन कली इजीप्ट रे गुंडची ना पशो कबल खोदेशो ममाइ। गो मेको आन वोंडश खोदेशो बाक्ती हना यो, मेकोपुकीमी मेको कबल मखबेम।

33 तन्न इस्राएल आ खिं डा मुर नोले डा नाक्ती डा कबल मार बाक्त देशा हना, गो आं अरेशो मेको आन थुंम वोइक्नुड। मिनू आन थुंम मेको ब्रेक्शा गेनुडमी। मिनू गो मेको आन परमप्रभु दुम्नुड। मिनू मेकोपुकी आं मुर दुम्नीम। इजीकीएल ११:१९; हिबू १०:१६-१७; येरमीया ७:२३

34 मेना रे परमप्रभु यावे कली तुइक्तीन, दे मुर कामी अर्को कली मशेनीम। मारदे हना आइक्च रे ठेयब नेल्लेम आं कली तुइक्तीन। गो मेको आन मरिम्शो पशो माफ गेनुडमी। मिनू लेंशा गेनायो मेको आन पाप ममिम्नुड” दे परमप्रभु यावेमी दैत। येरमीया ३३:८; यसेया ४३:२५; रोमी ११:२६-२७

35 मेको परमप्रभु यावेम नाक्ती हाम्पो सेल्चा कली नां वोइक्तु। मिनू तास्ला आ लां कोइताक्व। नाक्दो हाम्पो सेल्चा कली सोरुल वोइक्तु। मेकोमी समुन्द्र आ छाल पोक्चा कली शाक्तु। मेको आ नें मुर नेल्ल आन परमप्रभु यावे बाक्ब।

36 मिनू परमप्रभु यावेमी “आं डोंइती नां, तास्ला नु सोरुल जाप्तेक्म हना ला, इस्राएली यो आं डोंइती रागी का मडुम्नीम” दैत। येरमीया ३३:२५; रोमी ११:१

37 परमप्रभु यावेमी “सरीड कली पुक्ने जाप्त हना, रागी आ जग माल्शा गुंडेन चाम्साक्व हना, ला गो इस्राएल आ आल आन कली तिल्लुडमी” दैत।

38 परमप्रभु यावेम “हानानेल आ लाइशो खिं रे मुर डा ठेयब लाप्चो सम्म आं नेंम लेंशा सहर सेल्तीक नाक्ती थमा पा जाक्ना जाकन बाक्नीम।

39 पुक्तीक डोरी मेको रे पा गारेब डा डांडा सम्म जाक्दीप्ब। मिनू मेको रे हिरशा गोआह सम्म जाक्दीप्ब।

40 बेंक्शो मुर आन बेसी नेल्ल पुलु ताइक्तीक दिंम नु किद्रोन कोल्सा सम्म डा रू नेल्ल नु शारा लाप्चो डा कुना सम्म परमप्रभु यावे के दुम्ब। मिनू मेको गेनायो तुल्शा खतम मपोक्सीब” दैत।

## 32

येरमीयामी रू ग्याप्शो

1 परमप्रभु यावेम येरमीया कली लोत्र पाप्तु। मेना यहूदा डा पिप सिदकीयाहम सासन पशो १० बर्स दुम्मेनु, नेबुकदरेसर आ सासन पशो १८ बर्स दुम्शो बाक्त।

2 मेना बेबीलोन डा पिप आ लडाइ पाइबपुकीम यरूसलेम पुम्ताक्म। परमप्रभु यावे आ लोत्र पाइब येरमीया चहिं यहूदा डा पिप आ दरवार खाल पाइब मुर आ जेल्लखानम बाक्त। मेको यहूदा डा पिप आ लाडगाम बाक्त। २राजा २५:१-२

3 यहूदा डा पिप सिदकीयाहम मेको कली मेकेर चोक्शो बाक्त। मिनू मेकोमी “गे मारदे मोदेशो पा परमप्रभु यावे आ लोत्र पाइनेवे? परमप्रभु यावेमी ‘गो एको सहर बेबीलोन डा पिप आ गुडम गेचशो बाक्नुड। मिनू मेकोमी एको आंम के सेल्ब। येरमीया २१:७; येरमीया ३४:२

4 यहूदा डा पिप सिदकीयाह कल्दी आन गुड रे मब्रोंइब। मेको थमा पा बेबीलोन डा पिप आ गुडम गेचा पुंडसीब। मिनू मेको नु कोत्रमुशा, लोत्र पाइब।

5 मेकोमी सिदकीयाह कली बेबीलोन लाइक्ब। मिनू गो मेको कली मकोवड्डु सम्म मेकेर बाक्ब। गो कल्दी नु लडाइ पाप्तीवी हना मगानेवे’ दे परमप्रभु यावे आ लोत्र पवी” देशा चोक्शो बाक्त। येरमीया ५२:११

6 मिनू येरमीयामी परमप्रभु यावेम आं कली लोत्र पाप्तु। मार लोत्र पाप्तु देशा हना,

7 “इ बकान्छा शाल्लुम आ तौ हनामेल इ बाक्तीक जाक्शा, इ कली ‘अनाथोथम बाक्शो आं रू ग्यापीन। मारदे हना ग्याप्चा अधिकार इन के बाक्ब’ देब” दैत। लेवी २५:२५; रूथ ४:३-४

8 मिनू नोले परमप्रभु यावेम देशो खोदेशो पा आं बकान्छा आ तौ हनामेल पिप आ खिं खाल पाइब आन लाडगा जाक्शा, मेकोमी “बेन्यामीन आ रागी अनाथोथम बाक्शो आं रू ग्यापीन। मेको ग्याप्चा अधिकार इन केन बाक्ब। मोपतीके गे मेको ग्याम्सीन” दैत। मिनू गो मेको परमप्रभु यावे आ लोत्र बाक्माक्त, दे तुइक्ताक्ड।

9 मोपतीके गो आं बकान्छा आ तौ हनामेल आ अनाथोथम बाक्शो रू ग्याप्ता। मिनू गो मेको कली चांदी के १७ शेकेल नाक्शा गेता। शेकेल का ११.५ ग्राम डा चांदी के क्येट बाक्ब।

10 मिनू गो कागज ब्रेक्शा, छाप थोक्शा सांकछीपुकी वोइशशा चांदी के शेकेल नाक्शा गेता।

11 मिनू गो आं रू ग्याप्शो ब्रेक्शो छाप थोक्शो कागज ताक्ता। छाप थोक्शो नु छाप मथोक्शो कागज यो ताक्ता।

12 मिनू गो मेको रू ग्याप्शो ब्रेक्शो कागज आं बकान्छा आ तौ हनामेलम आ डोंइती, सांकछी नु पिप कली खाल पाइब आ लाडगाम बाक्शो यहूदी आन डोंइती माहसेयाह आ चच, नेरीयाह आ तौ बारुक कली गेता। मेको सांकछी नेल्ल आन नें यो कागजम ब्रेक्शो बाक्तेक्म।

13 गो मेको नेल्ल आन डोंइती बारुक कली

14 “मुर नेल्ल आन परमप्रभु यावे, इस्राएली आन परमप्रभुमी मार दैत देशा हना, मेको शुश नाक्त सम्म लील, दे मेको रू ग्याप्शो कागज, छाप थोक्शो नु मथोक्शो, निम्फा खप के ग्योब कामी कुर पावो” दैत।

15 मारदे हना मुर नेल्ल आन परमप्रभु यावे, इस्राएली आन परमप्रभुमी “मेको रागीमी खिं, रू नु अडगुर रू ग्याप्नीम” दैत। येरमीया ३२:१५

16 मिनू गो नेरीयाह आ तौ बारुक कली मेको रू ग्याप्शो कागज गेडा नोले, गो परमप्रभु यावे कली एको लोत्र पा

17 “परमप्रभु, परमप्रभु यावे, इन ठेयब सक्ति नु दिंशो गुडम गे सरीड नु रागी सेलतीनी। इन कली मारेड गेय मचाप्चा डा मबाकब। येरमीया २७:५; उत्पत्ती १८:१४; लूका १:३७

18 हजार हजार पाला सम्म इन गेना हना यो दाक्तीक कोडनीनी। तन्न आम आफ आन हेथे पशो आन नोले जाकब आन आल आन कली रपाडकनीनी। गे ठेयब नु सक्ति पाडशो परमप्रभु बाकनीनी। इन नें मुर नेल्ल आन परमप्रभु यावे बाकब। प्रस्थान २०:५-६

19 इन अर्ती ठेयब नु इन गेय नेल्ल क्येडा सक्ति पाडशो बाकनीम। मुर आन पशो मारेड मारेड इन डोंइती तचा डा पा बाकनीम। गे मुर नेल्ल आन कली कोडनीनी। गे नेल्ल आन लां नु आन पशो तशा इनाम गेनीनी। रोमी २:६

20 गे इजीप्त रागीमी चिन्ड नु छक लाकचा डा गेय कोडताकनी। मिनु मुल सम्म इसाएल नु मुर नेल्ल आन दातेमी इन नें ठेयब सेलतीनी।

21 गे इन मुर इसाएली आन कली इजीप्त रे चिन्ड नु छक लाकचा डा गेय इन सक्ति नु बोल नु शुश हिंचा डा श्येत कोडशा गुंडताकनी।

22 मिनु गे मेको आन किकी पिपी आन कली कसम जशो, मेको दूध नु खुदो शुश बाकशो रागी गेतीनी।

23 मिनु मेकोपुकी ओव्रशा, मेको रागी आन के सेल्लेकम। तन्न मेकोपुकीमी इन देंशो, इन अरेशो नु मार पचा माल्बा शेंशो मबिस्सम। गे मेको आन कली पन देंशा शेंशो लोव्र मेकोपुकीमी मटीमे। मोपतीके गे एको ठेयब श्येत नेल्ल मेको आन तार चाकतीनी।

24 कोव्रडीन, एको सहर आन के सेल्ल्या कली नु गारो डोडकचा कली लां सेल्ल्या कली मार मार तेल्लेकम। मेको सहर कली तरवार, अन्काल नु मुर बेक्तीक रोडम पतीके, मेको लडाइ तोडब कल्दी आन गुडम दुम्त। गे मार देंनी, मेको दुम्त। गे आंमा ताडनीनी।

25 मो हना यो परमप्रभु, परमप्रभु यावे, गे आं कली ‘एको सहर कल्दी आन गुडम दुम्त हना यो, क्येट गेशा, सांकछी आन कली ब्रेशशा, रू ग्यापो’ देंतीनी” दे येरमीया देंत।

26 मिनु परमप्रभु यावेम येरमीया कली लोव्र पाप्तु।

27 मार, लोव्र पाप्तु देंशा हना “गो परमप्रभु यावे, ब्रोंडशो नेल्ल आन परमप्रभु नड। मार, तेकोड गेय आं पने मचाप्चा डा बाकबा डा?” देंत। गन्ती १६:२२; येरमीया ३२:१७

28 मोपतीके परमप्रभु यावेमी “गो एको सहर कल्दी आन गुड नु बेबीलोन डा पिप नेबुकदरेसर आ गुडम गेचा चिक्ताकड। मिनु मेकोमी एको सहर ग्राब।

29 एको सहर कली लडाइ तोडब कल्दी जाकशा मी सुडकनीम। तेको खिं तारी आं कली गाडकपाडकचा कली बाल देवता कली चढेमे नु देवी देवता आन कली तूचा थोव्रक चढेशा लुकतेमे, मेको नेल्ल क्रोडकनीम। येरमीया १७:१३

30 मारदे हना इसाएल डा मुर नु यहूदा डा मुरुम आन टिटा रेन आं डोंइती मरिश्शो गेय डा लाकशा अरु मारेड मपामे। थमा पा इसाएल डा मुरपुकीम आन गुड डा गेयम आं कली गाडकपाडकचा डा लाकशा, अरु मारेड मपामे।

31 एको सहर सेल्मे नाक्त रे मुल सम्म आं कली गाडकपाडशशा, चुरपाडशशा पतीमी। मोपा गो एको कली आं डोंइती रे तिल्लुड।

32 मेको इसाएल नु यहूदा डा मुरपुकीमी आं कली गाडकपाडकचा कली आन मरिश्शो पशो आन परबंम पाइनुड। मेको आन पिप, आन सरकार डा गेय पाडब, आन चढेब, आं लोव्र पाडबपुकी, यहूदा डा मुरपुकी नु यरूसलेममी बाकबपुकी नेल्लेम मोदेशो पांतेकम।

33 मेकोपुकीमी आं कली आन ची हिरशा कोडशो बाकनीम। आन कुल ममाड। गो मेको आन कली शेंना शेंन बाकती हना यो, मनेनेम रिश्शो पचा कली ममिन्तेम। येरमीया २:२७

34 मेकोपुकीमी आं नें वोडशो खिंम आन ग्रांघ्रा दिशो देवी देवता वोडकतेकम। मिनु आं खिं कली ग्रांघ्रा दिशो सेल्लेकम।

35 मेकोपुकीमी हिन्नोम आ तौ आ बेसीम बाल देवता आन थान सेल्लेकम। मिनु मेकोपुकीमी मेकेर आन तमी तौ आन कली मोलेक कली चोशा चढेन्तेकम। गो मेको आन कली मेको मअरेडमी। गो मेको गेनायो ममिन्तु। मोदेशो ग्रांघ्रा दिशो गेय पशा, यहूदा डा मुर आन कली पाप पपाडकतेकम” देंत। येरमीया ७:३१; येरमीया १९:५; इजीकीएल २०:२५-२६

36 मोपतीके परमप्रभु यावे, इसाएली आन परमप्रभुमी “गेपुकीमी एको सहर आ परबंम ‘तरवार, अन्काल नु मुर बेक्तीक रोडम बेबीलोन डा पिप आ गुडम गेशो बाकब’ देंतीनी।

37 कोव्रडीन, गो मेको आन कली आं गाडशशो, चुरशो नु ठेयब ग्युश्रा बोक्तीकेमी तेको रागीम खेरुमी, मेको रागी नेल्ल रे गुम्पाडकनुडमी। गो मेको आन कली लेंशा एको रागीम लेशशा चाकनुडमी। मिनु मेको आन कली रिश्शो पा मारेड मदुम्थु बाकपाडकनुडमी। ब्यवस्था ३०:३

38 मिनु मेकोपुकी आं मुर दुम्नीम। मिनु गो मेको आन परमप्रभु दुम्नुड। येरमीया ७:२३

39 गो मेको आन कली थुं का दुम्तीक नु गाक्तीक लां का गेनुडमी। मेकोपुकी गेना हना यो आं कली मान पा हिंनीम। मेको आम आन कली नु आन आल आन कली रिश्शो दुम्ब। इजीकीएल ३६:२७

40 गो मेकोपुकी नु गेना हना यो लीब कबल का पाडनुड। गो मेको आन कली रिश्शो पचा कली गेनायो मप्रोंडनुड। मिनु गो मेको आन थुंमी आं कली मान पा हिंतीके वोडकनुड। मोपा मेकोपुकीम आं कली मप्रोंडनीम। येरमीया ३१:३१-३४

41 गो मेको आन कली रिश्शो पना पन ग्येरसीनुड। मिनु थमा पा गो आं थुं नु आं सोक्त नेल्लेम मेको आन कली एको रागीम वोडकनुडमी” देंत। ब्यवस्था २८:६३; आमोस ९:१५

42 परमप्रभु यावेमी “दोपा गो एको मुर आन कली ओं पा शुश श्येत गेडा, मोपा गो मुल आं देंशो रिश्शो पतीक नेल्लेम, मेको आन कली रिश्शो पाडकनुडमी।

43 एको रागीम रू ग्याप्नीम। मेको आ परबम गेपुकीम 'एको मुर नु बस्तु भाव मारेड मबाकशो रागी बाकब। मारदे हना एको कल्दी आन गुडम गेशो बाकब' देंनीनी।

44 मेकोपुकीम क्येटीम रू ग्याप्नीम। मेको आन नें ब्रेकशो ग्याप्शो कागज, सांकळी वोडशशा, छाप थोक्नीम। मोदेशो बेन्यामीन आ रागी, यरूसलेम आ एर ओथ, यहूदा डा सहरम, पहाडीम, शेफेलाहम नु नेगेबम मोदेशो पाइनीम। मारदे हना गो मेको आन शोंप लेशशा गेनुड" दे परमप्रभु यावेम देंत। येरमीया ३२:१५; येरमीया २९:१४,३०

### 33

“यरूसलेम लेंशा सेलनुड” देशो

1 परमप्रभु यावेमी येरमीया कली पिप आ दरवार खाल पाइब मुर आ जेलखानम बाकमेनु निक्शी खेयप लोत्र पाप्तु। येरमीया ३२:२

2 मिन रागी सेलब परमप्रभु यावेमी लोत्र पाप्तु। मेको रागी बोल्यो सेलब आं नें यावे बाकब।

3 मेकोमी “आं कली ब्रेत्ती। मिन गो इ कली लोत्र लेलनुड। मिन गो इ मतुडशशो टेयब नु खुडशशो थोत्रक शेनुड” देंत।

4 इस्राएली आन परमप्रभु यावेमी “एको सहर डा खिं नु यहूदा डा पिप आन खिं प्रेशशा, कल्दी नु लडाइ पचा कली सहर आगा रे यो गारो डोइक्तीक लां सेलनीम। यसैया २२:१०

5 कल्दी सहर ओव्रशा लडाइ पाइनीम। मेकोपुकीमी मेको खिं कली बेकशो मुर आन रांमी प्रिनीम। गो आं गाडशशो नु चुरशोम साइशशो मुर आन बेकशो रांम प्रिनीम। मारदे हना आं अरेशो लोत्र मटीब आन पतीके एको सहर रे आं कुल खुइक्ताकड।

6 गो आं मुर आन कली सापाइक्नुडमी। मिन गो मेको आन कली सापाइशशा, आन मालशो गेशा मारेड मदुमथु रिमशो पा बाक्या गेनुडमी। येरमीया ३०:१७

7 गो यहूदा नु इस्राएल डा मुर आन शोंप लेशशा गेनुडमी। मिन मेको आन कली डोंइती डा खोदेशो सेलनुडमी। येरमीया २९:१४; येरमीया २४:६

8 गो आं परबम पशो आन हेंथे पतीके नु पाप नेल्ल रे मेको आन कली ठीक सेलनुडमी। मिन गो मेको आन हेंथे पशो नु पाप पशो माफ गेनुडमी। येरमीया ३१:३४; येरमीया ५०:२०

9 मिन एको सहर आं डोंइती ग्येरपाइक्तीक, टेयब सेलतीके नु आं कली मान पतीके दुम्ब। मिन रागी रागी डा मुरुम गो इस्राएली आन कली मार मार रिमशो पशो नेंनीम। मिन मेको आन कली रिमशो नु आन मालशो क्येडा शुश गेशो तशा आं परबम हिंशा खिंखि पाइनीम” देंत।

10 परमप्रभु यावेमी “मेको सहर आ परबम गेपुकीम 'एको मुर नु बस्तु भाव मारेड मबाकशो रागी बाकब। यहूदा डा सहर नु यरूसलेम डा लां गाकब मुर नु बस्तु भाव, जन्तु मबाकथु, श्येत्थ दुमशो बाकब। मेको मारेड मबाकशो सहरम लेंशा, येरमीया ३२:४३

11 थुं नाइशशा बाक्तीक, ग्येरशो सेंदा, ग्युम्ली ग्युम्ले आन सेंदा, कुमसो पशो सेंदा नु परमप्रभु यावे आ खिम, रे रिमशो पाइब बाक्नीनी” देशा सेंदा लेंशा नेंसीब। मुर नेल्ल आन परमप्रभु यावे कली ‘परमप्रभु यावे, गे शिशी पाइब बाक्नीनी’ देंनीन। मारदे हना मेको रिमशो पाइब बाकब। मेको आ दाक्तीक गेना हना यो बाकब। गो रागी डा मुर आन कली डोंइती डा खोदेशो पा थुं नाइक्चा गेनुड” दे परमप्रभु यावेम देंत। येरमीया ७:३४; एजा ३:११; बजन संग्रह १०६:१

12 मुर नेल्ल आन परमप्रभु यावेमी “मुर नु क्यारश भेडा, बी ब्यफ मबाकशो रागीम लेंशा सहर नेल्लेमी गोठला आन क्यारश भेडा नाइक्तीक नु योत्रतीक दुम्ब।

13 मिन पहाड डा सहर, शेफेलाह, नेगेब बेन्यामीन आ रागी यरूसलेम आ एर ओथ नु यहूदा डा सहरम गोठलापुकीमी क्यारश भेडा लेंशा हिक्शा ओइनीम” दे परमप्रभु यावेम देंत। येरमीया ३२:४४

दाऊद नु लेवी कली पशो कबल

14 परमप्रभु यावेम “इस्राएल आ खिं डा मुर नु यहूदा आ खिं डा मुर आन कली आं थोक्शा पशो लोत्र खाप्तीक नाक्त थमा पा जाक्ना जाक्न बाक्नीम। येरमीया २३:५-६; जकरिया ३:८

15 मेको नाक्ती, मेना गो दाऊद आ खिं रे ठीक पाइब राशी का दाप्पाइक्नुड। मिन मेकोमी रागीम ठीक निसाफ नु ठीक गेय पाइब।

16 मेको नाक्ती यहूदा श्येत रे प्रोंडचा पुंडसीब। मिन यरूसलेम मारेड मदुमथु बाकब। मिन मेको आ नें आंइ कली ठीक सेलब परमप्रभु यावे” देंनीम। ब्यवस्था ३३:२८

17 मारदे हना परमप्रभु यावेम “गेना हना यो दाऊद आ खिं डा मुर का इस्राएलमी पिप दुम्ब। २सामुएल ७:१२-१३; १राजा ९:५; भजन संग्रह ८९:३०

18 गेना हना यो लेवी आ थर डा चढेब का आं डोंइती चोशा चढेचा कली, अन्न चढेचा कली नु क्योरशा चढेचा कली बाकब” देंत। गन्ती २५:१२-१३; नेहेम्याह १३:२९

19 परमप्रभु यावेम येरमीया कली लोत्र पाप्तु।

20 मार, लोत्र पाप्तु देशा हना “गेपुकीमी गो नु नाक्दो पशो कबल नु नाक्त पशो कबल क्याम्ने चाप्तीनी हना, नाक्दो नु नाक्ती आं देंशो ना मदुमतेक्म हना, येरमीया ३१:३५-३६; उत्पत्ती ८:२२

21 ला आं गेय पाइब दाऊद नु आ तो का पिप दुम्ब, देशो कबल क्याम्ने चाप्तीनी। मिन गो आं लेवी थर डा मुर चढेब नु पशो कबल यो क्याम्ने चाप्तीनी। गन्ती २५:१२-१३; हिब्रू ९:११-१४

22 दोपा सरीड डा सोरुल हिकने मचाप्या डा बाक्नीमी नु समुन्द्र डा बाल्वा पुक्ने मचाप्या डा बाक्वा, मोपा गो आं गेय पाइब दाऊद आ चच युड नु आं कली गेय पाइब लेवी आ थर डा मुर आन कली सोपाइशशा बोपाइशशा शुश सेल्लुडमी” दैत। उत्पत्ती १५:५

23 परमप्रभु यावेम येरमीया कली लोत्र पाण्टु।

24 मार लोत्र पाण्टु देशा हना “मेको मुरपुकी मार, देना दें बाक्मा, मार, गे मनेनी? मेकोपुकीमी ‘परमप्रभु यावे आ योत्रशो खिं निक्शी डा मुर आन कली प्रॉइशा तिल्लो बाक्ब’ दैतेक्म। मो दैतीके मेको मुरपुकीमी आं मुर आन कली आइक्च सेल्शा, मुल रे रागी का यो मनम, दे मिन्नीम” दैत।

25 परमप्रभु यावेमी “गो नाक्दो नु नाक्त नु आं कबल मपाता हना, सरीड, रागीम आं देशो मपातेक्म हना,

26 गो याक्ब आ आल नु आं गेय पाइब दाऊद आ चच युड आन कली तिल्लुडमी। मोपा मेको अब्राहाम, इसहाक नु याक्ब आन मुर आन कली पिप दुग्चा कली मयोत्रनुडमी। तन्न गो मेको डोंइती खोदेशो पा, मेको आन थुं नाइक्चा गेनुडमी। मिनु मेको आन कली शिशी पाइनुडमी” दैत।

## 34

सिदकीयाह कली हिंच कोंइशो

1 परमप्रभु यावेम येरमीया कली बेबीलोन डा पिप नेबुकदरेसर, मेको आ लडाइ पाइब नेल्ल, रागी डा राज्य नेल्ल नु मेको आ सासन पशो रागी डा मुर नेल्लेम यरूसलेम नु आ एर ओंथ डा सहर नेल्ल आन कली लडाइ तोम्तेक्म। मेना इस्राएली आन परमप्रभु यावेमी येरमीया आं कली लोत्र पाण्टु। येरमीया ५२:४; २राजा २५:१-२

2 मिनु परमप्रभु यावे, इस्राएली आन परमप्रभुमी आं कली “यहूदा डा पिप सिदकीयाह आ बाक्तीक लावो। मिनु मेको कली परमप्रभु यावेमी ‘गो एको सहर बेबीलोन डा पिप आ गुडम गेनुड। मिनु मेकोमी एको सहर कली मीम क्रोइक्ब। येरमीया २१:१०

3 गे मेको आ गुड रे ब्रोंइचा मताइनेव। गे थमा पा ग्याइक्चा पुंडसीशा मेको आ गुडम दुम्नेवे। गे बेबीलोन डा पिप कली तशा, मेको नु कोत्रमुशा लोत्र पाइनेवे” दे बेबीलोन लचा माल्नेवे” दैत। येरमीया ३२:४

4 मो हना यो ए यहूदा डा पिप सिदकीयाह, परमप्रभु यावे आ लोत्र नेनीन “गे तरवारम साइक्चा मपुंडसीनीनी। येरमीया ५२:११

5 गे इन थुं नाइशशा बेक्नीनी। मिनु दोपा इन किकी पिपी इन डोंइती डा पिप आन कली मुरपुकीमी ब्रोंइशो रिना पाइब थोत्रक चोशा थिम्मे, मोपा मेकोपुकीमी इन कली यो थिन्नीम। इन पबर्म ‘आंइ प्रभु’ दे रेंका पाइनीम। गो मेको लोत्र पाता, दे नेल्लेम नेंचा डा पा देनो” दे परमप्रभु यावेमी दैत। २इतिहास १६:१४; येरमीया २२:१८

6 मिनु येरमीयामी मेको लोत्र नेल्ल यरूसलेममी यहूदा डा पिप सिदकीयाह कली दैत।

7 बेबीलोन डा पिप आ लडाइ पाइब मुरपुकी यरूसलेम नु यहूदा डा अरु सहर नु लडाइ पना पन बाक्शो बाक्तेक्म। लाकीश नु आजैका नु यो मेकोपुकीमी लडाइ पचा मप्रॉइशो बाक्तेक्म। मेको यहूदा डा गारो हिरशो सहर निक्शी ला लीशो बाक्ताक्स।

वाइल आन कली प्रॉइतीक बर्स

8 मेना परमप्रभु यावेम येरमीया कली लोत्र पाण्टु। मेना यहूदा डा पिप सिदकीयाहम यरूसलेम डा मुर नेल्ल नु वाइलीम वाइल नेल्ल आन कली प्रॉइचा माल्नीम, दे कबल पशो बाक्त। येरमीया ३४:१४

9 मेना मुर नेल्लेम आंम हिबू वाइलीम वाइल आन कली प्रॉइचा माल्तेक्म। सुडम यो आंम हिबू लोकब आन कली वाइलीम वाइल सेल्चा मदुम।

10 मिनु मेको लोत्र टीब ठेयब मुर नु कबल टीब मुर नेल्लेमी आंम आन वाइलीम वाइल आन कली प्रॉइचा नु लेंशा अर्को वाइलीम वाइल मवोइक्चा नम, देशो बिस्साक्म। मिनु मेकोपुकी गारशा, मेको आन कली प्रॉइतेक्म।

11 मिनु नोले लेंशा मेकोपुकीमी आन थुं लेशशा आन प्रॉइशो वाइलीम वाइल आन कली लेंशा चाक्शा वाइलीम वाइल सेल्लेक्म।

12 मिनु परमप्रभु यावेम येरमीया कली लोत्र पाण्टु।

13 मार, लोत्र पाण्टु देशा हना “परमप्रभु यावे, इस्राएली आन परमप्रभुमी ‘गो मेको आन किकी पिपी आन कली इजीप्त रागी डा वाइलीम वाइल दुम्तीक खिं रे प्रॉइशा चाक्तामी। मिनु गो मेकोपुकी नु कबल पाता।

14 तेकोइ ७ बर्सम इन कली लेयसीशो मुर इन हिबू लोकबम इन कली ६ बर्स गेय पवा नोले, ७ बर्सम मेको कली प्रॉइचा माल्ब” दैती। तन्न इन किकी पिपीम आं लोत्र मटीम। आन नोफान मदाइक्तेम। प्रस्थान २१:२; लेवी २५:३९-४१; ब्यवस्था १५:१२

15 गेपुकीम चहिं नक माफ पुंडशा आं डोंइती नेल्ल आन कली प्रॉइचा नम, देशो लोत्र ठीक पाइतीनी। मिनु गेपुकीमी आं न बाक्तीक खिंम आं डोंइती कबल का पाइतीनी। लेवी २५:१०

16 तन्न नोले इन थुं फाइशशा आं नें ग्रॉग्रा दिशो सेल्लतीनी। गे नेल्लेम इन डोंइती प्रॉइशो वाइलीम वाइल आन कली लेशशा चाक्तीनी, देशो बाक्ब” दैत।

17 मोपतीके परमप्रभु यावेमी “गेपुकीम आं देशो मटिनी। मिनु आंम रागी डा आंम नेक्था डा मुर नु आंम वारच आन कली वाइलीम वाइल दुम्तीक रे मप्रॉइनी। मोपतीके गो मुल इन कली प्रॉइनन्ती। गो इन कली तरवार, मुर बेक्तीक रोड नु अन्कालम साइक्पाइक्चा कली प्रॉइनन्ती। गो इन कली राज्य नेल्लेम शुश हिंचा डा सेल्लन्ती।

18 आं कबल क्याम्ब नु आं डोंडती पशो कबल डा पतीके मपाइब मुर आन कली बाछा खोदेशो सेल्लुडमी। मेको कली फेके निक्शी सेल्लेक्म। मिनु मेको आ दाते रे गाक्तेक्म।

19 मिनु मेको बाछा आ फेके निक्शी आस दाते रे गाक्ब यहूदा नु यरूसलेम डा सरकार आ गेय पाइब, दरवार डा ठेयब मुरपुकी, चढेबपुकी नु रागी डा मुर नेल्ल

20 आन जोरी सत्रु आन गुडम नु आन कली साइक्चा माल्ब आन गुडम गेचा पुंडसीनीम। मेको आन बेक्शो रां सरीड डा चिक्ब नु रागी डा जन्तु आन ब्वतीक दुम्ब। येरमीया ७:३३

21 यहूदा डा पिप सिदकीयाह नु मेको आ सरकार डा गेय पाइब आन कली साइक्चा माल्ब, आन जोरी सत्रु आन गुडम नु बेबीलोन डा पिप आ लडाइ पाइब आन गुडम गेनुडमी। मेको लडाइ पाइबपुकी इन रे लेशशा लशो बाक्तेक्म” दैत। येरमीया ३७:५

22 परमप्रभु यावेमी “गो मेको आन कली अरेनुडमी। मिनु गो मेको आन कली एको सहरमी लेशशा चाक्नुडमी। मेकोपुकीमी एको सहर नु लडाइ पा ग्रानीम। मिनु एको कली क्रोइक्नीम। मिनु गो यहूदा डा सहर कली मुर मबाक्शो सेल्लुड” दैत। येरमीया ३७:८

## 35

येरमीया नु रेकाबी

1 यहूदा डा पिप योसीयाह आ तौ येहो-याकीमम सासन पवा ना परमप्रभु यावेम येरमीया कली लोत्र पाण्टु। २राजा २३:३४

2 मार, लोत्र पाण्टु देशा हना “गे रेकाबी आन खिं लशा, मेकोपुकी नु लोत्र पावो। मेको आन कली परमप्रभु यावे आ खिं डा कोठा कामी ओंडीदीमी। मिनु मेको आन कली अडगुर शांबु खेत्तीमी” दैत। १इतिहास २:५५

3 मोपतीके गो हाबासीन्याह आ तौ येरमीया, आ तौ याजन्याह नु मेको आ लोकबपुकी, मेको आ तौ नेल्ल नु रेकाबी आन खिं डा मुर नेल्ल आन कली लाइक्तामी।

4 मिनु गो मेको आन कली परमप्रभु यावे आ खिं परमप्रभु आ मुर हानान आ तौ आन कोठाम चाक्तामी। हानान परमप्रभु आ मुर यिगदाल्याह आ तौ बाक्त। मेको कोठा चहिं ठेयब मुर आन कोठा आ नेक्था बाक्त। मेको शाल्लुम आ तौ लाप्यो खाल पाइब, मासेयाह आ कोठा आ तार बाक्त।

5 मेको नोले गो अडगुर शांबु आ गर नु बोटकोपुकी रेकाबी आन डोंडती वोइक्ता। मिनु मेको आन कली “अडगुर शांबु तूडीन” दे माइक्तामी।

6 तन्न मेकोपुकीमी “गो अडगुर शांबु मत्नीकी। मारदे हना रेकाब आ तौ आंइ किकी योनादाबम आंइ कली ‘गेपुकी नु इन आलपुकीम गेनायो अडगुर शांबु मत्नीन। २राजा १०:१५

7 मेको प्रोंडशा यो गेपुकीम गेनायो खिं मसेलीन। वांचेर मशोक्कीन। अडगुर मख्खुमीन। गेपुकीम मोदेशो गेय गेनायो मपने। तन्न इन बाक्शो रागीम शुश सम्म ब्रोंडमल, दे गेना हना यो ताम्बुपुकीम बाक्शा हिरशा गाक्कीन” दे शेंशो बाक्त।

8 मिनु गो आंइ किकी रेकाब आ तौ योनादाब आ शेंशो नेल्ल पाइतक। गोपुकी आंमा नु आंइ मीशपुकी नु आंइ तमी तौ नेल्लेम गेनायो अडगुर शांबु मत्तक।

9 गो बाक्चा कली खिं यो मसेलीकी। अडगुर रू, अरू रू नु वांचेर गोपुकी नु मबाक्ब।

10 गो ताम्बुम बाक्शा, आंइ किकी योनादाबम शेंशो नेल्ल पाइतक।

11 तन्न बेबीलोन डा पिप नेबुकदरेसरमी एको रागी कली लडाइ तोण्टु। मिनु गोपुकीम ‘कल्दी नु अरामी आन लडाइ पाइबपुकी रे प्रोक्चा कली यरूसलेम लय” दैतक। मोपतीके गो यरूसलेममी बाक्शो बाक्नीकी” दैतेक्म।

12 मिनु नोले परमप्रभु यावेम येरमीया कली लोत्र पाण्टु।

13 मुर नेल्ल आन परमप्रभु यावे, इस्राएली आन परमप्रभुमी मार लोत्र पाण्टु देशा हना “गे यहूदा डा मुर नु यरूसलेममी बाक्ब आन कली लशा ‘मार, गे आं देशो मपाइनीनी? मिनु आं लोत्र मटीनीनी?” दैत” दे माइक्तीमी।

14 परमप्रभु यावेमी “मार, रेकाब आ तौ योनादाबम आ चच युइ आन कली ‘गेपुकीम अडगुर शांबु मत्नीन” दे शेंशो लोत्र मेकोपुकी टीनीमी। मोपतीके मेकोपुकीमी मुल सम्म अडगुर शांबु मत्नीम। मारदे हना मेकोपुकीमी आन किकी पिपीम शेंशो टिशो बाक्नीम। तन्न गो इन कली लोत्र पना पन बाक्ती। मो हना यो गेपुकीम आं लोत्र मटिनी। येरमीया २५:४

15 गो इन कली आं गेय नु आं लोत्र पाइब आन कली सोइक्ना सोइक्न बाक्ती। मेकोपुकीमी इन कली ‘गे नेल्ल इन मरिम्शो लो रे लेतीन। मिनु इन मरिम्शो गेय रिम्शो सेलीन। मिनु देवी देवता आन कली पूजा पचा नु आन नोले खोइक्चा प्रोनीन। मिनु गे इन किकी पिपी आन कली गेशो रागीम बाक्चा ताइनीनी” दैती। तन्न गेपुकीम आं देशो लोत्र मनेनी नु मटिनी। मती २३:३७

16 रेकाब आ तौ योनादाब आ चच युइमी आन किकी पिपीमी अरेशो टीनीम। तन्न एको मुरपुकीम आं देशो मटिशो बाक्नीम” दैत।

17 मोपतीके मुर नेल्ल आन परमप्रभु यावे, इस्राएली आन परमप्रभुमी “नेनीन, गो यहूदा नु यरूसलेमम बाक्ब मुर आन कली आं देशो ठेयब श्येत नेल्ल चाक्नुड। मारदे हना गो मेको आन कली लोत्र पाता, तन्न मेकोपुकीमी मनेनेम। गो मेको आन कली ब्रेत्ताक्डमी, तन्न मेकोपुकीमी लोत्र मलेत्तीमी” दैत। येरमीया ७:१३-१५

18 मिनु येरमीयामी रेकाबी आन चच युड आन कली “मुर नेल्ल आन परमप्रभु यावे, इस्राएली आन परमप्रभुमी गेपुकीम इन किकी योनादाब आ देशो टिना टिन नु मेको आ शंशो नेल्ल नु इन कली अरेशो नेल्ल पाडतीनी।

19 मोपतीके रेकाब आ तौ योनादाब आ चच युड का गेना हना यो आं डोंडती बाक्चा ताडब” दे मुर नेल्ल आन परमप्रभु यावे, इस्राएली आन परमप्रभुम देत।

## 36

येहो-याकीमम तोल्शो कागज चोशो

1 यहूदा डा पिप योसीयाह आ तौ येहो-याकीममी सासन पवा आ ४ बर्सम परमप्रभु यावेम येरमीया कली लोत्र पाप्तु। येरमीया २५:१

2 मार लोत्र पाप्तु देशा हना “गो योसीयाहम सासन पवा रे मुल सम्म इ कली इस्राएल, यहूदा नु रागी नेल्ल डा मुर आन परबम देशो लोत्र नेल्ल कागजम ब्रेकतो। येरमीया २५:३

3 मो दुम्मेनु, गो मेको आन कली गेचशो ठेयब श्येत दुम्तीके आ परबम यहूदा डा मुरपुकीम तुडशशा, आन मरिम्शो पतीके रे लेत्नीमी कों? मिनु गो मेको आन मरिम्शो पशो नु आन पाप पशो क्याम्शा गेनुडमी” देत। येरमीया २६:३

4 मिनु येरमीयामी नेरीयाह आ तौ बारुक कली ब्रेप्पाडक्तु। मिनु बारुकम येरमीयामी ब्रेक्पाडशशो परमप्रभु यावेम देशो लोत्र नेल्ल कागजम ब्रेक्ताक्व। येरमीया ३२:१२; येरमीया ४५:१

5 मिनु येरमीयामी बारुक कली “गो परमप्रभु यावे आ खिं लने मचाप्नुड।

6 मोपतीके गे तेकोड माडजा बाक्तीक नाक्त परमप्रभु यावे आ खिं लशा, आं इ कली ब्रेक्पाडशशो कागजम बाक्शो लोत्र मुरपुकीम नेंचा डा पा पढेशा नेंपाडक्मी। यहूदा डा सहर रे जाक्शो मुर नेल्लेम नेंचा डा पा पढेशा नेंपाडक्मी।

7 मो दुम्मेनु मेकोपुकीमी आन पुंडशो लोत्र परमप्रभु यावे आ नेक्था चाक्नीमी, कों? मिनु मेको नेल्लेम आन मरिम्शो लां प्रोंडनीमी, कों? मारदे हना परमप्रभु यावेम आ मुर आन परबम गाडशशा चुरशा देशो लोत्र ठेयब बाक्ब” देत।

8 मिनु नेरीयाह आ तौ बारुकम परमप्रभु यावे आ लोत्र पाडब येरमीया आ देशो नेल्ल पाप्तु। मेकोमी मेको परमप्रभु यावे आ लोत्र ब्रेक्शो कागज परमप्रभु यावे आ खिंम पढेशा नेंपाडक्तीमी।

9 यहूदा डा पिप योसीयाह आ तौ येहो-याकीम आ सासन पशो ५ बर्स ९ महिनाम यरूसलेममी बाक्शो मुर नेल्ल नु यहूदा डा सहर रे जाक्शो मुर आन कली यरूसलेमम परमप्रभु यावे आ डोंडती नेल्ल आन कली नेंपाडशशा माडजा बाक्तीक लोत्र पाप्तेक्म।

10 मिनु बारुकमी येरमीया आ ब्रेक्पाडशशो लोत्र परमप्रभु यावे आ खिंम मुर नेल्लेमी नेंचा डा पा पढेत्तु। मेकोमी मेको लोत्र ब्रेक्ब शाफान आ तौ गेमारायाह आ बाक्तीके परमप्रभु यावे आ खिंम डा नक लाप्चो आ नेक्था डा कोटाम बाक्शा, पढेत्तु। २राजा २२:३

11 मिनु गेमारायाह आ तौ शाफान आ चच मीकायामी मेको कागजम ब्रेक्शो परमप्रभु यावे आ लोत्र नेल्ल नेंतु।

12 मिनु मेको तोडशशा, पिप आ खिंम ब्रेक्ब आ बाक्तीके ओव्रदीत्त। मेकेर ठेयब मुर नेल्ल बाक्तेक्म। मेकेर सु सु बाक्तेक्म देशा हना, ब्रेक्ब एली-शामा, शेमायाह आ तौ देलायाह, आकबोर आ तौ एल्लानथान, शाफान आ तौ गेमारायाह नु हनान्याह आ तौ सिदकीयाह बाक्तेक्म। येरमीया २६:२२

13 मिनु मीकायामी बारुकम मुर नेल्लेम नेंचा डा पा पढेशो लोत्र नेल्ल नेंतु। मिनु मेको लोत्र नेल्ल मेको आन कली शेंताक्मी।

14 मिनु ठेयब मुर नेल्ल गारशा, नेथन्याह आ तौ शेलेम्याह आ चच कूशी आ युड येहूदी कली “लशा, नेरीयाह आ तौ बारुक कली मुर आन कली पढेशा नेंपाडशशो कागज कुरशा एक जाक्को मतो” दे सोडक्ताक्मे। मोपतीके गेदाल्याह आ तौ बारुक मेको कुरशा, आन बाक्तीके जाक्त। २राजा २२:११

15 मिनु मेकोपुकीमी मेको कली “निशशा, मेको आंइ कली पढेशा नेंपाडक्की” देतेक्म। मोपतीके बारुकम मेको आन कली, मेको पढेशा नेंपाडक्तीमी।

16 मिनु मेकोपुकीमी मेको पढेशो नेल्ल नेंशा हिंशा आन कुल कोवमुन्तेक्म। मिनु मेकोपुकीमी बारुक कली “गोपुकीम एको लोत्र नेल्ल पिप कली नेंपाडक्चा माल्लीकी” देतेक्म।

17 मिनु मेकोपुकीमी बारुक कली “गे एको लोत्र नेल्ल दोपा ब्रेक्ती? आंइ कली शेंदीकी। येरमीयामी इ कली ब्रेक्पदा?” दे हिल्लो पाप्तेक्म।

18 मिनु बारुकम “मेकोमी आं कली एको लोत्र नेल्ल ब्रेक्पाडक्ती। मिनु गो एको कागज मसीम ब्रेक्ताक्ड” दे माडक्तीमी।

19 मिनु मेको ठेयब मुरपुकीम बारुक कली “गे नु येरमीया निम्फा लशा, खुंडसीस। गे निकशी ते बाक्सी, दे सुडम मतुडक्तेक्म” दे माडक्तेक्म। येरमीया २५:८-११; येरमीया ७:२०; येरमीया ९:९-१०

20 मिनु मेकोपुकीमी मेको कागज ब्रेक्ब एली-शामा आ कोटाम वोडशशा, पिप आ बाक्तीक लशा, पिप कली मेको लोत्र नेल्ल शेंताक्मे।

21 मिनु पिपमी मेको कली “कागज चाक्को” दे येहूदी कली सोडक्ताक्व। मिनु मेकोमी ब्रेक्ब एली-शामा आ कोठा रे गुंडशा चाक्तु। मिनु येहूदीम पिप नु पिप आ नेक्था बाक्ब ठेयब मुर आन कली मेको पढेशा नेंपाडक्तु।

22 मेना मेको बर्स डा ९ महिना बाक्तीके, पिप हिंडुदम बाक्तीके, खिंम बाक्शो बाक्त। मेको आ डोंडतीमी ब्रशो बाक्त।

23 मिनु येहूदीम सां नु ४ हरप पढेने थुमानु, पिपम कागज खोडक्तीकेम खोडशशा, मीम हुन्ताक्व। मेको तोल्शो कागज नेल्ल मनुम्म सम्म पिपम मो पना पन बाक्त।

24 पिप नु मेको आ गेय पाडबपुकी मेको लोत्र नेंशा महिम। मेकोपुकीमी आन वा यो मखाक्गेम।

- 25 एल्नाथान, देलायाह नु गेमारायाहम पिप कली “मेको कागज मचोने” दे पुन्मेनु यो, पिपमी मेको आन लोत्र मनेन।
- 26 मेको आ पा डा पिपमी आ तौ येराहमेले, अजीएल आ तौ सेरायाह नु अब्देल आ तौ शेलेम्याह आन कली मेको ब्रेकब बारुक नु परमप्रभु यावे आ लोत्र पाइब येरमीया कली फ्रेशा चाक्चा नस, दे हुकुम गेम्तीमी। तन्न परमप्रभु यावेम मेको आस कली खुडक्ने थुम्शो बाक्त।
- 27 मिनु येरमीयामी ब्रेकपाइशशो बारुकम ब्रेकशो मेको तोल्शो कागज पिपम चोने थुमा नोले, परमप्रभु यावेमी येरमीया कली
- 28 “अर्को कागज काम यहूदा डा पिप येहो-याकीममी चोशो डोंडती डा कागजम बाकशो लोत्र नेल्ल लेंशा ब्रेकतो” दैत।
- 29 मिनु गे यहूदा डा पिप येहो-याकीम आ पर्वम परमप्रभु यावेम “गे मेको तोल्शो कागज चोप्तीवी। मिनु गे बारुक कली गे मारदे बेबीलोन डा पिप थमा पा जाक्शा, एको रागी श्येत्थ पोक्ब। मिनु मेकोमी मुर नु बस्तु भाव नेल्ल आन कली साइक्ब, दे कागजम ब्रेकती?” दैते।
- 30 मोपतीके परमप्रभु यावेमी यहूदा डा पिप येहो-याकीम आ पर्वम “मुल रे दाऊद आ निल्तीकेम मेको आ चच युड तेकोड मनिल्तीम। मेको पिप आ बेकशो रां नाक्त नांम नु नाकदो फुरशेम जिप्पाइक्चा डा पा तांइसीब। येरमीया २२:३०; येरमीया २२:१९
- 31 गो मेको कली, मेको आ आल आन कली नु आ गेय पाइब आन कली आन मरिम्शो पशो आ पर्वम सजाड गेनुडमी। गो मेको आन कली, यरूसलेममी बाक्ब आन कली नु यहूदामी बाक्ब नेल्ल आन कली आं देशो ठेयब श्येत नेल्ल गेनुड। मारदे हना मेकोपुकीमी आं देशो लोत्र मनेनेम” दैत।
- 32 मिनु येरमीयामी अर्को कागज का चाक्शा नेरीयाह आ तौ ब्रेकब बारुक कली गेपु। मिनु मेकोमी येरमीयाम देशो खोदेशो पा यहूदा डा पिप येहो-याकीममी मीम चोशो कागज डा लोत्र नेल्ल मेको कागजम ब्रेकताक्ब। मिनु येरमीयामी अरु शुश लोत्र यो मेकेर तेम्ताक्ब।

## 37

येरमीया कली चोक्शो

- 1 बेबीलोन डा पिप नेबुकदरेसरमी योसीयाह आ तौ सिदकीयाह कली यहूदा डा पिप सेल्शो बाक्त। मिनु येहो-याकीम आ तौ कोन्याह आ पा डा मेकोमी सासन पचा गोपु। येहो-याकीम आ अर्को नें कोन्याह बाक्ब। २राजा २४:१७
- 2 मिनु मेको, मेको आ गेय पाइबपुकी नु मेको रागी डा मुर नेल्लेम परमप्रभु यावे आ लोत्र पाइब येरमीया आ देशो परमप्रभु यावे आ लोत्र मनेनेम।
- 3 गो हना यो पिप सिदकीयाहम शेलेम्याह आ तौ येहुकल नु मासेयाह आ तौ चढ़ेब सेफन्याह आस कली परमप्रभु यावे आ लोत्र पाइब येरमीया आ बाक्तीकेम “आंइ पर्वम इ परमप्रभु यावे नु पुंइशा गेने” दैथ, मुर सोइक्ताक्ब। येरमीया ७:१६; येरमीया ४२:२
- 4 मेना सम्म येरमीया मुर आन दातेमी एर ओंथ गाक्ना गाक्न बाक्त। मारदे हना मेना सम्म मचोक्सीशो बाक्त।
- 5 मेना फाराओ आ लडाइ पाइबपुकी इजीप्ट रे जाक्शो बाक्तेक्म। मिनु कल्दी डा मुरपुकीमी यरूसलेम कली एर ओंथ नेल्ल रे पुम्शो लोत्र नैतेक्म। मिनु मेकोपुकी यरूसलेम रे नोले शोंइसाक्म।
- 6 मिनु परमप्रभु यावेम येरमीया कली लोत्र पापु।
- 7 मार लोत्र पापु देशा हना “परमप्रभु यावे, इस्राएली आन परमप्रभुमी ‘यहूदा डा पिपम आं कली हिल्लो पथ इ बाक्तीक सोइक्ताक्ब। मेको कली इ कली वारच पाइक्थ जाक्ब फाराओ आ लडाइ पाइब आन रागी इजीप्ट लेशशा लाइनीम, दे मतो।
- 8 मिनु कल्दी लेशशा जाक्नीम। मिनु एको सहर कली लडाइ तोइनीम। मिनु मेकोपुकीमी एको सहर ग्राशा, मीम क्रोइक्नीम’ देशो बाक्ब, दैत, मतो” दैत। येरमीया ३४:२२
- 9 परमप्रभु यावेमी “गेपुकीमी कल्दीम थमा पा आंइ कली लडाइ तोइनीम, दे मिम्तीन। मारदे हना मो पाइनीम।
- 10 गेपुकी नु लडाइ पाइब कल्दी नेल्ल आन कली गे ग्रातीनी हना, मेको आन गार दुम्शोपुकी ला आन ताम्बुम लीतेक्म हना यो, मेकोपुकी जाक्शा एको सहर कली मी सुइक्नीम” दैत।
- 11 फाराओ आ लडाइ पाइबपुकीम पतीके कल्दी यरूसलेम रे नोले शोंइसीची ना
- 12 येरमीया आं रू डा भाग ताक्चा कली यरूसलेम रे गूशा बेन्यामीन आ रागी गे लचा गोपु। येरमीया ३२:८-९
- 13 मिनु मेको बेन्यामीन लाप्चोमी जाक्दीम्मेनु, हनान्याह आ चच शेलेम्याह आ तौ खाल पाइब आन ठेयब मुर इरीयाहम येरमीया कली ग्याइशशा “गे प्रोक्शा कल्दी आन बाक्तीकेम लशो बाक्नेवे” दैत।
- 14 मिनु येरमीयामी “एको लोत्र थमा ममाइ। गो कल्दी आन बाक्तीके प्रोक्शा लशो मनड” दैत। तन्न इरीयाहम मेको आ लोत्र मनेन। मिनु मेकोमी येरमीया कली ग्याइशशा ठेयब मुर आन बाक्तीके चाक्तु।
- 15 मिनु मेकोपुकी येरमीया तशा गाइक्ताक्म। मिनु मेको कली तुप्शा, ब्रेकब योनाथन आ खिम चोक्शा वोइक्तेक्म। मारदे हना मेको खिं जेल्खान सेल्शो बाक्तेक्म। येरमीया २०:२
- 16 मेकोपुकीमी येरमीया कली जेल्खानम चोक्तेक्म। मिनु येरमीया थम छिडछिडम शुश नाक्त सम्म बाक्त।
- 17 मिनु पिप सिदकीयाहम मेको कली गुंइथ सोइक्ताक्ब। मिनु मेको कली दरवारम चाक्शा सुइम मतुइक्चा डा पा “मार, परमप्रभु यावे रे पा मारेइ लोत्र बाक्मे?” दे हिल्लो पापु। मिनु येरमीयामी “ओं, बाक्ब। गे बेबीलोन डा पिप आ गुइम गेचा पुंइसीनीन, देशो बाक्ब” दैत।



18 मिनू येरमीयामी पिप सिदकीयाह कली “गो इन कली, इन गेय पाइब ठेयब मुर आन कली नु एको मुर आन कली मार पडा डा? गे मारदे आं कली जेल्खानम चोक्यीनी?

19 इन कली नु एको रागी कली लडाइ तोचा कली बेबीलोन डा पिप मजाकब, दे इन कली देंब, परमप्रभु यावे आ लोत्र पाइबपुकी ते बाक्मा?

20 तन्न मुल आं प्रभु, पिप गो इन कली पुंडनुड। आं पुंडशो लोत्र नेनीन। आं देंचा माल्शो लोत्र इन डोंइती देंचा तडल। गो आं कली ब्रेकब योनाथन आ खिंम मसोइक्तीनी। मो दुम्त हना, गो मेकेर बेक्नुड” देत।

21 मिनू पिप सिदकीयाह आ हुकुममी येरमीया पिप आ दरवार खाल पाइब मुर आ जेल्खानम वोइक्चा पुंडसाकव। मिनू सहर डा शोब्ले चोतीक रे मनुम्म सम्म, नाक्त कित कित मेको कली शोब्ले चाक्शा गेम्तेकम। मोपा येरमीया पिप आ दरवार खाल पाइब आ जेल्खान डा लाडगाम बाक्त। येरमीया ३२:२

## 38

येरमीया कली इनारमी तोक्शो

1 मिनू मत्तान आ तौ शेफत्याह, पशहुर आ तौ गेदाल्याह, शेलेम्याह आ तौ युक्ल नु माल्कीयाह आ तौ पशहुरमी येरमीयामी मुर नेल्ल आन कली देशो लोत्र नेतेकम। मेको आ लोत्र मार बाक्त देशा हना, येरमीया २१:१

2 परमप्रभु यावेम “सु सु एको सहरमी बाक्नीमी, मेकोपुकी तरवार, अन्काल नु मुर बेक्तीक रोइम बेक्नीम। तन्न सु सु गुड पोक्शा, कल्दी आन बाक्तीके जाक्दीत्तीमी, मेकोपुकी चहिं ब्रॉइनीम। मेको आन गिंम प्रोइशा लडाइ रे ब्रॉइनीम” देशो बाक्त। येरमीया २१:९

3 मिनू परमप्रभु यावेमी “एको सहर थमा पा बेबीलोन डा पिप आ लडाइ पाइब आन गुडम दुम्ब। मिनू मेकोपुकीमी एको सहर आन के सेल्नीम” देत, दे येरमीयाम देशो बाक्त।

4 मिनू ठेयब मुरपुकीम पिप कली “एको मुर कली साइक्चा माल्ब। मारदे हना एकोमी ओदेशो लोत्र पा, एको सहरमी लीशो लडाइ पाइब नु मुर नेल्ल आन थुं लुकच लपाइशो बाक्ब। एको मुरुम मुर आन कली रिम्शो ममाइ मरिम्शो पचा दाक्ब” देतेकम।

5 मिनू पिप सिदकीयाहम “मेको इन गुडमीन बाक्ब। गो इन कली मारेइ पने मचापुंड” दे माइक्तीमी।

6 मोपतीके मेकोपुकीमी येरमीया कली लाइशशा, पिप आ तौ माल्कीयाह आ इनारम तोक्तेकम। मेको इनार पिप आ दरवार खाल पाइब आ लाडगाम बाक्त। मिनू मेकेर डोरीम फ्रेशा इनारम तोक्तेकम। मेको इनारमी ब्वाक्कु मबाक्माक्त। हिलो ला बाक्माक्त। मिनू येरमीया मेको हिलोम गुम्त।

7 मेकेर पिप आ खिंम गेय पाइब एबेद-मेलेक ने पाइशशो मुर का बाक्त। मेको एथीयोपीया डा बाक्त। मेकोमी येरमीया कली इनारम तोक्शो नेंतु। मेना पिप बेन्यामीन लाप्योमी बाक्शो बाक्त। येरमीया ३९:१५-१८

8 मिनू एबेद-मेलेक पिप आ खिं रे लशा पिप कली

9 “आं प्रभु, आं पिप, एको मुरपुकीम परमप्रभु यावे आ लोत्र पाइब येरमीया कली इनारम तोक्शा मरिम्शो पाम्तेकम। सहरम शोब्ले नुम नोले मेको मेकेर शोवलुम बेक्ब” देत।

10 मिनू पिपम कूशी, एथीयोपीया डा एबेद-मेलेक कली “एक रे मुर सां आन कली लाइशशा, मेको परमप्रभु यावे आ लोत्र पाइब येरमीया कली बेक्चा क्येडा डोंइती इनार रे गुंडदीन” दे अरेपुतु। का निक्शी मुरुमी ३० जना मुर ब्रेशो बाक्ब।

11 मोपतीके एबेद-मेलेकम मेको मुर आन कली लाइक्तु। मिनू पिप आ खिं डा मार मार वोइक्तीक आगा डा कोटाम लत। मिनू मेकेर रे माइत जेक्शो वासी गुंडताक्व। मिनू मेकोमी येरमीया कली मेको वासी डोरीम फ्रेशा तोक्तु।

12 मिनू एथीयोपीया डा एबेद-मेलेकमी येरमीया कली “इ बला आगा नु डोरी आन दातेमी एको माइत जेक्शो वासी वोतो” देत। मिनू येरमीयामी मो पापुतु।

13 मिनू मेकोपुकीमी डोरीम येरमीया कली इनार रे गुंडताक्मे। मेको नोले येरमीया पिप आ दरवार खाल पाइब मुर आ जेल्खान डा लाडगाम बाक्त।

सिदकीयाहम लेशा हिल्लो पशो

14 मिनू पिप सिदकीयाहम परमप्रभु यावे आ लोत्र पाइब येरमीया कली ब्रेत्थ सोइक्ताक्व। मिनू परमप्रभु यावे आ खिं डा निक्शी लाप्यो नोले डा ठेयब लाप्यो आ डोंइती चाक्पाइक्तीमी। मिनू पिपम येरमीया कली “गो इ कली लोत्र का निक्शी हिल्लो पाइनुड। आं डोंइती गे मारेइ लोत्र मखुइक्तो” दे माइक्तु।

15 मिनू येरमीयामी सिदकीयाह कली “गो इन कली लोत्र पाता हना, गे आं कली साइक्नीनी। गो इन कली अर्ती गेतनी हना, गे मेको मनेनीनी” देत।

16 मिनू पिप सिदकीयाहम सुइ आन मतुइक्चा डा पा, येरमीया नु कसम जशा “परमप्रभु यावे ब्रॉइशा बाक्शो खोदेशो पा, गो इ कली सोक्त गेपुतु। गो मेको आ नेमी कसम जशा देनुड। गो इ कली मसाइक्नुड। गो इ कली साइक्चा माल्ब मुर आन गुडम मगेनन” देत। येरमीया ३८:४-५

17 मिनू येरमीयामी सिदकीयाह कली “मुर नेल्ल आन परमप्रभु यावे, इस्राएली आन परमप्रभुमी ‘गे बेबीलोन डा पिप आ ठेयब मुर आन कली आंमान जिम्मा गेसाक्नी हना, इन सोक्त ब्रॉइब। मिनू एको सहर क्रोइक्चा मपुंडसीब। मिनू इन खिं डा मुरपुकी यो ब्रॉइनीमी।

18 तन्न गे आंमान बेबीलोन डा पिप आ ठेयब मुर आन गुडम जिम्मा मगेसाक्नी हना, एको सहर कल्दी आन गुडम गेसीब। मिनू मेकोपुकीमी एको कली क्रोइक्नीम। मिनू गे मेको आन गुड रे मब्रॉइनीनी” देशो बाक्ब” देत।

- 19 मिनू पिप सिदकीयाहम येरमीया कली “कल्दी आन बाक्तीकेम प्रोक्शा लशो यहूदीपुकी तशा, गो हिंशो बाक्नुड। मारदे हना कल्दीपुकीम आं कली मेको आन गुडम जिम्मा गेतीमी हना, मेकोपुकीमी आं कली मरिम्शो पाइक्नीम” देंत।
- 20 मिनू येरमीयामी “मेकोपुकीमी इन कली मेको आन गुडम जिम्मा मगेनीम। गो इन कली देंशो परमप्रभु यावे आ लोत्र टिने। मिनू इन कली रिम्शो दुम्ब। इन सोक्ती यो ब्रोंडब।
- 21 तन्न गे मेको आन गुडम जिम्मा गेंसीने मबिस्साक्नी हना, परमप्रभु यावेम आं कली कोंडशो एकोन बाक्ब।
- 22 यहूदा डा पिप आ दरवारम प्रोंडसीशो मीश मुर नेल्ल बेबीलोन डा पिप आ ठेयब मुर आन बाक्तीके लाइक्नीम। मिनू मेको मीश मुरपुकीम इन कली ‘इन थमा सुडशो इन वारचपुकीम इन कली जोल पाम्तेक्म। मुल इन खोइली हिलोम गुम्शो बाक्ब। इन वारचपुकीम इन कली प्रोंडशो बाक्नीम’ देंनीम।
- 23 इन मीशपुकी नु इन आल नेल्ल कल्दी आन बाक्तीके चाक्दीत्नीम। गे आंमा यो कल्दी आन गुड रे ब्रोंडचा मताइनीनी। बेबीलोन डा पिपम इन कली ग्याइक्ब। मिनू एको सहर चहिं क्रोइक्नीम, देंशो बाक्ब” देंत। येरमीया ३२:४; येरमीया ३४:३
- 24 मिनू सिदकीयाहम येरमीया कली “एको लोत्रसी पशो सुडम मतुडक्तमेक्ल। मो मटुम्त हना, गे साइक्चा पुंडसीनेवे।
- 25 गो गे नु लोत्र पशो ठेयब मुरपुकीम तुडक्ताक्म हना, मिनू इ बाक्तीक जाक्शा ‘पिप कली मार, देंनी? मिनू पिपम मार, देमे? आंइ रे मारेइ लोत्र मखुडक्तीन। मो पाइतीनी हना गो इन कली साइक्नीकी, दे इ कली हिल्लो पाम्तेक्म हना,
- 26 गेमी मेको आन कली “गो आं कली साइक्चा कली योनाथन आ खिंम मसोइक्तीनी” दे गो पिप नु लोत्र का ला पाता’ देनो” दे माइक्तु।
- 27 मिनू ठेयब मुर नेल्ल येरमीया आ बाक्तीक जाक्शा, हिल्लो पाम्तेक्म। मिनू मेकोमी पिपम देंशो खोदेंशो पा, मेको आन कली माइक्तीमी। मोपतीके मेकोपुकीमी मेको कली अरु मारेइ हिल्लो मपामे। मारदे हना पिप नु येरमीया आस दातेम पशो लोत्र सुडम मतुडक्तेम।
- 28 मिनू यरूसलेम ग्रातीक नाक्त सम्म येरमीया पिप आ दरवार खाल पाइब मुर आ लाडगा डा जेल्खानम बाक्शो बाक्त। येरमीया ३९:२१

## 39

यरूसलेम क्याम्चा पुंडसीशो

- 1 यहूदा डा पिप सिदकीयाहम सासन पवा आ ९ बर्स १० महिनाम बेबीलोन डा पिप नेबुकदरेसर नु मेको आ लडाइ पाइब नेल्ल जाक्शा, यरूसलेम कली लडाइ तोशा एर ओंथ नेल्ल रे पुम्ताक्म। येरमीया ५२:४-१६; २राजा २५:१-१२
- 2 मिनू सिदकीयाहम सासन पशो ११ बर्स ४ महिना ९ नाक्ती मेको सहर डा गारो प्रेशशा ओत्रतेक्म।
- 3 मिनू यरूसलेम ग्राशा, बेबीलोन डा पिप आ ठेयब मुर नेल्ल जाक्शा दाते डा लाप्चोमी बाक्तेक्म। नेरगल-शरेसेर, साम्गार-नेबो, सारसेकीम नेल्ल क्येडा ठेयब निसाफ पाइब नेरगल-शरेसेर नु बेबीलोन डा पिप आ ठेयब गेय पाइब मुर नेल्ल जाक्शा बाक्तेक्म।
- 4 मिनू यहूदा डा पिप सिदकीयाह नु आ लडाइ पाइब नेल्लेम मेको आन कली ताम्तेक्म। मिनू मेकोपुकी गारो निक्शी आस दातेम बाक्शो लाप्चो, पिप आ फल फुल रू रे पा नाक्दोन सहर रे प्रोक्शा, अराबाह गे लाम्तेक्म।
- 5 तन्न कल्दी आन लडाइ पाइबपुकीम मेको आन कली खेदा पाम्तेक्म। मिनू सिदकीयाह कली यरीको डा दिंम थित्तेक्म। मिनू मेकोपुकीमी मेको कली ग्याइश्शा, हमाथ रागी डा रिब्ला देंशो सहरमी बेबीलोन डा पिप नेबुकदरेसर आ बाक्तीके चाक्दीत्तेक्म। मिनू मेकोमी सिदकीयाह कली सजाइ गेतीक देंत।
- 6 मेको रिब्लामी बेबीलोन डा पिपम सिदकीयाह आ तौ आन कली आ डोंइतीन साइक्तीमी। मिनू यहूदा डा ठेयब मुर आन कली यो साइक्तीमी।
- 7 मेकोमी सिदकीयाह आ मिक्वी फेत्ताक्ब। मिनू बेबीलोन लाइक्चा कली साइलोमी फ्रेपाइक्तु।
- 8 कल्दीपुकीम पिप आ दरवार नु मुर आन खिंम मी सुडक्ताक्मे। मिनू यरूसलेम डा गारो प्रेत्तेक्म।
- 9 मिनू पिप कली कोत्रब आन कप्तानम नेबुजरदानमी सहरमी प्रोंडचा पुंडसीशो लीशो मुरपुकी, मेको आन बाक्तीक प्रोक्शा जाक्ब नु अरु लीशो मुर आन कली फ्रेशा बेबीलोन लाइक्तीमी।
- 10 तन्न पिप कली कोत्रब आन कप्तान नेबुजरदानमी मारेइ मपाइश्शो पुडय आन कली यहूदा रागीमी प्रोंडशा वोइक्तीमी। मिनू मेको आन कली मेकोमी अडगुर रू नु अरु रूपुकी गेम्तीमी।
- 11 मिनू बेबीलोन डा पिप नेबुकदरेसरमी आ कली कोत्रब आन कप्तान नेबुजरदान कली येरमीया आ पर्बम
- 12 “मेको कली लाइश्शा, रिम्शो पा कोत्रशा वोतीन। मेको कली मारेइ मरिम्शो मपावो। मेकोमी इ कली देंशो खोदेंशो पा, गे मेको कली पावो” दे माइक्तु। येरमीया ४०:४
- 13 मोपतीके पिप कली कोत्रब आन कप्तान नेबुजरदान, नेल्ल क्येडा ठेयब मुर नेबुशाज्बान, निसाफ पाइब ठेयब मुर नेरगल-शरेसेर नु बेबीलोन डा पिप आ अरु ठेयब मुरपुकीम
- 14 मुर सोइश्शा, येरमीया कली जेल्खान डा लाडगा रे चाक्पाइक्तेक्म। मेको कली आ खिंम लाइक्तीक जिम्मा शाफान आ चच अहीकाम आ तौ गेदाल्याह कली गेम्तेक्म। मोपा येरमीया आ मुरपुकी नु बाक्त। येरमीया ३८:२८; येरमीया ४०:५-६, १४-१६
- 15 मिनू येरमीया जेल्खान डा लाडगाम बाक्मेनु, परमप्रभु यावेम येरमीया ३८:७

16 मार, लोत्र पशो बाक्त देशा हना “लशा, कृशी एथीयोपीया डा मुर एबेद-मेलेक कली ‘मुर नेल्ल आन परमप्रभु यावे, इस्राएली आन परमप्रभुमी रिम्शो पा ममाइ, तन्न श्येत गेशा, एको सहर आ पर्वम गो मार पाइनुड देशो बाक्का, मेको खाप्चा चिक्शो बाक्नुड। मेको इ डोंडतीन मेको नाक्ती दुम्ब।

17 तन्न गो इ कली मेको नाक्ती प्रॉइनन। मिनु गे तेको मुर आन क्येडा हिनेवे मेको आन गुडम मटुम्नेवे’ दैत मतो।

18 परमप्रभु यावेमी ‘गो इ कली थमा पा प्रॉइनन। गे तरवारम साइक्चा मपुंडसीनेवे। गे लडाइ रे इ गिंग प्रॉइशा प्रोक्नेवे। मारदे हना गे आं कली थमा सुइशो बाक्नेवे देशो बाक्ब’ दे मतो” दे परमप्रभु यावेमी दैत।

## 40

येरमीया कली प्रॉइशो

1 मिनु पिप कली कोत्रब आन कप्तान नेबुजरादानमी, येरमीया कली साडलोमी फ्रेशा यरूसलेम नु यहूदा डा फ्रेशो मुरपुकी नु बेबीलोन लाइक्चा चिक्शो थिदा बाक्त। मिनु येरमीयामी रामाह प्रोना नोले परमप्रभु यावेमी मेको कली लोत्र पाप्तु। येरमीया ३९:११-१४

2 मिनु पिप कली कोत्रब आन कप्तानमी येरमीया कली थिश्शा, मेको कली “परमप्रभु यावे, इ परमप्रभुम एको रागीम ठेयब श्येत गेतीक आ पर्वम लोत्र पशो बाक्त।

3 मुल परमप्रभु यावेम एको रागी क्याम्ताक्व। मिनु मेकोमी आ देशो खोदेशो पाप्तु। मारदे हना गेपुकीम परमप्रभु यावे कली पाप पाइतीनी। मिनु मेको आ देशो मटिनी। मोपतीके इन कली ओदेशो दुम्त।

4 तन्न मुलाक्ती गो इ गुड डा साडलो प्रुइक्ताक्व। गे गो नु बेबीलोन लचा दाक्नेवे हना, गाक्को। गो इ कली रिम्शो पा कोत्रनुड। तन्न गे गो नु बेबीलोन लल मदाक्ते हना, बाक्को। कोत्रडो, एको रागी नेल्ल इ डोंडती बाक्ब। गे ते लल दाक्नेवे, मेक लने चाप्नेवे’ दे माइक्तु। येरमीया ३९:१२

5 मो हना यो येरमीया लचा चिक्तानु नेबुजरादानमी लेशशा कोत्रशा “शाफान आ तौ अहीकाम आ चच गेदाल्याह आ बाक्तीक लावो। मेको कली बेबीलोन डा पिपम यहूदा राज्य डा हुकुम पाइब सेल्शो बाक्ब। मेकेर मेको नु अरु मुरपुकी नु बाक्को। गे ते लत दाक्डे, मेक लावो” माइक्तु। मिनु मेको पिप कली कोत्रब कप्तानमी मेको कली जचा थोत्रक नु अरु कोसेलीपुकी गेत्तु। मिनु मेको कली प्रॉइतु। येरमीया ३९:१४

6 मोपतीके येरमीया अहीकाम आ तौ गेदाल्याह आ बाक्तीके मिस्पा सहर लत। मिनु मेको नु रागीम प्रॉइशा वोइशो मुरपुकी नु बाक्त।

गेदाल्याह यहूदाम हुकुम पशो

7 मिनु लडाइ पाइब आन ठेयब मुर नेल्ल नु आन मुरपुकीमी “बेबीलोन डा पिपमी अहीकाम आ तौ गेदाल्याह कली मेको रागी डा हुकुम पाइब सेल्लु। मिनु मेको रागी डा नेल्ल आन क्येडा पुडग मीश मुर, आल नु पुडग मुर आन कली फ्रेशा बेबीलोन मलाइशो मेको गेदाल्याह नु बाक्नीम” देशो नैतेक्म। २राजा २५:२२-२४

8 मिनु मेको नेल्ल मिस्पा सहरम गेदाल्याह आ बाक्तीकेम लाम्तेक्म। नेथन्याह आ तौ इश्माएल, कारेआह आ तौ योहानान नु योनाथन, तन्धुमेथ आ तौ सेरायाह, नेतोफाह आ मुर एफाइ आ तौपुकी, माकाथी आ तौ येजन्याह नु मेको आन मुर नेल्ल लाम्तेक्म। येरमीया ४१:१,११

9 मिनु शाफान आ चच अहीकाम आ तौ गेदाल्याहम मेकोपुकी नु मेको आन मुर नु कसम जशा “कल्दी आन गेय पचा कली महनीन। रागीम बाक्शा बेबीलोन डा पिप आ गेय पने। मिनु इन कली रिम्शो दुम्ब।

10 गो इ बाक्तीक जाक्ब कल्दी आन डोंडती इन ठेयब मुर दुम्शा लोत्र पचा कली मिस्पा सहरमी बाक्नुड। गेपुकीम चहिं अडगुर, बर्खाम सिप्ब फल फुल नु तेल इन ग्योबुम वोतीन। मिनु इन योत्रशो सहरमी बाक्कीन” दे माइक्तीमी।

11 मिनु मोआब, अम्मोन, एदोम नु अर्को रागीपुकीम बाक्ब यहूदी नेल्लेम मेको लोत्र नैतेक्म। बेबीलोन डा पिपम का निक्शी मुर आन कली यहूदामी प्रॉइशा वोइशो बाक्ब, दे नैतेक्म। मिनु शाफान आ चच अहीकाम आ तौ गेदाल्याह कली मेकेर डा हुकुम पाइब सेल्शा वोइशो बाक्ब, दे यो नैतेक्म।

12 मिनु नोले यहूदी नेल्ल ते ते ब्रशो बाक्मा, मेक मेक रे लेशशा, यहूदा रागी मिस्पाम गेदाल्याह आ बाक्तीकेम जाक्तेक्म। मिनु मेकोपुकीम शुश फल फुल नु अडगुर नु पोत्रशी खुप्ताक्मे।

13 मिनु कारेआह आ तौ योहानान नु गाउं गाउंम बाक्शो लडाइ पाइब मुर आन ठेयब मुर गेदाल्याह आ बाक्तीके मिस्पाम जाक्तेक्म।

14 मिनु मेको कली “अम्मोनी आन पिप बालीसमी नेथन्याह आ तौ इश्माएल कली इन कली साइक्चा कली सोइशो बाक्ब, दे तुइक्नीनी?” दैतेक्म। तन्न अहीकाम आ तौ गेदाल्याहम मेको आन लोत्र थमा मसुद।

15 मिनु कारेआह आ तौ योहानानम मिस्पाम गेदाल्याह कली “सुडम मटुइक्चा डा पा नेथन्याह आ तौ इश्माएल कली साइक्चा कली आं कली हुकुम गेयीनी। एको लोत्र सुडम मटुइक्नीम। इन एर ओंथ नेल्ल देल्शो यहूदी आन कली ब्रापाइक्चा कली नु यहूदामी लीशो आन कली साइक्चा कली मेकोमी मारदे इन कली साइक्चा मला?” दैत।

16 तन्न अहीकाम आ तौ गेदाल्याहम कारेआह आ तौ योहानान कली “गे मोदेशो गेय मपावो। मारदे हना इश्माएल आ पर्वम इ पशो लोत्र थमा ममाइ” दे माइक्तु।

## 41

गेदाल्याह कली साइशशो

२राजा २५:२५

1 मिनु मेको ७ महिनाम पिप आ खिं डा मुर एली-शामा आ चच नेथन्याह आ तौ इश्माएल नु पिप आ नेल्ल क्येडा टेयब गेय पाइब अरु १० जना मुर मिस्पा सहरम अहीकाम आ तौ गेदाल्याह आ बाक्तीके जाक्तेकम। मेको नेल्ल मेकेर काथा शोब्ले जन जन बाक्तेकम। येरमीया ४०:८

2 मेना नेथन्याह आ तौ इश्माएल नु मेको १० जना मुर बोक्शा, बेबीलोन डा पिपम हुकुम पाइब सेल्शा वोइशशो शाफान आ चच अहीकाम आ तौ गेदाल्याह कली तरवारम क्योरशा साइक्तेकम। येरमीया ४०:५

3 मिनु इश्माएलमी मिस्पा गेदाल्याह नु बाक्शो यहूदी नेल्ल नु मेकेर बाक्शो लडाइ पाइब कल्दी आन कली यो साइक्तीमी।

4 मिनु मुरपुकीमी गेदाल्याह साइशशो लोत्र तुइक्का क्येडा डोंडती आ दीसा सुनी,

5 शेकम, शिलो नु सामरीया रे आन गाल शोक्ने प्रेक्शो, आन वा खाक्शो नु आन रां चेशशो ८० जना मुरपुकी परमप्रभु यावे आ खिंम अन्न चढेचा कली नु धूप चोचा कली जाक्तेकम। येरमीया १६:६

6 नेथन्याह आ तौ इश्माएल मिस्पा रे डाक्ना डाक्न, मेको आन कली गुम्थ जाकत। मिनु मेको आन कली गुम्था मेकोमी “अहीकाम आ तौ गेदाल्याह आ बाक्तीक जाक्तीन” देत।

7 मिनु मेकोपुकी सहर आ आगा ओत्रतेकम। मिनु नेथन्याह आ तौ इश्माएल नु मेको आ मुरपुकीम मेको आन कली साइक्तेकम। मिनु मेको आन बेक्शो रां इनार काम ताइक्ताकम।

8 तन्न मेको आन दाते डा १० जना मुरपुकीम इश्माएल कली “आंइ कली मसाइक्की। गोपुकी नु रू कामी खुइशशा, वोइशशो चेरब क्योत्रजी तेल नु खुदो बाक्तीम” देतेकम। मोपतीके मेकोमी मेको आन कली प्रोइतीमी। मेको आन कली अरु नु मसद।

9 मेको इनारम इश्माएलमी मुर आन कली साइशशा ताइशशो बाकत। मेको इनार पिप आसाम इसाएल डा पिप बाशा क्येडा हिंशा ब्रोंइचा कली दोशो बाकत। नेथन्याह आ तौ इश्माएलमी मेको इनार आ साइशशो मुरपुकीम प्रिताकव। १राजा १५:१६-२४

10 मेको नोले इश्माएलमी, मिस्पा बाक्शो लीशो मुर नेल्ल, पिप आ तमीपुकी नु अरु मुर नेल्ल आन कली ग्याइक्ताकमी। मेको आन कली पिप कली कोत्रब आन कप्तान नेबुजरादानमी अहीकाम आ तौ गेदाल्याह आ गुडम गेशो बाकत। मिनु नेथन्याह आ तौ इश्माएलम मेको नेल्ल आन कली ग्याइशशा खोला आइक्की हांबु अम्मोनी आन रागीम लाइक्का कली गाकत।

11 मिनु कारेआह आ तौ योहानान नु मेको नु बाक्शो लडाइ पाइब आन टेयब मुर नेल्लेम नेथन्याह आ तौ इश्माएलमी मरिम्शो पशो नेल्ल नेतेकम। येरमीया ४०:८, १३-१६

12 मिनु मेको नेल्लेम आन मुर नेल्ल आन कली लाइशशा नेथन्याह आ तौ इश्माएल नु लडाइ पथ गाक्तेकम। मिनु मेकोपुकीमी मेको कली गिबोन डा टेयब दोम्ली आ नेक्था थित्तेकम। २सामुएल २:१३

13 मिनु इश्माएलम ग्याइशशा लाइशशो मेको नु बाक्शो मुरपुकीम, कारेआह आ तौ योहानान नु मेको नु बाक्शो लडाइ पाइब आन टेयब मुर नेल्ल आन कली तशा, ग्येरसाकम।

14 मिनु इश्माएलमी मिस्पा रे ग्याइशशा लाइशशो मुर नेल्ल कारेआह आ तौ योहानान आ बाक्तीके लेशशा जाक्तेकम।

15 तन्न नेथन्याह आ तौ इश्माएल नु ८ जना अरु मुर योहानान रे प्रोक्शा अम्मोनी आन रागी लाम्तेकम।

16 मिनु अहीकाम आ तौ गेदाल्याह कली सदमे नोले, नेथन्याह आ तौ इश्माएलमी गिबोन रे चाक्शो ब्रोंइशो आन कली लडाइ पाइबपुकी, मीश मुरपुकी, आलपुकी नु दरवारम गेय पाइब मुर आन कली, कारेआह आ तौ योहानान नु मेको नु बाक्शो लडाइ पाइब आन टेयब मुरपुकीम गिबोन रे लेल्ताकम।

17 मिनु मेकोपुकी इजीप्त लचा कली मिष्ठा बेथलेहेम डा गेरुथ-किम्हामम बास बाक्तेकम। २सामुएल १९:३८; येरमीया ४३:७

18 मेकोपुकी कल्दी आन क्येडा हिंशो बाक्तेकम। मारदे हना बेबीलोन डा पिपमी मेको रागी कली योत्रशा वोइशशो हुकुम पाइब अहीकाम आ तौ गेदाल्याह कली नेथन्याह आ तौ इश्माएलमी साइशशो बाकत।

## 42

इजीप्त लशो

1 मिनु लडाइ पाइब आन टेयब मुर नेल्ले, कारेआह आ तौ योहानान, होशयाह आ तौ येजन्याह नु आइक्च टेयब मुर नेल्ले येजन्याह कली अजारयाह यो ब्रेक्नीम।

2 परमप्रभु यावे आ लोत्र पाइब येरमीया आ बाक्तीके जाक्तेकम। मिनु मेको कली “गो आंइ पुंइशो नेनीन। मिनु परमप्रभु यावे, इन परमप्रभु कली आंइ पर्वम नु लीशो मुर नेल्ल आन पर्वम पुनीन। मारदे हना शुश मुर रे का निक्शी ला लीतक। मेको गे आंमा ताइतीनी। येरमीया ३७:३

3 मिनु परमप्रभु यावे, इन परमप्रभुम गो ते लचा माल्नीकी, मार पचा माल्नीकी, मेको कोंइदल, दे पुनीन” देतेकम।

4 मिनु परमप्रभु यावे आ लोत्र पाइब येरमीयामी मेको आन कली “दुम्ब। गो इन पर्वम इन देंशो खोंदेंशो पा परमप्रभु यावे इन परमप्रभु कली पुंइनुड। मिनु परमप्रभु यावेम मार देंमे, मेको नेल्ल इन कली शेनुड। गो इन डोंइती मारेइ लोत्र मखुइक्नुड” देत।

- 5 मिनू मेकोपुकीमी येरमीया कली “परमप्रभु यावे, इन परमप्रभुमी कोंडशो नु आंड कली देशो लोव्र गोपुकीम मपाइतक हना, परमप्रभु यावे आंड पर्वम थमा नु ठीक लोव्र पाइब सांकळी दुम्ल।
- 6 मेको रिम्शो दुम्ल कि मरिम्शो दुम्ल। गो परमप्रभु यावे, इ परमप्रभु आ बाक्तीक इन कली सोइक्ताक। गोपुकीम मेको आ अरेशो टीनीकी। मिनू परमप्रभु यावे, इ परमप्रभु आ लोव्र टितीके, गो आंड कली रिम्शो दुम्ल” देतेकम।
- 7 मिनू १० नाक्त नोले परमप्रभु यावेम येरमीया कली लोव्र पाप्टु।
- 8 मिनू येरमीयामी कारेआह आ तौ योहानान नु मेको नु बाक्शो लडाइ पाइब आन ठेयब मुर नेल्ल, आइक्ची नु ठेयब मुर नेल्ल आन कली ब्रेताकमी।
- 9 मिनू येरमीयामी मेको आन कली “गे आं कली परमप्रभु यावे, इस्राएली आन परमप्रभु आ डोंडती पुंडथ सोइक्ताकयीनी।
- 10 मिनू परमप्रभु यावेमी इन कली ‘एको रागीमीन बाक्तीनी हना, गो इन कली रिम्शो सेल्लन्नी, मप्रेल्लन्नी। गो इन कली खुम्लन्नी, मतुल्लन्नी। मारदे हना गो इन कली खतम पोक्शो आ पर्वम आं थुं खाइश्शो बाक्नुड। येरमीया १:१०
- 11 मुल गे बेबीलोन डा पिप क्येडा महिनीन। मारदे हना गो इन कली मेको आ गुड रे प्रोंडचा नु श्येत मगेपाइक्चा कली गोपुकी नु बाक्शो बाक्नुड।
- 12 गो इन कली शिशी पाइक्नन्नी। मिनू मेकोमी इन कली शिशी पा इन बाक्शो रागीमीन वोइक्ब’ देशो बाक्ब।
- 13 तन्न गोपुकीम परमप्रभु यावे, इन परमप्रभु आ लोव्र मटीतीनी हना ‘गोपुकी एको रागीम मबाक्नीकी’ देतीनी हना, येरमीया २९:१७-१८
- 14 गोपुकी इजीप्त लशा बाक्नीकी। मारदे हना मेकेर लडाइ मतांडसीब, तुराही ताप्शो सेंदा मनेंसीब, शोब्ले जचा मतथु शोव्रलुम मबेक्सीब। गो मेकेन बाक्नीकी देतीनी हना,
- 15 यहूदा डा लीशोपुकी, परमप्रभु यावे आ लोव्र नेनीन। मुर नेल्ल आन परमप्रभु यावे, इस्राएली आन परमप्रभुम ‘गोपुकी इजीप्त लशा मेकेर बाक्चा कली थमा पा मिम्शो बाक्तीनी हना,
- 16 तेको तरवार रे पा गे हिंशा प्रोक्शो बाक्नी, मेको तरवारमी इन कली इजीप्तमी साइक्ब। मिनू तेको अन्काल रे पा, गे हिंशो बाक्नी, मेको इजीप्तमी इन नोनोले जाक्ब। मिनू गे मेकेर बेक्नीनी।
- 17 सु सु इजीप्त लशा बाक्नीमी, मेको नेल्ल तरवार, अन्काल नु मुर बेक्ती रोडम बेक्नीम। गो इन कली खतम पोक्तीक रे का यो मब्रोंडनीनी’ देशो बाक्ब” देत।
- 18 मुर नेल्ल आन परमप्रभु यावे, इस्राएली आन परमप्रभुम “दोपा आं गाइश्शो नु चुरशो यरूसलेमम बाक्ब मुर आन तार मोइसे, मोपान गोपुकी इजीप्त लाइतीनी हना, आं चुरतीके इन तार मोइसीब। इन श्येत जशो तशा मुर हिनीम। गोपुकी सराप राइब नु शुक्शी पाइक्चा पुंडसीब दुम्नीनी। गोपुकीम लेंशा एको रागी गेनायो कोव्रचा मताइनीनी” देशो बाक्ब। येरमीया २५:१९; येरमीया ४४:१२
- 19 ए यहूदा डा लीशोपुकी, परमप्रभु यावेमी इन कली “गोपुकी इजीप्त मलने, देशो लोव्र तुइश्शा वोतीन। मुलाक्ती गो इन कली हिंच कोंडशा लोव्र पाता।
- 20 गोपुकीम ठेयब मरिम्शो का पाइतीनी। गोपुकीम आं कली परमप्रभु यावे, इन परमप्रभु आ डोंडती परमप्रभु यावेम, आंड परमप्रभु मार देंचा, मेको नेल्ल आंड कली शेंदीकी। मिनू गो मेको नेल्ल पाइनीकी देतीनी।
- 21 मुलाक्ती गो मेको नेल्ल इन कली शेंताक्नन्नी। परमप्रभु यावे, इन परमप्रभुम मार देंचा, दे सोइक्ती, मेको लोव्र इन कली देती, तन्न मुल सम्म मटिशो बाक्नीनी।
- 22 मोपतीके मुल एको लोव्र थमा पा तुइश्शा वोतीन। इन बाक्चा कली लचा दाक्शो रागीमीन गोपुकी तरवार, अन्काल नु मुर बेक्तीक रोडम बेक्नीनी देशो बाक्ब” देत।

## 43

येरमीया इजीप्त लाइक्चा पुंडसीशो

- 1 मिनू येरमीयामी परमप्रभु यावे, आन परमप्रभु आ पशो लोव्र नेल्ल मेको आन कली देने थ्युन्तु। परमप्रभु यावे, आन परमप्रभुमी येरमीया कली मेको आन कली मेको लोव्र पथ सोइश्शो बाक्त।
- 2 मिनू होशयाह आ तौ अजारयाह कारेआह आ तौ योहानान नु मटीब मुर नेल्लेम येरमीया कली “गे जोल पाइतीनी। गोपुकी इजीप्तम बाक्थ लचा मदुम्नीनी देंचा कली परमप्रभु यावे, आंड परमप्रभुमी इन कली सोइश्शो ममाइ। येरमीया ४२:१९
- 3 तन्न कल्दीपुकीम आंड कली सदमेक्ल कि ग्याइश्शा बेबीलोनमी लदमेक्ल, दे मिम्शा, नेरीयाह आ तौ बारुकमी इन कली आंड पर्वम मरिम्शो पचा कली क्युक्शो बाक्ब” देतेकम। येरमीया ३६:३२
- 4 मोपतीके कारेआह आ तौ योहानान, लडाइ पाइब आन ठेयब मुर नेल्ले नु अरु मुर नेल्लेम यहूदामी बाक्चा माल्ब, देशो परमप्रभु यावे आ लोव्र मटीम।
- 5 मेको आ पा डा कारेआह आ तौ योहानान नु लडाइ पाइब आन ठेयब मुर नेल्लेम यहूदामी बाक्शो मुर नेल्ल आन कली, जात जात डा मुर आन दातेम ब्रशा लेंशा यहूदामी बाक्थ जाक्शो मुर नेल्ल आन कली खुप्शा लाइक्तेकम।
- 6 मेकोपुकीम पिप कली कोव्रब आन कप्तान नेबुजरादानमी शाफान आ चच अहीकाम आ तौ गेदाल्याह आ गुडम गेशो, मीश मुरपुकी, वोंडश मुरपुकी, आल ब्रेचपुकी, पिप आ तमीपुकी, येरमीया नु नेरीयाह आ तौ बारुक कली यो लाइक्तेकम।

7 मोपा परमप्रभु यावे आ अरेशो मटिथु, मेकोपुकी इजीप्त लाम्तेक्म। मिनु ताहपनेसम जाकदीत्तेक्म। येरमीया ४२:१४-१७; २राजा २५:२६

8 मिनु परमप्रभु यावेम ताहपनेसम येरमीया कली लोत्र पाप्तु।

9 मार लोत्र पाप्तु दॅशा हना “इ गुडमी ठेयब ठेयब फुल्लु क्युक्को। मिनु यहूदीपुकीम कोवना कोवन बाक्मानु, ताहपनेसम बाक्शो फाराओ, आ दरवार डा आगा ओव्रतीक लामी खुइशशा थिम्शा वोतो।

10 मिनु मेको आन कली मुर नेल्ल आन परमप्रभु यावे, इस्राएली आन परमप्रभुमी ‘गो आं गेय पाइब बेबीलोन डा पिप नेबुकदरेसर कली ब्रेल्लुडा। मिनु आं खुइशशा वोइशशो एको फुल्लु तार गो मेको आ नित्तीके सेल्लुडा। मेकोमी मेको तार आ बाक्तीक ताम्बु कीब। येरमीया २५:९

11 मेको जाक्शा इजीप्त कली लडाइ तोइब। मिनु बेक्तीक रोइम बेक्चा ब्रेक्शो, बेक्तीक रोइ पा बेक्नीम। ग्याइशशा लाइक्चा पुंडसीचा ब्रेक्शो, ग्याइशशा लाइक्चा पुंडसीनीम। मिनु तरवारम साइक्चा पुंडसीचा ब्रेक्शो, तरवार साइक्चा पुंडसीनीम। येरमीया १५:२

12 मेकोमी इजीप्त डा मूर्ति आन खिम मी सुइक्ब। मेकोमी मेको आन खिम आन कली क्रोइक्ब। मिनु मेको देवी देवता आन कली लाइक्ब। मिनु गोठलापुकीम दोपा आन वा रे नेक्स गुप्नीमी, मोपा मेकोमी इजीप्त रागी डा मूर्ति आन कली गुप्शा ताइब। मिनु मारेइ मदुम्थु आ रागी लेप्ब। येरमीया ४६:२५

13 मेकोमी इजीप्त डा हेल्योपोलीस सहरम बाक्शो नां आ मूर्ति बाक्शो थामपुकी प्रेक्ब। मिनु इजीप्त डा देवी देवता आन खिम मी सुइक्ब’ दॅशो बाक्ब” दॅत।

## 44

मूर्ति पूजा पतीके जाम्शो

1 परमप्रभु यावेमी येरमीया कली इजीप्त मिग्दोल, ताहपनेस, मेम्फीस नु पश्रोस रागीम बाक्ब यहूदी नेल्ल आन पबर्म लोत्र पाप्तु। येरमीया ४३:७

2 मुर नेल्ल आन परमप्रभु यावे, इस्राएली आन परमप्रभुमी मार लोत्र पाप्तु दॅशा हना “गो यरूसलेम नु यहूदा डा सहर नेल्ल आन कली शुश श्येत गेता। गेपुकीमी मेको आंमा ताइतीनी। मेको सहर कोव्रडीन। मुर मबाक्तीके श्येतथ दुम्शो बाक्नीम।

3 मारदे मोदॅशो दुम्त दॅशा हना, मेकेर डा मुरुमी आं अरेशो मटिथु, गाइक्पाइक्तीमी। मेकोपुकीमी देवी देवता आन कली चढेशा मेको आन नोले खोइक्तेक्म। डोंइती मेकोपुकी, गेपुकी नु इन किकी पिपीमी यो मेको आन कली मतुइशशो बाक्तेक्म।

4 मो हना यो गो आं गेय पाइब आं लोत्र पाइब आन कली मेको आन बाक्तीके सोइक्ना सोइक्न ‘गो इन कली मेको आं काइ मदाक्शो ग्रंथा दिशो गेय मपन’ दॅपाइक्तामी। येरमीया २५:४

5 तन्न मेकोपुकीमी मनेनेम। आन नोफान मदाइक्तेम। मेको आं अरेशो मटितीक रे मलेम्म। मेकोपुकीमी देवी देवता आन कली चढेचा मप्रनेम।

6 मोपतीके गो यहूदा डा सहर नु यरूसलेम डा लाम आं शुश गाइशशो नु चुरशो मोइक्ता। मिनु मेको सहर ब्रेशो नु मुर मबाक्तीके दुम्तेक्म। मुलाक्ती मोदॅशो बाक्ब” दॅत।

7 मिनु मुल मुर नेल्ल आन परमप्रभु यावे, इस्राएली आन परमप्रभुमी “मारदे गेपुकीम आंम इन कली मोदॅशो श्येत गेनीनी? यहूदा आ दाते रे मीश मुर, वोइश मुर, आल नु दूध तूब आल नेल्ल आन कली तिल्पाइशशा, सुइ इन कली मलीपाइक्नी। येरमीया ४२:२२

8 मारदे गेपुकीमी इन गेयमी आं कली गाइक्पाइक्नीनी? मारदे गे इजीप्तमी बाक्शा, देवी देवता आन कली चढेशा आं कली गाइक्पाइक्नीनी? गेपुकी क्याम्चा पुंडसीशा, रागी डा मुर नेल्ल आन दातेमी सराप चीले राइब नु शुक्शी पाइक्चा पुंडसीब दुम्नीनी।

9 गे इन किकी पिपी आन मरिम्शो पशो प्रेदीनी? यहूदा डा पिप नु आन पिपीम आन मरिम्शो पशो, इन आंम मरिम्शो पशो, इन मीशेमी यहूदा रागीम नु यरूसलेम डा लामि मरिम्शो पशो प्रेदीनी? येरमीया ७:१७-१८

10 मुल सम्म मेकोपुकीमी आंम कली ब्रेम्शो मसेल्सम। आं कली मान पा महिम। गो आं अरेशो नु आं फुल्लुम मुशा ब्रेक्शो लोत्र इन डोंइती नु इन किकी पिपी आन डोंइती वोइक्ता। मिनु मेको, गेपुकी नु इन किकी पिपीमी मटिनी” दॅत।

11 मोपतीके मुर नेल्ल आन परमप्रभु यावे, इस्राएली आन परमप्रभुमी “गो इन कली ठेयब श्येत गेशा, यहूदा डा मुर नेल्ल आन कली क्याम्नुड। आमोस ९:४

12 इजीप्त लशा बाक्चा कली मिम्ब यहूदा डा लीशो मुर नेल्ल थमा पा जाम्शा लाइनीम। मेको नेल्ल इजीप्तमी साइक्चा पुंडसीनीमी। तरवार नु अन्कालमी बेक्नीम। ठेयब नु आइक्च नेल्ल तरवार नु अन्कालमी बेक्नीम। इन श्येत जशो तशा मुर हिंनीम। गेपुकी सराप राइब नु शुक्शी पाइक्चा पुंडसीब दुम्नीनी। येरमीया ४२:१४-१७

13 गो दोपा यरूसलेम कली तरवार, अन्काल नु मुर बेक्तीक रोइम सजाइ गेडा, मोपा इजीप्तम बाक्ब आन कली यो सजाइ गेनुडमी।

14 मोपा इजीप्तम बाक्शो यहूदा डा लीशो मुर सुइ प्रोक्चा मताइनीम। सुइ मब्रोंइनीम। मिनु सुइ यहूदा रागी लेत्चा मताइनीम। मो हना यो मेकेर बाक्चा कली लचा दाक्नीम। डोंइती प्रोक्शा लुश का निक्शी ला लेत्चा ताइनीमी” दॅत।

15 मिनू आन मीशेम देवी देवता आन कली चढेशो तुडक्ब वोंडश मुर नेल्ल, ठेयब हुल मीश मुर नु इजीप्त रागी डा पथ्रोस रागीमी बाक्ब नेल्लेमी येरमीया कली यसैया ११:१

16 “गे परमप्रभु यावे आ नेमी आंड कली पशो लोव गो मनेनीकी।

17 मेको आ पा डा आंड कसम जशो खाप्नीकी। गोपुकी सरीड डा पिपीम कली चढेशा, मेको कली तूचा थोवक लुक्नीकी। गोपुकी, आंड किकी पिपी, आंड पिपीपुकी नु आंड ठेयब मुरपुकीम यहूदा डा सहर नु यरूसलेम डा लाम मोदेशो पांतेक्म। मेना गोपुकी शुश जचा ताडतक। मिनू आंड माल्शो क्येडा शुश तशा, श्येत मजक। येरमीया ७:१७-१८; होसे २:७

18 तन्न गोपुकीम सरीड डा पिपीम कली चढेचा प्रोंडशो रे नु तूचा थोवक लुक्चा प्रोंडशो रे मारेड मतक। तरवार नु अन्कालम जाम्ना जाम्ना लाडतक” दैतेक्म।

19 मिनू मीश मुरपुकीम “गो थमा पा सरीड डा पिपीम कली चढेना ढेन बाक्नीकी। मिनू मेको कली तूचा थोवक लुक्नीकी। आंड वोंडशेम वारच मपथु, मेको कली बटुक चोका नु तूचा थोवक लुक्तका डा?” दे लोव पांतेक्म। गन्ती ११-१३

20 मिनू येरमीयामी आ कली लोव लेप्ब वोंडश मुर नु मीश मुर नेल्ल आन कली

21 “गोपुकी, इन किकी पिपी, इन पिप, इन ठेयब मुर नु एको रागी डा मुरपुकीम यहूदा डा सहर नु यरूसलेम डा लाम चढेशो परमप्रभु यावेम मतुडक्बा डा? मार, मेकोमी ममिप्ता डा?

22 परमप्रभु यावेम इन मरिम्शो पशो नु इन पशो ग्रांग्रा दिशो गेय तशा फाल्ने मचब। मोपतीके इन रागी श्येतथ नु मुर मबाक्तीके दुम्त। सराप चीले रशा, मुर मबाक्शो रागी दुम्त। मेको मुल सम्म मोदेशोन बाक्ब।

23 इन चोशा चढेतीके, इन परमप्रभु यावे कली पाप पशो, आ देशो मटिशो नु आ अरेशो, आ फुल्लुम मुशा ब्रेक्शो लोव नु आ शेंशो मटितीके इन कली ठेयब श्येत दुम्त। मेको आ पर्वम श्येत जाडनीनी” दे माडक्तीमी।

24 मिनू येरमीयामी मेको मुर नेल्ल नु मीश मुर नेल्ल आन कली “गे इजीप्तम बाक्ब यहूदा डा मुर नेल्ल परमप्रभु यावे आ लोव नेनीन।

25 मुर नेल्ल आन परमप्रभु यावे, इस्राएली आन परमप्रभुमी ‘गे नु इन मीश, इन देशो, गोपुकीमी आंड कसम जशो खाप्नीकी। गो सरीड डा पिपीम कली धूप चढेशा, मेको कली तूचा थोवक लुक्नीकी’ दे इन कसम जशो थमा पा खपीन।

26 मोपतीके गे इजीप्तम बाक्ब यहूदी नेल्ल परमप्रभु यावे आ लोव नेनीन। परमप्रभु यावेमी गो आं ठेयब नेमी कसम जाडनुड। मुल मेको इजीप्त रागीम बाक्ब यहूदा डा मुर आन शोत्र रे ‘परमप्रभु, परमप्रभु यावे ब्रोंडशा बाक्शो खोंदेशो पा’ दे दैतीकेमी आं नें गेनायो मदेनीम।

27 मारदे हना गो मेको आन कली रिम्शो पचा कली ममाड, मरिम्शो पचा कली कोवना कोवन बाक्नुड। इजीप्तम बाक्ब यहूदी नेल्ल मनुम्मा सम्म तरवार नु अन्कालम बेक्नीम। आमोस ९:४

28 तरवार रे ब्रोंडशोपुकी इजीप्त रे यहूदा रागीमी का निक्शी ला लेत्चा ताडनीम। मिनू इजीप्तम बाक्ब यहूदा डा मुर नेल्लेमी ‘आं देशो थमा बाक्म देय मेको आन लोव थमा बाक्ब’ दे नोले तुडक्नीम” दैत।

29 मिनू परमप्रभु यावेम “आं देशो थमा पा पाडनुड। मेको आ चिन्ड मार बाक्ब देशा हना, गो इन कली मेको रागीमी सजाड गेनुड। मेको नोले गो आ देशो पाडनुड, दे इन कली तुडक्तीके बाक्ब” दैत।

30 परमप्रभु यावेम “गो इजीप्त डा पिप फाराओ होफ्रा कली आ जोरी सनु नु मेको कली साडक्चा माल्ब आन गुडमी गेनुड। दोपा गो यहूदा डा पिप सिट्कीयाह कली आ जोरी सनु बेबीलोन डा पिप नेबुकदरेसर आ गुडमी गेडा, मोपा इजीप्त डा पिप कली साडक्ब आन गुडमी गेनुड” दे परमप्रभु यावेमी दैत। इजीकीएल २९:१९

## 45

बारुक कली अरेशो

1 यहूदा डा पिप योसीयाह आ तौ येहो-याकीममी सासन पवा आ ४ बर्सम नेरीयाह आ तौ बारुकमी परमप्रभु यावे आ लोव पाडब येरमीया आ ब्रेक्पाइशो लोव कागजम ब्रेक्ना ब्रेक्न बाक्मेनु, येरमीयामी बारुक कली येरमीया ३६:४

2 परमप्रभु यावे, इस्राएली आन परमप्रभुमी इ कली मार देब देशा हना,

3 गे “आबी, आबी, आं कली मार दुम्बा। परमप्रभु यावेमी आं श्येतम सुर्ता पतीक तेम्ताक्व। गो हुकयी पना पन दती। गो तेड नाडक्चा मतड” दैते।

4 गे मेको कली “परमप्रभु यावेमी ‘आं डोंडती सेल्शो मुल प्रेतनुड। गो मार खुमु मेको नेल्ल तुल्शा ताडक्नुड। मेको रागी नेल्ल कली दुम्ब।

5 मिनू गे आंम इ कली मारेड मारेड ठेयब थोवक माल्नेवे? गे मेको ममालो। मारदे हना गो मुर नेल्ल आन कली ठेयब श्येत जपाडक्नुडमी। तन्न गे ते लाडनेवे, मेके गो इ कली लडाइ रे ब्रोंडचा गेनुड” दे परमप्रभु यावेमी बारुक आ पर्वम दैत। येरमीया ३९:१८; येरमीया ४३:४-६

## 46

इजीप्त रागी आ पर्वम शेंशो

येरमीया ४६:५; येरमीया ५१:५; यसैया १९:५; इजीकीएल २९:५-३२:५

1 परमप्रभु यावेम रागी रागी आन पर्वम आ लोव पाडब येरमीया कली लोव पापतु।

2 मार लोत्र पाप्तु देशा हना “इजीप्त रागी आ पर्वम, इजीप्त डा पिप फाराओ नेको आ लडाइ पाइबपुकी युफ्रेटीस खोला आ नेक्था कारकेमीश सहरमी बाक्शो बाक्तेकम। यहूदा डा पिप योसीयाह आ तौ येहो-याकीममी सासन पवा आ ४ बर्सम बेबीलोन डा पिप नेबुकदनेसरमी लडाइ तोशा प्रात। २राजा २३:२९

3 आइक्च नु ठेयब तेक्तीक ठीक पने। लडाइ पचा कली डोंडती बारीन।

4 शाराम लगम पाइक्तीन। शारा डोंडसीन। कांसा के ताकी गुक्शा इन तूतीक शेप्पीन। इन कांसा के फेक्तीक फेक्सीन।

5 गो मारदे मेको आन कली हिंशो तडमी? मेकोपुकी नोले शोंडसीशो बाक्नीम। मेको आन लडाइ पाइबपुकी आन थुं लुक्च लत। मेकोपुकी रीब पा प्रोक्तेकम। मेकोपुकीमी नोले लेशशा मकोवनीम। तेइ तेइ हिंतीकेइ हिंतीके बाक्ब” दे परमप्रभु यावेम देंत। येरमीया २०:३

6 परमप्रभु यावेमी “रीब पा प्रोक्ब यो प्रोक्ने मचाप्नीम। लडाइ पाइबपुकी यो ब्रोंडचा मताइनीम। मेकोपुकी उत्तर गे डा युफ्रेटीस खोलाम दाइल पांडसीशा गोल्नीम।

7 एको नील खोला खोदेंशो पा बारशा जाक्ब, अरु ठेयब खोला बोक्शा कुशो खोदेंशो पा जाक्ब, सु बाक्मे?

8 इजीप्त रागी नील खोला खोदेंशो पा बारशा जाक्ब। ठेयब खोला बोक्शा कुशो खोदेंशो पा जाक्ब। मेकोमी ‘आं कली बारशा रागी कली सुम्या गेने। सहर नु मेकेर डा मुर आन कली साइक्चा गेयीनी।

9 शारापुकी दोरशा डोंडती लने। बग्गी खुल्बपुकी थाम्पा दोरपतीन। लडाइ पाइबपुकी बारीने। कूश एथीयोपीया नु पूत डा मुरपुकीमी तेक्तीक कुरनीम। लुद डा मुरपुकीमी लिब्रा आपनीम।

10 मेको नाक्ती परमप्रभु, मुर नेल्ल आन परमप्रभु यावे आ नाक्त बाक्ब। मेको क्येक्क लेत्तीक नाक्ती बाक्ब। आंम जोरी सत्रु आन कली क्येक्क लेत्तीक नाक्ती बाक्ब। मुरुम तरवारम साइक्नीम। तरवार हुश तूशा, आ तूत दाक्शो रूब। मारदे हना मुर नेल्ल आन परमप्रभु यावेमी उत्तर गे डा रागीमी, युफ्रेटीस खोला आ नेक्था क्योरशा चढेब। यसैया २:१२; ब्यवस्था ३२:४१-४२

11 गे कन्ने मीश आल इजीप्त, इर गिलादम लशा खेक्तीके चाक्को। गे शोर गाक्शो शुश खाल डा ओख्ती खेक्साक्वे। तन्न गे मसानेवे। येरमीया ८:२२

12 रागी रागी डा मुरपुकीम इ मुने दोक्शो लोत्र नेतेकम। इ वाइ ब्रेशोम रागी नेल्ल ब्रीब। मारदे हना लडाइ पाइब, लडाइ पाइब नु थोक्मुइनीम। मिनु मेको नेल्ल कालेमी गोल्नीम” दे परमप्रभु यावेमी देंत।

13 परमप्रभु यावेम बेबीलोन डा पिप नेबुकदरेसरम इजीप्त कली लडाइ तोथ जाक्चा आ पर्वम येरमीया कली लोत्र पाप्तु।

14 मार लोत्र पाप्तु देशा हना “इजीप्तमी एको लोत्र नेपतो। मिगदोलमी एको लोत्र नेपतो। मेम्फीस नु ताहपनेसमी यो एको लोत्र नेपतो। गे नेल्ल ठीक दुम्या आंम आंम राप्तीकेम रपीन। मारदे हना तरवारम इन एर ओंथ नेल्ल साइक्तु।

15 मारदे इ बोल्यो लडाइ पाइब प्रोक्नीमी। मारदे बोक्शा मराप्नीमी? मारदे हना परमप्रभु यावेम मेको आन कली साइक्तु।

16 इ लडाइ पाइबपुकी थोक्मुशा गोल्नीम। मिनु मेकोपुकीमी ‘लो, इ मुर आन बाक्तीक लय। इं जरमेशो रागी लेशशा लय’ दे साइक्ब तरवार आ पर्वम मो देंमुइनीम।

17 इजीप्त डा पिप फाराओ कली फश लोत्र पाइब, दे नें चोतीन। मेकोम आ गेय पतीक नाक्ती साम्तु” देंत।

18 परमप्रभु, पिपमी “आं ब्रोंडशा बाक्शो खोदेंशो पा” देंत। मेको पिप आ नें मुर नेल्ल आन परमप्रभु यावे बाक्ब। पहाड आन दाते डा ताबोर पहाड खोदेंशो पा का जाक्ब। मेको समुन्द्र आ नेक्था डा कारमेल खोदेंशो पा जाक्ब।

19 गे इजीप्त डा दारशो तमी ग्याइश्शा लाइक्चा पुंडसीचा कली इ मार मार कुम्लो पावो। मारदे हना मेम्फीस श्येत्य दुम्ब। मेको खिं नेल्ल ब्रेशशा, मुर मबाक्तीके दुम्ब।

20 इजीप्त रागी दारशो मगिक्शो बी का खोदेंशो बाक्ब। तन्न उत्तर रे डांस का जाक्ब।

21 मेको आ गाल्च ताक्शा लडाइ पाइबपुकी यो दोम्लो बाछा खोदेंशो बाक्नीम। मेको यो नेल्ल हिरशा लशा काथा प्रोक्तेकम। मेको राप्शा मदिकनीम। मारदे हना मेको आन हिंचा डा श्येत जतीक नाक्ती जाक्शो बाक्ब। मेको आन सजाइ तची ना जाक्त।

22 मेकोमी ग्रेशा गाक्शा, प्रोक्शो बुस्सुम खोदेंशो पा रेयके पाइब। मारदे हना आ जोरी सत्रु डोंडती बारशा, खा कुरशा रवा तिम्ब मुर खोदेंशो पा जाक्नीम।

23 परमप्रभु यावेमी “मेकोपुकीमी आ ब्वाकी नेल्ल तिम्ब्या माल्नीम। मारदे हना हिक्ने मचाप्चा डा बाक्नीम। मेकोपुकी सल्ला क्येडा शुश बाक्नीम” देंत।

24 मिनु इजीप्त आ तमी मुने तोक्चा पुंडसीब। मेको उत्तर रे जाक्ब मुर आन गुडम जिम्मा गेचा पुंडसीब।

25 मुर नेल्ल आन परमप्रभु यावे, इस्राएली आन परमप्रभुम “गो थेबेस सहर डा आमोन फाराओ, इजीप्त रागी नु आ देवी देवता नु आ पिप आन कली सजाइ गेनुड। गो फाराओ नु मेको आ सक्ति कली थमा सुइक्ब नेल्ल आन कली सजाइ गेनुड। येरमीया ४३:१२-१३; यसैया २४:२१

26 गो मेको आन कली साइक्चा माल्ब बेबीलोन डा पिप नेबुकदरेसर नु आ लडाइ पाइब आन ठेयब मुर आन गुडमी गेनुडमी। मेको नोले इजीप्त रागी डोंडती डा खोदेंशो पा मुर बाक्तीक रागी दुम्ब” दे परमप्रभु यावेम देंत। इजीकीएल २९:१४

27 मेकोमी “आं गेय पाइब याक्ब, गे महिनो। इस्राएल गे सुर्ता मपावो। गो इ कली डोन रागी रे प्रोंडनुड। इ चच युइ आन कली ग्याइश्शा लाइश्शा, वोइश्शो रागी रे प्रोंडशा चाक्नुडमी। याक्ब लेंशा श्येत मजथु, थुं नाइश्शा बाक्ब। मिनु मेको कली सुइम हिंच मकोइनीम। येरमीया ३०:१०



28 आं गेय पाइब याकूब गे महिनो। मारदे हना गो गे नु बाकशो बाकनुड। गो इ कली तेको रागी डा मुर आन दातेमी ब्रपदु, मेको रागी डा मुर नेल्ल आन कली क्याम्नुडमी। तन्न गो इ कली मक्याम्नुड। गो इ कली ठीक सजाइ गेनुड। गो इ कली सजाइ मगेथु मप्रॉडनुड” देत। येरमीया १०:२४; येरमीया ३०:११

## 47

पलिस्ती आन पर्वम देशो लोत्र

यसेया १४:२९-३२; इजीकीएल २५:१५-१७

1 फाराओमी गाजा कली लडाइ तोचा क्येडा डोंडती, पलिस्ती आन पर्वम परमप्रभु यावेम आ लोत्र पाइब येरमीया कली लोत्र पाप्तु।

2 परमप्रभु यावेमी मार लोत्र पाप्तु देशा हना “कोवडीन उत्तर रे ब्वाक्कु बारशा यिशो बाक्ब। मेकोमी रागी नु मेकेर बाकशो मारेड मारेड आन कली सुम्ब। सहरपुकी नु मेकेर बाकशो नेल्ल आन कली खुम्ब। मिनु मुर नेल्ल वाइ ब्रेतीम। मेको रागीम बाक्ब मुर नेल्ल डाकनीम।

3 प्रेक्शा दोरशा गाक्ब शारा आन खोइली आ रेयके नु जोरी सत्रु आन बग्गी आन रेयकेमी आफपुकीम आन आल आन कली वारच पाइक्चा कली मलेतीम। मेको आन गुड तिकने मचापब दुम्शा ग्युकशो बाकनीम।

4 मारदे हना पलिस्ती नेल्ल आन कली खतम पोक्शा साइक्तीक नाक्ती जाक्शो बाक्ब। टायर नु सीदोन आस कली वारच पाइक्ने चापब नेल्ल बेक्नीम। मारदे हना परमप्रभु यावेम पलिस्ती आन कली साइक्चा चिकशो बाक्ब। काफतोर डा टापु आ शुंडचीम रे जाक्शो लीशो नेल्ल आन कली साइक्चा चिकशो बाक्ब। आमोस १:६-७; सेफन्याह २:४; जकरिया ९:५; यूहन्ना १:२२; येरमीया १६:६; येरमीया ४८:३७; आमोस ९:७

5 गाजाम रोंका पचा कली आ चां प्रेक्शो बाक्ब। अश्कलोन खतम दुम्शा, सिक्सी पाइब। गे लीशो अनाकीमपुकी गेना सम्म इन रां चेंडसीनीनी?” देशो बाक्ब।

6 “परमप्रभु यावे आ तरवार, गे ग्रीचा गेना नाइक्नेवे? इन तरवार खोतम पिप्तीन। गे नाइश्शा सिक्सी पा बाक्कीन।

7 गे दोपा सिक्सी पा बाक्ने चाप्नीनी? मारदे हना परमप्रभु यावेमी मेको कली अरेशो बाक्ब। मेकोमी मेको कली अश्कलोन नु समुन्द्र आ शुंडच डा रागी आन कली गेय पचा कली अरेशो बाक्ब?” देत।

## 48

मोआब आ पर्वम लोत्र

यसेया १५:२; यसेया १६:२; इजीकीएल २५:८-११; आमोस २:१-३; सेफन्याह २:८-११

1 मुर नेल्ल आन परमप्रभु यावे, इस्राएली आन परमप्रभुमी मोआब आ पर्वम मार लोत्र पाप्तु देशा हना “नेबो सहर मुर मबाक्तीके दुम्ब। किरयथ-थाइम मुने दोक्ब। मेको बुत। मेको आ बोल्यो दरवार नेल्ल मुने तोक्शा प्रेशा ताइक्चा पुंडसाक्म।

2 मुल रे मोआब कली टेयब मसेलीम। मुरपुकीम हेरबोनम लोत्र गारपाइक्तेक्म। मेकोपुकीमी ‘जाक्कीन, गो मेको कली रागी का मदुम्चा डा सेल्य। ए मादमेन सहर, इ कली यो सिक्सी पपाइक्नीम। इ कली तरवार शेशा खेदा पाइनीम’ देतेक्म।

3 नेनीन, होरोनाइम रे वाइ ब्रेशो नेंसीब। खतम दुम्तीके नु क्याम्तीके आ पर्वम डाक्शो नेंसीब।

4 मोआब आ आलपुकीमी ‘मोआब खतम पोक्चा पुंडसाक्ब’ दे वाइ ब्रेशा डाकनीम।

5 मेकोपुकी लुहीथ डा ग्येत्थ लांमी हिशेक पा डाकना डाक्न डोइक्नीम। मारदे हना होरोनाइम डा लुकच लतीक लांमी श्येत जशा डाक्शो नेंसीब।

6 प्रोक्कीन, आंम कली प्रॉडचा कली दोरीन। गोरशो रागी डा गधा खोदेशो दुमीन। येरमीया १७:६

7 गेपुकीम इन गेय नु इन शोंपोम थमा सुइक्तीनी। गेपुकी यो ग्याइश्शा लाइक्चा पुंडसीनीनी। केमोश देवता आ चट्टेब नु आ नोले खोइक्ब मुरपुकी नु ग्याइश्शा लाइक्चा पुंडसीब। गन्ती २१:२९; न्यायाधीस ११:२४; १राजा ११:७

8 खतम पोक्ब सहर नेल्लेम जाक्ब। मिनु सहर का यो मप्रॉडसीब। बेंसी क्याम्सीब। मिनु दिंम खतम दुम्ब। परमप्रभु यावे आ देशो मोदेशो बाक्त।

9 मोआब कली फ्रां गेन। मारदे हना मेको थमा पा बुइब। मेको आ सहर श्येत्थ दुम्शा, मुर मबाक्तीके दुम्नीम” देत।

10 सु सुमी परमप्रभु यावे आ गेय देश पा पाइनीमी, मेको सराप राइनीम। आंम तरवार कली हुश खाक्श पोक्तीके रे तेक्ब सराप राइनीमी।

11 मोआब आ टिटा रेन नाइसीशा बाक्शो बाक्ब। मेको गरमी कुर पा वोइश्शो अडगुर शांबु खोदेशो बाक्ब। मेको ग्योब का रे अर्को ग्योबुम मलेशो बाक्ब। मेको ग्याइश्शा लाइक्चा मपुंडसीशो बाक्ब। मोपतीके मेको डोंडती डा खोदेशोन बाक्ब। मेको आ ब्रोइशो रिना मजाम्शो बाक्ब। सेफन्याह १:१२

12 मोपतीके परमप्रभु यावेमी “गो गर रे मोइक्ब आन कली मेको आ बाक्तीके सोइक्नुडमी। मिनु मेकोपुकीमी मेको मोइश्शा, गर श्येत्थ सेल्शा प्रोलीम। मेको नाक्त थमा पा जाक्ना जाक्न बाक्ब।

13 दोपा इस्त्राएल आ मुर आंम थमा सुइश्शो बेथेल रे पा मुने तोक्चा पुंडसमा, मोपा मोआब यो केमोश रे पा मुने तोक्चा पुंडसीब।

14 गेपुकीम ‘गेपुकी बोल्यो नु सक्ति पाइश्शो लडाइ पाइब बाक्नीकी’ दे दोपा देने चाप्नीनी?

15 मोआब नु आ सहर आन कली खतम पोक्ब जाकत। मेको आ नेल्ल क्येडा रिम्शो ठिटा मुर नेल्ल साइक्चा पुंडसीचा कली लाम्तेकम्” दे पिपम देंत। मेको आ नें मुर नेल्ल आन परमप्रभु यावे बाक्ब।

16 मेकोमी “हिंचा डा श्येत जतीक नाक्ती मोआब आ नेक्था जाक्शो बाक्ब। मेको आ श्येत जतीके रीब पा जाक्ब।

17 मेको आ एर ओंथ बाक्ब नेल्ल नु मेको आ पशो तुइक्ब नेल्ल मेको आ परबम रोंका पने। मिनु ‘दोपा सक्ति पाइश्शो राज्य क्याम्चा पुंडसे। पिप आ कोक्के दोपा जिक्मे’ देनीन।

18 ए दीबोन डा तमी, गे ठेयब निल्तीके रे तोइश्शा, सोव्रशो रागीम निस्सो। मारदे हना मोआब कली खतम पोक्ब इ कली लडाइ तोचा कली जाकत। मेकोमी इ गारो हिरशो सहर नेल्ल खतम पोक्तु।

19 आरोएर सहरम बाक्बपुकी लामी राप्शा कोव्रडीन। प्रोक्शो वोंइश मुर नु मीश मुर आन कली ‘मार, दुम्मे’ दे हिल्लो पने।

20 मोआब ब्रुत। मेको मुने दोक्त। रोंका पा डाक्कीन। ‘मोआब मुर मबाक्तीक दुम्त’ दे अरनोन खोला आ शुंडचीम लशा देनीन।

21 डांडा तार डा दिमम निसाफ पतीके नाक्ती जाक्शो बाक्ब। होलोन, याहसाह नु मेफा-आथ,

22 दीबोन, नेबो नु बेथ-दिब्लाथाइम आन तारी,

23 किरयथ-थाइम बेथ-गामुल नु बेथ-मेओन,

24 केरयोथ, बोंजा नु मोआब आ नेक्था नु डोन डा सहर नेल्ल आन तारी निसाफ पतीके जाक्शो बाक्ब।

25 मोआब आ ग्योव खोइक्साक्व। मिनु मेको आ गुइ जिक्त” दे परमप्रभु यावेमी देंत।

26 मिनु लेंशा “मेको कली दुक्पतीन। मारदे हना मेको ठेयब लेश्शो बाक्ब। मोआब आ मेशोमी दिड दाड गोल्ल। मिनु मेको शुक्शी पाइक्चा पुंडसीब दुम्ल। येरमीया २५:१५

27 मार, गे इस्माएल कली शुक्शी पशो मनवे? मेको खुइ आन दातेमी ग्याइक्चा पुंडसे डा, मेको आ परबम लोव्र पामेनु, इ पिया हिक्शा शुक्शी पवी?

28 मोआबम बाक्बपुकी, इन सहर प्रोंइशा, फुल्लु मेर लशा बाक्कीन। रोंगु डा ढोडोडगा आ शोव्रम ग्योव्र सेल्ब दुकुर खोदेशो दुमीन।

29 गो मोआब आ ठेयब लेश्शो आ परबम लोव्र नेंतक। मेको आ ठेयब दुम्तीके, बोरतीके, ठेयब लेत्तीके नु थुं डा ठेयब दुम्तीके आ परबम नेंतक।

30 गो मेको आ ठेयब लेश्शो तुइक्नुड। तन्न मेको आ ठेयब लेश्शो मारेइ मबाक्ब। मिनु मेको आ गेय जाम्शा लाइब बाक्ब।

31 मोपतीके गो मोआब आ परबम रोंका पाइनुड। गो मोआब नेल्ल आन परबम डाक्नुड। गो कीर-हेरेस डा मुर आन परबम हिशेक पाइनुड।

32 गो याजेर डाक्शो क्येडा इ परबम शुश डाक्नुड। ए सिब्मा डा अडगुर बोटपुकी, इन राशी समुन्द्र आ आइक्ची हांबु जाक्दीत्तेकम्। मेकोपुकी याजेर डा समुन्द्र सम्म जाक्दीत्तेकम्। इ मीशो फल फुल नु इ अडगुर खतम पोक्ब जाक्तेकम्।

33 मोआब डा फल फुल रू रे ग्येरतीक नु थुं नाइश्शा बाक्तीके जाम्ने थुम्तु। गो अडगुर खाक्तीक तेक्ता। सुइमी ग्येरशा ग्रीशा, मखाक्नीम। मेको आन वाइ ब्रेश्शो ग्येरशा वाइ ब्रेश्शो ममाइ।

34 हेरबोन नु एलेआले वाइ ब्रेलीस। मेको याहास सम्म नेंसीब। सोआर रे होरोनाइम, एगलाथ-शेलीशीया सम्म वाइ ब्रेश्शो नेंसीब। मारदे हना निमीम डा ब्वाक्कु यो सोव्रने थुम्शो बाक्ब।

35 गो मोआब कली खतम सेल्लुड। डांडा डा थानम चढेब नु देवी देवता आन कली धूप चोइब आन कली खतम सेल्लुडमी” दे परमप्रभु यावेमी देंत।

36 मिनु परमप्रभु यावेमी “मोपतीके आं थुं बांसुरीम खोदेशो पा मोआब आ परबम रोंका पाइब। आं थुं कीर-हेरेस डा मुर आन परबम बांसुरीम खोदेशो पा रोंका पाइब। मेको आन चेम्शो शोंप नेल्ल जाम्त। यसेया १५:७

37 मेको नेल्लेम आन चां प्रेक्शो बाक्नीम। मिनु आन गल शोक्के यो खोइश्शो बाक्नीम। मेको नेल्ल आन गुइ चेशो बाक्नीम। मिनु आन क्रातो भाडग्रामी गिल्लीशो बाक्नीम। येरमीया १६:६

38 मोआबी आन खिं तारी नु लां मेर रोंका पशो डा लाक्शा अर्को मारेइ मनेंसीब। मारदे हना गो मोआब कली सुइम ममाल्चा डा ग्योव खोदेशो पा प्रोल्ता” दे परमप्रभु यावेमी देंत।

39 मेको दोपा ब्रोल्मे, मोपा रोंका पाइनीम। मोआब दोपा मुने दोक्शा आ कुल खुइक्ता, मोपा मोआब आ एर ओंथ बाक्ब नेल्लेम मेको आन परबम शुक्शी पा हिंशा कोव्रचा डा दुम्शो बाक्ब।

40 मिनु परमप्रभु यावेमी “कोव्रडीन, मेको ककाकुली खोदेशो पा जुक्ब। मेको आ फ्रां हाम्शा, मोआब तारी जुक्ब। येरमीया ४९:२२

41 केरयोथ नु अरु सहर बुइनीम। आन जोरी सनुमी मेको आन हिरशो सहर आन के सेल्लनीम। मेको नाक्ती मोआब डा लडाइ पाइब आन थुं सुत्केरी रोइ पशो मीश मुर आन थुं खोदेशो दुम्नीम।

42 मोआब रागी का दुप्शा मलीचा डा पा खतम दुम्त। मारदे हना मेको परमप्रभु यावे आ डोंइती ठेयब लेश्शो बाक्ब।

43 मोआबम बाक्बपुकी इन डोंइती हिंचा डा बिक्तीके नु ब्वारद बाक्नीम। यसेया २४:१७-१८

44 हिंचा डा श्येत रे प्रोक्ब बिक्तीकेम बिक्नीम। मिनु बिक्तीके रे डोइश्शा गूब ब्वारदम रेल्चा पुंडसीनीम। मारदे हना गो मोआब कली आ सजाइ गेतीक बर्सम मोदेशो पाइनुड” दे परमप्रभु यावेमी देंत।

45 परमप्रभु यावेमी “प्रोकबपुकी हेरबोन आ वांकुमी दिक्नीम। मारदे हना हेरबोन रे मी का व्रूत। सीहोन आ खिं रे मी व्रूत। मेकोमी मोआब आ कुफ्फ नु जीब नु मरिम्शो पाइब आन पिया जेप्ब। गन्ती २१:२८-२९

46 आबी, आबी, मोआब, केमोश देवता आ मुर बेक्तेक्म। इ तौपुकी ग्याइश्शा लाइक्चा पुंडसाक्म। इ तमी ग्याइश्शा लाइक्चा पुंडसाक्म।

47 मो हना यो गो नोले डा नाक्ती मोआब आ शोंप लेशशा गेनुड। मोपा मोआब आ निसाफ नुप्त्” दे परमप्रभु यावेमी देंत।

## 49

अम्मोन आ परबंम लोव

इजीकीएल २५:३-७; आमोस १:१३-१५; सेफन्याह २:८-११

1 अम्मोनी आन परबंम परमप्रभु यावेमी “मार, इस्राएल आ तौपुकी मबाक्नीमी? मार, मेको आ हक ताइब सुइ मबाक्नीमी? मारदे मिल्कोम देवता आ मुरपुकीमी गाद आ बाक्तीके आन के सेल्मे? मिनु मारदे मिल्कोम आ मुर सहरम बाक्थ लमा?” देंत। मिल्कोम देवता मोलेक यो देंनीम। १राजा ११:५

2 मोपतीके परमप्रभु यावेमी “गो अम्मोनी आन रब्बाह कली लडाइ डा तुराही ताप्शो नेंपाइक्नुड। मेको श्येत्य डांडा खोदेंशो दुम्ब। मिनु मेको आ एर ओंथ डा गांउ मीम क्रोइक्चा पुंडसीनीम। मेना इस्राएलमी आ कली रोइक्ब आन कली रोइक्ब” दे परमप्रभु यावेमी देंत।

3 परमप्रभु यावेमी “हेरबोन रोंका पावो। मारदे हना ऐ सहर खतम पोक्शो बाक्ब। गे रब्बाह डा तमी, वाइ ब्रेश्शा डाक्कीन। भाडया फेंसीशा रोंका पने। वाम ग्याम दुम्शा एर ओंथ दोरीन। मारदे हना मिल्कोम, आ चढ़ेबपुकी नु आ नोले खोइक्ब ग्याइश्शा लाइक्चा पुंडसाक्म।

4 गे मारदे इ सक्तिं ठेयब लेशशा बाक्नेवे? इ सक्तिं ग्युम्ब। गे हेंथे गाक्ब तमी, गे इ शोंप कली थमा सुइश्शा ‘सुमी आं कली लडाइ तोइबा डा’ देंनेवे।

5 गो परमप्रभु, मुर नेल्ल आन परमप्रभु यावे नड। गो इ नेक्था बाक्ब मुर रे हिंतीक श्येत गेपाइक्नुड। गे नेल्ल एर ओंथ फ्रचा पुंडसीनीमी। मिनु प्रोकशो आन कली ख्व्ब सुइ मबाक्नीम।

6 मो हना यो गो नोले अम्मोनी आन शोंप लेशशा गेनुड” दे परमप्रभु यावेमी देंत। येरमीया ४८:४७

एदोम आ परबंम लोव

यसैया २१:११; यसैया ३४:५-१५; इजीकीएल २५:१२-१४; आमोस १:११-१२

7 मुर नेल्ल आन परमप्रभु यावेमी एदोम आ परबंम “मुल तेमान सहरम तुडक्तीक मबाक्बा डा? मार, रुप्ब मुर आन अतीं जाम्शा लमे? मार, मेको आन रुप्तीक योल्मे?

8 ए देदानम बाक्बपुकी, लेशशा प्रोककीन। लुक्च लने। मारदे हना गो एसाव कली सजाइ गेची ना मेको कली हिंचा डा श्येत गेनुड।

9 अडगुर सेक्बपुकी इ बाक्तीके जाक्तेक्म हना, मार, मेकोपुकीम अरु सीला गुप्तीके मप्रॉइनीमी डा? मार, नाक्दो खुइ जाक्शो नम हना, मेकोपुकीमी आन कली माल्शो थोवक ला मलाइक्नीमी डा?

10 तन्न गो एसाव कली शिन्ना सेल्ला। गो मेको आ खुइक्तीक नेल्ल तांडसीतीके सेल्ला। मिनु मेको खुइक्चा मताइब। मेको आ आल, आ खिं डा मुर, आ नेक्था बाक्ब नु आंमा यो मली।

11 इ रोम रोइक्च आन कली प्रॉइशा वोतो। गो मेको आन कली कोव्रनुडमी। मिनु वोंइश बेक्शो मीश मुरपुकीमी यो आं कली थमा सुइक्चा तामेक्ल” देंत।

12 परमप्रभु यावेमी “श्येत डा कचौरा तूचा ममाल्शोमी यो मेको तूचा माल्ताक्व हना, मार, गे सजाइ मतथु ब्रोंइचा ताइनेवे? गे सजाइ तचा माल्नेवे। गे मेको तूचा माल्नेवे। येरमीया २५:१५, २८, २९; भजन संग्रह १३७:७

13 मारदे हना बोझा ब्रेश्शा हिंचा डा, शुक्शी पाइक्चा पुंडसीब, श्येत्य नु सराप पाइक्तीके दुम्ब, दे आं नेंम कसम जाता। मिनु आ सहर नेल्ले गेना हना यो कली ब्रेश्शा लीनीम” देंत।

14 गो परमप्रभु यावे आ लोव्र कुरब रे पा लोव्र का नेंता। लोव्र कुरब का रागी रागी डा मुर आन परबंम सोइश्शो बाक्ब। मेकोमी “लडाइ तोचा कली बुक्कीन। लडाइ पचा कली सासीन” देंत।

15 परमप्रभु यावेम “मुल गो इ कली रागी रागी आन दाते डा नेल्ल क्येडा आइक्च सेल्लन। मुरपुकीमी इ कली महिक्नीम।

16 गो सेरथे फुल्लु आ पुक्खीम बाक्नेवे। इ हिंच कोइतीके नु इ थुं डा ठेयब लेत्तीकेमी इ कली जोल पाम्ताक्स। गे डांडा डा बाक्तीक आंम के सेल्लतीवी। गेमी इ बाक्तीक ककाकुली आ ग्योव्र खोदेंशो पा इर सेल्लतीवी हना यो, गो इ कली मेकेर रे उइ तोक्नन” दे परमप्रभु यावेम देंशो बाक्ब।

17 परमप्रभु यावेम “एदोम थम हिंचा डा दुम्ब। सु सु मेकेर लाइनीमी, मेको एदोम आ शुश श्येत तशा हिंनीमी। मिनु शुक्शी पाइनीम।

18 दोपा सोदोम, गोमोररा नु मेको आस एर ओंथ डा सहर नेल्ल श्येत्य दुम्मा, मोपा मेकेर सुइ मलीनीम। सुइ मबाक्नीम। येरमीया ५०:४०; यसैया १:९

19 यर्दन आ नेक्था डा ठेयब ब्वाकी रे बस्तु भाव योव्रतीकेम गुप्स जाक्शो खोदेंशो पा गो एदोम कली याम कामी मेको आ रागी रे गुंडनुड। गो सु कली सासन पचा कली योव्रडु, मेको कली गेनुड। आं खोदेंशो सु बाक्बा? आं कली सुम अरेंने चाप्बा डा? तेको गोठला आं डोंइती राने चाप्बा डा?” दे परमप्रभु यावेमी देंत येरमीया ५०:४४-४६

20 मोपतीके परमप्रभु यावेम एदोम आ पर्वम पचा चिकशो गेय नु तेमान सहरम बाकब आन पर्वम मेको आ मिम्शो दोदेंशो बाकबा, मेको नेनीन। थमा पा बगाल डा आइकच कीशा लाइकचा पुंडसीनीम। मेको आन पतीके आन योवतीक खतम दुम्ब।

21 मेको आन गोल्शो रेयकेमी रागी खिंखि पाइब। मेको आन वाइ बेशो लल समुन्द्र सम्म नेंसीब।

22 कोव्रडीन, मेको ककाकुली खोदेंशो पा बेरशा जाकब। मिनु मेको जुक्शा बोजा तार मेको आ फ्रां हाम्ब। मेको नाक्ती एदोम डा लडाइ पाइब आन थुं सुत्केरी रोइ पशो मीश मुर आन थुं खोदेंशो दुम्ब। येरमीया ४८:४०

दमस्कस आ पर्वम लोत्र

यसैया १७:१-३; आमोस १:३-५

23 परमप्रभु यावेमी दमस्कस आ पर्वम “हमाथ नु अरपाद वाम ग्याम दुम्शो बाक्नीस। मारदे हना मेको निक्शीमी मरिम्शो लोत्र नेंताक्स। मेको हिंशा आस थुं ग्येत्थ लुकच दुम्शो बाक्नीस। मिनु समुन्द्र खोदेंशो पा सिक्सी पा बाक्ने मचाप्नीस।

24 दमस्कस मचाप्ब दुम्शो बाकब। मेको प्रोक्त। मेको शुश हिंब। मेको सुत्केरी रोइ पशो मीश मुर खोदेंशो पा सुर्ता पा हिंब।

25 दोपा मेको नें चलेशो सहर प्रोइचा पुंडसे? मेको सहर डा मुर शुश ग्येरसाकम।

26 मुल मेको आ ठिटा मुरपुकी लां मेर गोल्नीम। मिनु मेको नाक्ती मेको आ लडाइ पाइब नेल्ल खतम दुम्नीम।

27 गो दमस्कस डा गारोपुकीम मी सुइक्नुडमी। मेकोमी बेन-हादाद आ गारो हिरशो सहर खतम सेल्ल” दे मुर नेल्ल आन परमप्रभु यावेम देंत।

केदार नु हासोर आस पर्वम लोत्र

28 बेबीलोन डा पिप नेबुकदरेसरम केदार नु हासोर आस कली ग्रात। एको केदार नु हासोर आस पर्वम पशो लोत्र बाकब। मिनु परमप्रभु यावेमी “बोक्कीन। केदार मेर लने। पूर्व डा मुर आन कली खतम पोक्कीन। यसैया २१:१६-१७; यहोसु ११:१०

29 मेको आन ताम्बु, मेको आन क्यारश भेडा, मेको आन वासी नु आन मारेइ मारेइ लतीन। आन दलओठ रोइश्शा आंमे के सेल्सीन। मिनु मुरपुकीम ‘एर ओंथ नेल्ल हिंचा डा श्येत बाकब’ दे ग्रीचा माल्नीम। येरमीया २०:३

30 ए, हासोरम बाकबपुकी, रीब पा प्रोक्कीन। लुकच लशा खुइश्शा बाक्कीन। बेबीलोन डा पिप नेबुकदरेसरमी इन कली मरिम्शो पचा मिम्शो बाकब। मेकोम इन कली मरिम्शो पचा कली गेय का पशो बाकब” दे परमप्रभु यावेमी देंत।

31 मिनु “बेबीलोन डा पिप नेबुकदनेसरमी इन कली श्येत गेचा मिम्ब। इन कली मरिम्शो पचा मिम्ताक्व। बोक्कीन, थुं नाइश्शा रिम्शो पा बाकब मुर गे बारीन। मेको रागी डा मुर आन के ठेयब लाप्चो नु चोक्तीके मबाक्नीम। मेको रागी डा मुर अरु क्येडा डोन बाक्नीम।

32 मेको आन दलओठ रोइक्चा पुंडसीनीम। आन बी ब्यफ यो रोइक्चा पुंडसीनीम। मेको चां प्रेक्शो मुर आन कली तेइ तेइ ब्रपाइक्नुडमी। मिनु मेको आन कली हिंचा डा श्येत गेनुड। येरमीया २५:२३

33 हासोर सिवार आन बाक्तीके दुम्ब। मेको गेना हना यो कली मुर मबाक्तीक रागी दुम्ब। मेकेर सुइ मबाक्नीम, मेकेर सुइ मुर बाक्थ मलाइनीम” दे परमप्रभु यावेम देंत। येरमीया ४९:१३

एलाम आ पर्वम लोत्र

34 यहूदा डा पिप सिदकीयाहम सासन पचा गोवा ना परमप्रभु यावेम आ लोत्र पाइब येरमीया कली एलाम आ पर्वम लोत्र पाप्तु। येरमीया २५:२५

35 मुर नेल्ल आन परमप्रभु यावेम मार लोत्र पाप्तु देशा हना “गो एलाम आ लिब्रा जिक्नुड। मेको आन लिब्रा आन ठेयब सक्ति बाकब। यसैया २२:६

36 गो एलाम डा मुर आन कली सरीड आ एर ओंथ नेल्ल रे फश गिवार पपाइश्शा एर ओंथ ब्रपाइक्नुडमी। एलाम डा ग्याइश्शा लाइकचा पुंडसीशो नेल्ल रागी रागीम ब्राइनीम।

37 मेको एलाम डा मुर आन कली, आन जोरी सत्रु नु मेको आन कली साइक्चा माल्ब आन डोंइती शुश हिंब सेल्लुडमी। गो मेको आन कली ठेयब श्येत गेनुड। गो मेको आन कली साइक्ने मथुम सम्म मेको आन नोले तरवार सोइक्नुड। इजीकीएल ३२:२४

38 गो आं नित्तीके एलामम सेल्लुड। मिनु मेकेर डा पिपी नु मेको आन ठेयब मुर आन कली साइक्नुडमी” दे परमप्रभु यावेमी देंत।

39 परमप्रभु यावेमी “मो हना यो गो मुल नोले डा नाक्ती एलाम डा मुर आन शोंप लेश्शा गेनुडमी” दे परमप्रभु यावेमी देंत।

## 50

बेबीलोन आ पर्वम लोत्र

यसैया १३:-; यसैया १४:-

1 परमप्रभु यावेम बेबीलोन नु कल्दी आन रागी आ पर्वम येरमीया कली लोत्र पाप्तु। यसैया ४६:१

2 मार लोत्र पाप्तु देशा हना “रागी रागी डा मुर आन दातेमी एको लोत्र नेंपतो। छेदर पोक्शा नेल्ल आन कली नेंपाइश्शा ठेयब सेंदा पा देनो। लोत्र का यो मखुइक्तो। बेबीलोन बुत। बेल देवता मुने दोक्त। मेरोदक देवता सुर्ता पाइब। मेको आन मूर्ति मुने दोक्नीम। मेको सुर्ता पाइनीम। बेल बेबीलोन सहर डा देवता बाकब।

3 उत्तर रे रागी का डा मुरपुकीम मेको कली लडाइ तोइनीम। मिनु मेको आ रागी श्येत्थ सेल्नीम। मेकेर सुइ मबाक्नीम। मुर नु जन्तु नेल्ल प्रोक्नीम।

4 मेको नाक्ती इस्राएल डा मुरपुकी नु यहूदा डा मुरपुकी काथा डाक्ना डाक्न परमप्रभु यावे, आन परमप्रभु कली माल्थ गाक्नीम। येरमीया ३१:९

5 मेकोपुकीमी 'सियोन गे लतीक लां ते बाक्बा?' दे हिल्लो पाइनीम। मिनु 'इन गाक्शो लांन बाक्ब' देंनीम। मेकोपुकीमी गेना हना यो लीब मंत्रेतीके कबल पा परमप्रभु यावे कली जिम्मा गेंसीनीम। येरमीया ३२:४०

6 आं मुरपुकी जाम्शो भेडा खोदेशो बाक्तेक्म। मेको आन गोठलापुकीम मेको आन कली हेंथे गाक्पाइश्शो बाक्तेक्म। मिनु मेको आन कली डांडा मेर हिरपाइश्शो बाक्तेक्म। मेकोपुकी डांडा पहाड सम्म हिरसाक्म। मिनु आन गोठ प्रेताक्मे। येरमीया २३:१

7 मेको आन कली थिप्बपुकीम मेको आन कली नेक्तेक्म। मिनु मेको आन जोरी सत्रुमी 'गो दोसी मनकी। मारदे हना मेकोपुकीमी परमप्रभु यावे कली पाप पाम्तेक्म। मेको आन ठीक पा जोतीके नु आन किकी पिपी आन आस पशो, परमप्रभु यावे बाक्त' देंतेक्म।

8 बेबीलोन रे प्रोक्कीन। कल्दी आन रागी प्रोनीन। मिनु क्यारश भेडा आन कली लां कोइब बोका खोदेशो दुमीन। येरमीया ५१:६; यसेया ४८:२०

9 मारदे हना गो उत्तर रे ठेयब रागी रागी डा लडाइ पाइब आन कली बेबीलोन आ परबम क्युकशो बाक्नुड। मेकोपुकी लडाइ पचा कली सासीनीम। मिनु मेको कली लडाइ तोइनीम। मेको आन ब्रा थाम्पा लडाइ पस जोक्ब मुर खोदेशो बाक्नीम। मेकोपुकी मोशा मलेत्नीम।

10 मोपा कल्दी रागी रोइक्चा पुंडसीब। मिनु मेको कली रोइक्ब नेल्ल रूनीम" दे परमप्रभु यावेम देंत।

11 परमप्रभु यावेम "गे ग्येरसीनी। शुश ग्येरसीने। गे आं शोप रोइक्ब बाक्नीनी। दांड पाइब मगिक्शो बी खोदेशो पा प्रेनीनी। गे शारा खोदेशो पा ग्रीनीनी।

12 इन ममा थाम्पा मुने दोक्ब। इन कली जरमेब शिशो मताइब। मेको इन रागी रागी आन दातेमी नेल्ल क्येडा आइक्च दुम्ब। मेको मुर मबाक्तीके सोव्रशो रागी नु गोरशो रागी दुम्ब।

13 परमप्रभु यावे आ चुरतीकेमी मेकेर सुइ मबाक्नीम। मेको थम श्येत्थ रागी दुम्ब। बेबीलोन रे पा गाक्ब मेको तशा हिनीम। मिनु मेको आ श्येत तशा शुक्शी पाइनीम। येरमीया ५१:३७

14 गे लिब्रा आप्बपुकी, बेबीलोन आ एर ओथ इन बाक्तीकेम राप्सा बाक्कीन। ब्रा कली का यो महेक्थु आप्पीन। मारदे हना मेकोमी परमप्रभु यावे कली पाप पाप्तु।

15 मेको आ एर ओथ नेल्ल बाक्शा, ठेयब सेंदा पा ग्रीडीन। मेको इन कली जिम्मा गेंसीब। मेको आ बोल्यो दरवार एतेक्म। मेको आ गारो प्रेट्या पुंडसीशा दोक्तेक्म। मारदे हना मेको परमप्रभु यावे आ क्येक्क लेशो बाक्ब। मेको कली क्येक्क लेत्तीन। मेकोमी अरु आन कली पाइश्शो खोदेशो पा मेको कली यो पतीन। प्रकाश १८:६

16 गे बेबीलोनम वांचेर शोक्ब आन कली खेरीन। मीशो अन्न रिक्ब आन कली खेरीन। खतम पोक्ब तरवारम पतीके नेल्ल आन कली आन आन खिं डा मुर आन बाक्तीके लेशशा लचा गेने। मेको नेल्ल आन आन रागी प्रोक्चा माल्नीम।

17 इस्राएल गुप्सपुकीम खेदा पा एर ओथ ब्रपाइश्शो भेडा खोदेशो दुम्शो बाक्ब। मेको कली डोंडती अस्सुर डा पिपम दाक्तु। मिनु नेल्ल क्येडा नोले बेबीलोन डा पिप नेबुकदरेसरमी मेको आ रुश नेल्ल नेक्तु" देंत।

18 मोपतीके मुर नेल्ल आन परमप्रभु यावे, इस्राएली आन परमप्रभुमी "गो बेबीलोन डा पिप नु मेको आ रागी कली अस्सुर डा पिप कली सजाइ गेशो खोदेशो पा, सजाइ गेनुड। २राजा १९:३५

19 गो इस्राएल कली आं कली योव्रतीकेम लेशशा चाक्नुड। मिनु मेको कारमेल नु बाशान मेर जोइब। एफ्राइम नु गिलाद डा पहाड मेर मेको आ शोव्रलु बेक्शो रूब।

20 मेको नाक्ती इस्राएल आ मरिश्शो पशो माल्शा कोव्रशा हना यो, मथिंसीब। यहूदा आ पाप माल्शा हना यो, मथिंसीब। मारदे हना गो आं प्रोंइशा वोइश्शो लीशो आन कली आन पाप माफ गेतामी। येरमीया ३३:७-८

21 मेराथाइम रागी कली लडाइ तोने। पेकोद आ मुर आन कली लडाइ तोने। मिनु नेल्ल खतम पोक्कीन। गो इन कली अरेशो खोदेशो पा, नेल्ल पने" दे परमप्रभु यावेमी देंत।

22 लडाइ डा रेयके नु ठेयब खतम दुम्तीके आन नेक्था बाक्ब।

23 दोपा रागी नेल्ल डा घन जिक्शा फस दुम्मे, मोपा बेबीलोन रागी रागी आन दातेमी शुश हिंचा डा दुम्ब। येरमीया ५१:२०

24 बेबीलोन, गो इ कली ब्वारद का दाइक्ताक्ड। गे मतुइक्थु ग्याइक्चा पुंडसीनेवे। मिनु इ कली थिरशा, ग्याइक्चा ताइतक। मारदे हना गे परमप्रभु यावे कली मरिश्शो पशो बाक्ते।

25 परमप्रभु यावेम आ या वोइक्तीक खिं रोक्तु। मिनु आ चुरशो डा या गुंडताक्व। मारदे हना मुर नेल्ल आन परमप्रभु यावेमी कल्दी आन रागीम गेय का पचा माल्ब।

26 मेको आ एर ओथ नेल्ल रे लडाइ पथ जाक्कीन। मेको आ अन्न वोइक्तीक खिं रोक्कीन। मेको कली अन्न खोदेशो पा लेलीन। मेको कली मारेड मलीशो खतम सेलीन। मेको के मारेड मलील।

27 मेको आ सांठि ब्यफ नेल्ल सतीन। मेको आन कली क्योरचा कली लतीन। आबी, आबी, मेको आन नाक्ती जाक्त। मेको आन कली सजाइ गेतीक नाक्ती जाक्त।

28 मिनु परमप्रभुमी "नेनीन, बेबीलोन रे प्रोक्ब मुर नु मेकेर बाक्ब अर्को रागी रे प्रोक्शो मुरुम सियोनम 'परमप्रभु यावे, आंइ परमप्रभुमी क्येक्क लेप्ब। आ खिं आ परबम क्येक्क लेप्ब' दे नेल्लेम नेंचा डा पा शेंनीम।

29 बेबीलोनी आन कली लिब्रा आप्बपुकी ब्रेत्तीन। लिब्रा आप्ब नेल्ल आन कली ब्रेत्तीन। मेको आ एर ओंथ नेल्ल ताम्बु कीशा मुर आन कली तेक्कीन। मेकेर रे सुइ ब्रोंडचा मतामेक्ल। मेको आ पशो खोदेशो पा मेको कली क्येक्क लेत्तीम। मेकोमी पशो खोदेशो पा, मेको कली यो पतीन। मारदे हना मेकोमी इस्राएली आन का ला बाक्शो परमप्रभु यावे कली शुक्शी पाप्तु। येरमीया ५०:१५

30 मोपतीके मेको आ ठिटा मुरपुकी लां मेर गोल्नीम। मिनु मेको आ लडाइ पाइब नेल्ल खतम दुम्नीम” दे परमप्रभु यावेम देंत।

31 परमप्रभु, मुर नेल्ल आन परमप्रभु यावेमी “गो इ कली ठेयब लेशो दुम्तीके काइ मदाक्नुड। इ नाक्ती जाक्त। इ कली सजाइ गेतीक नाक्ती जाक्त।

32 ठेयब लेशो मुर दाइल पा गोल्ब। मेको कली पोक्ब सुइ मबाक्नीम। मिनु गो मेको आ सहरम मी सुइक्नुड। मेको मीम मेको आ एर ओंथ बाक्ब नेल्ल आन कली दाक्ब” देंत।

33 मुर नेल्ल आन परमप्रभु यावेमी “इस्राएल डा मुर नु यहूदा डा मुर श्येत गेचा नु दिप्चा पुंडसीनीम। मेको आन कली ग्याइश्शा लाइक्बपुकीम मेको आन कली लचा मगेनीम।

34 मो हना यो मेको आन कली श्येत रे प्रोंडब सक्ति पाइश्शो बाक्ब। मेको आ नें मुर नेल्ल आन परमप्रभु यावे बाक्ब। मेकोमी मेको आन कली आ सक्तिमी थमा पा वारच पाइब। मिनु रागी कली रिम्शो दुम्पाइक्ने चाप्ब। तन्न बेबीलोनम बाक्ब आन कली चहिं थुं नाइक्चा मगेब” दे परमप्रभु यावेमी देंत।

35 मिनु परमप्रभु यावेमी “कल्दी आन कली तरवार का जाक्त। बेबीलोनम बाक्ब नेल्ल आन कली, आन ठेयब मुर आन कली नु आन जोक्ब तुइक्ब मुर आन कली यो तरवार जाक्त।

36 मेको आ जाटू कली यो तरवार का जाक्त। मोपतीके मेकोपुकी मूर्ख दुम्नीम। मेको आ लडाइ पाइब आन कली यो तरवार का जाक्त। मिनु मेको खतम दुम्नीम।

37 मेको आ शारा, आ बग्गी नु मेको आन दातेम बाक्ब अर्को रागी डा लडाइ पाइब आन कली साइक्चा कली तरवार जाक्त। मोपतीके मेकोपुकी मीश मुर खोदेशो दुम्नीम। मेको आ शोंप नेल्ल आन कली तरवार जाक्त। मेको नेल्ल रोइक्तीक दुम्ब। येरमीया ५१:३०

38 मेको आ ब्वाक्कु सोत्रचा कली काइ रेउ मयी। मारदे हना मेको शुश मूर्ति आन रागी बाक्ब। मिनु मेको आ देवी देवता आन पबंम निप्स ग्राइश्शो खोदेशो दुम्ब।

39 मोपतीके बेबीलोन सहरम ब्वाकी डा जन्तु नु फरपुकी बाक्नीम। मिनु मेकेर ठेयब चिक्ब बास बाक्नीम। मेकेर मुल लेशा नेल्ल पाला सम्म मुर मबाक्नीम।

40 मिनु सोदोम, गोमोररा नु मेको आस एर ओंथ डा गाउ आन कली लोकशो खोदेशो पा बेबीलोन सहरमी सुइ मबाक्नीम। मेकेर मुर मबाक्तीके दुम्ब” दे परमप्रभु यावेमी देंत। येरमीया ४९:१८; उत्पती १९:२४-२५

41 कोव्रडीन, मुरपुकी उत्तर रे जाक्ना जाक्न बाक्नीम। शुश जात डा नु शुश पिप आन जोंब बोक्शा डोन रागी रे जाक्नीम। येरमीया १:१४

42 मेकोपुकी लिब्रा नु तूतीक कुरशो, थम मरिम्शो पाइब नु शिशी मपाइक्ब बाक्नीम। मेको आन रेयके समुन्द्र ग्रीशो खोदेशो बाक्ब। मेकोपुकी शारा डोंइश्शा जाक्नीम। मेको लडाइ तोचा कली आन बाक्तीकेम राप्नीम। बेबीलोन आ तमी, इ कली लडाइ तोचा कली जाक्नीम। येरमीया ६:२३

43 मिनु बेबीलोन डा पिपम मेको आन पबंम लोव्र नेंतु। मिनु आ थुं लुकच लत। मेको सुत्केरी रोइ पशो मीश मुर खोदेशो पा सुर्ता पा हिंत।

44 यर्दन आ नेक्था डा ठेयब ब्वाकी रे बस्तु योव्रतीकेम गुप्स जाक्शो खोदेशो पा गो मेको कली याम कामी मेको आ रागी रे गुंडनुड। गो सु कली सासन पचा कली योव्रडु, मेको कली गेनुड। आं खोदेशो सु बाक्बा? आं कली सुम अरेने चाप्बा डा? तेको गोठला आं डोंइती राप्ने चाप्बा डा? येरमीया ४९:१९

45 मोपतीके परमप्रभु यावेम बेबीलोन आ पबंम पचा चिक्शो गेय नु कल्दी रागी डा मुर आन पबंम मिम्शो दोदेशो बाक्बा, मेको नेनीन। थमा पा लाइक्चा पुंडसीनीम। बेबीलोन डा पुडग मुर आन कली यो कीशा लाइक्चा पुंडसीनीम। मेको आन बाक्तीक मेको तशा हिं।

46 बेबीलोन कली ग्रामानु, मेको आन रेयकेम रागी खिंखि पाइब। मेको आन वाइ ब्रेश्शो रागी रागी डा मुर आन दातेमी नेंसीब।

## 51

बेबीलोन खतम दुम्शो

1 मिनु परमप्रभु यावेमी “गो बेबीलोन नु लेब-कमाइ डा मुर आन पबंम खतम सेल्ब फश गिवार कली सोइक्नुड। खतम सेल्ब फश गिवार कली यो खतम सेल्ब सोक्त देंसीब।

2 गो बेबीलोन कली क्राप्ब मुर सोइक्नुडमी। मेकोपुकीम बेबीलोन आ श्येत जतीक नाक्ती आ एर ओंथ नेल्ल रे जाक्शा, मेको आ रागी श्येतथ सेल्नीम। येरमीया १५:७

3 लिब्रा आप्बम आ लिब्रामी ब्रा मचुइक्तल। मिनु लडाइ पाइबमी आ लडाइ डा वा मफेक्सेक्ल। मेको आ ठिटा मुर आन कली मप्रोनीन। मेको आ लडाइ पाइब नेल्ल आन कली सतीन।

4 मेकोपुकी कल्दी आन रागीम साइक्चा पुंडसीनीम। मेकोपुकी आ लां मेर गार दुम्शा गोल्नीम।

5 मिनू इस्राएल नु यहूदा परमप्रभु, मुर नेल्ल आन परमप्रभु यावे रे मप्रोंइसीशो बाक्ब। मेको आन रागी इस्राएली आन का ला बाक्शो परमप्रभु यावे कली पापम ब्रीशो बाक्ब। यसैया ५४:४; येरमीया ५०:२९

6 बेबीलोन आ दाते रे प्रोक्कीन। मुर नेल्ल आम आम गिंम प्रोंइचा कली प्रोक्कीन। मेको आ दोसम पतीकेम गे मबेक्कीन। मारदे हना मेको परमप्रभु यावे आ क्येक्क लेत्तीक नाक्ती बाक्ब। मेकोमी मेको कली आ तचा माल्लो सजाइ गेब। येरमीया ५०:८; प्रकाश १८:४

7 बेबीलोन परमप्रभु यावे आ गुडम सुन के कचौरा का बाक्त। मेकोमी रागी नेल्ल डा मुर आन कली दुक्पाइक्तु। रागी रागी डा मुरपुकीम मेको आ अडगुर शांबु तूतेक्म। मोपतीके मेको रागी डा मुर निप्स ग्यशो दुन्तेक्म। प्रकाश १७:४; येरमीया २५:१५; प्रकाश १८:३

8 बेबीलोन याम कामी गोल्लत। मिनू टुक्रा टुक्रा सेल्चा पुंडसाक्ब। मेको आ पबंम रोंका पने। मेको आ गारम खेक्चा कली खेक्तीक चाक्कीन। मो पशोनू, मेको साबा कों। यसैया २१:९

9 गोपुकीम बेबीलोन कली सापाइय्य वा। तन्न मेको मसाब। गो मेको कली प्रोंइतक। मिनू आम आम रागी लेत्तक। मारदे हना मेको आ निसाफ पशो सजाइ स्वर्ग सम्म जाक्दीशो बाक्ब। मेको सरीड सम्म बोक्शो बाक्ब।

10 परमप्रभु यावेमी आंइ ठीक पतीके कोंइताक्ब। जाक्कीन, मिनू इ परमप्रभु यावेमी मार पवा, मेको सियोनमी नेंपाइशशा देंय।

11 इन ब्रा शेप्पीन। मिनू ब्रा कुरतीक प्रिदीन। परमप्रभु यावेम मादी आन पिप कली लडाइ पपाइक्तु। मारदे हना मेकोमी बेबीलोन कली खतम सेल्चा कली मिन्ताक्ब। मेको आ खिं आ पबंम क्येक्क लेत्तीके बाक्ब। यसैया १३:१७; येरमीया ५०:२८

12 बेबीलोन डा गारो आ डोंइती छेदर खुक्कीन। शुश कोव्रब वोतीन। खाल पाइब वोतीन। बाप्ब आन कली ठीक पा वोतीन। परमप्रभु यावेमी बेबीलोन डा मुर आन पबंम आ मिम्शो पाप्तु।

13 गे शुश ब्वाक्कु आ नेक्था बाक्नेवे। इ शोंप शुश बाक्नीम। मुल इ नाक्ती जाक्त। इ ब्रोंइतीक नाक्त नुप्त। प्रकाश १७:१

14 मुर नेल्ल आन परमप्रभु यावेम आ नेम कसम जाप्तु। गो थमा पा सल्ला खोंदेशो पा लडाइ पाइब मुर जाक्पाइशशा, इ रागी प्रिनुडमी। मिनू मेकोपुकीमी इ क्येडा ग्राशो आ पबंम टेयब सेंदा पा रेयके पाइनीम।

15 मेकोमी रागी कली आ सक्तिम सेल्लु। मेकोमी आ तुइक्तीकेम रागी कली वोइक्तु। मेकोमी आ रुप्तीकेम सरीड प्राक्तु। येरमीया १०:१२-१६

16 मेकोमी लोव्र पवानु, सरीडमी रेड यिशा, गरड गुरुड पाइब। मेकोमी रागी आ सुर रे गोस्स पोक्ब। रेड नु काथ काथा चिला दाप्पाइक्ब। मिनू फश आ बाक्तीक रे गुंइशा, फश पपाइक्ब। बजन संग्रह १३५:७

17 मुर नेल्ल मूर्ख नु मजोक्ब मतुइक्ब बाक्नीम। सुन चेम्ब नेल्ल आन मूर्तिम पतीके मुने दोक्नीम। मारदे हना मेको आन सेल्शो मूर्ति सोक्त मपाइशशो जोल बाक्नीम।

18 मेको शोर गाक्शो बाक्नीम। मेको मुर आन मिम्शो ला बाक्नीम। मेको आन कली सजाइ गेशोनू, मेकोपुकी खतम दुन्मीम।

19 परमप्रभु यावे मेको खोंदेशो ममाइ। परमप्रभु यावे याक्ब आ भाग बाक्ब। मेको आन खोंदेशो ममाइ। मारदे हना परमप्रभु यावे मारेइ मारेइ सेल्ब बाक्ब। मिनू इस्राएली मेको आ मुर बाक्नीम। मेको आ नें मुर नेल्ल आन यावे बाक्ब।

20 बेबीलोन, गे लडाइ पचा कली आं तुप्तीके नु लडाइ पतीक या बाक्नेवे। गो इ रे पा रागी रागी डा मुर आन कली तुप्तामी। गो इ रे पा राज्य आन कली खतम पोक्तामी। येरमीया ५०:२३

21 गो इ रे पा शारा नु शारा डोइक्ब आन कली तुप्तामी। गो इ रे पा बग्गी नु बग्गी चलेब आन कली तुप्तामी।

22 गो इ रे पा वोंइश मुर नु मीश मुर आन कली तुप्तामी। गो इ रे पा खूशो नु टिटा आन कली तुप्तामी। गो इ रे पा टिटी नु टिटा आन कली तुप्तामी।

23 गो इ रे पा गोंठला नु मेको आ बगाल कली तुप्तामी। गो इ रे पा रू दोइब नु आन ब्यफ आन कली तुप्तामी। गो इ रे पा सरकार आ गेय पाइब नु हुकुम पाइब आन कली तुप्तामी।

24 गो इ डोंइती बेबीलोन नु कल्दी रागीम बाक्ब मुर नेल्लेम सियोनम मरिम्शो पशो आ पबंम क्येक्क लेत्तुड” दे परमप्रभु यावेम देंत। येरमीया ५०:२९; अय्युब १:१७

25 परमप्रभु यावेमी “गे मारेइ मारेइ आन कली साइक्ब डांडा, गो इ कली काइ मदाक्नुड। गे रागी नेल्ल खतम सेल्नेवे। गो आं गुड दिशा, इ कली रोंगु रे उइ तोक्नन। मिनू कोक्त जेशो डांडा सेल्नन।

26 खिं डा मुर वोइक्चा कली इ रे पा फुल्लु का यो मलाइक्नीम। जग वोइक्चा कली यो इ फुल्लु मलाइक्नीम। तन्न गे गेना हना यो कली श्येत्थ रागी दुम्चा माल्लेवे” दे परमप्रभु यावेम देंत।

27 मिनू परमप्रभु यावेमी “गे रागीम छेदर का खुक्कीन। रागी रागी आन दातेमी तुगही तपीन। मेको नु लडाइ पचा कली रागी रागी डा मुर आन कली ठीक सेलीन। राज्य आन कली बेबीलोन नु लडाइ पचा कली पोक्कीन। आरारात, मिन्नी नु अश्केनजमी बेबीलोन नु लडाइ पाइब आन टेयब मुर का योव्रडीन। सल्ला आन हुल खोंदेशो पा शुश शारा चाक्कीन। यसैया १३:३ उत्पत्ती १०:३

28 मेको नु लडाइ पचा कली रागी रागी डा मुर आन कली पोक्कीन। मादी आन पिप, मेको आन हुकुम पाइब, मेको आन टेयब मुर नु मेको आन हुकुम पशो रागी नेल्ल डा मुर आन कली पोक्कीन” देंत।

29 खिनु कुशा रागी खिंखि पाइब। मारदे हना परमप्रभु यावेम बेबीलोन कली श्येत्थ नु मुर मबाक्तीके सेल्लुड देशो लोत्र गाण्व।

30 बेबीलोन डा लडाइ पाइबपुकीम लडाइ पचा प्रॉइतेकम। मेको आन बोल्यो दरवारम बाक्नीम। मेको आन सक्ति जाप्त। मेकोपुकी मीश मुर खोदेशो दुम्तेकम। मेको आन खिंम मी सुइक्ने थुम्तेकम। मेको आन लाप्यो डा आग्लो जिक्शो बाक्नीम। येरमीया ५०:३७

31 लोत्र कुरबम अर्को लोत्र कुरब आन कली लांम ग्रुम्नीम। मेकोपुकीमी बेबीलोन डा पिप कली “मेको सहर नेल्ल ग्रातेकम।

32 मिनु खोला शोक्तीके ग्रातेकम। जोरी सत्रु आन कली ओत्रचा मगेचा कली सेल्लो तेक्तीक नेल्ल मी सुइक्ताकमे। मिनु लडाइ पाइबपुकी शश हिंशा चाम ग्याम दुम्तेकम” देशा पिप कली लोत्र नेंपाइक्नीम।

33 मिनु मुर नेल्ल आन परमप्रभु यावे, इस्राएली आन परमप्रभुमी “बेबीलोन आ तमी दांइ पतीक खला का खोदेशो दुम्ब। मेको दिप्चा पुंइसीब। इच्का नोले रिक्ची नाक्ती रीब पा जाक्ब” दैत।

34 सियोनमी “बेबीलोन डा पिप नेबुकदरेसरमी आं कली दाक्ती। आं कली खतम सेल्लती। आं कली श्येत्थ गर खोदेशो सेल्लती। आं कली अजीडगरम खोदेशो पा दाक्ती। मिनु ब्रोत्रशो जचा थोत्रकम खोदेशो पा आ कोत्रज प्रिंताक्ब। मिनु नोले आं कली ताइक्ताक्यी।

35 आं मुर आन कली साइशो आ पबंम बेबीलोन क्येक्क लेत्चा पुंइसीब” दैत। सियोन डा यरूसलेममी “कल्दी रागीम बाक्ब मुरपुकीम ‘आं हुश आ क्येक्क लेत्चा पुंइसीनीम’ दैचा माल्नीम” दैत।

36 मोपतीके परमप्रभु यावेमी “गो इ पो न बोक्नुड। गो इ कली गेशो श्येत आ क्येक्क लेत्नुड। गो मेको आ समुन्द्र सोत्रपाइक्नुड। आ ब्वाक्कु बुक्तीके यो सोत्रपाइक्नुड।

37 मिनु बेबीलोन खिं ब्रेशशा देल्ल्यो, सिवार आन बाक्तीके, हिंचा डा नु शुक्शी पाइक्चा पुंइसीतीके नु मुर मबाक्तीक दुम्ब। येरमीया ५०:१३

38 मेकेर डा मुर नेल्ल गुप्स खोदेशो पा ग्रीनीम। मेकोपुकी गुप्स आन चाइक्ब खोदेशो पा डरर डरर पाइनीम।

39 नोले मेकोपुकी बोक्शा, मार मार माल्मेनु, गो मेको आन कली तूतीक खेत्नुड। मिनु गो मेको आन कली रिशशा ग्यारशा मपामे सम्म दुक्पाइक्नुडमी। मिनु गेना हना यो कली इप्नीम। मिनु गेनायो मसेंसीनीम” दे परमप्रभु यावेमी दैत।

40 मिनु परमप्रभु यावेमी “गो मेको आन कली क्योरचा कली कीशा लाइशो पाठा, सांड नु क्यारश खोदेशो पा चाक्नुडमी।

41 शेशाक सहर कली दोपा ग्राने चाप्मे? रागी नेल्ल डा ठेयब नु दारशो सहर ब्रुत। बेबीलोन दोपा रागी रागी आन दातेमी शश हिंचा डा दुम्मे? शेशाक बेबीलोन कली अरु नें का बाक्ब। येरमीया २५:२६

42 समुन्द्र डोइशशा बेबीलोन कली सुम्तु। समुन्द्र आ ग्रीशो छालम मेको कली सुम्तु।

43 मेको आ सहरपुकी हिंचा डा दुम्तेकम। सोत्रशो, गोरशो नु मुर मबाक्तीके दुम्तेकम। मेको रे पा सुइ मगाक्नीम।

44 गो बेबीलोन डा बेल देवता कली सजाइ गेनुड। मिनु आ दाक्शो थोत्रक मेपाइक्नुड। मुल रागी रागी डा मुर मेकेर चोक्शी क्राक्शी पा मलाइक्नीम। बेबीलोन आ गारो ब्रेत्त। येरमीया ५०:२; यसैया ४६:१

45 आं मुरपुकी मेकेर रे गूशा पिने। गे नेल्ल ब्रॉइचा कली प्रोक्कीन। परमप्रभु यावे आ ठेयब पा गाइशो रे प्रोक्कीन।

46 रागीम मारेइ रेयके नेंनीब, इन थुं ग्येत्थ लुक्च मदुमीन। महिनीन। एको बसंम खाल का डा रेयके नु अर्को बसंम अर्को खाल डा रेयके नेंसीब। मेको रागीम हुश ख्राक्श पोक्शोनु, सासन पाइब कामी अर्को सासन पाइब कली जिचा तोशो रेयके बाक्ब।

47 गो बेबीलोन डा मूर्ति आन कली सजाइ गेनुडमी। मेको आ रागी नेल्ल मुने दोक्नीम। मिनु मेको आ मुर नेल्ल मेको आ दातेमी साइक्चा पुंइसीनीम। मोदेशो नाक्ती थमा पा जाक्ब।

48 मिनु नोले सरीड, रागी नु मेकेर बाक्ब नेल्लेमी बेबीलोन बुशो आ पबंम ग्येरशा वाइ ब्रेल्लेमी। मारदे हना मेको आन कली क्येक्क लेण्व उत्तर रे जाक्नीम” दे परमप्रभु यावेम दैत। प्रकाश १८:२०

49 परमप्रभु यावेमी “इस्राएली आन कली साइक्तीके बेबीलोन बुचा माल्ब। बेबीलोनम रागी डा मुर आन कली साइक्तीके बेबीलोन यो साइक्चा पुंइसीब।

50 गे तरवार रे ब्रोइशा प्रोक्कीन। देश मपने। डोन रागीम बाक्शा, परमप्रभु यावे कली मिम्तीन। यरूसलेम इन थुंम चोतीन” दैत। भजन संग्रह १३७:५

51 मेकोपुकीमी “आंइ कली शुक्शी पाइशो नेंशा, गो मुने दोक्तक। गो आंइ कुल सुम्तक। मारदे हना परमप्रभु यावे आ खिंम अर्को रागी डा मुर जाक्शा ओत्रतेकम” दैतेकम।

52 परमप्रभु यावेमी “गो मेको आ रागी नेल्लेमी आन मूर्ति आन कली सजाइ गेनुडमी। मिनु मेकेर गार दुम्शो मुर हुक्यी पाइनीम। मेको नाक्ती थमा पा जाक्ब।

53 बेबीलोन इर सरीड सम्म बोक्त हना यो, आ इर डा सहर बोल्यो सेल्लु हना यो, गो मेको कली खतम सेल्लपुकी सोइक्नुडमी” दे परमप्रभु यावेमी दैत। उत्पत्ती ११:४; यसैया १४:१३

54 परमप्रभु यावेम “बेबीलोन रे वाइ ब्रेशो सेंदा नेंसीब। कल्दी डा मुर आन रागी रे मारेइ मारेइ प्रेशो रेयके नेंसीब।

55 परमप्रभु यावेम बेबीलोन कली श्येत्थ सेल्लब। मिनु मेको आ ठेयब सेंदा सिक्सी पपाइक्ब। मेको आ छाल समुन्द्र खोदेशो पा रेयके पाइब।



56 बेबीलोन कली खतम पोक्ब जाक्ब। बेबीलोन डा लडाइ पाइबपुकी ग्याइक्चा पुंडसीनीम। मेको आन लिब्रा जिक्नीम। मारदे हना परमप्रभु यावे क्येक्क लेप्ब बाक्ब। मेकोमी आ पशो आ पा डा नेल्ल गेब। ब्यवस्था ३२:३९-४१

57 गो मेको आ सरकार डा गेय पाइब, जोक्ब तुइक्ब, मेको आ हुकुम पाइब, नु आ लडाइ पाइब नेल्ल आन कली दुक्पाइक्नुडमी। मिनु मेकोपुकी गेना हना यो कली इप्नीम। लेंशा मबोक्नीम” दे पिपम देंत। मेको पिप आ नें मुर नेल्ल आन परमप्रभु यावे बाक्ब।

58 मुर नेल्ल आन परमप्रभु यावेम “बेबीलोन डा ब्रेम्शो गारो दिंम दुम्ब। मिनु मेको आ लाइशशो ठेयब लाप्चोपुकी मीम नेक्ब। मुरपुकी मोशा गेय पाइनीम। रागी रागी डा मुर आन श्येत पा पशो गेय नेल्ल मी कली ला दुम्ब” दे परमप्रभु यावेमी देंत। हबकुक् २:१३

59 परमप्रभु यावे आ लोत्र पाइब येरमीयामी माहसेयाह आ चच नेरीयाह आ तौ सेरायाह पिप आ गेय पाइब कली अरेप्तु। मिनु मेको यहूदा डा पिप सिदकीयाहम सासन पवा आ ४ बर्सम पिप नु बेबीलोन लशो बाक्त। येरमीया ३६:४

60 येरमीयामी बेबीलोनम जाक्चा चिक्शो श्येत आ पर्वम डा लोत्र कागज काम ब्रेक्ताक्व। बेबीलोन आ पर्वम नेल्ल ब्रेक्ताक्व। येरमीया ५०:१-५०,५८

61 मिनु येरमीयाम सेरायाह कली “गे बेबीलोनम जाक्दीनेनु, एको लोत्र नेल्ल पढेवो।

62 ‘परमप्रभु यावे, गे एको रागी कली खतम पोक्नुड’ देंतीनी। ‘एकेर मुर नु बी ब्यफ, क्यारश भेडा, मारेड बास मबाक्चा डा पा श्येत्थ रागी सेल्लुड। एको गेना हना यो मुर मबाक्तीके दुम्ब’ देंतीनी” देनो।

63 मोपा एको कागज पढेने थुम्शा, फुल्लु काम फ्रेंशा युफ्रेटीस खोलाम ताइक्तो। प्रकाश १८:२१

64 मिनु “कागज ब्वाक्कुम गुम्शो खोदेंशो पा बेबीलोन आं चाक्शो श्येत आ पर्वम गुम्ब। मेको गेनायो गूने मचाप्ब, देंचा माल्नेवे” देंत। मोपा येरमीया आ लोत्र नुत्त।

## 52

यरूसलेम खतम दुम्शो

येरमीया ३९:१-१०; २राजा २४:१८-२५-१९; २इतिहास ३६:११-२१

1 सिदकीयाह पिप दुम्मेनु, २१ बर्स दुम्शो बाक्त। मिनु मेकोम यरूसलेममी ११ बर्स सासन पात्तु। मेको आ ममा आ नें हामुतल बाक्त। मेको लिब्ना डा येरमीया आ तमी बाक्त।

2 मिनु मेकोम येहो-याकीममी खोदेंशो पा परमप्रभु यावे आ डोंइती मार मरिम्शो बाक्मे, मेको पात्तु।

3 मिनु यरूसलेम नु यहूदा डा मुरपुकीमी परमप्रभु यावे कली शुश गाइक्पाइक्तेक्म। मोपतीके मेकोमी मेको आन कली आ डोंइती रे तिल्लु। मिनु बेबीलोन डा पिप सिदकीयाहम कली मटीव।

4 सिदकीयाहम सासन पवा आ ९ बर्स, १० महिना, १० नाक्त बेबीलोन डा पिप नेबुकदरेसरमी आ लडाइ पाइब नेल्ल कुरशा, यरूसलेम नु लडाइ पथ जाक्त। मिनु मेकोपुकीमी सहर आ लाडगा रे पुम्ताक्म। सहर डा गारो डोंइक्चा कली एर ओंथ डोंइक्तीक सेल्लेक्म।

5 मोपा पिप सिदकीयाहम सासन पवा आ ११ बर्सम सहर आ एर ओंथ नेल्ल रे पुम्ताक्म।

6 मिनु ४ महिना डा ९ नाक्ती सहरम थम ठेयब अन्काल दुम्त। मिनु मेको सहर आ आगामी जचा कली मारेड मबा।

7 मिनु सहर डा गारो प्रेत्तेक्म। मिनु लडाइ पाइब नेल्ल प्रोक्तेक्म। कल्दी डा मुरपुकी सहर आ एर ओंथ बाक्तेक्म। मो हना यो मेकोपुकी पिप आ फल फुल रू डा गारो निक्शी आस दाते डा लाप्चो रे पा गूशा प्रोक्तेक्म। मिनु मेकोपुकी अराबाह रागी गे लाम्तेक्म।

8 तन्न कल्दी डा लडाइ पाइबपुकीम पिप सिदकीयाह कली खेदा पाम्तेक्म। मिनु मेको कली यरीको डा दिंम थित्तेक्म। मेको आ लडाइ पाइब नेल्ल ब्रशा एर ओंथ दुम्तेक्म।

9 मिनु मेको ग्याइक्चा पुंडसाक्व। मिनु मेकोपुकीमी पिप कली हमाथ रागी डा रिब्लामी बेबीलोन डा पिप आ डोंइती चाक्तेक्म। मिनु मेकेर बेबीलोन डा पिपमी मेको कली आ सजाइ नेंपाइक्तु।

10 मेको रिब्लामी बेबीलोन डा पिपमी सिदकीयाह आ तौ आन कली मेको आ डोंइतीन साइक्तीमी। मिनु यहूदा डा ठेयब मुर नेल्ल आन कली यो रिब्लाम साइक्तीमी।

11 मिनु मेकोमी पिप सिदकीयाह आ मिक्च फेल्ताक्व। मिनु मेको कली कांसा के साडलोमी पाइक्ताक्म। मिनु मेको कली बेबीलोनमी लाइशशा मबेक्म सम्म चोक्शा वोइक्तु। येरमीया ३२:५

12 बेबीलोन डा पिप नेबुकदरेसरमी सासन पवा आ १९ बर्स ५ महिना १० नाक्ती पिप कली खाल पाइब आन कप्तान नेबुजरादान यरूसलेममी जाक्त।

13 मिनु मेकोमी परमप्रभु यावे आ खिं, पिप आ दरवार नु यरूसलेम डा खिं नेल्लेम मी सुइक्ताक्व। मेकोमी ठेयब खिं नेल्लेम मी सुइक्ताक्व।

14 मिनु पिप कली खाल पाइब आन कप्तान नु बाक्शो कल्दी डा लडाइ पाइब नेल्लेम यरूसलेम आ एर ओंथ बाक्शो गारो नेल्ल प्रेत्तेक्म।

15 मिनु पिप कली खाल पाइब आन कप्तान नेबुजरादानमी नेल्ल आन क्येडा पुडग, सहरम प्रोंइशा वोइशशो मुरपुकी बेबीलोन डा पिप आ बाक्तीके प्रोक्शा जाक्दीशशो मुरपुकी नु लीशो मार, मार, सेल्ल जोक्ब मुर आन कली ग्याइशशा लाइक्तीमी।

16 तन्न पिप कली खाल पाइब आन कप्तान नेबुजरादानमी रागी डा अडगुर रू नु अरु रूम गेय पचा कली, थम पुडग आन कली ला प्रोइशा वोइक्तीमी।

17 कल्दीपुकीम परमप्रभु यावे आ खिंम बाक्शो कांसा के थामपुकी, कांसा के ठेयब चिक्तीके बोस, मेको आ कांसा के नित्तीके लाइक्तेक्म। कल्दीपुकीमी मेको नेल्ल प्रोल्शा, बेबीलोन लाइक्तेक्म। येरमीया २७:१९-२२; १राजा ७:१५-३९; २राजा २५:१३-१७

18 मेकोपुकीमी बोसपुकी, बेल्यापुकी, सल्दो खोइक्तीक कांइची, अरु बोसपुकी, डाडु नु कांसा के बोस नेल्ल नु चढेचा कली माल्शो मारेइ मारेइ लाइक्तेक्म।

19 पिप कली खाल पाइब आन कप्तानम सुन नु चांदीम सेल्शो आइक्च लोटापुकी, कोइला कुर पतीक, बोसपुकी, बत्ती दातीकपुकी, डाडु, तूचा थोत्रक चदेशोनु माल्तीक बोसपुकी नेल्ल लाइक्तु। १राजा ७:१५-३७

20 पिप सोलोमनम परमप्रभु यावे आ खिं कली सेल्पाइशो ठेयब थाम निक्शी, कांसा के ठेयब चिक्तीके बोस मेको आगाम बाक्शो १२ ओटा कांसा के ब्यफ नु मेको आगाम बाक्शो नित्तीके बाक्तेक्म। मेको आन कांसा नाक्ने मचाप्या डा शुश बाक्त।

21 मेको थाम निम्फा १८, १८ कुबीत लाइशो, १२, १२ कुबीत ब्रेम्शो नु आस थांइशो ४, ४ अडगुल बाक्ताक्स। मिनु आस आगा चहिं श्येत्थ बाक्ताक्स। कुबीत का ०.५ मिटर खोदेशो बाक्ब।

22 मेको आ तार कांसा के पिया पाइशो बाक्त। मेको आ पिया ५ कुबीत लाइशो बाक्त। मेको आ पिया कांसा के जाली नु दारीम आ बुटामी एर ओंथ नेल्ल हिरशो बाक्त। मिनु अर्को थाम यो डोंइती डा खोदेशो पा सेल्शो बाक्त।

23 मेको आस एर ओंथ नेल्ल ९६ ओटा दारीम बाक्तेक्म। मेको आस एर ओंथ नेल्ल डा जाली कली हिरशो दारीम सहे का बाक्तेक्म।

24 मिनु पिप कली खाल पाइब आन कप्तानमी ठेयब चढेब सेरायाह, मेको आ नोले डा चढेब सेफन्याह नु लाप्यो खाल पाइब सां आन कली ग्याइशो लाइक्तीमी।

25 मिनु मेकोमी सहरम मेना सम्म लीशो लडाइ पाइब आन कली कोत्रब कप्तान का नु पिप कली अर्ती गेब ७ जना मुर आन कली ग्याइशो लाइक्तीमी। मेको रागीम लडाइ पाइब आन कली पुक्ब आन कप्तान आ ब्रेक्ब मुर नु सहरमी थिंशो अरु ६० जना वोइश मुर आन कली यो ग्याइशो लाइक्तीमी।

26 मिनु मेको पिप कली खाल पाइब कप्तान नेबुजरादानमी मेको आन कली लाइशो रिब्लामी बेबीलोन डा पिप आ बाक्तीकेम चाक्तीमी।

27 मिनु बेबीलोन डा पिपम मेको आन कली हमाथ रागी रिब्ला सहरम साइक्तु। मोपा मेकोपुकी यहूदा आ रागी रे ग्याइशो लाइक्का पुंइसाक्म।

28 मिनु नेबुकदरेसरमी सासन पवा आ ७ बर्सम ग्याइशो लाइशो मुरपुकी हिक्शोनु, हजार सां २३ जना यहूदी बाक्तेक्म।

29 मेकोमी सासन पवा आ १८ बर्सम यरूसलेम रे ८ सहे ३२ जना आन कली ग्याइशो लाइक्तु।

30 मेकोम सासन पशो २३ बर्स दुम्मेनु, पिप कली खाल पाइब आन कप्तान नेबुजरादानमी ७ सहे ४५ जना यहूदी आन कली ग्याइशो लाइक्तीमी। मिनु मेको मुर नेल्ल पा ४ हजार ६ सहे जना बाक्तेक्म।

येहो-याकीन कली प्रोइशो

२राजा २५:२७-३०

31 यहूदा डा पिप येहो-याकीन कली ग्याइशो लाइशो ३७ बर्समी एवील-मेरोदक बेबीलोन डा पिप दुम्त। मेको आ सासन पशो १२ महिना २५ नाक्ती दुम्मेनु, मेकोमी यहूदा डा पिप येहो-याकीन कली चोक्तीक रे प्रोइपाइक्तु।

32 मेकोमी मेको नु रिम्शो पा लोत्र पा बेबीलोनम आं नु बाक्शो पिप नेल्ल आन क्येडा ठेयब सेल्शा, मेको कली मान गेशा वोइक्तु।

33 मोपा येहो-याकीनमी आ जेल्खानम फेक्तीक वा पुइशो, आ लीशो नाक्ती नेल्ल पिप नु जशा बाक्शा पाप्तु।

34 बेबीलोन डा पिपमी येहो-याकीन कली नाक्त कित कित मेको मबेक्म सम्म आ माल्शो मारेइ मारेइ गेप्तु।

## बिलाप

**ब्रेक्ब मुर:** एको किताब येरमीयामी ब्रेक्शो बाक्ब।

**गेना ब्रेक्शो:** एको किताब ५८७-५८६ बि. सी. परमप्रभु यावे आ खिं नु यरूसलेम खतम दुम नोले ब्रेक्शो बाक्ब।

**मारदे ब्रेक्शो:** येरमीया आ सेल्शो बिलाप ५ ओटा कुम्सो बाक्नीम। मेको कुम्सोपुकीम मार लोव बाक्ब देशा हना:

१. डोंइती डा लोव्र यरूसलेम सहर वोंइश बेक्शो मीश खोदेशो दुम्शो बाक्ब।
२. आ नोले डा लोव्र परमप्रभु यावे आ निसाफ पचा आ पर्वम बाक्ब।
३. नोले डा लोव्र ब्रेक्बमी आंम आ पर्वम ब्रेक्ब।
४. नोले डा लोव्र लेंशा टेयब श्येत आ पर्वम बाक्ब।
५. मिनु नेल्ल क्येडा नोले डा लोव्र “परमप्रभु, गे लेत्चा गयीनी” दे पुंडतीक बाक्ब।

यरूसलेममी “वारच पने” दे पुंडशो

१ मेको सहरम गिश श्येत्थ दुम्मे। डोंइती मेकेर शुश मुर बाक्तेक्म। मेको आ वोंइश बेक्शो मीश मुर खोदेशो दुम्त। मेको डोंइती रागी रागी आन दातेमी टेयब बाक्त। मेको रागी पिप आ तमी खोदेशो बाक्त। मुल मेको सहर वाइल खोदेशो दुम्त। येरमीया ५१:५

२ मेको नाकदो हिशेक पा डाक्ब। आ प्रेक्क यिना यिन बाक्नीम। मेको आ दाक्शो मुर आन दाते डा सुइम मेको कली आ थुं बारपाइक्चा डा लोव्र मपाइनीम। आ वारच नेल्लेम मेको कली प्रोंइतेक्म। मुल मेको आ जोरी सत्रु दुम्तेक्म। भजन संग्रह ६९:२१

३ यहूदा श्येत जशा, ग्याइश्शा लाइक्चा पुंडसाक्ब। मुल श्येत पा गेय पाइब दुम्त। मुल मेको रागी रागी डा मुर आन दातेमी बाक्ब। नाइक्चा कली बाक्तीक मबा। आ कली खेदा पाइबपुकीमी मेको कली श्येतमी ग्याइश्शा लाइक्तेक्म।

४ सियोन लतीक लां रोंका पाइनीम। मारदे हना सुइमी चाड मानेचा कली मेकेर रे मगाक्नीम। सहर डा टेयब लाप्यो नेल्ल श्येत्थ बाक्नीम। आ चढेबपुकी हुकयी पाइनीम। आ मीश आल सुर्ता पाइनीम। मिनु सहरम श्येत जशो बाक्ब।

५ मेको आ जोरी सत्रु आ होव्रप दुम्तेक्म। मेको आन माल्शो शुश ताइनीम। मारदे हना परमप्रभु यावेमी मेको आ शुश हेंथे पशो तशा, यरूसलेम कली श्येत गेप्टु। मेको आ आल ग्याइश्शा लाइक्चा पुंडसीशा, आन जोरी सत्रु आन डोंइती लाम्तेक्म।

६ सियोन आ तमी रे पा आ मान पचा पुंडसीतीके नेल्ल लने थुम्तु। आ पिप आ तौपुकी जोतीकेम थिश्शो रोकोश खोदेशो दुम्तेक्म। मेको बोल मपाइश्शो दुम्शा, आन कली खेदा पाइब आन डोंइती प्रोक्ना प्रोक्न बाक्नीम।

७ यरूसलेममी टेयब श्येत जतीक नु सुर्ता पतीक नाक्ती जाक्चा क्येडा डोंइती आंम के बाक्शो शोंप नेल्ल मिम्ब। मेको आ मुर आन जोरी सत्रु आन गुइमी गेचा पुंडसीची ना सुइमी मेको कली वारच मपाम। आ जोरी सत्रुम मेको आ श्येत तशा शुक्शी पाम्तेक्म।

८ यरूसलेममी टेयब पाप पाप्टु। मोपतीके मेको शुक्शी पाइक्चा पुंडसाक्ब। डोंइती मेको कली मान पाइब नेल्ले मुल महिकनीम। मारदे हना मेकोपुकीमी मेको कली शिश्ना ताम्तेक्म। मेको आंमान हुकयी पा आ कुल खुइक्ब।

९ मेको आ ग्रॉग्रा दितिके आ गुनेमी केम्साक्ब। मेकोमी नोले डा नाक्त ममिम्त। मेको आ तशो श्येत हिंचा डा बाक्त। आ थुं बारपाइक्ब सुइ मबाक्म। मेकोमी “परमप्रभु यावे, आं श्येत कोव्रडीन। आं जोरी सत्रुमी आं कली ग्रातेक्म।

१० आ जोरी सत्रुमी आ शोंप नेल्ल रोइक्ताकयीमी। गे मेको आन कली इन बाक्तीके खिंम ओव्रचा मगेतीनी हना यो, यरूसलेममी रागी रागी डा मुर इन खिं ओव्रचा ताम्तेक्म। येरमीया ५२:१७-१९; ब्यवस्था २३:४

११ मेको आ मुर नेल्ल हुकयी पा, अन्न माल्ना माल्न गाक्नीम। लेंशा बोल्यो दुम्चा कली आन शोंप लेयनीम। परमप्रभु यावे, मुल आं कली कोव्रडीन। गो महिक्सीशो दुम्ती” देती।

१२ गे एको लां रे पा लाइब तशा, आन पर्वम मारदे ममिम्नीनी? एर ओथ नेल्ल कोव्रडीन। आं श्येत क्येडा यो अरु हिंचा डा श्येत बाक्बा? परमप्रभु यावेमी आ शुश गाइक्तीकेमी आं कली मेको श्येत गेती।

१३ मेकोमी इर रे मी सोइक्ताक्ब। मिनु आं रुश आगा ओव्रपाइक्ती। आं खोइल कली ग्याइल दाइश्शा रेप्पाइक्ती। आं कली आ डोंइती रे तिलती। मेकोमी नेल्ल नाक्त आं कली मुर मबाक्तीके नु बोल मपाइश्शो सेलती।

१४ मेकोमी आं हेंथे पतीके जुवा खोदेशो सेल्लु। मिनु मेको आ गुइमी फ्रेंसाक्ब। मेको आं बला तारी शुश हेल्शो बाक्ब। मोपा आं बोल ग्युम्त। मिनु परमप्रभुमी आं कली आं ग्राने मचाप्या डा मुर आन गुइमी गेती।

१५ परमप्रभुमी आं दाते डा लडाइ पाइब नेल्ल आन कली प्रोंइतु। मुल मेकोमी आं कली वारच मपथु, आ टिटा वोंइश मुर नेल्ल आन कली साइक्तु। परमप्रभुम अडगुर खाक्शो खोदेशो पा यहूदा डा कन्ने मीश आल, यरूसलेम कली खाक्शो बाक्ब। यसेया ६३:३

१६ गो मार कली डाक्नुडा, मार कली आं प्रेक्क यीनीम देशा हना, आं कली लेम्ब नु आं थुं बारपाइक्ब आ क्येडा डोन बाक्नीम। आं आल लने थुम्तेक्म। मारदे हना आं जोरी सत्रु आं क्येडा बोल्यो बाक्तेक्म।

१७ सियोनमी पुंडचा कली आ गुइ दिताक्ब। तन्न आ थुं बारपाइक्ब सुइ मबाक्म। परमप्रभु यावेमी “याकूब आ नेक्था डा मुर आ जोरी सत्रु दुम्चा माल्नीम” दे अरेप्टु। मिनु मेको आन दातेम यरूसलेम ग्रॉग्रा दिचा डा दुम्त। येरमीया १:८

18 परमप्रभु यावे ठीक पाडब बाकब। मारदे हना गो आ लोत्र काड मटीब दुम्ती। तन्न गे जात जात डा मुर नेल्ल नेनीन। आं श्येत कोव्रडीन। आं मीश आल नु टिटा वोंडश आल नेल्ल ग्याइशशा लाडक्चा पुंडसाकम। येरमीया ३:४२; येरमीया ५:१६

19 गो आं दाकशो मुर आन कली ब्रेत्ताकड। तन्न मेकोपुकीमी आं कली प्रोंडतीमी। आं चढेब नु खाल्पा आन बोल लेप्पाइक्चा कली जचा थोत्रक माल्न माल्ना सहर्म बेक्तेकम।

20 “परमप्रभु यावे कोव्रडीन, गो शुश श्येत जाता। गो इन देशो मटीब दुम्तीके आं थुं चोती। आं थुं साप्पा सेक्बेर पाडब। लाडगाम तरवारमी साडकब। मिनु खिं आगाम बेक्तीक बाकब।

21 मुरपुकीमी आं हुकयी पशो नेतेकम। आं कली थुं बारपाइकब सुइ मबाक्नीम। आं जोरी सत्रु नेल्लेमी आं श्येत जशो आ पर्वम नेतेकम। आं कली मोदेशो दुम्शो तशा ग्येरसाकम। गे इन देशो नाक्त जाकल। मेकोपुकी यो आं खोदेशो पा श्येत जामेकल। येरमीया ४:२१

22 मेको आन मरिम्शो पशो नेल्ल इन डोंडती बाकल। मिनु गे आं हेंथे पशो आ पर्वम आं कली पशो खोदेशो पा मेको आन कली यो पतीन। गो शुश हुकयी पाडक्नुड। आं थुं लुकच लत” दैत।

## 2

### सियोन सुर्ता पशो

1 परमप्रभु गाइशशा, सियोन आ तमी कली मुने तोक्तु। इस्राएल आ दारस कली सरीड रे पा रागीमी तोक्तु। आ गाइशशो नाक्ती आंम खोडल वोडक्तीक सियोन कली यो प्रेताक्व। भजन संग्रह १३२:७-८

2 परमप्रभुमी शिशी मपथु याकूब आ बाक्तीक नेल्ल खतम सेल्लु। मोपा चुरशा यहूदा आ तमी आ गारो हिरशो सहर नेल्ल खतम सेल्लु। मेकोमी मेको राज्य नु आ सासन पाडब आन कली मान मताइब, आडक्च सेल्लु।

3 मेकोमी शुश चुरशा, इस्राएल डा सक्ति नेल्ल खतम सेल्लु। मेकोमी आ जोरी सत्रु आन डोंडती सियोन कली वारच पचा प्रोंडतु। मेको याकूब आ बाक्तीके आ एर ओंथ नेल्ल ग्राव गु दाकब मी खोदेशो दुम्त।

4 परमप्रभुमी सियोन आ जोरी सत्रु खोदेशो दुम्शा, आ लिब्रा कीतु। आ जोरी सत्रु खोदेशो दुम्त। आंइ दाकशो नेल्ल आन कली साडक्तु। परमप्रभुमी आ चुरशो मी खोदेशो पा सियोन आ तमी आ ताम्बु तारी मोडक्तु।

5 मुल परमप्रभु सियोन आ जोरी सत्रु खोदेशो दुम्त। मेकोमी इस्राएल कली खतम सेल्लु। आ दरवार नेल्ल आन कली खतम पोक्तु। आ गारो डा लाडशशो खिं नेल्ल प्रेल्लु। मिनु यहूदा आ तमी कली शुश रोंका नु हिशेक पपाइक्तु।

6 मेकोमी आंम ताम्बु कली रू डा कटेरा खोदेशो पा प्रेल्लु। मेकोमी आ बाक्तीके खतम सेल्लु। परमप्रभु यावेमी सियोनम चाड नु नाडक्तीक नाक्ती मानेतीक प्रोंडतु। आ शुश गाइशशोम पिप नु चढेब नेल्ल आन कली मुने तोक्तु। अय्युब २:१३; येरमीया ५:१२

7 परमप्रभुम आंम कली चढेतीक नु आ बाक्तीके निम्फा प्रोंडतु। मेको आन दरवार डा गारो जोरी सत्रु आन गुडमी गेप्लु। मोपा मेकोपुकीमी परमप्रभु यावे आ खिंमी चाड डा नाक्त खोदेशो पा रेयके पाम्तेकम।

8 परमप्रभु यावेमी सियोन आ तमी आ गारो प्रेत्या कली मिम्ताक्व। मेको आ तारी पुक्तीके कीतु। मेकोमी खतम सेल्चा कली आ गुड मतेक्वा। मेकोमी गारो नु आ बोल्यो सेल्लेतीके निक्शी कली रोंका पपाइक्तु। मिनु मेको कालेकम ब्रेत्ताकस। २राजा २१:१३

9 मेको आ ठेयब लाप्चो खपीम दोक्तेकम। मेकोमी आ आग्लो जिक्शा खतम पोक्तु। मेकेर डा पिप नु आन तौ नेल्ल रागी रागी डा मुर आन दातेमी बाक्नीम। मेकेर लां कोंडब परमप्रभु यावे आ अरेशो मबाक्ब। मिनु परमप्रभु यावे आ लोत्र पाडबपुकीमी परमप्रभु यावे रे पा मारेड लोत्र मताइनीम।

10 सियोन डा खाल्पा खपीम निशशा, सिक्सी पा बाक्नीम। मेकोपुकीमी आन पियामी फुरक फुंडसीनीम। मिनु भाडग्रा फेक्शा बाक्नीम। यरूसलेम डा मीश आलपुकीमी आन पिया खप सम्म बाप्पाइशशो बाक्नीम।

11 गो डाक्ना डाकन बाक्नुड। आं थुं चोडब। आं थुं खाडक्ब। मारदे हना आं मुर खतम दुम्तेकम। आल नु दूध तूब आलपुकी सहर डा लांम शोत्रलु बेक्नीम।

12 मेकोपुकीमी आन ममा आन कली “जचा तूचा थोत्रक ते बाकम” दे हिल्लो पाइनीम। मेकोपुकी सहर डा लांम गार दुम्शो लडाइ पाडब खोदेशो पा थाइनीम। मिनु आन ममा आन थुकुम बेक्नीम।

13 ए यरूसलेम आ तमी, गो इ पर्वम मार देंडा? गो इ कली मार नु थाप्तु? ए सियोन आ कन्ने तमी इ थुं बारपाइक्चा कली इ कली मार नु थाप्तु? इ श्येत समुन्द्र खोदेशो पा ठेयब बाकब। सुडम इ कली सापाइक्ने मचब।

14 इ परमप्रभु यावे आ लोत्र पाडब आन लोत्र नेल्ल जोल नु शोर गाकशो बाक्तेकम। मेकोपुकीमी इ कली रिम्शो दुम्ल, दे इ मरिम्शो पशो आ पर्वम लोत्र मपाम। तन्न मेकोपुकीमी इ पर्वम पशो लोत्र नेल्ल जोल नु दूली लां कोंडब बाक्त। येरमीया १४:१४-१६; येरमीया २३:१६-२२

15 इ नेक्था रे पा लाडब नेल्लेमी इ कली तशा शुक्शी पाइनीम। यरूसलेम आ तमी तशा शुक्शी पा आन पिया हिम्नीम। मेकोपुकीमी “एको सहर कली नेल्ल क्येडा दारशो नु रागी डा नेल्ल क्येडा दाकशो सहर देंनीमी, ममाइ डा?” देंनीम। भजन संग्रह ४८:३; इजीकीएल १६:१४

16 इ जोरी सत्रु नेल्लेमी इ पर्वम मरिम्शो लोत्र पा शुक्शी पाइनीम। मेकोपुकीमी आन गाडक्तीकेमी “गो मेको कली खतम सेल्लक। एको नाक्ती कोव्रचा कली रिम्ताक्क। मुल गो ताइतक” देंनीम।

17 परमप्रभु यावेमी मार मिम्ता नु डोंडती मार पाइनुड देमे, मेको पाप्तु। साइ डोंडती हिंच कोइशा देशो लोत्र मुल पाप्तु। मेकोमी शिशी मपथु, नेल्ल खतम सेल्लु। मिनु इ जोरी सत्रु आन कली इ पबंम ग्येरपाइक्तु। इ जोरी सत्रु आन सक्ति ठेयब सेल्लु।

18 गे सियोन आ तमी, आ गारो परमप्रभु कली ठेयब सेंदा पा पुनो। इ प्रेक्क खोला खोदेशो पा नाक्दो नाक्त यिपतो। याम का यो मनांडसो। शुश डाक्को।

19 बोक्को। नाक्दो डाक्शा पुनो। खाल पाइब आन गेय पची ना यो मो पावो। इ थुं डा श्येत परमप्रभु आ डोंडती ब्वाक्कु खोदेशो पा लुक्तो। लांमी बाक्ब इ शोत्रलु बेक्शो आल आन पबंम इ गुड परमप्रभु गे पोक्शा पुनो।

20 “परमप्रभु यावे कोत्रडीन। गे सु कली ओदेशो पा श्येत गेनी। मार मीश मुरपुकीमी आंम आल आन कली ब्वचा माल्नीमी? मार इन कली चढेब नु इन लोत्र पाइबपुकी इन बाक्तीकेमी साइक्चा पुंडसीचा माल्नीनी? ब्यवस्था २८:५३-५७; येरमीया १९:९

21 ठिटा नु खाल्पापुकी लांम गोल्लो बाक्नीम। आ ठिटी मीश मुर नु ठिटा वोंइश मुर तरवारमी साइक्चा पुंडसाक्म। गे इन गाइशशो नाक्ती मेको आन कली शिशी मपाइक्थु साइक्तीनी।

22 गे एर ओंथ डा आं जोरी सत्रु आन कली चाड मानेचा कली खोदेशो पा ब्रेत्ताक्नी। परमप्रभु यावे आ गाइशशो नाक्तीमी सुइ मुर प्रोक्शा ब्रोंइचा मताइनीम। गो आं थिशो नु कोल्पाइशशो आल आन कली आं जोरी सत्रुमी साइक्तेक्म” देती।

### 3

मुर आन पबंम रोका पशो

- 1 परमप्रभु आ चुरशोमी आं कली कोक्केम तुप्ती।
- 2 मेकोमी आं कली खेदा पा छेडछेड रे छिडछिडमी गाक्पाइक्ती।
- 3 मेकोमी नाक्त कित कित आं कली श्येत गेना गेन बाक्ब।
- 4 आं रां नु कुशुल नेल्ल सोत्रपाइक्ती। मिनु आं रुश जिक्तु।
- 5 मेकोमी आं कली सुर्ता पतीक नु श्येत जतीकेम पुम्शा गिल्पाइक्ती।
- 6 मेकोमी साइ नेसी डा बेक्शो मुर आन कली खोदेशो पा आं कली छिडछिडमी बाक्पाइक्ती।
- 7 मेकोमी आं कली प्रोक्ने मचबल, दे चोक्ती। आं कली हेल्शो साइलोमी पाइक्ताक्ती।
- 8 गो “वारच पाइय्नीन” दे शुश ब्रेत्ती। तन्न आं ब्रेशशो नेशा यो सिक्सी पा बाक्त। भजन संग्रह २२:३; भजन संग्रह ६९:४
- 9 मेकोमी आं लां ठेयब फुल्लुमी नेक्तु। मिनु आं लां हिरशो सेल्लु।
- 10 मेको ग्राम्चा कली बाप्शा बाक्शो वां खोदेशो बाक्ब। मिनु खुइशशा बाप्शा बाक्शो गुप्स खोदेशो बाक्ब।
- 11 मेकोमी आं कली आं लां रे पा लाइशशा, बेदर किदर पोक्ती। मेकोमी आं कली सुइ मपाइशशो सेल्लती।
- 12 मेकोमी आ लिब्रा कीशा, आं कली आप्ती।
- 13 मेको आ ब्रामी आं लुडगीर खिल्लाक्ती।
- 14 आं मुर नेल्ले आं पबंम रिन्नीम। मेकोपुकी नाक्त कित कित आं पबंम शुक्शी पा कुम्सो पाइनीम। अय्युब ३०:९
- 15 मेकोमी आं थुं खाइक्पाइशशा, आं कली कशो तूचा थोत्रक तूपाइक्ती।
- 16 मेकोमी आं कली फुल्लु जपाइशशा, पुलुमी निप्पाइक्ती।
- 17 गो थुं नाइशशा बाक्चा मताइक्नुड। ग्येरशा बाक्चा मार बाक्मे, मेको प्रेंताक्ड।
- 18 मोपतीके गो “आं दारस नेल्ल जाम्शा लत। गो परमप्रभु यावे रे ताइनुड, दे आस पशो यो नेल्ल जाम्शा लत” देती।
- 19 आं श्येत आ पबंम मिम्तीके नु आं खिं मबाक्तीके खाइल खोदेशो पा कशो दुम्ती।
- 20 गो मेको गेना हना यो मिम्नुड। मोपतीके आं थुं लुक्च लत।
- 21 तन्न गो परमप्रभु आ लोत्र फुक्शा, आ लां कोत्रनुड।
- 22 परमप्रभु यावे आ गेना हना यो दाक्तीक गेनायो मनुप्ब। आ शिशी गेनायो मनुप्ब। नेहेम्याह ९:३१
- 23 मेको सुनी कुस कुस नक दुम्शो बाक्ब। इन देशो गेना हना यो थमा बाक्ब।
- 24 आं थुंमी “परमप्रभु यावे आं भाग बाक्ब। मोपतीके गो मेको कली आस पाइनुड” देती। भजन संग्रह १६:५; भजन संग्रह ३:२६
- 25 परमप्रभु यावेमी आ कली रिम्ब आन कली रिम्शो पाइब। सुमी मेको कली माल्नीमी, मेको आन कली रिम्शो पाइब।
- 26 सिक्सी पा परमप्रभु यावे आ श्येत रे प्रोंडतीके रिम्चा रिम्शो दुम्ब। रोमी ८:२५
- 27 ठिटा बाक्शो ना आंम जुवा कुरचा रिम्शो दुम्ब।
- 28 परमप्रभुमी मुर कली आ का ला सिक्सी पा बाक्चा गेप्टु हना, मेको कली रिम्शो दुम्ब।
- 29 मुरुमी आ शोत्र खपीम वोदल। मोपा मेको के आस बाक्बा को?
- 30 मेको आ चोत्रचो राप्चा गेशा, शुश शुक्शी पाइक्चा पुंडसीब दुम्ब। मती ५:३९
- 31 परमप्रभुमी मुर आन कली आ डोंडती रे गेना हना यो मतिल्लब। यसेया ५४:८
- 32 मेकोमी श्येत गेप्टु हना यो, लेंशा शिशी पाइब। मेको आ गेना हना यो दाक्तीक थम ठेयब बाक्ब।
- 33 मारदे हना मेकोमी सुइ मुर आन कली श्येत गेचा मदाक्ब।
- 34 रागी डा जेल्खानम चोक्चा पुंडसीशो नेल्ल आन कली खोइलीमी दिम्नीम।

- 35 नेल्ल क्येडा ठेयब आ डोंडती मुर आन कली ठीक निसाफ मगेथु, दूली पाइनीम।  
 36 मुर आन कली दूली निसाफ पाइनीम। परमप्रभुमी मेको नेल्ल मताइबा डा?  
 37 परमप्रभुम अरेशो गेय सुमी अरेने नु पपाइवने चाप्बा डा? यसैया ४५:७; आमोस ३:६  
 38 मार नेल्ल क्येडा ठेयब आ शोत्र रे रिम्शो नु मरिम्शो लोत्र मगूबा डा?  
 39 मारदे मुरुमी आंम पाप आन पबंम सजाइ तामेनु, गन गन पाइनीमी?  
 40 गो आंम कली नाकशा कोत्रशा, परमप्रभु यावे गे लेत्नय।  
 41 गो आं ड थुं नु गुड स्वर्ग डा परमप्रभु गे पोक्य।  
 42 गोपुकीमी हेथे गाकशा, इन देशो काइ मटिक। मिनु गे आंइ कली माफ मगेनी। भजन संग्रह १०६:६  
 43 गे चुरशा आंइ कली खेदा पाइतीनी। काइ शिशी मपथु साइक्तीनी।  
 44 आंइ पुंडशो इन बाक्तीक मजाक्या डा पा, गे गोस्सुमी गिल्साक्नी।  
 45 गे आंइ कली शुश जात डा मुर आन दातेमी ग्रांरा दिशो सेल्तीनी।  
 46 आंइ जोरी सनु नेल्लेम आन शोत्र रोक्शा शुक्शी पांमतेक्म।  
 47 शुश हिंचा डा मरिम्शो दुम्तीक आंइ तार जाक्त।  
 48 आं मुर नेल्ल खतम दुम्शो तशा, गो शुश डाक्ती।  
 49 गो डाक्स डा डाक्स बाक्नुड। नाइक्चा मताइनुड।  
 50 परमप्रभु यावेमी स्वर्ग रे पा उड मकोत्रडा सम्म मो पाइनुड। भजन संग्रह १०२:२०-२१  
 51 आं सहर डा मीश आल आन कली मरिम्शो दुम्शो तशा आं थुं खाइक्ती।  
 52 आं जोरी सनुमी आं कली मोशीन चिक्ब कली खोदेशो पा सिखार ग्यारतेक्म।  
 53 मेकोपुकीमी आं कली सेसीन खाल्टामी ताइक्ताक्यीमी। आं कली फुल्लुमी यो आप्तीमी।  
 54 ब्वाक्कुम आं पिया सम्म सुम्ती। मिनु गो “मुल आं ब्रॉइस ओशोन बाक्माक्त।  
 55 परमप्रभु यावे, शुश लुक्य लशो खाल्टा रे पा गो इन नें थोवता।  
 56 गे आं थोशो लोत्र नेतीनी। आं कली प्रॉइचा कली आ थोशो लोत्र नेतीन। इन नोफा मसुने। तन्न आं कली श्येत रे प्रोनीन।  
 57 गो इन कली थोडानु, गे आं नेक्था जाक्तीनी। मिनु आं कली ‘महिने’ देंतीनी।  
 58 परमप्रभु गे आं कली वारच पाइक्तीनी। मिनु बेक्चा रे प्रॉइतीनी।  
 59 परमप्रभु यावे, गे आं कली पशो मरिम्शो नेल्ल ताइतीनी। आं कली निसाफ गेयीनी।  
 60 मेकोपुकीमी आं कली मरिम्शो पचा कली सल्ला पशो नेल्ल ताइतीनी।  
 61 परमप्रभु यावे, गे मेको आन आं कली हिंच कोंइशा पशो लोत्र नेल्ल नेतीनी।  
 62 मेकोपुकी नेल्ल नाक्त आं पबंम खुइशो लोत्र पा, नोफा मुइक्मुन्तेक्म।  
 63 मेकोपुकी निस्सामानु, बोक्मानु, आं पबंम शुक्शी पा कुम्सो पाइनीम। येरमीया ३:१४  
 64 परमप्रभु यावे, मेको आन पशो कोत्रशा, मेको आन कली क्येक्क लेत्तीन। येरमीया १:२१; भजन संग्रह १३७:८; १पत्रुस २:२३; १पत्रुस ३:९  
 65 मेको आन थुं सुम्शा गेन। इन सराप मेको आन कली रल।  
 66 मेको आन कली गाइशा खेदा पन। परमप्रभु यावे, सरीड आगा रे मेको आन कली खतम पोक्कीन” देंती।

## 4

सियोन कली सजाइ

- 1 सुनमी आं दारस नेल्ल साम्तु। क्येख सुन मदारशो दुम्त। शुश क्येट लाइब हीरा नेल्ल लां मेर फ्राइसीशो बाक्नीम।  
 2 सियोन आ दाक्शो आलपुकी, डोंडती सुन खोदेशो मिम्शो बाक्तेक्म। मुल खप के ग्योब खोदेशो दुम्तेक्म।  
 3 सिवारमे आन चाइक्ब आन कली दूध तुंडनीम। तन्न आं मुरपुकी काइ मरिम्शो दुम्तेक्म। मेकोपुकी गोरशो रागीम बाक्ब ठेयब चिक्ब खोदेशो दुम्तेक्म। अय्युब ३०:१४-१६  
 4 दूध तूब आल आन लें शुश तूत दाक्शा, आन कुंकुमी खोक्ताक्व। आलपुकीमी जचा थोत्रक पुंडनीम। तन्न सुइमी मेको आन कली मारेइ मगेनीम।  
 5 ब्रॉवशो ब्रॉवशो जाइबपुकी मुल लां मेर बेक्नीम। दारशो वासी फेक्शा कोल्शो मुल पुलु ताइक्तीकेम बाक्नीम।  
 6 मारदे हना आं मुर आन कली गेशो सजाइ सोदोम कली गेशो सजाइ क्येडा ठेयब बाक्त। मेको कली याम कामीन लोक्या पुंडसाक्व। उत्पत्ती १८:२०; उत्पत्ती १९:२४-२५  
 7 मेकेर पिप आ तौपुकी फुं नु दूध क्येडा बुश बाक्तेक्म। मेको आन रां मानीक हीरा क्येडा लल बाक्तेक्म। मेको आन चां नीर हीरा खोदेशो बाक्तेक्म।  
 8 मुल मेको आन रां कुंकी क्येडा क्येर दुम्तेक्म। मेको आन कली लां मेर यो सुइमी मतुइक्नीम। मेको आन कुशुल रुशेम केप्शो बाक्ब। मेकोपुकी शी खोदेशो पा सोत्रशो बाक्नीम।  
 9 जचा मतथु शोत्रलु पा बेक्बपुकी क्येडा तरवारमी क्योरशा साइक्चा पुंडसीबपुकी ग्येरसीशो बाक्नीम। रू डा फल मथित्थु, मेकोपुकी सोत्रशा लाइनीम।

10 ब्रेम्शो थुं पाइश्शो मीश मुरपुकीमी आंम आन आल क्येन्तेक्म। मेको आन जचा थोत्रक दुम्त। गो आ मुर आन कली खतम सेल्ल्तीके मोदेशो दुम्त। येरमीया २:२०

11 परमप्रभु यावेमी आ चुरशो नेल्ल कोइताक्व। मेकोमी आ हिंचा डा पा गाइश्शो नेल्ल कोइताक्व। मोपा सियोनम मी सुइक्ताक्व। मिनु मेकेर डा जग नेल्ल दाक्तु।

12 आ जोरी सन्नु यरूसलेम डा ठेयब लाप्शो रे पा ओवनीम, देशो रागी नेल्ल डा पिप नु मेकेर बाक्व मुर सुइमी यो थमा सुइक्ने मचबेम।

13 परमप्रभु यावे आ लोत्र पाइब आन पाप नु चढ़ेब आन मरिम्शो पशो आन पर्वम मो दुम्शो बाक्त। मेकोपुकीमी सहर आ दातेम ठीक पाइब मुर आन कली हुश खाक्श पोक्तेक्म।

14 मेकोपुकी मिक्च मताइब खोदेशो पा लां मेर हिरसाक्म। मेकोपुकी हुश लुम्सीशो बाक्तेक्म। मेको आन वा सुडम मथिंचा डा बाक्त।

15 मुरपुकीमी मेको आन कली “लने, ए यांग्रा दिशो मुर आंइ कली मथिने” दे ग्रीनीम। मोपतीके मेकोपुकी प्रोक्व नु हिरब मुर दुम्तेक्म। रागी रागी डा मुरपुकीमी “मुल मेको गोपुकी नु बाक्चा मताइनीम” देतेक्म। लेवी १३:४५

16 परमप्रभु यावेमी मेको आन कली मोपा ब्रपाइक्तीमी। मुल लेंशा मेको आन कली शिशी मपाइक्व। सुइमी चढ़ेब आन कली मान मपामे। खाल्पा आन कली यो महिकोम। येरमीया २:६; येरमीया ५:१२; लेवी १९:३२

17 वारच पाइब जाक्वा, को देशा लां कोव्रशा मिक्च चोप्नु। रागी कामी आंइ कली वारच पाइबा कों, दे कोव्रशा बाक्तक। तन्न मेकोमी आंइ कली प्रॉइने मचब।

18 मुरपुकीमी आंइ नोले खोइक्तेक्म। मोपतीके गो आंइ लांमी गाक्ने मचाप्क। आंइ बेक्तीक नाक्ती जाक्त। आंइ नाक्त नुप्शो बाक्तेक्म। गो बेक्चा चिक्तक।

19 आंइ कली खेदा पाइबपुकी सरीडम बेरब ककाकुली क्येडा यो रीब पा जाक्तेक्म। मेकोपुकीमी आंइ कली पहाडम खेदा पाम्तेक्म। गोरशो रागीमी बाप्शा बाक्तेक्म।

20 मेकोपुकीमी परमप्रभु यावे आ तेल लुक्शो, आंइ कली ब्रॉइचा गेब कली ग्याइक्ताक्म। मेको आ पर्वम गोपुकीमी “मेको आ वांकुम रागी रागी डा मुर आन दातेम बाक्नीकी” दे मिम्शो नकी।

21 एदोम आ तमी ग्येरसो। गे ऊज रागीम बाक्नेवे। तन्न गे यो मेको श्येत डा कचौरा तूचा माल्नेवे। गे दुक्नेवे। मिनु शिश्ना सेल्सीनेवे। येरमीया ३:६४; भजन संग्रह १३७:७; येरमीया २५:१५, २१

22 सियोन आ तमी इ हेंथे गाक्शो डा सजाइ नुप्त। मेकोमी इ कली ग्याइश्शा लाइश्शो रागी रे थुंडब। तन्न एदोम आ तमी, इ हेंथे गाक्शो डा सजाइ ताइनेवे। मेकोमी इ पाप कोइब। यसैया ४०:२; यसैया ३४:८-१०; इजीकीएल ३५:१४-१५

## 5

शिशी पन, दे प्रार्थना पशो

- 1 मिनु “परमप्रभु यावे, गो आंइ कली मार दुम्शो बाक्वा, मेको मिम्तीन। आंइ कली मरिम्शो पशो कोव्रडीन।
- 2 आंइ थेरशो रू अर्को रागी डा मुर आन के दुम्त। आंइ खिं यो अर्को रागी डा मुर आन के दुम्तेक्म।
- 3 गोपुकी रोम रोइक्च दुम्तक। आंइ ममा वॉइश बेक्शो मीश मुर खोदेशो दुम्तेक्म।
- 4 गोपुकीमी तूचा ब्वाक्कु यो ग्याप्चा माल्नीकी। शी यो ग्याप्चा माल्नीकी।
- 5 गोपुकी जुवा लाप्शो खोदेशो पा आंइ कली खेदा पाइनीम। गोपुकी दशो बाक्नीकी। तन्न नाइक्चा मताइनीकी। प्रस्थान २०:५; येरमीया ३१:२९
- 6 गो इजीप्त नु अस्सुर रागी नु जचा थोत्रक तचा कली सल्ला पाइतक।
- 7 आंइ किकी पिपीमी पाप पाम्तेक्म। मिनु बेक्तेक्म। गोपुकी मेको आन हेंथे पशो राइतक।
- 8 वाइलपुकीमी आंइ कली हुकुम पाइनीम। आंइ कली मेको आन गुड रे पा प्रॉइब सुइ मबाक्नीम।
- 9 गोपुकीमी आंइ जचा थोत्रक बेक्चा डा गोरशो रागीम लशा, चाक्चा माल्नीकी।
- 10 गो शोत्रलु बेक्तीके आंइ कुशुल चुप्नु खोदेशो पा होश दुम्त।
- 11 सियोनम मीश मुर आन कली बिथोलो पाइनीम। यहूदा सहरम कन्ने मीश आल आन कली बिथोलो पाइनीम।
- 12 मेकोपुकीमी सासन पाइब आन कली क्युकशा साइक्तेक्म। खाल्पा आन कली मान मपामे। २राजा २५:१९-२१
- 13 ठिटापुकीमी श्येत पा यात हिल्चा माल्नीम। वॉइश आलपुकीमी शी कुरशा गोल्चा चिक्शा गाक्नीम।
- 14 खाल्पापुकी सहर डा ठेयब लाप्शोमी गुम्शा बाक्चा प्रॉइतेक्म। मिनु ठिटापुकीमी बाजा ताप्चा प्रॉइतेक्म।
- 15 आंइ थुं रे पा ग्येरशा बाक्तीक जाम्त। गो आंइ सिल पतीक नेल्ल रोंका पतीके दुम्त।
- 16 सिरपेच आंइ पिया रे दोक्त। आबी, गो पाप पाइतक। येरमीया १३:१८
- 17 मोपतीके आंइ थुं खाइक्त। मिनु आंइ मिक्च ब्रा ब्रा दुम्त।
- 18 सियोन डांडाम श्येत दुम्त। मेको सिवार आन बाक्तीके दुम्त।
- 19 तन्न गे, परमप्रभु यावे गेना हना यो सासन पाइनीम। इन सासन पतीके नेल्ल पाला सम्म लीब।
- 20 गे मारदे आंइ कली प्रेंदीनी? गे मारदे आंइ कली इश डा नाक्त सम्म प्रॉइनी?
- 21 परमप्रभु यावे, आंइ कली इन गे लेप्पाइक्की। मिनु गो थमा पा इन गे लेत्नीकी। आंइ नाक्त डोंइती डा खोदेशो सेलीन। भजन संग्रह १२६:
- 22 गे आंइ कली थमा पा मप्रॉइशो बाक्तीनी हना नु आंइ तशा शुश मगाइश्शो बाक्तीनी हना, मोदेशो दुम्ल” दे पुंडतक।

## इजीकीएल

**ब्रेक्ब मुर:** साइ रे एको किताब इजीकीएल आ ब्रेक्बो बाक्ब देनीम।

**गेना ब्रेक्बो:** ६२० रे ६०० बि. सी. आस दातेम ब्रेक्बो बाक्ब।

**मार ब्रेक्बो:**

१. परमप्रभुमी यरूसलेम खतम दुम्या क्येडा डोंइती लोत्र पशो इजीकीएल १:- २४:-

२. परमप्रभुमी यरूसलेम आ नेक्था डा रागी आन पर्वम लोत्र पशो इजीकीएल २५:- ३२:-

३. परमप्रभुमी यरूसलेम खतम दुम नोले लेम्शा लोत्र पशो इजीकीएल ३३:- ४८:-

इजीकीएलम छेडछेड तशो  
इजीकीएल १०:-

1 मिनु ३० बर्स डा ४ महिना डा ५ नाक्ती ग्याइश्शा लाइक्चा पुंडसीशोपुकी नु गो केबार खोला आ नेक्था बाक्शो नड। मिनु मेना सरीड रोक्साक्व। मिनु गो परमप्रभु आ कोंइशो तातामी। इजीकीएल १:३; इजीकीएल ३:२३; इजीकीएल १०:१५, २०, २२; इजीकीएल ४३:३

2 मेको महिना डा ५ नाक्ती पिप येहो-याकीन ग्याइश्शा लाइक्चा पुंडसीशो ५ बर्स दुम्यो बाक्त। २राजा २४:१५

3 मिनु परमप्रभु यावेमी बूजी आ तौ चढेब इजीकीएल, आ कली लोत्र पाप्टु। मेना गो कल्दी आन रागी, केबार खोला आ नेक्थाम बाक्ती। मेना परमप्रभु यावेमी आं कली थिती। इजीकीएल ३:२२-२३; इजीकीएल ८:१; इजीकीएल ३३:२२; इजीकीएल ३७:१; इजीकीएल ४०:१

4 मिनु गो कोवडुनु, उत्तर रे फश गिवार यिशो ताता। ठेयब छेडछेड पाइश्शो गोस्स ताता। मेको आ दाते रे चिला दाप्शो खोंदेशो पा आ एर ओथ नेल्ल छेडछेड दुम्यो बाक्त। मिनु चिला खोंदेशो पा एर ओथ दोरत। मिनु मेको मी आगा रे कांसा खोंदेशो जिल जिल पा ब्रशो तांइसाक्व। प्रकाश ४:-

5 मिनु मेको आ दातेमी ४ ओटा सोक्त पाइश्शोपुकी तांइसाक्व। मेको मार खोंदेशो तांइसाक्व देशा हना,

6 मेको आन के ४, ४ ओटा कुल नु ४, ४ ओटा फ्रां बाक्तेक्म।

7 मेको आन खोइल दिंसीशो बाक्तेक्म। बाछा आन गंच खोंदेशो बाक्तेक्म। मेको आन खोइल खुइश्शो कांसा खोंदेशो पा टल्केशो बाक्तेक्म।

8 मेको आन फ्रां आगा एर ओथ नेल्ल मुर आन गुइ खोंदेशो बाक्तेक्म। मेको ४ ओटा सोक्त पाइश्शो आन कुल नु आन फ्रां दोदेशो बाक्तेक्म देशा हना,

9 मेको आन फ्रां थिमुशो बाक्तेक्म। मेकोपुकी तेइ लमानु डोंइती गे पा गाक्बाक्तेक्म। आन कुल एर ओथ महिरथु ग्येत्थ गाक्बाक्तेक्म।

10 मेको आन कुल दोदेशो बाक्तेक्म देशा हना, मेको नेल्ल का का पा ४ ओटा कुल बाक्तेक्म। डोंइती डा कुल मुर आ कुल खोंदेशो बाक्त। आ ग्युरा गे डा कुल गुप्स आ कुल खोंदेशो बाक्त। पेरा गे डा कुल ब्यफ के खोंदेशो बाक्त। मिनु आन नोले गे डा कुल ककाकुली के खोंदेशो बाक्त।

11 मेको आन कुल मोदेशो बाक्तेक्म। मेको आन फ्रां इर गे प्राक्शो बाक्तेक्म। मेको आन फ्रां निक्शीमी अर्को आन फ्रांम थिमुशो बाक्तेक्म। मिनु फ्रां निक्शीमी आन आन रां सुम्सीशो बाक्तेक्म।

12 मेको नेल्ल ग्येत्थ डोंइती गे गाक्बाक्तेक्म। सोक्त ते ते लमे, मेक मेक लाइबाक्तेक्म। मेको आन कुल महिरथु गाक्बाक्तेक्म।

13 मेको सोक्त पाइश्शो आन दातेमी ब्रशो कोइला खोंदेशो बाक्त। मेको एर ओथ गाक्शो तोव्रशी खोंदेशो तांइसीबाक्त। मेको मी थम छेडछेड पा ब्रशो बाक्त। मिनु मेको रे चिला दाप्बाक्त।

14 मेको सोक्त पाइश्शोपुकी चिला आप्शो खोंदेशो पा एर ओथ बेरबाक्तेक्म।

15 मिनु गो मेको सोक्त पाइश्शोपुकी कोवडुनु, मेको ४ ओटा सोक्त पाइश्शो आन नेक्था खपीम गुगील तातामी। मेको नेल्ल आन गुगील का का बाक्त।

16 मेको गुगील दोदेशो बाक्तेक्म देशा हना, मेको जिल जिल पाइब पीत मनी माइश्शो हीरा खोंदेशो बाक्तेक्म। मेको गुगील आगाम अर्को गुगील बाक्तेक्म।

17 मेकोपुकी गाक्मानु, तेइ महिरथु गाक्बाक्तेक्म। मेको सोक्त ते ते गाक्मे, मेको गुगील मेक मेक गाक्बाक्तेक्म।

18 मेको गुगील लाइश्शो नु हिंघा डा बाक्तेक्म। मिनु मेको कली कोवडुनु, नेल्ल मिक्ची मिक्च पाइश्शो बाक्तेक्म।

19 मिनु मेको सोक्त पाइश्शोपुकी गाक्मानु, मेको ग्येत्थ क्युकसीमानु, मेको गुगील यो ग्येत्थ क्युकसीबाक्तेक्म।

20 मिनु सोक्त ते ते गाक्मे, मेको सोक्त पाइश्शोपुकी यो मेक मेक गाक्बाक्तेक्म। मिनु मेको गुगील मेकोपुकी नु बोक्बाक्तेक्म। मारदे हना मेको सोक्त पाइश्शो आन सोक्त मेको गुगीलम बाक्त।

21 मेको सोक्त पाइश्शोपुकी गाक्मानु, मेकोपुकी यो गाक्बाक्तेक्म। मेको दिक्मानु, मेकोपुकी यो दिक्बाक्तेक्म। मेको रागी रे क्युकसमानु, मेको गुगील क्युकसीबाक्तेक्म। मारदे हना मेको सोक्त पाइश्शो आन सोक्त मेको गुगीलम बाक्त।

22 मेको सोक्त पाइश्शो आन पिया इर गे जिल जिल सिसा खोंदेशो बाक्तीक बाक्त।

23 मेको बाक्तीक आ दी गे आन फ्रां हाम्शो बाक्तेक्म। मेकोपुकी थिमुशो बाक्तेक्म। मेको सोक्त पाइश्शो आन फ्रां निक्शीम आन रां सुम्यो बाक्तेक्म।



24 मेको गाक्मानु, गो मेको आन फ्रां आन रेयके, ठेयब समुन्द्र आ रेयके खोदेशो नेता। मेको रेयके नेल्ल क्येडा सक्ति पाइशो बुबु पाइब नु लडाइ पाइब आन ग्रांग्ये मांग्ये पोक्शो रेयके खोदेशो नेता। मेको सोक्त पाइशोपुकी राम्मानु, आन फ्रां लुकच तोक्बाक्तेक्म।

25 मेको आन फ्रां लुकच तोक्शा दिक्मानु, मेको आन पिया इर गे बाक्तीके रे सेंदा का यूत। मेको सोक्त पाइशोपुकी राम्मानु, आन फ्रां लुकच तोक्बाक्तेक्म।

26 मेको आन पिया इर गे बाक्तीकेमी ठेयब नित्तीक का खोदेशो बाक्त। मेको कोत्रडुनु नीर हीरा खोदेशो तांडसाक्व। मिनु मेको ठेयब नित्तीकेम निप्ब आ रां मुर आ खोदेशो बाक्त। प्रस्थान २४:१०; प्रकाश ४:२-३; यसैया ६:१

27 मिनु मेको आ फ्रातो डा ग्येत्थ ब्रशो जिलजिल पाइशो कांसा चुप्लुम ब्रशो मी खोदेशो ताता। आ फ्रातो डा लुकचु मी खोदेशो पा ब्रशा शुश छेडछेड बाक्त।

28 रेउ यिमेनु, गोस्सुम वाक्श दापशो खोदेशो पा, मेको आ एर ओंथ नेल्ल छेडछेड बाक्त। मेको परमप्रभु यावे आ छेडछेड बाक्त। मिनु गो मेको तशा, खुम्की पा बाप्ती। मिनु मुर ब्वाक्शो खोदेशो सेंदा नेता। इजीकीएल ३:२३; इजीकीएल ८:४; इजीकीएल ९:३; इजीकीएल १०:४,१८; इजीकीएल ११:२३; इजीकीएल ४३:४; इजीकीएल ४४:४

## 2

इजीकीएल कली ब्रेशो

1 मिनु मेकोमी आं कली “ए मुर, बाक्शा रपो। मिनु गो गे नु लोत्र पाइनुड” देंत।

2 मिनु आं कली लोत्र पवानु, परमप्रभु यावे आ सोक्त आं आगाम ओत्रशा, आं कली राप्पाइक्ती। मिनु आं कली लोत्र पशो नेता।

3 मिनु मेकोमी आं कली “ए मुर, गो इ कली इस्राएल जात डा मुर आन बाक्तीक सोइक्नन। मटीब रागी डा मुर आन बाक्तीक सोइक्नन। मेकोपुकीम आं कली मटिशो बाक्नीम। मेको आन किकी पिपी नु मेकोपुकीम मुल सम्म हेंथे पा आं कली मटिशो बाक्नीम।

4 मेको आन चच युड आं कली मटीब नु खकटा थुं पाइशो बाक्नीम। गो इ कली मेको आन बाक्तीक सोइक्नन। मिनु गे मेको आन कली ‘परमप्रभु, परमप्रभु यावेमी इन कली लोत्र पाइब’ देंत।

5 मेकोपुकीम नेन्मेक्ल कि मनेन्मेक्ल, मेकोपुकी नु लोत्र पावो। मारदे हना मेको मटीब आन खिं डा मुर बाक्नीम। मिनु मेको आन दातेम परमप्रभु यावे आ लोत्र पाइब मुर का बाक्माक्त, दे तुइक्नीम। इजीकीएल २:७; इजीकीएल ५:११,२७

6 मिनु गे मेकोपुकी नु मेको आन लोत्र नेशा महिनो। गे इ एर ओंथ चू नु चोंक बाक्तेक्म नु गे बिच्छी आन दातेम बाक्ते हना यो, महिनो। मेकोपुकीम मार देंतेक्म हना यो, मेको आन लोत्र क्येडा महिनो। मेको आन कोत्रशोम ग्येत्थ लुकच मदुमो। मारदे हना मेको मटीब आन खिं डा मुर बाक्नीम। येरमीया १:८

7 गे मेको आन कली आं लोत्र पचा मालनेवे। मेकोपुकीम नेन्मेक्ल कि मनेन्मेक्ल। मारदे हना मेकोपुकी मटीब आन खिं डा मुर बाक्नीम।

8 तन्न गे आं लोत्र नेनो। गे मेको मटीब आन खिं डा मुर खोदेशो मदुमो। इ शोत्र पाक्को। मिनु गो मार गेना, मेको जावो” देंत।

9 मिनु गो कोत्रडुनु, गुड का आं गे दिंशो ताता। मेकेर ब्रेक्शा ओल्शो कागज का बाक्त। प्रकाश १०:८

10 मिनु मेकोम, मेको आं डोंइती प्राक्शा कोइताक्यी। मेको आ डोंइती नु नोले, निम्फा पटटी ब्रेक्शो बाक्त। मेकेर हिशेक पतीके, रोंका पतीके नु आबी आबी, दे हिंतीके लोत्र ब्रेक्शो बाक्त।

## 3

इजीकीएलमी कागज जशो

1 मिनु मेकोमी आं कली “ए मुर, मेको इ डोंइती बाक्शो ओल्शो कागज जावो। मिनु लशा इस्राएल आ खिं डा मुर आन कली लोत्र पावो” देंत। येरमीया १५:१६; येरमीया १:९; प्रकाश १०:९-११

2 मोपतीके गो आं शोत्र पाक्ता। मिनु मेकोमी मेको ओल्शो कागज आं कली जचा गेती।

3 मिनु मेकोमी आं कली “ए मुर, आं गेशो ओल्शो कागज जावो। मिनु इ कोत्रज प्रिंदो” देंत। मोपतीके गो मेको जाता। मिनु मेको आं शोत्रम खुदो खोदेशो पा जिज दुम्त। भजन संग्रह ११९:१०३

4 मिनु मेकोमी आं कली “ए मुर, इस्राएली आन खिं लावो। मिनु मेको आन कली आं देशो लोत्र नेल्ल नेंपाइक्मी।

5 मारदे हना गो इ कली मतुइक्चा डा नु मरुप्चा डा लोत्र ब्वाक्ब मुर आन बाक्तीक मसोइक्तन। तन्न इस्राएली आन खिं डा मुर आन बाक्तीक सोइक्ताक्न।

6 गो इ कली मतुइक्चा डा नु मरुप्चा डा लोत्र ब्वाक्ब मुर आन दातेमी, मरुप्ब लोत्र पाइब मुर आन बाक्तीक मसोइक्तन। गो इ कली मोदेशो मुर आन बाक्तीके सोइशो नड हना, मेकोपुकीम इ लोत्र नेनेम वा।

7 तन्न इस्राएली आन खिं डा मुरम इ लोत्र मनेनीम। मारदे हना मेकोपुकीम आं लोत्र नेंचा मदाक्नीम। इस्राएली आन खिं डा मुर नेल्ले काइ मटीब नु खकटा थुं पाइशो बाक्नीम।

8 गो इ कुल मेको आन कुल क्येडा बोल्यो सेल्ला। इ थुं मेको आन थुं क्येडा बोल्यो सेल्ला। यसैया ५०:७; येरमीया १:१८

9 गो इ थुं बोल्यो फुल्लु क्येडा बोल्यो चकमक खोदेशो सेल्ला। गे मेको आन क्येडा महिनो। मेको आन कोत्रशोम ग्येत्थ लुकच मदुमो। मारदे हना मेको मटीब आन खिं डा मुर बाक्नीम” देंत।

- 10 मिनू मेकोम आं कली “ए मुर, गो इ कली देंशो लोत्र नेल्ल इ थुंम वोतो। मिनू नेनो।
- 11 मिनू मेको ग्याइशशा लाइक्चा पुंडसीशो इ मुर आन बाक्तीक लावो। मिनू मेको आन कली लोत्र पावो। ‘परमप्रभु यावेमी इन कली लोत्र पाप्तु’ देनो। मेकोपुकीम नेन्मेक्ल कि मनेन्मेक्ल” देत। इजीकीएल २:५,७
- इजीकीएल खाल पाइब दुम्शो  
इजीकीएल ३३:१-९
- 12 मिनू परमप्रभु यावे आ सोक्तीम आं कली इर क्युक्ती। मिनू गो “परमप्रभु यावे आ छेडछेड ठेयब बाक्ब” देंशो नेंता। मिनू गो आं नोले गे ठेयब रेयके पशो नेंता। इजीकीएल १:२८
- 13 मेको रेयके सोक्त पाइशशो आन फ्रां थिमुशो रेयके मेको आन नेक्था डा गुगील रे वृशो रेयके नु खिनू कुशो रेयके बाक्त।
- 14 मिनू सोक्तीम आं कली क्युक्था लाइक्ती। मिनू गो कशो थुं दुम्शा, गाइशशा लती। मेना परमप्रभु यावे आ बोल्यो गुडम आं कली दिप्ती।
- 15 मिनू गो मेको केबार खोला आ नेक्था बाक्ब रागी रे ग्याइशशा लाइक्चा पुंडसीशो आन बाक्तीक तेल-अबीब सहरम जाक्ती। मिनू गो ७ नाक्ती सम्म मेको आन दातेम ब्रिथ्री बाक्ती।
- 16 मिनू ७ नाक्त नोले परमप्रभु यावेमी आं कली लोत्र पाप्तु।
- 17 मार लोत्र पाप्तु देंशा हना “ए मुर, गो इ कली इस्त्राएली आन खिं डा मुर आन कली खाल पाइब सेल्लन। गे आं देंशो लोत्र नेतीवी हना, मेको आन कली आं लोत्र रे पा हिंच कोंइदीमी। इजीकीएल ३३:७; यसैया ५२:८; हिबू १३:१७
- 18 मिनू गो आं अरेशो लोत्र मटीब मुर का कली ‘गे थमा पा इ मटितीके आ पर्वम बेक्नेवे’ दे माइक्नुड। मिनू गे मेको कली ब्रोंइचा कली हिंच मकोंइताक्वी हना, मेको आं अरेशो मटीब आ मरिम्शो पशो आ पर्वम बेक्ब। मेको मुर आ हुश आ क्येक्क इ रे पा ताक्नुड। इजीकीएल १४:१०
- 19 तन्न गे मेको आं अरेशो लोत्र मटीब मुर कली हिंच कोंइताक्वी हना, नु मेको मुर आं अरेशो लोत्र मपतीक रे मलेल्ल हना, मेको आं अरेशो मटिशो नु आ मरिम्शो पशो आ पर्वम बेक्ब। तन्न गे ब्रोंइनेवे।
- 20 मिनू ठीक पाइब मुर काम आ ठीक पतीक रे लेशशा मरिम्शो पाप्तु हना, गो मेको आ डोंइती दाइल पाइक्तीक फुल्लु वोइक्ता हना, मेको बेक्ब। गे मेको कली हिंच मकोंइतीके, मेको आ पापम पतीके बेक्ब। मेको आ डोंइती ठीक पशो मारेड ममिम्सीब। मिनू गो मेको आ हुश आ क्येक्क इ रे पा ताक्नुड। इजीकीएल १८:२४
- 21 तन्न गे मेको ठीक पाइब मुर कली ‘पाप मपावो’ दे हिंच कोंइताक्वी हना नु मेकोमी पाप मपाप्तु हना, मेको थमा पा ब्रोंइब। मारदे हना मेकोम हिंच कोंइशो टिशो बाक्ब। मिनू गे ब्रोंइनेवे” देत।
- 22 मेना परमप्रभु यावे आ गुडम आं कली थिती। मेकोमी आं कली “बोक्को, बेंसीम लावो। मिनू गो मेकेर गे नु लोत्र पाइनुड” देत। इजीकीएल १:३
- 23 भोपतीके गो बोक्था बेंसीम लती। मिनू गो केबार खोला आ नेक्थाम तशो परमप्रभु यावे आ छेडछेड मेकेर यो बाक्त। मिनू गो खुम्की पा बाप्ती। इजीकीएल १:२८
- 24 मिनू सोक्त आं थुंम ओव्रत। मिनू मेकोम आं कली राप्पाइक्ती। मिनू आं कली लोत्र पा “लावो, इ खिं लशा, लाप्यो चोक्था बाक्को। इजीकीएल २:२
- 25 ए मुर, मेकोपुकीम इ कली डोरीम फ्रेंनीम। मिनू गे फ्रेंचा पुंडसीशा, मुर आन दातेम लचा मताइनेवे।
- 26 मिनू गो इ लं इ कुंकुम खोक्पाइक्नुड। मिनू गे मब्वाक्ब दुम्शा, मेको आन कली हुइक्ने मचाप्नेवे। मारदे हना मेकोपुकी मटीब आन खिं डा मुर बाक्नीम।
- 27 तन्न गो, गे नु लोत्र पडानु, इ कली ब्वाक्ने चाप्ब सेल्लन। मिनू गे मेको आन कली ‘परमप्रभु, परमप्रभु यावेमी इन कली लोत्र पाइब। नेंने दाक्बम नेन्मेक्ल’ देनो। मारदे हना मेकोपुकी मटीब मुर आन खिं डा मुर बाक्नीम” देत।

## 4

यरूसलेम आ पर्वम लोत्र

- 1 मिनू परमप्रभु यावेमी “ए मुर, गे इंटा का चाक्था इ डोंइती वोतो। मिनू मेको तारी यरूसलेम सहर आ नकसा सेलो।
- 2 मिनू मेको कली पुम्शो कोंइदो। मेको आ एर ओंथ लडाइ पचा कली लाइशशो खिं सेलो। मिनू मेको आ गारो डोंइक्चा कली खप तेलो। एर ओंथ लडाइ पाइब आन बाक्तीक सेलो। मिनू आ एर ओंथ मेको गारो प्रेंत्या कली मुडा ठीक सेलो।
- 3 मिनू नोले फलाम के ग्योंब का चाक्था, सहर नु इ दातेम फलाम के गारो खोंदेंशो पा वोतो। मिनू गे सहर गे कोव्रडो। मिनू मेको सहर कली पुम्शो सेल्शा कोंइदो। शुश पुम्शो कोंइदो। मेको इस्त्राएली आन खिं डा मुर आन कली चिन्ड का दुम्ब।
- 4 मिनू नोले गे पेरा गे हिरशा इपो। मिनू इस्त्राएली आन खिं डा मुर आन सजाइ ततीक इ तार वोतो। गे गिश नाक्ती सम्म मेक गे हिरशा बाक्नेवे, मिश नाक्ती सम्म मेको आन सजाइ ततीक कुरचा माल्लेवे।
- 5 मारदे हना गो इ कली गिश नाक्त मोपा बाक्चा माल्लेवे, मेको देंनुड। मेको सहे सां ९० नाक्त दुम्चा माल्लेब। नाक्त का के बर्स का बाक्ब। मोपा गे इस्त्राएली आन खिं डा मुर आन सजाइ कुरचा माल्लेवे।
- 6 मिनू मेको नाक्त नेल्ल नुम नोले, लेंशा ग्युरा गे हिरशा इपो। मिनू मेना यहूदा आ खिं डा मुर आन सजाइ कुरचा माल्लेवे। मिनू मेको आ पर्वम गो इ कली ४० नाक्त बाक्पाइक्नुड। नाक्त का के बर्स का बाक्ब।

- 7 मिनु गे पुम्शो यरूसलेम गे कोव्रशा, इ गुइ डा वा तिल्शा, मेको सहर आ परबम नोले दुम्तीक लोव्र पावो।
- 8 कोव्रडो, गो इ कली डोरीम फ्रेशा वोइक्वन। मोपा गे एको पुम्तीक नाक्ती नुप्चा क्येडा डोंइती एर ओंथ लोकसीने मचाप्नेवे।
- 9 मिनु मेको चेरब, क्योव्रज, सिबी, दाल, चिरस नु उवा चाक्शा ग्योब काम कुर पा इ कली शोब्ले चोंइसो। गे मेको सहे सां ९० नाक्त सम्म मलोकसीथु बाक्डेनु, मेको जचा माल्नेवे।
- 10 इ नाक्ती डा जचा थोव्रक नाक्शा २० शेकेल डा दुम्चा माल्ब। गे गेना हना यो गो देंडा ना जचा माल्नेवे। शेकेल का ११.५ ग्राम चांदी के क्येट बाक्ब।
- 11 गे तूचा कली ब्वाक्कु यो पुक्चा माल्नेवे। हिन का ६ भाग डा भाग का तूचा माल्नेवे। मेको गेना तूचा माल्नेवे, इ कली देंनुड। हिन का ४ लिटर खोदेंशो बाक्ब।
- 12 गे क्योव्रज के बटुक खोदेंशो सेल्शा जावो। गे मुर आन डोंइती मुर आन ख्री चोशा, मेको चोचा माल्नेवे” देंत।
- 13 मिनु परमप्रभु यावेमी “मोपा इस्राएल डा मुर आन शोब्ले जचा माल्नीम। गो मेको आन कली रागी रागी डा मुर आन बाक्तीक खेरनुडमी। मेको आन दातेम मोदेंशो ग्रांग्रा दिशो शोब्ले जचा माल्नीम” देंत। होसे ९:३
- 14 मिनु गो “परमप्रभु, परमप्रभु यावे, गो आल रेन मोदेंशो ग्रांग्रा दिशो मद्दुम्शो नड। गो गेनायो आंमा बेक्शो नु ब्वाकी डा जन्तुम साइशो श्ये मब्वड। ग्रांग्रा दिशो गेनायो मजड” देंती। प्रस्थान २२:३०; प्रेरित १०:१४
- 15 मिनु मेकोम आं कली “दुम्ब, गो इ कली मुर आन ख्री आ पा डा, इ शोब्ले चोचा कली गोबर गेनुड” देंत।
- 16 मिनु मेकोमी आं कली “ए मुर, गो यरूसलेम रे अन्न तेक्नुड। मेकोपुकीम हिंशा शोब्ले नाक्ना नाक्न जाइनीम। मिनु पुक्ना पुक्न सुर्ता पन पन ब्वाक्कु तूनीम। इजीकीएल ५:१६; लेवी २६:२६
- 17 मेकोपुकीम शोब्ले नु ब्वाक्कु मताइनीम। मुर काम अर्को कली तवानु ग्रीचोक पा हिंनीम। मिनु मेकोपुकी सजाइ ततीके सोव्रना सोव्रन लाइनीम” देंत।

## 5

यरूसलेमम सजाइ तशो

- 1 मिनु मेकोमी “ए मुर, हेरशो तरवार का शेवो। मिनु मेकोम चां प्रेक्ब आन छूरा खोदेंशो पा इ चां नु इ गल शोक्ने प्रेक्को। मिनु मेको नाक्चा कली नाक्तीक चाक्को। मिनु मेको चां आन कली भाग सां पा योक्को।
- 2 मिनु मेको चां के भाग का सहर पुम्चा नुप्ची ना सहरम चोवो। मिनु अर्को भाग तरवारम सहर आ एर ओंथ फ्रावो। मिनु नोले डा भाग फशेम बेरपतो। मारदे हना गो मेको आन कली तरवारम खेदा पाइनुडमी। इजीकीएल ५:२
- 3 तन्न गे मेको चां इक्का इ वाम तोल्शा वोइक्मी।
- 4 मिनु मेको रे यो इक्का गुंइशा मीम चोवो। मेको रे पा इस्राएल डा खिं नेल्लेम मी का ब्रशा यूब” देंत।
- 5 मिनु परमप्रभु यावेमी “यरूसलेम एको बाक्ब। गो मेको कली रागी रागी आन दातेम वोइक्ता। मेको आ एर ओंथ नेल्ल रागी बाक्नीम।
- 6 तन्न मेकोम आं निसाफ पतीक लोव्र नु आं फुल्लुम मुशा ब्रेक्शो लोव्र मटीव। आ एर ओंथ बाक्शो रागी रागी नु जात जात डा मुर आन क्येडा यो आं निसाफ पतीक लोव्र नु आं फुल्लुम मुशा ब्रेक्शो लोव्र मटीब बाक्ब” देंत।
- 7 मोपतीके परमप्रभु यावेमी “गे इ एर ओंथ रागी रागी डा मुर आन क्येडा मरिम्शो पाइब बाक्नेवे। गे आं फुल्लुम मुशा ब्रेक्शो लोव्र नु आं निसाफ पतीके लोव्र मेको आन क्येडा मटीब बाक्नेवे। तन्न इ एर ओंथ डा मुर आ निसाफ पतीक लोव्र पाइनेवे।
- 8 गो इ कली आंमा सजाइ गेनुड। गो रागी रागी डा मुर आन डोंइती इ कली निसाफ पाइनुड।
- 9 गो इ ग्रांग्रा दिशो मूर्ति आन कली पूजा पतीके गो इ कली डोंइती गेनायो मगेशो सजाइ गेनन। मिनु नोले मोदेंशो सजाइ मगेनन।
- 10 थमा पा, इ दातेमी आम आफोम आन आल आन कली ब्वाइनीम। मिनु आलम यो आन आंम आफ आन कली ब्वाइनीम। गो इ कली सजाइ गेनन। मिनु इ लीशो मुर आन कली फशेम एर ओंथ बेरपाइक्नुडमी। ब्यवस्था २८:५३-५५
- 11 मोपतीके परमप्रभु, परमप्रभु यावेमी ‘गो ब्रोंइशा बाक्शो खोदेंशो पा, मो पाइनुड। मारदे हना इ मूर्ति नु इ ग्रांग्रा दिशो गेयम आं बाक्तीक ग्रांग्रा दिशो सेल्लतीके, गो इ कली खतम सेल्लनुड। गो इ कली शिशी मपथु सुइ आन कली ब्रोंइचा मगेनुड। इजीकीएल ७:४; इजीकीएल ८:७-१८
- 12 इ दातेमी, भाग सांम भाग का मुर बेक्तीक रोइम नु अन्कालम बेक्नीम। मिनु अर्को भाग तरवारम बेक्नीम। मिनु नोले डा भाग फशेम ते ते फ्राइनुडमी। मिनु गो मेको आन कली तरवारम खेदा पाइनुडमी। इजीकीएल ५:२
- 13 मिनु गो गाइक्ना गाइक्न, मेको आन कली आं चुरशो कोंइशा, आं थुं नाइक्पाइक्नुड। मिनु गो, परमप्रभु यावेमी आं रुश पतीकेमी मेको आन कली लोव्र पाता, दे तुइक्नीम। इजीकीएल १६:४२
- 14 गो इ कली श्येत्थ सेल्लनुड। गे रागी रागी डा मुर आन दातेम नु इ नेक्था रे पा लाइब नेल्ल आन डोंइती इ कली शुक्शी पाइक्चा पुंइसीब सेल्लन। ब्यवस्था २८:३७; येरमीया २४:९
- 15 गो आं गाइक्तीक नु चुरतीकेम इ कली निसाफ पाइनुड। मिनु गे शुक्शी पाइक्चा पुंइसीतीके, मुने दोक्तीके नु हिंच कोइतीके नु शुश हिंचा डा दुम्नेवे। गो परमप्रभु यावेमी, एको लोव्र देंती।
- 16 मिनु गो इ कली साइक्ब अन्काल नु खतम दुम्तीके ब्रा खोदेंशो पा सोइक्नुड, साइक्ब नु खतम दुम्तीक चाक्नुड। मिनु मेको क्येडा अन्काल दुम्पाइक्नुड। गो इ अन्न नेल्ल तेक्शा, ब्यवस्था ३२:२३-२४; इजीकीएल ४:१६

17 गो इ दातेमी अन्काल नु ब्वाकी डा जन्तुपुकी सोडक्ताकड हना, मेकोपुकीम इ आल रोडक्नीम। इ दातेम मुर बेक्तीक रोड नु हुश खाक्श पोक्तीक दुम्शा बाक्ब। मिनु गो इ कली तरवारम साइक्नुड' गो परमप्रभु यावेमी, एको देंती" देंत।

## 6

इसाएली आन थान खतम सेल्शो

- 1 मिनु परमप्रभु यावेमी आं कली लोव्र पाप्तु।
- 2 मार लोव्र पाप्तु देशा हना "ए मुर, गे इसाएल डा पहाड गे कोवशा, मेको आन पर्वम नोले दुम्ब लोव्र पावो। इजीकीएल ३६:१; मीका ६:१
- 3 गे 'ए इसाएल डा पहाड परमप्रभु, परमप्रभु यावे आ लोव्र नेनीन। पहाड नु डांडा खोल्सा नु बेंसी आन कली परमप्रभु यावेमी, गो इन तार तरवार का चाक्नुड। मिनु गो इन डांडा डा थान आन कली खतम पोक्नुडमी।
- 4 इन थान श्येत्थ दुम्नीम। मिनु इन धूप चोतीक ब्रोल्नीम। मिनु गो इन साइशो मुर आन कली आन मूर्ति आन डोंइती ताइक्नुडमी। लेवी २६:३०
- 5 गो इसाएल डा मुर आन बेक्शो रॉ मेको आन मूर्ति आन डोंइती वोइक्नुड। मिनु इन रुश इन चढ़ेतीक आन डोंइती एर ओंथ फ्राइनुडमी। २राजा २३:२४
- 6 गेपुकी ते बाक्तीनी हना यो, इन सहर श्येत्थ दुम्नीम। इन डांडा डा थान नेल्ल खतम दुम्नीम। मोपा इन चढ़ेतीक श्येत्थ दुम्शा नु इन मूर्ति ब्रोल्शा खतम दुम्नीम। इन धूप चोतीक जिकनीम नु इन गेय जाम्शा लाइब।
- 7 इन दातेमी मुर साइक्चा पुंडसीशा गोल्नीम। मिनु गेपुकीमी गो परमप्रभु यावे नड, दे तुइक्नीनी।
- 8 तन्न गो गे इन दाते डा का निकशी आन कली ब्रोंइचा गेनुडमी। रागी रागी आन दाते डा का निकशी साइक्चा मपुंडसीनीम। मेकोपुकी रागी रागीम ब्रशा लाइनीम। यसेया ६:१३
- 9 मिनु मोदेशो रागी रागीम ब्रोंइशा लीशोपुकी ग्याइशशा लाइक्चा पुंडसीशो रागीम आं कली मिम्नीम। मिनु मेकोपुकीम आन दला दाक्स पशा, आं रे दिलशा लशा, आन मूर्ति आन नोले खोइक्नीम। मेको आन पशो मरिम्शो नु ग्रॉग्रा दिशो गेयम आंमा मुने दोक्नीम।
- 10 मिनु मेकोपुकीम गो परमप्रभु यावे नड, दे तुइक्नीम' देंचा माल्नेवे। गो मेको आन कली मोदेशो श्येत मोशा मगेडमी" देंत।
- 11 मिनु परमप्रभु, परमप्रभु यावेमी "इन गुइ पोक्कीन। मिनु इन खोइल थाइक्तीन। इसाएल आ खिं डा मुर आन ग्रॉग्रा दिशो गेय आ पर्वम 'आबी आबी' देनीन। मारदे हना मेकोपुकी तरवार, अन्काल नु मुर बेक्तीक रोइम बेक्नीम।
- 12 मेको डोन बाक्बपुकी मुर बेक्तीक रोइम बेक्नीम। मिनु मेको आन नेक्था बाक्बपुकी तरवारम साइक्चा पुंडसीनीम। मिनु लीशो प्रोंइचा पुंडसीशोपुकी अन्कालम बेक्नीम। मोपा गो आं गाइशो मेको आन तार मोइक्नुड।
- 13 मेको आन साइशो मुर आन मूर्ति आन दाते आन चढ़ेतीक आन एर ओंथ बाक्नीम। नेल्ल डांडा डा थानम, नेल्ले पहाडम, नेल्ल रवा आन पुंम, शुश गिग रवा आन पुंम, नु मूर्ति आन कली धूप चोतीके नेल्लेम मोदेशो बाक्ब। १राजा १४:२३
- 14 गो आं गुइ मेको आन पर्वम क्युकुनुड। मिनु आन रागी रे श्येत्थ नु मुर मबाक्तीक सेल्नुड। मेको गोरशो रागी रे रिब्ला सम्म मोदेशो पाइनुड। मेना मेकोपुकीमी गो परमप्रभु यावे नड, दें तुइक्नीम" देंत। २राजा २५:२१

## 7

इसाएल आ खतम दुम्तीक जाक्ब

- 1 मिनु परमप्रभु यावेमी आं कली लोव्र पाप्तु।
- 2 मार लोव्र पाप्तु देशा हना "ए मुर, परमप्रभु यावेमी इसाएल रागी कली मार देंब देशा हना 'रागी नुप्तीके, एर ओंथ डा सुर नेल्लेम जाक्ब।
- 3 मुल गे नुप्नेवे। गो इ कली तशा गाइक्ताकड। गो इ पशो खोदेशो पा इ कली निसाफ पाइक्नुड। गो इ कली इ मूर्ति पूजा पशो आन पर्वम सजाइ गेनुड।
- 4 गो इ कली शिशी मपथु, सुइ आन कली ब्रोंइचा मगेनुड। गो इ कली इ गेय आ पर्वम नु इ मूर्ति पूजा आ पर्वम सजाइ गेनुड। मिनु गे, गो परमप्रभु यावे नड, दें तुइक्नेवे" देंत। इजीकीएल ५:११; इजीकीएल ८:१८; इजीकीएल ९:१०
- 5 परमप्रभु, परमप्रभु यावेमी "हिंचा डा श्येत, आ तार हिंचा डा श्येत दुम्ब। कोव्रडो, मेको जाक्ब।
- 6 नुप्तीक नाक्ती जाक्ब। मेको इन पर्वम बोक्शा जाक्ब।
- 7 गे रागीम बाक्ब इन खतम दुम्तीके जाक्ब। नुप्तीक नाक्ती जाक्शा, इन नेक्था बाक्ब। डांडापुकीम कुम्सो पतीके ममाइ, ग्रॉंये माग्ये दुम्शो बाक्ब।
- 8 मुल गो रीब पा गाइक्नुड। मिनु आं चुरशो इ तार मोइक्नुड। गो इ पशो खोदेशो पा इ कली निसाफ पाइनुड। मिनु इ मूर्ति पूजा पशो नेल्ल आन पर्वम सजाइ गेनन।
- 9 गो इ कली शिशी मपथु, सुइ आन कली ब्रोंइचा मगेनुड। गो इ कली इ पशो खोदेशो पा सजाइ गेनुड। इ मूर्ति पूजा पशो इ दातेम बाक्ब। मिनु गो इ कली तुब्ब, परमप्रभु यावे नड, दें तुइक्नेवे।
- 10 मेको नाक्ती मुल बाक्ब। इ खतम दुम्तीके जाक्ना जाक्न बाक्ब। कोक्के आ कोच्वा दाप्त। ठेयब लेत्तीक फू खोदेशो पा बोइक्त। यसेया २:१२

- 11 हुश खाकश पोक्तीके परमप्रभु यावे आ अरेशो मटीब आन कोक्के दुम्त। मेको आन दाते डा मारेड मलीब। मेको आन बाकशो मारेड मारेड, आन शोंप नु आन ठेयब दुम्तीके मारेड मलीब।
- 12 मेको खतम दुम्तीके जाकचा चिक्शो बाकब। ग्याप्वपुकी मग्येरसमल। लेयबपुकी रोंका मपामेकल। मारदे हना मेको नेल्लेम परमप्रभु आ गाइशो ताइनीम।
- 13 मारदे हना मेको ब्रोंडम सम्म लेयचा मताइब। मारदे हना मेको तशो नेल्ल आन कली दुम्ब। मिनु आन मरिम्शो पतीके नेल्ल बेक्नीम।
- 14 मेकोपुकीम ग्राव ताप्शा, मारेड मारेड ठीक पाम्तेकम हना यो, का यो लडाइ पथ मलाइनीम। मारदे हना आं गाइशो मेको नेल्ल आन तार जुक्शो बाकब।
- 15 लाडगाम तरवारम साइकब। आगाम मुर बेक्तीक रोइ नु अन्कालम बेक्नीम। मिनु रूम बाकब आन कली तरवारम साइकब। सहरम बाकब अन्काल नु मुर बेक्तीक रोइम साइकचा पुंडसीनीम।
- 16 मिनु ब्रोंडशा प्रोक्शो नेल्ल बेसी डा ढुकुर खोदेशो पा पहाडम बाक्नीम। मेको आन मरिम्शो पशो आ पर्बम रोंका पा बाक्नीम।
- 17 मुर आन गुइ नेल्ल सक्ति मपाइशो दुम्नीम। आन पोक्च बोल मपाइशो दुम्नीम। यसैया १३:७
- 18 मेकोपुकीम अरन्डी फेक्चा माल्नीम। शुश हिंतीकेमी मेको आन कली सुम्ब। मेको नेल्ल आन कुल मुनेम सुम्सीचा माल्नीम। मेको नेल्ल आन पिंया प्रेक्सीचा माल्नीम। येरमीया ४८:३७
- 19 मेकोपुकीम आन चांदी लॉम ताइकचा माल्नीम। मिनु आन सुन ग्रांया दिशो थोत्रक खोदेशो दुम्चा माल्ब। मेको आन सुन चांदीम परमप्रभु यावे आ गाइशो नाक्ती मेको आन कली प्रॉइने मचाप्व। मेको आन सुन चांदीम आन शोत्रलु साइकने मचाप्व। मेकोमी आन कोत्रज प्रिने मचाप्नीम। मारदे हना मेको आन कली मरिम्शो पपाइकब मेकोन बाक्त। हितोपदेस ११:४; सेफन्याह १:१८
- 20 मारदे हना आन दारशो गहनामी ठेयब लेशशा, आन ग्रांया दिशो मूर्ति सेल्लेकम। मोपतीके गो मेको आन सुन चांदी मेको आन कली ग्रांया दिशो सेल्लुड।
- 21 गो मेको नेल्ल अर्को रागी डा मुर आन कली रोइक्पाइक्नुडमी। गो रागीम बाकब परमप्रभु यावे आ अरेशो मटीब आन कली रोइक्पाइक्नुड। मिनु मेकोपुकीम मेको ग्रांया दिशो सेल्लनीम।
- 22 गो आं कुल मेको आन रे खुइक्नुड। मिनु मेकोपुकीम आं दाक्शो बाक्तीके ग्रांया दिशो सेल्लनीम। हुश खाकश पोक्बपुकी मेकेर ओत्रशा, ग्रांया दिशो सेल्लनीम।
- 23 साडलो का सेलीन। मारदे हना रागी हुश खाकशेम ब्रीशो बाकब। मिनु सहर हुश खाकश पोक्बपुकीम ब्रीशो बाकब।
- 24 गो रागी रागी डा नेल्ल आन क्येडा मरिम्शो पाइब मुर आन कली मेको आन खिं रोइक्पाइक्नुड। गो बोल्यो मुर आन ठेयब लेल्लीक नुप्पाइक्नुड। मिनु मेको आन चोत्रखो बाक्तीके ग्रांया दिशो दुम्नीम।
- 25 शुश श्येत जाकमेनु, मेकोपुकीम थुं नाइशा बाक्चा माल्नीम। तन्न मथिल्लीम।
- 26 हिंचा डा श्येत क्येडा हिंचा डा श्येत जाकब। हिंचा डा लोत्र क्येडा हिंचा डा लोत्र नेंसीब। मेकोपुकीम परमप्रभु यावे आ लोत्र पाइबपुकी रे 'मुल मार दुम्बा' दे तुइक्चा माल्नीम। चढेबपुकीमी मुर आन कली मशेंनीम। खाल्पा आन अर्ती गेतीक जाम्शा लने थुम्शो बाकब।
- 27 पिपम रोंका पाइब। पिप आ तौ आन थुं लुकच लाइब। रागी डा मुर आन गुइ खिंखि पाइनीम। मेको आन पशो खोदेशो पन, गो मेकोपुकी नु पाइनुड। गो मेको आन पशो कोत्रशा, मेको आन कली निसाफ पाइनुड। गो मेको आन आंम कानुन आ पर्बम निसाफ पाइनुड। मिनु मेकोपुकीमी गो परमप्रभु यावे नड, दे तुइक्नीम" देंत।

## 8

परमप्रभु आ खिम मूर्ति पूजा पशो

- 1 मिनु ग्याइशा लाइकचा पुंडसीशो ६ बर्स डा ६ महिना डा ५ नाक्त गो आं खिम बाक्शो नड। मेना यहूदा डा खाल्पापुकी आं डोंइती बाक्शो बाक्तेकम। मिनु मेकेर बाक्शोनु, परमप्रभु, परमप्रभु यावेमी आं कली थिती। इजीकीएल १४:१
- 2 मिनु गो कोत्रडुनु, मुर खोदेशो का ताता। मिनु मेको आ क्रातो डा लुकुच ब्रशो मी खोदेशो नु आ क्रातो डा ग्येत्थ जिलजिल पा टल्केशो कांसा खोदेशो बाक्त। इजीकीएल १:२७; इजीकीएल १:४
- 3 मेकोम आ गुइ दिशा आं चांम ग्याइशा छुल पोक्ती। मिनु सोक्तीम आं कली सरीड नु रागी आस दातेम लाइक्ती। मिनु परमप्रभु यावे आ सोक्तीम आं कली यरूसलेमम लाइक्ती। मेकोमी आं कली परमप्रभु यावे आ खिं डा उत्तर गे डा आगा डा लाडगा आ ओत्रतीकेम चाक्ती। मेकेर रुश पपाइकब मूर्ति आन बाक्तीके बाक्त। मेकोमी रुश पपाइकबाक्त। इजीकीएल ३:१२
- 4 मिनु इस्राएली आन परमप्रभु यावे आ छेडछेड मेकेर बाक्त। गो मेको मोदेशो छेडछेड डोंइती बेसीम कोइतीकेम ताता।
- 5 मिनु परमप्रभु यावेमी आं कली "ए मुर, मुल गे उत्तर गे कोत्रडो" देंत। मिनु गो उत्तर गे कोत्रडुनु, चढेतीक आ उत्तर गे डा लाप्योम मेको रुश पपाइकब आ मूर्ति ताता।
- 6 मिनु मेकोमी आं कली "ए मुर, मेको आन पशो तवी? मार पन पन बाक्मा, गे मेको तवी? इस्राएली आन खिं डा मुरपुकीम आं कली आं बाक्तीक रे खेरचा कली मेको ग्रांया दिशो गेय पना पन बाक्नीम। तन्न गे मेको क्येडा यो शुश ग्रांया दिशो गेय ताइनेवे" देंत।
- 7 मिनु मेकोम आं कली लाडगा डा ओत्रतीकेम चाक्दीत्ती। मिनु गो मेकेर डा गारोम पोत्रला का ताता।

8 मिनु मेकोम आं कली “ए मुर, मेको गारो डा पोत्रला प्रेतो” दे माइक्ती। मिनु गो मेको गारो डा पोत्रला प्रेत्ता। मिनु मेकेर ओव्रतीक का बाक्त।

9 मिनु मेकोम आं कली “आगा ओव्रशा, मेकोपुकीम पशो थम मरिम्शो नु ग्रांया दिशो गेय कोव्रडो” दैत।

10 मोपतीके गो आगा ओव्रशा कोव्रता। मिनु एर ओथ नेल्ल गारोमी नेल्ल खाल डा गेशा गाक्ब जन्तु, ग्रांया दिशो जन्तु, इस्राएली आन खिं डा मूर्ति नेल्ल मेकेर ब्रेक्स पा सेल्शो ताता। रोमी १:२३

11 मिनु मेको आन डोंइती इस्राएल डा ७० जना खाल्पा राप्शो बाक्तेक्म। मिनु शाफान आ तौ याजन्त्याह मेको आन दातेम राप्शो बाक्त। मेको नेल्ल आन गुडम आन आन थनौरो बाक्तेक्म। मिनु धूप चोशो आ ब्रोव्रशो रिना इर गे बोक्शो बाक्त। प्रस्थान २४:१; गन्ती ११:१६; लूका १०:१७; यसैया ६६:१७

12 नोले मेकोमी आं कली “ए मुर, इस्राएल आ खिं डा खाल्पा छिडछिडम मार पाइनीमी, मेको आन आन मूर्ति कोटाम मार पना पन बाक्मा, तवी? मेकोपुकीम ‘परमप्रभु यावेमी आंइ कली मताइब। परमप्रभु यावेमी एको रागी प्रॉइने थुम्शो बाक्ब’ देशो बाक्नीम” दैत। इजीकीएल ९:९

13 मिनु लेशा मेकोम आं कली “गे मेको क्येडा यो शुश ग्रांया दिशो गेय पना पन बाक्शो ताइनेवे” दैत।

14 नोले मेकोमी आं कली परमप्रभु यावे आ खिं डा उत्तर गे डा ओव्रतीकेम चाक्दीत्ती। मिनु गो मेकेर तम्मज देवता आ परबम डाक्शो मीश मुरपुकी तातामी।

15 मिनु परमप्रभुमी आं कली “ए मुर, गे मेको तवी? गे मेको क्येडा यो शुश ग्रांया दिशो गेय ताइनेवे” दैत।

16 मिनु मेकोम आं कली परमप्रभु यावे आ खिं डा आगा डा लाडगा चाक्दीत्ती। मिनु मेकेर परमप्रभु यावे आ खिं नु चढ़ेतीक आस दातेम २५ जना खोइ वोंइश मुर बाक्तेक्म। मेकोपुकीम आन ची परमप्रभु यावे आ खिं गे हिरशो बाक्तेक्म। आन कुल चहिं पूबं गे कोव्रशा नां आ डोंइती बाप्शो बाक्तेक्म। ब्यवस्था ४:१९; ब्यवस्था १७:३; २राजा २३:५,११; येरमीया ८:२

17 मिनु मेकोम आं कली “ए मुर, गे मेको तवी? मार, यहूदा आ खिं डा मुर आन ग्रांया दिशो गेय एकेर पचा माल्नीमी? मार, मेकोपुकीम रागी कली हुश खाक्श पोक्तीकेम प्रिंशा, आं कली मेको क्येडा गाइक्पाइक्चा माल्नीमी? कोव्रडो, मेको आन नैम राशी वोइक्नीम। आन नैम राशी वोइक्तीके थम मरिम्शो पतीके बाक्ब।

18 मोपतीके गो मेको आन कली आं गाइक्तीकेम गेय पाइनुड। गो मेको आन कली शिशी मपथु, सुइ आन कली ब्रोंइचा मंगेनुड। मेकोपुकीम ठेयब सेंदा पा पुंइशा ग्रीतेक्म हना यो, मेको आन लोव्र मनेनुड” दैत। इजीकीएल ७:४; यसैया १:१५

## 9

यरूसलेम खतम दुम्शो

1 मिनु परमप्रभुमी ठेयब सेंदा पा “सहर डा सजाइ गेब मुर आन नेक्था जाक्कीन। इन साइक्तीक या कुरशा जाक्कीन” दे ग्रीत।

2 मिनु गो ६ जना वोंइश मुर आइक्था डा उत्तर गे डा लाप्चो रे जाक्शो ताता। मेको नेल्लेमी साइक्चा कली या कुरशो बाक्तेक्म। मेको आन दातेमी बुश सुती वा फेक्शो ब्रेक्तीक कुरशो मुर का बाक्त। मेकोपुकी आगा ओव्रशा कांसा के चढ़ेतीक आ नेक्था राप्तेक्म। इजीकीएल १०:२; दानीएल १०:५

3 मेना इस्राएली आन परमप्रभु आ छेडछेड करूब आन दाते रे इर गे याक्सीशा परमप्रभु यावे आ खिं आ लाप्चोम जाक्दीन्ने थुम्शो बाक्त। मिनु मेकोमी मेको सुती के वा फेक्शो ब्रेक्तीक कुरशो मुर कली

4 “यरूसलेम सहर आ एर ओथ नेल्ल हिरशा मेकेर पशो मूर्ति पूजा नेल्ल आन परबम सुर्ता नु रोंका पाइब मुर नेल्ल आन कुप्फीम चिन्ड का वोतो” दे माइक्तु। प्रकाश ७:३

5 मिनु मेकोमी आं नेंचा डा पा अरु आन कली “गेपुकी मेको आ नोले लशा, सहर एर ओथ गाक्शा मुर आन कली सतीन। मेको आन कली शिशी मपथु, सुइ आन कली ब्रोंइचा मंगेने।

6 खूशो, टिटा टिटी, मीश मुर नु आल ब्रेप्च नेल्ल आन कली सतीन। तन्न आन कुप्फीम मेको चिन्ड पाइशो आन कली मथिने। आं बाक्तीके रे मेको मो पचा गेने” दे माइक्तीमी। मिनु मेकोपुकीम मेको परमप्रभु यावे आ खिं आ डोंइती बाक्शो खाल्पा आन रेन मो पचा गोम्तेक्म। येरमीया २५:२९

7 मिनु मेकोमी मेको आन कली “आं खिं ग्रांया दिशो सेलीन। साइशो मुर आन कली लाडगाम प्रिदीने, लने” दे माइक्तीमी। मोपतीके मेकोपुकी सहरम लशा, मुर आन कली साइक्तेक्म।

8 मेकोपुकीम साइक्ना साइक्न लाम्तेक्म। गो चहिं आं का ला बाक्ती। मिनु गो खुम्की पा बाप्शा ठेयब सेंदा पा “परमप्रभु, परमप्रभु यावे, इन गाइशो यरूसलेम कली मोइक्नीनु, इस्राएल डा लीशो नेल्ल आन कली यो साइक्नीनी?” दैती। इजीकीएल ११:१३

9 मिनु मेकोमी आं कली “इस्राएल नु यहूदा डा मुर आन खिं डा मुर आन दोस थम ठेयब बाक्ब। रागी नेल्ल हुश खाक्शेम ब्रीशो बाक्ब। मिनु सहर दूली पतीकेम ब्रीशो बाक्ब। मारदे हना मेकोपुकीम ‘परमप्रभु यावेमी एको रागी प्रॉइशो बाक्ब। मिनु परमप्रभु यावेमी मारेइ मताइब’ दैनीम। इजीकीएल ८:१२

10 मोपतीके गो मेको आन कली शिशी मपथु सुइ आन कली ब्रोंइचा मंगेनुड। मेको आन पशो खोदेशो पा सजाइ गेनुडमी” दैत। इजीकीएल ७:४

11 मिनु मेको सुती वा फेक्शो ब्रेक्तीक कुरशो मुरुम “गो इन अरेशो खोदेशो पाता” दैत।

## 10

परमप्रभु आ छेडछेड

इजीकीएल १:४-२८

1 मिनु कोव्रडुनु, मेको करूब आन पिया आन तारी डा बाक्तीके आ इर नीर माइशो हीरा खोदेशो बाक्त। मेको ठेयब नित्तीक का खोदेशो बाक्त।

2 मिनु परमप्रभु यावेमी मेको सुती के वा फेक्शो मुर कली “करूब आन दी गे बाक्शो गुगील आन दातेम लावो। मिनु मेको करूब आन दातेम बाक्शो मी आ कोइला हुइशशा, सहर आन तार फ्रावो” दे माइक्तु। मिनु आं कोव्रना कोव्रन, मेको आगा ओव्रत। इजीकीएल ९:३; प्रकाश ८:५

3 मिनु मेको मुर आगा ओव्रमेनु, करूब परमप्रभु यावे आ खिं आ दक्खिन गे बाक्तेक्म। मिनु गोस्स काम परमप्रभु यावे आ खिं डा आगा डा लाङगा ब्रीत।

4 मिनु परमप्रभु यावे आ छेडछेड करूब आन रे परमप्रभु यावे आ खिं आ लाप्चो गे लत। मिनु गोस्सुम खिं ब्रीत। मिनु आ लाङगा परमप्रभु यावे आ छेडछेड डा हाम्सोम ब्रीत। इजीकीएल १:२८; प्रस्थान ४०:३४; यसेया ६:४

5 मेको करूब आन फ्रां आन रेयके लाङगा सम्म नैसी बाक्त। मेको परमप्रभु यावे ब्वाक्शो खोदेशो पा नैसी बाक्त।

6 मिनु परमप्रभु यावेमी मेको सुती के वा फेक्शो मुर कली “मेको गुगील आन दातेम लशा करूब आन दाते डा मी पितो” दे अरेवानु, मेको गुगील आ नेक्था राप्त।

7 मिनु करूब काम आ गुड करूब आन बाक्तीक डा मी गे दिताक्व। मिनु मेकोमी मी आ कोइला हुइशशा, मेको सुती के वा फेक्सीशो मुर आ गुडम कुर पाप्तु। मिनु मेको मी कुरशा लाङगा गूत।

परमप्रभु आ छेडछेड लशो

8 मेको करूब आन फ्रां आगाम मुर आन गुड खोदेशो तांडसाक्व।

9 मिनु कोव्रडुनु, मेकेर ४ ओटा गुगील करूब आन नेक्था बाक्तेक्म। करूब का आ नेक्था गुगील का बाक्त। मेको गुगीलपुकी टल्केशो पित मनी माइशो हीरा खोदेशो बाक्तेक्म।

10 मिनु मेको गुगील नेल्ल खाल का डा बाक्तेक्म। गुगील का आगाम अर्को गुगील बाक्शो खोदेशो तांडसाक्व।

11 मेकोपुकी गाक्मानु, तेइ महिरथु ग्येत्थ गे उत्तर, दक्खिन, पूर्व नु पच्छिम गे गाक्बाक्तेक्म। मेको डोंइती डा गुगील ते ते लमे, अर्को यो मेक मेक गे लाइबाक्तेक्म।

12 मेको आन रां नेल्ल, मेको आन ची, मेको आन गुड, फ्रां नु मेको ४ ओटा करूब आन गुगील नेल्ल मिक्वी मिक्च पाइशो बाक्तेक्म।

13 गो मेको आन कली “गेय पाइब गुगील” देशो नेता।

14 मेको करूब नेल्ल आन के ४ ओटा कुल बाक्तेक्म। डोंइती डा कुल करूब के, मेको आ नोले डा कुल मुर के, मेको आ नोले डा कुल गुप्स के नु नेल्ल क्येडा नोले डा कुल ककाकुली के खोदेशो बाक्तेक्म। इजीकीएल १:१०

15 मिनु मेको करूबपुकी इर गे लाम्तेक्म। मेको डोंइती डा सोक्त पाइशोपुकी बाक्तेक्म। डोंइती गो मेको आन कली केबार खोला आ नेक्था तशो नडमी। इजीकीएल १:१

16 मिनु मेको करूब गाक्मानु, मेको गुगील आन नेक्था गाक्बाक्तेक्म। करूब इर लचा कली आन फ्रां ग्येत्थ क्युकामेनु, मेको आन नेक्था बाक्शो गुगील महिरथु, गाक्बाक्तेक्म। इजीकीएल १:१९

17 मिनु मेको करूब दिक्मानु, मेको गुगील यो दिक्बाक्तेक्म। मेको करूब इर गे बोक्मानु मेको गुगील यो मेको नु बोक्बाक्तेक्म। मारदे हना मेको सोक्त पाइशो आन सोक्त मेको गुगीलमीन बाक्त।

18 मिनु परमप्रभु यावे आ छेडछेड आ खिं डा लाप्चो रे गूशा, करूब आन तार गे दिक्त। इजीकीएल १:२८

19 मिनु मेको करूबम आन आन फ्रां क्युकतेक्म। मिनु आं डोंइती खप रे इर गे लाम्तेक्म। मिनु मेको लमानु, मेको गुगील यो मेको नु इर गे लाम्तेक्म। मिनु मेकोपुकी परमप्रभु यावे आ खिं आ पूर्व गे डा लाप्चो आ नेक्था दिक्तेक्म। मिनु इस्राएल डा परमप्रभु आ छेडछेड मेको आन तार गे बाक्त।

20 मेको केबार खोला आ नेक्था इस्राएली आन परमप्रभु आ आगाम बाक्शो आं तशो सोक्त पाइशो बाक्तेक्म। मिनु गो मेको करूब बाक्मा बाक्त, दे तुडक्ताक्ड।

21 मेको नेल्ल आन के ४ ओटा कुल नु ४ ओटा फ्रां बाक्तेक्म। मिनु मेको आन फ्रां आगाम मुर आन गुड खोदेशो बाक्तेक्म।

22 मेको आन कुल केबार खोला आ नेक्था आं तशो सोक्त पाइशो आन कुल खोदेशो बाक्तेक्म। मेकोपुकी तेइ लमानु, डोंइती गे पा गाक्बाक्तेक्म।

## 11

ठेयब मुर आन कली सजाइ

1 मिनु सोक्तीम आं कली क्युकशा, परमप्रभु यावे आ खिं डा पूर्व गे डा लाप्चोम चाक्ती। मेको पूर्व गे कोव्रशो बाक्त। मिनु मेको आगा ओव्रतीकेमी २५ जना मुर बाक्तेक्म। गो मेको आन दातेम इस्राएल डा ठेयब मुर अज्जुर आ तौ याजन्याह नु बेनायाह आ तौ पेलात्याह आस कली यो तातासी। इजीकीएल ३:१२

2 मिनु परमप्रभु यावेमी आं कली “ए मुर, मेकोपुकीम एको सहरम मरिम्शो पचा कली नु परमप्रभु यावे आ अरेशो लोव्र मटिचा कली अर्ती गेशा शेंशो बाक्तेक्म।

3 मेकोपुकीम 'खिं सेलतीक नाक्ती रीब पा मजाकबा को? एको सहर कराइ खोदेशो बाकब। मिनु गो चहिं श्ये बाकनय' देनीम। इजीकीएल २४:३-१४

4 मोपतीके ए मुर, मेको आन परबम नोले दुम्ब लोत्र पावो। आं देशो लोत्र पावो" देत।

5 मिनु परमप्रभु यावे आ सोक्त आं तार जाक्त। मिनु मेकोम आं कली "परमप्रभु यावेमी 'ए इसाएल आ खिं डा मुर, गे मार मिम्शो बाक्नीनी, गो मेको नेल्ल तुइक्नुड।

6 गेपुकीम एको सहरम शुश मुर आन कली साइशशा, आ लां नेल्ल बेक्शो मुरुम प्रिपाइक्तीनी" देत।

7 मोपतीके परमप्रभु, परमप्रभु यावेमी 'गे सहरम साइशशा इन ताइशशो मुर श्ये बाक्नीम। मिनु एको सहर कराइ बाकब। तन्न गो इन कली सहर रे गुंइनुड।

8 गेपुकी तरवार तशा हिंतीनी। तन्न गो इन परबम तरवार चाक्शा साइक्पाइक्नन्नी।

9 गो इन कली सहर रे गुंइनन्नी। मिनु अर्को रागी डा मुर आन गुइम गेनन्नी। मिनु इन कली निसाफ पाइक्नुड।

10 गेपुकी तरवारम साइक्चा पुंइसीशा गोलीनी। गो इन कली इसाएल आ सांदम निसाफ पाइनुड। मिनु गेपुकीम गोन परमप्रभु यावे नड, दे तुइक्नीनी। २राजा २५:२०-२१

11 एको सहर इन कली कराइ मदुम्ब। मिनु गे मेको कराइ डा श्ये मदुम्नीनी। गो इन कली इसाएल आ सांदम निसाफ पाइनुड।

12 मेना गेपुकीम गो परमप्रभु यावे नड, दे तुइक्नीनी। गेपुकीम आं फुल्लु मुशा ब्रेक्शो लोत्र मटिनी। आं निसाफ पतीक लोत्र यो मटिनी। तन्न गे इन एर ओंथ बाकब रागी रागी डा मुर आन पतीक लोत्र पाइतीनी" दे परमप्रभु यावेमी देत।

13 गो परमप्रभु यावे आ लोत्र पना पन बाक्डानु, बेनायाह आ तौ पेलात्याह बेक्त। मिनु गो खुम्की पा बाप्शा ठेयब सेंदा पा "परमप्रभु, परमप्रभु यावे, मार, गे इसाएल डा लीशो नेल्ल आन कली साइक्नीनी?" देती। इजीकीएल ९:८

ग्याइक्चा पुंइसीशो आन कली लोत्र

14 मिनु परमप्रभु यावेमी आं कली लोत्र पाप्तु।

15 मार लोत्र पाप्तु देशा हना "ए मुर, इ लोकबपुकी, इ खिं डा मुर, ग्याइशशा लाइक्चा पुंइसीशो इ लोकबपुकी, इसाएल आ खिं डा मुर नेल्ल आन परबम यरूसलेमम बाकब मुरपुकीमी 'मेकोपुकी परमप्रभु यावे रे डोन लाम्तेक्म। मोपा एको रागी इ कली अधिकार पचा कली गेशो बाक्त' देशो बाक्तेक्म" देत।

16 मोपतीके परमप्रभु, परमप्रभु यावेमी "गो मेको आन कली डोन रागी रागी डा मुर आन दातेम सोइक्ताक्डमी। गो मेको आन कली राज्य राज्य आन दातेमी फ्रात हना यो, इच्का नाक्ती सम्म मेको आन परमप्रभु दुम्ती। इजीकीएल ६:८-१०

17 मोपतीके गे मेको आन कली 'गो इन कली जात जात डा मुर आन दाते रे खुपनन्नी। मिनु ब्रशा लशो रागी नेल्ले रे पा खुपनन्नी। मिनु गो इन कली इसाएल रागी गेनन्नी। येरमीया २४:५-६; येरमीया २९:२४

18 मिनु मेकोपुकी लेशशा जाक्शा, मेकेर डा ग्रोग्रा दिशो थोत्रक नु मूर्ति नेल्ल गुंइशा ताइक्नीम।

19 मिनु गो मेको आन कली थुं का डा दुम्पाइक्नुडमी। मिनु मेको आन आगामी नक सोक्त का कुरपाइनुड। मिनु गो मेको आन फुल्लु खोदेशो थुं गुंइशा, श्ये के थुं कुरपाइनुडमी। इजीकीएल ३६:२६; येरमीया २४:७

20 मिनु मेकोपुकीमी आं फुल्लुम मुशा ब्रेक्शो लोत्र पशा, आं निसाफ पतीक लोत्र टीनीम। मिनु मेकोपुकी आं मुर दुम्नीम। मिनु गो मेको आन परमप्रभु दुम्नुड। इजीकीएल १४:११; येरमीया ७:२३

21 तन्न मेको आन ग्रोग्रा दिशो मारेइ मारेइ मूर्ति आन नोले खोइक्ब आन कली आन पशो नेल्ल आन पियामीन मोइक्नुडमी, दे परमप्रभु, परमप्रभु यावेमी देत' दे मतो" देत।

परमप्रभु आ छेडछेड इर गे लशो

22 मिनु नोले आ नेक्था गुगील बाक्शो करूबमी आन फ्रां प्राक्तेक्म। मेना इसाएली आन परमप्रभु आ छेडछेड मेको आन तार बाक्त। इजीकीएल १:२८

23 मिनु परमप्रभु यावे आ छेडछेड सहर आ दाते रे क्युकसीशा इर गे लत। मिनु सहर डा पूर्व गे बाक्शो पहाड तार दिक्त।

24 मिनु परमप्रभु यावे आ सोक्तीम आं कली इर क्युकती। मिनु कौइतीके कौइशोमी आं कली कल्दी रागीम ग्याइशशा लाइक्चा पुंइसीशो आन बाक्तीकेम चाक्दीत्ती। मिनु नोले मेको कौइतीके आं रे इर गे लाक्तु। इजीकीएल ३:१२

25 मिनु गो ग्याइशशा लाइक्चा पुंइसीशो आन कली परमप्रभु यावे आ लोत्र नेल्ल शेंताक्डमी।

## 12

ग्याइशशा लाइक्चा पुंइसीशो लेशशो

1 परमप्रभु यावेमी आं कली लोत्र पाप्तु।

2 मार लोत्र पाप्तु देशा हना "ए मुर, गे काइ मटीब खिं डा मुर आन दातेम बाक्शो बाक्नेवे। मेको आन के मिक्च बाक्त हना यो, मताइनीम। मेको आन के नोफा बाक्त हना यो, मनैनीम। येरमीया ५:२१

3 मारदे हना मेकोपुकी मटीब मुर आन खिं डा बाक्नीम। मोपतीके गे रागी रे ग्याइशशा लाइक्चा पुंइसीशो मुर खोदेशो पा इ कुम्लो खिक्सो। मिनु नाक्तीन मेको आन डौइती इ बाक्तीक रे ग्याइशशा लाइक्चा पुंइसीशो खोदेशो पा अर्को ठांउ लावो। मेकोपुकी मटीब खिं डा मुर बाक्तेक्म हना यो, रुपनीमी को?

4 गे ग्याइशशा लाइक्चा पुंइसीशो दुम्चा कली, मेको आन डौइती नाक्तीन इ मार मार फ्रेदो। मिनु मेको आन डौइती रे ग्याइशशा लाइक्चा पुंइसीशो मुर खोदेशो पा नाक्दो लावो।



- 5 मेकोपुकीम तथा डा पा गारोम पोव्रला खितो। मिनु इ कुम्लो मेकेर रे पा खीडो।
- 6 मेकोपुकीम कोव्रन कोव्रना गे इ कुम्लो इ बलाम कुरो। मिनु नां रिक्मेनु कुरशा गाक्को। रागी मतचा डा पा इ कुल सुम्सो। मारदे हना गो इ कली इस्राएल आ खिं डा मुर आन पर्वम चिन्ड का सेल्शो बाक्नुड” देत। इजीकीएल २४:२४,२७
- 7 गो मेको आ अरेशो खोदेशो पाता। मिनु ग्याइश्शा लाइक्चा पुंडसीशो दुम्चा कली नाक्तीन आं कुम्लो फ्रेशा गुंडताक्ड। मिनु नाक्दो गारोम पोव्रला खित्ता। मिनु मेको आन तन तना आं कुम्लो बलाम कुरशा नाक्दो गाक्ती।
- 8 मिनु आ सुनी परमप्रभु यावेमी आं कली लोव्र पाप्तु।
- 9 मार लोव्र पाप्तु देशा हना “ए मुर, मार, मेको इस्राएल डा मटीब खिं डा मुरपुकीम ‘गे मार पवी’ दे इ कली हिल्लो मपामे?” देत।
- 10 मेको आन कली “परमप्रभु, परमप्रभु यावेमी मार देत देशा हना ‘एको लोव्र यरूसलेम डा सासन पाइब नु इस्राएल डा मुर नेल्ल आन पर्वम बाक्ब’ दे माइक्मी।
- 11 मेको आन कली ‘गो गे इन कली चिन्ड का दुम्ती। गो मार पडा, मेको आन कली पाइनीमी। मेकोपुकी रागी रे ग्याइश्शा लाइक्चा पुंडसीनीम’ देत।
- 12 मेको आन दातेम बाक्शो सासन पाइबमी नाक्दो आ बलाम मार मार कुरशा गाक्ब। मिनु लाडगा यूचा कली गारोम पोव्रला खिप्ब। मिनु मेकोम आ रागी मकोव्रचा कली आ कुल सुम्ब। २राजा २५:४
- 13 गो मेको आ तार आं ग्याइल आप्नुड। मिनु मेको आं ग्याइलीम बिक्ब। मिनु गो मेको कली कल्दी आन रागी बेबीलोम चक्नुड। तन्न मेकोम, मेको रागी मताइब। मिनु मेकेरन बेक्ब। इजीकीएल १७:२०; येरमीया ३९:७
- 14 मेको आ एर ओंथ बाक्ब आ गेय पाइबपुकी नु आ लडाइ पाइब नेल्ल आन कली फशेम एर ओंथ ब्रपाइक्नुडमी। मिनु तरवार शोइश्शा खेदा पाइनुडमी।
- 15 मिनु गो मेको आन कली रागी रागी डा मुर आन दातेम फ्राइनुडमी। राज्य राज्य एर ओंथ ब्रपाइक्नुडमी। मिनु मेकोपुकीम गोन परमप्रभु यावे नड, दे तुइक्नीम।
- 16 तन्न गो मेको आन दाते डा का निक्शी आन कली तरवार, अन्काल नु मुर बेक्तीक रोइ रे प्रोइनुडमी। मिनु मेकोपुकी ते ते बाक्नीमी, मेक मेक डा रागी रागी डा मुर आन दातेम आन ग्रांगा दिशो गेय पशो आ पर्वम बिन्चीम ला मो पका बाक्त देंमल। मिनु मेकोपुकीम गोन परमप्रभु यावे नड, दे तुइक्नीम” दे परमप्रभुम देत। इजीकीएल ६:८

इजीकीएल चिन्ड दुम्शो

- 17 मिनु लेशा परमप्रभु यावेम आं कली लोव्र पाप्तु।
- 18 मार लोव्र पाप्तु देशा हना “ए मुर, गे इ जचा थोव्रक जवीनु खिंखि पा जावो। मिनु ब्वाक्कु तूडीनु, हिंशा गिक गिक पा खिंखि पा तूडो।
- 19 मिनु रागी डा मुर नु यरूसलेम नु इस्राएल रागीम बाक्ब मुर आन कली परमप्रभु, परमप्रभु यावेमी ‘मेको आन जचा थोव्रक हिंशा जाइनीम। मिनु सुर्ता पा ब्वाक्कु तूनीम। मारदे हना मेकेर बाक्ब आन मरिम्शो पतीके, मेको रागी नु मेकेर बाक्शो मारेड मारेड गोरशो सेल्नुड।
- 20 मुर बाक्शो सहर नेल्ल श्येत्थ दुम्नीम। मिनु रागी नुप्ब। मिनु गेपुकीम गो परमप्रभु यावे नड, दे तुइक्नीमी’ देशो बाक्ब” देत।
- 21 मिनु लेशा परमप्रभु यावेमी आं कली लोव्र पाप्तु।
- 22 “ए मुर, इस्राएल रागी आ पर्वम मार लोव्र बाक्बा? नाक्ती लाक्ना लाक्न बाक्नीम। मिनु परमप्रभु यावे आ कोंइतीके मखाप्नीम। २पत्रुस ३:४
- 23 मोपतीके मेको आन कली ‘परमप्रभु, परमप्रभु यावेमी, गो मेको मो देंतीक लोव्र आ अर्थ साम्नुड। मिनु मेकोपुकीम इस्राएलम मेको देंतीक लोव्र गेनायो मदेनीम’ दे माइक्मी। मेको आन कली ‘नाक्त नेक्थान जाक्शो बाक्नीम। कोंइतीक नेल्ल गाप्ब। हबक्कु २:३
- 24 मारदे हना मुल लेशा गेनायो इस्राएली आन दातेम जोल पा कोंइतीके नु लेम्शा लिक्वु कोव्रब मदुम्नीम।
- 25 मारदे हना गो, परमप्रभु यावे आं देशो लोव्र पशा, खाप्नुड। मेको देश मपाइब रीब पा दुम्ब। ए मटीब खिं डा मुर, इन पालामीन गो आं देशो लोव्र खाप्नुड’ दे परमप्रभु, परमप्रभु यावेमी देशो बाक्ब” देत।
- 26 मिनु लेशा परमप्रभु यावेमी आं कली लोव्र पाप्तु।
- 27 मेकोमी “ए मुर, इस्राएल आ खिं डा मुरपुकी, मेको आ कोंइतीकेमी कोंइशो लोव्र शुश बर्स नोले ला दुम्ब। मेको नोले दुम्ब लोव्र बाक्ब।
- 28 मोपतीके मेको आन कली ‘परमप्रभु, परमप्रभु यावेमी आ देशो लोव्र खाप्ब। लोव्र का यो मजाम्ब। मार देबा, मेको पाइब’ दे माइक्मी, दे परमप्रभु, परमप्रभु यावेमी” देत।

## 13

जोल पा परमप्रभु आ लोव्र पाइब

- 1 परमप्रभु यावेमी आं कली लोव्र पाप्तु।
- 2 मार, लोव्र पाप्तु देशा हना “ए मुर, इस्राएल डा आं लोव्र पाइब आन कली नु आंम आन मिम्शो लोव्र पाइब आन कली ‘परमप्रभु यावे आ लोव्र नेनीन’ देनो।

3 मेको निप्स मपाइश्शो आं लोत्र पाइब आन कली 'आबी, मेको आंमा आन थुं डा लोत्र, आं कोइतीके मतथु, लोत्र पाइनीम। येरमीया १४:१४

4 ए इस्राएल, जोल पा आं लोत्र पाइब ब्रेश्शो खिम बाकब सिवार खोदेशो बाक्नीम।

5 गे ब्रेश्शो गारो लेंशा मसेली। गे इस्राएल कली चारच मपनी। मोपतीके परमप्रभु यावे, आं नाक्त मेको बुइनीम' देंत। यसेया २:१२

6 मेको आन तशो लोत्र जोल बाकशा, आन लिंक्यु कोत्रतीक जोल बाकब। मेकोपुकीम 'परमप्रभु यावेमी देशो बाकब' देंनीम। तन्न मेको परमप्रभु यावेमी सोइश्शो मनम। मो हना यो मेकोम आन लोत्र गाप्ल, दे आस पाइनीम। इजीकीएल २२:२८; येरमीया ५:३१

7 गेपुकीम जोल पा कोइतीके तशा, लिंक्यु कोत्रशा, जोल लोत्र ला पाइब दुम्तीनी। तन्न गो इन कली काइ लोत्र मपथु, गेपुकीमी 'परमप्रभु यावे आ लोत्र बाकब देंतीनी' दे माइक्मी" देंत।

8 मोपतीके परमप्रभु, परमप्रभु यावेमी "गेपुकीम फश लोत्र पा, जोल पा कोइतीक आ पबर्म लोत्र पतीके, गो इन कली मरिम्शो पाइनुड।

9 'मेको दूली पा कोइतीक लोत्र पाइब आन पबर्म नु जोल पा लिंक्यु कोत्रब आन पबर्म, गो आं गुड इन गे क्युक्नुड। मेकोपुकी आं मुर आन दातेमी बाक्चा मताइनीम। मेको आन नें इस्राएली आन खिं डा मुर आन नें ब्रेक्तीकेम ब्रेक्चा मताइनीम। मेकोपुकी इस्राएल रागीम ओत्रचा मताइनीम। मिनु गेपुकीम गोन परमप्रभु यावे नड, दे तुइक्नीनी, देशो बाकब' दे माइक्मी" देंत। इजीकीएल १४:९

10 थमा पा, मेकोपुकीम ब्रेत्चा चिक्शो गारो प्रोवनीमी, मेको जोल पा लोत्र पाइबम बुलु बुइश्शो सुम्नीम। येरमीया ६:१४

11 गे मेको बुलु बुइक्ब आन कली "थाम्पा टेयब रेउ यीब। मिनु टेयब मुप्स यीनीम। मिनु फश गिवार जाकब।

12 मिनु मेको गारो ब्रेप्ब। मार, मुरपुकीम इन कली 'गे इन बुइश्शो बुलु ते लाक्गा, दे हिल्लो मपाइनीमी? देशो बाकब' दे माइक्मी" देंत।

13 मोपतीके परमप्रभु, परमप्रभु यावेमी "गो आं गाइश्शोम थम हिंचा डा फश गिवार पपाइक्नुड। मिनु आं चुरशोम खतम पोक्चा कली रेउ नु मुप्स जाकब।

14 मिनु मेकोमी इन बुलु बुइश्शो गारो नेल्ल ब्रेप्पाइक्ब। आ जग यो तांइसीब। मेको प्रेदुनु, गे गारो आगाम बेक्नीनी। मिनु गेपुकीम 'गोन परमप्रभु यावे नड' दे तुइक्नीनी।

15 मोपा गो आं गाइश्शो मेको गारो नु मेको बुलु बुइक्ब आन तारी मोइक्नुड। मिनु गो इन कली 'मुल मेको गारो मबा, मेको आन कली बुलु बुइक्ब यो मबाक्म' देंनुड।

16 इस्राएल डा मेको जोल पा परमप्रभु यावे आ लोत्र पाइबपुकीम यरूसलेम आ पबर्म लोत्र पाम्तेक्म। मिनु मेकेर थुं नाइश्शा बाक्तीक मदुथु यो 'थुं नाइश्शा बाक्तीक ताइतक' देतेक्म।

17 मेकोमी 'मुल ए मुर, इ मुर आन तमी आन कली हुइक्तो। मेकोपुकीम आन थुंम मिम्शा लोत्र पाइनीम। गे परमप्रभु यावे आ लोत्र मेको आन कली पावो' देंत।

18 'आबी आबी, गुड कली फ्रेंतीक सेल्ब मीश मुर आन कली श्येत बाकब। मुर आन कली साइक्चा कली लाइश्शो कोत्रशा, कुल सुम्तीक वा सेल्ब मीश मुर आन पबर्म आबी आबी। मार, गेपुकीम आं मुर आन कली साइक्नीनी? मिनु गे ब्रोंइचा ताइनीनी डा? मताइनीनी।

19 मुठी का निकशी क्योत्रज, नु टुक्रा का निकशी शोब्ले आ पबर्म साइक्चा ममाल्शो मुर आन कली साइक्तीनी। मिनु ब्रोंइचा मगेचा माल्शो मुर आन कली ब्रोंइचा गेतीनी। मिनु आं मुर आन कली जोल पा मोदेशो पाइतीनी' दे परमप्रभु, परमप्रभु यावेमी मेको आन कली माइक्मी" देंत।

20 मोपतीके परमप्रभु, परमप्रभु यावेमी "गो इन फ्रेंतीक आ पबर्म इन कली मरिम्शो पाइनुड। गो इन गुड रे चिक्ब खोदेशो पा साइक्चा चिक्शो मुर आन कली इन गुड रे प्रोंइनुड।

21 गो मेको आन कुल सुम्तीक वा शोल्शा, आं मुर आन कली प्रोंइनुडमी। मेकोपुकी मुल रे इन गुड डा सिखार मदुम्नीम। मिनु गेपुकीम गोन परमप्रभु यावे नड, दे तुइक्नीनी।

22 मारदे हना गे जोल पा दोस गेशा ठीक पाइब मुर आन कली आन थुं लुकच लपाइक्तीनी। गो मोदेशो मपड। मिनु आं अरेशो लोत्र मटीब आन कली टीब मदुमीन, देशा ब्रोंइचा मगेनी। येरमीया २३:१४

23 मोपतीके गेपुकीम मुल रे जोल पा कोइतीक मताइनीनी। गे लिंक्यु मकोवनीनी। गो आं मुर आन कली इन गुड रे प्रोंइनुडमी। मिनु गेपुकीम गोन परमप्रभु यावे नड, दे तुइक्नीनी" दे परमप्रभुम देंत।

## 14

मूर्ति पूजा पाइब आन कली दोस

1 इस्राएल डा खाल्पा का निकशी जाक्शा, आं डोंइती निस्साक्म। इजीकीएल २०:१

2 मिनु मेना परमप्रभु यावेमी आं कली लोत्र पाप्तु।

3 मार लोत्र पाप्तु देशा हना "ए मुर, एको खाल्पापुकीम आन मूर्ति आन आन थुंम वोइश्शो बाक्तेक्म। मिनु मरिम्शो पा दाइल पाइसीतीक फुल्लु यो आन डोंइती वोइश्शो बाक्नीम। मार, आन हिल्लो पशो लोत्र गो लेत्चा माल्नुडा, डा?

4 मोपतीके गे मेको आन कली 'परमप्रभु, परमप्रभु यावेमी इस्राएल आ खिं डा मुर सुइमी मूर्ति आन थुंम वोइश्शा, आन मरिम्शो पा दाइल पांडसीतीक फुल्लु, आन डोंइती वोइश्शा, आं लोत्र पाइब आन बाक्तीक जाक्तेकम हना, गो, परमप्रभु यावेमी, मेको आन थुंम मूर्ति वोइश्शा जाक्शो मुर आन कली लोत्र लेत्नुडमी।

5 मिनु मेको मूर्तिमे इस्राएल आ खिं डा मुरपुकीम आं कली प्रोइतेकम। मो हना यो आन थुं फाइश्शा, आं गे लेले चाप्नुडा, कौं?

6 मोपतीके इस्राएल आ खिं डा मुर आन कली 'परमप्रभु, परमप्रभु यावेमी इन ग्रांरा दिशो गेय नेल्ल प्रोइशा, इन मूर्ति रे पा लेशशा आं गे जाक्कीन' देंशो बाक्ब, दे माइक्मी।

7 इस्राएल आ खिं डा मुर सुइ नु मेकेर बाक्ब अर्को रागी डा मुर सुइमी आं कली प्रोइशा, मूर्ति आन थुंम वोइश्शा, आन मरिम्शो पा दाइल पांडसीतीक फुल्लु आन डोंइती वोइश्शा, आं लोत्र पाइब आन बाक्तीक जाक्तेकम हना, गो, परमप्रभु यावेमी, मेको आन थुंम मूर्ति वोइश्शा जाक्शो मुर आन कली लोत्र लेत्नुडमी।

8 गो मेको आन कली सजाइ गेनुडमी। मिनु गो मेको मुर कली कोंइतीक नु शुक्शी पाइक्तीक सेल्लुड। गो मेको कली आं मुर आन दाते रे तिल्लुड। मिनु गोन परमप्रभु यावे नड, दे तुइक्चा माल्नीनी।

9 मिनु सुइ परमप्रभु यावे आ लोत्र पाइबम आ लोत्र मार बाक्बा, दे हिल्लो पाइब आन कली आंमा थुंम मिम्शा लोत्र पाप्तु हना, गो मेको कली मोदेंशो पपाइक्ता। मिनु गो मेको कली आं गुड दिंशा, सजाइ गेशा आं मुर इस्राएली आन दाते रे क्याम्नुड। १राजा २२:२०-२३

10 मेको निम्फाम आस मरिम्शो पशो आ परबंम सजाइ ताइनीस। आं लोत्र पाइब नु आं लोत्र हिल्लो पाइब, निम्फा आस सजाइ उइक्थ उइक्थ दुम्ब। इजीकीएल ३:१७-२०

11 मिनु इस्राएल आ खिं डा मुर गेनायो आं रे पा बरलेशा मलाइनीम। मिनु मेकोपुकीम गेनायो हेंथे पा आंम कली ग्रांरा दिशो मसेल्सीनीम। मिनु मेकोपुकी आं मुर दुन्नीम। गो मेको आन परमप्रभु दुन्नुड, दे परमप्रभु, परमप्रभु यावेमी देंशो बाक्ब" देंत। इजीकीएल ११:२०

परमप्रभुम गेशो सजाइ ठीक बाक्ब

12 मिनु परमप्रभु यावेमी आं कली लोत्र पाप्तु।

13 मार लोत्र पाप्तु देंशा हना "ए मुर, तेकोइ रागी डा मुर आन थुं फाइश्शा आं कली प्रोइशा अर्को आ नोले खोइक्तेकम हना, गो मेको आन परबंम आं गुड दिंशा आन जचा थोत्रक खतम पोक्नुड। अन्काल चाक्शा, मेकेर डा मुर नु बी ब्यफ, क्यारश भेडा नेल्ल आन कली साइक्नुडमी। इजीकीएल ४:१६

14 मेकेर नोआह, दानीएल नु अय्युब सांफा बाक्तेकम हना यो, मेकोम आन ठीक पतीकेम आंमा ला ब्रोंइचा ताम वा, दे परमप्रभु, परमप्रभु यावेमी देंशो बाक्ब" देंत। येरमीया १५:१

15 गो मोदेंशो रागी कली खतम सेल्चा कली ब्वाकी डा जन्तु सोइक्ताक्डमी हना, जन्तुपुकीम पतीके मेको रागी रे सुइ एर ओंथ पने मचाप्तेकम हना,

16 मिनु मेको मुर सां मेकेर बाक्तेकम हना, गो आं ब्रोंइशा बाक्शो खोदेंशो पा, मेकोम आन तमी तौ आन कली प्रोइने मचबेम वा। मेकोपुकी आंमा ला ब्रोंइम वा। मिनु मेको रागी गोरशो रागी दुम वा।

17 मिनु परमप्रभु, परमप्रभु यावेमी "गो रागी आ परबंम तरवार सोइश्शा, मेको तरवार कली 'मुर नु बी ब्यफ, क्यारश भेडा नेल्ल साइक्मी' देंती हना,

18 मिनु मेको मुर सां मेकेर बाक्तेकम हना यो, गो आं ब्रोंइशा बाक्शो खोदेंशो पा मेकोम आन तमी तौ आन कली प्रोइने मचबेम वा। मेकोपुकी आंमा ला ब्रोंइम वा।

19 मिनु गो मेको रागीम मुर बेक्तीक रोइ सोइश्शा, हुश खाक्श पोक्शा, मेकेर डा मुर नु बी ब्यफ, क्यारश भेडा साइश्शा आं गाइश्शो मोइक्ता हना,

20 मिनु मेकेर नोआह, दानीएल नु अय्युब बाक्तेकम हना यो, गो आं ब्रोंइशा बाक्शो खोदेंशो पा मेकोम आन तमी तौ आन कली प्रोइने मचबेम वा। मेको आन ठीक पतीकेम आंमा ला ब्रोंइम वा" देंत।

21 परमप्रभु, परमप्रभु यावेमी "गो यरूसलेम आं ४ ओटा हिंचा डा श्येत तरवार, अन्काल, ब्वाकी डा जन्तुपुकी नु मुर बेक्तीक रोइ सोइश्शा मेकेर डा मुर नु बी ब्यफ, क्यारश भेडा आन कली साइक्तामी हना, सुइ मब्रोंइम वा। इजीकीएल ५:१७; लेवी २६:१६-२५; येरमीया १५:३; प्रकाश ६:८

22 मो हना यो मुर आन दाते डा का निक्शी ब्रोंइशा बाक्नीम। मेको आं तमी तौ गूशा इ बाक्तीक जाक्नीम। मिनु गे मेको आन मिम्शो नु आन पशो ताइनेवे। मिनु गो यरूसलेम कली श्येत गेशो नु क्याम्शो आ परबंम इ थुं नाइक्नेवे।

23 मेको आन मिम्शो नु आन पशो तशा, मेकोपुकीम इ थुं नाइक्पाइक्नीम। मिनु गो मेकेर मार मार पडा, मेको नेल्ल मोशीन मपड, दे तुइक्नेवे" दे परमप्रभु, परमप्रभु यावेमी देंत।

## 15

शोर गाक्शो अडगुर बोट

1 मिनु परमप्रभु यावेमी आं कली लोत्र पाप्तु।

2 मार लोत्र पाप्तु देंशा हना "ए मुर, मार, ब्वाकीम बाक्ब अडगुर बोट आ शी ब्वाकी डा अरु तेकोइ रवा आन शी क्येडा रिम्शो बाक्बा डा? येरमीया २:२१

3 मेको रे मारेइ थोत्रक सेल्चा दुम्बा डा? मुरपुकीम मार मार क्युक्चा कली मेको के कोडग सेल्नीमी डा?

4 मेको मीम चोइनीम। मेको मीम आ सुर निक्शी नेक्शा, आ दाते डा कोइला दुम्शा लीमेनु, मार दुम्बा डा? यूहन्ना १५:६

5 मेको सेसीन बाकमेनु ला यो मारेड मद्मुत हना, मीम नेक्शा क्येर दुम्मेनु, मारेड दुम्बा, डा?" देंशो बाक्ब।

6 मोपतीके परमप्रभु, परमप्रभु यावेमी "दोपा ब्वाकी डा रवा आन दाते डा अडगुर बोट कली मीम चोचा कली गेडा, मोपा गो यरूसलेम डा मुर आन कली यो पाइक्नुडमी।

7 गो मेको आन कली सजाइ गेनुड। मेकोपुकी मी रे ब्रॉइतेक्म हना यो, मीम मेको आन कली दाक्ब। गो मेको आन कली सजाइ गेडानु, गोन परमप्रभु यावे नड, दे तुडक्चा माल्नीनी।

8 मिनु आन थुं फाइशो अरु आन नोले खोइक्तीके मेको आन रागी मुर मबाक्तीके सेल्लुड" दे परमप्रभु, परमप्रभु यावेमी देंत।

## 16

यरूसलेम तेल्लेम खोदेशो दुम्शो

इजीकीएल २३:-

- 1 परमप्रभु यावेमी आं कली लोन्न पाप्नु।
- 2 मार लोन्न पाप्नु देशा हना "ए मुर, यरूसलेम कली मूर्ति पूजा पचा मद्मुब, दे तुडक्पतो।
- 3 मिनु मेको कली परमप्रभु, परमप्रभु यावेमी यरूसलेम कली 'इ गोतीके नु इ जरमेतीक रागी कनानी आन रागी बाक्ब। इ आफ एमोरी का बाक्त। इ ममा हिती बाक्त।
- 4 गे जरमेसेनु सुडम इ सपु मखोदेम। इ कली ब्वाक्कुम मचिक्तेम। सुडम इ रामं हिकसी मखेक्तेम। इ कली सुडम वाम मगिलेम।
- 5 सुडम मेको नेल्ल पचा कली इ कली शिशी मकोइदेम। तन्न गे जरमेसेनु, इ कली रूम ताइक्ताक्म। मारदे हना इ कली ग्रॉग्रा दिल्ताक्म।
- 6 मिनु गो इ नेक्था रे पा लडानु, इ कली हुश लुम्सीशा बाक्शो ताइतन। मिनु गे मोपा लुम्सीशा बाक्डेनु, गो इ कली रू डा बोट खोदेशो पा कोल्शा, ब्रॉइशा, बाक्को' देंती।
- 7 मिनु गे कोल्शा टेयब दुम्ते। मिनु इ कुचु कोल्शा इ चां लाइशो दुम्त। तन्न गे वा मफेक्शो शिन्ना बाक्ते।
- 8 गो लेशा इ नेक्था रे पा लडानु, गे ग्युबे पची ना दुम्शो बाक्ते। मिनु गो आं वा आ सुरमी इ शिन्ना रां सुम्ता। गो गे नु कबल का पाता। मिनु गे आं के दुम्ते। रूथ ३:९; प्रस्थान १९:५
- 9 नोले गो इ कली ब्वाक्कुम चिक्शा इ हुश नेल्ले चिक्ताक्न। मिनु इ कली तेल खेक्ताक्न।
- 10 नोले गो इ कली बुटा आप्शो वाम ग्योम्ताक्न। मिनु इ खोइलीम रिम्शो कुशुल के जुता लिक्ताक्न। गो इ कली रिम्शो पा किरशो सुती श्येले के वा फेक्ताक्न। मिनु शुश क्येट लाइब वाम इ कली ग्योम्ताक्न।
- 11 गो इ कली गहना पांइताक्न। इ गुडम चुरा लिक्ताक्न। इ शुरम सुन के माला रेल्लताक्न।
- 12 गो इ नेंम मुन्द्री लिक्ताक्न। मिनु इ नोफाम माडवडी क्युक्ताक्न। इ पियाम दारशो सुन फू चुइक्ताक्न।
- 13 मोपा गे सुन चांदीम ग्योम्साक्वे। इ वा रिम्शो पा किरशो सुती श्येले के वा, शुश क्येट लाइब वा नु बुटा आप्शो दारशो वा दुम्तेक्म। इ जचा थोव्रक रिम्शो फस, खुदो नु रिम्शो तेल बाक्तेक्म। गे थम दारशो दुम्शा कोल्ले। मिनु गे पिपीम दुम्चा शिरते।
- 14 गे दारशो दुम्तीके इ नें रागी रागी डा मुर आन दातेम ब्रत। मारदे हना इ दारस मारेड मद्मुशो रिम्शो बाक्त। मेको नेल्ल आं इ कली गेशो ग्योम्तीके रे मोदेशो दुम्त, दे परमप्रभु, परमप्रभु यावेमी देंशो बाक्ब" देंत।
- 15 मिनु परमप्रभुमी "तन्न गे इ दारसम थमा सुइक्तीवी। मिनु गे इ नें चेम्शा तेल्लेम का दुम्ते। इ नेक्था रे पा लाइब सु बाक्तेक्म हना यो, गे मेको नु तेल्लेम पाप्तीवी। येरमीया २:२०
- 16 गे इ वा रे लाइशशा, इ कली दारशो थान सेल्लतीवी। मिनु मेकेर गे तेल्लेम पाप्तीवी। मेको मोदेशो डोंइती गेनायो मद्मुशो बाक्त। मिनु नोले यो गेनायो मद्मुब।
- 17 गो इ कली गेशो दारशो गहना लाइशशा, मेको आं सुन चांदी के बाक्तेक्म। मिनु मेको रे वोंइशा मुर मूर्ति सेल्साक्वे। मिनु मेको नु तेल्लेम पाप्तीवी। होसे ८:४
- 18 गे इ बुटा आप्शो वा लाइशशा, मेको आन कली सुम्तीवी। मिनु गे आं तेल नु धूप मेको आन डोंइती चढेप्तीवी।
- 19 गो इ कली जचा थोव्रक यो गेतेन। गो इ कली रिम्शो फस, खुदो नु रिम्शो तेल जचा गेतेन। तन्न गे मेको जचा थोव्रक मेको आन डोंइती ब्रॉइशो रिना पपाइक्चा कली चढेप्तीवी। मोदेशो दुम्त।
- 20 मिनु गे आं कली थिशो तमी तौ आन कली लाइशशा, मूर्ति आन कली जचा थोव्रक सेल्शा क्योरशा चढेप्तीवी। मार इ तेल्लेम पशोमीन मगाम डा? इजीकीएल २०:२६; इजीकीएल २३:३७; ब्यवस्था १२:३१; २राजा १६:३; येरमीया ७:३१
- 21 गे आं आल आन कली क्योरशा, मूर्ति आन कली चढेप्तीवी।
- 22 मिनु इ मूर्ति पूजा नु इ तेल्लेम पशो नेल्लेम ठिटी दुम्शो डा नाक्त ममिम्ती। मेना गे वा मफेक्सीशो शिन्ना नु हुश लुम्सीशो बाक्ते।
- 23 इ आं अरेशो मटिशो आ परबंम परमप्रभु, परमप्रभु यावेमी इ परबंम 'आबी आबी' देंत। येरमीया ११:१३
- 24 गे इ कली चोक चोकम मूर्ति पूजा पतीके सेल्साक्वे।

25 मिनु गे लां गुम्तीक नेल्लेम इ कली लाइशशो बाक्तीके सेल्शा, इ दारसम तेल्लेम पाप्तीवी। मिनु मेको रे पा लाइब नेल्ल आन कली गे इ रां गेशा इ तेल्लेम पतीक बारपाइक्तीवी।

26 गे इ माल्शो, इ नेक्था बाक्ब इजीप्ट डा मुर नु तेल्लेम पाप्तीवी। मोपा इ तेल्लेम पतीक बारपाइशशा, आं कली थाम्पा गाइक्पाइक्ती।

27 मोपतीके गो इ कली सजाइ गेतन। गो इ कली शुश जचा थोव्रक मगेशु, इ जोरी सत्रु आन गुडम गेतन। गो इ कली पलिस्ती आन दाक्शो सिखार दुम्पाइक्चा कली गेतामी। पलिस्ती आन तमीपुकी इ मरिम्शो पशो तशा मुने पाम्तेक्म।

28 गे अस्सुर डा मुर नु यो तेल्लेम पाप्तीवी। मारदे हना गे मोपा मरुशो बाक्ते। तेल्लेम पशा नोले यो मरुडे। इजीकीएल २३:१२

29 गे मार मार ग्याप्ब लेयब रागी कल्दी नु यो इ तेल्लेम पतीक बारपाइक्तीवी। मेको मो पशा यो मरुडे” दैत।

30 मिनु परमप्रभु, परमप्रभु यावेमी “गे मोदेशो पचा कली इ थुंम दोदेशो पा रोइ पचा माल्दा? गे एको गेय नेल्ल मुने मपाइशशो तेल्लेममी खोदेशो पा पाप्तीवी।

31 गे गुम्तीक लां नेल्ल नु इ चोक चोकम इ लाइशशो बाक्तीके सेल्लतीवी। तन्न गे तेल्लेम खोदेशो मदुमे। मारदे हना गे इ गाल्च मताक्मी।

32 गे हेंशे पाइब मीश, इ वोंइश आ पा डा अर्को नु बाक्नेवे।

33 मुरपुकीम तेल्लेम नेल्ल आन कली गाल्च गेनीम। तन्न गे चहिं दूली पा इ कली दाक्ब आन कली कका गाल्च गेप्तीवी। गे मेको आन कली एर ओथ नेल्ल रे चाक्शा, गे नु इप्पाइक्चा कली घूस गेप्तीवी।

34 मोपा गे इ तेल्लेम पतीकेम अरु मीश मुर खोदेशो मदुमे। इ कली सुडम मयोव्रडेम। मोपतीके गे गाल्च गेप्तीवी। गे इ गाल्च मतगी। मोपा गे अरु तेल्लेम खोदेशो मदुमे” दैत।

35 मोपतीके ए तेल्लेम, परमप्रभु यावे आ लोव्र नेनो।

36 परमप्रभु, परमप्रभु यावेमी “मारदे हना माल्तीके थम ठेयब बाक्त, इ तेल्लेम पचा कली इ कली माल्शो मुर आन कली इ शिन्ना रां कोंइताक्वी। मेको नेल्ल इ ग्रान्रा दिशो मूर्ति नु इ आल आन हुश जारशो आ पबंम बाक्ब।

37 मोपतीके गो इ तेल्लेम पशो नु ग्येरसीशा बाक्शो इ दाक्शो मुर नेल्ल आन कली इ एर ओथ रे खुप्नुडमी। इ कली दाक्ब नु मदाक्ब नेल्ल आन कली खुप्नुडमी। गो मेको नेल्ल एर ओं रे खुप्नुडमी। मिनु गो मेको आन डोंइती इ कली शिन्ना सेल्लन। येरमीया १३:२२

38 गो इ कली हेंथे गाक्ब हुश ख्वाक्श पोक्ब मीश मुर खोदेशो पा आं निसाफ पतीक लोव्र कोव्रशा निसाफ पाइनुड। गो आं गाइशशो नु रुश पशोमी सजाइ गेनुड। लेवी २:१०

39 मिनु गो इ कली इ मदाक्शो मुर आन गुडम जिम्मा गेनुड। मिनु मेकोपुकीम इ लाइशशो बाक्तीके नु लां डा बाक्तीके प्रेत्नीम। मेकोपुकीमी इ वा पुइशशा इ दारशो थोव्रक रोइशशा, इ कली शिन्ना सेल्शा प्रोंइनीम।

40 मेकोपुकीम इ कली ग्रंगेये माग्ये पोक्ब मुरपुकी चाक्नीम। मिनु फुल्लु आप्नीम। मिनु इ कली आन तरवारम चक्शा चोकटा लाम्टा सेल्लनीम। ब्यक्स्था २२:२३-२४

41 मेकोपुकीम इ खिंम मी सुइक्नीम। मिनु शुश मीश मुर आन डोंइती इ कली सजाइ गेनीम। गो इ तेल्लेम पतीक तेक्नुड। मिनु इ मुर आन कली गाल्च गेतीक तेक्नुड। २राजा २५:९

42 मिनु आं गाइशशो नु आं रुश पशो, इ रे डोन नाइक्पाइक्नुड। मिनु गो सिक्सी पा बाक्शा मगाइक्नुड।

43 मारदे हना गे इ टिठी बाक्डे ना डा नाक्त ममिन्ती। तन्न एको गेय नेल्लेमी आं कली गाइक्पाइक्ती। मोपतीके गो इ पशो इ पियामीन मोइक्ता। गे इ अरु ग्रान्रा दिशो गेय नेल्ल प्रोंइशा यो इ पतीक नेल्ल मरिम्शो सेल्शा, इ गेय मतेम्दी डा? गे मूर्ति पूजा पाइब क्येडा मरिम्शो पाइब मनवे डा?” दैत।

44 मेकोम “कथा पाइब नेल्लेम इ पबंम कथा पा “दोदेशो ममा मोदेशो तमी” देनीम।

45 गे इ ममा आ तमी बाक्नेवे। मेकोम आ वोंइश नु आ आल आन कली प्रोंइतु। मिनु गे इ दिदी आ लोक्ब यो बाक्नेवे। मेकोम आ वोंइश नु आ आल आन कली प्रोंइतु। इ ममा हिन्ती का बाक्ब। इ आफ एमोरी का बाक्ब। इजीकीएल १६:३

46 मिनु इ दिदी सामरीया बाक्ब। मेको इ उतर गे आ तमीपुकी नु बाक्शो बाक्त। इ लोक्ब नु आ तमी चहिं दक्खिन गे सोदोम सहरम बाक्नीम। मेको आ तमीपुकी नु बाक्शो बाक्ब।

47 गे मेको आन गाक्शो लांम ला मगाक्डे। मिनु मेको आन मूर्ति पूजा पशो आ नोले यो खोइक्तीवी। मिनु इक्का नाक्तीमीन इ पतीक नेल्लेम मेको आन क्येडा यो शुश मरिम्शो पाप्तीवी” दैत।

48 परमप्रभु, परमप्रभु यावेमी “गो आं ब्रोंइशा बाक्शो खोदेशो पा, इ लोक्ब सोदोम नु मेको आ तमीपुकीम इ मरिम्शो पशो खोदेशो गेनायो मपाम। मती १०:१५

49 इ लोक्ब सोदोम आ दोस मार बाक्त देशा हना, मेको नु आ तमीपुकी ठेयब लेशरा, शुश जशा ब्वशा, शोप पाइशशो दुष्शा बाक्तेक्म। मेकोपुकीम पुडग नु मारिइ मथीब आन कली वारच मपदेम।

50 मेकोपुकी ठेयब लेशशा, आं डोंइती ग्रान्रा दिशो गेय पाम्तेक्म। मोपतीके गो मोदेशो तशा मेको आन कली तिलतामी। उत्पत्ती १९:२४

51 सामरीयामी इ पशो पाप क्येडा उइक्थ यो मपावो। गे मेको आन क्येडा शुश मूर्ति पूजा पाप्तीवी। मिनु गे इ पशो गेय नेल्ल रे पा, इ लोक्ब आस कली ठीक पाइब तांडसीब खोदेशो सेल्शो बाक्नेवे। येरमीया ३:११

52 गे इ मरिम्शो पशो रावो। मारदे हना गे इ लोक्ब आस कली इ क्येडा आइक्च सजाइ ताइब सेल्लतीवी। मारदे हना गे मेको आस पाप पशो क्येडा इ पशो मूर्ति पूजा शुश बाक्त। गे इ क्येडा मेको आस कली ठीक पाइब खोदेशो सेल्लतीवी। मोपतीके मुने पावो, इ मरिम्शो पशो राव। मारदे हना गे इ लोक्ब आस कली ठीक पाइब खोदेशो सेल्शो बाक्ते।

परमप्रभुमी आ मुर आन कली दाक्व

53 मिनु गो सोदोम नु आ तमी आन कली रिम्शो दुम्तीक नाक्ती लेशशा गेनुडमी। मिनु सामरीया नु आ तमी आन कली यो मोदेशो पाइनुड। मिनु इ रिम्शो दुम्तीके नाक्ती यो लेशशा गेनन। ब्यवस्था ३०:३

54 मोपा गे इ मरिम्शो पशो राइनेवे। मिनु इ पशो नेल्ल आन पर्वम गे मुने दोक्चा माल्नेवे। मिनु मेको आस कली थुं नाइक्तीके दुम्नेवे।

55 इ लोकब सोदोम नु आ तमीपुकी डोंइती डा खोदेशो पा रिम्शो दुम्नीम। मिनु सामरीया नु आ तमीपुकी यो डोंइती डा खोदेशो पा रिम्शो दुम्नीम। मिनु गे नु इ तमीपुकी यो डोंइती डा खोदेशो पा रिम्शो दुम्नीनी।

56 डोंइती इ टेयब लेत्तीक नाक्ती गे इ लोकब सोदोम आ पर्वम शुक्शी मपवी डा?

57 मेना मेकोपुकीम इ परमप्रभु यावे आ अरेशो मटिशो मतुइश्शो बाक्तेकम। मुल अराम डा तमीपुकीमी इ कली शुक्शी पाइनीम। मेको आ नेक्था डा मुर, पलिस्ती आ तमीपुकीमी नु एर ओंथ डा मुर नेल्लेमी शुक्शी पा आइक्व मिन्मीम। अराम आ तमी एदोम यो बाक्व।

58 गे इ मुने दोक्चा डा गेय नु इ मूर्ति पूजा पशो डा सजाइ तचा माल्नेवे” दे परमप्रभु यावेमी दैत।

गेना हना यो लीब कबल

59 परमप्रभु, परमप्रभु यावेमी “गे इ पशो खोदेशो पा गो इ कली पाइनुड। गे आं कसम जशो ममिन्ती। इस पशो कबल यो क्याम्ताक्वी।

60 मो हना यो गो इ ठिटी बाक्डे नाक्त डा गे नु पशो कबल मिम्नुड। गो गे नु गेना हना यो लीब कबल पाइनुड। लेवी २६:४५; होसे २:१७; इजीकीएल ३७:२६; येरमीया ३१:३१-३४

61 मेना गे इ पशो नेल्ल मिम्शा, मुने दोक्शा, इ लोकब आस कली ब्राइनेवे। गो मेको आस कली इ तमी खोदेशो पा गेनन। तन्न मेको गे नु पशो कबलम पतीके पशो ममाड। इजीकीएल २०:४३

62 मिनु गो गे नु ग्येत्थ लुकच मपाडब कबल पाइनुड। मिनु गे गोन परमप्रभु यावे नड, दे तुइक्नेवे।

63 मिनु गे इ डोंइती पशो मिम्शा मुने दोक्नेवे। गो इ पशो गेय नेल्ल आन पर्वम माफ गेनन। मिनु गे इ मुने आ पर्वम गे टेयब लेशशो लोत्र पने मचाप्नेवे” दे परमप्रभु, परमप्रभु यावेमी दैत। इजीकीएल ३६:३१-३२

## 17

अडगुर बोट नु ककाकुली आस कथा

1 मिनु परमप्रभु यावेमी आं कली लोत्र पाप्तु।

2 मार लोत्र पाप्तु हना “ए मुर, कथा का देनो। गे इस्राएल आ खिं डा मुर आन कली लोत्र पावो।

3 मिनु परमप्रभु यावेमी मेको आन कली ‘लाइश्शो, टेयब फ्रां पाइश्शो टेयब ककाकुली का बाक्त। मेको आ शुश ओफला शुश रड डा बाक्तेकम। मेको लेबानोनम जाक्शा, लाइश्शो रवा आ डर प्रोइक्तु।

4 मेकोमी मेको रवा आ डर लाइश्शा, ग्याप्तीक लेयतीक रागीम चाक्दीत्तु। मिनु मेको ग्याप्ब लेयब आन सहर काम खुम्तु। इजीकीएल १६:२९

5 मिनु नोले मेकोमी रागी डा वांचेर लाइश्शा, रिम्शो खपीम खुम्तु। मेकोम मेको वांचेर शुश ब्वाक्कु बाक्तीकम खुम्तु।

6 मिनु मेको वाशा एर ओंथ नेल्ल गे ब्राइब लहारा का दुम्त। मिनु मेको आ राशी मेको ककाकुली गे लेत्तेकम। तन्न मेको आ शाक्श चहिं आगामीन लीतेकम। मोपा मेको लहारा का दुम्त। मिनु मेको आ राशी दाप्तेकम। मिनु मेकेर रे शुश सफा यूतेकम। इजीकीएल १९:१०

7 मिनु मेकेर अर्को टेयब फ्रां पाइश्शो नु शुश ओफला पाइश्शो टेयब ककाकुली का बाक्त। मिनु मेको लहाराम आ शाक्श मेको गे ब्रपाइक्तु। ब्वाक्कु तचा कली मेको आ राशी यो मेको ककाकुली गे ब्रपाइक्तु। मेको डोंइती डा खुम्तीके रे याक्शो बाक्त।

8 मेको के राशी दाम्मल। फल सिम्मल। मिनु मेको रिम्शो लहारा का दुम्ल, दे शुश ब्वाक्कु बाक्शो नु रिम्शो खपीम खुम्शो बाक्त” देशो बाक्व।

9 मिनु परमप्रभु, परमप्रभु यावेमी ‘मार, मेको ग्रेल्बा डा? मार, मेको आ शाक्श तुल्चा मपुंडसीबा डा? मिनु मेको आ फल मसोवनीमी डा? मिनु मेको मबेक्वा डा? मेको आ नक वाशो कोच्वा नेल्ल बेक्नीम। मेको आ शाक्श तुल्चा कली शुश बोल्यो गुड नु शुश मुर ममाल्नीम।

10 मेको कली याक्शा ला हना यो मेको ग्रेल्बा डा? पूब डा फशेम आबानु मेको नेल्ल मसोवबा डा? रिम्शो खपीम खुम्शो बाक्त हना यो, फशेम आबानु मेको मसोवबा? दे मेको आन कली दैचा माल्नेवे” दैत।

कथा आ अर्थ शेंशो

11 मिनु परमप्रभु यावेमी आं कली लोत्र पाप्तु।

12 मार लोत्र पाप्तु दैशा हना “एको मटीब खिं डा मुर आन कली ‘एको लोत्र आ अर्थ मार बाक्वा, मेको मतुइक्नीनी?’ दे हिल्लो पामी। मेको आन कली ‘बेबीलोन डा पिप यरूसलेमम जाक्त। मिनु मेकोमी यरूसलेम डा पिप नु आ टेयब गेय पाडब आन कली बेबीलोनम लाइक्तीमी। २राजा २४:१०,१५,१६

13 मिनु मेकोम पिप आ खिं डा मुर का कली लाइश्शा, कसम जपाइश्शा, मेको नु कबल का पाप्तु। मिनु मेकोमी मेको रागी डा टेयब मुर आन कली लाइक्तु। २राजा २४:१७; २इतिहास ३६:१३

14 मेको रागी बोल्यो मडुम्ल। लेंशा बोक्ने मचबल नु मेकोम आ पशो कबल ला खाप्ने चाप्शा बाक्ल, दे मोदेशो पाप्तु' दैंत।

15 तन्न यरूसलेम डा पिपमी मेको बेबीलोन डा पिप कली मटिथु, इजीप्त रागीम शारा नु ठेयब हुल का लडाइ पाइब गेयीनी, दे मुर सोइक्ताक्व। मार, मेको कली रिम्शो दुम्बा डा? मार मोदेशो गेय पाइब मुर ब्रॉइने चाप्बा डा? कबल पशो प्रॉइशा यो, मेको ब्रॉइने चाप्बा डा?" दैंत।

16 परमप्रभु, परमप्रभु यावेमी "गो आं ब्रॉइशा बाक्शो खोदेशो पा, मेकोमी मेको कली पिप सेल्व पिप नु जशो कसम प्रेंशा, आ पशो कबल प्रॉइशा, बेबीलोन डा पिप आ बाक्तीक सहरम बेक्ब।

17 फाराओ आ सक्ति पाइश्शो लडाइ पाइब नु मेको आ मार मारमी मेको कली वारच पने मचाप्नीम। यरूसलेम कली पुम्ची ना नु गारो डोइक्तीक सेल्शा शुश मुर साइक्वी ना वारच मपाइब।

18 मारदे हना मेकोम आ जशो कसम ममिथु, आ पशो कबल प्रॉइशा, सल्ला पा यो, मोदेशो मरिम्शो पतीके मेको ब्रॉइने मचाप्ब" दैंशो बाक्ब।

19 मोपतीके परमप्रभु, परमप्रभु यावेमी "गो आं ब्रॉइशा बाक्शो खोदेशो पा, मेकोम आ कसम जशो प्रेंशा, आं कबल प्रॉइशो नेल्ल मेको आ पियामीन मोइक्नुड।

20 गो आं ग्याइल मेको तार ब्वारनुड। मिनु मेको आं ग्याइलीम रेप्ब। मिनु गो मेको कली बेबीलोनम चाक्नुड। मिनु मेकोम आं थुं फाइक्तीके गो मेको कली निसाफ पाइनुड। इजीकीएल १२:१३

21 मेको आ प्रोक्शा लशो लडाइ पाइब नेल्ल तरवारम साइक्वा पुंडसीनीम। मिनु ब्रॉइशो नेल्ल एर ओंथ ब्राइनीम। मिनु गो परमप्रभु यावेमीन एको लोत्र पशो नड, दे तुइक्नीनी" दैंशो बाक्ब।

22 परमप्रभु, परमप्रभु यावेमी "गो लेबानोन डा लाइश्शो रवा आ डर डा आइक्च राशी का प्रोइश्शा लाइक्नुड। मिनु गो मेको कली नेल्ल क्येडा लाइश्शो डांडाम खुम्नुड। यसैया ११:१

23 गो मेको इस्राएल डा लाइश्शो पहाड मेर खुम्नुड। मिनु मेकोम शुश राशी दाप्पाइश्शा फल सिप्पाइश्शा, थम दारशो लेबानोन डा लाइश्शो रवा का दुम्ब। मिनु नेल्ल खाल डा चिक्ब आ राशीम बाक्नीम। मिनु मेकेर ठेयब चिक्बपुकीम ग्योत्र सेल्शा, मेको आ वांकुम बाक्नीम। इजीकीएल २०:४०; १सामुएल २:७०८

24 मिनु रू डा रवा नेल्लेम गो, परमप्रभु यावे नड, दे तुइक्चा माल्नीम। गो लाइश्शो रवा आन कली आइक्च सेल्लुड। आइक्च रवा आन कली लाइश्शो सेल्लुड। गो गिगी रवा आन कली सोत्रपाइक्नुड। मिनु सोत्रशो रवा आन कली गिगी दुप्पाइक्नुड। गो, परमप्रभु यावेमी एको लोत्र पाता। मिनु गो एको थमा पा पाइनुड" दैंत।

## 18

बेक्चा नु ब्रॉइचा आंम गुइम बाक्ब

1 परमप्रभु यावेमी आं कली लोत्र पाप्तु।

2 मार लोत्र पाप्तु दैंशा हना "इसाएल रागी आ पर्बम लेंशा पशो कथा आ अर्थ मार बाक्बा, दे मिम्नीनी? 'आम आफोम ग्युरशो अडगुर ब्वाम्तेक्म हना, आन आल आन खुइ ग्रिम्बा डा?' " दे हिल्लो पाप्तु। येरमीया ३१:२९

3 लेंशा परमप्रभु, परमप्रभु यावेमी "गो आं ब्रॉइशा बाक्शो खोदेशो पा, मुल रे गेपुकीम एको कथा इस्राएलम लेंशा काइ मदेनीन।

4 मारदे हना ब्रॉइशा बाक्ब नेल्ल आं केन नम, दे तुइक्चा माल्नीनी। आम आफ नु आल नेल्ल आं केन नम। सुम पाप पाइबा, मेको ला बेक्ब।

5 ठीक पाइब मुर का बाक्त हना, आं अरेशो टीब नु रिम्शो पाइब।

6 मेको डांडा मेर मजाइब नु इस्राएल आ खिं डा मुर आन मूर्ति आन कली पूजा मपाइब, मेको आ नेक्था डा मुर आन मीश नु मडप्ब, रां ब्रॉइशो मीश मुर नु मडप्ब। लेवी १८:१९; लेवी १८:२०

7 मेकोम सुइ आन कली मदिप्ब, जाकटी वोइश्शो मार मार लेशशा गेब, मेकोम खुइ मपाइब, शोत्रलु बेक्शो आन कली आ जचा थोत्रक गेब। मिनु शिन्ना बाक्शो आन कली वा फेक्पाइक्ब। ब्यवस्था २४:१०-१३; यसैया ५८:७

8 मेकोम जेर गेशा चाइक्ब मताक्ब, मेको मरिम्शो पतीक रे डोन बाक्ब नु मुर आन दातेम कुल मकोत्रथु ठीक निसाफ पाइब। प्रस्थान २२:२४; भजन संग्रह १५:५

9 मेकोम आं फुल्लुम मुशा ब्रेक्शो लोत्र नु आं निसाफ पतीके लोत्र थुं मफाइक्थु पाइब। मोदेशो मुर ठीक पाइब मुर बाक्ब। मिनु मेको थमा पा ब्रॉइचा माल्ब" दे परमप्रभु, परमप्रभु यावेमी दैंशो बाक्ब।

10 मिनु "मेको मुर के तौ का बाक्ब। मेकोम हुश खाक्श पोक्ब नु मुर आन कली साइक्ब,

11 मेको आ आफोम मपशो गेय नेल्ले मेकोम पाइब, मेकोमी डांडा मेर जाइब, मेको आ नेक्था डा मुर आन मीश नु इप्ब।

12 पुडग नु मारेइ मथीब आन कली दिप्ब, मुर आन मार मार रोइक्ब। जाकटी वोइश्शो थोत्रक मलेप्ब, मूर्ति आन कली पूजा पाइब नु ग्रॉग्रा दिशो गेय पाइब।

13 मेकोम आ चाइक्ब ताक्शा ला जेर गेब, मार मोदेशो मुर ब्रॉइचा ताइबा डा? मेको ब्रॉइचा मताइब। मोदेशो ग्रॉग्रा दिशो गेय नेल्ल पतीके, मेको थमा पा बेक्चान माल्ब। मेको आ हुश आ दोस मेको आंमा राइब।

14 तन्न मेको मुर आ तौमी आ आफोम पशो पाप नेल्ल ताइब। मेको नेल्ल तशा, मोदेशो गेय मपाइब। ब्यवस्था २४:१६

15 मेकोम डांडा मेर मजाइब। इस्राएल आ खिं डा मुर आन मूर्ति आन कली पूजा मपाइब, मेको आ नेक्था डा मुर आन मीश नु मडप्ब।

16 मेकोम सुइ आन कली मरिम्शो मपाइब, मेकोमी जाकटी मताकब। मेकोम सुइ के मारेइ मरोइकब। तन्न शोत्रलु बेकशो आन कली आ जचा थोत्रक गोब। शिन्ना बाकशो आन कली वा फेक्पाइकब।

17 मेको मरिम्शो पतीक रे डोन बाकब, जेर गेशा आ चाइकब मताकब। मेकोम आं निसाफ पतीक लोत्र नेल्ल पाइब। मिनु आं फुल्लुम मुशा ब्रेकशो लोत्र नेल्ल खाप्ब। मेको मुर आ आफ आ मरिम्शो पशो आ पर्वम बेक्चा ममाल्ब। मेको थमा पा ब्रॉइब।

18 तन्न मेको आ आफोम चहिं आ दला दाक्स पशा, आ लोक्ब आन कली रोइक्ताकब। आ मुर आन दातेम मरिम्शो पाप्तु। मेको आ मरिम्शो पशो आ पर्वम बेक्ब।

19 मो हना यो गेपुकीम मारदे आ आफ आ मरिम्शो पशो आ तौम कुरचा ममाल्दा? देंनीनी। आ तौम आं अरेशो टिशा, ठीक गेय पशो बाकब, मेकोम आं फुल्लुम मुशा ब्रेकशो लोत्र होस पा टिशो बाकब। मोपतीके मेको थमा पा ब्रॉइब। प्रस्थान २०:५

20 सुम पाप पाइबा, मेको ला बेक्ब। आलमी आ आम आफ आस मरिम्शो पशो आ पर्वम श्येत जचा ममाल्ब। आ आम आफोम यो आस आल आन मरिम्शो पशो आ पर्वम श्येत जचा ममाल्नीस। ठीक पाइब आ ठीक पशो आ कली दुम्ब। मिनु परमप्रभु यावे आ अरेशो मटीबमी आ मटिशो आ कलीन दुम्ब। २राजा १४:६

21 तन्न परमप्रभु यावे आ अरेशो लोत्र मटीब मुर कामी आ पशो पाप नेल्ल प्रॉइशा, आं फुल्लुम मुशा ब्रेकशो लोत्र नेल्ल पाप्तु हना, आं अरेशो नु ठीक गेय पाप्तु हना, मेको थमा पा ब्रॉइब। मेको मबेक्ब। इजीकीएल ३३:१०-२०

22 मेको आ हेंथे पशो आ पर्वम लेंशा ममिम्सीब। मेको आ ठीक पतीकेम ब्रॉइब। यसेया ४३:२५

23 मार, गो आं अरेशो लोत्र मटीब मुर बेक्मेनु ग्येरनुडा डा? मेको क्येडा यो गो मेको आन मरिम्शो पशो प्रॉइशा ब्रॉइशा बाकशो तचा मदाक्नुडा डा? १तिमोथी २:४

24 तन्न ठीक पाइब मुरुम आ ठीक पतीक प्रॉइशा, मरिम्शो पाप्तु हना, आं अरेशो लोत्र मटीबपुकीम खोदेशो पा ग्रंथा दिशो गेय पाप्तु हना, मार मेको ब्रॉइबा डा? मेको आ डोंइती पशो ठीक गेय मारेइ ममिम्सीब। मेको आ मरिम्शो पशो नु आ पाप आ पर्वम बेक्चा माल्ब। इजीकीएल ३:२०

25 मो हना यो गेपुकीम 'परमप्रभु आ पशो ठीक मबाक्ब' देंनीनी। इस्राएल आ खिं डा मुर नेनीन, मार, आं पशो ठीक मबाक्बा डा? मार, इन पशो कका ठीक बाक्बा डा?

26 ठीक पाइब मुरुम आ ठीक पतीक प्रॉइशा मरिम्शो पाप्तु हना, मेको आ ठीक मपतीकेम बेक्ब। मेको आ मरिम्शो पशो आ पर्वम बेक्चा माल्ब।

27 तन्न परमप्रभु यावे आ अरेशो मटीब मुरुम आ मटितीके प्रॉइशा, आं अरेशो ठीक गेय पाप्तु हना, मेको ब्रॉइब।

28 मारदे हना मेकोम मिम्शा, आ पशो मरिम्शो नेल्ल रे लेत्त हना, मेको थमा पा ब्रॉइब। मेको बेक्चा ममाल्ब।

29 मो हना यो इस्राएल आ खिं डा मुरपुकीमी 'परमप्रभु यावे आ पशो ठीक मबाक्ब' देंनीन। ए इस्राएल आ खिं डा मुर, मार, आं पशो ठीक मबाक्बा डा? मार, इन पशो कका ठीक बाक्बा डा?

30 मोपतीके ए इस्राएल आ खिं डा मुर, गो नेल्ल इन कली इन पशो कोव्रशा निसाफ पाइनुड। मिनु इन हेंथे पशो नेल्ल रे लेतीन। मो मपाइतीनी हना, इन मरिम्शो पशोम इन कली साइकब।

31 गे इन आं कली हेंथे पशो नेल्ल प्रॉइशा, गे नक थुं नु नक सोक्ती ताक्कीन। ए इस्राएल आ खिं डा मुर, गे मारदे बेक्चा दाक्नीनी? इजीकीएल ११:१९

32 मारदे हना गो सुइ मुर बेक्शोम मग्येरसीनुड। मरिम्शो पतीक रे लेशशा, ब्रॉइशा बाक्कीन" दे परमप्रभु, परमप्रभु यावेमी देंत।

## 19

### रोंका पतीक कुम्सो

1 गे इस्राएल डा पिप आ खिं डा मुर आन पर्वम रोंका पने।

2 इ ममा गुप्स आन दातेम ठेयब छाउरी गुप्स दुम्शा बाक्त। मेको आ चाइकब आन कली कोल्पाइक्ना पाइक्न ठिटा गुप्स आन दातेम गोल्ला बाक्बाक्त। उत्पत्ती ४९:९

3 मिनु मेकोम आ चाइकब आन दाते डा का कली कोल्पाइशशा, ठेयब सेल्लु। मिनु मेको ठेयब बोल्यो ठिटा गुप्स का दुम्त। मेकोम सिखार पचा शेंसाक्ब। मिनु मुर आन कली ब्वाप्तु।

4 मिनु रागी रागी डा मुरपुकीम मेको आ पर्वम लोत्र नेंतेक्म। मिनु मेकोपुकीम मेको कली बिक्तीकेम पिक्शा ग्याइक्ताक्म। मिनु मुरपुकीम मेको कली कोंडुगुम कीशा, इजीप्त रागी लाइक्तेक्म। २राजा २३:३१-३३; येरमीया २२:११-१२

5 मिनु मेको छाउरी गुप्सम आ देशो मदुम्शो नु आ मिम्शो मगाप्शो तशा, आ चाइकब आन दाते डा का कली योव्रतु। मिनु मेको कली बोल्यो ठिटा गुप्स का सेल्लु। २राजा २४:६,८,९

6 मिनु मेको गुप्स आन दातेम एर ओंथ पचा गोप्तु। मारदे हना मेको ठेयब नु बोल्यो ठिटा गुप्स दुम्शो बाक्त। मिनु मेकोम सिखार पचा शेंसाक्ब। मिनु मुर आन कली ब्वाप्तु।

7 मेकोम मुर आन बोल्यो दरवार प्रेल्लु। मिनु मेको आन सहर खतम सेल्लु। मेको आ डोरशो नेंशा, रागी नु मेकेर बाक्ब नेल्ल हिंतेक्म।

8 मिनु आ एर ओंथ डा रागी रागी रे मुरपुकी जाक्तेक्म। मिनु मेको कली ब्वारद दाइक्ताक्म। मेको कली बिक्तीकेम पिक्शा ग्याइक्ताक्म।



9 मिनू मेकोपुकीम मेको कली कोंडगुम कीशा ग्याइश्शा खोरम चोक्तेकम। मिनू बेबीलोन डा पिप आ बाक्तीकेम लाइक्तेकम। मेकोपुकीम इस्राएल डा डांडा मेर आ सेंदा गेनायो मनेसेक्ल, दे मेको कली चोक्शा वोइक्तेकम। २२:१५

10 इ ममा ब्वाक्कु आ नेक्था खुम्शो अडगुर बोट खोदेशो बाक्त। शुश ब्वाक्कु बाक्तीके, मेको शुश राशी पाइश्शा शुश गेडा सिश्शो बाक्त। इजीकीएल १७:६

11 मेको आ बोल्यो राशी का पिप आन हुकुम पतीक कोक्के दुम्चा डा बाक्त। मेको शुश राशी आन दातेमी लाइश्शो नु कोल्शो दुम्शा, शुश राशी दाप्पाइश्शा लत।

12 तन्न मेको गाइश्शा चुरशा तुल्चा पुंडसाक्व। मिनू खपीम ताइक्चा पुंडसाक्व। मिनू पूर्ब डा फशेम मेको कली सोव्रपाइक्वतु। मिनू मेको आ गेडा नेल्ल हेम्तेकम। आ बोल्यो राशी सोव्रशा, मेको कली मीम नेक्वतु।

13 मिनू मुल मेको सोव्रशो ब्वाक्कु मबाक्शो गोरशो रागीम खुम्चा पुंडसाक्व।

14 मिनू मेको आ टेयब राशी रे मी शूत। मिनू मेको आ फल नु आ आइक्च राशी नेल्ल नेक्वतु। मोपा मेकेर हुकुम पतीक कोक्के दुम्चा डा बोल्यो राशी का यो मली। मिनू एको रेंका पतीक कुम्सो नेल्लेम तुइश्शा, पना पन बाक्तेकम।

## 20

इस्राएली हेंथे गाक्शो

1 मिनू ७ बर्स डा ५ महिना डा १० नाक्ती इस्राएल डा खाल्पापुकी परमप्रभु यावे कली हिल्लो पचा कली जाक्शा आं डोंइती बाक्तेकम। इजीकीएल १४:१

2 मेना परमप्रभु यावेमी आं कली लोव्र पाप्तु।

3 मेकोमी “ए मुर, इस्राएल डा खाल्पा आन कली लोव्र पावो। गो, परमप्रभु, परमप्रभु यावेमी, मारदे गेपुकी आं कली हिल्लो पथ जाक्नी? गो आं ब्रोंइशा बाक्शो खोदेशो पा, इन कली लोव्र मलेत्तुडा। इजीकीएल १४:३

4 ए मुर, गे मेको आन कली निसाफ पाइनेवे? गे मेको आन कली निसाफ पाइनेवे? मो हना मेको आन किकी पिपी आन ग्रॉग्रा दिशो गेय आन पर्बम मेको आन कली तुइक्पतो। इजीकीएल २२:२; इजीकीएल २३:३६

5 गो इस्राएल कली योव्रडु नाक्ती याक्कूब आ खिं डा आ चच युड नु कसम जाता। इजीप्ट रागीमी गो मेको आन दातेम तुइक्पाइसाक्यी। मेको आन कली गो परमप्रभु यावे, इन परमप्रभु नड, दे कसम जाता। प्रस्थान ६:७-८

6 गो मेको नाक्ती मेको आन कली इजीप्ट रे गुंइशा, आन माल्शो रागीम चाक्नुडमी। मेको रागीम दूध नु खुदो शाइश्शो बाक्ब। मिनू मेको रागी, रागी नेल्ल आन क्येडा रिम्शो बाक्ब, दे कसम जशा देंशो नड। प्रस्थान ३:८

7 मिनू गो मेको आन कली इन कोव्रत दाक्शो ग्रॉग्रा दित्चा डा थोव्रक ताइक्तीन। गे आंम कली इजीप्ट डा मूर्तिपुकीम ग्रॉग्रा दिशो मसेल्सीन। गो परमप्रभु यावे, इन परमप्रभु नड। यहोसु २४:१४, २३

8 तन्न मेकोपुकीमी आं कली मटिथु, आं लोव्र मनेनेम। सुडम आन कोव्रत दाक्शो ग्रॉग्रा दित्चा डा थोव्रक मताइक्तेकम। सुडमी इजीप्ट डा मूर्तिपुकी यो मप्रोनेम। मिनू गे इजीप्ट रागीम बाक्नीनु, आं गाइश्शो नेल्ले इन तारी मोइक्नुड, दे मिम्ताक्ड।

9 तन्न गो आं नें रागी रागी डा मुर आन डोंइती मरिम्शो मडुम्ल, दे गो इन कली इजीप्ट रागी रे गुंइताक्ड। इन बाक्शो रागी डा मुर आन कली यो आं नें तुइक्पाइक्ताक्मी। इजीकीएल २०:१४; इजीकीएल ३६:२१-२२; प्रस्थान ३२:१२

10 मोपतीके गो मेको आन कली इजीप्ट रागी रे गुंइशा गोरशो रागीम चाक्तामी।

11 गो मेको आन कली आं फुल्लुम मुशा ब्रेक्शो लोव्र तुइक्पाइक्ताक्मी। मिनू आं निसाफ पतीक लोव्र कोंइताक्डमी। सुम मेको टिशा पाइबा, मेको ब्रोंइब। लेवी १८:५; लूका १०:२८

12 मेको प्रोंइशा मेको आन कली नाइक्तीक नाक्त गेतामी। मेको गो नु मेको आन दातेमी चिन्ड का बाक्ब। मिनू गो, परमप्रभु यावेमी मेको आन कली आं मुर सेल्ताक्मी, दे तुइक्तमेक्ल। प्रस्थान ३१:१३-१७

13 तन्न इस्राएल आ खिं डा मुरपुकीमी गोरशो रागीम आं कली मटीयीमी। मेकोपुकीम आं फुल्लुम मुशा ब्रेक्शो लोव्र नु आं निसाफ पतीक लोव्र मपाम। मेको टिशा पाइब मुर मेको रे ब्रोंइनीम। मेकोपुकीमी आं नाइक्तीक नाक्त ग्रॉग्रा दिशो सेल्तेकम। मिनू गो एको गोरशो रागीमीन आं चुरशो मोइश्शा मेको आन कली साइक्नुडमी, दे मिम्ताक्ड। प्रस्थान ३२:१०-१२

14 मिनू गो रागी डा मुर आन डोंइती मेको आन कली इजीप्ट रागी रे गुंइताक्ड। गो आं नें मेको रागी रागी डा मुर आन डोंइती मरिम्शो मडुम्ल, दे मोदेशो पाता।

15 मिनू गो मेको आन कली गोरशो रागीमी गो इन कली गेशो, दूध नु खुदो शुश बाक्शो नेल्ल क्येडा दारशो रागीमी मलाइक्नुड, दे कसम जाता। गन्ती १४:३०

16 मारदे हना मेकोपुकीम आं निसाफ पतीक लोव्र होस पा मपाम। मिनू फुल्लुम मुशा ब्रेक्शो लोव्र मटीम। मिनू आं नाइक्तीक नाक्ती ग्रॉग्रा दिशो सेल्तेकम। मारदे हना मेको आन थुं आन मूर्ति गे हिरशो बाक्तेकम।

17 मो हना यो गो मेको आन कली शिशी पा, गोरशो रागीम मसदुमी। मेको आन कली मक्यामदुमी।

18 गो गोरशो रागीम मेको आन आल आन कली ‘गे इन आम आफ आन शेंशो फुल्लुम मुशा ब्रेक्शो लोव्र मटिने। मेको आन निसाफ पतीक मपने। मेको आन मूर्तिम आंम इन कली ग्रॉग्रा दिशो मसेल्सीन।

19 गो परमप्रभु यावे, इन परमप्रभु नड। गेपुकीम आं फुल्लुम मुशा ब्रेक्शो लोव्र टिशा, आं निसाफ पतीक लोव्र होस पा पने।

20 आं नाइक्तीक नाक्ती गेय मपने। मिनु मेको गे नु गो इं दातेम चिन्ड दुम्ल। मिनु गेपुकीम गो परमप्रभु यावे, इन परमप्रभु नड, दे तुइक्नीनी” देंती।

21 तन्न मेको आलपुकी आं कली मटीब दुम्तेकम। मेकोपुकीम आं फुल्लुम मुशा ब्रेक्शो लोत्रम मटीम। मिनु आं निसाफ पतीक लोत्र होस पा मपाम। मेको टिशा पाइब मुर मेको रे ब्रॉइनीम। मेकोपुकीम आं नाइक्तीक नाक्ती ग्रांघ्रा दिशो सेल्लेक्म। मिनु एको गोरशो रागीमीन आं चुरशो आन तारी मोइशशा, मेको आं गाइशशा पशो गेय कोंइनुड।

22 तन्न गो आं गुइ तेक्ता। मिनु गो रागी डा मुर आन डोंइती मेको आन कली इजीप्ट रागी रे गुंइताक्ड। गो आं नें मेको रागी रागी डा मुर आन डोंइती मरिम्शो मदुम्ल, दे मोदेशो पाता।

23 मेको प्रॉइशा यो, गो गोरशो रागीम मेको आन कली गो इन कली रागी रागी डा मुर आन दातेम एर ओंथ ब्रपाइक्नुडमी। मिनु राज्य राज्यम एर ओंथ ब्रपाइक्नुडमी, दे कसम जाता। लेवी २६:३३

24 मारदे हना मेकोपुकीम आं निसाफ पतीक लोत्र मपामे। मिनु आं फुल्लुम मुशा ब्रेक्शो लोत्र मटीम। आं नाइक्तीक नाक्त ग्रांघ्रा दिशो सेल्लेक्म। मिनु मेकोम आन किकी पिप आन मूर्ति पूजा पाम्तेक्म।

25 गो मेको आन कली फुल्लुम मुशा ब्रेक्शो मरिम्शो लोत्र यो गेतामी। मिनु आं निसाफ पतीक लोत्रम यो मेकोपुकी ब्रॉइने मचाप्बाक्तेक्म।

26 गो मेको आन कली आन चढ़ेशो रे पा ग्रांघ्रा दिशो दुम्चा गेतामी। आन डोंइती जरमेशो मारेइ मारेइ आन रे आं कली चढ़ेचा आ पर्वम मेको आन कली ग्रांघ्रा दिशो दुम्पाइक्तामी। मेकोपुकी हिंशा ग्येत्थ लुक्च दुम्ल, दे मो पाता। मिनु मेकोपुकीम गो परमप्रभु यावे नड, दे तुइक्तेक्म, दे मो पाता” देंत। इजीकीएल १६:२०; प्रस्थान १३:२,१३; प्रस्थान २२:२८

27 मोपतीके ए मुर, इस्राएल आ खिं डा मुरपुकी नु लोत्र पावो। मिनु मेको आन कली “परमप्रभु, परमप्रभु यावेमी इन कली मार देंत देशा हना, इन किकी पिपीम आं कली जोल पा शुक्शी पाइक्तीमी।

28 गो कसम जशा मेको आन कली गेनुड देशो रागीम चाक्तामी। मेकोपुकीम मेकेर लाइशशो डांडा नु शुश सफा पाइशशो रवा ताम्तेक्म। मेकेर आन मार मार चढ़ेम्तेक्म। आं कली गाइक्पाइक्चा कली आन पोक्शो मार मार चढ़ेम्तेक्म। मेकेर आन ब्रॉइशो रिना पाइशशो धूप चोशा, आन तूचा थोत्रक चढ़ेतीक चढ़ेम्तेक्म।

29 मिनु गो मेको आन कली गे इन लशो लाइशशो डांडा मार बाक्बा? दे हिल्लो पातामी। मुल सम्म यो मेको टांउ आं नें बामाह देंसीब” दे परमप्रभु यावेमी देंत। बामाह देंशो लाइशशो डांडा डा थान रुम्सीब।

परमप्रभु आ मुर आन कली पतीके

30 मोपतीके परमप्रभु, परमप्रभु यावेमी इस्राएल आ खिं डा मुर आन कली “गे यो इन किकी पिपी आन खोदेशो पा इन कली ग्रांघ्रा दिशो सेल्लेक्नीनी? मिनु मेको आन ग्रांघ्रा दिशो मूर्ति आन नोले खोइक्नीनी?

31 गेपुकीम मेको आन कली चढ़ेनीनी। गे इन आल आन कली चोशा चढ़ेनीनी। मिनु मुलाक्ती सम्म यो गे इन मूर्ति पूजा पतीकेम आंम इन कली ग्रांघ्रा दिशो सेल्लेक्नीनी बाक्नीनी। ए इस्राएल आ खिं डा मुरपुकी, गो ब्रॉइशा बाक्शो खोदेशो पा, गे आं कली हिल्लो पचा मताइनीनी” दे परमप्रभु, परमप्रभु यावेमी देंत।

32 मिनु परमप्रभुमी “इन थुंम ‘गेपुकी अर्को रागी डा मुर नु अर्को जात डा मुर खोदेशो दुम्चा दाक्नीक’ देंतीनी। गेपुकीमी ‘रागी डा जात जात डा मुर खोदेशो पा शी नु फुल्लु आन कली पूजा पाइब बाक्नीकी’ देंतीनी। तन्न इन मिम्शो गेनायो मजाक्दीप्ब” देंत। प्रस्थान २३:२४

33 परमप्रभु, परमप्रभु यावेमी “गो ब्रॉइशा बाक्शो खोदेशो पा, सक्ति पाइशशो गुइ दिशा चुरशा गो इन कली सासन पाइनुड।

34 गो इन कली सक्ति पाइशशो गुइ दिशा चुरशा इन ब्रशा बाक्शो रागी रागी डा मुर आन दाते रे गुंइशा चाक्नन्नी। मिनु गे इन ब्रशो रागी रे इन कली गुम्पाइक्नन्नी।

35 गो इन कली रागी रागी डा मुर आन गोरशो रागीम चाक्नन्नी। मिनु मेकेर इन कली निसाफ पाइनुड। होसे २:१६

36 डोंइती गो दोपा इजीप्ट डा गोरशो रागीम इन किकी पिपी आन कली निसाफ पडा, मोपा इन कली यो निसाफ पाइनुड। गन्ती १४:२२-२३

37 गो इन कली हिक्शा आं कबल पपाइक्नन्नी। लेवी २७:३२; येरमीया ३३:१३

38 इन दाते डा आं कली मटीब नु मरिम्शो पाइब आन कली तिल्लुडमी। गो मेको आन कली अर्को रागी डा मुर दुम्शा बाक्शो रागी रे गुंइनुडमी। तन्न मेको इस्राएल रागी ओत्रचा मताइनीम। मिनु गेपुकीम गो परमप्रभु यावे नड, दे तुइक्नीनी।

39 ए इस्राएल आ खिं डा मुरपुकी, परमप्रभु यावेमी इन कली ‘लन। गे आं देशो टिचा मदाक्नीनी हना, मुल रे गे नेल्लेम इन इन मूर्ति आन कली पूजा पने। तन्न इन मूर्ति पूजा पतीकेमी आं नें कली गेनायो ग्रांघ्रा दिशो मसेलीन।

40 मारदे हना आं डांडा, इस्राएल डा डांडामी इस्राएल आ खिं डा मुर नेल्लेम आं कली टेयब सेल्लेक्नीम। मिनु गो मेकेर मेको आन कली ब्राइनुडमी। गो मेकेर इन गेशो, इन गेशो नेल्ल क्येडा रिम्शो थोत्रक नु इन चढ़ेशो नेल्ल ताक्नुड। इजीकीएल १७:२३

41 गो इन कली रागी रागी डा मुर आन दाते रे गुंइशा नु इन कली इन ब्रशो रागी रे खुप्शा, ब्रॉइशो रिना पाइशशो धूप खोदेशो पा ब्राइनन्नी। मिनु रागी रागी डा मुर आन डोंइती आं कली तुइक्पाइसीनुड।

42 मिनु गो इन किकी पिपी आन कली गेनुड देंशो इस्राएल रागीम इन कली चाक्नन्नी। मेना गेपुकीम गो परमप्रभु यावे नड, दे तुइक्नीनी।

43 मेकेर गे इन कली ग्रांरा दिशो सेल्व थोत्रक नु मरिम्शो गेय नेल्ल मिम्नीनी। मिनु इन पशो मरिम्शो गेय नेल्ल आन परबं मिम्शा आंम इन कली ग्रांरा दीनीनी। इजीकीएल ३६:३१-३२  
 44 ए इस्राएल आ खिं डा मुरपुकी, गे इन मरिम्शो पतीक नु इन हेथे पशोम ममाड, तन्न आं नें आ परबंम गो इन कली रिम्शो पाइनुड। मिनु गेपुकीम गोन परमप्रभु यावे नड, दे तुइक्नीनी' देनो" दे परमप्रभु, परमप्रभु यावेमी देंत।

दक्खिन आ परबंम लोत्र

45 परमप्रभु यावेमी आं कली लोत्र पाप्तु।

46 मार लोत्र पाप्तु देशा हना "ए मुर, दक्खिन गे कोत्रशा दक्खिन आ परबंम आं लोत्र पावो। मेको दक्खिन नेगेब डा ब्वाकी आ परबंम आं लोत्र पावो।

47 नेगेब डा ब्वाकी कली 'परमप्रभु यावे आ लोत्र नेनो। परमप्रभु, परमप्रभु यावेमी गो इ कली मी सुइक्चा चिक्शो बाक्नुड। मिनु इ गिगी रवा नु सोत्रशो रवा आन कली मेकोम नेक्ब। मेको आ ब्रशो मकाप्ब। मिनु मेकोम पतीके दक्खिन रे उत्तर सम्म डा नेल्ल आन कुल किक्ब।

48 मिनु मुर नेल्लेमी गो, परमप्रभु यावेमी मेको जेत्ताक्ड, दे तुइक्नीम। मेको काप्चा मदुम्ब' देनो" देंत।

49 मिनु गो "परमप्रभु, परमप्रभु यावे, मेकोपुकीम आं परबंम 'मेकोमी कथा ला देशो बाक्ब, ममाड डा?' देंनीम" देंती।

## 21

परमप्रभुम आ तरवार हेश्शो सेल्शो

1 परमप्रभु यावेमी आं कली लोत्र पाप्तु।

2 मार लोत्र पाप्तु देशा हना "ए मुर, यरूसलेम गे कोत्रशा, आं बाक्तीक आ परबंम आं लोत्र पावो। इस्राएल रागी आ परबंम आं लोत्र पावो।

3 मिनु इस्राएल डा खाल्पा आन कली परमप्रभु यावेमी मार लोत्र पाप्तु देशा हना 'गो बारशा, आं तरवार खोत रे शोइश्शा, इन दाते डा ठीक पाइब नु आं अरेशो लोत्र मटीब नेल्ल आन कली साइक्नुडमी।

4 मिनु गो इन दाते डा ठीक पाइब नु आं अरेशो लोत्र मटीब नेल्ल आन कली साइक्नुडमी। मोपतीके दक्खिन रे उत्तर सम्म डा मुर नेल्ल आन परबंम आं तरवार खोत रे ग्रूशो बाक्ब।

5 मिनु मुर नेल्लेम गो, परमप्रभु यावेमीन आं तरवार शोइश्शो बाक्नुड' दे तुइक्नीम। मेको लेंशा मपिम्सीब।

6 मोपतीके ए मुर, हुकयी पावो। जिक्शो थुंम थम श्येत जशा, मेको आन डोंइती हुकयी पावो।

7 मिनु मेकोपुकीम इ कली 'गे मारदे हुकयी पवी' देंतेक्म हना, मेको आन कली 'लोत्र नेंतीके हुकयी पाता। मुर नेल्ल आन थुं बेक्शा लाइब। आन गुड योक्ब। आन थुं ग्येत्थ लुक्य दुम्ब। मिनु मुर नेल्ल आन पोक्च बोल मपाइश्शो दुम्ब। मेको नाक्ती जाक्ना जाकन बाक्ब। मेको थमा पा दुम्ब, दे परमप्रभु यावेमी देशो बाक्ब' दे माइक्मी" दे परमप्रभु यावेमी देंत। इजीकीएल ७:१७

8 परमप्रभु यावेमी आं कली लोत्र पाप्तु।

9 मार लोत्र पाप्तु देशा हना "ए मुर, परमप्रभु यावे आ लोत्र पा, परमप्रभु यावेमी 'तरवार का, तरवार का शेप्शा, हेश्शो सेल्शो बाक्ब। मेको टल्केशो बाक्ब।

10 मेको मुर साइक्चा कली शेप्शो बाक्ब। चिला दाप्शो खोदेशो पा टल्केपपाइक्चा कली शेप्शो बाक्ब। दोपा ग्येरसीने चाप्नीनी? आं मुरपुकीम आं सजाइ गेतीके ममिन्तेक्म।

11 तरवार टल्केपपाइक्चा कली गेशो बाक्ब। मिनु गुडम शेशा, मेको शेप्शा टल्केपपाइश्शो बाक्ब। मेको साइक्ब कली गेशो बाक्ब।

12 ए मुर, डाक्शा रेंका पावो। मारदे हना मेकोम आं मुर आन कली साइक्ब। मेकोम इस्राएल डा पिप आ खिं डा मुर नेल्ल आन कली साइक्ब। मेको नु आं मुरपुकी यो तरवारम साइक्चा पुंडसीनीम। मोपतीके गे इ कुचु तुपो।

13 गे आं गेशो सजाइ ममिन्थु, मेको श्येत मजाक्ब, दे मिम्नीनी' देनो" दे परमप्रभु यावेमी देंत। यसैया १:५

14 मिनु परमप्रभुमी "ए मुर, आं लोत्र पावो। तरवारम खेयप निक्शी खेयप सां सम्म क्योरब। मेको तरवार मारेड मारेड आन कली साइक्चा कली बाक्ब। मेको बोल्यो पा क्योरचा कली बाक्ब। मेकोम एर आंथ नेल्ल रे क्योरब।

15 मोपतीके थुं लुक्य लाइनीम। मिनु शुश गोल्नीम। मेको आन ठेयब लाप्चो नेल्लेमी हुश खाक्श पोक्चा कली तरवार वोइश्शो बाक्ती। मेको चिला दाप्शो खोदेशो पा साइक्चा कली शेप्शो बाक्ब।

16 तरवार, पेरा गे क्योरो। ग्युरा गे क्योरो। तेइ तेइ लावो।

17 मिनु गो यो साइक्ना साइक्न लाइनुड। मिनु आं चुरशो नाइक्नुड। गो, परमप्रभु यावेमीन लोत्र पाता" देंत।

18 परमप्रभु यावेमी आं कली लोत्र पाप्तु।

19 मार लोत्र पाप्तु देशा हना "ए मुर, बेबीलोन डा पिप आ तरवार चाक्चा कली लां निक्शी योत्रडो। मेको लां निक्शी रागी का रे जाक्चा माल्नीस। सहर गे लतीक लां आस डोंइती लां कोंइतीक का वोतो।

20 मेको तरवार जाक्चा कली अम्मोनी आन रब्बाह सहर, यहूदा नु गारो हिरशो यरूसलेम कली लां सेलीन।

21 मारदे हना बेबीलोन डा पिप मेको लां निक्शी गुन्तीकेम राप्ब। तेको लां लचा, दे मेकोमी लिक्चु कोत्रब, ब्रा कली हिम्पाइक्ब। आ खिं डा मूर्ति आन कली हिल्लो पा आ आइदी कोत्रब।

22 मेको आ ग्युरा गुडम यरूसलेम कली बाजी दुम्त। मेकेर गारो डोइक्चा कली शी फुल्लु तेल्ला, लडाइ पचा कली, ग्रीचा कली ठेयब लाप्चो गे शी फुल्लु तेल्ला सहर पुम्चा कली, लाइश्शो खिं सेल्चा माल्नीम। इजीकीएल ४:२

23 तन्न यरूसलेम डा मुर आन कली मेको लिंक्यु कोव्रतीक दूली बाक्त, दे मिन्मीम। मारदे हना मोदेशो मदुम्ब, दे कसम जशो लोव्र नेशो बाक्तेकम। तन्न परमप्रभुम मेको आन मरिम्शो पशो मिम्पाइक्व। मिनु मेको आन कली ग्याइक्पाइक्व।

24 मोपतीके परमप्रभु, परमप्रभु यावेमी मारदे हना इन मरिम्शो पशो मिम्पाइक्तीनी। इन हेंथे पशो नेल्ल तुइक्नीम। इन पशो पाप नेल्ल तांडसीब। गे ग्राइशशा लाइक्चा पुंडसीनीनी।

25 गे काइ मरिम्शो नु आं अरेशो लोव्र मटीब इसाएल डा सासन पाइब इ नाक्त जाक्त। इ नोले डा सजाइ ततीक नाक्त जाक्त।

26 मेको आ पिया रे गुप्तीक पुतीन। मेको आ सिरपेच पुतीन। मुल दुम्शो खोदेशो पा, लेंशा मदुम्ब। आइक्च आन कली ठेयब सेलीन। मिनु ठेयब आन कली आइक्च सेलीन। प्रस्थान २८:४; लूका १८:१४

27 मारेइ मारेइ ब्रेशो बाक्व। मेको गो पाता। मेको मोदेशो गेनायो मदुम्शो बाक्त। मेको सासन पचा कली शिरशो दुम्शा जाक्त हना, मेको कली गेनुड” दैत। उत्पत्ती ४९:१०

28 ए मुर, गे चहिं आं लोव्र पावो। गो, परमप्रभु, परमप्रभु यावेमी अम्मोनी नु मेको आन शुक्शी पशो आ पर्वम मार देनुड देशा हना “साइक्चा कली तरवार शोइशशो बाक्व। साइक्चा कली शेष्शा टल्केशो बाक्व। मेको चिला खोदेशो पा दाप्ब बाक्व। इजीकीएल २५:२-७

29 इन पर्वम जोल पा कौंडतीके ताम्तेकम। इन पर्वम दूली पा लिंक्यु कोव्रतेकम। मेको मरिम्शो पाइब नु परमप्रभु यावे आ अरेशो लोव्र मटीब नु साइक्चा पुंडसीनीम। मेको आन नाक्त जाक्शो मुर आन कली मोदेशो पशो बाक्व। मेको आन नोले डा सजाइ ततीक नाक्त जाक्शो बाक्व।

30 मेको तरवार आ खोतम पिप्तीन। गो इन कली इन जरमेशो रागीम निसाफ पाइनुड।

31 गो आं गाइशशो इन तार मोइक्नुड। आं चुरशो मी मुइशशो खोदेशो पा गो इन तारी मोइक्नुड। गो इन कली साइक्चा कली हुश खाक्श पोक्व नु सांडस जोक्व आन गुडम जिम्मा गेनन्नी।

32 गे मी कली शी दुम्नीनी। इन हुश खपीम शाइक्व। इन कली लेंशा गेनायो ममिन्मीम। मारदे हना गो, परमप्रभु यावेमी एको लोव्र पाता” दैत।

## 22

यरूसलेम आ पाप नु सजाइ

1 परमप्रभु यावेमी आं कली लोव्र पाप्तु।

2 मार लोव्र पाप्तु देशा हना “ए मुर, मार गे मेको निसाफ पाइनेवे? गे मेको हुश खाक्श पोक्व सहर कली निसाफ पाइनेवे? मो हना मेको आ ग्रांरा दिशो गेय नेल्ल आन पर्वम मेको कली शेंदो। इजीकीएल २४:६; इजीकीएल २०:४

3 गे मेको कली “परमप्रभु, परमप्रभु यावेमी इ पर्वम मार दैत देशा हना “ए सहर, गे इ दातेमी हुश खाक्श पोक्तीवी। इ खतम दुम्तीक नाक्त जाक्त। गे मूर्ति सेल्सीशा, ग्रांरा दिशो दुम्ते।

4 गे हुश शाइक्पाइशशा, दोस तशो बाक्नेवे। गे इ सेल्शो देवी देवता रे पा ग्रांरा दिशो दुम्नेवे। इ निसाफ नाक्त जाक्त। मिनु इ बर्स नुपशो बाक्नीम। मोपतीके गो इ कली रागी रागी डा मुर आन दातेम शिशी मताइब नु शुक्शी पाइक्तीक मुर सेल्लन। २राजा २१:१६; इजीकीएल ५:१५

5 ए, हिक्चा मपुंडसीशो नु ग्रांये माग्येम ब्रीशो सहर, इ नेक्था नु डोन बाक्व मुरपुकीम इ कली शुक्शी पाइनीम।

6 मेकेर बाक्शो इसाएल डा पिप आ तौ नेल्लेम आन सक्तिम हुश खाक्श पोक्शो बाक्तेकम।

7 मिनु मेकेरन आल आन आम आफ तशा महिक्नीम। मेकेरन अर्को रागी डा मुर आन कली दिप्नीम। मिनु रोम रोइक्च नु आन वोंडश बेक्शो मीश मुर आन कली मरिम्शो पाइनीम। प्रस्थान २२:२०-२१

8 गे आं थोव्रक आन कली आइक्च मिम्शा, आं नाइक्तीक नाक्त कली ग्रांरा दिशो सेलतीवी।

9 मेकेर मुर आन पर्वम जोल लोव्र पा साइक्पाइक्व मुर बाक्नीम। मिनु डांडा डा थानम चदेशो मार मार जाइब मुर यो बाक्नीम। मेकोपुकीम थम मरिम्शो गेय पाइनीम।

10 मेकेर मुरपुकी आन आफ आन मीश नु इप्नीम। मेकेर मुरपुकी रां ब्रोल्शो मीश मुर नु इप्नीम। लेवी १८:७-८; लेवी १८:१९

11 मेकेर मुरुम आन नेक्था डा मुर आन मीश नु इप्शा ग्रांरा दिशो गेय पाइनीम। मिनु का निक्शीमी आन चाइमी कली बिथोलो पाइनीम। का निक्शीमी आंम आफ आ तमी कली बिथोलो पाइनीम। लेवी १८:२०; लेवी १८:१५; लेवी १८:९

12 मेकेर मुरपुकीम मुर साइक्चा कली घूस ताक्नीम। गे मुर आन कली जेर गेशा आ चाइक्व के यो चाइक्व ताक्नेवे। आंम नेक्था डा मुर आन कली दिप्शा आंम कली रिम्शो दुम्तीक गेय पाइनेवे। गे आं कली प्रेंताक्यी” ‘ दे परमप्रभु, परमप्रभु यावेमी” दैत। प्रस्थान २२:२४

13 मिनु मेकोमी “गे जोल पा मरिम्शो पा क्येट चेम्शो तशा नु इ दातेम मुर साइशशा हुश खाक्श पोक्शो आ पर्वम गो छक लाक्शा थाम्पा ग्रांरा दीती।

14 गो तेको नाक्ती इ कली निसाफ पाइनुडा, मेको नाक्ती गे इ सक्ति महिक्सीथु बाक्बा डा? मार इ गुइ बोल्यो लीनीमी डा? गो, परमप्रभु यावेमी मेको लोव्र पाता। गो मेको पाइनुड।

15 गो इ कली रागी रागी डा मुर आन दातेम एर ऑथ फ्राइनन। मिनु राज्य राज्यम ब्रपाइक्वन। मिनु गो इ आगाम दुम्शो ग्रांरा दिशो गेय नेल्ल क्याम्नुड।

16 मिनु गे रागी रागी डा मुर आन डोंडती महिक्सीशो दुम्नेवे। मिनु गोन परमप्रभु यावे नड, दे तुइक्नेवे” दे परमप्रभु यावेमी दैत।

परमप्रभुमी यपाइकब

17 परमप्रभु यावेमी आं कली लोत्र पाप्तु।

18 मार लोत्र पाप्तु देशा हना “ए मुर, इस्राएल आ खिं डा मुरपुकी आं परबं कस खोदेशो दुम्लो बाकनीम। मेको नेल्ल मार मार यपाइक्तीकेम बाकशो तांबा, टिन, फलाम नु सिसा रे ग्रूशो कस खोदेशो दुम्लो बाकनीम। मेकोपुकी कस खोदेशो ला बाकनीम। यसैया १:२२-२५; येरमीया ६:२८

19 मोपतीके परमप्रभु, परमप्रभु यावेमी ‘गे नेल्ल कस खोदेशो दुम्लोके गो इन कली यरूसलेममी पुकनन्नी।

20 मिनु मुरपुकीमी मी फ्रशा यपाइकचा कली दोपा चांदी, तांबा, फलाम सिसा नु टिन यपाइक्तीकेम कुर पाइनीमी, मोपा गो यो आं गाइशो नु चुरशोम इन कली पुकनन्नी। मिनु कुर पा यपाइकनन्नी।

21 गो इन कली पुकशा, आं चुरशो मी खोदेशो पा इन तार मोइकनुड। मिनु गे मेकेर याइनीनी।

22 दोपा चांदी यपाइक्तीकेम यपाइक्तीमी, मोपा गो इन कली यपाइकनुड। मिनु गेपुकीम गो परमप्रभु यावेमीन आं चुरशो इन तार मोइकता, दे तुइक्तीनी’ देनो” देत।

इस्राएल डा ठेयब मुर आन पाप

23 मिनु परमप्रभु यावेमी आं कली लोत्र पाप्तु।

24 मार लोत्र पाप्तु देशा हना “ए मुर, एको रागी कली गे आं गाइक्तीक नाक्त रेउम मशेकशो, ग्रान्ना दिशो रागी बाकनेवे।

25 मेकेर बाकब पिप आ तौ आन सिखार ग्याइशो डरर डरर पाइब गुप्स खोदेशो बाकनीम। मेकोपुकीम मुर आन कली नेक्तेकम। शोप नु शुश क्येट लाइब, मार मार रोइक्ताकम। मिनु मेको आन दाते डा शुश मीश मुर आन कली वोंइश बेकशो मीश मुर सेल्लेकम। इजीकीएल ३४:३,८; सेफन्याह ३:३; भजन संग्रह १४:४

26 मेको आ च्हेबपुकीम आं शेशो लोत्र प्रोइतेकम। आं थोवकपुकी ग्रान्ना दिशो सेल्लेकम। मेकोपुकीम आं मार मार मुर आन थोवक खोदेशो सेल्लेकम। मेकोपुकीमी मार ग्रान्ना दिशो नु मार ग्रान्ना मदिशो बाकनीमी, मेको मशेदेम। मेकोपुकीम आं नाइक्तीक नाक्त प्रेताकम। मोपा गो मेको आन दातेम महिक्सीशो दुम्लो बाकनुड। सेफन्याह ३:४; इजीकीएल ४४:२३; मती २३:२५; लेवी १०:१०

27 मेकेर बाकब आन ठेयब मुर नेल्ल फर खोदेशो बाकनीम। मेकोपुकीम सिखार ग्यारनीम। मुर आन कली साइक्तीम नु क्येट तचा कली मुर आन कली खतम सेल्लनीम।

28 मेको आं लोत्र पाइबपुकीम ‘गो कोइतीक ताता’ देखु पा, जोल पा शेनीम। मेको आन पशो मरिम्लो नेल्ल बुलु ब्रुइशो खोदेशो पा सुन्नीम। मेकोपुकीम गो मारेड मदेशु ‘परमप्रभु, परमप्रभु यावेमी आं देत’ दे फश लोत्र पाइनीम।

29 मिनु मेको रागी डा मुरपुकीम गेन कि गेन, दे क्येट लाइक्तीम। मेकोपुकीमी मार मार रोइक्तीम। मेकोपुकीम प्रुडग नु मारेड मथीब आन कली दिप्नीम। मिनु अर्को रागी डा मुर आन कली दला दाक्स पाइनीम।

30 मिनु गो मेको आन दातेम गारो प्रोत्रशा गेब नु रागी मक्यामदुल, दे रागी आ परबं आं डोंइती राकब मुर का माल्ता, तन्न मथिदु। इजीकीएल १३:५

31 मोपतीके गो आ गाइशो मेको आन तार मोइकनुड। आं चुरशो मीमी मेको आन कली खतम सेल्लुडमी” दे परमप्रभु, परमप्रभु यावेमी देत। इजीकीएल २१:३६

## 23

मरिम्लो पाइब वोबु निक्शी

1 परमप्रभु यावेमी आं कली लोत्र पाप्तु।

2 मार लोत्र पाप्तु देशा हना “ए मुर, रागी काम मीश मुर निक्शी बाक्ताक्स। मेको ममा का आ तमी बाक्ताक्स।

3 मेको निक्शी इजीप्त रागीम तेल्लेम दुम्लाक्स। मेको निक्शी ठिटी दुम्लानु, तेल्लेम पचा गोम्लाक्स। मेको रागीम मेको आस कुचु थिम्तेकम। मिनु मेको निक्शी कन्ने बाक्सानु, आस दूध थिचा पुंडसाक्स।

4 मिनु दिदी आ नें ओहोला नु आ लोकब आ नें ओहोलीबा बाक्ता। मेको निक्शी आं के दुम्लो बाक्ताक्स। मिनु मेको निक्शीमी तमी तौ थिम्ताक्स। मेको आस नें आ अर्थ मार बाक्ता देशा हना, ओहोला सामरीया नु ओहोलीबा यरूसलेम बाक्ता।

5 मिनु ओहोला आं के दुम्ला, यो तेल्लेम पाप्तु। मेकोमी अस्सुर डा लडाइ पाइब आन कली खोइक्ता।

6 मेको नीलो वा फेकशो लडाइ पाइबपुकी, हुकुम पाइबपुकी, लडाइ पाइब आन कप्तानपुकी, मेको नेल्ल दारशो ठिटा शारा डोइशशा गाकबपुकी बाक्तेकम।

7 मेकोमी मेको आन कली दाक्शा, मेकोपुकी नु तेल्लेम पाप्तु। मेको अस्सुर डा योत्रशो नु दारशो मुर बाक्तेकम। मिनु मेकोपुकी नु इप्शा, मेको आ माल्लो वोंइश मुर आन मूर्ति नेल्लेम आंम कली ग्रान्ना दिशो सेल्लाकव।

8 मेकोम इजीप्त रागीम पशो तेल्लेम गेय मप्रोन। मारदे हना मेको ठिटी बाक्मेनु, मुरपुकी मेको नु इप्तेकम। मिनु मेकोपुकीमी आ कुचु थिम्तेकम। मिनु आन दाक्शो मेको नु पाप्तेकम। २राजा १७:४

9 मोपतीके गो मेको कली आ दाक्शो अस्सुर डा मुर आन गुडम गेता। मेको, मेकोपुकी नु दाक्मशो बाक्ता।

10 मिनु मेकोपुकीमी मेको कली शिन्ना सेल्लेकम। मिनु मेको आ तमी तौ आन कली ग्याइक्ताकम। मिनु मेको कली तरवारम साइक्तेकम। मेकोम सजाइ ताप्तु। मेको मीश मुर आन दातेम शुक्शी पाइकचा पुंडसीब दुम्लत।

11 मिनु मेको आ लोकब ओहोलीबामी मेको ताप्तु। तन्न मेकोम आ तेल्लेम पतीक नु खोइक्तीकेम आ दिदी क्येडा यो लाक्ता।

12 मेको यो अस्सुर डा मुर आन कली हुकुम पाइब, कप्तान, या कुरशा लडाइ पाइब नु शारा डोइक्ब बाक्तेकम। मेको दारशो ठिटा आन नोले खोइक्तु।

13 मिनु गो मेको यो ग्रांरा दिशो दुम्शो ताता। मेको निम्फा लां कामीन गाक्ताक्स।

14 तन्न मेकोम आ तेल्लेम पतीक डोंडती क्येडा शुश बारपाइक्तु। मेकोम गारोम मुशा सेल्शो वोंइश मुर आन नकसा ताप्तु। मेको लल रडम सेल्शो कल्दी आन नकसा बाक्तेकम।

15 आन क्रातोम किप्शुर क्यिप्शो नु आन पियाम रोम्सीशो फेटा रुक्शो, नेल्ल टेयब मुर खोदेशो तांइसीशो बाक्तेकम। मेको बेबीलोनम बाक्शो कल्दी डा मुर बाक्तेकम।

16 मिनु मेकोम मेको आन कली तशा, मेको आन कली दाक्शा कल्दी रागीम लोत्र कुरब मुर सोइक्ताक्व।

17 मिनु बेबीलोन डा मुरपुकी मेको आ बाक्तीकेम मेको नु इप्थ जाक्तेकम। मिनु आन दाक्तीकेम मेको कली ग्रांरा दिशो सेल्तेकम। मिनु मेकोपुकी रे ग्रांरा दिशो दुम नोले, मेको आन क्येडा रूशा, आ थुं लेत्ताक्व।

18 मोपा मेकोम नेल्लेम तचा डा पा तेल्लेम पा, आ शिन्ना रं नेल्ल आन कली कोंइताक्व। मिनु गो मेको आ दिदी कली खोदेशो पा, मेको कली यो ग्रांरा दिशा प्रोंइता।

19 मो हना यो मेकोम इजीप्तर रागीम ठिटी बाक्म ना डा तेल्लेम पशो मिम्शा आ तेल्लेम पतीके शुश बारपाइक्तु।

20 मेको मेकेर डा आ माल्शो मुर आन कली दाक्ताक्मी। मेको आन माल्शो मुरपुकी गधा नु शारा खोदेशो बाक्तेकम।

21 मो हना यो गे इजीप्तर रागीम इ कुचु थिशो इ ठिटी ना डा मरिम्शो पशो नाक्ती मिम्ताक्वी” दैत।

ओहोलीबामी सजाइ तशो

22 मोपतीके ए ओहोलीबा, परमप्रभु, परमप्रभु यावेमी “डोंडती गो इ कली सजाइ गेनुड। मिनु इ कली दाक्शा, ब्रीशो मुर आन कली सजाइ गेनुड। मिनु मेको मुर आन कली इ पबंम एर ओंथ रे पोक्नुड।

23 मेको बेबीलोन डा मुर नु कल्दी डा मुर नेल्ले, पेकोद, शोआ नु कोआ डा मुर, अस्सुर डा मुर नेल्ल, मेको नु बाक्शो दारशो ठिटा, हुकुम पाइब, कप्तान नु लडाइ पाइब, मेको नेल्ल नु शारा डोइक्ब नेल्ल आन कली इ पबंम पोक्नुडमी।

24 मेकोपुकी गे नु लडाइ पचा कली उत्तर रे पा बग्गी नु शुश लडाइ पाइब नु जाक्नीम। मेकोपुकीमी टेयब नु आइक्च तेक्तीक कुरशा, फलाम के गुक्तीक गुक्शा, इ कली पुम्नीम। मिनु गो इ कली सजाइ गेपाइक्चा कली मेको आन गुडम गेनन। मिनु मेकोम आन कानुन कोव्रशा इ कली सजाइ गेनीम।

25 गो आं गाइश्शोमी इ कली सजाइ गेपाइक्नुड। मिनु मेकोपुकी गे नु गाइश्शा चुरशा इ कली खतम पोक्नीम। मिनु मेकोपुकीम इ नें नु इ नोफा खोइक्नीम। मिनु इ लीशो मुर तरवारम साइक्चा पुंइसीनीम। मेकोपुकीम इ तमी तौ आन कली ग्याइश्शा लाइक्नीम। इ लीशो मुर मीम दुप्शा बेक्नीम।

26 मेकोपुकीम इ वा प्रुइश्शा शिन्ना सेल्नीम। मिनु इ दारशो गहनापुकी रोइश्शा लाइक्नीम।

27 मोपा गो इ इजीप्तर रागीम गोशो तेल्लेम पतीक थुम्पाइक्नुड। गे मेको आन कली ममाल्थु, इजीप्तर रागी कली ममिम्नेवे” दे परमप्रभु यावेमी दैत।

28 मिनु परमप्रभु, परमप्रभु यावेमी “गो इ कली इ काइ मदाक्शो मुर आन गुडमी गेनुड। गे डोंडती मेको आन क्येडा रूशा, इ थुं लेशो बाक्ते।

29 मिनु मेकोपुकीमी इ काइ मदाक्शो गेय पाइनीम। इ गेय पा तशो मारेइ मारेइ योल्शा, इ कली शिन्ना सेल्शा प्रोंइनीम। मिनु शिन्ना दुम्तीके इ तेल्लेम पशो नेल्ल तुंइसीब। इ ग्रांरा दिशो पशा, तेल्लेम पतीके गे मोदेशो दुम्नेवे।

30 मारदे हना गे रागी रागी नु तेल्लेम पा, गे मेको आन मूर्ति रे पा ग्रांरा दिशो सेल्साक्वे।

31 गे इ लोकब खोदेशो पाप्तीवी। मोपतीके गो मेको कली गेशो श्येत इ कली गेनन” दे परमप्रभु यावेमी दैत

32 परमप्रभु, परमप्रभु यावेमी “गे इ लोकब आ कचौरा तूचा माल्नेवे। मेको टेयब श्येत जतीक बाक्ब। गे फाल्ने मचाप्चा डा शुक्शी पाइक्चा पुंइसीब दुम्नेवे। मारदे हना इ श्येत टेयब दुम्ब।

33 गे दुक्शो दुम्शा सुर्ता पतीकेमी ब्रीनेवे। मेको इ लोकब सामरीया आ कचौरा शुश हिंतीक नु मुर मबाक्तीक बाक्ब। यसैया ५१:१७

34 मिनु इ लोकब खोदेशो दुम्नेवे, गे मेको श्येतथ मदुम सम्म तूनेवे। मिनु मेको कचौरा आ दुक्का नाक्नेवे। मिनु गे इ दूध रेल्नेवे। मारदे हना गो एको लोत्र पाता” दे परमप्रभु, परमप्रभु यावेम दैत।

35 मोपतीके परमप्रभु, परमप्रभु यावेमी “गे आं कली प्रेंताक्वी। मिनु आं कली प्रोंइती। मोपतीके गे इ ग्रांरा दिशो गेय नु तेल्लेम पशो आ पबंम सजाइ ताइक्नेवे” दैत। येरमीया २:३२

वोबु निम्फामी सजाइ तशो

36 मिनु परमप्रभु यावेमी आं कली “ए मुर, गे ओहोला नु ओहोलीबा आस कली निसाफ पाइनेवे? मो हना मेको निक्शी आस पशो ग्रांरा दिशो गेय आन पबंम मेको आस कली तुइक्पतो। इजीकीएल २०:४इजीकीएल २०:४

37 मारदे हना मेको निक्शीम हेंथे पाम्ताक्स। मिनु मेको आस गुडम हुश खाक्श पोक्ताक्स। मेकोमी आस मूर्ति नु हेंथे पाम्ताक्स। मेको निक्शीम आं कली जरमेशो आस तमी तौ आन कली, मूर्ति आन कली ब्वचा गेचा कली क्योरशा चढ्मेताक्स। इजीकीएल १६:२०

38 मेको निक्शीम आं कली मार पाम्ताक्स देशा हना, आं बाक्तीक ग्रांरा दिशो सेल्ताक्स। मिनु आं नाइक्तीक नाक्त कली अर्को नाक्त खोदेशो पा सेल्ताक्स। इजीकीएल ८:५-१८

- 39 तेको नाक्ती मेको आस आल आन कली मूर्ति आन कली क्योरशा चढ्मेसे, मेको नाक्तीन आं बाक्तीकेम ओव्रताक्स। मिनू ग्रांघा दिशो सेल्लाक्स। मेको निक्शीम आं खिम मोदेशो गेय पाम्ताक्स।
- 40 मेको निक्शीम डोन डा मुर आन कली लोत्र कुरब मुर सोइश्शा, ब्रेल्लाक्से। मिनू मेकोपुकी जाक्तेक्म। मिनू गे मेको आन पर्वम चिक्शा शोप्या इ मिक्चीम गाजल खेक्साक्वे। मिनू गहना पांइशा आंम कली ग्योम्साक्वे।
- 41 गे आंम दारशो खाटम बाक्ते। मिनू मेको आ डोंइती आं धूप नु तेल वोइक्तीवी।
- 42 मिनू सहरम ठेयब ग्येरसीशो रेयके दुन्त। मिनू गोरशो रागी रे चाक्शो दुक्शो मुरपुकीमी मेकेर डा मीश मुर आन कली चुरा लिक्ताक्म। मिनू आन पियाम दारशो सुन फू चुइक्ताक्म।
- 43 मिनू गोरशो रागी रे जाक्शो मुरपुकी मेको तेल्लेम पचा रूशो मीश मुर नु इप्तेक्म।
- 44 मारदे हना मेकोपुकी तेल्लेम का नु इप्शो खोदेशो पा इप्तेक्म। ओहोला नु ओहोलीबा नु इप्शो मुर खोदेशो पा जाक्तेक्म।
- 45 तन्न ठीक निसाफ पाइबम मेको आस कली 'नाता खोइक्ब, हुश खाक्श पोक्शो आ पर्वम दोस ताइनीस' मारदे हना मेकोम हेंथे पा आस गुडम मुर साइश्शो हुश बाक्ब" देत। इजीकीएल १६:३८,४०
- 46 मिनू परमप्रभु, परमप्रभु यावेमी "मेको आस पर्वम ग्रांघे मांघे पोक्ब हुल का पोक्कीन। मिनू मेको आस कली शुश हिंपाइश्शा मारेइ मारेइ रोइश्शा लतीन।
- 47 मिनू मेको ग्रांघे मांघे पोक्ब हुलपुकीम मेको आस कली फुल्लु आप्नीम। मिनू तरवारम क्योरशा साइक्नीम। मिनू मेकोपुकीम मेको आस तमी तौ आन कली साइक्नीम। मिनू मेको आन खिम मी सुइक्नीम।
- 48 मोपा गो रागीम मेको ग्रांघा दिशो गेय थुम्पाइक्नुड। एको इ खोदेशो मपामेक्ल। मीश मुर नेल्ल आन कली हिंच कोंइतीक दुम्ब।
- 49 गे इ ग्रांघा दिशो गेय आ पर्वम सजाइ ताइनेवे। मिनू इ मूर्ति पूजा पशो पाप राइनेवे। मिनू गोन परमप्रभु यावे नड, दे तुइक्नेवे" देत।

## 24

यरूसलेम खिया जोशो ग्योंब दुम्शो

- 1 मिनू ग्याइश्शा लाइक्चा पुंडसीशो आ ९ बर्स डा १० महिना डा १० नाक्ती परमप्रभु यावेमी आं कली लोत्र पाप्तु। रराजा २५:१
- 2 मार लोत्र पाप्तु देशा हना "ए मुर, मुलाक्ती तेको बर्स नु तेको नाक्ती बाक्बा, मेको ब्रेक्शा वोतो। मारदे हना मुलाक्ती बेबीलीन डा पिपम यरूसलेम कली पुम्शो बाक्ब।
- 3 एको मटीब खिं डा मुर आन कली, एको कथा नेंपाइक्मी। परमप्रभु, परमप्रभु यावेमी मार देब देशा हना 'मी तार ग्योंब कादीन। मिनू मेकेर ब्वाक्कु लुक्तीन। इजीकीएल ११:३
- 4 मिनू मेकेर श्ये कुर पने। रिम्शो रिम्शो श्ये, आ फिला डा नु कुथु डा श्ये कुर पने। रिम्शो रुशेम प्रिदीने।
- 5 बगाल डा नेल्ल क्येडा रिम्शो क्यारश भेडा योव्रशा चाक्कीन। मेको आ आगाम शी प्रोव्रडीन। मिनू मेकेर बुइक्पाइश्शा रुश क्येने" देत।
- 6 मोपतीके 'आबी आबी, एको हुश खाक्श पोक्ब सहर, मेको आ खिया ग्योंब आगाम बाक्ब। मेको आ खिया मेकेर रे मलशो बाक्ब। मेको कली फेन्टे मआप्यु, श्येत्थ पोक्कीन। इजीकीएल २२:२; नहुम ३:१
- 7 मारदे हना मेको आ हुश शाइक्पाइश्शो मेको आ दातेमीन बाक्ब। मेकोम मेको हुश श्येत्थ फुल्लु तार शाइक्पाइश्शो बाक्ब। मिनू खपीम मसुम्शो बाक्त।
- 8 गो चुरशा क्येक्क लेत्चा कली, मेको आ शाइक्पाइश्शो हुश मसुमल, दे श्येत्थ फुल्लु तार शाइक्पाइक्ता' दे परमप्रभु, परमप्रभु यावेमी देत।
- 9 मिनू 'आबी आबी, मेको हुश खाक्श पोक्ब सहर, गो यो शी शुश तेल्नुड।
- 10 मोपतीके शी तेल्ला मी सुइक्तीन। मस्ला सुष्शा रिम्शो पा बुइक्पाइश्शा श्ये क्येने। मिनू रुश नेल्ल किक्मल।
- 11 मेको नोले मेको ग्योंब श्येत्थ सेल्शा मी तार कादीन। मिनू मेको होल। मिनू मेको आ तांबा लल दुम्ल। मेको आ आगा डा ग्रांघा दिशो नु खिया यशा लल। मिनू मीम नेक्गल।
- 12 आं सुर्ता पशो नेल्ल मोशीन दुन्त। मेको आ थांइशो खिया मीम यो मला।
- 13 मिनू गो इ कली इ ग्रांघा दिशो गेय रे गुंइशा ग्रांघा मदिशो सेल्चा माल्ता। तन्न गे ग्रांघा मदिशो म्दुमे। मोपतीके गो गेना सम्म आं गाइश्शो नेल्ल इ तार मोइश्शा, आं थुं मनाइक्पाइक्नुडा, मेना सम्म गे ग्रांघा मदिशो सेल्चा मपुंडसीनेवे। इजीकीएल ५:१३
- 14 गो, परमप्रभु यावेमी एको लोत्र पाता। गो आं गेय पतीक नाक्ती जाक्शो बाक्ब। गो नोले मशोंइसीनुड। गो इ कली सुर्ता मपथु, शिशी मपाइक्नुड। इ पशो खोदेशो पा इ कली निसाफ पाइनुड" दे परमप्रभु, परमप्रभु यावेमी देत। येरमीया १३:१४

इजीकीएल आ मीश बेक्शो

- 15 परमप्रभु यावेमी आं कली लोत्र पाप्तु।

16 मार लोत्र पाप्तु देशा हना "ए मुर, गो याम काम इ नेल्ल क्येडा दाक्शो मुर लाइक्चा चिक्शो बाक्नुड। मो हना यो गे रोंका मपावो। मडाक्को। मिनू इ मिक्च रे प्रेक्कु यो मतोक्को।

17 सिक्सी पा बाक्शा हुकयी पावो। बेक्शो मुर आ पबर्म रोंका मपावो। इ पियाम फेटा रुक्सो। खोइलीम जुता लिक्सो। इ कुल मसुम्सो। मलामी आन जचा थोव्रक मजावो” दैत। मीका ३:७; होसे ९:४

18 मोपतीके गो मेको लोव्र सुनी कना मुर आन कली माडक्तामी। मिनु मेको नाकदो आं मीश बेक्ट। मिनु आ दीसा सुनी गो मार माडक्चा पुंडसीशो बाक्डा, मेकोन पाता।

19 मिनु मुरपुकीम आं कली “एको आ अर्थ मार बाक्बा? मार गे आंड कली मशेंनीनी?” दैतेक्म।

20 मिनु गो मेको आन कली “परमप्रभु यावेमी आं कली लोव्र पाप्तु।

21 मार लोव्र पाप्तु देशा हना ‘इसाएल आ खिं डा मुर आन नेल्ल क्येडा दाक्शो, इन सक्ति, इन कोव्रत दाक्शो नु थुंम दाक्शो आं बाक्तीक गो ग्रंथा दिशो सेल्लुड। मिनु इन प्रॉइशा वोइशो इन तमी तौ तरवारम साइक्चा पुंडसीनीम

22 मिनु आं पशो खोदेशो पा गेपुकीम यो पचा माल्लीनी। गे इन कुल मसुमीन। मिनु मलामी आन जचा थोव्रक मजने।

23 गे इन फेटा रुक्चा माल्लीनी। मिनु इन जुता लिक्चा माल्लीनी। गेपुकीम रोंका मपने। मडाक्कीने, तन्न इन मरिम्शो पतीकेम इन रॉ सोव्रशा लाइनीम। मिनु इन दातेम हुकयी पचा माल्लीनी। ब्यक्स्था २६:३९-४०

24 मोपा इजीकीएल गे इन कली चिन्ड का दुम्ब। मेकोम पशो खोदेशो पा गे यो पचा माल्लीनी। मिनु एको लोव्र गाम्मेनु, गोन परमप्रभु, परमप्रभु यावे नड, दे तुइक्नीनी’ देशो बाक्ब” दैत। इजीकीएल १२:६,११

25 मिनु “ए मुर, मेको नाक्ती गो मेको आन खुइशशा बाक्तीक, आन नेल्ल क्येडा दाक्शो, आन सक्ति, आन कोव्रत दाक्शो नु आन थुंम दाक्शो नु आन तमी तौ नेल्ल आन कली लाइनुडमी।

26 मेको नाक्ती प्रोक्शो मुर का इ बाक्तीक जाक्शा इ कली एको लोव्र नेल्ल नेंपाइक्ब। इजीकीएल ३३:२१

27 मेना गे ब्वाक्ने चाप्नेवे। मिनु गे मेको नु लोव्र पाइनेवे। मिनु गे सिक्सी पा मबाक्नेवे। मोपा गे मेको आन कली चिन्ड का दुम्नेवे। मिनु मेकोपुकीम गोन परमप्रभु यावे नड, दे तुइक्नीम” दैत।

## 25

अम्मोनी आन कली लोव्र पशो

1 परमप्रभु यावेमी आं कली लोव्र पाप्तु।

2 मार लोव्र पाप्तु देशा हना “ए मुर, अम्मोनी गे कोव्रशा, मेको आन पबर्म आं लोव्र पावो।

3 अम्मोनी आन कली ‘परमप्रभु यावे आ लोव्र नेनीन। परमप्रभु, परमप्रभु यावेमी इन कली मार देंब देशा हना, आं बाक्तीक ग्रंथा दिशो सेल्मेनु, इसाएल रागी मुर मबाक्तीके सेल्मेनु नु यहूदा आ खिं डा मुर ग्याइशशा लाइक्चा पुंडसमानु, गेपुकी ग्येरसाक्नी। इजीकीएल ३६:२; बिलाप २:१६

4 मोपतीके गो इन कली पूर्व डा मुर आन कली गेनन्नी। मिनु मेकोपुकीम इन दातेम आन लडाइ पाइब आन बाक्तीक सेल्लीम। मिनु इन दातेमीन आन ताम्बु कीनीम। मेकोपुकीम इन फल फुल जाइनीम। मिनु इन दूध तूनीम।

5 गो रब्बाह सहर कली दलओठ जोतीक नु अम्मोन कली क्यारश भेडा आन गोठ सेल्लुड। मेना गेपुकीम गोन परमप्रभु यावे नड, दे तुइक्नीनी’ ” दैत।

6 मारदे हना परमप्रभु यावेमी “गेपुकी इसाएल रागी आ पबर्म इन गुड फ्रोक्शा, खोइल थाइशो बाक्तीनी। मिनु इन थुंम ईख कुरशो नेल्ल गुइशा ग्येरसाक्नी।

7 मोपतीके गो आं गुइ गे इन पबर्म क्युकनुड। मिनु गो इन कली रागी रागी डा मुर आन गुइम गेनुड। मिनु गो जात जात डा मुर आन दाते रे इन नें क्याम्नुड। मिनु गो इन कली रागी नेल्ल रे क्याम्नुड। गो इन कली खतम पोक्नन्नी। मेना गेपुकीम गोन परमप्रभु यावे नड, दे तुइक्नीनी” दैत।

मोआबी आन कली लोव्र पशो

8 मिनु परमप्रभु, परमप्रभु यावेमी “मारदे हना मोआब रागीम ‘यहूदा आ खिं दा अर्को जात डा मुर आन खिं खोदेशो दुम्शो बाक्ब। यसेया १५:-; १६:-; येरमीया ४८:-

9 मोपतीके गो मोआब रागी डा सांद डा सहर रे गोशा बेथ-येशीमोथ, बाल-मेओन नु किरयथ-थाइम रागी रोकसीशो सेल्लुड।

10 गो मोआबी, अम्मोनी नु पूर्व डा मुर आन गुइम गेनुडमी। मिनु रागी रागी डा मुर आन दातेम अम्मोन कली सुइम ममिम्नीम।

11 मिनु गो मोआब कली निसाफ पा सजाइ गेनुड। मेना मेकोपुकीम गोन परमप्रभु यावे नड, दे तुइक्नीम’ देशो बाक्ब” दैत।

एदोमी आन कली लोव्र पशो

12 परमप्रभु, परमप्रभु यावेमी “एदोम रागीम यहूदा आ खिं डा मुर आन कली क्येक्क लेत्ताक्ब। मोपतीके मेको थाम्पा दोस ताइब दुम्त। इजीकीएल ३५:-; येरमीया ४९:७-२२; आमोस १:११-१२; ओबदिया १:-; भजन संग्रह १३७:७

13 गो आं गुइ एदोम आ पबर्म क्युकनुड। मिनु मेकेर डा मुर नु बी ब्यफ, क्यारश भेडा नेल्ल आन कली साइकुडमी। मिनु गो मेको कली मुर मबाक्तीके सेल्लुड। मिनु तेमान रे देदान सम्म डा मुर नेल्ल तरवारम साइक्चा पुंडसीनीम।

14 गो आं मुर इसाएल रे पा एदोम कली क्येक्क लेत्नुड। मिनु मेकोपुकीम आं गाइशो नु आं चुरशो खोदेशो पा एदोम कली पाइक्नीम। मिनु मेकोपुकीम आं गाइशो नु चुरशो खोदेशो पा क्येक्क लेत्नीम। मिनु मेकोपुकीमी परमप्रभु, परमप्रभु यावेमी क्येक्क लेशो बाक्ब, दे तुइक्नीम” दैत।



पलिस्ती आन कली लोव्र पशो

15 परमप्रभु, परमप्रभु, यावेमी “मारदे हना पलिस्तीपुकीम गेना हना यो जोरी सत्रु दुम्शा, क्येक्क लेत्ताक्म। आन थुंम ईख कुरशा, क्येक्क लेशशा खतम सेल्लेक्म। यसैया १४:२९-३२; येरमीया ४७:-; आमोस १:६-८; सेफन्याह २:४-५

16 मोपतीके गो पलिस्ती आन परबम आं गुड क्युकनुड। मिनु गो केरेथी आन कली साइक्नुडमी। मिनु समुन्द्र आ नेक्था डा बाक्तीक नेल्ल खतम सेल्लुड।

17 गो मेको आन कली आं चुरशोम ठेयब सजाइ गेशा थाम्पा क्येक्क लेत्तुडमी। मिनु गो मेको आन कली क्येक्क लेत्तुनु, मेकोपुकीम गोन परमप्रभु यावे नड, दे तुडक्नीम, देशो बाक्ब” दैत।

## 26

टायर सहर कली निसाफ पशो

आमोस १:९-१०; यसैया २३:-

1 मिनु ग्याइश्शा लाइक्चा पुंडसीशो ११ बर्स डा महिना डा डोंइती डा नाक्ती परमप्रभु यावेमी आं कली लोव्र पाप्तु।

2 मार लोव्र पाप्तु देशो हना “ए मुर, यरूसलेम श्येत जशो तशा, टायर सहर ग्येरसीशो बाक्त। मेकोमी ‘आं डोंइती ठेयब लाप्चो ब्रेशो बाक्ब। मेको लाप्चो आं कली रोक्सीशो बाक्ब। मुल मेको जाम्शा लत। मुल आं कली रिम्शो दुम्ब’ ” दैत। इजीकीएल २५:३

3 मोपतीके परमप्रभु, परमप्रभु यावेमी “कोव्रडो, ए टायर सहर गो इ कली सजाइ गेनुड। इ कली समुन्द्र आ छाल पोक्शो खोदेशो पा गो शुश रागी डा मुर इ परबम पोक्नुडमी।

4 मेकोपुकीम टायर डा गारो प्रेत्नीम। मिनु मेको आ लाइश्शो खिं खोल्नीम। गो मेको आ खप खोरशा श्येत्थ फुल्लु खोदेशो सेल्लुड।

5 टायर सहर समुन्द्र आ दातेम ग्याइल आप्तीक दुम्चा माल्ब, दे गो, परमप्रभु, परमप्रभु यावेमी एको लोव्र पाता। मेको सहर रागी रागी डा मुर आन रोइक्तीक दुम्ब।

6 मिनु मेको आ एर ओंथ डा सहर डा मुर तरवारम साइक्चा पुंडसीनीम। मेना मेकोपुकीम गोन परमप्रभु यावे नड, दे तुडक्नीम” दैत।

7 मिनु परमप्रभु, परमप्रभु यावेमी “गो उत्तर रे बेबीलोन डा पिप नेबुकदरेसर कली शारा, बग्गी, शारा डोइक्ब लडाइ पाइब नु ठेयब हुल बोल्यो लडाइ पाइब, टायर नु लडाइ पपाइक्थ चाक्नुड। येरमीया २७:६; दानीएल २:३७

8 मिनु एर ओंथ डा सहर डा मुर नेल्ल तरवारम साइक्चा पुंडसीनीम। मेको बेबीलोन डा लडाइ पाइबपुकीमी सहर कली पुन्नीम। गारो डोइक्तीक सेल्नीम। मिनु तेक्तीक कुरशो शुश लडाइ पाइब इ गे बारनीम।

9 मिनु पिप नेबुकदनेसरमी मुडांम गारो ब्रेण्ब आन कली अरेब। मिनु इ लाइश्शो खिं आ खापुकीम प्रेत्नीम।

10 मेको आन शुश शाराम पोक्शो फुरकुम इ कली सुम्ब। शारा डोइक्ब नु बग्गी आन गुगील आन रेयकेम इ गारो हिम्पाइक्ब। नेबुकदनेसर इ लाप्चो रे ओव्रमनु, प्रेशो गारोम हिरशो सहर खोदेशो पा ओव्रब।

11 मेको आ शारा थाम गेंचम इ सहर डा लां नेल्ल दिम्शा ताइश्शा पाइनीम। मिनु मेकोमी इ मुर आन कली तरवारम साइक्ब। मिनु इ बोल्यो थाम खपीम गोल्नीम।

12 मेकोपुकीम इ शोप रोइश्शा योल्नीम। इ लेयचा कली वोइश्शो थोव्रक रोइश्शा लाइक्नीम। मेकोपुकीम इ गारो नु इ दारदारशो खिं प्रेशा खतम पोक्नीम। मिनु इ फुल्लु, खिं सेल्लेक्तीक शी नु खप समुन्द्रम ताइक्नीम।

13 गो इ कुम्सो थुम्पाइक्नुड। इ बीना ताप्शो लेंशा मनेंसीब। आमोस ५:२३

14 गो इ कली श्येत्थ फुल्लु सेल्लुड। गे ग्याइल आप्तीक दुम्नेवे। इ कली लेंशा गेनायो मसेल्नीम। मारदे हना गो, परमप्रभु यावेमी एको लोव्र पाता” दे परमप्रभु, परमप्रभु यावेमी दैत।

15 परमप्रभु, परमप्रभु यावेमी टायर सहर कली “लडाइ पा, गार दुम्शो आन हुकयी पशो इ गोल्शो रेयकेम समुन्द्र आ नेक्था डा सहर आन कली हिम्पाइक्ब।

16 मेना समुन्द्र आ नेक्था डा सहर आन कली सासन पाइब आन ठेयब निल्लेक्तीक रे बोक्शा तोइश्शा, बुटा आप्शो वा पुडक्नीम। मेकोपुकी हिंशा खिंखि पशा, खपीम निश्शा, हिम्सीनीम। मिनु इ कली तशा हिंनीम।

17 मिनु मेकोपुकीम सहर आ परबम रोका पाइनीम। मिनु सहर कली ‘गे समुन्द्र रे क्याम्चा पुंडसाक्वे। ए दारशो सहर, गो नु इ मुरपुकी समुन्द्र डा सक्ति पाइश्शो बाक्तीनी। मेकेर बाक्ब नेल्ल आन कली गे हिंपाइश्शा थिर थिर पपाइश्शो बाक्ते।

18 मुल गे जाम्शा लवे नाक्ती समुन्द्र आ नेक्था डा रागी डा मुरपुकी खिंखि पाइनीम। इ गोल्शा लशो खतम दुम्शो तशा समुन्द्र आ नेक्था डा रागी हिंनीम” दैत।

19 मिनु परमप्रभु, परमप्रभु यावेमी “गो इ कली श्येत्थ सहर का सेल्लुड। गो इ कली मुर मबाक्शो सहर खोदेशो दुम्पाइक्नुड। मिनु गो इ कली समुन्द्र डा ब्वाक्कुम सुम्पाइक्नुड।

20 गो इ कली बेक्शा लशो मुर नु साइ डोंइती बेक्शो मुर आन बाक्तीके उइ तोक्नन। गो इ कली उइ डा रागीम साइ नेसी ब्रेशो खिं आन दातेमी बाक्पाइक्नुड। गे नरक लाइब नु बाक्नेवे। मिनु गे ब्रोंइशा बाक्ब आन बाक्तीकेम बाक्चा मताइनेवे। यसैया १४:११,१५; एफिसी ४:९; १पत्रुस ३:१९

21 गो इ जाम्तीक हिंचा डा सेल्लुड। मिनु गे जाम्शा लाइनेवे। इ कली माल्नीम, तन्न सुडम मथिल्लीम” दे परमप्रभु यावेमी दैत।

## 27

टायर सहर आ पर्वम रोंका पशो  
यसैया २३:-

- 1 परमप्रभु यावेमी आं कली लोत्र पाप्तु।
- 2 मार लोत्र पाप्तु दैशा हना “ए मुर, टायर सहर आ पर्वम रोंका पावो।
- 3 मेको समुन्द्र आ ओत्रतीक बाक्ब। मेको टायर सहर शुश मुर आन ग्याप्तीक लेयतीक बाक्ब। मिनु परमप्रभु, परमप्रभु यावेमी ए टायर, गे ‘गो नेल्ल क्येडा दारशो बाक्नुड’ दैते। होसे ९:१३
- 4 इ सांद समुन्द्र आ आगाम बाक्त। इ कली सेल्बपुकीमी नेल्ल आन क्येडा दारशो पा सेल्लेमी।
- 5 मेकोपुकीम इ डोंगा नेल्ल सेनीर डा शी के सेल्लेक्म। आ दाते डा थाम लेबानोन डा लाइशशो रवा आ शी के सेल्लेक्म। ब्यवस्था ३:८-९
- 6 मेकोपुकीम इ ब्वाक्क शाक्तीके बाशान डा बोल्यो शी के सेल्लेक्म। इ थैक्शा गाक्तीक साइप्रस डा समुन्द्र आ शुंडच रे चाक्शो तोवशी रवा आ शी के सेल्ल्या हात्ती आ दारा के बुटा आप्शा सेल्लेक्म।
- 7 इ जहाज डा वापुकी इजीप्त रागी डा दारशो बुटा आप्शा सेल्लो रिम्शो किरशो सुती वा के बाक्तेक्म। मेको इ छेदर दुम्शो बाक्तेक्म। मेको एलीशाह रागी डा समुन्द्र आ शुंडच डा नीलो नु प्याजी रड डा चाक्शो बाक्त। उत्पत्ती १०:४
- 8 सीदोन नु अरवाद डा मुरपुकी इ जहाजम गेय पाइब बाक्तेक्म। टायर, इन जोक्ब तुइक्ब मेकेर बाक्तेक्म। सेमेर सहर डा मुर इ जहाज चलेब बाक्तेक्म।
- 9 गेबाल डा खाल्पा नु दारशो थोत्रक सेल्स जोक्ब तुइक्ब इ आगाम बाक्तेक्म। मेकोपुकी जहाज डा बिग्रेशो मार मार सेल्ब बाक्तेक्म। जहाज नु आ गेय पाइब नेल्ल इ आगाम बाक्तेक्म। मेकोपुकीमी लेयतीक नु ग्याप्तीक गेय यो पांम्तेक्म। यहोसु १३:५; १ राजा ५:३२
- 10 पारसी, लूद नु पूत रागी डा मुरपुकी इ लडाइ पाइब बाक्तेक्म। मेकोपुकी बोल्यो लडाइ पाइब बाक्तेक्म। मेको आन तेक्तीक नु ताकी इ आगामीन क्युकशा इ दारस बारपाइक्तेक्म।
- 11 अरवाद नु हेलेक डा मुरपुकी इ गारो आ एर ओथ खाल पाइब बाक्तेक्म। गमाद डा मुरपुकी इ लाइशशो खिं खाल पाइब बाक्तेक्म। मेकोपुकीम आन तेक्तीक नु ब्रा कुरतीक इ एर ओथ डा गारोम क्युकबाक्तेक्म। मिनु मोपा इ दारस बारपाइक्तेक्म।
- 12 गे नु शुश शोंप नु शुश मार मार बाक्तीके टारशीश डा मुरपुकीम गे नु ग्याप्तीक लेयतीक गेय पा चांदी, फलाम, टिन नु सिसा चाक्शा फाइक्तेक्म।
- 13 यावान तूबल नु मेशेक डा मुरपुकीम गे नु ग्याप्तीक लेयतीक गेय पांम्तेक्म। मेकोपुकीम वाइलीम वाइल नु कांसा के ग्योब चाक्शा इ मार मार नु फाइक्तेक्म। इजीकीएल ३८:२
- 14 मिनु बेथ-तोगारमाह डा मुरपुकीम शारा, लडाइ पाइब शारा नु खच्चर चाक्शा इ मार मार नु फाइक्तेक्म।
- 15 रोडोस डा मुरपुकीम गे नु ग्याप्तीक लेयतीक गेय पांम्तेक्म। मिनु समुन्द्र आ नेक्शा डा शुश रागी इ मार मार ग्याप्ब लेयब दुनेक्म। मेकोपुकीम इ कली हात्ती आ दारा नु शुश क्येट लाइब क्येर शी चाक्शा इ मार मार नु फाइक्तेक्म।
- 16 इ शुश मार मार बाक्तीके एदोम डा मुरपुकीमी गे नु ग्याप्तीक लेयतीक गेय पांम्तेक्म। मेकोपुकीम फिरोजा माइशशो हीरा, प्याजी रड नुप्शा प्रोवशो वा, बुटा आप्शो वा, रिम्शो किरशो सुती वा, लल मूगा नु हीरा चाक्शा इ मार मार नु फाइक्तेक्म।
- 17 यहूदा नु इस्राएल डा मुरपुकीम गे नु ग्याप्तीक लेयतीक गेय पांम्तेक्म। मेकोपुकीम मिन्नीथ डा चेरब, फोत्रशी रवा आन फल, खुदो, तेल नु खेक्तीक चाक्शा इ मार मार नु फाइक्तेक्म।
- 18 मिनु इ शुश मार मार बाक्तीके नु इ शुश शोंप बाक्तीके दमस्कस डा मुरपुकीम गे नु मार मार ग्याप्तीक लेयतीक गेय पांम्तेक्म। मेकोपुकीम हेल्लेबोन डा अडगुर शांबु नु बुश ऊन चाक्शा इ मार मार नु फाइक्तेक्म।
- 19 उजाल डा वेदान नु यावान डा मुरपुकीम गे नु ग्याप्तीक लेयतीक गेय पांम्तेक्म। मेकोपुकीम चेम्शो फलाम, सिन्कौली नु बच चाक्शा इ मार मार नु फाइक्तेक्म।
- 20 देदान डा मुरपुकीम शारा आ लगम कली जीन वा चाक्शा इ मार मार नु फाइक्तेक्म।
- 21 अराब रागी नु केदार डा पिप आन तौ नेल्ल इ मार मार ग्याप्ब मुर बाक्तेक्म। मेकोपुकीम भेडा पाठा, सांड, क्यारश चाक्शा इ मार मार नु फाइक्तेक्म।
- 22 शेबा नु रामाह डा ग्याप्ब लेयब मुरपुकीम गे नु ग्याप्तीक लेयतीक गेय पांम्तेक्म। मेकोपुकीम सुप्तीक, नेल्ल खाल डा हीरा नु सुन चाक्शा इ मार मार नु फाइक्तेक्म। उत्पत्ती १०:७
- 23 हारान, कन्नेह, एदेन, शेबा, अशुर नु किल्मद डा ग्याप्ब लेयबपुकीम गे नु ग्याप्तीक लेयतीक गेय पांम्तेक्म।
- 24 मेकोपुकीमी दारशो वा, नीलो श्येलेम प्रोवशो वा, बुटा आप्शो वा, शुश रड पाइशशो गलैचा चाक्शा, इ मार मार नु फाइक्तेक्म।
- 25 टारसीस डा जहाजपुकीम इ ग्याप्तीक लेयतीक गेय पांम्तेक्म। गे हेल्शो ग्याप्तीक लेयतीक मार मारमी ब्रीशो समुन्द्रम बाक्ते।
- 26 मिनु इ कली शाक्बपुकीमी इ कली समुन्द्र आ दातेम लाइक्तेक्म। तन्न पूर्ब डा फशेम इ कली समुन्द्र आ दातेमीन खतम पोक्तु।

27 मिनु इ खतम दुम्तीक नाक्ती इ शोंप, इ ग्याप्तीक लेयतीक मार मार, इ गेय पाइब, इ कली चलेब, इ जहाज कली सेल्ब, इ ग्याप्ब लेयब, इ लडाइ पाइब नु गे नु बाक्ब मुर नेल्ले समुन्द्र आ दातेमी गुम्शा खतम दुम्नीम।

28 मेको इ जहाज चलेब आन वाइ ब्रेशशोम रागी खिंखि पाइब।

29 मिनु ब्वाक्कु शाक्ब नेल्ले आन जहाज प्रोइशा प्रोक्नीम। मिनु जहाजम गेय पाइब नु चलेबपुकी समुन्द्र आ नेक्थाम राप्नीम।

30 मिनु मेकोपुकी इ पबंम ठेयब सेंदा पा रोंका पा डाक्नीम। आन पियाम फुरक फुंडसीनीम। मिनु पुलुम लोकसीनीम।

31 गे इ पतीके मेकोपुकीम आन पिया डा चां प्रेक्नीम। मिनु अरन्डी फेक्सीनीम। मिनु इ पबंम आन थुं कशो दुम्शा डाक्नीम। शुश रोंका पाइनीम।

32 मेकोपुकीम इ पबंम रोंका पा बिलाना पतीक कुम्सो पाइनीम 'समुन्द्र आ दातेमी टायर खोदेशो पा अर्को तेको सहर खतम दुम्शो बाक्मे' दे रोंका पाइनीम।

33 समुन्द्रम इ ग्याप्तीक लेयतीक मार मार चाक्यामेनु, गे शुश मुर आन कली आन थुं ग्येरपाइक्तीवी। गे इ शुश शोंप नु इ ग्याप्तीक लेयतीक मार मारम रागी डा पिप आन कली शोंप पाइश्शो सेलतीवी।

34 मुल समुन्द्रम खुम्चा पुंडसाक्वे। इ ग्याप्तीक लेयतीक मार मार नु इ मुर नेल्ले गे नु गुम्तेकम।

35 मिनु समुन्द्र आ नेक्थाम बाक्ब नेल्ले इ कली तशा हिंशो बाक्नीम। मेको आन पिप थाम्पा हिंशा खिंखि पाइनीम। मेको आन कुल हिंशा किक्पाइश्शो बाक्नीम।

36 मिनु रागी रागी डा ग्याप्तीक लेयतीक गेय पाइबपुकीम इ कली शुक्शी पाइनीम। इ हिंचा डा नुप्तीक नाक्त जाक्शो बाक्त" देंत। इजीकीएल २८:१९

## 28

टायर डा पिप कली निसाफ पशो

1 परमप्रभु यावेमी आं कली लोत्र पाप्तु।

2 मार लोत्र पाप्तु देंशा हना "ए मुर, टायर डा पिप आ तौ कली परमप्रभु, परमप्रभु यावेमी 'गे इ थुं डा ठेयब लेत्तीकेम, गो परमप्रभु नड। गो समुन्द्र आ दातेम देवी देवता आन बाक्तीकेम बाक्नुड' देंते। तन्न गे मुर ला बाक्नेवे। परमप्रभु मनवे। गे ठेयब लेशशा, इ थुंम 'परमप्रभु खोदेशो जोक्ब तुइक्ब बाक्नुड' दे मिम्साक्वे। यसेया ३१:३; दानीएल ५:२०; प्रेरित १२:२३

3 गे दानीएल क्येडा यो जोक्ब तुइक्ब बाक्नेवे। मारेइ खुइक्तीक लोत्र इ रे मखुंडसीशो बाक्ब। इजीकीएल १४:१४; दानीएल १:१७

4 गे इ रुप्तीक थुं नु मिम्तीकेम शुश शोंप चेम्शो बाक्नेवे। मिनु गे इ मार मार वोइक्तीकेम सुन नु चांदी तेल्लो बाक्नेवे।

5 गे इ रुप्तीक थुंम ग्याप्तीक लेयतीक गेय पा इ शोंप बारपाइश्शो बाक्नेवे। मिनु इ शोंपोम पतीके गे बोरशा ठेयब लेशशो बाक्नेवे, देंशो बाक्ब" देंत।

6 मोपतीके परमप्रभु, परमप्रभु यावेमी "गे आंम इ कली परमप्रभु खोदेशो सुंडसीनेवे।

7 मोपतीके गो रागी रागी डा नेल्ल क्येडा मरिम्शो पाइब मुर आन कली चाक्नुड। मिनु मेकोमी आन तरवार इ दारस नु इ जोक्ब तुइक्ब थुं आ पबंम शोइक्नीम। मिनु इ दारस ग्रान्ना दिशो सेलनीम।

8 मेकोपुकीम इ कली तुरसुम चाक्वीत्नीम। मिनु गे समुन्द्र आ दातेम हिंचा डा दुम्शा बेक्नेवे। इजीकीएल २६:२०

9 मिनु मार, इ कली साइक्ब आन डोंइती गे मुर दुम्शा यो 'गो देवता का नड' देंनेवे डा? 'इ कली साइक्ब आन गुडमी बाक्शा यो मोदेशो लोत्र पाइनेवे?

10 गे अर्को रागी डा मुर आन गुडम खोइक्तीक चिनु मखोइश्शो मुर खोदेशो पा बेक्चा माल्नेवे' दे गो, परमप्रभु, परमप्रभु यावेमी लोत्र पाता" देंत।

11 परमप्रभु यावेमी लेशा आं कली लोत्र पाप्तु।

12 मार लोत्र पाप्तु देंशा हना "ए मुर, टायर डा पिप आ पबंम रोंका पावो। मिनु मेको कली परमप्रभु, परमप्रभु यावेमी इ कली 'गे रिम्शो पा थोक्शो छाप खोदेशो बाक्ते। मिनु रुप्तीक थुंम ब्रीशो नु थम दारशो बाक्ते। इजीकीएल २७:२

13 गे परमप्रभु आ रू एदेनम खोदेशो बाक्ते। गे हीराम ग्योम्सीशो बाक्ते। लल मानीक, हाव पुश्पराज, बुश नु नीलो पन्ना, पीतमनी, लल रड डा ओनीक्स, नीलो बिलौरा, बुश नीर, लल फिरोजा नु गिगी बेरूज माइश्शो हीराम ग्योम्सीशो बाक्ते। मिनु मेको हीरा ग्याइक्तीके नु आप्तीके सुन के बाक्तेकम। गे दुमे नाक्तीन मेको नेल्ल ठीक पशो बाक्तेकम। प्रस्थान २८:१७-२०; इजीकीएल ३१:८-९; उत्पत्ती २:८

14 गो तेल लुक्शो करूब इ कली खाल पाइब सेल्ला। गे आं डांडाम बाक्शो नवे। गे मी ब्रशो फुल्लु आन दातेम गाक्बाक्ते।

15 गे सेल्चा पुंडसे नाक्ते रे दोस मताइब बाक्ते। तन्न नोले मरिम्शो पाइब दुम्शो, बाक्ते।

16 मिनु इ एर ओंथ नेल्ल डा ग्याप्तीक लेयतीक आ पबंम हुश खाक्श पोक्शा, पाप पाप्तीवी। मोपतीके गो इ कली ताइक्तीक थोक्क खोदेशो पा आं डांडा रे ताइक्ताक्ड। मिनु इ कली खाल पाइब करूबम इ कली मी ब्रशो फुल्लु आन दाते रे खेरते।

17 गे इ दारसम पतीके इ थुं ठेयब लेशशा बोरत। इ शुश शोंप दुम्तीके इ जोक्ब तुइक्ब थुं मरिम्शो सेलतीवी। मोपतीके गो इ कली खपीम ताइक्ताक्न। मिनु इ कली पिप आन डोंइती शुक्शी पतीक सेलतन।

18 गे इ शुश मरिम्शो पशो नु इ जोल पा ग्याप्तीक लेयतीकेम इ आं कली ठेयब सेलतीके ग्रांग्रा दिशो सेलतीवी। मोपतीके गो इ आगा रे मी का गुंडताकड। मिनु मेकोमी इ कली नेकु। मिनु गो इ कली मुर आन डोंइती पुलु सेलतन।

19 मिनु इ कली तुडक्ब मुर नेल्ल इ कली तशा हितेक्म। गे हिंचा डा दुम्शा बेक्ते। मिनु गे गेना हना यो बेक्शा लाइनेवे' देनो" देत। इजीकीएल २७:३६

सीदोन सहर कली निसाफ पशो

20 परमप्रभु यावेमी आं कली लोत्र पापु।

21 मार लोत्र पापु देशा हना "ए मुर, सीदोन गे कोवडो। मिनु मेको आ पर्वम आं लोत्र पावो। यसैया २३:२-४

22 परमप्रभु, परमप्रभु यावेमी 'ए सीदोन, गो इ कली सजाइ गेनुड। गो इ दातेमी आं सक्ति कोइनुड। गो इ दातेमी आं सक्ति कोइशा, निसाफ पाता हना, मेकोपुकीमी गोन परमप्रभु यावे नड' दे तुडक्नीम

23 गो मेको आ आगाम मुर बेक्तीक रोड का सोइक्नुड। मिनु मेको आ लां मेर हुश शाइक्पाइक्नुड। मेको आन दाते डा मुर तेइ तेइ तरवारम साइक्चा पुंडसीनीम। मिनु मेकोपुकीम 'गोन परमप्रभु यावे नड' दे तुडक्नीम।

इसाएली आन रागी लेत्नीम

24 इसाएल आ खिं डा मुर नु मेको आन नेक्था डा मुर आन दातेमी मुल श्येत गोब मुर मुल मबाक्नीम। मेकोपुकीम 'गोन परमप्रभु, परमप्रभु यावे नड' दे तुडक्नीम" देशो बाक्ब।

25 परमप्रभु, परमप्रभु यावेमी "गो इसाएल आ खिं डा मुर आन कली मेको आन ब्रशा बाक्शो रागी रागी डा मुर आन दाते रे युम्पाइक्नुडमी। मिनु गो परमप्रभु यावे नड, दे रागी रागी डा मुर आन डोंइती तुडक्पांडसीनुड। मेना मेकोपुकी आं गेय पाइब याक्ब कली गेशो रागीम बाक्चा ताइनीम।

26 मेकोपुकी मेकेर मारेइ मद्दुथु बाक्नीम। मेकोपुकीम खिं सेलनीम। मिनु अडगुर खुन्नीम। मिनु गो मेको आन कली तशा, ग्रांग्रा दीब नेल्ल आन कली सजाइ गेनुडमी। गो मेको आन नेक्था बाक्ब मेको आन कली मदाक्ब आन कली निसाफ पडानु, मेकोपुकी रिम्शो पा बाक्नीम। मिनु मेकोपुकीम 'गोन परमप्रभु यावे, आन परमप्रभु नड' दे तुडक्नीम" देत।

## 29

इजीप्त कली निसाफ पशो

यसैया १९:-; यसैया २०:-; येरमीया ४६:-

1 मिनु ग्याइशशा लाइक्चा पुंडसीशो १० बर्स डा १० महिना डा १२ नाक्त परमप्रभु यावेमी आं कली लोत्र पापु।

2 मार लोत्र पापु देशा हना "ए मुर, गे इजीप्त डा पिप फाराओ गे कोवडो। मेको आ पर्वम नु इजीप्त रागी नेल्ल आन पर्वम आं लोत्र पावो।

3 मिनु परमप्रभु, परमप्रभु यावेमी मेको कली 'ए इजीप्त डा पिप फाराओ, गो इ कली सजाइ गेनुड। गे खोला आन दातेम बाक्ब समुन्द्र डा ठेयब जन्तु खोदेशो बाक्नेवे। मिनु नील खोला आं केन बाक्ब। मेको आं सेल्शो बाक्ब' देत। इजीकीएल ३२:२

4 गो इ शांपेम बोल्सी ब्वेक्नुड। मिनु गो इ खोला डा डांइ इ कत्लापुकीमीन क्येप्पाइक्नुडमी। गो खोला डा डांइ इ कत्लाम क्येप्पाइशशा, इ कली खोला रे कीशा गुंडनन।

5 मिनु गो इ कली नु इ खोला डा डांइ नेल्ल आन कली गोरशो रागीम ताइक्नन्नी। मिनु गे दिंमम गोल्नेवे। इन कली सुइम खुप्शा मथिन्नीम। गो इ कली रागी डा जन्तु नु सरीड डा चिक्ब आन कली ब्वचा कली गेनुड।

6 मेना इजीप्त रागीम बाक्ब नेल्लेम गोन परमप्रभु यावे नड, दे तुडक्नीम। गे इसाएल आ खिं डा मुर आन कली बुदी मीलु के कोक्के खोदेशो दुम्शो बाक्नेवे। २राजा १८:२१

7 मिनु मेकोपुकीम इ कली गुइम ग्याइक्तमेनु, गे जिक्बाक्ते। मिनु मेकोपुकीमी इ कली तिकसीमानु, गे जिक्शा, मेको आन खोइल रोप्पाइक्बाक्ते" देत।

8 मोपतीके परमप्रभु, परमप्रभु यावेमी "गो इ पर्वम तरवार सोइक्नुड। गो इ मुर नु इ बी ब्यफ, क्यारश भेडा नेल्ल आन कली साइक्नुडमी।

9 मिनु इजीप्त रागी मुर मबाक्तीके नु गोरशो रागी दुम्ब। मेना मेकोपुकीम गोन परमप्रभु यावे नड, दे तुडक्नीम। गे 'नील खोला आं केन बाक्ब। गो मेको सेल्ता' देत।

10 मोपतीके गो इ पर्वम नु इ खोला आन पर्वम बोक्नुड। मिनु गो मिग्दोल रे स्येने सम्म नु एथीयोपीया रागी आ सांद सम्म इजीप्त रागी कली गोरशो नु मुर मबाक्तीके सेल्लुड। इजीकीएल ३०:६

11 मेकेर सुइ मुर नु जन्तु मगाक्नीम। मेकेर ४० बर्स सम्म सुइ मबाक्नीम। गन्ती १४:३३-३४

12 गो इजीप्त रागी कली मुर मबाक्शो रागी आन दातेमी मेको क्येडा मुर मबाक्शो रागी सेल्लुड। मिनु मेको आ सहरपुकीम ४० बर्स सम्म मुर मबाक्नीम। मिनु गो इजीप्त रागी डा मुर आन कली रागी रागी नु राज्य राज्य डा मुर आन दातेम ब्रपाइक्नुडमी" देत।

13 गो हना यो परमप्रभु, परमप्रभु यावेमी "मेको ४० बर्स नोले गो इजीप्त डा मुर आन कली मेको आन ब्रशा बाक्तीक रागी रागी डा मुर आन दाते रे खुप्नुडमी।

14 गो मेको आन कली लेंशा रिम्शो पाइनुड। मिनु मेको आन कली आन किकी पिपी आन रागी पश्रोसम चाक्नुडमी। मिनु मेको मेकेर महिक्सीशो आइक्च राज्य का दुम्शा बाक्ब। पश्रोस रागी इजीप्त डा दक्खिन बाक्त।

15 मेको राज्य नेल्ल आन दातेमी नेल्ल क्येडा आइक्च राज्य दुम्ब। मेको अर्को रागी आन क्येडा गेनायो टेयब मदुम्ब। गो मेको कली थम आइक्च सेल्लुड। मिनु मेकोम गेनायो अर्को रागी रागी आन कली सासन मपाइब।

16 मिनु इस्राएल आ खिं डा मुरपुकीमी इजीप्त रागी कली लेशा गेनायो थमा मसुइक्नीम। तन्न इस्राएलम इजीप्त कली 'वारच पाइक्की' दे पुंडथ लशा आन पाप मिम्पाइक्नीम। मेना मेकोपुकीम गोन परमप्रभु, परमप्रभु यावे नड, दे तुइक्नीम" देशो बाक्ब।

इजीप्त रागी नेबुकदनेसर के दुम्शो

17 मिनु ग्याइश्शा लाइक्चा पुंडसीशो २७ बर्स डा डोंइती डा महिना डा डोंइती डा नाक्ती परमप्रभु यावेमी आं कली लोत्र पाप्तु।

18 मार लोत्र पाप्तु देशा हना "ए मुर, बेबीलोन डा पिप नेबुकदरेसरम टायर कली लडाइ पाइब आन कली शुश श्येत पपाइक्तु। मिनु मुर नेल्ल आन पिया डा चां दुल्लत। आन बला खीरसीशा, गार दुम्त। मो हना यो टायर आ पबंम पशो गेय आ पबंम मेको नु मेको आ लडाइ पाइबम मारेइ मतामे।

19 मोपतीके परमप्रभु, परमप्रभु यावेमी 'गो इजीप्त रागी कली बेबीलोन डा पिप नेबुकदरेसर आ गुइम गेनुड' दंत। मिनु मेकोम मेको आ शोंप नेल्ल लाइक्ब। मेकोम मारेइ मारेइ रोइश्शा, मेको रागी कली श्येत्य पोक्ब। मिनु मेको आ रोइश्शो शोंप मेको आ लडाइ पाइब आन गाल्च दुम्ब।

20 गो मेको आ पशो गेय आ पबंम इजीप्त रागी कली मेको आ गाल्च सेल्शा गेता। मारदे हना मेकोपुकीम आं पबंम शुश गेय पाम्तेक्म। इजीकीएल ३०:२४

21 मेको नाक्ती गो इस्राएल आ खिं डा मुर रे ग्रोत्र का वापाइक्नुड। मिनु गो इ कली मेको आन दातेमी ब्वाक्पाइक्वन। मेना मेकोपुकीम गोन परमप्रभु यावे नड, दे तुइक्नीम" दंत।

## 30

इजीप्त रागीम सजाइ तशो

1 परमप्रभु यावेमी आं कली लोत्र पाप्तु।

2 परमप्रभु, परमप्रभु यावेमी मार लोत्र पाप्तु देशा हना "ए मुर, आं लोत्र पावो। मेको नाक्त आ पबंम रोंका पावो।

3 मारदे हना मेको नाक्त नेक्थान जाक्ना जाक्न बाक्ब। परमप्रभु यावे आ नाक्त नेक्थान जाक्शो बाक्ब। मेको गोस्सुम सुम्शो नाक्त बाक्ब। मेको रागी रागी डा मुर आन कली हिंचा डा नाक्त दुम्ब। योएल १:१५; सेफन्याह १:१४

4 इजीप्त रागी तार तरवार का जाक्ब। मिनु एथीयोपीया रागीम यो श्येत दुम्ब। इजीप्त रागीम साइक्चा पुंडसीशो मुरपुकी खपीम गोल्नीम। मिनु मेको रागी डा शोंप लाइक्नीम। मिनु मेको आ जग प्रेल्लीम।

5 एथीयोपीया, पूत, लूद नु अराब रागी नेल्ल नु लिबीया नु अर्को आ नेक्था डा रागी डा मुर तरवारम साइक्चा पुंडसीनीम" दंत। येरमीया ४६:९

6 मिनु परमप्रभु यावेमी "मेको इजीप्त रागी कली वारच पतीके क्याम्चा पुंडसीनीम। मेको आ टेयब लेशशो जाम्ब। मिग्दोल रे श्येने सम्म बाक्ब मुर नेल्ल तरवारम साइक्चा पुंडसीनीम। इजीकीएल २९:१०

7 मेकोपुकी मुर मबाक्शो रागी आन दातेम मुर मबाक्तीके दुम्नीम। मिनु मेको आन सहर ब्रेश्शा, मुर मबाक्तीक सहर आन दातेम ब्रेश्शो सहर दुम्नीम।

8 गो इजीप्त रागीम मी सुइश्शा, मेको आ वारच नेल्ल फस सेल्लुड। मेना मेकोपुकीम गोन परमप्रभु यावे नड, दे तुइक्नीम।

9 मेको नाक्ती लोत्र कुरब मुर जहाजम डोइक्पा सोइक्नुड। मेको आन थुं नाइश्शा बाक्शो एथीयोपीया डा मुर आन कली हिंचा कोंइचा कली लोत्र सोइक्नुड। इजीप्त रागी आ नुप्ची नाक्ती मेकोपुकी शुश हिंनीम। मेको नाक्त थमा पा जाक्ब" दंत। यसैया २०:३-४

10 परमप्रभु, परमप्रभु यावेमी "गो बेबीलोन डा पिप नेबुकदरेसर आ गुइ रे पा इजीप्त रागी डा लडाइ पाइब आन कली साइक्नुडमी।

11 नेबुकदनेसर नु आ लडाइ पाइब रागी डा नेल्ल क्येडा मरिम्शो पाइब बाक्नीम। मेको आन कली खतम सेल्चा कली चाक्नुडमी। मेकोम आन तरवार इजीप्त रागी आ पबंम शोइक्नीम। मिनु साइश्शो मुरपुकीम रागी ब्रीनीम। इजीकीएल २८:७

12 गो नील खोला डा ब्राशो ब्वाक्कु सोत्रपाइक्नुड। मेको रागी कली मरिम्शो पाइब आन गुइम लेयनुड। गो मेको रागी नु मेकेर बाक्शो मारेइ मारेइ आन कली अर्को रागी डा मुर आन गुइ रे खतम पोक्नुड। गो, परमप्रभु यावेमी एको लोत्र पाता" दंत। यसैया १९:५

13 मिनु परमप्रभु, परमप्रभु यावेमी "गो देवी देवता आन कली खतम पोक्नुडमी। मिनु मेम्फीसम बाक्शो देवी देवता आन कली खतम पोक्नुडमी। इजीप्त रागीम गेनायो सासन पाइब मदुम्नीम। मोपा गो इजीप्त रागी डा मुर आन कली हिंतीक थुं गेनुडमी। मेम्फीस सहर कली नोफ यो देंनीम

14 गो पश्रोस कली मुर मबाक्तीके सेल्लुड। सोआन सहरम मी सुइक्नुड। गो थेबेस सहर कली निसाफ पा सजाइ गेनुड। नहुम ३:८-९

15 गो इजीप्त रागी डा बोल्यो दरवार पेलुसीयम तार आं गाइश्शो मोइक्नुड। मिनु थेबेस सहर डा शोंप नेल्ल खतम पोक्नुड।

16 गो इजीप्त रागी कली मी सुइक्नुड। मिनू पेलुसीयम श्येत जशा ग्येत्य लुकच दुम्ब। थेबेस सहर डा गारो ब्रेत्नीम। मेम्फीस सहरम चहिं नाक्ती लडाइ दुम्ब।

17 ओन नु पी-बेसेथ डा टिटापुकी तरवारम साइक्चा पुंडसीनीम। मिनू मेको सहर डा मुर ग्याइशशा लाइक्चा पुंडसीनीम।

18 मेको नाक्त तेहाफ-नेहेस सहर छिडछिड दुम्ब। गो मेकेर इजीप्त रागी आ जुवा जिक्नुड। मिनू मेको आ ठेयब लेशशो क्याम्नुड। गोस्सुमी मेको सहर कली सुम्ब। मिनू मेको आ एर ओंथ डा सहर डा मुर ग्याइशशा लाइक्चा पुंडसीनीम। येरमीया ४३:९

19 मोपा गो इजीप्त रागी कली निसाफ पा सजाइ गेनुड। मिनू मेकोपुकीम गोन परमप्रभु यावे नड, दे तुइक्नीम” दैत।

इजीप्त डा पिप आ सक्ति जाम्शो

20 मिनू ग्याइशशा लाइक्चा पुंडसीशो ११ बर्स डा डोंइती डा महिना डा ७ नाक्ती परमप्रभु यावेमी आं कली लोत्र पाप्तु।

21 मार लोत्र पाप्तु देशा हना “ए मुर, गो इजीप्त रागी डा पिप फाराओ आ गुइ जिक्शा गेता। मेको साचा कली मारेइ मफ्रेसीशो बाक्ब। मोपा बोल्यो मदुम्ब। तरवार चलने मचाप्ब।

22 मोपतीके परमप्रभु, परमप्रभु यावेमी गो इजीप्त रागी डा पिप फाराओ कली लोत्र का पाइनुड। गो मेको आ गुइ निम्फा जिक्नुड। आ बोल्यो गुइ नु आ डोंइती जिक्शो गुइ जिक्नुड। आ गुइ रे तरवार तोक्नुड।

23 गो इजीप्त डा मुर आन कली रागी रागी डा मुर आन दातेम फ्राइनुडमी। मिनू मेको आन कली रागी रागीम ब्रपाइक्नुडमी।

24 गो बेबीलोन डा पिप आ गुइ सक्ति पाइशशो सेल्लुड। मिनू आं तरवार मेको कली गेनुड। तन्न गो फाराओ आ गुइ जिक्नुड। मिनू मेको, मेको आ डोंइती बेक्चा डा पा गार दुम्शो मुर खोदेशो पा, नक्सुर पाइब। इजीकीएल २९:२०

25 गो बेबीलोन डा पिप आ गुइ सक्ति पाइशशो सेल्लुड। तन्न फाराओ आ गुइ सक्ति मपाइशशो दुम्ब। गो बेबीलोन डा पिप कली आं तरवार गेनुड। मिनू मेकोमी इजीप्त रागी आ पबंम हिरब। मेना मेकोपुकीम गोन परमप्रभु यावे नड, दे तुइक्नीम।

26 गो इजीप्ती आन कली रागी रागी डा मुर आन दातेम फ्राइनुडमी। मिनू मेको आन कली रागी रागीम ब्रपाइक्नुडमी। मेना मेकोपुकीम गोन परमप्रभु यावे नड, दे तुइक्नीम” दैत।

## 31

लाइशशो रवा आ चिन्ड

1 मिनू ग्याइशशा लाइक्चा पुंडसीशो ११ बर्स डा महिना सां डा डोंइती डा नाक्ती, परमप्रभु यावेमी आं कली लोत्र पाप्तु।

2 मार लोत्र पाप्तु देशा हना “ए मुर, इजीप्त डा पिप फाराओ नु मेको आ लडाइ पाइब आन कली ‘इन ठेयब दुम्तीक सु नु थाप्ने चाम्सीबा?

3 अस्सुर रागी कली मिम्तीन। मेको लेबानोन डा लाइशशो रवा खोदेशो बाक्त। मेको आ दारशो राशीम ब्वाकी आन कली सुम्शो बाक्त। मेको आ डर लाइशशो दुम्शा गोस्स सम्म जाक्दीशशो बाक्त।

4 मिनू मेको कली ब्वाक्कुम जिशशा कोल्पाइक्तु। ब्वाक्कुम मेको कली लाइशशो सेल्लु। मेको आ एर ओंथ डा खोलापुकीम मेको कली जिप्पाइक्तेक्म। मिनू मेको खोलाम दिम डा रवा नेल्ल आन कली जिप्पाइक्तु।

5 मोपा मेको दिम डा रवा नेल्ल आन क्येडा लाइशशो दुम्त। शुश ब्वाक्कु बाक्तीके मेको आ राशी शुश दुम्तेक्म। मिनू शुश ब्वाक्कु रे मेको कोल्लत।

6 सरीड डा चिक्बपुकीम मेको आ राशीम आन ग्योत्र सेल्लेक्म। मेको आ राशी आगाम ब्वाकी डा जन्तु नेल्लेम आन चाइक्ब जरमेक्तेक्म। मिनू मेको आ वांकु आगाम रागी रागी डा मुर जाक्शा बाक्तेक्म।

7 मेको एर ओंथ ब्रशा लाइशशो राशी पाइशशो दारशो रवा का दुम्त। मारदे हना मेको आ शाक्श शुश ब्वाक्कु बाक्तीकेम बाक्तेक्म।

8 परमप्रभु आ रू डा लाइशशो रवापुकीम यो मेको कली ग्राने मचबेम। तेकोइ तोत्रशी रवापुकीम यो मेको आन राशी कली ग्राने मचबेम। परमप्रभु आ रू डा तेकोइ रवा मेको खोइ दारशो मबाक्म।

9 गो मेको कली एर ओंथ लशो राशीपुकीम ग्योम्शा, दारशो सेल्ला। मिनू परमप्रभु आ रू एदेन डा रवा नेल्लेम मेको कली गेहे पाम्तेक्म’ देनो” दैत।

10 मोपतीके परमप्रभु, परमप्रभु यावेमी “मेको मिश लाइशशो दुम्तीके नु मेको आ डरम आ राशी आन कली गोस्स आन दाते रे ख्रिशशा लपाइक्तीके आ लाइशशोम मेको ठेयब लेल्लत।

11 मोपतीके गो मेको कली रागी रागी डा सासन पाइब आ गुइम गेता। मिनू मेको लाइशशो रवाम दोपा आं अरेशो मटिवा, मोपा सजाइ ताप्तु। गो मेको कली तिल्ला।

12 मिनू अर्को रागी डा थम मरिम्शो मुरपुकीम मेको कली तिम्शा प्रोंइतेक्म। मेको आ राशीपुकी बेसी नेल्ल नु पहाड मेर गोल्शा बाक्तेक्म। मिनू मेको आ ठेयब राशी रागी डा खोला नेल्लेम जिक्शा लीतेक्म। मिनू रागी डा मुर नेल्ले मेको आ वांकु रे गूशा मेको कली प्रोंइतेक्म।

13 मिनू मेको दिम्शो रवाम सरीड डा चिक्ब नेल्ल बाक्तेक्म। मिनू मेको आ राशी आगाम ब्वाकी डा जन्तु नेल्ल जाक्शा बाक्तेक्म।

14 मोदेशो दुम्तीके ब्वाक्कु आ नेक्था वाशो रवा मेको मिश लाइशो पा मकोल्नीम। मिनु आन डर गोस्स सम्म मजाक्दील्नीम। मारदे हना मेको नेल्ल बेक्चा माल्नीम। नेल्ल मुर खोदेशो पा बेक्चा माल्नीम। बेक्शो मुर आन बाक्तीके तुरसुम लाइनीम” दैत।

15 परमप्रभु, परमप्रभु यावेमी “गो मेको लेबानोन डा टेयब रवा कली बेक्शो मुर आन बाक्तीकेम तोक्नुड। मेको नाक्ती समुन्द्र रोंका पा खोला मशाइक्नीम। ब्वाक्कु बुक्तीके सोत्रनीम। मिनु गो लेबानोन डा रवा आन कली रोंका पपाइक्नुड। मिनु ब्वाकी डा रवा नेल्ल खिखि पा हिम्पाइक्नुडमी।

16 गो मेको कली तुरस नु बेक्शो मुर आ बाक्तीके सोइशशा, रागी रागी आन कली आ गोल्शो रेयकेमी हिम्पाइक्नुड। मिनु एदेन डा रवा नेल्ले, लेबानोन डा नेल्ल क्येडा दारशो रवा नु शुश ब्वाक्कु तशो रवा नेल्लेमी रागी आगाम आन थु नाइक्ताकम। इजीकीएल २८:८

17 मेको तरवारम साइक्चा पुंडसीशो नु मेको रागी कली वारच पा अर्को रागी डा मुर आ वांकुम बाक्ब नेल्ल बेक्शो मुर आन बाक्तीक लाम्तेकम।

18 एदेन डा रवा आन दाते डा तेको रवा इ खोदेशो पा सक्ति पाइशो नु टेयब बाक्बा डा? मो हना यो गे यो एदेन डा रवापुकी नुन रागी आगा तोक्चा पुंडसीनेवे। गे खोइक्तीक चिनु मखोइशशो तरवारम साइक्चा पुंडसीशो आन दातेमी बाक्नेवे। मेकोपुकी फाराओ नु मेको आ लडाइ पाइब बाक्नीम, देनो” दे परमप्रभु, परमप्रभु यावेमी दैत।

## 32

फाराओ आ परबम रोंका पशो

1 मिनु ग्याइशशा लाइक्चा पुंडसीशो १२ बर्स डा १२ महिना डा डोंइती डा नाक्त परमप्रभु यावेमी आं कली लोत्र पाप्नु।

2 मार लोत्र पाप्नु देशा हना “ए मुर, इजीप्त डा पिप फाराओ आ परबम रोंका पावो। मिनु मेको कली ‘गे रागी रागी डा मुर आन दातेम गुप्स का खोदेशो मिम्साक्वे। गे समुन्द्र डा टेयब जन्तु का खोदेशो बाक्ते। गे खोला डा ब्वाक्कुम एर ओंथ पवीनु ब्वाक्कु कली पोक्ना पोक्न नु खोइलीम ब्वाक्कु कली खाक्ना खाक्न गाक्बाक्ते। मिनु खोला कली ग्रंथा दिशो सेल्बाक्ते’ देनो” दैत। इजीकीएल २९:३

3 मिनु परमप्रभु यावेमी “गो मुर आन टेयब हुल चाक्नुड। मिनु आं ग्याइल इ तार ब्वारनुड। मेकोपुकीम आं ग्याइलीम इ कली कीशा रागीम युंडनीम। इजीकीएल १२:१३

4 मिनु गो इ कली खपीम ताइक्नन। गो इ कली रागीम नेप्शा सोइक्नन। गो सरीड डा चिक्ब नेल्ल आन कली इ तार जुक्पाइक्नुडमी। मिनु गो रागी डा जन्तु नेल्ल आन कली इ श्ये प्रोइक्पाइक्नुडमी। इजीकीएल २९:५

5 गो इ श्ये डांडा मेर फ्राइनुड। मिनु इ बेक्शो रॉम बेसी नेल्ल प्रिनुड।

6 मिनु गो इ हुशेम रागी जिप्पाइक्नुड। डांडा सम्म जिप्पाइक्नुड। मिनु खोल्सा नेल्ल इ श्येम प्रिनुड।

7 गो इ कली क्याम्दुनु, सरीड नेल्ल सुम्नुड। मिनु सोरुल आन कली छिडछिड सेल्नुडमी। गो नां कली गोस्सुम सुम्नुड। मिनु तास्लाम हाम्सो मगेब। यसैया १३:१०

8 गो सरीड डा छेडछेड नेल्ल आन कली इ तार छिडछिड सेल्नुडमी। मिनु गो इ रागी छिडछिड सेल्नुड” दे परमप्रभु यावेमी दैत।

9 मिनु “गो इ कली रागी रागी डा मुर आन दाते, इ मतुइशशो रागीम ग्याइशशा लाइक्पाइक्नन। गो शुश मुर आन थुं ग्येत्थ लुकच पपाइक्नुड।

10 गो शुश मुर आन कली इ कली तशा हिंब सेल्नुडमी। मेको आन पिप इ कली तशा शुश हिंनीम। गो आं तरवार मेको आन डोंइती हिरदुनु, मेको पिपपुकी बेक्चा कली हिंशा खिखि पस डा पस बाक्नीम। इ बेक्तीक नाक्ती मेको नेल्ल बेक्चा कली खिखि पना पन बाक्नीम” दैत।

11 मारदे हना परमप्रभु, परमप्रभु यावेमी “बेबीलोन डा पिप आ तरवारम इ तार जाक्ब।

12 गो थम सक्ति पाइशो मुर आन तरवार रे इ लडाइ पाइब आन कली साइक्पाइक्नुडमी। मेको सक्ति पाइशो मुर रागी नेल्ल डा मुर आन क्येडा मरिम्शो पाइब बाक्नीम। मेकोपुकीम इजीप्त रागी आ टेयब लेशशो खतम पोक्नीम। मिनु मेको आ लडाइ पाइब नेल्ल आन कली साइक्नीम।

13 गो मेको आ शुश ब्वाक्कु बाक्तीक आ नेक्था योत्रशो बी ब्यफ, क्यारश भेडा नेल्ल आन कली साइक्नुडमी। मिनु मुर नु बी ब्यफोम, मेको ब्वाक्कु मदिम्नीम।

14 मिनु नोले गो मेको ब्वाक्कु रिम्शो सेल्नुड। मिनु मेको आ खोलापुकी तेल खोदेशो पा शाइक्पाइक्नुडमी” दे परमप्रभु, परमप्रभु यावेमी दैत।

15 मेकोम “गो इजीप्त रागी कली मुर मबाक्शो रागी सेलुनु, मेको रागी श्येत्थ दुम्मेनु, मेकेर बाक्ब नेल्ल आन कली सदुमीनु, मेकोपुकीम गोन परमप्रभु यावे नड, दे तुइक्नीम।

16 मेको रोंका पतीक कुम्सो का बाक्ब। मेकोन पचा माल्नीम। रागी रागी डा मीश मुरपुकीम एको कुम्सो पचा माल्नीम। मेकोपुकीम इजीप्त रागी नु मेको आ लडाइ पाइब नेल्ल आन परबम एको कुम्सो पचा माल्नीम” दे परमप्रभु, परमप्रभु यावेमी दैत।

बेक्शो मुर आन बाक्तीक

17 मिनु ग्याइशशा लाइक्चा पुंडसीशो १२ बर्स डा डोंइती डा महिना डा १५ नाक्त परमप्रभु यावेमी आं कली लोत्र पाप्नु।

18 मार लोत्र पाप्तु देशा हना “ए मुर, इजीप्त रागी डा लडाइ पाइब आन परबम रोंका पावो। मिनु मेको आन कली तुरसुम सोइक्तो। मिनु इजीप्त नु सक्ति पाइइशो रागी रागी डा मुर आन तमी आन कली बेक्शो मुर आन बाक्तीक सोइक्तो। तुरसुम लाइबपुकी नु सोइक्तो। इजीकीएल ३१:१६

19 मार, गे अर्को जात आन क्येडा शुश शिशि ताइब बाक्नेवे डा? उइ लावो। मिनु खोइक्तीक चिनु मखोइइशोपुकी नु गोल्शा बाक्को। यसैया १४:११,१५

20 मेकोपुकी तरवारम साइइशो आन दातेम गोल्नीम। इजीप्त तरवारम साइइक्चा पुंडसीचा कली गेशो बाक्ब। आ लडाइ पाइब नु आ शोंप निम्फा लतीन।

21 मिनु ठेयब सक्ति पाइइशोपुकी नु आन वारच पाइइपुकीमी बेक्शो मुर आन बाक्तीकेम ‘मेकोपुकी उइ यिशो बाक्नीम। मेको गोल्शो बाक्नीम। खोइक्तीक चिनु मखोइइशोपुकी तरवारम साइइक्चा पुंडसीशो बाक्नीम’ देंनीम।

22 अस्सुर नु आ मुर नेल्ल मेकेर बाक्नीम। आ लडाइ पाइब नेल्ल आ तुरस आ एर ओंथ बाक्नीम। मेको नेल्ल तरवारम साइइक्चा पुंडसीशो बाक्नीम।

23 मेको आन तुरस बेक्शो मुर आन बाक्तीके क्येडा दी गे वोइइशो बाक्ब। मेको आ लडाइ पाइबपुकी मेको आ तुरस आ एर ओंथ बाक्नीम। मेको नेल्ल तरवारम साइइक्चा पुंडसीशो बाक्नीम। मेकोम ब्रोंइशा बाक्ब आन रागीम मुर आन कली शुश हिंपाइइशो बाक्तेक्म।

24 एलाम मेकेर बाक्ब। आ लडाइ पाइब नेल्ल आ तुरस आ एर ओंथ बाक्नीम। मेको नेल्ल तरवारम क्योरशा साइइक्चा पुंडसीशो बाक्नीम। मेकोपुकी खोइक्तीक चिनु मखोइइक्थु, उइ बेक्शो मुर आन बाक्तीक लाम्तेक्म। मेकोम ब्रोंइशा बाक्ब आन रागीम मुर आन कली शुश हिंपाइइशो बाक्तेक्म। मेकोपुकी बेक्शो मुर आन बाक्तीकेम लशो खोदेशो पा मुने दोक्नीम। येरमीया ४९:३७

25 मेकोपुकीमी एलाम कली आ साइइशो लडाइ पाइब आन दातेमी तुरस सेल्शो बाक्नीम। आ लडाइ पाइब आन तुरस मेको आ एर ओंथ बाक्नीम। मेको नेल्ल खोइक्तीक चिनु मखोइइक्थु तरवारम साइइक्चा पुंडसीशो बाक्नीम। मारदे हना मेकोम ब्रोंइशा बाक्ब आन रागीम मुर आन कली शुश हिंपाइइशो बाक्तेक्म। मेकोपुकी बेक्शो मुर आन बाक्तीके लाइब खोदेशो पा मुने दोक्नीम। मेको साइइक्चा पुंडसीशो मुर आन दातेमी बाक्नीम।

26 मेशेक, तूबल नु आस शुश मुर मेकेर बाक्नीम। आस मुर आस तुरस आस एर ओंथ बाक्नीम। मेको नेल्ल खोइक्तीक चिनु मखोइइक्थु तरवारम साइइक्चा पुंडसीशो बाक्नीम। मारदे हना मेकोम ब्रोंइशा बाक्ब आन रागीम मुर आन कली शुश हिंपाइइशो बाक्तेक्म। इजीकीएल २७:१३; इजीकीएल ३८:२

27 मेकोपुकी साइ डोंइती साइइशो अरु लडाइ पाइब नु मबाक्नीम। मिनु मेको आन या सुन्दा बेक्शो मुर आन बाक्तीकेम लशो बाक्नीम। मेको आन तरवार आन पिया आगाम वोइइशो बाक्ब। मिनु आन तेक्तीके आन रुश तार वोइइशो बाक्नीम। मारदे हना मेको लडाइ पाइबम ब्रोंइशा बाक्ब आन रागी डा मुर आन कली शुश हिंपाइइक्तेक्म।

28 इजीप्त गे यो खतम दुम्शा खोइक्तीक चिनु मखोइइक्थु तरवारम साइइक्चा पुंडसीशा गोल्चा माल्नेवे।

29 एदोम मेकेर बाक्ब। मेको आ पिप नु आ तौ नेल्ल मेकेर बाक्शो बाक्नीम। मेको आन के सक्ति बाक्त हना यो, मेको तरवारम साइइक्चा पुंडसीशा गोल्शा बाक्शो बाक्नीम। मेकोपुकी खोइक्तीक चिनु मखोइइशो नु तुरसुम गोल्शा बाक्नीम। इजीकीएल २५:१२-१४

30 उरार रागी डा सासन पाइब नु सीदोन डा मुर नेल्ल मेकेर बाक्नीम। मेको आन सक्तिम मुर नेल्ल आन कली शुश हिंपाइक्तेक्म। मोपतीके मेकोपुकी तरवारम साइइक्चा पुंडसीशो मुरपुकी नु मुने दोक्शा उइ लाम्तेक्म। मेकोपुकी खोइक्तीक चिनु मखोइइक्थु तरवारम साइइक्चा पुंडसीशो नु मुने दोक्शा तुरसुम बाक्शो बाक्नीम। इजीकीएल २८:२१-२३

31 फाराओमी मेको कली तशा, आ लडाइ पाइब नेल्ल तरवारम साइइक्चा पुंडसीशो तुइइशा, आ थुं नाइक्ब।

32 मारदे हना मेकोमी ब्रोंइशा बाक्ब आन रागी डा मुर आन कली शुश हिंपाइक्तु। मोपतीके फाराओ खोइक्तीक चिनु मखोइइक्थु तरवारम साइइशो मुर आन दातेमी बाक्ब” दे परमप्रभु, परमप्रभु यावेमी देंत।

### 33

इजीकीएल खाल पाइब दुम्शो

इजीकीएल ३:१६-२१

1 परमप्रभु यावेमी आं कली लोत्र पाप्तु।

2 मार लोत्र पाप्तु देशा हना “ए मुर, इ मुर आन कली ‘गो रागी का कली तरवार चाक्ता हना, मेको रागी डा मुरपुकीम आन रागी डा मुर का कली आन कली खाल पाइब का योत्रशा वोइक्नीम,

3 मिनु मेकोम आ रागीम तरवार कुरशा आ जोरी सनु जाक्शो तशा, आ मुर आन कली तुइक्पाइक्चा कली तुराही ताप्ब।

4 मिनु सुम मेको तुराही ताप्शो नेंशा मटीबा, मेको तरवारम साइइक्चा पुंडसाक्व हना, मेको आ हुश आ दोस आंमा राइब।

5 मेकोम तुराही ताप्शो नेंशा यो, मटितीके, मेको आ हुश आ दोस आंमा राइब। तन्न मेकोम टिशो हना, ब्रोंइ वा।

6 तन्न मेको खाल पाइबम तरवार कुरशा लडाइ पाइब जाक्शो तशा यो, मुर आन कली नेंपाइक्चा कली तुराही मताप्तु नु तरवार जाक्शा सुइ मुर का कली साइक्व हना, मेको मुर आ मरिम्शो पशो आ परबम बेक्ब। तन्न गो मेको खाल पाइब कली मेको आ हुश आ क्येक्क ताक्नुड।



7 ए मुर, गो इ कली इस्राएल आ खिं डा मुर आन कली खाल पाइब सेलतान। मोपतीके गेना इ कली लोत्र पडा, मेना गे मेको आन कली मेको आं लोत्र नेंशा, होस पा बाक्कीन' देंचा माल्नेवे। हिब्रू १३:१७

8 मिनु गो आं अरेशो मटीब मुर आन कली 'ए आं अरेशो मटीब मुरपुकी गे थमा पा बेक्नीनी' देंनुड, मिनु गे मेको आं अरेशो लोत्र मटीब मुर आन कली 'इन मरिम्शो पशो प्रोनीन' दे महिपाइक्तीवी हना, मेको मरिम्शो पाइब मुर आन मरिम्शो पशो आ परबम बेक्नीम। तन्न गो मेको आन हुश आ क्येक्क इ रे पा ताक्नुड।

9 तन्न गे मेको परमप्रभु यावे आं अरेशो लोत्र मटीब आन कली इन मटितीके प्रोनीन, दे हिंच कोंइताक्वी हना, मिनु मेकोपुकीम आं अरेशो लोत्र मटिम्तेक्म हना, मेको आन मटिशो आ परबम बेक्नीम। मिनु गे आंम कली प्रोंइनेवे" देंत।

परमप्रभुम निसाफ पाइब

इजीकीएल १८:२१-३२

10 मेकोम "ए मुर, गे इस्राएल आ खिं डा मुर आन कली 'गेपुकीम आंड हेंथे पशो नु पाप पशोम दिप्चा पुंडसीशो बाक्नीकी। मिनु मेको आ परबम आंड बोल नुम्ना नुम्न लशो बाक्ब। गो दोपा ब्रोंइनीकी?' देंनीनी" देनो।

11 मोपतीके गे मेको आन कली परमप्रभु, परमप्रभु यावेमी "गो आ ब्रोंइशा बाक्शो खोदेशो पा आं अरेशो लोत्र मटीब मुर बेक्मानु मयैरसीनुड। तन्न मेकोपुकीम आं अरेशो लोत्र टिशा ब्रोंइमल। गे इन मरिम्शो लां रे लेतीन। ए इस्राएल आ खिं डा मुरपुकी, गे मारदे बेक्चा दाक्नीनी? ब्यवस्था ३२:४०; यसैया ५५:७; योएल २:१२-१३

12 मिनु ए मुर, गे इ मुर आन कली ठीक पाइब मुर हेंथे गाक्त हना, आ डोंइती ठीक पशोमी मेको कली प्रोंइने मचाप्ब। डोंइती आं अरेशो मटीब मुर, ठीक पाइब दुम्त हना, आं डोंइती मटिशो आ परबम मबेक्ब। मिनु ठीक पाइब मुरुम पाप पाप्टु हना, मेको आ डोंइती ठीक पशो आ परबम ब्रोंइचा मताइब। इजीकीएल ३:२०

13 गो मेको ठीक पाइब मुर कली 'गे थमा पा ब्रोंइनेवे' देंडानु, मेकोम आ ठीक पतीकेम थमा सुइशशा, मरिम्शो पाप्टु हना, मेको आ डोंइती ठीक पशो मारिड ममिम्सीब। मेको आ मरिम्शो पशो आ परबम बेक्ब।

14 तन्न गो मेको आं अरेशो लोत्र मटीब मुर कली 'गे थमा पा बेक्नेवे' देंती हना, मेकोम आ पाप पतीक प्रोंइशा आं अरेशो नु ठीक पाप्टु हना,

15 मिनु मेकोम आ जाकटी वोइशशो थोत्रक लेत्ताक्व हना, आ रोइशशो थोत्रक लेशशा गेप्टु हना, ब्रोंइचा कली आं फुल्लुम मुशा ब्रेक्शो लोत्र पशा, मरिम्शो मपाप्टु हना, मेको थमा पा ब्रोंइब। मेको मबेक्ब। ब्यवस्था २४:१०-१३; इजीकीएल १८:७; लूका १९:८

16 मेको आ पशो तेकोइ पाप ममिम्सीब। मेकोमी आं अरेशो लोत्र नु ठीक गेय पाप्टु। मेको थमा पा ब्रोंइब।

17 मो हना यो इ मुरपुकीम 'परमप्रभु आ पशो ठीक मबाक्ब' देंनीम। तन्न थमा पा, मेको आन पशो कका ठीक मबाक्ब।

18 सुइ ठीक पाइब मुरुम मेको आ ठीक पतीके प्रोंइशा, मरिम्शो पाप्टु हना, मेको आ मरिम्शो पशो आ परबम बेक्ब।

19 मिनु सुइ आं अरेशो लोत्र मटीब मुरुम आं अरेशो लोत्र मटितीक प्रोंइशा, आं अरेशो नु ठीक पाप्टु हना, मेको मो पशो आ परबम ब्रोंइब।

20 मो हना यो गे 'परमप्रभु आ पशो ठीक मबाक्ब' देंनीनी। ए इस्राएल आ खिं डा मुर, गो इन कली इन पशो खोदेशो पा निसाफ पाइनुड" देंत।

यरूसलेम ब्रुशो

21 गो आंड ग्याइशशा लाइक्चा पुंडसीशो १२ बर्स डा १० महिना ५ नाक्त दुम्नेनु, यरूसलेम रे प्रोक्शा जाक्शो मुर का आं बाक्तीकेम जाक्शा "आंड सहर बुत" देंत। इजीकीएल १:२; इजीकीएल २४:२६; २राजा २५:२-४

22 मेको मुर जाक्चा क्येडा डोंइती नाक्दो परमप्रभु यावे आ गुइम आं कली थिशो बाक्त। मिनु सुनी मेको मुर जाक्चा क्येडा डोंइती आं कली ब्वाक्ब सेल्ने थुम्शो बाक्त। मोपा गो ब्वाक्ब दुम्ती।

लीशो मुर आन पाप

23 मिनु परमप्रभु यावेमी आं कली लोत्र पाप्टु।

24 मार लोत्र पाप्टु देशा हना "ए मुर, इस्राएल रागीम बाक्शो मेको ब्रेशो खिंम बाक्ब मुरपुकीम 'अब्राहाम दा मुर का ला बाक्त। मो हना यो मेको रागी मेको के दुम्त। तन्न गो शुश बाक्नय। मेको रागी थमा पा ई कली गेशो बाक्ब' देंनीम। यसैया ५१:२

25 मोपतीके गे मेको आन कली 'परमप्रभु, परमप्रभु यावेमी इन कली गेपुकी हुश सुन्दा श्ये ब्वाइनीनी। गे इन मूर्ति पूजा पाइनीनी। गेपुकीम हुश खाक्श पोकनीनी। मिनु मार, एको रागी इन के दुम्बा डा? १सामुएल १४:३२-३४

26 गे इन तरवार कली थमा सुइक्नीनी। गेपुकीम मूर्ति पूजा पाइनीनी। गे नेल्लेम इन नेक्था डा मुर आन मीश कली ग्रांया दिशो सेल्नीनी। मिनु मार, एको रागी इन के दुम्बा डा? देनो" देंत। इजीकीएल ११:१४-२१

27 मिनु गे मेको आन कली "परमप्रभु, परमप्रभु यावेमी 'गो आं ब्रोंइशा बाक्शो खोदेशो पा ब्रेशो खिंम बाक्बपुकी तरवारम साइक्चा पुंडसीनीम। मिनु गो दिंमम बाक्ब आन कली ब्वाकी डा जन्तु आन कली ब्बचा गेनुडमी। बोल्यो दरवार नु पुक्खीम बाक्बपुकी मुर बेक्तीक रोइम बेक्नीम।

28 गो मेको रागी कली मुर मबाक्शो नु श्येत्थ सेल्नुड। मिनु मेको आ ठेयब लेत्तीक जाम्ब। मिनु इस्राएल डा डांडाम सुइ एर ओथ पने मचाप्चा डा पा मुर मबाक्तीके दुम्ब।

29 गो मेको आन मूर्ति पूजा पशो आन परबम मेको रागी कली मुर मबाक्शो नु श्येत्थ सेल्नुड। मेना मेकोपुकीम गोन परमप्रभु यावे नड, दे तुइक्नीम' देशो बाक्ब" देंत।

30 मेकोम “ए मुर, इ पबर्म बुक्शो मुरपुकी काथा बुक्शा, गारो नु खिं डा लाप्चोम राप्शा ‘जाक्कीन परमप्रभु यावे आ लोत्र मार बाक्मे नैय’ देमुइनीम।

31 मेकोपुकीम आं मुर खोदेशो पा इ बाक्तीक जाक्शा इ डोइती निलीम। मिनु इ लोत्र नोफा दाइश्शा नैनीम। तन्न मेकोम इ लोत्र मटीनीम। मेकोम रिम्शो लोत्र परखु पा, आन थुंम चहिं दोपा क्येट चेम्चा, दे मिम्नीम। यसैया ५३:१

32 मेकोपुकीम इ कली तशा रिम्शो ताप्तीक ताप्शा, रिम्शो सेंदामी रिम्शो कुम्सो पाइब मुर का बाक्ब, दे मिम्नीम। इ देशो नैनीम, तन्न मपाइनीम।

33 मेको नेल्ल थमा दुम्ब। मेको थमा पा थमा दुम्ब। मेना मेकोपुकीम आन दातेम परमप्रभु यावे आ लोत्र पाइब का जाक्शो बाक्माक्त, दे तुइक्नीम” देत। इजीकीएल २:५

## 34

इसाएली आन मरिम्शो गोठलापुकी

इजीकीएल ३७:२४-२८

1 परमप्रभु यावेमी आं कली लोत्र पाप्तु।

2 मार लोत्र पाप्तु देशा हना “ए मुर, इस्राएल डा गोठला आन कली आं लोत्र पावो। परमप्रभु, परमप्रभु यावेमी इन कली मार देब देशा हना ‘इस्राएल डा गोठलापुकी गे आंमा जशा ब्वशा बाक्तीनी। मार, गोठलापुकीम भेडा आन कली रिम्शो पा कोवचा ममालनीमी डा? येरमीया २३:१-४

3 गे दोम्शो बोसो ब्वाइनीनी। मिनु ऊन के वा फेक्नीनी। मिनु दोम्शो भेडा आन कली क्योरनीनी। तन्न गे भेडा आन कली रिम्शो पा मकोवनीनी।

4 गेपुकीम मचाप्शो आन कली बोल्यो मसेलनी। रोइ पशो आन कली मसापाइक्नी। गार दुम्शो आन कली आन गारमी ओरुती मखेक्तीनी। गेपुकीम लां जाम्शो आन कली माल्थ लशा मलेत्तीनी। गे जाम्शो आन कली ममाल्थु, मरिम्शो पा सासन पशो बाक्तीनी। जकरिया ११:१५-१६; यूहन्ना १०:११

5 मोपतीके मेकोपुकी ब्राम्तेक्म। मारदे हना मेको आन के गोठला मबाक्म। मेको मोपा ब्रशा ब्वाकी डा जन्तु आन जचा थोव्रक दुम्तेक्म’ दे

6 आं भेडा लां प्रेंशा, पहाड मेर नु लाइश्शो डांडा मेर हिरसाक्म। आं भेडा रागी नेल्लेम ब्राम्तेक्म। मिनु सुइम मेको आन कली ममलेम। मेको आन पबर्म हिल्लो यो मपाम” देशो बाक्ब। मती १:३६

7 मोपतीके ए गोठलापुकी परमप्रभु यावे आ लोत्र नैनीन।

8 परमप्रभु, परमप्रभु यावेमी “गो आं ब्रोंइशा बाक्शो खोदेशो पा, आं भेडा सिस्वार दुम्तेक्म। गोठला मबाक्तीके ब्वाकी डा जन्तु आन जचा थोव्रक दुम्तेक्म। मिनु आं गोठलापुकीम आं भेडा आन कली ममलेम। तन्न आंम कली ला कोव्रसाक्म। आं भेडा आन कली चहिं मकोव्रडेम।

9 मोपतीके गे गोठलापुकी परमप्रभु यावे आ लोत्र नैनीन।

10 परमप्रभु, परमप्रभु यावेमी इन कली ‘गो गोठला आन पबर्म लोत्र का पाइनुड। गो आं भेडा मेको आन गुइ रे गुंइनुड। मेको आन कली आं भेडा योव्रतीक रे गुंइनुड। मिनु मेकोपुकीम जशा ब्वशा दोम्चा मताइनीम। गो आं भेडा मेको गोठला आन शोव रे प्रोंइनुडमी। मोपा आं भेडापुकी मेको आन ब्वचा थोव्रक मदुम्मी” देत। येरमीया २३:२

इसाएली आन रिम्शो गोठला

11 मिनु परमप्रभु, परमप्रभु यावेमी “मुल गो आंमान आं भेडा आन कली माल्थ लाइनुड। गो मेको आन कली कोव्रनुड। येरमीया २३:२

12 दोपा गोठलापुकीमी एर ओंथ ब्रशो क्यारश भेडा आन दातेमी आंम क्यारश भेडा माल्दीनीमी, मोपान गो आं भेडा आन कली माल्थ लाइनुड। क्येर गोस्सुम सुम्शो नाक्त ते ते ब्रशो आं भेडा आन कली श्येत रे प्रोंइनुडमी। लूका १५:४

13 गो मेको आन कली रागी रागी डा मुर आन दाते रे गुंइशा, आंम आन रागीम चाक्नुडमी। गो मेको आन कली इस्राएल डा पहाड मेर, मेको आ खोला आ नेक्था नु मुर बाक्शो रागी मेर योव्रनुडमी।

14 गो मेको आन कली रिम्शो पा योव्रनुडमी। मिनु इस्राएल डा पहाड मेको आन योव्रतीके दुम्ब। मेकोपुकी रिम्शो घांस बाक्तीकेम गोल्शा बाक्नीम। मिनु इस्राएल डा पहाड मेको आन रिम्शो पा जोतीक दुम्ब। भजन संग्रह २३:२

15 गो आंमान आं भेडा आन कली कोव्रनुड। मिनु मेको आन कली नाइक्चा गेनुडमी।

16 गो जाम्शो आन कली माल्नुडमी। हेंथे गाक्शो आन कली माल्शा थिरशा चाक्नुडमी। गो गार दुम्शो आन कली ओरुती खेक्नुडमी। मचाप्शो आन कली बोल्यो सेल्नुडमी। तन्न गो दोम्शो नु सक्ति पाइश्शो आन कली साइक्नुडमी। गो मेको आन कली ठीक पा योव्रनुडमी” देत।

17 मिनु परमप्रभु, परमप्रभु यावेमी “ए गे आं क्यारश भेडा, गो भेडा नु भेडा आन दातेमी निसाफ पाइनुड। गो सांड नु क्यारश आन दातेम निसाफ पाइनुड। मती २५:३२

18 मार, रिम्शो जोतीकेम जोशा यो, गे इन कली मगाम्मे? गे मारदे लीशो जोतीक कली इन खोइलीम दिम्नीनी? मार, रिम्शो सिक्स ब्वाक्कु तूशा यो, लीशो कली इन खोइलीम हिलो सेल्चा माल्नीनी?

19 मार, आं भेडा, इन दिम्शो जोतीकेम जोचा माल्नीमी? इन खोइलीम हिलो सेल्शो ब्वाक्कु तूचा माल्नीमी?” देत।

20 मोपतीके परमप्रभु, परमप्रभु यावेमी मेको आन कली “गो आंमान दोम्शो नु ग्येशो भेडा आन दातेम निसाफ पाइनुड।

21 मारदे हना गेपुकीम दा ग्येशो आन कली इन फिलाम नु बलाम नेम्ना नेम्न नु मचाप्शो आन कली खुना खुन एर ओथ ब्रपाइक्नीनी।

22 गो आं क्यारश भेडा नेल्ल आन कली प्रॉइनुडमी। मिनु मेको मुल रे रोइक्चा मपुइसीनीम। मिनु गो भेडा आन दातेम निसाफ पाइनुड।

23 गो मेको आन कली गोठला का वोइक्नुड। आं गेय पाइब दाऊद कली वोइक्नुड। मिनु मेकोम मेको आन कली कोव्व। मेको आन कली योव्रशा मेको आन गोठला दुम्ब। इजीकीएल ३७:२४; येरमीया ३०:९; होसे ३:५; यूहन्ना १०:१४-१६

24 मिनु गो, परमप्रभु यावे मेको आन परमप्रभु दुम्नुड। मिनु आं गेय पाइब दाऊद चहिं मेको आन दातेम सासन पाइब दुम्ब। गो, परमप्रभु यावेमी एको लोव्र पाता” देंत।

25 मेकोमी “गो मेकोपुकी नु थुं नाइशशा बाक्तीक कबल का पाइनुड। मिनु गो रागी कली ब्वाकी डा जन्तु रे प्रॉइनुड। मिनु मेकोपुकी महिंथु थुं नाइशशा गोरशो रागी नु ब्वाकीम इप्या ताइनीम। इजीकीएल ३७:२६; लेवी २६:६; होसे २:२०

26 गो मेको आन कली नु आं डांडा आ एर ओथ नेल्ल डा रागी कली अरु आन कली आसीक गेब सेल्लुडमी। गो रेउ यिची ना मेको आन कली रेउ यिपाइक्नुड। मेको रेउ आसीक खोदेशो पा यीब। लेवी २६:४

27 मिनु रूम बाक्शो रवाम फल सिल्लीम। खपीम मारेइ मारेइ ग्रेल्लीम। मिनु मुरपुकी आंम रूमी रिम्शो बाक्ने चाप्नीम। गो मेको आन जुवा जिक्शा, मेको आन कली वाइल सेल्ल आन गुइ रे प्रॉइनुडमी। मेना गोन परमप्रभु यावे नड, दे तुइक्नीम।

28 मिनु रागी रागी डा मुरपुकीमी मेको आन कली रोइक्ने मचाप्नीम। ब्वाकी डा जन्तुपुकीम यो मेको आन कली मब्वाइनीम। मेकोपुकी रिम्शो बाक्नीमी। मिनु सुडम मेको आन कली महिंपाइक्नीम। येरमीया ३०:१०

29 गो मेको आन कली शुश अन्न ग्रेल्लीक रू गेनुडमी। मोपा मेकोपुकी रागीम लेशा गेनायो शोव्रलु मबेक्नीम। मिनु रागी रागी डा मुर आन शुक्शी पाइशशो फाल्चा ममाल्लीम। इजीकीएल ३६:३०

30 मिनु मुरपुकीमी गो, परमप्रभु यावे मेको आन परमप्रभु नड, दे तुइक्नीम। गो मेकोपुकी नु बाक्नुड, दे तुइक्नीम। मिनु मेकोपुकीम इस्राएल आ खिं डा मुर आं मुर नम, दे तुइक्नीम। इजीकीएल ११:२०

31 गे आं भेडा खोदेशो ननी। आं योव्रतीके डा भेडा बाक्नीनी। मिनु गो इन परमप्रभु नड” दे परमप्रभु, परमप्रभु यावेमी देंत। भजन संग्रह १००:३

## 35

एदोम गोरशो रागी दुम्चशो

1 मिनु परमप्रभु यावेमी आं कली लोव्र पाप्तु।

2 मार लोव्र पाप्तु देंशा हना “ए मुर, गे सेडर पहाड गे कोव्वडो। मिनु मेको कली आं लोव्र पावो। इजीकीएल २५:१२-१४

3 परमप्रभु, परमप्रभु यावेमी ‘ए सेडर पहाड, गो इ कली लोव्र का पचा माल्लुड। आं गुइ इ गे क्युक्नुड। मिनु इ कली मुर मबाक्तीके नु श्येत्थ सेल्लन।

4 गो इ सहर प्रेतुड। मिनु गे मुर मबाक्तीक दुम्नेवे। मिनु गोन परमप्रभु यावे नड, दे तुइक्नेवे।

5 गे साइ इस्राएल कली ईख कुरतीवी। मिनु इस्राएली आन श्येत जची ना नु आन नोले डा सजाइ तची ना तरवारम क्योरचा कली जिम्मा गेप्तीवी। भजन संग्रह १३७:७

6 मोपतीके परमप्रभु, परमप्रभु यावेमी, गो आं ब्रॉइशा बाक्शो खोदेशो पा, गो इ कली हुश खाक्श पोक्ब आन गुइमी जिम्मा गेनन। मारदे हना गे हुश खाक्श पोक्चा दाक्तावी। हुश खाक्श पोक्तीकेम इ कली खेदा पाइब।

7 गो सेडर पहाड कली श्येत्थ नु मुर मबाक्शो पहाड सेल्लुड। मेको रे पा एर ओथ पाइब नेल्ल आन कली खतम सेल्लुडमी।

8 गो इ पहाड नेल्ल साइशशो मुरपुकीम प्रिनुड। तरवारम साइशशोपुकी इ डांडा मेर, इ बेसी मेर नु इ खोल्ला मेर गोल्लीम।

9 गो इ कली गेना हना यो कली श्येत्थ सेल्लन। इ सहर मुर मबाक्तीक दुम्नीम। मिनु गोन परमप्रभु यावे नड, दे तुइक्नेवे”।

10 गो परमप्रभु यावे मेक बाक्ती हना यो, गे ‘मेको रागी निक्शी नु राज्य निक्शी आं के दुम्ब। मिनु गो मेको आन कली हुकुम पाइनुड’ देंत।

11 मोपतीके परमप्रभु, परमप्रभु यावेमी गो आं ब्रॉइशा बाक्शो खोदेशो पा गे इ गाइशशो नु गेहे पतीक कौइताक्यी। मारदे हना गे इस्राएल कली काइ मदाक्ती। गो इ कली मोदेशोन पाइनुड। गो इ कली निसाफ पडानु, इन दातेमी आं कली तुइक्पाइक्नुड।

12 मिनु गे गो परमप्रभु यावे नड, दे तुइक्नेवे। मिनु गो इस्राएल डा पहाड आन पबर्म इ शुक्शी पा पशो लोव्र नेल्ल नेता। गे मार देंते देंशा हना ‘इस्राएल डा पहाड नेल्ल मुर मबाक्तीके दुम्शो बाक्नीम। मिनु मेको आं कली गेशो बाक्ब’ देंते।

13 गे आं कली टेयब लेशा कौइताक्यी। मिनु गे आं पबर्म शुश मरिम्शो लोव्र पाप्तीवी। गो मेको नेल्ल नेता।

14 रागी नेल्ल ग्येरसीशा बाक्मानु, गो इ कली चहिं मुर मबाक्तीक रागी सेल्लुड।

15 मारदे हना गे इस्राएल मुर मबाक्तीके दुम्नेनु, आं के दुम्त, दे ग्येरसीशो बाक्ते। मोपतीके, गो यो इ कली मोदेशोन पाइनुड। गे सेडर पहाड नु एदोम नेल्ल मुर मबाक्तीके दुम्नीनी। मिनु गोन परमप्रभु यावे नड, दे तुइक्नीनी” देंत।

## 36

इस्राएली आन रागी लेत्नीम

1 परमप्रभु यावेमी “ए मुर, इस्राएल डा पहाड आन कली आं लोत्र पावो। मेको आन कली ए इस्राएल डा पहाड, परमप्रभु यावे आ लोत्र नेनीन। इजीकीएल ६:२

2 मिनु परमप्रभु, परमप्रभु यावेमी इन जोरी सत्रुपुकीमी ‘मुल मेको माइत पहाड नेल्ल इं के दुम्तेकम’ दैतेकम। इजीकीएल २५:३

3 मोपतीके आं लोत्र पावो, परमप्रभु, परमप्रभु यावेमी ‘मारदे हना मेकोपुकीम इन कली नेल्ल मुर मबाक्तीके सेल्शा, एर ओंथ रे श्येत गेम्तेकम। मिनु गे रागी रागी डा लीशो मुर आन रागी दुम्तीनी। मिनु गे मुर आन दातेम शुक्शी पाइक्तीक दुम्शो बाक्तीनी।

4 मोपतीके गे इस्राएल डा पहाडपुकी, परमप्रभु, परमप्रभु यावे आ लोत्र नेनीन। परमप्रभु यावेमी डांडा, पहाड, खोलसा, बेंसी, ब्रेशो सहर नु मुर मबाक्शो सहर गे इन कली इन एर ओंथ बाक्शो मुरपुकीमी रोइक्ताकम। मिनु रिशशा इन कली आइक्च सेल्तेकम।

5 मोपतीके परमप्रभु, परमप्रभु यावे आं लोत्र नेनीन। गो थाम्पा रुश पा, अर्को रागी नु एदोम रागी नेल्ल आन कली लोत्र पाडनुड। मारदे हना मेकोपुकीम आन थुं नेल्लेम ग्येरसीशा आं रागी आन के सेल्तेकम। मारदे हना रिम्शो योव्रतीक जोतीक बाक्शा, मेको आंम कली रोइसाकम’ दैत। इजीकीएल ३५:१५

6 मोपतीके इस्राएल रागी आ पर्वम आं लोत्र पावो। मिनु डांडा, पहाड, खोलसा नु बेंसी आन कली परमप्रभु, परमप्रभु यावेमी ‘गो रुश पा शुश चुरशा लोत्र पाडनुड। गेपुकीम रागी रागी डा मुर आन शुक्शी पशो फाल्चा माल्तीनी’ दैत।

7 मोपतीके परमप्रभु, परमप्रभु यावेमी ‘गो गे इन एर ओंथ बाक्ब रागी रागी डा मुरपुकीम यो शुक्शी पाइक्चा पुंडसीनीम’ दे कसम जाडनुड।

8 तन्न गे इस्राएल डा डांडापुकी, गेपुकीम चहिं इन राशी डोन सम्म हाम्शा, आं मुर इस्राएली आन कली फल सिप्पाइक्नीनी। मारदे हना मेकोपुकी रीब पा आन खिं लेत्नीम।

9 कोल्रडीन मुल गो इन कली कोल्रनुड। गो इन गे लेशशा, इन कली दोपाइशशा, वांचेर शोक्पाइक्नुड।

10 गो इ मुर आन कली सोपाइशशा बोपाइशशा शुश सेल्लुड। इस्राएल आ खिं डा मुर नेल्ल आन कली मोदेशो पाडनुड। मिनु सहरम लेंशा मुर बाक्नीम। मिनु ब्रेशो खिं नेल्ल लेंशा सेल्सीब।

11 गो इन मुर नु इन बी ब्यफ, क्यारश भेडा शुश सेल्लुडमी। मिनु मेको शुश दुम्शा, शुश गिकनीम। गो डोंइती डा खोदेशो पा इन बाक्तीकम मुर बाक्पाइक्नुडमी। मिनु गो इन कली डोंइती डा क्येडा रिम्शो पाडनुड। मिनु गोन परमप्रभु यावे नड, दे तुइक्नीनी। लेवी २६:९

12 गो आं मुर इस्राएली आन कली इ तार गाक्पाइक्नुड। गे मेको आन के दुम्तीनी। मिनु गे मेको आन शोंप दुम्तीनी। गेपुकीम गेनायो मेको आन तमी तौ रोइशशा मलाइक्नीनी” दैत।

13 मिनु परमप्रभु, परमप्रभु यावेमी “मुरपुकीम इन पर्वम ‘गे मुर ब्वाइनीनी। मिनु आंम इन रागी डा आल आन कली साइक्नीनी’ देशो बाक्नीम” दैत।

14 मोपतीके परमप्रभु, परमप्रभु यावेमी “गेपुकीम मुल रे लेंशा गेनायो मुर मब्वाइनीनी। मिनु आंम रागी डा तमी तौ मसाइक्नीनी।

15 गो रागी रागी डा मुरपुकीम इन कली शुक्शी पचा मगेनन्नी। मिनु मुरपुकीम इन कली दिप्शो फाल्चा ममाल्नीनी। मिनु इन रागी डा मुर आन कली दाइल मपपाइक्नीनी” दे परमप्रभु, परमप्रभु यावेमी दैत।

मुरुम परमप्रभु आ सोक्त ताइनीम

16 मिनु लेंशा परमप्रभु यावेमी आं कली लोत्र पाप्तु।

17 मार लोत्र पाप्तु देश हना “ए मुर, इस्राएली आंम आन रागीमी बाक्शो बाक्मानु, मेकोपुकीम मेको रागी कली आन पतीक नु आन गेयम ग्रांशा दिशो सेल्तेकम। मेको आन मरिम्शो पशो मीश मुर आ रां ब्रोल्शो ग्रांशा खोदेशो बाक्त। मेकोपुकीम रागीम हुश शाइक्पाइक्तीके नु आन मूर्तिम मेको रागी ग्रांशा दिशो सेल्तेकम। मेको आन पतीके आं डोंइती रां ब्रोल्शो मीश मुर खोदेशो ग्रांशा बाक्त। लेवी १८:२४-२५

18 मारदे हना मेकोपुकी हुश खाक्श पोक्तीके नु मूर्ति रे पा मेको रागी ग्रांशा दिशो सेल्तीके गो आं चुरशो मेको आन तारी मोइक्ता।

19 गो मेको आन कली रागी रागी डा मुर आन दातेम ब्रपाइक्तामी। मिनु मेकोपुकी राज्य राज्यम एर ओंथ दुम्शा ब्राम्तेकम। गो मेको आन पतीक नु मेको आन गेय खोदेशो पा निसाफ पाता।

20 मिनु मेकोपुकी रागी रागी डा मुर आन दातेम जाक्शा, आं नें मरिम्शो सेल्तेकम। मारदे हना मेको आन पर्वम ‘एकोपुकी दा परमप्रभु यावे आ मुर नम। मो हना यो आन रागी प्रोइचा माल्तेकम’ दैतेकम। यसेया ५२:५

21 तन्न गो आं का ला बाक्शो नें आ पर्वम मिम्ताक्ड। मेको आं नें रागी रागी डा मुर आन दातेम मरिम्शो सेल्शो बाक्तेकम” दैत। इजीकीएल २०:९

22 परमप्रभु, परमप्रभु यावेमी “मोपतीके इस्राएल आ खिं डा मुर आन कली ‘ए इस्राएल आ खिं डा मुर, गो इन पर्वम एको गेय मपाडनुड। तन्न गो आं नें आ पर्वम गेय पाडनुड। गे इन लतीक रागी रागी डा मुर आन दातेम आं नें मरिम्शो सेल्तीनी। यसेया ४८:११; येरमीया १४:७

23 गो आं ठेयब नें लेंशा रिम्शो सेल्लुड। मेको रागी डा मुर आन दातेम मरिम्शो सेल्शो बाक्त। मिनु रागी रागी डा मुरपुकीम गोन परमप्रभु, परमप्रभु यावे नड, दे तुइक्नीम। मत्ती ६:९; इजीकीएल ३७:२८

24 गो इन कली रागी रागी डा मुर आन दाते रे थुंडनुड। मिनु राज्य नेल्ल रे इन कली खुप्शा, इन आंम रागीम चाक्नुड।

25 गो इन तार रिम्शो ब्वाक्कु बुडक्नुड। मिनु गे इन ग्रॉग्रा दिशो गेय नु इन मूर्ति पूजा पतीक ताइश्शा रिम्शो दुम्नीनी। इन ग्रॉग्रा दिशो दुम्शो नेल्ल रे ग्रॉग्रा मदिशो सेलन्नी। जकरिया १३:१; हिब्रू १०:२२

26 गो इन कली नक थुं का गेनुड। मिनु गो इन थुंम नक सोक्त का कुर पाइनुड। गो इन आगा रे फुल्लु के थुं गुंडशा, मेको आ पा डा श्ये के थुं कुर पाइनुड। इजीकीएल ११:१९-२०; येरमीया ३१:३३

27 गो आं सोक्ती इन आगाम वोइक्नुड। मिनु आं फुल्लुम मुशा ब्रेक्शो लोत्र नु आं निसाफ पतीक लोत्र होस पा पाइब सेल्लुड। इजीकीएल ३९:२९; यसेया ४४:३; इजीकीएल ३७:२४

28 मेना गेपुकी गो इन किकी पिपी आन कली गेशो रागीम बाक्नीनी। मिनु गे आं मुर दुम्नीनी। मिनु गो इन परमप्रभु दुम्नुड। इजीकीएल ११:२०

29 गो गे इन कली ग्रॉग्रा दितीक रे प्रॉइन्नी। गो शुश अन्न ग्रेल्लपाइक्नुड। मिनु गो गे इन कली अन्काल मपपाइक्नुड।

30 गो रवा आन फल नु रू डा मारेइ मारेइ आन कली शुश सेल्लुड। मोपा गेपुकी गेनायो रागी रागी डा मुर आन दातेम अन्काल पा मुने मदोक्नीनी। इजीकीएल ३४:२९; योएल २:१९

31 मेना गे इन मरिम्शो पशो गेय नु मरिम्शो पशो आ पर्वम मिन्नीनी। मिनु गे इन मरिम्शो पशो नु मूर्ति पूजा पतीके आन आन पर्वम आंमान ग्रॉग्रा दीसीनीनी। इजीकीएल २०:४३

32 गो इन पर्वम एको गेय पशो मनड। मेको तुइक्चा मालनीनी। ए इसाएल आ खिं डा मुर इन पशो गेयम पतीके मुने दौक्शा सुर्ता पन' ” दैत।

33 परमप्रभु, परमप्रभु यावेमी “मेको नाक्ती गो इन कली इन मरिम्शो पशो नेल्ल रे लेंशा रिम्शो सेल्लुड। गो इन सहर आन कली लेंशा मुर बाक्तीक सेल्लुड। मिनु ब्रेश्शो नेल्ल लेंशा सेल्लुड।

34 लां गाक्ब मुरपुकीमी इन मशोक्शो रू तचा क्येडा डोंइती मेकेर मार मार शोक्चा कली लेंशा दोइनीम।

35 मिनु मेकोपुकीम ‘एको श्येत्थ रू एदेन आ फल फुल रू खोदेशो दुम्शो बाक्ब। एको श्येत्थ दुम्शो मुर मबाक्शो नु ब्रेश्शो सहर मुल मुरपुकीम ब्रीशा गारो हिरशो बाक्नीम’ दैनीम।

36 मेना इन एर ओथ लीशो रागी डा मुरपुकीम परमप्रभु यावेमी मेको ब्रेश्शो सहर कली लेंशा सेल्लुड। मिनु श्येत्थ दुम्शो रागीम लेंशा मार मार वापाइक्नुड, दे तुइक्नीम। गो परमप्रभु यावेमी मेको पाता। गो मेको यो पाइनुड” दैत। इजीकीएल १७:२४; येरमीया १:१०; येरमीया १८:७-८

37 मिनु परमप्रभु, परमप्रभु यावेमी “गो इसाएल आ खिं डा मुर आन पुंडशो नेंशा, मेको आन मुर आन कली क्यारश भेडा खोदेशो पा शुश सेल्लुडमी। मीका २:१२

38 गो मेको आन कली यरूसलेम डा चाडम चढेतीक भेडा खोदेशो पा शुश सेल्लुडमी। मोपा सहर लेंशा शुश मुरपुकीम ब्रीनीम। मिनु मेकोपुकीम गोन परमप्रभु यावे नड, दे तुइक्नीम” दैत।

## 37

सोत्रशो रुश बाक्शो बेसी

1 परमप्रभु यावेमी आं कली थिती। मिनु परमप्रभु यावे आ सोक्तीम आं कली बेसी आ दातेमी चाक्ती। मेको बेसी रुशेइ रुशेम ब्रीशो बाक्त। इजीकीएल १:३

2 मेकोम आं कली मेको रुश बाक्तीकम एर ओथ पपाइक्ती। मेको बेसीम शुश रुश बाक्तेक्म। मेको थाम्पा सोत्रशो बाक्तेक्म।

3 मिनु मेकोम आं कली “ए मुर, मार, एको रुश लेंशा ब्रोंइने चान्नीमी डा?” दैत। मिनु गो “परमप्रभु, परमप्रभु यावे, गे ला मेको तुइक्नीनी” दैती।

4 मिनु मेकोम आं कली “एको रुश आन कली आं लोत्र पा ‘ए सोत्रशो रुश परमप्रभु यावे आ लोत्र नेनीन’ देनो” दैत।

5 मिनु परमप्रभु, परमप्रभु यावेमी “मेको रुश आन कली ‘गो इन आगाम सोक्त ओत्रपाइक्नुड। मिनु गे ब्रोंइनीनी। भजन संग्रह १०४:३०

6 गो इन कली नारीम बोइक्नन्नी। इन श्ये वापाइक्नुड, कुशुलम गिलन्नी। मिनु गो इन आगाम सोक्त कुर पाइक्नुड। मिनु गे ब्रोंइनीनी। मिनु गेपुकीम गोन परमप्रभु यावे नड, दे तुइक्नीनी” दैत। यसेया २६:१९

7 मोपतीके गो मेकोमी देशो खोदेशो पा परमप्रभु यावे आ लोत्र पाता। मिनु गो मेको परमप्रभु यावे आ लोत्र पन पन बाक्डानु, मेकेर करक कुरूक पशो नैता। मिनु मेको रुशपुकी का नु अर्को बोइसीचा गोम्तेक्म।

8 मिनु गो आं कोत्रन कोत्रना मेको आन नारी बोइसीशा, श्ये गूत। मिनु मेको कुशुलम गिल्लाक्म। तन्न मेकोपुकी नु सोक्त मबा।

9 मिनु मेकोमी आं कली “ए मुर, सोक्त कली आं लोत्र पावो। गे मुर, आं लोत्र पावो। मेको आन कली परमप्रभु, परमप्रभु यावेमी ‘ए सोक्त, पूर्व, पच्छिम, उत्तर दक्खिन रे जाक्कीन। मिनु एको बेक्शो आन कली मुडक्तीन। मिनु ब्रोंइमल’ देनो” दैत।

10 मिनु गो परमप्रभु यावे आ अरेशो पाता। मिनु मेको ब्रोंइतीक सोक्त मेको आन आगाम ओत्रत। मिनु मेकोपुकी ब्रोंइशा राप्तेक्म। मिनु थम ठेयब हुल का दुम्त।

11 मिनु मेकोम आं कली “ए मुर, एको रुश नेल्ल इसाएल आ खिं डा मुर बाक्नीम। मेकोपुकीम ‘आंइ रुश नेल्ल सोत्रने शुम्तेक्म। मिनु आंइ आस नेल्ल जाम्त। गो थमा पा ताइक्चा पुंडसाक्क’ दैतेक्म। इजीकीएल ३७:१

12 मोपतीके मेको नेल्ल आन कली आं लोत्र पा ‘गो, परमप्रभु, परमप्रभु यावेमी तुरस रोक्शा, इन कली गुंडनुड। आं मुरपुकी, गो इन कली लेंशा इसाएल रागीम चाक्नन्नी।

13 ए आं मुरपुकी, गो इन तुरस रोक्शा गुंडनु, गेपुकीम गोन परमप्रभु यावे नड, दे तुडक्नीनी।  
 14 गो आं सोक्त इन कली कुर पाइक्नन्नी। मिनु गे ब्रोंइनीनी। मिनु गो इन कली आम इन रूम बाक्पाइक्नुड। मिनु गेपुकीम गो परमप्रभु यावेमीन एको लोत्र पाता। मिनु मेको पाइनुड, दे तुडक्नीनी' देनो" दे परमप्रभु, यावेमी दैत।

यहूदा नु इस्राएल रागी का दुम्शो

- 15 परमप्रभु यावेमी आं कली लोत्र पाप्तु।  
 16 मार लोत्र पाप्तु दैशा हना "ए मुर, कोक्के का चाक्शा 'यहूदा नु इस्राएल डा मुर' दे ब्रेक्तो। मिनु नोले अर्को कोक्के का चाक्शा 'योसेफ, एफ्राइम नु मेको नु बाक्ब इस्राएल आ खिं नेल्ल' दे ब्रेक्तो।  
 17 मिनु मेको निम्फा फ्रिप्शा कान सेल्सी। मोपा मेको इ गुडम कोक्के कान दुम्ब।  
 18 मिनु इ मुरपुकीम इ कली 'मेको आ अर्थ मार बाक्बा गे आंइ कली मशेंनीनी?' दे हिल्लो पाइनीम।  
 19 गे मेको आन कली परमप्रभु, परमप्रभु यावेमी गो एफ्राइम आ गुडम बाक्शो योसेफ आ कोक्के, इस्राएली आन थर डा यहूदा आ कोक्के नु फ्रिप्नुड। मोपा गो मेको आस कली कोक्के कान सेल्नुड। मिनु मेको आं गुडम कान दुम्नीस।  
 20 मिनु मेको इन ब्रेक्शो कोक्के इन डोंइती इन गुडम ग्याइश्शा बाक्नीस" दैत।  
 21 मेना परमप्रभु, परमप्रभु यावेमी मेको आन कली "इस्राएल डा मुर तेको तेको रागीम लमा, गो मेको आन कली रागी नेल्ल रे खुप्नुडमी। मिनु मेको आन कली आम आन रागीम चाक्नुडमी। यसैया ११:१२-१३  
 22 गो मेको आन कली इस्राएल रागी डा पहाडम रागी कान सेल्नुडमी। मिनु मेको नेल्ल आन के पिप कान दुम्ब। मिनु गेनायो रागी निक्शी मदुम्नीस। मिनु राज्य निक्शी मदुम्नीस। इजीकीएल ३४:२३; येरमीया ३:१८; होसे २:२  
 23 मिनु मेकोपुकीम लेंशा गेनायो आन मूर्ति नु अरु ग्रंथा दिशो थोत्रक नु हेंथे मपाइनीम। मारदे हना गो मेको आन कली नेल्ल आन हेंथे पतीक रे प्रोंइनुडमी। मिनु मेको आन कली आं मुर सेल्नुडमी। मिनु मेकोपुकी आं मुर दुम्नीम। मिनु गो मेको आन परमप्रभु दुम्नुड। इजीकीएल ११:२०  
 24 आं गेय पाइब दाऊद मेको आन पिप दुम्ब। मिनु मेको आन गोठला कान दुम्ब। मिनु मेकोपुकीम आं निसाफ पतीक लोत्र टीनीम। मिनु मेकोपुकीम आं फुल्लुम मुशा ब्रेक्शो लोत्र होस पा पाइनीम। इजीकीएल ३४:२३; इजीकीएल ३६:२७  
 25 मिनु मेकोपुकी आं गेय पाइब याकूब कली गेशो रागीम बाक्नीम। मेकेर आन किकी पिपी बाक्शो बाक्तेक्म। मिनु मेकेर मेको आन आल, चच युड गेना हना यो बाक्नीम। मिनु आं गेय पाइब दाऊद गेना हना यो मेको आन कली सासन पाइब दुम्ब। लूका १:३२-३३  
 26 गो मेकोपुकी नु थुं नाइश्शा बाक्तीक कबल का पाइनुड। मेको गेना हना यो लीब कबल बाक्ब। गो मेको आन कली आसीक गेशा शुश दुम्पाइक्नुडमी। मिनु गो मेको आन दातेम गेना हना यो कली आं बाक्तीक सेल्नुड। प्रस्थान २५:८; इजीकीएल ३४:२५; यसैया ५४:३०  
 27 आं बाक्तीक मेकोपुकी नुन दुम्ब। मिनु गो मेको आन परमप्रभु दुम्नुड। मिनु मेकोपुकी आं मुर दुम्नीम। इजीकीएल ११:२०  
 28 मेना रागी रागी डा मुरपुकीम गो, परमप्रभु यावेमीन इस्राएली आन कली आं मुर सेल्ला। मिनु आं बाक्तीके मेको आन दातेम गेना हना यो बाक्ब, दे यो तुडक्नीम" दे परमप्रभु यावेमी दैत। इजीकीएल ३६:२३

## 38

गोग आ पबंम लोत्र पशो

- 1 परमप्रभु यावेमी आं कली लोत्र पाप्तु।  
 2 मार लोत्र पाप्तु दैशा हना "ए मुर, मागोग रागी डा ठेयब मुर, गोग आ बाक्तीक लावो। मेशेक नु तूबल डा सासन पाइब कली आं लोत्र पावो। इजीकीएल ३९:६; इजीकीएल २७:१३; इजीकीएल ३२:२६; उत्पत्ती १०:२  
 3 मिनु परमप्रभु, परमप्रभु यावेमी मेको कली 'ए मेशेक नु तूबल डा सासन पाइब गोग, गो इ कली लोत्र का पाइनुड।  
 4 गो इ कली हिरनुड। गो इ शांपेम बोल्सी ब्वेक्नुड। गो इ कली, इ लडाइ पाइब नेल्ल, इ शारा नु इ शारा डोइक्ब, या कुरब नेल्ल आन गुंडनुड। ठेयब नु आइक्च तेक्तीक कुरब, आन तरवार शेशा बाक्नीम।  
 5 पारसी, एथीयोपीया नु पूत डा मुरपुकी, मेकोपुकी नु बाक्नीम। मिनु मेको नेल्लेम आन तेक्तीक शेशा, लडाइ डा ताकी गुक्शो बाक्नीम।  
 6 गोमेर नु आ लडाइ पाइब नेल्ल, उत्तर डा बेथ-तोगारमाह नु आ लडाइ पाइब नेल्ले शुश मुरपुकी गे नु बाक्शो बाक्नीम। इजीकीएल २७:१४  
 7 गे सासीशा बाक्को। मिनु गे नु गारशा लडाइ पचा कली जाक्शो लडाइ पाइब नेल्ल आन कली सासीशा बाक्पतो। मिनु गे मेको नेल्ल आन ठेयब मुर दुम्शा, सासीशा बाक्को।  
 8 शुश नाक्ट नोले लडाइ पचा कली इन कली ब्रेत्नीम। गेपुकीम लडाइम श्येत्थ दुम्शा लेंशा सेल्शो रागी कली लडाइ तोइनीनी। मेको मुर शुश रागी रे खुप्शा, इस्राएल डा पहाडम चाक्शो बाक्नीम। मेकेर शुश बर्स रे मुर मबाक्म। मेकोपुकी रागी रागी रे चाक्शो बाक्तेक्म। मिनु मुल मेको नेल्ल मारेइ मदुम्थु रिम्शो पा बाक्शो बाक्नीम।  
 9 गे फश गिवार खोदेशो पा बारचा माल्नेवे। गे गोस्स खोदेशो पा मेको रागी कली सुम्चा माल्नेवे। गे नु इ लडाइ पाइब नेल्ल नु गे नु बाक्ब नेल्लेम मोदेशो पचा माल्नीनी' देनो" दैत।  
 10 परमप्रभु, परमप्रभु यावेमी "मेको नाक्ती इ थुम मार मार मिम्नेवे। मिनु गे थम मरिम्शो पचा मिम्नेवे।

11 मिनु गेम 'गो गारो महिरशो सहर कली लडाइ तोडनुड। गो सिक्सी पा रिम्शो पा गारो महिरशो, ठेयब लाप्चो मपाइशो नु आग्लो मपाइशो सहरम बाक्ब मुर आन रागी कली लडाइ तोडनुड।

12 मुल गो मेको रागी डा मार मार रोइशशा लाइक्चा कली लडाइ पाडनुड। मेकोपुकी श्येत्य दुम्शो रागीम लेशा खुम्सीशा बाक्शो बाक्तेक्म। मेकोपुकीम शुश बी ब्यफ, क्यारश भेडा थुल्शा शोप चेम्शा रागी आ दातेम बाक्शो बाक्नीम' दैते। न्यायाधीस ९:३७

13 शेबा नु देदान, टारशीश डा ग्याम्ब लेयबपुकी नु मेको आन टिटा लडाइ पाइब नेल्लेम इ कली 'मार, गे रोइक्थ जाक्शो नवे? मार गे रोइशशो मार मार तचा कली, सुन चांटी लाइक्चा कली, बी ब्यफ, क्यारश भेडा नु शुश मार मार रोइक्चा कली, जाक्नी?' " दैशो बाक्नीम।

14 मोपतीके "ए मुर, गोग कली आं लोत्र पावो। मेको कली 'परमप्रभु, परमप्रभु यावेमी इ कली आं मुर इस्राएली मारेड मदुथु रिम्शो पा बाक्मानु, गे मेक मलाइनेवे?

15 डोन इ बाक्तीक उत्तर रागी रे ठेयब हुल, सक्ति पाइशो लडाइ पाइब नु शुश जात डा मुर शारा डोइशशा, गो नु जाक्नीम।

16 गे आं मुर इस्राएली नु लडाइ पचा कली रागी कली सुम्ब गोस्स खोदेशो पा जाक्नेवे। ए गोग, नोले डा नाक्ती गो इ कली आं रागी नु लडाइ पपाइक्नुड। रागी रागी डा मुरुम आं कली तुडक्तमेक्ल, दे मोदेशो पाडनुड। मेको रागी रागी डा मुर आन डोइती गो का ला परमप्रभु यावे नड' दे कोइनुड" दैत।

17 मिनु परमप्रभु, परमप्रभु यावेमी "साइ आं गेय पाइब, इस्राएल डा आं लोत्र पाइबम इ पब्रम लोत्र मपामे डा? मेना मेकोपुकीम शुश बर्स सम्म 'गो इ कली इस्राएली नु लडाइ पथ सोइक्नुड' दे आं लोत्र पाम्तेक्म" दैत। सेफन्याह ३:८

गोग कली सजाइ गेशो

18 परमप्रभु यावेमी "मेको नाक्त मार दुम्ब देशा हना, गोगम इस्राएल कली लडाइ तोइब। मिनु गो थाम्पा चुरनुड।

19 मेको नाक्ती गो आं जोंब बोक्शा, गाइशो चुरशोम इस्राएल रागीम ठेयब खिनु कुइब।

20 मेको नाक्ती समुन्द्र डा डांड, सरीड डा चिक्ब, रागी डा जन्तु, खपीम ग्रेशा गाक्ब जन्तु नेल्ल नु रागी डा मुर नेल्ल आं डोइती खिखि पाडनीम। पहाड नेल्ल ब्रेनीम, रोगु नेल्ल दोक्नीम। मिनु गारो नेल्ल गोल्नीम।

21 गो आं पहाड नेल्लेम गोग आ पब्रम तरवार का क्युक्नुड। मिनु मेको आ मुर नेल्लेम आन तरवार आन लोक्ब आन पब्रम शोइक्नीम। प्रकाश २०:८-९

22 गो मुर बेक्तीक रोइम नु हुश खाक्श पोक्तीकेम मेको कली निसाफ पाडनुड। गो मेको आ लडाइ पाइब आन तार, मेको नु बाक्शो जात जात डा मुर आन हुल तार थम हिंचा डा रेउ, मुप्स, मी नु गन्धक यिपाइक्नुड।

23 मोपा गो आं ठेयब दुम्तीक नु गो आं बाक्शो परमप्रभु बाक्नुड, दे कोइनुडमी। मिनु शुश रागी डा मुर आन डोइती आं कली तुडक्पांडसीनुड। मेना मेकोपुकीम गोन परमप्रभु यावे नड, दे तुडक्नीम" दैत।

## 39

गोग नु आ लडाइ पाइबपुकी बुशो

1 मिनु परमप्रभु यावेमी आं कली "ए मुर, गोग आ मुर आन कली आं लोत्र पावो। मिनु परमप्रभु, परमप्रभु यावेमी इ कली 'गो इ कली लोत्र का पचा मालुनुड। गे मेशेक नु तूबल डा सासन पाइब बाक्नेवे। इजीकीएल ३८:२

2 गो इ कली हिरशा, ग्येत्य गे सोइक्नन। गो इ कली डोन उत्तर रे इस्राएल डा पहाड गे सोइक्नन।

3 गो इ पेरा गुडम बाक्शो लिब्रा तुप्शा तोक्नुड। मिनु इ ग्युरा गुडम बाक्शो ब्रा तोक्नुड।

4 गो इस्राएल डा पहाडमीन साइक्चा पुंडसीनेवे। इ लडाइ पाइब नेल्ल नु गे नु बाक्शो मुर नेल्ल मेकेर साइक्चा पुंडसीनीम। गो इ कली चिक्ब नु ब्वाकी डा जन्तु आन ब्वतीक सेल्लनुड।

5 गे दिमम गोल्नेवे। मारदे हना गो एको लोत्र पाता' दैत।

6 गो मागोग डा मुर नु समुन्द्र आ नेक्था रिम्शो पा बाक्शो आन तार मी सोइक्नुड। मिनु मेकोपुकीम गोन परमप्रभु यावे नड, दे तुडक्नीम।

7 गो आं नें आं मुर इस्राएली आन दातेम तुडक्पाइक्नुडमी। मिनु आं नें कली मरिम्शो सेल्चा मगेनुड। मिनु रागी रागी डा मुरपुकीम गोन परमप्रभु यावे, इस्राएली आन बाक्शो परमप्रभु नड, दे तुडक्नीम।

8 मेको थमा पा दुम्ब। मेको थमा पा जाक्ब। आं दैशो नाक्ती मेकोन बाक्ब" दे परमप्रभु, परमप्रभु यावेमी दैत।

9 मिनु परमप्रभु यावेमी "ले इस्राएल डा सहरम बाक्ब मुरपुकीमी या, आइक्च नु ठेयब तेक्तीके, लिब्रा नु ब्रा, कोक्के नु तूतीके नेल्ल खुप्शा चोइनीम। मेकोपुकीमी मेको ७ बर्स सम्म चोइनीम। यसेया ९:४

10 मेकोपुकीम रू रे शी खुप्चा ममालनीम। ब्वाकी डा रवा तिम्चा ममालनीम। मारदे हना मेकोपुकीम मेको यामीन आन मी मुइक्नीम। मेकोपुकीम आन मार मार गुंडशा लाइक्ब आन के मार मार गुंडशा चाक्नीम। आन कली रोइक्ब आन कली रोइक्नीम" दे परमप्रभु, परमप्रभु यावेमी दैत। येरमीया ३०:१६

गोग कली थिम्शो

11 मिनु परमप्रभु यावेमी "मेको नाक्ती गो गोग आ मुर आन कली इस्राएल रागीम तुरस का गेनुड। मेको इस्राएल डा समुन्द्र आ पूर्व गे मुर आन लतीक बेसी डा लाम बाक्ब। मेकेर गोग आ लडाइ पाइब नु मेको आन कली वारच पाइब हुल नेल्ल थिम्चा पुंडसीनीम। मोपतीके मेको बाक्तीक कली हामोन-गोग आ बेसी देनीम।

12 इस्राएल आ खिं डा मुरपुकीम मेको आन कली ७ महिना सम्मन थिम्ना थिम्ना बाक्नीम। मिनु मोपा रागी कली ग्रांघा मदिशो सेल्नीम।

13 मिनु रागी डा मुर नेल्लेमी मेको आन कली थिम्नीम। गो आं सक्ति कोंडु नाक्ती मेको आन कली ठेयब मिम्तीक का दुम्ब।

14 मेको रागी ग्रांघा मदिशो सेल्चा कली मुर वोइक्नीम। मेकोपुकीम नाक्त किंत किंत कोब्रशा माल्शा, थिश्शा थिम्नीम। मिनु आन माल्तीक गेय ७ महिना सम्म पचा माल्नीम।

15 मेकोपुकी रागी आ एर ओंथ नेल्ल लमानु, सुइमी मुर आन रुश का थित्तेकम हना, मेकेर चिन्ड वोइक्चा माल्बाक्तेकम। मिनु तुरस दोइबपुकीम मेको कली हामोन-गोग डा बेसीम लाइश्शा, थिम्बाक्तेकम।

16 मेकेर हामोनाह देशो सहर का यो बाक्ब। मोपा मेकोपुकीम रागी कली ग्रांघा मदिशो सेल्नीम” दे परमप्रभु यावेम देंत। हामोनाह आ अर्थ “ठेयब हुल” देशो बाक्ब।

17 मिनु परमप्रभु, परमप्रभु यावेमी “ए मुर, नेल्ल खाल डा चिक्ब नु ब्वाकी डा जन्तु नेल्ल आन कली “एर ओंथ नेल्ल रे जाक्कीन। गो इस्राएल डा पहाडम इन कली ठेयब चढ़ेतीक भोज का सेल्लुड। गेपुकीम मेकेर श्ये ब्वाइनीनी। मिनु हुश तूनीनी। प्रकाश १९:१७-१८

18 गेपुकीम शुश सक्ति पाइश्शो मुर आन श्ये ब्वाइनीनी। मिनु रागी डा पिप आन सासन पाइब, बाशान डा सांड, पाठा, बोका नु ब्यफ आन हुश तूनीनी।

19 गो इन कली चढ़ेतीक भोज का गेडानु, गे रूथी बोसो ब्वने चाप्नीनी। गे मदुक्नी सम्म हुश तूने चाप्नीनी।

20 गेपुकी आं भोजम शारा, बग्गी डोइक्ब, सक्ति पाइश्शो मुर नु नेल्ल खाल डा लडाइ पाइब ब्वशा रूनीनी” दे परमप्रभु, परमप्रभु यावेमी देंत।

इस्राएल लेंशा रागी का दुम्शो

21 मिनु परमप्रभु, परमप्रभु यावेमी “गो रागी रागी डा मुर आन डोंइती आं सक्ति कोंडनुड। मिनु रागी रागी नेल्लेम आं निसाफ पशो ताइनीम। आं सजाइ गेशो ताइनीम।

22 मिनु मेको नाक्ते रे इस्राएल आ खिं डा मुरपुकीम गोन परमप्रभु यावे, मेको आन परमप्रभु नड, दे तुइक्नीम।

23 मिनु रागी रागी डा मुरपुकीम इस्राएल आ खिं डा मुर आन मरिम्शो पतीके ग्याइश्शा लाइक्चा पुंडसीशो बाक्तेकम, दे तुइक्नीम। मारदे हना मेकोपुकीम आं कली मरिम्शो पाम्तेकम। मोपतीके गो आं कुल मेको आन रे खुइक्ताकड। मिनु मेको आन कली आन जोरी सत्रु आन गुडम गेतामी। मिनु मेको नेल्ल तरवारम साइक्चा पुंडसाकम। यसैया ५४:८

24 मेको आन ग्रांघा दिशो नु आन हेंथे पशो आ परबम गो मेको आन कली सजाइ गेतामी। मिनु गो आं कुल मेको आन रे खुइक्ताकड” देंत।

25 मोपतीके परमप्रभु, परमप्रभु यावेमी “गो याक्ब आ खिं डा मुर आन कली डोंइती डा खोदेशो पा रिम्शो सेल्लुड। मिनु इस्राएल आ खिं डा मुर नेल्ल आन कली शिशो पाइक्नुडमी। गो आं का ला बाक्शो नें आ परबम रुश पाइनुड।

26 मेकोपुकी रिम्शो पा महिंथु आन रागीम बाक्ची ना, आन मुने नु आं कली मरिम्शो पशो नेल्ल प्रेंनीम।

27 मिनु गो मेको आन कली रागी रागी डा मुर आन दाते रे चाक्नुडमी। मिनु मेको आन कली आन जोरी सत्रु आन रागी रे खुप्नुडमी। मिनु गो शुश रागी डा मुर आन डोंइती मेको आन रे पा गो का ला परमप्रभु नड, दे कोंडनुडमी।

28 मेना मेकोपुकीम गोन परमप्रभु यावे, आन परमप्रभु नड, दे तुइक्नीम। मारदे हना गो मेको आन कली रागी रागी डा मुर आन दातेम ग्याइश्शा लाइक्पाइक्तामी। मिनु का यो मजाम्चा डा पा खुप्शा आन रागीम चाक्नुडमी।

29 मुल रे गो आं कुल मेको आन डोंइती रे गेनायो मखुइक्नुड। मारदे हना गो आं सोक्त इस्राएल आ खिं डा मुर आन तार मोइक्नुड” दे परमप्रभु, परमप्रभु यावेमी देंत। इजीकीएल ३६:२६-२७; योएल ३:१

## 40

परमप्रभु आ खिं कली कोंइशो

1 गोपुकी ग्याइश्शा लाइक्चा पुंडसीशो २५ बर्स दुम्मेनु, डोंइती डा महिना डा १० नाक्त बाक्त। मेना यरूसलेम सहर फ्रुचा पुंडसीशो १४ बर्स दुम्शो बाक्त। मेको नाक्तीन परमप्रभु यावेमी आं कली थिती। मिनु मेकोम आं कली मेकेर लाइक्ती। इजीकीएल १:३

2 परमप्रभुमी आ कोंइतीकेम आं कली इस्राएल रागी लाइक्ती। मिनु आं कली थम ठेयब लाइश्शो डांडा काम वोइक्ती। मेको आ दक्खिन गे सहर का खोदेशो तांइसीशो बाक्त। जकरिया १४:१०

3 मिनु मेकोम आं कली मेकेर लदानु, गो मेकेर मुर का ताता। मेकेर कांसा खोदेशो टल्केशो मुर का बाक्त। मेको आ गुडम सुती के डोरी नु पुक्तीक कोक्के का बाक्त। मेको ठेयब लाप्यो आ नेक्था राप्शो बाक्त। इजीकीएल ४७:३; जकरिया २:५ प्रकाश २१:१५

4 मिनु मेकोम आं कली “ए मुर, कोवडो। मिनु नोफा दाइश्शा नेनो। गो इ कली मार मार कोंइक्नुडा, मेको रिम्शो पा कोव्रशा, इ थुम वोतो। मारदे हना गे मो पचा कली एक चाक्शो बाक्ते। मिनु गे मार ताइक्नेवे, मेको नेल्ल इस्राएल आ खिं डा मुर आन कली शेंदीमी” देंत।

पूर्ब डा ठेयब लाप्यो



5 मिनु गो मेकेर परमप्रभु यावे आ खिं आ एर ओंथ नेल्ल हिरशो गारो का ताता। मिनु मेको मुर आ गुडम बाक्शो पुक्तीक कोक्के ६ ठेयब कुबीत लाइशो बाक्त। मिनु मेकोम गारो पुक्गानु, ३ कुबीत ग्येत्थ नु ६ कुबीत थॉइशो बाक्त। ठेयब कुबीत ०.५ मिटर बाक्ब। १राजा ६:-

6 मिनु मेको नोले लेशा पूर्व गे डा ठेयब लाप्चोम लत। मिनु मेको आ थेंका रे पा डोइश्या लाप्चो ओव्रतीक पिंडी पुक्तु। मिनु मेको पुक्तीक कोक्के का लाइशो बाक्त। पुक्तीक कोक्के ३.२५ मिटर लाइशो बाक्ब।

7 मेकेर बाक्तीके कोठा बाक्तेक्म। मेको नेल्ल पुक्तीक कोक्के का ब्रेम्शो नु पुक्तीक कोक्के का लाइशो बाक्तेक्म। मेको कोठा आन दातेम गेय पतीक कोठा बाक्तेक्म। मिनु आन दाते डा बाक्तीके ५ कुबीत ब्रेम्शो बाक्त। मिनु परमप्रभु यावे आ खिं डा पिंडी डा लाप्चो लतीक लां पुक्तीक कोक्के का ब्रेम्शो बाक्त। कुबीत का आधा मिटर बाक्ब।

8 मिनु मेकोमी ठेयब लाप्चो आ आगा डा पिंडी पुक्गानु, मेको पुक्तीक कोक्के का लाइशो बाक्त।

9 मिनु मेको लतीक लां डा पिंडी पुक्गानु, ८ कुबीत लाइशो बाक्त। मेको आ थाम कुबीत निक्शी थॉइशो बाक्तेक्म। मेको लाप्चो आ पिंडी चहिं परमप्रभु यावे आ खिं गे बाक्त।

10 मिनु पूर्व डा लाप्चो आ एर गे नु ओंथ गे सां सां गेय पतीक कोठा बाक्तेक्म। मेको सांफान उडक्थ उडक्थ बाक्तेक्म। मेको एर नु ओंथ बाक्शो थाम उडक्थ उडक्थ बाक्तेक्म।

11 मिनु नोले मेकोमी लाप्चो ओव्रतीक आ ब्रेम्शो पुक्तु। मेको १० कुबीत ब्रेम्शो बाक्त। मेको लाप्चो नेल्ल १३ कुबीत लाइशो बाक्त।

12 गेय पतीक कोठा आन डोंइती आ दी गे कुबीत का डा आइक्थ गारो बाक्तेक्म। कोठा नेल्ल ६ कुबीत लाइशो नु ६ कुबीत ब्रेम्शो बाक्तेक्म।

13 मिनु नोले मेकोमी गेय पतीक कोठा का डा लाप्चो रे अर्को गेय पतीक कोठा सम्म पुक्गानु, गारो का रे अर्को गारो सम्म २५ कुबीत बाक्त।

14 मिनु साप्शो लतीक लां २० कुबीत ब्रेम्शो बाक्त। थाम आ नेक्था रे लाडगा लतीक लां यो बाक्त।

15 मिनु ओव्रतीक लाप्चो डा खिं नेल्ल लाप्चो रे लाडगा लतीक लां डा पिंडी सम्म ५० कुबीत लाइशो बाक्त।

16 गेय पतीक कोठा थाम आ नेक्था डा झेल डा गारो आ आइक्थ मेरे थरपु हिरशो बाक्तेक्म। एर ओंथ हिरशो साप्शो लतीक लां नेल्ल झेल बाक्तेक्म। मिनु पिंडीम यो मोदेशो झेल बाक्तेक्म। मेको थामपुकीम खजूर रवा आ बुटा आप्शो बाक्तेक्म।

लाडगा गे डा अर्को लाडगा

17 मिनु मेकोमी आं कली परमप्रभु यावे आ खिं डा लाडगा गे डा अर्को लाडगाम चाक्ती। मेकेर कोठा बाक्तेक्म। लाडगा आ एर ओंथ फुल्लु ब्रशो बाक्तेक्म। मिनु मेको फुल्लु ब्रशो खपीम ३० ओटा कोठा बाक्तेक्म।

18 मेको फुल्लु ब्रशो लां ओव्रतीक लाप्चो आ नेक्था बाक्त। मिनु मेको लाप्चो सम्म बाक्त। मेको उड डा फुल्लु ब्रशो लां बाक्त।

19 मिनु मेकोम आइदी डा लाप्चो आ आगा गे लाडगा डा ब्रेम्शो पुक्गानु, मेको सहे का कुबीत बाक्त।

उत्तर गे डा ठेयब लाप्चो

20 मिनु मेकोम उत्तर गे डा परमप्रभु यावे आ खिं डा लाडगा गे डा लाडगा आ लाइशो नु आ ब्रेम्शो पुक्तु।

21 मिनु मेकेर अर्को ठेयब लाप्चो खोदेशो एर ओंथ कोठा सां सां बाक्तेक्म। मेको आ थाम नु आ पिंडी डोंइती डा लाप्चो खोदेशो बाक्तेक्म। मेको आ लाइशो ५० कुबीत नु आ ब्रेम्शो २५ कुबीत बाक्त। कुबीत का ०.५ मिटर बाक्ब।

22 मेको आ झेल, आ पिंडी नु मेको खजूर रवा आ बुटा आप्शो थाम नु पूर्व गे कोव्रशो लाप्चो नेल्ल अर्को खोदेशो बाक्तेक्म। मेकेर लचा कली ७ ओटा थेंका बाक्तेक्म। मिनु मेको पिंडी आगाम बाक्त।

23 पूर्व डा ठेयब लाप्चो आ डोंइती गे परमप्रभु यावे आ खिं डा लाडगाम लाप्चो का बाक्त। उत्तर डा ठेयब लाप्चो आ डोंइती गे यो परमप्रभु यावे आ खिं डा लाडगाम लाप्चो का बाक्त। मेको लाप्चो रे अर्को लाप्चो सम्म पुक्गानु, सहे का कुबीत लाइशो बाक्त। कुबीत का ०.५ मिटर बाक्ब।

दक्खिन गे डा ठेयब लाप्चो

24 मिनु मेकोम आं कली दक्खिन गे लाइक्ती। मिनु मेकेर ठेयब लाप्चो का बाक्त। मिनु मेकोम आ थामपुकी नु आ पिंडी पुक्तु। मिनु मेकोपुकी यो अर्को ठेयब लाप्चो खोदेशो पा उडक्थ उडक्थ बाक्तेक्म।

25 मिनु मेकेर एर ओंथ नेल्ल नु पिंडीम झेल बाक्तेक्म। मेको अर्को ठेयब लाप्चो खोदेशो बाक्तेक्म। मेकोपुकी ५० कुबीत लाइशो नु २५ कुबीत ब्रेम्शो बाक्तेक्म।

26 मेकेर लतीक ७ ओटा थेंका बाक्तेक्म। मेको आ पिंडी आगा गे बाक्त। निम्फा पट्टी थाम बाक्तेक्म। मिनु थाम खजूर रवा आ बुटा आप्शो बाक्तेक्म।

27 मेको आ आगा डा लाडगाम यो दक्खिन गे लाप्चो का बाक्त। मेकोम मेको लाप्चो रे ठेयब लाप्चो सम्म पुक्गानु, मेको सहे का कुबीत बाक्त।

आगा डा लाडगा डा लाप्चो

28 मिनु मेकोम आं कली दक्खिन गे डा ठेयब लाप्चो रे पा आगा डा लाडगाम चाक्ती। मिनु मेकोम दक्खिन डा लाप्चो पुक्तु। मिनु मेको ठेयब लाप्चो यो अर्को ठेयब लाप्चो खोदेशो न बाक्त।

29 मेको आ कोठा, आ थाम नु आ पिंडी अर्को खोदेशो बाक्तेकम। मेको आ पिंडी आ एर ओंथ नेल्ल झेल बाक्तेकम। मेको ५० कुबीत लाइशशो नु २५ कुबीत ब्रेमशो बाक्त।

30 मेकेर एर ओंथ नेल्ल पिंडी बाक्तेकम। मेको २५ कुबीत लाइशशो नु २५ कुबीत ब्रेमशो बाक्तेकम। कुबीत का ०.५ मिटर बाक्ब।

31 मेको आ पिंडी लाडगा गे कोव्रशो बाक्त। मिनु मेको आ थामपुकीम खजूर रवा आ बुटा आप्शो बाक्तेकम। मिनु मेकेर लचा कली ८ ओटा थेंका बाक्तेकम।

आगा लाडगा डा पूर्व डा लाप्चो

32 मिनु मेकोम आ कली पूर्व गे डा आगा डा लाडगाम चाक्ती। मिनु मेको आ ओव्रतीक लाप्चो पुक्तु। मिनु मेको अर्को ठेयब लाप्चो खोदेशो बाक्त।

33 मेको आ कोठा, आ थाम नु आ पिंडी अर्को खोदेशो बाक्तेकम। मेको आ पिंडी आ एर ओंथ नेल्ल झेल बाक्तेकम। मेको ५० कुबीत लाइशशो नु २५ कुबीत ब्रेमशो बाक्त।

34 मेको आ पिंडी लाडगा गे कोव्रशो बाक्त। मिनु मेको आ थामपुकीम खजूर रवा आ बुटा आप्शो बाक्तेकम। मिनु मेकेर लचा कली ८ ओटा थेंका बाक्तेकम।

आगा लाडगा डा उत्तर डा लाप्चो

35 मिनु मेकोम आ कली उत्तर गे डा ठेयब लाप्चो रे पा आगा डा लाडगाम चाक्ती। मिनु मेको ठेयब लाप्चो ये अर्को ठेयब लाप्चो खोदेशो बाक्त।

36 मेको आ कोठा, आ थाम नु आ पिंडी अरु खोदेशो बाक्तेकम। मेको आ पिंडी आ एर ओंथ नेल्ल झेल बाक्तेकम। मेको ५० कुबीत लाइशशो नु २५ कुबीत ब्रेमशो बाक्त।

37 मेको आ पिंडी लाडगा गे कोव्रशो बाक्त। मिनु मेको आ थामपुकीम खजूर रवा आ बुटा आप्शो बाक्तेकम। मिनु मेकेर लचा कली ८ ओटा थेंका बाक्तेकम।

चोशा चढेतीक श्ये क्येतीक कोठा

38 पिंडी आ नेक्था लाप्चो पाइशशो कोठा का बाक्त। मेकेर चोशा चढेतीक ब्वाक्कुम मुरबाक्तेकम।

39 आगा ओव्रतीक लाप्चो आ पिंडीम का पटटी गे टेबल निक्शी बाक्ताक्स। अर्को पटटी गे ये टेबल निक्शी बाक्ताक्स। मेकेर चोशा चढेतीके, पाप आ पर्वम चढेतीके नु दोस आ पर्वम चढेतीके क्योरचा माल्बाक्तेकम।

40 पूर्व डा ओव्रतीक लां डा पिंडी आ डोंइती टेबल निक्शी बाक्ताक्स। मिनु अर्को पटटी डा पिंडी आ डोंइती ये टेबल निक्शी बाक्ताक्स।

41 मोपा आगा ओव्रतीक का पटटी ४ ओटा टेबल नु अर्को पटटी ४ ओटा टेबल बाक्तेकम। मिनु नेल्ल पा ८ ओटा टेबल बाक्तेकम। मेको टेबल तार चढेतीक क्योरचा माल्तेकम।

42 मेकेर ये चोशा चढेतीक कली चेशो फुल्लु के ४ ओटा टेबल बाक्तेकम। मेको कुबीत का नु आधा लाइशशो नु कुबीत का नु आधा ब्रेमशो बाक्तेकम। मेको कुबीत का ग्येल्थ लाइशशो बाक्तेकम। मेको आन तारी चोशा चढेतीक नु अरु चढेतीक क्योरचा कली मार मार माल्मा, मेको नेल्ल बाक्त। कुबीत का आधा मिटर खोदेशो बाक्ब।

43 मिनु श्ये क्युक्तीक अडगुल का ब्रेमशो ओव्रतीक आ एर ओंथ क्युकशो बाक्तेकम। मेकेर चढेतीक श्ये वोइक्का कली टेबल बाक्तेकम।

चढेब आन कोठा

44 मिनु आगा डा ठेयब लाप्चो आ लाडगा गे कोठा निक्शी बाक्ताक्स। कोठा का उत्तर गे डा ठेयब लाप्चो आ लाडगाम बाक्त। मेको दक्खिन गे कोव्रशो बाक्त। अर्को कोठा दक्खिन डा ठेयब लाप्चो आ लाडगा गे बाक्त। मेको उत्तर गे कोव्रशो बाक्त।

45 मिनु मेकोम आ कली “एको दक्खिन गे कोव्रशो कोठा चढेब आन कली बाक्ब। मेको परमप्रभु यावे आ खिम गेय पाइब आन के बाक्ब।

46 मिनु मेको उत्तर गे कोव्रशो कोठा चहिं मेको चढेतीकेम गेय पाइब आन कली बाक्ब। मेकेर सादोक आ चच युइ बाक्नीम। मेको लेवी आन दाते डा मेकोपुकी ला परमप्रभु यावे आ डोंइती जाके चाप्नीम” दैत। इजीकीएल ४३:१९; इजीकीएल ४४:१५; इजीकीएल ४८:११; १राजा १:८,३९; १इतिहास ५:३४-४१

47 मिनु मेकोम मेको लाडगा पुक्तु। मेको सहे का कुबीत लाइशशो नु सहे का कुबीत ब्रेमशो बाक्त। मेको ४ पाटे बाक्त। मिनु मेको चढेतीक परमप्रभु यावे आ खिं आ डोंइती बाक्त। इजीकीएल ४३:१३

परमप्रभु यावे आ खिं

48 मिनु मेकोम आ कली परमप्रभु यावे आ खिं डा पिंडीम चाक्ती। मिनु मेकोम पिंडी डा थामपुकी पुक्तु। मेको निम्फा गे ५ कुबीत ब्रेमशो बाक्तेकम। आगा ओव्रतीक ठेयब लाप्चो ३ कुबीत ब्रेमशो बाक्त। मिनु मेको आ आगा डा गारो ३ कुबीत ब्रेमशो बाक्ताक्स।

49 मेको पिंडी २० कुबीत लाइशशो नु १२ कुबीत ब्रेमशो बाक्त। मेकेर लचा कली १० ओटा थेंका बाक्तेकम। मिनु निम्फा गे थाम का का बाक्त। १राजा ७:२१

1 मिनू नोले मेकोम आं कली परमप्रभु यावे आ खिं आ नेक्था चाक्ती। मिनू मेको आ लाप्यो निक्शी पटटी डा थाम पुक्तु। मेको ६ कुबीत ब्रेम्शो बाक्तेक्म। कुबीत का ०.५ मिटर बाक्ब।

2 आगा ओव्रतीक १० कुबीत ब्रेम्शो बाक्त। मिनू मेको आ एर ओंथ गे डा गारो निक्शी ५ कुबीत ब्रेम्शो बाक्ताक्से। मिनू मेकोम परमप्रभु यावे आ खिं पुक्गानु, मेको ४० कुबीत लाइश्शो नु २० कुबीत ब्रेम्शो बाक्त।

3 मिनू मेको आगा डा कोठा ओव्रत। मिनू मेको आ आगा ओव्रतीक लाप्यो डा थाम पुक्गानु, मेको कुबीत निक्शी ब्रेम्शो बाक्ताक्स। मेको आगा ओव्रतीक ६ कुबीत ब्रेम्शो बाक्त। मेको आगा ओव्रतीक आ एर ओंथ डा गारो निम्फा ७ कुबीत ब्रेम्शो बाक्ताक्स।

4 मिनू मेकोम आगा डा कोठा पुक्गानु, आ लाइश्शो २० कुबीत नु आ ब्रेम्शो २० कुबीत बाक्त। मिनू मेकोमी आं कली “एको चहिं नेल्ल क्येडा चोव्रखो बाक्तीके बाक्ब” देत।

गारोम सेल्शो कोठापुकी

5 मिनू नोले मेकोम परमप्रभु यावे आ खिं डा गारो पुक्तु। मेको ६ कुबीत थांइशो बाक्त। मिनू मेको खिं आ लाडगा डा कोठा ४ कुबीत ब्रेम्शो बाक्तेक्म। मेको खिं आ एर ओंथ नेल्ल मोदेशो पा सेल्शो बाक्तेक्म।

6 मेको लाडगा डा कोठा तला सां पा सेल्शो बाक्तेक्म। का आ तारी अर्को पा सेल्शो बाक्त। मिनू मेको तला नेल्लेमी ३०, ३० कोठा बाक्तेक्म। मिनू मेको परमप्रभु यावे आ खिं आ एर ओंथ नेल्ल डा गारोम कोठा तिक्या कली तिकतीक सेल्शो बाक्तेक्म। मेको तिकशोपुकी परमप्रभु यावे आ खिं आ आगा मओव्रचा डा पा सेल्शो बाक्तेक्म।

7 मिनू परमप्रभु यावे आ खिं आ एर ओंथ डा कोठा ओव्रतीक लां आगा डा तला क्येडा आ तार डा तला ठेयब बाक्त। मुरपुकी उड रे इर सम्म लचा कली दाते डा लतीक रे लचा माल्बाक्तेक्म। मेकेर एर ओंथ क्रेसी सेल्शो बाक्तेक्म।

8 मेको नोले गो परमप्रभु यावे आ खिं आ एर ओंथ नेल्ल रे पा पेटी सेल्शो बाक्त। मेको लाडगा डा कोठा आन जग ६ कुबीत ग्येत्थ लाइश्शो बाक्तेक्म।

9 मेको कोठा आन लाडगा गे डा गारो ५ कुबीत ब्रेम्शो बाक्त। मेको परमप्रभु यावे आ खिं डा कोठा इजीकीएल ४२:१-३

10 नु गारो डा कोठा आन दातेमी २० कुबीत ब्रेम्शो लां बाक्त। मेको खिं नेल्ल एर ओंथ मोदेशो बाक्त।

11 मेको कोठा आन ओव्रतीक ब्रेम्शो लां आगाम लाम्तेक्म। लाप्यो का उत्तर गे बाक्त, अर्को दक्खिन गे बाक्त। मेको आन दाते डा श्येत्थ लां ५ कुबीत ब्रेम्शो बाक्त। जग आ एर ओंथ नेल्ल ५ कुबीत ब्रेम्शो बाक्तेक्म।

12 मेको परमप्रभु यावे आ खिं आ लाडगा गे हिरशो पच्छिम गे डा खिं ७० कुबीत ब्रेम्शो बाक्त। मेको खिं आ एर ओंथ डा गारो ५ कुबीत थांइशो बाक्त। मिनू मेको आ लाइश्शो १० कुबीत बाक्त। कुबीत का ०.५ मिटर बाक्ब।

13 मिनू परमप्रभु यावे आ खिं पुक्गानु, मेको सहे का कुबीत लाइश्शो नु सहे का कुबीत ब्रेम्शो बाक्त। आ आगा डा लाडगा नु खिं आ गारो नु मेको आ गारो सहे का कुबीत ब्रेम्शो बाक्त।

14 परमप्रभु यावे आ खिं आ पूर्व गे डा लाडगा यो सहे का कुबीत बाक्त।

15 मिनू नोले मेकोमी परमप्रभु यावे आ खिं डा लाडगा पच्छिम गे पुक्गानु, निम्फा पटटी डा लतीक लां सहे का कुबीत बाक्त। मिनू परमप्रभु यावे आ खिं, आ चोव्रखो बाक्तीके नु आ डोंइती डा पिंडी डा गारो नेल्ल शीम क्येप्यो बाक्तेक्म।

16 मिनू मेको सांफा आन एर ओंथ नेल्ल गे झेल बाक्तेक्म। लाप्यो गे कोव्रचा कली नेल्ल शीम क्येप्यो बाक्त। उड खप रे झेल सम्म शीम क्येप्यो बाक्तेक्म।

17 लाप्यो आ इर गे, चोव्रखो बाक्तीके नु परमप्रभु यावे आ बाक्तीके आगाम लतीक लाप्योम फारतीक वा बाक्तेक्म। मिनू खिं आ एर ओंथ डा गारो, चोव्रखो बाक्तीके नु खिं डा ठेयब कोठा नेल्ल बुटा आप्यो बाक्तेक्म।

18 मेकेर करूब नु खजूर रवा आन बुटा आप्यो बाक्तेक्म। मेको करूब का खजूर रवा का नु करूब का पा आप्यो बाक्त। मेको करूब नेल्ल आन के कुल निक्शी बाक्तेक्म।

19 मेको करूब आ मुर आ कुल खजूर रवा का गे कोव्रशो, नु अर्को ठिटा गुप्स आ कुल खोदेशो अर्को खजूर रवा गे कोव्रशो बाक्त। मेको परमप्रभु यावे आ खिं डा गारो नेल्लेम मुशा बुटा आप्यो बाक्तेक्म।

20 उड खप रे लाप्यो इर सम्म करूब नु खजूर रवा आन बुटा मुशा आप्यो बाक्तेक्म।

21 परमप्रभु यावे आ खिं डा ओव्रतीक डा लाप्यो डा शी दारपाइक्चा कली ४ ओटा खोप्यो बाक्त। मिनू चोव्रखो बाक्तीके आ डोंइती यो मेको खोदेशो पा बाक्त। मिनू लाडगा डा चोव्रखो बाक्तीक ओव्रतीक लाप्यो डा शी नेल्ल उडक्थ उडक्थ पा ४ पाटे बाक्तेक्म। मिनू थम चोव्रखो बाक्तीक आ डोंइती गे डा लाप्यो डा शी यो मोदेशोम बाक्तेक्म। प्रस्थान २५:२३-३०; प्रस्थान ४०:२२-२३

22 मेकेर शी के चढेतीक का बाक्त। मेको कुबीत सां ग्येत्थ लाइश्शो, कुबीत निक्शी पित्थ लाइश्शो नु कुबीत निक्शी ब्रेम्शो बाक्त। मेको आ सुर, मेको आ तार नु आ एर ओंथ नेल्ल शी के बाक्त। मिनू मेकोमी आं कली “एको टेबल परमप्रभु यावे आ डोंइती बाक्ब” देत।

23 परमप्रभु यावे आ खिं नु आ चोव्रखो बाक्तीक निक्शी के लाप्यो निक्शी बाक्तेक्म।

24 मेको लाप्यो आन के चोक्तीक निक्शी पाइश्शो बाक्तेक्म।

25 मिनू परमप्रभु यावे आ खिं डा लाप्योम गारो डा खोदेशो पा करूब नु खजूर रवा आन बुटा मुशो बाक्तेक्म। पिंडी आ डोंइतीम शी के खाट बाक्शो बाक्त।

26 पिंडी डा गारो आ निम्फा पटटी खजूर रवा आ बुटा मुशा आप्यो बाक्तेक्म।

## 42

चढ़ेब आन कोठा

- 1 मिनु मेकोमी आं कली लाडगा गे डा लाडगा उत्तर गे चाकती। मिनु मेकोमी आं कली परमप्रभु यावे आ खिं नु उत्तर गे डा खिं आ आइक्की डा कोठा गे लाइक्ती। इजीकीएल ४०:१७; इजीकीएल ४१:९, १०, १३
- 2 मेको खिं उत्तर गे सहे का कुबीत लाइशो नु ५० कुबीत ब्रेम्शो बाकत। कुबीत का ०.५ मिटर बाकब।
- 3 आगा डा लाडगा २० कुबीत बाकत। लाडगा गे डा लाडगा डा फुल्लु ब्रशो लां गे कोव्रशो कोठा तारी अर्को तला सां बाक्तेकम।
- 4 कोठा आन डोंइती आन आगा गे १० कुबीत ब्रेम्शो नु सहे का कुबीत लाइशो लां का बाकत। मेको आन लाप्चो उत्तर गे कोव्रशो बाक्तेकम। कुबीत का ०.५ मिटर बाकब।
- 5 आ तार डा कोठा ठेयब लां बाक्तीके आगा नु दाते डा कोठा आन क्येडा आइक्च बाक्तेकम।
- 6 मारदे हना मेको तला सां बाक्तेकम। मेको आन के लाडगा डा थाम खोदेशो पा थाम मबाकम। मोपतीके आइदी डा नु दाते डा कोठा आन क्येडा, मेको आ तार डा कोठा आइक्च बाक्तेकम।
- 7 मेकेर कोठा आन डोंइती गारो का बाकत। मेको गारो ५० कुबीत लाइशो बाकत।
- 8 लाडगा गे डा लाडगा डा कोठा आन लहर ५० कुबीत लाइशो बाकत। तन्न परमप्रभु यावे आ खिं आ आइक्था डा सहे का कुबीत लाइशो बाकत।
- 9 पूर्व रे आगा डा कोठापुकी ओव्रचा कली लां का बाकत। मोपा लाडगा गे डा लाडगा ओव्रने चाप्शो बाक्तेकम।
- 10 मेको लां आ ब्रेम्शो गारो सम्म थिशो बाकत। परमप्रभु यावे आ खिं आ आइक्की दक्खिन गे यो कोठा बाक्तेकम।
- 11 मेको आन डोंइती गाक्तीक लां का बाकत। मेको कोठा उत्तर डा खोदेशो बाक्तेकम। मेको आन खोदेशो लाइशो नु ब्रेम्शो बाक्तेकम। लाडगा लतीके लाप्चो नु मेको आ एर ओथ नेल्ल खाल का डा बाक्तेकम।
- 12 दक्खिन डा कोठा ओव्रतीक लां आ डोंइती अर्को लां ब्राशो बाकत। मेको लां पूर्व गे लत।
- 13 मिनु मेकोमी आं कली “परमप्रभु यावे आ खिं डा श्येत्थ बाक्तीके आइक्की उत्तर गे नु दक्खिन गे डा कोठापुकी चढ़ेब आन कोठा बाक्नीम। मेकेर परमप्रभु यावे आ डोंइती बाक्शो चढ़ेबपुकीमी नेल्ल क्येडा चोव्रखो चढ़ेशो ब्वाडनीम। मेकेर नेल्ल क्येडा चोव्रखो चढ़ेशो, अन्न चढ़ेशो, पाप आ पबर्म चढ़ेशो नु दोस आ पबर्म चढ़ेशो वोइक्नीम। मारदे हना मेको चोव्रखो बाक्तीके बाकब।
- 14 मिनु चढ़ेबपुकी चोव्रखो बाक्तीकेम ओव्रमानु, आन फेक्शो गेय पतीक वा मपुइक्थु, लाडगा यूचा मदुन्नीम। मारदे हना मेको चोव्रखो वा बाक्नीम। मेकोपुकी मुर आन दातेम लचा क्येडा डोंइती अर्को वा फेक्चा मालनीम” देंत। इजीकीएल ४४:१९

परमप्रभु आ खिं पुक्शो

- 15 मिनु मेकोम परमप्रभु यावे आ खिं आगा पुक्ने थुन्तु। मिनु आं कली पूर्व डा लाप्चो रे पा लाडगा गुंइताक्की। मिनु परमप्रभु यावे आ खिं आ एर ओथ लाडगा गे डा लाडगा नेल्ल पुक्तु।
- 16 मेकोमी आ पुक्तीकेम पूर्व गे पुक्तु। मेको ५ सहे कुबीत बाकत।
- 17 मिनु मेकोम आ पुक्तीकेमी उत्तर गे पुक्तु। मेको यो ५ सहे कुबीत बाकत।
- 18 मिनु मेकोम आ पुक्तीकेमी दक्खिन गे पुक्तु। मेको यो ५ सहे कुबीत बाकत।
- 19 मिनु मेकोम आ पुक्तीकेमी पच्छिम गे पुक्तु। मेको यो ५ सहे कुबीत बाकत।
- 20 मोपा मेकोमी पूर्व, उत्तर, दक्खिन नु पच्छिम नेल्ल पुक्तु। मेको आ एर ओथ गारो का बाकत। मेको ५ सहे कुबीत लाइशो नु ५ सहे कुबीत ब्रेम्शो बाकत। परमप्रभु यावे आ बाक्तीके नु मुर आन बाक्तीके तिलचा कली मोदेशो पशो बाकत।

## 43

परमप्रभु आ छेडछेड लेशो

- 1 मिनु मेकोमी आं कली पूर्व डा लाप्चो आ नेक्था चाकती।
- 2 मिनु इस्त्राएली आन परमप्रभु आ छेडछेड पूर्व रे जाकत। मेको आ रेयके ठेयब समुन्द्र आ रेयके खोदेशो नेंसाक्व। मिनु रागी नेल्ल मेको आ छेडछेडम हाम्सो दुम्त। इजीकीएल १:२८
- 3 मेको आं डोंइती तशो परमप्रभु यावेमी सहर कली खतम सेल्ची ना जाक्मेनु, कोंइतीक खोदेशो बाकत। मेको केबार खोला आ नेक्थाम तशो कोंइतीके खोदेशो बाकत। मिनु गो खुम्की पा बाप्ती। इजीकीएल ८:-११-; इजीकीएल १:-
- 4 मिनु परमप्रभु यावे आ छेडछेड मेको पूर्व डा लाप्चो रे पा आ खिं ओव्रत। इजीकीएल १०:१९
- 5 मिनु सोक्तीम आं कली क्युक्शा, आगा डा लाडगाम ओइताक्की। मिनु परमप्रभु यावे आ खिं छेडछेडम ब्रीत। इजीकीएल १:२८; प्रस्थान ४०:३४; १राजा ८:१०-११
- 6 मिनु मेको मुर आं नेक्था राप्शा बाक्मेनु, गो परमप्रभु यावे आ खिं रे आं कली लोव्र पशो नेंता।
- 7 मार लोव्र पाप्नु देशा हना “ए मुर, एको दा आं ठेयब नित्तीक बाक्ब। मिनु एको आं खोइल नाइक्तीक यो बाक्ब। गो इस्त्राएल डा मुर आन दातेम गेना हना यो बाक्नुड। मुल रे इस्त्राएल आ खिं डा मुरुम आं नें कली मरिम्शो मसेल्नीम। मेको नु आन पिपम आन मूर्ति पूजा नु आन बेक्शो पिप आन पबर्म पतीके आं नें मरिम्शो मसेल्नीम। भजन संग्रह १३२:७-८

8 मेकोपुकीम आं खिं आ नेक्था आन खिं सेल्लेक्म। आं लाप्चो आ डोंइती आन लाप्चो सेल्लेक्म। मिनु गो नु मेको आन दातेमी गारो का ला लीत। मिनु मेको आन ग्रांरा दिशो गेयम, आं नें ग्रांरा दिशो सेल्लेक्म। मोपतीके गो गाइशशा मेको आन कली साइक्तामी। इजीकीएल ८:७-१८

9 मुल मेकोपुकीम आन मूर्ति पूजा पतीक प्रोन्मेक्ल। मेको आन बेक्शो पिप आन पर्वम पतीके प्रोन्मेक्ल। मिनु गो मेको आन दातेमी गेना हना यो बाक्नुड।

10 ए मुर, इसाएल आ खिं डा मुर आन कलीं आं खिं आ पर्वम शेंदीमी। मिनु मेको दोपा सेल्सीशो बाक्मे, मेको पुक्पतो। मिनु मेको आन मरिश्शो पशो आ पर्वम मुने दोक्मल। इजीकीएल ३६:३२

11 मिनु मेकोपुकीम आन पशो आ पर्वम मुने पांम्तेक्म हना, मेको आन कली आं खिं दोपा सेल्सीशो बाक्मे, मेको तुइक्पतो। मेको आ लाडगा लतीके, खिंडगा ओव्रतीके, मेको दोदेशो तांइसीबा, आं देशो पतीक लोव्र, आं अरेशो लोव्र नु शेंतीक नेल्ले मेको आन डोंइती ब्रेकोत। मोपा मेको नेल्ले अरेशो होस पा टीब दुम्मल।

12 परमप्रभु यावे आ खिं आ पर्वम आ अरेशो लोव्र मार बाक्त देशा हना, मेको डांडा आ एर ओंथ नेल्ल आं के बाक्तीक बाक्ब। मेको परमप्रभु यावे आ खिं आ पर्वम आ अरेशो लोव्र बाक्ब” देंत।

#### चढ़ेतीक

13 चढ़ेतीके गिश ठेयब बाक्त देशा हना, मेको नेल्ल पा कुबीतम पुक्शोनु, कुबीत का नु गुड का ब्रेम्शो बाक्त। मेको आ एर ओंथ दोशो जग कुबीत का लुक्य नु कुबीत का ब्रेम्शो बाक्त। मिनु आ एर ओंथ नेल्ल डा सुर बिक्ता का ब्रेम्शो बाक्त। मिनु मेको चढ़ेतीक आ रापतीके दोदेशो बाक्त देशा हना, कुबीत का ०.५ मिटर बाक्ब। इजीकीएल ४०:४७; प्रस्थान ४७:१-८

14 मेको चढ़ेतीक खपीम बाक्शो जग रे आइदी डा सुर सम्म कुबीत निक्शी लाइशशो नु कुबीत का ब्रेम्शो बाक्त। मेको आ आइक्च सुर रे ठेयब सुर सम्म ४ कुबीत लाइशशो नु कुबीत का ब्रेम्शो बाक्त।

15 मिनु मेको चढ़ेशो चोतीक ४ कुबीत ग्येत्य लाइशशो बाक्त। मेकेर रे मेको आ ४ सुर रे ४ ओटा ग्रोव्र सेल्शो बाक्तेक्म।

16 मेको चढ़ेशो थोव्रक चोतीक १२ कुबीत लाइशशो नु १२ कुबीत ब्रेम्शो, ४ पाटे बाक्त।

17 मेको चढ़ेतीक आ ठेयब सुर १४ कुबीत लाइशशो नु १४ कुबीत ब्रेम्शो बाक्त। मेको ४ पाटे बाक्त। मेको आ सुर एर ओंथ आधा कुबीत बाक्त। मिनु आ एर ओंथ दोशो जग कुबीत का ब्रेम्शो बाक्त। मेको चढ़ेतीक आ क्रेसी पूर्व गे कोव्रशो बाक्त।

#### चढ़ेतीक गेय पचा गोशो

18 मिनु मेकोम आं कली “ए मुर, परमप्रभु, परमप्रभु यावेमी ‘मेको चढ़ेतीके सेल्ले थुम्शो नाक्ती चोशा चढ़ेतीके चढ़ेचा नु हुश बुइक्चा कली मेको चढ़ेतीके आ पर्वम पचा माल्लो गेय मार बाक्त देशा हना,

19 गेपुकीम आं कली चढ़ेब सादोक आ खिं डा लेवी आन कली पाप आ पर्वम चढ़ेचा कली बोहोर का गेचा माल्नीनी। मेकोपुकी आं गेय पचा कली आं नेक्था जाक्नीम’ दे परमप्रभु, परमप्रभु यावेमी देशो बाक्ब। इजीकीएल ४०:४६; लेवी ४:१-१२

20 मेकोपुकीमी मेको आ हुश इक्चा चाक्शा चढ़ेतीक आ ४ ओटा ग्रोव्र नु आइक्था डा सुर आन ४ कुना नेल्लेम खेक्तेक्मल। मोपा गे चढ़ेतीक ग्रांरा मदिशो सेल्शा पाप क्याम्तीक गेय पचा माल्नीनी।

21 मिनु नोले गेपुकीम मेको पाप आ पर्वम चढ़ेशो बोहोर चाक्शा, परमप्रभु यावे आ खिं डा देशो बाक्तीकेम चोने।

22 मिनु गेपुकीम आ दीसा नाक्ती मारेड मदुम्शो बोका का पाप आ पर्वम चढ़ेने। गेपुकीम बोहोर चढ़ेशोम चढ़ेतीक ग्रांरा मदिशो सेल्शो खोदेशो पा मेकोम यो चढ़ेतीक कली ग्रांरा मदिशो सेलल।

23 मिनु गेपुकीम चढ़ेतीक नेल्ल ग्रांरा मदिशो सेल्ले थुम्तीनी हना, मारेड मदुम्शो बोहोर का नु बगाल रे मारेड मदुम्शो सांड का चढ़ेने।

24 गेपुकीम मेको आस कली परमप्रभु यावे आ डोंइती वोइक्चा माल्नीनी। मिनु चढ़ेबपुकीम मेको तारी हिकसी वोइशशा, परमप्रभु यावे आ डोंइती चोशा चढ़ेतीक सेल्शा चढ़ेचा माल्नीम।

25 गेपुकीम पाप आ पर्वम चढ़ेचा कली ७ नाक्त सम्म नाक्त किंत किंत क्यारश का, बोहोर का नु बगाल रे मारेड मदुम्शो सांड का चाक्चा माल्नीनी।

26 मिनु मेकोपुकी ७ नाक्त सम्म चढ़ेतीक कली पाप क्याम्तीक गेय पचा नु ग्रांरा मदिशो सेल्शा माल्नीम। मो पशा मेको चढ़ेतीके चढ़ेचा कली जिम्मा गेचा माल्नीम।

27 मिनु मेको नाक्त नुम्मेनु, ८ नाक्त रे चढ़ेबपुकीम इन चोशा चढ़ेतीक नु दुशा बाक्चा आ पर्वम चढ़ेतीक चढ़ेचा माल्नीम। मिनु गो इन कली ब्राइनुड” दे परमप्रभु, परमप्रभु यावेमी देंत।

## 44

#### चोक्शो पूर्व डा ठेयब लाप्चो

1 मिनु नोले मेकोमी आं कली परमप्रभु यावे आ खिं डा पूर्व गे कोव्रशो लाडगा गे डा लाप्चोम चाक्ती। मिनु मेको चोक्शो बाक्त। इजीकीएल ४३:४

2 मिनु परमप्रभु यावेमी आं कली “एको लाप्चो चोक्स डा चोक्स बाक्चा माल्ब। एको रोक्या मदुम्ब। मेकेर रे सुइ ओव्रचा मताइनीम। मारदे हना परमप्रभु यावे, इसाएली आन परमप्रभु एकेर रे ओव्रशो बाक्ब। मोपतीके एको चोक्स डा चोक्स बाक्चा माल्ब। इजीकीएल ४६:२

3 सासन पाइब ला एको लाप्यो आगा डा बाक्तीक परमप्रभु यावे आ डोंइती जचा कली लने चापब। मेको एको लाप्यो आ पिंडी रे ओव्रचा मालब। मिनु मेको खाल का डा लां रे लेत्चा मालब” दैत।

सासन पाइब, लेवी नु चढ़ेब

4 मिनु नोले मेकोमी आं कली उत्तर गे डा ठेयब लाप्यो रे पा परमप्रभु यावे आ खिं आ डोंइती चाक्ती। मिनु मेको कोव्रडुनु, परमप्रभु यावे आ छेडछेडम मेको आ खिं ब्रीशो बाक्त। मिनु गो खुम्की पा बाप्ती।

5 मिनु परमप्रभु यावेम आं कली “ए मुर, आं नेक्था जाक्शा, कोव्रडो। आं खिं आ पबंम पचा माल्शो गेय नु मेको आ पबंम अरेशो लोव्र नेल्ल इ नोफा दाइशशा रिम्शो पा नेनो। सु सु आं खिं ओव्रचा ताइनीमी नु सु सु मताइनीम, दे रिम्शो पा कोव्रशा अरेवो।

6 मेको मटीब मुर, इस्राएल आ खिं डा मुर आन कली परमप्रभु, परमप्रभु यावेमी इन कली ‘ए इस्राएल आ खिं डा मुरपुकी, गे इन ग्रॉग्रा दिशो गेय नेल्ल प्रोनीन।

7 गेपुकी आं कली आं जचा थोव्रक बोसो नु हुश चढ़ेची ना आन थुं नु रॉम खोइक्तीक चिनु मखोइशशो अर्को रागी डा मुर आन कली आं बाक्तीकेम ओव्रचा गेतीनी। मोपा गे आं खिं, मुर आ खिं खोदेशो सेलतीनी। मिनु इन ग्रॉग्रा दिशो गेयम आं कबल प्रोइतीनी। यसैया ५२:१; येरमीया ९:२५

8 गेपुकीम आं कली चढ़ेशो आ पबंम होस मपनी। आं बाक्तीकेम इन गेय पचा कली गे अर्को रागी डा मुर आन कली चोइशशा आं खिं कोव्रब सेलतीनी” दैत।

9 मिनु परमप्रभु, परमप्रभु यावेमी “इस्राएली आन दातेम बाक्शो अर्को रागी डा आन थुं नु रॉम खोइक्तीक चिनु मखोइशशो मुर आं बाक्तीकेम ओव्रचा मताइनीम।

10 तन्न इस्राएली हेंथे गाक्मानु, लेवीपुकी हेंथे गाक्शा, आं कली प्रोइशा, आन मूर्ति कली पूजा पशो बाक्तेक्म। मेकोपुकीम आन पाप आ सजाइ तचा माल्नीम।

11 मिनु मेको लेवीपुकी आं बाक्तीकेम गेय पचा माल्नीम। मिनु आं खिं डा लाप्यो खाल पाइब दुम्चा माल्नीम। मिनु आं खिंम गेय पचा माल्नीम। मेकोपुकीम मुर आन पबंम चोशा चढ़ेतीक क्योरचा माल्नीम। मेकोपुकीम मुर आन कली वारच पा गेय पचा माल्नीम।

12 तन्न लेवीपुकीम मुर आन कली आन मूर्ति पूजा पतीकेम वारच पाम्तेक्म। मोपा मेकोपुकी इस्राएल आ खिं डा मुर आन कली मरिम्शो पपाइक्तेक्म। मोपतीके मेकोपुकी सजाइ तचा माल्नीम, दे कसम जाता।

13 मेकोपुकी चढ़ेब आ गेय पचा कली आं नेक्था जाक्चा मताइनीम। मेकोपुकी तेकोइ आं कली चढ़ेशो आ नेक्था जाक्चा मताइनीम। मारदे हना मेको चढ़ेशो नेल्ल क्येडा चोव्रखो बाक्ब। तन्न मेको मुने दोक्चा माल्नीम। मिनु मेकोपुकीम आन मूर्ति पूजा पशो डा सजाइ तचा माल्नीम।

14 मो हना यो गो मेको आन कली आं खिं कली कोव्रशा नु मार मार पचा माल्शो गेय पपाइक्नुड।

चढ़ेब आन गेय

15 तन्न चढ़ेब लेवी आ थर डा सादोक आ चच युइ, इस्राएली आं रे हेंथे गाक्तेक्म हना यो, मेकोपुकीम आं खिं डा पचा माल्शो गेय रिम्शो पा कोव्रतेक्म। मेकोपुकी आं गेय पचा कली आं नेक्था जाक्चा ताइनीम। मेकोपुकी आं डोंइती बोसो नु हुश चढ़ेथ जाक्चा ताइनीम। इजीकीएल ४०:४६

16 मेकोपुकी ला आं बाक्तीकेम ओव्रने चाप्नीम। मिनु आं टेबल आ नेक्था जाक्शा, आं गेय पचा ताइनीम।

17 मेकोपुकी आगा डा लाडगा डा लाप्यो रे ओव्रमानु, सुती के वा फेक्शो बाक्चा माल्नीम। मेकोपुकीम आगा डा लाडगा डा लाप्यो नु आं खिं आगाम गेय पामेनु, ऊन के मारेइ वा फेक्चा मदुम्नीम। लेवी १६:४

18 मेकोपुकीम पियाम सुती के गुप्तीक गुप्चा माल्नीम। मिनु सुती के आगाम फेक्तीक वा फेक्चा माल्नीम। मेकोपुकीम गल शाइक्ब तेकोइ वा फेक्चा मदुम्नीम।

19 मेकोपुकी लाडगा गे डा लाडगा, मुर आन बाक्तीक लमानु, आगाम गेय पामेनु, फेक्शो वा पुइक्चा माल्नीम। मिनु मेको चोव्रखो कोठाम वोइशशा, अर्को वा फेक्चा माल्नीम। मोपा परमप्रभु आ थोव्रक नु मुर आ थोव्रक मखाल्दमेक्ल। इजीकीएल ४२:१४

20 मेकोपुकीम आन चां प्रेक्चा मदुम्नीम। मेको शुश लाइशशो दुम्चा गेचा यो मदुम्ब। मेकोपुकीम आन चां खोइक्चा ला दुम्नीम। लेवी १९:२७

21 चढ़ेबपुकीम आगा डा लाडगा लमानु, अडगुर शांबु तूचा मदुम्नीम। लेवी १०:९

22 मेको चढ़ेबपुकीमी आन वोइश बेक्शो नु प्रोइचा पुंडसीशो मीश मुर ग्युंवे पचा मदुम्नीम। मेकोपुकीम इस्राएल आ खिं मुर रे जरमेशो कन्ने मीश आल नु आन वोइश बेक्शो चढ़ेब आन मीश कली ला ग्युंवे पने चाप्नीम।

23 मेकोपुकीम आं मुर आन कली आं मार मार नु मुर आन मार मार खाल का डा मबाक्नीम, दे शेंचा माल्नीम। मिनु मेको आन कली ग्रॉग्रा दिशो नु मदिशो थोव्रक खाल का डा मबाक्नीम, दे कोइचा माल्नीम। इजीकीएल २२:२६; लेवी १०:१०

24 मारेइ जितीक खेतीक दुम्मेनु, चढ़ेबपुकीमीन निसाफ पाइब आन गेय पचा माल्नीम। मिनु आं निसाफ पतीक लोव्र खोदेशो पा मेकोपुकीम निसाफ पचा माल्नीम। मेकोपुकीम चाड मानेचा आ पबंम आं अरेशो नु आं फुल्लुम मुशा ब्रेक्शो लोव्र खोदेशो पा पचा माल्नीम। मेकोपुकीम आं नाइक्तीक नाक्ती मानेचा माल्नीम। ब्यक्स्था १७:८-९

25 मेकोपुकीम बेक्शो मुर आ नेक्था लशा, आंम कली ग्रॉग्रा दिशो सेल्सीचा मदुन्मीम। मो हना यो आन आम आफ, तमी तौ, आन लोकब न गुंयुबे मपशो आंम समी आन बेक्शो रॉ आ नेक्था लशा ग्रॉग्रा दिशो दुम्मे चाप्नीम। गन्ती १९:११; लेवी २१:१-४

26 मिनु मेको ग्रॉग्रा मदिशो दुम्मा नोले, ७ नाक्त सम्म रिम्चा माल्नीम।

27 मेकोपुकी आं खिं डा आगा डा लाडगाम गेय पचा कली ओव्रतीक नाक्त मेकोपुकीमी पाप आ पर्बम चढेचा माल्नीम” दे परमप्रभु, परमप्रभु यावेमी देंत।

28 मिनु परमप्रभुमी “चढेब आन शॉप गो नड। मेको आन कली इस्राएलम रू गेचा मदुम्ब। गो मेको आन शॉप नड। गन्ती १८:२०

29 मेकोपुकीम अन्न चढेशो, पाप आ पर्बम चढेशो नु दोस आ पर्बम चढेशो जचा माल्नीम। इस्राएलम परमप्रभु यावे कली गेचा माल्शो थोव्रक नेल्ल मेको आन के दुम्ब। गन्ती १८:१४

30 डोइती मीशो फल आन नेल्ल क्येडा रिम्शो फल नु इन चढेशो मारेड मारेड नेल्ल चढेब आन केन दुम्ब। गे इन खिंम आसीक तचा कली इन निशो फस नेल्ल क्येडा डोइती डा डल्ला यो चढेब आन कली गेचा माल्नीनी। प्रस्थान २५:२; गन्ती १५:२०; नेहेम्याह १०:३८

31 चढेबपुकीम आंमा बेक्शो चिक्ब नु बी ब्यफ, क्यारश भेडा कि जन्तुपुकीम साडशो, मारेड ब्वचा मदुन्मीम” दे परमप्रभु यावेमी देंत। लेवी २२:८

## 45

परमप्रभु कली रू गेशो

1 मिनु गेपुकीम आंम इन शॉप सेल्चा कली रागी योक्शा गेनीनु, मेको रे परमप्रभु यावे कली १५ हजार कुबीत लाइशो नु २० हजार कुबीत ब्रेम्शो रू का तिल्चा माल्नीनी। मिनु मेको रू नेल्ल परमप्रभु यावे केन दुम्ब। कुबीत का ०.५ मिटर बाक्ब।

2 मेको रे पा ५ हजार कुबीत लाइशो नु ५ हजार कुबीत ब्रेम्शो रू का परमप्रभु यावे आ बाक्तीके दुम्ब। मेको आ एर ओथ नेल्ल ५० कुबीत ब्रेम्शो श्येल्चा लां बाक्चा माल्ब।

3 मिनु मेको परमप्रभु यावे आ बाक्तीकेम २५ हजार कुबीत लाइशो नु १० हजार कुबीत ब्रेम्शो पुक्चा माल्नीनी। मेकेर परमप्रभु यावे आ खिं डा नेल्ल क्येडा चोव्रखो बाक्तीक दुम्चा माल्ब।

4 मेको बाक्तीक चहिं परमप्रभु यावे के बाक्ब। मेको परमप्रभु यावे आ खिंम गेय पाइब नु परमप्रभु आ नेक्था जाक्ब आन खिं कली नु परमप्रभु यावे आ खिं कली दुम्ब।

5 मेको अर्को २५ हजार कुबीत लाइशो नु १० हजार कुबीत ब्रेम्शो रू का परमप्रभु यावे आ खिंम गेय पाइब लेवी आन के दुम्ब। मेको आन बाक्तीक सहर कली दुम्ब।

6 गेपुकीम परमप्रभु आ रू प्रॉइशा अर्को ५ हजार कुबीत ब्रेम्शो नु २५ हजार कुबीत लाइशो रू का सहर कली वोइक्चा माल्नीनी। मेको इस्राएल डा मुर नेल्ल आन कली दुम्ब। इजीकीएल ४८:१५-२०

सासन पाइब आन भाग

7 मेको परमप्रभु यावे आ रू आ निम्फा पटटी सासन पाइब आन के दुम्ब। मेको आ नेक्था डा सहर डा रू आन पूर्व गे नु पच्छिम गे सासन पाइब आन के दुम्ब। मेको थर का डा रू खोदेशो पा लाइशो दुम्ब। मेको पच्छिम डा सांद रे पूर्व डा सांद सम्म दुम्ब। इजीकीएल ४८:२१-२२

8 मेको रू चहिं इस्राएलम सासन पाइब आन रू दुम्ब। मिनु मुल रे आं सासन पाइबपुकीम आं मुर आन कली दिप्चा मदुन्मीम। तन्न मेकोपुकीम इस्राएल आ खिं डा मुर आन कली, मेको आन थर थर खोदेशो पा आन रू आन के दुम्ब, दे रोइक्चा मताइनीम। इजीकीएल ४६:१८

9 मिनु परमप्रभु, परमप्रभु यावेमी “ए इस्राएल डा सासन पाइबपुकी। गेपुकीम हुश खाक्श पोक्तीनी। दिप्चा प्रोनीन। गेपुकीम थम रिम्शो नु ठीक गेय पने। आं मुर आन कली आन खिं रू रे मखेरीन। १राजा १२:४,११; १राजा २१; येरमीया २१:११-१२; मीका ३:१-३

10 गेपुकीम ठीक नाक्तीक नु पुक्तीकपुकी चलेचा माल्नीनी। लेवी १९:३६; ब्यवस्था २५:१५

11 एफाह नु बाथ माडशो पुक्तीक खाल का डा दुम्चा माल्नीम। होमेर का १० बाथ दुम्चा माल्ब। मिनु १० एफाह यो होमेर का बाक्ब। होमेर चहिं थाप्तीक दुम्चा माल्ब। एफाह का २२ लिटर रिक्ब टैयब अन्न पुक्तीक बोस बाक्ब। बाथ का २२ लिटर रिक्ब बोस बाक्ब। होमेर का २२० लिटर रिक्ब बोस ताप्तीक बाक्ब।

12 शेकेल का २० गेराह दुम्चा माल्ब। २० शेकेल, २५ शेकेल नु १५ शेकेल नेल्ल पा मीना का दुम्चा माल्ब” देंत। शेकेल का ११.५ ग्राम बाक्ब। गेराह का ०.६ ग्राम बाक्ब। मीना का ६०० ग्राम खोदेशो बाक्ब।

सासन पाइब आन चढेचा माल्शो

13 मिनु परमप्रभु यावेमी “गेपुकीम चढेचा माल्शो अन्न गिश बाक्ब देंशा हना, होमेर का का चेरब रे एफाह डा भाग डा भाग का चढेचा माल्नीनी। होमेर का का क्योव्रज रे एफाह डा ६ भाग डा भाग का चढेचा माल्नीनी।

14 गेपुकीम चढेचा माल्शो तेल कोर का बाथ डा १० भाग डा भाग का बाक्ब। मेको ४ माना खोदेशो बाक्ब। कोर नु होमेर उडक्थ उडक्थ बाक्नीम। मिनु होमेर का के १० बाथ बाक्नीम। कोर नु होमेर खाल का डा २२० लिटर बाक्ब। बाथ का एफाह का खोदेशो बाक्ब, मेको २२ लिटर बाक्ब।

15 गेपुकीम सहे निक्शी भेडा रे का चढेचा माल्नीनी। मेको इस्राएली आन योत्रतीके रे चाक्चा माल्नीनी। मेको अन्न चढेशो, चोशा चढेशो नु दुशा बाक्चा आ पर्वम चढेशो बाक्ब। मेको पाप क्याम्चा कली बाक्ब” दे परमप्रभु यावेमी दैत।

16 मिनु मेकोमी लेशा “इस्राएल डा मुर नेल्लेमी मेको सासन पाडब कली मोदेशो गेचा माल्नीम।

17 तन्न सासन पाडबमी मेको चोशा चढेतीक, अन्न चढेतीक नु तूचा थोत्रक चढेतीक आ देशो चाडम चढेचा माल्ब। मेकोमी औंसी, नाइक्तीक नाक्ती नु इस्राएल आ खिं डा मुर आन चाड नेल्लेमी चढेचा माल्ब। मेकोमी पाप आ पर्वम चढेतीक, अन्न चढेतीक, चोशा चढेतीक नु दुशा बाक्चा आ पर्वम चढेतीक इस्राएली आन पाप क्याम्चा कली चाक्चा माल्ब” दे परमप्रभु यावेमी दैत। २सामुएल ६:१७-१८

परमप्रभु आ चाडपुकी

18 मिनु परमप्रभु, परमप्रभु यावेमी “डोंइती डा महिना नु डोंइती डा नाक्त, गेपुकीम मारेड मदुम्शो बोहोर का चाक्शा, परमप्रभु यावे आ बाक्तीक ग्रोग्रा मदिशो सेल्चा माल्नीनी।

19 मिनु चढेबमी पाप आ पर्वम चढेशो आ हुश इक्का लाइशशा, परमप्रभु यावे आ खिं डा लाप्चो डा शीमी, चढेतीक आ ४ कुना नु आ सुर नेल्लेम नु आगा लाडगा डा लाप्चो डा शीमी बुडक्चा माल्ब।

20 मिनु सुडम ममिम्थु म्तुइक्थु पाप पशो बाक्त हना, महिना डा ७ नाक्त गेपुकीम मो पचा माल्नीनी। मोपा गे परमप्रभु यावे आ खिं कली यो पाप क्याम्तीक गेय पचा माल्नीनी। लेवी ४:२२; लेवी ५:१७-१८

21 मिनु डोंइती डा महिना डा १४ नाक्ती गेपुकीम पास्सा चाड मानेचा माल्नीनी। मेना गे ७ नाक्त सम्म बोरब ओख्ती मसुप्चो शोब्ले जचा माल्नीनी।

22 मेको नाक्त सासन पाडबमी आंम कली नु रागी डा मुर नेल्ल आन कली पाप आ पर्वम बोहोर का चढेचा माल्ब।

23 मिनु मेकोमी मेको चाड डा ७ नाक्त नेल्लेम मारेड मदुम्शो ७ ओटा बोहोर नु ७ ओटा सांड नाक्त कित कित चोशा चढेचा माल्ब। मिनु चाड डा नाक्त कित कित पाप आ पर्वम बोका का का यो चढेचा माल्ब। गन्ती २८:१७-२५

24 मेको बोहोर का नु एफाह का अन्न चढेचा माल्ब। सांड का नु एफाह का अन्न चढेचा माल्ब। मिनु मेको का का पा, एफाह का कली हिन का तेल चढेचा माल्ब। एफाह का २२ लिटर पुक्तीके बाक्ब। हिन का ४ लिटर बाक्ब।इजीकीएल ४६:५; गन्ती १५:४-१२

25 मेकोम ७ महिना डा १५ नाक्त रे मेको ७ नाक्त डा चाड सम्म मेको मोदेशो चढेचा माल्ब। मेको पाप आ पर्वम चढेतीके, चोशा चढेतीके नु अन्न चढेतीक बाक्ब। मेको नु तेल यो चढेचा माल्ब” दैत। लेवी २३:३४

## 46

नाक्त कित कित डा चढेतीक

1 मिनु परमप्रभु, परमप्रभु यावेमी “मेको आगा लाडगा डा पूर्व गे कोव्रशो ठेयब लाप्चो मेको गेय पतीक ६ नाक्त चोक्शा चोडक्चा माल्नीम। तन्न नाइक्तीक नाक्त नु औंसी नाक्त रोक्चा माल्नीम।

2 सासन पाडब मेको पिंडी रे लाडगा डा लाप्चो रे पा ओव्रचा माल्ब। मिनु लाप्चो आ नेक्था राप्शा बाक्चा माल्ब। मिनु चढेबपुकीम सासन पाडब आ चोशा चढेतीक नु दुशा बाक्तीक आ पर्वम चढेतीक चढेचा माल्नीम। मिनु सासन पाडबमी लाप्चो आ नेक्था राप्शा, खुम्की पा परमप्रभु यावे कली ठेयब सेल्चा माल्ब। मिनु नोले मेको लाडगा रे गूचा माल्ब। तन्न मेको लाप्चो नां मरिक्म सम्म रोक्स डा रोक्स बाक्चा माल्ब। इजीकीएल ४४:३

3 मिनु रागी डा मुरपुकीम मेको ठेयब लाप्चो आ नेक्था नाइक्तीक नाक्ती नु औंसी नाक्ती खुम्की पा बाप्चा माल्नीम।

4 मेको सासन पाडबमी परमप्रभु यावे कली नाइक्तीक नाक्ती मार चढेचा माल्ब देशा हना, चोशा चढेचा कली मारेड मदुम्शो ६ ओटा पाठा नु सांड का चढेचा माल्ब। गन्ती २८:९-१०

5 मेको जचा थोत्रक चढेचा कली सांड नु एफाह का अन्न चढेचा माल्ब। मिनु पाठा नु अन्न गिश चढेचा दाक्बा, मिश चढेने चाप्ब। मिनु एफाह का का अन्न कली तेल चढेचा माल्ब। एफाह का २२ लिटर पुक्तीक बाक्ब। हिन का ४ लिटर खोदेशो बाक्ब।इजीकीएल ४५:२४

6 मिनु मेकोम औंसी नाक्त कली मार चढेचा माल्ब देशा हना, मारेड मदुम्शो बोहोर का ६ ओटा पाठा नु सांड का चढेचा माल्ब।

7 मिनु जचा थोत्रक चढेचा कली बोहोर नु एफाह का अन्न नु सांड नु एफाह का अन्न चढेचा माल्ब। मिनु पाठा नु अन्न गिश चढेचा दाक्बा, मिश चढेने चाप्ब। मिनु एफाह का का अन्न कली हिन का का तेल चढेचा माल्ब।

8 मिनु सासन पाडब ओव्रमेनु, मेको ठेयब लाप्चो डा पिंडी रे पा ओव्रचा माल्ब। नोले मेको आ ओव्रशो लां रेन लाडगा गूचा माल्ब।

सासन पाडब आन चढेशो

9 मिनु रागी डा मुरपुकी देशो नाक्त डा चाडम परमप्रभु यावे कली ठेयब सेल्चा कली आ डोंइती जाक्तेक्म हना, मेको उत्तर डा ठेयब लाप्चो रे ओव्रचा माल्नीम। नोले दक्खिन डा ठेयब लाप्चो रे पा गूचा माल्नीम। सु चहिं दक्खिन डा ठेयब लाप्चो रे ओव्रनीमी, मेकोपुकी उत्तर डा ठेयब लाप्चो रे गूचा माल्नीम। मेकोपुकी आगा ओव्रशो ठेयब लाप्चो रे लाडगा गूचा मदुम्नीम। आन ओव्रशो लाप्चो रे गूचा मदुम्नीम। ग्येत्थ पा अर्को ठेयब लाप्चो रे पा गूचा माल्नीम।

10 मेकोपुकी ओव्रमानु, सासन पाडब मेको नु ओव्रचा माल्ब। मिनु मेकोपुकी लाडगा गूमनु, मेको यो गूचा माल्ब।



11 मिनू चाडपुकी नु देशो नाक्त कली जचा थोत्रक चढेचा कली बोहोर नु एफाह का अन्न नु सांड नु एफाह का अन्न चढेचा माल्ब। मिनू पाठा नु अन्न गिश चढेचा दाक्बा, मिनू चढेने चाप्ब। मिनू एफाह का का अन्न कली हिन का का तेल चढेचा माल्ब। एफाह का २२ लिटर पुक्तीक बाक्ब। मेको ५ पाथी आधा खोदेशो बाक्ब।

12 मिनू सासन पाडबमी परमप्रभु यावे कली आ थुंम ग्येरशा चढेतीक चढेचा दाक्ताक्व हना, चोशा चढेतीक कि दुशा बाक्तीक आ परबम चढेतीक चढेचा दाक्ताक्व हना, मेको ओत्रचा कली पूर्व डा ठेयब लाप्चो रोक्शा गेचा माल्नीम। मिनू मेकोमी आ चोशा चढेतीक नु दुशा बाक्चा आ परबम चढेतीक, नाडक्तीक नाक्ती चढेशो खोदेशो पा चढेचा माल्ब। मिनू नोले मेको लाडगा लचा माल्ब। मिनू लम नोले मेको ठेयब लाप्चो चोक्चा माल्नीम।

13 मेकोमी परमप्रभु यावे कली नाक्त कित कित मारिड मदुम्शो बस का गाप्चो पाठा का का सुनी कुस कुस चोशा चढेचा कली गेचा माल्ब। प्रस्थान २८:३८-४२; गन्ती २८:३

14 मेको नु सुनी कुस कुस चढेतीक नु एफाह डा ६ भाग डा भाग का अन्न, हिन का डा ३ भाग डा भाग का तेल रिम्शो फस ब्वाइक्चा कली चढेचा माल्ब। एको परमप्रभु यावे कली अन्न चढेतीक बाक्ब। मिनू मेको गेना हना यो परमप्रभु यावे कली अन्न चढेतीक बाक्ब। एफाह का २२ लिटर पुक्तीक बाक्ब। हिन का ४ लिटर खोदेशो बाक्ब।

15 मिनू मेको पाठा, अन्न चढेतीक नु तेल सुनी कुस कुस चाक्शा, चोशा चढेचा माल्ब” देशो बाक्ब।

सासन पाडब आ थेरशो रू

16 मिनू परमप्रभु, परमप्रभु यावेमी “सासन पाडबमी आ तौ का कली आ शोंप रे रू गेप्टु हना, मेको आ तौ चच युड आन के दुम्ब।

17 तन्न मेकोम आ थेरशो रू रे आ गेय पाडब कली गेप्टु हना, मेको प्रोडतीक बस सम्म ला मेको गेय पाडब आ शोंप दुम्ब। नोले मेको लेशा सासन पाडब केन दुम्ब। आ तौ कली गेशो रू चहिं मेको केन दुम्शा लीब। लेवी २५:१०; येरमीया ३४:८

18 सासन पाडबमी मुर आन थेरशो रू रे गुंडशा आ शोंप सेल्ले मचाप्ब। मेकोम आ तौ आन कली रू गेचा दाक्ब हना, आ शोंप रे गेचा माल्ब। मोपा सुड आं मुर रू रोडक्चा मपुंडसीनीम” दैत। इजीकीएल ४५:८-९

चढेशो श्ये क्येतीक कोटा

19 मिनू नोले मेकोमी आं कली उत्तर गे डा ठेयब लाप्चो डा ओत्रतीक आ नेक्था रे पा, चढेब आन कली तिल्ला वोडशो कोठाम लाडक्ती। मिनू मेकेर बाक्तीक आ पच्छिम गे बाक्तीक का ताता।

20 मिनू मेकोम आं कली “एकेर चढेबपुकीम दोस आ परबम चढेतीक नु पाप आ परबम चढेतीक आन श्ये लोप्नीम। मिनू चढेशो अन्न के मार मार चोडनीम। मोपा मेकोपुकीम चढेशो थोत्रक लाडगा गे डा लाडगाम मगुंडनीम। मारदे हना मुर आन कली मरिम्शो मदुम्बल” दैत।

21 मिनू नोले मेकोमी आं कली लाडगा गे डा लाडगा डा ४ मुर कौडताक्यी।

22 मेको लाडगा गे डा लाडगा डा ४ मुरम ४ ओटा आडक्च लाडगा बाक्तेक्म। मेको नेल्ल खाल का डा ४० कुबीत लाडशो नु ३० कुबीत ब्रेम्शो बाक्तेक्म।

23 मेको नेल्ल आन एर ओंथ गारो हिरशो बाक्तेक्म। मेको ४ ओटा लाडगामी आन मुर मुरम लहर पा चुप्लु बाक्तेक्म।

24 मिनू मेकोमी आं कली “एको क्येतीक बाक्नीम। एकेर परमप्रभु यावे आ खिंम गेय पाडबपुकीमी मुर आन चढेशो मार मार लोप्नीम” दैत।

## 47

परमप्रभु आ खिं रे गूशो खोला

1 मिनू नोले मेकोमी आं कली परमप्रभु यावे आ खिं आ ओत्रतीक लाप्चोम लेशा चाक्ती। मिनू गो मेको लाप्चो आ थेंका रे ब्वाक्कु यिशा, पूर्व गे शाडशो ताता। मारदे हना मेको परमप्रभु यावे आ खिं पूर्व गे कोत्रशो बाक्त। मिनू मेको ब्वाक्कु परमप्रभु यावे आ खिं आ दक्खिन चढेतीक आ दक्खिन रे शाडशो बाक्त। उत्पत्ती २:१०-१४; योएल ४:१८; प्रकाश २२:१

2 नोले मेकोमी आं कली उत्तर गे डा ठेयब लाप्चो रे पा लाडगा गुंडताक्यी। मिनू पूर्व गे लेशो लाडगा डा लाप्चो रे पा हिरशा चाक्ती। मेको ब्वाक्कु दक्खिन गे शाडशो बाक्त।

3 मिनू मेको पुक्तीक डोरी का शेशा पूर्व गे लत। मिनू मेकोम हजार का कुबीत पुक्तु। मिनू नोले मेकोमी आं कली ब्वाक्कु शोक्पाडक्ती। मेको ब्वाक्कु दिम्ला सम्म जाक्शो बाक्त। कुबीत का ०.५ मिटर बाक्ब। इजीकीएल ४०:३

4 मिनू लेशा अर्को हजार का कुबीत पुक्तु। मिनू मेको ब्वाक्कुम शोक्पाडक्ती। मेको ब्वाक्कु पोक्च सम्म जाक्शो बाक्त। मिनू मेकोम लेशा अर्को हजार का कुबीत पुक्तु। मिनू मेकोमी आं कली मेको ब्वाक्कुम शोक्पाडक्ती। मेको ब्वाक्कु क्रातो सम्म जाक्शो बाक्त।

5 मिनू मेकोम लेशा अर्को हजार का कुबीत पुक्तु। मिनू गो मेको खोला शोक्ने मचबु। मारदे हना ब्वाक्कु बारशो बाक्त। मेको दोम्नी ग्यारचा डा दुम्शो बाक्त हना यो, शोक्ने मचाप्चा डा बाक्त।

6 मिनू मेकोम आं कली “ए मुर, गे एको तवी” दैत। मिनू लेशा खोला आ नेक्था लेप्पाडक्ती।

7 मिनू गो मेकेर जाक्डानु, मेको समुन्द्र आ ओंथ हांबु नु आडक्ची हांबु नेल्ल शुश रवा तातामी।

8 मिनू मेकोम आं कली “एको ब्वाक्कु पूर्व रागी गे लशा, उड अराबाह गे लशो बाक्ब। मिनू मेको हिक्सी समुन्द्रम ब्वाइसीब। मिनू मेकेर डा ब्वाक्कु रिम्शो दुम्ब।

9 मेको ब्वाक्कु शाइक्तीकेमी शुश खाल डा जन्तु बाक्नीम। मेकेर हिकने मचाप्या डा पा, डांड बाक्नीम। मारदे हना मेको ब्वाक्कु मेकेर जाक्दीशशो बाक्ब। मेको ब्वाक्कु रिम्शो दुम्तीके मेकेर मारेड मारेड ब्रोंडनीम। प्रस्थान १५:२३

10 मेको आ एर ओंथ नेल्लेम ग्याइल आण्वपुकी राप्नीम। एन-गेदी रे एन-एग्लै सम्म ग्याइल आप्तीक दुम्नीम। मेकेर ठेयब समुन्द्र खोदेशो पा शुश खाल डा डांड बाक्नीम।

11 तन्न मेको समुन्द्र आ सिम नु हिलो बाक्तीके डा ब्वाक्कु रिम्शो म्दुम्ब। मेको हिकसी युंडचा कली बाक्नीम।

12 मेको समुन्द्र आ एर ओंथ नेल्ल शुश खाल डा फल फुल रवा वानीम। मेको आन सफा मसोवनीम। मेको आन फल गेनायो मनुनीम। मेको महिना महिनाम सिलनीम। मारदे हना मेको आन कली माल्लो ब्वाक्कु परमप्रभु यावे आ बाक्तीक रे लशो बाक्ब। मेको आन फल रूचा कली नु मेको आन सफा सापाइक्चा कली दुम्नीम” देत। यसेया ३२:१५; प्रकाश २२:२

इसाएल रागी डा सांद

13 मिनु परमप्रभु, परमप्रभु यावेमी “इसाएल डा सांद आगा डा १२ थर आन थेरशो रू रोपा योक्चा माल्लीनी देशा हना, योसेफ कली भाग निक्शी गेचा माल्लीनी। उत्पत्ती ४८:५; यहोसु १७:१७

14 मेको लीशो रागी इन दातेम उडक्थ उडक्थ पा योक्चा माल्लीनी। मिनु गो इन किकी पिपी आन कली गेनुड, दे कसम जतीके मेको रागी इन शोंप दुम्ब। उत्पत्ती १२:७

15 मेको रागी आ सांद ते बाक्चा माल्लीम देशा हना, उत्तर गे डा सांद ठेयब समुन्द्र रे हेथ्लोन डा लां, लेबो-हमाथ रे सेदाद सम्म दुम्चा माल्ब। गन्ती ३४:२-१२

16 मेको सांद बेरोथाह नु सिब्रैम सम्म दुम्चा माल्ब। मेको दमस्कस नु हमाथ आस दातेम बाक्शो बाक्नीस। मेको सांद हासर-हात्तीकोन सम्म जाक्दीप्व। मेको हौरान डा सांद आ नेक्था बाक्ब।

17 मिनु ठेयब समुन्द्र रे हासर-एनोन सम्म बाक्ब। मेको दमस्कस आ उत्तर गे बाक्ब। मेको आ उत्तर गे हमाथ आ सांद बाक्ब। मेको उत्तर डा सांद बाक्ब।

18 पूबं गे डा सांद हौरान नु दमस्कस आस दातेम, यर्दन खोला आ नेक्था गिलाद नु इसाएल रागी आस दातेमी बाक्ब। मेको पूबं डा समुन्द्र नु तामार सम्म बाक्ब। मेको पूबं डा सांद बाक्ब।

19 दक्खिन गे डा सांद तामार रे मेरीबाथ-कादेश डा ब्वाक्कु बाक्तीके सम्म दुम्चा माल्ब। मिनु मेकेर रे इजीप्त डा खोल्सा रे ठेयब समुन्द्र सम्म जाक्दीप्व। मेको दक्खिन डा सांद बाक्ब। गन्ती २०:१३; गन्ती ३४:५

20 पच्छिम गे डा सांद ठेयब समुन्द्र लेबो-हमाथ आ डोंडती सम्म दुम्चा माल्ब। मेको पच्छिम डा सांद बाक्ब।

21 गे मेको रागी इन दातेम इसाएल आ थर डा मुर आन कली योक्शा गेचा माल्लीनी।

22 गेपुकीम आंम इन थेरशो रू वोइक्चा माल्लीनी। इन दातेमी बाक्ब तमी तौ थिशो अर्को रागी डा मुर आन कली यो आन भाग योक्शा, गेचा माल्लीनी। गेपुकीम मेको आन कली इसाएल रागीम जरमेशो आंम रागी डा मुर खोदेशो मिम्चा माल्लीनी। मिनु गेपुकी नु इसाएल आ थर आन दातेम मेकोपुकीम आन थेरशो रू तचा माल्लीम। लेवी १९:३३-३४

23 मेको अर्को रागी डा मुरपुकी तेको थर डा बाक्तीकेम बाक्नीमी, मेकेर मेको आन कली आन थेरशो रू गेचा माल्लीनी” दे परमप्रभु, परमप्रभु यावेम देत।

## 48

इसाएली आन कली रागी योक्शो

1 मिनु “मेको आन थर आन ने मार बाक्नीम देशा हना, उत्तर गे डा सांद हेथ्लोन डा लां रे पा लेबो-हमाथ रे हासर-एनोन सम्म बाक्ब। हासर-एनान दमस्कस आ सांदम बाक्ब। मिनु हमाथ मेको आ उत्तर गे बाक्ब। मिनु मेको पूबं रे पच्छिम सम्म बाक्ब। मेको दान आ थेरशो रू दुम्ब। इजीकीएल ४७:१५-१७

2 मिनु पूबं रे पच्छिम दान आ सांद थिशो रू आशेर आ थेरशो रू दुम्ब।

3 मिनु पूबं रे पच्छिम आशेर आ सांद थिशो रू नाप्ताली आ थेरशो रू दुम्ब।

4 मिनु पूबं रे पच्छिम नाप्ताली आ सांद थिशो रू मनस्से आ थेरशो रू दुम्ब।

5 मिनु पूबं रे पच्छिम मनस्से आ सांद थिशो रू एफ्राइम आ थेरशो रू दुम्ब।

6 मिनु पूबं रे पच्छिम एफ्राइम आ सांद थिशो रू रूबेन आ थेरशो रू दुम्ब।

7 मिनु पूबं रे पच्छिम रूबेन आ सांद थिशो रू यहूदा आ थेरशो रू दुम्ब।

8 मिनु पूबं रे पच्छिम गे यहूदा आ सांद सम्म थिशो भाग का तिल्ला माल्लीनी। मेको २५ हजार कुबीत ब्रेम्शो नु आ लाइशशो पूबं रे पच्छिम सम्म थर थर आन कली गेशो थेरशो रू खोदेशो लाइशशो दुम्चा माल्ब। मिनु परमप्रभु यावे आ बाक्तीक मेको आ दातेम दुम्चा माल्ब। कुबीत का ०.५ मिटर बाक्ब। इजीकीएल ४५:१-८

9 परमप्रभु यावे कली गेशो तिल्लो भाग चर्हि २५ हजार कुबीत लाइशशो नु २० हजार कुबीत ब्रेम्शो दुम्चा माल्ब।

10 मिनु मेको परमप्रभु यावे कली गेशो तिल्लो भाग चढ़ेब आन कली दुम्ब। मेको भाग उत्तर गे २५ हजार कुबीत लाइशशो, पच्छिम गे १० हजार कुबीत ब्रेम्शो, पूबं गे १० हजार कुबीत ब्रेम्शो नु दक्खिन गे २५ हजार कुबीत लाइशशो दुम्चा माल्ब। मिनु परमप्रभु यावे आ बाक्तीक मेको आ दातेम दुम्चा माल्ब।

11 मिनु मेको परमप्रभु यावे कली चढ़ेब आन भाग दुम्चा माल्ब। आं गेय पाइब सादोक आ चच युड आन के दुम्ब। मेकोपुकी इसाएली नु लेवीपुकी हेंथे गाक्तेकम हना यो, मेकोपुकी हेंथे मगाक्थु, आं गेय पांम्तेकम। इजीकीएल ४०:४६

12 मिनु मेको आन कली परमप्रभु यावे कली तिलशो रागी रे आन भाग दुम्ब। मेको आन नेल्ल क्येडा चोत्रखो बाक्तीक भाग, लेवी आन थेरशो रू थिशो बाक्ब।

13 चढेब आन थेरशो रू आ नेक्था लेवी आन थेरशो रू दुम्चा माल्ब। मेको २५ हजार कुबीत लाइशो नु २० हजार कुबीत ब्रेम्शो दुम्चा माल्ब। मेको आ लाइशो नेल्ल २५ हजार कुबीत नु आ ब्रेम्शो नेल्ल १० हजार कुबीत दुम्चा माल्ब।

14 मिनु मेकोपुकीमी मेको थेरशो रू लेयचा नु फाइक्या मदुमीम। मेको रू नेल्ल क्येडा रिम्शो बाक्ब। मिनु मेको सुइ आन कली गेने मचाप्नीम। मारदे हना मेको परमप्रभु यावे आ रू बाक्ब।

15 मिनु मेको लीशो ५ हजार कुबीत ब्रेम्शो नु २५ हजार कुबीत लाइशो रू सहर कली बाक्ब। मेको मुर बाक्तीके नु सहर आ दाते डा रू दुम्चा माल्ब।

16 मेको लीशो रू उत्तर गे ४ हजार ५ सहे कुबीत, दक्खिन गे ४ हजार ५ सहे कुबीत, पूर्व गे ४ हजार ५ सहे कुबीत नु पच्छिम गे ४ हजार ५ सहे कुबीत दुम्चा माल्ब। प्रकाश २१:१६

17 मिनु मेको सहर डा रू दुम्चा माल्ब। मिनु मेको लीशो सहर डा रू उत्तर गे सहे निक्शी ५० कुबीत, दक्खिन गे सहे निक्शी ५० कुबीत, पूर्व गे सहे निक्शी ५० कुबीत नु पच्छिम गे सहे निक्शी ५० कुबीत दुम्चा माल्ब।

18 मेको परमप्रभु यावे आ बाक्तीक आ सांद थिशा लीशो रू पूर्व गे १० हजार कुबीत नु पच्छिम गे १० हजार कुबीत दुम्चा माल्ब। मेको परमप्रभु यावे आ खिं आ का पटटी गे बाक्चा माल्ब। मेकेर सहरम गेय पाइब आन कली जचा थोत्रक लेयतीक दुम्चा माल्ब।

19 सहरम गेय पाइब इस्राएल आ थर डा मुर नेल्लेमी मेकेर बाक्शा, गेय पाइनीम।

20 गेपुकीमी तिलशो बाक्तीक रू नेल्ल २५ हजार कुबीत ब्रेम्शो नु २५ हजार कुबीत लाइशो दुम्चा माल्ब। मेको ४ पाटे दुम्ब। मेको परमप्रभु आ भाग नु सहर डा बाक्तीके बाक्ब।

21 मेको परमप्रभु यावे आ भाग नु सहर डा का पटटी गे लीत हना, सासन पाइब के दुम्चा माल्ब। मेको पूर्व गे परमप्रभु यावे कली तिलशो २५ हजार कुबीत पूर्व डा सांद गे नु पच्छिम गे बाक्शो २५ हजार कुबीत पच्छिम डा सांद गे बाक्ब। मेको आ लाइशो थर थर आन रू रू गे लाइब। मेको सासन पाइब के दुम्ब। मिनु परमप्रभु यावे आ खिं मेको आ दातेम बाक्ब। इजीकीएल ४५:७

22 मिनु लेवी आन रू नु सहर डा रू आन दातेमी मेको सासन पाइब आन रू बाक्ब। यहूदा नु बेन्यामीन आस दातेमी बाक्शो रू यो सासन पाइब आन के बाक्ब।

अरु थर आन थेरशो रू

23 मिनु लीशो थर आन कली पूर्व रे पच्छिम सम्म बेन्यामीन आ थेरशो रू,

24 पूर्व रे पच्छिम सम्म बेन्यामीन आ सांद थिशो सिमियोन आ थेरशो रू,

25 पूर्व रे पच्छिम सम्म सिमियोन आ सांद थिशो इस्साकार आ थेरशो रू,

26 पूर्व रे पच्छिम सम्म इस्साकार आ सांद थिशो जबूलून आ थेरशो रू,

27 पूर्व रे पच्छिम सम्म जबूलून आ सांद थिशो गाद आ थेरशो रू,

28 मिनु दक्खिन गे गाद आ थेरशो रू डा सांद तामार रे मेरीबाथ-कादेश डा ब्वाक्कु बाक्तीक सम्म नु इजीप्त डा खोल्सा आ नेक्था रे पा ठेयब समुन्द्र सम्म दुम्चा माल्ब। इजीकीएल ४७:१९

29 गेपुकीम मेको रागी डा रू इस्राएल आ थर डा मुर आन कली आन थेरशो रू दुम्पाइशो योक्शा गेचा माल्नीनी। मिनु मेकोन मेको आन भाग दुम्ब” दे परमप्रभु, परमप्रभु यावेमी दैत।

यरूसलेम सहर डा ठेयब लाप्चो

30 परमप्रभु यावेमी “सहर डा गारो रे लाडगा यूतीक ते दुम्चा माल्नीम दैशा हना, उत्तर गे डा गारो पुक्शा ४ हजार ५ सहे कुबीत लाइशो दुम्चा माल्ब। कुबीत का ०.५ मिटर बाक्ब।

31 ठेयब लाप्चो आन नें इस्राएल आ थर आन नें खोदेशो दुम्चा माल्नीम। उत्तर गे डा गारो डा ठेयब लाप्चो सां, रूबेन आ लाप्चो, यहूदा आ लाप्चो नु लेवी आ लाप्चो दुम्नीम।

32 मिनु पूर्व गे डा गारो ४ हजार ५ सहे कुबीत लाइशो दुम्चा माल्ब। पूर्व गे डा गारो डा ठेयब लाप्चो सां, योसेफ आ लाप्चो, बेन्यामीन आ लाप्चो नु दान आ लाप्चो दुम्नीम।

33 मेको दक्खिन गे डा गारो ४ हजार ५ सहे कुबीत लाइशो दुम्चा माल्ब। दक्खिन गे डा गारो डा ठेयब लाप्चो सां, सिमियोन आ लाप्चो, इस्साकार आ लाप्चो नु जबूलून आ लाप्चो दुम्नीम।

34 मेको पच्छिम गे डा गारो ४ हजार ५ सहे कुबीत लाइशो दुम्चा माल्ब। पच्छिम गे डा गारो डा ठेयब लाप्चो सां, गाद आ लाप्चो, आशेर आ लाप्चो नु नाप्ताली आ लाप्चो दुम्नीम।

35 मिनु सहर आ एर ओथ हिरशो गारो १८ हजार कुबीत दुम्ब। मेना रे मेको सहर आ नें ‘परमप्रभु यावे मेकेर बाक्ब’ देशो नें वोइक्या माल्ब” दे परमप्रभु यावेमी दैत। इजीकीएल ४३:७; यसैया ६०:१४; प्रकाश २१:३

## दानीएल

**ब्रेकब मुर:** दानीएल यरूसलेम सहरम जरमेशो बाक्त। मेको रिम्शो पिप योसीयाहम सासन पवा ना कोलत। दानीएलमी परमप्रभु यावे आ लोत्र पाइब येरमीया नु सेफन्याह आस लोत्र नेशो बाक्त। मेको २० बर्स खोदेशो दुम्मेनु, आ वारच नु ग्याइशशा बेबीलोन रागी लाइक्चा पुंडसीशो बाक्त। माइत किताबपुकीमी एको किताब ब्रेकब दानीएल बाक्ब, दे नेल्लेम ब्रेकशो बाक्नीम। एको किताब डा लोत्र कोइ हिब्रू नु कोइ आरामेइक लोत्रमी ब्रेकशो बाक्ब। दानीएलमी मुर कली ब्रेकपाइशशो बाक्म कों आंमा ब्रेकशो बाक्म मेको मतुंडसीब।

**गेना ब्रेकशो:** दानीएल नेबुकदनेसर पिप दुम्शो ६०४-५६१ बि. सी. रे कोरेस पिप दुम्शो बर्स सां सम्म बाक्शो बाक्त। मेको बेबीलोनम बाक्ची ना ७० बर्स खोदेशो दुम्शो बाक्त। एको किताब ६०६-५३५ बि. सी.म ब्रेकशो बाक्त।

**मार ब्रेकशो:** दानीएलमी पिप आन राज्य नु परमप्रभु यावे आ राज्य कोंइचा कली ब्रेकशो बाक्त।

परमप्रभु यावेमी सु सु कली रागी कली सासन पाइब सेल्चा दाक्बा, मेको पाइब।

१. दानीएल नु आ वारच आन पबर्म लोत्र बाक्ब। दानीएल १:-६:-

२. दानीएल कली कोंइशो आ पबर्म लोत्र बाक्ब। दानीएल ७:-१२:-

दानीएल बेबीलोनम बाक्शो

१ यहूदा रागीमी येहो-याकीम पिप दुम्शो बर्स सां दुम्शो बाक्माक्त। मेना बेबीलोन डा पिप नेबुकदनेसर जाक्शा, यरूसलेम सहर कली पुम्ताक्मे। २राजा २४:१-२

२ मिनू परमप्रभुमी यहूदा डा पिप येहो-याकीम कली बुपाइवतु। मिनू परमप्रभुमी आ खिं डा बोस का निक्शी यो मेको कली गेपु। मिनू नेबुकदनेसरमी मेको बोसपुकी शिनार रागीमी लाइशशा, आ देवता आ खिं डा मार मार शोंप चोइक्तीके कोठाम चोइवतु। शिनार रागी बेबीलोन रागी बाक्ब। उत्पत्ती ११:२

३ मिनू पिपमी आ दरवार डा ठेयब गेय पाइब अशपेनास कली "ग्याइशशा लाइक्चा पुंडसीशो इसाएली, पिप आ खिं डा नु ठेयब मुर आन खिं डा मुर आन कली योत्रशा एक चाक्को। २राजा २०:१८

४ गे ठिटा वोंइश मुर, मारेइ मदुम्शो रिम्शो रां पाइशशो, दारशो, शुश निप्स पाइशशो, जोक्ब तुइक्ब, रुप्तीके थुं पाइशशो नु पिप आ दरवारमी गेय पने चापब आन कली योत्रडो" दे अरेवा बाक्त। मिनू मेको आन कली कल्दी आन ब्रेक्स नु लोत्र शेंचा माल्बाक्माक्त।

५ मिनू पिपमी "मेको आन कली पिप आ खिं डा जचा थोत्रक नु अडगुर शांबु गेचा माल्ब" दे अरेशो बाक्माक्त। मिनू मेको आन कली बर्स सां सम्म शेंशा, पिप आ खिंम गेय पपाइक्चा कली चाक्चा माल्बाक्माक्त।

६ मिनू मेको योत्रचा पुंडसीशो आन दातेमी यहूदा आ थर डा दानीएल, हनान्याह, मीशाएल नु अजारयाह बाक्तेक्म।

७ मिनू दरवार डा ठेयब गेय पाइबमी मेको आन नें फाइशशा, दानीएल कली बेलत-शजर, हनान्याह कली शद्रक, मीशाएल कली मेशक नु अजारयाह कली अबेद-नेगो वोदा बाक्त।

८ मिनू दानीएलमी पिप आ गेशो जचा नु तूचा थोत्रक जशा तूचा आंम कली ग्रांशा दिशो मसेल्सीनुड, दे मिम्ता बाक्त। मोपतीके दानीएलमी पिप आ ठेयब गेय पाइब कली "आं कली मोदेशो जचा तूचा गेशा, ग्रांशा दिशो दुम्चा मगेयीनी" दे पुंडतु। लेवी ११:-

९ मिनू परमप्रभुमी पिप आ ठेयब गेय पाइब आ थुंमी दानीएल कली शिशी पा दाक्तीकेमी प्रिंदा बाक्त। उत्पत्ती ३९:२१

१० मिनू पिप आ ठेयब गेय पाइबमी दानीएल कली "गो आं प्रभु, आं पिप नु शुश हिंनुड। मेकोमी इन कली मार मार जचा तूचा थोत्रक गेचा, दे अरेशो बाक्त। मेकोमी इन वारच क्येडा इन कली गेयशो तापु हना, आं कली साइक्ब" दैत।

११ मिनू नोले दानीएलमी पिपमी आ दरवार डा ठेयब गेय पाइब आन कली कोत्रब मुर कली, आंम आ पबर्म नु हनान्याह, मीशाएल नु अजारयाह आन पबर्म लोत्र पापु।

१२ मिनू दानीएलमी "गे इन गेय पाइब आंइ कली १० नाक्त सम्म कोत्रडीन। जचा कली गिग खाइ नु तूचा कली ब्वाक्कु ला गेकी।

१३ मिनू नोले गो आंइ कली पिप आ गेशो, आ खिं डा जचा थोत्रक जाइब तूबपुकी नु थाप्शा कोत्रकी। मिनू दोदेशो ताइनीनी मोदेशो पाइक्की" दे माइक्तु।

१४ मिनू कोत्रबमी मेको लोत्र बिशशा, १० नाक्त सम्म आन देशो खोदेशो पापु।

१५ मिनू १० नाक्त जाक्दाम्मेनु, पिप आ गेशो जचा थोत्रक जाइब ठिटा नेल्ल आन क्येडा दानीएल नु आ वारच रिम्शो नु दोम्शो तांइसाक्म।

१६ मोपतीके मेको कोत्रबमी मेको आन कली गेचा देशो पिप आ जचा तूचा थोत्रक प्रोंइशा, गिग खाइ ला गेम्तीमी।

१७ मिनू परमप्रभुमी मेको ४ जना आन कली नेल्ल ब्रेक्तीकेमी नु तुइक्तीकेमी जोक्ब तुइक्ब सेला बाक्त। मिनू दानीएल कली मार पचा, दे ततीके नु डोमू रुप्तीक थुं यो गेपु। इजीकीएल २८:३

दानीएल नु आ वारच योत्रसीशो

१८ मिनू पिप आ देशो नाक्ती आ दरवार डा ठेयब गेय पाइबमी मेको ठिटा नेल्ल आन कली पिप नेबुकदनेसर आ डोंइती राप्पाइक्तीमी।

19 मिनु पिपमी मेकोपुकी नु लोत्र पाप्तु। मिनु दानीएल, हनान्याह, मीशाएल नु अजारयाह खोदेशो जोक्ब तुडक्ब आ रागीमी अरु सुइ मथिद। मोपतीके मेको ४ जना पिप आ दरवारम गेय पचा कली योत्रचा पुंडसाकम।

20 मिनु पिपमी आ माल्शो रुप्तीके नु तुडक्तीके आ पर्वम हिल्लो पवानु, आ रागी डा जादू नु मन्तर तन्तर पाइब नेल्ल आन क्येडा मेको ४ जना आन कली १० खेयप शुश जोक्ब तुडक्ब ताप्तु।

21 मिनु दानीएलमी पिप कोरेस आ सासन पशो आ डोंइती डा बर्स सम्म मेकेर गेय पाप्तु। एज्रा १:१

## 2

पिप नेबुकदनेसरमी डोमु तशो

1 मिनु पिप नेबुकदनेसर आ सासन पशो बर्स निक्शी जाक्दीम्मेनु, मेको पिपमी डोमु का तवा बाक्त। मिनु डोमु तशा नोले मेको मार पड, दो पड दुग्शा, आं थुं ग्येत्थ लुकच दुग्शा, लेशा इप्ने मचबा बाक्त।

2 मिनु मेको पिपमी आ डोमु मार बाक्मे, दे तुडक्चा कली “जादू, मन्तर तन्तर पाइब, टुना मुना पाइब नु सोरुल कोत्रब कल्दी आन कली चाक्चा माल्नीनी” दे हुकुम पाप्तु। मिनु मेकोपुकी पिप आ डोंइती जाक्शा राप्तेकम। यसैया ४७:१२-१३

3 मिनु पिपमी मेको आन कली “गो डोमु का ताता। मेको तशा, आं थुं ग्येत्थ लुकच दुम्त” देत।

4 मिनु सोरुल कोत्रब कल्दीपुकीमी आरामेइक लोत्र पा पिप कली “पिप, शुश ब्रोंइशा बाक्कीन। इन वाइल आन कली इन तशो डोमु शोत्रडीन। मिनु गो, इन वाइलपुकीमी, मेको रे मार रुम्सीबा मेको शेंनीकी” देतेकम।

5 मिनु पिपमी सोरुल कोत्रब कल्दी आन कली “गो मेको आ पर्वम हुकुम पाता। गेपुकीमी आं डोमु नु मेको रे मार रुम्सीबा, मेको शोत्रने मचाप्तीनी हना, इन गुइ खोइल खोइश्शा, साइक्नन्नी। मिनु इन खिं प्रेशा गेनन्नी।

6 तन्न आं तशो डोमु नु मेको रे मार रुम्सीबा, मेको शोत्रतीनी हना, गो इन कली मार मार रिम्शो थोत्रक, इनाम नु ठेयब मान गेनुड। मोपतीके आं तशो डोमु शोत्रशा, मेको रे मार रुम्सीबा, शेंदीनी” दे माइक्तीमी।

7 मिनु मेकोपुकीमी लेशा पिप कली “पिपमी इन वाइल, आंइ कली डोंइती इन तशो डोमु शोत्रडीने। मिनु नोले गोपुकीमी मेको रे मार रुम्सीबा इन कली शेंनीकी” देतेकम।

8 मिनु पिपमी “गो थमा पा तुडक्नुड, गेपुकीमी आं कली क्योल्नीनी। मारदे हना इन कली साइक्तीक हुकुम थमा बाक्ब।

9 गेपुकीमी आं कली आं तशो डोमु शोत्रने मचाप्तीनी हना, गे साइक्चा पुंडसीनीनी। गे आं कली जोल पा, शेंखु पतीक आ पर्वम गारशो बाक्नीनी। मोपतीके आं कली आं तशो डोमु मशोत्रतीनी हना, आ अर्थ मार बाक्बा, दे शेंने मचाप्तीनी, दे तुडक्नुड” दे माइक्तीमी।

10 मिनु सोरुल कोत्रब कल्दीपुकीमी पिप कली “एको रागी नेल्लेमी पिप आ हिल्लो पशो लोत्र शोत्रने चाप्ब सुइ मबाक्नीम। ठेयब नु सक्ति पाइश्शो पिपमी जादू, मन्तर तन्तर पाइब नु सोरुल कोत्रब कल्दी आन कली सुइम मोदेशो लोत्र गेनायो हिल्लो मपाम।

11 पिपमी हिल्लो पशो लोत्र सुइमी शोत्रने मचाप्चा डा बाक्ब। देवी देवतामी ला तुडक्पाइक्ने चाप्नीम। तन्न मेको देवी देवता मुर आन दातेमी मबाक्नीम” देतेकम।

12 मिनु मेको लोत्र नेशा, पिप शुश गाइश्शा, बेबीलोन रागीम बाक्ब जोक्ब तुडक्ब नेल्ल आन कली साइक्चा नम, दे हुकुम पाप्तु।

13 मिनु पिपमी जोक्ब तुडक्ब मुर नेल्ल आन कली साइक्चा माल्ब देशो लोत्र ब्रेक्शा गुंडताक्व। मिनु मेको देशो खोदेशो पा दानीएल नु आ वारच आन कली यो साइक्चा कली माल्तेकम।

दानीएल नु आ वारच साइक्चशो

14 मिनु दानीएलमी मेको नेशा, शुश मिग्शा, पिप आ साइक्तीक गेय पाइब अरयोक् नु लोत्र पाप्तु। मेको बेबीलोन डा जोक्ब तुडक्ब मुर आन कली साइक्चा कली लशो बाक्त। दानीएल १:२०

15 मिनु दानीएलमी मेको पिप आ गेय पाइब कली “मारदे पिप आ हुकुम मोदेशो रीब पा पचा माल्नीमी? दे हिल्लो पाप्तु। मिनु अरयोक्मी दानीएल कली नेल्ल शेंताक्व।

16 मिनु मेको तुडक्ता नोले दानीएल पिप आ बाक्तीकेम लशा ‘इच्का नाक्त रिम्दीन। मिनु गो मेको डोमु नु मेको आ अर्थ इन कली शोत्रनन्नी’ ” दे पुंडतु।

दानीएल नु आ वारचपुकी

17 मिनु नोले दानीएल आ खिं लशा, आ वारच हनान्याह, मीशाएल नु अजारयाह आन कली मेको लोत्र नेंपाइक्तु।

18 दानीएलमी मेको आन कली “गोपुकी नु बेबीलोन डा जोक्ब तुडक्ब नेल्ल साइक्चा मपुंडसीचा कली स्वर्ग डा परमप्रभु कली मेको खुइश्शो डोमु तुडक्पाइसीचा कली आ शिशो पुंडय” देत।

19 मिनु मेको नाक्दो परमप्रभुमी दानीएल कली कोंइतीकेमी मेको खुइश्शो डोमु नु आ अर्थ कोंइताक्व। मिनु दानीएलमी स्वर्ग डा परमप्रभु कली

20 “परमप्रभु, इन नें गेना हना यो ठेयब बाक्ब। मारदे हना सक्ति नु जोक्ब तुडक्ब थुं इन केन बाक्ब।

21 गे हिउंउद नु बर्खा फाइक्ब, पिप आन कली वोइक्ब नु तिल्ब बाक्नीनी। गे जोक्ब तुडक्ब आन कली तुडक्तीक थुं गेनीनी। मिनु रूप्ब थुं पाइश्शो मुर आन कली जोक्तीक थुं गेनीनी। दानीएल ४:१४, २२, २९

22 गे ठेयब नु खुइशशो लोत्र तुइकपाइकनीनी। छिडछिडम बाकशो मारेइ मारेइ नेल्ल तुइकनीनी। मारदे हना गे छेडछेडम बाकनीनी।

23 आं किकी पिपी आन परमप्रभु, गो इन कली 'गे रिम्शो पाइब बाकनीनी। गे नेल्ल क्येडा ठेयब बाकनीनी। मारदे हना गे आं कली तुइकतीक थुं नु सक्ति गेतीनी। मिनु आंइ पुंइशो नेल्ल गेतीनी। पिप आ तुइकचा मालशो नेल्ल आंइ कली तुइकपाइकतीनी' " दे परमप्रभु कली ठेयब सेल्शा, दैत।

दानीएल पिप आ बाकतीक लशो

24 मिनु दानीएल बेबीलोन रागी डा जोकब तुइकब मुर नेल्ल आन कली साइकचा, दे योत्रचा पुंइसीशो मुर अरयोक आ बाकतीकमी लशा, मेको कली "बेबीलोन रागी डा जोकब तुइकब मुर आन कली मसतीन। आं कली पिप आ डोंइती चाकदीय्यीनी। मिनु गो पिप कली आ डोमु शोत्रनुड। मिनु मेको रे मार रुम्सीबा नेल्ल शेंनुड" दैत।

25 मिनु अरयोकमी दानीएल कली दोरोर पा पिप आ डोंइती चाकदीशशा, पिप कली "गो यहूदा रागी रे ग्याइशशा चाकचा पुंइसीशो मुर आन दातेमी इन डोमु आ अर्थ शोत्रने चापब मुर का थित्ता" दैत।

26 मिनु पिपमी बेल्त-शजर नें वोइशशो दानीएल कली "गे आं तशो डोमु शोत्रशा, मेको आ अर्थ मार बाकबा मेको शेने चाप्नेवे?" दे हिल्लो पाप्तु।

27 मिनु दानीएलमी पिप कली "पिप, इन हिल्लो पशो खुइशशो लोत्र जोकब तुइकब, मन्तर तन्तर पाइब जादू नु चिन्ड आ अर्थ तुइकब सुइमी यो देने मचाप्नीम।

28 तन्न स्वर्गमी परमप्रभु का बाकब। मेकोमी खुइशशो लोत्र कोंइब। मिनु मेकोमी पिप नेबुकदनेसर, इन कली रागी नुप्ची ना मार दुम्बा, दे कोंइशो बाकब। मिनु इन इप्ची ना तशो डोमु मार बाकत देशा हना, उत्पती ४१:१६

29 गे इन इप्ची ना नोले 'मार दुम्बा?' दे मिम्ताकनी। मिनु नोले मार दुम्बा, दे कोंइबमी मेको इन कली तुइकपाइकतु।

30 गो मुर नेल्ल आन क्येडा शुश रूप्ने मचानुड। तन्न इन डोमु आ अर्थ तुइकपाइकचा नु इन थुं डा लोत्र रूप्पाइकचा कली परमप्रभुमी मेको आं कली तुइकपाइशशो बाकत। उत्पती ४१:३९

पिप आ तशो डोमु

31 हजुर, गे कोत्रशा बाकनीनु, इन डोंइती ठेयब मूर्ति का राप्शो ताइतीनी। मेको मूर्ति थम ठेयब नु थाम्पान टल्केशो बाकत। मिनु इन डोंइती शुश हिंचा डा मूर्ति का राप्शो ताइतीनी।

32 मेको आ पिया क्येश सुन के बाकत। आ कुचु नु गुइ चांदी के नु आ कोत्रज नु फिला कांसा के बाकतेकम।

33 मेको आ पोक्च फलाम के बाकत। मिनु आ खोइली फलाम नु खप ब्वांइसीशो बाकत।

34 गे मेको कली कोत्रशा बाकनीनु, फुल्लु का यित। तन्न मेको फुल्लु मुर आन गुइम मखोइशशो बाकत। मेकोमी मूर्ति आ फलाम नु खप ब्वांइसीशो खोइलीमी ख्राप्तु। मिनु मेको मूर्ति कली प्रोल्शा, रोब चिब सेल्लु

35 मिनु मेको फलाम, खप, कांसा, चांदी नु सुन नेल्ल ब्रोल चिल दुम्तेकम। मिनु फशेमी खला डा भूस हुरशा लाइशशो खोदेशो पा मारेइ मवोइकथ, ग्यौ फिकशा योल्ताकव। मिनु मेको मूर्ति कली ख्रशो फुल्लु बारना बारन लशा, ठेयब डांडा दुम्शा, रागी नेल्ल ब्रीत।

डोमु आ अर्थ

36 इन तशो डोमु एकोन बाकत। मुल पिप इन कली मेको डोमु आ अर्थ शेंनुड।

37 हजुर, गे पिप आन पिप बाकनीनी। स्वर्ग डा परमप्रभुमी इन कली राज्य, सक्ति, अधिकार नु शुश मान गेशो बाकब। इजीकीएल २६:१७

38 मिनु मेकोमी तेइ तेइ बाकब मुर, ब्वाकी डा जन्तु नु सरीडम बेरब चिक्ब नेल्ल आन कली इन कली गेशो बाकब। मिनु गे मेको नेल्ल आन कली सासन पाइनीनी। गे मेको मूर्ति आ सुन के पिया बाकनीनी। येरमीया २७:६; येरमीया २८:१४

39 मिनु इन नोले इन क्येडा ग्युम्शो राज्य का जाकब। मिनु मेको आ नोले डा अरु कांसा के खोदेशो राज्य का जाकब। मिनु मेकोमी रागी नेल्ल आन कली अधिकार पाइब।

40 मिनु मेको आ नोले फलाम खोदेशो बोल्यो अर्को राज्य का जाकब। दोपा फलाममी मारेइ मारेइ रोबल चिबल सेल्बा, मोपान मेको राज्यमी अर्को राज्य नेल्ल आन कली ब्रोले चीले पा तेइ तेइ फ्राइब।

41 मिनु इन तशो फलाम नु खप ब्वांइसीशो खोइली नु ब्रेप्चोपुकी खोदेशो पा ब्राशो राज्य का यो जाकब। तन्न मेको राज्य फलाम खोदेशो इक्का बोल्यो बाकब। मेको फलाम खप ब्वांइसीशो बाकत हना यो, मेको फलाम खोदेशो पा इक्का बोल्यो बाकब।

42 मिनु खोइली डा ब्रेप्चोपुकी फलाम नु खप ब्वांइसीशो बुद पा मेको राज्य सक्ति पाइशशो बोल्यो नु सक्ति मपाइशशो बाकब।

43 इन तशो फलाम नु खप ब्वांइसीशो खोदेशो पा मेको राज्य डा मुरपुकी ग्युंवे पा ब्वांइसीनीम। मिनु फलाम नु खप मगारशो बुद पा मेको राज्य यो का दुम्शा, लीने मचापब।

44 मेको पिप आन पालामी स्वर्ग डा परमप्रभुमी अर्को राज्य का सेल्ब। मेको राज्य गेनायो ब्रोल चिल मदुम्ब। मेको राज्य डा मुर खाल का डा बाकनीम। मेकोमी अरु राज्य नेल्ल आन कली रोब चिब पा थुम्पाइकब। तन्न मेको आ राज्य गेना हना यो लीब। दानीएल १४:२७; यसैया ९:६; १कोरिन्थी १५:२४; प्रकाश ११:१५

45 मिनू गे दोदेशो पा मरुमी मख्रोइक्थु डांडा रे फुल्लु का यिशो ताइतीनी। मिनू मेकोम फलाम, कांसा, खप चांदी नु सुन नेल्ल कली रोबल चिबल पोक्वा, मोदेशो पा ठेयब परमप्रभुमी 'नोले मार दुम्बा' दे पिप, इन कली कौंइशो बाक्ब। एको डोंमु नु आ अर्थ यो थमा बाक्ब" देत।

दानीएलमी मान तशो

46 मिनू पिप नेबुकदनेसरमी खुम्की पा दानीएल आ डोंइती बाप्शा, मेको कली ठेयब सेल्लु। मिनू "दानीएल कली अन्न नु धूप चढेचा" दे हुकुम पाप्तु।

47 मिनू पिपमी दानीएल कली "थमान, इन परमप्रभु देवी देवता आन परमप्रभु नु पिप आन परमप्रभु बाक्ब। मिनू खुइशो लोत्र तुइक्पाइक्ब बाक्ब। मोपतीके गे एको खुइशो लोत्र रुप्पाइक्ने चाप्तीनी" देत। दानीएल ३:२९; यहोसु २:११; भजन संग्रह ८६:८; यसैया ४२:८

48 मिनू पिपमी दानीएल आ मान बारपाइक्तु। मिनू शुश शोंप गेप्तु। मिनू बेबीलोन रागी नेल्ल कली हुकुम पाइब नु जोक्ब तुइक्ब मुर नेल्ल आन ठेयब मुर सेल्लु।

49 मिनू दानीएलमी "शद्रक, मेशक नु अबेद-नेगो आन कली बेबीलोन रागी डा सासन पतीक गेय गेचा" दे पिप नु लोत्र पा पुंडतु। दानीएल चहिं पिप आ दरवारमीन बाक्त। दानीएल ३:१२

### 3

नेबुकदनेसर आ सुन के मूर्ति

1 मिनू पिप नेबुकदनेसरमी सुन के मूर्ति का सेल्लु। मेको मूर्ति ६० कुबीत ग्येत्थ लाइशो नु ६ कुबीत पित्थ ब्रेम्शो बाक्त। मिनू मेको कली बेबीलोन डा दुरा माइशो दिममी राप्पाइशो चोइक्तु। कुबीत का आधा मिटर खोदेशो बाक्ब।

2 मिनू पिप नेबुकदनेसरमी मेको मूर्ति सेल्ले थुम्शा, पूजा गोतीके नाक्त मानेचा कली पारसी रागी डा हुकुम पाइब नेल्ल, अर्ती गेब, क्येट कोव्रशा हिक्ब, निसाफ पाइब, लल पिया आन ठेयब मुर नु सरकार डा अधिकार ताइब नेल्ल आन कली ब्रेत्ताक्ब।

3 मिनू मेको पारसी रागी डा हुकुम पाइब नेल्ल, अर्ती गेब, क्येट कोव्रशा हिक्ब, निसाफ पाइब, लल पिया आन ठेयब मुर नु सरकार डा अधिकार ताइब नेल्ल पिप नेबुकदनेसर आ राप्पाइशो मूर्ति कली पूजा गोतीक नाक्ती बुक्तेक्म। मिनू मेकोपुकी मेको मूर्ति आ डोंइती राप्शा बाक्मानु,

4 लोत्र पाइब मुर कामी ठेयब सेंदा पा "नेनीन, जात जात डा, रागी रागी डा नु आंम आंम लोत्र पाइब मुर नेल्ल, इन कली अरेतीके लोत्र का बाक्ब।

5 गे ग्रोत्र, मुराली, ठेयब नु आइक्च तार पाइशो नु मार मार ताप्तीक ताप्शो नेनीनु, पिप नेबुकदनेसरमी राप्पाइशो सुन के मूर्ति आ डोंइती खुम्की पा बाप्शा, सेउ पचा मालनीनी।

6 मिनू सु सुमी मोदेशो मपाइनीमी, मेको ठेयब मी ब्रतीकेमी हुम्चा पुंडसीनीम" दे ठेयब सेंदामी तुइक्पाइशो देत।

7 मोपतीके मुर नेल्लेमी ग्रोत्र, मुराली, तार पाइशो ठेयब, आइक्च नु मार मार ताप्तीके ताप्शो नेन्मे चोटीन नेबुकदनेसर आ राप्पाइशो सुन के मूर्ति आ डोंइती जात जात डा, रागी रागी डा नु आंम आंम लोत्र पाइब मुर नेल्लेमी खुम्की पा बाप्शा सेउ पाम्तेक्म।

यहूदी आन कली दोस गेशो

8 मिनू मेना कल्दी का निक्शी पिप आ बाक्तीकेमी जाक्शा, यहूदी आन परबम लोत्र पा मेको आन कली दोस गेम्तेक्म।

9 मिनू मेकोपुकीमी पिप नेबुकदनेसर कली "पिप, गे गेना हना यो ब्रोंइशा बाक्कीन।

10 हजुर, गे डोंइती 'सुइ सुइमी ग्रोत्र, मुराली, ठेयब नु आइक्च तार पाइशो नु मार मार ताप्तीक ताप्शो नेनीनु, सुन के मूर्ति आ डोंइती खुम्की पा बाप्शा, सेउ पचा मालनीम। दानीएल ६:१३

11 मिनू सु सुमी खुम्की पा सेउ मपाइनीमी, मेको ठेयब मी ब्रतीकेमी हुम्चा पुंडसीनीम" दे हुकुम पाइतीनी।

12 मिनू इन वोइशो बेबीलोन रागी कली सासन पाइब का निक्शी यहूदी बाक्नीमी। मेको आन नें शद्रक, मेशक नु अबेद-नेगो बाक्ब। मेकोपुकी इन कली काइ मटीब बाक्नीम। मिनू इन देवी देवता आन कली पूजा मपाइनीम। मिनू इन राप्पाइशो सुन के मूर्ति आ डोंइती यो खुम्की पा बाप्शा सेउ मपामे" देतेक्म।

13 मिनू मेको नेशा, पिप नेबुकदनेसर शुश गाइशो, चुरशा "शद्रक, मेशक नु अबेद-नेगो आन कली आं डोंइती चाक्कीन" दे हुकुम पाप्तु। मिनू मेको आन कली चाक्शा, पिप आ डोंइती राप्पाइक्तेक्म।

14 मिनू नेबुकदनेसरमी मेको आन कली "शद्रक, मेशक, नु अबेद-नेगो, गेपुकीमी आं देवी देवता आन कली सेउ मपाइनीनी? मिनू आं सेल्लो सुन के मूर्ति कली यो सेउ मपनी देशो लोत्र थमा बाक्बा?

15 गेपुकीमी मुल ग्रोत्र, मुराली, ठेयब नु आइक्च तार पाइशो नु मार मार ताप्तीक ताप्शो नेनीनु, आं सेल्लो मूर्ति आ डोंइती खुम्की पा बाप्शा, सेउ पाइतीनी हना, मेको इन कली रिम्शो दुम्ब। तन्न खुम्की पा बाप्शा, सेउ मपाइतीनी हना, इन कली ठेयब मी ब्रतीकेमी बो हुम्चा पुंडसीनीनी। मिनू इन कली आं गुइ रे तेको परमप्रभुम प्रोंइबाक्म?" दे माइक्तीमी। प्रस्थान ५:२; २राजा १८:३५

16 मिनू शद्रक, मेशक नु अबेद-नेगोमी पिप कली "हजुर, पिप नेबुकदनेसर, गो मेको आ परबम इन कली मारिइ लोत्र पचा ममालनीकी।

17 गो आंड परमप्रभु कली ठेयब सेलनीकी। मेकोमी आंड कली मेको ठेयब मी ब्रतीके रे प्रॉइने चाप्वा कों, मचाप्वा। तन्न इन गुड रे प्रोनल। व्यवस्था ४:२०; भजन संग्रह ६६:१२

18 तन्न आंड कली मप्रॉइतु हना यो, हजुर, इन कली एको लोत्र तुडक्पाइक्वा दाक्नीकी 'गोपुकी इन देवी देवता आन कली सेउ मपाइनीकी। मिनु इन राप्पाइश्शो सुन के मूर्ति आ डोंइती खुम्की पा मबाप्नीकी' दैतेक्म" दे पिप कली माइक्तेक्म। प्रस्थान २०:३-५

दानीएल आ वारच मीम हुम्शो

19 मिनु मेको नेशा नेबुकदनेसर शद्रक, मेशक नु अबेद-नेगो आन कली तशा, थाम्पान गाइश्शा, आ कुल राव किकपाइक्तु। मिनु मेकोमी "ब्रशो मी कली डोंइती क्येडा ७ खेयप नाप्शो सेल्चा माल्ब" दे हुकुम पाप्तु।

20 मिनु मेकोमी आ लडाइ पाइब आन नेल्ल क्येडा बोल्यो मुर आन कली "शद्रक, मेशक नु अबेद-नेगो आन कली फ्रेंशा, मेको ठेयब मी ब्रतीकेमी हुम्चा" दे हुकुम पाप्तु।

21 मिनु मेकोपुकीमी मेको आन कली आन फेक्शो वा नु ताकी सुन्दा फ्रेंशा, ठेयब मी ब्रतीकेमी हुम्ताक्म।

22 मारदे हना पिपमी "रीब वा पने" दे हुकुम पाप्तु। मिनु मेको मीम शद्रक, मेशक नु अबेद-नेगो आन कली हुम्थ लाइक्ब आन कली यु दाक्तु।

23 मिनु मेको शद्रक, मेशक नु अबेद-नेगो सांफा फ्रेंसीशा, ठेयब मी ब्रतीकेमी दोक्तेक्म।

परमप्रभु नु मीम काथा बाक्शो

24 मिनु पिप नेबुकदनेसर थाम्पान छक लाक्शा, छुल बोक्शा, आ अर्ती गेब आन कली "गोपुकीमी मुर सां आन कली फ्रेंशा, मीम हुम्शो मनकी डा?" दे हिल्लो पाप्तु। मिनु मेकोपुकीमी "हुम्ताक्क, हजुर" देशा, लोत्र लेत्ताक्म।

25 मिनु पिपमी मेको आन कली "तन्न कोत्रडीन, मफ्रेंसीशो ४ जना मुर मी ब्रतीकेमी एर ओंथ हिरना हिरन बाक्नीम। मीम मेको आन कली मडुप्शो तांडसीनीम। मिनु का आ कुल देवी देवता आस तौ आ कुल खोदेशो तांडसाक्व" दैत। यसेया ४३:२

26 मिनु पिप नेबुकदनेसर मेको ठेयब मी ब्रतीके आ लाप्चो आ नेक्था लशा, मेकोमी "शद्रक, मेशक नु अबेद-नेगो नेल्ल क्येडा ठेयब परमप्रभु आ मुर गूशा, एक पिन" दे ब्रेत्ताक्मी। मिनु शद्रक, मेशक नु अबेद-नेगो मेको मी रे गूतेक्म।

27 मिनु मेको पारसी रागी डा हुकुम पाइब नेल्ल नु पिप कली अर्ती गेब नेल्ल बुक्शा "मीम एको सां आन कली मारेड मपव। आन चां यो मप्रॉइश्शो बाक्त। मिनु आन वा यो मप्रॉइक्थु, मी आ रिना यो मबाक्शो बाक्त" दैतेक्म। हिब्रू ११:३३-३४

28 मिनु नेबुकदनेसरमी "शद्रक, मेशक नु अबेद-नेगो आन परमप्रभु नेल्ल क्येडा ठेयब बाक्ब। मेकोमी आ स्वर्ग डा गेय पाइब सोइश्शा, आ कली थमा सुइक्ब आन कली प्रॉइतु। मारदे हना मेकोपुकीमी पिप, आं देशो मबिक्थु, साइक्वा पुंडसीब दुम्शा यो, आंम परमप्रभु कली डा लाक्शा, अर्को तेकोइ देवी देवता आन डोंइती बाप्शा सेउ मपामे। दानीएल ६:२३

29 मोपतीके गो "जात जात डा, रागी रागी डा नु आंम आंम लोत्र पाइब मुर नेल्ल, सु सुमी शद्रक, मेशक नु अबेद-नेगो आन परमप्रभु आ पर्वम मरिम्शो लोत्र पा शुक्शी पाइनीमी, मेको आन गुड खोइल खोइश्शा साइक्वा पुंडसीनीम। मिनु मेको आन सिं यो प्रेशा गेचा पुंडसीनीम" दे हुकुम पाडनुड। मारदे हना मेको आन परमप्रभु का ला बाक्ब। देवी देवताम मोदेशो पा प्रॉइने मचाप्नीम" दैत। दानीएल २:४७

30 मिनु पिपमी शद्रक, मेशक नु अबेद-नेगो आन कली बेबीलोन रागी डा डोंइती क्येडा ठेयब मुर सेल्लु।

## 4

पिपमी लेंशा डोमु तशो

1 मिनु पिप नेबुकदनेसरमी जात जात नु रागी रागी डा आंम आंम लोत्र पाइब नेल्ल आन कली "गे थुं नाइश्शा बाक्कीन। दानीएल ६:२५

2 नेल्ल क्येडा ठेयब परमप्रभुमी आं कली चिन्ड नु छक लाक्का डा गेय कोइताक्यी। मिनु मेको लोत्र इन कली शेंचा रिम्शो लाक्ती।

3 मेको आ कोइशो चिन्ड गिश ठेयब बाक्नीमी। मिनु आ छक लाक्का डा गेय गिश सक्ति पाइश्शा बाक्नीमी। आ राज्य गेना हना यो लीब। मिनु आ अधिकार यो गेना हना यो लीब। दानीएल २:४४; दानीएल ४:३१; दानीएल ६:२७; दानीएल ७:१४, २७; भजन संग्रह १४५:१३

4 गो, नेबुकदनेसर, आं खिमी मारेड मारेडमी गाप्शा, आं दरवारमी थुं नाइश्शा बाक्शो नड।

5 मिनु गो आं दरवारम बाक्डानु, डोमु का ताता। मेको तशा, थाम्पा हिंती। आं थुंमी मार मार मिम्शा, मेको कोइतीके तशा, खिंखि पाता।

6 मिनु गो बेबीलोन रागी डा जोक्ब तुडक्ब मुर नेल्ल आन कली 'आं डोमु रे मार रुम्सीबा'? मेको तुडक्पांडसीचा कली आं बाक्तीकेमी ब्रेत्ताक्डमी।

7 मिनु जादू, मन्तर तन्तर पाइब, सोरुल कोत्रब कल्दी नु चिन्ड आ अर्थ तुडक्ब जाक्तेक्म। मिनु गो मेको आन कली 'गो डोमु का ताता' दे शोत्रता। तन्न मेकोपुकीमी आं कली आं डोमु रे मार रुम्सीबा, मेको शेने मचबेम।



8 मिनु नेल्ल क्येडा नोले दानीएल आं डोंइती जाकत। मेको आ नें आं देवता आ नें खोदेशो पा बेल्ल-शजर बाकत। मिनु मेको आ आगाम नेल्ल क्येडा ठेयब देवता आ सोक्त बाकत। मिनु मेको कली गो डोमु का ताता” दे शोव्रता। दानीएल ५:११,१४

9 मिनु गो मेको कली “बेल्ल-शजर, जाहू पाइब आन ठेयब मुर, इ आगाम नेल्ल क्येडा ठेयब देवी देवता आन सोक्त बाकत। मिनु खुइशो लोव्र मारेड मारेड शेने चापब बाकनेवे। मोपतीके आं तशो डोमु आ कोंइतीक देनो। मिनु मेको रे मार रुम्सीबा शेंदी” दे माइक्ता।

10 गो इण्शा बाकडानु, डोमु का ताता। मेको दोदेशो बाकत देशा हना, रागी आ दातेमी सरीड थिचशो थम लाइशो रवा का बाकत।

11 मिनु मेको रवा थम लाइशो बाकत। मेको रवा ठेयब नु बोल्यो दुम्त। आ डरीमी सरीड थिप्टु। मिनु मेको रवा रागी रागी रे तांडसीबाकत।

12 मेको आ सफा थम दारशो बाकतेकम। मिनु मेको रवाम शुश फल सिशशो बाकत। मिनु मेको रे नेल्लेमी जाइबाकतेकम। मिनु जन्तु मेको रवा आ पुंमी बाकबाकतेकम। मिनु चिक्ब आ राशीम ग्योत्र सेल्लबाकतेकम। मिनु ब्रोंडशा बाकब नेल्लेमी मेकेर रे जचा ताइबाकतेकम।

13 मिनु कोंइतीके कोव्रना कोव्रन बाकडानु, स्वर्ग डा कोव्रब इर रे यिशो ताता।

14 मेकोमी ठेयब शेंदा पा “एको रवा कली तिमीन। आ राशी नेल्ल क्योरीन, आ सफा हेमीन। मिनु आ फल फ्रशा गेने। मिनु जन्तु आन कली आ पुं रे प्रोक्पतीन। मिनु चिक्ब आन कली मेको आ राशी रे खेरीन।

15 तन्न मेको आ टुटा नु शाक्श खपीम लीचा माल्नीम। मेको फलाम नु कांसा के पातामी फ्रेंशा, खपीमी लीचा माल्नीम। मिनु नाकदो यिशो सीतमी जिशशा बाकल। मिनु मेको जन्तुपुकी नु बाकल। जन्तु खोदेशो पा घांसम बाक्चा माल्दल।

16 मेको ७ बर्स मोदेशो दुम्चा माल्ब। मिनु मेको मुर आ थुं फांडसीशा, जन्तु आन थुं खोदेशो दुम्ब।

17 स्वर्ग डा कोव्रबपुकीमी ‘नेल्ल क्येडा ठेयब परमप्रभुमी राज्य नेल्ल कली सासन पाइब। मेकोमी आ दाक्शो मुर कली सासन पतीक गेय गेब। मेको नेल्ल क्येडा ब्रेम्शो मुर आ गुइमी गेब। मेको मुर नेल्लेमी तुइक्चा माल्नीम’ दे लोव्र पाम्तेकम। दानीएल २:२१

दानीएलमी डोमु आ अर्थ शेंशो

18 मोपा गो पिप, नेबुकदनेसरमी डोमु का ताता। मुल बेल्ल-शजर, गे एको डोमु रे मार रुम्सीबा, मेको शेंदी। आं राज्यम बाकब जोक्ब तुइक्ब नेल्लेमी मेको शेंने मचवेम। गे चहिं मेको शेंने चापेवे। मारदे हना इ आगाम ठेयब देवता आ सोक्त बाकब” दे माइक्ता।

19 मिनु मेको नेंशा, बेल्ल-शजर माइशशो दानीएल आ थुं लुक्च लत। आ मिन्तीकेमी मेको कली शुश हिंपाइक्तु। मिनु गो, पिपमी मेको कली “बेल्ल-शजर, आं डोमु नु मेको आ रुप्तीकेमी इ कली हिंपाइक्चा मगेवो” देंती। मिनु दानीएलमी “हजुर, आं पिप, एको डोमु इन जोरी सत्रु आन कली दुम्ल। मिनु मेको आ रुप्तीक लोव्र इन जोरी सत्रुम राम हना, दुम वा।

20 इन डोमुम तशो रवा ठेयब नु बोल्यो दुम्शा, आ डरीमी सरीड थिप्टु। मिनु मेको रवा कली रागी रागी रे तांडसीबाकत। इजीकीएल ३१:३-१४

21 मेको आ सफा थम दारशो बाकतेकम। मेको रवाम शुश फल सिशशो बाकत। मिनु मेको रे नेल्लेमी जाइबाकतेकम। मिनु जन्तुपुकी मेको रवा आ पुंमी बाकबाकतेकम। मिनु चिक्ब आ राशीम बास बाकबाकतेकम।

22 हजुर, पिप, गे मेको रवा बाक्नीनी। गे ठेयब नु सक्ति पाइशशो दुम्तीनी। इन सक्ति बारशा, सरीड सम्म जाकदीशशो बाकत। मिनु इन अधिकार बारशा, रागी नेल्ल आन कली हुकुम पाइतीनी।

23 हजुर, पिप, गे स्वर्ग डा कोव्रब यिशो ताइतीनी। मिनु मेकोमी ‘एको रवा कली तिमीन। खतम पोक्कीन। तन्न मेको आ टुटा नु शाक्श खपीम लीचा माल्नीम। मेको फलाम नु कांसा के पातामी फ्रेंशा, खपीमी लीचा माल्नीनी। मिनु नाकदो यिशो सीतमी जिशशा बाकल। मिनु मेको जन्तुपुकी नु बाकल। ७ बर्स मलाक्गा सम्म मोदेशो दुम्चा माल्ब’ देंत।

24 मिनु हजुर, पिप, मेको डोमु डा रुप्तीक नु इन पबर्म नेल्ल क्येडा ठेयब परमप्रभु आ हुकुम मार बाकत देशा हना,

25 गे मुर आन बाक्तीके रे खेरचा पुंडसीनीनी। मिनु गे जन्तुपुकी नु बाक्नीनी। बी ब्यफोमी खोदेशो पा घांस ब्वाडनीनी। मिनु नाकदो डा सीतम जिल्लीनी। मिनु ७ बर्स सम्म मोदेशो दुम्नीनी। नेल्ल क्येडा ठेयब परमप्रभुमी मुर आन राज्यम सासन पाइब। मिनु परमप्रभुमी मेको राज्य आ दाक्शो मुर आ गुइमी गेब, दे इन कली तुइक्पाइक्चा कली मोदेशो पाप्टु।

26 मिनु रवा आ टुटा नु शाक्श खप उइ प्रोंडचा देशो हुकुम दुम्त। मिनु मेको रे मार रुम्सीब देशा हना, स्वर्ग डा परमप्रभु नेल्ल आन कली सासन पाइब बाकब, दे रुम्नी नोले इन राज्य लेंशा ताइनीनी।

27 हजुर पिप, मोपतीके आं गेशो अर्ती इन कली दुम्ल। इन पाप कली ठीक पतीकेमी क्याम्दीन। मिनु इन मरिम्शो पशो, श्येत जाइब आन कली शिशो पतीकेमी क्याम्दीन। मो पाइतीनी हना, इन रिम्शो बाक्तीक शुश नाकत सम्म लीब” देंत। हितोपदेस १९:१७; मत्ती ५:७

पिप आ डोमु गाण्शो

28 मिनु पिप नेबुकदनेसरमी दोदेशो डोमु तवा, मोदेशोन दुम्त।

29 मिनु १२ महिना नोले मेको पिप बेबीलोन आ दरवार आ कौसीमी हिरना हिरन बाक्शा,

30 मेकोमी “मार, एको बेबीलोन थम रिम्शो मबाक्बा डा? गो एको आं ठेयब सक्तिमी आं शुश शौप वोइशशा, बाक्चा कली सेल्ला” देंत। हितोपदेस १६:१८

31 मिनू पिपमी मेको लोत्र देमेनु, स्वर्ग रे सेंदा कामी “पिप नेबुकदनेसर इ कली मार लोत्र देंशो बाक्त देंशा हना, एको राज्य इ गुड रे रोइक्ने थुम्शो बाक्ब।

32 गे मुर आन बाक्तीके रे खेरचा पुंडसीनेवे। मिनू गे जन्तुपुकी नु बाक्नेवे। बी ब्यफोमी खोदेशो पा घांस ब्वाइनेवे। मिनू नाक्दो डा सीतम जिलेवे। मिनू ७ बर्स सम्म मोदेशो दुम्नेवे। नेल्ल क्येडा ठेयब परमप्रभुमी मुर आन राज्य कली सासन पाइब। मिनू परमप्रभुमी मेको राज्य आ दाक्शो मुर आ गुडमी गेब, दे इन कली तुइक्पाइक्चा कली मोदेशो पाइब” देंत। दानीएल ५:२१

33 मिनू मेको लोत्र पशो नेना चोटीन नेबुकदनेसर थमा पा मोदेशो दुम्त। मेको मुर आन दाते रे खेरचा पुंडसाक्ब। मिनू बी ब्यफोम खोदेशो पा घांस ब्वचा गोप्टु। मिनू मेको आ रां नाक्दो डा सीतमी जित्त। मिनू मेको आ चां ककाकुली आ ओफला खोदेशो पा लाइशो नु आ गेय चिक्ब आ नइग्रा खोदेशो दुम्त।

पिपमी परमप्रभु कली मान पशो

34 मिनू पिपमी “मेको देशो नेल्ल जाक्दीम नोले, गो आं पिया पोक्शा सरीइ गे कोव्रता। मिनू आं निप्स लेंशा रिम्शो दुम्त। मिनू गो नेल्ल क्येडा ठेयब नु गेना हना यो ब्रोंइशा बाक्ब परमप्रभु कली ठेयब सेल्शा, मान पाता। मेको आ सासन पतीके गेना हना यो लीब। मेको आ राज्य पाला पाला सम्म लीब। दानीएल ३:३३

35 रागी डा मुरपुकी नेल्ल मेको आ डोंइती मारेड म्बाक्नीम। मेकोमी स्वर्ग डा गेय पाइब नु रागी डा मुर आन कली मार पचा दाक्बा, मेकोन पने चाप्ब। सुइमी मेको कली तेक्ने मचाप्नीम। मिनू सुइमी ‘गे मार पनी?’ देंने मचाप्नीम। यसैया ४०:१७; अय्युब ९:१२

36 मेना आं निप्स लेंशा रिम्शो दुम्त। मिनू आं राज्य डा छेडछेड आं कली लेत्ताक्यी। आं कली अर्ती गेब नु आं ठेयब गेय पाइबपुकी आं कली गुम्थ जाक्तेक्म। मिनू गो लेंशा पिप दुम्ती। मिनू गो डोंइती क्येडा शुश सक्ति नु मान ताता।

37 मुल गो, नेबुकदनेसरमी ‘स्वर्ग डा पिप ठेयब बाक्ब’ दे मान पाइनुड। मारदे हना आ पशो नेल्ल थमा बाक्ब। आ पतीके नेल्ल ठीक बाक्नीम। मेकोमी ठेयब लेशो मुर आन कली ब्रेम्शो सेल्ने चाप्ब” दे पिपमी देंत। लूका १:५१; लूका १८:१४

## 5

पिप बेल-शजर आ भोज

1 मिनू पिप बेल-शजरमी आ राज्य डा ठेयब अधिकार ताइब हजार का मुर आन कली भोज का सेल्लु। मिनू मेकोमी मेको आन डोंइती अडगुर शांबु त्तु।

2 मिनू मेको पिप शांबुमी दुक्शा “आं आफ नेबुकदनेसरमी यरूसलेम सहर डा परमप्रभु आ खिं रे चाक्शो सुन नु चांदी के बोसपुकी एक चाक्कीन। गो, आं राज्य डा ठेयब अधिकार ताइबपुकी, आं ग्युंवे पशो मीशपुकी नु आं अरु चाक्शो मीशपुकी गारशा, मेको बोसम तूनीकी” देंत। दानीएल १:२; २इतिहास ३६:१०; एज्रा १:७-११

3 मिनू परमप्रभु आ खिं यरूसलेम रे चाक्शो सुन नु चांदी के बोसपुकी मेकेर चाक्तेक्म। मिनू पिप, आ राज्य डा ठेयब अधिकार ताइबपुकी, आ ग्युंवे पशो मीशपुकी नु आं अरु चाक्शो मीशपुकी गारशा, मेको बोसम तूतेक्म।

4 मिनू मेकोपुकीमी अडगुर शांबु तूशा, सुन, चांदी, कांसा, फलाम, शी नु फुल्लु के सेल्शो देवी देवता आन कली सेउ पाम्तेक्म।

5 मिनू मेना मुर आ गुड का फो गूशा, बत्ती आ नेक्था दरवार डा सिल्शो गारोमी ब्रेक्ताक्ब। मिनू पिपमी मेको गुडमी ब्रेक्ना ब्रेक्न पशो ताप्टु।

6 मिनू मेको तशा, पिप आ कुल लल गिग दुम्शा, शुश हिंत। आ खोइल खिंखि पा आ पोक्च थोक्सीशा, खोइल ललाक लुलुक दुम्त।

7 मिनू पिपमी “बेबीलोन रागी डा मन्तर तन्तर पाइब, सोरुल कोव्रब कल्दी नु चिन्ड आ अर्थ जोक्ब चाक्कीन” दे हुकुम पाप्टु। मिनू पिपम मेको बेबीलोन रागी डा जोक्ब तुइक्ब आन कली “सुमी एको ब्रेक्शो पदेशा, आं अर्थ आं कली शेंने चाप्बा, मेको प्याजी रड डा वा फेक्पाइशशा, सुन के माला रेल्चा पुंडसीब। मिनू गो नु आं राज्य डा ठेयब गेय पाइब आ नोले डा हुकुम पाइब सेल्नुड” देंत।

8 मिनू पिप आ जोक्ब तुइक्ब मुर नेल्ल दरवारम जाक्तेक्म। तन्न मेकोपुकीमी मेको ब्रेक्स पढेने मचबेम। मिनू मार रूसीबा, मेको यो देंने मचबेम।

9 मिनू पिप बेल-शजर शुश हिंशा, आ कुल लल गिगी जीत। मिनू आ राज्य डा ठेयब अधिकार ताइबपुकी मार पचा ना, मार पचा दुम्तेक्म।

10 मिनू पिपीममी पिप नु आ राज्य डा ठेयब अधिकार ताइबपुकी लोत्र पशो नेंशा, भोज जतीक कोठामी ओव्रत। मिनू मेकोमी “पिप, गे गेना हना यो ब्रोंइशा बाक्कीन। गे हिंशा इन थुं ग्येत्थ लुक्च मपने। इन कुल लल गिगी मटुम्पतीन।

11 इन राज्यमी ठेयब देवता आन सोक्त पाइशशो मुर का बाक्ब। इन आफ आ पालामी मेको नु देवी देवता के खोदेशो पा सोक्त आ मिम्शो रुप्तीके तुइक्तीके नु जोक्ब तुइक्ब थुं बाक्त। मोपतीके इन आफ पिप नेबुकदनेसर मी मेको कली जादू, मन्तर तन्तर पाइब, सोरुल कोव्रब कल्दी नु चिन्ड आ अर्थ जोक्ब आन ठेयब मुर सेल्शो बाक्त। दानीएल ४:५; दानीएल २:४८

12 मिनु पिपमी मेको कली बेलत-शजर, दे नें वोइशशो बाकत। मारेदे हना मेको बेलत-शजर माइशशो दानीएल तुइक्तीक नु डोमु आ अर्थ शेंतीक, खुइशशो लोव्र तुइक्ब नु मारेइ मारेइ ठेयब श्येत रे गुंइने चापब बाकब। मिनु मुल मेको दानीएल कली ब्रथ सोइक्तीन। मिनु मेकोमी मेको ब्रेक्स पढेशा, रुप्पाइक्ने चापब” दैत। दानीएल १:१७

13 मिनु नोले दानीएल कली पिप आ डोइती चाक्तेक्म। मिनु पिपमी दानीएल कली “गे दानीएल नवे? आं आफोमी इ कली चाकडे? गे यहूदा रागी रे ग्याइशशा चाक्चा पुंइसीशो नवे?

14 गो इ आगाम ठेयब देवता आन मिशो तुइक्तीक, रुप्तीक नु शुश जोक्ब तुइक्ब थुं बाकब, देशो लोव्र नेता।

15 गो एको ब्रेक्स पढेशा मार रुम्सीबा, आं कली देंमल, दे शुश जोक्ब तुइक्ब नु मन्तर तन्तर पाइब आन कली एक चाक्पाइक्ता, तन्न मेकोपुकीमी एको ब्रेक्स आ अर्थ शेंने मचबेम।

16 मिनु गे एको चिन्ड आ अर्थ मार रुम्सीबा, दे शेंने चापब नु मारेइ मारेइ श्येत रे गुंइने चापब बाक्नेवे, देशो लोव्र नेता। मिनु मुल एको ब्रेक्स पढेशा, मार रुम्सीबा मेको आं कली शेंने चाप्तीवी हना, गे प्याजी रड डा वा फेक्पाइशशा, सुन के माला रेल्ला पुंइसीनेवे। मिनु गे आं राज्य डा आं क्येडा नु आं ठेयब गेय पाइब आ नोले डा ठेयब हुकुम पाइब दुम्नेवे” दैत।

ब्रेक्स आ अर्थ शेंशो

17 मिनु दानीएलमी पिप कली “इन कोसेली आंमान वोंइसीन। मिनु अरु सुइ आन कली गेने। तन्न गो एको ब्रेक्स पढेशा, मार रुम्सीबा इन कली शेंननी।

18 हजुर, नेल्ल क्येडा ठेयब परमप्रभुमी इन आफ पिप नेबुकदनेसर कली राज्य, ठेयब दुम्तीके, मान ततीके नु शुश शोंप गेशो बाकत। दानीएल २:३७

19 मोपा परमप्रभुमी मेको कली ठेयब दुम्तीके गेतीके जात जात नु रागी रागी डा आंम आंम लोव्र पाइब मुर नेल्ल मेको क्येडा हिंशा, खिंखि पाप्तेक्म। मिनु मेकोमी सु कली साइक्चा दाक्ता, मेको कली साइक्तु। सु कली ब्रोंड्या गेचा दाक्ता, मेको कली ब्रोंड्या गेप्टु। मिनु मान बारपाइक्चा दाक्शो कली मान बारपाइक्तु। सु कली दिप्चा दाक्ता, मेको कली दिप्तु।

20 तन्न मेको ठेयब लेत्तीके नु आ थुं खकटा दुम्पाइक्तीके पिप आ नित्तीके रे खेरचा नु आ छेडछेड रोइक्चा पुंइसाक्व।

21 मिनु मुर आन बाक्तीके रे खेरचा पुंइसीशा, आ थुं जन्तु आन थुं खोदेंशो दुम्त। मेको ब्वाकी डा गधा नु बाक्शा, ब्यफोम खोदेंशो पा घांस ब्वशो बाकत। मिनु मेको नाक्दो डा सीतमी जित्त। नेल्ल क्येडा ठेयब परमप्रभु मुर आन राज्य कली सासन पाइब बाक्ब नु मेको राज्य आ दाक्शो मुर आन गुडमी गेब, दे तुइक्पाइक्चा कली मोदेंशो दुम्शो बाकत। दानीएल ४:२९

22 मिनु गे, मेको आ तौ, बेल-शजरमी, मेको लोव्र नेल्ल तुइशशा यो, इन थुं मब्रेम्पाइक्नी।

23 ‘गो स्वर्ग डा परमप्रभु क्येडा ठेयब नड’ दे आंम कली ठेयब सेल्लतीनी। मिनु गे परमप्रभु आ खिं डा बोसपुकी चाक्पाइशशा, गे नु इन राज्यम अधिकार ताइब, इन ग्युंवे पशो मीशपुकी नु इन अरु चाक्शो मीशपुकीमी मेको बोसम अडगुर शांबु तूतीनी। मिनु सुन, चांदी, कांसा, फलाम, शी नु फुल्लु के सेल्लो मिक्च मताइब, मनंब, मरुपब देवी देवता आन कली सेउ पाइतीनी। तन्न इन कली ब्रोंड्यातीक सोक्त गेब नु इन लां कोंडब परमप्रभु कली मान मपनी।

24 मोपतीके मेकोमी मेको गुड सोइशशा, मेको ब्रेक्स ब्रेक्पाइक्तु।

25 मिनु मेको ब्रेक्शो मार बाक्ब देशा हना ‘मेने मेने टेकेल परेस’ दे ब्रेक्शो बाक्ब। यसैया ४७:११

26 मेको आ अर्थ मार बाक्ब देशा हना, मेने आ अर्थ ‘परमप्रभुमी इन सासन पतीक नाक्त हिवका, थुम्तु’ देशो बाक्ब।

27 टेकेल आ अर्थ ‘गे नाक्तीकेम नाक्चा पुंइसीशा, सोपी दुम्तीनी’ देशो बाक्ब।

28 परेस आ अर्थ, इन राज्य निक्शी दुम्शा, मादी नु पारसी आन कली गेशो बाक्ब, देशो रुम्सीब। मेको आ अर्थ एको बाक्ब” दे दानीएलमी दैत।

29 मिनु पिप बेल-शजरमी “दानीएल कली प्याजी वा फेक्तीन। सुन के माला रेल्लदीन। मिनु मुर नेल्ल आन कली ‘मेको राज्य डा पिप, आं क्येडा नु आं ठेयब गेय पाइब क्येडा नोले डा हुकुम पाइब बाक्ब’ दे मुर नेल्ल आन कली शेंदीन” दैत। दानीएल २:२८; उत्पत्ती ४१:४२-४३

30 मिनु मेको नाक्दोन कल्दी आन पिप बेल-शजर साइक्चा पुंइसाक्व।

31 मिनु मादी रागी डा पिप दारामी राज्य ताप्टु। मेना पिप दारा ६२ बर्स दुम्शो बाक्माक्त। दानीएल ९:१; यसैया १३:१७

## 6

दानीएल रिम्शो पाइब दुम्शो

1 पिप दारामी आ राज्य कली सहे का २० जना हुकुम पाइब मुर वोइशशो बाकत। मेको पारसी रागीमी ब्राशा बाक्शो बाक्तेक्म। दानीएल ५:१२

2 मिनु पिप दाराम मारेइ मजाम्ल, दे मेको नेल्ल आन कली ठेयब कोव्रब मुर सां वोइशशो बाकत। मिनु मेको सां आन दातेमी का दानीएल बाकत। मेको हुकुम पाइबपुकीमी ठेयब कोव्रब मुर सां आन कली रागीमी मार दुम्मे, मेको शोव्रचा माल्लो बाक्तेक्म।

3 मिनु दानीएल अरु ठेयब कोव्रब मुर नु पारसी रागी डा सहे का २० जना हुकुम पाइब नेल्ल आन दातेमी नेल्ल आन क्येडा निप्स पाइशशो नु रिम्शो थुं पाइशशो बाकत। मोपतीके पिपमी “गो मेको कली रागी नेल्ल कली हुकुम पाइब सेल्लुड” दे मिम्ता बाकत।

4 मिनू मेको ठेयब कोत्रब मुर नु सहे का २० जना पारसी रागी कली हुकुम पाइबपुकीमी गेहे पा दानीएल कली दोस गेचा, दे क्यारी पचा गोत्रमे बाक्त। तन्न मरिम्शो नु दोस गेतीक मारेइ मथिदमे बाक्त। मारदे हना दानीएल रिम्शो, मारेइ दोस मपाइशो गेय पाइब मुर बाक्त।

5 मिनू मेकोपुकीमी “दानीएल कली आ परमप्रभु आ अरेशो लोत्र थमा सुइवतीक क्येडा लाकशा, अरु मारेइमी यो दोस गेने मचाप्नय” देमुमा बाक्त।

6 मिनू मेको ठेयब कोत्रब निकशी नु पारसी रागी कली हुकुम पाइब नेल्ल लोत्रसी पा गारशा, पिप आ दरवारमी जाकशा पिप कली “हजुर, पिप दारा, गे गेना हना यो ब्रोंइशा बाक्कीन।

7 गो इन राज्य डा ठेयब कोत्रब, आइक्च नु ठेयब हुकुम पाइब, अर्ती गेब नु इन रागी डा ठेयब मुर नेल्ल नु गारशा, गे पिपमी, कानुन का सेल्चा माल्नीनी। मार कानुन सेल्चा माल्नीनी देशा हना, मुल ३० नाक्त सम्म इन क्येडा लाकशा, सुइ मुरपुकीमी आंम देवी देवता नु मुर आन कली मारेइ पुंउने मचाप्नीम। इन क्येडा लाकशा अरु सुइ कली पुंउतेक्म हना, मेको मुर गुप्स वोइक्तीकेमी ताइक्चा पुंउसीब, दे ब्रेक्शा छाप थोकशा वोतीन।

8 हजुर पिप, मोपा कानुन का सेलीन। मिनू छाप थोकतीन। मादी नु पारसी आन कानुन मफांडसीब” देंमा बाक्त। एस्तर १:११; एस्तर ८:८

9 मिनू पिप दारामी मेको कानुन ब्रेक्पा छाप थोकशा गुंडताक्व।

दानीएल ग्याइक्चा पुंउसीशो

10 मिनू दानीएलमी पिप दारामी मोपा ब्रेक्शा छाप थोकशा गुंडशो तुइशशा, यरूसलेम गे कोत्रशा सेल्शो खिं आ तला तारी लशा, पोक्च थेक्शा आ परमप्रभु कली प्रार्थना पाप्तु। मोपा नाक्त किंत किंत सां खेयप पार्थना पाप्तु। मिनू डोंइती खोदेशो पा परमप्रभु कली ठेयब सेल्लु। १रजा ८:४८

11 मिनू दानीएल कली गेहे पाइबपुकी मेकेर जाकशा, दानीएलमी प्रार्थना पा आ परमप्रभु कली ठेयब सेल्शा पुंउशो थित्तेक्म।

12 मिनू नोले मेकोपुकी पिप आ दरवार लशा, मेको ब्रेक्शो कानुन आ पर्वम “हजुर पिप, गे ३० नाक्त सम्म सुइमी इन क्येडा लाकशा, अरु देवी देवता नु मुर आन कली मारेइ यो मपुंइचा, मो पाम्तेक्म हना, मेको आन कली गुप्स वोइक्तीकेमी पिकचा, दे कानुन सेल्नी ममाइ?” देतेक्म। मिनू पिपमी “एको लोत्र थमा बाक्ब। मादी नु पारसी आन कानुन गेनायो मफांडसीब” दे लोत्र पाप्तु। दानीएल ३:१०

13 मिनू मेकोपुकीमी पिप कली “आ रागी रे ग्याइशशा चाक्चा पुंउसीशो यहूदी दानीएलमी इन लोत्र लाकशा, इन गुंडशो कानुन मटीव। मेकोमी नाक्त किंत किंत खेयप सां प्रार्थना पा पुंउब” देतेक्म।

14 मिनू पिपमी मेको लोत्र नेशा, आ थुं शुश लुक्च लत। मिनू दानीएल कली “दोपा प्रोंइनुडा?” दे नां मलाक्पा सम्म शुश मिम्शा बाक्माक्त।

15 मेको दानीएल कली गेहे पाइबपुकी पिप आ डोंइती जाकशा “हजुर पिप, मादी नु पारसी आन पिपमी हुकुम पशो नु छाप थोकशो कानुन मफांडसीब, दे एको लोत्र तुइक्नीनी” देतेक्म।

दानीएल कली गुप्स खोरम तोक्शो

16 मिनू नोले पिपमी “दानीएल कली चाक्कीन। मिनू गुप्स आन कली वोइक्तीकेमी तोक्कीन” दे हुकुम पाप्तु। मिनू मेकोपुकीमी दानीएल कली गुप्स आन बाक्तीकेम तोक्तेक्म। मिनू पिपमी दानीएल कली “इ मप्रोंइथु, ठेयब सेल्शो परमप्रभुमी इ कली प्रोनल” देत। दानीएल ३:१५

17 मिनू नोले गेय पाइबपुकीमी फुल्लु का चाक्शा, मेको गुप्स बाक्तीक आ ओत्रतीक चोक्तेक्म। सुइमी दानीएल कली मारेइ पने मचाप्मेक्ल, दे पिपमी आ छाप पाइशो औंटीम थोकशा, आ राज्य डा ठेयब अधिकार ताइब आन छाप यो थोकपाइक्तु।

18 मिनू पिप आ दरवारम लेशशा लशा, मेको नाक्दो माइजा बाक्शा, मारेइ जचा थोत्रक आ बाक्तीकेम मचाक्पद। मिनू मइप्थु, नां सोंइताक्व।

परमप्रभुम दानीएल कली प्रोंइशो

19 मिनू पिप नां मसोथु, सुनी कना बोक्शा, मेको गुप्स आन कली वोइक्तीकेम दोरशा लत।

20 मिनू गुप्स आन बाक्तीके आ नेक्था जाक्दीशशा, शुश हिंशा दानीएल कली “दानीएल, ब्रोंइशा बाक्ब परमप्रभु आ गेय पाइब, इ गेना हना यो ठेयब सेल्ना सेल्न बाक्शो परमप्रभुमी इ कली गुप्स रे प्रोना?” दे हिल्लो पा ब्रेत्ताक्व। दानीएल ३:१७

21 मिनू दानीएलमी पिप कली “हजुर पिप, गे गेना हना यो ब्रोंइशा बाक्कीन।

22 आं परमप्रभुमी आ स्वर्ग डा गेय पाइब सोइशशा, आं कली मारेइ मपाइक्चाइक्चा कली गुप्स आन शोत्र चोक्पाइक्तु। मारदे हना आं दोस मबा। हजुर पिप, इन डोंइती यो मारेइ मरिम्शो मपड” देत। दानीएल ३:२८; भजन संग्रह २२:२२; हिब्रू ११:३३

23 मिनू पिप थाम्पा ग्येरसीशा “दानीएल कली गुप्स वोइक्तीके रे गुंडदीन” दे हुकुम पाप्तु। मिनू दानीएल कली कीशा गुंडताक्म। मिनू मेको मारेइ मडुम्शो बाक्त। मारदे हना मेकोमी आ परमप्रभु कली थमा सुइशशो बाक्त।

24 मिनु पिपमी “दानीएल कली दोस गेब, आन मीश नु आन तमी तौ नेल्ल आन कली गुप्स वोइक्तीकेमी तोक्कीन” दे हुकुम पाप्तु। मिनु मेको आन कली मेकेर तोक्तेकम। मिनु मेकोपुकी गुप्स आन बाक्तीके मजाकदीत्थु, गुप्सपुकी प्रेक्शा ग्राम्शा मेको आन रुश का यो मवोइक्थु नेक्तेकम।

पिपम परमप्रभु कली मान पशो

25 मिनु नोले पिप दारामी जात जात नु रागी रागी डा आंम आंम लोत्र पाइब नेल्ल आन कली “गे थुं नाइशशा बाक्कीन। दानीएल ४:१

26 आं राज्य डा मुर नेल्लेमी दानीएल आ परमप्रभु कली मान पा हिंचा माल्नीम। मारदे हना मेको गेना हना यो ब्रोंइशा बाक्ब परमप्रभु बाक्ब। मेको आ राज्य गेना हना यो लीब। मिनु आ अधिकार गेनायो मनुक्ब।

27 मेकोमी आ मुर आन कली प्रोंइशा, श्येत रे ग्रुंइने चाप्ब। मेको सरीड नु रागीमी चिन्ड नु छक लाक्चा डा गेय पाइब बाक्ब। मेकोमी दानीएल कली गुप्स आन सक्ति रे प्रोंइतु” दे हुकुम पा ब्रेक्ताक्व।

28 मिनु दानीएल पिप दारा नु पारसी आन पिप कोरेस आस पालामी शुश मान तशा, सक्ति पाइशशो दुम्त।

## 7

दानीएलमी कोंइतीके तशो

दानीएल २:-

1 मिनु बेबीलोन डा बेल-शजर पिप दुम्शो डोंइती डा बर्समी दानीएल इम्मेनु, डोमु पा, कोंइतीके का ताप्तु। मिनु मेकोमी आ तशो डोमु ब्रेक्ताक्व। दानीएल ५:१

2 मिनु दानीएलमी गो, दानीएल, इप्शा डोमु पा, कोंइतीक का ताता, सरीड पूर्ब, पच्छिम, उत्तर, दक्खिन रे फश पा ठेयब समुन्द्र कली छाल पोक्पाइशशो ताता।

3 मिनु समुन्द्र रे ४ ओटा ठेयब जन्तु वृतेकम। मेको दोदेशो तांडसाक्म देशा हना, प्रकाश १३:१-२

4 मेको डोंइती डा जन्तु गुप्स खोंदेशो बाक्शा, ककाकुली आ फ्रां खोंदेशो फ्रां पाइशशो बाक्त। मिनु गो कोव्रशा बाक्डानु, मेको आ फ्रां तुल्चा पुंडसाक्व। मिनु मेको खप रे बोक्पाइशशा, मुर खोंदेशो पा आ खोंइल निक्शीमी राप्पाइक्चा पुंडसाक्व। मिनु मेकोमी मुर आ थुं ताप्तु।

5 मिनु मेको आ नोले अर्को जन्तु का वृत। मेको वां खोंदेशो बाक्त। मेकोमी का पटटी रे बोक्शा, जेरी सां आ शोत्रम काम्शो बाक्त। मिनु मेको कली “बोक्को, श्ये शुश ब्वावो” देशो नेंता।

6 मिनु गो कोव्रशा बाक्डानु, नोले अर्को जन्तु का वृत। मेको जोइ खोंदेशो बाक्त। मेको आ चीमी ४ ओटा चिक्ब आ फ्रां खोंदेशो फ्रां बाक्तेकम। मिनु मेको के ४ ओटा पिया बाक्तेकम। मिनु मेकोमी सासन पतीक अधिकार ताप्तु।

7 मिनु नोले गो नाक्दो डा कोंइतीकेमी नेल्ल क्येडा नोले डा जन्तु वृशो ताता। मेको शुश हिंचा डा, अर्को आन क्येडा बोल्यो बाक्त। मेको के फलाम के ठेयब खुइ बाक्तेकम। मिनु श्ये ब्वना ब्वन बाक्शा, लीशो श्ये आ खोंइलीमी दिम्ताक्व। मेको डोंइती डा जन्तु आन खोंदेशो मबा। मारदे हना मेको के १० ओटा ग्रोव बाक्तेकम।

8 मिनु गो मेको ग्रोव आन कली रिम्शो पा कोव्रडुनु, मेको आन दातेमी अर्को आइक्च ग्रोव का वृशो ताता। मेको आइक्च ग्रोव कली बाक्तीक गेचा कली डोंइती डा ग्रोव सां आन शाक्श सुन्दा एत्तेकम। मेको नक वृशो ग्रोवमी मिक्च बाक्तेकम। मेको मुर आ मिक्च खोंदेशो बाक्तेकम। मिनु मेको के ठेयब लेशशा लोत्र पाइब शोत्र का बाक्त। दानीएल ११:३६

9 मिनु गो कोव्रना कोव्रन बाक्डानु, पिप आन शुश नित्तीक वोइशशो ताता। मिनु मेको शुश बर्स दुम्शो का ठेयब नित्तीकेमी निस्साक्व। मेको आ वा फुं खोंदेशो बुश बाक्त। मिनु आ पिया डा चां रिम्शो ऊन खोंदेशो पा बुश बाक्त। मिनु मेको आ ठेयब नित्तीके ठेयब ब्रशो मी खोंदेशो बाक्त। मेको ठेयब नित्तीक आ गुगीलपुकी बाक्तेकम। मेको के यो थम ठेयब मी खोंदेशो बाक्तेकम। इजीकीएल १:२६; प्रकाश ४:२; भजन संग्रह ९०:२

10 मिनु मेको शुश बर्स दुम्शो का आ डोंइती रे मी के खोला खोंदेशो पा वृत। मिनु हजार हजार आ स्वर्ग डा गेय पाइबमी मेको कली गेय पाम्तेकम। मिनु १०, १० हजार मेको आ डोंइती बाक्तेकम। मिनु मेको निसाफ पचा कली निस्साक्म। मिनु किताबपुकी प्राक्शा वोइक्तेकम। प्रकाश ५:११; भजन संग्रह ६९:२९; प्रकाश २०:१२

11 मिनु गो मेको ठेयब लेशशो लोत्र पाइब ग्रोव कली कोव्रना कोव्रन बाक्ती। मिनु गो कोव्रना कोव्रन बाक्डानु, मेको जन्तु कली साइक्तेकम। मिनु मेको आ रां खतम सेल्शा, ठेयब मीमी हुम्ताक्म। प्रकाश १९:२०

12 मिनु लीशो जन्तु आन सासन पतीक अधिकार रोइक्चा पुंडसाक्म। तन्न मेको आन कली इक्का नोले सम्म ब्रोंइचा गेम्तेकम। दानीएल २:२१

13 मिनु नोले गो नाक्दो डा कोंइतीकेमी मुर खोंदेशो का ताता। मेको गोस्सुम गिल्लीशा पिना पिन पशो ताता। मिनु मेको कली शुश बर्स दुम्शो का आ डोंइती राप्पाइशशो ताता। लूका २१:२७; प्रकाश १:१३; प्रकाश १४:१४

14 मिनु मेको कली सासन पतीक अधिकार, मान ततीक नु पिप सेल्शा राज्य गेशो ताता। मिनु जात जात नु रागी रागी डा आंम आंम लोत्र पाइब मुर नेल्लेमी मेको कली गेय पशो ताता। आ सासन पतीके अधिकार गेना हना यो लीबाक्त। आ पिप दुम्शो राज्य गेनायो खतम मडुम्बाक्त।

15 मिनु गो, दानीएल, मेको कोंइतीके तशा, आं थुं लुक्च लत। मिनु गो हिंती।

16 मिनु गो मेकेर राप्शा बाक्ब का कली “एको लोत्र रे मार रुम्सीबा?” दे हिल्लो पाता। मिनु मेकोमी “गो इ कली नेल्ल रुप्पाइक्नुड।

- 17 मेको ४ ओटा ठेयब जन्तु रागी डा ४ जना पिप बाक्नीम।
- 18 तन्न मेको नेल्ल क्येडा ठेयब आ मुरपुकीम मेको राज्य ताक्शा, गेनायो मनुच्चा डा पा, गेना हना यो सासन पाइनीम” दैत।
- 19 मिनु गो मेको नेल्ल आन क्येडा नोले डा जन्तु रे मार रुम्सीबा, दे रुप्चा थुं पाता। मेको अरु जन्तु खोदेशो मबा। मेको थम हिंचा डा बाक्त। मेको आ खुड फलाम के नु नडग्रा कांसा के बाक्तेक्म। मेकोमी मारेड मारेड ब्वशा नाक्शा, लीशो श्ये चहिं आ खोइलीम दिम्ताक्व। दानीएल ७:१७
- 20 मिनु मेको आ पियामी बाक्शो १० ओटा ग्रोत्र नु अर्को ग्रोत्र का आ पर्वम रुप्चा थुं पाता। मेको ग्रोत्र का यूमेनु, डोंइती डा ग्रोत्र सां एत्तेक्म। मेको यूशो ग्रोत्र के मिक्च नु ठेयब लेशो लोत्र पतीक शोत्र बाक्त। मिनु मेको अरु ग्रोत्र आन क्येडा ठेयब बाक्त। मेको आ पर्वम यो रुप्चा थुं पाता।
- 21 मिनु गो कोत्रना कोत्रन बाक्डानु, मेको ग्रोत्रमी नेल्ल क्येडा ठेयब आ मुर नु लडाइ पा प्रात। प्रकाश १३:१७
- 22 मिनु मेको शुश बर्स दुम्शो का मजाकम सम्म लडाइ ग्राना ग्रान बाक्त। मिनु नेल्ल क्येडा ठेयबमी आ मुर आन कली निसाफ पतीक अधिकार गेत्तु। मेना नेल्ल क्येडा ठेयब आ मुरुम मेको राज्य आंम के सेल्लेक्म।
- 23 मिनु आं कली रुप्पाइक्वमी नेल्ल आन क्येडा नोले डा जन्तु “रागीमी मेको नेल्ल आन क्येडा नोले डा जन्तु राज्य का बाक्ब। मेको अरु राज्य खोदेशो मबाक्ब। मिनु मेकोमी रागी नेल्ल आन कली गु दाक्ब। आ खोइलीमी दिम्शा नेल्ल आन कली रोबल चिबल पोक्ब।
- 24 मिनु मेको १० ओटा ग्रोत्र आ अर्थ मार बाक्ब देशा हना, मेको राज्य रे १० जना पिप यूनीम। मिनु मेको आन नोले अर्को पिप का यूब। मेको डोंइती डा पिप खोदेशो मदुम्ब। मिनु मेकोमी पिप सां आन कली फुडक्ब। प्रकाश १७:१२
- 25 मिनु मेकोमी नेल्ल क्येडा ठेयब आ पर्वम मरिम्शो लोत्र पा, नेल्ल क्येडा ठेयब आ मुर आन कली यो खतम सेल्ल। मिनु मेकोमी परमप्रभु आ देशो चाड नु आ अरेशो लोत्र कली फाइक्वा दाक्ब। मिनु परमप्रभु आ मुर आन पाला का, पाला निक्शी नु आधा पाला मेको आ अधिकारमी गेचा पुंडसीनीमी। प्रकाश १३:५-६; दानीएल १२:७
- 26 मिनु नोले निसाफ पची ना जाक्ब। मेको आ सासन पतीक अधिकार लेंशा गेनायो मतचा डा पा आ गुड रे रोडक्नीम। मिनु मेको कली साइशशा खतम पोक्नीम।
- 27 मिनु राज्य, सासन पतीक अधिकार नु राज्य नेल्ल आन ठेयब दुम्तीके नेल्ल क्येडा ठेयब आ मुर आन कली गेचा पुंडसीनीम। मेको आन राज्य गेना हना यो लीब राज्य दुम्ब। मिनु सक्ति पाइशशो नेल्लेमी मेको आ गेय पा, मेको कली टीनीम” दैत।
- 28 मेको आं डोमु तशो आ लोत्र बाक्ब। गो दानीएल, एको मिम्शा थाम्पा हिंती। मिनु आं कुल क्येर दुम्त। मिनु गो एको लोत्र नेल्ल आं थुंम वोइक्ता। दानीएल ८:१८; दानीएल १०:८,१६-१८

## 8

सांड नु बोका कोंइशो

- 1 मिनु बेल-शजर पिप दुम्शो बर्स सां जाक्दीमेनु, गो, दानीएलमी लेंशा कोंइतीके ताता। दानीएल ७:१
- 2 मिनु मेको कोंइतीकेमी गो एलाम रागी डा सुसा माइशशो ठेयब सहर डा उलाइ खोला आ नेक्था बाक्शो बाक्ती।
- 3 मिनु गो कोत्रशा बाक्डानु, ग्रोत्र निक्शी पाइशशो सांड का ताता। मेको आ ग्रोत्र निम्फा दुइशशो बाक्ताक्स। का चहिं अर्को क्येडा दुइशशो बाक्त। मेको दुइशशो ग्रोत्र नोले यूशो बाक्त।
- 4 मिनु गो मेको सांडम पच्छिम, उत्तर नु दक्खिन गे खुना खुन पशो ताता। अरु जन्तु नेल्ल मेको आ डोंइती राप्ने मचाप्बाक्तेक्म। मिनु सुइमी मेको आ सक्ति रे प्रोंइने मचाप्बाक्तेक्म। मेकोमी आ दाक्शो पशा, आ सक्ति बारत। दानीएल ८:४
- 5 मिनु गो मेको कोत्रशा बाक्डानु, पच्छिम रे बोका का फो यूत। मेकोमी आ खोइल खप मथिथु, रागी नेल्ल लाक्तु। मिनु मेको बोका आ मिक्च आस दातेमी ग्रोत्र का बाक्त। दानीएल ८:२१
- 6 मिनु मेको बोका मेको खोला आ नेक्था बाक्शो ग्रोत्र निक्शी पाइशशो सांड आ बाक्तीक जाक्त। मिनु मेको सांड कली खुचा, दे शुश बोल पा दोरत।
- 7 मिनु गो मेको सांड गे दोरशो ताता। मेको थाम्पा गाइशशा, मेको सांड कली खुशा, आ ग्रोत्र निम्फा जिक्ताक्व। मेको सांड बोल मपाइशशो दुम्शा, मेको बोका कली मारेड पने मचब। मेको बोकामी मेको सांड कली खपीम तोक्शा, आ खोइलीमी दिम्ताक्व। मिनु सुइमी मेको सांड कली बोका आ सक्ति रे प्रोंइने मचबेम।
- 8 मिनु नोले मेको बोकामी ठेयब सक्ति तात्तु। मिनु मेको नेल्ल क्येडा सक्ति पाइशशो दुम्तीके मेको आ दुइशशो ग्रोत्र जिक्त। मिनु मेको जिक्शो ग्रोत्र आ पा डा अर्को ४ ओटा ग्रोत्र रागी आ पूर्व, पच्छिम, उत्तर, दक्खिन गे हिरशा यूतेक्म। दानीएल ११:४
- 9 मिनु मेको ४ ओटा ग्रोत्र आन दाते डा का रे अर्को इम्चीली ग्रोत्र का यूत। मिनु मेको नक यूशो ग्रोत्र दक्खिन, पूर्व गे नु दारशो रागी गे कोत्रशा थाम्पा ठेयब दुम्शा कोल्लत। दानीएल ७:८
- 10 मिनु मेको कोल्शा, स्वर्ग डा लडाइ पाइब आन हुल बाक्तीक सम्म जाक्दीशशा, लडाइ पाइब का निक्शी नु सोरुल का निक्शी आन कली तोक्शा खोइलीमी दिम्ताक्व।
- 11 मेकोमी लडाइ पाइब आन नेल्ल क्येडा ठेयब कली यो ठेयब लेशशो लोत्र पा, नाक्त किंत किंत डा चोशा चढ्वेतीक रोइशशा, परमप्रभु यावे आ बाक्तीके खिं प्रेशशा गेत्तु। दानीएल ९:२७

12 मिनू आ परमप्रभु कली काड मट्टीकेमी नाक्त कित कित डा चढेतीक मचढेचा डा पा गेय पाडब वोडवकु। मिनू मेकोमी थमा पा शेंतीक कली खतम पोक्शा, आ मरिम्शो पतीक चहिं बारना बारन लपाडवकु।

13 मिनू नोले गो स्वर्गम बाक्ब कामी लोव्र पशो नेता। मिनू अरु स्वर्गम बाक्बमी मेको कली “नाक्त कित कित डा चोशा चढेतीक रोडवतीके, आ मरिम्शो पतीकेमी परमप्रभु आ खिं श्येत्थ नु खतम सेल्टीक नु परमप्रभु आ लडाइ पाडब आन कली खोइलीमी दिप्शा, कोंइतीके गेना नुप्बा?” दे हिल्लो पशो नेता।

14 मिनू अर्कोमी आं कली “हजार निक्शी सहे सां नाक्दो नाक्त सम्म मोदेशो दुम्ब। मिनू नोले परमप्रभु आ खिं लेंशा सेल्नीम” देत।

परमप्रभुमी कोंइशो आ अर्थ शेंशो

15 गो, दानीएलमी, एको कोंइतीके रे मार रुम्सीबा, दे तुडक्चा माल्ता। मिनू वोंइश मुर खोदेशो का आं डोंइती यूशा, दोक राप्शो ताता।

16 मिनू गो उलाइ खोला रे “गाब्रीएल, एको मुर कली एको कोंइतीके रे मार रुम्सीबा, मेको शेंदो” देशो मुर आ सेंदा का नेता। दानीएल ८:२; दानीएल ९:२१; लूका १:१९,२६

17 मिनू मेको परमप्रभु यावे आ स्वर्ग डा गेय पाडब आं राप्शा बाक्तीके आं नेक्था जाक्त। मिनू गो थाम्पा हिंशा खुम्की पा बाप्ती। मिनू मेकोमी आं कली “ए मुर, एको कोंइतीके नेल्ल क्येडा नोले डा नाक्त आ पबंम बाक्ब, दे रुपो” देत। प्रकाश १०:६

18 मिनू मेकोमी आं कली लोव्र पवानु, गो खपीमी दिड गोल्शा बाप्शा, थशो खोदेशो दुम्ती। मिनू मेकोमी आं कली थिशा, पोक्शा राप्पाडक्ती।

19 मिनू मेकोमी “गो इ कली नोले डा गाडक्तीक नाक्ती मार दुम्बा, तुडक्पाडक्नन। मारदे हना एको कोंइतीके नेल्ल क्येडा नोले डा नाक्त कली बाक्ब।

20 इ तशो ग्रोव निक्शी पाइशो सांड मादी नु पारसी रागी डा पिप बाक्नीस।

21 मिनू मेको बोका चहिं ग्रीस रागी डा पिप बाक्ब। मेको आ मिक्च आन दाते डा ठेयब ग्रोव, मेकेर डा नेल्ल क्येडा डोंइती डा पिप बाक्ब। दानीएल ११:३

22 मिनू गे मेको ग्रोव जिक्शा मेको आ पा डा ४ ओटा ग्रोव यूशो ताप्तीवी। मेको आ रागी ४ ओटा राज्य दुम्नीम। तन्न मेकोपुकी डोंइती डा राज्य खोदेशो सक्ति पाइशो मदुम्नीम।

23 मिनू मेको आन सासन पतीक अधिकार नुप्ची ना मेको आन मरिम्शो पतीकेम ब्रीतीके खकटा थुं पाइशो, शुश मरिम्शो पाडब पिप का जाक्ब। दानीएल ११:२१

24 मेको शुश बोल्थो दुम्ब। मिनू मेकोमी मारेड मारेड खतम पोक्ब। आ पतीक मारेड मारेडमी ग्राब। मिनू मेकोमी सक्ति पाइशो मुर नु थमा सुडक्ब आन कली खतम पोक्ब।

25 मेको आ निप्समी मुरुम मतुडक्चा डा पा जोल पतीकेमी ग्राब। मिनू आंम थुंमी ‘गो नेल्ल क्येडा ठेयब नड’ दे मिम्शा, शुश मुर आन कली साडक्ब। मिनू मेकोमी पिप आन पिप कली यो मरिम्शो पा बोक्ब। मिनू मेको खतम सेल्चा पुंडसीब। तन्न मुर आन गुड रे ममाड।

26 मिनू मेको इ कली कोंइशो नाक्दो नाक्त आ पबंम कोंइतीके कोंइशो थमा बाक्ब। तन्न गे एको कोंइतीके कली इ थुंमी खुइशशा वोडक्चा माल्नेवे। मारदे हना एको शुश नोले दुम्ब लोव्र बाक्ब” दे माडक्ती। दानीएल ८:१४; दानीएल १२:४

27 मिनू नोले गो, दानीएल, काड सोक्त मपाइशो खोदेशो दुम्ती। मिनू का निक्शी नाक्त रोड पा बाक्ती। मिनू नोले बोक्शा, पिप आ गेय पथ लती। मिनू मेको आं तशो कोंइतीके आ पबंम हिंती। मारदे हना मेको कोंइतीके रुप्व सुड मबाक्ब।

## 9

दानीएलम परमप्रभु कली पुंडशो

1 मिनू पिप अहासूरस आ तौ दारा डोंइती डा बर्समी कल्दी रागी डा पिप दुम्त। पिप दारा मादी जात डा बाक्माक्त। दानीएल ६:१

2 मिनू पिप दारा आ सासन पशो डोंइती डा बर्समी गो, दानीएलमी परमप्रभु यावेमी आ लोव्र पाडब येरमीया कली ब्रेक्पाइशो लोव्र डा किताब पढेशा, यरूसलेम खतम दुम्चा कली ७० बर्स लीनीम, दे रुप्ता। येरमीया २९:११-१२; येरमीया २९:१०

3 मिनू गो माइजा बाक्शा, अरन्डी फेक्शा नु पुलु मोंइसीशा परमप्रभु, आं होव्रप कली लोव्र पा पुंडशा, मार लोव्र लेप्बा, दे रिम्शा बाक्ती।

4 मिनू गो परमप्रभु यावे, आं परमप्रभु कली लोव्र पा, गो मार मार मरिम्शो पडा, मेको नेल्ल शोव्रशा “परमप्रभु, गे ठेयब नु हिंचा डा परमप्रभु बाक्नीनी। गे इन कली दाक्ब नु इन शेंशो लोव्र टीब आन कली गेना हना यो दाक्नीनी। मिनू इन कबल मप्रोंइनीनी। येरमीया १४:७; ब्यवस्था ७:९; नेहेम्याह १:५

5 गोपुकीमी पाप पशा, मरिम्शो पाइतक। मिनू इन अरेशो मटिथु नु इन कली गन गन पा, इन शेंशो नु निसाफ पतीके लोव्र प्रोंइतक।

6 गोपुकीमी इन गेय पाडब, इन लोव्र पाडब आन लोव्र मनेंक। मेकोपुकीमी इन नेमी आंइ पिप, आंइ ठेयब मुर, आंइ किकी पिपी नु आंइ रागी डा मुर नेल्ल आन कली लोव्र पांम्तेक्म।

7 परमप्रभु, गे ठीक पाइब बाकनीनी। गो चहिं मुने दोक्शो बाकनीकी। मुलाकती यहूदा डा मुर, यरूसलेममी बाकब, इस्राएली नेल्ल आन नेक्था नु डोन रागीम खेरचा पुंडसीशो मुर नेल्ल इन कली प्रोंडशो आ पर्वम दोस ताइब दुम्तेकम।

8 परमप्रभु यावे, आंड पिपपुकी, आंड ठेयब मुरपुकी, आंड किकी पिपि नु गो नेल्लेमी इन डोंडती पाप पाइतक। एजा ९:७; यसैया ४३:२७

9 गोपुकी इन देशो गन गन पा मटीतक हना यो, परमप्रभु, आंड होवप, गे शिशी पाइब नु पाप क्याम्ब बाकनीनी। भजन संग्रह १३०:४

10 गोपुकीमी परमप्रभु यावे, आंड परमप्रभु कली मटीब बाक्तक। इन लोव्र पाइबपुकीमी इन अरेशो लोव्र आंड कली नैपाइशो बाक्तेकम। तन्न गो मपक।

11 इस्राएली नेल्लेमी इन क्येडा डोन लशा, इन अरेशो मटिथु, इन देशो मपामे। मोपतीके गो इन गेय पाइब मोसामी ब्रेक्शो इन अरेशो लोव्रमी सराप नु कसम आंड तारी मोइक्चा पुंडसीशो बाकनीक। मारदे हना गोपुकीमी इन कली पाप पाइतक। लेवी २६:१४-३९; ब्यवस्था २८:१५-६८

12 मिनु गे आंड पर्वम नु आंड निसाफ पाइब आन पर्वम इन देशो लोव्र खाप्तीनी। यरूसलेम कली गेशो खोदेशो श्येत रागी नेल्ल आन कली गेनायो मदुम्यो बाक्त।

13 मोसामी इन अरेशो लोव्रम 'मेको कली मटीब श्येत जाइनीम' दे ब्रेक्शो खोदेशो पा, मेको श्येत नेल्ल आंड कली दुम्त। मिनु गोपुकीमी परमप्रभु यावे, आंड परमप्रभु कली 'इन थमा लोव्र कली रुप्तीक थुं गेकी' दे मपुंडक। मिनु आंड मरिम्शो पशो मप्रोंडक। इन कली दाक्शा मप्रोंडतीके ममिम्तक।

14 मोपतीके परमप्रभु यावेमी आंड कली गेतीक, मेको ठेयब श्येत तेक्तु। थमा पा परमप्रभु यावे, आंड परमप्रभु आ पशो नेल्ल ठीक बाकब। मारदे हना गोपुकीमी आ देशो मपक।

15 मिनु परमप्रभु यावे, आंड परमप्रभु गे इन मुर आन कली इजीप्त रागी रे गुंडशा चाकतीनी। मेको इन सक्ति नु इन ठेयब नें आ पर्वम मोदेशो पाइतीनी। गोपुकी पाप पा, इन अरेशो लोव्र मटीब दुम्तक।

16 परमप्रभु, इन ठीक पतीकेमी इन सहर यरूसलेम नु इन योव्रशो डांडा आ पर्वम मगाइकतीन, मचुरीन। आंड पशो पाप नु आंड किकी पिप आन मरिम्शो पशो आ पर्वम यरूसलेम नु इन योव्रशो मुर आन नेक्था बाकब मुर रे पा शुक्शी पाइक्चा पुंडसीब दुम्तेकम।

17 मोपतीके आंड परमप्रभु, इन गेय पाइब, आं देशो नु पुंडशो लोव्र नेनीने। मिनु इन नें आ पर्वम इन ब्रेशो बाक्तीके कली लेंशा शिशी पा कोव्रडीन।

18 आं परमप्रभु इन नोफा दाइशशा नेनीन। मिनु आंड कली दुम्यो श्येत नु इन नेंम सेल्शो सहर यरूसलेम कली कोव्रडीन। आंड ठीक पतीके आ पर्वम ममाइ, तन्न इन शुश शिशी पतीके आ पर्वम पुंडनीकी।

19 आं परमप्रभु, नेनीन। परमप्रभु, आंड पाप क्याम्दीन। परमप्रभु, नेनीन। मिनु इन नें आ पर्वम मरिम्थु गेय पने। मारदे हना इन सहर नु इन मुर इन नें रे ब्रेत्वा पुंडसीशो बाकनीम" दे गो दानीएलमी परमप्रभु कली देती। येरमीया १४:९

### गाब्रीएल शेंथ जाक्शो

20 मिनु गो मो देशा परमप्रभु यावे, आं परमप्रभु आ डोंडती लोव्र पना पन, प्रार्थना पा, आं पाप नु आं मुर इस्राएली आन पशो पाप नेल्ल शोव्रशा, आं परमप्रभु आ डांडा, आ मुर आन पर्वम पुंडना पुंडन, बाकडानु,

21 प्रार्थना पना पन, गो आं डोंडती आं कोंडतीकेमी तशो मुर गाब्रीएल बेरशा आं नेक्था जाक्त। मेना नाकदो डा चढ़ेची ना जाक्शो बाक्त। दानीएल ८:१६

22 मिनु मेकोमी आं कली "दानीएल, मुल गो इ कली जोक्तीक तुइक्तीक नु रुप्तीक थुं गेथ जाक्ती।

23 मिनु गे गेना पुंडचा गोवी, मेना गो लोव्र का नेता। मिनु गो इ कली मेको लोव्र शेंथ जाक्ती। मारदे हना गे शुश दाक्चा पुंडसीशो मुर बाक्नेवे। मेको लोव्र मिम्शा, मेको कोंडतीक रुपो।

24 इ मुर नु परमप्रभु आ सहर ७० हप्ता सम्म श्येत जचा मालनीम। मिनु मे नोले मरिम्शो नु पाप पतीके नुपब। मेना अरेशो मटितीके क्याम्तीके गेय पशो बाकब। मिनु ठीक पतीके गेना हना यो लीब। मिनु मेको कोंडतीक नु परमप्रभु यावे आ लोव्र पाइब कली छाप थोक्शा नोले परमप्रभु आ बाक्तीक लेंशा सेल्शा तेल खेक्नीम।

25 मोपतीके यरूसलेम लेंशा सेल्तीक लोव्र तेल लुक्शो पिप मजाकम सम्म ७ हप्ता बाक्नीम। मिनु ६२ हप्ता लां नु खिं आ एर आंथ लेंशा सेल्चा कली माल्ब, दे रुप्या तुइक्तो। मेना श्येत जतीक ना बाकब।

26 मिनु ६२ हप्ता नोले मेको तेल लुक्शो का मारड मदुम्यु यो तिल्चा पुंडसीब। मिनु मेको जाक्चा चिक्शो पिप आ लडाइ पाइब नु जाक्शा, मेको सहर नु परमप्रभु यावे आ बाक्तीक खतम पोक्ब। मिनु मेको आ नुप्ची ना ठेयब भोल यिशा, नोले सम्म लडाइ दुम्ब। डोंडती मोदेशो खतम दुम्तीक श्येत आ पर्वम देशो बाकब। यसैया २८:२२; लूका २१:२३-२४

27 मेकोमी हप्ता का सम्म शुश मुर नु कबल पाइब। मिनु आधा हप्तामी चढ़ेतीक नेल्ल तेक्ब। मिनु मेकोमी चढ़ेतीक आ पा डा शुश ग्रान्ना दिचा डा गेय पाइब। मेको कली खतम सेल्तीक लोव्र मग्रूम सम्म मोदेशो पाइब" देत। दानीएल ८:११; दानीएल ११:३१; दानीएल १२:११; मत्ती २४:१५; यसैया १०:२२-२३



1 मिनू पारसी रागी डा कोरेस पिप दुम्शो बर्स सां दुम्मेनु, परमप्रभुमी बेलत-शजर माइश्शो दानीएल कली लोत्र का तुइक्पाइक्तु। मेको लोत्र थमा बाकत। ठेयब श्येत आ पर्वम बाकत। मेको दानीएलमी मेको कोंडतीक तशा, रुप्तीक थुं यो ताप्तु। दानीएल १:२१; दानीएल १:७

2 मेना गो, दानीएल, हप्ता सां सम्म रोंका पाता।

3 मेको हप्ता सां सम्म गो ब्रोत्रशो मारेड जचा थोत्रक मजड। श्ये मब्वड। अडगुर शांबु यो मतूडु। मिनू तेल यो मखेक्सीड।

4 मिनू डोंडती डा महिना डा २४ नाकत टाइग्रीस माइश्शो ठेयब खोला आ नेक्था राप्शो बाक्ती।

5 मिनू गो इर गे कोव्रडुनु, सुती वा फेक्शो मुर का ताता। मेकोमी थम रिम्शो ओफीर डा सुन के किप्शुर किप्शो बाकत। दानीएल ८:१५; दानीएल १२:६; इजीकीएल १:२; प्रकाश १:१३-१५

6 मिनू मेको आ रां बेरील माइश्शो हीरा खोदेशो बाकत। आ कुल चिला खोदेशो बाकत। आ मिक्च ब्रशो तोव्रशी खोदेशो बाकत। मेको आ गुड खोडली थाम्पा खुइश्शो कांसा खोदेशो पा टल्केशो बाक्तेकम। मेको आ सेंदा शुश मुर आन लोत्र पशो खोदेशो नेंसाक्ब। इजीकीएल १:२७-२८

7 गो, दानीएलमी मेको कोंडतीक ताता। गो नु बाक्ब मुर सुडमी मतामे। तन्न मेकोपुकी हिंशा खिंखि पा प्रोक्शा खुंडसाक्म।

8 मिनू मेको ठेयब कोंडतीक तचा कली गो का ला बाक्ती। मिनू मारेड पने मचाप्ब दुम्ती। मिनू आं कुल बेक्चा चिक्शो मुर के खोदेशो दुम्शा, मारेड बोल मपाइश्शो दुम्ती।

9 मिनू नोले मेकोमी लोत्र पशो नेता। मिनू मेको लोत्र नेंनु चोटीन, गो खपीमी दिड गोल्शा, थती।

10 मिनू गुड काम आं कली थिती। मिनू गो गुड नु पोक्च थेक्शा, बोक्ती।

11 मिनू मेकोमी आं कली “दानीएल, गे शुश दाक्चा पुंडसीशो मुर बाक्नेवे। आं देशो लोत्र नोफा दाइश्शा नेनो। बोक्शा बाक्को। मारेदे हना गो इ बाक्तीकेमी सोइक्चा पुंडसीशो बाक्नुड” दे माइक्ती। मिनू मेकोमी लोत्र पवानु, गो आ डोंडती खिंखि पा राप्ती।

12 मिनू मेकोमी आं कली “दानीएल, महिने, गे रुप्चा माल्शा डोंडती डा नाक्ती रे इ परमप्रभु आ डोंडती आंम कली ब्रेम्शो सेल्साक्वे, इ पुइश्शो नेंतीके गो एक जाक्ती।

13 तन्न पारसी राज्य कली कोत्रब सैतान आ गेय पाइबमी गो नु २१ नाकत सम्म लडाइ पा तेक्ती। मिनू परमप्रभु यावे आ स्वर्ग डा ठेयब गेय पाइब मिकाएल जाक्शा, आं कली वारच पाइक्ती। मिनू गो जाक्चा ताता। यसैया २४:२१

14 नोले डा नाकत इ मुर आन कली मार दुम्बा, दे गो इ कली रूप्पाइक्थ जाक्ती। मारेदे हना इ तशो कोंडतीक क्येडा नोले डा नाकत कली अर्को कोंडतीक का यो बाक्ब” दे माइक्ती।

15 मिनू मेकोमी आं कली लोत्र पवानु, गो आं पिया खुक्शा मारेड लोत्र पने मचाप्ब दुम्शा बाक्ती।

16 मो दुम्मेनु, मुर खोदेशो काम आं शोत्र थिप्तु। मिनू गो लोत्र पने चाप्ता। मिनू गो आं डोंडती राप्शा बाक्ब कली “आं प्रभु, एको कोंडतीके आ पर्वम खाइक्ती। मिनू आं के मारेड बोल मली। यसैया ६:७; येरमीया १:९

17 गो, इन वाइलम, गे नु दोपा लोत्र पने चाप्नुडा? मारेदे हना गो खिंखि पा, आं बोल नेल्ल लशा, आ सोक्त हेररा मली” देती।

18 मिनू मेको मुर खोदेशोमी आं कली लेंशा थिशा, बोल्यो सेलती। दानीएल ८:१८

19 मिनू मेकोमी आं कली “नेल्ल क्येडा दाक्चा पुंडसीशो, महिने। इ कली मारेड मडुम्ब। बोल्यो नु महिंब दुमो” दे माइक्ती। मेकोमी गो नु लोत्र पवा नोले, गो बोल्यो दुम्ती। मिनू गो “आं प्रभु, लोत्र पने। मारेदे हना गे आं कली बोल्यो सेलतीनी” देती। प्रकाश १:१७

20 मिनू मेकोमी “गो इ बाक्तीकेम मारेदे जाक्डा, तुइक्नेवे? गो पारसी राज्य कली कोत्रब सैतान आ गेय पाइब नु लडाइ पचा कली लेत्चा माल्नुड। गो ग्राडा नोले ग्रीस रागी डा सैतान आ गेय पाइब जाक्ब।

21 मिनू गो थमा लोत्र डा किताबमी मार ब्रेक्शो बाक्मे, मेको इ कली शोत्र्थ जाक्ती। मेकेर मिकाएल क्येडा लाक्शा, अरु वारच पाइब सैतान आ गेय पाइब नु लडाइ पचा कली सुइ मबाक्नीम। परमप्रभु यावे आ स्वर्ग डा गेय पाइब, मिकाएल चहिं इस्साएली इन कली कोत्रब बाक्ब।

## 11

1 गो दारा मादी डा दुम्शो डोंडती डा बर्समी मिकाएल कली वारच पाइक्चा नु अरु रे पा प्रोंडचा कली बाक्ती” देत।

लडाइ आ पर्वम नोले दुम्ब लोत्र

2 मेकोमी लेंशा परमप्रभु यावे आ स्वर्ग डा गेय पाइबमी “मुल गो इ कली मेको थमा लोत्र पाइनुड। पिप दारा आ नोले पारसी रागीमी पिप सां दुम्मीम। मिनू मेको सांमी नोले जाक्ब पिप मेको डोंडती डा सां आन क्येडा शुश शोप पाइश्शो दुम्ब। मिनू मेको पिपमी आ शोपोमी आ सक्ति बारपाइक्ना पाइक्न लशा, रागी नेल्ल आन कली ग्रीस राज्य नु लडाइ पचा कली पोक्ब। दानीएल १०:२१

3 मिनू नोले शुश लडाइ पाइब पिप का जाक्ब। मेकोमी शुश रागी कली सासन पाइब। मिनू मेकोमी मार दाक्बा, मेको पाइब। दानीएल ८:२१

4 मिनू आ सक्ति बारना बारन लमेनु, आ राज्य पूर्व पच्छिम, उत्तर दक्खिन गे योक्सीब। मोपा योक्सीशा, आ तौ चचपुकीम मारेइ मताइनीम। मिनू मेको खोदेशो पा सुइमी लेंशा सासन मपाइनीम। मारदे हना मेको आ राज्य नेल्ल खतम दुम्बेनु, अरु आन कली दुम्ब। दानीएल ८:८,२२

5 मिनू नोले दक्खिन डा पिप शुश सक्ति पाइशशो दुम्ब। तन्न आ कप्तान आन दाते डा का मेको पिप क्येडा बोल्यो दुम्ब। मिनू मेकोमी पिप आ शुश रागी रोइशशा, हुकुम पाइब।

6 मिनू बर्स का निक्शी नोले मेको निक्शी गारशा, दक्खिन डा पिपम आ तमी मेको उत्तर डा पिप कली ग्युंवे पा गेब। तन्न मेको आ सक्ति मलीब। मिनू मेको आ तौ चच यो मलीनीम। मेको पिप आ तमी, आ गेय पाइब, आ आल नु मेको कली दाक्ब नेल्ल खतम पोक्चा पुंडसीनीम।

7 मिनू नोले मेको पिप आ तमी आ खिं डा मुर का ग्युब। मेकोमी उत्तर डा पिप नु मेको आ मुर नु लडाइ पा, आ गारो हिरशो सहर नु दरवार ओतनीम। मिनू मेकेर लडाइ पा ग्रानीम।

8 मेकोमी मेको आन देवी देवता आन मूर्तिपुकी नु सुन चांदी के बोसपुकी रोइशशा, इजीप्त रागीमी लाइक्ब। मिनू मे नोले उत्तर डा पिप नु बर्स का निक्शी सम्म लडाइ मपाइब।

9 मिनू नोले उत्तर डा पिपमी दक्खिन डा पिप कली लडाइ तोइब। तन्न मेको आंम आ रागीमी लेशशा लाइब।

10 मिनू मेको उत्तर डा पिप आ तौपुकीमी शुश लडाइ पाइब मुर खुपनीम। मिनू मेको तेक्ने मचाप्या डा भोल बुद पा ग्राना ग्रान लाइनीम। मेको लेंशा गारो हिरशो सहर डा दरवार सम्म लाइनीम।

11 मिनू दक्खिन डा पिप गाइशशा, उत्तर डा पिप नु लडाइ पचा कली बोक्ब। उत्तर डा पिपमी चहिं लडाइ पचा कली शुश लडाइ पाइब आन कली खुपब। तन्न मेको आन जोरी सत्रु रे पा बुइनीम।

12 मिनू उत्तर डा लडाइ पाइब ग्याइक्चा पुंडसीमानु, दक्खिन डा पिप ठेयब लेशशा हजार हजार मुर आन कली साइक्ब। तन्न मोदेशो पशा यो, बुना बुन लाइब।

13 मिनू उत्तर डा पिपमी डोंइती क्येडा शुश लडाइ पाइब खुपब। मिनू बर्स का निक्शी नोले लडाइ पचा कली शुश या कुरशा शुश लडाइ पाइब नु बारब।

14 मेना शुश रागी डा मुरपुकी यो दक्खिन डा पिप नु लडाइ पचा कली बोक्नीम। मिनू आ मुर आन दाते डा रोइक्ब नु साइक्ब यो बोक्नीम, दे कोइतीके कोइशो गाप्या कली बाक्ब। तन्न मेकोपुकी मग्रानीम।

15 मिनू नोले उत्तर डा पिप जाक्शा, दक्खिन डा राज्य इन गारो हिरशो सहर पुमशा, आंम के सेल्ब। दक्खिन डा लडाइ पाइब बुइनीम। मिनू मेको आन नेल्ल क्येडा बोल्यो लडाइ पाइब आन सक्ति यो जाम्शा लाइब।

16 मिनू उत्तर डा पिपम मार पचा दाक्बा, मेको पाइब। मिनू सुइमी मेको कली तेक्ने मचापनीम। मिनू मेकोम नेल्ल क्येडा दारशो रागी आंम के सेल्शा, मारेइ मारेइ खतम सेल्ब। दानीएल ८:९

17 मेकोमी कबल पा 'गो दक्खिन डा पिप आ राज्य नेल्ल आंम के सेलनुइमी' दे मिम्ब। मिनू मेको कली खतम सेल्चा कली गारचा देखु पा, आ तमी कली ग्युंवे पा गेब। तन्न मेको आ मिम्शो खोदेशो मटुम्ब।

18 मिनू नोले मेकोमी समुन्द्र आ नेक्था बाक्शो रागी नु लडाइ पा, शुश रागी आंम के सेल्ब। तन्न आ लडाइ पाइब आन ठेयब मुर कामी मेको आ ठेयब लेशशो थुं थमा पा खतम पोक्शा गेब।

19 मिनू नोले मेको पिप आ रागी डा दरवारम लेल्चा थुं पाइब, तन्न साइक्चा पुंडसीब।

20 मिनू मेको आ नोले अर्को मुर का पिप दुम्ब। मेकोमी आ राज्य कली शोंप तेल्चा कली ठेयब मुर का कली तिरो पोक्थ सोइक्ब। तन्न इक्चा नाक्त नोले मेको पिप यो गाइक्चा मपुंडसीथुं, लडाइ मपथु, बेक्ब।

21 मिनू मेको पिप आ नोले मारेइ मान मपाइशशो मुर का जाक्शा, सुइमी मटुइक्चा डा पा, रिम्शो लोत्र पखु पा मेको राज्य आंम के सेल्ब। दानीएल ८:२३-२४

22 मिनू मेको आ सक्ति बारना बारन लशा, नेल्ल आन कली ग्राब। मेकोमी परमप्रभु यावे आ कबल पशो का कली यो खतम पोक्ब।

23 मिनू मेकोमी लोत्र गारपाइशशा दुशा बाक्शो देखु पा, जोल पाइब। मिनू आ मुर का निक्शी ला बाक्तेक्म हना यो, मेको सक्ति पाइशशो दुम्ब।

24 मिनू सुइमी मारेइ मटुइक्थु, मेको नेल्ल क्येडा शोंप पाइशशो रागी लशा, लडाइ तोइब। मेकोम आ किंकी पिपीपुकीम गेनायो मपशो गेय पाइब। आ नोले खोइक्ब आन कली आ रोइशशो शोंप नु रू योत्रशा गेब। मेकोमी अरु गारो हिरशो सहर आन कली दोपा ग्राचा, दे मिम्शा बाक्ब। तन्न मोदेशो मिम्शो नाक्त का निक्शी कली ला दुम्ब।

25 मिनू उत्तर डा पिपमी आ बोल्यो लडाइ पाइब आन कली लाइशशा, आ सक्ति नेल्लेमी दक्खिन डा पिप नु लडाइ पाइब। मिनू दक्खिन डा पिपमी यो ठेयब हिक्ने मचाप्या डा लडाइ पाइब लाइशशा, मेको नु लडाइ पाइब। तन्न मेको पिप बुइब। मारदे हना आ मुरुमी मेको कली जोल पा मग्रापाइक्नीम।

26 मोदेशो पाइब आ नु जाइब बाक्नीम। मिनू मेको आ लडाइ पाइब ब्राशा, शुश साइक्चा पुंडसीनीम।

27 मेको पिप निक्शी मरिम्शो थुं पाइशशो बाक्नीस। काथा जाम्ताक्स हना यो, जोल पमुइनीस। तन्न मेको रे मारेइ रिम्शो मटुम्ब। मारदे हना नोले डा नाक्त मजाक्शो बाक्ब।

28 मिनू उत्तर डा पिप शुश शोंप लाइशशा, आ रागी लेशशा लाइब। तन्न मेकोमी परमप्रभु यावे आ कबल पशो आ पर्बम शुश गाइशशो बाक्ब। मिनू मेको पिपमी मार दाक्ता, मेको पाइब। मिनू आ रागीम लेशशा लाइब।

29 मिनू डोंइती देशो नाक्त गाम्मेनु, मेको उत्तर डा पिप लेंशा दक्खिन डा पिप नु लडाइ पथ लाइब। तन्न डोंइती डा खोदेशो पा ग्राने मचापब।

30 कितीमी रे पा मेको नु लडाइ पचा कली जहाजपुकी जाक्नीम। मिनु मेको पिप आ थुं लुकच लशा, आ रागी लेख्ब। मेकोमी परमप्रभु यावे आ कबल पशो आ परबम गाइशशा, थमा सुइक्ब आन कली खेदा पाइब। मिनु परमप्रभु यावे आ कबल प्रॉइशो मुर नु गारब।

31 मिनु मेको पिप आ सोइशशो लडाइ पाइबपुकीमी परमप्रभु यावे आ खिं नु दरवार कली ग्रांशा दिशो सेल्नीम। मिनु मेकोपुकीमी नाक्त कित कित चोशा चढेतीक गेय तेक्नीम। मिनु मेकेर ग्रांशा दिचा डा मार मार थोत्रक वोइक्नीम। दानीएल १:२७

32 मिनु मेको पिपमी परमप्रभु यावे आ कबल पशो मटीब मुर आन कली जोल पा आ नोले खोइक्ब सेल्ब। तन्न आन परमप्रभु कली तुइक्ब मुरपुकी बोल्यो दुम्शा, मेको कबल काइ मप्रॉइनीम।

33 मिनु मेको आन दाते डा जोक्ब तुइक्बपुकीमी शुश मुर आन कली रुष्ब सेल्नीम। मोपतीके नाक्त का निक्शी सम्म मेको तरवारम क्योरचा, मीम हुम्चा, ग्याइशशा चोक्चा नु आन मार मार रोइक्चा पुंडसीनीम।

34 मिनु मोदेशो दुम्मेनु, इच्का वारच पाइक्चा पुंडसीनीम। मिनु शुश मुर मेको आन नोले खोइक्नीम। तन्न थुं पाइशशो मुर ला मेको आन नोले खोइक्नीम।

35 मिनु मुरुम जोक्ब तुइक्ब आन कली मोदेशो खेदा पतीके रागीम नोले डा नाक्ती सम्म मेको आन कली सुन खोदेशो पा यपाइक्चा, नाक्चा नु रिम्शो दुम्पाइक्चा कली बाक्ब। मेको मुल सम्म मजाक्शो बाक्ब।

ठेयब लेशशो पिप

36 पिपमी मार दाक्बा, मेको पाइब। मिनु मेकोमी 'देवी देवता नेल्ल आन क्येडा ठेयब नड' देब। मिनु परमप्रभु नेल्ल आन क्येडा ठेयब परमप्रभु आ परबम गेनायो मनेसीशो मरिम्शो लोत्र पाइब। मेको आ नोले डा नाक्त मजाक्म सम्म आ माल्शो ताइब। परमप्रभुमी मेको कली सजाइ मगेवा सम्म मोदेशो दुम्ब। मारदे हना परमप्रभुमी मार पचा मिम्बा, मेको पाइब। २थिस्सलोनिकी २:४; दानीएल ७:८,२५; प्रकाश १३:५-६

37 मिनु मेको पिपमी आ किक्की पिपी आन देवी देवता आन कली सेउ मपाइब। मिनु मीश मुर आन दाक्शो देवी देवता आन कली यो सेउ मपाइब। मारदे हना 'गो देवी देवता नेल्ल आन क्येडा ठेयब नड' दे मिम्सीब। इजीकीएल ८:१४

38 तन्न बोल्यो दरवार डा देवता कली सेउ पाइब। आ किक्की पिपीमी मेको कली मतुइशशो बाक्तेक्म। मेको आन कली सुन, चांदी, हीरा नु शुश क्येट लाइब थोत्रक गेशा ठेयब सेल्ब।

39 मेकोमी अर्को रागी डा देवी देवता आन कली सेउ पशा, नेल्ल क्येडा बोल्यो दरवार कली ग्राब। सुमी मेको कली मान पाइबा, मेको शुश शोप पाइशशो दुम्ब। मिनु मेको आन कली रू शुश गेशा, शुश मुर आन कली हुकुम पाइब सेल्ब।

40 मिनु नोले डा नाक्ती दक्खिन डा पिपमी मेको कली लडाइ तोइब। मिनु उत्तर डा पिपमी फश गिवार खोदेशो पा मेको नु लडाइ पाइब। मेकोमी बग्गी, शारा डोइक्ब नु लडाइ पाइब जहाज शुश चाक्शा लडाइ पाइब।

41 मिनु मेको रागी रागी नु लडाइ पा, ठेयब खोला खोदेशो पा बारब। मिनु मेको दारशो रागी ओत्रशा, हजार हजार मुर आन कली साइक्ब। तन्न एदोम, मोआब रागी नु अम्मोनी आन रागी डा नेल्ल क्येडा ठेयब बाक्तीके मेको आ गुडमी मदुम्नीम। दानीएल ११:१६

42 मेकोमी रागी रागी आन कली ग्रांशा ग्रांन लाइब। मिनु इजीप्त रागी कली यो ग्राब।

43 मिनु मेकोमी इजीप्त डा सुन चांदी नु शोप नेल्ल आंम के सेल्ब। लिबीया नु एथीयोपीया डा मुर आ गेय पाइब दुम्नीम।

44 मिनु मेकोमी पूर्व नु उत्तर रे जाक्शो लडाइ पतीक लोत्र नेंशा, मेको शुश गाइशशा, मुर आन कली शुश साइशशा, रागी नेल्ल रोबल चिबल पोक्ब।

45 मिनु मेकोमी ठेयब समुन्द्र नु नेल्ल क्येडा दारशो परमप्रभु आ सहर डा डांडा आस दातेमी आ बाक्तीक ताम्बु कीब। मो पाप्टु हना यो, मेको बेक्ब। सुडमी मेको कली वारच मपाइनीम" दे स्वर्ग डा गेय पाइबम देंत।

## 12

बेक्शो मुर सेसीशो

1 मिनु परमप्रभु यावे आ स्वर्ग डा गेय पाइबमी "मेना नेल्ल क्येडा ठेयब स्वर्ग डा गेय पाइब मिकाएल जाक्ब। मिनु मेकोमी इ रागी डा मुर आन कली कोत्रब। मेना रागी दुम नोले गेनायो मदुम्शो श्येत जाक्ब। तन्न इ मुर श्येत रे प्रॉइचा पुंडसीनीम। सु सु आन नें कितावम बेक्शो बाक्मे, मेको ब्रॉइचा ताइनीम। दानीएल १०:१३; प्रकाश १२:७; मती २४:२१; दानीएल ७:१०

2 मिनु खपीमी बेक्शा इप्शो नेल्ल बोक्नीम। का निक्शी गेना हना यो ब्रॉइचा कली बोक्नीम। का निक्शी चहिं गेना हना यो शुश मुने दोक्चा कली बोक्नीम। यूहन्ना ५:२९

3 मिनु जोक्ब तुइक्बपुकी सरीड डा छेडछेड खोदेशो दुम्नीम। मिनु सु सुमी मुर आन कली ठीक लांमी गाक्पदमे, मेकोपुकी गेना हना यो सोरुल आ छेडछेड खोदेशो दुम्नीम। दानीएल ११:३३; हितोपदेस ४:१८; मती १३:४३

4 तन्न गे दानीएलमी, एको लोत्र सुइ आन कली मदने। एको नोले डा नाक्त कली बेक्शो किताब मप्राक्थु, छाप थोक्शा वोतो। नोले डा नाक्तीम शुश मुर आन थुं मनाइक्थु, थमा लोत्र माल्शा शुश तुइक्ब दुम्नीम" देंत। प्रकाश १०:४

नोले डा नाक्त

5 मिनु गो, दानीएलमी, अर्को मुर निक्शी तातासी। का खोला आ ओंथ हांबु नु अर्को खोला आ आइक्ची हांबुम बाक्ताक्स।

6 मिनु कामी सुती वा फेक्शा आइक्ची हांबुम बाक्ब कली “एको लोत्र गाप्चा कली गिश नाक्त बाक्नीमी?” दे हिल्लो पाप्तु।

7 मिनु मेको आइक्ची हांबु बाक्ब बुश सुती वा फेक्शोमी आ गुड निम्फा सरीड गे पोक्तु। मिनु गेना हना यो ब्रोंडशा बाक्ब आ नें थिशा कसम जशो नेता। मिनु मेकोमी “एको पाला का बाक्शो ना, पाला निक्शी बाक्शो ना नु आधा पाला बाक्शो ना कली दुम्ब। मिनु परमप्रभु यावे आ मुर आन कली श्येत जची ना नुम्मेनु, मेको देशो लोत्र नेल्ल गाप्ब” दे गेना हना यो ब्रोंडशा बाक्ब आ नेमी कसम जाप्तु। दानीएल ७:२५; प्रकाश १०:५-६

8 गो मेको लोत्र नेता, तन्न मरुबु। मोपतीके गो “आं प्रभु, एको नेल्ल रे मार दुम्बा?” दे हिल्लो पाता।

9 मिनु मेकोमी “दानीएल, गे इ लां खोतो। मारदे हना एको लोत्र नोले डा नाक्त सम्म खुडशशा छाप थोक्शा वोडक्चा माल्ब।

10 मिनु शुश मुर नाक्चा, रिम्शो सेल्चा नु सुन यपाडशशो खोदेशो पा रिम्शो सेल्चा पुंडसीनीम। तन्न परमप्रभु कली मटीब, मटिना टिन बाक्शा, मारेड मरुप्नीम। तन्न जोक्ब तुडक्बपुकीमी एको लोत्र रुप्नीम।

11 मिनु नाक्त कित कित डा चोशा चढेतीक चढेचा नाइक्तमे नोले नु ग्रॉग्रा दिशो थोत्रक चढेमे सम्म हजार का, सहे निक्शी १० नाक्त दुम्नीम। दानीएल १:२७

12 सु सु हजार का सहे सां ३५ नाक्त सम्म फाल्शा बाक्नीमी, मेको ग्येरसीशो मुर बाक्नीम।

13 तन्न गे, दानीएल, इ लां लशा, थुं नाइसो। मिनु नोले डा नाक्ती इ इनाम तचा कली बेक्चा रे सेंचा पुंडसीनेवे” दंत।

## होसे

**ब्रेक्ब मुर:** एको किताब होसेमी ब्रेक्शो बाक्ब। होसे आ अर्थ “परमप्रभु, वारच पाड्ययीनी” देशो बाक्ब।

**गेना ब्रेक्शो:** होसेमी परमप्रभु यावे आ लोत्र इस्राएल डा उत्तर रागी डा पिप योआश आ तौ येरोबोआम आ सासन ७८२-७५३ बि. सी. रे हिज्कीयाह आ सासन ७२९/७१६-६८६ बि. सी. सम्म पशो बाक्त। मेना परमप्रभु यावे आ लोत्र पाइब आमोस, यसैया नु मीका यो बाक्मा बाक्त। गोत्ये माइश्शो टेयब जोक्ब तुइक्ब मुर कामी “मेको किताब ८०० बि. सी.म हिब्रू लोत्र रे पा ब्रेक्शो बाक्ब” दे ब्रेक्शो बाक्ब।

**मार ब्रेक्शो:**

१. होसे आ ग्युंवे इस्राएली आन परमप्रभु यावे कली प्रोइशो कौइचा कली बाक्ब।
२. परमप्रभुमी इस्राएली आन कली दाक्शा, मप्रोइतीके आ कौइतीक यो बाक्ब। होसे १:-३:-
३. चढेब नु पिप आन कली मरिम्शो पचा कली दोस गेतीके यो बाक्ब। होसे ४:-१०:-
४. नोले परमप्रभु आ शिशो कौइतीके बाक्ब। होसे ११:-१४:-

डौइती डा लोत्र

१ परमप्रभु यावेमी बेयरी आ तौ होसे नु लोत्र पाप्तु। मेना यहूदा डा पिप उज्जीयाह, योथाम, आहाज नु हिज्कीयाह बाक्तेकम। मिनु इस्राएल डा पिप योआश आ तौ येरोबाम बाक्त। यसैया १:१; २राजा १४:२३; आमोस १:१

नोले शौइसीतीके आ चिन्ड

२ मिनु परमप्रभु यावेमी होसे नु लोत्र पचा गोप्तु। मेकोमी होसे कली “लावो, मिनु तेल्लेम मीश मुर कली ग्युंवे पावो। मिनु मेको नु आल थिवो। मारदे हना एको रागी परमप्रभु यावे कली प्रोइशा, तेल्लेम खोदेशो दुम्शो बाक्ब” दैत। होसे ३:१; ब्यवस्था २३:१८

३ मिनु होसे लशा दिब्लैम आ तमी गोमेर कली ग्युंवे पाप्तु। मिनु मेको मीशमी आल कुरशा, तौ का थिप्तु।

४ मिनु परमप्रभु यावेमी होसे कली “मेको तौ आ नें येजेल वोतो। मारदे हना गो रीब पा येहू आ खिं कली येजेलमी पशो हुश खाक्श आ परबंम क्येक्क लेत्नुड। मिनु इस्राएल राज्य खतम पोक्नुड। २राजा १०:१-१४

५ गो मेको नाक्ती इस्राएल कली येजेल डा दिंममी खतम सेल्नुड” दैत।

६ मिनु गोमेरमी लेशा आल कुरशा, तमी का थिप्तु। मिनु परमप्रभुमी होसे कली “मेको आ नें लो-रूहामा वोतो। मारदे हना गो इस्राएल कली लेशा शिशो मपाइनुड। मिनु मेको आन पाप मक्यानुड। होसे २:३, २५

७ मिनु गो यहूदा आ खिं कली शिशो कौइनुड। मिनु मेको आन कली जोरी सत्रु आन गुइ रे पा प्रोइनुड। लिब्रा, तरवार नु लडाइ पाइब शारा नु शारा डोइक्बपुकी रे ममाइ, तन्न गो मेको आन कली आंमान प्रोइनुडमी” दे परमप्रभु यावे, आन परमप्रभुमी दैत। लो-रूहामा आ अर्थ “मदाक्नुड” देशो बाक्ब।

८ मिनु गोमेरमी लो-रूहामा कली दूध तुंडचा प्रोना नोले, आल कुरशा, अर्को तौ का थिप्तु।

९ मिनु परमप्रभुमी होसे कली “मेको आ नें लो-अम्मी वोतो। मारदे हना गेपुकी आं मुर मननी। गो इन परमप्रभु मनड। लो-अम्मी आ अर्थ ‘गे आं मुर मनवे नु गो इ परमप्रभु मनड’ देशो बाक्ब।

१० इस्राएलीपुकी समुन्द्र डा बाक्वा खोदेशो पा शुश दुम्नीम। मिनु सुडमी मेको आन कली पुक्ने नु हिक्ने मचाप्नीम। ते मेको आन कली ‘गेपुकी आं मुर मननी’ देशो बाक्मे मेकेर मेको आन कली ‘गेना हना यो ब्रौइशा बाक्ब परमप्रभु आ मुर’ देनीम। उत्पत्ती २२:१७; रोमी ९:२६

११ मिनु यहूदा आ मुर नु इस्राएल आ मुर लेशा गारशा का दुम्नीम। मिनु मेकोपुकीमी मुर का कली सासन पाइब सेल्नीम। मिनु मेको रागी रे गूनीम। मारदे हना येजेल आ नाक्त टेयब दुम्ब” दैत। यसैया ११:११-१३; येरमीया ३:१८; इजीकीएल ३७:२२

## 2

लेशा रिम्शो पशो

१ मिनु परमप्रभुमी “गेपुकी आंम लोक्ब आन कली ‘गे आं मुर बाक्नीनी’ देनीन। मिनु इन समी आन कली ‘आं दाक्शो समी’ देनीन। होसे १:१९; होसे १:६

२ इन ममा कली हुइक्तीन। मेको कली शुश हुइक्तीन। मारदे हना मेको आं मीश मबाक्ब। मिनु गो मेको आ वौइश मनड। मेकोमी आ मिक्च वौइश मुर गे हिरचा प्रोनल। मिनु आ दूध आस दाते डा नाता खोइश्शा, ग्रोग्रा दिशो गेय प्रोनल। इजीकीएल १६:२३;

३ गो मपाप्तु हना, गो मेको आ वा पुइश्शा, मेको जरमेशो नाक्ती खोदेशो पा शिश्रा पोक्नुड। गो मेको कली गोरशो रागी खोदेशो सेल्नुड। सोत्रशो रागी खोदेशो पा ब्वाक्कु मबाक्शो सेल्नुड।

परमप्रभु रे नोले शौइसीशो

४ गो मेको आ तमी तौ आन कली आं दाक्स मकौइक्नुड। मारदे हना मेकोपुकी तेल्लेम पा थिशो आल बाक्नीम।

५ मेको आन ममा जोल पा अर्को मुर नु गाक्त। मेको आन कली मुने पा थिशो बाक्त। मेकोमी ‘गो आं कली दाक्ब वौइश खोइक्नुड। मिनु मेकोमी आं कली जचा तूचा, ऊन नु सुती वा, तेल नु अडगुर शांबु गेब’ दैत। येरमीया ४४:१७

6 मोपतीके गो मेको आ लां चूमी तेक्नुड। मेको आ लांम गारो सेल्शा, आ लां तेक्शा वोडक्नुड। मिनु मेकोमी तेड लां मताडब।

7 मेकोमी आ दाक्शो मुर आन कली माल्थ लाडब। तन्न मेको आन कली ग्याइक्ने मचाप्ब। मेकोमी आ दाक्शो मुर आन कली कोव्रब। तन्न मथिप्ब। मिनु मेकोमी 'मुल गो डोंइती डा खोदेशो पा आं वोइश आ बाक्तीक लाडनुड। मारदे हना गो मुल क्येडा मेना ठीक बाक्ती' देब।

8 गो मेको कली अन्न, नक अडगुर शांबु नु तेल गेता हना यो मेकोमी मतुडक्त। गोम मेको कली सुन चांदीम ग्योम्ताक्ड। तन्न मेकोमी आं गेशो नेल्ल बाल देवता कली गेप्टु। ब्यवस्था ७:१२-१३

9 मोपतीके बाली मीमिनु नु नक अडगुर शांबु बोक्मेनु, मेको गो लांडसीनुड। मिनु मेकोमी फेक्शो आं ऊन नु सुती वा यो लांडसीनुड।

10 गो मेको आ दाक्शो मुर आन डोंइती मेको कली शिन्ना पा आ मुने कोइक्नुड। मिनु सुडमी यो मेको कली आं गुड रे मलाइक्नीम। येरमीया १३:२२

11 गो मेको आ चाड नेल्ले मानेचा मगेनुड। मेको आ बर्स बर्स डा चाडपुकी नु औसी डा चाड, मेको आ नाइक्तीक नाक्तपुकी नु मेको आ अरु चाड नेल्ल मानेचा मगेनुड।

12 गो मेको आ अडगुर बोटपुकी नु फोव्रशी रवापुकी खतम सेल्लनुड। मेको आ परबम मेकोमी 'एको आं तेल्लेम पशो डा गाल्च नमी' देशो बाक्त। गो मेको रवा रे ठेयब ब्वाकी सेल्लनुड। मिनु ब्वाकी डा जन्तुपुकीमी मेको ब्वाइनीम।

13 गो मेको कली बाल देवता कली धूप चोशो नाक्ती सजाइ गेनुड। मेको नाक्त मेको ग्योम्सीशा वोइश खोइक्तु। आं कली चहिं प्रेताक्यी।

14 मोपतीके मुल गो मेको कली लेम्शा, गोरशो रागीमी लाइक्नुड। मिनु मेको नु आ दाक्शो लोव्र पाडनुड। यसैया ४०:२

15 मेकेर गो मेको कली आ अडगुर रू लेशशा गेनुड। गो आकोर माइशो दिंम कली चहिं आस पतीक रागी सेल्लनुड। मेकेर मेकोमी आ ठिटी बाक्ची ना डा खोदेशो नु इजीप्त रागी रे जाक्शो खोदेशो पा कुम्सो पाइब" देत। यहोसु ७:२४-२६

#### परमप्रभुमी लेशा दाक्ब

16 मिनु परमप्रभु यावेमी "मेको नाक्त गे आं कली 'आं वोइश' देनेवे। मिनु 'आं बाल देवता' मदेनेवे। यसैया ५४:५

17 गो बाल देवता आन ने यो मेको आ शोव्र रे गुंडनुड। मिनु लेशा मेकोमी मेको आन ने गेनायो मथोइब।

18 गो मेको नाक्त मेकोपुकी, ब्वाकी डा जन्तुपुकी, सरीड डा चिक्बपुकी नु खपीम ग्रेशा गाक्ब जन्तुपुकी नु कबल का पाडनुड। मिनु मेको रागी डा मुरपुकीमी मेना रे लिब्रा, तरवार नु लडाइ मताइनीम। मिनु मुर नेल्ल हेम्म पा बाक्चा ताइनीम। उत्पत्ती ९:९-१०; इजीकीएल ३४:२५

19 गो इ कली गेना हना यो आं मीश सेल्लन। गो इ कली थमा पा दाक्शा शिशी पा नु ठीक पा आं मीश सेल्लन। प्रकाश १९:१७

20 गो इ कली मप्रोंइथु आं मीश सेल्लन। मिनु परमप्रभु यावे कली रिम्शो पा तुडक्नेवे" दे परमप्रभु यावेमी देत। येरमीया ३१:३४

21 परमप्रभु यावेमी "मेको नाक्त गो सरीड कली लोव्र लेल्लनुड। सरीडमी रागी कली लोव्र लेप्ब।

22 मिनु रागीमी अन्न, नक अडगुर शांबु नु तेलमी येजेले कली लोव्र लेल्लमी।

23 गो मेको कली आं परबम आं रागीमी बाक्पाइक्नुड। गो मेको कली 'मदाक्नुड' देशो कली आं शिशी कोइनुड। मिनु गो 'गेपुकी आं मुर मननी' देशो नड। मुल गो 'आं मुर ननी' देनुड। मिनु मेकोपुकीमी आं कली 'गे आंइ परमप्रभु बाक्नीनी' देनीम" दे परमप्रभुमी देत। होसे १:६; होसे १:९; रोमी ९:२५; १पत्रुस २:१०

### 3

#### इसाएलम शिशी तशो

1 मिनु परमप्रभु यावेमी आं कली "इ मीशेमी अर्को वोइश खोइशशा, इ कली प्रोंइतु हना यो, मुल लशा, इ मीश कली लेशा इ दाक्तीक कोइडो। इसाएलीपुकीमी अर्को देवी देवता आन कली दाक्शा आन चदेशो थोव्रक जचा दाक्ताक्म हना यो, परमप्रभु यावेमी इसाएली आन कली दाक्ब" देत। होसे १:२

2 मोपतीके गो मेको मुर कली १५ शेकेल चांदी, होमेर का नु लेतेक का क्योव्रज गेशा आं मीश लेशा ग्याप्ता। शेकेल का ११.५ ग्राम चांदी के क्येट बाक्ब। होमेर का २२० लिटर बाक्ब। लेतेक का ११० लिटर बाक्ब।

3 मिनु गोमी आं मीश कली "गे मुल शुश नाक्त सम्म गो नु बाक्चा माल्नेवे। गे मुल तेल्लेम मपावो। अरु वोइश मखोतो। गो गे नु बाक्नुड" देती।

4 मारदे हना इसाएलीपुकी शुश नाक्त सम्म पिप नु सासन पाइब मबाक्थु, बाक्चा माल्नीम। मेकोपुकीमी चढ़ेचा कली मिम्तीक फुल्लु, एफोद माइशो चढ़ेब आ पांडतीक वा नु आन खिं डा मूर्ति यो मताइनीम। २इतिहास १५:३

5 मिनु नोले डा नाक्तीमी इसाएलीपुकी लेशशा, परमप्रभु यावे, आन परमप्रभु कली नु आन पिप दाऊद कली माल्नीम। मेकोपुकी खिंखि पा आन परमप्रभु यावे गे लेशशा, आसीक ताइनीम। येरमीया ३०:९; इजीकीएल ३४:२३-२४

### 4

#### चढ़ेबपुकीमी मरिम्शो पशो

1 गे इसाएली, परमप्रभु यावे आ लोव्र नेनीन। मारदे हना परमप्रभु यावेमी रागीम बाक्ब इन कली दोस गेब। मार दोस गेब देशा हना "एको रागी डा मुरुमी आं कली प्रोंइतीमी, आं कली मदाक्थु, आं कली मटीनीम।

2 एकेर कसम जचा, जोल पचा, मुर साइक्या, खुइ पचा नु तेल्लेम पचा डा लाकशा, अर्को मारेइ मबाकब। नेल्लेमी मरिम्शो ला पाइनीम। मेकोपुकीम मुर साइशशा, हुश खाकश पोक्नीम।

3 मोपतीके एको रागीमी रोंका पाइब। एकेर बाकब नेल्ले ओंखां पा जाम्शा लाइनीम। बस्तु भाव, चिक्ब नु समुन्द्र डा डांड बेकशा, जाम्शा लाइनीम।

4 तन्न सुइमी सुइ कली दोस मगेमेकल। मुरुमी मुर आन कली 'मरिम्शो पाइतीनी' मदेंमल। मारदे हना गो गे चढेबपुकी नु लोव्र का पचा माल्नुड।

5 गेपुकी काबु नाक्ती खतम दुम्नीनी। मिनु आं लोव्र पाइबपुकी यो गेपुकी नु काथा खतम दुम्नीम। मोपतीके गो इन खिं डा मुर नेल्ल गे नु खतम सेल्लुडमी।

6 आं मुर मारेइ मतुइक्तीके खतम दुम्नीम। मारदे हना गेपुकीमी तुइक्तीक कली ताइक्ताक्नी। मोपतीके गो यो इन कली आं कली चढेब दुम्तीक रे ताइक्नन्नी। मारदे हना गेपुकीमी इन परमप्रभु, आं अरेशो लोव्र कली क्यारी मपनी। मोपतीके गो यो इन आल आन कली क्यारी मपाइनुड।

7 चढेबपुकी दोशो बारमा, मोशोन आं कली मरिम्शो पाम्तेक्म। मेको आन टेयब दुम्तीके ताइशशा, मुने दोक्तीक गेय पाम्तेक्म।

8 मेकोपुकी आं मुर आन पाप आ पर्वम चढेशो ब्वशा दोम्नीम। मिनु मुरपुकीम पाप पशो दाक्नीम। लेवी ४:१३-२१, २७-३५; लेवी ६:१९

9 मिनु मुरपुकी दोदेशो बाक्मा, मोदेशो चढेबपुकी बाक्नीम। गो मुरपुकी नु चढेब नेल्ल आन कली सजाइ गेनुड। मेकोपुकीमी दोदेशो पामे, मोदेशोन सजाइ गेनुड।

10 मेकोपुकीमी जाइनीम ब्वाइनीम, तन्न मरूनीम। मेकोपुकीमी तेल्लेम पशा, सोशा बोशा मलाइनीम। मारदे हना मेकोपुकीमी तेल्लेम पचा कली परमप्रभु यावे कली प्रोइतेक्म।

इसाएली आन मूर्ति पूजा

11 माइत अडगुर शांबु नु नक अडगुर शांबुम मुर आन रुप्तीके कली साम्ब।

12 आं मुरपुकीमी शी के मूर्ति कली हिल्लो पाइनीम। मिनु मेकोपुकीमी कोक्केमी साहीत कोव्रनीम। मारदे हना तेल्लेम पतीक थुमी मेको आन कली हेंथे गाकपाइशो बाकब। मेकोपुकीमी तेल्लेम पचा कली परमप्रभु कली प्रोइतेक्म। येरमीया २:२७; होसे ५:४

13 मेकोपुकीमी डांडामी चढेनीम। मिनु पहाडमी तुल्च, पिपल नु सेकल रवा आन वांकुम धूप चोइनीम। मोपतीके इन तमी तेल्लेम दुम्नीम। मिनु इन चाइमीपुकी अरु आन वोंइश नु बाक्नीम। इजीकीएल ६:१३

14 गो इन तमी आन तेल्लेम पशो नु इन चाइमी अरु आन वोंइश नु बाकशो आ पर्वम सजाइ मगेनुड। मारदे हना मेको वोंइश मुर यो सुइ मबाक्तीकेमी तेल्लेम नु लशा देवी देवता आन कली चढेनीम। मोदेशो मरुब मुरपुकी जाम्शा लाइनीम। होसे १:२

15 गे इस्राएलीपुकी, तेल्लेम पाइतीनी हना यो, यहूदा डा मुर आन कली हेंथे मगाकपतीन। गेपुकी गिल्यालमी नु बेथ-आवेनमी मलन। मिनु 'परमप्रभु यावे ब्रोंइशा बाकशो खोदेशो पा' दे कसम मजने' दे परमप्रभुमी देंत। आमोस ५:५; होसे १०:५; आमोस ८:१४

16 इस्राएलीपुकी मटीब बी खोदेशो बाक्नीम। दोपा परमप्रभु यावेमी भेडा कली योव्रशो खोदेशो पा योव्रने चाक्बा?

17 एफ्राइम मूर्ति आन चारच दुम्शो बाकब। मोपतीके मेको कली प्रोनीन।

18 मेकोपुकीमी शांबु थुम्शा यो तेल्लेम पना पन बाक्नीम। मेको आन सासन पाइब यो मुने दोक्नीम।

19 टेयब फश गिवार पशा, मेको आन कली योल्ब। मिनु मेको आन चढेशो आ पर्वम मुने दोक्नीम।

## 5

चढेब आन कली सजाइ

1 मिनु परमप्रभुमी "चढेबपुकी, एको लोव्र नेनीन। इस्राएलीपुकी इन नोफा दाइशशा नेनीन। पिप आ खिं डा मुरपुकी, नेनीन। एको निसाफ इन मरिम्शो पशो आ पर्वम बाकब। गेपुकी मिस्या सहरमी दाइशशा ब्वारद नु ताबोर सहरमी ब्रशो ग्याइल खोदेशो दुम्शो बाक्नीनी।

2 मेकोपुकीमी शितीममी मुर बिक्शा बेक्तीक सेल्लेक्म। गो मेको नेल्ल आन कली सजाइ गेनुड।

इसाएलीपुकीमी सजाइ तशो

3 गो एफ्राइम आ पर्वम नेल्ल तुइक्नुड। मिनु इस्राएल यो गो नु खुइक्ने मचाप्ब। एफ्राइम, गे तेल्लेम पतीकेमी गुम्शो बाक्नेवे। इस्राएल ग्रॉग्रा दिचा डा दुम्शो बाक्ब। होसे १:२; होसे ६:१०

4 मेको आन गेय आ पर्वम आन परमप्रभु गे लेत्ने मचाप्नीम। तेल्लेम पचा मेको आन थुमी बाक्ब। मिनु मेकोपुकीमी परमप्रभु यावे कली मतुइक्नीम। होसे ४:१२

5 इस्राएली आन टेयब लेत्तीकेमी मरिम्शो पाइब बाक्नीम, दे आन सांकछी बाक्ब। एफ्राइम डा मुरपुकी आंम पाप पतीकेमी खतम दुम्नीम। यहूदा डा मुरपुकी यो मेकोपुकी नु खतम दुम्नीम।

6 मिनु मेको आन क्यारश भेडा नु बी ब्यफ लाइशशा, परमप्रभु यावे कली माल्थ लाइनीमी। तन्न मेकोपुकीमी मेको कली मथिल्तीम। मारदे हना मेको आन क्येडा डोन लत। यसैया १:११-१५

7 मेकोपुकी परमप्रभु यावे रे नोले शोंइसीशो बाक्नीम। मेकोपुकीमी हेंथे पा आल थिशो बाक्नीम। मेको आन औसी डा चाडमी आन बाली नाली नु मेको आन कली खतम सेल्ब। होसे २:१३

थर निकशी आस कली सजाड

8 गिबामी तुराही नु रामाह सहरमी श्रोत्र ताप्पीन। बेथ-आवेनमी लडाइ डा तुराही ताप्पीन। बेन्यामीन डा मुरपुकी डोंइती बारीन। २राजा १५:३७; यसेया ७:१-९; होसे ४:१५

9 सजाड डा नाक्ती एफ्राइम गोरशो रागी खोदेशो दुम्ब। मुल मार मार दुम्बा, मेको इस्राएली आन कली देने थुम्ता।

10 यहूदा थर डा ठेयब मुरपुकी सांद डा फुल्लु याक्ब खोदेशो दुम्तेक्म। गो आं गाइक्तीक मेको आन तारी ब्वाक्कु खोदेशो पा मोइक्नुडमी। ब्यवस्था १९:१४

11 एफ्राइम डा मुरपुकी सजाड तशा, आन थुं लुकच लत। मारदे हना मेकोपुकी जाम्शा लाइब मूर्ति आन नोले खोइक्तेक्म।

12 मिनु गो एफ्राइम डा मुर आन कली तुम्ब नु यहूदा डा मुर आन कली राक्शो खोदेशो दुम्शो बाक्नुड।

13 एफ्राइम नु यहूदामी आस श्येत तुडक्तेसे नोले, एफ्राइममी अस्सुर डा ठेयब पिप कली 'वारच पने' दे पुंइथ मुर सोइक्ताक्व। तन्न मेकोमी इ कली वारच पने मचाप्ब। होसे ७:११; होसे १०:६; होसे १२:२

14 मारदे हना गो एफ्राइम कली गुप्स खोदेशो नु यहूदा कली टिटा गुप्स खोदेशो दुम्शो बाक्नुड। गो मेको आन कली कुरशा लाइक्नुड। मिनु मेको आन कली आं रे रोइक्ने मचाप्नीम। होसे १३:७; होसे ६:१

15 मिनु गो आं बाक्तीकेमी लेशशा बाक्नुड। मेकोपुकीमी आन मरिम्शो पशो तुइशशा, आं कली ममाल्मे सम्म बाक्नुड। मिनु मेकोपुकीमी शुश श्येत जशा, आं कली माल्नीम" दे परमप्रभुमी दैत। यसेया २६:१६

## 6

परमप्रभु गे लेशशा, कुम्सो पशो

1 मिनु मार लोत्र पाइनीम दैशा हना "पिन, गोपुकी परमप्रभु यावे गे लेय्य। मेकोमी आंइ कली टुक्रा टुक्रा पशो बाक्त। मिनु आंइ कली सापाइक्ब। मेकोमी आंइ कली तुप्तु। मिनु मेकोमी आंइ कली ओख्ती पाइक्ब। होसे ५:१४

2 नाक्त निकशी नोले परमप्रभुमी आंइ कली लेंशा ब्रोंइचा गेब। मिनु नाक्त सां नोले आंइ कली आ डोंइती राप्पाइक्ब। मिनु मोपा गोपुकी मेको आ डोंइती ब्रोंइनीकी। ब्यवस्था ३२:३९

3 गोपुकी परमप्रभु यावे कली तुइशशा, ठेयब सेल्य। मेको कली शुश तुइशशा मान पय। मेको नां दाप्शो बुद पा जाक्ब। हिंडद डा रेउ खोदेशो पा जाक्ब। बर्खा डा रू कली रिम्शो पा जिप्ब रेउ खोदेशो पा जाक्ब" दे लोत्र पाम्तेक्म।

4 मिनु परमप्रभुमी "एफ्राइम, गो इ कली मार पड? यहूदा इ कली मार पड? इस दाक्चा सुनी डा गोप्स खोदेशो नु रीब पा जाम्शा लाइब सीत खोदेशो बाक्ब। होसे ७:१६

5 मोपतीके गो इस कली आं लोत्र पाइब रे पा टुक्रा टुक्रा पाता। आं लोत्रमी इस कली साइक्ता। आं निसाफ इस तारी चिला आप्शो खोदेशो बाक्ब। येरमीया २३:२९

6 मारदे हना गो क्योरशा चढेशो क्येडा दाक्मतीक दाक्नुड। मिनु चोशा चढेशो क्येडा आं कली तुइशशा ठेयब सेल्लो दाक्नुड। १सामुएल १५:२२; हितोपदेस २१:३; मत्ती ९:१३; १२:७

रागीम मरिम्शो पशो

7 मेकोपुकीमी आदम सहर डा मुर खोदेशो पा गो नु पशो कबल प्रॉइतेक्म। मेकोपुकीमी आं कली थमा मसुइक्थु प्रॉइतेक्म। यहोसु ३:१६

8 गिलाद मरिम्शो मुर आन सहर बाक्ब। मेको सहर डा लां हुशेम खुम्शो खोइल आ छापम ब्रीशो बाक्त।

9 दोपा रोइक्बपुकी बाप्शा बाक्नीमी, मोपा चढेबपुकी यो बुक्शा बाक्शो बाक्नीम। मेकोपुकीमी शेकेम लतीक लांमी मुर साइक्नीम। मेकोपुकीमी ठेयब मुने डा गेय पाइनीम।

10 गो इस्राएली आन खिंमी हिंंचा डा गेय का ताता। एफ्राइममी तेल्लेम पना पन नु इस्राएल ग्रांघा दित्या डा दुम्शो बाक्त। होसे ५:३

11 यहूदा, इ कली यो सजाड गेतीक नाक्त जाक्ब" दे परमप्रभुमी दैत।

## 7

1 "गो इस्राएल डा मुर आन कली सापाइक्चा मिन्ताक्ड हना, एफ्राइम आ मरिम्शो पशो नु सामरीया आ पाप तांइसीब। मेकोपुकी जोल पना पन बाक्नीम। खुइपुकी खिं ओत्रशा खुइ पाइनीम। रोइक्बपुकीम लांमी मुर आन कली रोइक्नीम। योएल ४:१

2 गो मेको आन मरिम्शो पशो नेल्ल तुइशशा मिन्नुड। मेकोपुकीम मतुइक्नीम। मेकोपुकीमी मरिम्शो ला पाइनीम। मिनु मेको आन पाप गेना हना यो आं डोंइती बाक्नीम" दैत।

नक पिप साइशो

3 परमप्रभुमी "मेको आन मरिम्शो पशोमी पिप कली ग्येरपाइक्नीम। मिनु आन जोल पतीकेमी सासन पाइब आन कली ग्येरपाइक्नीम।

4 मेको नेल्ल तेल्लेम बाक्नीम। मेकोपुकी शोब्ले चोचा कली होइशशा चुप्पु खोदेशो बाक्नीम। मेको शोब्ले चोइबमी फस निवा रे मबोरम सम्म मी थुक्या ममाल्ब।



- 5 आंड पिप आ भोजम आ सासन पाइब अडगुर शांबु तूशा दुक्नीम। मिनु पिपमी शुक्शी पाइबपुकी नु गुड गारपाइक्व।  
 6 मेको शुक्शी पाइब आन थुं मी खोदेशो पा ब्रशो बाक्व। मेकोपुकी नमो सिमो पा पिप आ नेक्था जाक्नीम। मेको आन थुंम बाक्शो पतीक नेल्ल नाक्दो मी पुमशो खोदेशो पा बाक्व। मिनु मेको सुनीं ठेयब मी खोदेशो पा ब्राइब।  
 7 मेको नेल्ले मी खोदेशो पा ब्रशो बाक्नीम। मिनु आन सासन पाइब आन कली साइक्नीम। मेको आन पिप नेल्ल आन कली साइक्तेक्म। मिनु मेकेर डा सुइमी यो आं कली मथोइनीम” दैत।

इजीप्त कली ब्रेशो

- 8 “एफ्राइम थर डा मुरपुकी रागी डा मुर नु ब्वाइसीनीम। एफ्राइम मलोक्शो शोब्ले खोदेशो बाक्व।  
 9 अर्को रागी डा मुरपुकीमी मेको आ बोल नुप्पाइक्नीम। तन्न मेकोमी मतुइक्व। मेको आ चां का निक्शी बोइशो बाक्व। तन्न मेकोमी मतुइक्व।  
 10 इस्राएल आ ठेयब लेत्तीकेमी ‘मरिम्शो पाइब बाक्व’ दे आन सांक्छी बाक्व। तन्न मेकोपुकी परमप्रभु यावे, आन परमप्रभु गे मलेत्नीम। मिनु मेको कली ममाल्नीम” दैत।  
 11 “एफ्राइम निप्स मपाइशो दुकुर खोदेशो बाक्व। मेको कली निप्स मपाइशो आन कली खोदेशो पा जोल पने चाम्सीब। मुल मेकोपुकीमी इजीप्त रागी कली ‘वारच पने’ दे ब्रेत्नीम। इक्का नोले मेकोपुकीमी अस्सुर रागी कली ब्रेत्नीम। होसे ५:१३  
 12 मिनु मेकोपुकी लची ना, गो मेको आन तारी आं ग्याइल ब्वारनुड। गो मेको आन कली सरीड डा चिक्व आन कली खोदेशो पा उइ तोक्नुडमी। गो मेको आन मरिम्शो पतीके कली सजाइ गेनुड।  
 13 आबी आबी, मेकोपुकी गो रे पा डोन लाम्तेक्म। मेकोपुकी खतम दुम्मल। मारदे हना मेकोपुकी आं कली मटीब दुम्शो बाक्नीम। गो मेको आन कली श्येत रे प्रोइचा दाक्नुड। तन्न मेकोपुकीमी आं पर्बम जोल पाइनीम। भजन संग्रह ८१:१४-१५  
 14 मेकोपुकीमी आन थुं नेल्लेमी आं कली मब्रेत्नीम। तन्न आन ब्राख्येमी रोंका पाइनीम। अन्न नु नक अडगुर शांबु आ पर्बम बुक्नीम। तन्न आं रे पा आन कुल हिरनीम।  
 15 गो मेको आन कली शेंशा, बोल्यो सेलता। तन्न मेकोपुकीमी आं कली मरिम्शो पचा मिन्मीम।  
 16 मेको नेल्ल क्येडा ठेयब गे मलेत्नीम। मेकोपुकी जिक्शो लिब्रा खोदेशो बाक्नीम। मेको आन ठेयब मुर आन मरिम्शो पशो लोत्र आ पर्बम तरवारमी साइक्चा पुंडसीनीम। इजीप्त रागीमी मेको आन पर्बम शुक्शी पाइनीम” दैत। भजन संग्रह ७८:५७

## 8

इसाएलीपुकीम सजाइ तशो

- 1 मिनु “तुराही तापो। ककाकुली का परमप्रभु यावे आ खिं तारी बेरना बेरन बाक्व। मारदे हना मुरपुकीमी आं पशो कबल प्रोइतेक्म। आं अरेशो लोत्र मटीम। यसेया ५८:१; ब्यवस्था २८:४९; होसे ६:७  
 2 मिनु इस्राएलीमी आं कली ‘आंड परमप्रभु, गो इन कली तुइक्नीकी’ दे देनीम।  
 3 तन्न इस्राएलीपुकीमी रिम्शो पचा प्रोइतेक्म। मिनु जोरी सत्रु काम मेको कली खेदा पाइब।  
 4 मेकोपुकीमी आं कली हिल्लो मपथु पिप योवनीम। मेकोपुकीमी गो आं मदेंथु सासन पाइबपुकी योवनीम। मेकोपुकीमी खतम दुम्चा कली आन सुन चांदी रे पा आम कली मूर्ति सेल्नीम। २राजा १५:१०,१४,२५,३०  
 5 सामरीया डा मुरपुकी, इन बाछा आ मूर्ति ताइक्तीन। गो मेकोपुकी नु गाइशो बाक्नुड। गेना सम्म मेकोपुकी आं मुर दुम्चा मदाक्नीमी? प्रस्थान ३२:२०; १राजा १२:२८  
 6 मेको बाछा इस्राएल रागी रे चाक्शो बाक्त। मूर्ति सेल्बम मेको कली सेल्लु। मेको परमप्रभु मबाक्व। काबु नाक्ती मेको सामरीया डा बाछा टुक्रा टुक्रा दुम्ब।  
 7 मेकोपुकीमी फश शोक्नीम। मिनु ठेयब फश गिवार खुप्नीम। मेको आन चेरब बोटमी बाला मबाक्नीम। मिनु मेकोपुकीमी फस सेल्ले मचाप्नीम। आन बाला बाक्तेक्म हना यो, रागी रागी डा मुरपुकीमी मेको खुप्शा जाइनीम। येरमीया १२:१३  
 8 इस्राएल खतम पोक्चा पुंडसाक्व। मुल मेकोपुकी रागी रागी डा मुर आन दातेमी शोर गाक्शो मुर खोदेशो दुम्शो बाक्नीम। येरमीया २२:२८  
 9 ब्वाकी डा गधा हेंथे गाक्शो खोदेशो पा मेकोपुकी अस्सुरमी लाम्तेक्म। एफ्राइम डा मुरपुकी आम कली दाक्वपुकी कली लेयसीशो बाक्नीम। होसे ५:१३  
 10 मेकोपुकी आम कली लेयसाक्म हना यो, मुल गो मेको आन कली खुप्नुडमी। मिनु मेकोपुकी सक्ति पाइशो पिप आ गुड रे क्याम्चा पुंडसीनीम।  
 11 एफ्राइममी आ पाप पतीके चढेतीक शुश सेल्लु। मेको चढेतीके शुश सेल्लेके मेको कली पाप दुम्शो बाक्व।  
 12 मिनु गो मेको आन कली आ अरेशो शुश ब्रेक्ताक्ड। तन्न मेकोपुकीमी आं लोत्र थमा मसुदेम।  
 13 मेकोपुकीमी आं कली चढेनीम। मिनु श्ये ब्वाइनीम। तन्न परमप्रभु यावे मेकोपुकी नु मय्येरसीशो बाक्व। मुल परमप्रभु यावेमी मेको आन मरिम्शो पशो मिम्शा, मेको आन कली सजाइ गेब। मिनु मेकोपुकी इजीप्त रागीमी लेशशा लाइनीम।  
 14 इस्राएलीपुकीमी आम कली सेल्ब कली प्रेंशा, ठेयब दरवार सेल्लो बाक्नीम। यहूदा डा मुरपुकीमी शुश सहर एर ओंथ गारो सेल्लो बाक्नीम। तन्न गो मेको आन सहरमी मी सुइशशा दरवार नेल्ल क्रोइक्नुड” दे परमप्रभुम दैत। येरमीया १७:२७; आमोस २:५

## 9

होसेमी लोव्र पशो

1 इस्राएली, मरयेरसीन। अर्को रागी रागी डा मुर खोदेशो पा, सोमशा मरयेरसीन। मारदे हना गे इन परमप्रभु क्येडा नोले शोइसाकनी। गे अन्न ओइतीक चाडमी तेल्लेम पशो आ परबम क्येट ताक्चा दाकनीनी। होसे १:२

2 मुल अन्न आ खला डा अन्नम नु अडगुर कोल डा अडगुर शांबुम मुर आन कली मरूपाइक्ब। नक अडगुर शांबु मेको आन कली मजाकदीण्ब।

3 मेकोपुकी परमप्रभु यावे आ रागीमी बाक्चा मताइनीम। एफ्राइम इजीप्त रागीमी लेशशा लाइब। मिनु मेकोपुकीमी अस्सुरमी ग्रान्ना दिचा डा थोव्रकी जाइनीम। होसे ८:१३

4 मेकोपुकीमी परमप्रभु यावे कली अडगुर शांबु चढेनीम। क्योरशा चढेतीक मचढेनीम। आन जचा थोव्रक मोन खमे खोदेशो पा जाइनीम। मेको जाइब नेल्ल ग्रान्ना दिशो दुम्नीम। मेको आन जचा थोव्रकीम मेको आन शोव्रलु साइक्चा ला दुम्ब। परमप्रभु यावे आ खिमी चाकने मचाप्नीम।

5 गेपुकी इन ठेयब चाड नु परमप्रभु आ चाडमी मार पाइनीनी?

6 मेकोपुकी खतम दुम्चा कली प्रोक्तेक हना यो, इजीप्त रागीमी मेको आन कली खुब्ब। मिनु मेम्फीस डा मुरपुकीमी मेको आन कली थिम्नीम। मेको आन चांदी के सेल्शो थोव्रकपुकी चू नु चोंकम सुम्ब। मिनु आन ताम्बुमी चू वानीम। होसे १०:८

7 मिनु सजाइ गेतीक नाक्त जाक्शो बाक्ब। क्येक्क लेत्तीक नाक्त यो जाक्शो बाक्ब। इस्राएल डा मुरपुकीमी मेको तुडक्नीम। परमप्रभु यावे आ लोव्र पाइब गुक्शो खोदेशो पा बाक्नीम। मेकोपुकी गशो दुम्तेकम। मारदे हना इन मरिम्शो पचा नु मदाक्चा आ परबम मोदेशो दुम्त।

8 परमप्रभु यावेमी आ लोव्र पाइब कली एफ्राइम कली कोव्रब सेल्लु। मेको आ लां नेल्लेमी चिक्ब रेत्तीक ब्वारद खोदेशो बाक्नीम। आ परमप्रभु आ खिमी यो मेको कली काइ मदाक्नीम।

9 गिबा डा नाक्त खोदेशो पा मेकोपुकी काइ मरिम्शो गेय पाम्तेकम। परमप्रभु यावेमी मेको आन मरिम्शो पशो मिम्शा सजाइ गेब। होसे १०:९; न्यायाधीस १९:२२-३०; न्यायाधीस २०:१३

डोइती नु नोले डा इस्राएल

10 दोदेशो पा गोरशो रागीमी अडगुर थिन्नीमी, मोदेशो पा गो इस्राएल कली थित्ता। फोव्रशी रवामी नेल्ल क्येडा डोइती डा फोव्रशी फल सिशशो खोदेशो पा गो इन किकी पिपी आन कली थित्तामी। तन्न मेकोपुकी बाल-पेओर गे लाम्तेकम। मिनु मेकोपुकी आंम कली बाल कली जिम्मा गेसाकम। मिनु मेको आन दाक्शो मूर्ति खोदेशो पा ग्रान्ना दित्चा डा दुम्तेकम। ब्यवस्था ३२:१०; गन्ती २५:३

11 एफ्राइम आ सक्ति चिक्ब खोदेशो पा बेरशा लाइब। मेको आन दातेमी सुड यो आल थीब मदुम्नीम।

12 मेकोपुकीमी आल थिशा कोल्पाइक्तेक हना यो, गो का सम्म यो मप्रॉइथु लाइक्नुड। मिनु गो मेको आन कली प्रॉइशा डोन लाइक्नुड। मिनु मेको आन कली ठेयब श्येत दुम्ब।

13 एफ्राइम आ तोपुकी साइक्चा पुइसीनीम। एफ्राइममी आ तो आन कली क्योरचा कली लाइक्चा माल्ब। इजीकीएल २७:३

14 परमप्रभु यावे, गे मेको आन कली मार गेनीनी? मेको आन आल शाम्सेकल। मिनु मेको आन दूध सोव्रल।

15 मेको आन मरिम्शो पतीके नेल्ल गिल्यालम पाम्तेकम। मेक रे गो मेको आन कली तशा ग्रान्ना दिचा गोव्रता। मेको आन काइ मरिम्शो पतीके, गो आं खिं रे खेरनुडमी। मेको आन ठेयब मुर नेल्ल मटीब बाक्नीम।

16 एफ्राइम आप्चा पुंडसीशो बाक्ब। मेको आन शाक्श सोव्रशो बाक्ब। मेकोपुकी मसित्नीम। मेकोपुकीमी आल थिम्तेकम हना यो, गो मेको आन दाक्शो आल आन कली साइक्नुड।

17 आं परमप्रभुमी मेको आन कली प्रॉइब। मारदे हना मेकोपुकीमी आ देशो मटीम। मोपतीके मेकोपुकी रागी रागी डा मुर आन दातेमी हिरशा गाक्ब दुम्नीम।

## 10

चढेनीम तन्न दूली पाइनीम

1 डोइती इस्राएल ब्राक्शो नु शुश फल सिण्ब अडगुर बोट का बाक्त। मिनु इस्राएल डा मुरपुकी शुश क्येट थीब दुम्तेकम। मिनु मोपा मेकोपुकीमी फुल्लु के चढेतीक यो शुश सेल्लेकम। मिनु मेको रागीमी दोशो क्येट चेम्मे, मोशोन मे कोपुकीमी आन थाम डा मूर्ति दारपाइक्तेकम। येरमीया २:२१; लेवी २६:१

2 मेको आन थुं दूली बाक्ब। मुल मेकोपुकीमी आन मरिम्शो पशो आ सजाइ तचा माल्नीम। परमप्रभुमी मेको आन चढेतीक नु आन खुक्शो फुल्लु प्रेण्ब। मेको आन थाम डा मूर्ति यो खतम सेल्लब।

श्येत जशा, थुं लेशशो

3 मिनु मुल मेकोपुकीमी “गो परमप्रभु यावे कली मान पा महिंतीके गो आंइ के पिप मबाक्ब। मिनु पिप बाक्त हना यो मेकोमी आंइ कली मार पने चाण्बा डा?” देनीम।

4 मेकोपुकीमी शुश फश लोव्र पाइनीम। मार फश लोव्र पाइनीम देशा हना, जोल पा कसम जशा कबल पाइनीम। मोपतीके वाक्शो रूमी ओशेर पाइशशो सुवा वाशो खोदेशो पा मुददा बारनीम।

मूर्ति पूजा पचा थुम्शो

5 सामरीयामी बाक्ब मुरपुकी बेथ-आवेन डा बाछा आ मूर्ति आ पर्वम हिंनीम। डोंइती मेको मूर्ति आ दारस तशा, ग्येरसीशो मुरपुकी मेको आ पर्वम रोंका पाइनीम। चढेबपुकी यो मेको आ पर्वम रोंका पाइनीम। मारदे हना मेको मूर्ति डोन लाइक्सीशो बाक्ब। होसे ४:१५

6 मेको मूर्ति कली अस्सुर लाइक्नीम। मिनु ठेयब पिप कली सोइक्नीम। एफ्राइम मुने दोक्ब, इस्राएल चहिं आ मिम्शो आ पर्वम मुने दोक्ब। होसे ५:१३

7 सामरीया डा पिप ब्वाक्कुम बाक्शो जिकशो राशी खोदेशो पा योल्सीब।

8 मिनु आन मरिम्शो पतीक मूर्ति बाक्शो आवेन डांडा खतम पोक्नीम। मेको इस्राएल डा मुर आन पाप पशो बाक्ब। मेको आन फुल्लु के चढेतीकेमी चुं नु चोंक वाशा सुम्नीम। मिनु मेकोपुकीमी पहाड कली “आइ कली सुम्की” दे डांडा कली “आइ तारी दोक्कीन” देंनीम। होसे ९:६; लूका २३:३०; प्रकाश ६:१६

9 गे इस्राएलीपुकीमी गिबा आ नाक्त रे पाप पाइतीनी। मिनु मुल सम्म पाप पना पन बाक्नीनी। गिबा डा मरिम्शो पाइब मुर आन कली मार, लडाइमी मसदमे डा? होसे ९:९

10 गो गेना दाक्नुडा, मेना मेको आन कली सजाइ गेनुड। मेको आन साप्पा मरिम्शो पशो आ पर्वम रागी रागी डा मुर आन हुलमी मेको आन कली फ्रेशा लाइक्नीम।

आन दला दाक्स पशो

11 मिनु एफ्राइम मगिक्शो बी का खोदेशो बाक्ब। मिनु दांइ पशोनु, मेको ग्येरसीब। मोपतीके मेको आ दारशो बलामी गो जुवा लानुड। गो एफ्राइम कली दौरपाइक्नुड। यहूदामी ब्यफ वाक्चा माल्ब। मिनु याकूबमी डल्ला प्रोल्चा माल्ब।

12 ठीक पतीक शोक्कीन। मिनु मप्रोंइचा डा दाक्तीक अन्न खोदेशो पा खुपतीन। गे इन मवाक्शो रू वाक्तीन। मारदे हना इन परमप्रभु यावे कली माल्ची नाक्त जाक्त। मिनु मेको जाक्शा, गे इन कली पाप रे प्रोंइब। येरमीया ४:३; यसैया ५५:६

13 तन्न गेपुकी परमप्रभु यावेमी अरेशो मटितीकेम गुम्शा बाक्तीनी। मिनु ठीक मदुम्तीके खुष्पा बाक्तीनी। गेपुकी जोल आ फल जाइब बाक्तीनी। मारदे हना गे आंम बोल नु इन लडाइ पाइब आन कली थमा सुइक्तीनी। अय्युब ४:८

14 मोपतीके इन मुर आन कली लडाइ तोइनीम। मिनु शाल्मनमी बेथ-आरबेल कली खतम पोक्शो खोदेशो पा इन दरवार नेल्ल खतम पोक्शा गेनीम। मेना आल नु आ ममा कली यो साइक्नीम।

15 मारदे हना इन मरिम्शो पतीके मोदेशो ठेयब बाक्ब। मोपतीके मोदेशो दुम्ब। मेको नाक्त सुनी नां दाम चोटीन इस्राएल डा पिप आन कली खतम पोक्नीम।

## 11

परमप्रभुमी इस्राएल कली दाक्शो

1 मिनु परमप्रभुमी “इस्राएल आल बाक्मेनु, गो मेको कली दाक्ताक्ड। मिनु गो आं तौ कली इजीप्त रागी रे ब्रेत्ताक्ड। ब्यवस्था ७:८; प्रस्थान ४:२२-२३; मती २:१५

2 मिनु गो दोशो इस्राएली आन कली ब्रेत्तु, मोशोन आं क्येडा डोन लाम्तेक्म। मेकोपुकीमी बाल देवता कली चढेम्तेक्म। मिनु मूर्ति आन कली धूप चोम्तेक्म।

3 एफ्राइम कली गुइ ग्याइश्शा गाक्चा शेंब गो नड। गो मेको आन कली आल आन कली खोदेशो पा कुरता। तन्न गो मेको आन कली सापाइक्ता हना यो, मेकोपुकीमी मतुइक्तेम।

4 गोमी मेको आन कली मुर आन शिशी पशो खोदेशो पा खुल्ताक्मी। गो मेको आन कली शुश दाक्ताक्ड। गो मेको आन बलामी लाम्सीशो जुवा युंइशा गेतामी। गो मेको आन डोंइती बाप्शा, मेको आन कली थुल्तामी।

5 मार, मेकोपुकी इजीप्त रागी लेत्चा माल्नीमी? मिनु अस्सुर मेको आन पिप दुम्चा माल्ब। मारदे हना मेकोपुकी आं गे लेत्चा म्बिस्सम।

6 मेको आन सहरपुकीमी लडाइ दुम्नीम। मिनु मेको आन लाप्चो डा थाम मीम दुम्नीम। मेको आन मिम्शो नेल्ल खतम दुम्नीम।

7 आं मुरपुकी गेना हना यो, आं क्येडा डोन लाइनीम। मोपतीके मेकोपुकीमी जुवा कुरशो खोदेशो पा श्येत जचा माल्नीम। मिनु सुइमी मेको आन कली आन श्येत रे मप्रोंइब।

8 एफ्राइम, गो इ कली दोपा प्रोंइने चाप्नुडा? इस्राएल, गो इ कली दोपा इ जोरी सत्रु आन गुइमी गेने चाप्नुडा डा? गो इ कली दोपा अदमाह कली पाइश्शो खोदेशो पाइनुडा डा? गो इ कली दोपा सेबोयीम खोदेशो सेल्नुडा डा? मुल आं थुं फांइसाक्व। गो गाइक्चा रे लेश्शा, शिशी पाइब दुम्ती। ब्यवस्था २९:२२; येरमीया ३१:२०

9 गो आं ग्याइश्शो कुरशा मगाक्नुड। गो एफ्राइम कली लेंशा खतम मपाइनुड। मारदे हना गो परमप्रभु नड। गो मुर मनडा। गो इन दातेमी नेल्ल क्येडा सक्ति पाइश्शो दुम्शा, गाइश्शा मजाक्नुड।

10 मेकोपुकी परमप्रभु यावे आ नोले खोइक्नीम। मेको चहिं गुप्स खोदेशो पा ग्रीब। मिनु मोपा ग्रीमेनु, आ आलपुकी पच्छिम रे पा खिंखि पना पन जाक्नीम। येरमीया २५:३०; होसे २:१

11 मेकोपुकी इजीप्त रागी रे चिक्ब खोदेशो पा बेरशा जाक्नीम। अस्सुर रे पा दुकुर खोदेशो पा खिंखि पना पन जाक्नीम। गो मेको आन कली आन खिमी बाक्चा गेनुड” दे परमप्रभु यावेमी देंत।

12 एफ्राइममी आं कली जोल पना पन बाकब। मिनू इस्राएलीमी यो खाल का डा पा आं कली जोल पाइनीम। मिनू यहूदा आ का ला परमप्रभु आ नोले खोइक्का कली थुं निक्शी पशो बाकब। तन्न मेकोमी मेको आन कली दाक्का मप्रोंडब।

## 12

इस्राएलीम पाप पशो

- 1 एफ्राइममी आं कली लोत्र पाइब। मेकोमी नेल्ल नाक्त पूब डा फश कली खेदा पाइब। मेकोमी जोल नु हुश खाक्का पोक्का बारपाइक्ब। मेको अस्सुर नु गारब। मिनू इजीप्त रागी कली तेल सोइक्ब। होसे ५:१३
- 2 परमप्रभु यावेमी यहूदा आ मरिम्शो पशो डा सजाइ गेपु। मेकोमी याकूब आ मरिम्शो पशो आ पबर्म सजाइ गेब। मेकोपुकीमी दोदेशो पामे, मोदेशो पा सजाइ गेब।
- 3 मेकोमी आ ममा आ कौवजीम आ लोक्ब आ गेग्रे ग्याइक्ताक्ब। मिनू टेयब दुम्शा, परमप्रभु यावे नु राम्शी पापु। उत्पत्ती २५:२२, २६; उत्पत्ती ३२:२५-२९
- 4 मेको परमप्रभु आ स्वर्ग डा गेय पाइब नु राम्शी पा ग्रात। मेकोमी डाक्का “शिशी पाइय्यी” दे पुंडतु। मेकोमी परमप्रभु कली बथेल सहरमी शुमानु, परमप्रभुमी मेको नु लोत्र पापु। उत्पत्ती ३५:१५
- 5 मिनू परमप्रभु यावे, मुर नेल्ल आन परमप्रभु आ नें यावे बाक्ब। भजन संग्रह ८३:१९
- 6 मिनू मेकोमी “गे परमप्रभु गे लेत्चा माल्नेवे। गे दाक्का नु ठीक पचा मप्रोनीन। परमप्रभु यावे कली रिम्शा बाक्कीन” देंत।
- 7 मिनू जोल पा नाक्तीक चलेब ग्याप्ब लेयब मुरुमी जोल पचा दाक्नीम।
- 8 एफ्राइममी “गो शुश क्येट थीब दुम्ती। गो शोप पाइश्शो बाक्नुड। आं शुश क्येट चेम्तीके ‘गे पाप पाप्तीवी’ दे दोस गेने मचाप्नीम” देंत। प्रकाश ३:१७
- 9 मिनू “गो परमप्रभु यावे, इन परमप्रभु नड। गो इन कली इजीप्त रागी रे चाक्को नड। गो डोंइती डा चाड नाक्ती खोदेशो पा इन कली लेंशा इन ताम्बुमी बाक्का गेनुड” देंत। होसे १३:४
- 10 मिनू मेकोमी “गो नोले दुम्ब लोत्र पाइबपुकी नु लोत्र पाता। गो मेको आन कली कोंइतीके कोंइताक्ड। गो मेको आन कली कथा शेपाइक्ता।
- 11 गिलाद मरिम्शो पाइब बाक्ब। मेको आ मुरपुकी शोर गाक्को बाक्नीम। मेकोपुकीमी गिल्यालमी ब्यफ चढ़ेन्तेकम हना, आन फुल्लु के चढ़ेतीक ब्रेशशा, फुल्लु देल्थो खोदेशो दुम्ब। होसे ६:८; होसे ९:१५
- 12 मिनू याकूब प्रोक्का, अराम रागीमी लत। मेकेर इस्राएलीमी मीश चाक्का आ पबर्म गेय पापु। मेकोम मेकेर भेडा योव्रतु। उत्पत्ती २७:४३; उत्पत्ती २८:५; उत्पत्ती २९:२०
- 13 मिनू परमप्रभु यावेमी आ लोत्र पाइब आ पतीके इस्राएली आन कली इजीप्त रागी रे गुंडताक्ब। मिनू आ लोत्र पाइब रे पा मेको आन कली कोव्रतु। प्रस्थान ३:१०
- 14 तन्न एफ्राइममी परमप्रभु कली चुरपाइश्शो बाक्ब। मोपतीके परमप्रभुमी आ पशो हुश खाक्का पोक्तीके आ पबर्म सजाइ गेब। मेकोमी दोदेशो पवा, मोदेशो पा क्येक्क लेत्चा पुंडसीब” दे परमप्रभुम देंत।

## 13

परमप्रभु इस्राएल नु गाइश्शो

- 1 मिनू परमप्रभुमी “एफ्राइममी लोत्र पवानु, मुरपुकी खिंखि पाम्तेक्म। इस्राएलीमी मेको कली मान पाम्तेक्म। तन्न मेको बाल देवता कली पूजा पतीके बेक्त।
- 2 मिनू मुल मेको क्येडा शुश पाप पाइनीम। मेकोपुकीमी आंम कली चांदी के मूर्ति सेल्नीम। मेको मूर्ति नेल्ल मुरुमी सेल्थो बाक्नीम। मिनू मुरुमी ‘मेको आन कली चढ़ेन। बाछा कली पुक्पु पने’ देंनीम। यसैया ४४:१०
- 3 मोपतीके मेकोपुकी सुनी डा गोस्स, सुनी डा जाम्शा लाइब सीत, फशेमी योल्ब खला डा भूस नु झेल रे पा गूब कुन खोदेशो दुम्नीम” देंत। होसे ६:४; भजन संग्रह १:४
- 4 मिनू “गो परमप्रभु यावे, इन परमप्रभु नड। गो इन कली इजीप्त रागी रे गुंडताक्ड। गे गो आं डा लाक्का अरु परमप्रभु मतुडक्नीनी। मिनू गो आं डा लाक्का अरुमी पाप रे प्रोंइने मचाप्नीम।
- 5 मिनू गो गोरशो रागी नु शुश सोव्रशो रागीमी इन कली कोव्रता। होसे ९:१०
- 6 गो मेको आन कली रूपाइक्ता। मिनू मेकोपुकी टेयब लेशशा, आं कली प्रेंताक्म। ब्यवस्था ३२:१५
- 7 मोपतीके गो मेको आन कली गुप्स खोदेशो पा नु जोइ खोदेशो पा आन लांम बाप्शा बाक्नुड। होसे ५:१४
- 8 चाइक्ब रोंइसीशो वां खोदेशो पा मेको आन कली ग्याइश्शा आन रां चेतुड। मिनू गुप्सुमी खोदेशो पा मेको आन कली ब्वाइनुड। मिनू ब्वाकी डा जन्तुमी साइश्शो खोदेशो पा साइक्नुड।
- 9 इस्राएलीपुकी, गो इन कली खतम सेल्नुड। इन कली सुम वारच पाइबा? येरमीया २:१७
- 10 इन कली प्रोंइने चाप्ब ते बाक्मा? इन कली वारच पाइब सासन पाइब, ते लाक्कामे? मेको आ पबर्म गेपुकीमी ‘गो आंइ कली पिप नु सासन पाइब गेकी’ देंतीनी। १सामुएल ८:५-९
- 11 मोपतीके गो गाइश्शा इन कली पिप का गेता। मिनू गो चुरशा मेको कली पोक्का लाइक्ता।
- 12 एफ्राइम आ पाप खुइश्शा वोइश्शो बाक्ब। मेको आ पापपुकी ब्रेक्का वोइश्शो बाक्नीम।

13 मीश मुर आल थितीक रोड पशो खोदेशो पा मेको कली श्येत दुम्ब। तन्न मेको मारेड यो मतुडक्ब आल खोदेशो बाक्ब। मेको दूली पा जरमेशो बाक्ब।

14 गो मेको आन कली तुरस रे प्रोडनुडा डा? गो मेको आन कली बेक्चा रे पा प्रोडनुडा डा? साडक्ब, इ साडक्तीक ते बाक्बा? तुरस, इ खतम सेलतीक ते बाक्बा? गो शिशी मपाडनुड। रतिमोथी १:१०; प्रकाश २०:१४; १कोरिन्थी १५:५४-५५

15 मेको आ लोकब आन दातेमी रिम्शो दुम्शा सोशा बोशा लत हना यो, गो मेको कली शिशी मपाडनुड। परमप्रभु यावे रे पा पूर्व डा फश गोरशो रागी रे पा जाक्ब। मिनु आ ब्वाक्कु बुक्तीक सोवब। मेको आ इनार यो सोवनीम। मोपा मेको आ शुश क्येट लाइब मारेड मारेड नेल्ल नुप्नीम।

16 सामरीया डा मुरपुकीमी आन पाप पशो डा श्येत जचा माल्नीम। मारदे हना मेकोपुकीम आंम परमप्रभु कली मटीम। मेकोपुकी तरवारमी साडक्चा पुंडसीनीम। मेको आन आलपुकी खपीमी ताडश्शा साडक्चा पुंडसीनीम। मेको आन कोव्रज कुरशो मीश मुर आन कोव्रज चेट्चा पुंडसीनीम” दैत। २राजा १५:१६

## 14

परमप्रभु गे लेत्तीन, दे ब्रेश्शो

1 गे इस्राएली, परमप्रभु यावे, इन परमप्रभु गे लेश्शा जाक्कीन। मारदे हना गे इन मरिम्शो पतीके रे खतम दुम्तीनी।

2 परमप्रभु आ लोव्र मेको कली दंशा, परमप्रभु यावे गे लेतीन। मिनु गेपुकीमी मेको कली “आंड पाप नेल्ल क्याम्दीने! आंड कली शिशी पा ब्रने। गो इन नें ठेयब सेलनीकी। हिबू १३:१५

3 अम्सुर डा मुरपुकीमी आंड कली प्रोडने मचाप्नीम। गोपुकी लडाइ पथ शारा डोइश्शा मगाक्नीकी। मिनु गो आंम सेल्शो थोवक कली “इ परमप्रभु” दे गेनायो मदेनीकी। मारदे हना रोम रोडक्चपुकीमी इन शिशी ताडनीम” दे परमप्रभु कली देनीन।

4 मिनु परमप्रभुमी “गो इन नोले शोडसीशो माफ गेनुड। गो इन कली शुश शिशी पा दाक्नुड। मारदे हना मुल इन कली तशा मगाडक्नुड।

5 गो इस्राएल कली सीत खोदेशो दुम्नुड। मेको लिली फू खोदेशो पा बोडक्ब। लेबानोन डा लाइश्शो रवा खोदेशो पा मेकोमी शाक्श थोक्ब।

6 मेको आ राशी लाइश्शो दुम्नीम। मेको आ दारस तेल रवा खोदेशो दुम्ब। मेको आ ब्रोवशो रिना लेबानोन डा लाइश्शो रवा खोदेशो दुम्ब।

7 मुरपुकी लेशा मेको आं वांकुमी बाक्नीम। मेकोपुकीमी लेशा अन्न खुम्नीम। मिनु अडगुर खोदेशो पा बोडक्नीम। मिनु मेको आन नें लेबानोन डा अडगुर शांबु खोदेशो पा ठेयब दुम्ब।

8 एफ्राइम डा मुरपुकी, मूर्तिपुकी नु गो आं के मार गेय बाक्बा डा? गो इन कली लोव्र लेत्नुड। मिनु इन कली कोव्रनुड। गो तोव्रशी रवा खोदेशो पा गिग बाक्नुड। इ फल फुल सित्वा आं सक्ति रे जाक्ब।

9 सु जोक्ब तुडक्ब बाक्बा, मेकोमी एको लोव्र तुडक्तल। सु के रुब्ब थुं बाक्मे, मेकोमी एको लोव्र रुबल। परमप्रभु यावे आ लां ठीक बाक्नीम। मिनु ठीक पाइबपुकी मेको आ लांमी गाक्नीम। तन्न आ देशो मटीबपुकी मेको आ लांमी दाइल पाइसीनीम” दे परमप्रभुम दैत।

## योएल

**ब्रेकब मुर:** योएल आ ने आ अर्थ “परमप्रभु यावे, परमप्रभु बाकब” देशो बाकब। मेको आ आफ पेशुएल आ पबर्म मारेड मतुंडसीब। योएलम यहूदा राज्यमी परमप्रभु आ लोत्र पशो बाकत।

**गेना ब्रेकशो:** मुर काम अथाल्याहम आंम कली पिपीम सेल्सेनु, पिप आ तौ योआश चढेब येहो-यादाम परमप्रभु आ खिंम खुडशशा वोडशशो ना, ८०० बि. सी.म खोदेशो एको किताब ब्रेकशो बाकब, दे मिन्मीम।

**मार ब्रेकशो:** मालेपुकीमी इस्राएल रागी कली निक्शी खेयप रागी नेल्ल खतम सेल्लेकम। रेड मयितीके परमप्रभु यावे आ गेशो सजाड बाकत। मोपतीके योएलम मुर आन कली परमप्रभु यावे गे लेतीन। परमप्रभु यावेम आ गे लेशशो मुर आन कली माफ गेब। योएल २:१३ आन साम्शो नेल्ल लेप्ब। योएल २:२५ योएलमी “इस्राएली ला ममाड, अर्को रागी डा मुरपुकीमी यो, परमप्रभु यावे आ श्येत रे प्रॉडशो तने चाप्नीम” देशो बाकब।

सल्हा मालेमी श्येत गेशो

- 1 परमप्रभु यावेमी पेशुएल आ तौ योएल कली देशो लोत्र एको बाकब।
  - 2 मिनु मेको लोत्र मार बाकत देशा हना “गे खाल्पापुकी, एको लोत्र नेनीन। रागीम बाकब मुर नेल्ल इन नोफा दाडशशा नेनीन। मार, इन ब्रॉडतीक नाक्ती नु इन किकी पिपी आन ब्रॉडतीक नाक्तीम ओदेशो दुम्शो बाकमे?
  - 3 गे एको लोत्र इन तमी तौ आन कली देनीन। मिनु इन तमी तौपुकीमी आन तमी तौ आन कली देंपतीन। मिनु मेकोपुकीमी आन चय युड आन कली देंमल।
  - 4 घांस खोडशशा ब्वाडब मालेपुकीमी मार मार प्रोन्मे, मेको लेस्वा मालेपुकीमी नेक्तेकम। मिनु लेस्वा मालेपुकीमी मार मार प्रोन्मे, मेको तोडले मालेपुकीमी नेक्तेकम। मिनु तोडले मालेपुकीमी मार मार प्रोन्मे, मेको सल्हा मालेपुकीमी नेक्तेकम। योएल २:२५
  - 5 मिनु गे दुक्शा बाकबपुकी सेंसीशा, डाक्कीन। मिनु अडगुर शांबु तूशा दुक्ब नेल्ल नक अडगुर शांबु आ पबर्म रोंका पने। मारदे हना मेको इन शांबु रे रेंडसीशो बाकब।
  - 6 टेयब रागी डा मुरपुकी आं रागीम ओव्रतेकम। मेको सक्ति पाडशशो नु हिकने मचाप्चा डा पा शुश बाक्नीम। मेको आ खुड गुप्स आन खुड खोदेशो बाक्नीम। मिनु मेको आन लाडशशो खुड, छाउरी गुप्स आ खुड खोदेशो बाक्नीम। योएल २:२
  - 7 मेकोपुकीमी आं अडगुर रू खतम पोक्शा, आं फोत्रशी रवा नेल्ल तिम्शा चेल्लेकम। मेकोपुकीमी मेको आन कोक्ते नेल्ल थुरशा, ताडक्ताकम। मेको आन राशी नेल्ल बुश दुम्तेकम।
  - 8 मिनु कन्ने मीश आलमी अरन्डी फेक्शा, आ ग्युंवे पचशो वोंडश आल आ पबर्म दोपा रोंका पाडबा, मोपा रोंका पने।
  - 9 अन्न चढेतीके नु तूचा थोत्रक चढेतीके परमप्रभु यावे आ खिंमी चढेचा देक्शो बाकब। परमप्रभु यावे आ डोंडती गेय पाडब चढेबपुकी रोंका पाडनीम। योएल २:१४
  - 10 मिनु रू नेल्ल श्येत्य दुम्शो बाक्नीम। खप रोंका पाडब। मारदे हना अन्न नेल्ल खतम दुम्शो बाकब। अडगुर आ रस सोव्रत। तेल रवा आन फल सोव्रतेकम।
  - 11 गे रूम गेय पाडबपुकी सुर्ता पने। अडगुर खुम्बपुकी रोंका पने। क्योव्रज चेरब आ पबर्म यो रोंका पने। मारदे हना बाली नाली खतम दुम्शो बाक्नीम।
  - 12 अडगुर बोट सोल सुल बेक्तेकम। फोत्रशी रवा यो सोव्रतेकम। अनार, खजूर, स्याउ रवा नु रू डा रवा नेल्ल सोव्रतेकम। थमा पा, मुर आन दातेमी मुर आन ग्येरतीक थुं यो मेको खोदेशो पा नुप्शो बाकब।
  - 13 चढेबपुकी, सुर्ता पा अरन्डी फेक्शा रोंका पने। चढेतीकेमी गेय पाडबपुकी रोंका पने। आं परमप्रभु आ गेय पाडबपुकी, नाकदो यो सुर्ता पा अरन्डी फेक्शा बाक्कीन। मारदे हना इन परमप्रभु आ खिंमी अन्न चढेतीके नु तूचा थोत्रक चढेतीके देक्शो बाकब।
  - 14 मिनु माडजा बाक्चा कली मुर आन कली खुप्तीन। परमप्रभु यावे आ खिंम रागीम बाकब मुर नेल्ल बुक्शा, खाल्पा आन कली ब्रेत्तीन। गे खाल्पा नु मुर आन कली परमप्रभु यावे, इन परमप्रभु आ खिंम पुक्कीन। मिनु परमप्रभु यावे कली टेयब सेंदा पा ‘वारच पाडक्की’ दे पुनीन” देत। भजन संग्रह १०४:१०,११; योएल २:१५
- योएलमी रोंका पशो
- 15 मिनु योएलमी “परमप्रभु यावे आ जाक्चा चिकशो नाक्त आ पबर्म आबी आबी, मारदे हना मुल मेको नाक्त जाकब। नेल्ल क्येडा सक्ति पाडशशो खतम पोक्तीके जाकब। योएल २:१; यसैया १३:६
  - 16 मार, इ जचा थोत्रक इ डोंडती रे मरोडक्से डा? मार, ग्येरशा सोम्शा बाक्तीके आंइ परमप्रभु आ खिं रे मयोल्म डा? ब्यवस्था १६:३१
  - 17 वांचेर नेल्ल खप आगाम सोव्रशा रोम्शा लीतेकम। अन्न वोडक्तीक खिं ब्रेशो बाक्नीम। अन्न वोडक्तीक श्येत्य दुम्तेकम। मारदे हना अन्न मदुम।
  - 18 मिनु बस्तु भाव रोंका पाडनीमी। बी ब्यफ जोतीक मबाक्तीके हिरना हिरन बाक्नीम। क्यारश भेडा आन हुल यो श्येत जशो बाक्नीम।
  - 19 परमप्रभु यावे, गो इन कली वाड ब्रेशशा थोडनुड। मारदे हना बी ब्यफ नु क्यारश भेडा आन जोतीके मीम नेक्शो बाकब। मिनु मीम रू डा रवा नेल्ल नेक्शो बाकब। योएल २:३

20 मिनू ब्वाकी डा जन्तुपुकीमी यो इन कली थोशो बाक्नीम। मारदे हना खोला सोव्रशो बाक्नीम। मिनू मीम गोरशो रागी डा बस्तु भाव योव्रतीक डा घांस नेल्ल नेक्शो बाक्ब” देंत। भजन संग्रह १०४:१०-११

## 2

परमप्रभुम निसाफ पचा चिक्शो

1 सियोनमी तुराही ताप्पीन। आं डांडामी शुश ग्रीब ताप्तीक ग्रोव्र ताप्पीन। रागीम बाक्ब मुर नेल्ल गिक गिक पा खिंखि पामेक्ल। मारदे हना परमप्रभु यावे आ जाक्शो नाक्त नेक्था जाक्शो बाक्ब। मेको जाक्था चिक्शो बाक्ब। योएल १:१५

2 मेको नाक्ती छिडछिड नु हिंचा डा बाक्ब। मेको थम ठेयब गोस्स नु छिडछिडमी सुम्शो बाक्ब। मिनू ठेयब सक्ति पाइशो लडाइ पाइब आन हुलमी डांडा आन कली क्येर गोस्सुम सुम्शो खोदेशो पा सुम्शो बाक्नीम। मेको मोदेशो डोंइती गेनायो मदुम्शो बाक्त। मिनू नोले डा मुर आन पालाम यो मोदेशो गेनायो मदुम्ब। योएल १:६; प्रस्थान १०:१३-१५

3 मेको आन डोंइती मीम मारेड मारेड नेक्ब। मिनू मेको आन नोनोले मी ब्राइब। मेको आन डोंइती रूपुकी एदेन डा फल फुल रू खोदेशो बाक्नीम। मेको आन नोले गोरशो रागी खोदेशो दुम्नीम। मेकोपुकी रे मारेड मब्रांडनीम। योएल १:१९

4 मेको आन कुल शारा आन कुल खोदेशो बाक्नीम। लडाइ पाइब शारा डोइक्ब खोदेशो पा बारनीम।

5 मेकोपुकी बग्गी दोरशो रेयके खोदेशो पा पहाड तार दोरनीम। मीम आइक्च शी दाक्शो खोदेशो पा रेयके पाइनीम। मेकोपुकी सक्ति पाइशो लडाइ पाइब आन हुलमी लडाइ पचा चिक्शो खोदेशो बाक्नीम।

6 मिनू जात जात डा मुर मेको आन कली तशा हिंशा, आन कुल राव किकपाइक्नीम।

7 मेकोपुकी लडाइ पाइबपुकी खोदेशो पा बारशा, गारो डोंइसीनीम। मेको का का पा आन गाक्शो लां मप्रोंइथु, आन लांम गाक्नीम।

8 मेकोपुकी मचुमुथु गाक्शा, लां का खोइक्नीम। मिनू या कुरशो आन जोरी सत्रु आन हुलम ओव्रनीम। मिनू सुइमी मेको आन कली तेक्ने मचाप्नीम।

9 मेकोपुकी सहर कली लडाइ तोचा कली गारो तार दोरनीम। मेकोपुकी खिं डा डेल रे खुइ खोदेशो पा ओव्रनीम।

10 मिनू मेको आन डोंइती रागीम खिनु कुइब। सरीड हिम्सीब। नां नु तास्ला छिडछिड दुम्नीस। मिनू सोरुलमी आन हाम्सो मकोंइनीम। योएल ३:४; यसैया १३:१०

11 मिनू परमप्रभु यावे आ लडाइ पाइब आन डोंइती ठेयब सेंदा पा लोत्र पाइब। मेको आ लडाइ पाइब सक्ति पाइशो नु शुश बाक्नीम। मिनू मेको आ देशो टीब हिक्ने मचाप्चा डा बाक्नीम। परमप्रभु यावे आ निसाफ पतीक नाक्ती ठेयब नु थम हिंचा डा बाक्ब। मेको सुम फाल्ने चाप्नीमी डा?

परमप्रभुमी “आं गे लेतीन” देशो

12 परमप्रभु यावेमी “इन थुं नेल्लेमी आं गे लेतीन। गे माइजा बाक्शा, डाक्शा नु रोंका पा आं गे लेतीन। इजीकीएल ३३:११

13 गे रोंका पा इन वा मखाक्कीन। इन थुं खाक्कीन। गेपुकी परमप्रभु यावे, इन परमप्रभु गे लेतीन। मारदे हना मेकोमी शिशी पा दाक्ब। मेको रीब पा मगाइक्ब। गेना हना यो दाक्ब नु रीब पा सजाइ मगेब बाक्ब। प्रस्थान ३४:६

14 मिनू परमप्रभु यावेमी आ थुं लेशशा, सजाइ मगेथु, आसीक गेबा कों? मेको सुम तुइक्बा डा? मिनू गेपुकीम परमप्रभु यावे, इन परमप्रभु कली अन्न चढेतीक नु तूचा थोव्रक चढेतीके चढेने। योना ३:९

15 सियोनमी तुराही ताप्पीन। माइजा बाक्था कली मुर आन कली खुप्तीन। मिनू चाड मानेचा कली मुर आन कली ब्रेत्तीन। योएल १:१४

16 मुर नेल्ल आन कली खुप्तीन। बुक्शो मुर नेल्ल आन कली परमप्रभु यावे आ डोंइती ठीक सेलीन। खाल्पा आन कली खुप्तीन। आल आन कली खुप्तीन। दूध तूब आल आन कली यो खुप्तीन। ग्युम्ले आ कोठा रे गूल। मिनू ग्युम्ली आ बाक्तीक रे जाक्ल।

17 परमप्रभु यावे आ डोंइती गेय पाइब चढेबपुकी परमप्रभु यावे आ खिं डा पिंडी नु चढेतीक आ दातेम डाक्मल” देंत। मेकोपुकीमी “परमप्रभु यावे इन मुर आन कली सजाइ मगेने। रागी रागी डा मुर आन डोंइती इन मुर आन कली शुक्शी नु तोक्शा लोत्र पाइक्तीक दुम्चा मगेने। मिनू जात जात डा मुरपुकीमी ‘मार, मेको आन परमप्रभु ते बाक्म?’ देंचा मतामेक्ल” देंतेक्म। भजन संग्रह ७९:१०

परमप्रभुमी लोत्र लेशशो

18 मिनू परमप्रभु यावेमी आ रागी आ परबंम रुश पा, आ मुर आन कली शिशी पाप्तु।

19 मिनू परमप्रभु यावेमी आ मुर आन कली मिग्शा “गो इन कली अन्न, अडगुर शांबु नु तेल सोइक्नन्नी। मिनू गे रूनीनी। मिनू गो इन कली रागी रागी डा मुर आन दातेमी गेनायो शुक्शी पाइक्तीक दुम्चा मगेनन्नी। योएल २६:२७

20 गो उत्तर रे जाक्शो लडाइ पाइब आन कली इन क्येडा डोन खेरनुडमी। गो मेको आन कली कोक्त। मुल गोरशो रागीमी खेरनुडमी। मेको आन डोंइती डा हुल आन कली पूर्व डा समुन्द्र गे नु मेको आन नोले डा हुल आन कली पच्छिम डा समुन्द्र गे खेरनुडमी। मिनू मेको आन राक्शो रिना इर गे लाइब” दे परमप्रभुमी देंत। मेकोमी थमा पा ठेयब गेय पशो बाक्ब।

21 रागी डा मुर महिनीन। गे ग्येरशा सोम्सीशा बाक्कीन। परमप्रभु यावेमी ठेयब गेय पशो बाक्ब।

22 गे ब्वाकी डा जन्तु महिनीन। मारदे हना गोरशो रागी डा योव्रतीक गिगी दुश्शो बाक्ब। रवाम फल सित्नीम। फोव्रशी रवा नु अडगुर आ बोटमी शुश फल सित्नीम।

23 गे सियोन डा मुरपुकी ग्येरसीन। गेपुकी परमप्रभु यावे, इन परमप्रभु आ पर्वम शुश ग्येरसीन। मारदे हना मेकोमी आ ठीक पतीकेम इन कली डोंडती डा रेउ गेशो बाक्त। मेकोमी इन कली शुश रेउ गेशो बाक्त। डोंडती नु नोले डा रेउ डोंडती खोदेशो पा गेशो बाक्त। येरमीया ५:२४

24 मिनु खलापुकी अन्नमी ब्रीनीम। गरपुकी नक अडगुर शांबु नु तेलम ब्रीशा क्युप्नीम।

25 परमप्रभु यावेमी “गो इन कली लेस्वा माले, तोडले माले, सल्ला माले नु घांस खोडशशा ब्वाडब माले आन नेक्शो नेल्ल लेशशा गेनन्नी। मेको आं सोडशशो लडाइ पाडबपुकी बाक्तेकम। गो मेको आन कली इन दातेमी सोडक्ताकडमी। योएल १:४

26 मिनु गे शुश जचा तशा रूनीनी। मिनु इन पर्वम छक लाक्चा डा गेय पाडब परमप्रभु यावे, इन परमप्रभु आ नें ठेयब सेल्चा माल्नीनी। मिनु आं मुरपुकी लेंशा गेनायो मुने मदोक्नीम। ब्यवस्था ८:१०

27 गो इस्त्राएली आन दातेमी बाक्शो बाक्नुड। गो परमप्रभु यावे, इन परमप्रभु नड। आं क्येडा लाक्शा, अर्को परमप्रभु मबाक्ब, दे गे तुडक्चा माल्नीनी। मिनु आं मुरपुकी लेंशा गेनायो मुने मदोक्नीम।

परमप्रभु आ सोक्त मोडक्तीके

प्रेरित २:१६-२१

28 मिनु नोले गो आं सोक्त मुर नेल्ल आन तार मोडक्नुड। मिनु इन तमी तौपुकीमी आं लोत्र पाडनीम। इन खाल्पापुकीमी डोमु ताडनीम। मिनु इन वोंडश आलपुकीमी आं कोंडशो ताडनीम। गन्ती ११:२९; यसैया ४४:३; इजीकीएल ३९:२९; तीतस ३:५-६

29 मेको नाक्ती गो वाइलीम वाइल आन तारी यो आं सोक्त मोडक्नुड।

30 गो सरीड नु रागीम चिन्ड कोंडनुडमी। हुश, मी नु कुन के थाम कोंडनुडमी। होसे ७:१

31 परमप्रभु यावे आ ठेयब हिंचा डा नाक्त जाक्चा क्येडा डोंडती नां छिडछिड दुम्ब। मिनु तास्ला हुश दुम्ब” देशो बाक्ब। योएल २:२, १०, ११; मत्ती २४:२९; प्रकाश ६:१२

32 मेना परमप्रभु यावे आ नें थोडब नेल्ल ब्रोंडचा ताडनीम। मारदे हना परमप्रभु यावेमी देशो खोदेशो पा सियोन डांडा नु यरूसलेममी परमप्रभु यावेमी ब्रेशशोपुकी ब्रोंडचा ताडनीम। मिनु मेको प्रोंडशो आन दातेमी परमप्रभु यावे आ योत्रशो मुर बाक्नीम। रोमी १०:१३; ओबदिया १७

### 3

मुर आन कली निसाफ पशो

1 परमप्रभु यावेमी “मेको नाक्ती गो यहूदा नु यरूसलेम आस रिम्शो दुम्तीक नाक्ती लेशशा चाक्नुड। होसे ७:१

2 मिनु गो रागी रागी डा मुर नेल्ल आन कली खुप्शा, येहो-शाफात आ दिम्मी चाक्नुडमी। मिनु मेकेर मेको आन कली निसाफ पाडनुड। मारदे हना मेकोपुकीमी आं मुर आन कली रागी रागी डा मुर आन दातेमी ब्रपाडक्तेकम। मिनु आं रागी भाग भाग सेल्लेकम।

3 मेकोपुकीमी आं मुर आन पर्वम फेन्टे ग्यारतेकम। मिनु वोंडश आल लेयशा, तेल्लेम नु लाम्तेकम। मीश आल आन कली लेयशा, अडगुर शांबु तूतेकम।

4 टायर, सीदोन नु पलिस्ती आन रागी डा मुरपुकी आं कली मार पाडनीनी डा? मार, आं पशो आ पर्वम आं कली क्येक्क लेल्तीनी? गेपुकीमी आं कली क्येक्क लेल्ताक्नी हना, गो मेको रीब पा इन पिया तार मोडक्नुड।

5 मारदे हना गे आं सुन, चांदी नु थम रिम्शो थोत्रक नेल्ल इन दरवारम लाइक्तीनी।

6 मिनु गे यहूदा नु यरूसलेम डा मुर आन कली मेको आन रागी रे लाइशशा, ग्रीस डा मुर आन कली लेयतीनी।

7 मुल गो मेको आन कली लेयशो रागी रे थुंडशा, चाक्नुडमी। मिनु गो इन श्येत गेशो लेंशा इन पिया तार मोडक्नुड।

8 मुल गो इन तमी तौ आन कली यहूदा डा मुर आन कली लेयनुडमी। मिनु मेकोपुकीमी मेको आन कली डोन साबा रागी डा मुर आन कली लेयनीम” दे परमप्रभु यावेमी देशो बाक्ब।

9 मिनु परमप्रभुमी “एको लोत्र रागी रागी डा मुर आन दातेम नेंपतीन। लडाइ पचा कली ठीक दुमीन। लडाइ पाडब आन कली ब्रेल्तीन। बुक्तीक आ नेक्था जाक्चा माल्नीम।

10 गे इन फाली शोल्शा, तुप्शा तरवार सेलीन। मिनु इन गुये तुप्शा, तूतीक भाला सेलीन। मिनु गे हिंच मुरपुकीमी ‘गो बोल्यो लडाइ पाडब नकी’ देनीन। यसैया २:४

11 एर ओंथ बाक्शो रागी रागी डा मुर नेल्ल रीब पा जाक्कीन। गे नेल्ल मेकेर खुम्सीन। परमप्रभु यावे, इन बोल्यो लडाइ पाडब आन कली उड यितीन।

12 मिनु रागी रागी डा मुर नेल्ल जोंब बोक्शा, खुम्सीशा येहो-शाफात आ दिम्मी लमल। मारदे हना गो एर ओंथ डा रागी डा मुर नेल्ल आन कली निसाफ पाडनुड।

13 मिनु इन गुयेमी रिक्चा ठीक दुमीन। मारदे हना बाली नाली खुप्ची जाक्शो बाक्ब। मिनु ओत्रशा अडगुर खाक्कीन। मारदे हना कोल ब्रीशो बाक्त। गर ब्रीशा क्युप्शो बाक्नीम। मेको खोदेशो पा आन मरिम्शो पशो शुश दुम्त। प्रकाश १४:१५; यसैया ६३:३, ६; प्रकाश १४:१८

14 मिनु निसाफ पतीक दिम्मी शुश मुर जाक्स डा जाक्स बाक्नीम। मारदे हना मेको दिम्मी परमप्रभु यावे आ निसाफ पतीक नाक्ती जाक्चा चिक्शो बाक्ब।

15 नां नु तास्ला छिडछिड दुम्नीस। मिनु सोरुलपुकीमी आन छेडछेड मकोडनीम” दैत। योएल २:१०; योएल ३:४



16 परमप्रभु यावेम सियोन रे ठेयब सेंदा पा लोत्र पाइब। यरूसलेम रे पा आ सेंदा नेंपाइक्ब। सरीड नु रागी खिंखि पाइनीस। तन्न परमप्रभु यावे आ मुर आन कली खुइशशा बाक्तीक नु इस्राएल डा मुर आन कली बोल्यो ब्रोंइशा बाक्तीक दरवार दुम्ब। आमोस १:२

परमप्रभु सियोनम बाक्ब

17 “गो, परमप्रभु यावे, इन परमप्रभु आं डांडा सियोनम बाक्नुड, दे गे तुइक्नीनी। मिनु यरूसलेम आं के दुम्ब। मिनु रागी रागी डा मुर मेको सहर डा लां रे पा मलाक्नीम। इजीकीएल ३४:३०

18 मेको नाक्ती डांडाम शुश अङ्गुर सिल्तीम। मिनु पहाडम दूध शुश बाक्ब। यहूदा डा खोला नेल्लेमी ब्वाक्कु शाइक्नीम। मिनु परमप्रभु यावे आ खिं रे पा ब्वाक्कु बुक्तीके शितीम डा दिंम जिप्पाइक्ब। आमोस ९:१३; इजीकीएल ४७:१

19 मिनु यहूदा डा दोस मताइब मुर आन कली मरिम्शो पतीके नु हुश खाक्श पोक्तीके इजीप्त रागी मुर मबाक्तीके दुम्ब। मिनु एदोम चहिं कोक्त रागी दुम्ब।

20 तन्न यहूदा रागीम गेना हना यो मुर बाक्नीम। मिनु यरूसलेम नेल्ल पाला डा मुर आन कली दुम्ब। ओबदिया १०:-

21 गो मेको आन हुश खाक्श पोक्शो क्येक्क लेत्नुडमी। मिनु आन पाप मक्याम्नुड” दे परमप्रभुमी देंत। परमप्रभु यावे सियोनम बाक्ब। ब्यवस्था ३२:४३; इजीकीएल ४८:३५

## आमोस

**ब्रेकब मुर:** आमोस आ नें आ अर्थ “कुरब मुर” बाकब। एको किताब मेकोमीन ब्रेकशो बाकब। आमोस ७:८; आमोस ८:१-२

**गेना ब्रेकशो:** आमोस यहूदा रागी डा बाकत हना यो, उत्तर रागी, इस्राएल डा मुर आन कली “होस पा बाक्कीन” देंत। परमप्रभु यावेमी मेको कली सोइशो बाकत। मेकोमी यहूदा डा पिप उज्जीयाह ७९२-७४० बि. सी. नु इस्राएल, उत्तर रागी डा पिप येरोबाम ७९३-७५३ बि. सी. क्येडा डोंइती ब्रेकशो बाकत। मेको उत्तर रागी रे खेरचा पुंडसे नोले ब्रेकशो बाकब, देंनीम।

**मारदे ब्रेकशो:** आमोसमी मुर आन मरिम्शो पतीके आ पर्वम ब्रेकशो बाकब। मेना शोप पाइशो वोंइश मुर नु मीश मुर आन शुश जचा तूचा, दूली निसाफ पचा नु पुडग आन कली दिप्चा आ पर्वम ब्रेकशो बाकब। आमोसमी मेको आन कली हिंचा डा सजाइ ताइनीम, दे ब्रेकशो बाकब। मिनु मेको सजाइ मार बाकब, दे यो ब्रेकशो बाकब। तन्न नोले श्येत रे प्रॉइतीक आ पर्वम यो ब्रेकशो बाकब। आमोस ४:१; ६:४-६ आमोस ७:१-९; आमोस ८:१-१४; आमोस ९:१-६; आमोस ९:७-१५

सजाइ ताइब रागी

1 एको आमोस आ लोत्र बाकब। आमोस तेकोहा सहरमी बाकब गोठला आन दाते डा का बाकत। परमप्रभु यावेमी मेको कली इस्राएल आ पर्वम लोत्र कोंइताकव। मेना यहूदा डा पिप उज्जीयाह नु इस्राएल डा पिप योआश आ तो येरोबाम बाकताकस। एको खिनु कुचा क्येडा बर्स निक्शी डोंइती डा लोत्र बाकब। आमोस ७:१४; २राजा १५:१; जकरिया १४:५; २राजा १४:२३

2 मिनु मेकोमी “परमप्रभु यावे सियोन रे ठेयब सेंदा पा ग्रीब। मेकोम यरूसलेम रे पा ठेयब सेंदाम लोत्र पाइब। गोठला आन बी ब्यफ आन जोतीक रू नेल्ल सोत्रब। मिनु कारमेल डांडा आ डर यो सोत्रब” देंत। येरमीया २५:३०; योएल ४:१६

दमस्कस कली सजाइ गेशो

3 मिनु परमप्रभु यावेमी मार देंत देंशा हना “गो दमस्कस आ ३ खेयप नु ४ खेयप मरिम्शो पशो आ पर्वम ततीके सजाइ मतेक्नुड। मारदे हना मेकोपुकीमी गिलाद डा मुर आन कली फलाम के खुइ पाइशो दांदिमी दांड पांतेकम। यसैया १७:१-३

4 मोपतीके गो हजाएल आ खिंमी मी सुइक्नुड। मेकोमी बेन-हादाद आ बोल्यो दरवार नेल्ल खतम पोक्ब।

5 गो दमस्कस डा ठेयब लाप्यो डा आगलो जिक्नुड। मिनु आवेन माइशो दिंम बाकब मुर नेल्ल आन कली नु बेथ-एदेन डा पिप कली क्याम्नुडमी। अराम डा मुर आन कली ग्याइक्पाइशो कीर सहरमी लाइक्पाइक्नुडमी” दे परमप्रभु यावेमी देंत। २राजा १६:९

गाजा कली सजाइ गेशो

6 मिनु परमप्रभु यावेमी “गो गाजा आ ३ खेयप नु ४ खेयप मरिम्शो पशो आ पर्वम ततीके सजाइ मतेक्नुड। मारदे हना मेकोमी शुश मुर आन कली ग्याइशो लाइशो एदोम आ गुइमी लेयतु। २इतिहास २१:१६-१७; २इतिहास २८:१८; येरमीया ४७:१

7 मोपतीके गो गाजा डा गारोम मी सुइक्नुड। मेकोमी मेको आ बोल्यो दरवार खतम पोक्ब।

8 गो अशदोद सहरम बाकब मुर आन कली नु अशकलोन डा पिप कली क्याम्नुडमी। गो एक्रोन कली युक्नुड। मिनु लीशो पलिस्ती नेल्ल जाम्शा लाइनीम” दे परमप्रभु यावेमी देंत।

टायर कली सजाइ गेशो

9 मिनु परमप्रभु यावेमी “गो टायर आ ३ खेयप नु ४ खेयप मरिम्शो पशो आ पर्वम ततीके सजाइ मतेक्नुड। मारदे हना मेकोमी शुश मुर आन कली एदोम आ गुइमी गेप्टु। मिनु आंम लोकब आन दातेम पशो कबल प्रेंताकव। यसैया २३:-; योएल ४:४; १राजा ५:२६

10 मोपतीके गो टायर डा गारोम मी सुइक्नुड। मिनु मेकोमी मेको आ बोल्यो दरवार खतम पोक्ब” दे परमप्रभु यावेमी देंत।

एदोम कली सजाइ गेशो

11 मिनु परमप्रभु यावेमी “गो एदोम आ ३ खेयप नु ४ खेयप मरिम्शो पशो आ पर्वम ततीके सजाइ मतेक्नुड। मारदे हना मेकोमी शिशी मपथु, आ लोकब आन कली तरवार शेशा, खेदा पाप्टु। मेको आ गाइशो गेना हना यो लीशा, ईख कुरशा बाकत। ओबदिया १०:-; ब्यवस्था २३:८; येरमीया ४९:७

12 मोपतीके गो तेमानम मी सुइक्नुड। मेकोमी बोजा डा बोल्यो दरवार खतम पोक्ब” दे परमप्रभु यावेमी देंत।

अम्मोन कली सजाइ गेशो

13 मिनु परमप्रभु यावेमी “गो अम्मोन आ ३ खेयप नु ४ खेयप मरिम्शो पशो आ पर्वम ततीके सजाइ मतेक्नुड। मारदे हना मेकोपुकीमी गिलाद डा आल कुरशो मीश मुर आन कोत्रज तरवारम चेततेकम। मेको आन रागी ठेयब सेल्चा कली मो पांतेकम। येरमीया ४९:१-६

14 मोपतीके गो रब्बाह डा गारोम मी सुइक्नुड। मेकोम आन बोल्यो दरवार खतम पोक्ब। मिनु लडाइ पाइबपुकी शुश रेयके पा, फश गिवार खोदेशो पा जाक्शा, मेको आन कली खतम पोक्नीम।

15 मेकेर डा पिप नु मेको आ ठेयब गेय पाइब मुर नेल्ल ग्याइशो लाइक्चा पुंडसीनीम” दे परमप्रभु यावेमी देंत।

## 2

मोआब कली सजाइ गेशो

1 परमप्रभु यावेमी “गो मोआब आ ३ खेयप नु ४ खेयप मरिम्शो पशो आ पर्वम ततीके सजाइ मतेक्नुड। मारदे हना मेकोमी एदोम डा पिप आन रुश चोप्टु। यसैया १५:३; येरमीया ४८:-

2 मोपतीके गो मोआब रागीम मी सुइक्नुड। मेकोमी गारो हिरशो केरयोथ डा बोल्यो दरवार खतम पोक्ब। मिनु मोआब डा मुर लडाइ, शुश रेयके नु तुराही ग्रीशोम बेक्नीम।

3 गो मेको आ सासन पाइब नु मेको आ ठेयब गेय पाइब नेल्ल आन कली मेको नु काथा साइक्नुडमी” दे परमप्रभु यावेमी देंत। गन्ती २४:१७

यहूदा कली सजाइ गेशो

4 मिनु परमप्रभु यावेमी “गो यहूदा आ ३ खेयप नु ४ खेयप मरिम्शो पशो आ पर्वम ततीके सजाइ मतेक्नुड। मारदे हना मेकोपुकीमी परमप्रभु यावे आ अरेशो लोव्र मटीम। आ फुल्लुम मुशा ब्रेक्शो लोव्र मपाम। मेकोपुकीम आन किकी पिपीम खोदेशो पा जोल लोव्र थमा सुइश्शा हेंथे गाक्तेक्म।

5 मोपतीके गो यहूदा रागीम मी सुइक्नुड। मेकोमी यरूसलेम डा बोल्यो दरवार खतम पोक्ब” दे परमप्रभु यावेमी देंत। होसे ८:१४

इस्राएल कली सजाइ गेशो

6 मिनु परमप्रभु यावेमी “गो इस्राएल आ ३ खेयप नु ४ खेयप मरिम्शो पशो आ पर्वम ततीके सजाइ मतेक्नुड। मारदे हना मेकोपुकीमी ठीक पाइब आन कली चांदी के क्येटीम नु मारेइ मथीब आन कली जोर का चेपल ताक्शा लेयतेक्म। आमोस ८:६

7 मिनु पुडग आन पिया फुरकुम खोल्ला दिम्नीम। श्येत जाइब आन कली नेप्शा गुंडनीम। पोबु निम्फा मीश आल का नु बाक्शा, आं नें ग्रांग्रा दिशो सेल्नीम। आमोस ८:४

8 मेको आन देवता थानम जाकटी चोइश्शो वा तार बाक्शा, सजाइ आ पा डा थाप्शो क्येटीम, अडगुर शांबु ग्याप्शा तूनीम। प्रस्थान २२:२५

9 गो मेको आन डोंडती रे एमोरी आन कली साइक्तामी। मेकोपुकी लेबानोन डा लाइश्शो रवा खोदेशो लाइश्शो नु बोल्यो बाक्तेक्म। गो मेको आन इर डा फल नु उइ आगा डा शाक्श नेल्ल खतम सेल्ला। गन्ती २१:२१-२८

10 मिनु गो इन कली एमोरी आन रागी गेचा कली इजीप्ट रागी रे गुंइशा ४० बर्स सम्म गोरशो रागीमी लां कोइशा गाक्पाइक्तन्नी।

11 गो इन वोंइश आल आन दाते डा का निक्शी आन कली आं लोव्र पाइब सेल्चा कली कोल्पाइक्तामी। इन तौ आन दाते डा का निक्शी आन कली नाजिरी दुम्पाइक्चा कली कोल्पाइक्तामी। ए इस्राएल डा मुरपुकी, मार एको लोव्र थमा ममाइ डा?” दे परमप्रभु यावेमी देंत। गन्ती ६:२-१३

12 मिनु परमप्रभु यावेमी “तन्न गे मेको नाजिरी दुम्शो मुर आन कली अडगुर शांबु तूपाइक्तीनी। आं लोव्र पाइब आन कली ‘परमप्रभु यावे आ लोव्र मपने’ दे माइक्तीनी। आमोस ७:१३, १६; येरमीया ११:२१

13 मोपतीके गो इन बाक्तीकेमी बाक्शा, इन कली बाला सुन्दा नलम ब्रीशो बग्गी दोपा हिम्बा, मोपा हिम्पाइक्तन्नी।

14 थाम्पा दोरबपुकी प्रोक्चा मताइनीम। मिनु बोल्यो मुर आन बोल जाम्शा लाइब। सक्ति पाइश्शोपुकीम यो आंम कली प्रोंइने मचाप्नीम।

15 लिब्रा आप्बपुकी राप्ने मचाप्नीम। फेरर पा दोरबपुकीमी यो आंम कली प्रोंइने मचाप्नीम। मिनु शारा डोइक्बपुकीम यो आंम कली प्रोंइने मचाप्नीम।

16 मेको नाक्त नेल्ल क्येडा सक्ति पाइश्शो आन दाते डा ठेयब थुं पाइश्शोपुकी शिन्ना प्रोक्नीम” दे परमप्रभु यावेमी देंत।

## 3

इस्राएल कली सजाइ

1 इस्राएल डा मुरपुकी, परमप्रभु यावेमी इन पर्वम लोव्र का पाप्टु। मेको लोव्र नेनीन। मेकोमी “एको लोव्र इजीप्ट रागी रे आं चाक्शो खिं डा मुर नेल्ल आन पर्वम बाक्ब।

2 रागी डा खिं खिं डा मुर नेल्ल रे गो इन कली ला योव्रतन्नी। मोपतीके गो इन मरिम्शो पशो आ पर्वम सजाइ गेनुड। ब्यवस्था ४:३४

3 मार, मुर निक्शी मगारसा सम्म काथ काथा गाक्नीसी डा?

4 मार, सिखार मथित्तु हना, ब्वाकीम गुप्स ग्रीबा डा? मार, गुप्स आ चाइक्बम मारेइ मथित्तु मेको आ पुक्खीमी डरर डरर पाइबा डा?

5 मार, खपीम ब्वारद मदाइक्थु, चिक्ब रेप्बा डा? मार, ग्याइक्चा कली मारेइ मबाक्थु, थ्रेम्लु खप रे ग्येत्थ बोक्नीमी डा?

6 मार, तेकोइ सहरमी तुराही ताप्शोनु, मुर महिनीमी डा? मार, सहरम श्येत दुम्मेनु, मेको परमप्रभु यावे आ सोइश्शो ममाइ डा? यसैया ४५:७; बिलाप ३:३७

7 थमा पा, परमप्रभु यावेमी आ लोव्र पाइब आन कली मदेंथु, मारेइ मपाइब। उत्पत्ती १८:१७

8 गुप्स ग्रीशो नेंशा, सु महिबा? परमप्रभु यावे ब्वाक्मेनु, सुम आ लोव्र मपाइबा डा?

सामरीया कली सजाइ

9 'अशुद्धो डो बोल्यो दरवार नु इजीप्त रागी डा बोल्यो दरवार डा मुर आन कली गेपुकी सामरीया डा पहाडमी बुक्कीन। मिनू मेको सहरम दुम्शो ठेयब रेयके नु मुर आन कली श्येत गेशा, दिप्शो कोवडीन' दे मुर आन कली देनीन।

10 मेकोपुकी ठीक गेय पस मजोक्नीम। हुश खाकश पोक्शा नु मार मार रोडशशा खुड पशो आन बोल्यो दरवारम खेक्शा वोडक्नीम" दे परमप्रभु यावेमी देंत।

11 मोपतीके परमप्रभु यावेमी "इ जोरी सत्रुमी इ रागी पुन्नीम। मेकोपुकीमी लडाइ तोवमेनु, गे बुइनीनी। मेकोमी इ बोल्यो दरवार नेल्ल रोडक्नीम" दे परमप्रभु यावेमी देंत।

12 मिनू परमप्रभु यावेमी "दोपा गोठलामी गुप्स आ शोत्र रे भेडा आ खोइल निक्शी कि नोफा आ टुक्रा का ला हना यो रोडक्बा, मोपा सामरीयाम नित्तीक आ कुना नु खाटम बाक्शा यो इसाएल डा मुर प्रॉइचा पुंडसीनीम" देंत।

13 मुर नेल्ल आन परमप्रभु यावेमी "नेनीन, याकूब आ खिं डा मुर आन परबम सांकडी गेन।

14 गो तेको नाक्त इसाएल कली आ मरिम्शो पशो आ परबम सजाइ गेनुडा, मेको नाक्त गो बेथेल डा चढ़ेतीक कली यो सजाइ गेनुड। मिनू चढ़ेतीक डा ग्रीवपुकी बेलशा खपीम दोक्नीम।

15 गो हिंडदमी बाक्तीक खिं नु हुप्शोमी बाक्तीक खिं निम्फा प्रेतनुड। मिनू हात्ती आ दाराम दारशो सेल्शो खिं ब्रेत्नीम। मिनू ठेयब खिंपुकी यो खतम सेलनुड" दे परमप्रभु यावेमी देंत। १ राजा २२:३९; भजन संग्रह ४५:९

## 4

परमप्रभु गे मलेशो

1 सामरीया डा डांडाम बाक्ब, बाशान डा बी खोदेशो दोम्शो मीश मुर, गे पुडग आन कली दिप्नीनी। मारेइ मथीब आन कली फस पोक्नीनी। मिनू इन वॉइश आन कली "आंइ कली तूचा कली मार मार चाक्कीन" देनीनी।

2 परमप्रभु यावेमी आ नेंम कसम जशो बाक्ब। मेकोमी "नेनीन, इन कली कौंडगुम कीशा लाइक्नीम। इन लीशो आन कली बोल्सीमी ब्वेक्शा लाइक्तीक नाक्त जाक्ब।

3 गे नेल्ल का का पा एर आंथ मकोवथु, गारो आ पोवला रे पा लाइनीनी। मिनू गे हारमोन मेर ताइक्चा पुंडसीनीनी" दे परमप्रभु यावेमी देंत। हारमोन हिबू लोव मार बाक्ब, दे मतुडक्नीम।

4 मिनू परमप्रभु यावेमी "बेथेल सहरम लशा, मरिम्शो पने। गिलगालमी लशा, मेको क्येडा यो शुश मरिम्शो पने। सुनी कुस कुस इन चढ़ेतीक चाक्कीन। नाक्त सां सांमी इन १० भाग डा भाग का चाक्कीन। होसे १२:१२; ब्यवस्था १४:२८

5 आं कली 'गे इसाएल डा मुर, रिम्शो पाडब बाक्नीनी' दे बोरब ओरूती सुप्शो शोब्ले चढ़ेपने। मिनू थुंम ग्येरशा चढ़ेतीक आ परबम ठेयब लोत्र पना पन गाक्कीन। मारदे हना गे मोदेशो पचा दाक्नीनी" दे परमप्रभु यावेमी देंत। लेवी २:११

6 मिनू परमप्रभु यावेमी "इन कली, सहर नेल्लेमी श्येतथ कोवज नु शोब्ले जचा मतशो सेलन्नी। मो हना यो गेपुकी आं गे मलेन्नी" दे परमप्रभु यावेमी देंत।

7 मिनू "गो इन अन्न खुप्चा क्येडा महिना सां डोंइती रेड मयिपदु। गो सहर का कली रेड यिपाइक्ता, अर्को सहर कली मयिपदु। मिनू रू कामी रेड यिपाइक्ता, अर्को रूम मयिपदु। मिनू मेको सोवत। १ राजा १७:१

8 मोपतीके मुरपुकी सहर सहर रे ब्वाक्कु तूचा कली सहर काम जाक्तेकम। तन्न रूश्री तूचा मतम। मो हना यो गेपुकी आं गे मलेन्नी" दे परमप्रभु यावेमी देंत।

9 मिनू परमप्रभु यावेमी "गो इन फल फुल रू नु अडगुर रूम सोवतीक नु बुक्शी डाइक्तीक रोड सोइक्ताक्ड। सल्ला मालेमी इन फोवशी रवा नु तेल रवा आन कली नेक्पाइक्तामी। मो हना यो गेपुकी आं गे मलेन्नी। हागै १:११; योएल १:४

10 गो इन दातेम इजीप्त रागी कली खोदेशो पा बेक्चा डा रोड सोइक्ताक्ड। गो इन टिटा आन कली तरवारमी क्योरशा साइक्पाइक्तामी। इन शारा रोडक्पाइक्तामी। इन बाक्तीक डा मरिम्शो रिना इन नें आगाम प्रिंताक्ड। मो हना यो गेपुकी आं गे मलेन्नी" दे परमप्रभु यावेमी देंत। प्रस्थान ९:३

11 मिनू परमप्रभु यावेमी "गो इन दाते डा का निक्शी आन कली सोदोम नु गोमोररा कली खोदेशो पा खतम सेल्ला। गे ब्रशो मी रे पा गुंडशो बुल्सी खोदेशो बाक्तीनी। मो हना यो गेपुकी आं गे मलेन्नी" दे परमप्रभु यावेमी देंत। उत्पत्ती १९:२४-२५; जकारिया ३:२

12 मोपतीके परमप्रभु यावेमी "ए इसाएल डा मुरपुकी, गो इन कली मार पाइनुड देंशा हना, गे इन परमप्रभु, आं कली गुम्चा माल्नीनी।

13 सुमी डांडा आन कली सेला, मेकोमी फश यो सेल्शो बाक्ब। मेकोमी मुर आन कली आ मिम्शो तुडक्पाइक्ब। मेकोमी सुनी कली छिडछिड सेल्ब। मिनू रागी डा लाइशो डांडा मेर गाक्ब। मेको आ नें मुर नेल्ल आन परमप्रभु यावे बाक्ब" देंत। मीका १:३

## 5

इसाएली आन परबम रोंका पशो

1 मिनू आमोसमी "ए इसाएल आ खिं डा मुरपुकी, इन परबम आं रोंका पशो नेनीन।

2 आं मीश आल इसाएल लेशा गेनायो मबोक्चा डा पा गोल्ल। मेको आ रागीमीन प्रॉइचा पुंडसीशो बाक्ब। मेको कली पोक्ब सुइ मबाक्नीम" देंत।

3 मिनू परमप्रभु यावेमी “तेकोड सहर रे इस्राएल आ परबम हजार का जना मुर गूतेकम हना, सहे का जना ला लीनीम। सहे का जना गूतेकम हना, १० जना मुर ला लीनीम” दैत।

दिप्ब आन परबम लोत्र पशो

4 मिनू परमप्रभु यावेमी इस्राएल आ खिं डा मुर आन कली “आं कली मालीन। मिनू ब्रोनीन।

5 बेथेल कली ममालीन। मिनू गिल्याल मलने। बेयर-शेबामी मगाक्कीन। मारदे हना गिल्याल डा मुर थमा पा ग्याइशशा लाइक्का पुंडसीनीम। मिनू बेथेल खतम दुम्ब। आमोस ४:४; होसे ४:१५

6 परमप्रभु यावे कली मालीने। मिनू ब्रोंडचा ताइनीनी। मो मपाइतीनी हना, मेको मी खोदेशो पा गाइशशा योसेफ आ खिम मी सुइक्ब। बेथेल कली खतम पोक्ब। मेको मी कली काप्ब सुइ मबाक्नीम। आमोस ६:१२; यसैया ५:२०

7 गेपुकी ठीक निसाफ कली दूली सेल्नीनी। ठीक पतीक कली खतम सेल्नीनी।

8 सोरुल आन कली सेल्ब, हिंचा डा छिडछिड रे सुनी डा हाम्सो सेल्ब, नाक्ती कली छिडछिड सेल्ब नु समुन्द्र डा ब्वाक्कु कली ब्रेशशा रागीमी मोइक्ब। आं नें परमप्रभु यावे बाक्ब। अट्युब ३८:३१; आमोस ९:६

9 मेकोमी बोल्यो आन कली रीब पा खतम सेल्ब। मिनू आन बोल्यो दरवार खतम दुम्नीम।

10 मेकोपुकीम निसाफ पतीके लाप्चोम निशशा अरेब कली काइ मदाक्नीम। मिनू थमा लोत्र पाइब आन कली ग्रांया दिल्नीम। यसैया २९:२१

11 मारदे हना गे वूडग आन कली दिम्नीनी। मेको आन कली गेन कि गेन, दे शुश अन्न थाप्पाइक्नीनी। गे खोइशशो फुल्लु के खिं सेल्तीनी। तन्न मेकेर बाक्का मताइनीनी। रिम्शो अडगुर रू सेल्तीनी। तन्न अडगुर शांबु तूचा मताइनीनी। सेफन्याह १:१३

12 मारदे हना गो इन शुश मरिम्शो पशो तुइक्नुड। गो इन पाप गिश ठेयब बाक्बा, मेको तुइक्नुड। गे ठीक पाइब आन कली श्येत गेनीनी। घूस ताक्नीनी। निसाफ पतीकेमी मारदे मथीब आन कली नेप्शा गुंडनीनी।

13 मोपतीके निप्स पाइशशो मुर सिक्सी पा बाक्नीम। मारदे हना इस्राएलम काइ मरिम्शो दुम्शो बाक्ब।

14 गे ब्रोंडशा बाक्का कली रिम्शो पचा मालीन। मरिम्शो पचा ममालीन। मिनू मुर नेल्ल आन परमप्रभु यावे गे नु बाक्ब।

15 मरिम्शो पतीक कली काइ मदाक्तीनी। रिम्शो पतीक कली दाक्तीनी। ठेयब लाप्चोमी ठीक निसाफ पने। मिनू मुर नेल्ल आन परमप्रभु यावेमी योसेफ आ लीशो मुर आन कली शिशी पाइबा कौं?” दे परमप्रभु यावेमी दैत। भजन संग्रह ३४:१५; रोमी १२:९

16 मोपतीके मुर नेल्ल आन परमप्रभु यावेमी “लां डा मुर नेल्ल डाक्का, रोंका पचा मालीनीम। आबी आबी, देंचा मालीनीम। रूम गेय पाइब आन कली रोंका पचा कली ब्रेत्तीन। रोंका पस जोक्ब आन कली यो ब्रेत्तीन।

17 अडगुर रू नेल्लेमी रोंका पचा मालीनीम। मारदे हना गो इन दाते रे पा गाक्का लाइनुड” दे परमप्रभु यावेमी दैत।

परमप्रभु आ निसाफ पतीके नाक्त

18 मिनू परमप्रभु यावेमी “मारदे गे परमप्रभु यावे आ नाक्त जाक्शो दाक्नीनी? मारदे परमप्रभु यावे आ निसाफ पतीक नाक्त मालीनी? मेको नाक्त छिडछिड दुम्ब, छेडछेड मदुम्ब। योएल २:११

19 मेको नाक्ती मुर का गुप्स रे प्रोक्का, वां कली गुम्शो खोदेशो बाक्ब। खिं लशा बाक्का कली आ गुइ गारोम वोदानु, बुस्सुम कोक्शो खोदेशो दुम्ब।

20 परमप्रभु यावे आ नाक्त छिडछिड दुम्ब। छेडछेड मदुम्ब। मेको छिडछिडमी छेडछेड काइ मबाक्ब।

21 गो इन चाड नु इन गुम्तीक आन कली काइ मदाक्नुड। यसैया १:११-१५

22 गे आं कली चोशा चढेतीक नु अन्न चढेतीक चढेतीनी हना यो, गो मेको मब्राइनुड। मिनू इन नेल्ल क्येडा दोम्शो बस्तु दुशा बाक्का आ परबम चढेशो यो मकोत्रनुड। मीका ६:६-७

23 इन कुम्सो आन रेयके आं क्येडा डोन वोतीनी। इन तार पाइशशो ठेयब ताप्तीके ताप्शो नेंचा मदाक्नुड।

24 तन्न ठीक निसाफ पतीक ब्वाक्क खोदेशो पा शाइक्पतीनी। ठीक पतीक गेनायो मसोत्रब खोला खोदेशो पा शाइक्पतीनी।

25 गे इस्राएल आ खिं डा मुरपुकी गोरशो रागीम ४० बर्स गाक्नीनु, आं कली चढेनी डा? येरमीया ७:२२-२४; प्रेरित ७:४२-४३

26 गेपुकीमी इन पिप देवता साकुथ नु इन सोरुल देवता काइवान आस कली कुरशा लतीन। मेको आंमा इन कली सेल्शो मूर्ति बाक्नीसी।

27 मोपतीके गो इन कली ग्याइशशा, दमस्कस क्येडा डोन लाइक्पाइक्नन्नी” दे परमप्रभु यावेम दैत। मेको आ नें मुर नेल्ल आन परमप्रभु यावे बाक्ब।

## 6

ठेयब लेशो आन कली हुइशशो

1 मिनू “आबी, सियोन डा ठेयब मुर, मेकोपुकीमी सामरीया डा डांडामी ‘गो रिम्शो बाक्नीकी’ दे मिम्नीम। इस्राएल डा मुरपुकीमी मेको आन कली थमा सुइशशा, जाक्नीम।

2 गे आइक्की हांबु कान्नेह सहर लशा, कोत्रडीन। मिनू मेकेर रे ठेयब हमाथ रागी लन। मेको नोले पलिस्ती आन गाथ सहरमी लने। इन राज्य मेको आन राज्य क्येडा रिम्शो बाक्बा डा? मार, मेको इन रागी मेको आन रागी क्येडा ठेयब बाक्बा डा? उत्पत्ती १०:१०

- 3 गे 'श्येत जतीक नाक्त मजाकब' दे मिम्नीनी। मिनु गे हुश खाकश पोक्ब सासन पाइब चाकनीनी। भजन संग्रह १०:५
- 4 आबी, मेको हाती आ दारा के सेल्शो खाटमी इप्नीमी। आन इप्तीकेमी गोल्शा बाकनीमी। मेकोपुकीम क्यारश भेडा आन पाठा नु गोठ डा बाछा ब्वाइनीमी।
- 5 मेकोपुकीम हेंथे कुम्सो पा तार पाइशशो ठेयब ताप्तीक ताप्नीमी। मिनु 'गो दाऊद खोदेशो पा ताप्तीक सेल्लुड' दे मिम्नीम। यसैया ५:१२
- 6 मेकोपुकीम डाप्काम अडगुर शांबु तूनीमी। नेल्ल क्येडा रिम्शो तेल खेकसीनीमी। तन्न योसेफ आ खिं डा मुरुम श्येत जामेनु, सुर्ता मपाइनीम।
- 7 मोपतीके मेको नेल्ल क्येडा डोंइती ग्याइशशा लाइक्का पुंइसीनीम। मोपा मेको आन चाड पतीके, ग्येरशा बाकतीक नाक्त नुप्ब" देंत।

इस्त्राएल डा मुर आन ठेयब लेशशो

- 8 परमप्रभु यावेमी आ नेमी कसम जशो बाकब। मिनु मुर नेल्ल आन परमप्रभु यावेमी "गो याकूब आ ठेयब लेशशो तशा ग्रांया दीनुड। मेको आ बोल्यो दरवार आन कली काइ मदाक्नुड। गो एको सहर नु आ मार मार नेल्ल आन जोरी सनु आन गुइमी गेनुडमी" देशो बाकब।
- 9 खिं काम १० जना मुर लीतेकम हना यो, मेको नेल्ल बेकनीम।
- 10 मिनु खिं डा मुर कामी मेको आन बेकशो रां चोइब, खिं आगा रे बेकशो मुर गुंइचा कली जाकशा, मेकेर खुडकब का कली "गेपुकी नु अरु सुइ बाकनीमी?" दे हिल्लो पाइब। मिनु मेकोमी "मबाकब" देंब। मिनु खिं डा मुरुमी "सिकसी पावो। गोपुकीमी परमप्रभु यावे आ नें थिचा मदुम्ब" देंब। आमोस ८:३
- 11 मारदे हना परमप्रभु यावेमी हुकुम पाइब। मिनु ठेयब खिं कली प्रेक्ब। मिनु आइक्च खिं यो प्रेक्ब।
- 12 मेकोमी "मार, शारा रोंगुम दोरनीमी डा? मार, मेकेर ब्यफ वाकनीमी डा? तन्न गेपुकीम ठीक निसाफ कली दूली सेल्लतीनी। ठीक पतीक कली कशो सेल्लतीनी। आमोस ५:७
- 13 गेपुकी लो-देबार सहर आ पर्बम ग्येरसाकनी। मिनु 'मार, गोपुकीमी इं सक्तिम कारनाइम सहर मग्रासे डा?' देंनीनी।
- 14 ए इस्त्राएल आ खिं डा मुरपुकी, गो इन पर्बम रागी का डा मुर आन कली पोक्नुडमी। मिनु मेकोपुकीमी इन कली लेबो-हेमाथ रे अराबाह डा खोला सम्म श्येत गेशा खेदा पाइनीम" दे मुर नेल्ल आन परमप्रभु यावेमी देंत।

## 7

सल्हा माले कोंइशो

- 1 परमप्रभु यावेमी आं कली मार कोंइताक्यी देशा हना, पिप आ बाली नाली खुप्ने थुम्शा, अर्को बाली वामानु, मेकोम मारेड मारेड नेकब सल्हा माले आन कली ठीक पशो ताता।
- 2 मिनु मेकोपुकीमी रू डा घांस नेल्ल नेकगमे नोले गो "परमप्रभु यावे माफ गेयीनी। याकूब आ रागी दोपा ब्रोंइने चाप्बा डा? मारदे हना मेको थम आइक्च बाकब" देंती।
- 3 मिनु परमप्रभु यावेमी "मेको मोदेशो मदुम्ब" देंत।

मी कोंइशो

- 4 मिनु परमप्रभु यावेमी आं कली मार कोंइताक्यी देशा हना परमप्रभु यावेमी आं कली ब्रशो मी का कोंइताक्यी। मिनु मेको मीम ठेयब समुन्द्र कली सोत्रपाइक्तु। मिनु रागी कली यो नेक्तु। उत्पती ७:११
- 5 मिनु गो "परमप्रभु यावे नाइक्तीन, दे गो इन कली पुंइनुड। याकूब आ रागी दोपा ब्रोंइने चाप्बा डा? मारदे हना मेको थम आइक्च बाकब" देंती।
- 6 मिनु परमप्रभु यावेमी "मोदेशो यो मदुम्ब" देंत।

गारो प्रोव्रतीक घन्टी कोंइशो

- 7 मिनु परमप्रभु यावेमी आं कली मार कोंइताक्यी देशा हना, परमप्रभु यावे गारो काम गारो प्रोव्रतीक घन्टी शेशा, राप्शो बाक्त।
- 8 मिनु परमप्रभु यावेमी आं कली "आमोस गे मार तवी?" दे हिल्लो पाप्तु। मिनु गो "गारो प्रोव्रतीक घन्टी का ताता" देंती। मिनु परमप्रभुमी "कोव्रडो, गो आं मुर इस्त्राएली आन दातेमी गारो प्रोव्रतीक घन्टी का क्युक्नुड। मिनु मुल गो मेको आन नेक्था बाकशा, मार पाइक्बाकमा, कोव्रनुडमी। यसैया ३४:११; आमोस ८:२
- 9 इसहाक आ डांडा डा थान खतम दुम्नीम। मिनु इस्त्राएल डा थान नेल्ल ब्रेशशा जाम्शा लाइनीम। मिनु गो तरवार शेशा येरोबाम आ खिं डा मुर साइक्का कली बोक्शा लाइनुड" देंत।

आमोस नु अमस्याह

- 10 मिनु बेथेल डा चहेब अमस्याहमी इस्त्राएल डा पिप येरोबाम कली "इस्त्राएल आ खिं डा मुर आन दातेमी इस्त्राएलम बाकब आमोसमी इन पर्बम मरिम्शो पाइब। एको रागीमी मेको आ लोव्र फाल्ने मचाप्ब।
- 11 आमोसमी 'येरोबाम तरवारम साइक्का पुंइसीब। मिनु इस्त्राएल डा मुर आन रागी रे ग्याइशशा लाइक्का पुंइसीनीम' देशो बाकब" दे आमोसमी देंत।
- 12 मिनु अमस्याहमी आमोस कली "ए, परमप्रभु यावे आ लोव्र पाइब, गे एकर रे प्रोक्शा यहूदा रागी लावो। मिनु मेकेर क्येट चेम्शा शोब्ले ग्याप्शा जशा, परमप्रभु यावे आ लोव्र पावो। १सामुएल १:९

13 बेथेलमी लेशा गेनायो परमप्रभु यावे आ लोत्र मपावो। मारदे हना मेको पिप आ देवी देवता थान नु राज्य डा पूजा पतीके बाकब” देत। १राजा १२:२८-२९

14 मिनु आमोसमी अमस्याह कली “गो परमप्रभु यावे आ लोत्र पाइब मनड। मिनु परमप्रभु यावे आ लोत्र पाइब आ तौ यो मनड। गो दा गोठला का नु फोत्रशी रवा कोत्रब मुर नड।

15 मिनु परमप्रभु यावेमी आं कली क्यारश भेडा योत्रतीक रे ब्रेत्ताकयी। मिनु मेकोमी आं कली ‘लावो। आं मुर इस्राएली आन कली आं लोत्र शेंदीमी’ दे माइकती।

16 मोपतीके मुल परमप्रभु यावे आ लोत्र नेनीन। गे आं कली ‘इसाएल आ परबम परमप्रभु यावे आ लोत्र मपावो। मिनु इसहाक आ खिं डा मुर आन परबम लोत्र मपावो’ देंतीनी। आमोस २:१२

17 मोपतीके परमप्रभु यावेमी इ कली ‘इ मीश सहरम तेल्लेम का दुम्ब। इ तमी तौ नेल्ल तरवारमी क्योरचा पुंडसीनीम। मिनु इ रागी पुक्शा योक्सीनीम। गे चहिं ग्रांग्रा दिशो रागी काम बेक्नेवे। मिनु इस्राएल थमा पा आ रागी रे ग्याइश्शा लाइक्चा पुंडसीब’ ” दे आमोसमी अमस्याह कली देत।

## 8

मीशो फोत्रशीम ब्रीशो डालो

1 मिनु परमप्रभु यावेमी आं कली मीशो फोत्रशीम ब्रीशो डालो का कोंइताकयी।

2 मिनु मेकोमी आं कली “आमोस, गे मार तवी?” दे हिल्लो पती। मिनु गो “मीशो फोत्रशीम ब्रीशो डालो का ताता” देती। मिनु परमप्रभु यावेमी आं कली “आं मुर, इस्राएली आन नाक्त गाप्त। मुल गो मेको आन नेक्था बाक्शा, मार मार पाइनीमी, मेको कोंव्रनुडमी। आमोस ७:८

3 मेको नाक्ती दरवारम कुम्सो पाइब आन कुम्सो रोंका पतीके दुम्नीम” दे परमप्रभु यावेमी देत। मिनु मेकोमी “बेक्शो मुर शुश बाक्नीम। लाडगाम गुंडशा ताइक्नीम। गे सिकसी पावो” देत। आमोस ६:१०

इसाएल खतम दुम्शो

4 मिनु परमप्रभु यावेमी “गे मारेइ मथीब आन कली दिम्बपुकी नु रागी डा पुडग आन कली खतम सेल्बपुकी, नेनीन। आमोस २:७

5 गेपुकीमी ‘औंसी गेना लाक्वा डा? गो अन्न लेयचा ताइनीकी। नाइक्तीक नाक्त गेना लाक्वा डा? गो चेरब लेयचा ताइनीकी। गो एफाह आइक्च सेल्शा, शेकेल कली हेल्शो सेल्शा नु दूली पा नाक्शा, शुश क्येट चेम्नीकी’ देंनीनी। एफाह का २२ लिटर लाइब पुक्तीक बाक्ब। शेकेल का ११.५ ग्राम डा क्येट बाक्ब निहेम्याह १३:१५

6 गेपुकीम ‘पुडग आन कली चांदीम ग्याप्नीकी। मारेइ मथीब आन कली जोर का चेपलमी ग्याप्नीकी। मिनु मक्राप्यो चेरब लेयनीकी’ देंनीनी” देत। आमोस २:६

7 परमप्रभु यावेमी याक्ब आ सोशो बोशो मिम्शा, कसम जाप्तु। मार कसम जाप्तु देंशा हना “गो मेको आन पशो गेनायो मप्रेनुड।

8 मार, मेको आ पतीके रागी खिंखि मपाइबा डा? मेकेर बाक्ब नेल्लेमी रोंका मपाइनीमी डा? रागी नेल्ल नील खोला खोदेशो पा बारनीम। इजीप्त रागी डा नील खोला बारशा ग्युम्शो खोदेशो पा नुष्शा लाइनीम। आमोस ९:५

9 गो मेको नाक्ती नां कली नाक्ती उइक्थ दुम्मेनु, लाक्पाइक्नुड। मिनु नाक्त बाक्ना बाक्न नां रिक्पाइक्नुड। येरमीया १५:१९

10 गो इन चाड कली रोंका पतीक सेल्नुड। इन कुम्सो नेल्ल आन कली डाक्तीक सेल्नुड। गो नेल्ल इन कली अरन्डी फेक्पाइश्शा चां प्रेक्पाइक्नुड। गो आंम का ला बाक्शो तौ आ परबम रोंका पशो खोदेशो दुम्पाइक्नुड। मेको चाड नुप्पतीक नाक्त कशो नाक्त दुम्ब” देंशो बाक्ब। येरमीया ६:२६

11 मिनु परमप्रभु यावेमी “गोम अन्काल सोइक्ची ना, थमा पा श्येत जतीक नाक्त जाक्ब। मेको अन्काल जचा नु तूचा के अन्काल ममाइ, तन्न परमप्रभु यावे आ लोत्र नैतीक अन्काल बाक्ब। १सामुएल ३:१

12 मुरपुकी परमप्रभु यावे आ लोत्र माल्शा, समुन्द्र का रे अर्को समुन्द्र सम्म लाइनीम। उत्तर रे पूर्व सम्म लाइनीम। मेकोपुकी एर आंथ गाक्शा, परमप्रभु यावे आ लोत्र माल्नीमी। तन्न मथिल्लीम।

13 मेको नाक्ती दारशो मीश आल नु बोल्यो वोंइश आल ब्वाक्कु तूचा मतथु, थाइनीम।

14 सु सु सामरीया डा देवता अशीमाह आ नैमी कसम जशा ‘ए दान, इ देवता ब्रोंइशा बाक्शो खोदेशो पा’ नु ‘बेयर-शेबा डा देवता ब्रोंइशा बाक्शो खोदेशो पा’ देंशा कसम जाइब नेल्ल गेनायो मबोक्चा डा पा गोल्लीम” दे परमप्रभु यावेमी देत। न्यायाधीस १८:३०

## 9

नोले डा दुम्तीक कोंइशो

1 गो परमप्रभु कली चढेतीक आ नेक्था राप्शो ताता। मिनु मेकोमी आं कली “लाप्चो डा शी शुश हिम्पाइक्चा कली थाम आन डर तुपो। मिनु ब्रेश्शा मुर नेल्ल आन पिया तार दोक्नीम। मिनु ब्रोंइशा लीशो आन कली तरवारमी क्योरनुडमी। मेको आन दाते डा का यो प्रोक्चा मताइनीम। का यो ब्रोंइचा मताइनीम।

2 मेकोपुकी बेक्शो मुर आन बाक्तीक लाम्नेक्म हना यो, मेकेर रे कीशा गुंडनुड। मिनु मेकोपुकी इर सरीड गे डोइश्शा लाम्नेक्म हना यो, गो मेको आन कली ग्याइश्शा लुक्च फ्रुप्नुडमी। अय्युब २६:६; भजन संग्रह १३९:८

3 मेकोपुकी कारमेल डांडामी खुंडसाकम हना यो, गो मेको आन कली मालशा, ग्याइशशा चाक्नुडमी। मेकोपुकी आं क्येडा खुइशशा समुन्द्र आगाम लाम्तेकम हना यो, समुन्द्रम बाकब बुस्स कली 'मेको आन कली कोकमी' दे अरेनुड। मिनु मेकोमी मेको आन कली कोकब।

4 मेको आन जोरी सनु आन डोंइती ग्याइशशा लाइक्या पुंडसाकम हना यो, गो मेको आन कली क्योरशा साइक्या कली तरवार कली अरेनुड। मिनु मेकोमी साइकब। गो मेको आन कली रिम्शो पचा कली ममाइ, तन्न मरिम्शो पचा कली कोव्रनुडमी" दैत।

5 मिनु मुर नेल्ल आन परमप्रभु यावेमी रागी कली थिप्टु हना, रागी याइब। मिनु मेकेर बाकब नेल्ल रेंका पाइनीम। मिनु रागी नेल्ल नील खोला खोदेशो पा बारब। मिनु इजीप्ट डा नील खोला खोदेशो पा सोव्रब। आमोस ८:८

6 मेकोमी स्वर्गम आ बाक्तीक सेल्लब। मिनु रागीमी मेको आ जग वोइकब। समुन्द्र डा ब्वाक्कु कली ब्रेशशा, रागीम मोइकब। मेको आ नें परमप्रभु यावे बाकब। भजन संग्रह १०४:३; आमोस ५:८

7 मिनु परमप्रभु यावेमी इस्राएल डा मुर आन कली "गे आं कली एथीयोपीया डा मुर खोदेशो बाक्नीनी। गो इस्राएली आन कली इजीप्ट रागी रे, पलिस्ती आन कली काफ्तोर रागी रे नु अरामी आन कली कीर रागी रे गुंडशा चाक्शो मनडमी डा?" देशो बाकब। ब्यवस्था ७:७; येरमीया ४७:४

8 परमप्रभु यावेमी शुश पाप पाइब राज्य कली कोव्रना कोव्रन बाकब। मेकोमी "गो मेको आन कली रागी रे क्याम्नुड। मो हना यो गो याकूब आ खिं कली चहिं नेल्ल मक्याम्नुड" दे परमप्रभु यावेमी दैत।

9 परमप्रभु यावेमी "गो मार हुकुम पाइनुडमी देशा हना, इस्राएल आ खिं डा मुर आन कली जात नेल्ल डा मुर आन दातेमी ग्योलोमी मार मार क्राप्शो खोदेशो पा, क्राप्नुडमी। मिनु इम्चीली फुल्लु का यो खपीम मदोक्ब।

10 मेकोपुकीम 'हिंचा डा श्येत आंइ तारी मजाकब। इ कली मेकोम मथिप्व' दे पाप पाइब, आं मुर नेल्ल तरवारमी साइक्या पुंडसीनीम" दैत। आमोस ६:३

इस्राएल कली लेंशा सेल्शो

11 परमप्रभु यावे, इन परमप्रभुमी "गो मेको नाक्त दाऊद आ ब्रेशो खिं आन कली लेंशा सेल्नुड। मिनु मेको आ ब्रेशो गारो आ पोव्रला सुइनुड। मिनु मोपा नेल्ल साइ डोंइती डा खोदेशो सेल्नुड। १राजा १२:१९; प्रेरित १५:१६-१७

12 मिनु मेकोपुकीम एदोम डा लीशो नु आं नें पाइशशो जात जात डा मुर नेल्ल आन के दुम्नीम" दे मोदेशो पाइब परमप्रभु यावेमी दैत।

13 मिनु परमप्रभु यावेमी "मेको नाक्त थमा पा जाकब। बाली नाली खुप्वमी ब्यफ वाकब कली गुम्ब। मिनु वांचेर व्वारबमी अडगुर खुम्ब कली गुम्ब। डांडा रे पा नक अडगुर रस याप्व। मिनु डांडा नेल्ल अन्न बाला सित्नीम। लेवी २६:५; योएल ४:१८

14 गो आं मुर इस्राएली आन कली आन मार मार लेशशा गेनुडमी। मिनु मेको आन ब्रेशो सहर कली लेंशा सेल्शा, मेकेर बाक्नीम। मेकोपुकीम अडगुर खुम्शा, अडगुर शांबु तूनीम। मेकोपुकीम फल फुल खुम्शा, मेको आन फल जाइनीम। ब्यवस्था ३०:३; यसैया ६५:२१

15 गो मेको आन कली गेनायो मखेरपांडसीचा डा पा आन रागीमी वोइक्नुड। आं गेशो रागी रे मेको आन कली सुइमी गुंडने मचान्नीम, दे इन परमप्रभु यावेमी देशो बाकब" दैत।



## ओबदिया

**ब्रेक्ब मुर:** ओबदिया आ अर्थ “परमप्रभु यावे आ गेय पाइब” बाकब। एको किताब सुम ब्रेक्शो मेको मतुंडसाकव हना यो, जोकब तुइक्ब शुशेमी एको किताब ओबदिया आंमा ब्रेक्शो बाकब, दे मिन्मीन।

**गेना ब्रेक्शो:** बेबीलोन डा पिप नेबुकदनेसरम ५८७ बि. सी. यरूसलेम सहर कली ग्राशा खतम सेल्शा, पिप दाऊद आ सासनमी दिप्शो एसाव आ चच युइमी एदोममी बेबीलोन डा लडाइ पाइब आन कली ग्येरशा वारच पशो बाक्तेकम।

**मारदे ब्रेक्शो:** साइ नेसी रे एदोम डा मुर यहूदी आन जोरी सत्रु बाक्शो बाक्तेकम। गन्ती २०:१४-२१ ओबदियामी एदोम डा मुर नेल्ल क्याम्चा पुंडसीनीम, दे लोत्र पशो बाकत। तन्न परमप्रभुमी शुश खेयप मटीब इस्त्राएली आन कली शिशो पा दाकब, दे यो ब्रेक्शो बाकब। एको किताबम परमप्रभु यावे आ निसाफ पतीक नाकत आ पर्वम ब्रेक्शो बाकब।

परमप्रभुम ओबदिया कली कौंइशो

येरमीया ४९:७-२२

1 परमप्रभु यावेमी ओबदिया कली कौंइशो लोत्र मार बाकत देशा हना, परमप्रभु, परमप्रभु यावेमी एदोम आ पर्वम लोत्र पाप्तु। गोपुकीमी परमप्रभु यावे रे लोत्र का नंतक। मेकोम रागी रागीम लोत्र कुरब मुर का सोइक्ताकव। मेकोमी “बोक्कीन। गो मेको नु लडाइ पथ लय।

2 गो इ कली रागी रागी डा मुर आन दातेम नेल्ल क्येडा आइक्च सेल्लुड। मिनु गे महिकसीशो दुन्नेवे।

3 इ थुं डा ठेयब लेत्तीकेमी इ कली जोल पाइशशो बाकब। इ सहर ठेयब फुल्लु तार सेल्शो बाकब। गे डांडा तार बाक्नेवे। गे इ थुंमी ‘आं कली सुम उइ तोक्ने चाप्बा डा?’ दे मिन्नेवे। गन्ती २४:२१

4 तन्न गे ककाकुली खोदेशो पा इर सरीड मेर बेरते हना यो, सोरुल आन दातेम इ ग्योत्र सेल्लेवी हना यो, गो इ कली मेक रे तोक्नन” दे परमप्रभु यावेम देंत।

5 मिनु खुडपुकी इ बाक्तीक जाक्तेकम हना, नाकदो रोइक्बपुकी इ बाक्तीक जाक्तेकम हना, गे दोदेशो पा खतम दुन्नेवे? मेकोपुकीम आन कली माल्लो खोइ ला रोइशशा मलाइक्नीमी डा? अडगुर सेक्बपुकी इ बाक्तीक जाक्शा सेक्तेकम हना, मेकोपुकीमी इक्कका अडगुर मप्रौंडनीमी डा?

6 तन्न एसाव आ शोप दोपा रौंडसीबा? मेको आ खुइशशा वोइशशो शोप दोपा माल्ला गुंडनीमी?

7 इ नेक्था डा रागी डा मुरपुकीमी इ कली जोल पाप्तेकम। मेकोपुकीम इ कली खेदा पा खेरशा इ सांद सम्म चाक्तेकम। इ वारचपुकीमी इ कली दिप्शा श्येत गेनीम। इ थुल्लो मुरपुकीमी इ कली ब्वारद दाइक्नीम। तन्न गे मारिड मतुइक्नेवे।

8 परमप्रभु यावेमी “गो मेको नाकत एदोम डा जोक्ब तुइक्ब मुर आन कली खतम सेल्लुड। एसाव आ डांडाम बाकब रूप मुर आन कली साइक्नुडमी।

9 गे तेमान, इ लडाइ पाइबपुकी फ्राचा पुंडसीनीम। एसाव आ डांडाम बाकब मुर नेल्ल क्योरशा साइक्चा पुंडसीनीम। आमोस १:१२

10 गे इ लोक्ब याकूब कली हुश ख्राक्श पोक्शो आ पर्वम इ कली मुनेम सुम्ब। मिनु गे गेना हना यो कली जाम्शा लाइनेवे। योएल ४:१९

11 मेको नाकत गे डोन राप्शा बाक्ते। मेको नाकत अर्को रागी डा मुरपुकीमी मेको आ शोप नेल्ल रोइशशा लाइक्तेकम। अर्को रागी डा मुर मेको आ लाप्चो रे ओव्रतेकम। मिनु यरूसलेम आ पर्वम फेन्टे आप्तेकम। गे यो मेकोपुकी खोदेशो का बाक्ते। भजन संग्रह १३७:७

12 तन्न गे इ लोक्ब श्येत जवानु, मेको कली मदिप्चा माल्लो नवे। यहूदा डा मुर खतम दुम्मा नाकत गे मग्येरसीचा माल्लो नवे। मेकोपुकी श्येत जामे नाक्ती गे ठेयब लेशो लोत्र मपचा माल्लो नवे।

13 आं मुर हिंचा डा श्येत जामे नाकत, गे मेको आन लाप्चो रे मओव्रचा माल्लो नवे। यहूदा डा मुर खतम दुम्मा नाक्ती, गे मेको मरिम्शो पाइबपुकी नु मगारचा माल्लो नवे। मेको हिंचा डा श्येत जामे नाक्ती गे मेको आन शोप रोइशशा मलाइक्चा माल्लो नवे।

14 मेको आ प्रोक्शा लशो मुर आन कली साइक्चा कली लां गुम्तीकेमी बाप्शा बाक्चा मदुम्शो नवे। मेको ब्रौंइशा प्रोक्शो आन कली मग्याइक्चा माल्लो नवे।

15 परमप्रभु यावे आ निसाफ पतीक नाकत रागी रागी डा मुर नेल्ल आन नेक्था जाक्शो बाकब। गे दोदेशो पशो नवे, इ कली मोदेशोन पांडसीब। इ पशो गेय नेल्ल इ पियामीन मोइसीब। योएल १:१५; येरमीया ५०:१५,२९

16 गे दोपा आं डांडाम तूडी, मोपा इ एर ओंथ बाकब रागी रागी डा मुरुम गेना हना यो तूनीम। मिनु गेनायो मबाक्शो खोदेशो दुम्नीम। येरमीया २५:१५

17 तन्न सियोन डांडाम चहिं प्रोक्शो मुरपुकी जाक्नीम। मेको परमप्रभु यावे आ डांडा बाकब। मिनु याकूब आ खिंमी डौंडती आम कली अधिकार पाइब आन कली अधिकार पाइनीम। योएल ३:५; योएल ४:१७

18 याकूब आ खिं मी दुम्ब। योसेफ आ खिं ब्रशो मी दुम्ब। एसाव आ खिं चहिं नल खोदेशो दुम्ब। मेकोपुकीमी मेको कली मीम हुम्शा, खतम पोक्नीम। मिनु एसाव आ खिं डा मुर सुइ मब्रौंडनीम” दे परमप्रभु यावेमी देंत। जकरिया १२:६

19 नेगेब डा मुरपुकीमी एसाव आ डांडा आन के सेल्लनीम। शेफेलाह डा मुरपुकीम पलिस्ती आन रागी आन के सेल्लनीम। मेकोपुकीमी एफ्राइम नु सामरीया डा रू आन के सेल्लनीम। मिनु बेन्यामीनम चहिं गिलाद आंम के सेल्ल। १राजा १६:२४

20 मिनु ग्याइशशा लाइक्चा पुंडसीशो हालाहम बाक्शो इस्माएलीपुकीमी फोनीचीआ रे चारेफाथ सम्म डा रागी आन के सेल्नीम। मिनु यरूसलेम रे ग्याइशशा लाइक्चा पुंडसीशो सेफाराद सहरम बाक्शो मुरपुकीम नेगेब डा सहर आन के सेल्नीम।

21 ब्रोंइशोपुकी सियोन डांडा डोइशशा कुइनीम। मिनु एसाव आ डांडा कली सासन पाइनीम। मिनु मेको राज्य परमप्रभु यावे के दुम्ब।

## योना

**ब्रेक्ब मुर:** एको किताब सुम ब्रेक्शो बाक्बा, मेको आ पर्वम तेइ मब्रेक्शो बाक्ब। तन्न योना आ शेंसीबपुकीमी योना आ ब्रेक्शा वोइश्शो रे एको किताब गुंडशो बाक्ब, दे मिन्मीम।

**गेना ब्रेक्शो:** इस्राएल डा पिप येरोवाम ८२५-७८४ बि. सी. आ पालाम योना बाक्त। २राजा १४:२५ मेना आमोस नु होसेमी यो परमप्रभु यावे आ लोत्र पशो बाक्ताक्स। एको किताब योना बेकम नोले ब्रेक्शो बाक्ब।

**मार ब्रेक्शो:** परमप्रभु यावेमी इस्राएली मदुम्शो, अर्को रागी डा मुर आन कली इस्राएली आन कली खोदेशो पा दाक्ब। येसुमी यो योना आ सांकली गेब। मत्ती १२:३८-४१; लूका ११:२९-३२

परमप्रभुमी योना कली सोइश्शो

1 परमप्रभु यावेमी अमीतै आ तौ योना कली मार लोत्र पवा बाक्त देशा हना, २राजा १४:२५

2 “गे छुल बोक्शा, निनवे माइश्शो ठेयब सहरम लावो। मिनु मेकेर डा मुर आन मरिम्शो पशो आ पर्वम शेंदीमी। मारदे हना गो मेको आन मरिम्शो पशो नेल्ल ताता” दे मदा बाक्त।

योना परमप्रभु रे प्रोक्शो

3 तन्न योना परमप्रभु यावे आ डोंइती रे लशा, निनवे मलथु, टारशीश गे प्रोक्शा गोवा बाक्त। मिनु योप्पा सहरम यिशा, टारशीश लाइब डोंगा का थिश्शा, क्येट थाप्शा, परमप्रभु यावे आ डोंइती रे प्रोक्शा, डोंगा डोंइसे बाक्त। भजन संग्रह १३९:७,९,१०

4 मिनु परमप्रभु यावेमी समुन्द्रमी ठेयब फश पपदा बाक्त। मोपा ठेयब फश गिवारम पतीके मेको डोंगा जिक्का चिक्ता बाक्त।

5 मिनु डोंगाम गेय पाइबपुकी हिंशा, आन देवी देवता आन नें थिशा, ब्रेम्मा बाक्त। मिनु डोंगा सोपी पचा कली मेको आन बाक्शो मारेइ मारेइ समुन्द्रमी ताइकतमे बाक्त। योना चहिं डोंगा आ आइदी तला लशा, इप्शो बाक्माक्त।

6 मिनु डोंगा चलेबमी योना आ इप्तीकेम लशा “गिश डा इमे। बोक्को, इ परमप्रभु कली थोवो। मेको परमप्रभु इ कली खतम दुम्चा रे प्रोंइबा, को” देंमाक्त।

7 मिनु डोंगाम गेय पाइबपुकीमी “सुम पतीके ओदेंब श्येत दुम्माइ, तुइक्का कली चिडगा कोत्रका” देंमुशा, चिडगा कोत्रकमे बाक्त। चिडगा कोत्रकमेनु, योना आ नेंम ग्रूमाक्त। हितोपदेस १६:३३

8 मिनु डोंगाम गेय पाइबपुकीमी योना कली “गो मारदे ओदेंब श्येत जया? इ गेय मार में? गे ते रे पिवे? तेको रागी डा नवे? मार थर डा मुर नवे?” दे हिल्लो पामे बाक्त।

9 मिनु योनामी “गो हिबू नड। रागी नु समुन्द्र सेल्व, सरीड डा परमप्रभु यावे कली थमा सुइक्ब नड” देंमाक्त। उत्पत्ती १:९-१०

10 मिनु मेको मुरपुकी डोंइती क्येडा हिंशा योना कली “गे मारदे ओपा प्रोक्डे?” दे हिल्लो पामे बाक्त। मारदे हना योनामी मेको आन कली “गो परमप्रभु यावे आ डोंइती रे प्रोक्ती” देशो बाक्माक्त।

11 मिनु मेकोपुकीमी योना कली “फश गिवार नाइक्पाइक्का कली मार पचा माल्नीकी?” दे हिल्लो पामे बाक्त। मारदे हना फश गिवार पतीके ब्वाक्कु बारना बारन लमाक्त।

12 मिनु योनामी “आं कली समुन्द्रमी ताइक्ताक्यीनी हना, फश गिवार नाइक्ब। एको फश गिवार आं पतीके पशो बाक्ब, दे गो तुइक्नुड” देंमाक्त।

13 मिनु मेको मुरपुकीमी लेंशा डोंगा रागीम चाक्का कली शुश खीयेमे बाक्त। तन्न मचाप्मे बाक्त। मारदे हना फश गिवार शुश बारशो बाक्माक्त।

14 मिनु मेकोपुकीमी परमप्रभु यावे कली “परमप्रभु यावे, एको मुर आ पर्वम गोपुकी बेक्का ममाल्कल। एको मुर आ दोस मतकल। मारदे हना परमप्रभु यावे, इन दाक्शो यो मोदेशोन बाक्त” देंमा बाक्त।

15 मिनु योना कली समुन्द्रमी ताइकतमे बाक्त। मिनु फश गिवार नु ब्वाक्कु खा दिम्शा, नांइसे बाक्त।

16 मिनु मेको मुरपुकी परमप्रभु यावे कली मान पा हिंशा, मेको कली चढेशा “आ देशो नेल्ल टीनीकी” दे परमप्रभु यावे कली कसम जामे बाक्त।

17 मिनु परमप्रभु यावेमी योना कली दाक्पाइक्का कली ठेयब डांइ का सोइकता बाक्त। मेको डांइमी योना कली यु दाक्गानु, योना सां नाक्दो नाक्ती आ कोत्रजीम बाक्माक्त। मत्ती १२:४०; मत्ती १६:४

## 2

योनाम परमप्रभु कली लोत्र पशो

1 मिनु योनामी डांइ आ कोत्रज रे पा परमप्रभु यावे कली लोत्र पवा बाक्त।

2 मिनु मेकोमी परमप्रभु यावे, आ परमप्रभु कली “गो आं श्येत जतीके रे लोत्र पाता। मिनु आं कली लोत्र लेक्ताक्यीनी। गो बेक्शो मुर आन बाक्तीके रे ब्रेत्ती। मिनु गे आं सेंदा नेतीनी। भजन संग्रह १२०:१

3 गे आं कली समुन्द्र आगाम ताइक्ताक्यीनी। आं एर ओथ ब्वाक्कु ला बाक्शो बाक्त। ब्वाक्कुमी आं कली गिल्शा, आ छाल आं तारी रे लाम्तेक्म। भजन संग्रह ४२:८

4 गोमी ‘इन क्येडा डोन दुम्शा, इन योत्रशो खिं मुल गेनायो मताइनुड’ दे मिम्ताकड। भजन संग्रह ३१:२२

5 आं एर ओथ ब्वाक्कु बाक्तीके, हेरा बेक्ती। गो ब्वाक्कु आगाम बाक्डानु, आं पिया लेउम सुम्शो बाक्त। भजन संग्रह १८:५; भजन संग्रह ६९:२

6 मिनु गो समुन्द्र आगा क्येडा यो लुक्च युम्ती। गो गेनायो मपूचा डा पा युम्ती। तन्न परमप्रभु यावे, आं परमप्रभु गे आं कली बेक्चा रे प्रौइतीनी। भजन संग्रह १०३:४

7 आं थुं लुक्च लशा, गो परमप्रभु यावे, इन कली मिम्शा, इन कली लोत्र पाता। मिनु इन बाक्तीके रे आं लोत्र नेतीनी। भजन संग्रह १४२:२-४

8 जाम्शा लाइब मूर्ति कली थमा सुइक्बपुकीमी इन शिशी मताइनीम। भजन संग्रह ३१:७

9 गो चहिं 'गे रिम्शो पाइब बाक्नीनी' देशा, इन कली ठेयब सेल्लुड। गो इन कली देशो लोत्र खानुड। परमप्रभु यावे, गे मुर आन कली श्येत रे प्रौइब बाक्नीनी" दे लोत्र पवा बाक्त। भजन संग्रह ५०:१४; भजन संग्रह ११६:१७-१८

10 मिनु परमप्रभु यावेमी डांइ कली "योना कली ब्वाक्कु रे गुंडशा रागीम तेवो" दे अरेवा बाक्त। मिनु डांइमी मेको कली ब्वाक्कु रे गुंडशा, रागीमी तेवा बाक्त।

### 3

लेशा योना कली शेंथ सोइश्शो

1 मिनु परमप्रभु यावेमी लेशा योना कली लोत्र पवा बाक्त। योना १:२

2 मिनु मेकोमी "गे बोक्को, निनवे माइश्शो ठेयब सहर लावो। गो इ कली मार शेंनुडा, मेको मेकेर डा मुर आन कली शेंदीमी" दे मदा बाक्त।

3 मिनु परमप्रभु यावे आ लोत्र टिशा, योना निनवे गे लचा गोवा बाक्त। निनवे थम ठेयब सहर बाक्माक्त। मेको निनवे सहर सुर का रे अर्को सुर जाक्दीत्या कली नाक्त सां माल्बाक्माक्त। योना ४:११

4 मिनु योनामी निनवे सहर ओव्रशा, नाक्त का गाक्शा, मुर आन कली "४० नाक्त नोले एको सहर खतम दुम्ब" दे ठेयब सेंदामी शेंदा बाक्त।

5 मिनु मेको नेशा निनवे डा मुरपुकीमी परमप्रभु आ लोत्र थमा बाक्ब, दे थमा सुदमे बाक्त। मेकोपुकीमी "निनवे सहर डा आइक्च नु ठेयब मुर आन मरिम्शो पतीके रे लेत्तेक्म, दे कौइचा कली नेल्ल माइजा बाक्शा, अरन्डी फेक्सीन" दे नेल्ल आन कली नेंपदमे बाक्त। मती १२:४१; योएल १:१४

6 मिनु निनवे डा पिपमी यो मेको लोत्र नेना बाक्त। मेको आ ठेयब नित्तीके रे बोक्शा, पिप आ फेक्तीके वा पुइश्शा, अरन्डी फेक्शा, पुलु तारी निस्से बाक्त।

7 मिनु पिप नु आ मुरपुकीमी निनवे डा मुर आन कली "मुरपुकी नु बस्तु भावमी मारेइ मजामेक्ल, मतूडमेक्ल। बी ब्यफ, क्यारश भेडा आन कली यो मयोव्रडमेक्ल, ब्वाक्कु मतुइदमेक्ल।

8 मुरपुकीम अरन्डी सुम्सीशा, बी ब्यफ, क्यारश भेडा यो सुम्चा माल्नीम। मिनु मेकोपुकीमी परमप्रभु कली ठेयब सेंदाम पुंडचा माल्नीम। मिनु नेल्ल आन मरिम्शो लां नु आन मरिम्शो पशो रे लेत्चा माल्नीम।

9 परमप्रभु आ शुश गाइक्तीके रे लेन्बा, कौ? मेकोमी आंइ कली मसाइक्बा, कौ? सुम तुइक्बा, डा?" देंमा बाक्त। योएल २:१४

10 मिनु परमप्रभुमी मेको मुर आन पशो नु आन मरिम्शो लां रे लेश्शो तशा "आं डौइती पाइनुड देशो, मुल मपाइनुड" दे मिम्ता बाक्त। मिनु परमप्रभुमी आ डौइती मिम्शो मपवा बाक्त। येरमीया १८:७-८

### 4

योना परमप्रभु नु गाइश्शो

1 मिनु परमप्रभुमी मुर आन कली खतम मपशो तशा, योना चुरशा, शुश गाइक्ता बाक्त। मिनु परमप्रभु यावे कली

2 "परमप्रभु यावे, आं रागीम बाक्डानु, गो एको तुइश्शो नड। मोपतीके गो टारशीश गे प्रोक्शो नड। गे नेल्ल कली शिशी पाइब नु दाक्ब परमप्रभु ननी। इन गाइक्चा रीब पा मबोक्ब। इन शिशी ठेयब बाक्ब। इन थुं श्येत गेचा बाक्त हना यो, इन थुं लेश्शा, मेको आन कली मारेइ मपाइनीनी, दे गो तुइश्शो नड। प्रस्थान ३४:६

3 मुल परमप्रभु यावे, आं कली साइय्यीनी। मारदे हना गो ब्रौइचा क्येडा बेक्चा दाक्नुड" दे परमप्रभु यावे नु लोत्र पवा बाक्त। १राजा १९:४

4 मिनु परमप्रभु यावेमी "इ गाइश्शो ठीक ममाइ" दे मदा बाक्त।

5 मिनु योना सहर रे लशा, पूर्ब गे डा डांडामी निस्से बाक्त। मेकेर गोठ का सेल्शा बाक्शो बाक्माक्त। मेकेर फाम्सीशा निश्शा "मेको सहरमी मार दुम्बा" दे कोव्रशा, रिम्दा बाक्त।

6 मिनु परमप्रभु, परमप्रभु यावेमी योना कली नां फाम्सीशा बाक्ल, श्येत मजवल, दे छक लाक्चा डा पा आइक्च रवा का आ बाक्तीकेमी वापदा बाक्त। मिनु योना मेको रवा तशा, शुश ग्येरसे बाक्त।

7 तन्न आ दीसा सुनी कना परमप्रभुमी खोंकला का सोइक्ता बाक्त। मेकोमी मेको आइक्च रवा आ शाक्श ख्रोदा बाक्त। मिनु रवा सोल बेक्माक्त।

8 मिनु नां दाम्मेनु, परमप्रभुमी योना आ बाक्तीकेम पूर्ब रे होश फश सोइक्ता बाक्त। मिनु नांमी योना आ पिया नाप्शा, योना ओले पेंते दुम्शा, गोल्माक्त। मिनु योनामी "ब्रौइचा क्येडा बेक्चा दाक्नुड" देंमाक्त।

परमप्रभु आ शिशी

9 मिनु परमप्रभुमी योना कली “गे मेको रवा आ पबर्म गाइक्चा, ठीक दुम्बा डा?” दे लोत्र पवानु, मेकोमी “गो मबेक्डा सम्म गाइक्नुड” दे लोत्र लेत्ता बाक्त।

10 मिनु परमप्रभु यावेमी “गे इ मखुम्शो, मकोल्पाइश्शो, नाक्दो कामी वाशा, आ दीसा नाक्दो सोल बेक्शो रवा कली शिशी पाइनेवे।

11 मिनु गो मेको ठेयब सहर निनवे आ पबर्म शिशी मपाइनुडा डा? मेकेर आन ग्युरा पेरा गुड मतुइक्ब लाख का २० हजार क्येडा शुश मुर नु बी ब्यफ, क्यारश भेडा यो बाक्नीमी। गो मेको आन कली शिशी पाइनुड” देमाक्त।

## मीका

**ब्रेक्ब मुर:** मीका इस्राएल डा दक्खिन हेब्रोन नु गाजा सहर आस दाते मोरेशेथ डा मुर बाक्त। मेको आ नें आ अर्थ “परमप्रभु यावे खोदेशो सुइ मबाक्ब” देशो बाक्ब। मीका आमोस खोदेशो पा रू डा गेय पाइब बाक्त। मेको अस्सुर डा लडाइ पाइब आन डोंडती रे प्रोकशा, यरूसलेम सहरम परमप्रभु यावे आ लोत्र पशो बाक्त। एको किताब मीकामी ब्रेक्बो बाक्त।

**गेना ब्रेक्बो:** मीकामी ७५०-७२३ बि. सी.म परमप्रभु यावे आ लोत्र पशो बाक्त। मेकोमी सामरीया खतम दुम्चा क्येडा डोंडती मेको आ परबम परमप्रभु आ लोत्र पशो बाक्त। मीका १:६ हिज्कीयाह पिप दुम्शो ६ बर्स दुम्ची ना ७२२ बि. सी. सामरीया खतम दुम्शो आ परबम चहिं मीकामी मारेइ मब्रेक्बो बाक्त। मोपतीके मेकोमी एको किताब ७२२ बि. सी. क्येडा डोंडती ब्रेक्बो बाक्त।

**मार ब्रेक्बो:** परमप्रभुमी थुं नाइक्चा गेब। इस्राएल नु रागी रागी डा मुर नेल्ल आन कली मस्सीह सोइक्ब। मेकोमी आ गे जाक्ब मुर आन कली श्येत रे प्रोंडब।

सामरीया नु यरूसलेम कली निसाफ

1 परमप्रभु यावेमी मोरेशेथ डा मीकाह कली लोत्र पाप्तु। मेना यहूदा रागीमी योथाम पिप बाक्त। मेको आ नोले आहाज नु मेको आ नोले हिज्कीयाह पिप दुम्ताक्स। मिनु मेको परमप्रभु यावे आ लोत्र नु आ कोंडतीके सामरीया नु यरूसलेम आस परबम बाक्त। येरमीया २६:१८; यसैया १:१

2 मिनु परमप्रभु यावेमी मार कोंडशो नु देशो बाक्त देशा हना “जात जात डा मुर, गे नेल्लेमी नोफा दाइक्तीन। रागी नु मेकेर बाक्ब नेल्लेमी नेनीन। परमप्रभु, परमप्रभु यावे आ बाक्तीके रे पा इन मरिम्शो पशो आ परबम सांक्छी दुम्ब।

3 लो कोत्रडीन, परमप्रभु यावे आ बाक्तीके रे जाक्ना जाक्न बाक्ब। मेको यीब नु रागी डा लाइशो डांडाम गाक्ब। आमोस ४:१३

4 मी आ नेक्था मयीन यशो खोदेशो पा, लुकच लतीकेमी ब्वाक्कु शाइशो खोदेशो पा, मेको आ थेक्शो डांडापुकी याइनीम। मिनु दिंमपुकी ब्रोल्नीम।

5 मेको नेल्ल याक्ब आ मरिम्शो पशो नु इस्राएल डा मुर आन पाप आ परबम दुम्शो बाक्ब। याक्ब आ मरिम्शो पशो मार बाक्बा? मेको सामरीया ममाइ डा? यहूदा डा लाइशो डांडा मार बाक्बा? मार, मेको यरूसलेम ममाइ डा? येरमीया २३:१३-१४

6 मोपतीके गो सामरीया कली फुल्लु तेल्लीक सेल्लुड। मेको अडगुर खुन्तीक रू दुम्ने चाप्ब। गो मेकेर डा फुल्लु दिंमम ताइक्नुड। मिनु मेको आ खिं प्रेशा, आ जग गुंडुनुड। १राजा १६:२४; होसे १४:१

7 मिनु मेको आ मूर्ति नेल्ल प्रोल्चा पुंडसीनीम। मेको आ गेय पा चेम्शो क्येट नेल्ल मीम हुम्चा पुंडसीब। गो मेको आ मूर्ति नेल्ल खतम पोक्नुड। मारदे हना मेको नेल्ल तेल्लेम पा चेम्शो क्येट खोदेशो पा खुप्शो बाक्नीम। मोपतीके मेको तेल्लेम पा चेम्शो क्येट खोदेशो पा जाम्शा लाइनीम” दैत। होसे २:७,१४

यहूदा सहर कली श्येत दुम्ब

8 मिनु गो मेको आ परबम रोंका पा डाक्ना डाक्न बाक्नुड। श्येल्थ खोइल नु भेत्रे गाक्नुड। गो सिवार खोदेशो पा ग्रीनुड। मिनु बुक्स खोदेशो पा ग्रीनुड।

9 मारदे हना मेको आ गार मसाब। मेको यहूदा सम्म जाक्शो बाक्ब। मेको आं मुर आन बाक्तीक यरूसलेम सहर डा ठेयब लाप्चो सम्म जाक्दीशो बाक्ब।

10 एको लोत्र गाथ सहरम मनेपतीन। मिनु डाक्सीन मडाक्कीन। बेथ-लेआफ्रामी इन पियाम फुरक फुंडसीन। २सामुएल १:२०

11 शाफीर सहर डा मुरपुकी, भेत्रे दुम्शा, मुने दोक्शा इन लां लने। सानान सहर डा मुरपुकी लाइगा मयूनीम। बेथ-एचेलम डा मुर रोंका पाइनीम। मुल रे इ कली वारच पाइब मबाक्नीम।

12 मिनु मारोथ सहर डा मुरपुकीम हिंन हिंन रिम्शो दुम्तीके रिम्ना रिम्न बाक्नीम। परमप्रभु यावे रे हिंन डा श्येत यित। मिनु मेको यरूसलेम डा ठेयब लाप्चो सम्म जाक्शो बाक्त।

13 लाकीश सहर डा मुरपुकी, शारा आन कली बग्गीम फ्रेशा लने। गे सियोन सहर डा मुर आन कली पाप पपाइक्तीनी। मिनु मेको कली पाप पपाइक्ब, गे बाक्नीनी। इस्राएल आ मरिम्शो पतीके इन दातेम थीसीब।

14 मोपतीके गे मोरेशेथ-गाथ सहर कली आ गाक्ची ना डा कोसेली गेचा बाक्नीनी। अकजीब सहर डा मुर इस्राएली आन पिप आन कली ब्वाक्कु मबाक्तीकेम ब्वाक्कु बुक्शो खोदेशो बाक्नीम।

15 मिनु मारेशा सहर डा मुरपुकी, गो इन कली ग्रापाइक्चा कली मुर का चाक्नुड। मेको इस्राएल डा मान ततीके अदुल्लाम सम्म जाक्ब।

16 मिनु इन दाक्शो आल आन परबम इन चां प्रेक्कीन। चां नेल्ल प्रेक्शा, गिदद खोदेशो दुमीन। मारदे हना इन आल नेल्ल ग्याइशशा, मुर आन रागीम लाइक्चा पुंडसाक्म।

## 2

मरिम्शो ठेयब मुर आन परबम लोत्र

- 1 आबी आबी, सु सुम आन ब्राख्येम गोल्शा पाप नु मरिम्शो पचा ला मिन्मी। मिनु नां सोत्रम चोटीन मेको आन मिम्शो पाइनीम। मारदे हना मेको पने चापब बाक्नीम।
- 2 मेकोपुकीम रिम्शो रू तशा वाल्शा, रोइक्नीम। रिम्शो खिं रोइक्नीम। मोपा मेकोपुकीमी मुर आन खिं नु आन थेरशो रू आंम के सेल्नीम। ब्यवस्था ५:२१; हितोपदेस २४:१५; यसैया ५:८
- 3 मोपतीके परमप्रभु यावेमी मार दैत देशा हना “गो मेको आन खिं डा मुर आन कली श्येत गेनुड। मेको रे आंम कली प्रॉइने मचाप्नीम। टेयब लेशशा गाक्ने मचाप्नीम। मारदे हना मेको थम श्येत जतीक नाक्त बाक्ब। आमोस ५:१३
- 4 मेको नाक्ती मुरपुकीमी इन परबंम शुक्शी पा कुम्सो पाइनीम। मिनु इन परबंम रोंका पा डाक्नीम। मिनु मुरपुकीमी ‘गोपुकी थमा पा खतम दुम्तक। आंइ मुर आन थेरशो रू अर्को मुरुम लाइक्नीम। आंइ रू आंइ जोरी सत्रु आन दातेमी योक्सीनीम’ देंनीम” दैत।
- 5 मोपतीके गेपुकी परमप्रभु यावे आ मुर आन योक्शो रू रोइक्चा मताइनीनी।
- 6 मेकोपुकीम “परमप्रभु यावे आ लोत्र मपने” देंनीम। तन्न लोत्र पाइनीम। मिनु मेकोपुकीमी “मोदेशो श्येत आंइ कली मदुम्ब” देंनीम। आमोस ७:१६
- 7 याक्ब आ खिं डा मुरपुकी, मोदेशो देंचा दुम्बा? मार, परमप्रभु यावे आ फाल्तीक सक्ति नुम्मे डा? मेकोमी मोदेशो पाइबा डा? परमप्रभु यावेमी रिम्शो पाइब आन कली रिम्शो लोत्र मपाइबा डा? आमोस ६:३
- 8 तन्न गो आं मुर आन डोंइती जोरी सत्रु खोदेशो दुम्शा बाक्नीनी। रिम्शो पाइब मुर आन फेक्तीक रोइशशा लाइक्नीनी। लडाइ मदुम्शो बाक्ब, दे इन कली थमा सुइशशा गाक्ब आन कली मोदेशो पाइनीनी।
- 9 गेपुकीम आं मुर आन मीश आन कली आन दारशो खिं रे गुंइनीनी। मेको आन आलपुकी रे आं गेशो आसीक गेना हना यो कली रोइशशा लाइक्नीनी।
- 10 बोक्शा लने। मारदे हना एकेर इन नाइक्तीक ममाइ। मारदे हना एको ग्रॉग्रा दितीकेमी मुर आन कली मरिम्शो सेल्ब। मेको मारेइ पने मचाप्चा डा पा खतम सेल्शो बाक्ब।
- 11 तेकोइ मुरुमी जोल पा दूली लोत्र पशा “गो इ कली अडगुर शांबु तूचा नु रकसी तूचा आ परबंम लोत्र पाइनुड” दैत हना, मेको मुर मेको आन कली गारचा डा लोत्र पाइब बाक्ब।

श्येत रे प्रॉइशो

- 12 परमप्रभुमी “याक्ब गो थमा पा नेल्ल इन कली खुप्शा पुक्नन्नी। गो इस्राएलम लीशो आन कली थमा पा खुप्नुडमी। गो मेको आन कली भेडा बगालम वोइशशो खोदेशो पा नु योत्रतीकेम योत्रशो खोदेशो पा वोइक्नुड। मिनु मेकेर शुश मुर दुम्नीम। येरमीया ३१:१०; इजीकीएल ३६:३७; यसैया ५२:१२
- 13 लां कोंइब मेको आन डोंइती गाक्ब। मेकोपुकी लाप्चो रे पा गूशा गाक्नीम। मेको आन पिप मेको आन डोंइती गाक्ब। परमप्रभु यावे मेको आन डोंइडोंइती बाक्ब” दैत।

### 3

टेयब मुर आन कली हुइशशो

- 1 मिनु गो “गे, याक्ब आ टेयब मुरपुकी नु इस्राएली आन खिं डा हुकुम पाइबपुकी, इन नोफा दाइशशा नेनीन। गे ठीक निसाफ तुइक्चा ममाल्नीनी डा? येरमीया ५:५
- 2 गेपुकी रिम्शो पचा काइ मदाक्नीनी। मिनु मरिम्शो पतीक दाक्नीनी। गेपुकीमी आं मुर आन कुशल उक्नीनी। मिनु मेको आन रुश रे आन श्ये रिक्नीनी।
- 3 गेपुकीमी आं मुर आन श्ये ब्वाइतीनी। मेको आन कुशल उक्तीनी। मिनु रुश टुक्रा टुक्रा पा जिकतीनी। मिनु बोसुम क्येतीक श्ये खोदेशो पा मेको आन कली टुक्रा टुक्रा पा चेक्तीनी” देंती। भजन संग्रह १४:४
- 4 मिनु मेकोपुकीमी परमप्रभु यावे कली पुइनीम। तन्न मेकोमी मेको आन पुइशो लोत्र मलेप्ब। आ अरेशो मटितीके मेकोमी मेको आन क्येडा आ कुल खुइक्ब। हितोपदेस १:२८; इजीकीएल ८:१८
- 5 मिनु परमप्रभु यावेमी आ लोत्र पाइब आन परबंम मार दैत देशा हना “सुम आं मुर आन कली दूली लांम गाक्पाइक्बा? आं लोत्र पाइबपुकीमी, सुमी मेको आन कली जचा गेमेनु ‘रिम्शो दुम्ब’ देंनीम। तन्न मेको आन कली जचा मगेमेनु, मेको आन कली लडाइ तोचा कली ठीक दुम्नीम।
- 6 मोपतीके इन कली मारेइ मततीक नाक्दो दुम्ब। परमप्रभु रे मारेइ मतुइक्चा डा पा छिडछिड दुम्नीनी। आं लोत्र पाइब आन कली नां रिक्ब। मिनु नाक्त मेको आन कली छिडछिड दुम्ब।
- 7 कोंइतीक ताइबपुकी शिशी मताइनीम। टुना मुना पाइबपुकी मुने दोक्नीम। मेको आन शोत्र सुम्सीचा माल्नीम। मारदे हना परमप्रभुमी मेको आन कली लोत्र मलेप्ब। आमोस ८:१२
- 8 तन्न गो सक्ति पाइशशो बाक्नुड। गो परमप्रभु यावे आ सोक्ती, ठीक निसाफ पतीके नु आ सक्तिम ब्रीशो बाक्नुड। गो याक्ब आ हेंथे पशो नु इस्राएल डा मुर आन पाप शेंचा कली मोदेशो दुम्शो बाक्नुड। यसैया ५८:१
- 9 याक्ब आ खिं डा टेयब मुरपुकी नु इस्राएल डा खिं खिं डा हुकुम पाइबपुकी एको लोत्र नेनीन। गेपुकीमी ठीक निसाफ पतीक कली ग्रॉग्रा दीनीनी। मिनु ठीक लोत्र नेल्ल दूली सेल्नीनी।
- 10 गेपुकीमी हुश शाइक्पाइशशा सियोन कली सेल्नीनी। मिनु यरूसलेम कली मरिम्शो पतीकेम सेल्नीनी। हबकुक २:१२

11 मेकेर डा ठेयब मुरपुकीमी घूस जशा निसाफ पाइनीम। मेकेर डा चढेबपुकीम शेशो डा क्येट ताकनीम। परमप्रभु यावे आ लोत्र पाइबपुकी क्येट तचा कली नोले दुम्ब लोत्र पाइनीम। मो हना यो मेकोपुकीमी 'परमप्रभु यावे आंइ दातेमी बाकब। गो श्येत मजाइनीकी' देनीम। येरमीया ७:४

12 मोपा इन पतीके सियोन वाकशो रू दुम्ब। यरूसलेम ब्रेशो खिं डा फुल्लु देल्लिके दुम्ब। परमप्रभु यावे आ खिं डा डांडा ब्वाकी दुम्शो बाकब" दैत। भजन संग्रह ७९:१; येरमीया ९:१०; येरमीया २६:१८

## 4

परमप्रभु आ डांडा

1 मिनु नोले डांडा नेल्ल आन क्येडा परमप्रभु यावे आ खिं बाकशो डांडा लाइशो तुम्ब। मिनु मेको नेल्ल आन क्येडा ग्येत्थ लाइब बाकब। मिनु शुश मुर मेकेर लाइनीम। यसैया २:२-४

2 मिनु रागी रागी डा मुरपुकी मेकेर जाकशा, मेकोपुकीमी "जाककीन। गोपुकी परमप्रभु यावे आ डांडा लय। याकूब आ परमप्रभु आ खिं लय। मेकोम इ कली आ लां कोइब। मिनु गोपुकी मेको आ लांम गाकने चाप्यल। मारदे हना शेंतीके सियोन रे नु परमप्रभु यावे आ लोत्र यरूसलेम रे बूब" दैत। लूका २४:४७

3 मेकोमी शुश जात डा मुर आन दातेमी निसाफ पाइब। मिनु डोन बाकशो बोल्यो रागी रागी डा मुर आन कली निसाफ पाइब। मिनु मेकोपुकीमी आन तरवार चेम्शा, फाली सेल्नीम। आन तूतीक भाला चेम्शा गुये सेल्नीम। मिनु रागी रागी डा मुर आन दातेमी लडाइ मपाइनीम। मेकोपुकीमी गेनायो लडाइ मशेंसीनीम।

4 तन्न मुर नेल्ल आन अडगुर नु फोवशी रवा आन पुंम निल्लीम। मिनु मेको आन कली सुइमी हिंच मकोंइनीम। मारदे हना मुर नेल्ल आन परमप्रभु यावेमी लोत्र पशो बाकब। १ राजा ५:५; जकरिया ३:३०

5 मिनु "जात जात डा मुर नेल्ल आन देवी देवता आन नैम गाकनीम। तन्न गोपुकी चहिं गेना हना यो परमप्रभु यावे, इ परमप्रभु आ नैम गाकनय" दैतेकम।

परमप्रभु आ मुरपुकीम शिशी ताइनीम

6 परमप्रभु यावेमी मार दैत देशा हना "मेको नाकती गो खोइल मदुक्ब आन कली खुण्डमी। मिनु गो खेरशो नु श्येत जशो आन कली खुण्डमी। येरमीया ३१:८; ब्यवस्था ३०:४

7 मिनु खोइल मदुक्ब आन कली लीशो मुर आन दातेम वोइक्नुड। खेरचा पुंडसीशो आन कली बोल्यो रागी डा मुर सेल्लुडमी। मिनु परमप्रभु यावेमी मेको आन कली सियोन डांडा रे गेना हना यो कली सासन पाइब।

8 आं बगाल बाकतीक डांडा, सियोन आ तमी इ सांद मिग्दाल-एदेर सहर सम्म जाकदीपब। गे डोंइती डा राज्य लेशा ताइनेवे। यरूसलेम डा तमीम आ राज्य लेशा ताइब।

9 मुल गे मारदे वाइ ब्रेशशा ग्रीनेवे? मार इ पिप मबाकबा डा? इ अर्ती गेब जाम्शा लमा? मिनु मारदे आल थितीक रोइ पशो मीश मुर खोदेशो पा वाइ ब्रेत्नेवे? येरमीया ८:१९

10 सियोन आ तमी, आल थितीक रोइ पशो मीश मुर खोदेशो पा वाइ ब्रेशशा ग्रीडो। मारदे हना मुल गे एको सहर प्रोंइचा माल्लेवे। मिनु खिं मबाकतीकेमी बाकतीक सेल्चा माल्लेवे। गे बेबीलोनम लचा माल्लेवे। मिनु मेकेर रे प्रोंइचा पुंडसीनेवे। मेकेर परमप्रभु यावेमी इ कली इ जोरी सत्रु आन गुड रे प्रोंइब।

11 मुल शुश रागी रागी डा मुर इ पबंम दूली पा बोक्शा 'सियोन ग्रांरा दिशो दुम्ल। गो मेको कली कोत्रना कोत्रन बाकचा ताइसेक्ल' देनीम" दैत।

12 तन्न मेकोपुकीमी परमप्रभु यावे आ मिम्शो मतुइक्नीम। मेकोपुकीमी आ पचा चिकशो मतुइक्नीम। परमप्रभुमी मेको आन कली खला डा अन्न खुण्डो खोदेशो पा खुप्ताकव।

13 सियोन आ तमी बोक्शा, अन्न तुपो। मारदे हना गो इ ग्रीव फलाम के सेल्लुड। गो इ गेरे कांसा के सेल्लुड। मिनु गे शुश जात जात डा मुर आन कली फस पोक्नेवे। मेको आन रोइशो परमप्रभु यावे कली गेनेवे। मिनु मेको आन शोंप रागी नेल्ल डा परमप्रभु यावे कली चढेनेवे।

## 5

बेथलेहेम रे सासन पाइब का जाकब

1 गे गारो हिरशो सहर बाक्नेवे। लडाइ पाइबपुकीमी इ कली पुन्नीम। मिनु इस्राएल कली सासन पाइब कली कोक्केम चोव्रचोम तुन्नीम। उत्पत्ती ३५:१९; मत्ती २:५-६; यूहन्ना १:१-२

2 तन्न गे बेथलेहेम एफ्रथाह, गे यहूदा डा सहर आन दाते डा आइक्च बाक्ते हना यो, इ रे पा आं पा डा इस्राएल कली हुकुम पाइब का जाकब। मेको साइ डोंइती रेन बाकशो बाकत। यसैया ४:१७; यसैया ११:१२

3 मिनु परमप्रभु यावेमी इस्राएली आन कली काइ मकोव्रब। मिनु मीश मुरुमी आल थिवा नोले ला कोव्रब। मेना लीशो मुरपुकी इस्राएल डा मुर नु गारशा, लेत्चा पुंडसीनीम। इजीकीएल ३४:२३

4 मिनु मेकोमी परमप्रभु यावे आ सक्तिमी आ बगाल आन कली योव्रब। मिनु मेकोमी आ परमप्रभु यावे आ ठेयब नेमी आ गेय पाइब। मिनु मेकोपुकी रिम्शो पा बाकनीम। मारदे हना मेको रागी डा सुर सम्म नेल्ल क्येडा ठेयब दुम्ब। यसैया ९:५; एफिसी २:१४

5 मिनु मेकोमी थुं नाइक्चा गेब। मिनु अस्सुर डा मुर इ रागी ओव्रशा लडाइ पचा गोम्तेकम हना, गोपुकीमी ७ जना गोठला नु ८ जना हुकुम पाइब वोइक्नीकी।



6 मेकोपुकीमी अस्सुर रागी कली तरवारम हुकुम पाइनीम। निप्रोद रागी कली शोइश्शो तरवारमी हुकुम पाइनीम। मिनु मेकोपुकीमी इं कली “अस्सुरी इं रागी ओव्रतेकम हना यो, इं कली प्रोइनीम। इ रागी डा सांदम जाक्तेकम हना यो, इं कली प्रोइनीम” देनीम। भजन संग्रह ११०:३

7 याकूब आ लीशो मुर शुश आन दातेम परमप्रभु यावे रे जाक्शो सीत नु घांस तार जुक्शो रेउ खोदेंशो दुम्नीम। मेकोमी “सुइ मुरुम वारच पाइनीमी कों” दे मकोव्रनीम। मिनु मुर आन आस मपाइनीम।

8 याकूब आ लीशो मुर शुश आन दातेमी ब्वाकी डा गुप्स खोदेंशो दुम्नीम। मेकोपुकी भेडा गोठम बाक्शो गुप्स आ चाइक्ब खोदेंशो दुम्नीम। गुप्स मेकेर लाम्तेकम हना, साइश्शा ब्वाइनीम। मिनु सुइमी मेको आन कली प्रोइने मचाप्नीम।

9 मिनु परमप्रभु यावेमी “गे इन गुइ इन जोरी सत्रु क्येडा बोल्यो दुम्शा ग्रानीनी। मिनु इन जोरी सत्रु नेल्ल खतम दुम्नीम। जकरिया ९:१०

10 मेको नाक्ती गो इन शारा इन दाते रे खतम पोक्नुड। इन बग्गी प्रेशा गेनुड।

11 गो इन रागी डा सहर नेल्ल खतम पोक्नुड। गो इन बोल्यो दरवार नेल्ल प्रेतनुड।

12 गो इन टुना मुना पशो आ पबंम इन कली खतम पोक्नुड। मिनु इन दातेमी साहीत कोव्रब आन कली बाक्चा मगेनुड। जकरिया १३:२

13 गो इन दाते डा मूर्ति नेल्ल खतम पोक्नुड। इन पूजा पचा कली खुक्शो फुल्लु खतम पोक्नुड। मिनु इन गुइमी सेल्शो थोव्रक आन डोंइती मबाप्नीनी।

14 गो इन दाते डा मूर्ति पाइश्शो थाम तुल्शा बेरपाइक्नुड। मिनु इन सहर आन कली प्रेतनुड।

15 गो गाइश्शा चुरशा रागी रागी डा मटीब मुर आन कली क्येक्क लेतुडमी” देत।

## 6

परमप्रभु पाप आ पबंम गाइश्शो

1 परमप्रभु यावेमी मार देंबा, इन नोफा दाइश्शा नेनीन “बोक्कीन। मिनु पहाड आन डोंइती इन देंचा माल्शो लोव्र शोव्रडीन। मिनु डांडापुकीमी इन लोव्र नेन्मेकल। इजीकीएल ६:२

2 गे डांडापुकी नु गेना हना यो लीब रागी डा जग, परमप्रभु यावेमी दोपा निसाफ पाइबा, मेको नेनीन। मारदे हना मेकोमी आ मुर आन कली निसाफ पचा चिक्शो बाक्ब। आ दोस गेशो नोफा दाइश्शा नेनीन। मारदे हना आ मुर आन कली मेको के लोव्र बाक्ब। मेकोम इसाएल कली निसाफ पाइब।

3 आं मुरपुकी गो इन कली मार पडा? गो इन कली मार श्येत गेडा? आं कली देनीन। येरमीया २:५

4 गो इन कली इजीप्तर रे एक चाक्तन्नी। मिनु इन वाइलीम वाइल दुम्शो रागी रे प्रोइतन्नी। इन कली लां कोंइचा कली मोसा, हारून नु मिरयाम आन कली सोइक्ताकडमी। प्रस्थान १५:२०

5 आं मुरपुकी, मोआब डा पिप बालाकम मार सल्ला पशो बाक्मे, मेको मिम्तीन। बेओर आ तौ बालाममी मेको कली मार लोव्र लेत्ता, मेको मिम्तीन। शितीम रे गिल्गाल सम्म डा लांमी गाक्शोन, मार मार दुम्मे, मेको मिम्तीन। मिनु परमप्रभु यावेमी इन कली दोपा प्रोइशो बाक्मे, मेको तुइक्नीनी” देत। गन्ती २२:२४:५; यहोसु २:१; यहोसु ४:१९

6 गो मार कुरशा परमप्रभु यावे आ डोंइती जाक्डा? मार चाक्शा, इर डा परमप्रभु आ डोंइती बाम्डा? मार चोशा चढेतीक चाक्शा, आ डोंइती जाक्डा? मेको आ डोंइती बर्स का दुम्शो ब्यफ चाक्शा, जाक्डा? भजन संग्रह ५०:८-१३; आमोस ५:२२

7 परमप्रभु यावे हजार हजार सांड तशा ग्येरबा? मार १० हजार तेल के खोला तशा ग्येरबा डा? गो आं पाप आ पबंम आं डोंइती जरमेशो तौ गेचा माल्नुडा? मिनु आं थुं डा पाप आ पबंम आं आल गेचा माल्नुडा?

8 परमप्रभु यावेमी इन कली, गे बेक्शा लाइब मुर, इन कली मार रिम्शो बाक्मे नु मार पचा माल्नीनी, मेको देशो बाक्ब। मार देशो बाक्ब देशा हना, गे ठीक निसाफ पने, शिशी पतीक कली दाक्तीन। मिनु इन परमप्रभु आ डोंइती ब्रेम्शो दुम्शा गाक्कीन। ब्यवस्था १०:१२; १सामुएल १५:२२

यरूसलेम कली दोस गेशो

9 परमप्रभु यावेमी सहर कली “आं कली मान पा हिंचा इन कली श्येत रे प्रोइतीक दुम्ब। गे थर डा मुर नु सहर डा गुम्तीक डा मुर आन लोव्र नेनीन।

10 गो मेको आ अरेशो मटीब आ खिं डा मरिम्शो पा चेम्शो शोंप प्रेंदु? इन आइक्च सेल्शो सराप रशो पुक्तीक प्रेंदु? लेवी १९:३५

11 मार गो इन मरिम्शो नाक्तीक नु जोल पा नाक्तीक ढक के थेलो वोइक्ब कली दोस मताइब सेलु? हितोपदेस २०:१०

12 मेको आ शोंप पाइश्शो मुरपुकी हुश खाक्श पोकतीकेम ब्रीशो बाक्नीम। मेको सहर डा मुरपुकी जोल पाइनीम। मेको आन शोव्र जोल पतीकेमी ब्रीशो बाक्ब।

13 मोपतीके गो इ कली खतम पोक्चा गोशो बाक्नुड। गो इ कली इ पाप आ पबंम श्येत्थ पोक्नुड।

14 गे जचा थोव्रक जाइनेवे, तन्न मरूनेवे। मिनु इ कोव्रज शोव्रलु बेक्शोन बाक्ब। गे खेक्चा दा खेक्नेवे, तन्न उप्शा वोइक्ने मचाप्नेवे। गे मार खेक्नेवे, मेको नेल्ल लडाइम खतम दुम्ब।

15 गे मार मार शोक्चा दा शोक्नेवे। तन्न खुप्चा मताइनेवे। तेल रवा आ फल खाक्चा दा खाक्नेवे, तन्न इ रॉम तेल खेक्चा मताइनेवे। गे अडगुर खाक्चा दा खाक्नेवे, तन्न अडगुर शांब तूचा मताइनेवे। ब्यवस्था २८:३८-४०; आमोस ५:११

16 गे ओप्री आ अरेशो लोत्र पाप्तीवी। मिनु आहाब आ खिं डा मुर आन पशो नेल्ल पाप्तीवी। मिनु मेको आन गेशो अर्ती टिप्तीवी। मोपतीके गो इ कली खतम पोक्नुड। मिनु इ मुर आन कली शुक्शी पतीक सेल्लुड। गे आं मुर आन गाइशो ताइनेवे” दे ब्रेन्न ब्रेन्न बाक्ब। १ राजा १६:२९-३३

## 7

इसाएल कली श्येत दुम्शो

1 गो दोदेशो पा श्येत जशो बाक्नुडा? गो फल सिरशा नोले, अडगुर रू डा सिला माल्ची नोले मारेड जचा मताइनुड। आं माल्शो डोंइती मीशो फोत्रशी यो मबाक्ब। भजन संग्रह १२:२; यसैया ५७:१

2 थमा सुइक्चा पुंडसीब मुर रागी रे जाम्शा लाम्तेक्म। मिनु गेना हना यो रिम्शो पाइब मुर मलीशो बाक्नीम। मुर नेल्ल मुर साइक्चा कली बाप्शा बाक्शो बाक्नीम। मुर नेल्लेमी ब्वारद दाइशशा आंम लोकब कली साइक्चा माल्शो बाक्नीम।

3 मेकोपुकी मरिम्शो पचा कली जोक्ब बाक्नीम। आन टेयब मुर नु निसाफ पाइबपुकीमी घूस जाइनीम। सक्ति पाइशशोपुकीमी मार मिम्तमे मेकोन पाइनीम। मोपा ठीक पतीके कली दूली सेल्लनीम।

4 मेको आन दाते डा नेल्ल क्येडा रिम्शो मुर चू रवा खोदेशो बाक्ब। मेको आन दाते डा गेना हना यो रिम्शो पाइब थरपु हिरशो चू खोदेशो बाक्ब। इन खाल पाइब आन नाक्त जाक्शो बाक्ब। मेको नाक्ती इन कली कोत्रबमी इन कली गुम्थ जाक्ब। मुल मेको आन कली खतम सेल्लतीक नाक्त जाक्ब।

5 इन वारच कली थमा मसुतीन। इन दाक्शो मुर कली थमा मसुतीन। गे नु काथा इप्शो मीश नु यो होस पा लोत्र पने। येरमीया ९:३-४

6 मारदे हना तौमी आ आफ कली मरिम्शो पाइब। तमी आ ममा आ पर्वम दूली पाइब दुम्ब। चाइमीम आ शिमी आ पर्वम मरिम्शो पाइब। आंम खिं डा मुर इन जोरी सत्रु दुम्नीम। मती १०:३५-३६

7 तन्न गो परमप्रभु यावे गे कोव्रनुड। गो आं कली श्येत रे प्रोंइब परमप्रभु कली रिम्नुड। आं परमप्रभुमी आं पुंडशो नेंब।

परमप्रभुमी श्येत रे प्रोंइब

8 मिनु “आं जोरी सत्रु आं कली शुक्शी पा मग्येरसीन। गो गोलती हना यो, बोक्नुड। गो छिडछिडम बाक्ती हना यो, परमप्रभु यावे आं छेडछेड बाक्ब। ओबदिया १:१२; भजन संग्रह २७:१

9 आं कली निसाफ पा वारच मपवा सम्म गो परमप्रभु यावे आ गाइशो फाल्चा माल्लुड। मारदे हना गो मेको कली पाप पाता। मेकोमी आं कली आ शिशी तपाइक्चा कली छेडछेडम गुंडब। येरमीया १४:७

10 मेना आं जोरी सत्रु मेको ताइनीम। मिनु मुने दोक्नीम। मारदे हना मेकोपुकीमी डोंइती ‘परमप्रभु यावे, इ परमप्रभु ते बाक्म?’ देशो बाक्तेक्म। गो मेको आन खतम दुम्शो ताइनुड। मुल यो मेकोपुकी लां डा हिलो खोदेशो पा दिम्चा पुंडसीशो बाक्नीम। भजन संग्रह ७९:१०

11 गे इन गारो लेंशा सेल्लतीक नाक्त नु इन सांदपुकी डोन डोन सम्म चाक्दीत्तीक नाक्त जाक्शो बाक्ब।

12 मेको नाक्त अस्सुर नु इजीप्ट रे शुश मुर जाक्नीम। इजीप्ट रे युफ्रेटीस सम्म, समुन्द्र रे समुन्द्र सम्म नु पहाड रे पहाड सम्म डा शुश मुर इन बाक्तीक जाक्नीम।

13 तन्न रागी रागी नेल्ल श्येत्थ दुम्नीम। मुर आन मरिम्शो पशो आ पर्वम मोदेशो दुम्ब” देंत।

परमप्रभुम इसाएल कली शिशी पाइब

14 गे इन मुर आन कली कोक्केम योव्रडीन। मेको ब्वाकीम बाक्शो बगाल इन के बाक्ब। मेको रिम्शो बाक्तीकेम बाक्नीम। मेको आन कली डोंइती डा खोदेशो पा बाशान नु गिलादमी जोचा गेन। मीका ५:३; येरमीया ५०:१९

15 गेपुकी इजीप्ट रे यूशो नाक्त खोदेशो पा गो इन कली छक लाक्चा डा गेय कोंइनुड।

16 मेको रागी रागी डा मुरपुकी शुश सक्ति पाइशशो बाक्तेक्म हना यो, मेको तशा, मुने दोक्नीम। मेकोपुकीम आन गुइम आन कुल सुम्सीनीम। मिनु मेको आन नोफा लाटा दुम्ब।

17 मेकोपुकीम बुस्स खोदेशो नु खपीम गेशा गाक्ब जन्तु खोदेशो पा, खप तुक्नीम। मेको आन बोल्यो दरवार रे हिंशा खिंखि पा यूनीम। मेकोपुकी हिंशा परमप्रभु यावे, आंइ परमप्रभु गे लेत्नीम। मिनु मेकोपुकीमी इन कली मान पा हिंनीम। भजन संग्रह ७२:९

18 इन खोदेशो परमप्रभु अर्को सु बाक्बा डा? गे ठीक मपशो क्याम्ब बाक्नीनी। इन लीशो मुर आन मरिम्शो पतीके माफ गेनीनी। गे गेना हना यो गाइक्स डा गाइक्स मबाक्नीनी। तन्न शिशी पचा कली ग्येरशा बाक्नीनी। भजन संग्रह १०३:३,८-१३

19 मेकोमी आंइ कली लेंशा शिशी पाइब। मेकोमी आंइ पाप कली दिम्ब। गे आंइ पाप शुश लुक्च लशो समुन्द्रमी ताइक्नीनी।

20 गे याक्ब कली इन थमा सुइक्तीके कोंइनीनी। मिनु अब्राहाम कली दाक्शा मप्रोंइतीके कोंइताक्नी। गे साइ डोंइती आंइ किकी पिप आन कली कसम जशा लोत्र गेशो बाक्तीनी। उत्पत्ती २८:१३-१५; उत्पत्ती २२:१६-१८; लूका १:७३

## नहुम

**ब्रेक्ब मुर:** एको किताब परमप्रभु यावे आ लोत्र पाइब नहुममी ब्रेक्शो बाक्ब।

**गेना ब्रेक्शो:** ६६३-६०६ बि. सी. मेर नहुम आ बाक्ची ना ब्रेक्शो बाक्ब।

**मारदे ब्रेक्शो:** एको किताब योना आ ब्रेक्शो किताब खोदेशो पा निनवे सहर आ पर्बम ला परमप्रभु यावे आ लोत्र बाक्ब।

१. निनवे सहर निसाफ पाइक्चा पुंडसीब
२. निनवे सहर लडाइम फुचा नु नेल्ल रोइक्चा पुंडसीब
३. निनवे सहर डा मुर आन मरिम्शो पशो

परमप्रभु निनवे सहर तशा गाइश्शो

1 एको निनवे सहर आ पर्बम परमप्रभु यावे आ पशो लोत्र बाक्ब। एको एल्कोश डा नहुममी तशा ब्रेक्शो लोत्र बाक्ब। मेकोमी मार ब्रेक्शो बाक्ब देशा हना,

2 परमप्रभु यावे रुश पाइब नु क्येक्क लेप्ब परमप्रभु बाक्ब। परमप्रभु यावेमी आ जोरी सत्रु आन कली क्येक्क लेप्ब। मेको आन कली तशा गाइक्ब। परमप्रभु यावेमी आ जोरी सत्रु आन कली क्येक्क लेशा, मेको आन कली तशा शुश चुरब। प्रस्थान २०:५; ब्यवस्था ४:२४

3 परमप्रभु यावे ओंखां ओंखां पा गाइक्ब। तन्न मेको ठेयब सक्ति पाइश्शो बाक्ब। मिनु परमप्रभु यावेमी दोस ताइब आन कली सजाइ मगेथु मप्रोंडब। मेको आ लां फश गिवारम बाक्ब। मिनु गोस्स मेको आ खोइल डा फुरक बाक्नीम। प्रस्थान ३४:६-७

4 मेकोमी ठेयब समुन्द्र कली हुइक्तानु, सोत्रब। मेकोमी खोला नेल्ल आन कली सोत्रपाइक्ब। बाशान डा बी ब्यफ योत्रतीके नु कारमेल पहाड डा मरिड मरिड सोल सुल बेक्नीम। लेबानोन डा फू यो सोल सुल बेक्नीम।

5 मेको आ डोइती डाडा नेल्ल खिंखि पाइनीम। मिनु पहाड दिम दुम्नीम। रागी नु रागीम बाक्ब नेल्ल हिम्सीनीम। भजन संग्रह ९७:५

6 परमप्रभु यावे गाइक्तानु, मेको आ डोइती सु राप्ने चाप्बा डा? मेको आ चुरशो सुम फाल्ने चाप्बा डा? मेको आ गाइश्शो मी खोदेशो पा बाइब। मिनु मेकोमी सेरथे फुल्लु आन कली प्रोल्ब।

7 परमप्रभु यावे रिम्शो पाइब बाक्ब। मेको श्येत जशो नाक्ती खुइश्शा ब्रोंडशा बाक्तीक बाक्ब। सु मेकेर प्रोक्शा लाइबा, मेको खुइश्शा बाक्चा ताइब। ब्यवस्था ४:३१; भजन संग्रह १:६

8 मेकोमी बारशो ब्वाक्कुमी निनवे कली खतम सेल्ब। मेकोमी आ जोरी सत्रु आन कली खेरशा छिडछिडमी सोइक्ब।

9 गे मारदे परमप्रभु यावे कली मरिम्शो पचा कली लोत्र गारपाइक्नीनी? मेकोमी इन कली खतम पोक्ब। गे मेको आ पर्बम मरिम्शो पचा कली निक्शी खेयप बोक्ने मचाप्नीनी।

10 आ जोरी सत्रु चूम रेशो खोदेशो पा रेशो बाक्नीम। मिनु दुक्शो मुर खोदेशो पा दुक्नीम। मिनु सोत्रशो नल खोदेशो पा मीम नेक्चा पुंडसीनीम।

11 निनवे, परमप्रभु यावे कली मरिम्शो पचा कली लोत्र गारपाइक्ब नु काइ मरिम्शो सल्ला पाइब इ दाते रे ग्रूशो बाक्नीम।

12 परमप्रभु यावे आ लोत्र मार बाक्ब देशा हना “मेको थम सक्ति पाइश्शो नु शुश मुर बाक्तेक्म हना यो, साइश्शा क्याम्चा पुंडसीनीम। यहूदा, गो इ कली श्येत गेतन हना यो, मुल इ कली श्येत मगनन।

13 मिनु मुल गो इ कली श्येत गेबपुकी रे प्रोंडनुड। मिनु इ कली फ्रेशो डोरी प्रोइक्नुड” दे परमप्रभु यावेमी देशो बाक्ब।

14 निनवे, परमप्रभु यावेमी इ पर्बम लोत्र का अरेशो बाक्ब। मेकोमी मार अरेशो बाक्ब देशा हना “मुल रे इ नें वोइक्ब मुर सुइ मलीनीम। गो इ परमप्रभु आ खिं रे इ मुशा सेल्शो मूर्ति नु चेम्शा सेल्शो मूर्ति गुंडनुड। गो इ कली तुरस ठीक सेल्नुड। मारदे हना गे काइ मरिम्शो पाइब बाक्नेवे” दे अरेशो बाक्ब।

15 कोत्रडीन, रिम्शो लोत्र पाइब का पहाडम गाक्ब। मेकोम थुं नाइक्तीक लोत्र शेंब। यहूदा डा मुरपुकी, इन चाड मानेन। इन कसम जशो खपीन। मारदे हना काइ मरिम्शो पाइब इन बाक्तीकेमी लेशा मजाक्नीम। मेको नेल्ल क्याम्चा पुंडसाक्म।

## 2

निनवे जाम्शा लाइब

1 निनवे, इ कली खतम सेल्ब जाक्शो बाक्ब। इ बोल्यो दरवार खाल पावो। इ लां रिम्शो पा कोत्रडो। इ किप्शुर किम्सो। इ बोल नेल्ल गुंडदो। यसैया ५२:७; नहुम १:११

2 मारदे हना परमप्रभु यावेमी याक्ब आ मान ततीके लेशा गेब। मिनु इस्राएल आ मान ततीके यो लेशा गेब। मरिम्शो पाइबपुकी इ रागी लेशा मओत्रनीम। मेकोपुकी खतम सेल्चा पुंडसीशो बाक्नीम।

3 मेको आ लडाइ पाइब आन तेक्तीक लल बाक्नीम। मिनु मेकोपुकीम लल वा फेक्शो बाक्नीम। मेको लडाइ पथ लची नाक्ती, आन बग्गी डा फलाम टल्केसीब। मेको आन तूतीके शेशा हिरनीम।

4 मेको आन बग्गीपुकी शुश दोरनीम। मेको सहर आ एर ओंथ शुश हिरशा गाक्नीम। मेको तोवशी खोदेशो तांडसीनीम। चिला दाप्शो खोदेशो पा गूनीम।

5 मेकोमी आ लडाइ पाइब आन कप्तान आन कली ब्रेण्व। मेकोपुकी दाइल पा आ डोंइती जाक्नीम। मिनु रीब पा सहर डा गारो गे दोरनीम। मेकेर आन फाम्सीतीके सेल्शो बाक्ब।

6 ब्वाक्कु बारशा यीब। मिनु दरवार खिंखि पाइब।

7 मेको सहर डा पिपीम कली ग्याइशशा, आ वा पुइशशा लाइक्नीम। मेको आ वाइलीम नेल्ल ग्याइशशा डोन लाइक्का पुंडसीनीम। मिनु मेकोपुकी कुच तुप्शा दुकुर खोदेशो पा रोंका पा डाक्नीम।

8 निनवे ब्वाक्कु शाइक्ना शाइक्न लाइब दोम्ली खोदेशो बाक्ब। मिनु “रिम्दो रिम्दो” दे ब्रेशोनो यो, सुइमी लेशशा मकोव्रनीम।

9 मेको आ सुन नु चांदी रोइक्तीन। आ शोंप हिकने मचाप्चा डा पा शुश बाक्नीम। शुश क्येट लाइब मारेइ मारेइ बाक्ब।

10 मेको सहर मारेइ मारेइ रोइशशा श्येत्थ नु खतम पोक्का पुंडसीशो बाक्ब। मिनु मुर आन थुं लुकच लाइब, आन पोक्च खिंखि पाइनीम। मिनु आन ची यो खिंखि पशो बाक्नीम। मेको आन कुल बेक्शो मुर आन कुल खोदेशो दुम्नीम।

11 निनवे सहर डा गुप्स खोदेशो ठेयब मुर आ दरवार मार दुम्मे? मेको आ गाक्तीक नु आ तमी तौ आन बाक्तीके मार दुम्मे? आ आल मेकेर बाक्शो बाक्तेकम। मिनु सुइमी मेको आन कली श्येत मगेम। यसैया १३:७-८

12 गुप्स खोदेशो ठेयब मुरुमी आ तमी तौ आन कली शुश मार मार खुप्शो बाक्त। आ मीश कली मारेइ मारेइ चाक्शो बाक्त। आ दरवार शोंपोम प्रिंशो बाक्त। आ पुक्खी मार मार साइशशा चाक्शा प्रिंशो बाक्ब।

13 मिनु मुर नेल्ल आन परमप्रभु यावेमी “गो इ कली काइ मदाक्थ, इ पबर्म बोक्ती। गो इ बग्गी चोशा गेनन। मिनु गुप्स आ चाइक्ब खोदेशो इ तमी तौ तरवारमी साइक्का पुंडसीनीम। इ रोइशशा, इ साइशशा रागी रे गुंडनुड। मिनु इ लोव कुरब मुर आन सेंदा मनेसीब” देशो बाक्ब।

### 3

निनवे कली सजाइ

1 मिनु निनवे, गे हुश खाक्श पोक्ब सहर बाक्नेवे। इ दातेम शुश जोल पतीके बाक्ब। गे रोइशशा थोवकीम ब्रीशो बाक्नेवे। इ दातेमी रोइक्तीक गेनायो मनुण्व। इजीकीएल ६:२,९

2 मेकेर युक्शो रेयके, गुगील आन रेयके, शारा आन प्रेक्शो रेयके नु बग्गी आन दोरशो रेयके नेसीशो बाक्ब।

3 शारा डोइक्ब दोरोर पा गाक्नीम। आन टल्केशो तरवार शेशा, आन तूतीक झिल्लील पा कोंइनीम। बेक्शो मुर शुश बाक्नीम। हिकने मचाप्चा डा पा साइशशा मुर बाक्नीम। मुर शोल्मो पा साइशशा बाक्नीम। मुरपुकी बेक्शो मुर तार दाइल पांडसीन सीन गाक्नीम।

4 मेको तेल्लेम खोदेशो सहरम हिकने मचाप्चा डा पा मरिम्शो पतीकेमी रागी रागी डा मुर आन कली आ खोदेशो पपाइक्तीमी। रिम्शो मीश मुर नड, देखु पा, आ टुना मुना पतीकेमी जात जात डा मुर आन कली दूली लां खोइक्काइक्तीमी।

5 मिनु मुर नेल्ल आन परमप्रभु यावेमी “गो इ कली काइ मदाक्थ, इ पबर्म बोक्ती। गो इ गुने इ कुल सम्म क्युकुनुड। मिनु रागी रागी डा मुर आन कली इ भेत्रे रां कोंइनुडमी। राज्य राज्य डा मुर आन कली इ मुने दोक्तीक कोंइनुडमी। यसैया ४७:३

6 गो ग्रान्ना दिशो थोवक इ तारी ताइशशा, इ कली थम मरिम्शो पाइनुड। मिनु इ कली तशा मुर हित्तीक सेल्लुड।

7 मिनु इ कली ताइब नेल्ल इ क्येडा हिंशा, नोले शोंइसीनीम। मिनु मेकोपुकीम ‘निनवे खतम दुम्त। मेको आ पबर्म सु रोंका पाइबा डा? गो इ कली लेम्ब मुर ते थिन्ने चाप्नया डा?’ देनीम।

निनवे आ खतम दुम्तीके

8 मार, गे थ्रेबेस सहर क्येडा यो रिम्शो बाक्नेवे? मेको सहर नील खोला आ नेक्था बाक्शो बाक्ब। आ एर ओंथ नेल्ल ब्वाक्कु बाक्ब। मिनु मेको ब्वाक्कुमी मेको कली खाल पशो बाक्ब। मेको ब्वाक्कु गारो खोदेशो बाक्ब। येरमीया ४६:२५

9 एशीयोपीया रागी मेको आ सक्ति बाक्त। इजीप्त गेना हना यो आ सक्ति बाक्त। पूत नु लिबीया डा मुर मेको कली वारच पाइब बाक्तेकम।

10 मो हना यो मेको ग्याइशशा गुंडचा पुंडसाक्ब। मेको आ आलपुकी लाम ताइशशा साइक्का पुंडसाक्म। आ ठेयब मुर आन कली बाजी आप्शा लाइक्तेकम। मिनु मेको आन नेल्ल क्येडा ठेयब मुर नेल्ल साडलोमी फ्रेंचा पुंडसाक्म। योएल ४:३

11 गे यो दुक्शो दुम्नेवे। मिनु खुइक्थ लाइनेवे। मिनु इ जोरी सत्रु रे पा ब्रोंइचा कली खुंडसीतीक मालनेवे। येरमीया २५:१५

12 इ बोल्यो दरवार नेल्ल फोवशी रवा आ डोंइती मीशो गेडा खोदेशो बाक्नीम। मेको रवा हिम्शोनो, मेको ब्वाइब आन शोव्रमी दोक्नीम।

13 इ लडाइ पाइब आन कली कोव्रडो। मेको मीश मुर खोदेशो बाक्नीम। इ रागी डा ठेयब लाप्चो इ जोरी सत्रु आन कली रोक्सीशो बाक्नीम। लाप्चो आन आग्लो नेल्ल मीम नेक्शो बाक्नीम।

14 गे पुम्चा पुंडसीनेवे। मेको नाक्ती कली ब्वाक्कु प्रिंशा वोतो। इ गारो बोल्यो सेलो। हिलो निशा, इंटा सेलो।

15 मेकेर इ कली मीम दाक्ब। तरवारमी इ कली साइक्ब। मिनु मालेपुकीम मार मार नेक्शो खोदेशो पा इ कली नेक्ब। गे माले खोदेशो पा सोशो बोशो दुमीन। मिनु घांस ब्वाइब माले खोदेशो पा सोशा बोशा शुश दुमीन। योएल १:४

16 गे सरीड डा सोरुल क्येडा इ ग्याप्ब लेयब मुर शुश सेलतीवी। मेको माले खोदेशो पा आन कुशुल ताइशशा बेरनीम।

17 इ कली खाल पाइब घांस ब्वाइब माले खोदेशो बाक्नीम। मिनु इ सरकार डा ठेयब मुर माले आन हुल खोदेशो बाक्नीम। मेको ग्यू दुम्मेनु, गारो तार बाक्नीम। मिनु नां पवानु, मेको नेल्ल बेरशा लाइनीम। मेको ते लाइनीमी, सुइमी मतुइक्नीम।

18 अस्सुर डा पिप, इ गोठलापुकी इप्शो बाक्नीम। इ ठेयब मुरपुकी नाइशशा गोल्शा बाक्शो बाक्नीम। इ मुर नेल्ल डांडाम ब्रशो बाक्नीम। मिनु मेको आन कली खुपब सुइ मबाक्नीम।

19 इ गार कली मारिडम यो सापाइक्ने मजापब। इ गार बेक्चा डा बाक्ब। मिनु इ पबर्म लोत्र नेंब मुर नेल्ल शुश हिनीमी। मारदे हना इ गेनायो मनुपब मरिम्शो पतीकेमी सुइ ब्रोइने मचाप्शो बाक्तेक्म” दैत।

## हबकुक

**ब्रेकब मुर:** एको किताब हबकुकमी ब्रेकशो बाकब। हबकुक आ अर्थ “मुप्ब मुर”, “शुश दाकब मुर” बाकब। मेको परमप्रभु यावे आ लोव्र पाइब बाकत।

**गेना ब्रेकशो:** कल्दी आन लडाइ पाइबपुकी ६०५ बि. सी.म निनवे ग्राशा, बारना बारन लशो बाकतेकम। हबकुक १:६ हबकुकम एको किताब यहूदा डा पिप योसीयाह आ पाला ६३९-६०९ बि. सी.म नु यहूदा डा पिप योयाकीम ६०९-५९८ बि. सी.म आस सासन पचा क्येडा डोंइती ब्रेकशो बाकत। हबकुक येरमीया आ लोव्र पची ना यो बाकशो बाकत।

**मारदे ब्रेकशो:** परमप्रभु यावेमी इस्राएली आन कली निसाफ पाइब। इस्राएली आन कली श्येत गेब सजाइ गेचा पुंडसीनीम। ठीक पाइब आन थमा सुइक्तीके ब्रोंइनीम।

मरिम्शो दुम्तीके आ पर्वम लोव्र

- १ एको परमप्रभु यावे आ लोव्र पाइब हबकुकमी परमप्रभु यावे रे पा नोले दुम्ब ततीक तशो बाकब।
- २ मिन हबकुकमी “परमप्रभु यावे, गो गेना सम्म इन कली ‘वारच पन’ दे पुंडनुडा? गे काइ मनेनीनी? ‘हुश खाकश पोक्नीम’ दे थोइनुड। तन्न गे काइ मप्रोंइनीनी।
- ३ गे मारदे आं कली मरिम्शो पशो तपाइक्नीनी? गे मारदे आं कली श्येत जशो तपाइक्नीनी? खतम सेलतीके नु जिचा पोक्तीक आं डोंइती बाक्नीस। तेइ तेइ राम्शी पचा नु जिचा ला पोक्नीम।
- ४ मिन इन अरेशो मपाइनीम। ठीक पाइबपुकीमी ग्राने मचाप्नीम। इन अरेशो मटीबपुकीमी ठीक पाइब आन कली पुम्नीम। मिन निसाफ पतीके दूली दुम्ब” देंती।

कल्दी आन पर्वम लोव्र पशो

- ५ मिन परमप्रभुमी आं कली “रागी रागी डा मुर आन कली कोव्रडो। मेको आन कली कोव्रशा, गे छक लाक्नेवे। मारदे हना इन ब्रोंइतीक नाक्तीमी गेय का पशो बाकब। मेको इ कली देंतेकम हना यो, गे मेको थमा मसुइक्नेवे। प्रेरित १३:४१
- ६ गो कल्दी डा मुर आन कली पोक्नुडमी। मेको हिंचा डा नु शिशी मपाइक्ब बाक्नीम। मेकोपुकीमी रागी नेल्ल कली ग्राशा, मुर आन खिं नु बाक्तीके रोइक्नीम।
- ७ मेकोपुकी श्येत गेब नु शुश हिंचा डा बाक्नीम। मिन ‘मार ठीक निसाफ पतीके बाक्बा? सु मान ताइब बाक्बा’ दे आंमान देंनीम।
- ८ मेको आन शारा जोइ आन क्येडा रीब पा दोरब बाक्नीम। मिन नाकदो ग्रूब फर खोदेशो पा साइक्ब बाक्नीम। मेको आन शारा बारनीम। मेको आन शारा डोइक्ब डोन रागी रे जाक्नीम। ककाकुली खोदेशो पा बेरशा, रीब पा सिस्वार ग्याइक्नीम। सेफन्याह ३:३
- ९ मेकोपुकी डोंइती बारशा, हुश खाकश पोक्चा कली जाक्नीम। मिन मुर आन कली बाल्वा खोदेशो हिक्ने मचाप्चा डा पा शुश ग्याइश्शा, खुप्नीम।
- १० मिन पिप आन पर्वम शुक्शी पाइनीम। हुकुम पाइब आन पर्वम तोक्शो लोव्र पा रिल्टीम। मेकोपुकीमी बोल्यो दरवार आन पर्वम ‘गो ग्रानय’ दे खप तेल्शा डोइश्शा लशा, आंम के सेल्टीम।
- ११ मेको फश खोदेशो पा गाक्नीम। मिन पाप पा दोस ताइब दुम्नीम। मेकोपुकीमी आंम सक्ति कली ला थमा सुइक्नीम” देंत।

हबकुकम परमप्रभु कली पुंडशो

- १२ मिन हबकुकमी “परमप्रभु यावे, आं परमप्रभु, गे का ला आं परमप्रभु बाक्नीनी। गो मबेक्नीकी। परमप्रभु यावे, गे मेको आन कली निसाफ पचा कली योव्रतीनी। गे, आं सेरथे फुल्लु, गे मेको आन कली सजाइ गेचा कली वोइक्तीनी। येरमीया १०:२४
- १३ गे मरिम्शो पशो काइ तने मचाप्नीनी। मरिम्शो पशो फाल्ने मचाप्नीनी। मोदेशो बाकत हना यो, थम मरिम्शो पाइब आन कली तशा, मारदे मारिड मदेनीनी? इन अरेशो मटीबपुकीमी आंम क्येडा ठीक पाइब मुर आन कली सदमेनु, गे मारदे सिक्सी पा बाक्नीनी?
- १४ गे मुर आन कली समुन्द्र डा डांइ खोदेशो सेल्टीनी। सासन पाइब मबाक्शो ग्रेशा गाक्ब आइक्ब जन्तु खोदेशो सेल्टीनी।
- १५ मिन आन जोरी सन्तुमी नेल्ल आन कली बोलसीमी खोदेशो पा रेल्टीम। मेको आन कली ग्याइलीम पिक्शा, गुंडनीम। आन ग्याइक्तीकेमी खुप्नीम। मिन डांइ रेशो खोदेशो पा ग्येरशो बाक्नीम।
- १६ मोपतीके मेकोपुकीमी आन ग्याइल कली क्योरशा चढेनीम। आन ग्याइक्तीके कली चोशा चढेनीम। मारदे हना मेको ग्याइल नु ग्याइक्तीके रे पा शुश तशा, ब्रोंवशो जाइनीम।
- १७ मार, मेकोपुकीमी आन ग्याइलीम रेन्ना रेन्, रागी रागी डा मुर आन कली शिशी मपथु, खतम सेल्ना सेल्ल बाक्चा गेनीनी?” दे हबकुकमी परमप्रभु कली देंत।

## 2

परमप्रभुमी लोव्र लेशो

- 1 गो नेल्ल तचा डा पा राप्शा बाक्नुड। गो गारो डोइश्शा कोव्नुड। मिनु परमप्रभु यावेमी आं कली मार देबा, मेको नेल्ल तशा नेशा बाक्नुड। आं कली मारेड लोत्र लेप्बा कों, दे रिम्नुड। यसैया २१:८
- 2 मिनु नोले परमप्रभु यावेमी आं कली “गे इ तशो नेशो ब्रेक्टो। रिम्शो पा रुप्चा डा पा फुल्लु तार ब्रेक्टो। मिनु सु मेकेर लाइबा, मेकोम रीब पा पढेने चाप्ब। यसैया ३०:८; प्रकाश १:११,१९
- 3 मारदे हना इ तशो आं देशो नाक्ती जाक्ब। मेको दीसा नित्थी मट्टुन्त हना यो, मेको कली रिम्शा बाक्को। मेको थमा पा लुम्ब। देश मपाइब। इजीकीएल १२:२३; २ पत्रुस ३:९
- 4 गे टेयब लेशशो कली कोव्नुडो। मेको आ थुं मरिम्शो बाक्ब। तन्न ठीक पाइब आं कली थमा सुइश्शा ब्रोइब।
- 5 मिनु शुश शोप कली थमा सुइक्चा दूली बाक्ब। टेयब लेशशो मुर मलीब। मेको आ शोत्र तुरस खोदेशो पा पाक्शा बाक्ब। बेक्पाइक्ब खोदेशो पा गेनायो मरुब। रागी रागी डा मुर नेल्ल आन कली खुप्शा आंम के सेल्ब” दैत।

मुर आन कली दिम्ब कली हुइश्शो

- 6 मिनु “मुर नेल्लेमी मोदेशो मुर आ पर्वम मुने तोक्चा डा लोत्र पाइनीम। मेको आ पर्वम शुक्शी लोत्र पा, आबी आबी, गे अरु मुर आन शोप आंम कली तेल्लीवी। गे गेना सम्म अरु मुरुमी इ कली गेशो क्येट आंम कली वोइक्नेवे?
- 7 मार, इ कली जेर गेबपुकी कालेमीन मबोक्नीमी डा? मेकोपुकी सेंसीशा इ कली महिपाइक्नीमी डा? मेना गे श्येत जाइब दुम्नेवे।
- 8 मारदे हना गे रागी रागी डा शुश मुर आन शोप रोइक्ताक्नी। मुल चहिं इ साइक्तीक रे ब्रोइशोपुकीमी इ के बाक्शो नेल्ल रोइक्नीम। गे मुर आन कली हुश खाक्श पोक्तीवी। गे रागी, सहरपुकी नु मेकेर बाक्ब मुर नेल्ल आन कली खतम सेल्लतीवी” दैत। हबकुक २:१७
- 9 “आबी आबी, गे मरिम्शो पा क्येट चेम्नेवे। मोपा इ खिं डा मुर आन कली खतम सेल्नेवे। तन्न गे ‘श्येत मजाइनुड’ दे इ खिं इर सेल्लतीवी।
- 10 गेम शुश जात जात डा मुर साइक्तीके, इ खिं डा मुर आन कली मुने तोक्शा, साइक्चा पुंडसीनेवे।
- 11 गारो डा फुल्लुमी इ पर्वम ‘वारच पने’ दे ग्रीनीम। मिनु थाम आ तार डा शीमी मेको कली लोत्र लेप्ब” दैत। लूका १९:४०
- 12 “आबी आबी, गे हुश खाक्श पोक्तीकेमी, सहर का सेल्लतीवी। गे ठीक मपतीकेमी सहर आ जग वोइक्ब बाक्नेवे। येरमीया २२:१३; मीका ३:१०
- 13 जात जात डा मुर आन गेय नेल्ल मी कली ला दुम्ब। रागी रागी डा मुरपुकी मलीचा डा गेय पचा कली सोम्सीनीमी, दे मुर नेल्ल आन परमप्रभु यावे आ देशो मबाक्बा डा? येरमीया ५१:५८
- 14 तन्न रागी नेल्ल परमप्रभु यावे आ सक्ति डा तुइक्तीकेम ब्रीशो बाक्ब। ब्वाक्कुमी समुन्द्र ब्रीशो खोदेशो पा ब्रीशो बाक्ब” दैत। यसैया ११:९
- 15 “आबी आबी, गे इ नेक्था बाक्ब मुर आन कली मुने तोक्चा कली इ दुक्तीक थोत्रक तुंइशा दुक्पाइक्नेवे।
- 16 गे टेयब दुप्चा क्येडा शुश मुने दोक्नेवे। मुल इ पालो जाक्त। गे यो तूशा, तुक्शा दाइल पांडसो। परमप्रभु यावेमी आ ग्युरा गुड डा कचौरा इ कली गेब। मिनु इ टेयब दुम्तीके मुने दोक्ब। येरमीया २५:१५,२६
- 17 गे लेबानोन डा टेयब रवा नेल्ल तिम्तीवी। मेकेर डा ब्वाकी डा जन्तु नेल्ल आन कली मरिम्शो पाप्तीवी। मेको इ मरिम्शो पतीके क्येक्क लेत्चा पुंडसीब दुम्नेवे। मारदे हना गे मुर आन कली हुश खाक्श पोक्तीवी। मिनु रागी, सहरपुकी नु मेकेर बाक्ब मुर नेल्ल आन कली खतम सेल्लतीवी” दैत।

मूर्तिम मारेड पने मचाप्नीम

- 18 मिनु “मूर्तिम मार गेय पने चाप्बा डा? मुर आ चेम्शो मूर्ति जोल ला बाक्ब। मारदे हना मेको चेम्बमी आंम चेम्शो मूर्ति कली थमा सुइक्ब। तन्न मेको मूर्ति ब्वाक्ने मचाप्ब। यसैया ४४:१०-२०
- 19 आबी आबी, गे शी कली ‘संसो’ दे ब्वाक्ने मचाप्ब फुल्लु कली ‘बोक्को’ देनेवे। मार, मेकोमी मुर कली शेंने चाप्बा? मेको सुन चांदीमी गिल्लो बाक्त। तन्न मेको नु काड ब्रोइतीक सोक्त मबाक्ब। भजन संग्रह ११५:४-८
- 20 मिनु परमप्रभु यावे आंम आ बाक्तीकेमी बाक्ब। रागी नेल्ल मेको आ डोंइती मान पा सिक्सी पवल” दैत। भजन संग्रह ११:११; भजन संग्रह ७६:९; जकरिया २:१७; प्रेरित ८:३

### 3

हबकुक ग्येरसीशो

- 1 परमप्रभु यावे आ लोत्र पाइब हबकुकमी परमप्रभु यावे कली लोत्र पा कुम्सो पा टेयब सेल्लु।
- 2 “परमप्रभु यावे, गो इन पशो नेल्ल नैता। परमप्रभु यावे, गो इन पशो तशा, इन कली टेयब सेल्लुड। आंइ ब्रोइतीक नाक्तीमी मेको लेंशा कोंइदीन। मेको तुइक्पतीन। गे गाइक्ताक्नी हना, यो इन शिशो मिम्तीन।
- 3 परमप्रभु तेमान रे पा जाक्त। मेको का ला परमप्रभु पारान डांडा रे जाक्त। टेयब सेंदा पा आ टेयब दुम्तीकेमी सरीड सुम्शो बाक्त। आ मान ततीकेम रागी नेल्ल ब्रीशो बाक्त। ब्यवस्था ३३:२
- 4 मेको आ छेडछेड नां दाप्शो खोदेशो बाक्त। आ गुइ रे पा चेरये गूशो बाक्त। मेकेर आ सक्ति खुइश्शो बाक्ब।
- 5 आ डोंइती मुर आन कली साइक्तीक रोइ लत। आ नोले मुर बेक्तीक रोइम खोइक्तु।

6 मेको गाकशा नाइश्शा, रागी हिम्पाइक्तु। मेकोमी कोव्रडानु, रागी रागी डा मुर आन कली खिंखि पपाइक्तु। गेना हना यो बाक्ब डांडा ब्रेत्लीम। मेको गेना हना यो लीब पहाड नेल्ल यशो खोदेशो पा दिम दुम्तेक्म। मेकोमी साइ डोंडती रे मोदेशो पशो बाक्त। भजन संग्रह १०४:३२

7 गो कुशन रागी डा ताम्बुमी बाक्ब आन कली श्येत जशो ताता। मिदयान डा ताम्बु आन सुम्तीके हिम्साक्म।

8 परमप्रभु यावे, गे खोलापुकी नु गाइक्तीनी? गे ठेयब समुन्द्र आ पर्बम चुरनी? इन शारा नु बग्गी आन कली लां कोंडशा प्रातीनी।

9 गे इन लिब्रा युंइताक्नी। गे इन ब्रा ते देंनी मेक लत। गे खोला शाइक्तीकेमी रागी कली चेततीनी।

10 मिनु डांडापुकी इन कली तशा रोम्सीनीम। ठेयब रेउ यित। ठेयब समुन्द्र आ रेयके नेंसाक्व। भजन संग्रह ७७:१७

11 इन आप्शो ब्रा जिल पा ब्रशा बेरमेनु, इन तूतीक जिल्मील पवानु, नां मसोव्र। मिनु तास्ला सरीडम नाइसाक्व। यहोसु १०:१३

12 गे गाइश्शा रागी तार गाक्तीनी। चुरशा रागी रागी डा मुर आन कली दिप्शा साइक्तीनी।

13 गे इन आंम योव्रशो मुर आन कली प्रोंडचा, दे जाक्तीनी। इन तेल लुक्शो मुर कली प्रोंडथ जाक्तीनी। तन्न गे इन अरेशो मटीब रागी डा ठेयब मुर आ खिं तला तारी रे जग सम्म प्रेत्तीनी। भजन संग्रह १८:८,१६

14 मिनु गे मेको आ लडाइ पाइब आन ब्राम आन पिया खिलतीनी। मेकोपुकी खुइश्शा बाक्ब पुडग मुर आन कली साइक्चा थुं पा फश गिवार खोदेशो पा जाक्शो बाक्तेक्म।

15 गे ठेयब समुन्द्रमी आन शारा ओव्रपाइश्शा, ठेयब ब्वाक्कु नेल्ल शाकपाइक्तीनी। प्रस्थान १४:२६-२९

16 गो इन सेंदा नेंनुनु, खिंखि पाता। आं शोव्र यो खिंखि पाप्तु। आं रुश आगा नेल्ल मुक्ताक्मे। खोइल खिंखि पाप्तु। मो हना यो आंइ कली मरिम्शो पाइब मुर आन कली श्येत दुम नाक्ती कली रिम्शा बाक्ती।

17 फोव्रशी रवा मबोइक्ब। अडगुर बोट मसिप्ब। तेल रवाम फल काइ मसिप्ब। रूमी अन्न मसिप्ब। गोटीम बी ब्यफ नु क्यारश भेडा मबाक्त हना यो,

18 गो परमप्रभु यावे कली तुइश्शा ग्येरसीनुड। मिनु आं कली श्येत रे प्रोंडब परमप्रभु कली ठेयब सेल्शा ग्येरसीनुड। यसैया ६१:१०

19 परमप्रभु यावे, आं परमप्रभु आं सक्ति बाक्ब। मेकोमी आं खोइल किश्श आ खोइल खोदेशो सेल्ब। मेकोमी आं कली ठेयब लाइश्शो डांडामी लतीक सक्ति गेब” दे कुम्सो पाप्तु।

मेको कुम्सो शेंब कली तार पाइश्शो ताप्तीके ताप्शा, मेको कुम्सो पपाइक्चा मालब। भजन संग्रह १८:३४



## सेफन्याह

**ब्रेक्ब मुर:** एको किताब सेफन्याहमी ब्रेक्शो बाक्ब। मेको मुर आ पर्बम शुश मतुंडसीब। मेको हिज्कीयाह आ युड बाक्ब। मेको हिज्कीयाह पपि हिज्कीयाह यो दुम्ने चापब। एको किताब आडक्ब बाक्त हना यो, खीस्त आ पर्बम शुश लोत्र बाक्ब।

**गेना ब्रेक्शो:** पपि योसीयाहम सासन पची ना ६४१-६१० बि. सी. मेर सेफन्याहमी एको किताब ब्रेक्शो बाक्त। अरेशो किताब थित्या क्येडा डोंइती एको किताब ब्रेक्शो बाक्त, दे मिन्नीम।

**मार ब्रेक्शो:**

१. परमप्रभु यावे आ निसाफ पतीक नाक्त जाक्ब। सेफन्याह १:१-४
२. निसाफ पशो मार कली बाक्बा? सेफन्याह १:५-१८
३. अर्को रागीम यो निसाफ ताइनीम। सेफन्याह २:१-३:८
४. नोले डा रिम्शो दुम्तीके जाक्ब। सेफन्याह २:-३:-

डोंइती डा लोत्र

1 यहूदा डा पपि आमोन आ तौ योसीयाहमी सासन पवा ना परमप्रभु यावेमी सेफन्याह कली लोत्र पापु। सेफन्याह आ आफ कूशी बाक्माक्त। कूशी आ आफ गेदाल्याह बाक्माक्त। गेदाल्याह आ आफ अमारयाह बाक्माक्त। मिनु अमारयाह आ आफ हिज्कीयाह बाक्माक्त। येरमीया १:२

नेल्ल खतम दुम्तीक नाक्त जाक्ब

- 2 परमप्रभु यावेमी मार लोत्र पापु देशा हना “गो रागी नेल्ल डा मारेड मारेड खतम सेल्लुड।
- 3 मुर नु बी ब्यफ, क्यारश भेडा, जन्तु नेल्ल आन कली खतम सेल्लुड। सरीड डा चिक्ब, समन्द्र डा डांड नेल्ल आन कली साइक्नुडमी। रागी डा मुर नेल्ल आन कली खतम सेल्लुड। परमप्रभु यावे आ अरेशो मटीब आन कली दाइल पपाइक्नुड। गो मुर नेल्ल आन कली रागी नेल्ल रे क्याम्नुड। मती १३:४१

यहूदा डा मुर आन कली हुइशो

- 4 गो यहूदा रागी नु यरूसलेममी बाक्ब मुर नेल्ल आन पर्बम आं गुड क्युक्नुड। मिनु मेकेर बाल देवता कली पूजा पतीके नु मेको कली चढेब आन नें मलीचा डा पा क्याम्नुड। २राजा २३:५; होसे १०:५
- 5 खिं तार बाक्शा, नां तास्ला नु सोरुल आन डोंइती बापब, परमप्रभु यावे आ डोंइती बापशा आ नें थिशा कसम जाइब। मोलेक आ नें यो थिशा कसम जाइब। येरमीया १९:१३; येरमीया ४९:१
- 6 गो, परमप्रभु यावे, आं कली ममाल्थु, मपुंइथु आं नोले खोइक्चा प्रोंइशा, नोले शोंइसीब आन कली खतम पोक्नुडमी।
- 7 परमप्रभु, परमप्रभु यावे आ डोंइती सिक्सी पने। मारदे हना परमप्रभु यावे आ नाक्त जाक्चा चिक्शो बाक्ब। परमप्रभु यावेमी चढेतीक चाड का ठीक पापु। परमप्रभु यावेमी आ ब्रेशो मुर आन कली ठीक सेल्लेमी। हबकुक २:२०
- 8 परमप्रभु यावे आ चढेतीक नाक्त गो सरकार आ ठेयब मुर, पपि आ तौपुकी नु अर्को रागी डा मुर आन वा फेक्ब नेल्ल आन कली सजाइ गेनुडमी। हबकुक २:२०
- 9 मेको नाक्त सु सु लाप्यो रे ओवनीमी, मेको आन कली सजाइ गेनुड। मारदे हना मेकोपुकीमी आन होत्रप आ खिं तुम्मुचा, जिचा खेचा नु जोल पतीकेमी फ्रिनीम” देंत।
- 10 मिनु परमप्रभु यावेमी “मेको नाक्त डांड लाप्यो रे ठेयब सेंदा पा डाक्शो, नक सहर रे रोंका पशो नु डांडा रे पा ठेयब रेयके पशो नेंसीब।

11 गे माकतेशम बाक्बपुकी रोंका पने। मारदे हना ग्यापब लेयब नेल्ल खतम दुम्तेक्म। चांदी नाक्ब नेल्ल क्याम्चा पुंडसाक्म। माकतेश यरूसलेम सहर डा बजार का बाक्त।

12 मेना गो यरूसलेममी बत्ती दाशा मुर आन कली माल्शा, सजाइ गेनुड। मारदे हना मेकोपुकीमी अल्सी पा आन थुमी ‘परमप्रभु यावेमी रिम्शो नु मरिम्शो मारेड यो मपाइब’ दे मिन्नीम।

13 मेको आन शोंप नेल्ल रोइक्चा पुंडसीनीम। मेको आन खिं ब्रेत्नीम। मेकोपुकीमी खिं सेल्लेक्म हना यो, मेकेर बाक्चा मताइनीम। मेकोपुकीमी अडगुर खुम्तेक्म हना यो, अडगुर शांबु तूचा मताइनीम। ब्यवस्था २८:३०, ३९; आमोस ५:११

परमप्रभु आ ठेयब नाक्त

14 परमप्रभु यावे आ ठेयब नाक्त जाक्चा चिक्शो बाक्ब। मेको रीब पा जाक्ब। नोफा दाइशशा नेनीन। परमप्रभु यावे आ ठेयब नाक्त, श्येत डा नाक्त बाक्ब। लडाइ पाइबपुकी थम ठेयब सेंदा पा ग्रीनीम। योएल १:१५

15 मेको नाक्त गाइक्चा डा नाक्त दुम्ब। श्येत नु हिंचा डा नाक्त दुम्ब। नेल्ल ब्रेत्तीक नु खतम दुम्तीक नाक्त दुम्ब। मेको नाक्त छिडछिड नु हिंचा डा दुम्ब। गोस्सुम गिल्लो नु शुश छिडछिड डा नाक्त दुम्ब।

16 गारोम हिरशो सहरपुकी नु गारो डा कुनाम बाक्शो लाइशो खिं आन कली लडाइ तोचा कली तुराही ताप्शो नु लडाइ डा रेयके पशो नेंसीब। येरमीया ३०:१७

17 गो मुर आन कली शुश श्येत गेनुड। मिनु मेको मिक्च मताइब खोंदेशो पा गाक्नीम। मारदे हना मेकोपुकीमी परमप्रभु यावे आ डोंइती पाप पाम्तेक्म। मेको आन हुश फुरक खोंदेशो नु श्ये खी खोंदेशो पा ताइक्नीम।

18 परमप्रभु यावे गाइकची नाक्ती मेको आन चांदीमी मप्रोंडब। मेको आन सुनमी यो मेको आन कली प्रोंडेने मचाण्ब। मेको आ मी खोंदेशो पा गाइकतीकेमी रागी नेल्ल क्रोइकब। मेकोमी रागीम बाकब नेल्ल आन कली थम मरिम्शो पा साइशशा क्याम्ब” दे परमप्रभु यावेमी देंत। इजीकीएल ७:१९

## 2

पलिस्ती आन कली लोव्र

- 1 मिनु मेकोमी “गे मुने मपाइशशो रागी डा मुर, गे नेल्ल काथा बुक्कीन।
- 2 इन नाक्त फशेम बेरशो भूस खोंदेशो पा लाक्नीम। आ योव्रशो नाक्त जाक्चा, परमप्रभु यावे आ शुश गाइशशो इन तार जुक्चा नु परमप्रभु यावे आ गाइशशो नाक्त जाक्चा क्येडा डोंइती,
- 3 गे रागी डा परमप्रभु यावे आ डोंइती ठीक पाइब नु ब्रेम्शो मुरपुकी परमप्रभु यावे कली मालीन। गे ठीक पाइब नु ब्रेम्शो थु पाइशशो दुम्चा मालीन। मिनु परमप्रभु यावेमी आ गाइशशो नाक्त इन कली खुइक्बा कों? आमोस ५:१५
- 4 गाजा मुर मबाक्थु, श्येत्य दुम्ब। अश्कलोन नेल्ल ब्रेशशा खतम दुम्शा प्रोंइसीब। नाक्ती उइक्थ दुम्मेनु अशदोद डा मुर खेरचा पुंडसीनीम। एक्रोन चहिं तुलुचा पुंडसीब।
- 5 आबी आबी, समुन्द्र आ शुंगीम बाकब केरेथी जात डा मुर परमप्रभु यावे आ लोव्र इन कली ‘गे पलिस्ती आन रागी बाकब, कनानी, इ कली सुइ मुर मबाक्चा डा पा खतम सेलनुड’ देंत। १सामुएल ३०:१४; येरमीया ४७:-
- 6 केरेथी आन बाक्तीक समुन्द्र आ शुंगी डा रागी बी ब्यफ, क्यारश भेडा योव्रतीके दुम्ब। भेडा गोठला आन बाक्तीक दुम्ब। मेको आन भेडा मेकेर वोइक्नीम।
- 7 मेको समुन्द्र आ शुंगी डा रागी यहूदा आ खिं डा लीशो मुर आन के दुम्ब। मेकोपुकीमी मेकेर आन बी ब्यफ, क्यारश भेडा योव्रतीम। नाकदो मेकोपुकी अश्कलोन आ खिंपुकीम इप्नीम। मारदे हना परमप्रभु यावे, आन परमप्रभुमी मेको आन कली कोव्रब। मिनु मेको आन कली डोंइती खोंदेशो पा रिम्शो पा बाक्चा गेब” देंत। सेफन्याह ३:२०

मोआबी नु अम्मोनी आन लोव्र

- 8 मिनु “गो मोआब नु अम्मोनी आन शुक्शी पशो नेता। मेकोपुकीमी आं मुर आन कली मरिम्शो पाम्तेक्म। मेको आन रागी कली ‘खतम पोक्नीक’ दे हिंच कोंइताक्म। येरमीया ४८:-; येरमीया ४९:१-६
- 9 मोपतीके मुर नेल्ल आन परमप्रभु यावे, इस्राएली आन परमप्रभुमी ‘गो ब्रोंइशा बाक्शो खोंदेशो पा, मोआब सोदोम खोंदेशो नु अम्मोन गोमोररा खोंदेशो दुम्ब। मेको आन बाक्तीके चूले वाशो नु हिक्सी खाल्टा बाक्शो रागी दुम्ब। मेको गेना हना यो मुर मबाक्तीक रागी दुम्ब। आं लीशो मुरपुकीमी मेको आन मार मार रोइक्नीम। मिनु आं रागी डा ब्रोंइशो मुरपुकीमी मेकेर हुकुम पाइनीम। उत्पती १९:२४-२५
- 10 मेको आन ठेयब लेशशो आ पा डा मोदेंशो ताइनीम। मारदे हना मेकोपुकीमी मुर नेल्ल आन परमप्रभु यावे आ मुर आन कली शुक्शी पा आंम कली ठेयब सेल्लो बाक्नीम।
- 11 परमप्रभु यावेमी मेको आन कली थम मरिम्शो पाइब। रागी डा देवी देवता नेल्ल आन कली खतम पोक्ब। नेल्ल आन बाक्तीकेमी बाक्शा, मेको आ डोंइती बाप्चा मालनीम। रागी रागी समुन्द्र आ सुंगी नु टापु डा मुर नेल्ल परमप्रभु यावे आ डोंइती बाप्नीम’ देंत।

एथीयोपीया नु अस्सुर कली लोव्र

- 12 गे एथीयोपीया डा मुर यो आं तरवारमी साइक्चा पुंडसीनीनी” दे परमप्रभु यावेमी देंत। इजीकीएल ३०:९
- 13 मेकोमी उत्तर गे आ गुइ दिंशा अस्सुर कली खतम पोक्ब। निनवे कली कोक्त नु गोरशो रागी खोंदेशो सेल्ल। नहुम १:१
- 14 मेकेर बी ब्यफ नु ब्वाकी डा जन्तु नेल्ल इप्नीम। गोरशो रागी डा बुक्स नु ग्रीब बुक्सपुकीम मेको आन थाम तारी ग्योव्र सेलनीम। बुक्स झेल रे पा ग्रीनीम। खदपुकी लाप्चोम ग्रीनीम। मिनु दारपाइक्चा कली क्येप्शो शी नेल्ल लां रे तांइसीब। यसैया १३:२१; यसैया ३४:११
- 15 मेको महिंथु थु नाइशशा बाकब सहर मबाक्बा डा? मेकोमी आंम कली “गो गोन नड। आं क्येडा लाक्शा अरु सुइ मबाक्नीम” देंत। मेको मुल दोदेंशो पा ब्रेशशो दुम्मे? मेको ब्वाकी डा जन्तु आन बाक्तीके दुम्त। मेको लां रे पा गाक्ब नेल्ल मेको तशा आबी, दे हिंशा खिंखि पाइनीम। यसैया ४७:८

## 3

यरूसलेम आ नोले डा नाक्त

- 1 मेकोमी “आं देंशो गेनायो मटीब, ग्रॉया दिचा डा नु मुर आन कली दिप्ब सहर बाकब।
- 2 मेकोमी सुइ आन देंशो मटीब। रिम्शो पचा कली हुइशशो लोव्र मनेंब। मेकोमी परमप्रभु यावे कली थमा मसुइक्थु, आ परमप्रभु आ नेक्था मजाक्ब।
- 3 मेको सहर डा सरकार डा ठेयब मुर ग्रीब गुप्स खोंदेशो बाक्नीम। मेको आ निसाफ पाइब नाकदो गाक्शा, सुनी सम्म मारेइ महेंब फर नम। इजीकीएल २२:२७
- 4 मेको आ परमप्रभु यावे आ लोव्र पाइबपुकी हेंथे पाइब नु थमा मसुइक्चा डा मुर बाक्नीम। मेको आ चढेबपुकीमी परमप्रभु यावे आ खिं ग्रॉया दिशो सेलनीम। मेकोपुकीम परमप्रभु यावे आ अरेशो लोव्र हेंथे सेल्लेक्म। मीका ३:११

5 मेको आन दातेम बाक्ब परमप्रभु यावे ठीक पाइब बाक्ब। मेकोमी मारेइ मरिम्शो मपाइब। मेकोमी सुनी कुस कुस निसाफ पाइब। तेकोइ सुनी मप्रोंइब। तन्न ठीक मपाइबपुकी मुने दोक्शा लल मजिनीम।

6 गो रागी रागी डा मुर आन कली खतम पोक्ता। मेको आन ब्रोंइशा बाक्तीक खिं प्रेशशा गेता। मेको आन लां नेल्ल श्येत्थ सेल्ला। मेकेर रे सुइ मगाक्नीम। मेको आन सहरपुकी श्येत्थ बाक्नीम। मेकेर सुइ मुर मबाक्नीम।

7 मो पडा नोले मेको सहर डा मुरपुकी आं कली तशा मान पा हिंनीम। आं देंशो पाइनीम, दे मिम्ताड। तन्न मेकोपुकीमी डोंइती क्येडा मरिम्शो गेय पाम्तेक्म” देंत।

8 परमप्रभु यावेमी “मोपतीके लोव पचा कली गो मजाक्डा सम्म आं कली रिम्शा बाक्कीन। गो रागी रागी डा मुर आन कली खुन्नुड। गो राज्य राज्य डा मुर आन कली गुम्पाइक्नुड। मेको आन तारी आं गाइश्शो मोइक्नुड। मारदे हना आं मी खोदेशो पा गाइश्शोमी रागी रागी नेल्ल ग्रोइश्शा खतम दुम्नीम। योएल ४:२; भजन संग्रह ७९:६

9 मेना जात जात डा मुर आन कली रिम्शो लोव पाइब सेल्लुड। मिनु मेको नेल्लेमी परमप्रभु यावे कली पुंइशा ठेयब सेल्मेक्ल। मेको नेल्ल गारशा आ गेय पामेक्ल।

10 मिनु आं नें ठेयब सेल्ब एथीयोपीया डा खोला आइक्की हांम डा ब्रशा बाक्शो आं मुरपुकीमी आं कली चढेतीक थोवक चाक्नीम। भजन संग्रह ६८:३२; यसेया १८:१; प्रेरित ८:२७

11 मेको नाक्त आं कली मटिशो आ पबर्म गे मुने दोक्चा ममाल्नीनी। मेना इ दाते डा ठेयब लेशशो मुर आन कली पुंइनुडमी। आं डांडामी गे लेंशा ठेयब लेशशो मदुम्नेवे।

12 गो इ दातेमी ब्रेम्शो नु पुडग मुर लीचा गेनुडमी। मेकोपुकीम ‘परमप्रभु यावे आंइ कली वारच पाइब बाक्ब’ दे थमा सुइक्नीम। इजीकीएल ६:८

13 इस्राएल डा लीशोपुकीमी लेंशा दूली मपाइनीम। मेकोपुकीमी जोल मपाइनीम। हेंथे लोव मपाइनीम। मेकोपुकी जशा तूशा गोल्शा बाक्नीम। सुइम मेको आन कली हिंच मकोंइनीम।

14 सियोन आ तमी, ठेयब सेंदा पा कुम्सो पावो। इस्राएल, ठेयब सेंदा पा ग्रीडो। यरूसलेम आ तमी इ थुं नेल्लेम ग्येरशा सोम्शा बाक्को।

15 परमप्रभु यावेमी इ सजाइ क्याम्शा गेशो बाक्ब। मेकोमी इ जोरी सत्रु आन कली सोइश्शो बाक्ब। इस्राएली आन पिप, परमप्रभु यावे गे नु बाक्ब। मुल डा मेरे गे तेकोइ श्येत रे हिंचा ममाल्नेवे। जकरिया ९:९

16 मेको नाक्त यरूसलेम कली सियोन डा मुर महिनीन। गे शुश गेय पने।

17 परमप्रभु यावे, इन परमप्रभु इन दातेमी बाक्ब। मेको बोल्यो बाक्शा, श्येत रे प्रोंइब बाक्ब। मेको इन कली तशा, शुश ग्येरशो बाक्ब। मेकोमी आ दाक्तीकेमी इन कली नक मुर सेल्ब। मेकोमी इन कली तशा ग्येरशा कुम्सो पाइब। यसेया ६२:५

18 चाडमी ग्येरशो खोदेशो पा कुम्सो पाइब। आन क्येडा डोन बाक्ब आन कली खुन्नुड। मेको इन मुर नम। आं पबर्म शुक्शी पाइक्चा पुंइसीनीम।

19 मेना गो इन कली दिप्ब आन कली सजाइ गेनुड। गो खोइल मदुक्ब आन कली श्येत रे प्रोंइनुड। मिनु ब्रशा बाक्शो आन कली खुन्नुडमी। मेको आन कली मुने तोक्शो रागीम आं पा डा मान ताइब सेल्लुडमी। मीका ४:७

20 मेना गो इन कली खुप्शा चाक्नन्नी। मारदे हना गो इन कली रागी नेल्ल डा मुर आन दातेमी ठेयब सेल्शा, मान ताइब सेल्लन्नी। मिनु गो नेल्ल आन तचा डा पा इन कली डोंइती खोदेशो पा रिम्शो पा बाक्चा गेनन्नी” दे परमप्रभु यावेमी देंत। सेफन्याह २:७; येरमीया २९:१४

## हागै

**ब्रेक्ब मुर:** एको किताब हागैमी ब्रेक्शो बाक्ब। मेकोमी यहूदीपुकी ग्याइशशा लाइशशो, यरूसलेम लेशशो जकरिया नु परमप्रभु यावे आ खिं लेंशा सेल्चा गेय पशो बाक्त।

**गेना ब्रेक्शो:** यहूदी ग्याइशशा लाइशशा यरूसलेम लेशशो १६ बर्स नोले ५२० बि. सी.मी परमप्रभु यावे आ खिं सेल्चा कली जग वोइशशो बाक्तेक्म। मेको आ डोंइती नु सेल्ची ना हागैमी एको लोत्र पा ब्रेक्शो बाक्त।

**मारदे ब्रेक्शो:** परमप्रभु यावे आ खिं लेंशा सेल्चा माल्नीम। मोपतीके हागै आ शेंचा माल्शो लोत्र “गो श्येत जाइनीकी। मोपतीके परमप्रभु यावे आ खिं सेल्चा कली मारेइ गेने मचाप्नीकी” देंनीनी। तन्न “मारदे मगेनीनी, मोपतीके श्येत जाइनीनी” देंब।

परमप्रभु आं खिं सेलीन, दे अरेशो

1 पिप दाराम सासन पशो बर्स निकशी, ६ महिना डा डोंइती डा नाक्त परमप्रभु यावेमी आ लोत्र पाइब हागै कली लोत्र पाप्तु। मेको लोत्र यहूदा रागीम हुकुम पाइब जेरूब-बाबेल नु नेल्ल क्येडा ठेयब चढ़ेब यहोसु आस कली बाक्त। जेरूब-बाबेल शाल्तीएल आ तौ बाक्त। यहोसु चहिं यहो-सादाक आ तौ बाक्त। एजा ४:२४; एजा ५:१; एजा ५:२

2 मिनु हागैमी “मुर नेल्ल आन परमप्रभु यावेमी मार देंत देशा हना ‘एको मुरपुकीमी परमप्रभु यावे आ खिं मुल लेंशा सेल्ची मजाक्शो बाक्ब देंनीम’ ” देंत।

3 मिनु हागैमी परमप्रभु यावे आ लोत्र पा “परमप्रभु यावेमी मार देंब देशा हना

4 ‘आं खिं ब्रेशशा खतम दुम्शो बाक्ब। गे चहिं दारशो शी क्येप्शो खिंम बाक्चा रिम्शो दुम्बा डा?’ देशो बाक्ब” देंत। २सामुएल ७:२

5 मिनु मुर नेल्ल आन परमप्रभु यावेमी “गे दोदेशो बाक्नीनी, मिम्तीन।

6 गे शुश शोक्तीनी, तन्न इच्का ला खुप्ताक्नी। गे जाइनीनी, तन्न मरूनीनी। गे तूनीनी, तन्न इन तूतू दाक्तीके मबेक्ब। गे फेक्नीनी, तन्न इन रां मोहोइब। गे शुश गेय पा क्येत चेम्नीनी, तन्न होइशशो थैलीम कुर पा वोइक्नीनी” देंत। ब्यवस्था २८:३८

7 मिनु मुर नेल्ल आन परमप्रभु यावेमी मार देंत देशा हना “गे दोदेशो बाक्नी, मिम्तीन।

8 डांडा मेर डोइशशा शी यितीन। मिनु आं खिं सेलीन। मिनु गो मेको तशा, ग्येरशा बाक्ने चबुल। मोपा मुरपुकीम आं कली ठेयब सेल्यीमील।

9 गे शुश आस पाइतीनी, तन्न इच्का ला ताइतीनी। मिनु गे खिंमी मार चाक्नी, गो मेको कली मुइशशा बेरपाइक्ता। गो मारदे मोदेशो पाता देशा हना, आं खिं ब्रेन्ने थुम्शो बाक्ब। गे चहिं आंम खिं कली ला मिम्नीनी।

10 मोपतीके सरीड रे सीत यिचा प्रोंइतु। मिनु रूमी मारेइ मारेइ वाचा प्रोंइशो बाक्ब। १राजा १७:१

11 मिनु गो रू नु डांडा तार रेड मयिपदु। अन्न, अडगुर, तेल नु रूम सिप्ब मारेइ मारेइ मसिप्पदु। मुर नु रागीम ब्रोंइशो नेल्ल आन कली श्येत जपाइक्ता। मुर आन गेय नेल्ल शोर गाक्शो सेल्ता” देंत। हागै २:१७; आमोस ४:९

12 मिनु शाल्तीएल आ तौ जेरूब-बाबेल नु यहो-सादाक आ तौ, नेल्ल क्येडा ठेयब चढ़ेब यहोसु नु लीशो मुर नेल्लेमी परमप्रभु यावे आन परमप्रभु आ लोत्र टिम्तेक्म। मिनु परमप्रभु यावे आन परमप्रभु आ देशो नु आ लोत्र पाइब हागै आ देशो लोत्र टिम्तेक्म। मिनु मुरपुकी परमप्रभु यावे कली मान पा हितेक्म।

13 मिनु परमप्रभु यावे आ सोइशशो लोत्र पाइब हागैमी “परमप्रभु यावेमी मुर आन कली ‘गो गेपुकी नु बाक्नुड’ देशो बाक्ब” देंत। मलाकी २:७

14 मिनु परमप्रभु यावेमी शाल्तीएल आ तौ, यहूदा रागीम हुकुम पाइब, जेरूब-बाबेल नु यहो-सादाक आ तौ, नेल्ल क्येडा ठेयब चढ़ेब, यहोसु नु लीशो मुर आन थुं कली जोंब पोक्ताक्व। मिनु मेकोपुकीमी मुर नेल्ल आन परमप्रभु यावे, आ खिं सेल्चा गोम्तेक्म।

15 मिनु मेकोपुकीमी पिप दाराम सासन पशो बर्स निकशी, ६ महिना, २४ नाक्तीमी परमप्रभु यावे आ खिं सेल्चा गोम्तेक्म।

## 2

परमप्रभु आ खिं लेंशा सेल्शो

1 पिप दारामी सासन पशो बर्स निकशी, ७ महिना २१ नाक्तीम परमप्रभु यावे आन परमप्रभुमी हागै कली लोत्र पाप्तु। मार लोत्र पाप्तु देशा हना,

2 “गे शाल्तीएल आ तौ यहूदा रागीम हुकुम पाइब, जेरूब-बाबेल नु यहो-सादाक आ तौ नेल्ल क्येडा ठेयब चढ़ेब यहोसु नु लीशो मुर आन कली

3 “इन दाते डा सु सुमी परमप्रभु यावे आ डोंइती डा खिं आ दारस तनी? मुल एको खिं दोदेशो तांइसीबा? मार, एको मदारशो तांइसीबा? दे हिल्लो पावो?” देंत। एजा ३:१२

4 मिनु मुर नेल्ल आन परमप्रभु यावेमी “जेरूब-बाबेल, महिनो। यहो-सादाक आ तौ नेल्ल क्येडा ठेयब चढ़ेब यहोसु गे यो महिनो। मिनु मेकेर डा मुर नेल्ल महिनीन। गेय पचा गोने। मारदे हना गो गेपुकी नु बाक्नुड।

5 गेपुकी इजीप्त रागी रे पा गूशा पिनीनु, गेपुकी नु कबल का पाता। आं सोक्त गेपुकी नु बाक्ब, दे कबल पाता। मोपतीके महिनीन” दे मुर नेल्ल आन परमप्रभु यावेमी देंत। प्रस्थान १९:५; जकरिया ४:६

6 मिनु मुर नेल्ल आन परमप्रभु यावेमी “मुल इच्का नोले गो लेंशा सरीड, रागी, समुन्द्र नु गोरशो रागी कली हिम्नुड। हिबू १२:२६

7 गो रागी रागी डा मुर आन कली हिम्नुड। मिनु रागी रागी डा शोप नेल्ल एकेर चाक्नीम। मिनु गो एको खिं कली आं दारसीम प्रिनुड।

8 सुन चांदी नेल्ल आं के बाक्ब।

9 मोपतीके एको खिं आ मुल डा दारस क्येडा नोले डा दारस शुश रिम्शो दुम्ब। मिनु एकेर आसीक शुश गेनुडमी” दे मुर नेल्ल आन परमप्रभु यावेमी देंत।

परमप्रभुम आसीक गेशो

10 पिप दारामी सासन पशो बर्स निकशी ९ महिना २४ नाक्तीमी परमप्रभु यावेमी आ लोत्र पाइब हाग्ये कली लोत्र पाप्तु।

11 मिनु हाग्येमी “मुर नेल्ल आन परमप्रभु यावेमी मार देंत देंशा हना ‘चढ़ेबपुकीम मार देंबाक्मा, दे हिल्लो पावो’ ” देंत।

12 मिनु हागाइम “सुड मुरुमी किप्शुरम पोल्तो पा चढ़ेशो र्ये कुरशो बाक्त हना नु मेको आ किप्शुर आ सुरमी शोब्ले, खाड, अडगुर शांबु, तेल नु अरु मारेड जचा थोवक थिप्तु हना, मेको चोत्रखो दुम्नीमी?” दे हिल्लो पाप्तु। मिनु चढ़ेबपुकीम “मदुम्नीम” देंतेक्म।

13 मिनु हाग्येमी “बेक्शो मुर थिशा, ग्रान्ना दिशो दुम्शो मुरुम मारेड थोवक थिप्तु हना, मेको थोवक ग्रान्ना दिशो दुम्बा?” दे हिल्लो पाप्तु। मिनु चढ़ेबपुकीमी “मेको ग्रान्ना दिशो दुम्ब” देंतेक्म। लेवी ५:२; गन्ती १९:२२

14 मिनु हाग्येमी “परमप्रभु यावेमी मार देंब देंशा हना ‘आं डोंडती बाक्शो एको रागी डा मुरपुकी मोदेशोन बाक्नीम। मेकोपुकीम मार मार पाइनीमी, मार मार चढ़ेनीमी मेको नेल्ल ग्रान्ना दिशो बाक्ब’ देंशो बाक्ब” देंत। एजा ४:१-३

मुर आन थुं बारपाइशो

15 मिनु परमप्रभुमी “गे मुलाक्त डा मेरे मार दुम्बा, मेको रिम्शो पा मिम्तीन। परमप्रभु यावे आ खिं सेल्शोन, फुल्लु तार फुल्लु वोइशशा गारो प्रोवचा क्येडा डोंडती दोदेशो बाक्मे, मेको मिम्तीन।

16 गे दोदेशो बाक्नी? गे २० सेआह बाक्ब, दे मिम्ताक्नी हना, मेकेर १० सेआह ला बाक्ब। अडगुर खाक्शा, ५० गर रस ताप्नुड, दे मिम्ताक्नी हना, २० गर ला दुम्ब। सेआह का ७ लिटर खोदेशो बाक्ब। गर कली हिन यो देंनीम। हिन का ६,५ लिटर बाक्ब। हाग्ये १:१६

17 गो इन कली नु इन रूम खुम्शो मारेड मारेड खतम सेल्ला। मेको सोत्रपाइक्ब रोड, बुखी डाइक्तीक रोड नु मुप्सीम खतम सेल्ला। मो हना यो गे आं गे मलेन्नी। हाग्ये १:११

18 मुल ९ महिना २४ नाक्ती, परमप्रभु यावे आ खिं डा जग वोइशशो नाक्त रे मार दुम्बा, मेको कोत्रडीन।

19 मार, गे नु वांचेर बाक्मे? अडगुर बोट, फोवशी रवा, अनार नु तेल रवामी मुल सम्म फल मसिश्शो बाक्मा? मुलाक्त डा मेरे गो इन कली आसीक गेनन्नी” दे परमप्रभु यावेमी देंत।

परमप्रभु आ लोत्र

20 मिनु ९ महिना डा २४ नाक्ती परमप्रभु यावेमी लेंशा हाग्ये कली लोत्र पाप्तु।

21 मार लोत्र पाप्तु देंशा हना “गे यहूदा रागीम हुकुम पाइब जेरूब-बाबेल कली ‘गो सरीड नु रागी हिम्चा चिक्शो बाक्नुड।

22 गो पिप आन राज्य खतम पोक्नुड। गो रागी रागी डा राज्य थुम्पाइक्चा चिक्शो बाक्नुड। गो बग्गी नु बग्गी डोइक्ब आन कली थिप्पाइक्नुडमी। शारा नु शारा डोइक्बपुकी आंम लोक्ब आन तरवारम क्योरचा पुंडसीनीम’ देनो” देंत।

23 मिनु मुर नेल्ल आन परमप्रभु यावेमी “मेको नाक्त शाल्तीएल आ तौ, आं गेय पाइब, जेरूब-बाबेल गो इ कली छाप पाइशो औंठी खोदेशो सेल्लन। मारदे हना गो इ कली योत्रशो बाक्नुड” दे मुर नेल्ल आन परमप्रभु यावेमी देंत। जकरिया ४:६-७

## जकरिया

**ब्रेक्ब मुर:** जकरिया बेरेक्याह आ तौ, इददो आ चच बाक्त। इददो चढेब आ खिं डा ठेयब मुर बाक्त। जकरिया यहूदीपुकी ग्याइश्शा लाइक्चा पुंडसीमानु, बेबीलोनम जरमेशो बाक्त। डोंइती यरूसलेम लेक्ब चढेब आन दातेमी मेको यो बाक्त। एको किताब ब्रेक्ब परमप्रभु यावे आ लोत्र पाइब जकरिया बाक्ब।

**गेना ब्रेक्शो:** ५२०-५१८ बि. सी. पिप दाराम सासन पशो बर्स निकशी दुम्मेनु, परमप्रभु यावे आ लोत्र पाइब जकरियामी गेय पशो बाक्त। मेना परमप्रभु यावे आ लोत्र पाइब हाग्गैम यो लोत्र पशो बाक्त।

**मार ब्रेक्शो:** जकरियामी मुर आन शुश श्येत जची ना मेको आन कली थुं बारपाइक्तीक लोत्र पवा बाक्त। मेकोमी मस्सीह जाक्ब, दे परमप्रभु यावे आ लोत्र ब्रेक्शो बाक्ब। मस्सीह आ पर्वम:

१. मस्सीह गथा आ चाइक्ब डोइश्शा यरूसलेम ओत्रब जकरिया ९:९; मत्ती २१:५
२. मस्सीह ३० ओटा चांदी के शेकेलम लेयचा पुंडसीब जकरिया ११:१२; मत्ती २६:१५
३. मेको क्येटीमी मार पाइनीम जकरिया ११:१३; मत्ती २७:९-१०
४. मस्सीह बेक्शो जकरिया ११:-; १३:७; यूहन्ना १०:११-१८
५. थमा सुइक्ब ब्रशो जकरिया १३:७; मत्ती २६:३१; जकरिया १२:१०; यूहन्ना १९:३७

परमप्रभु गे लेतीन, दे अरेशो

१ पिप दारामी सासन पशो बर्स का ८ महिना दुम्मेनु, परमप्रभु यावेमी इददो आ चच, बेरेक्याह आ तौ परमप्रभु यावे आ लोत्र पाइब जकरिया कली लोत्र पाप्तु। परमप्रभु यावेमी मार लोत्र पाप्तु देशा हना, एजा ५:१

२ “परमप्रभु यावे इन किकी पिपी आन पर्वम शुश गाइक्ताक्ब।

३ मोपतीके मुर नेल्ल आन परमप्रभु यावेमी मुर आन कली मार दैत देशा हना ‘आं गे लेतीन। मिनु गो इन कली कोत्रनुड। मलाकी ३:७; याकूब ४:८

४ साइ डा आं लोत्र पाइबपुकीमी इन किकी पिपी आन कली लोत्र पाप्तेक्म। मेकोपुकीमी मुर नेल्ल आन परमप्रभु यावेमी इन कली मार लोत्र पाप्तु देशा हना इन मरिम्शो लां रे नु इन मरिम्शो पतीके रे परमप्रभु आ लां गे लेतीन, दे लोत्र पाप्तेक्म। तन्न इन किकी पिपीमी आं लोत्र मनेंथु मटीम। गेपुकी मेको आन खोदेशो मपने। येरमीया ३:१२; इजीकीएल ३३:११

५ इन किकी पिपी ते बाक्नीमी? आं लोत्र पाइबपुकी गेना हना यो ब्रोंइशा बाक्नीमी डा?

६ तन्न गो आं गेय पाइब, आं लोत्र पाइब आन कली पशो लोत्र नु आं फुल्लुम मुशा ब्रेक्शो लोत्र इन किकी पिपी आन पाला रे मुल सम्म मबाक्म डा?’ मिनु मेकोपुकी परमप्रभु यावे गे लेत्या माल्शा, मेकोपुकीमी ‘मुर नेल्ल आन परमप्रभु यावेमी आंइ मरिम्शो लां नु आंइ मरिम्शो पशो आ पर्वम आ देशो खोदेशो पा पाप्तु’ दैतेक्म” दे मुर नेल्ल आन परमप्रभु यावेमी दैत।

लल शारा डोइक्ब

७ मिनु पिप दारामी सासन पशो बर्स निकशी, शेबात माइश्शो ११ महिना डा २४ नाक्ती इददो आ चच, बेरेक्याह आ तौ जकरिया, परमप्रभु यावे आ लोत्र पाइब आ बाक्तीकेमी परमप्रभु यावे आ लोत्र जाक्त।

८ मिनु जकरियामी “गो नाक्दो लल शारा डोइक्ब का गाक्शो ताता। मेको दिंममी बाक्शो मूरे रवा आन दातेमी दिक्शा राष्शा बाक्शो बाक्त। मिनु मेको आ नोले अरु लल, खाइरो नु बुश शारापुकी राष्शो बाक्तेक्म। जकरिया ६:१-८

९ मिनु गो नु लोत्र पाइब, परमप्रभु यावे आ स्वर्ग डा गेय पाइब कली ‘आं प्रभु, मेको मार कली नमी?’ दे हिल्लो पाता। मिनु मेकोमी ‘एको मार कली नमी, दे गो इ कली कोइन्न’ दैत।

१० मिनु नोले मूरे रवा आन दातेमी राष्शा बाक्ब मुरुमी लोत्र लेश्शा ‘परमप्रभु यावेमी एको आन कली रागी नेल्ल हिरशा कोत्रचा कली सोइक्ताक्ब’ दैत।

११ मिनु नोले शारा डोइक्बपुकीमी मूरे रवा आन दातेमी बाक्ब परमप्रभु यावे आ स्वर्ग डा गेय पाइब कली ‘गो रागी नेल्ल हिरशा कोत्रतक। मिनु रागी नेल्ल डा मुर सिकसी पा नाइश्शा बाक्शो बाक्तेक्म’ दैतेक्म।

१२ मिनु परमप्रभु यावे आ स्वर्ग डा गेय पाइबमी ‘मुर नेल्ल आन परमप्रभु यावे, गे गेना सम्म यरूसलेम नु यहूदा सहर डा मुर आन कली शिशी मपाइनीनी? गे मेको आन कली मुल रे ७० बर्स सम्म गाइक्ना गाइक्न बाक्शो बाक्तीनी”’ दैत। भजन संग्रह १०२:१४; दानीएल ६:२

१३ मिनु परमप्रभु यावेमी गो नु लोत्र पाइब, आ स्वर्ग डा गेय पाइब कली रिम्शो नु थुं बारपाइक्तीक लोत्र पाप्तु।

१४ मिनु स्वर्ग डा गेय पाइबमी आं कली “परमप्रभु आ लोत्र नेल्ल आन कली नैपतो। मिनु मुर नेल्ल आन परमप्रभु यावेमी ‘गो यरूसलेम नु सियोन कली शुश रुश पशो बाक्नुड।

१५ रिम्शो पा बाक्ब रागी रागी डा मुर आन कली तथा शुश गाइश्शो बाक्नुड। गो डोंइती इच्का ला गाइक्ताक्ड। मिनु मुरपुकीमी तेम्शा मरिम्शो पचा गोम्तेक्म’ दैत। येरमीया ४७:६

१६ मोपतीके परमप्रभु यावेमी मार दैत, देशा हना ‘गो शिशी पा यरूसलेम लेत्ती। मेकेर आं खिं लेंशा सेल्चा माल्नीम। मिनु यरूसलेम नेल्लेमी पुक्तीक डोरी केंचा माल्नीम’ दे मुर नेल्ल आन परमप्रभु यावेमी दैत। जकरिया ८:३

17 मिनु मुर नेल्ल आन परमप्रभु यावेमी मार दैत, देशा हना 'आं सहरपुकी लेशा शुश सोशो बोशो दुम्चा माल्नीम। परमप्रभु यावेमी सियोन कली लेम्शा शिशो पाइब। मिनु यरूसलेम कली योत्रब' दैत। यसैया ४०:१-२; यसैया १४:१

४ ओटा ग्रोत्र नु ४ जना तुप्तील

18 मिनु इर गे कोत्रडुनु, ४ ओटा ग्रोत्र ताता।

19 मिनु गो नु लोत्र पाइब, स्वर्ग डा गेय पाइब कली "एको मार में?" दे हिल्लो पाता। मिनु मेकोमी "एको ग्रोत्रपुकीमी यहूदा, इस्राएल नु यरूसलेम डा मुर आन कली एर ओंथ फ्राम्तेकम" दैत।

20 मिनु नोले परमप्रभु यावेमी आं कली ४ जना तुप्तील कोइताकयी।

21 मिनु गो "एको मार पचा कली जाकमा?" दे हिल्लो पाता। मिनु मेकोमी "मेको ग्रोत्रपुकीमी यहूदा कली मबोक्या डा पा खोल्लो बाक्तेकम। मिनु मेको तुप्तीलपुकी रागी रागी डा मुर आन कली ब्रपाइकब ग्रोत्र खोदेशो ठेयब हुकुम पाइब मुर आन कली श्येत गेशा साइक्या कली जाकशो बाक्तेकम। मारदे हना मेकोपुकीमी यहूदा डा मुर आन कली फ्रना फ्रन बाक्तेकम" दैत।

## 2

पुक्तीक डोरी

1 मिनु गो इर कोत्रडुनु, पुक्तीक डोरी शेशो मुर का आं डोंइती राप्शो ताता। इजीकीएल ४०:३

2 मिनु गो मेको कली "गे ते गाक्नी?" दे हिल्लो पाता। मिनु मेकोमी आं कली "यरूसलेम पुक्शा, मेको दोशो दुइशो नु दोशो ब्रेम्शो बाकमे, मेको कोत्रथ लती" दे माइक्ती।

3 मिनु मेको गो नु लोत्र पाइब, स्वर्ग डा गेय पाइब जाकत। मिनु अर्को स्वर्ग डा गेय पाइब मेको कली गुम्थ जाकत। इजीकीएल ३८:११

4 मिनु मेकोमी "दोरशा लशा मेको ठिटा कली 'यरूसलेममी लेशा शुश मुर बाक्या माल्नीम। मुर नु बी ब्यफ, क्यारश भेडा शुश दुम्तीके यरूसलेम गारो मपाइशो गाउं खोदेशो दुम्ब।

5 मिनु गो मेको आ एर ओंथ मी के गारो दुम्नुड। मिनु गो मेको आ आगा डा छेडछेड दुम्नुड' दे परमप्रभु यावेमी दैत, देनो" दैत। जकरिया १:८

इस्राएली लेशा जाक्या माल्लो

6 परमप्रभु यावेमी "जाक्कीन जाक्कीन, उत्तर डा रागी रे प्रोक्शा जाक्कीन। मारदे हना गो इन कली एर ओंथ डा फशेमी खोदेशो पा फ्राता" दे परमप्रभु यावेमी दैत।

7 मेकोमी आं कली "आबी, सियोन, गे बेबीलोन डा मुर आन दाते रे बोक्शा, प्रोक्कीन।

8 मारदे हना मुर नेल्ल आन परमप्रभु यावेमी इन कली रोइकब रागी रागी डा मुर आन परबम मार दैत देशा हना 'सुमी इन कली थीबा, मेकोमी आं मिक्च आ क्रिकबील थीब' दैत। ब्यवस्था ३२:१०

9 मूल नेनीन, गो आं गुड मेको आन परबम क्युकनुड। मिनु मेको आन वाइलमी मेको आन कली रोइक्नीम। मिनु गेपुकीमी मुर नेल्ल आन परमप्रभु यावेमी आं कली सोइशो बाकब, दे तुइक्नीनी। ब्यवस्था ३२:१०

10 सियोन आ तमी, ग्येरशा सोम्शा कुम्सो पावो। मारदे हना गो इन दातेमी बाक्थ जाक्नुड।

11 मेको नाकत शुश रागी डा मुरपुकी परमप्रभु यावे नु गारचा कली जाक्नीम। मेको नाक्ती मेको आं मुर दुम्नीम। मिनु गो गे इन दातेमी बाक्नुड। मिनु गेपुकीमी मुर नेल्ल आन परमप्रभु यावेमी आं कली इन कली लोत्र पथ सोइशो बाकब, दे तुइक्नीनी" दे परमप्रभु यावेमी दैत। यसैया ११:१०

12 परमप्रभु यावेमी यहूदा रागी कली आ के सेल्ब। मिनु यरूसलेम कली लेशा योत्रब। जकरिया १:१७

13 रागी डा मुर नेल्ल परमप्रभु यावे आ डोंइती सिक्सी पा बाक्कीन। मारदे हना मेको आ बाक्तीक रे पा गूशा जाकशो बाकब। हबकुक २:२०

## 3

नेल्ल क्येडा ठेयब चढ़ेब यहोसु

1 मिनु परमप्रभु यावे आ स्वर्ग डा गेय पाइबमी नेल्ल क्येडा ठेयब चढ़ेब यहोसु कोइताकयी। मेको परमप्रभु यावे आ स्वर्ग डा गेय पाइब आ डोंइती राप्शो बाकत। मिनु सैतान मेको कली दोस गेचा कली आ ग्युरा गे राप्शो बाकत। हागै १:१; अय्युब १:९; प्रकाश १२:१०

2 मिनु परमप्रभु यावेमी सैतान कली "सैतान, परमप्रभु यावेमी इ कली हुइकब। यरूसलेम कली योत्रब परमप्रभु यावेमी इ कली हुइकब। मार, एको मुर मी रे पा गुंइशो बुल्सी खोदेशो ममाइ डा?" दैत। यहूदा :९

3 यहोसु ग्रांया दिशो लुम्सीशो वा फेक्शा, स्वर्ग डा गेय पाइब आ डोंइती राप्शो बाकत।

4 मिनु मेको स्वर्ग डा गेय पाइबमी आ डोंइती बाकब आन कली "मेको आ ग्रांया दिशो लुम्सीशो वा पुइक्तीन" दैत। मिनु मेकोमी यहोसु कली "गो इ मरिम्शो पशो नेल्ल क्याम्ताकड। गो इ कली रिम्शो वा फेक्कन" दैत। यसैया ६:७; यसैया ६१:३

5 मिनु गो "मेको आ पियामी रिम्शो गुप्तीक का गुप्तीन" दैती। मिनु मेकोपुकीमी मेको कली रिम्शो गुप्तीके गुप्शा, रिम्शो वा फेक्ताकम। मिनु परमप्रभु यावे आ स्वर्ग डा गेय पाइब आ नेक्था राप्शा बाकत। प्रस्थान २८:३९

6 मिनु नोले परमप्रभु यावे आ स्वर्ग डा गेय पाइबमी यहोसु कली

7 “मुर नेल्ल आन परमप्रभु यावेमी मार देंत देशा हना ‘गे आं लांमी गाक्ते नु इ कली देशो लोत्र टिप्तीवी हना, गे आं खिं नु आं लाडगा नेल्ल कोत्रब दुम्नेवे। मिनु एकेर राप्शा बाक्ब आन दातेमी आं डोंइती जाक्ने चाप्नेवे।

8 यहोसु, नेल्ल क्येडा ठेयब चढ़ेब नु इ नेक्था बाक्ब इ खोदेशो गेय पाइबपुकी नोफा दाइशशा नेनीन। गो नोले आं गेय पाइब, राशी माइशशो चाक्नुड, मेकोपुकी मेको आ पर्वम चिन्ड बाक्नीम। यसैया ८:१८; जकरिया ६:१२; येरमीया २३:५; येरमीया ३३:१५

9 मारदे हना गो यहोसु आ डोंइती फुल्लु का वोइक्ता। मेको आ तारी ७ ओटा मिक्च बाक्नीम। मिनु गो फुल्लु तारी मेको आ ब्रेक्स मुशा ब्रेक्नुड। मिनु गो काबुमीन मेको रागी डा मुर आन दोस नेल्ल क्याम्नुड। प्रस्थान ३९:६-७; जकरिया ४:१०; प्रकाश ५:६

10 मेको नाक्ती गे नेल्लेमी आंम आंमा ब्रेम्मुशा अडगुर नु फोत्रशी आ पुंमी ग्येरशा युम्नीनी’ दे मुर नेल्ल आन परमप्रभु यावेमी देंत’ देंत। १राजा ५:५; मीका ४:४

## 4

सुन के बत्ती दातीक

1 मिनु गो नु लोत्र पाइब, स्वर्ग डा गेय पाइब लेंशा जाक्त। मेकोमी आं कली मुर कली निन्द्रा रे पा पोक्शो खोदेशो पा सेंपाइक्ती।

2 मिनु मेकोमी आं कली “गे मार तवी?” दे हिल्लो पती। मिनु गो “सुन के बत्ती दातीक ताता। मेको आ तारी बोस का बाक्ता। मेको तारी ७ ओटा बत्ती बाक्तेक्म। मेको बत्ती नेल्लेमी दातीक सल्दो वोइशशो बाक्तेक्म। येरमीया १:११-१३; आमोस ८:२; प्रस्थान २५:३१-४०

3 मिनु मेको आ नेक्था तेल रवा निक्शी, का ग्युरा गे नु का पेरा गे बाक्ताक्स” देंती।

4 मिनु गो नु लोत्र पाइब, परमप्रभु यावे आ स्वर्ग डा गेय पाइब कली “आं प्रभु, मेको मार नसी?” दे हिल्लो पाता।

5 मिनु मेको गो नु लोत्र पाइब, परमप्रभु यावे आ स्वर्ग डा गेय पाइबमी “मेको मार नसी, गे मतुइक्नेवे?” देंत। मिनु गो “आं प्रभु, मतुइक्नुड” देंती।

6 मिनु मेकोमी आं कली “एको परमप्रभु यावेमी जेरूब-बाबेल कली पशो लोत्र बाक्ब। ‘बोलम ममाइ, सक्तिमी यो ममाइ, तन्न आं सोक्तीमी पाइनुड’ दे मुर नेल्ल आन परमप्रभु यावेमी देंत।

7 ठेयब डांडा गे मार नवे डा? जेरूब-बाबेल आ डोंइती गे दिंम दुम्चा माल्लेवे। मेकोमी परमप्रभु यावे आ खिं डा नोले डा फुल्लु वोदानु, मुर नेल्लेमी ठेयब सेंदा पा ‘रिम्शो दुम्त, रिम्शो दुम्त’ दे ठेयब सेंदा पा देनीम” देंत। भजन संग्रह १२२:६

8 मिनु परमप्रभु यावेमी आं कली लोत्र पाप्नु। मार लोत्र पाप्नु देंशा हना

9 “जेरूब-बाबेलमी एको परमप्रभु यावे आ खिं डा जग फुल्लु वोइशशो बाक्ब। मिनु मेकोमीन मेको खिं सेल्ले थुम्ब। मिनु मुर नेल्ल आन परमप्रभु यावेमी आं कली इन कली लोत्र पथ सोइशशो बाक्ब, दे तुइक्नीनी” देंती। एजा ३:८; एजा ६:१४-१६; जकरिया २:१३,१५

10 मिनु “सु आइक्च गेय गोशो नाक्ती आइक्च सेल्ला? नोले मेकोपुकीमी जेरूब-बाबेल आ गुइमी गारो थाप्तीक श्येले तशा, ग्येरसीनीम। हागै २:३; जकरिया ४:७ मेको फुल्लु डा ७ ओटा मिक्च परमप्रभु यावे आ मिक्च बाक्नीम। मेको मिक्चीमी रागी नेल्ल कोत्रशो बाक्नीम” दे परमप्रभु आ लोत्र बाक्ब।

तेल रवा निक्शी

11 मिनु नोले गो मेको कली “एको बत्ती दातीक आ ग्युरा नु पेरा गे बाक्शो तेल रवा निक्शी मार में?” दे हिल्लो पाता।

12 मिनु लेंशा मेको कली “मेको सुन के तेल लुक्तीके निक्शीमी तेल लुक्ना लुक्न पशो, एको तेल रवा निक्शी आस राशी मार में?” दे हिल्लो पाता।

13 मिनु मेकोमी “एको मार बाक्बा, दे मतुइक्नेवे?” दे हिल्लो पती। मिनु गो “आं प्रभु, मतुइक्नुड” देंती।

14 मिनु मेकोमी “मेको रागी नेल्ल डा परमप्रभु यावे आ डोंइती राप्शा कली तेल लुक्चा पुंडसीशो बाक्नीसी” देंत। जकरिया ६:५; प्रकाश ११:४

## 5

तोल्शा प्राक्शो ब्रेक्स

1 मिनु गो इर गे कोत्रडुनु, प्राक्सीशो ब्रेक्स का बेरशो ताता।

2 मिनु मेकोमी आं कली “गे मार तवी?” दे हिल्लो पती। मिनु गो “२० कुबीत लाइशशो नु १० कुबीत ब्रेम्शो तोल्शो प्राक्सीशो ब्रेक्स बेरशो ताता” देंती। कुबीत का ०.५ मिटर बाक्ब।

3 मिनु नोले मेकोमी आं कली “एको रागी नेल्ल कली जाक्चशो सराप बाक्ब। मेको तोल्शा प्राक्शो ब्रेक्स निम्फा गे ब्रेक्सशो बाक्ब। का गे खुइ आन पर्वम ब्रेक्सशो बाक्ब। मारदे हना मेको मुल सम्म सजाइ मतशो बाक्तेक्म। अर्को गे जोल पा कसम जाइब आन पर्वम ब्रेक्सशो बाक्ब। मारदे हना मेको यो मुल सम्म सजाइ मतशो बाक्तेक्म” देंत।

4 मिनु मुर नेल्ल आन परमप्रभु यावेमी “गो मेको ब्रेक्स सोइक्ताक्ड। मिनु मेको खुइ नु आं नैमी जोल पा सांक्छी बाक्ब आन खिंमी ओत्रब। मेकेर बाक्शा, खिं खतम सेल्शा, शी फुल्लु का यो मलीपाइक्ब” देंत।

डालोम निरशो मीश मुर

5 मिनु गो नु लोत्र पाइब, स्वर्ग डा गेय पाइबमी आं नेक्था जाक्शा “हरी इर कोत्रडो। मार ग्रूमे?” देंत।



6 मिनु गो “मिरी मार में?” दे हिल्लो पाता। मिनु मेकोमी “मेकेर डालो का यूत” दैत। मिनु मेकोमी “एको रागी नेल्ल डा मुर आन दोस बाक्ब” दैत।

7 नोले हेल्शो सिसा के सुन्तीकेम रोकसाक्व। मिनु मेको डालोम मीश मुर का निरशा बाक्बो ताता।

8 मिनु मेकोमी “परमप्रभु यावे आ अरेशो मटितिके एकोन बाक्ब” दैत। मिनु मेकोमी मेको मीश मुर कली डालो आगा नेप्शा, हेल्शो सिसा के सुन्तीकेमी सुन्तु।

9 मिनु इर कोव्रडुनु, मीश मुर निक्शी पिशो तातासी। मेको आस फ्रॉमी फश बाक्त। मेको आस फ्रॉ सारस के खोदेशो बाक्त। मेको निक्शीमी मेको डालो कली सरीड नु रागी आस दातेमी क्युकशा लाइक्ताक्स।

10 मिनु गो नु लोव्र पाइब, स्वर्ग डा गेय पाइब कली “मेको निक्शीमी मेको डालो ते लत्से?” दे हिल्लो पाता। उत्पती ११:२

11 मिनु मेकोमी “बेबीलोन डा शिनार माइक्तीकेमी मेको कली खिं का सेल्चा चिक्बो बाक्ब। मिनु सेल्ने थुम्मे नोले मेको डालो कली मेकेर आ बाक्तीकेम वोइक्नीम” दे माइक्ती।

## 6

### ४ ओटा बग्गी

1 मिनु गो लेंशा इर गे कोव्रडुनु आं डोंइती डांडा आस दाते रे ४ ओटा बग्गी यिशो तातामी। मेको डांडा कांसा के बाक्ताक्स। प्रकाश ६:१-८; जकरिया १:८

2 डोंइती डा बग्गी लल शारापुकीमी कीशो बाक्तेक्म। मेको आ नोले डा बग्गी क्येर शारापुकीमी कीशो बाक्तेक्म।

3 मेको आ नोले डा बग्गी बुश शारापुकीमी कीशो बाक्तेक्म। मिनु नेल्ल क्येडा नोले डा बग्गी पाइये शारापुकीमी कीशो बाक्तेक्म। प्रकाश ६:१-८; जकरिया १:८

4 मिनु गो नु लोव्र पाइब, स्वर्ग डा गेय पाइब कली “आं प्रभु, एको मार नमी?” दे हिल्लो पाता।

5 मिनु मेको परमप्रभु यावे आ स्वर्ग डा गेय पाइबमी आं कली “एको स्वर्ग डा ४ ओटा फश नम। एको यूशा लचा कली रागी नेल्ल डा परमप्रभु यावे आ डोंइती जाक्तेक्म। जकरिया ४:१४

6 क्येर शारा पाइइशो बग्गी उत्तर रागी गे लाइब। बुश शारा पाइइशो बग्गी पच्छिम रागी गे लाइब। पाइये शारा पाइइशो बग्गी दक्खिन रागी गे लाइब” दैत।

7 मेको शारा यूशा रागी कोव्रथ लचा कली चुइइशो बाक्तेक्म। मिनु मेकोमी “रागी नेल्ल कोव्रथ लने” दे अरेप्टु। मिनु मेकोपुकी रागी कोव्रथ लाम्तेक्म। जकरिया १:१०

8 मिनु नोले मेकोमी ठेयब सेदा पा आं कली “कोव्रडो, मेको उत्तर रागी गे लाइबमी आं सोक्त नाइक्पाइक्तेक्म” दैत।

### यहोसु आ सिरपेच

9 मिनु परमप्रभु यावेमी आं कली लोव्र पाप्टु।

10 मार लोव्र पाप्टु देशा हना “ग्याइइशा लाइक्चा पुंइसीशो बेबीलोन रे जाक्बो हेल्दाइ तोबीयाह नु येदायाह रे सुन चांदी पोक्को। मिनु मेको नाक्ती सेफन्याह आ तौ योसीयाह आ खिं लावो।

11 मेको सुन नु चांदी रे पा सिरपेच का सेलो। मिनु मेको सिरपेच लाइइशा, यहो-सादाक आ तौ नेल्ल क्येडा ठेयब चढेब यहोसु आ पियामी गुप्तो। जकरिया ३:८

12 मिनु मेको कली मुर नेल्ल आन परमप्रभु यावेमी मार दैत देशा हना ‘मेकेर मुर का बाक्ब। मेको आ नें राशी बाक्ब। मेको राशी आ बाक्तीकेमी बारशा, परमप्रभु यावे आ खिं सेल्चा माल्ब।

13 मेकोमीन परमप्रभु यावे आ खिं सेल्चा माल्ब। मेको पिप आ मान तशा, शुश ग्योम्सीशो बाक्ब। मेको आ ठेयब नित्तीकेमी निरशा सासन पाइब। मेको आ नित्तीकेमी आ ग्युरा गे चढेब का बाक्ब। मेको निक्शी दुशा गारशा गेय पाइनीसी। भजन संग्रह ११०:४

14 मिनु मेको सिरपेच हेल्दाइ, तोबीयाह, येदायाह नु सेफन्याह आ तौ योसीयाह मिम्शा, परमप्रभु यावे आ खिंमी वोइक्चा माल्नीम।

15 शुश डोन बाक्ब मुरपुकी यो परमप्रभु यावे आ खिं सेल्चा कली वारच पथ जाक्नीम। मिनु गोपुकीमी मुर नेल्ल आन परमप्रभु यावेमी आं कली इन कली लोव्र पथ सोइइशो बाक्ब, दे तुइक्नीनी। गे इन थुं नेल्लेमी परमप्रभु यावे, इन परमप्रभु आ देशो टीतीनी हना, मोदेशो दुम्ब’” दैत। यसेया ६०:१०

## 7

### माइजा बाक्चा आ पर्वम लोव्र

1 पिप दारामी सासन पशो ४ बर्स, किस्लेव माइइशो ९ महिना ४ नाक्त परमप्रभु यावेमी जकरिया कली लोव्र पाप्टु।

2 मार लोव्र पाप्टु देशा हना “बेथेल डा मुरपुकीमी शरसेर, रेगोम-मेलोक नु मेकेर डा मुर आन कली परमप्रभु यावे आ शिशो पुंइचा कली सोइइशो बाक्तेक्म।

3 मिनु मुर नेल्ल आन परमप्रभु यावे आ खिंमी चढेब नु परमप्रभु यावे आ लोव्र पाइब आन कली ‘गोपुकी मुल सम्म शुश बर्स डोंइती रे पशो खोदेशो पा ५ महिनामी रेंका पा माइजा बाक्चा माल्नीकी डा?’ दे हिल्लो पचा कली सोइइशो बाक्तेक्म” दैत। जकरिया ८:१९; २राजा २५:८-९; येरमीया ५२:१२-१३

4 मिनु मुर नेल्ल आन परमप्रभु यावेमी मार दैत देशा हना

5 “रागी डा मुर नेल्ल नु चढेब आन कली ‘गेपुकीमी मेको ७० बर्स डा ५ नु ७ महिनामी रोंका पा माइजा बाकतीनी। मार गे मेको आं पर्वम पनी डा? यसैया ५८:५  
6 मिनु गे जशा, ब्वशा तूतीनी हना, गे आम इन पर्वम मपाइनीनी डा?’ देनो” दैत।

इसाएली आन कली निसाफ

7 परमप्रभुमी “यरूसलेममी शुश मुर बाकशा, एर ओथ डा सहर नेल्ल रिम्शो नु सोशो बोशो बाकमेनु, नेगेब नु पच्छिम डा शेफेलाह नेल्ल रिम्शो पा बाकमानु, डोंइती डा आं लोत्र पाइबपुकीमी मुर आन कली दैशो परमप्रभु यावे आ पशो लोत्र एकोन ममाइ डा?” दैत।

8 मिनु परमप्रभु यावेमी लेंशा जकरिया कली लोत्र पाप्तु।

9 मिनु मुर नेल्ल आन परमप्रभु यावेमी मार लोत्र पाप्तु दैशा हना “ठीक पा निसाफ पने, दाकमुने नु शिशी पमुने, मीका ६:८

10 वोंइश बेक्शो मीश मुर, रोम रोइक्च, अर्को रागी डा मुर नु पुडग आन कली मदिपीन। मरिम्शो पमुचा ममिम्तीन। प्रस्थान २२:२०-२१

11 तन्न मेकोपुकीमी एको लोत्र मनेनेम। काइ मटीब दुम्शा, आन नोफा सुम्तेक्म।

12 मेकोपुकीमी परमप्रभु यावे आ अरेशो नु आ लोत्र मनेंचा डा पा आन थुं खकटा सेलतेक्म। डोंइती मुर नेल्ल आन परमप्रभु यावेमी आ सोक्तर रे पा आ अरेशो लोत्र नु मुर आन कली पतीक लोत्र पथ आ लोत्र पाइब आन कली सोइशशो बाकत। मोपतीके मुर नेल्ल आन परमप्रभु यावे शुश गाइशशो बाकब। यसैया ४८:४

13 दोपा मेकोपुकीमी आं लोत्र मनेन्मे, मोपा गो यो मेको आन पुंइशो लोत्र मनेनुड।

14 मिनु गो मेको आन कली फश गिवारमी खोदेंशो पा आन मतुइशशो रागी रागीम फ्रातामी। मोपतीके आन प्रोंइशो रागी मुर मबाक्शो दुम्त। मेकेर सुइ मलम। मोदेंशो पा रिम्शो रागी खतम दुम्त” दे मुर नेल्ल आन परमप्रभु यावेमी दैत।

## 8

परमप्रभुमी आ मुर खुप्शो

1 मिनु मुर नेल्ल आन परमप्रभु यावेमी आं कली लोत्र पाप्तु।

2 मेकोमी मार लोत्र पाप्तु दैशा हना “गो सियोन आ पर्वम शुश रुश पाइनुड। गो मेको आ पर्वम थाम्पा रुश पा गाइशशो बाक्नुड” दे परमप्रभु यावेमी दैत। जकरिया १:१४

3 परमप्रभु यावेमी “गो सियोनमी जाक्शा, यरूसलेम आ दातेमी बाक्नुड। मिनु यरूसलेम थमा सुइक्चा पुंइसीब सहर दुम्ब। मिनु मुर नेल्ल आन परमप्रभु यावे आ डांडा आम आ बाक्तीक डांडा दुम्ब” दैत। जकरिया १:१६; यसैया १:२१, २६; भजन संग्रह २:६

4 मिनु मुर नेल्ल आन परमप्रभु यावेमी “खूशो खूशोम यरूसलेम डा लांम नित्नीम। शुश बर्स दुम्तीके कोक्के तिव्शा बाक्नीम। यसैया ६५:२०

5 सहर डा लांमी ग्यारब मीश आल नु वोंइश आलम ब्रीशो बाक्नीम” दैत।

6 मुर नेल्ल आन परमप्रभु यावेमी “मेको लीशो मुरपुकीमी मेको थमा सुइक्चे मचाप्तेक्म हना यो, गो मोदेंशो पने मचाप्नुडा डा?” दैत। लूका १:३७

7 मुर नेल्ल आन परमप्रभु यावेमी मार दैत दैशा हना “गो आं मुर आन कली पूर्व डा रागी नु पच्छिम डा रागी रे पा प्रोंइनुडमी।

8 मिनु गो मेको आन कली यरूसलेममी बाक्पाइक्चा कली चाक्नुडमी। मेकोपुकी आं मुर दुम्नीम। मिनु गो मेको आन परमप्रभु दुम्नुड। गो मेको आन कली दाक्चा मप्रोंइथु, ठीक पाइनुड” दैत। येरमीया २४:७

9 मुर नेल्ल आन परमप्रभु यावेमी मार दैत दैशा हना “गेपुकी शुश गेय पने। डोंइती गे आं लोत्र पाइबपुकीम लोत्र पशो नेतीनी। मेकोपुकी मुर नेल्ल आन परमप्रभु यावे आं खिं लेंशा सेल्ची ना डा जग वोंइक्ची ना बाक्तेक्म। यसैया ३५:३

10 मेको क्येडा डोंइती मुर आन कली गाल्च मगेमे। बी ब्यफ, क्यारश भेडा आन कली क्येट यो मगेमे। मेको आन जोरी सत्रुमी पतीके आन गेय पथ लने मचाप्शो बाक्तेक्म। मारदे हना गो मुर आन कली साइक्मुपाइक्तामी।

11 तन्न मुल रे एको लीशो आन कली डोंइती डा खोदेंशो मपाइक्नुडमी” दे मुर नेल्ल आन परमप्रभु यावेमी दैत।

12 मेकोमी “मुल थुं नाइक्तीक दुम्शो बाक्ब। अड्युर आ बोटमी रिम्शो फल सिपब। रूमी अन्न खेल्ब। सरीड रे सीत यीब। गो मेको नेल्ल लीशो आं मुर आन कली गेनुडमी।

13 यहूदा नु इस्राएल डा मुरपुकी गे रागी रागी डा मुर आन दातेमी सराप रशो बाक्तीनी। दोपा गेपुकी सराप रनी, मोपा आसीक ताइब दुम्नीनी। महिनीन, बोल्यो दुमीन” दैत। उत्पत्ती १२:२

14 मिनु मुर नेल्ल आन परमप्रभु यावेमी “गो मोपा इन किकी पिपी आन कली आं कली गाइक्पाइक्तीके श्येत गेतामी। मिनु गो शिशी मपड।

15 गो मुल यरूसलेम नु यहूदा डा मुर आन कली रिम्शो पाइनुड। गेपुकी महिनीन।

16 गेपुकीमी मार पचा माल्नीनी दैशा हना, गे इन दातेमी थमा लोत्र ला पमुने। इन ठेयब लाप्चोमी जिचा मबोक्चा डा पा थमा नु ठीक निसाफ पने। एफिसी ४:२५

17 इन दातेमी थुंम मिम्शा, मरिम्शो मपमुने। जोल पा कसम मजने। मारदे हना मेको नेल्ल गो ग्रंशा दीनुड” दे परमप्रभु यावेमी दैत। जकरिया ७:१०

18 मुर नेल्ल आन परमप्रभु यावेमी आं कली लोत्र पाप्नु।

19 मिनु मेकोमी मार दैत देशा हना “४ महिना डा माइजा बाक्तीक, ५, ७ नु १० महिना डा माइजा बाक्तीके, मुल रे यहूदा डा मुर ग्येरशा सोम्शा पतीक नाक्त दुम्चा माल्नीम। मेको ग्येरशा बाक्तीक चाड दुम्चा माल्नीम। मोपतीके गे थमा लोत्र पचा नु थुं नाइक्चा दाक्तीन” दे मुर नेल्ल आन परमप्रभु यावेमी दैत। जकरिया ७:३, ५

परमप्रभुम श्येत रे प्रोइब

20 मुर नेल्ल आन परमप्रभु यावेमी “शुश सहर डा मुर तेम्शा जाक्नीम।

21 सहर का डा मुरपुकीम अर्को सहर डा मुर आन कली ‘परमप्रभु यावे आ शिशी पुंडथ नु मुर नेल्ल आन परमप्रभु यावे कली माल्थ लने। गो आंमा यो लाइक्नीकी’ दैनीम।

22 शुश मुर नु बोल्यो रागी डा मुरपुकी मुर नेल्ल आन परमप्रभु यावे कली माल्थ, यरूसलेम सहरम जाक्नीम। मेकोपुकीमी परमप्रभु यावे आ शिशी पुंडनीम” दैत।

23 मुर नेल्ल आन परमप्रभु यावेमी मार दैत देशा हना “मेको नाक्ती रागी रागी डा आन आन लोत्र ब्वाक्ब १० जना मुरपुकीमी यहूदी का आ वा ग्याइशशा ‘गो गे नु लाइनीकी। मारदे हना परमप्रभु यावे गेपुकी नु बाक्ब देशो नेशो बाक्नीक’ दैनीम” दे परमप्रभुमी दैत।

## 9

परमप्रभु आ लोत्र

1 परमप्रभु यावेम हद्राक रागी नु दमस्कस सहर आस पर्वम लोत्र का पशो बाक्त। मारदे हना इस्राएल डा थर नेल्ल नु अर्को रागी डा मुर यो परमप्रभु यावे केन बाक्नीम। यसैया १७:-

2 शुश जोक्ब तुइक्ब बाक्तेकम हना यो, हमाथ, टायर नु सीदोन सहर आन पर्वम परमप्रभु यावेमी लोत्र पशो बाक्ब। यसैया २३:-; येरमीया ४७:४; इजीकीएल २६:-; इजीकीएल २८:-

3 टायरमी आंम पर्वम बोल्यो दरवार का सेल्शो बाक्ब। मेकोमी फुरक खोदेशो पा चांदी नु लां मेर डा हिलो खोदेशो पा सुन तेल्लो बाक्ब।

4 तन्न परमप्रभुमी मेको आ बाक्शो मारेइ मारेइ रोइक्ब। मेको आ शोंप नेल्ल समुन्द्रमी ताइशशा गेब। मिनु मेको मीम प्रोइशशा, खतम दुम्नीम।

5 मिनु अश्कलोन मेको तशा हिंब। गाजा हिंशा खिंखि पाइब, एक्रोन शुश सुर्ता पा आ आस पशो जाम्शा लाइब। गाजा डा पिप जाम्शा लाइब। अश्कलोनमी मुर मबाक्तीक दुम्ब। येरमीया ४७:-

6 अश्दोद सहरमी खाल्सीशो मुरपुकी बाक्नीम। मिनु गो पलिस्ती आन टेयब लेत्तीक खतम पा गेनुड। ब्यवस्था २३:३

7 गो मेको आन शोत्र रे पा हुश नु मेको आन खुइ रे ग्रान्रा दिचा डा थोत्रक गुंडनुड। लीशो मुरपुकी आंइ परमप्रभु आ मुर दुम्नीम। मेकोपुकी यहूदा आ थर डा मुर खोदेशो दुम्नीम। एक्रोन डा मुर चहिं यबुसी खोदेशो दुम्नीम। उत्पत्ती ९:४; यहोसु १५:६३; २सामुएल २४:१८

8 मिनु नोले गो आं खिं कली आंमा खाल पाइब खोदेशो बाक्नुड। मोपा सुइ मुर एर आंथ गाक्ने मचाप्नीम। सुइमी आं मुर आन कली लडाइ मतोइनीम। मारदे हना मुल गो आंमान मेको आन कली कोत्रनुड। जकरिया २:९

सियोन डा पिप जाक्शो

9 सियोन आ तमी, साप्पा ग्येरसो। यरूसलेम आ तमी ग्येरशा टेयब सेंदा पा ग्रीडो। मारदे हना इ पिप इ बाक्तीकेमी जाक्ना जाक्न बाक्ब। मेको ग्राशा ग्येरसीशा जाक्ब। मेको ब्रेम्शो बाक्ब। मेको गधा तार डोइशशा जाक्ब। गधा आ चाइक्ब तार डोइशशा जाक्ब। सेफन्याह ३:१४; मत्ती २१:५

10 गो एफ्राइम रे पा बग्गीपुकी नु यरूसलेम रे पा लडाइ पाइब शारा लाइक्नुड। लडाइ पाइब आन लिब्रा जिक्ब। मेकोमी रागी रागी डा मुर आन कली थुं नाइशशा बाक्चा गेब। मेकोमी समुन्द्र कारे अर्को समुन्द्र सम्म नु युफ्रेटीस खोला रे रागी डा सुर सम्म सासन पाइब। मीका ५:९

11 गे नु पशो आं हुश आ कबलम पतीके इ चोक्चा पुंडसीशो मुर आन कली ब्वाक्कु मबाक्शो खाल्टा रे गुंडनुडमी। प्रस्थान २४:८; उत्पत्ती ३७:२४

12 आस पा बाक्शो चोक्चा पुंडसीशो मुरपुकी इन बोल्यो ब्रोंइशा बाक्तीके लेशशा लने। गो इन कली इन साम्शो क्येडा निक्शी खेयब खोइ शुश गेनुड। जकरिया १०:९; यसैया ६१:७

13 गो यहूदा कली आं लिब्रा खुक्शो खोदेशो पा खुक्नुड। गो एफ्राइम कली मेको आ ब्रा खोदेशो सेल्लुड। सियोन, इ तौ आन कली गो ग्रीस रागी आ तौ आन पर्वम क्युक्नुड। मिनु गो इ कली बोल्यो लडाइ पाइब आ तरवार खोदेशो सेल्लुड।

14 मिनु नोले परमप्रभु यावे इन क्येडा डर गूब। मेको आ ब्रा चिला आप्शो खोदेशो पा बेरनीम। परमप्रभु, परमप्रभु यावेमी तुराही ताप्ब। मिनु दक्खिन डा फश गिवारम गाक्शा लाइब।

15 मुर नेल्ल आन परमप्रभु यावेमी मेको आन कली राइशशा प्रोइब। मेकोमी आन जोरी सत्रु आन कली खतम पोक्ब। मेकोपुकीमी आन हुश अडगुर शांब खोदेशो पा तूनीम। मेकोपुकी चढेतीक डा हुश कुर पतीक बोस खोदेशो पा ब्रीशो बाक्नीम। चढेतीक आ एर आंथ कुना कुना मेर फ्रशो हुश खोदेशो बाक्नीम।

16 मेको नाक्ती परमप्रभु यावे, आन परमप्रभुमी मेको आन कली श्येत रे प्रॉडब। मारदे हना मेकोपुकी आ बगाल खोदेशो बाक्नीम। मेको सिरपेच डा हीरा खोदेशो पा ब्राइनीम। मेकोपुकी परमप्रभु यावे, आन परमप्रभु आ रागीम हीरा खोदेशो पा ब्राइनीम।

17 मेको आ दाक्तीके नु आ शिशी पतीके थम ठेयब बाक्ब। वोंडश आल ग्रेल्लो अन्न खोदेशो पा शुश दुम्नीम। मीश आल नक अडगुर शांबु खोदेशो पा दारशो दुम्नीम।

## 10

परमप्रभु यावे कली पुनीन

1 परमप्रभु यावे कली नोले डा रेड पुनीन। परमप्रभु यावे गोस्स नु फश सेल्व बाक्ब। मिनु इन कली नु रू नेल्ल आन कली रेड यिपाइक्ब।

2 खिं डा देवी देवतामी फश लोत्र पाइनीम। लिंक्वु कोत्रबपुकीमी जोल तशा, डोमु डोशा, हेंथे लोत्र पाइनीम। मिनु मुर आन कली फश लोत्र पा लेम्नीम। मोपतीके मुरपुकी गोठला मबाक्शो भेडा खोदेशो पा श्येत जशा प्रोक्नीम। मत्ती ९:३७

परमप्रभुम आ मुर बोल्यो सेल्व

3 मिनु परमप्रभु यावेमी “गो गोठला आन कली तशा शुश गाइशो बाक्नुड। मारदे हना मुर नेल्ल आन परमप्रभु यावेमी आ बगाल, यहूदा आ मुर आन कली कोत्रब। मेकोमी आ मुर आन कली लडाइ पा गेनायो मरूब शारा खोदेशो सेल्व। जकरिया ११:५

4 मिनु यहूदा रे सुर डा फुल्लु, ताम्बु कीतीक किला, लडाइ पाइब आन लिब्रा नु कप्तान नेल्ल यूनीम। येरमीया ३०:२१

5 मिनु मेको नेल्ल लडाइम बाक्शो लडाइ पाइब खोदेशो बाक्नीम। मेकोपुकीम आन जोरी सत्रु लां डा हिलोम खोल्शा दिम्नीम। परमप्रभु यावे मेकोपुकी नु बाक्तीके मेकोपुकीमी लडाइ पाइनीम। शारा डोइक्ब आन कली मुने तोक्नीम।

6 गो यहूदा आ खिं डा मुर आन कली बोल्यो सेल्लुड। योसेफ आ खिं डा मुर आन कली श्येत रे प्रॉडनुड। मेको आन कली डोइती डा खोदेशो सेल्लुड। मारदे हना गो मेको आन कली शिशी पाइनुड। मेकोपुकी गेनायो मतिल्लो खोदेशो दुम्नीम। मारदे हना गो परमप्रभु यावे, मेको आन परमप्रभु नड। गो मेको आन कली लोत्र लेल्लुडमी।

7 मिनु एफ्राइम आ खिं डा मुर लडाइ पाइब खोदेशो पा बोल्यो दुम्नीम। अडगुर शांबु तूशो खोदेशो पा ग्येरसीनीम। आन आलपुकीम मेको तशा शुश ग्येरसीनीम। मेकोपुकीमी ‘गो परमप्रभु यावे आ मुर नय’ दे शुश ग्येरसीनीम।

8 गो आं मुर आन कली ब्रेशशा, खुनुड। मारदे हना गो मेको आन कली श्येत रे प्रॉडता। मिनु मेकोपुकी डोइती डा खोदेशो पा साशा बोशा, शुश दुम्नीम।

9 गो मेको आन कली रागी रागीम फ्राता हना यो, मेकोपुकीमी डोन रागीम बाक्शा, आं कली मिम्नीम। मिनु मेको आन आल कोल्पाइशशा आन रागीम लेत्नीम। यसैया ६६:१९; येरमीया ५१:५०

10 गो मेको आन कली इजीप्त रागी रे आन आंम रागीम लेप्पाइक्नुड। गो मेको आन कली अस्सुर रे गुंडशा, गिलाद नु लेबानोनम चाक्नुड। नोले मेकेर शुश मुर दुम्तीके बाक्तीके मबाक्ब।

11 मेकोपुकी समुन्द्र डा ठेयब ब्वाक्कु खोदेशो श्येत जाइनीम। तन्न गो समुन्द्र डा छाल थुम्पाइक्नुड। मिनु नील खोला सोत्रपाइक्नुड। अस्सुर आ ठेयब लेशशो जाम्ब। मिनु इजीप्त डा राज्य थुम्सीब।

12 गो मेको आन कली परमप्रभु यावे कली थमा सुइक्तीकेम बोल्यो सेल्लुड। मिनु मेकोपुकी मेको आं नेम गाक्नीम” दे परमप्रभु यावेमी देंत।

## 11

इसाएली आन मरिम्शो गोठला

1 लेबानोन, मीम इ लाइशशो रवा आन कली नेक्पाइक्चा कली इ लाप्चोपुकी रोक्को।

2 तोत्रशी रवा रोंका पने। मारदे हना लेबानोन डा लाइशशो रवा गोल्तेक्म। मेको दारशो रवा खतम दुम्तेक्म। बाशान डा बोल्यो शी के रवा रोंका पने। मारदे हना ठेयब ब्वाकी नेल्ल क्योत्रशो बाक्ब।

3 गोठला आन रोंका पशो नेनीन। मेको आन रिम्शो योत्रतीके खतम दुम्शो बाक्ब। गुप्स आन ग्रीशो नेनीन। यर्दन डा ब्वाकी नेल्ल खतम दुम्शो बाक्ब।

रिम्शो नु मरिम्शो गोठला

4 परमप्रभु यावे, आं परमप्रभुमी “क्योरचा पुंडसीब भेडा आन कली योत्रडो।

5 मेको य्याप्बपुकीमी भेडा क्योरशा सजाइ मतथु ब्रोंडशा लाइनीम। मिनु मेको आन कली लेयबपुकीमी ‘परमप्रभु ठेयब बाक्ब। मारदे हना गो शोंप पाइशशो दुम्तक’ देंनीम। मिनु मेको भेडा आन गोठलामी मेको आन कली शिशी मपाइनीम। येरमीया २३:-; इजीकीएल १३:-; इजीकीएल ३४:-

6 मुल रे गो रागी डा मुर आन कली शिशी मपाइनुड” दे परमप्रभु यावेमी देंत। मिनु परमप्रभुमी “गो नेल्ल आन कली आन नेक्था डा मुर आन गुडमी नु आन पिप आन गुडमी गेनुड। मिनु मेकोपुकीमी रागी कली खतम सेल्लनीम। मेको आन गुड रे सुड आन कली मप्रोंडनुडमी।

7 मोपतीके क्योरचा चिक्शो भेडा लेयब आन पा डा गो गोठला दुम्ती। गो कोक्के निक्शी ग्याइक्ताक्ड। मिनु गो का कली शिशी पतीक नु अकॉ कली थुं का दुम्तीक नें वोइक्ता। मिनु गो भेडा आन कली योत्रतामी।

8 गो महिना कामी गोठला सां आन कली खेरतामी। गो मेको आन गेय तशा ब्रीशा, फाल्ले मचाप्शो बाक्ती।

9 मिनु गो मेको आन कली 'गो इन गोठला दुम्ने मचाप्नुड। बेकशा लाइबपुकी बेकमल। खतम दुम्शा लाइबपुकी खतम दुम्मल। लीशोपुकीम आन श्ये ब्वमुमल' " देती। येरमीया १५:२

10 मिनु गो आं शिशी नें पाइशो कोक्के जिकता। मिनु गो मुर नु पशो कबल क्याम्ताकड। जात जात नेल्ल डा मुरपुकी नु फ्रेशो कबल क्याम्ताकड, दे मेको कोक्के जिकता।

11 मेको कबल मेको नाक्ती क्याम्ताकड। भेडा लेयबपुकीमी आं कली कोवना कोवन बाक्तेकम। मेकोपुकीमी एको परमप्रभु यावे आ लोत्र बाक्माकत, दे तुइक्ताकम। जकरिया ११:७

12 मिनु गो मेको आन कली "गे ठीक लाक्तीनी हना, आं गाल्च गेयीनी। ममाइ हना वोंइसीन" देती। मिनु मेकोपुकीमी आं कली ३० चांदी के शेकेल गेम्तेकम। शेकेल का ११.५ ग्राम चांदी के क्येट बाक्ब। मत्ती २६:१५

13 मिनु परमप्रभु यावेमी आं कली "मेको क्येट लाइशशा, खप के ग्योंब सेल्ब आ डोंइती ब्वारदो। मेको मिश डा क्येट आं पर्वम कुर पान्तेकम" देत। मिनु गो मेको ३० चांदी के शेकेल लाइशशा, परमप्रभु यावे आ शोंप वोइक्तीकेमी यपाइक्ब आ डोंइती ब्वारताकड। मत्ती २७:५-१०

14 मिनु नोले गो थुं का दुम्तीक नें वोइशो कोक्के जिकता। मो पा गो यहूदा नु इस्राएल आस कली खिं का डा दुम्तीक रे फ्राताकड। इजीकीएल ३७:२२

15 मिनु परमप्रभु यावेमी आं कली "गे लेंशा शोर गाकशो गोठला खोदेशो दुमो।

16 मारदे हना मुल गो मेको रागीमी गोठला का सेल्लुड। मेकोमी बेकशा लाइब आन कली मकोवब। ब्रशा गाकशो आन कली मखुप्ब। रोइ पशो आन कली मसापाइक्ब नु रिम्शो भेडा आन कली मयोवब। तन्न मेकोमी दोम्शो भेडा आन श्ये ब्वशा, आन गेंरे यो चेशशा ब्वाइब।

17 आबी आबी, शोर गाकशो गोठला। मेकोमी बगाल प्रोंडब। तरवारमी आ ग्युरा गुड नु आ ग्युरा मिक्च कली आबल। मिनु मेको आ ग्युरा गुड नेल्ल सोव्रल। आ ग्युरा मिक्च बुक्शा मताइब दुम्ल" देत।

## 12

इस्राएल आ पर्वम लोत्र पशो

1 परमप्रभु यावेमी इस्राएल आ पर्वम पशो लोत्र एको बाक्ब। सरीड नु रागी सेल्ब नु मुर आन कली सोक्त गेब परमप्रभु यावेमी मार देत देशा हना

2 "गो यरूसलेम कली आ एर ओथ रागी डा मुर आन गाइक्तीके सेल्चा चिकशो बाक्नुड। मुरपुकीमी यरूसलेम पुम्नीम। यहूदा यो श्येत जाइब। यसेया ५१:१७; येरमीया २५:१५-२९

3 मेको नाक्ती गो रागी डा मुर नेल्ल आन कली यरूसलेम हेल्शो फुल्लु सेल्लुड। तेको रागी डा मुरुमी क्युक्चा लोक्या माल्नीमी, मेकोपुकी शुश खाइक्पाइसीनीम। मिनु रागी रागी डा मुर नेल्ल खुम्सीशा यरूसलेममी लडाइ पथ जाक्नीम। जकरिया १४:३; योएल ४:१२

4 मेको नाक्ती गो शारा नेल्ल आन कली शुश हिंपाइक्नुड। मिनु शारा डोइक्ब आन कली निप्स ग्यशो सेल्लुड। गो यहूदा आ खिं डा मुर आन कली कोवनुड। मिनु आन जोरी सत्रु आन शारा मिक्च मताइब सेल्लुड।

5 मिनु यहूदा आ खिं खिं डा मुरपुकीमी आंम आंम थुंमी 'यरूसलेम डा मुरपुकी बोल्यो बाक्नीम। मारदे हना मुर नेल्ल आन परमप्रभु यावे, मेको आन परमप्रभुमी मेको आन कली सक्ति पाइशो सेल्ब' देनीम।

6 मेको नाक्ती गो यहूदा आ खिं खिं डा मुर आन कली शी तारी वोइशो बुइशो बोस नु शी आन दातेमी ब्रशो तोव्रशी खोदेशो सेल्लुड। मिनु मेकोपुकीमी ग्युरा नु पेरा गे बाक्ब नु पुम्ब मुर नेल्ल आन कली साइक्नीम। तन्न यरूसलेम आ बाक्तीके उड बाक्शा, लेंशा मेकेर मुर बाक्नीम। ओबदिया १८:-

7 मिनु परमप्रभु यावेमी डोंइती यहूदा डा मुर आन कली श्येत रे प्रोंडब। मोपा दाऊद आ खिं डा मान ततीके नु यरूसलेममी बाक्ब मुर आन मान ततीके यहूदा आन क्येडा शुश मदुम्ल" देत।

8 मेको नाक्ती परमप्रभु यावेमी यरूसलेममी बाक्ब मुर आन कली वारच पाइब। मेकेर बाक्ब नेल्ल क्येडा मचाप्ब दाऊद खोदेशो बाक्नीम। मिनु दाऊद आ खिं डा मुर परमप्रभु खोदेशो बाक्नीम। मिनु परमप्रभु यावे आ स्वर्ग डा गेय पाइब मेको आन डोंइती गाक्ब। यसेया ३३:२४

9 मिनु "मेको नाक्ती गो यरूसलेम कली लडाइ तोथ जाक्ब रागी रागी डा मुर आन कली खतम सेल्लुड" देत।

साइशो आ पर्वम रोंका पशो

प्रकाश २०:९

10 मिनु परमप्रभुमी "गो दाऊद आ खिं डा मुर नु यरूसलेममी बाक्ब मुर आन तारी शिशी पतीक नु पुंइतीक लोत्र पतीके सोक्त मोइक्नुड। मो दुम्नेनु, आ साइशो आन कली तशा, मेको आन पर्वम आन का ला तौ आन पर्वम रोंका पशो खोदेशो पा, रोंका पाइनीम। मेको आन पर्वम, आन डोंइती जरमेशो तौ आन पर्वम खोदेशो पा डाक्नीम। योएल ३:१; यूहन्ना १९:३७; प्रकाश १:७

11 मेको नाक्ती मेगीददो डा बेसीमी हदाद-रिम्मोनमी रोंका पशो खोदेशो पा यरूसलेममी ठेयब रोंका पाइनीम। २राजा ५:१८

12 रागी नेल्ल डा मुरपुकी रोंका पचा माल्नीम। खिं खिं डा मुरपुकीमी रोंका पचा माल्नीम। दाऊद आ खिं डा वोंइश मुरपुकीमी रोंका पचा माल्नीम। मिनु मेको आन मीश आन दातेमी रोंका पचा माल्नीम। नाथान आ खिं डा वोंइश मुरपुकीमी रोंका पचा माल्नीम। मिनु मेको आन मीश आन दातेमी रोंका पचा माल्नीम।

- 13 लेवी आ खिं डा वोंइश मुरपुकीमी रोंका पचा माल्नीम। मिनु मेको आन मीश आन दातेमी रोंका पचा माल्नीम। शिमेइ आ खिं डा वोंइश मुरपुकीमी रोंका पचा माल्नीम। मिनु मेको आन मीश आन दातेमी रोंका पचा माल्नीम।  
14 लीशो खिं डा वोंइश मुर नेल्लेमी रोंका पचा माल्नीम। मिनु मेको आन मीश आन दातेमी रोंका पचा माल्नीम” देंत।

## 13

मूर्ति नु जोल पाइब

- 1 मेको नाक्ती दाऊद आ खिं नु यरूसलेममी बाक्ब मुर आन पाप नु आन मरिम्शो पशो क्याम्चा कली ब्वाक्कु बुक्तीके का बुक्शा यूब। यसैया १२:३; यसैया ५५:१  
2 मुर नेल्ल आन परमप्रभु यावेमी मार देंत देशा हना मेको नाक्ती “गो रागी रे मूर्ति आन नें क्याम्नुड। मिनु सुइमी मेको आन कली मीमिनीम। मिनु गो मेको रागी रे जोल पा नोले दुम्ब लोत्र पाइब नु ग्राना दिशो चोल आन कली गुंइशा खेरनुड। मीका ५:१२; येरमीया २९:८-९  
3 मिनु लेंशा सुइमी जोल पा नोले दुम्तीक लोत्र पापु हना, मेको कली थीब आ आम आफोमी मेको कली ‘गे बेक्चा माल्नेवे। मारदे हना गे परमप्रभु यावे आ नेंमी जोल लोत्र पाप्तीवी’ देंनीस। मिनु मेकोमी जोल पा नोले दुम्ब लोत्र पवानु, आ आम आफोमी मेको कली साइक्नीस। ब्यवस्था १३:६  
4 मेको नाक्ती नोले दुम्ब लोत्र पाइब नेल्ल आंम तशो नु आंम लोत्र आ पबंम मुने पाइनीम। मेकोपुकीमी दलओठ आ चां के प्रोव्रशो वा मफेक्नीम।  
5 तन्न मेकोपुकीमी ‘गो दा नोले दुम्ब लोत्र पाइब मनड। गो रू डा गेय पाइब बाक्नुड। मारदे हना गो ठिटा बाक्डा रेन रू डा गेय पा जशा ब्रोंइती’ देंनीम।  
6 सुइमी मेको कली ‘इ रां डा गार मार नमी? दे हिल्लो पाम्तेक्म हना, एको आं वारच आ खिंमी दुम्शो गार नम’ देंब।

नाक्शा लीशो परमप्रभु आ मुर

- 7 मिनु मुर नेल्ल आन परमप्रभु यावेमी मार देंत देशा हना ‘तरवार, आं गोठला आ पबंम बोक्को। नेल्ल क्येडा आं नेक्था डा मुर आन पबंम बोक्को। गोठला कली तुपो। मिनु भेडापुकी ब्रमल। मिनु गो आं गुड आइक्थ गोठला आन पबंम क्युकनुड। मती २६:३१  
8 एको रागी डा मुर भाग सांमी भाग निकशी साइक्चा पुंडसीनीम। मिनु भाग का ब्रोंइचा ताइनीम। यसैया ६:१३  
9 मिनु मेको लीशो भाग आन कली गो मीम कुरपाइनुडमी। चांदी याप्पाइशो खोदेशो पा याप्पाइक्नुडमी। मिनु सुन नाक्शो खोदेशो पा नाक्नुडमी। मिनु मेकोपुकीमी आं कली थोइनीम। मिनु गो मेको आन कली लोत्र लेत्नुडमी। मेकोपुकी आं मुर नम’ देंनुड। मिनु मेकोपुकीमी ‘परमप्रभु यावे, आंइ परमप्रभु बाक्ब’ देंनीम” दे परमप्रभु यावेमी देंत। होसे २:२५

## 14

परमप्रभु यावे आ नाक्ती

- 1 परमप्रभु यावे आ नाक्त का जाक्ब। मेना इन के रोइशशा लाइशो थोत्रक इन दातेमीन योक्सीनीनी। यसैया ३९:६  
2 गो रागी रागी डा मुर नेल्ल आन कली यरूसलेम नु लडाइ पपाइक्चा कली पुक्नुडमी। मिनु सहर मेको आन के दुम्ब। मेको आन खिं डा मारेइ मारेइ रोइक्नीम। मिनु मीश मुर आन कली बिथोलो पाइनीम। सहर डा उइक्थ मुर ग्याइशशा लाइक्चा पुंडसीनीम। लीशो मेको सहर उइ बाक्नीम।  
3 मिनु नोले परमप्रभु यावेमी मेको रागी रागी डा मुर नु लडाइ पाइब। मुरुमी लडाइ पशो खोदेशो पा लडाइ पाइब। जकरिया १२:३; यसैया ४२:१३; प्रकाश १९:१९  
4 मेको नाक्त आ खोइलीमी यरूसलेम आ डोंइती पूर्व गे बाक्शो जैतून डांडा कली थेक्ब। मिनु जैतून डांडा आ पूर्व रे पच्छिम सम्म ठेयब पा जेक्ब। मिनु डांडा उइक्थ उत्तर गे नु उइक्थ दक्खिन गे दुम्शा बाक्ब। मिनु दातेमी ठेयब बेंसी का दुम्ब।  
5 गेपुकी परमप्रभु यावे आ डांडा डा बेंसी रे पा प्रोक्चा माल्नीनी। मेको आस दाते डा बेंसी आसाल सम्म जाक्दीशो बाक्ब। गेपुकी यहूदा डा पिप उज्जीयाह आ पालामी कुशो खिनुमी मुरपुकी प्रोक्शो खोदेशो पा प्रोक्नीनी। मिनु नोले परमप्रभु यावे, आं परमप्रभु आ मुर नेल्ल नु यीब। आमोस १:१  
6 मेको नाक्त नां नु तास्लाम छेड्छेड मंगेनीस। ग्यू यो मदुम्ब।  
7 मिनु गेना हना यो नाक्त बाक्ब। मारदे हना नाक्दो दुम्ची ना छेड्छेड बाक्ब। परमप्रभु यावेमी मेको नेल्ल तुइक्ब। मर्कूस १३:३२  
8 मेको नाक्त यरूसलेम रे पा ब्रोंइचा गेब ब्वाक्कु शाइशशा यीब। मिनु मेको उइक्थ पूर्व डा समुन्द्र गे नु उइक्थ पच्छिम डा समुन्द्र गे शाइक्ब। मेको होशो नु सिकशो नेल्ल नाक्त शाइक्ब। इजीकीएल ४७:१-८  
9 परमप्रभु यावे रागी नेल्ल डा पिप दुम्ब। मेको नाक्त परमप्रभु यावे का ला बाक्ब। आ नें यो का ला बाक्ब। भजन संग्रह ९७:१; प्रकाश ११:१५  
10 मिनु रागी नेल्ल दिंम दुम्ब। मेको गेबा रे पा यरूसलेम आ दक्खिन डा रिम्मोन सम्म दिंम दुम्ब। तन्न यरूसलेम बेन्यामीन लाप्चो रे, माइत लाप्चो लाक्शा, सुर डा लाप्चो सम्म नु हानानेल माइशो लाइशो खिं रे पिप आ अडगुर ख्वाक्तीक सम्म बाक्ब। मिनु यरूसलेम आ इर डा बाक्तीकेम बाक्ब। यहोसु १५:३२; येरमीया ३१:३८

11 मिनु यरूसलेममी मुरपुकी बाक्नीमी। मिनु मेको गेनायो लेंशा खतम मसेल्नीम। यरूसलेम मारेइ मदुस्थु बाक्ब। प्रकाश २२:३; येरमीया ३३:१६

12 परमप्रभु यावेमी यरूसलेम कली लडाइ तोइब आन कली मार बेक्तीक रोइ पपाइक्ब देशा हना, मुर गाक्ना गाक्ना आन श्ये राक्तीके, आन मिक्च आन बाक्तीकेम राक्तीके नु आन लें आन शोत्रमी राक्तीके रोइ पपाइक्ब।

13 मेको नाक्ती परमप्रभु यावे रे पा मुर शुश हिंनीम। मेको नेल्लेमी आन नेक्था डा मुर आन गुइ ग्याइक्नीम। मिनु नोले राम्शी पोक्नीम।

14 यहूदा आ मुरपुकीमी यो यरूसलेममी लडाइ पाइनीम। मिनु रागी रागी डा मुर आन शोप खुप्नीम। मार खुप्नीम देशा हना, सुन चांदी नु वासी शुश खुप्शा तेलनीम।

15 मेको आन बाक्तीकेम बाक्शो शारा, खच्चर, दलओठ, गधा नु मेकेर मार मार बी ब्यफ क्यारश भेडा बाक्मा, मेको नेल्ल मुर कली साइक्ब रोइ पाइनीम।

16 मिनु यरूसलेम कली लडाइ तोइब रागी रागी डा मुर आन दाते डा सु सु ब्रोंइशा लीमा, मेकोपुकी बर्स बर्समी यरूसलेम लशा पिप नु मुर नेल्ल आन परमप्रभु यावे कली मान पा ठेयब सेल्चा माल्नीम। मेकोपुकीमी गोठ सेल्शा मानेतीक चाड मानेचा कली यरूसलेम लचा माल्नीम। जकरिया १४:९

17 मिनु तेको रागी नु खिं डा मुर नु पिप, मुर नेल्ल आन परमप्रभु यावे कली मान पा ठेयब सेल्चा कली यरूसलेम मलाम्तेक्म हना, मेको आन कली रेउ मयीब।

18 मिनु इजीप्त रागी डा मुरपुकी गोठ सेल्शा मानेतीक चाड मानेचा कली यरूसलेम मलाम्तेक्म हना, मेकोपुकी यो अर्को रागी डा मुर खोदेशो पा परमप्रभु यावेमी गेशो श्येत जाइनीम।

19 इजीप्त रागी नु रागी नेल्ल डा मुर सु मेको गोठ सेल्शा मानेतीक चाड मानेथ मलाइनीमी, मेको मोदेशो सजाइ ताइनीम।

20 मेको नाक्ती शारा आन किडगोम यो “परमप्रभु यावे कली ला बाक्नीम” दे मुशा ब्रेक्शो बाक्ब। मिनु परमप्रभु यावे आ खिं डा क्येतीक ग्योबपुकी, चढेतीक आ डोंइती बाक्शो ग्योब खोदेशो पा “परमप्रभु यावे केन बाक्नीम” दे ब्रेक्शो बाक्ब। प्रस्थान २८:३६

21 मिनु यरूसलेम नु यहूदामी बाक्शो क्येतीक ग्योब नेल्ल मुर नेल्ल आन परमप्रभु यावे कली ला बाक्नीम। सु सुमी चढेनीमी, मेकोपुकीम मेको ग्योबुम आन चढेशो श्ये लोप्ने चाप्नीम। मिनु मेको नाक्तर मुर नेल्ल आन परमप्रभु यावे आ खिंमी ग्याप्ब लेयब मुर का यो मबाक्नीम। प्रकाश २१:२६-२७; मत्ती २१:१२

## मलाकी

**ब्रेक्ब मुर:** हिब्रू लोत्रमी मलाकी आ अर्थ “आं लोत्र कुरब” बाक्ब। साइ डोंइती डा थमा सुइक्ब हिरोनिमुस शुश ब्रेक्ब मुर का बाक्त। मेकोमी “आं लोत्र कुरब” नें पाइशशो, परमप्रभु यावे आं खिं लेंशा सेल्ब, जोक्ब तुइक्ब एजा आ खुइशशो नें बाक्ब, देंब। मुरपुकीम चहिं मेको दुम्ने मचाप्ब देंशो बाक्तेक्म।

**गेना ब्रेक्शो:** नेहेम्याहमी इस्राएली आन पर्वम ब्रेक्शो नु मलाकी किताबम ब्रेक्शो लोत्र शुश गारब। इस्राएली ग्याइशशा लाइक्चा पुंडसीमा नोले लेशशा यरूसलेमम बाक्शो बाक्तेक्म। शुश मुरुमी अर्को रागी डा मीश चाक्शो बाक्तेक्म। मेना ४३२ बि. सी. बाक्शो बाक्त।

### मार ब्रेक्शो:

१. मुर आन थमा सुइक्चा गाम्त। मलाकी २:८; नेहेम्याह १३:२९
२. अर्को रागी डा मीश आल कली चाक्शो बाक्तेक्म। मलाकी २:११-१२; नेहेम्याह १३:२३-२५
३. १० भाग मगेब दुम्शो बाक्तेक्म। मलाकी ३:८-१०; नेहेम्याह १३:१० मेको नेल्ल तशा यो, परमप्रभु यावेमी “गो इन कली दाक्नुड। आं गो लेत्तीन। गो इन कली आसीक गेनुड” दे लोत्र कुरब का सोइशशो बाक्त।

परमप्रभुम इस्राएली आन कली दाक्शो

- १ मलाकीमी इस्राएली आन कली परमप्रभु यावे आ पशो लोत्र देंत।
- २ परमप्रभु यावेमी “गो इन कली दाक्ताक्ड। गेपुकीमी चहिं ‘दोपा आंड कली दाक्तीनी डा? मार, एसाव याक्ब आ लोक्ब ममाइ डा?’ देंनीनी। मिनु परमप्रभु यावेमी गो याक्ब कली शुश दाक्ताक्ड। उत्पती २५:२३; रोमी ९:१३
- ३ तन्न एसाव कली काइ मदाक्तु। मोपतीके मेको आ बाक्तीक पहाड कली गोरशो रागी सेल्ला। आ थेरशो रू सिवार आन बाक्तीक दुम्पाइक्ता” देंत। यसेया ३४:१३
- ४ मिनु एदोम डा मुरपुकीमी “गेपुकी बूइसाक्ब हना यो, गो लेंशा मेको ब्रेशो नेल्ल सेल्नीकी” देंतेक्म। मुर नेल्ल आन परमप्रभु यावेमी “मेकोपुकीमी सेल्लेक्म हना यो, गो प्रेतनुड। मिनु अरु मुरपुकीमी मेको आ पर्वम ‘एको ठीक मपाइब रागी का बाक्ब। परमप्रभु यावे मेको रागी तशा, गेना हना यो गाइक्ब” देंनीम।
- ५ गेपुकीमी मेको नेल्ल तशा “तेइ तेइ रागी डा मुरपुकीमी परमप्रभु यावे कली ठेयब सेल्नीम” दे लोत्र पाइनीनी।

ग्रांरा दिचा डा थोत्रक चढेशो

- ६ मिनु मुर नेल्ल आन परमप्रभु यावेमी आ नें आइक्च सेल्ब चढेब आन कली “तौपुकीमी आन आफ कली मान पाइनीम। मिनु गेय पाइबपुकीमी आन होत्रप कली यो मान पाइनीम। गो इन आफ नड हना, मारदे आं कली मान मपाइनीनी? गो इन होत्रप नड हना, मारदे आं कली मान पा महिनीनी?” देंत। मिनु गेपुकीमी “गो दोपा इन नें आइक्च सेल्का?” देंतीनी। प्रस्थान २०:१२
- ७ परमप्रभुमी “गेपुकी आं कली ग्रांरा दिचा डा थोत्रक आं चढेतीकेमी चढेनीनी। मिनु गेपुकीमी ‘दोपा इन कली ग्रांरा दिपाइक्का?’ दे लोत्र पाइनीनी। परमप्रभु यावे आ टेबल कली मारेइ खोइ मलाक्नीनी।
- ८ गेपुकीमी मिक्च मताइब बस्तु चढेथ चाक्नीनी। मिनु मेको दूली मबाक्ब देंनीनी। खोइल मदुक्ब नु रोइ पशो बस्तु चढेचा दूली मबाक्ब देंनीनी। मिनु इन रागी डा ठेयब मुर कली मोदेंशो गेनीनु, मार, मेको ग्येरशा ताक्शा, इन कली दाक्बा डा?” दे मुर नेल्ल आन परमप्रभु यावेमी देंत। लेवी २२:२०,२३
- ९ मिनु “परमप्रभु आंड कली शिशी पन” दे पुनीन। “गेपुकीमी मोदेंशो मरिम्शो थोत्रक चढेशा मरिम्शो पाइतीनी। मिनु इन कली दोपा शिशी पाइनुडा?” दे मुर नेल्ल आन परमप्रभु यावेमी देंत।
- १० मिनु लेंशा “गेपुकीमी आं चढेतीकेमी मो मी मुइक्चा क्येडा का लशा लाप्चो चोक्नी हना, रिम्शो दुम वा। गो इन कली तशा मग्येरसीशो बाक्नुड। मिनु इन चढेशो यो मताक्नुड” दे मुर नेल्ल आन परमप्रभु यावेमी देंत। मलाकी २:१३; यसेया १:१३
- ११ “नां दाप्तीक रे नां पेरतीक सम्म रागी रागी डा मुर आन दातेमी आं नें ठेयब बाक्ब। रागी नेल्ल डा मुरपुकीमी आं कली धूप चोशा, रिम्शो थोत्रक चढेनीनी। मारदे हना रागी रागी डा मुर आन दातेमी आं नें ठेयब बाक्ब” दे मुर नेल्ल आन परमप्रभु यावेमी देंत। यसेया ६०:१-७
- १२ मिनु “गेपुकीमी ‘परमप्रभु आ टेबल ग्रांरा दिचा डा बाक्ब, मेक बाक्शो थोत्रक यो ठीक दुम्चा ममाल्ब’ दे आं नें कली आइक्च सेल्नीनी।
- १३ मिनु गेपुकीमी ‘एको गिश श्येत बाक्बा’ दे आं कली चढेतीक आ पर्वम इन नें कुप्नीनी। गेपुकीमी रोइशशो बस्तु चाक्नीनी। खोइल मदुक्ब नु रोइ पशो बस्तु चढेथ चाक्नीनी। मार, गो इन चढेशो ग्येरशा ताक्चा माल्नुडा डा?” दे परमप्रभु यावेमी देंत।
- १४ “सु सुमी आंम बस्तु आन बगाल रे पा ‘रिम्शो बस्तु चढेनुड’ देंनीमी, तन्न नोले मरिम्शो चढेनीमी, मेको जोल पाइब सराप राइनीम। मारदे हना गो ठेयब पिप नड। आं नें रागी रागी नेल्ल डा मुर आन दातेमी हिचा डा बाक्ब” दे मुर नेल्ल आन परमप्रभु यावेमी देंत। लेवी २२:१९



## 2

चढेब आन कली अरेशो

1 मिनू मुर नेल्ल आन परमप्रभु यावेमी “गे चढेबपुकी, एको शेंशो लोत्र इन कली बाकब।

2 गे इन नोफा मदाइक्ताक्नी नु आं नें कली मान पचा कली ममिम्ताक्नी हना, गो इन कली सराप पाइननी। इन कली गेशो आसीक सराप दुम्ब। मारदे हना गे काइ मटीब बाक्नीनी। गो थमा पा इन आसीक कली सराप सेल्लुड। ब्यवस्था २८:१५

3 गो इन पतीके इन आल आन कली हुडक्नुड। इन चढेशो बस्तु आन गा कयी डा ग्राना इन कुलम देप्नुड। मिनू इन कली आं डोंइती रे तिल्लुड।

4 गो लेवी नु पशो कबल गेना हना यो लील, दे इन कली मेको शेंतीक सोडक्ताक्ड।

5 आं पशो कबल ब्रोंइतीक नु थुं नाइक्तीक कबल बाकब। गो मेको कबल आं कली मान पा हिल्ल, दे गेता। मेकोमी आं कली मान पा आं नें थिचा शुश हित।

6 मेकोमी रिम्शो शेंतीक लोत्र पाप्तु। गेनायो दूली मशेंद। थम रिम्शो नु ठीक पतीकेमी गो नु गाक्त। मिनू मेकोमी ठीक मपाइब शुश मुर आन कली आन मरिम्शो पतीक रे लेप्पाइक्तु।

7 चढेबपुकीमी तुडक्तीक लोत्र होस पा पचा माल्नीम। मिनू मुरपुकीमी मेको आन शेंशो नेंचा माल्नीम। मारदे हना चढेबपुकी मुर नेल्ल आन परमप्रभु यावे आ सोइशो लोत्र पाइब बाक्नीम। ब्यवस्था ३३:१०; हागै १:१३

8 गेपुकी चहिं आं लां प्रोंइशा, हेंथे गाक्तीनी। इन दूली शेंतीकेमी गे शुश मुर आन कली हेंथे गाकब सेल्लतीनी। गेपुकीमी लेवी नु पशो कबल खतम सेल्लतीनी” दे मुर नेल्ल आन परमप्रभु यावेमी देंत।

9 परमप्रभुमी “मोपतीके गो इन कली मुर नेल्ल आन डोंइती आइक्च नु महिक्सीशो सेल्ला। मारदे हना गेपुकीमी आं लां प्रोंइतीनी। आं शेंशो लोत्र मटिथु, कुल कोत्रमुशा हुकुम पाइतीनी” देंत।

यहूदा आ मरिम्शो पशो

10 मार, गो नेल्ल इं आफ कान ममाइ डा? मार, परमप्रभु कामीन इं कली मसेला डा? मारदे गोपुकीमी कामी अर्को कली थमा मसुइक्थु, इं किकी पिपी आन कली गेशो कबल खोइक्नया? मलाकी १:६; अय्युब ३१:१५; एफिसी ४:६

11 यहूदामी आं कली प्रोंइती। मिनू इस्माएल नु यरूसलेममी ग्राना दिक्ता डा गेय दुम्शो बाकब। मारदे हना यहूदामी परमप्रभु यावे आ दाक्शो बाक्तीके ग्राना दिशो सेल्लु। दोपा मोदेंशो सेल्लु देंशा हना, आम तौ आन कली देवी देवता आन कली ठेयब सेल्ल मुर आन तमी चाक्तु। एज्रा ९:२

12 परमप्रभु यावेमी मोदेंशो पाइब मुर आन कली याकूब आ मुर आन बाक्तीक ताम्बु रे तिल्ल। मिनू मेकोपुकीम मुर नेल्ल आन परमप्रभु यावे कली गेनायो चढेचा मताइनीम।

13 गेपुकीमी अर्को मार पाइनीनी देंशा हना, परमप्रभु यावे आ चढेतीके आ नेक्था डाक्शा, रोंका पा इन प्रेक्कुमी जिल्लीनी। मारदे हना इन चढेशो ग्येरशा मब्राइब। मलाकी १:१०

14 मिनू गेपुकीमी “मारदे मब्राइबा”? दे हिल्लो पाइनीनी। मारदे हना गे इन ठिटा बाक्ची ना डा मीश प्रोंइतीनी। मेको आ परबम परमप्रभु यावे सांकळी बाकब। मेको इ वारच इ मीश बाकब, इ कबल पा चाक्शो मीश बाकब।

15 परमप्रभुम मेको निक्शी आस कली कान मसेला डा? मेको आस सोक्त नु गिंग परमप्रभु यावे के बाक्नीस। मारदे मेको निक्शी आस कली कान सेल्लु देंशा हना, आस आल परमप्रभु आ मुर दुम्मल, दे कान सेल्लु। मोपतीके गेपुकी आम थुं आ परबम होस पा, सुइमी आम ठिटा बाक्ची ना डा मीश कली मप्रोनीन।

16 मारदे हना परमप्रभु यावे, इस्राएली आन परमप्रभुमी गो मीश, वोंइश कली प्रोंइब मुर काइ मदाक्नुड। आन जिशो मदाक्नुड। मोपतीके इन थुं फ्रेंदीन। इन मीश मप्रोंइब दुमीन। ब्यवस्था २४:१

परमप्रभु आ निसाफ पतीक नाक्त

17 गे इन लोत्रमी परमप्रभु यावे कली ब्रीपाइक्तीनी। मोपा यो गेपुकीमी “गेपुकीमी मार लोत्रमी इन कली ब्रीपाइक्ता?” देंतीनी। गेपुकीमी “दूली लोत्र पा मरिम्शो गेय पाइब नेल्ल परमप्रभु यावे आ डोंइती ठीक बाक्नीम। मिनू मेको, मेको आन कली तशा ग्येरसीशो बाकब” दे “निसाफ पाइब परमप्रभु ते बाक्बा डा?” दे यो देंतीनी। मलाकी ३:१३-१४

## 3

1 परमप्रभुमी “नेनीन, गो आं लोत्र पाइब आं डोंइती सोइक्नुड। मेकोमी आं डोंइती आं लां सेल्ल्या माल्ल। इन माल्लो प्रभु रीब पा आ खिम जाकब। मेको इन माल्लो कबल डा लोत्र चोक्ब बाकब। गे मेको कली शुश दाक्नीनी” दे मुर नेल्ल आन परमप्रभु यावेमी देंत। मती ११:१०; मर्कूस १:२; लूका १:१७

2 मिनू मेकोमी “तन्न आ जाक्ची नाक्त सु फाल्ने चाप्बा डा? आ गूची ना सु राप्शा बाक्ने चाप्बा डा? मारदे हना मेको तुप्तीलमी मुइशो मी नु वा मुरब आ वा बुश सेल्लतीक खोदेंशो बाकब। यसैया १:२५

3 मेको चांदी यपाइशशा रिम्शो सेल्ल खोदेंशो पा निसाफ पाइब बाकब। लेवी आ चच युड आन कली सुन चांदी खोदेंशो पा यपाइशशा रिम्शो सेल्ल। नोले मेकोपुकीमी परमप्रभु यावे कली ठीक पा चढेनीम। जकरिया १३:९

4 मेना परमप्रभु यावेमी यहूदा नु यरूसलेममी चढेशो साइ डोंइती डा खोदेंशो पा ब्राइब” देंत।

5 तन्न मेको ब्येडा डोंइती “गो निसाफ पचा कली इन बाक्तीकेमी जाक्नुड। गो टुना मुना पाइबपुकी, मुर आन मीश वोंइश नु इप्बपुकी, जोल पा कसम जाइबपुकी, गेय पाइब आन कली गाल्च मगेबपुकी, वोंइश बेक्शो मीश मुर, रोम

रोडक्च, नु अर्को रागी डा मुर आन कली निसाफ पा मगेबपुकी नु आं क्येडा महिब नेल्ल आन कली निसाफ पथ जाक्नुड” दे मुर नेल्ल आन परमप्रभु यावेमी देत।

गेचा माल्शो १० भाग

6 मिनु मेकोमी “गो, परमप्रभु यावे, गेनायो मफांडसीनुड। मोपतीके गे याकूब आ चच युड मुल सम्म ब्रॉडशो बाक्नीनी।

7 इन किकी पिपी आन बाक्ची ना रे आं फुल्लुम मुशा ब्रेक्शो लोव्र मटिथु, हेंथे लां खोइक्तीनी। आं गे लेतीन। मिनु गो इन गे लेतुड” दे मुर नेल्ल आन परमप्रभु यावेमी देत। तन्न गेपुकीमी “गो दोपा लेत्चा?” देंतीनी। जकरिया १:३

8 परमप्रभुमी “मार, मुरपुकीमी परमप्रभु आ मार मार खुड पने चाप्नीमी डा? तन्न गेपुकीमी आं के खुड पशो बाक्नीनी। मो हना यो गेपुकीमी ‘गेपुकीमी इन के मार खुड पका डा?’ देंतीनी। इन १० भाग डा भाग का नु मार मार चढेतीकेमी खुड पशो बाक्नीनी। प्रस्थान २५:२

9 गे सराप रशो दुम्नीनी। मारदे हना गे आं मार मार खुड पाइब बाक्नीनी। गे इस्राएल नु मुर नेल्लेमी आं कली रोइक्ताक्यनीनी। हागै १:५-६

10 गे नेल्लेमी इन १० भाग डा भाग का वोइक्तीकेमी चाक्कीन। मिनु आं खिंमी जचा थोव्रक बाक्ल। मोपा आं कली नाक्शा, कोव्रडीन। गो स्वर्ग डा लाप्चो रोक्शा, इन कली शुश आसीक गेबाक्डा, कों, मगेबाक्डा” दे मुर नेल्ल आन परमप्रभु यावेमी देत।

11 मिनु “गो इन रू डा बाली नाली खतम मसेल्चा डा पा माले आन कली हुइक्नुडमी। इन रूम बाक्शो अडगुर सिरशा ग्रेल्लनीम” दे मुर नेल्ल आन परमप्रभु यावेमी देत। योएल १:४

परमप्रभुमी शिशी पाइब देशो

12 मिनु “रागी रागी डा मुर नेल्लेमी इन परबम ‘आसीक रशा, ग्येशो मुर बाक्नीमी’ देंनीम। मारदे हना इन रागी थम आसीक रशो रागी दुम्ब” दे मुर नेल्ल आन परमप्रभु यावेमी देत।

13 मिनु परमप्रभु यावेमी “गे आं परबम मरिम्शो लोव्र पाइतीनी हना यो ‘इन कली मार मरिम्शो लोव्र पका डा?’ देंतीनी।

14 गेपुकीमी ‘परमप्रभु आ गेय पचा, मोशीन बाक्ब। आ शेंशो लोव्र पचा नु बेक्शो मुर आ परबम रोंका पशो खोदेशो पा मुर नेल्ल आन परमप्रभु यावे आ डोंइती रोंका पचा, मोशा बाक्ब। भजन संग्रह ७३:१३-१४; जकरिया ७:३,५

15 मुल गो ठेयब लेशशो मुर आन कली रिम्शो मुर बाक्नीम, देंनीकी। मारदे हना मरिम्शो पाइबपुकी दारनीम। परमप्रभु कली मरिम्शो पाइब ब्रॉडशा बाक्नीम’ देंतीनी” देत।

16 मिनु परमप्रभु यावे क्येडा हिब आन दातेमी लोव्र पाप्तेक्म। मिनु परमप्रभु यावेमी नोफा दाइशशा, मेको आन लोव्र नेंतु। मिनु आ डोंइती आ कली मान पा हिब, आ नें ठेयब सेल्ब आन परबम मिम्तीक किताब ब्रेक्शो बाक्त।

17 मिनु मुर नेल्ल आन परमप्रभु यावेमी “मेको आं मुर दुम्नीम। आं निसाफ पतीक नाक्त आं नेक्था डा मुर दुम्नीम। दोपा मुरुमी आंम कली गेय पाइब तौ कली शिशी पा वोइक्बा, मोपा गो मेको आन कली शिशी पा वोइक्नुड। प्रस्थान १९:५

18 मेको नाक्त ठीक पाइब नु परमप्रभु आ अरेशो मटीब खाल का डा मदुम्नीम। मेको ताइनीनी। परमप्रभु कली गेय पाइब नु गेय मपाइब खाल का डा मदुम्नीम। मेको यो ताइनीनी” देत।

## 4

परमप्रभु यावे आ नाक्त

1 मुर नेल्ल आन परमप्रभु यावेमी “आं निसाफ पतीक नाक्ती जाक्ब। मेको ठेयब मी खोदेशो पा ब्रशो बाक्ब। मेना ठेयब लेशशो नु मरिम्शो पाइब नेल्ल सोव्रशो टुटा खोदेशो बाक्नीम। मेको नाक्ती मीम मेको आन कली नेक्ब। मिनु मेको आन शाक्श नु राशी यो मलीब।

2 तन्न गे आं नें कली मान पाइब, इन डोंइती आं ठीक पतीके नां खोदेशो पा दाप्ब। इन रोइ यो सानीनी। गे गोठ रे पा मूशो बाछा खोदेशो पा प्रेक्ना प्रेक्न दोरनीनी। लूका १:७८

3 मिनु गेपुकीमी आं अरेशो लोव्र मटीब आन कली इन खोइलीमी दिम्नीनी। आं निसाफ पतीक नाक्ती मेको इन खोइलीम दिम्शा, पुलु खोदेशो सेल्चा पुंडसीनीमी” दे मुर नेल्ल आन परमप्रभु यावेमी देत।

4 परमप्रभुमी “आं वाइल मोसामी इन कली गेशो आं अरेशो लोव्र मिम्तीन। गो मेको फुल्लुम मुशा ब्रेक्शो लोव्र नु आं देशो ठीक पतीक लोव्र होरेब डांडामी इस्राएली नेल्ल आन कली अरेचा कली गेता।

5 नेनीन, आं ठेयब नु हिंचा डा नाक्त जाक्चा क्येडा डोंइती आं लोव्र पाइब एलीया कली इन बाक्तीकेम सोइक्नुड। मती ११:१४; १७:११-१३; योएल ३:४

6 मिनु मेकोमी आम आफ आस थुं आस आल गे नु आल आन थुं आम आफ गे लेप्पाइक्ब। मोदेशो मदुम्त हना, गो रागी कली सराप पाइक्नुड” दे परमप्रभु यावेमी देत। लूका १:१७

## मती

**ब्रेक्ब मुर:** एको किताब मती आ ब्रेक्शो बाक्ब। मती शेंसीब आन दाते डा का बाक्त। मेको कली अल्फयस आ तौ लेवी यो देंतेक्म। तन्न थमा सुदा नोले मती नें वोडक्तु।

**गेना ब्रेक्शो:** मती आ ब्रेक्शो ग्येरपाइक्ब लोत्र यरूसलेम खतम सेल्चा क्येडा डोंइती ब्रेक्ने थुम्शो बाक्त। एको ५८ ए. डी. हिब्रू लोत्रमी ब्रेक्शो बाक्त। नोले यहूदी नेल्ल ब्रातेक्म। मिनु मती मेको आन कली शेंचा कली लत। मेना ग्रीक लोत्र पाइबमी यो एको लोत्र रुप्चा दाक्शो बाक्तेक्म। मोपतीके मेकोमी आ ब्रेक्शो ग्येरपाइक्ब लोत्र लेंशा ग्रीक लोत्रम ब्रेक्शो बाक्त, दे मिन्मीम। मती आ ब्रेक्शो ग्येरपाइक्ब लोत्रम डोंइती नु नोले दुम्शो लोत्र इच्का खाल्शा ब्रेक्शो बाक्ब।

**मारदे ब्रेक्शो:** येसु ख्रीस्त पिप बाक्ब। परमप्रभु यावे आ राज्य आ परबम लोत्र पाइब।

येसु आ किकी पिपी  
लूका ३:२३-२८

1 अब्राहाम आ तौ, पिप दाऊद आ तौ, येसु ख्रीस्त आ किकी पिपी आन नें एको बाक्नीम। १इतिहास १७:११; उत्पत्ती २२:१८

2 येसु ख्रीस्त आ किकी पिपी सु सु बाक्मा बाक्त देशा हना, डोंइती अब्राहाम बाक्माक्त। अब्राहाममी इसहाक थिमाक्त। इसहाकमी याकूब थिमाक्त। याकूबमी यहूदा नु आ वोबु थीमी बाक्त। उत्पत्ती २१:३,१२; उत्पत्ती २५:२६; उत्पत्ती २९:३५; उत्पत्ती ४९:१०

3 यहूदामी तामार रे परेस नु जेरह तौ निक्शी थिम्सी बाक्त। परेसमी हेसोन थिमाक्त। हेसोनमी अराम थिमाक्त। रूथ ४:१८-२२; उत्पत्ती ३८:२९-३०

4 अराममी अम्मीनादाब थिमाक्त। अम्मीनादाबमी नहशोन थिमाक्त। नहशोनमी साल्मोन थिमाक्त।

5 साल्मोनमी राहाब माइशो मीश रे बोआज थिमाक्त। बोआजमी रूथ माइशो मीश रे ओबेद थिमाक्त। ओबेदमी येस्से थिमाक्त। येस्सेमी दाऊद थिमाक्त। दाऊद चहि पिप दुम्माक्त। यहोसु २:१; रूथ ४:१३-१७

6 पिप दाऊदमी उरीयाह आ मीश चाक्शा, सोलोमन थिमाक्त। २सामुएल १:२:२४

7 सोलोमनमी रेहोबाम थिमाक्त। रेहोबाममी अबीयाह थिमाक्त। अबीयाहमी आसा थिमाक्त। १इतिहास ३:१०-१६

8 आसामी येहो-शाफात थिमाक्त। येहो-शाफातमी योराम थिमाक्त। मिनु योराममी उज्जीयाह थिमाक्त।

9 उज्जीयाहमी योथाम थिमाक्त। योथाममी आहाज थिमाक्त। आहाजमी हिज्कीयाह थिमाक्त।

10 हिज्कीयाहमी मनस्से थिमाक्त। मनस्सेमी आमोन थिमाक्त। आमोनमी योसीयाह थिमाक्त।

11 योसीयाहमी येकोन्याह नु आ लोकब थीमी बाक्त। येकोन्याह आ पालामी बेबीलोन डा मुरपुकीमी यहूदी आन कली लडाइ पा ग्याइशशा बेबीलोन चाक्दीत्मे बाक्त। २राजा २५:७,११,२१

12 बेबीलोन चाक्दीत्मे आ नोले येकोन्याहमी शाल्तीएल थिम्माक्त। शाल्तीएलमी जेरूब-बाबेल थिमाक्त।

13 जेरूब-बाबेलमी अबीउद थिमाक्त। अबीउदमी एल्याकीम थिमाक्त। एल्याकीममी आजोर थिमाक्त।

14 आजोरमी सादोक थिमाक्त। सादोकमी अकीम थिमाक्त। अकीममी एलीउद थिमाक्त।

15 एलीउदमी एलाजर थिमाक्त। एलाजरमी मात्थान थिमाक्त। मात्थानमी याकूब थिमाक्त।

16 मिनु याकूबमी योसेफ थिमाक्त। योसेफ मरीयम आ वोंइश बाक्माक्त। मरीयममी येसु थिमाक्त। येसु कली ख्रीस्त देंमा बाक्त। लूका १:२७

17 अब्राहाम रे पा दाऊद सम्म १४ पाला दुम्मा बाक्त। मिनु दाऊद पिप रे पा बेबीलोन चाक्दीत्वी सम्म १४ पाला दुम्मा बाक्त। बेबीलोन चाक्दीशो रे ख्रीस्त जरमेसेनु १४ पाला दुम्मा बाक्त।

येसु जरमेशो

18 येसु ख्रीस्त जरमेचा कली दोदेशो दुम्माक्त देशा हना, मरीयम योसेफ कली गेशा लोत्र खोइक्ने थुम्शो बाक्माक्त। मिनु योसेफमी मरीयम कली गुंये पा आ खिं लाइक्चा क्येडा डोंइती मरीयम आल कुरशो बाक्माक्त। मेको आल चहिं मुर आ आल ममाइ। परमप्रभु यावे आ सोक्त रे पा दुम्शो बाक्माक्त। लूका १:३५

19 मिनु योसेफमी “मरीयम आल कुरशो बाक्माक्त” दे तुइशशा “मुल प्रोंइचा दुम्ती” दे मिम्ता बाक्त। योसेफ रिम्शो मुर बाक्माक्त। मोपतीके “मरीयम कली मुने मतोकचा” दे मिम्शो बाक्माक्त।

20 मिनु “गो प्रोंइचा दुम्ती” दे मिम्ता मिम्न बाक्मेनु, काबु डोमु तवा बाक्त। मिनु डोमु तवानु, परमप्रभु यावे आ स्वर्ग डा गेय पाइबमी “दाऊद आ तौ योसेफ नेनो। मरीयम कली प्रोंइनुड, दे ममिम्तो। महिंथु इ खिं लाइशशा वोंइसो। आ कोत्रजम बाक्शो चहिं परमप्रभु यावे आ सोक्त के बाक्त।

21 नोले तौ का थीब। मेको कली येसु नें वोतो। मारदे हना मेकोमी आ मुर आन कली पाप रे प्रोंइब” दे तुइक्पदा बाक्त। लूका २:२१; प्रेरित ४:१२; भजन संग्रह १३०:८

22 मेको मो दुम्शोमी परमप्रभु यावेमी साइ नेसी आ लोत्र पाइब पपाइशशो लोत्र खाप्ताक्व। साइ नेसी परमप्रभु यावे आ लोत्र पाइबमी

23 “नेनीने, कन्ने मीश आलमी कोत्रज कुरशा, तौ का थीब। मेको आल आ नें इम्मानुएल वोइक्नीम। इम्मानुएल देशो ‘परमप्रभु यावे गोपुकी नु बाक्शो बाक्ब’ दे रुम्सीब” दे ब्रेक्शो बाक्ब। यसैया ७:१४

24 योसेफ निन्द्रा रे सेसीशा बोकशा, परमप्रभु यावे आ स्वर्ग डा गेय पाइब आ लोत्र टिशा, मरीयम कली आ खिं लदा बाक्त।

25 मरीयम नु मइप्थ, तौ का थिमाक्त। मिनु मेको कली येसु नें वोदा बाक्त।

## 2

सोरुल कोव्रशा, जोक्ब तुइक्ब जाक्शो

1 येसु यहूदीया रागी डा बेथलेहेम सहरमी जरमेसे बाक्त। मेना मेकेर हेरोद पिप बाक्माक्त। मिनु येसु जरमेसेनु, सोरुल कोव्रशा, जोक्ब तुइक्ब नां दाप्तीक रे यरूसलेममी जाक्मा बाक्त। लूका २:१-७

2 मिनु यरूसलेममी जाक्शा “यहूदी आन पिप ते जरमेसे? मारदे हना गोपुकीमी पूब डा रागीम आ सोरुल ताइतक। मिनु गो मेको कली ठेयब सेल्थ जाक्तक। ते बाक्मा?” देमा बाक्त। गन्ती २४:१७

3 मिनु पिप हेरोद नु यरूसलेममी बाक्बपुकीमी मेको आन लोत्र नेंशा, आन थुं ग्येत्थ लुकच दुम्मा बाक्त।

4 मिनु हेरोदमी ठेयब चढेब नु सास्त्री आन कली खुप्शा “खीस्त ते जरमेसीबा?” दे हिल्लो पामी बाक्त। सास्त्री यहूदी आन कली परमप्रभु यावे आ अरेशो लोत्र शेंब बाक्शो बाक्तेक्म।

5 मिनु मेकोपुकीमी “यहूदीया डा बेथलेहेम सहरमी जरमेसीब। मारदे हना परमप्रभु यावे आ लोत्र पाइबमी मीका ५:१; यूहन्ना ७:४२

6 “ए यहूदीया डा बेथलेहेम सहर, यहूदीया डा सहर नेल्ल क्येडा आइक्च महिकसीशो सहर मनवे। मारदे हना इं इसाएली आन कली सासन पाइब बेथलेहेममी जरमेसीब” दे ब्रेक्शो बाक्ब” दे शेंदमे बाक्त। मीका ५:२

7 मिनु हेरोदमी मेको आन लोत्र नेंशा सुइमी मतुइक्थु, नां दाप्तीके रे जाक्शो सोरुल कोव्रब आन कली ब्रेत्तीमी बाक्त। मिनु मेको सोरुल गेना यूमे, दे रुबा बाक्त।

8 मिनु “लो, मुल बेथलेहेम सहर लने। मेकेर जाक्दीरशा, मेको आल मालीन। मिनु थिश्शा आं कली यो शेंदीन। गो यो लशा ठेयब सेल्लुड” दे सोइक्तीमी बाक्त।

9 मिनु मेकोपुकीमी पिप आ लोत्र नेंशा, आन लां खोदमे बाक्त। मिनु नां दाप्तीकेमी तशो सोरुलमी आन कली लां कोइदीमी बाक्त। लां कोइना कोइन नक थिशो आल बाक्तीके आ सोरुल खा दिक्माक्त।

10 सोरुल खा दिक्शो तशा, शुश ग्येरशा आल आ बाक्तीकेमी ओव्रमा बाक्त।

11 मिनु ओव्रशा, आल नु आल आ ममा मरीयम कली तामे बाक्त। मिनु आन पोक्च थेक्शा आल कली ठेयब सेल्मे बाक्त। मिनु आन कुरशो थैलो प्राक्शा, सुन धूप नु ब्रोव्रशो रिना पाइब थोव्रक गुंइशा खेत्तमे बाक्त। भजन संग्रह ७२:१०,१५; यसैया ६०:६

12 आल कली युन्ने थुम्शा, आन रागी लेत्ची ना परमप्रभु यावेमी डोमुमी “पिप हेरोद कली लेंशा मयुमीने” दे तुइक्पाइक्मी बाक्त। मिनु यरूसलेम लतीक लां हेरशा, आन रागी लेम्मा बाक्त।

इजीप्त रागी लशो

13 मेकोपुकी लमा नोले काबु योसेफमी डोमुमी परमप्रभु यावे आ स्वर्ग डा गेय पाइब का फो यूशो तवा बाक्त। मेकीमी “मोबु आस कली लाइरशा, एकेर रे प्रोक्शा, इजीप्त रागी जाक्दीरशा, लेत्तीन मदेइ सम्म बाक्कीन। मारदे हना पिप हेरोदमी आल कली साइक्चा, दे माल्चा चिकताक्व” दे मदा बाक्त।

14 मिनु योसेफमी निन्द्रा रे सेसीशा छुल बोक्शा, मोबु आस कली लाइरशा मेको, नाक्दोन इजीप्त प्रोक्मा बाक्त।

15 मिनु इजीप्त रागीमी जाक्दीरशा, पिप हेरोद मबेक्म सम्म मेकेर बाक्मा बाक्त। मो दुम्शोमी परमप्रभु यावे आ लोत्र थमा दुम्माक्त। साइ नेसी परमप्रभु यावेमी आ लोत्र पाइब रे पा “इजीप्त रे लेत्तो, दे आं तौ कली ब्रेत्ताक्ड” दे देशो बाक्माक्त। होसे ११:१

पिपमी आल आन कली साइक्पाइरशा

16 पिप हेरोदमी मार पवा बाक्त देशा हना “मेको सोरुल कोव्रशा जोक्ब तुइक्बपुकीमी जोल पाइयीमी बाक्त” दे तुइरशा चुरमाक्त। मिनु आन देशो लोव्रमी “पिप मेना जरमेसीब” दे मिम्शा, मेको पिप दुम्ब आल कली थिन्ने मचाप्तीके बेथलेहेम सहर एर ओंथ गाउ डा बर्स निक्शी मलाक्शो वोंइश आल नेल्ल आन कली माल्ना माल्न साइक्पाइक्मी बाक्त।

17 मो पवानु, परमप्रभु यावे आ लोत्र थमा दुम्माक्त। साइ नेसी परमप्रभु यावेमी आ लोत्र पाइब येरमीया रे पा

18 “रामाह सहरमी रोंका पा डाक्शो नेंसीब। राहेलमी डाक्ना डाक्न बाक्ब। सुइमी लेम्ने मचाप्नीम। मारदे हना आ आल साइक्चा पुंइसाक्म” देमाक्त। येरमीया ३१:१५; उत्पत्ती ३५:१९

इजीप्त लां लेशो

19 मिनु नोले पिप हेरोद बेक्माक्त। मिनु काबु इजीप्त रागीम बाक्शो योसेफ डोमु तवानु, परमप्रभु यावे आ स्वर्ग डा गेय पाइबमी

20 “मोबु आस कली लाइरशा, इसाएल लेशशा लावो। आल कली साइक्चा माल्बपुकी बेक्तेक्म” देमाक्त। प्रस्थान ४:१९

21 मिनु योसेफमी मोबु आस कली इसाएल लेत्ता बाक्त।

22 मिनु लेशशा जाक्दीरशा, यहूदीया रागीमी हेरोद आ तौ अरकीलाउस पिप दुम्शो बाक्त देशो नेंशा, यहूदीया रागीमी बाक्चा हिंमाक्त। मिनु लेंशा डोमुमी “यहूदीयामी मबाक्कीन। गालील रागी लशा बाक्कीन” दे माइक्चा पुंइसे बाक्त। मिनु गालील रागी लमा बाक्त।

23 मिनू गालील डा नासरथ सहरमी जाकदीशशा बाक्मा बाकत। मारदे हना साइ नेसी परमप्रभु यावे आ लोत्र पाइब आन लोत्र थमा दुम्चा माल्बाक्माकत। मेकोपुकीमी “मेको कली नासरी देंनीम” देशो बाक्मा बाकब। लूका २:३९; यूहन्ना १:४६

### 3

ब्वाक्कुमी खुम्शा गुंडब यूहन्ना

मर्कूस १:२-८; लूका ३:१-१८

1 मेना ब्वाक्कुमी खुम्शा गुंडब यूहन्ना यहूदीया डा गोरशो रागीम बाक्शा लूका १:१३

2 “इन थुं परमप्रभु यावे गे लेलतीने। मारदे हना स्वर्ग डा राज्य जाकचशो बाक्ब” दे मुर आन कली शेना शेन बाक्माकत। मती ४:१७; रोमी १२:२

3 साइ नेसी परमप्रभु यावे आ लोत्र पाइब यसैयामी “गोरशो रागीमी सेंदा कामी ओदेंशो नेंसीब ‘प्रभु आ लां सेलीने। आ गाकतीके फुल्लु ग्रोकशा थेलीने’ देशो नेंसीब” देशो बाक्माकत। मेको लोत्र पाइब यूहन्ना बाक्माकत। यसैया ४०:३; यूहन्ना १:२३

4 यूहन्नामी दलओठ आ चां के प्रोत्रशो वा फेक्बाक्माकत, कुशुल के पेटी किप्बाक्माकत। मिनू सल्ला ब्वशा, रोका खुदो जशा बाक्बाक्माकत। २राजा १:८

5 मिनू गोरशो रागीम बाक्मेनु, यरूसलेम सहर नु यहूदीया रागी डा गाडं सहर डा मुर नेल्ल जाकशा देल्मा बाकत। यर्दन खोला आ नेक्था डा मुरपुकी यो शुश जाक्शा देल्मा बाकत।

6 यूहन्ना आ लोत्र नेंशा, शुश मुरुमी आन मरिम्शो पशो शोवडमे बाकत। मो पा शोवब आन कली यूहन्नामी यर्दन खोलामी खुम्शा गुंडदीमी बाकत।

7 मिनू यूहन्नामी फरिसी नु सदुकी शुश जाकशो तशा, मेको आन कली “गे बुस्स आ खलकपुकी, सुमी परमप्रभु यावे आ सजाइ रे ब्रोंडचा तांडसीब, दे शेंदीनी?फरिसी रिती थीती सेल्शा, रिम्शो पचा कली कोवब यो बाक्शो बाक्तेक्म। सदुकी यहूदी आन सरकार डा हुल ‘मुर मसेंसीनीम’ दे थमा सुइक्ब बाक्शो बाक्तेक्म। मती २३:३३

8 परमप्रभु यावे गे इन थुं लेशो तचा डा पा फल सिप्पा कोंडदीने।

9 अब्राहाम इं आफ बाक्ब, दे शोर गाक्शा मबाक्कीन। मारदे हना परमप्रभु यावेमी एको फुल्लु रे अब्राहाम कली आल सेले चाप्ब, दे तुइक्तीन। यूहन्ना ८:३३,३९; रोमी २:२८:२९; रोमी ४:१२

10 तिम्चा, दे रवा आ पुंमी खा वोइशो बाक्ब। फल मसिप्ब रवा का का पा तिम्शा मीमी चोचा पुंडसीनीम, दे तुइक्तीन। लूका १३:६-९

11 इन थुं लेत्या कली इन कली ब्वाक्कुम खुम्शा गुंडनन्नी। गो ब्वाक्कुम खुम्शा गुंडब ला नड। आं नोले जाक्ब चहिं आं क्येडा शुश सक्ति पाइशो टेयब बाक्ब। गो मेको आ जुत्ता गुप्शा कुरचा लायो मशिरनुड। मेकोमी इन कली परमप्रभु यावे आ सोक्तीमी खुम्ब, मीमी यो हुम्ब। यूहन्ना १:२६,२७,३३; प्रेरित १:५; प्रेरित २:३-४

12 आ गुडमी य्योल बाक्ब। मेकोमी लाडगामी हांमशो चेरब हुरशा, भूस नु गेडा तिल्लब। गेडा कोटोमी कुर पा वोइक्ब। भूस चहिं गेनायो मकाप्ब मीमी चोइब” दे माइक्मी बाकत। मती १३:३०

येसु ब्वाक्कुम खुम्शा गुंडशो

मर्कूस १:९-११; लूका ३:२१-२२; यूहन्ना १:३२-३४

13 मिनू काबु येसु गालील रागी रे यूहन्ना नु ब्वाक्कुम खुम्शा गुंडसीथ यर्दन खोला यूहन्ना आ बाक्तीकेमी जाक्माकत।

14 मिनू यूहन्नामी “गेमी आं कली कका ब्वाक्कुम खुम्शा गुंडचा गारब। मिनू मार आं गे पीनीनी?” देंमाकत। यूहन्ना १:३६

15 मिनू येसुमी “मुल ओन पय। मारदे हना रिम्शो पतीके नेल्ल पचा मालनय” देंमाकत। मिनू यूहन्नामी “लो, मो हना” देशा, येसु कली ब्वाक्कुम खुम्शा गुंडदा बाकत।

16 मिनू ब्वाक्कु रे गूशा, खोला रे कुसानु, मार दुम्माकत देशा हना, येसुमी स्वर्ग रोक्सीशा, परमप्रभु यावे आ सोक्ती परवा खोदेशो दुम्शा, यिशा आ रांमी जुक्चशो तवा बाकत। यसैया ११:२

17 मिनू सरीड रे “एको आं दाक्शो तो बाक्ब। एको कली तशा थाप्पा ग्येरसीनुड” देशो सेंदा गूमाकत। मती १७:५; यसैया ४२:१

### 4

येसु थांम्चा पुंडसीशो

मर्कूस १:१२-१३; लूका ४:१-१३

1 मिनू नोले सैतान रे पा थुं थांम्चा पुंडसीचा कली परमप्रभु यावे आ सोक्तीमी येसु कली गोरशो रागीमी चाक्दीदा बाकत। हिब्रू ४:१५;

2 मिनू येसु ४० नाकदो नाकत मजथु बाक्माकत। मिनू ४० नाकत जाक्दीम्मेनु, शोत्रलु बेक्माकत। प्रस्थान ३४:२८; १राजा १९:८

3 मिनू सैतानमी येसु कली “मार, गे परमप्रभु यावे आ तौ नवे हना, एको फुल्लु आन कली शोब्ले दुमीन देशा शोब्ले सेलो” देंमाकत। उत्पत्ती ३:१-७

4 मिनु येसुमी “परमप्रभु यावे आ लोवमी ‘मुर जशा ला मब्रॉइनीम, परमप्रभु यावे आ देशो लोवमी यो ब्रॉइनीम’ दे ब्रेकशो बाक्त” दे लोव लेता बाक्त। ब्यवस्था ८:३

5 मिनु नोले सैतानमी येसु कली यरूसलेम सहर लाइशशा, परमप्रभु यावे आ खिं डा नेल्ल क्येडा तारी लदा बाक्त।

6 मेकेर बाकसानु, सैतानमी “मार, गे परमप्रभु यावे आ तौ नवे हना, एकेर रे प्रेक्को। मारदे हना परमप्रभु यावे आ ब्रेकपाइशो लोवमी ‘परमप्रभु यावेमी आ स्वर्ग डा गेय पाइब आन कली सोइशशा, इ कली आन गुडम ताकशा खपीम नाइकपाइकब। इ खोइल फुल्लु कामी यो मथोकब’ ब्रेकशो बाकब” देमाक्त। भजन संग्रह ९१:११,१२

7 मिनु येसुमी “परमप्रभु यावेमी ब्रेकपाइशो लोवमी ‘परमप्रभु यावे कली थुं मथाम्चा’ दे यो ब्रेकशो” देमाक्त। ब्यवस्था ६:१६

8 मिनु नोले सैतानमी येसु कली ठेयब लाइशशा डांडा तारी लदा बाक्त। मेकेर चाकदीशशा, रागी डा नेल्ल राज्यपुकी नु आन दारस कोइदा बाक्त।

9 मिनु “गे पोक्च थेकशा, आं कली सेउ पाप्तीवी हना, एको नेल्ल गेनन” देमाक्त। मती १६:२६

10 मिनु येसुमी “लावी, सैतान। मारदे हना ‘परमप्रभु यावे कली ला सेउ पावो। मिनु ठेयब सेलो’ देशा ब्रेकशो बाकब” देमाक्त। ब्यवस्था ६:१३

11 मिनु सैतानमी येसु कली प्रॉइशा लमाक्त। मिनु मार दुम्माक्त देशा हना, परमप्रभु यावे आ स्वर्ग डा गेय पाइबपुकी जाकशा, येसु कली गेय पामे बाक्त। यूहन्ना १:५१; हिबू १:६,१४

येसुमी शेंचा गोशो

मकूस १:१४-१५; लूका ४:१४-१५

12 मिनु नोले येसुमी “यूहन्ना कली ग्याइशशा चोक्तेकम” देशो लोव नेंशा, यहूदीया रागी रे लशा, गालील रागी जाकदीम्माक्त। मती १४:३

13 मिनु नासरथ रे लशा डा मिन, जबूलून नु नाप्ताली रागी डा समुन्द्र आ नेक्था डा कापेरनाउम सहरम जाकदीशशा बाक्माक्त।

14 मोदेशो पा साइ नेसी परमप्रभु यावे आ लोव पाइब यसैया आ लोव थमा दुम्माक्त। यसैयामी

15 “जबूलून, नाप्ताली रागी, समुन्द्र आ एर ओंथ रागी, यर्दन खोला आइक्की हांबु नु अर्को जात डा गालील रागीमी बाकबपुकी,

16 डोइती छिडछिडम बाकबपुकीमी मुल ठेयब छेडछेड ताम्तेकम। बेक्या डा रागी नु हिंशा बेक्या डा रागीम बाकब आन कली छेडछेड दुम्त” दे ब्रेकशो बाक्त। यसैया ८:२३; यसैया ९:१; यूहन्ना ८:१२

17 येसुमी मुर आन कली “इन थुं परमप्रभु यावे गे लेत्तीन। मारदे हना स्वर्ग डा राज्य जाकचशो बाकब” दे शेंचा गोवा बाक्त। मती ३:२

येसुम शेंसीबपुकी योव्रशो

मकूस १:१६-२०; लूका ५:१-११; यूहन्ना १:३५-५१

18 मिनु काबु गालील डा समुन्द्र आ नेक्था गाकमेनु, माझी वोबु निकशीम एर ओंथ ग्याइल आप्शा, डांड रेन्ना रेन् बाकशो ताम्सी बाक्त। मेको निकशी आस नें का पयुस माइशो सिमोन बाक्माक्त, का अन्द्रीयास बाक्माक्त।

19 मिनु येसुमी “आं नोले खोइय्यीसी। मिनु मुर आन कली रेख सेल्नन्सी” दे ब्रेत्तीम्सी बाक्त। मती २८:१९-२०

20 मिनु ग्याइल थु था प्रॉइशा, येसु आ नोले खोदसे बाक्त। मती १९:२७

21 मिनु मेकेर रे लशा हिरसमानु, येसुमी जब्दी नु आ तौ याकूब नु यूहन्ना पोबु आन कली तामी बाक्त। मेको सांफा डोंगाम बाक्शा गाकशो, ग्याइल प्रोवना प्रोवना बाक्मा बाक्त। मिनु येसुमी वोबु आस कली ब्रेत्तीम्सी बाक्त।

22 मिनु आस गेय प्रॉइशा, येसु आ नोले खोदसे बाक्त।

येसुम रोइ पाइब सापाइशो

मकूस १:३९; मकूस ३:७-१२; लूका ४:४४; लूका ६:१७-१९

23 मिनु गालील रागी तेइ तेइ हिरना हिरन लमानु, येसुमी युम्तीक खिंमी स्वर्ग डा राज्य डा ग्येरपाइकब लोव शेंना शेंन नु रोइ पशो नु रोइमी गुरशो मुर नेल्ल आन कली सापाइकना पाइकन गाकबाक्माक्त।

24 मिनु सिरीया रागी नेल्ल मेको आ पबंम लोव ब्रम्माक्त। मिनु रोइ पशो मुर नेल्ल आन कली येसु आ बाक्तीकेमी चाक्स डा चाक्स पाइबाक्मा बाक्त। वोलमी तशो, वोलमी सुम्शो नु गुइ खोइल मदुकब मुर चाक्गमे बाक्त। मिनु येसुमी मेको नेल्ल आन कली सापाइकमी बाक्त। मकूस ६:५५

25 मिनु गालील, डेकापोलीस, यरूसलेम, यहूदीया रागी नु यर्दन खोला आइक्की हांबु डा शुश मुरुमी येसु आ नोले खोदमे बाक्त।

## 5

डांडाम शेंशो लोव

लूका ६:२०-४९

1 मिनु येसुमी शुश मुर आ नोले खोइशशो तशा, डांडा डोइशशा निस्से बाक्त। मिनु मेकेर आ शेंसीबपुकी यो जाक्मा बाक्त।

2 मिनु मेकेर जाकशो आन कली ठेयब सेंदा पा शेंना शेंन बाक्माक्त।

आसीक राइब सु बाक्नीम?

मिनु येसुमी

- 3 “महिक्सीशो मुरपुकी आसीक राइनीम। मारदे हना स्वर्ग डा राज्य मेको आन केन बाक्ब। यसैया ५७:१५
- 4 आन थुं खाइशोपुकी आसीक राइनीम। मारदे हना आन थुं नाइक्चा ताइनीम। भजन संग्रह १२६:५; प्रकाश ७:१७
- 5 ब्रेमशोपुकी आसीक राइनीम। मारदे हना रागी आन केन दुम्ब। मती ११:२९; भजन संग्रह ३७:११
- 6 ठीक पशो तचा दाक्बपुकी आसीक राइनीम। मारदे हना आन दाक्बो ताइनीम। लूका १८:९-१४; यूहन्ना ६:३५
- 7 शिशी पाइबपुकी आसीक राइनीम। मारदे हना आं यो शिशी ताइनीम। मती २५:३५-४६; याकूब २:१३
- 8 आन पाप क्याम्चा पुंडसीशा, रिमशो थुं दुमशोपुकी आसीक राइनीम। मारदे हना परमप्रभु यावे कली ताइनीम। भजन संग्रह २४:३-५; भजन संग्रह ५१:१२-१३; १यूहन्ना २:२-३
- 9 दुशा गारशा बाक्बपुकी आसीक राइनीम। मारदे हना परमप्रभु यावे आ तमी तौ देंचा पुंडसीनीम। हिब्रू १२:१४
- 10 ठीक पशा यो खेदा पचा पुंडसीबपुकी आसीक राइनीम। मारदे हना स्वर्ग डा राज्य मेको आन केन बाक्ब। १पत्रुस ३:१४
- 11 आं पर्वम मुरपुकीमी इन कली हेला पा, खेदा पा, जोल पा, मरिमशो लोत्र पाम्तेकम हना यो, आसीक राइनीनी। मती १०:२२; प्रेरित ५:४१; १पत्रुस ४:१४
- 12 ग्येरसीने। मारदे हना स्वर्गमी इन कली ठेयब इनम चोइशो बाक्ब। साइ नेसी रे मुल सम्म परमप्रभु यावे आ लोत्र पाइब आन कली खेदा पा श्येत गेस डा गेस पाम्तेकम। हिब्रू ११:३३-३८; याकूब ५:१०

रागी डा हिक्सी

13 गे रागी डा हिक्सी ननी। हिक्सी आ डाम्चा जाम्त हना, मारेइ काम मलाप्व। लांमी ताइशशा मुर गाक्मानु, दिम्शा खाक्चा पुंडसीब। मर्कूस ९:५०; लूका १४:३४-३५

रागी डा छेडछेड

- 14 गे रागी डा छेडछेड ननी। डांडामी सेल्लो सहर मारेइमी मफारसीब। यूहन्ना ८:१२
- 15 सुइमी बती दाशा, पाथीम गुप्शा मवोइक्नीम। खिं आगा नेल्ल छेडछेड पा तचा डा पा चोइक्नीम। मर्कूस ४:२१; लूका ८:१६
- 16 मेको ब्रशो बती खोदेशो पा गेमी इन रिमशो गेय रे पा इन छेडछेड मुर आन कली कोइदीने। मिनु इन रिमशो पशो तशा, स्वर्गमी बाक्ब इन आफ कली ठेयब सुइशशा मान पाइनीम। फिलिप्पी २:१४-१५; यूहन्ना १५:८; एफिसी ५:८-९

येसुमी नु अरेशो लोत्र

- 17 परमप्रभु यावे आ अरेशो लोत्र नु परमप्रभु यावे आ लोत्र पाइबपुकीमी ब्रेकशो लोत्र क्याम्ब, दे ममिम्तीने। क्याम्चा कली ममाइ, नेल्ल पचा कली जाक्ती। मती ३:१५; रोमी ३:३१; रोमी १०:४; १यूहन्ना २:७
- 18 नोफा दाइशशा नेनीने, सरीड नु रागी मग्याम्ब सम्म परमप्रभु यावे आ लोत्र का यो मग्याम्ब। नेल्ल थमा दुम्ब। लूका १६:१७
- 19 सुमी परमप्रभु यावे आ अरेशो लोत्र के लोत्र का मपाइबा, मुर आन कली मो पचा शेंबा, मेको मुर स्वर्ग डा राज्यमी नेल्ल क्येडा आइक्च दुम्ब। सुमी लोत्र का यो मप्रोइथु, नेल्ल पशा डा मिन, मुर आन कली शेंबा, मेको चहिं स्वर्ग डा राज्यमी ठेयब दुम्ब। याकूब २:१०
- 20 सास्त्री नु फरिसी आन पशो क्येडा गे रिमशो ठीक गेय मपाइतीनी हना, गेपुकी यो स्वर्ग डा राज्य ओत्रचा मताइनीनी, दे इन कली देनुड। मती २३:२-३३

साइक्चा मदुम्ब, दे शेंशो

- 21 साइ नेसी इं किकी पिपी आन कली ‘मुर कली मसाइक्चा। सुइमी अरु कली साइक्तु हना, मेको सजाइ गेचा पुंडसीब’ दे देशो लोत्र बाक्ब, दे तुइक्नीनी। प्रस्थान २०:१३, प्रस्थान २१:१२
- 22 गोमी चहिं इन कली मार देनुड देशा हना, सु मुर नु ईख पा ब्राशा बाक्बा, मेको सजाइ गेचा पुंडसीब। सुमी अर्को कली मरिमशो लोत्र पाइबा, मेको कछडी पचा पुंडसीब। सुमी अर्को कली ‘ए मूर्ख’ देबा, मेको नरक डा मीम हुम्चा पुंडसीब। १यूहन्ना ३:१५
- 23 मोपतीके गे परमप्रभु यावे कली मार मार चढेचा सादीनीनु, सुइ गेपुकी नु गाइशशा, चुरशो फुक्तीनी हना,
- 24 चढेचा क्येडा डोंइती मेको आन कली गुम्शा, दुशा गारशा ला चढेने। मर्कूस ११:२५
- 25 इन कली मरिमशो पाइब नु लांमी बाक्नीनुन, गारीने। मारदे हना मेकोमी इन कली अडडाम लाइशशा, निसाफ पाइब आ डोंइती चाक्दीप्व। मिनु निसाफ पाइबमी पुलीस आन गुइमी गेब। मिनु पुलीसम जेल्खानम चोक्नीम। मती १८:२३-३५; लूका १२:५८-५९
- 26 नोफा दाइशशा नेनीने, इन कली नोले डा क्वद्रन्स मथाप्पाइक्थु मप्रोइनीम। क्वद्रन्स नेल्ल क्येडा आइक्च क्येट बाक्त।

मीश वोंइश आस नाता मखोइक्चा

- 27 ग्युंवे पशोपुकी आन मीश वोंइश नाता ब्राचा मदुम्ब देशो बाक्ब, दे तुइक्नीनी। प्रस्थान २०:१४
- 28 गो मार देनुड देशा हना, ग्युंवे पशो मुर्कमी अर्को मीश मुर तशा वाल्त हना, आ थुंमी मीश वोंइश आस नाता खोइक्ब। रसामुएल ११:२; अय्युब ३१:१; २पत्रुस २:१४

29 इ ग्युरा मिक्चीमी इ कली पाप पपाइक्तु हना, फेशशा ताइक्तो। मारदे हना रां नेल्ल नरकम खुम्चा पुंडसीचा क्येडा रां डा मिक्च का जाम्शा लशो रिम्शो दुम्ब। मती १८:८-९; मर्कूस ९:४७; कलस्सी ३:५

30 इ ग्युरा गुडमी इ कली पाप पपाइक्तु हना, खोइशशा ताइक्तो। मारदे हना रां नेल्ल नरकम खुम्चा पुंडसीचा क्येडा रां डा गुड का जाम्शा लशो रिम्शो दुम्ब।

31 सु आ मीश नु ब्राबा, मेकोमी छोड पत्र ब्रेकशा गेचा माल्ब, दे यो देशो बाक्ब। ब्यवस्था २४:१; मती १९:३-९; मर्कूस १०:४-१२

32 गोमी मार देंनुड देशा हना, सुमी आ मीश आं नु फ्राशा सोइक्बा, मेकोमी आ मीश कली मीश वोंइश आस नाता खोइक्पाइक्ब। मीश मुरुमी आ वोंइश बाकना बाकन अर्को वोंइश मुर नु मरिम्शो गेय पाप्टु हना, मोदेशो मीश मुर कली प्रोंइचा दुम्ब। सुमी छोड पत्र गेचा पुंडसीशो मीश मुर ग्युंवे पाइबा, मेकोमी यो मीश वोंइश आस नाता खोइक्ब। लूका १६:१८; १कोरिन्थी ७:१०-११

कसम मजचा

33 साइ नेसी इं किकी पिपी आन कली 'जोल पा कसम मजचा। परमप्रभु यावे कली मार मार गेनुड, पाडनुड, दे कसम जाइतीनी हना, मेकोन गेचा पचा माल्नीनी' दे देशो बाक्ब, दे यो तुइक्नीनी। लेवी १९:१२; गन्ती ३०:३

34 गोमी मार देंनुड देशा हना, कसम का यो मजने। सरीड आ नेंमी कसम मजने। मारदे हना सरीड परमप्रभु यावे आ नित्तीके बाक्ब। मती २३:१६-२३२; यसैया ६६:१

35 रागी आ नेंमी यो कसम मजने। मारदे हना रागी परमप्रभु यावे आ खोइल थैक्तीक बाक्ब। यरूसलेम सहर आ नेंमी यो कसम मजने। मारदे हना यरूसलेम नेल्ल क्येडा ठेयब पिप आ सहर बाक्ब। भजन संग्रह ४८:३

36 इन पिया थिशा यो कसम मजने। मारदे हना चां का यो बुश के क्येर, क्येर के बुश सेल्ले मचाप्नीनी।

37 इन देशो लोव्र चहिं 'दुम्ब हना दुम्ब, मटुम्ब हना मटुम्ब' देनीन। मेको क्येडा लाकशो लोव्र चहिं मरिम्शो लां रे पीब। याकूब ५:१२

क्येक्क मलेत्चा

38 'सुडमी इन मिक्च पुक्ताकम हना, मेको आन कली यो मिक्च पुक्तीने। सुडमी इन खुइ जिक्ताकम हना, मेको आन कली यो खुइ जिक्तीने' देशो बाक्ब, दे तुइक्नीनी। प्रस्थान २१:२४

39 गो मार देंनुड देशा हना, सुडमी इन कली मरिम्शो पाप्तेक्म हना यो, मेको आन कली आन क्येक्क मलेत्तीने। इन ग्युरा चोव्रचो राप्तेक्म हना, पेरा यो राप्चा गेने। बिलाप ३:३०; यूहन्ना १८:२२-२३; रोमी १२:१९, २१; १पत्रुस २:२०-२३

40 इन कली मुददान कोप्शा, अडडाम लाइशशा, इन फेक्शो वा लाइक्चा माल्लेक्म हना, इन बरखी यो गेशा सोइक्तीने। १कोरिन्थी ६:७; हिब्रू १०:३४

41 इन कली आधा कोस सम्म लचा, दे ढिपी पाप्तेक्म हना, कोस का सम्म यो लने।

42 इन के मारेइ थोव्रक पुंइतेक्म हना, आन पुंइशो गेने, जेर पुंइतेक्म हना यो, मगेनीकी, दे श्येत्थी मसोइक्तीने।

जोरी सत्रु आन कली यो दाक्चा

43 'गेपुकी नु बाक्ब मुर आन कली दाक्तीने। जोरी सत्रु आन कली चहिं मदाक्तीने' देशो बाक्ब, दे तुइक्नीनी। लेवी १९:१८

44 गोमी इन कली मार देंनुड देशा हना, जोरी सत्रु आन कली दाक्तीने। इन कली हेला पा खेदा पाइब आन पबंम परमप्रभु यावे कली पुनीने। प्रस्थान २३:४-५; लूका ६:२७-२८; रोमी १२:१४, २०; लूका २३:३४; प्रेरित ७:५९; लूका ६:२७-२८

45 मो पाइतीनी हना, इन स्वर्ग डा आफ आ तमी तौ नकी, दे कोंइनीनी। स्वर्गम बाक्ब आफोमी रिम्शो मरिम्शो पाइब नेल्ल आन कली नां दाप्पाइक्ब। नेल्ल आन कली रेट यिपाइक्ब। एफिसी ५:१

46 इन कली दाक्ब आन कली ला दाक्ताक्नी हना, मार इनाम ताइनीनी डा? तिरो पोक्बपुकीमी यो मो मपाइनीम डा?

47 इन जात, थर डा मुर आन कली ला मान पा सेत्ताक्नी हना, मार इनाम ताइनीनी डा? परमप्रभु कली मतुइक्बपुकीमी मसेम्मुइनीमी डा?

48 मोपतीके दोपा इन स्वर्ग डा आफोमी रिम्शो पाइबा, मोपा गे यो रिम्शो पने। लेवी १९:२

## 6

मथीब आन कली शिशी पचा

1 होस पांडसीने, मुर आन डोंइती कोंइचा कली पुडग आन कली शिशी मपने। मारदे हना मोदेशो पाइब आन कली स्वर्गम बाक्ब इन आफोमी इनाम मगेब।

2 श्येत जाइब, मथीब आन कली मारेइ गेनीनु, इन डोंइती तुगही मतापीने। कपटीपुकीमी गुम्तीक खिंमी, लांमी मुर आन कली आन रिम्शो पतीके कोंइशा ठेयब सेल्लांडसीनीम। नोफा दाइशशा नेनीने, मेको आन तचा डा इनाम मारेइ मलीब। १कोरिन्थी १३:३

3 श्येत जाइब, मथीब आन कली मारेइ गेनीनु, इन ग्युरा गुडमी गेशो, पेरा गुड कली यो मतुइक्पाइक्थु गेने। मती २५:३७-४०; रोमी १२:८

4 मोदेशो पा इन गेशो खुइशशोम बाक्ब। मिनू खुइशशो यो नेल्ल तुइक्ब इन आफोमी इन कली इनाम गेब।

प्रार्थना पचा शेशो



5 परमप्रभु यावे कली प्रार्थना पनीनु, कपटीपुकीमी पशो खोदेशो पा मपने। मेकोपुकीमी गुम्तीक खिमी, लामी मुर आन कुल राप्शा कोत्रपांडसीशा, प्रार्थना पाडनीम। नोफा दाइशशा नेनीने, मेको आन तचा डा इनाम मारेइ मबाकब।

6 गे चहिं परमप्रभु यावे कली प्रार्थना पनीनु, इन खिं ओव्रशा, लाप्यो चोकशा, सुइ आन मतुइकथु, खुइशशोमी बाकब इन आफ कली प्रार्थना पने। मिनु खुइशशो यो नेल्ल तुइकब इन आफोमी इन कली इनाम गेब।

7 परमप्रभु यावे कली प्रार्थना पनीनु, अर्को रागी डा मुरपुकीमी खोदेशो पा हेंथे शुश लोत्र मपने। मारदे हना शुश लोत्र पशोमी आन पुंडशो ताइनीम, दे मिन्मीम। यसैया १:१५

8 मेको आन पशो खोदेशो मपने। मारदे हना पुंडचा क्येडा डोंडती इन आफोमी इन माल्लो तुइशशो बाकब।

9 ओदें प्रार्थना पने 'स्वर्गम बाकब आंड आफ, इन नें ठेयब बाकब। लूका ११:२-४; इजीकीएल ३६:२३

10 इन राज्य जाकल। स्वर्गमी इन दाकशो खोदेशो पा रागीमी यो मोदेशोन दुम्ला। लूका २२:४२

11 काबु नाक्त डा जचा थोत्रक मुलाक्ती आंड कली गेने।

12 आंड मरिम्शो पशो क्याम्शा गेने। मारदे हना गो यो आंड कली मरिम्शो पाइब आन कली माफ गेतक। मती १८:२१-३५

13 सैतानमी आंड थुं हिरपाइक्या मगेने। आंड कली सैतान रे प्रोनीने। मारदे हना राज्य, सक्ति नु छेडछेड गेना हना यो इन के नम' आमने। यूहन्ना १७:१५; १कोरिन्थी १०:१३; १इतिहास २९:११-१३

14 इन कली मरिम्शो पाइब आन कली माफ गेतीनी हना, स्वर्गमी बाकब इन आफोमी यो इन कली माफ गेब। मर्कूस ११:२५

15 माफ मगेतीनी हना, इन आफोमी यो इन कली माफ मगेब।

बर्त बाक्या शेशो

16 बर्त बाक्नीनु, राव कीशो कुल मसेलीने। कपटीपुकीमी आंड बर्त बाकशो तांडसेकल, दे आन कुल राव कीपा कोंडनीम। नोफा दाइशशा नेनीने, मेको आन तचा डा इनाम मारेइ मबाकब। यसैया ५८:५-६

17 गेपुकी चहिं बर्त बाक्नीनु, चांमी तेल खेकशा, कुल चिकशा, इन बुं जिप्शा बाक्नीन।

18 मो पाइतीनी हना, इन बर्त बाकशो खुइशशोमी बाकब। मिनु खुइशशो यो नेल्ल तुइकब इन आफोमी इन कली इनाम गेब।

इन थुं शोंप गे महिरदीने

19 एको रागीमी शोंप खुष्पा, खेकशा मवोतीने। मारदे हना बुस्सुम खोइकब, खिया जोइब, खुइपुकीमी खुइ पाइनीम।

20 स्वर्गमी इन शोंप वोतीने। मेकेर बुस्सुम मखोइकब, खिया मजोइब, खुइपुकीमी यो खुइ मपाइनीम। मती १९:२१; लूका १२:३३-३४; कलस्सी ३:१-२

21 तेकेर इन शोंप बाकबा, मेकेरन इन थुं यो लीशो बाकब।

22 इन मिक्च रां डा छेडछेड बाकब। मिक्च ब्राभा मदुम्शो बाक्त हना, इन रां नेल्ल छेडछेड बाकब। लूका ११:३४-३६

23 मिक्च ब्राभा दुम्शो बाक्त हना, इन रां नेल्ल छिडछिड दुम्ब। इन रां डा छेडछेड नेल्ल छिडछिड दुम्त हना, शुश छिडछिड दुम्ब। यूहन्ना ११:१०

24 सुइमी होत्रप निकशी आस गेय पने मचापब। मारदे हना का कली मदाकब, का कली दाकब। का कली मान पा टीब, का कली मान मपथु मटीब। परमप्रभु यावे नु शोंप निम्फा आस कली गेय पने मचाप्नीनी। लूका १६:१३; याकूब ४:४

25 मोपतीके गो 'मार जचा, मार तूचा, मार फेक्चा' दे ममिन्तीने। मारदे हना जचा तूचा क्येडा ब्रोंडचा ठेयब बाकब। फेक्तीक क्येडा रां ठेयब बाकब। लूका १२:२२-३१; फिलिप्पी ४:६; १पत्रुस ५:७

26 सरीडमी बेरब चिक्ब आन कली कोव्रशा मिन्तीने। मेकोपुकीमी वांचेर मशोक्नीम, अन्न मखुप्नीम, भकारीमी मवोइक्नीम। स्वर्गम बाकब इन आफोमी मेको आन कली थुल्लो बाकब। मेको आन क्येडा शुश ठेयब मननी डा? मती १०:२९-३१; लूका १२:६-७

27 गेपुकीमी सुर्ता पा, इन न हात का लाइशशो सेल्ले चाप्नीनी डा?

28 मार फेक्चा, दे मारदे मिन्तीनी? लिली फू कली कोव्रशा मिन्तीने। गिश बोइशशा रिम्शो तांडसीनीमी। श्येत पा गेय मपाइनीम। पांडतो मपाइनीम।

29 पिप सोलोमन आ दारस नेल्ल कोंडताकब हना यो, लिली फू खोदेशो रिम्शो ग्योम्सीशो मबाकब। १राजा १०:-

30 परमप्रभु यावेमी चीबेर बोइशशा, हेम्शा चोचा पुइसीब फू, घांस आन कली लायो मिश रिम्शो ग्योम्ताकब हना, गे थमा पा थमा सुइक्ने मचापबपुकी इन कली मफेक्पाइकबा डा?

31 मोपतीके मार जचा, मार तूचा, मार फेक्चा, दे ममिन्तीने।

32 मारदे हना अर्को रागी डा मुरपुकीमी ला मोदेशो मिन्तीम। इन स्वर्ग डा आफोमी इन माल्लो नेल्ल तुइकब।

33 डोंडती परमप्रभु यावे आ राज्य नु आ ठीक पतीके मिम्शा मालीने। मिनु जचा तूचा फेक्चा यो ताइनीनी। रोमी १४:१७; १राजा ३:१३-१४; भजन संग्रह ३७:४, २५

34 मोपतीके दीसा मार दुम्बा, दे सुर्ता मपने। मारदे हना दीसा डा श्येत दीसान दुम्ब। मुलाक्ती डा श्येतम दीसा डा श्येत मतेम्दीने। प्रस्थान १६:१९

## 7

नाकमुचा आ पबर्म शेशो

1 मुर आन कली मनाक्तीने। मुर आन कली नाक्ताक्नी हना, इन कली यो नाक्नीम। रोमी २:१; १कोरिन्थी ४:५

- 2 दोपा नाक्तीनी, मोपा नाक्चा पुंडसीनीनी। दोपा पुक्शा गेनीनी, मोपान पुक्शा ताइनीनी। यसैया ३३:१; मर्कूस ४:२४  
 3 मारदे इन लोकब आ मिक्चीम बाक्शो कसीडगर ताइनीनी। मिनु इन मिक्चीम बाक्शो मुढा चहिं मताइनीनी?  
 4 इन मिक्चीम मुढा बाक्त हना, दोपा इन लोकब कली 'इ मिक्चीम बाक्शो कसीडगर फेलुड' देने चाप्तीनी डा?  
 5 कपटी, डोंइती इन मिक्चीम बाक्शो मुढा फेत्तीने। मिनु ला मिक्च ठीक ताइब दुग्शा, इन लोकब आ मिक्चीम बाक्शो कसीडगर फेत्तीने।  
 6 हेंथे थिपाइक्चा मदुग्शो थोव्रक कुचुम कली मगेने, पोत्र आन डोंइती इन मोती मब्बारदीने। मारदे हना दिम्मीम। मिनु बिर लेशशा इन कली ग्राम्थ पीनीम। मती १०:११; लूका २३:९

परमप्रभुमी इन पुंडशो नेंब  
 लूका ११:९-१३

- 7 परमप्रभु यावे कली पुनीने। मिनु इन पुंडशो ताइनीनी। मालीने, मिनु इन माल्शो थिल्लीनी। बाक्नी? दे लाप्चो खोकोल पने। मिनु गे ओव्रचा ताइनीनी। मर्कूस ११:२४; यूहन्ना १४:१३; येरमीया २९:१३-१४  
 8 मोपतीके सुम पुंडबा, मेकोमी आ पुंडशो ताइब। सुम माल्बा, मेकोमी आ माल्शो थिप्ब। सुम ओव्रडा? दे लाप्चो खोकोल पाइबा, मेको ओव्रचा ताइब।  
 9 गे नु बाक्ब सुड इन तीमी 'शोब्ले जाइनुड' दे पुंडतु हना, शोब्ले आ पा डा फुल्लु जचा गेनीनी डा?  
 10 'डांड ब्वाइनुड' दे पुंडतु हना, डांड आ पा डा बुस्स ब्वचा गेनीनी डा?  
 11 गेपुकी मरिग्शो बाक्तीनी हना यो, इन तमी तौ आन कली रिग्शो थोव्रक गेस जोक्नीनी। इन पशो क्येडा स्वर्गमी बाक्ब इन आफोमी आ कली पुंडब आन कली रिग्शो थोव्रक मगेब डा?

परमप्रभु आ दाक्शो पचा

- 12 गेमी दोदेशो पपांडसीचा दाक्नीनी, गे यो मुर आन कली मोदेशो पने। मारदे हना परमप्रभु यावे आ अरेशो लोत्र नु परमप्रभु यावे आ लोत्र पाइब आन शेंतीक लोत्र मेकोन बाक्ब। मती २२:३६-४०; रोमी १३:८-१०; गलाती ५:१४  
 13 आइक्च लाप्चो रे ओव्रडीन। मारदे हना जाग्शा लतीक लाप्चो ठेयब नु लां ब्रेग्शो नु ग्युग्शो बाक्ब। मोपतीके शुश मुर मेकेर गाक्नीम। लूका १३:२४  
 14 गेना हना यो ब्रोंइतीक लतीक डा लाप्चो आइक्च नु आ लां गाक्चा श्येत बाक्ब। मेको लां थिप्बपुकी का निकशी ला बाक्नीम। मती १९:२४; प्रेरित १४:२२  
 15 होस पांडसीने। मारदे हना परमप्रभु यावे आ लोत्र दूली शेंबपुकी बोक्नीम। मेकोपुकी भेडा खोदेशो तांडसीनीमी। मेको आन थुं चहिं फर के खोदेशो बाक्नीम। मती २४:४, ५, २४; २कोरिन्थी ११:१३-१५  
 16 मेको आन पशो गेय तशा, रिग्शो नम, दे मरिग्शो नम रुम्सीब। चू रवामी अडगुर सिप्बा डा? सिउंडी आ बोटमी फोव्रशी सिप्बा डा?  
 17 रिग्शो फल रवामी ब्रोंवशो फल सिप्ब, मरिग्शो फल रवामी मब्रोंवशो फल सिप्ब। मती १२:३३  
 18 रिग्शो फल रवामी मब्रोंवशो फल मसिप्ब। मरिग्शो फल रवामी यो ब्रोंवशो फल मसिप्ब।  
 19 मरिग्शो फल सिप्ब रवा कली तिग्शा शी चोइनीम। मती ३:१०; यूहन्ना १५:२, ६  
 20 मोपतीके मेको आन सिग्शो फल तशा, रिग्शो नमी, दे मरिग्शो नमी तुइक्नीनी।  
 21 आं कली प्रभु, प्रभु देंशा ला स्वर्ग डा राज्य ओव्रचा मताइनीम। स्वर्गमी बाक्ब आं आफ आ दाक्शो पाइबपुकी ला ओव्रचा ताइनीम। रोमी २:१३; याकूब १:२२  
 22 मेको नाक्त शुशेमी आं कली 'हे प्रभु, हे प्रभु, गोपुकीमी इन नेंमी नोले दुम्ब लोत्र मपका डा? इन नेंमी वोल आन कली मखेरका डा? चिन्ड नु छक लाक्चा डा गेय मपका डा?' देंनीम। लूका १३:२५-२७; येरमीया २७:१५  
 23 मोदेब आन कली 'गो इन कली गेनायो मतुडकतन्नी। ए मरिग्शो पाइबपुकी, डोन लने' दे हुइक्नुडमी। मती २५:१२; २तिमोथी २:१९

नेंशो लोत्र पचान माल्ब

- 24 सुमी आं लोत्र नेंशा, आं देंशो पवा, मेको निप्स खाप्शा, खिं सेल्ब खोदेशो बाक्त। मेकोमी आ खिं सेरथे फुल्लु तारी सेल्लु।  
 25 मिनु ठेयब रेड यिशा, भोल यिशा, फशेमी हुरदानु, मेको खिं मब्रे। मारदे हना सेरथे फुल्लु तारी सेल्लो बाक्त।  
 26 सुमी आं लोत्र नेंशा, आं देंशो मपवा, मेको शोर गाक्शो मुर खोदेशो बाक्त। मेकोमी आ खिं बाल्वामी सेल्लु।  
 27 मिनु ठेयब रेड यिशा, भोल यिशा, फश पवानु, मेको खिं ब्रेग्शा योल्त। मिनु मेको के ठेयब खती दुम्त" दे येसुमी शेंदीमी बाक्त।  
 28 येसुमी शेंने थुमानु, मेकेर देल्शो शुश मुरुमी आ शेंशो आ पर्बम छक लाक्मा बाक्त। प्रेरित २:१२  
 29 मारदे हना सास्त्रीपुकीमी शेंशो खोदेशो ममाड, तन्न सक्ति पाइग्शो मुर बुदी शेंदा बाक्त। यूहन्ना ७:१६-४६

## 8

कोर पाइब कली सापाइग्शो

मर्कूस १:४०-४४; लूका ५:१२-१४

- 1 मिनु येसु डांडा रे लेशशा यिमेनु, शुश मुरुमी आ नोले खोदमे बाक्त।

2 मिनू मार दुम्माक्त देशा हना, कोर पाइब का जाकशा, येसु आ डोंइती आ पोक्च थेक्शा “प्रभु, सापाइक्चा दाक्ताक्नी हना, आं कली सापाइक्चने चाप्नीनी” देंमाक्त।

3 मिनू येसुमी आ गुड दिशा, कोर पाइब कली थिशा “गो सापाइक्चा दाक्नुड” देंमेनु, ब्रा सामाक्त।

4 मिनू येसुमी “सुड कली मशोव्रचा, चढेब आ डोंइती लशा, इ साशो रां कोंइदो। मिनू मोसामी मार चढेचा माल्ब देशो बाक्मे, मेको चढेशा, सामाक्त, दे तुडक्पतो” दे मदा बाक्त। मर्कुस ८:३०; लेवी १४:२-३२

कप्तान आ गेय पाइब सापाइश्शो

लूका ७:१-१०; यूहन्ना ४:४६-५३

5 मिनू कापेरनाउम सहर लेश्शा जाक्मेनु, कप्तान का येसु कली गुम्थ पिमाक्त।

6 मिनू “प्रभु, आं गेय पाइब रोइमी गुरशा, आ गुड खोइल मदुक्ब दुम्शा, गोल्शा बाक्शो बाक्ब” दे शोव्रडा बाक्त।

7 मिनू येसुमी “इन खिंमीन पिशा सापाइक्नुड” दे मदानु

8 “प्रभु, श्येत मपने, गो इन कली आं खिं ओंइचा मशिरनुड। लोव्र ला देनीने। मिनू आं गेय पाइब साब।

9 मारदे हना अधिकार तचा दा गो यो अधिकार तशो नड, अधिकार पाइनुड, अधिकारमीन बाक्नुड। गोमी सिपाही का कली ‘लावो’ दे सोइक्तनु, लाइब। का कली ‘पिवो’ दे ब्रेत्तनु, पीब। आं वाइल कली ‘एको गेय पावो’ दे मदनु, पाइब” देंमाक्त।

10 येसुमी मोदेशो नेशा, आ नोले खोइक्ब आन कली “ओहो, नोफा दाइश्शा नेनीने, एको कप्तान खोदेशो थमा सुडक्ब इ इस्माएल जात डा मुर सुड मतडमी। मर्कुस ६:६; लूका १८:३

11 गो मार देनुड देशा हना, नां दाप्तीके नु नां पेरतीके रे शुश मुर जाक्नीम। मिनू स्वर्ग डा राज्यमी ओव्रशा, इ किकी पिपी अब्राहाम, इसहाक नु याकूब नु काथा बाक्नीम। लूका १३:२८-२९

12 एको राज्य डा मुरपुकी चहिं तिल्शा, छिडछिडमी सोइक्चा पुंडसीनीम। मेकेर मुरपुकी आन खुड शेष्शा डाक्नीम” देंमाक्त।

13 मिनू येसुमी कप्तान कली “इन खिं लने, इन थमा सुडश्शो खोदेशो दुम्ल” दे सोइक्ता बाक्त। मो देंमे रे आ गेय पाइब यो सामाक्त। मती ९:२९; मती १५:२८

पत्रुस आ खिंमी

मर्कुस १:२९-३४; लूका ४:३८-४१

14 मिनू येसु पत्रुस आ खिं जाक्दीश्शा ओव्रमेनु, पत्रुस आ शिमी जरो पा गोल्शो तवा बाक्त। १कोरिन्थी ९:५

15 मिनू आ गुड थिवानु, जरोम थु प्रोना बाक्त। मिनू छुल बोक्शा, येसु कली जचा तूचा गेवा बाक्त।

16 में नाक्दो वोलमी सुम्शो शुश मुर आन कली चाक्गमे बाक्त। मिनू वोल आन कली लोव्र रे खेरमी बाक्त। रोड पाइब नेल्ल आन कली सापाइक्मी बाक्त।

17 मो पवानु, साइ नेसी यसेयामी देशो लोव्र “मेकोमी आंइ गुरपाइक्ब रोड लाइक्तु। आंइ रोड नेल्ल कुरतु” देशो लोव्र थमा दुम्माक्त। यसैया ५३:४

निक्शी थुं मपथु, येसु कली खोइक्चा

लूका ९:५७-६०

18 मिनू येसुमी शुश मुर देल्शो तशा “एकेर रे लशा, समुन्द्र शोक्शा आइक्ची हांबु लय” देंमाक्त।

19 मिनू सास्त्री कामी येसु कली “शेंब, तेक तेक लनी, मेक मेक गो यो लाइनुड” देंमाक्त।

20 मिनू येसुमी “फयाउरे आन बाक्तीके ढोडोडगा बाक्ब। चिक्ब आन बाक्तीके ग्योव्र बाक्ब। रागीम जरमेशो के बाक्तीक मबाक्ब” देंमाक्त। २कोरिन्थी ८:९

21 मिनू येसु आ नोले खोइक्ब मुर कामी “प्रभु, डोंइती लशा, आं आफ कली थिम्चा गेयीनी” देंमाक्त। मती १०:३७

22 मिनू येसुमी “आं नोले खोइय्थी। बेक्शो मुरुमी बेक्शो कली थिम्मेक्ल” दे मदा बाक्त।

फश गिवार तेक्शो

मर्कुस ४:३५-४१; लूका ८:२२-२५

23 मिनू समुन्द्र शोक्सीचा कली डोंगाम डोंइसेनु, आ शेंसीबपुकीमी आ नोले खोदमे बाक्त।

24 मिनू शोक्समानु, टेयब फश गिवार पतीके डोंगाम ब्वाक्कु ओव्रशा गुम्चामे बाक्त। येसु चहिं इष्शो बाक्माक्त।

25 मिनू शेंसीबपुकीमी हिंशा येसु कल पोक्शा “प्रभु, गो नेल्ल गुम्शा बेक्चांइतय, है” दे वाइ ब्रेम्मा बाक्त।

26 मिनू येसुमी “मारदे हिंनी? गे थमा पा थमा सुडक्चने मचाप्बपुकी” देशा बोक्शा, फश नु समुन्द्र आस कली हुडक्ता बाक्त। मिनू सिक्सी पाम्से बाक्त। भजन संग्रह ८९:१०; प्रेरित २७:२२,३४

27 मोदेंब पशो तशा “ओहो, एको मुर सु बाक्म माड? फश नु समुन्द्रमी यो आ लोव्र टीबाक्ताक्से” देंमुमा बाक्त।

वोल आन कली खेरशो

मर्कुस ५:१-१७; लूका ८:३६-३७

28 मिनू आइक्ची हांबु शोक्सीशा, गदरीनी आन रागी जाक्दीम्मा बाक्त। मेकेर लांम गाक्मानु, वोलम गपाइश्शो मुर निक्शी गुम्मे बाक्त। मेको निक्शी चहिं बेक्शो मुर वोडक्तीके पुक्खीम बाक्शा, लां गाक्ब आन कली बाप्शा, श्येत गेशा सुड आन कली लचा मगेबाक्सा बाक्त।

- 29 मिनू मार दुम्माक्त देशा हना, मेको निक्कीमी “परमप्रभु यावे आ तौ, गे नु गोपुकी मार पमुइया डा? आंड कली श्येत गेची मजाक्थ, मुल कना श्येत गेथ जाक्नी?” दे ग्रीसा बाक्त। लूका ४:४१; २पत्रुस २:४; याकूब २:१९
- 30 मेकेर आ नेक्था डा डांडामी शुश पोव्र जौन जौन बाक्शो बाक्मा बाक्त।
- 31 मिनू वोलपुकीमी “आंड कली खेरनीनी हना, मेरे पोव्र आन रांमी ओव्रचा गेकी” दे पुन्मे बाक्त।
- 32 मिनू येसुमी “लने” दे सोइक्तीमी बाक्त। मिनू मुर रे यूशा, पोव्रमी ओव्रदीम्मा बाक्त। मिनू पोव्र नेल्ल गशा, डांडा रे यिना यिन समुन्द्रम प्रेक्ना प्रेक्न गुम्शा बेक्मा बाक्त।
- 33 पोव्र योव्रबपुकीमी मो दुम्शो तशा, प्रोक्शा सहरम जाक्दीशशा, मेको वोलम सुम्शो आस कली मार दुम्मे, मेको नेल्ल शोव्रडमे बाक्त।
- 34 मिनू सहर डा मुर नेल्ल येसु कली कोव्रथ जाक्मा बाक्त। मिनू “आंड रागी रे लने” दे पुन्मे बाक्त।

## 9

गुड खोइल मदुक्ब कली सापाइशो

मर्कूस २:१-१२; लूका ५:१७-२६

- 1 मिनू येसु मेकेर रे लशा, डोंगामी डोइशशा समुन्द्र शोक्शा, आ सहरमी जाक्माक्त। मती ४:१३
- 2 मिनू मार दुम्माक्त देशा हना, आ गुड खोइल मदुक्ब मुर का कली आ ब्राख्येमी कुरशा चाक्गमे बाक्त। मिनू येसुमी “मेको मुर कली चाक्बपुकीमी थमा सुइक्कीमी बाक्त” दे तुइशशा, मेको गुड खोइल मदुक्ब कली “आं तौ, इ पाप क्याम्साक्व। मिनू इ थुं बारपतो” दे मदा बाक्त। प्रस्थान ३४:६-७; भजन संग्रह १०३:३
- 3 सास्त्री का निक्कीमी “इ पाप क्याम्साक्व” देशो नेंशा “मेकोमी परमप्रभु यावे कली शुक्शी पाइबाक्माक्त” दे मिम्तमे बाक्त। मती २६:६५
- 4 मिनू येसुमी मेको आन मिम्शो तुइशशा, मेको आन कली “मारदे मरिम्शो मिम्तीनी? यूहन्ना २:२५
- 5 “इ पाप क्याम्साक्व” देंचा देय “छुल बोक्शा एर ओथ हिरशा कोइदो” देंचा तेको सजलो बाक्बा?
- 6 रागीमी जरमेशोमी पाप क्याम्साक्व अधिकार तशो बाक्माक्त, दे गेपुकीमी यो तुइक्तीनील” देशा, गुड खोइल मदुक्ब कली “छुल बोक्शा, इ ब्राख्ये कुरशा खिं लेत्तो” दे मदा बाक्त। यूहन्ना १७:२
- 7 मिनू मेको छुल बोक्शा, आ खिं लेम्माक्त।
- 8 मोदेब दुम्शो तशा, मेकेर देल्शोपुकी हिंमा बाक्त। मिनू मुर आन कली मोदेशो अधिकार गेब परमप्रभु कली ठेयब सुइशशा मान पांमे बाक्त।

मती कली गुम्शो

मर्कूस २:१३-१७; लूका ५:२७-३२

- 9 मिनू येसु मेकेर रे लमेनु, मती माइशशा तिरो पोक्ब मुर का आ अडडाम बाक्शो ताप्तु। मिनू येसुमी “आं नोले खोइय्यी” दे मदानु, मेको छुल बोक्शा, येसु आ नोले खोइक्तु। मती १०:३
- 10 मिनू येसु नु आ शेंसीबपुकी खिंमी जना जन बाक्मानु, तिरो पोक्ब नु पापीपुकी शुश यो मेकोपुकी नु काथा जांमतेक्म।
- 11 मिनू फरिसीपुकीमी मेको नेल्ल आन कली काथा बाक्शा जशो तशा, येसु आ शेंसीब आन कली “मारदे इन शेंबमी तिरो पोक्ब नु पापीपुकी नु काथा बाक्शा जाइबा?” देतेक्म।
- 12 येसुमी मेको आन देशो नेंशा “रोइ मपशो मुर सापाइक्ब ममाल्नीम। रोइ पशो मुर चिं सापाइक्ब माल्नीम। इजीकीएल ३४:१६
- 13 चढ्हेतीक ममाइ, तन्न शिशी पशो तचा दाक्नुड, दे देशो आ अर्थ मार बाक्म, दे शेंसीने। ठीक पाइब आन कली ब्रेथ जाक्शो मनड। पापी आन कली ब्रेथ जाक्शो नड” दे माइक्तीमी। होसे ६:६; मती १२:७; १सामुएल १५:२२; मती १८:११

माइत नु नक मगारब

मर्कूस २:१८-२२; लूका ५:३३-३८

- 14 मिनू यूहन्ना आ शेंसीबपुकी जाक्शा, येसु कली “मारदे गो नु फरिसीपुकी शुश बर्त बाक्नीकी, इन शेंसीबपुकी चिं बर्त मबाक्नीमी?” दे हिल्लो पांमतेक्म। लूका १८:१२
- 15 मिनू येसुमी “जन्तीपुकी ग्युम्ले नु काथा बाक्मानु, हिशेक पा डाक्नीमी डा? काबु ग्युम्ले नु फ्राचा पुंइसीनीम। मिनू मेना बर्त बाक्नीम। यूहन्ना ३:२९
- 16 सुइमी माइत वामी नक वा केप्शा मफेरनीम। फेरतेक्म हना, नक वा चुप्शा, माइत वा कली खाक्शा, डोंइती डा गाक्शो क्येडा ठेयब सेल्ब। रोमी ७:६
- 17 सुइमी माइत कुशुल के थैलोमी नक अडगुर शांबु कुर मपाइनीम। कुर पांमतेक्म हना, शांबु बोरशा, थैलो खाक्शा, क्युप्ब। नक शांबु कली नक थैलोमी कुर पचा माल्ब। मोपा कुर पशोनु, थैलो मगाक्वा, शांबु यो मक्युप्ब” दे शेंताक्मी।

बेक्शो आल कली सेंपाइशो

मर्कूस ५:२१-४३; लूका ८:४०-५६

- 18 मोदेशो शेंना शेंन बाक्मेनु, मेकेर डा गुम्तीक खिं डा ठेयब मुर का जाक्शा, पोक्च थेक्शा बाप्शा “आं तमी बेक्त। गे आं तमी तारी इन गुड वोइक्तीनी हना, ब्रोंडब” दे सेउ पाप्तु।

- 19 मिनू येसु नु आ शेंसीबपुकी मेको आ खिं लाम्तेक्म।  
 20 मिनू मार दुम्त देशा हना, लना लन बाकमानु, १२ बर्स डोंडती रे हुश याप्शा रोइ पशो मीश मुर कामी मेको आन नोले खोइश्शा, येसु आ फेक्शो वा थिवा बाक्त।  
 21 मारदे हना “आ फेक्शो वा थिचा ताता हना, सानुड” दे थमा सुइश्शो बाकमाक्त। मती १४:३६  
 22 मिनू येसुमी फिर लेश्शा कोत्रशा, मेको मीश मुर कली तशा “आं तमी, इ थुं बारपतो। इ थमा सुइश्शोमी साते” दे माइक्तु। मो देंमेनु, आ रोइ ब्रा सामाक्त।  
 23 मिनू ठेयब मुर आ खिं जाक्दीम्मानु, येसुमी शुश मुर देल्शा बाजा ताप्शा, रोंका पा डाकना डाकन बाक्शो ताप्तु।  
 24 मिनू मेको आन कली “कतीने। एको आल बेक्शो ममाइ, इप्शो बाक्ब” दे माइक्तीमी। मेकोपुकीमी “मबाक्शो लोत्र पाइबाक्त” दे शुक्शी पाम्तेक्म। यूहन्ना ११:११, १४, २५  
 25 मेको आन कली सोइश्शा, खिं ओत्रते। मिनू आल आ गुइ ग्याइक्तानु, छुल बोक्त।  
 26 मिनू मेको लोत्र मेको रागी नेल्लेम ब्रम्माक्त।

मिक्च मताइब आस कली सापाइश्शो

- 27 मिनू येसु मेकेर रे लमेनु, मिक्च मताइब निक्शीमी “ए दाऊद पिप आ तौ, आंस कली शिशी पाइस्की” दे रेयके पा वाइ ब्रेश्शा, आ नोले खोइक्ताक्स। मती २०:३०  
 28 मिनू खिं ओत्रमेनु, मेको निक्शी यो ओत्रताक्स। मिनू येसुमी “गो इस कली सापाइक्ने चाप्न्सी, दे थमा सुइक्नीसी?” देंमेनु “थमा सुइक्नस्कु, प्रभु” देंताक्स। प्रेरित १४:९  
 29 मिनू येसुमी आस मिक्च थिशा “इस थमा सुइश्शो बुदी दुम्ल” देंत। मती ८:१३  
 30 मिनू मिक्च ताइब दुम्ताक्स। मिनू “एको लोत्र सुइ कली मशोत्रडीसे” दे सोइक्ताक्म्सी। मती ८:४  
 31 तन्न मेको निक्शीमी चहिं आस रागी डा मुर नेल्ल आन कली येसु आ पशो तुइक्पदसे बाक्त।

वोलम सुम्शो लाटा कली सापाइश्शो

- 32 मिनू येसु नु आ शेंसीबपुकी मेको खिं रे गूशा लमानु, मार दुम्त देशा हना, वोलमी सुम्शो लाटा का चाक्तेक्म।  
 33 मिनू येसुमी वोल कली गुंडताक्व। मिनू मेको मुरुमी लोत्र पाप्तु। मिनू मेकेर बाक्बपुकीमी छक लाक्शा “इं इस्राएलमी ओदेशो दुम्शो गेनायो मतशो नय” देंमुम्तेक्म।  
 34 फरिसीपुकीमी चहिं “वोल आन पिप आ नें थिशा, वोल आन कली गुंडबाक्त” देंतेक्म। मती १२:२४-३२

बाली नाली रुक्बपुकी माल्शो

- 35 येसु गालील रागी डा सहर गाउं नेल्ल हिरना हिरन गुम्तीक खिंमी मुर आन कली स्वर्ग डा राज्य डा लोत्र शेंना शेंन, रोइमी गुरशो नु रोइ पशो मुर नेल्ल आन कली सापाइक्ना पाइक्न गाक्त।  
 36 शुश मुर आन कली तशा, शिशी पाइक्तीमी। मारदे हना गोठला मबाक्शो भेडापुकी खोदेशो पा दशो बाक्मा बाक्त। १राजा २२:१७; इजीकीएल ३४:५; मर्कूस ६:३४  
 37 मिनू आ शेंसीब आन कली “बाली नाली रुक्पा माल्शो शुश बाक्ब। रुक्ब मुर चहिं का निक्शी ला बाक्नीम।  
 38 मोपतीके ‘रुक्पा कली मुर योत्रशा सोइक्तीने’ दे बाली नाली आ परमप्रभु कली पुनीने” दे माइक्तीमी। लूका १०:२

## 10

शेंसीब आन कली ब्रेश्शो

- मर्कूस ६:७; मर्कूस ३:१३-१९; लूका ९:१; लूका ६:१२-१६  
 1 मिनू आ शेंसीब १२ जना आन कली खुप्शा, वोल आन कली गुंडशा, खेरतीक, रोइमी गुरशो नु रोइ पाइब आन कली सापाइक्तीक अधिकार गेम्तीमी।  
 2 मोदेशो अधिकार ताइब आन कली “सोइश्शोपुकी” दे यो देंसीब। मेकोपुकी सु सु बाक्तेक्म देशा हना, पत्रुस माइश्शो सिमोन नु आ दायु अन्द्रीयास, जब्दी आ तौ याकूब नु यूहन्ना, मर्कूस ३:१६-१९; लूका ६:१४-१६; प्रेरित १:१३  
 3 फिलीप नु बारथोलोमाइ, थोमास, तिरो पोक्ब मती, अल्फयस आ तौ याकूब, थदेयस,  
 4 कनानी सिमोन नु इस्कारीयोत डा यहूदा बाक्तेक्म। मेको यहूदा नोले येसु कली साइक्चा, दे माल्ब आन कली वारच पाइब दुम्बाक्माक्त।

शेंसीब आन कली सोइश्शो

- मर्कूस ६:७-१३; लूका ९:२-६  
 5 येसुमी आ १२ जना शेंसीब आन कली सोइश्शा, मेको आन कली “अर्को जात डा मुर आन रागी मलने। सामरीया डा मुरपुकी आन रागी यो मलने।  
 6 तन्न गोठला मबाक्शो, लां जाम्शो भेडा खोदेशो, इं इस्राएली आन बाक्तीके लने। मती १५:२४; प्रेरित १३:४६  
 7 ‘स्वर्ग डा राज्य जाक्चशो बाक्त’ दे शेंदीने। लूका १०:१-१२; मती ४:१७  
 8 रोइ पाइब आन कली सापतीन। बेक्शो मुर आन कली सेंपतीन। कोर पाइब आन कली सापतीन। वोल आन कली गुंडशा खेरीन। मेको नेल्ल मोशा ताइतीनी। मिनू मोशा गेने। मर्कूस १६:१७  
 9 सुन चांदी तांबा का यो मकुरीन। प्रेरित २०:३३

10 लां कली फेक्तीक वा, जुता जोड निक्शी, झोला नु कोक्के मकुरीन। मारदे हना गेय पाइबपुकीमी जचा गेचा पुंडसीनीम। गन्ती १८:३१; १कोरिन्थी ९:१४; १तिमोथी ५:१८

11 सहर गाडे तेड जाक्दीन्नीनु, रिम्शो थुं पाइश्शो मुर आ खिं हिल्लो पा बाक्थ लने। मिनु बास गेम्तेक्म हना, गाक्ची मजाक्म सम्म बाक्कीन।

12 मिनु खिं ओवनीनु 'परमप्रभु यावेमी इन कली रिम्शो पवल' दे आसीक गेने।

13 मेको खिंमी रिम्शो थुं पाइश्शो मुर बाक्तेक्म हना, आसीक रशा, आन थुं नाइक्चा ताइनीमी। मोदेशो मुर मबाक्तेक्म हना चहिं मेको आन रचा डा आसीक गे राइनीमी।

14 मुरपुकीमी इन लोव्र मनंथु, बास मगेम्तेक्म हना, इन खोइल डा फुरक थुर थुर पाइश्शा गाक्कीन। प्रेरित १३:५१

15 नोफा दाइश्शा नेनीने, निसाफ पची नाक्त सोदोम नु गोमोररा सहर निक्शीमी बाक्ब मुर आन क्येडा इन लोव्र मनंभे मटीबपुकीमी शुश सजाइ ताइनीमी। उत्पती १९:१-२९

थमा सुइक्बपुकी खेदा पचा पुंडसीनीम

मर्कूस १३:९-१३; लूका २१:१२-१७

16 भेडा आन कली फर आन दातेम सोइश्शो खोदेशो पा सोइक्नन्नी। बुस्स खोदेशो पा निप्स पाइश्शो दुमीने। मिनु परवा खोदेशो दुम्शा, सुइ कली मरिम्शो मपने। लूका १०:३; रोमी १६:१९; एफिसी ५:१५

17 होस पा गाक्कीन। मारदे हना मेको फरपुकीमी इन कली सभा कछडीम वोइक्नीम। ग्रुम्तीक खिंमी लाइश्शा युक्नीम। प्रेरित ५:४०; २कोरिन्थी ११:२४

18 इन कली श्येत गेबपुकी नु अर्को रागी डा मुर आन डोइती सांकछी दुम्चा कली ठेयब मुर नु पिप आन डोइती राप्पाइक्नीम। प्रेरित २५:२३; प्रेरित २७:२४

19 इन कली मोपा राप्पदमेनु, मार लोव्र पका? मार देका? दे सुर्ता मपने। मार देंचा माल्बा, मेको लोव्र तुइक्पाइक्चा पुंडसीनीमी। प्रस्थान ४:१२; लूका १२:११-१२; प्रेरित ४:८

20 मारदे हना गे इन थुं रे पिशो लोव्र मपाइनीमी, तन्न इन आफ आ सोक्तीमी इन शोव्र रे पा लोव्र पाइब। १कोरिन्थी २:४

21 लोकबमी आ लोकब कली साइक्पाइक्चा गेब। आफोमी तमी तौ आन कली नु तमी तौपुकीमी यो आम आफ कली मरिम्शो पा साइक्पाइक्नीम। मीका ७:६

22 आं नें आ पबंम नेल्लेमी इन कली मदाक्नीम। तन्न सु सुमी चहिं नोले सम्म फाल्शा बाक्नीमी, मेकोपुकी परमप्रभु यावे नु ब्रोंडशा बाक्चा ताइनीमी। २तिमोथी २:१२; मती २४:९-१३

23 सहर कामी खेदा पाप्तेक्म हना, प्रोक्शा अर्को सहरमी जाक्दीश्शा बाक्कीन। नोफा दाइश्शा नेनीने, रागीम जर्मेशो मजाक्म सम्म ड्साएल डा सहर नेल्ल हिरशा मग्रुम्नीमी। प्रेरित ८:१; मती १६:२८

श्येत गेब आन कली तशा महिंचा

24 शेंब क्येडा शेंसीब नु होव्रप क्येडा गेय पाइब ठेयब मनमी। लूका ६:४०; यूहन्ना १३:१६; यूहन्ना १५:२०

25 शेंब नु शेंसीब, होव्रप नु आ गेय पाइब कांडचीक दुम्ने चाप्नीम। खिं डा ठेयब मुर कली बेल्जीबुल, दे शुक्शी पाइक्तेक्म हना, आ खिं डा मुर आन कली शुक्शी मपाइनीमी डा? मती १२:२४

26 मोपतीके मेको आन कली तशा महिनीन। मुल सम्म सुम्शा वोइश्शो नोले नेल्ल हाक्सीशा तांडसीब। मुल खुइश्शा वोइश्शो नोले तुंडसीब। लूका १२:२-९; मर्कूस ४:२२; लूका ८:१७

27 गोमी इन कली छिडछिडमी माइश्शो लोव्र छेडछेडमी मतीने। इन कली नोफाम देशो लोव्र नोले ठेयब सेंदा पा नेंपतीने।

28 इन रां कली साइक्ने चाप्ब। तन्न इन सोक्ती कली साइक्ने मचाप्बपुकी आन कली तशा महिनीन। रां नु सोक्त निम्फा नरकमी खतम पने चाप्ब कली तशा चहिं हिनीन। हिब्रू १०:३१; याकूब ४:१२

29 अस्सारीयोन कामी भंगेरा निक्शी मग्याम्सीबा डा? मो हना यो इन आफोमी मदेंथु, का यो खपीम मदोक्ब।

30 इन पिया डा चां का का पा हिक्शा, गिश बाक्मा, दे तुइश्शो बाक्ब। अस्सारीयोन का आइक्च तांबा के क्येट बाक्त। प्रेरित २७:३४

31 मोपतीके महिनीन। गे भंगेरा क्येडा शुश हिक्सीशो बाक्नीमी। मती ६:२६

32 सुमी मुर आन कली 'येसु आ मुर नड' देंबा, गो यो स्वर्गम बाक्ब आं आफ कली 'एको आं मुर बाक्ब' देंनुड। प्रकाश ३:५

33 सुमी चहिं मुर आन कली 'येसु सु में? मतुइक्नुड' देंबा, गो यो स्वर्गम बाक्ब आं आफ कली 'मेको कली मतुइक्नुड' देंनुड। मर्कूस ८:३८; लूका ९:२६; २तिमोथी २:१२

येसु आ पबंम मुर ब्रानीम, दे शेंशो

34 रागीमी नेल्ल आन कली गारपाइक्थ जाक्शो बाक्ब, दे आं पबंम ममिम्तीने। दुपाइक्चा कली ममाइ, तन्न तरवार ग्यारपाइक्थ जाक्ती। लूका १२:५१-५३; मीका ७:६

35 मारदे हना आ पबंम तौ नु आफ, तमी नु ममा, चाइमी नु शिमी जिमुशा ब्रानीम।

36 मोदेशो पा आंम खिं डा मुर जोरी सत्रु दुम्नीम।

37 आं क्येडा आन आम आफ कली दाक्बपुकी आं नोले खोइक्चा मशिरनीम। आं क्येडा आन तमी तौ आन कली दाक्बपुकी यो आं नोले खोइक्चा मशिरनीम। ब्यवस्था १३:७-१२; ब्यवस्था ३३:९; लूका १४:२६-२७

38 सुमी आं नोले खोइशशा, श्येत फाल्ने मचाप्बा, मेको आं नोले खोइक्का मशिरब। मती १६:२४-२५  
 39 आंम कली प्रोइचा दाक्ब जाम्शा लाइब। आं पर्वम जाम्शा लाइब चहिं ब्रोंइचा ताइब। लूका ९:२४; यूहन्ना १३:२०;  
 गलाती ४:१४

रिम्शो पाइबमी इनाम ताइब

40 इन कली ब्राइबमी आं कली ब्राइब। मिनु आं कली ब्राइबमी आं कली सोइक्ब कली यो ब्राइब।  
 41 परमप्रभु यावे आ लोत्र पाइब बाक्माक्त, दे मिम्शा, परमप्रभु यावे आ लोत्र पाइब कली ब्राप्तु हना, परमप्रभु यावे  
 आ लोत्र पाइब आ तचा डा इनाम मेकोम ताइब। ठीक पाइब मुर बाक्माक्त, दे मिम्शा, ठीक पाइब मुर कली ब्राप्तु हना,  
 ठीक पाइब आ तचा डा इनाम मेकोम ताइब। १राजा १७:८-२४  
 42 नोफा दाइशशा नेनीने, सुमी महिकसीशो मुर का कली 'एको यो शेंसीब का बाक्माक्त' दे मिम्शा, लोटा का ब्वाक्कु  
 तूचा गेबा, मेकोमी दोपा यो आ तचा डा इनाम मसाम्ब" दे शेंताक्मी। मती २५:४०; मर्कूस ९:४१

## 11

शेंसीब आन कली शेंथ सोइशशो

लूका ७:१८-२३

1 आ १२ जना शेंसीब आन कली मेको लोत्र शेंने थुम्शा, येसु मेकेर रे लशा, सहर सहरम हिरशा, शेंना शेंन गाक्त।  
 2 मिनु येसु शेंना शेंन गाक्मेनु, यूहन्ना जेल्खानमी बाक्माक्त। मिनु ख्रीस्तमी पशो गेय आ पर्वम नेंशा, आ शेंसीब आन  
 कली मती १४:३  
 3 "गे जाक्चा माल्लो बाक्नीनी देय अर्को कली लां कोव्रका?" दे हिल्लो पथ सोइक्तीमी बाक्त। मती ३:११; मलाकी  
 ३:१  
 4 मिनु मेकोपुकी जाक्शा, हिल्लो पामेनु, येसुमी "गे मार मार नेंनी, मार मार तनी, यूहन्ना कली मतीने  
 5 'मिक्च मताइबपुकीमी मिक्च ताइबाक्तेक्म, खोइल मदुक्बपुकी गाक्बाक्तेक्म, कोर पाइब साबाक्तेक्म, नोफा  
 मनैबपुकी नेंबाक्तेक्म, बेक्शो मुर बेक्शो रे सेंसीशा ब्रोंइबाक्तेक्म। महिकसीशो मुरपुकीम ग्येरपाइक्ब लोत्र नेंबाक्तेक्म'  
 यसैया ३५:५-६; यसैया ६१:१  
 6 सु सुमी आं कली तशा थुं मखाइक्पाइक्नीम, मेकोपुकी ग्येरसमल, दे मतीन" दे लेशशा सोइक्ताक्मी। मती १३:५७;  
 मती २६:३१

यूहन्ना आ पर्वम शेंशो

लूका ७:२४-३५

7 मिनु मेकोपुकी लमा नोले, येसुमी मुर आन कली यूहन्ना आ पर्वम "साइ गोरशो रागीमी मार कोव्रथ लनी? फशेम  
 हिम्शो किन्दा कोव्रथ लनी? मती ३:१,५  
 8 मिनु मार कोव्रथ लनी? दारशो वा फेक्शो मुर ताइसीबा कों, दे कोव्रथ लनी? नेनीने, दारशो वा फेक्ब पिप आन  
 खिमी बाक्नीम।  
 9 गेपुकी मार कोव्रथ लनी, मिनु? परमप्रभु यावे आ लोत्र पाइब ताइसीबा कों, दे कोव्रथ लनी? गे नेल्ल आन क्येडा  
 ठेयब परमप्रभु यावे आ लोत्र पाइब ताइतीनी, दे इन कली देनुड। लूका १:७६; लूका २०:६  
 10 परमप्रभु यावेमी ब्रेक्पाइशशो लोत्रमी मेको आ पर्वम मार ब्रेक्शो बाक्ब देशा हना 'गो आं लोत्र कुरब ड डोंडोंइती  
 सोइक्नुड। मेकोमी इ लां ठीक सेल्ब' दे ब्रेक्शो बाक्ब। मलाकी ३:१  
 11 नोफा दाइशशा नेनीने, रागी नेल्लेमी ब्वाक्कुम खुम्शा गुंडब यूहन्ना खोदेशो ठेयब सुइ मबाक्ब। स्वर्ग डा राज्यमी  
 चहिं नेल्ल क्येडा यो आइक्च यूहन्ना क्येडा ठेयब बाक्ब। मती १३:१७  
 12 यूहन्नामी मुर आन कली शेंशा, ब्वाक्कुम खुम्शा गुंडदा रे मुल सम्म स्वर्ग डा राज्य ओव्रशा, आन के सेल्चा, दे दाम  
 पा मुना मुन बाक्नीम। लूका १६:१६  
 13 साइ नेसी परमप्रभु यावे आ लोत्र पाइब नेल्लेमी नोले दुम्ब लोत्र पा यूहन्ना आ पर्वम ब्रेक्शो बाक्तेक्म।  
 14 जाक्चा माल्लो एलीया सु बाक्बा, दे तुइक्चा दाक्ताक्नी हना, मेको यूहन्ना बाक्ब। मती १७:१०-३०; मलाकी  
 ३:२३  
 15 सु नोफा पाइशशो बाक्मे, मेकोमी नेंनल।  
 16 सिनाक्त मुलाक्त डा मुर दोदेशो बाक्नीम देशा हना, बजारमी ग्यारब आलपुकीम  
 17 'ताप्तीक ताप्कानु, गे सिल मपनी, रोंका पा डाक्कानु, गे मडाक्नी' दे ब्रेम्मुशो खोदेशो बाक्नीम। यूहन्ना ५:३५  
 18 मारदे हना यूहन्नामी बर्त बाक्शा, शांबु राकसी मतूडानु, वोलम सुम्शो मुर बाक्माक्त देनीम। मती ३:४  
 19 रागीम जरमेशोमी चहिं जचा तूचा थोव्रक नेल्ल जाइब तूब। मेको कली तशा 'धोक्त्रे, शांबु राकसीमी दुक्ब, तिरो  
 पोक्ब नु पापी आन वारच बाक्माक्त' देनीम। मेको के दोशो तुइक्तीक बाक्मे, मेको आ गेय रे पा तुंडसीब" दे येसुमी मुर  
 आन कली शेंताक्मी। मती ९:१०-१५; यूहन्ना २:२; १कोरिन्थी १:२४-३०

गालील डा सहर सजाइ ताइनीम

लूका १०:१३-१५

20 येसुमी शुश छक लाक्चा डा गेय नु चिन्ड कोंइशा यो सहर डा मुरपुकी आन थुं परमप्रभु यावे गे मलेत्तेम। मोपतीके  
 ओदें हुइक्ताक्मी

21 “ए खोराजीन, ए बेथसैदा, गेमी तशो छक लाकचा डा गेय नु चिन्ड टायर नु सीदोन डा मुरपुकीमी तशो नम हना, साड कना भाडरा फेक्शा, पुलु खेक्सीशा, आन थुं परमप्रभु यावे गे लेत्तेम वा। जोना ३:६

22 निसाफ पची नाक्त गेपुकी टायर नु सीदोन डा मुर आन क्येडा शुश सजाड ताइनीम, दे इन कली देंनुड।।

23 ए कापेरनाउम, मार गे स्वर्ग सम्म क्युक्सीनेवे डा? नरकम तोक्चा पुंडसीनेवे। मारदे हना गेमी तशो छक लाकचा डा गेय नु चिन्ड सोदोम डा मुरपुकीमी तशो नम हना, आन थुं परमप्रभु यावे गे लेशशा सजाड रे ब्रोंडचा ताम वा, मिनु सहर मुल सम्म ली वा। मती ४:१३; मती ८:५; मती ९:१; यसेया १४:१३,१५

24 निसाफ पची नाक्त सोदोम डा मुर आन क्येडा कापेरनाउम सहर डा मुरपुकीमी शुश सजाड ताइनीम, दे इन कली देंनुड” दे हुडक्ताक्मी। मती १०:१५

येसुमी मुर आन कली ब्रेशो

25 काबु येसुमी “आं आफ, सरीड नु रागी डा परमप्रभु, गे नेल्ल क्येडा ठेयब ननी। गे शुश रिम्शो पाइतीनी। जोक्ब तुडक्ब नड, दे मिम्ब आन कली इन लोत्र मरुप्तीक थुं गेतीनी। मजोक्ब मतुडक्ब आन कली रुप्तीक थुं गेतीनी। यसेया २९:१४; लूका १०:२१-२२; यूहन्ना १७:२५; १कोरिन्थी १:२८-२९

26 आं आफ, गे मोदेशो पचा दाक्ताक्नी।

27 आं आफोमी मारड मारड तुडक्पाइक्ती। सुडमी आं कली, आ तौ कली मतुडक्नीम। आं आफोमी ला तुडक्ब। सुडमी आं आफ कली मतुडक्नीम। आ तौमी ला तुडक्ब। मिनु तौमी सु सु आन कली योव्रडमी, मेको आन कली आ आफ आ पर्वम तुडक्पाइक्ब। मती २८:१८; यूहन्ना ३:३५; यूहन्ना १७:२; फिलिप्पी २:९

28 गे श्येत जशो नु भारीम चिप्चा पुंडसीशोपुकी, आं गे जाक्कीन। मिनु नाइक्चा गेनन्नी। मती १२:२०; मती २३:४; येरमीया ३१:२५

29 आं जवा लाम्सीशा, गो नु शेंसीने। मारदे हना गो शिशी पाइब नु ब्रेम्शो थुं डा नड। मिनु गे इन थुं नाइक्चा ताइनीनी। यसेया २८:१२; येरमीया ६:१६

30 आं जवा ग्युप्चा डा बाक्ब। आं भारी कुरने चाप्चा डा बाक्ब” देंत। लूका ११:४६; १यूहन्ना ५:३

## 12

नाइक्तीक नाक्त डा लोत्र

मर्कूस २:२३-२८; लूका ६:१-५

1 काबु नाइक्तीक नाक्त येसु नु आ शेंसीबपुकी चेरब रू डा लां लना लन बाक्मानु, शेंसीबपुकी शोत्रलु बेक्शा, चेरब बाला शोइशशा नोक्शा जाम्तेक्म। ब्यवस्था २३:२६

2 फरिसीपुकीमी मेको आन मो पशो तशा, येसु कली “कोव्रडीने, इन शेंसीबपुकीमी नाइक्तीक नाक्तीम पचा मटुम्शो गेय पाम्तेक्म” देंतेक्म। प्रस्थान २०:१०

3 मिनु येसुमी मो देंब आन कली “दाऊद नु आ वारचपुकी शोत्रलु बेक्मानु, मार पामे, दे परमप्रभु यावेमी ब्रेक्पाइशशो लोत्र मपढेनी? १सामुएल २१:७

4 दोपा दाऊदमी परमप्रभु यावे आ खिंमी ओव्रशा, परमप्रभु यावे कली चढेशो शोब्ले शोल्शा योक्शा जामे? मेको चढेशो शोब्ले चढेबपुकीमी ला जचा दुम्बाक्माक्त। अरु मुरपुकीमी जचा मटुम्ब बाक्माक्त। लेवी २४:९

5 नाइक्तीक नाक्त चढेबपुकीमी परमप्रभु यावे आ खिंमी चढेनीम। मेकोपुकीमी गेय पाइनीम। मेकोपुकी चहिं दोस गेचा मपुंडसीनीम। परमप्रभु यावेमी ब्रेक्पाइशशो एको लोत्र यो मपढेनी?

6 एकर परमप्रभु यावे आ खिं क्येडा ठेयब मुर का बाक्ब, दे इन कली देंनुड।।

7 “चढेतीक ममाइ, शिशी पशो तचा दाक्नुड” देंशो परमप्रभु यावे आ लोत्र आ अर्थ रुप्तीनी हना, दोस गेचा मपुंडसीब आन कली दोस मगेनी वा। होसे ६:६; मती ९:१३

8 रागीमी जरमेशो चहिं नाइक्तीक नाक्त मार पचा, मार मपचा अधिकार पाइब बाक्ब” दे माइक्तीमी।

नाइक्तीक नाक्त सापाइशशो

मर्कूस ३:१-६; लूका ६:६-११

9 मिनु येसु मेकेर रे लशा, मेको आन गुम्तीक खिंमी जाक्दीशशा ओव्रत।

10 मिनु मेकेर गुड सोव्रशो मुर का बाक्त। मेकोपुकीमी येसु कली दोस गेचा माल्शो बाक्मा बाक्त। मोपतीके “नाइक्तीक नाक्त सापाइक्तीक गेय पचा दुम्बा?” दे हिल्लो पखु पा योव्रकी पाम्तेक्म।

11 मिनु येसुमी “सुड इन के कांडचीक भेडा नाइक्तीक नाक्त खाल्टाम बिक्त हना, मेको कली कीशा मयुंडनीनी डा? लूका १४:३-५

12 भेडा का क्येडा मुर ठेयब ममाइ डा? मोपतीके नाइक्तीक नाक्त मुर आन कली शिशी पा रिम्शो पचा इं कानुन डा लोत्र नु गारब” दे माइक्तीमी।

13 मिनु गुड सोव्रशो मुर कली “इ गुड दिंदो” दे माइक्तु। मिनु मेकोमी गुड दिंसेनु, ब्रा साशा, अर्को गुड खोदेशो दुम्त।

14 मिनु फरिसीपुकीमी मेकेर रे गूशा खुम्सीशा “मेको कली दोपा साइक्चा ताइनया?” दे लोव्रसी पाम्तेक्म। यूहन्ना ५:१६

परमप्रभु आ गेय पाइब

मर्कूस ३:७-१२; लूका ६:१७-१९



15 मिनू येसुमी मेको आन लोत्र पशो तुइशशा, मेकेर रे गाक्त। मिनू शुश मुरुमी आ नोले खोइक्तेक। मेकोपुकी रोइ पाइबपुकी यो बाक्तेक। मेको नेल्ल आन कली सापाइक्तीमी।

16 सापाइशशा “सुइ कली मतुइक्पाइय्नीनी” दे माइशशा सोइक्ताक्मी। मती ८:४

17 मोदेशो पा साइ नेसी परमप्रभु यावे आ लोत्र पाइब यसैयामी देशो लोत्र थमा दुम्पाइक्तु।

18 यसैयामी मार देशो बाक्त देशा हना “आं गेय पाइब कली कोवडीन। एको कली योत्रता। मिनू एको कली दाक्नुड। एको कली तशा शुश ग्येरसीनुड। आं सोक्तीम प्रिंशा, अर्को रागी डा मुर आन कली दोपा ठीक दुम्चा, दे तुइक्पपाइक्व। प्रेरित ३:१३, २६; मती ३:१७

19 मेकोमी जिचा मपोक्व। शुश रेयके मपाइब। लां पित्थ आ सेंदा मनेसीब।

20 जिक्चशो किन्दा मजिक्व, काप्चशो मी मकाप्ब। ठीक पतीकेमी मग्राम सम्म मोदेशो पना पन बाक्त।

21 अर्को रागी डा मुरपुकीमी मेको आ नेमी आस पा बाक्नीम” दे ब्रेक्शो बाक्व। यसैया ४२:१-४

वोल गुंडतीक अधिकार कोइशो

मर्कूस ३:२२-२७; लूका ११:१४-२३

22 मिनू मिक्च मताइब, नोका मनेब, मबवाक्व चोलम तशो मुर का चाक्तेक। मिनू येसुमी मेको कली सापाइक्तु। मिनू मिक्च ताप्तु, लोत्र यो पाप्तु।

23 मेकेर देशोपुकीमी “ओहो, एकोन दाऊद आ तौ बाक्म कोर में?” देमुम्तेक। मती २१:९; यूहन्ना ७:४२

24 फरिसीपुकीमी चहिं मेको आन देशो नेशा “वोल आन पिप बेल्जीबुल आ सक्तिम कका वोल आन कली गुंडशा खेरबाक्माक्त” दे मिम्शा लोत्र पामे बाक्त।

25 मिनू येसुमी मेको आन मिम्शा लोत्र पशो तुइशशा, मेको आन कली “राज्य का डा मुरपुकी जिशा ब्राशा गाक्तेकम हना, राज्य जाम्शा लाइब। सहर का डा मुरपुकी जिशा ब्राशा गाक्तेकम हना, सहर नुब। खिं का डा मुरपुकी यो जिम्तेकम हना, मेको खिं मलीब। मती ९:३४

26 सैतानमी सैतान कली खेरतु हना, मेकोपुकी ब्रानीम। मिनू आ राज्य दोपा लीबा डा?

27 गो बेल्जीबुल आ सक्तिम वोल आन कली खेरतामी हना, इन तौपुकीमी सु आ सक्तिम खेरमे? मेकोपुकीमी गे इन कली निसाफ पाइनीम।

28 गोमी परमप्रभु आ सोक्तीमी वोल आन कली खेरनुड हना, परमप्रभु यावे आ राज्य जाक्शो बाक्माक्त, दे तुइक्तीन। १यूहन्ना ३:८

29 नेनीने, बोल्यो मुर आ खिं खुइ पाइबमी डोंइती मेको खिं डा मुर कली ग्याइशशा फ्रेशा मवोइक्तु हना, आ खिं डा मारेइ मारेइ दोपा लाइक्ने चाप्बा डा? पाइशशा नोले ला मेको आ खिं डा मारेइ मारेइ लाइक्ने चाप्ब। मती ४:१-११; यसैया ४९:२४

30 गो नु मगारब आं जोरी सत्रु दुम्नीम। गो नु गारशा मखुप्बमी आं खुप्चो यो फ्रशा ताइक्व। मर्कूस ९:४०

31 मोपतीके गो इन कली मार देनुड देशा हना, मुरपुकीमी पाप पा, परमप्रभु यावे कली शुक्शी लोत्र पाम्तेकम हना, माफ गेचा पुंडसीनीम। परमप्रभु यावे आ सोक्त आ परबम शुक्शी लोत्र पशो पाप चहिं मक्याम्सीब, दे इन कली देनुड। मर्कूस ३:२८-३०; लूका १२:१०; १यूहन्ना ५:१६; हिब्रू ६:४-६; हिब्रू १०:२६

32 रागीम जरमेशो आ परबम शुक्शी लोत्र पाम्तेकम हना, माफ ताइनीम। तन्न सुमी परमप्रभु यावे आ सोक्त आ परबम शुक्शी लोत्र पाइबा, मेको आ पाप मुल मक्याम्सीब, बेक्शा लशा नोले यो मक्याम्सीब, गेना हना यो लीब। १तिमोथी १:१३

ब्रोत्रशो नु मब्रोत्रशो फल रवा

लूका ६:४३-४५

33 ब्रोत्रशो फल सिप्ब रवा खुम्तीनी हना, ब्रोत्रशो फल सिप्ब। मब्रोत्रशो फल सिप्ब रवा खुम्तीनी हना, मब्रोत्रशो फल सिप्ब। फल थाम्शा रिम्शो रवा बाक्म, दे मरिम्शो रवा बाक्म मेको तुंडसीब। मती ७:१६-१८

34 ए बुम्स आ खलकपुकी, गे मरिम्शो थुं पाइशशो ननी। मिनू इन शोत्र रे दोपा रिम्शो लोत्र यूबा डा? थुं मारम ब्रीशो बाक्मे, मेकोन लोत्र पा यूब। मती ३:७

35 रिम्शो थुं पाइशशो मुरुमी रिम्शो लोत्र पाइब। मरिम्शो थुं पाइशशो मुरुमी मरिम्शो लोत्र पाइब।

36 निसाफ पची नाक्त मुर नेल्लेमी आन हेंथे पशो लोत्र का का पा शोत्रचा मालनीम, दे इन कली देनुड। याकूब ३:६; यहूदा १५

37 मोपतीके होस पा बाक्कीन। मारदे हना इन पशो लोत्रमीन दोस गेचा नु ठीक सुइक्चा पुंडसीनीनी” दे माइक्तीमी।

चिन्ड कोत्रकोत्र दाक्शो

मर्कूस ८:११-१२; लूका ११:२९-३२

38 मिनू सास्त्री नु फरिसी का निकशीमी “शेंब हजुर, चिन्ड का कोइदीकी” देतेकम।

39 मिनू येसुमी “मरिम्शो थुं पाइशशो नु थमा मसुइक्वपुकीमी चिन्ड कोत्रकोत्र दाक्नीम। मेको आन कली परमप्रभु यावे आ लोत्र पाइब योना आ चिन्ड डा लाक्शा मारेइ चिन्ड मकोइनुडमी।

40 योना नाक्त सां सम्म डाइ आ कोत्रजम बाक्शो खोदेशो पा, रागीम जरमेशो यो नाक्त सां सम्म रागी आ कोत्रजम बाक्व। योना २:१; एफिसी ४:९; १पत्रुस ३:१९

41 निसाफ पची नाक्तीम निनवे सहर डा मुरपुकी बोक्शा, एको पाला डा आन कली दोसी सुडक्नीम। मारदे हना मेकोपुकीमी योना आ लोव नेंशा, आन थुं परमप्रभु यावे गे लेत्ताकम। नेनीने, एकेर का योना क्येडा ठेयब बाक्ब। जोना ३:५

42 निसाफ पची नाक्त लुकच रागी डा पिपीम बोक्शा, एको पाला डा मुर आन कली दोसी सुडक्ब। मारदे हना मेकोमी डोन रे कुशा, पिप सोलोमनमी दोदेशो निप्स पा हुकुम पवा, दे कोव्रथ जाक्माक्त। नेनीने, एकेर सोलोमन क्येडा ठेयब का बाक्ब। १राजा १०:१-१०

वोल यूशा लशा यो लेन्ने चाप्ब

लूका ११:२४-२६

43 मुर रे वोल कली गुंडशा खेरमेनु, ग्राना दिचा डा वोल यूशा लशा, ब्वाक्कु मबाक्तीकेमी नाइक्तीके मालथ गाक्ब। माल्शा यो नाइक्तीके मथीब।

44 मिनु 'डोंडती आ बाक्तीकेमीन लेत्नुड' दे लेशशा जाक्ब। मिनु लेशशा जाक्मेनु, बाक्तीके फिकशा, सिल्शा श्येत्य वोडशशो थिप्ब।

45 मिनु आ क्येडा ग्राना दिचा डा उ ओटा वोल आन कली मालथ लशा चाक्ब। मिनु ओव्रशा बाक्नीम। मिनु डोंडती क्येडा मेको मुर शुश मरिम्शो दुम्ब। एको मरिम्शो पाला कली मोदेशो दुम्ब" दे माडक्तीमी। २पत्रुस २:२०

येसु आ खिं डा मुर

मर्कूस ३:३१-३५; लूका ८:१९-२१

46 येसुमी मेको लोव पना पन बाक्मेनु, आ ममा नु आ लोकबपुकी गुम्थ जाक्मा बाक्त। मती १३:५६

47 मिनु मुर कामी "इन ममा नु लोकबपुकी गुम्थ जाक्तेकम" देंत।

48 मिनु येसुमी मो देंब कली "आं ममा नु आं लोकबपुकी सु नमी?" मती १०:३७; लूका २:४९

49 देंशा, आ गुड आ शेंसीबपुकी गे शुक्शा "कोव्रडीने, एकोपुकी आं ममा नु आं लोकबपुकी नम। हिब्रू २:११

50 मारदे हना स्वर्गम बाक्ब आं आफ आ दाक्शो पाडबपुकीन आं ममा नु लोकबपुकी नम" देंत। रोमी ८:२९

## 13

वांचेर शोक्शो कथा

मर्कूस ४:१-९; लूका ८:४-८

1 मेको नाक्त येसु खिं रे गाक्शा, समुन्द्र आ नेक्था लशा निस्साक्ब।

2 मिनु शुश मुर जाक्शा देलतेकम। मिनु येसुमी शुश मुर आन कली देल्लो तशा, डोंगा डोडशशा निस्साक्ब। मुरपुकी चहिं समुन्द्र आ नेक्था बाक्तेकम।

3 मिनु कथा सेल्शा, शुश लोव शेंताक्मी। कथा का ओं देंत "मुर कामी वांचेर शोक्थ लमाक्त।

4 मिनु ब्वारानु, गेडा का निकशी लांमी जुक्तमे बाक्त। मिनु चिकबीम गुप्शा जामे बाक्त।

5 का निकशी ग्याडग्रो ठांठीं जुक्तमे बाक्त। मिनु शुश खप मबाक्तीके जिव जाव वामा बाक्त।

6 तन्न नां पवानु, सोल सुल बेक्मा बाक्त। मारदे हना शाक्श मपाडशशो बाक्मा बाक्त।

7 का निकशी चू घारीमी जुक्तमे बाक्त। मिनु चूम सुम्शा, वाचा मगेवा बाक्त।

8 मिनु का निकशी रिम्शो खपीम जुक्तमे बाक्त। मिनु वाशा शुश ग्रेल्शा, गेडा का के सहे का, ६०, ३० सिम्मा बाक्त।

9 सु नोफा पाडशशो बाक्मे, मेकोमी नेंनल" देंत।

कथा सेल्शा शेंशो आ पबर्म

मर्कूस ४:१०-१२; लूका ८:९-१०

10 मिनु शेंसीबपुकीमी येसु कली "मारदे कथा सेल्शा, मुर आन कली शेंनीनी?" दे हिल्लो पाम्तेकम।

11 मिनु येसुमी "इन कली स्वर्ग डा राज्य आ पबर्म खुडशशो लोव रुपतीक थुं गेशो बाक्त। तन्न मेको आन कली मगेमी बाक्त। १कोरिन्थी २:१०

12 थीबमी तेम्शा गेचा पुंडसीब, मिनु शुश दुम्ब। मथीब चहिं बाक्शो यो रोडक्चा पुंडसीब। हितोपदेस ९:९; मती २५:२८-२९; मर्कूस ४:२४; लूका ८:१८

13 कथा सेल्शा शेंनुडमी। मारदे हना कोव्रशा यो मताडनीम। नेंशा यो मरुप्नीम। यूहन्ना १६:२५; ब्यवस्था २९:३

14 साड नेसी यसैयामी देंशो नोले दुम्ब लोव मुल थमा दुम्ब। मार ब्रेक्शो बाक्त देंशा हना 'नेंचा दा नेंनीनी, तन्न दोपा यो मरुप्नीनी। कोव्रचा दा कोव्रनीनी, तन्न दोपा यो मताडनीनी।

15 मेको मुर आन थुं ग्याम्शो बाक्नीम। आन नोफा थॉडशो बाक्नीम। आन मिक्च क्रिप्शो बाक्नीम। मोदेशो मपशो नम हना, आन मिक्चीम ताम वा, नोफाम नेंनम वा, थुंमी रुबेम वा, मिनु आं गे लेम्म वा, मिनु गो सापदुमी वा' दे ब्रेक्शो बाक्त। यसैया ६:९-१०; यूहन्ना ९:३९

16 गेपुकी चहिं ग्येरसीने। इन मिक्च नु नोफा मेको आन के खोदेशो ममाड। मिक्चीम ताडनीनी, नोफाम नेंनीनी। लूका १०:२३-२४

17 नोफा दाडशशा नेनीने, गेमी मुल तशो नेंशो साड नेसी रे परमप्रभु यावे आ लोव पाडबपुकीमी तचा नेंचा दाक्बाक्मा बाक्त। तन्न तचा नेंचा मतामे बाक्त। १पत्रुस १:१०

वांचेर शोकशो कथा आ अर्थ शेंशो

मर्कूस ४:१३-२०; लूका ८:११-१५

18 वांचेर ब्वारशो कथा आ अर्थ शेंननी,

19 सुमी परमप्रभु यावे आ राज्य डा लोत्र नेंशा मरुबा, मेको लामी जुक्शो वांचेर खोदेशो बाक्ब। सैतानमी आ रुप्शो क्याम्शा गेब।

20 ग्याडग्रो खपीम शोकशो खोदेशो बाक्त हना, देशो चोटी बिश्शा ग्येरसीब।

21 तन्न शाकश थोकचा मतथु शुश मलीब। परमप्रभु यावे आ लोत्र आ परबंम श्येत जाप्टु हना, थु प्रोइशा गाक्ब।

22 चू घारीम जुक्शा सुम्शो खोदेशो बाक्त हना, लोत्र नेंब। तन्न दोपा ठेयब दुम्नुडा? दोपा क्येत चेमु? दे मिम्शा, आ थमा सुडक्तीके देक्ब। मिनु नेंशो लोत्रमी फल मसिम्ब। मती ६:१९-३४; १तिमोथी ६:९

23 सुमी नेंशा रुप्बा, मेको चहिं रिम्शो खपीम जुक्शो वांचेर खोदेशो शुश ग्रेल्शा, गेडा का के सहे का, ६०, ३० सम्म सिम्ब” दे शेंताकमी।

सुवा नु चेरब शोकशो कथा

24 मिनु अर्को कथा ओदें शेंताकमी “स्वर्ग डा राज्य ओदेशो बाक्ब, मुर कामी आ रूमी रिम्शो वांचेर शोकगा बाक्त।

25 मिनु नाकदो इम्मेनु, आ जोरी सत्रुमी मेको तारी सुवा ब्वारशा गेवा बाक्त।

26 मिनु वांचेर वामेनु, सुवा यो वामाक्त।

27 मिनु गेय पाइबपुकीमी सुवा वाशो तशा, रू आ धनी कली ‘रिम्शो वांचेर शोक्नी ममाइ? मिनु सुवा दोपा वामा?’ देंमा बाक्त।

28 मिनु रू धनीमी ‘आं जोरी सत्रुमी ब्वारा बाक्त’ देंमाक्त। ‘मो हना मेको सुवा तुल्शा ताइक्तका? मार देंनीनी?’ देंमानु

29 ‘तुल्शा मदुम्ब। सुवा तुलतीनी हना, चेरब यो दुल्ब।

30 मोपतीके रिक्ची मजाक्म सम्म बाक्ल। रुप्ची जाक्मेनु, आं गेय पाइब आन कली डोंइती सुवा रिक्शा फ्रेंशा चोचा कली तिल्शा वोतीने। मिनु चेरब रिक्शा तुप्शा आं भकारीम कुर पा वोतीने, दे माइक्नुडमी’ देंमाक्त” दे शेंताकमी। मती ३:१२; मती १५:३; प्रकाश १४:१५

तोरी शोकशो कथा

मर्कूस ४:३०-३२; लूका १३:१८-१९

31 येसुमी “स्वर्ग डा राज्य ओदेशो यो बाक्ब, मुर कामी आ रूमी तोरी शोकगा बाक्त।

32 वांचेर नेल्ल क्येडा आइक्च गेडा तोरी गेडा बाक्माक्त हना यो, वाशा ठेयब रवा दुम्माक्त। मेको रवामी चिकबीम ग्योत्र सेल्शा बाक्मा बाक्त” दे अर्को कथा का शेंताकमी।

बोरपाइक्ब ओरुती कथा

33 मिनु येसुमी “स्वर्ग डा राज्य ओदेशो बाक्ब, मीश मुर कामी पाथी सां फसमी बोरपाइक्ब ओरुती सुप्शा, फस नेल्ल मबोरम सम्म सुम्शा वोदा बाक्त” दे अर्को कथा का शेंताकमी। लूका १३:२०-२१

34 येसुमी मेको लोत्र नेल्ल कथा सेल्शा शेंताकमी। कथा मसेल्थु मारेड लोत्र मशेंदीमी। मर्कूस ४:३३-३४

35 मारदे हना साइ नेसी परमप्रभु यावे आ लोत्र पाइबमी देशो लोत्र मुल थमा दुम्ल, दे कथा रे पा शेंताकमी। मेको साइ ब्रेक्शो लोत्र चहिं मार बाक्ब देशा हना “सरीड नु रागी सेल्शो रे मुल सम्म खुइश्शो लोत्र कथा सेल्शा नेंपाइक्नुडमी” दे ब्रेक्शो बाक्त। भजन संग्रह ७८:२

चेरब शोकशो कथा आ अर्थ शेंशो

36 मिनु येसु मुर आन कली प्रोइशा, खिं लेत्त। मिनु आ शेंसीबपुकीमी “रूमी वाशो सुवा आ कथा आ अर्थ शेंदीकी” देंतेक्म।

37 मिनु येसुमी “रिम्शो वांचेर शोकब देशो रागीम जरमेशो बाक्ब।

38 रू देशो रागी बाक्ब। रिम्शो वांचेर देशो राज्य डा सन्तान नमी। सुवा देशो सैतान आ सन्तान नम। १कोरिन्थी ३:९; यूहन्ना ८:४४

39 सुवा ब्वारब सैतान बाक्ब। रुप्ची नाक्त चहिं निसाफ पची नाक्त बाक्ब। गेय पाइबपुकी परमप्रभु यावे आ गेय पाइब नम।

40 सुवा खुप्शा, मीम चोशो खोदेशो पा निसाफ पची नाक्त मार दुम्ब देशा हना, मोदेशोनु दुम्ब।

41 रागीम जरमेशोमी परमप्रभु यावे आ गेय पाइब आन कली सोइक्ब। मिनु मेकोपुकीमी आ राज्य रे पाप पपाइक्ब नु पाप पाइब नेल्ल आन कली खुप्शा, मती २४:३१

42 ठेयब मीम हुम्नीम। मेकेर मुरपुकी आन खुइ शेष्शा डाक्नीम।

43 परमप्रभु यावे आ डोंइती ठीक दुम्शोपुकी चहिं आं आफ आ राज्यमी नां खोदेशो छेडछेडम ग्येरशा बाक्चा ताइनीम। सु नोफा पाइश्शो बाक्मे, मेकोमी नेंनल। दानीएल १२:३

रूमी थिम्शो शोप

44 स्वर्ग डा राज्य ओदेशो यो बाक्ब, रू कामी शोप थिम्शा वोइश्शो बाक्माक्त। मिनु काबु मुर कामी मेको शोप थिदा बाक्त। मिनु थम ग्येरसीशा, लेंशा थिम्शा वोइश्शा, आइक्के बाक्शो नेल्ल लेश्शा, मेको रू ग्यबा बाक्त। मती १९:२९; लूका १४:३३; फिलिप्पी ३:७

शुश क्येट लाइब मोती

- 45 स्वर्ग डा राज्य ओदेशो यो बाकब, मोती ग्यापब लेयब कामी रिम्शो मोती ग्यान्ड, दे मिम्शा, माल्ना माल्न गाक्माक्त।  
46 मिनु काबु शुश क्येट लाइब मोती तवा बाक्त। मिनु आइक्के बाकशो नेल्ल लेयशा, मेको ग्यबा बाक्त।

डांड रेशो कथा

- 47 स्वर्ग डा राज्य ओदेशो यो बाकब, समुन्द्रमी डांड रेत्चा कली ग्याइल आप्शो बाक्माक्त। मेको आप्शो ग्याइलीम शुश थरी डा डांड ओत्रमा बाक्त। मती २२:९-१०

48 मिनु ब्रीमेनु, माझीपुकीम ग्याइल कीशा समुन्द्र रे गुंडदमे बाक्त। गुंडशा ब्वचा डा डांड वोदमे बाक्त, मब्वचा डा डांड ताइक्तेम बाक्त।

49 निसाफ पची नाक्त मोदेशोन दुम्ब। परमप्रभु यावे आ गेय पाइबपुकी जाक्शा, ठीक पाइब आन दाते रे पापी आन कली योत्रशा गुंडशा, मती २५:३२

50 ठेयब मीम हुन्मीम। मेकेर मुरपुकी आन खुड शेप्शा डाक्नीम।

51 आं शेंतीक लोत्र नेल्ल रुन्नी?" दे हिल्लो पवानु "रुप्तक" देंतेक्म।

52 मिनु येसुमी "स्वर्ग डा राज्य आ पर्वम शेंसीशो जोक्ब तुइक्ब दुम्शो मुर खिं डा होत्रप खोदेशो बाकब। मेकोमी आ भकारी रे माइत नु नक थोत्रक शोल्ने चापब" देंत।

नासरथ सहरम येसु कली मब्रशो

मर्कूस ६:१-६; लूका ४:१६-३०

53 मिनु येसुमी मेको लोत्र शेंने थुम्शा, मेकेर रे लत।

54 मिनु लशा, आ बाकशो सहरम जाक्दीशशा, युम्तीक खिंमी शेंताक्व। शेंदानु, आ लोत्र नेंबपुकीमी छक लाक्शा "आमाइ, एकोमी ओदेशो लोत्र दोपा जोक्गा? सु आ सक्तिमी छक लाक्चा डा गेय पवा?

55 शी के सेलब आ तौ ममाइ डा? आ ममा मरीयम ममाइ डा? आ लोकब याकूब, योसेफ, सिमोन, यहूदा मनमी डा?

56 आ समीपुकी गोपुकी नु बाक्ब मनमी डा? मिनु मोदेशो आन तौमी दोपा जोक्शा ठेयब दुम्मे?" दे आन थुं मनुशो लोत्र पमुमा बाक्त। यूहन्ना ६:४२; यूहन्ना ७:१५, ५२

57 मिनु येसुमी मेको आन थुं मनुशो तुइशशा, मेको आन कली "तेइ तेइ परमप्रभु यावे आ लोत्र पाइब आन कली ठेयब सुइशशा मान पाइनीम। आम रागी, आम खिंमी चहिं महिक्नीम" दे माइक्तीमी। यूहन्ना ४:४४

58 मेकेर छक लाक्चा डा गेय का निक्शी ला पाप्तु। मारदे हना मेकोपुकीमी थमा मसुदेम।

## 14

यूहन्ना कली साइशो

1 येसुमी छक लाक्चा डा गेय पा शेंना शेंन गाक्मेनु, आ पशो नु आ शेंशो पिप हेरोदमी नेंना बाक्त। मेको पिप हेरोद चहिं मेको रागी डा ४ भागमी भाग का डा पिप बाक्माक्त। मोपतीके भाग का डा आन पिप, दे नें वोइशो बाक्माक्त।

2 मिनु पिप हेरोदमी येसु आ पशो नु शेंशो नेंशा, आ गेय पाइब आन कली "मेको ब्वाक्कुम खुम्शा गुंडब यूहन्ना बेक्शो रे सेंसे बाक्त। मिनु शुश सक्ति पाइशशा, छक लाक्चा डा गेय पाइबाक्माक्त" देंमाक्त।

3 यूहन्ना बेक्शो रे सेंसे बाक्त, देशो दोपा देंशा हना, हेरोदमी आ लोकब फिलीप आ मीश आ पर्वम यूहन्ना कली जेल्खानमी चोक्शो बाक्माक्त। मती ११:२

4 मारदे हना यूहन्नामी हेरोद कली "इन लोकब आ मीश चाक्चा मदुम्ब" दे माइशो बाक्माक्त। प्रस्थान २०:१४

5 मो देंतीके यूहन्ना कली साइक्चा माल्शो बाक्माक्त। तन्न मुर आन कली तशा हिंमाक्त। मारदे हना मुरपुकीमी यूहन्ना परमप्रभु यावे आ लोत्र पाइब बाक्ब, दे थमा सुइशो बाक्मा बाक्त। मती २१:२६

6 मिनु पिप हेरोद आ जरमेशो नाक्त जाक्माक्त। मिनु हेरोदनी आ तमीमी हेरोद आ भोजमी जाक्ब आन दातेमी सिल पशा, हेरोद कली ग्येरपदा बाक्त।

7 मेको कली सिल पशो तशा, हेरोद थाम्पा ग्येरशा, कसम जशा "मार पुंडतीवी हना यो, गो गेनन" दे मदा बाक्त।

8 मिनु मीश आल आ ममामी "ब्वाक्कुम खुम्शा गुंडब यूहन्ना आ पिया क्योरशा, थालम कुर पा गेयीनी" दे पुंडपदा बाक्त।

9 मिनु हेरोदमी मेको लोत्र नेंशा, आ थुं मनुमाक्त। तन्न भोजमी जाक्ब आन कुल कसम जशा लोत्र गेतीके मगेनन देंने मचबा बाक्त।

10 मिनु आ सिपाही आन कली जेल्खानमी सोइशशा, यूहन्ना कली क्योरपा,

11 आ पिया थालम कुर पा चाक्पा गेपदा बाक्त। मिनु मीश आलम मेको थाल ताक्शा लाइशशा, आ आम्मा कली गेवा बाक्त।

12 मिनु यूहन्ना आ शेंसीबपुकीमी जेल्खानमी लशा, आ लास लाइशशा, थिम्मे बाक्त। मिनु येसु आ बाक्तीके जाक्शा, मो दुम्शो नेल्ल शोत्रतेक्म।

५ हजार मुर आन कली थुल्शो

मर्कूस ६:३१-४४; लूका ९:१०-१७; यूहन्ना ६:१-१३

13 मिनु येसुमी मेको लोत्र नेंशा डोंगा डोइशशा, सुइ मबाक्तीकेम लत। मिनु सहर डा शुश मुरुमी येसु लाम्माक्त देशो नेंशा, समुन्द्र हिरशा, आइक्की हांबु जाक्दीम्मा बाक्त।

- 14 मिनु येसु डोंगा रे तोइश्शा, शुश मुर देल्शो तशा, मेको आन कली शिशी पा रोड पाइब आन कली सापाइक्तीमी।  
 15 मिनु नां रिक्चावानु, आ शेंसीबपुकीमी “एको मारेइ मबाक्तीकेम मार जाइनीमी? देल्शो मुर आन कली लचा गेने।  
 गाउं गाउं लशा, ग्याप्शा जामेक्ल” दैतेक्म।  
 16 मिनु येसुमी “लचा ममाल्नीम। गेपुकीमी एको आन कली जचा गेने” दैत।  
 17 “गोपुकी नु ५ ओटा शोब्ले नु डांड निक्शी डा लाक्शा मारेइ मबा” देंमानु  
 18 “लो, मेको शोब्ले नु डांड गेयीनी” दैत।  
 19 मिनु मुर आन कली “निस्सीने” दे माइश्शा, मेको शोब्ले नु डांड शेशा, सरीड गे कोत्रशा “गे रिम्शो पाइब बाक्नीनी”  
 देशा शोब्ले नु डांड आ शेंसीब आन कली योक्शा गेपाइक्तीमी।  
 20 मिनु नेल्लेमी रूथ्री जाम्तेक्म। जशा हेंशो १२ डालो खुप्ताक्म। २राजा ४:४४  
 21 जाइबपुकी चहिं आलपुकी नु मीश मुर आन कली प्रोइशा, वोंइश मुर ला ५ हजार खोइ बाक्तेक्म।

येसु ब्वाक्कु तारी गाक्शो

- 22 मिनु येसुमी शेंसीब आन कली “आं डोंइती लने, गो मुर आन कली सोइश्शा पीनुड” दे डोंगामी डोंइक्पा सोइक्ताक्मी।  
 23 मिनु मुर आन कली सोइश्शा, प्रार्थना पथ डांडाम डोंइसे बाक्त। नां रिक्मेनु यो मेकेरन आ काइचीक बाक्माक्त।  
 लूका ६:१२; लूका ९:१८  
 24 शेंसीबपुकी चहिं समुन्द्र आ दातेम जाक्दीश्शा, फश नु छालमी तेक्शा, रयेत जाम्तेक्म।  
 25 मिनु नां सोत्रचावानु, येसु ब्वाक्कु तारी गाक्ना गाक्न पिशो ताम्तेक्म।  
 26 मोपा पिशो तशा “आमाइ, वोल पित” दे हिंशा वाइ ब्रेम्मानु,  
 27 येसुमी “थुं बारपतीने। गो नड, महिनीन” दैत। लूका २४:३७  
 28 मिनु पत्रुसमी “प्रभु, गेन ननी हना, आं कली यो ब्वाक्कु तारी गाक्शा, इन गे पिचा कली ब्रेत्तीनी” दैत।  
 29 मिनु येसुमी “पिवो” दे ब्रेत्तानु, पत्रुस डोंगा रे तोइश्शा, ब्वाक्कु तारी गाक्शा येसु गे लत।  
 30 मिनु फश गिवार पशो तशा हिंशा, गुम्चा माल्तु। मिनु “प्रभु प्रोइयीनी” दे वाइ ब्रेत्त।  
 31 मिनु येसुमी फि ग्याइश्शा कीशा “ए, गे थमा पा थमा सुइक्ने मचाप्ब, मार दल्गीर पवी?” दे माइश्शा,  
 32 डोंगा डोंइसाक्स। मिनु फश यो दिक्त।  
 33 डोंगाम बाक्बपुकीम येसु आ डोंइती बाप्शा “थमान, परमप्रभु यावे आ तौ बाक्नी बाक्त” देशा सेउ पाम्तेक्म। मती  
 १६:१६; यूहन्ना १:४९

मुर आन कली सापाइश्शो

मर्कूस ६:५३-५६

- 34 मिनु समुन्द्र शोक्शा, गेनेसरेथ रागीम जाक्दीत्तेक्म।  
 35 मेकेर जाक्दीम्मानु, मुरपुकीमी येसु जाक्माक्त, दे तुइश्शा “रोड पाइब आन कली चाक्कीन, है” देशा डा मीन आन  
 रागीम नेंपाइक्मुमा बाक्त।  
 36 मिनु रोड पाइब आन कली चाक्गामेनु, मेकोपुकीमी “प्रभु, इन फेक्शो वा थिचा गेकी” दे पुंडतेक्म। मिनु सु सुमी थीमे,  
 मेकोपुकी सातेक्म। मती ९:२१; लूका ६:१९

## 15

ग्रांया दिचा आ पर्वम शेंशो

मर्कूस ७:१-१३

- 1 मिनु फरिसी नु सास्त्रीपुकी यरूसलेम रे येसु कली गुम्थ जाक्शा  
 2 “इन शेंसीबपुकीमी जोक्ब तुइक्ब खाल्पा आन रिती थिती मारदे मपाइनीमी? जचा डोंइती गुइ चिक्चा माल्लो। मारदे  
 मचिक्नीमी” देंमानु, लूका ११:३८  
 3 येसुमी “गेपुकीमी मारदे इन पतीके पाइनीनी? परमप्रभु यावेमी अरेशो लोत्र चहिं मपाइनीनी।  
 4 परमप्रभु यावेमी अरेशो लोत्र का ‘आम आफ आस कली मान पचा’ मिनु ‘सु सुमी आम आफ आस कली सराप  
 पाइनीमी, मेकोपुकी साइक्शा पुंडसीनीम’ दे ब्रेक्शो बाक्ब। प्रस्थान २०:१२; प्रस्थान २१:१७  
 5 गेपुकीमी चहिं ‘सु सुमी आम आफ कली गेचा माल्लो थोत्रक परमप्रभु यावे आ खिं लाइश्शा गेने थुम्तक’ देंनीम।  
 मेकोपुकीमी आम आफ कली मान पचा ममाल्नीम, दे शेंनीनी। हितोपदेस २६:२४; १तिमोथी ५:८  
 6 मोदेशो पा इन रिती थिती सेल्शा, परमप्रभु यावेमी अरेशो लोत्र क्याम्नीनी।  
 7 ए कपटीपुकी, यसैयामी इन कली गारचा डा लोत्र पा  
 8 ‘मेकोपुकीमी शोत्र नु लोत्रम ठेयब सेल्नीमी। आन थुमी चहिं आं कली मदाक्नीम।  
 9 आं कली मान पक्षु पशो खोदेशो पा आन सेल्शो शेंतीक लोत्र परमप्रभु यावेमी अरेशो लोत्र बाक्ब, दे मुर आन कली  
 शेंनीम’ दे ब्रेक्शो बाक्त” दे माइक्तीमी। यसैया २९:१३  
 10 मिनु येसुमी मुर आन कली ब्रेश्शा “नेशा रुपीने,  
 11 शोत्र आगा ओत्रब शोत्रकीमी मुर कली ग्रांया मसेल्ब। शोत्र रे यूशोमी चहिं मुर कली ग्रांया सेल्ब” दे शेंताक्मी।  
 प्रेरित १०:१५; १तिमोथी ४:४; तीतस १:१५  
 12 मिनु शेंसीबपुकीमी येसु कली “शेब, इन देशो नेशा, फरिसीपुकी आन थुं मनुम दे तुइक्तीनी?” दैतेक्म।

- 13 मिनू येसुमी “स्वर्ग डा आं आफोमी मखुम्शोपुकी तुल्शा ताडक्चा पुंडसीनीम। प्रेरित ५:३८  
 14 मेकोपुकीमी मारेड पामेक्ल। मिक्च मताइब लां कोंडब नम। मिक्च मताइबमी मिक्च मताइब कली कीशा लां कोंडताक्व हना, निम्फा खाल्टाम बिक्नीस” दैत। मती २३:२४; लूका ६:३९; रोमी २:१९  
 15 मिनू पत्रुसमी “थमा, इच्छी ना मुर आन कली पशो लोत्र आ अर्थ मार में?” दे हिल्लो पवानु  
 16 “ए, गेपुकी यो आं लोत्र मरुपब बाक्नीनी?  
 17 शोत्र आगा ओत्रब थोत्रक कोत्रज जाक्दीरशा, खी दुम्शा लाइब, दे मतुडक्नीनी?  
 18 शोत्र रे गूशो चहिं थुं रे गूशो बाक्ब। मेकोमी मुर कली ग्रॉग्रा सेल्ब।  
 19 मुर आन थुमी मार मरिम्शो मिन्मीम देशा हना, मुर साइक्चा, मुर आन मीश लाइक्चा, तेल्लेम पचा, खुड पचा, जोल पा सांकछी बाक्चा, मुर आन परबम मरिम्शो लोत्र पचा, दे मिन्मीम। मेको चहिं शोत्र रे गूशा, उत्पती ८:२१  
 20 मुर आन कली ग्रॉग्रा सेल्ब। गुड मचिक्थु जशोमी चहिं मारेड मपाइब” दे शेंताक्मी।

कनानी रागी डा मीश मुर

मर्कूस ७:२४-३०

- 21 मिनू येसु मेकेर रे लशा, टायर नु सीदोन सहर आ नेक्था जाक्दीतल।  
 22 मिनू मार दुम्त देशा हना, कनानी रागी डा मीश मुर का जाक्शा “दाऊद आ तौ, प्रभु, शिशी पाइय्यीनी। आं तमी कली वोल्म सुम्शा शुश श्येत गेप्टु। वोल् कली खेरशा सापतीने” दे डाक्न डाक्न पुंडतु।  
 23 मिनू येसु सिक्सी पा बाक्त। मिनू शेंसीबपुकीमी “एको मीश मुरुम रेयके पना पन इं नोले खोइरशा पिन पिन बाक्ब। एको कली सोइक्तीने” दैतेक्म।  
 24 मिनू येसुमी “लां जाम्शो भेडा खोदेशो दुम्शो इं इस्राएल डा मुर आन कली ला वारच पथ, सोइसीशो नड” दैत। मती १०:५-६; रोमी १५:८  
 25 मीश मुरुम चहिं येसु आ डोंडती पोक्च थेक्शा “प्रभु, आं कली वारच पयीनी” दे सेउ पाप्टु।  
 26 मिनू येसुमी “आल आन कली वोइरशो शोब्ले लाइरशा, कुचुम कली गेचा मडुम” दैमेनु  
 27 “प्रभु, मेको थमा बाक्त हना, होत्रपमी हेंशा ताइरशो थोत्रक कुचुममी जचा ताइनीम” दैत।  
 28 मिनू येसुमी “ओहो, मेकोमी थमा पा थमा सुइय्यी बाक्त। मोपतीके इ पुंडशो जाक्दील” दे माइक्तु। मो दैमेनु, आ तमी ब्रा सामाक्त। मती ८:११-१३

रोइ पाइब आन कली सापाइरशो

- 29 मिनू येसु मेकेर रे लशा, गालील समुन्द्र आ नेक्था जाक्दीरशा, डांटा का डोइरशा निस्साक्व।  
 30 मिनू शुश मुरुमी गुड खोइल मदुक्ब, कूजी कुंजे, मिक्च मताइब, नोफा मनैब, लोत्र मपाइब नु मार मार रोइ पाइबपुकी चाक्शा, आ डोंडती तेल्लेक्म। मिनू मेको नेल्ल आन कली सापाइक्तीमी।  
 31 मिनू शुश मुर आन कली साशो तशा “लाटापुकी लोत्र पाइबाक्तेक्म, कूजी कुंजे साबाक्तेक्म, खोइल मदुक्ब गाक्बाक्तेक्म, मिक्च मताइब मुल् मिक्च ताइब दुम्बाक्तेक्म” दे छक लाक्शा, इस्राएली आन परमप्रभु यावे कली ठेयब सेल्शा मान पाप्तेक्म। मर्कूस ७:३७

४ हजार मुर आन कली थुल्शो

मर्कूस ८:१-१०

- 32 मिनू येसुमी आ शेंसीब आन कली ब्रेरशा “एको शुश मुर आन कली शिशी पाइनुडमी। मारदे हना नाक्त सां सम्म गो नु काथा बाक्तेक्मे। मिनू आन के जचा मारेड मबा। जचा मगेथु, आन खिं सोइक्चा मदाक्नुड। सोइक्ताक्डमी हना, लामी बेक्नीम” दे माइक्तीमी। मती १४:१३-२१  
 33 मिनू मेकोपुकीमी “गोरशो रागी मारेड मबाक्तीकेमी इरका मुर आन कली मार जचा गेचा नमी डा?” दैतेक्म।  
 34 मिनू येसुमी “शोब्ले दोशो कुरनी?” दैत। मिनू “शोब्ले ७ ओटा नु आइक्च डांइ का निक्शी” दैतेक्म।  
 35 मिनू मुर आन कली निप्पाइरशा,  
 36 मेको ७ ओटा शोब्ले नु डांइ शेशा “गे रिम्शो पाइब बाक्नीनी” दे शोब्ले जिक्शा, शेंसीब आन कली गेशा योक्पाइक्तीमी।  
 37 मिनू नेल्लेमी रूथ्री जाप्तेक्म। जशा हेंशो ७ डालो खुप्ताक्म।  
 38 जाइबपुकी चहिं मीश मुर नु आलपुकी प्रोइशा, ४ हजार बाक्तेक्म।  
 39 मिनू मुर नेल्ल आन कली सोइरशा, आ शेंसीबपुकी नु काथा डोंगा डोइरशा समुन्द्र शोक्शा, माग्दाला रागीमी जाक्दीतेक्म।

## 16

चिन्ड कोत्रकोत्र दाक्शो

मर्कूस ८:११-१२; लूका १२:५४-५६

- 1 मिनू फरिसी नु सदुकीपुकी जाक्शा, येसु आ थुं थाम्चा कली “स्वर्ग डा चिन्ड का कोंडकी” दैतेक्म। मती १२:३८  
 2 मिनू येसुमी मेको आन कली “नां परेचवानु ‘दीसा हाक्ब। मारदे हना सरीड लल जिशो बाक्ब’ दैनीनी।

3 मिनू नां दाम्मेनु 'मुलाक्त फश गिवार पाइब। मारदे हना गोस्सुम सुम्शा, सरीड लल जिशो बाक्ब' देंनीनी। सरीड कोव्रशा हाक्बा, दे रेउ यीबा देंने चापनीनी। तन्न मुल मार दुम्चशो बाक्बा मेको आ चिन्ड मरुपनीनी। मती ११:४  
 4 मरिम्शो पाइब नु देवी देवता नु परमप्रभु यावे खाल्ब पालाम चिन्ड कोव्रकोव्र दाक्नीम। मेको आन कली योना आ चिन्ड डा लाक्शा मारैइ चिन्ड मकोइनुडमी" देश, मेको आन कली प्रोइशा गाक्त। मती १२:३९-४०

लोव्र नेंशा होस पांडसीने  
 मर्कुस ८:१४-२१

5 मिनू समुन्द्र शोक्शा, आइक्ची हांबु जाक्दीम्मानु, शेंसीबपुकीमी "ला, शोब्ले कुरचा प्रेसे बाक्त" दे ति फुकशा देमुम्तेक्म।

6 मिनू येसुमी "फरिसी नु सदुकी आन शोब्लेमी सुप्शो बोरपाइक्ब ओख्ती रे होस पांडसीने" दे माइक्तीमी। लूका १२:१

7 मिनू "शोब्ले कुरचा प्रेदया बाक्त, दे तुइश्शा, मो देंम को" देमुम्तेक्म।

8 मिनू येसुमी मेको आन लोव्र तुइश्शा "ए, गे थमा पा थमा सुइक्ने मचाप्बपुकी, शोब्ले मबा, दे मारदे शुश लोव्र पमुनी?"

9 मुल यो मारेइ मरुपनीनी? ५ ओटा शोब्लेमी ५ हजार मुर आन कली रूथी जचा गेशा, गिश डालो हेंम? मती १४:१७-२१

10 मिनू ७ ओटा शोब्लेमी ४ हजार मुर आन कली जचा गेशा, दोशो हेंम, दे ममिम्नीनी? मती १५:३४-३५

11 फरिसी नु सदुकी आन शोब्लेमी सुप्शो बोरपाइक्ब ओख्ती रे होस पांडसीने देशो चहिं शोब्ले आ पबंम शेंशो ममाइ। मुल यो मरुपनीनी?" दे माइक्तीमी,

12 "गे फरिसी नु सदुकी आन शेंतीक लोव्र नेंशा, होस पांडसीन, दे शेंशो बाक्माक्त" दे रुप्तेक्म।

पत्रुसम "खीस्त ननी" देशो

मर्कुस ८:२७-३०; लूका ९:१८-२१

13 मिनू सिजरिया फिलिप्पी रागीम जाक्दीश्शा, येसुमी आ शेंसीब आन कली "मुरपुकीमी रागीम जरमेशो आ पबंम मार देंनीमी?" दे हिल्लो पवानु

14 "का निक्शीमी 'ब्वाक्कुम खुम्शा गुंडब यूहन्ना बाक्माक्त' देंनीम। का निक्शीमी 'एलीया बाक्माक्त' का निक्शीमी 'येरमीया बाक्म को, परमप्रभु यावे आ लोव्र पाइब अर्को का बाक्म को' देंनीम" देंतेक्म। मती १४:२; मती १७:१०; लूका ७:१६

15 मिनू येसुमी "गेपुकी चहिं आं कली सु सुइक्यीनी?" देंमेनु,

16 सिमोन पत्रुसमी "ब्रोइशा बाक्ब परमप्रभु यावे आ तौ खीस्त बाक्नीनी" देंत। यूहन्ना ६:६९

17 मिनू येसुमी पत्रुस कली "योना आ तौ सिमोन, ग्येरसो। मारदे हना इ देशो लोव्र मुरुमी शेंशो ममाइ। स्वर्गम बाक्ब आं आफोमी इ कली रुप्पाइक्वतु। मती ११:२७; गलाती १:१५-१६

18 गे पत्रुस नवे, एको सेरथ फुल्लु तारी आं खिं सेल्लुड। नरकमी मेको कली ग्राने मचाप्ब। यूहन्ना १:४२; एफिसी २:२०

19 गो स्वर्ग डा राज्य आ सांचो गेनन। एको रागीम मार कली फ्रेनेवे, स्वर्गमी यो फ्रेशो बाक्नीम। एको रागीमी मार कली प्रोइनेवे, स्वर्गमी यो प्रोइशो बाक्नीम" दे माइक्वतु। मती १८:१८

20 मिनू आ शेंसीब आन कली "खीस्त एकोन बाक्माक्त दे सुइ आन कली मशोवडीने" दे माइक्तीमी। मती १७:९

येसु श्येत जचा माल्ब, दे शेंशो

मर्कुस ८:३१-३३; लूका ९:२२

21 मेना रे येसुमी आ शेंसीब आन कली "यरूसलेम लशा, जोक्ब तुइक्ब खाल्पा, ठेयब चढेब नु सास्त्रीपुकी रे पा शुश श्येत जशा साइक्चा पुंडसीनुड। मिनू बेक्शा आ निल्थ नाक्त संसीनुड" दे शेंचा गोप्तु। मती १२:४०; यूहन्ना २:१९

22 मिनू कावु लेंशा शेंदानु, पत्रुसमी येसु कली आइक्ची ब्रेश्शा लाइश्शा "परमप्रभु यावेमी इन कली शिशो पवल। प्रभु, इन देशो खोदेशो गेनायो मटुल्ल" देंमाक्त।

23 मिनू येसुमी नोले हिरशा पत्रुस कली कोव्रशा "ए सैतान, इ कुल मकोइडी। मारदे हना आं लां तेक्ब बाक्डे बाक्त। गे परमप्रभु यावे आ मिम्शो मपथु, मुरुमी मिम्शो लोव्र कका पाप्तीवी" दे हुइक्ताक्व।

येसु आ नोले खोइक्बपुकी

मर्कुस ८:३४-९:१; लूका ९:२३-२७

24 मिनू येसुमी आ शेंसीब आन कली "सुमी आं नोले खोइक्चा थुं पाइबा, मेकोमी आंम दला दाक्स पचा प्रोइशा, श्येत जचा महिंथु, आ नोले खोइक्चील। मती १०:३८-३९; १पत्रुस २:२१

25 आ गिम प्रोइचा दाक्बमी मेको साम्ब। आं पबंम आ गिम साम्बमी आ गिम प्रोइब। प्रकाश १२:११

26 रागी नेल्ल आंम के सेल्शा, आ गिम चहिं खतम दुम्त हना, मार रिम्शो दुम्त डा? खतम दुम्शो गिम मार गेशा लेन्ने चाप्बा डा? लूका १२:२०; भजन संग्रह ४९:९

27 रागीम जरमेशो आ आफ आ दारसमी परमप्रभु यावे आ स्वर्ग डा गेय पाइबपुकी नु जाक्ब। मिनू मुर आन गेशो पशो कोव्रशा, आन गेशो का का पा लेश्शा गेब। रोमी २:६

28 नोफा दाइश्शा नेनीने, मुल गो नु काथा बाक्ब का निक्शीमी रागीम जरमेशो आ राज्य जाक्शो मतथु मबेक्नीम" दे शेंताक्मी। मती १०:२३

## 17

येसुमी रां फाइशशा कोइशो

मकूस ९:२-१३; लूका ९:२८-३६

1 मिनू ६ नाक्त नोले येसुमी पत्रुस, याकूब नु आ लोक्ब यूहन्ना सां आन कली सुइ मबाक्तीके लाइशशो डांडामी लदा बाक्त। मती २६:३७; मकूस ५:३७; मकूस १३:३; मकूस १४:३३; लूका ८:५१

2 मिनू मेको आन डोंइती येसु फाइसेनु, मेकोपुकीमी आ कुल नां खोदेशो नु आ फेक्शो वा बुबु पा जिलील पा बुश दुम्शो तामे बाक्त। २पत्रुस १:१६-१८; प्रकाश १:१६

3 मिनू मोसा नु एलीया जाक्शा, येसु नु लोत्रसी पशो तामे बाक्त।

4 मिनू पत्रुसमी येसु कली “हे प्रभु, इं कली एकेर बाक्चा रिम्शो दुम्ब। गे दाक्नीनी हना, बाक्तीके सां सेल्लुड। इन कली का, मोसा कली का नु एलीया कली का सेल्लुड” देमाक्त।

5 मोदेशो लोत्र पना पन बाक्मेनु, जिलील पा बुश तांडसीशो गोस्सुमी नेल्ल आन कली गिल्मी बाक्त। मिनू गोस्स आगा रे “एको आं दाक्शो तौ बाक्ब। एको कली तशा ग्येरसाक्यी। आ लोत्र नेनीने” देशो सेंदा नेन्मे बाक्त। मती १:१७

6 मोदेशो नेशा, शेंसीबपुकी हिंशा खुम्की पा बाग्मा बाक्त।

7 मिनू येसुमी मेको आन कली गुडमी थिशा “बोक्कीन, महिनीन” दे माइक्मी बाक्त।

8 मिनू बोक्शा कोत्रडमेनु, येसु कली ला तामे बाक्त।

9 मिनू डांडा रे ब्रुम्मानु, येसुमी “रागीम जरमेशो बेक्शो रे मसेंसे सम्म इन तशो सुइ आन कली मशेंदीने” दे माइक्मी बाक्त। मती १६:२०

10 मिनू शेंसीबपुकीमी “सास्त्रीपुकीमी ‘डोंइती एलीया जाक्चा माल्ब’ दे शेंनीम ममाइ? मारदे मोदे शेंनीमी?” दे हिल्लो पामेनु मती ११:१४

11 “थमान, एलीया डोंइती जाक्शा, नेल्ल ठीक सेल्लब।

12 तन्न एलीया डोंइती जाक्त। आ जाक्मेनु, सास्त्रीपुकीमी तुइक्तेम। मिनू मेको कली मार पचा दाक्तेम, मेकोन पाम्तेक्म। मोदेशो पा रागीम जरमेशोमी यो आन गुइ रे पा श्येत गेचा पुंडसीब, दे गो इन कली देनुड” देमाक्त। मती १४:९-१०

13 मिनू “ब्वाक्कुम खुम्शा गुंडब यूहन्ना आ पर्वम लोत्र देशो बाक्माक्त” दे रूप्मे बाक्त। लूका १:१७

येसुमी वोल् कली खेरशो

मकूस ९:१४-२९; लूका ९:३७-४२

14 मिनू येसु नु आ शेंसीब सां शुश मुर देल्शा बाक्तीकेमी जाक्मानु, मुर का येसु आ डोंइती जाक्शा, पोक्च थेक्शा सेउ पा

15 “हे प्रभु, आं तौ कली शिशी पा सापतीने। आं तौ छारे रोइ पा मीम दुप्पांडसीशा ब्वाक्कुम गुम्पांडसीशा, शुश श्येत जना जन बाक्ब।

16 इन शेंसीब आन कली सापतीने देंडानु, सापाइक्ने मचबेम” दे माइक्तु।

17 मिनू येसुमी “गे थमा पा थमा मसुइक्ब नु मटीबपुकी, गेना सम्म गेपुकी नु बाक्नुडा? ओदेशो इन पशो गेना सम्म फाल्शा बाक्नुडा डा? रोइ पाइब कली चाक्कीन” देत।

18 मिनू चाक्गमेनु, येसुमी वोल् कली हुइशशा खेरतु। मिनू आल ब्रा सात।

19 मिनू मुर गाक्मा नोले शेंसीबपुकीमी येसु कली “मारदे गो मेको वोल् कली खेरने मचाप्का?” दे हिल्लो पामेनु,

20 येसुमी “थमा पा थमा सुइक्ने मचाप्बपुकी, नोफा दाइशशा नेनीने, रायो गेडा खोइ ला थमा सुइक्तीनी हना, इन पने मचाप्चा डा मारेड मलीब। एको डांडा याक्सो देनीनु, एको डांडा यो याक्सीशा लाइब। मती २१:२१; लूका १७:६; १कोरिन्थी १३:२

21 ओदेशो वोल् खेरचा कली चहिं बर्त बाक्शा, प्रार्थना पा ला गुंइने चाम्सीब” दे माइक्तीमी।

येसु श्येत जचा माल्ब, दे लेंशा शेंशो

मकूस ९:३०-३२; लूका ९:४३-४५

22 मिनू गालील रागीम बाक्मानु, येसुमी “रागीम जरमेशोमी मुर आन गुडमी गेशा साइक्चा पुंडसीब। मती १६:२१; मती २०:१८-१९

23 मिनू बेक्शो आ नित्थ नाक्त बेक्शो रे सेंसीब” देमेनु, शेंसीब आन थुं थाम्पान खाइक्मा बाक्त।

गुम्तीक खिं डा तिमो

24 मिनू नोले कापेरनाउम सहर जाक्दीम्मानु, गुम्तीक खिं डा तिमो पोक्बपुकीमी पत्रुस कली “इन कली शेंबमी तिमो मथाप्बा?” देमानु प्रस्थान ३०:३३; २राजा १२:५-६

25 “थाप्ब” देमाक्त। मिनू खिं लेशशा जाक्मेनु, येसुमी पत्रुस कली “ए सिमोन, पिपपुकीमी तिमो पोक्पदमेनु, आन तौ आन के यो पोक्नीमी देय अर्को रागी डा मुर आन के ला पोक्नीमी, मार देनेवे?” दे हिल्लो पापनु।

26 पत्रुसम “अर्को रागी डा मुर आन के ला पोक्नीम” देत। “लो, मो हना तौपुकीमी तिमो थाप्चा ममाल्बाक्मा बाक्त।

27 मोदेशो बाक्त हना यो, मेको आन थुं नुपाइक्चा कली तिमो थाप्तस। गे समुन्द्रमी लशा, बोल्सी ग्यारशा, नेल्ल क्येडा डोंइती रेशशो डांड आ शोत्र पाक्को। आ शोत्र आगामी स्तातेर का थित्त्वे। मेको लाइशशा, इस तिमो थाप्तो” दे माइशशा सोइक्ताक्ब। स्तातेर का ४ देनार बाक्ब। ग्रीक क्येट बाक्ब।



## 18

नेल्ल क्येडा ठेयब सु बाकब

मर्कूस १:३३-३७; लूका १:४६-४८

1 मिनू काबु शेंसीबपुकीमी येसु कली “स्वर्ग डा राज्यमी नेल्ल क्येडा ठेयब सु बाकबा?” दे हिल्लो पांत्तेकम।

2 मिनू येसुमी आल का कली ब्रेशा, आन दातेमी राप्पाइशशा

3 “नोफा दाइशशा नेनीने, गेपुकीमी दोपा ठेयब दुम्चा, दे मिम्चा प्रॉइशा, आल खोदेशो मदुम्तीनी हना, स्वर्ग डा राज्य दोपा यो ओत्रचा मताइनीनी। मती १९:१४

4 एको आल खोदेशो ब्रेशोपुकी स्वर्ग डा राज्यमी नेल्ल क्येडा ठेयब बाकनीम।

5 सुमी आं नेम ओदेशो आल कली ब्राइबा, मेकोमी आं कली ब्राइब। मती १०:४०

पाप पपाइक्चा आ पबर्म शेंशो

मर्कूस १:४२-४७; लूका १७:१-२

6 सुमी आं कली थमा सुडक्ब आल कली पाप पपाइक्चा, मेको आ शुरम यात क्युकशा, समुन्द्रमी खुम्शा साइक्चा अरु सजाइ क्येडा रिम्शो बाकब। लूका १७:१-२

7 पाप पपाइक्ब आन पबर्म, आबी आबी। एको रागीमी पाप पपाइक्ब शुश जाकनीम। तन्न सुमी अरु आन कली पाप पपाइक्चा, मेको आन कली आबी आबी।

8 इ गुड खोइलीमी इ कली पाप पपाइक्तु हना, खोइशशा ताइक्तो। मारदे हना गुड खोइल निम्फा बाकशा, नरकम खुम्चा पुंडसीचा क्येडा दुंडे खोरन्डे दुम्शा, स्वर्ग डा राज्यम ओत्रचा तचा रिम्शो दुम्ब। मती ५:२९-३०

9 इ मिक्चीमी इ कली पाप पपाइक्तु हना, मिक्च फेशशा ताइक्तो। मारदे हना मिक्च निम्फा पाइशशा, नरकम खुम्चा पुंडसीचा क्येडा काना दुम्शा, स्वर्ग डा राज्यमी ओत्रचा तचा रिम्शो दुम्ब।

जाम्शो भेडा माल्थ लशो

लूका १५:४-७

10 होस पांडसीने, आल आन कली आइक्च मसेलीने। नोफा दाइशशा नेनीने, आल आन कली कोत्रब परमप्रभु यावे आ स्वर्ग डा गेय पाइबपुकी स्वर्गम बाकब आं आफ आ डोंइती बाकनीम।

11 रागीम जरमेशो जाम्शो आन कली माल्थ जाक्शो बाकब। हिबू १:१४

12 मुर का के सहे का भेडामी का जाम्त हना, मेकोमी ९९ भेडा आन कली प्रॉइशा वोइशशा, जाम्शो का कली मथिदा सम्म माल्ना माल्न मगाक्बा डा?

13 नोफा दाइशशा नेनीने, थिदानु, मजाम्शो ९९ भेडा क्येडा मेको थिशो का आ पबर्म शुश ग्येरसीब।

14 मेको बुदी स्वर्ग डा इन आफोमी आइक्च का यो मजाम्मल, दे मिम्ब।

माफ गेचा

15 इ लोकबमी इ कली मरिम्शो पापु हना, गे निकशी बाकसीनु, एको ओदेशो मरिम्शो पापुतीवी, दे तुइक्पतो। इ लोत्र बीसाक्ब हना, मेको कली आम के सेल्लेवे। लेवी १९:१७; लूका १७:३; गलाती ६:१

16 इ लोत्र मबिस्साक्ब हना चहिं, मुर निकशी सां दुम्शा लशा, सांकछी वोइशशा लोत्र पावो। ब्यवस्था १९:१५

17 मेको आन लोत्र यो मबिस्साक्ब हना, मुर पुक्शा लोत्र पावो। मिनू मेको आन लोत्र यो मबिस्साक्ब हना, अर्को रागी डा मुर खोदेशो बाक्माक्त, दे तिल्शा सोइक्तो। १कोरिन्थी ५:१३; २ थिस्सलोनिकी ३:६; तीतस ३:१०

18 नोफा दाइशशा नेनीने, रागीमी मार पाइशशा वोइक्नीनी, मेको स्वर्गम यो पाइशशा बाकब। रागीमी मार प्रॉइनीनी, मेको स्वर्गम यो प्रॉइशा बाकब। मती १६:१९; यूहन्ना २०:२३

19 मिनू रागीमी मुर निकशी गारशा, थुं का पा मारेइ पुंडताक्स हना, स्वर्गमी बाकब आं आफ रे पा आस पुंडशो ताइनीस, दे इन कली देंनुड। मर्कूस ११:२४; मती २८:२०

20 मारदे हना तेकेर आं नेमी निकशी सां खुम्सीनीमी, मेकेर गो यो बाक्नुड” दे येसुमी देंत।

21 मिनू पत्रुसमी “प्रभु, आं लोकबमी आं कली मरिम्शो पना पन बाक्त हना, गिश खेयप सम्म माफ गेचा माल्नुडा? मार ७ खेयप सम्म गेचा माल्नुडा?” देंमेनु,

22 येसुमी “गो माइक्नन, ७ खेयप ला ममाइ। ७ कली ७० खेयप हिक्शो क्येडा यो शुश माफ गेचा माल्लेवे। उत्पत्ती ४:२४; लूका १७:४; एफिसी ४:३२

23 मोपतीके स्वर्ग डा राज्य ओदेशो बाकब, पिप कामी आं जेर लाइब आन के हिसाब ताक्चा, दे मिम्ता बाक्त।

24 मिनू हिसाब ताक्गानु, मुर कामी १० हजार टलेन्ट शुश जेर थुइशशा बाक्माक्त। टलेन्ट का ६ हजार द्राक्मे कि ३४ किलो खोदेशो बाक्त।

25 मिनू मेको जेर थाम्ने मचबानु, पिपीमी ‘गे, गे नु बाक्शो थोत्रकी, इ खिं रू, इ मीश तमी तौ, लेयशा, जेर थाप्टी’ दे मदा बाक्त। नेहेम्याह ५:५

26 मो देंमेनु ‘हे पिप, गो इच्छीन थाम्ने मचापुण्ड। दीसा नित्थी दोपा हना यो थापुण्ड’ दे खुम्की पा बाप्शा सेउ पवा बाक्त।

27 मिनू पिपमी शिशी पा ‘इ लाइशशा जेर मुलाक्त डा मैरे थाप्या ममाल्लेवे। एको हिसाब नेल्ल क्याम्शा गेनन’ दे आ जेर नेल्ल क्याम्दा बाक्त।

28 मेको जेर क्याम्चा पुंडसीब मेकेर रे लशा, आ वारच का कली गुमा बाक्त। मेको आ वारचमी मेको के सहे का देनार जेर लाइशशो बाक्माक्त। मिनु गुम्सानु, ग्याइशशा आ क्रोकक्रो निष्शा 'साइ लाइशशो क्येट मुलन थाप्ती' दे मप्रोना बाक्त। देनार का रोमी आन चांदी के क्येट बाक्त। ग्रीक लोव्रमी द्वाकमे देशो बाक्त।

29 मिनु मेकोमी 'ए वारच, मुल मचापुण्ड, दीसा निल्थी दोपा हना यो, थापुण्ड' दे खुम्की पा बाष्पा सेउ पवानु

30 'मुलाक्त मथाप्ताक्यी हना, इ कली प्रॉइसीन मप्रॉइडन' दे लाइशशा, जेर नेल्ल थाम्ने मथुमा सम्म जेल्खानम चोकपा वोदा बाक्त।

31 मोपा चोक्पाइशशो तशा, आ वारचपुकीमी आन थुं स्वाइशशा, पिप कली मेको लोत्र नेल्ल तुडक्पदमे बाक्त।

32 मिनु पिपीमी चोक्पाइक्ब कली ब्रेशशा 'हिंचा डा बाक्डे बाक्त। गेम आं कली खुम्की पा बाष्पा सेउ पाप्तीवी। मिनु गो इ जेर नेल्ल क्याम्शा गेतन। लूका ६:३६

33 दोपा इ कली शिशी पाडना, मोपा गेमी यो इ वारच कली पचा ममाल्नेवे डा?' दे गाइशशा मदा बाक्त। १यूहन्ना ४:११

34 मिनु मेको आ जेर नेल्ल मथाप्ता सम्म जेल्खान डा पुलीस आन गुडमी जिम्मा गेवा बाक्त। मती ५:२६

35 मोपतीके होस पांडसीने। मारदे हना इन लोकब कली इन थुं गा रे पा माफ मगेतीनी हना, स्वर्गम बाक्ब आं आफोमी यो इन कली मोदेशोन पाइब" दे शेंताकमी। मती ६:१४-१५; याकूब २:१३

## 19

1 मिनु येसुमी मोदें शेंने थुम्शा, गालील रागी प्रॉइशा, यर्दन खोला शोक्शा, यहूदीया रागीम जाकदीत्त।

2 मिनु शुश मुर आ नोले खोइशशा लाम्तेक्म। मिनु येसुमी रोइ पाइब आन कली सापाइकना पाइक्न गाक्त।

मीश वॉइश आस पर्वम शेंशो

मर्कूस १०:१-१२

3 काबु फरिसीपुकी जाक्शा, येसु आ थुं थाम्चा कली "आन मीश आन कली मारेइ दोस गेशा प्रॉइचा तांडसीबा?" दे हिल्लो पाम्तेक्म।

4 मिनु येसुमी "नेल्ल क्येडा डोंइती परमप्रभु यावेमी वॉइश मुर नु मीश मुर सेलतीम्सी। उत्पत्ती १:२७

5 मेको लोत्र मपढेनी? 'मुरुमी आम आफ प्रॉइशा, आ मीश नु गारशा बाक्ब। मिनु मेको निक्शी रां का दुम्नीस' दे ब्रेक्शो बाक्ब। उत्पत्ती २:२४

6 मोपतीके वॉइश मीश निक्शी मनसी। निम्फा का नस, दे ब्रेक्शो बाक्ब। परमप्रभु यावेमी कांडीक सेल्शो मुरुमी मफ्रादमेक्ल" दे माइक्तीमी। १कोरिन्थी ७:१०-११; उत्पत्ती २:२४

7 मिनु फरिसीपुकीमी "मो हना मारदे मोसामी 'छोड पत्र गेशा, मीश प्रॉइने चाम्सीब' दे मुर आन कली शेंदा?" देंमानु, मती ५:३१

8 येसुमी "मुरपुकीमी शिशी मपाइनीम, दे तुइशशा, परमप्रभु यावेमी मोदेशो पा इन मीश प्रॉइचा गेपुतु। तन्न डोंइती रे मोदेशो मबाक्शो बाक्त।

9 सुमी आ मीश प्रॉइशा, अर्को चाक्बा, मेकोमी वॉइश मीश आस नाता फ्राब। मीश मुर आ वॉइश बाक्ना बाक्न अर्को वॉइश खोइक्तु हना चहिं, मोदेशो मीश कली प्रॉइचा दुम्ब। सुमी छोड पत्र गेचा पुंडसीशो मीश मुर कली ग्युंवे पाइबा, मेकोमी यो वॉइश मीश आस नाता फ्राब, दे इन कली देनुड" दे माइक्तीमी। मती ५:३२; लूका १६:१८

10 मिनु येसु आ शेंसीबपुकीमी आ लोत्र नेंशा "मोदेशो बाक्त हना, ग्युंवे मपचा रिम्शो बाक्माक्त" देंतेक्म।

11 मिनु येसुमी "का निक्शी आन कली ला एको लोत्र रुप्तीक थुं गेशो बाक्ब। शुशेमी मरुप्नीम। १कोरिन्थी ७:७

12 मुरपुकी मारदे ग्युंवे मपाइनीम देंशा हना, का निक्शी जरमेसे रे ग्युंवे पा, आल थिचा मगारचा डा बाक्नीम। का निक्शी आन कली मुरुमी आल मथीब सेल्शो बाक्नीम। का निक्शी चहिं स्वर्ग डा राज्य आ पर्वम ग्युंवे मपथु बाक्नीम। मोपतीके सु सु आन कली रुप्तीक थुं गेशो बाक्मे, मेकोपुकीमी रुप्मेक्ल" दे शेंताकमी।

आल आन कली आसीक गेशो

मर्कूस १०:१३-१६; लूका १९:१५-१७

13 मिनु मुरपुकीमी आल आन तारी आ गुड चाक्शा प्रार्थना पवल, दे आल चाक्गामेनु, शेंसीबपुकीमी "आल मचाक्कीन" दे हुइक्ताक्म।

14 मिनु येसुमी "आल आन कली आं बाक्तीके जाक्चा गेन। मारदे हना स्वर्ग डा राज्य मेको आन केन बाक्ब" देंत। मती १८:२-३

15 मिनु आल आन तारी आ गुड वॉइशशा प्रार्थना पाइक्तीमी। मिनु मेकेर रे गाक्त।

शोप पाइशशा आन पर्वम शेंशो

मर्कूस १०:१७-२७; लूका १८:१८-२७

16 मिनु मुर का जाक्शा, मेकोमी येसु कली "शेंब, गेना हना यो परमप्रभु यावे नु बाक्चा तचा कली रिम्शो पा मार पचा माल्नुडा?" देंमेनु,

17 येसुमी "रिम्शो पचा आ पर्वम मारदे हिल्लो पवी? रिम्शो पाइब का ला बाक्ब। गेना हना यो मेको नु ब्रॉइशा बाक्चा थुं पाप्तीवी हना, मेको रिम्शो पाइब आ देशो लोत्र टिचा माल्नेवे" देंमेनु

18 "लोत्र शुश बाक्नीम। तेक तेको लोत्र टिचा माल्नुडा?" देंत। मिनु येसुमी "मसाइक्चा, मीश वॉइश आस नाता मफ्राचा, खुइ मपचा, जोल मपथु सांक्छी बाक्चा।

19 आम आफ आस कली मान पा आस लोत्र टिचा। मिनू इ कली दाकशो खोदेशो पा इ नेक्था बाकब आन कली दाकतो” दैत। प्रस्थान २०:१२-१६, लेवी १९:१८

20 मिनू मेको टिटामी “इन देशो नेल्ल पना पन बाक्ती। में डा लाकशा मार पचा मालनुडा?” देमेनु,

21 येसुमी “मेको डा लाकशा पचा दाक्तावी हना, लशा इ शोंप नेल्ल लेयशा, जचा फेक्चा मताइब आन कली योक्शा गेमी। मिनू लेशशा, आं नोले खोइय्यी। मो पाप्तीवी हना, इ कली स्वर्गम शोंप वोइशशो बाकब” दैत। मती ६:२०; लूका १२:३३

22 मिनू मेको टिटामी एको लोत्र नेशा, आ कुल राव कीपाइशशा गाक्त। मारदे हना शुश शोंप पाइशशो मुर बाक्माक्त। भजन संग्रह ६२:११

23 मिनू येसुमी आ शेंसीब आन कली “नोफा दाइशशा नेनीने, शुश शोंप पाइशशो मुर स्वर्ग डा राज्य हेरा ओव्रचा मताइनीम।

24 मिनू शोंप पाइशशो मुर परमप्रभु यावे आ राज्यमी ओव्रने चाप्चा क्येडा दलओंठ लूजे आ पोलामी ग्रीने चाप्च, दे लेशा इन कली देंनुड” दैत।

25 मिनू आ शेंसीबपुकीमी छक लाकशा “मो हना सु ओव्रचा ताइनीमी डा?” दैतेक्म।

26 मिनू येसुमी मेको आन कुल गे कौवशा “मुरपुकीमी पने मचाप्नीम। तन्न परमप्रभु यावेमी पने चाप्च। मारदे हना परमप्रभु यावेमी मारेइ मारेइ पने चाप्च” दे माइक्तीमी। अय्युब ४२:२

येसु कली खोइक्ब आन तशो

मर्कस १०:२८-३१; लूका १८:२८-३०

27 मिनू पत्रुसमी “गोपुकीमी मारेइ मारेइ प्रॉइशा, इन नोले खोइक्बतक। मिनू गो मार ताइनीकी” देमेनु, मती ४:२०-२२

28 येसुमी “नोफा दाइशशा नेनीने, मार ताइनीनी देशा हना, परमप्रभु यावेमी सेल्लशो नक सरीड नु रागीमी दुमशा, रागीम जरमेशो पिप दुम्मेनु, आं कली खोइक्बपुकी १२ ओटा टेयब नित्तीकेम निशशा, इ इसाएल डा १२ थर आन कली निसाफ पाइब दुम्नीनी। लूका २२:३०; प्रकाश ३:२१; १कोरिन्थी ६:२

29 सुमी आं नें आ परबम आ खिं, आ लोक्ब, दिदी बहिनी, आम आफ, तमी तौ, आ नु बाकशो नेल्ल प्रॉइबा, मेकोमी आ प्रॉइशो क्येडा शुश ताइब। मिनू गेना हना यो परमप्रभु यावे नु बाक्चा ताइब।

30 डोंइती दुमशोपुकी नोले दुम्नीम। नोले दुमशोपुकी डोंइती दुम्नीम।

## 20

डोंइती नु नोले दुमशो

1 स्वर्ग डा राज्य ओदेशो बाकब, खिं का डा होवप सुनी कना बोक्शा, आ अडगुर रूमी गेय पाइब आन कली ब्रेथ लमाक्त।

2 काबु डा गाल्च देनार का गेनन्नी, दे गारपाइशशा, अडगुर रूमी सोइक्तीमी बाक्त।

3 मिनू सुनी ९ बजे गे बजार लशा डा मिन, गेय मथिप्च मुर आन कली तशा,

4 मेको आन कली ‘गे यो लशा, आं अडगुर रूमी गेय पने। इन गेय पशो डा गाल्च गारपा गेनन्नी’ दे सोइक्तीमी बाक्त।

5 मिनू मोपान १२ बजे नु ३ बजे यो अरु आन कली ब्रेशशा, गेय पथ सोइक्तीमी बाक्त।

6 मिनू क्यारश चोक्ची सम्म यो गेय मथिप्च आन कली तशा ‘गे सुनी रे मार गुड फ्रेशा बाक्नी’ दे हिल्लो पवा बाक्त।

7 मिनू मेकोपुकीमी ‘सुइमी गेय मगेमे। मिनू गो मार पाइनीकी?’ देमानु ‘गे यो लशा, आं अडगुर रूमी गेय पने’ दे माइक्तीमी बाक्त।

8 मिनू नां रिक्शा गेय प्रोन्मे नोले, होव्रपमी आ क्येट योक्ब मुर कली ‘गेय पाइब आन कली ब्रेशशा, आन गाल्च योक्शा गेमी। नेल्ल क्येडा नोले जाक्शो आन कली डोंइती योक्शा गेमी’ देमाक्त।

9 मिनू क्यारश चोक्ची ना जाक्शो आन कली डोंइती ब्रेशशा, काबु डा गाल्च देनार का का गेमी बाक्त।

10 मिनू सुनी कना रे गेय पाइबपुकीमी जाक्शा ‘एको आन क्येडा शुश ताइनीकी’ दे मिम्तमे बाक्त। तन्न नेल्लेमी देनार का का ला तामे बाक्त।

11 मिनू ताक्शा, मेको आन थुं मनुथु, होव्रप कली

12 ‘नेल्ल क्येडा नोले जाक्बपुकीमी इच्का ला गेय पाम्तेक्म। गोपुकी सुनी रे गेय पा नांम दुप्शा चोशा श्येत पा गेय पाइतक। तन्न आंइ कली उइक्थ उइक्थ गाल्च गेतीनी’ दे गाइशशा देमा बाक्त।

13 मिनू होव्रपमी मो देंब का कली ‘आं वारच, इ कली मार मरिम्शो पडा? काबु डा गाल्च देनार का कली बिस्से ममाइ डा?

14 देनार का ताक्शा लावो। नोले जाक्ब कली यो इ कली गेशो खोदेशो पा गेचा दाक्ताक्ड।

15 आंम आं के बाक्शो आं दाक्शो पा योक्चा मताइनुडा डा? अरु आन कली शिशी पशो तशा, इ कुप्फीम मी ब्रवे?’ दे मदा बाक्त। रोमी ९:१६, २१

16 मोदेशो पान, नोले दुम्बपुकी डोंइती दुम्नीम, डोंइती दुम्बपुकी नोले दुम्नीम” दे शेंताक्मी।

येसुमी श्येत जचा माल्ब, दे शेंशो

मर्कस १०:३२-३४; लूका १८:३१-३३

17 मिनू येसु यरूसलेम डा लां खोइशशा गाक्मेनु, आ शेंसीब १२ जना आन कली सुइ मबाक्तीकेम लाइशशा

18 “मुल यरूसलेम लाइनय। मिनु रागीम जरमेशो ठेयब चढेब नु सास्त्री आन गुडमी जिम्मा गेचा पुंडसीब। मिनु मेकोपुकीमी दोस गेशा, साइक्या डा सजाइ गेनीम। यूहन्ना २:१३; मती १६:२१; मती १७:२२-२३

19 शुक्शी पा युक्शा, शीम केप्शा कांटी थोकशा, क्याइश्शा साइक्थ अर्को जात डा मुर आन गुडमी गेनीम। बेक्शो आ नित्थ नाक्त बेक्शो रे सेंसीब” दे माइक्तीमी।

ठेयब दुम्चा कली गेय पचा मालब

मर्कूस १०:३६-४५

20 मिनु काबु जब्दी तौ आस ममामी आ तौ आस कली चाक्शा, येसु कली सेउ पाप्तु। मती १०:२

21 मिनु येसुमी “मार पुंडनेवे?” दैमेनु “हे शेंब, गे इन राज्यम आं तौ आस कली का इन ग्युरा, का इन पेरा गे बाक्चा गेचा कली मुल हुकुम दुम्ल” दे पुंडतु। मती १९:२८

22 मिनु येसुमी आ तौ आस गे हिरशा “इस पुंडशो मार बाक्मे, दे मरुप्नीसी। गोमी तूचशो कचौरा तूने चान्नीसी?” दैमेनु “चान्स्कु” दैताक्स। मती २६:३९

23 मिनु येसुमी “थमा आं कचौराम तूनीसी। तन्न आं ग्युरा पेरा गे बाक्चा गेचा आं गुडमी ममाइ। आं आफोमी योव्रशो आन कली बाक्ब” दे माइक्तीमीसी। प्रेरित १२:२; प्रकाश १:९

24 मिनु शेंसीब १० जनामी मेको आस कली मो देंशो नेंशा “एको निक्शी दोदेंशो बाक्सा, है” दे आन थुं मनुम। लूका २२:४-२७

25 मिनु येसुमी नेल्ल आन कली खुप्शा “अर्को रागी कली हुकुम पाइबपुकीमी मुर आन कली दिप्शा वोइश्शा, हुकुम पाइनीम, दे तुइक्नीनी।

26 गेपुकी इन दातेमी मोदेंशो पचा मदुम्ब। इन दातेमी ठेयब दुम्चा माल्बम नेल्ल आन गेय पाइब दुम्चा माल्ब। मती २३:११; १कोरिन्थी ९:१९

27 इन दातेमी नेल्ल क्येडा डोंइती दुम्चा माल्बम नेल्ल आन वाइल दुम्चा माल्ब। मर्कूस ९:३५

28 रागीम जरमेशो मान पपाइसीचा कली जाक्शो ममाइ। तन्न गेय पथ नु शुश मुर आन कली प्रोंइचा कली आ गिंम सोइक्थ जाक्शो बाक्ब” दे माइक्तीमी। फिलिप्पी २:७; १पत्रुस १:१८-१९

मिक्च मताइबम तशो

मर्कूस १०:४६-५२; लूका १८:३५-४३

29 मिनु काबु यरीको सहर रे गाक्मानु, शुश मुरुमी येसु आ नोले खोइक्तेकम।

30 मिनु लांमी बाक्शा, मिक्च मताइब निक्शीमी येसु एको लां पित देंशो नेंशा “हे प्रभु, दाऊद आ तौ, गो आंस कली शिशी पांडस्की” दे वाइ ब्रेत्ताक्स।

31 येसु नु काथा गाक्बपुकीमी “रेयके मपसे” दे हुइक्तेमेनु, डोंइती क्येडा वाइ ब्रेशशा “प्रभु, दाऊद आ तौ, गो आंस कली शिशी पांडस्की” दे ब्रेत्ताक्स।

32 मिनु येसु ख्वा दिक्शा, मेको आस कली ब्रेशशा “इस कली मार पडा, मार पुंडसी?” दैमेनु

33 “प्रभु, आंस कली मिक्च ताइब सेलीने” दे पुंडताक्स।

34 मिनु येसुमी मेको आस कली शिशी पा आस मिक्च थिवानु, मिक्च ताइब दुम्शा, येसु आ नोले खोइक्ताक्स।

## 21

येसु मान पचा पुंडसीशो

मर्कूस ११:१-१०; लूका १९:२९-३८; यूहन्ना १२:१२-१९

1 मिनु यरूसलेम आ नेक्था जैतून डांडा डा बेथफागे माइश्शो गांउ जाक्दीत्तेकम।

2 मिनु येसुमी आ शेंसीब निक्शी आस कली “मेरे गांउ लसे। मेकेर जाक्दीश्शा, गधा नु आ चाइक्ब पाइश्शा वोइश्शो थिल्तीसी। मेको निक्शी प्रोंइशा चाक्कीसे।

3 मुरपुकीमी “एको गधा मारदे लाइक्सी?” दैतेकम हना “प्रभु मेको कली माल्ताक्व” दैसीनु, लाइक्चा गेनीम” दे सोइक्ताक्सी। मती २६:१८

4 मोदेंशो दुम्चा माल्ब। मारदे हना साइ नेसी परमप्रभु यावे आ लोव्र पाइबमी

5 “सियोन डा तमी कली ओदें तुइक्पतीन। कोव्रडीन, इन पिप ब्रेम्शो दुम्शा, गधा गधैनी आ चाइक्ब डोइश्शा, इन बाक्तीके गे पिन पिन बाक्ब” दे ब्रेक्शो बाक्ब। जकरिया ९:९

6 मेको निक्शी लशा, येसु आ देंशो खोदेंशो पाम्से बाक्त।

7 मिनु गधा नु आ चाइक्ब चाक्शा, आन वासी गधा तारी ब्राम्तेकम। मिनु येसु डोंइसाक्व।

8 मिनु येसु आ नोले खोइक्बपुकीमी आन फेक्तीक वा लांमी ब्राम्तेकम। खजूर रवा आ राशी जिक्शा, लांमी ब्रशा दारशो सेल्लेकम। २राजा ९:१३

9 मिनु आ डोंइती नोले गाक्बपुकीमी “दाऊद आ तौ कली होसन्ना, परमप्रभु यावे आ नेंमी जाक्ब कली जाइ, गे ठेयब बाक्नीनी” दे रेयके पा ठेयब सेल्ला सेल्ला गाक्तेकम। भजन संग्रह ११८:२५-२६

10 मिनु यरूसलेम सहर ओव्रमेनु, मेकेर बाक्बपुकीमी “मेको सु बाक्म, माइ” दे लोव्र पमुम्तेकम।

11 मिनु येसु नु काथा गाक्बपुकीमी “गालील रागी डा नासरथ रे जाक्शो परमप्रभु यावे आ लोव्र पाइब येसु एको बाक्ब” दैतेकम।

ग्याप्ब लेयब आन कली खेरशो

मर्कूस ११:१५-१९; लूका ११:४५-४८; यूहन्ना २:१३-१६

12 मिनू येसु परमप्रभु यावे आ खिं ओव्रत। मेकेर ग्याप्ब लेयब क्येट फाइक्ब आन कली खेरतीमी। क्येट फाइक्ब आन टेबल नु दुकुर लेयब आन नित्तीके खोलशा गोमतीमी।

13 मिनू “ ‘आं खिं आं कली मान पतीके बाक्ब’ दे ब्रेकशो बाक्ब। गेपुकीमी चहिं खुइ आन बाक्तीके पुक्खी सेलतीनी” दे हुइक्ताक्मी। यसैया ५६:७, येरमीया ७:११

आलपुकीम येसु कली मान पशो

14 मिनू मिक्च मताइब नु खोरन्डेपुकी जाक्तेक्म। मिनू येसुमी मेको आन कली सापाइक्तीमी।

15 मिनू ठेयब चढेब नु सास्त्रीपुकीमी येसुमी छक लाक्चा डा गेय पशो नु आलपुकीमी “दाऊद आ तौ कली होसन्ना” दे शुश रेयके पा येसु कली ठेयब सुइश्शा मान पशो तशा, होसन्ना आ देशो “परमप्रभु वारच पने” बाक्ब।

16 येसु कली “मेकोपुकीमी मार देंबाक्मा मनेनीनी?” दे गाइश्शा देंतेक्म। मिनू येसुमी “नेता, ‘आइक्च आल नु बुकलु आलपुकीमी इन कली ठेयब सेल्पांडसाक्नी’ दे ब्रेकशो लोत्र मपढेनी?” दे माइक्तीमी। भजन संग्रह ८:२

17 मिनू मेको आन कली प्रोइशा, सहर रे गूशा, बेथानी जाक्दीश्शा बास बाक्त।

सिश्शो फोव्रशी रवा

मर्कूस ११:१२-१४, २०-२४

18 आ दीसा सुनी यरूसलेम लेम्मेनु, शोव्रलु बेक्माक्त।

19 मिनू लां नेक्थामी फोव्रशी रवा का तशा, फोव्रशी सिश्शो बाक्म कों, दे कोव्रडानु, सफा ला ताप्तु। सफा ला तशा “मुल डा मेरे गेनायो मसिप्ब रवा दुमो” दे माइक्तु। मिनू रवा साव सोव्रत। लूका १३:६

20 मिनू शेसीबपुकीमी रवा सोव्रशो तशा “रवा दोपा साव सोव्रमे” दे छक लाक्तेक्म।

21 मिनू येसुमी “नोफा दाइश्शा नेनीने, दलीर मपथु थमा सुइक्तीनी हना, फोव्रशी रवा कली पशो खोदेशो पचा ला ममाइ, डांडा कली एकेर रे समुन्द्रमी याक्सो देंतीनी हना, मेको डांडा यो याक्सीशा लाइब। मती १७:२०

22 थमा सुइश्शा प्रार्थना पा पुंडतीनी हना, इन पुंडशो ताइनीनी” दे माइक्तीमी।

येसु आ अधिकार ते रे जाक्बा?

मर्कूस ११:२७-३३; लूका २०:१-८

23 मिनू परमप्रभु यावे आ खिं ओव्रशा, मुर आन कली शेना शेन बाक्मेनु, ठेयब चढेब नु जोक्ब तुइक्ब खालपापुकी जाक्शा “तेको अधिकारमी मोदेशो पवी? एको अधिकार सुमी गेवे?” देंतेक्म। यूहन्ना २:१८; प्रेरित ४:७

24 मिनू येसुमी “गो इन कली लोत्र का हिल्लो पाइनुइ। गेम आं लोत्र लेत्ताक्नी हना, तेको अधिकारमी एको गेय पडा, दे शेनन्नी।

25 यूहन्नामी मुर आन कली ब्वाक्कुम खुम्शा गुंडतीके अधिकार स्वर्ग रे तवा, दे मुरपुकी रे तवा?” दे हिल्लो पाम्तीमी। मिनू लोव्रसी पमुशा “स्वर्ग रे तवा बाक्त देंतय हना, मो हना यूहन्ना आ लोत्र मारदे थमा मसुइक्नी देंब।

26 मुरपुकी रे तवा बाक्त देंयानु, मुरपुकीमी इ लोत्र मनेंथु मटीनीम। मारदे हना मुरपुकीमी यूहन्ना परमप्रभु यावे आ लोत्र पाइब बाक्त, दे थमा सुइश्शा बाक्नीम” देमुक्तेक्म। मती १४:५

27 मोपतीके “मतुइक्नीकी” देंतेक्म। मिनू येसुमी “मो हना तेको अधिकारमी एको गेय पडा, गो यो मशेनन्नी।

येसु कली ग्येरपाइक्ब

28 अर्को लोत्र का नेशा मिम्तीने। मुर का के तौ निक्शी बाक्सा बाक्त। मिनू काबु आफोमी आ जेठा कली ‘आं तौ, मुलाक्ती अडगुर रूमी गेय पथ लावो’ देंमाक्त।

29 मिनू जेठामी ‘गो मलाइनुइ’ देंमाक्त। नोले आ थुं लेशशा लमाक्त।

30 मिनू आफोमी कान्छा कली यो ‘आं तौ, मुलाक्ती अडगुर रूमी गेय पथ लावो’ देंमाक्त। मेकोमी ‘दुम्ब, गो लाइनुइ’ देंमाक्त। तन्न मलमाक्त। मती ७:२१

31 आस आफ आ दाक्शो सुमी पवा? जेठामी पवा, दे कान्छामी पवा?” दे माइक्मीनु “जेठामी पवा बाक्त” देंतेक्म। मिनू येसुमी मेको आन कली “नोफा दाइश्शा नेनीने, इन क्येडा डोंइती तिरो पोक्ब नु तेल्लेम पाइबपुकी परमप्रभु यावे आ राज्य ओव्रचा ताइनीम। लूका १८:९-१४

32 मारदे हना यूहन्नामी ठीक लां कोंइशा यो गेपुकीमी थमा सुइश्शा, इन थुं परमप्रभु यावे गे मलेलतीनी। मेकोपुकीमी चहिं यूहन्ना कली थमा सुइश्शा, आन थुं परमप्रभु यावे गे लेत्ताक्म” देंत। लूका ७:२९

मरिम्शो बुम्था पाइब

मर्कूस १२:१-२; लूका २०:९-१९

33 मिनू येसुमी “लो, अर्को कथा का नेनीने। मुर कामी अडगुर खुम्शा, थारपु हिरशा, अडगुर खाक्तीक नु वोइक्तीक सेल्शा, बुम्था पाइब माल्शा, मेको आन कली गेशा वोइश्शा, अर्को रागी लमाक्त। यसैया ५:१-२

34 अडगुर मीशा सेक्वी जाक्मेनु, आ गेय पाइब आन कली आ भाग पोक्थ सोइक्तीमी बाक्त।

35 मिनू गेय पाइबपुकी जाक्दीम्मानु, बुम्था पाइबपुकीमी का कली तुम्पे बाक्त, का कली सदमे बाक्त, का कली फुल्लु आप्शा खेरमे बाक्त।

- 36 मिनू डोंडती सोइशशो क्येडा शुश आन कली सोइक्तीमी बाकत। मेको आन कली यो में मोदेशोन पामे बाकत।  
 37 मिनू 'आं तौ कली टीनीम को' दे मिम्शा, आ तौ कली सोइक्ता बाकत।  
 38 मिनू बुम्शा पाइबपुकीमी आ तौ कली पिशो तशा 'एको अडस ताइब बाकब। लो साइक्या। मिनू रू, अडगुर नेल्ल इ केन दुम्ब' देशा गारमा बाकत। मती २६:३-५; यूहन्ना १:११  
 39 मिनू फि ग्याइशशा, रू रे गुंडशा, सदमे बाकत।  
 40 मो पाइब आन कली रू होत्रप लेशशा जाकशा, मार पाइबा?' दैमेनु  
 41 "मोदेशो मरिम्शो पाइब आन कली साइकपाइकब। आ रू चहिं सुमी अडगुर मीमेनु, पोक्थ जाकब आन कली गेब, मेको आन कली गेब" दैतेकम।  
 42 मिनू येसुमी "ओदेशो ब्रेकशो लोत्र मपढेनी? 'खिं सेल्वपुकीमी गारो प्रोडमेनु, एको फुल्लु मगार, दे ताइकतमे बाकत। मेको मगारथु ताइशशो फुल्लु चहिं सुर डा सुरे फुल्लु दुम्माकत। परमप्रभु यावेमी मोदेशो पशो बाकत। मिनू मेको इ दातेमी छक लाक्या डा बाकब' दे ब्रेकशो बाकब।। भजन संग्रह ११८:२२-२३; प्रेरित ४:११; १पत्रुस २:४-८  
 43 मोपतीके परमप्रभु यावे आ राज्य इन गुड रे रोइक्या पुंडसीनीनी। मिनू फल सिप्ब अर्को जात डा मुर आन कली गेब, दे माइक्तीमी।  
 44 सुमी एको फुल्लुम दाल पांडसीशा राम्सीबा, मेको फस दुम्ब। एको फुल्लुमी सु कली चिप्बा, मेको चिम्सीशा बेकब" दैत।  
 45 मिनू ठेयब चढेब नु फरिसीपुकीमी येसुमी देशो कथापुकी नेशा "एहे, इ कली कका देशो बाक्माकत" दे रुपमे बाकत।  
 46 मिनू ग्याइकपाइक्या माल्मे बाकत। तन्न येसु कली "परमप्रभु यावे आ लोत्र पाइब बाकब" दैब आन कली तशा, हिंमा बाकत।

## 22

पिप आ ग्युबेम ब्रेशो

लूका १४:१६-२४

- 1 मिनू येसुमी लेशा कथापुकी सेल्शा, मुर आन कली शेना शेंन  
 2 "स्वर्ग डा राज्य ओदेशो बाकब, पिप कामी आ तौ आ ग्युबे पा भोज पचवा बाकत। यूहन्ना ३:२९  
 3 मिनू आ गेय पाइब आन कली निम्तो ताइब आन कली ब्रेत्थ सोइक्तीमी बाकत। तन्न निम्तो ताइबपुकी लचा थुं मपामे बाकत।  
 4 मिनू लेशा अरु गेय पाइब आन कली 'नेनीने, गो जचा थोत्रकी सेल्शा ठीक पाता। लो, जथ जाक्कीन, दे मतीन' दे ब्रेत्थ सोइक्तीमी बाकत।  
 5 तन्न ब्रेत्था पुंडसीब नेल्लेमी ग्युबे जथ लचा थुं मपथु, का आ रूमी गेय पथ लमाकत, का ग्याप्तीक लेयतीक गेय पथ लमाकत।  
 6 लीशोपुकीमी ब्रेत्थ जाकब आन कली शुक्शी पा ग्याइशशा तुप्शा सदमे बाकत। मती २१:३५  
 7 मिनू पिपमी मोदेशो दुम्शो तुइशशा चुरशा, आ सिपाही आन कली 'लने, मुर साइकब आन कली साइशशा, आन सहर गाउं क्रोइशशा गेने' दे सोइक्तीमी बाकत। मती २४:२  
 8 मिनू आ गेय पाइब आन कली 'आं तौ आ ग्युबे भोज ठीक सेल्ला। ब्रेशोपुकी चहिं भोजम जाक्या मशिरसीशो बाक्मा बाकत।  
 9 मोपतीके मुल लां पित्थ लशा, सु सु आन कली थिन्नी, मेको आन कली चाक्कीने' दे सोइक्तीमी बाकत। मती १३:४७  
 10 मिनू मेकोपुकीमी लां पित्थ लशा, रिम्शो मरिम्शो दोदेशो मुर थिदमे, मोदेशो नेल्ल आन कली खुप्शा चाक्गामे बाकत। मिनू ग्युबे खिं पौनापुकीमी ब्रीमाकत।  
 11 मिनू पिपमी 'आं पौना दोपा बाक्मा, दोशो जाक्मा' दे कोत्रथ जाक्मेनु, ग्युबे भोज डा वा मफेक्शो मुर का तवा बाकत। प्रकाश १९:८  
 12 मिनू 'ए वारच, ग्युबे भोज डा वा मफेक्थु, दोपा एकेर ओव्रडे?' दैमेनु, सिक्सी पा मारेइ दैने मचबा बाकत।  
 13 मिनू पिपमी आ गेय पाइब आन कली 'एको आ गुड खोइल फ्रेशा गुंडशा, छिडछिडमी ताइक्तीन। मेकेर मुरपुकी आन खुड शेप्शा डाक्नीम'  
 14 ब्रेत्था पुंडसीशो मुर शुश बाक्नीम, योत्रशो चहिं का निक्शी ला बाक्नीम" दे येसुमी शेंताकमी।

तिरो थाप्चा देय मथाप्चा

मर्कुस १२:१३-१७; लूका २०:२०-२६

- 15 मिनू फरिसीपुकीमी "एको कली दोपा आंम आ लोत्र खाइकपपाइशशा दोस गेचा" दे लोत्रसी पममा बाकत।  
 16 मिनू आन शेंसीब नु हेरोद आ वारच आन कली येसु आ बाक्तीके ओं माइक्थ सोइक्तीमी बाकत "हे शेंब, गे थमा पाइब ननी। मुर आन कुल मकोवथु सुड नु महिंथु, परमप्रभु यावे आ लोत्र थमा पा शेंनीनी, दे तुइक्नीक। यूहन्ना ३:२  
 17 मिनू लोत्र का शेंदीकी, शेंब हजुर, मार लोत्र देशा हना, सिजर सरकार कली तिरो थाप्चा माल्ब, दे मथाप्थु यो दुम्बा?" दे हिल्लो पखु पा, लोत्र खाइकपपाइक्या माल्तेकम।  
 18 मिनू येसुमी मेको आन मरिम्शो मिम्शो तुइशशा "ए कपटीपुकी, मारदे आं थुं थाम्नीनी?  
 19 तिरो थाप्तीके क्येट का कोंडदीनी" दैमेनु, देनार का कोंडताकम।  
 20 मिनू "एको सु आ नेमी खोइशशो बाक्मे?" दैमेनु

21 “सिजर आ नेमी खोइश्शो बाकत, हजुर” दैतेकम। मिनू येसुमी “लो मो हना, सिजर आ थोत्रक सिजर कली गेने। परमप्रभु यावे आ थोत्रक परमप्रभु यावे कली गेने” दैमेनु, रोमी १३:१,७

22 मेकोपुकी छक लाकशा, फ्रा फ्रु लेशा गाक्तेकम।

बेक्शो रे सेंसीचा आ पर्वम शेंशो

मर्कुस १२:१८-२७; लूका २०:२७-४०

23 मिनू सदुकीपुकी जाक्तेकम। सदुकीपुकीमी बेक्शो रे मसेंसीब, दे शेंनीम। मिनू येसु आ बाक्तीके जाक्शा प्रेरित ४:२; प्रेरित २१:६-८

24 “हे शेंब, मोसामी बेक्शो लोत्रमी ‘मुर कामी आल मथिथु बेकत हना, आ लोकबमी आ भोग्यु वोंइसीशा, आ दाग्यु आ पा डा सन्तान मजाम्मल, तमी तौ थिवल’ दे बेक्शो बाकब। ब्यवस्था २५:५-६

25 खिं कामी ७ जना लोकब बाक्तेकम। मिनू डोंइती जरमेशोमी ग्युंवे पाप्तु।

26 मिनू आल मथिथु बेकत। मिनू माइलामी आ भोग्यु वोंइसाकव। मिनू मेको यो आल मथिथु बेकत। मिनू साइलामी आ भोग्यु वोंइश्शा, मेको यो आल मथिथु बेकत। मोदेशो पा ६ जनामीन आन भोग्यु वोंइश्शा, आल मथिथु बेक्तेकम।

27 मिनू नोले मेको मीश मुर यो बेकत।

28 मुर बेक्शो रे सेंसीशा ब्रोंइमानु, मेको ७ जना वोंइश आन मीश दुम्शो मीश मुर तेको आ मीश दुम्बा?” दे हिल्लो पाप्तेकम।

29 मिनू येसुमी “गे दूली मिम्नीनी। मारदे हना परमप्रभु यावे आ लोत्र मरुप्नीनी, परमप्रभु यावे आ सक्ति यो मतुइक्नीनी।

30 बेक्शो रे सेंसीशा ब्रोंइमानु, मुरुमी ग्युंवे मपाइनीम। स्वर्गम बाकब परमप्रभु यावे आ गेय पाइब खोदेशो बाक्नीम।

31 बेक्शो रे सेंशा ब्रोंइचा देशो मार बाकब देशा हना,

32 परमप्रभु यावेमी ‘गो अब्राहाम आ परमप्रभु यावे, इसहाक आ परमप्रभु यावे, याकूब आ परमप्रभु यावे नड’ दे बेक्शो बाकब। मेको लोत्र मपढेनी? परमप्रभु यावे बेक्शो मुर आन परमप्रभु यावे ममाइ। ब्रोंइशो आन परमप्रभु यावे बाकब” दे माइक्तीमी। प्रस्थान ३:६

33 मिनू मेकेर देल्शोपुकीमी येसु आ लोत्र नेशा छक लाक्तेकम।

नेल्ल क्येडा टेयब अरेशो लोत्र

मर्कुस १२:२८-३१; लूका १०:२५-२८

34 मिनू फरिसीपुकीमी “सदुकी आन कली लेन्ने मचाप्चा डा लोत्र पाइमी बाकत” देशो नेशा, खुम्सीशा जाक्तेकम।

35 आन दाते डा अरेशो लोत्र जोकब तुइक्ब कामी येसु कली

36 “हे शेंब, परमप्रभु यावे आ अरेशो लोत्र डा तेको नेल्ल क्येडा तुइक्चा माल्शो बाक्बा?” दे आ थुं थाम्चा कली हिल्लो पाप्तु।

37 मिनू येसुमी “ ‘गेपुकी परमप्रभु यावे, इन परमप्रभु कली इन थुं नेल्लेमी, इन सोक्त नेल्लेमी नु इन बोल नेल्लेमी दाक्चा माल्नीनी’ ब्यवस्था ६:५

38 मेको नेल्ल क्येडा टेयब नु तुइक्चा माल्शो अरेशो लोत्र बाकब।

39 मिनू आ नोले डा लोत्र ‘आम इ कली दाक्शो खोदेशो पा, इ नेक्था बाकब कली यो दाक्तो’ देशो बाकब। लेवी १९:१८

40 एको अरेशो लोत्र निक्शीमी परमप्रभु यावे आ अरेशो लोत्र नु आ लोत्र पाइब आन लोत्र नेल्ल खाप्शो बाकब” दे येसुमी माइक्तीमी। रोमी १३:९-१०

ख्रीस्त सु आ तौ बाक्बा?

मर्कुस १२:३५-३७; लूका २०:४१-४४

41 काबु फरिसीपुकी खुम्समानु, येसुमी मेको आन कली

42 “ख्रीस्त आ पर्वम मार मिम्नीनी? मेको सु आ तौ सुइक्नीनी?” दे हिल्लो पाप्तु। मिनू “दाऊद आ तौ” दैतेकम। यसेया ११:१; यूहन्ना ७:४२

43 मिनू येसुमी “मो हना मारदे परमप्रभु यावे आ सोक्त रे पा दाऊदमी मेको कली प्रभु देंबा?

44 ‘परमप्रभु यावेमी आं प्रभु कली “इ जोरी सत्रु आन कली इ खोइल आगाम मवोदुमी सम्म आं ग्युरा गे बाक्को” देशा’ बेक्शो बाकब। भजन संग्रह ११०:१; मत्ती २६:६४

45 दाऊदमी मेको कली ‘प्रभु’ देंब। मिनू दोपा आ तौ दुम्मे?” दे माइक्तीमी।

46 मिनू सुइमी लोत्र का यो लेन्ने मचबेम। में डा मेरे हिंशा, लोत्र हिल्लो पचा यो प्रोंइतेकम।

## 23

कपटी आन कली हुइश्शो

मर्कुस १२:३८-४०; लूका २०:४५-४७; लूका ११:३९-५२

1 मिनू येसुमी मेकेर देल्शो शुरु मुर नु आ शेंसीब आन कली शेंना शेंन

2 “सास्त्री नु फरिसीपुकी इं किर्की पिपी मोसा आ पा डा दुम्शो बाक्नीम।

3 मेको आन शेंशो टिने, तन्न आन पशो खोदेशो मपने। मारदे हना मेकोपुकीमी देंनीम, तन्न मपाइनीम। मलाकी २:७-८; रोमी २:२१-२३

4 हेल्शो भारी सेल्शा, मुर आन कली कुरपाडक्नीम। मेकोपुकीम चहिं ब्रेप्चो कामी यो नेप्शा मगेनीम। मती ११:२८-३०; प्रेरित १५:१०, २८

5 मार मार पामेनु, मुर आन डोंडती ला पाडनीम। ठेयब टालोमी परमप्रभु यावेमी अरेशो लोत्र ब्रेक्शा आन फेक्शो वामी केप्नीमी। मिनु आन वामी लाडशो झुम्का क्युकसीनीम। मती ६:१; गन्ती १५:३८-३९

6 भोजमी नु युम्तीक खिंमी मान पचा पुंडसीतीकेमी नित्चा दाक्नीम। लूका १४:७

7 लां बजारमी गाक्मानु, मान पा सेड पा 'शेंब, हजुर' देपांडसीचा दाक्नीम।

8 गे इन कली सुडमी शेंब हजुर मदेंमल। मारदे हना इन कली शेंब का ला बाक्ब। गे नेल्ल वोबु ननी।

9 एको रागीमी सुड आन कली आफ मदेनीने। मारदे हना इन आफ का ला स्वर्गम बाक्ब।

10 गे इन कली सुडमी होत्रप मदेंमल। मारदे हना इन होत्रप का ला खीस्त बाक्ब।

11 इन दातेमी नेल्ल क्येडा ठेयब सु बाक्मे, मेको इन गेय पाडब दुम्ब। मती २०:२६-२७

12 ठेयब सुंडसीब हिक्चा मपुंडसीब। महिक्सीशो चहिं मान पाडक्चा पुंडसीब। अय्युब २२:२९; हितोपदेस २९:२३; इजीकीएल २१:३१; लूका १८:१४; १पत्रुस ५:५

13 सास्त्री नु फरिसीपुकी, गे कपटी, इन कली तशा थुं खाडक्ती। मारदे हना स्वर्ग डा राज्य ओव्रतीक लां तेक्नीनी। गे मओव्रनीनी, मिनु अरु आन कली यो ओव्रचा मगेनीनी।

14 सास्त्री नु फरिसीपुकी, गे कपटी, इन कली तशा थुं खाडक्ती। मारदे हना दुडशो प्रार्थना पा कोंडखु पा वोंडश बेक्शो मीश मुर आन शोंप नेल्ल नेक्शा गेनीनी। मोपतीके अरु आन क्येडा शुश सजाड ताडनीनी।

15 सास्त्री नु फरिसीपुकी, गे कपटी, इन कली तशा थुं खाडक्ती। मारदे हना इन खोदेशो पा यहूदी धर्म पाडब का सेल्चा कली रागी नेल्ल हिरशा गाक्नीनी। मिनु इन लोत्र टीब सेल्शा, इन क्येडा शुश सजाड ताडपाडश, नरक सोडक्नीनी।

16 मिक्च मताडब दुम्शा यो लां कोंडखु पाडब, इन कली तशा थुं खाडक्ती। मारदे हना परमप्रभु यावे आ खिं थिशा कसम जशोमी मारेड लोत्र मथोक्सीब, खिं डा सुन थिशा चहिं लोत्र थोक्सीब, दे शेंनीनी। मती ५:३४-३७; मती १५:१४

17 मिक्च मपाडशो मूर्खपुकी, सुन ठेयब मिम्सीबा, दे सुनमी ग्योम्सीशो खिं ठेयब मिम्सीबा?

18 चढेतीके थिशा, कसम जशोमी लोत्र मथोक्सीब, चढेशो थोवकी थिशा कसम जशोमी चहिं लोत्र थोक्सीब, दे यो शेंनीनी।

19 मिक्च मपाडशोपुकी, चढेशो ठेयब मिम्सीबा, दे चढेतीके ठेयब मिम्सीबा?

20 चढेतीके थिशा कसम जाडबमी चढेतीके नु चढेशो थोवकी थिशा कसम जशो बाक्ब।

21 परमप्रभु यावे आ खिं थिशा कसम जाडबमी परमप्रभु यावे आ खिं नु मेकेर बाक्ब परमप्रभु यावे कली थिशा कसम जशो बाक्ब।

22 स्वर्ग कोंव्रशा कसम जाडबमी परमप्रभु यावे आ नित्तीके नु मेकेर निप्ब कली कोंव्रशा, कसम जशो बाक्ब, दे रूपीने।

23 सास्त्री नु फरिसीपुकी, गे कपटी, इन कली तशा थुं खाडक्ती। मारदे हना मसला खोरसानी डा १० भागमी भाग का परमप्रभु यावे कली चढेनीनी। तन्न परमप्रभु यावे आ अरेशो तुडक्चा माल्शो ठीक निसाफ पतीके, मुर आन कली शिशी पतीके नु परमप्रभु यावे कली थमा सुडक्तीके लोत्र ममिम्नीनी। एको गेय पचा माल्शो ननी, मिनु इन पशो यो मप्रोंडचा माल्शो ननी। लेवी २७:३०; लूका १८:१२; मीका ६:८

24 मिक्च मताडब दुम्शा यो लां कोंडखु पाडबपुकी, तूचा ब्वाक्कुमी रकमिक्च ओव्रशो बाक्त हना, तिल्शा तूनीनी। दलओंट खोदेशो ठेयब जन्तु ओव्रशो बाक्त हना, यु दाक्नीनी।

25 सास्त्री नु फरिसीपुकी, गे कपटी, इन कली तशा थुं खाडक्ती। मारदे हना बोस आ तार ला खुडशो खोदेशो पा गेपुकी लाडगा रे रिम्शो तांडसीनीनी। तन्न इन आगामी खुड नु ग्रांरा दिचा डा गेय पतीकेमी बीशो बाक्नीनी। मर्कूस ७:४, ८

26 ए मिक्च मपाडशो फरिसीपुकी, डोंडती बोस आगा खुडक्तीने। मिनु आ तारी यो रिम्शो तांडसेक्ल। यूहन्ना ९:४०; तीतस १:१५

27 सास्त्री नु फरिसीपुकी, गे कपटी, इन कली तशा थुं खाडक्ती। मारदे हना बुलु बुडशो दारपाडशो तुरस खोदेशो ननी। मेको आ तारी दारशो तांडसीब, तन्न आगाम रुश राक्शा, रिना पाडशो ग्रांरा दिचा डा बाक्ब।

28 मोदेशो पा गेपुकी यो मुर आन डोंडती धर्मी तांडसीनीनी, तन्न इन थुं कपट नु पापम बीशो बाक्नीनी।

29 सास्त्री नु फरिसीपुकी, गे कपटी, इन कली तशा थुं खाडक्ती। मारदे हना बेक्शा लशो परमप्रभु यावे आ लोत्र पाडब नु ठीक पाडब आन तुरस दारशो सेल्नीनी।

30 मिनु 'इ किंकी पिपी आन पालामी गो यो बाक्शो नक हना, मेको आन परमप्रभु यावे आन कली साडक्पाडक्चा मगेक वा' देंनीनी।

31 मो देशोमी 'साड नेसी परमप्रभु यावे आ लोत्र पाडब आन कली साडक्ब आन चच युड गो नकी' दे तुडक्पांडसीनीनी। येरमीया २६:२०-२३; मती ५:१२; प्रेरित ७:५२

32 इन किंकी पिपीम पचा मजाक्दीशो पाप गेपुकीमी खपीने।

33 गे बीख पाडशो बुम्स आ खलकपुकी, नरक लतीके सजाड रे दोपा ब्रोंडनीनी डा?

34 मोपतीके गो इन बाक्तीके परमप्रभु यावे आ लोत्र पाडब, जोक्ब तुडक्ब मुर नु परमप्रभु यावे आ लोत्र शेंब सोडक्नुडमी। का निक्शी आन कली साडक्नीनी, का निक्शी आन कली शीमी क्याडशो साडक्नीनी, का निक्शी आन कली युम्तीक खिंमी लाडशो, कोरामी युक्नीनी, मिनु तेड बाक्चा मगेथु, खेदा पा खेरनीनी।



35 मेको मोपा खेदा पा साइशशो पाप नेल्ल इन कली राइब। साइ नेसी रिमशो पाइब हाबील साइशशो रे बेरेक्याह आ तौ जकरिया साइशशो सम्म डा आन हुशेमी लां मताइनीनी। जकरिया कली परमप्रभु यावे आ खिंमी चढेतीके आ डोंइती साइशशो बाक्मा बाक्त। उत्पती ४:८; २इतिहास २४:२०-२१

36 नोफा दाइशशा नेनीने, मेको पाप एको पाला डा मुर आन कली राइब। लूका १३:३४-३५

37 ए यरूसलेम, यरूसलेम, परमप्रभु यावे आ लोत्र पाइब आन कली साइक्तीवी। इ कली शेंथ सोइशशो आन कली फुल्लु क्रोम्लाक्वी। पोथीमी आ चितोली आन कली आ फ्रा आगामी पुष्पो खोदेशो पा, गो शुश खेयप इ आल आन कली पुच्चा माल्ता, गे चहिं मबिस्से।

38 मिनु मार दुम्ब देशा हना, इ खिं ब्रेशशा, मारेइ मलीब। येरमीया २२:५; भजन संग्रह ६९:२६; १राजा ९:७-८

39 गो माइक्नन 'परमप्रभु यावे आ नेमी जाक्ब कली आसीक रल' दे मान मपवी सम्म आं कली लेंशा मताइनेवे" देंत। मती २१:९; मती २६:६४

## 24

परमप्रभु आ खिं मलीब

मर्कूस १३:१-२; लूका २१:७-१९

1 मिनु येसु परमप्रभु यावे आ खिं रे गूशा लमेनु, आ शेंसीबपुकीमी "एको खिं दोमो कोल्पा गिश दारपाइशशा सेल्शो बाक्माक्त" देंतेकम।

2 मिनु येसुमी "मुल ओमो ठेयब नु दारपा सेल्शो ताइतीनी। नोफा दाइशशा नेनीने, नोले ब्रेशशा, फुल्लु का यो खोष्शा मलीब" देंत। लूका १९:४४

श्येत दुम्चशो बाक्ब

3 मिनु जैतून डांडामी जाक्दीशशा बाक्मेनु, आ शेंसीबपुकी यो जाक्शा "एको इन देशो लोत्र गेना दुम्बा? इन जाक्ची ना डा चिन्ड मार तांडसीनीमी? मिनु रागी नुचवा बाक्त, दे दोपा तुंडसीबा?" दे हिल्लो पाम्तेकम। प्रेरित १:६-८

4 मिनु येसुमी "सुइमी इन थुं मक्यामेक्ल, दे होस पा बाक्कीन।

5 मारदे हना शुश मुरपुकीमी आं नें ब्रशा 'गो खीस्त नड' देशा, मुर आन थुं क्यानीम। यूहन्ना ५:४३; १यूहन्ना २:१८

6 लडाइ दुम्शो लडाइ डा लोत्र शुश नेनीनी। मेको लोत्र नेंशा महिनीन। मोदेशो दुम्चा माल्ब, रागी नुच्चा चहिं इच्ची मजा।

7 मारदे हना डोंइती जात जात नु राज्य राज्यमी लडाइ पाइनीम। रागी रागीमी अन्काल दुम्ब, एर ओंथ खिनु कुइब।

8 मो दुम्मेनु, श्येत दुम्चा गोवा बाक्त, दे तुंडसीब।

आं मुर आइक्च सेल्चा पुंडसीनीम

9 इन कली खेदा पा शुश श्येत गेनीम, साइक्नीम। नेल्ल जात डा मुरपुकीमी आं परबम इन कली मदाक्थु आइक्च सेल्नीम। मती १०:२१-२२; यूहन्ना १६:२

10 मिनु शुशेमी थमा सुइक्चा प्रोंइनीम। खेदा पाइब आन कली वारच पाइनीम। वारच आन दातेमी काइ मदाक्मुइनीम।

11 परमप्रभु यावे आ लोत्र दूली शेंबपुकी शुश बोक्शा, दूली पा शेंशा, शुश मुर आन थुं क्याशा गेनीम। मिनु परमप्रभु यावे आ राज्य डा लां प्रोंइपाइक्नीम। २पत्रुस २:१; १यूहन्ना ४:१

12 पाप पचा शुश बारतीके शुशेमी वारच पमुचा, दाक्मुचा प्रोंइनीम। २तिमोथी ३:१-५

13 सु सु चहिं नेल्ल क्येडा नोले सम्म थमा सुइक्चा मप्रोंइथु बाक्नीमी, मेकोपुकी श्येत जचा रे ब्रोंइशा, गेना हना यो परमप्रभु यावे नु बाक्चा ताइनीम। मती १०:२२; प्रकाश १३:१०

14 परमप्रभु यावे आ राज्य आ परबम चहिं नेल्ल रागी डा मुर आन कली तुइक्पांडसीब। मारदे हना नेल्लेमी तुइक्चा माल्नीम। मिनु नोले रागी नुच्ची जाक्ब।

श्येत शुश नाक्त मलीब

मर्कूस १३:१४-२३; लूका २१:२०-२४

15 परमप्रभु यावे आ खिं ग्रांया सेल्नीम, दे परमप्रभु यावे आ लोत्र पाइब दानीएलमी ब्रेक्शो लोत्र थमा दुम्शो तनीनु 'पढेबपुकीमी रुप्मेक्ल' दानीएल ९:२७, दानीएल ११:३१

16 यहूदीया रागीमी बाक्बपुकी डांडा ग्येत्थ प्रोक्मल।

17 बारदलीम बाक्बमी 'खिं ओव्रशा, मारेइ लाइक्चा ताइनुड' दे ममिम्तमेक्ल, तन्न दिव दाव प्रेक्शा प्रोक्मल। लूका १७:३१

18 रूमी गेय पाइबपुकीमी 'फेक्तीक का लाइक्नीकी' दे खिं लेशशा मलमल, तन्न आन गेय थु था प्रोंइशा प्रोक्मल। लूका २३:२९

19 आल कुरशो नु दूध तूब आल पाइशशो मीश मुर अरु क्येडा शुश श्येत जाइनीम।

20 नाइक्तीक नाक्त नु हिउंदमी मोदेशो श्येत मदुम्ल, दे परमप्रभु यावे कली पुनीने।

21 परमप्रभु यावेमी रागी सेला रे मुल सम्म सुइमी मतुइशशो श्येत जाइनीम। मोदेशो श्येत जचा लेंशा गेनायो मदुम्ब। दानीएल १२:१

22 मोदेशो श्येत जतीक नाक्त शुश नाक्त दुम्त हना, सुइ मब्रोइनीम वा। तन्न आ योत्रशो आन पबंम परमप्रभु यावेमी मेको श्येत शुश नाक्त लीचा मगेब।

‘ख्रीस्त जाक्त’ देब बोक्नीम

23 मिनु मुरपुकीमी ‘ख्रीस्त एकेर जाक्त, मेरेक बाक्ब, कोव्रथ गाक्कीन’ दैतेकम हना, थमा मसुतीने।

24 मारदे हना शुशेमी ‘गो ख्रीस्त नड’ दे जोल पा गाक्नीम। ‘परमप्रभु यावे आ लोव्र पाइब नकी’ दे जोल पाइबपुकीमी चिन्ड नु छक लाक्चा डा गेय कौइनीम। मो पशोमी परमप्रभु यावे आ योत्रशो आन कली यो लां प्रोइपाइक्चा माल्नीम। ब्यवस्था १३:२-४; २थिस्सलोनिकी २:८-९; प्रकाश १३:१३

25 मेको नेल्ल दुम्चा डोइतीन गो इन कली नेल्ल शेंशा तुडक्पाइक्तन्नी।

26 मेकोपुकीमी ‘सुइ मबाक्तीके गोरशो रागीमी ख्रीस्त बाक्ब’ दैतेकम हना, थमा सुइशशा कोव्रथ मलने। ‘खिं आगा डा कोठामी ख्रीस्त बाक्ब’ दैतेकम हना, थमा मसुतीन। लूका १७:२३-२४

27 नां दाप्तीकेमी चिला पवानु, छेडछेड पा नां परतीकेमी सम्म तांइसीशो खोदेशो पा, रागीम जरमेशो आ जाक्ची ना दुम्ब।

28 सिनु बाक्तीकेमी गिद्ध आंमा बेरशा जाक्नीम। लूका १७:३७; प्रकाश १९:१७-१८

येसु लेंशा यीब

मकूस १३:२४-२७; लूका २१:२५-२८

29 रागीम मोदेशो श्येत दुम्ने नुम चोटी, सरीडमी चिन्ड तांइसीनीम। नां आ छेडछेड जाम्शा, जिक रिक्शो तांइसीब। तास्ला आ हाम्शो यो जाम्ब, सोरुल खपीम दोक्नीम। सरीड डा सक्ति हिम्सीनीम। यसैया १३:१०; प्रेरित ६:१२-१३; २पत्रुस ३:१०

30 मिनु सरीडमी रागीम जरमेशो आ चिन्ड तांइसीब। मिनु नेल्ल जात डा मुरपुकी डाक्नीम। रागीम जरमेशो कली गोस्स तारी बाक्शा, सक्ति नु टेयब छेडछेडमी यिशो ताइनीम। प्रकाश १:७; मती २६:६४; दानीएल ७:१३-१४; प्रकाश १९:११-१३

31 मिनु रागीम जरमेशोमी परमप्रभु यावे आ स्वर्ग डा गेय पाइब आन कली तुराही ताप्पा, रागी तेइ तेइ रे परमप्रभु यावे आ योत्रशो नेल्ल आन कली खुप्शा चाक्थ सोइक्ब।

32 फोव्रशी रवा कोव्रशा शेंसीने। फोव्रशी रवा आ कोच्वा दाप्शा कुशो तनीनु, बर्सा ओव्रमाक्त, दे तुइक्नीनी।

33 आं देशो लोव्र थमा दुम्शो तनीनु, आ जाक्ची जाक्माक्त, दे तुइक्नीनी।

34 नोफा दाइशशा नेनीने, एको जात मनुप्थु, आं देशो थमा दुम्ब।

35 सरीड नु रागी नेल्ल जाम्शा लाइनीम, आं लोव्र चहिं गेना हना यो लीब। मती ५:१८; यसैया ५१:६

सासीशा बाक्चा माल्ब

36 मोदेशो गेना दुम्बा, सुइमी मतुइक्नीम। परमप्रभु यावे आ स्वर्ग डा गेय पाइबपुकीमी यो मतुइक्नीम। तौमी यो मतुइक्ब। आफोमी ला तुइक्ब। प्रेरित १:७

37 रागीम जरमेशो जाक्मेनु, मुरपुकीमी नोआह आ पालामी पशो खोदेशो पाइनीम। लूका १७:२६-२७; उत्पत्ती ६:९-७, २३

38 नोआह आ टेयब डोंगा मओव्रम सम्म मुरपुकीमी जना जन, तूना तून, ग्युंवे पना पन नु ग्युंवे पांइसीन सीन बाक्शो बाक्मा बाक्त।

39 नेल्ल आन कली ब्वाक्कुमी मयोल्दा सम्म मारेइ मतुइशशा बाक्मा बाक्त। रागीमी जरमेशो आ जाक्ची नाक्त यो मोदेशो दुम्ब।

40 वोंइश मुर निक्शी रूमी बाक्नीसी, का लाइक्चा पुंइसीब, का प्रोइशा वोइक्चा पुंइसीब।

41 मीश मुर निक्शी यात हिल्ला हिल्ल बाक्नीसी, का लाइक्चा पुंइसीब, का प्रोइशा वोइक्चा पुंइसीब। लूका १७:३५

42 इन प्रभु गेना जाक्बा, दे मतुइक्नीनी। मोपतीके गेना हना यो सासीशा बाक्कीन। मती २५:१३

43 खिं डा मुरुमी ‘आपो नाक्दो खुइपुकी खुइ पथ जाक्नीम’ दे तुइक्ताक्ब हना, मेको नाक्दो मइप्थु बाक्शा, खुइ पचा मगेन वा। १थिस्सलोनिकी ५:२

44 गेना हना यो सासीशा बाक्कीन। मारदे हना रागीम जरमेशो इन मतुइक्थु जाक्ब।

होव्रप लेशशा जाक्ब

लूका १२:४१-४६

45 होव्रपमी आ खिं कोव्रब कली जची जाक्मेनु, जचा गेचा, दे अरेशा वोइक्चा पुंइसीशो खोदेशो रिम्शो थुं पाइशशो गेय पाइब सु बाक्बा?

46 आ होव्रप लेशशा जाक्शा, आ गेय पाइबमी आ देशो टिशा पशो तशा ‘रिम्शो’ पाप्तीवी देब।

47 नोफा दाइशशा नेनीने, होव्रपमी आइक्के बाक्शो नेल्ल मेको आ गुइमी जिम्मा गेब। मती २५:२१-२३

48 मरिम्शो थुं पाइशशो गेय पाइबमी चहिं आ होव्रप लम नोले ‘इक्ची ना मजाक्ब’ दे मिम्शा, २पत्रुस ३:४

49 अरु गेय पाइब आन कली जिचा पोक्शा, श्येत गेशा तुप्शा, शांबु राकसी दुक्ब नु काथा बाक्शा पाइब।

50 आ मरिम्शो मतुइशशा नाक्त खिं डा होव्रप लेशशा जाक्ब।

51 मिनु मेको कली तुप्शा, फस सेल्शा कपटीपुकी नु काथा वोइक्ब। मेकेर मुरपुकी आन खुइ शेप्शा डाक्नीम।

## 25

निप्स पाइशशो मीश आल

1 स्वर्ग डा राज्य ओदेशो दुम्ब, १० जना मीश आलमी तेल बती कुरशा, ग्युम्ले गुमथ लाइनीम। लूका १२:३५-३६; प्रकाश १९:७

2 ५ जना निप्स पाइशशो बाकनीम। ५ जना चहिं निप्स मपाइशशो बाकनीम।

3 निप्स मपाइशशोपुकीमी बती कुरशा तेल मकुरनीम।

4 निप्स पाइशशोपुकीमी चहिं तेल यो कुरनीम।

5 मिनु ग्युम्ले जाकची जाकशा यो मजाकमेनु, नेल्ल मुकु जिशा इप्नीम।

6 मिनु १२ बजे नाकदो 'ग्युम्ले जाकत, गुमथ लन' देशा ब्रेशशो नेनीम।

7 मिनु छुल छाल बोक्शा, आन बती का का पा जेत्नीम।

8 मिनु निप्स मपाइशशोपुकीमी निप्स पाइशशो आन कली 'आंड बती काप्चा चिकताकम, इच्छी खोड तेल आंड कली यो गेचा नकी' दे पुंडनीम।

9 तन्न निप्स पाइशशोपुकीमी 'गो आंड कुरशो तेलमी गो नेल्ल इ बती आन कली मजाकदीप्व। पसल लशा ग्याप्शा, चाकशा दाडीन' देनीम।

10 मिनु मेकोपुकी तेल ग्यापथ लमानु, ग्युम्ले जाकब। मिनु लचा कली सासीशा बाकब आन कली ग्युबे भोज खिंमी ओइशा, लाप्यो चोक्नीम। लूका १३:२५

11 मिनु नोले तेल ग्यापथ लाइबपुकी यो जाकशा 'प्रभु, लाप्यो रोकशा गेचा नकी' देनीम।

12 मिनु प्रभुमी 'नोफा दाइशशा नेनीने, गो इन कली मतुइकनन्नी। सु ननी?' देब। मती ७:२३

13 मेको खोदेशो पा इन प्रभु गेना जाकब, दे मतुइकनीनी। मोपतीके गेना हना यो सासीशा बाककीन। मती २४:४२-४४

होत्रप लेशशा हिसाब पाइब

लूका १९:१२-२७

14 ओदेशो यो दुम्ब, मुर कामी 'रागी हिरथ लाइनड' दे थुं पशा, लचा डोइती आ गेय पाइब आन कली ब्रेशशा, आ शोंप आन गुडमी गेब।

15 आन पने चाप्चा डा गेय तुइशशा, का कली ५ टलेन्ट, का कली टलेन्ट निकशी, का कली टलेन्ट का योक्शा गेशा वोइशशा लाइब। रोमी १२:६

16 होत्रप गोकम चोटी ५ टलेन्ट ताकबमी ग्याप्तीक लेयतीक पचा गोइब। मिनु मोपा का डा निकशी सेल्व।

17 टलेन्ट निकशी ताकबमी यो में मोपा का डा निकशी सेल्व।

18 टलेन्ट का ताकबमी चहिं आ होत्रप आ शोंप लाइशशा थिम्शा खुइशशा वोइकब। टलेन्ट का नेल्ल क्येडा टेयब क्येट बाकब।

19 मिनु शुश बर्स नोले होत्रप लेशशा जाकब। मिनु आ गेय पाइब आन कली ब्रेशशा 'दोशो दोशो सेल्नी, कोइदीनी' दे का का पा हिल्लो पाइब।

20 मिनु ५ टलेन्ट ताकबमी आ डोइती जाकशा 'हजुर, ५ टलेन्ट गेतीनी। मिनु मार मार पा गो अर्को ५ टलेन्ट सेल्ता। मुल १० दुम्त' देमेनु,

21 आ होत्रपमी 'रिम्शो पाप्तीवी। थमा सुइकचा पुंडसीशो बाक्ते। इच्छी खोइ तशोमी शुश सेल्शा, रिम्शो गेय पाप्तीवी। मोपतीके शुश अधिकार गेनन। ग्येरसीशा बाक्स' देब। मती २४:४५-४७

22 मिनु टलेन्ट निकशी ताकबमी जाकशा 'हजुर, टलेन्ट निकशी गेतीनी। मिनु मार मार पशा, अर्को टलेन्ट निकशी सेल्ता। मुल ४ दुम्त' देमेनु,

23 मेको कली यो 'रिम्शो पाप्तीवी। इच्छी खोइ तशोमी शुश सेल्शा, रिम्शो गेय पाप्तीवी। थमा सुइकचा पुंडसीशो बाक्ते। मोपतीके शुश अधिकार गेनन। ग्येरसीशा बाक्स' देब।

24 मिनु टलेन्ट का ताकब जाकशा 'हजुर, गे शिशो मपाइनीनी। मशोकशो रिक्नीनी, मक्राप्यो खुप्नीनी, दे तुइशशो नड।

25 मोपतीके गो हिंती। मिनु इन टलेन्ट ताकशा, मारेइ मपथु, थिम्शा खुइशशा वोइकता। मुल फेरशा चाक्ता। लतीन' देब।

26 मिनु आ होत्रपमी 'मरिम्शो थुं पाइशशो अल्से, गोमी मशोकशो रिक्नुड, मक्राप्यो खुप्नुड, दे तुइशशो नवे हना, एको आं गेशो टलेन्ट का लाइशशा, अरु आन कली गेशा, आ चाइकब पपाइकचा ममाल्नेवे डा?

27 मो पशो नवे हना, आं टलेन्ट क्येडा यो आ चाइकब ताकचा तड वा।

28 एको टलेन्ट ताकशा, ५ टलेन्टमी १० टलेन्ट सेल्व कली तेम्शा गेचा'

29 मारदे हना शुश थीब आन कली तेम्शा, शुश बारपा गेचा पुंडसीनीम। इच्छी खोइ थीब आन इच्छी खोइ यो रोइकचा पुंडसीनीम। मती १३:१२; हितोपदेस ११:२४-२५

30 एको काम मलाप्शो अल्से कली गुंडशा, लाडगा डा छिडछिडमी ताइक्तीने। मेकेर मुरपुकी आन खुइ शेप्शा डाक्नीम।

नेल्ल निसाफ पचा पुंडसीनीम

31 रागीम जरमेशो परमप्रभु यावे आ स्वर्ग डा गेय पाइबपुकी नु आ छेडछेडमी जाकशा, आ टेयब नित्तीकेम निस्सीब। मती १६:२७; प्रकाश २०:११-१३

32 मिनु आ डोइती नेल्ल रागी डा मुर खुम्सीनीम। गोठलामी भेडा नु क्यारश आन कली ग्युरा नु पेरा गे तिल्लो खोदेशो पा रोमी १४:१०; मती १३:४९

- 33 पिपमी भेडा आन कली ग्युरा गे क्यारश आन कली पेरा गे वोइक्ब। इजीकीएल ३४:१७
- 34 मिनु पिपमी आ ग्युरा गे राप्शो आन कली 'आं आफ आ आसीक तशोपुकी, आं नेक्थान जाक्कीने। रागी सेल्चा डोइती एको राज्य इन कली सेल्शा वोइश्शो बाक्त। मुल बाक्कीने।
- 35 मारदे हना गेपुकीमी गो जचा मतथु बाक्डानु, जचा गेतीनी। तूतू दाक्डानु, तूचा गेतीनी। इन मतुइश्शो मुर इन खिं जाक्डानु, बाक्चा गेतीनी। यसेया ५८:१७
- 36 फेक्चा मतडानु, फेक्चा गेतीनी। रोइ पडानु, कोव्रतीनी। जेल्खानमी चोक्शा वोइय्यीमीनु, युम्थ जाक्तीनी' देंब।
- 37 मिनु मेकोपुकीमी 'प्रभु, इन कली गेना जचा मतनीनु, जचा गेका, तूचा मतनीनु तूचा गेका,
- 38 मतुइश्शो बाक्नीनु, बाक्चा गेका, फेक्चा मतनीनु, फेक्चा गेका,
- 39 गेना इन कली रोइ पशा नु जेल्खानमी चोक्सीनीनु, युम्थ जाक्का डा?' देंनीम।
- 40 मिनु पिपमी 'नोफा दाइश्शा नेनीने, आं लोकब नेल्ल क्येडा महिक्सीशो आन कली मार मार गेतीनी, मेको आं कली गेशो ननी' देंब। मती १०:४२; हितोपदेस १९:१७; हिब्रू २:११
- 41 मिनु आ पेरा गे राप्शो आन कली हिरशा 'सराप तशोपुकी, गो नु मबाक्कीने। सैतान नु आ गेय पाइब आन कली गेनायो मकाप्ब मी वोइश्शो बाक्ब। मेकेर लने। प्रकाश २०:१०,१५
- 42 मारदे हना गो जचा मतडानु, जचा मगेयीनी। तूतू दाक्डानु, तूचा मगेयीनी।
- 43 इन मतुइश्शो मुर इन खिमी जाक्डानु, बाक्चा मगेयीनी। फेक्चा मतडानु, फेक्चा मगेयीनी। रोइ पडानु, जेल्खानमी चोक्शा वोइय्यीमीनु, युम्थ मजाक्नी' देंब।
- 44 मिनु मेकोपुकीमी यो लोव लेश्शा 'प्रभु, गेना इन कली जचा मतशो, तूचा मतशो, बास माल्शा गाक्शो, फेक्चा मतशो, रोइ पा बाक्शो, जेल्खानमी चोक्शा वोइश्शो तका नु वारच मपका डा?' देंनीम।
- 45 मिनु पिपमी मेको आन कली 'नोफा दाइश्शा नेनीने, महिक्शो आइक्च मुर आन कली मार मार वारच मपनीनु, मेको आं कली यो मपनी' देंब।
- 46 मिनु मेकोपुकी गेना हना यो सजाइ ततीकेमी लाइनीम। परमप्रभु आ डोइती ठीक दुम्शोपुकी चहिं गेना हना यो परमप्रभु यावे नु बाक्चा ततीकेमी लाइनीम" दे शेंताक्मी। यूहन्ना ५:२९; याकूब २:१३

## 26

येसु कली साइक्चा माल्शो

मकूस १४:- १६:-; लूका २२:- २४:-; यूहन्ना १८:- २१:-

- 1 मिनु येसुमी लोव नेल्ल शेने थुम्शा, आ शेंसीब आन कली
- 2 "नित्थ नाक्त पास्सा चाड बाक्ब, दे तुइक्नीनी। मिनु रागीम जरमेशोमी शीमी केप्शा कांटी थोक्शा क्याइश्शा साइक्चा कली जिम्मा गेचा पुइसीब" देंत। प्रस्थान १२:१-२०; मती २०:१८
- 3 मेना नेल्ल क्येडा ठेयब चढेब काइयाफास आ खिमी ठेयब चढेब नु जोक्ब तुइक्ब खाल्पापुकी खुम्सीमा बाक्त। लूका ३:१-२
- 4 मेकोपुकीमी "मुर आन मतुइक्थु येसु कली दोपा ग्याइश्शा साइक्पाइक्चा" दे सल्ला पामेनु
- 5 "पास्सा नाक्त साइक्पाइक्चा मदुम्ब। मारदे हना मुरपुकीमी जिचा पोक्नीम" देमुमा बाक्त।

येसु कली ब्रोव्रशो तेल खेक्शो

लूका ७:३६-५०; यूहन्ना १२:१-८

- 6 काबु येसु नु आ शेंसीबपुकी बेथानी डा कोर पशो सिमोन आ खिमी खमे जना जन बाक्मानु,
- 7 मीश मुर कामी ब्रोव्रशो रिना पाइब शुश क्येट लाइब तेल कुरशा जाक्शा, मेको तेल येसु आ पियामी लुक्ताक्ब।
- 8 मिनु येसु कली तेल लुक्शो तशा, आ शेंसीबपुकीमी "ओदेशो तेल मारदे मो पवा?
- 9 लेयशा हना, शुश क्येट पी वा। मिनु श्येत जशो आन कली योक्शा, वारच पने जाम वा" दे आन थुं मनुमा बाक्त।
- 10 मिनु येसुमी मेको आन थुं मनुशो तुइश्शा "एको मीश मुर कली मारदे आ थुं खाइक्पाइक्नीनी? आं कली थम रिम्शो पाइक्ती।
- 11 श्येत जशो मुर गेना हना यो थित्नीनी, आं कली चहिं मथित्नीनी। ब्यवस्था १५:११
- 12 एको तेल लुक्शोमी आं रां थिम्चा कली साशो दुम्त।
- 13 नोफा दाइश्शा नेनीने, रागीमी तेक तेक आं लोव नैपाइक्नीमी, मेक मेक एको मीश मुर आ पशो आ पर्बम यो लोव पाइनीम" देंत।

यहूदा आ पशो

- 14 मिनु इस्कारीयोत डा यहूदा येसु आ शेंसीब का ठेयब चढेब आन कली युम्थ लशा
- 15 "येसु कली इन गुडमी ग्याइक्पाइक्ता हना, दोशो गेनीनी" देंमेनु, ३० टुक्का चांदी गेमे बाक्त। यूहन्ना ११:५७; जकरिया ११:१२
- 16 मिनु मेको चांदी ताक्गा रे "गेना नु दोपा ग्याइक्चा वारच पदुमी" दे योव्रकी पना पन गाक्माक्त।

पास्सा चाड डा भोज

यूहन्ना १३:२१-२६

17 मिनू बोरब ओखती मसुण्शो शोब्ले जची नाक्त येसु आ शेंसीबपुकीम “पास्सा मानेचा कली ते साचा, मार देनीनी” दे हिल्लो पाम्तेकम। प्रस्थान १२:१८-२०

18 येसुमी “सहर लशा, आं कली तुडकब मुर कली ग्रुम्शा ‘शेंबमी आं कली दुम्चा माल्शो मुल दुम्चापु। मोपतीके इन खिंमी बास गेशा, आं शेंसीब नु काथा बाक्शा, पास्सा मानेचा गेयी, दे पुंडथ सोडक्ताक्की’ दे मतीन” दे सोडक्ताक्की। मती २१:३

19 मिनू शेंसीबपुकीमी येसु आ देशो खोदेशो पा पास्सा मानेचा कली नेल्ल साताकम।

20 मिनू नां रिक्मेनु, येसु आ शेंसीबपुकी नु काथा जचा कली निस्साक्व।

21 मिनू जना जन बाक्मानु, येसुमी “नोफा दाइरशा नेनीने, मुल एक बाक्ब कामी आं कली ग्याइकब आन वारच पाइब दुम्ब” देंत।

22 मिनू नेल्लेमी शुश मरिम्शो लाक्शा “हे प्रभु, मेको वारच पाइब गो दुम्नुडा?” दे का का पा हिल्लो पाम्तेकम।

23 मिनू येसुमी “गो नु कालेम शोब्ले शेक्कुम तेप्बमी आं कली ग्याइकपाइक्चा वारच पाइब।

24 रागीम जरमेशो आ पर्बमी ब्रेक्शो साइ नेसी डा लोत्र नेल्ल थमा दुम्चा माल्ब। मो दुम्चा माल्शो बाक्त हना यो, ग्याइकपाइक्चा वारच पाइब कली थमा मरिम्शो दुम्ब। मोदेशो पाइब मुर मजरमेशो हना, मेको कली रिम्शो दुम्ब वा” देंत। लूका १७:१-२

25 मिनू ग्याइक्चा वारच पाइब यहूदामी यो “शेंब, मेको गो दुम्नुडा?” देंमेनु “आंमा तुइक्नेवे” दे माइक्तु।

26 मिनू जना जन बाक्मानु, येसुमी आ गुडमी शोब्ले शेशा “गे रिम्शो पाइब बाक्नीनी” दे प्रार्थना पशा जिक्शा, शेंसीब आन कली योक्शा “दांडसीने, ताक्शा जने। एको आं रां बाक्ब” देंत। १कोरिन्थी १०:१६; १कोरिन्थी ११:२३-२५

27 मिनू कचौरा शेशा “गे रिम्शो पाइब बाक्नीनी” दे प्रार्थना पशा, मेको आन कली तूचा गेशा “गे नेल्लेमी तूडीने।

28 एको आं हुश बाक्ब। आं हुशेमी परमप्रभु यावे आ नक कबल खापना। आं हुश जारशोमी शुश मुर आन पाप क्याम्सीब। प्रस्थान २४:८; येरमीया ३१:३१; हिब्रू ९:१५-१६

29 मुल डा मेरे एको अडगुर रस मतनुड, नोले नेल्ल नक दुम्शा, आं आफ आ राज्यमी गेपुकी नु काथा बाक्शा ला तनुड, दे इन कली देंनुड” दे माइक्तीमी। भजन संग्रह ११३:-११८:-

नेल्लेमी प्रोडनीम, दे शेंशो

30 मिनू कुम्सो का पशा डा मीन, मेकेर रे गाक्शा, जैतून डांडा ग्येत्य लाम्तेकम।

31 मिनू येसुमी “आपो नाक्दो गे नेल्लेमी आं कली तशा, इन थुं ग्याइक्नीनी। मारदे हना साइ नेसी ओदें ब्रेक्शो बाक्ब। ‘गो गोठला कली तुण्या क्रेक्नुड। मिनू भेडापुकी प्रोक्शा साव सुव ब्राडनीम’ दे ब्रेक्शो लोत्र थमा दुम्ब। जकरिया १३:७; यूहन्ना १६:३२

32 नोले गो बेक्शो रे सेंपाइक्चा पुंडसीशा, इन डोंइती गालील रागीमी जाक्दीतनुड” देंत। मती २८:७

33 मिनू पत्रुसमी “मेको नेल्लेमी इन कली प्रोडशा प्रोक्तेकम हना यो, गो मप्रोडनन्नी” देंमेनु,

34 येसुमी “नोफा दाइरशा नेनो, आपो नाक्दो भाले ग्रीचा डोंइती खेयप सां सम्म ‘मेको कली मतुडक्नुड, सु बाक्मे?’ दे आं पर्बम देंनेवे” देंत। यूहन्ना १३:३८

35 मिनू पत्रुसमी “मप्रोडनन्नी। गे नु काथा बाक्शा, साइक्चा पुंडसाक्ड हना यो, गेनायो मप्रोडनन्नी” दे लोत्र थोक्शा देंत। मिनू शेंसीब नेल्लेमी यो मोन देंतेकम।

गेथ्सेमनेमी प्रार्थना पशा

36 मिनू गेथ्सेमनेमी जाक्दीत्तेकम। मिनू येसुमी “लो, एक बाक्कीने, गो इक्का आइक्की लशा, प्रार्थना पशा लेरशा पीनुड” देंत।

37 पत्रुस नु जब्दी आ तौ निक्शी, सां आन कली इक्की आइक्की लाइक्तु। मेना येसु आ थुं शुश खाइरशो बाक्माक्त। मती १७:१; हिब्रू ५:७

38 मिनू सां आन कली “आं थुं शुश खाइरशा, बेक्चा डा दुम्ती। मुल एकेर मइप्यु गो नु काथा बाक्कीन” देंमाक्त। यूहन्ना १२:२७

39 मिनू इक्का डोंइती लशा, खुम्की पा खपीम बाप्शा “आं आफ, दुम्ब हना, एको कचौरा आं कली मपूपाइक्थु सोइक्तीने। तन्न आं दाक्शो मदुम्ल, इन दाक्शोन दुम्ल” दे प्रार्थना पशा, लेरशा जाक्माक्त। यूहन्ना १८:११; यूहन्ना ६:३८; हिब्रू ५:८

40 मिनू लेरशा जाक्मेनु, सांफा आन कली इप्शो तामी बाक्त। मिनू पत्रुस कली “छिन का यो मइप्यु, बाक्ने मचाप्नी? लो, सेंसीने।

41 थुं थाम्चा पुंडसीनीनु, पाप मपय, दे प्रार्थना पने। थुंमी पाइनुड चापुण्ड देंब, तन्न रांमी फाल्ने मचाप्ब” देंमाक्त। एफिसी ६:१८; हिब्रू २:१८

42 मिनू लेंशा इक्का आइक्की लशा “आं आफ, गोमी एको मतूथु सोडक्चा मदुम्बाक्त हना, इन दाक्शो दुम्ल” दे प्रार्थना पवा बाक्त।

43 मिनू लेरशा जाक्मेनु, निन्द्रामी दुक्शा बाक्शो तामी बाक्त।

44 मिनू मेको आन कली निन्द्रामी दुक्शो तशा, लेंशा लशा डोंइती डा पशा खोदेंब पा प्रार्थना पवा बाक्त। २कोरिन्थी १३:८

45 मिनू लेशशा, शेंसीब आन बाक्तीकेमी जाकशा, मेको आन कली “इन दशो सानी, दे मुल यो इप्शो बाक्नी? तुइक्तीन, रागीम जरमेशो पापी आन गुइमी गेचा पुंडसीचा चिकताकव।

46 बोक्कीन, लय। आं कली ग्याइक्पाइक्चा कली वारच पाइब जाक्चापुतु” देंत।

येसु ग्याइक्चा पुंडसीशो

47 मो देंमेनु, आ शेंसीब यहूदामी ठेयब चढेब नु जोक्ब तुइक्ब खालपापुकीमी सोइश्शो हुलमी तरवार कोक्के कुरशा, येसु कली ग्याइक्च चाक्तीमी।

48 यहूदामी “सु कली पुक्पु पदु, मेको कली ग्याइक्चा” दे ग्याइक्च जाक्ब आन कली तुइक्पाइश्शो बाक्माक्त।

49 मिनू यहूदामी जाकशा, येसु कली “रब्बी” दे बे मुप्शा पुक्पु पाइक्तु।

50 मिनू येसुमी “आं वारच, मार पथ जाक्डे लो पावो” देंत। मिनू ग्याइक्च जाक्बपुकीमी येसु कली ग्याइक्ताकम।

51 मिनू येसु नु काथा बाक्ब कामी तरवार ग्रि शोइश्शा, ठेयब चढेब आ गेय पाइब का आ नोफा दि खोइक्तु।

52 मिनू येसुमी “इ तरवार पिप्तो। मारदे हना तरवारम साइक्ब, तरवारमी साइक्चा पुंडसीब। उत्पत्ती ९:६

53 आं आफ कली ‘आफ, इन स्वर्ग डा गेय पाइब हजार हजार आन कली सोइश्शा, आं कली वारच पा प्रोंइपाइय्नीनी’ दे पुंडता हना, गिश हना यो सोइश्शा, आं कली प्रोंइपाइक्ब, दे मतुइक्नीनी? १२ खेयप ६ हजार स्वर्ग डा गेय पाइब ब्रेक्शो बाक्ब। मती ४:११

54 मोदें पुंडता हना, साइ नेसी डा लोत्र दोपा थमा दुम्मे चाप्बा डा?” दे माइक्तु।

55 मिनू येसुमी हुल आन कली “तरवार कोक्के कुरशा, खुइ पाइब कली ग्याइक्च जाक्शो खोदेंब पा आं कली ग्याइक्च जाक्नी? नाक्त कित कित परमप्रभु यावे आ खिंमी मुर आन दातेमी शेंना शेंन बाक्डानु, मग्याइक्तीनी।

56 परमप्रभु यावे आ लोत्र पाइब आन ब्रेक्शो लोत्र नेल्ल थमा दुम्चा माल्ब, मोपतीके आं कली ओदेंशो दुम्चा माल्ब” दे माइक्तीमी। मिनू आ शेंसीबपुकी येसु कली प्रोंइशा, साव सुव ब्राशा प्रोक्तेकम।

येसु ठेयब चढेब आ डोंइती

57 मिनू येसु कली ग्याइक्बपुकीमी मेकेर रे लाइश्शा, नेल्ल क्येडा ठेयब चढेब काइयाफास आ खिंमी चाक्दीत्मे बाक्त। मेकेर सास्त्री नु जोक्ब तुइक्ब खाल्पा नेल्ल खुम्सीशा बाक्शो बाक्मा बाक्त।

58 पत्रुस यो आन नोनोले खोइश्शा, मेकेर जाक्दीम्माक्त। मिनू लाडगा ओत्रशा, नेल्ल क्येडा ठेयब चढेब आ गेय पाइबपुकी नु काथा बाक्शा, मिनू गेपुकी परमप्रभु यावे, इन परमप्रभु कली इन थुं नेल्लेमी, इन सोक्त नेल्लेमी नु इन बोल नेल्लेमी दाक्चा माल्नीनी। कली मार पाइनीमी, मार देंनीमी, दे कोव्रशा बाक्माक्त।

59 मिनू ठेयब चढेब नु जोक्ब तुइक्ब खालपापुकी मार पामे बाक्त देंशा हना, कछडी वोइश्शा, जोल पा दोस गेचा माल्मे बाक्त। मारदे हना येसु कली साइक्पाइक्चा माल्शो बाक्मा बाक्त।

60 मिनू सांकछीपुकी शुश चाक्शा यो, मेको आन लोत्र मगारमाक्त। मोपतीके दोसी सेल्ने मचाप्बमे बाक्त। नोले सांकछी निक्शी आस लोत्र

61 “एको ग्याइश्शो मुरुमी साबेर मार देंत देंशा हना ‘परमप्रभु यावे आ खिं प्रेशशा, नाक्त सांमी नक सेल्लुड’ देंत” देंसा बाक्त। प्रेरित ६:१४; यूहन्ना २:१९-२१

62 मिनू नेल्ल क्येडा ठेयब चढेबमी बोक्शा, येसु आ डोंइती राप्शा “मेको निक्शीमी इ पर्बम देंशो लोत्र नेंशा, मार देंनेवे?” देंमेनु, येसुमी मारोइ मदेमाक्त।

63 मिनू नेल्ल क्येडा ठेयब चढेबमी “ब्रोंइशा बाक्ब परमप्रभु यावे आ नेंमी हिल्लो पाइनन, गे परमप्रभु यावे आ तौ खीस्त नवे, दे मनवे?” देंमेनु, मती २७:१२; यूहन्ना १०:२४

64 येसुमी “गे आंमा देंतीनी। मुल डा मेरे रागीम जरमेशो कली नेल्ल सक्ति पाइश्शो आ ग्युरामी बाक्शो ताइनीनी। गोस्स तारी बाक्शा, यिना यिन पशो ताइनीनी, दे गो इन कली देंनुड” दे मदा बाक्त। भजन संग्रह ११०:१; मती १६:२७; मती २४:३०; दानीएल ७:१३

65 मिनू नेल्ल क्येडा ठेयब चढेबमी आ फेक्शो वा खाक्शा “ये, परमप्रभु यावे कली शुक्शी लोत्र पाइबाक्त। मार सांकछी लोत्र माल्दा डा? आ शुक्शी पशो लोत्र गे नेल्लेमी नेंशा, सांकछी दुम्तीनी। लेवी २४:१६; यूहन्ना १०:३३; यूहन्ना १९:७

66 मार पय, मिनू?” देंमेनु “साइक्चा पुंडसीब” देंमा बाक्त।

67 मिनू साइक्चा पुंडसीब देंमानु, का निक्शीमी आ कुल तोक्तमे बाक्त, का निक्शीमी तुप्मे बाक्त, का निक्शीमी चोव्रचो राप्शा यसैया ५०:६

68 “ए खीस्त, सुमी राम्मे, लो देन” दे शुक्शी पा मरिम्शो पदमे बाक्त।

पत्रुसमी “मतुइक्नुड” देंशो

69 मेना पत्रुस लाडगामी बाक्माक्त। मिनू गेय पाइब मीश मुर कामी “गे यो गालील डा येसु नु काथा गाक्ब का नवे” देंमेनु,

70 मेकेर बाक्ब नेल्लेमी नेंचा डा पा “इ देंशो मरुबु। मार लोत्र पवी?” देंमाक्त।

71 मिनू लाडगामी ग्रुमेनु, मेकेर गेय पाइब मीश मुर कामी “नासरथ डा येसु नु काथा गाक्ब का एको यो बाक्माक्त” दे मेकेर बाक्ब आन कली देंमाक्त।

72 मिनू पत्रुसमी “मेको मुर कली मतुइक्नुड” दे कसम जशा आ लोत्र थोक्शा देंमाक्त।

73 मिनू मेको एर ओंथ बाकबपुकी जाक्शा, पत्रुस कली “गे यो काथा गाकब का बाकडे बाक्त। इ ब्वाक्स नेंशा, गालील डा बाकडे बाक्त, दे तुंडसीब” दे मदमे बाक्त।

74 मिनू पत्रुसमी “जोल पाता हना, परमप्रभु यावेमी सजाइ गेयील, एको मुर कली तुंडसीन मतुडकुड” दे कसम जशा, आ लोत्र थोकशा देमाक्त। मो देमेनु, भाले ग्रीमाक्त।

75 मिनू पत्रुसमी “भाले ग्रीचा डोंइतीन सां खेयप सम्म मेको मुर कली मतुडकुड, देनेवे” दे येसुमी देशो ति फ्रुक्का बाक्त। मिनू गूशा शुश डाक्माक्त।

## 27

1 मिनू नां सोत्रमेनु, टेयब चढेब नु जोकब तुडक्ब खाल्पापुकीमी येसु कली साइकपाइक्चान, दे सल्ला पामे बाक्त।

2 मिनू फ्रेशा लाइश्शा, पिलातस, सरकार डा टेयब मुर आ गुडमी जिम्मा गेमे बाक्त।

यहूदा ग्युक्शा बेक्शो

3 ग्याइक्पाइक्चा वारच पाइब यहूदामी येसु कली साइक्चा, दे उजुर पाम्तेक्म देशो नेंशा “मरिश्शो पडा बाक्त। मार पचा डा मुल” दे टेयब चढेब नु जोकब तुडक्ब खाल्पा आन कली परमप्रभु यावे आ खिंमी ग्युथ लशा मती २६:१५

4 “रिश्शो मुर कली ग्याइक्पाइक्चा वारच पा पाप पाता” देमेनु “गोपुकीमी मार पाइनीकी? गे आंमा तुडक्तो” देमा बाक्त।

5 मिनू चांदी मेको आन डोंइती ताइश्शा, मेकेर रे फो गूशा लशा, ग्युक्शा बेक्माक्त। प्रेरित १:१८-१९

हुशेम ग्याप्शो रू

6 टेयब चढेबपुकीमी मेको ताइश्शो चांदी गुप्शा “परमप्रभु यावे कली चढेशो क्येट नु काथा वोइक्चा मतुम्ब। मारदे हना हुश के दाम बाकब” देब्यवस्था २३:१९

7 सल्ला पशा, खप के ग्योब सेल्ब आ रू का ग्याप्मे बाक्त। मेको रू यहूदी धर्म मपाइब यरूसलेममी बेक्शो मुर आन कली थिम्तीके पामे बाक्त।

8 मेको रू कली मुल सम्म “हुश रू” देसीब।

9 मोदेशो आन पशोमी साइ नेसी परमप्रभु यावे आ लोत्र पाइब येरमीयामी ब्रेक्शो लोत्र थमा दुम्त। आ ब्रेक्शो लोत्र चहिं ओदेशो बाकब “इस्राएल आ खिं डा मुरपुकीमी एको मुर आ मोल ३० टुक्रा चांदी डा बाकल देतेक्म।

10 मिनू ३० टुक्रा चांदी लाइश्शा, खप के ग्योब सेल्ब आ रू ग्याप्तेक्म, दे परमप्रभु यावेमी लोत्र पपाइक्ती” दे ब्रेक्शो बाकब। येरमीया ३२:९, जकरिया ११:१२-१३

येसु पिलातस आ डोंइती राप्शो

11 येसु सरकार डा टेयब मुर आ डोंइती राम्मेनु, मेकोमी “यहूदी आन पिप नवे?” दे हिल्लो पवानु “गे आंमा देंतीनी” देमाक्त।

12 मिनू टेयब चढेब नु जोकब तुडक्ब खाल्पापुकीमी शुश दोस गेमेनु, ब्वालेइ पा बाक्माक्त। मती २६:६३; यसैया ५३:१७

13 मिनू पिलातसमी येसु कली “एकोपुकीमी इ कली शुश दोस गेशा, लोत्र पशो मनेनी?” देमेनु,

14 लोत्र का यो मलेत्ता बाक्त। मिनू सरकार डा टेयब मुर आ छक लाक्माक्त। यूहन्ना १९:९

15 पास्सा नाक्त सरकार डा टेयब मुर आन दाक्शो मुर का कली जेल्खान रे प्रोंइतीके पशो बाक्माक्त।

16 बारब्बा माइश्शो मरिश्शो पाइब मुर का चोक्सीशो बाक्माक्त।

17 मिनू सरकार डा टेयब मुरुमी “बारब्बा कली प्रोंइचा, दे ख्रीस्त देशो येसु कली प्रोंइचा? तेको कली प्रोंइचा?” दे हिल्लो पामी बाक्त।

18 मारदे हना आन थुं चोशा, येसु कली ग्याइक्पदमे बाक्त, दे तुडक्ता बाक्त, मोपतीके येसु कली प्रोंइचा माला बाक्त। यूहन्ना १२:१९

19 मिनू निसाफ पचा कली बाक्मेनु, आ मीशेमी “मेको सुइ कली मरिश्शो मपाइब कली मारेइ मपतीने। मारदे हना मुलाकदो इम्डानु, मेको आ पर्वम गो शुश श्येत जचा डा डोमु ताता” दे शोत्रथ सोइक्ता बाक्त।

20 तन्न टेयब चढेब नु जोकब तुडक्ब खाल्पापुकीमी मुर आन कली हुल पोक्शा “बारब्बा कली प्रोंइचा, येसु कली साइक्चा” दे रेयके पा पुंडपदमे बाक्त।

21 मिनू पिलातसमी “मुल सु कली प्रोंइचा?” देमेनु “बारब्बा कली प्रोंइचा, सरकार” देमा बाक्त।

22 मिनू पिलातसमी “ख्रीस्त देशो येसु कली मार पदु, मिनू?” देमेनु “शीमी केप्शा कांटी थोकशा क्याइश्शा साइक्चा माल्ब, सरकार” देमा बाक्त।

23 मिनू “मार मरिश्शो पवा, मार दोस गेचा” देमेनु “शीमी केप्शा कांटी थोकशा क्याइश्शा साइक्चा माल्ब” दे रेयके पामे बाक्त।

24 मुरपुकीमी मोदेशो रेयके पा प्रेक्शो तशा “मुल येसु कली प्रोंइने मचबु” दे मिम्शा “एको सुइ कली मरिश्शो मपाइब आ हुश इन गुडमी ला लुम्सेक्ल, आं गुडमी मलुम्सेक्ल” देशा, नेल्ल आन कुल आ गुड चिक्शा कोंइदीमी बाक्त। ब्यवस्था २१:६

25 मिनू हुलपुकीमी “आंइ कली नु आंइ चच युइ आन कली लुम्सेक्ल” दे रेयके पामे बाक्त। प्रेरित ५:२८

26 मिनू बारब्बा कली प्रोइशा सोडक्ता बाक्त। येसु कली कोरॉम युक्पाइश्शा शीमी केप्शा कांटी थोकशा क्याइश्शा साइक्का कली आ सिपाही आन गुइमी जिम्मा गेमी बाक्त।

येसु कली क्याइश्शा साइश्शो

27 मिनू सिपाहीपुकीमी येसु कली हेरोद आ दरवार डा सिपाही बाक्तीकेमी चाक्दीश्शा, आन पल्टन नेल्ल खुप्शा, शुक्शी पदमे बाक्त।

28 आ फेक्शो वा पुइश्शा, लल वा फेक्पा

29 चू के सिरपेच सेल्शा, आ पियामी गुप्पा, सुन के कोक्के, दे किन्दा आ ग्युरा गुइमी शेपदमे बाक्त। मिनू आ डोइती आन पोक्च थेक्शा “हे यहूदी आन पिप, सेउ ताक्कीन” दे शुक्शी पा सेउ पदमे बाक्त।

30 मिनू आ कुलम तोक्तमे बाक्त। मेको किन्दा रोइश्शा, आ पियामी तेत्मे बाक्त। यसैया ५०:६

31 मिनू शुक्शी पने थुम्शा, लल वा पुइश्शा, आंमा आ वा फेक्पा शीमी केप्शा कांटी थोकशा क्याइश्शा साइक्का कली लदमे बाक्त।

32 मिनू लना लन पामेनु, साइरेनी डा सिमोन नें पाइश्शो मुर का गुम्मे बाक्त। मिनू मेको कली येसु कली क्याइक्तीक शी “लो, कुर कि कुर” दे कुरपदमे बाक्त।

33 मिनू गोल्पाथा माइक्तीकेमी चाक्दीत्मे बाक्त। गोल्पाथा कली खप्परे यो देंसीब।

34 मिनू ग्युरशो अडगुर शांबु खाइल ब्वाइश्शा तूतीके सेल्शा, तूचा गेमेनु, येसुमी थाम्शा डा मिन, तूने मबिस्से बाक्त। भजन संग्रह ६९:२२

35 मिनू शीमी केप्शा कांटी थोकशा क्याइश्शा, फेन्टे ग्यारशा आ वासी योक्सीशा, यूहन्ना १९:२४

36 खाल पा बाक्मा बाक्त।

37 “यहूदी आन पिप येसु” दे आ कली दोस गेशा ब्रेक्शो आ पिया तार एरे शीमी केप्तमे बाक्त।

38 मिनू खुइ निकशी आस कली यो आ कली खोदेशो पा आ ग्युरा नु पेरा गे क्युकगमे बाक्त।

39 मिनू कोत्रब मुर शुश जाक्शा, आन पिया हिम्शा भजन संग्रह २२:८

40 “परमप्रभु यावे आ खिं प्रेशा, सां नाक्तीमी नक सेल्लुड देंते। खोइ मिनू, सेल्ले चबी? थमान परमप्रभु यावे आ तौ नवे हना, शीमी केप्शा कांटी थोकशा क्याइश्शो रे ब्रोंइशा यीवो” दे शुक्शी पामे बाक्त। मती २६:६१; यूहन्ना २:१९

41 टेयब चहेब, सास्त्री नु जोक्ब तुडक्ब खाल्पापुकीमी यो

42 “शुश आन कली श्येत रे प्रोंइना प्रोंइन गाक्बाक्माक्त। आंमा आ कली चहिं प्रोंइने मचाप्बाक्माक्त। इं इस्राएल डा पिप बाक्ब, मोपतीके शीमी केप्शा कांटी थोकशा क्याइश्शो रे ब्रोंइल। ब्रोंइने चापुतु हना, गो आ लोत्र नेल्ल थमा सुइक्नय।

43 परमप्रभु यावे कली थमा सुइक्बाक्माक्त। मोपतीके परमप्रभु यावेमी एको कली दाक्ताक्व हना, एको श्येत रे प्रोनल। “परमप्रभु यावे आ तौ नड” देंते, मोपतीके परमप्रभु यावे आ दाक्शो बाक्माक्त” दे शुक्शी पामे बाक्त। भजन संग्रह २२:९

44 आ ग्युरा नु पेरा गे क्युकशो खुइ निकशीमी यो मोदेशो पान शुक्शी पदसे बाक्त।

येसु बेक्शो

45 मिनू नाक्ती १२ बजे रे ३ बजे सम्म नेल्ल रागीमी नां रिक्शो खोदेशो पा छिडछिड दुम्त।

46 ३ बजे गे येसुमी “एली, एली, लामा आसबथानी” दे वाइ ब्रेम्माक्त। आ देशो मार रुम्सीब देंशा हना “परमप्रभु यावे, आं परमप्रभु, आं कली मारदे प्रोंइयीनी” देशो रुम्सीब। भजन संग्रह २२:२

47 एर ऑथ बाक्बपुकीमी मो देंशा वाइ ब्रेश्शो नेंशा “एलीया कली ब्रेत्ताक्व” देंमुमा बाक्त।

48 मिनू कामी रुवामी ग्युरशो तूतीके नुप्शा, कोक्केम फ्रेंशा, युप्चा गेचवा बाक्त। भजन संग्रह ६९:२२

49 मिनू मेकेर बाक्बपुकीमी “कते, वारच पाइक्थ एलीया जाक्बा कों, कोत्रय” देंमा बाक्त।

50 मिनू येसुमी लेंशा वाइ ब्रेश्शा, आ सोक्त प्रोना बाक्त।

येसु बेक्मे नोले चिन्ड गूशो

51 मिनू बेक्मे चोटी मार दुम्माक्त देंशा हना, परमप्रभु यावे आ खिं डा आगा डा कोटामी बारेशो वा इर रे उड सम्म उडक्थ पा जेर गाक्माक्त। खिनु कुशा, प्रस्थान २६:३१-३३; २इतिहास ३:१४

52 सेरथे फुल्लु नेल्ल एश्शा ब्रोल्ला बाक्त। लास थिम्तीके यो एश्शा ब्रोल्ला बाक्त। मिनू परमप्रभु यावे कली थमा सुइश्शा बेक्शोपुकी सेंसमा बाक्त।

53 येसु सेंसीशो नोले मेकोपुकी लास वोइक्तीके रे गूशा, सहर जाक्दीश्शा, शुश मुर आन कली तपांइसाम।

54 येसु कली खाल पाइब कप्तान नु सिपाहीपुकीमी खिनु कुशा नु मोपा हिंचा डा गेय दुम्शो तशा, शुश हिंशा “एको परमप्रभु यावे आ तौ बाक्माक्त” देंमुमा बाक्त।

55 गालील रे यरूसलेम सम्म येसु कली वारच पना पन काथा गाक्ब मीश मुरपुकीमी डोन रे कोत्रशा बाक्मा बाक्त। लूका ८:२-३

56 मोपा कोत्रब का माग्दाला डा मरीयम बाक्माक्त। का याक्ब नु योसेफ आस ममा मरीयम बाक्माक्त। का जब्दी आ तौ निकशी आस ममा बाक्माक्त।

येसु आ लास पुक्खीमी वोइश्शो

57 मिनू नां रिक्मेनु, येसु आ नोले खोइक्ब अरीमाथीया डा योसेफ माइश्शो शोंप पाइश्शो मुर कामी पिलातस कली गुम्थ लशा, ब्यवस्था २१:२२, २३



- 58 “येसु आ बेक्शो रां लाइक्चा गेयीनी” दे पुना बाक्त। मिनु पिलातसमी लाइक्चा गेवा बाक्त।  
 59 मिनु योसेफमी लास बुश नक वामी गिल्शा,  
 60 आम आ लास वोइक्तीके सेल्शो रोगु डा पुक्खीम ओइशा वोदा बाक्त। मिनु पुक्खी कली ठेयब फुल्लुमी सुशा वोइश्शा गाक्माक्त।  
 61 माग्दाला डा मरीयम नु अर्को मरीयममी योसेफ आ नोले खोइश्शा लशा, लास वोइक्तीके पुक्खी आ डोंइती बाक्सा बाक्त।

फुल्लुम लाहा छाप थोक्शा

- 62 मेको नेल्ल दुम्शो आ दीसा ठेयब चढेब नु फरिसीपुकीमी पिलातस कली गुम्थ लशा मर्कुस १५:४२  
 63 “सरकार, एको नेल्ल आन थुं क्याल्पाइक्ब मबेक्थु बाक्मेनु, मार दैत देशा हना ‘आं बेक्शो नित्थ नाक्त बेक्शो रे सेंपांडसीचा पुंडसीनुड’ देशो फुक्तक। मत्ती २०:१९  
 64 मोपतीके मेको आ लास वोइक्तीकेमी सां नाक्त सम्म खाल पाइब वोइक्चा माल्ब। मारदे हना मेको आ नोले खोइक्बपुकीमी आ लास खुड पा लाइश्शा, मुर आन कली ‘बेक्शो रे सेंसाक्व’ दे शेंना शेंन गाक्तेक्म हना, डोंइती रे पशो क्येडा शुश जोल ग्रूब” दे पुन्मे बाक्त।  
 65 मिनु पिलातसमी “लो, सिपाही आन कली सोइक्नुडमी। गेपुकी यो चाप्नी सम्म कोवडीन” देशा, आन देशो बिश्शा सोइक्तीमी बाक्त।  
 66 मिनु सिपाहीपुकी नु लशा, मेक जाक्दीश्शा, सुशो फुल्लुमी लाहा छाप थोक्शा, खाल पा बाक्सा बाक्त।

## 28

येसु बेक्शो रे सेंसीशा तपांडसीशो

मर्कुस १६:३-१०; लुका २४:१-१०; यूहन्ना २०:१-१८

- 1 मिनु नाइक्तीक नाक्त सां लाक्शा, हप्ता डा डोंइती नाक्त नां सोवसोव्रमी माग्दाला डा मरीयम नु अर्को मरीयम येसु आ लास वोइक्तीके कोव्रथ लसा बाक्त। प्रेरित २०:७; १कोरिन्थी १६:२; प्रकाश १:१०  
 2 मिनु जाक्दीस्सानु, ठेयब खिनु कुमाक्त। मारदे हना परमप्रभु यावे आ स्वर्ग डा गेय पाइब का यिशा, सुशो ठेयब फुल्लु तिल्शा, मेको आ तारी निस्से बाक्त।  
 3 मेको आ कुल चिला पशो खोदेशो नु आ वा बुबु पा छेडछेड तांडसे बाक्त। मत्ती १७:२; प्रेरित १:१०  
 4 मेको कली तशा, मेकेर खाल पाइब सिपाहीपुकी हिंशा खिंखि पा थशा गोल्मा बाक्त।  
 5 मिनु परमप्रभु यावे आ स्वर्ग डा गेय पाइबमी मीश मुर आस कली “महिनीसे। गे शीमी क्याइश्शा साइश्शो येसु कली माल्थ पिंसी ममाइ?  
 6 मुल एके मबा। मारदे हना डोंइती देशो खोदेशो पा बेक्शो रे सेंचा पुंडसाक्व। प्रभु कली वोइक्तीके कोवडीसे। मत्ती १२:४०; मत्ती १६:२१; मत्ती १७:२३; मत्ती २०:१९  
 7 मुल एके रे फ्रा लेशशा लशा, आ शेंसीब आन कली ‘प्रभु बेक्शो रे सेंचा पुंडसे बाक्त। इन डोंइती लशा, गालील जाक्दीप्ब। मिनु गे मेकेर गुम्चा ताडनीनी’ दे शोव्रथ लसे। इस कली तुइक्पाइक्तन्सी, मिनु मप्रेंदीसे” दे सोइक्तीम्सी बाक्त। मत्ती २६:३२  
 8 मिनु मेकेर रे गूशा, हिंसा यो बाक्त, ग्येरसीसा यो बाक्त। मिनु गुरु पा दोरशा, मेको लोव्र शेंचा, दे आ शेंसीब आन कली गुम्थ लसा बाक्त।  
 9 मिनु दोरना दोरन लसानु, मार दुम्माक्त देशा हना, येसुमी मेको आस कली गुम्सी बाक्त। मिनु “आसीक रसील” दे सेत्तीम्सीनु, आ नेक्था जाक्शा बाप्शा, आ खोइल थिशा मान पदसे बाक्त।  
 10 मिनु येसुमी “महिनीसे। येसु कली गुम्थ गालील लने, दे आं लोक्ब आन कली शोव्रथ लसे” दे सोइक्तीम्सी बाक्त। हिब्रू २:११

खाल पाइबपुकीम घूस जशो

- 11 मेको निक्शी दोरना दोरन लसानु, सिपाही का निक्शी सहरमी जाक्दीश्शा, ठेयब चढेब आन कली मेकेर मार दुम्मे, मेको नेल्ल शोव्रडमे बाक्त।  
 12 मिनु ठेयब चढेब नु जोक्ब तुइक्ब खाल्पापुकी खुम्सीशा “मुल मार पय?” दे लोव्रसी पमुमा बाक्त। मिनु सिपाही आन कली शुश क्येट गेशा  
 13 “लो, मुर आन कली मार दैचा देशा हना, नाक्दो इप्कानु, आ शेंसीबपुकी जाक्शा, लास खुड पामे बाक्त, दे लोव्र फ्रने। मत्ती २७:६४  
 14 सरकार डा ठेयब मुरुमी नेंतु हना, नेल्ल गारपाइक्नीकी, इन कली मारेड मडुम्ब” दैमा बाक्त।  
 15 मिनु सिपाहीपुकीमी क्येट ताक्शा लशा, मेको मोदेशो लोव्र तेइ तेइ फ्रामे बाक्त। मुल सम्म यहूदी आन दातेमी एको लोव्र लीशो बाक्ब।

येसु आ लोव्र नेल्ल कली शेंदीन

- 16 येसु आ शेंसीब ११ जना चहिं येसुमी तुइक्पाइश्शो गालील डा डांडामी जाक्दीत्तेक्म।  
 17 मिनु येसु कली तामेनु, मान पाम्तेक्म। का निक्शीमी चहिं दल्गीर पामे बाक्त।

18 मिनू येसु नेल्ल आन नेक्था जाक्शा “स्वर्ग नु रागी डा अधिकार नेल्ल आं कली गेशो बाक्ब। मती ११:२७; एफिसी १:२०-२२

19 मोपतीके रागीम नेल्ल हिरशा, नेल्ल जात, थर डा मुर आन कली आं पबमी शेंशा, आं नोले खोडक्ब शेंसीब सेलीने। आं आफ, परमप्रभु यावे, आ तौ नु परमप्रभु यावे आ सोक्त आन नेमी मेको आन कली ब्वाक्कुम खुम्शा गुंडदीने। मती २४:१४; मर्कुस १६:१५-१६; २कोरिन्थी ५:२०

20 मिनू गोमी इन कली मार मार शेंदन्नी, मेको नेल्ल मेको आन कली शेंशा पपतीने। नेनीने, रागी मनुच्ची सम्म गो गेनायो गेपुक नु बाक्नुड” देंत। मती १६:२०

## मर्कूस

**ब्रेक्ब मुर:** एको किताब ब्रेक्ब मुर मर्कूस बाक्ब। मेकोमी आंम आ पबंम मर्कूस १४:५१-५२ ब्रेक्बो बाक्ब। मेको आ यहूदी नें यूहन्ना बाक्त, मेको आ रोमी नें चहिं मर्कूस बाक्त। मर्कूस बारनाबास आ याच बाक्त। मेको पावल नु बारनाबास काथा लमा बाक्त। तन्न मेको आस कली प्रोइशशा, यरूसलेम लेम्माक्त। प्रेरित १३:५, १३ नोले पवलम मेको आ पबंम रिम्शो लोत्र पवा बाक्त। मेको कली लेंशा, रोम सहरम वारच पचा कली ब्रेशो बाक्त। २तिमोथी ४:११ मर्कूसमी पत्रुस कली वारच पा, आ शेंतीक लोत्र रोमी लोत्रम सेला बाक्त। मिनु मेको लोत्र मसाम्चा कली नेल्ल ब्रेक्ता बाक्त।

**गेना ब्रेक्बो:** मर्कूस ६३-६४ ए. डी. रोम सहर जाक्माक्त। मेना थमा सुइक्ब आन कली रोम डा सिजर नेरो आ पतीकेमी खेदा पचा गोत्रमे बाक्त। मिनु मेको किताब ६४-६५ ए. डी. मेर खोदेशो ब्रेक्बो बाक्ब। तन्न ७० ए. डी. क्येडा डोंइती दुम्चा माल्ताक्व। मारदे हना यरूसलेम सहर कली खतम सेल्लतीके आ पबंम मारेइ मब्रेक्बो बाक्त।

**मारदे ब्रेक्बो:** मर्कूसमी आ किताबम येसु आ पशो छक लाक्चा डा गेय आ पबंम शुश ब्रेक्ताक्व। मेको पत्रुस आ शेंतीक लोत्र रे बाक्ब। येसु आ गेय डा नेल्ल क्येडा ठेयब लोत्र बाक्नीम। येसु परमप्रभु यावे आ गेय पाइब दुम्तीके किताब नेल्लेम कोइशो बाक्ब, देशो बाक्ब। मर्कूस १०:४५

ब्वाक्कुम खुम्शा गुंडब यूहन्ना

मती ३:१-१२; लूका ३:१-१८; यूहन्ना १:१९-२७

1 एको परमप्रभु यावे आ तौ येसु खीस्त आ पबंम ब्रेक्बो ग्येरपाइक्ब लोत्र बाक्ब। मेको लोत्र दोदेशो पा गोइब देशा हना,

2 परमप्रभु यावे आ लोत्र पाइब यसैयामी ब्रेक्बो लोत्रमी मार ब्रेक्बो बाक्त देशा हना “नेनो, इ डोंइती आं लोत्र पाइब सोइक्नुड। मेकोमी इ लां थेल्व। मती ११:१०

3 गोरशो रागीमी सेंदा कामी ‘प्रभु आ लां थेलीने। आ गाक्तीके लां फुल्लु प्रोक्शा थेलीने’ देशो नेंसीब” दे ब्रेक्बो बाक्ब। मलाकी ३:१; यसैया ४०:३

4 ब्वाक्कुम खुम्शा गुंडब यूहन्ना गोरशो रागीमी गूशा, मुर आन कली “इन पाप क्याम्चा कली इन थुं परमप्रभु यावे गे लेत्तीने। आंइ थुं लेत्ताक्व दे कोइचा कली ब्वाक्कुम खुम्शा गुंडपांडसीने” दे लोत्र पाइक्बाक्माक्त।

5 मिनु यहूदीया रागी नु यरूसलेम सहर डा मुर नेल्ल मेकेर जाक्शा, आन पाप शोत्रशा, यूहन्ना रे पा यर्दन खोलाम खुम्शा गुंडचा पुंडसमा बाक्त।

6 यूहन्नामी दलओंठ आ चां के प्रोत्रशो वा फेक्बाक्माक्त। कुशुल के किप्शुर किप्बाक्माक्त। मिनु सल्हा माले ब्वशा नु रोका खुदो जशा बाक्बाक्माक्त।

7 मिनु मुर आन कली “आं नोले जाक्ब आं क्येडा सक्ति पाइशो बाक्ब। गो मेको आ डोंइती बाप्शा, आ जुत्ता पुइक्चा लायो मशिरनुड।

8 गो इन कली ब्वाक्कुम खुम्शा गुंडताक्नी। मेकोमी चहिं इन कली परमप्रभु यावे आ सोक्तीमी खुम्ब” दे मुर आन कली शेंना शेंन बाक्बाक्माक्त।

येसु ब्वाक्कुम खुम्शा गुंडचा पुंडसीशो

मती ३:१३-४:११; लूका ३:२१-२२; लूका ४:१-१३; यूहन्ना १:३२-३४

9 मेना येसु गालील रागी डा नासरथ सहर रे गाक्शा, यूहन्ना आ बाक्तीकेमी जाक्माक्त। मिनु यूहन्ना रे पा यर्दन खोलामी ब्वाक्कुम खुम्शा गुंडपांडसे बाक्त। लूका २:५१

10 मिनु ब्वाक्कुमी गुम्शा यूमैनु, सरीड रोक्सीशा, परमप्रभु यावे आ सोक्त परवा खोदेशो पा यिशा, आ तारी जुक्बो तवा बाक्त।

11 मिनु सरीड रे “आं दाक्बो तौ नवे। इ कली तशा थाम्पा ग्येरसीनुड” देशो सेंदा नेंसे बाक्त। मर्कूस ९:७

येसु थुं थाम्चा पुंडसीशो

12 मिनु नोले परमप्रभु यावे आ सोक्तीमी येसु कली गोरशो रागीम लदा बाक्त।

13 मिनु गोरशो रागीम ४० नाक्त सम्म बाक्माक्त। मेकेर बाक्मेनु, सैतान रे पा थुं थाम्चा पुंडसे बाक्त। मेको गोरशो रागी डा जन्तुपुकी नु बाक्माक्त। परमप्रभु यावे आ स्वर्ग डा गेय पाइबपुकीमी मेको कली वारच पामे बाक्त।

येसुम परमप्रभु आ लोत्र नेंपाइशो

14 यूहन्ना जेल्लखानमी चोक्चा पुंडसे नोले, येसुमी गालील रागीमी परमप्रभु यावे आ ग्येरपाइक्ब लोत्र नेंपाइक्ना पाइक्न गाक्माक्त।

15 मेकोमी “परमप्रभु यावे आ देशो नाक्त जाक्त। आ राज्य इन नेक्था जाक्बो बाक्ब। इन थुं परमप्रभु यावे गे लेशशा, आ ग्येरपाइक्ब लोत्र थमा सुतीने” दे नेंपाइक्ना पाइक्न गाक्माक्त। गलाती ४:४

येसुमी शेंसीब आन कली ब्रेशो

मती ४:१८-२२; लूका ५:१-११; यूहन्ना १:३५-५१

- 16 मिनू येसु गालील समुन्द्र आ नेक्था हिरसेनु, सिमोन नु आ लोकब अन्द्रीयास ग्याइल आप्शा, डांड रेन्ना रेन्न बाक्शो तवा बाक्त। मेको निक्शी डांड रेण्व बाक्सा बाक्त।  
 17 मिनू येसुमी मेको आस कली “आं नोले खोडय्थीसी। मिनू मुर आन कली रेण्व सेलन्सी” दे माइक्सी बाक्त।  
 18 मिनू ग्याइल थु था प्रोइशा, आ नोले खोडशशा गाक्सा बाक्त।  
 19 मिनू इच्छी आइक्ची लशा, जब्दी आ तौ निक्शी याकूब नु यूहन्ना वोबु आस कली डोंगाम बाक्शा, गाक्शो ग्याइल प्रोव्रना प्रोव्रन पशो ताम्सी बाक्त।  
 20 मिनू मेको आस कली यो ब्रेत्तीम्सी बाक्त। मिनू आस आफ जब्दी नु गेय पाइब आन कली प्रोइशा, आ नोले खोदसे बाक्त।

वोल कली गुंडशो

मत्ती ८:१४-१७; लूका ४:३१-४४

- 21 मिनू कापेरनाउम सहरम जाक्दीम्मा बाक्त। मिनू नाइक्तीक नाक्त येसुमी गुन्तीक खिं लशा, मुर आन कली शेंदीमी बाक्त।  
 22 मेको आ शेंशो नेशा, नेल्ल छक लाक्मा बाक्त। मारदे हना सास्त्री आन लोव्र खोदेशो ममाइ। अधिकार पाइशशो लोव्र पा शेंदीमी बाक्त। सास्त्री यहूदी आन कली परमप्रभु यावे आ अरेशो लोव्र शेंब बाक्शो बाक्तेकम। मत्ती ७:२८-२९  
 23 मिनू मेको गुन्तीक खिंमी ग्रांघा दिचा डा वोलमी सुमशो मुर का बाक्माक्त।  
 24 मिनू मेको वाइ ब्रेशशा “ए नासरथ डा येसु, मार पमुया डा? आंइ कली खतम पोक्थ जाक्नी? गो इन कली तुइक्नीकी। गे परमप्रभु यावे आ योव्रशो ननी” देमा बाक्त। मर्कूस ५:७  
 25 मिनू येसुमी वोल कली “सिक्सी पावो। मिनू यूडो” दे हुइक्ता बाक्त। मर्कूस ९:२६  
 26 मिनू ग्रांघा दिचा डा वोलमी मुर कली दिड खोल्शा, वाइ ब्रेशशा गूमाक्त।  
 27 मोदुमशो तशा, मुरपुकी छक लाक्शा “मार बाक्म माइ? नक शेंतीक लोव्र बाक्म कोर में? अधिकार पाइशशो लोव्र पवानु, ग्रांघा दिचा डा वोलम लायो टीबाक्तेकम” देमुमा बाक्त।  
 28 मिनू गालील रागीमी तेइ तेइ येसु आ परबंम लोव्र ब्रना ब्रन लमाक्त।

रोइ पाइब आन कली सापाइशशो

- 29 मिनू वोल कली गुंडशा, येसु गुन्तीक खिं रे सिमोन नु अन्द्रीयास वोबु आस खिंम जाक्दीम्माक्त। मिनू याकूब नु यूहन्ना यो येसु नु काथा बाक्सा बाक्त।  
 30 मिनू जाक्दीम्मानु, सिमोन आ शिमी जरो पा गोल्लो बाक्माक्त। मिनू येसु कली तुइक्पदमे बाक्त।  
 31 मिनू येसु मेको आ नेक्था लशा, आ गुड ग्याइशशा पोक्गा बाक्त। मोपा पोक्गानु, जरो जाम्माक्त। मिनू सेस दुमशा, मेको आन कली मान पा थुल्मी बाक्त।  
 32 मिनू नां रिक्मेनु, मेको सहर डा मुरपुकीमी रोइ पशो नु वोलम सुमशो मुर नेल्ल आन कली चाक्मे बाक्त।  
 33 सहर डा मुर नेल्ल खिं डा लाप्यो आ डोंइती खुम्समा बाक्त।  
 34 मिनू येसुमी रोइ पशो शुश मुर आन कली सापदा बाक्त। मिनू शुश वोल आन कली हुइशशा खेरमी बाक्त। वोल आन कली लोव्र पचा मगेवा बाक्त। मारदे हना वोलपुकीमी येसु कली तुइशशो बाक्तेकम। प्रेरित १६:१७-१८  
 35 आ दीसा सुनी नां मसोव्रथु, येसु बोक्शा मेकेर रे गाक्शा, सुइ मबाक्तीकेमी जाक्दीशशा, प्रार्थना पवा बाक्त। मत्ती १४:२३; मत्ती २६:३६; लूका ५:१६; लूका ११:१  
 36 मिनू सिमोन नु मेको नु बाक्बपुकीमी येसु कली माल्मे बाक्त।  
 37 मिनू गुमशा, येसु कली “मुर नेल्लेमी इन कली माल्लो बाक्नीम” दे मदमे बाक्त।  
 38 मिनू येसुमी “मेकेर रे लशा, एर आंथ गाउं सहर हिरशा लय। मारदे हना मेकेर यो शेंथ जाक्ती” देमाक्त।  
 39 मिनू गालील रागी नेल्ल हिरशा, गुन्तीक खिंमी शेंबाक्माक्त। वोल आन कली खेरबाक्माक्त।

कोर पाइब कली सापाइशशो

मत्ती ८:२-४; लूका ५:१२-१६

- 40 मिनू कोर पाइब का जाक्शा, येसु आ डोंइती आ पोक्च थेक्शा “सापाइक्चा दाक्ताक्नी हना, आं कली सापाइक्चे चाप्नीनी” दे सेउ पशा पुना बाक्त।  
 41 मिनू येसुमी शिशी पा आ गुड दिंशा, कोर पाइब कली थिशा “गो सापाइक्चा दाक्नुड। साडो” देमाक्त।  
 42 मो देमेनु, कोर सामाक्त।  
 43 मिनू येसुमी “सुइ कली मशेंदो। मर्कूस ३:१२  
 44 चहेब आ डोंइती लशा, इ साशो रां कोंइदो। मिनू मुर नेल्ल आन कली “गो साती” दे तुइक्पाइक्चा कली मोसाम देशो खोदेशो पा चहेवो” दे माइशशा सोइक्ता बाक्त। मर्कूस ७:३६; लेवी १४:२-३२  
 45 मिनू साशो मुर मेकेर लशा, दोपा सामे, मेको लोव्र तेइ तेइ ब्रपदा बाक्त। मोदेशो लोव्र ब्रतीके येसु सहर सहरमी गाक्ने मचबा बाक्त। मोपतीके शुश मुर मबाक्तीकेमी बाक्माक्त। तन्न मुरपुकी तेइ तेइ रे जाक्बाक्मा बाक्त।

## 2

गुड खोइली मटुकब कली सापाइशशो

मत्ती ९:१-८; लूका ५:१७-२६; यूहन्ना १:१९-२७

- 1 नाक्त का निक्शी नोले कापेरनाउम लेम्माक्त। मिनु मुरपुकीमी “येसु खिमी बाकब” दे तुइक्तमे बाक्त।
- 2 मिनु मेकेर शुश मुर खुम्शीशा, लाप्चोमी यो मुरपुकी देल्मा बाक्त। मिनु येसुमी मेको आन कली परमप्रभु यावे आ लोत्र शेंदीमी बाक्त।
- 3 मिनु ४ जना मुरपुकीमी गुड खोइल मटुकब मुर का कुरशा चाकम्मे बाक्त।
- 4 शुश मुर देल्लतीके येसु आ डोंइती चाकदीन्ने मचाप्मे बाक्त। मिनु खिं डोइशशा, फुल्लु याकशा, ओइतीके सेल्मे बाक्त। मिनु गुड खोइल मटुकब कली कुरशो ब्राख्ये एर ओंथ डोरीम पाइशशा, ओंखां पा येसु आ डोंइती तोकगमे बाक्त।
- 5 मिनु येसुमी मेको आन कली मो पशो तशा, थमा सुइय्यीमी बाक्त, दे तुइक्ता बाक्त। मिनु गुड खोइली मटुकब कली “आं तौ, इ पाप क्याम्साक्व” देंमाक्त।
- 6 मेकेर सास्त्रीपुकी यो बाकशो बाक्मा बाक्त।
- 7 मेकोपुकीमी येसु आ लोत्र नेंशा, आन थुंमी “दोदेशो लोत्र पवा? परमप्रभु यावे कली शुक्शी पाइबाक्त। सुमी पाप क्याम्मे चाप्मा डा?” दे मिन्तमे बाक्त। भजन संग्रह १३०:४; यसेया ४:३, २५
- 8 मिनु येसुमी आन मिम्शो तुइशशा, मेको आन कली “मारदे मोदेशो मिन्तीनी?”
- 9 गुड खोइल मटुकब कली “इ पाप क्याम्साक्व” देंचा देय ‘छुल बोक्शा, इ ब्राख्ये कुरशा, एर ओंथ हिरशा कोंइदो’ देंचा, तेको सक्ति कोंइतीक लोत्र बाक्बा?
- 10 रागीमी जरमेशोमी पाप क्याम्चा अधिकार तशो बाकब, दे गेपुकीमी यो तुइक्ताक्नी” देंमाक्त। मिनु गुड खोइली मटुकब कली
- 11 “छुल बोक्शा, इ ब्राख्ये कुरशा, इ खिं लेतो” दे मदा बाक्त।
- 12 मिनु नेल्ल आन डोंइती मेको बोक्शा, आ ब्राख्ये जो गुप्शा कुरशा, गाक्माक्त। मिनु नेल्लेमी छक लाक्शा “ओदेशो छक लाक्चा डा गेय मुल सम्म गेनायो मतशो नय” देंशा, परमप्रभु यावे कली ठेयब सेल्मे बाक्त।

लेवी कली ब्रेशशो

मत्ती ९:९-१३; लूका ५:२७-३२

- 13 मिनु येसु मेकेर रे लशा, लेंशा समुन्द्र आ नेक्था बाक्माक्त। मिनु मेकेर शुश मुर देल्मा बाक्त। मिनु येसुमी मेको आन कली शेंदीमी बाक्त।
- 14 मिनु मेकेर रे लशा, तिरो पोक्ब अल्फयस आ तौ लेवी कली तिरो पोक्तीकेमी बाक्शो तशा “आं नोले खोइय्यी” दे ब्रेत्ता बाक्त। मिनु मेको बोक्शा, आ नोले खोदा बाक्त।
- 15 मिनु लेवी आ खिमी जना जन बाक्मानु, तिरो पोक्ब नु पापी शुश नु काथा जामे बाक्त। मारदे हना शुशेमी येसु आ नोले खोदमे बाक्त।
- 16 मिनु फरिसी आन दाते डा सास्त्रीपुकीमी येसु कली पापी नु तिरो पोक्बपुकी नु काथा बाक्शा जशो तशा, येसु आ शेंसीब आन कली “मारदे तिरो पोक्बपुकी, पापीपुकी नु काथा बाक्शा जाइबा?” देंमा बाक्त।
- 17 मिनु येसुमी मेको आन लोत्र नेंशा, मो देंब आन कली “रोइ मपशो मुर डाक्टर ममाल्नीम। रोइ पशो मुर ला डाक्टर माल्नीम। ठीक पाइब कली ममाइ, पापी आन कली ब्रेत्थ जाक्शो नड” दे माइक्मी बाक्त।

माइजा बाक्चा

मत्ती ९:१४-१७; लूका ५:३३-३८

- 18 यूहन्ना आ शेंसीबपुकी नु फरिसीपुकी माइजा बाक्बाक्मा बाक्त। मिनु मुरपुकीमी येसु आ नेक्था जाक्शा “यूहन्ना आ शेंसीबपुकी नु फरिसी आन शेंसीबपुकी माइजा बाक्नीम। इन शेंसीबपुकी चहिं माइजा मबाक्नीम। मारदे मो पशो नमी?” दे हिल्लो पामे बाक्त। फरिसी रिती थिती सेल्शा, रिम्शो पचा कली कोत्रब यो बाक्शो बाक्तेक्म।
- 19 मिनु मोदें हिल्लो पाइब आन कली येसुमी “जन्तीपुकी ग्युम्ले नु बाक्मानु, माइजा बाक्ने मचाप्नीम।
- 20 काबु चहिं ग्युम्ले नु फ्राचा पुंइसीनीम। मिनु माइजा बाक्नीम।
- 21 सुइमी माइत वामी नक वा क्येप्शा मफेरनीम। फेरतेक्म हना, नक वा चुप्शा, माइत वा कली खाक्शा, डोंइती डा गाक्शो क्येडा ठेयब सेल्ब। मारदे हना माइत नु नक मगारब।
- 22 सुइमी माइत कुशुल के थैलोमी नक अडगुर शांबु कुर मपाइनीम। कुर पातेक्म हना, नक अडगुर शांबु बोरशा, थैलो खाक्शा क्युप्ब। थैलो यो गाक्ब। नक शांबु नक थैलोमी ला गारब” दे शेंदीमी बाक्त।

नाइक्तीक नाक्त आ पर्वम लोत्र

मत्ती १२:१-८; लूका ६:१-५

- 23 मिनु काबु नाइक्तीक नाक्त येसु नु आ शेंसीबपुकी चेरब रू लां गाक्मा बाक्त। मिनु गाक्मानु, शेंसीबपुकीमी चेरब बाला शोइक्चा गोत्रमे बाक्त।
- 24 मिनु फरिसीपुकीमी येसु कली “कोत्रडीन, नाइक्तीक नाक्तीमी पचा मटुम्ब गेय मारदे पाइनीमी?” दे मदमे बाक्त।
- 25 मिनु येसुमी “दाऊद नु आ वारचपुकी शोत्रलु बेक्मानु, दाऊदमी मार पचा, मेको ब्रेक्शो लोत्र गेनायो मपढेनी?

26 डेयब चढेब अबीयाथार आ पालामी दाऊद परमप्रभु यावे आ खिं ओव्रशा, परमप्रभु यावे कली चढेशो शोब्ले शोल्शा जशा, आ वारच आन कली यो जचा गोवा बाकत, दे मपढेनी? मेको शोब्ले चढेबपुकीमी ला जाइबाक्मा बाकत। अर्को मुरपुकीमी जचा मडुम्ब बाक्माकत। १ सामुएल २१:७; लेवी २४:९

27 नाइक्तीक नाकत मुर आन कली वोइशो बाक्ब। मुरपुकी नाइक्तीक नाकत कली ममाइ। प्रस्थान २०:१०

28 मोपतीके रागीम जरमेशो दा नाइक्तीक नाकत मार पचा, मार मपचा मेको अधिकार पाइब बाक्ब” दे शेंदीमी बाकत।

### 3

नाइक्तीक नाकत आ पर्वम लोत्र

मती १२:९-१४; लूका ६:६-११

- 1 मिनू येसु गुम्तीक खिं लेंशा ओव्रमाकत। मेकेर गुड सोव्रशो मुर का बाक्माकत।
- 2 मिनू फरिसी नु सास्त्रीपुकीमी “नाइक्तीक नाकती सापाइक्तीक गेय पाइबा कौ” दे योवकी पा कोव्रडमे बाकत, मारदे हना दोस गेचा माल्शो बाक्मा बाकत।
- 3 मिनू येसुमी गुड सोव्रशो मुर कली “एक पिबो” दे मदा बाकत।
- 4 मिनू योवकी पा कोव्रब आन कली “नाइक्तीक नाकत शिशी पचा देय मरिम्शो गेय पचा? ब्रोंडचा गेचा देय साइक्चा? तेको लोत्र अरेतीक लोत्र नु गारबा?” दे हिल्लो पवानु, सिक्सी पामे बाकत।
- 5 मिनू सिक्सी पा बाक्शो तशा, आ थुं खाइशशा गाइशशा, मेको आन कली का का पा कोव्रशा, गुड सोव्रशो कली “इ गुड दिंदो” दे मदा बाकत। मिनू मेकोमी गुड दिसेनु सामाकत।
- 6 मिनू फरिसीपुकी गूशा, हेरोदी आन कली शो शु खुप्पा “मेको कली दोपा साइक्चा ताइनय” दे लोवसी पामे बाकत।

मुर आन कली सापाइशशो

मती १२:१५-१६; लूका ६:१७-१९

- 7 मिनू नोले येसु नु आ शेंसीबपुकी सहर रे गाक्शा, गालील डा समुन्द्र आ नेक्था जाक्दीम्मा बाकत। शुश मुरुमी आन नोले खोदमे बाकत। मेको खोइक्बपुकी ते ते डा बाक्मा बाकत देशा हना, गालील नु यहूदीया रागी डा, मती ४:२५
- 8 यरूसलेम सहर डा, इदुमेआ रागी डा, यर्दन खोला आइक्की हांबु डा टायर नु सीदोन सहर डा बाक्मा बाकत। मेकोपुकीमी येसु आ पशो गेय आ पर्वम शुश लोत्र नेंशा जाक्मा बाकत।
- 9 मिनू येसुमी आ शेंसीब आन कली “डोंगा का चाक्शा वोतीन” देमाकत। मारदे हना शुश मुरपुकीमी नेप्शा चुशा, येसु आ नेक्था जाक्चा बोल पामे बाकत।
- 10 येसुमी रोइ पाइब शुश आन कली सापदा बाकत। रोइ पाइबपुकीमी “थिचा तडल” दे आ नेक्था जाक्मा बाकत।
- 11 प्रांग्रा दिचा डा वोलपुकीमी येसु कली तशा, पोक्च थेक्शा “परमप्रभु यावे आ तौ ननी” दे वाइ ब्रेम्मा बाकत। लूका ४:४१
- 12 मिनू येसुमी “एको लोत्र मन्नपाइक्चा” दे माइक्मी बाकत। मर्कूस १:४३-४४

१२ जना शेंसीबपुकी वोइशशो

मती १०:१-४; लूका ६:१२-१६

- 13 काबु येसु डांडा डोंइसे बाकत। मिनू सु सु आन कली योव्रडा, मेको आन कली आ नेक्था ब्रेत्ता बाकत। मिनू मेको ब्रेशोपुकी जाक्मा बाकत।
- 14 आं नु काथा बाक्चा कली नु शेंथ सोइक्चा कली
- 15 वोल खेरतीक अधिकार तशा बाक्मल, दे १२ जना आन कली वोइक्मी बाकत।
- 16 मेको १२ जना आन नें सिमोन आ याइनी नें पत्रुस वोदा बाकत।
- 17 जब्दी आ तौ याकूब नु आ लोक्ब यूहन्ना, मेको आस कली बोअनेरगेस नें वोदा बाकत। बोअनेरगेस देशो “बुंबु आ तौ नस” दे रुम्सीब। लूका ९:५४
- 18 मिनू अन्द्रीयास, फिलीप, बारथोलोमाइ, मती, थोमास, अल्फयस आ तौ याकूब, थदेयस, सिमोन कनानी
- 19 नु यहूदा इस्कारीयोती बाक्मा बाकत। यहूदा चहिं नोले येसु कली साइक्ब आन कली लां कोंइब दुम्माकत।

येसु नु आ खिं डा मुर

20 मिनू लेंशा शुश मुर खुम्समानु, येसु नु आ शेंसीबपुकी जचा कली यो नाइक्चा मतामे बाकत।

21 मिनू येसु आ खिं डा मुरपुकीमी मेको नेंशा “आ निप्स ग्यशो दुम्माकत, दोपा यो खिं लाइक्चा” दे ब्रथ लमा बाकत।

मर्कूस ६:४; यूहन्ना ७:५; यूहन्ना ८:८४

येसु नु वोलपुकी

मती १२:२४-३२; लूका ११:१४-२३

- 22 यरूसलेम रे यिशो सास्त्रीपुकीमी “बेल्जीबुलमी सुम्शो बाक्माकत। वोल आन पिप आ सक्तिमी वोल आन कली खेरबाक्माकत” देमा बाकत। मती ९:३४
- 23 मिनू येसुमी मेको आन कली आ नेक्था ब्रेशशा, कथा सेल्शा “सैतानमी सैतान कली खेरने चाप्बा डा?
- 24 राज्य का डा मुरपुकी जिशा ब्राशा गाक्तेक्म हना, मेको राज्य जाम्शा लाइब।
- 25 खिं का डा मुरपुकी जिम्तेक्म हना, मेको खिं मलीब।

- 26 सैतान आ राज्यम जिशा ब्रातेकम हना, आ राज्य नुष्ठा लाइब।
- 27 बोल्यो मुर आ खिम सुइ खुइ पथ ओवने मचाप्नीम। बोल्यो मुर कली फ्रेशा पाइशशा वोइशशा ला, आ मारेइ मारेइ खुइ पने चाम्सीब।
- 28 नोफा दाइशशा नेनीन, मुरपुकीमी पाप पाप्तेकम हना यो, आन पशो पाप क्याम्चा ताइनीम। मरिम्शो लोत्र पाप्तेकम हना यो, मेको पाप यो क्याम्चा ताइनीम।
- 29 तन्न परमप्रभु यावे आ सोक्त आ पबर्म मरिम्शो लोत्र पशो पाप चहिं मक्याम्सीब। मोदेशो लोत्र पाइब आ पाप गेना हना यो लीब” दैमाक्त। हिब्रू ६:४-६
- 30 मारदे हना मेकोपुकीमी येषु आ पबर्म “येसु ग्रांया दिचा डा वोल्म सुम्शो बाकमाक्त” देशो बाकमा बाक्त। यूहन्ना १०:२०
- येसु आ खिं डा मुर जाकशो  
मत्ती १२:४६-५०; लूका ८:१९-२१
- 31 मिनु येषु आ ममा नु आ लोकबपुकी आ बाक्तीक लाडगामी जाकमा बाक्त। मिनु “गो गुम्थ जाक्तक” दे तुइकपाइकथ मुर सोइकतमे बाक्त।
- 32 मेकोपुकी जाकमानु, शुश मुर खुम्सीशा, येषु आ नेक्था बाकशो बाकमा बाक्त। मिनु मेको नेक्था बाकबपुकीमी “इन ममा नु इन लोकबम लोकब लाडगाम जाकशा, इन कली ब्रेत्ताकमे” दे मदमे बाक्त।
- 33 मिनु येषुमी “आं ममा नु आं लोकबपुकी सु नमी?” देशा,
- 34 आ नेक्था निशशा बाकब आन कली कोव्रशा “एकेर बाकब आं ममा नु आ लोकबपुकी नम।
- 35 परमप्रभु यावे आ दाकशो पाइबपुकी आं लोकब नु आं ममा नम” दैमाक्त।

## 4

- वांचेर शोकशो कथा  
मत्ती १३:१-९; लूका ८:४-८
- 1 मिनु समुन्द्र आ नेक्था लशा, मेकेर बाकशा, लेशा शेंचा गोवा बाक्त। मेकेर शुश मुर खुम्सीशो बाकमा बाक्त। आं चहिं डोंगा काम डोइशशा बाकशो बाकमाक्त। आ लोत्र नेंबपुकी समुन्द्र आ नेक्था बाकमा बाक्त।
- 2 मिनु कथा सेल्शा, शुश लोत्र शेंदा बाक्त।
- 3 मिनु शेंना शेंन “नेनीने, मुर का वांचेर शोकथ लमाक्त।
- 4 मिनु ब्वारानु, गेडा का निक्शी लॉमी जुक्तमे बाक्त। मिनु चिक्बीमी गुष्ठा जामे बाक्त।
- 5 गेडा का निक्शी ग्याडगो खपीमी जुक्तमे बाक्त। मिनु शुश खप मबाक्तीके थे थु बुक्शा, जिव जाव वामा बाक्त।
- 6 तन्न नां पवानु, सोल सुल बेकमा बाक्त, मारदे हना शाकश थोकचा मतथु सोत्रमा बाक्त।
- 7 का निक्शी चू आ दातेमी जुक्तमे बाक्त। मिनु चूमी सुम्शा, बारचा मगेवा बाक्त। मिनु मसिम्माक्त।
- 8 का निक्शी चहिं रिम्शो खपीम जुक्तमे बाक्त। मिनु वाशा बारशा, शुश ग्रेल्शा, गेडा का के ३०, ६०, सहे का सम्म सिम्मा बाक्त” दे शेंदीमी बाक्त।
- 9 मिनु “सु के नेंब नोफा बाकमे, मेकोमी नेंनल” दैमाक्त।
- वांचेर शोकशो कथा आ अर्थ  
मत्ती १३:१०-१७; लूका ८:९-१०
- 10 मिनु आ लोत्र नेंबपुकी गाकमा नोले, येषु नु गाकब नु आ १२ जना शेंसीबपुकीमी कथा सेल्शा शेंशो लोत्र आ पबर्म हिल्लो पामे बाक्त।
- 11 मिनु येषुमी “परमप्रभु यावे आ राज्य दोदेशो बाकब दे इन कली रुप्तीक थुं गेशो बाक्त। लाडगाम बाकब आन कली चहिं कथा सेल्शा शेंनुडमी।
- 12 मारदे हना आन मिक्चीमी कोव्रनीम, तन्न मताइनीम। आन नोफामी नेंनीम तन्न मरुप्नीम। कोव्रशा रुप्तेकम हना, आन थुं लेशशा, आन पाप क्याम्चा ताम वा” दैमाक्त। यसैया ६:९-१०
- वांचेर शोकब आ पबर्म शेंशो  
मत्ती १३:१८-२३; लूका ८:११-१५
- 13 मिनु येषुमी “मेको कथा आ अर्थ मरुप्नी? मेको लायो मरुप्नी हना, अरु कथा डा शेंतीक दोपा रुप्ने चाप्नीनी?
- 14 वांचेर शोकबमी परमप्रभु यावे आ लोत्र शोकब।
- 15 लॉमी शोकशो दोदेशो बाक्नीम देशा हना, लोत्र नेन्मेनु, सैतानमी आन थुमी रुप्शो लोत्र योल्ब।
- 16 ग्याडगो खपीम शोकशो खोदेशोपुकीमी लोत्र नेंशा, बिशशा ग्येरसीनीम।
- 17 तन्न शाकश थोकचा मतथु, शुश मलीनीम। लोत्र आ पबर्म श्येत गेचा पुंडसाकम हना, थु प्रोइशा गाक्नीम।
- 18 चू आ दातेमी जुक्शो खोदेशोपुकीमी लोत्र नेंनीम।
- 19 तन्न दोपा ठेयब दुम्नुडा? दोपा क्येत चेमु? दोपा मारेइ मारेइ ताइनुडा? दे मिम्शा, आ थुमी तेकब। मिनु आ नेंशो लोत्रमी फल मसिप्ब।
- 20 रिम्शो खपीम शोकशो खोदेशोपुकीमी चहिं परमप्रभु यावे आ लोत्र नेंशा, आन थुमी चोइक्नीम। मिनु गेडा का के ३०, ६० सहे का गेडा सम्म सिशशा ग्रेल्नीम” दे शेंदीमी बाक्त।

परमप्रभु आ राज्य आ पर्वम शेशो

लूका ८:१६-१८

21 मिनू येसुमी “मार, बत्ती पाथीमी गुप्शा वोइक्का कली, खाट आगामी वोइक्का कली दानीमी डा? मफारथु वोइक्कीमी, ममाइ डा? मत्ती ५:१५

22 खुइशो मखुइक्सीब, सुम्शा वोइशो यो हाक्सीब। मत्ती १०:२६-२७; लूका १२:२

23 सुइ के नेंब नोफा बाकत हना, नेंनल” देंमाकत।

24 मिनू येसुमी “गे मार नेंनी, मेको नोफा दाइशो नेंनीने। दोपा नाक्शा गेनीनी, मोपा नाक्का पुंडसीनीनी। मत्ती ७:२

25 मारदे हना थीब तेम्शा गेचा पुंडसीब, मथीबमी चहिं आइक्के बाकशो यो रोइक्का पुंडसीब” दे शेंदीमी बाकत। मत्ती १३:१२-१३

26 मिनू “परमप्रभु यावे आ राज्य ओदेशो बाकब, मुर कामी आ रूमी वांचेर शोकब।

27 मिनू नाकदो इप्ब, सुनी बोक्ब। शोकशो वांचेर दोपा वाबा, दे मारिइ मतुइक्ब। याकूब ५:७

28 रू आंमा मेको वापाइक्ब। वाशा, बाला गूशा, आख सिप्ब।

29 तन्न मीमेनु, रिक्ब। मारदे हना रिक्की जाकशो बाकब” देंमाकत।

तोरी वांचेर

मत्ती १३:३१-३२; लूका १३:१८-१९

30 मिनू “परमप्रभु यावे आ राज्य मार नु गारबा? दोदेशो कथा सेल्शा रूपाइक्नन्नी?

31 वांचेर नेल्ल आन क्येडा आइक्च तोरी गेडा बाकब।

32 तोरी गेडा वाशा, शुश राशी पाइशो गिग घांस आन क्येडा ठेयब रवा दुम्ब। मेको रवामी चिकबीमी ग्योत्र सेल्शा, फाम्सीशा बाकने चाप्नीम। परमप्रभु यावे आ राज्य मेको खोदेशो बाकब” दे शेंदीमी बाकत।

33 मुरपुकीमी रूप्ने चाप्नेक्ल, दे शुश कथा सेल्शा, परमप्रभु यावे आ लोत्र शेंना शेंन बाक्माकत।

34 कथा मसेल्थु, लोत्र मपाइक्माकत। आ शेंसीब आन कली मेको कथा आन अर्थ यो नेल्ल रूपाइक्माकत।

फश गिवार तेक्शो

मत्ती ८:२३-२७; लूका ८:२२-२५

35 मोपा शेंने थुम्शा डा मिन, नां रिक्मेनु, येसुमी आ शेंसीब आन कली “समुन्द्र शोकशा, आइक्की हांबु जाकदीय्य” देंमाकत।

36 मिनू देल्शो मुरपुकी नु ब्राशा, डोंगा का डोइशो, लमा बाकत। अरु डोंगा का निक्शी यो लमा बाकत।

37 मिनू लमानु, ठेयब फश गिवार पचा गोवा बाकत। फश गिवार पवानु, ब्वाक्कु डोंगामी ओत्रशा, गुम्चवा बाकत।

38 येसु चहिं पिया थांडसीशा इप्शा निन्द्रा पवा बाकत। शेंसीबपुकीमी “ए शेंब, गो नेल्ल ब्वाक्कुमी गुम्शा बेक्चांडतय दे म्मिम्नीनी?” देंशा सेंदमे बाकत।

39 मिनू येसु बोक्शा, फश गिवार कली हुइशो, समुन्द्र कली “ब्वालेइ पावो, मदुक्को” देंमेनु, फश गिवार खा दिक्माकत। मिनू सिक्सी दुम्माकत।

40 मिनू शेंसीब आन कली “मारदे हिंनी? आं कली थमा मसुइक्नीनी?” देंमाकत।

41 मेकोपुकी चहिं छक लाक्शा, शुश हिंशा “फश नु ब्वाक्कुमी यो आ लोत्र टीबाक्ताक्से। एको सु बाक्म माइ?” दे लोत्र पमुमा बाकत।

## 5

वोल आन कली पोत्रम ओत्रचा गेशो

मत्ती ८:२८-३४; लूका ८:२६-३९

1 मिनू आइक्की हांबु गेरासीनी आन रागी जाकदीम्मा बाकत।

2 मिनू डोंगा रे तोइसीशा, येसुमी बेक्शो मुर थिम्तीके रे पिशो ग्रान्ना दिचा डा वोलमी ब्रीशो मुर का कली युमा बाकत।

3 मेको मुर बेक्शो मुर थिम्तीकेमी बाक्बाक्माकत। सुइमी मेको कली खिंमी वोइक्के मचाप्मे बाकत।

4 आ गुइ खोइली फ्रेंशा, साडलोमी पाइशो वोदमेनु यो, साडलो प्रोइशो प्रोक्बाक्माकत। सुइमी मेको कली ग्राशा तेक्ने मचाप्बाक्मा बाकत।

5 नाकदो नाक्ती बेक्शो मुर थिम्तीके नु डांडामी हिरशा, वाइ ब्रेशो, फुल्लुमी थोकसीशा, तेस्सीशा, गार सेल्सी बाक्माकत।

6 मेको मुरुमी येसु कली डोन रे तशा, दोरशा पिशा, सेउ पवा बाकत।

7 मिनू ठेयब सेंदामी ग्रीशा “परमप्रभु यावे, नेल्ल क्येडा ठेयब आ तौ, गो निक्शी मार पमुसा डा? परमप्रभु आ नें थिशा, श्येत मगेयीनी दे पुंडनन्नी” देंमाकत। मकूस १:२४

8 मारदे हना येसुमी वोल कली “ए ग्रान्ना दिचा डा वोल, एको मुर रे यूडो” दे माइशो बाक्माकत।

9 मिनू “श्येत मगेयीनी, दे पुंडनन्नी” देंमेनु, येसुमी “इ नें मार में?” दे हिल्लो पवा बाकत। मिनू मेकोमी “आं नें फौज बाक्ब, मारदे हना गो शुश बाक्नीकी” देंमाकत।

10 मिनू “आंड कली एको रागी रे मखेरचा नकी” दे पुना बाकत।

11 मेको डांडामी शुश पोत्र जोन जोन बाक्शो बाक्मा बाकत।

12 मोपतीके वोलपुकीमी “मेको पोत्र गे लशा, आन रांमी ओत्रचा गेकी” दे पुन्मे बाकत।



13 मिनू येसुमी लशा, ओव्रचा गेमी बाक्त। मिनू ग्रांग्रा दिचा डा वोलपुकी मुर रे गूशा लशा, पोत्र आन रांमी ओव्रमा बाक्त। मिनू मेको हजार निक्की पोत्रपुकी रेंगु रे यिना यिन, समुन्द्रमी गुप्शा बेक्मा बाक्त।

14 पोत्र योत्रबपुकीमी मो दुम्शो तशा, प्रोकशा, सहर नु मेको रागीमी लोत्र ब्रपदमे बाक्त। मिनू मुरपुकीमी “मार दुम्मे? दो दुम्मे?” दे तुइक्थ जाक्मा बाक्त।

15 मिनू येसु आ नेक्था जाक्शा, डोंइती वोलमी ब्रीशो मुर वा फेक्शा, साशा, येसु नु निश्शो तामे बाक्त। मेको कली साशो तशा, हिंमा बाक्त।

16 मिनू आन मिक्कीमी तशो तुइक्बपुकीमी नक जाक्शो मुर आन कली मार मार दुम्मे, मेको नेल्ल शोत्रडमे बाक्त।

17 मिनू मुरपुकीमी येसु कली “आंइ रागी रे गूशा लने” देमा बाक्त।

18 मिनू येसु डोंगामी डोंइसेनु, डोंइती वोलम ब्रीशो मुरुमी “गे नु बाक्चा गेयीनी” दे पुना बाक्त।

19 मिनू येसुमी चहिं बाक्चा मगेथु “इ खिं लेशशा लशा, इ मुर आन कली प्रभुमी इ कली दोदेशो रिम्शो पवा, गिश शिशी कोंइदा तुइक्पतो” दे आ खिं सोइक्ता बाक्त।

20 मिनू लशा, आ खिंमी ला ममाइ, डेकापोलीस रागी नेल्ल हिरशा, येसुमी दोदेशो रिम्शो पवा शुश मुर आन कली तुइक्पदा बाक्त। मिनू नेबपुकीमी “गिश रिम्शो दुम्माक्त” दे छक लाक्मा बाक्त। मर्कूस ७:३१

याइरस आ तमी

मती १:१८-२६; लूका ८:४०-५६

21 मिनू येसु डोंगा डोइश्शा, समुन्द्र शोकशा, आइक्वी हांबु जाक्दीश्शा, समुन्द्र आ नेक्था बाक्माक्त। मिनू शुश मुर देल्मा बाक्त।

22 मिनू याइरस नें पाइश्शो गुम्तीक खिं डा ठेयब मुर का जाक्शा, येसु कली तशा, आ डोंइती बाप्शा, आ पोक्च थेक्शा

23 “आं तमी बेक्चा चिक्ताक्व। आं खिं लशा, इन गुइ आं आल आ तार वोतीने। मिनू आ रोइ साशा ब्रोंइब” दे पुना बाक्त।

24 मिनू येसु मेको नु लमाक्त।

मिनू शुश मुर मेको आ नोले खोइश्शा, हुल पा क्राक्शा लमा बाक्त।

25 मेको शुश मुर आन दातेमी १२ बर्स डोंइती रे हुश याप्शो रोइ पाइब मीश मुर का यो बाक्माक्त।

26 शुश डाक्टर आन कली कोंइशा यो, आ रोइ मसाशो बाक्माक्त। डाक्टर आन गुइ रे पा शुश श्येत जशो बाक्माक्त। आ रोइ चहिं मसाथु, डोंइती क्येडा सारो दुम्शो बाक्माक्त। आ बाक्शो मारेइ मारेइ यो नुप्शो बाक्माक्त।

27 मेको मीश मुरुमी “मेको येसु माइश्शो मुरुमी रोइ पशो आन कली सापाइक्ने चाप्ब” देशो लोत्र नेंशो बाक्माक्त। मिनू शुश मुर आन दातेमी ओव्रशा, नोले रे पा येसु आ फेक्शो वा थिवा बाक्त।

28 मारदे हना “आ फेक्शो वा थिचा ला ताता हना यो, सानुड” दे मिम्शो बाक्माक्त।

29 मिनू थिवानु, आ हुश याप्चा देक्माक्त। मिनू साडा बाक्त दे तुइक्ता बाक्त।

30 येसुमी आइक्के सापाइक्तीक सक्ति गूशो तुइश्शा, फिर लेशशा कोव्रशा “सुम आं फेक्शो वा थिवा?” दे हिल्लो पवा बाक्त। लूका ६:१९

31 मिनू शेसीबपुकीमी “मिश डा मुरुमी इन कली नेप्नीम। मिनू गे ‘सुम थियी’ देनीनी?” देमा बाक्त।

32 येसुमी चहिं एर ओंथ नेल्ल मिक्च हिरशा, सुम थियी दे तुइक्चा मला बाक्त।

33 मिनू मीश मुरुमी हिंशा खिंखि पा पिशा, येसु आ डोंइती बाप्शा, पोक्च थेक्शा, लोत्र नेल्ल शोत्रडा बाक्त।

34 मिनू येसुमी “आं तमी, गे थमा सुइक्तीवी, मिनू इ रोइ साते। इ थुं नाइश्शा बाक्को। मुल सास डा सास बाक्को” देशा डा मिन सोइक्ता बाक्त।

35 मोपा येसुमी मीश मुर नु लोत्र पवानु, याइरस आ खिं रे जाक्शो मुरपुकीमी याइरस कली “इ तमी बेक्त। शेंब कली मारदे श्येत गेचा” दे मदमे बाक्त।

36 येसुमी मेको आन देशो मनेंखु पा, याइरस कली “महिनो। थमा सुइक्ना सुइक्न बाक्को” देमाक्त।

37 मिनू आ नोले खोइक्ब आन कली लचा मगेथु, पत्रुस, याकूब नु आ लोकब यूहन्ना आन कली ला काथा लदा बाक्त। मती १७:१

38 मिनू जाक्दीश्शा, रोंका पा डाक्ब मुर शुश तवा बाक्त।

39 मिनू खिं ओव्रशा, डाक्ब आन कली “मारदे रोंका पा डाक्नीनी? मेको आल बेक्शो ममाइ, इप्शा बाक्शो बाक्ब” देमाक्त। यूहन्ना ११:११

40 मिनू मेकोपुकीमी आ देशो थमा मसुदमे बाक्त। “हत्तै, दोदेशो लोत्र पवा” देमानु, येसुमी मेको आन कली गुंइदीमी बाक्त। मिनू आल आ आम आफ नु आ शेसीब आन कली आल आ बाक्तीके ओंइदा बाक्त।

41 मिनू आल आ गुइ ग्याइश्शा “तालीता कूमी” देमाक्त। मेको लोत्र आ अर्थ “ए आल, बोक्को” देशो रुम्सीब। लूका ७:१४; प्रेरित ९:४०

42 मिनू आल छुल बोक्शा, एर ओंथ हिरसे बाक्त। मेको आल १२ बर्स डा बाक्माक्त। मिनू मेकेर बाक्बपुकी मोदेशो दुम्शो तशा, थाम्पा छक लाक्मा बाक्त।

43 मिनू येसुमी “सुइ आन कली मशेंचा। आल कली जचा गेसे” दे आम आफ आस कली देमाक्त।

## 6

मुरपुकीम येसु कली थमा मसुइशो

मत्ती १३:५३-५८; लूका ४:१६-३०

- 1 मिनु मेकेर रे लशा, आ बाकतीके सहरमी जाकदीम्माकत। आ शेंसीबपुकी यो खोइशला लमा बाकत।
- 2 मिनु नाइकतीक नाकत युमतीक खिं लशा, मुर आन कली शेंचा गोवा बाकत। मिनु आ शेंशो नेंब शुशेमी छक लाकशा "मेकोमी ओदेशो शेंचा ते रे शेंसे माइ? ओदेशो निप्स पाइशो लोत्र पचा दोपा जोक्या? मेको आ गुइ रे दोदेशो सक्ति पाइशो गेय दुम्मे? यूहन्ना ७:१५
- 3 शी मुइब ममाइ डा? मरीयम आ तौ ममाइ डा? याकूब, योसेस, यहूदा नु सिमोन आन लोकब ममाइ डा? आ लोकबपुकी गोपुकी नु मबाकनीमी डा?" दे आन थुं मनुशो लोत्र पमुमा बाकत। यूहन्ना ६:२२
- 4 मिनु येसुम मो देंब आन कली "तेइ तेइ परमप्रभु यावे आ लोत्र पाइब आन कली ठेयब सेल्शा मान पाइनीम। आंम रागी डा नु आंम जात डा, आंम खिं डा मुरपुकीमी चहिं महिकनीम" दे माइकमी बाकत।
- 5 मिनु का निकशी रोइ पशो मुर आन कली आ गुइम थिशा सापाइक्या डा लाकशा, अरु सक्ति पाइशो गेय कोइने मचवा बाकत।
- 6 मिनु "थमा मसुइय्मी बाकत" दे तुइशला, छक लाकमाकत। मिनु एर ओंथ डा गाउं गाउंमी हिरशा, शेंना शेंन गाकमाकत।

शेंसीब आन कली सोइशो

मत्ती १०:१,५; लूका ९:१-६

- 7 मिनु काबु आ १२ जना शेंसीब आन कली ब्रेशला, निनिकशी पा शेंथ सोइक्या गोवा बाकत। शेंसीब आन कली वोल खेरतीक सक्ति गोवा बाकत। लूका १०:१
- 8 मिनु "जचा थोत्रक, क्येट, झोला मारेइ मलाइक्या। कोक्के कुरशा,
- 9 जुत्ता लिक्शा, फेकतीक वा का ला फेकशा गाककीन।
- 10 गाउं सहर जाकदीशला, खिं कामी ओत्रशा, बास बाककीन। मेको गाउं सहर रे गाकची मजाकम सम्म बाककीन। खिं खिं याकशा मबाककीन।
- 11 इन कली बाकचा मगेथु इन शेंशो लोत्र यो मनेतेकम हना, इन खोइली डा फुरक थुर थुर पाइशला गाककीन। इन मो पशोमी मेको आन कली चिन्ड दुम्ब" दे माइशला सोइकतीमी बाकत।
- 12 मिनु शेंसीबपुकी लशा, मुर आन कली "इन थुं परमप्रभु यावे गे लेत्तीन" दे नेंपाइकना पाइकन गाकमा बाकत।
- 13 मिनु वोल आन कली गुंइशा खेरबाकमा बाकत। रोइ पशो मुर आन कली तेल खेक्शा, प्रार्थना पा सापाइकबाकमा बाकत। याकूब ५:१४-१४

यूहन्ना कली साइशो

मत्ती १४:१-१२; लूका ९:७-९; लूका ३:१९-२०

- 14 मिनु हेरोद पिपमी मेको लोत्र नेंना बाकत। मारदे हना येसु आ नें तेइ ब्रशो बाकमाकत। का निकशी मुरपुकीमी "ब्वाककुमी खुम्शा गुंइब यूहन्ना बेकशो रे सेंचा पुंइसे बाकत। मोपतीके सक्ति पाइशो गेय पाइबाकमाकत" देंबाकमा बाकत।
- 15 का निकशीमी "एलीया बाकमाकत" देंबाकमा बाकत। का निकशीमी "साइ डा परमप्रभु यावे आ लोत्र पाइब आन दाते डा का, माइ" देंबाकमा बाकत।
- 16 हेरोद पिपमी मोदेशो लोत्र नेंशा "गो आ पिया क्योरपाइशो यूहन्ना बेकशो रे सेंचा पुंइसे बाकत" देंमाकत।
- 17 हेरोदमी हेरोदनी कली ग्येरपाइशला, यूहन्ना कली ग्याइकपाइशला, जेल्लानमी चोकपाइशला वोइशो बाकमाकत। मारदे हना हेरोदमी आ लोकब फिलीप आ मीश लाइशो बाकमाकत।
- 18 मिनु यूहन्नामी हेरोद कली "इन लोकब आ मीश लाइक्या मदुम्ब" दे माइशो बाकमाकत। प्रस्थान २०:१४; लेवी १८:१६
- 19 मोदेशो आ परबम हेरोद आ मीशेमी चुरशा, यूहन्ना कली साइकपाइक्या माल्लो बाकमाकत।
- 20 तन्न साइकपाइकने मचाप्शो बाकमाकत। मारदे हना हेरोद पिपमी "यूहन्ना ठीक पाइब नु रिम्शो थुं पाइशो मुर बाकब" दे तुइशला, यूहन्ना क्येडा हिंबाकमाकत। मोपतीके साइक्या मगेथु वोइशो बाकमाकत। मिनु यूहन्ना आ लोत्र नेंन दाकशा, आ थुं ग्येत्थ लुकच दुम्शा, नोफा दाइशला नेंबाकमाकत।
- 21 काबु मार दुम्माकत देंशा हना, पिप आ जरमेशो नाकती मिम्चा कली हेरोद पिपमी आ दरवार डा गेय पाइब, सरकार डा गेय पाइब नु गालील डा ठेयब मुर नेल्ल आन कली ब्रेशला, ठेयब भोज का गोवा बाकत।
- 22 मिनु हेरोदनी आ तमीमी सिल कोइडा बाकत। मिनु हेरोद नु मेकेर खुम्सीशा बाकबमी मेको सिल पशो तशा, शुश दाकशा, नेल्ल ग्येरसमा बाकत। मिनु पिपमी मेको मीश आल कली "इ दाकशो पुनो। गो मेको गेनन" देंमाकत।
- 23 मिनु लोत्र थोक्शा "मार पुंइतीवी हना यो, इ पुंइशो नेल्ल गेनन। राज्य उडक्थ उडक्थ पा योक्शा यो गेनन" दे कसम जशा, लोत्र गेवा बाकत। एस्तर ५:३-६
- 24 मिनु मीश आल गूशा, आ ममा कली "मार पुनू माइ" दे हिल्लो पवानु, आ ममामी "ब्वाककुम खुम्शा गुंइब यूहन्ना आ पिया गेचा नड, दे पुनो" देंमाकत।
- 25 मिनु मीश आल फ्रा लेशला, ओत्रशा पिप कली "ब्वाककुम खुम्शा गुंइब यूहन्ना आ पिया थालमी कुर पा गेयीनी" दे पुना बाकत।

- 26 मेको आ पुंड्रशो नेंशा, पिप आ थुं शुश खाइक्माकत। तन्न मेकेर बाकब आन कुल कसम जशा डा मिन “इ पुंड्रशो गेनन” देतीके “मगेनन” देने मचबा बाकत।  
 27 मोपतीके सिपाइ का कली “लशा, यूहन्ना आ पिया क्योरशा चाक्को” दे सोइक्ता बाकत।  
 28 मिनु आ पिया थालम कुर पा चाक्शा, मीश आल कली गोवा बाकत। मिनु मीश आलमी आ ममा कली गोवा बाकत।  
 29 मिनु यूहन्ना आ शेंसीबपुकीमी “यूहन्ना साइक्चा पुंड्रसे बाकत” देशो नेंशा, जेल्खानमी लशा, आ बेक्शो रां लाइशशा, थिममे बाकत।

शुश मुर आन कली रूथ्री थुलशो

मती १४:१३-२१; लूका ९:१०-१७; यूहन्ना ६:१-१३

- 30 येसु आ सोइशशोपुकी लशा शेंशा, लेशशा जाकमा बाकत। मिनु मार पामे, मार शेंदमे, मेको लोत्र येसु कली शोवडमे बाकत। लूका ९:१०; लूका १०:१७  
 31 मिनु येसुमी “मुर मबाक्तीके लशा नांडसय” देमाकत, मारदे हना शुश मुर गुमथ जाकबाकमा बाकत। मिनु येसु नु आ शेंसीबपुकीमी जचा कली यो नाइक्चा मतामे बाकत।  
 32 मिनु डोंगा डोइशशा, समुन्द्र शोकशा लमा बाकत। मुर मबाक्तीके जाकदीशशा, नाइक्चा, दे थुं पामे बाकत।  
 33 तन्न शुश मुरुमी येसु नु आ शेंसीब आन कली लशो तुइशशा, डोंगाम डोइशशो तशा, आइक्ची हांबु गे लमा बाकत दे तुइशशा, समुन्द्र हिरशा, दोरशा जाकदीम्मा बाकत।  
 34 मिनु येसु डोंगा रे तोइसीशा, शुश मुर देल्शा बाक्शो तशा, शिशी पवा बाकत। मारदे हना मेको आन कली गोठला मपाइशशो भेडा खोदेशो दुमशो तामी बाकत। मिनु शुश लोत्र शेंचा गोवा बाकत। मती ९:३६  
 35 मिनु शेंस डा शेंस पवानु, नां रिक्चवा बाकत। मिनु शेंसीबपुकीमी येसु कली “मुर मबाक्तीके बाकब, नां रिक्चापतु।  
 36 एको देल्शो मुर आन कली सोइक्चा। मारदे हना गाउं सहर लशा, आंम कली जचा थोत्रक ग्याप्केल” दे मदमेनु, मर्कूस ८:१-९  
 37 येसुमी “गेपुकीमी एको आन कली जचा गेने” दे माइक्मी बाकत। मिनु शेंसीबपुकीमी “गोपुकी लशा, सहे निक्शी देनार खोइ डा शोब्ले ग्याप्शा, चाक्शा, थुल्चा देनी?” दे हिल्लो पामेनु, देनार का नाकत का डा गाल्च बाकत। मेको रोम डा चांदी के क्येट बाकत।  
 38 “शोब्ले दोशो कुरनी? कोव्रथ लने” देमाकत। मिनु कोव्रशा “शोब्ले ५ ओटा नु डाइ निक्शी बाकत” देमा बाकत।  
 39 मिनु येसुमी मुर आन कली गिग घांस बाक्तीके दिममी “लस्कर पा निप्पतीन” दे माइक्मी बाकत।  
 40 मिनु सहे, सहे नु ५०, ५० डा लस्कर पा निस्समा बाकत।  
 41 मिनु येसुमी शोब्ले नु डाइ शेशा, सरीड गे कोव्रशा “परमप्रभु गे रिमशो पाइब बाक्नीनी” देशा, शोब्ले जिक्शा, निप्पाइशशो मुर आन कली “योक्शा गेने” दे आ शेंसीब आन कली गोवा बाकत। डाइ यो योक्पाइक्मी बाकत। मर्कूस ७:३४  
 42 मिनु नेल्लेमी रूथ्री जामे बाकत।  
 43 मिनु जशा, हेंशो शोब्ले नु डाइ गुप्मेनु, १२ डालो ब्रीमाकत।  
 44 जाइबपुकी वोंइश मुर ला ५ हजार बाक्मा बाकत।

येसु ब्वाक्कु तार गाक्शो

मती १४:२२-३३; यूहन्ना ६:१५-२१

- 45 मिनु येसुमी आ शेंसीब आन कली “आं डोंइती लशा, समुन्द्र शोकशा, बेथसैदा सहरमी जाकदीतीन” दे डोंगामी डोइक्पाइशशा, सोइक्तीमी बाकत।  
 46 मिनु नोले प्रार्थना पथ डांडा डोंइसे बाकत।  
 47 मिनु नां रिक्मेनु, डोंगा समुन्द्रमी बाक्माकत। येसु चहिं डांडाम बाक्माकत।  
 48 मिनु येसुमी आ शेंसीबपुकीमी श्येत जामे बाकत, दे तुइक्ता बाकत। मारदे हना फशेमी डोंगा तेक्गा बाकत। मिनु नां सोत्रचावानु, येसु ब्वाक्कु तारी गाक्शा पिमाकत।  
 49 “मेको आन कली दाम पाइक्नुड” दे मिम्शा, पेट्चावानु, शेंसीबपुकीमी येसु कली ब्वाक्कु तारी गाक्शो तशा, वोल दाप्शा, हिंशा वाइ ब्रेम्मा बाकत।  
 50 मारदे हना नेल्लेमी तामे बाकत। मिनु शुश हिंमा बाकत। मिनु येसुमी मेको आन कली सेशशा “महिनीन, गो नड, इन थुं बारपतीन” देमाकत।  
 51 मिनु डोंगा डोंइसे बाकत। मिनु फश गिवार दिक्माकत। मिनु शेंसीबपुकी थाम्पा छक लाक्मा बाकत। मर्कूस ४:३९  
 52 दोपा शोब्ले बारपदा, दे मारेइ ममिम्शो बाक्मा बाकत। मारदे हना रुप्चा थुं मपाइबाक्मा बाकत। मर्कूस ८:१७

रोइ पाइब आन कली सापाइशशो

मती १४:३४-३६

- 53 मिनु समुन्द्र शोकशा, गेनेसरेथ जाकदीम्मा बाकत।  
 54 मिनु डोंगा रे तोइसामानु, मुरपुकीमी येसु बाक्ब दे तुइक्तमे बाकत।  
 55 मिनु येसु ते ते लमे, मेक मेक दोरशा लशा, रोइ पशो आन कली कुरशा, आ नेक्था चाक्मे बाकत।

56 येसु गाउं सहर ते ते लमे, मेक मेक रोड पशो आन कली चाकबाक्मा बाक्त। मिनू येसु कली “इन फेक्शो वा थिचा गेयीनी” दे पुंडबाक्मा बाक्त। मिनू सु सुमी आ फेक्शो वा थीमे, मेकोपुकी साबाक्मा बाक्त। मर्कूस ५:२७-२८; प्रेरित ५:१५; प्रेरित १९:११-१२

## 7

साइ डा पतीके आ परबम शेंशो

मती १५:१-२०

- 1 फरिसीपुकी नु सास्त्री का निक्शी यरूसलेम रे यिशा, येसु आ बाक्तीकेम जाक्मा बाक्त।
- 2 मिनू काथा बाक्मानु, येसु आ शेंसीबपुकीमी गुड मचिक्थु जशो तामे बाक्त।
- 3 फरिसी नु यहूदी नेल्लेमी गुड मचिक्थु मजाइनीम। आन जोक्ब तुडक्ब खाल्पापुकीमी वोइशशो पतीके नेल्ल पाइनीम।
- 4 बजार लशा लेशशा, खिं जाक्शा, चोत्रखेसीशा ला जाइनीम। कचौरा, लोटा, गायी, निक्तीके नेल्ल चोत्रखेचा माल्ब। मेको मोदेशो पतीके शुश पाइनीम। मती २३:२५
- 5 मोपतीके येसु आ शेंसीबपुकीमी गुड मचिक्थु जशो तशा, येसु कली “इन शेंसीबपुकीमी किकी पिपीमी वोइशशो रिती थिती मारदे मपाइनीमी? मचोत्रखेसीथु गुड मचिक्थु जाइबाक्तेक्म” दे मदमे बाक्त।
- 6 मिनू येसुमी मेको आन कली “गे कपटीपुकी, यसैयामी पशो नोले दुम्ब लोत्र इन कली गारमाक्त। मार ब्रेक्शो बाक्त देशा हना ‘मेकोपुकीमी शोत्र रे पा ला आं कली मान पाइनीम। आन थुमी चहिं मदाक्नीम, आं देशो यो मपाइनीम। यसैया २९:१३
- 7 आं कली सेउ पखु पा, परमप्रभु यावे आ लोत्र बाक्त, दे शेंनीमी, तन्न मुरुमी मिम्शो ला शेंनीम’ दे ब्रेक्शो बाक्त। यसैया २९:१३
- 8 परमप्रभु यावे आ अरेशो लोत्र प्रोइशा, मुरुमी वोइशशो पतीके पाइनीनी” दे माइक्मी बाक्त।
- 9 मिनू लोत्र बोइशशा “गिश जोक्ब तुडक्ब ननी। परमप्रभु यावे आ देशो शेंचा प्रोइशा, आम सेल्शो इन पतीके ला शेंनीनी।
- 10 मोसामी ब्रेक्शो लोत्र का ‘आम आफ आस कली मान पचा’ मिनू लोत्र का ‘सु सुमी आम आफ आस कली मरिम्शो लोत्र पामे, मेकोपुकी साइक्चा पुंडसमल’ दे ब्रेक्शो बाक्त। प्रस्थान २०:१२; प्रस्थान २१:१७
- 11 गेपुकीमी चहिं सुमी आम आफ आस कली ‘इन कली गेचा माल्शो थोत्रक लाइशशा, कुरबन कली गेता’ दे माइक्बा, मेकोमी आम आफ आस कली मारेइ गेचा ममाल्ब दे शेंनीनी। ‘कुरबन गेता’ देशो चहिं ‘परमप्रभु कली गेता’ देशो रुम्सीब।
- 12 मोपा इन शेंतीक लोत्रमी आम आफ आस कली वारच पचा तेक्नीनी।
- 13 इन वोइशशो रिती थितीमी परमप्रभु यावे आ देशो टिचा प्रोइपाइक्नीनी। मिनू मोदेशो कपटी गेय शुश पाइनीनी” दे हुडक्तीमी बाक्त।

ग्रांया दिशो सेल्ब थोत्रक

- 14 मिनू येसुमी मुर आन कली लेंशा ब्रेशशा “गे नेल्लेमी नोफा दाइशशा नेंशा रूपीने।
  - 15 लाडगा रे ओत्रशो थोत्रकीमी मुर कली ग्रांया दिशो सेल्ने मचापब। मुर रे गूशो थोत्रकीमी चहिं मुर कली ग्रांया दिशो सेल्ब। प्रेरित १०:१४-१५
  - 16 सु के नेंब नोफा बाक्मे, मेकोमी नेंनल” दे शेंदीमी बाक्त। मर्कूस ४:२३
  - 17 मिनू मुर आन कली प्रोइशा, खिं ओत्रमेनु, आ शेंसीबपुकीमी “इन शेंशो लोत्र थमा पा मार रुम्सीबा?” दे हिल्लो पामे बाक्त।
  - 18 मिनू येसुमी “मार, गे यो एको लोत्र मरुप्नी? लाडगा रे ओत्रशो थोत्रकीमी मुर कली ग्रांया दिशो सेल्ने मचापब,
  - 19 मारदे हना मुर आ थुमी मओत्रब। आ कोत्रजीम ओत्रशा ग्रिम्शा, कयी लां पा गूब, दे मतुडक्नीनी?” दे शेंदीमी बाक्त।
- मो देशोमी जचा थोत्रक नेल्ल ग्रांया मबाक्नीम, दे शेंदा बाक्त।
- 20 मिनू मेकोमी “मुर रे मार गूबा, मेकोमी मुर कली ग्रांया दिशो सेल्ब।
  - 21 मुर आ थुं रे दोदेशो ग्रांया दितीके गूब देशा हना, तेल्लेम पचा, खुइ पचा, साइक्चा,
  - 22 ग्युंबे पशो मुर अर्को नु इप्चा, शिम पचा, जोल पचा, गेहे पचा, नें तोक्चा, ठेयब लेत्चा, ममिम्थु गेय पचा।
  - 23 मोदेशो पतीके मुर आ थुंम बाक्ब। मेको गूशा, मुर कली ग्रांया दिशो सेल्ब” दे शेंदीमी बाक्त।

सुरोफोनीसीया डा मीश मुर

मती १५:२१-२८

- 24 मिनू बोक्शा, मेकेर रे टायर नु सीदोन गे लशा, खिं का ओत्रमाक्त। सुइमी मतुडक्तेमेल देंत हना यो, खुइशशा बाक्ने मचबा बाक्त।
- 25 मिनू ग्रांया दिचा डा वोल्म सुम्शो आइक्च आल आ ममामी “येसु जाक्माक्त” देशो नेंशा, येसु आ बाक्तीके जाक्दीम्माक्त।
- 26 मेको मीश मुर अर्को रागी डा, सुरोफोनीसीयामी जरमेशो डा बाक्माक्त। मिनू मेको जाक्शा, येसु आ डोंइती खुम्की पा बाप्शा “आं तमी रे वोल् गुंडदीने” दे पुना बाक्त।
- 27 मिनू येसुमी “डोंइती आल आन कली थुल्चा माल्ब। आल आन कली गेचा माल्शो शोब्ले कुचुम आन कली गेचा मद्दुम्ब” दे मदा बाक्त।
- 28 मिनू मेको मीश मुरुमी “मद्दुम्ब, प्रभु, तन्न कुचुमपुकीमी यो आलपुकीमी तोक्शो शोब्ले जचा ताइनीम” दैमाक्त।
- 29 मिनू येसुमी “इ मो दैतीके इ पुंडशो गेतन। वोल् इ तमी रे गूत” दे मदा बाक्त।

30 मिनू आ खिं लेशशा जाकमेनु, वोल गूशा, आल सेस दुम्शा इप्शो बाकमाक्त।

नोफा मनैब कली सापाइश्शो

31 मिनू टायर रे लेशशा, सीदोन नु डेकापोलीस सहर दाते लां पा लशा, गालील डा समुन्द्र जाकदीम्माक्त। मत्ती १५:२९-३१; मर्कूस ५:२०

32 मिनू नोफा मनैब मुर का चाकशा “एको तार इन गुड वोतीने” दे पुन्मे बाक्त।

33 मिनू येसुमी मेको नोफा मनैब कली हुल रे फ्राशा लदा बाक्त। मिनू आ ब्रेप्यो मुर आ नोफामी ओइशा, थुथु पा तोक्शा, नाक्चुकमी आ लें थिशा,

34 सरीड गे कोत्रशा, लाइश्शो सोक्त कीशा “हेफाता” दे मदा बाक्त। मेको चहिं “रोक्सो” देशो रुम्सीब।

35 मिनू आ नोफा रोक्सीशा, नोफा नैब दुम्माक्त। आ लें लोकसीशा, लोत्र पाइब दुम्माक्त।

36 मिनू “सुड आन कली मशेंदीने” दे माइक्मी बाक्त। मशेंदीने माइक्मी बाक्त हना यो, मेकोपुकीमी तेड तेड शेंना शेंन गाक्मा बाक्त। मर्कूस १:४३-४५

37 मिनू आ लोत्र नैबपुकी थाप्पा छक लाक्शा “मेकोमी नेल्ल रिम्शो सेल्बाक्त। नोफा मनैब आन कली नोफा नैब सेल्बाक्त। लोत्र पस मजोक्ब आन कली लोत्र पाइब सेल्बाक्त” देमा बाक्त।

## 8

४ हजार मुर आन कली थुल्लशो

मत्ती १५:३२-३९

1 मिनू लेंशा शुश मुर देल्ला बाक्शा बाक्मा बाक्त। मेकोपुकी नु मारेड जचा थोत्रक मबाक्माक्त। मिनू येसुमी आ शेंसीब आन कली ब्रेशशा

2 “एको आन कली शिशी पातामी। मारेदे हना साबेर नाक्त रे मुल सम्म गो नु काथा बाक्शा, मारेड जचा मतामे। मर्कूस ६:३४-४४

3 जचा मगेथु आन खिं खिं सोइक्ताक्डमी हना, लांमी गाक्ना गाक्न थाइनीम। का निकशी शुश डोन रे जाक्शो बाक्नीम” देमाक्त।

4 मिनू शेंसीबपुकीमी “ओदेशो गोरशो रागीमी इश डा मुर आन कली शोब्ले गेशा, दोपा रूपाइक्चा डा?” देमा बाक्त।

5 मिनू येसुमी “शोब्ले दोशो कुरनी?” दे हिल्लो पवानु “७ ओटा” देमा बाक्त।

6 मिनू मुर आन कली “निस्सीन” दे दिममी निप्पाइक्मी बाक्त। मिनू मेको ७ ओटा शोब्ले गेशा, परमप्रभु कली “गे रिम्शो पाइब बाक्नीनी” देशा, शोब्ले जिक्शा, शेंसीब आन कली गेशा, योक्पदा बाक्त। मिनू मेकोपुकीमी मुर आन कली गेमे बाक्त।

7 आइक्च डांड का निकशी यो बाक्माक्त। मेको डांड यो गेशा “गे रिम्शो पाइब बाक्नीनी” देशा “योक्कीन” दे गेमी बाक्त।

8 मिनू मुरपुकीमी रूथ्री जामे बाक्त। जशा लीशो गुप्शा, ७ डालो प्रिंडमे बाक्त।

9 जाइबपुकी ४ हजार खोड बाक्मा बाक्त। मिनू येसुमी मुर आन कली आन खिं खिं सोइक्ता बाक्त।

10 मिनू छुल छाल बोक्शा, आ शेंसीबपुकी नु डोंगा डोइश्शा, दल्मानुथा रागी जाकदीम्मा बाक्त।

फरिसीमी चिन्ड कोत्रचा माल्लशो

मत्ती १६:१-४

11 मिनू फरिसी जाक्शा, येसु आ शुं थाप्पा कली “सरीड डा चिन्ड का कोंइदीकी” देमा बाक्त। यूहन्ना ६:३०

12 मिनू येसुमी लाइश्शो सोक्त कीशा “सिनाक्त मुलाक्त डा मुरपुकीमी मारेदे चिन्ड कोत्रचा माल्लीमी? नोफा दाइश्शा नेनीन, चिन्ड का यो मकोइनन्नी” देमाक्त।

13 मिनू मेको आन कली प्रोंइशा, डोंगा डोइश्शा, समुन्द्र शोक्शा, आइक्ची हांबु जाकदीम्मा बाक्त।

फरिसी आन बोरब ओरुत्ती

मत्ती १६:५-१२

14 शेंसीबपुकीमी शोब्ले लाइक्चा प्रेशो बाक्मा बाक्त। डोंगाम शोब्ले का ला लीशो बाक्माक्त।

15 मिनू येसुमी आ शेंसीब आन कली “नेनीने, फरिसीपुकी नु पिप हेरोद आन बोरपाइक्ब ओरुत्ती क्येडा होस पांडसीन” दे माइक्मी बाक्त। लूका १२:१; मर्कूस ३:६

16 मिनू “शोब्ले कुरचा प्रेंदमे बाक्त, दे तुइश्शा, मो देंम कौ?” देमुमा बाक्त।

17 मिनू येसुमी आन लोत्र तुइश्शा “शोब्ले मबा दे मारेदे शुश लोत्र पाइनीनी? गे मुल यो मारेड मरुप्नीनी? ममिम्नीनी? तुइक्चा यो ममाल्लीनी? मर्कूस ६:५२

18 मिक्च पाइश्शो बाक्तीनी हना यो, मताइनीनी? नोफा पाइश्शो बाक्तीनी हना यो, मनैनीनी? मुल यो मारेड मिम्ने मचाप्नीनी? मत्ती ११:१३, १६

19 गोम ५ ओटा शोब्ले जिक्शा योक्शा, ५ हजार मुर आन कली थुल्लु, जशा लीशो गिश डालो प्रिदीनी?” देमेनु “१२ डालो” देमा बाक्त। मर्कूस ६:४१-४४

20 “मिनू ७ ओटा शोब्लेमी ४ हजार मुर आन कली थुल्लु, जशा लीशो गिश डालो प्रिदीनी?” देमेनु “७ डालो” देमा बाक्त। मर्कूस ८:८-९

21 मिनू “मुल यो मारेड मरुप्नीनी?” देमाक्त।

मिक्च मताइब कली सापाइशशो

22 येसु नु आ शेंसीबपुकी बेथसेदा जाकदीम्मा बाक्त। मिनु मुरपुकीमी मिक्च मताइब का चाकशा “मेको कली थिने” दे पुन्मे बाक्त। मर्कूस ६:५६

23 मिनु येसुमी मिक्च मताइब कली गुइमी ग्याइशशा डा मिन, कीशा गाउं रे गुंडशा लदा बाक्त। मिनु आ मिक्चीम थुथु पा तोकशा, आ गुइ आ तारी वोइशशा “मुल मार मार तवी?” दे हिल्लो पवा बाक्त। यूहन्ना ९:६

24 मिनु मेकोमी इर गे कोव्रशा “मुरपुकी गाकशो ताता, तन्न मेको मुरपुकी रवा खोदेशो तांडसाकम” देमाक्त।

25 मिनु लेंशा आ गुइ आ मिक्च तारी वोदा बाक्त। मिनु मेकोमी कोव्रशा डा कोव्रशा पा तवा बाक्त।

26 मिनु येसुमी “गाउं हेरशा, इ खिं लावो” दे सोइक्ता बाक्त।

ख्रीस्तमी श्येत जचा मालब, दे शेंशो

मती १६:१३-२०; लूका ९:१८-२१; यूहन्ना ६:६७-६९

27 येसु नु आ शेंसीबपुकी सिजरिया फिलिप्पी गे लमा बाक्त। मिनु लामी गाकमानु, येसुमी “मुरपुकीमी आं पबर्म मार देंनीमी?” दे हिल्लो पवानु,

28 “का निक्शीमी ‘ज्वाककुम खुम्शा गुंडब यूहन्ना बाकमाक्त’ देंनीम। का निक्शीमी ‘एलीया बाकमाक्त’ देंनीम। का निक्शीमी ‘परमप्रभु यावे आ लोत्र पाइब का बाकमाक्त’ देंनीम” दे मदमे बाक्त। मर्कूस ६:१५

29 मिनु येसुमी “गेपुकी चहिं आं कली सु सुइय्यीनी?” दे हिल्लो पवानु, पत्रुसमी “गे ख्रीस्त बाकनीनी” देमाक्त।

30 मिनु आ शेंसीब आन कली “एको ख्रीस्त बाकब, दे सुइ आन कली मशेंदीन” दे माइक्मी बाक्त। मर्कूस ९:९

साइक्चा पुंडसीचा आ पबर्म शेंशो

मती १६:२१-२३; लूका ९:२२

31 मिनु येसुमी आ शेंसीब आन कली “रागीम जरमेशोमी शुश श्येत जचा मालब। जोकब तुइक्ब खालपा, ठेयब चढेब नु सास्त्रीपुकीमी मेको कली मब्राइनीम, साइक्पाइक्नीम। मिनु बेकशो आ नित्थ नाक्ती सेंसीब” दे लोत्र मखुइक्थु शेंदीमी बाक्त। मर्कूस ४:३१; मर्कूस १०:३२-३४

32 मिनु पत्रुसमी येसु कली एर आइक्ची लाइशशा, हुइक्ता बाक्त।

33 मिनु येसु हिरशा, अर्को शेंसीबपुकी गे कोव्रशा “ए सैतान, इ कुल मकॉइदी। परमप्रभु यावे आ मिम्शो ममाइ, मुर आन देशो नेंबाक्ते” दे पत्रुस कली हुइक्ता बाक्त।

दोपा ख्रीस्त आ नोले खोइक्चा

मती १६:२४-२६; लूका ९:२३-२७

34 मिनु आ शेंसीबपुकी नु मेकेर देल्शो आन कली ब्रेशशा “सुमी आं नोले खोइक्चा थुं पाइबा, मेकोमी आंम दला दाकस पचा प्रॉइशा, श्येत जचा महिंथु, आं नोले खोइय्यील।

35 सुमी आंम कली प्रॉइचा माल्बा, मेको जाम्शा लाइब। सुमी आं पबर्म नु परमप्रभु यावे आ लोत्र आ पबर्म आंम कली जिम्मा गेबा, मेको ब्रॉइब। मती १०:१९

36 रागी नेल्ल आंम के सेलने चाप्व, तन्न बेक्त हना, मेको मार रिम्शो दुम्बा डा?

37 मारदे हना गे मार गेशा ब्रॉइने चाप्नीनी डा?

38 सुमी हेंथे गाकब नु पाप पाइब आन पालामी आं पबर्म नु आं लोत्र आ पबर्म मुर आन कली देंचा मुने पाइबा, मेको आ पबर्म रागीम जरमेशोमी यो आ आफ आ छेडछेड नु आ स्वर्ग डा गेय पाइबपुकी नु जाकमेनु मेको कली तशा मुने पाइब” दे माइक्मी बाक्त। मती १०:३३

## 9

1 मिनु “नोफा दाइशशा नेनीने, मुल गो नु काथा बाकशो का निक्शीमी परमप्रभु यावे आ राज्य सक्ति पाइशशा जाकशो मतामे सम्म मबेक्नीम” देमाक्त।

येसु आ रां फाइशशो

मती १७:१-१३; लूका ९:२८-३६

2 मिनु ६ नाक्त नोले येसुमी पत्रुस, याकूब नु यूहन्ना, सां आन कली सुइ मबाक्तीके डांडामी लदा बाक्त। मिनु मेको आन डांडती येसु फांडसे बाक्त।

3 दोपा फांडसे बाक्त देशा हना, आ फेक्शो वा बुबु पा जिलील बुश दुम्शो तामे बाक्त। मोदेशो बुश सुइमी सेलने मचाप्नीम।

4 मिनु एलीया नु मोसा यूशो तामे बाक्त। मेको निक्शीमी येसु नु लोत्रसी पाम्से बाक्त।

5 मिनु पत्रुसमी येसु कली “ए शेंब, इ कली एकेर बाक्चा रिम्शो दुम्ब। बाक्तीके सां सेल्य। इन कली का, मोसा कली का नु एलीया कली का सेल्य” देमाक्त।

6 मारदे हना मार देंचा दे मतुइक्ता बाक्त। मिनु शुश हिंमा बाक्त।

7 मिनु गोस्सुमी नेल्ल आन कली गिल्मी बाक्त। गोस्स आगा रे सेंदा का यूशा “एको आं दाकशो तौ बाकब। आ लोत्र नेनीने” देशो नेन्मे बाक्त। मर्कूस १:११; २पत्रुस १:१७

8 मिनु एर ओंथ कोव्रडमेनु, येसु ला तामे बाक्त।

9 मिनू डांडा रे बुम्मानु, येसुमी “रागीम जरमेशो बेक्शो रे सेंचा मपुंडसे सम्म इन तशो सुड आन कली मशेंदीने” दे माइक्मी बाक्त। मर्कूस ८:३०

10 मिनू मोदेंशो दुम्शो सुड आन कली मशेंदमे बाक्त। “बेक्शो रे सेंचा पुंडसीचा देंशो मार बाक्म माइ” दे हिल्लो पमुमा बाक्त।

11 मिनू आ शेंसीबपुकीमी येसु कली “डोंइती एलीया जाक्चा माल्ब, दे सास्त्रीपुकीम शेंनीम। मारदे मोदें शेंनीमी?” दे हिल्लो पामेनु,

12 येसुमी “एलीया डोंइती जाक्शा, नेल्ल ठीक सेल्ब। मिनू रागीम जरमेशो श्येत जाइब नु महिक्सीशो दुम्ब, दे बेक्शो बाक्बा, ममाइ डा? मलाकी ३:१३; यसेया ५३:३-५

13 एलीया डोंइती जाक्त। मिनू आ पबंम डोंइती बेक्शो खोदेंशो दुम्शा, मेको कली मार पचा दाक्तमे, मेको पांमतेक्म” दे शेंदीमी बाक्त। मत्ती ११:१४; १राजा १९:२-१०

वोलम तशो आल सापाइश्शो

मत्ती १७:१४-२०; लूका ९:३७-४२

14 मिनू अरु शेंसीब आन बाक्तीकेमी लेश्शा जाक्शा, शुश मुर देल्शो नु सास्त्रीपुकीमी लीशो शेंसीब आन कली लोत्र हिल्लो पशो तामे बाक्त।

15 मिनू देल्शो मुरपुकीमी येसु कली तशा, छक लाक्शा, दोरशा पिशा, येसु कली सेउ पदमे बाक्त।

16 मिनू येसुमी “मेकोपुकी नु मार लोत्रसी पनी” दे हिल्लो पवानु,

17 देल्शो मुर आन दाते डा कामी “ए शेंब, आं तौ एक चाक्ता, मारदे हना वोलमी तशा, लाटा दुम्शो बाक्ब।

18 वोलमी सुमानु, गोल्ब। आ शोत्र रे बोग्यो गुंडब। आ खुड शेम्ब। मिनू आ रां मदुक्ब दुम्ब। इन शेंसीब आन कली ‘वोल गुंडदीन’ दे पुंडता, तन्न वोल गुंडने मचबेम” देंमाक्त।

19 मिनू येसुमी “गे थमा पा थमा मसुइक्बपुकी, गेना सम्म गेपुकी नु बाक्नुडा डा? ओदेंशो इन पशो गेना सम्म फाल्शा बाक्नुडा डा? रोइ पाइब कली चाक्कीन” दे माइक्मी बाक्त।

20 मिनू वोंइश आल कली येसु आ डोंइती चाक्मे बाक्त। मिनू वोलमी येसु कली तवानु, आल तिड गोल्शा, रोम्मीशा, आ शोत्र रे बोग्यो गुंडदा बाक्त।

21 मिनू येसुमी आ आफ कली “गेना रे ओदेंशो दुम्शो?” दे हिल्लो पवानु, आ आफोमी “आइक्च रेन,

22 एको वोलमी साइक्चा कली मीमी दुप्पदानु, ब्वाक्कुमी गुप्पदानु, शुश खेयप हेर हेरा बेक्त। गे मारेइ पने चाप्नीनी हना, शिशी पा एको श्येत जचा रे प्रोंइयीकी” देंमाक्त।

23 मिनू येसुमी “गे मारेइ पने चाप्नीनी कों देंनीनी। तन्न सु सुमी गेन चाप्नीनी देंशा, थमा सुइक्नीमी, मेकोपुकीमी आन पुंडशो ताइनीम” देंमाक्त।

24 मिनू आल आ आफोमी “थमा सुइक्ता, आं थमा मसुइक्ब थुं कली थमा सुइक्पतीने” दे थुं खाइश्शा, डाक्शा देंमाक्त।

25 मिनू येसुमी शुश मुर आन कली एर ओथ रे जाक्शो तशा, ग्रॉया दिचा डा वोल कली “गे लाटा नु नोफा मनेब वोल, गेनायो लेंशा मओत्रचा डा पा यूशा लावो” दे हुइश्शा, खेरा बाक्त।

26 मिनू वोल वाइ ब्रेश्शा, आल कली रोप्पाइश्शा गूमाक्त। मिनू आल बेक्शो खोदेंशो दुम्माक्त। मुरपुकीमी “बेक्त” देंमा बाक्त। मर्कूस १:२६

27 मिनू येसुमी आल आ गुइ ग्याइश्शा पोक्गानु, राम्माक्त।

28 मिनू येसु नु आ शेंसीबपुकी खिं लमा बाक्त। मिनू शेंसीबपुकीमी “मारदे मेको वोल कली गुंडने मचाप्का?” दे हिल्लो पामे बाक्त।

29 मिनू येसुमी “ओदेंशो वोल कली प्रार्थना पशा ला गुंडने चाम्सीब” दे माइक्मी बाक्त।

रागीम जरमेशो श्येत जचा माल्शो

मत्ती १७:२२-२७; लूका ९:४३-४५

30 मिनू मेकोपुकीमी “इं गाक्शो सुइम मतुइक्तेक्ल” दे गालील लां पा गाक्मा बाक्त।

31 मारदे हना आ शेंसीब आन कली “रागीम जरमेशो दा मुर आन गुइमी गेशा, साइक्चा पुंडसीशा, आ नित्थ नाक्ती बेक्शो रे सेंसीब” दे शेंचा दाक्ता बाक्त। मर्कूस ८:३१; मर्कूस १०:३२-३४

32 शेंसीबपुकीमी चहिं आ शेंशो मरुप्मे बाक्त। मिनू हिल्लो पचा यो हिमा बाक्त। लूका १८:३-४

नेल्ल क्येडा टेयब सु बाक्बा

मत्ती १८:१-५; लूका ९:४६-४८

33 मिनू कापेरनाउम जाक्दीम्मा बाक्त। मिनू खिं का ओत्रशा, येसुमी आ शेंसीब आन कली “लांमी गाक्यानु, मार लोत्रसी पनी?” दे हिल्लो पवा बाक्त।

34 तन्न मेकोपुकी सिक्सी पामे बाक्त, मारदे हना लांमी गाक्मानु “नेल्ल क्येडा टेयब सु बाक्का माइ?” दे लोत्र पशो बाक्मा बाक्त।

35 मिनू निश्शा, शेंसीब आन कली आ नेक्था ब्रेश्शा “नेल्ल क्येडा डोंइती दुम्चा कली नेल्ल क्येडा नोले दुम्शा, नेल्ल आन गेय पाइब दुम्चा माल्ब” देंमाक्त। मर्कूस १०:४३-४४; मत्ती २९:११; लूका २२:२६-२७

36 मिनू आल का आन दातेमी चाक्शा, आल कली मुप्शा

37 “सुमी आं नेंमी ओदेशो आल कली ब्राइबा, मेकोमी आं कली ब्राइब। आं कली ब्राइबमी आं कली ममाइ, तन्न आं कली सोइक्ब कली यो ब्राइब” दे माइक्मी बाकत। मत्ती १०:४०

रिम्शो पचा मतेक्चा

लूका ९:४९-५०

38 यूहन्नामी येसु कली “ए शेंब, गोपुकी नु मगाक्ब मुर कामी इन नें थिशा, वोल आन कली खेरशो ताइतक। मिनु मो पचा मटुम्ब, दे माइक्तक” देंमाकत। गन्ती १०:२७-२८

39 मिनु येसुमी “मटुम्ब, दे मदेंचा, मारदे हना आं नें थिशा, ठेयब गेय पाइबमी आं पर्बम लोत्र मक्याल्ब।

40 इं कली मरिम्शो मपाइब मेको इं मुरुन बाक्ब। मत्ती १२:३०; लूका ११:२३

41 नोफा दाइश्शा नेनीने, सुमी आं नें थिशा, खीस्त आ मुर नम देशा, इन कली लोटा का ब्वाक्कु तूचा गेबा, मेकोमी दोपा यो आ इनाम ताइब। मत्ती १०:४२

थमा सुइक्चा मतेक्चा

मत्ती १८:६-९; लूका १७:१-२

42 सुमी आं कली थमा सुइक्ब आइक्च आल आ थमा सुइक्तीक क्याल्बा, मेको कली आ शुरम यात क्युक्शा, समुन्द्रमी ताइश्शा साइक्चा रिम्शो बाक्ब।

43 इ गुडमी तेक्तु हना, मेको गुड खोतो। मारदे हना निम्फा गुड पाइश्शो दुम्शा, गेनायो मकाप्ब नरक डा मीम ओव्रचा क्येडा, डुडे दुम्शा, परमप्रभु यावे आ राज्यमी ओव्रचा तचा रिम्शो बाक्ब। मत्ती ५:३०

44 नरकमी बाक्ब आन लुस्पु मबेक्नीम, मी यो मकाप्ब।

45 इ खोइलीमी तेक्तु हना, मेको खोतो। मारदे हना खोइली निम्फा पाइश्शो दुम्शा नरकम ओव्रचा क्येडा, खोरन्डे दुम्शा, परमप्रभु यावे आ राज्यमी ओव्रचा तचा रिम्शो बाक्ब।

46 नरकमी बाक्ब आन लुस्पु मबेक्नीम, मी यो मकाप्ब।

47 इ मिक्चीमी तेक्तु हना, मेको मिक्च फेरशा ताइक्तो। मारदे हना मिक्च निम्फा पाइश्शो दुम्शा, नरकम ओव्रचा क्येडा, काना दुम्शा, परमप्रभु यावे आ राज्यमी ओव्रचा तचा रिम्शो बाक्ब। मत्ती ५:२९

48 नरकमी बाक्ब आन लुस्पु मबेक्नीम, मी यो मकाप्ब। यसेया ६६:२४

49 नेल्ल मीम याक्पाइक्चा पुंडसीनीम। मारेइ चढेमेनु, हिकसी सुप्शो चढेनीम। लेवी २:१३; गन्ती १८:१९

50 हिकसी डाम्ताक्ब हना, बोत्रब। हिकसी आ डाम्तीक जाम्त हना, मारम डाम्पाइक्चा डा? हिकसी डाम्शो दुमीन। मिनु दुशा बाक्कीन” दे शेंदीमी बाकत। मत्ती ५:१३; लूका १४:१४; कलस्सी ४:६

## 10

1 मिनु मेकेर रे लशा, यहूदीया रागी नु यर्दन खोला आइक्ची हांबु जाक्दीम्मा बाकत। मिनु लेंशा शुश मुर देल्मा बाकत। मिनु तेइ तेइ गाक्शा, दोपा शेंदा, मोपा मेको आन कली यो शेंदा बाकत।

वोंइश मीश आस नाता

मत्ती १९:१-९

2 मिनु फरिसीपुकी जाक्शा, आ थुं थाम्चा कली “मीश कली प्रोंइचा दुम्बा देय मटुम्बा?” दे हिल्लो पामे बाकत।

3 मिनु येसुमी “मोसामी इन कली मार पन देंमे?” देंमेनु

4 “छोड पत्र ब्रेक्शा, सोइक्चा दुम्ब देंत” देंमा बाकत। ब्यक्स्था २४:१; मत्ती ५:३१-३२

5 मिनु येसुमी “मुरपुकीमी शिशी मपाइनीम, दे तुइश्शा, मोदेशो पचा गेवा बाकत।

6 नेल्ल क्येडा डोंइती परमप्रभु यावेमी वोंइश मुर नु मीश मुर सेलतीम्सी। उत्पती १:२७

7 मोपतीके मुरुमी आम आफ प्रोंइशा, आ मीश नु गारशा बाक्ब। उत्पती २:२४

8 मिनु मेको निकशी रां का दुम्नीस। मोपतीके वोंइश मीश निकशी मनसी, निम्फा का नस।

9 परमप्रभु यावेमी कांडचीक सेल्शो आस कली मुरुमी मफ़ादमेक्ल” दे माइक्मी बाकत।

10 मिनु खिंमी बाक्मेनु, आ शेंसीबपुकीमी “इन शेंशो मार रुम्सीबा” दे हिल्लो पामे बाकत।

11 मिनु येसुमी “सुमी आ मीश प्रोंइशा, अर्को चाक्बा, मेकोमी वोंइश मीश आस नाता खोइक्ब। लूका १६:१८; १कोरिन्थी ७:८-११

12 मीश मुरुमी आ वोंइश प्रोंइशा, अर्को खोइक्तु हना, मेकोमी यो वोंइश मीश आस नाता खोइक्ब” देंमाकत।

येसु नु आलपुकी

मत्ती १९:१३-१५; लूका १८:१५-१७

13 मिनु येसुमी आ गुड आल आन तारी वोदल दे आलपुकी चाक्मे बाकत। मिनु शेंसीबपुकीमी आल चाक्ब आन कली “मचाक्कीन” दे हुइक्तमे बाकत।

14 मिनु येसुमी मेको तशा, आ थुं मनुथु, हुइक्ब आन कली “आल आन कली आं बाक्तीके जाक्चा गेने, मतेक्कीन। मारदे हना परमप्रभु यावे आ राज्य आल आन केन बाक्ब।

15 नोफा दाइश्शा नेनीने, मुरपुकीमी आल आन थुं डा मिम्शो खोदेशो पा ममिम्ताक्म हना, परमप्रभु यावे आ राज्यमी ओव्रचा मताइनीम” दे माइक्मी बाकत।



16 मिनू आल आन कली मुष्ठा, आ गुड आन तारी वोडशशा, आसीक गेमी बाकत।

शोंप आ पर्वम लोत्र

मती १९:१-९

17 मिनू मेकेर रे लमेनु, मुर का दोरशा पिशा, येसु आ डोंडती पोक्थ थेक्शा बाष्ठा “शेंब, गे रिम्शो ननी। गेना हना यो ब्रोंडशा बाक्का कली मार पचा माल्नुडा?” दे हिल्लो पवा बाकत।

18 मिनू येसुमी “मारदे आं कली रिम्शो मुर दे माड्य्यी? सुड रिम्शो मनमी। परमप्रभु यावे ला रिम्शो बाक्ब।

19 परमप्रभु यावे आ अरेशो लोत्र तुडक्नेवे। मसाडक्का, वोंडश मीश आस नाता मखोडक्का, खुड मपचा, सांकछी बाक्शोन, जोल मपचा, हिंच कोंडशा मारेड मरोडक्का, आम आफ आस कली मान पचा, दे ब्रेक्शो बाक्ब” दे मदा बाकत। प्रस्थान २०:१२-१७

20 मिनू मेकोमी “गो आल रेन मेको नेल्ल पन पन बाक्ती” देंमेनु,

21 येसुमी मेको आ कुल शिरशा कोत्रशा, मेको कली दाक्का “का चहिं मपवी। लशा, इ शोंप नेल्ल लेयशा, जचा फेक्का मताडब आन कली योक्का गेमी। मिनू लेशशा, आं नोले खोड्य्यी। मिनू इ शोंप स्वर्गमी बाक्ब” देंमाकत। मर्कूस ८:३४; मती १०:३८

22 मेको लोत्र नेंशा, आ कुल राव किक्पाडशशा, आ थुं खाडशशा, गाक्माकत। मारदे हना मेको शुश शोंप पाडशशो मुर बाक्माकत।

23 मिनू येसुमी एर ओंथ कोत्रशा, आ शेंसीब आन कली “शुश शोंप पाडशशो मुर परमप्रभु यावे आ राज्य ओत्रचा गिश श्येत बाक्बा” देंमाकत।

24 मेको लोत्र नेंशा, शेंसीबपुकी छक लाक्का बाकत। मिनू येसुमी लोत्र थोक्का “आलपुकी, आन शोंपोम थमा सुडक्ब आन कली परमप्रभु यावे आ राज्य ओत्रचा शुश श्येत दुम्ब।

25 शोंप पाडशशो मुर परमप्रभु यावे आ राज्य ओवने चाप्पा क्येडा, दलओठ लूजे आ पोलांम ग्रीने चाप्ब” देंमाकत।

26 मिनू शेंसीबपुकी थाम्पा छक लाक्का “मो हना, सु ओत्रचा ताडबा डा?” देंमुमा बाकत।

27 मिनू येसुमी आन कुल गे कोत्रशा “मुरपुकीमी पने मचाप्नीम। तन्न परमप्रभु यावेमी पने चाप्ब, मारदे हना परमप्रभु यावेमी मारेड मारेड पने चाप्ब” दे माडक्की बाकत।

येसु आ नोले खोडक्ब आन इनाम

मती १९:२७-३०; लूका १८:२८-३०

28 पत्रुसमी येसु कली “गो मारेड मारेड प्रोंडशा, इन नोले खोडक्कतक” देंमेनु,

29 येसुमी “नोफा दाडशशा नेनीन, सुमी आं पर्वम नु ग्येरपाडक्ब लोत्र आ पर्वम आ खिं, लोकबम लोकब, आम आफ, तमी तौ नु रू प्रोंडबा,

30 मेकोमी खेदा पा श्येत जचा पुंडसाक्ब हना यो, मुल आ प्रोंडशो क्येडा शुश खिं, लोकबम लोकब, आम आफ, तमी तौ नु रू ताडब। मिनू नोले गेना हना यो परमप्रभु यावे नु बाक्का ताडब।

31 डोंडती दुम्शोपुकी नोले दुम्नीम। नोले दुम्शोपुकी डोंडती दुम्नीम” दे शेंदीमी बाकत।

रागीम जरमेशो साडक्का पुंडसीब देशो

मती २१:१७-१९; लूका १८:३१-३४

32 मिनू यरूसलेम डा लां खोडशशा गाक्मानु, येसु नेल्ल आन डोंडती गाक्माकत। आ नोले खोडक्बपुकी छक लाक्का हिंमा बाकत। मिनू १२ जना शेंसीब आन कली लेंशा आ नेक्था ब्रेशशा, आ कली मार दुम्बा दे तुडक्पाडक्का गोवा बाकत। मर्कूस ९:११

33 मिनू “मुल यरूसलेम लाइनय। मिनू रागीम जरमेशो ठेयब चढेब नु सास्त्री आन गुडमी गेचा पुंडसीब। मिनू मेकोपुकीमी दोस गेशा, साडक्का माल्ब, दे अर्को जात डा मुर आन गुडमी गेनीम।

34 मिनू मेकोपुकीमी शुक्शी पशा, आ कुलमी तोक्का युक्नीम। मिनू साडक्नीम। मिनू बेक्शो आ नित्थ नाक्ती बेक्शो रे सेसीब” दे तुडक्पाडक्की बाकत।

ठेयब सु बाक्बा?

मती २०:२०-२८

35 मिनू जब्दी आ तौ याक्ब नु यूहन्ना येसु आ नेक्था जाक्का “ए शेंब, मार पुंडस्कु, मेको तस्कुल” दे पुन्से बाकत।

36 मिनू येसुमी “मार पुंडनीसी?” दे हिल्लो पवानु,

37 मेको निक्शीमी “गे सक्ति पाडशशो दुम्शा, हुकुम पाडब दुम्नीनु, का इन ग्युरा, का इन पेरा गे बाक्का गेचा नस्कु” दे पुन्से बाकत।

38 तन्न येसुमी “गे मार पुंडसी, मेको मरूपनीसी। आं तूचा माल्शो कचौरा तूने चाप्नीसी? आं बुद पा श्येतम खुम्चा पुंडसीने चाप्नीसी?” देंमेनु मर्कूस १४:३६; लूका १२:५०

39 “चाप्नस्कु” देंसा बाकत। मिनू येसुमी “आं तूचा माल्शो कचौरा यो तूनीसी। आं बुद पा श्येतम खुम्चा यो पुंडसीनीसी। प्रेरित १२:२

40 तन्न आं ग्युरा पेरा गे बाक्का गेचा चहिं आं गुडमी ममाड। परमप्रभु यावेमी योत्रचा पुंडसीशो मुर ला मेकेर बाक्का ताडनीम” दे माडक्की बाकत।

41 मिनू शेंसीब १० जनामी मेको आस कली मोदेशो पुंडशो तशा “याकूब नु यूहन्ना दोदेशो बाक्सा” दे आन थुं मनुथु, लोत्र पमुमा बाक्त। लूका २२:२५-२७

42 मिनू येसुमी नेल्ल आन कली खुष्ठा “अर्को जात डा मुर आन कली हुकुम पाडनुड, दे मिम्बपुकीमी मुर आन कली दिष्ठा वोइशशा, हुकुम पाडनीम, दे तुइक्नीनी।

43 तन्न इन दातेमी मोदेशो पचा मदुम्ब। सुमी टेयब दुम्चा दाक्बा, मेको नेल्ल आन गेय पाइब दुम्चा माल्ब।

44 सु नेल्ल क्येडा डोंइती दुम्चा दाक्बा, मेको नेल्ल आन वाइल दुम्चा माल्ब। मर्कूस ९:३५; १पत्रुस ५:३

45 मारदे हना रागीम जरमेशो यो मान पपांडसीचा कली ममाड, तन्न वारच पथ नु शुश मुर आन कली प्रोंइचा कली आ गिम गेथ जाक्शो बाक्त” दे माइक्मी बाक्त।

मिक्च मताइब बारतीमै

मती २०:२९-३४; लूका १८:३५-४३

46 मिनू यरीको सहरमी जाक्दीम्मा बाक्त। मिनू यरीको रे लशा, येसु नु आ शेंसीब आन नोले खोइशशा, शुश मुर गाक्मानु, तिमै आ तौ मिक्च मताइब पुंडब बारतीमै मेको लां उड बाक्शो बाक्माक्त।

47 मिनू बारतीमैमी नासरथ डा येसु एको लां पिना पिन बाक्त देशो नेंशा “ए येसु, दाऊद आ तौ, शिशी पाइय्यीनी” दे वाइ ब्रेत्चा गोवा बाक्त।

48 मिनू शुशेमी “सिक्सी पावो” दे हुइक्तेमै बाक्त। आं चहिं डोंइती क्येडा शुश वाइ ब्रेशशा “दाऊद आ तौ, शिशी पाइय्यीनी” दे ब्रेम्माक्त।

49 मिनू येसु खा दिक्शा “मेको कली एके ब्रेत्तीने” देंमाक्त। मिनू मिक्च मताइब कली “टेयब थुं पावो। मिनू बोक्को। मारदे हना इ कली ब्रेत्ताक्व” दे मदमे बाक्त।

50 मिनू आ बरखी ताइशशा, छुल बोक्शा, येसु आ डोंइती जाक्माक्त।

51 मिनू येसुमी “इ कली मार पड, मार पुंडनेवे?” दे हिल्लो पवा बाक्त। मिनू मिक्च मताइबमी “ए शेंब, मिक्च ताइब सेल्यीनी” दे पुना बाक्त।

52 मिनू येसुमी “साशा लावो। इ थमा सुइशशोमी साते” दे मदानु, ब्रा साशा मिक्च ताइब दुम्शा, येसु आ नोले खोदा बाक्त।

## 11

येसु यरूसलेमम जाक्दीशशो

मती २१:१-११; लूका १९:२९-४०; यूहन्ना १२:१२-१९

1 मिनू यरूसलेम आ नेक्था जैतून डांडा बेथफागे नु बेथानी जाक्दीम्मा बाक्त।

2 मिनू येसुमी आ शेंसीब निक्शी आस कली “मेरे गाउं लसे। मिनू गाउं ओवसीनु, सुइ मडोइशशो गधा आ चाइक्ब पाइशशा, वोइशशो थित्तीसी।

3 मेको चाक्कीसे। मुरपुकीमी ‘मारदे लाइक्सी?’ देंतेक्म हना ‘प्रभु कली माल्ताक्व। नोले लेशशा सोइक्ब’ देंसीनु, लाइक्चा गेनीम” दे सोइक्तीम्सी बाक्त।

4 मिनू मेको निक्शी लशा, मेक जाक्दीशशा, लांमी लाप्चो आ डोंइती पाइशशो गधा आ चाइक्ब थित्से बाक्त। मिनू प्रॉन्से बाक्त।

5 मेकेर बाक्ब मुरपुकीमी “मारदे प्रोंइसी?” देंमा बाक्त।

6 मिनू येसुमी देशो खोदेशो पा, लोत्र लेत्से बाक्त। मिनू लाइक्चा गेमे बाक्त।

7 मिनू गधा आ चाइक्ब चाक्से बाक्त। मिनू आन वासी ब्रामे बाक्त। मिनू येसु डोंइसे बाक्त।

8 मिनू शुशेमी आन बरखी लांमी ब्रामे बाक्त। अरुमी एर ओंथ डा राशी जिक्शा, लांमी ब्रामे बाक्त।

9 डोंइती नोले गाक्बपुकीमी “होसन्ना, प्रभु आ नेंमी जाक्ब टेयब दुम्ल। होसन्ना आ देशो ‘परमप्रभु वारच पने’ बाक्ब। भजन संग्रह ११८:२५-२६

10 मुल जाक्चशो ई किक्की पिपी दाऊद आ राज्य कली जाइ। परमप्रभु कली होसन्ना” दे रेयके पा टेयब सेल्ना सेल्ल गाक्मा बाक्त।

11 मिनू यरूसलेम जाक्दीशा, परमप्रभु यावे आ खिं ओव्रमाक्त। मिनू एर ओंथ मारेइ मारेइ कोव्रशा, आ शेंसीब १२ जना नु बेथानी लेम्माक्त। मारदे हना नां रिक्चशो बाक्माक्त।

फल मसिशशो फोव्रशी रवा

मती २१:१२-२२; लूका १९:४५-४८; यूहन्ना २:१३-१६

12 आ दीसा बेथानी रे पिशा, लांमी गाक्मानु, येसु शोव्रलु बेक्माक्त।

13 मिनू इच्छी आइक्था सफा पाइशशो फोव्रशी रवा तशा, फोव्रशी सिशशो बाक्म को दे कोव्रथ लमाक्त। मिनू जाक्दीशशा कोव्रडानु, सफा ला तवा बाक्त। मारदे हना सित्वी मजाक्शो बाक्माक्त।

14 मिनू “मुल डा मेरे सुइमी इ फल जचा मतामेक्ल” दे मदा बाक्त। आ शेंसीबपुकीमी मो देशो नेन्मे बाक्त।

ग्याप्ब लेयब आन कली खेरशो

15 मिनू यरूसलेम जाक्दीम्मा बाक्त। जाक्दीशशा येसु परमप्रभु यावे आ खिं ओव्रशा, मेकेर ग्याप्ब लेयब आन कली खेरचा गोवा बाक्त। क्येट फाइक्ब आन क्येट वोइक्तीके नु दुकुर लेयब आन नित्तीके खोल्शा गेमी बाक्त।

16 मिनू सुइ कली मारेइ यो चाक्शा लेयचा मगेथु,

17 “जात जात डा मुरपुकीमी एकेर प्रार्थना पामेक्ल दे आं खिं वोइशशो बाक्त दे ब्रेक्शो बाक्बा, ममाइ डा? गेपुकीमी चहिं खुइपुकीमी खुइ पा चाक्शा आन बाक्तीके पुक्खी सेलतीनी” दे हुइक्तीमी बाक्त। यसेया ५६:७; येरमीया ७:११

18 मिनु फरिसी नु सास्त्रीपुकीमी मेको नेंशा, दोपा साइक्चा दे लां कोव्रडमे बाक्त। तन्न येसु कली तशा, हिंमा बाक्त। मारदे हना मुर नेल्लेमी आ शेंशो नेंशा, छक लाक्बाक्मा बाक्त।

19 मिनु नां रिक्चावानु, येसु नु आ शेंसीबपुकी सहर रे लेम्मा बाक्त।

दल्गीर मपथु, प्रार्थना पचा

20 मिनु सुनी लां गाक्मानु, फोव्रशी रवा आ डर रे पुं सम्म सोव्रशो तामे बाक्त।

21 मिनु पनुसमी ति फुक्शा, येसु कली “ए शेंब, कोव्रडीन, इन सराप पशो फोव्रशी रवा सोव्रमाक्त” देंमाक्त।

22 मिनु येसुमी मेको आन कली “परमप्रभु यावे कली थमा सुतीने।

23 नोफा दाइशशा नेनीने, सुमी आं देशो थमा दुम्ब, दे दल्गीर मपथु, मेको डांडा कली ‘एकेर रे समुन्द्रमी याक्सो’ देंत हना, मेको आ थमा सुइशशोमी डांडा याक्सीशा लाइब। मईस ९:२३; मती १७:२०

24 मोपतीके ‘आं पुइशो ताइनुड’ दे थमा सुइशशा, प्रार्थना पा पुइतीनी हना, इन पुइशो ताइनीनी। मती ७:७; यूहन्ना १४:१३; १ यूहन्ना ५:१४-१५

25 प्रार्थना पा बाक्नीनु, सुइ नु चुशो बाक्तीनी हना, मेको कली माफ गेने। मिनु स्वर्गम बाक्ब इन आफोमी यो इन मरिम्शो पशो क्याम्शा माफ गेब।

26 माफ मगेतीनी हना, स्वर्गम बाक्ब इन आफोमी यो इन कली माफ मगेब” दे शेंदीमी बाक्त।

अधिकार आ पर्बम हिल्लो पशो

मती २१:२३-२७; लूका २०:१-८

27 मिनु यरूसलेममी जाक्दीम्मा बाक्त। मिनु येसु परमप्रभु यावे आ खिंमी हिरसेनु, ठेयब चढेब, सास्त्री नु जोक्ब तुइक्ब खाल्पापुकी जाक्शा

28 “तेको अधिकारमी मोदेशो पवी? मो पचा, दे सुमी अधिकार गेवे?” देंमा बाक्त।

29 मिनु येसुमी “गो इन कली लोव्र का हिल्लो पाइनुड, मेको लोव्र लेत्तीने। मिनु तेको अधिकारमी एको गेय पडा शेंनन्नी।

30 यूहन्नामी मुर आन कली ब्वाक्कुमी खुम्शा गुंडतीके अधिकार स्वर्ग रे तवा देय मुर रे तवा? लो देनीन” दे माइक्मीनु,

31 मेकोपुकीमी “स्वर्ग रे तवा बाक्त देंतय हना, मो हना यूहन्ना आ लोव्र मारदे थमा मसुइक्नी देंब।

32 मुर रे तवा बाक्त देंचा यो दोपा देंय” दे लोव्रसी पमुमा बाक्त। मोदेशो देंचा हिंमा बाक्त। मारदे हना मुर नेल्लेमी यूहन्ना थमान परमप्रभु यावे आ लोव्र पाइब बाक्ब, दे थमा सुइशशो बाक्मा बाक्त। लूका ७:२९-३०

33 मोपतीके “मतुइक्नीकी” देंमानु, येसुमी “मो हना तेको अधिकारमी एको गेय पडा दे गो यो मशेंनन्नी” दे माइक्मी बाक्त।

## 12

मरिम्शो बुम्था पाइब आन कथा

मती २१:३३-४६; लूका २०:९-१९

1 मिनु येसुमी कथा सेल्शा, शेंचा गोवा बाक्त। मिनु “मुर कामी अडगुर खुम्शा, थारपु हिरशा, अडगुर ख्वाक्तीक खाल्टा दोशा, धन्सार सेल्शा, बुम्था पाइब माल्शा, मेको आन कली गेशा वोइशशा, अर्को रागी लमाक्त। यसेया ५:१-२

2 मिनु अडगुर मीशा, सेक्ची जाक्मेनु, आ गेय पाइब का कली आ भाग पोक्थ सोइक्ता बाक्त।

3 मिनु मेको जाक्दीम्मेनु, बुम्था पाइबपुकीमी मेको कली तुप्शा, श्येत्थ गुइ सोइक्तमे बाक्त।

4 मिनु लेंशा गेय पाइब का कली सोइक्ता बाक्त। मेको कली यो जिचा तोशा, पिया प्रोल्शा, गार सेल्शा सोइक्तमे बाक्त। २इतिहास ३६:१६

5 मिनु लेंशा का कली सोइक्तानु, मेको कली सदमे बाक्त। मोदें शुश खेयप गेय पाइब आन कली सोइक्तानु, का निक्शी आन कली तुप्मे बाक्त। का निक्शी आन कली सदमे बाक्त।

6 मिनु सोइक्ने चाक्चा डा का ला लीमाक्त। मेको आ दाक्शो तौ बाक्माक्त। मिनु ‘आं तौ आ देशो टीनीम’ दे मिम्शा, आ तौ कली सोइक्ता बाक्त।

7 मिनु बुम्था पाइबपुकीमी ‘एको दा अडस ताइब बाक्त। लो साइक्चा। मिनु आ अडस नेल्ल इं केन दुम्ब’ देंमुशा गारमा बाक्त।

8 मिनु ग्याइशशा, साइशशा, रू रे लाइशशा ताइक्तमे बाक्त। हिबू १३:१२

9 मोदेशो दुम्त हना, रू आ होव्रपम मार पाइबा? जाक्शा, मेको बुम्था पाइब आन कली साइक्ब। मिनु आ रू अरु आन कली गेब।

10 ‘खिं सेल्बपुकीमी गारो प्रोव्रडमेनु, एको फुल्लु मगार, दे ताइक्तमे बाक्त। मेको मगारथु ताइशशो फुल्लु चहिं मुर डा सुरे फुल्लु दुम्माक्त’ दे ब्रेक्शो लोव्र मपढेनी?

11 मेको नेल्ल प्रभुमी पशो बाक्त। मिनु ‘ओहो, गिश रिम्शो दुम्मे। एको छक लाक्चा डा बाक्ब’ दे ब्रेक्शो बाक्ब” दे माइक्मी बाक्त। भजन संग्रह ११८:२२-२३

12 मिनु “एको कथा इं कली कका देंमाक्त” दे रुप्शा, ग्याइक्पाइक्चा माल्मे बाक्त। तन्न शुश मुर देल्शो तशा हिंशा, ब्राशा लमा बाक्त।

तिरो थाप्चा देय मथाप्चा?

मत्ती २२:१५-२२; लूका २०:२०-२६

13 मिनू येसु कली लोव्र खाइक्पाइक्चा दे फरिसी नु हेरोदी का निकशी येसु आ बाक्तीके सोइक्तमे बाक्त।

14 मिनू मेको सोइश्शोपुकी जाक्शा, येसु कली “शंब, गे थमा पाइब ननी। मुर आन कुल मकोव्रथु सुइ तशा महिथु, परमप्रभु यावे आ लोव्र थमा पा शेंनीनी, दे तुइक्नीकी। सिजर सरकार कली तिरो थाप्चान माल्ब देय मथाप्थु यो दुम्बा?

15 गोपुकीमी थाप्चा देय मथाप्चा? मार देंनीनी” दे हिल्लो पखु पा लोव्र खाइक्पाइक्चा माल्बे बाक्त। मिनू येसुमी मेको आन पचा माल्शो तुइश्शा, मेको आन कली “मारदे आं थुं थाम्नीनी? देनार का कोंइदीनी” देमाक्त। देनार का नाक्त का डा गाल्च बाक्त। मेको रोम डा चांदी के क्येट बाक्त।

16 मिनू देनार का कोंइदमे बाक्त। मिनू येसुमी “एको सु आ नेमी खोइश्शो बाक्मे?” देंमेनु “सिजर आ नेमी खोइश्शो बाक्त” देमा बाक्त।

17 मिनू येसुमी “सिजर आ मार मार बाक्मा, मेको सिजर कली गेने। परमप्रभु यावे आ मार मार बाक्मा, मेको परमप्रभु यावे कली गेने” दे माइक्मी बाक्त। मिनू नेल्ल छक लाक्मा बाक्त। रोमी १३:१७

बेक्शो रे सेंसीचा आ परबम शेशो

मत्ती २२:२३-३३; लूका २०:२७-३८

18 मिनू सदुकीपुकी जाक्मा बाक्त। सदुकीपुकीमी बेक्शो रे मसेंसीब दे शेंनीम। मिनू येसु आ बाक्तीके जाक्शा

19 “ए शंब, मोसामी ब्रेक्शो लोव्रमी ‘सुइ आ लोकब आल मथिथु बेक्त हना, मेकोमी आ भोग्यु वोंइसीशा, आ लोकब आ खिं डा मुर मजाम्मल, दे तमी तौ थिवल’ दे ब्रेक्शो बाक्त। ब्यवस्था २५:५-६

20 मिनू खिं कामी ७ जना लोकब बाक्मा बाक्त। डोंइती जेठामी मीश चाक्मा बाक्त। मिनू आल मथिथु बेक्माक्त।

21 मिनू माइलामी आ भोग्यु वोंइसे बाक्त। मिनू आ यो आल मथिथु बेक्माक्त। मिनू साइलामी वोंइसे बाक्त। मेको यो आल मथिथु बेक्माक्त।

22 मोदेंशो पा ७ जानान आल मथिथु, बेक्मा बाक्त। मिनू नोले मेको मीश मुर यो बेक्माक्त।

23 मुर बेक्शो रे सेंसीशा ब्रोंइमानु, मेको ७ जना वोंइश आन मीश दुम्शो मीश मुर तेको आ मीश दुम्बा?” दे हिल्लो पामे बाक्त।

24 मिनू येसुमी “गे परमप्रभु यावे आ लोव्र मरुप्नीनी। परमप्रभु यावे आ सक्ति यो मतुइक्नीनी। मोपतीके दूली मिम्नीनी, ममाइ?

25 बेक्शो रे सेंसीशा ब्रोंइमानु, मुरपुकीमी ग्युबे मपाइनीम, स्वर्गम बाक्ब परमप्रभु यावे आ गेय पाइबपुकी खोदेंशो दुम्नीम।

26 बेक्शो रे सेंसीचा आ परबम परमप्रभु यावेमी मोसा कली मी ब्रशो रवा आ नेक्था युग्शा ‘अब्राहाम आ परमप्रभु यावे, इसहाक आ परमप्रभु यावे नु याक्ब आ परमप्रभु यावे गो नड’ दे मदा बाक्त दे मोसामी ब्रेक्शो किताबमी ब्रेक्शो बाक्ब। मेको लोव्र मपढेनी? प्रस्थान ३:६

27 परमप्रभु यावे बेक्शो मुर आन परमप्रभु ममाइ, ब्रोंइशो आन परमप्रभु यावे बाक्ब। गे दूली मिम्बाक्नी बाक्त” दे माइक्मी बाक्त।

नेल्ल क्येडा तुइक्चा माल्शो लोव्र

मत्ती २२:३५-४०; लूका १०:२५-२८

28 मिनू सास्त्री कामी सदुकीपुकीमी येसु नु लोव्र पशो नेशा, येसुमी मेको आन लोव्र लेन्ने चाप्बाक्त, दे रुप्शा डा मिन, येसु आ नेक्था जाक्शा “ए शंब, परमप्रभु यावे आ अरेशो लोव्र तेको नेल्ल क्येडा डोंइती डा बाक्बा?” दे हिल्लो पवा बाक्त।

29 मिनू येसुमी “नेल्ल क्येडा डोंइती डा लोव्र एकोन बाक्ब ‘ए इस्राएल नेनो, इ परमप्रभु यावे का बाक्ब।

30 थुं का पा, सोक्त का पा, मिम्तीके नु सक्ति नेल्लेमी परमप्रभु यावे, इ परमप्रभु कली दाक्तो’ देंशो एको लोव्र नेल्ल क्येडा डोंइती डा बाक्ब। ब्यवस्था ६:४-५

31 मिनू आ नोले डा टेयब लोव्र ‘आम इ कली दाक्शो खोदेंशो पा इ नेक्था बाक्ब आन कली यो दाक्तो’ देंशो बाक्ब। एको लोव्र निकशी क्येडा टेयब लोव्र मबाक्ब” देमाक्त। लेवी १९:१८

32 मिनू सास्त्रीमी “शंब, गे थमान ठीक लोव्र पाइतीनी। परमप्रभु यावे कानाइ बाक्ब। आ डा लाक्शा सुइ मबाक्ब। लूका २०:३९-४०

33 मिनू थुं का पा, रुप्तीक नु सक्ति नेल्लेमी परमप्रभु यावे कली दाक्चा, आम कली दाक्शो खोदेंशो पा इ नेक्था बाक्ब आन कली दाक्चा, देंशो लोव्र नेल्ल क्येडा टेयब बाक्त। मारेइ मारेइ क्योरशा चढेशो क्येडा मेको लोव्र टिशा पचा रिम्शो बाक्ब” देमाक्त। १सामुएल १५:२२; होसे ६:६; मत्ती ९:१३

34 मिनू येसुमी “एकोमी निप्स खाप्शो लोव्र पाइबाक्त” दे रुप्शा “गे परमप्रभु यावे आ राज्य रे डोन मबाक्नी बाक्त” दे मदा बाक्त। में डा मेरे हिंशा, सुइमी लोव्र हिल्लो मपामे बाक्त। प्रेरित २६:२७-२९

ख्रीस्त सु का आ तौ बाक्बा?

मत्ती २२:४१-४६; लूका २०:४१-४४

35 मिनू येसुमी परमप्रभु यावे आ खिंमी शेंना शेंन बाक्मेनु “ख्रीस्त दाऊद आ तौ बाक्माक्त, दे सास्त्रीपुकीमी दोपा शेंने चाप्नीमी डा? यसैया ११:१; यूहन्ना ७:४२; रोमी १:३

36 दाऊदमी परमप्रभु यावे आ सोक्त रे पा “प्रभुमी आं प्रभु कली इ जोरी सत्रु आन कली इ खोडली आगाम मवोदुमी सम्म आं ग्युरा गे बाक्को” देंत। भजन संग्रह ११०:१; २सामुएल २३:२  
37 दाऊदमी मेको कली प्रभु देंब। मिनु दोपा आ तौ दुम्ने चाप्बा डा?” दे शेंदा बाक्त। शुश मुरुमी आ शेंशो लोव्र नेंचा दाक्तमे बाक्त।

सास्त्री आन कली हुइशशो

मती २५:५-१४; लूका २०:४५-४७

38 मिनु शेंना शेंन “सास्त्री आन लोव्र क्येडा होस पांइसीने। मेकोपुकीमी लाइशशो कोट फेक्शा गाक्चा दाक्नीम। बजारमी हिरशा, मान पपांइसीचा दाक्नीम।

39 गुम्टीक खिमी ठेयब नित्तीकेमी नित्चा दाक्नीम। भोजमी मान पपांइसीचा डा नित्तीकेमी नित्चा दाक्नीम।

40 वोंइश बेक्शो मीश मुर आन शोंप नेल्ल नेक्शा गेशा, दुइशशो दुइशशो प्रार्थना पा कोइखु पाइनीम। मोदेशो पाइबपुकीमी अरु आन क्येडा शुश सजाइ ताइनीम” देंमाक्त। याकूब १:२७

पुडग मीश मुरु आ चढ़ेशो क्येट

लूका २१:१-४

41 मिनु येसुमी क्येट चढ़ेतीक एरे निरशा, शुश मुरुमी क्येट चढ़ेशो कोव्रना कोव्रन बाक्माक्त। क्येट थीब शुशेमी शुश क्येट चढ़ेमे बाक्त। २राजा १२:१०

42 मिनु आ वोंइश बेक्शो मारिइ मथीब पुडग मीश मुर का जाक्शा, लेप्तोन निक्शी चढ़ेवा बाक्त। लेप्तोन का नेल्ल क्येडा आइक्च तांबा के क्येट बाक्त।

43 मिनु येसुमी आ शेंसीब आन कली ब्रेशशा “नोफा दाइशशा नेनीने, नेल्लेमी चढ़ेशो क्येडा मेको पुडग मीश मुरुमी शुश चढ़ेप्टु।

44 आ जशा ब्रोंइतीक क्येट नेल्ल गेप्टु। अरुमी चहिं आन गाप्शो रे गेम्तेक्म” देंमाक्त।

## 13

“परमप्रभु आ खिं मलीब” देशो

मती २४:-; लूका २१:५-३६; लूका १७:२३-३७

1 मिनु येसु परमप्रभु यावे आ खिं रे यूमने, आ शेंसीब कामी “ए शेंब, कोव्रडीन, एको खिं ठेयब फुल्लु के सेल्शा, दोमो कोल्शो गिश दारशो तांइसाक्व” देंमाक्त।

2 मिनु येसुमी “मुल ओमो ठेयब दारशो सेल्शो खिं ताप्तीवी। तन्न नोले ब्रेशशा, फुल्लु का यो खोप्शा मलीब” देंमाक्त।

श्येत दुम्चा गोइब

3 मिनु परमप्रभु यावे आ खिं तांइसीचा डा पा जैतून डांडामी निस्सेनु, पत्रुस, याकूब, यूहन्ना नु अन्द्रीयास जाक्शा, मती १७:१

4 येसु कली “एको इन देशो लोव्र गेना दुम्बा? एको नेल्ल दुम्चाप्टु, दे तुइक्पाइक्चा डा चिन्ड दोपा तांइसीनीमी? शेंदीकी” देंमा बाक्त।

5 मिनु येसुमी “सुइमी इं थुं मक्यामेक्ल, दे होस पा बाक्कीन।

6 शुश मुरुमी आं नें ब्रशा ‘गो एको नड’ देंशा, मुर आन थुं क्येडाक्नीम। यूहन्ना ८:४९

7 शुश लडाइ दुम्शो लोव्र नेंनीनु, महिनीन। मोदेशो दुम्चान माल्ब। रागी नुच्ची चहिं मजा।

8 रागी नुच्चा क्येडा डोंइती जात जात नु राज्य राज्यमी लडाइ पमुइनीम। रागी रागीमी खिनु कुइब। अन्काल दुम्ब। मो दुम्मेनु, श्येत दुम्चा गोवा बाक्त, दे तुंइसीब।

थमा सुइक्ब ग्याइक्चा पुंइसीनीम

9 आंम इन कली मिम्शा होस पा बाक्कीन। कछडी वोइक्चा पुंइसीनीनी। गुम्टीक खिमी तुप्चा पुंइसीनीनी। आं नें आ पर्वम हुकुम पाइब नु पिप आन डोंइती राप्पाइक्चा पुंइसीशा, सांकछी दुम्चा माल्नीनी।

10 मोदेशो दुम्चा क्येडा डोंइती रागी नेल्ल डा मुर आन कली ग्येरपाइक्ब लोव्र नेंपाइक्ने थुम्शो दुम्चा माल्ब। मर्कूस १६:१५

11 मिनु इन कली ठेयब मुर आन डोंइती राप्पदमेनु, मार लोव्र पय, मार देंय? दे हिंशा, मिम्स डा मिम्स मबाक्कीन। इन कली दोदेशो लोव्र पचा गेशो बाक्मे, मोदेशो लोव्र पने। मारदे हना गे लोव्र मपाइनीनी, परमप्रभु यावे आ सोक्तीम इन कली लोव्र पपाइक्ब।

12 लोक्बमी आ लोक्ब कली साइक्पाइक्चा गेब। आफोमी तौ कली साइक्पाइक्ब। मिनु तमी तौपुकीमी आम आफ आस कली ग्याइक्पाइक्चा साइक्पाइक्चीम।

13 आं नें आ पर्वम सुइम इन कली मदाक्नीम। सु सु चहिं नेल्ल क्येडा नोले सम्म थमा सुइक्चा मप्रोंइथु बाक्नीमी, मेकोपुकी श्येत जचा रे ब्रोंइशा, गेना हना यो परमप्रभु यावे नु बाक्चा ताइनीम। यूहन्ना १५:१८,२१

मुल सम्म मदुम्शो श्येत दुम्ब

14 परमप्रभु यावे आ खिं गेनायो मदुम्चा डा पा बिथोलो दुम्मेनु, मेको मुल पढ़ेबपुकीमी रुम्मेक्ल, यहूदीया रागीम बाक्बपुकी डांडा ग्येत्थ प्रोक्मल। दानीएल ९:२७; दानीएल ११:३१; दानीएल ११:३१

- 15 बारदालीम बाकबपुकीमी 'तोइशशा, खिं ओव्रशा मारेइ लाइक्का ताइनुड' दे ममिस्तमेकल, दिव दाव प्रेक्शा प्रोकमल।  
 16 रूमी गेय पाइबपुकीमी 'फेक्तीक का लाइक्नुड' देशा, खिं मलेम्मल। तन्न आन गेय थु था प्रोइशा प्रोकमल।  
 17 कोव्रज कुरशो नु दूध तूब आल पाइशशो मीश मुर अरु क्येडा शुश श्येत जाइनीम।  
 18 हिउंइमी मोदेशो श्येत मदुम्मल, दे परमप्रभु यावे कली पुनीने।  
 19 परमप्रभु यावेमी रागी सेला रे मुल सम्म सुइमी मतुइशशो श्येत दुम्ब। मोदेशो श्येत लेशा गेनायो मपीब। दानीएल १२:१  
 20 प्रभुमी मोदेशो श्येत जतीक नाक्त शुश वोइशशो हना, सुइ ब्रोंइने मचाप्नीम। तन्न आ योव्रशो आन परबम प्रभुमी मेको श्येत शुश नाक्ती लीचा मगेब।  
 21 मिनु मुरपुकीमी 'खीस्त एकेर जाक्त, मेरेक बाकब, लो कोव्रडीन' देतेकम हना, थमा मसुतीन।  
 22 शुशेमी 'गो खीस्त नड' दे जोल पा गाक्नीम। 'परमप्रभु यावे आ लोव्र पाइब नकी' दे जोल पाइबपुकीमी चिन्ड नु छक लाक्का डा गेय पा कोइनीम। मेकोपुकीमी परमप्रभु यावे आ योव्रशो आन कली यो लां प्रोइपाइक्का माल्नीम।  
 23 मेको दुम्चा डोंइतीन नेल्ल शेशा तुडक्पाइक्तन्नी। एको लोव्र मिम्शा मप्रेंथु बाक्कीन।

रागीम जरमेशो जाकब

- 24 रागीमी मोदेशो टेयब श्येत नुम्मेनु, सरीडमी चिन्ड तांइसीनीम। नां आ छेडछेड जाम्शा, जिक रिक्शो दुम्ब। तास्ला आ हाम्सो यो जाम्ब।  
 25 सोरुल खपीम दोक्नीम। सरीडमी बाक्शो सक्तिपुकी हिम्सीनीम। हिब्रू १२:२६  
 26 मिनु मुरपुकीमी रागीम जरमेशो कली गोस्सुमी गिल्सीशा, शुश सक्ति पाइशशा, यिना यिन पशो ताइनीम। दानीएल ७:१३  
 27 मिनु रागीम जरमेशोमी परमप्रभु यावे आ गेय पाइब आन कली रागी तेइ तेइ रे परमप्रभु यावे आ योव्रशो नेल्ल आन कली खुप्शा चाक्थ सोइक्ब। मती १३:४१  
 28 फोव्रशी रवा कोच्वा दाप्शा कुशो तनीनु, बर्खा जाक्माक्त दे तुडक्नीनी।  
 29 आं देशो लोव्र थमा दुम्शो तनीनु, आं जाक्ची जाक्माक्त दे तुडक्नीनी।  
 30 नोफा दाइशशा नेनीने, एको जात डा मुर मनुप्थु, आं देशो थमा दुम्ब।  
 31 सरीड नु रागी नेल्ल जाम्शा लाइनीम, आं लोव्र चहिं गेना हना यो मजाम्थु लीब।  
 32 मोदेशो गेना दुम्ब, दे सुइमी मतुइक्नीम। परमप्रभु यावे आ स्वर्ग डा गेय पाइबपुकीमी यो मतुइक्नीम। तौमी लायो मतुइक्ब। आं आफोमी ला तुडक्ब।

सासीशा बाक्का माल्ब

- 33 मोदेशो गेना दुम्बा मतुइक्नीनी। मोपतीके सासीशा बाक्कीन। लूका १२:३५-४०; लूका २१:३६  
 34 दोदेशो दुम्ब देशा हना, मुर का तेइ तेइ हिरथ लमेनु, लचा डोंइती आ गेय पाइब आन कली का का पा आन गेय योक्शा, लाप्चो खाल पाइब कली 'गेना हना यो लां कोव्रशा बाक्को' दे माइशशा लाइब।  
 35 आं खिं डा प्रभु गेना लेशशा जाक्बा, दे मतुइक्नीनी। नां रिक्शा जाक्बा को? नाकदो जाक्बा को? भाले ग्रीची ना जाक्बा को? सुनी जाक्बा को दे मारेइ मतुइक्नीनी। मेको इन मतुइक्थु जाक्ब। लूका १२:३८  
 36 इन मतुइक्थु जाक्मेनु, इन कली इप्शो मथिदल।  
 37 मोपतीके लां कोव्रशा सासीशा बाक्कीन दे माइक्तन्नी। मोदेशो नेल्ल आन कली माइक्नुडमी” दे शेंदीमी बाक्त।

## 14

येसु कली साइक्का माल्शो

मती २६: - २८:-; लूका २२: - २४:-; यूहन्ना १८: - २१:-

- 1 मिनु बोरब ओरुली मसुप्शो शोब्ले जतीक पास्सा चाड आ निक्शी नाक्ती डोंइती टेयब चढेब नु सास्त्रीपुकीमी “येसु कली दोपा मुर आन मतुइक्थु ग्याइशशा, साइक्पाइक्का” दे लोव्रसी पमुमानु  
 2 “चाड नाक्ती मदुम्ब, मुरपुकीमी मरिम्शो पाइनीम” देमुमा बाक्त।

येसु तेल खेक्का पुंइसीशो

- 3 येसु बेथानीमी कोर पाइब सिमोन आ खिंमी खमे जना जन बाक्मेनु, मीश मुर कामी शुश क्येट लाइब ब्रोव्रशो रिना पाइशशो तेल कुरशा जाक्शा, मेको तेल येसु आ पियामी लुक्ता बाक्त।  
 4 मिनु मेकेर बाक्ब का निक्शीमी “ओदेशो तेल मारदे एकोमी ओपा ताइक्ता?  
 5 लेयड हना, सहे सां देनार क्येडा शुश ताक्शा, श्येत जाइब आन कली योक्शा, वारच पने चाम्स वा” दे आन थुं मनुथु, मीश मुर कली हुइक्तमे बाक्त। देनार का नाक्त का डा गाल्च बाक्त। मेको रोम डा चांदी के क्येट बाक्त।  
 6 मिनु येसुमी “महुइक्तीने, मारदे आ थुं खाइक्पाइक्की? आं कली रिम्शो पाइक्ती।  
 7 श्येत जशो मुर गेना हना यो थिल्तीनी, मिनु शिशी पाइक्का दाक्ताक्नी हना, गेना हना यो पाइक्ने चाप्नीनी। आं कली चहिं नोले मथिल्तीनी। ब्यवस्था १५:११  
 8 आ चाप्शो पाप्तु। बेक्का क्येडा डोंइती आं रां थिम्चा कली तेल खेक्ताक्ब।  
 9 नोफा दाइशशा नेनीने, रागीम ते ते आं लोव्र नेंपाइक्नीमी, मेक मेक एको आ पशो आ परबम यो लोव्र पाइनीम” देमाक्त।

इस्कारीयोट डा यहूदा आ पशो

10 इस्कारीयोट डा यहूदा येसु आ शेंसीब कामी ठेयब चढेब आन कली “येसु कली ग्याइक्चा वारच पाइननी” दे लोत्र पथ लमाक्त। मिनु मेकोपुकीमी आ देशो नेंशा, ग्येरशा “लो, रिम्शोन दुम्त। क्येट गेनीकी” देमा बाक्त।  
11 में डा मेरे “गेना नु दोपा ग्याइक्चा वारच पदुमी” दे योत्रकी पना पन गाक्माक्त।

पास्सा चाड डा भोज

12 बोरब ओख्ती मसुप्शो शोब्ले जतीक चाड आ डोंडती डा नाक्ती पास्सा डा पाठा क्योरशा ब्वाइनीम। मिनु येसु आ शेंसीबपुकीमी “पास्सा मानेचा कली ते लशा साचा? मार देनीनी?” दे हिल्लो पामे बाक्त।

13 मिनु येसुमी शेंसीब निक्शी आस कली “सहर लसे। मिनु गाग्री कुरशो मुर का कली युम्नीसी। मेको आ नोले खोतीसे।

14 मिनु मेको तेको खिं ओत्रबा, गे यो ओत्रडीसे। मिनु खिं डा मुर कली “शेंबमी सोइश्शो नस्कु। शेंबमी आ शेंसीबपुकी नु काथा बाक्शा, पास्सा ते मानेचा? दे हिल्लो पथ सोइक्ताक्सकी” दे मतीसे। मर्कूस ११:३

15 मो माइक्सीनु, मेकोमी इस कली तला तारी ठेयब कोठा का कोइब। मेको कोठामी गुन्दी पीरा ब्रशा वोइश्शो थित्नीसी। मिनु मेकेरन साचा” दे सोइक्तीम्सी बाक्त।

16 मिनु मेको निक्शी लशा, सहर जाक्दीरशा, येसुमी दोदेशो देमे, मोदेशो थित्से बाक्त। मिनु पास्सा चाड डा भोज सादसे बाक्त।

17 मिनु नां रिक्मेनु, येसु नु आ १२ जना शेंसीब खुम्समा बाक्त।

18 मिनु जना जन बाक्मानु, येसुमी “नोफा दाइश्शा नेनीन। मुल एक बाक्ब काम आं कली ग्याइक्ब आन कली वारच पाइब। मुल गो नु काथा जना जन बाक्ब” देमाक्त। यूहन्ना १३:२१-२६

19 मिनु नेल्लेमी शुश मरिम्शो लाक्शा “ए प्रभु, मेको वारच पाइब गो दुम्नुडा को?” दे का का पा हिल्लो पामे बाक्त।

20 मिनु येसुमी “१२ जना शेंसीब इन दाते डा का बाक्ब। गो नु काथा शोब्ले शेक्कुम तेप्बमी आं कली ग्याइक्पाइक्चा वारच पाइब।

21 मारदे हना रागीम जरमेशो आ पर्वम ब्रेक्शो लोत्र नेल्ल थमा दुम्चा माल्ब। मेको बेक्चा माल्ब। मो हना यो रागीम जरमेशो कली ग्याइक्पाइक्चा वारच पाइब कली शुश मरिम्शो दुम्ब। मो देशो पाइब मुर मजरमेस हना, मेको कली रिम्शो दुम्ब वा” दे माइक्मी बाक्त।

22 मिनु जना जन बाक्मानु, शोब्ले शेशा “गे रिम्शो पाइब बाक्नीनी” दे प्रार्थना पशा जिक्शा, आ शेंसीब आन कली योक्शा “दाइसीने, एको आं रां बाक्ब” देमाक्त। १कोरिन्थी ११:२३-२५

23 मिनु कचौरा शेशा “गे रिम्शो पाइब बाक्नीनी” दे प्रार्थना पा, मेको आन कली तूचा गेमी बाक्त। मिनु नेल्लेमी तूडमे बाक्त।

24 मिनु “एको आं हुश बाक्ब। आं हुशेमी परमप्रभु यावे आ गेशो नक लोत्र खाप्ता। आं हुश जारशोमी शुश मुर आन पाप क्याम्सीब। प्रस्थान २४:८; हिब्रू ९:१५-१६

25 नोफा दाइश्शा नेनीन, मुल डा मेरे एको अडगुर रे सेल्शो तूतीके मतनुड। नोले नेल्ल नक दुम्शा, परमप्रभु यावे आ राज्यमी बाक्शा तनुड” दे माइक्मी बाक्त।

26 मिनु कुम्सो पा बोक्शा, जैतून डांडा ग्येथ लमा बाक्त। भजन संग्रह ११३:- ११८:-

पत्रुसमी “गेनायो मप्रोंडननी” देशो

27 मिनु लना लन बाक्मानु, येसुमी “गे नेल्लेमी इन थुं ग्यशा, आं कली प्रोंडनीनी। मारदे हना ओदें ब्रेक्शो लोत्र थमा दुम्ब “गो गोठला कली तुप्शा खेरनुड। मिनु भेडापुकी प्रोक्शा, साव सुव ब्राइनीम” देशो बाक्ब। जकरिया १३:७; यूहन्ना १६:३२

28 नोले गो बेक्शो रे सेंचा पुंडसीशा, इन डोंडती गालील रागी जाक्दीत्नुड” देमाक्त। मर्कूस १६:७

29 मिनु पत्रुसमी “मेको नेल्लेमी इन कली प्रोंडशा प्रोक्तेक्म हना यो, गो मप्रोंडननी” देमेनु, यूहन्ना १३:३८

30 येसुमी “नोफा दाइश्शा नेनो, में नाक्दोन भाले खेयप निक्शी मग्रीथु, खेयप सां सम्म “मेको कली मतुइक्नुड, सु बाक्म” दे आं पर्वम देनेवे” दे मदा बाक्त।

31 मिनु पत्रुसमी “मदेनुड, गे नु काथा बाक्शा, साइक्चा पुंडसाक्वी हना यो, मोदेशो गेनायो मदेनुड” दे लोत्र थोक्शा देमाक्त। आ शेंसीब नेल्लेमी यो मो देमा बाक्त।

गेथ्सेमनेमी प्रार्थना पशो

32 मिनु गेथ्सेमने जाक्दीम्मा बाक्त। मिनु येसुमी “लो, एक बाक्कीन। गो इच्ची आइक्था लशा, प्रार्थना पाइनुड” देशा,

33 पत्रुस, याकूब नु यूहन्ना सां आन कली आइक्था लाइश्शा लमाक्त। येसु आ थुं शुश खाइक्माक्त। मती १७:१

34 मिनु सां आन कली “आं थुं शुश खाइश्शा, बेक्चा डा दुम्ती। मइप्थु गो नु काथा बाक्कीन” दे माइक्मी बाक्त। यूहन्ना १२:२७

35 मिनु इक्का डोंडती लशा, खपीम बाप्शा “दुम्त हना, मुल दुम्चशो श्येत मदुम्ल” दे प्रार्थना पवा बाक्त।

36 मिनु “आब्बा, आं आफ, गे मारेड मारेड पने चाप्नीनी। एको कचौरा आं कली मतूपाइक्थु लतीने। तन्न आं दाक्शो मदुम्ल। इन दाक्शोन दुम्ल” दे प्रार्थना पशा, लेश्शा जाक्माक्त। येसुमी आइक्च आल खोदेशो पा आ आफ कली आब्बा देत।

37 लेश्शा जाक्मेनु, सांफा आन कली इप्शो तामी बाक्त। मिनु पत्रुस कली “ए सिमोन, इमे? छिन का यो मइप्थु बाक्ने मचबी? मर्कूस १०:३८

38 थुं थाम्चा पुंडसेनु, पाप मपड, दे मइप्यु बाक्शा प्रार्थना पावो। थुंमी पाडनुड, चाप्नुड देंब, तन्न रांमी फाल्ने मचाप्ब” दे मदा बाक्त।

39 मिनु लेंशा इक्का आइक्था लशा, डोंडती प्रार्थना पशो खोदेशो पा, प्रार्थना पवा बाक्त।

40 मिनु लेंशा लेशशा जाक्शा, निन्द्रामी दुक्शा बाक्शो तामी बाक्त। मेकोपुकीमी मार देंचा, दे मारेड मतुडक्तमे बाक्त।

41 मिनु लेंशा प्रार्थना पथ लशा, लेशशा जाक्शा, मेको आन कली “गे मुल सम्म इप्शा बाक्नीनी? मुल गाप्त। रागीम जरमेशो पापी आन गुडमी गेचा पुंडसीचा चिकताक्व।

42 लो बोक्कीन, लय। आं कली ग्याइक्का वारच पाइब जाक्चाप्तु” दे माइक्मी बाक्त।

येसु ग्याइक्का पुंडसीशो

43 मो माइक्मीनु, आ शेंसीब यहूदामी ठेयब चढेब, सास्त्री नु जोक्ब तुडक्ब खालपापुकीमी सोइश्शो तरवार कोक्के कुरब हुल, येसु कली ग्याइक्थ चाक्गा बाक्त।

44 यहूदामी “सु कली पुक्पु पदु, मेको कली ग्याइश्शा लतीने” दे ग्याइक्थ जाक्ब आन कली तुडक्पाइश्शो बाक्माक्त।

45 मिनु जाक्मानु, यहूदा येसु आ नेक्शा लशा “रब्बी” दे बे मुप्शा, पुक्पु पवा बाक्त। हिबू लोवमी ठेयब शेंब कली रब्बी देंनीम।

46 मिनु ग्याइक्थ जाक्बपुकीमी येसु कली ग्याइक्तमे बाक्त।

47 मिनु येसु नु काथा बाक्ब कामी तरवार ग्रि शोइश्शा, ठेयब चढेब आ वाइल का आ नोफा दि खोदा बाक्त।

48 मिनु येसुमी आ कली ग्याइक्ब हुल आन कली “तरवार कोक्के कुरशा, खुड पाइब कली ग्याइक्थ जाक्शो खोदेशो पा आं कली ग्याइक्थ जाक्नी?

49 नाक्त कित कित परमप्रभु यावे आ खिंमी गेपुकी नु काथा बाक्शा, शेंना शेंन बाक्डानु, मग्याइक्तीनी। तन्न परमप्रभु यावेमी ब्रेक्पाइश्शो लोव थमा दुम्चा कली ओदेशो दुम्त” दे माइक्मी बाक्त।

50 मिनु आ शेंसीबपुकी येसु कली थु था प्रोंडशा, साव सुव ब्रशा प्रोक्मा बाक्त।

51 मिनु येसु कली ग्याइश्शा फ्रेंशा लदमेनु, टिटा का आन नोले खोदा बाक्त। मेको टिटाम वा का ला गिल्सीशो बाक्माक्त।

52 मारदे हना मेको कली ग्याइक्तमेनु, आ फेक्शो वा प्रोंडशा, शिश्रा प्रोक्शो बाक्माक्त। आमोस २:१६

येसु कली चढेब आ डोंडती चाक्शो

53 मिनु येसु कली नेल्ल क्येडा ठेयब चढेब आ डोंडती चाक्दीत्मे बाक्त। मेकेर ठेयब चढेब, जोक्ब तुडक्ब खाल्पा नु सास्त्रीपुकी खुम्सीशा बाक्शो बाक्मा बाक्त।

54 पत्रुस मेको आन नोनोले खोइश्शा लशा, नेल्ल क्येडा ठेयब चढेब आ लाडगा जाक्दीम्माक्त। मेकेर सिपाइपुकी नु काथा मी थेरशा बाक्माक्त।

55 ठेयब चढेब नु मेकेर बाक्ब नेल्लेमी मार पामे बाक्त देशा हना, जोल पा दोस गेशा, येसु कली साइक्पाइक्का माल्मे बाक्त। तन्न दोस गेने मचाप्मे बाक्त।

56 शुश मुरुमी जोल पा सांकळी गेमे बाक्त, तन्न आन लोव्र मगारमाक्त।

57 सांकळी का निक्शी बोक्शा “एको ग्याइश्शो मुरुमी साबेर मार देशो नेंतक देशा हना

58 “एको गुडमी सेल्शो परमप्रभु यावे आ खिं प्रेशशा, नाक्त सांमी अर्को सेल्नुड। मेको चहिं गुडमी सेल्शो ममाइ’ देशो नेंतक” देंमा बाक्त। यूहन्ना २:१९-२१

59 मो देंमा बाक्त हना यो, आन लोव्र मगारमाक्त।

60 मिनु नेल्ल क्येडा ठेयब चढेब बोक्शा, आन दातेमी राप्शा, येसु कली “एकोपुकीमी देशो लोव्र नेंशा, मार देनेवे?” दे हिल्लो पवा बाक्त। मर्कूस १५:५; यसैया ५३:७

61 मिनु येसु सिक्सी पां बाक्शा, लोव्र का यो मलेत्ता बाक्त। मिनु नेल्ल क्येडा ठेयब चढेबमी “गे नेल्ल क्येडा मान ताइब परमप्रभु यावे आ तौ ख्रीस्त नवे?” दे हिल्लो पवानु,

62 येसुमी “गो नड। गे रागीम जरमेशो कली नेल्ल सक्ति पाइश्शो आ ग्युरा गे बाक्शो ताइनीनी। गोस्सुमी गिल्सीशा जाक्ना जाक्न पशो ताइनीनी” दे मदा बाक्त। भजन संग्रह ११०:१; दानीएल ७:१३-१४

63 मिनु नेल्ल क्येडा ठेयब चढेबमी आंम आ फेक्शो वा खाक्शा “परमप्रभु यावे कली शुक्शी लोव्र पाइबाक्त।

64 मार सांकळी माल्दा डा? आ शुक्शी पशो लोव्र गे नेल्लेमी नेंशा, सांकळी दुम्तीनी। एको कली मार पाइक्का? मार देंनीनी?” दे माइक्मीनु, नेल्लेमी “साइक्का माल्ब” देंमा बाक्त। यूहन्ना १९:७

65 मिनु साइक्का माल्ब देशा डा मिन, का निक्शीमी आ कुलम तोक्तमे बाक्त। का निक्शीमी आ मिक्च सुम्शा, तुप्शा “सुमी तुमे? लो देन” दे शुक्शी पामे बाक्त। मिनु सिपाइ आन गुडमी गेमे बाक्त। मेकोपुकीमी तुप्ना तुप्न लदमे बाक्त।

पत्रुसम “मेको कली मतुडक्नुड” देशो

66 आगाम मोदेशो दुम्मेनु, पत्रुस लाडगामी बाक्माक्त। मिनु गेय पाइब मीश मुर कामी जाक्शा,

67 पत्रुस कली मी थेरशो तशा, शिरशा कोव्रशा “गे यो मेको नासरथ डा येसु नु काथा गाक्ब का बाक्डे बाक्त” देंमाक्त।

68 मिनु पत्रुसमी “इ देशो मरुबु। मारेड मतुडक्तु” देंमाक्त। मिनु यूशा, ठेयब लाप्चो डा लां जाक्दीम्माक्त।

69 मिनु मेको गेय पाइब मीश मुरुमी पत्रुस कली लेंशा तशा, मेकेर बाक्ब आन कली “मेरे यो मेको नु गाक्ब का बाक्त” देंमेनु,



70 पत्रुसमी “गो मनड, मेको कली मतुडकुनुड” देमाक्त। मिनु छिन का नोले मेकेर बाक्वपुकीमी यो “गे मेको नु काथा गाक्व का बाक्डे बाक्त, मारदे हना गालील डा बाक्डे बाक्त, दे तुंडसीब” देमानु,

71 पत्रुसमी “जोल पाता हना, यावेमी सजाइ गेयील, इन देशो मुर कली तुंडसीन मतुडकुनुड” दे कसम जशा, आ लोव्र थोक्शा देमाक्त।

72 मो दैम चोटी भाले खेयप निकशी ग्रीमाक्त। मिनु पत्रुसमी “भाले खेयप निकशी मग्रीथु, खेयप सां सम्म मेको कली मतुडकुनुड, सु बाक्म? देनेवे” दे येसुमी देशो लोव्र ति फुकगा बाक्त। मिनु आ पशो मिम्शा डाक्माक्त।

## 15

पिलातस आ डोंडती राप्पाइश्शो

1 मिनु नां सोव्रमेनु, ठेयब चढेब, जोक्व तुडक्वखाल्पा नु सास्त्रीपुकी, सभाम बाक्व नेल्ल खुम्सीशा, सल्ला पामे बाक्त। मिनु येसु कली फ्रेंशा लाइश्शा, पिलातस आ गुडमी गेमे बाक्त।

2 मिनु पिलातसमी येसु कली “गे यहूदी आन पिप नवे?” दे हिल्लो पवानु “गे आंमा देंतीनी” दे लोव्र लेत्ता बाक्त।

3 ठेयब चढेबपुकीमी शुश दोस गेमे बाक्त।

4 मिनु पिलातसमी येसु कली “इ कली शुश दोस गेम्तेक्मे। गे मेको आन कली मारेइ लोव्र मलेतेवे?” दे हिल्लो पवा बाक्त।

5 मिनु येसुमी लोव्र का यो मलेत्ता बाक्त। मिनु पिलातस छक लाक्माक्त। मईस १४:६१; यसैया ५३:७

6 पास्सा नाक्ती पिलातसमी मुरपुकीमी प्रोंडचा, दे पुंडशो जेल्खानमी चोक्सीशो मुर का कली प्रोंडबाक्माक्त।

7 सरकार कली मरिम्शो पा जेल्खानमी चोक्चा पुंडसीशो मुर आन दाते डा बारब्बा माइश्शा का बाक्माक्त। मेकोमी मुर साइश्शा बाक्माक्त।

8 मिनु मुरपुकीमी पिलातस कली “साइ रे डा पशो खोदेशो पा मुर का कली प्रोनीन” दे पुन्मे बाक्त।

9 मिनु पिलातसमी “यहूदी, इन पिप प्रोंडचा दे पुंडनी?” दे हिल्लो पवा बाक्त।

10 मारदे हना ठेयब चढेबपुकीमी थुं चोशा, येसु कली ग्याइक्पदमे बाक्त दे रुप्शा, प्रोंडचा माल्लो बाक्माक्त। यूहन्ना ११:४८

11 तन्न ठेयब चढेबपुकीमी मुर आन कली हुल पोक्शा “मेको कली मप्रोंडचा, बारब्बा कली प्रोंडचा, सरकार” दे पुंडपदमे बाक्त।

12 मिनु पिलातसमी “गेपुकीमी यहूदी आन पिप देशो मुर कली मार पदु मिनु?” दे हिल्लो पवानु

13 “मेको कली शीमी क्येप्शा कांटी थोक्शा क्याइक्चा माल्ब” दे रेयके पचा गोव्रमे बाक्त।

14 मिनु पिलातसमी “मार मरिम्शो पवा, मार दोस गेचा” देमेनु “शीमी क्येप्शा कांटी थोक्शा क्याइक्चा माल्ब” दे शुश रेयके पामे बाक्त।

15 मिनु पिलातसमी “हुल आन दाक्शो पचा” दे मिम्शा, बारब्बा कली प्रोंडपदा बाक्त। येसु कली चिंहिं युक्पाइश्शा, शीमी क्येप्शा कांटी थोक्शा क्याइक्चा कली सिपाइ आन गुडमी गेवा बाक्त।

येसु कली शीमी क्येप्शा क्याइश्शा

16 मिनु सिपाइपुकीमी येसु कली दरवार डा सिपाइ आन बाक्तीके चाक्दीश्शा, आन पल्टन नेल्ल खुप्शा डा मिन,

17 आ फेक्शो वा पुइश्शा, पिप आन फेक्तीक रड पाइश्शा वा फेक्पाइश्शा, चू के सिरपेच सेल्शा, आ पियाम गुप्तमे बाक्त।

18 मिनु “यहूदी आन पिप, सेउ ताक्कीन” दे सेउ पखु पामे बाक्त।

19 मिनु रेक्के के कोक्केमी आ पिया तेत्मे बाक्त। आ कुल तोक्तमे बाक्त। मिनु आ डोंडती पोक्च थेक्शा बाप्शा, ठेयब सेल्खु पामे बाक्त।

20 मिनु शुक्शी पचा रूशा, वा पुइश्शा, आंम आ वा फेक्पाइश्शा, गुंडशा, शीमी क्येप्शा कांटी थोक्शा क्याइक्चा कली लदमे बाक्त।

21 मिनु लना लन बाक्मानु, आ गाउं रे पिशो साइरेनी डा सिमोन गुम्मे बाक्त। मेको सिमोन अलेकजन्डर नु रुफुस आस आफ बाक्माक्त। मेको कली गुम्शा, येसु कली क्येप्तीक शी “लो, कुर कि कुर” दे कुरपदमे बाक्त। रोमी १६:१३

22 मिनु येसु कली गोल्गथामी चाक्दीत्मे बाक्त। गोल्गथा कली खप्परे यो देंसीब।

23 मिनु अडगुर शांबुमी मूरे माइश्शा तेल कुर पशो तूतीके गेमेनु, येसुमी तूने मबिम्से बाक्त।

24 मिनु शीमी क्येप्शा कांटी थोक्शा क्यदमे बाक्त। क्याइश्शा डा मिन, सुमी ताडबा, दे तुडक्चा कली वा वोइश्शा फेन्टे आप्के बाक्त। भजन संग्रह २२:१८

25 शीमी क्यदमेनु, सुनी डा ९ बजेशो बाक्माक्त।

26 “यहूदी आन पिप” दे दोस गेशा, ब्रेक्शो ब्रेक्स यो क्येप्शो बाक्माक्त।

27 खुड निकशी आस कली यो का आ ग्युरा गे, का आ पेरा गे क्याइश्शा वोदमे बाक्त।

28 मो पशोमी “मरिम्शो पाइब सुइश्शा, मरिम्शो पाइब नु काथा वोइक्चा पुंडसीब” दे परमप्रभु यावेमी ब्रेक्पाइश्शा लोव्र थमा दुम्माक्त। यसैया ५३:१२

29 मेकेर कोव्रब शुश मुर बाक्मा बाक्त। मेकोपुकीम आन पिया हिम्शा “परमप्रभु यावे आ खिं प्रेशा, नाक्त सांमी नक सेल्लुड, देंते। खोइ मिन, सेल्ले चबी? मईस १४:५८

30 शीमी क्येप्शो रे प्रोंडसीशा तोइसो” दे शुक्शी पामे बाक्त।

31 ठेयब चढेब नु सास्त्रीपुकीमी यो शुक्शी पा “शुश मुर आन कली श्येत रे प्रॉइना प्रॉइन गाक्बाक्त, आंम कली चहिं प्रॉइसीने मचाप्बाक्त।

32 इसाएल डा पिप, खीस्तमी शीमी क्येष्यो रे प्रॉइसेक्ल। प्रॉइसीशो ताडतय हना, थमा सुडक्नय” देंमुमा बाक्त। आ ग्युरा नु पेरा गे वोइश्शो निक्शीमी यो शुक्शी पदसे बाक्त। मत्ती १६:१४

33 मिनु नाक्त १२ बजे नां जिक रिक्शा, ३ बजे सम्म रागी नेल्ल छिडछिड दुम्माक्त।

34 मिनु ३ बजे गे येसुमी “एली, एली, लामा असाब्थानी” दे वाइ ब्रेम्माक्त। आ देंशो मार रुम्सीब देशा हना “आं परमप्रभु, आं परमप्रभु, मारदे प्रॉइयीनी?” देंशो रुम्सीब। भजन संग्रह २२:२

35 एर ओंथ बाक्बपुकीमी मो देंशा वाइ ब्रेश्शो नेंशा “नेनीने, एलीया कली ब्रेत्ताक्व” देंमुमा बाक्त।

36 मिनु का दोरशा लशा, रुवामी ग्युरशो तूचा थोव्रक नुप्शा, कोक्केमी लिक्शा युप्चा गेशा “एलीया जाक्शा, प्रॉइबा को? लो, कोव्रय” देंमाक्त।

37 मिनु येसु लेंशा काले वाइ ब्रेश्शा, नोले सोक्त कीशा बेक्माक्त। प्रस्थान २६:३१-३३; २इतिहास ३:१४

38 मिनु बेक्म नोले मार दुम्माक्त देंशा हना, परमप्रभु यावे आ खिं आगा डा कोठामी बारेशो वा इर रे उड सम्म उडक्थ पा जेर गाक्माक्त।

39 मिनु येसु आ डोंइती राप्शा बाक्शो कप्तानमी येसु वाइ ब्रेश्शा, नोले सोक्त कीशा बेक्शो तशा “थमा पा, एको मुर परमप्रभु यावे आ तौ बाक्माक्त” देंमाक्त।

40 येसु बेक्मेनु, शुश मीश मुरपुकीमी डोन रे कोव्रशो बाक्मा बाक्त। मोदेंशो कोव्रब का माग्दाला डा मरीयम बाक्माक्त। का याक्ब नु योसेस आस ममा मरीयम बाक्माक्त। का सालोमे बाक्माक्त।

41 मेकोपुकी गालील रे यरूसलेम सम्म काथा गाक्शा, येसु कली वारच पना पन बाक्शो बाक्मा बाक्त। अरु यो काथा गाक्शा, यरूसलेम जाक्दीश्शो बाक्मा बाक्त। लूका ८:२-३

येसु आ रां पुक्खीमी वोइश्शो

42 येसु बेक्की नाक्त चहिं नाइक्तीक नाक्त आ डोंइती नाक्त बाक्माक्त। मिनु नां रिक्मेनु, मार दुम्माक्त देंशा हना,

43 अरीमाथीया डा योसेफ माइश्शो, सभामी बाक्ब आन दाते डा हिकसीशो मुर का बाक्माक्त। मेको परमप्रभु यावे आ राज्य तांइसेक्ल, दे आस पा बाक्शो बाक्माक्त। मेको मुरुमी महिंथु, पिलातस कली गुम्थ लशा “येसु आ बेक्शो रां लाइक्चा गेयीनी” दे पुना बाक्त।

44 मिनु पिलातसमी बेक्म को? मबेक्म दे मारेड मतुइक्थु कप्तान कली ब्रेश्शा “मेको येसु माइश्शो बेक्मे?” दे हिल्लो पवा बाक्त।

45 मिनु कप्तानमी “बेक्त” देंमेनु, लाइक्चा गेवा बाक्त।

46 मिनु योसेफमी बुश वा ग्याप्शा चाक्शा, येसु आ बेक्शो रां रे कांटी उडश्शा शोल्शा, बुश वामी गिल्शा लाइश्शा, पुक्खी कामी ओइशा वोदा बाक्त। मेको पुक्खी बेक्शो मुर वोइक्चा कली फुल्लु मुशा, लाप्चो पाइश्शो सेल्शा वोइश्शो बाक्माक्त। मिनु बेक्शो मुर ओइशा वोइश्शा, फुल्लुमी चोक्शा वोदा बाक्त।

47 मोपा वोइश्शो माग्दाला डा मरीयम नु योसेस आ ममा मरीयममी ताम्से बाक्त।

## 16

येसु बेक्शो रे सेंसाक्व, दे नेपाइश्शो

मत्ती २८:१-१०; लूका २४:१-१२; यूहन्ना २०:१-१०

1 मिनु नाइक्तीक नाक्त नोले माग्दाला डा मरीयम, याक्ब आ ममा मरीयम नु सालोमेमी बेक्शो मुर आ रांम खेक्चा कली खेक्तीक ग्याप्मे बाक्त।

2 मिनु हप्ता डा डोंइती नाक्त सुनी कना बोक्शा, नां सोव्रमेनु, पुक्खी गे लमा बाक्त।

3 मिनु लमा लमा “फुल्लु सुमी याक्शा गेबा?” देंमुमा बाक्त।

4 मिनु जाक्दीश्शा कोव्रडमेनु, फुल्लु याक्ने थुम्शो तामे बाक्त। मेको फुल्लु शुश ठेयब बाक्माक्त।

5 मिनु पुक्खी ओव्रशा कोव्रडमेनु, बुश वा फेक्शो ठिटा का ग्युरा गे निश्शो तशा छक लाक्मा बाक्त।

6 मिनु मेको ठिटामी “मार छक लाक्नी? शीमी क्येष्यो कांटी थोक्शा क्याइश्शो नासरथ डा येसु कली माल्थ जाक्नी ममाइ? आ बेक्शो रां वोइक्तीके कोव्रडीन, मबाक्ब। बेक्शो रे सेंसाक्व।

7 मुल लशा, पत्रुस, शेंसीब नेल्ल आन कली नु इन डोंइती तुइक्पाइश्शो खोदेंशो पा, इन डोंइती गालील जाक्दीप्ब। मेकेर गुम्था ताइनीनी, दे शोव्रथ लने” दे माइक्मी बाक्त। मर्कूस १४:२८

8 मिनु मीश मुरपुकी छक लाक्शा, हिंशा खिखि पा फो फु गूशा प्रोक्मा बाक्त। मिनु सुड कली मारेड मदेंमा बाक्त। मारदे हना क्युल हिंशो बाक्मा बाक्त।

येसुमी आंम कली तपांइसीशो

लूका २४:३६-४९; यूहन्ना २०:१९-२३

9 हप्ता डा डोंइती नाक्ती सुनी कना येसु बेक्शो रे सेंसीशा, ७ ओटा वोल गुंडचा पुंडसीशो माग्दाला डा मरीयम कली तपांइसे बाक्त। लूका ८:२; यूहन्ना २०:१-१८

10 मरीयममी येसु कली तशा, लशा, डोंइती येसु नु काथा गाक्ब मुल आन थुं खाइश्शा बाक्ब आन कली “गो येसु कली बेक्शो रे सेंसीशा ब्रोंइशो ताता” दे शोव्रडा बाक्त।

- 11 मेकोपुकीमी मरीयम आ लोव्र थमा मसुदमे बाक्त।
- 12 नोले येसु कली थमा सुइक्ब निक्शी आस गाउं लसानु, लांमी येसुमी तपांडसे बाक्त। लूका २४:१३-३५
- 13 मेको निक्शी फ्रा फ्रु लेशशा जाक्शा, अरु आन कली “येसु कली ताइतस्कु” देसा बाक्त। मिनु मेको आस लोव्र यो थमा मसुदमे बाक्त।
- 14 मिनु नोले आ शेंसीब ११ जनामी खमे जना जन बाक्मानु, येसुमी मेको आन कली तपांडसे बाक्त। मिनु “मुल सम्म रुप्चा थुं मपनी? मुल यो थमा मसुइय्यीनी?” दे हुइक्तीमी बाक्त। मारदे हना “बेक्शो रे सेंसीशा ब्रोंइशो आंड मिक्चीमी ताइतक” देब आन लोव्र थमा मसुइशो बाक्मा बाक्त। १कोरिन्थी १५:५
- येसु आ नोले डा लोव्र
- 15 मिनु येसुमी आ शेंसीब ११ जना आन कली “रागी नेल्ल हिरशा, ग्येरपाइक्ब लोव्र नेल्ल आन कली नेंपतीने। मर्कूस १३:१०; मत्ती २८:१६-२०
- 16 सुमी थमा सुइशशा, ब्वाक्कुमी खुम्शा गुंडचा पुंडसीबा, मेको ब्रोंइचा ताइब। सुमी चहिं थमा मसुइक्बा, मेको सजाड गेचा पुंडसीब। प्रेरित २:३८; प्रेरित १६:३१-३३
- 17 थमा सुइक्बपुकी दोदेशो सक्ति पाइशो दुम्नीम देशा हना, आं नें थिशा बोल आन कली गुंडशा खेरनीम। परमप्रभु यावे आ सोक्तीमी पपाइशो लोव्र ब्वाक्नीम। प्रेरित १६:१८; प्रेरित १०:४६; प्रेरित १९:६
- 18 बुस्स ग्याइक्ताक्म हना यो, ओश्येर तूतेक्म हना यो, मेको आन कली मारेड मदुम्ब। रोड पाइब आन तारी गुड चाक्शा प्रार्थना पामेनु, सानीम” दे माइक्मी बाक्त। लूका १०:१९; प्रेरित २८:३-६; याकूब ५:१४-१५
- 19 मेको लोव्र नेल्ल थुम्शा नोले प्रभु येसु स्वर्ग लाइक्चा पुंडसे बाक्त। मिनु परमप्रभु यावे आ ग्युरा गे निस्से बाक्त। प्रेरित १:२; भजन संग्रह ११०:१; प्रेरित ७:५५
- 20 मिनु येसु कली थमा सुइक्बपुकी लशा, ग्येरपाइक्ब लोव्र तेइ तेइ नेंपाइक्ना पाइक्न गाक्मा बाक्त। प्रभु यो मेकोपुकी नु काथा बाक्शा, चिन्ड कौंडना कौंडन मेको आन लोव्र थमा बाक्ब देबाक्माक्त। प्रेरित १४:३; हिब्रू २:४

## लूका

**ब्रेक्ब मुर:** नेल्ल क्येडा डोंइती डा थमा सुइक्ब नु नोले थमा सुइक्ब आन इतिहास ब्रेक्ब येरोम नु यूसेबियसमी एको किताब लूकाम ब्रेक्शो बाक्ब, दे तुइक्तसे बाक्त। लूकामी प्रेरित किताब यो ब्रेक्शो बाक्ब। परमप्रभु यावे आ लोव्रमी लूका आ पर्वम सां खेयप लोव्र पशो बाक्ब। कलस्सी ४:१४; फिलेमोन:२४; तिमोथी ४:११ लूकामी, इस्राएली मदुम्शो, पावल नु गेय पवा बाक्त। मेको शुश शेंसीशो मुर बाक्माक्त।

**गेना ब्रेक्शो:** एको किताब गेना ब्रेक्शो बाक्ब ठीक पा मतुइक्नीम। तन्न ६०-८५ ए. डी. मेर दुम्चा माल्ब। लूका आ ब्रेक्शो क्येडा डोंइती अर्को ग्येरपाइक्तीक लोव्र ब्रेक्ने थुम्शो बाक्तेक्म। लूका १:१

**मारदे ब्रेक्शो:** लूकामी थियोफीलस माइश्शो टेयब मुर कली येसु ख्रीस्त आ इतिहास नु आ शेंशो नेल्ल ब्रेक्शो बाक्ब। येसु आ किकी पिपी आदम सम्म डा लोव्र ब्रेक्शो बाक्ब। एको किताब यहूदी आन कली ला ममाइ, रागी नेल्ल डा मुर आन कली ग्येरपाइक्ब लोव्र बाक्ब। येसु नेल्ल मुर, पुङग नु श्येत जाइब आन कली यो पाप रे प्रॉइब बाक्ब।

डोंइती डा लोव्र

- 1 माननीय थियोफीलस, इं रागीम मार मार दुम्मे, मेको आ पर्वम शुश लोव्र ब्रशो बाक्माक्त।
- 2 डोंइती रे मेको ताइब नु तुइक्बपुकीमी मेको आन तशो, तुइश्शो लोव्र तेइ तेइ नेंपाइश्शो बाक्मा बाक्त। १यूहन्ना १:१-४
- 3 गोमी ताइब तुइक्ब आन देशो नेंशा, ब्रेक्ब आन ब्रेक्शो पदेशा “थमान बाक्माक्त” देंती। मिनु गो यो ब्रेक्तु देंशा, एको लोव्र का का पा इन कली ब्रेक्ताक्नी। प्रेरित १:१; कलस्सी ४:१४
- 4 लोव्र का निक्शी डोंइती नेंनी माइ। एको आं ब्रेक्शो यो पढेतीनी हना, गेमी यो “थमा बाक्माक्त” दे थमा सुइक्नीनी।

जकरिया योव्रसीशो

- 5 यहूदीया रागीम हेरोद पिप आ पालामी अबीयाह आ हुल डा जकरिया नें पाइश्शो चढेब का बाक्माक्त। आ मीश हारून आ खिं डा चढेब आ तमी बाक्माक्त। आ नें एलीशीबा बाक्माक्त। १इतिहास २४:१०,१९
- 6 मेको निक्शी परमप्रभु यावे आ डोंइती ठीक पाइब बाक्सा बाक्त। परमप्रभु यावे आ अरेशो लोव्र नु पतीके लोव्र नेल्ल टिशा, दोस मताइब दुम्शा बाक्शो बाक्सा बाक्त।
- 7 मेको निक्शी खाल्पी खाल्पा दुम्शो बाक्ताक्स हना यो, आल मथिशो बाक्सा बाक्त। मारदे हना एलीशीबा आल मथीब मीश मुर बाक्माक्त।
- 8 मिनु मार दुम्माक्त देंशा हना, चढेब आ गेय पचा कली अबीयाह आ हुल आन पालो जाक्माक्त। मिनु जकरिया यरूसलेम लमाक्त। मिनु मेकेर जाक्दीश्शा, परमप्रभु यावे आ खिंमी गेय पवा बाक्त।
- 9 मिनु धूप चोचा कली चढेब योव्रचा माल्बाक्माक्त। मिनु चढेबपुकीमी यहूदी आन पतीके धूप चोइब मुर योव्रचा कली भोट तोक्गमे बाक्त। मिनु भोट तोक्गमेनु, जकरिया योव्रसे बाक्त। मिनु जकरियाम परमप्रभु यावे आ खिंमी धूप चोचा माल्दा बाक्त। प्रस्थान ३०:७
- 10 मिनु धूप चोची ना मुर नेल्ल लाडगाम रिम्शा, परमप्रभु यावे कली पुंइना पुंइन बाक्मा बाक्त।

“तौ का थीनेवे” देशो

- 11 मिनु आगामी चहिं मार दुम्माक्त देंशा हना, परमप्रभु आ स्वर्ग डा गेय पाइब का फो यूशा, धूप चोतीके आ ग्युरा गे राप्शा, जकरिया कली तपांइसे बाक्त।
- 12 मिनु जकरियामी मेको कली तशा, थाम्पा हिंमाक्त।
- 13 मिनु परमप्रभु यावे आ स्वर्ग डा गेय पाइबमी “जकरिया महिनो। परमप्रभु यावेमी इ पुंइशो गेब। इ मीश एलीशीबाम तौ का थीब। मिनु गे मेको आ नें यूहन्ना वोतो।
- 14 मेको आल थिशो तशा, गे ग्येरसीनेवे। शुश मुर मेको आल आ पर्वम ग्येरसीनीम।
- 15 मारदे हना मेको परमप्रभु आ डोंइती टेयब दुम्ब। मेकोमी शांबु राकसी मतूब। मेको कोव्रजम बाक्मेनुन, परमप्रभु यावे आ सोक्तीम ब्रीशो बाक्ब। न्यायाधीस १३:४-५
- 16 मेकोमी शुश इस्राएली आन थुं परमप्रभु, आन परमप्रभु यावे गे लेप्पाइक्ब।
- 17 मिनु मेकोमी एलीया आ सोक्त नु सक्ति तशा, आम आफ आ थुं आन तमी तौ गे लेप्पाइक्ब। मिनु मटीब आन कली ठीक पतीक लां जोक्ब तुइक्ब सेल्ब। मिनु मोपा मुर आन कली प्रभु नु गुम्पाइक्चा कली ठीक सेल्ब” देमाक्त। मलाकी ३:१,२३,२४; मत्ती १७:११-१३
- 18 मिनु जकरियाम परमप्रभु यावे आ स्वर्ग डा गेय पाइब कली “गो खाल्पा दुम्ती, आं मीश खाल्पी दुम्त। आल थीनस्कु, दे दोपा थमा सुइक्चा डा?” देमाक्त। उत्पत्ती १८:११
- 19 मिनु “गो परमप्रभु यावे आ स्वर्ग डा गेय पाइब गाब्रीएल नड। गो परमप्रभु यावे आ डोंइती बाक्नुड। परमप्रभु यावेमी इ कली ग्येरपाइक्ब लोव्र नेंपाइक्थ सोइक्ताक्की। दानीएल ८:१६
- 20 तन्न गे आं देंशो लोव्र थमा मसुदी। मोपतीके आं देंशो लोव्र नेल्ल मदुम सम्म गे इ सेंदा सोव्रशा ब्वाक्ने मचाप्ब दुम्नेवे” देमाक्त।

21 जकरिया आगाम बाकमेनु, शुश मुर लाडगाम देल्शा “ना रेन आगा ओत्रशो मार पवा माड, काड मयू” दंशा रिम्दमे बाक्त।

22 मिनु नोले जकरिया यूशा “लोत्र पड” देंमेनु, काड लोत्र पने मचबा बाक्त। मिनु गुड चाल पवा बाक्त। मिनु लाडगाम बाक्बपुकीमी “मेकोम परमप्रभु यावे कली गुमा बाक्त” दे तुइकतमे बाक्त।

23 मिनु अबीयाह आ हुल डा पालो नुप्शा, जकरिया आ खिं लेम्माक्त।

24 मिनु आ मीशेम कोत्रज कुरा बाक्त। मिनु ५ महिना सम्म सुड आन कली मतुइक्पाइक्थु, खिं डा खिं बाक्माक्त।

25 मिनु “मुरपुकीमी आं कली आल मथीब, दे महिक्गेम। मुल परमप्रभुमी आं कली हिक्पाइक्का कली शिशी पतीकेमी आल थीब दुम्पाइक्ती” देंमाक्त। उत्पत्ती ३०:२३

येसु जरमेसीब, दे तुइक्पाइक्थो

26 एलीशीबामी आल कुरशो ६ महिना दुम्मेनु, परमप्रभु यावे आ स्वर्ग डा गेय पाइब गाब्रीएल गालील रागी डा नासरथ सहर सोइक्का पुंइसे बाक्त।

27 मेकर मरीयम नें पाइश्शो मीश आल का बाक्माक्त। मरीयम दाऊद आ थर डा योसेफ माइश्शो वोंइश मुर नु ग्युंवे पचशो बाक्माक्त। मती १:१६-१८

28 गाब्रीएल मरीयम आ बाक्तीके जाक्शा, मरीयम कली “परमप्रभु गे नु बाक्ब। इ कली दाक्शा, आसीक गेते” दे सेउ पवा बाक्त।

29 मिनु मरीयममी परमप्रभु यावे आ स्वर्ग डा गेय पाइब कली तशा, आ लोत्र नेंशा छक लाक्शा “मार लोत्र माड” दे मिम्ता बाक्त।

30 मिनु गाब्रीएलमी “ए मरीयम, महिनो। परमप्रभु यावेमी इ कली दाक्शा योत्रे।

31 गे मुल कोत्रज कुरशा, तौ का थीनेवे। मिनु इ तौ कली येसु नें वोतो। यसैया ७:१४; मती १:२१-२३

32 मेको ठेयब दुम्ब। मेको कली नेल्ल क्येडा ठेयब आ तौ देंनीम। मिनु परमप्रभु, परमप्रभु यावेमी मेको कली आ किकी पिपी दाऊद आ ठेयब निल्लीके गेब। यसैया ९:६

33 मिनु मेको याक्ब आ खिं डा मुर, यहूदी आन पिप दुम्शा, हुकुम पाइब। मिनु आ राज्य गेनायो मनुप्ब” देंमाक्त।

34 मरीयममी मेको लोत्र नेंशा “गो मुल सम्म ग्युंवे मपशो बाक्नुड। गो वोंइश मुर नु मडम्ड। इन देशो दोपा दुम्ने चाप्बा डा?” दे हिल्लो पवानु

35 “परमप्रभु यावे आ सोक्तीमी इ कली सुम्ब। मिनु नेल्ल क्येडा ठेयब आ सक्ति ताइनेवे। मोपतीके इ आल परमप्रभु यावे के बाक्ब। मेको कली परमप्रभु यावे आ तौ देंनीम। मती १:१८-२०

36 इ थर डा एलीशीबा कली यो मार दुम्त दंशा हना, आल मथीब खाल्पी बाक्त हना यो, मुल कोत्रज कुरशो ६ महिना दुम्त।

37 मारदे हना परमप्रभु यावेमी पने मचाप्शो मारेइ मबाक्ब” देंमाक्त। उत्पत्ती १८:१४

38 मिनु मरीयममी “गो परमप्रभु आ वाइलीम दुम्ती। मिनु इन देशो बुद पा आ दाक्शो पपाइय्यील” देंमाक्त। मिनु परमप्रभु यावे आ स्वर्ग डा गेय पाइब लेशशा लमाक्त।

मरीयमम एलीशीबा गुम्शो

39 मिनु नोले मरीयम यहूदीया रागी डा पहाडी सहर कामी बाक्शो एलीशीबा कली गुम्थ लमाक्त।

40 मिनु जकरिया आ खिं ओत्रशा, एलीशीबा कली सेउ पवा बाक्त।

41 मरीयम आ सेउ ताक्गानु, एलीशीबा आ कोत्रज डा आल प्रेक्माक्त। मिनु परमप्रभु यावे आ सोक्तीमी एलीशीबा कली प्रिंदा बाक्त।

42 मिनु ठेयब सेंदा पा मरीयम कली “मीश मुर नेल्ल आन दातेमी गे आसीक ताइब बाक्नेवे। इ कोत्रज डा आल आसीक ताइब बाक्ब।

43 आं प्रभु आ ममा दोपा आं खिमी आं कली गुम्थ जाक्नी?

44 गो इ सेउ ताक्गानु, आं कोत्रज डा आल ग्येरशा प्रेक्त।

45 गे परमप्रभु आ लोत्र नेंशा, आ देशो गेना हना यो जाक्दीप्ब, दे थमा सुइक्तीनी। परमप्रभु यावेम इन कली आसीक गेवल” देंमाक्त। लूका ११:२७-२८

परमप्रभु कली ठेयब सेल्शो

46 मिनु मरीयममी “आं थुमी परमप्रभु कली ठेयब सेल्नुड। १सामुएल २:१-१०

47 मारदे हना मेको आं कली श्येत रे प्रोंइब, परमप्रभु बाक्ब। गो ग्येरसीनुड।

48 गो महिक्सीशो आइक्च नड। तन्न परमप्रभु यावेमी आं कली हिक्ती। मुल डा मेरे जात नेल्ल डा मुरपुकीमी आं कली आसीक गेनीम।

49 मारदे हना सक्ति पाइश्शोमी आं कली थम रिम्शो पाइक्ती। परमप्रभु यावे आ नें का ला बाक्ब।

50 सु सुम मेको कली मान पा हिंनीमी, मेको आन कली शिशी पाइब। भजन संग्रह १०३:१३, १७

51 मेकोमी सक्ति कोंइताक्व। मिनु ठेयब लेशशो आन कली आन मिम्शा हिंतीके मेको आन कली गेब। उत्पत्ती ११:८

52 हुकुम पाइब आन सासन पशो रोइश्शा, महिक्सीशो आन कली ठेयब सेल्तु। भजन संग्रह १४७:६

53 शोत्रलु बेक्शो आन कली जचा गेब। शोप पाइश्शो आन कली श्येत्थ गुड सोइक्ब। भजन संग्रह ३४:११; भजन संग्रह १०७:९

- 54 मेकोमी आ शिशी कोइशा, आ वाइल इस्राएल कली वारच पाप्नु।  
 55 मेकोमी इं किकी पिपी, अब्राहाम नु आ चच युइ आन कली गेना हना यो शिशी पचा कली मिम्ताक्व” दे मरीयममी परमप्रभु यावे कली मान पा देमाक्त। उत्पत्ती १७:७; उत्पत्ती १८:१८  
 56 मिनु मरीयम एलीशीबा आ खिंमी महिना सां सम्म बाक्शा, आ खिं लेम्माक्त।

यूहन्ना जरमेशो

- 57 मिनु डोंइती देशो बुद पा एलीशीबामी तौ का थिमाक्त।  
 58 आ एर ओंथ बाक्ब नु आ खिं डा मुर नेल्लेमी “परमप्रभुमी मेको कली शिशी पा, तौ थीब सेल्लु” देशो नेंशा, नेल्ल मेको नु ग्येरसमा बाक्त।  
 59 मिनु आल ८ नाक्त दुम्मेनु, जकरिया आ खिंमी मुर देल्शा, खोइक्तीक चिनु खोइश्शा, आल आ नें वोइक्चामेनु, नेल्लेमी “आ आफ आ नें खोदेशोन वोइक्चा” देमा बाक्त। उत्पत्ती १७:१२  
 60 तन्न आल आ ममामी “मदुम्ब, एको आ नें यूहन्ना वोइक्चा माल्ब” देमाक्त।  
 61 मिनु मुरपुकीमी “मुल सम्म इन खिं डा सुइ मुरुमी मोदेशो नें मवोदेम” देमा बाक्त।  
 62 मिनु नोले “आ आफ कली हिल्लो पय” दे जकरिया कली हिल्लो पामेनु,  
 63 जकरियाम ब्रेक्तीक का पितीन, दे चाल पा “आं तौ आ नें यूहन्ना वोतीने” दे ब्रेक्ता बाक्त। मिनु नेल्ले छक लाक्मा बाक्त।  
 64 मेना जकरिया आ सेंदा ग्रिशशा, ब्वाक्ने चाप्ब दुम्शा, परमप्रभु यावे कली ठेयब सेला बाक्त।  
 65 मिनु लोत्र पाइब दुम्त देशो नेंशा, मुर नेल्ल छक लाक्शा हिंमा बाक्त। मिनु मेको लोत्र यहूदीया डा पहाड नेल्ल ब्रमाक्त।  
 66 नेंबपुकीमी मेको लोत्र आन थुंमी वोइश्शा “मेको आल नोले दोदेशो दुम्बा?” देमुमा बाक्त। मारदे हना परमप्रभु मेको आल नु बाक्माक्त।

जकरियाम परमप्रभु कली ठेयब सेल्शो

- 67 आल आ आफ जकरियामी परमप्रभु यावे आ सोक्तीम ब्रीशा, परमप्रभु यावे आ लोत्र पवा बाक्त।  
 68 मेकोमी “परमप्रभु, इस्राएली आन परमप्रभु यावे ठेयब बाक्ब। मारदे हना इस्राएल डा मुर इं कली शिशी पा पाप रे प्रोंइब सोइक्चाप्नु। लूका ७:१६  
 69 मेकोमी आ गेय पाइब दाऊद आ खिं डा मुर रे इं कली सक्ति पाइश्शो पाप रे प्रोंइब सोइक्ताक्व।  
 70 साइ नेसी परमप्रभु यावेमी आ लोत्र पाइब आन कली मेको इस्राएल कली पाप रे प्रोंइब आ पबर्म लोत्र पपदा बाक्त। मिनु मेको लोत्र पाइबपुकीमी मार देमा बाक्त देशा हना  
 71 ‘परमप्रभु यावेमी गो इस्राएल डा मुर आंइ कली आंइ जोरी सत्रु आन गुइ रे नु आंइ कली काइ मदाक्ब रे प्रोंइब’ देमा बाक्त।  
 72 ‘परमप्रभु यावेमी आंइ किकी पिपी आन कली शिशी पाइनुड’ दे आ पशो कबल मिम्ताक्व। उत्पत्ती १७:७  
 73 मोदेशो पा शिशी पाइनुड, दे इं किकी पिपी अब्राहाम नु कसम जशा लोत्र थोक्ता बाक्त। मार लोत्र थोक्शो बाक्त देशा हना उत्पत्ती २२:१६-१८; मीका ७:२०  
 74 ‘गो इं जोरी सत्रु आन गुइ रे प्रोंइचा पुंइसीनय। मिनु गो महिथु परमप्रभु यावे कली ठेयब सेल्ने चाप्नय।  
 75 आ मुर दुम्शा, ब्रोंइका सम्म ठीक गेय पा बाक्ने चाप्नय’ दे परमप्रभु यावे आ लोत्र पाइबमी देमा बाक्त। तीतस २:१२-१४  
 76 मिनु जकरियामी आ तौ कली ‘गे नेल्ल क्येडा ठेयब आ लोत्र पाइब’ देंनीमी। मारदे हना गे प्रभु आ डोंइती गाक्शा, मेको आ लां सेल्नेवे। मलाकी ३:१  
 77 गे मेको आ मुर आन कली आन पाप क्याम्सीशा, पाप रे ब्रोंइशो मुर दुमीन, दे शेनेवे। येरमीया ३१:३४  
 78 आंइ परमप्रभु यावेमी इं कली दाक्शा, शिशी पा, रुप्तीक थुं सुनी डा छेडछेड खोदेशो पा इं तार मोइक्ताक्व। यसैया ६०:१-२  
 79 मिनु मेको बेक्पाइक्ब आ छिडछिड बाक्ब आन कली हाम्सो दुम्ब। मिनु मेकोमी आंइ कली थुं नाइश्शा बाक्तीकेम खुल्ब” देमाक्त। यसैया ९:१  
 80 मिनु यूहन्ना कोल्शा, परमप्रभु यावे आ सोक्तीम बोल्यो दुम्शा, खिं रे गाक्शा, मुर मबाक्तीके गोरशो रागीमी जाक्दीश्शा, इस्राएल डा मुर आन कली परमप्रभु यावे आ लोत्र मशंदीमी सम्म मेकेर बाक्माक्त। मती ३:१

## 2

येसु जरमेशो

- 1 मिनु मेना सिजर अगस्टसमी “रागी नेल्ल डा मुर आन नें ब्रेक्शा हिक्चा नमी” दे हुकुम पवा बाक्त।  
 2 मोदेशो नें ब्रेक्तीके डोंइती गेनायो मपशो बाक्मा बाक्त। मुल पामेनु, सिरीया रागीम क्वीरीनीयसम सासन पशो बाक्माक्त।  
 3 मिनु मुर नेल्ल आन नें ब्रेक्पाइक्चा कली आन थर डा सोतीक बोतीक गाउं गाउं सहर सहरम जाक्दीम्मा बाक्त।  
 4 योसेफ पिप दाऊद आ खिं डा बाक्माक्त। पिप दाऊद आ खिं डा मुर आन सोतीक बोतीक बेथलेहेम सहर बाक्माक्त। मोपतीके योसेफ आ मीश मरीयम कली लाइश्शा, गालील रागी डा नासरथ सहर रे यहूदीया रागी डा बेथलेहेम सहर लमाक्त।

- 5 मोपा आस नें ब्रेक्पाइक्थ लसानु, मरीयम कोव्रज कुरशो बाक्माक्त।  
 6 मिनु बेथलेहेम सहरम जाक्दीस्सा नोले मरीयम आल थितीक रोइ पवा बाक्त।  
 7 मेकेर बास बाक्तीक खिं मथित्थु, गोठ कामी बास बाक्सा बाक्त। मिनु गोठम बाक्सानु, मरीयममी तौ का थिशा, वाम गिल्शा, शुंगुम इप्पादा बाक्त। मती १:२५

गोठलापुकी जाक्शो

- 8 मेकेर गोठलापुकी बाक्मा बाक्त। मेकोपुकी नाकदो रूम बाक्शा, आन भेडा खाल पशो बाक्मा बाक्त।  
 9 मिनु परमप्रभु यावे आ स्वर्ग डा गेय पाइब का गोठला आन बाक्तीकेम फो ग्रूमाक्त। मिनु परमप्रभु आ छेडछेडमी मेको गोठला आन एर ओंथ ठेयब हाम्सो सेला बाक्त। मेको तशा गोठलापुकी शुश हिंमा बाक्त।  
 10 तन्न परमप्रभु यावे आ स्वर्ग डा गेय पाइबमी “महिनीने। गो इन कली नु मुर नेल्ल आन कली ग्येरपाइक्ब लोत्र नेंपाइक्थ जाक्ती।  
 11 एको ग्येरपाइक्ब लोत्र दोदेशो बाक्ब देशा हना, मुलाकदो पिप दाऊद आ सहरम आल का जरमेसाक्ब। मेको नक जरमेशो आल पाप रे प्रॉइब, प्रभु येसु ख्रीस्त बाक्ब।  
 12 आं लोत्र थमा बाक्ब, दे दोपा तुइक्नीनी देशा हना, गे मेको नक जरमेशो आल कली वाम गिल्शा, शुंगुम इप्पाइश्शो थिल्लीनी” देमाक्त।  
 13 मिनु सरीड रे परमप्रभु यावे आ स्वर्ग डा गेय पाइब शुश फो फु गूशा, परमप्रभु यावे कली ठेयब सेल्शा भजन संग्रह १०३:२०-२१  
 14 “नेल्ल क्येडा इर डा परमप्रभु यावे नेल्ल क्येडा ठेयब बाक्ब। आ दाक्शो मुर आन कली थुं नाइश्शा बाक्चा गेब” दे कुम्सो पामे बाक्त। लूका १९:३८; गन्ती ६:२६; एफिसी २:१४,१७  
 15 मिनु परमप्रभु यावे आ स्वर्ग डा गेय पाइब सरीड गे लेशशा लमा बाक्त। मिनु गोठलापुकीमी “बेथलेहेम सहर लय। एको परमप्रभुमी तुइक्पाइश्शो लोत्र कोव्रथ लय” देमुमा बाक्त।  
 16 मिनु दोरशा जाक्दीश्शा कोव्रडमेनु, मरीयम नु योसेफ थित्मे बाक्त। मेकेर नक थिशो आल यो शुंगुम इप्पाइश्शो तामे बाक्त।  
 17 मेको नेल्ल तशा, आल आ पर्वम नेशो लोत्र शुश मुर आन कली तुइक्पदमे बाक्त।  
 18 मिनु आन लोत्र नेंब नेल्ल छक लाक्मा बाक्त।  
 19 तन्न मरीयममी गोठला आन लोत्र नेशा, आ थुंमी वोदा बाक्त।  
 20 गोठलापुकीमी आन तशो नु आन नेशो आ पर्वम परमप्रभु यावे कली ठेयब सेल्ना सेल्न लेम्मा बाक्त।

येसु नें वोइश्शो

- 21 मिनु आल जरमेसे आ ८ नाक्ती खोइक्तीक चिनु खोदमे बाक्त। मिनु आ नें येसु वोदमे बाक्त। मारदे हना परमप्रभु यावे आ स्वर्ग डा गेय पाइबमी “मेको आ नें येसु वोइक्चा” दे आ कोव्रज कुरचा क्येडा डोंइती मरीयम कली देशो बाक्माक्त। लूका १:५९; उत्पत्ती १७:१२; लूका १:३१

येसु परमप्रभु आ खिं लाइश्शो

- 22 मिनु चोत्रखेतीक नाक्त जाक्मेनु, मोसामी ब्रेक्शो लोत्र टिशा, यरूसलेम सहर जाक्दीश्शा, आल कली परमप्रभु यावे आ खिं लाइश्शा “परमप्रभु यावे केन दुम्ल” देशा, परवा आ चाइक्ब निकशी चढेम्से बाक्ता। लेवी १२:१-४; गन्ती १८:१५  
 23 मारदे हना परमप्रभुम अरेशो लोत्रमी “डोंइती थिशो वोइंश आल परमप्रभु यावे के बाक्ब” दे ब्रेक्शो बाक्ब। प्रस्थान १३:२,१५  
 24 परमप्रभु आ अरेशो लोत्रमी आम्मा चोत्रखेचा कली “परवा आ चाइक्ब निकशी चढेचा माल्ब” दे ब्रेक्शो बाक्ब। लेवी १२:६-८  
 25 यरूसलेममी सिमियोन माइश्शो मुर का बाक्माक्त। मेको ठीक पाइब नु परमप्रभु यावे कली मान पा हिंब बाक्माक्त। परमप्रभु यावे आ सोक्तीम ब्रीशा “परमप्रभु यावेमी इस्राएल डा मुर आन कली पाप रे प्रॉइब का सोइक्ब” दे लां कोव्रशा बाक्शो बाक्माक्त। उत्पत्ती ४९:१८  
 26 परमप्रभु यावे आ सोक्तीमी मेको कली “इ मबेक्थु, प्रभु, पाप रे प्रॉइब ख्रीस्त गुम्पाइक्कन” देशो बाक्माक्त।  
 27 मिनु परमप्रभु यावे आ सोक्तीमी मेको कली “मुल परमप्रभु यावे आ खिं लावो” देतीके लशा, परमप्रभु यावे आ खिं जाक्दीम्माक्त। मिनु मरीयम नु योसेफमी आल कली परमप्रभु यावे आ ब्रेक्पाइश्शो लोत्रमी मार पचा देशो बाक्मे, मेको पचा कली चाक्शो तवा बाक्त।  
 28 मिनु सिमियोनमी आल कली लाइश्शा, परमप्रभु यावे कली ठेयब सेल्शा  
 29 “परमप्रभु, इन देशो जाक्दीत्त। मुल इन वाइल थुं नाइश्शा बेक्ने चाप्ब।  
 30 मारदे हना इन सोइश्शो पाप रे प्रॉइब कली आं मिक्चीम ताता।  
 31 मेको कली रागी रागी डा मुर नेल्ल आन पर्वम सोइक्ताक्नी।  
 32 अर्को जात डा मुर आन कली छेडछेड दुम्शा, मेको आन कली रुप्तीक थुं गेचा कली सोइक्ताक्नी। गो इस्राएली आंइ कली थम रिम्शो दुम्त” देमाक्त। यसैया ४९:६  
 33 मिनु आल आ आम आफोमी “मार, मिश रिम्शो लोत्र पवा” दे छक लाक्सा बाक्त।

34 मिनू सिमियोन मेको आस कली आसीक गेशा, मरीयम कली “एको आल इस्राएली आन दातेमी लां कोंइशा मुर आन कली फ्राब। का निक्शी खतम दुन्मी, का निक्शी रिम्शो दुन्मी। मिनू शुश मुरुमी एको कली मदाक्नीम। लूका २०:१७-१८; प्रेरित २८:२२; १कोरिन्थी १:२३

35 मोपा मुर आन थुंम मिम्शो तुंडसीब। मिनू तरवार कामी इ थुं थोकब” देंमाक्त। यूहन्ना १९:२५

36 यरूसलेममी आन्ना माइशशो परमप्रभु यावे आ लोत्र पाइब खाल्पी का बाक्माक्त। मेको आशेर आ थर डा फनुएल आ तमी बाक्माक्त। मेको ग्युबे पशो आ ७ बर्सम आ वोंइश बेक्शो बाक्माक्त।

37 मिनू आ वोंइश बेक्म नोले शुश बर्स ब्रोंइशा, ८४ बर्स दुम्माक्त। मेकोमी परमप्रभु यावे आ खिं मप्रोंइथु, नाक्दो नाक्ती मेकेर माइजा बाक्शा प्रार्थना पा, परमप्रभु यावे कली ठेयब सेल्ना सेल्न बाक्बाक्माक्त। १तिमोथी ५:५

38 मिनू मरीयम नु योसेफमी आल मेकेर लदसेनु, मेको खाल्पी गुम्से बाक्त। मिनू खाल्पीमी आल कली तशा, परमप्रभु यावे कली ठेयब सेला बाक्त। मिनू “परमप्रभु यावेमी पाप रे प्रोंइब सोइक्ब” दे आस पा बाक्ब यरूसलेम डा मुर आन कली मेको आल आ पर्वम लोत्र पा नेंपाइक्मी बाक्त।

39 मिनू परमप्रभु आ अरेशो पचा माल्शो गेय नेल्ल थुम्शा, आल कली लाइशशा, गालील रागी डा नासरथ सहरम लेस्सा बाक्त।

40 मिनू नोले आल कोल्शा, जोक्ब तुइक्ब दुम्माक्त। मारदे हना परमप्रभु यावेमी दाक्शा मेको कली आसीक गेवा बाक्त।

येसु परमप्रभु आ खिंमी बाक्शो

41 येसु आ आम आफ बर्स बर्समी पास्सा चाड मानेथ यरूसलेम लाइबाक्सा बाक्त। ब्यवस्था १६:१-८

42 मिनू येसु १२ बर्स जाक्दीम नोले पास्सा मानेथ लमानु, मार दुम्माक्त देंशा हना,

43 पास्सा थुम्शा खिं लेम्मानु, आम आफोम मतुइक्थु, येसु मेकेरन लीमाक्त। तन्न आ आम आफोमी मतुइसे बाक्त। प्रस्थान १२:१८

44 मेको नाक्त का डा लां गाक्सानु, येसु आ वारच नु लत, दे मिम्तसे बाक्त। मिनू वारच नु बाक्शो मतथ, येसु कली माल्चा गोम्से बाक्त। नाक्त का डा लां ३०-४० किलो मिटर बाक्ब।

45 मिनू माल्से माल्से तेइ मथित्से बाक्त। मिनू लेशशा माल्ना माल्न यरूसलेम जाक्शा यो मथित्से बाक्त।

46 नाक्दो नाक्ती सां सम्म माल्ना माल्न गाक्सा नोले परमप्रभु यावे आ खिंम थित्से बाक्त। मेको परमप्रभु यावे आ लोत्र शेंबपुकी नु बाक्शा, आन लोत्र नेंशा, मेको आन कली लोत्र हिल्लो पना पन बाक्शो ताम्से बाक्त।

47 मेको आ लोत्र नेंब नेल्लेमी “शुश जोक्ब तुइक्ब आल बाक्माक्त” दे छक लाक्मा बाक्त।

48 आ आम आफोम मेको कली तशा, थाम्पा छक लाक्सा बाक्त। मिनू आ ममामी “आं तौ, गे मारदे आंस कली मोदेंशो श्येत गेस्की? इ आफ नु गो इ कली ‘ते लाक्गा?’ दे शुश हिंशा माल्तास्कु” देंमाक्त।

49 मिनू येसुमी “मारदे माल्वीसी? गो आं आफ आ खिंमी बाक्चा माल्नुइ, दे मतुइक्तीसी?” देंमाक्त। यूहन्ना २:१६

50 तन्न मेको आ लोत्र मरुप्से बाक्त।

51 मिनू येसु आ आम आफ नु लेशशा, नासरथ आ खिं लमाक्त। में डा मेरे आ आम आफ आस लोत्र टिशा बाक्माक्त। आ ममामी मेको मोदेंशो दुम्शो नेल्ल शुश मिम्शा थुंम वोदा बाक्त।

52 येसु कोल्शा बारशा, शुश जोक्ब तुइक्ब दुम्माक्त। परमप्रभु यावेमी मेको कली दाक्ता बाक्त। मुरपुकीमी यो दाक्तमे बाक्त। १सामुएल २:२६

### 3

ब्वाक्कुम खुम्शा गुंडब यूहन्ना

मती ३:१-१२; मर्कूस १:१-८

1 सिजर तिबेरीयुस आ हुकुम पशो १५ बर्स दुम्मेनु, इस्राएल रागीम सासन पाइब सु सु बाक्मा बाक्त देंशा हना, यहूदीया रागीम पन्तीयस पिलातस, गालील रागीम हेरोद, इतुरीया नु त्राकोनीतीस रागीम हेरोद आ लोक्ब फिलीप नु अबील्लेने रागीम लुसानीयस बाक्मा बाक्त।

2 यरूसलेममी नेल्ल क्येडा ठेयब चढेब हन्नास नु काइयाफास बाक्सा बाक्त। जकरिया आ तौ यूहन्ना गोरशो रागी मुर मबाक्तीकेमी बाक्शो बाक्माक्त। मिनू परमप्रभु यावेमी यूहन्ना कली लोत्र पवा बाक्त। इजीकीएल १:३; होसे १:१

3 मिनू यूहन्ना यर्दन खोला आ नेक्था जाक्दीशशा, एर ऑथ परमप्रभु यावे आ लोत्र शेंना शेंन गाक्माक्त। मिनू शेंना शेंन मुर आन कली “इन थुं परमप्रभु यावे गे लेशशा, ब्वाक्कुम खुम्शा गुंडचा पुंडसीन। मिनू परमप्रभु यावेमी इन पाप क्याम्शा गेब” दे शेंदीमी बाक्त।

4 साइ नेसी परमप्रभु यावे आ लोत्र पाइब यसैयामी “गोरशो रागीमी सेंदा का नेंसीब। मेकोमी मार देंब देंशा हना, प्रभु आ लां सेलीने। आ गाक्तीकेम फुल्लु ग्रोक्शा थेलीने। यसैया ४०:३-५

5 बेंसी नेल्ल प्रिंचा पुंडसीनीम। डांडा नेल्ल दिम सेल्चा पुंडसीनीम। हिरशो लां नेल्ले सोत्रजो सेल्चा पुंडसीनीम। मरिम्शो लां नेल्ले रिम्शो सेल्चा पुंडसीनीम।

6 मिनू मुर नेल्लेमी परमप्रभु यावेमी दोपा पाप रे प्रोंइबा मेको तुइक्नीम” दे ब्रेक्शो बाक्माक्त। यसैया ४०:३-५

7 मिनू शुश मुर यूहन्ना आ बाक्तीकेमी ब्वाक्कुम खुम्शा गुंडपाइसीचा कली जाक्मा बाक्त। मिनू यूहन्नामी मेको आन कली “गे बुस्स आ खलकपुकी, परमप्रभु यावे आ सजाइ रे ब्रोंइचा ताइनीनी, दे सुम शेंदा?



8 इन थुं परमप्रभु यावे गे लेशरा, रिम्शो फल सिशशो खोदेशो गेय कोंडदीने। गे 'इं किकी पिपी अब्राहाम बाक्ब' दे मिम्शा, देश पा मबाक्कीन। मारदे हना गो इन कली 'परमप्रभु यावेमी एको फुल्लु रे अब्राहाम आ चच युइ सेल्ने चाप्ब' देंनुड।

9 तिम्चा, दे रवा आन पुंमी खा वोइशशो बाक्ब। रिम्शो फल मसिप्ब रवा का का पा तिम्शा, मीम चोचा पुंडसीनीम, दे तुडक्तीन" दे माइक्मी बाक्त।

10 मिनु मुरपुकीमी "मुल मार पक?" दे हिल्लो पामे बाक्त।

11 मिनु यूहन्नामी "सु के फेक्तीक वा निक्शी बाक्मे, मेकोमी फेक्तीक का मबाक्शो कली गेचा माल्ब। सु के जचा थोत्रक बाक्मे, मेकोमी जचा मताइब कली गेचा माल्ब" देमाक्त।

12 तिरो पोक्बपुकी यो जाक्शा यूहन्ना कली "शेंब, गो मार पक?" दे हिल्लो पामे बाक्त।

13 मिनु मेकोमी "सरकारम ताक्चा देशो क्येडा शुश मताक्चा" देमाक्त।

14 का निक्शी सिपाइपुकी यो जाक्शा "मिनु गो मार पक?" दे हिल्लो पामे बाक्त। मिनु मेको आन कली "सुइ आन कली हिंम हिंम पा जोल पा दोस गेशा आन मारेइ मारेइ मरोइक्तीन। इन गेय रे पा तशो क्येटम इन थुं नुशा बाक्कीन" दे माइक्मी बाक्त।

15 मिनु यूहन्ना आ लोत्र नेंबपुकीमी "एको मुर सु माइ? ख्रीस्त कोर में?" दे शुश मिम्तमे बाक्त।

16 यूहन्नामी मेको नेल्ल आन कली "गो इन कली ब्वाक्कुम खुम्शा गुंडननी। आं नोले जाक्ब चहिं आं क्येडा ठेयब बाक्ब। गो मेको आ डोंडती बाप्शा, आ जुता पुइक्चा लायो मशिरनुड। मेकोमी इन कली परमप्रभु यावे आ सोक्ती नु मीम खुम्ब।

17 लाडगाम हाम्शो चेरब हुरशा, भूस नु गेडा तिल्चा कली मेको आ गुइमी ग्योल बाक्ब। गेडा कोठोम कुर पा वोइक्ब। भूस चहिं गेनायो मकाप्ब मीम हुम्ब" दे माइक्मी बाक्त।

18 मोदेशो लोत्र पा अर्ती गेशा, रिम्शो लोत्र शेंदीमी बाक्त।

19 मेकोमी सासन पाइब हेरोद आ लोकब आ मीश चाक्चा आ पबंम दोस गेवा बाक्त। मोपतीके मेकोमी यूहन्ना कली जेल्खानमी चोक्पदा बाक्त। मती १४:३-४; मर्कूस ६:१७-१८

20 हेरोद कली मार दोस गेवा बाक्त देशा हना "इन लोकब आ मीश चाक्चा, पात्के पाइतीनी। अरु पाप यो शुश पाइतीनी" दे हुइशशो बाक्माक्त।

येसु ब्वाक्कुम खुम्पांडसीशो

मती ३:१३-१७; मर्कूस १:९-११

21 मिनु यूहन्ना चोक्सीचा क्येडा डोंडती शुश मुर आन कली ब्वाक्कुम खुम्शा गुंडदा बाक्त। काबु येसु यो जाक्शा, ब्वाक्कुम खुम्शा गुंडचा पुइसे बाक्त। मिनु ब्वाक्कु रे गूशा, प्रार्थना पना पन बाक्मेनु, सरीड रोक्से बाक्त।

22 मिनु सरीड रे परमप्रभु यावे आ सोक्त परवा खोदेशो पा यिशा, येसु आ तारी जुक्ता बाक्त। मिनु सरीड रे "आं दाक्शो तो नवे। इ कली तशा थाम्पा ग्येरसीनुड" देशो सेंदा नेंसे बाक्त। यूहन्ना १:३२; लूका ९:३५

येसु आ किकी पिपी

मती १:१-१७

23 मिनु येसुमी मुर आन कली परमप्रभु यावे आ लोत्र शेंचा गोवानु, ३० बर्स दुम्शो बाक्माक्त। मुरपुकीमी आ आफ योसेफ बाक्ब, दे मिम्तमे बाक्त। योसेफ हेली आ तौ बाक्माक्त। लूका ४:२२

24 हेली मात्थात आ तौ बाक्माक्त। मात्थात लेवी आ तौ बाक्माक्त। लेवी मेल्ली आ तौ बाक्माक्त। मेल्ली यान्नाइ आ तौ बाक्माक्त। यान्नाइ योसेफ आ तौ बाक्माक्त।

25 योसेफ मत्थाथीयास आ तौ बाक्माक्त। मत्थाथीयास आमोस आ तौ बाक्माक्त। आमोस नाहुम आ तौ बाक्माक्त। नाहुम एस्ली आ तौ बाक्माक्त। एस्ली नग्गे आ तौ बाक्माक्त।

26 नग्गे माथ आ तौ बाक्माक्त। माथ मत्थाथीयास आ तौ बाक्माक्त। मत्थाथीयास सेमेइन आ तौ बाक्माक्त। सेमेइन योसेक आ तौ बाक्माक्त। योसेक योदा आ तौ बाक्माक्त।

27 योदा योआनान आ तौ बाक्माक्त। योआनान रेसा आ तौ बाक्माक्त। रेसा जेरूब-बाबेल आ तौ बाक्माक्त। जेरूब-बाबेल शाल्तीएल आ तौ बाक्माक्त। शाल्तीएल नेरी आ तौ बाक्माक्त।

28 नेरी मेल्ली आ तौ बाक्माक्त। मेल्ली अददी आ तौ बाक्माक्त। अददी कोसाम आ तौ बाक्माक्त। कोसाम एल्मादम आ तौ बाक्माक्त। एल्मादम एर आ तौ बाक्माक्त।

29 एर यहोसु आ तौ बाक्माक्त। यहोसु एलीएजर आ तौ बाक्माक्त। एलीएजर योरीम आ तौ बाक्माक्त। योरीम मात्थात आ तौ बाक्माक्त। मात्थात लेवी आ तौ बाक्माक्त।

30 लेवी सिमियोन आ तौ बाक्माक्त। सिमियोन यहूदा आ तौ बाक्माक्त। यहूदा योसेफ आ तौ बाक्माक्त। योसेफ योनाम आ तौ बाक्माक्त। योनाम एल्याकीम आ तौ बाक्माक्त।

31 एल्याकीम मेलेया आ तौ बाक्माक्त। मेलेया मेन्ना आ तौ बाक्माक्त। मेन्ना मात्ताथा आ तौ बाक्माक्त। मात्ताथा नाथान आ तौ बाक्माक्त। नाथान दाऊद आ तौ बाक्माक्त। २सामुएल ५:१४

32 दाऊद येस्से आ तौ बाक्माक्त। येस्से ओबेद आ तौ बाक्माक्त। ओबेद बोआज आ तौ बाक्माक्त। बोआज सालमोन आ तौ बाक्माक्त। सालमोन नहशोन आ तौ बाक्माक्त। रूथ ४:१७-२२

33 नहशोन अम्मीनादाब आ तौ बाक्माक्त। अम्मीनादाब आदमीन आ तौ बाक्माक्त। आदमीन अरनी आ तौ बाक्माक्त। अरनी हेसोन आ तौ बाक्माक्त। हेसोन परेस आ तौ बाक्माक्त। परेस यहूदा आ तौ बाक्माक्त। उत्पत्ती ५:१-३२; उत्पत्ती ११:१०-२६; उत्पत्ती २१:२-३; उत्पत्ती २९:३५

34 यहूदा याकूब आ तौ बाक्माक्त। याकूब इसहाक आ तौ बाक्माक्त। इसहाक अब्राहाम आ तौ बाक्माक्त। अब्राहाम तेराह आ तौ बाक्माक्त। तेराह नाहोर आ तौ बाक्माक्त।

35 नाहोर सेरूग आ तौ बाक्माक्त। सेरूग रेऊ आ तौ बाक्माक्त। रेऊ पेलेग आ तौ बाक्माक्त। पेलेग एबेर आ तौ बाक्माक्त। एबेर शेलाह आ तौ बाक्माक्त।

36 शेलाह केनान आ तौ बाक्माक्त। केनान अरपक्शाद आ तौ बाक्माक्त। अरपक्शाद शेम आ तौ बाक्माक्त। शेम नोआह आ तौ बाक्माक्त। नोआह लमेक आ तौ बाक्माक्त।

37 लमेक मेथुसेलाह आ तौ बाक्माक्त। मेथुसेलाह हनोक आ तौ बाक्माक्त। हनोक यरेद आ तौ बाक्माक्त। यरेद मा-हालालेल आ तौ बाक्माक्त। मा-हालालेल केनान आ तौ बाक्माक्त।

38 केनान एनोश आ तौ बाक्माक्त। एनोश सेथ आ तौ बाक्माक्त। सेथ आदम आ तौ बाक्माक्त। आदम चहिं परमप्रभु यावे आ सेल्शो बाक्माक्त।

## 4

येसु नाक्चा पुंडसीशो

1 येसु परमप्रभु यावे आ सोक्तीम ब्रीशा, यर्दन खोला रे लशा, परमप्रभु यावे आ सोक्तीमी गोरशो रागीमी चाक्दीत्या पुंडसे बाक्त।

2 मिनू ४० नाक्ती गोरशो रागीम सैतान रे पा थु नाक्चा पुंडसे बाक्त। मेको ४० नाक्त सम्म मारेड मजथु बाक्शो बाक्माक्त। मिनू नोले शुश शोत्रलु बेक्माक्त।

3 मिनू सैतानमी “मार, गे परमप्रभु आ तौ नवे हना, एको फुल्लु कली ‘शोब्ले दुमो’ देन” देमाक्त।

4 मिनू येसुमी “परमप्रभु यावेम ब्रेक्पाइशो लोत्रमी ‘मुर जशा ला मब्रोंडनीम’ दे ब्रेक्शो बाक्ब” देमाक्त। ब्यवस्था ८:३

5 मिनू नोले सैतानमी येसु कली इर लाइशशा, याम कामीन रागी नेल्ल कोइशा

6 “रागी, रागीमी बाक्शो नेल्ल शोप आं के नम। रागी नेल्ल आन कली हुकुम पाइब यो गो नड। गो मेको इ कली गेनुड। मारदे हना सु कली गेचा दाक्तु, मेको कली गेने चाप्नुड।

7 गे आं डोंइती बाप्शा, आं कली ठेयब सेल्लतीवी हना, मेको नेल्ल इ कली गेनन” देमाक्त।

8 मिनू येसुमी “परमप्रभु यावे आ लोत्रमी ‘परमप्रभु यावे कली ला ठेयब सेलो। मेको कली ला गेय पावो’ दे ब्रेक्शो बाक्ब” देमाक्त। ब्यवस्था ६:१३

9 मिनू नोले सैतानमी येसु कली यरूसलेम लाइशशा, परमप्रभु यावे आ खिं डा नेल्ल क्येडा तारी लदा बाक्त। मिनू “मार, गे परमप्रभु यावे आ तौ नवे हना, एकेर रे प्रेक्को।

10 मारदे हना ‘इ कली कोत्रचा कली आ स्वर्ग डा गेय पाइब आन कली सोइक्ब।

11 मिनू मेकोपुकीमी इ कली आन गुडम ताक्शा, खपीम नाइक्पाइक्नीम। इ खोडल फुल्लु कामी यो मथोक्ब’ दे ब्रेक्शो बाक्ब” देमाक्त। भजन संग्रह ९१:११, १२

12 मिनू येसुमी “परमप्रभु, इन परमप्रभु यावे कली थु मनाक्चा, दे यो देशो बाक्ब” देमाक्त। ब्यवस्था ६:१६

13 मिनू सैतानमी नेल्ल नाक्ने थुमा नोले, मुल अर्को खेयप नाक्नुड, दे मिम्शा येसु कली प्रोंइशा मेक रे गाक्माक्त। हिब्रू ४:१५

येसुमी गालील रागीम शेंशो

मत्ती ४:१२-१७; मर्कूस १:१४-१५

14 मिनू नोले, येसु परमप्रभु यावे आ सोक्त आ सक्तिम गालील रागी लेम्माक्त। मेकेर एर ओंथ येसु आ परबम शुश लोत्र ब्रशो बाक्माक्त।

15 मेकोमी आन गुम्तीक खिं खिंमी शेंना शेंन गाक्मेनु, आ लोत्र नेंब नेल्लेमी “रिम्शो लोत्र पाइक्बाक्त” दे ठेयब सेल्मे बाक्त।

येसुमी नासरथ सहरम लोत्र पशो

मत्ती १३:५३-५८; मर्कूस ६:१-६

16 मोपा हिरेना हिरन गाक्मेनु, काबु आ कोल्टीक नासरथ सहरम जाक्दीम्माक्त। आल रेन नाइक्तीक नाक्ती गुम्तीक खिं लशो खोदेशो पा, गुम्तीक खिं लशा, परमप्रभु यावे आ लोत्र पढेचा कली राम्माक्त।

17 मिनू गुम्तीक खिं डा गेय पाइबमी मेको कली यसेया आ ब्रेक्शो किताब गेवा बाक्त। मिनू किताब प्राक्शा कोत्रशा यसेया ६:१-२

18 “परमप्रभु यावे आ सोक्त आं तार बाक्ब। मारदे हना परमप्रभु यावेमी तेल लुक्ताक्यी। मेकोमी आं कली दिप्शो पुडग मुर आन कली ग्येरपाइक्ब लोत्र नेंपाइक्चा कली, ग्याइशशा चोक्चा पुंडसीशो मुर आन कली प्रोंइचा कली, मिक्च मताइब आन कली तपाइक्चा नु श्येत जाइब आन कली श्येत रे प्रोंइशा, रिम्शो पा बाक्चा गेचा कली सोइक्ताक्यी। यसेया ४२:७

19 परमप्रभु यावे आ शिशी पतीक बर्स आ परबम शेंचा कली सोइक्ताक्यी” दे पढेशा नेंपाइक्मी बाक्त। लेवी २५:१०

20 मिनू किताब गिल्शा, गुम्टीक खिं डा गेय पाइब कली गेशा, निस्से बाकत। मिनू नेल्लेमी येसु कली मिक्च मयाक्थु कोल्लस डा कोव्रस पामे बाकत।

21 मिनू येसुमी “एको इन नेशो लोव्र मुलाकत गाप्त” देंमाकत।

22 नेंबपुकीमी मेको आ पर्वम रिम्शो लोव्र पामे बाकत। येसु आ रिम्शो लोव्र नेशा छक लाकशा “एको योसेफ आ तौ ममाइ डा?” देंमुमा बाकत। लूका ३:२३

23 मिनू येसुमी मेको आन कली “गे इच्ची ना आं कली ‘मुर आन कली सापाइक्ब, गे इ कली यो सापतो’ देंतीक लोव्र देंनीनी। मिनू ‘गो कापेरनाउम सहरम चिन्ड नु छक लाकचा डा गेय पशो नेतक। मुल इ कोलतीक सहरम, एकेर यो मोदेशो पावो’ दे आं कली देंनीनी” देंमाकत।

24 मिनू येसुमी “थमा पा, मुरपुकीमी परमप्रभु यावे आ लोव्र पाइब आन कली आंम आन बाक्तीक सहरम काइ महिक्नीम। यूहन्ना ४:४४

25 थमा लोव्र मार बाकत देंशा हना, एलीया आ पालाम इसाएल रागीम शुश वोंइश बेक्शो मीश मुर बाक्शो बाक्तेकम। मेना बर्स सां ६ महिना सम्म रेउ मयिमाकत। मिनू रागी नेल्ल डा मुरपुकीमी जचा मतामे बाकत। १राजा १७:१,९-२४

26 तन्न परमप्रभु यावेमी एलीया कली मेको आन बाक्तीक मसोइकत। तन्न सीदोन रागी डा सारेप्ता सहरम बाक्ब वोंइश बेक्शो मीश मुर का कली ला श्येत रे प्रोंइथ सोइकता बाकत। सारेप्ता सहर कली हिब्रू लोव्रमी चारेफाथ देंनीम।

27 एलीशा आ पालामी यो इसाएल रागीमी शुश कोव्र पाइब मुर बाक्मा बाकत। सुइ मसामा बाकत। सिरिया डा नामान माइशशो मुर ला सापाइक्चा पुंइसे बाकत” दे येसुमी माइक्मी बाकत। २राजा ५:१-१४

28 गुम्टीक खिंम बाक्शो मुर नेल्लेम मेको लोव्र नेशा चुरमा बाकत।

29 मिनू छुल छाल बोक्शा, येसु कली आन गुम्टीक खिं नु सहर रे गुंइशा, डांडा तार सेल्लशो सहर डा रोंगु रे तोक्चा, दे लदमे बाकत।

30 तन्न येसु मेको आन दाते रे यूशा गाक्माकत।

येसु कापेरनाउम जाक्दीशशो

मती ८:१४-१७; मर्कूस १:२१-३९

31 मिनू नोले गालील रागी डा कापेरनाउम सहर बुम्माकत। मिनू नाइक्तीक नाक्ती गुम्टीक खिं लशा, मुर आन कली शेंदा बाकत।

32 मिनू आ शेंशो नेशा छक लाक्मा बाकत। मारदे हना आ लोव्र अधिकार पाइशशो बाक्माकत। मती ७:२८-२९; यूहन्ना ७:४६

33 मेको गुम्टीक खिंमी ग्रांया दिचा डा वोल आ सोक्तीम सुम्शो मुर का बाक्माकत। मेकोमी वाइ ब्रेशशा

34 “ओहो, नासरथ डा येसु, मार पमया डा? आंइ कली साइक्थ जाक्नी? इन कली तुइक्ताक्क। गे परमप्रभु यावे आ योव्रशो ननी” देंमाकत।

35 मिनू येसुमी वोल कली “रेयके मपथु, यूडो” दे हुइक्ता बाकत। मिनू वोलमी मुर कली श्येत मगेथु, दिड खोल्ला वोंइशशा गूमाकत।

36 मो दुम्शो तशा, मुरपुकी छक लाकशा “मार लोव्र बाक्म माइ? मारदे हना अधिकार नु सक्ति पाइशशो लोव्र पवानु, वोलपुकी गूबाक्तेकम” देंमुमा बाकत।

37 मिनू मेको रागी नेल्ल येसु आ पर्वम लोव्र ब्रना बन लमाकत।

38 मिनू येसु गुम्टीक खिं रे गाक्शा, सिमोन आ खिं जाक्दीम्माकत। सिमोन आ शिमी शुश जरो पा रोइ पा गोल्लशो बाक्माकत। मिनू खिं डा मुरुमी येसु कली “सापतीन” दे पुन्मे बाकत।

39 मिनू येसु मेको आ नेक्था राप्शा, जरो कली हुइक्ता बाकत। मिनू हुइक्तानु, जरो जाम्माकत। मिनू साशा छुल बोक्शा, येसु नु आ वारच आन कली जचा गेमी बाकत।

40 मिनू नां रिक्मेनु, शुश रोइ पाइब आन कली चाक्मे बाकत। मिनू येसुमी रोइ पाइब आन कली आ गुइ आन तारी चाक्शा, नेल्ल आन कली सापाइक्मी बाकत।

41 शुश मुर रे वोल गुंइदा बाकत। वोल आन कली गुंइदानु, मेकोपुकीमी “परमप्रभु यावे आ तौ ननी” दे ग्रीमा बाकत। तन्न येसुमी मेको आन कली लोव्र पचा मगेथु, हुइक्तीमी बाकत। मारदे हना मेकोपुकीम “ख्रीस्त बाक्ब” दे डोंइती रे तुइशशो बाक्मा बाकत। मती ८:२९; मर्कूस ३:११-१२

42 मिनू आ दीसा सुनी येसु मेकेर रे गाक्शा, मुर मबाक्तीकेम जाक्दीम्माकत। मिनू मुरपुकीमी “ते लमे?” दे माल्ला, आ बाक्तीकेम जाक्दीम्मा बाकत। मिनू “आंइ कली प्रोंइशा मगाक्कीन। आंइ सहरम बाक्कीन” देंमा बाकत।

43 मिनू येसुमी “अर्को सहर लचा माल्लुड। मारदे हना गो मेकेर डा मुर आन कली यो परमप्रभु यावे आ राज्य डा लोव्र पचा माल्लुड। गो मेको गेय पचा कली सोइशशो नड” देंमाकत।

44 मिनू रागी नेल्ल हिरना हिरन यहूदीया डा गुम्टीक खिं खिंमी शेंना शेंन गाक्माकत। मती ४:२३

## 5

डोंइती डा शेंसीब योव्रशो

मती ४:१८-२२; मर्कूस १:१६-२०

1 मिनू काबु येसुमी गेनेसरेथ समुन्द्र आ नेक्था जाक्दीशशा, मुर आन कली परमप्रभु यावे आ लोत्र शेंदीमी बाक्त। मुरपुकीमी येसु कली डी डा चूमे बाक्त।

2 मिनू समुन्द्र आ शुडचम डोंगा निकशी तवा बाक्त। डांड रेपबपुकी डोंगा रे तोइशशा आन ग्याइली मुरना मुरन बाक्मा बाक्त।

3 मिनू डोंगा का डोंडसे बाक्त। मेको डोंगा सिमोन के बाक्माक्त। मिनू येसुमी सिमोन कली “डोंगा इक्का आइक्ची लतो” दे मदा बाक्त। मिनू मोपा डोंगाम बाक्शा मुर आन कली शेंदीमी बाक्त।

4 मिनू शेंने थुम्शा, सिमोन कली “बवाक्कु आ दातेम जाक्दीशशा, डांड रेट्या कली ग्याइली आपो” देमाक्त। यूहन्ना २१:६

5 मिनू सिमोनमी “शेंब, नाकदो रे श्येत पा ग्याइली आप्ना आप्न बाक्तक। डांड का यो मरे। मुल ‘गे आपो’ देंतीनी हना, गो आप्नुड” देमाक्त।

6 मिनू ग्याइली आबानु, शुश डांड रेशशा, ग्याइल गाक्चा गोवा बाक्त।

7 मिनू ग्याइली गाक्शी पा डांड रेशशा तशा, आ वारच आस कली “ए, एक जाक्शा, वारच पसे” दे ब्रेशशा, डोंगा निम्फा डांडम प्रिदमे बाक्त। मिनू डोंगा हेल्शा, बवाक्कुम युम्चा चिक्ता बाक्त।

8 मिनू सिमोन पत्रुसमी मो दुम्शो तशा, येसु आ डांडती पोक्च थेक्शा बाप्शा “प्रभु, गो पापी मुर नड। गे नु काथा बाक्चा मशिरनुड” देमाक्त। लूका १८:१३

9 मारदे हना सिमोन नु मेको नु बाक्ब नेल्ले मिश डा डांड रेशशा तशा, छक लाक्मा बाक्त।

10 जब्दी आ तौ याक्ब नु यूहन्ना यो छक लाक्सा बाक्त। मिनू येसुमी सिमोन कली “महिनो। मुल डा मेरे मुर रेपब दुम्नेवे” दे मदा बाक्त।

11 मिनू डोंगा गुंइशा, तोइशशा, सिमोन, याक्ब नु यूहन्ना सांफामी आन गेय नेल्ल प्रोंइशा, येसु आ नोले खोइशशा, आ शेंसीब दुम्मा बाक्त।

कोत्रर पाइब कली सापाइशशा

मती ८:१-४; मर्कूस १:४०-४५

12 मिनू काबु येसु आ शेंसीबपुकी नु सहर कामी बाक्मेनु, कोत्रर पाइब मुर का कली युमा बाक्त। मिनू मेको कोत्रर पाइबमी येसु कली तशा, आ डांडती बाप्शा “प्रभु, सापाइक्चा दाक्ताक्नी हना, आं कली सापाइक्चे चाप्नीनी” देमाक्त।

13 मिनू येसुमी कोत्रर पाइब कली थिशा “गो सापाइक्चा दाक्नुड” देमेनु, मेको कोत्रर पशो मुर सामाक्त।

14 मिनू येसुमी “एको लोत्र सुइ कली मदेंचा। चढेब आ डांडती लशा, इ साशो रां कोंइदो। मिनू मोसामी मार चढेचा माल्ब देशो बाक्मे, मेको चढेशा, साती, दे तुइक्पतो” दे माइशशा, सोइक्ता बाक्त। लेवी १४:२-३२

15 सुइ कली मदेंचा देशो बाक्त हना यो, शुश मुरुमी येसु आ पर्बम लोत्र पामे बाक्त। रागी नेल्लेम मेको लोत्र ब्रमाक्त। येसु आ लोत्र नेंचा कली नु रोइ रे साचा कली शुश मुर येसु आ बाक्तीकेम जाक्मा बाक्त।

16 तन्न येसु मेकोपुकी नु ब्राशा, सुइ मबाक्तीकेम लशा, परमप्रभु यावे कली प्रार्थना पवा बाक्त। मर्कूस १:३५

गुइ खोइल मदुक्ब कली सापाइशशा

मती ९:१-८; मर्कूस २:१-१२

17 काबु येसुमी शेंना शेंन बाक्मेनु, गालील रागी, यहूदीया रागी, नु यरूसलेम सहर रे जाक्शो फरिसी नु अरेशो लोत्र शेंबपुकी देल्शा, येसु आ नेक्था निस्समा बाक्त। परमप्रभु आ सापाइक्तीक सक्ति येसु नु बाक्माक्त।

18 मेना मुरपुकीमी आ गुइ खोइल मदुक्ब मुर का कली ब्राख्येम कुरशा चाक्मे बाक्त। चाक्बपुकीम मेको कली येसु आ डांडती चाक्दीत्त्या, दे मिम्तमे बाक्त।

19 तन्न शुश मुर देलतीके येसु आ नेक्था चाक्दीन्ने मचाप्मे बाक्त। मिनू खिं डोइशशा, साप्शो फुल्लु याक्शा, रोइ पाइब आ ब्राख्ये आ एर ओंथ डोरीम फ्रेंशा, मेको कली ओंखां पा तोक्शा, येसु आ डांडती वोदमे बाक्त।

20 मिनू येसुमी मेको आन थमा सुइक्शो तुइशशा, मेको कली “आं वारच, इ पाप क्याम्शा गेतन” दे मदा बाक्त।

21 मिनू फरिसी नु सास्त्रीपुकीमी “ओदेंशो शुक्शी लोत्र पाइब सु बाक्म? परमप्रभु यावेमी ला पाप क्याम्ने चाप्ब” दे मिम्तमे बाक्त। फरिसी रिती थिती सेल्शा, रिम्शो पचा कली कोत्रब यो बाक्शो बाक्तेक्म। सास्त्री यहूदी आन कली परमप्रभु यावे आ अरेशो लोत्र शेंब बाक्शो बाक्तेक्म। लूका ७:४९; भजन संग्रह १३०:४; यसेया ४३:२५

22 मिनू येसुमी मेको आन मिम्शो तुइशशा, मेको आन कली “मारदे इन थुंम मोदेंशो मिम्तीनी?

23 इ पाप क्याम्शा गेतन देंचा देय छुल बोक्शा, एर ओंथ हिरशा कोंइदो देंचा तेको रिम्शो बाक्बा?

24 रागीम जरमेशोमी, पाप क्याम्चा कली अधिकार तशो बाक्ब, दे गेपुकीमी यो तुइक्तीन” दे गुइ खोइल मदुक्ब कली “छुल बोक्शा, इ ब्राख्ये कुरशा, इ खिं लावो” दे मदा बाक्त। यूहन्ना ५:३६

25 मो देमेनु, मेको मुर छुल बोक्शा, आ ब्राख्ये कुरशा, परमप्रभु यावे कली ठेयब सेल्ना सेल्न आ खिं लमाक्त।

26 मेको चिन्ड तशा, मुर नेल्ले छक लाक्शा, परमप्रभु यावे कली ठेयब सेल्शा, मान पा हिंशा “डांडती गेनायो मतशो ताइतय” देमुमा बाक्त।

लेवी कली ब्रेशशा

मती ९:९-१३; मर्कूस २:१३-१७

27 मिनू मेकेर रे लशा, येसुमी तिरो पोक्ब लेवी नें पाइश्शो मुर का आ गेय पतीकेमी बाक्शो तशा “आं नोले खोइय्यी” दे मदा बाक्त।

28 मिनू मेकोमी आ गेय प्रोइशा, येसु आ नोले खोदा बाक्त।

29 मिनू लेवीमी येसु कली मान पा थुल्चा, दे जचा तूचा सेला बाक्त। मिनू मेको नु तिरो पोक्ब, आ वारच नु अरु मुर यो जथ बाक्मा बाक्त। लूका १५:१

30 मिनू फरिसी नु सास्त्रीपुकीमी मेको आन कली काथा बाक्शो तशा, आन थुं मनुथु येसु आ शेंसीब आन कली “मारदे गे तिरो पोक्ब नु पापीपुकी नु काथा बाक्शा जाइनीनी?” देमा बाक्त।

31 मिनू येसुमी मेको आन लोत्र तुइश्शा “रोइ मपाइब आन कली डाक्टर ममालनीम। तन्न रोइ पाइब आन कली डाक्टर मालनीम।

32 ठीक पाइब आन कली ब्रेथ जाक्शो मनड। तन्न पापी आन कली ‘इन थुं परमप्रभु यावे गे लेत्तीन’ दे ब्रेथ जाक्शो नड” दे माइक्मी बाक्त।

माइजा बाक्चा आ पबंम शेंशो

मती १:१४-१७; मर्कूस २:१८-२२

33 मिनू मेकोपुकीमी “यूहन्ना आ शेंसीबपुकी नु फरिसी आन शेंसीबपुकी शुश माइजा बाक्शा, प्रार्थना पाइनीम। तन्न इन शेंसीबपुकी माइजा मबाक्थु, जाइनीम तूनीम” देमा बाक्त।

34 मिनू येसुमी मेको आन कली “ग्युम्ले नु काथा बाक्मानु, जन्ती आन कली माइजा बाक्पाइक्ने चान्नीनी डा?

35 काबु ग्युम्ले लाइक्चा पुंइसीब। मेना माइजा बाक्नीम” दे माइक्मी बाक्त।

36 मिनू येसुमी मेको आन कली “सुइमी नक वा खाक्शा, माइत वाम मक्येप्नीम। मो पाम्तेक्म हना, नक वा मरिम्शो दुम्बा ममाइ? नक वा माइत वा तार क्येप्चा मगारब।

37 सुइमी माइत कुशुल के थैलोमी नक अडगुर शांबु कुर मपाइनीम। कुर पाम्तेक्म हना, नक अडगुर शांबु बोरशा थैलो बुक्ब। मिनू अडगुर शांबु क्युप्ब। मेको थैलो यो खतम दुम्ब।

38 नक शांबु नक थैलोमी कुर पचा माल्ब।

39 कशो शांबु तूशा बानी दुम्शोमी जीजी शांबु मदाक्नीम, मेकोमी ‘कशो ला ब्रोत्रब’ देब” दे कथा का देमाक्त।

## 6

नाइक्तीक नाक्ती

मती १२:१-८; मर्कूस २:२३-२८

1 मिनू काबु नाइक्तीक नाक्ती येसु नु आ शेंसीबपुकी चेरब रू लां रे पा गाक्मानु, शेंसीबपुकीमी चेरब बाला शोइश्शा, नोक्शा जामे बाक्त। लूका १३:१०-१७; लूका १४:१-६

2 मिनू फरिसीपुकीमी मेको आन कली चेरब जशो तशा “नाइक्तीक नाक्ती पचा मदुम्ब गेय, मारदे पाइनीमी?” दे आन थुं मनुथु लोत्र पामे बाक्त।

3 मिनू येसुमी “दाऊद नु आ वारचपुकी शोत्रलु बेक्मानु, मार पामे, परमप्रभु यावेमी बेक्पाइश्शो लोत्र मपढेनी? १ सामुएल २१:७

4 दोपा दाऊदमी परमप्रभु यावे आ खिंमी ओत्रशा, परमप्रभु यावे आ डोंइती कोंइतीक शोब्ले शोल्शा योक्शा जामे? मेको शोब्ले चढेबपुकीम ला जाइनीमी, ममाइ? अरु मुरपुकीमी जचा मदुम्बा, ममाइ डा?” दे माइक्मी बाक्त। लेवी २४:९

5 मिनू येसुमी “रागीम जरमेशो दा नाइक्तीक नाक्ती मार पचा, मार मपचा मेको नेल्ल देब बाक्ब” देमाक्त।

गुड सोत्रशो कली सापाइश्शो

मती १२:९-१४; मर्कूस ३:१-६

6 मिनू अर्को नाइक्तीक नाक्ती येसुम ग्युम्तीक खिंमी शेंदानु, मेकेर आ ग्युरा गुड सोत्रशो मुर का बाक्माक्त।

7 मिनू सास्त्री नु फरिसीपुकीमी “नाइक्तीक नाक्ती सापाइक्चा गेय पाइबा कों?” दे योत्रकी पा कोत्रडमे बाक्त। मारदे हना येसु कली दोस गेचा माल्शो बाक्मा बाक्त।

8 मिनू येसुमी मेको आन मिम्शो तुइश्शा, आ गुड सोत्रशो मुर कली “एक पिशा, राप्शा बाक्को” दे मदा बाक्त। मिनू मेको छुल बोक्शा राम्माक्त।

9 मिनू येसुमी योत्रकी पाइब आन कली “लोत्र का हिल्लो पाइनन्नी, नाइक्तीक नाक्ती शिशी पचा देय मरिम्शो गेय पचा? ब्रोइचा गेचा देय बेक्चा गेचा? अरेशो लोत्रम मार देबा?” दे हिल्लो पवा बाक्त।

10 मिनू मेकेर बाक्ब आन कली मिक्च मयाक्थु, कोत्रशा, गुड सोत्रशो कली “इ गुड दिंदो” दे मदा बाक्त। मिनू मेकोमी गुड दिसेनु, सामाक्त।

11 मिनू योत्रकी पाइबपुकी चुरशा “मेको कली मार पय?” दे लोत्र पमुमा बाक्त।

येसुमी आ १२ जना शेंसीब योत्रशो

मती १०:१-४; मर्कूस ३:१३-१९

12 काबु येसु डांडा का डोइश्शा, नाक्दो रे परमप्रभु यावे कली प्रार्थना पचा बाक्त। मर्कूस १:३५

13 मिनू आ दीसा नां सोव्रशा, आ नोले खोडकब आन कली गुम्शा, १२ जना आन कली योवमी बाक्त। योव्रशो आन कली “सोडशशो” दे नें वोदा बाक्त। मती १०:२-४; प्रेरित १:१३

14 मेको १२ जना सु सु बाक्मा बाक्त देशा हना, सिमोन, मेको कली पत्रुस यो देंनीम। सिमोन आ लोक्ब अन्द्रीयास, याकूब, यूहन्ना, फिलीप, बारथोलोमाइ,

15 मती, थोमास, अल्फयस आ तौ याकूब, सिमोन, मेको कली कनानी यो देंनीम,

16 याकूब आ तौ यहूदा नु इस्कारीयोत डा यहूदा बाक्मा बाक्त। इस्कारीयोत डा यहूदा चहिं नोले येसु कली साइक्चा, दे माल्ब आन कली वारच पाइब दुम्बाक्माक्त।

दिंमम शुश मुर सापाइशशो

17 मेको मुर आन कली योव्रशा, डांडा रे यिमा बाक्त। मिनू ठेयब दिंमम जाक्दीशशा बाक्मानु, येसु आ लोव्र नेंथ एर ओथ रे शुश मुर खुम्सीशा देल्मा बाक्त। मेकोपुकी यहूदीया रागी, यरूसलेम सहर, टायर नु सीदोन सहर एर ओथ रे जाक्शो बाक्मा बाक्त।

18 का निक्शी येसु आ लोव्र नेंथ जाक्मा बाक्त। का निक्शी आन रोड सापांडसीथ जाक्मा बाक्त। मिनू वोल्म तशो मुरपुकी यो जाक्शा, सामा बाक्त।

19 रोड पाइबपुकीमी येसु कली थिचा माल्मे बाक्त। मारदे हना येसु आ सक्तिम मेको नेल्ल आन रोड साबाक्मा बाक्त।

ग्येरसीने, दे शेशो

मर्कुस ५:३-१२

20 मिनू येसुमी शेंसीब आन कली कोव्रशा “गे पुडग मुर, ग्येरसीने। मारदे हना परमप्रभु यावे आ राज्य इन के बाक्ब। याकूब २:५

21 मुल जचा मतथु बाक्बपुकी, ग्येरसीने, मारदे हना परमप्रभु यावेमी इन कली रूथी जचा गेब। मुल श्येत जशा, डाकन डाकन बाक्शोपुकी, ग्येरसीने। मारदे हना नोले ग्येरसीशा बाक्चा ताइनीनी। प्रकाश ७:१६-१७

22 मुरुमी इन कली आं पर्वम काइ मदाक्थु, खेरशा हेला पामेनु, रागीम जरमेशो आ पर्वम इन कली दिप्मेनु, गे शुश ग्येरसीन। यूहन्ना १५:१८-१९

23 मेको नाक्ती थाम्पा ग्येरसीने। मारदे हना परमप्रभु यावेमी इन कली स्वर्गम इनाम गेब। इन कली श्येत गेब आन किकी पिपीमी साइ रे परमप्रभु यावे आ लोव्र पाइब आन कली यो खेदा पा श्येत गेशो बाक्तेक्म।

हिनीन, दे शेशो

24 गे शुश शोप पाइशशोपुकी, हिनीन। मारदे हना इन तशो रिम्शो नेल्ल थुम्तीनी। मती १९:२३; याकूब ५:१

25 मुल शुश जचा ताइबपुकी, हिनीन। मारदे हना नोले जचा मतथु शोव्रलु बेक्नीनी। मुल रिशशा बाक्बपुकी, हिनीन। मारदे हना नोले डाक्शा रोका पचा माल्नीनी।

26 मुल मुरपुकी रे पा मान पाइक्चा पुंडसीशोपुकी, हिनीन। मारदे हना इन किकी पिपीमी यो जोल पा परमप्रभु यावे आ लोव्र पाइब आन कली मो पाइक्बाक्तेक्म” देत।

इन कली मदाक्ब कली दाक्तीन

मती ५:३९-४८

27 मिनू “आं लोव्र नेंबपुकी, नोफा दाइशशा नेनीन, इन जोरी सत्रु आन कली दाक्तीने। इन कली काइ मदाक्ब आन कली दाक्तीने।

28 इन कली सराप चीले पाइब आन कली आसीक गेने। इन कली शुक्शी पाइब आन पर्वम परमप्रभु यावे कली पुंडदीने। १कोरिन्थी ४:१२

29 इन चोव्रचो का राक्ब आन कली अर्को चोव्रचो यो राप्चा गेने। इन दौरा लाइक्ब आन कली भोटो यो पुइशशा गेने।

30 सुइमी गे नु बाक्शो थोव्रकी पुंडतु हना, गेने। सुइमी गे नु बाक्शो थोव्रकी लाइक्तु हना, पितो, दे मपुनीन।

31 गोमी दोदेशो पचा पुंडसीचा दाक्नीनी, गे यो मुर आन कली मोदेशो पने। मती ७:१२

32 इन कली दाक्ब आन कली ला दाक्ताक्नी हना, मार रिम्शो पनी डा? पापीपुकीमी यो आंम कली दाक्ब कली दाक्नीम।

33 इन कली रिम्शो पाइब आन कली ला रिम्शो पाइतीनी हना, मार रिम्शो पनी डा? पापीपुकीमी यो रिम्शो पाइब कली रिम्शो पाइनीम।

34 इन कली थाम्ने चाप्ब आन कली ला जेर गेतीनी हना, मार रिम्शो पनी डा? पापीपुकीमी यो लेंशा ताक्चा कली मोदेशो पाइनीम। ब्यवस्था १५:५-८

35 इन जोरी सत्रु आन कली दाक्तीन। वारच पने। लेंशा ताक्चा ममिम्थु जेर गेने। मो पाइतीनी हना, गे ठेयब इनाम ताइनीनी। मिनू नेल्ल क्येडा ठेयब आ मुर दुम्नीनी। मारदे हना ‘रिम्शो पाइतीनी’ मदेंब नु आ अरेशो मटीब आन कली रिम्शो पाइब।

36 दोपा इन आफोमी शिशी पवा, मोपा गेपुकीमी यो शिशी पने” देमाक्त।

मुर आन कली मनाक्चा

मती ७:१-५

37 मिनू येसुमी “मुर आन कली मनाक्तीने। मिनू इन कली मनाक्नीम। दोस मगेने। मिनू गे यो दोस मताइनीनी। माफ गेने, मिनू गे यो माफ गेचा पुंडसीनीनी। मती ६:१४

38 अरु आन कली मार मार माल्मा, मेको गेने। हाइश्शो दुम्शा गेतीनी हना, गे यो क्युप्चा डा पा प्रिशा ताइनीनी। दोपा पुक्शा गेनी, मोपा पुक्शा ताइनीनी” दे शेंदीमी बाक्त। मर्कूस ४:२४

39 मिनु येसुमी कथा सेल्शा “मिक्च मताइबमी मिक्च मताइब कली लां कौडेने चापब डा? लांमी खाल्टा बाक्त हना, निम्फा खाल्टाम मबिक्नीसी डा? मती १५:१४

40 शेंब क्येडा शेंसीब ठेयब मनम। तन्न शेंसीबमी शुश शेंसीशा आ शेंब खोदेशो दुम्ब। मती १०:२४-२५; यूहन्ना १५:२०

41 मारदे इन लोकब आ मिक्चीम बाक्शो कसीडगर ताइनीनी। मिनु इन मिक्चीम बाक्शो मुढा चहिं मताइनीनी?

42 इन मिक्चीम मुढा बाक्त हना, दोपा इन लोकब कली ‘आं लोकब, इ मिक्चीम बाक्शो कसीडगर फेत्नुड’ देने चाप्नीनी डा? गे कपटी, डोंइती इन मिक्चीम बाक्शो मुढा फेल्टीने। मिनु मिक्च ठीक ताइब दुम्शा ला, इन लोकब आ मिक्चीम बाक्शो कसीडगर फेन्ने चाप्नीनी।

रिम्शो रवाम रिम्शो फल सिप्ब

मती १२:३३-३५

43 रिम्शो फल रवाम रिम्शो फल मसिप्ब। रिम्शो रवामी यो रिम्शो फल मसिप्ब। मती ७:१६-१८

44 फल थाम्शा, रिम्शो रवा नु रिम्शो रवा तुंडसीब। चू बोटमी फोत्रशी मसिप्ब। खुमीच आ बोटमी अडगुर मसिप्ब।

45 रिम्शो थुं पाइश्शो मुरुमी रिम्शो पाइब। पापम ब्रीशो थुं पाइश्शो मुरुमी चहिं रिम्शो पाइब। मुर आन थुंमी मार बाक्मे, मेको आन लोत्र नेशा रिम्शो देय रिम्शो मेको तुंडसीब। मारदे हना थुंम मार बाक्मे, मेको शोत्र रे यूब।

खिं रे पा शेंतीक

46 मारदे आं कली प्रभु, प्रभु, देंनीनी। तन्न आं देंशो मटीनीनी? मलाकी १:६; मती ७:२१

47 सुम आं लोत्र नेशा टीबा, मेको दोदेशो मुर दुम्बा, मेको गो इन कली माडक्नन्नी।

48 मेकोमी खिं सेलानु, जग दोशा, सेरथे फुल्लु तारी सेल्ब। मिनु रेउ थिशा भोल यिमेनु, मेको खिं मब्रेप्ब। मारदे हना जग बोल्यो पा सेल्शो बाक्ब।

49 सुमी आं लोत्र नेशा मपाइबा, मेकोमी खिं सेलानु, जग मदोथु सेल्ब। मिनु रेउ यिमेनु, मेको खिं नेल्ल ब्रेशशा भोलम योल्ब” दे शेंदीमी बाक्त।

## 7

कप्तान आ गेय पाइब सापाइश्शो

मती ८:५-१३; यूहन्ना ४:४६-५३

1 मिनु लोत्र शेंने थुम्शा, मेकेर रे लशा, कापेरनाउम सहरम जाक्दीम्माक्त।

2 मेकेर रोमी कप्तान का बाक्माक्त। मेको आ दाक्शो वाइल का रोइ पा बेक्चशो बाक्माक्त।

3 मिनु मेको कप्तानमी येसु आ पबंम लोत्र पशो नेशा, यहूदी आन जोक्ब तुइक्ब खाल्पा आन कली येसु ब्रथ सोइक्तीमी बाक्त। मेको आन कली “येसु एक पिशा, ‘आं वाइल कली सापतीन’ दे पुनीने” देमाक्त।

4 मिनु मेकोपुकी येसु आ बाक्तीकेम जाक्शा, येसु कली “मेको कप्तान कली वारच पचा कली शिरशो बाक्ब।

5 मारदे हना मेकोमी यहूदी इं कली दाक्ब। मिनु इं युम्तीक खिं यो सेल्पाइक्तु” दे येसु कली देमा बाक्त।

6 मिनु येसु मेकोपुकी नु लमाक्त। मिनु कप्तान आ खिं आ नेक्था जाक्दीम्मेनु, कप्तानमी आ वारच आन कली येसु कली लोत्र पथ सोइक्ता बाक्त। मेकोपुकीमी येसु कली “प्रभु, श्येत मपने। गो इन कली आं खिंम ओइचा मशिरनुड।

7 मोपतीके गो इन कली युम्थ मपिड। गे सापाइक्तीक लोत्र का ला पने। मिनु आं वाइल साब।

8 गो यो अधिकार पाइश्शो मुर बाक्नुड। लडाइ पाइबपुकीम आं कली टीनीम। गो का कली ‘लावो’ देंती हना, मेको लाइब। मिनु अर्को कली ‘पिवो’ देंती हना, पीब। आं वाइल कली ‘मेको गेय पावो’ देंती हना, मेकोमी पाइब” दे माइक्थ सोइक्ता बाक्त।

9 मिनु येसुमी मेको लोत्र नेशा छक लाक्माक्त। मिनु आ नोले खोइक्ब आन कली हिरशा कोत्रशा “गो इस्राएली आन दातेमी मेको कप्तान खोदेशो थमा सुइक्ब मुर सुइ मतडमी” देमाक्त।

10 मिनु मेको सोइश्शो मुर खिं लेशशा जाक्मानु, वाइल साने थुम्शो तामे बाक्त।

बेक्शो मुर कली सेंपाइश्शो

11 इक्का नाक्त नोले येसु नाइन सहर गे लमाक्त। आ शेंसीबपुकी नु शुश मुर यो मेको नु लमा बाक्त।

12 मिनु सहर डा ठेयब लाप्चो आ नेक्था जाक्दीम्मानु, मुरपुकीमी बेक्शो मुर का कुरशा पिशो तामे बाक्त। मेको वोंइश बेक्शो मीश मुर आ कांडचीक तौ बाक्माक्त। मेको मीश मुर नु सहर डा शुश मुर मलामी लशो बाक्मा बाक्त।

13 मिनु येसुमी मेको कली तशा, शिशी पा “मडाक्को” देमाक्त।

14 मिनु बेक्शो मुर कुरशो पला थिवानु, कुरबपुकी खा दिक्मा बाक्त। मिनु मेकोमी “ए टिटा, गो इ कली सेंसीशा बोक्को देंनुड” देमाक्त। मर्कूस ५:४१

15 मिनु बेक्शो मुर बोक्शा निश्शा, लोत्र पचा गोवा बाक्त। मोपा सेंपाइश्शा, आ ममा कली गेवा बाक्त। १ राजा १७:२३; २ राजा ४:३६

16 मिनु मुरपुकी मोदेशो दुम्शो तशा, हिंमा बाक्त। मिनु मेकोपुकीमी परमप्रभु यावे कली ठेयब सेल्शा “इं दातेमी परमप्रभु यावे आ लोत्र पा छक लाक्चा डा गेय पाइब का यूमाक्त। परमप्रभु यावेम इं कली थमा पा शिशी पाइक्बाक्त” देमा बाक्त। मती १६:१४; लूका १:६८

17 मिनू यहूदीया नु एर ओंथ डा रागी नेल्लेमी मेको लोत्र ब्रमाक्त।

यूहन्नामी दल्गीर पशो

मती ११:२-६

18 मिनू यूहन्ना आ शेंसीबपुकीमी यो मेको लोत्र नेंशा, यूहन्ना कली शेंदमे बाक्त। मिनू यूहन्नामी आ शेंसीब निक्शी आस कली ब्रेशशा

19 “जाक्चा माल्लो गेन ननी देय अर्को आ लां कोत्रक? दे प्रभु कली हिल्लो पथ लसे” दे सोइक्तीम्सी बाक्त।

20 मिनू मेको निक्शी येसु आ बाक्तीके जाक्शा “ब्वाक्कुम खुम्शा गुंडब यूहन्नामी सोइश्शो मुर नस्कु। जाक्चा माल्लो गेन ननी देय अर्को आ लां कोत्रक? दे हिल्लो पथ सोइक्ताक्स्की” देसा बाक्त।

21 मेको निक्शी जाक्सानु, येसुमी शुश रोड पाइब मुर आन कली सापाइक्ना पाइक्न बाक्शो बाक्माक्त। बेक्चा डा रोड पशो, वोल्म सुम्शो मुर आन वोल् खेरना खेरन बाक्माक्त। मिक्च मताइब आन कली मिक्च तपाइक्ना पाइक्न बाक्माक्त।

22 मिनू येसुमी यूहन्ना आ शेंसीब आस कली “मार मार तसी, मार मार नेंसी, मेको नेल्ल यूहन्ना कली मतीसे। मिक्च मताइब मिक्च ताइबाक्तेक्म। खोइल मटुक्ब गाक्बाक्तेक्म। कोत्र पाइब साबाक्तेक्म। नोफा मनेबम नेंबाक्तेक्म। बेक्शो मुर बेक्शो रे सेंसीशा ब्रोंडबाक्तेक्म। मिनू महिक्सीशो मुरपुकी ग्येरपाइक्ब लोत्र नेंपांइसीबाक्तेक्म।

23 सु सुमी आं कली तशा, आन थुं मखाइक्पाइक्नीमी, दल्गीर मपाइनीमी, मेको ग्येरसमल, दे मतीसे” दे सोइक्तीम्सी बाक्त।

यूहन्ना आ पर्वम शेंशो

मती ११:७-१९

24 मिनू यूहन्नामी सोइश्शो मुर गाक्सा नोले, येसुमी मुर आन कली यूहन्ना आ पर्वम “साइ गोरशो रागीमी मार कोत्रथ लनी? फशेम हिम्शो किन्दा कोत्रथ लनी?

25 दारशो वा फेक्शो मुर तांइसीबा कों, दे कोत्रथ लनी? दारदारशो वा फेक्शो नु शोंप पाइश्शो मुर पिप आन बाक्तीकेमी बाक्नीम।

26 मार कोत्रथ लनी, मिनू? परमप्रभु यावे आ लोत्र पाइब तांइसीबा कों, दे कोत्रथ लनी? गे परमप्रभु यावे आ लोत्र पाइब नेल्ल आन क्येडा ठेयब मुर ताइतीनी। लूका १:७६

27 परमप्रभु यावेमी ब्रेक्पाइश्शो लोत्रमी मेको आ पर्वम ‘गो आं लोत्र कुरब इ डोंडोंइती सोइक्नुड। मेकोमी इ लां ठीक सेल्व’ दे ब्रेक्शो बाक्ब। मलाकी ३:१

28 रागी नेल्लेम यूहन्ना खोदेशो ठेयब सुइ मबाक्ब। परमप्रभु यावे आ राज्यमी नेल्ल क्येडा आइक्च चहिं यूहन्ना क्येडा ठेयब बाक्ब” दे शेंदीमी बाक्त। लूका १:१५

29 आ लोत्र नेंबपुकी नु तिरो पोक्ब का निक्शीमी डोंइती यूहन्ना आ लोत्र नेंशा “परमप्रभु यावे आ देशो ठीक बाक्माक्त” दे मिम्तमे बाक्त। मारदे हना मेको ब्वाक्कुम खुम्शा गुंडपांइसीशो बाक्मा बाक्त। लूका ३:७,१२; मती २१:३२

30 फरिसी नु सास्त्रीपुकीमी चहिं यूहन्ना आ लोत्र नेंशा “ब्वाक्कुम मखुम्पांइसीनीकी” दे परमप्रभु यावे कली थमा मसुइक्थु बाक्मा बाक्त। मेकोपुकीमी परमप्रभु आ पावो, दे देशो लोत्र मपामे बाक्त। प्रेरित १३:४६

31 मेको आन कली येसुमी “एको पाला डा मुर दोदेशो नु सु खोदेशो नमी?

32 मेकोपुकी बजारम बाक्ब आलपुकी खोदेशो बाक्नीमी। हुल कामी अर्को हुल कली ‘गो बासुरी ताप्कानु, गे सिल मपनी। गो हिशेक पा डाक्कानु, गे मडाक्नी’ दे ब्रेम्मुइनीम।

33 यूहन्नामी माइजा बाक्शा, शांबु राकसी मतूडानु ‘वोल्म सुम्शो बाक्माक्त’ दे मरिम्शो सुइक्तीनी। मती ३:४

34 रागीम जरमेशोमी चहिं जचा तूचा थोत्रकी नेल्ल जाइब तूब। मेको कली तशा ‘धोक्त्रे, शांबु राकसीमी दुक्ब, क्येट पोक्ब नु पापी आन वारच बाक्माक्त’ देसा, मरिम्शो सुइक्तीनी। लूका १५:२

35 परमप्रभु यावे आ तुइक्तीके आ नोले खोइक्बम ला तुइक्ने चाप्नीम” दे माइक्मी बाक्त। १कोरिन्थी १:२४-३०

येसुमी फरिसी आ खिम जशो

36 काबु फरिसी कामी येसु कली खमे जथ ब्रेत्ता बाक्त। मिनू येसु मेको आ खिम लशा, खमे जचा कली निस्से बाक्त। लूका ११:३

37 मिनू सहर डा मीश मुर का यो बाक्माक्त। मेको तेल्लेम बाक्माक्त। मेकोमी येसु मेको फरिसी आ खिमी जाक्शो बाक्ब, दे नेंशा, ब्रोंडशो रिना पाइश्शो तेल कुरशा, जाक्माक्त। मर्कूस १४:३

38 मेको येसु आ खोइलीम बाक्शा डाक्माक्त। मिनू आ प्रेक्कुम येसु आ खोइल जिप्पाइश्शा, आ चांमी फिक्गा बाक्त। मिनू आ खोइल पुक्पु पा मेको तेल खेक्ता बाक्त।

39 मिनू फरिसीमी मो पशो तशा “येसु परमप्रभु यावे आ लोत्र पाइब बाक्त हना, आ कली थीब मीश मुर दोदेशो बाक्म, दे तुइक्त वा। मारदे हना पापी बाक्ब” दे मिम्ता बाक्त।

40 मिनू येसुमी फरिसी कली “ए सिमोन, गो इ कली लोत्र का पाइनुड” देमाक्त। मिनू मेकोमी “शेंब, मार देंनीनी?” देमेनु

41 येसुमी “साइ होत्रप का के जेर लाइक्ब मुर निक्शी बाक्सा बाक्त। कामी ५ सहे देनार जेर थुइश्शो बाक्माक्त। कामी ५० देनार जेर थुइश्शो बाक्माक्त। इस्राएल डा क्येट देनार का नाक्त का डा गाल्च बाक्त।

42 मिनू निम्फामी थाप्ने मचाप्सेनु, होत्रपमी निम्फा आस कली प्रोंइदीम्सी बाक्त। मुल तेकोमी होत्रप कली शुश दाक्बा?” दे हिल्लो पवा बाक्त।



- 43 मिनू सिमोनमी “शुश जेर थुइशशोमी शुश दाक्व, दे मिम्ताक्ड” देंमाक्त। मिनू येसुमी “ठीक देंते” देंशा,  
 44 मीश मुर कली कोव्रशा, सिमोन कली “एको मीश मुर कली तवी? गो इ खिमी जाक्डानु, आं खोइल चिक्या कली  
 ब्वाक्कु मगेयी। एकोमी दा आं खोइल आ प्रेक्कुम जिप्पाइशशा, आ चांमी फिक्तु। उत्पती १८:४  
 45 गो जाक्डानु, आं कली मुष्ठा पुक्कु मपाइय्यी। एकोमी दा इ खिमं बाक्डा रे आं खोइल पुक्कु पना पन बाक्व। रोमी  
 १६:१६  
 46 गेमी आं पियाम तेल मखेक्ती। एकोमी दा आं खोइलीम तेल खेक्ताक्यी।  
 47 मोपतीके एको के शुश पाप नेल्ल क्याम्साक्व। मारदे हना एकोमी शुश आ दाक्तीके कोइताक्व। सु के पाप इक्का  
 ला क्याम्से, मेकोमी इक्का ला दाक्व” दे मदा बाक्त।  
 48 मिनू मीश मुर कली “इ पाप क्याम्साक्व” दे मदा बाक्त।  
 49 मिनू येसु नु काथा जाइबपुकीमी “पाप क्याम्से चाप्ब, एको सु बाक्म माइ?” देंमुमा बाक्त। लूका ५:२१  
 50 मिनू येसुमी मीश मुर कली “इ थमा सुइशशोमी पाप रे ब्रोंइते। इ थुं नाइशशा ग्येरशा बाक्को” देंशा सोइक्ता बाक्त।  
 लूका ८:४८; लूका १७:१९; लूका १८:४२

## 8

येसु नु गाक्शा, वारच पाइबपुकी

- 1 मिनू नाक्त का निक्शी नोले येसु सहर सहर, गाउं गाउं हिरशा, परमप्रभु यावे आ राज्य डा ग्येरपाइक्व लोव्र शेंना शेंन  
 गाक्माक्त। मेको नु आ १२ जना शेंसीब यो बाक्मा बाक्त।  
 2 मेको नु मीश मुर का निक्शी यो बाक्मा बाक्त। मेको वोल गुंइशो नु रोइ रे साशो बाक्मा बाक्त। मेको आन दातेमी  
 माग्दाला डा मरीयम बाक्माक्त। येसुमी मेको रे पा ७ ओटा वोल गुंइशो बाक्माक्त। यूहन्ना २०:१,११-१८  
 3 का हेरोद आ गेय पाइब कूजा आ मीश योअन्ना बाक्माक्त। का सुसन्ना बाक्माक्त। मिनू अरु मीश मुरपुकी यो  
 बाक्मा बाक्त। मेको मीश मुरपुकीमी आन बाक्शो थोव्रक रे येसु नु आ शेंसीब आन कली मार मार माल्मा, मेको गेशा,  
 वारच पाइक्बाक्मा बाक्त। मर्कूस १५:४०-४१

वांचेर शोक्शो कथा

मती १३:१-९; मर्कूस ४:१-९

- 4 मिनू सहर सहर, गाउं गाउं रे शुश मुर जाक्शा, येसु आ बाक्तीकेम देल्मानु, मेकोमी कथा सेल्शा शेंदीमी बाक्त  
 5 “मुर का वांचेर शोक्थ लमाक्त। मिनू ब्वारानु, गेडा का निक्शी लांमी जुक्तमे बाक्त। मिनू मुर गाक्मानु, दिम्दमे  
 बाक्त। मिनू चिक्बीम गुष्ठा जामे बाक्त।  
 6 का निक्शी ग्याडग्रो खपम जुक्तमे बाक्त। मिनू वामा चोटी सिकशो नु खप मतथु सोव्रशा बेक्मा बाक्त।  
 7 का निक्शी चू घारीम जुक्तमे बाक्त। मिनू चूम सुम्शा, कोल्चा मगेवा बाक्त।  
 8 मिनू का निक्शी रिम्शो खपीम जुक्शा वामा बाक्त। मिनू शुश ग्रेल्शा, गेडा का के सहे का गेडा सिम्मा बाक्त” दे शेंशा  
 टेयब सेंदा पा “सु के नोफा बाक्मे, मेकोमी नेनल” देंमाक्त।

कथा आ अर्थ हिल्लो पशो

मती १३:१०-१७; मर्कूस ४:१०-१२

- 9 मिनू नोले आ शेंसीबपुकीमी “एको कथा आ अर्थ मार बाक्बा?” दे हिल्लो पामेनु,  
 10 येसुमी “इन कली परमप्रभु यावे आ राज्य आ पर्वम खुइशशो लोव्र रुप्तीक थुं गेशो बाक्व। अरु आन कली चहिं  
 कथा सेल्शा शेंनुडमी। मिनू कोव्रशा यो मतामेक्ल, नेंशा यो मरुप्मेक्ल। यसैया ६:९-१०

कथा आ अर्थ शेंशो

मती १३:१८-२३; मर्कूस ४:१३-२०

- 11 आं देंशो कथा आ अर्थ मार बाक्व देंशा हना, मेको वांचेर परमप्रभु यावे आ लोव्र बाक्व।  
 12 लांमी जुक्शो गेडा देंशो मुरपुकीमी परमप्रभु यावे आ लोव्र नेंनीम। तन्न सैतानमी मेको लोव्र प्रेंपाइक्व। मोपा थमा  
 मसुइक्नीम। मिनू पाप रे ब्रोंइचा मताइनीम।  
 13 ग्याडग्रो खपीम जुक्शो देंशो मुरपुकीमी परमप्रभु यावे आ लोव्र नेंशा, बिशशा ग्येरसीनीम। तन्न शाक्श थोक्चा मतथु  
 शुश मलीथु, थुं थाम्चा पुंडसमानु, थमा सुइक्चा प्रोंइनीम।  
 14 चू घारीम जुक्शो देंशो मुरपुकीमी परमप्रभु यावे आ लोव्र नेंशा, थुंम वोइक्नीम। तन्न नोले ‘मार जचा, मार फेक्चा,  
 दोपा शोप पाइशशो दुम्चा? दोपा गेय मपथु ग्येरशा बाक्चा तचा’ दे मिम्शा, परमप्रभु यावे आ लोव्र कली सिक्चा मगेनीम।  
 15 रिम्शो खपीम जुक्शो देंशो मुरपुकीमी परमप्रभु यावे आ लोव्र नेंशा, आन रिम्शो थुंमी वोइशशा, मिम्शा बाक्मानु, मेको  
 लोव्र आन थुंमी सिक्व। प्रेरित १६:१४

बती आ पर्वम शेंशो

मर्कूस ४:२१-२५

- 16 सुइमी बती दाशा सुम्शा मवोइक्नीम। खाट आगाम यो मखुइक्नीम। खिं ओव्रब आन कली हाम्सो दुम्ल, दे नेल्लेम  
 ततीकेम वोइक्नीम। मती ५:१५

17 मूल खुडशशो मारेड मारेड नेल्ल नोले तांडसीब। खुडशशो लोत्र बाक्त हना यो, नोले नेल्लेम तुडक्नीम। मत्ती १०:२६; १कोरिन्थी ४:५

18 होस पा, रिम्शो पा नेनीन। मारदे हना रुप्बमी तेम्शा रुप्पाइक्का पुंडसीब, मरुप्बम चहिं इक्का खोड रुप्शो यो, रोडशशा लाइक्का पुंडसीब” दे शेंदीमी बाक्त। मत्ती २५:२९

येसु आ खिं डा मुर

मत्ती १२:४६-५०; मर्कूस ३:३१-३५

19 काबु येसु आ ममा नु आ लोकब जाक्मा बाक्त। तन्न शुश मुर देल्लतीके येसु कली गुम्चा मतामे बाक्त।

20 मिनु मुर कामी “इन ममा नु इन लोकब इन कली गुम्थ जाक्शा, लाडगाम रिम्शा बाक्नीम” देमाक्त।

21 मिनु येसुमी “परमप्रभु यावे आ लोत्र नेंशा, टीबपुकी कका थमा डा आं ममा नु लोकब नम” दे माइक्मी बाक्त।

फश गिवार तेक्शो

मत्ती ८:२३-२७; मर्कूस ४:३५-४१

22 काबु येसु नु आ शेंसीबपुकी डोंगाम डोइशशा “समुन्द्र शोकशा, आइक्की हांबु लय” दे लचा गोत्रमे बाक्त।

23 मिनु मोपा लमानु, येसु निन्द्रा पवा बाक्त। मिनु फश गिवार पचा गोवा बाक्त। मिनु डोंगामी ब्वाक्कु ओत्रशा, डोंगा गुम्चवा बाक्त।

24 मोपतीके शेंसीबपुकीम येसु कली पोक्शा “शेंब, शेंब! मुल बेक्चांडतय, है” दे हिंशा खिंखि पा देमा बाक्त। मिनु येसु बोक्शा, फश गिवार नु छाल कली हुडक्ता बाक्त। मिनु फश गिवार नाइशशा ब्वाक्कु यो खा दिक्माक्त। मिनु सिक्सी दुम्माक्त।

25 मिनु शेंसीब आन कली “इन थमा सुइक्तीक ते लम?” देमाक्त। मेकोपुकी चहिं हिंशा, छक लाक्शा “फश गिवार नु ब्वाक्कुमी यो आ लोत्र टीबाक्तेक्म, एको सु बाक्म माइ?” दे लोत्र पमुमा बाक्त।

फौज माइशशो वोल कली गुंडशो

मत्ती ८:२८-३४; मर्कूस ५:१-२०

26 मिनु समुन्द्र शोकशा, गेरासीनी आन रागी जाक्दीम्मा बाक्त। गेरासीनी आन रागी चहिं गालील रागी क्येडा आइक्की हांबुम बाक्माक्त।

27 मिनु जाक्दीशशा, डोंगा रे तोंडसामानु, वोलम सुम्शो मुर का सहर रे पिशा, येसु आ डोंइती जाक्माक्त। मेको मुर वोलम सुमा रे शिन्ना गाक्शा, खिंमी मबाक्थु, बेक्शो मुर वोइक्तीकेमी बाक्शो बाक्माक्त। मोपा बाक्शो शुश बर्स दुम्शो बाक्माक्त।

28 मेकोमी येसु कली तशा, वाड ब्रेशशा, आ डोंइती बाप्शा, ठेयब सेंदा पा “येसु, नेल्ल क्येडा ठेयब, आ तौ, गो मार पमुया डा? श्येत मगेयीनी, दे सेउ पाइनन्नी” देमाक्त।

29 मारदे हना येसुमी ग्रान्रा दिचा डा वोल कली “गूडो” दे माइशशो बाक्माक्त। डोंइती शुश खेयप वोलम मेको मुर कली सुमानु, मुरपुकीमी साडलोम पाइशशा चोक्शा वोइशशा बाक्मा बाक्त। तन्न वोलम साडलो पुइक्पाइशशा, गोरशो रागीम चाक्दीशशो बाक्माक्त।

30 मिनु मेको येसु आ डोंइती बाप्शा बाक्मेनु, येसुमी वोल कली “इ नें मारम?” दे हिल्लो पवानु, मेकोमी “फौज” देमाक्त। मारदे हना मेको मुर आ रांमी शुश वोल ओत्रशो बाक्मा बाक्त।

31 मिनु वोलपुकीम “आंड कली नरकम मसोइक्तीकी” दे पुन्मे बाक्त।

32 मेको डांडामी शुश पोत्र जोना जोन बाक्शो बाक्मा बाक्त। मिनु वोलपुकीमी “मेको पोत्र आन रांम ओत्रचा गेकी” दे पुन्मे बाक्त। मिनु येसुमी ओत्रचा गेमी बाक्त।

33 मिनु वोलपुकी मुर रे गूशा, पोत्रमी ओत्रमानु, पोत्र नेल्ल गशा रोंगु रे दोरशा थिश्शा समुन्द्रम प्रेक्ना प्रेक्न बेक्मा बाक्त।

34 मिनु पोत्र योत्रबपुकीमी मो दुम्शो तशा प्रोक्शा, सहर नु सहर आ एर ओथ नेल्ल मेको लोत्र शोत्रडमे बाक्त।

35 मिनु मुरपुकी मार दुम्मे, दे कोत्रथ जाक्मा बाक्त। मिनु येसु आ नेक्था वोल गूशो मुर वा फेक्शा, आ गशो थुं साशा, येसु नु निश्शो तशा, हिंमा बाक्त।

36 वोलम सुम्शो मुर दोपा सामे, मेको ताइबपुकीमी जाक्ब आन कली मार मार दुम्मे, मेको नेल्ल शेंदमे बाक्त।

37 मिनु गेरासीन रागीम बाक्बपुकीमी येसु कली “आंड रागीम मबाक्कीन, लने” दे पुन्मे बाक्त। मारदे हना थाम्पा हिंमा बाक्त। मिनु येसु डोंगा डोइशशा लेम्माक्त।

38 मिनु डोंगा डोइशशा लचवानु, वोल गुंडचा पुंडसीशो मुरुमी “गे नु लचा गेयीनी” दे पुना बाक्त।

39 तन्न येसुमी “इ खिंम लशा, इ मुर आन कली परमप्रभु यावेमी इ कली दोदेशो रिम्शो पवा, मेको तुडक्पतो” दे सोइक्ता बाक्त। मिनु मेको लशा, आ खिंमी ला ममाड, सहर डा मुर नेल्ल आन कली येसुमी दोदेशो रिम्शो पवा, मेको तुडक्पदा बाक्त।

याइरस आ तमी साशो

मत्ती ९:१८-२६; मर्कूस ५:२१-४३

40 मिनु येसु लेशशा जाक्मेनु, शुश मुरुमी येसु कली रिम्शा बाक्शो बाक्मा बाक्त।

41 मिनु मेकेर याइरस माइशशो गुम्तीक खिं डा ठेयब मुर का येसु आ डोंइती पोक्क थेक्शा बाप्शा “आं तमी बेक्चा चिक्ताक्व। आं खिं लय” दे सेउ पा पुना बाक्त।

- 42 मेको के १२ बर्स जाक्दीशो तमी का ला बाक्माक्त। मिनु मेको रोड पा बेक्चशो बाक्माक्त। मिनु येसु लमेनु, हुल डा मुरपुकीमी येसु कली डी डा चूमे बाक्त।
- 43 मेको हुलमी १२ बर्स रे हुश याप्शा रोड पशो मीश मुर का बाक्माक्त। मेकोमी ओरुली पा आ बाक्शो नेल्ल थुम्शो बाक्माक्त। तन्न सुइमी मेको कली आ रोड सापाइक्ने मचाप्शो बाक्मा बाक्त।
- 44 मिनु मेकोमी येसु आ नोले जाक्शा, येसु आ फेक्शो वा थिवा बाक्त। मिनु आ हुश याप्चा दिक्माक्त।
- 45 मिनु येसुमी “सुमी थियी?” दे हिल्लो पवानु, नेल्लेमी “गो मथिड, गो मथिड” देमा बाक्त। मिनु पत्रुसमी “शेंब, मुरपुकीमी हुल पा नेम्मुइनीम, चुमुइनीम। मिनु मार पचा?” देमाक्त।
- 46 येसुमी चहि “मुर कामी आं कली थिती। मारदे हना आं सक्ति लशो तुइक्ताक्ड” देमाक्त।
- 47 मिनु मेको मीश मुरुमी खुइक्ने मचाप्नुड, दे मिम्शा हिंशा खिंखि पना पन येसु आ डोंइती बाक्माक्त। मिनु मेकोमी येसु कली मारदे थिवा चोटीन दोपा सामे, मेको लोत्र नेल्ल मुर आन डोंइती शोत्रडा बाक्त।
- 48 मिनु येसुमी “आं तमी, इ थमा सुइशोमी साते। इ थुं नाइशशा लावो” दे सोडक्ता बाक्त। लूका ७:५०
- 49 येसुमी मेको मीश मुर नु लोत्र पवानु, याइरस आ खिं डा मुर का जाक्शा, याइरस कली “शेंब कली श्येत मगेने। इन तमी बेक्त” देमाक्त।
- 50 येसुमी मेको मुर आ लोत्र नेंशा, याइरस कली “महिनो। थमा सुइक्ना सुइक्न बाक्को। इ तमी साब” देमाक्त।
- 51 मिनु खिंमी जाक्दीशशा, येसुमी पत्रुस, याकूब, यूहन्ना नु आल आ आम आफ आन कली ला लाइशशा आगा ओत्रमा बाक्त। मत्ती १७:१
- 52 मेकेर बाक्ब नेल्ल हिशेक पा डाक्शो बाक्मा बाक्त। मिनु येसुमी मेको आन कली “मडाक्कीन, आल मबेक्शो बाक्ब। मेको इप्शो बाक्ब” देमाक्त। लूका ७:१३
- 53 मेकेर बाक्बपुकीमी आल बेक्ने थुम्शो बाक्ब, दे तुइशशा “एको मार लोत्र पवा?” दे शुक्शी पामे बाक्त।
- 54 मिनु येसुमी आल कली गुडम ग्याइशशा “ए आल, सेसो” देमाक्त।
- 55 मो मदानु आ सोक्त लेशशा छुल बोक्माक्त। मिनु येसुमी “मेको आल कली इक्का जचा गेने” दे माइक्मी बाक्त।
- 56 मेको तशा, आल आ आम आफ छक लाक्सा बाक्त। मिनु येसुमी “एको लोत्र सुइ आन कली मशेंदीसे” दे माइक्सी बाक्त। लूका ५:१४; मर्कूस ७:३६

## 9

शेंसीब आन कली सोइशशा

मत्ती १०:१, ५-१४; मर्कूस ६:७-१३

- 1 मिनु काबु येसुमी आ १२ जना शेंसीब आन कली खुप्शा, वोल आन कली गुंइतीक नु रोड पशो मुर आन कली सापाइक्ती सक्ति नु अधिकार गेमी बाक्त। लूका १०:१-१२
- 2 मिनु मेको आन कली परमप्रभु यावे आ राज्य डा लोत्र शेंथ नु रोड पाइब आन कली सापाइक्थ सोइक्तीमी बाक्त।
- 3 मिनु लचामेनु, येसुमी मेको आन कली “कोक्के, झोला, जचा थोत्रक, क्येट मारेड मलाइक्का। फेक्तीक यो मकुरसीचा।
- 4 मिनु तेको खिंमी ओत्रनी, मेको खिंमी गाक्ची मजाक्म सम्म बाक्कीन।
- 5 दोकका पा मुरपुकीमी इन कली बाक्चा मगंतेक्म हना, मेको सहर रे गाक्ची ना इन खोइल डा फुरकु थुर थुर पा ताइशशा गाक्कीन। मेको, मेको आन पर्वम चिन्ड दुम्ब” दे माइशशा सोइक्तीमी बाक्त।
- 6 मिनु लशा, गाउं गाउं, सहर सहरम परमप्रभु यावे आ राज्य आ पर्वम शेंना शेंन, रोड पाइब आन कली सापाइक्ना पाइक्न हिरसमा बाक्त।
- हेरोदमी येसु कली गुम्चा दाक्शो
- मत्ती १४:१-२; मर्कूस ६:१४-१६
- 7 मिनु सासन पाइब हेरोदमी मेको लोत्र नेल्ल नेंशा, छक लाक्माक्त। मारदे हना मुर का निक्शीमी “ब्वाक्कुम खुम्शा गुंइब यूहन्ना बेक्शो रे सेसे बाक्त” देबाक्मा बाक्त।
- 8 का निक्शीमी “एको एलीया बाक्माक्त थां का” देबाक्मा बाक्त। का निक्शीमी “साइ डा परमप्रभु यावे आ लोत्र पाइब का बेक्शो रे सेसे बाक्त” देमा बाक्त।
- 9 मिनु हेरोदमी “गो यूहन्ना आ पिया क्योरपाइक्ता। तन्न एको सु का आ पर्वम लोत्र नेंनु?” दे मेको कली गुम्चा दाक्ता बाक्त। लूका २१:८

येसुम ५ हजार आन कली थुल्शो

मत्ती १४:१३-२१; मर्कूस ६:३१-४४; यूहन्ना ६:१-१३

- 10 मिनु येसु आ सोइशशापुकी येसु आ बाक्तीके लेम्मा बाक्त। मिनु मार मार पामे, दो दो पामे, मेको नेल्ल शोत्रडमे बाक्त। मिनु येसुमी मेको आन कली बेथसैदा सहरम लाइक्मी बाक्त।
- 11 मिनु मुरपुकीम “येसु नु आ शेंसीब मेक लाम्तेक्म” दे तुइशशा, आन नोले खोइशशा लशा थित्मे बाक्त। मिनु येसुमी मेको आन कली बाक्चा गेशा, परमप्रभु यावे आ राज्य डा लोत्र शेंशा, रोड पाइब आन कली सापाइक्मी बाक्त।
- 12 मिनु नां रिक्चावानु, आ १२ जना शेंसीबपुकीम “मुर आन कली सोइक्तीन। मिनु मेकोपुकी गाउं मेर लशा, जचा तूचा ताइनीम, बास यो थितीन। मारदे हना एकेर सुइ मुर मबाक्नीम” दे मदमे बाक्त।

13 मिनू येसुमी “गेपुकीमी एको आन कली जचा गेने” दे माइक्मी बाक्त। मिनू शेंसीबपुकीमी “इं के ५ ओटा शोब्ले नु डांड निक्शी ला बाक्ब। सहर लशा, जचा थोत्रक ग्याप्शा नेल्ल आन कली थुल्चा देंनी?” देंमा बाक्त।

14 मेकर देशो वोंडश मुर ला ५ हजार बाक्मा बाक्त। मिनू येसुमी शेंसीब आन कली “मुर आन कली ५०, ५० जना पा निप्पतीन” देंमाक्त।

15 मिनू मेकोपुकीमी निप्पदमे बाक्त।

16 मिनू येसुमी ५ ओटा शोब्ले नु डांड निक्शी शेशा, सरीड गे कोव्रशा “गे रिम्शो पाडब बाक्नीनी” दे आसीक गेशा जिव्शा, शेंसीब आन कली योक्चा गेमी बाक्त।

17 मिनू नेल्लेमी रूथ्री जामे बाक्त। जशा हेंशो खुप्तमेनु, १२ डालो दुम्माक्त।

पत्रुसमी “ख्रीस्त ननी” देशो

मत्ती १६:१३-१९; मर्कूस ८:२७-२९; यूहन्ना ६:६७-६९

18 मिनू काबु आ शेंसीबपुकी नु बाक्शा प्रार्थना पा, येसुमी “मुरपुकीमी आं पर्वम मार देंनीमी?” दे हिल्लो पवा बाक्त।

19 मिनू मेकोपुकीमी “का निक्शीमी ब्वाक्कुम खुम्शा गुंडब यूहन्ना, का निक्शीमी एलीया, का निक्शीमी साइ नेसी डा परमप्रभु यावे आ लोत्र पाडब का बेक्शो रे सेंसे बाक्त देंनीम” देंमा बाक्त। लूका ९:८

20 मिनू येसुमी “गेपुकी चहिं आं कली सु मिम्नीनी?” देंमेनु, पत्रुसमी “गे परमप्रभु यावे आ सोइश्शो ख्रीस्त ननी” देंमाक्त।

21 मिनू येसुमी “एको लोत्र सुइ आन कली मशेंदीने” दे अरेमी बाक्त।

ख्रीस्तम “श्येत जचा माल्नुड” देशो

मत्ती १६:२०-२१; मर्कूस ८:३०-३१

22 येसुमी “रागीम जरमेशोमी शुश श्येत जचा माल्ब। जोक्ब तुडक्ब खाल्पापुकी, ठेयब चढेबपुकी नु सास्त्रीपुकीमी मेको कली मब्रथु साइक्पाडक्नीम। मिनू बेक्शो आ नित्थ नाक्ती सेंसीब” दे शेंदीमी बाक्त। लूका ९:४४-४५; लूका १८:३१-३४

आ नोले खोइक्ब “श्येत जाइनीम” देशो

मत्ती १६:२४-२८; मर्कूस ८:३४-९:१

23 मिनू येसुमी मेको आन कली “सुमी आं नोले खोइक्चा थुं पाइबा, मेकोमी आंम दला दाक्स पचा प्रोंडशा, नाक्त कित कित श्येत जचा महिंथु, आं नोले खोइय्यील।

24 सुमी आंम गिंम प्रोंडचा माल्बा, मेको आ गिंम योल्ब। आं पर्वम आ गिंम सोइक्बमी आ गिंम प्रोंडब। लूका १७:२३; मत्ती १०:३९; यूहन्ना १२:२५

25 रागी नेल्ल आंम के सेल्शा, आ थुं खतम दुम्त हना, मार रिम्शो दुम्बा डा?

26 सुमी आं पर्वम नु आं लोत्र आं पर्वम देंचा कली मुने पाइबा, मेको आ पर्वम रागीम जरमेशोमी, आ आफ आ छेडछेडमी, परमप्रभु यावे आ स्वर्ग डा गेय पाइबपुकी नु जाक्मेनु ‘मेको कली मतुडक्नुड, सु बाक्मे?’ देंब। मत्ती १०:३३; रत्तिमोथी १:८

27 गो इन कली थमा लोत्र पाइनुड मुल गो नु काथा बाक्ब का निक्शीमी परमप्रभु यावे आ राज्य मतथु मबेक्नीम” दे माइक्मी बाक्त।

येसुमी आ रां फाइश्शा तपाइसीशो

मत्ती १७:१-८; मर्कूस ९:२-८

28 मेको लोत्र पशो हप्ता का नोले, येसुमी पत्रुस, यूहन्ना नु याकूब सां आन कली प्रार्थना पथ डांडाम लाइक्मी बाक्त।

29 मिनू येसुमी प्रार्थना पवानु, फांडसीशा आ कुल बुबु देशो नु आ फेक्शो वा यो बुबु पा तांइसे बाक्त।

30 मिनू मुर निक्शी, मोसा नु एलीया यूशा, येसु नु लोत्र पशो तामे बाक्त।

31 मेको यो छेडछेडम गिल्सीशा येसु नु लोत्रसी पामे बाक्त। मेकोपुकीम यरूसलेमम दोपा श्येत जशा, बेक्चा मेको आ पर्वम लोत्र पामे बाक्त।

32 मेको सांफा मोदेशो लोत्र पामेनु, पत्रुस, यूहन्ना नु याकूब मारेइ मतुडक्चा डा पा निन्द्रा पामे बाक्त। तन्न मेको आ डोंइती येसु नु मुर निक्शी राप्शो तामे बाक्त। येसु आ छेडछेडम मेको निक्शी नु बाक्शो तामे बाक्त।

33 मिनू मोसा नु एलीया गाक्चाम्सेनु, पत्रुसमी येसु कली “शेंब, इं कली एकेर बाक्चा रिम्शो दुम्ब। बाक्तीके सां सेल्नीकी। का इन कली, का मोसा कली, का एलीया कली” देंमाक्त। मोपा ब्वाक्शो आंमान मतुडक्ता बाक्त।

34 मिनू पत्रुसमी लोत्र पवानु, सरीड रे गोस्स यिशा, मेको आन कली सुम्मी बाक्त। मेको गोस्सुम गिल्मीनु, हिंमा बाक्त।

35 मिनू गोस्स आगा रे सेंदा का “एको आं योव्रशो तो बाक्ब। मेको आ लोत्र नेनीन” देशो नेन्मे बाक्त। लूका ३:२२; भजन संग्रह २:७; ब्यवस्था १८:१५

36 मिनू मेको लोत्र नेन्मेनु, येसु का ला तामे बाक्त। मिनू मेको आन तशो नु नेंशो शुश नाक्ती सम्म सुइ आन कली मशेंथु, सिक्सी पा थुंमी वोदमे बाक्त।

वोलमी सुम्शो आल कली सापाइश्शो

मत्ती १७:१४-२१; मर्कूस ९:१४-२९

37 मो दुम्मे आ दीसा डांडा रे यिशा, शुश मुर नु युम्शा देल्मा बाक्त।

- 38 मेकेर मुर का जाक्शा ठेयब सेंदा पा “हे शेंब, आं तौ कली वारच पने। मारदे हना आं तौ का ला बाक्ब।  
 39 मेको कली वोलम हो हु सुमानु, वाइ ब्रेशशा, शोत्र रे बोग्यो गुंडशा, खिंखि पना पन मोल मोल थाइब।  
 40 गो इन शेंसीब आन कली ‘वोल गुंडदीने’ दे पुंडता। तन्न गुंडने मचबेम” देंमाक्त।  
 41 मिनु येसुमी “गे थमा पा थमा मसुइक्ब नु दूली पाइब, गेना सम्म इन पशो फाल्शा बाक्नुडा डा? इ तौ एक चाक्को” दे मदा बाक्त।  
 42 मिनु चाक्गानु, वोलम मेको वोंइश आल कली खोलशा रोप्से पा, शोत्र रे बोग्यो गुंडपदा बाक्त। मिनु येसुमी ग्रांया दिचा डा वोल कली हुइशशा, वोंइश आल कली सापाइशशा, आ आफ कली गेवा बाक्त। लूका ७:१५

रागीम जरमेशो श्येत जचा माल्ब देंशो  
 मत्ती १:२२-२३; मर्कूस ९:३०-३२

- 43 मिनु मुर नेल्लेमी परमप्रभु यावे आ गेय तशा छक लाक्शा “परमप्रभु यावे ठेयब बाक्ब” दे लोत्र पामे बाक्त। मिनु मुर नेल्लेमी येसु आ पशो तशा छक लाक्मानु, येसुमी आ शेंसीब आन कली  
 44 “नोफा दाइशशा नेनीन। आं देंशो लोत्र थुमी वोतीन। रागीम जरमेशो दा मुर आन गुडमी गेशा साइक्चा पुंडसीब” देंमाक्त। लूका ९:२२; लूका १८:३१-३४

- 45 तन्न मेकोपुकीमी मेको लोत्र काइ मरुप्मे बाक्त। मारदे हना मेको आन कली मेको लोत्र रुप्चा कली थुं मगेशो बाक्माक्त। येसु कली “एको लोत्र मार में?” दे हिल्लो पचा यो हिंमा बाक्त। लूका २४:४५

“ठेयब सु बाक्या माइ?” देंशो  
 मत्ती १८:१-५; मर्कूस ९:३३-३७

- 46 काबु शेंसीबपुकीमी “गो इं १२ जनामी नेल्ल क्येडा ठेयब सु बाक्या माइ?” दे लोत्र पमुमा बाक्त।  
 47 येसुमी मेको आन मिम्शो तुइशशा, आल का कली आ नेक्था वोइशशा  
 48 “सुमी एको आल कली आं नेंमी ब्राइबा, मेकोमी आं कली ब्राइब। मिनु सुमी आं कली ब्राइबा, मेकोमी आं कली सोइक्ब कली यो ब्राइब। गे इन दातेमी सु नेल्ल क्येडा आइक्च सुइसीबा, मेको नेल्ल क्येडा ठेयब दुम्ब” दे शेंदीमी बाक्त। मत्ती १०:४०

छक लाक्चा गेय पाइब का  
 मर्कूस ९:३८-४०

- 49 मिनु यूहन्नामी “शेंब, इं नोले मखोइक्ब मुरुमी इन नें थिशा, वोल आन कली खेरशो ताइतक। मिनु मो पचा मदुम्ब, दे माइक्तक। मारदे हना मेको इं नोले खोइशशा मगाक्ब” दे मदा बाक्त।  
 50 मिनु येसुमी “मोदेंचा मदुम्ब, मारदे हना इं कली मरिम्शो मपाइब इं मुरुन बाक्ब” दे शेंदा बाक्त। लूका ११:२३; फिलिप्पी १:१८

बास मगेचा पुंडसीशो

- 51 मिनु येसुमी परमप्रभु यावे आ बाक्तीके लची नाक्त आं नेक्था जाक्शो तुइशशा, यरूसलेम लचा थुं पवा बाक्त। मर्कूस १०:३२  
 52 मिनु सामरीया रागी डा गाउं आ नेक्था जाक्दीशशा, मुर का निक्शी आन कली “आं डोंइती लशा, नेल्ल ठीक पने” दे सोइक्तीमी बाक्त। मिनु मेको सामरीया डा मुर आन गाउंमी ओत्रमा बाक्त।  
 53 तन्न मुरपुकीम बाक्चा गेने मबिस्समा बाक्त। मारदे हना येसुमी “यरूसलेम लाइनुड” देंशो बाक्माक्त। मिनु सोइशशा मुरपुकी लेशशा जाक्शा “बास मगेनीकी, देंतेक्म” दे येसु कली मदमे बाक्त। यूहन्ना ४:९  
 54 मिनु आ शेंसीब याक्ब नु यूहन्नामी मेको लोत्र नेंशा, येसु कली “प्रभु, मेको गाउं डा मुर आन कली परमप्रभु यावे कली पुंडशा, सरीड रे मी तोक्पाइशशा, खतम पपाइश्य?” दे हिल्लो पाम्से बाक्त। २राजा १:१०-१२  
 55 तन्न येसुमी मेको आस गे हिरशा हुइक्तीम्सी बाक्त।  
 56 मिनु बास बाक्थ अर्को गाउं लमा बाक्त।

आ नोले खोइक्चा कली सु शिरबा?  
 मत्ती ८:१९-२२

- 57 मिनु लॉमी गाक्मानु, मुर कामी येसु कली “प्रभु, गो इन नोले खोइक्चा दाक्नुड” देंमाक्त।  
 58 मिनु येसुमी “सिवार आन बाक्तीके ढोडोडगा बाक्ब, चिक्ब आन बाक्तीके ग्योत्र बाक्ब। तन्न रागीम जरमेशो के आ बाक्तीके खिं मबाक्ब” देंमाक्त।  
 59 नोले येसुमी अर्को मुर का कली “आं नोले खोइक्ची” दे मदानु, मेकोमी “डोंइती लशा, आं आफ कली थिम्चा गेयीनी” देंमाक्त।  
 60 मिनु येसुमी मेको कली “बेक्शो मुरुमी बेक्शो कली थिम्मेक्ल। गे चहिं परमप्रभु यावे आ राज्य डा लोत्र नेंपाइक्थ लावो” दे मदा बाक्त।  
 61 अर्को मुरुमी “प्रभु, गो इन नोले खोइक्चा दुम्ती, तन्न डोंइती आं खिं डा मुर आन कली तुइक्पाइक्थ लचा गेयीनी” देंमेनु, १राजा १९:२०  
 62 येसुमी “ब्यफ वाक्बमी वाक्तानु, आ नोले हिरशा मवाक्ब। नोले हिरशा कोव्रना कोव्रन वाक्ब मुर चहिं परमप्रभु यावे आ राज्य डा गेय पचा मशिरब” देंमाक्त। फिलिप्पी ३:१३

## 10

शेंसीब आन कली शेंथ सोइश्शो

मत्ती १०:७-१६

- 1 मिनु नोले प्रभुमी ७० जना अरु शेंसीब आन कली योव्रशा, डोंडती आ लशो सहर गाउंमी निक्निक्शी पा सोइक्तीमी बाक्त। का निक्शी किताबम ७२ देनीम। लूका ६:१३-१६; लूका ९:१; मर्कूस ६:७
- 2 मिनु गाक्चामेनु, मेको आन कली “बाली नाली रुप्या शुश बाक्ब। रुप्व मुर चहिं का निक्शी ला बाक्नीम। मोपतीके ‘बाली रुप्या कली मुर योव्रशा सोइक्तीने’ दे बाली नाली आ परमप्रभु कली पुनीने। मत्ती ९:३७-३८; यूहन्ना ४:३५
- 3 मिनु गे लने। भेडा पाठा आन कली फर आन दातेमी सोइश्शो खोदेशो पा सोइक्तान्नी।
- 4 लनीनु, क्येट, झोला, जुता मकुरथु लने। लांमी मुर आन कली युम्तीनी हना, लोव्र मपने। लूका ९:३-५; २राजा ४:२९
- 5 मुर आन खिंमी जाक्दीश्शा ओवनीनु, मेको खिं डा मुर आन कली ‘थुं नाइश्शा बाक्कीन’ दे आसीक गेने। यूहन्ना २०:१९
- 6 मेको खिंमी थुं नाइक्चा ताइब का बाक्त हना, इन थुं नाइक्तीक आसीक मेकोम राइब। तन्न मबाक्ब हना, मेको थुं नाइक्तीक आसीक गे राइनीनी।
- 7 मुरपुकीम बास गेम्तेक्म हना, गाक्ची मजाक्म सम्म मेकेरन बाक्कीन। खिं खिं याक्शा मबाक्कीन। इन कली मार जचा तूचा गेमे, मेको जने तूडीन। मारदे हना गेय पाइबपुकीमी आन गाल्च तचा मालनीम।
- 8 सहरम जाक्दीन्नीनु, मुरपुकीम इन कली ब्रशा, बास गेशा थुल्लेक्म हना, मार जचा गेमे, मेको जने।
- 9 रोइ पाइब आन कली सापतीन। मिनु मुर आन कली ‘परमप्रभु यावे आ राज्य इन नेक्था जाक्शो बाक्ब’ दे नेंपतीन।
- 10 तन्न मुरपुकीमी इन कली मबाम्तेक्म हना, सहर डा लांमी गाक्नीनु,
- 11 ‘आंइ खोइलीम क्येप्शो इन सहर डा फुरक यो फिक्नीकी। मो हना यो परमप्रभु यावे आ राज्य इन नेक्था जाक्शो बाक्ब, दे तुइक्तीन।
- 12 परमप्रभु यावे आ ठेयब निसाफ पची ना गे इन क्येडा सोदोम सहरम शिशी ताइब, देनीन।’ उत्पत्ती १९:१-२९

गालील डा सहर आ पर्वम लोव्र

मत्ती ११:२०-२४

- 13 ए खोराजीन, ए बेथसैदा, इन तशो चिन्ड नु छक लाक्चा डा गेय टायर नु सीदोन डा मुरपुकीमी तशो नम हना, भाडरा फेक्शा, पुलुम निश्शा आन थुं परमप्रभु यावे गे लेत्तेम वा।
- 14 ठेयब निसाफ पची नाक्ती टायर नु सीदोन डा मुर आन क्येडा गे शुश सजाइ ताइनीनी।
- 15 ए कापेरनाउम, मार गे स्वर्ग सम्म क्युक्सीनेवे डा? ममाइ, बेक्शो आन बाक्तीक तोक्चा पुंडसीनेवे।
- 16 सुमी इन शेंशो नेंना, मेकोमी आं शेंशो नेंब। सुमी इन कली मब्राइबा, मेकोमी आं कली मब्राइबा। आं कली मब्राइबमी आं कली सोइक्ब कली यो मब्राइब” दे माइश्शा सोइक्तीमी बाक्त। मत्ती १०:४०; यूहन्ना ५:२३

येसुमी ग्येरसीन देशो

मत्ती ११:२५-२७

- 17 मिनु मेको ७० जना लशा शेंने थुम्शा, येसु आ बाक्तीके लेश्शा जाक्मा बाक्त। मिनु जाक्शा, येसु कली “प्रभु, इन नें थिशा, हुइश्शोनु वोल्म यो टिशा प्रोक्बाक्तेक्म” दे थाम्पा ग्येरसीशा मदमे बाक्त। ७२ जना शेंसीब यो देनीम।
- 18 मिनु येसुमी “सरीड रे चिला आप्शो खोदेशो पा गो सैतान कली दोक्शो ताता। यूहन्ना १२:३१; प्रकाश १२:८-९
- 19 गे बुस्स नु बिच्छी दिम्ताक्नी हना यो, इन कली मकोक्नीम। मारेइ पने मचाप्नीम। मोदेशो पा सैतानमी इन कली मारेइ पने मचाप्ब। सुइमी यो इन कली मारेइ पने मचाप्ब। भजन संग्रह ९१:१३; मर्कूस १६:१८
- 20 वोल्म इन देशो टीनीम, दे तुइक्नीनी। मेको आ पर्वम मग्येरसीन। तन्न ‘परमप्रभु यावे आ मुर दुम्शा, इ नें परमप्रभु यावे नु ब्रोंडचा ताइब आन किताबम ब्रेक्साक्व’ दे तुइश्शा थाम्पा ग्येरसीने” दे माइक्मी बाक्त। प्रस्थान ३२:३२; यसैया ४:३; फिलिप्पी ४:३; प्रकाश ३:५
- 21 मिनु येसु परमप्रभु यावे आ सोक्तीम पतीके ग्येरशा “आं आफ, सरीड नु रागी डा परमप्रभु, गे नेल्ल क्येडा ठेयब ननी। गे शुश रिम्शो पाइतीनी। जोक्ब तुइक्ब नड, दे मिम्ब आन कली इन लोव्र रुपतीक थुं मगेनी। मजोक्ब मतुइक्ब आन कली रुपतीक थुं गेतीनी। गे मोदेशो पचा दाक्ताक्नी। १कोरिन्थी २:७
- 22 आं आफोमी आं कली नेल्ल कली अधिकार पतीक सक्ति गेती। तन्न सुइमी आ तौ सु बाक्बा, मतुइक्नीम, आं आफोमी ला तुइक्ब। सुइमी आं आफ कली मतुइक्नीम। आ तौमी ला तुइक्ब। मिनु तौमी सु सु आन थुंम तुइक्तीक वोइक्बा, मेकोपुकीमी यो तुइक्नीम” देमाक्त।
- 23 मिनु आ शेंसीब गे हिरशा, मेको आन कली “सुम इन खोदेशो पा ताइनीमी, मेकोपुकी ग्येरसीमल। मत्ती १३:१६-१७
- 24 मारदे हना इन तशो नेंशो साइ नेसी रे परमप्रभु यावे आ लोव्र पाइब नु पिपीपुकीमी तचा नेंचा दाक्ताक्मे। तन्न तचा नेंचा मतामे” दे माइक्मी बाक्त। १पत्रुस १:१०

इ नेक्था डा मुर सु बाक्बा, दे शेंशो

- 25 मिनु येसुमी मुर आन कली शेंदानु, सास्त्री का बोक्शा, येसु आ थुं थाम्पा “हे शेंब, गो गेना हना यो ब्रोंडशा बाक्चा कली मार पचा मालनुडा?” दे हिल्लो पचा बाक्त। मत्ती २२:३५-४०; मर्कूस १२:२८-३४; लूका १८:१८-२०
- 26 मिनु येसुमी “परमप्रभु यावे आ अंरेशो लोव्रमी मार ब्रेक्शो बाक्मे? मेको मपढेनी?” देमेनु,

- 27 मेकोमी “इ थुं नेल्लेमी, इ रां नेल्लेमी नु इ सक्ति नेल्लेमी परमप्रभु, इ परमप्रभु यावे कली दाकतो। मिनु आंम कली दाकशो खोदेशो पा इ नेक्था बाक्ब आन कली यो दाकतो, दे ब्रेकशो बाक्ब” देमाक्त। ब्यवस्था ६:५; लेवी १९:१८
- 28 मिनु येसुमी “ठीक देते। मेको इ देशो खोदेशो पाप्तीवी हना, गेना हना यो ब्रॉइशा बाक्चा ताइनेवे” देमाक्त। लेवी १८:५; मती १९:१७
- 29 मिनु आंम कली ठीक सेल्शा, मेकोमी “आं नेक्था डा मुर सु बाक्नीमी, गो मतइकुनुड” देमाक्त।
- 30 मिनु येसुमी “मुर का यरूसलेम रे यिशा, यरीको सहर डा लां खोदा बाक्त। मिनु लमेनु, खुडपुकीमी लांम बाप्शा, मेको कली तुप्शा, थपाइश्शा, आ बाक्शो मारेइ मारेइ नेल्ल रोइश्शा, प्रोकमा बाक्त।
- 31 इक्का नोले मेको लां पा चढेब का पिशा, मेको तुप्शा बेक्चशो मुर कली तशा, हेरशा लाक्गा बाक्त।
- 32 मिनु इक्का नोले लेवी आ थर डा मुर का यो मेको लां रे पिमाक्त। मेकोमी यो मेको बेक्चशो मुर कली तशा, हेरशा लाक्गा बाक्त।
- 33 मिनु नोले सामरीया रागी डा मुर का पिमाक्त। मेकोमी बेक्चशो मुर कली तशा शिशी पवा बाक्त।
- 34 तुप्शो मुर आ गारमी तेल नु ओरुती खेक्शा वाम फ्रेंशा, आ गधा तारी डोइक्पाइश्शा, होटेल सम्म लाइश्शा, बास पुंइशा, जचा बाक्चा गेवा बाक्त।
- 35 आ दीसा नाक्ती गाक्चा क्येडा डोंइती निम्फा आस जशो नु बास डा नेल्ल थाप्शा, होटेल दाइक्ब कली क्येट गेशा वोइश्शा ‘मेको तुप्चा पुंइसीशो मुर कली रिम्शो पा कोव्रडीने। मसाम सम्म वारच पने। गो लेडडानु, मजाक्दीश्शो क्येट नेल्ल थाप्पन्नी’ दे लोत्र गार पा लमाक्त।
- 36 मेको लां गाक्ब सांमी सु चहिं तुप्शा रोइक्चा पुंइसीशो मुर आ नेक्था डा मुर दुम्मे?” दे हिल्लो पवा बाक्त।
- 37 मिनु सास्त्रीमी “शिशी पाइब मुर थमा पा आ नेक्था डा मुर बाक्त” देमाक्त। मिनु येसुमी “मेको आ खोदेशो पावो” दे माइश्शा सोइक्ता बाक्त। यूहन्ना १३:१७

मरीयम नु मारथा आस खिंम बाक्शो

- 38 मिनु येसु नु आ शेंसीबपुकी यरूसलेम डा लां रे गाक्मानु, गाउं कामी जाक्दीम्मा बाक्त। मेकेर मारथा नें पाइश्शो मीश मुर कामी येसु कली मान पा बास गेवा बाक्त। यूहन्ना ११:१
- 39 मारथा आ लोकब मरीयम येसु आ खोइल आ नेक्था बाक्शा आ शेंशो नेंना बाक्त।
- 40 मारथामी शुश गेय पा श्येत पशा “प्रभु, आं लोकबमी आं कली काड वारच मपाइब। गे मोदेशो तशा यो मारेइ मदेनी? मेको कली ‘बोक्शा, इ लोकब कली वारच पतो’ दे मतीन” देमाक्त।
- 41 मिनु येसुमी मारथा कली “मारथा, आं लोत्र नेनो। इ थुंमी ग्येत्थ लुक्च मिम्शा, पीर पाइबाक्ते।
- 42 तन्न थोत्रक का ला माल्ब। मरीयममी रिम्शो थोत्रक योत्रतु। मेको सुइम लाइक्ने मचाप्नीम” दे मदा बाक्त। मरीयम ६:३३

## 11

प्रार्थना पचा आ पर्बम शेंशो

मती ६:९-१३

- 1 काबु येसुमी प्रार्थना पवा बाक्त। मिनु प्रार्थना पने थुमानु, आ शेंसीब कामी “हे प्रभु, यूहन्नामी दोपा आ शेंसीब आन कली प्रार्थना पचा शेंदा, मोपा आंइ कली यो शेंदीकी” देमाक्त।
- 2 मिनु येसुम “परमप्रभु यावे कली प्रार्थना पनीनु ‘आं आफ, इन नें का ला ठेयब बाक्ल। इन राज्य जाक्ल।
- 3 नाक्त कित कित डा आंइ जचा थोत्रक गेकी।
- 4 आंइ मरिम्शो पशो क्याम्शा गेकी। मारदे हना गो यो आंइ कली मरिम्शो पाइब आन कली का का पा माफ गेनीकी। सैतानमी आंइ थुं थाम्चा मगेने’ दे प्रार्थना पने” दे शेंदीमी बाक्त।

परमप्रभुम शिशी पाइब, दे शेंशो

मती ७:७-११

- 5 मिनु येसुमी “सुइमी नाक्दो इप्शो वारच कली पोक्शा ‘ए वारचै, शोब्ले सां गेयी।
- 6 वारच का डोन रे जाक्त। मेको कली थुलु देंडानु, गो नु मारेइ जचा थोत्रक मबा।
- 7 मोपतीके जचा थोत्रक गेचा नड’ दे पुंइतु हना, वारचम लाप्चो मरोक्थु, खिं आगा रे ‘रेयके मपावो। लाप्चो चोक्ता। आल इप्तेक्म। सेंसीनीम। बोक्शा, इ पुंइशो गेने मचाप्नुड’ दंत हना,
- 8 तन्न मेकोमी पुंइस डा पुंइस बाक्त हना, मेको मगेनुड देंब मुरुमी वारच, दे ला ममाइ डिपी पतीके मेको कली आ पुंइशो गेब।
- 9 परमप्रभु यावे कली पुनीने। मिनु इन पुंइशो ताइनीनी। मालीने। मिनु इन माल्शो थितीनी। ‘बाक्नी?’ दे लाप्चो खोकोल पने। मो पाइतीनी हना ओत्रचा ताइनीनी।
- 10 मोपतीके सुम पुंइबा, मेकोमी आ पुंइशो ताइब। सुम माल्बा, मेकोमी आ माल्शो थिप्ब। सुम ओत्रनुड, दे लाप्चो खोकोल पाइबा, मेको ओत्रचा ताइब। लूका १३:२५
- 11 तौमी आ आफ कली ‘डॉइ ब्वाइनुड’ दे पुंइतु हना, मार, आ आफोमी डॉइ, दे बुस्स ब्वचा गेबा डा? मती ७:९
- 12 ‘ब्वोफु जाइनुड’ दे पुंइतु हना, ब्वोफु, दे बिच्छी ब्वचा गेबा डा?

13 गे, मरिश्शो पाइब बाक्तीनी हना यो, इन आल आन कली रिश्शो थोत्रक गेने चाप्नीनी, इन पशो क्येडा स्वर्गम बाक्ब इन आफोमी आ तमी तो आन कली आन पुंडशो गेब। मेकोपुकीमी 'इन सोक्त गेकी' दे पुंडतेकम हना, आ सोक्त यो गेब" दे शेंदीमी बाक्त।

वोल गुंडचा आ पर्वम शेंशो

मती १२:२२-३०; मर्कूस ३:२२-२७

14 मिनू काबु येसुमी लाटा वोलम थिशो मुर का कली युमा बाक्त। मिनू लाटा वोल कली गुंडशा खेरा बाक्त। वोल ग्रूम नोले मेकोमी लोत्र पने चबा बाक्त। मेकोमी लोत्र पशो नेंशा, मुर नेल्ले छक लाक्मा बाक्त।

15 मिनू का निक्शीमी चहिं "वोल आन पिप बेल्जीबुल आ सक्तिम वोल आन कली गुंडशा खेरबाक्माक्त" देंमा बाक्त।

16 का निक्शीमी येसु कली थुं कोत्रचा कली चिन्ड कोंडपाइक्चा माल्मे बाक्त। मर्कूस ८:११

17 येसुमी मुर आन थुं डा लोत्र नेल्ल तुइश्शा, मेको आन कली "राज्य का डा मुर जिशा ब्राशा गाक्तेकम हना, राज्य जाम्शा लाइब। खिं का डा मुरपुकी जिशा ब्राशा गाक्तेकम हना, मेको खिं मलीब।

18 सैतान आ राज्य डा सक्ति ब्रात हना, रीब पा आ राज्य जाम्शा मलाइबा डा? 'बेल्जीबुल आ सक्तिम वोल आन कली खेरबाक्माक्त' देंतीनी।

19 गो बेल्जीबुल आ सक्तिम वोल आन कली खेरतामी हना, इन तौपुकीमी सुका आ सक्तिम खेरनीमी? इन तौपुकीमी इन कली निसाफ पाइनीम।

20 गोमी परमप्रभु यावे आ सक्तिम वोल आन कली खेरता हना, परमप्रभु यावे आ राज्य जाक्शो बाक्माक्त, दे तुइक्तीन। प्रस्थान ८:१५

21 बोल्यो मुर कामी या शेशा आ दरवार खाल पाप्तु हना, आ शोंप सुइमी खुइ पने मचाप्नीम।

22 तन्न मेको क्येडा यो बोल्यो अर्को का जाक्त हना ला, मेको आ या नेल्ल रोइश्शा, ग्राशा, शोंप नेल्ल आंम के सेल्ब। कलस्सी २:१५; १यूहन्ना ४:४

23 गो नु मगारब आं जोरी सत्रु दुम्नीम। गो नु मखुप्बपुकीमी आं खुप्शो यो फ्राइनीम। लूका ९:५०

वोल लेशशा जाक्ब, दे शेंशो

मती १२:४३-४५

24 ग्रोग्रा दिचा डा वोल मुर रे ग्रूशा लशा, ब्वाक्कु मबाक्तीकेम नाइक्तीके माल्ब। मिनू नाइक्तीके मथित्लु हना 'डोंइती आं बाक्तीकेमीन लेत्नुड' दे लेप्ब।

25 मिनू लेशशा जाक्मेनु, आ डोंइती बाक्तीके फिक्शा सिल्शा वोइश्शो ताइब। मिनू आ क्येडा ग्रोग्रा दिचा डा ७ ओटा वोल आन कली माल्थ लशा चाक्ब। मिनू ओत्रशा बाक्नीम।

26 मिनू डोंइती क्येडा मेको मुर शुश मरिश्शो दुम्ब" दे शेंदीमी बाक्त। यूहन्ना ५:१४

परमप्रभु कली टीब आसीक राइब।

27 येसुमी मेको लोत्र पवानु, मीश मुर कामी ठेयब सेंदा पा "इन कली थिशा थुल्शा कोल्पाइक्ब ममा आसीक रशो मुर बाक्माक्त" दे येसु कली ठेयब सेला बाक्त। लूका १:२८:४८

28 मिनू येसुमी "आं ममा क्येडा परमप्रभु यावे आ लोत्र नेंशा, थुंमी वोइश्शा पाइबपुकी आसीक राइब नम" देंमाक्त। लूका ८:१५:२१

चिन्ड कोत्रकोत्र दाक्बपुकी

मती १२:३८-४२

29 येसु आ लोत्र नेंबपुकी बारना बारन लशा, शुश दुम्मा नोले येसुमी "सिनाक्त मुलाक्त डा मुर थम मरिश्शो बाक्नीम। मारदे हना चिन्ड ला कोत्रकोत्र दाक्नीम। मेको आन कली योना आ चिन्ड डा लाक्शा, मारिड चिन्ड मकोइनुडमी। लूका ११:१६

30 निनवे सहर डा मुर आन कली योना आ चिन्ड खोदेशो पा, रागीम जरमेशो सिनाक्त मुलाक्त डा मुर आन कली चिन्ड दुम्ब।

31 निसाफ पची नाक्त दक्खिन रागी डा पिपीममी बोक्शा, एको पाला डा मुर आन कली दोस ताइब सेल्ब। मारदे हना मेकोमी डोन रागी रे पिप सोलोमन आ जोक्तीक तुइक्तीक नेंचा कली जाक्त। नेनीन, एकेर सोलोमन क्येडा यो ठेयब का बाक्ब। १राजा १०:१

32 निसाफ पची नाक्ती निनवे सहर डा मुरपुकी बोक्शा, एको पाला डा मुर आन कली दोस ताइब सेल्नीम। मारदे हना मेकोपुकीमी योना आ लोत्र नेंशा, आन थुं परमप्रभु यावे गे लेत्ताक्म। नेनीन, एकेर योना क्येडा यो ठेयब का बाक्ब। योना ३:५

इन रां छेडछेड दुम्चा माल्ब

मती ५:१५; मती ६:२२-२३

33 बत्ती दाशा, सुइमी खुइश्शा सुम्शा मवोइक्नीम। खिं ओत्रब आन कली हाम्मो दुम्ल, दे नेल्लेम ततीकेम वोइक्नीम। लूका ८:१६

34 इन मिक्च इन रां डा छेडछेड बाक्ब। गे हेंथे मकोत्रतीनी हना, इन रां नेल्ल छेडछेड दुम्ब। गे मरिश्शो कोत्रचा दाक्ताक्नी हना, इन रां नेल्ल छिडछिड बाक्ब।

35 मोपतीके होस पांडसीने, इन रां डा छेडछेड छिडछिड मदुम्ल।



- 36 मिनू इन रां छिडछिड मद्दुथु, छेडछेडम ब्रीशो बाक्त हना, बत्ती दाशो खोदेशो पा तांडसीनीनी” दे शेंदीमी बाक्त।  
 फरिसी नु सास्त्री कली हुइशो  
 मती २३:१-३६
- 37 काबु येसु फरिसी आ खिंमी खमे जथ लमेनु, आ गुड मचिक्सीथु निस्से बाक्त। लूका ७:३६; लूका १४:१
- 38 मिनू फरिसीमी येसु कली गुड मचिक्थु जचशो तशा छक लाक्माक्त। मती १५:२
- 39 मिनू प्रभु येसुमी मेको कली “गे फरिसीपुकी बोस शेक्तीनीनु, आ तार ला शेक्तीनी। आगा मशेक्तीनी। मेको खोदेशो पा इन थुमी रोइक्तीके नु परमप्रभु कली मटितीकेमी ब्रीशो बाक्व।
- 40 गे मूर्खपुकी, सुमी आ लाडगा डा सेला, आगा डा यो मेकोम सेल्शो ममाइ डा?
- 41 गे आगा डा थोत्रक मथीब आन कली गेने। मिनू इन कली नेल्ल रिम्शो दुम्ब।
- 42 तन्न आबी, फरिसीपुकी, गे खतम बाक्तीनी। मारदे हना सुप्तीके के १० भाग डा भाग का परमप्रभु यावे कली गेनीनी। तन्न गे मुरु आन कली ठीक निसाफ मपथु, परमप्रभु यावे कली मदाक्तीनी। गे डोंडती नु नोले डा निम्फा पचा माल्नीनी। यूहन्ना ५:४२
- 43 आबी, फरिसीपुकी, गे खतम बाक्तीनी। मारदे हना गुम्तीक खिंमी मान तशो टेयब मुर आन नित्तीकेमी नित्या दाक्तीनी। बजारमी गाक्तीनु, मुरपुकीमी मान पा सेउ पशो ताक्चा दाक्तीनी। लूका १४:७
- 44 आबी, फरिसीपुकी, गे खतम बाक्तीनी। मारदे हना गे मततीक तुरस खोदेशो बाक्तीनी। मुरपुकीमी मेको कली मतुइक्थु, दिम्शा गाक्तीमी” देत।
- 45 मिनू सास्त्री कामी “शेंब हजुर, इन हुइशो फरिसी आन कली ला ममाइ। आंड कली यो हुइक्ताक्ती” देंमेनु,
- 46 येसुमी “आबी, सास्त्रीपुकी गे यो खतम बाक्तीनी। मारदे हना हेल्लो भारी सेल्शा, मुर आन कली कुरपाइक्तीनी। गे चहिं ब्रेप्चो कामी यो नेप्शा वारच मपाइनीनी।
- 47 आबी, गे खतम बाक्तीनी। मारदे हना इन किकी पिपीपुकीमी परमप्रभु यावे आ लोत्र पाइब आन कली साइक्तेक्म। मिनू गे मेको आन तुरस सेलतीनी। प्रेरित ७:५२
- 48 मोपा इन किकी पिपी नु गारशो दुम्तीनी। मेको आन पशो ठीक बाक्माक्त, दे आन पशो खोदेशो पाइब दुम्तीनी। मारदे हना इन किकी पिपीपुकीमी परमप्रभु यावे आ लोत्र पाइब आन कली साइक्ना साइक्न बाक्तेक्मे। गेपुकीमी चहिं तुरस सेल्ना सेल्न बाक्तीनी।
- 49 साइ नेसी परमप्रभु यावे आ तुइक्तीक पाइशोमी ‘गो आं लोत्र शेंब मुर सोइक्नुडमी। मेको आं सोइशो मुर का निक्शी आन कली खेदा पा श्येत गेनीम, का निक्शी आन कली साइक्नीम’ देशो बाक्त।
- 50 साइ डोंडती रे मुल सम्म परमप्रभु यावे आ लोत्र पाइब शुश आन कली साइशो क्येक्क एको पाला डा मुर आन रे ताक्सीब।
- 51 डोंडती साइशो हाबील बाक्त। नेल्ल क्येडा नोले साइशो जकरिया बाक्त। मेको कली परमप्रभु यावे कली चढ्ढेतीक नु आ खिं आस दातेम साइशो बाक्त। मेको नेल्ल आन कली मोपा साइक्तीके सिनाक्ती मुलाक्ती डा मुर दोस गेने पुंडसीशा सजाइ ताइनीम।
- 52 आबी, सास्त्रीपुकी, गे खतम बाक्तीनी। मारदे हना गे जोक्तीक तुइक्तीक सांचो ताक्तीनी, तन्न मेकेर मओवनी। मिनू ओवचा दाक्ब आन कली यो ओवचा मगेनी” दे हुइक्तीमी बाक्त।
- 53 मिनू येसु फरिसी आ खिं रे गाक्चवानु, सास्त्री नु फरिसीपुकी गाइशशा, शुश लोत्र हिल्लो पा आ थुं थाम्मे बाक्त।
- 54 मारदे हना आ लोत्र खाइक्पाइशशा, दोस गेचा माल्मे बाक्त। लूका २०:२०

## 12

परमप्रभु कली थमा सुइक्चा माल्ब

मती १०:२६-३३

- 1 मिनू हजार, हजार मुर खुम्सीशा, नेम्मुशा, चुमुशा, येसु आ लोत्र नेंथ जाक्मा बाक्त। मिनू येसुमी आ शेंसीब आन कली “फरिसी आन बोरपाइक्तीक ओरुती रे होस पा बाक्कीन। मेको आन जोल पा शेंतीक बाक्ब। मती १६:६; मर्कूस ८:१५
- 2 सुम्शा वोइशो नोले नेल्ल हाक्सीशा तांडसीब। खुइशशा वोइशो लोत्र नेल्ल नोले तुइसीब। लूका ८:१७
- 3 मोपतीके इन छिडछिडम बाक्शा पशो लोत्र नोले छेडछेडम नेंसीब। मुल इन खिंमी बाक्शा, नोफाम मुइक्मुशा पशो लोत्र नोले टेयब सेंदा पा देंनीम।
- 4 आं वारचपुकी, इन रां कली साइक्ने चाम्बपुकी तशा महिनीन। मारदे हना साइक्ने थुम्शा, नोले मारेइ पने मचाप्नीम।
- 5 तन्न परमप्रभु यावे कली मान पा हिनीन। मारदे हना मुर आन कली साइशशा, नाराक सोइक्तीक सक्ति मेको नु बाक्ब। मोपतीके मेको कली तशा मान पा हिनीन। हिब्रू १२:२९
- 6 आस्सारीयोन निक्शीम ५ ओटा भंगेरा मग्याम्सीबा डा? मो हना यो परमप्रभु यावेमी मेको आन कली कोव्रशो बाक्ब। आस्सारीयोन का नेल्ल क्येडा आइक्च तांबा के क्येट बाक्त।
- 7 मेको आन कली ला ममाइ। इन पिया डा चां का का पा हिक्शा, गिश बाक्मा, दे तुइशो बाक्ब। मोपतीके महिनीन। गे भंगेरा क्येडा शुश हिक्सीशो बाक्तीनी। लूका २१:१८
- 8 सुमी मुर आन कली ‘गो येसु आ मुर नड’ देंबा, रागीम जरमेशोमी यो मेको आ पर्वम परमप्रभु यावे आ स्वर्ग डा गेय पाइब आन डोंडती ‘मेको आं मुर बाक्ब’ देंब।

9 सुमी चहिं मुर आन कली 'येसु सु बाकमे? मतुइक्नुड' देंबा, मेको आ परबम परमप्रभु यावे आ स्वर्ग डा गेय पाइब आन डोंडती 'मेको कली मतुइक्नुड' देंबा। लूका ९:२६; १सामुएल २:३०

10 सु सुमी रागीम जरमेशो आ परबम शुक्शी पामे, मेको का का पा माफ ताइनीम। सु सुमी चहिं परमप्रभु यावे आ सोक्त आ परबम शुक्शी लोत्र पामे, मेको आन पाप गेनायो मक्याम्सीब। मती १२:३२; मर्कूस ३:२८-२९

11 इन कली आन ग्रुमतीक खिं डा ठेयब मुर नु हुकुम पाइब आन डोंडती लाइशशा राष्ट्रमेनु 'मुल मार देंचा, मार लोत्र लेत्वा' दे सुर्ता मपने।

12 मोपा राष्ट्रमेनु, परमप्रभु यावे आ सोक्तीमी इन कली मार देंचा दो देंचा तुइक्पाइशशा देंपाइक्ब" दे शेंदीमी बाक्त।

शोंप गे थुं महिरचा, दे शेंशो

13 मिनु काबु आ लोत्र नेंथ शुश मुर खुम्समानु, मुर कामी "शेंब, आं लोक्ब कली आं तचा डा अडस योक्शा गेवो, दे मतीन" दे पुना बाक्त।

14 मिनु येसुमी "मार गो इस अडस योक्ब नडा डा? मनड" देंमाक्त।

15 मिनु नोले मुर आन कली "नेनीन, होस पा बाक्कीन। शिम मदुमीन। मारदे हना शुश शोंप बाक्शा ला ब्रोंडशा बाक्का मतांडसीब" देंमाक्त। उपदेसक ५:९; १तिमोथी ६:९-१०

शोंप पाइशशो मूर्ख

16 मिनु कथा सेल्शा "शोंप पाइशशो मुर का आ बाली नाली शुश ग्रेल्माक्त।

17 मिनु मेकोमी शुश ग्रेल्शो तशा 'मुल अन्न वोइक्तीके खिं मजाक्दीप्ब।

18 मोपतीके खिं प्रेशशा अन्न वोइक्तीक ठेयब खिं सेल्शा, बाक्शो अन्न नेल्ल मेकेर उप्नुड'।

19 मिनु मेकोमी 'शुश बस कली जाक्दीप्ब। शुश शोंप गे नु बाक्ब। मोपतीके जशा तूशा ग्येरशा बाक्को' दे आंम थुं कली देंमाक्त। भजन संग्रह ४९:१-२०

20 मिनु परमप्रभु यावेमी मेको कली 'गे मूर्ख नवे। मारदे हना मुलाक्दो बेक्नेवे। मिनु इ खुप्शा उप्शो शोंप सुम जाइबा?' दे मदा बाक्त।

21 परमप्रभु यावे कली ममिम्थु, शोंप ला मिम्ब मुर नेल्ल मोदेशो दुम्नीम" दे शेंदीमी बाक्त। मती ६:२०

सुर्ता मपचा, दे शेंशो

मती ६:२५-३३

22 मिनु आ शेंसीब आन कली "मार जचा, मार फेक्चा, दे सुर्ता मपने।

23 मारदे हना जचा क्येडा ब्रोंडचा ठेयब बाक्ब। फेक्चा क्येडा इन रां ठेयब मिम्तीने।

24 खद आन कली कोव्रडीने। मेकोपुकीमी मशोक्नीम, मारेड मरुप्नीम मखुप्नीम। आन अन्न वोइक्तीक खिं यो मबाक्ब। तन्न परमप्रभु यावेमी मेको आन कली कोव्रशा थुल्ब। मिनु गे मेको चिक्ब आन क्येडा हिक्सीशो मबाक्कीनी डा?

25 मार, गेपुकीमी सुर्ता पा इन ब्रोंडतीक नाक्त बारपाइक्ने चाप्नीनी डा?

26 मोदेशो लायो मचाप्तीनी हना, मारदे अरु थोव्रक आन कली सुर्ता पाइनीनी?

27 लिली फू कली कोव्रशा मिम्तीने। गिश रिम्शो तांडसीनीमी। श्येत पा गेय मपाइनीम। पांडतो मपांडनीम। पिप सोलोमन गिश ग्योम्साक्ब हना यो, मेको लिली फू खोड दारशो मदुम्माक्त।

28 परमप्रभु यावेमी मेको घांस रिम्शो पा ग्योम्ताक्ब बाक्त हना यो, याम का बाक्चा गेब। नोले मेको घांस मीम हुम्चा पुंडसीब। घांस कली लायो गिश रिम्शो पा ग्योम्ताक्ब हना, गे रिम्शो पा थमा सुइक्ने मचाप्ब इन कली मग्योम्बा डा?

29 मार जचा मार तूचा, दे थुंमी सुर्ता मपने।

30 रागी रागी डा मुर नेल्लेमी मोदेशो मिम्नीम। इन आफ, परमप्रभु यावेमी इन माल्लो नेल्ल तुइक्ब।

31 मोपतीके मोदेशो मिम्चा प्रोंडशा, परमप्रभु यावे आ राज्य मालीने। मिनु मारेड मारेड यो ताइनीनी।

32 गे आइक्च बगाल, महिनीन। मारदे हना इन आफोमी इन कली आ राज्यम वोइक्चा दाक्ब। लूका २२:२९

33 इन के बाक्शो लेयशा, मथीब आन कली योक्शा गेने। मो पनीनु, स्वर्गम इन शोंप लीब। मिनु मेको मोपा वोइशशो शोंप खुडमी खुड पने मचाप्नीम, खिया मजोइब मराक्ब, गेनायो मजाम्ब। लूका १८:२२

34 तेकेर इन शोंप बाक्बा, मेकेरन इन थुं यो लीशो बाक्ब।

सासीशा बाक्कीन, दे शेंशो

मती २४:४३-५१

35 बती दाशा वा फेक्शा सासीशा बाक्कीन। प्रस्थान १२:११; १पत्रुस १:१३; मती २५:१-१३

36 होव्रप ग्युंवे भोज जथ लमेनु, आ गेय पाइबपुकीमी 'इ होव्रप लेशशा जाक्ब। मोपतीके लेशशा मजाक्म सम्म मडप्थु बाक्च, दे रिम्नीम। मिनु होव्रप जाक्शा, लाप्चो खोकोल पदानु, गु रोक्शा ओव्रचा गेनीम। प्रकाश ३:२०

37 मोदेशो गेय पाइब आसीक ताइब बाक्कीम। होव्रप लेशशा जाक्मेनु, आ गेय पाइब आन कली मडप्थु रिम्शा बाक्शो थित्तु हना, आ होव्रप थाम्पा ग्येरसीशा, मेको आन कली निप्पाइशशा थुल्ब।

38 होव्रप नाक्दो नाक्ती गेना हना यो लेशशा जाक्मेनु, आ गेय पाइब मडप्थु बाक्तेक्म हना, मेको मुर रिम्शो दुम्शा आसीक ताइनीम'।

39 नेनीने, खिं डा मुरुमी 'मुल खुड जाक्नीम' दे तुइशशो नम हना, मेकोम खिं मप्रोंडथु मडप्थु बाक्शा, खुड पचा मगेम चा। १थिस्सलोनिकी ५:२

- 40 मोदेशो पा गे यो मइप्यु सासीशा बाक्कीन। मारदे हना रागीम जरमेशो इन मतुइक्थु जाक्ब” दे शेंदीमी बाक्त।  
 41 मिनु पत्रुसमी “प्रभु, एको लोत्र गो आंड कली ला शेंदीनी देय मुर नेल्ल आन कली शेंदीनी?” दे हिल्लो पवानु,  
 42 प्रभुमी “होत्रपमी आ खिं कोत्रब कली जची जाक्मेनु जचा गेचा, दे अरेशा वोइक्चा पुंडसीब। मेको खोदेशो निप्स पाइशशो थमा सुइक्चा पुंडसीशो गेय पाइब सु बाक्बा?  
 43 आ होत्रप लेशशा जाक्मेनु, आ गेय पाइबमी आ अरेशो गेय पना पन बाक्शो थित्तु हना, मेको गेय पाइब आसीक राइब दुम्ब।  
 44 नोफा दाइशशा नेनीने, मेको होत्रपमी आ बाक्शो मारेइ मारेइ मेको गेय पाइब कली जिम्मा गेब।  
 45 तन्न मेको गेय पाइबमी ‘आं होत्रप इक्का नोले जाक्ब’ दे मिम्शा, मेकोमी गेय पाइब वोइश मुर, मीश मुर आन कली तुप्शा श्येत गेशा, जशा तूशा, दुक्शा पाप्तु हना,  
 46 आ ममिम्शो मतुइशशो नाक्त आ होत्रप लेशशा जाक्ब। मिनु मेकोमी मेको गेय पाइब कली सजाइ गेशा, मरिम्शो गेय पाइबपुकी नु काथा वोइक्ब।  
 47 मिनु होत्रप आ देशो रुप्शा यो मतुइशशो खोदेशो पा मेको आ देशो मटीब गेय पाइब शुश तुप्चा पुंडसीब। याकूब ४:१७  
 48 होत्रप आ देशो मतुइक्थु, मरिम्शो पाप्तु हना, इक्का ला तुप्चा पुंडसीब। सुमी शुश रुप्शा तुइशशो बाक्मे, मेकोम शुश जिम्मा ब्राइबा। मिनु सुमी शुश जिम्मा ब्राइबा, मेको शुश जिम्मा वारी दुम्ब” दे शेंदीमी बाक्त।

फ्राचा कली जाक्ती

मती १०:३४-३६

- 49 मिनु येसुमी शेंना शेंन “गो एको रागीम मी जेथ जाक्शो नड। एको मी आं क्येडा डोंइती जेशशो हना, रिम्शो दुम वा।  
 50 गो श्येत का जचा माल्नुड। मेको बेक्चा डा श्येत मजडा सम्म परमप्रभु यावेम गेशो गेय पाइनुड। लूका १८:३१;  
 मती २०:२२; मती २६:३८  
 51 गो रागीमी नेल्ल आन कली गारपाइक्थु जाक्शो बाक्नुड, दे मिम्नीनी? तन्न गो इन कली फ्राथ कका जाक्ती।  
 52 खिं कामी ५ जना मुर बाक्तेकम हना, मेको ५ जना ब्रानीम। सांमी थमा सुइक्नीम, निक्शीमी थमा मसुइक्नीसी। निक्शीम थमा सुइक्नीसी, सांमी थमा मसुइक्नीम।  
 53 आफोमी थमा सुइक्ब, आ तौमी थमा मसुइक्ब। मिनु आफ कली आइक्च सेल्ब। तौमी थमा सुइक्ब, आ आफोम थमा मसुइक्ब। मिनु आ तौ कली आइक्च सेल्ब। ममामी थमा सुइक्ब, तमीमी थमा मसुइक्ब। तमीमी थमा सुइक्ब, ममामी थमा मसुइक्ब। शिमीमी थमा सुइक्ब, चाइमीमी थमा मसुइक्ब। चाइमीमी थमा सुइक्ब, शिमीमी थमा मसुइक्ब। मोपा थुं का पा बाक्ने मचाप्नीम” दे शेंदीमी बाक्त।  
 54 मिनु मेकेर खुम्सीशो शुश मुर आन कली “नां पेरतीकेम गोस्स गूमेनु, ‘इच्ची ना रेउ यीब’ देंनीनी। मिनु रेउ यीब।  
 मती १६:२-३  
 55 दक्खिन रागी रे फश पवानु ‘मुलाक्ती हुप्ब’ देंनीनी। मिनु हुप्ब।  
 56 गे कपटीपुकी, सरीड, रागी कोत्रशा, मुल मार दुम्बा, दे तुइक्नीनी। मुल मार दुम्चशो बाक्मे, मेको चहिं मारदे मरुप्नीनी?  
 57 तेको गेय पशोमी रिम्शो दुम्बा, तेको गेय पशोमी मरिम्शो दुम्बा, मेको मिम्ने मचाप्नीनी?  
 58 इन कली दोस गेमेनु, दुशा बाक्कीन। मारदे हना इन कली दोस गेशा, निसाफ पाइब आ डोंइती लाइक्तेकम हना, मेकोमी इन कली लल पिया आन गुइमी जिम्मा गेशा, जेल्खानम चोक्पाइक्नीम। मती ५:२५-२६  
 59 नोफा दाइशशा नेनीने, मेकोम इन कली नोले डा लेप्तोन सम्म मथाप्पाइक्थु मप्रोइनीम” दे माइक्मी बाक्त। लेप्तोन का नेल्ल क्येडा आइक्च रोमी आन तांबा के क्येट बाक्ब।

## 13

इन थुं परमप्रभु गे लेत्तीन, दे शेंशो

- 1 मोपा शेंदीमीनु, आ लोत्र नेंब का निक्शीमी “साइ गालील रागी डा मुरपुकीमी मारेइ मारेइ क्योरशा जारदमेनु, पिलातसमी सिपाइ सोइशशा, मेको जारब आन कली क्योरपाइशशा, मेको आन जारशो हुश नु ब्वाइक्ताक्व” देंमा बाक्त।  
 2 मिनु येसुमी मेको आन कली “मोपा साइक्चा पुंडसीब आन कली रागी डा मुर क्येडा मरिम्शो बाक्मा बाक्त, दे मिम्नीनी? ममाइ, मेको इन खोदेशोन नम। यूहन्ना ९:२  
 3 इन थुं परमप्रभु यावे गे मलेत्ताक्नी हना, गे यो मोदेशो पा बेक्नीनी।  
 4 सिलोआमी नेल्ल क्येडा लाइशशो खिं ब्रेम्मेनु, १८ जना चिप्शा बेक्मा बाक्त। मोपा बेक्शोपुकी यरूसलेम सहरम बाक्ब नेल्ल आन क्येडा मरिम्शो बाक्मा बाक्त, दे मिम्नीनी? ममाइ, मेको इन खोदेशोन नम।  
 5 इन थुं परमप्रभु यावे गे मलेत्ताक्नी हना, गे यो मोदेशो पा बेक्नीनी” दे माइक्मी बाक्त।  
 6 मिनु कथा सेल्शा “मुर कामी पोत्रशी रवा का खुमा बाक्त। मिनु फल सित्वी ना, सिदा कों, दे कोत्रथ लमाक्त। मिनु कोत्रडानु दा, काइ मसिश्शो बाक्माक्त। मती २१:१९  
 7 मोपा मसिश्शो तशा, आ गेय पाइब कली ‘एको रवा फल मसिप्ब। गो बर्स बर्सम खेयप सां कोत्रथ जाक्डानु, काइ मसिश्शो बाक्त। एको रवामी रू ला नेक्तु। मोपतीके एको कली तिम्शा ताइक्तो’ दे मदा बाक्त।  
 8 आ गेय पाइबमी चहिं ‘आं होत्रप, मुल बाक्ल। बर्स का सम्म आ पुं मेर दोशा, मोल कुर पाइनुड। २पत्रुस ३:९, १५

9 मिनू सिस्त हना, बाक्ल। मसिस्त हना, तिम्शा ताडक्चा' देंमाक्त" दे शेंदीमी बाक्त। लूका ३:९

कूजी कली सापाइश्शो

10 काबु नाइक्तीक नाक्ती गुम्तीक खिंमी मुर आन कली शेंदीमी बाक्त। लूका ६:६-११

11 मेकेर वोल्म तशा, १८ बर्स कूजी दुम्शो मीश का मुर बाक्माक्त। मेको गुर ब्वेशो बाक्माक्त। रिम्शो पा राप्ने मचाप्बाक्माक्त।

12 मिनू येसुमी मेको मीश मुर कली तशा "एक पिबो" दे ब्रेत्ता बाक्त। मिनू पिमेनु "आं तमी, कूजी दुम्शो रे प्रॉइतन" देंशा आ गुड मेको तारी वोदा बाक्त।

13 मोपा वोदानु, साशा राम्माक्त। मिनू ग्येरशा परमप्रभु यावे कली टेयब सेला बाक्त।

14 मिनू गुम्तीक खिं डा टेयब मुरुमी नाइक्तीक नाक्ती सापाइश्शो तशा, आ थुं मनुमाक्त। मिनू आ थुं मनुथु, मेकेर बाक्ब आन कली "साता कामी ६ नाक्त गेय पचा माल्ब। काबु नाइक्चा माल्ब। मिनू नाइक्तीक नाक्ती गेय पचा मदुम्ब। मोपतीके इन रोड सापाइक्चा कली नाइक्तीक नाक्ती गेनायो मजाक्कीन। अरु नाक्त जाक्कीन" दे हुडक्तीमी बाक्त। प्रस्थान २०:९-१०

15 मिनू प्रभुमी हुडक्ब मुर कली "ए कपटी, गे नाइक्तीक नाक्ती इन ब्यफ नु गधा आन कली प्रॉइशा, ब्वाक्कु मतूपाइक्नीनी डा? लूका १४:५

16 एको मीश मुर अब्राहाम आ तमी बाक्ब। सैतानमी एको कली १८ बर्स सम्म रोडम गुरपाइश्शा वोइश्शो बाक्त। मिनू एको कली नाइक्तीक नाक्ती मप्रॉइचा? मसापाइक्चा?" दे हुडक्ता बाक्त। लूका १९:९

17 मोदेंशो लोत्र पवानु, आ कली मरिम्शो देंब मुर मुने दोक्माक्त। मेकेर बाक्ब मुर नेल्ल येसु आ पशो रिम्शो गेय तशा, थाप्पा ग्येरसमा बाक्त।

परमप्रभु आ राज्य आ पर्वम शेंशो

मती १३:३१-३३; मर्कूस ४:३०-३२

18 मिनू मेकोमी "परमप्रभु यावे आ राज्य दोदेंशो बाक्ब देंशा हना,

19 मुर कामी आ रूमी तोरी शोक्गा बाक्त। मिनू वाशा टेयब रवा दुम्माक्त। मेको रवाम चिक्बपुकीमी ग्योत्र सेल्मे बाक्त।

20 मिनू परमप्रभु यावे आ राज्य दोदेंशो बाक्ब देंशा हना,

21 मीश मुर कामी सेआह सां फसीम बोरपाइक्ब ओरूती सुप्ताक्व। मिनू मेको फस नेल्ल बोरन" दे शेंदीमी बाक्त। सेआह का १३ लिटर गारचा डा पुक्तीके बाक्ब। अरु ब्रेक्तीकेमी चहिं ७ लिटर पुक्तीके बाक्ब, दे ब्रेक्शो बाक्त। सेआह सां ३९ लिटर कि २१ लिटर पुक्तीके बाक्ब।

आइक्च लाप्चो आ पर्वम शेंशो

22 येसु गाउं सहर ते ते जाक्दीम्मे, मेक मेक शेंना शेंन यरूसलेम गे लमाक्त।

23 मिनू मुर कामी "शेंब हजुर, परमप्रभु यावे आ राज्य ओत्रचा ताडबपुकी का निक्शी ला बाक्नीमी?" दे हिल्लो पवा बाक्त

24 मिनू येसुमी "आइक्च लाप्चो रे ओत्रचा मालो। मेकेर रे शुश मुर ओत्रचा दाक्नीम, तन्न ओत्रने मचाप्नीम। मती ७:१३-१४

25 मारदे हना खिं डा मुरुमी लाप्चो चोक्ब। मिनू जाक्शोपुकी लाडगाम राप्शा 'ओत्रचा गेकी, प्रभु' दे ब्रेत्लीनी। तन्न खिं डा मुरुमी 'इन कली मतुडक्ननी, ते रे जाक्शो ननी?' देंब। मती २५:११-१२

26 मिनू गेपुकीमी 'हजुर, गे नु काथा खमे जाइब नकी। आंइ गाउं सहर सहरमी शेंदीनीनु, गो इन लोत्र नेतक' देंनीनी। मती ७:२२-२३

27 तन्न मेकोमी इन कली ओत्रचा मगेथु 'ते रे जाक्नी मतुडक्नुड। मरिम्शो पाइबपुकी आं रे पा डोन लने' दे खेरब।

28 मोदेंशो पा खेरचा पुडसीशा, डाक्शा इन खुड शेप्नीनी। मारदे हना इ किकी पिपी अब्राहाम, इसहाक, याक्ब नु परमप्रभु यावे आ लोत्र पाइब नेल्ल आन कली परमप्रभु यावे आ राज्यम ओत्रशा, बाक्शो ताइनीनी। गे चहिं खेरचा पुडसीनीनी। मती ८:११-१२

29 मुरपुकी पूर्व पच्छिम उत्तर दक्खिन रे जाक्शा, परमप्रभु यावे आ राज्यम ओत्रशा भोज जशा बाक्शो ताइनीनी। लूका १४:१५

30 नेल्ल आन क्येडा नोले दुम्शोपुकी डोंइती दुम्नीम। मिनू नेल्ल आन क्येडा डोंइती दुम्शोपुकी नोले दुम्नीम" दे शेंदीमी बाक्त।

हेरोदम येसु कली साइक्चा माल्शो

31 येसुमी शेंना शेंन बाक्मेनु, फरिसीपुकी जाक्शा, येसु कली "पिप हेरोदम इन कली ग्याइश्शा साइक्चा माल्शो बाक्ब। मोपतीके एक रे रीब पा लने" देंथ जाक्मा बाक्त।

32 मिनू येसुमी "लशा, मेको फ्याउरे कली 'मुलाक्ती नु दीसा वोल् आन कली खेरनुडमी। रोड पशो मुर आन कली सापाइक्नुडमी। मिनू नित्थ नाक्ती आं गेय थुम्नुड।

33 मुलाक्ती, दीसा नु नित्थ नाक्ती यरूसलेम मेर गाक्नुड। मारदे हना परमप्रभु यावे आ लोत्र पाइबपुकी साइ रेन यरूसलेम सहम ला खतम दुम्नीम' देंनीन" दे सोइक्तीमी बाक्त।

यरूसलेम मिम्शा, येसु आ थुं खाइशशो

मती २३:३७-३९

34 मिनु यरूसलेम कली “ए यरूसलेम, यरूसलेम, परमप्रभु यावे आ लोत्र पाइब आन कली साइक्तीवी। इ कली शेंथ सोइशशो आन कली फुल्लु क्रोमताक्वी। पोत्रथीमी आ चितोली आन कली पुष्पो खोदेंशो पा, गो शुश खेयप इ आल आन कली पुष्पा माल्ती, गे चहिं मबिस्से। मती २३:३७-३९; लूका १९:४१-४४

35 मुल इ खिं ब्रेशशा मारेइ मलीब। ‘प्रभु आ नेंमी जाक्ब ठेयब बाक्ब’ मदेने सम्म गे आं कली मताइनेवे” देमाक्त। येरमीया २२:५, भजन संग्रह ६९:२७; भजन संग्रह ११८:२६

## 14

नाइक्तीक नाक्ती सापाइशशो

1 मिनु काबु नाइक्तीक नाक्ती मार दुम्माक्त देशा हना, येसु फरिसी आ खिंमी खमे जथ लमाक्त। मिनु फरिसीपुकीम “मार पाइबा, मार शेंबा” दे योत्रकी पा बाक्मा बाक्त। लूका ६:६-११; लूका ११:३७

2 मिनु मेकेर शुश ब्वाक्कुम ब्रीशा होम्शो रोइ पशो मुर का बाक्माक्त।

3 मिनु मेको रोइ पशो मुर येसु आ डोंइती बाक्मेनु, येसुमी सास्त्री नु फरिसी आन कली “नाइक्तीक नाक्ती सापाइक्चा दुम्बा, दे मदुम्बा?” दे हिल्लो पामी बाक्त।

4 मेकोपुकीमी आ लोत्र मलेत्थु ब्वालेइ पा बाक्मा बाक्त। मिनु येसुमी रोइ पाइब कली थिशा, सापाइशशा, आ खिं सोइक्ता बाक्त।

5 मिनु मेको योत्रकी पाइब आन कली “नाइक्तीक नाक्ती इन ब्यफ, इन गधा का इनारम बिक्त हना, मगुंइनीनी डा?” दे हुइक्तीमी बाक्त। लूका १३:१५; मती १२:११

6 मिनु मारेइ लोत्र लेन्ने मचाप्मे बाक्त।

लोत्र खाइक्पाइशशो

7 मिनु मेकेर खमे जथ जाक्शो शुशेमी ठेयब लेशशा, ठेयब मुर आन नित्तीकेमी नित्चा माल्शो तशा मती २३:६

8 “जन्ती लनीनु, सम्दी नित्तीकेमी मनिस्सीन। हितोपदेस २५:६-७

9 मारदे हना सम्दी जाक्मेनु, खिं डा मुरुमी इन कली पोक्शा याक्पाइक्ब। मिनु सम्दी नित्तीकेमी सम्दी कली निप्पाइक्ब। इन कली चहिं वाइलपुकी नु निप्पाइक्ब। मिनु मुने दोक्नीनी।

10 जन्ती लनीनु, वाइल आन नित्तीकेम निस्सीने। मिनु खिं डा मुरुमी इन कली वाइल नु निशशो तशा ‘ए जन्तीपुकी, एक पिने’ दे ब्रेशशा, इन कली मान पा ठेयब मुर नु निप्पाइक्ब। मिनु मेकेर बाक्बपुकीमी यो इन कली मान पाइनीम।

11 मारदे हना ठेयब सुंइसीब कली मुरपुकीमी महिक्थु मान मपाइनीमी। ठेयब मसुंइसीब कली चहिं मुरपुकीमी ठेयब सेल्शा, मान पाइनीम” दे शेंदीमी बाक्त। लूका १८:१४; मती २३:१२; याक्ब ४:६,१०

12 मिनु खमे जथ ब्रेप्ब कली “गे जचा तूचा सेल्शा मान पा गेवीनु, आंम मुर बारचपुकी नु शोंप पाइशशो मुर आन कली मब्रेत्तीमी। मारदे हना इ कली यो लेशा ब्रेशशा मान पा जचा गेशा, इ देदेइ लेत्तीम।

13 भोज पवीनु, पुडग आन कली कूजी कुंजे, नु मिक्च मताइब आन कली ब्रेत्तीमी। ब्यवस्था १४:२९

14 मिनु मेकोपुकीमी इ देदेइ लेन्ने मचाप्नीम। तन्न परमप्रभु यावेमी निसाफ पची ना इ पशो नेल्ले ताइनेवे” देमाक्त। १कोरिन्थी १५:२३; प्रेरित २४:१५

ठेयब भोज

मती २२:१-१०

15 मिनु मेकेर बाक्ब कामी येसु आ लोत्र नेंशा “सु परमप्रभु यावे आ राज्यम ओत्रशा, जचा ख्रेत्ता पुंइसीबा, मेको ग्येरसेक्ल” देमाक्त। लूका १३:२९

16 मो देंब कली येसुमी “मुर कामी ठेयब भोज का गेचा कली, शुश मुर आन कली ब्रेत्ता बाक्त।

17 मिनु जचा तूचा सेल्शा, आ गेय पाइब का कली ‘जचा तूचा ठीक पाता। मुल जथ पिने’ दे ब्रेत्थ सोइक्ता बाक्त।

18 मिनु गेय पाइब लशा, खिं कामी जाक्दीशशा ‘लो जथ पिने’ देमेनु ‘गो रू ग्याप्ता। मुलाक्ती कोत्रथ लड देंती। मिनु पिचा मताइनुड, देंत, देनो’ देमाक्त।

19 मिनु अर्को आ खिंमी जाक्दीम्मेनु ‘गो ५ हाल ब्यफ ग्याप्ता। मिनु मुलाक्त ब्वाक्शा, कोत्रथ लाइनुड। मोपतीके गो पिचा मताइनुड, देंत, देनो’ देमाक्त।

20 मिनु अर्को खिं लमेनु, मेकोमी ‘गो ग्युंवे पाता। मिनु गो पिचा मताइनुड’ देमाक्त। का का पा ‘पिचा मताइनुड’ दे मेको गेय पाइब कली लोत्र लेत्मे बाक्त। १कोरिन्थी ७:३३

21 मिनु गेय पाइबमी मेको लोत्र नेल्ल आ होत्रप कली शेंदा बाक्त। मिनु मेको गाइशशा ‘मो हना गे सहर मेर हिरशा लावो। मिनु पुडग, कूजी कुंजे, मिक्च मताइब नु गुइ खोइल मदुक्ब आन कली खुप्शा चाक्मी’ दे सोइक्ता बाक्त।

22 मिनु ब्रेत्थ लशा चाक्शा, आ होत्रप कली ‘इन देशो नेल्ल पाता, चिनु नित्तीकेम मुर मब्रीम’ देमाक्त।

23 मिनु होत्रपमी ‘नित्तीके मब्रीम सम्म मुर आन कली “जाक्कीन है, जाक्कीन” दे ब्रेशशा चाक्मी। मिनु आं खिं ब्रील।

24 डोंइती आं ब्रेशशो सुइमी मारेइ यो जचा थोत्रक थाम्चा मतामेक्ल” देमाक्त।

येसु आ नोले दोपा खोइक्चा

25 येसु गाक्मेनु, शुश मुरुमी आ नोले खोदमे बाक्त। मिनु येसुमी मेको आन कली कोत्रशा

26 “सु सु गो नु बाकचा दाक्नीमी, मेकोपुकीमी आम आफ, आम मीश, आम वोंइश, तमी तौ, लोकबपुकी नु आम कली यो ममिम्थु, आं नोले खोइय्यीमील। मारदे हना मेको मिम्बपुकीमी आं नोले खोइक्ने मचाप्नीम। लूका १८:२९-३०; ब्यवस्था ३३:९; १कोरिन्थी ७:२९

27 सु सुमी आन श्येत कुरशा, आं कली मखोइक्नीमी, मेको आं शेंसीब दुम्ने मचाप्नीम। लूका ९:२३

28 मार, गेपुकीमी लाइशशो खिं सेल्चा क्येडा डोंइती, सेल्ने थुम्चा कली क्येट जाकदीप्बा देय मजाकदीप्बा, दे हिसाब मपाइनीनी डा?

29 हिसाब मपथु सेल्चा गोशा, खिं सेल्ने मथुम्थु क्येट नुप्त हना

30 ‘आ क्येट मजाकदीत्थु, मार सेल्चा गोवा?’ दे शुक्शी पाइक्चा पुंडसीशा मुने दोक्सीब।

31 पिप काम आ बाक्शो १० हजार लडाइ पाइब लाइशशा, २० हजार लडाइ पाइब बाक्शो पिप नु लडाइ पचा थुं पाप्नु हना, मेकोमी ग्राने चाप्नुडा देय मचाप्नुडा, दे ममिम्बा डा?

32 ग्राने मचाप्नुड, दे मिम्ताक्व हना, डोन बाक्मानु ‘दुशा बाक्य’ दे लोत्रसी पचा कली आ मुर सोइक्ब।

33 मोदेशो पा गे यो आं नोले खोइक्चा क्येडा डोंइती ‘खोइक्ने चाप्नुडा देय मचाप्नुडा’ दे मिम्तीने। गे नु बाक्शो मारेड ममिम्थु, आं नोले खोइय्यीनी। ममिम्थु मचाप्नीनी हना, आं शेंसीब दुम्ने मचाप्नीनी। लूका ९:६२

34 हिकसीम ब्रोव्रपाइक्ब। तन्न आ डाम्चा जाम्त हना, मारम मेको कली डाम्पाइक्चा। मत्ती ५:१३; मार्कूस ९:५०

35 मेको ना रू कली दुम्बा, ना मुर कली दुम्बा। मोपतीके मुरुम मेको कली ताइक्नीम। सु के नोफा बाक्मे, मेकोमी नेनल” दे शेंदीमी बाक्त।

## 15

“जाम्शो थिरशा ग्येरसमल” दे शेंशो

1 मिनु शुश तिमो पोक्ब नु पापीपुकी येसु आ लोत्र नेंथ जाक्मा बाक्त।

2 मिनु फरिसी नु सास्त्रीपुकीमी तिमो पोक्ब नु पापी शुश येसु नु काथा बाक्शा जशो तशा “मेको मुरुमी पापी आन कली ब्राइब। पापीपुकी नु काथा बाक्शा, खमे जाइब” दे आन थुं मनुथु, लोत्र पामे बाक्त। लूका ५:३०; लूका १९:७

3 मिनु येसुमी मेको आन थुं मनुशो तुइक्ता बाक्त।

जाम्शो भेडा आ कथा

4 मिनु “मुर कामी सहे का भेडा थुल्शा, मेको आन कली योव्रडानु, भेडा का जाम्त हना, मार, मेकोमी लीशो ९९ भेडा आन कली प्रोंइशा, जाम्शो कली माल्थ मलाइबा डा? मथिदा सम्म माल्ना माल्ना गाक्ब। मत्ती १८:१२-१४; लूका १९:१०; इजीकीएल ३४:१२; यूहन्ना १०:११-१२

5 मिनु मेको जाम्शो भेडा का कली थिरशा, ग्येरसीशा, बलाम लाप्शा, आ खिं चाक्ब।

6 मिनु आ वारच आन कली ‘आं जाम्शो भेडा थिरशा चाक्ता। मोपतीके नेल्ल ग्येरसय’ देंब।

7 मारदे हना ९९ परमप्रभु यावे गे लेत्चा ममाल्शो रिम्शो पाइब आन क्येडा पापी कामी पाप पचा प्रोंइशो तशा, स्वर्गम बाक्बपुकी ग्येरसीनीम” दे शेंताक्मी।

जाम्शो क्येट आ कथा

8 मिनु “मार, मीश मुर कामी १० ओटा द्राक्मे वोइशशोमी का जाम्त हना, बत्ती दाशा, खिं गा, कुना लाडगा नेल्ल हिरशा, मथिदा सम्म ममाल्बा डा? द्राक्मे ग्रीक लोत्र बाक्ब। मेको देनार का खोदेशो नाक्त का डा गाल्च बाक्त। देनार चहिं रोमी लोत्र बाक्ब।

9 मिनु थिरशा आ वारच आन कली नु आ नेक्था डा मुर आन कली ब्रेशशा ‘आं के जाम्शो द्राक्मे का माल्शा थिल्ला। मुल ग्येरसाक्की’ देंब।

10 मोपा पापी मुर कामी पाप पचा प्रोंइशा, आ थुं परमप्रभु यावे गे लेत्ताक्व हना, परमप्रभु यावे आ स्वर्ग डा गेय पाइबपुकी ग्येरसीनीम” दे माइक्मी बाक्त।

जाम्शो तौ आ कथा

11 मिनु लोत्र बोइशशा “मुर का के तौ निकशी बाक्सा बाक्त।

12 मिनु काबु कान्छा तोमी ‘आं आफ अडस योक्शा गेयी’ देंमाक्ता। मिनु आफोमी जेटा नु कान्छा आस कली अडस योक्शा, गेम्सी बाक्त।

13 मिनु कान्छामी इक्का नाक्त नोले आ अडस नेल्ल खुप्शा, क्येट नेल्ल कुरशा गाक्माक्ता। मिनु जशा, तूशा, तेल्लेम पा, जवा ग्यारशा, क्येट नेल्ल थुमा बाक्त। हितोपदेस २९:३

14 मिनु मेको रागीमी अन्काल दुम्माक्ता। मिनु कान्छामी श्येत जवा बाक्त।

15 मिनु मेको रागी डा मुर का आ खिंमी गेय पवा बाक्त। मिनु मेको मुरुमी कान्छा कली पोव्र योव्रब सेला बाक्त।

16 मिनु जचा मतथु, शोव्रलु बेक्शा, पोव्र कली जचा गेशो थोव्रकी यो जड खोदेशो दुम्माक्ता। तन्न सुइमी मारेड जचा मगेमे बाक्त। हितोपदेस २३:२१

17 मिनु शुश श्येत जशा ‘आं आफ आ खिंमी गेय पाइबपुकीमी रूथ्री जाइनीम। हेंथ्री दुम्ब। गो चहिं शोव्रलुम बेक्चता।

18 मुल गो आं आफ आ खिं लेत्नुड। मिनु आं आफ कली “गो परमप्रभु यावे आ देशो मटिड। इन देशो यो मटिड। भजन संग्रह ५१:६; येरमीया ३:१२-१३

19 मुल इन तौ देंचा मशिरनुड। मोपतीके इन गेय पाइब का सेल्यीनी” दे मिम्ता बाक्त।

20 मिनू आ आफ आ खिं लेम्माक्त। मिनू आ आफ आ खिं जाकदीत्चावानु, आ आफोमी कान्छा कली पिशो तशा, शिशी पा दोरशा लशा मुप्शा पुक्पु पदा बाक्त।

21 मिनू मेकोमी 'आं आफ, गो परमप्रभु यावे आ देशो मटिड। इन देशो यो मटिड। मोपा मटितीके पापम ग्रुन्ती। इन तौ देंचा मशिरनुड' देंमाक्त।

22 मिनू आफोमी गेय पाइब आन कली 'नेल्ल क्येडा दारशो फेक्तीक वा गुंडशा, आं तौ कली फेक्तीने। आ गुडमी औंठी लिक्तीन। जुत्ता मुडक्पतीने।

23 मिनू दोम्शो बाछा क्योरशा, क्येशा जचा तूचा सेल्शा, नेल्ल ग्येरसय।

24 मारदे हना आं बेक्शो तौ सेस दुम्त। आं जाम्शो तौ थित्ता' देंमाक्त। मिनू जशा तूशा नेल्ले ग्येरसमा बाक्त। एफिसी २:५

25 मेकोपुकी ग्येरसीशा बाक्मानु, जेठा तौ रूमी गेय पथ लशो बाक्माक्त। मिनू लेशशा खिं आ नेक्था जाक्मेनु, शुश मुर खुम्सीशा सिल पा, जशा तूशा ग्येरसीशा बाक्शो तवा बाक्त।

26 मिनू गेय पाइब का कली 'इं खिंमी मार दुम्मे?' दे हिल्लो पवानु,

27 मेकोमी 'इन लोकब जाक्त। मिनू इन आफोमी जाक्शो तशा, ग्येरसीशा, दोम्शो बाछा क्योरपाइक्तु' देंमाक्त।

28 मिनू मेको नेल्ल नेशा 'खिं मओन्ननुड' दे चुरशा बाक्माक्त। मत्ती २०:१५

29 मिनू आफोमी लेम्शा 'ओन्नडो, गे यो ग्येरसो' देंमेनु 'मार ग्येरसीनुडा, गो शुश बर्स एको खिं डा गेय पना पन बाक्ती। इन लोन्न नेल्ल टिशा बाक्ती। गेना हना यो रिम्शो ला पाता। तन्न आं वारचपुकी नु बाक्शा ग्येरसीचा कली बोका का यो मगेनी।

30 इन तौ कान्छामी इं खिं डा बाक्शो नेल्ल लाइशा, तेल्लेम पा थुम्तु। मोदेशो मुर लेशशा जाक्मेनु, दोम्शो बाछा क्योरतीनी। मिनू मचुरनुडा डा?' देंमाक्त।

31 मिनू आफोमी 'आं तौ, गे गो नु काथा बाक्ते। आं मार मार बाक्मा, मेको नेल्ल इ के नमी।

32 इ लोकब चहिं बेक्शा रे ब्रोडत। जाम्शो रे थिस्साक्व। मोपतीके गो नेल्ल ग्येरसय' देंमाक्त" दे येसुमी शेंदीमी बाक्त।

## 16

थुं का पा परमप्रभु कली टेयब सेल्लीन

1 काबु येसुमी आ शेसीब आन कली "क्येट थीब मुर कामी आ मार मार बाक्मा, मेको नेल्ल हिसाब पाइब का कली जिम्मा गेशा वोइशो बाक्माक्त। मिनू काबु मुरपुकीमी 'हजुर, इन हिसाब पाइबमी क्येट मारेड मारेड हेंथे पा थुम्तु' दे शेंदमे बाक्त।

2 मिनू क्येट थीबमी आ हिसाब पाइब कली ब्रेशशा 'गेमी आं क्येट थुम्शा गेयी बाक्त। डोंइती रे डा दोशो चेमी दोशो थुमी, लो, नेल्ल कोंइदी। मुल डा मेरे इ कली मवोइक्नन' दे मदा बाक्त।

3 मिनू मेकोमी 'आं गेय रोइशशा सोइक्ताक्यी। मुल गेय मताइनुड। कोदाली दोने यो मचाप्नुड। पुंडशा जचा कली यो मुने पाइनुड।

4 मुल मार पचा माल्नुडा। गो मेको तुइक्नुड। मुर आन खिं लडानु आं कली दोपा लोन्न पाइनीमी, मेको यो तुइक्नुड' दे मिम्ता बाक्त।

5 मिनू मेकोमी आ होन्नप आ जेर लाइब आन कली का का पा ब्रेशशा, डोंइती जाक्ब कली 'गे दोशो, मार लदी?' दे हिल्लो पवा बाक्त।

6 मिनू मेकोमी 'सहे का बाथ जचा तेल लाइशशो नड' देंमेनु 'लो, नक कागज का सेल्स। मिनू जोल पा ५० बाथ ला ब्रेक्ताक्स' देंमाक्त। बाथ का २२ लिटर खोदेशो बाक्ब।

7 मिनू अर्को कली 'गे दोशो मार लदी' दे हिल्लो पवानु, 'सहे का कोर चेरब लाइशशो नड' देंमेनु 'लो, नक कागज सेल्शा, जोल पा ८० कोर ब्रेक्ताक्स' दे नक कागज का सेल्से बाक्त। कोर का २२० लिटर बाक्ब।

8 मिनू जेर लाइक्ब नेल्ल आन के नक कागज सेल्शा, होन्नप कली कोंइदा बाक्त। मिनू मेकोमी कोन्नशा 'गे मेको आन कली वारच सेल्शा, निप्स पाइशशो गेय पा कोंइताक्यी' देंमाक्त। रागीमी थमा सुइक्ब क्येडा थमा मसुइक्बपुकीमी निप्स पाइशशो गेय पाइनीम। एफिसी ५:८-९

9 मोपतीके गे यो निप्स पाइशशो गेय पा वारचपुकी सेलीने। इन शोंप क्येट मारेड मारेड यो मथीब आन कली शिशी पा गेतीनी हना, परमप्रभु यावेमी इन पशो खोदेशो पा गेब" देंमाक्त। लूका १४:१४; मत्ती ६:२०; मत्ती १९:२१

थुं निक्शी पाइशशो मटुमीन

10 मिनू लेंशा "सुमी थम आइक्च गेय कली रिम्शो पा पाइबा, मेकोमी टेयब गेय यो रिम्शो पा पाइब। सुम आइक्च गेय, दे मरिम्शो पा पाइबा, मेकोमी टेयब गेय यो मरिम्शो पा पाइब। लूका १९:१७

11 मोपतीके गे रागी डा क्येट आ पर्वम जोल पाइब दुम्तीनी हना, स्वर्ग डा शोंप दोपा ताइब दुम्ने चाप्नीनी?

12 गे अर्को मुर आन थोवक आ पर्वम जोल पाइतीनी हना, आंमा इन शोंप इन कली सुम गेबा डा?

13 गेय पाइब कामी होन्नप निक्शी आस गेय पने मचाप्ब। मारदे हना का आ देशो टिप्तु हना, अर्को कली मटीब दुम्ब। का कली दाक्ताक्व हना, अर्को कली चहिं काइ मदाक्ब। मोपतीके गे यो परमप्रभु यावे नु शोंप निक्शी आस नोले खोइक्ने मचाप्नीनी" दे येसुमी शेंदीमी बाक्त। मत्ती ६:२४

फरिसी आन कली हुइशशो

14 फरिसीपुकीमी क्येट नु शोप दाक्बाक्मा बाक्त। मिनु येसु आ लोव नेंशा गाइश्शा, शुक्शी पामे बाक्त।  
 15 मिनु येसुमी “मुर आन कली ‘गो ठीक नकी’ देखु पा कोंइनीनी। मिनु मुरपुकीमी इन कली ठेयब सेल्नीम। परमप्रभु यावेमी चहिं इन मिम्शो नेल्ल तुडक्ब। मुर आन दातेमी हिक्सीशो नेल्ले परमप्रभु यावे आ डोंइती थम आइक्च दुम्नीम। लूका १८:९-१४

साइ ब्रेक्शो लोव आ परबम शेंशो

16 साइ डोंइती रे परमप्रभु यावे आ अरेशो लोव नु आ लोव पाइब आन ब्रेक्शो यूहन्ना आ पाला सम्म शेंताक्म। यूहन्ना जाक्म रे परमप्रभु यावे आ राज्य डा लोव नेंपाइक्नीम। मिनु शुश मुरुमी मेको लोव नेंशा, थमा सुइश्शा, परमप्रभु यावे आ राज्यम ओव्रचा बोल पाइनीम। मती ११:१२-१३

17 परमप्रभु यावेमी ब्रेक्पाइश्शो लोव का यो मग्याम्ब। मेको ग्याम्बा क्येडा सरीड नु रागी ग्याम्ब। मती ५:१८; मती १९:९

18 सुमी आ मीश कली प्रोंइशा, अर्को मीश चाक्बा, मेकोमी मीश वोंइशा आस नाता खोइश्शा, हेंथे पाइब। सुमी आ वोंइश नु ब्राशा गाक्शो मीश चाक्बा, मेकोमी यो वोंइश मीश आस नाता खोइश्शा, हेंथे पाइब।

शोप पाइश्शो मुर नु लाजरस

19 शुश शोप पाइश्शो मुर का बाक्माक्त। मेको रिम्शो रिम्शो फेक्शा, ब्रोवब्रोवशो जशा बाक्बाक्माक्त।

20 आ खिं डा लाइगाम चहिं जचा मतथु, श्येत जशो लाजरस माइश्शो मुर का गोल्शा बाक्बाक्माक्त। मेको रोइ पा आ रां नेल्ल गार गूशा राक्शो बाक्माक्त।

21 मेको शोप पाइश्शो मुरुम आ जशो रे खपीम दोक्शो जचा ताइनुडा कों, दे आस पा कोव्रशा बाक्बाक्माक्त। आ गार कुचुमपुकीमी तुक्बाक्मा बाक्त।

22 मिनु लाजरस शुश श्येत जशा बेक्माक्त। मिनु परमप्रभु यावे आ स्वर्ग डा गेय पाइबमी अब्राहाम आ थुकुमी वोदमे बाक्त। मेको नोले शोप पाइश्शो मुर यो बेक्शा थिम्चा पुंइसे बाक्त।

23 मेको शोप पाइश्शो मुर बेक्शो मुर आन बाक्तीक जाक्दीम्माक्त। मिनु शुश श्येत जशा, डोन रे कोव्रडानु, लाजरस कली अब्राहाम आ थुकुम बाक्शो तवा बाक्त।

24 मिनु ठेयब सेंदा पा ‘ए, आं आफ अब्राहाम, शिशी पाइय्यीनी। मारदे हना गो मीम दुप्शा, आं शोव सोव्रशा बेक्चता। लाजरस कली आ ब्रेचो ब्वाक्कु खुम्शा, ब्वाक्कु तोक्पाइक्थ सोइक्तीने’ दे ब्रेम्माक्त।

25 तन्न अब्राहाममी ‘डोंइती थम रिम्शो पा बाक्ते। लाजरस चहिं शुश श्येत जशा बाक्त। मुल चहिं लाजरस आ थुं नाइक्चा ताप्तु, गे चहिं श्येत जशा बाक्नेवे। लूका ६:२४

26 मोशो ला ममाइ। परमप्रभु यावे आ राज्य डा मुर नरक मलाइनीम। मिनु नरक डा मुर यो परमप्रभु यावे आ राज्यम ओव्रचा मताइनीम’ दैमाक्त।

27 मिनु मेकोमी ‘आं आफ, सेउ पाइनन्नी, खिंमी आं के ५ जना लोक्ब बाक्नीम।

28 मेको आन कली “इन लोक्ब बेक्शा, नरक लशा श्येत जशा बाक्त। आ पशो खोदेशो मपने। मो पाइतीनी हना, आ खोदेशो दुम्नी” दे माइक्थ, लाजरस कली सोइक्तीने’ दे सेउ पवा बाक्त।

29 मिनु अब्राहाममी ‘परमप्रभु यावेमी मोसा कली ब्रेक्पाइश्शो लोव नु परमप्रभु यावे आ लोव पाइब आन ब्रेक्पाइश्शो लोव मेकोपुकी नु बाक्नीम। मेको पदेशा नेन्मेकल’ दैमेनु, रतिमोथी ३:१६

30 ‘ममाइ, आ आफ, बेक्शो रे सेंसीशो मुर सोइक्ताक्नी हना ला, मेको आ लोव नेंशा टिशा, पाप पचा प्रोंइशा, आन थुं परमप्रभु यावे गे लेल्नीम’ दे सेउ पवा बाक्त।

31 मिनु अब्राहाममी ‘ममाइ, परमप्रभु यावे आ ब्रेक्पाइश्शो लोव मटिन्तेक्म हना, बेक्शो रे सेंसीशो मुर तशा यो थमा मसुइक्नीम’ दैमाक्त” दे येसुमी शेंदीमी बाक्त।

## 17

पाप पपाइक्ब बोक्नीम, दे शेंशो

मती १८:६-७; मती १५:२१-२२; मर्कूस ९:४२

1 काबु येसुमी आ शेंसीब आन कली “मुरपुकीमी पाप पपाइश्शा दाइल पाइक्चा गोइनीम। तन्न सुइमी अरु आन कली दाइल मपपदल, मारदे हना दाइल पपाइक्ब कली शुश मरिम्शो दुम्ब। मती १८:६-७

2 मेको आ शुमी यात क्युक्शा, समुन्द्रमी खुम्शा साइक्चा अरु सजाइ क्येडा रिम्शो दुम्ब।

3 इन कली का का पा शेंनन्नी। मिनु नेनीने। इ लोक्बमी पाप पाप्तु हना, मेको कली ‘मो मपचा’ दे अर्ती गेवो। इ अर्ती नेंशा माफ पुंइतु हना, माफ गेवो। मती १८:१५

4 काबुम ७ खेयप पाप पशा, ७ खेयप माफ पुंइथ जाक्त हना यो, ७ खेयप माफ गेवो” दे शेंदीमी बाक्त। मती १८:२१-२२

थमा सुइक्तीक बारपाइक्चा, दे पुंइशो

5 मिनु शेंसीबपुकीमी येसु कली “प्रभु, आंइ थमा सुइक्तीक थुं बारपा गेकी” दे पुन्ने बाक्त।

6 मिनु प्रभुमी “रायो गेडा खोइ ला थमा सुइक्तीनी हना, इन पने मचाप्चा डा मारिइ मलीब। एको रवा कली ‘शाक्श सुन्दा दुल्शा समुन्द्रम याक्सो’ देंनीनु, एको रवा यो याक्सीब।

गेय पाइबम गाल्च ला ताइब, दे शेंशो



7 नेनीने, मिनु मिम्तीने। इन गेय पाइब कामी ब्यफ वाक्शा, कि बी योवशा, खिं लेशशा जाक्मेनु, खमे खेत्नीनी डा? ममाइ।

8 गेमी 'लो, मी मुइशशा, खमे क्येशा थुल्यी। मिनु गे यो जावो' देंनीनी।

9 गेय पाइबमी अरेशो गेय पवानु, आ ठेयब मुरुमी सेवासी गेबा डा?

10 गेपुकी गेय पाइब ननी। परमप्रभु यावेम इन कली आ गेय पाइब सेल्शा, गेय पपाइक्तु। मिनु एको गेय पशा 'परमप्रभु यावे आ देशो पाइतय। तन्न सेवासी गेने मपुंडसय। मारदे हना आ वोइशशो मुर नय' दे मिम्तीने" दे शेंदीमी बाक्त। १कोरिन्थी ९:१६

कोव्रर पाइब आन कली सापाइशशो

11 मिनु यरूसलेम डा लां खोइशशा, गालील नु सामरीया रागी आन दाते डा लां लमा बाक्त। लूका ९:५१; लूका १३:२२

12 मिनु काबु गाउं का जाकदीम्मानु, १० जना कोव्रर पशो मुरपुकीमी "येसु पीब" देशो नेशा, लां कोव्रशा बाक्मा बाक्त। लेवी १३:४५-४६

13 मिनु मेकोपुकीमी "येसु, शेंब, आंड कली शिशी पाइक्की" दे सेउ पा ब्रेम्मा बाक्त।

14 मिनु येसुमी मेको आन कली तशा "गेपुकी, चढेब आ डोंइती लशा, इन साशो रां कोंइदीने" दे सोइक्तीमी बाक्त। मिनु लना लन लामीन आन कोव्रर सामा बाक्त। लूका ५:१४

15 कामी आ रां साशो तशा, फ्रा लेशशा परमप्रभु यावे कली ठेयब सेला बाक्त।

16 मिनु दोरशा पिशा, येसु आ डोंइती बाप्शा खुम्की पा "प्रभु, गे आं कली रिम्शो पाइतीनी" दे सेउ पवा बाक्त। मेको सामरीया डा मुर बाक्माक्त।

17 मिनु येसुमी "१० जना आन कली सापदुमी ममाइ डा? अरु ९ जना ते लागमे?"

18 मेको सामरीया डा मुर ला परमप्रभु यावे कली ठेयब सेल्शा 'गे रिम्शो पाइब बाक्नीनी' देथ जाक्मे?" देंमाक्त।

19 मिनु "गे रिम्शो पाइब बाक्नीनी" देथ जाक्ब कली "इ पिया पोक्को। आं कली थमा सुइक्तीवी। मोपतीके साते" देशा सोइक्ता बाक्त। लूका ७:५०

परमप्रभु आ राज्य आ पबर्म शेंशो

मती २४:-; मर्कूस १३:-

20 मिनु फरिसीपुकीमी येसु कली "परमप्रभु यावे आ राज्य जाक्चशो गेना तांडसीबा, दोपा तांडसीबा?" दे हिल्लो पामे बाक्त। मिनु येसुमी "परमप्रभु यावे आ राज्य मिक्चीम तचा डा पा मतपांडसीबा। यूहन्ना १८:३६

21 एक जाक्त, मेरेक जाक्त, दे मदेनीम। नेनीन, परमप्रभु यावे आ राज्य जाक्ने थुम्शा, गेपुकी नु बाक्त" दे शेंदीमी बाक्त।

22 मिनु आ शेंसीब आन कली नोले दुम्ब लोत्र पा "दोपा मुल रागीम जरमेशो नु काथा बाक्चा तनी, मोपा नोले चिनु काथा बाक्चा दाक्नीनी। तन्न काथा बाक्चा मताइनीनी।

23 मिनु मुरपुकीमी 'परमप्रभु यावे आ सोइशशो हुकुम पाइब एक जाक्त, मेरेक जाक्त, डरी जाक्त, उयु जाक्त, कोव्रथ लय' देंमानु, मेको थमा मसुइक्थु, मेको आन नोले मखोतीन। लूका २१:८

24 रागीम जरमेशोमी चिन्ड कोंइशा तपांडसेनु, चिला पवानु, चिलाम नां दाप्तीक रे नां पेरतीक सम्म थिशो तांडसीशो बाक्ब।

25 मोपा तपांडसीचा क्येडा डोंइती शुश श्येत जचा माल्ब। मारदे हना एको पाला डा मुरपुकीमी आं कली मब्रथु, आं लोत्र मनेनीम, थमा मसुइक्नीम। लूका ९:२२

26 रागीम जरमेशो जाक्मेनु, मुरपुकीमी नोआह आ पालामी पशो खोदेशो पाइनीम।

27 नोआह ठेयब डोंगाम मओव्रम सम्म मुरपुकी जशा तूशा, ग्युंवे पशा, ग्युंवे पांडसीशा बाक्मा बाक्त। मिनु रेउ यिशा मुर नेल्ल बेक्मा बाक्त।

28 लोत आ पालामी यो मोदेशो दुम्माक्त। मुरपुकीमी जचा फेक्चा, ग्याप्चा लेयचा, खुम्शा मीमेनु रिक्चा नु मार मार सेल्चा मिम्तमे बाक्त। उत्पती १९:१५, २४-२५

29 काबु चहिं लोत सोदोम प्रोंइशा प्रोक्मेनु, परमप्रभु यावेमी सरीड रे मी नु बारुक तोक्पदा बाक्त। मिनु सोदोम सहरम बाक्ब नेल्ल बेक्मा बाक्त।

30 रागीम जरमेशो जाक्शा तपांडसेनु, नोआह नु लोत आस पालाम दुम्शो खोदेशो दुम्ब।

31 में नाक्ती बारदलीम बाक्बमी खिं गाम मार मार बाक्मा, मेको ब्रदीचा ममालीन। रूमी गेय पाइब खिं मलेतीन।

32 लोत आ मीश दोपा बेक्मे, मेको मिम्तीने। उत्पती १९:२६

33 आ गिम प्रोंइचा माल्ब के आ गिम योल्ब। आ गिम सोइक्बमी आ गिम प्रोंइब। लूका ९:२४

34 मिनु मुर निक्शी ब्राख्ये कामी इप्शो बाक्नीस। का लाइक्चा पुंडसीब, का प्रोंइशा वोइक्चा पुंडसीब।

35 मीश मुर निक्शी यात हिल्ला बाक्नीस। का लाइक्चा पुंडसीब, का प्रोंइशा वोइक्चा पुंडसीब।

36 वोइश मुर निक्शी रूम गेय पा बाक्नीस। का लाइक्चा पुंडसीब, का प्रोंइशा वोइक्चा पुंडसीब, दे इन कली देंनुड" दे शेंदीमी बाक्त। मती २४:४०

37 मिनु आ शेंसीबपुकीमी "प्रभु, इन देशो तेकेर दुम्बा?" दे हिल्लो पामेनु "तेकेर सिनु बाक्मे, मेकेरन गिद हिरसीनीम" देंमाक्त।

## 18

पुंडचा मप्रोंडचा, दे शेंशो

1 मिनू येसुमी आ शेंसीब आन कली “परमप्रभु यावे कली पुंडचा नु ‘गे रिम्शो पाडब बाक्नीनी’ देंचा गेनायो मप्रोंडचा” दे रुप्पाडक्चा कली कथा सेला बाक्त। १थिस्सलोनिकी ५:१७

2 मिनू मेकोमी “सहर कामी निसाफ पाडब का बाक्माक्त। मेको सुइ नु महिंब बाक्माक्त। परमप्रभु यावे कली ममिम्थु, मुर आन लोव्र यो मनेंथु, आ थुंमी मार पिमे में ला पाडबाक्माक्त।

3 मेको सहरमी आ वोंडश बेक्शो मीश मुर का बाक्माक्त। मेको मीश मुर मेको निसाफ पाडब आ बाक्तीके जाक्ना जाकन ‘आं कली दोस गेब आन कली सजाइ गेशा, आं कली ग्रापाड्यीनी’ देंबाक्माक्त।

4 शुश नाक्ती सम्म निसाफ पाडबमी मेको कली आ पुंडशो मगेवा बाक्त।

5 काबु चहिं ‘परमप्रभु यावे कली मान पा महिंथु, मुर आन लोव्र यो मनेंथु, आं थुंमी मार पिमे में ला पा बाक्ती। तन्न मेको मीश मुरम नाक्त कित कित जाक्शा, श्येत गेती। मुल आ लोव्र नेंचा ब्रीताक्ड, नेंने यो मदाक्ड। आ देंशो मपाता हना, जाक्स डा जाक्स पाडब। मोपतीके मेको आ देंशो मपथु मप्रोंडनुड’ दे मिम्ता बाक्त। लूका ११:७-८

6 मेको निसाफ पाडब आ मिम्शो मिम्तीने।

7 मारदे हना निसाफ पाडब आ पशो खोंदेंशो पा परमप्रभु यावेमी आ योव्रशो आन कली आन पुंडशो मगेबा डा? मेकोपुकीमी नाक्त कित कित पुंडचा मप्रोंडथु बाक्नीम। मुल मगेपुतु हना, काबु डा काबु गेब। मिनू ग्रापाडक्चा।

8 रागीम जरमेशो तपांडसेनु, थमा सुइशशा, परमप्रभु यावे कली पुंडशा ‘गे रिम्शो पाडब बाक्नीनी’ देंस डा देंस बाक्शोपुकी ताडबा कों?’ दे येसुमी देंमाक्त।

ठेयब मसुंडसीचा, दे शेंशो

9 काबु येसुमी अरु आन कली महिंथु, ठेयब सुंडसीशो आन कली लोव्र पवा बाक्त। मेकोपुकीमी “गो आंम पचा माल्शो पा ठीक दुम्तक” दे मिम्शो बाक्मा बाक्त। रोमी १०:३

10 मोदेंशो ठेयब सुंडसीब आन कली “मुर निक्शी परमप्रभु यावे आ खिंमी परमप्रभु यावे कली प्रार्थना पथ लसा बाक्त। का फरिसी बाक्माक्त, का तिरो पोक्ब बाक्माक्त।

11 फरिसीमी मुर नेल्ल आन कली तपांडसीशा, चढेतीक आ नेक्था राष्ठा ‘परमप्रभु यावे, गे रिम्शो पाडब बाक्नीनी। मारदे हना गो अरु मुर खोंदेंशो पा मुर आन मार मार रोइक्ब मनड। गो जोल पाडब यो मनड। मीश वोंडश आस नाता खोंडक्ब मनड। मेरे तिरो पोक्ब खोंदेंशो पापी मनड। यसेया ५८:२-३

12 साता कामी खेयप निक्शी माडजा बाक्नुड। क्येत ताक्गुनु, १० भाग डा भाग का योक्शा गेनुड’ दे प्रार्थना पवा बाक्त। मती २३:२३

13 तिरो पोक्ब चहिं हारे बाक्शा, शुर खुक्शा ‘परमप्रभु यावे, गो पापी नड। शिशी पाड्यीनी’ दे प्रार्थना पवा बाक्त। भजन संग्रह ५१:१३,१९

14 परमप्रभु यावेमी मेको कली आ पाप क्याम्शा, ठीक दुम्पाडक्तु। मिनू ठीक दुम्शा, आ खिं लेल्ल। फरिसी चहिं पाप क्याम्चा मतव। मारदे हना सुमी ठेयब सुंडसीबा, मेको महिक्शो दुम्ब। ठेयब मसुंडसीब कली चहिं परमप्रभु यावेमी ठेयब सेल्ल” दे येसुमी माडक्मी बाक्त। मती २१:३१; लूका १४:११; मती २३:१२

आल आन कली आसीक गेशो

15 मिनू मुरपुकीमी येसुमी आल आन कली थिवल, दे चाक्मेनु, शेंसीबपुकीमी आल चाक्ब आन कली हुइक्तमे बाक्त।

16 तन्न येसुमी मेको आन कली ब्रेशशा “आल आन कली आं बाक्तीके चाक्चा मतेक्कीन। मारदे हना परमप्रभु यावे आ राज्य आल आन केन बाक्ब।

17 नोफा दाइशशा नेनीने, मुरपुकीमी आल आन थुं डा मिम्शो खोंदेंशो पा ममिम्ताक्म हना, परमप्रभु यावे आ राज्यम ओव्रचा मताइनीम” दे माडक्मी बाक्त।

शोंप आ पबर्म लोव्र

मती १९:१६-२६; मकूस १०:१७-२७

18 मिनू ठेयब मुर कामी येसु कली “गे रिम्शो शेंब बाक्नीनी। गेना हना यो ब्रोंडशा बाक्चा कली मार पचा माल्नुडा?” दे हिल्लो पवानु, लूका १०:२५-२८

19 येसुमी “मारदे आं कली रिम्शो मुर, दे माड्यीनी? सुइ रिम्शो मनमी। परमप्रभु यावे ला रिम्शो बाक्ब।

20 परमप्रभु यावेम ब्रेक्पाडशो लोव्र तुइक्नीनी ‘वोंडश मीश आस नाता मखोंडक्चा, मसाइक्चा, खुइ मपचा, सांक्छी बाक्शोनु जोल मपचा, आम आफ आस कली मान पचा’ ” दे मदा बाक्त। प्रस्थान २०:१२-१६

21 मिनू मेकोमी “आल रेन मोदेंशो पा पिशो नड” देंमाक्त।

22 मिनू येसुमी “नेल्ल पाप्तीवी, का चहिं मपवी। इ शोंप नेल्ल लेयशा, क्येत मथीब आन कली योक्शा गेमी। मिनू आं नोले खोंड्यी। मिनू इ शोंप स्वर्गम बाक्ब” देंमाक्त। मती ६:२०

23 मिनू येसु आ लोव्र नेंशा, आ थुं खाइक्माक्त। मारदे हना मेको शुश शोंप पाडशो मुर बाक्माक्त।

24 येसुमी मेको आ थुं खाइशो तुइशशा, मिक्च मयाक्थु कोव्रशा “शुश शोंप पाडशो मुर परमप्रभु यावे आ राज्य ओव्रचा गिश श्येत बाक्मे। लूका १९:९

25 शोंप पाडशो मुर परमप्रभु यावे आ राज्य ओव्रने चाप्चा क्येडा दालओंठ लूजे आ पोलाम ग्रीने चाप्ब” देंमाक्त।

26 येसु आ लोव्र नेंबपुकीमी “मो हना सु ओव्रचा ताडबा डा?” देमा बाक्त।

27 मिनू येसुमी “मुर आन पने मचाप्शो परमप्रभु यावेमी पने चाप्ब” दे माइक्मी बाक्त।

नेल्ल प्रोइबम मार ताइनीमी  
मती १९:२७-३०; मर्कूस १०:२८-३१

28 मिनू पत्रुसमी “गोपुकी आंड खिं प्रोइशा, इन नोले खोइक्तक” देमाक्त।

29 मिनू येसुमी “नोफा दाइशशा नेनीने, सुमी आ खिं, आ मीश, आ वोंइश, आ लोक्बपुकी, आम आफ, तमी तौ नु मारेड मारेड नेल्ल परमप्रभु यावे आ राज्य आ पबंम प्रोइबा, मेकोमी मुल एको रागीम बाक्मेनुन आ प्रोइशो क्येडा शुश ताइब।

30 मोशो ला ममाइ, नोले गेना हना यो परमप्रभु यावे नु बाक्चा ताइब” देमाक्त।

रागीम जरमेशोम साइक्चा पुंडसीब  
मती २०:१७-१९; मर्कूस १०:३२-३४

31 मिनू येसुमी आ १२ जना शेंसीब आन कली “नेनीने, मुल यरूसलेम लाइनय। मेकेर जाक्दीशशो नोले रागीम जरमेशो आ पबंम साइ परमप्रभु यावे आ लोत्र पाइबपुकीम ब्रेक्शो लोत्र नेल्ल थमा दुम्ब।

32 रागीम जरमेशो अर्को जात डा मुर आन गुडमी गेचा पुंडसीब। मिनू मेकोपुकीमी शुक्शी पा, मेको आ कुलुम तोक्नीम।

33 मिनू युक्शा, हुश यिपाइक्नीम। मिनू नोले साइक्नीम। साइशशो आ निन्थ नाक्त बेक्शो रे सेंसीब” दे शेंदीमी बाक्त।

34 आ लोत्र नेंशा, मारेड मरुप्मे बाक्त। मारदे हना खुइशशो लोत्र बाक्माक्त।

मिक्च मताइब कली सापाइशशो  
मती २०:२९-३४; मर्कूस १०:४६-५२

35 मिनू यरीको सहर आ नेक्था जाक्दीम्मानु, लॉमी मिक्च मताइब पुंडब मुर का बाक्माक्त।

36 मेको मिक्च मताइबमी शुश मुर लोत्रसी पा पिशो नेंशा “सु ननी? ते लनी? मार माल्नी?” दे हिल्लो पवानु

37 “नासरथ डा येसु एको लॉ पित” देमा बाक्त।

38 मिनू मिक्च मताइबमी “हे येसु, दाऊद आ तौ, शिशी पाइय्यी” दे ब्रेम्माक्त।

39 मिनू येसु आ डोंइती गाक्बपुकीमी “सिक्सी पावो” दे हुइक्तमे बाक्त। आं चहिं वाइ ब्रेशशा “दाऊद आ तौ, शिशी पाइय्यी” देमाक्त।

40 मिनू येसु खा दिक्शा “मेरे मिक्च मताइब कली एक चाक्कीन” देमाक्त। मिनू चाक्मेनु

41 “इ कली मार पड? मार पुंडनेवे?” दे हिल्लो पवानु “प्रभु, मिक्च ताइब सेल्यीनी” दे पुना बाक्त।

42 मिनू “इ मिक्च साल। इ थमा सुइशशोमी साते” दे मदा बाक्त।

43 मो मदानु, आ मिक्च ब्रा साशा, मिक्च ताइब दुम्शा, येसु आ नोले खोइशशा, परमप्रभु यावे कली मान पवा बाक्त। मेको कली मिक्च ताइब दुम्शो तशा, मुर नेल्लेमी यो परमप्रभु यावे कली ठेयब सेल्मे बाक्त।

## 19

तिरो पोक्ब जक्कै

1 मिनू यरीको सहरम जाक्दीशशा, बास मबाक्चा, दे गाक्मा बाक्त।

2 मेको सहरमी जक्कै नें पाइशशो शुश शोप पाइशशो तिरो पोक्ब ठेयब मुर का बाक्माक्त।

3 मेकोमी “इ सहरम येसु जाक्ब” देशो नेंशा “गो कोव्रथ लाइनुड” दे मिम्ता बाक्त। सहर डा मुरपुकी यो “येसु कली कोव्रचा” दे लॉमी रिम्शा, आ लॉ कोव्रशा बाक्मा बाक्त।

4 जक्कै अरु आन क्येडा आइक्च बाक्माक्त। मिनू शुश मुरुमी लॉमी रिम्शा फारशो तशा, मेको आन डोंइती लशा, रवा का डोइशशा कोव्रडा बाक्त।

5 मिनू येसु मेको लॉ पिमेनु, जक्कै कली रवाम डोइशशा बाक्शो तशा “ए जक्कै, फु तोंइसो। मारदे हना मुलाक्दो इ खिंमी बास बाक्नुड” देमाक्त।

6 मिनू जक्कै फु तोंइसीशा, ग्येरसीशा आ खिं लाइशशा, बास बाक्चा गेवा बाक्त।

7 मेकोमी मोदेशो पशो तशा, मेकेर बाक्बपुकीमी “मेको पापी आ खिंम ओव्रशा बास बाक्त” दे आन थुं मनुथु, लोत्र पामे बाक्त। लूका १५:२

8 मिनू जक्कैमी प्रभु कली खिंम ओइशा “हे प्रभु, आं शोप क्येट नेल्ल उइक्थ पा योक्शा, मथीब आन कली गेनुडमी। सु सु कली हिम हिम पा मार मार ताक्नु, मेको आन कली ४ खेयप तेम्शा लेशशा गेनुडमी” देमाक्त। प्रस्थान २१:३७; इजीकीएल ३३:१४-१६

9 मिनू येसुमी “थमा पा इ खिंमी बास बाक्शो रिम्शो दुम्त। मारदे हना गे पाप रे ब्रोइतो। इ किक्की पिपी अब्राहाम आ तौ बाक्डे बाक्त। लूका १३:१६

10 रागीम जरमेशो लॉ साम्शो आन कली लॉ कोंइथ जाक्त” देमाक्त। लूका ५:३२; इजीकीएल ३४:१६; १तिमोथी १:१५

ठेयब मुर लेशशा जाक्ब, दे शेंशो  
मती २५:१४-३०

11 मिनू यरूसलेम आ नेक्था जाक्दीम्मा बाक्त। मिनू शुश मुरुमी “यरूसलेम जाक्दीशशा नोले येसु पिप दुम्ब। मिनू परमप्रभु यावे आ राज्य पशो तांइसीब” दे मिम्शो बाक्मा बाक्त। येसुमी मेको आन मिम्शो तुइशशा कथा सेल्शा

- 12 “खेयप का ठेयब मुर का पिप रे सासन पतीक ताक्चा कली डोन रागी लचा चिक्शो बाक्माक्त।
- 13 मिनु मेकोमी ‘गो शुश नाक्ती खिंम मबाक्नुड’ दे तुडशशा, लचा डोंइती आ गेय पाइब १० जना मुर आन कली ब्रेशशा, का का पा मीना का का गेशा ‘एको क्येटम खेले पने। नोले जाक्डानु, लेशशा गेयीनी’ दे गाक्माक्त। मीना का १०० देनार बाक्ब। देनार का नाक्त का डा गाल्च बाक्माक्त। देनार रोमी आन चांदी के क्येट बाक्माक्त। मती २०:२
- 14 मेको मुर गाक्म नोले मेको रागी डा मुरपुकीमी ‘मेको मुर आंड कली सासन पाइब मटुम्ल’ दे लोत्र कुरब मुर मेको पिप आ बाक्तीक सोइक्तमे बाक्त। मारदे हना मेको कली मदाक्बाक्मा बाक्त। यूहन्ना १:११
- 15 मो हना यो मेकोमी सासन पतीक अधिकार ताक्शा, खिं लेम्माक्त। मिनु जाक्शा, आ गेय पाइब आन कली ब्रेशशा, आ डोंइती राप्पाइशशा ‘आं गेशो क्येटमी मार पनी? गिश सेल्नी?’ दे हिल्लो पवा बाक्त।
- 16 मिनु डोंइती डा जाक्शा ‘आं होव्रप, इन गेशो क्येटमी, मार मार ग्याप्शा लेयशा, अर्को १० मीना चेम्ता’ देमाक्त।
- 17 ‘गे रिम्शो गेय पाइब बाक्ते, आइक्च गेयमी रिम्शो पाप्तीवी। मोपतीके १० ओटा सहर कली अधिकार पाइब सेलनन’ देमाक्त। लूका १६:१०
- 18 मिनु मेको नोले अर्को जाक्शा ‘आं होव्रप, इन गेशो क्येटमी ग्याप्शा लेयशा, अर्को ५ मीना चेम्ता’ देमाक्त।
- 19 मिनु मेकोमी ‘इ कली यो ५ ओटा सहर कली अधिकार पाइब सेलनन’ देमाक्त।
- 20 मिनु मेको आ नोले अर्को जाक्शा ‘आं होव्रप, इन क्येट एकेर बाक्त। गो मेको वाम गिल्शा खुइशशा वोइक्ता।
- 21 गो इन क्येडा ह्तिती। मारदे हना गे हिंचा डा होव्रप बाक्नीनी। इन मगेशो थोव्रक ताक्नीनी। इन मशोक्शो खुप्नीनी’ देमाक्त।
- 22 मिनु ठेयब मुरुमी ‘गो इ लोत्रम इ कली निसाफ पाइनुड। आं देशो मटीब गेय पाइब बाक्नेवे। मार मगेडा, मेको ताक्नुड। मार मशोक्गु, मेको खुप्नुड। गो मरिम्शो मुर नडा दे गो तुडशशोन नवे?
- 23 गे मारदे मेको क्येट वोइक्तीक खिंमी मवोदी? गो मेको आ चाइक्ब तड वा’ देमाक्त।
- 24 मिनु मेकेर बाक्ब आन कली ‘मेको आ क्येट रोइशशा १० मीना चेम्ब कली गेने’ देमाक्त।
- 25 मिनु मुरपुकीमी ‘हजुर, मेको नु १० मीना सुन बाक्ब’ देमा बाक्त।
- 26 मिनु मेकोमी ‘सु नु बाक्मे, मेको तेम्शा गेचा पुंडसीब। सु नु मबाक्मे, मेको के बाक्शो यो रोइक्चा पुंडसीब। लूका ८:१८; मती १३:१२
- 27 तन्न आं कली मटीब आं जोरी सत्रु आन कली चहिं ग्याइशशा चाक्शा आं डोंइती क्योरशा सतीन’ देमाक्त” दे शेंदीमी बाक्त।

येसु यरूसलेम जाक्दीशशो

मती २१:१-११; मर्कूस ११:१-१०; यूहन्ना १२:१२-१६

- 28 मिनु मेको लोत्र नेल्ल शेने थुम्शा, यरूसलेम मेर लमा बाक्त।
- 29 मिनु जैतून डांडा जाक्दीम्मा बाक्त। मेको डांडा आ आइदी बेथफागे नु बेथानी गांउ निक्शी बाक्सा बाक्त।
- 30 मेको गांउ आ नेक्था जाक्दीशशा, येसुमी आ शेंसीब निक्शी आस कली “मेरे गांउ लसे। मिनु गांउ ओव्रसीनु, सुइमी मडोइशशा गधा आ चाइक्ब का पाइशशो थिल्लीसी। मेको कली प्रोइशा चाक्कीसे।
- 31 मुरपुकीमी ‘मारदे प्रोइशा लाइक्सी?’ दे हिल्लो पाम्तेक्म हना ‘प्रभु कली माल्ताक्व’ दे मतीसे” दे माइशशा, सोइक्तीम्मी बाक्त।
- 32 मिनु लसानु, येसुमी देशो खोदेशो पा गधा पाइशशा वोइशशो थित्से बाक्त।
- 33 मिनु प्रोन्सेनु, गधा आ होव्रपमी “गधा मारदे प्रोइसी?” दे हिल्लो पवा बाक्त।
- 34 मिनु मेको निक्शीमी “प्रभु कली माल्ताक्व” देसा बाक्त।
- 35 मिनु लाइशशा येसु आ बाक्तीकेम चाक्दीत्से बाक्त। मिनु येसु आ शेंसीबपुकीमी गधा तारी आन वा ब्रशा, येसु कली डोइक्पदमे बाक्त।
- 36 मिनु गाक्मा बाक्त। मिनु मुरपुकीमी आन फेक्शो वा लांमी ब्रामे बाक्त।
- 37 मेको जैतून डांडा लाक्शा बुम्मा बाक्त। येसुमी शुश छक लाक्चा डा गेय पतीके मुर नेल्ल थाम्पा ग्येरशा, कुम्सो पा परमप्रभु यावे कली ठेयब सेल्ला सेल्ल,
- 38 “परमप्रभु यावे आ नेंमी जाक्ब पिप ठेयब बाक्ब। सरीडम यो ग्येरसमल। इर डा नेल्ल रिम्शो दुम्ल” दे रेयके पामे बाक्त। भजन संग्रह ११८:२६; लूका २:१४
- 39 मेकेर फरिसी का निक्शी यो बाक्मा बाक्त। मेकोपुकीमी येसु कली “इन शेंसीब आन कली हुइक्तीन” देमा बाक्त।
- 40 तन्न येसुमी “एकोपुकीमी सिक्सी पाम्तेक्म हना, फुल्लुमी यो रेयके पचा गोइनीम” देमाक्त।
- 41 मिनु यरूसलेम सहर आ नेक्था जाक्शा, सहर तांइसेनु, येसु मेको सहर आ पबंम डाक्शा
- 42 “थुं नाइक्तीक ते रे जाक्बा, दे तुइक्ती हना तुम वा। तन्न मुल मेको इ डोंइती रे खुइशशो बाक्ब। लूका १३:३४; मती १३:१३, १४
- 43 नोले इ जोरी सत्रु बोक्शा, इ कली एर ओंथ रे पुम्शा, तेइ लचा मगेथु, गारो डोइक्नीम।
- 44 मेकोपुकीमी इ कली नु इ आल आन कली खपीम राप्नीम। मेकेर फुल्लु का सम्म खोप्शा मलीनीम। मारदे हना गे इ कली ग्रुम्थ जाक्ब कली मटुइक्ती” देमाक्त। लूका २१:६

यरूसलेम सहरम बाक्शा, शेंशो

मती २१:१२-१६; मर्कूस ११:१५-१८; यूहन्ना २:३-१६

- 45 मिनू येसु सहरम जाकदीशशा, परमप्रभु यावे आ खिं लमाक्त। मिनू मार मार लेयब आन कली खेरा बाक्त।
- 46 मिनू येसुमी मेको आन कली “परमप्रभु यावे आ लोवमी ‘आं खिं आं कली प्रार्थना पचा कली बाक्ब’ दे ब्रेकशो बाक्ब। तन्न गेपुकीमी चहिं खुड आन बाक्तीक पुक्खी सेल्लनी” दे हुडशशा खेरमी बाक्त। यसेया ५६:७; येरमीया ७:११
- 47 मिनू येसुमी परमप्रभु यावे आ खिंमी बाक्शा, नाक्त किंत किंत मुर आन कली शेंदीमी बाक्त। ठेयब चढेब, सास्त्री नु ठेयब मुरपुकीमी येसु कली साइक्या माल्मे बाक्त।
- 48 तन्न मेकोपुकीमी येसु कली मारेड दोस गेने मचाप्मे बाक्त। मारेदे हना मुर नेल्लेमी येसु आ शेंशो थाम्पा नोफा दाइशशा नेंमे बाक्त।

## 20

“इ कली सुम अधिकार गेवे?”

मती २१:२३-२७; मर्कूस ११:२७-३३

- 1 मिनू काबु येसुमी परमप्रभु यावे आ खिंमी बाक्शा, मुर आन कली ग्येरपाइक्तीक लोव्र शेंना शेंन बाकमेनु,
- 2 ठेयब चढेब, सास्त्री नु जाक्ब तुइक्ब खाल्पापुकीमी “तेको अधिकारमी मोदेंशो पवी? इ कली अधिकार गेब सु बाक्बा, लो देन” देमा बाक्त।
- 3 मिनू येसुमी “गो इन कली लोव्र का हिल्लो पाइनुड। मिनू आं हिल्लो पशो लोव्र लेल्लेनी।
- 4 यूहन्नामी मुर आन कली ब्वाक्कुम खुम्शा गुंडतीक अधिकार स्वर्ग रे तवा देय मुरपुकी रे तवा?” दे हिल्लो पामी बाक्त।
- 5 मिनू मेकोपुकीमी “स्वर्ग रे तवा बाक्त देंतय हना, मो हना यूहन्ना आ लोव्र मारदे थमा मसुइक्नी? देंब। लूका ७:२९-३०
- 6 मुरपुकी रे तवा बाक्त देंतय हना, एकेर बाक्बपुकीमी इ कली फुल्लु आप्शा साइक्नीम। मारदे हना यूहन्ना परमप्रभु यावे आ लोव्र पाइब बाक्त, दे थमा सुइक्ब बाक्नीम” दे शुश मिम्शा लोव्रमी पांमे बाक्त।
- 7 मिनू शुश मिम्शा “यूहन्ना कली अधिकार सुमी गेवा सुम? गो मतुइक्नीकी” देमा बाक्त।
- 8 मिनू येसुमी “मो हना तेको अधिकारमी एको गेय पडा, गो यो मशेंननी” दे माइक्मी बाक्त।

मरिम्शो बुम्था पाइबपुकी

मती २१:३३-४६; मर्कूस १२:१-१२

- 9 मिनू मुर आन कली कथा सेल्शा “मुर कामी ठेयब रूमी अडगुर खुमा बाक्त। मिनू नोले ‘गो रागी हिरथ लाइनुड’ दे मिम्शा, आ रू बुम्था पाइब आन कली गेशा वोदा बाक्त। मिनू लशा, शुश नाक्त मलेम्माक्त।
- 10 अडगुर मीशा सेक्ची जाकमेनु, होव्रपमी आ गेय पाइब का कली ‘अडगुर योक्शा चाक्को’ दे ब्रथ सोइक्ता बाक्त।
- 11 मिनू लेंशा अर्को गेय पाइब का कली सोइक्ता बाक्त। मेको कली तुप्शा मुने तोक्शा, श्येत्थ सोइक्तमे बाक्त। २इतिहास ३६:१५-१६
- 12 मोपा यो लेंशा गेय पाइब का कली सोइक्ता बाक्त। मेको कली यो हुश यिथ्री तुप्शा खेरेमे बाक्त।
- 13 मिनू नोले ‘मार पड? मुल आं दाक्शो तौ कली सोइक्नुड। मेको कली तशा मान पाइनीमी को?’ दे मिम्ता बाक्त। मिनू आ तौ कली सोइक्ता बाक्त।
- 14 मिनू बुम्था पाइबपुकीमी आ तौ कली पिशो तशा ‘एको हक ताइब बाक्ब। लो, साइय्य। मिनू रू, अडगुर नेल्ल इ केन दुम्ब’ देंशा गारमा बाक्त।
- 15 मिनू रू रे गुंडशा सदमे बाक्त। रू आ होव्रपमी मोदेंशो पाइब आन कली मार पाइबा?
- 16 जाक्शा मेको बुम्था पाइब आन कली साइक्ब। मिनू आ रू अरु आन कली गेब” दे शेंदीमी बाक्त। आ लोव्र नेंबपुकीमी मेको कथा नेंशा “मोदेंशो मदुम्ल” देमा बाक्त।
- 17 मिनू येसुमी आ लोव्र नेंब आ कली मिक्च मयाक्थु कोव्रशा “परमप्रभु यावेमी ब्रेक्पाइशशो एको लोव्र रे मार रूमसीबा, लो देनीन ‘खिं सेल्बपुकीमी गारो प्रोवडमेनु, एको फुल्लु मगार’ दे ताइक्तमे बाक्त। मेको मगारथु ताइशशो फुल्लु चहिं सुर डा सुरे फुल्लु दुम्माक्त। भजन संग्रह ११८:२२
- 18 सु मेको फुल्लु तारी थिप्बा, मेको खतम दुम्ब। मेको फुल्लुम सु कली चिप्ता, मेको फस दुम्ब” दे शेंदीमी बाक्त। दानीएल २:३४, ३५, ४४, ४५
- 19 मिनू ठेयब चढेब नु सास्त्रीपुकीमी “इ कली कका एको कथा देंमाक्त” दे रुप्शा चुरशा, येसु कली ग्याइक्पाइक्का माल्मे बाक्त। तन्न शुश मुरुमी आ लोव्र नेंशो तशा हिंमा बाक्त। लूका १९:४८

तिरो आ पर्वम लोव्र पशो

मती २२:१५-२२; मर्कूस १२:१३-१७

- 20 सास्त्री नु ठेयब चढेबपुकीमी मुर योव्रशा, येसु आ थुं नाक्शा, आ लोव्र खुड पथ सोइक्तमे बाक्त। मारदे हना दोस गेशा हुकुम पाइब आ गुडमी गेचा माल्शो बाक्मा बाक्त। मेको सोइशशोपुकीमी येसु आ लोव्र नेंशा, थमा सुइशशो खोदेंशो पखु पांमे बाक्त। लूका ११:५४; लूका २३:२
- 21 मिनू मिलो शिलो पा “शेंब, गे रिम्शो शेंनीनी। सुइ कली तशा महिंथु, मुर आन कुल मकोव्रथु, परमप्रभु यावे आ लोव्र थमा पा शेंनीनी। मुल लोव्र का शेंदीकी,

22 मार लोत्र देशा हना, पिप सिजर कली तिरो थाप्चा माल्बा देय मथाप्थु यो दुम्बा?" दे हिल्लो पखु पा, लोत्र खाइक्पाइक्चा माल्मे बाक्त।

23 मिनू येसुमी मेको आन थुं डा लोत्र तुइश्शा

24 "देनार का कोंडदीनी। एको सु का आ नेमी खोइश्शो बाक्मे?" देंमेनु "सिजर आ नेमी खोइश्शो बाक्त, हजुर" देंमा बाक्त। देनार का चांदी के क्येट बाक्त। मेको नाक्त का डा गाल्च बाक्त।

25 मिनू प्रभु येसुमी "मो हना पिप सिजर आ मार मार बाक्मे, मेको सिजर कली गेने। परमप्रभु यावे आ मार मार बाक्मे, मेको परमप्रभु यावे कली गेने" देंमाक्त। रोमी १३:१,७

26 मिनू मेकेर देल्शो मुर आन डोंडती आ लोत्र खाइक्पाइश्शा मारिड दोस गेने मचाप्मे बाक्त। आ लोत्र लेश्शो नेंशा छक लाक्शा सिक्सी पामे बाक्त।

बेक्शो रे सेंसीचा आ पर्वम शेंशो

मती २२:२३-३३, ४६; मर्कूस १२:१८-२७, ३४

27 मिनू सदुकीपुकी जाक्मा बाक्त। सदुकीपुकीमी "मुर बेक्शो रे मसेंसीनीम" दे शेंबाक्मा बाक्त।

28 मेको जाक्बपुकीमी येसु कली "शेंब, मोसामी बेक्शो लोत्रमी 'मुर का आल मथिथु बेक्त हना, आ लोकबमी आ भोग्यु वोंडसीशा, आ दाग्यु आ पा डा खिं डा मुर मजाम्मल, दे तमी तौ थिल' दे ब्रेक्शो बाक्ब। ब्यवस्था २५:५-६

29 साइ ७ जना लोकब बाक्मा बाक्त। मिनू जेठाम ग्युंवे पवा बाक्त। मिनू आल मथिथु बेक्माक्त।

30 मिनू माइलामी आ भोग्यु वोंडसे बाक्त। मिनू मेको यो आल मथिथु बेक्माक्त।

31 मिनू साइलाम आ भोग्यु वोंडसे बाक्त। मेको यो आल मथिथु बेक्माक्त। मोदेशो पा ६ जनामी आन भोग्यु वोंडसीशा, आल मथिथु बेक्मा बाक्त।

32 नोले मेको मीश मुर यो बेक्माक्त।

33 मुर बेक्शो रे सेंसीशा ब्रोंडमानु, मेको ७ जना वोंडश आन मीश दुम्शो मीश मुर तेको आ मीश दुम्बा?" दे हिल्लो पामे बाक्त।

34 मिनू येसुमी मेको आन कली "एको रागीमी बाक्मानु, मुरपुकीमी ग्युंवे पांइसीनीम। ग्युंवे पा गेनीम।

35 तन्न बेक्शो रे सेंसीशा परमप्रभु यावे नु बाक्चा शिरशोपुकी ग्युंवे मपांइसीनीम, ग्युंवे पा यो मगेनीम।

36 मेकोपुकी गेनायो मबेक्ब दुम्शो बाक्नीम। बेक्शो रे सेंसीशा, परमप्रभु यावे आ स्वर्ग डा गेय पाइबपुकी खोदेशो दुम्नीम। मेकोपुकी परमप्रभु यावे आ तमी तौ बाक्नीम। १यूहन्ना ३:१-२

37 बेक्शो रे सेंसीशा ब्रोंडचा तांइसीब, दे इं किकी पिपी मोसामी अरु आन कली तुइक्पदा बाक्त। दोपा तुइक्पदा बाक्त देशा हना, परमप्रभुमी मोसा कली मी ब्रशो बुटा रे तपांइसेनु, मोसामी परमप्रभु यावे कली 'गे अब्राहाम, इसहाक नु याकूब आ परमप्रभु यावे ननी' दे ब्रेत्ता बाक्त। प्रस्थान ३:६

38 परमप्रभु यावे बेक्शो मुर आन परमप्रभु ममाड। ब्रोंडशो आन परमप्रभु यावे बाक्ब। मारदे हना परमप्रभु यावे आ डोंडती नेल्ल ब्रोंडशो बाक्नीम" देंमाक्त। रोमी १४:८

39 मिनू सास्त्री का निक्शीमी "शेंब, गे रिम्शो शेंताक्नी" देंमा बाक्त।

40 मारदे हना सदुकीपुकीमी लेंशा हिल्लो पचा हिंशा सिक्सी पामे बाक्त।

ख्रीस्त सुका आ तौ बाक्बा?

मती २२:४१-४४; मर्कूस १२:३५-३७

41 मिनू येसुमी मेकेर बाक्ब आन कली "ख्रीस्त दाऊद आ तौ बाक्ब, दे दोपा देंनीमी?"

42 मारदे हना दाऊद आ ब्रेक्शो भजन संग्रह माइश्शो कुम्सो किताबम

43 'प्रभुमी आ प्रभु कली इ जोरी सत्रु आन कली इ खोइल थेक्तीके मसेलु सम्म आं ग्युरा गे बाक्को' दे ब्रेक्ताक्ब। भजन संग्रह ११०:१

44 दाऊदमी मेको कली 'प्रभु' देंब। मिनू दोपा आ तौ दुम्मे? लो, देंनीन" देंमाक्त।

"सास्त्री खोदेशो मपने" दे शेंशो

मती २३:५-५

45 मेकेर बाक्ब शुश मुरुमी येसु आ लोत्र नेन्मे बाक्त। मिनू येसुमी आ शेंसीब आन कली

46 "लाइश्शो वा फेक्शा एर ओथ गाक्ब, बजार मेर गाक्मानु, सेउ ताक्चा दाक्ब, गुम्तीक खिं लशा, टेयब नित्तीकेम नित्चा दाक्ब नु भोजमी लशा, मान ताइब आन नित्तीकेम नित्चा माल्ब, सास्त्री आन कली तशा होस पा बाक्की। लूका ११:४३

47 मेकोपुकीमी वोंडश बेक्शो मीश मुर आन खिं रोइक्नीमी, दुइश्शो प्रार्थना पा कोंइखु पाइनीम। मोदेशो पाइबपुकी अरु आन क्येडा शुश सजाइ ताइनीम" देंमाक्त।

## 21

भेटी चढ्हेचा आ पर्वम शेंशो

मर्कूस १२:४१-४४

1 मिनू नोले येसुमी शोंप पाइश्शो मुरपुकीमी भेटी चढ्हेचो तवा बाक्त।

2 आ वोंइश बेक्शो मारेड मथीब पुडग मीश मुरुमी जाकशा, लेप्तोन निक्शी चढेशो यो तवा बाक्त। लेप्तोन (ग्रीक लोव) नेल्ल क्येडा आइक्च तांबा के क्येट बाक्त।

3 मिनू येसुमी “नोफा दाइशशा नेनीने, नेल्लेमी चढेशो क्येडा एको पुडग मीश मुरुमी शुश चढेप्टु।

4 मारदे हना आ बाकशो नेल्ल गेप्टु। अरुमी चहिं आन गाप्शो रे गेम्तेक्म” देंमाक्त। २कोरिन्थी ८:१२

परमप्रभु आ खिं मलीब

मती २४:१-३६; मर्कूस १३:१-३२

5 काबु मुरपुकीमी “परमप्रभु यावे आ खिं ठेयब नु दारशो सेल्शो बाक्त” देंमा बाक्त।

6 मिनू येसुमी “एको खिं मुल ठेयब नु दारशो सेल्शो ताइतीनी। नोले नेल्ल ब्रेशशा, फुल्लु का यो खोप्शा मलीब” देंमाक्त। लूका १९:४४

श्येत डा चिन्ड

7 मिनू मुरपुकीमी “शेंब, इन देंशो लोव गेना दुम्बा? मेको दुम्चशो चिन्ड दोपा तांइसीबा?” दे हिल्लो पामे बाक्त।

8 मिनू येसुमी “सुडमी इन थुं मक्याल्मेक्ल, दे होस पा बाक्कीन। मारदे हना शुश मुरपुकीमी आं नें ब्रशा ‘गो मेको नड। गो मेको नड देंतीक नाक्त नेक्था जाकशो बाक्ब’ दे शेंनीम। मो देंब आन लोव थमा मसुइक्थ, आन नोले मखेतीन।

9 लडाइ दुम्शो, जुलुस बोक्शो लोव शुश नेनीनी। मेको लोव नेशा महिनीन। मोदेंशो दुम्चा मालब। मिनू इक्का नोले ला रागी नुप्ची नाक्त जाक्ब” देंमाक्त।

10 मिनू लोव बोइशशा “जात जात नु राज्य राज्य लडाइ पाइनीम।

11 ठेयब खिनु कुइब। रागी रागीमी ठेयब अन्काल दुम्ब। शुश मुर रोड पा बेक्नीम। हिंचा डा श्येत जाक्नीम। सरीडम ठेयब चिन्ड तांइसीनीम।

थमा सुइक्ब श्येत जाइनीम

12 मो दुम्चा क्येडा डोंइती थमा सुइक्ब इन कली खेदा पा ग्याइक्नीमी। मिनू ग्याइशशा, आन गुम्तीक खिंम लाइशशा दोस गेशा, जेल्खानमी चोक्नीम। आं नें आ परबम ठेयब मुर नु पिप आन डोंइती चाक्दीशशा, राप्पाइक्चा पुंइसीनीनी। मती १०:१८-२२, ३०

13 मोपा राप्पाइक्चा पुंइसीनीनु, सांकळी का दुम्नीनी।

14 “ठेयब मुर आन डोंइती मार देंचा?” दे गेनायो पीर मपाइनुड, दे इन थुं फ्रेशा बाक्कीन। लूका १२:११

15 मारदे हना मोपा राप्पदमेनु, इन जोरी सत्रुमी लेन्ने मचाप्पा डा लोव इन शोव रे पपाइक्नन्नी। इन कली ठीक लोव पपाइक्नुड। मिनू मेकोपुकीमी इन लोव खोइक्ने मचाप्नीम। प्रेरित ६:१०

16 इन आम आफ, लोकबपुकीमी, इन जात डा मुर, इन वारचपुकीमी इन कली दोस गेशा, खेदा पा ग्याइक्पाइशशा, चोक्पाइक्नीम। का निक्शी आन कली साइक्पाइक्नीम।

17 मुरपुकी नेल्लेमी आं नें आ परबम इन कली काइ मदाक्नीम।

18 तन्न इन पिया डा चां का यो महेम्ब। लूका १२:७

19 मोपतीके थमा सुइक्चा मप्रोनीन। मिनू ला गे ब्रोंइचा ताइनीनी। हिबू १०:३६

‘यरूसलेम जाम्शा लाइब’ देंशो

20 यरूसलेम सहर आ एर ओंथ लडाइ पाइबपुकीमी पुम्शो ताइतीनी हना ‘मुल सहर खतम दुन्ची नाक्त जाक्माक्त’ दे तुइक्तीन।

21 मोपतीके यहूदीया रागीम बाक्बपुकी डांडा ग्येतथ प्रोक्मल। सहरम बाक्बपुकी सहर प्रोंइशा प्रोक्मल। सहर एर ओंथ रू मेर बाक्बपुकी सहर मओवमल।

22 परमप्रभु यावे आ लोवमी एको ओदेंशो दुम्ब, दे ब्रेक्शो बाक्ब। एको ब्रेक्शो नेल्ल थमा दुम्शा, सहर खतम दुम्ब। ब्यवस्था ३२:३५

23 मेना आल कुरशो नु दूध तूब आल पाइशशो मीश मुर आन कली श्येत दुम्ब। मारदे हना रागीमी शुश श्येत दुम्शा, मेको मुरपुकीमी परमप्रभु यावे आ गाइशशो ताइनीम।

24 कोइ तरवारम बेक्नीमी। कोइ ग्याइशशा अर्को रागीम लाइक्चा पुंइसीनीम। मिनू आन नाक्त मजाक्दीम सम्म अर्को जात डा मुरपुकीमी यरूसलेम कली दिप्शा वोइक्नीम। यसैया ६३:१८; प्रकाश ११:२; रोमी ११:२५

चिन्ड तांइसीब, दे शेंशो

25 मिनू सरीड नु रागीमी चिन्ड तांइसीनीम। सरीडमी नां, तास्ला नु सोरुल मार मार तांइसीब। रागीम समुन्द्रमी ठेयब ब्वाक्कु ब्रुइशशा, मुर नेल्ल आन कली हिंपाइक्ब। प्रकाश ६:१२-१३

26 मुरपुकी सरीड नु रागी कोव्रशा, हिंशा थाइनीम। मारदे हना सरीड डा सक्ति हिम्सीनीम।

27 मिनू रागीम जरमेशो कली गोस्स तारी बाक्शा, सक्ति नु ठेयब छेडछेडमी यिशो ताइनीम। दानीएल ७:१३

28 मेको चिन्डपुकी दुम्शो तनीनु, इन पिया पोक्शा, ठेयब थुं पा ग्येरसीने। मारदे हना श्येत रे प्रोंइब इन नेक्था जाकशो बाक्ब” दे शेदीमी बाक्त। फिलिप्पी ४:४,५

29 मिनू कथा सेल्शा “फोव्रशी रवा नु अरु रवा कोव्रडीन।

30 कोचवा दाप्शा कुशो तशा, रेड यिची ना जाक्चा चिक्शो बाक्त, दे तुइक्नीनी।

31 आं देंशो लोव थमा दुम्शो तनीनु, परमप्रभु यावे आ राज्य इन नेक्था जाक्माक्त, दे तुइक्नीनी।

- 32 नोफा दाइशशा नेनीने, एको मुरपुकी मनुप्यु, आं देशो नेल्ल थमा दुम्ब।  
 33 सरीड नु रागी नेल्ल जाम्शा लाइनीम। तन्न आं लोत्र चहिं गेनायो मजाम्ब।  
 34 आं देशो मप्रंथु होस पा बाक्कीन। शांबु राकसी दुक्शा मबाक्कीन। मार जचा मार फेक्चा, दो पचा, दे शुश ममिम्तीने।  
 मारदे हना आं देशो लोत्र इन मतुइक्थु दुम्ब। मर्कूस ४:१९; १थिस्सलोनिकी ५:३  
 35 मेको मोदेशो श्येत नेल्ल रागीम दुम्ब।  
 36 मोपतीके आं देशो मिम्शा बाक्कीन। परमप्रभु यावे कली 'श्येत नेल्ल फाल्शा, थमा सुइक्तीक सक्ति गेकी। मिनु रागीम जरमेशो जाक्मेनु, सासीशा गुम्चा तकल' दे पुंडना पुंडना बाक्कीन" दे अर्ती गेमी बाक्त।

नाक्त कित कित शेशो

- 37 मिनु येसुमी नाक्त मुर आन कली शेना शेंन नाक्दो चहिं जैतून डांडाम लशा इप्बाक्माक्त।  
 38 शुश मुरुमी नाक्त कित कित सुनी कना बोक्शा, परमप्रभु यावे आ खिं लशा, येसु आ लोत्र नेंबाक्मा बाक्त।

## 22

येसु कली साइक्चा, दे लोत्र पशो

मती २६:- २८:-; मर्कूस १४:- १६:-; यूहन्ना १८:- २१:-

- 1 मिनु बोरेब ओख्ती मसुप्यो शोब्ले जतीक पास्सा चाड जाक्चशो बाक्माक्त।  
 2 मिनु ठेयब चढेब नु सास्त्रीपुकीमी "येसु कली दोपा ग्याइशशा साइक्चा?" दे लोत्र पमुशा, साइक्चा माल्मे बाक्त।  
 तन्न शुश मुरुमी येसु आ लोत्र नेशो तशा, हिंमा बाक्त। लूका २०:१९  
 3 मिनु सैतान इस्कारीयोत डा यहूदा आ थुंम ओत्रमाक्त। मेको शेंसीब आन दाते डा का बाक्माक्त। यूहन्ना १३:२, २७  
 4 मिनु मेको ठेयब चढेब नु ठेयब मुर आन कली गुमथ लशा "येसु ग्याइक्पाइक्चा कली वारच पाइननी" दे माइक्मी बाक्त।  
 5 मिनु मेकोपुकीमी ग्येरशा "दुम्ब, ग्याइक्चा वारच पाप्तीवी हना, क्येट गेनीकी" देंमा बाक्त।  
 6 में डा मेरे यहूदामी "सुइमी मतुइक्थु, दोपा ग्याइक्पदु?" दे मिम्शा बाक्माक्त।

पास्सा चाड डा भोज

- 7 मिनु बोरेब ओख्ती मसुप्यो शोब्ले जची चाड जाक्माक्त। मेको नाक्ती पाठा का क्योरचा माल्बाक्माक्त। प्रस्थान १२:१८-२०  
 8 मिनु येसुमी पत्रस नु यूहन्ना आस कली "पास्सा चाड डा भोज साथ लसे" दे माइक्सी बाक्त।  
 9 मिनु मेको निक्शीमी "ते लशा साचा?" दे हिल्लो पाम्से बाक्त।  
 10 मिनु येसुमी "नेनीसे, मुल सहर लसे। सहरम जाक्दीस्सीनु, गाग्री कुरशा ब्वाक्कु दिथ पिशो मुर का गुम्नीसी।  
 11 मेको आ नोले खोइशशा, तेको खिं ओत्रबा, मेको खिं ओत्रडीसे। मिनु खिं डा मुर कली 'शेंबमी सोइशशो नस्कु।  
 शेंबमी, आ शेंसीबपुकी नु काथा बाक्शा, पास्सा ते मानेचा? दे हिल्लो पथ सोइक्ताक्की" दे मतीसे।  
 12 मो माइक्सीनु, मेकोमी इस कली तला तारी ठेयब कोठा का कोइब। मेको कोठामी गुन्डी पीरा ब्रशा वोइशशो थित्तीसी। मिनु मेकेरन साचा" दे सोइक्तीम्सी बाक्त।  
 13 मिनु लासानु, येसुमी दोदेशो देंमे, मोदेशो थित्से बाक्त। मिनु पास्सा चाड डा भोज सादसे बाक्त। लूका १९:३२  
 14 मिनु भोज जचा कली येसु नु आ शेंसीबपुकी जथ निस्समा बाक्त।  
 15 मिनु जचामेनु, येसुमी "गो श्येत गेचा पुइसीचा क्येडा डोंइती गेपुकी नु काथा बाक्शा, एको पास्सा मानेशा जत दाक्ती।  
 16 मारदे हना परमप्रभु यावे आ राज्य पशो मतांइसे सम्म लेशा गेपुकी नु काथा बाक्शा, पास्सा मानेचा मताइनुड" देंमाक्त। लूका १३:२९  
 17 मिनु कचौरा शेशा "गे रिम्शो पाइब बाक्नीनी" दे प्रार्थना पशा "ताक्शा, का का पा तूडीन।  
 18 मुल डा मेरे एको अडगुर रस मतनुड। परमप्रभु यावेमी राज्य पशो तांइसे नोले ला तनुड, दे इन कली देंनुड" देंमाक्त।  
 19 मिनु शोब्ले शेशा "गे रिम्शो पाइब बाक्नीनी" दे प्रार्थना पा, जिक्शा योक्शा "एको आं रां बाक्ब। इन कली गेतन्नी।  
 आं कली मिम्शा जने" दे शोब्ले जपाइक्मी बाक्त। १कोरिन्थी ११:२३-२५  
 20 मिनु जशा, कचौरा शेशा "एको तूनीनु, आं हुश चढेशो मिम्तीने। आं हुशेमी परमप्रभु यावे आ गेशो नक कबल खाप्ता।  
 आं हुश जारशोमी शुश मुर आन पाप क्याम्सीब।  
 21 नेनीने, आं कली ग्याइक्ब आन कली वारच पाइब का गोपुकी नु काथा बाक्शो बाक्ब। यूहन्ना १३:२१-२२  
 22 रागीम जरमेशो कली साइ मोदेशो दुम्चा माल्ब देशो लोत्र नेल्ल थमा दुम्चा माल्त हना यो, ग्याइक्ब आन कली वारच पाइब कली शुश मरिम्शो दुम्ब" देंमाक्त।  
 23 मिनु शेंसीबपुकीमी येसु आ लोत्र नेशा "मोदेशो पाइब सु बाक्म माइ?" दे लोत्रसी पमुचा गोत्रमे बाक्त।

नेल्ल क्येडा ठेयब सु बाक्वा माइ?

- 24 मिनु लोत्रसी पस डा पस बाक्मानु "गो इं दातेम नेल्ल क्येडा ठेयब सु बाक्वा माइ?" दे जिचा पोक्मे बाक्त। मती २०:२५-२८; मर्कूस १०:४२-४५; लूका ९:४६



25 मिनू येसुमी “अर्को रागी डा पिपपुकीमी इन कली हुकुम पाइनीम। मिनू मुरपुकीमी मेको आन कली मान पा ठेयब सेल्नीम।

26 गेपुकी चहिं मेको आन पशो खोदेशो पा ठेयब दुम्चा ममालीने। नेल्ल क्येडा ठेयबमी आइक्च सुइसीशा, नेल्ल आन कली वारच पवल।

27 मान पा खमे योक्गमेनु, जाइब मुर आन कली मान पा ठेयब सेल्नीम। खेप्व मुर चहिं आइक्च दुम्ब। गो इन कली खेप्व मुर खोदेशो दुम्शा गेय पाता। यूहन्ना १३:४-१४

28 आं कली थुं थाम्मेनु, वारच पाइब गे ननी। यूहन्ना ६:६७-६८

29 आं आफोमी आ राज्यमी हुकुम पाइब सेल्ती। मिनू गो इन कली काथा वोइशशा, हुकुम पाइब सेल्ननी।

30 आं राज्यमी गो नु काथा बाक्शा, जचा तूचा ताइनीनी। मिनू इंडसाएल जा १२ थर आन कली निसाफ पाइनीनी” दे माइक्मी बाक्त। मती १९:२८

पत्रुस कली लोव्र पशो

31 मिनू प्रभुमी सिमोन पत्रुस कली “ए सिमोन, नेनो। सैतानमी गे इ कली चेरब खोदेशो पा क्राप्चा गेयीनी, दे पुंडशो बाक्ब। २कोरिन्थी २:११

32 गो चहिं इ पर्वम परमप्रभु यावे कली ‘पत्रुस कली थमा सुइक्चा प्रोंडपाइक्चा मगेने’ दे पुंडता। गे नोले थमा पा इ थुं परमप्रभु यावे गे लेशशा थमा सुइक्चेवे। मिनू थमा सुइक्ब आन कली ‘थमा सुइक्चा मप्रोनीन’ दे आन थुं बारपतो” दे अर्ती गेवा बाक्त। यूहन्ना १७:११,१५

33 मिनू पत्रुसमी “प्रभु, इन कली जेल्खानम चोक्तेक्म हना, गो यो चोक्सीनुड। इन कली साइक्तेक्म हना, इन कली मप्रोंडथु, गो यो साइक्चा पुंडसीनुड” देमाक्त।

34 मिनू येसुमी “पत्रुस, दीसा सुनी भाले ग्रीचा क्येडा डोंइती खेयप सां ‘गो मेको कली मतुइक्नुड, सु बाक्मे?’ देनेवे” देमाक्त।

“होस पांडसीने” देशो

35 मिनू शेंसीब नेल्ल आन कली “गोमी इन कली क्येट, झोला, जुता, मारेड मकुरुथ, परमप्रभु यावे आ राज्य डा लोव्र शेंथ सोइक्तन्नीनु, जचा फेक्चा मतनी डा?” देमेनु “मार माल्का, मेको नेल्ल थित्तक, ताइतक” देमा बाक्त। लूका ९:३; लूका १०:४

36 मिनू येसुमी “मुल क्येट बाक्त हना, क्येट कुरीन। झोला बाक्त हना, झोला कुरीन। तरवार मबाक्त हना, फेक्शो वा लेयशा ओ ग्याप्शा कुरचा माल्ब।

37 आं पर्वम ब्रेक्पाइशो लोव्र नेल्ल थमा दुम्चापु। मार ब्रेक्शो बाक्ब देशा हना ‘मरिम्शो पाइब सुइशशा, दोस गेनीम’ दे ब्रेक्शो बाक्ब। आं पर्वम ब्रेक्शो लोव्र नेल्ल थमा दुम्चा माल्ब” देमाक्त। यसैया ५३:१२

38 मिनू शेंसीबपुकीमी “प्रभु, गोपुकी नु तरवार निक्शी बाक्त” देमानु “मोशो बाक्त हना दुम्त, लो गाक्य” देमाक्त।

येसुमी प्रार्थना पशो

39 मिनू मेकेर रे गाक्शा, डोंइती डा खोदेशो पा जैतून डांडा जाक्दीम्माक्त। आ शेंसीबपुकीमी आ नोले खोदमे बाक्त।

40 मिनू मेकेर जाक्दीम्मानु, येसुमी आ शेंसीब आन कली “थुं थाम्चा पुंडसीनीनु, पाप मपय, दे प्रार्थना पने” दे माइक्मी बाक्त।

41 मिनू आन बाक्तीक आ ता एरे लशा, पोक्च थेक्शा

42 “आं आफ, इन दाक्शो बाक्त हना, एको कचौरा आं कली मतूपाइक्थु लतीने। तन्न आं पुंडशो मदुम्ल, इन दाक्शो दुम्ल” दे पुना बाक्त। मती ६:१०

43 मिनू परमप्रभु यावे आ स्वर्ग डा गेय पाइब का गूशा, येसु कली बोल गेवा बाक्त।

44 मिनू लेंशा आ थुं खाइशशा पुना बाक्त। आ थुं खाइशशा पुनानु, आ पस्ना हुश खोदेशो दुम्शा खपीम दोक्माक्त।

45 मिनू लेशशा शेंसीब आन बाक्तीकम जाक्मेनु, मेको आन कली यो आन थुं खाइशशा इप्शा बाक्शो थिम्मी बाक्त।

46 मिनू “मारदे इम्नी? बोक्कीन, थुं थाम्चा पुंडसीनीनु, पाप मपय, दे प्रार्थना पने” दे पोक्मी बाक्त।

येसु ग्याइक्चा पुंडसीशो

47 मिनू शुश मुर फो फु गूमा बाक्त। मेको आन कली येसु आ शेंसीब यहूदामी लां कोंइशा चाक्शो बाक्माक्त। मिनू जाक्शा, यहूदामी येसु कली पुक्पु पचा कली आ डोंइती जाक्माक्त।

48 तन्न येसुमी “यहूदा, गे रागीम जरमेशो कली वारच दुम्खु पा पुक्पु पा ग्याइक्चाइक्चेवे?” देमाक्त।

49 मिनू शेंसीबपुकीमी “ग्याइक्च जाक्मा बाक्त” दे तुइशशा “प्रभु, एको आन कली तरवारम क्योरशा खेदा पचा?” देमानु

50 कामी तरवार ग्रि शोइशशा, ठेयब चढेब आ गेय पाइब आ ग्युरा नोफा खोदा बाक्त।

51 येसुमी मेको खोइशशो तशा “दुम्त मपने” दे नोफा सेस सेला बाक्त।

52 मिनू येसुमी मेकेर जाक्शो ठेयब चढेब, परमप्रभु यावे आ खिं डा ठेयब मुर नु जोक्ब तुइक्ब खाल्पा आन कली “तरवार कोक्के कुरशा, खुड पाइब कली ग्याइक्च जाक्शो खोदेशो पा आं कली ग्याइक्च जाक्नी?

53 नाक्त किंत किंत परमप्रभु यावे आ खिमी गेपुकी नु काथा बाक्झानु, मग्याइक्तीनी। मुल चहिं छिडछिड डा सक्ति नु इन पालो जाक्त” दे माइक्मी बाक्त। यूहन्ना ७:३०; यूहन्ना ८:२०

पत्रुसमी “मतुडकुनुड” देशो

54 मिनु येसु कली ग्याइशशा लाइशशा, नेल्ल कयेडा ठेयब चढेब आ खिमी ओइदमे बाक्त। पत्रुस यो डोन रे कोव्रना कोव्रन लमाक्त।

55 मेको खिं डा लाडगाम मुर खुम्सीशा, मी थेरशा बाक्मा बाक्त। पत्रुस जाकदीशशा, मेकोपुकी नु मी थेरशा बाक्माक्त।

56 मिनु मेकेर गेय पाइब मीश मुर कामी पत्रुस कली मी थेरशो तशा, मिक्च मयाक्थु कोव्रशा “एको मुर मेरे नु काथा गाक्ब का बाक्त, है” देमेनु

57 “मार लोत्र पवी? गो येसु कली मतुडकुनुड, सु बाक्मे?” देमाक्त।

58 मिनु याम का नोले मेकेर बाक्ब कामी “मेरे नु काथा गाक्ब का गे नवे” देमेनु “हत्तै गो मनड” देमाक्त।

59 मिनु घन्टा का नोले अर्कोमी यो “मेरे नु काथा गाक्ब का एकोन बाक्ब। मारदे हना एको यो गालील डा बाक्ब” देमाक्त।

60 मिनु पत्रुसमी “गो इ देशो मरुबु” देमाक्त। मो देमेनुन, भाले ग्रीमाक्त।

61 मिनु प्रभुमी पत्रुस गे हिरशा, मिक्च मयाक्थु कोव्रडा बाक्त। मिनु पत्रुसमी “सुनी कना भाले ग्रीचा डोंइती खेयप सां ‘मेको कली मतुडकुनुड, सु बाक्मे’ देनेवे” देशो प्रभु आ लोत्र ति फुक्गा बाक्त।

62 मिनु यूशा शुश डाक्माक्त। भजन संग्रह ५१:१९

येसु शुक्शी पाइक्चा पुंडसीशो

63 चढेब आ खिमी चहिं मार पामे बाक्त देशा हना, येसु कली आ मिक्चीम वाम फ्रेंशा तुप्सा

64 “इ कली सुमी तुप्मे? लो देन” दे तुप्स डा तुप्स पामे बाक्त।

65 तुप्स डा तुप्स पा, तोक्शा लोत्र पा शुश श्येत गेमे बाक्त।

येसु कली राप्पाइशशो

66 मिनु सुनी जोक्ब तुडक्ब खाल्पापुकीमी ठेयब चढेब नु सास्त्री आन कली खुप्सा कछडी बाक्मा बाक्त। मिनु येसु कली मेकेर चाक्शा राप्पदमे बाक्त।

67 मिनु “गे ख्रीस्त नवे हना, ख्रीस्त नड देनो” देमा बाक्त। यूहन्ना ३:१२

68 मिनु येसुमी “गो ख्रीस्त नड देंती हना, गे थमा मसुडक्नीनी। इन कली लोत्र का हिल्लो पाता हना, आं लोत्र मलेत्तीनी।

69 तन्न लोत्र का ‘मुल रागीम जरमेशो परमप्रभु यावे आ ग्युरा गे बाक्चा ताइब’ ” दे माइक्मी बाक्त। भजन संग्रह १००:१

70 मिनु मेकोपुकीमी “मो हना गे परमप्रभु यावे आ तौ नवे?” देमानु “परमप्रभु यावे आ तौ नवे, दे गेन देंतीनी” देमाक्त।

71 मिनु मेकोपुकीमी “मार सांक्छी माल्दा डा? आ देशो नैतय। आं मा देशोमी दोस ताइब दुम्त” देमुमा बाक्त।

## 23

पिलातस आ डोंइती राप्पाइशशो

1 मिनु मेकेर रे येसु कली पिलातस आ डोंइती चाकदीत्मे बाक्त।

2 मिनु पिलातस आ डोंइती राप्पाइशशा “हजुर, एको मुरुमी मुर आन थुं क्याल्ब। ‘सिजर कली ममानेचा। तिरो थाप्चा ममाल्ब। गो ख्रीस्त नड। मिनु गोन पिप नड’ दे शेंना शेंन गाक्त” दे दोस गेमे बाक्त। प्रेरित २४:५; लूका २०:२५

3 मिनु पिलातसमी येसु कली “यहूदी आन पिप नवे?” दे हिल्लो पवानु “गे आंमा देंतीनी” दे लोत्र लेत्ता बाक्त।

4 मिनु पिलातसमी ठेयब चढेब नु येसु कली चाक्ब आन कली “एको दोस तचा डा मुर मतड, रिम्शो मुर ताता” देमाक्त।

5 मिनु मेकोपुकीमी “एकोमी गालील रागी नु यहूदीया रागी नेल्ल हिरशा, एक यो जाक्शा, मुर आन कली ‘पिप कली ममानेन। आं कली मानेन’ दे आन थुं क्याल्तीमी। मिनु गाउं सहरमी पिप आ पर्वम दूली लोत्र पचा गोम्तेक्मे” दे दोस गेशा लोत्र थोक्शा देमा बाक्त।

6 मिनु पिलातसमी येसु गालील डा बाक्माक्त, दे तुडक्ता बाक्त।

7 गालील डा हुकुम पाइब हेरोद बाक्माक्त। मेना हेरोद नाक्त का निक्शी कली यरूसलेम जाक्शो बाक्माक्त। मोपतीके मेकेर सोइक्ता बाक्त। लूका ३:१

8 मिनु हेरोदमी येसु कली तशा, ग्येरसे बाक्त। मारदे हना शुश नाक्त रे ग्रुम ग्रुम दाक्शो बाक्माक्त। मुर आन कली सापाइशशो, चिन्ड कोइशो शुश लोत्र नेंशा “मारदे छक लाक्चा डा गेय कोंडबा कों” दे मिम्शो बाक्माक्त। लूका ९:९

9 मिनु हेरोदमी शुश लोत्र हिल्लो पवा बाक्त। तन्न येसुमी लोत्र का यो मलेत्ता बाक्त।

10 ठेयब चढेब नु सास्त्रीपुकीमी शुश दोस गेमे बाक्त।

11 मिनु हेरोद नु आ सिपाइपुकीमी येसु कली शुक्शी पा पिपी आ वा फेक्पा “लो, मुल पिप दुम्ते” दे पिलातस आ बाक्तीकेमी लेशशा सोइक्तेमे बाक्त।

12 डोंइती हेरोद नु पिलातस जोरी सत्रु खोदेशो दुम्शो बाक्सा बाक्त। मेको नाक्त रे वारचुब दुम्सा बाक्त।

13 मिनु पिलातसमी येसु कली पिप आ वा फेक्पा लेशशा चाक्शो तशा, ठेयब चढेब, ठेयब मुर नु शुश मुर आन कली खुप्सा

14 “एको मुरुमी ‘पिप ममानेचा’ दे शेंना शेंन गाक्ब दे दोस गेतीनी। गो चहिं दोस गुंइने मचबु।

15 हेरोदमी यो आ दोस थिन्ने मचाप्थु, लेशशा सोइक्ताक्व। साइक्चा पुंडसीब मारदे दोस मथिदु।

16 मोपतीके इक्का सजाइ गेशा, सोइक्चा दुम्ती” देमाक्त।

- 17 पास्सा नाक्ती जेल्खानमी चोक्सीशो मुर का प्रोंडचा माल्बाक्माक्त।  
 18 मिनू पिलातसमी येसु कली प्रोंडशा सोइक्चा देंमेनु, मेकेर बाक्बपुकीमी “प्रोंडचा मदुम्ब। मुर का प्रोंडचा देंतीनी हना, बारब्बा कली प्रोंडशा सोइक्तीने। एको कली चहिं साइक्चान माल्ब” दे गुड मुठी पा पोक्शा, रेयके पामे बाक्त।  
 19 बारब्बा चहिं डोंडती मरिम्शो गेय पा, सहरम हुल पोक्शा, मुर का कली साइशशा, जेल्खानमी चोक्सीशो बाक्माक्त।  
 20 पिलातसमी खुम्सीशो मुर आन कली लेंशा लोत्र पशा, येसु कली प्रोंडचा बोल पवा बाक्त।  
 21 तन्न मेकोपुकीमी शुश रेयके पा “शीम केप्शा कांटी थोक्शा क्याइशशा सतीने” दे वाइ ब्रेशशा, रेयके पामे बाक्त।  
 22 मिनू पिलातसमी लेंशा “मार मरिम्शो पवा? मार दोस गेचा? साइक्चा डा दोस मारेड मतड। तुप्पाइशशा, प्रोंडशा सोइक्नुड” देमाक्त।  
 23 मिनू मेकोपुकीमी “ब्रोंडचा मगेचा, सरकार, ब्रोंडचा मगेचा। शीम केप्शा कांटी थोक्शा क्याइशशा साइक्चा माल्ब” दे वाइ ब्रेस्स डा ब्रेस्स बाक्मा बाक्त।  
 24 मिनू पिलातसमी मेको आन कली सिक्सी पपाइक्ने मचाप्तीके “मो हना, लो, सतीन” दे आन पुंइशो पचा गेमी बाक्त।  
 25 डोंडती मरिम्शो गेय पा, मुर साइशशा चोक्सीशो बारब्बा कली प्रोंडपाइशशा सोइक्ता बाक्त। येसु कली आन पुंइशो खोदेशो पा शीम केप्शा कांटी थोक्शा क्याइशशा साइक्चा कली गेवा बाक्त।

येसु साइक्चा पुंइसीशो

- 26 मिनू सिपाइपुकीमी येसु कली लदमे बाक्त। सहर रे गुंइदमेनु, आ रू रे पिशो साइरेनी डा सिमोन कली ग्याइशशा, येसु कली क्याइक्तीक शी कुरपा, येसु आ नोनोले खोइक्पाइशशा लदमे बाक्त।  
 27 शुश मुरुमी मेको आन नोले खोदमे बाक्त। मीश मुरपुकी डाक्शा रोंका पना पन गाक्मा बाक्त।  
 28 मोपा डाक्शा खोदमेनु, येसुमी आ नोले लेशशा कोत्रशा, डाक्ब मीश मुर आन कली “ए यरूसलेम डा तमीपुकी, आं कली तशा, मडाक्कीन। तन्न इन तमी तौ नु आंमा इन कली मिम्शा डाक्कीन।  
 29 मारदे हना काबु एको सहर डा मुर शुश श्येत जाइनीम। मोपा श्येत जाक्मेनु, आल मथीब नु दूध मतुंडब मीश मुर ग्येरसीनीम। मारदे हना शुश श्येत दुम्ब। लूका २१:२३  
 30 मिनू मेकोमी रोगु कली “ब्रेशशा चिप्शां, आंइ कली सुम्शा खुइक्तीकी” दे पुंइनीम। होसे १०:८; प्रकाश ६:१६; प्रकाश ९:६  
 31 क्येख शी लाइ यो चोत्रमेनु, सोत्रशो शी मार लीबा डा?” दे माइक्मी बाक्त। भजन संग्रह २२:१९; १पत्रुस ४:१७  
 32 येसु कली लदमेनु, खुइ निक्शी आस कली यो साइक्थ लदमे बाक्त।  
 33 मिनू खप्परे माइक्तीकेमी चाक्दीशशा, मेको सांफा आन कली शी का का तारी इप्पा गुड खोइलीम कांटी थोक्शा, शी पोक्शा, येसु आ ग्युरा गे का, आ पेरा गे का क्याइशशा वोदमे बाक्त।  
 34 मिनू क्यदमेनु, येसुमी “आं आफ, एको आन कली माफ गेने। मारदे हना एकोपुकीम मारेड मतुइशशो बाक्नीम” दे पुना बाक्त। सिपाइपुकीमी फेन्टे ग्यारशा, आ वा योक्समा बाक्त। यसेया ५३:१२; प्रेरित ७:१६; प्रेरित ३:१७; भजन संग्रह २२:१९  
 35 मुर शुश मेकेर कोत्रना कोत्रन बाक्शो बाक्मा बाक्त। टेयब मुरपुकीमी “एकोमी शुश मुर आन कली श्येत रे प्रोंइना प्रोंइन गाक्बाक्माक्त। परमप्रभु यावे आ योत्रशो ख्रीस्त बाक्त हना, मुल आंमा प्रोंइसेक्ल” दे शुक्शी पामे बाक्त।  
 36 सिपाइपुकीमी ग्युरशो थोत्रक तुंडशा  
 37 “गे यहूदी आन पिप नवे हना, मेकेर ब्रोंडशा लावो” दे शुक्शी पामे बाक्त।  
 38 येसु कली क्याइशशो शीमी “यहूदी आन पिप बाक्ब” दे ब्रेक्शा वोदमे बाक्त।  
 39 येसु नु काथा क्याइशशो खुइ कामी यो शुक्शी पा “ख्रीस्त मनवे डा? लो, मुल ब्रोनो। मिनू आंस कली यो प्रोंइस्की” देमाक्त।  
 40 मो देंमेनु, अर्कोमी “गे यो परमप्रभु यावे कली तशा महिंनेवे? गो सांफा कांइचीक सजाइ ताइतय।  
 41 गो सजाइ जचा माल्लो नस। मारदे हना खुइ पाइतस। एको मुरुमी चहिं मारेड मरिम्शो मपावो” दे हुइक्ता बाक्त।  
 42 मिनू मेकोमी “येसु, गे परमप्रभु यावे आ राज्यमी हुकुम पचा गोनीनु, आं कली यो मिम्तीन” देंमेनु, मती २०:२१  
 43 येसुमी “नोफा दाइशशा नेनो, मुलाक्ती गे गो नु काथा दुम्शा, परमप्रभु यावे नु बाक्चा ताइनेवे” दे मदा बाक्त।  
 २कोरिन्थी १२:४  
 44 मिनू नाक्ती १२ बजेसे बाक्त। मिनू घन्टा सां सम्म रागी नेल्ल छिडछिड दुम्माक्त।  
 45 मारदे हना नां आ छेडछेड जाम्माक्त। मिनू परमप्रभु यावे आ खिं आगा डा कोठामी फारशो वा उइक्थ पा जेरर गाक्माक्त। प्रस्थान २६:३१-३३; २इतिहास ३:१४  
 46 मिनू येसुमी “आं आफ, आं सोक्त इन गुइमी गेटन्नी” दे वाइ ब्रेशशा, आ सोक्त प्रोना बाक्त। भजन संग्रह ३१:६; प्रेरित ७:५८  
 47 मेकेर बाक्ब कप्तानमी मो दुम्शो तशा “थमा पा, एको मुरुमी मरिम्शो गेय मपशो बाक्माक्त” देशा, परमप्रभु यावे कली टेयब सेला बाक्त।  
 48 मेकेर कोत्रथ जाक्बपुकीमी मो दुम्शो तशा “ओहो, गो मरिम्शो गेय पया बाक्त” दे रुप्शा, आन कुचु तुप्शा, डाक्शा आन खिं खिं लेम्मा बाक्त।  
 49 गालील रागी रे यरूसलेम सम्म येसु नु काथा गाक्शो मीश मुर नु आ वारचपुकीमी डोन रे कोत्रशा, मोदेशो दुम्शो नेल्ल तामे बाक्त। लूका ८:२-३

येसु आ बेकशो रां पुक्खीम वोइशशो

50 यहूदीया रागी अरीमाथीया सहर डा योसेफ नें पाइशशो ठेयब मुर का बाक्माक्त। मेको मुर यरूसलेम “येसु कली साइक्चा” दे लोव्रसी पामेनु, मबिश्शो बाक्माक्त।

51 मेको रिम्शो थुं पाइशशो बाक्माक्त। मेकोमी “परमप्रभु यावे आ राज्य पशो तांइसेकल” दे थमा सुइशशा, आस पा बाक्शो बाक्माक्त। लूका २:२५,३८

52 मिनु मेको लशा, पिलातस कली “येसु आ रां लाइक्चा गेयीनी” दे पुंडदा बाक्त।

53 मिनु पिलातसमी “लो, लतो” देंमेनु, शी रे शोलशा, बुश वाम गिल्शा लाइशशा, पुक्खी कामी ओइशा वोदा बाक्त। डोंइती मेको पुक्खीमी सुइ मवोइशशो बाक्माक्त।

54 सुक्रबार नाक्नाक्दो ६ बजे क्येडा डोंइती मेकेर चाक्दीशशा वोदा बाक्त। मारदे हना ६ बजे रे नाइक्तीक नाक्त गोइबाक्माक्त।

55 गालील रे येसु नु काथा गाक्ब मीश मुरपुकीमी योसेफमी येसु आ रां लाइशशो तशा “ते वोइक्वा?” दे कोव्रशो बाक्मा बाक्त।

56 मिनु वोइक्तीके तुइशशा, सहर लेशशा लशा, रां मराक्ब ओख्ती ग्याप्शा चाक्शा, साशा खिम वोदमे बाक्त। मिनु आ दीसा नाइक्तीक नाक्त दुम्तीक गेय मपथु, नाइशशा बाक्मा बाक्त। प्रस्थान २०:१०

## 24

पुक्खी श्येत्थ तशा, छक लाक्शो

मती २८:१-१०; मर्कूस १६:१-८; यूहन्ना २०:१-१०

1 मिनु आ दीसा सुनी कना बोक्शा, मराक्ब ओख्ती लाइशशा, पुक्खीमी जाक्दीम्मा बाक्त।

2 मिनु पुक्खी सुशो फुल्लु रोकशो तशा,

3 ओव्रशा कोव्रडमेनु, येसु आ रां मबाक्माक्त।

4 मिनु मबाक्शो तशा “ओदेशो मार दुम्मे?” दे छक लाक्मानु, झिल झिल पाइशशो वा फेक्शो मुर निक्शी फो फु यूशो तामे बाक्त।

5 मेको आस कली तशा, हिंशा कोव्रने मचापथु, खुम्की पा बाम्मा बाक्त।

6 मिनु मेको निक्शीमी “मारदे सेस मुर कली बेक्शो मुर वोइक्तीकेमी माल्नीनी? एकेर मबा, सेंसीचा पुंडसाक्व। गालील रागीम काथा बाक्नीनु, इन कली मार शेंदा, मेको ममिम्तीनी?

7 ‘रागीम जरमेशो पापी आन गुइमी जिम्मा गेने पुंडसीशा, शीम क्याइशशा कांटी थोकशा साइक्चा पुंडसीब। मिनु बेक्शो आ निन्थ नाक्ती बेक्शो रे सेंसीब’ दे शेशो प्रेंदीनी डा?” देंसा बाक्त। लूका ९:२२

8 मिनु येसु आ लोव्र ति फुकुमे बाक्त।

9 मिनु मेकेर रे लशा, येसु आ शेंसीब ११ जना नु आ वारच नेल्ल आन कली तुइक्पदमे बाक्त।

10 मेको मो दुम्शो ताइब मीश मुर सु सु बाक्मा बाक्त देंशा हना, माग्दाला डा मरीयम, योअन्ना नु याक्ब आ ममा मरीयम बाक्मा बाक्त। मेको आन वारच का निक्शी यो बाक्मा बाक्त। लूका ८:२-३

11 येसु आ शेंसीबपुकीमी मीश मुर आन लोव्र नेंशा “एको मीश मुर आन लोव्र बाक्ब” दे थमा मसुदमे बाक्त।

12 पत्रुस चहिं दोरशा, कोव्रथ जाक्दीम्माक्त। जाक्दीशशा बाप्शा कोव्रडानु, बुश वा डा लाक्शा मारोइ मतवा बाक्त। मिनु छक लाक्शा आ खिं लेम्माक्त। यूहन्ना २०:६-१०

येसु कली एम्माउस डा लांम तशो

मर्कूस १६:१२-१३

13 मेको नाक्ती येसु आ वारच निक्शी यरूसलेम रे गाक्शा, एम्माउस माइशशो गाउं डा लां खोदसे बाक्त। एम्माउस गाउं यरूसलेम रे ६० स्तादीयोन डोन बाक्माक्त। स्तादीयोन का १८५ मिटर खोदेशो बाक्ब।

14 मिनु गाक्ना गाक्न बाक्सानु, ओदेशो मार दुम्मे, दे लोव्रसी पमुसा बाक्त।

15 मिनु गाक्स डा गाक्स लोव्र पाम्सेनु, येसु पिशा, गुम्शा, काथा गाक्मा बाक्त।

16 काथा गाक्शा यो, येसु, दे मतुइक्तसे बाक्त। मारदे हना येसुमी आस कली मतुइक्पांडसे बाक्त।

17 मिनु येसुमी “नाप्खे मार लोव्र पसी?” दे हिल्लो पवा बाक्त।

18 मिनु खा दिक्शा आस थुं खाइक्सा बाक्त। मिनु क्लेओपास माइशशोमी “यरूसलेममी मार दुम्मे, दे गेमी ला मतुइक्तीनी?” देंमेनु,

19 येसुमी “मार दुम” देमाक्त। मिनु मेको निक्शीमी “मार दुम्त देंशा हना, नासरथ डा येसुमी परमप्रभु यावे आ लोव्र पवानु, शुश चिन्ड कोइताक्व। परमप्रभु यावे नु मुर नेल्ल आन डोंइती मोदेशो पापु। मती २१:११

20 तन्न इं ठेयब चढेब नु ठेयब मुरपुकीमी दोस गेशा ‘साइक्चा पुंडसीब’ दे शीम क्येप्शा कांटी थोकशा क्याइशशा साइक्पाइक्तेक्म।

21 मेको ‘परमप्रभु यावे आ सोइशशो इं इस्माएली कली प्रोंइब बाक्ब’ दे थमा सुइशशा, आस पा बाक्तस्कु। आ बेक्शो नाक्त सां दुम्त। प्रेरित १:१६

22 मुल सुनी गोपुकी नु बाक्शो मीश मुरपुकीमी आंस वारच नु गो नेल्ल आइ थुं क्याल्तीकी।

23 मारदे हना सुमी कना येसु आ रां वोइक्तीक पुक्खीम लमानु, येसु आ रां मथिक्क। तन्न परमप्रभु यावे आ स्वर्ग डा गेय पाइब निक्शी यूशा 'येसु ब्रॉइत, देंताक्क' दे लेशशा पिशा लोत्र पाम्तेक्क।

24 मिनु आंस वारच का निक्शी यो लशा, कोत्रशा लेशशा जाक्शा 'मीश मुर आन लोत्र थमा बाक्क' देंतेक्के। तन्न मुल सम्म सुडमी येसु कली मतामे" देंसा बाक्क।

25 मिनु येसुमी "गे मरुप्ब नसी। साइ नेसी परमप्रभु यावे आ लोत्र पाइब आन देशो लोत्र रुप्शा थमा सुडक्के मचाप्नीसी? लूका ९:२२

26 ख्रीस्त श्येत जशा, सक्ति पाइशो दुम्शा, राज्य पचा ताइब देशो लोत्र मुल यो मरुप्नीसी?" देंमाक्क।

27 साइ नेसी मोसा नु परमप्रभु यावे आ लोत्र पाइबपुकीमी ख्रीस्त आ पर्बम मार मार ब्रेक्शो बाक्का, मेको नेल्ल शेंदीम्सी बाक्क। ब्यवस्था १८:१५; भजन संग्रह २२:-; यसैया ५२:१३-५३

28 मिनु आंस गाउं जाक्दीशशा, येसुमी "लो, बाक्कीसे, गो लाइनुड" देंमाक्क। उत्पत्ती १९:१५,२४,२५

29 मेको निक्शीमी "मुल नां रिक्शा ते लाइनीनी? मुलाक्को काथा बाक्क" देंसा बाक्क। मिनु येसुमी "मो हना दुम्ब, नां यो रिक्क" देंमाक्क। न्यायाधीस १९:९

30 मिनु खमे क्येशा, शोब्ले चोने थुम्शा जचामेनु, येसुमी शोब्ले शेशा, परमप्रभु यावे कली "गे रिम्शो पाइब बाक्नीनी" देंसा, जिक्शा योक्का बाक्क। लूका ९:१६; लूका २२:१९

31 मिनु मो पा तुइक्पांडसेनु "येसु कका बाक्माक्क" दे तुइक्कसे बाक्क। तुइक्कसे चोटी येसु यो जाम्माक्क।

32 मिनु मेको निक्शीमी "मेकोमी लाम गो निक्शी नु लोत्र पवानु, परमप्रभु यावे आ लोत्र शेंदानु, इस थुं रांमी नांम तशो खोदेशो मदुम्सा डा?" देंमुसा बाक्क। उत्पत्ती १९:२६

33 मिनु मेको रीब पा लेशशा, यरूसलेम लसा बाक्क। यरूसलेम जाक्दीशशा, येसु आ शेंसीब ११ जना नु मेको नु काथा बाक्कपुकी खुम्सीशा बाक्को गुम्से बाक्क। लूका ९:२४

34 मेकोपुकीमी यो "प्रभु, थमा पा बेक्शो रे सेंसाक्क। मिनु सिमोन पत्रुस कली तपांडसाक्क" देंसा बाक्क। १कोरिन्थी १५:४-५

35 मिनु मेको निक्शीमी लां गाक्सानु, मार मार दुम्मे, आस खिं जाक्दीशशा मार दुम्मे, मेको नेल्ल तुइक्कपदसे बाक्क। मिनु "शोब्ले योक्शा जचशोनु कका येसु बाक्माक्क, दे तुइक्कस्कु" देंसा बाक्क।

येसुमी तपांडसीशो

36 मिनु मोपा लोत्रसी पामेनु, येसुमी आंम कली तपांडसे बाक्क। मर्कूस १६:१४-१९; यूहन्ना २०:१९-२३; प्रेरित १:१-१४; १कोरिन्थी १५:५

37 मिनु "वोल कोर में" दे थाम्पा हिंमा बाक्क। मत्ती १४:२६

38 मिनु येसुमी "मारदे आं कली तशा 'वोल कोर में?' दे हिंनी? वोल मनडा। वोल के श्ये रुश मबाक्क।

39 आं कली थिशा कोत्रयीनी।

40 आं गुड खोइलीमी कांटी थोक्शो गार कोत्रडीने" देंमेनु, कोत्रडमे बाक्क। यूहन्ना २०:२०

41 मिनु छक लाक्शा "येसु बाक्क कौं, मबाक्क" दे दल्गीर पामे बाक्क। हिंमा यो बाक्क। ग्येरसमा यो बाक्क। मिनु येसुमी मेको आन कली दल्गीर पशो तशा "एक मारेड जचा थोत्रकी बाक्क कौं" दे पुना बाक्क।

42 मिनु वाल्शो डांड का गेमे बाक्क। यूहन्ना २१:५,१०; प्रेरित १०:४१

43 मिनु मेको डांड ताक्शा, नेल्ल आन तचा डा पा ब्ववा बाक्क।

"साइ ब्रेक्शो लोत्र थमा दुम्ब" दे शेंशो

44 मिनु येसुमी आ शेंसीब आन कली "गो गे नु बाक्की ना आ देशो मोसा आ अरेशो लोत्र, परमप्रभु यावे आ लोत्र पाइब आन ब्रेक्शो नु भजन संग्रह आं पर्बम ब्रेक्शो लोत्र नेल्ल गाप्चा माल्ब, दे इन कली लोत्र पाता" देंमाक्क। लूका १८:३१-३३; लूका २४:२६-२७; लूका १८:३१

45 मिनु नोले येसुमी परमप्रभु यावे आ ब्रेक्पाइशो लोत्र रुप्चा कली रुप्तीक थुं गेमी बाक्क। लूका ९:४५; यूहन्ना १२:१६

46 मिनु मार ब्रेक्पाइक्की बाक्क देशा हना "ख्रीस्त श्येत जशा, साइक्चा पुंडसीशा आ नित्थ नाक्ती बेक्शो रे सेंसीचा माल्ब। होसे ६:२

47 मिनु यरूसलेम रे पा रागी नेल्ल डा मुर आन कली 'गे इन थुं परमप्रभु यावे गे लेत्वा माल्नीनी। मिनु येसु ख्रीस्त आ नेंमी पाप क्याम्चा तांडसीब' दे नेपाइक्का माल्ब" देंमाक्क। प्रेरित २:३८ प्रेरित १७:३०

48 मिनु मेकोमी "गे मेको नेल्ल तशा, सांक्छी दुम्तीनी।

49 नेनीने, गो आं आफोम 'सक्ति गेनुड' देशो सक्ति इन कली सोइक्नुड। तन्न इर डा सक्ति मतनी सम्म यरूसलेममी रिम्शा बाक्कीन" दे माइक्की बाक्क। यूहन्ना १५:२६; यूहन्ना १६:७; प्रेरित २:१-४

येसु परमप्रभु आ बाक्तीके लशो

50 मिनु नोले मेको आन कली यरूसलेम रे लाइशशा, बेथानी गाउं चाक्दीशशा, आ गुड पोक्शा मेको आन कली आसीक गेमी बाक्क।

51 आसीक गेना गेन बाक्मेनु, सरीड गे लाइक्चा पुंडसे बाक्क।

52 मिनु शेंसीबपुकीमी आन पोक्च थेक्शा, येसु कली टेयब सेल्शा, थाम्पा ग्येरसीशा यरूसलेम लेम्मा बाक्क।

53 मिनु परमप्रभु यावे आ खिंम बाक्ना बाक्न परमप्रभु यावे कली मान पा टेयब सेल्मे बाक्क।

## यूहन्ना

**ब्रेक्ब मुर:** एको किताब येसु आ शेंसीब यूहन्नामी ब्रेक्शो बाक्ब। मेको जब्दी आ तौ याकूब आ लोकब बाक्ब। यूहन्नामी एको किताब आं नें मब्रेक्शो बाक्त हना यो “येसु आ दाक्शो शेंसीब” दे आम आ पर्बम ब्रेक्शो बाक्ब, दे नेल्लेम तुइश्शो बाक्नीम। यूहन्नामी “येसुमी दाक्शो शेंसीब” दे आम कली खुइश्शो नें वोइश्शो बाक्ब। यूहन्ना १३:२३; यूहन्ना १९:२६; यूहन्ना २०:२; यूहन्ना २१:७,२०,२४

**गेना ब्रेक्शो:** यूहन्ना खाल्पा दुम्शा एफिसस सहरम बाक्शो बाक्त। मेना ८५-९८ ए. डी. मेर एको किताब ब्रेक्शो बाक्ब।

### मार ब्रेक्शो:

१. येसु मुर दुम्शो यूहन्ना १:-
२. येसु रागीम बाक्शो यूहन्ना २:- १२:-
३. येसु नु आ शेंसीब यूहन्ना १३:- १७:-
४. येसु श्येत जशो यूहन्ना १८:- १९:-
५. येसु बेक्शा सेंसीशो यूहन्ना २०:- २१:- २२:- २३:-

यसु ख्रीस्त रागीम जाक्शो

1 नेल्ल क्येडा डोंइती लोत्र माइश्शो का बाक्त। मेको लोत्र माइश्शो परमप्रभु यावे नु बाक्शा, मेको नु उइक्थी बाक्त। यूहन्ना १७:५; उत्पत्ती १:१; १यूहन्ना १:१२; प्रकाश १९:१३

2 मिनु मेको रागी सेल्चा क्येडा डोंइती रे परमप्रभु यावे नु काथा बाक्शो बाक्त।

3 परमप्रभु यावेमी मेको कली नेल्ल सेल्पाइश्शो बाक्त। मार मार सेल्शो बाक्मे, मेको नेल्ल आ सेल्शो बाक्त। १कोरिन्थी ८:६; कलस्सी १:१६; हिब्रू १:२

4 मेको नु ब्रोंइतीक सोक्त बाक्शो बाक्त। मिनु मेको ब्रोंइतीक सोक्ती मुर आन कली छेडछेड बाक्त। यूहन्ना ८:१२

5 मेको छेडछेड छिडछिडमी ब्राइब। मिनु छिडछिडमी छेडछेड कली काप्ने मचाप्ब। यूहन्ना ३:१९

6 मिनु परमप्रभु यावे आ सोइश्शो मुर का बाक्त। मेको आ नें यूहन्ना बाक्त। मत्ती ३:१; मर्कूस १:४

7 यूहन्नामी छेडछेड माइश्शो सु बाक्म, दे शेंथ जाक्त। यूहन्नामी “मुर नेल्लेमी लोत्र माइश्शो कली थमा सुइक्ब दुम्मल” दे शेंताक्व। प्रेरित १९:४

8 यूहन्ना छेडछेड माइश्शो ममाइ, छेडछेड आ पर्बम शेंब ला बाक्त।

9 मिनु छेडछेड माइश्शोमी रागीमी बाक्शो मुर नेल्ल आन कली रुप्ब थुं गेचा कली रागीमी जाक्त।

10 मिनु रागीमी जाक्मेनु, आ सेल्शो मुरपुकीमी मेको कली “आंइ कली सेल्ब बाक्ब” दे मतुइक्तेम।

11 आंम रागी जाक्मेनु, आंम सेल्शो मुरपुकीमी मेको कली मब्राम। भजन संग्रह २४:१

12 सु सुमी चहिं ब्रामे नु थमा सुदमे, मेको आन कली परमप्रभु यावे आ तमी तौ दुम्चा गेपु। गलाती ३:२६

13 ठेयब जातमी जरमेतीके, मुर आन दाक्शोमी जरमेतीके नु मुर आन थुंमी मिम्शोमी ममाइ तन्न परमप्रभु यावे आ पतीके ला आ तमी तौ दुम्ने चाप्नीम। यूहन्ना ३:५-६

14 मिनु लोत्र माइश्शो मुर दुम्शा, गोपुकी नु बाक्शो बाक्त। मेको शिशी पाइब नु परमप्रभु यावे आ लां कोंइब बाक्त। गोपुकीमी “परमप्रभु यावे आ कांइचीक तौ बाक्ब” दे तुइश्शा, मेको कली परमप्रभु यावे आ छेडछेड, आ शिशी नु आ थमा पतीकेमी ब्रीशो ताइतक। १तिमोथी ३:१६; प्रस्थान ३३:१८; यसैया ६०:१; २पत्रुस १:१६-१७

15 यूहन्नामी मेको आ पर्बम “मेको आं नोले जाक्त हना यो, आं क्येडा ठेयब बाक्ब। मिनु आं क्येडा डोंइती यो बाक्शो बाक्त” देत।

16 आ शिशी पतीक गो शुश शिशी तना तन बाक्तक। यूहन्ना ३:३४; कलस्सी १:१९

17 मोसामी परमप्रभु यावे आ अरेशो लोत्र गेपु। तन्न शिशी पाइब नु परमप्रभु यावे आ थमा लां कोंइब येसु ख्रीस्त रे बाक्ब। रोमी १०:४

18 मुरपुकीमी परमप्रभु यावे कली गेनायो मतामे। तन्न परमप्रभु यावे नु बाक्ब आ कांइचीक तौमी मुर आन कली परमप्रभु यावे कली तुइक्पाइक्तु। यूहन्ना ६:४६; मत्ती ११:२७

यूहन्नामी येसु ख्रीस्त आ पर्बम शेंशो

मत्ती ३:१-१२; मर्कूस १:१-८; लूका ३:१-१८

19 मिनु यरूसलेम सहर डा यहूदीपुकीमी चढ़ेब नु लेवी आ थर डा मुर आन कली यूहन्ना नु गुम्थ सोइक्ताक्म। मिनु मेकोपुकीमी यूहन्ना कली “गे सु ननी?” दे हिल्लो पाम्तेक्म।

20 यूहन्नामी जोल मपथ, ठीक लोत्र पशा “गो परमप्रभु यावे आ सोइश्शो ख्रीस्त मनड” देत।

21 मेकोपुकीमी “मिनु, गे एलीया ननी?” दे हिल्लो पाम्तेक्म। मिनु यूहन्नामी “गो मेको यो मनड” देत। मिनु मेकोपुकीमी लेंशा “गे परमप्रभु यावे आ लोत्र पाइब ननी?” दे हिल्लो पाम्तेक्म। मिनु मेकोमी “गो मेको यो मनड” देत। मलाकी ३:२३; मत्ती १७:१०-१३; ब्यवस्था १८:१५

22 मिनू नोले मेकोपुकीमी “मिनु, गे सु ननी? आंड कली सोइक्व आन कली मार माइक्चा, गे इन पर्वम मार देंनीनी?” दे हिल्लो पाम्तेक्म।

23 मिनू यूहन्नामी “परमप्रभु यावे आ लोत्र पाइब यसैया आ देशो खोदेशो पा ‘गो गोरशो रागीमी बाक्शा, प्रभु आ लां रिम्शो ग्रीकशा थेलीने’ दे लोत्र पाइब नड” देंत। यसैया ४०:३

24 मिनू हिल्लो पाइब का निक्शी फरिसी आन सोइश्शो बाक्तेक्म। फरिसी रिती थिती सेल्शा, रिम्शो पचा कली कोत्रब यो बाक्शो बाक्तेक्म।

25 मिनू यूहन्ना कली “गे ख्रीस्त मननी हना, एलीया मननी हना, परमप्रभु यावे आ लोत्र पाइब यो मननी हना, मारदे मुर आन कली ब्वाक्कुमी खुम्शा गुंडतीक गेय पाइनीनी?” दे हिल्लो पाम्तेक्म।

26 मिनू यूहन्नामी “इन दातेमी मुर का बाक्शो बाक्ब, मेको कली गे मतुइक्नीनी। लूका १७:२१

27 आं नोले जाक्शो बाक्त हना यो, गो मेको आं जुत्ता पुइक्चा यो मशिरनुड” देंत।

28 मेना यूहन्नामी यर्दन खोला आइक्ची हांबु बेथानी गाउंमी मुर आन कली ब्वाक्कुमी खुम्शा गुंडतीक गेय पना पन बाक्त।

ब्वाक्कुम खुम्ब यूहन्ना आ पर्वम लोत्र

मत्ती ३:१३-१७; मर्कूस १:९-११; लूका ३:२१-२२

29 आ दीसा यूहन्नामी येसु कली आ बाक्तीक गे पना पिन पशो तशा “परमप्रभु यावे आ पाठा मेकोन बाक्ब। मेकोमी रागी नेल्ल डा मुर आन मरिम्शो पशो क्याम्ब। यसैया ५३:७

30 गो मेको आ पर्वम मार लोत्र पाता देशा हना, मेको मुर आं क्येडा नोले जाक्त हना यो, आं क्येडा टेयब बाक्ब। मिनू आं क्येडा डोंइती यो बाक्शो बाक्त।

31 डोंइती गो यो मेको कली मतुइक्ब बाक्ती। तन्न गो मुल इस्राएल डा मुर आन कली मेको आ पर्वम तुइक्पाइक्चा कली ब्वाक्कुमी खुम्शा गुंडतीक गेय पथ जाक्ती” दे यूहन्नामी मुर आन कली देंत।

32 यूहन्नामी “गो परमप्रभु यावे आ सोक्त कली परवा बुदी सरीड रे बेरशा, येसु आ तारी जुक्शो ताता।

33 डोंइती गो यो मेको कली मतुइक्ब बाक्ती। मिनू आं कली ब्वाक्कुमी खुम्शा गुंडतीक गेय पथ सोइक्बमी ‘तेको मुर तारी गेमी आं सोक्त जुक्शो ताइनेवे, मेको आं सोक्तीम खुम्ब बाक्ब’ दे परमप्रभु यावेमी माइक्ती।

34 मिनू गो मेको नेल्ल ताता। परमप्रभु यावे आ तौ मेकोन बाक्ब, दे तुइश्शा, इन कली तुइक्पाइक्तन्नी” दे यूहन्नामी देंत।

येसु ख्रीस्त आ शेंसीबपुकी

35 मिनू आ नित्थ नाक्त यूहन्ना आ शेंसीब निक्शी नु बाक्माक्त।

36 मिनू यूहन्नामी येसु कली हिरशा गाक्शो तशा “कोत्रडीसे, मेरेन परमप्रभु यावे आ पाठा बाक्ब” देंत।

37 मिनू मेको शेंसीब निक्शीमी यूहन्ना आ लोत्र नेंशा, येसु आ नोले खोइक्ताक्स।

38 मिनू येसुमी लेशशा कोत्रडानु, मेको आस कली खोइश्शो तशा “गे मार माल्सी?” दे हिल्लो पाप्तु। मिनू मेको निक्शीमी “शेंब, गे ते बाक्नीनी?” दे हिल्लो पाम्ताक्स।

39 मिनू येसुमी “गो नु पिशा, कोत्रडीस” देंत। मिनू मेको निक्शी आ बाक्तीक कोत्रथ लाम्ताक्स। मिनू मेको नाक्त येसु नु बाक्ताक्स। मारदे हना मेना ४ बजे खोदेशो दुम्शो बाक्त।

40 यूहन्ना आ लोत्र नेंशा, येसु आ नोले खोइक्ब का अन्द्रीयास बाक्त। अन्द्रीयास सिमोन पत्रुस आ लोकब बाक्त। मत्ती ४:१८-२०

41 मिनू मेकेर रे लशा, अन्द्रीयासमी सिमोन कली गुम्शा “गो निक्शीमी मस्सीह कली गुम्तस्कु” देंत। मस्सीह चहिं ख्रीस्त, दे रुम्सीब। मस्सीह आ देशो “परमप्रभु यावेमी मेको कली तेल लुक्शो बाक्ब” बाक्ब।

42 मिनू अन्द्रीयासमी सिमोन पत्रुस कली येसु नु गुम्पाइक्तु। येसुमी मेको कली तशा “गे यो आन्नेस आ तौ सिमोन नवे। इ नें केफास देंचा माल्ब” देंत। केफास देशो फुल्लु बाक्ब। ग्रीक लोत्रमी पत्रुस बाक्ब।

43 मिनू आ सांबु नाक्ती येसुमी “गालील रागी लाइनुड” देंत। मिनू मेकेर लशा फिलीप कली गुम्तु। मिनू फिलीप कली “आं नोले खोइय्यी” देंत।

44 मेको फिलीप अन्द्रीयास नु पत्रुस खोदेशो पा बेथसैदा सहर डा बाक्माक्त।

45 मिनू फिलीपमी नथानेल माइश्शो मुर कली गुम्शा, मेको कली “मोसामी नु परमप्रभु यावे आ लोत्र पाइबपुकीमी यो परमप्रभु यावे आ सोइश्शो का आ पर्वम ब्रेक्शो बाक्तेक्म। मिनू गोपुकीमी मेको कली गुम्तक। मेको नासरथ सहर डा योसेफ आ तौ येसु बाक्माक्त” दे नथानेल कली देंत। यसैया ५३:२; ब्यवस्था १८:१८; येरमीया २३:५; इजीकीएल ३४:२३

46 मिनू नथानेलमी चहिं “नासरथ सहर रे सु रिम्शो मुर जाक्ने चाप्वा डा?” दे फिलीप कली देंत। मिनू फिलीपमी “लो, कोत्रडो” देंत। यूहन्ना ७:४१

47 मिनू येसुमी नथानेल कली आ बाक्तीक जाक्शो तशा, नथानेल आ पर्वम “काइ जोल मपाइब नु रिम्शो गेय पाइब इस्राएली का बाक्ब” देंत।

48 मिनू नथानेलमी येसु कली “गे आं कली दोपा तुइक्नीनी?” दे हिल्लो पाप्तु। येसुमी “फिलीपमी इ कली गुम्चा डोंइती गो इ कली फोत्रशी रवा आ पुंमी निश्शो ताता” देंत।

49 मिनू नथानेलमी “शेंब, गे परमप्रभु यावे आ तौ ननी। गे इस्राएल डा मुर आन पिप ननी” देंत। यूहन्ना ६:६९; भजन संग्रह २:७; येरमीया २३:५; मत्ती १४:३३; मत्ती १६:१६

50 मिनू येसुमी लेंशा “गो फोवशी रवा आ पुंमी इ कली ताता देशो आ परबम गे थमा सुइक्तीवी। गे मेको क्येडा ठेयब गेय पशो ताइनेवे” दे माइक्तु।

51 मिनू लोत्र बोइशशा “नोफा दाइशशा नेनीने, गेपुकीमी सरीड रोकशो ताइनीनी। मिनू परमप्रभु यावे आ स्वर्ग डा गेय पाइबपुकी रागीमी जरमेशो आ तार जुक्शो नु स्वर्ग गे लेशशा लशो ताइनीनी” दे माइक्तीमी। उत्पत्ती २८:१२; मत्ती ४:११

## 2

डोंइती डा छक लाक्चा डा गेय

1 आ सांबु नाक्ती गालील रागी डा काना सहरमी ग्युंवे का बाक्शो बाक्त। मिनू येसु आ ममा यो मेकेर लशो बाक्त।

2 येसु नु आ शेंसीब आन कली यो ब्रेशो बाक्तेकम।

3 मिनू अडगुर शांबु नुम्मेनु, येसु आ ममामी येसु कली “अडगुर शांबु नुप्त” देंत।

4 मिनू येसुमी आ ममा कली “गो मार पचा मालनुडा, आं कली मदेनीन। मुल सम्म आं पची मजा” दे माइक्तु।

5 मिनू आ ममामी गेय पाइब आन कली “एकोमी मार देंमे, मोदेशो पने” दे माइक्तीमी।

6 मिनू मेकेर फुल्लु के मुशो ६ ओटा गर वोइशशा बाक्तेकम। यहूदी आन रितती थिततीमी मुर आन कली चिक्चा, दे वोइशशा बाक्तेकम। मेको गर कामी २, ३ ठेयब पुक्तीक खोदेशो ब्वाक्कु रिक्ब। मेत्रेतस माइशशा ठेयब पुक्तीक का ३९ लिटर खोदेशो बाक्ब। मर्कूस ७:३-४

7 मिनू येसुमी गेय पाइब आन कली “गर नेल्ल ब्वाक्कुमी प्रिदीन” देंत। मिनू मेकोपुकीमी गर नेल्ल ब्वाक्कुमी प्रिताकम।

8 मिनू “जचा योक्ब आन ठेयब मुर कली एको थाम्चा गेने” दे माइक्तीमी। मिनू मेकोपुकीमी आ देशो खोदेशो पांम्तेकम।

9 मेको ठेयब मुरुमी मेको अडगुर शांबु दुग्शो ब्वाक्कु थाम्शा कोत्रडानु, जिजी कका पा ब्रोवशो बाक्माक्त। मेकोमी मेको अडगुर शांबु ते रे चाक्शो मतुइक्त। गेय पाइबपुकीमी ला तुइशशा बाक्तेकम। मिनू मेको ठेयब मुरुमी ग्युंले कली ब्रेशशा

10 “मुर नेल्लेमी डोंइती ब्रोवशो अडगुर शांबु योक्नीम। तूशा रांइदमे नोले मब्रोवशो योक्नीम। गे चहिं मुल सम्म ब्रोवशो अडगुर शांबु खेक्शा वोइशशा बाक्ते” दे माइक्तु।

11 मेको येसु आ डोंइती डा छक लाक्चा डा गेय बाक्त। मेको डोंइती पशो छक लाक्चा डा गेय गालील रागी डा काना माइशशा सहरमी पशो बाक्त। मोपा मुर आन कली आ सक्ति कोंइशो बाक्त। मेको तशा आ शेंसीबपुकीमी येसु कली परमप्रभु यावे आ तौ बाक्त, दे थमा सुदमे बाक्त। यूहन्ना १:१४

12 मिनू नोले येसु, आ ममा, आ लोकबपुकी नु आ शेंसीबपुकी नु कापेरनाउम सहरमी यिशा, मेकेर इक्का नाक्त सम्म बाक्मा बाक्त। यूहन्ना ७:३; मत्ती १३:५५

येसु परमप्रभु आ खिं लशो

मत्ती २१:१२-१७; मर्कूस ११:१५-१९; लूका १९:४५-४८

13 मिनू यहूदी आन पास्सा चाड जाक्चशो बाक्त। मोपतीके येसु यरूसलेम सहर लत। यूहन्ना ५:९; यूहन्ना ७:१०; मत्ती २०:१८; मर्कूस ११:१; लूका १९:२८

14 परमप्रभु यावे आ खिं जाक्दीम्मेनु, मेकेर ब्यफ लेयबपुकी, भेडा लेयबपुकी, परवा लेयबपुकी नु क्येट फाइक्ब नेल्लेमी आन गेय पना पन बाक्शो ताप्तु।

15 मिनू येसुमी पले डोरी के युक्तीक सेल्शा, भेडा, ब्यफ लेयबपुकी नु क्येट फाइक्ब आन कली परमप्रभु यावे आ खिं रे खेरतीमी। क्येट फाइक्ब आन क्येट वोइक्तीक खोल्शा, क्येट नेल्ल फ्राम्तीमी।

16 मिनू येसुमी परवा लेयब आन कली “एको नेल्ल लतीन। आं आफ आ खिं कली ग्याप्तीक लेयतीक खिं मसेलीन” दे माइक्तीमी।

17 मिनू परमप्रभु यावे आ लोत्रमी “इन खिं कली थमा पा दाक्नुड। मेको दाक्तीक मी खोदेशो पा आं थुंम चोइब” दे ब्रेक्शो बाक्ब, दे आ शेंसीबपुकीमी फ्रुक्तेकम। भजन संग्रह ६९:९

18 मिनू यहूदीपुकीमी येसु कली “इ के मो पचा डा अधिकार बाक्ब, दे आंइ कली मार चिन्ड कोंइने चाप्नेवे?” देंमानु, मत्ती २१:२३

19 येसुमी “परमप्रभु यावे आ खिं प्रेतीन। गो नाक्त सांमी लेंशा सेल्ने थुंनुड” दे माइक्तीमी। मत्ती २६:६१; मत्ती २७:४०

20 मिनू यहूदीपुकीमी “परमप्रभु यावे आ खिं सेल्चा कली ४६ बर्स माल्शो बाक्त। दोपा नाक्त सांमी सेल्ने चाप्नेवे डा?” देंतेकम।

21 येसुमी आ रां आ परबम लोत्र पाप्तु। आ रां परमप्रभु यावे आ खिं बाक्ब। १कोरिन्थी ६:१९

22 मिनू नोले परमप्रभु यावेमी येसु कली बेक्शो रे सेंदानु, आ शेंसीबपुकीमी डोंइती आ रां आ परबम पशो लोत्र फ्रुक्तेकम। मिनू परमप्रभु यावेमी ब्रेक्पाइशशा लोत्र नु येसु आ देशो लोत्र थमा सुइक्तेकम। होसे ६:२

23 मिनू येसु पास्सा चाडम यरूसलेममी बाक्शा, छक लाक्चा डा गेय पवानु, मेको तशा, शुश मुरपुकीमी “परमप्रभु यावे आ तौ बाक्त” दे थमा सुइक्तेकम।

24 येसुमी चहिं मेको आन कली थमा मसुद।



25 मारदे हना मुर नेल्ल आन कली तुडशशा, आन पबर्म लोव्र नेंचा ममाल्द। आन थुमी मार बाक्मे, मेको नेल्ल तुडशशो बाक्त। मर्कूस २:८

### 3

परमप्रभु आ राज्य आ पबर्म शेंशो

1 मिनु फरिसी आन हुल डा यहूदी आन ठेयब मुर का बाक्त। मेको आ नें निकोदेमस बाक्त। यूहन्ना ७:५०; यूहन्ना १९:३९

2 मिनु नाक्दो मेको मुर येसु आ बाक्तीक जाक्शा, येसु कली “शेंब, गे परमप्रभु यावे आ सोडशशो शेंब ननी, दे तुडक्नीकी। मारदे हना परमप्रभु यावे आ सोडशशोमी ला गे इन खोदेशो पा छक लाक्चा डा गेय पने चाप्व” देंत।

3 मिनु येसुमी “नोफा दाडशशा थमा लोव्र नेनीन, मुर लेंशा, इर रे नक पा मजरमेसाक्व हना, परमप्रभु यावे आ राज्य तने मचाप्व” देंत। १पत्रुस १:२३

4 मिनु निकोदेमसमी “कोलशो मुर दोपा लेंशा जरमेने चाप्वडा डा? मेको लेंशा, आ ममा आ कोव्रज ओव्रशा, जरमेने चाप्वडा डा?” दे हिल्लो पाप्टु।

5 मिनु येसुमी “नोफा दाडशशा थमा लोव्र नेनीन, ब्वाक्कु रे नु परमप्रभु यावे आ सोक्तर रे जरमेशो मुरपुकी ला परमप्रभु यावे आ राज्य ओव्रने चाप्नीम। इजीकीएल ३६:२५-२७; मत्ती ३:११; तीतस ३:५

6 मुर आ रां रे जरमेशो मुरपुकी रागी कली ला गारनीम। परमप्रभु यावे आ सोक्तर रे जरमेशो मुरपुकी चहिं परमप्रभु यावे आ राज्य कली गारनीम। यूहन्ना १:१३; रोमी ८:५-९

7 मुर लेंशा जरमेचा माल्व, दे आं लोव्र नेंशा छक मलाक्कीन।

8 फश ते रे जाक्व, ते लाडवा मतुंडसीब। आ रेयके नेंशा यो ते रे यूवा, ते ते लाडवा, मतुंडसीब। परमप्रभु यावे आ सोक्तर रे जरमेशो मुर मेको खोदेशो बाक्नीम” देंत।

9 मिनु निकोदेमसमी “इन देशो दोपा दुम्ने चाप्वडा डा?” दे हिल्लो पाप्टु।

10 मिनु येसुमी “गे इस्राएली आन कली शेंब दुम्शा यो, एको लोव्र मतुंडक्नीकी?”

11 नोफा दाडशशा थमा लोव्र नेनीन, गो आंड तुडशशो लोव्र पाइनीकी। आंड तशो यो शेनीकी। गे चहिं आंड शेंशो थमा मसुडक्नीनी।

12 गो इन कली रागी डा लोव्र पडानु, गे थमा मसुडक्नीनी। मिनु गो स्वर्ग डा लोव्र पाता हना, गे दोपा थमा सुडक्ने चाप्नीनी?

13 मुर परमप्रभु यावे आ बाक्तीकेम मलम। स्वर्ग रे जाक्शो रागीमी जरमेशो ला परमप्रभु यावे आ बाक्तीकेमी बाक्शो बाक्त।

14 मोसा गोरशो रागीम बाक्मेनु, कांसा के बुस्स सेल्शा, मेको कली क्युक्शा वोदा बाक्त। मोपा रागीम जरमेशो यो क्युक्चा पुंडसीब। गन्ती २१:८-९

15 मारदे क्युक्चा पुंडसीब देशा हना, सुमी मेको कली थमा सुडक्वा, मेको गेना हना यो ब्रोडशा बाक्चा ताडब” देंत।

16 परमप्रभु यावेमी रागी डा मुर आन कली शुश दाक्ताक्व। मोपतीके आ कांडचीक तौ रागीमी सोडक्ताक्व। सु सुमी मेको कली थमा सुडक्नीमी, मेकोपुकी नरक मलाइनीम। तन्न गेना हना यो परमप्रभु यावे नु बाक्चा ताडनीम। रोमी ५:८; रोमी ८:३२; १यूहन्ना ४:९

17 परमप्रभु यावेमी रागी डा मुर आन कली निसाफ पा नरकमी वोडक्चा, दे आ तौ मसोडक्त। तन्न रागी डा मुर आन कली नरक रे प्रोंडचा कली सोडक्ताक्व। लूका १९:१०

18 सुमी परमप्रभु यावे आ तौ कली थमा सुडक्वा, मेको स्वर्गमी निसाफ पचा मपुंडसीब। सुमी चहिं थमा मसुडक्वा, मेको डोंडती रेन निसाफ पा सजाइ तचा पुंडसीब दुम्शो बाक्व। मारदे हना मेकोमी परमप्रभु यावे आ कांडचीक तौमी पाप रे प्रोंडब, दे थमा मसुडशशो बाक्व। यूहन्ना ५:२४

19 मिनु निसाफ दोदेशो बाक्ब देशा हना, छेडछेड माडशशो रागीम जाक्त। मुरपुकीमी छेडछेड क्येडा छिडछिड कली शुश दाक्ताक्व। मारदे हना आन पशो गेय मरिम्शो बाक्त। यूहन्ना १:५, ९-११

20 सुमी मरिम्शो गेय पाडवा, मेकोम छेडछेड कली काड मदाक्व। आ गेय मतांडसेक्ल, दे छेडछेडमी मलाइब। एफिसी ५:१३

21 सुमी चहिं थमा पा रिम्शो गेय पाडवा, मेको छेडछेडमी लाइब। मारदे हना आ रिम्शो गेय परमप्रभु यावे कली टिशो नेल्ल तांडसेक्ल, दे छेडछेडमी लाइब। १यूहन्ना १:६-७

यूहन्नामी येसु आ पबर्म शेंशो

22 मिनु नोले येसु नु आ शेंसीबपुकी यहूदीया रागी लाम्तेक्म। मेकेर आ शेंसीबपुकी नु बाक्शा, ब्वाक्कुमी खुम्शा गुंडतीक गेय पाम्तेक्म। यूहन्ना ४:१-२

23 यूहन्नामी यो सालीम सहर आ नेक्शा एनोन बाक्तीक डा शुश ब्वाक्कु बाक्तीकेमी ब्वाक्कुमी खुम्शा गुंडतीक गेय पशो बाक्त। शुश मुर जाक्शा, ब्वाक्कुम खुम्शा गुंडचा पुंडसाक्म।

24 मेना यूहन्ना जेल्खानम चोक्चा मपुंडसीशो बाक्त। मर्कूस १:१४

25 मिनु यूहन्ना आ शेंसीबपुकीमी “दोपा पाप क्याम्सीबा?” दे यहूदी का नु लोव्र पाम्तेक्म।

26 मिनू यूहन्ना कली गुम्शा “शेंब, मेको यर्दन खोला आइक्ची हांबुम गे नु बाकब, इन तुइक्पाइश्शो परमप्रभु यावे आ तौम ब्वाक्कुमी खुम्शा गुंडतीक गेय पाइब। मिनू मुर नेल्ल मेकेर लाइनीम” दे यूहन्ना कली देंतेक्म। यूहन्ना १:२६-३४

27 मिनू यूहन्नामी “परमप्रभु यावेमी गेशो गेय डा लाक्शा, सुइमी मारेइ गेय पने मचाप्नीम। हिबू ५:४

28 गे आं कली तुइक्नीनी। गो ख्रीस्त मनड। तन्न गो ख्रीस्त आ डोंइती शेंचा कली सोंइसीशो नड, दे आं शेंशो लोत्र तुइक्नीनी। यूहन्ना १:२०,२३,२७

29 ग्युम्लेमी ग्युम्ली कली चाक्शो तशा, आ लोत्र नेंशा, आ वारच ग्येरसीब। मोपतीके गो थमा पा ग्येरसीनुड। मत्ती ९:१५

30 मेको ठेयब दुम्चा माल्ब। गो चहिं आइक्च दुम्चा माल्नुड।

31 मेको स्वर्ग रे जाकब नेल्ल क्येडा ठेयब बाकब। रागी रे दुम्शो चहिं रागी डा मुर बाकब। रागी डा मुर आन पर्बम ला तुइश्शा लोत्र पाइब। स्वर्ग रे जाकशो चहिं नेल्ल आन क्येडा ठेयब बाकब। यूहन्ना ८:२३

32 मिनू आ तशो नु आ नेंशो आ पर्बम लोत्र पाइब। तन्न सुइमी आ देशो लोत्र थमा मसुइक्नीम।

33 सु सुमी आ देशो थमा सुइक्नीम, मेकोपुकीमी ‘परमप्रभु यावेमी डोंइती देशो लोत्र थमा बाकब’ दे तुइश्शा गेय पाइनीम।

34 परमप्रभु यावे आ सोइश्शोमी परमप्रभु यावे आ लोत्र पाइब। मेकोमी परमप्रभु यावे आ सोक्तीमी ब्रीतीके आ लोत्र पाइब। यूहन्ना १:१६

35 आफोमी आ तौ कली दाक्शा, मेको कली नेल्ल क्येडा ठेयब अधिकार गेप्तु। यूहन्ना ५:२०; मत्ती ११:२७

36 सुमी आ तौ आ देशो थमा सुइक्बा, मेको गेना हना यो ब्रोंइशा बाक्चा ताइब। सुम चहिं आ देशो मटीबा, मेको गेना हना यो ब्रोंइशा बाक्चा मतथु, परमप्रभु यावे आ गाइश्शो ताइब” दे यूहन्नामी शेंताक्व।

## 4

येसुमी सामरी आन कली शेंशो

1 फरिसीपुकीमी “प्रभु येसुमी यूहन्ना क्येडा शुश शेंसीब सेल्शा नु ब्वाक्कुमी खुम्शा गुंडतीक गेय पाइब” दे तुइश्शो बाक्तेक्म। मेकोन येसुमी तुइक्ताक्व। यूहन्ना ३:२२-२६

2 मेको गेय येसुमी आंमा मपथु, आ डोंइती डा शेंशो १२ जना शेंसीब आन कली पपाइक्तु।

3 मिनू आ शेंसीबपुकी नु यहूदीया रागी रे पा, गालील रागी गे लाम्तेक्म।

4 मिनू लमानु, सामरीया रागी जाक्दीत्तेक्म।

5 सामरीया रागीमी गाक्शा, सीकार सहर जाक्दीत्तेक्म। सीकार सहर आ नेक्था याकूब आ रू बाक्त। मेको रू आ तौ योसेफ आ थेरशो रू बाक्त। उत्पती ४८:२२; यहोसु २४:३३

6 मेकेर याकूब आ दोशो इनार यो बाक्त। मिनू येसु मेकेर जाक्दीश्शा, दशा, इनार तारी नांइसाक्व। मेना १२ बजे खोदेशो दुम्शो बाक्त।

7 मेना सामरीया डा मीश मुर का ब्वाक्कु दिथ जाक्त। मिनू येसुमी मेको मीश मुर कली “ब्वाक्कु तूचा गेयी” दे पुंडतु।

8 मेना आ शेंसीबपुकी जचा थोत्रक ग्याप्थ सहर लशो बाक्तेक्म।

9 मिनू मीश मुरुमी “गे यहूदी ननी। गो चहिं सामरीया डा नड। मिनू आं गुइ रे दोपा ब्वाक्कु तूचा पुंडनीनी?” दे येसु कली मदा बाक्त। मारेदे हना सामरी डा मुर आन थिशो ब्वाक्कु यहूदीपुकीमी मतूबाक्मा बाक्त। सामरीया डा मुरपुकी आइक्च जात डा मुर नम। लूका ९:५२-५३

10 मिनू येसुमी मेको मीश मुर कली “परमप्रभु यावेमी इ कली मार गेचा दाक्ब, दे तुइक्ताक्वी हना, नु ब्वाक्कु पुंडब, आं कली, सु बाक्नुड, दे तुइक्ताक्वी हना, आं कली ‘ब्वाक्कु गेयी’ दे पुंडती वा। मिनू ब्रोंइचा गेब ब्वाक्कु गेन वा” दे मदा बाक्त। यूहन्ना ७:३८-३९

11 मिनू मीश मुरुमी “प्रभु, एको इनार दुइश्शो बाक्ब। इन के ब्वाक्कु गुंडतीक मबा। ते रे ब्रोंइचा गेब ब्वाक्कु गेनीनी?

12 आइ किंकी पिप याकूब क्येडा गे ठेयब ननी डा? याकूबमी आंइ कली एको इनार गेशो बाक्माक्त। एकेर डा ब्वाक्कु आंमा यो तूडा बाक्त। आ तौपुकी नु आ बी ब्यफपुकीमी यो एको ब्वाक्कु तूडमे बाक्त, दे मतुइक्नीनी?” दंत।

13 मिनू येसुमी “सुमी एको ब्वाक्कु तूबा, मेकोमी लेंशा तूतू दाक्ब। यूहन्ना ६:५८

14 तन्न सुमी आं गेशो ब्वाक्कु तूबा, मेकोमी लेंशा तूतू मदाक्ब। आं गेशो ब्वाक्कु मुर आगामी बुक्शो खोदेशो पा बारशा, गेना हना यो ब्रोंइशा बाक्चा गेब” दंत। यूहन्ना ६:३५; यूहन्ना ७:३८-३९; भजन संग्रह ३६:१०

15 मिनू मीश मुरुमी “प्रभु, मेको ब्वाक्कु गेयीनी। मिनू तूतू मदाक्डल। ब्वाक्कु दिथ पिचा यो ममालडल” दंत।

16 मिनू येसुमी “इ वोइश ब्रेश्शा चाक्को” दंत।

17 मिनू मीश मुरुमी “आं वोइश मबाक्ब” दंत। येसुमी “गे इ के वोइश मबाक्ब, दे थमा लोत्र पाप्तीवी।

18 इ के ५ जना वोइश बाक्तेक्म। मुल गे नु बाक्ब चहिं इ वोइश ममाड। इ लोत्र थमा बाक्ब” दंत।

19 मिनू “प्रभु, गे परमप्रभु यावे आ लोत्र पाइब का बाक्नी बाक्त। मोपतीके आं मारेइ मारेइ तुइक्ताक्नी।

20 आंइ किंकी पिपीमी मेको डांडामी परमप्रभु यावे कली ठेयब सेल्शो बाक्तेक्म। गे यहूदीपुकीमी चहिं ‘यरूसलेम सहरमी परमप्रभु यावे कली ठेयब सेल्चा माल्ब’ दे देंनीनी” दंत। ब्यवस्था १२:५; भजन संग्रह १२२:-

21 मिनू येसुमी मेको मीश मुर कली “इक्का नोले गे इं आफ कली मेको डांडामी नु यरूसलेममी ठेयब मसेल्नीनी। गे आं देशो लोत्र थमा सुतो।

22 गे परमप्रभु यावे कली मतुडक्थु ठेयब सेल्नीनी। गो चहिं परमप्रभु यावे कली तुडशशा ठेयब सेल्नीकी। मारदे हना पाप रे प्रोंडब यहूदी आन दाते रे जाकब। २राजा १७:२९-४१; यसेया २:३

23 मिनु मुल नु नोले थमा पा आं आफ कली ठेयब सेल्बपुकीमी आ सोक्त आ पतीकेमी थमा पा ठेयब सेल्नीमी। आं आफोमी मोदेशो मुर माल्ब।

24 परमप्रभु यावे सोक्त बाकब। मिनु सुम मेको कली ठेयब सेल्नीमी, मेकोपुकीमी आ सोक्त पतीकेमी थमा पा ठेयब सेल्चा माल्नीम” देंत। २कोरिन्थी ३:१७; रोमी १२:१

25 मिनु मीश मुरुमी “मस्सीह जाकब, दे तुडक्नुड। मेको कली ख्रीस्त यो देनीमी। मेको जाक्शा, आंइ कली नेल्ल शेंब” देंत। यूहन्ना १:४१

26 मिनु येसुमी “गे नु लोत्र पाडब, गो मेको नड” देंत।

27 मेना येसु आ शेंसीब जाक्तेकम। मेकोपुकीमी मेको कली सामरीया डा मीश मुर नु लोत्र पशो तशा, छक लाक्तेकम। तन्न सुडमी “मारदे गे मेको नु लोत्र पाडनीनी? मार माल्नीनी?” दे हिल्लो मपाम।

28 मिनु मीश मुरुमी आ गर प्रोंडशा, सहर लत। मिनु सहर जाक्दीशशा, सहर डा मुर आन कली

29 “मुर का कली कोत्रथ पिने। मेकोमी आं पशो नेल्ल तुडशशा गो नु लोत्र पाप्तु। मेको ख्रीस्त बाक्म, कों?” दे मुर आन कली माडक्मी बाक्त।

30 मिनु सहर डा मुर नेल्ल येसु कली कोत्रथ जाक्तेकम।

31 मिनु आ शेंसीबपुकीमी “शेंब, लो जने” देंतेकम।

32 तन्न येसुमी “इन मतुडशशा जचा थोत्रक गो नु बाक्ब” देंत।

33 मिनु शेंसीबपुकीमी “सुडमी जचा थोत्रक चाक्शा, गेमे कों” देंमुतेकम।

34 येसुमी मेको आन कली “आं जचा थोत्रक मार बाक्ब देंशा हना, आं कली सोडक्ब आ दाक्शो पचा नु आ देंशो गेय थुम्चा। मेको आं के जचा थोत्रक बाक्ब। यूहन्ना ६:३८; यूहन्ना १७:४

35 गेपुकीमी ‘४ महिना नोले बाली नाली रुप्ची जाक्ब’ देंनीनी। गो चहिं रू कोत्रडीन, हो हो पा मीशा, रुप्ची जाक्शो बाक्ब। मत्ती ९:३७

36 रुप्चमी गाल्च ताडब। मेकोमी गेना हना यो ब्रोंडशा बाक्चा कली मुर आन कली चाक्ब। मिनु शोक्ब नु रिक्ब नेल्ल कालेम ग्येरसीनीम।

37 मारदे हना ‘का निक्शीमी शोक्नीम, का निक्शीमी रुप्नीम’ देंशो लोत्र थमा बाक्ब, दे तुंडसीब।

38 मिनु गो इन कली इन मशोक्शो रुप्थ सोडक्नन्नी। अर्कोमी शोक्तीक गेय पाम्तेकम। गे चहिं मेको आन शोक्शो रुप्नीनी” देंत।

39 मेको मीश मुरुमी सामरीया डा सीकार सहर डा मुर आन कली “आं पशो गेय नेल्ल माडक्ती” देंशो नेंशा, सामरीया डा मुर शुशेमी “मेकोन परमप्रभु यावे आ सोडशशा ख्रीस्त बाक्त” दे थमा सुदमे बाक्त।

40 मिनु सामरीया डा मुरपुकीमी येसु आ बाक्तीक जाक्शा “गो नु काथा बाक्कीन” दे पुंडतेकम। मोपतीके येसु नाक्त निक्शी सम्म मेको नु बाक्त।

41 मिनु येसु आ शेंतीक लोत्र नेंशा, डोंइती क्येडा शुश मुरपुकीमी थमा सुडक्तेकम।

42 मेकोपुकीमी मीश मुर कली “इ देतीक गो थमा मसुडक्नीकी। तन्न आ शेंशो आंमा नेंतक। रागी डा मुर आन कली पाप रे प्रोंडब एकोन बाक्त, दे रुप्था तुडक्ताक्क” देंतेकम। प्रेरित ८:५-८

येसुमी आल कली सापाडशशा

मत्ती ८:५-१३; लूका ७:१-१०

43 मिनु नाक्त निक्शी बाक्शा, येसु मेकेर रे गालील रागी गे लत। मत्ती ४:१२

44 येसुमी “आंम रागी डा मुरपुकीमी परमप्रभु यावे आ लोत्र पाडब कली काड महिक्नीम” देंत। मत्ती १३:५७

45 मिनु गालील रागी जाक्मेनु, गालील डा मुरपुकीमी मेको कली ब्राम्तेकम। मारदे हना मेकोपुकीमी यो पास्सा नाक्त यरूसलेममी बाक्शा, येसु आ पशो नेल्ल तशो बाक्तेकम। यूहन्ना २:२३

46 मिनु येसु डोंइती ब्वाक्कुरे अडंगुरे शांबु सेल्तीक गालील रागी डा काना सहरमी जाक्शो बाक्त। मिनु कापेरनाउम सहरमी पिप आ गेय पाडब कप्तान का बाक्शो बाक्त। मेको आ तौ रोड पशो बाक्माक्त। यूहन्ना २:१,९

47 मेको कप्तानमी “येसु यहूदीया रे गालील रागीमी जाक्त” दे नेंशा, येसु कली युम्थ जाक्त। मिनु मेकोमी येसु कली “आं तौ बेक्चा चिक्ताक्व, सापतीने” देंत।

48 मिनु येसुमी “गे चिन्ड नु छक लाक्चा डा गेय मताइतीनी हना, आं कली थमा मसुडक्नीनी” देंत। यूहन्ना २:१८; १कोरिन्थी १:२२

49 कप्तानमी “प्रभु, आं तौ मबेक्थु, आं खिं जाक्कीन” दे पुंडतु।

50 मिनु येसुमी “इन खिं लने, मारदे हना इन तौ साशा ब्रोंडब” देंशा सोडक्ताक्व। मिनु येसु आ देंशो थमा सुडशशा, आ खिं लेशशा लत।

51 मिनु लना लन बाक्मेनु, आ गेय पाडबपुकीमी लांमी युम्शा “इन तौ सात” दे शोत्रडमे बाक्त।

52 मिनु “गेना रे आं तौ साचा गोवा?” दे हिल्लो पवानु “सिनाक्त छकाल रे जरो शिक उडक्ताक्व” देंमा बाक्त।

53 मेको आल आ आफोमी “इन तौ साशा ब्रोंडब” दे येसुमी देंमेनु, सामाक्त, दे तुडक्ताक्व। मिनु मेको नु आ खिं डा मुर नेल्लेमी थमा सुदमे बाक्त।

54 येसुमी यहूदीया रे गालील रागी जाक्शा, खेयप निक्शी डा आ पशो छक लाक्चा डा गेय एको बाक्वत। यूहन्ना २:११

## 5

येसुमी खोइल मदुक्व सापाइश्शो

- 1 यरूसलेममी यहूदी आन के चाड का बाक्वत। मिनू येसु यरूसलेम लत। यूहन्ना २:१३
- 2 यरूसलेम सहर कली गारोमी हिरशो बाक्वत। मेको गारोमी लाप्चोपुकी बाक्नीम। मेको गारो डा ठेयब लाप्चो का कली भेडा लाप्चो देनीम। मेको आ नेक्थामी हिब्रू लोत्रमी बेथेस्टा माइश्शो दोम्ली का बाक्वत। मेको दोम्ली बाक्तीकेमी ५ ओटा पाटी खिं बाक्नीम। नेहेम्याह ३:१
- 3 मेको खिं आगामी शुश रोड पाइब, मिक्च मताइब, गुड खोइल मदुक्व, रां सोत्रशो रोड पाइबपुकी बाक्शो बाक्तेकम। मेको मुरपुकी दोम्ली डा ब्वाक्कु गेना हिम्सीब, दे कोत्रचा कली बाक्शो बाक्मा बाक्त।
- 4 मारदे हना परमप्रभु यावे आ स्वर्ग डा गेय पाइबमी यिशा, दोम्ली डा ब्वाक्कु कली हिम्बाक्माक्त। मिनू ब्वाक्कु हिम्सेनु, नेल्ल क्येडा डोंइती दोम्लीम गुम्ब आ रोड साबाक्माक्त।
- 5 मिनू मेकेर ३८ बर्स सम्म रोड पशो मुर का बाक्त।
- 6 मिनू येसुमी मेको कली तशा “मेको मुर शुश बर्स रोड पशो बाक्त” दे तुइश्शा “गे साचा दाक्नेवे?” दे हिल्लो पाप्तु।
- 7 मेको रोड पाइबमी “प्रभु, ब्वाक्कु हिम्सेनु, आं कली दोम्लीमी खुम्ब मुर सुइ मपिदु। मिनू गो हना यो “लड” देंडानु, मुर का आं डोंइती ब्वाक्कुमी गुम्ब” देंत।
- 8 मिनू येसुमी “बोक्को, इ ब्राख्ये कुरशा गाक्को” दे माइक्तु।
- 9 मो देंशानु, मेको मुर आ रोड साशा, छुल बोक्त। मिनू आ ब्राख्ये कुरशा गाक्त। मिनू मेको सापाइश्शो नाक्त चहिं नाइक्तीक नाक्त बाक्त।
- 10 मोपतीके यहूदीपुकीमी साशो मुर कली “मुलाक्त नाइक्तीक नाक्त बाक्वत। इ ब्राख्ये कुरचा मदुम्ब, दे मतुइक्ती?” देंतेक्म। प्रस्थान २०:१०; येरमीया १७:२१-२२
- 11 मिनू मेकोमी “आं कली सापाइक्व मुरुमी ‘इ ब्राख्ये कुरशा गाक्को’ दे माइक्ती” देंत।
- 12 मेकोपुकीमी “इ ब्राख्ये कुरशा गाक्को देंब मुर सु बाक्मे?” दे हिल्लो पाप्तेक्म।
- 13 मिनू मेकोमी “मतुइक्नुड” देंत। मारदे हना दोम्ली बाक्तीकेमी मुरपुकीमी पुम्दमेनु, येसु मेकेर रे गाक्ने थुम्शो बाक्त।
- 14 मिनू नोले येसुमी मेको साशो मुर कली परमप्रभु यावे आ खिंमी गुम्तु। मिनू “गे साते। मेको क्येडा ठेयब रोड मपचा कली गे लेंशा पाप मपावो” दे माइक्तु। यूहन्ना ८:११
- 15 मिनू साशो मुरुमी यहूदी आन कली गुम्थ लशा “आं कली सापाइक्व दा येसु बाक्माक्त” दे माइक्ती बाक्त।
- 16 सापाइक्वी गेय नाइक्तीक नाक्ती पतीक यहूदीपुकीमी येसु कली श्येत गेचा गोप्तेक्म। मत्ती १२:१४
- 17 मिनू येसुमी मेको आन कली “आं आफ मुल सम्म गेय पना पन बाक्वत। गो यो गेय पाइनुड” देंत। यूहन्ना ९:४
- 18 आ लोत्र नेंशा, यहूदीपुकीमी येसु कली साइक्चा माल्तेक्म। मारदे हना नाइक्तीक नाक्ती गेय मपतीके क्याम्चा ला ममाइ “परमप्रभु यावे नु उइक्थ बाक्नुड। परमप्रभु यावे आं आफ बाक्वत” दे देंशोमी, मेकोपुकीमी येसु कली साइक्चा माल्तेक्म। यूहन्ना ७:३०; यूहन्ना १०:३३

येसुमी यहूदी आन कली शेंशो

- 19 मिनू येसुमी यहूदी आन कली “नोफा दाइश्शा नेनीन, आं आफोमी मार पाइबा, आ तौमी मेको मतवा सम्म मारेड पने मचाप्ब। मिनू आफोमी दोदेंशो पाइबा, तौमी मोदेंशोन पाइब। यूहन्ना ३:११, ३२
- 20 मारदे हना आं आफोमी आ तौ कली दाक्वत। मिनू आ पशो गेय नेल्ल आ तौ कली कोंइब। मिनू आं आफोमी मुल सम्म पपाइश्शो गेय क्येडा नोले ठेयब गेय कोंइपाइक्वत। मेको गेय तशा गेपुकी छक लाक्नीनी। ३:३५
- 21 मिनू आं आफोमी बेक्शो आन कली दोपा सेंबा, मोपा आ तौमी यो सु कली बेक्शो रे सेंचा दाक्वा, मेको कली सेंपाइक्वत। दानीएल ७:१३-१४; प्रेरित १०:४२
- 22 आं आफोमी मुर आन कली निसाफ मपाइब। तन्न नेल्ल निसाफ पचा डा गेय आ तौ कली पपाइक्वत।
- 23 मो दुम्मेनु, आं आफ कली मान पाइबपुकीमी आ तौ कली यो आफ कली खोदेंशो पा मान पाइनीम। सुमी तौ कली मान मपाइबा, मेकोमी तौ कली सोइक्व आं आफ कली यो मान मपाइब। फिलिप्पी २:१०-११; १ यूहन्ना २:२३
- 24 नोफा दाइश्शा नेनीन, सुमी आं लोत्र नेंबा नु आं कली सोइक्व आं आफ परमप्रभु यावे कली थमा सुइक्वा, मेको गेना हना यो ब्रोंइशा बाक्चा ताइब। सजाइ मताइब। मारदे हना बेक्शो रे गेना हना यो ब्रोंइशा बाक्चा ताइब। यूहन्ना ३:१६-१८
- 25 नोफा दाइश्शा नेनीन, बेक्शो मुरपुकीमी मुल परमप्रभु यावे आ तौ आ सेंदा नेनीन। सुमी नेंबा, मेको गेना हना यो ब्रोंइशा बाक्चा ताइब। एफिसी २:५-६
- 26 परमप्रभु यावे नु ब्रोंइतीक सोक्त बाक्वत। मिनू आ तौ कली यो मोदेंशो ब्रोंइतीक सोक्ती गेशो बाक्त। यूहन्ना १:१-४
- 27 मिनू आ तौ कली निसाफ पतीक अधिकार गेप्तु। मारदे हना आ तौ रागीमी जरमेसीशो बाक्वत। दानीएल ७:१३-१४
- 28 आं देंशो आ पर्वम छक मलाक्कीन। मारदे हना इक्का नोले तुरसुमी बाक्शो बेक्शो मुर नेल्लेमी रागीमी जरमेशो आ सेंदा नेनीन।
- 29 डोंइती रिम्शो पाइबपुकी गेना हना यो ब्रोंइशा बाक्चा कली सेंसीनीन। मरिम्शो पाइबपुकी चहिं सजाइ तचा कली सेंसीनीन। दानीएल १२:२; मत्ती २५:४६; २कोरिन्थी ५:१०

30 मिनू गो आंम अधिकारी मारेड पने मचाप्नुड। गो दोदेशो नेंनुड, मोदेशो पा निसाफ पाडनुड। आं निसाफ चहिं ठीक बाक्ब। मारेदे हना आं दाक्शो मपथु, आं कली सोडक्ब आ देशो पाडनुड। यूहन्ना ६:३८

येसु सु बाक्म, देशो सांकळी

- 31 गो आं पर्वम लोव्र पाता हना, मेको लोव्र थमा बाक्ब, दे थमा मसुडक्नीनी।
- 32 आं पर्वम अर्कामी लोव्र पाडब, गो मेको तुडक्नुड।
- 33 मेको लोव्र देब चहिं यूहन्ना बाक्ब। गो मेको कली 'गे सु ननी?' दे हिल्लो पथ सोडक्ताक्नी। मिनू यूहन्नामी आं पर्वम थमा पा शेंताक्ब।
- 34 आं पर्वम शेंशो चहिं मुरुमी शेंतीक ममाड। पाप पशो आ पर्वम सजाड रे ब्रोनीन, दे इन कली देंनुड।
- 35 यूहन्ना छेडछेड पा ब्रशो बती खोदेशो बाक्त। गो मेको आ हाम्सोमी ग्येरशा बाक्चा दाक्ताक्नी।
- 36 मिनू यूहन्नामी आ पर्वम शेंशो ठेयब बाक्त हना यो, आं पर्वम मेको क्येडा ठेयब सांकळी का बाक्ब। आं सांकळी मार बाक्ब देशा हना, आं आफोमी आं कली पपाडशो गेय बाक्ब। मेको आं पशो गेयमी 'परमप्रभु यावेमी आं कली सोडक्ताक्ब' दे इन कली शेंब। यूहन्ना ३:२; यूहन्ना १०:२५:३८
- 37 आं कली सोडक्ब आं आफ आं सांकळी बाक्ब। गेपुकीमी आं आफ आ सेंदा गेनायो मनेनी। मेको कली गेनायो मतनी। मती ३:१७
- 38 आं आफ आ लोव्र इन थुंमी मबा। मोपतीके गेपुकीमी आं आफोमी सोडशो कली थमा मसुडक्नीनी।
- 39 गो परमप्रभु यावे आ लोव्र शेंसीन सीन बाक्नीनी। मारेदे हना मो पशोनु, ब्रोंडशा बाक्चा तांडसीब, दे मिम्नीनी। मिनू परमप्रभु यावे आ लोव्रमी आं पर्वम ब्रेक्शो बाक्त। लूका २४:२७,४४; २तिमोथी ३:१५-१७
- 40 गो चहिं ब्रोंडचा तकल, दे आं गो मपीनीनी।
- 41 गो मुर आन ठेयब सेलतीके मब्राडनुड।
- 42 मिनू परमप्रभु यावेमी गेशो दाक्तीके गेपुकी नु मबाक्ब, दे गो तुडक्नुड।
- 43 गो आं आफ आ नेंमी जाक्ती। तन्न गेपुकीमी आं कली मब्रनी। सुड मुर आंम आ नेंमी जाक्त हना, मेको कली चहिं ब्राडनीनी। मती २४:५
- 44 मोपा गो ठेयब सेल्मुडनीनी। तन्न का ला परमप्रभु यावेमी इन कली 'रिम्शो ननी' देंचा मपुंडसीनीनी। आं कली दोपा थमा सुडक्ने चाप्नीनी डा? यूहन्ना १२:४२-४३; १थिस्सलोनिकी २:६
- 45 गो परमप्रभु यावे आ डोंडती इन कली दोस गेनन्दी, दे ममिम्तीन। गो मोसामी ब्रेक्शो लोव्रमी आस पाडनीनी। तन्न मेको मोसा आ ब्रेक्शो लोव्रमी इन कली दोस गेब। ब्यवस्था ३१:२४-२७
- 46 गो मोसा आ लोव्र थमा सुडक्नी हना, आं कली यो थमा सुडक्नी वा। मारेदे हना आं पर्वम ब्रेक्शो बाक्त। उत्पत्ती ३:१५; उत्पत्ती ४९:१०; ब्यवस्था १८:१५
- 47 तन्न गो मोसा आ ब्रेक्शो लोव्र ठीक पा थमा मसुडक्नीनी। मिनू आं लोव्र दोपा थमा सुडक्ने चाप्नीनी डा? दे येसुमी यहूदी आन कली देंत। लूका १६:३१

## 6

शुश मुर आन कली थुल्शो

मती १४:१३-२१; मर्कूस ६:३०-४४; लूका ९:१०-१७

- 1 मिनू नोले येसु गालील डा समुन्द्र आडक्ची हांबु लत। गालील डा समुन्द्र कली तिबेरीयास समुन्द्र यो देंनीम।
- 2 मिनू शुश मुरपुकीमी येसु आ नोले खोडक्तेक्म। मारेदे हना येसुमी छक लाक्चा डा गेय पा, रोड पाडब आन कली सापाडशो तशो बाक्तेक्म।
- 3 मिनू येसु आ शेंसीबपुकी नु आडक्था डांटा गो डोडशशा, तशो बाक्तेक्म।
- 4 मेना यहूदी आन पास्सा चाड जाक्चशो बाक्त। मोपतीके शुश मुर लांम गाक्शो बाक्तीक येसु आ नेक्था जाक्तेक्म। यूहन्ना २:१८; यूहन्ना ११:५५
- 5 येसुमी शुश मुर जाक्शो तशा, फिलीप कली "शोब्ले ग्याप्शा, नेल्ल आन कली दोपा थुल्चा?" दे हिल्लो पाप्तु।
- 6 येसुमी चहिं "आं कली थमा सुडक्बा कों, मसुडक्बा" दे फिलीप आ थुं कोव्रचा कली मोदेशो देंत। येसुमी "गो छक लाक्चा डा गेय पाडनुड" दे तुडक्ताक्ब।
- 7 मिनू फिलीपमी "मेको मुरपुकीमी ड्चकका ला जाप्तेक्म हना, सहे निक्शी देनारमी यो मेको आन कली शोब्ले ग्याप्चा कली मजाक्दीप्ब" देंत। मेना देनार का काबु डा गेय आ गाल्च बाक्त।
- 8 मिनू सिमोन पत्रुस आ लोक्ब अन्दीयासमी येसु कली
- 9 "एकेर वोंडश आल का बाक्ब। मेको नु ५ ओटा क्योव्रज के शोब्ले नु डांङ निक्शी बाक्ब। एको इश डा मुर आन कली ओशोमी मार गाप्बा डा?" देंत।
- 10 मिनू येसुमी "मुर आन कली निप्पतीन" देंत। मेकेर रिम्शो दिंम का बाक्त। मिनू मुरपुकी नेल्ल निस्साक्म। आल नु मीश मुर प्रोंडशा, ५ हजार खोड वोंडश मुर बाक्तेक्म।
- 11 येसुमी मेको शोब्ले ताक्शा "गे रिम्शो पाडब बाक्नीनी" दे परमप्रभु यावे कली ठेयब सेल्शा, मुर आन कली शोब्ले योक्पाडक्तीमी। मोदेशो पा डांङ यो योक्पाडक्तीमी। मिनू मुरपुकीमी दोशो जचा ब्वचा दाक्मा, मोशोन गेपाडक्तीमी।

12 मिनु मुर नेल्लेमी रूथ्री जामे नोले, येसुमी आ शेंसीब आन कली “एर ओंथ दोशो शोब्ले लीशो बाकमे, मेको नेल्ल खुप्तीन” देत।

13 मिनु गुप्शा, १२ डालो प्रिताकम। मेको लीशा गुप्शो शोब्ले डोंइती डा ५ ओटा रे दुमशो बाकतेकम।

14 मिनु मुरपुकीमी येसु आ पशो छक लाक्या डा गेय तशा “रागीमी जाकब परमप्रभु यावे आ लोत्र पाडब एकोन बाकत” देतेकम। ब्यवस्था १८:१५

15 मिनु येसुमी “आं कली ग्याइशशा, पिप सेल्नीमी” दे तुइशशा, आ का ला डांडा डोंइसाकव। यूहन्ना १८:३६

येसु ब्वाककु तार गाकशो

मत्ती १४:२२-२३; मार्कुस ६:४५-५२

16 मिनु नां रिक्चावानु, येसु आ शेंसीबपुकी गालील डा समुन्द्र आ नेकथा जाकशा,

17 डोंगामी डोइशशा, समुन्द्र शोकशा, कापेरनाउम सहर गे लचा गोम्तेकमे। मेना नां रिक्शो बाकत। येसु चहिं लेशशा मजाकशो बाकत।

18 मिनु ठेयब फश गिवार पा समुन्द्र डा ब्वाककु शुश मुइशशा, डोंगा कली हिम्पाइकतु।

19 मिनु येसु आ शेंसीबपुकी डोंगा डोइशशा, २५ कि ३० स्तादीयोन खोदेशो जाकदीमामनु, येसु कली समुन्द्र डा ब्वाककु तार गाकना गाकन आन डोंगा गे पिशो ताम्तेकम। मिनु मेको कली तशा “सु बाकम” दे हिंतेकम। स्तादीयोन का १८५ मिटर खोदेशो बाकव।

20 मिनु येसुमी “गो नड, महिनीन” दे माइक्तीमी।

21 मिनु ग्येरसीशा, येसु कली डोंगामी डोइकपाइक्तेकम। मिनु डोंगामी डोइकपाइशशा, कापेरनाउम जाकदीत्तेकम।

येसु ब्रोंइचा गेब शोब्ले बाकब

22 मिनु आ दीसा नाकत शोब्ले जाइब मुरपुकी मेक उड बाकशो बाकतेकम। सिनाक्ती समुन्द्र आ नेकथा डोंगा का ला बाकत। मिनु येसु आ शेंसीबपुकीमी मेको डोंगा लाइशशा, कापेरनाउम गे लाम्तेकम, दे तुइक्ताकम। येसु चहिं आ शेंसीबपुकी नु डोंगामी मला, दे यो तुइक्ताकम।

23 तिबेरीयास सहर रे डोंगापुकी प्रभुमी परमप्रभु यावे कली “गे रिमशो पाडब बाकनीनी” देशा शोब्ले योक्तीक दिम आ नेकथा जाकतेकम।

24 मिनु मुरपुकीमी येसु नु आ शेंसीबपुकी मेकेर मबाकशो तशा, डोंगा डोइशशा, कापेरनाउम गे लशा, येसु कली माल्तेकम।

25 मिनु मेकेर जाकदीशशा, येसु कली थित्तेकम। मिनु मेकोपुकीमी “शेंब, एकेर गेना जाकनी?” दे हिल्लो पाम्तेकम।

26 येसुमी “नोफा दाइशशा नेनीन, आं छक लाक्या डा गेय आ पर्बम ममाइ, तन्न शोब्ले जशा रूतीके आं कली माल्तीनी।

27 राक्या डा जचा थोत्रक कली श्येत मपने। मराक्या डा जचा थोत्रक कली चहिं गेय पने। मराक्या डा जचा थोत्रक मार बाकमे देशा हना, गेना हना यो ब्रोंइशा बाक्या बाकब। रागीमी जरमेशोमी इन कली मेको जचा थोत्रक गेब। मारदे हना आ आफोमी रागीम जरमेशो कली आ छाप थोक्ताकव” दे येसुमी शेंताकव। यूहन्ना ५:३६

28 मिनु येसु कली “परमप्रभु यावे आ देशो पचा कली मार गेय पचा माल्नीकी?” दे हिल्लो पाम्तेकम।

29 मिनु येसुमी “मेको परमप्रभु यावे आ गेय बाकब। गेपुकी परमप्रभु यावे आ सोइशशो कली थमा सुइक्चा, परमप्रभु यावे आ गेय बाकब” दे माइक्तीमी।

30 मिनु मेकोपुकीमी लेंशा येसु कली “गे परमप्रभु यावे आ तौ ननी, दे कोंइचा कली मार छक लाक्या डा गेय पाइनीनी?

31 आइ किर्की पिपीमी गोरशो रागीमी मन्ना शोब्ले जशो बाकतेकम। ‘मेको आन कली सरीड रे शोब्ले गेम्तीमी’ दे ब्रेकशो बाकत” देतेकम। भजन संग्रह ७८:२४; प्रस्थान १६:१३-१५

32 मिनु येसुमी “नोफा दाइशशा नेनीन, मोसामी इन कली स्वर्ग रे शोब्ले गेशो ममाइ, तन्न आं आफोमी इन कली थमा पा स्वर्ग रे शोब्ले गेब।

33 मारदे हना परमप्रभु यावेमी गेशो शोब्ले स्वर्ग रे यीब। मेकोमी रागी डा मुर आन कली गेना हना यो परमप्रभु यावे नु ब्रोंइचा गेब” दे माइक्तीमी।

34 मिनु मेकोपुकीमी “प्रभु, मेको शोब्ले गेना हना यो गेकी” दे पुंइतेकम।

35 मिनु येसुमी “गेना हना यो परमप्रभु यावे नु ब्रोंइचा गेब शोब्ले गो नड। सु सु आं गे पीनीमी, मेको शोत्रलु मबेक्नीम। मिनु आं कली थमा सुइक्बपुकी गेनायो तूतू मदाक्नीम। यूहन्ना ४:१४; यूहन्ना ७:३७

36 गेपुकीमी चहिं आं कली तशो बाक्तीनी हना यो, थमा मसुइक्नीनी।

37 मिनु आं आफोमी आं कली गेशो मुरपुकी आं गे पीनीम। आं गे पीब आन कली गेनायो मतिल्नुडमी। मत्ती ११:२८

38 मारदे हना गो आं दाकशो गेय पथ ममाइ, तन्न आं कली सोइकब आ दाकशो गेय पचा कली स्वर्ग रे जाकशो नड। यूहन्ना ४:३४

39 मिनु आं कली सोइकब आ दाकशो मार बाकब देशा हना, आं कली गेशो मुर का यो मसाम्चा, नु नोले डा नाक्तीमी मेको आन कली सेंपाइक्चा बाकब। यूहन्ना १०:२८-२९; यूहन्ना १७:१२

40 मिनु सु सुमी परमप्रभु यावे आ तौ, दे आं कली तुइक्नीमी नु थमा सुइक्नीम। मेको आन कली नोले डा नाक्तीमी सेंपाइशशा, गेना हना यो ब्रोंइशा बाक्या गेनुडमी। आं आफ आ दाकशो गेय मेकोन बाकत” दे यहूदी आन कली शेंताकव। यूहन्ना ५:२९; यूहन्ना ११:२४

41 मिनु यहूदीपुकीमी येसु आ लोत्र नेंशा गन गन पाम्तेकम। मारदे हना येसुमी “गो स्वर्ग रे यिशो शोब्ले नड” देशो बाकत।

- 42 मिनू मेकोपुकीमी “मार, एको योसेफ आ तौ येषु ममाड? मेको आ आम आफ कली गो तुइक्नीकी” दैतेक्म। मिनू मेकोमी “ ‘गो स्वर्ग रे जाक्शो नड’ दे दोपा देने चाप्वा डा?” दे गन गन पाम्तेक्म। लूका ४:२२
- 43 मिनू येषुमी मेको आन कली “गन गन मपने।
- 44 आं कली सोइक्व आं आफोमी आं कली गेशो मुर ला आं गे पिने चाप्नीम। अरु चहिं मचाप्नीम। आं कली गेशो मुर आन कली नोले डा नाक्ती सेंनुडमी।
- 45 मिनू परमप्रभु यावे आ लोत्र पाइब आन किताबमी ‘परमप्रभु यावेमी नेल्ल आन कली शेंब’ दे ब्रेक्शो बाक्त। तेकोमी आं आफ आ लोत्र नेंशा शेंसीबा, मेको आं गे पीब। यसैया ५४:१३
- 46 सुइमी आं आफ कली मतामे। परमप्रभु यावे रे यीबमी ला आफ कली तशो बाक्त। यूहन्ना १:१८
- 47 मिनू नोफा दाइशशा नेनीन, सुमी थमा सुइक्वा, मेको गेना हना यो ब्रोंइशा बाक्चा ताइब। यूहन्ना ३:१६
- 48 मिनू गो ब्रोंइचा गेब शोब्ले नड। यूहन्ना ६:३५
- 49 इन किकी पिपीमी गोरशो रागीमी मन्ना शोब्ले जचा ताम्तेक्म हना यो, बेक्तेक्म। १कोरिन्थी १०:३-५
- 50 तन्न मुरपुकीमी स्वर्ग रे यिशो शोब्ले कली जाम्तेक्म हना, मबेक्थु ब्रोंइशा बाक्नीम।
- 51 गो स्वर्ग रे यिशो ब्रोंइतीक शोब्ले नड। सुमी मेको शोब्ले जाइबा, मेको गेना हना यो परमप्रभु यावे नु बाक्शा ब्रोंइब। मिनू रागी डा मुर आन कली ब्रोंइपाइक्चा, दे मार शोब्ले गेनुड देशा हना, आं गेशो शोब्ले आं रां बाक्ब” दे शेंताक्व। मर्कूस १४:२२
- 52 मिनू यहूदीपुकीमी “एको मुरुमी आंइ कली दोपा आ रां ब्वचा गेने चाप्वा?” दे लोत्र पा जिम्तेक्म।
- 53 मिनू येषुमी “नोफा दाइशशा नेनीन, गे रागीमी जरमेशो आं रां मब्वाइतीनी हना, नु आं हुश मत्तीनी हना, गेना हना यो परमप्रभु नु ब्रोंइशा बाक्चा गेब सोक्त गे नु मबाक्ब।
- 54 सु सुमी आं रां ब्वाइनीमी नु आं हुश तूनीमी, मेको गेना हना यो ब्रोंइशा बाक्चा ताइनीम। मारदे हना गो मेको कली नोले डा नाक्ती सेंपाइक्नुडमी। मती २६:२६-२८
- 55 आं रां थमा जचा थोत्रक बाक्ब। आं हुश यो थम तूचा थोत्रक बाक्ब।
- 56 सुमी आं रां ब्वाइबा नु आं हुश तूबा, मेको आं आगाम बाक्ब। मिनू गो मेको आ आगाम बाक्नुड। यूहन्ना १५:४; १यूहन्ना ३:२४
- 57 दोपा ब्रोंइशा बाक्ब आं आफोमी आं कली सोइशशा ब्रोंइपाइय्ती, मोपा आं रां ब्वाइब यो गो रे पा ब्रोंइचा ताइब।
- 58 मेको स्वर्ग रे यिशो शोब्ले बाक्ब। इन किकी पिपीमी शोब्ले जशा बेक्तेक्म। गो मेको खोदेशो शोब्ले मगेनुड। सुमी चहिं आं शोब्ले जाइबा, मेको गेना हना यो ब्रोंइशा बाक्ब” दैत।
- 59 मेको लोत्र येषुमी कापेरनाउम सहर डा गुम्तीक खिमी यहूदी आन कली शेंताक्व।

गेना हना यो ब्रोंइचा गेब लोत्र

- 60 मिनू मेको लोत्र नेंशा, येषु आ शेंसीबपुकी शुशेमी “एको आं शेंशो कका पा कशो लोत्र बाक्त। सु नेने चाप्वा डा?” दैमुम्तेक्म।
- 61 येषुमी चहिं “आं शेंसीबपुकीमी आं लोत्र आ पर्वम गन गन पाम्तेक्म” दे तुइशशा, मेको आन कली “मार, आं पशो लोत्र नेंशा, चुरशा आं कली प्रोंइनीनी?
- 62 मिनू रागीमी जरमेशो आ डोंइती डा बाक्तीकेमी लेशशो ताइतीनी हना, मार मिम्नीनी? लूका २४:५०-५१
- 63 परमप्रभु यावे आ सोक्त ब्रोंइचा गेब बाक्ब। मुरुम चहिं मारेड पने मचाप्नीम। आं देशो लोत्र परमप्रभु यावे आ सोक्ती डा ब्रोंइचा गेब लोत्र बाक्ब।
- 64 तन्न गे का निक्शी आं कली थमा मसुइक्व बाक्नीनी” दैत। मारदे हना येषुमी डोंइती रे आ कली थमा मसुइक्व सु सु नमी, दे तुइशशो बाक्त। मिनू येषु आ शेंसीब का येषु कली साइक्व आन कली वारच पाइब दुम्ब, दे यो तुइशशो बाक्त।
- 65 मिनू येषुमी “आं आफोमी आं कली गेशो मुर ला आं गे पिने चाप्नीम, दे डोंइती रे माइक्तन्नी” दैत।
- 66 मिनू मोदेशो शेंशो आ पर्वम शुशेमी येषु आ नोले खोइक्चा प्रोंइतेक्म।
- 67 मिनू येषुमी आ १२ जना शेंसीब आन कली “गेपुकी यो लाइनीनी?” दे हिल्लो पाम्तीमी।
- 68 मिनू सिमोन पत्रुसमी “प्रभु, गो सु का आ नोले खोइक्नीकी? गे गेना हना यो ब्रोंइशा बाक्चा डा लोत्र पाइनीनी।
- 69 गे परमप्रभु यावेमी योत्रशा सोइशशो ननी, दे तुइशशा थमा सुइक्नीकी” दैत। मती १६:१६
- 70 मिनू येषुमी “गो गे १२ जना इन कली योत्रतन्नी। तन्न इन दातेमी सैतान का बाक्ब” दैत।
- 71 येषुमी मेको लोत्र इस्कारीयोत डा सिमोन आ तौ यहूदा आ पर्वम देशो बाक्त। मारदे हना यहूदा मेको १२ जना आन दाते डा का दुम्शा यो येषु कली साइक्व आन कली वारच पाइब दुम्त।

## 7

बाली ओइतीक चाडम लशो

- 1 मिनू नोले येषु गालील रागीमी हिरना हिरन बाक्त। मारदे हना यहूदीपुकीमी येषु कली साइक्चा माल्तीके यहूदीया रागीमी लचा मदाक्शो बाक्माक्त। यूहन्ना ४:४३
- 2 मिनू यहूदी आन बाली ओइतीक चाड जाक्चशो बाक्त। लेवी २३:३४-३६

- 3 मिनु आ लोकबपुकीमी येसु कली “इ शेंसीब आन कली इ गेय कोंडचा कली यहूदीया रागी लावो। यूहन्ना २:१२; मत्ती १२:४६; प्रेरित १:१४
- 4 मुरपुकीमी इ कली तुडक्पाइसीचा दाकनेवे हना, खुडशशा गेय मपावो। इ पशो गेय मुर आन कली कोंडदीमी” दैतेकम।
- 5 मारदे हना आ लोकबपुकीमी यो येसु कली थमा मसुडक्बाक्तेकम।
- 6 मिनु येसुमी आ लोकब आन कली “मुल सम्म आं लची मजा। गेपुकी लने चाप्नीनी। यूहन्ना २:४
- 7 रागी डा मुरपुकीमी इन कली श्येत मगेनीम। आं कली चहिं श्येत गेनीम। मारदे हना गो मेको आन कली ‘आन पशो गेय मरिम्शो बाक्ब’ दे कोंडनुडमी। यूहन्ना १५:१८
- 8 गे लने, गो मुल मलाडनुड। मुल आं लची मजा” दे माइक्तीमी।
- 9 मो देंशा येसु गालील रागीमी बाक्त।
- 10 मिनु येसु आ लोकबपुकी चाड मानेथ लाम्तेकम। मिनु नोले येसु यो मुर आन मतचा डा पा यरूसलेम लत। यूहन्ना २:१३
- 11 मिनु चाडमी यहूदीपुकीमी येसु कली माल्शा “मेको ते बाक्मे” दे हिल्लो पाम्तेकम।
- 12 मिनु मुरपुकीमी येसु आ परबंम शुश खुडशशा लोत्र पमुम्तेकम। का निक्शीमी “रिम्शो मुर बाक्ब” दैतेकम। का निक्शीमी चहिं “ममाड, मुर आन कली हेथे गाक्पाइक्ब बाक्ब” दैतेकम।
- 13 नेल्लेमी यहूदी आन क्येडा हिंशा, खुडशशा लोत्र पाम्तेकम। यूहन्ना ९:२२; यूहन्ना १२:४२; यूहन्ना १९:३८

येसु चाडम बाक्शो

- 14 मिनु बाली ओंइतीक चाड डा नाक्त का येसुमी परमप्रभु यावे आ खिंमी लशा, मुर आन कली शेंताक्ब।
- 15 मिनु यहूदीपुकीमी छक लाक्शा “मेको गेनायो मशेंसीशो मुरुम यो दोपा इश डा जोक्मा?” देमुम्तेकम। मत्ती १३:५६
- 16 मिनु येसुमी मेको आन कली “आं शेंतीक आं के ममाड, तन्न आं कली सोडक्ब के बाक्ब।
- 17 सु मुरुमी परमप्रभु यावे आ दाक्शो पाइबा, मेकोमी आं शेंतीके लोत्र परमप्रभु यावे के बाक्बा कों, आंम के बाक्बा, दे तुडक्ब।
- 18 सुम चहिं आंम लोत्र शेंबा, मेकोमी आंम कली ठेयब सेल्चा दाक्ब। आं कली सोडक्ब परमप्रभु यावे कली ठेयब सेल्चा दाक्ब चहिं थमा पा काड पाप मपाइब बाक्ब। यूहन्ना ५:४१,४५
- 19 मोसामी इन कली परमप्रभु यावे आ अरेशो लोत्र गेशो बाक्त। मिनु गेपुकी मारदे मेको मपाइनीनी? मारदे आं कली साइक्चा माल्नीनी?” दैत। रोमी २:१७-२४; यूहन्ना ५:१६-१८
- 20 मिनु मुरपुकीमी “सुमी इन कली साइक्चा माल्बा? वोल्मी इन कली सुम्शो बाक्तीके ‘गे आं कली साइक्चा माल्तीनी’ दे दैनीनी” दैतेकम। यूहन्ना १०:२०
- 21 येसुमी “गो गेय का पाता। गे मेको तशा, छक लाक्तीनी। यूहन्ना ५:१६
- 22 मोसामी इन कली ‘खोइक्तीक चिनु खोइक्चा माल्ब’ दे अरेशो लोत्र गेशो बाक्त। मेको मोसा आ अरेशो ममाड, इं किकी पिपी आन अरेशो बाक्त। मिनु गेपुकीमी नाइक्तीक नाक्त खोइक्तीक चिनु खोइक्तीनी। उत्पत्ती १७:१०-१२; लेवी १२:३
- 23 मोसा आ गेशो अरेशो लोत्र टिचा कली नाइक्तीक नाक्त यो खोइक्तीक चिनु खोइक्तीनी। गो चहिं मुर का आ रां नेल्ल सापदनु, गेपुकी मारदे गाइक्तीनी?
- 24 कुल कोत्रशा, निसाफ मपने। तन्न कुल मकोत्रथु निसाफ पने” दे माइक्तीमी।
- 25 मिनु यरूसलेम डा मुर का निक्शीमी “मुरुमी मेको कली साइक्चा माल्शो ममाड?
- 26 मिनु एंकेर बाक्शा, मुर नेल्ल आन कली शेंब। मेको कली मारेड मदेनीमी। मिनु ठेयब मुरपुकीमी ‘एको खीस्त बाक्त’ दे थमा पा तुडक्ताक्मे?
- 27 गोपुकीमी चहिं मेको मुर ते रे जाक्मे, दे तुडक्तीकी। तन्न खीस्त जाक्त हना, ते रे जाक्बा, दे सुडमी मतुडक्तीमी” दे देमुम्तेकम। हिब्रू ७:३
- 28 मोपतीके येसुमी परमप्रभु यावे आ खिंमी मुर आन कली ठेयब सेंदा पा “गेपुकीमी आं कली तुडक्तीनी। मिनु गो ते डा नड, मेको यो तुडक्तीनी? आंमा मिम्शा मजाक्ड। तन्न आं कली सोडक्ब थमा पा परमप्रभु यावे बाक्ब। मिनु गेपुकीमी मेको कली मतुडक्तीनी।
- 29 गो चहिं मेको कली तुडक्नुड। मारदे हना गो मेको आ बाक्तीक रे जाक्शो नड। मेकोम आं कली सोइक्ताक्की” दे शेंताक्की। मत्ती ११:२७
- 30 मिनु यहूदीपुकीमी येसु कली ग्याइक्चा माल्तेकम। तन्न सुडमी मग्गाइक्तेम। मारदे हना येसु कली ग्याइक्ची ना मजाक्शो बाक्त। यूहन्ना ८:२०; लूका २३:५२
- 31 मिनु शुश मुरपुकीमी मेको कली थमा सुइक्तेकम। मेकोपुकीमी “खीस्त अर्को बाक्त हना, मेकोमी एको क्येडा शुश छक लाक्चा डा गेय पने चाप्बा डा?” दैतेकम।
- 32 मिनु फरिसीपुकीमी मुर आन पशो लोत्र नेशा, ठेयब चढेब नु फरिसीपुकीमी “येसु कली ग्याइक्चा” दे पिप आ गेय पाइब ठेयब मुर आन कली सोइक्ताक्म।
- 33 मिनु येसुमी “गो गेपुकी नु इच्छा नाक्ती सम्म बाक्नुड। मिनु नोले आं कली सोइक्ब आ बाक्तीकेमी लाडनुड। यूहन्ना १३:३३



34 मेना गेपुकीमी आं कली माल्नीनी, तन्न मथिल्लीनी। गे आं बाक्तीकेमी जाक्ने मचाप्नीनी” दे माइक्तीमी। यूहन्ना ८:२१

35 मिनू यहूदीपुकीमी “एको ते लचा चिक्शो बाक्मे? मिनू गोपुकीमी एको कली मथिल्लीकी? ग्रीस डा मुर आन बाक्तीक लशा, मेकेर ब्रशा बाक्शो यहूदी आन कली ममाइ, तन्न ग्रीस डा मुर आन कली शेंचा दाक्वा, कों?

36 आ देशो ‘गेपुकीमी आं कली माल्नीनी, तन्न मथिल्लीनी’ मिनू ‘आं बाक्तीकेमी जाक्ने मचाप्नीनी’ दे एको दोदेशो लोत्र पचा?” देमूत्तकम।

यहूदीपुकी येसु आ पर्वम ब्राशो

37 मिनू बाली ओइतीक चाड नुप्ची नाक्त नेल्ल क्येडा ठेयब नाक्ती बाक्त। मेना येसुमी मुर आन कली “सु सुमी तूतू दाक्नीमी, मेको आं गे पिशा तूडमेक्ल। लेवी २३:३६; यूहन्ना ४:१०; यसैया ५५:१; प्रकाश २२:१७

38 सु सुमी आं कली थमा सुइक्नीमी, मेको आन रां रे ब्रॉइचा गेब ब्वाक्कु बुक्ब, दे परमप्रभु यावे आ लोत्रमी ब्रेक्शो बाक्ब” दे शेंताक्मी। यसैया ५८:११; येरमीया ३१:१२

39 मेको आ शेंशो दोदेशो रूसीब देशा हना, येसुमी परमप्रभु यावे आ सोक्त आ पर्वम शेंशो बाक्त। येसु कली थमा सुइक्बपुकीमी मेको सोक्त कली तचशो बाक्तेक्म। तन्न मेना सम्म परमप्रभु यावे आ सोक्त थमा सुइक्ब आन कली मगेशो बाक्त। मारदे हना येसु आ आफ आ छेडछेडम लाइक्चा मपुंडसीशो बाक्त। यूहन्ना १६:१७

40 मिनू येसु आ शेंशो नेंशा, मुर का निक्शीमी “एकोन थमा परमप्रभु यावे आ लोत्र पाइब बाक्ब” देतेक्म। यूहन्ना ६:१४

41 का निक्शीमी “एकोन ख्रीस्त बाक्त” देतेक्म। का निक्शीमी “ख्रीस्त गालील रागी रे जाक्बा डा? यूहन्ना १:४६

42 परमप्रभु यावे आ लोत्रमी ‘ख्रीस्त दाऊद आ खिं डा मुर रे नु दाऊद आ गाउं बेथलेहेम रे जाक्ब’ मदेम डा?” देतेक्म। मती २२:४२; मीका ५:१; मती २:५-६

43 मोदुन्तीके मुरपुकी येसु आ पर्वम ब्रातेक्म। यूहन्ना ९:१६

44 मिनू का निक्शीमी येसु कली ग्याइक्चा माल्तेक्म। तन्न सुइमी मेको कली मग्याइक्तेम।

45 मिनू मेको पिप आ गेय पाइब ठेयब मुरपुकी ठेयब चढेब नु फरिसी आन बाक्तीक लेम्मा बाक्त। मिनू मेको आन कली “मारदे मेको कली मचाक्नी?” दे हिल्लो पामेनु,

46 “मेको मुरुम शेंशो खोदेशो पा सुइमी गेनायो मशेंदेम” देमा बाक्त। मती ७:२८-२९

47 मिनू फरिसीपुकीमी “इन कली यो हेंथे खोइक्पदा?

48 ठेयब मुरपुकी नु फरिसीपुकीमी यो मेको कली थमा सुदमे?

49 तन्न परमप्रभु यावे आ अरेशो लोत्र मजोक्बपुकी सराप रशो बाक्नीम” दे हुइक्तेम बाक्त।

50 मिनू डोंइती येसु आ बाक्तीक जाक्शो फरिसी आन हुल डा निकोदेमस माइइशो मुरुमी यूहन्ना ३:१-२

51 “आंइ ऐन कानुनमी मुर आ पशो नेंशा ला निसाफ पाइनीम, ममाइ?” देंत। ब्यक्स्था १:१६

52 मेकोपुकीमी “गे यो गालील रागी डा नवे? परमप्रभु यावे आ लोत्र ब्रेक्शो किताब पढेशा कोत्रडो। गालील रे सुइ परमप्रभु यावे आ लोत्र पाइब मगूब, दे मतुइक्नेवे?” देमा बाक्त।

53 मिनू नेल्ल छुल छाल बोक्शा, खिं लमा बाक्त।

## 8

फरिसीपुकीमी येसु आ थुं थाम्शो

1 मिनू मेको नेल्ल खिं लमानु, येसु चहिं जैतून डांडा डोंइसाक्व।

2 आ दीसा सुनी कना यिशा, परमप्रभु यावे आ खिं लत। मिनू मुर नेल्ल येसु आ नेक्था जाक्तेक्म। मिनू येसुमी निश्शा, मुर आन कली शेंताक्मी।

3 मिनू सास्त्री नु फरिसीपुकीमी येसु आ बाक्तीकेमी मीश मुर का चाक्तेक्म। मेको मीश मुर ग्युबे पशा यो अरु वोंइश नु इप्शो बाक्माक्त। मेको कली मुर आन दातेमी राप्पाइक्तेक्म। सास्त्री यहूदी आन कली परमप्रभु यावे आ अरेशो लोत्र शेंब बाक्शो बाक्तेक्म।

4 मिनू येसु कली “शेंब, एको मीश मुर ग्युबे पशो बाक्त हना यो, अरु आ वोंइश नु इप्शा बाक्शो थित्वा पुंडसाक्व

5 मिनू परमप्रभु यावे आ अरेशो लोत्रमी मोसामी ‘मोदेशो पाइब कली फुल्लु आप्शा साइक्चा’ दे आंइ कली अरेशो बाक्त। गे मार देंनीनी?” दे हिल्लो पाम्तेक्म। लेवी २०:१०

6 मेकोपुकीमी येसु आ थुं थाम्शा, दोस गेचा कली मो देंतेक्म। मिनू येसुमी बाप्शा, फुरक शाक्शा ब्रेक्ताक्व।

7 मेकोपुकीमी “एको मीश मुर कली मार पचा?” दे हिल्लो पना पन बाक्तेक्म। येसुमी चहिं राप्शा, मेको आन कली “गेनायो पाप मपाइबमी डोंइती फुल्लु आबल” देंत। रोमी २:१

8 मिनू लेंशा बाप्शा, फुरक शाक्शा ब्रेक्ताक्व।

9 मिनू येसु आ लोत्र नेंशा, दोस गेब मुर जोक्ब तुइक्ब खाल्पा रे का का पा नेल्ल लाम्तेक्म। मिनू येसु नु मेको मीश मुर ला लीताक्स।

10 येसुमी नेल्ल लशो तशा, मीश मुर कली “इ कली चाक्बपुकी ते लमा? इ कली साइक्ब सुइ मलीमा?” दे हिल्लो पवानु

11 “प्रभु, सुइ मलीम” देंत। मिनू येसुमी “गो यो इ कली मसाइक्नुड। लावो, मिनू लेंशा पाप मपावो” देशा सोइक्ताक्व। यूहन्ना ५:१४

येसु रागी डा छेडछेड

12 मिनु येसुमी लेशा फरिसी आन कली “गो रागी कली छेडछेड नड। आं नोले खोडकवपुकी गेनायो छिडछिडमी मगाक्नीम। ब्रॉइतीक छेडछेड ताइनीम” दैत। यूहन्ना १:५,९; यसेया ४९:६; यसेया ६०:२०; मत्ती ५:१४-१६

13 मिनु फरिसीपुकीमी येसु कली “गे इ पर्वम आंमा लोत्र पाइनेवे। मोपतीके इ लोत्र थमा ममाइ” दैतेकम।

14 मिनु येसुमी मेको आन कली “गो आं पर्वम आंमा लोत्र पाता हना यो, आं लोत्र थमा बाकब। मारदे हना ते रे जाकडा, ते लाइनुडा, मेको तुडक्नुड। गेपुकी चहिं गो ते रे जाकडा, ते लाइनुडा मतुडक्नीनी। यूहन्ना ५:३१; यूहन्ना ७:२८

15 मिनु गेपुकी मुर आन कुल कोल्रशा निसाफ पाइनीनी। गो चहिं सुइ आन कली निसाफ मपाइनुड। यूहन्ना ३:१७

16 गो निसाफ पाता हना यो, आं निसाफ ठीक बाकब। मारदे हना गो का ला दुम्शा निसाफ मपाइनुड। गो नु आं कली सोडकब आं आफोमी निसाफ पाइब।

17 इन ऐन कानुनमी यो ‘मुर निक्शी आस देशो नेशो लोत्र थमा तुम्ब’ दे ब्रेकसीशो बाकब। ब्यवस्था १९:१५

18 गो आं पर्वम लोत्र पाइनुड। मिनु आं कली सोडकब आं आफोमी आं पर्वम लोत्र पाइब” दे माइक्तीमी।

19 मिनु मेकोपुकीमी येसु कली “इ आफ ते बाकबा?” दे हिल्लो पाम्तेकम। येसुमी “गेपुकीमी आं कली मतुडक्नीनी। आं आफ कली यो मतुडक्नीनी। आं कली तुडक्तीनी हना, आं आफ कली यो तुडक्तीनी वा” दे माइक्तीमी। यूहन्ना १४:७

20 येसुमी परमप्रभु यावे आ खिं डा शोप वोइक्तीक कोठा आ डोंइती बाकशा, मोदेशो शेशो बाकत। परमप्रभु यावे आ खिंमी बाकशा शेशा यो, सुइमी मग्याइक्तेम। मारदे हना मेको कली ग्याइक्ची ना मजाकशो बाकत। यूहन्ना ७:३०

आ आफोमी येसु कली सोइशो

21 मिनु येसुमी लेशा यहूदी आन कली “गो लाइनुड, गे चहिं आं कली माल्नीनी। मिनु मरिम्शो पतीकेमी गुम्शा बेक्नीनी। गे आं लतीकेमी जाक्ने मचाप्नीनी” दैत। यूहन्ना ७:३४-३५; यूहन्ना १३:३३

22 मिनु यहूदीपुकीमी “एकोमी आंम कली सांडसीबा, कों? मारदे ‘आं लतीकेमी जाक्ने मचाप्नीनी’ दैबा” दैमुम्तेकम।

23 मिनु येसुमी मेको आन कली “गेपुकी उइ डा ननी। गो चहिं इर डा नड। गेपुकी रागी डा ननी। गो चहिं रागी डा मनड। यूहन्ना ३:३१

24 मोपतीके गो इन कली ‘गे इन मरिम्शो पतीकेमी गुम्शा बेक्नीनी’ दैती। गेपुकीमी ‘गो मरिम्शो गेय रे प्रोंइब ननी’ दे आं कली थमा मसुइक्तीनी हना, इन मरिम्शो पतीकेमी गुम्शा बेक्नीनी” दैत। यसेया ४३:१०

25 मिनु यहूदीपुकीमी “गे सु नवे” दे हिल्लो पाम्तेकम। येसुमी मेको आन कली “गो इन कली डोंइती रे मार दैडा? मारदे गो गेपुकी नु लोत्र पडा?

26 गो इन पर्वम शुश लोत्र पचा नु शुश निसाफ पचा माल्नुड। आं कली सोडकब आं आफ आ लोत्र थमा लोत्र बाकब। मेको आ लोत्र नेशा, रागी डा मुर आन कली शेंनुड” दैत।

27 मिनु येसुमी आ आफ आ पर्वम लोत्र पाप्तु, दे मेकोपुकीमी मरुबेम।

28 येसुमी “गेपुकी रागीमी जरमेशो कली क्युक्नीनु, गो सु नडा, दे तुडक्नीनी। मिनु गो आंमा मिम्शो मारेइ मपाइनुड। तन्न आं आफोमी आं कली दोदेशो शेंदा, मोदेशो लोत्र इन कली शेंनुड। यूहन्ना ३:१४; यूहन्ना १२:३२

29 मिनु आं कली सोइकब गो नु बाकब। आं कली गेनायो मप्रोंइब। मारदे हना गो आ दाकशो गेय ला पाइनुड” दे मुर आन कली दैत।

थमा पा प्रोंइशो मुर

30 एको लोत्र नेशा, शुश मुरुमी येसु कली थमा सुइक्तेकम।

31 मिनु येसुमी आ कली थमा सुइकब यहूदी आन कली “गेपुकी आं देशो पना पन बाक्तीनी हना, थमा पा आं शेंसीब ननी। यूहन्ना १५:७

32 थमा माइशो सु बाक्मे, दे तुडक्नीनी। मिनु थमा माइशोमी इन कली प्रोंइब” दे येसुमी दैत।

33 मेकोपुकीमी “गो अब्राहाम आ चच युइ नकी। मुल सम्म गो सुइ आन वाइलीम वाइल मडुम्शो बाकतक। मारदे ‘थमा माइशोमी इन कली प्रोंइब’ दैनीनी?” दे हिल्लो पाम्तेकम। मत्ती ३:९

34 येसुमी “नोफा दाइशशा नेनीन, सु सुमी पाप पाइनीमी, मेको पाप आ वाइलीम वाइल बाक्नीम।

35 वाइलीम वाइल खिं डा मुर मबाक्नीम, तौ चहिं खिं डा मुर बाकब।

36 मिनु तौमी इन कली प्रोंइतु हना, गेपुकी थमा पा प्रोंइसीशो मुर दुम्नीनी” दैत। रोमी ६:१६,१८,२२

अब्राहाम आ आल नु सैतान आ आल

37 मिनु येसुमी “गेपुकी अब्राहाम आ चच युइ ननी, दे गो तुडक्नुड। मोपा यो गे आं कली साइक्वा माल्नीनी। मारदे हना आं लोत्र नेशा यो, थमा मसुइक्नीनी।

38 गो आं आफ आ पशो तशा, शेंनुड। गेपुकीमी चहिं इन आफ आ देशो नेशा, मार मार पाइनीनी” दे माइक्तीमी।

39 मेकोपुकीमी “गो आंइ आफ अब्राहाम बाकब” दैमानु, येसुमी “गेपुकी अब्राहाम आ चच युइ ननी हना, अब्राहाम आ पशो गेय खोदेशो पनी वा।

40 गो परमप्रभु यावेमी देशो नेशा, इन कली शेंथ जाकशो बाक्ती हना यो, गेपुकीम आं कली साइक्वा माल्नीनी। अब्राहाममी इन खोदेशो गेय गेनायो मपव।

41 गेपुकीमी चहिं इन आफ आ पशो गेय खोदेशो पाइनीनी” दे माइक्तीमी। मेकोपुकीमी “गेपुकी मुर आन तौ मनकी। गेपुकी आंइ के आफ का बाकब। मेको चहिं परमप्रभु यावे बाकब” दैतेकम।

- 42 मिनू येसुमी “परमप्रभु यावे इन आफ बाक्त हना, गेपुकी आं कली दाकतीनी वा। मारदे हना गो परमप्रभु यावे रे रागीमी जाकती। गो आंमा जाकशो मनड। तन्न आं आफोमी सोडक्ताक्यी।
- 43 आं देशो लोत्र मारदे मरुप्नीनी? गे आं लोत्र नेशा, फालने मचाप्नीनी। १कोरिन्थी २:१४
- 44 इन आफ सैतान बाक्व। मिनू गे इन आफ आ दाकशो पचा दाकनीनी। मेको चहिं डोंइती रे मुर आन कली साडक्व नु जोल पाडब बाक्त। मारदे हना मेको नु थमा देशो बाकसीन मबा। मोपतीके जोल ला पाडब। मेको जोल पना पन बाक्व। जोल आ आफ बाक्त। १यूहन्ना ३८-१०; उत्पत्ती ३:४,१९
- 45 गे आं कली थमा मसुइक्नीनी। मारदे हना गो थमा लोत्र पाडनुड।
- 46 गेपुकीमी आं कली “गे मरिम्शो पाडब नवे” दे दोसी सेलने चाप्नीनी डा? गो थमा लोत्र पाता हना, मारदे आं कली थमा मसुइक्नीनी? २कोरिन्थी ५:२१; १पयुस २:२२; १यूहन्ना ३:५; हिब्रू ४:१५
- 47 सु चहिं परमप्रभु यावे रे जाक्वा, मेको परमप्रभु यावे आ लोत्र नैब। गेपुकी परमप्रभु यावे रे मजाक्नी। मोपतीके परमप्रभु यावे आ लोत्र नैने मचाप्नीनी” दे माडक्तीमी। यूहन्ना १८:३७
- 48 मिनू यहूदीपुकीमी “गे सामरीया डा बाक्ते। गे वोलमी सुम्शो बाक्ते, दे थमा लोत्र मपका डा?” दैतेक्म। यूहन्ना ७:२०
- 49 येसुमी “आं कली वोलमी मसुम्प्यी। गो आं आफ कली मान पाडनुड। गे चहिं आं कली मान मपथु आडक्च सेल्नीनी। 50 गो आंम कली ठेयब मसेल्सीनुड। आं कली ठेयब सेल्ब का बाक्व। मेको ठीक निसाफ पाडब यो बाक्व” दैत।
- 51 मिनू येसुमी “नोफा दाइशशा नेनीन, सुमी आं देशो लोत्र टीबा, मेको गेनायो मबेक्व” दैत। यूहन्ना ६:४०,४७
- 52 मिनू यहूदीपुकीमी “गे वोलमी सुम्शो बाक्ते, दे गो मुल तुडक्ताक्क। अब्राहाम नु परमप्रभु यावे आ लोत्र पाडबपुकी बेक्तेक्म। गे चहिं “सुमी आं देशो टीबा, मेको गेनायो मबेक्व” दैते।
- 53 आंइ किकी पिपी अब्राहाम बेक्माक्त। गे मेको क्येडा ठेयब नवे? मिनू परमप्रभु यावे आ लोत्र पाडब यो बेक्मा बाक्त। गे सु नवे डा?” दैतेक्म।
- 54 येसुमी “गो ठेयब सेल्साक्यी हना, गो ठेयब मटुम्नुड। आं आफोमी चहिं आं कली ठेयब सेल्ब। गे आं आफ कली ‘आंइ परमप्रभु यावे’ देनीनी। यसेया ६३:१६
- 55 गेपुकीमी मेको कली मतुइक्नीनी। तन्न गो तुडक्नुड। गो ‘मेको कली मतुइक्नुड’ देती हना, इन खोदेशो जोल पाडब दुम्नुड। तन्न गो मेको कली तुडक्नुड। मिनू आ शेशो पाडनुड। यूहन्ना ७:२८-२९
- 56 इन किकी पिपी अब्राहाममी आं नाक्त जाकशो तचा दाकशो बाक्माक्त। मिनू आं जाकशो तशा ग्येरसाक्व” दे येसुमी दैत।
- 57 मिनू यहूदीपुकीमी “गे मुल सम्म ५० बर्स मजाक्दीशशो बाक्ते। मिनू अब्राहाम कली तशो बाक्नेवे डा?” दैतेक्म।
- 58 मिनू येसुमी “नोफा दाइशशा नेनीन, गो अब्राहाम क्येडा डोंइती रे बाकशो नड” दैत। यूहन्ना १:१२
- 59 मिनू यहूदीपुकीमी “फुल्लु आप्शा साडक्चा” दे फुल्लु गुप्तेक्म। तन्न येसु खुंडसाक्व। मिनू परमप्रभु यावे आ खिं रे गृशा गाक्त। यूहन्ना १०:३१

## 9

मिक्च मताडब कली सापाइशशो

- 1 मिनू येसु लना लन बाक्मेनु, जरमेशो रेन मिक्च मताडब मुर का युम्तु।
- 2 मिनू आ शेंसीबपुकीमी येसु कली “शेंब, मारदे मेको मिक्च मताडब जरमेशो बाक्मे? मेकोमी पाप पवा देय आ आम आफोमी पाप पाम्से?” दे हिल्लो पाम्तेक्म। लूका १३:२
- 3 मिनू येसुमी “एको मुरुमी पाप पशो ममाड, आ आम आफोमी यो मपाम्से। तन्न परमप्रभु यावे आ गेय कौंडचा कली एको मिक्च मताडब दुम्शो जरमेशो बाक्त। यूहन्ना ११:४
- 4 मिनू गोपुकीमी आं कली सोडक्व आ गेय नाकती पचा मालनय। नां रिक्मेनु, सुडमी गेय पने मचाप्नीम। यूहन्ना ५:१७; येरमीया १३:१६
- 5 गो रागीमी बाक्डानु, रागी कली छेडछेड नड” दैत। यूहन्ना ८:१२; यूहन्ना १२:१५
- 6 गो देशा येसुमी खपीमी तोकशा, नाक्युक नु खप निशा, मेको मुर आ मिक्चीमी खेक्ताक्व। मर्कूस ८:२३
- 7 मिनू मिक्च मताडब कली “सिलोआ डा दोम्लीम लशा चिक्सो” दे माडक्तु। सिलोआ देशो चहिं सोडशशो, दे रुम्सीब। मिनू मेको लशा चिक्से बाक्त। मिनू मिक्च ताडब दुम्शा, लेशशा जाक्त।

सापाइशशो मुर नु यहूदीपुकी

- 8 मिनू आ गाड डा मुर नु मिक्च मताडब पुंडब मुर दे तुडक्वपुकीमी “मिक्च मताडब पुंडब एको ममाड डा?” दैतेक्म।
- 9 का निकशीमी “मेकोन बाक्त” दैतेक्म। का निकशीमी चहिं “ममाड, मेको खोदेशो बाक्त” दैतेक्म। आ चहिं “गो मेकोन नड, शां” दैत।
- 10 मुरपुकीमी “दोपा मिक्च ताडब दुमे, मिनू?” दे हिल्लो पाम्तेक्म।
- 11 मेकोमी “येसु माइशशोमी खप निशा, आं मिक्चीम खेक्ताक्यी। मिनू ‘सिलोआ डा दोम्लीम लशा चिक्सो’ दे माडक्ती। मिनू गो दोम्ली लशा चिक्सीडानु, मिक्च ताडब दुम्ती” दे माडक्तीमी।
- 12 मिनू “येसु माइशशो ते बाक्मे” दे हिल्लो पामेनु “डाद, ते लमे, गो मतुडक्नुड” दे माडक्तीमी।
- 13 मिनू आ मिक्च साशो मुर कली फरिसी आन बाक्तीक चाक्दीत्तेक्म।

- 14 येसुमी खप निशा, आ मिक्चीमी खेक्शा सापाइश्शो नाक्त चहिं नाइक्तीक नाक्त बाक्त।
- 15 मोपतीके फरिसीपुकीमी यो लेंशा मेको कली “दोपा मिक्च ताइब दुमे?” दे हिल्लो पाम्तेक्म। मिनू “खप निशा, आं मिक्चीमी खेक्ताकयी। मिनू गो चिक्शा, मुल मिक्च ताइब दुम्ती” दे माइक्तीमी।
- 16 फरिसी का निक्शीमी “परमप्रभु यावे आ सोइश्शो ममाइ। मारदे हना नाइक्तीक नाक्त ममानेब” दैतेक्म। का निक्शीमी चहिं “पापी मुरुमी दोपा ओदेंशो छक लाक्चा डा गेय पने चाप्बा डा?” दैतेक्म। मिनू मेकोपुकी ब्रातेक्म।
- 17 मिनू फरिसीपुकीमी लेंशा आ मिक्च साशो कली “मिनू इ कली मिक्च ताइब सेल्ब आ पबंम मार देनेवे?” दे हिल्लो पाम्तेक्म। मिनू मेकोमी “परमप्रभु यावे आ लोत्र पाइब बाक्त” दैत।
- 18 यहूदीपुकीमी “मेको मुर डोंइती मिक्च मताइब बाक्त” दे थमा मसुदेम। मोपतीके मेको आ आम आफ आस कली ब्रेत्ताक्म।
- 19 मिनू मेको आस कली “एको इस तौ ममाइ? डोंइती मिक्च मताइब जरमेसाक्व देंतीसी? मुल दोपा तने चबा?” दे हिल्लो पाम्तेक्म।
- 20 मिनू आम आफोमी “आंस तौ बाक्ब। मिनू मिक्च मताइब जरमेसाक्व।
- 21 मुल दोपा मिक्च ताइब दुमे, गो मतुइक्नस्कु। सुम ताइब सेला, मेको यो मतुइक्नस्कु। आ कली हिल्लो पने। आल ममाइ, आंमान देने चाप्ब” दैताक्स।
- 22 आ आम आफोमी यहूदी आन क्येडा हिंसा मो दैताक्स। मारदे हिंसा देशा हना, यहूदीपुकीमी “सुम सापाइक्ब कली खीस्त दे थमा सुइक्बा, मेको कली यहूदी आन गुम्तीक खिं रे तिल्ला” दे सल्ला पशो बाक्तेक्म। यूहन्ना ७:१३; यूहन्ना १२:४२
- 23 मोपतीके “आल ममाइ। आ कली हिल्लो पने” देशो बाक्ताक्स।
- 24 मिनू मिक्च ताइब दुम्शो कली लेंशा ब्रेशशा “परमप्रभु यावे कली मान पावो। इ कली मिक्च तपाइक्ब पापी बाक्माक्त, दे तुइक्नीकी” दैतेक्म।
- 25 आ मिक्च साशो मुरुमी “मेको पापी बाक्म कों, मबाक्म, गो मतुइक्नुड। डोंइती मिक्च मताइब बाक्ती, मुल ताइब दुम्ती, मेको ला तुइक्नुड” दे माइक्तीमी।
- 26 मिनू मेकोपुकीमी “मेकोमी इ कली मार पवा? दोपा इ मिक्च ताइब सेला?” दे हिल्लो पामेनु
- 27 “गो ना कना माइक्तनी। गेपुकी चहिं मनेनीनी। मारदे लेंशा नेंचा दाक्नीनी? गेपुकी यो मेको आ शेंसीब दुम्चा दाक्नीनी?” दे माइक्तीमी।
- 28 मिनू “गे मेको आ शेंसीब नवे। गोपुकी चहिं मोसा आ शेंसीब नकी।
- 29 परमप्रभु यावेमी मोसा कली लोत्र पशो बाक्त, दे तुइक्नीकी। तन्न मेको मुर ते रे जाक्मे, दे गो मतुइक्नीकी” दे हुइक्ताक्म।
- 30 मिनू आ मिक्च साशो मुरुमी “गो इन कली तशा, छक लाक्ती। आं मिक्च सापाइक्तु हना यो, मेको ते रे जाक्मे, दे गेपुकीमी मतुइक्नीनी?
- 31 परमप्रभु यावेमी पापी आन लोत्र मनेब, दे गोपुकीमी तुइक्नय। तन्न सुमी परमप्रभु यावे कली मान पशा, आ दाक्शो पाइबा, परमप्रभु यावेमी मेको कली आ पुंइशो गेब। भजन संग्रह ६६:१८; यसेया १:१५; हितोपदेस १५:२९
- 32 मिनू रागी सेल्चा गोशो रे जरमेशो रे मिक्च मताइब मुर मिक्च ताइब सेल्शो, दे गेनायो मनेय।
- 33 मेको परमप्रभु यावे आ सोइश्शो मबाक्त हना, छक लाक्चा डा गेय पने मचाप्ब वा” दैत।
- 34 मिनू “गे पापी जरमेशो बाक्ते। आंइ कली मार शेनेवे?” दे हुइश्शा, मेको कली गुंइताक्म।

सापाइश्शो मुर नु येसु

- 35 मिनू येसुमी मेको कली यहूदी आन गुम्तीक खिं रे तिल्लेक्म देशो नेंशा, मेको कली गुम्शा “गे रागीमी जरमेशो कली थमा सुइक्नेवे?” दे हिल्लो पाप्नु।
- 36 मेकोमी “प्रभु, मेको सु बाक्मे, गो मेको कली थमा सुइक्नुड” दैत।
- 37 मिनू येसुमी “गे मेको कली तशो बाक्ते। गे नु लोत्र पाइब मेकोन बाक्त” दैमेनु, यूहन्ना ४:२६
- 38 “प्रभु, गो थमा सुइक्नुड” देशा, पोक्च थेक्शा, येसु कली ठेयब सेल्तु।
- 39 येसुमी “गो निसाफ पचा कली रागीमी जाक्ती। मिक्च मताइबपुकीमी तामेक्ल। मिक्च ताइब चहिं मताइब दुम्मल” दैत। मत्ती १३:११-१५
- 40 येसु आ नेक्था बाक्ब फरिसी का निक्शीमी आ लोत्र नेंशा, येसु कली “गोपुकी मिक्च मताइब दुम्नीकी?” दैमानु,
- 41 येसुमी “गेपुकी मिक्च मताइब नकी देंतीनी हना, पाप मरनी वा। तन्न गोपुकी मिक्च ताइब नकी देंतीनी। मोपतीके पाप राइनीनी” दे माइक्तीमी। यूहन्ना १५:२२

## 10

रिम्शो भेडा गोठला

- 1 मिनू येसुमी लेंशा मेको आन कली “नोफा दाइश्शा नेनीन, सु सु भेडा गोठ आ लाप्चो रे मओवनीमी। बार रे डोइश्शा ओवनीमी, मेकोपुकी खुइ नु रोइक्ब नम।
- 2 सु लाप्चो रे ओवबा, मेको भेडा गोठला बाक्ब।

3 गोठला जाकमेनु, लापचो खाल पाइबमी मेको कली लापचो रोकब। भेडापुकीमी गोठला आ सेंदा नेंनीम। गोठलामी आंम भेडा आन नें थिशा ब्रेशशा, गोठ रे गुंडब।

4 मिनु नेल्ल आन कली गुंडशा, भेडा आन डोंडती गाकब। भेडापुकीमी गोठला आ नोले खोइक्नीम। मारदे हना आ सेंदा तुइक्नीम।

5 सेंदा मतुइशो मुर आ नोले मखोइक्नीम। मेको कली तशा प्रोक्नीम। मारदे हना आ सेंदा मतुइक्नीम” दे येसुमी शेंताक्मी।

6 येसुमी मुर आन कली मेको कथा शेंशो बाक्त। तन्न मार लोत्र शेंशो बाक्मे, मेकोपुकीमी मरुपशो बाक्तेक्म।

7 येसुमी लेंशा मेको आन कली “नोफा दाइशशा नेनीन, गो भेडा गोठ डा लापचो नड।

8 सु सु आं डोंडती जाक्मा, मेको नेल्ल खुड नु रोइक्ब नम। मिनु भेडापुकीमी मेको आन लोत्र मटीनीमी।

9 गो लापचो नड। सु सु मेको लापचो रे ओवनीमी, मेकोपुकी श्येत रे ब्रोंडनीम। मिनु रिम्शो घांस बाक्तीकेमी लशा, जोचा ताइनीम। यूहन्ना १४:६

10 खुइमी दा खुइ पथ, साइक्थ नु प्रेत्थ ला जाक्ब। गो चहिं भेडा आन कली ब्रोंडचा गेशा, ग्येरसीशा बाक्मल, दे जाक्ती” दे शेंताक्व।

11 मिनु येसुमी “गो रिम्शो गोठला नड। रिम्शो गोठला भेडा आन पा डा साइक्चा पुंडसीब। भजन संग्रह २३:-; यसैया ४०:११; इजीकीएल ३४:११-२३; यूहन्ना १५:१३; हिब्रू १३:२०

12 मिनु खिं डा गोठला मबाक्थु, वोइशशो गोठला बाक्त हना, मेकोमी भेडापुकी रिम्शो पा मकोत्रब। मारदे हना मेको आ भेडा मनमी। फर पिशो तशा, भेडा आन कली प्रोंडशा, प्रोक्ब। फरमी चहिं भेडा आन कली ग्याइशशा साव सुव ब्रपाइक्ब।

13 मिनु मेको वोइशशो गोठला प्रोक्ब। मारदे हना भेडा आइक्के मनम, मोपतीके रिम्शो पा मकोत्रब।

14 गो रिम्शो गोठला नड। दोपा गो आं भेडा आन कली तुइक्नुडमी, मोपा मेकोपुकीमी आं कली तुइक्नीम। रतिमोथी २:१९

15 दोपा आं आफोमी आं कली तुइक्बा, मोपा गो आं आफ कली तुइक्नुड। मिनु भेडा आन पा डा गो साइक्चा पुंडसीनुड।

16 मेको गोठ डा ला ममाइ, अरु गोठ डा भेडा यो आं के बाक्नीमी। गो मेको आन कली यो चाक्चा माल्नुड। मेकोपुकीमी आं सेंदा नेंशा, आं कली टीनीमी। मोपा गोठला का नु बगाल का दुम्ब। यूहन्ना ११:५२; प्रेरित १०:३४-३५

17 मेको आन साइक्चा पुंडसीचा डा गो साइक्चा पुंडसीनुड। मोपतीके आं आफोमी आं कली दाक्ब, मिनु आं कली बेक्शो रे सेंब।

18 गो साइक्चा मपुंडसाक्थी हना, सुइमी आं कली साइक्के मचाप्नीम। गो आं के साइक्चा पुंडसीतीके अधिकार बाक्ब। मिनु बेक्शो रे सेंसीचा अधिकार यो बाक्ब। मेको अधिकार निम्फा आं आफोमी गेती” दे शेंताक्व। यूहन्ना ५:२६

19 येसु आ लोत्र नेंशा, यहूदीपुकी लेंशा ब्रातेक्म। यूहन्ना ७:४३; यूहन्ना ९:१६

20 शुश यहूदीपुकीमी “एको वोलमी सुम्शा गशो बाक्त। मारदे आ लोत्र नेंनीनी?” दैतेक्म। यूहन्ना ७:२०; मर्कूस ३:२१

21 का निक्शीमी चहिं “एको आ लोत्र वोलमी सुम्शो मुर आ पशो खोदेंशो मनेंसीब। वोलमी मिक्च मताइब मुर आ मिक्च तपाइक्के चाप्बा डा?” दैतेक्म।

यहूदीपुकीम येसु कली खेदा पशो

22 मिनु यरूसलेममी परमप्रभु यावे आ खिं डा डोंडती ओवतीक चाड जाक्शो बाक्त।

23 मिनु मेको हिंडम बाक्त। मिनु येसु परमप्रभु यावे आ खिं डा पिप सोलोमन आ सेल्लो लाडगामी हिरना हिरन बाक्त। प्रेरित ३:११

24 यहूदीपुकी येसु आ एर ओंथ देल्शा “गेना आंइ कली ठीक लोत्र पाइनीनी? गे ख्रीस्त ननी हना, लोत्र महिरथु, थमा पा देनीन” दैतेक्म।

25 येसुमी “गो इन कली देंती। तन्न गेपुकीमी थमा मसुइक्नी। गो आं आफ आ गेय पाइनुड। मेको गेयमी ‘गो परमप्रभु यावे आ सोइशशो नड’ दे इन कली तुइक्पाइक्ब। यूहन्ना ५:३६

26 गेपुकीमी चहिं आं कली थमा मसुइक्नीनी। मारदे हना गे आं गोठ डा भेडा मननी। यूहन्ना ८:४५-४७

27 गो आं भेडा आन कली तुइक्नुडमी। मिनु मेकोपुकीमी आं सेंदा नेंशा आं नोले खोइक्नीमी। भजन संग्रह ९:५७

28 गो मेको आन कली परमप्रभु यावे नु गेना हना यो ब्रोंडशा बाक्चा गेनुडमी। मेको नरकम मलाइनीम। सुइमी आं गुड रे रोइशशा, लाइक्के मचाप्नीम।

29 आं आफोमी मेको आन कली गेती। आं आफ नेल्ल क्येडा ठेयब सक्ति पाइशशो बाक्ब। मोपतीके आं आफ आ गुड रे सुइमी रोइक्के मचाप्नीम।

30 गो नु आं आफ उइक्थ उइक्थ नस्कु” दैत।

येसु कली दोस गेशो

31 मिनु यहूदीपुकीमी लेंशा येसु कली साइक्चा, दे फुल्लु गुप्तेक्म। यूहन्ना ८:४९

32 मिनु येसुमी “गो इन कली आं आफोमी पशो रिम्शो गेय कोंइताक्नी। तेको गेय आ परबंम आं कली फुल्लु आप्शा साइक्चा माल्नी?” दैत।

33 यहूदीपुकीमी “रिम्शो गेय पतीक आ परबम इ कली फुल्लु मआप्नीकी। तन्न परमप्रभु यावे आ परबम मरिम्शो लोत्र पतीके इ कली फुल्लु आप्चाइतक। गे मुर दुम्शा यो, परमप्रभु यावे नु उडक्थ नड देनेवे” दैतेकम। मती ९:३; मती २६:६५; यूहन्ना ५:१८

34 येसुमी “परमप्रभु यावे आ लोत्र ब्रेकशो किताबमी ‘गे नेल्ल परमप्रभु यावे आ तमी तौ ननी’ मदेबा डा? भजन संग्रह ८२:६

35 परमप्रभु यावेमी आ लोत्र नेंब आन कली आ तमी तौ देंब। मिनु मेको किताब डा लोत्र मक्याम्सीब। मती ५:१७

36 परमप्रभु यावेमी आं कली रागीमी सोडक्चा कली ठीक सेल्लु। गेपुकीमी चहिं ‘परमप्रभु यावे आ परबम मरिम्शो लोत्र देनेवे’ देनीनी। मारदे हना ‘गे परमप्रभु यावे आ तौ नड’ देती। यूहन्ना ५:१७-२०

37 गो आं आफ आ गेय मपाता हना, आं कली थमा मसुतीन।

38 तन्न गो आं आफ आ गेय पाडनुड हना, गेपुकी आं कली थमा मसुडक्नीनी। आं पशो गेय परमप्रभु यावे के बाक्त, दे थमा सुतीन। मिनु गो आं आफ नु बाक्नुड। आं आफ गो नु बाक्ब, दे रूपीन” दे येसुमी यहूदी आन कली माइक्तीमी।

39 मेकोपुकीमी येसु कली ग्याइक्चा माल्तेकम। तन्न मेको आन दाते रे मूशा गाक्त। यूहन्ना ८:५९; लूका ४:३०

40 येसु लेंशा यर्दन खोला आइक्ची हांबु लशा बाक्माक्त। डोंडती मेकेर यूहन्नामी ब्वाक्कुमी खुम्शा गुंडतीक गेय पशो बाक्माक्त। यूहन्ना १:२८

41 आ नेक्था जाक्शा, शुश मुरपुकीमी “यूहन्नामी छक लाक्चा डा गेय मपव। तन्न मेको मुर आ परबम मार मार देमे, मेको नेल्ल थमा बाक्माक्त” देमुक्तेकम।

42 मिनु शुश मुरुमी येसु कली थमा सुडक्तेकम।

## 11

येसुमी लाजरस कली सेंशो

1 बेथानी गांउमी लाजरस माइश्शो रोड पशो मुर का बाक्त। मेको के समी निक्शी बाक्शो बाक्ताक्स। मेको आस नें मरीयम नु मारथा बाक्ताक्स। लूका १०:३८-३९

2 मरीयम सु बाक्त देशा हना, येसु आ खोइलीमी ब्रोत्रशो रिना पाइश्शो तेल खेक्शा, आ चांमी फिक्ब बाक्त। मेको आस लोकब लाजरस रोड पशो बाक्त। यूहन्ना १२:३

3 मिनु मेको समी निक्शीमी मुर का कली येसु आ बाक्तीक सोइश्शा “प्रभु, इन दाक्शो वारच रोड पाप्तु” दे येसु कली ब्रेप्पत्से बाक्त।

4 मिनु येसुमी “मेको रोड बेक्चा डा रोड ममाइ, तन्न परमप्रभु यावे आ सक्ति कोइचा कली बाक्ब। मिनु मुरपुकीमी मेको रोड आ परबम परमप्रभु यावे आ तौ कली टेयब सेल्लनीमी” दैत। यूहन्ना ९:३

5 येसुमी मारथा नु मरीयम वोबु नु आस लोकब लाजरस आन कली दाक्शो बाक्माक्त।

6 मोपतीके लाजरस रोड पाप्तु देशो नेंशा, आन बाक्तीक लचा, नाक्त निक्शी सम्म रिम्ताक्व।

7 मिनु नोले येसुमी आ शेंसीब आन कली “लो, लेंशा यहूदीया रागी लय” दैत।

8 आ शेंसीबपुकीमी “शेंब, यहूदीपुकीमी इन कली फुल्लु आप्शा हेरा साइक्तेकमे। मिनु गे मुल लेंशा मेकेर लचा दाक्नीनी?” दे हिल्लो पाम्तेकम। यूहन्ना १०:३१

9 मिनु येसुमी “काबु नाक्तीम १२ घन्टा बाक्बा, ममाइ? सु सु चहिं नाक्ती गाक्नीमी, मेको दाइल मपांडसीनीम, मारदे हना छेडछेडमी लां ताइनीम। यूहन्ना ९:४-५

10 सु सु चहिं नाक्दो गाक्नीमी, मेकोपुकी दाइल पांडसीनीम, मारदे हना मेको छेडछेडमी मबाक्नीम” दैत। यूहन्ना १२:३५

11 मो देशा आ शेंसीब आन कली “इ वारच लाजरस इप्त। गो चहिं मेको कली सेनुड” दैत। मती ९:२४

12 आ शेंसीबपुकीमी “प्रभु, इप्त हना, आ रोड साब” दैतेकम।

13 येसुमी चहिं लाजरस आ बेक्चा आ परबम लोत्र पशो बाक्त। आ शेंसीबपुकीमी “नाइक्चा कली इप्त” दे मिम्ताकम।

14 मिनु येसुमी लोत्र महिरथु “लाजरस बेक्ने थ्मुतु।

15 गो मेकेर मबाक्ड। मोपतीके गो ग्येरसीनुड। मारदे हना गेपुकीमी थमा सुइक्ने चाप्नीनी। मुल गोपुकी बेथानी लय” दैत।

16 आ याइनी नें जौले, थोमास माइश्शो शेंसीब का बाक्त। मेकोमी अरु शेंसीब आन कली “गोपुकी यो मेको नु बेक्थ लय” दैत। यूहन्ना २०:२४-२८

लाजरस कली सेंपाइश्शो

17 मिनु येसु बेथानी जाक्दीम्मेन, मेकेर डा मुरपुकीमी “लाजरस बेक्शो ४ नाक्त दुम्त। मेको कली बेक्शो मुर वोइक्तीक कोठामी वोइक्तेकम” दे येसु कली दैतेकम।

18 बेथानी गांउ यरूसलेम आ नेक्था बाक्शो बाक्ब। बेथानी रे यरूसलेम सम्म १५ स्तादीयोन डा लां बाक्ब। स्तादीयोन का १८५ मिटर बाक्ब।

19 मिनु यरूसलेम डा शुश यहूदीपुकीमी मारथा नु मरीयम आस लोकब बेक्शो आ परबमी “सुर्ता मपाम्सेकल” दे लेम्चा कली जाक्मा बाक्त।

20 मिनु मारथामी “येसु पिन पिन बाक्ब” देशो नेंशा, येसु कली गुम्थ जाक्त। मरीयम चहिं खिंमीन बाक्माक्त।

21 मिनु मारथामी येसु कली “प्रभु, एक बाक्शो ननी हना, आंस लोकब मबे वा।

- 22 तन्न मुल यो परमप्रभु यावे कली पुंडतीनी हना, परमप्रभु यावेमी इन पुंडशो गेब, दे तुडक्नुड” दे माइक्तु।
- 23 म्नु येसुमी “इ लोकब सेंसीब” देत। यूहन्ना ५:२८-२९; यूहन्ना ६:४०; मती २२:२३-३३
- 24 म्नु मारथामी “नोले डा नाक्ती आंस लोकब सेंसीब दे गो तुडक्नुड” देत।
- 25 म्नु येसुमी “गो सेंपाइक्ब नु ब्रॉइपाइक्ब नड। आं कली थमा सुइक्ब बेक्तेक्म हना यो, सेंसीनीम।
- 26 सु ब्रॉइबा, म्नु आं कली थमा सुइक्बा, मेको गेनायो मबेक्ब। एको लोत्र थमा सुइक्नेवे?” दे हिल्लो पाप्तु। यूहन्ना ८:५१
- 27 म्नु मारथामी “प्रभु, गे रागीमी जाक्शो परमप्रभु यावे आ तौ, ख्रीस्त ननी, दे गो थमा सुइक्नुड” देत। मती १६:१६
- 28 मोदेशा मारथा खिं लेशशा, मरीयम कली “शेंब जाक्शो बाक्त। म्नु इ कली ब्रेत्ताक्व” दे मुर आन मनेचा डा पा मदा बाक्त।
- 29 म्नु मरीयम मेको नेंशा, छुल बोक्शा, येसु कली गुमथ लमाक्त।
- 30 मेना येसु मारथा गुमतीक उड बाक्शो बाक्त। आस गाउं मजाक्दीशो बाक्माक्त।
- 31 म्नु मरीयम आ खिंम लेमथ जाक्ब यहूदीपुकीमी मरीयम कली छुल बोक्शा लशो तशा, आ नोले खोदमे बाक्त। मारदे हना मेकोपुकीमी “मरीयम तुरसुम डाक्थ लाइबा, कौं” दे मिम्यो बाक्मा बाक्त।
- 32 म्नु मरीयम येसु आ बाक्तीक जाक्दीशशा, येसु आ खोइलीम बाप्शा “प्रभु, एक बाक्शो ननी हना, आंस लोकब मबे वा” देत।
- 33 म्नु येसुमी मेको कली नु में नु जाक्शो यहूदी आन कली डाक्शो तशा, येसु आ थुं खाइक्त। यूहन्ना १३:२१
- 34 म्नु “गे मेको कली ते वोइक्नी?” दे हिल्लो पवानु “प्रभु, कोत्र थ पिने” देतेक्म।
- 35 म्नु येसु यो डाक्त।
- 36 यहूदीपुकीमी येसु कली डाक्शो तशा “कोत्रडीन, येसुमी मेको कली यो शुश दाक्शो बाक्माक्त” देतेक्म।
- 37 का निक्शीमी “मिक्च मताइब मुर सापाइक्बमी मेको कली बेक्चा मगेशु, सापाइक्ने मारदे मचाप्बा?” देमुमतेक्म। यूहन्ना ९:७
- 38 म्नु येसु आ थुं लेंशा खाइशशा, बेक्शो मुर वोइक्तीक कोठा आ नेक्था जाक्दीत्त। मेको पुक्खी खोदेशो बाक्त। मेको पुक्खी चोक्चा, दे आ डोंइती फुल्लु का थारशो बाक्त। मती २७:६०
- 39 म्नु येसुमी “फुल्लु तिलीन” देत। म्नु बेक्शो मुर आ समी मारथामी “प्रभु, मुल दा एको रिना पाइब। मारदे हना आ बेक्शो ४ नाक्ती दुम्त” देत।
- 40 म्नु येसुमी “गे थमा सुइक्तीवी हना, गे परमप्रभु यावे आ सक्ति ताइनेवे, दे इ कली ममाइक्ना डा?” देत।
- 41 म्नु मुरपुकीमी पुक्खी आ डोंइती थारशो फुल्लु तिल्लेक्म। म्नु येसुमी सरीड गे कोत्रशा “आं आफ, गे आं लोत्र नेतीनी, गो ग्येरसाक्यी।
- 42 गे आं देशो गेना हना यो नेनीनी, दे तुडक्नुड। म्नु आं एर ओंथ बाक्शो मुरपुकीमी गेमी आं कली सोइशशो ननी, दे थमा सुइक्पाइक्चा कली एको लोत्र पाता” देत। यूहन्ना १२:३०
- 43 म्नु मो देशा, ठेयब सेंदा पा येसुमी “ए, लाजरस, यूडो” दे ब्रेत्ताक्व।
- 44 म्नु मेको डोंइती बेक्शो मुर येसु आ ब्रेशशो नेंशा, आ गुड खोइल आ रां नेल्ल वामी गिल्लीशा यूत। आ कुल यो रुमालमी फ्रेंशो तशा, येसुमी “गिल्लो वासी पुइशशा, लचा गेने” दे मुर आन कली माइक्तीमी।

येसु कली साइक्चा माल्लो

- 45 मरीयम कली लेमथ जाक्शो शुश यहूदीमी मो दुम्यो तशा, येसु कली थमा सुइक्तेक्म।
- 46 का निक्शी चहिं फरिसी आन कली गुमथ लशा, येसु आ पशो शोत्रडमे बाक्त।
- 47 मो दुम्या ठेयब चढेब नु फरिसीपुकी बुक्शा “मुल मार पय? मारदे हना मेको मुरुमी शुश छक लाक्चा डा गेय पाइबाक्त। मती २६:३-४
- 48 मेको कली मो पचा गेतय हना, नेल्लेमी मेको कली थमा सुइक्नीम। म्नु रोमीपुकीमी परमप्रभु यावे आ खिं नु इझाएल रागी निम्फा खतम सेलनीम” दे लोत्र पामे बाक्त।
- 49 मेकोपुकी नु काइयाफास माइशशो मुर का बाक्माक्त। मेको बर्स डा नेल्ल क्येडा ठेयब चढेब बाक्माक्त।
- 50 म्नु मेकोमी “गे मारेड मतुडक्नीनी। गो नेल्ल रागी खतम दुम्या क्येडा, मुर का कली साइक्चा रिम्यो बाक्ब” देमाक्त। यूहन्ना १८:१४
- 51 काइयाफासमी आंम मिम्यो मदे, तन्न मेको बर्स डा नेल्ल क्येडा ठेयब चढेब दुम्या “इझाएल रागी डा मुर आन पा डा येसु साइक्चा पुंडसीब” दे नोले दुम्य लोत्र पशो बाक्त।
- 52 इझाएल रागी डा मुर आन कली ला ममाइ, तन्न ब्रशा बाक्शो परमप्रभु यावे आ तमी तौ नेल्ल आन कली काथा दुम्याइक्चा, दे येसु साइक्चा पुंडसीब दुम्त। यूहन्ना ७:३५; यूहन्ना १०:१६; १यूहन्ना २:२
- 53 म्नु मेको नाक्तर येसु कली दोपा साइक्चा, दे सल्ला पामे बाक्त।
- 54 मोपतीके येसु यहूदीपुकी नु मबाक्थु, गोरशो रागी आ नेक्थान एफ्राइम सहर लत। म्नु मेकेर आ शेंसीबपुकी नु बाक्त। २सामुएल १३:२३
- 55 म्नु यहूदी आन पास्सा चाड जाक्चशो बाक्त। पहाड डा शुश मुरपुकी आंम कली ठीक सेल्चा, दे पास्सा चाड आ डोंइती यरूसलेम लाइबाक्मा बाक्त। २इतिहास ३०:१७-१८

56 मेकेर जाकदीशशा, परमप्रभु यावे आ खिंमी बाकशा “गे मार मिन्नीनी? येसु पास्सा चाडम जाकबा देय मजाकबा” दे हिल्लो पमुशा, येसु कली माल्मे बाक्त।

57 मिनु ठेयब चढेब नु फरिसीपुकीमी “सुमी येसु ते बाकबा, दे तुडक्ता, मेकोमी आंड कली यो तुडक्पदल” दे मुर आन कली देशो बाकमा बाक्त। मोपा येसु कली ग्याडक्चा माल्मे बाक्त।

## 12

मरीयममी येसु कली तेल खेक्शो

1 यहूदी आन पास्सा चाड जाकचा ६ नाक्त डोंइती येसु बेथानी गाड जाकदीत। मेकेर येसुमी लाजरस कली बेक्शो रे सेंपाइशशो बाक्त। यूहन्ना ११:१,४३

2 लाजरस आ खिंमी येसु नु आ शेंसीब आन कली थुल्चा ठीक पशो बाक्तेकम। मारथामी जचा थोत्रक योक्तु। लाजरस येसु नु काथा बाक्शो बाक्त।

3 मिनु मरीयममी मार पाप्तु देशा हना, लित्रा का शुश क्येट लाइक्ब ब्रोत्रशो रिना पाइशशो तेल येसु आ खोइलीमी खेक्ताक्व। मिनु आ चांमी फिक्ताक्व। मो पशा खिं गा नेल्ल ब्रोत्रशो रिना पपाइक्तु। लित्रा का ३२७ ग्राम खोदेशो बाक्ब। लूका ७:३८

4 मेकेर येसु आ शेंसीब इस्कारीयोत डा यहूदा यो बाक्त। मेको नोले येसु कली साइक्ब आन कली वारच पाइब दुम्बाक्माक्त।

5 मेकोमी “मारदे सहे सां देनारमी मेको तेल लेयशा, पुडग आन कली मयोक्वा?” दे लोत्र पाप्तु। देनार का नाक्त का डा गाल्च बाक्त।

6 यहूदामी पुडग आन कली शिशी पा मिम्शा ममाड, तन्न क्येट कुरशा, क्येट खुड पना पन बाक्बाक्माक्त। यूहन्ना १३:२९

7 मिनु येसुमी यहूदा कली “मरीयममी आं बेक्चा डोंइती तेल खेक्ताक्वी। एको कली श्येत मगेवो।

8 पुडगपुकी दा गेपुकी नु गेना हना यो बाक्नीम। गो चहिं गेपुकी नु शुश नाक्त मबाक्नुड” दे माइक्तु।

9 मिनु शुश यहूदीपुकीमी येसु मेकेर बाक्त, दे तुइशशा, येसु आ पबंम ला ममाड, येसुमी बेक्शो रे सेंपाइशशो लाजरस कली यो कोत्रचा, दे जाक्तेकम।

10 ठेयब चढेबपुकीमी “लाजरस कली यो साइक्चा” दे सल्ला पामे बाक्त।

11 मारदे हना मेको आ पबंम शुशेमी यहूदी आन शेंतीक प्रोंइशा, येसु कली थमा सुडक्तेकम।

येसु यरूसलेम सहर ओत्रशो

मत्ती २१:१-११; मर्कूस ११:१-१०; लूका १९:२९-४०

12 मिनु आ दीसा शुश मुरुमी “येसु पास्सा नाक्त यरूसलेममी जाक्ब” देशो नेन्मे बाक्त।

13 मिनु खजूर रवा आ सफा शेशा, येसु कली गुम्थ जाक्तेकम। मेकोपुकीमी “होसन्ना, परमप्रभु आ नेमी जाक्ब इसाएली आन पिप आसीक रशो बाक्ब” दे ग्येरशा, ग्रीना ग्रीन येसु कली गुम्थ जाक्तेकम। होसन्ना आ देशो “परमप्रभु वारच पने” बाक्ब। भजन संग्रह ११८:२५-२६

14 मिनु येसुमी गधा आ चाडक्ब का डोंइसाक्व। परमप्रभु यावे आ ब्रेक्पाइशशो किताबमी

15 “सियोन डा मुर, महिनीन। कोत्रडीन, इन पिप गधा डोंइशशा पिना पिन बाक्ब” दे ब्रेक्शो बाक्त। जकरिया ९:९

16 येसु आ शेंसीबपुकीमी डोंइती मेको लोत्र मरुप्शो बाक्तेकम। तन्न येसु स्वर्ग लशा नोले ला “मेको लोत्र येसु आ पबंम ब्रेक्शो बाक्माक्त। दोदेशो ब्रेक्शो बाक्मे, मोदेशो दुम्त” दे रुप्यो बाक्तेकम।

17 मेको “होसन्ना” दे ग्रीबपुकी सु बाक्मा बाक्त देशा हना, येसुमी लाजरस बेक्शो रे सेंपाइशशो ताइब बाक्मा बाक्त। मिनु मेकोपुकीमी मुर आन कली लाजरस सेंसीशो आ पबंमी तुडक्पाइक्तेकम।

18 मोपतीके मेकोपुकी येसु कली गुम्थ जाक्तेकम।

19 मिनु फरिसीपुकीमी “गोपुकी मारेड पने मचापन्य। कोत्रडीन, मुर नेल्ल मेको आ नोले खोइक्नीम” देमुम्तेकम। यूहन्ना ११:४८

ग्रीस डा मुर येसु कली गुम्थ जाक्शो

20 मिनु पास्सा नाक्ती परमप्रभु यावे कली मान पचा कली का निक्शी ग्रीस रागी डा मुर यो जाक्शो बाक्तेकम।

21 मेकोपुकी फिलीप माइशशो शेंसीब नु लोत्र पचा कली जाक्तेकम। फिलीप चहिं गालील रागी डा बेथसेदा सहर डा बाक्त। मिनु मेको ग्रीस रागी डा मुरपुकीमी “प्रभु, गोपुकी येसु कली गुम्चा दाक्नीकी” देतेकम। यूहन्ना १:४४

22 फिलीपमी मेको आन लोत्र नेंशा, अन्द्रीयास कली माइक्तु। मिनु अन्द्रीयास नु फिलीपमी येसु कली “ग्रीस रागी डा मुरपुकी इन कली गुम्थ जाक्तेकम” दे माइक्ताक्स।

23 मिनु येसुमी “मुल रागीमी जग्मेशो परमप्रभु यावे आ बाक्तीक लाइब। मिनु ठेयब सेल्चा पुंडसीब।

24 नोफा दाइशशा नेनीन, चेरब गेडा खपीमी शोक्शा मराक्त हना, मेको मोशा लीब। तन्न शोक्शा राक्त हना, शुश ग्रेल्ब। रोमी १४:९; १कोरिन्थी १५:३६

25 सुमी आंम दला दाक्स पाइबा, मेको गेना हना यो ब्रोंइशा बाक्चा मताइब। सुमी चहिं रागीमी बाक्शा, आंम कली ममिम्थु, परमप्रभु यावे आ देशो टीबा, मेको गेना हना यो ब्रोंइशा बाक्चा ताइब। मत्ती १०:३९; मत्ती १६:२५; लूका १७:३३



26 सुमी आं गेय पाइबा, आं देशो यो पचा माल्बा, मेको आं बाक्तीकेमी बाक्चा ताइब। आं आफोमी आं गेय पाइब आन कली टैयब सेल्ब” दैत। यूहन्ना १७:२४

येसुम आ बेक्चा आ पर्वम शेंशो

27 मिनु येसुमी “मुल आं थुं खाइक्ती। गो मार देनुडा, आफ, आं कली मोपा साइक्चा रे प्रोंडयी, दे पुंइनुडा डा? गो साइक्चा पुंइसीचा कली रागीमी जाक्ती। मत्ती २६:३८

28 आं आफ, इन सक्ति कौंडदीन” दे येसुमी दैत। मिनु सरीड रे “गो आं सक्ति कौंडताकड। लेशा चिनु कौंडनुड” देशो सेंदा का नेंसाक्व। यूहन्ना १३:३१; मत्ती ३:१७; मत्ती १७:५

29 मिनु मेकेर बाक्शो मुरपुकीमी मेको सेंदा नेंशा “बुंबु पाप्टु” दैतेक्म। का निक्शीमी “परमप्रभु यावे आ स्वर्ग डा गेय पाइब कामी मेको कली लोत्र पाप्टु” दैतेक्म।

30 मिनु येसुमी “मेको लोत्र आं कली देशो ममाइ, इन कली देशो बाक्ब। यूहन्ना ११:४२

31 मुल रागी नेल्ल डा मुर आन कली निसाफ पची नाक्त जाक्त। मुल रागी कली हुकुम पाइब कली तिल्लीम। यूहन्ना १४:३०; यूहन्ना १६:११; लूका १०:१८

32 गो क्युक्शा साइक्चा पुंइसीशा, मुर नेल्ल आन कली आं गे कीनुडमी” दैत। यूहन्ना ८:२८

33 येसुमी दोपा साइक्चा पुंइसीचा चिक्शो बाक्नुड, दे तुडक्पाइक्चा कली मो दैत।

34 मिनु मुरपुकीमी येसु कली “परमप्रभु यावे आ लोत्र ब्रेक्शो किताबमी “ख्रीस्त गेनायो मबेक्थु बाक्ब” देशो नैतक। गे चहिं ‘रागीमी जरमेशो क्युक्शा साइक्चा पुंइसीब’ देंनीनी। मिनु मेको रागीमी जरमेशो चहिं सु बाक्म?” दे हिल्लो पांतेक्म। भजन संग्रह ११०:४; दानीएल ७:१४

35 मिनु येसुमी मेको मुर आन कली “मेको छेडछेड माइशो का गेपुकी नु इक्का नाक्त सम्म बाक्ब। छेडछेड बाक्म सम्म गाक्कीन। छेडछेडमी मगाक्तीनी हना, छिडछिडमी गाक्चा माल्लीनी। सु छिडछिडमी गाक्बा, मेको ते लाइबा मतुइक्ब।

36 छेडछेड माइशो का बाक्म सम्म मेको कली थमा सुतीन। मो पाइतीनी हना, छेडछेड माइशो आ तमी तौ दुम्नीनी” दैत। मिनु येसुमी मेको लोत्र पशा, मेकेर रे गाक्शा खुंडसाक्व। एफिसी ५:८

यसैयाम यहूदी आन पर्वम ब्रेक्शो

37 मिनु येसुमी मुर आन डोंडती शुश छक लाक्चा डा गेय पाप्टु हना यो, मेकोपुकीम येसु कली थमा मसुदेम।

38 मोपा यसैया माइशो परमप्रभु यावे आ लोत्र पाइब आ ब्रेक्शो लोत्र थमा दुम्त। मार ब्रेक्शो बाक्त देशा हना “प्रभु, आंइ देशो लोत्र सुम थमा सुदा डा? इन पशो गेय सुम तुइक्ता डा?” दे ब्रेक्शो बाक्त यसैया ५३:१

39 मोपतीके सुइमी थमा सुइक्ने मचबेम। यसैया ६:९,१०

40 मिनु यसैयामी “परमप्रभु यावेमी मेको आन कली मिक्च मताइब सेल्लतीमी। मोपा परमप्रभु यावे कली मतुइक्नीम। मेको आन कली मटीब सेल्लतीमी। मोपा मेकोपुकीमी परमप्रभु यावे आ लोत्र रुम्ने मचबेम। मिनु परमप्रभु यावे कली ‘आं कली सापतीन’ दे मपुंइनीम” दे यो यसैयामी ब्रेक्शो बाक्त। मत्ती १३:१४-१५

41 मारदे हना यसैयामी येसु ख्रीस्त आ छेडछेड डा सक्ति ततीके येसु आ पर्वम लोत्र पशा ब्रेक्शो बाक्त। यसैया ६:१

42 टैयब मुर शुशेमी येसु कली थमा सुइक्तेक्म। मेकोपुकीमी “फरिसीपुकीमी आंइ कली यहूदी आन गुत्तीक विं दे तिल्लीम” दे हिंशा, अरु आन कली “गो थमा सुइक्ब दुम्तक” दे मदेंम। यूहन्ना ९:२२

43 मारदे हना मेकोपुकीमी “आंइ पर्वमी मुरपुकीमी मार देंनीमी” दे परमप्रभु यावे क्येडा मुरपुकी तशा हितेक्म। यूहन्ना ५:४४

येसुम परमप्रभु आ शेंशो ला पाइब

44 मिनु येसुमी टैयब सेंदा पशा “आं कली थमा सुइक्बमी आन थमा सुइशो आं कली ला ममाइ, तन्न आं कली सोइक्ब कली यो थमा सुइशो नम।

45 मिनु सुम आं कली ताइबा, मेकोमी आं कली सोइक्ब कली यो ताइब। यूहन्ना १४:९

46 रागी डा मुर आन कली परमप्रभु यावे आ पर्वम तुडक्पाइक्चा कली गो रागी कली छेडछेड दुम्शा जाक्ती। मोपतीके सुम आं कली थमा सुइक्बा, मेको छिडछिडमी मबाक्ब।

47 मिनु सु सुमी आं देशो लोत्र नेंशा यो मपाइनीमी, गो मेको आन कली निसाफ मपाइनुड। मारदे हना गो रागी डा मुर आन कली निसाफ पचा कली जाक्शो मनड। तन्न रागी डा मुर आन कली पाप रे प्रोंडिया कली जाक्शो नड। यूहन्ना ३:१७; लूका ९:५६

48 सुम आं कली मब्रथु, आं देशो लोत्र मपाइबा, मेको कली निसाफ पाइब का बाक्ब। मेको निसाफ पाइब सु बाक्ब देशा हना, आं देशो लोत्र बाक्ब। एको लोत्रमी मेको कली नोले डा नाक्ती निसाफ पाइब।

49 आं कली सोइक्ब आं आफोमी गो मार देंचा नु शेंचा माल्नुडा, मेको नेल्ल माइक्ती। मोपतीके मेको आं लोत्र ममाइ। आं आफ आ लोत्र बाक्ब।

50 मेको आ देशो लोत्र मार बाक्ब देशा हना, गेना हना यो ब्रोंडशा बाक्चा गेब लोत्र बाक्ब। मेको आं आफोमी आं कली देशो लोत्र बाक्ब। मोपतीके आं पशो लोत्र आं आफोमी आं कली डोंडती देशो लोत्र बाक्ब” दे येसुमी मुर आन कली माइक्तीमी।

## 13

येसुम आ शेंसीब आन खोइल चिक्शो

1 येसुमी पाससा चाड डोंइती “मुल रागी रे आं आफ आ बाक्तीक लची नाक्त जाक्त” दे तुइक्ताक्व। मिनु येसुमी नेल्ल क्येडा नोले डा नाक्त सम्म रागीमी बाक्शो आ मुर आन कली दाक्शो बाक्त। यूहन्ना ७:३०; यूहन्ना १७:१

2 मिनु येसु नु आ शेंसीबपुकी नाक्दो डा खमे जना जन बाक्शो बाक्तेक्म। आ शेंसीब सिमोन आ तौ इस्कारीयोती डा यहूदा यो बाक्शो बाक्त। सैतानमी “येसु कली साइक्चा माल्ब आन कली वारच पावो” दे यहूदा कली मिम्पाइशो बाक्त। लूका २२:३

3 मिनु येसुमी “आं आफोमी आं कली नेल्ल सक्ति गेती। गो परमप्रभु यावे रे जाक्शो नड। मिनु परमप्रभु यावे आ बाक्तीके लेल्लुड” दे तुइश्शा, यूहन्ना ३:३५; यूहन्ना १६:२८

4 येसु बोक्शा, आ तार फेक्शो रिम्शो वा पुइश्शा, वा कामी गिल्साक्व।

5 मिनु चिक्तीकेमी ब्वाक्कु कुर पा, आ शेंसीब आन खोइल चिक्ताक्मी। चिक्शा डा मिन आ गिल्सीशो वाम फिक्ताक्मी।

6 मिनु सिमोन पत्रुस आ पालो जाक्मेनु, मेकोमी येसु कली “प्रभु, गेमी आं खोइल चिक्चा दुम्बा डा?” दैत।

7 मिनु येसुमी “मुल आं पशो मरुप्नेवे। गे नोले ला रुप्नेवे” दैत।

8 पत्रुसमी “गो आं खोइल चिक्चा काइ मगेनुड” दैत। मिनु येसुमी “गो इ खोइल मचिक्ताक्व हना, गे आं मुर मनवे” दे माइक्तु।

9 मिनु सिमोन पत्रुसमी “प्रभु, आं खोइल ला ममाइ, आं गुइ पिया यो चिक्तीनी” दैत।

10 येसुमी “चिक्शो मुर आन कली लेंशा चिक्चा ममाल्ब। खोइल ला चिक्चा माल्ब। खोइल चिक्शोनु, नेल्ल रिम्शो दुम्ब। गेपुकी चिक्सीशो दुम्तीनी। काइ मचिक्सीशो गेपुकी नु का बाक्ब” दैत। यूहन्ना १५:३

11 येसुमी आ कली साइक्ब आन कली वारच पाइब कली तुइश्शा मो दैत।

12 मिनु येसुमी आन खोइल चिक्चे थुम्था, आ डोंइती पुइश्शा फेक्तीक फेक्शा, आ बाक्तीक लत। मिनु शेंसीब आन कली “इन कली पशो गेय आ अर्थ मार बाक्बा, गे तुइक्तीनी?”

13 गेपुकीमी आं कली शेंब नु प्रभु देंतीनी। मेको ठीक देंतीनी। मारदे हना गो मेकोन नड। मत्ती २८:८,१०

14 गो प्रभु नु शेंब दुम्शा यो इन खोइल चिक्ताक्नी। गेपुकीमी यो इन खोइल चिक्मुचा माल्तीनी। लूका २२:२७

15 गो इन खोइल चिक्ताक्नी। मिनु गेपुकी आं खोदेशो पने। फिलिप्पी; १पत्रुस २:२१

16 मिनु नोफा दाइश्शा नेनीन, खिं डा होवप क्येडा वाइल ठेयब ममाइ। मिनु सोइश्शा मुर सोइक्ब क्येडा ठेयब यो ममाइ।

17 गेपुकी आं देशो लोत्र तुइश्शा पाइतीनी हना, गे आसीक रशा ग्येरसीशो मुर दुम्तीनी” दे येसुमी दैत। मत्ती ७:२४

यहूदा आ पर्वम लोत्र पशो

मत्ती २६:२१-२५; मर्कूस १४:१८-२१; लूका २२:२१-२३

18 मिनु येसुमी “गो नेल्ल इन पर्वम लोत्र मपाइनुड। आं योत्रशो आन कली तुइक्नुड। परमप्रभु यावे आ ब्रेक्पाइश्शा लोत्रमी मार ब्रेक्शो बाक्ब देशा हना ‘आं शोब्ले जाइबमी आं कली साइक्चा कली आ खोइल क्युक्तु’ दे ब्रेक्शो बाक्ब। मुल मोदेशो दुम्चा चिक्ताक्व। भजन संग्रह ४१:९

19 मोदेशो दुम्चा डोंइती तुइक्पाइक्तन्नी। मिनु मो दुम्मेनु, गो मेकोन बाक्डा बाक्त, दे तुइक्तीनी। मिनु आं कली थमा सुइक्तीनी।

20 नोफा दाइश्शा नेनीन। सुमी आं सोइश्शा कली ब्राइबा, मेकोमी आं कली ब्राइब। मिनु सुमी आं कली ब्राइबा, मेकोमी आं कली सोइक्ब कली यो ब्राइब” दैत। मत्ती १०:४०

21 मिनु येसुमी मेको लोत्र पशा आ थुं खाइक्त। मिनु “नोफा दाइश्शा नेनीन। गेपुकी नु का बाक्ब। मेकोमी आं कली साइक्ब आन कली वारच पाइब” दे आ थुं खाइश्शा दैत। यूहन्ना १२:२७

22 मिनु येसु आ शेंसीबपुकीमी “सु आ पर्वम देशो बाक्मे?” दे मतुइक्थु कोवमुम्तेक्म।

23 येसु आ नेल्ल क्येडा दाक्शो शेंसीब येसु आ नेक्था बाक्त। यूहन्ना १९:२६; यूहन्ना २०:२; यूहन्ना २१:२०

24 मिनु सिमोन पत्रुसमी मेको कली “सु आ पर्वम लोत्र पवा, हिल्लो पावो। मिनु आंइ कली देनो” दैत।

25 मिनु येसु आ नेक्था बाक्शो शेंसीबमी “प्रभु, मेको सु बाक्मे?” दे येसु कली हिल्लो पावतु।

26 मिनु येसुमी “गो एको शोब्ले शेक्कुमी तेप्शा सु कली जचा गोडा, मेकोन बाक्ब” देशा, येसुमी शोब्ले शेक्कुमी तेप्शा, सिमोन आ तौ इस्कारीयोत डा यहूदा कली गेत्तु।

27 यहूदामी शोब्ले ताक्तु। मेना सैतान आ थुंमी ओव्रत। मिनु येसुमी यहूदा कली “इ मिम्शो पावो” दैत।

28 शेंसीबपुकीमी येसुमी यहूदा कली मारदे मोदेशो देंमे, दे मतुइक्तेम।

29 का निकशीमी “यहूदामी क्येट आ थैली कुरशो बाक्ब। मिनु येसुमी मेको कली पाससा नाक्त कली ‘मार मार माल्नया, मेको ग्याप्य लावो, दे मदा कों, पुडग आन कली क्येट योक्शा गेवो’ दे मदा कों?” दे मिम्ताक्म।

30 यहूदा शोब्ले ताक्शा, छुल बोक्शा लत। मेना छिडछिड दुम्शो बाक्त।

येसुम नक अरेशो लोत्र शेंशो

यूहन्ना १३:३१-१६:३३

31 मिनू यहूदा लम नोले येसुमी “मुल रागीमी जरमेशोमी सक्ति ताप्तु। मिनू मुरपुकीमी रागीमी जरमेशो आ पतीक तशा, परमप्रभु यावे कली ठेयब सेल्नीमी। यूहन्ना १२:२३,२८

32 मिनू परमप्रभु यावेमी रागीमी जरमेशो कली आंम आ सक्ति गेशा, ठेयब सेल्ब। एको मुल दुम्या चिकशो बाक्त। यूहन्ना १७:१-५

33 आं आइक्च आलपुकी, गो इन कली शुश दाक्ताक्ड हना यो, गो गेपुकी नु शुश बाक्चा मताइनुड। गेपुकी आं कली माल्नीनी। मिनू गो यहूदी आन कली ‘आं लतीकेमी गेपुकी जाक्ने मचाप्नीनी’ देशो खोदेशो, गो इन कली यो मो देंनुड। यूहन्ना ८:२१

34 मिनू इन कली नक अरेशो लोत्र का पाइनुड। मार लोत्र पाइनुड देशा हना, गेपुकी दाक्मुने। गोम इन कली दाक्शो खोदेशो पा गेपुकी यो दाक्मुने। यूहन्ना १५:१२,१३,१७

35 दाक्मुशो तशा, मुर नेल्लेमी ‘गेपुकी आं शेंसीब ननी’ दे तुइक्नीम” दे येसुमी दैत।

येसु पत्रुस कली लोत्र पशो

मती २६:३३-३५; मर्कूस १४:२९-३१; लुका २२:३१-३४

36 मिनू सिमोन पत्रुसमी येसु कली “प्रभु, ते लाइनीनी?” दे हिल्लो पाप्तु। येसुमी “गो ते लाइनुडा, मुल गे आं नोले खोइक्ने मचाप्नेवे। तन्न नोले खोइक्नेवे” दैत। यूहन्ना २१:१८-१९

37 मिनू पत्रुसमी “प्रभु, मारदे इन कली मुल नोले खोइक्ने मचाप्नुडा डा? इन साइक्चा पुंडसीचा डा साइक्चा पुंडसाक्ड हना यो, गो बेक्नुड” दैत।

38 मिनू येसुमी “मार आं साइक्चा पुंडसीचा डा साइक्चा पुंडसीनेवे? इ नोफा दाइशशा नेनो, भाले ग्रीचा क्येडा डोंइती गेमी खेयप सां आं कली मतुइक्नुड, दे देंनेवे” दे माइक्तु।

## 14

येसु परमप्रभु नु गुम्पाइक्ब लां बाक्ब

1 मिनू येसुमी आ शेंसीब आन कली “इन थुं ग्येत्थ लुकच मपने। परमप्रभु यावे कली थमा सुतीन। आं कली यो थमा सुइय्नीनी।

2 आं आफ बाक्तीकेम शुश मुर आन कली बाक्तीक सेल्शो बाक्नीम। मोपतीके इन बाक्तीक ठीक पथ लाइनुड।

3 मिनू इन बाक्तीक ठीक पशा, लेंशा जाक्शा आं बाक्तीक लाइक्नन्नी। मिनू गो नु काथा बाक्नीनी। यूहन्ना १२:२६; यूहन्ना १७:२४

4 मिनू आं लतीक लां तुइक्नीनी” दैत।

5 मिनू थोमासमी येसु कली “प्रभु, गे ते लाइनीनी? गो मतुइक्नीकी। मिनू लां दोपा तुइक्नीकी?” दैत।

6 मिनू येसुमी “गो थमा नु बॉइचा गेब लां नड। सुइ आन पतीक गेना हना यो आं आफ नु बाक्चा मताइनीम। तन्न आं पतीके रे ला गेना हना यो परमप्रभु यावे नु बाक्चा ताइनीम। यूहन्ना १०:९; मती ११:२७; रोमी ५:१-२; हिब्रू १०:२०

7 गेपुकी आं कली तुइक्ताक्नी हना, आं आफ कली यो तुइक्नीनी। मुल रे गेपुकी आं आफ कली तुइशशा ताइनीनी” दैत।

8 मिनू फिलीपमी “प्रभु, इन आफ आंइ कली कोंइदीन। मिनू ग्येरनीकी” दैत।

9 मिनू येसुमी “गो नु शुश बाक्शा यो, गे आं कली मतुइक्नेवे, फिलीप? सुमी आं कली तयी, मेकोमी आं आफ कली यो ताप्तु। मारदे ‘इन आफ कोंइदीन’ देंनेवे? यूहन्ना १२:४५; हिब्रू १:३

10 गो आं आफ आगामी बाक्नुड। मिनू आं आफ आं आगामी बाक्ब, दे थमा मसुइक्नेवे? आं देशो लोत्र आं के ममाइ, आं आफ आ लोत्र बाक्ब। आं आगामी बाक्शो आं आफोमी गेय पाइब। यूहन्ना १२:४९

11 गो आं आफ आ आगामी बाक्नुड। आं आफ आं आगामी बाक्ब, दे थमा सुतीन। आं लोत्र नेंशा, थमा सुइक्ने मचाप्नीनी हना, आं पशो तशा थमा सुतीन। यूहन्ना १०:२५,३८

12 मिनू नोफा दाइशशा नेनीन, सुमी आं कली थमा सुइक्बा, मेकोमी आं पशो गेय यो पाइब। मिनू आं क्येडा ठेयब गेय पाइब। मारदे हना गो आं आफ आ बाक्तीक लाइनुड। मती २८:१९

13 मिनू गेपुकी आं नेमी मार मार पुंडनीनु, गो गेनन्नी। गो इन पुंडशो गेशा, गो, आं पतीके आं आफ आ सक्ति कोंइनुड। यूहन्ना १५:७; यूहन्ना १६:२४; मर्कूस ११:२४; १यूहन्ना ५:१४-१५

14 आं नेमी मार मार पुंडनीनी, गो मेको गेनन्नी।

परमप्रभु आ सोक्त आ पबर्म शेंशो

15 गेपुकी आं कली दाक्ताक्नी हना, आं अरेशो पाइनीनी। यूहन्ना १५:१०; १यूहन्ना ५:३

16 गेपुकी नु काथा बाक्शा, वारच पाइब का सोइक्चा, दे आं आफ कली पुंडनुड। मेको गेपुकी नु गेना हना यो मप्रोंइथु बाक्ब। यूहन्ना १५:२६; यूहन्ना १६:७

17 मेको वारच पाइब थमा डा सोक्त बाक्ब। आं कली थमा मसुइक्बपुकीमी मेको सोक्त ताक्ने मचाप्नीम। मारदे हना मेकोपुकीमी मेको सोक्त कली मतुइक्नीम। गेपुकी चहिं मेको कली तुइक्नीनी। मारदे हना मेको गेपुकी नु बाक्ब। मिनू इन आगामी बाक्ब। यूहन्ना १६:१३

18 गो इन कली रोम रोइक्च खोदेशो पा मवोइक्नन्नी। इन बाक्तीके जाक्नुड।

19 इच्छा नोले थमा मसुइक्वपुकीमी आं कली लेंशा मताइनीम। गेपुकीमी चहिं आं कली ताइनीनी। मारदे हना गो ब्रोइनुड। मिनु गेपुकी यो ब्रोइनीनी। यूहन्ना २०:२०

20 मिनु आं आफ आ आगाम बाक्नुड। गेपुकी आं आगामी बाक्नीनी। मिनु गो इन आगामी बाक्नुड, दे मेना रुप्शा तुइक्नीनी।

21 सुमी आं अरेशो तुइश्शा पाइबा, मेकोमी आं कली दाक्व। सुमी आं कली दाक्वा, आं आफोमी मेको कली यो दाक्व। मिनु गो मेको कली दाक्वा, आं कली तुइक्वाइसीनुड” दे येसुमी देंत। १यूहन्ना ५:३; यूहन्ना १६:२७

22 मिनु यहूदामी, इस्कारीयोत डा यहूदा चहिं ममाइ, येसु कली “प्रभु, गे आंइ कली तुइक्वाइसीनीनी। थमा मसुइक्व आन कली चहिं मतुइक्वाइसीनीनी, दोपा रुम्सीबा डा?” दे हिल्लो पाप्तु।

23 मिनु येसुमी “सुमी आं कली दाक्वा, मेकोम आं देंशो लोत्र पाइब। आं आफोमी मेको कली दाक्व। मिनु गो नु आं आफ मेको नु बाक्नस्कु। हितोपदेस ८:१७; एफिसी ३:१७

24 आं कली मदाक्वमी चहिं आं देंशो लोत्र यो मपाइब। आं देंशो लोत्र आं के ममाइ, आं कली सोइक्व आं आफ के बाक्व। यूहन्ना ७:१६-१७

25 गेपुकी नु बाक्वा, एको लोत्र पाता।

26 आं नेमी आं आफोमी इन कली वारच पाइब आ सोक्त सोइक्व। मेको सोक्तीमी इन कली मारेइ मारेइ शेंब नु आं देंशो लोत्र नेल्ल फ्रुक्पाइक्व।

येसु आ गेशो थुं नाइक्तीके

27 गो आं थुं नाइश्शो खोदेंशो पा इन थुं नाइक्पाइक्वन्नी। मुरुमी पशो खोदेंशो ममाइ, इन थुं ग्येत्थ लुकच मपने। महिनीने। यूहन्ना १६:३३; फिलिप्पी ४:७

28 “गो लाइनुड। मिनु लेंशा जाक्नुड” दे आं देंशो नेतीनी। गेपुकी आं कली दाक्ताक्यीनी हना, ग्येरसीनी वा। मारदे हना गो आं आफ आ बाक्तीक लाइनुड। आं आफ चहिं आं क्येडा ठेयब बाक्व।

29 नेल्ल दुम्चा क्येडा डोंइती शेंताक्नी। मेको दुम्मेनु, गेपुकी थमा सुइक्व दुम्नीनी।

30 मुल डा मेरे शुश मशेंनन्नी। मारदे हना रागी डा मुर आन कली हुकुम पाइब जाक्व। मेकोमी आं कली ग्राने मचाप्ब। यूहन्ना १२:३१; एफिसी २:२

31 गो आं आफ आ देंशो पाइनुड। मो पडानु, गो आं आफ कली दाक्नुड, दे रागी रागी डा मुरपुकीमी तुइक्वमेक्व। लो बोक्कीन, गाक्व” देंत। यूहन्ना १०:१८

## 15

थमा डा अडगुर बोट

1 मिनु येसुमी “गो थमा डा अडगुर बोट नड। आं आफ चहिं अडगुर कली कोवब बाक्व। भजन संग्रह ८०:९-१२; यसेया ५:१-७; येरमीया २:२१

2 आं आफोमी फल मसिप्ब राशी आन कली खोइश्शा ताइक्व। फल सिप्ब राशी कली मेको क्येडा शुश फल सिप्पाइक्वा, दे मुंइशा वोइक्व। यूहन्ना १३:१०; १पत्रुस १:२३

3 गेपुकी आं देंशो लोत्र टितीके मुंइशीशो राशी खोदेंशो दुम्नीनी।

4 गेपुकी आं आगामी बाक्कीन। मिनु गो इन आगामी बाक्नुड। राशी बोटमी मबाक्त हना, मेको राशी फल सिन्ने मचाप्ब। मोपतीके गेपुकी यो आं आगामी मबाक्तीनी हना, फल सिन्ने मचाप्नीनी।

5 गो अडगुर बोट नड। गेपुकी चहिं राशी ननी। सु आं आगाम बाक्वा, गो मेको आ आगामी बाक्नुड। मिनु मेकोमी शुश फल सिप्ब। तन्न गो रे डोन बाक्तीनी हना, मारेइ पने मचाप्नीनी। २कोरिन्थी २:५-६

6 सु चहिं आं आगामी मबाक्वा, मेको खोइश्शा ताइश्शो राशी खोदेंशो पा सोवब। मिनु मुरपुकीमी मोदेंशो राशी कली खुप्शा मीम चोइनीम।

7 गेपुकी आं आगामी बाक्वा नु आं लोत्र इन आगामी बाक्त हना, इन दाक्वो पुनीन। मिनु इन पुंइशो ताइनीनी। मर्कूस ११:२४

8 गेपुकी आं शेंसीब दुम्शा, शुश फल सिप्ब दुम्नीनी हना, आं आफ आ सक्ति कोंइनीनी। मोपा गेपुकी आं शेंसीब दुम्नीनी। मत्ती ५:१६

दाक्मुचा माल्ब, दे शेंशो

9 आं आफोमी आं कली दाक्व। मिनु आं आफोमी आं कली दाक्वो खोदेंब पा, गो इन कली दाक्ताक्नी। गेपुकी यो ‘गो इन कली दाक्नुड’ दे तुइश्शा बाक्कीन।

10 दोपा गो आं आफोमी देंशो लोत्र टिशा, आं आफ नु दाक्मुइनस्कु, मोपा गेपुकी यो आं देंशो लोत्र टीतीनी हना, गो नु दाक्मुशा बाक्नय।

11 इन कली एको लोत्र मारदे पाता देशा हना, आं ग्येरशो थुं इन थुंमी लील। मिनु इन थुं ग्येरसीशा बाक्व, दे एको लोत्र पाता। यूहन्ना १७:१३

12 गो इन कली दाक्वो खोदेंशो पा गेपुकी यो दाक्मुने, दे आं अरेशो बाक्व। यूहन्ना १३:३४

13 सु आ वारच आ पर्वम साइक्वा पुंइसीबा, मेको नेल्ल क्येडा ठेयब दाक्व वारच बाक्व। यूहन्ना १०:११; १यूहन्ना ३:१६

- 14 गेपुकी आं देशो पना पन बाक्तीनी हना, आं वारच ननी। यूहन्ना ८:३१; मत्ती १२:५०
- 15 मुल रे गो इन कली वाइल मदेनुड। मारदे हना वाइल आ ठेयब मरूमि मार गेय पचशो बाक्मे, मेको वाइलम मतुइक्व। गो चहिं इन कली आं आफ आ देशो नेल्ल शेंताक्न्नी। मोपतीके इन कली वारच देनुड।
- 16 गेपुकीमी आं कली मयोव्रयीनी। तन्न गेपुकी लशा फल सिशशा, इन सिशशो फल लील, दे गो इन कली योव्रतन्नी। मिनु गेपुकीमी आं आफ कली आं नेमी इन दाक्शो पुंडनीनु, आं आफोमी इन कली गोवल, दे वोइक्त्न्नी।
- 17 गो इन कली 'दाक्मुने' दे माइक्त्न्नी" दैत।

थमा सुइक्व श्येत जाइनीम

- 18 मिनु "रागी डा मुरपुकीमी इन कली मदाक्नीमी। इन कली मदाक्चा क्येडा डोंइती आं कली मदाक्नीम, दे तुइक्नीनी। यूहन्ना ७:७
- 19 गेपुकी रागी डा मुर खोदेशो बाक्तीनी हना, रागी डा मुरपुकीमी इन कली दाक्नीमी। तन्न गे रागी डा मुर मननी। गो इन कली रागी डा मुरपुकी रे योव्रतन्नी। मोपतीके रागी डा मुरपुकीमी इन कली मदाक्नीम। यूहन्ना १७:१४; १यूहन्ना ४:४-५
- 20 मिनु डोंइती गो इन कली 'होव्रप क्येडा वाइली ठेयब ममाइ' दैती। मिनु आं देशो मिम्तीन। मुरपुकीमी आं कली श्येत गेतीमी हना, इन कली यो श्येत गेनीमी। मुरपुकीमी दोपा आं देशो लोव्र नेंशा टीमे, मोपा इन देशो लोव्र यो टीनीम। यूहन्ना १३:१६; मत्ती १०:२४-२५
- 21 मुरपुकीमी आं नोले खोइक्व इन कली श्येत गेनीम। मारदे हना आं कली सोइक्व कली मतुइक्नीम। यूहन्ना १६:३
- 22 गो रागीमी जाक्शा, मेको मुर आन कली शेंताक्डमी। आं लोव्र तुइशशा यो मटीमे। मोपतीके मेकोपुकी पाप राइनीमी। यूहन्ना ९:४१
- 23 सुमी आं कली मदाक्बा, मेकोमी आं आफ कली यो मदाक्ब। लूका १०:३६
- 24 गो मुर आन कली छक लाक्चा डा गेय कोंइताक्डमी। आं क्येडा डोंइती सुइमी आं खोदेशो गेय मकोंइदे। मेको गेय कोंइशा यो मुरपुकीमी आं आफ नु गो निम्फा आंस कली मदाक्नीम।
- 25 परमप्रभु यावेमी ब्रेक्पाइशशो लोव्र थमा दुम्चा कली आं कली मदाक्नीम। मार ब्रेक्पाइशशो बाक्त देशा हना 'मेकोपुकीमी आं कली मोशा यो मदाक्नीम' दे ब्रेक्शो बाक्त। भजन संग्रह ६९:४
- 26 मिनु वारच पाइब का जाक्ब। गो मेको कली आफ आ बाक्तीक रे सोइक्नुड। मेको परमप्रभु यावे रे जाक्शो थमा डा सोक्त बाक्ब। मेकोमी आं पर्वम शेंब। यूहन्ना १४:१६,२६; लूका २४:४९
- 27 मिनु गेपुकी यो आं सांकछी दुम्शा, मुर आन कली आं पर्वम शेंनीनी। मारदे हना गेपुकी डोंइती रे गो नु बाक्शो ननी" दैत। प्रेरित १:८, २१-२२; प्रेरित ५:३२

## 16

- 1 मिनु येसुमी "गो एको लोव्र नेल्ल मारदे शेंताक्न्नी देशा हना, थमा सुइक्तीक रे नोले मशोंइसीन, दे शेंताक्न्नी।
- 2 मुरपुकीमी इन कली युम्तीक खिं रे तिल्लीम। थमा, इक्का नोले इन कली साइक्बपुकीमी 'गो परमप्रभु यावे आ दाक्शो पना पन बाक्ती' दे मिम्नीम। मत्ती १०:१७,२२; मत्ती २४:९
- 3 मोदेशो पाइनीम। मारदे हना आं आफ नु आं कली मतुइक्नीम। यूहन्ना १५:२३
- 4 मिनु गो मेको नेल्ल इन कली शेंताक्न्नी। आं देशो दुम्मेनु, गो इन कली डोंइती देशो मिम्तीन। डोंइती गो एको लोव्र इन कली मनैपाइक्न्नी। मारदे हना गेपुकी नु काथा बाक्ती।

परमप्रभु आ सोक्त आ गेय

- 5 मुल चहिं आं कली रागीमी सोइक्व आ बाक्तीकेमी लाइनुड। गो लती हना यो, गेपुकी सुइमी 'ते लाइनीनी?' दे हिल्लो मपाइनीनी।
- 6 तन्न आं देशो नेंशा, इन थुं खाइक्ब।
- 7 नोफा दाइशशा नेनीन, आं लशो इन कली रिम्शो दुम्ब। गो मलती हना, थमा सुइक्व आन कली वारच पाइब मजाक्ब। गो लती हना, मेको कली सोइक्नुड। यूहन्ना १४:१६,२६
- 8 मिनु मेको जाक्शा, रागी डा मुर आन कली पाप आ पर्वम नु परमप्रभु यावे आ डोंइती मार ठीक बाक्ब नु परमप्रभु यावे आ निसाफ पतीक दोदेशो बाक्बा, दे शेंब।
- 9 मेको आन पाप मार बाक्त देशा हना, आं कली थमा मसुइशशो बाक्नीम। यूहन्ना १५:२२,२४
- 10 परमप्रभु यावे आ डोंइती ठीक दुम्शा बाक्चा आ पर्वम मार शेंब देशा हना, गो आं आफ आ बाक्तीक लाइनुड। मो दुम्तीके गेपुकीमी आं कली मताइनीनी, दे शेंब। प्रेरित ५:३१; रोमी ४:२५
- 11 मिनु निसाफ पचा आ पर्वम मार शेंब देशा हना, परमप्रभु यावेमी रागी डा मुर आन कली हुकुम पाइब सैतान कली निसाफ पने थुम्तु, दे शेंब। यूहन्ना १२:३१
- 12 मिनु इन कली शेंतीक लोव्र शुश लीब। तन्न मुल फाल्ने मचाप्नीनी। १कोरिन्थी ३:१
- 13 मिनु थमा डा सोक्त जाक्शा, इन कली थमा लां कोंइशा शेंब। मेकोमी आम मिम्शो मशेंब। तन्न मार मार नेंबा, मेकोन शेंब। नोले मार मार दुम्बा, मेको यो शेंब। यूहन्ना १४:२६; १यूहन्ना २:२७
- 14 आं सक्ति कोंइब। गो मार देनुडा, मेको इन कली शेंब।

15 आं आफ आ सक्ति नु आं सक्ति कान बाक्ब। आं आफ नु मार मार बाक्मे, मेको आं के नम। मिनु परमप्रभु यावे आ सोक्तीमी आं लोत्र नेंशा, इन कली शेंब। यूहन्ना ३:३५; यूहन्ना १७:१०

‘परमप्रभु आ बाक्तीक लाइनुड’ देशो

16 इच्का नाक्त नोले आं कली मताइनीनी। मिनु इच्का नोले ताइनीनी” दे येसुमी आ शेंसीब आन कली माइक्तीमी। यूहन्ना १४:१९

17 आ शेंसीब का निक्शीमी “इच्का नाक्त नोले आं कली मताइनीनी। मिनु लेंशा इच्का नाक्त नोले ताइनीनी। मिनु गो आं आफ आ बाक्तीक लाइनुड देत। एको लोत्र मार में” देमुक्तेकम।

18 मिनु “इच्का नोले नाक्त देशो लोत्र, मार में, आ देशो लोत्र मरुबय” देमुक्तेकम।

19 मिनु येसुमी आ कली हिल्लो पाइनीमी, दे तुइक्ताक्व। मिनु मेको आन कली “इच्का नाक्त नोले आं कली मताइनीनी। मिनु लेंशा इच्का नाक्त नोले ताइनीनी देशो लोत्र आ पर्वम मार लोत्र पमुनी?

20 नोफा दाइश्शा नेनीन, गेपुकी डाक्शा, हिशेक पाइनीनी। रागी डा मुरपुकी चहिं ग्येरसीनीम। इन थुं खाइश्शो बाक्नीनी। तन्न थुं खाइश्शो साशा ग्येरनीनी। मर्कुस १६:१०

21 मीश मुरुमी आल थिचावानु ‘आं थिची जाक्त’ दे हिंशा, श्येत जाइब। तन्न आल थिशा ‘आल का जरमेसाक्व’ दे ग्येरसीब। आ डोंइती डा हिंशो नु श्येत ममिम्ब। यसैया २६:१७

22 मिनु मेको खोदेशो पा गेपुकी मुल थुं खाइश्शो बाक्नीनी। तन्न गो इन कली लेंशा तडानु, गेपुकी थमा पा ग्येरसीनीनी। मिनु इन ग्येरसीशो सुइमी क्याम्ने मचाप्नीम।

23 मेना गेपुकी आं कली मारेइ हिल्लो मपाइनीनी। नोफा दाइश्शा नेनीन, गे आं नेमी आं आफ कली मार मार पुंइनीनु, आं आफोमी इन कली गेब। यूहन्ना १४:१३-१४

24 मुल सम्म गेपुकीमी आं नेमी मारेइ मपुंइनी। पुनीन, मिनु इन पुंइशो ताइनीनी। मेको तशा, गेपुकी थमा पा ग्येरसीनीनी।

25 गो इन कली कथा खोदेशो पा शेंताक्नीनी। नोले कथा पा मशेंनन्नी। मेना आं आफ आ पर्वम मारेइ मखुइक्थु शेंनन्नी। यूहन्ना १५:११

26 आं नेमी पुंइनीनी। मिनु गो ‘आं आफ कली इन पर्वम पुंइनुड’ दे इन कली मदेनुड।

27 आं आफोमी इन कली दाक्ब। मारेदे हना आं कली दाक्ताक्नीनी। गो आं परमप्रभु यावे रे जाक्शो नड, दे थमा सुइक्तीनी। यूहन्ना १४:२१

28 गो आं आफ रे रागीमी जाक्ती। लेंशा रागी रे पा, आं आफ आ बाक्तीक लाइनुड” देत।

29 मिनु आ शेंसीबपुकीमी येसु कली “मुल गे कथा पा मशेंथु, मारेइ मखुइक्थु शेंनीनी।

30 गे नेल्ल तुइक्नीनी, दे गोपुकी मुल तुइक्ताक्व। मोपतीके इन कली शेंब ममाल्ब। गे परमप्रभु यावे आ बाक्तीक रे यिशो ननी, दे थमा सुइक्ताक” देतेक्म।

31 मिनु येसुमी “मार, गे मुल थमा सुइक्नीनी, मिनु?

32 नोले नेल्ल ब्राशा, इन खिं खिं लशा, आं कली प्रॉइनीनी। मिनु गो का ला बाक्नुड। तन्न गो का ला मदुम्नुड। मारेदे हना आं आफ गो नु बाक्ब। जकरिया १३:७; मती २६:३१

33 आं कली मिम्शा इन थुं नाइश्शा बाक्कीन, दे एको लोत्र शेंताक्नीनी। गेपुकी रागीम बाक्शा, श्येत जाइनीनी। तन्न थुं बारपाइश्शा ग्येरसीने। गो रागी कली ग्राती” देत। यूहन्ना १४:२७; रोमी ५:१; १यूहन्ना ५:४

## 17

येसुम आ आफ कली पुंइशो लोत्र

1 मिनु येसुमी मेको लोत्र पने थुम्शा, सरीड गे कोइशा “आं आफ, आं लची जाक्त, इन सक्ति गेयीनी। मिनु गो इन सक्ति कोइनुड।

2 गे आं कली मुर नेल्ल आन कली अधिकार पचा गेतीनी। मिनु आं कली गेशो मुर नेल्ल आन कली गेना हना यो ब्रॉइशा बाक्चा गेनुडमी। मती ११:२७

3 गेना हना यो गे नु ब्रॉइशा बाक्चा मार बाक्ब देशो हना, सुमी इन कली गे ला थमा परमप्रभु यावे बाक्नीनी नु गो, इन सोइश्शो येसु खीस्त नड, दे तुइक्नीमी, मेको ला गेना हना यो गे नु ब्रॉइशा बाक्चा ताइनीम। १यूहन्ना ५:२०

4 रागीम बाक्शा, इन पपाइश्शो गेय थुम्शा, इन सक्ति कोइताक्डमी।

5 आं आफ, रागी सेल्चा क्येडा डोंइती गे नु इन छेडछेडमी बाक्ती। मुल लेंशा इन बाक्तीक जाक्चा चिक्ताक्व। डोंइती डा खोदेशो पा गे नु इन छेडछेडमी बाक्चा गेयीनी। यूहन्ना १:१; फिलिप्पी २:६

6 गेमी रागी रे प्रॉइशो मुरपुकी गेतीनी। मेको आन कली इन नें तुइक्पाइक्तामी। मेको मुरपुकी इन के बाक्तेक्म। मिनु गे आं कली गेतीनी। मेकोपुकीमी इन लोत्र टिना टिन बाक्नीम।

7 गे आं कली मार मार गेनी, मेको नेल्ल इन के बाक्ब, दे मेकोपुकीमी मुल तुइक्नीम।

8 गे आं कली शेंताक्यीनी। मिनु इन शेंशो लोत्र मेको आन कली शेंताक्डमी। मिनु थमा सुइक्तेक्म। गो इन बाक्तीक रे जाक्शो नड, दे थमा पा तुइक्नीम। मेकोपुकीमी आं कली सोइक्ब, गे ननी, दे थमा सुइक्तेक्म। यूहन्ना १६:३०

9 मिनु गो मेको आन पर्वमी इन कली पुंइनुड। रागी डा मुर आन पर्वम मपुंइनुड। आं कली गेशो मुर आन पर्वम पुंइनुड। मारेदे हना मेकोपुकी इन के नम। यूहन्ना ६:३७,४४

- 10 आं मुर नेल्ल इन के नम। इन के आं के नम। मेकोपुकीमी आं सक्ति कोइनीम। यूहन्ना १६:१५
- 11 मुल गो रागीमी शुश नाक्त मबाक्नुड। गे का ला बाक्शो आं आफ, इन बाक्तीक जाक्चशो बाक्नुड। तन्न मेकोपुकी रागीमी बाक्नीम। आं आफ, आं कली गेशो मुर इन नें डा सक्तिमी रिम्शो कोव्रशा वोतीन। दोपा गो गे नु थुं का डा बाक्डा, मोपा मेकोपुकी यो थुं का दुम्शा बाक्मल, दे सक्ति गेने।
- 12 गो आं कली गेशो मुरपुकी नु बाक्डानु, इन नें डा सक्तिमी रिम्शो कोव्रशा वोडक्तामी। सुड मजाम्म। इन ब्रेक्पाइश्शो लोत्र थमा दुम्चा, दे का चहिं जाम्शा, नरक लाडब दुम्त। यूहन्ना ६:३९; भजन संग्रह ४१:१०
- 13 मुल गो इन बाक्तीक जाक्चशो बाक्नुड। इन लोत्र रागीमी शेंताक्डमी। मारदे शेंताक्डमी देशा हना, आं ग्येशो खोदेशो पा मेको यो ग्येशीशा बाक्मल, दे शेंताक्डमी। यूहन्ना १५:११
- 14 गो मेको आन कली इन देशो लोत्र शेंताक्डमी। मिनु रागी डा मुरपुकीमी मेको आन कली श्येत गेम्तेक्म। मारदे हना रागी डा मनम। गो यो रागी डा मनड। यूहन्ना १५:१९
- 15 मेको आन कली रागी रे प्रोनीन, दे इन कली मपुंडनुड। तन्न मेको आन कली सैतान रे प्रोनीन, दे पुंडनुड। मत्ती ६:१३; रथिस्सलोनिकी ३:३
- 16 गो रागी डा मनड। मिनु आं खोदेशो पा मेकोपुकी यो रागी डा मनम।
- 17 मेको आन कली इन थमा पतीकेमी खुमीन। इन थमा पतीक चहिं इन लोत्र बाक्ब। भजन संग्रह ११०:१६०
- 18 गेमी आं कली रागीमी सोइश्शो खोदेशो पा, गो यो मेको आन कली रागी रागीम सोइक्ताक्डमी। यूहन्ना २०:२१
- 19 मेको आन पबंम गो इन कली जिम्मा गेसीनुड। मेकोपुकी यो थमा पतीकेमी खुम्शो मुर दुम्शा बाक्मल। हिबू १०:१०
- 20 गो मेको आन पबंम ला इन कली मपुंडनुड। तन्न मेको आन शेंशो लोत्र रे आं कली थमा सुइक्ब दुम्ब आन पबंम यो पुंडनुड। रोमी १०:१७
- 21 मार पुंडनुड देशा हना, मेको नेल्ल थुं का डा दुम्मल। आं आफ, गे आं आगामी बाक्शो नु गो इन आगामी बाक्शो खोदेशो पा मेकोपुकी इस आगामी बाक्मल, दे पुंडनुड। मो दुम्त हना, रागी डा मुरपुकीमी गेमी आं कली सोइक्ताक्नी, दे थमा सुइक्नीम। गलाती ३:२८
- 22 गेमी आं कली गेशो सक्ति मेको आन कली गेतामी। मारदे गेतामी देशा हना, गो निक्शी थुं का डा दुम्शो खोदेशो पा, मेकोपुकी यो गे नु थुं का डा दुम्मल, दे मेको सक्ति गेतामी। प्रेरित ४:३२
- 23 गो मेको आन आगामी बाक्नुड। गे आं आगामी बाक्नीनी। मो पा बाक्शोनु, मेकोपुकी गे नु गो खोदेशो पा का दुम्नीम। मो दुम्शो तशा, रागी डा मुरपुकीमी गे आं कली सोइक्ताक्नी। मिनु गेमी आं कली दाक्ताक्यीनी। मोपा गेमी आं कली दाक्शो बुदी मेको आन कली यो दाक्ताक्नी, दे तुइक्तेक्म। १कोरिन्थी ६:१७
- 24 आं आफ, आं कली गेशो मुरपुकी गो नु काथा बाक्मल, दे पुंडनुड। गे रागी सेल्चा डोइती आं कली दाक्शा, इन सक्ति आं कली गेतीनी। मिनु मेकोपुकीमी यो आं सक्ति तामेक्म। यूहन्ना १२:२६; हितोपदेस ८:२२-३१
- 25 आं आफ, गे नेल्ल रिम्शो नु ठीक पाइब बाक्नीनी। रागी डा मुरपुकीमी इन कली मतुइक्नीम। गो चहिं इन कली तुइक्नुड। मिनु आं शेंसीबपुकीमी गे आं कली सोइक्ताक्यीनी, दे तुइक्नीम।
- 26 गो मेको आन कली इन नें तुइक्पाइक्तामी। मिनु लेंशा तुइक्पाइक्नुडमी। मारदे इन नें तुइक्पाइक्नुडमी देशा हना, गेमी आं कली दाक्शो खोदेशो पा इन दाक्तीके मेको आन आगामी बाक्ल। मिनु गो मेको नु आन आगाम बाक्डल” दे येसुमी परमप्रभु यावे कली पुंडतु।

## 18

यहूदीपुकीमी येसु कली ग्याइश्शो

यूहन्ना १३:-; मत्ती २६:-२८:-; मर्कूस १४:-१६:-; लूका २२:-२४:-

- 1 मिनु येसुमी परमप्रभु यावे नु मेको लोत्र पने थुम्शा, आ शेंसीबपुकी नु किद्रोन खोलसा आइक्वी हांबु लाम्तेक्म। मेकेर फल फुल रवा बाक्शो रिम्शो बाक्तीक बाक्त। मिनु येसु आ शेंसीबपुकी नु मेकेर ओत्रतेक्म।
- 2 डोइती मेकेर येसु आ शेंसीबपुकी नु शुश ग्रुम्तीके बाक्त। मोपतीके येसु कली ग्याइक्ब आन कली वारच पाइब यहूदामी यो “मेकेर लाइनीम” दे तुइश्शो बाक्त। लूका २१:३७
- 3 मिनु यहूदामी ठेयब चढ़ेब नु फरिसी आन सोइश्शो सिपाहीपुकी नु सिपाही आन ठेयब मुर आन कली येसु नु आ शेंसीब आन बाक्तीक चाक्तु। मेकोपुकी तोव्रशी नु लालटिन दाशा, या कुरशा जाक्तेक्म।
- 4 मिनु येसुमी “आं कली ग्याइक्थ जाक्तेक्म” दे तुइश्शा, मेको आन नेक्था लशा “सु कली माल्नी?” दे हिल्लो पाप्तु।
- 5 मिनु मेकोपुकीमी “नासरथ डा येसु कली माल्तक” दैतेक्म। मिनु येसुमी “गो नड” दे माइक्तीमी। येसु कली साइक्ब आन कली वारच पाइब यहूदा येसु कली ग्याइक्थ जाक्ब नु बाक्त।
- 6 मिनु येसुमी “गो नड” दैमेनु, मेको नेल्ल नोले गे दिल्ला गोल्तेक्म।
- 7 मिनु येसुमी लेंशा “सु कली माल्नी?” दे हिल्लो पवानु “नासरथ डा येसु कली माल्तक” दैतेक्म।
- 8 मिनु येसुमी “गो नड, दैती। आं कली माल्तीनी हना, अरु आन कली लचा गेने” दे माइक्तीमी।
- 9 डोइती येसुमी परमप्रभु यावेमी गेशो मुर आन पबंम “गो इन गेशो मुर सुइ मसाम्नुडमी” देशो लोत्र थमा दुम्चा कली मेको लोत्र पाप्तु। यूहन्ना १७:१२

10 सिमोन पत्रुसमी तरवार कुरशो बाक्त। मिनु मेकोमी तरवार ग्रि शोडशशा, ठेयब चढेब आ वाडल आ नोफा दी खोडक्तु। मेको वाडली आ नें माल्कस बाक्त।

11 येसुमी “इ या खोतीमी पिप्तो। गो आं आफोमी देशो श्येत मजडल, दे मिन्मीनी? गो मेको श्येत जचा माल्नुड” दैत।

येसु हन्नास नु काइयाफास आस डोंइती

12 मिनु सिपाहीपुकी, आन कप्तान नु यहूदी आन ठेयब मुरपुकीमी येसु कली ग्याइशशा फ्रेंताकम।

13 मेको बर्स डा नेल्ल क्येडा ठेयब चढेब काइयाफास माइशशा बाक्माक्त। मेको आ शिउ हन्नास माइशशा बाक्माक्त। मिनु ग्याइकबपुकीमी येसु कली डोंइती हन्नास आ बाक्तीकेम लाइक्तेकम।

14 डोंइती काइयाफासमी यहूदी आन कली “मुर नेल्ल आन साइक्या डा मुर का कली साइक्या रिम्शो दुम्ब” देशो बाक्माक्त। लूका ३:१-२; यूहन्ना ११:४९-५०

येसुम पत्रुस आ पर्वम देशो थमा दुम्शो

15 मिनु सिमोन पत्रुस येसु आ नोले खोडक्तु। अर्को शेंसीब कामी यो नोले खोडक्तु। नेल्ल क्येडा ठेयब चढेबमी मेको अर्को शेंसीब कली तुइशशा बाक्त। मोपतीके मेको शेंसीब यो येसु नु नेल्ल क्येडा ठेयब चढेब आ खिं डा लाडगामी ओव्रत।

16 पत्रुस चहिं लाप्यो उड बाक्माक्त। नेल्ल क्येडा ठेयब चढेब कली तुइकब अर्को शेंसीबमी लाप्यो कोव्रब मीश मुर कली लोव्र पशा गूत। पत्रुस कली खिं डा लाडगामी ओडताकव।

17 लाप्यो कोव्रब मीश मुरुमी पत्रुस कली तशा “गे यो मेको मुर आ शेंसीब का मनवे डा?” दैमेनु, पत्रुसमी “गो मनड” दैत

18 ग्यू पशो बाक्त। मोपतीके वाडलपुकी नु मेकेर बाक्ब मुरपुकीमी मी मुइशशा, एर ओंथ बाक्शा, मी थेरना थेरन बाक्तेकम। पत्रुस यो मी थेरशो बाक्त।

19 मेना नेल्ल क्येडा ठेयब चढेबमी येसु कली “इ शेंसीब आन कली मार शेंनेवे?” दे हिल्लो पाप्तु।

20 मिनु येसुमी “गो मुर नेल्ल आन कली लोव्र पाता। गुम्टीक खिंमी नु परमप्रभु यावे आ खिंमी शुश यहूदी गुम्टीकेमी शेंताकडमी। खुइशशा मारिड लोव्र मपड। यूहन्ना ७:१४,२६

21 मारदे हिल्लो पयीनी? आं शेंशो लोव्र नेंब आन कली हिल्लो पने। मेकोपुकीमी आं शेंशो लोव्र तुइकनीम” दैत।

22 मिनु मो दैमेनु, येसु आ नेक्था बाक्ब मुरुमी येसु कली चोव्रचो राप्शा “गे नेल्ल क्येडा ठेयब चढेब कली मोदेशो लोव्र पाइनेवे?” दे हुइक्ताकव।

23 येसुमी “गो मरिम्शो लोव्र पाता हना, आं कली देनो। तन्न गो ठीक लोव्र पाता हना, मारदे राप्पी?” दैत।

24 मिनु हन्नासमी येसु कली फ्रेंशो मपुइकथु, नेल्ल क्येडा ठेयब चढेब काइयाफास आ बाक्तीकेमी सोइक्ताकव।

25 मेना सिमोन पत्रुसमी थेरना थेरन बाक्शो बाक्त। मिनु मेकेर बाक्बपुकीमी पत्रुस कली “गे यो मेको मुर आ शेंसीब का मनवे डा?” दैमानु “गो मनड” दैत।

26 मेकेर नेल्ल क्येडा ठेयब चढेब आ वाडल का यो बाक्त। पत्रुसमी नोफा क्योरशो मुर आ खिं डा मुर का बाक्त। मेकोमी पत्रुस कली “गो इ कली मेको मुर नु फल फुल रूमी ताइतन, शां” दैत।

27 मिनु पत्रुसमी लेंशा “गो मनड” दैत। मो दैमेनु, भाले ग्रीत।

येसुम पिलातस नु लोव्र पशो

28 मिनु नोले मेको ग्याइकबपुकीमी येसु कली काइयाफास आ बाक्तीके र पिलातस आ खिं गे लाइक्तेकम। मेना नां सोव्रचशो बाक्माक्त। मिनु मेकोपुकी पाससा चाड डा भोज जचा कली ठीक दुम्शा बाक्शो बाक्तेकम। मोपतीके मेकोपुकी पिलातस रोमी दुम्शो आ पर्वम मथिचा डा बाक्त, दे आ खिं आगा मओव्रम।

29 मो दुम्टीके पिलातस लाडगा गूशा, मेको आन कली “एको मुर कली मार दोस गेनीनी?” दे हिल्लो पाप्तु।

30 मिनु मेकोपुकीमी “एको मुर मरिम्शो मबाक्शो हना, गोपुकीमी एको कली ग्याइशशा, इन बाक्तीकेमी मारदे चाक्नीकी डा?” दैतेकम।

31 मिनु पिलातसमी “एको कली लतीन। मिनु इन ऐन कानुनमी ब्रेक्शो कोव्रशा, निसाफ पने” दे माइक्तीमी। मिनु मेको यहूदीपुकीमी पिलातस कली “गो आंड कली सुइ मुर साइक्या मगारब” दैतेकम। यूहन्ना १९:६-७

32 येसुमी आ डोंइती देशो लोव्र “दोपा बेक्चा माल्नुडा” देशो, थमा दुम्चा कली मोदेशो दुम्ब। यूहन्ना १२:३२-३३; मत्ती २०:१९

33 मिनु पिलातस आ खिं ओव्रशा, येसु कली आगामी ब्रेशशा “गे यहूदी आन पिप ननी?” दे हिल्लो पाप्तु।

34 येसुमी “गे आंमा मिम्शा मो देनी देय मुरुमी दैमा?” दे हिल्लो पाप्तु।

35 मिनु पिलातसमी “गो यहूदी मनड। इन रागी डा मुरपुकी नु ठेयब चढेबपुकीमी इन कली निसाफ पचा कली आं कली जिम्मा गेतीमी। गे मार पनी?” दे हिल्लो पाप्तु।

36 येसुमी “गो एको रागी डा पिप मनड। गो रागी डा पिप नड हना, आं वारचपुकीमी राम्शी तोशा, ओपा यहूदीपुकीमी आं कली मग्याइक्कीमी वा। तन्न गो एको रागी डा पिप मनड” दे येसुमी दैत।

37 पिलातसमी “मिनु गे पिपन ननी?” दे हिल्लो पाप्तु। मिनु येसुमी “गो पिप नड, दे गे आंमा देतीनी। मिनु थमा मार बाक्बा, दे कोइचा कली रागीम जरमेशा जाक्ती। सु थमामी बाक्बा, मेकोमी आं सेंदा नेंब” दैत। १तिमोथी ६:१३



38 मिनू पिलातसमी “थमा मार में?” दैत। मिनू मेको देंम नोले पिलातस लेंशा लाडगा गूशा, यहूदी आन कली “एको मुर मरिम्शो पाइब, दे मसुइक्नुड।

39 मिनू पास्सा चाडमी मुर का प्रॉइतीकेमी गो एको यहूदी आन पिप प्रॉइशा सोइक्नुड। गेपुकी मार देंनीनी?” दे हिल्लो पाप्तीमी।

40 मेकोपुकीमी चहिं “एको कली मप्रॉइचा। तन्न बारब्बा कली प्रॉइचा” दे ग्रीतेक्म। बारब्बा चहिं खुड बाक्माक्त।

## 19

“येसु कली साइक्चा” दे ग्रीशो

1 मिनू पिलातसमी येसु कली युक्पाइक्तु।

2 आ सिपाहीपुकीमी चू के सिरपेच सेल्शा, येसु आ पियामी गुप्ताक्म। मिनू येसु कली पिप आ फेक्तीक वा फेक्ताक्म।

3 मिनू आ नेक्था जाक्शा “जय, यहूदी आन पिप” देशा, आ चोत्रचो राप्तेक्म।

4 मिनू पिलातस लेंशा, खिं रे गूशा, लाडगामी रिम्शा बाक्शो आन कली “कोत्रडीन, गो एको कली गुंडशा, गेपुकी नु गुप्ताइक्नुड। मारदे हना मरिम्शो पाइब मसुइक्नुड, दे तुइक्तीन” दे माइक्तीमी।

5 मिनू येसु चू के सिरपेच गुप्शा, पिप आ फेक्तीक वा फेक्शा गूत। पिलातसमी “लो, एको मुर कली कोत्रडीन” दैत।

6 मिनू ठेयब चढ़ेब नु यहूदी आन ठेयब मुरपुकीमी “शीमी कांटी थोक्शा क्याइश्शा सतीन। शीमी कांटी थोक्शा क्याइश्शा सतीन” देंना देंन ग्रीतेक्म। मिनू पिलातसमी “गो एको कली मरिम्शो पाइब मसुइक्नुड। मोपतीके गेपुकी एको कली लाइश्शा, शीमी कांटी थोक्शा क्याइश्शा सतीन” दे माइक्तीमी।

7 यहूदीपुकीमी “आंइ ऐन कानुन बाक्ब। मिनू मेको ऐन कानुनमी ब्रेक्शो खोदेशो पा एको मुर बेक्चा माल्ब। मारदे हना एकोमी आंमा कली परमप्रभु यावे आ तौ सेल्सीशो बाक्त” दैतेक्म। यूहन्ना १०:३३; लेवी २४:१६

8 मिनू पिलातसमी मोदेशो नेंशा, डोंइती क्येडा हित।

9 मिनू येसु कली लेंशा खिं ओंइशा “गे ते रे जाक्शो ननी?” दे हिल्लो पाप्तु। मिनू येसुमी मारेइ लोत्र मलेत्त।

10 मोपतीके पिलातसमी “गे आं कली लोत्र मपाइनीनी? इन कली प्रॉइशा सोइक्चा नु शीमी कांटी थोक्शा क्याइश्शा साइक्चा गो नु निम्फा अधिकार बाक्ब, दे मतुइक्नीनी?” दे माइक्तु।

11 मिनू येसुमी “इन के अधिकार बाक्ब। इन कली गेशो अधिकार चहिं इर रे गेशो बाक्ब। मोपतीके इन मरिम्शो पशो क्येडा आं कली साइक्चा कली वारच पाइब आ मरिम्शो पशो ठेयब बाक्ब” दैत।

12 मिनू येसु आ लोत्र नेंशा नोले पिलातसमी येसु कली प्रॉइशा सोइक्चा माल्तु। तन्न मेको यहूदीपुकीमी पिलातस कली “गे एको कली प्रॉइशा सोइक्ताक्नी हना, गे रोमी आन पिप सिजर आ वारच मननी। मिनू सुमी ‘गो पिप नड’ देंबा, मेको सिजर आ जोरी सत्रु दुम्ब” दैतेक्म। प्रेरित १७:७

येसु कली यहूदी आन गुइमी गेशो

13 मिनू यहूदी आन लोत्र नेंशा, पिलातसमी येसु कली खिं रे गुंडताक्व। मिनू पिलातस निसाफ पाइब आ नित्तीकेमी निस्साक्व। मेको निसाफ नित्तीक आ खपीमी फुल्लु ब्रशो बाक्तेक्म। मेको कली हिबू लोत्रमी गाब्बाथा देंनीम।

14 मेना नां सोक्चा चिक्शो बाक्त। मेको नाक्ती चहिं पास्सा चाड डा भोज सातीक नाक्ती बाक्त। मिनू पिलातसमी यहूदी आन कली “इन पिप कली कोत्रडीन” दैत।

15 मिनू यहूदीपुकीमी “सतीन, सतीन, एको कली शीमी क्येप्शा कांटी थोक्तीन” दे ग्रीतेक्म। पिलातसमी “गो इन पिप कली शीमी क्येप्शा कांटी थोक्नुडा डा?” दे माइक्तीमी। मिनू ठेयब चढ़ेबपुकीमी “गो आंइ के सिजर का ला पिप बाक्ब” दैतेक्म। यूहन्ना १८:३७

16 पिलातसमी “येसु कली शीमी क्येप्शा कांटी थोक्तीन” दे मेको आन कली जिम्मा गेप्तु।

येसु कली शीम केप्शा कांटी थोक्शो

17 मिनू नोले यहूदीपुकीमी येसु कली लाइक्तेक्म। मिनू आ कली कांटी थोक्शा क्याइश्शा साइक्तीक शी आंमा कुरपाइश्शा, खप्परे माइक्तीकेमी लाइक्तेक्म। हिबू लोत्रमी मेको कली गोल्था देंनीम।

18 मेकेर जाक्दीश्शा, येसु कली शीमी केप्शा कांटी थोक्ताक्म। मोदेशो पा मुर निक्शी आस कली यो शीमी केप्शा कांटी थोक्ताक्म। मिनू येसु कली कांटी थोक्शो शी मेको आस दातेमी खुक्तेक्म।

19 मिनू पिलातसमी “नासरथ डा येसु, यहूदी आन पिप” दे ब्रेक्स ब्रेक्शा, येसु आ शीमी केप्शा चोइक्तु।

20 येसु कली साइक्तीक ठांउ यरूसलेम सहर आ नेक्था बाक्त। मिनू शुश यहूदीपुकीमी मेको ब्रेक्शो ब्रेक्स पढेम्तेक्म। मेको ब्रेक्स चहिं हिबू, रोमी नु ग्रीक लोत्रमी ब्रेक्शो बाक्त।

21 मिनू यहूदी आन ठेयब चढ़ेबपुकीमी पिलातस कली “यहूदी आन पिप ममाइ, तन्न ‘गो यहूदी आन पिप नड’ दैत, दे ब्रेक्तीन” दे माइक्तेक्म।

22 मिनू पिलातसमी “गो मार ब्रेक्तु, मेकोन ठीक ब्रेक्ताक्ड” दे माइक्तीमी।

23 सिपाहीपुकीमी येसु कली कांटी थोक्शो शी खुक्ने थुम्शा, येसु आ वासी ४ जना सिपाहीपुकीमी उइक्थ उइक्थ पा योक्साक्म। येसु आ तारी फेक्तीक वा उइ रे इर सम्म प्रोत्रशो मफेरशो थम रिम्शो वा का बाक्त।

24 मोपतीके मेकोपुकीमी “एको चहिं मखाक्य। तन्न बाजी ग्यारय। मिनु सुम ग्राबा, मेकोमी ताइब” देमुम्तेकम। मो पामेनु “आं वासी योक्सीनीम। आं तारी फेक्तीक वा कली “सुम ताइबा?” दे बाजी ग्यारनीम” दे ब्रेक्शो लोत्र थमा दुम्त। भजन संग्रह २२:१८

25 मिनु सिपाहीपुकीमी मो पामेनु, येसु आ ममा येसु आ शी आ नेक्था बाक्त। क्लोपास आ मीश मरीयम नु मागदाला डा मरीयम यो मेकेर बाक्ताक्स। मिनु येसु आ नेल्ल क्येडा दाक्शो शेंसीब यो मेकेर बाक्त।

26 मिनु येसुमी आ ममा कली “आं ममा, मेको कली इ तौ मिम्तो” दे माइक्तु। यूहन्ना १३:२३

27 मिनु आ शेंसीब कली “गेमी यो इम्मा खोदेशो मिम्तो” दे माइक्तु। मेना रे मेको शेंसीबमी येसु आ ममा कली आ ममा मिम्शा, आ खिम वोइक्तु।

येसु बेक्चा आ पबंम ब्रेक्शो लोत्र

28 मिनु नोले येसुमी “आं गेय पचा नुप्त” दे तुइक्ताक्व। मिनु परमप्रभु यावे आ ब्रेक्पाइश्शो लोत्र थमा दुम्चा कली येसुमी “गो तूत दाक्ती” देत। भजन संग्रह २२:१५

29 मिनु मेकेर गर का ग्युरशो तूचा थोत्रक वोइश्शो बाक्त। मेकोपुकीमी कोक्केमी वा खोदेशो फ्रेंशा, मेको ग्युरशो तूचा थोत्रकीमी खुम्शा, येसु कली युप्पाइक्तेकम। भजन संग्रह ६९:२१

30 मिनु येसुमी युप्शा “मुल थुम्ता” देत। मिनु आ पिया खुक्शा बेक्त।

31 मेको पास्सा चाड मानेचा कली सातीक नाक्त बाक्त। मोपतीके बेक्शो रां शीमी मबाकमल, दे यहूदीपुकीमी पिलातस कली “मेको आन खोइल जिक्शा साइश्शा, शी रे शोल्शा लदमेक्ल” देतेकम। मारदे हना मेको पास्सा आ डोंइती डा डेयब नाक्त बाक्त। ब्यवस्था २१:२३

32 मोदुम्तीके सिपाहीपुकीमी कांटी थोक्शो येसु आ ग्युरा नु पेरा गे डा निम्फा आस कली खोइल जिक्ताकम।

33 मिनु येसु आ क्युक्तीकेमी जाकमानु, येसु कली बेक्शो ताम्तेकम। मिनु येसु आ खोइल मजिकगेम।

34 सिपाही कामी येसु आ कोत्रखामी भालामी तूताक्व। मिनु तूदानु, हुश नु ब्वाक्कु यित।

35 मेको नेल्ल ताइबमी मेको दुम्शो आ पबंम सांकछी बाक्शा, थमा लोत्र पाइब। गेपुकी यो थमा सुतीन दे मेकोमी थमा लोत्र पाइब।

36 परमप्रभु यावे आ ब्रेक्पाइश्शो लोत्र थमा दुम्चा कली मोदेशो दुम्त। लोत्र कामी “मेको आ रुश का यो मजिकनीम” दे ब्रेक्पाइश्शो बाक्त। प्रस्थान १२:४६

37 मिनु लोत्र कामी “मेको तूबपुकीमी आंम तूशो मुर कली कोत्रनीम” दे ब्रेक्पाइश्शो बाक्त। जकरिया १२:१०; प्रकाश १:७

येसु आ बेक्शो रां वोइश्शो

38 अरीमाथीया गाडे डा योसेफ माइश्शो मुर का बाक्त। मेको यहूदी आन कली तशा हिंशा खुइश्शा, येसु आ शेंसीब दुम्शो बाक्त। मेकोमी पिलातस कली “येसु आ बेक्शो रां लाइक्चा गेयीनी” दे पुना बाक्त। मिनु पिलातसमी लाइक्चा गेवा बाक्त। मिनु योसेफ येसु आ बेक्शो रां ब्रथ जाक्त। यूहन्ना ७:१३

39 डोंइती येसु नु लोत्र पचा कली नाक्दो जाक्शो निकोदेमसमी येसु आ बेक्शो रां गिल्चा, दे सहे का लित्रा मूरे नु एलोत्र माइश्शो के सेल्शो ब्रोत्रशो रिना पाइब थोत्रक चाक्शा जाक्त। लित्रा का ३२७ ग्राम बाक्ब। यूहन्ना ३:२

40 मिनु येसु आ बेक्शो रां लाइश्शा, ब्रोत्रशो रिना पाइब थोत्रक नु वामी गिल्लेकम। मेकोन यहूदी आन के बेक्शो मुर आन कली पतीक बाक्ब।

41 येसु कली शीमी कांटी थोक्तीक आ नेक्था फल फल रू का बाक्त। मेको रूमी बेक्शो मुर कली वोइक्तीक नक पुक्खी का सेल्शो बाक्त। मेकेर सुइ मवोइश्शो बाक्त।

42 मेको नाक्त यहूदी आन पास्सा मानेचा कली सातीक नाक्त बाक्त। मोपतीके येसु कली नेल्ल क्येडा नेक्था डा पुक्खीमी वोइक्तेकम।

## 20

येसु सेंशो

मती २८:१-१०; मर्कूस १६:१-८; लूका २१:१-१२

1 मिनु साता डा डोंइती नाक्त नां मसोत्रथ, मागदाला डा मरीयम बेक्शो मुर वोइक्तीक पुक्खी जाक्दीम्मेनु, पुक्खी कली सुशो डेयब फुल्लु तिल्लो तवा बाक्त।

2 मिनु फुल्लु तिल्लो तशा, दोरशा लशा, सिमोन पत्रुस नु येसु आ दाक्शो शेंसीब आस बाक्तीक जाक्त। मिनु “प्रभु कली बेक्शो मुर वोइक्तीक पुक्खी रे लदमे बाक्त। ते वोदमे?” दे हिल्लो पाप्तु। यूहन्ना १३:२३

3 मिनु पत्रुस नु अर्को शेंसीब बेक्शो मुर वोइक्तीक पुक्खी कोत्रथ लाम्ताक्से।

4 निम्फा दोरताक्स। मिनु अर्को शेंसीबमी पत्रुस कली दाम पाप्तु। दाम पशा, डोंइती बेक्शो मुर वोइक्तीक पुक्खी जाक्दीत।

5 मिनु खुम बाप्शा पुक्खी आगा कोत्रतु। मेकेर येसु कली गिल्लो वा ला तशा, आगा मओत्र।

6 सिमोन पत्रुस जाक्शा, पुक्खी यु ओत्रशा कोत्रडानु, येसु कली गिल्लो वा ताप्तु।

7 मिनु पियामी फ्रेंशो रूमाल मुक्शा, तिल्ला वोइश्शो ताप्तु। यूहन्ना ११:४४

8 नोले डोंइती जाक्ब अर्को शेंसीब यो ओत्रत। मिनु मेको वा तशा थमा सुइक्तु।

9 मारदे हना मुल सम्म मेकोपुकीमी येसु बेक्शो रे सेंसीचा माल्ब, दे ब्रेक्पाइश्शो लोत्र मतुइश्शो बाक्तेक्म। भजन संग्रह १६:१०; लूका २४:२५-२७; प्रेरित २: २४-३२; १कोरिन्थी १५:४  
10 मिनु नोले मेको शेंसीब निक्शी खिं लेत्ताक्स।

येसुमी तपांडसीशो

11 मरीयम डाकना डाकन पुक्खी आ नेक्था बाक्शो बाक्माक्त। डाकना डाकन खुम बाप्शा, पुक्खी आगामी कोत्रडानु,  
12 बुश वा फेक्शो परमप्रभु यावे आ स्वर्ग डा गेय पाइब निक्शी आस कली तवा बाक्त। मेको निक्शी येसु आ बेक्शो रां वोइक्तीकेमी का पिपा गे का खोइल गे निश्शो ताम्सी बाक्त।

13 मिनु मेको निक्शीमी मरीयम कली “गे मारदे डाक्नेवे?” दे हिल्लो पाम्से बाक्त। मिनु मरीयममी “मेकोपुकीमी आं प्रभु कली लदमे बाक्त। मिनु ते वोदमे मतुइक्नुड” दे माइक्सी बाक्त।

14 मो देशा मरीयममी फिर लेश्शा कोत्रडानु, येसु कली राप्शा बाक्शो तवा बाक्त। मेको येसु बाक्ब, दे मतुइक्ता बाक्त।

15 मिनु येसुमी “गे मारदे डाक्नेवे? सु कली मली?” दे हिल्लो पवा बाक्त। मरीयममी “मेको फल फुल रूमी गेय पाइब मुर बाक्माक्त” दाप्शा, मेको कली “हजुर, गे मेको बेक्शो रां कली एक रे लाइक्तीनी हना, ते वोइक्नी, आं कली देनीने। गो मेको कली लाइक्नुड” दे मदा बाक्त।

16 मिनु येसुमी मरीयम कली “मरीयम” देमेनु, मरीयममी फिर लेश्शा, हिबू लोत्रमी “राब्बोनी” देमाक्त। हिबू लोत्रमी राब्बोनी देशो “शेंब” बाक्ब।

17 मिनु येसुमी “मग्याइक्ती। मारदे हना मुल सम्म आं आफ आ बाक्तीक मलड। आं लोकब आन बाक्तीक लशा, मेको आन कली “गो इं आफ, परमप्रभु यावे आ बाक्तीक लाइनुड” गे मेको आन कली शेंदो” दे माइक्तु। हिबू २:११-१२

18 मिनु मागदाला डा मरीयम शेंसीब आन बाक्तीकेमी लशा “गो प्रभु कली ताता” देंत। येसु आ देशो लोत्र यो तुइक्पाइक्तीमी।

येसुम शेंसीब आन कली तपांडसीशो

मर्कुस १६:१४-१८; लूका २४:३६-४९

19 मेको साता डा डोंडीता नाक्त नां रिक्चावानु, येसु आ शेंसीबपुकी यहूदी आन क्येडा हिंशा, लाप्चो चोक्शा, खिं गाम बाक्तेक्म। मिनु येसु मेको आन बाक्तीकेमी जाक्शा “थुं नाइश्शा बाक्कीन” देंत।

20 मो देशा मेको आन कली आ गुड नु आ कोत्रखा कोइदानु, आ शेंसीबपुकी प्रभु कली तशा ग्येरसाक्म। १यूहन्ना १:३

21 मिनु लेंशा येसुमी मेको आन कली “इन थुं नाइश्शा बाक्कीन। आं आफोमी दोपा सोइक्ती, मोपा गो इन कली यो सोइक्ताक्नन्नी” दे माइक्तीमी। यूहन्ना १७:१८

22 मो देशा येसुमी मेको आन कली मुइश्शा “परमप्रभु यावे आ सोक्त ताक्कीन।

23 गेपुकीमी सु सु कली माफ गेनीनी, मेकोम माफ ताइनीम। सु सु कली माफ मगेनीनी, मेको आन पाप लीब” देंत। मत्ती १८:१८

थोमास कली थमा सुइक्पाइश्शो

24 मिनु येसु आ शेंसीब १२ जना आन दाते डा का जौले माइश्शो थोमास येसु जाक्मेनु, मेकेर मबाक्शो बाक्त। यूहन्ना ११:१६; यूहन्ना १४:५

25 अरु शेंसीबपुकीमी “प्रभु कली ताइतक” दे थोमास कली देमानु “येसु आ गुइमी कांटी थोक्शो गार मतडा सम्म, मेको गारमी आं ब्रेप्चो मलिकथु नु आ कोत्रखा डा गारमी मथिडा सम्म, गो थमा मसुइक्नुड” देंत। यूहन्ना १९:३४

26 मिनु मेको मो दुम्शो साता का नोले येसु आ शेंसीबपुकी लेंशा खिं आगाम बाक्तेक्म। मेना थोमास यो मेकोपुकी नु काथा बाक्शो बाक्त। लाप्चो चोक्शा, आगाम बाक्मानु, येसु मेको आन बाक्तीकेमी जाक्शा “थुं नाइश्शा बाक्कीन” देंत।

27 मिनु येसुमी थोमास कली “आं गुइ डा गारमी इ ब्रेप्चो लिक्शा, कोत्रडो। मिनु इ गुइमी आं कोत्रखा डा गार थिवो। गे थमा मसुइक्ब मदुमो। तन्न थमा सुइक्ब दुमो” दे माइक्तु।

28 थोमासमी “आं प्रभु, आं परमप्रभु यावे” देंत। यूहन्ना १:१

29 मिनु येसुमी “गे आं कली तशा थमा सुइक्तीवी। सुमी आं कली मतथु, थमा सुइक्बा, मेको शुश ग्येरसीशो मुर बाक्ब” देंत। १पत्रुस १:८; हिबू ११:३

एको किताब मारदे ब्रेक्शो बाक्मे

30 मिनु येसुमी आ शेंसीब नु बाक्शा, शुश अरु छक लाक्चा डा गेय पाप्तु। मेको गेयपुकी एको किताबमी मब्रेक्शो बाक्नीम।

31 मिनु मेको ब्रेक्शो छक लाक्चा डा गेयपुकी मारदे ब्रेक्शो बाक्नीम देशा हना, गेपुकीमी “येसु खीस्त, परमप्रभु यावे आ तौ बाक्ब” दे थमा सुइक्ने चापीन। मिनु थमा सुइश्शा, आ नेमी गेना हना यो ब्रोंइशा बाक्चा ताइनीनी, दे ब्रेक्शो बाक्ब। १यूहन्ना ५:१३

1 मिनू नोले येसु तिबेरीयास डा समुन्द्र आ नेक्थामी आ शेंसीब आन कली लेंशा तपांडसाक्व। दोपा तपांडसाक्व देशा हना,

2 सिमोन पत्रुस, जौले माइशशो थोमास, गालील डा काना सहर डा नथानेल, जब्दी आ तौ निक्शी नु येसु आ शेंसीब अर्को निक्शी काथा बाक्तेक्म। यूहन्ना १४:५

3 मिनू सिमोन पत्रुसमी मेको आन कली “गो डांड रेत्थ लाइनुड” दंत। मिनू “गो यो गे नु लाइनीकी” दंतेक्म। मिनू लशा, डोंगा डाइशशा, डांड रेत्थ लाम्तेक्म। तन्न मेको नाकदो डांड का यो मरेम्म।

4 मिनू सुनी नां सोव्रची ना येसु समुन्द्र आ नेक्थामी बाक्शो बाक्त। आ शेंसीबपुकीमी येसु बाक्माक्त, दे मतुइक्तेम। यूहन्ना २०:१४; लूका २४:१६

5 मिनू येसुमी “ए आलपुकी, डांड बाक्म कों?” दे ब्रेशशा, हिल्लो पाप्तु। मिनू “मबा” दे लोत्र लेत्ताक्म। लूका २४:४१

6 मिनू येसुमी “इन ग्याइल डोंगा आ ग्युरा गे आपीन। मेकेर रेत्नीनी” दे माइक्तीमी। मिनू आ देशो खोदेशो पा ग्याइल आप्तेक्म। मिनू आन ग्याइली गुंडने मचाप्चा डा पा शुश डांड रेत्तेक्म। लूका ५:४-७

7 मोदेशो तशा, येसु आ नेल्ल क्येडा दाक्शो शेंसीबमी पत्रुस कली “प्रभु बाक्ब” दे माइक्तु। मिनू सिमोन पत्रुसमी “प्रभु बाक्ब” देशो नेंशा, आ डांडती पुइशशो वा लेंशा फेक्साक्व। मिनू ब्वाक्कुमी प्रेक्त। यूहन्ना १३:२३

8 मिनू अरु शेंसीबपुकीमी डोंगामी बाक्शा, ग्याइल कीना कीन पिम्तेक्म। ग्याइल ब्रीशो बाक्त। मेकोपुकी समुन्द्रमी सहे निक्शी गज खोदेशो डोन जाक्दीशशो बाक्तेक्म।

9 मिनू मेकोपुकीमी डोंगा रे गूशा, डांड नु शोब्ले मीमी चोशा, वोइशशो ताम्तेक्म।

10 मिनू येसुमी “इन रेशशो डांड का निक्शी पितीन” दे माइक्तीमी।

11 येसु आ देशो टिशा, सिमोन पत्रुस डोंगामी डाइशशा, ग्याइल कली कीशा, ब्वाक्कु रे गुंडताक्व। मेको ग्याइलीमी सहे का ५३ ओटा टेयब टेयब डांड बाक्तेक्म। मिश डा डांड बाक्शा यो मेको ग्याइली मगाक्माक्त।

12 मिनू येसुमी “निस्सीन जने ब्वने” दे माइक्तीमी। मिनू शेंसीबपुकीमी “गे सु ननी?” दे हिल्लो मपाम। “प्रभु बाक्ब” दे तुइक्ताक्म।

13 मिनू येसुमी शोब्ले लाइशशा, आ शेंसीब आन कली शोब्ले नु डांड योक्शा गेम्तीमी। यूहन्ना ६:११

14 मो दुम्मेनु, येसु सेंसीशो नोले आ शेंसीब आन कली खेयप सां तपांडसाक्व।

येसुमी पत्रुस कली लोत्र पशो

15 मिनू जने थुम्शा, येसुमी सिमोन पत्रुस कली “योआन्नेस आ तौ सिमोन, गे आं कली एको आन क्येडा दाक्नेवे?” दे हिल्लो पाप्तु। मिनू पत्रुसमी “दाक्नन्नी, प्रभु, गे तुइक्नीनी” दे माइक्तु। मिनू येसुमी “आं पाटा आन कली थुल्मी” दंत। यूहन्ना १:४२

16 मिनू येसुमी लेंशा पत्रुस कली “योआन्नेस आ तौ सिमोन, गे आं कली दाक्नेवे” दे हिल्लो पाप्तु। मिनू पत्रुसमी “दाक्नन्नी, प्रभु, गे तुइक्नीनी” दे माइक्तु। मिनू येसुमी “आं भेडा आन कली कोत्रमी” दंत। १ पत्रुस ५:२,४

17 लेंशा येसुमी “योआन्नेस आ तौ सिमोन, गे आं कली दाक्नेवे?” दे हिल्लो पाप्तु। मिनू येसुमी खेयप सां “आं कली दाक्नेवे?” दे हिल्लो पशो नेंशा, पत्रुस आ थुं खाइक्त। मिनू “प्रभु, गे नेल्ल तुइक्नीनी। गो इन कली दाक्नन्नी, दे तुइक्नीनी” दे माइक्तु। मिनू येसुमी “आं भेडा आन कली योत्रमी। यूहन्ना १३:३८; यूहन्ना १६:३०

18 नोफा दाइशशा नेनो, गे ठिटा बाक्डेनु, किप्शुर किम्सीशा, इ दाक्शो लां खोइक्तीवी। खाल्पा दुमेनु, इ गुइ हाम्नेवे। मिनू अर्कोमी इ कली किप्शुर किप्शा, इ मदाक्शो लां लाइक्ब” दे माइक्तु।

19 येसुमी पत्रुस दोपा परमप्रभु यावे आ सक्ति कोंइशा, साइक्चा पुंडसीबा, दे मोदेशो दंत। मिनू येसुमी “आं नोले खोइय्यी” दंत। यूहन्ना १३:३६

20 मिनू पत्रुसमी येसु आ नोले खोइशशा, फिर लेशशा कोत्रडानु, येसु आ दाक्शो शेंसीब आस नोले खोइशशो ताप्तु। मेको शेंसीब सु बाक्त देशा हना, डांडती नाकदो डा खमे जची ना येसु नु बाक्शो बाक्त। मेको “प्रभु, इन कली साइक्ब आन कली वारच पाइब सु में?” दे हिल्लो पाइब बाक्त। यूहन्ना १३:२३-२५

21 मिनू पत्रुसमी मेको कली तशा “प्रभु, मेको कली मार दुम्बा?” दे हिल्लो पाप्तु।

22 मिनू येसुमी “गो लेंशा मजाक्का सम्म मेकोमी रिम्शा बाक्चा माल्ब, दे मिम्ताक्क हना यो, इ कली मार दुम्बा डा? गे आं नोले खोइय्यी” दे माइक्तु।

23 मिनू थमा सुइक्बपुकीमी मेको येसु आ दाक्शो शेंसीब आ परबम “मेको शेंसीब मबेक्ब” दे लोत्र पम्तेक्म। तन्न येसुमी “मेको मबेक्ब” देशो ममाइ, तन्न “गो मजाक्का सम्म मेको रिम्शा बाक्क कों मबाक्क, इ कली मार दुम्बा डा” दे माइशशो बाक्त।

24 येसुमी “एको मबेक्ब” देशो शेंसीब सु बाक्त देशा हना, एको किताब ब्रेक्ब बाक्त। मिनू मेको आ ब्रेक्शो नेल्ल थमा बाक्ब, दे तुइक्नीकी। यूहन्ना १५:२७

25 येसुमी मेको किताबमी ब्रेक्शो पशो गेय लाममाइ, तन्न अरु शुश गेय यो पाइबाक्त। आ पशो गेय नेल्ल ब्रेक्ताक्व हना, मेको किताबपुकी वोंइक्चा कली रागीमी यो मरिक्ब, दे मिम्नुड। यूहन्ना २०:३०; भजन संग्रह १०६:२

## प्रेरित

**ब्रेक्ब मुर:** एको किताब लूकाम ब्रेक्शो बाक्ब। लूका यहूदी मबाक्थु यो, पावल नु गेय पवा बाक्त। प्रेरित १६:१०-१७; प्रेरित २०:५-१५; प्रेरित २१:१-१८ नु प्रेरित २७:१-२८:१६ एको किताबमी शुश खेयप “गोपुकी” ब्रेक्शो बाक्ब। मोपतीके लूका पावल नु काथा बाक्शो तुंडसीब। लूका डक्टर बाक्त। कलस्सी ४:१४

**गेना ब्रेक्शो:** एको किताब गेना ब्रेक्शो बाक्मे, मेको रिम्शो पा मतुंडसीब। तन्न पावल रोम सहरम चोक्चा पुंडसीशो बर्स निक्शी दुम्शो नोले ६३-६४ ए. डी. एको किताब ब्रेक्शो बाक्चा माल्ब। एको किताब मथुम्शो किताब का बाक्त। मारदे हना लूका ते लमे, सुइमी मतुंडकीम। ६४ ए. डी.मी रोम सहरम ठेयब मी सुइक्तीके नु थमा सुइक्ब आन कली खेदा पतीके लूका बेक्म कों, प्रोक्म कों मारेड मतुंडसीब।

**मार ब्रेक्शो:** लूका, यहूदी मुर मबाक्ब। आ ब्रेक्शो “लूका ग्येरपाइक्तीक” लोत्रमी अर्को रागी डा मुर येसु ख्रीस्त आ पतीकेमी पाप रे ब्रोंडचा ताइनीम, दे शुश ब्रेक्शो बाक्ब। येसु ख्रीस्त आ सोइश्शो आन पशो गेय नु परमप्रभु यावे आ सोक्त आ गेय आ पबंम शुश ब्रेक्शो बाक्ब।

येसु स्वर्ग लाइक्चा पुंडसीशो

1 आं दाक्शो थियोफीलस, गो डोंइती डा किताबमी परमप्रभु यावे आ बाक्तीक लाइक्चा मपुइसे सम्म येसुमी मार पवा, मार शेंदा, मेको नेल्ल ब्रेक्शा, तुइक्पाइक्ने थुम्तन्नी। लूका १:३

2 येसुमी शेंसीब आन कली योत्रशा, मेको योत्रशो आन कली सोइश्शोपुकी नें वोइश्शो बाक्माक्त। मेको सोइश्शो आन कली परमप्रभु यावे आ सोक्त रे पा मार शेंचा, मार पचा, नेल्ल शेंना शेंन वोइक्मी बाक्त। मत्ती २८:१-२०

3 मेको आन कली शेंशो मार बाक्माक्त देशा हना, येसु श्येत जशा साइक्चा पुंडसीशा, बेक्शा, बेक्शो रे सेंपाइक्चा पुंडसीशा, ४० नाक्त सम्म आ सोइश्शो आन कली तपांडसीन सीन परमप्रभु यावे आ राज्य डा लोत्र शेंना शेंन बाक्माक्त।

4 मोदेशो पा काथा बाक्शा, मेको आन कली “परमप्रभु यावेमी आ देशो लोत्र मखबा सम्म यरूसलेम सहरमीन बाक्कीन। लूका २४:४९; यूहन्ना १५:२६

5 इन कली डोंइती मार मार देंडा, मेको लेंशा देनुड यूहन्नामी मुर आन कली ब्वाक्कुम खुम्शा गुंडताक्ब। इन कली चहिं परमप्रभु यावेमी आ सोक्तीम खुम्ब। मेको दुम्चा कली शुश नाक्त मलीशो बाक्ब” दे शेंदीमी बाक्त। मत्ती ३:११

6 मिनु येसु नु आ सोइश्शोपुकी बुक्शा बाक्मानु, मेकोपुकीमी येसु कली “प्रभु, गे इस्त्राएल कली मुल लेंशा आंम राज्य सेल्नीनी?” दे हिल्लो पामे बाक्त। लूका १९:११; लूका २४:२१

7 मिनु येसुमी “राज्य सेल्चा आं आफ आ गुइमी बाक्ब। मिनु गेना सेल्चा दाक्बा, मेना सेल्ब। मेको तुइक्चा यो ममाल्नीनी। मत्ती २४:३६

8 मार चहिं तुइक्चा माल्नीनी देशा हना, परमप्रभु यावे आ सोक्त आ सक्ति ताइनीनी। सक्ति तशा यरूसलेम, यहूदीया, सामरीया नु रागी नेल्लेमी हिरशा, आं लोत्र शेंशा, आं सांकछी दुम्नीनी” दे माइक्मी बाक्त। लूका २४:४८; प्रेरित ८:१

9 मिनु मोदेशो लोत्र पा, मेको आन तना तन ग्येल्थ ग्युक्शा, गोस्सुमी गिल्सीशा सरीड ग्येल्थ लमाक्त। मिनु नोले मेकोपुकीमी मतामे बाक्त। मर्कूस १६:१९; लूका २४:५१

10 मोपा यो सरीड गे कोत्रना कोत्रन बाक्मानु, बुश वा फेक्शो मुर निक्शी फो फु गूशा, आन डोंइती राप्शो तामे बाक्त। लूका २४:४

11 मिनु मेको निक्शीमी “ए गालील डा मुर, मार सरीड गे कोत्रना कोत्रन बाक्नी? येसु इन बाक्तीके रे परमप्रभु यावे आ बाक्तीके लाइक्चा पुंडसाक्ब। दोपा लशो तनी, मोपा काबु लेशशा यीब, दे तुइक्तीने” देसा बाक्त। लूका २१:२७

12 मिनु मेकोपुकी जैतून डांडा रे यरूसलेम लेम्मा बाक्त। मेको लां चहिं नाइक्तीक नाक्त गाक्चा दुम्तीक लां बाक्माक्त।

13 मिनु यरूसलेम सहरम जाक्शा डा मीन, खिं का डा तला तारी ओव्रशा बाक्मा बाक्त। मोपा बाक्बपुकी सु सु बाक्मा बाक्त देशा हना, पत्रुस, यूहन्ना, याक्ब, अन्दीयास, फिलीप, थोमास, बारथोलोमाइ, मत्ती, अल्फयस आ तौ याक्ब, सिमोन, मेको कली कनानी यो देसीब नु याक्ब आ तौ यहूदा बाक्मा बाक्त। लूका ६:१३-१६

14 मेकोपुकी नु मीशा मुरपुकी, येसु आ ममा मरीयम नु येसु आ लोकबपुकी यो बाक्मा बाक्त। मेको नेल्ल थुं का डा दुम्शा, नाक्त किंत किंत परमप्रभु यावे कली ठेयब सेल्ना सेल्न, पुंडना पुंडन बाक्बाक्मा बाक्त। यूहन्ना ७:३

सोइश्शो का तेम्शो

15 मिनु काबु नाक्त पत्रुस थमा सुइक्ब सहे का २० जना मुर आन दातेमी बाक्मा बाक्त। यूहन्ना २१:१५-१९

16 मिनु पत्रुस मेको आन दातेमी राप्शा, मेको आन कली “आं लोकबपुकी, नेनीने, येसु कली ग्याइक्ब आन कली लां कोंडब यहूदा आ पबंम लोत्र का निक्शी पाइनुड। साइ परमप्रभु यावे आ सोक्तीमी पिप दाऊद कली मार ब्रेक्पाइश्शो बाक्मे, मेको नेल्ल थमा दुम्चा माल्ब। मिनु मुल थमा दुम्त। भजन संग्रह ४१:१०

17 यहूदा १२ जना शेंसीब आंइ दाते डा वारच का बाक्त। मेको कली यो प्रभुमी गेय का पपाइक्चा कली योत्रशो बाक्त।

18 मेकोमी येसु कली ग्याइक्ब आन कली लां कोंइशा, वारच पा क्येट ताक्गा बाक्त। मिनु मेको क्येटमी रू ग्यबा बाक्त। मोपा मरिम्शो गेय पतीके क्यूली पा दोक्शा, आ कोत्रज ब्रोल्ला आ कयी गूशा बेक्माक्त। मत्ती २७:३-१०

19 मेको आ मरिम्शो पशो यरूसलेम सहरमी बाक्ब नेल्लेमी तुइक्ताक्म। मिनु मेको रू कली आन लोत्र रे पा आखेल्दामा, दे नें वोइक्तेक्म। आखेल्दामा देशो “हुश आ रू” रुम्सीब।

20 साइ पिप दाऊदमी ब्रेक्शो लोत्रमी मार ब्रेक्शो बाक्ब देशा हना ‘मेको आ खिं ब्रेशशा बाक्ल, मेकेर सुइ बाक्चा मतामेक्ल, आ पशो गेय अर्को मुरुमी पवल’ दे ब्रेक्शो बाक्ब। भजन संग्रह ६९:२५-२६; भजन संग्रह १०९:८

21 मुल यहूदा आ पा डा मुर का योत्रचा माल्ब। दोदेशो मुर माल्ब देशा हना, यहून्नामी मुर आन कली ब्वाक्कुमी खुम्शा गुंडशो नाक्तर रे येसु परमप्रभु यावे आ बाक्तीक लाइक्चा मपुंडसे सम्म, प्रभु येसु नु काथा बाक्ब, काथा गाक्ब, काथा जाइब मुर का माल्ब। यहून्ना १५:२७

22 मेको मुरुम ‘येसु बैक्शा, सेंसीशो ताता’ देने चाप्या माल्ब” दे माइक्मी बाक्त।

23 मिनु आ लोत्र नेंशा बिश्शा, आन दाते रे योत्रशा, मुर निक्शी आस कली नेल्ल आन डोंइती राप्पदमे बाक्त। मेको आस नें का के योसेफ बारसाबास, आ याइनी नें चहिं युस्तस बाक्माक्त। का के चहिं मत्तीयस बाक्माक्त।

24 मिनु मेकोपुकीमी “परमप्रभु, गे मुर नेल्ल आन थुं तुइक्नीनी। मोपतीके एको निक्शीमी तेंको कली योत्रनीनी, आंइ कली तुइक्पतीने। प्रेरित ६:६

25 मिनु मेको यहूदा आ पा डा सोइश्शो का दुम्ल” दे प्रार्थना पामे बाक्त।

26 मिनु भोट तोक्गमे बाक्त। भोट तोक्गमेनु, मत्तीयस ग्रामाक्त। मोपा मत्तीयस यो सोइश्शो का दुम्शा तेम्सीशा, १२ जना सोइश्शो दुम्मा बाक्त। हितोपदेस १६:३३; निसाफ पाइब २१:१७

## 2

परमप्रभु आ सोक्तीम प्रिंचा पुंडसीशो

1 मिनु पेन्तीकोस नाक्तर थमा सुइक्ब आन गुम्तीकेमी देल्मा बाक्त। लेवी २३:१५-२१

2 मिनु सरीड रे हुरु पा फश खोदेशो फो गूशा, आन बाक्तीक प्रिंशा थुरशा रेयके पवा बाक्त।

3 मिनु ब्रशो मी खोदेशो तांडसीशो परमप्रभु यावे आ सोक्त का का पा आन तारी जुक्ता बाक्त। मती ३:११

4 मिनु परमप्रभु यावे आ सोक्तीमी सोइश्शो आन कली प्रिंशा, मेको आन कली आन मतुइश्शो लोत्र पपाइक्मी बाक्त।

प्रेरित ४:३१; प्रेरित १०:४४-४६

5 यरूसलेममी परमप्रभु यावे कली मान पा हिंब, रागी नेल्ल रे जाक्शो यहूदी बाक्मा बाक्त। प्रेरित १३:२६

6 मिनु मेकोपुकीमी मेको रेयके नेंशा, खुम्सीमा बाक्त। मिनु मेकेर आन लोत्र कका ब्वाक्शो नेंशा छक लाक्मा बाक्त।

7 मिनु छक लाक्शा “मेकोपुकी गालील डा मुर मनमी डा? तन्न इं लोत्र कका ब्वाक्तेक्म।

8 गालील डा मुरपुकीमी दोपा इं लोत्र नेल्ल ब्वाक्स जोक्गमे माइ?” देंमुमा बाक्त।

9 मो दुम्शो ताइबपुकी ते ते डा बाक्मा बाक्त देशा हना, पारथेस, मेदी, एलाम, मेसोपोटामीया, यहूदीया, कापाडोसीया, पोन्टस, एसीया,

10 फ्रिगीया, पाम्फीलीया, इजीप्ट, लिबीया नु साइरेनी एर ओथ, रोम, क्रेट नु अरब रागी रे जाक्शो यहूदी नु यहूदी दुम्शोपुकी बाक्मा बाक्त।

11 मेकोपुकीमी “गो नेल्लेमी परमप्रभु यावे आ पशो छक लाक्चा डा गेय आ पर्बम आंइ लोत्र पशो नेंतय।

12 मोपा मेको नेंबपुकीमी ‘मार बाक्म माइ, मार दुम्बा’ देंमुमा बाक्त।

13 का निक्शीमी चहिं ‘शांबु दुक्शो बाक्तेक्म’ ” दे शुक्शी पामे बाक्त।

साइ डा लोत्र थमा दुम्शो

14 मिनु पत्रुसमी सोइश्शोपुकी नु राप्शा, मुर आन कली “इं यहूदी नु यरूसलेममी बाक्बपुकी, आं लोत्र रुप्या कली नोफा दाइश्शा नेनीने।

15 इन मिम्शो खोदेब पा एकोपुकी दुक्शो मनमी। मुल सुनी डा ९ बजेशो बाक्ब, दे तुइक्तीने। भजन संग्रह १६:८-११

16 मार रुपीन देशा हना, साइ परमप्रभु यावे आ लोत्र पाइब योएलमी ब्रेक्शो लोत्र मुल थमा दुम्त, दे रुपीने। साइ डा लोत्रम मार ब्रेक्शो बाक्त, देशा हना योएल ३:१-५

17 ‘परमप्रभु यावेमी रागी नुप्ची नाक्तर मुर नेल्ल आन कली आं सोक्तीम प्रिनुडमी। मिनु इन तमी तौपुकीमी आं लोत्र पाइनीमा। टिटापुकीमी आं कोंइशो ताइनीमी, खाल्पापुकीमी डोमु ताइनीमी।

18 आं वाइलीम वाइल आन कली यो आं सोक्तीम प्रिनुडमी। मिनु मेकोपुकीमी यो आं लोत्र पाइनीमा।

19 मेको ठेयब नाक्तर जाक्चा क्येडा डोंइती गो सरीड नु रागीमी चिन्ड नु छक लाक्चा डा गेय कोंइनुड। हुश यिपाइक्नुड, मी ब्रपाइक्नुड नु ठेयब कुन गूशो तपाइक्नुड।

20 नां छिडछिड दुम्ब। तास्ला हुश खोदेशो लल दुम्शो तांडसीब। मेको प्रभु आ ठेयब नाक्तर आ क्येडा डोंइती मोदेशो दुम्ब।

21 मिनु सु सुमी प्रभु आ नें थिशा प्रोंइयीकी, दे ब्रेम्मा, मेकोपुकी पाप रे प्रोंइचा पुंडसीनीम’ दे परमप्रभु यावेम देशो बाक्ब। योएल २:२७-३२

22 मोपतीके इस्त्राल एल डा लोकबपुकी, आं लोत्र नेनीने। परमप्रभुमी नासरथ डा येसु कली योत्रशा, सक्ति पाइश्शो गेय, चिन्ड नु छक लाक्चा डा गेय इन दातेमी कोंइपाइक्तु। मेको गे यो तशो तुइश्शो बाक्नीनी।

23 गेपुकीमी येसु कली अरेशो मटीब आन गुइम गेशा, शीम केषा कांटी थोक्शा क्याइश्शा साइक्पाइक्तीनी। डोंइती रे परमप्रभु यावेमी मोदेशो दुम्चा माल्ब, दे मिम्शा, इन कली मो पचा गेशो बाक्माक्त, दे रुपीन। प्रेरित ४:२८

24 गेपुकीमी साइकपाइकतीनी हना यो, परमप्रभुमी येसु कली बेकशो रे सेंताकव। मारदे हना आ गेना हना यो ब्रोंडशा बाकब परमप्रभु बाकव।

25 मिनू पिप दाऊदमी येसु आ परबम 'प्रभु गेना हना यो आं ग्युरा गे बाकब, दे तुइश्शा महिनुड। भजन संग्रह १६:८-११

26 गो ग्येरसीशा प्रभु कली ठेयब सेल्शा कुम्सो पाइनुड। मारदे हना प्रभु नु काथा बाकशा, गेना हना यो ब्रोंडचा ताइनुड।

27 बेकशा आं रां राकशा लचा मगेब, दे तुइकुनुड।

28 परमप्रभुमी ब्रोंडतीक लां कोइताकवी। मिनू गेना हना यो प्रभु नु ग्येरसीशा बाकनुड' दे येसु आ परबम बेकशो बाकत। भजन संग्रह १६:८-१०

29 आं लोकबपुकी, इं किकी पिपी दाऊद आ परबम का का पा देने चाप्नुड। दाऊद बेकमाकत। मिनू लाइश्शा थिम्ने थुम्ने बाकत। तेकेर थिम्ने गोपुकीमी मुल यो तुइकनय। १राजा २:१०

30 परमप्रभु यावेमी आ लोत्र पाइब दाऊद कली 'इ चच युइ रे पिप का सेल्लुड' दे लोत्र गेशो तुइश्शो बाकत।

31 मिनू दाऊदमी परमप्रभु यावे आ लोत्र पाइब दुम्तीके, मेको येसु, मस्सीह आ परबम लोत्र पाप्नु, दे तुइश्शो बाकमाकत। मिनू मेकोमी 'मेको बेकशो मुर आन बाकतीकेम मलीब। आ रां मराकवा' देशो बाकमाकत। २सामुएल ७:१२-१३; भजन संग्रह ८९:४-५

32 परमप्रभु यावेमी येसु कली बेकशो रे सेंताकव। मेको गो आंइ मिकचीमी ताइतक।

33 मिनू येसु परमप्रभु यावे आ ग्युरा गे बाकशा, आ आफ रे परमप्रभु यावे आ सोकत ताकशा, आंइ तारी मोइकतु। मिनू मार मार नैनी, मार मार तनी, मेको नेल्ल परमप्रभु यावे आ सोकतीम पपाइश्शो बाकमाकत, दे तुइकतीने। यूहन्ना १५:२६

34 पिप दाऊद सरीड ग्येत्थ क्युकचा मतवा। तन्न दाऊदमी 'प्रभुमी आं प्रभु कली, आं ग्युरा गे बाकको। भजन संग्रह ११०:१

35 इ जोरी सत्रु आन कली इ खोइल आगाम मवोदुमी सम्म आं ग्युरा गे बाकको' दे बेकशो बाकत। मेको लोत्र दाऊद आ परबम ममाड। येसु आ परबम बेकशो बाकब, दे रुपीन।

36 मोपतीके इस्राएली नेल्लेमी मार तुइकचा माल्नीनी देशा हना, गेपुकीमी शीम केप्शा कांटी थोकशा साइकपाइश्शो येसु कली परमप्रभु यावेमी प्रभु नु खीस्त सेल्लु' दे माइकमी बाकत। खीस्त आ देशो मस्सीह बाकब। प्रेरित ५:३१

37 मिनू आ लोत्र नैब आन थुं खाइकमाकत। मिनू पत्रुस नु सोइश्शो आन कली "गो मार पक मिनू?" दे हिल्लो पामेनु, प्रेरित १६:३०; लूका ३:१०

38 पत्रुसमी "इन थुं परमप्रभु यावे गे लेश्शा, येसु कली थमा सुइश्शा, आ नैमी ब्वाककुम खुम्शा गुंडपांडसीने। मिनू इन पाप क्यान्चा पुंडसीनीनी। परमप्रभु यावे आ सोकतीम प्रिंचा यो पुंडसीनीनी। प्रेरित ३:१७-१९; लूका २४:४७

39 मारदे हना परमप्रभु यावे आ गेशो लोत्र इन कली, इन तमी तो चच युइ आन कली नु डोन रागीम बाकब आन कली गेशो बाकत। मिनू परमप्रभु आंइ परमप्रभु यावेमी सु सु कली बेशो बाकमे, मेको आन कली गेशो बाकत" दे शेंदीमी बाकत। योएल ३:५

40 मिनू पत्रुसमी शुश शेंशा "थमा मसुइकब मदुमीने। मरिम्शो पाइब रे डोन बाककीने" दे शुश अर्ती गेशा माइकमी बाकत। मती १७:१७; फिलिप्पी २:१५

41 मिनू शुश मुरुमी पत्रुस आ देशो बिश्शा, खीस्त कली थमा सुइश्शा, ब्वाककुम खुम्शा गुंडचा पुंडसमा बाकत। मोपा ब्वाककुम खुम्शा गुंडचा पुंडसीबपुकी हजार सां खोइ दुम्मा बाकत। मोपा थमा सुइकब नु तेम्समा बाकत।

42 मिनू नेल्ल काथा बाकशा, सोइश्शोपुकीमी शेंशा लोत्र शेंसीशा, प्रभु भोज जशा, प्रार्थना पना पन बाकबाकमा बाकत। प्रेरित २०:७

थुं का डा दुम्शा बाकशो

43 मिनू सोइश्शोपुकीमी परमप्रभु यावे आ सोकत रे पा शुश चिन्ड नु छक लाक्या डा गेय कौइना कोइन बाकबाकमा बाकत। मुरपुकीमी मेको आन कली मोदेशो पशो तशा छक लाक्या हिंबाकमा बाकत।

44 थमा सुइकब नेल्ल थुं का दुम्शा, आन के बाकशो मारेइ मारेइ नेल्ल इं के बाकब, दे मिम्बाकमा बाकत। प्रेरित ४:३२-३५

45 रू, मारेइ लेयडमेनु, सु सु आन कली माल्मा, मेको आन कली योकशा क्येट गेशा वारच पाइबाकमा बाकत।

46 मिनू नाकत कित कित परमप्रभु यावे आ खिंमी गुम्शा शेंसीबाकमा बाकत। खिं खिं हिरशा, प्रभु भोज जाइबाकमा बाकत। हाइश्शो थुं डा दुम्शा, जचा तूचा योकशा, ग्येरसीशो दुम्शा,

47 परमप्रभु यावे कली ठेयब सेल्ना सेल्ल बाकबाकमा बाकत। मुरपुकीमी मेको आन कली मोदेशो पशो तशा, रिम्शो मिम्बाकमा बाकत। प्रभुमी नाकत कित कित येसु कली थमा सुइकब तेम्ना तेम्न बारपाइकमी बाकत। प्रेरित ४:४; प्रेरित ५:१४; प्रेरित ६:७; प्रेरित ११:२१; प्रेरित १४:१

### 3

खोइली मदुकब कली सापाइश्शो

1 मिनू काबु पत्रुस नु यूहन्ना ३ बजे डा प्रार्थना पची ना परमप्रभु यावे आ खिंमी जाकसा बाकत।

2 मेकेर जरमेसे रेन खोइल मदुकब मुर का बाकमाकत। मेको कली नाकत कित कित कुरशा चाकशा, खिं ओत्रब आन कली पुंडदीमील, दे "रिम्शो लाप्चो" नें पाइश्शो लाप्चो आ डोंइती वोइकबाकमा बाकत।

3 मिनू मेको पुंडब मुरुमी पत्रुस नु यूहन्ना आस कली ओत्रबशो तशा, मारेइ गेनीसी कौं, दे पुना बाकत।

4 मिनू पत्रुस नु यूहन्नामी पुंडब कली कोत्रशा, पत्रुसमी "ओथ कोत्रस्की" देमाकत।

- 5 मिन पुंडबमी मार गेयीसी, दे आस पा कोव्रसी बाक्त।
- 6 मिन पत्रुसमी “गो नु सुन चांदी मबा। मार बाक्मे, मेकोन गेनन। तन्न आं के मार मेकोन गेनन। नासरथ डा येसु ख्रीस्त आ नेमी बोक्शा एर ओथ हिरसो” देशा,
- 7 पुंडब आ ग्युरा गुड ग्याइश्शा कीशा छुल पोक्शा राप्पदा बाक्त। राप्पदानु, आ खोइल डा बॉइसे नेल्ल दुक्ब दुग्शा,
- 8 दिव दाव प्रेक्शा, एर ओथ गाक्ब दुग्माक्त। गाक्ब दुग्शा परमप्रभु यावे कली ठेयब सेल्शा, कुम्सो पना पन, प्रेक्ना प्रेक्न पत्रुस नु यूहन्ना नु काथा गाक्शा, परमप्रभु यावे आ खिं ओत्रमाक्त।
- 9 मिनु मेकेर बाक्बपुकीमी मेको पुंडब कली साशा, परमप्रभु यावे कली ठेयब सेल्शा गाक्शो तशा,
- 10 “रिम्शो लाप्चो आ डोंइती बाक्ब खोइल मदुक्ब दोपा साशा ओं पा गाक्मे” दे छक लाक्मा बाक्त।
- 11 पुंडबमी पत्रुस नु यूहन्ना कली काइ मप्रोंइथु काथा गाक्शा, पिप सोलोमन नें वोइश्शो थाम पाइश्शो बाक्तीके जाक्दीम्मा बाक्त। मिनु एर ओथ डा मुर दोरशा जाक्शा पुम्दमे बाक्त। प्रेरित ५:१२; यूहन्ना १०:२३
- 12 मिनु मोपा पुम्शो तशा, पत्रुसमी “इं इस्राएलीपुकी, एको मुर साशो तशा छक लाक्तीनी। मिनु गो आंस सक्तिम सापाइश्शो बाक्माक्त, फेस्तस दे मिम्तीनी? आंस सक्तिम सापाइश्शो ममाइ।
- 13 इ किकी पिपी अब्राहाम, इसहाक नु याक्ब आन परमप्रभु यावेमी आ गेय पाइब येसु कली ठेयब सेल्लु। गेपुकी चहिं मेको कली ग्याइक्पाइक्तीनी। पिलातसमी मेको कली प्रोंइचा थु पवानु यो, गे मबिस्सीनी।
- 14 तन्न गेपुकीमी परमप्रभु यावे आ योव्रशो नु ठीक पाइब कली तिल्लीनी। मुर साइक्ब कली प्रोंइशा सोइक्चा कली पुंडतीनी। मती २७:२०-२१
- 15 मिनु गे ब्रोंइचा गेब कली साइक्तीनी। परमप्रभु यावेमी चहिं बेक्शो रे सेंताक्व। गो मेको तशा, सांकछी दुम्ताक्व।
- 16 परमप्रभु आ सक्ति येसु नु बाक्ब। मिनु येसु आ नें थिशा थमा सुइश्शा, सक्ति पाइश्शो गेय पचा तांडसीब, दे थमा सुइक्कीनी। मिनु आंइ कली थमा सुइश्शो तशा, परमप्रभुमी एको मुर कली सापाइश्शा कोंइताक्व। मिनु साशा सेस दुग्शो ताइतीनी।
- 17 आं लोकबपुकी, इन ठेयब मुरपुकी नु गे नेल्लेमी येसु कली मतुइक्थु, साइक्पाइक्तीनी, दे तुइक्नुइ। लूका २३:३४
- 18 साइ डोंइती रे परमप्रभुमी यावे आ लोत्र पाइबपुकी रे ‘ख्रीस्त श्येत जशा साइक्चा पुंडसीब’ दे लोत्र पाइक्बक्माक्त। परमप्रभु यावेमी मेको लोत्र खाप्शो बाक्त। लूका २४:४४
- 19 मुल चहिं इन थुं परमप्रभु यावे गे लेश्शा, ख्रीस्त कली थमा सुतीन। मिनु मेकोमी इन पाप क्याम्ब। प्रेरित २:३८
- 20 मिनु मेकोमी इन कली रिम्शो बाक्चा गेब। मिनु परमप्रभु यावेमी पाप रे प्रोंइब, येसु ख्रीस्त इन बाक्तीक सोइक्ब। मिनु इन थुं नाइक्पाइक्ब।
- 21 तन्न परमप्रभु यावे आ लोत्र पाइबपुकीमी साइ रे मार मार देमा, मेको लोत्र थमा मदुम सम्म येसु ख्रीस्त परमप्रभु यावे नु स्वर्गम बाक्ब।
- 22 साइ नेसी परमप्रभु यावे आ लोत्र पाइब मोसामी ‘परमप्रभु, इन परमप्रभु यावेमी आं कली योव्रशो खोदेंशो पा आ लोत्र पाइब इन मुर आन दाते रे योव्रशा, इन कली चारच पाइब नु लां कोंइब सेल्ब। मोपा योव्रशोमी इन कली मार मार शेंबा, मेको आ लोत्र नेंशा टिने। ब्यवस्था १८:१५,१९
- 23 सु सुमी आ लोत्र मटीमे, मेकोपुकी जाम्शा लाइनीम’ दे देंशो बाक्त।
- 24 मोसामी देंशो लोत्र ला ममाइ। परमप्रभु यावे आ लोत्र पाइब सामुएल नु अरु शुशेमी मोसामी देंशो खोदेंशो लोत्र पामे बाक्त।
- 25 इन किकी पिपी अब्राहाम आ खिं डा मुर नमी। परमप्रभु यावेमी अब्राहाम कली ‘गे इ खिं डा मुर रे पा रागी डा मुर नेल्लेमी आसीक राइनीम’ दे कबल पशो बाक्माक्त। उत्पती २२:१८
- 26 मोपतीके परमप्रभु यावेमी आ गेय पाइब येसु कली डोंइती इन बाक्तीकेम सोइक्ताक्व। मारदे हना इन कली आसीक गेशा, इन मरिम्शो गेय रे लेत्चा, दे मोदेंशो पाप्तु, दे रुपीने” दे शेंदीमी बाक्त। प्रेरित १३:४६

## 4

### कछडीम राप्पाइक्चा पुंडसीशो

- 1 मिन पत्रुस नु यूहन्नामी मोदेंशो शेना शेंन बाक्सानु, चढेबपुकी, परमप्रभु यावे आ खिं डा ठेयब मुर नु सदुकीपुकी जाक्मा बाक्त। लूका २७:४:५२
- 2 मिन “येसु बेक्शो रे सेंसाक्व। मिनु मुर नेल्ले यो बेक्शो रे सेंसीनीम” दे शेंशो नेंशा, थुं मनुमा बाक्त। प्रेरित २३:८
- 3 मिन पत्रुस नु यूहन्ना आस कली ग्याइक्पाइश्शा “मुल नां रिक्त। मोपतीके कछडीम दीसा बाक्चा” दे मेको नाक्दो जेल्खानमी चोक्पदमे बाक्त।
- 4 पत्रुस नु यूहन्ना आस शेंशो लोत्र नेंशा, थमा सुइक्ब ५ हजार जना जाक्दीश्शो बाक्मा बाक्त। प्रेरित २:४७
- 5 मिनु आ दीसा कछडीम बाक्चा कली यरूसलेम डा हुकुम पाइब, जोक्ब तुइक्ब खाल्पापुकी नु सास्त्री नेल्ल बुक्मा बाक्त।
- 6 मेना ठेयब चढेब हन्नास बाक्माक्त। डोंइती डा ठेयब चढेब काइयाफास, यूहन्ना नु अलेकजन्डर बाक्मा बाक्त। ठेयब चढेब आन खिं डा मुर यो शुश जाक्शो बाक्मा बाक्त। लूका ३:१-२
- 7 मेको नेल्ल खुम्सीशा बाक्मानु, पत्रुस नु यूहन्ना आस कली जेल्खान रे गुंडपाइश्शा, आन बाक्तीके चाक्पाइश्शा आन डोंइती राप्पदमे बाक्त। मिनु “मेको खोइल मदुक्ब मुर कली सु आ सक्तिमी, सु आ नें ब्रशा सापांडसी, लो देनीस” दे हिल्लो पामे बाक्त। मती २१:२३



8 मिनू पत्रुस परमप्रभु यावे आ सोक्तीमी ब्रीशा, मेको आन कली “इ इस्राएल डा हुकुम पाइब नु खाल्पापुकी, आं लोत्र नेनीने। मती १०:१९-२०

9 मेको खोइल मदुक्ब कली खोइल सापाइश्शा, रिम्शो गेय पाइतस्कु। दोपा सापाइस्कु, दे तुइक्वा दाक्नीनी हना, शेनन्नी।

10 गे ला ममाइ, तन्न इ इस्राएल डा मुर नेल्लेमी रुप्चा माल्नीम। मेको खोइल मदुक्ब मुर नासरथ डा येसु ख्रीस्त आ नें ब्रशा साशा गाक्ने चाप्ब दुम्माक्त, दे रुपीने। मेको नासरथ डा येसु ख्रीस्त कली गेपुकीमी शीमी केप्शा कांटी थोक्शा क्याइक्पाइश्शा साइक्पाइक्तीनी। तन्न परमप्रभु यावेमी मेको कली बेक्शो रे सेंताक्व। प्रेरित ३:६,१३-१६

11 खिं सेल्बपुकीमी गारो प्रोवडमेनु, एको फुल्लु मगार, दे ताइक्तमे बाक्त। मेको मगारथु, ताइश्शो फुल्लु चहिं सुर डा जग फुल्लु दुम्माक्त, दे ब्रेक्शो लोत्र, मेको येसु आ पर्वम ब्रेक्शो बाक्ब, दे रुपीन। मती २१:४२; भजन संग्रह ११८:२२

12 मुर आन कली श्येत नु पाप रे प्रोइब येसु ख्रीस्त का ला बाक्ब। परमप्रभुमी येसु ख्रीस्त कली अधिकार गेशा, मुर नेल्ल आन क्येडा ठेयब सेल्लु। मिनु आ नेमी ला ब्रोइचा ताइसीब, दे तुइक्तीने” दे माइक्मी बाक्त। प्रेरित १०:४३; मती १:२१

13 पत्रुस नु यूहन्ना शुश मशेंसीशो बाक्ताक्स हना यो, जोक्ब तुइक्ब खोदेशो पा महिंथु, ठेयब थुं पा लोत्र पाम्से बाक्त। मेको लोत्र नेशा, कछडी पाइबपुकी छक लाक्मा बाक्त। मिनु मेको निक्शी थमा पा येसु नु काथा गाक्ब काथा बाक्ब बाक्सा बाक्त, दे तुइक्तमे बाक्त।

14 सापाइक्चा पुंडसीशो मुर पत्रुस नु यूहन्ना नु काथा राप्शा बाक्शो तशा, जोल पाम्से बाक्त देशा, आस लोत्र जोल सेल्ले मचाप्थु, मारेइ देने मचाप्मे बाक्त। प्रेरित ३:८-९

15 मिनु पत्रुस, यूहन्ना नु साशो मुर सांफा आन कली गुंडशा वोइश्शा “मुल मार पया” दे लोत्रसी पचा गोत्रमे बाक्त।

16 मिनु लोत्रसी पा “खोइल मदुक्ब कली सापाइश्शा मेको निक्शीमी ठेयब छक लाक्चा डा गेय कौंडताक्स। इ यरूसलेममी बाक्बपुकीमी थमा लोत्र बाक्माक्त, दे नेल्लेमी तुइक्नीमी। मिनु गोपुकीमी थमा ममाइ देने मचाप्नय। यूहन्ना ११:४७

17 तन्न मोदेशो लेंशा मदुल्ल, दे मेको आस कली मार पचा देशा हना, मुल डा मेरे येसु आ नें सुइ कली मतुइक्पाइक्चा नमी, आ नें ब्रशा सुइ कली मसापाइक्चा नम, दे माइक्चा नसी” दे सल्ला पामे बाक्त।

18 मिनु पत्रुस नु यूहन्ना आस कली खिंम ओइशा “हेरकादे, मुल डा मेरे येसु आ नें मब्रचा। सुइ मुर आन कली मशेंचा। मतुइक्पाइक्चा नम” देमा बाक्त।

19 मिनु पत्रुस नु यूहन्नामी “परमप्रभु यावे आ देशो टिचा देय इन देशो टिचा? एको निक्शीमी परमप्रभु यावेमी तेको पचा देबा, दे आंमा मिन्तीने। प्रेरित ५:२८-२९

20 गो निक्शी चहिं आंस मिक्चीम तशो नु आंस नोफामी नेशो लोत्र मदेंथु मचाप्नस्कु। मेको रुपीन” देसा बाक्त।

21 मिनु मेको आस दोस थिन्ने मचाप्तीके मेकोपुकीमी “हेरकादे, मुल डा मेरे मोदेशो गेय मपसे” दे हिंच कौंडशा, लोत्र थोक्शा, सोइक्तमे बाक्त। शुश मुरुमी आस पशो छक लाक्चा डा गेय तशा, परमप्रभु कली ठेयब सेल्ला सेल्ल बाक्बाक्मा बाक्त।

22 साशो मुर चहिं ४० बर्स लाक्शो बाक्माक्त। मोपतीके मेको कली साशो तशा, नेल्ल छक लाक्मा बाक्त।

परमप्रभु कली ठेयब सेल्लो

23 मिनु पत्रुस नु यूहन्ना प्रोइचा पुंडसीशा, वारच आन कली गुम्य लसा बाक्त। मिनु सु सुमी मार मार पवा, मार मार देमा, मेको नेल्ल शोत्रडसे बाक्त।

24 मिनु आस लोत्र नेशा, नेल्ल थुं का पा परमप्रभु यावे कली ठेयब सेल्ला “परमप्रभु यावे, नेल्ल आन कली सासन पाइब, गे सरीड, रागी, समुन्द्र नेल्ल सेल्लतीनी। मिनु मेकेर बाक्शो मारेइ मारेइ सेल्लतीनी। मिनु मेको आन कली कोत्रनीनी।

25 साइ इन लोत्र पाइब किकी पिपी, आंइ आफ दाऊद कली इन सोक्त रे पा ‘अर्को रागी डा मुरपुकी मारदे गाइक्नीमी, मारदे चुरनीमी? मुरपुकीमी मारदे शोर गाक्शो दूली मिन्नीमी?

26 परमप्रभु यावे नु आ तेल लुक्शो, ख्रीस्त आस जोरी सत्रु दुम्शा, रागी डा पिपपुकी नु हुकुम पाइबपुकी थुं का दुम्शा बुक्नीम’ देपाइक्तीनी। भजन संग्रह २:१-२

27 मोपा साइ इन पपाइश्शो लोत्र सिनाक्त मुलाक्त गाम्ना गाम्न पित। मारदे हना इन सोइश्शो, इन गेय पाइब येसु, आ जोरी सत्रु आंइ मिक्चीमी ताइतक। पिप हेरोद का, पन्तीयस पिलातस का, अर्को रागी डा मुर नु इस्राएल डा मुर नेल्ल गारशा, आंइ सहरमी बुक्शो ताइतक। लूका २३:१२

28 मेकोपुकीमी इन देशो डा लाक्शा मारेइ पने मचबेम। इन देशो ला पने चाप्तेक्म। प्रेरित २:२३

29 परमप्रभु, मेकोपुकीमी हिंच कौंडताक्म हना यो, महिंथु ठेयब थुं पा इन लोत्र शेंतीक सक्ति तकल, दे पुंडनीकी। एफिसी ६:१९

30 परमप्रभु यावे, इन गेय पाइब येसु आ नें ब्रशा, सापाइक्तीक गेय, छक लाक्चा डा गेय नु चिन्ड कौंडने चाप्कल, दे पुंडनीकी” दे प्रभु कली ठेयब सेल्ला पुन्मे बाक्त।

31 मोदेशो प्रार्थना पने थुम्मे चोटीन खिनु कुशो खोदेशो पा आन बुक्शा बाक्तीके एर आंथ नेल्ल हिम्से बाक्त। मिनु नेल्ले परमप्रभु यावे आ सोक्तीम प्रिंचा पुंडसमा बाक्त। मिनु महिंथु ठेयब थुं पा परमप्रभु आ लोत्र शेना शेन गाक्बाक्मा बाक्त।

थमा सुइक्ब नेल्ल थुं का डा दुम्शो

32 मिनू थमा सुइक्व आन थुं नेल्ल कांडचीक दुम्शा, मेकोपुकी नु बाक्शो मारेइ मारेइ नेल्ल इं के मिम्बाक्मा बाक्त। सुइमी यो आं के, इं के मदेबाक्मा बाक्त। प्रेरित २:४४

33 मिनू येसु आ सोइश्शोपुकीमी सक्ति पाइश्शो लोत्र पा प्रभु येसु बेक्शो रे सेंचा पुंडसाक्व, दे नेपाइक्वाक्मा बाक्त। मेको नेल्ल शुश आसीक तामे बाक्त। प्रेरित २:४७

34 मोपतीके श्येत जाइब का यो मबाक्मा बाक्त। मारदे हना रू खिं थीबपुकीमी रू खिं का निक्शी लेयशा, क्येट चाक्शा, प्रेरित २:४५

35 मेको १२ जना सोइश्शो आन कली गेशा, सु सु कली माल्मा, मेको आन कली योक्शा गेचा नमी, दे गेबाक्मा बाक्त। मिनू मेकोपुकीमी योक्बाक्मा बाक्त।

36 मोदेशो गेब का चहिं योसेफ माइश्शो मुर का बाक्माक्त। मेको योसेफ साइप्रस रागीमी जरमेशो लेवी आ थर डा बाक्माक्त। सोइश्शोपुकीमी योसेफ आ याइनी नें बारनाबास वोइश्शो बाक्मा बाक्त। बारनाबास देशो “आन थुं ग्येत्य लुकच दुम्शो मुर आन कली आन थुं नाइक्पाइक्व” दे रुम्सीब। प्रेरित ११:२२-२६; प्रेरित १२:२५; प्रेरित १५:२; गलाती २:१कलस्सी ४:१०

37 मेको बारनाबासमी रू का लेयशा क्येट चाक्शा, सोइश्शो आन गुइमी गेवा बाक्त।

## 5

हनानीया नु सफीरा

1 मिनू हनानीया नु आ मीश सफीरामी यो आस रू का लेयडसे बाक्त।

2 मिनू क्येट ताक्शा, इक्का गो वोंइसीस, लीशो चहिं नेल्ल ओशो ला, दे सोइश्शो आन कली गेचा, दे लोत्रसी गारपदसे बाक्त। मिनू मोपा मेको लीशो क्येट हनानीयामी चोत्रदीम्माक्त। प्रेरित ६:३४-३७

3 मिनू सोइश्शो आन बाक्तीके जाक्दीश्शा, क्येट गेवानु, पत्रुसमी “हनानीया, मारदे गे इ थुंम सैतान ओत्रका गेशा, परमप्रभु यावे आ सोक्त कली जोल पवी? रू लेयशो क्येट नेल्ल ओशो ला बाक्ब, दे मारदे इक्का खुइश्शा वोदी?

4 मेको रू मलेयसी नु इस केन बाक्त। लेयसी नोले मेक रे जाक्शो क्येट यो इस केन बाक्त। मिनू मारदे जोल पसी? गे आइ कली जोल मपसी, तन्न परमप्रभु यावे कली जोल पाइतीसी” दे मदा बाक्त।

5 मिनू हनानीयामी पत्रुस आ देशो नेशा, दिड गोल्शा बेक्माक्त। मिनू मुरपुकीमी मेको लोत्र नेशा, शुश हिंमा बाक्त।

6 मेकर खुम्सीशो टिटापुकीमी आ बेक्शो रां लाइश्शा थिम्मे बाक्त।

7 मिनू हेररा घन्टा सां नोले हनानीया आ मीशमी आ वोंइश बेक्त, दे मतुइक्थु, मेकेर जाक्माक्त।

8 मिनू पत्रुसमी “इस रू ओशोमीन लेयसी? लो, देनो” देमेनु “ओशोमीन लेयतस्कु” देमाक्त।

9 मिनू पत्रुसमी “गे निक्शी गारशा, मोदेशो पा परमप्रभु यावे आ सोक्त कली जोल पचा दुम्बा? इ वोंइश कली थिम्थ लाइबपुकी लेरशा जाक्चाम्तेक्म। इच्छी ना इ कली यो लाइश्शा थिम्नीम” देमेनु, मीश मुर यो दिड गोल्शा बेक्माक्त।

10 मिनू टिटापुकी जाक्शा कोत्रडमेनु, सफीरा यो बेक्शो तामे बाक्त। मिनू लाइश्शा आ वोंइश थिम्तीके आ नेक्था थिम्मे बाक्त।

11 मिनू थमा सुइश्शा बुक्बपुकी नु मेको लोत्र नेंब नेल्लेमी “मो देशो हेंथे पा जोल पचा मदुम्बाक्माक्त” दे तुइश्शा, शुश हिंमा बाक्त।

सोइश्शोपुकीमी गेय पशो

12 मिनू सोइश्शोपुकीमी मुर आन दातेमी शुश चिन्ड नु छक लाक्चा डा गेय पाम्तेक्म। मेको नेल्ल सोलोमन नें वोइश्शो थाम पाइश्शो टेयब कोठाम बाक्बाक्मा बाक्त। प्रेरित ३:११

13 थमा मसुइक्वपुकी मेकोपुकी नु काथा गाक्चा बाक्चा हिंशा, मेको आन कली टेयब सेल्शा, आन पर्वम रिम्शो लोत्र ला पाइबाक्मा बाक्त।

14 मिनू वोंइश मुर नु मीश मुर शुशेमी प्रभु कली थमा सुइक्व दुम्शा, तेम्सीन सीन शुश बारना बारन लमा बाक्त। प्रेरित २:४७

15 सोइश्शोपुकीमी शुश छक लाक्चा डा गेय पशो तशा, मुरपुकीमी रोइ पाइब आन कली चाक्शा, लां पित्थ इप्पाइश्शा, वोइक्बाक्मा बाक्त। मारदे हना पत्रुस मेको लां गाक्मेनु, आ वांकुम योइश्शा साब, दे मिम्शा मो पाइबाक्मा बाक्त। प्रेरित १९:११-१२

16 यरूसलेम एर ओंथ सहर डा रोइ पशो नु वोलम तशो मुर शुश आन कली चाक्बाक्मा बाक्त। मेकोपुकी यो नेल्ल साशा लाइबाक्मा बाक्त।

सोइश्शोपुकी खेदा पचा पुंडसीशो

17 सोइश्शोपुकीमी मोदेशो छक लाक्चा डा गेय पशो तशा, टेयब चढ़ेब नु सदुकी आन थुंम गेहे पामे बाक्त। प्रेरित ४:१,६

18 मिनू सोइश्शो आन कली ग्याइक्पा लाइश्शा, जेल्खानमी चोक्पदमे बाक्त।

19 मिनू मेको नाक्दो परमप्रभु यावे आ स्वर्ग डा गेय पाइब कामी लाप्यो रोकशा, मेको आन कली गुंडदीमी बाक्त। प्रेरित १२:७

20 मिनू गुंडशा “परमप्रभु यावे आ खिं लशा, मुर आन कली येसु आ नेमी ब्रोंइतीक लां आ पर्वम शेंदीने” दे सोइक्तीमी बाक्त।

21 मेको लोत्र टिशा, सुनी कना परमप्रभु यावे आ खिं जाक्दीश्शा, ओत्रशा शेंचा गोत्रमे बाक्त।

कछडीमी राप्पाइक्का पुंडसीशो

मेको लोत्र टिशा, सुनी कना परमप्रभु यावे आ खिं जाकदीरशा, ओत्रशा शेंचा गोत्रमे बाक्त। मिनु ठेयब चढेब, मेको नु बाकबपुकी, इस्राएली आन जोकब तुडक्ब खाल्पापुकी खुम्सीशा “सिनाक्त चोकपाइरशा आन कली चाक्का” दे जेल्खान सोइकतमे बाक्त।

22 मिनु गेय पाइबपुकी लशा कोत्रडमेनु, मेको चोकका पुंडसीशोपुकी मथिदमे बाक्त। मिनु लेरशा जाक्का, देमा बाक्त।

23 मेकोपुकीमी “जेल्खानी जाकदीकानु, खाल पाइब बाक्तेकम। लाप्चो नेल्ल चोकस डा चोकस बाक्तेकम। मिनु आगा कोत्रशोनु, इन माल्शो मुरपुकी चहिं मबाकम” देमा बाक्त।

24 मिनु परमप्रभु यावे आ खिं डा कप्तान नु ठेयब चढेबपुकीमी मेको लोत्र नेंशा “ते लमा, दोपा ओदेशो दुम्मे?” दे छक लाक्का, मुल मार पचा, दे मिम्ने मचाप्मे बाक्त।

25 मिनु मुर का जाक्का “सिनाक्त गेपुकीमी जेल्खानीमी चोकपाइरशा मुरपुकीमी परमप्रभु यावे आ खिंमी मुर आन कली शेना शेंन बाक्नीम” देमाक्त।

26 मिनु कप्तान नु गेय पाइबपुकी परमप्रभु यावे आ खिं लशा, सोइरशा आन कली मारेड मपथु, चाक्मे बाक्त। “मारदे हना मरिम्शो पाइतय हना, मुरपुकीमी इं कली फुल्लु आप्शा साइक्नीम” दे हिंमा बाक्त।

27 मिनु कछडीम चाक्का, आन डोंइती राप्पाइक्की बाक्त।

28 मिनु ठेयब चढेबमी “येसु आ नें मशेंचा, मुर आन कली मतुडक्पाइक्का दैतक। गेपुकीमी चहिं यरूसलेम नेल्ल मेको लोत्र फनी बाक्त। लोत्र फ्रशो ला ममाइ। मेको येसु कली गेपुकीमी साइरशा, दे आइ कली दोस गेनी बाक्त” दे हुइक्तीमी बाक्त। प्रेरित ४:१८; मती २७:२५

29 मिनु पत्रुस नु येसु आ सोइरशा नेल्लेमी “गेपुकीमी मुर आन लोत्र क्येडा परमप्रभु यावे आ लोत्र टिचा, दे थुं फ्रेताक्क। प्रेरित ४:१९; दानीएल ३:१७-१८

30 इं किकी पिपी आन परमप्रभु यावेमी गेपुकीमी शीम केप्शा, कांटी थोकशा क्याइरशा साइक्पाइरशा येसु कली बेक्शो रे सेंताक्क। प्रेरित ३:१५

31 परमप्रभु यावेमी इस्राएली आन थुं आ गे लेप्पाइक्क, लां कोइब कली नु पाप रे प्रॉइब सेल्शा, आ ग्युरा गे निप्पाइक्कु। प्रेरित २:३३

32 मेको नेल्ल आइ मिक्चीमी ताइतक। आ देशो टीब आन कली परमप्रभु यावेमी आ सोक्त गेब। मिनु परमप्रभु यावे आ सोक्तीमी “मेको लोत्र नेल्ल थमा बाकब” दे तुडक्पाइक्क, दे तुइक्तीने” देमा बाक्त। लूका २४:४८; यूहन्ना १५:२६-२७

33 मोदेशो लोत्र पशो नेंशा, गाइरशा “मेको आन कली मसाइक्थु मप्रॉइचा नमी” देमा बाक्त।

गमालीएल आ देशो पशो

34 मिनु मेको आन दातेमी गमालीएल माइरशा फरिसी का बाक्माक्त। मेको निसाफ पतीक आ पर्वम शेंब बाक्माक्त। मुर नेल्लेमी मेको कली मान पाइबाक्मा बाक्त। मिनु गमालीएलमी मेकेर बाकब आन कली मोपा गाइरशा तशा, सोइरशा आन कली लाडगा गुंडशा वोइक्की बाक्त। प्रेरित २२:३

35 मिनु कछडीम बाकब आन दातेमी राप्शा, मेको आन कली “आं लोकब इस्राएलीपुकी, मेको मुर आन कली मार पचा चिकतीनी, मेको होस पा पने। मोपतीके आं लोत्र का निक्शी नेनीने।

36 साइ थुदास माइरशा आ पर्वम गो नेल्लेमी तुइक्ताक्क। मेकोमी ठेयब सेल्सीशा, ४ सहे मुर आन कली आ नोले खोइक्क सेल्लु। मिनु थुदास साइक्का पुंडसाक्क। मिनु आ नोले खोइक्क नेल्ल ब्राशा गाक्तेकम। मिनु मेको आन लोत्रसी जाम्शा लत।

37 मेको नोले मुर आन कली हिक्तीक बर्समी गालील डा यहूदा माइरशा मुर का बोक्माक्त। मेकोमी यो आ नोले खोइक्क मुर सेला बाक्त। मेको यो जाम्शा लमाक्त। मिनु आ नोले खोइक्क नेल्ल ब्राशा गाक्मा बाक्त।

38 मोपतीके मेको येसु माइरशा आ नोले खोइक्क आन कली मारेड मपाइय्य। मो प्रॉइशा सोइक्तय। मेको आन लोत्र मुरुमी मिम्शो लोत्र बाक्त हना, मारेड मडुथु जाम्शा लाइब। मती १५:३३

39 परमप्रभु यावे आ पशो बाक्त हना चहिं, गेपुकीमी तेक्शा यो मतेक्सीब। मेको ला ममाइ। गेपुकी परमप्रभु यावे कली मरिम्शो पाइब दुम्नीनी” दे माइक्की बाक्त।

40 मिनु गमालीएल आ लोत्र नेंशा, बिस्समा बाक्त। मिनु लाडगाम सोइरशा आन कली खिं गा ब्रेरशा, का का पा युक्पदमे बाक्त। मिनु “मुल डा मेरे येसु आ नेमी शेंशा मगाक्कीने” दे प्रॉइशा सोइक्तमे बाक्त। मती १०:१७

41 मिनु सोइरशापुकी ग्येरसीशा, मेकेर रे लमा बाक्त। मारदे हना “येसु आ नेमी श्येत जचा रिम्शो दुम्ब” देमा बाक्त। मती ५:१०-१२; १पत्रुस ४:३३

42 मिनु नाक्त कित कित परमप्रभु यावे आ खिंमी, आंम आन खिं खिंमी खुम्सीशा “येसु परमप्रभु यावे आ सोइरशा ख्रीस्त बाकब” दे शेना शेंन बाक्बाक्मा बाक्त।

## 6

गेय पाइब आन कली योत्रशो

1 मेना थमा सुइक्बपुकी शुश बारन लमा बाक्त। ग्रीक लोत्र नु हिब्रू लोत्र पाइबपुकीमी गन गन पाप्तेकम। मारदे हना नाक्त कित कित योक्तीक जचा थोत्रक मेको आन वोंइश बेक्शो मीश मुरपुकीमी ठीक पा मताइबाक्तेकम। ग्रीक लोत्र नु हिब्रू लोत्र पाइबपुकी यहूदी बाक्तेकम। प्रेरित ४:३८

2 मेको लोत्र नेंशा सोइशशोपुकीमी थमा सुइकब नेल्ल आन कली ब्रेशशा “आंड लोकबपुकी, गो परमप्रभु यावे आ लोत्र शेंचा प्रोइशा, जचा फेक्चा योक्शा गाक्चा आंड गेय ममाइ।

3 मोपतीके मेको योक्चा कली मुरपुकी वोइक्चा मालनय। दोदेशो मुर मालनय देशा हना, मुरपुकीमी हिव्को, परमप्रभु यावे आ सोक्तीमी ब्रीशो नु जोक्ब तुइक्ब ७ जना गेय पाइब मुर योत्रचा मालनय। १तिमोथी ३:८-१०

4 गो चहिं परमप्रभु कली प्रार्थना पना पन शेंथ गाक्चा मालनय” देमा बाक्त।

5 सोइशशो आन लोत्र नेंशा नेल्ल आन थुं नुशा, ७ जना मुर आन कली योत्रचा बिस्समा बाक्त। मिनु सु सु आन कली योत्रडमे बाक्त देशा हना, रिम्शो थमा सुइकब परमप्रभु यावे आ सोक्तीमी ब्रीशो स्तीफानस, फिलीप, प्रोकोरस, निकानोर, तीमोन, परमीनास नु एन्टीओक डा निकोलाउस आन कली योत्रडमे बाक्त। निकोलाउस चहिं अर्को रागी डा मुर बाक्शा यो यहूदी दुम्शो बाक्माक्त। प्रेरित ८:५

6 मिनु योत्रशो आन कली सोइशशो आन डोंइती राप्पदमे बाक्त। मिनु सोइशशोपुकीमी योत्रशो आन तारी आन गुड वोइशशा, मेको आन परबम परमप्रभु कली पुन्मे बाक्त। प्रेरित १:२४; प्रेरित १३:३; प्रेरित १४:२३

7 मिनु परमप्रभु यावे आ लोत्र तेइ तेइ बारना बारन लमाक्त। यरूसलेममी शुश मुर येसु ख्रीस्त कली थमा सुइकब दुम्शा, तेम्सीन सीन बारना बारन लमा बाक्त। चढेब शुश यो थमा सुइकब दुम्मा बाक्त। प्रेरित २:४९; प्रेरित १९:२०

स्तीफासमी लोत्र पशो

8 मिनु स्तीफानस चहिं परमप्रभुमी शुश शिशो नु सक्ति गेचा पुंडसीशो बाक्माक्त। मोपतीके मुर आन कली शुश चिन्ड नु छक लाक्चा डा गेय नु चिनु कोंइशा बाक्बाक्माक्त।

9 मिनु लिबेरती माइशशो गुन्तीक खिं नु साइरेनी, अलेकजेन्दीया, सिलीसीया नु एसीया रे जाक्शो शेंबपुकीमी स्तीफानस नु जिशो बाक्तेक्म।

10 तन्न स्तीफानस परमप्रभु यावे आ सोक्तीमी ब्रीशा जोक्शो तुइशशो ब्वाक्मेनु, सुइमी ग्राने मचाप्मे बाक्त। लूका २१:१५

11 मोपा ग्राने मचाप्तीके सुइ आन मतुइक्थु, मुर आन कली पोक्शा “मेकोमी इं किकी पिपी मोसा नु परमप्रभु यावे आ परबम हेंथे नु ग्राना दिशो लोत्र पशो नेंतक” दे जोल पा लोत्र ब्रपदमे बाक्त। मती २६:६०-६६

12 मोदेशो जोल लोत्र पाइब मुर, यहूदी आन जोक्ब तुइक्ब खाल्पा नु सारस्त्री आन कली पोक्गमे बाक्त। मेको लोत्र पा बुइबपुकीमी स्तीफानस कली ग्याइशशा, कछरीम राप्पदमे बाक्त।

13 मिनु जोल पा सांकळी वोइशशा, मेको आन कली “एको मुरुमी परमप्रभु यावे आ खिं नु परमप्रभु यावे आ अरेशो लोत्र आ परबम शुक्शी पा हेंथे लोत्र पाइब। येरमीया २६:९, ११

14 मेको नासरथ डा येसुमी परमप्रभु यावे आ खिं प्रेम्ब। मोसामी गेशो पतीके लोत्र प्रोइशा, नक पतीक वोइक्ब, देशो आंड नोफामी नेंतक” दे ब्वाक्पदमे बाक्त। यूहन्ना २:१९

15 कछडीम बाक्बपुकीमी स्तीफानस गे कोत्रडमेनु, आ कुल परमप्रभु यावे आ स्वर्ग डा गेय पाइब आन कुल खोदेशो पा महिंथु बाक्शो तामे बाक्त। मिनु कोत्रस डा कोत्रस दुम्मा बाक्त।

## 7

स्तीफानस आ लोत्र

1 मिनु ठेयब चढेबमी “एको आन देशो लोत्र थमा देय जोल, लो देनो” देमेनु,

2 स्तीफानसमी “आं आफ, बाजे नु आं लोकबपुकी, गो लोत्र का निक्शी पाइनुड। दोपा छेडछेड नु सक्ति पाइशशो परमप्रभु यावेमी इं किकी पिपी अब्राहाम कली तपांडसे, गो मेको नेल्लेमी तुइक्नय। उत्पत्ती ११:- ५०:-; यहोसु २४:३२

3 हारान जाक्दीत्वा क्येडा डोंइती अब्राहाम मेसोपोटामीया रागीम बाक्शो बाक्माक्त। मेकेर बाक्मेनु, परमप्रभु यावेमी ‘इ रागी नु इ खिं डा मुर प्रोइशा लावो। ते लशा बाक्चा माल्लेवे, नोले तुइक्पाइक्नन’ दे माइशशो बाक्माक्त।

4 मिनु अब्राहाम कल्दी आन रागी प्रोइशा, हारान सहर जाक्दीशशा बाक्माक्त। मिनु आ आफ बेक्म नोले परमप्रभुमी अब्राहाम कली हारान रे मुल इ बाक्शो रागीमी चाक्पा बाक्त।

5 मेना परमप्रभु यावेमी अब्राहाम कली खोइल थेक्तीक रागी यो मगेशो बाक्माक्त। तन्न ‘एको रागी इ चच युइ आन कली गेनुडमी’ दे लोत्र पशो बाक्माक्त। मेना अब्राहाममी तमी तौ काइ यो मथिशो बाक्माक्त।

6 मिनु परमप्रभु यावेमी ‘नोले इ चच युइ मुर आन रागीमी लाइनीमी। मेको रागी डा मुरपुकीमी इ मुर आन कली वाइलीम वाइल सेल्शा, ४ सहे बर्स सम्म श्येत गेशा वोइक्नीम। उत्पत्ती १५:१३-१४; प्रस्थान १२:४०

7 तन्न गो मेको श्येत गेब आन कली सजाइ गेनुडमी। इ चच युइ चहिं मेको रागी प्रोइशा एक लेशशा जाक्शा, आं कली ठेयब सेल्शा मानेनीम’ दे परमप्रभुमी अब्राहाम कली नोले दुम्ब लोत्र तुइक्पदा बाक्त।

8 मिनु नोले परमप्रभुमी अब्राहाम कली खोइक्तीक चिनु डा कबल गेवा बाक्त। मिनु अब्राहाममी आ तौ इसहाक थिशो, ८ नाक्त दुम्मेनु, मेको कली खोइक्तीक चिनु खोदा बाक्त। इसहाक याक्ब आ आफ दुम्माक्त। मिनु याक्ब आ १२ जना तौ आन आफ दुम्माक्त। मिनु मेको १२ जना तौ इ यहूदी १२ थर दुम्मा बाक्त।

9 मिनु याक्ब आ तौ आन लोकब योसेफ कली गेहे पा, मेको कली इजीप्ट रागी डा मुर आन कली लेयडमे बाक्त। तन्न परमप्रभु यावेमी मेको कली कोत्रशो बाक्माक्त।

10 मिनू आ श्येत रे प्रॉइबाक्माक्त। मिनू योसेफ इजीप्त रागी डा पिप फाराओ आं डोंइती जाक्मेनु, मेकोमी आ जोक्तीक तुइक्तीक थुं तशा, योसेफ कली शुश दाक्शो बाक्माक्त। मिनू पिप फाराओम योसेफ कली आ रागी डा ठेयब मुर सेला बाक्त।

11 मिनू इजीप्त नु कनान रागीमी ठेयब अन्काल दुम्तीके, मुरपुकीमी जचा मतामे बाक्त। इं किकी पिपीमी यो जचा मतामे बाक्त।

12 इजीप्तमी अन्न ग्याप्चा तांडसीब देशो नेंशा, याकूबमी आ तौ आन कली इजीप्त सोइक्तीमी बाक्त।

13 मिनू ग्याप्चा चाक्मेनु, मजाक्दीत्थु, लेंशा सोइक्तीमी बाक्त। मोपा लमानु, योसेफमी आ लोकब आन कली 'गो इन लोकब योसेफ नड' दे तुइक्पपांडसे बाक्त। में डा मेरे फाराओमी मेकोपुकी योसेफ आ मुर बाक्मा बाक्त, दे तुइक्ता बाक्त।

14 मिनू योसेफमी आ आफ, आ लोकबपुकी आ खिं डा मुर नेल्ल आन कली इजीप्त रागी जाक्शा बाक्कीन, दे ब्रथ सोइक्तीमी बाक्त। मेको नेल्ल ७५ जना बाक्मा बाक्त।

15 मिनू याकूब इजीप्त जाक्दीरशा, शुश बर्स बाक्शा, मेकेर उइ बेक्माक्त। नोले इं किकी पिपी याकूब आ तौ यो मेकेर बेक्मा बाक्त।

16 इजीप्तमी बेक्तेक्म हना यो, आन बेक्शो रां शेकेम सहर लाइरशा थिम्मे बाक्त। अब्राहाममी शेकेम सहरम मेको थिम्तीके रू हमोर आ तौपुकी रे चांदी गेशा, ग्याप्शो बाक्माक्त।

17 मिनू परमप्रभु यावेमी अब्राहाम कली गेशो लोव्र जाक्दीम्माक्त। मोपतीके इजीप्त रागीमी इं मुर बारना बारन लशा, शुश दुम्मा बाक्त। प्रस्थान १:-३:-

18 मिनू इजीप्त रागीमी अर्को पिप दुम्माक्त। मेको योसेफ नु आ खिं डा मुर आन कली मतुइक्ब बाक्माक्त।

19 मेको पिपीमी इं मुर आन कली शिशो मपथु, शुश श्येत गेवा बाक्त। आल थीब आन कली यो आन आल थुल्चा मगेशु ताइक्पदा बाक्त।

20 मेना मोसा जरमेसे बाक्त। मेको परमप्रभु यावे आ डोंइती थम दारशो आल बाक्त। मोपतीके आम आफोमी मेको कली महिना सां सम्म आस खिंमी खुइरशा थुल्से बाक्त।

21 महिना सां नोले आल कली प्रोन्से बाक्त। मिनू फाराओ आ तमीमी मेको आल कली थिरशा लाइरशा, आ तौ सेला बाक्त।

22 मिनू पिप बाक्तीक खिंमी बाक्मेनु, इजीप्त रागी डा ठेयब मुर आन जोक्शो तुइरशो आं यो नेल्ल जोक्ब तुइक्ब दुम्माक्त। मिनू मोसा आ लोव्र नु आ गेय नेल्ल सक्ति पाइरशो दुम्माक्त।

23 मिनू मोसा ४० बर्स दुम्मेनु, आ लोकब इस्राएली आन कली गुम्चा थुं पवा बाक्त।

24 मिनू काबु गुम्थ लमेनु, इजीप्त डा मुरुमी इस्राएली कली तुप्शो तशा, मोसामी इस्राएली कली प्रॉइशा, इजीप्ती कली तुप्शा सदा बाक्त।

25 मोसामी 'परमप्रभुमी आं कली आं लोकब आन कली श्येत रे प्रॉइब सेलती' आं लोकबपुकीमी एको आंइ कली श्येत रे प्रॉइब बाक्माक्त, दे रूप्शा, आं कली ब्राइनीम, दे मिम्शो बाक्माक्त। आ लोकबपुकीमी चहिं मेको काइ मरुप्शो बाक्मा बाक्त।

26 मिनू आ दीसा मोसा लेंशा मेक जाक्दीम्मेनु, इस्राएली निक्शी आस कली जिशो तवा बाक्त। मिनू मेको आस कली 'गे निक्शी, वोबु दुम्शा यो जिनीसी?' देमाक्त।

27 मिनू मरिम्शो पाइबमी गाइरशा मोसा कली 'गो आंस कली हुकुम नु निसाफ पाइब सुम सेले? प्रस्थान २:१४

28 सिनाक्त एकेर इजीप्ती कली साइरशो खोदेशो पा आं कली सद्दु, देने?' दे नेप्ता बाक्त।

29 मेको लोव्र नेंशा, मोसा इजीप्त रागी रे प्रोक्शा, मिदयान रागीम जाक्दीम्माक्त। मेकेर जाक्दीरशा बाक्मेनु, तौ निक्शी थिमाक्त। प्रस्थान १८:३-४

30 मिदयान जाक्दीरशा, बाक्शो ४० बर्स दुम्माक्त। मिनू काबु सौने डांडा डा गोरशो रागीमी बाक्मेनु, परमप्रभु यावे आ स्वर्ग डा गेय पाइब कामी ब्रशो बुटा कोंइदा बाक्त।

31 मोसामी मोपा ब्रशो तशा छक लाक्शा, ओदेशो मार ब्रमे, दे आ नेक्था लशा कोव्रडा बाक्त। मिनू नेक्था जाक्दीरशा कोव्रडानु, परमप्रभु आ लोव्र नेंना बाक्त। प्रस्थान ३:५-१०

32 'गो इन किकी पिपी आन परमप्रभु यावे नड। गो अब्राहाम, इसहाक नु याकूब आन परमप्रभु यावे नड' देशो नेंशा हिंशा, खिंखि पा बुटा गे यो कोव्रने मचबा बाक्त।

33 मिनू परमप्रभु यावेमी 'इ थेक्शा राप्चा बाक्तीके आं बाक्तीक बाक्ब। मोपतीके इ जुत्ता पुइरशा, आं लोव्र नेनो।

34 इजीप्त रागीम बाक्ब आं मुरपुकीमी शुश श्येत जाम्तेक्म, दे तुइक्ताक्ड। आन श्येत ताता। मिनू आन डाक्शो यो नेंता। मिनू आं मुर आन कली मोदेशो श्येत रे प्रॉइपाइक्चा दुम्ती, दे इ कली इजीप्त सोइक्नन' देशो नेंना बाक्त।

35 'इ कली हुकुम पाइब नु निसाफ पाइब सुम सेले?' दे खेरचा पुंइसीशो मोसा कली परमप्रभु यावेमी हुकुम पाइब नु प्रॉइब सेल्शा, आ स्वर्ग डा गेय पाइब रे बुटाम तपांइसीशा इजीप्त सोइक्ता बाक्त।

36 मिनू शुश चिन्ड नु छक लाक्चा डा गेय कोंइशा, इस्राएली आन कली इजीप्त रे गुंइशा, लल समुन्द्र चाक्दीम्मी बाक्त। मेकेर यो शुश छक लाक्चा डा गेय कोंइदीमी बाक्त। मिनू लल समुन्द्र शोक्शा ४० बर्स सम्म गोरशो रागीमी हिरशा गाक्मानु, शुश छक लाक्चा डा गेय पाइबाक्माक्त। प्रस्थान ७:१०; प्रस्थान १४:२१

37 मेको मोसामी इस्राएली आन कली 'आं खोदेशो, परमप्रभु यावेमी आ लोव्र पाइब इन दाते रे का योव्रशा, आ लोव्र नेंपाइक्ब का सेल्व' दे तुइक्पाइक्मी बाक्त। ब्यवस्था १८:१५

38 इस्राएलीपुकी गोरशो रागीमी बाकमानु, आन कली लां कौंडब मेको मोसा बाकमाकत। सनै डांडामी परमप्रभु आ सोइशशा आ गेय पाइबमी इं किकी पिपी आन कली लोत्र पवानु, मेको मोसा रे पा नैपाइकमी बाकत। मेको लोत्र चहिं मजांमथु गेना हना यो लीब लोत्र बाकब। मुल सम्म गो इं कली गारशो लोत्र बाकब, दे तुइकतीने। प्रस्थान १९:१; व्यवस्था १:१०

39 इं किकी पिपीमी मोसा आ लोत्र मटिथु मनैथु, मोसा कली प्रौइशा आन थुं इजीपत रागी गे हिरदमे बाकत।

40 मिनु हारून कली 'इं कली इजीपत रागी रे एक चाकब मोसा ते लाकगा? बेकम कौं प्रोकम कौं? मतुइसे। मुल लां कौंडब का माल्ताकव। मोपतीके देवता सेल्चा गेकी। मिनु मेको इं कली लां कौंडब दुम्ल' दे पुन्मे बाकत। प्रस्थान ३२:१

41 मिनु सुन के बाछा आ मूर्ति सेल्शा, मार मार क्योरशा जारदमे बाकत। आंम आन गुडमी सेल्शो मूर्ति तशा ग्येरसीशा, जचा तूचा सेल्शा डा मिन बुकशा जामे तूडमे बाकत।

42 मेकोपुकीमी मो पशो तशा, परमप्रभु यावे गाइशशा 'मेकोपुकी नां नु तास्ला कली सेउ पाइब दुम्ल' दे प्रौइमी बाकत। परमप्रभु यावे आ लोत्र पाइबमी 'गे इस्राएलीपुकी, गोरशो रागीम ४० बसं सम्म हिरशा गाक्नीनु, मार मार क्योरशा जारशा, आं कली चहेनी डा?

43 मो मपनी। गे मोलोक देवता आ ताम्बु कुरशा लाइकतीनी। रिफन सोरुल आ मूर्ति सेल्शा लाइकतीनी। मोपतीके इन रागी रे बेबीलोन लाइकनन्नी' दे ब्रेकशो बाकत। आमोस ५:२५-२७

44 इं किकी पिपी गोरशो रागीमी हिरसमानु, परमप्रभु यावे आ ताम्बु यो कुरशा गाक्मा बाकत। परमप्रभु यावे आ ताम्बु चहिं दोपा सेल्चा, दे परमप्रभु यावेमी मोसा कली कौंडशो खोदेशो पा मोसामी सेल्पाइशो बाकमाकत। प्रस्थान २५:९

45 मिनु नोले इं किकी पिपी यहोसु मेको आन लां कौंडब दुम्शा, मेको ताम्बु कुरशा गाक्मा बाकत। मिनु कनान रागीमी जाकदीमानु, मेको ताम्बु आन डौइती कुरशा गाक्शो बाक्तेक्म। परमप्रभु यावेमी मेकेर बाकब मुर आन कली प्राशा खरशा, मेको रागी आन के सेल्शा, मेको ताम्बु मेकेन वोदमे बाकत। मिनु पिप दाऊद आ पाला सम्म मेको ताम्बु मोदेशोन लीमाकत। यहोसु ३:१४; यहोसु १६:१

46 पिप दाऊद परमप्रभु यावे आ दाकशो मुर बाकमाकत। पिप दाऊदमी परमप्रभु यावे कली दाकशा 'याकूब आ परमप्रभु यावे कली खिं सेल्सुड' दे थुं पवा बाकत। २सामुएल ७:१-१६; भजन संग्रह १३२:३-५

47 तन्न आ तौ सोलोमनमी परमप्रभु यावे आ खिं सेला बाकत। १राजा ६:-

48 मिनु नेल्ल क्येडा ठेयब मुरुम सेल्शो खिंमी मबाकब। साइ नेसी परमप्रभु यावे आ लोत्र पाइबमी परमप्रभु यावेमी

49 'सरीड आं नित्तीके बाकब। रागीम आं खोइल थेक्तीक बाकब। मोपतीके आं कली दोदेशो खिं सेल्ने चाप्नीनी? गो आं नाइकचा कली बाक्तीक मार सेल्ने चाप्नीनी?

50 सरीड नु रागी नेल्ल आं सेल्शो ममाइ डा?' दे परमप्रभुमी देमाकत" दे लोत्र पवा बाकत। यूसैया ६६:१-२

51 "ए, गे परमप्रभु यावे आ लोत्र मनैथु मटीब फुल्लु खोदेशो थुं पाइशशोपुकी, गे परमप्रभु यावे कली मतुइकब मुर खोदेशो पाइनीनी। इन किकी पिपीमी पशो खोदेशो पा गे यो परमप्रभु यावे आ सोकत आ देशो मटिथु दूली पाइनीनी। प्रस्थान १२:९; लेवी २६:४; रोमी २:२८-२९

52 इन किकी पिपीमी मार पामे? परमप्रभु आ लोत्र पाइब सु कली श्येत मगेमे डा? नेल्ल आन कली श्येत गेम्तेक्म। श्येत गेशा ला ममाइ। इन कली पाप रे प्रौइब खीस्त जाकब, दे लोत्र नैपा गाकब आन कली साइक्पाइक्ना पाइकन बाक्तेक्म। इन कली पाप रे प्रौइब खीस्त जाकत। मिनु गेपुकीमी मेको कली यो साइक्पाइक्तीनी। २इतिहास ३६:१६; मत्ती २३:३१

53 परमप्रभु यावे आ स्वर्ग डा गेय पाइबपुकीमी मार पचा मार मपचा, दे परमप्रभु यावे आ अरेशो लोत्र शेंसीशा योत्रसीशो दुम्शा यो मटिनी" दे स्तीफानसमी हुइक्तीमी बाकत। प्रस्थान २०:१-२१; गलती ३:१९; हिबू २:२

54 स्तीफानसमी मोदें हुइक्तीमीनु, नेल्ल गाइशशा, लल गोंगों जिशा, खुइ शेप्शा प्रेक्मा बाकत।

55 स्तीफानस चहिं परमप्रभु यावे आ सोक्तीम ब्रीशा, सरीड गे कोत्रडा बाकत। सरीड गे कोत्रडानु, ठेयब सक्ति पाइशशो नु छेडछेड पा तांडसीशो परमप्रभु यावे कली तवा बाकत। परमप्रभु आ ग्युरा गे रागीम जरमेशो, येसु कली यो राप्शा बाक्शो तवा बाकत।

56 मिनु "लो कोत्रडीन, गो स्वर्ग रोक्सीशा, परमप्रभु आ ग्युरा गे रागीमी जरमेशो कली राप्शा बाक्शो ताता" दे माइकमी बाकत। लूका २२:६९

57 मो देमेनु "एको आ लोत्र मनैचा" दे शुश रेयके पा, गुइ पोक्शा प्रेक्शा ग्राम्शा ग्याइकतेमे बाकत।

58 मिनु कीशा लाइशशा, सहर रे गुंइशा, फुल्लु क्रोम्चा गोत्रमे बाकत। सांकछीपुकीमी आन वा प्रुइशशा, सावल नें पाइशशो ठिटा का आ डौइती वोदमे बाकत। लेवी २४:१६; प्रेरित २२:२०

59 मेको हुलमी स्तीफानस कली फुल्लु क्रोम्स डा क्रोम्स पामेनु, स्तीफानसमी "प्रभु येसु, आं सोकत ताक्कीन" दे पुंडडा बाकत। लूका २३:४६

60 मिनु आ पोक्च थेक्शा ठेयब सेंदा पा "प्रभु, एको पाप एको आन कली मरल" देशा, बेक्माकत। लूका २३:३४

## 8

थमा सुइक्बपुकी खेदा पचा पुंडसीशो

1 स्तीफानस कली साइशशो तशा, सावलमी "एको कली साइकचा माल्शो। मिनु साइशशा ठीक पाइतीनी" देमाकत। स्तीफानस कली सादमे नाकत रे यरूसलेम सहरम बाकब थमा सुइक्ब नेल्ल आन कली खेदा पा श्येत गेचा गोत्रमे बाकत।

मिनु श्येत गेशा प्रोक्पदमेनु, मेकोपुकी ब्रशा गाकशा, यहूदीया नु सामरीया रागीमी जाकदीशशा बाक्मा बाक्त। १२ जना येसु आ सोइशशोपुकी ला यरूसलेम उड बाक्मा बाक्त। प्रेरित १:८; प्रेरित ११:१९

2 परमप्रभु यावे कली मान पा हिवपुकीमी स्तीफानस आ बेक्शो रां लाइशशा, थिम्मे बाक्त। स्तीफानस कली साइशशो तशा, थमा सुइक्ब नेल्ल शुश डाक्मा बाक्त।

3 सावलमी चहिं “मेको आन थमा सुइशशो क्याम्चा” दे खिं खिं हिरशा ओत्रशा, थमा सुइक्ब वोंइश मुर, मीश मुर नेल्ल आन कली ग्याइक्पाइशशा, फ्रेंशा लाइशशा जेल्खानमी चोक्पाइक्बाक्माक्त। प्रेरित ९:१; प्रेरित २२:४; १कोरिन्थी १५:९

येसु आ लोत्र ब्रपाइशशो

4 प्रोक्शा ब्राशा गाकबपुकीमी येसु आ लोत्र तेइ तेइ शेंना शेंन गाकबाक्मा बाक्त।

5 फिलीप सामरीया सहरमी जाकदीशशा, मेकेर बाक्ब मुर आन कली “परमप्रभु यावे आ सोइशशो खीस्त येसु बाक्ब” दे शेंदीमी बाक्त। प्रेरित ६:५

6 फिलीप आ शेंशो लोत्र नेंशा, आ पशो छक लाक्चा डा गेय तशा, नेल्लेमी थम नोफा दाइशशा नेम्मे बाक्त।

7 छक लाक्चा डा गेय चहिं मार कोंडबाक्माक्त देशा हना, वोलम तशो मुर आन कली वोल खेरशा सापाइक्बाक्माक्त। वोल खेरानु, वोलम तशो मुर वाइ ब्रेशशा, वोल प्रोक्बाक्माक्त। गुड खोइल मडुक्ब मुर शुश आन कली गुड खोइल दुक्ब गाकब सेल्बाक्माक्त। मर्कूस १६:१७

8 मोपतीके मेको सहरमी सापाइक्चा पुंडसीब मुर नेल्ले ग्येरसीबाक्मा बाक्त।

चटक कोंडब सिमोन

9 मेको सहरमी सिमोन नें पाइशशो मुर का बाक्माक्त। मेको डोंइती रे सामरीया रागी डा मुर आन कली चटक कोंइशा, टेयब सुंडसीशो बाक्माक्त।

10 सहर डा मुर नेल्लेमी एको मुर परमप्रभु आ सक्ति तशो बाक्माक्त, दे टेयब सेल्शा, मान पशो बाक्मा बाक्त।

11 शुश बर्स सम्म सिमोनमी चटक पा छक लाक्पाइक्तीके मुर नेल्लेमी सिमोन आ देशो नोफा दाइशशा आ पशो कोत्रशा बाक्शो बाक्मा बाक्त।

12 मिनु फिलीप जाकशा, मुर आन कली येसु खीस्तमी इ कली पाप रे प्रोंडब, दे परमप्रभु यावे आ राज्य डा लोत्र नु येसु खीस्त आ पर्बम नेंपाइक्ना पाइक्न, शेंना शेंन गाकमेनु, मीश मुर नु वोंइश मुर शुशेमी थमा सुइशशा, ब्वाक्कुम खुम्शा गुंडचा पुंडसमा बाक्त।

13 शुशेमी थमा सुइशशा तशा, मेको चटक पा गाकब सिमोन यो थमा सुइक्ब दुम्शा, ब्वाक्कुम खुम्शा गुंडचा पुंडसे बाक्त। मिनु फिलीप कली मप्रोंइथु, काथा गाकबा दुम्माक्त। फिलीपमी चिन्ड नु छक लाक्चा डा गेय कोंइदानु, सिमोन यो छक लाक्बाक्माक्त।

14 मिनु नोले यरूसलेममी बाक्ब सोइशशोपुकीमी “सामरीया डा मुरपुकीमी परमप्रभु यावे आ लोत्र थमा सुइक्ब दुम्तेक्म” देशो नेंशा, पत्रुस नु यूहन्ना आस कली सामरीया सोइक्तमे बाक्त।

15 मिनु मेको निक्शीमी “परमप्रभु यावे आ सोक्त थमा सुइक्बपुकी नु लील” दे प्रार्थना पथ जाकदीस्सा बाक्त।

16 मारदे हना सामरीया डा मुर सुइ आन कली परमप्रभु यावे आ सोक्त मगेशो बाक्माक्त। प्रभु येसु आ नेंमी ब्वाक्कुम खुम्शा गुंडचा ला पुंडसीशो बाक्मा बाक्त।

17 मिनु पत्रुस नु यूहन्नामी आस गुइ थमा सुइक्ब आन तारी वोइशशा, मेकोपुकी परमप्रभु यावे आ सोक्त तामे बाक्त।

18 मिनु सिमोनमी मेको सोइशशा आस गुइ थमा सुइक्ब आन तारी वोइशशा, परमप्रभु यावे आ सोक्त गेशो तशा, मेको आस कली “क्येट गेनुड।

19 मोदेशो सक्ति गेयी। गो गुइ वोइशशा, पुनुनु, परमप्रभु यावे आ सोक्त मुरपुकीम तामेक्ल” दे पुंडदा बाक्त।

20 मिनु पत्रुसमी “इ क्येट गे नुन जाम्शा लल। मारदे हना गे परमप्रभु यावे आ गेशो सक्ति क्येट थाप्शा, ग्याप्चा तांडसीब, दे मिम्ताक्वी।

21 गे मेको गेय पने मचाप्नेवे। मारदे हना इ थुं परमप्रभु यावे आ डोंइती मरिम्शो बाक्ब।

22 गे ओदेशो मरिम्शो थुं पचा प्रोंइशा, इ थुं परमप्रभु यावे गे लेत्तो। मिनु परमप्रभुमी इ पाप क्याम्शा गेबा कों? दे पुनो।

23 मुल इ थुं चोशा पापमी बीशो मरिम्शो बाक्डे बाक्त, दे तुइक्ताक्ड” दे पत्रुसमी मदानु,

24 सिमोनमी “इन देशो खोदेशो मडुम्ल, दे आं पर्बम प्रभु कली प्रार्थना पने, हजुर” दे सेउ पवा बाक्त।

25 मिनु पत्रुस नु यूहन्नामी प्रभु आ लोत्र नेंपाइक्ने थुम्शा, यरूसलेम लेस्सानु, सामरीया डा गाउ लामी शुश मुर आन कली ग्येरपाइक्ब लोत्र शेंना शेंन लेस्सा बाक्त।

एथीयोपीया डा मुर कली शेंशो

26 काबु परमप्रभु यावे आ स्वर्ग डा गेय पाइब कामी फिलीप कली “छुल बोक्शा यरूसलेम रे गाकशा, गाजा लतीक लां लावो” दे माइशशा, मेको लां सोइक्ता बाक्त। मेको लां गोरशो रागी लतीक लां बाक्माक्त।

27 परमप्रभु यावे आ स्वर्ग डा गेय पाइब आ लोत्र नेंशा, फिलीप छुल बोक्शा, गाजा सहर लतीक लां लमाक्त। मिनु मेको लां गाकमेनु, एथीयोपीया रागी डा मुर का यो मेको लां लना लन बाक्माक्त। मेको एथीयोपीया डा पिपीम कान्दाके रे शुश अधिकार तशो, टेयब मुर बाक्माक्त। यरूसलेममी परमप्रभु यावे कली मार मार चढ़ेने थुम्शा, आ रागी लेशशो बाक्माक्त।

28 मेको बग्गीम बाक्शा, परमप्रभु यावे आ लोत्र पाइब यसैयामी ब्रेक्शो पढेना पढेन बाक्माक्त।

29 मिनू परमप्रभु यावे आ सोकतीमी फिलीप कली “मिरी लन लन पाइशशो बग्गी आ नेक्था लावो” दे माइक्तीके फिलीप दोरशा, मेक जाक्दीम्माक्त।

30 जाक्दीरशा, ठेयब मुर कली परमप्रभु यावे आ लोत्र पाइब यसैयामी आ ब्रेक्शो लोत्र पढेशो नेंशा “इन पढेशो लोत्र नेल्ल रूपनी?” दे हिल्लो पवा बाक्त।

31 मिनू ठेयब मुरुमी “सुडमी मशंथु, दोपा रुणे चाप्नुडा डा?” देशा, फिलीप कली बग्गीम डोइक्पाइशशा निप्पाइशशा, किताब कोंडदा बाक्त।

32 ठेयब मुरुम पढेना पढेन बाक्शो लोत्र चहिं “भेडा कली क्योरपाइक्थ लाइशशो खोंदेंब पा मेको कली लाइक्तेक्म। भेडा पाठा आ ऊन प्रेक्गमेनु, ब्वालेड पा बाक्शो खोंदेंशो पा मेको ब्वालेड पा बाक्त।

33 महिक्सीशो सेल्लेक्म। दोस गेशा ठीक निसाफ मपथु, दोसी सेल्लेक्म। आ खिं डा मुर सु लीबा डा? आल मथिथु साइक्चा पुंडसाक्व। मोपतीके आ खिं डा मुर सुड मली” दे ब्रेक्शो लोत्र बाक्माक्त। यसैया ५३:७-८

34 मिनू ठेयब मुरुमी फिलीप कली “परमप्रभु यावे आ लोत्र पाइबमी आम आ परबम मोदेंशो देमे देय अरु आन परबम मोदेंशो देमे?” दे हिल्लो पवा बाक्त।

35 मिनू फिलीपमी मेको पढेशो लोत्र रे शेंचा गोशा, परमप्रभु यावे आ ब्रेक्पाइशशो लोत्र शुश शेंशा, येसु आ परबम नेल्ल रूपदा बाक्त।

36 मोपा लसा लसा ब्वाक्कु बाक्तीकेमी जाक्दीस्सा बाक्त। मिनू ठेयब मुरुमी “एकेर ब्वाक्कु बाक्त, एको ब्वाक्कुम खुम्शा गुंडचा पुंडसीनुड, दुम्बा?” देमाक्त।

37 मिनू फिलीपमी “गे येसु कली थमा सुडक्तीनी हना, ब्वाक्कुम खुम्शा गुंडचा शिरनीनी” देमेनु “गे येसु ख्रीस्त परमप्रभु आ तो बाक्ब, दे थमा सुडक्ता” देमाक्त।

38 मिनू बग्गी तिक्शा तोइशशा, फिलीपमी ठेयब मुर कली ब्वाक्कुम खुम्शा गुंडदा बाक्त।

39 मिनू ब्वाक्कु रे गूशा कुसानु, परमप्रभु यावे आ सोकतीमी फिलीप कली लदा बाक्त। मिनू ठेयब मुरुमी मेको मतवा बाक्त। मो हना यो थाम्पा ग्येरसीशा, आ लां खोइशशा गाक्माक्त।

40 नोले फिलीप अस्दोद सहरमी गूदीम्माक्त। मिनू मेकेर रे गाउं सहर सहरम येसु आ लोत्र नेंपाइक्ना पाइक्न गाक्शा, सिजरिया सहर जाक्दीम्माक्त। प्रेरित २१:८-९

## 9

सावल दमस्कस लशो

1 सावल मुल यो थमा सुडक्ब आन कली खेदा पा श्येत गेशा साइक्नुडमी देना देन गाक्बाक्माक्त। प्रेरित २२:३-१६; प्रेरित २६:९-१८; प्रेरित ८:३

2 मिनू काबु यरूसलेममी बाक्ब ठेयब चढेब आन कली गुम्शा, दमस्कस सहर डा गुम्तीक खिं खिं डा ठेयब मुर आन कली कागज ब्रेक्शा गेचा नड देशा पुना बाक्त। सावल आ पुंडशो लोत्र मार बाक्त देशा हना “दमस्कसमी बाक्ब येसु आ लां खोइक्ब मीश मुर वोंडश मुर सु सु थिदुमी, मेको नेल्ल आन कली ग्याइशशा फ्रेंशा, यरूसलेम चाक्नुडमी” दे पुंडशो बाक्माक्त।

3 मिनू मोदेंशो कागज ताक्शा, दमस्कस सहर लशा जाक्दीत्यावानु, मार दुम्माक्त देशा हना, सरीड रे छेडछेड फो गूशा, आ एर ओथ नेल्ल कोंडदा बाक्त। १कोरिन्थी १५:८

4 मोपा छेडछेड तवानु, दिड गोल्माक्त। मिनू “सावल, सावल, गे मारदे आं कली खेदा पर्यी?” देशो लोत्र नेंना बाक्त।

5 मोदेंशो नेंशा “प्रभु, गे सु ननी?” दे हिल्लो पवानु “ड खेदा पशो येसु गो नड।

6 मुल छुल बोक्शा दमस्कस सहर लावो। मिनू मेकेर जाक्दीरशा, गे मार गेय पचा माल्नेवे तुइक्पाइक्चा पुंडसीनेवे” देशो लोत्र नेंना बाक्त।

7 सावल नु काथा गाक्बपुकीमी मारेड मतथु, लोत्र पशो ला नेंशा, वाम ग्याम दुम्मा बाक्त।

8 मिनू सावल बोक्शा मिक्च पाक्शा कोत्रडानु, मिक्च मताइब दुम्शो बाक्माक्त। मिनू आ वारचपुकीमी आ गुड रे कीशा दमस्कसमी चाक्दीत्मे बाक्त।

9 दमस्कसमी जाक्दीरशा यो नाक्त सां सम्म मिक्च मतवा बाक्त। जचा तूचा यो, प्रोना बाक्त।

सावलमी येसु कली थमा सुइशशो

10 दमस्कसमी हनानीया नें पाइशशो थमा सुइक्ब मुर का बाक्माक्त। प्रभुमी मेको मुर कली कोंडतीक कोंडशा “हनानीया” दे ब्रेत्ता बाक्त। मिनू “मार देनी, प्रभु?” देमेनु

11 “छुल बोक्शा ग्येत्थ माइशशो लां लावो। मेकेर जाक्दीरशा, यहूदा आ खिं लशा, टारसस डा सावल माइशशो मुर कली मालो। मेकोमी प्रार्थना पाइब।

12 मिनू मेकोमी कोंडतीकेमी हनानीया माइशशो मुर ओत्रशा, मिक्च तपाइक्चा कली आ तारी गुड वोंडशशो तशो बाक्ब” देशो लोत्र नेंना बाक्त।

13 मिनू हनानीयामी “आमाइ, प्रभु, गो शुश मुर आन शोत्र रे मेको मुर आ परबम शुश मरिम्शो लोत्र नेंता। मेकोमी यरूसलेममी बाक्ब थमा सुइक्ब आन कली शुश श्येत गेशा, खेदा पना पन बाक्ब देशो नेंता।

14 थमा सुइक्ब आन कली ग्याइशशा फ्रेंशा लाइक्चा कली ठेयब चढेबपुकी रे अधिकार तशो बाक्माक्त, दे तुइक्ताक्ड” देमाक्त।

15 प्रभुमी “मोदेंशो तुइक्ताक्वी हना यो, मुल छुल बोक्शा लावो। मारदे हना अर्को रागी डा मुर, पिपपुकी नु इसाएली आन कली आं नें तुइक्पाइक्चा, दे गो मेको कली योत्रने थुम्ता। प्रेरित १३:४६; प्रेरित २६:२; प्रेरित २७:२४



16 आं नेंमी शुश श्येत जचा माल्नेवे देशा गो मेको कली आंमान तुइक्पाइक्नुड” दे प्रभुमी हनानीया कली माइशशा सोइक्ता बाक्त। २कोरिन्थी ११:२१-२८

17 मिनु हनानीया लशा, यहूदा आ खिं जाकदीशशा ओव्रशा, सावल तारी आ गुड चाक्शा “आं लोकब सावल, गे यरूसलेम रे पिवेनु, लांमी इ तशो प्रभु येसुम सोइक्ताकयी। मिनु मिक्च ताइब दुमो, परमप्रभु यावे आ सोक्तीम ब्रीशो दुमो” देंमेनु,

18 सावल आ मिक्च मारम फारशो बाक्मे, मेको दोक्शा, मिक्च ताइब दुम्माक्त। मिनु छुल बोक्शा, ब्वाक्कुम खुम्शा गुंडचा पुंडसे बाक्त।

19 मिनु जशा तूशा बोल तेम्सीशा, इच्का नाक्त दमस्कस डा थमा सुइक्बपुकी नु काथा बाक्माक्त।

सावलमी येसु आ लोत्र शेंशो

20 मिनु सावल गुन्तीक खिं खिं लशा “येसु परमप्रभु यावे आ तौ बाक्ब” दे शेंना शेंन यहूदी आन कली येसु आ पबंम शुश लोत्र तुइक्पाइक्मी बाक्त।

21 मोदेशो मेको आ शेंशो नेंशा “आमाइ, यरूसलेममी येसु कली थमा सुइक्ब आन कली का यो मवोइक्नुडमी देंब मेको ममाइ डा? इं सहर डा येसु कली थमा सुइक्ब आन कली यो ग्याइशशा लाइशशा, ठेयब चढेब आन डोंइती राप्पाइक्नुडमी, दे एक जाक्शो ममाइ डा?” दे छक लाक्शा देंमुमा बाक्त। प्रेरित ८:१; प्रेरित २६:१०

22 सावलमी शेंना शेंन आ शेंचा सक्ति बारपाइक्ना पाइक्न “येसु परमप्रभु यावे आ सोइशशो ख्रीस्त बाक्ब” दे दमस्कसम बाक्ब यहूदी आन कली शेंदीमी बाक्त। मिनु सुइमी लोत्र लेन्ने मचाप्मे बाक्त। प्रेरित १८:२८

23 मिनु शुश नाक्त मोपा शेंना शेंन गाक्मेनु, यहूदीपुकी गारशा सावल कली साइक्चा माल्मे बाक्त।

24 मिनु सावलमी “आं कली साइक्चा माल्तीमी” दे तुइक्ता बाक्त। नाक्दो नाक्त यहूदीपुकीमी सहर डा ओव्रतीक गूतीक लां मेर मेको कली बाप्बाक्मा बाक्त।

25 मोपतीके काबु नाक्दो थमा सुइक्बपुकीमी सावल कली डोकोमी कुर पशा, डोरीमी क्युक्शा, सहर डा गारो आ ची लुक्च तोइक्पा प्रोक्पदमे बाक्त। २कोरिन्थी ११:२२-२३

सावल यरूसलेम लेशशो

26 सावल दमस्कस रे प्रोक्शा, यरूसलेम लेशशा जाकदीम्माक्त। मिनु थमा सुइक्ब नु गारशा, काथा बाक्चा मला बाक्त। तन्न मेकोपुकीमी मेको येसु आ नोले खोइक्ब दुम्त, दे थमा मसुइक्थु, हिंशा मन्नामे बाक्त। गलाती १:१७-१९

27 बारनाबासमी चहिं सावल नु सोइशशो आन कली गुम्पदा बाक्त। मिनु लांमी गाक्मेनु, प्रभु कली तशो, प्रभुमी लोत्र पशो, दमस्कसमी महिंथु, येसु आ नेंमी शेंशा गाक्शो, मेको लोत्र नेल्ल बारनाबासमी रुप्पाइक्मी बाक्त।

28 मिनु सावल कली ब्रामे बाक्त। मिनु सावलमी यरूसलेम सहरमी सुइ सुइ आन कली तशा महिंथु, येसु आ नेंमी शेंना शेंन गाक्माक्त।

29 शेंना शेंन गाक्मेनु, ग्रीक लोत्र पाइब यहूदीपुकी यो गुम्मी बाक्त। मिनु हिल्लो हिक्सी पमुमानु, जिचा बोक्माक्त। मोदेशो दुम्मेनु, सावल कली साइक्चा माल्मे बाक्त।

30 मिनु थमा सुइक्ब लोकबपुकीमी साइक्चा माल्तेकम, दे तुइशशा, सिजरिया सम्म चोव्रदीशा, टारसस सोइक्तमे बाक्त। गलाती १:२१

31 मिनु यहूदीया, गालील नु सामरीया रागीमी बाक्ब थमा सुइक्बपुकी खेदा पचा मपुंडसीथु, बाक्चा तामे बाक्त। थमा सुइक्बपुकीमी प्रभु कली मान पा हिंशा, परमप्रभु यावे आ सोक्त रे पा वारच पचा पुंडसीशा, आन थुं बारना बारन लमाक्त। मिनु थमा सुइक्ब यो तेम्सीन सीन लमा बाक्त।

पत्रुस लिडडा जाकदीशशो

32 पत्रुस शेंना शेंन गाक्शा, लिडडा सहर जाकदीम्माक्त। मिनु मेकेर बाक्ब प्रभु आ योव्रशो आन कली गुमा बाक्त।

33 मिनु काबु एनीयास माइशशो मुर कली तवा बाक्त। एनीयास चहिं आ गुड खोइल मदुक्ब रोइ पशा, ब्राख्ये रे बोक्ने मचाप्शो ८ बर्स दुम्शो बाक्माक्त।

34 मिनु पत्रुसमी “एनीयास, येसु ख्रीस्तमी इ कली सापाइक्ब। मोपतीके बोक्शा, इ ब्राख्ये पोक्शा वोतो” देंमेनु, एनीयास छुल बोक्माक्त।

35 मिनु लिडडा सहरम नु शारोने रागीमी बाक्ब नेल्लेमी एनीयास कली मोपा साशो तशा, आन थुं प्रभु गे लेत्मे बाक्त।

तबीता कली बेक्शो रे सेंपाइशशो

36 योप्पा सहरमी तबीता नें पाइशशो थमा सुइक्ब मीश मुर का बाक्माक्त। ग्रीक लोत्रमी मेको आ नें दोरकास, किशशा रुम्सीब। तबीता गेना हना यो सुइ सुइ आन कली रिम्शो पाइबाक्माक्त। मथीब आन कली शुश वारच पाइबाक्माक्त।

37 मेको तबीता रोइ पा बेक्माक्त। मिनु आ मुरपुकीमी आ बेक्शो रां चिक्शा, खिं डा तला तार डा कोठा लाइशशा वोदमे बाक्त।

38 लिडडा नु योप्पा नेक्नेक्शा बाक्नीसी। मोपतीके थमा सुइक्बपुकीमी पत्रुस लिडडा जाक्शो बाक्ब, दे यो नेंशो बाक्मा बाक्त। मिनु आन मुर निक्शी योव्रशा, पत्रुस कली “आंइ बाक्तीक रीब जाक्शा, वारच पाइक्चा नकी” दे ब्रथ सोइक्तमे बाक्त।

39 मिनु पत्रुस मेको आस लोत्र नेंशा मेको नु काथा लमाक्त। मिनु जाक्मेनु, तला तारी लदमे बाक्त। तला तारी आन वोइश बेक्शो मारेइ मथीब मीश मुर खुम्सीशा डाक्ना डाक्न बाक्शो बाक्मा बाक्त। मिनु पत्रुस कली “तबीतामी शुश वारच पाइक्तीकी, ओदेशो वा फेरशा गेतीकी” दे तबीतामी फेरशा गेशो वापुकी कोइदमे बाक्त।

40 मिनू पत्रुसमी मेकेर डाकशा बाकब नेल्ल आन कली लाडगा सोइक्तीमी बाक्त। मिनू आ पोक्च थेक्शा, प्रार्थना पवा बाक्त। मिनू तबीता आ बेक्शो रां गे हिरशा कोव्रशा “ए तबीता, छुल बोक्को” देमेनु, तबीतामी आ मिक्च पाक्शा कोव्रडानु, पत्रुस कली तवा बाक्त। मर्कूस ५:४१

41 मिनू पत्रुसमी आ गुड कीशा पोक्गा बाक्त। मिनू लाडगा सोइश्शो नु प्रभु आ योव्रशो नेल्ल आन कली खिं गा ब्रेशा, तबीता कली बेक्शो रे सेंपाइश्शो कौंडदा बाक्त।

42 मोदेशो दुम्त देशो लोव्र योप्पा सहरमी बाकब नेल्लेमी नेन्मे बाक्त। मिनू शुशेमी प्रभु कली थमा सुदमे बाक्त।

43 मिनू पत्रुस योप्पा डा कुशुल नोक्ब सिमोन आ खिंमी शुश नाक्त बाक्माक्त।

## 10

कोरनेलीयस आ तशो

1 सिजरिया सहरमी कोरनेलीयस नें पाइश्शो इटाली पल्टन डा कप्तान का बाक्माक्त।

2 मेको कप्तान परमप्रभु यावे कली मान पा हिंभ मुर बाक्माक्त। आ खिं डा मुर नेल्लेमी यो आ खोदेशो पा प्रभु कली मान पा टीबाक्मा बाक्त। मेको कप्तानमी मारेड मथीब आन कली शिशी पा शुश वारच पाइबाक्माक्त। परमप्रभु कली प्रार्थना पना पन बाक्बाक्माक्त।

3 मिनू काबु ३ बजे डा प्रार्थना पची ना कौंडतीक का तवा बाक्त। मेको कौंडतीकेमी परमप्रभु यावे आ स्वर्ग डा गेय पाइब का आ बाक्तीकेमी जाक्शा “ए कोरनेलीयस” देमेनु,

4 कोरनेलीयसमी हिंशा, कोव्रस डा कोव्रस पा “मार देंनी, प्रभु” देमेनु “इ प्रार्थना पशो, प्रभु कली मान पा टिशो, इ शिशी पा वारच पशो नेल्ल परमप्रभु यावेमी तुइश्शो बाक्ब।

5 मुल गे योप्पा सहरमी बाक्शो सिमोन पत्रुस नें पाइश्शो मुर कली ब्रथ सोइक्तो।

6 मेको सिमोन पत्रुस कुशुल नोक्ब सिमोन आ खिंमी बाक्ब। मेको आ खिं चहिं समुन्द्र आ नेक्था बाक्ब” देश लशो नेना बाक्त। प्रेरित १:४३

7 मोदेशो लोव्र देशो नेंशा, आ गेय पाइब निक्शी नु सिपाही का कली ब्रेत्ता बाक्त। सिपाही यो प्रभु कली मान पा टीब का बाक्माक्त।

8 मिनू मेको मुर सां आन कली मार दुम्मे, दोदेशो लोव्र नेंना, मेको लोव्र नेल्ल शेंशा, पत्रुस कली माल्शा, चाक्चा, दे योप्पा सहर सोइक्तीमी बाक्त। प्रेरित ११:५-१७

परमप्रभुम सेल्शो कली ग्रांया मदिचा

9 मिनू आ दीसा नाक्त मेकोपुकी लमा लमा योप्पा सहर आ नेक्था जाक्दीम्मानु, पत्रुस प्रार्थना पथ खिं तारी डोंइसे बाक्त।

10 मिनू डोइश्शा बाक्मेनु, शोत्रलु बेक्शा जज दाक्माक्त। खिं डा मुरपुकी चहिं क्येना क्येन बाक्मा बाक्त। मिनू पत्रुसमी प्रभुमी कौंइशो कौंइतीक तवा बाक्त।

11 दोदेशो तवा बाक्त देशा हना, सरीड रोकसीशा ठेयब वा का हाम्सीशा क्युक्सीशो खोदेशो पा खप गे यिशो तवा बाक्त।

12 मेको वामी मब्बचा डा, ग्रांया दिचा डा जन्तु बुस्स चिक्ब बाक्मा बाक्त।

13 मिनू “ए पत्रुस, एको आन कली साइश्शा ब्वामी” देशो नेंना बाक्त।

14 मिनू पत्रुसमी “हत्तेरी ओदेशो ग्रांया दिचा डा दोपा ब्बचा नमी डा, प्रभु? ओदेशो ग्रांया दिचा डा गे गेनायो मब्बशो नड” देमाक्त। लेवी ११:१-३; इजीकीएल ४:१४

15 मिनू लेंशा “परमप्रभु यावे आ चोव्रखो सेल्शो कली ग्रांया मदित्तो” देशो नेंना बाक्त। रोमी १४:१४

16 खेयप सां मोदेशो दुम्शा, मेको ठेयब वा सरीड गे लशो तवा बाक्त।

पत्रुस कोरनेलीयस आ खिं लशो

17 मिनू पत्रुसमी छक लाक्शा एको मार बाक्म माड, दे मिम्ना मिम्न बाक्माक्त। पत्रुस मोदेशो मिम्स डा मिम्स बाक्मेनु, कोरनेलीयसमी सोइश्शो मुरपुकी कुशुल नोक्ब सिमोन आ खिंमी जाक्दीश्शा, लाप्चो आ डोंइती राप्शा कोव्रशा

18 “एको खिंमी सिमोन पत्रुस बाक्मे?” दे हिल्लो पामे बाक्त।

19 पत्रुसमी मुल यो आ तशो मार बाक्म माड, दे मिम्न मिम्न बाक्मेनु, परमप्रभु यावे आ सोक्तीमी मेको कली “इ कली ब्रथ मुर सां जाक्तेक्मे।

20 तोइश्शा मेको आन कली युम्थ लावो। मिनू लचा, दे मलचा, दे थुं निक्शी मपथ, मेकोपुकी नु लावो। मारदे हना मेकोपुकी आं सोइश्शो नम” देशो नेंना बाक्त।

21 मिनू पत्रुस फ्रु तोइश्शा “इन माल्शो मुर गो नड, आं कली मारदे माल्थीनी?” दे हिल्लो पवा बाक्त।

22 मिनू मेकोपुकीमी “कोरनेलीयस आ सोइश्शो नकी। कोरनेलीयस कप्तान बाक्ब। परमप्रभु कली मान पा हिंभ, रिम्शो मुर बाक्ब। यहूदीपुकीमी यो रिम्शो मुर बाक्ब, दे मिम्नीम। परमप्रभु आ स्वर्ग डा गेय पाइब कामी कोरनेलीयस कली ‘योप्पा सहरमी सिमोन पत्रुस माइश्शो कली माल्शा चाक्शा आ लोव्र नेंचा’ देतीके इन कली ब्रथ जाक्तक” देमा बाक्त।

23 मिनू पत्रुस नु खिं डा मुरपुकीमी मेको आन कली खिं गा ओइशा जचा तूचा गेशा, बास गेमे बाक्त। मिनू आ दीसा पत्रुस मेकोपुकी नु सिजरिया गे लमाक्त। योप्पा सहर डा थमा सुइक्ब लोक्ब का निक्शी यो लमा बाक्त।

कोरनेलीयस आ खिंमी

24 आ दीसा सिजरियामी जाकदीम्मा बाक्त। कोरनेलीयसमी आ मुर, आ वारच आन कली ब्रेशा, पत्रुस आ लां कोव्रशा बाक्शो बाक्मा बाक्त।

25 मिनु पत्रुस कोरनेलीयस आ खिं ओव्रचवानु, कोरनेलीयसमी पत्रुस आ डोंइती बाप्शा आ खोडल गुप्शा सेउ पवा बाक्त।

26 मिनु पत्रुसमी कोरनेलीयस आ पिया पोक्शा “गो यो इन खोदेशो मुर ला नड” देशा राप्पदा बाक्त। प्रेरित १४:१५; प्रकाश १९:१०

27 मिनु लोव्र पना पन खिं गा ओव्रसा बाक्त। खिं गामी शुश मुर खुम्सीशा देल्शो बाक्मा बाक्त।

28 मिनु पत्रुसमी मेको देल्शा बाक्ब आन कली “गो आंड यहूदी अर्को रागी डा मुरपुकी नु काथा बाक्चा, जचा, आन खिं ओव्रचा मदुम्ब, दे नेल्लेमी तुडक्नीनी। मोदेशो बाक्त हना यो, परमप्रभु यावेमी आं कली सुड आन कली आडक्च ममिम्चा, दे शेंताक्यी।

29 मोपतीके गेपुकीमी आं कली ब्रेत्तीनीनु, लचा, दे मलचा, दे थुं निक्शी मपथु, गिरिककै जाक्ती। मारदे ब्रेत्तीनी?” देमाक्त।

30 मिनु कोरनेलीयसमी “गाबेर नाक्त आं खिंमी ३ बजे डा प्रार्थना पना पन बाक्डानु, जील्माक्श देशो वा फेक्सीशो मुर का फो यूशा, आं डोंइती राप्शो ताता।

31 मेकोमी आं नें थिशा ‘ए कोरनेलीयस, परमप्रभुमी इ प्रार्थना पशो नेंशो बाक्ब। इ शिशी पा मथीब आन कली मार मार गेशो तशो बाक्ब।

32 मोपतीके योप्पा सहरमी जाक्शा बाक्शो सिमोन पत्रुस नें पाइश्शो मुर कली ब्रथ सोडक्तो। मेको कुशुल नोक्ब सिमोन आ खिंमी बाक्शो बाक्ब। मेको खिं समुन्द्र आ नेक्था बाक्ब’ देंत।

33 मोपतीके ब्रथ सोडक्ताक्नीनी। गे बिश्शा गिरिककै जाक्शा, आंड कली रिम्शो पाइतीनी। परमप्रभु गे नु बाक्ब। मिनु परमप्रभु यावेमी इन कली मार शेंपाइक्बा, मेको लोव्र नेल्ले नेंचा कली खुम्सीशा बाक्तक” देमाक्त।

34 मिनु पत्रुसमी “परमप्रभु यावेमी सुड आन कली मतिल्थु, उडक्थ उडक्थ मिम्ब। ब्यवस्था १०:१७; १सामुएल १६:७; रोमी २:११

35 मुर आन के जात रागी मारेड मकोव्रथु, आ कली मान पा हिंशा, आ लोव्र टिशा, रिम्शो पाइब आन कली दाक्शा, नेल्ल आन कली ब्राडब, दे मुल रुप्ता। यूहन्ना १०:१६

36 परमप्रभु यावेमी येसु खीस्त आ पतीकेम आंड इस्राएल डा मुर आन कली ग्येरपाइक्ब लोव्र नेंपाइक्तु। मिनु येसु खीस्त नेल्ल आन प्रभु बाक्ब। एफिसी २:१७

37 यूहन्नामी मुर आन कली शेंशा, ब्वाक्कुम खुम्शा गुंडदा नोले येसु खीस्तमी गालील रे गोशा यहूदीया रागीम हिरशा, मुर आन कली शेंना शेंन गाक्त। मती ४:१२-१७

38 परमप्रभु यावेमी मेको नासरथ डा येसु कली आ सोक्तीम प्रिंशा, आ सक्ति पाइश्शो सेल्लु। मिनु परमप्रभु यावे आ सक्ति पाइश्शो दुम्शा, तेड तेड गाक्शा मुर आन कली रिम्शो पाप्तु। वोलेम तशो आन कली वोले खेरशा सापाइक्तु। सैतानमी दिप्शा वोइश्शा श्येत गेशो आन कली श्येत रे प्रोंइतीमी। मारदे हना परमप्रभु यावे मेको नु बाक्त। मती ३:१६

39 यहूदीया रागी यरूसलेम सहरमी येसुमी मार मार पवा, मार मार दुम्मे, मेको नेल्ल गो नु आं वारचपुकीमी आंम आंड मिक्चीम ताइतक। येसु शीमी केप्शा कांटी थोक्शा क्याइश्शा साइक्चा पुंडसाक्ब।

40 साइक्चा पुंडसीशा यो आ बेक्शो आ नित्थ नाक्ती परमप्रभुमी बेक्शो रे सेंपाइश्शा कोंइताक्ब। १कोरिन्थी १५:४-७

41 हना यो मुर नेल्लेमी मताम। गोपुकीमी चहिं ताइतक। मारदे हना डोंइती रे गोपुकी सांकछी दुम्चा कली योव्रशो नकी। येसु बेक्शो रे सेंसीशा, गोपुकी नु बाक्शा काथा जाइतक, काथा तूतक। यूहन्ना १४:१९,२२; लूका २४:३०,४३

42 मिनु मोदेशो पा काथा बाक्कानु, येसुमी आंड कली ‘मुर आन कली आं पर्बम शेंदीने। मार शेंचा देशा हना, परमप्रभु यावेमी येसु कली ब्रोंइशा बाक्ब नु बेक्शो मुर नेल्ल आन कली निसाफ पाइब सेल्लु, दे शेंशा गाक्कीन’ दे माइक्तीकी। यूहन्ना ५:२२

43 सु सुमी येसु कली थमा सुदमे, मेकोपुकी येसु आ नेमी आन पाप क्याम्चा पुंडसीनीम। साइ डोंइती रे परमप्रभु यावे आ लोव्र पाइबपुकीमी मोदेशो देशो बाक्नीम” दे शेंदीमी बाक्त। यसेया ५३:५-६; येरमीया ३१:३४

मुरपुकी परमप्रभु आ सोक्तीम ब्रीशो

44 पत्रुसमी शेंना शेंन पवानु, परमप्रभु यावेमी आ लोव्र नेंब नेल्ल आन कली आ सोक्तीमी प्रिंशो बाक्त।

45 पत्रुस नु काथा जाक्शो खोइक्तीक चिनु खोइश्शो थमा सुडक्ब यहूदीपुकीम अर्को रागी डा मुर यो परमप्रभु यावे आ सोक्तीम ब्रीशो तशा छक लाक्मा बाक्त।

46 मेकोपुकीमी परमप्रभु यावे आ सोक्तीमी पपाइश्शो लोव्र पा परमप्रभु यावे कली ठेयब सेल्लो तशा तुडक्तमे बाक्त। प्रेरित २:४

47 मिनु पत्रुसमी “मेकोपुकी आंड खोदेशो पा परमप्रभु यावे आ सोक्तीम प्रिंचा पुंडसाक्म। मोपतीके एको आन कली ब्वाक्कुम खुम्शा गुंडचा मदुम्ब, दे सुम देंने चाप्बा डा?” देमाक्त।

48 मिनु मेको आन कली येसु खीस्त आ नेमी ब्वाक्कुम खुम्शा गुंडपदा बाक्त। मिनु मेको नक थमा सुडक्बपुकीमी पत्रुस कली “नाक्त का निक्शी गोपुकी नु बाक्कीन” दे तेक्गमे बाक्त।

1 मिनू यरूसलेममी बाकब सोइशशोपुकी नु यहूदीया रागी तेइ तेइ बाकब थमा सुइकब लोकबपुकीमी “अर्को रागी डा मुरपुकीमी यो परमप्रभु यावे आ लोव्र नेंशा, थमा सुइकब दुम्मा बाकत” देशो नेन्मे बाकत।

2 मिनू पत्रुस यरूसलेम लेशशा जाकमेनु, खोइक्तीक चिनु खोइशशो थमा सुइकबपुकीमी पत्रुस कली

3 “मारदे खोइक्तीक चिनु मखोइशशोपुकी नु काथा बाकशा जवी” दे लोव्र पोक्मे बाकत। गलाती २:१२

4 मिनू पत्रुसमी मेको लोव्र पोक्ब आन कली खुप्शा, दोपा मोदेशो दुम्मे, मेको नेल्ल रुप्पाइक्चा कली

5 “गो योप्पा सहरमी बाक्ती। मिनू काबु मार दुम्त देशा हना, प्रार्थना पना पन बाकडानु, प्रभुमी कोंइतीक कोंइताक्यी। सरीड रोक्सीशा ठेयब वा का हाम्सीशा क्युकसीशो खोदेशो पा खप गे यिशो ताता। मिनू आं नेक्था जाकशा दिक्त। प्रेरित १०:९-४८

6 मिनू गो गीशा कोव्रडुनु, मब्वचा डा, ग्रांया दिचा डा, जन्तु, खोते नु चिक्ब तातामी।

7 मिनू ‘ए पत्रुस, मेको साइशशा ब्वामी’ देशो नेंता।

8 मिनू गोमी ‘हत्तेरी, ओदेशो ग्रांया दिचा डा दोपा ब्वचा नमी डा, प्रभु, ओदेशो ग्रांया दिशो गेनायो मब्वशो नड’ देती।

9 मिनू ‘परमप्रभु यावेमी चोव्रखो सेल्शो कली गे ग्रांया मदित्तो’ दे सरीड रे देशो नेंता।

10 खेयप सां मोदेशो दुम्शा, मेको ठेयब वा सरीड गे लेशशा लत।

11 मोदेशो दुमे चोटीन सिजरिया रे आं कली ब्रथ सोइशशो मुर सां आं बाकशो खिंमी जाक्तेकम।

12 मिनू परमप्रभु यावे आ सोक्तीमी ‘मेको आन जात मार नमी?’ दे ममिथ्यु मेकोपुकी नु काथा लावो’ देतीके गो मेकोपुकी नु लती। मुल एकेर गो नु बाकब थमा सुइकब ६ जना लोकब गो नु लाम्तेकम। गो काथा गाकशा, कोरनेलीयस आ खिं जाक्दीशशा ओव्रतक।

13 आ खिं ओव्रशा बाकानु, कोरनेलीयसमी आंइ कली ‘परमप्रभु यावे आ स्वर्ग डा गेय पाइब का आं डोंइती राप्शा, मेकोमी योप्पा सहरमी जाकशा बाकशो सिमोन पत्रुस कली ब्रथ सोइक्ते।

14 मेकोमी जाकशा, गे नु इ खिं डा मुर नेल्ले आन कली गेना हना यो ब्रोंइशा बाक्तीक लोव्र शेंब, दे माइक्ती’ देंत।

15 मिनू गो मेकेर खुम्सीशा बाकब आन कली ख्रीस्त आ लोव्र शेंदुनु, साइ गोपुकी खोदेशो पा मेकोपुकी यो परमप्रभु यावे आ सोक्तीम पिंचा पुंइसाकम। प्रेरित २:१-४

16 परमप्रभु यावे आ सोक्तीम ब्रीचा पुंइसीशो तशा, गो इ प्रभु आ देशो लोव्र ति फुकता। प्रभुमी मार देंत देशा हना ‘यूहन्नामी मुर आन कली ब्वाक्कुमी खुम्शा गुंइताकव। गे चहिं परमप्रभु यावे आ सोक्तीमी खुम्चा पुंइसीनीनी’ देंत। प्रेरित १:५

17 गोपुकीमी प्रभु येसु ख्रीस्त कली थमा सुइक्तीके परमप्रभु यावे आ सोक्तीम पिंचा पुंइसाक्य। मिनू अर्को रागी डा मुरपुकीमी यो येसु ख्रीस्त कली थमा सुइक्तीके आ सोक्तीम पिंचा पुंइसाकम। मोदेशो दुम्शो तशा, मार पाइनुडा? गो परमप्रभु आ पशो गेय तेक्ने चापनडा?” दे रुप्पाइक्मी बाकत।

18 पत्रुसम मो देशो नेंशा, मेको आन पोक्शो लोव्र साम्शा “मोदेशो बाकत हना, परमप्रभु यावेमी इ कली गेशो खोदेशो पा अर्को रागी डा मुर आन कली यो आन थुं लेप्पा आन पाप क्याम्बाक्माकत” दे परमप्रभु यावे कली ठेयब सेल्मे बाकत।

अर्को रागीम येसु आ लोव्र शेंशो

19 स्तीफानस साइक्चा पुंइसे नोले खेदा पचा पुंइसीशा, प्रोक्शा गाकशो थमा सुइकब का निक्शी फोनीसीया, का निक्शी साइप्रस, का निक्शी एन्टीओक जाक्दीशशो बाक्मा बाकत। मिनू मेकोपुकीमी येसु आ लोव्र यहूदी आन कली ला शेंदमे बाकत। प्रेरित ८:१-४

20 साइप्रस नु साइरनी रे एन्टीओक सहर जाक्दीशशो थमा सुइकब का निक्शीमी चहिं अरु ग्रीस रागी डा मुर आन कली यो प्रभु येसु आ परबम शेंदमे बाकत।

21 मोदेशो शेंब आन कली प्रभुमी सक्ति गेवा बाकत। मिनू मेको आन लोव्र नेंशा, शुश मुरुमी थमा सुइशशा, आन थुं प्रभु गे हिरदमे बाकत। प्रेरित २:४७

22 एन्टीओक सहरमी शुश मुर थमा सुइकब दुम्तेकम, दे यरूसलेममी बाकब थमा सुइकबपुकीमी यो नेन्मे बाकत। मिनू बारनाबास कली रुप्थ सोइक्तेमे बाकत। प्रेरित ४:३६

23 बारनाबास एन्टीओकम जाक्दीशशा, परमप्रभु यावेमी शुश मुर आन कली शिशो पा आन थुं लेप्पाइशशो तशा थाम्पा येरसे बाकत। मिनू मेको आन कली “मार दुम्त हना यो, प्रभु कली मप्रोंइचा, है” दे आन थमा सुइक्तीक थुं बारपाइक्मी बाकत।

24 बारनाबास रिम्शो मुर बाक्माकत। परमप्रभु यावे आ सोक्तीमी ब्रीशा, खोइल थेक्शो खोदेशो पा थमा सुइक्बाक्माकत। आ पशो तशा, आ लोव्र नेंशा, शुश मुरुमी प्रभु कली थमा सुइकब दुम्मा बाकत। प्रेरित ५:१४

ख्रीस्तीयन नें वोइक्चा पुंइसीशो

25 मिनू नोले बारनाबास सावल माल्थ टारसस सहर लमाकत। प्रेरित ९:३०

26 मिनू थिंशशा एन्टीओकम जाकशा बाक्सा बाकत। मिनू बर्स का सम्म थमा सुइकबपुकी नु काथा बाकशा, शुश मुर आन कली प्रभु आ लोव्र शेंना शेंन बाक्सा बाकत। एन्टीओक सहरमीन येसु आ लां खोइकब नेल्ल क्येडा डोंइती “ख्रीस्तीयन” दे नें वोइक्चा पुंइसमा बाकत। मेना रे मेको नें लीमाकत। गलाती २:११

श्येत जाइब आन कली क्येट सोइशशो

27 मिनू काबु परमप्रभु यावे आ लोव्र पाइबपुकी यरूसलेम रे यिशा, एन्टीओकम जाक्मा बाकत। प्रेरित १३:१; प्रेरित १५:३२

28 मेको आन दातेमी अगाबस नें पाइश्शो मुर का बाक्माकत। मिनु काबु थमा सुइक्वपुकी खुम्सीशा बाक्मानु, अगाबसमी परमप्रभु यावे आ सोकत रे पा “रागी नेल्लेमी अन्काल दुम्शा, जचा मताइसीब” दे लोत्र पवा बाकत। मेको लोत्र पिप क्लौदीयस आ सासनम थमा दुम्माकत। प्रेरित २१:१०

29 अन्काल दुम्ब देशो तुइश्शा, एन्टीओक डा थमा सुइक्वपुकीमी “यहूदीया रागीमी बाक्ब थमा सुइक्व आन कली वारच पाइक्चा माल्ब, मोपतीके क्येट पोक्क्य” देमा बाकत।

30 मिनु नेल्लेमी दो दोशो चाप्मे, मो मोशो क्येट पोक्शा, यरूसलेममी बाक्ब थमा सुइक्व आन शेंब खाल्पा आन कली गेचा नमी, दे बारनाबास नु सावल आस कली चोवथ सोइक्वतमे बाकत। प्रेरित १२:२५; १कोरिन्थी १६:१-४

## 12

पत्रुस जेल्खान रे प्रोंइचा पुंडसीशो

1 मेको बर्समी पिप हेरोदमी यरूसलेम सहरम बाक्ब थमा सुइक्व का निक्शी आन कली खेदा पा ग्याइश्शा, शुश श्येत गेमी बाकत।

2 यूहन्ना आ लोकब याकूब कली तरवारमी क्योरपा साइक्पदा बाकत। मती २०:२०-२३

3 हेरोदमी “आं पशो तशा यहूदीपुकी ग्येरसीनीम” दे तुइश्शा, मोदेशो खेदा पना पन लमाकत। मिनु पत्रुस कली यो ग्याइक्पदा बाकत। पत्रुस कली ग्याइक्पदानु, बोरब ओरुली मसुप्शो शोब्ले जतीक चाड जाकशो बाक्माकत।

4 मोपतीके पाससा चाड थुम्शा, मुर आन डोंइती राप्पाइक्चा, दे जेल्खानमी चोकशा, ४, ४ जना पालो पालो पा बाक्कीन, दे १६ जना सिपाही वोइक्पदा बाकत।

5 पत्रुस जेल्खानमी चोकसीशा बाक्मेनु, थमा सुइक्व नेल्ल थुं का दुम्शा “पत्रुस कली कोवडीने, प्रोंइशा सोइक्तीने” दे प्रार्थना पा बाक्मा बाकत।

6 हेरोदमी पत्रुस कली मुर आन डोंइती राप्पाइक्चा देशो नाकत आ डोंइती नाकदो पत्रुस साडलो निक्शीमी पाइश्शा, सिपाही निक्शी आस दातेम इप्पाइश्शो बाक्माकत। लाप्चो आ डोंइती यो खाल पाइबपुकी बाक्मा बाकत।

7 मिनु मार दुम्माकत देशा हना, परमप्रभु यावे आ स्वर्ग डा गेय पाइब का फो यूशा, पत्रुस आ डोंइती राम्माकत। मिनु कोटा छेडछेड तांडसे बाकत। मिनु परमप्रभु यावे आ स्वर्ग डा गेय पाइबमी पत्रुस कली “छुल बोक्को” दे चुशा पोक्गा बाकत। मिनु बोक्मेनु, आ गुडमी पाइश्शो साडलो बुइश्शा खपीमी देल्माकत। प्रेरित ५:१९

8 मिनु “किप्शुर किम्सो, इ जुत्ता मुंडसो” देमेनु, पत्रुसमी किप्शुर किप्शा, जुत्ता मुंडसे बाकत। मिनु “इ किप्शुर किप्शा रुक्शा, आं नोले खोइय्यी” देमाकत।

9 मिनु पत्रुस मेको आ नो नोले खोइश्शा, कोटा रे यूसा बाकत। पत्रुसमी चहिं एको नेल्ल गो कोइतीक तना तन बाक्नुड, दे मिम्ता बाकत। थमा कोटा रे यूसा बाकत, दे मतुइश्शो बाक्माकत।

10 मिनु कोटा रे यूशा, डोंइती बाक्ब खाल पाइब कली लाक्शा, नोले बाक्ब कली यो लाक्शा, फलाम के सेल्शो ठेयब लाप्चो जाक्दीस्सा बाकत। मेकेर जाक्दीस्सानु, लाप्चो रोक्से बाकत। मिनु यूशा गाक्सा बाकत। मिनु लां का लाग्सेनु, परमप्रभु यावे आ स्वर्ग डा गेय पाइबमी पत्रुस कली प्रोंइशा गाक्माकत।

11 मेना ब्रड सेंसीशा “परमप्रभुमी पिप हेरोद नु आं कली खेदा पाइब यहूदी आन गुड रे प्रोंइथ, आ गेय पाइब सोइश्शा प्रोंइथी बाकत” दे तुइक्ता बाकत।

12 मेको तुइश्शा मर्कूस, यूहन्ना नें यो वोइश्शो, आ ममा मरीयम आ खिं गे लमाकत। मरीयम आ खिंमी थमा सुइक्व शुश खुम्सीशा, प्रार्थना पना पन बाक्शो बाक्मा बाकत। प्रेरित १२:२५; प्रेरित १३:५,१३; प्रेरित १५:३७

13 मिनु पत्रुस जाक्शा, लाडगा डा लाप्चो खोकोल पदा बाकत। मिनु रोदा माइश्शो गेय पाइब मीश मुरुम सु जाक्मे, दे कोवथ यूमाकत।

14 मिनु पत्रुस आ सेंदा नेंशा, पत्रुस जाक्माकत, दे तुइश्शा, लाप्चो मरोक्थु फ्रा लेश्शा, खिं गामी बाक्शो आन कली “आमाइ, लाप्चो डोंइती राप्शा बाक्ब दा पत्रुस कका बाकत” दे माइक्मी बाकत।

15 मोदेशो नेंशा “गे मार निप्स ग्यशो लोत्र पवी?” दे आ देशो थमा मसुदमे बाकत। रोदामी चहिं लोत्र थोकशा, “थमान पत्रुस जाकत” देमेनु “मो हना पत्रुस ममाइ। पत्रुस कली कोवब परमप्रभु यावे आ स्वर्ग डा गेय पाइब बाक्म माइ?” देमा बाकत।

16 मोपा लोत्र पना पन बाक्मानु, पत्रुसमी लाप्चो खोकोल पाइक्स डा पाइक्स बाक्माकत। मिनु नोले लाप्चो रोक्शा कोवडमेनु, पत्रुस कली तशा “आल्लेइ” दे छक लाक्मा बाकत।

17 मिनु पत्रुस ओव्रशा आ गुड हिक्शा, आ शोत्र थीप थीप पा सिक्सी पा नेनीन देशा, दोपा प्रभुमी जेल्खान रे प्रोंइशा सोइक्ता, मेको नेल्ल तुइक्पाइक्मी बाकत। मिनु “याकूब नु इं थमा सुइक्व लोकब नेल्ल आन कली एको लोत्र नैपतीन, है” देशा, मेकेर रे गाक्माकत।

18 जेल्खानमी चहिं मार दुम्माकत देशा हना, सुनी कना सिपाही नु खाल पाइबपुकीमी पत्रुस कली मतामे बाकत। मिनु शुश हिंशा, मार दुम्मे, ते लाक्गा, दे वाइ की ब्रेम्मा बाकत। प्रेरित ५:२१-२२

19 मिनु पिप हेरोदमी पत्रुस कली माल्थ सोइक्तीमी बाकत। माल्ना माल्न गाक्मानु, यो तेड मथिदमे बाकत। मिनु थिन्ने मचाप्शो तशा, पिपमी खाल पाइब आन कली ब्रेश्शा हिल्लो हिक्सी पशा यो मारेड तुइक्ने मचाप्तीके खाल पाइब सिपाही आन कली साइक्पाइक्मी बाकत। मिनु यहूदीया रागी रे सिजरिया सहर याक्सीशा बाक्माकत।

पिप हेरोदमी सजाइ तशो

20 पिप हेरोद मेकेर बाकमेनु, टायर नु सीदोन सहर डा मुर आन कली तशा चुरमाकत। मोपतीके मेकोपुकीमी मुर निक्शी का योव्रशा, ब्लास्तस नें पाइशशो पिप आ ठेयब गेय पाइब मुर नु गारशा, पिप कली गुम्थ जाकमा बाकत। मिनु मेकोपुकीमी “दुशा गारशा बाक्य, सरकार” दे सेउ पदमे बाकत। मारदे हना पिप हेरोद आ रागी रे मचाकथु जचा मजाकदीम्माकत। इजीकीएल २७:१७

21 मिनु काबु पिप हेरोदमी रकारी वा फेकशा, आ ठेयब नित्तीकेमी निशशा, मेको आन कली आ लोत्र नेंपाइकमी बाकत।

22 मिनु आ लोत्र नेंशा “मुर आ लोत्र ममाइ, देवता आ लोत्र बाकमाकत” देशा, रेयके पा पिप कली ठेयब सेल्मे बाकत। इजीकीएल २८:२

23 पिप हेरोदमी परमप्रभु यावे कली मान मपथु, आंमान ठेयब सेल्सीतीके परमप्रभु यावे आ स्वर्ग डा गेय पाइबमी मेको कली रोइ पपदा बाकत। मिनु मेको हेरोद लुस्पु जोल्शा बेक्माकत। दानीएल ५:२०

24 परमप्रभु यावे आ लोत्र तेइ तेइ ब्रशा, शुश मुर थमा सुइकब दुम्मा बाकत। प्रेरित ६:७

25 बारनाबास नु सावल यरूसलेममी क्येट चोवने थुम्शा, एन्टीओक लेस्सा बाकत। लेस्सानु, मर्कूस कली यो लदसे बाकत। मर्कूस कली यूहन्ना नें यो वोइशशो बाकत। प्रेरित ११:२९-३०; प्रेरित १३:५

## 13

शेंब आस कली सोइशशो

1 एन्टीओक सहर डा थमा सुइकब आन दातेमी परमप्रभु यावे आ लोत्र पाइब नु शेंब का निक्शी यो बाकमा बाकत। मोदेंशो मुर सु सु बाकमा बाकत देशा हना, बारनाबास, क्येर माइशशो सिमियोन, साइरनी डा लुसीयस, पिप हेरोद आ गेय पाइब मानाएन नु सावल बाकमा बाकत। प्रेरित ११:२७; १कोरिन्थी १२:२८

2 मिनु काबु थमा सुइकबपुकी खुम्सीशा माइजा बाकशा, प्रार्थना पना पन प्रभु कली ठेयब सेल्ना सेल्न बाकमानु, परमप्रभु यावे आ सोक्तीमी “बारनाबास नु सावल आस कली आं गेय पथ योव्रतासी। मोपतीके मेको आस कली आं गेय पचा कली सोइक्तीने” दे तुइकपाइकमी बाकत। प्रेरित ९:१५

3 मिनु माइजा बाकशा, प्रार्थना पा आसीक गेशा, प्रभु आ गेय पथ सोइकतमे बाकत। प्रेरित ६:६

4 मिनु मेको निक्शी परमप्रभु यावे आ सोक्तीमी योव्रशा सोइक्तीके एन्टीओक सहर रे बुष्शा, सिलुसीया सहरमी जाकदीम्मा बाकत। मेकेर जहाज डोइशशा समुन्द्र शोकशा, साइप्रस टापु जाकदीम्मा बाकत।

5 मिनु सलामीस सहर जाकदीशशा, यहूदी आन गुम्तीक खिं लशा, परमप्रभु यावे आ लोत्र शेंदसे बाकत। एन्टीओक रे काथा गाकशा, यूहन्ना मर्कूसमी मेको आस कली वारच पस डा पस बाकमाकत। प्रेरित १२:१२,२५

चटक कौडब कली हुइशशो

6 मिनु साइप्रस टापु नेल्ल हिरशा, गाकमा गाकमा पाफोस सहरमी जाकदीम्मा बाकत। मेकेर जाकदीशशा बाकमानु, बार-येसु माइशशो चटक कौडब, यहूदी मुर का गुम्मे बाकत। मेको “परमप्रभु यावे आ लोत्र पाइब नड” देकु पा गाकबाकमाकत।

7 मेको चटक कौडब सेरगीयस-पावल नें पाइशशो हुकुम पाइब आ खिंमी बाकबाकमाकत। मेको हुकुम पाइब जोकब तुइकब मुर बाकमाकत। मिनु काबु बारनाबास नु सावल आस कली ब्रेशशा “परमप्रभु यावे आ लोत्र गो यो नेंनुड” दे माइक्सी बाकत।

8 मेको चटक कौडब बार-येसु कली ग्रीक लोव्रमी एलुमास यो देंबाकमा बाकत। मिनु मेकोमी हुकुम पाइब कली बारनाबास नु सावल आस शेंशो लोत्र थमा सुइकशो तशा “मेको आस शेंशो थमा मसुतीन” दे हुकुम पाइब आ थुं हिरपाइकचा मला बाकत।

9 सावल कली पावल यो देनीमी। मिनु पावलमी चटक कौडबमी हुकुम पाइब आ थुं हिरपाइकचा माल्शो तुइशशा, परमप्रभु यावे आ सोक्तीम ब्रीशा सक्ति पाइशशो दुम्शा, चटक कौडब कली मिक्च मयाकथु कोव्रस डा कोव्रस पा

10 “गे सैतान आ तौ नवे। रिम्शो मदाकथु, मरिम्शो ला दाकनेवे। प्रभुमी सेल्शो रिम्शो लां कली मरिम्शो सेल्चा थुं पवी? मरिम्शो थुं पाइशशो बाकते। मोपतीके प्रभुमी इ कली मुल सजाइ गेब।

11 गे मिक्च मताइब दुम्शा, शुश नाकत सम्म छेडछेड मताइनेवे” दे हुइकता बाकत। मो देंम चोटीन मेको चटक कौडब मिक्च मताइब दुम्शा, आ गुइ कीशा लां कौडब मुर माल्दा बाकत।

12 मिनु हुकुम पाइबमी चटक कौडब कली मिक्च मताइब दुम्शो तशा छक लाकमाकत। मिनु “मेको आस लोत्र प्रभु आ सक्ति पाइशशो लोत्र बाकमाकत” दे रुष्शा, प्रभु कली थमा सुइकब दुम्माकत।

पिसीदीया डा एन्टीओकम शेंशो

13 मिनु पावल नु आ वारचपुकी पाफोस सहरमी जहाज डोइशशा समुन्द्र शोकशा, पाम्फिलीया रागी डा पेरगा सहरमी जाकदीम्मा बाकत। यूहन्ना मर्कूस चहिं पावल नु बारनाबास आस कली प्रोइशा, यरूसलेम लेम्माकत। प्रेरित १५:३८

14 पावल नु बारनाबास पेरगा रे गाकशा, पिसीदीया रागी डा एन्टीओक सहरमी जाकदीम्मा बाकत। मिनु नाइक्तीक नाक्ती गुम्तीक खिं लशा, मेकेर देल्शो मुरपुकी नु निशशा बाकसा बाकत।

15 मिनु गुम्तीक खिं डा ठेयब मुरपुकीमी मोसा नु परमप्रभु यावे आ लोत्र पाइबमी ब्रेकशो लोत्र पढेपा नेंपाइकने थुम्शा, पावल नु बारनाबास आस कली ब्रेशशा “आंइ लोकब निक्शी, मुर आन कली शेंशा, आन थुं बारपाइकचा डा लोत्र बाकत हना, शेंदीसे” दे आस कली लोत्र पचा गेमे बाकत। प्रेरित १५:२१

16 मिनु पावल राष्शा “इस्राएली नु परमप्रभु यावे कली मान पा हिबपुकी, इन नोफा दाइशशा, नेनीन।

17 इस्राएली आन परमप्रभु यावेमी आंड किकी पिपी आन कली योव्रशा, इजीप्त रागीमी बाक्मानु, शुश सोशा बोशा ठेयब जात दुम्पाइक्मी बाक्त। मिनु शुश सक्ति पाइइशो गेय कोंइशा, मेको आन कली श्येत रे प्रोंइशा गुंडदीमी बाक्त। प्रस्थान १२:३७,४०,४१; प्रस्थान १४:८

18 मिनु ४० बर्स सम्म गोरशो रागीमी लां कोंइना कोंइन लाइक्मीनु, मेकोपुकीमी आ लोव्र मटिन्वेकम हना यो, फाल्शा रिम्शो पाइक्मी बाक्त। भजन संग्रह १०६:१३-३३

19 कनान रागीमी बाक्ब ७ रागी डा मुर नेल्ल आन कली साइइशा, मेको आन रागी आंड किकी पिपी आन कली गेवा बाक्त। ब्यवस्था ७:१; यहोसु १४:२

20 मोपा ४ सह ५० बर्स बाक्शा नोले निसाफ पाइब योव्रशा वोदा बाक्त। नोले परमप्रभु यावे आ लोव्र पाइब सामुएल कली अधिकार गेवा बाक्त। न्यायाधीस २:१६; १सामुएल ३:२०

21 सामुएल आ पालामी आंड किकी पिपीमी 'आंड कली सासन पाइब पिप का गेचा नकी' दे पुन्मे बाक्त। मिनु परमप्रभु यावेमी बेन्यामीन थर डा कीश आ तौ सावल कली योव्रशा, आन पिप सेला बाक्त। मिनु सावल ४० बर्स सम्म पिप दुम्माक्त। १सामुएल ८:५; १सामुएल १०:२१-१४

22 मिनु परमप्रभु यावेमी सावल नु आ खिं डा मुर आन कली पिप दुम्चा रे तिल्शा, दाऊद कली पिप सेला बाक्त। दाऊद आ पर्बम परमप्रभु यावेमी 'येस्से आ तौ दाऊद आं मिम्शो खोदेशो पा आं यो मिम्ब। मिनु गो नु गारब। आं दाक्शो पाइब, दे तुइक्नुड' देशो बाक्त। १सामुएल १३:१४

23 परमप्रभु यावेमी इस्राएली आन कली पाप रे प्रोंइब का सोइक्नुड, दे लोव्र गेशो बाक्माक्त। मेको पाप रे प्रोंइब दाऊद आ खिं डा येसु बाक्ब। यसैया ११:१

24 येसुम शेंचा क्येडा डोंइती ब्वाक्कुम खुम्शा गुंडब यूहन्नामी इस्राएली आन कली 'पाप पचा प्रोंइशा, इन थुं परमप्रभु यावे गे लेत्तीन' दे शेंशो बाक्माक्त। लूका ३:३

25 मोपा शेंदानु, मुर आन कली 'आं कली तशा, पाप रे प्रोंइब एको बाक्म कोर में? मदेनीन। गो मनड। तन्न मुल जाक्चशो बाक्ब। गो मेको आ डोंइती बाप्शा, आ जुत्ता पुइक्चा यो मशिरनुड' दे शेंशो बाक्माक्त। लूका ३:१५; यूहन्ना १:२०; मर्कूस १:७; लूका ३:१६; यूहन्ना १:२७

26 आं लोक्बपुकी, अब्राहाम आ खिं डा मुर बाक्तीनी हना यो, परमप्रभु यावे कली मान पा हिंब अर्को रागी डा मुर बाक्तीनी हना यो, गो नेल्ल इं कली परमप्रभुमी पाप रे ब्रोंइतीक लोव्र नेंपाइक्ब।

27 यरूसलेममी बाक्बपुकी नु आन ठेयब मुरपुकीमी येसु पाप रे प्रोंइब बाक्ब, दे मरुबेम। नाइक्तीक नाक्त किंत किंत परमप्रभु यावेमी ब्रेक्पाइइशो लोव्र पदेशा नेंशा यो रुप्ने मचबेम। मोपा मारेड रुप्ने मचाप्तीके येसु कली दोस गेम्तेक्म। आन मो पशोमी साइ डा ब्रेक्शो लोव्र नेल्ल थमा सेल्लेक्म। यूहन्ना १६:३

28 साइक्चा पुंडसीचा डा दोस गुंडने मचाप्तेक्म हना यो, हुकुम पाइब पिलातस कली मेको मुर साइक्चा पुंडसीब बाक्ब, दे साइक्पाइक्तेक्म। मत्ती २७:२२-२३

29 मिनु साइ डा ब्रेक्शो लोव्र नेल्ल थमा दुम्पाइक्तेक्म। येसु शीम क्येप्शा कांटी थोक्शा क्याइइशा साइइशा खपीम फ्रुप्शा, आ बेक्शो रां थिम्तेक्म। मत्ती २७:५९-६०

30 तन्न परमप्रभु यावेमी मेको कली बेक्शो रे सेंताक्ब। प्रेरित ३:१५

31 मिनु गालील रे यरूसलेम सम्म येसु नु काथा गाक्ब आन कली बेक्शो रे सेंसीशा शुश नाक्त तपांडसाक्ब। मोदेशो पा येसु कली सेंसीशो ताइबपुकीमी 'येसु बेक्शो रे सेंचा पुंडसाक्ब। मुल यो ब्रोंइशो बाक्ब। आंड मिक्चीमी ताइतक' दे शेंशा शेंन गाक्नीम।

32 परमप्रभु यावेमी इं किकी पिपी आन कली डोंइती पशो लोव्र पाप रे प्रोंइब का सोइइशा खाप्शो, ग्येरपाइक्तीक लोव्र इन कली शेंनीकी।

33 मेको लोव्र साइ परमप्रभु यावेमी ब्रेक्पाइइशो लोव्र नु गारब। मारदे हना भजन संग्रह कामी 'गे आं तौ नवे। मुलाक्ती गो इ कली थीतन' दे ब्रेक्शो बाक्ब। भजन संग्रह २:७

34 लेंशा मबेक्चा डा नु मराक्चा डा पा बेक्शो रे सेंसीशो आ पर्बम परमप्रभुमी 'दाऊद कली गेशो खोदेशो पा गो इ कली आसीक गेनन' दे ब्रेक्पाइइशो बाक्ब। यसैया ५५:३

35 मोपतीके दाऊदमी भजन संग्रह कामी 'परमप्रभु यावे, इन योव्रशो तौ कली बेक्शा लशा यो, राक्चा मगेनीनी' दे ब्रेक्शो बाक्त। भजन संग्रह १६:१०; प्रेरित २:२७

36 दाऊदमी मेको लोव्र ब्रेक्शो बाक्त हना यो, आंम पर्बम ममाइ। मारदे हना दाऊदमी परमप्रभु यावेमी गेशो सासन पने थुम्शा बेक्शा, आ किकी पिपी आन कली थिम्तीकेमी थिम्चा पुंडसीशा राक्शा लमाक्त।

37 येसु चहिं बेक्शा मरा। मारदे हना परमप्रभु यावेमी मेको कली बेक्शो रे सेंताक्ब।

38 मोपतीके आं लोक्बपुकी, आं लोव्र रूपीने। मेको येसुमी मुर आन पाप क्याम्शा गेब, दे इन कली शेंनीकी। रोमी ८:३-४

39 येसु कली थमा सुइक्ब नेल्ल आन पाप क्याम्चा पुंडसीनीम। मिनु आन पाप क्याम्चा पुंडसीशा, परमप्रभु आ डोंइती पाप मपथु बाक्शो तांडसीनीम। मोसामी ब्रेक्शो लोव्रमी इन पाप क्याम्चे मचाप्ब। मारदे हना मेको लोव्र नेल्ल टिने मचाप्तीके पापी दुन्तीनी। रोमी १०:४

40 मोपतीके होस पांडसीने। साइ परमप्रभु यावे आ लोव्र पाइबमी

41 'ए, गे शुक्शी पाइबपुकी, छक लाक्चा डा पा पुलु दुम्शा लने। मारदे हना गो इन पालामीन गेय का पाइनुड। तन्न गे थमा मसुइक्नीनी। मिनु सुइमी इन कली शेंताक्म हना यो गे थमा मसुइक्नीनी' " दे पावलमी शेंदीमी बाक्त। हबकुक् १:५

42 मिनू गुम्टीक खिं रे यूशा गाक्चाम्सेनु, आस लोत्र नेंबपुकीमी “मुल जाकशो नाइक्तीक नाक्ती लेंशा शेंचा नकी” दे पुन्मे बाक्त।

43 मिनू गाक्सानु, यहूदी नु यहूदी धर्म मानेब शुशेमी मेको आस नोले खोदमे बाक्त। मेको निकशीमी “परमप्रभु यावेमी इन कली शिशी पा ख्रीस्त कली थमा सुइक्ब सेल्लु। मुल डा मेरे मेको थमा सुइक्तीक मप्रोनीन” दे मदसे बाक्त।

खेरचा पुंडसीशो

44 मिनू नाइक्तीक नाक्त जाक्मेनु, सहर डा मुर नेल्ल जाक्शा, परमप्रभु यावे आ लोत्र शेंशो नेंथ देल्मा बाक्त।

45 मोपा शुश मुर देल्लो तशा, यहूदी आन थुं चोत्रमे बाक्त। मिनू पावलमी लोत्र शेंदानु, मेकोपुकीमी आ लोत्र खोइश्शा, जिचा पोक्मे बाक्त।

46 मिनू पावल नु बारनाबासमी यो महिंथुं ठेयब थुं पा “अरु आन क्येडा डोंइती इन कली परमप्रभु यावे आ लोत्र नेंपाइक्चा माल्लो। गेपुकीमी चहिं मनैनीनी, नोफा मदाइक्नीनी, थमा मसुइक्नीनी। इन मोदेशो पशोमी गेना हना यो ब्रोंइशा बाक्चा मताइनीनी। जाम्था लाइनीकी, दे तुइक्तीने। मुल डा मेरे इन कली शेंचा प्रोंइशा, अर्को रागी डा मुर आन कली शेंथ गाक्नस्कु। प्रेरित ३:२५-२६; मती १०:५-६

47 आंमा शेंब दुम्शा, गाक्शो मनस्कु। परमप्रभु यावेमी आंस कली आ लोत्र शेंब सेल्लु। मिनू मेकोमी ‘गो इ कली नेल्ल रागी डा, नेल्ल जात डा मुर आन कली लां कोंइशा, छेडछेड दुम्शा रुप्पाइक्चा कली सोइक्ताक्ड’ दे ब्रेक्शो बाक्ब” देसा बाक्त। यसैया ४९:६

48 मिनू अर्को रागी डा मुरपुकीमी “मुल गो यो पाप रे ब्रोंइचा ताइबाक्तक” दे रुप्शा थाम्पा ग्येरसीशा, परमप्रभु यावे कली ठेयब सेल्मे बाक्त। परमप्रभु यावेमी डोंइती रे योत्रशोपुकीमी ख्रीस्त कली थमा सुइश्शा, गेना हना यो ब्रोंइशा बाक्चा ताइब दुम्मा बाक्त। रोमी ८:२९-३०

49 मिनू ख्रीस्त आ परबम शेंशो लोत्र मेको रागीमी तेइ तेइ ब्रमाक्त।

50 ख्रीस्त कली थमा मसुइक्ब यहूदीपुकीमी यहूदी धर्म मानेब ठेयब मीश मुर नु सहर डा सरकार डा ठेयब मुर आन कली पोक्शा, पावल नु बारनाबास आस कली मेको रागी रे गुंइदमे बाक्त।

51 मेको निकशी चहिं आस खोइल डा फुरकु थुर थुर पा ताइश्शा, गाक्शा आइकोनीयम सहरमी जाक्दीस्सा बाक्त। प्रेरित १६:८; मती १०:१४

52 एन्टीओक सहरम बाक्ब थमा सुइक्बपुकी चहिं ग्येरसीशा, परमप्रभु यावे आ सोक्तीम प्रिंचा पुंडसमा बाक्त।

## 14

आइकोनीयम सहरमी शेंशो

1 पावल नु बारनाबास आइकोनीयम सहरमी जाक्दीश्शा, यहूदी आन गुम्टीक खिं लशा, मेकेर खुम्सीशा बाक्शो आन कली ख्रीस्त आ लोत्र शेंना शेंन बाक्सा बाक्त। मिनू ख्रीस्त आ लोत्र नेंशा, यहूदी नु ग्रीक शुशेमी थमा सुदमे बाक्त।

2 मिनू थमा मसुइक्ब यहूदीपुकीमी अर्को रागी डा मुर आन कली पोक्शा “मेको आस शेंशो लोत्र मनेंचा” दे आन थुं हिरपा मरिम्शो पचा गोत्रमे बाक्त।

3 मो दुम्शा यो पावल नु बारनाबास शुश नाक्त सम्म मेकेर शेंना शेंन बाक्सा बाक्त। ठेयब थुं पा सुइ आन कली तशा महिंथुं, ख्रीस्त आ लोत्र शेंदसेनु, प्रभुमी चिन्ड नु छक लाक्चा डा गेय पचा कली सक्ति गेशा, आस शेंशो लोत्र थमा सेला बाक्त। प्रेरित १९:११; हिब्रू २:४

4 आस लोत्र नेंशा, चिन्ड नु छक लाक्चा डा गेय पशो तशा, सहर डा मुरपुकी ब्राशा, का निकशी थमा मसुइक्ब यहूदीपुकी नु गारमा बाक्त, का निकशी ख्रीस्त आ सोइश्शा नु गारमा बाक्त।

5 मिनू अर्को रागी डा मुर, यहूदी नु आन हुकुम पाइब गारशा “शेंब आस कली फुल्लु आप्शा मसाइक्थु मप्रोंइचा नसी” दे साइक्चा माल्मे बाक्त। २तिमोथी ३:११

6 मिनू पावल नु बारनाबासमी मेको आन मो पशो तुइश्शा, सहर रे प्रोक्शा, लाइकाओनीया रागी डा लिस्त्रा नु डेरबे सहर लसा बाक्त।

7 मिनू मेकेर एर ओंथ डा गाउं गाउं हिरना हिरन ख्रीस्त आ लोत्र शेंना शेंन गाक्सा बाक्त।

लिस्त्रा सहरम शेंशो

8 मिनू लिस्त्रा सहरमी जरमेसे रे गाक्ने मचाप्ब आ खोइल मदुक्ब मुर का बाक्माक्त।

9 काबु मेको खोइल मदुक्ब मुरुमी पावल आ शेंशो लोत्र थाम्पा नोफा दाइश्शा नेंना बाक्त। मिनू पावलमी मोपा नोफा दाइश्शा नेंशो तशा, मेकोमी साबाक्ती, दे थमा सुदा बाक्त, दे तुइश्शा, मती ९:२८

10 मेको कली मिक्च मयाक्थु कोत्रशा, ठेयब सेंदा पा “इ खोइल दिंशा बोक्शा रपो” दे मदा बाक्त। मो मदानु, मेको छुल बोक्शा राप्शा एर ओंथ गाक्माक्त।

11 मिनू मोपा सापाइश्शा तशा, छक लाक्शा, मेकेर देल्लोपुकीमी आन लाइकाओनीया डा लोत्र पा “इ देवता मुर खोदेशो दुम्शा यिशा, गोपुकी नु काथा बाक्सा बाक्त” देमुमा बाक्त। प्रेरित २८:६

12 मिनू बारनाबास कली जिउस नु पावल कली हेरमेस, दे देवता आस नें वोदमे बाक्त। मारदे हना पावल चहिं लोत्र पस जोक्बाक्माक्त।

13 सहर ओत्रतीक आ नेक्था जिउस देवता आ थान सेल्लो बाक्माक्त। मिनू जिउस कली चढेबमी चढेचा कली ब्यफ नु फू माला चाक्पाइक्मी बाक्त।



14 मिनू बारनाबास नु पावलमी मेकोपुकीमी गो इंस कली देवता मानेशा हुश जारशा चढेचशो बाकनीमी, दे तुइश्शा, आस वा खाक्शा दोरशा लशा, मुर आन दातेमी जाकदीस्सा बाक्त।

15 मिनू ठेयब सेंदा पा “ए गेपुकी, मार पचानी? गो देवता मनस्कु, इन खोदेशो मुर कका नस्कु। इन कली ग्येरपाइक्ब लोव्र शेंथ जाक्शो नस्कु। मूर्ति पूजा पचा प्रोइशा, गेना हना यो ब्रोंइशा बाक्ब परमप्रभु यावे गे इन थुं हिरदीने। मेकोमी सरीड, रागी, समुन्द्र नु मेकेर मार मार बाक्मा, मेको नेल्ल सेल्शो बाक्ब, दे तुइक्तीने। प्रेरित १०:२६

16 साइ डोंइती रे मुल सम्म परमप्रभु यावेमी रागी नेल्ल आन कली आन दला दाक्स पचा गेशो बाक्त। प्रेरित १७:३०

17 आन दला दाक्स पा बाक्तेक्म हना यो, परमप्रभुमी मेको आन कली तुइक्पाइसीन सीन बाक्त। दोपा तुइक्पाइसीन सीन बाक्त देशा हना, रेउ यिपा मार मार वापा इन कली जाकदीत्वा डा पा जचा नु फेक्चा गेशा, ग्येरशा बाक्चा गेशो बाक्त” देसा बाक्त।

18 मिनू देवता मानेशा हुश जारशा चढेचा ममाल्ब देसानु यो, हेर हेररा चढेमे बाक्त।

19 मिनू नोले एन्टीओक नु आइकोनीयम सहर रे थमा मसुइक्ब यहूदीपुकी जाक्मा बाक्त। मेकोपुकीमी सहर डा मुर आन कली पोक्शा, पावल कली साइक्चा कली फुल्लु क्रोम्पदमे बाक्त। मिनू बेक्त, दे आ रां लाइश्शा, सहर रे गुंइशा ताइक्तमे बाक्त। २कोरिन्थी ११:२५; २तिमोथी ३:११

20 मिनू थमा सुइक्बपुकी कोव्रथ लशा, पावल आ एर ओथ राम्मानु, सेसीशा बोक्शा सहर लेम्माक्त। मिनू आ दीसा बारनाबास नु गाक्शा, डेरबे सहर जाकदीस्सा बाक्त।

एन्टीओक लेशो

21 मिनू डेरबे सहरमी शुश मुर आन कली येसु आ ग्येरपाइक्ब लोव्र शेंशा रूपदसेनु, शुश मुरुमी थमा सुदमे बाक्त। मिनू मेकेर रे लशा लेंशा लिन्शा, आइकोनीयम नु पिसीदीया डा एन्टीओकमी जाकदीस्सा बाक्त।

22 मेको सांफा सहर डा थमा सुइक्ब आन कली “मार दुम्त हना यो, थमा सुइक्चा मप्रोनीन। इन खोइल थेक्शा बाक्कीने। ख्रीस्त आ नेमी शुश श्येत जचा पुंइसीशा ला परमप्रभु यावे आ राज्य ओव्रचा ताइनय, दे रूपीने” दे आन थुं बारपदसे बाक्त। रोमी ५:३-५; १थिस्सलोनिकी ३:३

23 मिनू ते ते थमा सुइक्बपुकी गुम्शा बाक्मा, मेक मेक शेंब खाल्पापुकी वोइक्ना वोइक्न, माइजा बाक्शा, प्रार्थना पना पन, प्रभु कली थमा सुइश्शा, थमा सुइक्ब आन कली प्रभु आ गुइमी जिम्मा गेना गेन गाक्सा बाक्त। प्रेरित ६:६

24 मिनू पिसीदीया रागी रे गाक्शा, पाम्फलीया रागी जाकदीस्सा बाक्त।

25 मिनू पेरगा सहरमी ख्रीस्त आ लोव्र शेंशा, मेकेर रे बुप्शा अत्तलीया जाकदीस्सा बाक्त।

26 अत्तालीया सहरमी जहाज डोइश्शा, समुन्द्र शोक्शा, एन्टीओक सहरम जाकदीस्सा बाक्त। डोंइती एन्टीओकम बाक्सानु, परमप्रभु यावेमी मेको आस कली ख्रीस्त आ लोव्र शेंथ योव्रशो बाक्माक्त। मिनू थमा सुइक्बपुकीमी मेको आस कली प्रभु कली जिम्मा गेशा, शेंथ सोइश्शो बाक्मा बाक्त। मिनू मुल शेंने थुम्शा लेशा जाक्सा बाक्त। प्रेरित १३:१-२

27 मिनू जाक्शा थमा सुइक्ब आन कली खुप्शा, दोपा परमप्रभु यावेमी आं नु बाक्शा गेय पपाइश्शा आसीक गेवा, दोपा अर्को रागी डा मुर आन कली थमा सुइक्पा, पाप रे ब्रोंइतीक लां कोइशा, आ मुर सेला, मेको लोव्र नेल्ल तुइक्पदसे बाक्त। १कोरिन्थी १६:९

28 मिनू शुश नाक्त सम्म थमा सुइक्बपुकी नु काथा बाक्सा बाक्त।

## 15

खोइक्तीक चिनु आ पर्वम लोव्र

1 मिनू नोले यहूदीया रागी रे मुरपुकी यिशा, एन्टीओकमी जाक्मा बाक्त। मेकोपुकीमी “साइ मोसामी देशो खोइक्तीक चिनु खोइक्चा माल्ब। मपाइतीनी हना, पाप रे ब्रोंइचा मताइनीनी” दे शेंबाक्मा बाक्त। गलाती ५:२

2 मिनू पावल नु बारनाबासमी मोदें शेंशो नेंशा, मेको आन शेंशो लोव्र मबिस्सा बाक्त। मेकोपुकीमी खोइक्तीक चिनु खोइक्चा माल्ब देसा बाक्त। पावल नु बारनाबासमी चहिं खोइक्चा ममाल्ब, देसा बाक्त। मिनू लोव्र निक्शी दुम्तीके थमा सुइक्ब आन थुं ग्याल्माक्त। मिनू पावल, बारनाबास नु का निक्शी आन कली योव्रशा, यरूसलेममी बाक्ब सोइश्शोपुकी नु गुम्तीके डा शेंब खाल्पा आन कली हिल्लो पथ सोइक्तमे बाक्त। गलाती २:१

3 मिनू योव्रशा सोइक्चा पुंइसीशोपुकी एन्टीओक रे गाक्शा, यरूसलेम डा लां खोइश्शा डोंइती फोनीसीया, नोले सामरीया रागीमी जाकदीम्मा बाक्त। मिनू ते ते जाकदीम्मा, मेक मेक डा थमा सुइक्ब आन कली गुम्शा “अर्को रागी डा मुरपुकीमी यो ख्रीस्त कली थमा सुइश्शा, पाप रे ब्रोंइचा ताम्तेक्म” दे तुइक्पाइक्ना पाइक्न गाक्मा बाक्त। मिनू नेंबपुकी शुश ग्येरसमा बाक्त।

अर्को रागी डा मुर आन पर्वम सल्ला पशो

4 मिनू यरूसलेममी जाकदीम्मानु, थमा सुइक्बपुकी, ख्रीस्त आ सोइश्शो, थमा सुइक्ब आन शेंब खाल्पा नेल्लेमी मान पा ब्रामे बाक्त। मिनू परमप्रभु यावेमी पपाइश्शो गेय दोपा पामे, मार दुम्मे, मेको लोव्र नेल्ल देसा बाक्त।

5 थमा सुइक्ब का निक्शी फरिसी बाक्मा बाक्त। मेकोपुकीमी बोक्शा “अर्को रागी डा मुरपुकीमी ख्रीस्त कली थमा सुइक्ब दुम्मानु, इं यहूदी धर्म डा खोइक्तीक चिनु खोइक्चा माल्नीम, मोसामी अरेशो नेल्ल पचा माल्नीम” देसा बाक्त।

6 मिनू ख्रीस्त आ सोइश्शोपुकी नु थमा सुइक्ब शेंब खाल्पापुकी खुम्सीशा “मेको लोव्र निक्शीमी तेको लोव्र टिशा पचा?” दे लोव्रसी पमुमा बाक्त।

7 मिनू शुश लोत्र पमुमानु, पत्रुस बोक्शा “आं लोकबपुकी, नोफा दाइशशा नेनीने, ख्रीस्त आ लोत्र ब्रचा गोवानु, परमप्रभु यावेमी अर्को रागी डा मुर आन कली शेंशा, ग्येरपाइक्ब लोत्र थमा सुइक्पाइक्थ, आं कली योत्रती, दे तुइशशो ननी। प्रेरित १०:४४; प्रेरित ११:१५

8 मुर नेल्ल आन थुं तुइक्ब परमप्रभु यावेमी यहूदी इं कली गेशो खोदेशो पा अर्को रागी डा मुर आन कली यो आन थुंमी आ सोक्त गेप्तु।

9 मेकोपुकीमी येसु ख्रीस्त कली थमा सुइक्तीकेमी माफ तशा, गो नेल्ल का दुम्लो बाक्नीकी।

10 परमप्रभु यावेमी मेको आन कली रिम्लो सेल्लु, दे तुइशशा, इं किकी पिपीमी लाइ यो कुरने मचाप्चा डा भारी मेको आन कली कुरपाइक्चा दुम्बा डा? परमप्रभु क्येडा लाक्शा जोक्ब तुइक्ब दुम्बा शिरबा डा? मती २३:४; गलाती ५:१

11 मारदे हना प्रभु येसुमी इं कली शिशी पतीके पाप रे ब्रोंडचा ताइतय, दे थमा सुइक्तय। मेकोपुकीमी इं खोदेशो पा प्रभु आ शिशी तशा थमा सुइक्ब दुम्तेक्म” दे पत्रुसमी माइक्मी बाक्त। मिनू नेल्ल ब्वालेइ पामे बाक्त। गलाती २:१६; एफिसी ४:२-१०

12 मिनू बारनाबास नु पावल आस पालो लोत्र पचा गोम्से बाक्त। अर्को रागी डा मुरपुकी नु बाक्सानु, दोपा परमप्रभु यावेमी चिन्ड नु छक लाक्चा डा गेय पपदा, मेको लोत्र नेल्ल तुइक्पदसे बाक्त।

13 मेको लोत्र पने थुम्से नोले याकूबमी “आं लोकबपुकी, इन नोफा दाइशशा, आं लोत्र नेनीने। प्रेरित २१:१८; गलाती २:९

14 परमप्रभु यावेमी अर्को रागी डा मुर आन कली यो योत्रशा, आ मुर सेल्लु, दे सिमोनमी तुइक्पाइक्तु। नेल्ल क्येडा डोंइती दोदेशो दुम्मे, मार दुम्मे, मेको लोत्र शेंताक्व।

15 अर्को रागी डा मुर आन कली योत्रशा, आ मुर सेल्लु, दे साइ नेसी परमप्रभु यावे आ लोत्र पाइबपुकीमी ब्रेक्शो आन लोत्र नु गारब।

16 ‘मेको नेल्ल दुम्ला नोले गो लेशशा जाक्नुड। मिनू साइ दाऊदमी सेल्पाइशशो ब्रेशो खिं लेंशा सेल्लुड। मार मार ब्रेशो बाक्मा, मेको नेल्ल गो नक सेल्शा वोइक्नुड।

17 मारदे हना योत्रचा पुंडसीशो अर्को रागी डा मुरपुकीमी आं कली तुइशशा, आं मुर दुम्मल, दे मो पाइक्नुड।

18 साइ रे गो मोदेशो लोत्र तुइक्पाइक्ना पाइक्न पिति’ दे ब्रेक्शो बाक्ब। आमोस ९:११-१२

19 मोपतीके परमप्रभु यावे आ देशो तुइशशा, दोदेशो मिम्चा माल्नय देशा हना, अर्को रागी डा थमा सुइक्ब आन कली श्येत मगेचा।

20 मेको आन कली ‘मूर्ति कली चदेशो मजचा, तेल्लेम मपचा, हुश मचुइक्थु साइशशो श्ये मब्वचा, हुश मब्वचा’ दे चिठी ब्रेक्शो बाक्त। लेवी १९:४; लेवी १९:२९; लेवी ३:१७

21 परमप्रभुमी मोसा कली ब्रेक्पाइशशो लोत्र चहिं तुइक्नीम। मारदे हना साइ रे नाइक्तीक नाक्त इं गुम्टीक खिंमी नेंशा तुइक्नीम” दे माइक्मी बाक्त। प्रेरित १३:१५

अर्को रागी डा मुर आन कली चिठी

22 मिनू याकूब आ लोत्र नेंशा, नेल्ल थुं का दुम्ला, आ देशो बिस्समा बाक्त। मिनू चिठी ब्रेक्शा, मेको चिठी चोत्रथ मुर योत्रशा, पावल नु बारनाबास, नु काथा एन्टीओक सोइक्चा, दे सल्ला पामे बाक्त। मेको योत्रशो का यहूदा नु का सिलास बाक्सा बाक्त। यहूदा आ याइनी नें बारसाबास बाक्माक्त। यहूदा नु सिलास थमा सुइक्ब आन कली शेंब खाल्पा बाक्सा बाक्त।

23 मेको चिठीम चहिं “एन्टीओक, सिरीया नु सिलीसीया डा अर्को रागी डा येसु ख्रीस्त कली थमा सुइक्ब आंइ लोकबपुकी, गो यरूसलेम सहरम बाक्ब ख्रीस्त आ सोइशशो, आंइ गुम्टीक डा शेंब खाल्पा नु थमा सुइक्ब लोकब नेल्लेमी इन कली ‘रिम्शो बाक्कीन’ देशा ब्रेक्शा सोइक्ताक्क।

24 गोपुकी नु बाक्ब का निकशी इन बाक्तीकेमी जाक्शा, इन थुं क्याल्लेक्म देशो लोत्र नेंतक। मेको आंइ सोइशशो मबाक्नीम।

25 मोपतीके गो नेल्ल थुं का दुम्ला, मुल इन थुं नाइक्पाइक्चा कली इं दाक्शो बारनाबास नु पावल नु काथा लोत्र कुरब मुर इन बाक्तीक सोइशशो बाक्नीकी।

26 बारनाबास नु पावल इं प्रभु येसु ख्रीस्त आ नेमी बेक्चा यो महिंब बाक्नीसी।

27 आंइ रिम्शो नु आंइ देशो नेल्ल मेको आंइ सोइशशो यहूदा नु सिलास निकशीमी इन कली तुइक्पाइक्नीसी। मिनू गे लोत्र नेल्ल तुइक्नीनी।

28 इन कली रुप्पाइक्चा माल्लो लोत्र चहिं परमप्रभु यावे आ सोक्तीमी आंइ कली रुप्पाइशशो लोत्र बाक्ब। मिनू मेको लोत्र इन कली शेनीकी। इन कली हेल्शो भारी कुरपा गाक्पाइशशो खोदेशो लोत्र ममाइ।

29 मेको लोत्र मार बाक्ब देशा हना ‘मूर्ति कली चदेशो मजचा, हुश मब्वचा, हुश मचुइक्थु साइशशो श्ये मब्वचा, तेल्लेम मपचा’ एको लोत्र टीतीनी हना, गे रिम्शो दुम्नीनी। आंइ लोत्र ओशोन बाक्ब” दे ब्रेक्शो बाक्माक्त।

30 मिनू यरूसलेम रे बुष्शा एन्टीओक जाक्दीशशा, थमा सुइक्ब आन कली ब्रेशशा, मेको चिठी गेम्से बाक्त।

31 मिनू मेकोपुकीमी चिठी प्राक्शा पढेशा, ग्येरसमा बाक्त।

32 यहूदा नु सिलास परमप्रभु यावे आ लोत्र पाइब यो बाक्सा बाक्त। मिनू मेको निकशीमी शुश लोत्र पा लोकब आन थुं बारपदसे बाक्त। प्रेरित ११:२७; प्रेरित १३:१

33 मिनू शुश नाक्ती एन्टीओकम शेंना शेंन बाक्शा, यरूसलेम लेत्वी ना यहूदा ला लेम्माक्त।

- 34 सिलास चहिं एक उइ बाक्नुइ, दे बाक्माक्त।
- 35 पावल नु बारनाबास एन्टीओकम बाक्शा अरु नु गारशा, प्रभु आ लोत्र तुइक्पाइक्ना पाइक्न शेंना शेंन बाक्सा बाक्त।
- पावल नु बारनाबास ब्राशो
- 36 मिनु काबु पावलमी बारनाबास कली “डोंइती ते ते प्रभु आ लोत्र शेंथ हिरससा, मेक मेक डा थमा सुइक्बपुकी दो पामे, मार पामे, कोत्रथ लस” देंमाक्त।
- 37 मिनु बारनाबासमी “यूहन्ना, आ याइनी नें मर्कूस कली यो काथा लाइश्शा लस” देंमाक्त। प्रेरित १२:१२,२५
- 38 पावलम चहिं मलाइक्चा, दे मबिस्से बाक्त। मारदे हना डोंइती काथा गाक्शा, पाम्फीलीया रागीमी बाक्मानु, गेय प्रोंइशा आ का ला लेशो बाक्माक्त। प्रेरित १३:१३
- 39 मिनु बारनाबास लाइक्चा, पावलमी मलाइक्चा देंतीके मेको आस लोत्र मगारथु, जिशा ब्रासा बाक्त। मिनु बारनाबासमी मर्कूस कली लाइश्शा, जहाज डोंइशा साइप्रस लमाक्त।
- 40 पावलम चहिं सिलास कली योत्रडा बाक्त। मिनु थमा सुइक्बपुकीमी परमप्रभु यावेमी पावल नु सिलास आस कली रिम्लो कोत्रडल, आसीक गेवल, दे प्रार्थना पशा सोइक्तमे बाक्त।
- 41 मिनु मेकेर रे लशा, सिरीया नु सिलीसीया रागीमी जाक्दीश्शा, थमा सुइक्ब आन थुं बारपदसे बाक्त।

## 16

तिमोथी कली योत्रशो

- 1 मिनु डेरबे सहरमी जाक्दीश्शा, मेकेर रे लशा, लिस्त्रा सहरमी जाक्दीस्सा बाक्त। मिनु लिस्त्रामी तिमोथी नें पाइश्शो थमा सुइक्ब का गुम्से बाक्त। तिमोथी आ ममा खीस्त कली थमा सुइक्ब यहूदी जात डा बाक्माक्त। आ आफ चहिं ग्रीक बाक्माक्त। प्रेरित १७:१४; प्रेरित १९:२२; प्रेरित २०:४; फिलिप्पी २:१९-२२; १थिस्सलोनिकी ३:२,६; २तिमोथी १:५
- 2 लिस्त्रा नु आइकोनीयम सहरमी बाक्ब थमा सुइक्ब नेल्लेमी तिमोथी रिम्लो मुर बाक्ब देंबाक्मा बाक्त।
- 3 मिनु पावलमी तिमोथी कली गेय पाइब वारच सेल्शा, काथा लाइक्चा देंमाक्त। मिनु यहूदीपुकीमी तिल्शा मवोदमेक्ल, दे खोइक्तीक चिनु खोइक्पदा बाक्त। मारदे हना तिमोथी आ आफ ग्रीक बाक्ब, दे नेल्लेमी तुइश्शो बाक्मा बाक्त। गलाती २:३
- 4 मिनु काथा लाइश्शा, गाउं सहर हिरना हिरन गाक्शा, थमा सुइक्ब आन कली गुम्शा, यरूसलेम बाक्ब खीस्त आ सोइश्शोपुकी नु युम्तीक डा शेंब खाल्पा आन देशो लोत्र नेंपदमे बाक्त। प्रेरित १५:२३-२९
- 5 मोदेशो नेपा गाक्मानु, थमा सुइक्ब आन थुं बारपदमे बाक्त। मिनु नाक्त कित कित थमा सुइक्बपुकी तेम्सीशा, शुश दुम्मा बाक्त।

परमप्रभु आ सोक्तीमी लां कोइशो

- 6 मिनु परमप्रभु यावे आ सोक्तीमी पावल नु आ वारच आस कली एसीयामी शेंचा मगेतीके फ्रिगीया नु गलातीया रागी लमा बाक्त। प्रेरित १८:२३
- 7 मिनु माइसीया आ नेक्था जाक्दीश्शा, मुल बिथीनीया रागी ओत्रचा, दे थुं पामे बाक्त। तन्न येसु आ सोक्तीमी लचा मगेमी बाक्त।
- 8 मोपतीके माइसीया लां रे पा बुष्शा, त्रोआस सहरम जाक्दीम्मा बाक्त।

मासीडोनीया लशो

- 9 मिनु त्रोआस सहरमी बाक्मानु, काबु नाक्दो प्रभुमी पावल कली कोइतीक कोइडा बाक्त। मार कोइडा बाक्त देशा हना, मासीडोनीया रागी डा मुर का पावल आ डोंइती राप्शा “आइ मासीडोनीया रागी पिशा, आइ कली वारच पाइक्चा नकी, हजुर” दे पुंइशो तवा बाक्त।
- 10 मेको कोइतीक तशा, पावल छुल बोक्शा “मासीडोनीया लय” देंत। मोपतीके गो यो सासाक्क। प्रभुमी मासीडोनीया डा मुर आन कली ग्येरपाइक्तीक लोत्र शेंथ सोइक्ता बाक्त, दे नेल्लेमी रूप्तक।
- 11 मिनु त्रोआस सहरमी जहाज डोंइशा तेइ महिरथु, सामोथ्रेस टापु लां पा आ दीसा नाक्ती निआपोलीस सहरमी जाक्दीत्तक।
- 12 मेकेर जाक्दीश्शा जहाज रे तोंइसाक्क। मिनु गाक्शा फिलिप्पी सहरमी जाक्दीत्तक। फिलिप्पी मासीडोनीया रागी डा टेयब सडर का बाक्ब। मेको रागी रोमी आन गुइमी बाक्माक्त। गोपुकी फिलिप्पी सहरमी इचका नाक्ती बाक्तक।
- 13 मिनु नाइक्तीक नाक्त सहर रे यूशा, खोला आ नेक्था लाइतक। मारदे हना खोला आ नेक्थामी यहूदी आन प्रार्थना पथ बुक्तीक बाक्म कों, दे मिम्शा, मेक जाक्दीत्तक। मिनु जाक्दीक्कानु, मीश मुरपुकी खुम्सीशा बाक्शो थित्तक।
- 14 मिनु मेको आन कली लोत्रसी पना पन येसु आं लोत्र शेंताक्क। आइ लोत्र नेंब का चहिं थिआटीरा सहर रे जाक्शो वा पसल दाइक्ब लिडीया नें पाइश्शो मीश मुर का बाक्त। मेको लिडीया परमप्रभु यावे कली मान पा टेयब सेल्ब बाक्बाक्माक्त। मेकोमी पावल आ लोत्र थम नोफा दाइश्शा नेंतु। मिनु प्रभुमी रूप्चा थुं गेप्टु।
- 15 मिनु थमा सुइक्ब दुम्शा, ब्वाक्कुम खुम्शा गुंइचा पुंइसाक्क। आ खिं डा मुर नेल्ले यो थमा सुइक्ब दुम्शा, ब्वाक्कुम खुम्शा गुंइचा पुंइसाक्क। ब्वाक्कुम खुम्शा गुंइचा पुंइसीशा नोले लिडीयामी “गोपुकीमी प्रभु कली थमा सुइक्ब बाक्माक्त, दे मिन्ताक्थीनी हना, आं खिंमी बास बाक्थ जाक्कीन। आं खिंमी मजाक्थ मडुम्ब” दे माइक्तीकी। मिनु लिडीया आ खिं लशा बाक्तक।

येसु आ नें थिशा वोल खेरशो

16 मेकेर बाक्शा गो प्रार्थना पथ खोला आ नेक्था लना लन पकानु, काबु वाइलीम मीश आल का लांमी गुन्तक। मेको मीश आल वोलम गेशो सक्ति तशा, मुर आन कली नोले दुम्ब लोत्र नेल्ल तुइक्पाइक्बाक्माक्त। मोपा आ होत्रप आन कली शुश क्येट चेम्शा गेबाक्माक्त।

17 मिनु लांमी गुम्शा, आंड नोले खोइश्शा “एको मुर नेल्ल क्येडा ठेयब परमप्रभु यावे आ गेय पाइब नमी। पाप रे दोपा ब्रोंइचा, दे शेशा गाक्ब नमी, इन कली लां कोंइब नमी” दे रेयके पना पन पित। मर्कूस १:२४,३४

18 नाक्त किंत किंत मेकोमी मोदेशा, रेयके पवानु, पावल ब्रीताक्व। मिनु काबु पावल नोले हिरशा, कोत्रशा वोल कली “गो येसु ख्रीस्त आ नें थिशा गूशा लावो, देंनुड” दे हुइश्शा खेरतु। मर्कूस १६:१७

19 मिनु वोल गूशा, लम डा मेरे नोले दुम्ब लोत्र तुइक्तीक सक्ति जांम्त। मिनु आ होत्रपपुकीमी क्येट का यो मतामे। मिनु चुरशा, पावल नु सिलास आस कली ग्याइश्शा कीशा, सहर डा दिंम कामी चाक्शा, ठेयब मुर निसाफ पाइब आन डोंइती राप्पाइक्तेकम।

20 मिनु “एको मुर यहुदी नसी। इं सहरमी जाक्शा, मुर आन थुं ग्याल्पाइश्शा शुश श्येत गेम्ताक्से। प्रेरित १७:६

21 इं रोमी ऐन कानुनम मगारचा डा दूली शेशा, आस पतीके पपाइक्चा बोल पांम्ताक्व” दे दोस गेम्तेकम।

22 एर ओंथ जाक्शा देल्लोपुकीमी यो “एको आस कली तुप्चा माल्ब” दे रेयके पांम्तेकम। मिनु निसाफ पाइबपुकीमी पावल नु सिलास आस कली आस फेक्शो वा पुइश्शा, कोक्केम तुप्पाइक्तेकम। २कोरिन्थी ११:२५; फिलिप्पी १:३०; १थिस्सलोनिकी २:२

### जेल्लखानम चोक्चा पुंडसीशो

23 मिनु तुप्शा जेल्लखानमी चोक्चा दैतेकम। मिनु जेल्लखान डा ठेयब मुर कली “प्रोक्ने मचाप्चा डा पा चोक्पाइश्शा वोतो” दे माइक्तेकम।

24 मिनु मेकोमी मेको आस कली नेल्ल क्येडा आगा डा कोठा लाइश्शा, ठेंडरो थोक्शा वोइक्पदा बाक्त।

25 नाक्दो पावल नु सिलासमी प्रार्थना पा कुम्सो पा परमप्रभु यावे कली ठेयब सेल्से बाक्त। आस प्रार्थना नु कुम्सो पशो जेल्लखानमी चोक्सीशो नेल्लेमी नेन्मे बाक्त।

26 मिनु प्रार्थना नु कुम्सो पना पन बाक्सानु, ठेयब खिनु कुशा, जेल्लखान डा जग यो हिम्पदा बाक्त। खिनुमी हिम्दानु, लाप्चो नेल्ल रोक्समा बाक्त। जेल्लखानमी चोक्सीशो आन साडलो, ठेंडरो नेल्ल बुइक्मा बाक्त।

27 मो दुम्मेनु, जेल्लखान डा ठेयब मुर ग्रीचोक पा सेंसीशा छुल बोक्माक्त। मिनु लाप्चो नेल्ल रोक्सीशो तशा “आमाइ, चोक्शो नेल्ल प्रोक्शा गाक्मा बाक्त। मार पडा” दे आ तरवार गि शोइश्शा, क्योरसीशा बेक्नुड, दे क्योरसीचा मला बाक्त।

28 मिनु पावलमी क्योरसीचशो तशा “ए मपावो, मपावो, सुइ मप्रोक्क। नेल्ल बाक्तक” दे ब्रेम्माक्त।

29 मिनु बत्ती दाशा गेयीनी देशा, चोक्शो आन बाक्तीके पावल नु सिलास आस डोंइती लशा, खिंखि पा बाम्माक्त।

30 मिनु मेको आस कली गुंइशा “हजुर, आं पशो पाप मार पा क्याम्सीबा?” दे हिल्लो पवा बाक्त। प्रेरित २:३७

31 मिनु पावल नु सिलासमी “प्रभु येसु कली थमा सुतो। मिनु गे नु इ खिं डा मुर नेल्लेमी पाप क्याम्चा पुंडसीशा गेना हना यो ब्रोंइशा बाक्चा ताइनीनी” देसा बाक्त।

32 मिनु मेको ठेयब मुर नु आ खिं डा मुर नेल्ल आन कली प्रभु आ लोत्र तुइक्पदसे बाक्त।

33 मिनु ठेयब मुर नु आ खिं डा मुर नेल्लेमी थमा सुइश्शा ब्वाक्कुमी खुम्शा गुंइचा पुंडसमा बाक्त। पावल नु सिलास आस तुप्शो गार नेल्ल चिक्तेमे बाक्त।

34 मिनु आ खिं लाइश्शा, जचा तूचा सेल्शा थुल्मे बाक्त। मिनु नेल्लेमी “परमप्रभु यावे कली थमा सुइक्ब दुम्तय” दे थाम्पा ग्येरसमा बाक्त।

35 आ दीसा सुनी ठेयब मुर निसाफ पाइबपुकीमी “मेको आस कली प्रोंइचा नसी” दे सिपाही आन कली जेल्लखानमी सोइक्तेमे बाक्त।

36 मिनु जेल्लखान डा ठेयब मुरुमी पावल कली “गे इस कली प्रोंइचा नसी, दे निसाफ पाइबपुकीम सिपाही कली सोइक्ताक्मे। सुइमी इस कली दोस गेने मचाप्नीम। रिम्शो पा लसे” देमाक्त।

37 मिनु पावलमी सिपाही आन कली “गो मोशा मलाइनस्कु। मारदे हना सिनाक्त आंस कली मारेइ मरुप्थु दोस का यो मगुंइथु मुर नेल्ल आन कुल तुप्तीस्कीमी। तुप्शा ला ममाइ, जेल्लखानमी यो चोक्तीस्कीमी। गो रोमी यो नस्कु। मिनु मो पचा मद्दुम्ब। आंस कली सुइ आन मतुइक्थु खुइश्शा प्रोंइशा सोइक्चा मगारब। गो लसीन मलाइनस्कु। सिनाक्त आंस कली चोक्पाइक्बपुकी जाक्शा गुंइदीस्कीमील” देशा सिपाही आन कली लेश्शा सोइक्ता बाक्त। प्रेरित २२:२५

38 मिनु सिपहीपुकी लशा, पावल आ देशो लोत्र मेको चोक्पाइक्ब आन कली देमा बाक्त। मिनु मेको निक्शी रोमी यो बाक्सा बाक्त देशो नेशा हिंमा बाक्त।

39 मिनु हिंशा “लो, प्रोंइथ लचा माल्ब” देशा जेल्लखानमी जाक्मा बाक्त। मिनु पावल नु सिलास आस कली “गो इस कली मतुइक्थु चोक्पाइश्शो, मगाइक्तीसे, आंड सहर प्रोंइशा, रिम्शो पा लसे” दे मिलो शिलो पा गुंइशा सोइक्तेमे बाक्त।

40 मिनु जेल्लखान रे गूशा, लिडीया आ खिं जाक्ताक्सा। मिनु पावल नु आ वारचपुकीमी थमा सुइक्ब आन कली गुम्शा, आन थुं बारपाइश्शा वोइश्शा गाक्तेकम।

1 मिनू मेकेर रे लशा, अम्फी-पोलीस नु आपोल्लोनीया सहरमी हिरशा, थिस्सलोनीकी सहरमी जाकदीम्मा बाक्त। मेकेर यहूदी आन गुम्तीक खिं का बाक्माक्त। १थिस्सलोनीकी २:२

2 पावल हिरशा गाक्मेनु, सहर सहर डा यहूदी आन गुम्तीक खिं खिं ओव्रशा शेंबाक्माक्त। मोपा थिस्सलोनीकी सहरमी यो गुम्तीक खिं लशा, शेंचा गोवा बाक्त।

3 नाइक्तीक नाक्ती सां सम्म परमप्रभु यावे आ लोव रे पा यहूदी आन कली “पाप रे प्रोंडब खीस्त शुश श्येत जशा बेक्चा माल्ब। मिनू बेक्शो रे सेंसीचा माल्ब, दे बेक्शो बाक्ब। मेको मोदेशो श्येत जशा बेक्शा, बेक्शो रे सेंसीशो खीस्त चहिं येसु बाक्त, दे रुपीने” दे शेंदीमी बाक्त। लूका २४:२६-२७, ४५-४६

4 पावल आ लोव नेंशा “आ देशो थमा बाक्माक्त” दे यहूदी का निकशी थमा सुइक्ब दुम्शा, पावल नु सिलास नु गारमा बाक्त। परमप्रभु यावे कली मान पाइब ग्रीकपुकी नु ठेयब नें चलेशो मीश मुरपुकी शुशेमी यो पावल आ शेंशो नेंशा थमा सुदमे बाक्त। १थिस्सलोनीकी १:१; २थिस्सलोनीकी १:१

5 शुश मुर आन कली थमा सुइक्ब तशा, थमा मसुइक्ब यहूदी आन थुं चोव्रमी बाक्त। मिनू हेंथे गाक्ब गेय मपाइश्शो मुर आन कली खुप्शा, सहरमी मरिम्शो मुर आन कली पोक्पाइश्शा, ठेयब रेयके पपदमे बाक्त। मिनू पावल नु सिलास यासोन आ खिंमी बाक्सा बाक्त, दाप्शा, यासोन आ खिं लशा “मेको आस कली गुंइशा, आंइ गुइमी गेचा नकी” दे रेयके पामे बाक्त।

6 तन्न पावल नु सिलास मेको खिंमी मबाक्शो बाक्सा बाक्त। मिनू मेको आस कली मथित्थु, यासोन नु थमा सुइक्ब आन कली ग्याइश्शा कीशा लाइश्शा, ठेयब मुर आन डोंइती चाक्दीत्मे बाक्त। मेकोपुकीमी “नेल्ल रागी डा मुर आन कली आन थुं ग्याल्पाइश्शा, दूली पपाइक्बपुकी इं सहरमी यो जाक्तेक्म। प्रेरित १६:२०

7 मिनू एको यासोनमी मेको आन कली बास गेशा थुल्शा वोइक्तीमी। मेकोपुकीमी इं रोमी पिप सिजर कली ममानेचा। येसु कका पिप बाक्ब, दे शेंना शेंन गाक्नीम” दे दोस गेमे बाक्त। लूका २३:२

8 मेको लोव नेंशा ठेयब मुर नु अरु नेल्ल आन थुं ग्याल्मा बाक्त।

9 मिनू यासोन नु आ वारच आन कली क्येट थाप्पाइश्शा प्रोंइशा सोइक्तमे बाक्त।

10 मिनू थमा सुइक्बपुकीमी पावल, सिलास नु तिमोथी आन कली में नाक्दोन छुल छाल पोक्शा, बेरोइया सहर गे सोइक्तमे बाक्त। मिनू बेरोइया सहरमी जाक्दीश्शा, यहूदी आन गुम्तीक खिं लशा, शेंचा गोव्रमे बाक्त।

बेरोइया सहरमी शेंशो

11 बेरोइया सहर डा यहूदीपुकीमी थिस्सलोनीकी डा मुर आन पशो खोदेशो मपामे बाक्त। तन्न नोफा दाइश्शा पावल नु सिलास आस लोव नेंशा परमप्रभुमी ब्रेक्पाइश्शो लोव नु मेको आस शेंशो लोव गारबा देय मगारबा कोव्रचा कली नाक्त कित कित जाक्मा बाक्त। यूहन्ना ५:३९

12 मिनू शुश मुरुमी थमा सुदमे बाक्त। ग्रीक रागी डा नें चलेशो मीश मुर वोंइश मुर यो शुश थमा सुइक्ब दुम्मा बाक्त।

13 मिनू थिस्सलोनीकी सहरमी बाक्ब यहूदीपुकीमी “पावलमी बेरोइया सहरमी परमप्रभु यावे आ लोव शेंबाक्माक्त” देशो नेंशा जाक्शा, मुर आन कली पोक्शा दूली पपाइश्शा, पावल कली खेदा पचा गोपदमे बाक्त।

14 मिनू थमा सुइक्बपुकीमी पावल कली समुन्द्र आ नेक्शा गे सोइक्तमे बाक्त। सिलास नु तिमोथी चहिं मेक उइ बाक्सा बाक्त। प्रेरित १६:१

एथेन्स सहरमी शेंशो

15 पावल कली चोव्रदीबपुकीमी एथेन्स सहर सम्म चोव्रदीमा बाक्त। मिनू लेत्थामेनु, पावलमी मेको आन कली “सिलास नु तिमोथी आस कली आं बाक्तीके रीब पा सोइक्चा नसी” दे सोइक्तीमी बाक्त।

16 मिनू पावल एथेन्स सहरम मेको आस कली रिम्शा बाक्मेनु, सहरमी हिरशा गाक्माक्त। मिनू सहरमी गाक्मेनु, तेइ तेइ शुश मूर्ति सेल्शा वोइश्शो तशा, आ थुं मनुमाक्त।

17 मिनू यहूदी आन गुम्तीक खिं लशा, यहूदी नु परमप्रभु कली मान पाइब अर्को रागी डा मुर आन कली येसु आ पर्वम लोव्रसी पना पन बाक्माक्त। नाक्त कित कित सहरमी हिरशा, लांमी सु सु आन कली गुम्मी, मेको नेल्ल आन कली येसु आ पर्वम शेंना शेंन गाक्माक्त।

18 मोपा मुर आन कली ग्रामानु, इपीक्युरीपुकी, स्तोइकीपुकी नु यो गुम्शा लोव पवा बाक्त। मेकोपुकीमी पावल आ शेंशो नेंशा का निकशीमी “एकोमी मार हेंथे फश लोव्र पना पन गाक्बाक्मे” देमा बाक्त। का निकशीमी चहिं “फश लोव्र ममाइ। मुल सम्म इं मतुइश्शो देवता आ पर्वम शेंबाक्त” देमा बाक्त। देवता आ पर्वम शेंबाक्त, दे मारदे देमा बाक्त देशा हना, पावलमी “येसु आ ग्येरपाइक्ब लोव नु बेक्शो रे सेंसीशा ब्रोंइत” दे शेंबाक्माक्त। १कोरिन्थी ४:१२

19 मिनू मेकोपुकी पावल कली अरीयोपागस माइश्शो आन देल्शा बाक्तीकेमी लोव्र पथ चाक्दीत्मे बाक्त।

20 मिनू मेकोपुकीमी “गो मारेइ मतुइक्नीकी। गो आंइ कली शेंदीने, रुप्पतीने। इन शेंशो लोव्र मार में, दे रुप्चा दाक्नीकी” देमा बाक्त

21 एथेन्स डा मुर नु एथेन्स सहरमी बाक्ब नेल्लेमी नक नक लोव्र पचा नु नेंचा कली नाक्त कित कित हिरशा माल्शा बाक्बाक्मा बाक्त।

22 मिनू पावल अरीयोपागसमी राप्शा “एथेन्स सहरम बाक्बपुकी, गो इन सहरमी हिरशा गाक्डानु, तेइ तेइ मूर्ति सेल्शा वोइश्शो ताता। मोपतीके गे मूर्ति आन कली सेउ पाइबाक्तीनी, पूजा पाइबाक्तीनी, दे रुप्चा।

23 इन पूजा पशो मूर्ति कोव्रना कोव्रन गाकडानु, मूर्ति कामी 'मतुइशो देवता' दे मुशा ब्रेकशा वोइशशो ताता। मुल सम्म इन मतुइकथु मानेशो परमप्रभु आ पबंम गो इन कली शेंथ जाकती।

24 सरीड रागीमी मार मार बाक्मा मेको नेल्ल परमप्रभुमी सेल्लो नम। मोपतीके सरीड रागी सेल्ल परमप्रभु मुरुमी सेल्लो थान मन्दीरमी मबाक्ब। १कोरिन्थी ८:२७

25 मुरपुकीमी परमप्रभु कली मारेड गेचा ममालनीमी। आं कका रागीमी बाक्ब नेल्ल आन कली ब्रोंडतीक सोकत नु आन माल्लो नेल्ल गेशो बाक्ब। भजन संग्रह ५०:१-१२

26 डोंडती मुर का सेल्ला, मेको मुर रे पा नेल्ल रागी डा मुर सेल्लतीमी। दोशो ब्रोंडचा, ते बाक्चा, मेको नेल्ल परमप्रभुमी पने थुम्शो बाक्ब। ब्यवस्था ३२:८

27 मुरपुकीमी परमप्रभु यावे कली माल्ला थिश्शा, मुर आन कली सेल्ला रागीमी वोइकतीमी। मेको मुर आन क्येडा डोन मबाक्ब, इ नेकथान बाक्शो बाक्ब। यसैया ५५:६

28 मारदे हना परमप्रभु नु काथा बाक्शा ब्रोंडनय, दे तुडकनय। गेपुकी नु बाक्ब ब्रेकब मुर कामी 'गो नेल्ल परमप्रभु आ तमी तौ नय' दे ब्रेकशो बाकत।

29 गोपुकी परमप्रभु यावे आ तमी तौ दुम्शा, मुर आन मिम्शो आन गुडमी सेल्लो सुन चांदी फुल्लु मार मार के मूर्ति तशा, परमप्रभु मोदेशो बाक्ब, दे मिम्चा मटुम्ब। उत्पत्ती १:२७; यसैया ४०:१८

30 मुल सम्म गे मतुइकतीनी। मिनु मतुइकथु देवता आन कली सेउ पाडबाकतीनी। मतुइकथु मो पशो तुइशशा, परमप्रभु यावेमी इन कली दोस मगेब। मुल चहिं परमप्रभुमी मुर नेल्ल आन कली 'इन थुं आं गे लेल्लतीन' दे ब्रेण्ड। प्रेरित १४:१६; लूका २४:४७

31 मारदे हना काबु नेल्ल आन कली ठीक पा निसाफ पाडब। मेको निसाफ पची नाकत परमप्रभुमी योव्रशा वोइशशो बाक्ब। निसाफ पाडब यो योव्रशा वोइशशो बाक्ब। मेको निसाफ पाडब कली 'आं योव्रशा बाक्ब' दे कोंडचा कली बेक्शो रे सेंताक्ब" दे पावलमी शेंदीमी बाकत। प्रेरित १०:४२; मती २५:३१-३३

32 मिनु बेक्शो रे सेंचा पुंडसाक्ब, मुर नेल्ल बेक्शो रे सेंचा पुंडसीनीम, दे शेंशो नेंशा, का निकशीमी "एको फश लोव्र पाडक्बाकत, है" दे रिस्समा बाकत। का निकशीमी चहिं "इन शेंशो रिम्शो लाकतक, लेंशा नेंनीकी" दे गाक्मा बाकत।

33 मिनु पावल मेकेरे रे लमाकत।

34 का निकशीमी आ लोव्र थमा सुइशशा, पावल नु गारमा बाकत। मोदेशो आ नु गारब का डियोनीसीयस नें पाइशशो अरीयोपागस डा मुर बाक्माकत। का डामारीस नें पाइशशो मीश मुर बाक्माकत। अरु यो बाक्मा बाकत।

## 18

कोरिन्थ सहरम शेंशो

1 मिनु नोले पावल एथेन्स रे लशा, कोरिन्थ सहरमी जाकदीम्माकत।

2 मिनु कोरिन्थ सहरम बाक्मेनु, नक डटाली रे जाक्शो अक्वीला नें पाइशशो यहूदी नु आ मीश प्रिस्कीला आस कली युम्सी बाकत। अक्वीला पोन्टसमी जरमेशो बाक्माकत। मेको निकशी डोंडती रोम सहरमी बाक्शो बाक्सा बाकत। तन्न क्लौदीयस माइशशो रोमी पिपमी यहूदी नेल्ल आन कली रोम सहरम बाक्चा मगेथु, गुंडशा सोडकतीके गाक्शा, कोरिन्थ सहरम जाक्शो बाक्सा बाकत। रोमी १६:३

3 मिनु पावल अक्वीला नु प्रिस्कीला युम्शा, मेको नु काथा बाक्माकत। मारदे हना डोंडती पावल मेको आस खोदेशो पा ताम्बु सेल्ल बाक्माकत। मिनु सांफा दुम्शा गारशा, गेय पामे बाकत। प्रेरित २०:३४; १कोरिन्थी ४:१२

4 नाइकतीक नाकती पावल यहूदी आन युम्तीक खिं लशा, यहूदी नु ग्रीक नेल्ल आन कली खीस्त आ पबंम रूपपटुमी, दे शेंबाक्माकत।

5 मिनु नोले सिलास नु तिमोथी मासीडोनीया रे जाक्शा, मेक जाक्सा बाकत। मिनु पावलमी "शेंचा गेय ला पाइनुड" देशा, यहूदी आन कली "येसु मेको खीस्त बाक्ब, दे रूपीन" दे शेंना शेंन गाक्बाक्माकत। प्रेरित १७:१४-१५; २कोरिन्थी १:१९

6 मिनु यहूदीपुकीमी आ शेंशो थमा मसुइकथु शुक्शी पामेनु, पावलमी आ फेक्शो वा डा फुरकु थुर थुर पा मेको आन कली "गे बेक्शा जाम्शा लाइतीनी हना, आं कली मारेड देंचा मताइनीनी। मुल डा मेरे यहूदी इन कली शेंचा प्रोंडशा, अर्को रागी डा मुर आन कली शेंथ गाक्नुड" दे मेको आन कली प्रोंडशा गाक्माकत। प्रेरित १३:५१; नेहेम्याह ५:१५; प्रेरित २०:२६

7 मिनु परमप्रभु यावे कली मान पाडब तीतीयस-युस्तस नें पाइशशो मुर आ खिं लशा, मेकेर शेंचा गोवा बाकत। मेको आ खिं युम्तीक खिं आ नेकथान बाक्माकत।

8 युम्तीक खिं डा क्रिस्पस माइशशो टेयब मुर नु आ खिं डा मुर नेल्ल प्रभु कली थमा सुइक्ब दुम्मा बाकत। कोरिन्थी शुशेमी यो पावल आ शेंशो नेंशा, थमा सुइशशा ब्वाक्कुम खुम्शा गुंडचा पुंडसमा बाकत। १कोरिन्थी १:१४

9 मिनु काबु नाकदो प्रभुमी पावल कली कोंडतीक कोंडदानु "सुइ कली तशा महिनो। शेंस डा शेंस बाक्को। येरमीया १:८; १कोरिन्थी २:३

10 मारदे हना गे नु काथा बाक्शा, इ कली कोव्रनन। मिनु सुइमी इ कली मरिम्शो पने मचाप्नीम। मेको सहरमी बाक्ब शुश मुर आन कली योव्रने थुम्ता" देशो नेंना बाकत। यूहन्ना १०:१६

11 मिनु पावल बर्स का ६ महिना सम्म कोरिन्थ सहरमी परमप्रभु यावे आ लोव्र शेंना शेंन बाक्माकत।

हुकुम पाडब आ डोंडती रूपाइशशो

12 आकाया रागीमी गाल्लीयो माइशो हुकुम पाइब बाक्मेनु, यहूदीपुकी खुम्सीशा, पावल कली ग्याइशशा, हुकुम पाइब आ डोंडती चाक्दीत्मे बाक्त।

13 मिनु मेकोपुकीमी “एको मुरुम ‘परमप्रभु यावे आ अरेशो लोत्र मगारचा डा पा परमप्रभु कली ठेयब सेल्चा माल्ब’ दे मुर आन कली शेंब” दे दोस गेमे बाक्त।

14 मिनु पावलमी एको गेशो दोस आ परबम लोत्र लेत्चा चिक्शो, गाल्लीयोमी लोत्र पचा मगेथु, दोस गेब यहूदी आन कली “एको मुर मरिम्शो पशा, खुड पा मुर आन कली साइशशो हना, इन लोत्र नेंशा गो निसाफ पड वा। प्रेरित २५:१८-२०

15 तन्न लोत्र, नें नु इन परमप्रभु यावे आ अरेशो लोत्र आ परबम बाक्त हना, गो मेको निसाफ पचा मदाक्नुड। गे आंमा गारीने” दे हुइशशा सोइक्तीमी बाक्त। यूहन्ना १८:३१

16 मिनु मेको आन कली सोइक्ता बाक्त।

17 यहूदीपुकीमी गुम्तीक खिं डा ठेयब मुर सोस्थेनेस कली ग्याइशशा, हुकुम पाइब आ डोंडती तुप्मे बाक्त। मोपा तुम्मानु यो, गाल्लीयोमी मारेड मपवा बाक्त।

थमा सुइक्ब आन थुं बारपाइशशो

18 मोदेशो दुम्शा नोले पावल शुश नाक्ती सम्म कोरिन्थ सहरम बाक्माक्त। मिनु अक्वीला नु नोले थमा सुइक्ब लोकब आन कली “लो, मुल लची जाक्ती” देंशा, जहाज डोइशशा, सिरीया गे लमाक्त। अक्वीला नु प्रिस्कीला यो पावल नु सिरीया गे लसा बाक्त। केन्क्रेया सहरमी जाक्दीशशा, पावलमी आ चां प्रेक्गा बाक्त। मारदे हना कसम जशो बाक्माक्त। प्रेरित २१:२४-२६

19 मिनु एफिसस सहरमी जाक्दीशशा, प्रिस्कीला नु अक्वीला आस कली “लो, गे एके बाक्कीसे” दे प्रोइशा वोइक्सी बाक्त। मिनु पावल चहिं गुम्तीक खिं लशा, यहूदीपुकी नु लोत्रसी पचा गोवा बाक्त।

20 मिनु यहूदीपुकीमी “इच्का नाक्त बाक्शा शेंदीकी” देंमानु “गो बाक्ने मचाप्नुड।

21 परमप्रभु यावेमी लेशशा सोइक्ताक्वी हना, लेशशा जाक्शा शेंनन्नी” दे एफिसस रे लशा जहाज डोंडसे बाक्त। याकूब ४:१५

22 मिनु सिजरियामी जाक्दीशशा, यरूसलेम ग्येत्थ लशा, थमा सुइक्ब आन कली गुम्शा, एन्टीओकमी जाक्दीम्माक्त। प्रेरित २१:१५

23 मिनु इच्का नाक्त एन्टीओकमी बाक्शा, मेकेर रे लशा, गलातीया नु फ्रिगीया रागीमी जाक्दीशशा, तेड तेड हिरशा, थमा सुइक्ब आन कली गुम्शा, आन थुं बारपाइक्तीक लोत्र पना पन गाक्माक्त।

आपोल्लोसमी एफिससम शेंशो

24 मिनु एफिसस सहरमी मार दुम्माक्त देंशा हना, अलेकजेन्दीया रागीमी जरमेशो आपोल्लोस माइशो यहूदी मुर का जाक्माक्त। मेको शुश पढेशा, परमप्रभु यावे आ लोत्र रुप्शा, अरु आन कली यो रूपाडक्ने चाप्ब बाक्माक्त। १कोरिन्थी ३:५-६

25 प्रभु येसु आ परबम शेंसीशा जोक्शो बाक्माक्त। सक्ति पाइशशो लोत्र पने चाप्ब बाक्माक्त। मिनु येसु आ लोत्र दोदेशो बाक्मे, मोदेशो न शेंबाक्माक्त। ब्वाक्कुम खुम्शा गुंइचा आ परबम चहिं यूहन्नामी दोदेशो पशो बाक्मे, मेको ला तुइशशो बाक्माक्त। प्रेरित १९:३

26 मिनु मेको एफिससमी जाक्दीम रे यहूदी आन गुम्तीक खिंमी शेंचा गोवा बाक्त। सुइ कली तशा महिंथु, येसु आ परबम शेंदा बाक्त। मिनु प्रिस्कीला नु अक्वीलामी आपोल्लोस आ शेंशो नेंशा, आस खिं लाइशशा, परमप्रभु यावे आ परबम शुश लोत्र तेम्शा रूप्पदसे बाक्त।

27 मिनु काबु आपोल्लोसमी “आकाया रागीमी हिरशा, शेंथ लाइनुड” देंमेनु, थमा सुइक्ब लोकबपुकीमी “दुम्ब” देंमा बाक्त। मिनु आकाया रागीमी बाक्ब थमा सुइक्ब आन कली चिटी ब्रेक्शा “आपोल्लोस इन बाक्तीके जाक्मेनु, मान पा ब्रने, आ लोत्र नेनीने” दे ब्रेक्शा सोइक्तमे बाक्त। मिनु मेकेर जाक्दीशशा, थमा सुइक्ब आन कली गुम्शा, आन थुं बारपाइक्मी बाक्त।

28 थमा मसुइक्ब यहूदी नु लोत्र पवानु, परमप्रभु यावे आ लोत्र रे पा शेंशा, येसु मेको ख्रीस्त बाक्ब, दे लोत्र शेंदा बाक्त। मिनु यहूदीपुकीमी मारेड देंने मचाप्मे बाक्त। प्रेरित ९:२२; प्रेरित १७:३

## 19

परमप्रभु आ सोक्त आ परबम शेंशो

1 आपोल्लोस मोपा शेंना शेंन गाक्शा, कोरिन्थ सहरमी जाक्दीम्माक्त। पावल चहिं एफिससमी जाक्दीम्माक्त। मिनु प्रभु आ लां खोइक्ब आन कली गुमा बाक्त।

2 मिनु पावलमी मेको आन कली “गेपुकीमी थमा सुइक्ब दुम्नीनु, परमप्रभु यावे आ सोक्तीम पिंचा पुंइसीनी?” दे हिल्लो पवानु “ममाइ, गो परमप्रभु यावे आ सोक्त मतुइक्नीकी। मेको आ परबम मनेशो यो बाक्नीक” देंमा बाक्त। प्रेरित २:३८

3 मिनु पावलमी “मो हना सु आ नेंमी ब्वाक्कुम खुम्शा गुंइचा पुंइसीनी?” दे हिल्लो पवानु “यूहन्नामी देशो टिशा, ब्वाक्कुमी खुम्शा गुंइचा पुंइसाक्क” देंमा बाक्त।

4 मिनू पावलमी “यूहन्नामी मुर आन कली ‘पाप पचा प्रॉइशा इन थुं परमप्रभु यावे गे लेत्तीने। मिनू आं नोले जाकब कली थमा सुतीने’ दे ब्वाक्कुम खुम्शा गुंडीमी बाकत। यूहन्ना आ नोले जाकशो चहिं येसु बाक्ब” दे शेंदीमी बाकत। मत्ती ३:११

5 पावल आ लोत्र नेंशा, मेकोपुकीमी “लो दुम्ब” दे येसु आ नेंमी ब्वाक्कुमी खुम्शा गुंडचा पुंडसमा बाकत।

6 मिनू पावलमी आ गुड आन पिया तारी वोदानु, परमप्रभु यावे आ सोकतीम ब्रीमा बाकत। मिनू आन मतुइशो लोत्र पा प्रभु कली ठेयब सेल्मे बाकत। मिनू परमप्रभु यावे आ सोकतीम गेशो लोत्र पामे बाकत। प्रेरित ८:१७; प्रेरित १०:४४,४६

7 मोदेशो दुम्शोपुकी १२ जना खोड बाक्मा बाकत।

पावल एफिससम बाकशो

8 मिनू पावल महिना सां सम्म यहूदी गुम्तीक खिंमी परमप्रभु यावे आ राज्य डा लोत्र शेंना शेंन बाक्माकत। सुड तशा महिंथु, ठेयब थुं पा “थमा सुइशशा परमप्रभु यावे आ राज्य ओत्रडीन” दे शेंना शेंन बाक्माकत।

9 मिनू आ लोत्र नेंबपुकीमी थमा मसुइक्थु, नक लां आ परबम गुम्तीक खिंमी शुक्शी लोत्र पतीके मेको मेकेर शेंचा प्रोना बाकत। मिनू शेंसीचा दाकब आन कली चहिं काथा लाइशशा, टिरान्नस आ इस्कुलमी नेंचा दाकब आन कली खुप्शा, नाकत किंत किंत शेंना शेंन बाक्माकत।

10 मिनू बर्स निक्शी सम्म मोपा शेंना शेंन बाक्माकत। मोपतीके एसीया डा यहूदी नु ग्रीक नेल्लेमी परमप्रभु यावे आ लोत्र नेंचा तामे बाकत।

पावलमी छक लाक्चा डा गेय पशो

11 मिनू परमप्रभु यावेमी शुश छक लाक्चा डा गेय पावल आ गुड रे पा कोइदा बाकत। प्रेरित १४:३; २कोरिन्थी १२:१२

12 मुरपुकीमी आन फेक्शो वा, रूमाल लाइशशा, पावल कली थीबाक्मा बाकत। मिनू लेशशा चाक्शा रोड पाइब आन कली थीपदमेनु, साबाक्मा बाकत। वोलमी तशो आन वोल यूशा प्रोक्बाक्मा बाकत। प्रेरित ५:१५

13 मिनू वोल आन कली खेरशा गाकब यहूदी का निक्शीमी पावल आ तस खोइशशा, प्रभु येसु आ नें थिशा, वोल गुंडशा खेरचा गोत्रमे बाकत। मेकोपुकीमी “पावलमी शेंशो येसु आ नेंमी यूडो” दे वोल आन कली खेरचा बोल पाइबाक्मा बाकत। लूका १:४९

14 यहूदी डा ठेयब चढेब स्केवा माइशशो मुर आ ७ जना तौपुकीमी मोदेशो पाइबाक्मा बाकत।

15 मिनू काबु वोलमी मेको आन कली “येसु कली तुडक्नुड। पावल कली यो तुडक्नुड, गेपुकी चहिं सु ननी?” देमाकत।

16 मिनू वोलम थिशो मुरुमी प्रेक्शा, ग्राम्शा, ग्याइशशा खोल्शा तुप्स डा तुप्स पा हुश चुइशशा, मेको आन वा खाक्शा, शिश्रा सेल्मी बाकत। मिनू नेल्ल प्रोक्मा बाकत।

17 मेको लोत्र तेड तेड ब्रशा, एफिससमी बाक्ब यहूदी नु ग्रीक नेल्लेमी नेम्मे बाकत। मिनू “येसु आ नेंमी हेंथे मब्वाक्चा बाक्माकत” दे रुप्शा हिंशा, प्रभु येसु आ नें कली मान पा ठेयब सेल्मे बाकत।

18 मिनू येसु कली थमा सुइक्चा क्येडा डोंइती आन मन्तर तन्तर पशो आ परबम “मुल डा मेरे मपाइनीकी” दे थमा सुइक्ब नेल्ल आन कली नेंपदमे बाकत।

19 मिनू शुश मन्तर तन्तर पाइब आन मन्तर तन्तर डा किताब चाक्शा, मेको मुर आन डोंइती चोत्रमे बाकत। मेको किताब कली ५० हजार चांदी के द्राकमे थाप्शो बाक्माकत। द्राकमे का देनार यो देशो बाकत। मेको नाकत का डा गाल्च चांदी के क्येट बाक्ब।

परमप्रभु आ लोत्र बारशा लशो

20 मिनू परमप्रभु यावे आ लोत्र तेड तेड ब्रशा सक्ति पाइशशो दुम्शा बारना बारन लमाकत। प्रेरित १२:२४

21 मेको नोले पावलमी “गो मासीडोनीया नु आकाया लां पा यरूसलेममी जाकदीत्नुड। मेकेर काबु निक्बु बाक्शा, रोम सहर मजाकदीत्थु मप्रॉइनुड” दे थुं पवा बाकत। प्रेरित २३:११

22 मोदेशो थुं पशा, तिमोथी नु इरास्तस आस कली मासीडोनीया सोइक्तीम्सी बाकत। आं चहिं एसीया उड बाक्माकत। रतिमोथी ४:२०

मूर्ति सेल्बपुकी गाइशशो

23 एफिससमी बाक्मेनु, मार दुम्माकत देशा हना, प्रभु आ नक लां खोइक्चा आ परबम राम्शी पोक्चा गोत्रमे बाकत। २कोरिन्थी १:८-९

24 मारदे हना देमेत्रीयस माइशशो सुन चांदी चेम्ब मुर कामी सुन के आरतेमीस देवी आ मूर्ति सेल्शा लेयशा, शुश क्येट चेम्बाक्माकत। मूर्ति चेम्ब शुश बाक्मा बाकत। मेकोमी शुश मुर आन कली गेय गेशो बाक्माकत। आरतेमीस लतीन लोत्रमी दिआना बाक्ब।

25 मिनू काबु मेको आन कली ब्रेशु, खुप्शा “आं वारचपुकी, आं लोत्र का निक्शी नेनीने। मूर्ति चेम्शा लेयशा क्येट चेम्शो नय, दे गो नेल्लेमी तुडक्नय।

26 मुल चहिं एको पावल नें पाइशशो मुरुमी एसीया नेल्ल हिरने थुम्शा, इं एफिससमी जाक्शा, मुर नेल्ल आन कली ‘मुर आन गुड रे सेल्शो मूर्ति देवी ममाइ’ देशा शुश मुर आन थुंमी मूर्ति पूजा पचा प्रॉइपाइक्तीमी। मेको इं मिक्चीम ताइतय।

27 मोदेशो दुम्शा, इं गेय ला जाम्शो ममाइ, इं मानेशो आरतेमीस ठेयब देवी आ मन्दीर आ नें यो जाम्शा लचा चिक्ताक्ब। मुरपुकीमी मेको कली सेड पचा प्रॉइचाम्तेक्मे। साइ एसीयामी बाक्ब नेल्लेमी ठेयब सेल्शा, मान पना पन बाक्शो नमी, मुल मारेइ मान मलीब” दे आन थुं खुरपाइक्मी बाकत।



- 28 मिनू मेकोपुकीमी “इं एफिसस डा आरतेमीस देवी नेल्ल क्येडा ठेयब देवी बाक्ब” दे शुश रेयके पचा गोवमे बाक्त।
- 29 मिनू मोदेशो पा सहर नेल्ल ठेयब रेयके दुम्माक्त। मुरपुकी दोरशा जाक्शा, सहर डा दिंममी खुम्समा बाक्त। मासीडोनीया रे जाक्शो पावल नु काथा गाक्ब गायस नु अरीस्तारकस आस कली ग्याइश्शा, मेको दिंममी चाक्मे बाक्त। प्रेरित २०:४
- 30 मिनू पावलमी मोदेशो दुम्शो तशा, गो यो देल्टीकेमी लाइनुड देंमेनु, थमा सुडक्बपुकीमी लचा मगमे बाक्त।
- 31 एसीया रागी डा सरकार आ गेय पाइब डोंइती डा आ वारचपुकीमी यो “मेक लचा मडुम्ब, है” दे लोत्र नेंपाइक्थ मुर सोइक्तमे बाक्त।
- 32 दिंममी देल्शोपुकीमी कामी लोत्र का, अर्कोमी अर्को लोत्र पा रेयके ला पामे बाक्त। तन्न मारदे देल्शो, मारदे रेयके पशो, मेको लोत्र हुलपुकीमी मारेड मतुइक्तमे बाक्त।
- 33 मिनू यहूदीपुकीमी पोक्शो अलेकजन्डर कली हुल आन डोंइती राप्पाइश्शा “लो, लोत्र पावो” दे मदमेनु, मेकोमी आ गुड हिम्शा “सिक्सी पा आं लोत्र नेनीने, नेल्ल रुप्पाइक्नन्नी” देंमाक्त।
- 34 तन्न आ लोत्र पशो रे “एको यहूदी कका बाक्माक्त” दे तुइश्शा “इं एफिसस डा आरतेमीस देवी नेल्ल क्येडा ठेयब देवी बाक्ब, जाइ आरतेमीस, जाइ आरतेमीस” दे घन्टा निकशी सम्म रेयके पस डा पस ग्रीमे बाक्त।
- 35 मिनू नोले सहर डा ठेयब मुरुमी मेको आन कली रेयके पचा नाइक्पाइक्मी बाक्त। मिनू “इं एफिसीपुकी, आं लोत्र नेनीने। इं एफिसस सहरमी बाक्ब आरतेमीस देवी आ मन्दीर, आ नें यो नेल्ल क्येडा ठेयब बाक्ब, दे मुर नेल्लेमी ममिन्नीमी डा? सरीड रे दोक्शो मूर्ति कली मान पा ठेयब मसेल्नीमी डा?
- 36 रागी रागीम बाक्ब मुर नेल्लेमी मानेशा ठेयब सेल्नीमी। मिनू गेपुकीमी मार रेयके पनी? मोदेशो रेयके पचा मडुम्ब।
- 37 गेपुकीमी ग्याइश्शा चाक्शो मुर निकशीमी आरतेमीस देवी आ मन्दीर आ नें मक्वाम्देस, देवी कली शुक्शी लोत्र यो मपाम्स, मारेड मरिम्शो मपाम्स।
- 38 देमेत्रीयस नु आ वारचपुकीमी सुड कली मुददा पचा थुं पाम्तेक्म हना, निसाफ पाइब आ डोंइती लशा, उजुर पचा माल्शो। निसाफ पाइब आ डोंइती चाक्शा, दोस गुंडचा माल्शो।
- 39 निसाफ पाइबमी गारपाइक्ने मचापुतु हना, गो सहर डा ठेयब जोक्ब तुइक्ब नेल्ल बुक्शा, लोत्र पा गेनीकी।
- 40 तन्न मुलाक्ती खोदेशो रेयके पचा मडुम्ब। मोदेशो पाइतय हना, गो नेल्ल मरिम्शो पा दोसी दुम्नय, दे रूपिने। मारदे हना एको रेयके मारदे दुम्मे, मेको देंने मचाप्नय” दे माइक्मी बाक्त।
- 41 मो देंने थुम्शा, मुर आन कली आन खिं खिं सोइक्तीमी बाक्त।

## 20

मासीडोनीया नु ग्रीसमी शेंशो

- 1 मिनू मेको रेयके नाइक्तमे नोले पावलमी थमा सुडक्ब आन कली ब्रेश्शा खुष्पा “थमा सुडक्चा मप्रोंइथु, इन थुं बारपा बाक्कीन” देशा आन कली मेक उड प्रोंइशा मासीडोनीया लमाक्त। २कोरिन्थी २:१३
- 2 मासीडोनीयामी हिरना हिरन थमा सुडक्ब आन कली गुम्शा शेंशा, आन थुं बारपाइक्ना पाइक्न गाक्शा, ग्रीस रागी जाक्दीम्माक्त।
- 3 मिनू ग्रीस रागीमी महिना सां सम्म बाक्शा “मुल जहाज डोइश्शा, सिरीया गे लाइनुड” दे लचावानु “यहूदीपुकीमी आं कली ग्याइक्चा कली लां बाष्पो बाक्नीम” दे तुइश्शा, जहाज डोइश्शा मलथु, गाक्शा मासीडोनीया लमाक्त।
- 4 पावल नु काथा गाक्ब सु सु बाक्मा बाक्त देशा हना, बेरोइया डा पुरोस आ तौ सोपाटेर, थिस्सलोनीकी सहर डा अरीस्तारकस नु सेकुन्दस, डेरबे डा गायस, तिमोथी, एसीया डा तिखीकस नु त्रोफीमस बाक्मा बाक्त। प्रेरित १७:१०; प्रेरित १९:२०; प्रेरित १६:३; एफिसी ६:२१; प्रेरित २१:२९
- 5 मेकोपुकी गो आंइ क्येडा डोंइती लशा, त्रोआस सहरमी रिम्शा बाक्मा बाक्त।
- 6 बोरब ओखती मसुप्शो शोब्ले जची नाक्त लाक्शा, फिलिप्पी सहर रे जहाज डोइश्शा, ५ नाक्त नोले त्रोआस सहरमी जाक्दीत्तक। मेकेर आंइ वारच आन कली गुम्शा, ७ नाक्त मेक उड बाक्तक।
- त्रोआसमी बाक्शो
- 7 आइतबार नाक्त प्रभु भोज जथ खुम्साक्क। मिनू पावलमी दीसा लचा माल्ब देशा, नाक्दो उइक्थ दुम सम्म शुश लोत्र पापुतु। मत्ती २८:१; प्रेरित २:४२,४६
- 8 आंइ बाक्शो तला तारी डा कोठा शुश बत्ती दाशो बाक्त।
- 9 मेकेर युतीकस नें पाइश्शो ठिटा मुर का झेलमी निश्शो बाक्त। मिनू पावलमी शेंना शेंन शुश लाइश्शो लोत्र पवानु, युतीकस मुकु जिशा निन्द्रा पापुतु। मिनू तला सां तार रे दोक्त। मिनू मुरपुकी कोव्रथ लमानु, बेक्ने थुम्शो थित्तेक्म।
- 10 मिनू पावल यो यिशा बाष्पा आ रां मुष्शा, एर ओंथ बाक्ब आन कली “मबेक्शो बाक्त। मोपतीके महिनीन” दे माइक्तीमी। १राजा १७:२१
- 11 मिनू लेश्शा कुशा, प्रभु भोज जने थुम्शा नां दाप्ची सम्म शेंना शेंन बाक्त। मिनू गो आंइ लची जाक्मेनु,
- 12 मेको ठिटा कली सेस तशा, नेल्ल आंइ थुं नाइश्शा ग्येरसाक्क।
- मिलेटस जाक्दीश्शो
- 13 मिनू पावलमी “गे जहाज डोइश्शा, अस्सोस सहर लने। गो चहिं गाक्शा इन कली गुम्नन्नी” देशा आंइ कली जहाजमी डोइक्पाइश्शा सोइक्ताक्की। मिनू अस्सोसमी जाक्दीत्तक।

- 14 मिनू अस्सोस सहरमी गुम्शा, पावल यो जहाजमी डोइशशा गो नेल्ल मितीलेनेमी सहर जाकदीत्तक।  
 15 आ दीसा नाक्त खिओस हांबु जाकदीत्तक। आ नित्थ नाक्त सामोसमी जाकदीत्तक। मिनू आ सांबु नाक्त मिलेटस जाकदीत्तक।  
 16 पावलमी “पेन्तीकोस चाड मानेचा कली यरूसलेम जाकदीत्ता मालब। मोपतीके लांमी मग्योल्चा, एसीयामी मनाइक्चा। एफिससमी यो मनाइक्चा” देंतीके मनाइक्थु गाक्तक। प्रेरित १८:२१

एफिसी आन कली लोत्र पशो

17 मिलेटसमी जाकदीशशा, पावलमी एफिससमी बाक्ब थमा सुइक्ब आन शेंब खाल्पा आन कली “मिलेटसमी गुम्थ जाककीने” दे ब्रथ सोइक्ताक्व।

18 मिनू मेकोपुकी जाकमानु, पावलमी मेको आन कली “नेल्ल क्येडा डोइती इन एसीया रागी जाकडा रे मुल सम्म गेपुकी नु बाक्शा, गो मार शेंदन्नी दोपा लां कोंडदन्नी, दोपा गेपुकी नु बाक्डा, मेको नेल्ल तुइक्नीनी। प्रेरित १८:१९; प्रेरित १९:१०

19 गो प्रभु आ वाइल दुम्शा, ठेयब मलेत्थु प्रभु आ गेय पना पन गाक्ती। मोपा गाक्डानु, यहूदीपुकीमी खेदा पा शुश श्येत गेशा, आं थुं खाइक्पा डाक्पाइक्तीमी।

20 मो पाम्तेक्म हना यो, गो इन खिं खिं हिरशा, इन कली गुम्शा, का का पा शेंशा, इन कली रिम्शो दुम्ल, दे तुइक्पाइक्तन्नी। खिं खिं हिरशा ला ममाइ। गाउ सहरमी यो हिरशा, मुर आन बुक्तीकेमी जाकदीशशा, शेंना शेंन गाक्ती।

21 मोदेशो शेंशा गाक्शा यहूदी, ग्रीक नु नेल्ल रागी डा मुर आन कली ‘पाप पचा प्रोंइशा, परमप्रभु यावे गे लेशशा, इं प्रभु येसु ख्रीस्त कली थमा सुइक्व’ दे शेंना शेंन गाक्ती।

22 मिनू मुल परमप्रभु यावे आ सोक्तीमी देंशो टिशा, यरूसलेम गे डा लां खोइशशा गाक्शो बाक्नुड। यरूसलेममी जाकदीशशा, आं कली मार दुम्बा, दे मतुइक्नुड। प्रेरित १९:२१

23 लोत्र का ला तुइक्नुड। मारदे हना सहर गाउ तेइ तेइ हिरशा गाक्डानु, परमप्रभु यावे आ सोक्त रे पा लोत्र पाइबमी ‘यरूसलेम जाकदीशशा, शुश श्येत जाइनेवे। जेल्खानमी चोक्चा पुंइसीनेवे’ दे नेपाइक्तीमी। प्रेरित ९:१६; प्रेरित २१:४,११

24 गो साइक्चा पुंइसाक्ड हना यो, एको आं गिंम मारेइ ममिम्नुड। प्रभु येसुमी आं कली पपाइशशो लोत्र ‘परमप्रभु यावेमी मुर आन कली शिशी पाइब’ आ ग्येरपाइक्ब लोत्र कली तुइक्पाइक्नुड। प्रेरित २१:१३; २तिमोथी ४:७

25 गो इन कली परमप्रभु यावे आ राज्य डा लोत्र नेल्ल तुइक्पाइक्ने थुम्तन्नी। मुल डा मेरे मग्युम्य, दे तुइक्नुड।  
 26 वेक्शा जाम्शा लाइतीनी हना यो, आं के मारेइ दोस मतुम्ब, इन कली थमा पा देंनुड। इजीकीएल ३:१७-१९; प्रेरित १८:६

27 मारदे हना परमप्रभु यावेमी शेंपाइशशो लोत्र का यो मखुइक्थु नेल्ल शेंताक्नी।

28 गे आंम कली कोत्रडीने। परमप्रभु यावे आ सोक्तीमी इन कली थमा सुइक्ब आन कली कोत्रब सेल्टु। गे परमप्रभु यावे आ मुर आन कली मुर आन कली कोत्रब रिम्शो गोठला दुमीन। मारदे हना मेकोपुकी आ तौ आ हुशेम ग्याप्शो बाक्नीमी। १तिमोथी ४:१६; १पत्रुस ५:२-४

29 गो इन कली प्रोंइशा वोइशशा, गाक्डा नोले फरमी बी क्यारश आन कली खेदा पशो खोदेशो पा खेदा पचा पुंइसीनीनी। मत्ती ७:१५

30 गेपुकी नु काथा गाक्ब थमा सुइक्बपुकी यो मोदेशो खेदा पाइब फर खोदेशो दुम्नीम। मेकोपुकीमी दूली लोत्र शेंशा, थमा सुइक्ब आन थुं ग्येत्थ लुकच क्याल्पाइशशा, आन नोले खोइक्ब सेल्नीम, दे तुइक्नुड। १यूहन्ना २:१८-१९

31 मोपतीके होस पांइसीने। बर्स सां सम्म श्येत पा डाक्थ्री दुम्शा, गोमी इन कली शेंशो, वारच पशो काइ मप्रेंदीने।  
 32 मुल गो इन कली परमप्रभु यावे आ गुइमी जिम्मा गेनुड। प्रभुमी इन कली शिशी पा आ लोत्र नेल्ल रुप्चा गेशा, इन थुं बारना बारन लपाइशशा, आ मुर नेल्ल आन कली गेतीक आसीक गेब, दे तुइक्नुड।

33 गेपुकी नु बाक्डानु, इन बाक्शो सुन चांदी वा नेल्ल तशा मवाल्ड। मारेइ मताक्गु।

34 गो आंम आं गुइमी गेय पना पन जाता। गो नु काथा गाक्ब आन कली यो गोन थुल्तामी। प्रेरित १८:३; १कोरिन्थी ४:१२; १थिस्सलोनिकी २:९

35 गो मार पाता हना यो, मचाप्ब आन कली वारच पाइक्चा नमी, दे गेय पा कोंइताक्न्। प्रभु येसु आ शेंशो लोत्रमी ‘ताक्चा क्येडा गेचा रिम्शो बाक्ब’ ” देंत।

36 मेको लोत्र पने थुम्शा, आ पोक्च थेंक्शा मेकोपुकी नु प्रार्थना पाप्तु। प्रेरित २१:५

37 पावलमी “मुल डा मेरे मग्युम्य” देंशो लोत्रमी नेल्ल डाक्तेक्म।

38 मिनू पावल कली “लेंशा मतांइसीब” दे मुप्शा पुक्पु पशा, जहाज सम्म चोत्रतेक्म।

## 21

टायर सहरमी जाकदीशशो

1 मिनू गो पावल नु गाक्ब नेल्ले जहाजमी डोइशशा, मिलेटस रे लशा, कोस टापुमी जाकदीत्तक। आ दीसा नाक्ती रोदोस लाक्शा, पतारा सहर जाकदीत्तक।

2 पतारामी जहाज रे तोइशशा, फोनीसीया लाइब जहाज डोइशशा लाइतक।

3 साइप्रस टापु तांइसीतीक जाकदीशशा, साइप्रस गे मलथु, आइदी रे पा ग्रीशा लशा, सिरिया रागी डा टायर सहरमी जाकदीशशा तोंइसाक्क। मारदे हना मेको जहाजमी कुरशो भारी शोल्चा माल्शो बाक्त।

- 4 मिनू सहर लशा, थमा सुइक्व आन बाक्तीके मालशा, ७ नाक्त सम्म मेकोपुकी नु बाक्तक। मिनू थमा सुइक्वपुकीमी परमप्रभु यावे आ सोक्त रे पा लोत्र पा पावल कली “यरूसलेम मलावो” दे माइक्तेक्म। प्रेरित २०:२३
- 5 साता का नोले “गो आंड लां खोइक्नीकी” देंकानु, मीश मुर वॉइश मुर, आल बेप्च नेल्लेमी चोव्रथ सहर लाक्शा समुन्द आ नेक्था सम्म चाक्तेक्म। मिनू पोक्च थेक्शा प्रार्थना पशा ब्राशा, प्रेरित २०:३६
- 6 गोपुकी जहाज डोंइसाक्का, मेकोपुकी चहिं आन खिं खिं लेशशा लाम्तेक्म।

पावल सिजरियाम बाक्शो

- 7 मिनू टायर रे लशा, तोलेमाइस जाक्दीशशा तोंइसाक्क। मिनू थमा सुइक्व आन कली गुमथ लशा, काबु काथा बाक्तक।
- 8 मिनू आ दीसा नाक्ती सिजरिया जाक्दीशशा तोंइसाक्क। मिनू ग्येरपाइक्व लोत्र शेंब फिलीप आ खिं लशा बाक्तक। योव्रशो गेय पाइब ७ जना डा फिलीप का बाक्शो बाक्त। प्रेरित ६:५; प्रेरित ८:४०
- 9 फिलीप के ४ जना ग्युबे मपशो तमी बाक्तेक्म। मेकोपुकी परमप्रभु यावे आ लोत्र पाइब बाक्तेक्म।
- 10 मोपा फिलीप आ खिमी बाक्कानु, काबु अगाबस माइशशो परमप्रभु यावे आ लोत्र पाइब मुर का यहूदीया रागी रे यिशा, आंड बाक्तीकेमी जाक्त। प्रेरित ११:२८
- 11 मिनू गोपुकी नु बाक्शा, पावल आ किप्शुरम आंम गुइ खोइल फ्रेंसीशा, “परमप्रभु यावे आ सोक्तीमी ‘एको किप्शुर किप्ब मुर कली यरूसलेमम जाक्दीशशा बाक्मेनु, यहूदीपुकीमी एको ओं पा फ्रेंनीमी’। मिनू अर्को रागी डा मुर आन गुइमी जिम्मा गेनीमी” दे नोले दुम्ब लोत्र पाप्तु। प्रेरित २०:२३
- 12 अगाबस आ मोदेशो लोत्र नेशा, गो नेल्लेमी पावल कली “यरूसलेम मलावो, लचा मटुम्ब” दे माइक्तक। मती १६:२२
- 13 पावलमी चहिं “मारदे डाक्शा ब्रेशशा, आं थुं खाइक्पाइक्नीनी? मलथु मप्रोंइनुड। यरूसलेम जाक्दीशशा, प्रभु येसु आ नेमी फ्रेंसीचा ला ममाइ, बेक्चा माल्ती हना यो, बेक्नुड” देंत। प्रेरित २०:२४
- 14 मिनू मलथु मप्रोंइबाक्माक्त, दे रुपशा, गोपुकीमी “लो, मो हना प्रभु आ दाक्शो दुम्ल” देंतक। लूका २२:४२

पावल यरूसलेमम जाक्दीशशो

- 15 मिनू नोले यरूसलेम लाइतक।
- 16 सिजरिया डा थमा सुइक्वपुकी यो गो नु गाक्तेक्म। यरूसलेममी जाक्दीशशा, मेको गो नु गाक्बपुकीमी मनासोन आ खिमी बास बाक्चा, दे चाक्दीत्तेक्म। मनासोन चहिं साइप्रस टापु डा बाक्माक्त। साइ डोंइती रे खीस्त कली थमा सुइक्व बाक्माक्त।
- 17 यरूसलेममी जाक्दीकानु, मेकेर बाक्ब थमा सुइक्वपुकीमी आंड कली तशा ग्येरशा ब्राइतीकी।
- 18 जाक्दीशशो आ दीसा पावलमी आंड कली याकूब आ खिं लाइशशा, थमा सुइक्व आन कली शेंब खाल्पा नु गुप्पाइक्तु। प्रेरित १५:१३
- 19 मिनू गुमशा सेउ पमुशा, पावलमी अर्को रागी डा मुर आन कली खीस्त आ पर्वम शेंना शेंन गाक्मेनु, परमप्रभु यावेमी दोपा टेयब गेय पपाइशशो बाक्मे, मेको लोत्र नेल्ल का का पा रुप्पाइक्तीमी।
- 20 आ लोत्र नेशा, परमप्रभु यावे कली टेयब सेल्लेक्म। मिनू मेकोपुकीमी पावल कली “आंड लोकब, इ देशो नेल्ल रिम्यो बाक्ब। तन्न गो इ कली लोत्र का निकशी देंनीकी। इ यहूदीपुकी हजार हजार जना खीस्त कली थमा सुइक्व दुम्तेक्म, दे तुइक्नेवे। मेकोपुकीमी थमा सुइशशा यो इ यहूदी अरेशो लोत्र काइ मप्रोंइथु पचा माल्ब देंनीमी। प्रेरित १५:१
- 21 मेकोपुकीमी ‘पावलमी अर्को रागी डा मुर नु बाक्ब यहूदी आन कली मोसामी अरेशो लोत्र पचा प्रोनीने, इन आल आन कली खोइक्तीक चिनु मखोतीन’ दे शेंना शेंन गाक्ब, देशो नेशो बाक्नीमी। प्रेरित १६:३
- 22 पावल यरूसलेम जाक्माक्त, दे तुइक्नीम।
- 23 आंड देशो पावो। मिनू मेको लोत्र जाम्ब। गो नु बाक्ब ४ जना मुर कसम पशो बाक्तेक्म। प्रेरित १८:१८
- 24 मोपतीके मेकोपुकी नु गारशा आन कसम जशो खाप्चा कली लावो। मिनू चोव्रखो दुम्शा, नेल्लेमी इन चां प्रेक्सीने। चां प्रेक्शो डा चहिं गे क्येट थाप्तीन। मो पाइतीनी हना, सुइमी मारेइ दोस गेने मचाप्नीमी। इ यहूदी अरेशो नेल्ल पशो बाक्ब, दे नेल्लेमी तुइक्नीमी।
- 25 अर्को रागी डा खीस्त कली थमा सुइक्व कली चहिं दोदेशो शेंचा, दे डोंइती कना ब्रेक्शा सोइक्ने थुम्तक। मेको आन कली ‘मूर्ति कली चदेशो मज्या, हुश मब्वचा, हुश मचुइक्थु साइशशो श्ये मब्वचा, तेल्लेम मपचा’ दे नेंपाइक्ने थुम्तक” दे माइक्तेक्म। प्रेरित १५:२१,२९
- 26 मिनू पावलमी मेको आन लोत्र नेशा, आ दीसा मेको ४ जना नु काथा लशा चोव्रखेचा पुंडसीशा, परमप्रभु यावे आ खिं ओव्रशा, चोव्रखेतीक नाक्त गेना नुप्वा नु नोले चढ़ेचा, दे चढ़ेब आन कली तुइक्पदमे बाक्त। गन्ती ६:१३-२१; १कोरिन्थी ९:२०

पावल कली ग्याइशशो

- 27 मेको चोव्रखेतीक ७ नाक्त दुम्चा चिक्तानु, यहूदीपुकी एसीया रे जाक्शा पावल कली ग्याइक्तमे बाक्त। मेकोपुकीमी पावल कली परमप्रभु यावे आ खिमी बाक्शो तशो बाक्मा बाक्त।
- 28 मिनू पावल कली ग्याइशशा, मेकेर बाक्ब मुर आन कली “इ इसाएली, नेल्ल कोव्रथ पिन, है। गो आंड ग्याइशशो मुर तेइ तेइ हिरशा, नेल्ल मुर आन कली इ यहूदी आ पर्वम मरिम्शो लोत्र पशो बाक्त। इ अरेशो मपचा, दे दूली शेंबाक्त। परमप्रभु यावे आ खिं आ पर्वम शुक्शी लोत्र पाइक्बाक्त। मोशो ला ममाइ, अर्को रागी डा ग्रीक आन कली परमप्रभु यावे

आ खिमी लाइशशा ओइशा, ग्रांरा दिशो सेल्शो आंइ मिक्चीमी ताइतक” दे शुश रेयके पा दोस गेमे बाक्त। प्रेरित ६:१३; इजीकीएल ४४:१७

29 परमप्रभु यावे आ खिं ग्रांरा दिशो सेल्शो बाक्माक्त, दे मारदे देंमा देशा हना, एफिसस सहर डा त्रोफीमस कली सहरमी पावल नु काथा गाक्शो तशा, परमप्रभु यावे आ खिं लाइशशा, ओइने थुमा बाक्त, दे मिम्शो बाक्मा बाक्त। प्रेरित २०:४; २तिमोथी ४:२०

30 पावल कली दोस गेशो लोत्र सहर नेल्ल ब्रीमाक्त। मिनु सहर डा मुरुपुकी दौरशा जाक्शा, शुश रेयके पामे बाक्त। पावल कली ग्याइशशा कीशा परमप्रभु यावे आ खिं रे गुंडशा लदमे बाक्त। मिनु परमप्रभु यावे आ खिं डा खाल पाइबपुकीमी ठेयब लाप्चो नेल्ल गु ग्रा चोकगमे बाक्त।

31 मिनु मेको रेयके पाइबपुकीमी पावल कली साइक्चा चिक्तमेनु, यरूसलेमम बाक्ब रोमी लडाइ पाइब आन ठेयब मुरुमी “सहरम क्योरमुशा साइक्मुचा चिक्ताकम” देंशो नेशा,

32 आ सिपाही आन कली लाइशशा दौरशा जाक्दीम्माक्त। मिनु मेकोपुकी जाक्शो तशा, पावल कली तुप्चा प्रोन्मे बाक्त।

33 मिनु लडाइ पाइब आन ठेयब मुरुम पावल कली ग्याइक्पाइशशा, साडलो निक्शी लिक्तीने देंशा लिक्पाइशशा आ डोंइती राप्पदा बाक्त। मिनु “एको मुर ते डा बाक्मे? मार पवा?” दे मुर आन कली हिल्लो पचा गोवा बाक्त। प्रेरित २०:२३

34 मिनु नेल्लेमी रेयके पामेनु, लडाइ पाइब आन ठेयब मुरुमी मारेइ रुप्ने मचबा बाक्त। मोपतीके सिपाही आन बाक्तीकेम लाइक्चा माल्ब, दे लदमे बाक्त।

35 मिनु सिपाही आन बाक्तीके जाक्दीशशा, पावल कली कुरशा, तला तारी लदमे बाक्त।

36 मारदे हना मुरुपुकीमी “मेको कली मसाइक्थु मप्रॉइनीकी” दे रेयके पा कोक्के शेशा, मेको आन नोले खोइशशा लमा बाक्त। प्रेरित २२:२२; लुका २३:१८

37 मिनु तला तारी कुरशा ओइदमेनु, पावलमी लडाइ पाइब आन ठेयब मुर कली ग्रीक लोत्र रे पा “हजुर, गो लोत्र का निक्शी पचा ताइनडा को?” देंमेनु, मेको छक लाक्शा “ओहो, ग्रीक लोत्र यो ब्वाक्स जोक्बाक्ते।

38 इजीप्त्त रागी डा ४ हजार खुइ आन कली गोरशो रागीमी लां कोइब मुर दा मनवे” देंमाक्त।

39 मिनु पावलमी “गो इजीप्ती मनड। सिलीसीया डा टारसस सहरमी जरमेशो यहूदी का नड। टारसस सहर तेइ तेइ नेल्लेमी आं नें तुइक्नीमी। गे यो तुइक्नीनी माइ। मेको मुर आन कली लोत्र का निक्शी पचा गेयीनी” देंमाक्त।

40 मिनु लडाइ पाइब आन ठेयब मुरुमी “लो, लोत्र पचा गेनन” देंमाक्त। मिनु पावल गूशा तला तारी डा लाइगाम राष्शा “लो, सिक्सी पा आं लोत्र नेनीने” दे गुइ हिक्ता बाक्त। मिनु पावलमी हिब्रू लोत्र पा, मुर नेल्ल सिक्सी पामे बाक्त।

## 22

पावलमी सांकछी गेशो

1 मिनु पावलमी हिब्रू लोत्र पा “आं आफ नु लोक्बपुकी, लोत्र का निक्शी नेनीने” देंमेनु, मेकोपुकी थम सिक्सी पा नोफा दाइशशा बाक्मा बाक्त।

2 मारदे हना पावलमी हिब्रू लोत्र पवानु, मेकोपुकी क्येडा सिक्सी पामे बाक्त। प्रेरित २१:४०

3 मिनु मेकोमी “गो सिलीसीया डा टारसस सहरमी जरमेशो यहूदी नड। आल रे इं यरूसलेममी बाक्शो नड। आं कली शेंब गमालीएल बाक्ब। मेको ठेयब शेंबमी आं कली इं किकी पिपी आन अरेशो लोत्र नेल्ल शेंताक्शी। मिनु गो मेको नेल्ल पना पन बाक्ती। इन पशो खोदेंशो पा गो यो थुं का पा परमप्रभु यावे कली मान पा बोल पाता। प्रेरित ९:१-२९; प्रेरित २६:९-२०; प्रेरित ५:५४

4 मोपा बाक्डानु, ख्रीस्त आ लां खोइक्ब आन कली साइक्चा सम्म डा श्येत गेतामी। मीश मुर वोंइश मुर आन कली खेदा पा ग्याइक्पाइशशा, जेल्खानमी चोक्पाइक्तामी। प्रेरित ८:३

5 एको आं देंशो थमा बाक्ब, दे ठेयब चढ़ेब नु जोक्ब तुइक्ब खाल्पा नेल्लेम तुइक्नीमी। मेकोपुकीमी दमस्कसमी बाक्ब यहूदी गुन्तीक खिं डा ठेयब मुर आन कली चिठी ब्रेक्शा, ख्रीस्त कली थमा सुइक्ब आन कली ग्याइशशा यरूसलेम चाक्चा, दे अधिकार गेतीमी। मिनु थमा सुइक्ब आन कली ग्याइक्थ दमस्कस लती।

6 दमस्कस सहर जाक्दीत्वाडानु, १२ बजे खोइ दुम्शो बाक्त। मिनु मार दुम्त देंशा हना, सरीड रे जेव हाक्सीशा यिशा, एर आंथ नेल्ल थम छेइछेइ दुम्त।

7 मिनु गो दिड गोल्ती। मिनु ‘सावल, सावल मारदे आं कली खेदा पा श्येत गेयी?’ देंशो नेता।

8 मिनु गो ‘प्रभु सु ननी?’ दे हिल्लो पडानु ‘गेमी खेदा पशो नासरथ डा येसु नड’ देंशो नेता।

9 गो नु काथा गाक्बपुकीमी छेइछेइ दुम्शो ताम्तेक्मे। लोत्र पशो चहिं मारेइ मनेनेम।

10 मिनु गो ‘प्रभु, मुल गो मार पाइनुडा?’ देंडानु, प्रभुमी ‘मुल छुल बोक्शा दमस्कस लावो। मेकेर जाक्दीनेनु, मार पचा माल्नेवे, मेको नेल्ल तुइक्पाइक्चा पुंइसीनेवे’ देंशो नेता।

11 मेको छेइछेइम पतीके गो मिक्च मताइब दुम्ती। मिनु गो नु काथा गाक्ब वारचपुकीमी आं गुइ ग्याइशशा कीशा, दमस्कस सहरमी चाक्दीत्तीमी।

12 दमस्कसमी हनानीया नें पाइशशो मुर का बाक्माक्त। परमप्रभु यावे आ अरेशो नेल्ल टिशा, रिम्शो पाइब बाक्माक्त। मेकेर बाक्ब यहूदी नेल्लेमी मेको आ पबंम ‘रिम्शो पाइब बाक्ब’ देंमा बाक्त।

13 मेको मुर आं कली गुमथ जाक्त। मिनु आं डोंइती राप्शा 'आं लोकब सावल, मिक्च ताइब दुमो' देमैनु, गो मिक्च ताइब दुमशा, आं डोंइती राप्शा ताता।

14 मिनु हनानीयामी 'इं किर्की पिपीमी आन परमप्रभु यावेमी इ कली योत्रशा, आ दाक्शो पचा, दे तुइक्पाइक्ते। मेको ठीक पाइब कली तशा, आ लोत्र नेतीवी।

15 दोदेशो पा गुमी, मार लोत्र नेंनी, मेको नेल्ल शुश मुर आन कली तुइक्पाइक्नेवे।

16 मुल कोत्रशा मबाक्को, छुल बोक्शा प्रार्थना पा, हे प्रभु येसु, आं पशो पाप क्याम्शा गेयीनी, दे पुंइशा, ब्वाक्कुमी खुम्शा गुइने पुंइसो' दे माइक्ती।

17 मिनु नोले यरूसलेम लेत्ती। मिनु काबु परमप्रभु यावे आ खिमी प्रार्थना पा बाक्डानु, प्रभुमी कोंइतीक कोंइदीनु,

18 गो प्रभु कली ताता। मिनु प्रभुमी 'यरूसलेम थु प्रोनो। मारदे हना एकेर बाक्बपुकीमी गेमी आं पबर्म शेंशो लोत्र मनैनीम' देत।

19 मिनु गो 'प्रभु, गो थमा सुइक्ब आन कली जेल्खानमी चोक्पाइक्तामी। गुम्तीक खिं खिं हिरशा, थमा सुइक्ब आन कली माल्शा तुप्पाइक्तामी, दे तुइक्नीमी।

20 इन पबर्म लोत्र पाइब स्तीफानस कली फुल्लु क्रोम्शा सदमेनु, रिम्शो पाइतीनी, दे माइक्तामी। साइक्ब आन पुइइशा वोइइशो वा खाल पा बाक्शो नड। मेको लोत्र नेल्लेम तुइइशो बाक्नीम' देडानु, प्रेरित ७:५८; प्रेरित ८:१

21 प्रभुमी 'मेकेर रे लावो। मारदे हना डोन डोन बाक्ब अर्को रागी डा मुर आन कली आं पबर्म शेंथ सोइक्वन' देत" दे पावलमी देमाक्त। प्रेरित १३:२

22 डोन डोन बाक्ब अर्को रागी डा मुर आन कली ख्रीस्त आ पबर्म शेंथ सोइइशो नड देमे चोटीन आ लोत्र थुम्चा मगेथु "एको कली मसाइक्थु मप्रोंइया। ओं देशो मुर कली ब्रोंइचा गेचा मदुम्ब" दे शुश रेयके पामे बाक्त। प्रेरित २१:३६

23 मिनु आन जोंब बोक्शा, आन फेक्शो वा बेरपा फुरक फ्रशा, राम्शी पोक्शा, मरिम्शो पामे बाक्त।

24 मिनु लडाइ पाइब आन ठेयब मुरुमी मेकोपुकीमी मोदेशो मरिम्शो पशो तशा, पावल कली आगा ओंइपदा बाक्त। मिनु मुरपुकीमी एको मुर कली तशा, मारदे आन जोंब बोक्मा, एकोमी मार मरिम्शो पवा, दे तुइक्चा कली कोरामी युक्शा, हिल्लो पने, दे आ सिपाही आन गुइमी गेमी बाक्त।

25 मिनु सिपाहीपुकीमी पावल कली फ्रेंशा कोरामी युक्चा चिक्तमेनु, पावलमी मेकेर आ नेक्था राप्शा बाक्ब कप्तान कली "इं रोमी ऐन कानुनमी रोमी नागरिक आन कली मारिइ दोस मपुंइथु, गे कोरामी युक्चा ताइनीनी?" देमाक्त। प्रेरित १६:३७; प्रेरित २३:२७

26 मिनु कप्तानमी मुल मार पचा, दे सिपाही आन ठेयब मुर कली हिल्लो पथ लमाक्त। मिनु "कोरामी युक्चा पुंइसीचा डा मुर ममाइ बाक्त। आं यो रोमी नागरिक बाक्त" दे तुइक्पदा बाक्त।

27 मिनु लडाइ पाइब आन ठेयब मुर पिशा "गे थमान रोमी नागरिक नवे? लो देंनो" देमैनु "नड, हजुर" देमाक्त।

28 मिनु लडाइ पाइब आन ठेयब मुर "गो शुश क्येट थाप्शा, रोमी नागरिक दुम्शो नड" देमैनु, पावलमी "गो दा जरमेशो रेन रोमी नड, हजुर" देमाक्त।

29 मेको लोत्र नेंशा, कोरामी युक्शा हिल्लो पचा चिक्बपुकीमी "हेत्त, मो पचा मदुम्शो बाक्माक्त" देमा बाक्त। मेको मुर रोमी नागरिक बाक्माक्त, दे तुइक्तेमे डा मेरे लडाइ पाइब आन ठेयब मुर यो हिंमाक्त। मारदे हना रोमी नागरिक आन कली फ्रेंपाइक्चा लायो मदुम्बाक्माक्त।

30 मिनु मेको लडाइ पाइब आन ठेयब मुर "मेको मुर आ दोस मार बाक्म?" दे रुप्चा माला बाक्त। मोपतीके आ दीसा नाक्ती ठेयब चढेब नु कछडी बाक्ब मुर आन कली खुप्पाइइशा, पावल कली आ गुइ डा साडलो पुइइशा लाइइशा, खुम्सीशो मुर आन डोंइती राप्पदा बाक्त।

## 23

पावल कली कछडी राप्पाइइशो

1 मिनु पावल मेको आन डोंइती राप्शा, आन कली मिक्च मयाक्थु कोत्रशा, "आं लोकबपुकी, गो साइ रे मुल सम्म आं तुइइशो जोक्शो रिम्शो ला पाता। एको लोत्र थमा बाक्ब, दे परमप्रभुमी तुइक्ब" देमैनु, प्रेरित २४:१६

2 हनानीया माइइशो ठेयब चढेबमी पावल आ नेक्था बाक्ब आन कली "मेरे आ शोत्र रोप्तीने" देमाक्त।

3 मिनु पावलमी "परमप्रभु यावेमी इ कली कका इ शोत्र रोप्तेक्ल। ब्रेत्चशो गारोमी, बुलु बुइइशा, बुबु पा तांइसीशो खोदेशो नवे। अरेशो लोत्रमी दोदेशो पा ब्रेक्शो बाक्मे, मोदेशो पा आं कली निसाफ पचा माल्शो नवे। गे अरेशो लोत्र क्येडा दूली पा आं कली तुप्चा माल्ब, देते" देमाक्त। मत्ती २३:२७

4 मिनु एर ओथ बाक्बपुकीमी पावल कली "परमप्रभु यावेमी योत्रशा वोइइशो ठेयब चढेब कली मोदेशो लोत्र पचा दुम्बा?" देमा बाक्त।

5 पावलमी "मेको मोदेशो ठेयब चढेब, दे मतुइक्तु, आं लोकबपुकी। तुइइशो नड हना, मोदेशो लोत्र मदेड वा। मारदे हना परमप्रभु यावे आ ब्रेक्पाइइशो लोत्रमी "इन कली अधिकार पचा, दे वोइइशो आन कली मरिम्शो लोत्र मपचा" दे ब्रेक्शो बाक्ब" देमाक्त। प्रस्थान २२:२८

6 मिनु पावलमी कछडीम बाक्बपुकी का निकशी सदुकी, का निकशी फरिसी बाक्नीम, दे तुइइशा, ठेयब सेंदा पा "आं लोकबपुकी, गो फरिसी नड। गो फरिसी आ तौ नड। बेक्शो रे सेंसीशा ब्रोंइचा तांइसीब, दे थमा सुइइशो लोत्रमी आं कली दोस गेशा, मुददा कोप्ताक्यीमी" देमाक्त। प्रेरित २२:३; प्रेरित २६:५; गलाती १:१४

- 7 मो देंमेनु, फरिसी नु सदुकी ब्राशा, जिचा गोत्रमे बाक्त।
- 8 मारदे हना सदुकीपुकीमी बेकशो रे मसेंसीनीम, स्वर्ग डा गेय पाडबपुकी मबाक्नीम नु परमप्रभु यावे आ सोक्त मबाक्ब देंनीम। तन्न फरिसीपुकीमी चहिं मेको नेल्ल बाक्ब देंनीम। मत्ती २२:२३
- 9 मोपतीके आन जिचा बारना बारन लशा, शुश रेयके पामे बाक्त। मिनु फरिसी डा शेंब का निक्शीमी बोक्शा “एको मुर के मारेड दोस मबाक्ब, दे मिन्नीकी। मुर आ मिक्चीम मतांडसीब का नु लोत्र पवा कों? परमप्रभु यावे आ स्वर्ग डा गेय पाडब नु लोत्र पवा कों? मोदेंशो यो दुम्ने चाप्ब” देंमा बाक्त। प्रेरित २५:२५
- 10 मिनु आन जिचा बारना बारन लशा, तुम्मुचा गोत्रमे बाक्त। मिनु लडाइ पाडब आन टेयब मुर “पावल कली साइक्नीमी कौर में” दे हिंशा, सिपाही आन कली ब्रेशशा, पावल कली गुंडशा, सिपाही आन बाक्तीके लेशशा चाक्पदा बाक्त।
- 11 मिनु मेको नाकदो प्रभुमी पावल आ नेक्था जाक्शा “दोपा यरूसलेममी आं पर्वम शेंदीमी, मोपा रोम सहरमी यो आं पर्वम शेंशा सांकछी दुम्नेवे। मोपतीके महिथु, टेयब थुं पा बाक्को” देंमाक्त। प्रेरित १:८; प्रेरित २५:११-१२; प्रेरित २७:२३-२४
- पावल कली साइक्चा माल्शो
- 12 मिनु आ दीसा सुनी यहूदीपुकीमी “पावल कली साइशशो मतया सम्म मारेड मजय, मतूय” दे कसम जशा, पावल कली साइक्चा सल्ला पामे बाक्त।
- 13 मोदेंशो पा कसम जाइब ४० जना क्येडा शुश बाक्मा बाक्त।
- 14 मेकोपुकीमी टेयब चढेब नु यहूदी आन जोक्ब तुइक्ब खाल्पा आन कली गुम्थ लशा “पावल कली साइशशो मतका सम्म गो मारेड मजाइनीकी मतूनीकी, दे कसम जाइतक।
- 15 मोपतीके गे टेयब मुर नेल्लेमी गारशा, लडाइ पाडब आन टेयब मुर कली ‘पावल कली मारेड मारेड हिल्लो पाइनीकी। मिनु एकर सोइक्तीन’ दे मतीन। मिनु एर लां रे गुंडशा पिदमेनु, लां उइ साइक्नीकी” देंमा बाक्त।
- 16 मेको लोत्र पावल आ भानीजमी नेंना बाक्त। मिनु सिपाही बाक्तीके लशा, पावल कली माल्शा गुम्शा तुइक्पदा बाक्त।
- 17 मिनु पावलमी कप्तान का ब्रेशशा “एको ठिटा कली लडाइ पाडब आन टेयब मुर नु गुम्पतीने। मारदे हना लोत्र का निक्शी तुइक्पाइक्चा माल्ताक्ब” देंमाक्त।
- 18 मिनु कप्तानमी ठिटा कली लडाइ पाडब आन टेयब मुर आ बाक्तीके चाक्दीशशा “हजुर, चोकसीशो पावलमी आं कली ब्रेशशा, एको ठिटा कली इन बाक्तीके चाक्दीत्चा। मारदे हना इन कली लोत्र का निक्शी तुइक्पाइक्चा माल्ताक्ब देंशा, हजुर, इन बाक्तीक चोत्रथ सोइक्ताक्यी” देंमाक्त।
- 19 मिनु लडाइ पाडब आन टेयब मुरमी पावल आ भानीज कली गुइमी ग्याइशशा, सुइ मबाक्तीक कोटामी लाइशशा “मार देंचा दाक्नेवे, लो देनो” दे हिल्लो पवानु,
- 20 पावल आ भानीजमी “हजुर, यहूदीपुकीमी गारशा, पावल कली गुंडशा, आंइ बाक्तीके सोइक्तीने। लोत्र का निक्शी हिल्लो पचा माल्ताक्ब देंखु पा इन कली पुंडनीम।
- 21 मेको आन लोत्र मनेंचा। मारदे हना ४० जना क्येडा शुश मुरमी पावल कली साइक्चा, दे लांम बाप्शा बाक्नीम। मेकोपुकीमी ‘पावल कली साइशशो मतका सम्म मारेड मजाइनीकी, मतूनीकी’ दे कसम जने थुम्तेक्म। मिनु हजुरमी पावल कली गेना सोइक्बा, तेको लां रे सोइक्बा, दे योत्रकी पा बाक्शो बाक्नीम” देंमाक्त।
- 22 मिनु लडाइ पाडब आन टेयब मुर “एको लोत्र सुइ कली मशेंदो” देंशा सोइक्ता बाक्त।
- पावल कली सिजरिया सोइशशो
- 23 मिनु लडाइ पाडब आन टेयब मुरमी कप्तान निक्शी आस कली ब्रेशशा “एको चोकसीशो पावल कली सिजरिया सहर चोत्रदीचा माल्ताक्ब। मोपतीके गे निक्शीमी आपो नाकदो ९ बजे सहे निक्शी सिपाही, ७० जना शारा डोइक्ब नु सहे निक्शी भाला शेयब आन कली साशा वोतीसे।
- 24 पावल कली यो शारा का साशा वोतीसे। लांमी पावल कली सुइमी मारेड पाइक्ने मचाप्मेक्ल, दे रिम्शो पा हुकुम पाइब फेलीक्स आ डोंइती चाक्दीत्तीसे” दे माइक्सी बाक्त।
- 25 मिनु हुकुम पाइब कली चिठी ब्रेक्ता बाक्त।
- 26 मेको चिठीमी “हुकुम पाइब फेलीक्स हजुर, गो क्लौदीयस लिसीयस आं के नमस्ते। हजुर, आं के लोत्र का निक्शी नेनीने।
- 27 एको मुर कली यहूदीपुकीमी ग्याइशशा, हेरर हेररा साइक्तेक्म। साइक्चाम्तेक्म देंशो नेंशा, गो सिपाही आन कली लाइशशा, आन गुइ रे प्रोंइता। रोमी नागरिक बाक्माक्त, दे यो तुइक्ताक्ड। प्रेरित २१:३३; प्रेरित २२:२५
- 28 एको के मार दोस बाक्मे? दे हिल्लो पथ यहूदी आन कछडमी लाइक्पाइक्ता। प्रेरित २२:३०
- 29 हिल्लो हिक्सी पामेनु, यहूदी आन अरेतीक लोत्र आ पर्वम दोस गेमे बाक्त। जेल्खानमी चोक्चा, साइक्चा पुंडसीचा डा गेय मारेड मपशो बाक्त, दे रुप्ता।
- 30 मिनु यहूदीपुकीमी ‘मेको कली साइक्चा, दे गारशो बाक्नीम’ देंशो नेंशा, हजुर, इन बाक्तीक सोइक्ताक्ड। एको कली दोस गेब आन कली ‘सिजरिया डा हुकुम पाइब आ बाक्तीक लने’ दे माइक्नुडमी” दे ब्रेक्ता बाक्त।
- 31 मिनु लडाइ पाइब आन टेयब मुरमी दोदेंशो देंमे, मोदेंशो पा कप्तान नु सिपाहीपुकीमी पावल कली लाइशशा गाक्मा बाक्त। मिनु नाकदो रे गाक्शा, एन्तीपात्रीसमी जाक्दीम्मा बाक्त।

32 मिनु आ दीसा खोइलीमी गाकबपुकी यरूसलेम लेम्मा बाक्त। शारा डोइकबपुकीमी पावल कली सिजरिया चाकदीत्मे बाक्त।

33 मिनु चाकदीशशा, पावल नु चिठी मेको हुकुम पाइब कली जिम्मा गेमे बाक्त।

34 मिनु मेकोमी चिठी पदेशा, पावल कली “इ खिं ते में? तेको रागी डा नवे?” दे हिल्लो पवानु “सिलीसीया रागी डा नड, हजुर” देमाक्त। प्रेरित २२:३

35 मिनु हुकुम पाइबमी “लो मो हना इ कली दोस गेबपुकी जाकमल। मिनु इ मुददा कोव्रनुड” देशा हेरोद आ दरवारमी लाइशशा, खाल पाइब आन दातेमी वोइकपदा बाक्त।

## 24

हुकुम पाइब आ डोइती राप्पाइशशा

1 मिनु ५ नाक्त नोले टेयब चढेब हनानीया, यहूदी आन जोकब तुइकब खाल्वा का निकशी नु तेरतुल्लस नें पाइशशा निसाफ पाइब का सिजरियामी जाकमा बाक्त। मिनु हुकुम पाइब आ डोइती पावल कली दोस गेमे बाक्त।

2 मिनु कछडी बाकमा नाकती पावल कली हुकुम पाइब आ डोइती राप्पदमेनु, तेरतुल्लस निसाफ पाइबमी दोस गेशा “माननीय फेलीक्स सरकार, हजुर, इन रिम्शो पा हुकुम पशोमी गो यहूदी नेल्ल थुं नाइशशा बाकचा ताइतक। आंइ रागी रिम्शो सेल्चा कली नक लां कोंइताकनी। मिनु नेल्ल आंइ कली थम रिम्शो दुम्त।

3 इन पशो मारेइ मारेइ रिम्शो बाकब, दे गो नेल्लेमी तुइकनीकी।

4 हजुर, कली शुश मक्योल्चा, दे मिम्नुड। तन्न लोत्र का चहिं पचा गेयीनी।

5 मेको इन डोइती राप्पा वोइशशा मुर कली गो रिम्शो पा तुइकनीकी। मेको मुर थम हिंचा डा रोइ खोदेशो बाकब। रागी रागी हिरशा गाकमेनु, यहूदी आन कली पोक्शा मरिम्शो पपाइकबाक्त। एको नासरथ डा दूली थमा सुइकब आन टेयब मुर बाकब। प्रेरित १७:६

6 मोशो ला ममाइ, काब परमप्रभु यावे आ खिं ग्रांया पचशो बाक्त। मिनु गोपुकीमी ग्याइशशा, मो पचा मगेक। गो आंइ धर्म डा अरेतीक लोत्र काव्रशा, सजाइ पाइकचा देशो नकी। प्रेरित २१:२८-२९

7 तन्न लिसीयस लडाइ पाइब आन टेयब मुरम लोत्र पचा मगेथु, आ सिपाहीपुकी चाकशा, आंइ कली हिंम हिंम पा आंइ गुइ रे रोइशशा लाइकतु।

8 मेकोमी आंइ कली ‘मेको मुर आ दोस मार बाकमे, मेको लोत्र हुकुम पाइब फेलीक्स कली मतीन’ दे हजुर, इन बाकतीके सोइकताककी। मुल एको मुर कली गे आंमान हिल्लो पना पन आ दोस नेल्ल गुंइने चाप्नीनी। मिनु आंइ गेशो दोस थमा बाकमाक्त, दे तुइकनीनी” देमाक्त।

9 मेकेर बाकब यहूदीपुकीमी यो “एको लोत्र थमा बाकब” दे निसाफ पाइब आ देशो लोत्र थोकशा देमा बाक्त।

10 मिनु हुकुम पाइबमी पावल कली लोत्र पचा गेवा बाक्त। मिनु पावलमी “हुकुम पाइब, हजुर, एको रागीम शुश बर्स डोइती रे निसाफ पाइब बाकनीनी, दे तुइशशा, गो ग्येरसीशा टेयब थुं पा आन गेशो दोस नेशा लोत्र लेत्नुड। मार लोत्र बाकमे, मेको लोत्र नेल्ल देनुड।

11 परमप्रभु कली मान पथ, गो एसीया रे यरूसलेममी जाकशो १२ नाक्त लाइ यो लाकशो मबाकब। आं देशो थमा मदाप्तीनी हना, सु कली हिल्लो पाइतीनी हना यो, नेल्लेमी देनीम। प्रेरित २१:१७

12 गो यरूसलेममी बाकडानु, परमप्रभु यावे आ खिंमी, गुम्तीक खिंमी, सहर तेइ तेइ हिरशा, सुइ कली जिचा पोक्चा डा लोत्र मपड। मुर आन कली पोक्शा मरिम्शो यो मपपदुमी। सुइमी मोदेशो मरिम्शो पशो ताइतक देने मचाप्नीम।

13 आं कली शुश अरु दोस यो गेतीमी। तन्न थमा पा गुंइशा कोंइने मचबेम।

14 लोत्र का चहिं हजुर, इन कली रुप्पाइकनन्नी, गो येसु खीस्त आ लां खोइशशा गाकनुड। मेकोपुकीमी मेको लां दूली बाकब, दे मिम्शो बाकनीम। खीस्त आ लां खोइशशा, साइ आं किकी पिपी आन परमप्रभु यावे कली टेयब सेल्नुड। गो मोसा आ अरेशो लोत्र नु परमप्रभु यावे आ लोत्र पाइबपुकीमी ब्रेकशो लोत्र नेल्ल थमा सुइकनुड।

15 गो नु अर्को यो ठीक पाइब नु ठीक मपाइब बेकशो रे सेसीचा पुंडसीनीम, दे थमा सुइकनीकी। दानीएल १२:२; यूहन्ना ५:२८-२९

16 मोपतीके गो परमप्रभु यावे नु मुर आन डोइती रिम्शो पाइनुड, दे आं थुं फ्रेंशा बाकनुड। प्रेरित २३:१

17 मिनु मुल मार देनुड देशा हना, गो शुश बर्स मुर आन रागीमी हिरथ लशा, साबेर गाबेर यरूसलेम लेशशा जाकती। आंम आंइ यहूदी मारेइ मथीब आन कली मार मार गेथ नु परमप्रभु यावे कली मार मार चढेथ लेशशा जाकती। रोमी १५:२५-२६; गलाती २:१०

18 गो चोत्रखो दुम्शा, परमप्रभु कली मार मार चढेडानु, मेकोपुकीमी परमप्रभु यावे आ खिंमी ततीमी। मेना गो आं का ला बाकशो नड। मुर आन कली पोक्शा, मरिम्शो यो मपड। मोदेशो एकोपुकीमी यो मतशो बाकनीम। प्रेरित २१:२७

19 एसीया रे जाकशो यहूदीपुकी यो परमप्रभु यावे आ खिंमी बाकतेकम। मेकोपुकीमी आं कली दोस गेचा गोम्तेकम। गो दोस गेचा पुंडसीब मुर नड हना, मेकोपुकी एकेर जाकशा, हजुर इन डोइती देंचा मालशो नमी।

20 साबेर यरूसलेममी कछडी पामेनु, मुल इन डोइती जाकशोपुकी यो बाकशो नम। आं कली मार मार सुइदमे, मेको लोत्र हजुर, इन कली तुइकपाइकचा मालशो नमी।

21 आं देशो लोत्र का आ पर्वम दोस गेतीमी, दे तुइक्नुड। मेको आं देशो लोत्र मार बाक्ब देशा हना 'मुर बेक्शो रे सेंसीनीम' दे थमा सुइक्नुड। मेको आ पर्वम आं कली मुददा कोप्ताक्यीमी। मिनु इन डोंइती राप्पाइय्यीनी, दे माइक्तामी। मिनु मुल इन डोंइती राप्पाइक्तीमी" दे पावलमी देमाक्त। प्रेरित २३:६

22 मिनु फेलीक्स, हुकुम पाइबमी, ख्रीस्त आ लां खोइक्चा आ पर्वम शुश लोत्र तुइश्शो बाक्माक्त। मोपतीके "लिसीयस, लडाइ पाइब आन ठेयब मुर, जाक्शा नोले ला इन लोत्र नेशा, निसाफ कोत्रशा खोइश्शा गेनन्नी" दे बैठक पोक्शा सोइक्तीमी बाक्त। प्रेरित २३:२६

23 पावल कली कप्तान आ गुइमी जिम्मा गेशा "सिपाहीपुकीमी कोत्रशा, एर ओंथ गाक्चा गेचा। आ वारच जाक्तेकम हना, गुम्चा गेचा" दे वोइक्पदा बाक्त। प्रेरित २७:३

पावल सांकछी दुम्शो

24 इक्का नाक्त नोले हुकुम पाइब फेलीक्स नु आ मीश दुसील्ला जाक्सा बाक्त। आ मीश यहूदी तमी बाक्माक्त। मिनु पावल कली चाक्पाइश्शा, ख्रीस्त कली थमा सुइक्चा आ पर्वम लोत्र पपदसे बाक्त।

25 मिनु पावलमी "ठीक पशो नु ठीक मपशो मार बाक्बा, इं थुं नु रां कली दोपा अरेचा नु परमप्रभुमी मुर नेल्ल आन कली निसाफ पाइब" दे शेंदानु, फेलीक्स हिंशा "लो मोक्ल, मुलाक्ती ओशो ला लोत्र पय। इ लोत्र दीसा नित्थ लेंशा नेंनुड" दे सोइक्ता बाक्त।

26 फेलीक्समी "पावलमी क्येट सुइक्बा कों" दे यो आस पशो बाक्माक्त। मिनु लेंशा ब्रेप्बाक्माक्त।

27 मोपा ब्रेल्ला ब्रेल्ला बर्स निकशी योल्माक्त। मिनु फेलीक्स अकों रागीमी याक्से बाक्त। आ पा डा हुकुम पाइब पोरसीयस फेस्तस जाक्माक्त। फेलीक्समी यहूदी आन कली ग्येरपाइक्चा, दे पावल आ मुददा मखोइक्थु, चोक्स डा चोक्स वोइश्शा गाक्माक्त।

## 25

फेस्तस आ डोंइती राप्पाइश्शो

1 फेस्तस हुकुम पाइब दुम्शा, आ सांबु नाक्ती सिजरिया रे गाक्शा, यरूसलेम ग्येत्थ लमाक्त।

2 मिनु यरूसलेममी बाक्मेनु, ठेयब चढेबपुकी यहूदी आन ठेयब मुरपुकीमी गुम्थ जाक्शा, फेस्तस कली पावल आ पर्वम लोत्र पांमे बाक्त।

3 मार देमा बाक्त देशा हना "पावल कली यरूसलेम लेश्शा सोइश्शा, आ मुददा कोत्रचा माल्ताक्व" दे शुश लोत्र पा पुन्मे बाक्त। मारदे हना, लांमी बाप्शा, साइक्चा, दे लोत्र पशो बाक्मा बाक्त। प्रेरित २३:१५

4 मिनु हुकुम पाइब फेस्तसमी मेको आन लोत्र नेशा, आन पुंइशो मगेथु "पावल कली सिजरियामी चोक्स डा चोक्स वोइश्शा पिती। मुल शुश नाक्त मबाक्थु, मेरेन लेश्शा लाइनुड।

5 मोपतीके अधिकार तशो इन मुर का निकशी योवशा, गो नु सोइक्तीने। मिनु सिजरियामी जाक्दीश्शा, मुददा कोत्रनुड। मेको मुरुमी मरिम्शो पशो बाक्त हना, दोस गुंइने चाम्सीब" दे माइक्मी बाक्त।

6 मिनु ८, १० नाक्त बाक्शा, सिजरिया लेश्शा यिमाक्त। मिनु आ दीसा नाक्ती कछडी वोइश्शा, पावल कली चाक्पाइश्शा, आ डोंइती राप्पदा बाक्त।

7 मिनु आ डोंइती राप्पदानु, यरूसलेम रे जाक्शो यहूदीपुकीमी शुश दोस गेमे बाक्त। तन्न लोत्र का यो थमा बाक्ब, दे कोंइने मचाप्मे बाक्त।

8 मिनु पावलमी "आंइ यहूदी आन अरेशो लोत्र का यो दूली मपड। परमप्रभु यावे खिं ग्रांरा मपड। रोमी पिप सिजर कली यो मरिम्शो मदेड" देमाक्त।

9 फेस्तसमी यहूदी आन कली ग्येरपाइक्चा दाक्ता बाक्त। मोपतीके पावल कली "गे यरूसलेम लचा दाक्नेवे? इ मुददा मेरेन कोत्रशा गेनन, दुम्बा?" दे हिल्लो पवा बाक्त।

10 मिनु पावलमी "मदुम्ब हजुर, मारदे हना सिजर आ निसाफ पाइबपुकीमी कका आं मुददा कोत्रचा माल्नीम। यहूदी आन कली मरिम्शो मारेड मपड, दे हजुर, गे यो तुइक्नीनी।

11 गो दूली पाइब दुम्शा, साइक्चा पुंइसीचा डा बाक्ती हना, सजाइ जाइनुड। बेक्चा यो महिनुड। आं कली दोस गेबपुकीमी दोस गुंइने मचाप्तेकम हना, आन गुइमी दोपा गेचा पुंइसीनुडा? सिजर पिपी कली आं मुददा कोत्रचा गेने, देंनुड" दे मदा बाक्त। प्रेरित २३:११; प्रेरित २८:१९

12 मिनु फेस्तसमी आ मुरपुकी नु पावल आ मुददा मार पचा, दो पचा, दे लोत्रसी पने थुम्शा, पावल कली "गे सिजर पिप कली इ मुददा कोत्रचा गेचा देते। मोपतीके सिजर पिप आ बाक्तीके सोइक्नन" दे माइश्शा, कछडी पोक्शा सोइक्तीमी बाक्त।

अग्रीप्पा नु फेस्तस लोत्र पशो

13 मिनु इक्का नाक्त नोले पिप अग्रीप्पा नु बेरनीस हुकुम पाइब फेस्तस कली गुम्थ सिजरिया जाक्सा बाक्त।

14 मिनु शुश नाक्त बाक्सानु, फेस्तसमी पिप कली पावल आ पर्वम "एक फेलीक्समी मुददा मखोइक्थु चोक्शा वोइश्शो मुर का बाक्ब। प्रेरित २४:२७

15 मिनु यरूसलेम लडानु, ठेयब चढेब नु यहूदी आन शेंब खाल्पापुकीमी एको मुर आ पर्वम नेल्ल तुइक्पाइक्तीमी। शुश दोस गेम्तेकम। मिनु मेको कली सजाइ गेचा, दे पुंइतेकम।



16 गो मेको आन कली 'कछडी वोइश्शा, दोस गेबपुकी नु दोस गेचा पुंडसीब कली मयुम्पाइक्थु, दोस मयुंडथु, सजाइ गेचा आंड रोमी ऐन कानुनम मगारब। दोस गेचा पुंडसीबमी एको आन देशो थमा बाक्ब, दे मदेंम सम्म सजाइ गेचा मदुम' दे माइक्तामी। प्रेरित २२:२५

17 मिनु दोस गेबपुकी एक जाक्मा आ दीसा नाक्त कछडी वोइश्शा गुम्पटुमीनु,

18 एको मुरुमी मुर साइश्शो बाक्मे कों, दे मिश्शो नड। तन्न दोस गेमेनु, दोस मारेइ मबा।

19 आन जिमुशो दा आन धर्म आ पर्वम कका बाक्माक्त। लोत्र का दोपा परमप्रभु कली मान पचा आ पर्वम, लोत्र का येसु माइश्शो मुर आ पर्वम बाक्माक्त। यहूदीपुकीमी मेको मुर बेक्त देबाक्तेक्म। तन्न पावलमी चहिं बेक्शो रे सेंसीशा ब्रोंइशो बाक्ब देबाक्त।

20 मिनु गो मार पड, दो पड दुम्ती। मोपतीके गो पावल कली 'यरूसलेम लशा, मेरेन इ मुददा कोत्रचा दुम्बा?' दे हिल्लो पाता।

21 मो देंडानु, पावलमी 'अगस्टस कली आं मुददा कोत्रचा गेने। सिजर आ बाक्तीकेमी मसोइक्तीनी सम्म चोक्शा वोइय्थीनी' दे पुंडतु। मिनु गो रिम्शो पा वोइक्पाइक्ता। मिनु गेना सोइक्तु, दे लां कोत्रना कोत्रन बाक्ती' देंमाक्त।

22 मिनु अग्रीप्पामी फेस्तस कली "गो मेको मुर आ लोत्र नेंचा दाक्नुड" देंमेनु "सरकार, दीसान इन डोंइती राप्पाइक्नुड" देंमाक्त। लूका २२:८

अग्रीप्पा आ डोंइती राप्पाइश्शो

23 मिनु आ दीसा अग्रीप्पा नु बेरनीस नु सहर डा सरकार आ ठेयब मुरपुकीमी सरकारी वा फेक्शा जाक्शा, दरवारमी देल्मा बाक्त। मिनु फेस्तसमी पावल कली चाक्पाइश्शा, नेल्ल आन डोंइती राप्पादा बाक्त।

24 मिनु फेस्तसमी "सरकार अग्रीप्पा, एकेर देल्शो हजुरपुकी, आं लोत्र का निक्शी नेनीने। एको इन डोंइती राप्पाइश्शो मुर कोत्रडीने। यहूदी नेल्लेमी एको कली मरिम्शो मुर, दे दोस गेनीमी। यरूसलेम नु एकेर कछडी वोइमेनु 'मेको कली साइक्का माल्ब' देंन देंन रेयके पाम्तेक्म। प्रेरित २२:२२

25 गो चहिं मो देशो साइक्का पुंडसीब मुर मतड। मिनु एकोमी यो रोमी पिप सिजर अगस्टस कली आं मुददा कोत्रचा गेने, दे पुंडतु। मिनु सिजर आ बाक्तीके सोइक्तु देंती।

26 तन्न सिजर कली एको मुर आ पर्वम मार लोत्र बेक्चा डा? आ दोस गुंडने मचबु। मोपतीके मुलाक्ती अग्रीप्पा सरकार नु हजुर नेल्ल इन डोंइती राप्पाइक्ता। गो नेल्लेमी हिल्लो हिकसी पा दोस गुंडताक्च हना, सिजर पिप कली बेक्शा सोइक्ने चाप्नुड।

27 मारदे हना ओं पा ग्याइश्शा फ्रेशो मुर कली दोस का यो मयुंडथु, सिजर पिप बाक्तीके सोइक्ताक्ड हना, मुने दोक्सीब, दे मिम्ताक्ड" देंमाक्त।

## 26

पावलमी सांकछी गेशो

1 मिनु पिप अग्रीप्पामी पावल कली "इ लोत्र मार बाक्मे, मेको देने" दे लोत्र पचा गेवा बाक्त। मिनु पावलमी गुड का पोक्शा,

2 "अग्रीप्पा सरकार, यहूदीपुकीमी शुश दोस गेतीमी। मिनु मेको दोस आ पर्वम हजुर नु लोत्र पचा तडानु, गो ग्येरसाक्यी।

3 मारदे हना यहूदी आन पतीके नु गारचा डा मगारचा डा लोत्र नेल्ल हजुरमी, रिम्शो पा तुइश्शो बाक्नीनी। लोत्र शुश बाक्ब। मोपतीके मब्रीथु, हजुरमी, नेंशा गेचा नड।

4 गो आल रे यरूसलेममी बाक्शा, यहूदी नेल्लेमी आं कली तुइश्शो बाक्नीमी।

5 मेकोपुकी गो शुश धर्म पाडब फरिसी का बाक्ती, दे डोंइती रे तुइक्नीमी। मेकोपुकीमी गो फरिसी का बाक्ती, दे सांकछी दुम्ने चाप्नीम। प्रेरित २३:६; फिलिप्पी ३:५

6 परमप्रभु यावेमी आंड किकी पिपी आन कली लोत्र गेशो बाक्माक्त। मिनु मेको लोत्र आ पर्वम दोस ताइब दुम्ती। प्रेरित २८:२०

7 मिनु मेको लोत्र नेल्ल खाप्ब, दे आंड १२ थर डा यहूदी नेल्लेमी थमा सुइश्शा, परमप्रभु यावे कली नाक्दो नाक्त ठेयब सेल्शा बाक्नीकी। मेको आन थमा सुइश्शो खोदेंशो पा गो यो थमा सुइक्ब का नड। मेको थमा सुइश्शो आ पर्वम आं कली दोस गेतीमी, अग्रीप्पा सरकार। प्रेरित २४:१५

8 परमप्रभु यावेमी बेक्शा लशो आन कली सेंपाइश्शा गेना हना यो ब्रोंइशा बाक्चा गेब देशो लोत्र थमा सुइक्तीक लोत्र ममाइ डा? हजुरपुकी, एको लोत्र मारदे थमा सुइक्ने मचाप्नीनी? प्रेरित २३:८

9 साइ गो दोपा यो मेको नासरथ डा येसु आ नें क्याम्चा, दे मिश्शो नड। प्रेरित ९:१-२९; प्रेरित २२:३-२१

10 यरूसलेममी मेको आ नें क्याम्तीक गेय पा गाक्ती। ठेयब चढेबपुकी रे अधिकार तशा, थमा सुइक्ब शुश आन कली जेल्खानमी चोक्पाइक्तामी। मोशो ला ममाइ, थमा सुइक्ब आन कली सदमेनु, गोमी 'रिम्शो पाइतीनी' देंती।

11 थमा सुइक्ब आन कली आंड गुम्तीक खिं खिमी कीशा चाक्शा तुप्शा, येसु आ नें मरिम्शो सेल्पाइश्शा, मुल डा मेरे मेको लां मखोइक्नीकी देंपाइक्तामी। नेल्ल आन कली साइक्पाइक्नुडमी, दे जोंब बोक्शा गाक्ती। यरूसलेममी ला ममाइ, डोन डोन रागी लशा, खेदा पा श्येत गेतामी।

12 मोपा श्येत गेना गेन गाक्डानु, काबु ठेयब चढेब आन अधिकार तशा, वारच नु गारशा, दमस्कस सहर गे लाइतक।

13 अग्रीप्पा सरकार हजुर, मुल नोफा दाइशशा नेनीन। नाकती उइक्थ दुम्मेनु गाक्कानु, मार दुम्त देशा हना, नां पशो क्येडा छेडछेड सरीड रे यिशा, आंइ एर ओंथ कोंइताक्व।

14 मोदेशो छेडछेड दुम्शो तशा, गो नेल्ल दिड दाड गोल्तक। मिनु हिब्रू लोव्र पा आं नें थिशा 'सावल, सावल आं कली मारदे खेदा पा श्येत गेयी? गे आंमा श्येत जाइनेवे' दे लोव्र पशो नेता।

15 मिनु गोमी 'प्रभु, सु ननी' दे हिल्लो पडानु 'इ खेदा पशो येसु नड।

16 मुल छुल बोक्को। इ कली योव्रशा आं लोव्र नेपाइक्व सेल्लतन। मुलाकत इ कली तपांडसाक्वी। मुल डा मेरे इ कली तपांडसीन सीन बाक्नुड। मिनु मुलाकती तशो नेशो खोदेशो पा नोले यो नेनेवे, ताइनेवे। मेको लोव्र नेल्ल नेपाइक्व सेल्लतन।

17 आं लोव्र शेंथ सोइक्वन। आं लोव्र नेपा गाक्डेनु, यहूदी नु अर्को रागी डा मुर आन गुड रे प्रॉइनुड।

18 मारदे हना मेकोपुकी मिक्च ताइब दुम्मल। छिडछिडमी बाक्शोपुकी छेडछेडमी बाक्चा तामेक्ल। सैतान आ अधिकांरमी बाक्शोपुकी परमप्रभु यावे आ अधिकांरमी बाक्ब दुम्मल। मेको आन पाप क्याम्चा पुंडसीशा, आं कली थमा सुइशशोमी आं मुरपुकी नु काथा दुम्शा, आं मुर दुम्मल' देशो नेता। प्रेरित २०:३२

19 अग्रीप्पा सरकार, परमप्रभुमी कोंइशो कोंइतीक तशा, आ लोव्र नेशा, मेको लोव्र टीब दुम्ती। गलाती १:१६

20 दमस्कसमी जाक्दीशशा, लोव्र शेंचा गोव्रता। मिनु यरूसलेममी, यहूदीया रागी हिरशा गाक्ती। अर्को रागी डा मुर आन रागी रागी हिरशा गाक्ती। मोपा गाक्डानु, मुर आन कली 'पाप पचा प्रॉइशा, इन थुं परमप्रभु यावे गे हिरदीने। मिनु परमप्रभु कली शिरशो गेय पा इन थुं थमा पा हिरशो बाक्त, दे कोंइदीने' दे शेंना शेंन गाक्ती।

21 मोदेशो शेशो आ पर्वम यहूदीपुकीमी परमप्रभु यावे आ खिमी ग्याइशशा दोस गेशा, साइक्चा पुंडसीब, दे साइक्चा माल्तीमी। प्रेरित २१:३०-३१

22 खेदा पा शुश श्येत गेयीमीनु, परमप्रभु यावेमी श्येत फाल्तीक सक्ति गेती। मोपतीके गो ठेयब थुं पा इन डोंइती राप्शा, ठेयब मुर आइक्च मुर नेल्ल इन कली आं लोव्र मोसा नु परमप्रभु यावे आ लोव्र पाइब आन लोव्र नु गारब, दे रूपीन। लूका २४:४४-४७

23 मेकोपुकीमी 'ख्रीस्तम श्येत जचा माल्व' दे ब्रेक्शो बाक्शो बाक्तेक्म। मिनु बेक्शो रे सेंसीशा ब्रोंइशा बाक्ब। बेक्शो रे सेंचा पुंडसीबपुकीमी नेल्ल आन क्येडा डोंइती मेको येसु ख्रीस्त बेक्शो रे सेंसाक्व। मिनु मोपा यहूदी नु अर्को रागी डा मुर नेल्ल आन कली छेडछेड दुम्शो खोदेशो पा आन लां कोंइब दुम्त' दे पावलमी सांकछी गेशा शेंदीमी बाक्त। १कोरिन्थी १५:२०

24 मोपा लोव्र पना पन लदानु, हुकुम पाइब फेस्तसमी आ लोव्र खोइशशा "पावल, गे बौला, शुश शेंसीशा जोक्ब तुइक्व दुम्शा, निप्स ग्यशो कका दुमे बाक्त" दे ठेयब सेंदा पा देंमेनु,

25 पावलमी "माननीय फेस्तस हजुर, गो बौला मनड। गो थमा पा आं तुइशशो रिम्शो लोव्र पाता।

26 अग्रीप्पा सरकारमी आं देशो लोव्र नेल्ल रूप्यो बाक्ब, दे तुइक्ताक्ड। मोपतीके आं ग्राकी लोकशा लोव्र पाता। सरकारमी ख्रीस्त आ पर्वम ब्रशो शुश लोव्र नेशा रूप्यो बाक्माक्त। ख्रीस्त आ पर्वम दुम्शो चहिं का निक्शीमी ला तुइशशो मनमी। शुशेमी तुइशशो बाक्नीमी। यूहन्ना १८:२०

27 अग्रीप्पा सरकार, परमप्रभु यावे आ लोव्र पाइब आन लोव्र थमा सुइक्नुड मदेतीनी हना यो, इन थुंमी थमा सुइक्नीनी, दे तुइक्ताक्ड" देंमाक्त।

28 मिनु पिप अग्रीप्पामी "लोव्र का निक्शीमी गो ख्रीस्त कली थमा सुइक्व दुम्ती" देंमेनु,

29 पावलमी "लोव्र का निक्शी पशा हना यो, शुश पशा हना यो, दोपा यो आं खोदेशो दुमीन, दे मिम्नुड। सरकार ला ममाड, एकेर खुम्सीशा बाक्ब नेल्ल आं खोदेशो दुम्मल। तन्न ग्याइशशा साडलोम पाइशशा जेल्खानमी चोक्चा चहिं मपुंडसमल, दे पुंडनुड" देंमाक्त।

30 मो देंमेनु, पिप छुल बोक्शा गाक्माक्त। मिनु हुकुम पाइब, बेरनीस नु मेकेर बाक्ब नेल्ल छुल छाल बोक्शा गाक्मा बाक्त।

31 मिनु गाक्मानु "एको मुर रिम्शो बाक्माक्त, जेल्खानमी चोक्चा डा, साइक्चा पुंडसीचा डा मबा" देंमुशा गाक्मा बाक्त।

32 मिनु पिप अग्रीप्पामी हुकुम पाइब फेस्तस कली "एको मुरुमी सिजर कली आं मुददा कोव्रचा गेने, दे मपुंडशो हना, प्रॉइशा सोइक्ने चाप्स वा" देंमाक्त। प्रेरित २५:११

## 27

पावल कली रोम सोइशशो

1 मिनु पावल कली सिजर बाक्तीके इटाली सोइक्ची जाक्माक्त। मिनु पावल नु अरु चोक्चा पुंडसीशो का निक्शी आन कली अगस्टस पल्लन डा युलीयस नें पाइशशो कप्तान आ गुडमी जिम्मा गेमे बाक्त। मिनु गो पावल आ वारच का निक्शी यो सासाक्क। प्रेरित २५:१२

2 सिजरिया रे लशा, अद्रामीत्तीयम जाक्दीशशा, एसीया लाइब जहाज डोइशशा लाइतक। मासीडोनीया डा थिस्सलोनीकी रे जाक्शो अरीस्तारकस पावल आ वारच का यो गोपुकी नु लत। प्रेरित २०:४

3 मेकेर रे लशा, आ दीसा नाक्त सीदोन जाक्दीत्तक। मेकेर जाक्दीक्कानु, कप्तान युलीयसमी पावल कली रिम्शो पा आ वारच आन कली ग्रुथ लचा गेप्टु। मिनु मेकोपुकीमी पावल कली रिम्शो पाम्तेक्म। प्रेरित २४:२३; प्रेरित २८:१६

4 मिनु लेशशा जाक्शा, जहाज डोइशशा, लाइतक। मिनु साइप्रस आ नेक्नेक्था जाक्दीत्तक। मारदे हना फश गिवारमी आइदी लां लचा मगेव।

5 मिनु सिलीसीया नु पाप्कीलीया रागी आस दी डा लां पा लिसीया रागी डा मिरा सहरमी जाक्दीशशा तोंइसाक्क।

- 6 मिनू कप्तानमी अलेकजेन्द्रीया रे जाकशो इटाली लाइब जहाज थिश्शा, नेल्ल आंड कली मेकोमी डोइक्पाइक्तीकी।
- 7 मिनू लकानु, शुश फश गिवार पा तेक्तीके श्येत पा ओंखां ओंखां लशा, क्नीदोस रागी आ नेक्था जाक्दीत्तक। फश गिवार मलीथु, आइक्था रे पा साल्मोने नु क्रेट टापु आस नेक्नेक्था लां रे पा लाइतक।
- 8 मिनू श्येत पा क्रेट टापु डा जहाज नाइक्तीके जाक्दीत्तक। मेको जहाज नाइक्तीके दारशो जहाज नाइक्तीक नें वोइश्शो बाक्त। मेको लासेया सहर आ नेक्था सेल्शो बाक्त।
- 9 फश गिवारमी तेक्तीके क्रेटमी जाक्दीत्त्वा यो शुश नाक्त लाक्शा, माइजा बाक्तीक लाइ यो लाक्तु। में डा मेरे जहाज चलेचा हिंचा पाइब। २कोरिन्थी ११:२५-२६; लेवी १६:२९
- 10 मोपतीके पावलमी जहाज चलेब आन कली “हजुरपुकी, एक डा लाक्शा लाइतय हना, फश गिवारमी योल्ब। जहाज नु जहाजमी कुर पशो थोत्रक नेल्ल जाम्ब, गोपुकी यो ब्रोइचा मताइनय दे तुइश्शो बाक्नुड। मोपतीके मलचा” दैत।
- 11 कप्तानमी चहिं पावल आ देशो लोत्र थमा मसुइक्थु, जहाज आ होत्रप नु चलेब आन लोत्र नेंतु।
- 12 मेकोपुकीमी “हिउंदमी एकेर बाक्चा मदुम्ब” दैतेक्म। मो दैमानु, अरुमी यो “मो हना फोनीकस गे लचा” दैतेक्म। फोनीकसमी जाक्दीन्ने चापनय। मिनू मेकेरेन हिउंद लाक्चा रिश्शो दुम्ब दैतीके लाइतक। फोनीकस चहिं क्रेट टापु डा नेल्ल क्येडा पच्छिममी बाक्ब।
- 13 मिनू लना लन बाक्कानु, दक्खिन रे इचीची फश पवानु, मुल रिश्शो चलेसीब देशा, जहाज तिक्तीके क्युकशा वोइश्शा, क्रेट आ नेक्था लां लाइतक।
- 14 मिनू में चोटान टापु रे फश गिवार यिशा सुम्तु। मोदेशो फश गिवार कली उत्तर पूर्व डा फश, दे नें वोइश्शो बाक्ब।
- 15 मोपा सुम्कीनु, जहाज लतीक लां लाइक्ने मचबेम। मोपतीके फश गिवारमी तेइ योल्दल, दे चलेचा प्रोइतेक्म।
- 16 मिनू कौदा माइश्शो टापु आ ता जाक्दीश्शा, टापुमी फश गिवार इचीची फारताक्व। मिनू शुश श्येत पा इम्ची डोंगा ब्वाक्कुम तोक्शा, मेको डोंगा रे गेय पा जहाज कली ठेयब ठेयब डोरीम फ्रेंशा बोल्यो सेल्तेक्म।
- 17 मिनू सिरतीस माइश्शो बाल्वा बाक्तीकेमी जहाज मओवदील, दे जहाज कीब वा फ्रुप्शा, ओंखां ओंखां पा जहाज लचा गेम्तेक्म।
- 18 फश गिवार काइ यो मनाइक्थु पना पन बाक्त। मिनू आ दीसा जहाज सोपी दुम्ल, दे जहाजमी कुर पशो भारी शोल्शा ताइक्ताक्मे।
- 19 मिनू आ नित्थ नाक्ती जहाज कली माल्शो थोत्रक यो ताइक्ताक्मे। मिनू शुश नाक्ती सम्म फश गिवार पना पन नां तास्ला सोरुल मारेइ मताइसे।
- 20 मिनू गोपुकीम ब्रोइचा मताइसीबाक्त, बेक्सीबाक्त दैतक।
- 21 गो शुश नाक्ती सम्म मारेइ मजथु बाक्तक। मिनू पावलमी जहाज चलेब आन डोंइती राप्शा “हजुरपुकी, सावेर आं देशो लोत्र टिचा माल्शो ननी। गोमी क्रेट मलचा दैती। गेपुकीमी आं देशो टिश्शो ननी हना, जहाजमी कुर पशो नु जहाज डा थोत्रक मारेइ ताइक्चा ममाल्द वा। गो यो ओदेशो श्येत मजय वा।
- 22 मुल मोदेशो दुम्त हना यो, इन थुं बारपा बाक्कीने। मारदे हना सुइ यो मबेक्नय। जहाज ला जाम्शा लाइब, दे तुइक्ताक्ड।
- 23 दोपा तुइक्ताक्ड देशा हना, गो परमप्रभु यावे कली ठेयब सेल्नुड, मेको आ मुर नड। परमप्रभु यावेमी आ स्वर्ग डा गेय पाइब का कली सोइश्शा, सिनाक्दो आं डोंइती राप्शो ताता।
- 24 मेकोमी ‘पावल, महिनो। गे सिजर पिप आ डोंइती राप्शा माल्नेवे। ब्वाक्कुम गुम्शा मबेक्नेवे। परमप्रभु यावेमी गे नु बाक्ब नेल्ल यो मबेक्थु, इन कली गेप्टु’ दे माइक्ती। प्रेरित २३:११
- 25 मोपतीके इन थुं बार पा बाक्कीन, हजुरपुकी। परमप्रभुमी आ देशो का यो मप्रोइथु, नेल्ल खाप्ब, दे थमा सुइक्नुड। प्रेरित २८:१
- 26 मुल जहाज टापु जाक्दीश्शा, खा दिक्ब, दे तुइक्नुड” दे माइक्तीमी।
- 27 मिनू १४ नाक्त मोपा योल्स डा योल्स पा अद्रीया समुन्द्र लाक्शा, काबु नाक्दो जहाज चलेबपुकीमी तेक कका डा रागी तांडसीशो खोदेशो ताम्तेक्म।
- 28 मिनू ब्वाक्कु पुक्तीके खुम्शा पुक्गामेनु, २० ओरग्या बाक्त। मिनू इच्छी नोले बारशा लशा लेंशा पुक्गामेनु, १५ ओरग्या बाक्त। ओरग्या का १,८५ मिटर बाक्ब।
- 29 मिनू सेरथे फुल्लुम थोक्सीशा, जहाज बिग्रेसीब देशा जहाज तिक्तीके ४ ओटा तोक्शा, जहाज कली तिक्शा नाइक्पाइक्तेक्म। मिनू गेना नां सोत्रबा, दे रिश्शा बाक्तक।
- 30 नां मसोत्रथु जहाजम गेय पाइबपुकीमी जहाज तिक्तीके तोक्खु पा आइक्च डोंगा तोक्शा, जहाज प्रोइशा प्रोक्चा माल्मे बाक्त।
- 31 मिनू पावलमी मेको आन मो पचशो तुइश्शा, कप्तान कली “मेकोपुकी प्रोक्शा गाक्तेक्म हना, गो नेल्ल गुम्शा बेक्नय” दे माइक्तु।
- 32 मिनू सिपाहीपुकीमी डोंगा डा डोरी खोइश्शा तोक्शा, मेको आन कली प्रोक्चा मगेम।
- 33 मिनू नां सोत्रमेनु पावलमी नेल्ल आन कली “मजशो, मइप्शो मुलाक्त १४ नाक्त दुम्त।
- 34 मोपतीके मुल इच्छी खोइ जय। मिनू बोल ताइनय। महिनीन। मारदे हना सुइ के चां का यो महम्ब” दे नेल्ल आइ थुं बारपाइक्तु। मती १०:३०
- 35 मिनू शोब्ले आ गुइमी शेशा, प्रभु कली “गे रिश्शो पाइब बाक्नीनी” देशा, जिक्शा नेल्ल आइ कली योक्तु।
- 36 मिनू नेल्ल आइ थुं बारशा जाइतक।
- 37 मेको जहाजमी २७६ जना मुर बाक्शो नकी।

- 38 मिनु रूश्री जशा, जहाजमी कुर पशो चेरब ताइक्ताकम।  
 39 मिनु नां सोवमेनु, मेको डोंडती तांडसीशो रागी मार रागी बाकमे, दे मतुइक्ताक। बाल्वा ला तांडसाकव।  
 40 मेको बाल्वा बाक्तीके चाकदीशशा, जहाज तिकतीके खोइशशा, ब्वाक्कुमी प्रॉइतेकम। मिनु चलेतीके आ डोरी प्राक्शा, वा क्युक्शा वोइशशा, फशेमी जहाज कली गाक्पा बाल्वा गे लाइक्तेकम।  
 41 मो पामेनु, जहाज बाल्वामी ओवदीशशा, आ शोव ग्युक्साकव। आ मीलु चहिं ब्वाक्कुम आप्शा जिक्त।  
 42 एको चोक्सीशा लाइशशोपुकी प्रोक्नीमी कोर में, दे हिंशा, सिपाहीपुकीमी मेको आन कली प्रोक्चा मगेथु साइक्चा, दे मिंशो बाक्मा बाक्त।  
 43 कप्तानमी चहिं “पावल कली मसाइक्थु ब्रोंइचा गेचा” दे आ थुं फ्रेंशो बाक्माक्ता। मोपतीके सुइ कली साइक्चा मगेव। दोम्ली ग्यारस जोक्ब आन कली दोम्ली ग्यारशा रागीमी यूडीन, दे सोइक्ताकमी।  
 44 दोम्ली ग्यारस मजोक्बपुकीमी चहिं जहाज डा शी फलेक ग्याइशशा डोंइशशा रागीमी गूमल देंत। मोपा सुइ मगुंथु नेल्ल ब्रोंइशा रागीमी गूतक। प्रेरित २७:२२-२५

## 28

माल्टाम बाक्शो

- 1 मेको रागीमी गूकानु, माल्टा नें पाइशशो टापु बाक्माक्ता, दे तुइक्ताक।  
 2 मेको टापुमी बाक्बपुकीमी आंड कली तशा, शिशो पा शुश रिंशो पा वारच पाम्तेकम। मेकेर थम ग्यू पा रेड यित। मोपतीके मेकोपुकीमी मी मुइशशा थेरपाइक्तीकी। २कोरिन्थी ११:२७  
 3 मी थेरना थेरन बाक्कानु, पावलमी एर ओंथ डा शी खुप्शा चाक्शा चोवानु, मीम होशा गूशो बुस्स कामी आ गुडमी गिल्शा कोक्तु।  
 4 टापुमी बाक्बपुकीमी पावल आ गुड बुस्सुम गिल्शो तशा “एको मुर मुर साइक्ब बाक्माक्ता। समुन्द्रमी फश गिवार पा गुंशा हेररा बेक्शा यो ब्रोंइशा, रागीमी गूशा यो बुस्सुमी कोक्शा बेक्ब दुम्त” देमुंतेकम।  
 5 पावलमी आ गुड थुर थुर पा बुस्स कली मीम हुंताकव। मिनु आ कली मारेइ मदुम। मर्कूस १६:१८  
 6 मुरपुकीमी पावल कली कोव्रस डा कोव्रस पाम्तेकम। मारदे हना बुस्सुमी कोक्शो मुर इच्छी होम्शा बेक्ब, दे मिंशो बाक्मा बाक्म। मिनु कोव्रस डा कोव्रस बाक्मानु, मारेइ मदुम। मोपतीके आन थुं हिरशा “मुर साइक्ब मुर ममाइ, देवता कका बाक्माक्ता, है” देमुंतेकम। प्रेरित १४:११

ठेयब मुर आ आफ सापाइशशो

- 7 मेको टापु डा ठेयब मुर आ नें पुब्लीयस बाक्माक्ता। आंड जाकदीत्तीके आ नेक्था पुब्लीयस आ रू, खिं बाक्ता। मिनु पुब्लीयसमी आंड कली गुंशा, आ खिं लाइशशा, नाक्ता सां सम्म बास जचा तूचा गेशा रिंशो पाइक्तीकी।  
 8 पुब्लीयस आ खिंमी बास बाक्कानु, आ आफ ख्युर पा जरो पा रोइ पशो बाक्ता। मिनु पावलमी रोइ पाइब कली गुंथ लशा, आ गुड मेको तारी वोइशशा, प्रार्थना पा सापाइक्ता।  
 9 मोपा सापाइशशो तशा, टापु डा रोइ पशो मुरपुकी जाक्शा, आन रोइ सापाइसाकम।  
 10 मिनु टापु डा मुर नेल्लेमी ग्येरसीशा, आंड कली मार मार चाक्शा गेम्तेकम। गाक्चकानु लांमी जचा कली लाम्जी कुम्ज सेल्शा कुरपा सोइक्ताकम।

रोम जाकदीशशो

- 11 मेको टापुमी महिना सां सम्म बाक्ताक। अलेकजेन्दीया रे जाक्शो कस्तोर नु पोल्लुक्स माइशशो जौले आस नें पाइशशो जहाज माल्टामी हिउंदमी बाक्बाक्माक्ता। मिनु हिउंद लाक्शा, मेको जहाज डोंइशशा गे लाइतक।  
 12 मिनु सिराकुसमी जाकदीशशा, नाक्ता सां सम्म बाक्ताक।  
 13 मेकेर रे लशा इच्छी हेरशा, रेगीयम जाकदीत्ताक। मिनु आ दीसा दक्खिन रे फश पशोमी नाक्ता निक्शीमी पुटेओलीमी जाकदीत्ताक।  
 14 मेकेर जाकदीशशा, जहाज रे तोइशशा, सहर लाइतक। मिनु थमा सुइक्ब लोकब आन कली ग्युकानु, मेकोपुकीमी “बाक्कीन, बाक्कीन” देंतीके ७ नाक्ता सम्म बाक्ताक। मिनु रोम सहर गे लाइतक।  
 15 रोम सहरमी बाक्ब थमा सुइक्ब लोकब ते गुंथ जाक्चाम्तेकम देंशो नेंशा, सां-पाटी नु अप्पीयस बजारमी गुंथ जाक्तेकम। पावलमी मेको थमा सुइक्ब आन कली तशा, आ थुं बारशा, परमप्रभु यावे कली “गे रिंशो पाइब बाक्नीनी” दे ठेयब सेल्लु।  
 16 मिनु रोम सहरमी जाकदीत्ताक। जाकदीशशो रे पावल ते ते बाक्चा दाक्ता, मेक मेक बाक्चा गेम्तेकम। आ कली कोव्रब सिपाही का वोइक्तेकम। प्रेरित २७:३

रोममी यहूदी आन कली गुंशो

- 17 रोम सहरम जाकदीशशो आ सांबु नाक्ती पावलमी रोममी बाक्ब यहूदी आन ठेयब मुर ब्रेशशा खुप्ताकमी। मिनु मेको आन कली “आं लोकबपुकी, आं लोव का निक्शी नेनीन। इं यहूदी नु इं किकी पिपी आन पतीके पना पन बाक्ती हना यो, यरूसलेममी बाक्ब लोकबपुकीमी आं कली दोस गेशा ग्याइशशा, रोमी सरकार आन गुडमी गेतीमी। प्रेरित २३:१  
 18 मिनु रोमी निसाफ पाइबपुकीमी हिल्लो हिक्सी पशा डा मिन, आं कली प्रॉइचा देंतेकम। मारदे हना साइक्चा डा सजाइ गेचा पुइसीब मारेइ दोस थुंइने मचबेम।

19 यहूदी लोकबपुकीमी प्रोंडचा मदुम्ब देना देन बाकमानु, गोमी सिजर कली आं मुददा कोव्रचा गेने, दे पुंडता। पिप आ डोंडती इं यहूदी सुइ आन कली मारेड दोस मगेनुडमी। प्रेरित २५:११

20 इन कली एको लोव्र नेल्ल रुप्पाइक्वथ ब्रेशशा खुप्ताकन्नी। आं दोस चहिं मार बाक्ब देशा हना, इं इस्राएलीपुकीमी परमप्रभु यावेमी पाप रे प्रोंडब ख्रीस्त कली रागीमी सोइशशो देशो लोव्र थमा सुइशशो आ पबर्म साडलो पाइक्वा पुंडसाकड” दे माइक्तीमी। प्रेरित २६:६-७

21 मिनु मेकोपुकीमी पावल आ लोव्र नेंशा “इ पबर्म यहूदीया रे लोव्र, चिटी का यो मजा। मेक रे एक जाक्वशो लोकब सुइमी इ पबर्म मरिम्शो लोव्र पा दोस मगेम।

22 गोपुकीमी एको नक थमा सुइक्तीके आ पबर्म चहिं लोव्र नेतक। मेको लोव्र तेक तेक ब्रामे, मेक मेक जिचा पोक्वमे बाक्त, दे तुइशशो नकी। मोदेशो दुम्त हना यो, गो इ मिम्शो तुइक्वा दाक्नीकी, लेंशा गुम्चा” दे लोव्रसी थुम्शा गाक्तेकम। प्रेरित २४:१४; लुका २:३४

यहूदीपुकीमी ख्रीस्त आ लोव्र नेंशो

23 मिनु गुम्ची नाक्ती पावल आ बाक्तीकेमी शुश मुर खुम्साकम। मिनु सुनी रे नाक्दो सम्म पावलमी मेको आन कली एको लोव्र नेल्ल रुप्पाइक्तीमी। मोसा आ अरेशो नु परमप्रभु यावे आ लोव्र पाइब आन ब्रेक्वशो लोव्र रे शेंशा, परमप्रभु यावे आ सोइशशो ख्रीस्त चहिं येसु बाक्ब देशा, परमप्रभु यावे आ राज्य डा लोव्र शेंताक्व।

24 आ लोव्र नेंबपुकी का निक्शीमी आ देशो थमा बाक्त, दे थमा सुइक्तेकम। का निक्शीमी चहिं थमा मसुदेम।

25 थमा सुइक्ब नु थमा मसुइक्ब दुम्शा ब्रातेकम। मिनु गाक्चामेनु, पावलमी थमा मसुइक्ब आन कली “परमप्रभु यावे आ सोक्तीम परमप्रभु यावे आ लोव्र पाइब यसैया इन किक्की पिपी आन पबर्म ठीक लोव्र पशो बाक्त।

26 मेकोमी ‘मेको मुर आन कली गुम्थ लावो। मेको आन कली “नेंचा दा नेंनीन। तन्न गे यो मरुप्नीनी। कोव्रचा दा कोव्रनीन। तन्न मताइनीनी।

27 मेको मुर आन थुं ग्याम्शो बाक्नीम। आन नोफा थॉइशो बाक्नीम। आन मिक्च क्रिप्शो बाक्नीम। मोदेशो मपशो नम हना, आन मिक्चीमी ताम वा, आन नोफाम नेंनेम वा, थुंमी रुबेम वा, आं गे लेम वा, गो सापदुमी वा” दे ब्रेक्वशो बाक्त’। यसैया ६:९-१०

28 परमप्रभु यावेमी अर्को रागी डा मुर आन, कली आ लोव्र नेंपाइक्ब। मेकोपुकीमी नोफा दाइशशा नेंशा टीनीम, दे तुइक्तीन” दे माइक्तीमी।

29 पावलमी मेको आन कली मोदेशो लोव्र पवानु, यहूदी लाम्तेकम। का निक्शीमी “आ लोव्र थमा बाक्ब” दैतेकम, का निक्शीमी “थमा ममाइ” दैतेकम। मिनु हेरर हेररा जिशा बोक्तेकम। प्रेरित १३:४६

पावलमी सांकळी गेचा तशो

30 मिनु पावल बसं निक्शी सम्म मुर आ खिंमी क्येट थाप्शा बाक्मेनु, शुश मुर पावल कली गुम्थ जाक्वा बाक्त। मेको गुम्थ जाक्ब आन कली “निस्सीने, बाक्कीने, लोव्रसी पय” दे शुश लोव्र शेंबाक्माक्त।

31 शेंचा मदुम्ब, दे सुइमी मदेंबाक्मा बाक्त। मिनु ठेयब थुं पा परमप्रभु यावे आ राज्य नु प्रभु येसु ख्रीस्त आ पबर्म शेंना शेंन बाक्माक्त। एफिसी ६:२०

## रोमी

**ब्रेक्ब मुर:** एको चिठी पावलम रोम सहर डा थमा सुइक्ब आन कली ब्रेक्शो बाक्ब।

**गेना ब्रेक्शो:** पावलम रोम सहर डा थमा सुइक्ब आन कली गुम्चा दाक्शो बाक्त। कोरिन्थ सहरम बाक्शा, एको चिठी ब्रेक्शो बाक्त। मेको यरूसलेमम ग्याइक्का पुंडसीशो ५८ ए. डी.म पेन्तीकोस क्येडा डोंइती दुम्शो बाक्त।

**मार ब्रेक्शो:**

१. डोंइती डा लोत्र रोमी १:१-१७
२. मुर नेल्लेम मरिम्शो पशो बाक्तेक्म। रोमी १:१८ - रोमी ३:२०
३. येसु ख्रीस्तमी थमा सुइक्ब आन कली परमप्रभु आ डोंइती ठीक सेल्ब। रोमी ३:२१ - रोमी ५:२१
४. थमा सुइक्तीकेम ग्राशो। रोमी ६:- ८:-
५. यहूदी नु रागी रागी डा मुर। रोमी ९:- ११:-
६. ठीक पाइब थमा सुइक्ब। रोमी १२:१ - १५:१३
७. नोले डा लोत्र। रोमी १५:१४ - १६:२७

**डोंइती डा लोत्र**

१ गो ख्रीस्त येसु आ वाइल पावल नड। आ सोइश्शो दुम्शा, परमप्रभु यावेमी आ ग्येरपाइक्ब लोत्र तुइक्पाइक्का कली योत्रचा पुंडसाक्यी। प्रेरित ९:१५; प्रेरित १३:२; गलाती १:१५

२ मेको लोत्र साइ नेसी रे परमप्रभु यावे आ लोत्र पाइबपुकीमी ब्रेक्शो बाक्मा बाक्त। रोमी १६:२५-२६; लूका १:७०; तीतस १:२

३ येसु ख्रीस्त पिप दाऊद आ थरमी मुर दुम्शा, जरमेशो बाक्माक्त। रोमी ९:५; २सामुएल ७:१२; मती २२:४२

४ तन्न मुर ला ममाइ। परमप्रभु यावे आ तौ यो बाक्ब। “आं तौ बाक्ब” दे तुइक्पाइक्का कली परमप्रभु यावेमी आ सोक्त आ सक्तिम येसु ख्रीस्त कली ब्रेक्शो रे सेंताक्व। मती २८:१८; प्रेरित १३:३३

५ मिनू येसु ख्रीस्तमी नेल्ल अर्को रागी डा मुर आन कली आ लोत्र तुइक्पाइक्का कली शिशो पा योत्रती। मुरपुकीमी येसु ख्रीस्त आ लोत्र टीमेक्ल देंशा, शेंथ सोइक्ताक्यी। रोमी १५:१८; प्रेरित २६:१६-१८; गलाती २,७,९

६ इन कली यो येसु ख्रीस्तमी “आं मुर दुम्मल” दे योत्रतु।

७ गे योत्रचा पुंडसीशा, परमप्रभु यावे आ दाक्शो रोम सहरम बाक्बपुकी इन कली एको लोत्र ब्रेक्ताक्ड। इं आफ परमप्रभु यावे नु प्रभु येसु ख्रीस्तम इन कली शिशो पा इन थुं नाइश्शा बाक्का गेम्सेक्ल। १कोरिन्थी १:२; २कोरिन्थी १:१-२; एफिसी १:१; गन्ती ६:२४-२६

**रोमी आन कली गुम्चा दाक्शो**

८ गेपुकीमी येसु ख्रीस्त कली थमा सुइश्शो नेल्लेमी तुइक्नीम। मिनू गो आं परमप्रभु यावे कली “रोम सहरम बाक्ब आन कली रिम्शो पाइतीनी” दे ठेयब सेल्लुड। रोमी १६:१९

९ मिनू गो परमप्रभु यावे आ सांकछी बाक्ब। गो गेय पना पान नु आ तौ आ ग्येरपाइक्ब लोत्र शेंना शेंन बाक्नड। गो इन पर्वम परमप्रभु यावे कली पुंडना पुंडन बाक्नुड, मेको थमा बाक्ब। एफिसी १:१६

१० मिनू परमप्रभु यावे आ दाक्तीकेमी “गो रोम सहरम बाक्ब थमा सुइक्ब आन कली रीब पा गुम्पाइय्वीनी” दे यो पुंडना पुंडन बाक्नुड। रोमी १५:२३, ३२; प्रेरित १९:२१

११ मारदे हना इन थमा सुइक्तीक थुं बारपा बोल्यो सेलु, दे इन कली गुम गुम दाक्ती। रोमी १५:२९

१२ मिनू मोपा आं थमा सुइश्शोमी इन कली नु इन थमा सुइश्शोमी आं कली नेल्ल इं थुं बारपदल, दे मिम्ताक्ड। २पत्रुस १:१

१३ आं लोकबपुकी, गो शुश खेयप “रोम सहर पिड” देंती, तन्न मुल सम्म पिने मचबु। अर्को रागी डा मुर आन कली येसु ख्रीस्त आ लोत्र शेंना शेंन गाक्ती। मेको लोत्र शेंदुनु, शुशेम थमा सुइक्तेक्म। गेपुकी नु यो बाक्शा, येसु ख्रीस्त आ लोत्र पचा दाक्नुड। मो पडानु, का निकशी थमा मसुइक्बमी यो थमा सुदमेक्ल, थमा सुइक्ब आन थुं बारल, दे मिम्नुड।

१४ मारदे हना ग्रीक नु अर्को रागी डा, जोक्ब नु मजोक्ब, पदेशो मपदेशो, नेल्ल आन कली येसु ख्रीस्त आ लोत्र शेंचान माल्लुड।

१५ मोपतीके रोमम बाक्ब इन कली यो ग्येरपाइक्ब लोत्र शेंचा माल्ती।

**ग्येरपाइक्तीक लोत्र आ सक्ति**

१६ ग्येरपाइक्तीक लोत्र शेंना शेंन गाक्डानु, मुने मपथु, शेंनुड। मारदे हना मेको लोत्रमी परमप्रभु यावे पाप रे प्रोंइतीक सक्ति बाक्ब। मेको लोत्र डोंइती यहूदी आन कली तुइक्पाइश्शो बाक्माक्त। नोले ग्रीक आन कली यो तुइक्पाइश्शो बाक्माक्त। भजन संग्रह ११९:४६; २तिमोथी १:८; १कोरिन्थी १:१८, २४

१७ परमप्रभु यावेमी मुर आन कली दोपा ठीक दुम्पाइक्बा, मेको आ लोत्र रे पा तुंडसीब। मिनू “ठीक पाइब आं कली थमा सुइश्शा ब्रोंडब” दे ब्रेक्शो बाक्ब। हबकुक् २:४; रोमी ३:२१-२२; गलाती ३:११

**मुर आन मरिम्शो पतीके**

18 मुरपुकीमी “थमा माइश्शो सु बाक्मे?” दे तुइक्चा मदाक्थु, मरिम्शो थुं पाइश्शो दुम्शा, मरिम्शो गेय पाम्तेक्म। मुर आन कली मोदेशो पशो तशा, परमप्रभु यावेम आ गाइश्शो कोइताक्व।

19 मारदे हना परमप्रभु यावे आ परबं मार तुइक्ने चाप्नीमी, मेको परमप्रभु यावेमी कोइशो बाक्त। प्रेरित १४:१५-१७; प्रेरित १७:२४-२८

20 मिनु रागी सेल्चा रे मतांडसीशो नु गेना हना यो सक्ति पाइश्शो परमप्रभु यावे आ सरीड नु रागीमी सेल्शो मार मार रे तुइसीब। मोपतीके मेकोपुकीमी मतुइक्तक देशा, माफ पुंडने मचाप्नीमी। भजन संग्रह १९:२; हिब्रू ११:३

21 परमप्रभु यावे नेल्ल क्येडा ठेयब बाक्ब, दे तुइश्शा यो ठेयब मसेलेम। परमप्रभु यावे कली “गे रिम्शो पाइतीनी” दे यो मदेंम। तन्न आन मिम्तीकेमी दूली पना पन बाक्तेक्म। मिनु आन मरुप्ब थुं क्येडा मरुप्ब दुम्त। एफिसी ४:१८

22 मजोक्थु यो ठेयब लेशशा बोरशा “गो शुश जोक्ब ठेयब नकी” देंतेक्म। मोपा मूर्ख दुम्तेक्म। १कोरिन्थी १:२०

23 मेकोपुकीमी गेना हना यो बाक्ब परमप्रभु यावे आ छेडछेड कली बेक्शा लाइब मुर, चिक्ब, जन्तु नु ग्रेशा गाक्ब जन्तु आन मूर्ति नु फाइक्तेक्म। प्रस्थान २०:४; व्यवस्था ४:१५-१९; भजन संग्रह १०६; येरमीया २:११

24 मिनु परमप्रभु यावेमी मो पशो तशा, मेको आन कली प्रोइतु। मिनु आन थुंमी मरिम्शो मिम्शा, ग्रोग्रा दिचा डा गेय पशा बिग्रेपमुम्तेक्म। प्रेरित १४:१६

25 मेकोपुकीमी परमप्रभु यावे आ थमा लोत्र कली जोल सेल्लेक्म। नेल्ल सेल्ब परमप्रभु यावे क्येडा आ सेल्शो मुर आन कली ठेयब सेल्लेक्म। गोपुकीमी मारेइ मारेइ सेल्ब परमप्रभु यावे कली गेना हना यो ठेयब सेल्य, आमैन।

26 मोपतीके परमप्रभु यावेमी मेको आन कली आन मिम्शो ग्रोग्रा दिचा डा गेय पपाइक्चा कली प्रोइतु। मेको आन मीशेमी यो मगारचा डा ग्रोग्रा दिचा डा गेय पाम्तेक्म।

27 मेकोपुकी वोंइश मुर नु मीश मुर व्वांडसीचा प्रोंइशा, वोंइश मुर नु वोंइश मुर व्वांडसाक्म। मोदेशो मरिम्शो गेय पतीके आन सजाइ ताम्तेक्म। लेवी १८:२२; लेवी २०:१३; १कोरिन्थी ६:९

28 आन थुंमी “परमप्रभु यावे कली तुइक्चा ममाल्ब” दे मिम्ताक्म। मोपतीके परमप्रभु यावेमी मेको आन कली आन मरिम्शो मिम्शो पचा गेशा, प्रोंइतु।

29 मिनु आन थुं पापम ब्रीशो दुम्तेक्म। मिनु मार पाम्तेक्म देशा हना, मारेइ मारेइ मरिम्शो ला पमुम्तेक्म, शिम दुम्तेक्म, थुं चोमुम्तेक्म, रुश पमुम्तेक्म, मुर साइक्तेक्म, जिम्तेक्म, जोल पाम्तेक्म, खुइश्शा मुर आन लोत्र पाम्तेक्म।

30 मुर आन कली शुक्शी पाम्तेक्म, परमप्रभु यावे कली काइ मदाक्थु, आइक्च सेल्लेक्म, शुश तुमुम्तेक्म, ठेयब लेल्लेक्म, बोरतेक्म। मारेइ मारेइ मरिम्शो पचा ला मिम्ताक्म, आम आफ कली मटीमे,

31 बी ब्यफ खोदेशो दुम्तेक्म, देशो लोत्र मखबेमे, अरु आन कली वारच मपामे, सुइ आन कली मदाक्तमे, शिशी यो मपामे।

32 परमप्रभु यावे आ निसाफ पतीक लोत्र तुइश्शा यो मोदेशो मरिम्शो पना पन गाक्तेक्म। अरु आन कली आन खोदेशो मरिम्शो पशो तशा “रिम्शो दुम्त” दे ग्येरसाक्म।

## 2

दोस गेब दोसी बाक्नीम

1 गे अरु आन कली दोस गेचा दाक्बपुकी, नेनीने, सु बाक्तीनी हना यो, दोस गेचा मदुम्ब, दे तुइक्तीन। दोस गेतीनी हना, दोसी दुम्नीनी, मारदे हना दोस गेबपुकी दोस ताइब आन पशो गेय खोदेशोन पशो बाक्नीम, दे रुपीन। मती ७:२; यूहन्ना ८:७; याकुब ४:१२

2 परमप्रभु यावेमी मरिम्शो गेय पाइब आन कली ठीक निसाफ पशा, सजाइ गेब, दे तुइक्नय।

3 गे अरु आन कली दोस गेशा, गे चहिं खाल का डा पाइतीनी हना “गो परमप्रभु यावे आ सजाइ रे ब्रोंइचा ताइनीकी” दे मिम्नीनी?

4 मिनु गे परमप्रभु यावेमी मुर आन कली दाक्तीके, फाल्तीके नु आ गे लेत्नीनी कों, दे रिम्तीके कली आइक्च मिम्नीनी? परमप्रभु यावेमी “आन थुं आं गे लेत्नीमी कों” दे रिम्शो मतुइक्नीनी? २पत्रुस ३:९,१५

5 इन थुं परमप्रभु यावे गे मलेत्तीके परमप्रभु यावे आ गाइश्शो तेम्नीनी। मिनु आ ठीक निसाफ पची नाक्त शुश सजाइ ताइनीनी।

6 परमप्रभु यावेमी मुर आन पशो कोत्रशा, दोदेशो पामे मोदेशो पाइब। येरमीया ३२:१९; मती १६:२७; २कोरिन्थी ५:१०

7 सुमी परमप्रभु यावे आ राज्य माल्शा, रिम्शो गेय पना पन बाक्नीमी नु गेना हना यो ब्रोंइचा ताइनीमी, मेको गेना हना यो परमप्रभु यावे नु बाक्चा ताइनीम।

8 तन्न आंम कली ला मिम्बपुकी, थमा लोत्र मटीबपुकी, जोल लोत्र थमा सुइक्बपुकी परमप्रभु यावे आ गाइश्शो चुरशो ताइनीम। २थिस्सलोनिकी १:८

9 मरिम्शो पाइबपुकी हिंशा बाक्शा, शुश श्येत जाइनीम। नेल्ल आन क्येडा डोंइती यहूदी सजाइ ताइनीम। मिनु ग्रीक यो सजाइ ताइनीम।

10 रिम्शो पाइबपुकी परमप्रभु यावे आ राज्य जाक्शा, मान तशा, आन थुं नाइश्शा बाक्चा ताइनीम। डोंइती यहूदी आन कली मोदेशो दुम्ब। मिनु ग्रीक आन कली यो मोदेशो दुम्ब।

11 मारदे हना परमप्रभु यावेमी मुर आन कली आइक्च जात, ठेयब जात मतिल्लथु ठीक निसाफ पाइब। २इतिहास १९:७; प्रेरित १०:३४; कलस्सी ३:२५; १पत्रुस १:१७

12 परमप्रभु यावे आ अरेशो लोत्र मतुडक्थु, पाप पाइबपुकी मेको आन मतुडशोमीन जाम्शा लाइनीम। परमप्रभु यावे आ अरेशो लोत्र तुडशशा यो पाप पाइबपुकी मेको लोत्रमीन निसाफ पचा पुंडसीनीम।

13 परमप्रभु यावे आ अरेशो लोत्र नेशा ला मुर ठीक मदुम्नीम। आ देशो पशा ला ठीक दुम्नीम। ब्यवस्था ६:२५; मत्ती ७:२१; याकूब १:२२

14 मोपतीके अर्को रागी डा मुरपुकीमी परमप्रभु यावे आ अरेशो लोत्र मतुडक्ताकम हना यो, मार पचा दुम्बा, मार पचा मदुम्बा, दे तुडशशा, गेय पाइनीमी, मेको आन आगामी अरेशो लोत्र बाक्ब। प्रेरित १०:३५

15 मेको मुर आन थुमी अरेशो लोत्र ब्रेक्सीशो बाक्ब, दे कोइनीम। मेको आन थुमी आन पशो आ पर्वम रिम्शो बाक्ब देय मरिम्शो बाक्बा सांकली गेब। रोमी १:३२

16 मिनु परमप्रभु यावे आ निसाफ पची नाक्त मुर आन खुडशशा पशो कली निसाफ पाइब। आं शेशो ग्येरपाइक्तीक लोत्र परमप्रभु यावेमी येसु ख्रीस्त आ पतीकेमी निसाफ पाइब। लूका ८:१७

यहूदीम यो पाप पशो

17 मिनु गे “गो यहूदी ठेयब जात नकी। परमप्रभु यावे आ अरेशो ताइतक, आ योत्रशो मुर नकी” दे मिम्नीनी।

18 परमप्रभु यावे आ दाक्शो तुडक्नीनी, मार पचा दुम्बा, मार पचा मदुम्बा तुडक्नीनी। मारदे हना गे अरेशो लोत्र शेंसीशो बाक्नीनी,

19 इन थुमी “गो जोक्ब नड, गो मिक्च मताइब आन कली लां कोइब नड। छिडछिडम बाक्ब आन कली बत्ती दाब नड। मत्ती १५:१४

20 हेथे गाक्ब आन कली रिम्शो लां कोइब नड। मशेंसीशो आन कली शेंब नड, गो अरेशो लोत्र जोक्ब तुडक्ब बाक्नुड” दे मिम्नीनी।

21 तन्न अर्को आन कली शेशो, आंम कली मशेंसीनीनी। खुड मपचा दे शेंनीनी। तन्न गे खुड पाइनीनी। भजन संग्रह ५०:१६-२१; मत्ती २३:२,४

22 मुर आन मीश मलाइक्चा, दे शेंनीनी, तन्न लाइक्नीनी। मूर्ति कली तशा, ग्राम्रा दीनीनी, तन्न मन्दीर रे मूर्ति खुड पा लाइक्नीनी।

23 परमप्रभु यावे आ अरेशो लोत्र रिम्शो बाक्ब देंनीनी, तन्न इन मट्टीकेमी परमप्रभु यावे कली आइक्च सेलनीनी।

24 इन मोदेशो पशो आ पर्वम “अर्को रागी डा मुरपुकीमी परमप्रभु यावे आ नें आ पर्वम शुक्शी पाइनीम” दे ब्रेक्शो बाक्ब। यसैया ५२:५

25 गे खोइक्तीक चिनु खोइशशा, परमप्रभु यावे आ आ अरेशो लोत्र टीतीनी हना, रिम्शो दुम्ब। तन्न खोइक्तीक चिनु खोइशशा आ अरेशो मटीतीनी हना, गे खोइक्तीक चिनु मखोइशशो खोदेशो दुम्नीनी।

26 खोइक्तीक चिनु मखोइशशो, तन्न परमप्रभु यावे आ ठीक पतीक नेल्ल पाइब हना, मेको खोइक्तीक चिनु खोइशशो खोदेशो बाक्ब। गलाती ५:६

27 मेको अर्को रागी डा खोइक्तीक चिनु मखोइशशो मुरपुकीमी यहूदी आन क्येडा आंमा आन थुं रे ठीक पाइनीम। मिनु निसाफ दुम्ची ना परमप्रभु यावे कली मटीब यहूदी आन कली दोस गेनीम।

28 रांमी खोइक्तीक चिनु ला बाक्शा, परमप्रभु यावेमी योत्रशो यहूदी मदुम्नीम। येरमीया ४:४

29 मार पा यहूदी दुम्नीम देशा हना, मार पचा दुम्बा, मार पचा मदुम्बा, मेको तुडशशा, परमप्रभु यावे आ सोक्तीम थुंम खोइक्तीक चिनु खोइशशा ला परमप्रभु यावे आ मुर दुम्नीम। मेको आन कली मुरपुकीमी ठेयब मसेलनीम। तन्न परमप्रभु यावेमी नेल्ल तुडशशा “रिम्शो पाइतीनी” देब। ब्यवस्था ३०:६; फिलिप्पी ३:३; कलस्सी २:११

### 3

परमप्रभु आ निसाफ

1 मोदेशो बाक्त हना, यहूदीपुकीमी अरु आन क्येडा मार ताइनीमी? खोइक्तीक चिनु खोइशशो मार दुम्बाक्डा?

2 अरु आन क्येडा शुश तशो बाक्तेक्म। डोइती परमप्रभु यावेमी मेको आन कली आ लोत्र तुडक्पाइक्चा कली योत्रतु। रोमी ९:४; ब्यवस्था ४:७-८; भजन संग्रह १४७:१९-२०

3 का निक्शीमी परमप्रभु यावे आ अरेशो लोत्र मटीमे। मो पाम्तेक्म हना यो, परमप्रभु यावे आ लोत्र जोल मदुम्ब। रोमी ९:६; रोमी ११:२९; २तिमोथी २:१३

4 मुर आन देशो लोत्र मजाक्तीक। परमप्रभु यावे आ देशो चहिं गेना हना यो थमा दुम्ब। “इन लोत्र ठीक बाक्ब। इन मुर आन कली निसाफ पतीक यो ठीक बाक्ब” दे ब्रेक्शो बाक्ब। भजन संग्रह ५१:६; भजन संग्रह ११६:११

5 गो इं मरिम्शो पशो परमप्रभु यावे कली रिम्शो देशा कोइताक्च हना, गो मार देंनय डा? परमप्रभु यावेमी मो देब आन कली सजाइ गेशो मरिम्शो बाक्बा डा? शुश मुरपुकीमी मोदेशो मिन्नीम।

6 तन्न परमप्रभु यावेमी मेको आन कली सजाइ गेशो मरिम्शो ममाइ। परमप्रभु यावेमी निसाफ मपशो हना, मुर आन कली दोपा दोस गेशा, सजाइ पाइबा?

7 आं मरिम्शो पशोमी परमप्रभु यावे आ रिम्शो पतीके तपाइशशा, परमप्रभु यावे कली ठेयब सेलता हना, मारदे पापी सुइक्चा पुंडसीनुडा?



8 मुरपुकीमी आं लोत्र नेशा “पापमी परमप्रभु यावे कली ठेयब सेल्ब, दे शेंब” दे आं देशो लोत्र कली दूली सेल्लेक्म। गो दूली मशेंदुमी। मारदे हना पाप पशोमी परमप्रभु यावे कली ठेयब मसेल्ब। मोदेंब आन कली परमप्रभु यावेमी सजाइ गेप्टु हना, ठीक दुम्ब। रोमी ६:३

मुर नेल्लेमी मरिम्शो पशो

9 मिनु मार देंचा देशा हना, अर्को जात क्येडा गो यहूदी रिम्शो मुर नया? मनय। मारदे हना गो यहूदीपुकी यो अर्को जात डा मुर खोदेशो पा पापी बाक्नय। रोमी १:१८; रोमी २:२४

10 मिनु “रिम्शो पाइब सुइ मबाक्नीम। रिम्शो पाइब का यो मबाक्ब। अय्युब ४:१७

11 परमप्रभु यावे कली तुइक्ब सुइ मबाक्नीम। मेको कली ममाल्ब यो मबाक्नीम।

12 नेल्लेमी रिम्शो लां प्रोइशा हेंथे गाक्नीम। रिम्शो पाइब का यो मबाक्नीम” दे ब्रेक्शो बाक्ब। भजन संग्रह १४:१-३

13 “ग्रान्रा दिचा डा लोत्र ला पाइनीम। जोल पाइनीम। शुक्शी पा थुं स्वाइक्चा डा लोत्र पाइनीम। भजन संग्रह ५:१०; भजन संग्रह १४०:४

14 मेको आन शोत्र सराप नु कशो लोत्रमी ब्रीशो बाक्ब।” भजन संग्रह १०:७

15 “मेकोपुकीमी मारेइ ममिम्थु मुर साइक्नीम।

16 ते ते गाक्मा, मेक मेक मारेइ महेंथु खतम पाइनीम।

17 दुशा गारशा बाक्चा नु वारच पचा मतुइक्नीम।” यसैया ५९:७-८; लुका १:७९

18 “परमप्रभु यावे कली मान पा महिनीम” दे ब्रेक्शो बाक्ब। भजन संग्रह ३६:२

19 अरेशो लोत्र अरेशो टीब आन कली ब्रेक्शो बाक्ब। मेको लोत्र मटिम्तेक्म हना, सिक्सी पचा माल्नीम। यहूदी नु रागी डा मुर नेल्ल पापी दुम्तेक्म। मोपतीके परमप्रभु यावेमी मुर नेल्ल आन कली निसाफ पाइब। रोमी २:१२; गलाती ३:२२

20 मिनु अरेशो लोत्र पशा, सुइ ठीक मटुम्नीम। मारदे हना आ अरेशो लोत्र तुइइशा, गो मरिम्शो पाइब बाक्नय, दे तुइक्नय। भजन संग्रह १४३:२; गलाती २:१६; रोमी ७:७

दोपा ठीक सेल्थो

21 तन्न मुल रे अरेशो लोत्र मबाक्थुन, परमप्रभु यावे रे मुर आन कली ठीक पतीक जाक्शो बाक्ब। परमप्रभु यावेम ब्रेक्पाइइशो लोत्र नु आ लोत्र पाइब आन देशो गारब। रोमी १:१७; प्रेरित १०:४३

22 परमप्रभु यावे आ ठीक पतीके येसु ख्रीस्त कली थमा सुइक्ब नेल्ल आन कली बाक्ब। यहूदी बाक्तेक्म हना यो, अर्को रागी डा मुर बाक्तेक्म हना यो, नेल्ल कान बाक्नीम। फिलिप्पी ३:९

23 मारदे हना नेल्लेमी पाप पाम्तेक्म। मोपतीके परमप्रभु यावे आ छेडछेडम जाक्दीन्ने मचाप्नीम। उत्पत्ती ८:२१

24 सु सुमी चहिं ख्रीस्त येसु कली थमा सुदमे, मेको आन कली परमप्रभु यावेमी आन थुं ठीक दुम्पाइक्ब। रोमी ५:१; २कोरिन्थी ५:१९; एफिसी २:८

25 डोइती परमप्रभु यावेमी रिम्शा, पापी आन कली सजाइ मगेवा बाक्त। नोले मेको आन जचा डा सजाइ येसु ख्रीस्त कली जपाइइशा बेक्चा गेशा, मेको आन पाप क्याम्ताक्व।

26 मोपा परमप्रभु यावेमी “ठीक निसाफ पाइनुइ” दे कोइताक्व। मिनु येसु कली थमा सुइक्ब आन कली “इन पाप ग्याम्शा, ठीक दुम्तीनी” देंब। लेवी १६:१५-१६; हिब्रू ४:१६

27 नेल्ल परमप्रभु यावेमी पशो बाक्ब। सुइमी ठेयब सेल्सीशा “गो गेय नेल्ल रिम्शो पा ठीक दुम्ती” देंने मचाप्नीम। ठीक दुम्तीके मुर आन गेय रे मपीब। तन्न थमा सुइक्तीके रे पीब। १कोरिन्थी १:२९, ३१

28 गोपुकीम “परमप्रभु यावे आ अरेशो लोत्र डा गेयम मुर आन कली ठीक मसेल्ब” दे शेंनीकी। थमा सुइइशोमी ला मुर आन कली ठीक सेल्ब। गलाती २:१६

29 परमप्रभु यावे यहूदी आन परमप्रभु यावे ला बाक्बा डा? नेल्ल अर्को रागी डा मुर आन परमप्रभु यावे बाक्ब। रोमी १०:१२

30 मारदे हना परमप्रभु यावे का ला बाक्ब। मिनु मेकोमी खोइक्तीक चिनु खोइइशो नु मखोइइशो आन थमा सुइक्तीके कोत्रशा, मुर आन कली ठीक दुम्पाइक्ब। रोमी ४:११-१२

31 मो देंतय हना, परमप्रभु यावे आ अरेशो लोत्र क्याम्नीकी? ममाइ, येसु ख्रीस्त कली थमा सुइइशोमी परमप्रभु यावे आ अरेशो लोत्र टीतय, दे रुब्य। मती ५:१७

## 4

अब्राहाम मिम्शा शेंशो

1 इ किकी अब्राहाममी रिती थिती धर्म पशो तशा, परमप्रभु यावेमी ठीक दुम्पाडा डा? ममाइ।

2 गेय पशा, ठीक दुम्शो हना, मुर आन कली “गो रिम्शो पाइब नड” देंने चाप्ब वा। तन्न परमप्रभु यावे कली चहिं मो देंने मचबा बाक्त।

3 मार ब्रेक्शो बाक्ब देशा हना “अब्राहाममी परमप्रभु यावे कली थमा सुइक्तु। मिनु परमप्रभु यावेमी ठीक दुम्पाइक्तु” दे ब्रेक्शो बाक्ब। उत्पत्ती १५:६; गलाती ३:६

4 गेय पाइबपुकीमी गेय पशो डा गाल्च ताइनीम। तन्न शिशी पा गेशो ममाइ। रोमी ११:६

5 तन्न सुमी गेय मपाइब, डोइती मटीब मुर आन कली ठीक पाइब कली थमा सुइक्बा, मेको आ थमा सुइक्तीके ठीक बाक्ब। रोमी ३:२६

6 इं किकी दाऊदमी “मुरुमी गेय मपथु, ठीक दुम्शा, मेको ग्येरसीशो मुर बाक्नीम, दे परमप्रभु यावे आ देशो बाक्ब” देशो बाक्त।

7 परमप्रभु यावे आ अरेशो मटितीके नु आन पाप क्याम्चा पुंडसीशो मुर ग्येरसीशो मुर बाक्नीम।

8 प्रभुमी पाप क्याम्चा पुंडसीशो मुर कली दोस मगेब। मेको ग्येरसीशो मुर बाक्ब। भजन संग्रह ३२:१-२

9 मिनु मुल मार देंचा? ग्येरसीशो मुर खोइक्तीक चिनु खोइश्शो बाक्नीम देय मबाक्नीमी? मारदे हना अब्राहाममी थमा सुइक्तु। मिनु परमप्रभु यावेमी मेको कली ठीक दुम्पाइक्तु।

10 खोइक्तीक चिनु खोइक्चा क्येडा डोंइती अब्राहाममी परमप्रभु यावे कली थमा सुइक्तु। मिनु परमप्रभु यावेमी आ कली थमा सुइश्शोमी अब्राहाम कली ठीक दुम्पाइक्तु।

11 आ थमा सुइश्शोमी ठीक दुम्पाइक्चा कली खोइक्तीक चिनु छाप खोदेशो पा ताप्तु। मारदे हना मेको डोंइतीन थमा सुइक्ब बाक्त। मोपतीके मेको खोइक्तीक चिनु मखोइश्शो थमा सुइक्ब, ठीक दुम्शो नेल्ल आन आफ दुम्त। उत्पत्ती १७:१०-११

12 अब्राहामम खोइक्तीक चिनु खोइक्ब आन आफ ला ममाइ, खोइक्तीके चिनु मखोइक्थु थमा सुइक्ब आन लां गाक्ब आन आफ यो दुम्त। मती ३:९

13 परमप्रभु यावेमी अब्राहाम कली अरेशो लोत्र टितीके लोत्र मगेशो बाक्त। तन्न थमा सुइश्शो तशा “इ चच युइ शुश दुम्शा, रागी नेल्ल ब्रीनीम” दे लोत्र गेशो बाक्त। उत्पत्ती २२:१७-१८

14 अरेशो लोत्र टीब ला परमप्रभु यावे आ मुर दुम्नीम हना, थमा सुइक्तीके नु थोकशो लोत्र जाम्शा लाइब।

15 मारदे हना परमप्रभु यावे आ अरेशो लोत्रमी आ गाइक्तीक पोक्ब। मेको लोत्र मबाक्शो हना, पाप मतुंडस वा। रोमी ३:२०; रोमी ५:१३; रोमी ७:८,१०

16 थमा सुइक्तेक्म हना, शिशी ताइनीम। अरेशो टीबपुकीम यो शिशी ताइनीम। सु सुमी अब्राहामम खोदेशो पा, परमप्रभु यावे कली थमा सुदमे, मेको आ थोकशो लोत्र डा मुर नु अब्राहाम आ आल दुम्नीम।

17 अब्राहाम आ पर्वम “गो इ कली शुश रागी डा मुर आन किकी सेल्लन” दे ब्रेक्शो बाक्ब। अब्राहाममी “परमप्रभु यावे बेक्शो रे सेंब नु मारोइ मबाक्शो कली बाक्शो खोदेशो पा ब्रेश्शा सेल्ल” दे थमा सुइश्शो बाक्ब। उत्पत्ती १७:५; २कोरिन्थी १:९; हिब्रू ११:१९

18 “शुश रागी डा मुर आन किकी सेल्लन” दे परमप्रभु यावे आ गेशो लोत्र थमा सुइश्शा, आस पचा डा मबाक्माक्त हना यो, आस पा बाक्माक्त। उत्पत्ती १५:५

19 मेको सहे का बर्स दुम्शा, आल मथिथु, आ रां बेक्शो खोदेशो दुम्शा, आ मीश सारा शुश बर्स दुम्शो बाक्ब, दे तुइश्शा यो थमा सुइक्ना सुइक्न बाक्माक्त। उत्पत्ती १७:१७

20 दालीर मपथु, आ थमा सुइक्चा बारना बारन लशा, परमप्रभु यावे कली टेयब सेला बाक्त।

21 परमप्रभु यावेमी आ गेशो लोत्र दोपा यो खान्ने चाप्ब, दे थमा पा तुइश्शो बाक्माक्त। हिब्रू १:११

22 मोपा थमा सुइश्शोमी परमप्रभु यावेमी अब्राहाम कली ठीक दुम्पाइक्तु। उत्पत्ती १५:६

23 मेको कली ठीक दुम्पाइक्तु, दे ब्रेक्शो लोत्र अब्राहाम कली ला ब्रेक्शो ममाइ।

24 गो नेल्ल इं कली यो ब्रेक्शो बाक्ब। मारदे हना सु सुमी इं प्रभु येसु कली बेक्शो रे सेंपाइक्ब परमप्रभु यावे कली थमा सुइक्नीमी, मेको आन कली ठीक दुम्पाइक्ब।

25 येसु ख्रीस्त इं पाप क्याम्चा कली साइक्चा पुंडसाक्व। मिनु इं कली ठीक दुम्पाइक्चा कलीन बेक्शो रे सेंचा पुंडसाक्व। रोमी ८:३२-३४; यसेया ५३:४-६

## 5

परमप्रभु आ गाइश्शो रे ब्रोंइशो

1 मिनु गो थमा सुइश्शोमीन ठीक दुम्पाइक्चा पुंडसीशा, इं प्रभु येसु ख्रीस्त रे पा परमप्रभु यावे नु दुशा बाक्तीक दुम्शो बाक्त। रोमी ३:२४,२८; यसेया ५३:५

2 येसु ख्रीस्त आ पतीके गो परमप्रभु यावे आ शिशी ताइतय। मिनु परमप्रभु यावे नु बाक्चा ताइनीकी, दे आस पशा, ग्येरशा बाक्तय। यूहन्ना १४:६; एफिसी ३:१२

3 मेको ला ममाइ। श्येत जयानु, ग्येरनय। मारदे हना श्येत जशोमी फाल्तीक सक्ति बारपाइक्ब। याकूब १:२-३

4 मिनु श्येत फाल्बपुकी रिम्शो थुं पाइश्शो दुम्नीम। रिम्शो थुं पाइश्शोपुकी आस पाइब दुम्नीम, दे तुइक्ताक्य। याकूब १:१२

5 मिनु मोदेशो आस पतीकेम मुर आन कली बोल्यो सेल्लब। मारदे हना परमप्रभु यावे आ सोक्त आ पतीकेमी परमप्रभु यावे आ दाक्तीके इं थुंम मोइश्शो बाक्त। भजन संग्रह २२:६; भजन संग्रह २५:३,२०; हिब्रू ६:१८-१९

6 डोंइती मचाप्ब बाक्यानु, ख्रीस्त परमप्रभु यावे कली मटीब आन पर्वम बेक्त।

7 ठीक पाइब आन बेक्चा आ पा डा सुइ बेक्बा कौ? रिम्शो पाइब आ पा डा सुइ बेक्ने चाप्बा कौ?

8 तन्न परमप्रभु यावेमी इं कली शुश दाक्शा, गो पापी, इं बेक्चा आ पा डा ख्रीस्त कली बेक्चा गेत्तु। यूहन्ना ३:१६; १यूहन्ना ४:१०

9 मोपतीके ख्रीस्त आ हुशेमी इं पाप क्याम्शा, ठीक सेल्ल्या पुंडसाक्व। मोशो ला ममाइ। गोपुकी येसु ख्रीस्त आ पतीकेमी परमप्रभु यावे आ गाइश्शो रे ब्रोंइचा ताइनय, दे तुइक्ताक्य। रोमी १:१८; रोमी २:५,८

10 डोंडती गोपुकी परमप्रभु यावे आ जोरी सत्रु दुम्शा बाक्यानु, आ तौ आ बेक्शोमीन परमप्रभु यावेमी इ कली आ दाकशो मुर सेल्लु। आ दाकशो मुर दुम्शा, येसु आ ब्रोंडशोमीन सजाइ जचा रे मब्रोंडया डा? ब्रोंडतया। २कोरिन्थी ५:१८; रोमी ८:७; कलस्सी १:२१

11 मेको ला ममाइ, इ प्रभु येसु ख्रीस्तम इ पशो पाप रे प्रोंडतीके आ पबर्म परमप्रभु यावे आ मुर दुम्शा ग्येरनय।

आदम नु येसु ख्रीस्त

12 मिनु डोंडती मुर कामी परमप्रभु यावे आ देशो लोव्र मटितीके मुर बेक्ब दुम्मा बाक्त। मिनु मेको आ तमी तौ चच युइ नेल्ले यो बेक्ब दुम्मा बाक्त। मारदे हना मेकोपुकीमी यो पाप पामे बाक्त। उत्पत्ती ३:१९; रोमी ६:२३; उत्पत्ती २:१७

13 मेना परमप्रभु यावे आ अरेशो लोव्र मबेक्पाइशो बाक्माक्त। मोपतीके पाप मग्रूशो बाक्माक्त। अरेशो लोव्र मबाक्थु, मुर दोस मताइब दुम्शो बाक्तेक्म। रोमी ४:१५

14 तन्न आदम आ पाला रे मोसा आ पाला सम्म मुरपुकी बेक्ना बेक्न लमा बाक्त। आदम खोदेशो मरिम्शो मपामे बाक्त हना यो, बेक्मा बाक्त। आदम चहिं नोले डा पाला कली कोंडतीक दुम्शो बाक्त।

15 आदम आ मटिश्शो परमप्रभु यावे आ शिशी पशो खोदेशो ममाइ। मुर का आ मटितीकेम मुर नेल्ल कली बेक्ब सेल्लतीमी। मेको क्येडा परमप्रभु यावे नु मुर का दुम्शो येसु ख्रीस्त आस गेशो शिशी ठेयब बाक्ब।

16 येसु ख्रीस्त आ गेशो आदम आ पशो खोदेशो ममाइ। मारदे हना आदम आ पशोमी मुर नेल्ल खतम दुम्तेक्म। येसु ख्रीस्त आ गेशो शिशीमी पाप पशो शुश मुर आन कली ठीक दुम्पाइक्तु।

17 दोपा आदम आ पशोमी बेक्तीकेम मुर आन कली हुकुम पवा, मोपा मेको आन क्येडा येसु ख्रीस्त आ गेशो शिशी नु आ ठीक सेल्लतीकेमी मुर आन कली ब्रोंडचा गेशा हुकुम पाइब।

मेको पपाइक्ब नेल्ल येसु ख्रीस्त बाक्ब।

18 दोपा मुर कामी पाप पतीके मुर नेल्ल जाम्शा लाइब दुम्मा, मोपा मुर का आ ठीक पतीकेम मुर नेल्ल आन पाप क्याम्शा, ठीक सेल्चा पुंडसीशा, ब्रोंडचा ताइनीम। १कोरिन्थी १५:२१-२२

19 परमप्रभु यावे आ देशो मटीव मुर का आ पतीके दोपा पापी शुश दुम्मा, मोपा परमप्रभु यावे आ देशो टीब कामी चहिं शुश मुर आन पाप क्याम्शा, ठीक सेल्लतीमी। रोमी ३:२६; यसेया ५३:११

20 परमप्रभु यावेमी आ अरेशो लोव्र बेक्पदा रे पाप तुइक्ना तुइक्न लाम्तेक्म। मिनु पाप ठेयब दुम्मेनु, परमप्रभु यावे आ शिशी मेको क्येडा ठेयब दुम्त। रोमी ७:८, १३; गलाती ३:१९

21 दोपा पापमी मुर आन कली बेक्पाइक्ब सेल्लमी, मोपा येसु ख्रीस्त आ शिशी नु ठीक पतीकेमी मुर आन कली परमप्रभु यावे नु गेना हना ब्रोंडशा बाक्ब सेल्ल। मेको नेल्ल इ प्रभु येसु ख्रीस्तम पशो बाक्ब। रोमी ६:२३

## 6

पापम बेक्शा, ख्रीस्तम सेंसीशो

1 मिनु मो हना, मार देंचा? परमप्रभु यावेमी गो इ कली शुश शिशी पवल, दे गोपुकीमी पाप पस डा पस बाक्चा डा? रोमी ३:५-८

2 मो पचा मदुम्ब। बेक्शो मुरपुकीम खांखा दोपा पाप पस डा पस बाक्ने चाप्नीमी डा? गो इ के पाप पतीक थुं बेक्त।

3 ख्रीस्त येसु कली थमा सुइश्शा, आ नें नु आ बेक्तीकेमी ब्वाक्कुम खुम्शा, गुंडपांडसाक्व, दे गे मतुइक्नीनी? गलाती ३:२७

4 मिनु ब्वाक्कुम गुय्यानु, गो येसु बेक्शा थिम्शो खोदेशो दुम्तय। मिनु परमप्रभु यावे आ सत्किमी ख्रीस्त कली बेक्शो रे सेंपाइश्शो खोदेशो पा गो यो सेंसीशा, नक लाम गाक्तय। कलस्सी २:१२; १पत्रुस ३:२१

5 गो दोपा मेको आ बेक्शो नु कान दुम्या, मोपा आ सेंसीशो नु यो कान दुम्तय।

6 येसु ख्रीस्त कली शीम केप्शा कांटी थोक्शा साइक्तीके इ पापम ब्रीशो थुं आ सत्कि जाम्त। मोपतीके मुल गो पाप आ वाइल मबाक्नय। गो मेको लोव्र तुइक्चा मालनय। गलाती ५:२४

7 बेक्शो मुर पाप रे ब्रोंडशो बाक्नीम।

8 गो येसु ख्रीस्त नु बेक्तय हना, मेको नुन ब्रोंडनय, दे थमा सुइक्नय।

9 मारदे हना येसु यो बेक्शो रे सेंसीशा, मुल गेनायो मबेक्चा डा पा ब्रोंडत। मुल मेको गेनायो मबेक्ब।

10 पाप क्याम्शा कली काले बेक्त। नोले सेंसीशा, मुल परमप्रभु यावे नु ब्रोंडशो बाक्ब। हिबू ९:२६-२८

11 मोपतीके गेपुकीमी यो आंम कली पाप आ पबर्म बेक्शो नु ख्रीस्त येसु आ पतीकेमी परमप्रभु यावे कली ब्रोंडनय, दे मिम्तीन। २कोरिन्थी ५:१५; १पत्रुस २:२४

12 इन बेक्शा लाइब रां कली पापम हुकुम पचा मगेने। उत्पत्ती ४:७

13 इन गुइ खोइली, मिक्च, शोव्र, रां नेल्ल कली मरिम्शो मपपतीन। तन्न बेक्शो रे सेंसीशो मुर खोदेशो पा, परमप्रभु यावे कली जिम्मा गेंसीशा, आ रिम्शो गेय पने। रोमी १२:१

14 पापमी इन कली मारेइ पपाइक्ने मचाप्ब, मारदे हना परमप्रभु यावे आ अरेशो लोव्रमी इन कली दोसी मसेल्थु, परमप्रभु यावेमी शिशी पाइक्चा पुंडसाक्नी। रोमी ७:४-६; १यूहन्ना ३:६; रोमी ५:१७,२१

15 परमप्रभु यावे आ अरेशो लोव्रमी इ कली दोसी मसेल्थु, परमप्रभु यावे आ शिशी ताइतय हना, पाप पचा दुम्ब, दे मिम्चा डा? मोदेशो मिम्चा मदुम्ब।

16 तेको होत्रप आ वाइली दुम्या, मेको होत्रप कली टिचा मालनय, दे मतुइकनीनी? “पाप पना पन बाक्य” देंतीनी हना, पाप आ वाइली दुम्या, बेकनीनी। “परमप्रभु यावे आ देशो टिय” देंतीनी हना, परमप्रभु यावे आ वाइली दुम्या, ठीक पाइब दुम्नीनी। यूहन्ना ८:३४

17 इन पबंम परमप्रभु यावे कली “मेको आन कली रिम्शो पाइतीनी” दे ठेयब सेलनुड। मारदे हना डोंइती गेपुकी पाप आ वाइल बाकतीनी। मुल चहिं इन थुं रे पा परमप्रभु यावे आ शेंशो दाकशा टीतीनी।

18 गेपुकी पाप रे ब्रोंइशा, ठीक पतीके आ वाइल दुम्तीनी। यूहन्ना ८:३२

19 इन कली रुप्पाइकचा कली चिनु लेंशा शेंनन्नी। दोपा गेपुकीमी इन गुड खोइल, मिक्च, शोत्र, रां नेल्लेमी ग्रॉग्रा दिशो गेय पशा, अरेशो लोत्र मटिनी, मोपा मुल इन थुं, रां नेल्ल ठीक पतीक आ वाइल दुम्या कली परमप्रभु यावे आ गेय पाइब मुर दुमीन।

20 डोंइती पाप आ वाइली बाकनीनु, ठीक पतीक रे डोन बाकतीनी।

21 इन पशो मिम्शा, मुल यो मुने पाइनीनी। मारदे हना इन मरिम्शो पशो बेकपाइकब बाक्त, दे तुइकताकनी। रोमी ८:६,१३

22 मुल गेपुकी मरिम्शो पचा रे प्रोंइचा पुंडसीशा, गे परमप्रभु यावे आ वाइल दुम्तीनी। मुल इन रिम्शो पतीके रे गे परमप्रभु यावे आ मुर दुम्या, गेना हना यो मेको नु ब्रोंइशा बाकचा ताइनीनी।

23 मरिम्शो पशो आ गाल्च बेकचा बाकब। परमप्रभु यावे आ गेशो शिशी चहिं ई प्रभु येसु ख्रीस्त रे पा गेना हना यो ब्रोंइशा बाकचा बाकब। रोमी ५:१२; उत्पत्ती २:१७; याकूब १:१५

## 7

अरेशो लोत्र प्रोंइशो

1 आं लोकबपुकी, मुल गो अरेशो लोत्र तुइकब इन कली शेंचा दाकती। मबेक्या सम्म ला अरेशो लोत्र कली टिचा मालनय।

2 ग्युंवे पशो मीश मुर आ वोंइश मबेकम सम्म कानुनमी आस नाता लीब। आ वोंइश बेक्त हना, आस नाता मलीब। १कोरिन्थी ७:३९

3 आ वोंइश मबेकथु, अर्को वोंइश खोइश्शा लत हना, मेकोम आस नाता खोइकब। तन्न आ वोंइश बेकशा नोले अर्को वोंइश खोइकतु हना, मेको मीश अरेशो लोत्र रे मारेइ दोस गेचा मपुंडसीब, मारदे हना मेको आ वोंइश बेकने थुम्शो बाकब।

4 आं लोकबपुकी, येसु ख्रीस्त बेकशोमी परमप्रभु यावे आ अरेशो लोत्र टिने मचाम्सीब देंतीक थुं बेक्त, दे रुपीन। मुल बेकशो रे सेंचा पुंडसीशो ख्रीस्त नु काथा दुम्या, इन पशो रे पा परमप्रभु यावे कली गेय पाइनय।

5 गो येसु ख्रीस्त रे डोन बाकयानु, परमप्रभु यावे आ अरेशो लोत्र रे पा पाप तुइश्शा यो पाप आ ग्रॉग्रा दिशोमी ब्रीशा शुश मरिम्शो पाइतय। मेको आ गाल्च बेकतीक बाकब। रोमी ६:२१

6 तन्न मुल गो अरेशो लोत्र रे ब्रोंइशा बाकनय। मारदे हना गो मरिम्शो पतीक आ ग्याइश्शो रे बेक्तय। मुल गो येसु ख्रीस्त आ सोक्त रे पा नक गेय पाइनय। अरेशो ब्रेकशो लोत्र प्रोंइने थुम्तय। रोमी ८:१-२; रोमी ६:२-४

अरेशो लोत्र नु पाप

7 मिनु मुल मार दैय देशा हना, परमप्रभु यावे आ अरेशो लोत्रमी पाप बाकबा? मो देशो ममिम्चा। परमप्रभु यावे आ अरेशो लोत्र मपढेडा सम्म गो पाप मतुइकतु। परमप्रभु यावे आ अरेशो लोत्रमी “मुर आन मार मार तशा मवलो” दे मब्रेकशो हना, वाल्चा आ पबंम गो मारेइ मतुइकतु वा। प्रस्थान २०:१७

8 मिनु पापम ब्रीशो आं थुमी शुश वाल्पाइकती। परमप्रभु यावे आ अरेशो लोत्र मबाकशो हना, पाप मयू वा, मेको बेक्त। रोमी ५:१३; १कोरिन्थी १५:५६

9 अरेशो लोत्र मपदेशो नड हना यो, पाप मतुइकतु वा। तन्न मेको लोत्र तुइकतु रे आं थुमी पाप बोक्त। मिनु बेकती।

10 परमप्रभु यावे आ अरेशो लोत्र ब्रोंइचा कली बाक्त हना यो, मेको लोत्रमीन बेकब सेलती। लेवी १८:५; याकूब १:१५

11 मारदे हना मेको अरेशो लोत्र टिने मचापतीके पापम खुम्शा साइकती। हिब्रू ३:१३

12 मिनु परमप्रभु यावे आ अरेशो लोत्र ठीक नु रिम्शो बाकब। १तिमोथी १:८

13 मिनु मार? ठीक नु रिम्शो लोत्रमी आं कली साइय्यी डा? ममाइ। पापम कका साइकती। परमप्रभु यावे आ देशो लोत्र रे पाप शुश मरिम्शो बाकब, दे तुइसीब। रोमी ५:२०

14 गोपुकीमी परमप्रभु यावे आ अरेशो लोत्र सोक्त पाइश्शो बाकब, दे तुइकनय। गो चहिं रांम बाकशा पाप आ वाइल बाकती। यूहन्ना ३:६

15 गो आं पशो आंमा मरुनुड। मारदे हना आं दाकशो मपाइनुड, आं काइ मदाकशो पाइनुड।

16 तन्न आं मदाकशो पाता हना यो, परमप्रभु यावे आ अरेशो लोत्र रिम्शो सुइकनुड।

17 आं मदाकशो पशो चहिं गो आं पशो ममाइ। आ आगाम बाकशो पापम पपाइकती।

18 रिम्शो पतीके गो नु मबा, दे रुप्ता। रिम्शो पपदाकती हना यो, रिम्शो पने मचबु। उत्पत्ती ६:५; उत्पत्ती ८:२१

19 मारदे हना रिम्शो गेय पड देंती, तन्न पने मचबु। मरिम्शो मपड देंडानु यो मरिम्शोन पाता।

20 आं मदाकशो पाता हना, गो आं पशो ममाइ। गो आ आगाम बाकशो पापमी मोदेशो पपाइकती।

21 तन्न आ थुमी गो रिम्शो पचा दाकती हना यो, मरिम्शो ला दुम्त।

22 गो आं थुमी परमप्रभु यावे आ अरेशो लोत्र दाकशा ग्येरसीनुड।

- 23 तन्न आं रांम अर्को अरेतीक का बाकब। मेको आं थुं डा दाकशो अरेतीक नु जीब। मिनु आं रांम बाकशो अरेतीकेमी आं कली प्याइशशा, पाप पपाइकब। गलाती ५:१७
- 24 मोपतीके थुं खाइशशा “मार मुर नडा? एको बेकशा लाइब पाप पाइब रां रे सुम प्रॉइबा?” दे डाकशा बाकनुड।
- 25 गो परमप्रभु यावे कली इं प्रभु येसु खीस्तम आ पतीके “गे रिम्शो पाइब बाकनीनी” दे ठेयब सेल्लुड। परमप्रभु यावे आ सोक्तीम ब्रीशो थुं आ देशो टीनुड। येसु खीस्त नु मबेकशो आं थुं नु रां चहिं पाप आ वाइली बाकब, दे तुइक्ताकड। १कोरिन्थी १५:५७

## 8

परमप्रभु आ सोक्त रे ब्रॉइशो

- 1 येसु खीस्तमी बाकब आन कली सजाइ मबाकब। रोमी ३३:३४
- 2 मारदे हना येसु खीस्त आ ब्रॉइचा गेब सोक्त आ अरेशो लोव्रमी इन कली पाप पचा नु बेकचा आ अरेशो लोव्र रे प्रॉइतु।
- 3 परमप्रभु यावेमी अरेशो लोव्र टिने मचाप्नीम, दे तुइशशा, आ तौ कली पापी बुद पा रागीम सोइक्ताकब। मोपा मेको कली मुर आन पाप आ पबर्म सजाइ गेप्टु। प्रेरित १८:३८; प्रेरित १५:१०; हिब्रू २:१७
- 4 मिनु परमप्रभु यावे आ ठीक पतीक लोव्र काप्या कली खीस्त सजाइ जपाइशशा, बेकचा गेप्टु। मोपा येसु आ पशोमी गो निसाफ ताइतय। परमप्रभु यावे आ सोक्त रे पा ब्रॉइशा बाकनय। गो रागी डा मुर खोदेशो मबाकनय। गलाती ५:१६, २५
- 5 सु सुमी रागी डा मुर आन थुं डा लोव्र ला मिन्नीमी, मेकोपुकीमी मुरुम पशो खोदेशो पाइनीम। सु सुमी परमप्रभु यावे आ सोक्तीम गेशो थुं डा लोव्र मिन्नीमी, मेकोपुकीमी चहिं परमप्रभु यावे आ सोक्त आ दाकशो पाइनीम।
- 6 मारदे हना मुर आ थुंमी मिम्शो पाइबपुकी जाम्शा लाइनीम। परमप्रभु यावे आ सोक्तीम गेशो थुंमी मिम्शा पाइबपुकी परमप्रभु यावे नु ब्रॉइशा थुं नाइशशा बाक्या ताइनीम। रोमी ६:२१; गलाती ६:८
- 7 मुर आ थुंमी परमप्रभु यावे कली मदाकब आ जोरी सत्रु दुम्शा, आ देशो मटीब। मारदे हना परमप्रभु यावे आ अरेशो लोव्र थमा पा टिने मचाप्ब। याकूब ४:४
- 8 रागी डा मुर आन थुंमी मिम्बपुकीमी परमप्रभु यावे कली ग्येरपाइकने मचाप्नीम।
- 9 इन थुंमी परमप्रभु यावे आ सोक्त थमा पा बाक्त हना, मुर आ थुंमी मिम्शो प्रॉइशा, परमप्रभु यावे आ सोक्त रे पा मिम्ब दुम्नीनी। खीस्त आ सोक्त मुर आन थुंमी मबाक्त हना, मेको मुर येसु खीस्त आ मुर मनम।
- 10 गो चहिं येसु खीस्त आ मुर दुम्नीनी। बेकचा दा बेकनीनी। पाप पशोमी मुर बेकब दुम्तेकम। तन्न खीस्त आ ठीक पतीकेमी ब्रॉइनीनी। गलाती २:२०
- 11 परमप्रभु यावे आ सोक्तीमी दोपा खीस्त येसु कली बेकशो रे सेंदा, मोपान इं कली यो सेंशा ब्रॉइचा गेब। मारदे हना मुल मेको सोक्त इं आगाम बाकशा, इं कली ब्रॉइचा गेब।
- 12 आं लोकबपुकी “परमप्रभु यावे आ सोक्त इन आगामी बाकब” दे तुइक्ताकनी हना, मुर आन थुंमी मिम्शो पचा ममालनीनी। रोमी ६:७, १८
- 13 मो पाइतीनी हना, जाम्शा लाइनीनी। तन्न गो परमप्रभु यावे आ सोक्त रे पा इन रां डा दला दाक्स पतीक कली साइक्तीनी हना, ब्रॉइनीनी। रोमी ७:२४; गलाती ६:८; एफिसी ४:२२-२४
- 14 सु परमप्रभु यावे आ सोक्तीम खुल्चा पुंडसीशो बाकमे, मेको परमप्रभु यावे आ तमी तौ बाकनीम।
- 15 मारदे हना गेपुकी परमप्रभु यावे कली हिंब थुं ताकशा, वाइल मबाकनीनी। गोपुकी आ तमी तौ दुम्तीके मेको कली “आब्बा, आं दाकशो आफ” दे ब्रेन्नय। गलाती ४:५-६; २तिमोथी १:७
- 16 गोपुकीमी “आफ” देंयानु, इं थुंमी बाकशो परमप्रभु यावे आ सोक्तीमी इं थुं कली “परमप्रभु यावे आ तमी तौ ननी” दे सांकछी गेब। २कोरिन्थी १:२२
- 17 परमप्रभु यावे आ तमी तौ दुम्शा, येसु खीस्त नु काथा बाकशा, अडस ताइब दुम्तय। मेको अडस तचा डोंइती येसु खीस्त आ नैमी श्येत जाइनय। नोले आ राज्य तांइसेनु, येसु खीस्त नु काथा बाकशा अडस ताइनय। गलाती ४:१७; प्रकाश २१:७
- आस पा बाकशो
- 18 मुल येसु खीस्त आ नैमी श्येत जाइतय। तन्न नोले परमप्रभु यावे आ बाक्तीक डा छेडछेडमी बाकशा, मेको श्येत थम आइकच मिन्नीनी। २कोरिन्थी ४:१७
- 19 परमप्रभु यावे आ सेल्लो नेल्लेमी “परमप्रभु यावे आ तमी तौ दोदेशो बाकनीमी” दे कोव्रचा दाकनीम। कलस्सी ३:४; १यूहन्ना ३:२
- 20 डोंइती रे सेल्लो नेल्ल बेकशा राकब दुम्शो बाकमा बाक्त। तन्न परमप्रभु यावेमी “काबु नाक्त प्रॉइननी” दे आस गेशो बाकमाक्त। उपदेसक १:४
- 21 नोले परमप्रभु यावेमी आ तमी तौ आन कली बेकशा राक्या रे प्रॉइशो खोदेशो पा आ सेल्लो नेल्ल आन कली यो आ छेडछेडमी प्रोनानु, शुश रिम्शो दुम्ब। २पत्रुस ३:१३
- 22 मुल सम्म आ सेल्लो मारेइ मारेइमी हिंमा क्येम्स पा परमप्रभु यावे कली “इन देशो रीब दुम्ल” दे पुंडना पुंडन बाकनीम।
- 23 मेको सेल्लोमी ला ममाइ। गो नेल्ल क्येडा डोंइती परमप्रभु यावे आ सोक्त ताइबपुकीमी यो हिंमा क्येम्स पा “आंइ रां बेकचा रे प्रोनीन” दे पुंडना पुंडन आस पा बाकनय। २कोरिन्थी ५:२

- 24 मेको थमा मदुम सम्म आस पा बाकनय। थमा दुम्शा नोले आस पा बाक्या ममालनय। सुमी आ तने थुम्शो कली आस पाडबा डा? २कोरिन्थी ५:७
- 25 तन्न गो इ मतशो मदुम सम्म “गेना दुम्बा?” दे लां कोव्रशा फाल्शा रिम्ब मुर बाकनय। गलाती ५:५
- 26 गोपुकीमी परमप्रभु यावे कली आस पा बाक्यानु, परमप्रभु यावे आ सोक्तीमी इ मतुइशो तुइक्ब। मिनु गो मार पुंडचा, दे मतुइक्ताक्ब हना यो, इ पर्वम हिंमा क्येम्स पा पुंडब।
- 27 मारदे हना परमप्रभु यावे आ सोक्तीमी इ थुं डा लोत्र नेल्ल तुइक्ब, परमप्रभु यावेमी मार दाक्बा, मेको यो तुइशशा, थाम सुइक्ब आन पर्वम पुंडब।

गो परमप्रभु आ दाक्शो बाकनय

- 28 गो परमप्रभु यावे आ योव्रशो, मेको कली दाक्बपुकीमी दोदेशो श्येत जाम्तेक्म हना यो, दोदेशो ग्येरसाक्म हना यो, मार दुम्त हना यो, इ कली रिम्शो दुम्ब, दे तुइशशो बाकनय। एफिसी १:११
- 29 मारदे हना आ डोंइती तुइशशो मुर कली “आं तौ खोदेशो दुम्मल” दे योव्रतु। आ तौ मेको योव्रशो लोक्ब आन क्येडा डोंइती जरमेशो बाक्ब। कलस्सी १:१८; हिब्रू १:६
- 30 आ तौ खोदेशो दुम्मल, दे योव्रचा पुंडसीब आन कली ब्रेत्ताक्ब। मिनु ब्रेशो आन कली ठीक सेल्लु। मिनु ठीक दुम्शो आन कली बेक्चा रे प्रोंइशा, आ नु काथा बाक्चा गेब। १थिस्सलोनिकी २:१३,१४; रोमी ३:२६
- 31 मुल मार देनुड देशा हना, परमप्रभु यावे गोपुकी नु बाक्त हना, सुइमी इ कली मारेड पने चाप्नीमी डा? सुइमी मारेड पने मचाप्नीमी। भजन संग्रह ११८:६
- 32 परमप्रभु यावेमी इ कली दाक्शा, आ दाक्शो तौ कली इ पाप क्याम्चा कली बेक्चा गेप्लु। मोपा आ दाक्शो तौ लाड गेवानु, इ कली मार मार माल्या, मेको मगेबा डा? गेब।
- 33 परमप्रभु यावे आ योव्रशो आन कली सुमी दोस गेने चाप्बा डा? सुइमी मचाप्नीमी। मारदे हना परमप्रभु यावेमी मेको आन कली ठीक दुम्पाइक्तु। यसैया ५०:८
- 34 सुमी मेको आन कली सजाइ गेने चाप्बा डा? सुइमी मचाप्नीमी। मारदे हना मेको आन बेक्चा डा बेक्शा, बेक्शो रे सेंसीशा, परमप्रभु यावे आ ग्युरा गे बाक्चा तशो ख्रीस्त येसुमी मेको आन पर्वम मपुंडबा डा? पुंडब। १यूहन्ना २:१; हिब्रू ७:२५
- 35 ख्रीस्तमी इ कली शुश दाक्ब। मिनु सुमी इ कली ख्रीस्त आ दाक्तीके रे फ्राने चाप्बा डा? सुइमी मचाप्नीमी। श्येतमी, हिंतीकेमी, खेदा पतीकेमी, जचा मततीकेमी, फेक्चा मततीकेमी, मुर साइक्तीकेमी नु लडाइमी काड फ्राने मचाप्नीमी। भजन संग्रह ७३:२३-२६
- 36 श्येत जचा आ पर्वम “इन नें आ पर्वम साइक्चा पुंडसीन सीन बाक्नीकी। क्योरचा चिक्शो भेडा खोदेशो दुम्तक” दे ब्रेक्शो बाक्ब। भजन संग्रह ४४:२२; २कोरिन्थी ४:११
- 37 मो दुम्त हना यो, मारेड पने मचाप्नीमी, मारदे हना येसु ख्रीस्तमी इ कली दाक्शा, गेनायो मप्रोंइब। मोपतीके सिक्सी पा ग्रानय। १यूहन्ना ५:४
- 38 “बेक्चामी, ब्रोंइचामी, परमप्रभु यावे आ स्वर्ग डा गेय पाडबपुकीमी, अधिकार पाडबपुकीमी, मुल दुम्तीकेमी, नोले दुम्तीकेमी, एफिसी ६:१२
- 39 इर डामी, उड डामी नु रागीम बाक्शो मारेड मारेडमी इ कली इ प्रभु ख्रीस्त येसुम बाक्शो परमप्रभु यावे आ दाक्शो रे फ्राने मचाप्नीमी” दे यो तुइक्ताक्ड।

## 9

यहूदीपुकीमी थमा मसुइशशो

- 1 ख्रीस्त आ नें ब्रशा, जोल मपथु, एको लोत्र पाडनुड। परमप्रभु यावे आ सोक्तमी आं थुमी थमा लोत्र बाक्ब, दे सांकछी गेब।
- 2 गो इ यहूदी लोक्ब आन कली तशा, आं थुं शुश खाइक्ती। मेको आन कली दो पड, मार पड देशा आं थुं खुरसाक्यी।
- 3 आं लोक्ब, आ खिं डा मुर आन पा डा गो सरार रशा, ख्रीस्त रे तिल्ला पुंडसींचा यो बिस्सीड वा। प्रस्थान ३२:३२
- 4 मेकोपुकी इस्राएली नम। मेको परमप्रभु यावे आ तमी तौ बाक्नीमी। आ छेडछेडम बाक्चा कली योव्रशो मुर नम, मेको आन कली कबल पशो बाक्त, आ अरेशो लोत्र तुइक्पाइशशो बाक्त, परमप्रभु यावे कली दोपा मान पचा, दे तुइक्पाइशशो बाक्त। परमप्रभु यावेमी मेको आन कली थोक्शो लोत्र पशो बाक्त। प्रस्थान ४:२२; ब्यवस्था ७:६; प्रस्थान ४०:३४; उत्पत्ती १७:७; प्रस्थान २०:-
- 5 नेल्लेम तुइशशो किंकी पिपी एको जात डा बाक्मा बाक्त। मिनु मेको आन दाते रे मेको नेल्ल आन क्येडा ठेयब दुम्शा ख्रीस्त जरमेसे बाक्त। गोपुकीम परमप्रभु यावे कली गेना हना यो मान पय, आमेन। रोमी १:३; मत्ती १:-; लूका ३:२३-३४

सु सु थमा इस्राएली बाक्नीम

- 6 परमप्रभु यावे आ लोत्र मदुम्थु मलीब। मारदे हना इस्राएल रागी डा मुर नेल्ल इस्राएली मदुम्नीम। गन्ती २३:१९; रोमी २:२८
- 7 अब्राहाम आ चच युड शुश बाक्तेक्म हना यो, मेको नेल्ल परमप्रभु यावे आ मुर मबाक्मा बाक्त। मेकोमी “इसहाक रे पा इ चच युड लील” दे गेशो लोत्र खाप्चा, इसहाक कली ला योव्रडा बाक्त। उत्पत्ती २१:१२

8 मोपा अब्राहाम आ खिम जरमेशा लायो, परमप्रभु यावे आ तमी तौ, दे ब्रेत्चा मपुंडसम। तन्न परमप्रभु यावे आ लोत्र गेशोमी जरमेशोपुकीन अब्राहाम आ थमा चच युड बाक्नीम। गलाती ४:२३

9 परमप्रभु यावे आ गेशो लोत्र चहिं “बर्स का नोले लेशशा जाक्नुडानु, सारामी तौ थीब” देशो बाक्ब। उत्पती १८:१०

10 सारा कली ला लोत्र गेशो ममाइ। इ किंकी इसहाक रे पा आ मीश रेबेकामी कोत्रज कुरशा, जौले आल थिवानु,

11 मेको आल निम्फामी रिम्शो मरिम्शो मारेड मतुडक्थ, आस जरमेचा डोंइती परमप्रभु यावेमी का कली योत्रडा बाक्त। आल आ पशो तशा, योत्रशो ममाइ। परमप्रभु यावे आ दाक्शो पा ब्रेशो बाक्त।

12 मेको आल आस गेय आ पर्वम ममाइ, परमप्रभु यावे आ दाक्शो पा आस ममा कली “आ दाग्युमी आ लोक्ब आ गेय पाइब” दे तुडक्पदा बाक्त। उत्पती २५:२३

13 मेको आल आस पर्वम “याक्ब कली दाक्ताक्ड। एसाव कली काइ मदाक्तु” दे ब्रेक्शो बाक्ब। मलाकी १:२-३

परमप्रभुम आ दाक्शो कली योत्रब

14 मोदेशो बाक्त हना, गो मार देंचा? परमप्रभु यावेमी ठीक गेय मपवा डा? ममाइ।

15 परमप्रभु यावेमी मोसा कली “सु कली शिशी पचा दाक्डा, मेको कली शिशी पाइनुड। सु कली आ श्येत रे प्रोंइचा दाक्डा, मेको कली आ श्येत रे प्रोंइनुड” देशो बाक्त। प्रस्थान ३३:१९

16 मारेड मारेड पशोमी परमप्रभु यावे आ शिशी पाइक्चा मपुंडसीब। परमप्रभु यावेमी शिशी पचा दाक्ताक्ब हना, शिशी पाइब। एफिसी २:८

17 परमप्रभु यावेमी फाराओ कली “नेल्ल रागी डा मुरपुकीमी आं सक्ति तशा, आं नें तुडक्तेमेल, दे इ कली वोडक्ता” देशो बाक्त। प्रस्थान ९:१६

18 मोपतीके परमप्रभु यावेमी सु कली शिशी पचा दाक्ता, मेको कली शिशी पाइब। सु कली आ लोत्र मटिपाइक्चा दाक्ता, मेको कली मटिपाइक्ब। प्रस्थान ४:२१; १पत्रुस २:८

19 परमप्रभु यावेमी मो पाप्टु हना, मार, मुर आन कली दोस गेचा दुम्बा डा? आ पशो सुमी तेक्ने चाप्नीमी डा? देंनी माइ।

20 गे मुर दुम्शा परमप्रभु यावे कली दोस गेचा दुम्बा डा? सेल्चा पुंडसीबमी सेल्ब कली “मारदे ओपा सेल्ची” देबा डा? यसैया ४५:९

21 खप के ग्योब सेल्बामी आ दाक्शो पा खप कांडचीक के गर, नाक्चुक तोक्तीके सेल्ने मचाप्बा डा? येरमीया १८:४-६

22 परमप्रभु यावेमी आ गाइशशो कोंइताक्ब हना, मरिम्शो पाइब आन कली शुश फाल्शो बाक्त हना यो, नोले ला खतम दुम्पाइक्ब। रोमी २:४; हितोपदेस १६:४

23 मेकोमी आ टेयब गेय कोंइचा कली का निक्शी आन कली शिशी पशा, गेना हना यो काथा बाक्शा, आ छेडछेड कोंइचा कली योत्रतीमी। एफिसी १:३-१२

24 इ यहूदी कली ला ब्रेशो योत्रशो ममाइ। अर्को रागी डा मुर आन कली यो ब्रेशशा, आ मुर सेल्शा, आ नु बाक्चा ताइब सेल्तीमी।

25 होसेमी “साइ आं कली मतुडक्ब आन कली आं मुर सुइक्नुडमी। डोंइती मदाक्शो कली मुल आं दाक्शो, दे ब्रेत्नुड।

26 डोंइती मेको रागीमी परमप्रभु यावे आ मुर मबाक्म। नोले चहिं ब्रोंइशा बाक्ब परमप्रभु यावे आ तमी तौ ब्रेत्चा पुंडसीनीम” दे ब्रेक्शो बाक्त। होसे २:२५; होसे २:१

27 यसैयामी इस्राएली आन पर्वम “इसाएल डा मुरपुकी समुन्द्र डा बाल्वा खोदेशो पा शुश दुम्तेक्म हना यो, मेको आन लीशो का निक्शी ला ब्रोंइचा ताइनीम। रोमी ११:५

28 मारदे हना प्रभुमी आ देशो खाप्शा रीब पा पाइब” दे ब्रेक्शो बाक्ब। यसैया १०:२२-२३

29 मिनु डोंइती यसैयामी “मुर नेल्ल आन परमप्रभु यावेमी आ तमी तौ सेल्चा कली का निक्शी मयोत्रशो हना, सोदोम नु गोमोररा सहर डा मुर खोदेशो दुम्शा, नेल्ल बेक्शा नुब्य वा” देशो बाक्त। यसैया १:९

थमा ठीक पतीके

30 मिनु मुल गो मार देंचा डा? अर्को रागी डा मुरपुकीमी ठीक दुम्चा ममाल्थु, ठीक दुम्तेक्म। तन्न आन ठीक दुम्तीके मेको आन परमप्रभु यावे कली थमा सुइक्तीक रे जाक्त। रोमी १०:२०

31 तन्न इस्राएलीपुकीमी चहिं ठीक दुम्चा कली परमप्रभु यावे आ अरेशो लोत्र टिचा माल्तेक्म हना यो, ठीक दुम्ने मचबेम। रोमी १०:२-३

32 मारदे ठीक दुम्ने मचबेम देशा हना, थमा सुइशशोमी ठीक दुम्चा ममालेम, रिती थिती डा गेय रे ठीक दुम्चा माल्तेक्म। मोपतीके दाइल पाइब फुल्लुमी राम्साक्म। मती २१:४१, ४४; १पत्रुस २:८

33 मिनु “गो सियोनम फुल्लु का वोडक्नुड। मेको फुल्लुमी मुर आन कली दाइल पपाइक्ब। मिनु शुश मुर मेको फुल्लुम थोक्शीशा राम्सीनीम। सुमी मेको कली थमा सुइक्बा, मेको खतम मदुम्ब” दे ब्रेक्शो बाक्ब। यसैया ८:१४; यसैया २८:१६

## 10

1 आं लोक्बपुकी, गो थमा मसुइक्ब इस्राएली आन पर्वम परमप्रभु यावे कली “थमा सुइक्पतीन” दे पुंडना पुंडन बाक्नुड।

2 परमप्रभु यावे कली तुडक्चा माल्नीम, दे तुडक्नुड। तन्न मेको आन के रुप्तीक थुं मबा।

3 परमप्रभु यावे आ डोंइती दोपा ठीक दुम्चा, मेको मरुबेम। मिनु आंमा गेय पतीकेमी ठीक दुम्चा माल्तेक्म। मोपा परमप्रभु यावे कली थमा सुइक्तीके रे ठीक दुम्तीक मपामे। रोमी १:१७

थमा सुइक्तीक रे ठीक दुम्तीक

4 येसु ख्रीस्तमी परमप्रभु यावे आ अरेशो लोत्र खाप्ने थुन्तु। मिनु येसु ख्रीस्त कली थमा सुइक्बपुकी ठीक दुम्शो बाक्नीम। मती ५:१७; हिब्रू ८:१३; यूहन्ना ३:१८; गलाती ३:२४-२५

5 मिनु मोसामी परमप्रभु यावे आ अरेशो लोत्र पतीक रे ठीक दुम्तीके ब्रेक्शो बाक्ब। “परमप्रभु यावे आ अरेशो लोत्र टीबपुकी मेको लोत्र टितीकेन ब्रॉइनीम” दे ब्रेक्शो बाक्त देंनीम। लेवी १८:५

6 थमा सुइश्शा, ठीक दुम्शोपुकीमी चहिं मार देंनीम देशा हना, स्वर्ग सु लाइबा डा? सुइ मलाइनीम मारदे हना येसु ख्रीस्त कली ब्रथ लचा ममाल्ब। ब्यवस्था ३०:११-१४

7 बेक्शो मुर आन बाक्तीके सु लाइबा डा? सुइ मलाइनीम। मारदे हना येसु ख्रीस्त कली कुइक्थ लचा ममाल्ब।

8 तन्न मार देशो बाक्त हना “मेको लोत्र इ नेक्था, इ थुं नु इ शोत्रमी बाक्ब” देशो बाक्त। मेको थमा सुइक्तीक लोत्र कली शेंनीकी।

9 मिनु गेपुकीमी “येसु प्रभु बाक्ब” देशा इन थुंमी “परमप्रभु यावेमी मेको कली बेक्शो रे सेंताक्ब” दे थमा सुइक्तीनी हना, गे ब्रॉइचा ताइनीनी। मती १०:३२; २कोरिन्थी ४:५

10 मुक्मी मेको थमा सुइश्शा, ठीक दुम्तीम। मिनु सु सुमी “येसु आं प्रभु बाक्ब” दे मुर आन डोंइती देंबा, मेको ब्रॉइचा ताइनीम, दे तुइक्नय।

11 मिनु परमप्रभु यावे आ लोत्रमी “सु सुमी मेको कली थमा सुइक्नीमी, मेको मुने मदोक्नीम” दे ब्रेक्शो बाक्ब। यसैया २८:१६

यहूदीमी “मतुइक्तक” देंने मचाप्नीम

12 परमप्रभु यावेम नेल्ल आन कली कोत्रब। यहूदी नु अर्को रागी डा मुर नेल्ल आन कली कांडचीक मिम्ब। मेको आन कली प्रभु का बाक्ब। मेको कली प्रभु देंब आन कली आसीक गेशा, रिम्शो पाइब। प्रेरित १०:३४-३५; प्रेरित १५:९

13 सु सुमी प्रभु आ नें थिशा “प्रॉइयीनी” दे पुंइबा, मेको कली प्रॉइब दे ब्रेक्शो बाक्ब। योएल ३:५

14 मेको कली थमा मसुइक्बपुकीमी “प्रॉइयीनी” दे पुंइने चाप्नीमी डा? आ पर्वम मनेशो कली थमा सुइक्ने चाप्नीमी डा? सुइ शेंब मबाक्त हना, मेको लोत्र नेंने चाप्नीमी डा?

15 शेंथ सोइश्शो मनम हना, शेंथ लाइनीमी डा? शेंथ सोइक्चा पुंइसीब आन पर्वम ओदेशो ब्रेक्शो बाक्ब “ग्येरपाइक्ब नु रिम्शो लोत्र शेंथ गाक्ब आन खोइल गिश रिम्शो बाक्ब” दे ब्रेक्शो बाक्ब। यसैया ५२:७

16 मेको आन लोत्र नेशा कोइमी थमा मसुदेम। मेको आन पर्वम यसैयामी “हे प्रभु, आंइ शेंशो लोत्र सुम थमा सुदा डा?” दे ब्रेक्शो बाक्त। यसैया ५३:१; यूहन्ना १७:२०

17 डोंइती ख्रीस्त आ लोत्र नेशा तुइक्पाइक्चा माल्नीम। मेको लोत्र नेशा ला थमा सुइक्ने चाप्नीम।

18 मार, येसु ख्रीस्त आ लोत्र यहूदीपुकीम मनन्मे डा? नेंतेक्म। “एको लोत्र तेइ रेइ रागी नेल्लेमी ब्रशो बाक्त” दे ब्रेक्शो बाक्ब। भजन संग्रह १९:४

19 मोपा यो इस्राएलीमी एको लोत्र मरुप्मे डा? मोसामी यहूदी आन पर्वम ओदेशो ब्रेक्शो बाक्त “अर्को रागी डा मुरपुकीमी आं कली थमा सुइक्चा गेनुडमी। मिनु गेपुकीमी अरु आन कली आं गे पिशो तशा, रुश पा थमा सुइक्नीमी, दे परमप्रभु यावेम देंत” दे ब्रेक्शो बाक्त। ब्यवस्था ३२:२१

20 मिनु यसैयामी एको लोत्र तेम्शा “परमप्रभु यावेमी ‘आं कली ममाल्ब मुरपुकीमी आं कली थित्तीमी। आं कली ममिम्ब आन कली आं पर्वम तुइक्पाइक्तामी” दे ब्रेक्शो बाक्त” देंत। यसैया ६५:१

21 इस्राएल डा मुर आन कली चहिं परमप्रभु यावेमी “गो नेल्ल नाक्त मटीब नु जोप पाइब आन कली रिम्शो दुम्मल, दे आं गुइ दिस डा दिस बाक्नुड। तन्न मेकोपुकीमी आं देशो मटीम। आं कली मरिम्शो ला सुइक्तीमी” दे ब्रेक्शो बाक्त। यसैया ६५:२

## 11

लीशो इस्राएलीपुकी

1 मिनु मो दुम्मेनु, परमप्रभु यावेमी यहूदी नेल्ल आन कली प्रॉइमी डा? मप्रॉइमी। गो यो अब्राहाम आ चच युइ बेन्यामीन थर डा इस्राएली का नड। भजन संग्रह ९४:१४; येरमीया ३१:३७; फिलिप्पी ३:५

2 डोंइती रे परमप्रभु यावेमी आ योत्रशो मुर आन कली मप्रॉइमी। एलीयामी इस्राएली आन पशो आ पर्वम परमप्रभु यावे कली देशो लोत्र मिम्तीन।

3 एलीयामी परमप्रभु यावे कली “परमप्रभु यावे, इन लोत्र पाइब आन कली साइक्तेक्म। इन कली चढ्ढेतीक नेल्ल प्रेशा गेम्तेक्म। इन नोले खोइक्ब गो का ला लीती। आं कली यो साइक्चा कली माल्शा गाक्नीम” दे ब्रेक्शो बाक्त। १राजा १९:१०

4 परमप्रभु यावेमी एलीया कली मार लोत्र लेत्ता बाक्त देशा हना “आं नोले खोइक्ब, ७ हजार मुर योत्रतामी। मेकोपुकीमी बाल देवता आ डोंइती आन पोक्य मथेक्नीम” दे लोत्र लेश्शो ममाइ डा? १राजा १९:१८

5 मुल यो परमप्रभु यावेमी शिशी पा योत्रशो का निक्शी लीशो बाक्नीम। रोमी ९:२७

6 मेको आन पशोमी ममाइ, परमप्रभु यावेमी मोशा शिशी पा आ मुर सेल्टीमी। आन गेय आ पर्वम पशो हना, शिशी मली वा।

7 मिनु मार देंचा डा? इस्राएलम माल्शा यो आ माल्शो मथित्थु, परमप्रभु यावे आ योत्रशो का निक्शी ला ठीक दुम्तेक्म। अरु नेल्ल परमप्रभु यावे आ लोत्र मटीब दुम्तेक्म। रोमी ९:३१



8 मेको आन पर्बम यसैयामी “परमप्रभु यावेमी मेको आन कली मरुख थुं गेपु। मेकोपुकी मिक्च मताइब नु नोफा मनेब दुम्शा बाकशो बाक्नीम। मुल सम्म मोदेशो दुम्शा बाक्नीम” दे ब्रेक्शो बाक्त। यसैया २९:१०; ब्यवस्था २९:४

9 दाऊदमी “मेको आन भोज आन कली ग्याइली खोदेशो दुम्स। मेको आन कली बेक्तीक नु क्येक्क लेत्तीक दुम्स।

10 मेको मिक्च मताइब दुम्स। मिनु वाइलीम वाइल खोदेशो दुम्शा, श्येत जामेक्ल” दे ब्रेक्शो बाक्त। भजन संग्रह ६९:२१-२३

अर्को रागी डा मुर

11 मिनु मुल मार देनुडा? मेकोपुकी गेनायो मबोक्या डा पा रामसमा डा? ममाइ। इस्राएली आन मरिम्शो पतीके अर्को रागी डा मुरपुकीम शिशी तशो बाक्नीम। मेकोपुकीम रुश पामेक्ल, दे मोदेशो दुम्शो बाक्ब। प्रेरित १३:४६; रोमी १०:१९

12 तन्न इस्राएली आन राम्सीतीके रागी नेल्ल आन कली रिम्शो नु अर्को रागी डा मुर आन कली शोप दुम्त हना, मेको नेल्लेम थमा सुदेम हना, चिनु गिश रिम्शो दुम वा।

13 मिनु गो अर्को रागी डा मुर, इन कली “गो अर्को रागी डा मुर आन कली लोव शेंथ सोइक्चा पुंडसाक्यी। एको शेंतीक गेय शुश रिम्शो लाक्ती।

14 मारदे हना अर्को रागी डा मुर आन कली थमा सुइश्शो तशा, आं जात डा मुर का निक्शीमी यो रुश पा थमा सुइक्नीमी कों, दे आस पा बाक्ती।” १कोरिन्थी ९:२०-२२; १तिमोथी ४:१६

15 परमप्रभु यावेमी मुल इस्राएली आन कली मकोवथु, अर्को रागी डा मुर आन कली शिशी पा ब्रशा, नोले यहूदी आन कली यो ब्रवानु, शुश रिम्शो मदुम्बा डा? एको दा बेक्शो रे सेंसीशो खोदेशो ठेयब दुम्ब।

16 निशो फस रे डोंइती डा शोब्ले परमप्रभु यावे के दुम्त हना, नेल्ल निशो फस रिम्शो दुम्ब। शाक्श रिम्शो बाक्त हना, राशी नेल्ल यो रिम्शो दुम्नीम। गन्ती १५:२०

17 रिम्शो तेल रवा खोदेशो इस्राएल रे राशी का निक्शी क्योरशा गुंडशो बाक्तेक्म हना, रे रागी रागी डा मुर ब्वाकी डा तेल रवा खोदेशो पा, मेको रवामी इन राशी क्येप्या पुंडसाक्नी हना, गे मेको रवा आ शाक्श रे ताइनीनी। मेको मप्रेंदीन। एफिसी २:११-१४

18 मो हना यो क्योरशा ताइश्शो राशी, दे मेको आन कली “गो इन क्येडा ठेयब दुम्तक” दे ठेयब लेश्शो लोव्र मपने। मारदे हना गेपुकी यो राशीन ननी। राशीमी शाक्श कली मतिकब। शाक्शम राशी कली तिकब, दे तुइक्तीने। यूहन्ना ४:२२

19 गेपुकीमी “मेको क्योरशा ताइश्शो राशी आ पा डा गो दुम्तय” देंतीनी।

20 इन देंशो ठीक बाक्ब। मेकोपुकीमी थमा मसुदेम। मिनु परमप्रभु यावेमी मेको आन कली क्योरशा ताइक्ताक्ब। इन थमा सुइश्शो तशा इन कली चहिं रिम्शो फल रवाम केप्यो खोदेशो पा आ मुर सेल्लु। काइ ठेयब मलेत्थु, परमप्रभु यावे कली मान पा हिंशा बाक्कीन। १कोरिन्थी १०:१२

21 परमप्रभु यावेमी डोंइती डा राशी आन कली क्योरशा ताइक्ताक्ब हना, मार, गे नोले केप्यो राशी इन कली मताइक्बा डा?

22 परमप्रभु यावेमी दोदेशो शिशी पाइबा, दोदेशो सजाइ गेबा, दे रुपीन। साइ डोंइती रे डा आ लोव्र थमा मसुइक्थु मटीब आन कली खोइश्शा ताइक्ताक्ब। आ लोव्र मटिथु, थमा सुइक्चा प्रोंइतीनी हना, इन कली यो खोइश्शा ताइक्ब, दे तुइक्तीन। गे परमप्रभु यावे कली दाक्शा, थमा सुइक्चा मप्रोंइतीनी हना ला, इन कली यो दाक्चा मप्रोंइब। यूहन्ना १५:२-४; हिब्रू ३:१४

23 मेको क्योरशा ताइश्शो राशी खोदेशो दुम्शो यहूदीपुकीमी आन थुं परमप्रभु यावे गे लेश्शा, थमा सुइक्तेक्म हना, रिम्शो फल रवाम लेंशा केप्यो खोदेशो पा आ मुर सेल्ले चाप्ब।

24 डोंइती क्योरशा ताइश्शो राशी बोइक्चा कली श्येत मदुम्ब। तन्न अर्को ब्वाकी डा तेल रवा आ राशी माल्शा चाक्शा, केप्या कली शुश श्येत बाक्ब। परमप्रभु यावेमी इन कली केप्ताक्ब। मिनु इन कली केप्या क्येडा यहूदी आन कली केप्या श्येत मबाक्ब।

यहूदीपुकी यो ब्रोंइनीम

25 आं लोकबपुकी, आं शेंशो खुइश्शो लोव्र रिम्शो पा रुप्तीनी हना, गे ठेयब मलेत्तीनी। योव्रसीचा पुंडसीशो अर्को रागी डा मुर आन कली आ मुर सेल्ले मथुमा सम्म परमप्रभु यावेमी इस्राएली आन कली येसु खीस्त आ पर्बम मरुख सेलतीमी। यूहन्ना १०:१६

26 योव्रसीचा पुंडसीशो अर्को रागी डा मुरपुकीमी थमा सुदेम डा मेरे इस्राएली नेल्लेमी रुप्शा, थमा सुइश्शा, ब्रोंइचा ताइनीम। “सियोनमी पाप रे प्रोंइब का यूब। मेकोमी याकूब कली आ मरिम्शो पतीके रे प्रोंइब। मती २९:३९; भजन संग्रह १४:१९

27 मेको आन पाप क्यान्नुड। मिनु मेको आन कली गेशो कबल खाप्नुड” दे ब्रेक्शो बाक्ब। यसैया ५९:२०, येरमीया ३१:३३

28 मुल सम्म इस्राएलीपुकीमी खीस्त परमप्रभु यावे आ सोइश्शो पाप रे प्रोंइब बाक्ब, दे थमा मसुइक्नीम। मोपतीके परमप्रभु यावे आ जोरी सत्रु दुम्तेक्म। आन थमा मसुइश्शोमी इन कली चहिं रिम्शो दुम्त। परमप्रभु यावेमी आन किकी पिपी आन पर्बम मेको आन कली योव्रशा, दाक्ब।

29 परमप्रभु यावेमी गेशो नु आ योव्रतीक गेनायो मजाम्ब। गन्ती २९:१३

30 गेपुकीमी यो परमप्रभु यावे आ लोव्र मटिनी। यहूदीपुकीम मटितीके परमप्रभु यावेमी इन कली शिशी पा थमा सुइक्चा गेपु। मिनु मुल गे परमप्रभु यावे आ शिशी ताइब दुम्तीनी।

31 यहूदीपुकीमी मुल सम्म परमप्रभु यावे आ लोत्र मटीमे। नोले परमप्रभु यावेमी मेको आन कली यो शिशी पाइब।  
 32 मारदे हना परमप्रभु यावेमी इस्राएली नु अर्को रागी डा मुर नेल्ल आन कली आ लोत्र मटिशो तशा, खाल का डा पा वोइक्तीमी। मिनु नोले नेल्ल आन कली शिशी पाइब। गलाती ३:२२; १तिमोथी २:४

परमप्रभु कली ठेयब सेल्य

33 परमप्रभु यावेमी नेल्ल तुइक्ब। परमप्रभु यावे सक्ति पाइश्शो नेल्ल क्येडा ठेयब बाक्ब। मुरपुकीमी परमप्रभु यावे आ निसाफ पशो, मुर आन कली पाइश्शो, सुइमी रुम्ने मचाप्नीम। यसैया ४५:१५; यसैया ५५:८-९

34 मिनु “सुमी प्रभु आ थुं तुइक्बे चाप्नीमी डा? सुमी मेको कली अर्ती गेने चाप्नीमी डा?” दे ब्रेक्शो बाक्ब। १कोरिन्थी २:१६; येरमीया २३:१८; यसैया ४०:१३

35 “सुमी परमप्रभु यावे कली मार मार गेशा, परमप्रभु यावेमी मार मार गेचा माल्ब, देने चाप्बा डा?” दे ब्रेक्शो बाक्ब। अय्युब ४१:३

36 परमप्रभु यावेमी मार बाक्त हना यो, आंमान सेल्लु। मिनु मारेइ मारेइ आइक्के नम। मिनु आ गोशो गेय आंमान थुम्ब, दे तुइक्तय। मोपतीके “परमप्रभु यावे नेल्ल क्येडा ठेयब बाक्ब” दे ठेयब सेल्लतीक गेना हना यो लील। आमेन।

## 12

परमप्रभु आ दाक्शो पने

1 आं लोक्बपुकी, इन कली मुल यो शुश शेंचा दाक्ताक्ड। परमप्रभु यावेमी इन कली शिशी पा आ मुर सेल्लु। मोपतीके आ मुर दुग्शा, इन रां, थुं, गिंम नेल्ल, सेसीन परमप्रभु यावे आ दाक्शो चढेतीक खोदेंशो पा जिम्मा गेंसीन। मेको इन परमप्रभु यावे कली रिम्शो पशो गेय बाक्ब। रोमी ६:१३

2 परमप्रभु यावे कली मटीब आन पशो खोदेंशो मपने। तन्न परमप्रभु यावे कली इन थुं कली फाइक्का गेन। मो पाइतीनी हना, परमप्रभु यावे आ मिम्शो मार में, रिम्शो मार में, आ दाक्शो मार में नु नेल्लेम ठीक दुग्शा तुइक्नीनी। एफिसी ४:२३; एफिसी ५:१०,१७

3 परमप्रभु यावेमी आं कली शिशी गेशा, शेंब सेल्लती। इन दातेमी सुइ आंम कली ठेयब मसेल्सीन। परमप्रभु यावेमी इन कली दोदेंशो थमा सुइक्तीक गेवा, मेको मिम्शा ब्रेम्शो दुग्शा बाक्कीन। मती २०:२६; १कोरिन्थी ४:६; १कोरिन्थी

4 रां कामी गुइ, खोइल, मिक्च, नोफा, शोत्र बाक्नीमी। मेको नेल्ल आन के आन आन गेय बाक्ब। १कोरिन्थी १२:१२

5 मोपा गोपुकी नेल्ल खीस्तम रां का बाक्नय। गेय का का गेचा पुंइसाक्य। १कोरिन्थी १२:२७; एफिसी ४:४,२५

6 गोपुकीमी परमप्रभु यावे आ शिशी पा गेशो गेय का का पय। परमप्रभु यावेमी इ कली आ लोत्र तुइक्पाइश्शा नेंपाइक्ब वोत्रतु हना, थमा सुइश्शा मेको लोत्र नेंपतो। १कोरिन्थी ४:७; १कोरिन्थी १२:४; १पत्रुस ४:१०

7 मुर आन कली वारच पचा कली वोत्रने पुंइसाक्वे हना, वारच पावो। शेंब सेल्ल्या पुंइसाक्वे हना, शेंब दुमो। १पत्रुस ४:११

8 अर्ती गेब वोत्रने पुंइसाक्वे हना, अर्ती गेचा मब्रीदो। मुर आन कली मार गेप्टीवी हना यो, ठेयब सेल्सीचा कली मगेवो। थमा सुइक्ब आन लां कोंइब दुम्ते हना, होस पा गेय पावो। शिशी पवीनु, ग्येरशा पावो। मती ६:३; २कोरिन्थी ८:२; २कोरिन्थी ९:७

दाक्चा आ पर्वम

9 थमा पा दाक्मुशा बाक्कीन। मरिम्शो गेय रे डोन बाक्कीन। रिम्शो पने। १तिमोथी १:५; आमोस ५:१५

10 लोक्बपुकीमी दाक्मुशो खोदेंशो पा दाक्मुशा बाक्कीन। आंम कली मान पचा मपुंइसीथु, अरु आन कली मान पने। यूहन्ना १३:४-१५; फिलिप्पी २:३

11 पचा माल्शो गेय अल्सी मपथु पने। परमप्रभु यावे आ सोक्तीम इन थुंम मी ब्रशो खोदेंशो आ प्रभु कली गेय पने। प्रकाश ३:१५; प्रेरित १८:२५; कलस्सी ३:२३

12 आस पा ग्येरसीशा बाक्कीन। श्येत जनीनु, फाल्शा बाक्कीन। प्रार्थना पना पन बाक्कीन। लूका १८:१-८; कलस्सी ४:२; १थिस्सलोनिकी ५:१७

13 थमा सुइक्ब आन कली आन माल्शो गेशा, वारच पने। इन खिंमी जाक्ब आन कली बास गेशा थुलीन। ३यूहन्ना ५-८; हिब्रू १३:२

14 सराप चीले मपने। इन कली सराप चीले पाइब आन कली आसीक गेने। मती ५:४४; प्रेरित ७:५९; १कोरिन्थी ४:१२

15 ग्येरसीशोपुकी नु ग्येरसीने, डाक्शोपुकी नु डाक्कीन। भजन संग्रह ३५:१३-१४; २कोरिन्थी ११:२९

16 थुं का डा दुग्शा, दुशा गारशा बाक्कीन। जोक्ब तुइक्ब नड, दे ठेयब मलेत्तीने। आंम महिक्सीशो सुइसीन। जोक्ब तुइक्ब ममिम्सीने। रोमी १५:५; फिलिप्पी २:२; यसैया ५:२१

17 इन कली मरिम्शो पाइब आन कली मरिम्शो मपने। मुर आन कली मार रिम्शो बाक्बा, मेको मिन्तीन। हितोपदेस २०:२२; १थिस्सलोनिकी ५:१५; २कोरिन्थी ८:२१

18 चाप्वी सम्म मुर आन कली जिचा मतोंने। मुर नेल्ल नु दुशा गारशा बाक्कीन। मर्कूस ९:५०; हिब्रू १२:१४

19 आं दाक्शो लोक्बपुकी, इन कली श्येत गेब आन कली आंमा क्येक्क मलेत्तीन। परमप्रभु यावेमी गाइश्शा, मेको आन कली मारेइ पवल्, दे सिक्सी पा बाक्कीन। मारदे हना “क्येक्क लेत्तीक गेय आं केन बाक्ब। मिनु गोन पाइनुड, दे परमप्रभु यावेमी देंब” दे ब्रेक्शो बाक्ब। ब्यवस्था ३२:३५; लेवी १९:१८; मती ५:३८-४४

20 क्येक्क मलेत्चा ला ममाड। “इ जोरी सत्रु शोत्रलु बेक्तेक्क हना, जचा गेवो। तूतू दाक्तेक्क हना, तूचा गेवो। मो पाप्तीवी हना, मेको आन पियामी मी मोडशो खोदेशो पा, मुने तोक्नेवे” दे ब्रेक्शो बाक्ब। हितोपदेस २५:२१-२२  
21 मरिश्शोमी रिश्शो कली लाक्चा मगेव। रिश्शोमी मरिश्शो कली प्रापतो।

## 13

सरकार आ परबम शेशो

1 गो नेल्लेमी सरकार आ हुकुम टिचा मालनय। मारदे हना रागी डा नेल्ल सासन पाडब आन कली परमप्रभु यावेमी योत्रशा, अधिकार गेशा वोडशो बाक्नीम। तीतस ३:१; हितोपदेस ८:१५; यूहन्ना १९:११

2 सरकार आ हुकुम मटिथु, गेय पाम्तेक्क हना, सरकार कली मटिशो ला ममाड, परमप्रभु यावे कली यो मटिशो खोदेशो दुम्ब। मिनु सजाड गेचा पुंडसीनीम।

3 रिश्शो पाडबपुकी सरकार आ हुकुम तशा महिनीम “रिश्शो पाडतीनी” देंनीम। मरिश्शो पाडबपुकी चहिं हिंनीम। १पत्रुस २:१३-१४

4 मुर आन कली रिश्शो पपाडक्का कली परमप्रभु यावेमी सरकार वोडक्तु। गे मरिश्शो पाडतीनी हना, सरकार क्येडा हिंनीम। मारदे हना सरकारमी सजाड गेचा कली परमप्रभु यावे रे अधिकार तशो बाक्ब। मिनु मरिश्शो पाडब आन कली सजाड गेब। २इतिहास १९:६-७

5 “सरकारमी सजाड गेब” दे मिम्चा ला ममाड। रिश्शो पय, दे इं थुं फ्रेंशा बाक्य।

6 मोपतीके परमप्रभु यावेमी सरकार कली योत्रशा, गेय पपाडक्तु, दे तुडशशा, गेपुकीमी तिरो थाप्तीनी।

7 तिरो, भन्सार थाप्तीने। हिक्का पुंडसीशो कली हिक्कीने, मान पचा पुंडसीशो कली मान पने। मती २७:२१

दाक्तीकेम अरेशो लोत्र खाप्शो

8 मारोड मारेडम दाक्मुशा बाक्कीन। दाक्ताक्नी हना, परमप्रभु यावे आ अरेशो लोत्र खाप्तीनी। गलाती ५:१४; १तिमोथी १:५

9 मेको लोत्रमी मार ब्रेक्शो बाक्ब देशा हना “मीश वोडशा आस नाता मखोडक्का, मुर मसाडक्का, खुड मपचा, मवाल्चा” अरु मपचा डा गेय यो बाक्नीम। मिनु मार पा मेको लोत्र खाप्तीब देशा हना, आंम कली दाक्शो खोदेशो पा आंम नेक्था डा आन कली दाक्शा, खाप्तीब। प्रस्थान २०:१३-१७; लेवी १९:१८

10 मोपा दाक्ताक्नी हना, मुर आन कली मरिश्शो मपाडनीनी। दाक्शोमीन परमप्रभु यावे आ अरेशो लोत्र खाप्शो बाक्ब। १कोरिन्थी १३:४; मती २२:४०

छेडछेडम बाक्ब मुर दुम्य

11 आं देशो टिशा रिश्शो पने। सेंसीशा बोक्शो खोदेशो दुम्य। मारदे हना साड थमा सुडक्क दुम्यो नाक्त क्येडा मुल परमप्रभु यावे नु बाक्ची नाक्ती इ नेक्था जाक्त, दे तुडक्तय। १थिस्सलोनिकी ५:६-८; एफिसी ५:१४

12 नाक्दो लाक्शा नां सोक्शा, छेडछेडम बाक्शो खोदेशो दुम्या, होस पा बाक्कीन। छिडछिड डा गेय ताडशशा, छेडछेड डा पा पिम्सीन। १यूहन्ना २:८; एफिसी ५:११

13 नाक्ती छेडछेड दुम्यो खोदेशो पा रिश्शो गेय पय। छिडछिड डा गेय मार बाक्नीम देशा हना, शुश जचा ब्वचा, दुक्शा हेंथे गाक्चा, तेल्लेम पा, ग्रॉग्रा दिचा डा गेय पचा, जिचा खेचा नु रुश पचा बाक्नीम। लूका २१:३४; एफिसी ५:१८

14 नक वा फेक्शो खोदेशो पा प्रभु येसु खीस्त नु रां का दुम्या, इन रां कली मरिश्शो पचा मगेने। गलाती ३:२७; १कोरिन्थी ९:२७; कलस्सी २:२३

## 14

दाल्गीर मपथु गेय पचा

1 मिनु का निक्शी आन थमा सुडक्तीके बोल्यो मदुम्यो बाक्त हना यो, इन गुम्तीकेमी जाक्चा गेन। तन्न मेको नु आन मिन्तीक आ परबम लोत्र मपने। रोमी १५:१; १कोरिन्थी ८:९

2 मुर कामी नेल्ल जचा दुम्बा, दे मिम्बा, आ थमा सुडक्तीकेम बोल्यो मदुम्यो मुरुम चहिं गिग खाड ला ब्वाडब। उत्पत्ती १:२९; उत्पत्ती ९:३

3 मिनु श्ये ब्वाडबमी श्ये मब्वाडब आन कली आडक्क मसेलीन। मिनु श्ये मब्वाडबमी श्ये ब्वाडब आन कली यो दोस मगेन। मारदे हना जचा ब्वचामी मारोड मपाडब। परमप्रभु यावेमी मुर आन कली कांडचीक पा दाक्शा, आ मुर सेलतीमी। कलस्सी २:१६

4 मुर आन गेय पाडब कली निसाफ पाडब गे से बाक्ने? आ होत्रपमी ला मेको कली निसाफ पाडब। मेको ठीक दुम्ने चाप्ब, मारदे हना परमप्रभु यावेमी मेको कली ठीक सेल्ले चाप्ब। मती ७:१; याकूब ४:११-१२

5 का निक्शी मुरुमी नेल्ल नाक्त कांडचीक मिन्नीम। का निक्शीम चहिं नाक्त का कली ठेयब मिन्नीम। तन्न मार रिश्शो बाक्बा, मेको आंमा तुडक्का माल्नीम। गलाती ४:१०

6 थमा सुडक्कपुकीमी नाक्त का कली ठेयब मिन्तमेनु, परमप्रभु यावे कली मिम्शा ठेयब मिन्नीम। श्ये ब्वामेनु, परमप्रभु यावे कली मिम्शा ब्वाडनीम। श्ये मब्वाडबपुकीमी यो परमप्रभु यावे कली “गे रिश्शो पाडब बाक्तीनी” दे मिम्शा मब्वाडनीम।

7 गो नेल्ल आंम कली मब्रॉडनय, आंम कली मबेक्नय।

8 ब्रॉडतय हना यो, परमप्रभु यावे आ नें ठेयब सेल्चा कली ब्रॉडय। बेक्तय हना यो, परमप्रभु यावे आ नें ठेयब सेल्चा कली बेक्चा। ब्रॉडतय हना यो, बेक्तय हना यो, परमप्रभु यावे आ मुर नय। २कोरिन्थी ५:१५; गलाती २:२०

- 9 मारदे हना ख्रीस्त बेक्शा, बेक्शो रे सेंसीशा, नेल्ल आन कली कोत्रब दुम्त। बेक्शो, ब्रोंडशो मुर नेल्ल आन प्रभु बाक्ब।
- 10 मिनु मार, इं लोकब आन कली नाक्चा दुम्बा डा? आइक्ब सेल्चा दुम्बा डा? काबु नाक्ती परमप्रभु यावेमी नेल्ल इं कली आ टेयब नित्तीक आ डोंडती खुप्शा, का का पा निसाफ पाइब। मती २५:३१-३२; प्रेरित १७:३१; २कोरिन्थी ५:१०
- 11 मारदे हना “प्रभुमी गो ब्रोंडशा बाक्शो खोंदेशो पा, मुर नेल्लेमी आं डोंडती आन पोक्च थेक्नीम। मिनु नेल्लेमी परमप्रभु यावे कली टेयब सेल्नीम” दे ब्रेक्शो बाक्ब। यसैया ४५:२३; फिलिप्पी २:१०-११
- 12 गो नेल्लेमी परमप्रभु यावे आ डोंडती मार पशो बाक्चा, मेको का का पा शोत्रचा माल्नय।
- 13 मोपतीके आंम आंमा मनाक्मुय। थमा सुइक्ब लोकब आन थुं खाइक्पाइक्चा डा गेय मपमुय। १कोरिन्थी १०:३३
- 14 गो प्रभु येसु आ मुर दुम्शा, मारेइ मारेइ जचा थोत्रक रिम्शो बाक्ब, दे शेंसाक्ड। तन्न सुमी ग्रॉग्रा दिशो मिम्बा, मेको कली ग्रॉग्रा दिशोन दुम्ब। मती १५:११; प्रेरित १०:१५; तीतस १:१५
- 15 गे मार मार जशा ब्वशा, इ लोकब आ थुं खाइक्पाइक्चेवे हना, इ मदाक्तीके कोंडनेवे। इ जचा थोत्रकम पतीके इ ख्रीस्त बेक्शो लोकब कली खतम मसेलो। १कोरिन्थी ८:११-१३
- 16 मोपतीके गे मार दाक्नीनी, मेको कली मुरुम ग्रॉग्रा दिचा मगेने।
- 17 परमप्रभु यावे आ राज्य जचा तूचा आ पर्वम ममाड। परमप्रभु यावे आ सोक्त रे पा थमा सुइक्बपुकीमी रिम्शो गेय पशा, दुशा ग्येरशा बाक्चा आ पर्वम बाक्ब। १कोरिन्थी ८:८; हिब्रू १३:९
- 18 गे मोपा ख्रीस्त आ गेय पाइतीनी हना, परमप्रभु यावे आ दाक्शो नु मुर आन डोंडती मान ततीक दुम्ब।
- 19 मोपतीके दुशा गारशा नु थमा सुइक्तीक थुं बारपाइक्मुशा बाक्च। रोमी १२:१८; रोमी १५:२
- 20 गे जचा थोत्रक आ पर्वम परमप्रभु यावे आ गेय मक्यान्दीने। मारेइ मारेइ जचा ठीक बाक्ब। तन्न होस पने। मारदे हना इन जचा ब्वचामी इन लोकब आन थुं खाइक्पाइक्तीनी हना, मरिम्शो दुम्ब।
- 21 मोपतीके श्ये मब्वथु, अडगुर शांबु मद्रूथ, इन लोकब आन कली थुं मखाइक्पाइक्थु, बाक्चा रिम्शो दुम्ब। रोमी १४:२; १कोरिन्थी १०:२५-२७
- 22 इ थमा सुइक्तीके परमप्रभु यावे आ डोंडती बाक्ब। इन जचा थोत्रक आ पर्वम दाल्गीर मपाइतीनी हना, गे ग्येरसीशो मुर दुम्नीनी।
- 23 दाल्गीर पा जाइब चहिं दोस ताइब दुम्ब। मारदे हना आ थमा सुइक्तीके रे मपाइब। मोपा थमा मसुइक्तीके रे पशो गेय नेल्ल पाप बाक्ब।

## 15

- 1 गो थमा सुइक्चामी बोल्यो दुम्शोपुकीमी, आंम कली टेयब मसेल्थु, बोल्यो मदुम्शो थमा सुइक्ब आन कली वारच पय। रोमी १४:१
- 2 इं दातेम नेल्लेमी अरु आन कली रिम्शो पा आन थमा सुइक्तीक थुं बारपाइक्ब दुम्चा माल्नय। १कोरिन्थी ९:१९; १कोरिन्थी १०:२४,३३
- 3 ख्रीस्तमी यो आंमा दाक्शो मपव “इन कली पशो शुक्शी, आं तार मोंडसाक्ब” दे ब्रेक्शो बाक्ब। भजन संग्रह ६९:९
- 4 डोंडती ब्रेक्शो नेल्ल इं कली शेंचा कली ब्रेक्शो बाक्त। मेको लोत्र पढेशा, फाल्शा इं थुं बारपा, आस पा बाक्च। १कोरिन्थी १०:११
- 5 फाल्तीक सक्ति गेब नु थुं बारपाइक्ब परमप्रभु यावेमी इन कली थुं का दुम्शा, दुशा गारशा बाक्चा गेवल। दुशा गारशा बाक्तीनी हना, ख्रीस्त येसु आ गेय पाइब दुम्नीनी। फिलिप्पी २:२
- 6 मिनु गे थुं का नु लोत्र का पा इं प्रभु येसु ख्रीस्त आ आफ परमप्रभु यावे कली टेयब सेल्ब दुम्नीनी।
- 7 दोपा येसु ख्रीस्तमी इन कली दाक्शा ब्रवा। मोपान गेपुकी यो दाक्मुशा ब्रमुने। मो पनीनु, परमप्रभु यावे कली टेयब सेल्नीनी।
- 8 इं किक्की पिपी आन कली गेशो लोत्र खाप्चा कली ख्रीस्त यहूदी आन कली पाप रे प्रोंडब दुम्त। मोपा परमप्रभु यावे आ देशो थमा बाक्ब, दे कोंडचा कली मोदेशो दुम्त। मती १५:२४; प्रेरित ३:२५
- 9 अर्को रागी डा मुरपुकीमी परमप्रभु यावे आ शिशो आ पर्वम मेको कली टेयब सेल्मेक्ल। मोपतीके “अर्को रागी डा मुर आन दातेमी इन नें तुइक्पा कुम्सो पाइनुड” दे ब्रेक्शो बाक्ब। भजन संग्रह १८:४९
- 10 मिनु लेंशा “अर्को रागी डा मुर आं योत्रशो मुरपुकी नु थुं का दुम्शा, ग्येरसीन” दे ब्रेक्शो बाक्ब। ब्यवस्था ३२:४३
- 11 चिनु “ए, अर्को रागी डा मुर नेल्लेमी परमप्रभु यावे कली टेयब सेलीन, जात नेल्लेमी मेको कली मान पचा माल्नीम” दे ब्रेक्शो बाक्ब। भजन संग्रह ११७:१
- 12 यसैयामी “येस्से आ बडस रे का गूशा, टेयब दुम्शा, अर्को रागी डा मुर आन कली सासन पाइब। मिनु मेको कली सासन पशो तशा, नेल्लेमी “इं कली श्येत रे प्रोंडब” दे ग्येरशा, आस पा बाक्नीम” दे ब्रेक्शो बाक्त। यसैया ११:१०; प्रकाश ५:५
- 13 आस गेब परमप्रभु यावे आ सोक्तीमी इन कली शुश ग्येरपा, थुं नाइक्पा बाक्चा गेवल। मोपा इन थमा सुइक्तीकेमी टेयब आस पा बाक्कीन।

पावल आ गेय

- 14 आं लोकबपुकी, गे इन दातेमी दाक्मुशा, रिम्शो पा जोक्ब तुइक्ब दुम्शा नु शेंमुने चाप्ब दुम्शो बाक्नीनी, दे तुइक्ताक्ड।

15 परमप्रभु यावेमी आं कली शिशी पा शेंब सेलती। मोपतीके गो एको चिठीमी इच्का ठेयब लोत्र पा ब्रेक्ताकड। रोमी १:५; रोमी १२:३

16 गो रागी रागी डा मुर आन कली खीस्त येसु आ गेय पाइब दुम्ती। गो चढेब खोदेशो पा परमप्रभु यावे आ गेय पाइनुड। परमप्रभु यावे आ सोक्त आ पतीकेमी रागी डा मुर नेल्ल आ दाकशो चढेतीक खोदेशो दुम्मल। रोमी ११:३३

17 मेको शेंतीक गेय पचा कली खीस्त येसुमी बोल नु सक्ति गेती। मिनु परमप्रभु यावे आ डोंइती “गो ठेयब गेय पाता” देंती।

18 खीस्तमी पपाइशो गेय आ परबम ला लोत्र पाइनुड। गो आंमा गेय पा अर्को रागी डा मुर टीब दुम्मल, दे मेको आन कली शेंतीक गेय यो पना पन बाक्ती। २कोरिन्थी ३:५; रोमी १:५

19 परमप्रभु यावे आ सोक्तीम गेशो सक्तिमी चिन्ड नु छक लाक्या डा गेय कोइताकडमी। यरूसलेम सहर रे लशा, इल्लीरीकुम रागी सम्म जाकदीशशा, सहर सहर, गाउं गाउंमी खीस्त आ ग्येरपाइब लोत्र नेल्ल शेंना शेंन गाक्ती। मर्कूस १६:१७; २कोरिन्थी १२:१२

20 डोंइतीन खीस्त आ लोत्र नेंने थुम्शो आन बाक्तीकेम, मलड। मुल सम्म खीस्त आ नें मनेशो आन कली शेनुडमी देंशा, शेंना शेंन गाक्ती। २कोरिन्थी १०:१५-१६

21 मिनु “आं लोत्र तुइक्पाइक्का मपुंडीशीपुकीमी तुइक्का ताइनीम। मिनु मनेशोपुकीमी रुपनीम” दे ब्रेक्शो बाक्ब। यसैया ५२:१५

रोम लचा चिक्शो

22 गो मोदेशो शेंना शेंन गाक्कानु रोममी बाक्ब थमा सुइक्ब आन कली गुम्थ लाइनुड, दे डोंइती रे देंती, तन्न मुल सम्म इन कली गुम्चा मतड। रोमी १:१३

23 शुश बर्स रे इन कली गुम्तीक थुं पा बाक्ती। मुल एकेर डा गेय थुम्शा,

24 गो दीसा नित्थी एकेर रे गाक्शा, स्पेन रागी लाइनुड। मिनु इन बाक्तीके यो ओत्रशा गुम्नन्ती। गुम्यानु, ग्येरसीशा, आं थुं नाइक्का तडल देंती। मिनु नोले आं कली स्पेन सम्म चोव्रदीनीनी कों, दे आस यो पाता।

25 स्पेन लचा डोंइती थमा सुइक्ब आन कली वारच पथ यरूसलेम लाइनुड। प्रेरित १८:२१; प्रेरित १९:२१; प्रेरित २०:२२; प्रेरित २४:१७

26 मासीडोनीया नु आकाया रागीमी बाक्ब थमा सुइक्बपुकीमी “यरूसलेमम बाक्ब थमा सुइक्बपुकीमी जचा मतामे” देशो नेंशा, क्येट पोक्शा गेतीमी। मोपतीके मेको आन कली क्येट चोव्रथ लाइनुड। १कोरिन्थी १६:१; २कोरिन्थी ८:१-४

27 मारदे हना डोंइती यरूसलेमम बाक्ब थमा सुइक्बपुकीमी मेको आन कली येसु खीस्त आ लोत्र शेंशो बाक्तेकम। मोपतीके मुल मेको आन कली श्येत दुम्तीके, क्येट पोक्शा, चोव्रथ सोइक्ताक्यीमी। १कोरिन्थी ९:११; गलाती ६:६

28 मेको आन कली सोइशो क्येट चोव्रशा, स्पेन लाइनुड। लडानु, इन बाक्तीके यो ओत्रनुड।

29 इन बाक्तीके जाकडानु, खीस्त आ आसीकम जाकुनुड, दे तुइक्ताकड।

30 आं लोकबपुकी, इं प्रभु येसु खीस्तमी इं कली थुं का सेल्लु। परमप्रभु यावे आ सोक्तीमी दाकमुपाइक्कु। मिनु थमा पा वोबु दुम्तय। मोपतीके आं परबम परमप्रभु यावे कली पुंडना पुंडन बाक्कीन। २कोरिन्थी १:११; २थिस्सलोनिकी ३:१

31 मार पुनीन देंनुड देशा हना “पावल कली यहूदीया रागीम बाक्ब थमा मसुइक्ब आन गुइ रे प्रोनीन। मिनु यरूसलेम जाकदीशशा, मेकेर बाक्ब थमा सुइक्ब आन कली वारच पचा गेने।

32 परमप्रभु यावे आ दाकशो पा ग्येरसीशा यरूसलेम रे पिशा, आंइ कली गुम्पतीने। इन नेंमी थुं का दुम्शा, ग्येरपाइक्कुशा बाक्चा तकल” दे पुनीन। १थिस्सलोनिकी २:१५

33 नेल्ल इं थुं नाइक्पाइक्ब परमप्रभु यावे गेपुकी नु बाक्ल। आमेन।

## 16

रिम्शो बाक्कीन, दे माइशो

1 केन्क्रेया डा थमा सुइक्ब आन गुम्तीक खिंमी गेय पाइब फिबी दिदी आ परबम ब्रेक्शो बाकुनुड।

2 फिबी दिदीमी थमा सुइक्ब शुश आन कली वारच पाप्लु। आं कली यो शुश वारच पाइक्ती। मोपतीके फिबी दिदी कली प्रभु आ नेंमी मान पतीने। मार मार माल्दा, मेको गेशा वारच पतीने।

3 अक्वीला नु प्रिस्कीला साइ गो नु गारशा, खीस्त येसु आ गेय पाम्ताकसे। मेको आस कली “रिम्शो बाक्कीस” देनीन। प्रेरित १८:२; प्रेरित १८:२६

4 मिनु थमा मसुइक्बपुकीमी आं कली खेदा पामेनु, आं कली प्रोंइचा, दे वारच पय्यीसीनु, हेरा साइक्का पुंडसाकस। मेको निक्शीमी आं कली प्रोंइशो आ परबम परमप्रभु यावे कली “गे रिम्शो पाइब बाक्नीनी” देनुड। गो ला ममाइ, नेल्ल रागी रागी डा थमा सुइक्बपुकीमी यो मेको निक्शी आस पशो मिम्शा, परमप्रभु यावे कली “गे रिम्शो पाइब बाक्नीनी” देनीन। मोपतीके मेको आस कली “रिम्शो बाक्कीसे” दे मतीने।

5 आस खिंमी देल्ल थमा सुइक्ब नेल्ल आन कली यो “रिम्शो बाक्कीन” दे माइक्का। आं दाकशो एपेनेतस कली “रिम्शो बाक्को” दे माइक्का। एपेनेतस एसीया रागी डा नेल्ल क्येडा डोंइती खीस्त कली थमा सुइक्ब बाक्ब।

6 इन कली शुश वारच पाइब मरीयम कली यो “रिम्शो बाक्को” दे माइक्का।

7 इं यहूदी जात डा अन्डोनीकस नु युनीयस साइ येसु आ नेंमी गो नु जेल्खानम बाक्शो नसी। आं क्येडा डोंइती मेको निक्शीमी खीस्त कली थमा सुइक्ताकसे। खीस्त आ सोइशो आन दातेमी शुश जोक्ब दुम्ताकसे। मेको आस कली “रिम्शो बाक्कीसे” दे माइक्का।

- 8 प्रभु आ नेम आं दाक्शो अमप्लीआतस कली “रिम्शो बाक्को” दे माइक्का।  
 9 गोपुकी नु ख्रीस्त आ गेय पा उरबानस कली “रिम्शो बाक्को” दे माइक्का। आं दाक्शो स्ताकीस कली “रिम्शो बाक्को” दे माइक्का।  
 10 ख्रीस्त कली रिम्शो पा थमा सुइक्ब अपेल्लेस कली “रिम्शो बाक्को” दे माइक्का। अरीस्तोबलस आ खिं डा मुर नेल्ल आन कली यो “रिम्शो बाक्कीन” दे माइक्का।  
 11 इं यहूदी जात डा हेरोदीयन कली “रिम्शो बाक्को” दे माइक्का। नारसीसस आ खिं डा प्रभु कली थमा सुइक्ब नेल्ल आन कली यो “रिम्शो बाक्कीन” दे माइक्का।  
 12 प्रभु आ गेय पाइब त्रिफेना नु त्रिफोसा दिदी आस कली यो “रिम्शो बाक्कीसे” दे माइक्का। प्रभु आ शुश गेय पाइब आं दाक्शो पेरसीस दिदी कली यो “रिम्शो बाक्को” दे माइक्का।  
 13 प्रभुम योत्रशो थमा सुइक्ब रुफुस कली “रिम्शो बाक्को” दे माइक्का। साइ रुफुस आ ममामी आं कली आ तौ खोदेशो पती। मेको कली यो “रिम्शो बाक्को” दे माइक्का। मर्कूस १५:२१  
 14 असीनक्रीतस, फ्लेगन, हेरमेस, पत्रोबास, हेरमेस नु मेकोपुकी नु बाक्ब थमा सुइक्ब लोकब नेल्ल आन कली यो “रिम्शो बाक्कीन” दे माइक्का।  
 15 फिलोलोगस, युलीया, नेरीयस, नेरीयस आ दिदी, ओलीम्पास नु मेको नेल्ल आन खिंम बाक्ब थमा सुइक्ब आन कली यो “रिम्शो बाक्कीन” दे मतीने।  
 16 येसु आ नेमी मुम्मुशा, आसीक गेमुने। एक डा थमा सुइक्ब नेल्लेमी इन कली “रिम्शो बाक्कीन” देतेकम। १कोरिन्थी १६:२०

दूली शेंब आन लोत्र मनेंचा

- 17 आं लोकबपुकी, एको नेल्ल क्येडा नोले डा लोत्र पशा, अर्ती गेनन्नी। कोइ मुरुमी ख्रीस्त आ लोत्र नेंशा, दूली मिम्ताकम। मेको मुरपुकीमी मुल सम्म दुशा गारशा बाक्शो थमा सुइक्ब लोकब इन कली फ्राचा माल्नीम। मेको आन क्येडा होस पा बाक्कीन। मती ७:१५; २थिस्सलोनिकी ३:६; तीतस ३:१०  
 18 मेकोपुकीमी येसु ख्रीस्त आ गेय मपाइनीम। आन कोत्रज प्रिंचा ला मिम्शा, गेय पाइनीम। मिलो शिलो लोत्र पा रिम्शो लोत्र नेंब आन थुं क्याल्नीम। मोदेशो मुर आन क्येडा होस पा बाक्कीन। फिलिप्पी ३:१९; कलस्सी २:४  
 19 गे शेंतीक लोत्र नेंशा, टीब मुर ननी, दे नेल्लेमी तुइक्ताकमे। एको नेंशा, गो ग्येरसाक्यी। तन्न रिम्शो गेय मरिम्शो गेय, थमा शेंतीक दूली शेंतीक, थमा नु जोल तुइक्ब दुमीने, देंनुडा। मोपतीके ब्रेक्शा, शुश शेंताकनी। रोमी १:८; १कोरिन्थी १४:२०  
 20 थुं नाइक्का गेब परमप्रभु यावेमी रीब पा सैतान कली इन खोइल आगाम वोइक्ब। इं प्रभु येसु ख्रीस्तमी इन कली शिशी पवल।

“रिम्शो बाक्कीन” देंशो

- 21 गो नु गेय पाइब तिमोथीमी इन कली “रिम्शो बाक्कीन” देंत। यहूदी जात डा लुसीयस, यासोन, सोसीपाटर सांफामी यो इन कली “रिम्शो बाक्कीन” देंतेकम। प्रेरित १६:१-३; प्रेरित १९:२२; फिलिप्पी २:१९-२२; प्रेरित १७:६; प्रेरित २०:४  
 22 पावलमी अरेशा ब्रेक्पाइशो एको चिठी ब्रेक्ब गो तेरतीयस नडा। मिनु प्रभु आ नेमी गो यो इन कली “रिम्शो बाक्कीन” दे ब्रेक्ताकड।  
 23 गोम चिठी ब्रेक्पदुनु, गायस आं खिंमी बाक्तक। मिनु गायस नु आ खिंमी देल्ब थमा सुइक्बपुकीमी यो इन कली “रिम्शो बाक्कीन” दे माइक्का देंतेकम। इरास्तस माइशो सरकार आ गेय पाइबमी यो इन कली “रिम्शो बाक्कीन” देंत। थमा सुइक्ब इं लोकब क्वारटसमी यो इन कली “रिम्शो बाक्कीन” देंत। १कोरिन्थी १:१४  
 24 इं प्रभु येसु ख्रीस्त आ शिशी गेपुकी नेल्ल नु बाक्ल। आमेन।

नोले डा लोत्र

- 25 परमप्रभु यावेमी इन कली आ ग्येरपाइक्तीक लोत्र नु येसु ख्रीस्त आ पर्वम शेंतीक नेंशा, बोल्यो पा थमा सुइक्ब सेल्ने चाप्ब, दे तुइक्ताकड। मोपा साइ डा खुइशो लोत्र नेल्ल तुइक्पाइशो बाक्ब। १कोरिन्थी २:७; एफिसी १:९; एफिसी ३:४-९  
 26 परमप्रभु यावे आ लोत्र पाइबपुकीम मेको खुइशो लोत्र ब्रेक्शो बाक्तेकम। मेको गेना हना यो बाक्ब परमप्रभु यावे आ दाक्शो बाक्ब। मेको लोत्र रागी रागी डा मुर आन कली तुइक्पाइशो थमा सुइक्ब सेल्चा कली बाक्त।  
 27 आ का ला बाक्शो मारेड मारेड तुइक्ब परमप्रभु यावे कली येसु ख्रीस्त रे पा गेना हना यो नेल्ल सक्ति नु ठेयब दुम्तीके बाक्ल। आमेन। रोमी १:५

## १ कोरिन्थी

**ब्रेक्ब मुर:** एको चिटी ब्रेक्ब पावल बाक्ब। मेकोमी आ नें नेल्ल क्येडा डोंइती ब्रेक्शो बाक्त। पावलमी कोरिन्थ सहर कली थमा सुइक्ब आन ग्रुम्तीक सेल्लतु। मिनु पावल कली आफ, दे नें वोइक्तेक्म। १कोरिन्थी १:१; १कोरिन्थी ३:१०; १कोरिन्थी ४:१५

**गेना ब्रेक्शो:** पावल, बर्स निकशी महिना सां एफिसस सहरम बाक्शा, मेकेर रे कोरिन्थ सहर डा थमा सुइक्ब आन कली चिटी ब्रेक्शो बाक्त। मेको ५७ ए. डी. डा डोंइती डा महिनाम ब्रेक्शो बाक्ब।

**मार ब्रेक्शो:** पावलमी मेको थमा सुइक्ब आन ग्रुम्तीक खिं ५२ ए. डी. मेर आंमान सेल्ला, बर्स निकशी मेकेर शेंशो बाक्त। मिनु मेको थमा सुइक्ब आन दातेम मार मार मरिम्शो दुम्मे, मेको ख्लोए आ खिं डा मुरुम पावल कली शेंथ जाक्शो बाक्तेक्म।

१. थमा सुइक्ब आन ग्रुम्तीकेमी मीश मुर दोदेंशो दुम्चा माल्नीमी।
२. मेकोपुकी हुल हुल दुम्शो बाक्तेक्म १कोरिन्थी १:१-१६
३. मुर आन हेंथे पा मरिम्शो पशो १कोरिन्थी ५:- १०:-
४. ग्रुम्तीक डा मुरुम तुइक्चा माल्लो लोव्र:  
मीश मुर आन पबर्म  
प्रभु भोज आ पबर्म  
परमप्रभु यावे आ सोक्तीम मार गेय पाइब  
परमप्रभु यावे आ सोक्त आ नेल्ल क्येडा ठेयब गेय  
परमप्रभु यावे आ सोक्त आ लोव्र पचा आ पबर्म  
मुर बेक्शा, सेंचा आ पबर्म १कोरिन्थी ११:- १५:-

डोंइती डा लोव्र

१ परमप्रभु यावे आ दाक्शो पा खीस्त येसु आ सोइश्शो ब्रेत्चा पुंडसीशो, गो पावल नड। इं लोकब सोस्थेनेस नु गोमी कोरिन्थ सहरम बाक्ब परमप्रभु यावे आ मुर दुम्शा देल्ल इन कली एको चिटी ब्रेक्शा सोइक्ताक्कु।

२ गे कोरिन्थ सहर डा खीस्त येसुमी योव्रचा पुंडसाक्नी। मोपतीके योव्रशोपुकी दे ब्रेत्चा पुंडसीनीनी। गेपुकी ला ममाड, ते ते इं प्रभु येसु खीस्त आ नेमी खुम्सीनीमी, मेक मेक डा मुरपुकी यो इन खोदेंशो पा योव्रशा, योव्रशोपुकी दे ब्रेत्चा पुंडसीनीम। येसु खीस्त आंड प्रभु, इं प्रभु, थमा सुइक्ब नेल्ल आन प्रभु बाक्ब। मिनु आ नेमी गो नेल्ल का दुम्तया। १कोरिन्थी ६:११; प्रेरित ९:१६; प्रेरित १८:१-१७

३ इं आफ परमप्रभु यावे नु प्रभु येसु खीस्तमी इन कली शिशी पा इन थुं नाइश्शा बाक्चा गेम्सेक्ल।

प्रार्थना पशो

४ गो इन पबर्म परमप्रभु यावे कली “गे रिम्शो पाइब ननी” दे ठेयब सेल्लुड, मारदे हना इन कली शिशी पा येसु खीस्तमी तुइक्पाइक्तु।

५ मिनु तुइक्तीक नु रुप्तीक थुं शुश गेशा, अरु आन कली शेंब नु रुप्पाइक्ब सेल्लु।

६ मिनु इन पतीके मुरपुकीमी खीस्त आ सक्ति ताइनीम। तीतस २:१३; २पत्रुस ३:१३-१४

७ गेपुकी परमप्रभु यावे आ सोक्तीमी पपाइश्शो गेय नेल्ल पचा ताइतीनी। मारेड मारेडम गाप्शा बाक्नीनी। इं प्रभु येसु खीस्तमी तपांडसेक्ल, दे रिम्शा बाक्नीनी।

८ इं प्रभु येसु खीस्त जाक्म नाक्ती आ डोंइती ठीक दुम्शा, इन कली सक्ति पाइश्शो गेय पना पन थिप्ब, दे तुइक्ताक्ड। मारदे हना इन कली नेल्ल क्येडा नोले सम्म थमा सुइक्चा मप्रोंइथु रिम्शा बाक्तीक सक्ति गेब। फिलिप्पी १:६; १थिस्सलोनिकी ३:१३

९ परमप्रभु यावेमी इन कली आ तौ इं प्रभु येसु खीस्त नु गेना हना यो काथा बाक्चा कली योव्रतु। मिनु आ देंशो लोव्र नेल्ल खाप्ब। १थिस्सलोनिकी ५:२४

थुं का दुम्शा बाक्कीन

१० आं लोकबपुकी, इं प्रभु येसु खीस्त आ नेमी, इन कली अर्ती गेनन्नी। लोव्र का, शोव्र का नु थुं का दुम्शा बाक्चा मप्रोनीन। १कोरिन्थी ११:१८; रोमी १५:५; फिलिप्पी २:२

११ “कोरिन्थीपुकी जिशा बाक्नीम” दे इन पबर्म ख्लोए आ खिं डा मुरपुकीमी तुइक्पाइक्तीमी।

१२ इन जिशो मार बाक्ब देंशा हना, का निकशीमी “पावल आ नोले खोइक्ब नकी” का निकशीमी “आपोल्लोस आ नोले खोइक्ब नकी” का निकशीमी “केफास आ नोले खोइक्ब नकी” नु का निकशीमी “खीस्त आ नोले खोइक्ब नकी” देतीनी। १कोरिन्थी ३:४; प्रेरित १८:२४-२७; यूहन्ना १:४२

१३ मार खीस्त देंशो शुश बाक्नीमी डा? पावलमी इन पाप क्याम्चा कली शीमी केप्शा कांटी थोक्शा क्याइश्शा साइक्चा पुंडसे डा? पावल आ नेमी ब्वाक्कुम खुम्शा गुंडचा पुंडसीनी डा?

१४ गो परमप्रभु कली “गे रिम्शो पाइब ननी” देंनुड। मारदे हना गो क्रिस्पस नु गायस डा लाक्शा सुइ कली ब्वाक्कुम खुम्शा मयुंडदुमी। प्रेरित १८:८; रोमी १६:२३

15 मुर आन कली ब्वाक्कुम खुम्शा गुंडतीक गेय पशो नड हना, मेकोपुकीमी “पावल आ नेमी ब्वाक्कुम खुम्शा गुंडचा पुंडसाक्क” देम वा।

16 स्तीफानस आ खिं डा मुर आन कली ब्वाक्कुम खुम्शा गुंडताक्डमी। मेको डा लाक्शा, सुइ आन कली ब्वाक्कुम खुम्शा गुंडदुमी कों मयुंडदुमी, मारेइ मतुइक्नुड। १कोरिन्थी १६:१५

17 खीस्तमी मुर आन कली ब्वाक्कुम खुम्शा गुंडतीक गेय पथ मसोइक्ती। आ लोत्र नेपाइक्का कली सोइक्ताक्की। लोत्रमी फू चुइश्शो खोदेशो पा ममाइ। गो फू चुइश्शो लोत्र पाता हना, खीस्त बेक्शो सक्ति क्याम्सीशा लाइब।

रागी डा जोक्ब तुइक्ब आन पर्वम

18 “खीस्त पाप क्याम्चा कली साइक्का पुंडसाक्क” देशो लोत्र नेशा, नरक लाइबपुकीमी “मूर्ख लोत्र बाक्ब” देनीम। गो पाप रे ब्रोइशोपुकीमी चहिं “एको लोत्रम परमप्रभु यावे आ सक्ति बाक्ब” दे तुइक्नय। २कोरिन्थी ४:३; रोमी १:१६

19 मिनू “जोक्ब आन कली आन जोक्शो क्याम्शा, तुइक्ब आन कली आन तुइश्शो साम्शा गेनुडमी” दे ब्रेक्शो बाक्ब। यसैया २९:१४

20 जोक्ब तुइक्ब सु सु नमी? पढेस जोक्ब सु सु नमी? सिनाक्त मुलाक्त शुश लोत्र पा ग्राब सु नमी? लो, मिम्तीने। एको रागी डा जोक्ब तुइक्ब लोत्र कली परमप्रभु यावेमी फश लोत्र मसेला डा? मती ११:२५; रोमी १:२२

21 परमप्रभु यावेमी मुर आन जोक्तीक तुइक्तीक रे आम कली मतुइक्पांडसे। परमप्रभु यावेम आ दाक्शो पा, आंइ मूर्ख लोत्र नेपाइक्ब। मिनू मेको लोत्रम थमा सुइक्ब आन कली पाप रे ब्रोइचा गेब।

22 यहूदीपुकी चिन्ड नु छक लाक्का डा गेय कोत्रकोत्र दाक्नीम। ग्रीकपुकीमी मुर आन जोक्तीक तुइक्तीक लोत्र माल्शा, नैथ गाक्नीम। मती १२:३८; यूहन्ना ४:४८; प्रेरित १७:१८-२१

23 मेको आन दाक्शो, आन माल्शा गाक्शो नेल्ल तुइश्शा यो गोमी चहिं “खीस्त पाप क्याम्चा कली साइक्का पुंडसाक्क” दे आन कली नेपाइक्नीकी। मोदेशो नेपाइक्कानु, खीस्त लामी वोइश्शो फुल्लु खोदेशो दुम्शा, यहूदी आन कली दाइल पाइक्ब। मिनू राम्सीनीम। अर्को रागी डा मुरपुकीमी “मूर्ख लोत्र बाक्माक्त” दे काइ नेचा मदाक्नीम। प्रेरित १७:३२; गलाती ५:११; १कोरिन्थी २:१४

24 परमप्रभु यावेमी योत्रशो यहूदी नु ग्रीकपुकीमी चहिं मार देनीम देशा हना “परमप्रभु यावे आ सक्ति नु जोक्तीक तुइक्तीक नेल्ल खीस्त नु थिसीब” देनीम। कलस्सी २:३

25 परमप्रभु यावे आ मूर्ख लोत्र मुर आन जोक्तीक तुइक्तीक क्येडा ठेयब जोक्तीक तुइक्तीक लोत्र बाक्ब। परमप्रभु यावे आ आइक्च सक्ति यो मुर आन ठेयब सक्ति क्येडा ठेयब बाक्ब।

26 आं लोक्बपुकी, परमप्रभु यावेमी इन कली मारदे योत्रडा? इन पढेशो तशा देय, इन जोक्शो तुइश्शो तशा? गे शुश सक्ति पाइश्शो यो मननी। ठेयब खिं डा मुर यो मबाक्नी। लो, मेको मिम्तीन। यूहन्ना ७:४८; याक्ब २:१-५

27 तन्न परमप्रभु यावेमी जोक्ब तुइक्ब आन कली मुने तोक्का कली मजोक्ब मतुइक्ब मूर्ख आन कली योत्रतीमी। परमप्रभु यावेमी अधिकार सक्ति पाइश्शो आन कली मुने तोक्का कली अधिकार सक्ति मपाइश्शो आन कली योत्रतीमी।

28 परमप्रभु यावेमी रागी डा महिक्सीशो आइक्च आन कली योत्रतु। मारदे हना हिक्सीशो नु ठेयब आन कली मुने तोक्का कली मो पाप्तु।

29 मोपतीके सुइ मुर परमप्रभु यावे आ डोंइती ठेयब दुम्ने मचाप्नीम। रोमी ३:२७; एफिसी २:९

30 मेकोमी येसु खीस्त आ नेमी इन कली ब्रोइचा गेब। मेको इन जोक्तीक तुइक्तीक, इन ठीक पतीके, परमप्रभु यावे आ मुर दुम्तीके नु पाप रे प्रोंइतीके बाक्ब। येरमीया २३:५-६; २कोरिन्थी ५:२१; यूहन्ना १७:३९; मती २०:२८

31 मोपतीके “प्रभु आ पतीके इं नें बोरपाइय्य” दे साइ नेसी देशो लोत्र मिम्शा, परमप्रभु कली ठेयब सेल्य। येरमीया ९:२२-२३; २कोरिन्थी १०:१७

## 2

येसु खीस्त आ पर्वम शेंशो

1 आं लोक्बपुकी, गो गेपुकी नु बाक्डानु, परमप्रभु यावे आ लोत्र नेपदनु, मुर आन जोक्तीक तुइक्तीक रे नु फू चुइश्शो लोत्र पा मशेंदन्नी।

2 मारदे हना येसु खीस्त कली शीम केप्शा कांटी थोक्शा क्याइश्शा साइक्का पुंडसीशो लोत्र डा लाक्शा अरु मशेंनुडमी, दे आं थुं फ्रेंशा जाक्शो नड। गलाती ६:१४

3 मिनू इन कली शेंदन्नीनु, आं रांमी बल मबाक्थु, हिना हिन, खिंखि पा शेंताक्नी। गलाती ४:१३; प्रेरित १८:९; २कोरिन्थी १०:३

4 मुर आन कली जोक्तीक तुइक्तीक कोंइशा, ठेयब लोत्र मपड। तन्न परमप्रभु यावे आ सोक्तीम कोंइशो सक्ति रे पा शेंताक्नी। मती १०:२०

5 तन्न इन थमा सुइक्तीके मुर आन जोक्तीक तुइक्तीकेम मबाक्थु, परमप्रभु यावे आ सक्तिम बाक्ल। १थिस्सलोनिकी १:५

परमप्रभु आ जोक्तीक तुइक्तीक

6 मो हना यो गो जोक्तीक तुइक्तीक लोत्र रुक्ब आन कली लोत्र पाइनीकी। तन्न रागी डा नु सासन पाइब आन जोक्तीक तुइक्तीक डा लोत्र चहिं ममाइ। मारदे हना मेको बेक्शा लाइनीम।



7 तन्न गो दोदेशो जोक्तीक तुडक्तीक डा लोत्र शेंनीकी देशा हना, परमप्रभु यावे आ जोक्तीक तुडक्तीक डा लोत्र शेंनीकी। मेको लोत्र डोंइती खुइशशा वोइशशा बाकत। मुल इन कली रिम्शो दुम्मल, दे शेंनीकी। मती ११:२५; कलस्सी १:२६

8 मेको लोत्र रागी डा ठेयब मुरपुकीमी मरुबेम। रूप्तेकम हना, सक्ति पाइशशो प्रभु कली शीम केषा कांटी थोकशा क्याइशशा मसदेम वा।

9 मिनु “मिक्चीम मतशो, नोफाम मनंशो, मुर आन थुंमी ममिम्शो लोत्र परमप्रभु यावेमी आ कली दाक्ब आन कली तुडक्पाइशशा, रुप्चा गेम्तीमी” दे ब्रेक्शो बाक्ब। यसेया ६४:४

10 मेको लोत्र परमप्रभु यावेमी आ सोक्त रे पा इ कली तुडक्पाइशशा रूप्पाइक्तु। मारदे हना परमप्रभु यावे आ सोक्तीम नेल्ल तुडक्ब। खुइशशो लोत्र यो माल्शा युंडब। परमप्रभु यावे आ सोक्तीम परमप्रभु यावे आ थुं डा लोत्र यो नेल्ल तुडक्ब।

11 मुर आन थुंमी मार बाक्बा, सुमी तुडक्नीमी डा? आंम आन थुं डा लोत्र आंमा ला तुडक्नीम। परमप्रभु यावे आ सोक्त डा लाक्शा सुइमी परमप्रभु यावे आ थुं डा लोत्र मतुडक्नीम, आ सोक्तीम ला तुडक्ब।

12 गोपुकीम रागी डा सोक्त मतशो बाक्नय, परमप्रभु यावे आ सोक्त कली ताइतय। मोपतीके गो परमप्रभु यावे आ गेशो नेल्ल रुप्नय। यूहन्ना १४:१६-१७

13 मोपतीके गो शेंदकानु, मुर आन जोक्तीक तुडक्तीक लोत्रम मशेंनीकी। परमप्रभु यावे आ सोक्तीम गेशो लोत्र पा शेंनीकी। मिनु परमप्रभु यावे आ सोक्तीम ब्रीशो मुर आन कली शेंशा रूप्पाइक्नीकी।

14 परमप्रभु यावे कली थमा मसुडक्ब मुरुम परमप्रभु यावे आ सोक्त डा गेय मताइनीम। मेको नेल्ल मेको आन कली मूर्ख गेय खोंदेशो पा रुप्ने मचाप्नीम। मारदे हना मेको सोक्त डा लोत्र बाक्ब। यूहन्ना ८:४७; १कोरिन्थी १:२३

15 परमप्रभु यावे आ सोक्त पाइशशो मुरपुकीमी मारेइ मारेइ नाक्ने नु रुप्ने चाप्नीम। तन्न मेको आन कली नाक्ब सुइ मबाक्नीम।

16 मार ब्रेक्शो बाक्ब देशा हना “सुमी प्रभु आ थुं नाक्ने नु रुप्ने चाप्बा डा? सुमी प्रभु कली शेंने चाप्बा डा?” दे ब्रेक्शो बाक्त। तन्न गोपुकी नु ख्रीस्त आ थुं बाक्ब। यसेया ४०:१३

### 3

आलम खोंदेशो पाइतीनी, दे हुइशशो

1 आं लोक्बपुकी, इन कली शेंदुनु, परमप्रभु यावे आ सोक्तीम ब्रीशो मुर खोंदेशो पा शेंने मचबु। मारदे हना रागी डा मुर खोंदेशो पा, ख्रीस्त कली थमा सुइक्तीकेमी आल खोंदेशो बाक्नीनी। यूहन्ना १६:१२

2 गो इन कली खमे मगेथु, दूध तुंडताक्नी। मिनु मुल सम्म यो दूध तुंडना तुंडन वोइक्तन्नी। १पत्रुस २:२

3 गे मुल सम्म रागी डा मुर खोंदेशो बाक्नीनी। गे जीनीनी, रुश पाइनीनी। मिनु रागी डा मुर खोंदेशो मदुम्नी डा? १कोरिन्थी १:१०-११; १कोरिन्थी ११:१८

4 का निकशीमी “गो पावल आ नोले खोंडक्ब नकी” का निकशीमी चहिं “गो आपोल्लोस आ नोले खोंडक्ब नकी” दे जिना जिन बाक्तीनी। मोपतीके रागी डा मुर खोंदेशो मदुम्नी डा? १कोरिन्थी १:१२

गे परमप्रभु आ खिं बाक्नीनी

5 आपोल्लोस माइशशो सु में? गो पावल माइशशो सु नडा? प्रभुमी आंस कली आ लोत्र शेंथ योत्रशो नस्कु। गेपुकीमी आंस लोत्र नेंशा थमा सुइक्तीनी।

6 गो खुम्ता आपोल्लोसमी ब्वाक्कु लुक्ताक्ब। मिनु परमप्रभु यावेमी कोल्पाइक्तु। प्रेरित १८:२४-२८

7 मोपतीके खुम्ब ठेयब ममाइ, ब्वाक्कु लुक्ब यो ठेयब ममाइ। कोल्पाइक्ब, बारपाइक्ब परमप्रभु यावे ठेयब बाक्ब।

8 खुम्ब नु ब्वाक्कु लुक्ब कांडचीक बाक्नीस। मिनु आंइ कली पपाइशशो गेय दोदेशो पा पका, मोदेशो पा गाल्च ताइनीकी। १कोरिन्थी ४:५

9 गे परमप्रभु यावे आ रू नु आ खिं ननी। गोपुकी चहिं मेको रूमी गेय पाइब नु मेको खिं सेल्ब नकी। मती १३:२-९; एफिसी २:२०

10 परमप्रभु यावेमी आं कली रिम्शो दारशो खिं सेल्ब सेलती। मिनु आ देशो टिशा, खिं डा जग दोशा, बोल्यो पा वोइक्ता। मेको जग तारी अरुमी प्रोव्रना प्रोव्रन लाइक्नीम। मेको प्रोव्रबपुकीमी दोपा रिम्शो दुम्बा, मेको मिम्शा गेय पामेक्ल।

11 थमा जग येसु ख्रीस्त ला बाक्ब। आ क्येडा लाक्शा अरु मारेइ जग मबाक्ब। मिनु सुइमी अरु जग वोइक्ने मचाप्नीम। १पत्रुस २:४-६

12 मेको जग तारी मार मार के खिं सेल्नीम देशा हना, सुन, चांदी, हीरा मोती, शी, खिंवा नु नल के खिं सेल्नीम। मुल मार के सेल्शो बाक्बा मतांडसीब।

13 ख्रीस्तम निसाफ पची नाक्त मार के सेल्तेकम हना यो, मीम हुम्शा कोव्रब। मारदे हना मेना ख्रीस्तमी आ लोत्र शेंब आन गेय दोदेशो बाक्मे, मीम हुम्शा नाक्ब। १कोरिन्थी ४:५

14 मेको जग तारी सेल्शो खिं लीत हना, सेल्बमी इनाम ताइब।

15 गेय मीम ग्रोइशशा, पुलु दुम्शा लत हना, मेको मुर गेना हना यो ब्रोंइचा ताइब। तन्न इनाम मतथु, मारेइ मपाइशशो दुम्शा बाक्चा माल्ब।

16 गे परमप्रभु यावे आ खिं ननी, दे मतुडक्नीनी? मिनु परमप्रभु यावे आ सोक्त इन आगाम बाक्ब, दे मतुडक्नीनी? १कोरिन्थी ६:१९; २कोरिन्थी ६:१६

17 मिनू सुमी परमप्रभु यावे आ खिं ग्रॉण दिशो सेल्बा, परमप्रभु यावेमी मेको कली यो ग्रॉण दिशो सेल्ब। मारदे हना परमप्रभु यावे आ खिं परमप्रभु यावे के ला बाक्ब। मिनू मेको गे बाक्नीनी।

सुइ टेयब मसुंडसमल

18 सुइमी आंम कली जोल मपांडसेक्ल। इन दातेमी सुइमी आंम कली जोक्ब तुइक्ब मिम्साक्व हना, मेको मूर्ख दुम्ल। मोपा ला जोक्ब तुइक्ब दुम्ने चाप्ब। प्रकाश ३:१७-१८

19 एको रागी डा जोक्तीक तुइक्तीक परमप्रभु यावे आ डोंइती मूर्ख लोत्र बाक्ब। मार ब्रेक्शो बाक्ब देशा हना “जोक्ब तुइक्बपुकी आंम आन जोक्तीक तुइक्तीक गेयमी आंम कली ग्याइक्पांडसीनीम” दे ब्रेक्शो बाक्ब। अय्युब ५:१३

20 लेंशा “प्रभुमी एको रागी डा जोक्ब तुइक्ब आन मिम्शो जाम्शा लाइब, दे तुइक्ब” दे यो ब्रेक्शो बाक्ब। भजन संग्रह ९४:११

21 मोपतीके सुइमी मुर आन नें आ पर्वम टेयब मलेम्मल। मारदे हना नेल्ल इन के बाक्नीम।

22 इन कली शेंब, गो पावल, आपोल्लोस, केफास नु रागी, ब्रोंइचा नु बेक्चा, मुल मार दुम्शो बाक्बा नु नोले मार दुम्बा, नेल्ल इन के बाक्नीम।

23 तन्न गे ख्रीस्त आ मुर बाक्नीनी। मिनू ख्रीस्त परमप्रभु यावे आ तौ बाक्ब। १कोरिन्थी ११:३

## 4

मुर आन कली मनाक्चा

1 मिनू मुरपुकीमी गो शेंब, आंड पर्वम मार मिम्चा माल्नीम देशा हना, गो ख्रीस्त आ गेय पाइब नु परमप्रभु यावे आ खुइश्शो लोत्र तुइक्पाइक्चा कली शेंब नकी। तीतस १:७

2 मोदेशो पा शेंबपुकी थमा सुइक्चा माल्शो मुर दुम्चा माल्नीम। लूका १२:४२

3 गे नु अरु निसाफ पतीकेम आं कली नाक्तीनीनु, मेको नाक्शो मारेइ खोंदेशो ममिम्नुड। गो आंमा यो मनाक्सीनुड।

4 गो मारेइ मरिम्शो मपड, दे मिम्नुड। तन्न मतुइक्थु, पडा कों? आं कली निसाफ पाइब प्रभु बाक्ब।

5 मोपतीके प्रभु आ निसाफ पतीक नाक्त मजाक्म सम्म मुर आन कली मनाक्तीन। आ निसाफ नाक्ती जाक्मेनु, खुइश्शा वोइश्शो लोत्र नेल्ल तुइक्पाइक्ब। छिडछिडम खुइश्शो थुं डा थोत्रक नेल्ल छेडछेडम तांडसीनीम। मिनू परमप्रभु यावेमी मुर आन कली “गे रिम्शो पाइतीनी” देंब। १कोरिन्थी ३:८

मुर आन नें ब्रशा टेयब मलेत्चा

6 आं लोकबपुकी, गे परमप्रभु यावे आ लोत्र रिम्शो पा टिने चाप्नीनी, दे गो मेको नेल्ल पाइतक। गे “गो पावल आ शेंशो शेंसीब नड” अरुमी “गो आपोल्लोस आ शेंशो शेंसीब नड” दे टेयब लेश्शा, इन नें मबोरपतीने। रोमी १२:३

7 सुमी इन कली टेयब सेल्नी? इन पशोमी टेयब दुम्नी डा? परमप्रभु यावे आ शिशो पशोमी कका टेयब दुम्शो ननी। मिनू परमप्रभु यावे आ गेशोमी टेयब लेत्चा दुम्बा डा?

8 मुल गे इन माल्शो नेल्ल ताइतीनी। शुश क्येट थीब दुम्तीनी। शेंब, आंड कली हिल्लो मपथु, मुर आन कली हुकुम पाइतीनी। गे रिम्शो हुकुम पाइतीनी हना, गो यो गे नु गेय पाइब दुम्शो, रिम्शो दुम वा। प्रकाश ३:१७; प्रकाश ३:२१

9 परमप्रभु यावेमी आ सोइश्शो, आंड कली मुर नेल्ल आन क्येडा आइक्च सेल्शा साइक्चा पुंडसीचा कली वोइक्तु, दे मिम्नुड। मारदे हना रागी रागी डा मुर नेल्ल नु परमप्रभु यावे आ स्वर्ग डा गेय पाइबम आंड कली कोत्रना कोत्रन बाक्नीमी। रोमी ८:३६; हिब्रू १०:३३

10 गो ख्रीस्त आ पर्वम मूर्ख दुम्तक। तन्न गे ख्रीस्त आ पतीकेमी जोक्ब तुइक्ब बाक्नीनी। गोपुकी मचाप्ब दुम्तक। गोपुकी चहिं बोल्यो बाक्नीनी। मुरपुकीमी इन कली मान पा टेयब सेल्नीम। आंड कली चहिं महिकनीम। १कोरिन्थी ३:१८

11 मुल यो जचा तूचा मतथु, मरिम्शो फेक्सीशा, श्येत जशा, आंड बाक्तीक खिं यो मबाक्ब। २कोरिन्थी ११:२३-२७

12 गो आंम गुइमी श्येत पा गेय पा बाक्तक। मुरपुकीमी आंड कली शुक्शी लोत्र पामेनु, मेको आन कली आसीक गेतक। गिश खेदा पाम्तेक्म हना यो, फाल्शा बाक्तक। १कोरिन्थी ९:१५; प्रेरित १८:३; मती ५:४४; रोमी १२:१४

13 जिचा पोक्शा, गाइश्शा मरिम्शो पामेनु, गो मेको आन कली रिम्शो लोत्र पा, गारपाइक्कीनी। गोपुकी रागी डा ग्रॉण दिचा डा थोत्रक खोंदेशो दुम्शा, नेल्ल क्येडा आइक्च महिकसीशो मुर दुम्तक।

थमा सुइक्ब आन आफ मिम्सीशो

14 गो इन कली मुने तोक्चा कली एको मब्रेक्तु। गे आं दाक्शो तमी तौ इन कली रिम्शो अरेचा कली एको ब्रेक्ताक्ड।

15 ख्रीस्त आ पर्वम अर्ती गेब शेंब मुर शुश बाक्मा माइ। तन्न इन आफ खोंदेशो मुर शुश मबाक्नीम। मारदे हना गो इन कली येसु ख्रीस्त आ ग्येरपाइक्ब लोत्र शेंशा, इन आफ दुम्ती। १कोरिन्थी ९:२; गलाती ४:१९

16 मोपतीके गो इन कली अर्ती का गेनन्नी। आं पशो खोंदेशो पने। १कोरिन्थी ११:१

17 मोपतीके गो प्रभु आ पशोमी, आ रिम्शो नु दाक्शो तौ तिमीथी इन बाक्तीके सोइक्ताक्ड। मेकोमी गो ते ते मार मार लोत्र शेंदु, गो दोपा येसु ख्रीस्त आ लां खोदु, मेको नेल्ल इन कली शेंदल। प्रेरित १६:१-३

18 मिनू इन दाते डा का निक्शीमी “पावल मजाक्ब” दे टेयब लेश्शो लोत्र पाम्तेक्म, दे लोत्र पशो नेंता।

19 तन्न प्रभुम इन कली गुम्चा गेती हना, गो रीब पा जाक्नुड। मेको टेयब लेश्शो मजाक्ब देंब आन लोत्र ममाइ, मेको आन सक्ति बाक्म को मबाक्म दे ला कोत्रनुड।

20 मारदे हना परमप्रभु यावे आ राज्य फू चुइश्शो ठेयब लोत्र रे पा मतांडसीब। सक्ति पाइश्शो गेय रे पा तांडसीब।

१कोरिन्थी २:४

21 गे मार पांडसीचा दाकनीनी? कोककेम हिंच कोंइशो खोदेशो पा शेंदनी देय आं दाकशो आल आन कली लेम्शो खोदेशो ब्रोव्रशो लोत्र पा शेंदनी? आमा मिम्शा देनीन। २कोरिन्थी १०:२

## 5

मरिम्शो आन कली तिल्या माल्शो

1 गे नु बाकब कामी हेंथे पाप्टु देशो लोत्र नेता। मोदेशो पात्के अर्को रागी डा मुर आन दातेमी यो मबाकब। मुर कामी आ आफ आ मीश वोंइसाकब, देशो लोत्र नेता। लेवी १८:८

2 मिनु मुल सम्म ठेयब लेशशा बाकनीनी? मोदेशो पशो तशा, इन थुं मखाइकनीनी? मोदेशो पाइब कली तिल्या मालनीनी। १कोरिन्थी ४:६-८

3 इन दातेम मबाकती हना यो, आं थुं गेपुकी नु काथा बाकशो खोदेशो पा, मेको मुर कली येसु ख्रीस्त आ नेमी निसाफ पने थुम्ता। कलस्सी २:५

4 गे नेल्ल प्रभु येसु आ नेम गुम्शो बाकतीनी हना, आं थुं गे नु बाकत हना, इ प्रभु येसु ख्रीस्त आ सक्तिम मती १६:१९; मती १८:१८; २कोरिन्थी १३:३०

5 मेको मुर कली सैतान आ गुडम गेचा मालनीनी। मेको आ रां खतम दुम्त हना यो, प्रभु आ निसाफ नाकतीमी ब्रोइचा तवल। १तिमोथी १:२०

6 इन ठेयब लेशशो रिम्शो ममाइ। इम्चीली डल्ला का बोरपाइकब ओखतीमी फस नेल्ल डाम्शा, बोरब दे मतुडकनीनी? गलाती ५:९

7 मेको माइत बोरपाइकब ओखती ताडकतीने। गे मारेइ मसुप्शो फस खोदेशो दुम्शा, नक दुम्शो बाकनीनी। मारदे हना आंइ पास्सा चाड डा क्योरशो पाठा ख्रीस्त बाकब। प्रस्थान १२:३-२०; प्रस्थान १३:७; यसाया ५३:७; १पत्रुस १:१९

8 मोपतीके माइत बोरब ओखती मसुप्शो फस खोदेशो दुम्शा, मरिम्शो थुं पाइश्शो गेय पचा प्रोंइशा, नक मुर दुम्शा, पास्सा मानेय।

9 इन कली डोंइती ब्रेकशो चिठीमी “पात्के पाइब नु काथा बाक्या मदुम्ब” दे ब्रेकताकनीनी।

10 आं देशो मार बाकत देशा हना, रागी डा पात्के नु तेल्लेम पाइब, शिम पाइब, खुइ पा रोइश्शा गाकब, मूर्ति कली पूजा पाइब नु काथा बाक्या मदुम्ब, दे मशेंदनी। मोदेशोपुकी नु काथा बाक्या मदुम्ब हना दा, रागीमी ते बाक्या डा?

11 तन्न थमा सुइश्शा प्रभु आ मुर दुम्ती देंब लोकबम पात्के पा तेल्लेम पा, शिम दुम्शा, मूर्ति पूजा पा, शुक्शी पा गाकब नु शांब राकसीमी दुकशा, खुइ पा गाकब दुम्तेकम हना, मेकोपुकी नु काथा बाक्या जचा यो मदुम्ब। २थिस्सलोनिकी ३:६

12 प्रभु आ मुर मदुम्शो आन कली मार निसाफ पाइनुडा डा? प्रभु आ मुर दुम्शो इन दाते डा आन कली चहिं गेपुकीमीन नाक्या, सजाइ गेचा ममालनीनी डा?

13 परमप्रभु यावेमी रागी डा मुर आन कली निसाफ पाइब। गेपुकी नु बाकशो पात्के पाइब कली गुंइशा सोइकतीने। ब्यवस्था ११:६; मती १८:१७

## 6

निसाफ पचा आ पबर्म

1 इन दाते डा का निक्शी जिम्तेकम। मिनु मारदे निसाफ पाइब आन डोंइती लाइश्शा मुददा कोप्शा, थमा मसुइकब निसाफ पाइब आन गुडमी गेनीनी? आंमा इन दातेम गारपाइक्या माल्शो ननी।

2 थमा सुइकबपुकीमी नेल्ल रागी डा मुर आन कली निसाफ पाइनीम देशो लोत्र मतुइकनीनी डा? गे रागी डा मुर आन कली निसाफ पाइतीनी हना, इन दाते डा आइकच लोत्र गारपाइकने मचाप्नीनी डा? मती १९:२८

3 गोपुकीमी परमप्रभु यावे आ स्वर्ग डा गेय पाइब आन कली लाइ यो निसाफ पाइनीकी देशो लोत्र यो प्रेंदीनी? आंइ नाकत किंत किंत डा पतीक मार बाक्या डा?

4 इन दातेमी मोदेशो जीब खेब बाकत हना, मारदे थमा मसुइकब, महिक्सीशो मुर आन गुडमी निसाफ पचा कली गेनीनी।

5 मोदेशो पशोमी गे मुने दोकतीनी। इन दातेमी मोदेशो मुर कली निसाफ पाइब जोकब तुइकब लोकब का मबाक्या डा?

6 तन्न लोकबमी लोकब कली मुददा कोप्शा, थमा मसुइकब आन डोंइती चाकदीश्शो तशा, गो थम मरिम्शो लाकती।

7 इन जिशो ठीक मलाकनुड। इन के मार लाइकतेकम हना यो, मार पाम्तेकम हना यो, मुददा मकोप्शु, फाल्शा बाकने मचाप्नीनी? मती ५:३८-४८; १थिस्सलोनिकी ५:१५; १पत्रुस ३:९

8 तन्न गे आंमा इन लोकब आन कली मरिम्शो पाइनीनी, रोइकनीनी।

9 ठीक मपाइबपुकी परमप्रभु यावे आ राज्य ओव्रचा मताइनीम दे मतुइकनीनी? दूली ममिम्तीने। मरिम्शो पाइबपुकीमी दोदेशो पाइनीम देशा हना, पात्के, तेल्लेम पाइनीमी, मूर्ति कली पूजा पाइनीमी, मुर आन मीश लाइकनीमी, वोंइश मुर वोंइश मुर ब्वांडसीनीमी, १तिमोथी १:९-११; गलाती ५:१९-२१

10 खुइ पाइनीमी, शिम पाइनीमी, शांब राकसीमी दुकशा गाकनीमी, शुक्शी लोत्र पा गाकनीमी, मुर आन के बाकशो थोत्रक रोइश्शा, श्येत गेनीमी। मोदेशो पाइबपुकी परमप्रभु यावे आ राज्यम ओव्रचा मताइनीम।

11 इन दातेमी का निक्शी मोदेशो बाक्या बाकत। तन्न मुल गे चिकशो खोदेशो पा, परमप्रभु यावे आ मुर दुम्शा, प्रभु येसु ख्रीस्त आ नेमी नु इ परमप्रभु यावे आ सोकतीम पतीके ठीक मुर सेल्चा पुंडसाकनी। तीतस ३:३-७; १कोरिन्थी १:२; रोमी ३:२६

थमा सुइक्ब आन रां

12 गो मार गेय पचा दाक्तु, मेको पने चापुण्ड। तन्न गेय का निक्शी आं कली रिम्शो मदुम्ब। गो मारेइ पने चापुता हना यो, मरिम्शो पतीक आ वाइल मदुम्बुड। १कोरिन्थी १०:२३

13 जचा थोवक कोवज कली बाक्ब, कोवज जचा थोवक कली बाक्ब। मिनु परमप्रभु यावेमी निम्फा आस कली जाम्शा लाइब सेल्शो बाक्ब। मुर आ रां ग्रांया दिशो तेल्लेम पचा कली मसेल्शो बाक्ब। तन्न रां प्रभु कली सेल्शो बाक्ब। मिनु प्रभु यो रां कली सेल्शो बाक्ब। १थिस्सलोनिकी ४:३-५

14 परमप्रभु यावेमी प्रभु कली बेक्शो रे सेंताक्ब। मिनु आ सक्तिम इं कली यो सेंब। १कोरिन्थी १५:२०; २कोरिन्थी ४:१४

15 इन रां ख्रीस्त आ रां बाक्ब दे मतुइक्नीनी? मिनु ख्रीस्त आ रां लाइशशा, तेल्लेम आ रां सेल्चा डा? मोदेशो मपने।

16 तेल्लेम नु ब्वांडसीशो, रां कांडचीक दुम्सीब दे मतुइक्नीनी? मार ब्रेक्शो बाक्त देशा हना “मेको निक्शी रां का दुम्नीस” दे ब्रेक्शो बाक्ब। उत्पत्ती २:२४

17 तन्न प्रभु आ मुर दुम्नानु, प्रभु आ सोक्त नु इं सोक्त का दुम्नीस। यूहन्ना १७:२१-२२

18 ग्रांया दिशो तेल्लेम पतीक रे जेन बाक्कीन। मारदे हना मारेइ मारेइ पाप पनीनु, रां आगामी मपाइनीनी। तेल्लेम पनीनु चहिं आंम रां कली पाप पाइनीनी।

19 इन रां परमप्रभु यावे आ सोक्त आ खिं बाक्ब दे मतुइक्नीनी? परमप्रभु यावेमी आ सोक्त इन रांमी वोइक्तु। मिनु इन रां इन के ममाइ। १कोरिन्थी ३:१६

20 ने ग्याशो मुर बाक्नीनी। मोपतीके इन रांमी परमप्रभु यावे कली टेयब सेलीने। १कोरिन्थी ७:२३; १पत्रुस १:१८-१९; फिलिप्पी १:२८

## 7

ग्युबे आ पर्वम लोत्र

1 साइ आं कली इन ब्रेक्शो चिटीमी गेपुकीमी “ग्युबे पचा नु मपचा, तेको रिम्शो बाक्बा?” दे हिल्लो पशो बाक्तीनी। मिनु मुल मार देनुड देशा हना, वोंइश मुरुमी मीश मुर कली मथिथु बाक्चा रिम्शो दुम्ब।

2 मो हना यो हेंथे मगाकमल देशा, ग्युबे पा वोंइश मुर मीश का नु मीश मुर वोंइश का नु बाक्चा रिम्शो दुम्ब।

3 ग्युबे पशा, वोंइश मीश दाक्मुशा टिमुशा बाक्सल।

4 मीश मुर आ रां आ वोंइश आ अधिकारम बाक्ब। आ वोंइश आ रां आ मीश आ अधिकारम बाक्ब।

5 वोंइश मीश गारशा, नाक्त का निक्शी काथा मडप्यु, प्रार्थना पना पन बाक्स, दे लोव्रसी गारपाइशशा बाक्चा यो रिम्शो दुम्ब। मेको डा लाक्शा चहिं ब्राशा बास मबाक्कीने। मारदे हना सैतानमी शुश नाक्त सम्म ब्राशा बाक्ने मचाप्नीम दे तुइशशा, इन कली तेल्लेम पपाइक्ने चाप्ब।

6 एको आं पशो लोत्र बिन्वान मालनीनी दे मदेनुड। तन्न आं देशो लोत्र बिस्साक्नी हना, इन कली रिम्शो दुम्ब।

7 मुर नेल्ले आं खोंदेशो दुम्मल दे मिम्नुड। मो हना यो परमप्रभु यावेमी आ दाक्शो पा का निक्शी आन कली ग्युबे पशा बाक्चा, का निक्शी आन कली चहिं ग्युबे मपथु बाक्चा गेशो बाक्त। मती १९:१२

कान बाक्शो आन पर्वम लोत्र

8 मुल सम्म ग्युबे मपथु बाक्ब, आन वोंइश बेक्शो मीश मुर नु आन मीश बेक्शो वोंइश मुर आन कली “आं खोंदेशो पा कान बाक्तेक्म हना, मेको इन कली रिम्शो दुम्ब” देनुड।

9 सु सु चहिं आन का ला बाक्ने मचाप्नीमी, मेकोपुकी ग्युबे पांडसमल। मारदे हना वोंइश नु मीश माल्ला, हेंथे गाक्चा क्येडा ग्युबे पचा रिम्शो दुम्ब। १तिमोथी ५:१४

ग्युबे पशो आन कली शेंशो

10 मेको आं लोत्र ममाइ, ग्युबे पशो आन कली, प्रभु आ देशो लोत्र मिम्पाइक्नुडमी। मीश मुरुमी आ वोंइश प्रोंइचा मदुम्ब। मती ५:१२

11 प्रोंइशा गाक्त हना, अर्को वोंइश खोइक्चा मदुम्ब। आ वोंइश नु बाक्चा दाक्ब हना, आ वोंइश नुन दुशा बाक्सल। वोंइश मुरुमी आ मीश कली मप्रोनल। मती ५:३२

12 एको लोत्र डा लाक्शा, प्रभु आ लोत्र ममाइ, आं मिम्शो लोत्र मार देनुड देशा हना, थमा सुइक्ब लोकब आ मीश थमा मसुइक्ब बाक्त हना, तन्न आ वोंइश नु बाक्चा दाक्ब हना, आ वोंइशेमी मेको कली मप्रोनल।

13 थमा सुइक्ब मीश मुर आ वोंइश थमा मसुइक्ब बाक्त हना, तन्न आ मीश नु बाक्चा दाक्ब हना, आ मीशेमी यो मेको कली मप्रोनल।

14 मारदे हना थमा मसुइक्ब वोंइश आ मीश आ थमा सुइक्तीकेमी आसीक ताइब। मिनु थमा मसुइक्ब मीश मुर आ वोंइश आ थमा सुइक्तीकेमी आसीक ताइब। मोदेशो मदुम्त हना, आन आल प्रभु के मदुम्नीम। तन्न मोदेशो दुम्त हना, मेको आल परमप्रभु यावे के दुम्नीम। रोमी ११:१६

15 थमा मसुइक्ब वोंइश मुर नु मीश मुरुमी थमा सुइक्ब आन वोंइश मीश आन कली प्रोंइशा ब्राशा बाक्चा दाक्ताक्म हना, लचा गेमेक्ल। काथा बाक्चान माल्ब देशो मबाक्ब। परमप्रभु यावेमी आ मुर आन कली दुशा बाक्शो तचा दाक्ब। रोमी १४:१९

16 थमा सुइक्व मीश मुर, गे इ वोंइश कली “थमा सुइक्व सेल्ने चानुड” दे दोपा तुइक्नेवे? थमा सुइक्व वोंइश मुर, गे इ मीश कली “थमा सुइक्व सेल्ने चानुड” दे दोपा तुइक्नेवे? १पत्रुस ३:१

दोपा योवशा, मोपा बाक्कीन

17 प्रभुमी इन कली दोपा योवशा वोदा मोपान बाक्कीन। परमप्रभु यावेमी इन कली दोपा ब्रेत्ता मोपा बाक्कीन। मेको आं शेंतीक नेल्ल गुन्तीक खिं आन कली बाक्ब।

18 गे ब्रेत्ता पुंडसीचा क्येडा डोंइती खोइक्तीक चिनु खोइक्चा पुंडसीशो बाक्तीनी हना, मखोंइसीशो दुम्चा बल मपने। मखोंइसीशो बाक्तीनी हना, खोंइसीचा बल मपने।

19 मारदे हना खोइक्तीक चिनु खोइश्शो नु मखोंइश्शो आन पर्वम मारेइ ममिम्सीब। तन्न परमप्रभु यावे आ अरेशो टिचा, ठेयब बाक्ब। गलाती ५:६; गलाती ६:१५

20 मुर नेल्ल इन कली दोदेशो पा ब्रेत्ता, मोदेशोन बाक्कीन।

21 मेना वाइलीम वाइल बाक्तीनी हना, वस्ता मपने। प्रोंइचा पुंडसाक्नी हना, ग्येरशा लने। फिलेमोन १६; एफिसी ६:६

22 मारदे हना प्रभुमी ब्रेत्ची ना वाइलीम वाइल बाक्तीनी, प्रभु आ डोंइती प्रोंइचा पुंडसीशो मुर दुम्तीनी। ब्रेत्ची ना प्रोंइचा पुंडसीशो मुर बाक्तीनी हना, मुल ख्रीस्त आ वाइलीम वाइल दुम्तीनी।

23 गे थाप्पा, प्रोंइचा पुंडसीशो बाक्तीनी। मुल मुर आन वाइलीम वाइल मदुमीन। १कोरिन्थी ६:२०

24 आं लोकबपुकी, परमप्रभु यावेमी इन कली दोपा योवशा ब्रेश्शा वोदा, मोपान परमप्रभु यावे नु बाक्कीन।

ग्युबे मपथु बाक्शो आन पर्वम

25 ग्युबे मपथु बाक्ब आन पर्वम प्रभुमी आं कली मारेइ मअरेव। तन्न गो प्रभु आ शिशी पतीकेमी थमा सुइक्व मुर दुम्ती, गो आं मिम्शो देंनुड।

26 श्येत जचाइतय। मोपतीके मुल दोदेशो बाक्चा, मोदेशोन बाक्तय हना, रिम्शो दुम्ब, दे मिम्नुड। १कोरिन्थी १०:११

27 मीश बाक्शो मुरुमी मेको कली प्रोंइशा बाक्चा ममालीन। मीश मपाइश्शो बाक्तीनी हना, ग्युबे पचा ममालीन।

28 तन्न ग्युबे पनीनु, मरिम्शो मपाइनीनी। मीश आलम ग्युबे पापु हना, मेकोमी मारेइ यो मरिम्शो मपाइब। तन्न ग्युबे पशोपुकीमी श्येत जाइनीम। मोपतीके मेकोपुकीम रागी डा श्येत मजामेकल, दे अर्ती गेतनी।

29 आं लोकबपुकी, प्रभु जाक्चा चिक्शो बाक्ब। मुल रे मीश बाक्शो मुर, मीश मबाक्शो खोदेशो पा बाक्कीन। रोमी १३:११; लूका १४:२६

30 रोंका पाइबपुकी रोंका मपाइब खोदेशो पा बाक्कीन। मिनु ग्येरशा बाक्बपुकी मग्येरसीशो खोदेशो पा बाक्कीन। मारेइ मारेइ ग्याप्पा वोइक्बपुकीमी मारेइ मवोइश्शो खोदेशो मिम्तमेकल।

31 मुरपुकीम रागी डा गेय पाइनीम हना यो, रागी डा गेय मपशो खोदेशो पा बाक्मल। मारदे हना रागी जाम्शा लचा चिक्शो बाक्ब। १यूहन्ना २:१५-१७

32 गे सुर्ता मपथु, थुं नाइश्शा बाक्शो तचा दाक्नुड। ग्युबे मपशो वोंइश मुरपुकीमी दोपा प्रभु आ दाक्शो पचा, दे मिन्नीम।

33 तन्न ग्युबे पशो वोंइश मुरपुकीमी चहिं दोपा मीश कली ग्येरपाइक्चा? दे मिम्शा बाक्नीम। लूका १४:२०

34 मोपा गे निकशी मिम्शो बाक्तीनी। ग्युबे मपशो मीश मुर नु मीश आलपुकीमी प्रभु आ दाक्शो पा थुं नु रं नेल्ले प्रभु कली जिम्मा गेचा कली मिन्नीम। तन्न ग्युबे पशो मीश मुरपुकीम चहिं रागी डा गेय पा, दोपा आंम वोंइश कली ग्येरपाइक्चा, दे मिम्शा बाक्नीम।

35 इन कली रिम्शो दुम्ल, दे मोदेशो पाता। तन्न श्येत गेचा कली ममाइ। इन गुन्तीकेमी नेल्ल रिम्शो दुम्ल नु इन थुं नेल्लेमी प्रभु कली खोइश्शा, रिम्शो बाक्ने चापीन, दे मोदेशो लोव पाता।

36 सुइ मुरुमी ग्युबे पचा कली मीश आल पुंडने थुम्शा, मेको मीश आल कली प्रोंइचा मरिम्शो बाक्ब, दे मिम्ब नु मेको कली दाक्ब हना, ग्युबे पवल। मेको पाप मबाक्ब।

37 तन्न सुमी ग्युबे मपाइनुड देश, आ रां कली चलेब नु आ मीश आल कली मो वोइक्नुड, दे आ थुंम मिम्ब हना, मेको रिम्शो दुम्ब।

38 मोपतीके सुमी आ मीश आल कली ग्युबे पाइबा, मेकोमी रिम्शो पाइब। सुमी मपाइबा, मेकोमी मेको क्येडा रिम्शो पाइब।

वोंइश बेक्शो मीश मुर आन पर्वम

39 आन वोंइश बाक्ना बाक्न मीश मुरुमी अर्को वोंइश मुर नु ग्युबे पचा मताइनीम। आन वोंइश बेक्म नोले आन दाक्शो मुर कली ग्युबे पने चान्नीम। तन्न प्रभु कली थमा सुइक्व दुम्चा माल्नीम। रोमी ७:२

40 गो परमप्रभु यावे आ सोक्तीम ब्रीशो मुर नड। गो मार मिम्नुड देश हना, लेशा ग्युबे पचा क्येडा ग्युबे मपथु बाक्चा रिम्शो दुम्ब। मिनु ग्येरशा बाक्चा तांइसीब दे मिम्नुड।

## 8

मूर्ति कली चढेशो श्ये

1 मूर्ति कली चढेशो श्ये व्वचा आ पर्वम गो नेल्लेमी तुइक्नय। गो शुश तुइक्ब नकी, दे तुइश्शोमी मुर आन कली बोरशा ठेयब लेप्पाइक्ब। दाक्मुशा बाक्शोमी चहिं नेल्ल आन कली रिम्शो दुम्ब, नेल्ल आन थुं बारपाइक्ब। प्रेरित १५:२९

2 मारेइ मारेइ जोक्ब तुइक्ब नड देंबमी आ माल्लो मतुइश्शो बाक्ब। गलाती ६:३

- 3 तन्न सु सुमी परमप्रभु यावे कली दाक्नीमी, मेको आन कली परमप्रभु यावेमी तुइश्शो बाक्ब। १कोरिन्थी १३:१२
- 4 मूर्ति कली चढेशो श्ये ब्वचा आ परबं मार देंनुड देशा हना, मूर्तिपुकी सोक्त पाइश्शो मनम। मेकोपुकी नु मारेइ मबाक्ब। परमप्रभु यावे डा लाकशा सुइ मबाक्ब दे तुइक्ताक्य। ब्यवस्था ६:४
- 5 सरीड नु रागीमी शुश देवी देवता नु प्रभु माइश्शो बाक्नीम हना यो, १कोरिन्थी १९:२०; भजन संग्रह १३६:२-३; रोमी ८:३८-३९
- 6 इं कली परमप्रभु यावे का ला बाक्ब। मेको मारेइ मारेइ सेल्ब इं आफ बाक्ब। मिनु गोपुकी यो मेको आ सेल्शो बाक्नय। मिनु इं प्रभु का ला बाक्ब, मेको प्रभु येसु खीस्त बाक्ब। मेको आ पतीकेम मारेइ मारेइ दुम्शा, गो ब्रॉइचा ताइनीकी। १कोरिन्थी १२:५-६; प्रस्थान २०:३; मलाकी २:१०; एफिसी ४:५-६; यूहन्ना १:३; कलस्सी १:१६
- 7 गोपुकी नु बाक्ब का निक्शीमी इं मिम्शो लोत्र मरुबेम। मेकोपुकीमी “देवी देवता बाक्नीम” दे डोंइती रे डा आन मिम्शो प्रॉइने मचबेम। मिनु मुल मूर्ति कली चढेशो श्ये ब्वामेनु “पाप राइसीबा, कोर में?” दे मिम्शा, आन थुं क्याल्नीम। १कोरिन्थी १०:२८
- 8 जचा थोत्रक जशा ब्वशा, परमप्रभु यावे आ डोंइती मारेइ मपाइब। जशोमी ठेयब मदुम्सीब, मजशोमी आइक्च यो मदुम्सीब, दे तुइक्नय। रोमी १४:१७
- 9 मोदेशो तुइक्ताक्नी हना यो, होस पांइसीने। मारदे हना का निक्शीमी इन कली तशा, आन थुं क्याल्तेक्म। गलाती ५:१३
- 10 मारदे हना सुइमी इ कली, जोक्ब तुइक्ब दुम्शा, मन्दीरम बाक्शा, मूर्ति कली चढेशो श्ये ब्वशो ताप्तु हना, मेको मजोक्ब मुरुमी मूर्ति कली चढेशो श्ये मब्वाइबा डा?
- 11 मिनु इन जोक्तीके तुइक्तीकेमी इन मजोक्ब लोक्ब आन कली पाप पपाइक्नीनी। मेको आ परबं खीस्त साइक्चा पुंइसाक्ब। रोमी १४:१५
- 12 गे इन लोक्ब आन थुं क्याल्पाइक्तीनी हना, गे खीस्त कली मरिम्शो पशो बाक्नीनी।
- 13 मोपतीके मार देंनुड देशा हना, आं कली श्ये ब्वशो तशा, आं लोक्बपुकीमी आन थुं क्याल्नीम दे तुइक्ताक्ड। मिनु मेको आन थुं मक्याल्मेक्ल देशा, मुल डा मेरे गो गेनायो श्ये मब्वाइनुड दे आं थुं फ्रेशा, श्ये ब्वचा प्रॉइता। रोमी १४:२१

## 9

शेंबम आन माल्शो गेचा पुंइसीनीम

- 1 गो आं दाक्शो, आं मिम्शो पने मचाप्नुडा डा? गो खीस्त आ सोइश्शो मनडा डा? आं मिक्चीमी इं प्रभु येसु खीस्त कली मतशो नडा डा? गो प्रभु आ गेय पडा रे गेपुकी यो प्रभु आ मुर मदुम्नी डा? १कोरिन्थी १५:८; प्रेरित ९:३-५, १५
- 2 शुश मुरुमी आं परबं “आं कली खीस्त आ लोत्र शेंथ सोइश्शो ममाइ” दे मिम्ताक्म हना यो, इन कली शेंथ सोइश्शो नड। मारदे हना प्रभु आ मुर दुम्तीनी। गे आं सोइश्शो दुम्तीके आ छाप बाक्नीनी। १कोरिन्थी ४:१५; २कोरिन्थी ३:२-३
- 3 आं शेंशो आ परबं हिल्लो पाइब आन कली कोरिन्थीपुकी दोपा थमा सुइक्ब दुम्मा? लो, मिम्तीनी, दे माइक्नुडमी।
- 4 मिनु आंइ कली माल्शो जचा तूचा थोत्रक “गेन” दे पुंइने मचाप्नीनी डा? लूका १०:८
- 5 केफास, प्रभु आ लोक्ब नु सोइश्शो नेल्लेमी शेंना शेंन गाक्मानु, आन मीश काथा लाइश्शा गाक्तेक्म। मिनु गोपुकी मेको आन बुद पा आंइ मीश लाइश्शा गाक्चा मताइनीकी डा?
- 6 शेंबपुकीम शेंशा जाइनीम। बारनाबास नु गो चहिं शेंशा गाक्स्कुनु, जचा मतथु, गेय पचा माल्स्कु डा? प्रेरित ४:३६; २थिस्सलोनिकी ३:७-९
- 7 लडाइ पाइब आन खिं डा जशा बाक्नीमी डा? अडगुर रू थीबपुकीमी श्येत पा खुम्शा, अडगुर मीमेनु, ब्वचा मताइनीमी डा? गोठलापुकीमी चिम्शो बी कली योत्रशा कोत्रशा, घांस लाप्शा, श्येत पा गेय पशा, दूध चिम्शा तूचा मताइनीमी डा?
- 8 आं देशो लोत्र मुरुम देशो लोत्र ला बाक्बा डा? परमप्रभु यावे आ अरेशो लोत्र नु मगारबा डा?
- 9 मोसामी “ब्यफ कली दांइ पपाइश्शोनु, फुडला मपाइक्चा” दे ब्रेक्शो बाक्त। परमप्रभु यावेमी ब्यफ आन परबं ला मोदेशो पचा दे ब्रेक्पदा डा? ब्यवस्था २५:४; १तिमोथी ५:१८
- 10 इं परबं यो ब्रेक्शो बाक्त दे रुपीन। अर्को लोत्र का निक्शी ब्रेक्शो बाक्ब “ब्यफ वाक्बपुकीमी बाली नाली मीमेनु, इक्का अन्न ताइनुड दे वाक्नीमी। चेरब तुप्बमी यो, इक्का चेरब ताइनुड, दे तुप्ब” दे ब्रेक्शो बाक्ब।
- 11 गोपुकीमी इन कली परमप्रभु यावे आ लोत्र शेंदकानु, इन जचा तूचा थोत्रक तचा, ठीक मदुम्बा डा? रोमी १५:२७
- 12 अरु शेंबपुकीमी मेको तान्तेक्म हना, मार, गो मेको आन क्येडा मताइनीकी डा? मो हना यो गो मोदेशो लोत्र मपाइनीकी। खीस्त आ ग्येरपाइक्ब लोत्र शेंशोनु, श्येत मदुम्ब, दे मोदेशो लोत्र मपाइनीकी। प्रेरित २०:३३-३५ २कोरिन्थी ११:९
- 13 परमप्रभु यावे आ खिंमी गेय पाइबपुकीमी मेक रे जाइनीम। चढेतीकेम गेय पाइबपुकीमी मेक रे ब्वाइनीम, दे मतुइक्नीनी? गन्ती १८:१८-१९, ३१; ब्यवस्था १८:१-३
- 14 प्रभुमी “आं ग्येरपाइक्ब लोत्र शेंबपुकी शेंशा गाक्मानु, मेकोपुकी मार मार माल्मा, मेको आं ग्येरपाइक्ब लोत्र शेंतीके रे तचा माल्नीम” देशो बाक्त। लूका १०:७; गलाती ६:६
- 15 मिनु मोदेशो बाक्त हना यो, गो मारेइ मपुनु, मारेइ मताक्गु। आं कली गेचा माल्नीनी दे यो मदेनुड। थमा सुइक्ब आन शोप मलाइक्चा, दे बोरनुड। अरु आन थोत्रक तचा क्येडा बेक्चान रिम्शो, दे मिम्नुडा। प्रेरित १८:३

16 गो शेंशा गाक्ती, आं टेयब लेत्या डा मारेड मबाक्ब। मारदे हना लोत्र शेंथ सोडशशो नड, दे तुडशशा, गो प्रभु आ ग्येरपाइक्ब लोत्र मशेंथु बाक्ती हना, आं कली काड मरिम्शो दुम्ब। येरमीया २०:९

17 आं दाक्शो पा शेंथ गाक्शो नड हना, गाल्च ताक्गु वा। तन्न आं दाक्शो पा शेंशा गाक्शो मनड। “शेंथ गाक्को” दे माडक्चा पुंडसीतीके शेंशा गाक्ती। १कोरिन्थी ४:१

18 मिनु आं शेंशा गाक्शो डा मार ताक्गु डा? गो प्रभु आ ग्येरपाइक्ब लोत्र मारेड मताक्थु शेंनुड। ग्येरपाइक्ब लोत्र शेंब आन तचा डा, ताक्चा मदाक्नुड।

नेब मुर नु गारशा शेंशो

19 गो आं दाक्शो पने चाप्नुड, मो हना यो शुश मुरुमी खीस्त आ लोत्र रुप्शा, आ मुर दुम्मल, दे आन वाडल खोदेशो दुम्शा, शेंना शेंन गाक्ती। मती २०:२७; रोमी १५:२

20 गो यहूदी आन कली शेंदुनु, खीस्त आ लोत्र रुप्पाइशशा, आ मुर दुम्मल, दे गो यहूदी दुम्ती। गो परमप्रभु यावे आ डोंडती डा पतीके पाइब आन कली शेंना शेंन, मेको खीस्त आ मुर दुम्मल, दे गो परमप्रभु यावे आ डोंडती डा पतीके पाइब खोदेशो दुम्ती। तन्न गो मेको डोंडती डा पतीके पाइब मनड। १कोरिन्थी १०:३३; प्रेरित १६:३; प्रेरित २१:२०-२६

21 गो परमप्रभु यावे आ अरेशो लोत्र मतुडक्ब आन कली शेंदुनु, खीस्त आ लोत्र रुप्पाइशशा, आ मुर दुम्मल, दे गो परमप्रभु यावे आ अरेशो मपाइब खोदेशो दुम्ती। गो परमप्रभु यावे आ अरेशो मपाइब दुम्शा यो, मेको आ डोंडती खीस्त आ अरेशो पाइब दुम्ती। गलाती २:३

22 गो बोल मपाइशशो मुर आन कली शेंशा, खीस्त आ लोत्र रुप्पाइशशा, आ मुर दुम्मल, दे गो बोल मपाइशशो खोदेशो दुम्ती। का निक्शी खीस्त आ लोत्र रुप्शा, आ मुर दुम्मल, दे गो मेको नेल्ल आन खोदेशो दुम्ती। रोमी ११:१४

23 प्रभु आ ग्येरपाइक्ब लोत्र रागीम ब्रचा आ पर्वम मेको गेय पाडनुड। मिनु शुश मुरपुकीमी एको लोत्र रुप्शो तशा, आसीक तशा ग्येरसाक्यी।

इनाम तांडसीब, दे मिम्शा गेय पशो

24 इनाम तांडसीब, दे दोरबपुकी “डोंडती जाक्दीत्नुड” दे मिम्शा दोरनीम। दोरमानु, नेल्ल क्येडा डोंडती जाक्दीत्नुबम ला इनाम ताडब दे मतुडक्नीनी? मोपतीके गे यो इनाम तकल दे मिम्शा दोरीने। २तिमोथी ४:७; फिलिप्पी ३:१४

25 मोपा दोरबपुकीमी दोरने चबुल, दे हेंथे मजाइनीम मतूनीम। आन रां नेल्ल चलेस जोक्नीम। मोदेशो पाइबपुकीमी जाम्शा लाइब इनाम ला ताडनीम। गोपुकीमी चहिं गेनायो जाम्शा मलाइब इनाम ताडनय, दे तुडशशा, मेको आन क्येडा रिम्शो पचा ममालन्या डा? २तिमोथी २:४-५; १पत्रुस ५:४

26 गो ते जाक्दीत्या माल्बा, मेको मतुडक्थु हेंथे पा मदोरनुड। गो हेंथे पा फशीम मुडकी मआप्नुड।

27 तन्न आं रां कली हेंथे पचा मगेथु, गेय पाइब वाडल खोदेशो सेल्लनुड। मारदे हना अरु आन कली मोदेशो शेंताक्डमी। मिनु गो आंम आं देशो मपाता हना, आं कली सुडमी महिक्नीम। रोमी १३:१४

## 10

इसाएली आन पशो मिम्तीन

1 आं लोकबपुकी, गो आंइ इसाएली किकी पिपी आन पशो आ पर्वम लोत्र का निक्शी शेंनन्नी। आंइ किकी पिपी नेल्ल गोस्स आगाम बाक्शा, समुन्द्र शोक्सीशा लमा बाक्त। प्रस्थान १३:२१; प्रस्थान १४:२२

2 मिनु नेल्ल गोस्स आगा गाक्शा, समुन्द्र शोक्शा, मोसा आ नेम ब्वाक्कुम खुम्शा गुंडचा पुंडसाक्मा बाक्त।

3 नेल्लेमी परमप्रभु यावेम गेशो जचा थोत्रक जामे बाक्त। प्रस्थान १६:४,३५; ब्यवस्था ८:३

4 नेल्लेमी परमप्रभु यावेम गेशो सोक्त डा ब्वाक्कु तूडमे बाक्त। मिनु मेको आन नोले खोइक्बम सेरथे फुल्लु रे ब्वाक्कु तूडमे बाक्त। मिनु मेको सेरथे फुल्लु खीस्त बाक्माक्त। प्रस्थान १७:६

5 मो हना यो मेको का निक्शी आन कली तशा, परमप्रभु यावे गाइक्ता बाक्त। मिनु गोरशो रागीमी प्रोना बाक्त। गन्ती १४:२२-३२

6 मोदेशो मरिम्शो थुं पाइशशो मुर मटुमीन, होस पा बाक्कीन।

7 मेको आन दाते डा मूर्ति पूजा पाइब खोदेशो मदुमीन। मार ब्रेक्शो बाक्ब देशा हना “मुरपुकी जचा तूचा कली निस्साक्म। मिनु सिल पचा कली बोक्तेक्म” दे ब्रेक्शो बाक्ब। मेको आन पशो खोदेशो मपने। प्रस्थान ३२:६

8 गोपुकीम तेल्लेम पचा मदुम्ब। मेको आन दाते डा का निक्शीमी ग्रांरा दिचा डा गेय पामे बाक्त। मिनु नाक्त कामीन २३ हजार मुर साइक्चा पुंडसाक्मा बाक्त। गन्ती २५:१९

9 गोपुकीम प्रभु कली नाक्चा मदुम्ब। मेको आन दाते डा का निक्शीमी मो पाम्तेक्म। मिनु बुस्स रे पा साइक्चा पुंडसमा बाक्त। गन्ती २१:४-६

10 गोपुकीम गन गन पचा मदुम्ब। मेको आन दाते डा का निक्शीम मोदेशो पामे बाक्त। मिनु खतम पाइबमी मेको आन कली खतम पोक्गा बाक्त। गन्ती १४:२,३५-३६; हिब्रू ३:११,१७

11 मेको आन मोदेशो दुम्शो तुडशशा, गोपुकीमी रुब्यल, दे एको लोत्र नेल्ल ब्रेक्शो बाक्त। एको रागी नेल्ल जाम्शा लचा चिक्शो बाक्त। १पत्रुस ४:७

12 “गो ठीक बाक्नुड” दंब होस पा बाक्मल। मारदे हना पाप पने चाप्नीम।

13 मुल सम्म गे फाल्ने मचाप्या डा पा थुं नाक्चा मपुंडसीनी। परमप्रभु यावे थमा सुइक्चा माल्शो बाक्ब। इन फाल्ने चाप्तीक सक्ति कोव्रशा, इन फाल्ने मचाप्या डा पा थुं थाम्चा मगेब। तन्न गेप्टु हना यो, इन फाल्ने चाप्तीक सक्ति बारपाइक्ब दे तुइक्तीने। भजन संग्रह ६८:२०; २पत्रुस २:९

मूर्ति पूजा नु प्रभु भोज मगारब

- 14 आं दाक्शो लोकबपुकी, मूर्ति पूजा पचा प्रोनीन। १यूहन्ना ५:२१
- 15 गो लोत्र रूप्ब मुर आन कली लोत्र पाइनुड। मोपतीके आं देशो ठीक बाक्बा कों, ठीक मबाक्बा, मिन्ने चाप्तीनी।
- 16 गो कचौरा कली आसीक गेनीकी। मेको आसीक डा कचौरा रे तूयानु, ख्रीस्त आ हुश मिम्शा, आ मुर दुम्शा, मेको नु काथा बाक्शो दुम्नय। गोपुकीमी शोब्ले जिक्शा योक्शा जयानु, ख्रीस्त आ रॉ मिम्शा, आ मुर दुम्शा, काथा बाक्शो दुम्नय। १कोरिन्थी ११:२३-२६; मत्ती २६:२७; प्रेरित २:४२
- 17 गो शुश बाक्यानु, रॉ का खोदेशो दुम्शा बाक्य। मोपतीके शोब्ले का बाक्ब। मिनु गो नेल्लेम मेको शोब्ले का रे जाडनय। १कोरिन्थी १२:२७; रोमी १२:५
- 18 आइ इसाएल डा चढेबपुकीमी चढेशो गेय मिम्तीने। चढेबपुकीमी मारेइ मारेइ क्योरशा, मेको चढेशो जाडनीम ब्वाइनीम। मो पामेनु, चढेतीके नु काथा बाक्शो खोदेशो दुम्नीम। लेवी ७:६
- 19 मिनु आं देशो लोत्र मार रुम्सीब देशा हना, मूर्ति कली चढेशो ठेयब बाक्बा कों? मूर्तिपुकी ठेयब नमी कों? १कोरिन्थी ८:६
- 20 अर्को रागी डा मुर आन चढेशो परमप्रभु यावे कली ममाइ, वोल आन कली चढेनीम। मोपा मेकोपुकी वोल नु काथा बाक्ब दुम्नीम। मिनु गो इन कली वोल नु काथा बाक्शो तचा मदाक्नुड।
- 21 गे प्रभु आ कचौरा रे तूतीनी हना, वोल आन कली चढेशो रे तूने मचाप्तीनी। गे प्रभु आ भोज नु वोल आन कली चढेशा जने मचाप्तीनी। मत्ती ६:२४; २कोरिन्थी ६:१५-१६
- 22 गोपुकीम प्रभु कली रुश पपाइक्चा दुम्बा डा? गो प्रभु क्येडा ठेयब नया डा?

गेय नेल्लेम परमप्रभु कली मान पने

- 23 मारेइ मारेइ ठीक बाक्ब। तन्न गेय का निक्शी चहिं इन कली रिम्शो मटुम्ब। मारेइ मारेइ ठीक बाक्तेक्म हना यो, का निक्शीम इन थमा सुइक्तीक मबारपाइक्नीम। १कोरिन्थी ६:१२
- 24 होस पांडसीने, आंम इन कली ला मिम्चा प्रोइशा, अरु आन कली यो रिम्शो दुम्ल दे मिम्शा गेय पने। रोमी १५:२; फिलिप्पी २:४
- 25 श्ये ब्वचा आ पबंम “श्ये ग्यापथ लनीनु ‘चढेशो श्ये कों’ दे हिल्लो मपने। मारेइ ममिम्थु ग्यापीन” दे शेंनन्नी। रोमी १४:२-१०, २२
- 26 रागी नु रागीमी मार मार बाक्मा, मेको नेल्ल प्रभु के बाक्ब दे रुपीने। भजन संग्रह २४:१
- 27 मिनु ख्रीस्त कली थमा मसुइक्बपुकीमी इन कली खमे जथ ब्रेम्मानु, गे लचा थुं पा लाइतीनी हना, मारेइ हिल्लो मपथु, ममिम्थु ग्येरसीशा जने ब्वने।
- 28 गे नु काथा बाक्शा जाइबपुकीमी “एको चढेशो बाक्ब” दे तुइक्पाइक्तेक्म हना, मेको मुर आ पबंम नु थुं ग्येरसीशो दुम्चा आ पबंम मेको मजने मब्वने। १कोरिन्थी ८:७
- 29 थमा सुइक्बपुकीमी चढेशो मजाइनीम मब्वाइनीम, दे तुइक्नीम। मिनु इन कली जशो ब्वशो तशा, मेको आन थुं क्याल्नीम। आं जचा ब्वचा आ पबंम आं अधिकार बाक्ब। मारदे अरुम शेंचा माल्नीमी?
- 30 गो प्रभु कली “गे रिम्शो पाइब बाक्तीनी” देश, मारेइ मारेइ जाइनुड ब्वाइनुड। तन्न आं जशो ब्वशो सुइमी मरिम्शो मलाक्मल, दे यो मिम्नुड। १तिमोथी ४:४
- 31 मोपतीके मार जाइतीनी ब्वाइतीनी हना यो, तूतीनी हना यो, मार पाइतीनी हना यो परमप्रभु यावे कली ठेयब सेल्चा कली पने। कलस्सी ३:१७
- 32 यहूदी नु ग्रीक आन कुल, परमप्रभु यावे कली थमा सुइक्ब आन कुल, मुर नेल्ल आन कुल, गेना हना यो रिम्शो गेय पने। रोमी १४:१३
- 33 गो मोदेशो पा नेल्ल आन कली ग्येरपाइक्चा डा गेय पचा दाक्नुड। आंम आं कली ममिम्सीथु, मेको आन कली रिम्शो दुम्ल, दे मिम्शा, गेय पाइनुड। “शुशेमी ख्रीस्त कली थमा सुइक्शा, आ मुर दुम्मल” दे मिम्शा बाक्ती। १कोरिन्थी ९:२०-२२

## 11

पिया सुम्सीचा आ पबंम शेंशो

- 1 गो दोपा ख्रीस्त आ पशो खोदेशो पडा, मोपा गे यो आं पशो खोदेशो पाइब दुमीन।
- 2 इन कली शेंशो लोत्र का यो मप्रेंथु, टिशा बाक्तीनी दे तुइक्ताक्ड। मिनु गे आ शेंशो नेल्ल पाइतीनी।
- 3 वॉइश मुर नेल्ल आन पिया ख्रीस्त बाक्ब, मेको रुपीन। मीश मुर आन पिया मेको आन वॉइश बाक्ब। ख्रीस्त आ पिया परमप्रभु यावे बाक्ब दे रुपीन। उत्पत्ती ३:१६; एफिसी ५:२३; १कोरिन्थी ३:२३
- 4 खुम्सीशा, प्रार्थना पनीनु, परमप्रभु यावेमी तुइक्पाइक्शा लोत्र पनीनु, वॉइश मुरपुकीमी पियामी मारेइ मसुम्सीचा। सुम्साक्नी हना, ख्रीस्त कली आइक्च सेल्शो खोदेशो दुम्ब।



5 मीश मुरपुकी चहिं आन पिया सुम्सीचा माल्नीम। मसुम्सीशो बाक्तेक्म हना, आन वोंइश आन कली आइक्च सेल्शो खोदेशो दुम्ब। मसुम्सीथु बाक्ब आन कली चां प्रेक्शो खोदेशो मिम्सीब।

6 पिया मसुम्नुड देबम चहिं आन चां प्रेक्समल। चां प्रेक्शो आन कली मुरपुकीम मरिम्शो मिम्नीम, दे गो नेल्लेमी तुडक्नय। मोपतीके मीश मुरपुकीमी आन पिया सुम्समल।

7 वोंइश मुरुम पिया सुम्चा मदुम्ब। मारदे हना मेको परमप्रभु यावे खोदेशो पा सेल्सीशो नु आ दारस पाइशशो बाक्नीम। मीश मुरपुकी चहिं आन वोंइश आन दारस पाइशशो बाक्नीम। मोपतीके सुम्सीचा माल्नीम।

8 वोंइश मुर मीश मुर आ रां रे सेल्शो मबाक्ब। तन्न मीश मुर वोंइश मुर आ रां रे सेल्शो बाक्ब। उत्पत्ती २:२१:३

9 वोंइश मुर मीश मुर कली वारच पचा कली सेल्शो ममाइ। तन्न मीश मुर आ वोंइश कली वारच पचा कली सेल्शो बाक्ब। उत्पत्ती २:१८

10 मीश मुरुमी आन पिया सुम्सीचा माल्नीम। मारदे हना परमप्रभु यावे आ स्वर्ग डा गेय पाइबपुकीमी कोव्रशो बाक्नीम।

11 मोदेशो दुम्त हना यो, प्रभुमी “वोंइश मुर कली मीश मुर माल्ब। मीश मुर कली वोंइश मुर माल्ब। मबाक्थु मदुम्ब दे सेल्शो बाक्त” देत।

12 मीश मुर वोंइश मुर आ रां रे सेल्शो बाक्त हना यो, मुल वोंइश मुर मीश मुर रे थिशो बाक्नीम। मेको मोदेशो परमप्रभु यावे आ पशो बाक्ब।

13 लो आंमा मिम्तीन मीश मुरपुकीमी आन पिया मसुम्थु परमप्रभु यावे कली प्रार्थना पचा दुम्बा?

14 वोंइश मुरपुकीमी लाइशशो चां थुल्चा मुने दुम्ब, दे आंमा मतुडक्नीनी?

15 तन्न मीश मुरपुकीमी लाइशशो चां थुल्शो चहिं आन मान ततीक बाक्ब। आन रां सुम्चा कली लाइशशो चां गेशो बाक्ब। साइ डोंडती रे डा मोदेशो लोव्र बाक्ब दे मतुडक्नीनी डा?

16 गे नु बाक्ब आं शेशो आ परबम जिचा पोक्ब आन कली मार देनुड देशा हना, तेइ तेइ शेंथ गाक्कानु, मोदेशो शेंनीकी। परमप्रभु यावे आ गुम्तीक खिंमी यो मोदेशो शेंनीकी।

प्रभु भोज आ परबम शेशो

17 मुल इन कली शेशो लोव्रम गे रिम्शो दुम्नीनी देने मचाप्नुड। मारदे हना गुम्नीनु, इन कली रिम्शो ममाइ, मरिम्शो दुम्ब।

18 खुम्सीशा बाक्नीनु, थुं का दुम्शा मबाक्नीनी। एर ओथ ब्राशा बाक्नीनी देशो नेंता। एको लोव्र नेंशा, इक्का थमा सुइक्ता। १कोरिन्थी १:१२; १कोरिन्थी ३:३

19 एर ओथ ब्राशा बाक्चा चहिं दुम्चा माल्ब। मारदे हना लोव्र रुम्ब नु मरुम्बपुकी दिल्लीम। मती १८:७; १यूहन्ना २:१९

20 गे खुम्सीशा बाक्नीनु। मार मार जाइनीनी, मेको प्रभु भोज ममाइ।

21 मारदे हना आंम आंमा चाक्शो जचा थोव्रक जाइनीनी। मिनु मोपान का निक्शी जचा मतथु, शोव्रलु बेक्शो बाक्नीनी, का निक्शी दुक्शा बाक्नीनी। यहूदा १२

22 मार, मोदेशो पा जचा तूचा कली इन खिं मबाक्बा डा? मार, गे परमप्रभु यावे आ गुम्तीक खिं कली आइक्च मिम्नीनी? जचा तूचा मताइब आन कली मुने तोक्नीनी? मिनु मुल इन कली मार देनुडा? रिम्शो पाइतीनी देनुडा डा? गो मदेनुड। याक्कब २:५-६

23 मारदे हना प्रभुमी आं कली मार शेंदा, मेको इन कली शेंताक्ड। मेको ग्याइक्चा पुंडसीशो नाक्दो प्रभु येसुम शोब्ले शेशा, मती २६:२६-२८; मर्कुस १४:२२-२४; लूका २२:१९-२०

24 “परमप्रभु गे रिम्शो पाइब बाक्नीनी” दे मेको शोब्ले जिक्शा “एको आ रां बाक्ब। एको इन कली बाक्ब। एको ओदेशो आं कली मिम्चा कली पने” देत।

25 मिनु मोपान जने थुम्शा, कचौरा शेशा “एको कचौरा आं हुश डा नक कबल बाक्ब। गे गेना एको तूनीनी, मेना आं कली मिम्शा तूडीन” देत।

26 गे गेना एको शोब्ले जाइनीनी नु कचौरा रे तूनीनी, मेना प्रभु लेशशा मजाक्म सम्म मेको आ बेक्शो आ परबम शेंनीनी। मती २६:२९

27 सु सुमी हेंथे पा प्रभु भोज डा शोब्ले रे जाइबा नु कचौरा रे तूबा, मेकोमी पाप पा प्रभु आ रां नु आ हुश कली मरिम्शो सेल्ब। १कोरिन्थी १२:२१-२२

28 तन्न गे नेल्लेमी आंम कली नाक्तीन। मिनु ला मेको शोब्ले जन नु कचौरा रे तूडीन। मती २६:२२

29 मारदे हना नु सुमी जशा तूशा, प्रभु आ रां बाक्ब, दे ममिम्नीमी, मेको सजाइ गेचा पुंडसीनीम। १कोरिन्थी १०:१६-१७

30 मोपतीके इन दातेमी शुश मचाप्ब दुम्शो बाक्नीनी। शुश रोइ पशो बाक्नीनी। का निक्शी बेक्शा यो लाम्तेक्म।

31 तन्न गोपुकीमी आंम कली ठीक पा नाक्शा, प्रभु भोज जाइतय हना, सजाइ गेचा मपुंडसीनय।

32 तन्न प्रभुमी आंइ कली नाक्शा सजाइ गेब। मेको शेंचा कली बाक्ब। मोपा रागी डा मुर नु काथा बाक्शा, जाम्शा मलाइनीकी। हितोपदेस ३:११-१२

33 मोपतीके आं लोक्बपुकी, गे जचा कली खुम्सीनीनु, नेल्ल जाक्ने थुम्मे नोले ला जने।

34 शोव्रलु फाल्ने मचाप्बपुकीमी आन खिंम जशा जाक्मल। मो मपाइतीनी हना, प्रभु भोज मरिम्शो सेल्शा नु दोसी दुम्नीनी। अरु थोव्रक आन परबम गो इन कली नोले जाक्ची ना शेंनुड।

1 आं लोकबपुकी, इन कली परमप्रभु यावे आ सोक्तीम पपाइश्शो गेय मजोक्थु बाक्शो तशा, आं थुं मनुड। मोपतीके एको गेय आ परबम शेनन्नी।

2 खीस्त कली थमा सुडक्व क्येडा डोंइती गे मूर्ति पूजा पाइब बाक्तीनी। मिनु मेको मारेड पने मचाप्ब मूर्ति गे इन थुं हिरशो बाक्तीनी। अय्युब २:१८-१९

3 मिनु परमप्रभु यावे आ सोक्तीम पपाइश्शो लोत्र पा “येसु सराप रल” देने मचाप्सीब। परमप्रभु यावे आ सोक्तीम पतीके ला “येसु इं प्रभु बाक्ब” देने चाम्सीब, दे रूप्पाइक्नन्नी। मर्कूस ९:३९; १यूहन्ना ४:२-३

4 परमप्रभु यावे आ सोक्त का बाक्ब। आ पपाइश्शो गेय चहिं शुश बाक्नीम। एफिसी ४:४-६, ११; रोमी १२:६

5 आ पपाइश्शो गेय शुश बाक्शा यो, प्रभु चहिं का बाक्ब। १कोरिन्थी १२:२८

6 मेकेर शुश गेयपुकी बाक्नीमी। मिनु परमप्रभु यावेमी मुर नेल्ल आन कली का का पा मेको गेय पतीके थुं गेब।

7 परमप्रभु यावे आ सोक्तीमी पपाइश्शो गेय नेल्ल आन कली रिम्शो दुम्ब, दे पपाइश्शो बाक्ब। १कोरिन्थी १४:२६

8 परमप्रभु यावे आ सोक्तीमी का कली जोक्तीक तुइक्तीक लोत्र पपाइक्ब। अर्को कली मेकोन सोक्तीमी शेंतीक सक्ति गेब।

9 का कली आ सोक्तीम पतीके थमा सुडक्तीक सक्ति गेब। अर्को कली सापाइक्तीक सक्ति गेब।

10 का कली छक लाक्वा डा गेय पतीक सक्ति गेब। का कली परमप्रभु यावे आ लोत्र पतीक सक्ति गेब। का कली परमप्रभु यावे आ सोक्त देय वोल आन सोक्त बाक्बा, दे तुइक्तीक सक्ति गेब। का कली परमप्रभु यावे आ सोक्त आ लोत्र पतीक सक्ति गेब। का कली मेको लोत्र आ अर्थ शेंतीक सक्ति गेब। १कोरिन्थी १४:-; प्रेरित २:४

11 मोदेशो सक्ति पाइश्शो गेय नेल्ले परमप्रभु यावे आ सोक्तीमी पपाइश्शो बाक्ब। मिनु परमप्रभु यावे आ सोक्तीमी आ दाक्स पा सु सु आन कली गेचा दाक्बा, मेको आन कली गेब। रोमी १२:३; एफिसी ४:७

मुर आ रां

12 दोपा मुर आ रांम गुड, खोइली, नोफा, मिक्च नु अरु मार बाक्तेक्म हना यो, रां का दुम्ब, मोपान खीस्त आ मुर शुश बाक्तेक्म हना यो, रां का खोदेशो बाक्नीम, दे मिम्सीब।

13 परमप्रभु यावे आ सोक्तीम पतीके यहूदी, ग्रीक, वाइलीम वाइल, होत्रप नु गो नेल्ल परमप्रभु यावे आ सोक्त डा दुम्तय। गलाती ३:२८

14 मारेदे हना रां काइचीक बाक्त हना यो, मेकेर शुश अरु मार मार बाक्नीम।

15 खोइलीमी “गो गुड मनड। मोपतीके गो रां डा मनड” देत हना, मार, मेको रां डा मदुम्बा डा?

16 नोफामी “गो मिक्ची मनड। मोपतीके गो रां डा मनड” देत हना, मार मेको रां डा मदुम्बा डा?

17 मिनु रांमी मिक्च ला बाक्त हना, दोपा नेंचा डा? रांमी नोफा ला बाक्त हना, दोपा नाम्चा डा?

18 तन्न परमप्रभु यावेमी आ दाक्स पा नेंतीके, नाम्तीके, ततीके नु मारेड मारेड पतीके गारपाइश्शा वोइक्तु।

19 मिक्च ला बाक्त हना, दोपा रां दुम्बा डा?

20 मेको मारेड मारेड शुश बाक्तेक्म हना यो, रां चहिं काइचीक बाक्ब।

21 मिक्चीमी गुड कली “इ कली ममालनुड” देने मचाप्ब। पियामी खोइली कली “इ कली ममालनुड” देने मचाप्ब।

22 रां डा आइक्च मिम्सीशोपुकी मबाक्थु मदुम्शो बाक्नीम। मेको रां कली शुश माल्शो बाक्नीम।

23 रां डा महिक्सीशो आन कली गो मान पाइक्नय, मदारशो मिम्सीशो आन कली दारपाइक्नय।

24 रां दारशो आन कली दारपाइक्वा ममालनय। आइक्च मिम्शो आन कली चहिं परमप्रभु यावेमी नेल्ल क्येडा मान पपाइश्शो बाक्ब।

25 मोपा रां का दुम्शोपुकी मब्रामल, काइचीक दुम्शा बाक्मल नु काम अर्को कली कोत्रमुमल।

26 मोदेशो पा काइचीक दुम्शोपुकी, काम श्येत जाप्तु हना, नेल्ल श्येत जाइनीम। काम मान ताप्तु हना, नेल्ल गारशा ग्येरसीनीम।

गे खीस्त आ रां बाक्नीनी

27 गे खीस्त आ रां बाक्नीनी। मिनु का का पा मिक्ची, नोफा, शोत्र, गुड, खोइली नु मार मार बाक्नीनी। रोमी १२:५

28 परमप्रभु यावेमी थमा सुडक्ब आन युम्तीकेमी डोंइती खीस्त आ सोइश्शोपुकी, मेको आन नोले आ लोत्र पाइबपुकी, मेको आन नोले शेंबपुकी, मेको आन नोले छक लाक्वा डा गेय पाइबपुकी, मेको आन नोले सापाइक्बपुकी, मेको आन नोले बारच पाइबपुकी, मेको आन नोले कोत्रबपुकी नु मेको आन नोले सोक्त आ लोत्र पाइबपुकी वोइक्तीमी। एफिसी ४:११-१२

29 मार, मेको नेल्ल खीस्त आ सोइश्शोपुकी नमी? मार, मेको नेल्ल परमप्रभु यावे आन लोत्र पाइब बाक्नीमी? मार, मेको नेल्ल शेंब बाक्नीमी? मार, मेको नेल्ल छक लाक्वा डा गेय पाइब बाक्नीमी?

30 मार, मेको नेल्ल सापाइक्ब बाक्नीमी? मार मेको नेल्ले परमप्रभु यावे आ सोक्त आ लोत्र पाइनीमी? मार, मेको नेल्ले लोत्र आ अर्थ शेंनीमी?

31 गो मार देंनुड देंशा हना, परमप्रभु यावे आ सोक्तीमी पपाइश्शो गेय पनीनु, नेल्ल क्येडा ठेयब गेय पने। मिनु गो इन कली नेल्ल क्येडा रिम्शो लां कोइनन्नी। १कोरिन्थी १४:१,१२

- 1 गो मुर आन लोत्र पाता हना नु परमप्रभु यावे आ स्वर्ग डा गेय पाइब आन लोत्र यो पाता हना, तन्न मुर आन कली मदाक्ताकड हना, गो हेंथे पा ताण्शो किडगो नु रेयके पाइब बुफ्केल खोदेशो दुम्नुड।
- 2 गो नु परमप्रभु यावे आ लोत्र पतीक सक्ति, खुइशशो लोत्र नेल्ल रुपतीक सक्ति, नेल्ल जोक्तीक तुइक्तीक सक्ति नु डांडा याक्पाइक्तीक थमा सुइक्तीक बाक्त हना, तन्न गो नु दाक्तीक मबाक्त हना, गो मारेइ मनड। मत्ती ७:२२; मत्ती १७:२०
- 3 आं के बाक्शो थोत्रक नेल्ल योक्शा गेशा, आंम आं रां ग्रीडशशा बेक्चा कली गेता हना यो, दाक्ब मुर चहिं मदुम्ती हना, मार रिम्शो दुम्नुडा डा? गो शोर गाक्शो मदुम्नुडा डा? मत्ती ६:२
- 4 दाक्तीकेमी श्येत फाल्ने नु शिशी पने चाप्ब। दाक्तीकेमी गेहे मपाइब मबोरब।
- 5 दाक्तीकेमी ठेयब मलेप्ब नु मुने दोक्चा डा लोत्र मपाइब। दाक्तीकेमी आं के ला ठीक मदेबं। दाक्तीकेमी रीब पा मचुरब, ईख मकुरब। फिलिप्पी २:४
- 6 मरिम्शो पशो तशा मग्येरसीब। ठीक पशो तशा ग्येरसीब। रोमी १२:९
- 7 दाक्तीकेमी मारेइ मारेइ सुम्ब, मारेइ मारेइ थमा सुइक्ब, मारेइ मारेइ आस पाइब नु नेल्ल फाल्ने चाप्ब। हितोपदेस १०:११; मत्ती १८:२१-२२; रोमी १५:१
- 8 दाक्तीक गेनायो मक्याम्सीब। परमप्रभु यावे आ लोत्र पतीक जाम्शा लाइब। परमप्रभु यावे आ सोक्त आ लोत्र यो नुप्ब। तुइक्तीक सक्ति नुप्शा लाइब।
- 9 मारदे हना आंड जोक्तीक तुइक्तीक आइक्च बाक्ब। आंड परमप्रभु यावे आ लोत्र पतीक यो नेल्ल रुप्या डा मबाक्ब।
- 10 नोले चहिं गोपुकीमी नेल्ले तुइशशा रुन्नय। मिनु मरुण्शो नु मतुइशशो मारेइ मलीब।
- 11 गो आल बाक्डानु, आलम ब्वाक्स पा ब्वाक्ती। आलम मिम्स पा मिम्ताकड। आलम पस पा पाता। मिनु कोल्शा ठेयब दुम्शा, आलम खोदेशो मपड।
- 12 मुल गोपुकीमी ब्राबा पा ताइतय। मेना रिम्शो पा ताइनय। मुल गो इक्चा ला रुनुड। मेना नेल्ल रिम्शो पा रुनुड। परमप्रभु यावेमी आं कली तुइशशो बुद पा, गो मेना नेल्ल तुइक्नुड। गन्ती १२:८; २कोरिन्थी ५:७; १कोरिन्थी ८:३
- 13 थमा सुइक्चा, परमप्रभु यावेमी आ देशो नेल्ल खाप्ब, दे आस पा बाक्चा नु दाक्तीक सांफा बाक्नीम। मेको सांफामी दाक्तीक चहिं नेल्ल क्येडा ठेयब बाक्ब। १थिस्सलोनिकी १:३; १यूहन्ना ४:१६

## 14

मतुइशशो नु रुण्शो लोत्र पचा

- 1 दाक्तीक पाइशशो मुर दुमीन। परमप्रभु यावे आ सोक्तीम पपाइशशो गेय शुश मालीन। परमप्रभु यावे आ लोत्र पतीक शुश मालीन।
- 2 परमप्रभु यावे आ सोक्त आ लोत्र पाइबमी मुर कली लोत्र मपाइब। तन्न परमप्रभु यावे कली लोत्र पाइब। सुइमी मेको आ लोत्र मरुप्नीम। मेकोमी परमप्रभु यावे आ सोक्त आ पतीकेमी खुइशशो लोत्र पाइब। प्रेरित २:४; प्रेरित १०:४६
- 3 परमप्रभु यावे आ लोत्र पामेनु, मुर आन थुं बारपाइक्ब। रिम्शो गेय पपाइक्ब, नु थुं खाइशशो आन कली सापाइक्ब।
- 4 परमप्रभु यावे आ सोक्त आ लोत्र पाइबमी आंम थुं कली ला बारपाइक्ब। तन्न परमप्रभु यावे आ लोत्र पाइबमी युम्तीक खिं डा मुर आन थमा सुइक्तीक बारपाइक्ब।
- 5 गे नेल्लेम परमप्रभु यावे आ सोक्त आ लोत्र पशो दाक्नुड। तन्न मेको क्येडा परमप्रभु यावे आ लोत्र पशो तचा दाक्नुड। परमप्रभु यावे आ सोक्त आ लोत्र पाइब क्येडा, परमप्रभु यावे आ लोत्र पाइब ठेयब बाक्ब। तन्न सोक्त आ लोत्र आ अर्थ शेंब बाक्त हना, युम्तीक खिं डा मुर आन कली रिम्शो दुम्ब। १कोरिन्थी १२:१०
- 6 आं लोक्बपुकी, गो परमप्रभु यावे आ सोक्त आ लोत्र पा, इन युम्तीकेमी जाक्ती हना, इन कली मरुप्चा डा बाक्त। गो इन कली नोले दुम्तीक लोत्र, जोक्तीक तुइक्तीक लोत्र, परमप्रभु यावे आ लोत्र नु आ शेंतीक लोत्र पाता हना चहिं इन कली रिम्शो दुम्ब। १कोरिन्थी १२:८
- 7 ताप्तीके मुराली, तार पाइशशो ठेयब ताप्तीके ताप्तेनु, हेंथे पा ताप्तेक्म हना, मार ताण्शो बाक्बा, दोपा तुइक्नीमी?
- 8 लडाइ पची ना तुराही ताप्बमी मरुप्चा डा पा ताप्तु हना, लडाइ पाइब लाइनीमी डा?
- 9 मिनु गोपुकीमी सोक्त आ लोत्र पनीनु, इन देशो लोत्र सुमी रुप्नीमी डा? इन मोदेशो पशो लोत्र नेल्ल फशेम योल्शो खोदेशो दुम्ब।
- 10 रागीमी लोत्र शुश बाक्नीमी। मेको लोत्र नेल्ल रुप्या डा बाक्नीमी।
- 11 तन्न गो मेको लोत्र रुप्ने मचाप्ता हना, गो अर्को रागी डा मुर दुम्नुड। मिनु मेको लोत्र पाइब आं कली यो अर्को रागी डा मुर दुम्ब।
- 12 गे इन दातेमी मोदेशो बाक्ब। परमप्रभु यावे आ सोक्तीम पपाइशशो गेय पचा दाक्ताक्नी हना, गे इन युम्तीक खिं डा मुर आन थमा सुइक्तीक बोल्यो दुम्चा कली गेय पने।
- 13 मोपतीके सुमी परमप्रभु यावे आ सोक्त आ लोत्र पाइबा, मेकोमी आ अर्थ शेंचा कली पुनल। १कोरिन्थी १२:१०
- 14 गो सोक्त आ लोत्र पा प्रार्थना पडानु, आं थुंमी मारेइ मरुप्नुड।
- 15 गो मुल मार पाइनुड देशा हना, गो सोक्त आ लोत्रमी प्रार्थना पडानु, आ थुंमी यो प्रार्थना पाइनुड। परमप्रभु यावे आ सोक्तीम कुम्सो पडानु, आं थुंमी यो कुम्सो पाइनुड। एफिसी ५:१९

16 मिनू गेपुकी खुम्सीशा बाक्नीनु, सोक्त आ लोत्रम आसीक गेशा, परमप्रभु यावे कली “गे रिम्शो पाइब बाक्नीनी” देंतीनी हना, दोपा मरुप्ब मुरुमी “आमेन” देंने चाप्बा डा?

17 इन लोत्र रिम्शो बाक्त हना यो, अर्को मुर आ थुं मबारपाइश्शो बाक्त।

18 गो परमप्रभु यावे कली “गे रिम्शो पाइब बाक्नीनी” देंनुड। मारदे हना गो सोक्त आ लोत्र नेल्ल इन क्येडा शुश पाइनुड।

19 तन्न थमा सुइक्ब आन गुम्तीकेमी बाक्शा, मुर आन कली शेंचा नु रुप्पाइक्चा कली गो १० हजार सोक्त आ पशो लोत्र क्येडा रुप्चा डा ५ ओटा लोत्र पचा रिम्शो लाक्ती।

20 आं लोकबपुकी, आलमी मिम्शो खोदेशो पा ममिम्तीने। मरिम्शो गेय पचा कली मजोक्ब आल खोदेशो दुम्शा बाक्कीने। तन्न इन मिम्तीकेमी निप्स पाइश्शो मुरुम मिम्शो खोदेशो पा मिम्तीन। एफिसी ४:१४; यसैया २८:११-१२

21 मिनू परमप्रभु यावेमी आ अरेशा ब्रेक्पाइश्शो लोत्रमी “गो डोन रागी डा मुर आन मतुइश्शो लोत्र पतीकेमी नु रागी डा मुर आन लोत्रमी मेको नु लोत्र पाइक्नुड। मो हना यो मेकोपुकीम आं लोत्र मनेनीम” दे प्रभुमी देंत, दे ब्रेक्शो बाक्ब। यसैया २८:११,१२

22 परमप्रभु यावे आ सोक्त आ लोत्र पतीके थमा सुइक्ब आन कली ममाइ, थमा मसुइक्ब आन कली चिन्ड दुम्ब। परमप्रभु यावे आ लोत्र चहिं थमा मसुइक्ब आन कली ममाइ, थमा सुइक्ब आन कली बाक्ब।

23 मिनू थमा सुइक्ब नेल्ल खुम्सीशा बाक्मानु, मुर नेल्लेमी परमप्रभु यावे आ सोक्तीमी पपाइश्शो मतुइश्शो लोत्र पना पन बाक्तेकम हना, अरु मुर, थमा मसुइक्ब ओत्रशा, इन मोदेशो लोत्र पशो नेंशा “गशो बाक्तेकम” दे मदेनीमी डा?

24 तन्न गे नेल्ल परमप्रभु यावे आ लोत्र पना पन बाक्नीनु, थमा मसुइक्ब, अरु मुर ओत्रशा, इन मोदेशो नेंशा, आ थुंमी मिम्शा, आ मरिम्शो पशो नेल्ल फुकब।

25 आ थुं डा खुइश्शो नेल्ल तुइश्शा, बाप्शा “परमप्रभु यावे ठेयब बाक्ब” देंशा, परमप्रभु यावे थमा पा, इन दातेमी बाक्ब, दे तुइक्ब। यूहन्ना १६:८

26 आं लोकबपुकी, मुल मार देंनुड देंशा हना, गे खुम्सीशा बाक्नीनु, नेल्ल इन के गेय का का बाक्ब। कामी परमप्रभु यावे कली कुम्सो पाइब, कामी लोत्र शेंबा, कामी नोले दुम्तीक लोत्र पाइब, कामी परमप्रभु यावे आ सोक्त आ लोत्र पाइब नु अर्कोमी मेको लोत्र आ अर्थ शेंब। मेको गेय नेल्ल थुं बारपाइक्चा कली दुम्ल। १कोरिन्थी १२:८-१०; एफिसी ४:१२

27 परमप्रभु यावे आ सोक्त आ लोत्र पामेनु, निक्शीमी कि सांमी पामेक्ल। मिनू का का पा पचा माल्नीम। मिनू मुर कामी आ अर्थ शेंचा माल्ब।

28 तन्न मेको लोत्र आ अर्थ शेंब मबाक्त हना, सिक्सी पा बाक्चा माल्नीम। सोक्त आ लोत्र पाइबमी आंम थुं बारपाइक्चा कली, परमप्रभु यावे कली लोत्र पवल।

29 परमप्रभु यावे आ लोत्र पामेनु, निक्शीमी कि सांमी पामेक्ल। मिनू नेबपुकीमी “मेको लोत्र परमप्रभु यावे आ लोत्र नु गारबा देय मगारबा?” दे नाक्चा माल्नीमी। प्रेरित १७:११; १थिस्सलोनिकी ५:२१

30 तन्न मेकेर बाक्ब कामी परमप्रभु यावे आ नोले दुम्ब लोत्र तुइक्ताक्ब हना, डोंइती डा लोत्र पाइब सिक्सी पा बाक्ल।

31 गे नेल्लेमी का का पा परमप्रभु यावे आ लोत्र पने चाप्नीनी। मो पाइतीनी हना नेल्लेमी शेंसीने चाप्नीनी। गे नेल्ल इन थुं बारब।

32 परमप्रभु यावे आ लोत्र पाइब आन सोक्त मेको आन गुइम बाक्ब।

33 मारदे हना परमप्रभु यावे खल बल डा परमप्रभु मबाक्ब। मेको थुं नाइश्शा बाक्तीक परमप्रभु बाक्ब।

थमा सुइक्ब आन गुम्तीकेमी

34 मीश मुरपुकी लोत्रसी मपथु, सिक्सी पा बाक्मल। मेकोपुकी ब्वाक्चा मताइनीम। मारदे हना अरेशो लोत्रमी मोदेशो ब्रेक्शो बाक्ब। मिनू मेको लोत्र मेकोपुकीम टिचा माल्नीम। १तिमोथी २:११-१२; उत्पत्ती ३:१६

35 लोत्र मरुप्तेकम हना, आन खिं लमा नोले आन वोंइश आन कली हिल्लो पामेक्ल। थमा सुइक्ब आन गुम्तीकेमी चहिं लोत्र मपामेक्ल, मारदे हना मुने दुम्ब।

36 मार, परमप्रभु यावे आ लोत्र इन रे पा जाक्म डा देय इन कली ला जाक्म?

37 इन दातेमी परमप्रभु यावे आ लोत्र पाइब नु आ सोक्तीम ब्रीशो मिम्ब मुरुमी आं ब्रेक्शो लोत्र प्रभु आ देंशो लोत्र बाक्ब दे तुइक्तेमेक्ल १यूहन्ना ४:६

38 तन्न सुइमी “पावल आ शेंशो प्रभु आ लोत्र मबाक्ब” देंत हना, मेको आ लोत्र यो थमा मसुतीन।

39 मोपतीके आं लोकबपुकी, परमप्रभु यावे आ लोत्र पचा कली शुश बोल पने। मिनू परमप्रभु यावे आ सोक्त आ लोत्र पाइब आन कली मतेक्कीन।

40 खुम्सीशा बाक्नीनु, खल बल मपथु, नेल्ल रिम्शो दुम्चा माल्ब। १कोरिन्थी १४:३३; कलस्सी २:५

## 15

येसु बेक्शो रे सेंसीशो

1 आं लोकबपुकी, इन कली डोंइती येसु ख्रीस्त आ पर्वम शेंशो ग्येरपाइक्तीक लोत्र मिम्पाइक्नुड। गेपुकीमी एको लोत्र नेंशा थमा सुइक्तीनी। मिनू मुल यो थमा सुइक्ना सुइक्न बाक्तीनी।

2 एको लोत्र दोपा शेंदनी, मोपा थमा सुइक्ना सुइक्न बोल्यो दुम्तीनी हना, परमप्रभु यावे नु बाक्चा ताइनीनी।

3 मारदे हना आं खीस्त रे तशो ठेयब लोत्र इन कली शेंताकन्नी। दोदेशो लोत्र बाकब देशा हना, परमप्रभु यावे आ लोत्रमी ब्रेकशो खोदेशो पा खीस्त इं पाप आ परबम साइक्या पुंडसाकव। यसेया ५३:१२

4 मेको थिम्चा पुंडसाकव। मिनु परमप्रभु यावे आ लोत्रम ब्रेकशो खोदेशो पा आ नित्य नाक्ती सेंचा पुंडसाकव। होसे ६:२; लूका २४:२७,४४,४६

5 मिनु सेंसीशा, डोंडती केफास कली तपांडसाकव। मिनु नोले १२ जना शेंसीब आन कली तपांडसाकव। लूका २४:३४; यूहन्ना २०:२६

6 नोले कालेमी ५ सहे क्येडा शुश थमा सुइकब आन कली तपांडसाकव। का निकशी मुल बेकशा लाम्तेकम। शुश चहिं मुल यो बाक्नीम।

7 नोले याकूब कली तपांडसाकव। मिनु आ सोइशशो शेंसीब नेल्ल आन कली यो तपांडसाकव। लूका २४:५०

8 मिनु नेल्ल क्येडा नोले गो महिना मजाकदीत्यु जरमेशो आल खोदेशो आं कली तपांडसाकव। १कोरिन्थी ९:१; प्रेरित ९:३-६

9 मारदे हना गो सोइशशो आन दातेमी नेल्ल क्येडा आइक्य बाक्नुड। आं कली सोइशशो देंचा मशिरचा डा बाक्नुड। मारदे हना गो परमप्रभु यावे कली थमा सुइकब आन कली खेदा पाता। एफिसी ३:८; प्रेरित ८:३

10 तन्न परमप्रभु यावेमी शिशी पा आ सोइशशो नु आ लोत्र शेंब सेलती। आ शिशी पशो यो मो मबाकब। मिनु गो नेल्ल आन क्येडा शुश गेय पाता। मेको नेल्ल आं पशो ममाड, तन्न परमप्रभु यावे आ पपाइशशो बाकब। २कोरिन्थी ११:५,२३

11 मोपतीके गोम शेंताकन्नी हना यो, मेकोपुकीम शेंताकम हना यो, गेपुकीमी थमा सुइक्तीनी।

येसु बेकशो रे मसेंस दे लोत्र ब्रशो

12 मिनु खीस्त बेकशो रे सेंसाकव, दे शेंशो बाकत। तन्न इन दाते डा का निकशीमी “बेकशो मुर बेकशो रे मसेंसीनीम” देशा दोपा देने चाप्नीमी?

13 बेकशो रे सेंचा मपुंडसीनीम हना, खीस्त यो बेकशो रे मसेंसीशो बाकब।

14 खीस्त बेकशो रे मसेंसीशो बाकत हना, आंइ शेंशो फश लोत्र खोदेशो दुम्त। इन थमा सुइशशो यो मोशीन दुम्त।

15 गो आंइ परमप्रभु यावे आ परबम शेंशो यो जोल दुम्बाकत। मारदे हना गोमी परमप्रभु यावेमी खीस्त कली बेकशो रे सेंताकव दे शेंशो बाकतक। तन्न मेकोम मपव। “बेकशो रे मसेंसीनीम” देंशो लोत्र थमा बाकत हना, आंइ शेंशो जोल दुम्ब। प्रेरित १:२२

16 मारदे हना मुर बेकशो रे मसेंसीनीम हना, खीस्त यो बेकशो रे मसेंस।

17 मिनु खीस्त बेकशो रे मसेंसाकव हना, इन थमा सुइशशो मोशीन दुम्त। इन पाप यो मक्याम्सीथु लीशो बाकब।

18 खीस्त कली थमा सुइशशा बेकशोपुकी यो जाम्शा लाम्तेकम।

19 एको रागीम ब्रोंडचा कली ला खीस्त कली थमा सुइशशो बाकतक हना, गो मुर नेल्ल आन क्येडा शिशी पाइक्या पुंडसीब नकी।

येसु रे नेल्ल ब्रोंडब दुम्नीम

20 तन्न खीस्त बेकशो रे सेंसीशो बाकब। बेकशो आन दातेमी नेल्ल क्येडा डोंडती सेंसीब खीस्त बाकत। १कोरिन्थी ६:१४; कलस्सी १:१८

21 दोपा मुर कामी नेल्ल मुर आन कली बेकशा लाइब सेला, मोपा मुर कामीन मुर नेल्ल आन कली बेकशो रे सेंचा पुंडसीब सेल्लु। उत्पत्ती ३:१७-१९; रोमी ५:१८

22 दोपा आदम रे नेल्ल बेकब दुम्मा, मोपा खीस्त रे पा नेल्ल ब्रोंडब दुम्तेकम।

23 मिनु नेल्ल का का पा सेंसीनीम। डोंडती खीस्त सेंसाकव। मिनु नोले आ जाक्ची ना मेको कली थमा सुइकबपुकी सेंसीनीम। १थिस्सलोनिकी ४:१६-१७

24 मिनु नोले रागी नुप्ची ना जाकब। मिनु मेकोमी नेल्ल सासन, नेल्ल अधिकार नु नेल्ल सक्ति खतम सेल्शा, आ आफ परमप्रभु यावे कली आ राज्य गेब। रोमी ८:३८

25 मारदे हना खीस्तमी आ जोरी सत्रु आन कली आ खोइलीम मदिम्दा सम्म सासन पचा माल्व। भजन संग्रह ११०:१; मती २२:४४

26 नेल्ल क्येडा नोले साइक्तीक चहिं जोरी सत्रु बेक्तीक बाकब।

27 मारदे हना परमप्रभु यावेमी रागी डा सक्ति नेल्ल कली आ खोइलीम दिप्शा वोइक्तु। रागी डा सक्ति नेल्ल आ खोइलीम दिप्शा वोइक्तु, आ चहिं दिम्सीशा मबा, दे रुम्सीब। भजन संग्रह ८:६

28 मिनु सक्ति नेल्ल परमप्रभु यावे आ गुडम बाकत हना, तौ यो आ गुडम बाकब। मारदे हना परमप्रभु यावे नेल्ल आन कली का ला परमप्रभु यावे बाकब।

29 बेकशो रे मसेंसीब देंशो लोत्र थमा बाकत हना, बेकशो मुर आन पा डा अरु थमा सुइकब मुर ब्वाक्कुम खुम्शा गुंडपांडसीचा, मार मिन्नीमी? बेकशो मुर थमा पा मसेंसीनीम हना, मारदे अरु मेको आन पा डा ब्वाक्कुम खुम्शा गुंडचा पुंडसीनीमी?

30 मारदे गो शुश श्येत फाल्शा, एको लोत्र शेंना शेंन गाक्नुडा? रोमी ८:३६; गलाती ५:११

31 आं लोक्बपुकी, येसु खीस्त, इं प्रभु आ मुर दुम्तीनी। मिनु इन कली तशा, आं नें बोरपाइक्नुड। तन्न शेंना शेंन गाक्शा, नाकत कित कित बेक्का डा खोदेशो दुम्नुड। २कोरिन्थी ४:१०

- 32 एफिसस सहरम शेंना शेंन बाकडानु, मेकेर डा मुरपुकीमी जोड वां खोदेशो पा खेदा पतीमी। मुर बेकशो रे मसेसीनीम हना, जय तूय मारदे हना दीसा बेकनय। यसैया २२:१३
- 33 सुइमी जोल थमा मसुतीन। मारदे हना मरिम्शो मुर नु बाकबम, मुर कली मरिम्शो सेल्व।
- 34 दूली मिम्चा प्रोनीन। लेशा पाप मपने। इन दाते डा का निकशीमी परमप्रभु यावे आ पबंम मारेइ मतुइकब बाकनीम। मेको इन कली मुने दोकचा डा बाकब। १थिस्सलोनिकी ५:८

बेकशो रे सेंसीशो आन रां

- 35 मिनु मुर कामी “मुर बेकशो रे दोपा सेंसीनीमी? आन रां दोदेशो बाकबा डा?” दे हिल्लो पाइनीम।
- 36 गे मूर्खपुकी, वांचेर शोकनीनु, वांचेर मबेकथु, कोच्वा मदाप्व। यूहन्ना १२:२४
- 37 मिनु इन शोकशो, वाशो खोदेशो मबाकब। मेको गेडा ला बाकब। मेको चेरब बाक्त हना यो अरु वांचेर बाक्त हना यो मोदेशो बाकब।
- 38 तन्न परमप्रभु यावेमी नेल्ल आन कली आ योवशो रां गेब। मिनु वांचेरमी आंम आंम कोच्वा दापशो खोदेशो बाकब।
- 39 मारदे हना ब्रोंडशो नेल्ल खाल का डा मबाकनीम। मुर खाल का डा बाकनीम, जन्तु अर्को खाल डा बाकनीम, बस्तु भाव अर्को खाल डा बाकनीम, चिकब अर्को खाल डा बाकनीम नु डांड अर्को खाल डा बाकनीम।
- 40 मिनु स्वर्ग डा रां बाकनीम नु रागी डा रां बाकनीम। स्वर्ग डा रां आन दारस का बाकब नु रागी डा रां आन दारस अर्को बाकब।
- 41 नां आ छेडछेड का बाकब नु तास्ला आ छेडछेड अर्को बाकब। मिनु सोरुल आन छेडछेड लेशा अर्को बाकब। सोरुल का आइकच नु अर्को टेयब छेडछेड पाइशो बाकब।
- 42 मोदेशो मुर आन बेकशो रे सेंसीचा यो बाकब। शोकशो रां, वांचेर खोदेशो पा, जाम्शा लाइब। सेंसीशो रां चहिं गेना हना यो लीब रां बाकब।
- 43 शोकशो रां मरिम्शो बाकब। सेंसीशो रां चहिं थम दारशो बाकब। शोकशो रां मारेइ पने मचाप्व दुम्शो बाकब। सेंसीशो रां चहिं सक्ति पाइशो बाकब। फिलिप्पी ३:२१; कलस्सी ३:४
- 44 बेकचा माल्शो रां शोकशो बाकब, परमप्रभु यावे आ सोक्तीम गेशो रां सेंसीशो रां बाकब। बेकचा माल्शो रां बाक्त हना, परमप्रभु यावे आ सोक्तीम गेशो रां यो बाकब।
- 45 मार बेकशो बाकब देशा हना “नेल्ल क्येडा डोंइती डा मुर, आदम, ब्रोंड दुम्माक्त” दे बेकशो बाकब। नेल्ल क्येडा नोले डा आदम चहिं ब्रोंडतीक सोक्त गेब दुम्न। उत्पती २:७; २कोरिन्थी ३:१७
- 46 तन्न परमप्रभु यावे आ सोक्तीम गेशो रां डोंइती डा ममाइ। डोंइती बेकचा माल्शो रां बाकब। नोले ला सोक्तीम गेशो रां बाकब।
- 47 डोंइती डा मुर रागी डा खप के सेल्लो बाक्त। नोले डा मुर स्वर्ग रे बाकब।
- 48 डोंइती डा मुर खप के सेल्लो खोदेशो पा, खप के सेल्लो बाक्तेकम। डोंइती स्वर्ग रे जाकशो मुर खोदेशो पा, स्वर्ग डा मुर बाकनीम।
- 49 दोपा गो खप के सेल्लो मुर खोदेशो बाकनया, मोपा गो स्वर्ग डा मुर खोदेशो यो दुम्नय। उत्पती ५:३

फाइकचा पुंडसीनय दे शेंशो

- 50 आं लोकबपुकी, मुल हुश नु रुश पाइशो मुर परमप्रभु यावे आ राज्य ओव्रने मचाप्नीम। बेकशा जाम्शा लाइब रां, गेना हना यो लीब रां दुम्ने मचाप्व।
- 51 मुल इन कली खुइशो लोत्र का शेंननी। गो का निकशी बेकशा लाइनय, का निकशी ब्रोंडशा बाकनय। गो बेकशा लशो नु ब्रोंडशा बाकशो नेल्ल फाइकचा पुंडसीनय। १थिस्सलोनिकी ४:१५-१७
- 52 मेको छिन काम दुम्ब। याम काम दुम्ब। नोले डा नाक्त डा तुराही ताप्ची ना मेको दुम्ब। मारदे हना मेको तुराही नेंसीब। बेकशो मुर, मबेकचा डा पा सेंसीनीम। मिनु गो फाइकचा पुंडसीनय। मती २४:३१
- 53 मारदे हना मेको जाम्शा लाइब रां, मजाम्चा डा रां दुम्चा माल्व। मेको बेकशा लाइब रां, मबेकचा डा रां दुम्चा माल्व। २कोरिन्थी ५:४
- 54 मिनु जाम्शा लाइब रां, गेना हना यो लीब रां दुम्चा माल्व। बेकब रां, गेनायो मबेकचा डा रां दुम्चा माल्व। मेना मेको बेकशो लोत्र थमा दुम्ब “ब्रोंडतीक सक्तिमी बेकचा कली ग्रात।
- 55 ए बेकचा, इ ग्रातीक ते लमे? ए बेकचा, इ हिंपाइक्तीक ते लमे?” दे बेकशो बाकब। यसैया २५:८; होसे १३:१४
- 56 पाप पशोमी बेकचा कली हिंपाइकब। परमप्रभु यावे आ अरेशो लोत्र तुडकबमी पाप पशो यो तुडकब। मेको आ अरेशो आ सक्ति बाकब। रोमी ७:८; रोमी ११:१३
- 57 तन्न गो परमप्रभु यावे कली “गे रिम्शो पाइब बाकनीनी” देंनय। मारदे हना मेकोमी इं प्रभु येसु खीस्त आ पशोमी ग्राचा गेप्तु।
- 58 मोपतीके आं दाकशो लोकबपुकी, इन खोइली थेकशा, दल्गीर मपथु, प्रभु आ गेय पना पन बाक्कीन। प्रभु आ नेंमी पशो गेय गेनायो मोशीन मलाइब, दे तुडक्तीन।

- 1 क्येट पोक्चा आ पर्वम गलातीया रागी डा थमा सुइक्ब आन कली शेंशो इन कली यो शेंननी। २कोरिन्थी ८:९; गलाती २:१०
- 2 हप्ता डा डोंइती नाक्ती गे नेल्लेमी आंम के बाक्शो रे हेंशा, गो ओशो गेने चाप्नुड, दे वोतीने। मो पाइतीनी हना, गो जाक्डानु, क्येट मबा दे खिं खिं हिरशा पुंइशा गाक्चा ममाल्नीनी। प्रेरित २०:७
- 3 मिनु आं जाक्ची ना मेको क्येट चोत्रदीचा कली सु सु कली सोइक्चा दाक्नीनी, मेको आन कली योत्रशा वोतीने। मिनु गो चिठी ब्रेक्शा, मेको क्येट नु चिठी इन योत्रशो मुर कली यरूसलेम चोत्रथ सोइक्नुड।
- 4 गो यो लचा माल्ताक्ची हना, मेको गो नु लाइनीमी।
- पावल आ बाक्चा नु गाक्चा आ पर्वम
- 5 गो मासीडोनीया रागी लाक्शा, इन कली ग्रुमथ जाक्नुड। प्रेरित १९:२१
- 6 मिनु महिना का निक्शी हिउंद मलाक्गा सम्म गे नु बाक्नुडा कों? मिनु ते ते लाइनुडा, आं कली वारच पाइनीनी कों, दे मिम्शा बाक्ती।
- 7 मुल ग्रुमथ जाक्ती हना, काबु निक्बु ला बाक्चा ताइनुड। तन्न प्रभुमी गेपुकी नु शुश बाक्चा गेयील दे आस पा बाक्ती। प्रेरित २०:२
- 8 पेन्तीकोस नाक्त सम्म गो एफिसस सहरमी बाक्नुड। प्रेरित १९:१,१०
- 9 मारदे हना शुश मुर आन कली खीस्त आ पर्वम शेंचा नु नेंपाइक्चा ताइनुडमी। आं शेंशो लोत्र मदाक्बपुकी यो शुश बाक्नीम। २कोरिन्थी २:१२; कलस्सी ४:३
- 10 तिमोथीमी एको चिठी कुरशा जाक्मेनु, मेको कली रिम्शो पतीने। आ लोत्र नेनीने। मारदे हना गो नु बाक्शा, आं यो प्रभु आ गेय पना पन बाक्ब। १कोरिन्थी ४:१७; फिलिप्पी २:१९-२२
- 11 सुइमी महिक्शो मुर खोदेशो मपने। मान पा रिम्शो पा लेशशा आं बाक्तीक सोइक्तीने। मारदे हना गो मेको नु लोक्ब आन कली रिम्शा बाक्नुड।
- 12 डोंइती इं लोक्ब आपोल्लोस कली लोक्बपुकी नु गारशा “कोरिन्थी आन कली ग्रुमथ लावो” दे शुश लोत्र पाता। आ चहिं “मुल लचा थुं मपड” दे लने मबिस्से। आ गेय गारत हना, इन कली ग्रुमथ पीब। १कोरिन्थी १:३२
- नोले डा लोत्र
- 13 होस पा बाक्कीने। पोक्च थेक्शा थमा सुइश्शा बाक्कीन। ठेयब थुं पा बाक्कीने। सक्ति पाइश्शो गेय पना पन बाक्कीन। एफिसी ६:१०
- 14 मार पाइतीनी हना यो, दाक्मुशा पने।
- 15 आं लोक्बपुकी, आकाया रागीम नेल्ल क्येडा डोंइती थमा सुइक्बपुकी स्तीफानस नु आ खिं डा मुर बाक्तेक्म दे तुइक्नीनी। मेकोपुकीमी थमा सुइक्ब आन कली वारच पा रिम्शो गेय पा शेंना शेंन गाक्नीम। १कोरिन्थी १:१६
- 16 मेको आन पशो खोदेशो पा शेंना शेंन गाक्ब नेल्ल आन कली मान पा आन लोत्र नेंशा टिने।
- 17 स्तीफानस, फोरटुनातस नु अकाइकस एक जाक्मानु, गो ग्येरसाक्ची। मेको आन कली ग्रुमशा, इन कली ग्रुमशो खोदेशो पा, आं थुं नाइक्ताक्ड।
- 18 मारदे हना मेकोपुकीमी ग्येरपाइक्तीमी, आं थुं बारपाइक्तीमी। गे नु बाक्मानु, इन कली यो ग्येरपाइश्शा, इन थुं बारपदमे बाक्त दे तुइक्ताक्ड। मोदेशो मुर आन कली मान पतीने। १थिस्सलोनिकी ५:१२; फिलिप्पी २:२९
- 19 एसीयाम बाक्ब थमा सुइक्बपुकीमी इन कली “रिम्शो बाक्कीन” देंतेक्म। अक्वीला, प्रिस्कीला नु आस खिंमी ग्रुम्ब थमा सुइक्बपुकीमी प्रभु आ नेंमी “रिम्शो बाक्कीन” देंतेक्म। प्रेरित १८:२; रोमी १६:३,६
- 20 लोक्ब नेल्लेमी इन कली “रिम्शो बाक्कीन” देंतेक्म। प्रभु आ नेंमी मुम्मुशा आसीक गेमुने।
- 21 गो पावलमी “रिम्शो बाक्कीन” दे आंम गुइमी ब्रेक्ताक्ड। गलाती ६:११; कलस्सी ४:१८; २थिस्सलोनिकी ३:१७
- 22 प्रभु कली मदाक्बपुकी सराप रमल। इं प्रभु जाक्कीन। प्रकाश २२:२०
- 23 प्रभु येसुमी इन कली शिशी पा कोत्रडल।
- 24 खीस्त येसु आ नेंमी गो नेल्ल इन कली दाक्शा बाक्नुड। आमेन।

## २ कोरिन्थी

**ब्रेकब मुर:** एको चिठी ब्रेकब आ नें चिठी आ डोंइती “पावल नड” देंत।

**गेना ब्रेकशो:** पावल मासीडोनीया रागीम बाकशा, ५७ ए. डी. नोले डा महिना मेर ब्रेकशो बाकत।

**मार ब्रेकशो:**

१. पावल थमा सुइक्ब आन दातेमी रिम्शो दुम्त, दे शुश ग्येरसीशो लोत्र। २कोरिन्थी १:१२-२:४
२. थमा सुइक्बपुकी हाइशशो दुम्चा मालनीम। २कोरिन्थी ८:१-९:१५
३. पावल नु यहूदी आन पतीके। २कोरिन्थी १०:१-१२:१८

डोंइती डा लोत्र

१ परमप्रभु यावे आ दाकशो पा ख्रीस्त येसु आ सोइशशो गो पावल नड। इं लोक्ब तिमोथी नु गोमी कोरिन्थ सहर डा परमप्रभु यावे कली थमा सुइशशा गुम्ब इन कली नु आकाया रागीम बाकब थमा सुइक्ब नेल्ल आन कली एको चिठी ब्रेकशा सोइक्ताक्कु। १कोरिन्थी १:१

२ इं आफ परमप्रभु यावे नु प्रभु येसु ख्रीस्तमी इन कली शिशी पा इन थुं नाइशशा बाक्या गेम्सेक्ल।

परमप्रभु कली ठेयब सेल्शो

३ इं प्रभु येसु ख्रीस्त आ आफ परमप्रभु यावे कली “गे रिम्शो पाइब ननी” देंशा ठेयब सेल्नीकी। मारदे हना मेको शिशी पाइब आफ, थुं नाइक्पाइक्ब नु थुं बारपाइक्ब परमप्रभु यावे बाकब, दे तुइक्नीकी। रोमी १५:५

४ गो शुश श्येत जकानु, परमप्रभु यावेमी आंइ थुं नाइक्पाइशशा बारपाइक्ब। मिनु आंइ थुं नाइसीशा, गोपुकीमी यो श्येत जाइब आन कली आन थुं नाइक्पाइशशा, बारपाइक्ने चाप्नीकी।

५ ख्रीस्त आ नेमी गिश श्येत जाइनीकी, मिश ख्रीस्त आ नेमी थुं नाइक्पाइक्चा पुंइसीनीकी। भजन संग्रह ३४:२०; रोमी ८:१७; भजन संग्रह ९४:१९

६ आंइ श्येत जशोमी इन थुं नाइक्पाइक्ब। मिनु रिम्शो दुम्ब। गो आंइ थुं नाइक्पाइक्चा पुंइसीशोमी गे इन थुं नाइक्पाइक्चा पुंइसाक्नी। गे आंइ खोदेंशो दुम्शा, श्येत फाल्शा बाक्तीनी हना, गे आंइ खोदेंशो पा थुं नाइक्पाइक्चा पुंइसीनीनी। २कोरिन्थी ४:८-११,१५

७ आंइ जशो श्येत गे यो जाइनीनी। मिनु आंइ खोदेंशो पा थुं नाइक्पाइक्चा पुंइसीनीनी। आंइ खोदेंशो पा, थुं नाइक्पाइक्चा पुंइसीनीनी, दे तुइशशा, आस पचा मप्रोंइथुं बाक्नीकी।

८ आंइ दाकशो लोक्बपुकी, एसीया रागीमी बाक्कानु, शुश श्येत जाइतक। श्येत जचा आ पबंम लोत्र मखुइक्थु, तुइक्पाइक्नन्नी। आंइ जशो श्येत मार बाक्ब देंशा हना, बेक्चा डा सम्म दुम्शो नकी। प्रेरित १९:२३-४०; १कोरिन्थी १५:३२

९ साइक्चा पुंइसीशो खोदेंशो दुम्तक। मो दुम्तक हना यो “परमप्रभु यावेम बेक्शो मुर आन कली सेंब। मोपतीके मेको कली थमा सुइय्य। मेको क्येडा लाकशा सुइमी इं कली प्रोंइने मचाप्नीम” दे मिम्शा बाकतक।

१० मिनु परमप्रभु यावेमी मोदेंशो बेक्चा डा दुम्शो रे प्रोंइतीकी। मिनु मुल नोले यो आंइ कली श्येत रे प्रोंइब, दे तुइक्नीकी।

११ मोपतीके परमप्रभु कली “श्येत रे प्रोंइयीकी” दे पुंइना पुंइन बाक्नीकी। मिनु गेपुकीमी यो “पावल नु आ वारच आन कली श्येत रे प्रोनीन” दे पुनीने। नोले आंइ कली श्येत रे प्रोंइशो तशा, शुश मुरुमी “गे रिम्शो पाइब ननी, आंइ पुंइशो गेतीकी, रिम्शो पाइतीनी” दे परमप्रभु कली ठेयब सेल्नीम, दे तुइक्नीकी। फिलिप्पी १:१९

रिम्शो पाइतक, दे लोत्र थोकशो

१२ गो आंइ नें बोरपा बाक्नीकी। मारदे हना परमप्रभु यावेमी सक्ति गेतीकी। मिनु मेको आन मुर दुम्शा, मुर नेल्ल आन कुल, इन कुल यो रिम्शो थुं रे पा गेय कोंइताक्क। आम आंइ रागी डा जोक्तीक तुइक्तीक रे ममाइ। तन्न परमप्रभु यावे आ शिशीम पतीके बाक्ब। २कोरिन्थी २:१७; हिब्रू १३:१८; १कोरिन्थी १:१७

१३ मिनु गो इन कली नेल्ल रुक्चा डा नु पडेचा डा लोत्र ब्रेक्नीकी। मुल गे नेल्ल रुप्तीनी, दे गो आस पाइनुड।

१४ गे दोपा आंइ पबंम इन नें बोरपाइक्ने चाप्नीकी, मोपान इं प्रभु येसु आ नाक्ती जाक्मेनु, गोपुकीमी इन कली तशा, आंइ नें बोरपाइक्ने चाप्नीकी। २कोरिन्थी ५:१२; फिलिप्पी २:१६

१५ मारदे हना गो मेको नेल्ल तुइक्ताक्क। गे शुश ग्येरसीशा बाक्कीन, दे डोंइती इन बाक्तीके जाक्चा मिम्ताक्क।

१६ गो मासीडोनीया लडानु, इन कली ग्रुनुड। मिनु मासीडोनीया रे लेडडानु, इन बाक्तीके जाक्नुड। मिनु गेपुकीमी आं कली यहूदीया रागी सम्म चोक्नीनी, दे आस पाता। १कोरिन्थी १६:५-६

१७ मोदेंशो आस पा, मरिम्शो पडा डा? मार, मोदेंशो मिम्शा, रागी डा मुर खोदेंशो पडा डा? मार मेको आन खोदेंशो काइले ना दुम्बा, काइले ना म्दुम्बा देंन डा?

१८ परमप्रभु यावेमी आ देंशो खाप्ब, दे नेल्लेम तुइक्नीम। गोपुकीमी इन कली देंशो लोत्र थमान बाक्ब। दुम्बा कों, म्दुम्बा कों, मार तुइक्चा देंशो लोत्र दुम्सीन म्दुम्बा।

१९ सिल्वानस, तिमीथी नु गो सांफामी इन कली परमप्रभु यावेमी आ तो येसु ख्रीस्त आ लोत्र नेंपाइक्तक। मेको लोत्र थमा दुम्बा कों म्दुम्बा, मार तुइक्चा देंशो लोत्र ममाइ। येसु ख्रीस्त थमा बाक्ब। प्रेरित १८:५



20 परमप्रभु यावे आ गेशो लोत्र नेल्ल येसु ख्रीस्तमी खाप्तु। मोपतीके गो मेको आ नेमी आमेन देंनीकी। मिनु परमप्रभु यावे कली “ठेयब बाक्नीनी” दे ठेयब सेल्नीकी। प्रकाश ३:१४

21 परमप्रभु यावेमी आंइ कली नु इन कली ख्रीस्तमी काथा वोइश्शा, आ मुर दुम्पाइक्तु, आ गेय पाइब सेल्लु। १यूहन्ना २:२७

22 मेकोमी इं कली छाप थोक्ताक्व। मिनु आ सोक्त इं थुमी वोइक्तु। मेको सोक्त बैना खोदेशो पा गेप्तु। एफिसी १:१३; २कोरिन्थी ५:५; रोमी ८:१६

23 परमप्रभु यावे कली सांकळी वोइश्शा, इन कली थमा पा देंनुड, गो इन कली हुइक्का कली कोरिन्थ मजाक्ड।

24 गो इन थमा सुइक्तीके कली हुकुम मपाइनीकी। इन ग्येरसीचा डा पा, गे नु गेय पाइनीकी। मारदे हना इन थमा सुइक्तीके बोल्यो बाक्ब। २कोरिन्थी ४:५; १पत्रुस ५:३

## 2

1 गो इन कली लेंशा श्येत गेचा कली कोरिन्थ मपीनुड, दे मिम्ताक्ड।

2 मारदे हना गो इन कली श्येत गेता हना, आं श्येत गेशो मुर आन क्येडा लाक्शा, सुमी आं कली ग्येरपाइक्ने चाप्बा डा?

3 गो डोंइती मार मिम्शा ब्रेक्ताक्ड देंशा हना, गो जाक्डानु, सु मुरपुकीमी आं कली ग्येरपाइक्का माल्नीमी, मेको रे पा आं थुं मखाइक्ल, दे ब्रेक्ताक्ड। मारदे हना गो ग्येरसीडानु, गे नेल्ल ग्येरसीनीनी, दे थमा सुइक्नुड।

4 एको चिठी ब्रेक्तनु, आं थुं खाइश्शा “दोपा अर्ती गेडमी? हुइश्शा रिम्शो दुम्नीमी कौ? दोपा रिम्शो दुम्नीमी?” दे इन कली शुश मिम्शा, डाक्थ्री दुम्ती। इन थुं खाइक्पाइक्का कली ममाइ, इन कली दाक्तीके मोदेशो दुम्त, दे मिम्तीनी।

माफ पुंइब आन कली माफ गेचा

5 इन वारच कामी इन थुं खाइक्पदा बाक्त, दे रुप्ता। आं थुं खाइक्पाइश्शो क्येडा नेल्ल इन थुं खाइक्पाइक्तु।

6 मेको कली गे नेल्ल इन मिम्शा गेशो सजाइ ठीक बाक्ब।

7 मुल डा मेरे माफ गेने। आ थुं नाइक्पाइश्शा बारपतीनी। मोदेशो मपाइतीनी हना, आ मरिम्शो पशो मिम्शा, आ कांइचीक बाक्शा, बेक्शो खोदेशो दुम्ब।

8 मोपतीके मेको कली ब्रशा, दाक्तीन, दे इन कली पुंइनुड।

9 गे टीनीनी देय मटीनीनी, दे गो इन कली डोंइती डा चिठी सोइश्शो नड।

10 गेपुकीमी सु सु आन कली माफ गेनी, गो यो मेको आन कली माफ गेता। माफ गेडानु, इन पर्वम ख्रीस्त आ डोंइती गेता। यूहन्ना २०:२३

11 सैतानमी इं कली खतम सेल्चा मतवल। मारदे हना मेको आ मिम्शो गो नेल्ल तुइक्नय। लूका २२:३१; १पत्रुस ५:८

ख्रीस्त आ लोत्रमी ग्राना ग्रान लशो

12 गो त्रोआस सहरमी ख्रीस्त आ ग्येरपाइक्तीक लोत्र शेंथ जाक्डानु, प्रभुमी आं कली नक लाप्चो का रोकशा गेती। प्रेरित १४:२७; १कोरिन्थी १६:९

13 तन्न आं दाक्शो लोक्ब तीतस कली मयुम्थु, आं थुं मनाइक्स। मोपतीके मेको आन कली प्रोंइशा, मासीडोनीया लती। २कोरिन्थी ७:६; प्रेरित २०:१

14 तन्न परमप्रभु यावे कली “गे रिम्शो पाइब बाक्नीनी” दे ठेयब सेल्नीकी। मारदे हना ख्रीस्त आ नेमी ग्राना ग्रान लाइनीकी। मोपा शेंना शेंन हिरशा गाक्कानु, ब्रोंव्रशो रिना पाइश्शो खोदेशो पा नेल्लेमी ख्रीस्त कली तुइक्नीमी।

15 मारदे हना गो पाप रे ब्रोंइशा बाक्ब नु जाम्शा लाइब आन दातेमी गो परमप्रभु यावे आ डोंइती ख्रीस्त आ ब्रोंव्रशो नाम्सीशो बाक्नीकी। १कोरिन्थी १:१८

16 गो जाम्शा लाइब आन कली बेक्का डा रिना नु पाप रे ब्रोंइशा बाक्ब आन कली ब्रोंइचा डा रिना बाक्नीकी। मोदेशो लोत्र शेंचा कली सुम जिम्मा ब्रने चाप्नीमी? लूका २:३४; २कोरिन्थी ३:५

17 तन्न गो परमप्रभु यावे आ लोत्र ग्याप्ब लेयब खोदेशो पा मलेयनीकी। गो ठीक पाइब मुर बाक्नीकी। गो परमप्रभु यावे आ सोइश्शो, परमप्रभु यावे आ डोंइती ख्रीस्त आ नेमी शेंनीकी। २कोरिन्थी १:१२; २कोरिन्थी ४:२; १पत्रुस ४:११

## 3

नक कबल डा गेय

1 गो मेकोपुकीमी लोत्र पशो खोदेब पा ठेयब सेल्सीनीकी डा? मेकोपुकीमी सिफारीस कागज गुंइनीमी। मिनु गोपुकी यो मोदेशो कागज कुरशा, शेंना शेंन गाक्का माल्नीकी डा? २कोरिन्थी ५:१२

2 मोदेशो आंइ कागज चहिं गेपुकी दुम्तीनी। गे आंइ थुंमी ब्रेक्शो बाक्नीनी। मिनु मुर नेल्लेमी इन पर्वम तुइक्ने चाप्नीम। १कोरिन्थी ९:२

3 गे ख्रीस्तमी ब्रेक्शो चिठी दुम्तीनी। कागज मसीमी ब्रेक्शो ममाइ। फुल्लु मुशा ब्रेक्शो यो ममाइ। ब्रोंइचा गेब परमप्रभु यावे आ सोक्तीमी इन थुंमी ब्रेक्शो बाक्ब। प्रस्थान २४:१२

4 ख्रीस्त आ नेमी परमप्रभु यावे कली थमा सुइक्नीकी।

5 गो शेंदकानु, आंम जोक्तीक तुइक्तीक मकोइनीकी। आंइ लोत्र शेंतीके परमप्रभु यावेमी पपाइश्शो बाक्ब, दे तुइक्नीकी। २कोरिन्थी २:१६

6 मेकोमी आंड कली जोक्ब तुइक्ब सेल्शा, आ नक कबल डा लोत्र शेंथ सोडक्ताक्की। ब्रेक्शा ममाइ, तन्न आ सोक्तीमी गेन्तु। ब्रेक्शोमी साइक्ब, तन्न आ सोक्तीमी ब्रॉइचा गेब। येरमीया ३१:३१; १कोरिन्थी ११:२५; रोमी ७:६; यूहन्ना ६:६३

नक कबल ठेयब बाक्ब

7 बेक्तीक चाक्ब कबल फुल्लुमी मुशा, ब्रेक्शो बाक्माक्त। मेको आ छेडछेड थम ठेयब बाक्त। मेकोम पतीके इस्राएलीपुकीम मोसा आ कुल कोत्रने मचाबेम। तन्न नोले मेको छेडछेड ग्युम्ना ग्युम्न लत। प्रस्थान ३४:२९-३५

8 परमप्रभु यावे आ सोक्त आ कबल मेको क्येडा छेडछेड मदुम्बा डा? गलाती ३:२,५

9 मारदे हना बेक्तीक कबल छेडछेड बाक्त हना, ठीक पतीके आ कबल मेको क्येडा शुश छेडछेड दुम्चा माल्ब। रोमी १:१७; रोमी ३:२१

10 मेको डोंइती छेडछेड पाइशरो बाक्त। मुल आ छेडछेड नेल्ल जाम्शा लत। मारदे हना मुल मेको क्येडा शुश छेडछेड पाइशरो जाक्त।

11 डोंइती डा जाम्शा लाइब कबल छेडछेड पाइशरो बाक्ब। मुल लीशो कबल आ छेडछेड गिश ठेयब बाक्म माइ?

12 मोदेशो आस पतीके गो काइ महिब दुम्शो बाक्नीकी।

13 साइ मोसामी पशो खोदेशो मपाइनीकी। मोसामी इस्राएलीपुकीमी आ कुल डा छेडछेड ग्युम्ना ग्युम्न लशो मतामेक्ल, दे आ कुल वामी गिल्से बाक्त।

14 मोसामी इस्राएली आन कली परमप्रभु यावे आ देशो लोत्र शेंदीमी बाक्त। मेकोपुकी चहिं मारेइ मरुब्ब दुम्मा बाक्त। मुल यो मरुब्ब बाक्नीम। साइ डा लोत्र नैपदमेनु, मेको आन थुं वाम गिल्शो खोदेशो दुम्शा, लोत्र मरुप्नीम। खीस्तमी ला मेको आन थुंमी गिल्शो वा प्राक्शा रुब्ब सेल्ने चाप्ब। प्रेरित २८:२७; रोमी ११:२५

15 मुल यो मोसाम ब्रेक्शो लोत्र नेन्मेनु, आन थुं गिल्सीशो बाक्ब।

16 तन्न सुमी आ थुं प्रभु गे हिरबा, मेको आ थुंमी गिल्शो वा हुक्सीशा, रुब्ब दुम्ब। रोमी ११:२३,२६; प्रस्थान ३४:३४

17 मारदे हना प्रभु सोक्त बाक्ब। प्रभु आ सोक्ती ते बाक्बा, मेकर पाप आ सजाइ रे ब्रॉइतीके बाक्ब।

18 गो नेल्ल इं थुं गिल्शो वा हुक्शा, प्रभु आ छेडछेड कोंइशा, प्रभु आ छेडछेड पाइशरो खोदेशो दुम्शा फाइक्का पुंडसाक्क। मेको फाइक्तीके बारना बारन लशा, इं कली छेडछेड का रे अर्को छेडछेडम फाइक्ब। मेको नेल्ल प्रभु रे जाक्ब। मेको सोक्त बाक्ब। २कोरिन्थी ४:६

## 4

खीस्त आ वाइल दुम्शा, शेंशा गाक्शो

1 गोपुकी नु परमप्रभु यावे आ शिशो बाक्तीके मेको शेंब दुम्तक। मोपतीके गेनायो आइक्क थुं पाइशरो मदुम्नीकी। २कोरिन्थी ३:६; १कोरिन्थी ७:२५

2 गोपुकीमी मुने दोक्तीक खुइरशा पतीक गेय प्रोंइशो बाक्नीक। मरिम्शो पा परमप्रभु यावे आ लोत्र फाइक्का रे डोन बाक्नीकी। तन्न परमप्रभु यावे आ लोत्र तुइक्पाइक्तीकेमी मुर नेल्ल नु परमप्रभु यावे आ डोंइती ब्रचा डा बाक्नीकी। २कोरिन्थी २:१७; १थिस्सलोनिकी २:५

3 आंड शेंशो ग्येरपाइक्तीक लोत्र वाम गिल्सीशो बाक्त हना यो, जाम्शा लाइब मुर कली ला मोपा गिल्सीशो बाक्ब। १कोरिन्थी १:१८

4 मेको आन थुं दोपा मोदेशो दुम्त देशा हना, रागी कली हुकुम पाइब सैतानमी मेको आन कली मिक्च मताइब खोदेशो पा मरुब्ब सेल्शो बाक्त। मोपा खीस्त आ ग्येरपाइक्ब लोत्र आ छेडछेड तने मचाप्नीम। खीस्त परमप्रभु यावे आ कोंइतीके बाक्ब। हिब्रू १:३

5 गो आम परबम मशेंनीकी। तन्न येसु खीस्त प्रभु बाक्ब, दे शेंनीकी। मिनु येसु आ पतीके गो इन गेय पाइब दुम्तक।

6 परमप्रभु यावेमी “छिडछिड जाम्शा, छेडछेड दुम्ल” देमाक्त। मेकोमी आंड थुंमी छेडछेड ब्रपाइशरो बाक्त। गो परमप्रभु यावे आ छेडछेड खीस्त रे पा रुप्नीकी। उत्पत्ती १:३; २कोरिन्थी ३:१८

खप के गरम शोंप कुरशो

7 मेको ठेयब सक्ति परमप्रभु यावे के बाक्ब, दे कोंइचा कली मेको छेडछेड खप के गर गो आंड रां आगाम बाक्ब। १कोरिन्थी ४:११-१३; २कोरिन्थी ११:२३-२७

8 गो शुश श्येत जाइतक हना यो, खतम मदुम्क। मारेइ पने मचाप्ब दुम्तक हना यो, आइक्क थुं पाइशरो मदुम्क।

9 गो खेदा पचा पुंडसाक्क हना यो, आंड कली कोत्रब बाक्ब। खोल्चा पुंडसाक्क हना यो, मनुप्क।

10 येसु आ लोत्र शेंना शेंन गाक्कानु, येसु बेक्का डा श्येत जशो खोदेशो पा, गो यो बेक्का डा श्येत जाइनीकी। तन्न येसु बेक्शो रे सेंचा पुंडसीशो खोदेशो पा, सक्ति पाइशरो दुम्नीकी। १कोरिन्थी १५:३१; गलाती ६:१७

11 ब्रोंइतक हना यो, येसु आ परबम बेक्का डा बाक्नीकी। मोपा आंड बेक्का डा रांमी येसु आ ब्रोंइतीक सक्ति बाक्ब। रोमी ८:३६; फिलिप्पी ३:२१

12 आंड रांमी बेक्का डा श्येत जशा, इन कली खीस्त आ लोत्र शेंताक्क। आंड गेय रे पा गो ब्रोंइचा ताइतीनी।

13 साइ डा लोत्र ब्रेक्ब कामी “गो थमा सुइक्नुड। मोपतीके आं थमा सुइशरो नैपाइक्नुडमी” दे ब्रेक्शो बाक्ब। मोदेशो ब्रेक्ब थमा सुइक्तीक सोक्त का दुम्शा, गो यो थमा सुइक्नीकी। मिनु आंड थमा सुइशरो मुर आन कली नैपाइक्नीकी। भजन संग्रह ११६:१०

14 मार लोत्र थमा सुइश्शा, नेपाइक्नीकी देशा हना “प्रभु येसु कली बेक्शो रे सेंबमी आंड कली यो येसु नु सेंब” दे लोत्र बाक्ब। मिनु मेकोमी गो, गो नेल्ल इं कली आ डोंइती बाक्चा गेब। १कोरिन्थी ६:१४

15 मारदे हना मेको नेल्ल इन पबंम बाक्ब। परमप्रभु यावे आ शिशी शुश मुरुम नैतेक्म हना, मेको क्येडा शुश मुरुम मेको कली ठेयब सेल्नीम। २कोरिन्थी १:६,११

16 ठेयब थुं पा शेना शेन गाक्नीकी। आंड रां बेक्चशो तांडसाक्व हना यो, आंड थुं चहिं बारना बारन लशो बाक्ब। एफिसी ३:१६

17 मारदे हना मुल जशो श्येत इच्छा ला बाक्ब। नोले मेकोमी इं कली मरुप्चा डा ठेयब छेडछेडमी बाक्चा गेब। रोमी ८:१७-१८; १पत्रुस १:६

18 मारदे हना गो मिक्चीमी तशो थोव्रक ममाइ। तन्न मिक्चीम मतशो थोव्रक ला कोव्रनीकी। तशो थोव्रक जाम्शा लाइनीम। मतशो थोव्रक चहिं मजाम्थु, गेना हना यो लीनीम। हिब्रू ११:१

## 5

प्रभु नु काथा बाक्चा दाक्शो

1 इं रां, रागी डा ताम्बु खोदेशो बाक्ब। मेको जाम्शा लाइब बाक्त। मेको जाम्शा लत हना यो, परमप्रभु यावेमी इं कली नक बाक्तीके गेब। मेको खिं गुडम सेल्शो मबाक्ब। मेको गेना हना यो लीब स्वर्ग डा खिं बाक्ब। २पत्रुस १:१४

2 गो एकेर बाक्शा, रोंका पाइनीकी, आंड स्वर्ग डा खिम बाक्चा दाक्नीकी।

3 मेको नक बाक्तीके ओव्रचा चहिं माइत वा पुइश्शा, नक वा फेक्शो खोदेशो बाक्ब। मोपा शिप्रा मटुन्नीकी।

4 मुल सम्म रागी डा रांम बाक्नीकी, सुर्ता पना पन बाक्नीकी। शिप्रा दुम्चा कली ममाइ। तन्न नक फेक्शो खोदेशो पा, आंड जाम्शा लाइब रां गेना हना यो ब्रोंइशा बाक्ब स्वर्ग डा रां दुम्ल। १कोरिन्थी १५:५१-५३

5 मोदेशो दुम्चा कली परमप्रभु यावेमी आंड कली ठीक पा वोइश्शो बाक्त। मेकोमी आंड कली आ सोक्त बैना खोदेशो पा गेप्टु। २कोरिन्थी १:२२; रोमी ८:१६,२३; एफिसी १:१३-१४

6 मोदेशो दुम्मेनु, ठेयब थुं पाइश्शो दुम्शा बाक्नय। रांमी बाक्यानु, प्रभु रे डोन बाक्नीकी। हिब्रू ११:१३

7 मारदे हना गो थमा सुइक्तीकेमी गाक्नीकी। ततीकेमी मगाक्नीकी।

8 गो ठेयब थुं पाइश्शो बाक्नीकी। गो रां रे डोन दुम्शा, प्रभु नु बाक्चा दाक्नीकी। फिलिप्पी १:२३

9 मोपतीके गो रांम बाक्शा हना यो, मबाक्शा हना यो, प्रभु कली ग्येरपाइक्चा दाक्नीकी।

10 मारदे हना गो नेल्ल खीस्त आ डोंइती निसाफ पची ना जाक्चा माल्नीकी। रांम बाक्यानु, इं रांम पशो रिम्शो नु मरिम्शो नेल्ल ताइनीकी। प्रेरित १७:३१; रोमी २:१६; रोमी १४:१०; यूहन्ना ५:२९; एफिसी ६:८

पाप रे प्रोंइब कली ग्येरपाइय्य

11 गोपुकी प्रभु कली मान पा हिंशा तुइक्तीके गो मुर आन कली शेनीकी। परमप्रभु यावेमी आंड पशो नेल्ल तुइक्ब। मिनु गो यो तुइक्नीनी, दे आस पाइनीकी।

12 गो आंड कली इन डोंइती ठेयब मसेल्सीनीकी। तन्न आंड पबंम बोरशा, आंम आन कली ठेयब सेल्सीबपुकीमी शोव्रमी ला गेय पाइनीम। थुंमी मारेड ममिन्मीम। मोदेशो मुर आन कली लोत्र लेत्वा कली आंड देशो लोत्र तुइक्ब दुमीने। २कोरिन्थी ३:१; २कोरिन्थी १०:१२

13 गो मरुप्चा डा बाक्तक हना, गो परमप्रभु यावे कली ठेयब सेल्चा कली मोदेशो दुम्तक। गो रुप्चा डा बाक्तक हना, मेको इन कली दुम्ब।

14 मारदे हना खीस्तमी इं कली दाक्ब, दे शुश मिन्मीकी। मेको नेल्ल मुर आन पबंम बेक्त, दे तुइश्शा, गो नेल्ल बेक्चा डा मुर बाक्नय, दे तुइक्नीकी।

15 मिनु मेको नेल्ल आन पबंम बेक्त। मिनु ब्रोंइशोपुकी मुल रे आंम पबंम मब्रोंइमल। तन्न येसु कली ब्रोंइमल। मारदे हना मेको आन पबंम साइश्शा, सेंसीचा पुंडसाक्व। रोमी १४:७-८

16 गो मुल रे मुर नेल्ल आन कली रागी डा मुर खोदेशो पा मकोव्रनीकी। खेयप का गो खीस्त कली मुर खोदेशो पा कोव्रतक। मुल मोदेशो ममिन्मीकी।

17 सुइ खीस्त आगाम बाक्त हना, मेको नक सेल्सीशो मुर का दुम्ब। डोंइती डा नेल्ल जाम्शा लत। नेल्ल नक दुम्ने नुप्त। रोमी ८:१०; गलाती २:२०; गलाती ६:१५; प्रकाश २१:५

18 मेको नेल्ल परमप्रभु यावेम पशो बाक्ब। परमप्रभु यावेमी आंड कली खीस्त रे पा आं नु गारपाइक्तु। मिनु आंड कली मेको गारपाइक्तीक गेय पपाइक्तु। रोमी ५:१०

19 परमप्रभु यावेमी खीस्त रे पा मुर आन कली आ नु गारपाइक्तु। मेको आन मरिम्शो पशो नेल्ल प्रेशा, गारपाइक्तीक गेय आंड कली गेप्टु। रोमी ३:२४-२५; कलस्सी १:१९-२०

20 मिनु गो खीस्त आ पबंम मुर आन कली गेय पाइब बाक्नीकी। परमप्रभु यावेमी आंड पतीकेमी मुर आन कली ब्रेक्ब। गोपुकी खीस्त आ पबंम मुर नेल्ल आन कली “परमप्रभु यावे नु गारब दुमीने” दे शेनीकी। लूका १०:१६

21 परमप्रभु यावेमी काइ पाप मतुइश्शो खीस्त कली पापी सेल्लु। मिनु गो खीस्त आगाम बाक्शा, परमप्रभु यावे आ डोंइती ठीक दुम्नीकी। यूहन्ना ८:४६; यूसैया ५३:४-६; गलाती ३:१२; रोमी १:१७; १कोरिन्थी १:३०

## 6

पावल आ पशो गेय

- 1 गो परमप्रभु यावे नु गेय पतीके इन कली “परमप्रभु यावे आ शिशी तशा, मप्रेदीन” देनीकी। २कोरिन्थी १:२४
- 2 मारदे हना मेकोमी “शिशी पची ना इ पुंडशो नेता। गो पाप रे प्रौडतीक नाक्तीमी इ कली वारच पाता” दे ब्रेक्शो बाक्ब। नेनीने, मुल शिशी पची ना बाक्ब। नेनीन मुल पाप रे प्रौडतीक नाक्त बाक्ब। यसैया ४९:८; लूका ४:१९,२१
- 3 प्रभुमी पपाइशो गेयम मारेइ दूली मपाइनीकी। सुइ आन थुं मक्याल्नीकी।
- 4 तन्न परमप्रभु यावे आ गेय पाइब दुम्शा, आंइ गेय नेल्ल रिम्शो पाइनीकी। गो शुश फाल्नीकी, खेदा पतीकेमी, श्येत जतीकेमी, हितीकेमी,
- 5 तुप्चा पुंडसीनीकी, चोक्चा पुंडसीनीकी, आं पर्वम हुल बोक्चा पुंडसीनीकी। बेक्चा डा गेय पा दशा, इप्चा मतथु बाक्नीकी। माइजा बाक्नीकी, २कोरिन्थी ११:२३-२७; १कोरिन्थी ४:११-१३
- 6 रिम्शो थुं कोंइनीकी, जोक्शो तुइशो गेय कोंइनीकी, मचबु देब मदुम्नीकी, शिशी कोंइनीकी, परमप्रभु यावे आ सोक्तीम देशो टीनीकी, मुर आन कली दाक्नीकी। १तिमोथी ४:१२; २कोरिन्थी ४:२; १कोरिन्थी २:४; एफिसी ६:१४-१७
- 7 थमा लोत्र पाइनीकी, परमप्रभु यावे आ सक्तिमी गेय कोंइनीकी, ग्युरा नु पेरा निम्फारे रे टीक पतीके पाइशो बाक्नीकी।
- 8 आंइ नुं चुइक्ताक्म हना यो, क्याम्ताक्म हना यो, आंइ कली मान पाक्तेक्म हना यो, ग्रांग्रा दिम्तेक्म हना यो, मेको आन पशो मारेइ मसुइक्नीकी। मुरपुकीमी आंइ पर्वम “जोल पा शेंशा, मुर आन थुं क्याल्शा हेंथे शेनीम” देतेक्म हना यो, गो थमा लोत्र शेनीकी।
- 9 आंइ कली मसुइक्नीकी, तन्न तुइशो बाक्नीमी। बेक्चा चिक्शो, तन्न मबेक्शो बाक्नीकी। सजाइ तशो, तन्न साइक्चा मपुसीशो बाक्नीकी। २कोरिन्थी ४:१०-११; भजन संग्रह ११८:८; प्रेरित १४:१९
- 10 सुर्ता पशो, तन्न गेना हना यो ग्येरसीशो बाक्नीकी। पुइग दुम्शो, तन्न शुश आन कली शोंप सेल्नीकी। मारेइ मथीब दुम्शो, तन्न मारेइ मारेइमी गाप्शो बाक्नीकी। फिलिप्पी ४:१२-१३

प्रभु आ मुर दुम्शो कोंइदीने

- 11 गो कोरिन्थी इन कली शेंचा, शुश दाक्नीकी।
- 12 गोपुकीमी इन कली दाक्चा मतेक्नीकी। तन्न इन आंम थुंम आंइ कली दाक्चा तेक्ब।
- 13 मेको आ पा डा, गो आल आन कली लोत्र पशो खोदेशो पा, इन कली लोत्र पाइनुड। इन थुं आंइ गे हिरदीन। १कोरिन्थी ४:१४
- 14 नेनीन, थमा मसुइक्ब आन कली इन थुं मगेने। मारदे हना ठीक पतीके नु परमप्रभु यावे कली मटितीके दोपा गारनीस? छेडछेड नु छिडछिड दोपा गारनीसी? एफिसी ५:११
- 15 ख्रीस्त नु सैतान बेलीआर दोपा उइक्थ उइक्थ दुम्ने मचाप्नीसी। थमा सुइक्ब नु मसुइक्ब मारम गारनीसी डा?
- 16 परमप्रभु यावे आ खिं नु मूर्ति दोपा गारनीसी डा? मारदे हना गो गेना हना यो ब्रोंइशा बाक्ब परमप्रभु यावे आ खिं बाक्नीकी। मिनु परमप्रभु यावेमी “आं मुर आगाम बाक्नुड। मेको आन दातेम गाक्नुड। मेको आन परमप्रभु यावे दुम्नुड। मिनु मेकोपुकी आं मुर दुम्नीम” देशो बाक्त। लेवी २६:११-१२; इजीकीएल ३७:२७; १कोरिन्थी ३:१६
- 17 मोपतीके प्रभुमी “मेको आन दाते रे गूशा, पिने। मेको आन दाते रे ब्राडीने। ग्रांग्रा दिशो मारेइ मथिने। मिनु गो इन कली ब्राइनुड। प्रकाश १८:४
- 18 मिनु गो इन आफ दुम्नुड। मिनु गेपुकी आं तमी तौ दुम्नीनी” दे नेल्ल सक्ति पाइशो परमप्रभु यावेमी देत, दे ब्रेक्शो बाक्ब। यसैया ५२:११; इजीकीएल २०:४१; २सामुएल ७:१४; यसैया ४३:६; होसे २:१

## 7

पावल ग्येरसीशो

- 1 आं दाक्शोपुकी, गो नेल्लेमी परमप्रभु यावे आ गेशो लोत्र तुइशो बाक्नय। मोपतीके इं रां थुं नेल्ल मरिम्शो पतीक रे डोन बाक्नय। मिनु इं परमप्रभु यावे कली ला मान पा हिंशा ठेयब सेल्नय।
- 2 इन थुं आंइ गे हिरदीन। मारदे हना गो सुइ इन कली मरिम्शो मपक। सुइ आन कली मरिम्शो मसेल्क। सुइ रे पा मारेइ यो मताक्क। २कोरिन्थी १२:१७; प्रेरित २०:३२
- 3 मेको इन कली दोस गेचा कली मदेंक। मारदे हना डोंइती देशो आं लोत्र लेंशा देनुड, इन कली दाक्नीकी। बेक्चा माल्तय हना यो, काथा बेक्च। ब्रोंइचा ताइतय हना यो, काथा ब्रोंइय। २कोरिन्थी ६:११-१३; रोमी ६:८
- 4 मिनु इन कली तशा, ग्येरसीशा, आं थुं बोरनुड। आं थुं नाइक्सीशा बारना बारन लत। श्येत जाता हना यो, इन कली तशा गो ग्येरस डा ग्येरस बाक्ती।

कोरिन्थी आन कली मिम्शा ग्येरशो

- 5 गो मासीडोनीया रागीम शेंना शेंन गाक्कानु, शुश श्येत जाइतक। मुरपुकीमी गडड मडड पा खेदा पा श्येत गेतीकी। मिनु शुश हिंचा माल्तक। प्रेरित २०:१-२; २कोरिन्थी ४:८
- 6 तन्न परमप्रभु यावेमी आइक्च थुं पाइशो आन कली आन थुं बारपाइक्ब। मिनु तीतस जाक्शा आंइ थुं बारपाइक्तु। मिनु आंइ थुं बारत। २कोरिन्थी २:१३

7 तीतस कली तशा ला ममाइ, तीतस आ लोत्र नेशा, ठेयब थुं पाइश्शो दुम्तक। तीतसमी आंइ कली “कोरिन्थीपुकीमी थम रिम्शो पाइक्तीमी। आं कली शुश मान पशा कोइताय्यीमी। आं थुं बारपाइक्तीमी” देंत। आ देशो नेशा गो थाम्पा ग्येरसाक्की।

8 डोंइती डा चिठीमी इन थुं खाइक्पाइक्तनी, दे तुइक्ताक्क। मो हना यो मुल आं थुं मखाइक्क। मारदे हना मेको इन थुं खाइश्शो शुश नाक्त मली, दे यो तुइक्ताक्क। २कोरिन्थी २:४

9 इन थुं खाइश्शो तुइश्शा, गो मग्येरसीड। आं ब्रेक्शो टिशा, इन थुं लेत्ताक्नी। गेपुकीम “परमप्रभु यावेमी इं कली लां कोइचा नु रिम्शो सेल्चा कली थुं खाइक्पाइक्की बाक्त” दे रुप्तीनी। मोपतीके गो इन थुं लेशो तशा ग्येरसाक्की।

10 परमप्रभु यावेमी थुं खाइक्पाइश्शो आन कली रिम्शो दुम्मल, दे मो पशो बाक्क। रागी डा थुं खाइक्पाइक्कमुशोमी चहिं थुं साइक्क। मत्ती २६:७५; लूका १५:१७-२४; मत्ती २७:३-५

11 परमप्रभु यावेमी इन थुं खाइक्पाइश्शोमी मार दुम्मे, दे तुइक्तीने। गे रिम्शो दुम्चा कली शुश गेय पाइतीनी। गे सल्ला पा, जिशा, हिंशा, रिम्शो दुम्चा कली शुश बोल पा दोस मताइब दुम्चा कली गे मेको मुर कली सजाइ गेतीनी। मोपा गे दोस मताइब बाक्नीनी, दे कोइताक्नी।

12 मुल देंचा लीशो लोत्र नेनीने, इन कली डोंइती ब्रेक्शो चिठी मारदे ब्रेक्ताक्क देशा हना, गेपुकी नु बाक्क मरिम्शो पाइब नु मरिम्शो पचा पुंडसीब आस कली गारपाइक्का लोत्र ला ममाइ। परमप्रभु यावेमी पावल कली अधिकार गेशो बाक्क। मोपतीके आ देशो टिचा माल्ब, दे रुप्शा, गेय कोइदीने, दे ब्रेक्ताक्क।

13 मोपतीके गो इन कली आं देशो टिशो तशा, ग्येरसाक्क। मिनु आंइ थुं नाइक्ताक्क। गेपुकीमी तीतस कली आ थुं नाइक्पाइक्तीनी। आ थुं नाइश्शो तशा शुश ग्येरसाक्क।

14 मोदेशो पा तीतस कली यो “कोरिन्थीपुकीमी आं लोत्र टीनीमी, रिम्शो पाइनीम” दे थमा लोत्र पशो नड। मुल तीतसमी इन कली आं लोत्र टिशो तशा, थमा बाक्माक्त, दे तुइक्ताक्क। मोपा आं कली मुने मतोक्नी। मोपतीके आं नें बोरपा बाक्ती।

15 तीतसमी इन टिशो तशा, ग्येरसाक्क। गे हिंशा, खिखि पा मेको कली ब्राइतीनी। मिनु इन कली शुश दाक्ताक्क।

16 गो इन रिम्शो पशो तशा ग्येरसाक्की। मिनु इन कली थमा सुइक्ता।

## 8

### क्येट पोक्शो

1 आं लोक्कपुकी, परमप्रभु यावेमी मासीडोनीया रागीमी बाक्क थमा सुइक्क आन कली शिशी पशो आ पबंम इन कली शेनीकी। रोमी १५:२६

2 मेकोपुकी शुश श्येत जांतेक्क हना यो, ग्येरसीशो बाक्नीम। पुडग बाक्तेक्क हना यो, अरु आन कली योक्शा गेम्तेक्क।

3 सुइमी गेन की गेन मदेंथु, आंमा आन दाक्शो पा आन चाप्शो क्येडा यो शुश गेम्तेक्क। आन चाप्शो क्येडा शुश गेशो आं मिक्कीमीन ताता।

4 मेकोपुकीमी आं कली “गो यो थमा सुइक्क आन कली क्येट पोक्का दाक्नीकी” दे पुंडतेक्क। प्रेरित ११:२९

5 मेको आन मोदेशो चहिं क्येट गेचा लोत्र ला ममाइ। डोंइती मेकोपुकीमी आन थुं प्रभु कली गेम्तेक्क। मिनु परमप्रभु यावे आ दाक्शो पा, गोपुकी नु गारशा बाक्तेक्क।

6 डोंइती तीतसमी इन कली क्येट पोक्पाइक्कु। मुल गो तीतस कली “इन क्येट पोक्तीके, रिम्शो गेय, थुमीन” दे अरेतक।

7 गे मार पाइतीनी हना यो, शुश पाइतीनी। इन थमा सुइक्का, इन लोत्र पस जोक्का, इन तुइक्का, इन रिम्शो गेय पतीके नु इन आंइ कली दाक्तीकेमी शुश गेय पाइतीनी। मुल गे मेको दाक्तीक गेयमी यो रिम्शो गेय कोइताक्नी। १कोरिन्थी १:५; १कोरिन्थी १६:१-२

8 इन कली अधिकार तशो लोत्र मपाइनुड। थमा पा दाक्का दोपा तांइसीब देशा हना, सुइमी गेन की गेन माइक्का मपुंडसीथु, आंम थुंमी मिम्शा गेशो रे तांइसीब। शुशेमी मोपा गेम्तेक्क। मिनु गेपुकीमी यो दाक्तीक गेय कोइदीने।

9 मारदे हना गे इं प्रभु येसु ख्रीस्त आ शिशी तुइक्नीनी। मेको शोप पाइश्शो बाक्त हना यो इन पबंम पुडग दुम्त। मेको पुडग दुम्तीकेम गे शोप पाइश्शो दुमीन, दे मो पाप्तु। मत्ती ८:२०; फिलिप्पी २:७

10 मिनु गो इन कली मार देंनुड देशा हना “बस का डोंइती इन गोशो गेय थुम्चा मालीने” देंनुड।

11 इन गेचा दाक्शो नु इन गेने चाप्चा डा क्येट पोक्का गारीन।

12 आंम के बाक्शो ला गेने जाप्ब, आंम के मबाक्शो गेने मजाप्ब। इन चाप्चा डा पा गेने। हितोपदेस ३:२७-२८; मर्कूस १२:४३

13 इन कली मजाक्दीत्वा डा पा वोइश्शा, अरु आन कली आन माल्लो क्येडा शुश गेन मदेंनुड। इन कली गप्प, मेको आन कली यो गप्प देंनुड।

14 मुल इन के शुश बाक्मेनु, मथीब आन कली वारच पतीने। मिनु नोले मेको आन के शुश दुम्मेनु, इन कली यो वारच पाइनीम। मोपा वारच पा गेमुशोमी नेल्ल इं के बाक्शो उइक्थ उइक्थ दुम्मल, दे मिम्ताक्क।

15 मार ब्रेक्शो बाक्त देशा हना “सु सुमी शुश खुप्तमे, मेको आन के महें। सु सुमी चहिं इक्का ला खुप्तमे, मेको आन कली यो जाक्दीत्त” दे ब्रेक्शो बाक्क। प्रस्थान १६:१८

16 गो परमप्रभु यावे कली “गे रिम्शो पाइब बाक्नीनी” दे ठेयब सेल्लुड। मारदे हना तीतसमी कोरिन्थी इन कली शुश मिम्ताक्क।

17 गोपुकीमी तीतस कली “कोरिन्थी आन कली गुमथ लावो की लावो” दे सोडक्ताक्क। आंइ देशो लोत्र टिशा, लशो ला ममाइ। आं यो गुमथुम दाक्शा ग्येरसीशा पित, दे तुइक्नुड। २कोरिन्थी ८:६; २कोरिन्थी ७:७,१५

18 तीतस नु गाक्ब वारच का यो सोडक्ताक्क। थमा सुइक्ब नेल्लेमी मेको कली तुइशशो बाक्नीमी। मारदे हना मेको येसु खीस्त आ ग्येरपाइक्ब लोत्र रिम्यो पा शेंब, दे नें चलेशो बाक्ब। २कोरिन्थी १२:१८

19 आ नें चलेशो ला ममाइ। थमा सुइक्बपुकी गारशा मेको कली गो नु क्येट पोक्शा गाक्चा कली योत्रतेक्म। मेको गोपुकी नु शिशी पतीक गेय पाइब। गो मेको वारच पतीके प्रभु कली ठेयब सेल्चा कली पाइनीकी। गलाती २:१०

20 मोपा सांकळी वोइक्कानु, मेको क्येट आ पर्वम मरिम्शो लोत्र पने मचाप्नीम।

21 गो प्रभु आ डोंइती रिम्यो पशो ला ममाइ। मुर नेल्ल आन डोंइती यो रिम्यो पशा कोंइनीकी।

22 मोपतीके मेको निक्शी नु आंइ लोक्ब का यो सोइक्नीकी। डोंइती खेयप निक्शी सां सोइक्ताक्कानु, मेको लोक्बमी रिम्यो गेय पा कोंइताक्क। मोपतीके मुल यो रिम्यो पाइब, दे तुइक्ताक्क। मेकोमी इन कली यो रिम्यो मिम्ब।

23 तीतस गो नु गारशा इन कली गेय पाइब बाक्ब। अर्को लोक्ब निक्शी थमा सुइक्ब आन सोइशशो बाक्नीस। मेको खीस्त आ नें ठेयब सेल्ब बाक्नीस। २कोरिन्थी ७:१३; २कोरिन्थी १२:१८

24 मोपतीके मेको सां इन बाक्तीके जाक्मानु, मेको आन कली दाक्शा, वारच पतीने। मेको आन कली मार माल्दा, मेको गेने, आन लोत्र नेनीने। आं देशो पाइतीनी हना, गोमी इन पर्वम पशो लोत्र थमा दुम्ब। मिनु गो ग्येरसीनुड। थमा सुइक्ब नेल्लेमी यो “कोरिन्थीपुकीमी रिम्यो पामे बाक्त” दे तुइक्नीम। २कोरिन्थी ७:१४

## 9

दोपा शोकगमे, मोपा खुप्नीम

1 मेको क्येट पोक्चा आ पर्वम इन कली लेंशा शेंचा ममाल्नुड।

2 साइ थोचे क्येट पोक्चा माल्ब देशो नेंशा “पोक्नीकी की पोक्नीकी” दे प्रेक्तीनी। मिनु इन कली मोपा प्रेक्शो तशा, मासीडोनीयाम बाक्ब आन कली “आकाया डा मुरपुकीम ग्येरसीशा क्येट पोक्नीम” दे लोत्र नेंपाइक्तामी। मिनु शुशेमी “गो यो पोक्नीकी” देंतेक्मे। २कोरिन्थी ८:१९

3 साइ थोचे डा बोरशो लोत्र जाल मदुम्ल। मिनु गे ठीक बाक्शा, लोक्ब सां आन कली क्येट पोक्शा वोतीन, दे इन बाक्तीक सोइक्ताक्क।

4 मारदे हना गो इन बाक्तीके जाक्डानु, मासीडोनीया डा मुर आन डोंइती गे क्येट मपोक्थु बाक्शा मुने मदोक्कीन, दे मेको सां आन कली इन बाक्तीक सोइक्ताक्क।

5 मोपतीके मेको सां आन कली आं क्येडा डोंइती लने, दे सोइक्ताक्कडमी। मिनु गो जाक्ची ना “मुल क्येट पोक्कीन” देशा, ग्रीचा ममाल्नुड। सुइमी आन थुं मखाइक्थु ग्येरशा, आंम आ दाक्स पा, चाप्स पा गेने चाप्मेक्ल, दे लोक्ब सां आन कली आं क्येडा डोंइती सोइक्ताक्कडमी।

6 आंम आन दाक्स पा, चाप्स पा, गेचा चहिं दोदेशो रुम्सीब देशा हना, वांचेर शोकगमेनु, इक्का ला शोक्बमी, इक्का ला खुप्चा ताइब। तन्न शुश शोक्बमी शुश खुप्चा ताइब। हितोपदेस ११:२४-२५; हितोपदेस १९:१७

7 क्येट पोक्कु कों मपोक्कु, दे थुं निक्शी मपथु, सुइमी “गेव की गेव” माइक्का मपुंडसीथु, आंम थुंमी मिम्शा, ग्येरसीशा गेचा माल्ब। ग्येरसीशा गेव कली परमप्रभु यावेमी दाक्ब। रोमी १२:८

8 परमप्रभु यावेमी इन कली माल्शो क्येडा शुश गेने चाप्ब। मिनु मारेइ मारेइम गाप्शा, मारेइ वारच पचा डा गेय बाक्त हना यो, गे पने चाप्नीनी।

9 मार ब्रेक्शो बाक्त, देशा हना “मेकोमी वांचेर ब्वारब, पुडग आन कली गेब। मेको आ ठीक पशो गेना हना यो लीब” दे ब्रेक्शो बाक्ब। भजन संग्रह ११२:९

10 शोक्ब कली वांचेर गेब। जचा दाक्ब कली जचा थोत्रक गेबमी इन के बाक्शो यो बारपाइक्ब। मोपा इन ठीक पतीके डा फल बारना बारन लाइब। इजीकीएल १०:१२

11 मिनु गे शुश थीब दुम्शा, हाइशशा गेशो तशा, गो परमप्रभु यावे कली “गे रिम्यो पाइब बाक्नीनी” दे ठेयब सेल्नीकी।

12 मोदेशो हाइशशा गेशोमी श्येत जशो थमा सुइक्ब आन कली रिम्यो दुम्ब। मोशो ला ममाइ, शुशेमी परमप्रभु यावे कली ठेयब सेल्नीम

13 एको क्येट पोक्तीक गेय पशा इन टितीक नाक्सीशो बाक्ब। मिनु गे परमप्रभु यावे कली ठेयब सेल्शो बाक्नीनी। मिनु इन हाइशशा मेको आन कली नु अरु आन कली गेशोमी गे खीस्त आ ग्येरपाइक्ब लोत्र तुइक्ब बाक्नीनी, दे कोंइनीकी।

14 परमप्रभु यावे आ शिशी गे नु बाक्तीके मेकोपुकीम इन कली प्रार्थना पाइनीमी।

15 परमप्रभु यावेमी इन कली देंने मचाप्चा डा ठेयब कोसेली गेप्टु। मेको आ पर्वम मेको कली “गे रिम्यो पाइब बाक्नीनी” देचा मप्रोंइनीक।

## 10

पावल आ गेय

1 गो, खीस्त आ ब्रेम्शो नु रिम्यो पतीकेमी, इन कली शेंना शेंन बाक्नुड। गो इन नेक्था बाक्शा, ब्रेम्शो लोत्र पाइनुड। तन्न गो डोन बाक्ती हना, हुइशशा लोत्र पाइनुड।

2 गो इन बाक्तीके जाकडानु, चिटीम ब्रेकशो लोत्र खोदेशो पा हुइशशा लोत्र पचा ममालडल, दे मिम्शा ब्रेकताकड। आंइ परबीमी “रागी डा मुर खोदेशो पा शेंनीम” देब आन कली हुइशशो खोदेशो पा इन कली हुइकचा मदाकनुड। २कोरिन्थी १३:१-२; १कोरिन्थी ४:२१

3 मारदे हना गो रागीम बाकतक हना यो, रागी डा मुर खोदेशो पा मजीनीकी।

4 आंइ लडाइ पतीक या रागी डा खोदेशो मबाक्नीम। तन्न मेको परमप्रभु यावे आ सक्ति पाइशशो बाक्नीम। मेकोमी मारेड मारेड खतम सेल्ने चाप्नीम। एफिसी ६:१३-१७

5 परमप्रभु यावे कली थमा सुइकब आन कली तेकबमी पशो लोत्र, ठेयब लेशशा थमा मसुइक्तीक लोत्र खतम सेल्लतक। मिनु ख्रीस्त आ लोत्र टीब दुम्पाइकचा कली मटीब मिम्तीक नेल्ल ग्याइशशा लाइकब खोदेशो बाक्नीकी।

6 मिनु इन ख्रीस्त कली टिशो रिम्शो दुम्त हना, सु सुमी मटीमे, गो मेको आन कली सजाइ गेनीकी।

7 मिनु इन डोंइती दोपा बाक्नीकी, मेको कोवडीन। सु सुमी “गो ख्रीस्त आ मुर दुम्ती” दे आन नें बोरपदमे, मेकोपुकीमी आंइ कली यो ख्रीस्त आ मुर बाक्नीम, दे रुपेक्कल।

8 गो आंइ अधिकार आ परबम बोरती हना यो, मुने मदोकनुड। मारदे हना मेको इन कली खतम सेल्चा कली ममाइ। तन्न इन कली रिम्शो सेल्चा कली प्रभुम गेती। २कोरिन्थी १३:१०; १कोरिन्थी ५:४-५

9 आं ब्रेकशो चिटी इन कली हिंपाइकचा कली ममाइ, दे मिम्तीम।

10 मारदे हना मेकोपुकीमी “मेको आ ब्रेकशो चिटी ठेयब नु बोल्यो लोत्रम ब्रीशो बाक्नीम। तन्न आंमान जाकत हना, मारेड पने मचाप्ब नु ब्वाक्स मजोक्ब बाक्ब” देनीम।

11 मोदेशो मुरपुकीमी मार रुप्या माल्नीम देश हना “गो मबाक्ची ना हुइशशा शेंशा ब्रेकशो लोत्र, आंइ बाक्ची ना मपाइनीकी” दे रुपेक्कल। २कोरिन्थी १३:२,१०

ठेयब मनकी, दे रुप्पाइशशो

12 आंमान ठेयब सेल्सीबपुकी नु मगारनीकी। आन पशो खोदेशो यो मपाइनीकी। मेकोपुकीमी ठेयब सेल्सीशा, आंम आन जोक्तीक तुइक्तीक कोइमुइनीम। मोदेशो पशोमी “मारदे मरुप्ब बाक्नीम” दे तुइसीब। २कोरिन्थी ३:१; २कोरिन्थी ५:१२

13 गो आंइ नें बोरपाइक्नीकी। मारदे हना परमप्रभु यावेमी आंइ कली अधिकार गेशा, इन कली शेंब सेल्लतु। आ गेशो अधिकार डा लाक्शा चहिं जोक्ब तुइक्ब नकी, दे बोरशा मगाक्नीकी। रोमी १५:२०; रोमी १२:३

14 आंइ नें बोरपाइक्नीकी। मारदे हना आंइ क्येडा डोंइती इन बाक्तीके ख्रीस्त आ ग्येरपाइक्तीक लोत्र नेंपाइक्थ सुइम मजाक्म, दे तुइक्ताक्क।

15 अरु मुरपुकीमी इन कली शेंशो आ परबम गो मबोरनीकी। तन्न इन थमा सुइक्तीके बारना बारन लमेनु, आंइ शेंतीके यो मेको नु बारना बारन लाइब।

16 मिनु इन बाक्तीक क्येडा लाक्शा, एर ओंथ ख्रीस्त आ ग्येरपाइक्तीक लोत्र शेंने चाप्नीकी। मुर आन शेंने थुम्शो युम्तीके आ परबम आंइ नें मबोरपाइक्नीकी।

17 सु बोरनीमी, मेको प्रभु आ परबम नें बोरपदमेक्कल। येरमीया ९:२३-२४; १कोरिन्थी १:३१

18 सुमी आंम कली शेंब सेल्बा, मेको कली मब्राइनीम। तन्न प्रभुमी शेंब सेल्शो कली ब्राइनीम। १कोरिन्थी ४:५

## 11

दूली शेंब आन परबम लोत्र

1 गो इक्का निप्स ग्राइशशो लोत्र पाइनुड, गे आं लोत्र फाल्शा नेंशा गेयीनी।

2 इन कली मिम्शा, गो परमप्रभु यावेमी रुश पशो खोदेशो दुम्ती। मारदे हना रिम्शो ग्युम्ली ग्युबे पा गेशो खोदेशो पा, इन कली ख्रीस्त कली गेतन्नी। एफिसी ५:२६-२७

3 बुस्सुमी हव्वा कली मिलो शिलो पा जोल पा आ थुं हिरपा, परमप्रभु यावे कली मटीब सेल्शो खोदेशो पा, दूली शेंबपुकीमी इन थुं क्याल्शा, ख्रीस्त कली दाक्चा रे हेंथे लां खोइक्पाइक्नीम। उत्पत्ती ३:४,१३

4 मारदे हना मुर का जाक्शा, मेकोमी इन कली अर्को येसु आ परबम शेंब आंइ शेंशो खोदेशो ममाइ, इन डोंइती ताक्शो ममाइ, अर्को सोक्त ताक्पाइक्ब। अर्को ग्येरपाइक्तीक लोत्र नेंपाइक्ब। मिनु गे रीब पा बिन्तीनी। गलाती १:८-९

5 गो मेको शुश जोक्ब तुइक्ब देखु पशो सोइशशो आन क्येडा आइक्च मनड। २कोरिन्थी १२:११

6 ब्वाक्स मजोक्ब बाक्ती हना यो, शुश जोक्ब बाक्नुड। गो आंइ पतीकेमी कोइताक्क। १कोरिन्थी २:१,२,१३; एफिसी ३:४

7 गो ब्रेम्शो दुम्शा, इन कली ठेयब सेल्चा कली परमप्रभु यावे आ ग्येरपाइक्तीक लोत्र क्येत मताक्थु शेंताक्क। मार, मेको पाप मिम्नीनी? २कोरिन्थी १२:१३; मत्ती १०:८; १कोरिन्थी ९:१२-१८

8 अर्को रागीम बाक्ब थमा सुइक्ब आन युम्तीके डा आन क्येत रोइशशो खोदेशो पा ताक्शा, इन कली शेंताक्न्नी। फिलिप्पी ४:१०,१५

9 गेपुकी नु बाक्शा शेंदन्नीनु, मासीडोनीया रागी रे जाक्शो थमा सुइक्ब लोकबपुकीमी आं कली माल्शो थोत्रक गेशा, वारच पाइक्तीमी। मोपा आन पशोमी गेपुकीमी मोशा शेंसीचा ताइतीनी। मुल यो मारेड ताक्चा ममालडल, दे मिम्ताक्क।

10 ख्रीस्त थमा बाक्ब, देशो लोत्र लीशो खोदेशो पा “कोरिन्थी आन कली आन क्येत मताक्थु, मोशा शेंताक्ब” देशो लोत्र आकाया रागीम ब्रशा लील, दे मिम्शा, मारेड मताक्गु।

11 मो पडानु, इन कली मदाक्ब दुम्नुडा डा? गोमी इन कली दाक्शो मदाक्शो परमप्रभु यावेमी तुइक्ब।

- 12 मुल सम्म दोपा बाकडा, मुल यो मोपान बाक्नुड। मारदे हना दूली लोत्र शेंबपुकीमी “पावल नु आ वारचपुकीमी पशो खोदेशो पा गो यो पाइनीकी” दे नें बोरपा गाकनीम। मेको आन जोल गुंडचा कली गो मारेड मताक्थु शेंनीकी।
- 13 मेकोपुकी परमप्रभु यावे आ सोइशशो मनम। खुइशशा जोल पा गेय पाइनीम। ख्रीस्त आ सोइशशो दुम्बु पा शेंथ गाकनीम। २कोरिन्थी २:१७
- 14 मोपा गाक्तेकम हना यो, मेको आन मोदेशो पशो छक लाक्चा डा ममाइ। मारदे हना सैतान यो परमप्रभु यावे आ स्वर्ग डा गेय पाइब खोदेब दुम्बु पा गेय पा गाक्ब।
- 15 मेकोपुकी रिम्शो गेय पाइब खोदेशो दुम्बु पा गाकनीम। मेको आन जोल नोले यूब। मिनु आन गेय यो मलीब।

पावल श्येत जशो

- 16 गो इन कली लेशा देनुड, मार देती हना यो, आं लोत्र नेंचा मप्रोनीन। गो निप्स ग्राइशो लोत्र पाइब खोदेशो पा, आ नें बोरपाइशो लोत्र पना पन बाक्ती हना यो, आं लोत्र नेनीने। २कोरिन्थी १२:६
- 17 मुल इन कली देशो लोत्र प्रभुम गेशो अधिकार डा लोत्र ममाइ। आं नें बोरपाइक्तीक लोत्र पा, गो निप्स ग्राइशो लोत्र पड देती।
- 18 मारदे हना शुश मुर रागी डा लोत्रमी ठेयब लेत्नीम। मोपतीके गो यो बोरनुड।
- 19 गे ग्येरसीशा निप्स ग्राइशो आन लोत्र फाल्नीनी। मिनु आंम कली जोक्ब तुइक्ब मिम्नीनी। १कोरिन्थी ४:१०
- 20 सुइ मुरुमी इन कली वाइलीम वाइल सेल्तेकम हना, रोइक्ताकम हना, जोल पाम्तेकम हना, बोरशा कौइताकम हना नु इन चोचो राप्तेकम हना यो फाल्शा बाक्बाक्तीनी।
- 21 गो मुने पा देनुड, मेको आन पशो खोदेशो पने मचाक्क। सुइ मुर मारेइ आ पर्बम ठेयब लेशशा बोरतेकम हना, गो यो मेको आ पर्बम ठेयब लेशशा बोरनुड। गो मूर्ख खोदेशो पा ब्वाक्नुड।
- 22 मार, मेको हिबू नमी? गो हिबू नड। मार, मेको इसाएली नमी? गो इसाएली नड। मार, मेको अब्राहाम आ चच युइ नमी? गो यो अब्राहाम आ चच युइ नड। फिलिप्पी ३:५
- 23 मार, मेको ख्रीस्त आ गेय पाइब नमी? गो यो ख्रीस्त आ गेय पाइब नड। गो मेको आन क्येडा रिम्शो गेय पाइब नड। गो गशो मुरुम खोदेशो लोत्र पाइनुड। गो मेको आन क्येडा शुश गेय पाता। मेको आन क्येडा शुश चोक्चा पुंडसाक्यी। मेको आन क्येडा तुप्चा पुंडसाक्यी। हेर हेरा साइक्चा पुंडसाक्यी। १कोरिन्थी १५:१०; २कोरिन्थी ६:४-५
- 24 यहूदीपुकीमी आं कली ५ खेयप ३९ कोरां आप्तीनी। ब्यवस्था २५:३
- 25 खेयप सां कोक्केमी तुप्तीमी। काले फुल्लु आप्तीमी। खेयप सां आं डोइशशो जहाज समुन्द्रम गुम्शा हेरा बेक्ती। मो दुम्मेनु, काब नाकदो नाक्ती समुन्द्रम बाक्ती। प्रेरित १६:२२; प्रेरित १४:१९
- 26 रागी रागी हिरशा गाक्डानु, खोला शोक्सीडानु, हेर हेरा योल्ताक्यी। लांम बाप्शा बाक्ब खुइपुकीमी हेर हेरा साइक्तीमी। आंम यहूदीपुकीमी यो शुश श्येत गेतीमी। अर्को रागी डा मुरपुकीमी यो हेर हेरा साइक्तीमी। सहर, गोरशो रागी, समुन्द्र ते ते हिरशा गाक्डा, मेक मेक हिंन हिंन गाक्चा माल्ताक्यी। आं लोक्ब दुम्बु पा, थमा सुइक्ब नकी देंब नु गाक्डानु, मेकोपुकीमी यो शुश श्येत गेतीमी।
- 27 येसु आ लोत्र शेंना शेंन गाक्डानु, शुश गेय पा, शुश श्येत जशा, शुश नाकदो इप्चा यो मतड। जचा तूचा यो मतड। ग्यूमी फेक्चा यो मतड। २कोरिन्थी ६:५
- 28 मोदेशो श्येत आं रांमी जशो ला ममाइ। आं थुं यो मनाइक्स। मारदे हना थमा सुइक्ब आन कली दोपा मार पा रिम्शो सेलुमी, दे मिम्स डा मिम्स बाक्ती। प्रेरित २०:१८-२१,३१
- 29 मुरुमी “मचाप्नीकी” देनीम। गो चहिं गेना हना यो चाप्नुडा डा? मुरुम पाप पाम्तेकम हना, गो शुश सुर्ता पाइनुड।
- 30 गो आं नें बोरपा लोत्र पचा माल्नुड हना, आं मचाप्शो आ पर्बम आं नें बोरपाइक्नुड। २कोरिन्थी १२:५
- 31 गेना हना यो ठेयब सेल्चा पुंडसीब प्रभु येसु आ आफ परमप्रभु यावेमी गो जोल मपाइनुड, दे तुइक्ब।
- 32 साइ दमस्कस सहरमी बाक्डानु, पिप अरेतस आ हुकुम पाइबमी आं कली ग्याइक्चा, दे सहर आ एर ओंथ आ सिपाहीपुकी वोइक्मी बाक्त।
- 33 तन्न थमा सुइक्बपुकीमी आं कली डोकोम कुरपा गारो डा झेल रे ओंखां पा तोक्शा प्रोक्पाइक्तीमी। मोपा जोरी सत्रु आन गुइ रे ब्रौइती। प्रेरित ९:२४-२५

## 12

मचाप्ब सक्ति पाइशशा दुम्शो

- 1 नें बोरपाइक्तीक लोत्र शोर गाक्शो बाक्त हना यो, गो आं नें बोरपा लोत्र पचा मप्रौइनुड। मारदे हना प्रभुमी छेडछेड पा तपाइसीशा तुइक्पाइक्ती, दे मुल सम्म इन मतुइशो लोत्र तुइक्पाइक्नन्नी।
- 2 गो ख्रीस्त आ मुर का कली तुइक्नुड। १४ बर्स डौइती मेको स्वर्गम लाइक्चा पुंडसाक्व। रांम बाक्म, कौं मबाक्म, गो मतुइक्नुड। परमप्रभु यावेमी ला तुइक्ब।
- 3 मिनु गो मेको मुर परमप्रभु यावे आ बाक्तीके लाइक्चा पुंडसाक्व, दे तुइक्नुड। रांम बाक्म, कौं मबाक्म, गो मतुइक्नुड। परमप्रभु यावेमी ला तुइक्ब।
- 4 मिनु मेको मुरुमी खुइशशा लोत्र नेतु। मेको लोत्र मुरुम देचा मदुम्ब।



5 मेको मुर आ पबर्म आं नें बोरपाइक्नुड। आं पबर्म चहिं आं नें मबोरपाइक्नुड। तन्न गो आं मचाप्शो आ पबर्म आं नें बोरपाइक्नुड। २कोरिन्थी ११:३०

6 मारेड पने मचाप्ब दुम्तीके आं नें बोरपाइक्नुड देशोमी निप्स ग्राइशशो लोत्र पाइब मडुम्नुड। मारेदे हना गो थमा लोत्र पाइनुड। मारेदे हना मुरपुकीमी आं कली तशा, आं लोत्र नेशा आं पबर्म मार मिम्चा माल्बा, दे आंमा तुडक्तमेक्ल, दे मिम्शा बाक्नुड। २कोरिन्थी १०:८

7 गो शुश कोइतीके तशा, मेको आ पबर्म ठेयब लेशशा, नें मबोरपदुल, दे सैतान आ चू आं रांम गेती। मेको आं कली श्येत गेचा कली नु आं ठेयब लेत्तीक तेक्चा कली बाक्ब।

8 खेयप सां गो प्रभु कली “मोदेशो चू रे प्रोइयीनी” दे पुंडता।

9 तन्न मेकोमी आं कली “आं शिशो इ कली गारब। मारेदे हना मचाप्ब मुर आगाम आं सक्ति नेल्ल क्येडा ठीक बाक्ब” देंत। मोपा तुडक्तु रे ख्रीस्त आ सक्ति गो नु बाक्शो तांडसेक्ल, दे गो मारेड पने मचाप्ब दुम्शोमी, थाम्पा ग्येरसीशा आं नें बोरपाइक्नुड।

10 मोपतीके ख्रीस्त आ सक्ति तांडसेक्ल, दे मारेड पने मचाप्ब दुम्ती हना यो, शुक्शी लोत्र पाइक्चा पुंडसाक्यी हना यो, जचा फेक्चा मारेडम मजाकदीत्ती हना यो, खेदा पचा पुंडसाक्यी हना यो नु दोदेब श्येत गेचा पुंडसाक्यी हना यो, आं थुं नाइशशा हेम्म पा बाक्नुड। मारेदे हना गो मारेड पने मचाप्ब दुम्डानु, सक्ति पाइशशो बाक्नुड, दे रुप्ता। फिलिप्पी ४:१३

थमा सुइक्ब आन कली शेंशो

11 गो निप्स ग्राइशशो लोत्र पाइब खोदेशो दुम्ती, दे तुडक्ताक्ड। गेपुकीमी मोदेशो पाइब सेल्वतीनी। मारेदे हना गेपुकीमी आं कली ठेयब सेल्चा माल्लो, दे तुडक्चा माल्लो ननी। गो मेको शुश जोक्ब तुडक्ब देखु पशो सोइशशो आन क्येडा आइक्च मनड। मो हना यो गो आइक्च दुम्ती। २कोरिन्थी ११:५

12 ख्रीस्त आ सोइशशो न बाक्माक्त, दे कोइचा कली गेपुकी नु बाक्डानु, चिन्ड नु छक लाक्चा डा गेय कोत्रचा ताइतीनी। रोमी १५:१९; हिब्रू २:४

13 तेइ तेइ येसु आ नेमी खुम्सीशा बाक्ब आन कली मारेड मारेड शेंशा, मारेड मारेड पशा कोइशो खोदेशो पा इन कली यो पशा कोइताक्नी। मिनु मार लीम डा? लोत्र का चहिं मार लीत देशा हना, गेपुकी नु गो मारेड मताक्गु। आं मताक्शोमी माफ गेयीनी। २कोरिन्थी ११:७-९

14 मुल इन कली गुम्थ पिडानु, खेयप सां दुम्ब। गो इन कली श्येत मगेनुड। इन बाक्शो मारेड मताक्नुड। तन्न इन कली माल्लुड। मारेदे हना आलपुकीम आंम आफ कली शोप मउप्नीम। तन्न आम आफोमी आन आल आ पबर्म शोप उप्नीमी।

15 गो दोपा इन कली वारच पा रिम्शो थुं सेल्चा कली ग्येरसीशा, आं थुं गेनन्नी, मोपा इन कली दाक्चा डा गेय पाता। मिनु गो चहिं इक्चा ला दाक्चा पुंडसीनुडा डा? फिलिप्पी २:१७

16 इन मुर का निक्शीमी मार देंतेक्म देशा हना “मारेड मताक्नुड देशा, जोल पा शुश ताक्बाक्त” देंतेक्म।

17 मार, आं सोइशशो आन गुड रे गो मारेड ताक्गु डा? मार ताक्शा, इन कली श्येत गेमे डा?

18 गो तीतस कली कोरिन्थी आन कली गुम्थ लावो, दे सोइक्ताक्ड। तीतस नु लोक्ब का यो सोइक्ताक्ड। मिनु तीतसमी गेपुकी नु मारेड ताक्गा डा? आंस सोक्त का पा गेय मपस्कु डा? २कोरिन्थी ८६, १६-१८

19 “पावल नु आ वारचपुकीमी ब्रोंइचा कली लोत्र पाइबाक्तेक्म” देशो मिम्ताक्नी हना, गे दूली मिम्ताक्नी। आंइ दाक्शो लोक्बपुकी, गो इन कली शेंशा लोत्र पकानु, परमप्रभु यावे आ डोंइती जिम्मा ब्रशा ख्रीस्त आ अधिकार तशा, इन कली रिम्शो दुम्ल, दे मिम्शा शेंताक्क।

20 मुल गुम्थानु, मार दुम्बा, दो दुम्ब, दे थुं ग्येत्थ लुक्च पा बाक्नुड। मारेदे हना गुम्थानु, आं दाक्शो खोदेशो मपाइनीनी को, गो यो इन दाक्शो खोदेशो मपाइनुडा को? मिनु मगारथु, जिचा बोक्शा, गेहे पमुशा, गाइशशा, आंम कली ठेयब सेल्मुशा, शुक्शी पमुशा, मुर आन पबर्म मरिम्शो लोत्र पा नोफा मुइक्मुशा, ठेयब लेशशा, खडड मडड दुम्नया को? २कोरिन्थी १०:२

21 गो लेशशा जाक्डानु, परमप्रभु यावेमी आं कली आइक्च सेल्बा को, दे हिंनुड। मिनु डोंइती पाप पाइब नु परमप्रभु यावे गे मलेप्ब आन पबर्म सुर्ता पचा माल्लुडा को? डोंइती मेकोपुकीमी ग्रोग्रा दिचा डा, तेल्लेम नु हेंथे गेय पाप्तेक्म। २कोरिन्थी १३:२

## 13

हिंच कोइशो

1 मुल गो इन कली गुम्थ पिडानु, सां खेयप दुम्नुड। निसाफ पामेनु, सांक्छी निक्शी सां वोइशशा, मेको आन लोत्रमी दोस गुंइशा, सजाइ गेचा माल्ब। ब्यक्स्था १९:१५; मती १८:१६

2 मोपतीके सजाइ गेचा पुंडसीब आन कली सजाइ मगेथु, मप्रोंइनुड। मारेदे हना एको क्येडा डोंइती जाक्डानु, मो मपचा, दे शेंशो नन्नी।

3 गेपुकीमी “पावल ख्रीस्त आ सक्ति तशा, अधिकार पाइशशो बाक्माक्त” दे इन मिक्चीमी तचा माल्बाक्तीनी, दे तुडक्ताक्ड। ख्रीस्त इन दातेमी मचाप्ब ममाइ, शुश सक्ति पाइशशो बाक्ब, दे कोइताक्क।

4 मारेदे हना मेको मचाप्ब दुम्शा, शीम केप्शा कांटी थोक्शा क्येइशशा साइक्चा पुंडसाक्व। तन्न परमप्रभु यावे आ सक्तिमी बेक्शो रे सेंचा पुंडसाक्व। मोदेशो पा गो यो मेको नु मारेड पने मचाप्ब दुम्नीकी। तन्न गेपुकी नु बाक्कानु, बेक्शो रे सेंचा पुंडसीशा, परमप्रभु यावे आ सक्ति तशो सक्ति पाइशशो गेय कोइनीकी।

5 इन थमा सुइक्तीके ठीक बाक्बा देय मबाक्ब आंमा नाक्शा कोत्रडीने। आंमा नाक्तीन। येसु ख्रीस्त इन आगाम बाक्ब, दे मप्रेंदीन। मबाक्ब हना इन गेय शोर गाक्शो दुम्ब।

6 गो आंड शेंशोमी इन कली रिम्शो पाइतक, दे तुइक्नीकी। मिनु गे यो मोदेशो मिम्नीनी, दे आस पाइनीकी।

7 गे मारेइ मरिम्शो मपन, दे गो परमप्रभु यावे कली पुइनीकी। गो ग्राशो मुर खोदेशो दुम्चा ममाइ, तन्न ठीक पाइब दुम्मीन। गो ठीक मपाइब खोदेशो दुम्तक हना यो, गे रिम्शो पाइब दुम्नीकी।

8 गोपुकीमी थमा लोत्र थमा पाइनीकी। दूली नु जोल लोत्र कली थमा देने मचाप्नीकी।

9 गो मारेइ पने मचाप्ब दुम्शो बाक्तक। तन्न इन कली बोल्यो दुम्शो तशा ग्येरनीकी। गो परमप्रभु यावे कली “कोरिन्थीपुकी रिम्शो दुम्मल” दे पुइना पुइन बाक्नीकी।

10 गो इन नेक्था मबाक्डानु, एको चिठी ब्रेक्नुड। मिनु आं जाक्ची ना गो इन कली हुइशशा, प्रभुमी आं कली गेशो अधिकार कोइचा ममालडल। मेको अधिकार सेल्चा कली गेशो बाक्त, प्रेत्चा कली ममाइ। २कोरिन्थी १०:११; २कोरिन्थी १०:८

नोले डा लोत्र

11 आं लोक्बपुकी, मुल रिम्शो बाक्कीन। रिम्शो पने। आं लोत्र नेंशा टीब दुमीने। इन दातेमी गारमुने। थुं नाइशशा बाक्कीने। दाक्तीक नु थुं नाइक्तीक गेब परमप्रभु यावे गेपुकी नु बाक्ल। फिलिप्पी ४:४; रोमी १५:३३

12 प्रभु आ नेंमी मुम्मुशा, आसीक गेमुने।

13 गो नु बाक्ब थमा सुइक्ब नेल्लेमी इन कली “रिम्शो बाक्कीन” देंतेक्म।

14 इ प्रभु येसु ख्रीस्त आ शिशी, परमप्रभु यावे आ दाक्तीके नु परमप्रभु यावे आ सोक्त गेना हना यो गेपुकी नु लील।

## गलाती

**ब्रेक्ब मुर:** एको चिठी पावलम गलातीया रागीम बाक्ब यहूदी आन कली ब्रेक्बो बाक्त।

**गेना ब्रेक्बो:** एको चिठी ब्रेक्बा क्येडा डोंडती पावलामी निक्शी खेयप गलाती आन कली शेंचा कली मेकेर बाक्बो बाक्त। प्रेरित १६:६; प्रेरित १८:२३ मेको निक्शी खेयप लशा, लेशा लची ना ब्रेक्बो बाक्त। मेको ५५ ए. डी. बाक्त।

**मार ब्रेक्बो:** गलातीपुकीमी पावल आ शेंशो मुल रे “येसु ख्रीस्त आ पतीक रे ला परमप्रभु यावे आ मुर दुम्ने चाप्नीम” दे शेंशो, दे मगारब मिम्तमे बाक्त। मेकोपुकी लेशा “यहूदी आन माइत पतीके पचा माल्ब” दे दूली शेंब आन लोत्र नेंचा गोम्तेकम। “येसु ला पाप रे प्रॉइब बाक्ब” देंशो एको चिठी डा ठेयब लोत्र बाक्ब।

डोंडती डा लोत्र

1 गो सोइश्शो ब्रेत्वा पुंडसीशो पावल नड। आ शेंतीके लोत्र मुर आन लोत्र ममाड। मुरपुकीम सोइश्शो यो मनड। येसु ख्रीस्त कली बेक्बो रे सेंब इं आफ परमप्रभु यावे नु येसु ख्रीस्त आस सोइश्शो नड। गलाती १:११-१२

2 गो नु काथा बाक्ब थमा सुइक्ब लोकबपुकीमी गलातीया रागीम बाक्ब येसु ख्रीस्त आ नेंमी देल्ब इन कली एको चिठी सोइक्ताक्क।

3 इं आफ परमप्रभु यावे नु प्रभु येसु ख्रीस्तम इन कली शिशी पा इन थुं नाइश्शा बाक्बा गेम्सेकल।

4 प्रभु येसु ख्रीस्तमी इं पाप क्याम्चा नु रागीम गृशो मरिम्शो पतीके रे प्रॉइचा कली आ गिम गेप्टु। आ मोदेंशो पशो चहिं इं आफ परमप्रभु यावे आ दाक्बो बाक्त। गलाती २:२०; १तिमोथी २:६; तीतस २:१४; १यूहन्ना ५:१९

5 इं आफ परमप्रभु यावे कली ठेयब सेल्चा गेनायो मप्रॉइय। आमेन।

येसु ख्रीस्त आ लोत्र का ला बाक्ब

6 इन कली तशा, गो छक लाक्ती। मारदे हना इन कली येसु ख्रीस्त रे पा शिशी पा आ गे ब्रेप्ब कली प्रॉइशा, अर्को आन ग्येरपाइक्ब लोत्र नेंतीनी।

7 थमा लोत्र चहिं का ला बाक्ब, दे रूपीन। ख्रीस्त आ ग्येरपाइक्ब लोत्र दूली पा शेंबपुकी जाक्शा, आन दूली शेंशोमी इन थुं क्याल्पाइक्तेकम। प्रेरित १५:१, २४

8 मिनु गोपुकी डोंडती आंइ शेंशो ग्येरपाइक्ब लोत्र क्येडा अर्को ग्येरपाइक्ब लोत्र शेंताक्क हना, गोपुकी सराप रकल। परमप्रभु यावे आ स्वर्ग डा गेय पाइबमी मोपा अर्को ग्येरपाइक्ब लोत्र शेंताक्क हना मेको यो सराप रल।

9 गो इन कली “सु सुमी अर्को ग्येरपाइक्ब लोत्र शेंनीमी, मेको सराप रमल” दे लेंशा देंनुड। १तिमोथी ६:३

10 मार, गो मुर आन थुं नुपाइक्बा माल्नुडा डा? गो परमप्रभु यावे आ थुं कका नुपाइक्बा माल्नुड। गो मुर आन थुं नुपाइक्तीके लोत्र पाता हना, ख्रीस्त आ गेय पाइब माइक्बा मपुंडसीनुड। १थिस्सलोनिकी २:४-६

पावलम आंम पबंम लोत्र पशो

11 आं लोकबपुकी, गोमी इन कली शेंशो ग्येरपाइक्तीक लोत्र मुर आन लोत्र मबाक्ब।

12 गो मेको मुरुमी शेंशा नेंपाइश्शो मनड। येसु ख्रीस्तमी तपांडसीशा, शेंताक्की। प्रेरित ९:१-१५

13 साइ गो दोपा यहूदी धर्म ब्रडा, मेको नेंशा तुइश्शो बाक्नीनी। मेना गो येसु ख्रीस्त आ नेंमी देल्ब आन कली खेदा पपाइश्शा ग्याइक्पाइश्शा चोकपाइश्शा, रयेत गेतामी। मेको आन कली साम्चा, दे शुश गेय पाता।

14 आं पालामी नेल्ल आन क्येडा शुश धर्म पा आंइ यहूदी आन रिती थिती पाता। अरु आन कली यो आंइ किक्की पिपीम पशो रिती थिती पपाइक्नुडमी, दे आं थुं फ्रेंशा बाक्बो नड। प्रेरित २३:६; प्रेरित २६:५

15 परमप्रभु यावेमी चहिं काबु आं मोदेंशो पचा तेक्ती। मारदे हना आ दाक्बो पा आं जरमेचा डोंडती रे योत्रशा, आ लोत्र शेंब सेल्ने थुम्शो बाक्माक्त। येरमीया १:५; रोमी १:१

16 मोपतीके आ तौ येसु ख्रीस्त कली तपाइक्ती। मिनु शुश अर्को रागी डा मुर आन कली आ तौ आ पबंम शेंथ सोइक्ताक्की। मेको शेंचा आ पबंम गो सुइ नु लोत्रसी मपड। अर्को मुर आन अर्ती यो मनेंनु। मत्ती १६:१७; गलाती २:७

17 गो यरूसलेम बाक्ब आं डोंडती ब्रेत्वा पुंडसीशा शेंथ सोइश्शो आन कली गुम्थ यो मलड। अराब रागी लशा हिरशा, दमस्कस सहर जाक्दीश्शा बाक्ती।

18 मिनु बर्स सां नोले केफास गुम्थ यरूसलेम लती। मिनु केफास नु १५ नाक्ती सम्म बाक्ती। यूहन्ना १:४२; प्रेरित ९:२६-२७

19 मेना ख्रीस्त आ सोइश्शो सुइ आन कली मगुमुमी। प्रभु आ लोकब याक्ब चहिं गुम्ता। मत्ती १३:५५

20 गोम इन कली ब्रेक्बो लोत्र थमान बाक्ब, देंनुड। जोल ममाइ, दे परमप्रभु यावेमी तुइक्ब।

21 नोले यरूसलेम रे गाक्शा, सिरिया नु सिलीसीया रागी हिरथ लती। प्रेरित ९:३०

22 यहूदीया रागीम बाक्ब ख्रीस्त कली थमा सुइक्ब आन गुम्तीकेमी आं कली गेनायो मतशो बाक्मा बाक्त।

23 मेकोपुकीमी आं पबंमी “साइ इं कली खेदा पा एको लोत्र साम्चा देबमी मुल एको लोत्रन शेंना शेंन ब्रपाइक्बाक्त” दे नेंशो बाक्तेकम ने।

24 मेको नेंशा परमप्रभु यावे कली ठेयब सेल्तेकम ने।

## 2

## सोडशशोपुकीमी ब्रशो

1 यरूसलेममी केफास नु याकूब गुम्शा, १४ बर्स नोले लेंशा, यरूसलेम लती। गो नु बारनाबास यो लत। तीतस कली यो लाइवतस्कु। प्रेरित १५:१-२९; प्रेरित ४:३६

2 येसु ख्रीस्तमी यरूसलेमम बाकब सोडशशोपुकी नु लोत्रसी पथ लावो, दे तुइक्पाइक्तीके लशो नड। मिनु जाक्दीशशा, सोडशशोपुकी नु अरु आन कली लां कोंडब दुम्शो आन कली खुपशा, अर्को रागी डा मुर आन कली मार मार शेंदुमी, मेको नेंपाइक्तामी। मारदे हना मेकोपुकीमी गोम शेंशो तुइक्चा माल्नीम। मतुइक्ताकम हना, आं मिम्शो नु आन मिम्शो मगारब। मिनु आं देंशो मनेंनीम, दे मिम्शो नड। मिनु मेको नेंपदुमीनु, आं देंशो ठीक लाक्तेकम।

3 मारदे हना गो नु लशो ग्रीक डा तीतस कली खोइक्तीक चिनु खोइक्पाइसो मदेंथु, ब्राम्तेकम। प्रेरित १६:३; १कोरिन्थी ९:२१

4 तन्न मेकेर खुम्सीशा बाकब आन मतुइक्थु थमा सुइक्ब दुम्बु पा, दूली शेंब ब्वाइसाकम। मोपा गोपुकी नु ब्वाइसीशा, आंइ थुं कोत्रशा बाक्तेकम। गोपुकी ख्रीस्त येसुमी यहूदी आन रिती थिती पचा प्रोंडशा बाक्तक। तन्न मेकोपुकीमी यहूदी आन रिती थितीम लेप्पाइक्चा बोल पाम्तेकम।

5 येसु ख्रीस्त आ लोत्र थमा बाकब देंशा, मेको दूली शेंब आन लोत्र नेंशा, छिन का यो गु ब्रेशशा मबाक्क। मिनु मोदेंशो पशोमी इन कली शेंशो ग्येरपाइक्ब लोत्र थमा बाकब, दे कोंडताक्क। गलाती ३:१

6 परमप्रभु यावेमी मुर आन कली ठेयब आइक्च मसेल्ब। मुर आन थुं नेल्ल तुइक्ब। मुल लां कोंडब दुम्शो आन कली मान पाइनुडमी। मेको लां कोंडबपुकीमी अर्को लोत्र शेंचा कली मतेम्देम।

7 मेकोपुकीमी आं कली परमप्रभु यावेमी अर्को रागी डा मुर आन कली शेंथ सोइक्ताक्क, पनुस कली चहिं यहूदी आन कली शेंथ सोइक्ताक्क, दे रुप्तेकम। एफिसी ३:१२

8 पनुस कली यहूदी आन कली शेंथ सोइक्ब नु आं कली अर्को रागी डा मुर आन कली शेंथ सोइक्ब कानाइ बाक्क, दे रुप्तेकम।

9 गो थमा पा एको शेंतीक गेय कली योत्रशो नड, दे रुप्शा, याकूब, केफास नु यूहन्ना सांफामी बारनाबास नु आं कली “गो इं यहूदी आन कली शेंनीकी। गे निक्शी चहिं अर्को रागी डा मुर आन कली शेंथ लसे” देंशा, ग्युरा गुइमी ग्याइशशा, लोत्रसी गारपाइक्तेकम। यूहन्ना १:४२

10 मिनु दोपा शेंचा, मार शेंचा, दे मारेइ मदेंम। मथीब आन कली शिशी पाइक्चा ला देंतेकम। मेको आन लोत्र टिशा, शुश आन कली शिशी पाइक्तामी। प्रेरित ११:२९-३०; २कोरिन्थी ८:९

## केफास कली हुइशशो

11 काबु केफास एन्टीओकमी जाक्त। मिनु गुम्स्कुनु हुइक्ताक्क। मारदे हना आ पशो तशा आं थुं मनुड।

12 डोंइती मेकोमी अर्को रागी डा थमा सुइक्ब नु काथा जशा, नोले याकूबमी सोइशशो चारच का निक्शी जाक्मा रे यहूदीपुकी नु ला जचा गोप्तु। मारदे हना यहूदी जात डा थमा सुइक्बपुकीमी आ कली मोदेंशो पा जशो तशा, मरिम्शो सुइक्नीम, आ लोत्र यो मनेंनीम, दे हिंशा मो पाप्तु। प्रेरित ११:२-३

13 मोदेंशो पाइब आ ला ममाइ। यहूदी थमा सुइक्ब नेल्लेमी दिल्ला, जखु पा कोंडताकम। बारनाबासमी यो आन पशो खोदेंशो पचा गोप्तु।

14 मिनु मेको आन मोदेंशो पशो चहिं ख्रीस्त आ लोत्र नु मगारब देंती। मोपतीके मेको आन कली खुपशा, केफास कली “गे यहूदी नवे। तन्न इं यहूदी बुद पा आन पतीके पचा प्रोंडशा, अर्को रागी डा मुर खोदेंशो दुम्ते। मोपतीके अर्को रागी डा मुर आन कली इं यहूदी रिती थिती पपाइक्चा दुम्बा?

15 गोपुकी यहूदी नय। अर्को रागी डा मुरपुकीमी परमप्रभु यावे कली मतुइक्नीमी। आ अरेशो लोत्र मतुइक्थु, मतीनीम। गो मोदेंशो मनय।

16 इं यहूदी रिती थिती पतीके ठीक मदुम्नय। ख्रीस्त येसु कली थमा सुइक्तीके ठीक दुम्नय, दे रुप्तय। मोपतीके इं यहूदी रिती थिती पचा प्रोंडशा, ख्रीस्त येसु कली थमा सुइक्तय। गो लेंशा देंनुड, रिती थिती पतीके सुड ठीक मदुम्नीम। परमप्रभु यावेमी मुर आन कली येसु ख्रीस्त कली थमा सुइशशो तशा, ठीक दुम्पाइक्ब। रोमी ३:२०,२८; एफिसी २:८

17 गो यहूदी बाक्तय हना यो, येसु ख्रीस्त कली थमा सुइक्तीके ठीक दुम्तय। मोपान अर्को रागी डा मुर खोदेंशो दुम्तय। मिनु येसु ख्रीस्तमी मुर आन कली पापी सेल्शा, पाप बारपाइक्ब, दे मिम्चा डा? मोदेंशो ममिम्चा।

18 गो रिती थिती पचा प्रोंडशा। मुल लेंशा रिती थिती पशा, ठीक दुम्चा माल्ता हना, गो थमान परमप्रभु यावे आ लोत्र मटीब दुम्नुड, दे रुप्ता।

19 गो यहूदी आन पतीके आन पर्वम बेक्शो मुर दुम्ती। ख्रीस्त नु काथा शीम कांटी थोक्शा, क्याइशशा साइक्चा पुंडसाक्की। मुल गो परमप्रभु यावे आ दाक्शो पा ब्रोंइनुड।

20 तन्न गो मब्रोंइनुड। ख्रीस्त आं आगामी ब्रोंइब। तन्न आं मुल ब्रोंइतीके गो परमप्रभु यावे आ तौ कली थमा सुइशशा ब्रोंइनुड। मेकोमी आं कली शुश दाक्शा, आं पशो पाप आ पर्वम साइक्चा पुंडसाक्क। यूहन्ना १७:२३; प्रेरित १:४

21 परमप्रभु यावेमी मो गेशो शिशी खेर मसोइक्नुड। यहूदी आन पतीके पाप रे ब्रोंइसीब हना, ख्रीस्त साइक्चा पुंडसीशा बेक्शो शोर गाक्शो मदुम्बा डा?” दे केफास नु मेकेर देल्शा बाकब आन कली माइक्तामी।

## 3

थमा सुइशोमी ठीक दुम्सीब

1 ए गलातीपुकी, मे मरुब मुर दुम्नी बाक्त। सुमी मोपा इन थुं हिरदा? येसु खीस्त कली शीम केप्शा कांटी थोकशा क्याइशशा साइक्तेक्म, दे इन मिक्चीमी तशो खोदेब पा नेपाइक्तानी। मुल मेको लोव प्रेदीनी?

2 मुल लोव का निक्शी हिल्लो पाइक्नन्नी। परमप्रभु यावे आ सोक्त दोपा तनी? यहूदी आन पतीक पशोमी तनी देय खीस्त आ लोव थमा सुइशोमी तनी? लो देनीन।

3 मारेइ मरुब मुर दुम्नी? परमप्रभु यावे आ सोक्तीम प्रिशो थुं गेचा पुंडसीशा, प्रभु आ लां खोइक्का गोइतीनी। मिनु मुल मुर आ थुमी मिम्शो पशा, जाक्दीय्य, दे मिम्तीनी?

4 प्रभु आ लां खोइशशा गाकनीनु, मारेइ मारेइ ताइतीनी। मुल मेको लां प्रोइतीनी हना, मेको नेल्ल मसाम्नीनी डा?

5 परमप्रभु यावेमी इन कली आ सोक्त गेशा, छक लाक्का डा गेय कोंइताक्व। यहूदी आन पतीक पशो तशा, मोदेशो छक लाक्का डा गेय कोंइदा डा? खीस्त कली थमा सुइशो तशा, कका छक लाक्का डा गेय कोंइताक्व।

6 अब्राहाम आ पर्वम “अब्राहाममी परमप्रभु यावे कली थमा सुइक्तु। मिनु परमप्रभु यावेमी ठीक दुम्पाइक्तु” दे ब्रेक्शो बाक्ब। उत्पत्ती १५:६; रोमी ४:३

7 थमा सुइक्तीके ठीक दुम्शो मुरपुकी अब्राहाम आ आल नम, दे रूपीने।

8 अर्को रागी डा मुरपुकी थमा सुइक्तीकेमी ठीक दुम्पाइक्का पुंडसीनीम, दे परमप्रभु यावे आ लोवम ब्रेक्शो बाक्ब। मारेदे हना अब्राहाम कली “इ लां रे पा नेल्ल रागी डा मुरपुकीमी आसीक ताइनीम” दे ब्रेक्शो बाक्ब। उत्पत्ती १२:३

9 मोपतीके सु सुमी अब्राहाममी थमा सुइशो खोदेशो पा थमा सुदमे, मेकोपुकी अब्राहाम आ आसीक यो ताइनीम। रोमी ४:१६

10 सु सुमी चहिं यहूदी आन पतीक पा, ठीक दुम्चा माल्मे, मेकोपुकी सराप राइनीम। मिनु “परमप्रभु यावेमी अरेशो लोव नेल्ल टिचा माल्ब। सु सुमी लोव नेल्ल टिशा पशा, का चहिं मटीमे, मेकोपुकी सराप राइनीम” दे ब्रेक्शो बाक्ब। ब्यवस्था २७:२६

11 सुइमी यहूदी आन पतीक पशा परमप्रभु यावे आ डोंइती ठीक मदुम्नीन, दे तुंडसीब। “थमा सुइशो रे पा ठीक दुम्पाइक्का पुंडसीब चहिं गेना हना यो ठीक बाक्नीम” दे ब्रेक्शो बाक्ब। हबकुक २:४; रोमी १:१७; हिब्रू १०:३८

12 परमप्रभु यावे आ अरेशो लोव येसु खीस्त कली थमा सुइक्तीक रे मबाक्ब। “सुइम परमप्रभु यावे आ अरेशो पशो हना, मेको रे पा ब्रोंइ वा” दे ब्रेक्शो बाक्ब। लेवी १८:५

13 खीस्तमी सुइमी मेको लोव टिने मचाप्नीम, दे तुइशशा, इं पा डा सराप रशा, मेको सराप रे प्रोंइतु। मिनु “शीम क्याइशशा साइक्का पुंडसीबपुकी सराप रशो बाक्नीम” दे ब्रेक्शो बाक्ब। ब्यवस्था २१:२३; २कोरिन्थी ५:२१

14 खीस्त येसु सराप रमेनु, अर्को रागी डा मुरपुकी यो अब्राहाम आ तशो आसीक ताइनीम। मिनु यहूदी आन पशो पतीक रे ममाइ। खीस्त येसु कली थमा सुइशो रे पा गोपुकीमी परमप्रभु यावेमी गेनुइ देशो आ सोक्त ताइतय, दे रुब्य।

परमप्रभु आ गेशो नु अरेशो लोव

15 आं लोकबपुकी, कथा सेल्शा रुप्पाइक्नन्नी, कागज ब्रेक्शा, ब्रेप्चो दिम्ने थुम्शो डा मेरे मेको ब्रेक्शो लोव लीब। सुइमी मारेइ लोव क्याम्ने तेम्ने मचाप्नीम।

16 परमप्रभु यावेमी अब्राहाम नु अब्राहाम आ युइ का कली “इ लां रे पा रागी नेल्ल डा मुरपुकी आसीक राइनीम” दे आ लोव गेशो बाक्त। शुश आन कली ममाइ “इ युइ का कली” दे ब्रेक्शो बाक्ब। मेको लोव खाप्ब चहिं खीस्त बाक्ब। उत्पत्ती २२:१८

17 आं देशो रूपीन। परमप्रभु यावेमी अब्राहाम कली गेशो लोव कागज ब्रेक्शा, ब्रेप्चो दिप्शो खोदेशो बाक्ब। मेको लोव गेशा, ४ सहे ३० बर्स नोले आ अरेशो लोव तुइक्पाइशो बाक्त। मेको अरेशो लोवमी डोंइती गेशो लोव खोइक्ने मचाप्ब। प्रस्थान १२:४०

18 अरेशो लोव पतीके हक ताइब दुम हना, परमप्रभु यावे आ गेशो लोव खोत वा। परमप्रभु यावेमी “हक ताइनेवे” दे अब्राहाम कली आ लोव गेशो बाक्त।

19 अरेशो लोव शोर गाक्शो मदुम्बा डा? नेनीन, परमप्रभु यावेमी अब्राहाम कली गेशो लोव खाप्ब, दे तुइक्नय। मेको युइ मजरमेथु, परमप्रभु यावे आ अरेशो लोव रे पा पाप माइशो मार में, दे तुइसीशो बाक्त। मेको लोव परमप्रभु यावे आ स्वर्ग डा गेय पाइबमी गारपाइक्ब का आ गुइमी गेशा, मुर आन कली तुइक्पदा बाक्त। रोमी ५:२०; प्रेरित ७:३८, ५३; हिब्रू २:२; ब्यवस्था ५:५

20 गारपाइक्तीक गेय पचा कली मुर का मदुम्ब। तन्न परमप्रभु यावे आ का ला बाक्शा लोव गेशो बाक्त।

21 अरेशो लोव नु परमप्रभु यावेमी गेशो लोव मगारचा डा लोव नसी डा? ममाइ। ब्रोंइचा गेचा कली अरेशो लोव का गेशो हना, थमा पा ठीक पतीके अरेशो लोव रे पा दुम वा। रोमी ८:२-४

22 तन्न परमप्रभु यावेमी ब्रेक्पाइशो लोवमी “मुर नेल्ल पाप आ वाइलीम वाइल दुम्शो बाक्नीम” दे ब्रेक्शो बाक्ब। सु सुमी येसु खीस्त कली थमा सुदमे, मेको आन थमा सुइशोमीन “पाप रे ब्रोंइचा ताइनीम” दे गेशो लोव खाप्शो ताम्तेक्म। रोमी ३:९-२०; रोमी ११:३२

23 थमा सुइक्तीक जाक्का क्येडा डोंइती अरेशो लोव पना पन बाक्तक। मोपा थमा सुइक्तीक मजाक्म सम्म चोक्सीशो खोदेशो बाक्तक। गलाती ४:३

24 मोपतीके मेको अरेशो लोव्रम आंड कली हिंच कोइशा, ख्रीस्त आ लां गाक्पाडक्ब दुम्त। मोदेशो बाक्त हना, थमा सुइक्तीक रे ठीक दुम्नय।

25 तन्न थमा सुइक्तीक जाक्चा नोले हिंच कोइब ममालनय। रोमी १०:४

26 ख्रीस्त येसु कली थमा सुइश्शा, गे नेल्ल परमप्रभु यावे आ तमी तौ दुम्तीनी। यूहन्ना १:१२; रोमी ८:१७

27 गे ख्रीस्त आ नेमी ब्वाक्कुम खुश्शा गुंडपांडसीशोपुकी येसु ख्रीस्त फेक्शो खोदेशो पा, ख्रीस्त नु रां का दुम्तीनी। रोमी ६:३; रोमी १३:१४

28 मोपा रां का दुम्शो आन कली यहूदी नु ग्रीक, वाइल नु होव्रप, मीश मुर नु चोंइश मुर मतिल्सीब। मेको ख्रीस्त येसुम नेल्ल खाल का डा बाक्नीम। रोमी १०:१२; १कोरिन्थी १२:१३

29 ख्रीस्त नु रां का दुम्शा, अब्राहाम आ चच युइ दुम्तीनी। परमप्रभु यावेमी अब्राहाम कली गेशो लोव्र गाप्शा, हक ताइब दुम्तीनी।

## 4

हक ताइब दुम्तय

1 मारेइ मतुइक्ब आल हक ताइब दुम्त हना यो, मेको खिं डा तौ बाक्त हना यो, गेय पाइब वाइल खोदेशो मिम्सीब।

2 मेको मकोल्म सम्म ठेयब मुर आन गुइमी बाक्ब। आ आफोमी “मुल आ हक गेचा” मदेंम सम्म आ तचा डा हक मताइब।

3 गेपुकी मेको खिं डा आल खोदेशो बाक्तय। कोल्शा इं हक मतशो सम्म गो एको रागी डा सक्ति आन वाइल दुम्शो बाक्तय। गलाती ५:१; कलस्सी २:२०

4 मिनु नोले परमप्रभु यावेमी वोइश्शो नाक्त आ तौ कली सोइक्ताक्ब। मेको आ तौ मीश मुर रे परमप्रभु यावे आ अरेशो लोव्रमी जरमेसाक्ब। मर्कूस १:१५; एफिसी १:१०

5 मेकोमी मुर दुम्शा, यहूदी आन पतीक पाइब आन कली प्रोंइशा, परमप्रभु यावे आ तमी तौ सेलतीमी।

6 गो आ तमी तौ दुम्शोपुकी परमप्रभु यावेमी आ तौ आ सोक्त गेचा पुंडसाक्ब। मेको सोक्तीमी “आब्बा, आं दाक्शो आफ” देब। रोमी ८:१५

7 मोपतीके गो वाइलीम वाइल दुम्शा प्रोंइशा, परमप्रभु यावे आ तमी तौ दुम्शा, हक ताइब दुम्तय। रोमी ८:१६-१७

तमी तौ दुम्शोपुकी

8 डोंइती गे परमप्रभु यावे कली मतुइक्थ, देवी देवता आन कली सेउ पा, मेको आन वाइलीम वाइल दुम्तीनी।

9 मुल चहिं परमप्रभु यावे कली तुइक्ताक्नी। मिनु परमप्रभु यावेमी यो इन कली तुइक्ताक्ब। मिनु मुल लेशा डोंइती पशो खोदेशो पचा दाक्नीनी?

10 गेपुकीमी बार, औंसी, पूरें नु रीतु मानेनीनी। शुश मोदेशो रिती थिती पाइनीनी देशो नेता। रोमी १४:५; कलस्सी २:१६, २०, २१

11 गो शुश श्येत पा येसु ख्रीस्त आ लोव्र शेंताक्नी। इन कली शेंशा श्येत ला जडा कों, दे मिम्ताक्ड। २यूहन्ना ८

12 आं लोकबपुकी, गो रिती थिती पचा प्रोंइशा, येसु ख्रीस्त कली थमा सुइक्ता। आं खोदेशो पा थमा सुइक्चा मप्रोंइथु बाक्कीन, दे इन कली देंनुड। साइ गेपुकी नु बाक्डानु, गारशा बाक्तय। गेपुकीमी आं कली वारच पशो मिम्शा, मुल यो मप्रेंनुड।

13 मेना गो रोइ पा, मचाप्थु यो येसु ख्रीस्त आ ग्येरपाइक्ब लोव्र शेंताक्नी। १कोरिन्थी २:३; प्रेरित १६:६

14 आं कली मोदेशो रोइ पशो तशा ग्रांया मदिल्लीनी। मरिम्शो लोव्र यो मपाइय्यीनी। श्येत पा वारच पाइतीनी। परमप्रभु यावे आ स्वर्ग डा गेय पाइब कली ब्रशो खोदेशो पा मान पाइतीनी। ख्रीस्त येसु कली ब्रशो खोदेशो पा ब्रतीनी।

15 मेना ग्येरसीशा बाक्तीनी। मुल इन ग्येरसीशो ते लाक्गा? मेना इन मिक्च फेशशा, आं मिक्चीम केप्चा डा दुम्तीनी। आं बेक्चा डा गेपुकी बेक्चा ठीक दुम्तीनी।

16 मुल इन कली हुइश्शा, थमा लोव्र शेंदन्नीनु, आं कली मरिम्शो सुइक्नीनी?

17 नेनीने, दूली शेंबपुकीमी इन कली मिलो शिलो पा, येसु आ लां खोइक्चा प्रोंइपाइक्चा माल्नीम। मेकोपुकीमी इन कली मान पखु पा, आंम आन कली मान पपांडसीनीम। गलाती १:७

18 शेंब आन लोव्र नेंचा रिम्शो बाक्ब। गेपुकी नु बाक्ती हना यो, मबाक्ती हना यो, शेंब आन लोव्र नेंचा मप्रोनीन। तन्न शेंशो लोव्र थमा बाक्म कों दूली बाक्म, मेको रुप्चा माल्नीनी।

19 आं दाक्शो आलपुकी, मीश मुरुमी आल थिचामेनु, श्येत जाइनीमी। शुश खाइक्ब। आल थिचशो मीश मुरुमी श्येत जशा खाइश्शो खोदेशो पा, गो इन कली मिम्शा, श्येत जाइनुड। इन थुमी ख्रीस्त बारल, दे मिम्शा, मोदेशो पा आं थुं खाइक्ती। १कोरिन्थी ४:१५

20 गेपुकी नु काथा बाक्शा लोव्र पचा तड हना, गिश रिम्शो दुम वा। गो इन कली तशा मार पचा दो पचा दुम्शो बाक्नुड।

अब्राहाम आ तौ निकशी

21 गे रिती थिती पचा दाक्बपुकी, अरेशो लोव्रमी मार ब्रेक्शो बाक्बा, मेको तुइक्नीनी?

22 मार ब्रेक्शो बाक्ब देशा हना, अब्राहाम आ तौ निकशी बाक्ताक्स। का वाइलीम आ तौ बाक्त, का ग्युंवे पशो मीश आ तौ बाक्त, दे ब्रेक्शो बाक्ब। उत्पत्ती १६:१५; उत्पत्ती २१:२

- 23 वाइलीम आ तौ मुर आ दाकशो पतीकेम जरमेशा ब्रोंडशो बाक्त। ग्युंवे पशो मीश आ तौ चहिं परमप्रभु यावेमी अब्राहाम कली गेशो लोत्र गाप्शा, जरमेशा ब्रोंडशो बाक्त। रोमी ९:७-९
- 24 अब्राहाम आ ग्युंवे पशो मीश नु आ वाइलीम मीशेमी कबल पशा लां निकशी कोंडनीसी। लां का सीनै डा लां बाक्ब। मेकोपुकी वाइलीम वाइल बाक्तेकम। मारदे हना हागार माइशो वाइलीम आ चच युड बाक्तेकम। गलाती ५:१; रोमी ८:१५
- 25 हागार देशो मार रुम्सीब देशा हना, अराब रागी डा सीनै डांडा रुम्सीब। सिनाक्त मुलाक्त यरूसलेममी बाक्बपुकीमी हागार आ लां खोइशशा, रिती थिती पा वाइलीम वाइल दुम्शो बाक्नीम।
- 26 इर डा यरूसलेम चहिं प्रोंडसीशो बाक्ब। मेको यरूसलेम कली ई ममा मिन्मय। हिबू १२:२२; प्रकाश २१:२
- 27 मारदे हना “ए गेनायो आल मथीब मीश मुर, कुम्सो पा ग्येरसो। गे आल मथिशो मुर बाक्ते हना यो, इ कली ममा देंब शुश दुम्नीम। ग्युंवे पा आल थिशो नेल्ल आन क्येडा गे मान पाइक्चा पुंडसीनेवे” दे ब्रेकशो बाक्ब। यसेया ५४:१
- 28 आं लोकबपुकी, इसहाक जरमेशो खोदेशो पा गे परमप्रभु यावे आ गेशो लोत्र गाप्शा, आ तमी तौ दुम्नीनी।
- 29 मुर रे जरमेशोमी मेको सोक्त रे जरमेशो कली मदाक्थु हेला पा खेदा पाइब। मेको मोदेशो मुल यो बाक्ब।
- 30 मिनु मार ब्रेकशो बाक्त देशो हना “वाइलीम आ तौ कली गुंडशा खेरचा। मारदे हना वाइलीम आ तौ ग्युंवे पशो आ तौ नु हक मताइब” दे ब्रेकशो बाक्ब। उत्पत्ती २१:१०
- 31 आं लोकबपुकी, वाइलीम आ चच युड मनय। ग्युंवे पशो मीश आ चच युड नय, दे रुब्बय।

## 5

परमप्रभु आ सोक्तीमी ब्रोंडशो

- 1 खीस्तमी रिती थिती पतीके लां खोइक्चा प्रोंडपा, थमा सुइक्तीके लां कोंडशा, इं थुं हिरताक्व। मोपतीके जवा लाप्यो खोदेशो पा लेंशा रिती थिती पा वाइलीम वाइल मदुमीने। गलाती ४:५; प्रेरित १५:१०
- 2 गो पावलमी “खोइक्तीक चिनु रिती थिती पाइतीनी हना, खीस्त इन पा डा बेक्शो, शोर गाक्शो मदुम्बा डा? शोर गाक्शो दुम्ब” देंनुड।
- 3 लोत्र थोक्शा का का पा शेंननी, खोइक्तीक चिनु खोइसीबपुकीमी अरेशो लोत्र नु रिती थितीम बाक्शो नेल्ल पचा माल्नीम। का यो प्रोंडचा मदुम्ब।
- 4 सु सुमी रिती थिती पशोमी ठीक दुम्चा माल्मे, मेकोपुकीमी खीस्त आ पशो सामशा, मेको रे डोन दुम्शा आ शिशो मताइनीम।
- 5 गोपुकी “खीस्त आ पतीके ठीक दुम्तय” देशा, परमप्रभु यावे आ सोक्तीमी तुइक्पाइक्चा पुंडसाक्य।
- 6 खीस्त येसु नु थुं का दुम्शा, खोइक्तीक चिनु खोइशशो, मखोइशशो आन कली मतिल्थु, थमा सुइक्तीकेमी दुशा गारशा दाक्मुशा बाक्शोम सक्ति बाक्ब। गलाती ६:१५; रोमी २:२६; १कोरिन्थी ७:१९
- 7 झोंडती गे रिम्शो पाइतीनी। तन्न सुम इन कली थमा लोत्र मनैथु, दूली शेंब आन लोत्र नेंचा, दे इन थुं हिरदा?
- 8 इन कली आ तमी तौ सेलबमी मोदेशो मपाइब।
- 9 बोरपाइक्ब ओरुती इक्का खोइ सुप्शोमी शोब्ले नेल्ल बोरपाइक्ब, दे रुपीने। १कोरिन्थी ५:६
- 10 गे आं शेंशो लोत्र थमा सुइक्चा मप्रोंडनीनी, दे प्रभु रे तुइक्ताकड। सु सुमी इन कली दूली लोत्र शेंशा, इन थुं क्याल्पाइशशा हिरदमे, मेको आन कली परमप्रभु यावेमी सजाइ गेब, दे यो तुइक्ताकड। गलाती १:७
- 11 आं लोकबपुकी, नेनीन, गो खोइक्तीक चिनु खोइक्चा माल्ब, दे शेंथ गाक्शो नड हना, खेदा पा श्येत गेचा मपुंडसीड वा। गोमी येसु खीस्त इं पा डा बेक्त, दे थमा सुतीन, दे शेंना शेंन गाक्शो नड। मेको शेंतीक आ परबम आन थुं मनुथु श्येत गेतीमी। १कोरिन्थी १५:३०; गलाती ६:१२; १कोरिन्थी १:२३
- 12 इन थुं क्याल्पाइक्बपुकीमी आंम आन रांमी चिनु खोइदमेनु, खसी पशो दुम्मल, देंनुड।

परमप्रभु आ सोक्त नु मुर आ थुं

- 13 आं लोकबपुकी, प्रभुमी रिती थिती पचा प्रोंडपाइक्तीकी, दे गेनायो मप्रेंदीने। मोपा ब्रोंडशा यो इन दला दाक्स मनपे। तन्न दाक्मुशा, वारच पमुशा बाक्कीने। १पत्रुस २:१६; २पत्रुस २:१९
- 14 “आंम इ कली दाक्शो खोदेशो पा, इ नेक्था बाक्ब आन कली यो दाक्तो” देशो लोत्रमी परमप्रभु यावे आ अरेशो लोत्र नेल्ल बाक्ब। लेवी १९:१८
- 15 गेपुकी कुचुम जिशा क्राइक्मुशो खोदेशो पा जीतीनी हना, खतम दुम्नीकी, दे तुइक्तीन। याकूब ४:२
- 16 लोत्र थोक्शा, का निकशी नु तेम्शा शेंननी, परमप्रभु यावे आ सोक्त रे पा ब्रोंडशा गेय पने। मो पाइतीनी हना ला, इन दला दाक्स मपाइनीनी, इन थुंमी मिम्शा मरिम्शो मपाइनीनी।
- 17 मुर आ थुंमी मिम्शो पचा नु परमप्रभु यावे आ सोक्तीम ब्रीशो थुं आ मिम्शो पचा मगारब। रिम्शो पय देंतीनी हना यो, रिम्शो पने मचाप्नीनी। रोमी ७:१५, २३
- 18 परमप्रभु यावे आ सोक्तीमी चहिं इन कली गेय पपाइक्त्तु हना, रिम्शो पाइनीनी, अरेशो लोत्र मटीब यो मदुम्नीनी।
- 19 आन दला दाक्स पा मुर आ थुंमी मिम्शो पाइबपुकीमी दोदेशो गेय पाइनीम देशा हना, तेल्लेम पाइनीमी, ग्रान्रा दिचा डा गेय पाइनीमी, हेंथे गाक्नीमी, १कोरिन्थी ६:९-१०
- 20 मूर्ति पूजा पाइनीमी, मन्तर तन्तर पाइनीमी, जिचा पोक्नीमी, थुं खाइक्पाइक्नीमी, रुश पाइनीमी, शुश चुरनीमी, आंम कली ला मिम्नीमी, गाइशशा बाक्नीमी, दुशा गारशा बाक्ब आन कली फ्रानीमी,

21 गेहे पाइनीमी, तूशा दुक्शा हेंथे पाइनीमी, शुश जाइनीमी। मारेइ मारेइ मरिम्शो पशा गाक्नीम। साइ गोमी मोदेशो गेय पाइबपुकी परमप्रभु यावे आ राज्य ओवचा मताइनीम, दे शेंताक्नी। मुल लेंशा मिम्पाइक्तन्नी। एफिसी ५:५; प्रकाश २२:१५

22 परमप्रभु यावे आ सोक्तीमी ब्रीशो थुं पाइशशोपुकीमी परमप्रभु यावे आ सोक्तर रे पा दोदेशो पाइनीम देशा हना, दाक्मुइनीमी, ग्येरीनीमी, थुं नाइक्नीमी, शुश फाल्नीमी, रिम्शो पाइनीमी, शिशी पाइनीमी, कबल खाप्नीमी,

23 ब्रेम्शो दुम्नीमी नु आंम कली चलेस जोक्नीमी। मोदेशो पाइब मुर कली परमप्रभु यावे आ अरेशो लोत्रमी मारेइ मपाइब। १तिमोथी १:९

24 सु ख्रीस्त येसु आ मुर दुम्शो बाक्नीमी, मेकोपुकीमी आंम रां डा दला दाक्स येसु ख्रीस्त खोदेशो पा शीम क्याइक्ने थुम्शो बाक्नीमी। रोमी ६:६

25 गो परमप्रभु यावे आ सोक्तीमी ब्रोंइतय हना, इं गेय यो परमप्रभु यावे आ सोक्तीमीन पय। रोमी ८:४

26 मोपतीके ठेयब मसेल्सीय, मगाइक्मुय अरु आन कली रिम्शो दुम्शो तशा गेहे मपय। फिलिप्पी २:३

## 6

दाक्मुशा, रिम्शो गेय पा बाक्व

1 आं लोकबपुकी, सुमी आ थुंमी मिम्शा, दला दाक्स पा प्रभु आ देशो मटिथु मरिम्शो दुम्मे, गे मेको कली परमप्रभु यावे आ सोक्तीमी ब्रीशो थुं पाइशशोपुकीमी, ठेयब मलेत्थु, रिम्शो लोत्र पा, आ थुं परमप्रभु यावे गे लेप्पतीने। मो पनीनु, थुं थाम्चा मपुंडसेक्ल, दे होस पा बाक्कीन। मती १८:१५; याकूब ५:१९

2 कामी अर्को कली वारच पने। मोपा गे ख्रीस्त आ अरेशो लोत्र खाप्नीमी। २कोरिन्थी ११:२९

3 सुइ ठेयब मसुंडसेक्ल। मजोक्थु यो जोक्ब तुइक्ब नड, दे ठेयब लेप्बमी आंम कली जोल पांडसीब।

4 परमप्रभु यावे आ सोक्तीम गेय पडा कों, आंम दला दाक्स पडा कों, दे का का पा मिम्शा तुइक्तीने। मिनु ला गे “गो रिम्शो पाता” देने चाप्नीनी। २कोरिन्थी १३:५

5 मारदे हना नेल्लेमी आंम गेय आंमा पचा माल्ब। रोमी १४:१२

6 ख्रीस्त आ लोत्र शेंचा पुंडसीबमी शेंब कली आ नु बाक्शो रिम्शो थोक्शा योक्शा गेवल। १कोरिन्थी ९:१४

7 परमप्रभु यावे कली कोंइखु पा जोल पचा मदुम्ब। परमप्रभु यावेमी नेल्ल तुइशशो बाक्ब। मोपतीके दूली ममिम्तीने। मुरपुकीमी मार शोक्वामे, मेको रूप्नीम। येरमीया २१:१४

8 आंम आन थुं डा मिम्शो गेय पाम्तेक्म हना, मेको आन गेय मलीथु जाम्शा लाइब। मिनु आ यो जाम्शा लाइनीम। परमप्रभु यावे आ सोक्तीम गेय पाम्तेक्म हना, परमप्रभु यावे आ सोक्तर रे पा गेना हना यो ब्रोंइशा बाक्चा ताइनीम। रोमी ८:१३

9 रिम्शो गेय पचा मदने। मोपा ला गो रूप्ची ना रूप्ने चाप्नीकी। २थिस्सलोनिकी ३:१३

10 सुइ कली रिम्शो पचा ताइतय हना, रिम्शो पय। नेल्ल क्येडा डोंइती थमा सुइक्ब लोकब आन कली वारच पय। २पत्रुस १:७

नोले डा लोत्र

11 ठेयब ठेयब अच्छेर ब्रेक्शो तशा, पावल आ ब्रेक्शो बाक्तर, दे तुइक्नीनी।

12 दूली शेंबपुकीमी खोइक्तीक चिनु खोइक्चा माल्ब देशा, इन कली यहूदी रिती थिती पपाइक्चा माल्नीम। “ख्रीस्त शीम केप्शा कांटी थोक्शा साइक्चा पुंडसाक्व” दे शेंतीक लोत्र आ पर्वम खेदा पचा पुंडसीब, दे तुइक्नीम। मोपतीके खेदा पचा मपुंडसेक्ल, दे दूली लोत्र शेंनीम। गलाती ५:११

13 आंइ यहूदी रिती थिती नेल्ल मपाइनीमी, खोइक्तीक चिनु ला खोइक्नीम। मिनु इन कली खोइक्तीक चिनु खोइशशो तचा दाक्नीम। मोदेशो पशो तशा “आंइ शेंशो पामे बाक्तर” दे आन नें बोरपाइशशा गाक्चा ताइनीम।

14 नें बोरपाइक्चा दा गो यो आं नें बोरपाइशशा गाक्ती। तन्न मुर आन पशो तशा ममाइ। इं प्रभु येसु ख्रीस्त इं पा डा शीम केप्शा कांटी थोक्शा साइक्चा पुंडसीशा, इं पाप क्याम्ताक्व, दे ख्रीस्त आ पशो मिम्शा, आं नें बोरपाइशशा गाक्ती। ख्रीस्त आ गेय डा लाक्शा मारेइ ठेयब ममिम्नुइ। रागी डा मिम्तीक पतीक नेल्ल बेक्शो खोदेशो मिम्ताक्ड। रागीमी यो आं कली बेक्शो खोदेशो मिम्ताक्व। १कोरिन्थी १:३१; १कोरिन्थी २:२

15 खोइक्तीक चिनु खोइक्चा, मखोइक्चा मेको ममिम्तीने। ख्रीस्त येसु नु थुं का दुम्शा, नक मुर दुम्चा चहिं नेल्ल क्येडा ठेयब बाक्ब, दे रूपीने। गलाती ५:६; १कोरिन्थी ७:१९; २कोरिन्थी ५:१७

16 गे सु सु आं देशो लोत्र टिशा पाइनीमी, मेको थुं नाइशशा नु शिशी तशा बाक्चा ताइनीम। मेको ला ममाइ, परमप्रभु यावे कली थमा सुइक्ब, इसाएली, दे नें वोइक्चा पुंडसीनीम। भजन संग्रह १२५:५

17 मुल डा मेरे सुइमी श्येत मगेयीमील। येसु आ नेमी श्येत जशा, तुप्चा, युक्चा पुंडसीशो चिनु आं रांमी शुश बाक्ब। २कोरिन्थी ४:१०

18 आं लोकबपुकी, इं प्रभु येसु ख्रीस्तमी इन कली शिशी पा, आ सोक्तर इन थुंमी लीपदल। आमनेम।



## एफिसी

**ब्रेक्ब मुर:** एको चिठी पावलमी ब्रेक्बो बाक्ब।

**गेना ब्रेक्बो:** एको चिठी नु कलस्सी आन कली चिठी कालेमी ब्रेक्बो बाक्ब। मारदे हना तिखीकसम एको चिठी निक्शी चाक्बो बाक्त। एको चिठी रोम सहर रे ६२ ए. डी. नुप्ची ना कि ६३ ए. डी. गोची ना ब्रेक्बो बाक्त।

**मारदे ब्रेक्बो:** तेड तेड थमा सुइक्बपुकी श्येत जशा, आन योत्रचा पुंडीतीके नु येसु नु बाक्शा परमप्रभु यावे आ डोंइती ठीक दुम्तीके तुइश्शा मिम्चा माल्नीम। एको चिठीम थमा सुइक्ब आन गुम्तीकेम मार पचा नु मार मपचा, दे शेंशो बाक्ब। एको का निक्शी गुम्तीक कली ब्रेक्बो चिठी बाक्त हना यो, अरु क्येडा डोंइती एफिसी डा गुम्तीक डा थमा सुइक्ब कली पढेचा कली चाक्बो बाक्त।

डोंइती डा लोत्र

1 गो पावल नड। ख्रीस्त येसुम आं कली सोइक्ताक्यी। मेको परमप्रभु यावे आ दाक्बो बाक्त। मिनु गो एको चिठी एफिसस सहरम बाक्ब येसु ख्रीस्त कली थमा सुइक्ब, परमप्रभु यावे आ मुर इन कली ब्रेक्ताकनी।

2 इं आफ परमप्रभु यावे नु इं प्रभु येसु ख्रीस्तमी इन कली शिशी पा थुं नाइश्शा बाक्चा गोम्सेक्ल।

परमप्रभु कली ठेयब सेल्शो

3 इं प्रभु येसु ख्रीस्त आ आफ परमप्रभु यावे कली “गे ठेयब बाक्नीनी” देंय। मारदे हना मेकोमी स्वर्गम आ सोक्तीम पतीके इं कली आसीक गोप्तु। मेको नेल्ल ख्रीस्तम बाक्ब।

4 मोपतीके रागी सेल्चा क्येडा डोंइती परमप्रभु यावेमी इं कली योत्रतु। मार कली योत्रतु देंशा हना, गोपुकी परमप्रभु यावे आ मुर दुम्शा, दोस मताइब नु दाक्ब दुम्बल, दे योत्रतु। रोमी ८:२८-३०; एफिसी ५:२७

5 मिनु परमप्रभु यावेमी इं कली दाक्शा “येसु ख्रीस्त कली थमा सुइक्ब दुम्नीम” दे आंम आ तमी तौ सेल्लु। मेकोन परमप्रभु यावे आ दाक्बो बाक्त।

6 मिनु मेकोमी इं कली आ दाक्बो तौ आ पतीक रे मुरुमी मिम्ने मचाप्चा डा शिशीम ठेयब सेल्चा कली आ तमी तौ सेल्लु। मती ३:१७

7 मोपा गोपुकी येसु ख्रीस्त आ हुशेम पतीके माफ तशा ब्रोंइशा बाक्नय। इं हेंथे पशो आ पर्वम माफ ताइनय। दोपा माफ तशा ब्रोंइशा बाक्नय देंशा हना, मुरुमी मिम्ने मचाप्चा डा आ शिशी रे पा माफ ताइनय। कलस्सी १:१४; एफिसी २:७; एफिसी ३:८,१६

8 मिनु मेको आ जोक्तीक तुइक्तीक नेल्लेमी आ शिशी इं तारी मोइश्शो बाक्त। एफिसी ३:३-६,९; रोमी १६:२५; कलस्सी १:२६-२७

9 परमप्रभु यावेमी इं कली डोंइती ख्रीस्त रे आ थुमी खुइश्शा वोइश्शो लोत्र तुइक्पाइक्चा दाक्ताक्ब।

10 मिनु मेको नेल्ल ठीक दुम्मेनु, परमप्रभु यावेमी ख्रीस्त कली रागीमी सोइक्ताक्ब। मोपा रागी नु स्वर्गमी बाक्ब, इसाएली नु अर्को रागी डा मुर नेल्ल आन कली ख्रीस्तमी का सेल्लु। गलाती ४:४

11 परमप्रभु यावेमी ख्रीस्त रे पा आ आल सेल्शा, इं कली योत्रतु। मारदे हना डोंइती रे योत्रनुडमी, दे मिम्शो बाक्माक्त। मेकोन पाप्तु। कलस्सी १:१२

12 गोपुकी डोंइती “ख्रीस्तमी आंइ कली मरिम्शो रे प्रोंइब” दे आस पाइतक। मोपतीके परमप्रभु यावेमी आंइ कली “आ सक्ति ठेयब बाक्ब” दे ब्रोंइचा गेचा कली योत्रतीकी।

13 मिनु गोपुकीमी यो “येसु ख्रीस्तमी पाप रे प्रोंइब” देंशो थमा ग्येरपाइक्ब लोत्र नेंतीनी। ख्रीस्त कली थमा सुइक्तीनी। मिनु परमप्रभु यावेमी डोंइती देंशो खोदेंशो पा आ सोक्तीमी छाप थोक्सीशो बाक्तीनी। एफिसी ४:३०

14 आ सोक्त चहिं गोपुकी परमप्रभु यावे नु बाक्ची मजाक्म सम्म कली परमप्रभु यावे आ तमी तौ दुम्ने थुम्शो नय, दे कोइतीक बाक्ब। मोपतीके “परमप्रभु यावे आ सक्ति ठेयब बाक्ब” देंय।

पावलम पशो प्रार्थना

15 गोपुकी प्रभु येसु कली थमा सुइक्तीनी। अरु थमा सुइक्ब आन कली दाक्ताकनी, दे गो इन पर्वम लोत्र नेता।

16 मोपतीके गो इन कली मिम्शा, परमप्रभु यावे कली “गे एफिसस डा मुर आन कली रिम्शो पाइतीनी” दे ठेयब सेल्शा, लोत्र पना पन बाक्नुड। कलस्सी १:४,९

17 मार लोत्र पना पन बाक्नुड देंशा हना “परमप्रभु यावे, आंइ प्रभु येसु ख्रीस्त आ आफ ननी। गे नेल्ल छेडछेड डा आफ बाक्नीनी। गे एफिसस डा थमा सुइक्ब आन कली येसु ख्रीस्त कली तुइक्तीकेमी रिम्शो गेय पस जोक्तीके नु नोले मार दुम्बा तुइक्तीक सोक्त गेने।

18 गे मेको आन कली मार कली ब्रेश्शो बाक्नीनी, थमा सुइक्ब आन ततीक मार बाक्बा, इन छेडछेड गिश ठेयब बाक्बा, मेको नेल्ल रुप्तीक थुं गेने।

19 मिनु गो थमा सुइक्ब आंइ कली इन ठेयब सक्तिम मार पाइनीनी नु इन गेशो बोल गिश ठेयब बाक्मे, मेको रुप्तीक थुं यो गेने।

20 मेको सक्तिमी ख्रीस्त कली बेक्शो रे सेंशा, स्वर्ग डा इन बाक्तीकेमी इन ग्युरा गे निप्पाइक्तीनी। भजन संग्रह ११०:१

21 मिनू हुकुम पाइब, अधिकार पाइइशो, सक्ति पाइइशो ठेयब दुम्शो नेल्लेमी खीस्त कली प्रभु देंचा माल्नीमी। मेको नेल्ल आन क्येडा ठेयब नें बाकब। मुल ला ममाइ, नोले यो मोदेंशोन बाकब। रोमी ८:३८-३९; फिलिप्पी २:९; कलस्सी २:१०

22 मिनू गेमी मारेइ मारेइ आन कली येसु खीस्त आ खोइलीमी दिम्पाइकतीनी। थमा सुइकबपुकी रां का खोदेंशो सेल्शा, येसु खीस्त कली मेको रां आ पिया सेलतीनी। भजन संग्रह ८:७; मती २८:१८; एफिसी ४:१५

23 मोपा थमा सुइकबपुकी येसु खीस्त आ रां दुम्तेकम। मिनू मेको रां आ पिया येसु खीस्त आमान दुम्शा, मारेइ मारेइ खाप्शो बाकत" दे लोत्र पाइनुड। एफिसी ३:३०; १कोरिन्थी १२:२७; कलस्सी १:१९

## 2

बेकशो रे ब्रोइशो

1 गेपुकी डोंइती बेकशो मुर खोदेंशो बाकतीनी। दोपा मोदेंशो बाकतीनी देंशा हना, मरिम्शो पशा, परमप्रभु यावे कली मटिथु, हेथे गाकशो बाकतीनी। लूका १५:२४,३२; कलस्सी २:१३

2 मिनू रागी डा मुर आन लां खोइकतीनी। मोपा फशेम हुकुम पाइब, सैतान आ देंशो टीब बाकतीनी। मेको आ सोकती परमप्रभु परमप्रभु यावे कली मटीब आन आगाम बाकब। तीतस ३:३; एफिसी ६:१२; यूहन्ना १२:३१

3 मिनू डोंइती गो नेल्ल मोदेंशो रागी डा मुर बाकतय। गेपुकी यो मार दाकतय, मेकोन पाइतय। इं रां नु थुमी मार दाकता, मेकोन पाइतय। मोपतीके गेपुकी यो अरु मुर खोदेंशो पा गाइकब आ आल दुम्तय। १पत्रुस ४:३; कलस्सी ३:६

4 तन्न परमप्रभु यावे शुश शिशी पाइब दुम्तीके इं कली तशा, शिशी पा दाकताकव।

5 मेना गोपुकी मटिथु बेकशो बाकतय हना यो, मेकोमी इं कली खीस्त नु कालेम सेंताकव। मोपा आ शिशी रे गोपुकी ब्रोइशो बाकतय।

6 मिनू परमप्रभु यावेमी इं कली खीस्त येसु नु सेंशा, मेको नु स्वर्गमी काथा बाकपाइइशा, फिलिप्पी ३:२०

7 मुरुमी मिन्ने मचाप्चा डा ठेयब शिशी आंम आ दाकतीकेमी खीस्त येसु रे नोले डा मुर आन कली कोंइचा कली पाप्टु। एफिसी १:७

8 मिनू गेपुकी परमप्रभु यावे आ शिशी तशा, थमा सुइकतीके पाप रे ब्रोइतीनी। मेको इन पतीके ममाइ, परमप्रभु यावेमी मोशा गेशो बाकब। रोमी ३:२३-२४; गलाती २:१६

9 मेको मुरुम पशो ममाइ, मोपतीके सुइ ठेयब लेन्ने मचाप्नीम। रोमी ३:२८; १कोरिन्थी १:२९

10 गोपुकी परमप्रभु यावे रे खीस्त येसु आ पतीकेमी सेल्शो बाकनय। परमप्रभु यावेमी इं कली रिम्शो गेय वोइइशो बाकत। मेको पचा मालनय। तीतस २:१४

खीस्तमी नेल्ल का बाकनीम

11 डोंइती गेपुकी परमप्रभु यावे आ देंशो लोत्र मतुइकब बाकतीनी। मुर आन गुड रे खोइकतीक चिनु खोइइशो, इस्राएलीपुकीमी इन कली "खोइकतीक चिनु मखोइइशो मुर नम" देतेकम। मेको मप्रेदीन। एफिसी ५:८

12 मेना गेपुकी खीस्त रे डोन बाकतीनी। इस्राएल डा मुरपुकी रे यो डोन बाकतीनी। मोपा परमप्रभु यावेमी पशो कबल मतुइकवथु, आस मपाइइशो नु परमप्रभु यावे कली मतुइकब मुर बाकतीनी। रोमी ९:४; १थिस्सलोनिकी ४:१३

13 मुल चहिं गे खीस्त येसु रे डोन बाकबपुकी खीस्त आ हुशेम पतीके मेको आ नेकथा दुम्तीनी।

14 मेको इं कली दुशा बाकचा गेब बाकब। मेकोमी इस्राएली नु अर्को रागी डा थमा सुइकब आन कली का सेल्लु। मिनू मेको आन दातेमी बाकशो दुचा मगेब गारो प्रेशशा, जितिक खेतीक नेल्ल साम्तु। यसैया ९:५; गलाती ३:२८

15 दोपा साम्तु देंशा हना, यहूदी आन कली अरेशो, शेंशो, फुल्लुम मुशा ब्रेकशो लोत्र डा गेय नेल्ल आ रां साइकचा गेशा साम्तु। मिनू मेकोमी जात निक्शी के जात का सेल्शा, नक मुर सेल्लु। मोपा दुशा बाकचा गेप्टु। कलस्सी २:१४

16 येसु खीस्तमी इं कली परमप्रभु यावे नु गारपाइकचा कली शीम कांटी थोकचा पुंइसीशा बेकत। मोपा इस्राएली नु अर्को रागी डा जिचा खेचा साम्शा, निम्फा आस कली परमप्रभु यावे नु गारपाइकवतु।

17 मिनू येसु खीस्त रागीमी जाकशा, डोन बाकब इन कली नु परमप्रभु यावे आ नेकथा बाकब आन कली परमप्रभु यावे नु दोपा दुशा बाकचा, मेको शेंताकव। यसैया ५७:१९

18 मोपा गोपुकी परमप्रभु यावे आ सोकतीम पतीके नेल्ल येसु खीस्त रे पा इं आफ परमप्रभु यावे आ नेकथा जाकदीनय। एफिसी ३:१२

19 मोपतीके गेपुकी मुल रे डोन बाकब अर्को रागी डा मुर मननी। परमप्रभु यावे आ राज्य डा, अरु थमा सुइकबपुकी नु आ खिं डा मुर बाकनीनी। एफिसी ३:६; हिब्रू १२:२२-२३

20 मिनू खीस्त आ सोइइशो नु साइ डा परमप्रभु यावे आ लोत्र पाइबपुकी जग खोदेंशो दुम्तेकम। गेपुकी चहिं मेको तारी सेल्शो खिं खोदेंशो ननी। खीस्त येसु मेको खिं डा डोंइती वोइइशो जग फुल्लु खोदेंशो बाकब। मती १६:१८; यसैया २८:१६; १पत्रुस २:४-६मती १६:१८

21 मेको तारी फुल्लु नेल्ल प्रोत्रसीशा, परमप्रभु यावे आ खिं दुम्चा कली बारना बारन लाइब।

22 मिनू गेपुकी यो परमप्रभु यावे आ सोकतीम पतीके परमप्रभु यावे आ खिं बाकनीनी।

## 3

पावलम अरु आन कली पशो गेय

- 1 मिनु गो पावल अर्को रागी डा मुर इन कली ख्रीस्त येसु आ लोत्र शेंतीके साडलोम पाइक्साकयी। फिलिप्पी १:७, १३
- 2 परमप्रभु यावेमी “अर्को मुर आन कली आं शिशी आ पर्वम शेंदो” दे आं कली गेय पाइब सेलती। गेपुकीम एको लोत्र नेंशो बाकनी माड, दे मिन्मुड। गलाती २:७
- 3 दोपा परमप्रभु यावेमी आ खुइश्शो लोत्र आं कली तुइक्पदा, मोपा डोंइतीन इन कली इचइच्का ब्रेक्ने थुम्शो बाकती। एफिसी १:९-१०; गलाती १:१२
- 4 मिनु गेपुकीमी मेको पढेनीनु, ख्रीस्त आ पर्वम खुइश्शो लोत्र डा गेय दोपा पवा, दे आं तुइश्शो लोत्र रुप्ने चाप्नीनी।
- 5 मुल परमप्रभु यावे आ सोक्तीमी येसु ख्रीस्त आ सोइश्शो नु परमप्रभु यावे आ लोत्र पाइब आन कली परमप्रभु यावे आ खुइश्शो मार बाकबा, दे शेंताकडमी। डोंइती डा मुरपुकीमी चहिं मतुइश्शो बाक्तेक्म। कलस्सी १:२६
- 6 मिनु मेको खुइश्शो लोत्र मार बाकब देशा हना, अर्को रागी डा मुरपुकी यो इसाएली नु खाल का डा दुम्शा, अडस ताइब बाकनीम। मेको नेल्ल रां का नम। ग्येरपाइक्ब लोत्रमी मार देंब देशा हना, ख्रीस्त येसु कली थमा सुइश्शा, मेकोपुकी यो परमप्रभु यावे आ कबल ताइब बाकनीम। एफिसी ३:१३, १८-१९; प्रेरित १५:७-९
- 7 मोपा अर्को रागी डा मुर आन कली ग्येरपाइक्ब लोत्र शेंचा, दे शेंब सेलती। परमप्रभु यावे आ सक्तिम पतीके आ शिशी मोशा गेप्नु।
- 8 गो परमप्रभु यावे आ मुर नेल्ल आन क्येडा आइक्च बाक्नुड। मिनु परमप्रभु यावेमी आ शिशी रे आं कली “अर्को रागी डा मुर आन कली ख्रीस्त आ शिशी गिश ठेयब बाकबा तुइक्पाइक्मी” दे शेंब सेलती। १कोरिन्थी १५:९-१०; गलाती १:१६; एफिसी १:७
- 9 मिनु मारेड मारेड सेल्ब परमप्रभु यावेमी रागी सेल्शो रे खुइश्शा वोइश्शो नेल्ल आन कली तपाइक्चा, दे कोंइब सेलती। एफिसी १:९-१०; रोमी १६:२५-२६; कलस्सी १:१६
- 10 मारदे आं कली मोदेशो सेलती देशा हना, येसु ख्रीस्त कली थमा सुइक्बपुकीमी परमप्रभु यावे आ मिम्शो मार बाकबा, मेको स्वर्गम बाकब हुकुम नु अधिकार पाइब आन कली तुइक्पदमेक्ल, दे आं कली कोंइब सेलती। १पत्रुस १:१२
- 11 मेको परमप्रभु यावे आ गेना हना यो मिम्शो लोत्र बाक्त। मेको मुल इं प्रभु ख्रीस्त येसु रे खाप्शो बाक्त।
- 12 मोपा येसु ख्रीस्त कली थमा सुइक्तीकेमी गोपुकी महिंथु, इं कली दाक्ब, दे तुइश्शा, परमप्रभु यावे आ नेक्था जाक्दीत्लय। रोमी ५:२
- 13 इन पर्वम गो श्येत जशो बाक्नुड। मेको इन कली रिम्शो दुम्ब। मोपतीके आं कली श्येत जशो तशा महिनीन। कलस्सी १:२४
- 14 मोदेशो पा गो इं आफ परमप्रभु यावे आ डोंइती बाप्शा, पोक्च थेक्शा, इन कली मिम्शा पुंइशा बाक्नुड।
- 15 परमप्रभु यावे सरीड नु रागीम बाकब नेल्ल आन आफ बाक्ब।
- 16 मिनु गोमी परमप्रभु यावे कली “इन शुश छेडछेड नु सक्तिम, एफिसस डा थमा सुइक्ब आन थुं बोल्यो सेलीन। मिनु इन सोक्त आन थुंमी बाक्मेनु, महिंब दुम्नीम। एफिसी १:७; एफिसी ६:१०; २कोरिन्थी ४:१६
- 17 मोपा थमा सुइक्तीके ख्रीस्त मेको आन थुंमी बाक्ब। मिनु ‘येसु ख्रीस्तमी आं कली दाक्ब’ दे शाक्श युक्शो रवा खोदेशो पा इन दाक्तीकेमी खुम्शो मुरपुकी सेलीन। यूहन्ना १४:२३; कलस्सी २:७
- 18 मो दुम्मेनु, मेकोपुकी नु नेल्ल थमा सुइक्बपुकीमी येसु ख्रीस्त आ मुर आन कली दाक्तीके गिश ब्रेम्शो, गिश दुइश्शो, गिश लाइश्शो नु गिश लुकच लशो बाक्मे, मेको नेल्ल रुप्तीक थुं गेने।
- 19 ख्रीस्त आ दाक्तीके गिश ठेयब बाकबा, मेको रुप्ने मचाप्चा डा बाक्त हना यो, मेको आन कली रुप्पतीन। मिनु परमप्रभु यावे, गे दोपा मारेड मारेडमी गाप्शो बाक्नीनी, मोपा मेको आन कली यो इन सक्तिमी प्रिंदीन। कलस्सी २:२-३
- 20 गे नेल्ल आन क्येडा ठेयब सक्ति पाइश्शो बाक्नीनी। मोपतीके इन सक्ति रे आंइ पुंइशो नु मिम्शो क्येडा यो शुश गेने चाप्नीनी।
- 21 मिनु थमा सुइक्ब आंइ दातेमी येसु ख्रीस्त आ नेमी नेल्ल पाला डा मुरपुकीमी इन कली गेना हना यो ठेयब सेल्नीकी, आमैन” दे इन पर्वम पुंइनुड।

## 4

ख्रीस्तमी पपाइश्शो गेय

- 1 गो प्रभु आ पर्वम ग्याइक्चा पुंइसीब, इन कली अरेनुड। गेपुकी परमप्रभु यावे आ ब्रेश्शो दुम्शो बाक्नीनी। मोपतीके परमप्रभु यावे कली शिरशो गेय पने।
- 2 गेपुकी ब्रेम्शो दुम्शा, सुइ नु मचुरथु, रिम्शो पा बाक्कीन। मुर आन कली फाल्शा, मेकोपुकी नु रिम्शो पा दाक्मुने। कलस्सी ३:१२-१३
- 3 मिनु दोपा परमप्रभु यावे आ सोक्तीमी थुं का सेल्बा, मोपा थुं का दुम्शा दुशा बाक्कीन। कलस्सी ३:१५; फिलिप्पी २:२
- 4 दोपा रां नु सोक्त का बाक्नीसी, मोपा थुं का दुमीन। गे नेल्ल इन आस कान बाक्ब। मोपा ब्रेत्चा पुंइसाक्नी। रोमी १:२:५
- 5 मोपा प्रभु का, थमा सुइक्तीक का नु ब्वाक्कुमी खुम्शा गुंइचा यो का ला बाक्ब। १कोरिन्थी ८:६
- 6 मिनु नेल्ल इं आफ परमप्रभु यावे यो का ला बाक्ब। मेको नेल्ल आन क्येडा ठेयब बाक्ब। नेल्ल पतीकेमी नु नेल्ल आन आगाम बाक्ब। १कोरिन्थी १२:६
- 7 इं कली नेल्ल शिशी गेशो बाक्ब। मेको ख्रीस्तमी “आं गेय पचा कली गिश माल्बा” दे मो गेशो बाक्ब। रोमी १२:३-६; १कोरिन्थी १२:१

8 मिनू मार ब्रेकशो बाकत देंशा हना “मेको इर परमप्रभु यावे आ बाकतीक लमेनु, चोक्सीशो शुश आन कली लाइक्तु। मिनू मुर आन कली गेय पतीक सक्ति गेप्टु” दे ब्रेकशो बाकब। भजन संग्रह ६८:१९; कलस्सी २:१५

9 मिनू इर लचा देशो, मार रुम्सीब देंशा हना, मेको डोंडती रागी आगा तोंडसीशो बाकब, दे रुम्सीब। यूहन्ना ३:१३

10 मिनू मेको रागी आगा तोंडसीब सरीड क्येडा ता लाइब यो बाकब। मोपा मेकोमी मारेड मारेड खाप्टु।

11 मिनू येसु खीस्तम मुर आन कली गेशो गेय मार बाकब देंशा हना, का निक्शी आ सोइशो दुम्नीम, का निक्शी परमप्रभु यावे आ लोत्र पाइब दुम्नीम, का निक्शी ग्येरपाइकब लोत्र नेंपाइकब दुम्नीम, का निक्शी थमा सुइकब आन कली कोत्रब नु शेंब दुम्नीम। १कोरिन्थी १२:२८; प्रेरित २१:८

12 मेको गेय मार कली बाकब देंशा हना, परमप्रभु यावे आ मुर आन थमा सुइकतीके बारपाइकचा कली बाकब। थमा सुइकब आन युम्तीक, खीस्त आ रां दुम्शा, मेकेर डा मुर बोल्यो सेल्चा कली गेशो गेय बाकब। १कोरिन्थी १४:२६; १पत्रुस २:५

13 मोपा गो नेल्ल थमा सुइशशा, का दुम्तीके परमप्रभु यावे आ तौ कली तुइकब दुम्नय। मिनू मोदेशो पा गोपुकी आइकच आल ममाड, कोल्शा चोक्शो मुर दुम्शा, खीस्त दोदेशो बाकमे, मोदेशो दुम्नय।

14 गोपुकीम आल खोदेशो पा मुर आन शेंशो हेंथे लोत्र थमा सुइकचा मदुम्नय। दूली शेंबपुकीमी निप्स खाप्शा, मुर आन कली जोल पा फश लोत्र शेंशा, दूली लां खोइकपाइक्नीम। १कोरिन्थी १४:२०; हिब्रू १३:९; याकूब १:६

15 गोपुकी चहिं मुर आन कली दाक्शा, थमा शेंतीक लोत्र शेंशा, मारेड मारेडमी इं पिया खीस्त खोदेशो दुम्नय। एफिसी १:२२; एफिसी ५:२३; कलस्सी १:१८

16 मोपा येसु खीस्त पिया दुम्तीके रां नेल्ल का खोदेशो पा गारपाइकब। थमा सुइकबपुकीमी ठीक गेय पाम्तेकम हना, मेको रां बारना बारन लशा, थमा सुइकबपुकी दाकमुइनीम। कलस्सी २:१९

माइत नु नक मुर

17 परमप्रभु यावे कली मतुइकब मुरपुकी जाम्शा लाइब गेय ला मिम्शा पाइनीम। मिनू गोपुकी मुल रे मेको आन खोदेशो मपने, दे प्रभु आ नेंमी इन कली रिम्शो पा अरेनुड। रोमी १:२१-२४

18 मेको आन थुं फुल्लु खोदेशो पा खकटा दुम्तीके परमप्रभु यावे कली मतुइकब बाकतेकम। मोपतीके मेकोपुकी छिडछिडमी बाकशो खोदेशो पा परमप्रभु यावे कली रुम्मे मचाप्नीम। मिनू मोपा परमप्रभु यावे रे डोन बाक्नीम। एफिसी २:१२

19 मेकोपुकी रिम्शो मुर दुम्शा बाकचा ताइशशा, आन दला दाक्स पा, ग्रान्रा दिचा डा गेय नेल्ल शुश दाक्नीम।

20 गोपुकी चहिं खीस्त कली तुइशशा, मोदेशो मशेंसीनी।

21 थमा पा येसु खीस्त आ पबंम लोत्र नेंतीनी। मिनू येसु आ थमा लोत्र तुइशशो बाक्तीनी।

22 मोपतीके इन डोंडती डा ग्रान्रा दिचा डा दला दाक्स पाइब माइत थुं डा मुर दुम्शा बाकचा ताइक्तीने। मारदे हना मेकोम इन कली खतम सेल्ब। कलस्सी ३:९-१०; रोमी ८:१३; गलाती ६:८

23 मिनू इन थुंमी बाकशो माइत सोकत नक सेल्चा गेने। रोमी १२:२

24 परमप्रभु यावे आ थुं खोदेशो पा थमा पा ठीक पतीकेमी परमप्रभु यावे आ मुर दुम्शा बाक्कीन। उत्पत्ती १:२६-२७

नक मुहमी पचा माल्शो गेय

25 मारदे हना गो नेल्ल रां का नय, मुर आन कली जोल पचा ताइक्तीने। थमा लोत्र ला पने। जकरिया ८:१६

26 गाइक्ताक्नी हना, पाप मपने। मिनू नां रिक्चा क्येडा डोंडती इन गाइक्चा थुमीने। भजन संग्रह ४:४; याकूब १:१९-२०

27 मोपा सैतान कली गेय पचा मगेने।

28 खुइ पाइबमी लेंशा खुइ मपथु, ठीक गेय पचा माल्ब। मिनू मेकोमी रिम्शो गेय पवानु, श्येत जाइब आन कली यो वारच पने चाप्ब। प्रस्थान २०:१५; १थिस्सलोनिकी ४:११

29 गोपुकी नना ओल लोत्र काइ मपने। मुर आन कली रिम्शो दुम्ब नु गारचा डा लोत्र ला पने। मुरपुकीमी इन रिम्शो लोत्र नेन्मेनु, परमप्रभु यावे आ शिशि रुम्मेकल। एफिसी ५:४; कलस्सी ४:६

30 परमप्रभु यावे आ सोकत कली थुं मखाइकपतीन। मारदे हना गोपुकी परमप्रभु यावे आ बाक्तीके मजाक्दीन्नी सम्म परमप्रभु यावे आ सोक्तीमी छाप थोक्सीशो बाक्नीनी। यसेया ६३:१०; एफिसी १:१३-१४

31 मिनू ईख कुरचा, चुरचा, गाइक्चा, ग्रीचा, मरिम्शो लोत्र पचा नु मरिम्शो पचा नेल्ल ताइक्तीने। कलस्सी ३:८

32 मिनू रिम्शो पा कोत्रमुने। दोपा परमप्रभु यावेमी खीस्त मिम्शा, इन कली माफ गेवा, मोपा गोपुकी यो माफ गेमुने। मत्ती ६:१४; मत्ती १८:२२-३५; कलस्सी ३:१३

## 5

छेडछेडम ब्रोंडशो मुर

1 गोपुकी परमप्रभु यावे आ दाक्शो तमी तौ दुम्तीके मेकोमी दोदेशो पवा, मोदेशो पने। लुका ६:३६

2 मिनू येसु खीस्तमी इं कली दाक्शो खोदेशो पा दाकमुने। मेकोमी दोपा दाक्ताकव देंशा हना, आंम कली ममिम्शु, ब्रोंडशो रिना पाइशशो धूप नु क्योरशा चढेशो खोदेशो पा, इं पाप क्याम्चा कली बेक्शा, परमप्रभु यावे कली जिम्मा गेंसाक्ब।

3 मोपतीके गोपुकी परमप्रभु यावे आ मुर दुम्शा, इन दातेमी तेल्लेम पचा, ग्रान्रा दिचा डा गेय पचा नु शिम पचा आ पबंम लोत्र सम्म यो मपने। मेको परमप्रभु यावे आ मुर आन कली रिम्शो दुम्ब। कलस्सी ३:५

4 गेपुकी मुने दोक्चा डा हेंथे लोत्र नु मूर्ख लोत्र पचा इन कली मगारब। मेको आ पा डा परमप्रभु यावे कली “गे आंइ कली रिम्शो पाइतीनी” देंचा माल्नीनी। एफिसी ४:२९

5 तेल्लेम पाइब, ग्रांया दिचा डा गेय पाइब नु शिम पाइबपुकी ख्रीस्त नु परमप्रभु यावे आ राज्यमी ओव्रचा मताइनीम, दे रिम्शो पा तुडक्चा माल्नीनी। मेको नेल्ल मूर्ति पूजा पचा खोदेंशो बाक्ब। १कोरिन्थी ६:९-१०; प्रकाश २१:८; प्रकाश २२:१५

6 सुइ मुरुमी इन कली फश लोत्र पा, हेंथे लां खोइक्पाइक्चा मगेने। मारदे हना परमप्रभु यावे आ कली मटीब आन कली तशा गाइक्ब। कलस्सी ३:६

7 मिनु गेपुकी मोदेंशो मुर नु वारचुबु मदुमीन।

8 गेपुकी यो डोंइती छिडछिड डा गेय पाइब बाक्तीनी। मुल चहिं प्रभु कली थमा सुइश्शा, छेडछेड डा गेय पाइब दुम्तीनी। मोपतीके गेपुकी छेडछेड डा तमी तौ खोदेंशो दुम्शा बाक्कीन। एफिसी २:१; १पत्रुस २:९; मत्ती ५:१४; यूहन्ना १२:३६; १थिस्सलोनिकी ५:५

9 छेडछेड डा फल दोदेंशो बाक्ब देंशा हना, नेल्ल शिशी पतीकेमी, ठीक पतीकेमी नु थमा पतीकेमी बाक्ब। गलाती ५:२२; फिलिप्पी १:११

10 मिनु गेपुकीमी प्रभु आ दाक्शो मार बाक्बा, मेको तुडक्चा माल्नीनी। रोमी १२:२; फिलिप्पी १:१०

11 छिडछिड डा गेयमी काइ फल मथिसीब। मोदेंशो गेय पाइबपुकी नु मबाक्कीन। मेको गेय यो मपने। तन्न मेको गेय मरिम्शो बाक्ब, दे कोइदीन।

12 मिनु मेको आन खुइश्शा पशो आ पर्वम लोत्र पचा यो मुने बाक्ब। रोमी १:२४

13 तन्न मेको खुइश्शा पशो गेय छेडछेडमी तांइसीब।

14 मोपतीके “ए निन्द्रा पाइब, बोक्को। मिनु बेक्शो रे सेंसीशा बाक्को। मो पवीनु, ख्रीस्तमी इ कली आ छेडछेड गेब” देंशो बाक्ब। यूहन्ना ३:२०-२१; रोमी १३:११; यसेया ६०:१; यूहन्ना ८:१२

15 मोपतीके होस पा बाक्कीन। मतुइक्ब ममाइ, तुइक्ब मुर दुम्शा बाक्कीन। मत्ती १०:१६; कलस्सी ४:५

16 मुरपुकीमी मरिम्शो गेय पना पन बाक्तेक्म हना यो, गेपुकीमी नेल्ल नाक्त रिम्शो गेय पने।

17 मोपतीके गेपुकी मूर्ख मदुमीन, प्रभु आ दाक्शो मार बाक्मे मेको रूपीन।

18 राकसी शांबुमी मदुक्कीन। मारदे हना दुक्ब मुरपुकी ग्येत्थ मलाइनीम। तन्न गेपुकी परमप्रभु यावे आ सोक्तीम ब्रीशो दुमीन। लूका २१:२४

19 परमप्रभु यावे आ लोत्र डा कुम्सो, परमप्रभु यावे कली ठेयब सेल्ब कुम्सो नु परमप्रभु यावे आ सोक्तीम इन कली शेंशो कुम्सो पने। मोपा इन थुं बार पमुशा, प्रभु कली कुम्सो पना पन बाक्कीन। भजन संग्रह ३३:२-३; कलस्सी ३:१६

20 मिनु गेपुकीमी मार दुम्त हना यो, गेना हना यो ई आफ परमप्रभु यावे कली “गे रिम्शो पाइतीनी” दे प्रभु येसु ख्रीस्त आ नेमी देंचा माल्नीनी। थिस्सलोनिकी ५:१८

थमा सुइक्ब आन कली लोत्र

21 गेपुकी ख्रीस्त कली मान पा हिंशा बिम्मुने। १पत्रुस ५:५

22 गे मीश मुरपुकी, प्रभु कली टिशो खोदेंशो पा आंम वोंइश कली यो टिने। उत्पत्ती ३:१६; तिमोथी २:११-१२; तीतस २:५

23 मारदे हना वोंइश मुर मीश मुर आन पिया बाक्नीम। मिनु ख्रीस्त थमा सुइक्ब आन पिया बाक्ब। थमा सुइक्बपुकी ख्रीस्त आ रां बाक्नीम। मिनु येसु ख्रीस्त थमा सुइक्ब आन कली पाप रे प्रोंइब बाक्ब। १कोरिन्थी ११:३; एफिसी १:२२-२३

24 दोपा थमा सुइक्बपुकीमी ख्रीस्त कली टीनीमी, मोपा मीश मुरपुकीमी आंम वोंइश आ देंशो नेल्ल टिचा माल्नीमी।

25 गे वोंइश मुरपुकी, आंम मीश कली दाक्तीने। दोपा ख्रीस्तमी थमा सुइक्ब आन कली दाक्शा, मेको आन कली पाप रे प्रोंइचा, दे आंम रां जिम्मा गेवा, मोपा वोंइश मुरुमी आंम मीश कली दाक्चा माल्नीमी।

26 मारदे ख्रीस्तमी मो पाप्टु देंशा हना, थमा सुइक्बपुकी परमप्रभु यावे आ डोंइती शिरशो मुर दुम्मल, दे मो पाप्टु। डोंइती ख्रीस्तमी मेको आन कली लोत्र रे पा चिक्शो खोदेंशो पाप्टु। तीतस ३:५; हिब्रू १०:२२

27 मोदेंशो पा थमा सुइश्शा, छेडछेड पाइश्शो मुरपुकी आंम कली वोइश्शो बाक्त। मेकोपुकी मारेइ मलुम्सीशो, मरोम्सीशो, थम दारशो नु परमप्रभु यावे आ मुर दुम्शा, दोस मताइब मुरपुकी बाक्नीमी। २कोरिन्थी ११:२; कलस्सी १:२२

28 मेको खोदेंशो पा वोंइश मुरपुकीमी आंम मीश कली “आंम रां बाक्ब” दे मेको कली दाक्चा माल्नीमी। सु आंम मीश कली दाक्बा, मेकोमी आंम कली यो दाक्ब।

29 सुइमी आंम रां कली खेदा मपाइनीम, थुल्शा रिम्शो पाइनीम। ख्रीस्तमी यो थमा सुइक्ब आन कली मोदेंशो पाइब। एफिसी १:२३

30 मिनु गोपुकी आ रां डा गुड खोइल बाक्नय।

31 मो दुम्तीके वोंइश मुरुमी आ आम आफ आस कली प्रोंइब। मिनु आ मीश नु काथा बाक्ब। मेको निक्शी रां का दुम्नीसी। उत्पत्ती २:२४

32 मेको आ खुइश्शो अर्थ ठेयब बाक्ब। मिनु मार बाक्ब देंशा हना, गो ख्रीस्त नु थमा सुइक्ब आन पर्वम लोत्र पाइनुड।

33 मार दुम्त हना यो, गे नेल्लेमी आंम मीश कली आंम कली दाक्शो खोदेंशो पा दाक्तीन। मीश मुरपुकीमी चहिं आंम वोंइश कली मान पा हिक्चा माल्नीमी।

## 6

- 1 गे आलपुकी, प्रभु कली मिग्शा, इन आम आफ आन देशो टिने। मारदे हना मेको इन कली रिग्शो बाक्ब। मर्कूस ७:१-१३
- 2 मिनु गे इन आम आफ कली मान पने। मेको डोंइती डा आसीक पाइग्शो अरतीक लोत्र बाक्ब। प्रस्थान २०:१२
- 3 मेको आसीक मार बाक्ब देशा हना “गे मो पाइतीनी हना, इन कली रिग्शो दुम्ब। मिनु गे शुशा बर्स ब्रोंइचा ताइनीनी” दे ब्रेक्शो बाक्ब। ब्यवस्था ५:१६
- 4 गे आफपुकी, इन आल आन कली मगाइक्पतीन। तन्न मेको आन कली रिग्शो थुल्शा कोल्पतीन। मिनु मेको आन कली शेंशा, प्रभु सु बाक्बा मेको तुइक्पतीन। ब्यवस्था ६:२०-२५
- 5 गे वाइलीम वाइलपुकी, इन रागी डा होत्रप कली टिने। दोपा टिचा मालनीनी देशा हना, गेपुकी खीस्त कली टिशो खोदेशो पा, मेको आन क्येडा हिंशा खिंखि पा, थुं का पा रिग्शो गेय पने। तिमोथी ६:१२; तीतस २:९-१०; १पत्रुस २:१८
- 6 होत्रपमी इन कली गेय पशो कोत्रतेक्म हना यो, मकोत्रतेक्म हना यो, ठीक पा गेय पने। गेपुकीमी मुर कली ग्येरपाइक्चा ममाइ, खीस्त आ वाइलीम वाइल दुग्शा, इन थुं नेल्लेमी परमप्रभु यावे आ दाक्शो पने।
- 7 मो पनीनु, गेपुकीमी मुर आन कली ममाइ, प्रभु कली रिग्शो थुंमी गेय पाइनीनी।
- 8 मिनु मुरुमी दोपा रिग्शो पाइबा, मेको खोदेशो पा प्रभु रे ताइब, दे तुइक्चा मालनीनी। प्रभुमी वाइलीम वाइल नु ठेयब मुर आन कली खाल का डा पा कोत्रब। २कोरिन्थी ५:१०
- 9 गे होत्रपपुकी, इन वाइलीम वाइल आन कली प्रभुम पशो खोदेशो पा पने। हिंच कोइचा प्रोनीन। मारदे हना मेको आन के नु इन के प्रभु स्वर्गमी बाक्ब। मिनु प्रभुमी मुर नेल्ल आन कली उइक्थ मिम्ब।

परमप्रभु आ गेशो या

- 10 मिनु आं नोले डा लोत्र, प्रभु कली तुइग्शा सक्ति पाइग्शो मुर दुमीन। मोपा प्रभु आ सक्तिमी बोल्यो दुग्शा बाक्कीन। एफिसी ३:१६; १कोरिन्थी १६:१३; २तिमोथी २:१; १यूहन्ना २:१४
- 11 मिनु परमप्रभु यावे आ गेशो या नेल्ल लतीन। सैतानमी आ मरिग्शो थुंमी इन कली खतम सेल्चा माल्तु हना, गेपुकी परमप्रभु यावे आ गेशो यामी ग्रानीनी।
- 12 गोपुकी मुर नु लडाइ मपाइनय। हुकुम पाइबपुकी, अधिकार पाइबपुकी नु रागी कली मुल छिडछिडमी गेय पाइब चोल नु लडाइ पाइनय। मेको स्वर्गम बाक्ब सैतान आ गेय पाइबपुकी बाक्नीम। एफिसी २:२; लूका २२:३१
- 13 मोपतीके परमप्रभु यावे आ गेशो या नेल्ल लतीन। मेकोमी ला मरिग्शो नाक्त ग्राशा राप्ने चाप्नीनी।
- 14 गेपुकी थमा शेंतीकेमी किप्शुर किप्शो खोदेशो पा राप्शा बाक्कीन। मिनु ठीक दुन्तीकेमी पीतल के भोटो फेक्शो खोदेशो पा बाक्कीन। लूका १२:३५; १पत्रुस १:१३; १थिस्सलोनिकी ५:८
- 15 परमप्रभु यावे नु दुपाइक्ब ग्येरपाइक्ब लोत्र पा, जुत्ता मुइग्शो खोदेशो पा बाक्कीन।
- 16 मिनु नेल्ल क्येडा ठेयब या येसु खीस्त कली थमा सुइक्तीके तेक्तीक खोदेशो पा इन डोंइती वोतीन। सैतानमी आप्शो ब्रशो ब्रा कली मेकोमी तेक्ने चाप्नीनी। १पत्रुस ५:९; १यूहन्ना ५:४
- 17 मिनु येसु खीस्तम इन कली पाप रे प्रोंइशो तुइक्तीक पीतल के ताक्की खोदेशो पा गुम्सीने। मिनु परमप्रभु यावे आ लोत्र लतीन। मेको चहिं परमप्रभु यावे आ सोक्त डा तरवार बाक्ब। १थिस्सलोनिकी ५:८; हिब्रू ४:१२
- 18 मिनु गेपुकीमी गेना हना यो परमप्रभु यावे आ सोक्तीमी पतीके परमप्रभु यावे नु लोत्र पशा पुनीन। पुइचा मदथ, परमप्रभु यावे आ मुर नेल्ल आन पबंम पुनीन।
- 19 आं पबंम यो पुनीन। आं कली मिग्शा, मार पुनीन देशा हना, येसु खीस्त आ पबंम डोंइती खुइग्शो ग्येरपाइक्ब लोत्र मुल गो महिंथु, शेंने चबुल, दे पुनीन। कलस्सी ४:३; २थिस्सलोनिकी ३:१; प्रेरित ४:२९
- 20 गो मेको लोत्र शेंचा कली साडलोम फ्रेंशा सोइग्शो मुर दुम्ती। गेपुकीमी आं पबंम “महिंथु शेंदल” दे परमप्रभु यावे कली पुनीने। मोपा महिंथु, लोत्र पचा परमप्रभु यावे आ दाक्शो बाक्ब। २कोरिन्थी ५:२०; प्रेरित २८:३१

नोले डा लोत्र

- 21 मिनु गो दोपा बाक्बा, मार पडा मेको नेल्ल प्रभु आ रिग्शो गेय पाइब, इं दाक्शो थमा सुइक्ब लोकब तिखीकसमी इन कली देंब। प्रेरित २०:४; कलस्सी ४:७-८; २तिमोथी ४:१२; तीतस ३:१२
- 22 गोपुकी दोपा बाक्बा तुइक्पाइक्चा नु इन थुं बारपाइक्चा कली इन बाक्तीके सोइक्ताक्ब।
- 23 मिनु इं आफ परमप्रभु यावे नु प्रभु येसु खीस्तमी इन कली थुं नाइग्शा बाक्चा गेम्सेक्ल।
- 24 सु सुमी इं प्रभु येसु खीस्त कली गेना हना यो दाक्नीमी, मेको नेल्लेमी शिशी तामेक्ल।

## फिलिप्पी

**ब्रेकब मुर:** पावलमी एको चिठी ब्रेकशो बाकब।

**गेना ब्रेकशो:** एको चिठी ६३ ए. डी. नुप्ची ना कि ६४ ए. डी. गोची ना ब्रेकशो मिन्नीम। एको चिठी ब्रेकची ना पावलमी “जेल्लखान रे प्रोंडचा पुंडसीनुड” दे आस पात्तु।

**मार ब्रेकशो:** पावलमी जेल्लखानम यो ग्येरपाइकब लोत्र शेंब। थमा सुइकबपुकीमी श्येत जाम्तेकम हना यो, येसु ख्रीस्त कली मप्रोंडचा। थमा सुइकबपुकीमी दूली शेंब आन पबर्म होस पचा माल्नीम। प्रभु आ पशो मिम्शा, ग्येरसीचा माल्नीम। पावलमी फिलिप्पी आन गुड रे क्येट तात्तु। मेको आ पबर्म “रिम्शो पाइब बाकनीनी” दे ब्रेकशो बाकब।

डोंडती डा लोत्र

1 पावल नु तिमोथी, गो निक्शी ख्रीस्त येसु आ वाडल नस्कु। फिलिप्पी सहरम बाकशो ख्रीस्त येसु कली थमा सुइकब नेल्ल इन कली, थमा सुइकब आन कली कोत्रब नु युम्तीके डा गेय पाइब इन कली चिठी ब्रेक्ताकड। प्रेरित १६:३

2 इं आफ परमप्रभु यावे नु प्रभु येसु ख्रीस्तमी इन कली शिशी पा थुं नाइक्या गेम्सेकल।

पावल आ प्रार्थना

3 गो इन कली मिम्शा, आं परमप्रभु यावे कली “गे रिम्शो पाइतीनी” देंनुड। रोमी १:८; १कोरिन्थी १:४

4 गो परमप्रभु यावे नु लोत्र पडानु, गेना हना यो नेल्ल इन कली मिम्शा, ग्येरशा पाइनुड।

5 डोंडती रे मुल सम्म ग्येरपाइकब लोत्र पचा कली आं कली वारच पाइतीनी।

6 इन आगामी रिम्शो गेय गोडबमी येसु ख्रीस्त आ जाकची ना सम्म थुम्ब, दे तुइकुनुड। फिलिप्पी २:१३; १कोरिन्थी १:८

7 नेल्ल इन पबर्म मोदेशो मिम्चा ठीक बाकब। मारदे हना गो इन कली शुश दाकनुड। आं जेल्लखानमी चोक्या पुंडसीशो, निस्फा पची ना नु ग्येरपाइकब लोत्र शेंची ना गो इन कली मिम्नुड। गो नेल्ल खाल का डा शिशी ताइब बाकनय।

8 ख्रीस्त येसुमी आं कली दाकपाइक्तीके थुं गेतीके गो इन कली युम्चा शुश दाक्ताकड, परमप्रभु यावेमी मेको तुइकब।

9 आं प्रार्थना मार बाकब देंशा हना, इन दाक्या शुश बारशा, रिम्शो नु मरिम्शो मार बाकबा से रुप्ने चाप्नील, दे पुंडशा, परमप्रभु यावे नु लोत्र पचा बाकब। फिलेमोन ६

10 मोपा गे नेल्ल क्येडा रिम्शो मार में, दे तुइश्शा, ख्रीस्त आ नाक्ती पाप मपाइब नु दोस मताइब दुम्नीनी। रोमी १२:२; एफिसी ५:१०; १थिस्सलोनिकी ५:२३

11 गेपुकी येसु ख्रीस्तमी पपाइश्शो ठीक पतीकेमी ब्रीशो बाकतीनी हना, परमप्रभु यावे सक्ति पाइश्शो नु ठेयब बाकब, दे तुइसीब। एफिसी ५:९

पावलमी पशो लोत्र

12 आं लोकबपुकी, आं कली दुम्शो श्येतमी ग्येरपाइकब लोत्र ब्रपाइकुतु। १तिमोथी २:९

13 हुकुम पाइब आ खिं डा मुर नु अरु नेल्लेमी गो ख्रीस्त कली थमा सुइश्शो आ पबर्म जेल्लखानम बाक्ती, दे तुइक्ताकम। फिलिप्पी ४:२२

14 मिनु प्रभु कली थमा सुइकब लोकब शुशेमी आं कली जेल्लखानमी बाकशो तशा, प्रभु कली थमा सुइक्तीक बारपा महिंथु, परमप्रभु यावे आ लोत्र पाइनीम।

15 का निक्शीमी गेहे पशा, नेल्ल क्येडा ठेयब नड, दे ख्रीस्त आ पबर्म शेंनीम। का निक्शीमी चहिं रिम्शो थुं पा शेंनीम।

16 मोपा शेंबपुकीमी आं कली दाक्या, गो परमप्रभु यावे आ ग्येरपाइकब लोत्र पतीके एकेर बाकनुड, दे तुइक्नीम।

17 गेहे पा ख्रीस्त आ लोत्र शेंबपुकीम चहिं “गो नेल्ल क्येडा ठेयब नड” दे रिम्शो थुं मपथु, आं कली जेल्लखानम श्येत तेम्चा मिन्नीम।

18 मिनु मार? ठेयब लेश्शा हना यो, थमा पा हना यो, ख्रीस्त आ पबर्म लोत्र पाम्तेकम हना, गो शुश ग्येरसीनुड। फिलिप्पी २:१७-१८

19 इन परमप्रभु यावे कली पुंडतीके नु येसु ख्रीस्त आ सोक्तीम आं कली वारच पतीके गो एको श्येत रे ब्रोंडनुड, दे तुइकुनुड। २कोरिन्थी १:११

20 गो काइ मुने मदोक्नुड, दे तुइश्शा, आस पाइनुड। मिनु काइ महिंब दुम्शा, ब्रोंडती हना यो, साइक्तीमी हना यो, मुरपुकीमी गेना हना यो ख्रीस्त कली ठेयब सेल्मेकल, देंनुड।

21 मारदे हना ब्रोंडडानु, ख्रीस्त कली ब्रोंडनुड, साइक्तीमी हना यो, ग्रानुड। गलाती २:२०

22 गो ब्रोंडती हना, ख्रीस्त आ गेय पाइनुड। तन्न तेको गेय योत्रनुडा मेको मतुइकुनुड।

23 गो निम्फा आस दातेमी बाकनुड। मेकेर रे लशा, ख्रीस्त नु बाक्या आं दाक्यो बाकब। मारदे हना मेको शुश रिम्शो बाकब। २कोरिन्थी ५:८

24 गो ब्रोंडती हना, इन कली शुश रिम्शो दुम्ब।

25 मोदेंब दुम्ब, दे तुइश्शा, इन थमा सुइक्या नु ग्येरपाइक्तीके बारल, दे गो गेपुकी नु बाकनुड, दे तुइकुनुड। फिलिप्पी २:२४

26 मारदे हना गो इन कली लेंशा ग्रुम्थ जाकनुड, गेपुकीमी आं जाक्यो आ पबर्म ख्रीस्त येसु कली ठेयब सेल्नीनी।

थमा सुइक्ब श्येत जाइनीम

27 गो इन नाक्त किंत किंत डा पतीकेमी खीस्त आ ग्येरपाइक्ब लोत्र कली शिरशो दुम्शा बाक्कीन। गो गेपुकी नु बाक्ती हना यो, मबाक्ती हना यो, इन सोक्त का दुम्शा, इन थुं का दुम्शा, ग्येरपाइक्ब लोत्र डा थमा सुइक्तीके गेय पा वारच पमुने।

28 इन कली श्येत गोब आन कली तशा काड महिनीन। मेकोन मेको आन कली ब्रुतीक चिनु बाक्ब। इन कली चहिं ब्रोंइतीक चिनु दुम्ब। मेको परमप्रभु यावे रे दुम्ब। रथिस्सलोनिकी १:५

29 खीस्त कली थमा सुइक्चा ला इन कली गेशो ममाइ, तन्न मेको आ परबंम श्येत जचा यो गेशो बाक्ब।

30 मुल आं श्येत जशो खोदेशो पा, गेपुकी यो श्येत जाइनीनी। प्रेरित १६:२२

## 2

खीस्त खोदेशो दुमीन

1 खीस्त आ परबंम इन दातेमी थुं बारपाइक्तीके, दाक्शा वारच पाइब, दे थुं नाइक्तीके, थमा सुइश्शा थुं का दुम्तीके, दाक्मुतीके नु शिशी पतीके बाक्तेकम हना,

2 गेपुकी खाल का डा दुम्शा, उइक्थ उइक्थ पा दाक्मुशा, नेल्ल गारशा थुं का दुम्शा, आं कली शुश ग्येरपाइक्कीनी।

3 गेपुकी ठेयब लेशशा “गो ठेयब नड” दे मिम्शा, काइ गेय मपने। ब्रेम्शो थुंमी “मेको मुर आं क्येडा ठेयब बाक्ब” दे मिम्तीन। गलाती ५:२६; रोमी १२:१०

4 गेपुकी का का पा नेल्लेमी आंम दाक्शो ला ममिम्थु, अरु मुर आन दाक्शो “मार बाक्मे” मेको यो मिम्तीन। १कोरिन्थी १०:२४; १कोरिन्थी १३:५

5 खीस्त येसु नु बाक्शो थुं इन दातेमी कोंइदीन।

6 खीस्त येसु परमप्रभु यावे नु उइक्थ दुम्शो बाक्त हना यो “परमप्रभु यावे नु उइक्थ दुम्ती” दे ममिम्थु, यूहन्ना १:१२; यूहन्ना १७:५

7 मेको नेल्ल प्रोंइशा, वाडल खोदेशो दुम्शा, मुर दुम्शा जरमेसाक्ब। यसेया ५३:३; मत्ती २०:२८; २कोरिन्थी ८:९; हिब्रू २:१४,१७

8 मिनु मुर दुम्शा, साइक्चा पुंइसीचा सम्म परमप्रभु यावे कली टिशा, शीम क्याइश्शा साइक्चा पुंइसीशा, आ ब्रेम्शो थुं कोंइताक्ब। लुका १४:११; हिब्रू १२:२; हिब्रू ५:८

9 मोपतीके परमप्रभु यावेमी मेको कली नेल्ल क्येडा ठेयब सेल्शा, आ नें यो अरु आन क्येडा ठेयब सेल्लु। प्रेरित २:३३; एफिसी १:२१; हिब्रू १:३-४

10 येसु आ नें नेशा, स्वर्गम बाक्ब, रागीम नु रागी आगाम बाक्ब नेल्लेमी बाप्शा, पोक्च थेक्चा माल्नीम। यसेया ४५:२३; यूहन्ना ५:२३; प्रकाश ५:१२-१३

11 मिनु नेल्लेमी “येसु खीस्त प्रभु बाक्ब” दे परमप्रभु यावे, इन आफ कली ठेयब सेल्शा माल्नीम। प्रकाश ५:१३

परमप्रभु यावे आ आलपुकी

12 आं दाक्शो लोकबपुकी, गेपुकीमी नेल्ल नाक्त आं देशो टीतीनी। गो बाक्कानु ला ममाइ, गो मबाक्कानु यो मेको क्येडा शुश रिम्शो पने। गेपुकी हिंशा खिंखि पा इन पाप रे ब्रोंइतीक गेय पने। १पत्रुस १:१७

13 मारदे हना परमप्रभु यावेमी इन थुंमी गेय पाइब। मार गेय पाइब देशा हना, आ दाक्शो पचा, दे इन कली दाक्ब थुं गेशा, गेय पपाइक्ब। फिलिप्पी १:६

14 गेपुकीमी सुंइच मपथु, दाल्गीर मपथु, गेय पने।

15 मोपा दोस गेचा मपुंइसीब, परमप्रभु यावे आ रिम्शो आल दुम्नीनी। मरिम्शो नु दूली पाइब मुर आन दातेमी स्वर्ग डा छेडछेड खोदेशो दुम्नीनी। फिलिप्पी १:१०; मत्ती ५:१४; एफिसी ५:८-९

16 मोपा ब्रोंइचा गोब लोत्र मप्रोंइब दुम्नीनी। मिनु खीस्त आ जाक्ची ना गो मो मगाक्ड, मो गेय यो मपड, दे ग्येरशा बाक्चा तडल। २कोरिन्थी १:१४; १थिस्सलोनिकी २:१९

17 गो इन थमा सुइक्चा आ परबंम गेय पा, साइक्चा पुंइसाक्की हना यो, ग्येरसीनुड। गे नेल्ल नु ग्येरशा बाक्नुड। २तिमोथी ४:६

18 मोपा गेपुकी यो ग्येरसीने। मिनु गो नेल्ल ग्येरसय। फिलिप्पी ४:४

तिमोथी नु इपाफ्रोडीटस

19 प्रभु येसुमी तिमोथी कली इन कली युम्थ सोइक्चा गेपुतु हना, ब्रा सोइक्नुड। इन परबंम लोत्र नेशा, गो यो ग्येरसीनुड।

20 मारदे हना मेको खोदेशो अरु मबाक्नीम। “गेपुकी दोपा बाक्नी माइ” दे थमा पा शुश मिम्शा, सुर्ता पान्तु। १कोरिन्थी १६:१०

21 नेल्लेमी आंम आंम दाक्शो ला मिम्शा, पना पन बाक्नीमी। येसु खीस्त आ दाक्शा मिम्शो चहिं मपाइनीम। २तिमोथी ४:१०,१६

22 गेपुकीमी तिमोथी कली तुइक्कीनी। दोपा तौमी आ आफ नु गेय पाइब, मोपा मेको गो नु परमप्रभु यावे आ ग्येरपाइक्ब लोत्र शेंथ गाक्त।

23 मोपतीके आं कली मार मार दुम्बा, मेको तुइक्कु नोले गो मेको कली इन बाक्तीक ब्रा सोइक्नुड, दे आस पाता।

24 प्रभुमी आं कली एकेर रे प्रोंइब, दे थमा सुइक्नुड। मिनु गो यो इक्का नाक्त नोले जाक्नुड। फिलिप्पी १:२५



25 इन सोइशो आं कली वारच पाइब आं लोकब इपाफ्रोडीटस कली लेशशा सोइक्नुड। मेकोमी गो नु गेय पाप्नु। गो नु काथा गाकशा, परमप्रभु यावे आ लोव्र शंताकव। फिलिप्पी ४:१८

26 मेकोमी नेल्ल इन कली शुश मिन्ताकव। मारदे हना गेपुकीमी “मेको रोइ पाप्नु” देशो नेंतीनी ने। मोपतीके शुश सुर्ता पाप्नु।

27 इपाफ्रोडीटस थमा पा बेक्चा डा रोइ पाप्नु। तन्न परमप्रभु यावेमी मेको कली शिशी पाइक्नु। मेको कली ला ममाड, आं कली यो शिशी पाइक्ती। मोपतीके गो शुश श्येत मजड।

28 मेको कली इन बाक्तीके सोइक्चा दाक्नुड। गेपुकी मेको कली लेशशा जाक्शो तशा, ग्येरनीनी। मो दुम्मेनु, आं हेल्शो थुं यो सोपी दुम्ब।

29 गेपुकीमी प्रभु आ नेंमी मेको कली रिम्शो पने, ग्येरसीने। मोदेशो मुर कली ठेयब सेलीन। १कोरिन्थी १६:१६

30 मेकोमी खीस्त आ गेय पशा, आंम कली ममिम्थु, इन पा डा आं कली वारच पथ जाक्मेनु, रोइ पा हेरा बेकत।

### 3

पावलम आ पबंम पशो लोव्र

1 आं दाक्शो लोकबपुकी आं नोले डा लोव्र मार बाक्ब देशा हना, प्रभु नु बाक्शा ग्येरसीने। मोदेशो लोव्र गो इन कली ब्रेक्ना ब्रेक्न बाक्ती हना यो, श्येत ममिम्नुड। मेको इन कली बोल्यो दुम्चा कली बाक्ब। फिलिप्पी २:१८; फिलिप्पी ४:४

2 कुचुम खोदेशो मुर आन क्येडा होस पा बाक्कीन। मरिम्शो गेय पाइब आन कली तशा, होस पा बाक्कीन। खोइक्तीक चिनु खोइक्चा माल्ब देंब, आन क्येडा यो होस पा बाक्कीन। प्रकाश २२:१५; गलाती ५:१२

3 मारदे हना गेपुकी थमा खोइक्तीक चिनु डा मुर बाक्नय। गेपुकीमी परमप्रभु यावे आ सोक्त आ पतीकेमी खुम्की पा बाप्शा, परमप्रभु यावे कली गेय पशा, खीस्त येसु आ पतीकेमी ग्येरसय। मुर आ पतीकेमी थमा मसुड्य्य। रोमी २:२९

4 गो मुर आन पतीके कली थमा सुइक्ने चाप्नुड। मुरपुकीमी आन पतीकेमी थमा सुइक्ने चाप्नीमी, दे मिन्नीमी। मोदेंब दुम्त हना, गो यो मेको आन क्येडा शुश चाप्नुड। २कोरिन्थी ११:१८,२२

5 गो ८ नाक्त डा आल बाक्डानु, खोइक्तीक चिनु ताता। गो इसाएली नड। गो बेन्यामीन आ थर डा मुर नड। हिब्रू मुर रे जरमेशो, हिब्रू नड। परमप्रभु यावे आ अरेशो पशा, फरिसी दुम्ती। २तिमोथी १:३; प्रेरित २६:५

6 गो थमा सुइक्ब आन कली खेदा पाता। परमप्रभु यावे आ अरेशो लोव्र टिशा, ठीक पाता, दे मिम्शा, दोस मताइब दुम्ती, देंती। प्रेरित ८:३

7 तन्न गो खीस्त कली तुइशशा, आंम कली ठेयब सेल्सीतीके नेल्ल ग्येरशा प्रोंइता। मती १३:४४-४६

8 थमा पा, गो आं डोंइती डा पशो जाम्शा लाइब बाक्ब, दे तुइक्ताकड। मारदे हना आं प्रभु येसु खीस्त कली तुइक्चा नेल्ल क्येडा ठेयब बाक्ब। मोपतीके मेको आ पबंम आं पशो नेल्ल ताइशशा, ग्रॉग्रा दिचा डा बाक्ब, दे तुइक्ताकड। मारदे हना गो खीस्त नु बाक्ब मुर दुम्ती।

9 मोपा आ मुर दुम्शा, परमप्रभु यावे आ अरेशो लोव्र डा आंम ठीक पतीके मबाक्थु, खीस्त कली थमा सुइक्तीकेमी ठीक दुम्तीके बाक्ब। मेको ठीक दुम्तीके परमप्रभु यावेमी गेशो थमा सुइक्तीके रे ला बाक्ब। रोमी ३:२२

10 आं दाक्शो मार बाक्त देशा हना, गो येसु खीस्त कली तुइक्ने चबुल। आ सेंतीक सक्ति गो नु बाक्ल। दोपा श्येत जशा, साइक्चा पुइसीशो बाक्मे, मोपा गो यो मोदेशो दुम्डल। रोमी ६:३-५; रोमी ८:१७; गलाती ६:१७

11 दुम्ने चाप्ब हना, गो यो बेक्शो रे सेंसीने चबुल, देंती।

पावल आ माल्शो गेय

12 मुल सम्म गो मेको नेल्ल मतड। मिनु ठीक मडुम्ड। तन्न मेको आं के दुम्ल, दे शुश गेय पाइनुड। मारदे हना खीस्त येसुम आं कली आ मुर सेलती। कलस्सी १:२९; १तिमोथी ६:१२; प्रेरित ९:३-६

13 आं लोकबपुकी, मुल सम्म गो नेल्ल मतड। तन्न गो मुल मार पाइनुड देशा हना, आं डोंइती पशो नेल्ल प्रेंशा, मुल पचा माल्शो मार बाक्मे, मेकोन शुश पाइनुड। लूका ९:६२

14 परमप्रभु यावेमी खीस्त येसु आ नेंमी आ बाक्तीके रे इनाम गेचा कली मार देंमे, मेकोन शुश पाइनुड। १कोरिन्थी ९:२४

15 इं दातेमी सु सु रुम्ने चाप्ब बाक्नी, मेकोमी आं खोदेशो पा मिन्तीन। गेपुकीमी आं खोदेशो पा ममिम्ताक्नी हना, परमप्रभु यावेमी इन कली तुइक्पदल।

16 गोपुकीम मार रुब्ब्या, मेकोन पय।

स्वर्ग डा मुर

17 आं दाक्शो लोकबपुकी, गेपुकी आं खोदेशो दुमीने। आंइ खोदेशो पा गेय पाइब आन कली कोव्रशा, मेको आन खोदेशो पने। १कोरिन्थी ११:१

18 गो इन कली का निक्शी मुर आन पबंम लोव्र पाता। मुल आं थुं खाइशशा, डाक्शा लोव्र पाइनुड। मारदे हना मेकोपुकी खीस्त आ जोरी सत्रु दुम्शा, आ बेक्शो आ पबंम मरिड ममिन्नीम। १कोरिन्थी १:२३; गलाती ६:१२

19 नोले मेकोपुकी जाम्शा लाइनीम। आन कोव्रज कली परमप्रभु यावे क्येडा ठेयब बाक्ब, दे मुने पचा डा गेयमी आंम कली ठेयब सेल्सीशा, आन थुमी रागी डा माल्शो ला मिन्नीम। रोमी १६:१८

20 तन्न इं बाक्तीक स्वर्गम बाक्ब। मारदे हना गो स्वर्ग डा मुर नय। मेकेर रे इं पाप रे प्रॉइब प्रभु येसु ख्रीस्त जाक्ब, दे रिमनय। एफिसी २:६; कलस्सी ३:१; हिलू १२:२२; तीतस २:१३

21 मेकोमी इं बेक्चशो रं आ सक्ति पाइशशो रं खोदेशो सेल्ब। मेको आ सक्तिमी नेल्ल आन कली आ डोंइती खुम्की पा बाप्पाइक्ब। १कोरिन्थी १५:४९; २कोरिन्थी ५:१; १यूहन्ना २:३

## 4

थुं का डा दुमीन

1 मोपतीके आं दाक्शो लोकबपुकी, प्रभु कली थमा सुइशशा, खोइल थेक्शा बाक्कीन। गो इन कली दाक्शा शुश मिम्नुड। गेपुकीम आं कली ग्येरपाइशशा, आं ग्रातीक सिरपेच खोदेशो दुम्तीनी। २कोरिन्थी १:१४; १थिस्सलोनिकी २:१९-२०

2 इयोदीया नु सुन्तुके “प्रभु कली थमा सुइशशा थुं का दुमीस” देती।

3 मिनु गो नु गेय पाइब वारच, इ कली “मेको मीश मुर निक्शी आस कली वारच पावो” देती। मारदे हना मेको निक्शीमी गो नु काथ काथा ग्येरपाइक्ब लोत्र शेंतीक गेय पाम्ताक्से। क्लेमेन्त नु अर्को वारच आन कली यो वारच पाम्ताक्से। मेको नेल्ल आन नें ब्रोंइतीक किताबमी ब्रेक्शो बाक्ब। लूका १०:२०

परमप्रभुमी गेशो थुं नाइक्तीक

4 प्रभु नु बाक्शा गेना हना यो ग्येरसीन। गो लेंशा “ग्येरसीने” देनुड। फिलिप्पी ३:१; २कोरिन्थी १३:११; १थिस्सलोनिकी ५:१६

5 इन रिम्शो पतीके मुर नेल्ल आन कली कोंइदीने। प्रभु जाक्चशो बाक्ब। तीतस ३:२

6 सुर्ता मपने। परमप्रभु यावे नु लोत्र पा, इन माल्शो पुंइशा “गे रिम्शो पाइब बाक्नीनी” दे परमप्रभु यावे कली देनीन। मत्ती ६:२५-३४; १पत्रुस ५:७

7 परमप्रभु यावे आ गेशो थुं नाइक्तीके रुन्ने मचाप्पा डा ठेयब बाक्ब। मेको थुं नाइक्तीके इन थुं नु इन मिम्शो ख्रीस्त येसु नु बाक्ब। यूहन्ना १४:२७; कलस्सी ३:१५

8 आं लोकबपुकी, आं नेल्ल क्येडा नोले डा लोत्र मार बाक्ब देशा हना, तेको थमा बाक्बा, तेको शिरशो बाक्बा, तेको ठीक बाक्बा, तेको ग्रांग्रा मदिशो बाक्बा, तेको दाक्चा डा बाक्बा, तेको रिम्शो लोत्र बाक्बा, तेको नेल्ल क्येडा रिम्शो नु दोस गेचा मपुंइसीब बाक्बा, तेको “रिम्शो पाइब” दे माइक्चा पुंइसीब बाक्बा, मेको आ परबंम मिम्तीन।

9 गो इन कली मार शेदु, गे मार रुम्नी, मार नेंनी, आं कली मार पशो तनी, मेकोन पने। मो पाइतीनी हना, इन थुं नाइक्चा गेब परमप्रभु यावे गेपुकी नु बाक्ब।

गेचा नु ताक्चा आ परबंम

10 गो प्रभु नु बाक्शा शुश ग्येरसीनुड। मारदे हना शुश नाक्त नोले गे आं कली लेंशा मिम्ताक्नी। गेपुकीमी आं कली नेल्ल नाक्त थमा पा मिम्शा बाक्तीनी। तन्न डोंइती मारइ सोइक्ने मचाप्शो बाक्तीनी। मुल चहिं सोइक्ताक्यीनी।

11 गो श्येत जचा आ परबंम लोत्र मपाइनुड। मार दुम्त हना यो, ग्येरसीशा बाक्चा, दे शेंसीशो नड। १तिमोथी ६:६

12 पुडग दुम्चा नु शोंप पाइशशो दुम्चा, दोपा बाक्मे, गो मेको निम्फा तुइक्नुड। गो गेना हना यो रूशा बाक्चा नु शोंवल्लु बेक्शा बाक्चा, निम्फा शेंसाक्यी। मोपा शुश बाक्त हना यो, काइ मबाक्त हना यो आं कली ठीक दुम्ब। २कोरिन्थी ६:१०

13 आं कली सक्ति गेब आ नेंमी गो नेल्ल पने चाप्नुड। २कोरिन्थी १२:१०

14 दोदेब दुम्त हना यो, गेपुकीम आं कली वारच पशा रिम्शो पाइतीनी।

15 ग्येरपाइक्ब लोत्र शेंचा डोंइती मासीडोनीया रागी प्रॉइशा लडा नोले, सुइमी आं कली वारच मपामे, गे फिलिप्पीपुकीम ला पाइतीनी। गेपुकीम आं शेंशो ताइतीनी, मिनु इन वारच पशो गो ताता। २कोरिन्थी ११:९

16 थिस्सलोनिकी सहरमी बाक्डानु यो, गे निक्शी खेयप वारच पा क्येट सोइक्ताक्यीनी।

17 इन गेशो क्येट ममिम्नुड, तन्न परमप्रभु यावेमी इन मो पशो तशा, इन कली रिम्शो पाइब। गो मोदेशो तचा दाक्नुड।

18 गो मार मार माल्डा, आं माल्शो क्येडा शुश ताता। इपाफ्रोडीटसमी इन सोइशशो क्येट गेती। मेको ब्रोत्रशो रिना पाइशशो परमप्रभु यावे कली च्देशो खोदेशो बाक्ब। परमप्रभु यावे इन मो पशो तशा ग्येरसाक्ब। फिलिप्पी २:२५

19 मिनु आं परमप्रभु यावेमी इन माल्शो नेल्ल आ स्वर्ग डा बाक्तीक येसु ख्रीस्त आ पतीकर रे शुश गेब।

20 इं आफ परमप्रभु यावे कली गेना हना यो ठेयब सेल्य। आमैन।

नोले डा लोत्र

21 ख्रीस्त येसुमी बाक्शो थमा सुइक्ब नेल्ल आन कली “रिम्शो बाक्कीन” मतीन। गो नु बाक्ब लोकबपुकीमी “रिम्शो बाक्कीन” देतेक्म।

22 सिजर आ खिं डा नु अरु थमा सुइक्ब नेल्लेमी यो इन कली “रिम्शो बाक्कीन” देतेक्म। फिलिप्पी १:१३

23 प्रभु येसु ख्रीस्त आ शिशी गेपुकी नु बाक्ल।

## कलस्सी

**ब्रेक्ब मुर:** एको चिठी पावलमी ब्रेक्शो बाक्ब।

**गेना ब्रेक्शो:** पावल रोम सहरम ग्याडक्चा पुंडसीशा ६२ ए. डी. थुम्ची ना कि ६३ ए. डी. गोची ना ब्रेक्शो बाक्ब।

**मारदे ब्रेक्शो:**

१. येसु ख्रीस्त प्रभु बाक्ब। कलस्सी १:१३-२९

२. थमा सुडक्ब आन युम्तीक खिं दोदेशो दुम्चा माल्ब। कलस्सी २:१-२३

३. थमा सुडक्ब दोपा बाक्चा माल्नीमी नु नोले डा लोव। कलस्सी ३:१-४, ६ नु ४:१८ सम्म

डोंइती डा लोव

1 गो परमप्रभु यावे आ दाक्शो पा, ख्रीस्त येसु आ सोइशशो पावल नड। इं लोकब तिमाथी गो नु बाक्ब।

2 गो कलस्से सहर डा परमप्रभु यावे कली थमा सुडक्ब नु ख्रीस्तमी बाक्शो लोकब इन कली चिठी ब्रेक्ताक्ड। इं आफ परमप्रभु यावेमी इन कली शिशो पा थुं नाइक्चा गेवल।

कलस्सी आन पबंम प्रार्थना

3 गो निक्शीमी इन पबंम प्रार्थना पस्कुनु, इं प्रभु येसु ख्रीस्त आ आफ परमप्रभु यावे कली “गे रिम्शो पाइतीनी” देनस्कु।

4 मारदे हना गेपुकी ख्रीस्त येसु कली थमा सुडक्तीनी। मिनु थमा सुडक्ब नेल्ल आन कली दाक्नीनी, देशो नेंतस्कु।

5 स्वर्गमी इन कली रिम्शो दुम्ब, दे तुडक्ताक्नी। गेपुकीमी डोंइती रे थमा लोव पशो नेंतीनी। मेकोन ग्येरपाइक्ब लोव बाक्ब। १पत्रुस १:३-४

6 इन सहर नु नेल्ल अरु सहर डा मुरपुकीमी यो मेको ग्येरपाइक्ब लोव नेंतेक्म। इन दातेमी दोदेशो पा बारशा लमे, मोदेशो पा रागी नेल्लेमी बारना बारन लत। गेपुकीमी मेको लोव नेंशा, परमप्रभु यावे आ शिशो थमा पा रुपनी नाक्त रेन मेको लोव बारना बारन लत।

7 इपाफ्रास आंस दाक्शो लोकब, गो निक्शी नु गेय पाइब। मेको रिम्शो पा ख्रीस्त आ लोव इन कली शेंब दुम्त। कलस्सी ४:१२; फिलेमोन २३

8 मेकोमी आंस कली गे परमप्रभु यावे आ सोक्तीम पतीके मुर आन कली दाक्नीनी, दे इन पबंम तुडक्पाइक्तस्की।

9 मिनु मेको लोव नेंस्कु रे इन कली मिम्शा, प्रार्थना पना पन बाक्तस्कु। मार प्रार्थना पाइतस्कु देशा हना “कलस्सीपुकीमी इन दाक्शो मार बाक्बा, मेको तुडक्तमेक्ल। परमप्रभु यावे, इन सोक्त डा तुडक्तीके नु रुपतीके शुश तामेक्ल। एफिसी १:१५-१७

10 इन डोंइती शिरशो मुर दुम्मल। आन पशो नेल्लेमी इन कली ग्येरपदमेक्ल। रिम्शो पामेनु, इन कली तुडक्तीके आन थुंमी बारना बारन लल। एफिसी ४:१; फिलिप्पी १:२७

11 इन छेडछेड डा सक्ति खोदेशो पा मेको आन कली सक्ति पाइशशो, बोल्यो सेलीन। मिनु सक्ति पाइशशो बोल्यो दुम्शा, मारेड मारेड फाल्ने चाप्नीम” दे प्रार्थना पाइतस्कु।

12 इं आफ, परमप्रभु यावे कली “गे रिम्शो पाइब बाक्नीनी” देनीन। मारदे हना इन कली थमा सुडक्ब आन छेडछेडमी बाक्चा गेपु। एफिसी १:११; १पत्रुस १:४

13 मेकोमी इं कली छिडछिड डा राज्य डा अधिकार रे गुंइशा, आ दाक्शो तौ आ राज्यमी ओंइताक्व। कलस्सी २:१५

14 मेकोमी इं कली मरिम्शो रे प्रोंइशा, इं पाप क्याम्ताक्व। एफिसी १:७

येसु डोंइती डा बाक्ब

15 सुइमी तने मचाप्शो परमप्रभु यावे खोदेशो येसु ख्रीस्त रागी सेल्चा डोंइती रेन बाक्त। हिबू १:३; प्रकाश ३:१४

16 सरीड नु रागीमी बाक्ब, तांडसीब नु मतांडसीब नेल्ल, पिपपुकी, मान पचा पुंडसीबपुकी, हुकुम पाइबपुकी, अधिकार पाइब नेल्ल नु मार मार सेल्शो बाक्मा, मेको नेल्ल येसु ख्रीस्तमी आंम कली सेल्लु। यूहन्ना १:३, १०; हिबू १:२

17 मोपा मेको नेल्ल आन क्येडा डोंइती डा बाक्ब। मिनु नेल्ल आन कली बाक्चा गेब यो बाक्ब।

18 थमा सुडक्बपुकी रां का बाक्तेक्म हना, येसु ख्रीस्त मेको रां आ पिया बाक्ब। मेको नेल्ल आन क्येडा डोंइती डा दुम्शा, डोंइती बेक्शो रे सेंसीब यो बाक्ब। मोपा नेल्ल आन क्येडा टेयब बाक्ब। एफिसी १:२२; प्रेरित २६:२३; १कोरिन्थी १५:२०; प्रकाश १:५

19 मिनु परमप्रभु यावेमी “आं सक्ति नेल्ल मेको आगामी बाक्शो दाक्नुड” दे ग्येरसाक्व। २कोरिन्थी ५:१०; कलस्सी २:९; यूहन्ना १:१६; एफिसी १:२३

20 परमप्रभु यावेमी येसु ख्रीस्त रेन मारेड मारेड आन कली आ नु गारपाइक्तु। सरीड नु रागीम बाक्शो नेल्ल आन कली, शीम केप्शा कांटी थोकशा साडक्चा पुंडसीशा, आ हुशेमी आ नु गारपाइक्तु। यूहन्ना २:२

परमप्रभु आ नेक्था दुम्पाइशशो

21 डोंइती गेपुकी परमप्रभु यावे क्येडा डोन दुम्शा, इन थुंमी मेको कली ममिम्थु, मरिम्शो पना पन बाक्तीनी। एफिसी २:१२-१३; एफिसी ४:१८; रोमी ५:१०

22 मुल येसु ख्रीस्तमी आ रां साडक्चा गेशा, इन कली परमप्रभु यावे आ मुर दुम्पाइक्तु। मोपा इन कली दोस मताइब, काइ हेंथे मपाइब, परमप्रभु यावे आ मुर सेल्शा, आ डोंइती राप्पाइक्तु। एफिसी ५:२७

23 गेपुकीमी थमा सुइक्ना सुइक्न बाक्शा, नोले मशोंडसीथु खोइल थेक्शा, इन नेंशो ग्येरपाइक्ब लोत्र मप्रोंडथु बाक्तीनी हना, मोदेशोन लीनीनी। मुल मेको ग्येरपाइक्ब लोत्र नेल्ल मुर आन कली नेंपाइश्शो बाक्त। गो पावल, मेको लोत्र शेंब दुम्ती।

पावल आ श्येत नु गेय

24 मुल गो इन परबंम श्येत जाता हना यो, ग्येरसाक्यी। मारदे हना आं रांमी ख्रीस्त आ लीशो श्येत थुम्पाइक्नुड। ख्रीस्त आ लीशो श्येत थमा सुइक्ब आन परबंम बाक्ब। मेकोपुकी ख्रीस्त आ रां बाक्नीम। एफिसी ३:१३; रतिमोथी २:१०

25 परमप्रभु यावे आ पतीकेमी मेको आन कली शेंब दुम्ती। परमप्रभु यावेमी आ लोत्र नेल्ल मेको आन कली शेंतीक गेय गेती। मोपा आ लोत्र खाप्चा कली शेंब सेलती।

26 साइ डोंइती रे परमप्रभु यावे आ मिम्शो खुइश्शो बाक्त। मुल चहिं मेको आ मुर आन कली कोंइशो बाक्त। रोमी १६:२५; एफिसी ३:३-६

27 परमप्रभु यावेमी मेको आन कली “आं डोंइती खुइश्शो लोत्र अर्को रागी डा मुर आन कली गिश रिम्शो, गिश ठेयब बाक्ब” दे तुइक्पाइक्तु। मेको खुइश्शो लोत्र मार बाक्ब देशा हना, ख्रीस्त इन आगामी बाक्ब। मिनु इन कली परमप्रभु यावे आ छेडछेडम बाक्चा गेब आस यो ख्रीस्तम बाक्ब। १तिमोथी १:१

28 गोपुकीमी येसु ख्रीस्त सु बाक्बा, मार पाइबा, दे शेंनीकी। मुर नेल्ल आन कली “होस पा बाक्कीन” दे यो शेंनीकी। मोपा गोपुकीमी मुर आन कली का का पा ख्रीस्त कली थमा पा तुइक्ब सेल्शा, परमप्रभु यावे आ डोंइती राप्पाइक्चा दाक्नीकी।

29 मोपतीके गो बोल पा शुश गेय पाइनुड। येसु ख्रीस्तमी आं कली मोदेशो पा आ सक्तिमी गेय पपाइक्ब।

## 2

दूली शेंब क्येडा होस पने

1 गो इन परबंम, लाओडीसीया सहर डा थमा सुइक्ब आन परबंम नु का निक्शी अरु आं कली गेनायो मताइब मुर आन परबंम गिश श्येत जडा, मेको नेल्ल इन कली तुइक्पाइक्चा दाक्नुड।

2 मेकोपुकी दाक्मुशा आन थुं बारपदमेक्ल। थमा पा रुप्तीके गिश ठेयब बाक्बा, परमप्रभु यावेमी ख्रीस्त आ परबंम खुइश्शो लोत्र मार बाक्बा, मेको नेल्ल रुम्पेक्ल।

3 रुप्तीके तुइक्तीके नेल्ल ख्रीस्त आगाम खुइश्शो बाक्नीम। १कोरिन्थी १:२४,३०

4 मारदे इन कली मो देंती देशा हना, जोल पा शेंब जाक्शा, शुश मिलो शिलो लोत्र पशा, दूली शेंने मचाप्मेक्ल, दे मो देंती। रोमी १६:१८

5 गो इन नेक्था मबाक्ती हना यो, आं थुंमी गेपुकी नु बाक्नुड। इन रिम्शो पशो नु ख्रीस्त कली बोल्यो पा थमा सुइश्शो तशा ग्येरसाक्यी। १कोरिन्थी १४:४०

नेल्ल ख्रीस्तम बाक्ब

6 गेपुकी दोपा डोंइती प्रभु ख्रीस्त येसु कली ओत्रचा गेनी, मोपा मेको नु बाक्कीन।

7 खप आगामी शाक्शा थोक्शो रवा खोदेशो पा, ख्रीस्त आगा डा बोल्यो मुर दुम्शा बाक्कीन। दोपा शेंसीनी, मोपा बोल्यो पा थमा सुइश्शा, परमप्रभु यावे कली “गे रिम्शो पाइतीनी” दे शुश देंना देंन बाक्कीन। एफिसी ३:१७

8 मिनु गेपुकी दूली लोत्र शेंब आन नोले मखोतीन। मेकोपुकीमी इन कली मुर आन मिन्तीके नु फश लोत्र पशा, मुर आन रिती थिती ला शेंनीमी। मेको रागी रागी डा मुर आन थुं डा बाक्ब, ख्रीस्त के ममाइ।

9 मारदे हना परमप्रभु यावे आ सक्ति नेल्ल ख्रीस्तम बाक्ब। यूहन्ना १:१४-१६

10 गेपुकी मेको नु बाक्शा, आ ब्रोंइतीक सक्तिम ब्रीशो मुर दुम्तीनी। मेको नेल्ल हुकुम पाइब नु नेल्ल अधिकार पाइब आन पिया बाक्ब। एफिसी १:२१

11 मेको आ पशोमी खोइक्तीक चिनु पाइश्शो खोदेशो दुम्तीनी। मेको खोइक्तीक चिनु मुरुमी खोइश्शो ममाइ, गेपुकी ख्रीस्त कली थमा सुइश्शा, इन मरिम्शो पशो ताइश्शो इन खोइक्तीक चिनु दुम्त। रोमी २:२९; रोमी ६:५; १पट्रुस ३:२१

12 मिनु गेपुकी ब्वाक्कुम खुम्शा गुंडचा पुंडसीनीनु, मेको नु बेक्शा थिम्शो दुम्तीनी। परमप्रभु यावे आ पतीके कली थमा सुइक्तीके मेको नु बेक्शो रे सेंशो यो बाक्नीनी। रोमी ६:४; कलस्सी ३:१

13 डोंइती गेपुकी मरिम्शो पाइब दुम्शा, खोइक्तीक चिनु इन रांमी मखोइक्थु, बेक्शो मुर खोदेशो बाक्तीनी। परमप्रभु यावेमी इ मरिम्शो पतीके नेल्ल क्याम्शा, इ कली येसु ख्रीस्त नु ब्रोंइपाइक्तु। एफिसी २:१,५

14 नेल्ल गेचा चिक्शो दोस नु सजाइ ब्रेक्शो कागज लाइश्शा, कांटी थोक्शा साइक्तीक शीम वोइक्तु। एफिसी २:१५

15 मेकोमी हुकुम पाइब नु अधिकार पाइब आन कली आन या रोइश्शा फ्रुम्तीमी। मोदेशो पा ग्राशा, नेल्ल आन कली कोंइताक्ब। परमप्रभु यावे येसु ख्रीस्त आ पशो तशा शुश ग्येरसाक्ब। कलस्सी १:१३; एफिसी ४:८

16 मोदेशो दुम्शा इन कली मार मार जचा तूचा दुम्बा, मार मार जचा तूचा मडुम्बा, मार मार चाइ मानेचा, तेको औंसी ठेयब सेल्चा, तेक तेको नाइक्तीक नाक्ती ठेयब सेल्चा देंब मुर आन लोत्र मनेनीन। रोमी १४:१-१२

17 मेको दुम्चा चिक्शो आ वांकु ला बाक्नीम। थमा सुइक्तीक रां चहिं ख्रीस्त के बाक्ब। हिब्रू ८:५; हिब्रू १०:१

18 सुइमी इन कली “मतुइक्ब मुर ननी” देंचा मगेने। मेकोपुकीमी आंम मिम्शो पशो बाक्नीम, स्वर्ग डा गेय पाइब आन कली सेउ पचा मालनीनी, दे शेंनीमी। “गो डोम खोदेशो पा ततीके तुइक्ताक्क” देंनीमी। मेको मुरपुकी मो ठेयब लेशशा बाक्शा, आन मिम्शो ला शेंनीम।

19 मेकोपुकी पिया नु मबाकशो बाक्नीम। मेको पियामी रां कली थुला थुल बाक्मेनु, नाडी नु रुशेम बोइक्पाइश्शा, परमप्रभु यावेमी मेको रां कली कोल्पाइक्ब। एफिसी ४:१५-१६

20 गेपुकी ख्रीस्त नु बेक्तीनी हना, रागी डा थोत्रक नेल्ल इन कली आइक्च बाक्ब। मिनु मारदे गेपुकी रागी डा मुर खोदेशो पा पाइनीनी? मारदे गेपुकी रिती थिती पचा टीनीनी? गलाती ४:९-१०

21 मेकोपुकीमी “मेको थिचा मटुम्ब, थाम्चा मटुम्ब, पचा मटुम्ब” देंनीम।

22 मेको शेंबपुकीमी गेय पना पन जाम्ब थोत्रक आन परबम लोत्र पाइनीम। मेको लोत्र मुर आन मिम्शो लोत्र ला ममाइ डा? मत्ती १५:९

23 मिनु मेको रिती थिती पचा, शुश धर्म पचा नु मुर आन माल्लो मपथु, थमा पा जोक्ब तुइक्ब नु ब्रेम्शो दुम्बु पाइनीम। तन्न मोदेशो पतीकेमी मुर आ मरिम्शो पतीके तेक्ने मचाप्ब। १तिमोथी ४:३; रोमी १३:१४

### 3

माइत नु नक मुर

1 गेपुकी ख्रीस्त नु सेंसीशो बाक्तीनी हना, स्वर्गमी बाक्ब दोपा बाक्मा, मेको मालीन। मेकेर ख्रीस्त परमप्रभु यावे आ ग्युरा गे निश्शो बाक्ब। कलस्सी २:१२

2 इन थुंमी स्वर्गम बाक्ब कली मिम्तीन। रागी डा थोत्रक ममिम्तीन। मत्ती ६:३३

3 मारदे हना गे बेक्तीनी। इन थुं ख्रीस्त नु परमप्रभु यावेमी खुइश्शा वोइश्शो बाक्ब। रोमी ६:२

4 इं कली ब्रोइचा गेब ख्रीस्त गूत हना, गे यो मेको नु परमप्रभु यावे आ छेडछेड डा बाक्तीकेमी गूनीनी। १कोरिन्थी १५:४३

5 मोपतीके इन आगामी बाक्शो माइत रागी डा थुं कली सतीन। रागी डा मुर आन थुंमी मार बाक्ब देशा हना, हेथे पचा, मार मार ग्रान्ना दिचा डा गेय पचा, आंम दला दाक्स पचा, मरिम्शो मिम्तीके नु शिम दुम्तीके बाक्ब। शिम दुम्तीके चहिं मूर्ति पूजा पचा खोदेशो बाक्ब। एफिसी ५:३

6 परमप्रभु यावे मोदेशो पाइब मटीब मुर आन परबम शुश गाइक्ब। एफिसी ५:६

7 गेपुकी यो डोंइती मोदेशो पना पन बाक्तीनी।

8 मुल चहिं मेको नेल्ल ताइक्तीन। गाइक्चा, चुरचा, मरिम्शो पचा, अरु आन परबम मरिम्शो लोत्र पचा, ओल ओल लोत्र पचा ताइक्तीने। एफिसी ४:२९, ३१

9 गेपुकी जोल मपमुने। मारदे हना, गे डोंइती डा पतीक नेल्ल ताइक्ताक्नी। एफिसी ४:२२-२५

10 रिम्शो पाइब नक मुर दुमीन। परमप्रभु यावेमी इन थुं आ थुं खोदेशो पा नक सेलना सेलन बाक्ब। मारदे मो पाइब देशा हना, आंम कली नेल्ल तुइक्पाइक्चा कली मोदेशो पाइब। एफिसी ४:२४; उत्पत्ती १:२६-२७

11 मुल रे ग्रीक नु यहूदी खोइक्तीक चिनु खोइक्पांइसीशो नु मखोइक्पांइसीशो मुरपुकी उइक्थ उइक्थ दुम्तेकम। रागी रागी डा मरुप्चा डा लोत्र पाइबपुकी, ब्वाकी मुरपुकी, वाइलीम वाइलपुकी नु ठेयब मुर उइक्थ उइक्थ दुम्तेकम। ख्रीस्त नेल्ल क्येडा ठेयब बाक्ब। मिनु नेल्ल आन आगामी बाक्ब। गलाती ३:२८

12 गेपुकी परमप्रभु यावे आ योत्रशो, आंम आ दाक्शो मुर दुम्तीनी। मोपतीके शिशी पचा, रिम्शो पमुचा, ब्रेम्शो थुं पाइश्शो, ठेयब मलेत्थु टीब नु फाल्ब मुर दुमीने।

13 का निक्शीमी दोस गेचा पुंडसाकम हना, फाल्मुशा, माफ गेमुशा बाक्कीन। प्रभुमी दोपा इन कली माफ गेवा, मोपा माफ गेमुने। एफिसी ४:२; मत्ती ६:१४; एफिसी ४:३२

14 मेको नेल्ल पा इन नेल्ल क्येडा ठेयब गेय दाक्मुचा बाक्ब। मारदे हना मेकोम नेल्ल इन कली थुं का डा सेलब। रोमी १३:८, १०

15 ख्रीस्त आ थुं इन थुंम नाइश्शा हुकुम पचा गेने। गेपुकी रां का डा दुम्चा कली योत्रसीशो बाक्नीनी। गेपुकीमी प्रभु कली “गे रिम्शो पाइब बाक्नीनी” दे शुश देनीन। फिलिप्पी ४:७; १कोरिन्थी १२:१३, २७; एफिसी ४:३-४

16 ख्रीस्त आ लोत्र खोत ब्रेक्शा वोतीन। गेपुकीमी शुश तुइश्शा, शेंमुशा थुं बारपमुने। परमप्रभु यावे आ लोत्र डा कुम्सो, परमप्रभु यावे कली “गे ठेयब बाक्नीनी” दे पशो कुम्सो नु परमप्रभु यावे आ सोक्तीमी इन कली शेंशो कुम्सोमी “गे रिम्शो पाइब बाक्नीनी” दे इन थुंमी परमप्रभु यावे कली कुम्सो पने। एफिसी ५:१९

17 मार मार लोत्रपुकी, गेयपुकी, मारेइ मारेइ पनीनु, नेल्ल प्रभु येसु आ नेंमी पने। इं आफ परमप्रभु यावे कली “गे रिम्शो पाइतीनी” दे येसु आ नेंमी देनीन। १कोरिन्थी १०:३१

थमा सुइक्ब दोपा बाक्चा

18 गे मीश मुरपुकी, आंम वोंइश आ देशो लोत्र टिने। मो पाइतीनी हना, प्रभु नु गारशो मुर दुम्तीनी। १पत्रुस ३:७

19 गे वोंइश मुरपुकी, आंम मीश कली दाक्शा, काइ श्येत मगेने।

20 गे आलपुकी, इन आंम आफ कली नेल्लेम टिने। मो पाइतीनी हना, प्रभु ग्येरब।

21 गे आल आन आफपुकी यो, इन आल आन कली रिम्शो पने। काइ श्येत मगेने। श्येत गेतीनी हना, आन थुं जिक्ब।

22 वाइलीम वाइलपुकी, इन ठेयब मुरुमी मार मार देंनीमी, मेको नेल्ल टिचा माल्नीनी। इन ठेयब मुरुमी कोत्रतेकम हना यो, मकोत्रतेकम हना यो, थुं का पशा, प्रभु कली मान पा हिनीन।

23 इन गेय मार बाक्त हना यो, इन थुं नेल्लेमी मुर आन कली ममाइ, प्रभु कली गेय पने।

24 गे प्रभु आ गुड रे इनाम ताइब बाकनीनी, दे तुइकनीनी। मेकोन मिम्ना मिम्न गेय पने। गेपुकी प्रभु खीस्त कली गेय पाइब बाकनीनी।

25 मरिम्शो पाइबपुकीम मरिम्शो पतीके कुल मकोव्रथु निसाफ पचा पुंडसीनीम। रोमी २:११

#### 4

1 गे ठेयब मुरपुकी, इन के यो ठेयब होव्रप का स्वर्गम बाकब, दे तुइश्शा, इन वाइलीम वाइल आन कली ठीक पा आन माल्शो थोव्रक गेने। लेवी २५:४३, ५३

प्रार्थना पचा मप्रोंडचा

2 गेपुकीमी प्रार्थना पचा मप्रोंडचा, पना पन बाककीन। परमप्रभु यावे कली “गे रिम्शो पाइब बाकनीनी” देंचा मप्रेंदीन। रोमी १२:१२; १थिस्सलोनिकी ५:१७

3 गेपुकीमी आंड कली यो मिम्शा प्रार्थना पने। परमप्रभु यावेमी आंड कली खीस्त आ खुइश्शो लोव्र शुश मुर आन डोंडती शेने चाप्मेक्ल, दे पुनीन। मेको लोव्र शेंतीके गो ग्याइक्चा पुंडसाक्यी। रोमी १५:३०; एफिसी ६:१९; २थिस्सलोनिकी ३:१; १कोरिन्थी १६:९; कलस्सी १:२६-२७

4 रिम्शो रुप्चा डा लोव्र पने चाप्मेक्ल, दे यो पुनीन।

5 गेपुकी थमा मसुइक्ब आन डोंडती रिम्शो जोक्शा तुइश्शा गेय पने। लोव्र पचा तनीनु, रिम्शो पा लोव्र पने। एफिसी ५:१५-१६; १थिस्सलोनिकी ४:१२

6 इन पशो लोव्र हिक्सी डाम्शो खोदेशो दुम्ल। इन कली हिल्लो पाइब नेल्ल आन कली दोपा लोव्र लेत्चा, दे तुइक्चा माल्नीनी। मर्कूस ९:५०; एफिसी ४:२९

नोले डा लोव्र

7 आं पर्वमी मार मार दुम्मे, मेको नेल्ल तिखीकसमी इन कली देंब। मेको इं दाकशो लोक्ब बाकब। दीगो पा गेय पाइब नु आं खोदेशो प्रभु आ वाइल बाकब।

8 गोपुकी दोपा बाकनीकी, दे इन कली शोव्रचा नु इन थुं बारपाइक्चा कली मेको कली इन बाक्तीके सोइक्ताकड। एफिसी ६:२१-२२

9 इं दाकशो नु रिम्शो पाइब लोक्ब, ओनेसीमस मेको नु जाक्ब। मेको इन मुरुन बाकब। एक मार मार दुम्मे, मेको निक्शीमी इन कली देंनीसी। फिलेमोन १०

10 गो नु ग्याइक्चा पुंडसीब वारच अरीस्तारकसमी इन कली “रिम्शो बाक्कीन” दे आं कली ब्रेक्पाइक्ती। बारनाबास आ लोक्ब मर्कूसमी यो इन कली “रिम्शो बाक्कीन” देंत। मेको जाक्मेनु, रिम्शो पा बाक्चा गेने। मेको आ पर्वम इन कली डोंडती तुइक्पाइक्तन्नी। प्रेरित १९:२९; प्रेरित २७:२; प्रेरित १२:१२, २५

11 येसु माइश्शो याइनी नें पाइश्शो युस्तसमी यो इन कली “रिम्शो बाक्कीन” देंत। परमप्रभु यावे आ राज्य डा गेय पाइब आं वारचपुकी मेको सां ला खोइक्तीक चिनु पाइश्शो यहूदी बाक्नीम। मेकोपुकीमी आं कली वारच पाइश्शा, आं थुं नाइक्चा गेतीमी।

12 खीस्त येसु आ गेय पाइब इन मुर इपाफ्रासमी इन कली “रिम्शो बाक्कीन” देंत। मेकोमी इन कली मिम्शा, परमप्रभु यावे कली “कलस्सी आन कली रुप्तीक थुं गेशा, इन दाकशो नेल्ल तुइक्तमेक्ल” दे पुंडना पुंडन बाक्ब। कलस्सी १:७; फिलेमोन २३

13 इन कली, लाओडीसीया नु हिरापोलीस डा थमा सुइक्ब आन कली शुश गेय पाप्नु, दे गो इन कली तुइक्पाइक्ता। प्रकाश ११:१; प्रकाश ३:१४

14 इं दाकशो डाक्टर लूका नु डेमासमी यो इन कली “रिम्शो बाक्कीन” देताकस।

15 लाओडीसीया सहर डा लोक्ब आन कली नु नुम्फा माइश्शो आ खिंमी गुम्ब थमा सुइक्ब आन कली यो गोमी “रिम्शो बाक्कीन” देंत ने, दे मतीन।

16 मिनु एको चिठी इन गुन्तीकेमी पढेने थुम्शा, लाओडीसीया सहर डा थमा सुइक्ब आन गुन्तीकेमी यो पढेचा गेने। लाओडीसीया डा थमा सुइक्ब आन कली ब्रेक्शो चिठी गेपुकीमी पढेने।

17 गेपुकीमी अरकीप्पस कली “प्रभुमी इ कली गेशो शेंतीक गेय नेल्ल रिम्शो पावो” दे मतीन। फिलेमोन २

18 गो पावलमी इन कली “रिम्शो बाक्कीन” दे आंमा ब्रेक्ताकड। गो ग्याइक्चा पुंडसीशो बाक्नुड, दे मप्रेंदीन। परमप्रभु यावे आ शिशी गे नु लील। १कोरिन्थी १६:२१; गलाती ६:११; २थिस्सलोनिकी ३:१७

## १ थिस्सलोनिकी

**ब्रेक्ब मुर:** एको चिठी पावल थिस्सलोनिकी आन कली आ डोंइती ब्रेक्बो चिठी बाक्ब।

**गेना ब्रेक्बो:** पावल निकशी खेयप रागी रागी लशा, कोरिन्थ सहरम बाक्शा, एको चिठी ५३ ए. डी. मेको बर्स डा डोंइती डा महिनाम ब्रेक्बो बाक्ब।

**मार ब्रेक्बो:**

१. पावलमी श्येत जाइब नक थमा सुइक्ब आन थुं बारपाइवतु।
२. पावलमी थमा सुइक्ब आन कली प्रभु कली शिरशो गेय पचा आ पबर्म अरेब।
३. पावलमी येसु खीस्त दोपा लेशशा जाक्बा, मेको शेंब। मारदे हना दूली शेंब युम्तीकेम जाक्शा, मुर आन थुं क्याल्लेक्म।

डोंइती डा लोव

1 गो पावल नड। सिल्वानस नु तिमोथी यो गो नु बाक्नीस। गो इं आफ परमप्रभु यावे नु इं प्रभु येसु खीस्त कली थमा सुइक्ब थिस्सलोनिकी सहर डा इन कली चिठी ब्रेक्ताक्ड। येसु खीस्तमी इन कली शिशो पा इन थुं नाइक्चा गेवल। प्रेरित १५:४०; प्रेरित १६:१-३, १९; प्रेरित १७:१-९; २थिस्सलोनिकी १:१

थिस्सलोनिकी डा थमा सुइक्ब

2 गोपुकी प्रार्थना पकानु, परमप्रभु यावे कली “गे थिस्सलोनिकी सहर डा थमा सुइक्ब नेल्ल आन रिम्शो पाइतीनी” दे गेना हना यो देंनीकी।

3 गोपुकी इं आफ परमप्रभु यावे आ डोंइती इन थमा सुइक्तीके डा गेय, दाक्चा डा गेय नु इं प्रभु येसु खीस्त कली आस पतीके मिम्ना मिम्न बाक्नीकी। १कोरिन्थी १३:१३

4 आइ थमा सुइक्ब लोकबपुकी, परमप्रभु यावेमी इन कली दाक्शा योव्रतु, दे तुइक्नीकी।

5 मारदे हना इन कली शेशो ग्येरपाइक्ब लोव पचा ला मशेंदक, सक्ति यो ताइतीनी। परमप्रभु यावे आ सोक्तीमी आइ कली शुश तुइक्तीक थुं गेशा प्रिताक्व। गोपुकी दोदेशो मुर बाक्नीकी, दे गोपुकी नु बाक्शा कोंइताक्क। मिनु गे तुइक्ताक्नी। १कोरिन्थी २:५

6 गोपुकी आइ खोदेशो नु प्रभु खोदेशो पाइब दुम्तीनी। मारदे हना गोपुकी शुश श्येत जशा, परमप्रभु यावे आ लोव नेतीनी। मिनु परमप्रभु यावे आ सोक्तीमी इन थुं ग्येरपाइक्वतु। २थिस्सलोनिकी ३:७

7 मोपा गोपुकी मासीडोनीया नु आकाया रागी डा थमा सुइक्ब आन कली रिम्शो कोंइतीक दुम्तीनी।

8 डोंइती गोपुकी प्रभु आ लोव मासीडोनीया नु आकाया रागी डा मुर आन कली शेंताक्नी। मेको आन कली ला ममाइ, नेल्ल अर्को रागी डा मुरपुकीमी यो इन परमप्रभु यावे थमा सुइक्तीके तुइक्ताक्म। मोपतीके गो मेकेर शेंचा ममाल्नीकी। रोमी १:८

9 मेकोपुकीमी इं पबर्म लोव पाम्तेक्म। मार लोव पाम्तेक्म देशा हना, थिस्सलोनिकी सहर डा मुरपुकीमी आइ कली मिश रिम्शो ब्राम्तेक्म। मिनु गोपुकी इन मूर्ति कली प्रोंइशा, परमप्रभु यावे कली थमा सुइक्ब दुम्शा, ब्रोंइशा बाक्ब, थमा परमप्रभु यावे आ गेय पाइब दुम्तीनी। प्रेरित १४:१५; १कोरिन्थी १२:२

10 मिनु बेक्बो रे सेंशो परमप्रभु यावे आ तो लेंशा सरीड रे यीब, दे रिम्शा बाक्तीनी। येसुमी इं कली परमप्रभु यावे आ गाइक्चा रे प्रोंइब। तीतस २:१३

## 2

पावल आ गेय

1 आइ लोकबपुकी, इन कली युम्चा मोशा मदुम्शो बाक्त, दे तुइक्नीनी।

2 गोपुकी डोंइती फिलिप्पी सहरमी श्येत जशा, मुरपुकीमी आइ कली शुक्शी पाम्तेक्म, दे तुइक्नीनी। शुश शुक्शी पाम्तेक्म हना यो, परमप्रभु यावेमी आइ कली वारच पाइब, दे थमा सुइइशा, परमप्रभु यावे आ ग्येरपाइक्ब लोव इन कली शेंताक्क। प्रेरित १६:२०-२४; प्रेरित १७:१-५

3 गोपुकीमी इन कली मुरुम पशो जोल रे मशेंदक। टेयब दुम्कल, दे ममिम्तक। २कोरिन्थी ४:२; २कोरिन्थी ११:७; यूहन्ना ५:४४

4 परमप्रभु यावेमी आइ कली ग्येरपाइक्ब लोव शेंचा, दे शेंब सेलतीकी। मोपतीके गोपुकी मुर आन दाक्बो लोव मशेंथु, परमप्रभु यावे आ दाक्बो लोव शेंचा गाक्तक। मेकोमी आइ थुं कली नाक्शा कोव्रब। गलाती १:१०

5 गो इन कली मिलो शिलो मपक, दे तुइक्नीनी। इन क्येट ताइनीकी कों, दे मिम्शा मशेंदक, मेको परमप्रभु यावेमी तुइक्ब। मत्ती १२:४०; प्रेरित २०:३३

6 गे नु अरु मुरपुकीमी आइ कली टेयब सेलीन, दे मशेंदक।

7 गोपुकी खीस्त आ सोइशो दुम्शा, इन गुइ रे मार मार ताक्चा ठीक दुम वा। तन्न गो आल कली दूध तुंइब ममा खोदेशो पा, इन कली कोव्रतक।

8 गोपुकीमी इन कली शुश दाक्शा, परमप्रभु यावे आ ग्येरपाइक्ब लोव शेंचा ला ममाइ, तन्न शेंचा आ पबर्म बेक्चा माल्तक हना यो, बेक्नीकी। २कोरिन्थी १२:१५

9 आंड लोकबपुकी, गे नु बाक्शा, शुश गेय पाइतक, दे तुइक्नीनी। गोपुकीमी परमप्रभु यावे आ ग्येरपाइकब लोत्र शेंदकानु, इन कली श्येत मगेचा, दे नाक्दो नाक्त गेय पाइतक। प्रेरित १८:३; प्रेरित २०:३३-३४; १ कोरिन्थी ४:१२; २ थिस्सलोनिकी ३:८

10 गो ठीक, रिम्शो नु परमप्रभु यावे आ गेय ला पाइतक। परमप्रभु यावेमी मेको तुइकब। मिनु गे थमा सुइकबमी यो तुइक्नीनी।

11 मिनु गोपुकीमी आल आन कली रिम्शो अरेब आफ खोदेशो पा इन कली अरेतक। इन थुं बारपाइशशा

12 “परमप्रभु यावे आ मुर दुम्शा, मेको आ डोंइती शिरशो दुम्शा बाक्कीन” दे इन कली पन कि पन, दे शेंशा शुश अरेतक। परमप्रभु यावेमी इन कली आंम राज्य नु आ छेडछेडमी बाक्चा गेचा कली ब्रेण्ब। एफिसी ४:१-२; फिलिप्पी १:२७

थिस्सलोनिकी आन श्येत

13 गोपुकीमी आंड शेंशो परमप्रभु यावे आ लोत्र नेंशा, मुर आ लोत्र ममाइ, थमा पा परमप्रभु यावे आ लोत्र बाक्ब, दे तुइक्ताक्नी। थमा सुइशशा मेको लोत्रमी इन थुंमी गेय पना पन बाक्ब। मो दुम्मेनु, गोपुकीमी परमप्रभु यावे कली “गे थिस्सलोनिकी डा मुर आन कली रिम्शो पाइतीनी” देंना देंन बाक्नीकी। गलाती १:११-१२

14 आंड लोकबपुकी, गे यहूदीया डा परमप्रभु यावे आ युम्तीक डा खीस्त येसुमी बाक्ब थमा सुइकब खोदेशो दुम्तीनी। मारदे हना यहूदीया डा मुरपुकीमी आंम रागी डा थमा सुइकब आन कली श्येत गेशो खोदेशो पा, इन रागी डा मुरपुकीमी यो इन कली श्येत गेम्तेक्म। प्रेरित ८:१; प्रेरित १७:५-६

15 यहूदीया डा मुरपुकीमी प्रभु येसु कली नु परमप्रभु यावे आ लोत्र पाइब आन कली साइशशा, आंड कली खेरतेक्म। मेकोपुकीमी मोपा परमप्रभु यावे कली मग्येरपदेम, मुर नेल्ल आन कली श्येत गेम्तेक्म। प्रेरित २:२३; मती २३:३७; प्रेरित ७:५२

16 दोपा श्येत गेम्तेक्म देशा हना, रागी रागी डा मुर आन कली पाप रे ब्रोंडचा ताइनीम, दे आंड कली लोत्र पचा मगेम। मोदेशो पा यहूदीम आन पाप गेना हना यो तेम्ना तेम्न बाक्नीम। मोपतीके परमप्रभु यावेमी मेको आन कली चुरशा सजाइ गेब। मती २१:३२-३३

17 आंड लोकबपुकी, गोपुकी नु मबाक्थु, गोपुकी रोइकच खोदेशो दुम्तक। इन बाक्तीकेमी जाक्चा मतथु, इन कली शुश मिम्शा युम युम दाक्तक।

18 गो इन कली युम युम दाक्बमी गो पावल चहिं शुश पिचा दाक्शो बाक्ती। तन्न सैतानमी आंड कली युम्थ पिचा मगेव।

19 इ प्रभु येसु आ यिचि ना गे आंड आस पतीके, ग्येरतीके नु सिरपेच खोदेशो बाक्नीनी। फिलिप्पी २:१६; फिलिप्पी ४:१

20 इन कली तशा, ग्येरशा आंड नें बोरपाइक्नीकी।

### 3

तिमोथी लशा लेशशो

1 मोपतीके गो इन कली श्येत जशो तशा, फाल्ने मचाप्क। गो निक्शी एथेन्स सहरम बाक्स्कु, दे सल्ला पाइतक। प्रेरित १७:१४-१६

2 गो निक्शीमी आंस लोकब, गो नु परमप्रभु यावे आ गेय पाइब, खीस्त आ ग्येरपाइकब लोत्र शेंब, तिमोथी कली इन थमा सुइक्तीक बारपाइक्चा नु इन कली अरेचा कली सोइक्ताक्स्कु। प्रेरित १६:१-३

3 सुइमी श्येत जशा थमा सुइक्चा मप्रोन्मेक्ल। मारदे हना गोपुकीमी श्येत जचा मालनय, दे तुइक्नीनी। प्रेरित १४:२२; एफिसी ३:१३; हिब्रू १०:३९; २ तिमोथी ३:१२

4 डोंइती रे गो नु बाक्नीनु “श्येत जचा मालनय” दे शेंताक्क। मुल आंड शेंशो दुम्त। मेको यो तुइक्नीनी।

5 गो इन कली श्येत जशो तशा फाल्ने मचबु। मोपतीके तिमोथी कली इन थमा सुइक्तीक दोपा बाक्म, दे तुइक्चा कली कौवथ सोइक्ताक्ड। मुर आन कली पाप पपाइक्बमी इन कली बिग्रेवा कौं, आंड पशो गेय यो मोशा लम कौं, दे गो हिंती। फिलिप्पी २:१६

6 मिनु तिमोथी इन कली युम्थ पिशा, लेशशा जाक्त। मेकोमी इन थमा सुइक्तीके नु इन दाक्तीके रिम्शो बाक्ब। गोपुकी आंड कली गेना हना यो शुश मिम्नीनी, गोपुकी खोदेशो पा आंड कली युम्चा दाक्नीनी, दे तिमोथीमी आंस कली देंत। प्रेरित १८:५

7 आंड लोकबपुकी, गोपुकी शुश श्येत जाइतक हना यो, इन थमा सुइक्तीक आ पबंम लोत्र नेंशा ग्येरसाक्क।

8 मारदे हना गे प्रभु कली मप्रोंडब बाक्नीनी, दे तुइशशा, गोपुकी डोंइती रोइ पशा, मुल चहिं साशा ब्रोंडशो मुर खोदेशो बाक्नीकी।

9 गो परमप्रभु यावे आ डोंइती “गे थिस्सलोनिकी सहर डा थमा सुइकब आन कली रिम्शो पाइतीनी” दे शुश ग्येरशा, परमप्रभु यावे कली टेयब सेल्नीकी।

10 मिनु नाक्दो नाक्त गोपुकी परमप्रभु यावे कली “थिस्सलोनिकी सहर डा थमा सुइकब आन कली युम्थ सोइक्तीन। मुल सम्म मशेंथु लीशो लोत्र शेंथ सोइक्तीन” दे पुंडना पुंडन बाक्नीकी।

11 इ आफ परमप्रभु यावे नु इ प्रभु येसुमी आंड कली गोपुकी नु युम्चा गेम्सेक्ल।

12 गोपुकीमी इन कली शुश दाक्शो खोदेशो पा प्रभुमी इन दाक्चा शुश बारपाइशशा, दाक्मुचा नु अरु आन कली यो दाक्ब दुमीन।



13 मोपा प्रभु येसु आ मुर नु जाक्की ना इन थमा सुइक्तीक थुं बारपाइश्शा, दोस गेचा मपुंडसीब, इं आफ परमप्रभु यावे आ डोंइती रिम्शो सेलल। १कोरिन्थी १:८; फिलिप्पी १:१०

## 4

परमप्रभु कली ग्येरपतीन

- 1 मिनु आंड नोले डा लोत्र, आं लोकबपुकी, प्रभु येसु आ नेमी इन कली शुश शेंतीक नु अरेतीक लोत्र पाइनीकी। गेपुकी आंड कली दोपा बाक्शो तनी, मोपा बाक्शा, परमप्रभु यावे कली ग्येरपतीन। गेपुकी मेको क्येडा यो शुश रिम्शो पने।
- 2 गोपुकीमी प्रभु येसु आ नेमी इन कली मार अरेतीक लोत्र गेका, मेको गे तुइक्नीनी।
- 3 परमप्रभु यावे आ दाक्शो मार बाक्ब देशा हना, मरिम्शो मपचा नु ग्रॉग्रा दिशो गेय रे डोन बाक्चा बाक्ब।
- 4 गे नेल्ल आंम मीश नु बाक्शा, हेंथे मगाक्थु, मान तचा कली शिरशो दुम्शा बाक्कीन।
- 5 अर्को रागी डा परमप्रभु यावे कली मतुइक्ब मुरपुकीमी खोदेशो पा ग्रॉग्रा दिचा डा गेयमी मबाक्कीन।
- 6 सुइ वोंइश मुरुम आ लोकब कली मोदेशो पा श्येत मगेवल। मारदे हना प्रभुमी मोदेशो पाइब आन कली क्येक्क लेप्ब, दे डोंइती रे इन कली शेंताक्क। लेवी १९:११
- 7 परमप्रभु यावेमी इं कली ग्रॉग्रा दिचा डा गेय पचा कली मयोत्रड। पाप रे डोन बाक्चा कली योत्रतु।
- 8 मोपतीके सुमी मेको लोत्र मटीबा, मेकोमी मुर आ लोत्र मटीब ममाइ, परमप्रभु यावे कली मटीब बाक्ब। परमप्रभु यावेमी इन कली आ सोक्त गेब। लूका १०:१६
- 9 थमा सुइक्ब लोकब आन दाक्मुतीके आ पर्वम सुइ मुरुमी इन कली ब्रेक्चा ममाल्ब। मारदे हना परमप्रभु यावेमी इन कली दाक्मुचा माल्नीनी, दे आंमान शेंशो बाक्त। यूहन्ना १३:३४; लेवी १९:१८
- 10 मिनु गेपुकी थमा पा मासीडोनीया रागी डा लोकब नेल्ल आन कली दाक्नीनी। गोपुकीमी मेको क्येडा यो दाक्तीन, दे इन कली अरेनीकी।
- 11 गेपुकी दुशा बाक्कीन। आंम खिं डा गेय ला मिम्तीने। आंमान गेय पना पन बाक्कीन। मेको इन कली अरेतीक लोत्र पाइतक। १थिस्सलोनिकी २:९; एफिसी ४:२८; २थिस्सलोनिकी ३:८, १२
- 12 मो पाइतीनी हना, अरु मुरपुकीमी इन कली ठेयब सेल्नीम। मिनु सुइ के मारेड ममाल्नीनी। कलस्सी ४:५

येसु यिचा आ पर्वम

- 13 आंड लोकबपुकी, बेक्शो मुर आ पर्वम रागी रागी डा मुरपुकीमी हिशेक शुश पाइनीम। मारदे हना मेको आन के आस मबाक्ब। गेपुकी चहिं मतुइक्ब खोदेशो पा, बेक्शो इन वारच आन पर्वम थुं खाइक्पाइश्शा मबाक्कीन। १कोरिन्थी १५:२०; एफिसी २:१२
- 14 गोपुकी येसु बेक्शा सेंसाक्ब, दे थमा सुइक्तय हना, परमप्रभु यावेमी येसु आ पतीकेमी बेक्शो मुर आन कली सेंशा चाक्ब। रोमी १४:९; १कोरिन्थी १५:३, ९, १२
- 15 मिनु गोपुकीमी इन कली प्रभु आ लोत्र रे “प्रभु आ यिचा सम्म बाक्बपुकी बेक्शो वारच आन क्येडा डोंइती प्रभु कली गुन्चा मताइनय” दे तुइक्पाइक्नीकी। मती १६:२८; मती २४:३०-३१; १कोरिन्थी १५:५१-५२; यूहन्ना १७:२४
- 16 मारदे हना प्रभुमी आ मुर आन कली “कुन” दे ब्रेलतानु, नेल्ल क्येडा ठेयब परमप्रभु यावे आ स्वर्ग डा गेय पाइबमी यो ब्रेक्ब। परमप्रभु यावे आ तुराही ताप्शो नेंनीम। मेना प्रभु सरीड रे यीब। ख्रीस्त कली थमा सुइश्शा बेक्शो मुरपुकी डोंइती सेंसीनीम।
- 17 नोले ब्रोंइशा लीशो गोपुकी मेको नु गोस्सुमी क्युक्सीशा, मेकोपुकी नु लाइनय। मेकोपुकी नु सरीडमी देल्शा बाक्शा, प्रभु कली गुन्चय। मोदेशो पा गोपुकी गेना हना यो प्रभु नु काथा बाक्चा ताइनय। यूहन्ना १२:२६
- 18 मोपतीके मेको लोत्र पा थुं बारपाइक्मुने।

## 5

प्रभु आ नाक्त

- 1 आंड लोकबपुकी “गिश बर्स लीबा, गेना सम्म रिम्चा” दे इन कली ब्रेक्चा ममाल्नीकी। मती २४:३६
- 2 मारदे हना गेपुकी प्रभु आ नाक्त खुइ खोदेशो पा जाक्ब, दे तुइक्नीनी। मती २४:४२-४४; २पत्रुस ३:१०; प्रकाश ३:३; प्रकाश १६:१५
- 3 मेना मुरुमी “दुशा बाक्चय, मारेड मटुम्ब” दंतेक्म हना यो, आल कुरशो मीश मुर आल थिचा रोइ गेना पाइबा मतुइक्ब। मोदेशो खोदेशो पा मुरपुकी मब्रोंइचा डा पा श्येत जाइनीम। येरमीया ६:१४; मती २४:३९
- 4 गे लोकबपुकी चहिं छिडछिडम मबाक्नीनी। मेको नाक्त खुइ जाक्शो खोदेशो पा इन कली महिपाइक्ब।
- 5 मारदे हना गे नेल्ल छेडछेड नु नाक्त डा मुर बाक्नीनी। गोपुकी नाक्दो नु छिडछिड डा मुर मनय। रोमी १३:१२; एफिसी ५:९
- 6 मोपतीके अरु खोदेशो पा गो मइप्य, सासीशा “प्रभु यीब” दे मिम्ना मिम्न बाक्चय। १पत्रुस ५:८
- 7 इप्बपुकी नाक्दो इप्नीम, दुक्बपुकी नाक्दो दुक्शा बाक्नीम।
- 8 तन्न गोपुकी नाक्त डा मुर दुम्शा “प्रभु यीब” दे मिम्ना मिम्न बाक्शा, परमप्रभु यावे आ या डा पीतल के भोटो खोदेशो पा, थमा सुइक्तीके नु दाक्तीके फेक्शा बाक्चय। पीतल के ताकी गुप्शो खोदेशो पा पाप रे प्रोंइशो बाक्नुड, दे तुइश्शा आस पय। एफिसी ६:१४-१७
- 9 मारदे हना परमप्रभु यावे इं पर्वम मगाइक्ब। प्रभु येसु ख्रीस्त आ पतीके पाप रे ब्रोंइब सेल्लु।

10 मेको इं पबंम साइक्चा पुंडसाक्व। मो दुम्टीके गोपुकी इप्तय हना यो, मइप्तय हना यो, मेको नु ब्रोंडचा ताइनय। रोमी १४:८-९

11 मोपतीके अरेपमुशा, इन थुं बारपमुने। गेपुकी मोदेशो पना पन यो बाक्तीनी। हिब्रू ३:१३

नोले डा लोत्र

12 आंड लोक्बपुकी, इन कली शेंब नु लां कोंडशा, अरेब आन कली रिम्शो पने, दे माइक्नीकी। १कोरिन्थी १६:१८

13 मेकोपुकी नु शुश दाक्मुशा बाक्कीन। मारदे हना प्रभु आ गेय पाइब बाक्नीमी।

14 आंड लोक्बपुकी, गेय मपाइब आन कली अरेपने। हिंब मुर आन थुं बारपतीन। मचाप्ब आन कली वारच पने। नेल्ल आन कली फाल्शा बाक्कीन। २थिस्सलोनिकी ३:१५

15 मूरुमी इन कली मरिम्शो पाम्तेक्म हना, गेपुकी मेको आन कली मरिम्शो मपने। रिम्शो पमुचा माल्नीनी। अरु आन कली यो रिम्शो पने। हितोपदेस २०:२२; रोमी १२:१७,२१; १पत्रुस ३:९

16 मिनु गेना हना यो ग्येरसीन। फिलिप्पी ४:४

17 प्रार्थना पना पन बाक्कीन। लूका १८:१-८; रोमी १२:१२; एफिसी ६:१८; कलस्सी ४:२

18 मार दुम्त हना यो, परमप्रभु यावे कली “गे रिम्शो पाइब बाक्नीनी” देनीन। मारदे हना मेको परमप्रभु यावे आ दाक्शो बाक्ब। ख्रीस्त येसु आ नोले खोडक्ब मेको गेना हना यो देंचा माल्नीम। एफिसी ५:२०

19 परमप्रभु यावे आ सोक्त कली मकाप्तीन। १कोरिन्थी १४:१, ३९

20 परमप्रभु यावेमी तुडक्पाइरशो लोत्र पचा गेन।

21 तन्न परमप्रभु यावे आ लोत्र नु गारबा देय मगारबा, दे नाक्शा कोत्रडीन। गारत हना, मप्रेंदीने।

22 नेल्ल ग्रान्ना दिचा डा गेय क्येडा डोन बाक्कीन।

23 थुं नाइक्पाइक्ब परमप्रभु यावेमी इन कली थम रिम्शो सेलल। इन सोक्त, थुं नु रां इं प्रभु येसु ख्रीस्त मयिम सम्म रिम्शो नु दोस मताइब दुम्शा बाक्मल।

24 इन कली ब्रेप्ब इन कली देंशो पाइब बाक्ब। मेकोमी थमा पाइब। १कोरिन्थी १:९; २थिस्सलोनिकी ३:३

25 आंड लोक्बपुकी, आंड पबंम परमप्रभु यावे कली पुनीन।

26 लोक्ब नेल्ल आन कली प्रभु आ नेंमी मुम्मुशा आसीक गेने।

27 प्रभु आ नेंमी एको चिठी लोक्ब नेल्ल आन कली पडेशा नेंपतीन।

28 इं प्रभु येसु ख्रीस्त आ शिशी गेपुकी नु लील।

## २ थिस्सलोनिकी

**ब्रेक्ब मुर:** एको चिठी पावल थिस्सलोनिकी आन कली आ नोले ब्रेक्शो चिठी बाक्ब।

**गेना ब्रेक्शो:** थिस्सलोनिकी डा थमा सुइक्ब आन कली डोंइती ब्रेक्शो चिठीम ब्रेक्शो खोदेंशो बाक्तेक्म। पावल सिल्वानस नु तिमोथी बाक्शो कोरिन्थ सहरम बाक्शो बाक्त। मोपतीके एको चिठी ५३ ए. डी. डा बर्स डा नोले डा महिनाम ब्रेक्शो बाक्ब, दे मिन्मीम।

**मार ब्रेक्शो:** डोंइती डा चिठीम नोले थिस्सलोनिकी डा थमा सुइक्बम रिम्शो पाम्तेक्म हना यो, का निक्शी चहिं हेंथे पाम्तेक्म। मुल पावलमी गुम्तीक डा शेंब कली थमा सुइक्ब आन कली गेय रिम्शो पचा कली ठीक सेल्चा माल्ब, दे ब्रेक्शो बाक्ब।

डोंइती डा लोव

1 गो पावल नड। सिल्वानस नु तिमोथी यो गो नु बाक्नीस। गो इं आफ परमप्रभु यावे नु प्रभु येसु ख्रीस्त कली थमा सुइक्ब थिस्सलोनिकी सहर डा इन कली चिठी ब्रेक्ताक्ड। १थिस्सलोनिकी १:१

2 इं आफ, परमप्रभु यावे नु प्रभु येसु ख्रीस्तमी इन कली शिशी पा, इन थुं नाइश्शा बाक्चा गेम्सेक्ल।

श्येतम खोइल थेक्शा बाक्शो

3 आंइ लोकबपुकी, इन कली मिम्शा, परमप्रभु यावे कली “गे रिम्शो पाइब बाक्नीनी” देंचा ठीक बाक्ब। मारदे हना इन थमा सुइक्तीके हु बारशा, इन दाक्मुतीक यो बारना बारन लाइब। १थिस्सलोनिकी १:२-३

4 मोदेंशो दुम्शा, गेपुकी खेदा पचा पुंडसीशा, श्येत फाल्शोमी खोइल थेक्शा थमा सुइक्ब बाक्नीनी, दे गोपुकीमी परमप्रभु यावे कली थमा सुइक्ब आन गुम्तीकेमी इन पबंम ग्येरशो लोव पाइनीकी। २कोरिन्थी ७:४

5 गेपुकी परमप्रभु यावे आ राज्यम शिरशो मुर दुम्तीनी। मिनु मेको राज्य आ पबंम श्येत जाइनीनी। परमप्रभु यावेमी इन कली श्येत जचा गेप्नु हना यो, ठीक निसाफ पाइब बाक्ब। फिलिप्पी १:२८

निसाफ पची नाक्त

6 परमप्रभु यावेमी थमा पा इन कली श्येत गेब आन कली क्येक्क लेप्ब। रोमी १२:१९; प्रकाश १८:६-७

7 गे श्येत जाइब इन कली नु आंइ कली इं थुं नाइक्चा गेब। गेना थुं नाइक्चा गेब देंशा हना, प्रभु येसु नु आ सक्ति पाइश्शो स्वर्ग डा गेय पाइबपुकी सरीड रे गूची ना इं थुं नाइक्चा गेब। मती १६:२७; मती २५:३१-४६; १थिस्सलोनिकी ४:१६

8 मेको नु हुरर पा ब्रशो मी सरीड रे यीब। प्रभुमी परमप्रभु यावे कली मतुइक्ब नु आ ग्येरपाइक्ब लोव मटीब आन कली क्येक्क लेप्ब। रोमी २:८

9 मेको मुरपुकी गेना हना यो साम्सीशो दुम्शा, प्रभु आ कुल मताइनीम। आ सक्ति डा छेडछेड यो मताइनीम।

10 थमा सुइक्बपुकी चहिं आ जाक्ची नाक्त आ नें ठेयब सेल्शा, थमा सुइक्ब नेल्लेमी आ छेडछेड तशा छक लाक्नीम। मारदे हना गेपुकी आंइ शेंशो लोव थमा सुइक्तीनी।

11 मोपतीके गो इन पबंम प्रार्थना पना पन बाक्नीकी। परमप्रभु यावेमी इन कली ब्रेश्शा, आ ब्रेश्शो शिरशो सेलल, दे गोपुकीमी गेना हना यो, पुंडना पुंडन बाक्नीकी। इन रिम्शो पतीके नु इन थमा सुइश्शो डा गेय आ सक्तिमी पपदल।

12 मो दुम्शा, इं प्रभु येसु आ नें इन पबंम ठेयब सेल्नीम। गेपुकी आ मुर दुम्शा, मान ताइनीनी। मेको इं परमप्रभु यावे नु प्रभु येसु ख्रीस्त आस शिशी डा गेय बाक्ब।

## 2

येसु ख्रीस्त यिचा आ पबंम

1 आंइ लोकबपुकी, इं प्रभु येसु ख्रीस्त यिशा, गोपुकी नु गुम्चा आ पबंमी १थिस्सलोनिकी ४:१३-१७

2 इन थुं मकयन। सोक्तीमी कोंइताक्व देंरु पाइनीम। आंइ ब्रेक्शो चिठी जाक्त, देंरु पाइबमी “प्रभु आ नाक्त जाक्शा नुप्त” दे लोव पाम्तेक्म हना यो, थमा मसुतीन। २पत्रुस ३:१५-१६

3 इन कली दूली शेंतीके शेंब आन कली थमा मसुतीन। मारदे हना प्रभु येसु ख्रीस्त आ नाक्त जाक्चा क्येडा डोंइती परमप्रभु यावे कली मटिथु नेल्ल क्येडा मरिम्शो पाइब का गूब। मेको कली जाम्शा लाइब आ तौ यो देंनीम। १तिमोथी ४:१; १युहन्ना २:१८

4 मेकोमी “मानेचा डा मारोड मबा” देंब। परमप्रभु यावे नु मानेचा डा थोवक आन क्येडा आंम कली ठेयब सेल्शा, परमप्रभु यावे आ खिंमी निश्शा “गो का ला परमप्रभु यावे नड” देंब। दानीएल ११:३६; मती २४:१५

5 गेपुकी नु बाक्डानु, इन कली मोदेंशो लोव पाता। गेपुकी आं शेंशो ममिन्नीनी?

6 मेको नेल्ल क्येडा मरिम्शो पाइब कली तेक्ब कली तुइक्नीनी। मेको तेक्बमी मेको कली देंशो ना ला गूचा गेब।

7 आ मरिम्शो गेय चहिं मुल बाक्ब। तन्न मतांइसीब। तेक्ब मयाक्से सम्म मेको गूने मचाप्ब।

8 नेल्ल क्येडा मरिम्शो पाइब गूचा तवा नोले, प्रभु येसुमी आ जाक्शो नु आ मुइश्शोमी साइक्ब। यसैया ११:४; प्रकाश १९:१५, २०

9 मेको नेल्ल क्येडा मरिम्शो पाइबम चहिं सैतान आ सक्ति तशा, चिन्ड नु छक लाक्चा डा गेय पखु पाइब। मती २४:२४; प्रकाश १३:११-१४

10 जाम्शा लाइब आन कली जोल शेंब। मारदे हना मेकोपुकीमी थमा शेंतीक नेंचा मदाक्तेम। मिनु पाप रे ब्रोंडतीक ताक्चा मदाक्तेम।

11 परमप्रभु यावेमी मेको आन कली दूली शेंतीक थमा सुइक्पाइक्ब। रतिमोथी ४:४

12 दूली शेंतीक थमा सुइक्बपुकी जाम्शा लाइनीम। मारदे हना थमा लोत्र थमा मसुइक्वु, मदुम्शो गेय दाक्ताकमे।

थमा शेंतीकेमी बाक्चा

13 प्रभु आ दाक्शो लोकबपुकी, गोपुकीमी गेना हना यो इन कली मिम्शा, परमप्रभु यावे कली “गे रिम्शो पाइब बाक्नीनी” देंनीकी। मारदे हना परमप्रभु यावेमी इन कली डोंडती रे आ मुर दुम्नीम, दे योत्रतु। दोपा आ मुर दुम्नीनी देंशा हना, परमप्रभु यावे आ सोक्तीमी इन कली पाप रे डोन वोइश्शा, थमा शेंतीके थमा सुइक्पाइक्वु। रोमी ८:३०

14 गोपुकीमी इन कली ग्येरपाइक्ब लोत्र पकानु, मेकोमी इं प्रभु येसु खीस्त आ छेडछेड पाइश्शो मुर दुम्मल, दे इन कली ब्रेत्ताक्व।

15 आंइ लोकबपुकी, खोइल थैक्शा बाक्कीन। आंइ शेंशो मप्रोनीन। गो शोत्रम शेंशो नु चिटीम ब्रेक्शा शेंशो मप्रोनीन। रथिस्सलोनिकी ३:६

16 इं प्रभु येसु खीस्त नु इं आफ परमप्रभु यावे आस शिशीमी इं कली दाक्शा, गेना हना यो थुं बारपाइश्शा, रिम्शो आस गेम्ताक्स।

17 इन थुं बारपाइश्शा, इन कली रिम्शो गेय नु रिम्शो लोत्र पचा गेम्सेकल।

### 3

पावलमी प्रार्थना पुंइशो

1 मिनु आंइ लोकबपुकी, आंइ कली मिम्शा, प्रार्थना पने। आंइ पबंम परमप्रभु यावे कली मार पुंइचा देंशा हना, इन दातेमी खोदेशो पा, प्रभु आ लोत्र तेइ तेइ साव सुव ब्रशा लल। एफिसी ६:१८-१९; कलस्सी ४:३; १थिस्सलोनिकी ५:२५

2 गोपुकी दूली पाइब नु मरिम्शो मुर रे ब्रोंडचा तकल, दे प्रार्थना पने। मारदे हना मेकोपुकी थमा मसुइक्ब बाक्नीमी। 3 प्रभुमी चहिं इन कली दाक्शा मप्रोंइब। इन थुं बारपाइक्ब। मरिम्शो रे डोन वोइश्शा, इन कली कोत्रब। १थिस्सलोनिकी ५:२४; यूहन्ना १५:१७

4 गोपुकीमी इन कली मार देंका, मेको पना पन बाक्शा, नोले यो पाइनीनी। प्रभुमी इन कली वारच पाइब, दे तुइक्नीकी। २कोरिन्थी ७:१६; गलाती ५:१०

5 प्रभुमी इन कली परमप्रभु यावे आ दाक्तीके नु खीस्त आ फालतीक रूपदल।

गेय मपथु मबाक्चा

6 आंइ लोकबपुकी, गोपुकीमी इं प्रभु येसु खीस्त आ नेमी इन कली मार देंनीकी देंशा हना, गेपुकी नु बाक्शो लोकब सु सुम गेय पचा मदाक्वु बाक्मा, मोदेशो पा आंइ शेंशो मटीमे, मेको नु काइ मबाक्कीन। रथिस्सलोनिकी २:१५; मती १८:१७; रोमी १६:१७

7 गेपुकी दोपा आंइ खोदेशो दुम्चा माल्नीनी, मेको आंमा तुइक्नीनी। इन दातेमी बाक्कानु, शुशा गेय पाइतक। १थिस्सलोनिकी १:६

8 सुइ आन के मोश मजक। गोपुकीमी नाक्दो नाक्त मदेंथु, सुइ कली श्येत मगेचा, दे गेय पना पन बाक्तक। १थिस्सलोनिकी २:९

9 मोश जचा अधिकार बाक्त हना यो, दोपा रिम्शो पचा इन कली कोंइचा, दे मोदेशो पाइतक। मती १०:१०; प्रेरित २०:३५; फिलिप्पी ३:१७

10 गोपुकीमी “सुमी गेय मपाइबा, मेकोमी जचा मतवल” दे डोंडती रे गेपुकी नु बाक्शा देंतक।

11 इन दातेमी का निक्शीमी काइ गेय मपथु, हिरशा गाक्शा मो बाक्नीम, देशो नेंतक।

12 गोपुकीमी मोदेशो मुर आन कली प्रभु येसु खीस्त आ नेमी “रिम्शो गेय पने। आंम आंम जचा थोत्रक जशा बाक्कीन” दे अरेनीकी। १थिस्सलोनिकी ४:११

13 आंइ लोकबपुकी, रिम्शो गेय पचा कली गेनायो मदने। गलाती ६:९

14 मिनु सु सुमी आंइ ब्रेक्शो लोत्र मटीमे, मेको आन कली तुइश्शा वोतीन। मिनु मेकोपुकी नु मबाक्कीन। मोदेशो पशो तशा, मेको मुरपुकी मुने दोक्नीम।

15 मोदेशो पशा यो, मेको मुर कली जोरी सत्रु खोदेशो पा ममिम्तीन। थमा सुइक्ब लोकब कली खोदेशो अर्ती गेने। १थिस्सलोनिकी ५:१४

नोले डा लोत्र

16 थुं नाइक्चा गेब प्रभुमी दोदेशो बाक्तीनी हना यो, इन कली गेना हना यो थुं नाइक्चा गेवल। प्रभु गेपुकी नेल्ल नु बाक्कल। यूहन्ना १४:२७

17 गो पावलमी एको चिटी आंमान ब्रेक्ताक्ड। तेको चिटी ब्रेक्ताक्ड हना यो, ओदेंब ब्रेक्नुड, दे तुइक्नीनी। १कोरिन्थी १६:२१; गलाती ६:११; कलस्सी ४:१८

18 इं प्रभु येसु खीस्त आ शिशी गेपुकी नेल्ल नु लील।

## १ तिमोथी

**ब्रेक्ब मुर:** एको चिठी पावलमी तिमोथी कली डोंइती ब्रेक्शो बाक्त।

**गेना ब्रेक्शो:** तिमोथीम पावल नु गेय पवा बाक्त। मेकोमी थिस्सलोनिकी सहर डा थमा सुइक्ब आन कली शेंशो बाक्त। पावलमी मेको कली अर्को सहरम यो शेंथ सोइक्ता बाक्त। पावलमी एको चिठी गेना ब्रेक्शो बाक्मे, मेको बर्स मदेंशो बाक्त।

**मारदे ब्रेक्शो:** शेंतीक लोत्र तिमोथी १:१-२

१. ठीक शेंतीके मार बाक्ब तिमोथी १:३-२०

२. युन्तीक खिं डा मुर दोपा बाक्चा मालनीम तिमोथी २:१ - तिमोथी ३:१६

३. रिम्शो थमा सुइक्तीके मार बाक्ब तिमोथी ४:१-११

४. मुर आन कली मार शेंचा माल्ब तिमोथी ४:१२ - ६:२

५. धर्म पतीके शोर गाक्शो बाक्ब तिमोथी ६:३-२१ नेल्ल जम्मा पा गे येसु खीस्त आ पर्वम ला शेंदो। आंम पतीके होस पावो।

डोंइती डा लोत्र

1 खीस्त आ सोइश्शो गो पावल नड। इ कली पाप रे प्रोंइब परमप्रभु यावेमी “खीस्त येसु आ सोइश्शो दुमो” दे माइक्ती। इ कली ब्रोंइचा गेनुड, दे कबल पाइब खीस्त येसुमी यो मोन माइक्ती। कलस्सी १:२७

2 गे थमा सुइक्ब, आं दाक्शो तो खोदेंशो तिमोथी, इ कली चिठी ब्रेक्ताक्ड। इ आफ परमप्रभु यावे नु प्रभु येसु खीस्त आस दाक्चा गे नु बाक्ल। आस शिशीमी इ कली थुं नाइश्शा बाक्चा गेम्सेकल। प्रेरित १६:१-२; तीतस १:४

दूली शेंब आन पर्वम ब्रेक्शो

3 गो मासीडोनीया रागी लडानु, गे एफिसस सहरम बाक्को। मेकेर मुर का निकशीमी दूली लोत्र शेंनीम। मोदेंशो मशेंदीन, दे अरेवो। प्रेरित २०:३

4 मेकोपुकीमी मुरुमी सेल्शो लाइश्शो कथा नु किकी पिपी आन पर्वम शेंना शेंन बाक्नीम। मोदेंशो शेंतीके काम मलाप्या डा बाक्शा, परमप्रभु यावे आ शेंशो थमा सुइक्तीके मबारपाइक्ब। १तिमोथी ४:७

5 इ शेंतीके चहिं रिम्शो थुं, रिम्शो थुं डा मिन्तीके नु रिम्शो थमा सुइक्तीके रे जाक्शो शुश दाक्मुचा आ पर्वम बाक्ब। मती २२:३७-४०; रोमी १३:१०; गलाती ५:६

6 का निकशीमी मेको शेंतीक प्रोंइशा, शोर गाक्शो लोत्र पाइनीम। १तिमोथी ६:४, २०

7 मेकोपुकीमी परमप्रभु यावे आ अरेशो लोत्र शेंब दुम्चा दाक्नीम, तन्न आंम देंशो लोत्र नु आंम शेंशो आंमान मरुप्ब बाक्नीम।

8 परमप्रभु यावे आ अरेशो लोत्र ठीक पाइब आन कली रिम्शो दुम्ब, दे गो तुइक्नय। रोमी ७:१२

9 ठीक पाइब आन कली मब्रेक्शो बाक्ब, दे यो तुइक्नय। तन्न परमप्रभु यावे आ अरेशो लोत्र मपाइब, मटीब, परमप्रभु कली ममिम्ब नु मरिम्शो पाइब आन कली ब्रेक्शो बाक्ब। परमप्रभु यावे रे डोन बाक्ब, रागी कली ला मिम्ब, आम आफ कली साइक्ब, आंम ममा कली साइक्ब नु मुर आन कली साइक्ब आन कली ब्रेक्शो बाक्ब। १कोरिन्थी ६:९-११

10 तेल्लेम पाइब, ग्रॉन्पा दिचा डा गेय पाइब, मुर आन कली खुड पा लेयब, जोल पाइब, जोल पा कसम जाइब नु आन गेय परमप्रभु यावे आ शेंशो नु मगारब मुर आन कली ब्रेक्शो बाक्ब।

11 मेको थमा शेंतीके नु नेल्ल आसीक पाइश्शो परमप्रभु यावे आ ग्येरपाइक्ब लोत्र शेंब सेलती।

परमप्रभु आ दाक्तीक ठेयब बाक्ब

12 एको लोत्र शेंचा कली बोल गेब इ प्रभु खीस्त येसु कली “गे रिम्शो पाइब बाक्नीनी” देनुड। मारदे हना खीस्त येसुमी आं पर्वम “थमा सुइक्चा डा मुर बाक्ब” दे आ गेय पाइब सेलती। प्रेरित ९:१५; १कोरिन्थी १५:९-१०; गलाती १:१३-१६

13 डोंइती गो मेको कली शुक्शी पाइब, श्येत गेब नु शुश मरिम्शो पाइब बाक्ती। तन्न मतुइक्ब नु थमा मसुइक्ब बाक्तीके परमप्रभु यावे आ शिशी ताता।

14 इ प्रभुमी आ दाक्शो थमा सुइक्तीके नु दाक्तीके थुं ब्रीशा, क्युप्या डा पा गेती। मेको निम्फा खीस्त येसु नु बाक्नीस।

15 मरिम्शो पाइब आन कली नरक रे प्रोंइचा, दे खीस्त येसु रागीम जाक्त। एको लोत्र थमा बाक्ब नु थमा सुइक्चा माल्शो बाक्ब। गो नेल्ल क्येडा मरिम्शो पाइब नड। लूका १९:१०

16 गो परमप्रभु यावे आ शिशी मारदे ताता देंशा हना, गो नेल्ल क्येडा मरिम्शो पाइब दुन्ती हना यो, येसु खीस्त आ फाल्तीक सक्ति कोंइचा, दे शिशी ताता। मेको कोंइतीके नोले थमा सुइक्ब नु गेना हना यो, परमप्रभु यावे नु बाक्चा ताइब आन कली बाक्ब।

17 गेना हना यो मबेक्थु बाक्ब पिप कली सुइमी तने मचाप्नीम। मेको कांइचीक परमप्रभु, परमप्रभु यावे बाक्ब। गेना हना यो मान ताक्चा नु छेडछेड मेको केन बाक्ब। आमेन।

18 आं तौ तिमोथी, परमप्रभु यावेमी इ पर्वम पशो लोत्र तुइक्पाइक्ती। मेको लोत्र इ कली मिम्पाइक्नुड। मेको लोत्र मिम्शा ग्राने चाप्नेवे। १तिमोथी ४:१४; १तिमोथी ६:१२; यहूदा ३

19 थमा सुइक्तीके नु इ थुं डा रिम्शो मिम्तीके टिशा बाक्को। आन थुं डा रिम्शो मिम्तीके कली मटीब का निक्शीमी थमा सुइक्चा प्रोइतेक्म। १तिमोथी ३:९; १तिमोथी ६:१०

20 मेको आन दान्तेमी हीमेनेयस नु अलेक्जन्डर बाक्नीसी। परमप्रभु यावे आ पबंम मरिम्शो लोत्र मपचा, दे शेंचा कली, गो मेको आस कली सैतान आ गुडमी जिम्मा गेतासी। २तिमोथी २:१७; १कोरिन्थी ५:५

## 2

थमा सुइक्ब आन पुंइशो

1 आं के नेल्ल क्येडा ठेयब अरेशो लोत्र मार बाक्ब देशा हना, परमप्रभु यावे नु बाक्शा, मेको नु लोत्र पचा नु नेल्ल मुर आन पबंम पुंइना पुंइन बाक्चा मालनय। मेको आन पबंम “गे मेको आन कली रिम्शो पाइतीनी” दे परमप्रभु यावे कली ठेयब सेल्चा मालनय।

2 पिप नु सरकार डा ठेयब अधिकार पाइश्शो मुर आन पबंम यो मोदेशो पुंइतीक लोत्र पचा मालनय। मो पा गो रिम्शो, थुं नाइश्शा, इं गेयमी परमप्रभु यावे कली मिम्चा, दाक्चा नु नेल्ल गेयमी ठीक दुम्शा बाक्य।

3 मोदेशो मरिम्शो गेय प्रोइब परमप्रभु यावे आ डोइती रिम्शो नु दाक्चा डा बाक्ब।

4 परमप्रभु यावेमी नेल्ल मुर आन कली मरिम्शो गेय रे प्रोइश्शा, थमा लोत्र तुइक्पाइक्चा दाक्ब। इजीकीएल १८:२३; रोमी ११:३२; २पत्रुस ३:९

5 परमप्रभु यावे का ला बाक्ब। मेको नु मुर आन कली गारपाइक्चा कली येसु ख्रीस्त रागीम जाक्शा, मुर दुम्शो यो का ला बाक्ब। हिब्रू ९:१५

6 मेकोमी मुर नेल्ल आन कली पाप रे प्रोइचा, दे आंम कली जिम्मा गेप्टु। एको लोत्र मेना रे शेंचा गोम्तेक्म। गलाती १:४; गलाती २:२०; तीतस २:१४

7 मोपतीके परमप्रभु यावेमी एको लोत्र शेंब नु ख्रीस्त आ सोइश्शो सेल्टी। गो जोल मपथु, थमा लोत्र पाइनुड। इस्राएली आन कली ममाइ, तन्न रागी रागी डा मुर आन कली थमा सुइक्तीके आ पबंम शेंब नु थमा लोत्र शेंब सेल्टी। २तिमोथी १:११; गलाती २:७-८

थमा सुइक्ब आन कली शेंशो

8 तेइ तेइ डा वोंइश मुरपुकीमी प्रार्थना पचा मालनीम। परमप्रभु यावे कली थुं नेल्लेम थमा सुइक्ब गे गुइ पोक्शा, मगाइक्ब नु मजीब दुम्शा, परमप्रभु यावे नु लोत्र पशो तचा दाक्नुड।

9 मीश मुरपुकी यो ठीक पा फेक्शा, गेय पचा डोइती मिम्शा, रिम्शो बाक्चा मालनीम। मोपा चांमी मार मार वोइश्शा लामा प्रोत्रशा, सुन मोती नु शुश क्येट लाइब वामी मग्योम्समल। १पत्रुस ३:३-५

10 परमप्रभु यावे कली मिम्ब मीश मुर रिम्शो पतीकेमी “गो परमप्रभु यावे कली दाक्ब नड” दे कोइनीम। १तिमोथी ५:१०

11 मीश मुरपुकीमी टीब दुम्शा, रिम्शो पा नेंशा शेंसमल। एफिसी ५:२२

12 वोंइश मुर आन कली शेंतीक अधिकार मीश मुर आन कली मगेनुडमी। मेकोपुकी सिक्सी पा बाक्मल। १कोरिन्थी १४:३४; उत्पती ३:१६

13 डोइती आदम, नोले हव्वा सेल्शो बाक्त।

14 आदम डोइती हेंथे मगाक्शो बाक्त। मीश मुर चहिं मिक्च सिल्चा पुंइसीशा, परमप्रभु यावे कली मटीब दुम्शो बाक्त। उत्पती ३:६

15 मो हना यो मीश मुरपुकी रागीम आल जरमेसे डा मेरे ब्रोंइचा ताइनीम। तन्न मेकोपुकी थमा सुइक्ब दुम्शा, दाक्मुशा, परमप्रभु यावे आ मुर दुम्शा नु ठेयब मलेत्थु बाक्चा मालनीम। १तिमोथी ५:१४; तीतस २:४-५

## 3

थमा सुइक्ब आन कली कोत्रब शेंशो

1 सुमी थमा सुइक्ब आन कली कोत्रब दुम्चा दाक्बा, मेको ठेयब नु रिम्शो गेय माल्ब बाक्ब। एको लोत्र थमा बाक्ब। प्रेरित २०:२८; तीतस १:५-९

2 थमा सुइक्ब आन कली कोत्रब काइ दोस गेचा मपुंइसीशो बाक्चा माल्ब। मीश का के ला वोंइश बाक्चा माल्ब। गेय पचा डोइती मिम्ब, आ गेय नेल्ल कली रिम्शो पाइब, मुर आन कली बास गेब नु रिम्शो शेंब बाक्चा माल्ब।

3 राकसी शांबु तूशा दुक्ब नु तुप्ब मुर थमा सुइक्ब आन कली कोत्रब दुम्ने मचाप्ब। थमा सुइक्ब आन कली कोत्रब रिम्शो थुं पाइश्शो बाक्चा माल्ब। जिचा पोक्ब नु क्येट शुश दाक्बमी एको गेय पने मचाप्ब।

4 आंम खिं डा मुर आन कली रिम्शो कोत्रब बाक्चा माल्ब। आंम आलपुकी टीब नु मुर नु रिम्शो पाइब बाक्चा मालनीम।

5 मारदे हना आंम खिं डा मुर आन कली रिम्शो कोत्रबने मचाप्ब बाक्त हना, दोपा परमप्रभु यावे आ खिं डा मुर आन कली कोत्रबने चाप्बा डा?

6 थमा सुइक्चा नक गोशो मुर थमा सुइक्ब आन कली कोत्रब दुम्ने मचाप्ब। मारदे हना मेको बोरशा ठेयब लेशो दुम्ब। मिनु सैतानमी मेको कली रेशशा, खतम सेल्ब।

7 थमा मसुइक्बपुकीमी यो थमा सुइक्ब आन कली कोत्रब आ पबंम रिम्शो लोत्र पचा मालनीम। मोदेशो मदुम्त हना, दोस गेचा पुंइसीब। मिनु सैतान आ ग्याइलीम रेप्ब।

गुम्टीकेम गेय पाइब आन कली शेंशो

8 थमा सुइक्ब आन गुम्टीक खिं डा गेय पाइबपुकी यो रिमशो मुर बाक्चा माल्नीम। लोत्र क्याल्ब, शुश राकसी शांबु तूब नु क्येट ला मिम्बमी मोदेशो गेय पने मचाप्नीम। प्रेरित ६:३; फिलिप्पी १:१

9 मेकोपुकीमी रिमशो थुंमी थमा सुइश्शा, मेकेर डा खुइश्शो लोत्र मिम्ने चाप्ब दुम्या माल्नीम। १तिमोथी १:२९

10 डोंइती गे मेको आन थुं कोत्रचा माल्नेवे। मिनु शुश रिमशो पाइब बाक्ब, दे तुइश्शा ला थमा सुइक्ब आन गुम्टीके खिंमी गेय पचा कली वोइक्ने चाप्नेवे।

11 आ मीश यो रिमशो बाक्शा, डुलेथ मगाक्थु, गेय पचा डोंइती मिम्ब बाक्चा माल्ब। मेको आ गेय नेल्ले रिमशो पा पचा माल्ब। तीतस २:३

12 थमा सुइक्ब आन गुम्टीके खिंमी गेय पाइब मीश का आ वोइश दुम्या माल्ब। मेकोमी आ आल नु आंम खिं डा मुर नेल्ल आन कली रिमशो पा कोत्रब दुम्या माल्ब।

13 मोदेशो पाइबमी थमा सुइक्ब आन गुम्टीकेमी आंम कली रिमशो नें सेल्नीमी। खीस्त येसु कली आंम थमा सुइक्तीके शुश बारपाइक्नीमी।

थमा सुइक्तीके आ खुइश्शो लोत्र

14 गो इ कली रीब पा गुम्नुड, दे आस पाइनुड। मिनु इ कली ओदेशो अरेतीक लोत्र मारदे ब्रेक्ताक्ड देशा हना,

15 गो नोले दुम्टी हना, परमप्रभु यावे आ खिं डा मुरपुकी दोपा बाक्चा माल्नीमी, मेको तुइक्तमेक्ल। मेकोपुकी ब्रोंइचा गेब परमप्रभु यावे आ गुम्टीक खिं डा मुर बाक्नीम। मेको थमा लोत्र डा थाम नु बोल्यो हिरशो गारो खोदेशो बाक्नीम। एफिसी २:१९-२२

16 इ परमप्रभु यावे कली थमा सुइक्तीके थम खुइश्शो बाक्ब। मेको मार बाक्ब देशा हना “मेको मुर दुम्या, रागीमी जर्मेसाक्व। परमप्रभु यावे आ सोक्तीमी ‘परमप्रभु यावे आ तौ बाक्ब’ दे सांकछी गोप्तु। परमप्रभु यावे आ स्वर्ग डा गेय पाइबपुकीमी मेको कली ताम्तेक्म। आ नें मार बाक्बा, दे रागी रागी डा मुर आन कली शेंताक्मे। रागी रागी डा मुरपुकीम मेको कली थमा सुइक्तेक्म। मिनु मेको परमप्रभु यावे आ छेडछेडमी लाइक्चा पुइसाक्व” देशो बाक्ब। यूहन्ना १:१४; रोमी १:४; प्रेरित २८:२८; मर्कूस १६:१९; एफिसी १:२०-२१

## 4

दूली शेंब आन शेंतीक

1 परमप्रभु यावे आ सोक्तीमी “नोले डा नाक्तीम का निक्शी थमा सुइक्बपुकीमी थमा सुइक्चा प्रॉइनीम। मेको मुरपुकीमी हेंथे लां कोंइब नु जोल पाइब वोल आन शेंशो नेंनीम” देंत। मत्ती २४:२४; २थिस्सलोनिकी २:३; २तिमोथी ३:१; २पत्रुस ३:३; १यूहन्ना २:१८; यहूदा १८

2 मेको मुर आन थुं डा मिन्तीके खतम दुम्ब। मिनु जोल शेंनीम।

3 मेकोमी “ग्युंवे पचा मदुम्ब, का निक्शी थोत्रक जचा मदुम्ब” दे शेंनीमी। परमप्रभु यावेमी थमा सुइक्ब आन कली सेल्शा गेशो मेको जचा थोत्रक “गे रिमशो पाइब बाक्नीमी” दे जचा ब्वचा दुम्ब। उत्पत्ती ९:३; १कोरिन्थी १०:३०-३१; कलस्सी २:२३

4 तन्न परमप्रभु यावे आ सेल्शो नेल्ल रिमशो बाक्ब। मुरुमी परमप्रभु यावे कली “गे रिमशो पाइतीनी” दे नेल्ल जचा ब्वचा दुम्ब। उत्पत्ती १:३१; मत्ती १५:११; प्रेरित १०:१५

5 मारदे हना परमप्रभु यावे आ लोत्र नु प्रार्थनामी मेको नेल्ल परमप्रभु यावे आ गेशोन बाक्ब, दे तुंडसीब।

तिमोथी आ गेय

6 गे एको लोत्र थमा सुइक्ब लोकब आन कली शेंताक्वी हना, खीस्त येसु आ रिमशो गेय पाइब दुम्नेवे। गे थमा सुइक्तीक डा लोत्र नु रिमशो शेंतीके तुइक्ना तुइक्न आ नोले खोइक्नेवे। २तिमोथी २:१५

7 तन्न मुरुमी सेल्शो नु मरिश्शो कथापुकी मनेनो। परमप्रभु यावे कली मिम्या दाक्शा बाक्को। १तिमोथी ६:२०; २तिमोथी २:१६, २३; २तिमोथी ४:४; तीतस १:१४; तीतस ३:९

8 रां कली रिमशो पतीके इच्छा ला रिमशो बाक्ब। परमप्रभु यावे कली मिम्या दाक्तीके नेल्ल क्येडा रिमशो बाक्ब। मारदे हना मुल कली रिमशो बाक्ब नु गेना हना यो परमप्रभु यावे नु बाक्चा कली नोले यो रिमशो बाक्ब। १तिमोथी ६:६

9 एको देशो लोत्र थमा बाक्ब नु नेल्ल थमा सुइक्चा माल्शो बाक्ब।

10 एको लोत्र शेंशा श्येत जशा, शेंतीक गेय पाइनय। मारदे हना ब्रोंइचा गेब परमप्रभु यावे कली आस पाइनय। मेको नेल्ल मुर आन कली प्रॉइब बाक्ब। मोपा थमा सुइक्बपुकी पाप रे ब्रोंइचा ताइनीम।

11 एको लोत्र अरेशा शेंदो।

12 गे टिटा बाक्ते हना यो, लोत्र पतीकेमी, मुर नु गेय पतीकेमी, दाक्तीकेमी, थमा सुइक्तीकेमी नु ग्रंथा मदिशोमी थमा सुइक्ब नेल्ल आन कली कोंइतीक दुमो। मिनु तोक्शो लोत्र पचा मगेमी। तीतस २:१५; २तिमोथी २:२२

13 गो मजाक्डा सम्म मुर आन कली परमप्रभु यावे आ लोत्र पढेशा, नेंपाइक्ना पाइक्न नु शेंना शेंन बाक्को।

14 थमा सुइक्ब आन शेंब खाल्पापुकीमी इ पिया तारी गुड वोइश्शा, परमप्रभु यावेमी तुइक्पाइश्शो लोत्र पशा, इ कली गेय पतीके सक्ति गेशो बाक्त। मेको गेय रिमशो पा पावो। १तिमोथी १:१८; १तिमोथी ५:२२; प्रेरित ६:६; प्रेरित ८:१७; २तिमोथी १:६

15 मोपा बाक्को। मेको इ पशो तशा, नेल्लेमी इ थमा सुइक्तीके बारशो तामेक्ल।

16 आम कली नु इ शेंतीके कली रिम्शो पा होस पावो। मोदेशो पा, गे आम इ कली नु इ लोत्र नेंब आन कली श्येत रे प्रोइनेवे। रोमी ११:१४

## 5

मुर नेल्ल आन कली रिम्शो पावो

1 शेंब खाल्पा आन कली महुइक्तो, तन्न आम आफ कली खोदेशो पा लोत्र पावो। ठिटा वोंइश मुर आन कली लोकब खोदेशो मिम्तो। लेवी १९:३२; तीतस २:२

2 मीश मुर आन कली इम्मा खोदेशो मिम्तो। ठिटी आन कली समी खोदेशो मिम्तो। मोपा नेल्ले रिम्शो पावो।

वोंइश बेक्शो मीश मुर आन पर्वम

3 आन वोंइश बेक्शो रिम्शो पाइब मीश मुर आन कली ठेयब सेलो।

4 आन वोंइश बेक्शो मीश मुर आ तमी तौ, चच युइ बाक्तेकम हना, मेकोपुकीम आम खिं डा मुर आन कली रिम्शो गेय पा कोंइचा मालनीम। आम आफ आस कली रिम्शो पचा मालनीम। मेको परमप्रभु यावे आ डोंइती शुश रिम्शो बाक्ब।

5 आ वोंइश बेक्शो मीश मुर रिम्शो बाक्त हना, परमप्रभु यावे कली ला मिम्ब। मेकोमी नाकदो नाक्त प्रार्थना पा पुंइना पुंइन बाक्ब। लूका २:३७

6 आ दला दाक्स पाइब चहिं सेस बाक्त हना यो, बेक्शो खोदेशो दुम्ब।

7 एको लोत्र शेंदीमी। मेकोपुकी दोस गेचा मपुंडसीब दुम्मल।

8 सुमी आ खिं डा मुर आन कली मकोत्रबा, मेको आ थमा सुइक्तीके जाम्शा लशा, थमा मसुइक्ब आन क्येडा यो मरिम्शो दुम्ब। मती १५:५-६

9 वोंइश बेक्शो मीश मुर ६० बर्स दुम्ने थुम्शा ला, वारच पचा कली आ नें ब्रेक्सीब। मेको वोंइश का आ मीश ला दुम्चा माल्ब।

10 आ तमी तौ रिम्शो पा कोल्पाइश्शा, मुर आन कली बास बाक्चा गेशा, थमा सुइक्ब आन खोइली चिक्शा, श्येत जाइब आन कली वारच पशा, नेल्लेमी रिम्शो पना पन बाक्ब, दे मुरपुकीमी तुइश्शा मीश मुर आ नें ला ब्रेक्सीब। हिब्रू १३:२; यूहन्ना १३:१४

11 वोंइश बेक्शो ठिटी मीश मुर आन कली वारच पचा कली आन नें मब्रेक्चा। मारदे हना आन दला दाक्स पा खीस्त कली प्रेंताक्म हना, ग्युंवे पचा ला मिन्नीम।

12 मिनु आन डोंइती देशो प्रोंइशा, दोस ताइब दुम्नीम।

13 मेकोपुकी मुर आन खिं खिं हिरथ लाइनीम। अल्सी ला ममाइ, मदेंचा डा लोत्र यो शुश पाइनीम।

14 मोपतीके वोंइश बेक्शो ठिटी मीश मुरपुकीमी ग्युंवे पा, आल थिशा, आन खिं डा गेय पामेक्ल। मो पाम्तेकम हना, मरिम्शो पा गाक्चा मताइनीम। अरुमी यो थमा सुइक्ब आन पर्वम मरिम्शो लोत्र पचा मताइनीम। १तिमोथी २:१५; १कोरिन्थी ७:९

15 का निक्शीमी सैतान कली खोइक्चा गोम्तेकम।

16 थमा सुइक्ब आन खिंमी वोंइश बेक्शो मीश मुरपुकी बाक्तेकम हना, मेको आन कली वारच पामेक्ल। मिनु गुम्तीके कली श्येत मदुम्थु, वोंइश बेक्शा, का ला लीशो मीश मुर आन कली वारच पचा ताइब। प्रेरित ६:१

गुम्तीके डा गेय पाइब

17 गुम्तीके खिंमी श्येत पा लोत्र पाइब नु शेंब खाल्पा आन कली निक्शी खेयप मान पा क्येट गेचा मालनीम। प्रेरित १४:२३; रोमी १२:८

18 परमप्रभु यावे आ लोत्रमी “ब्यफ कली दांड पपाइश्शोनु, फुडला मपाइक्चा” मिनु “गेय पाइब आन गाल्च ताइब बाक्नीम” दे ब्रेक्शो बाक्ब। ब्यवस्था २५:४; १कोरिन्थी ९:९; लूका १०:७

19 मुर कामी गुम्तीक डा शेंब खाल्पा कली दोस गेप्टु हना, सांकछी निक्शी सां मबाक्थु, थमा मसुतो। ब्यवस्था १९:१५; मती १८:१६

20 सु मरिम्शो पना पन बाक्मे, मेको कली थमा सुइक्ब आन डोंइती हुइक्तो। मिनु मेको नेंब नेल्लेमी मरिम्शो पचा हिनीम। गलती २:१४; मती १८:१५-१७

21 परमप्रभु यावे, खीस्त येसु नु योत्रशो परमप्रभु यावे आ स्वर्ग डा गेय पाइब आन डोंइती “मुर आन कुल मकोत्रथु, आं देशो नेल्ल पावो” दे इ कली अरेनुइ। मुर आन कुल कोत्रशा, मारेइ मपावो।

22 मुर आन कली ब्रो थिशा, आन तार गुइ वोइश्शा, प्रार्थना मपावो। मुर आन मरिम्शो पतीकेमी मगरो। मरिम्शो रे डोन बाक्को। १तिमोथी ४:१४

23 डोंइती डा खोदेशो पा ब्वाक्कु ला मतूडो। इ कोत्रज रोइ पतीके इक्का अडगुर शांबु ब्वाइश्शा तूडो।

24 मुर का निक्शी आन मरिम्शो पशो तुंडसीब। सजाइ ताइनीम, दे यो तुंडसीब। का निक्शी आन मरिम्शो पशो चहिं नोले ला तुंडसीब।

25 मोपा मुर का निक्शी आन रिम्शो पशो मतुंडसाक्व हना यो, खुइश्शा लीने मचान्नीम।

## 6

वाइलीम वाइल आन पर्वम शेंशो



1 वाइलीम वाइल नेल्लेमी आन होत्रप मान ताक्का शिरशो बाक्नीम, दे मिम्चा माल्नीम। मोपा मुरपुकीमी परमप्रभु यावे आ नें नु आ शेंतीके आइक्च मसेल्नीम। एफिसी ६:५; तीतस २:९-१०

2 सु सु आन होत्रप थमा सुइक्ब बाक्मा, मेको आन पर्वम “थमा सुइक्ब लोकब दुम्शा, मान गेचा ममाल्नुड” दे ममिम्मेक्ल। मेकोपुकीमी डोइती क्येडा रिम्शो पचा माल्नीमी, दे मतो। मारदे हना मेको आन गेय गेब थमा सुइक्ब नु दाक्को मुर दुम्त। मोदेशो पचा शुश शेंदो। फिलेमोन १६

तिमोथी नु थमा सुइक्ब आन कली अरेशो

3 सुमी अरु शेंतीक शेंबा, मेकोमी इ प्रभु येसु खीस्त आ थमा लोत्र नु आ शेंतीके नु मगारचा डा शेंब। मेको आं देशो थमा लोत्र चहिं परमप्रभु यावे कली मिम्ब नु दाक्ब थुं रे बाक्ब। रतिमोथी १:१३

4 मेको अरु लोत्र शेंब ठेयब लेशशो मारिड मजोक्ब बाक्नीम। आन लोत्र ला आ तार पशा, जिचा पोक्का माल्नीम। मेकोपुकीमी गेहे पाइब, जीब, मरिम्शो लोत्र पाइब नु मरिम्शो मिम्ब सेल्नीम। रतिमोथी २:१४; तीतस ३:१०-११

5 मेकोपुकीमी मुर आन दातेमी जिचा पोक्नीम। आन थुं गशो खोदेशो दुम्शा, थमा लोत्र रुपने मचाप्नीम। परमप्रभु यावे कली मिम्चा, दाक्का क्येट चेन्तीके बाक्ब, दे मिम्नीम।

6 परमप्रभु यावे कली बोल्यो थमा सुइक्का चहिं थुं नाइक्तीक बाक्ब। रतिमोथी ४:८; मती ६:२५-३४; फिलिप्पी ४:११-१२; हिब्रू १३:५

7 मारदे हना गोपुकीम जरमेशोन, मारिड पने मचाक्नय। बेक्शोनो यो मारिड मलाइक्नय। अय्युब १:२१; भजन संग्रह ४९:१८; उपदेसक ५:१४

8 जचा फेक्का गाप्त हना, ग्येरसय। हितोपदेस ३०:८

9 तन्न सु सु शुश क्येट थीब दुम्चा दाक्नीमी, मेको आन थुं थाम्चा पुंडसीशा, ग्याइलीम रेशशो खोदेशो पा, निप्स मपाइशशो नु श्येत जाइब दुम्नीम। आंम कली खतम सेल्सीशो बाक्नीम। हितोपदेस २८:२२; मती १३:२२

10 क्येट कली दाक्ब मरिम्शो आन क्येडा यो मरिम्शो बाक्ब। मोपा क्येट दाक्ब का निक्शीमी थमा सुइक्तीके प्रोइशा, आंम थुं कली तूशो खोदेशो पा शुश खाइक्पाइक्तेक्म। एफिसी ५:५; रतिमोथी १:१९

11 मोपतीके गे परमप्रभु यावे आ मुर दुम्शा, मेको नेल्ल रे डोन बाक्को। ठीक पतीके, परमप्रभु यावे कली मिम्शा दाक्का, थमा सुइक्का, मुर आन कली दाक्का, थमा सुइक्का मप्रोइचा नु ब्रेम्शो दुम्चा ला मिम्तो। रतिमोथी ३:१७; रतिमोथी २:२२

12 थमा सुइशशा ग्राडो। “गेना हना यो परमप्रभु यावे नु बाक्ब दुम्ती” दे मिम्तो। गे शुश मुर आन डोइती इ थमा सुइशशो आ पर्वम रिम्शो लोत्र पाप्तीवी। मेना गे गेना हना यो ब्रोइशा बाक्का ताइब, दे ब्रेत्चा पुंडसीशो बाक्ते। रतिमोथी १:१८; एकोरिन्थी ९:२५-२६; रतिमोथी ४:७; रतिमोथी ४:१४; हिब्रू ३:१

13 नेल्ल आन कली ब्रोइचा गेब परमप्रभु यावे नु खीस्त येसु पन्तीयस पिलातस कली रिम्शो सांक्की गेब बाक्त। गो इ कली परमप्रभु यावे नु खीस्त येसु आस डोइती अरेनुड। यूहन्ना १८:३६-३७; प्रकाश १:५

14 मार अरेनुड देशा हना, इ प्रभु येसु खीस्त मजाक्म सम्म गे मेको आ शेंशो लोत्र मखाल्थु शेंदीमी। मिनु सुइमी दोस गेचा मतामेक्ल।

15 येसु खीस्त जाक्मेनु, नेल्ल आसीक तशा, नेल्ल सक्ति पाइशशो पिप आन पिप नु प्रभु आन प्रभु दुम्शा जाक्त। ब्यवस्था १०:१७; प्रकाश १७:१४

16 मेको ला गेनायो मबेक्ब। सुइ आन कोवने मचाप्चा डा पा छेडछेडमी बाक्ब। सुइमी मेको कली गेनायो मताम। तने यो मचाप्नीमी। मेको मान तशा नेल्ल क्येडा सक्ति पाइशशो बाक्ब। आमैन। प्रस्थान ३३:२०; यूहन्ना १:१८

शुश थीब आन कली अरेशो

17 गे मुल शुश क्येट थीब आन कली “ठेयब लेशशो मदुमीन। जाम्शा लाइब शोंप कली आस मपथु, परमप्रभु यावे कली आस पने। मारदे हना परमप्रभु यावेमी इ कली शुश तेम्शा गेब। आ गेशो तशा ग्येरसीन” दे माइक्की। भजन संग्रह ६२:११; लूका १२:१५-२१

18 मेकोपुकीमी रिम्शो गेय पतीकेमी गेनायो मनुप्ब शोंप पाइशशो दुम्मल। हाइशशो दुम्शा, मुर आन कली गेब दुम्चा माल्नीम।

19 मो पाम्तेक्म हना, नोले रिम्शो दुम्नीम। बोल्यो जग खोदेशो पा, गेना हना यो ब्रोइशा बाक्का ताइब दुम्नीम। मेको ला थमा ब्रोइचा बाक्ब। मती ६:२०; लूका १६:९

नोले डा लोत्र

20 तिमोथी, इ कली शेंशो लोत्र रिम्शो पा पावो। जाम्शा लाइब लोत्र नु जिचा पोक्तीक लोत्र, तुइक्ब थुं रे पीब देंखु पाइनीम। मेको रे डोन बाक्को। रतिमोथी १:१२-१४; रतिमोथी ४:७

21 मारदे हना का निक्शीमी मोदेशो लोत्र मिम्शा पशा, आन थमा सुइक्तीके जाम्शा लत। परमप्रभु यावे आ शिशी गे नु लील। रतिमोथी १:६; रतिमोथी २:१८

## २ तिमोथी

**ब्रेक्ब मुर:** एको चिठी पावलमी तिमोथी कली नोले ब्रेक्शो बाक्ब।

**गेना ब्रेक्शो:** पावलमी रोम सहरम लेंशा चोकचा पुंडसीतीकेमी ब्रेक्शो बाक्ब।

**मारदे ब्रेक्शो:** पावलमी आंम पर्वम शुश ब्रेक्ब। मेकोमी तिमोथी आ थमा सुइक्तीके कली बारपाइशशा नु गुम्तीक डा मुर यो रिम्शो सेल्चा दाक्ब। “दूली शेंब आन पर्वम होस पा बाक्कीन” दे यो लोत्र पाइब। मेको चिठी गुम्तीक कली शेंतीक बाक्ब।

डोंइती डा लोत्र

1 गो परमप्रभु यावे आ दाक्शो ख्रीस्त येसु आ सोइशशो पावल नड। डोंइती परमप्रभु यावेमी “ख्रीस्त येसुमी गेना हना यो ब्रोंइशा बाक्तीक बाक्ब” दे आ लोत्र खाण्शो बाक्त।

2 एको चिठी आं दाक्शो तौ तिमोथी, इ कली ब्रेक्ताक्ड। इ आफ परमप्रभु यावे नु इं प्रभु येसु ख्रीस्त आस दाक्चा गे नु लील। मेको आस शिशामी इ कली थुं नाइशशा बाक्चा गेम्सेक्ल।

ग्येरपाइक्ब लोत्र आ पर्वम ब्रेक्शो

3 गो परमप्रभु यावे कली “गे रिम्शो पाइब बाक्नीनी” दे गेय पाइनुड। आं के किकी पिपी यो मोदेंशो पशो बाक्तेक्म। आं प्रार्थनामी इ कली गेना हना यो मिम्नुड। फिलिप्पी ३:५; प्रेरित २३:१; प्रेरित २४:१६

4 गो इ डाक्शो मिम्शा, नाक्दो नाक्ती इ कली गुम्चा दे मिम्नुड। मेकोमी आं कली ग्येरपाइक्ब। २तिमोथी ४:९

5 इ रिम्शो थमा सुइक्तीके मिम्नुड। मोदेंशो थमा सुइक्तीके डोंइती इ बगे लोइसमी, नोले इम्मा युनीसमी बाक्शो बाक्त। मुल थमा पा इ आगाम बाक्ब। गो मेको तुइक्नुड। प्रेरित १६:१-३

6 मोपतीके गो इ कली आं गुइ इ तारी वोदुन, परमप्रभु यावेमी इ कली मार मार गेवा, मेको लेंशा मी खोदेंशो पा ब्रपतो, दे फुकपाइक्वन। १तिमोथी ४:१४

7 मारदे हना परमप्रभु यावेमी इ कली हिंब थुं मगेव। तन्न सक्ति पाइशशो, दाक्पाइक्ब नु गेय पचा डोंइती मिम्पाइक्ब थुं गेप्टु। रोमी ८:१५

8 इं प्रभु आ पर्वम लोत्र पचा मुने मपावो। गो प्रभु आ पर्वम जेल्खानम बाक्शो आं पर्वम यो मुने मपावो। तन्न ग्येरपाइक्ब लोत्र आ पर्वम परमप्रभु यावे आ सक्तिमी श्येत फलो। रोमी १:१६; पत्रुस ४:१६

9 परमप्रभु यावेमी सेतान रे प्रोंइशा “आं मुर नम” दे ब्रेक्ताक्ब। इं रिम्शो पतीके कोत्रशा ममाइ, आ माल्शो नु शुश डोंइती रे ख्रीस्त येसुमी इ कली गेशो दाक्तीके आ पर्वम ब्रेक्ताक्ब। तीतस ३:५

10 मुल इं कली पाप रे प्रोंइब येसु ख्रीस्त कली रागीम सोइशशा, मुर नेल्ल आन कली तपाइक्वतु। ख्रीस्त येसुमी बेक्तीक कली प्राशा, ब्रोंइतीके नु गेना हना या ब्रोंइशा बाक्शा, परमप्रभु यावे आ ग्येरपाइक्ब लोत्र आ पतीकेमी छेडछेडमी वोइशशो खोदेंशो पा तुइक्पाइक्वतु। १कोरिन्थी १५:५५-५७; हिब्रू २:१४

11 मेको ग्येरपाइक्ब लोत्र तुइक्पाइक्चा, दे गो लोत्र पाइब, ख्रीस्त आ सोइशशो नु शेंब दुम्ती। १तिमोथी २:७

12 मोपतीके गो यो श्येत जाइनुड। तन्न गो मुने मपाइनुड, मारदे हना सु कली थमा सुइक्नुडा मेको तुइक्नुड। मेकोमी आं कली मबेक्डा सम्म कोत्रने चाप्ब, दे यो तुइक्नुड।

13 थमा लोत्र कली खोतो। मेको ख्रीस्त येसुमी बाक्शो थमा सुइक्तीके नु दाक्तीके बाक्ब। गे आं लोत्र रे तुइक्नेवे।

14 इं आगामी बाक्शो परमप्रभु यावे आ सोक्तीमी इ कली तुइक्पाइशशा थमा शेंतीके कली खोतो।

15 नेल्ल एसीया डा मुरपुकीमी आं कली प्रोंइतीमी दे तुइक्नेवे। मेको आन दातेमी फीगेलस नु हेरमोगेनेस बाक्नीसी। २तिमोथी ४:१६

16 प्रभुमी ओनेसीफरस आ खिं डा मुर आन कली शिशो पवल। मारदे हना साडलोम पाइशशो बाक्डानु, ओनेसीफरस आं पर्वम मुने मपथु, आं कली शुश रिम्शो पाप्टु। २तिमोथी ४:१९

17 मेकोमी रोम सहर जाक्दीशशा, आं कली शुश माल्शा थित्ती।

18 प्रभुमी मेको कली आ निसाफ पतीक नाक्तीमी शिशो पवल। मेकोमी एफिसस सहरमी शुश गेय पाप्टु, दे यो तुइक्नेवे।

## 2

श्येत फाल्चा माल्नीम

1 आं तौ, गे ख्रीस्त येसुमी बाक्शो शिशो मिम्शा, बोल्यो दुम्शा बाक्को। एफिसी ६:१०

2 गो शुश मुर आन डोंइती इ कली नेंपाइशशो लोत्र रिम्शो थमा सुइक्ब आन कली शेंदीमी। मेकोपुकीमी यो अरु आन कली शेंने चाप्नीम।

3 ख्रीस्त येसु आ रिम्शो सिपाही खोदेंशो दुम्शा, श्येत फलो। २तिमोथी १:८; २तिमोथी ४:५

4 लडाइ पाइब सिपाहीपुकीमी खिं डा गेय मपाइनीम। मारदे हना आन ठेयब मुरपुकीम देशो ला पाइनीमी।

5 दोरतीक दोरबमी हेंथे पा दोरत हना, ग्राने मचाप्ब। २तिमोथी ४:८; १कोरिन्थी १:२४-२७

6 सुमी रूम शुश गेय पाइबा, मेको आ बाली नाली आ डोंइती डा जाइब दुम्चा माल्ब।

7 आं देशो नेल्ल मिम्तो। मारदे हना प्रभुमी नेल्ल कली रुपतीक थुं गेब।

- 8 येसु ख्रीस्त कली मिम्तो। मेको दाऊद आ खिं रे जाकशा, बेकशो रे सेंसाकव। आं शेंशो ग्येरपाइकब लोत्र मेकोन बाकब। १कोरिन्थी १५:४,२०; रोमी १:३
- 9 मेको ग्येरपाइकब लोत्र शेंतीके, गो मरिम्शो पाइब खोदेशो पा साडलोम पाइकचा पुंडसीशा श्येत जाइनुड। तन्न परमप्रभु यावे आ लोत्र दा मपांडसीशो बाकब। फिलिप्पी १:१२-१४
- 10 मोपतीके गो योत्रशो मुर आन कली मिम्शा, श्येत नेल्ल फाल्नुड। मोपा मेकोपुकीमी ख्रीस्त येसुमी पाप रे प्रोंडशो दुम्शा, गेना हना यो परमप्रभु यावे आ छेडछेडमी ब्रोंडशा बाकचा तामेकल। कलस्सी १:२४
- 11 मुरुमी मेको लोत्र कली थमा सुइकने चाप्नीम “गोपुकी मेको नु बेकतय हना यो, मेको नु ब्रोंडनय। २कोरिन्थी ४:११
- 12 गोपुकीमी श्येत फाल्तय हना, मेको नु हुकुम पाडनय। गोपुकीमी ‘मेको कली मतुइकनुड’ दंतय हना, मेकोमी यो ‘मतुइकनुड’ देंब। मत्ती १०:३३
- 13 गोपुकीमी थमा सुइकचा प्रोंडतय हना यो, मेकोमी मप्रोंडब। मारदे हना ‘गो परमप्रभु यावे आ तौ मनड’ देंने मचाप्ब’ देंत। गन्ती २३:१९; भजन संग्रह ८९:३१-३४; रोमी ३:३-४; तीतस १:२

मजिचा दे शेंशो

- 14 एको लोत्र मेको आन कली फुकपाइकमी। परमप्रभु यावे आ डोंडती मेको आन कली “लोत्र आ परबम मजिने” दे माइकमी। मारदे हना मेको मरिम्शो दुम्ब, नेंबपुकी यो वाम ग्याम दुम्नीम। १तिमोथी ६:४; तीतस ३:९
- 15 गे परमप्रभु यावे आ डोंडती रिम्शो गेय पाइब दुम्चा कली बल पावो। थमा शेंतीके रिम्शो पा शेंचा कली काइ मुने पचा ममाल्नेवे। १तिमोथी ४:६; तीतस २:७-८
- 16 जाम्शा लाइब लोत्र पाइब रे डोन बाकको। मारदे हना मेकोपुकीमी मुर आन कली परमप्रभु यावे रे डोन दुम्पाइकनीम। १तिमोथी ४:७
- 17 मेको आन लोत्र राकशो गार खोदेशो बाकब। हीमेनेयस नु फिलेतस मेको आन दातेमी बाकनीस। १तिमोथी १:२०
- 18 मेको निक्शीमी थमा शेंतीक प्रोंडशा, मुर आन सेंचा नुप्शो बाकत दे शेंनीस। मोपा का निक्शी आन थमा सुइकतीके बेकपाइकताकसे।
- 19 तन्न परमप्रभु यावे आ थमा शेंतीके मब्रेत्चा डा जग खोदेशो बाकब। प्रभुमी आ मुर आन कली तुइकब। मिनु प्रभु कली तुइकब मुरपुकी मरिम्शो पचा रे डोन बाकचा माल्नीम। मेको थोत्रशो छाप खोदेशो बाकब। गन्ती १६:५; मत्ती ७:२२-२३; यूहन्ना १०:१४,२७
- 20 ठेयब खिंमी सुन नु चांदी के बोसपुकी ला ममाइ, तन्न शी नु खप के यो बाकनीम। का निक्शी रिम्शो गेय कली बाकनीम, का निक्शी मरिम्शो गेय कली बाकनीम।
- 21 सु आ मरिम्शो पशो शोत्रशा माफ ताइबा, मेको रिम्शो गेय डा बोस खोदेशो दुम्ब। आ होत्रप कली जिम्मा गेंसीशो नु मेको रिम्शो गेय पचा कली रिम्शो बाकब।
- 22 ठिटी ठिटा आन दला दाक्स रे डोन बाकको। रिम्शो थुंमी प्रभु कली लोत्र पाइबपुकी नु गारशा, ठीक पचा, थमा सुइकचा, दाकचा नु थुं नाइकचा ला मिम्तो। १तिमोथी ४:१२; १तिमोथी ६:११; हिब्रू १२:१४
- 23 हिक्सी मडाम्शो लोत्र पाइब नु काम मलाप्या डा लोत्र पा जित्तीके रे डोन बाकको। मेको जिचा पोक्ब ला बाकनीम दे तुइकनेवे। १तिमोथी ४:७
- 24 प्रभु आ गेय पाइबमी जिचा मटुम्ब। नेल्ल आन कली रिम्शो पाइब दुम्चा माल्ब। रुप्पाइशशा शेंबमी मुर आन मरिम्शो पतीके फाल्चा माल्ब। तीतस १:७-९
- 25 जिचा पोक्ब आन कली रिम्शो लोत्रमी ठीक सेल्चा माल्ब। परमप्रभु यावेमी मेको आन कली आ गे लेप्पाइशशा, थमा शेंतीके तुइकपाइकब कों?
- 26 सैतानमी मेको आन कली ग्याइशशा, आ दाकशो पपदानु, मेको रे प्रोक्मल।

### 3

नोले डा नाक्त दोदेशो बाकनीम

- 1 नोले डा नाक्त हिंचा डा श्येत दुम्ब। गे मेको तुइकचा माल्नेवे। १तिमोथी ४:१
- 2 मारदे हना मुरपुकीमी आंम कली ला दाकनीम। क्येट कली शुश दाकनीम। ठेयब लेशशा, अरु नेल्ल आन कली दिप्नीम। मरिम्शो लोत्र पाइनीम। आंम आफ कली मटिथु “गे रिम्शो पाइतीनी” गेनायो मदेंथु, पापम गुम्शा बाकनीम।
- 3 आंम खिं डा मुर आन कली मदाकनीम। ईख कुरनीम, मरिम्शो लोत्र पाइनीम। आंम रां नु शोत्र चलेस मजोक्नीम। जिचा पोक्नीम। रिम्शो मारेड मदाकनीम।
- 4 मुर आन कली श्येतम खुम्नीम। चुइशशा गेय पाइनीम। “गो जोक्नुड” दे बोशशा, मुर आन लोत्र मनेनीम। आंम दला दाक्स ला पाइनीम। परमप्रभु यावे कली मदाकनीम।
- 5 मोदेशो मुरुमी परमप्रभु यावे कली मिम्शा दाकचा देंखु पाइनीम। तन्न आन आगामी सक्ति मबाक्तीके कोंडनीम। मेकोपुकी नु डोन बाकको। मत्ती ७:१५-२१; तीतस १:१६
- 6 मेको आन दातेमी का निक्शीमी आन दला दाक्स पा पापम गुम्शो नु आंम कली चलेस मजोक्ब मीश मुर आन खिं ओत्रशा, लोत्र नेंपाइकनीम।
- 7 मेको मीश मुरपुकीमी सु आन लोत्र नेतेक्म हना यो, थमा शेंतीक गेनायो रुम्मे मचाप्नीम।

८ दोपा यन्नस नु याम्ब्रेस माइश्शो मुर निक्शीमी मोसा कली “इ गेय ठीक मबाक्ब” देंसा, मोपा मेको मुरपुकीमी यो थमा शेंतीके कली “ठीक मबाक्ब” देंनीम। आन थुं मूर्ख गेयम ब्रीशो दुम्शा, थमा सुइक्तीके प्रॉइशो बाक्नीम। प्रस्थान ७:११,२२

९ तन्न मोदेशो दूली शेंबपुकीमी शुश गेय पचा मताइनीम। मारदे हना यन्नस नु यम्ब्रेस आस कली खोदेशो पा, मुरपुकीमी “गशो बाक्नीम” दे तुइक्नीम।

पावल आ श्येत

१० मिनु गे आं शेंतीके, आं गेय पतीके “मार पाइनुड” दे आं मिम्तीके, आं थमा सुइक्तीके, आं फाल्तीके, आं दाक्तीके नु थमा सुइक्तीके मप्रॉइशो ताप्तीवी।

११ आं कली खेदा पशो, आं श्येत जशो यो ताप्तीवी। एन्टीओक, आइकोनीयम नु लिस्त्रा सहरमी गो दोदेशो श्येत जडा, दोपा खेदा पशो नेल्ल फलु, मेको नेल्ल ताप्तीवी। तन्न प्रभुमी मेको नेल्ल रे प्रॉइती। प्रेरित १३:१३-१४:२२; भजन संग्रह ३४:२०

१२ सु सु ख्रीस्त येसुमी परमप्रभु यावे कली मिम्शा, दाक्शा ब्रॉइनीमी, मेकोपुकी खेदा पचा पुंडसीनीम। मती १६:२४; प्रेरित १४:२२; १थिस्सलोनिकी ३:३

१३ मरिम्शो नु ग्रान्ना दिचा डा मुरपुकीमी “मुर आन मिक्च सिल्लीक” दे मिम्तमेनु, डोंइती डा क्येडा मरिम्शो दुम्शा, आंमान आन मिक्च सिल्ला पुंडसीनीम। १तिमोथी ४:१

परमप्रभु यावे आ लोत्र

१४ मिनु गे मार शेंसे, मेको “ठीक बाक्ब” दे थमा सुइश्शा, पना पन बाक्को। मारदे हना गे सु नु शेंसे मेको तुइक्नेवे।

१५ गे आल रे ना परमप्रभु यावे आ लोत्र तुइश्शो बाक्नेवे। मेको लोत्रमी ख्रीस्त येसु कली थमा सुइश्शा “दोपा पाप रे प्रॉइचा” दे इ कली शेंने चाप्ब। यूहन्ना ५:३९

१६ परमप्रभु यावेमी मेको लोत्र नेल्ल गेशो बाक्त। मेको शेंचा कली, हुइक्चा कली, रिम्शो सेल्चा कली नु थमा सुइक्तीक ठीक सेल्चा कली बाक्ब। २पत्रुस १:१९-२१

१७ परमप्रभु यावेमी आ मुरपुकीमी नेल्ल गेय रिम्शो पामेक्ल दे एको लोत्र तुइक्पाइश्शो बाक्त। १तिमोथी ६:११

## 4

बेक्चा सम्म थमा सुइक्चा मप्रॉइचा

१ गो इ कली ख्रीस्त येसु नु परमप्रभु यावे आस डोंइती मार देंनुड देंशा हना, येसु ख्रीस्त आ राज्य जाची ना बेक्शो नु ब्रॉइशो मुर आन कली निसाफ पाइब बाक्ब। मेको आ जाक्चा नु राज्य पचा मिम्शा १पत्रुस ४:५

२ “परमप्रभु यावे आ लोत्र पावो। नेंचा दाक्ताक्म हना यो, मदाक्ताक्म हना यो, शेंदीमी। मरिम्शो पाइब आन कली लोत्र पावो। मुर आन कली ‘ठीक पचा’ दे शेंदो। आन थुं बारपतो। नेल्ल आन कली फाल्शा, रिम्शो शेंदो। प्रेरित २०:२०,३१

३ मारदे हना इक्का नोले थमा शेंतीक नेंचा काइ मदाक्नीम। आंम दला दाक्स पा अर्को लोत्र कली नोफा दाइश्शा, आंम कली शेंबपुकी तेलनीम। १तमोथी ४:-

४ मेना थमा शेंतीक प्रॉइशा, मुर आन सेल्थो कथा नेंनीम। १तिमोथी ४:७; २थिस्सलोनिकी २:११

५ गे चहिं मार पाप्तीवी हना यो, मिम्ना मिम्न गेय पावो, श्येत फलो, ग्येरपाइक्ब लोत्र शेंदो। इ कली गेशो गेय नेल्ल पावो” दे माइक्नन। २तिमोथी २:३

६ मारदे हना गो च्देशो खोदेशो दुम्शा, आं लची ना जाक्त। फिलिप्पी २:१७

७ गो थमा सुइश्शा ग्राती। दाम पशो खोदेशो पा ग्राती। थमा सुइक्चा मप्रॉइथु बाक्ती। १कोरिन्थी ९:२५; १तिमोथी ६:१२; प्रेरित २०:२४; फिलिप्पी ३:१४

८ मुल रे ठीक पतीके डा सिरपेच गुप्चा दे आं कली वोइश्शो बाक्त। प्रभु ठीक निसाफ पाइब बाक्ब। मेकोमी आं कली आ नाक्तीम सिरपेच गेब। आं कली ला ममाइ, सु सुमी आ जाक्शो दाक्नीमी, मेको आन कली यो गेब। २तिमोथी २:५; १पत्रुस ५:४; याकूब १:१२; प्रकाश २:१०; मती २५:२१

पावल नु आ नु गेय पाइबपुकी

९ आं कली रीब पा गुम्थ जाक्को। २तिमोथी १:४

१० मारदे हना डेमासमी रागी डा गेय दाक्शा, आं कली प्रॉइती। मिनु थिस्सलोनिकी सहर लत। क्रेसेन्स गलातीया नु तीतस डाल्मातीया रागी लाम्ताक्स। कलस्सी ४:७,१०,१४

११ लूका ला गो नु बाक्ब। मर्कूस कली गे पिश्शा पिवां। मारदे हना मेको आं कली वारच पाइब बाक्ब। प्रेरित १५:३७; कलस्सी ४:१०

१२ तिखीकस कली एफिसस सहरम सोइक्ताक्ड। एफिसी ६:२१

१३ त्रोआस सहरमी कारपस आ खिंमी फेक्तीक वा का प्रॉइता। मेको चाक्को। किताब नु कागजपुकी यो चाक्मी।

१४ अलेक्जन्डर तांबा तुप्तीलमी शुश श्येत गेती। प्रभुमी मेको आ गेय तशा, सजाइ गेब। १तिमोथी १:२०

१५ गे यो मेको नु होस पा बाक्को। इ शेंतीके आ पर्वम शुश जिचा पोक्त।

१६ डोंइती डा आं मुददाम सुइमी आं कली वारच मपाम। नेल्लेमी प्रॉइतीमी। परमप्रभु यावेमी मेको आन कली सजाइ मगेवल। २तिमोथी १:१५

17 तन्न प्रभु गो नु बाक्शा, अर्को रागी डा मुर आन कली परमप्रभु यावे आ लोत्र नेल्ल शेंचा सक्ति गेती। मोपा आं कली गुप्स रे प्रौडती। प्रेरित २३:११; प्रेरित २७:२३

18 प्रभुमी आं कली आ स्वर्ग डा राज्य लचा, दे नेल्ल श्येत रे प्रौडब। मेको कली गेना हना यो मान पय। आमेन।

नोले डा लोत्र

19 प्रिस्कीला, अक्वीला नु ओनेसीफरस आ खिं डा मुर नेल्ल आन कली “रिम्शो बाक्कीन” देनो। प्रेरित १८:२; रतिमोथी १:१६

20 इरास्तस कोरिन्थ सहरम बाक्ब। त्रोफीमस रोड पवानु, गो मिलेटस सहरमी लाइशशा वोडक्ता। प्रेरित १९:२२; प्रेरित २०:४

21 हिउंद क्येडा डौडती आं कली गुमथ रीब पा जाक्को। युबुलसमी इ कली “रिम्शो बाक्को” देशो बाक्ब। पुडेन्स, लिनस, क्लौदीया नु थमा सुइक्ब लोकब नेल्लेमी यो मो देंतेक्म।

22 प्रभु गे नु बाक्ल। आ शिशी गे नु लील।

## तीतस

**ब्रेकब मुर:** एको चिठी पावलमी आ नु गेय पाइब तीतस कली ब्रेकशो बाक्त।

**गेना ब्रेकशो:** पावल रोम सहर डा जेलखान रे प्रॉडचा पुंडसे नोले क्रेट टापु लमाक्त। मेकेर मुर आन कली शेंचा कली तीतस कली वोइशशो बाक्त। एको चिठी ६५ ए. डी.मी तीतस कली ब्रेकशो बाक्त।

**मारदे ब्रेकशो:**

१. थमा सुइक्ब आन शेंब दोदेशो दुमचा माल्नीमी।

२. थमा सुइक्ब आन कली शेंतीके रिम्लो दुमचा माल्नीमी।

हुकुम पाइब आन कली टिचा माल्नीमी।

दूली शेंब आन पर्वम होस पचा माल्नीमी।

**डोंइती डा लोत्र**

1 गो परमप्रभु यावे आ वाइल नु येसु ख्रीस्त आ सोइशशो, थमा सुइक्ब पावल नड। परमप्रभु यावे आ योत्रशो मुर आन कली थमा सुइक्ब आ पर्वम शेंतीक नु मेको तुइशशो रे रिम्लो गेय पचा माल्ब, दे शेंब दुमती।

2 मोदेशो दुम्मेनु, गो नेल्ल गेना हना यो परमप्रभु यावे नु बाकशा ब्रोडनय, दे आस पाइनय। रतिमोथी २:१३

3 आ दाकशो ना मुर आन कली आ लोत्र तुइक्पाइक्तु। दोपा तुइक्पाइक्तु देशा हना, इं मरिम्लो गेय रे प्रॉडब परमप्रभु यावेम “आं लोत्र शेंदीमी” देत। एफिसी १:९-१०

4 तीतस, एको चिठी इ कली ब्रेक्ताकड। गो निक्शी इस के थमा सुइक्तीक का दुमशा, गो आं तौ खोदेशो दुम्ले। इं आफ परमप्रभु यावे नु इं पाप रे प्रॉडब येसु ख्रीस्तमी इ कली शिशी नु थुं नाइक्चा गेम्सेक्ल। रतिमोथी १:२

**थमा सुइक्ब आन कली कोत्रब**

5 गो इ कली क्रेट टापुमी मारदे वोइक्तन देशा हना “गे थमा सुइक्ब आन दातेमी ठीक मद्रुम्लो गेय ठीक पपतो। मिनु सहर सहर डा युम्ल्तीकेमी शेंब खाल्पापुकी वोतो” दे इ कली अरेतन। प्रेरित १४:२३

6 मिनु युम्ल्तीक खिं डा शेंब खाल्पापुकी सु सु दुम्ने चाप्नीमी देशा हना, काइ दोस गेचा मपुंडसीब नु मीश का ला पाइशशो वोइश मुर बाक्चा माल्ब। मेको आ तमी तौ थमा सुइक्ब बाक्चा माल्नीमी। हेंथे गाक्ब नु मटीब आल आन आफ युम्ल्तीक खिं डा शेंब खाल्पा दुम्ने मचाप्नीमी। रतिमोथी ३:१-७

7 मोदेशो थमा सुइक्ब आन कली कोत्रब परमप्रभु यावे आ खिं डा गेय पाइब दुमशा, दोस गेचा मपुंडसीब बाक्चा माल्ब। मिनु ठेयब लेशशो, शुश गाइक्ब, राकसी शांबु तूशा दुक्ब, चुरशा गुइ प्रॉडब नु शिम मुरुम मेको गेय पने मचाप्नीमी। रतिमोथी ४:१; रतिमोथी २:२४

8 थमा सुइक्ब आन कली कोत्रब चहिं बास गेब, रिम्लो गेय दाक्ब, रिम्लो नु मरिम्लो तुइक्ब, ठीक गेय पाइब, थमा पा परमप्रभु आ गेय पाइब नु आंम रां चलेस जोक्ब मुर बाक्चा माल्नीमी।

9 मोदेशो पाइब मुर परमप्रभु यावे आ लोत्र डा शेंतीक तुइशशा पचा माल्नीमी। मोपा मेकोपुकीमी थमा सुइक्ब आन कली रिम्लो शेंशा, अरेने चाप्नीमी। मिनु परमप्रभु यावे आ लोत्र दूली शेंब आन कली यो रिम्लो सेल्ले चाप्नीमी।

**दूली शेंब आन पर्वम**

10 परमप्रभु यावे आ शेंशो लोत्र मटीबपुकी शुश बाक्नीमी। शोर गाक्शो लोत्र पाइब नु हेंथे लां शेंब बाक्नीमी। मेको शुश खोइक्तीक चिनु पाइशशो इस्त्राएली बाक्नीमी।

11 मोदेशो मुर आन कली ब्वालेइ पपाइक्चा माल्नीमी। मारदे हना खिं खिं डा मुर नेल्ल आन कली जिपाइक्नीमी। मिनु क्येट चेमचा कली शेंनीमी।

12 क्रेट टापु डा शुश जोक्ब मुरुमी आंम मुर आन पर्वम मार लोत्र पवा बाक्त देशा हना, मेकोमी “क्रेट डा मुरपुकी गेना हना यो जोल पाइब, मरिम्लो पाइब जन्तु, शुश जाइब ब्वाइब नु अल्सी अल्से बाक्नीमी” दे लोत्र पवा बाक्त।

13 मेको आ देशो थमा बाक्ब। मोपतीके गे मेको आन कली शुश अरेवो। मोपा ला आन थमा सुइक्तीके ठीक दुम्ने चाप्ब। रतिमोथी ४:२

14 मिनु थमा सुइक्बपुकीमी यहूदी आन कथा नु मुरुम सेल्लो अरेशो लोत्र नेंचा मद्रुम्ब। मेको थमा लां प्रॉडब बाक्नीमी। रतिमोथी ४:७; रतिमोथी ४:४

15 रिम्लो मुर आन कली मारेइ मारेइ रिम्लो बाक्ब। ग्रंथा दिचा डा मुर नु थमा मसुइक्ब आन कली चहिं मारेइ मारेइ रिम्लो मबाक्ब। मेको आन थुं नु मिम्ल्तीके मरिम्लो बाक्ब। मती १५:११; रोमी १४:२०

16 मिनु मेकोपुकीमी “गो परमप्रभु यावे कली तुइक्नुड” देखु पाइनीमी। तन्न आन पतीकेमी मतुइक्ब बाक्नीमी, दे तुंडसीब। मोपा मेकोपुकी ग्रंथा दिचा डा मुर बाक्नीमी। मिनु मटीब दुमशा, रिम्लो गेय यो पने मचाप्नीमी। रतिमोथी ३:५

## 2

**युम्ल्तीकेमी दोपा बाक्चा**

1 गे चहिं येसु ख्रीस्त आ ठीक लोत्र रिम्लो पा मुर आन कली शेंदीमी। रतिमोथी १:२३

2 गे खाल्पा आन कली मार शेंचा माल्नेवे देंशा हना, रिम्शो मिम्ने चाप्ब, मान पाडकचा शिरशो मुर, गेय पचा क्येडा डोंइती मिम्ब, आन थमा सुडकचा, आन दाकचा नु आन फाल्चा डा सक्ति ठीक दुम्शा बाकचा माल्नीम, दे शेंचा माल्नेवे। १तिमोथी ५:१

3 मिनु खाल्पी आन कली मार शेंचा माल्नेवे देंशा हना, खाल्पीपुकी रिम्शो थमा सुडकब दुम्चा माल्नीम। हेंथे लोत्र पचा मदुम्ब। शुश शांबु तूचा मदुम्ब। खाल्पीपुकी रिम्शो गेय शेंब दुम्चा माल्नीमी।

4 मोदेंशो पा खाल्पीपुकीमी आन क्येडा आल मीश मुर आन कली आन वोंइश नु आन आल आन कली दाकचा माल्ब, दे शेंचा माल्नीम।

5 गेय पचा क्येडा डोंइती मिम्चा, आंम वोंइश नु ला बाकचा, खिं डा गेय रिम्शो पचा, मुर नु रिम्शो दुम्चा, आंम वोंइश कली टिचा, दे शेंचा माल्नीम। मोदेंशो पाम्तेकम हना, मुरपुकीमी परमप्रभु यावे आ लोत्र आ पबंम मरिम्शो लोत्र मपाइनीमी। एफिसी ५:२२

6 मोदेंशो पा गे इ क्येडा आल वोंइश मुर आन कली “गेय पचा क्येडा डोंइती मिम्चा माल्ब” दे शेंचा माल्नेवे।

7 मिनु नेल्ल क्येडा ठेयब मार बाकब देंशा हना, गे रिम्शो गेय पशा, थमा सुडकबपुकी दोदेंशो मुर बाकनीमी, दे कोंइचा माल्नेवे। मिनु मुर आन कली शेंदीनु, हेंथे लोत्र मपथु, रिम्शो शेंतीक शेंचा माल्नेवे। २तिमोथी २:१५; १पत्रुस २:१५; १तिमोथी ४:१२; १पत्रुस ५:२

8 गे रिम्शो लोत्र शेंताकवी हना, सुइमी इ कली दोस गेने मचाप्नीम। मिनु इ कली मदाकबमी यो इ पबंम मारेइ मरिम्शो लोत्र पचा मताइनीम। मिनु आन मुने दोकनीम।

9 मिनु वाइलीम वाइल आन कली मार शेंचा माल्नेवे देंशा हना, आंम ठेयब मुर आन लोत्र टिचा माल्नीम। आन गेय रिम्शो पा आन ठेयब मुर आन कली ग्येरपाडकचा माल्नीम। आन ठेयब मुरुमी लोत्र पामेनु, मेकोपुकीम जोप पचा मदुम्नीम। एफिसी ६:५-६१; तिमोथी ६:१-२; १पत्रुस २:१८

10 खुइ पचा मदुम्ब, नेल्ल गेयमी थम रिम्शो पाइब दुम्चा माल्नीम। मोदेंशो रिम्शो गेय पा इ कली पाप रे प्रोंइब परमप्रभु यावे आ शेंतीके रिम्शो लोत्र बाकब, दे कोंइनीमी। मेको शेंचा माल्नेवे।

परमप्रभु यावे आ शिशी

11 परमप्रभु यावे आ शिशी मुर नेल्ल आन कली पाप रे प्रोंइचा कली तपांडसाक्व। तीतस ३:४

12 मोदेंशो शिशीमी इ कली परमप्रभु यावे कली मगारचा डा गेय नु रागी रागी डा मुर आन पतीके आ पबंम मोदेंशो मपचा, दे शेंब। मिनु मुल गेय पचा क्येडा डोंइती मिम्चा, ठीक गेय पचा नु रागीम बाकशा, परमप्रभु यावे कली मान पा हिंचा, दे शेंब।

13 मोदेंशो दुम्शा, मान ताइब परमप्रभु यावे नु इ कली पाप रे प्रोंइब येसु ख्रीस्त आ छेडछेड यूब, दे गो आस पशा रिम्नय। १कोरिन्थी १:७; फिलिप्पी ३:२०; १थिस्सलोनिकी १:१०

14 येसु ख्रीस्तम आंम कली काइ ममिम्थु, साइकचा पुंडसाक्व। मारे दे साइकचा पुंडसाक्व देशा हना, इ कली मटितीके रे प्रोंइचा कली साइकचा पुंडसाक्व। मिनु इ कली परमप्रभु यावे आ योत्रशो मुर सेल्चा नु इ कली शुश रिम्शो गेय पपाइकचा कली आंम कली साइकचा, दे जिम्मा गेसाक्व। गलाती १:४; १तिमोथी २:६; प्रस्थान १९:५; एफिसी २:१०

15 मेको लोत्र शेंदीमी। मिनु गे अधिकार पाइशो दुम्शा, मुर आन कली अरेवो। मिनु मुरपुकीमी “एको टिटामी आंड कली शेने मचाप्ब” देंचा मपुंडसो। १तिमोथी ४:१२

### 3

रागीम दोपा बाकचा माल्नीमी

1 मिनु गेमी हुकुम पाइब नु सरकार डा अधिकार पाइशो मुर आन कली टिचा, दे थमा सुडकब आन कली मिम्पतो। थमा सुडकबपुकी टीब मुर दुम्चा माल्नीम। मिनु मार मार रिम्शो गेय बाकमे, मेको पचा माल्नीम। रोमी १३:१; १पत्रुस २:१३

2 मिनु सुड आन पबंम काइ शुक्शी मपचा, जिचा मपोक्चा, मुर आन कली रिम्शो पा फाल्चा, ठेयब मलेल्थु, मुर आन कली वारच पचा माल्नीम। फिलिप्पी ४:५

3 डोंइती गो मरुब बाकतय। परमप्रभु यावे कली मटीब बाकतय, हेंथे गाक्ब, मार मार दाकतय, मेको दला दाक्स पाइब बाकतय। ग्रॉंरा दिचा डा गेय पाइब बाकतय। गो मरिम्शो पा गेहे पाइतय। मिनु गोपुकी काइ मदाकमुय। १कोरिन्थी ६:११; एफिसी २:२; एफिसी ५:८; १पत्रुस ४:३

4 तन्न पाप रे प्रोंइब परमप्रभु यावे आ रिम्शो पतीके, आ दाकतीके नु शिशी जाकत। तीतस २:११

5 मेकोमी इ कली मरिम्शो गेय रे प्रोंइतु। इ पशो ठीक गेय तशा मप्रोन, तन्न आ शिशीमी इ कली प्रोंइतु। दोपा पाप रे प्रोंइतु देंशा हना, इ कली मरिम्शो गेय रे चिकशो खोदेंशो पा, आ सोक्त आ पशोमी नक मुर सेल्लु। योएल ३:१; २तिमोथी १:९; यूहन्ना ३:५; एफिसी ५:२६

6 मिनु परमप्रभु यावेमी आ सोक्त इ तारी मोइकतु। दोपा मोइकतु देशा हना, इ पाप रे प्रोंइब येसु ख्रीस्त आ पतीकेमी मोइकतु।

7 मोदेंशो पा, परमप्रभु यावे आ शिशी आ पतीकेम इ कली ठीक सेल्लु। मिनु परमप्रभु यावे नु बाकचा शिरशो दुम्तय। परमप्रभु यावे नु गेना हना यो बाकचा कली आस पा बाकतय। रोमी ३:२६

8 एको लोत्र थमा बाकब। मिनु एको लोत्र शुश शेंदो। मोदेंशो पा शेंताकवी हना, परमप्रभु यावे कली थमा सुडकब दुम्शो मुरपुकी रिम्शो गेय पचा कली होस पा बाकनीम। आं देंशो शेंतीके मुर आन कली रिम्शो नु गारचा डा बाकब।

9 मिनु गे मूर्ख खोदेशो पा हिल्लो पतीके, यहूदी आन बडसावली डा शेंतीके नु अरेतीक लोत्र रे सेल्शो पतीके आ पर्वम गाइक्पाइक्ब नु जिचा पोक्ब रे डोन बाक्को। मारदे हना मेको शोर गाक्शो नु जाम्शा लाइब बाक्नीम। १तिमोथी १:४; १तिमोथी ४:७; २तिमोथी २:१४

10 गे मोदेशो दूली शेंब आन कली खेयप निक्शी सम्म लोत्र पावो। मेकोम मटिप्टु हना, मेको रे डोन बाक्को। २यूहन्ना १०; मत्ती १८:१५-१७

11 मोदेशो मुर नेल्ल दूली नु मरिम्शो पाइब दुम्शा, आन मरिम्शो पतीकेमी आंम कली खतम सेल्ब बाक्नीम, दे तुइक्नेवे। १तिमोथी ६:४-५

नोले डा लोत्र

12 गो अरतीमास हना यो, तिखीकस हना यो इ कली गुम्चा कली सोइक्ताक्ड हना, गे आं कली गुम्चा कली निकोपोलीस सहर पिबो। मारदे हना गो हिडेदमी मेकेर बाक्चा कली मिम्ताक्ड। एफिसी ६:२१

13 मिनु गे चीनास माइशो वोकील नु आपोल्लोस आस कली रीब पा सोइक्तीम्सी। मेको निक्शीम मार मार माल्नीसी, मेको आस कली गेम्सी। प्रेरित १८:२४; १कोरिन्थी ३:५-६

14 मिनु इ मुरपुकीमी यो रिम्शो गेय पचा कली शेंसीचा माल्नीमी। मोपा शुश श्येत जाइब आन कली चारच पशा, फल सिप्ब रवा खोदेशो दुम्नीम। तीतस २:१४; मत्ती ७:१९

15 गो नु बाक्बपुकी नेल्लेमी इ कली “रिम्शो बाक्को” दे ब्रेक्पाइक्तीमी। आंइ कली दाक्ब थमा सुइक्ब नेल्ल आन कली “रिम्शो बाक्कीन” ने माइक्मी। परमप्रभु यावे आ शिशी गे नेल्ल नु लील।



## फिलेमोन

**ब्रेक्ब मुर:** एको चिठी पावलमी फिलेमोन कली ब्रेक्शो बाक्ब।

**गेना ब्रेक्शो:** पावल रोम सहर डा जेल्खानम बाक्शा ६२ ए. डी. नुप्ची ना कि ६३ ए. डी. गोची ना ब्रेक्शो बाक्ब।

**मारदे ब्रेक्शो:** एको चिठीमी ठेयब शेंतीके मबाक्ब। फिलेमोन आ वाइल ओनेसीमस प्रोक्शो बाक्त। मेकोमी पावल कली रोम सहरम गुम्शा, थमा सुइक्ब दुम्शा, मुल आ होवप आ खिं लेत्चा चिक्शो बाक्त। एफिसी नु कलस्सी कली चिठी कुरबपुकीम एको चिठी यो चाक्शो बाक्तेकम। फिलेमोन आ खिं यो कलस्से सहरम बाक्त।

डोंइती डा लोव

1 खीस्त येसु आ नेमी जेल्खानम चोक्चा पुंडसीशो पावल नु इं लोक्ब तिमीथी गो निक्शीमी एको चिठी ब्रेक्ताक्स्कु। एको चिठी सु सु इन कली ब्रेक्ताक्स्कु देंशा हना, गो नु गारशा गेय पाइब इं दाक्शो फिलेमोन, एफिसी ३:१

2 इं समी आप्पीया, पल्टन कामी बाक्शा गाक्शो खोंदेशो दुम्शो अरकीप्पस नु फिलेमोन आ खिंमी देल्ब थमा सुइक्ब नेल्ल इन कली ब्रेक्ताक्स्कु। कलस्सी ४:१७

3 इं आफ, परमप्रभु यावे नु प्रभु येसु खीस्तमी इन कली शिशी पा इन थुं नाइश्शा बाक्चा गोम्सेकल।

प्रार्थना पशो

4 आं दाक्शो लोक्ब फिलेमोन, गो इ परबम प्रार्थना पडानु “फिलेमोन कली रिम्शो पपाइक्तीनी” दे परमप्रभु यावे कली ठेयब सेल्लुड।

5 मारदे हना गे थमा सुइक्ब नेल्ल आन कली शुश दाक्शो नु इ येसु खीस्त कली थमा सुइश्शो आ परबम नेता।

6 इ थमा सुइश्शोमी रिम्शो गेय शुश पाइनेवे, मिनु दोपा रिम्शो गेय पवी, मोपान परमप्रभु यावेमी खीस्त कली तुइक्तीके बारना बारन लपदल, दे प्रार्थना पाइनुड। फिलिप्पी १:९

7 आं लोक्ब, इ पशोमी थमा सुइक्ब शुश आन थुं नाइक्चा ताम्तेकम। शुश आन थुं बारना बारन लत। इ कली मोदेशो रिम्शो पशो तशा, गो यो आं थुं नाइश्शा ग्येरसाक्वी। २कोरिन्थी ७:४

इम्चीली लोव देंशो

8 गो खीस्त आ नें आ परबम इ कली मारेइ अरेतीक अधिकार तशो नड।

9 तन्न गे मुर आन कली दाक्शा शिशी पाइनेवे, आं देशो यो टीनेवे, दे तुइश्शा, अधिकार कोंइचा ममाल्दी। गो खीस्त येसु आ परबम जेल्खानम चोक्चा पुंडसीशो खाल्पा पावलमी इ कली इम्चीली लोव का माइक्नन।

10 जेल्खानम बाक्डानु, ओनेसीमस कली गुम्ता। मेकोमी थमा सुदा रे आं दाक्शो तौ दुम्त। गो थमा पोबु दुम्तस्कु। कलस्सी ४:९; १कोरिन्थी ४:१५; गलाती ४:१९

11 साइ इ खिंमी बाक्मेनु, आ गेय रिम्शो मपथु, शोर गाक्शो बाक्माक्त। मुल आं कली शुश वारच पाइक्ती। मुल डा मेरे इ थुं नुपाइक्चा डा गेय पाइब, दे तुइश्शा, इ खिं लेशशा सोइक्ताक्ड।

12 मेको कली सोइश्शो ला ममाइ, पावलन जाक्शो मिम्तो।

13 खीस्त आ लोव शेंशो आ परबम जेल्खानम चोक्सीशा बाक्डानु, ओनेसीमस इ पा डा आं वारच सेल्चा थुं पाता। फिलिप्पी २:३०

14 गेमी गेय पपाइश्शा वोतो, दे मदेने सम्म मवोटु देशा, सोइक्ताक्ड। वारच पाइय्यीनी मदेथु, वारच पाइतीनी हना, गो ग्येरसीनुड। २कोरिन्थी ९:७

15 ओनेसीमस इ खिं रे प्रोक्शा, नाक्त का निक्शी गाक्शो रिम्शोन दुम्त। मारदे हना येसु खीस्त आ लोव रुप्शा, गेना हना यो इ खिंम बाक्ब दुम्त।

16 मुल डा मेरे मेको कली वाइल ममिम्थु, आंम कयी का डा लोक्ब मिम्तो। प्रभु आ नेमी यो लोक्ब मिम्तो। मिनु मोदेशो लोक्ब दुम्शोन, गेनायो मब्रासीब। १तिमीथी ६:२

17 मोपतीके वारच मिम्ताक्वी हना, आं कली ब्रशो खोंदेशो पा ओनेसीमस कली ब्रावो।

18 साइ इ कली मरिम्शो पशो बाक्त हना यो, इ कली मेकोमी मारेइ थाप्चा माल्शो बाक्त हना यो, मेको नेल्ल गो गारपाइक्नुड।

19 एको लोव गो पावलमी आंम आं गुडमी ब्रेक्ताक्ड। लोव थोक्शा, मार थाप्चा माल्शो बाक्मे, मेको नेल्ल थाप्नुड। तन्न गोमी साइ इ कली वारच पशो यो मिम्चा माल्नेवे, दे इन कली देनुड।

20 आं दाक्शो लोक्ब, प्रभु आ नेमी गो निक्शी वोबु दुम्शा बाक्स। खीस्त आ दाक्शो पा आं थुं बारपा ग्येरपाइय्यी।

21 गे आं लोव नेंशा टिशा, आं देशो क्येडा यो शुश रिम्शो पाइनेवे, दे तुइश्शा, एको लोव ब्रेक्ताक्न।

नोले डा लोव

22 इ खिंमी इप्तीक बाक्तीक बास फिक्शा वोतो, मारदे हना गेपुकीमी “पावल जेल्खान रे गूचा तवल” दे प्रार्थना पाइनीनी, दे तुइश्शा, गूचा ताइनुड, दे आस पा बाक्ती। फिलिप्पी १:२५; फिलिप्पी २:२४

23 खीस्त येसु आ नेमी जेल्खानमी काथा बाक्ब इपाफ्रासमी इन कली “रिम्शो बाक्कीन” देंत। कलस्सी १:७; कलस्सी ४:१०-१४

24 गो नु काथा गाक्ब येसु आ लोत्र शेंब मर्कूस, अरीस्तारकस, डेमास नु लूकामी यो इन कली “रिम्शो बाक्कीन”  
देतेक्म।

25 प्रभु येसु खीस्त आ शिशी इन थुंमी लील।

## हिबू

**ब्रेक्ब मुर:** एको किताब पावलम ब्रेक्शो बाक्ब, दे शुश मुरुम मिन्मीम। तन्न का निक्शीमी लूका, का निक्शीम बारनाबास, का निक्शीम आपोल्लोस का ब्रेक्शो बाक्ब, देंनीम। साइ डा जोक्ब तुइक्बमी “हिबू किताब सुमी ब्रेक्शो बाक्बा, परमप्रभु यावेम ला तुइक्ब” दे ब्रेक्ताक्म।

**गेना ब्रेक्शो:** एको किताबमी यरूसलेम सहर खतम दुम्शो आ परबम मारेइ मब्रेक्शो बाक्त। मारेदे हना तिमोथी आ परबम लोत्र ब्रेक्शो बाक्ब। मिनु तिमोथी ८१ ए. डी. रोमी सिजर दोमीतीयन आ सासनमी थमा सुइक्चा आ परबम साइक्चा पुंडसीशो बाक्त। मोपतीके ६३ नु ७० ए. डी. रोम रे ब्रेक्शो बाक्ब, देंनीम।

### मार ब्रेक्शो:

१. एको किताब डा शेंतीक लोत्र: परमप्रभु यावे आ लोत्र पाइब क्येडा येसु ख्रीस्त ठेयब बाक्ब।

परमप्रभु यावे आ स्वर्ग डा गेय पाइब क्येडा येसु ख्रीस्त ठेयब बाक्ब।

मोसा क्येडा येसु ख्रीस्त ठेयब बाक्ब।

हारून क्येडा येसु ख्रीस्त ठेयब बाक्ब।

मेलकीसेदेक नक खाल डा चढेब बाक्ब।

२. एको किताब डा पतीक लोत्र:

मुर नेल्ल नु दुशा बाक्चा।

थमा सुइक्ब लोकब आन कली दाक्चा मप्रोनीन।

### डोंइती डा लोत्र

1 साइ नेसी परमप्रभु यावेमी आ लोत्र पाइब आन कली मार मार पपाइशु ना कुडोइशा, इ किकी पिपी नु लोत्र पाइबाक्माक्त।

2 नोले डा नाक्ती आ तौ रे पा इ कली लोत्र पाप्तु। आ तौ कली नेल्ल अधिकार गेशो बाक्त। सरीड नु रागी नेल्ल आ तौ रे पा सेला बाक्त। भजन संग्रह २:८; यूहन्ना १:३; कलस्सी १:१६

3 आ तौ आ आफ आ सक्ति नु छेडछेड बाक्ब। मिनु आ सक्ति डा लोत्र पतीकेमी नेल्ल आन कली कोत्रना कोत्रन बाक्ब। मेकोमी पाप क्याम्तीक गेय पने थुम्शा, नेल्ल क्येडा ठेयब मान ताइब आ ग्युरा गे निरशो बाक्ब।

### स्वर्ग डा गेय पाइब नु येसु

4 परमप्रभु यावे आ स्वर्ग डा गेय पाइब आन क्येडा आ तौ ठेयब बाक्ब। मिनु मेको आन क्येडा ठेयब नें तशो बाक्ब। १पत्रुस ३:२२; फिलिप्पी २:९

5 परमप्रभु यावेमी आ स्वर्ग डा गेय पाइब सु कली चहिं “गो इ कली थितन। मोपतीके गे आं तौ नवे” देंम डा? मिनु “गो मेको आ आफ दुम्नुड, मेको चहिं आं तौ दुम्ब” देंम डा? भजन संग्रह २:७; २सामुएल ७:१४

6 आ डोंइती जरमेशो तौ कली रागीम सोइक्तानु “आं स्वर्ग डा गेय पाइब नेल्लेमी मेको कली मान पा ठेयब सेल्मेक्ल” देंत। भजन संग्रह ९७:७; रोमी ८:२९

7 परमप्रभु यावेमी आ स्वर्ग डा गेय पाइब आन परबम “आं स्वर्ग डा गेय पाइब आन कली फश नु ब्रशो मी सेल्नुड” देंत। भजन संग्रह १०४:४

8 तन्न आ तौ आ परबम “इन राज्य पचा गेना हना यो लीब। इन राज्य डा राज दन्द ठीक निसाफ पतीके राज दन्द बाक्ब।

9 ठीक गेय पतीके दाक्नीनी। मरिम्शो पतीके मदाक्नीनी। मोपतीके परमप्रभु, इन परमप्रभु यावेमी इन पियामी तेल खेक्शा ग्येरपाइक्तु। इन वारच आन क्येडा इन कली ठेयब सेल्लु” देंत। भजन संग्रह ४५:६-७

10 अरु लोत्रमी यो “प्रभु, गे नेल्ल क्येडा डोंइती रागी डा जग वोइक्तीनी। मिनु सरीड इन गुइ डा गेय बाक्ब।

11 मो हना यो मेको नेल्ल मलीनीम। गे चहिं गेना हना यो बाक्नीनी। सेल्शोपुकी माइत वा खोदेशो पा जेक्शा लाइनीम।

12 फेक्तीक वा मुक्शो खोदेशो पा, मेको आन कली मुक्नीनी। वा फाइशो खोदेशो पा, मेकोपुकी फांडसीनीम। गे चहिं गेनायो मफांडसीथु गेना हना यो बाक्नीनी” देंत। भजन संग्रह १०२:२५-२७

13 परमप्रभु यावेमी आ स्वर्ग डा गेय पाइब सु कली “इ जोरी सत्रु आन कली इ खोइल आगामी मवोदुमी सम्म आं ग्युरा गे बाक्को, देंम डा? भजन संग्रह ११०:१

14 मेको गेय पाइब सोक्त मनमी डा? मिनु आन पाप क्याम्चा पुंडसीब आन कली वारच पथ सोइशो मनमी डा?” देंत। भजन संग्रह ३४:८; भजन संग्रह ९१:११-१२

## 2

### नेंशो लोत्र थुंम वोइक्चा माल्ब

1 इं नेशो लोत्र थुंमी वोइक्चा माल्ब। थुंमी मवोइक्तय हना, मेको लोत्र सामन्य।

2 परमप्रभु यावे आ स्वर्ग डा गेय पाइबपुकीम तुइक्पाइशो लोत्र थमा दुम्त। मिनु सु सुमी मेको आन लोत्र मटीमे, मेकोपुकीमी सजाइ ताम्नेक्म। प्रेरित ७:५३; गलाती ३:१९

3 पाप आ सजाइ रे ब्रोंइतीक ठेयब गेय कली ममिम्ताक्य हना, दोपा सजाइ रे ब्रोंइने चापनया डा? मेको ठेयब गेय डोंइती प्रभुमी तुइकपाइशो बाकत। मिनू आ लोत्र नैबपुकीमी “थमा बाकब” दे तुइकपाइशो बाकतेकम। हिब्रू १०:२९; हिब्रू १२:२५

4 परमप्रभु यावेमी पपाइशो चिन्ड नु छक लाक्या डा गेय, सक्ति पाइशो शूश गेय नु परमप्रभु यावेमी आ दाकशो पा योत्रशा आ सोक्तीमी मुर आन कली पपाइशो गेय, मेको सांफा सांकळी बाक्नीम। मर्कूस १६:२०; २कोरिन्थी १२:१२; १कोरिन्थी १२:४-११; प्रेरित २:१-१३; प्रेरित १०:४४-४५

ख्रीस्त सेंसीशा नेल्ल क्येडा ठेयब दुम्शो

5 इं देंशो लोत्र मार बाकब देंशा हना, पाप रे प्रोंइचा नु नोले जाकब परमप्रभु यावे आ राज्य चहिं परमप्रभु यावेमी आ स्वर्ग डा गेय पाइब आन गुडमी जिम्मा मगेशो बाकब।

6 परमप्रभु यावे आ लोत्र पाइब कामी “मुर आइकच बाकत हना यो, मेको कली मिम्नीनी। रागीम जरमेशो मुर आन कली मारदे कोवनीनी?

7 मेको कली इन स्वर्ग डा गेय पाइब क्येडा इच्छी आइकच सेल्शा वोइक्तीनी। नोले मान पाइक्या पुंडसीतीके सिरपेच गुप्चा गेशा, सक्ति पाइशो सेलतीनी।

8 मिनू मारेइ मारेइ मेको आ अधिकारम गेतीनी” दे ब्रेकशो बाकत। परमप्रभु यावेमी आ गुडमी मारेइ मारेइ जिम्मा गेशा अधिकार गेपु देंशो लोत्रमी मार रुम्सीब देंशा हना, मेको नेल्ल कोत्रब बाकब, दे रुम्सीब। तन्न गो मुल सम्म मोदेशो अधिकार पाइब बाकब, दे मरुप्नय। भजन संग्रह ८:४-६

9 गोपुकीमी येसु कली मान पाइक्या पुंडसीतीके, छेडछेड डा सिरपेच गुप्शो नु सक्ति पाइशो दुम्शो ताइतय। रागीम बाकमेनु, परमप्रभु यावे आ स्वर्ग डा गेय पाइब क्येडा इच्छी आइकच दुम्शो बाकत। मारदे हना परमप्रभु यावेमी मुर नेल्ल आन कली शिशी पाइनुड, दे कोंइचा कली मुर आन परबंम श्येत जपाइशशा बेक्चा गेपु। फिलिप्पी २:८-९

10 नेल्ल सेल्व नु नेल्ल आन कली ब्रोंइतीक सोकत गेबमी शूश मुर आन कली आन पाप रे प्रोंइतु। मेको प्रोंइब कली शूश श्येत जपाइशशा, पाको सेल्लु। हिब्रू १२:२

11 पाप रे प्रोंइब नु पाप रे ब्रोंइब नेल्ल खिं का डा मुर दुम्तेकम। मोपतीके पाप रे प्रोंइबमी पाप रे ब्रोंइब आन कली आ लोकबपुकी देंचा मुने मपाइब। यूहन्ना १७:१९; मर्कूस ३:३४-३५; यूहन्ना २०:१७

12 मेकोमी “गो आं लोकब आन कली इन नें तुइकपाइकनुडमी। थमा सुइकब आन दातेमी इन कली ठेयब सेल्शा कुम्सो पाइनुड” देंत। भजन संग्रह २२:२२

13 मिनू लेंशा “गो मेको कली थमा सुइकनुड” दे ब्रेकशो बाकत। मिनू चिनु लेंशा “नेनीन, परमप्रभु यावेमी आं कली गेशो तमी तौ, गो नेल्ल काथा बाक्नीकी” देंत। यसैया ८:१६-१७

14 तमी तौ हुश नु रुश के जोल्शो नम। मोपतीके येसु ख्रीस्त मेकोपुकी नु खाल का डा पा हुश नु रुश के दुम्त। बेक्पाइकब सक्ति पाइशो कली खतम पोक्चा कली आंमन बेकत। रतिमोथी १:१०; १यूहन्ना ३:८

15 मारदे हना बेक्पाइकब सक्ति पाइशो सैतान कली ग्राचा नु मबेकम सम्म बेक्चा हिंब मुर आन कली हिंचा रे प्रोंइचा कली मो पापुतु।

16 परमप्रभु यावे आ स्वर्ग डा गेय पाइब आन कली ममाइ। अब्राहाम आ खिं डा मुर आन परबंम मोदेशो पशो बाकत।

17 मोपतीके मेको आ लोकब खोंदेशो दुम्चा माल्ताकव। मोपा परमप्रभु यावे आ गेय पा मुर आन पाप क्याम्चा कली शिशी पाइब नु गेनायो आ दाक्या मप्रोंइब ठेयब चढ़ेब दुम्त। फिलिप्पी २:७

18 मारदे हना आ यो शूश श्येत जशा, थुं थाम्चा पुंडसाकव। मोपा आन थुं थाम्चा पुंडसीशा, श्येत जाइब आन कली वारच पने चापव। हिब्रू ४:१५

### 3

मोसा क्येडा ख्रीस्त ठेयब बाकब

1 मोपतीके परमप्रभु यावे आ मुर, आं लोकबपुकी, गे यो स्वर्ग रे ब्रेत्चा पुंडसीशो बाक्नीनी। सोइशशो, दे नें वोइक्या पुंडसीशो नु इं थमा सुइक्तीक डा नेल्ल क्येडा ठेयब चढ़ेब येसु कली मिम्तीन। हिब्रू ४:१४

2 दोपा मोसामी परमप्रभु यावे आ खिंमी रिम्शो गेय पवा, मोपा येसुमी यो आंम कली योत्रब आ डोंइती रिम्शो पा आ देंशो पापुतु। गन्ती १२:७

3 दोपा खिं क्येडा खिं सेल्व शूश मान पाइक्या पुंडसीबा, मोपा मोसा क्येडा येसु शूश मान पाइक्या पुंडसीशो बाकब।

4 खिं नेल्ल मुरुम सेल्शो बाक्नीम। तन्न मारेइ मारेइ सेल्व चहिं परमप्रभु यावे बाकब।

5 नोले तुइकपाइक्तीक लोत्र आ परबंम सांकळी दुम्चा कली मोसा परमप्रभु यावे आ खिंमी थम रिम्शो गेय पाइब दुम्त।

6 ख्रीस्तम चहिं परमप्रभु यावे आ खिंमी आ तौ दुम्शा, रिम्शो गेय पापुतु। मिनू गो मेको कली आस पा थमा सुइक्या मप्रोंइतय हना, गो आ खिं बाक्नय। एफिसी २:१९; १पत्रुस २:५

परमप्रभु कली टीब दुमीन

7 परमप्रभु यावे आ सोक्तीमी मार देंत देंशा हना “मुलाक्ती आं लोत्र नेंतीनी हना, हिब्रू ४:७

8 साइ नेसी इन किंकी पिपी गोरशो रागीम गाकशा, नाक्या पुंडसमानु, पशो खोंदेशो इन थुं खकटा पा मटीब मदुमीन। प्रस्थान १७:७; गन्ती २०:२-५

- 9 इन किकी पिपीम ४० बर्स सम्म आं टेयब गेय तशा यो, आं थुं थाम्ना थाम्न बाक्तेक्म।  
 10 मोपतीके मेको आन कली तशा, आं थुं जिक्त। मिनु गो 'मेकोपुकी गेना हना यो हेथे गाक्नीम। आं लां मतुइक्नीम' देंती।  
 11 मिनु गो चुरशा 'मेकोपुकी गेनायो आं राज्य ओव्रशा थुं नाइक्चा मताइनीम' दे कसम जशा देंती" देंत। भजन संग्रह १५:७-११; हिब्रू ४:३; गन्ती १४:२१-२३  
 12 आं लोकबपुकी, होस पांडसीने। मारदे हना मरिम्शो नु थमा मसुइक्तीक थुंमी गेना हना यो ब्रोंइशा बाक्ब परमप्रभु यावे रे सुइ इन कली फ्राशा मलदल।  
 13 पापम इं थुं क्याल्शा मटीब मदुम्यल, दे मुलाक्त रेन नाक्त कित कित अर्ती गेमुने। १थिस्सलोनिकी ५:११  
 14 इं डोंइती नाक्त डा थमा सुइक्तीके नोले सम्म मप्रोंइतय हना, गो ख्रीस्त नु थुं का डा दुम्शा बाक्नय। हिब्रू ६:११  
 15 डोंइती "मुलाक्ती आं लोव्र नेंतीनी हना, इं किकी पिपीम मटिशो खोदेशो पा इन थुं खकटा पा मटीब मदुमीन" देशो बाक्ब।  
 16 नेंशा यो मटीब सु नमी? मोसाम इजीप्ट रे गुंइशा पिशोपुकी मनमी डा?  
 17 सु सुमी ४० बर्स सम्म परमप्रभु यावे आ थुं जिक्तमे? मेको पाप पाइबपुकी मनमी डा? मेको गोरशो रागीमी बेक्शो बाक्तेक्म। गन्ती १४:२९; १कोरिन्थी १०:१०  
 18 परमप्रभु यावेमी आ लोव्र मटीब आन पबर्म "मेकोपुकी गेनायो आं राज्य ओव्रशा थुं नाइक्चा मताइनीम" दे कसम जशो मबाक्बा डा?  
 19 मोपतीके परमप्रभु यावे आ लोव्र कली थमा मसुइक्तीकेन आ राज्य ओव्रशा नाइक्चा मतामे बाक्त, दे रुपनय।

## 4

- परमप्रभु आ मुर थुं नाइक्चा ताइनीम  
 1 मोपतीके होस पांडसय, थुं नाइक्चा ताइनीनी देशो लोव्र मुल यो लीशो बाक्तीके, होस पा बाक्य। मारदे हना सु सुमी आ लोव्र मटीमे, मेको ओव्रचा मताइनीम।  
 2 थमा पा, इं कली यो मेको आन कली खोदेशो पा परमप्रभु यावे आ लोव्र नेंपाइशो बाक्त। तन्न इं किकी पिपी आन कली नेंपाइशो लोव्र शोर गाक्शो दुम्त। मारदे हना नेंबपुकीमी थमा मसुइक्थु मटिशो बाक्तेक्म।  
 3 गो थमा सुइक्बपुकी चहिं थुं नाइक्चा ताइनय। परमप्रभु यावेमी "गो चुरशा, मेको आन कली गेनायो थुं नाइक्चा मगेनुडमी, दे कसम जाता" देशो बाक्त हना यो, आ राज्यमी नाइशशा बाक्तीके वोइक्ने थुम्शो बाक्त। हिब्रू ३:११  
 4 परमप्रभु यावेमी रागी मारेइ मारेइ सेल्शा, ७ नाक्त आ पबर्म "परमप्रभु यावेमी नेल्ल सेल्ने थुम्शा, ७ नाक्तीमी नाइक्से बाक्त" दे ब्रेक्शो बाक्ब। उत्पत्ती २:२  
 5 मिनु लेंशा लोव्र का चहिं "मेको आन कली गेनायो आं राज्य ओव्रशा, नाइक्चा मगेनुडमी" दे ब्रेक्शो बाक्ब।  
 6 मो हना यो का निक्शी ओव्रचा ताइनीम। तन्न आ लोव्र डोंइती डा नेंबपुकीमी मटिशु, ओव्रचा मतामे बाक्त।  
 7 मोपतीके अर्को नाक्त का वोइक्ब। नाप्खे देशो लोव्र "मुलाक्ती आ लोव्र नेंतीनी हना, इन थुं खकटा पा मटीब मदुमीन" दे शुश बर्स नोले दाऊद कली ब्रेक्पाइशो बाक्माक्त। हिब्रू ३:७  
 8 यहोसुमी मेको आन कली नाइक्तीकेम चाक्दीन्ने चाप्शो हना, मेकोमी मो देंचा ममाल वा। ब्यवस्था ३१:७; यहोसु २२:४  
 9 मोपतीके परमप्रभु यावे आ मुर आन कली नाइक्तीक नाक्त का बाक्ब, दे तुइक्नय।  
 10 मिनु सुमी परमप्रभु यावे आ नाइक्तीके ताइबा, मेको परमप्रभु यावे खोदेशो पा आ गेय रे नाइक्चा ताइब। प्रकाश १४:१३  
 11 मोपतीके सुइमी परमप्रभु यावे आ लोव्र मटिशु जाम्शा मलमल। गो नेल्ले नाइक्चा ततीकेमी ओव्रचा माल्य। हिब्रू ३:१६-१९  
 12 मारदे हना परमप्रभु यावे आ लोव्र ब्रोंइतीक सक्ति पाइशो, गेय पाइब नु निम्फा पटटी हेशो तरवार क्येडा हेशो बाक्ब। मेकोमी श्ये नु रुश, सोक्त नु थुं तिब्ब। मिनु मिम्तीके नु थुं डा लोव्र नेल्ल नाक्ने चाप्ब। प्रकाश २:१२; येरमीया २३:२९  
 13 मेको आ डोंइती सुइमी मारेइ खुइक्ने मचाप्नीम। नेल्लेमी पशो नु मिम्शो मेको आ डोंइती तांडसीब।

ख्रीस्त नेल्ल क्येडा टेयब चढेब दुम्शो

- 14 तन्न गो इं के टेयब चढेब का बाक्ब। मेको स्वर्ग लाक्शा लाइब, परमप्रभु यावे आ तौ, येसु बाक्ब। इं थमा सुइक्तीके बोल्यो सेल्शा, गेनायो मप्रोंइय। हिब्रू ३:१; हिब्रू ९:११,१२; हिब्रू १०:२३  
 15 मारदे हना इं नेल्ल क्येडा टेयब चढेबमी इं चाप्तीक नु मचाप्तीक दोदेशो बाक्बा, नेल्ल तुइक्ब। गोपुकी इं थुं थाम्ना पुंडसीशो खोदेशो पा, आ यो थुं थाम्ना पुंडसाक्ब। तन्न थुं थाम्ना पुंडसाक्ब हना यो, पाप मपव। हिब्रू २:१८; यूहन्ना ८:४६  
 16 मोपतीके इं कली मार मार माल्यानु, वारच पपांडसीशा, माफ नु शिशो तचा कली परमप्रभु यावे आ डोंइती महिंथु, थुं बारपा जाक्दीय्य। रोमी ३:२५; रोमी ५:२

## 5

ख्रीस्त नु मेल्कीसेदेक

1 ठेयब चढेबपुकी मुर आन दाते रे योत्रचा पुंडसीशो बाक्नीम। परमप्रभु यावे नु मुर आन कली गारपाइक्चा, दे मेकोपुकीमी मुर आन पाप क्याम्चा कली परमप्रभु यावे कली भेटी नु मार मार चढेनीम।

2 मेकोमी मतुडक्ब नु मरिम्शो लां गाक्ब आन कली शिशी पने चाप्ब। मारदे हना मेको आंमन यो मोदेशो बाक्ब।

3 मोपतीके मुर आन पर्बम चढेशो खोदेशो पा आंमा आन मरिम्शो पशो क्याम्चा कली आं यो चढेचा माल्नीम। लेवी १:७

4 मोदेशो चढेब आंमन दुम्ने मचाप्नीम। हारून योत्रचा पुंडसीशो खोदेशो पा परमप्रभु यावेमी मेको आन कली योत्रब। प्रस्थान २८:१

5 मोदेशो पा खीस्त आंमन ठेयब चढेब सेल्सीशो ममाड “मुलाक्ती गो इ कली थीतन, गे आं तौ नवे” देबमी योत्रतु। भजन संग्रह २:७

6 मिनु लेंशा “गे गेना हना यो मेलकीसेदेक आ खाल डा चढेब दुम्ते” देत। भजन संग्रह ११०:४; हिबू ६:२०

7 येसु मुर दुम्शा, रागीम बाक्मेनु, प्रेक्कु तोक्शा गोंगों पा डाक्शा आ कली बेक्शो रे सेंब कली पुना बाक्त। परमप्रभु यावे कली मान पा हिंशा, मुर आन पर्बम पुना बाक्त। मिनु आ पुंडशो तवा बाक्त। मती २६:३९-४६

8 तौ दुम्शा यो श्येत जतीक रे पा टिचा शेंसे बाक्त। फिलिप्पी २:८

9 मेको पाको दुम नोले आ कली टीब आन कली गेना हना यो श्येत रे प्रोंडशा बाक्चा गेब दुम्माक्त।

10 मिनु परमप्रभु यावेमी मेको कली मेलकीसेदेक आ खाल डा ठेयब चढेब वोडशो बाक्त। हिबू ७:-

लोत्र रुपब दुमीने

11 ठेयब चढेब सेल्शा वोडक्चा पुंडसीशो आ पर्बम मुल यो इन कली शुश शेंचा लीशो बाक्ब। इन नोफा थॉडशो बाक्ब। मोपतीके मेको आ अर्थ दोपा रुपपाइक्चा ननी?

12 मुल गेपुकी अरु आन कली शेंब दुम्चा माल्लो ननी। तन्न इन कली कका परमप्रभु यावे आ डोंडती डा लोत्र लेंशा शेंचा माल्ताक्नी। मुल खमे जाडब खोदेशो दुम्चा माल्लो ननी। तन्न दूध तूब आल खोदेशो बाक्नीनी। १कोरिन्थी ३:१-३; १पत्रुस २:२

13 दूध तूब आल खोदेशो दुम्शा, बाक्बपुकीम परमप्रभु यावे आ ठीक लोत्र शुश रुपने मचाप्नीम। एफिसी ४:१४

14 पाको दुम्शो आन कली चहिं खमे गेंसीब। मेकोपुकीमी परमप्रभु यावे आ गेय पना पन मार रिम्शो बाक्मे, मार मरिम्शो मेको तुडक्नीम।

## 6

डोंडती शेंशो लोत्र लेंशा मशेंचा

1 मोपतीके खीस्त आ पर्बम शेंचा माल्लो लोत्र लेंशा मशेंचा। में क्येडा लाक्शा पाको दुम्प। डोंडती शेंचा माल्लो लोत्र चहिं मार बाक्ब देशा हना, मरिम्शो गेय पचा प्रोंडशा, आन थुं परमप्रभु यावे गे लेत्चा, परमप्रभु यावे कली थमा सुडक्चा, ब्वाक्कुम खुम्शा गुंडपांडसीचा,

2 मार मार चिक्चा शेंतीके, मुर आन तारी गुड वोडक्चा, बेक्शो रे सेंसीशा ब्रोंडचा नु गेना हना यो निसाफ पचा आ पर्बम लोत्र बाक्ब।

3 परमप्रभु यावेमी आंइ कली मोदेशो शेंचा गेपु हना, गो शेंनीकी।

4 मारदे हना डोंडती शेंतीक लोत्र रुपशा, परमप्रभु यावे आ छेडछेड तशा, आ सक्ति तशा, परमप्रभु यावे आ सोक्तीम ब्रीशा,

5 परमप्रभु यावे आ लोत्र डा शिशी रुपशा नु मेको जाक्चशो आ राज्य डा सक्ति आन कली लेंशा शेंचा शोर गाक्शो बाक्ब। मारदे हना सुम मेको नेल्ल तशा यो, हिबू १०:२६-२९; २पत्रुस २:२०

6 मुल मेको नेल्ल ताडक्ताक्म हना, मेको आन कली डोंडती खोदेशो पा लेंशा नक पा वोडक्ने मचाप्सीब। मारदे हना आन पशोमी परमप्रभु यावे आ तौ कली लेंशा शीम केप्शा कांटी थोक्शा क्याडशशा मुने तोक्नीम।

7 माल्लो रेड थिमेनु, खुम्ब आ माल्लो बाली नाली तापु हना, परमप्रभु यावेमी मेको रू कली आसीक गेब।

8 माल्लो रेड थिशा यो चू नु सुवा ला वात हना, मेको रू शोर गाक्शा, सराप राडब। मिनु मी सुडक्चा क्रोडक्चा पुंडसीब।

परमप्रभुमी आ लोत्र खाप्ब

9 आंइ दाक्शो लोकबपुकी, गोपुकीमी ओदेशो लोत्र पाडतक हना यो, इन कली तशा, गे पाप रे ब्रोंडचा तशो ननी, दे थमा सुडक्नीकी।

10 मारदे हना परमप्रभु यावे आ नेमी अरु थमा सुडक्ब आन कली वारच पा रिम्शो पाडतीनी। मुल यो रिम्शो पाडतीनी। मिनु मेकोमी इन रिम्शो पशो गेनायो मप्रेंब। हिबू १०:३२-३४

11 गे नेल्लेमी नेल्ल क्येडा नोले सम्म “परमप्रभु यावे आ देशो नेल्ल जाक्दीप्ब” दे थमा सुडक्चा मप्रोंडतीक सक्ति तने, दे मिन्नीकी। हिबू ३:१४; फिलिप्पी १:६

12 मचाप्नुड देब मदुमीने। “आ देशो जाक्दीप्ब” दे आ थोक्शा पशो लोत्र थमा सुडक्ब खोदेशो पने। मेकोपुकीमी फाल्ला, थमा सुडशशा, परमप्रभु यावे आ देशो जाक्दीशो ताडनीम।

13 परमप्रभु यावेमी अब्राहाम कली लोत्र गेवानु, आ क्येडा ठेयब सुड मबाक्तीके आंम आ नें थिशा कसम जशा

14 “इ कली थमा पा आसीक गेनन। इ खिं डा मुर सोशा बोशा, शुश दुम्शा नेल्ल रागीम ब्रीपाडक्नुडमी” देशो बाक्त। उत्पत्ती २२:१६-१७

- 15 मिनु अब्राहाममी शुश बर्स सम्म रिम्शा बाक्शा, परमप्रभु यावे आ देशो नेल्ल लोत्र गाण्शो ताप्तु।  
 16 मुरपुकीमी यो कसम जामेनु, आन क्येडा ठेयब आ नें थिशा कसम जाइनीम। कसम जशोमी आन लोत्र थमान सेलीम। प्रस्थान २२:१०  
 17 मोपतीके परमप्रभु यावेमी “आं गेशो लोत्र गेनायो मफाइक्नुड” दे आ गेशो लोत्र ताइब आन कली रुप्पाइक्वा, दे कसम जशा, आ लोत्र थोक्ता बाक्त।  
 18 मिनु परमप्रभु यावेमी गेनायो जोल मपाइब, आ गेशो लोत्र नु आ कसम जशो, एको निक्शी गेनायो मफांडसीनीस दे तुइश्शा, गो सजाइ तचा रे प्रॉइचा पुंडसीबपुकी इं डोंइती चोइश्शो आस तचा कली इं थुं बारपाइक्वा ताइनय।  
 19 मेको आस चहिं इं थुं ग्येत्थ लुक्च पचा मगेब ग्याइक्तीके खोदेशो बाक्ब। मेको आस नेल्ल क्येडा आगा डा चोत्रखो कोठा डा फारतीक वा आगा बाक्ब। लेवी १६:२, १२  
 20 येसु मेल्कीसेदेक आ खाल डा ठेयब चढ़ेब नु इं कली लां कोंइब दुम्शा, नेल्ल क्येडा डोंइती मेकेर ओत्रदीश्शो बाक्ब। हिब्रू ५:६

## 7

ख्रीस्त मेल्कीसेदेक आ खाल डा बाक्ब

- 1 मेको मेल्कीसेदेक सालेम डा पिप नु नेल्ल क्येडा ठेयब परमप्रभु यावे आ चढ़ेब बाक्माक्त। अब्राहाममी आ जोरी सत्रु दुम्शो पिप आन कली ग्राशा साइश्शा डा मिन लेम्मेनु, मेको मेल्कीसेदेकमी अब्राहाम कली गुम्थ लशा, आसीक गेवा बाक्त। उत्पत्ती १४:१८-२०  
 2 मिनु अब्राहाममी मेको कली आ ग्राशा चाक्शो थोत्रक १० भागमी भाग का गेवा बाक्त। मेको आ नें मार रुम्सीब देशा हना, टीक निसाफ पाइब पिप नु सालेम डा पिप, दे रुम्सीब। सालेम देशो चहिं थुं नाइश्शा बाक्तीके बाक्ब।  
 3 मेको आ आम आफ नु आ किकी पिपी मबाक्नीम। गेना जरमेसे, गेना बेक्मे, दे मतुइसीब। तन्न परमप्रभु यावे आ तौ खोदेशो बाक्शा, गेना हना यो परमप्रभु यावे कली चढ़ेब दुम्शा बाक्ब। यूहन्ना ७:२७  
 4 मेको गिश ठेयब बाक्ब, दे मिम्तीन। मारदे हना इं ठेयब किकी अब्राहाममी आ ग्राशा चाक्शो रिम्शो थोत्रक १० भागमी भाग का मान पा गेचा पुंडसे बाक्त।  
 5 लेवी आ खिं डा मुर चढ़ेब दुम्शा, इस्राएली आन लोकब रे पा १० भागमी भाग का का पोक्बाक्तेकम। मेको आन पतीके बाक्ब। लेवी आ खिं डा नु इस्राएली नेल्ल अब्राहाम आ खिं डा मुर नम। गन्ती १८:२१  
 6 मेल्कीसेदेक लेवी नु इस्राएली जात डा मबाक्त हना यो, अब्राहाम रे पा १० भागमी भाग का गेचा पुंडसे बाक्त। मिनु परमप्रभु यावे आ गेशो लोत्र ताइब अब्राहाम कली आसीक गेवा बाक्त।  
 7 ठेयबमी आइक्च कली आसीक गेब, दे नेल्लेमी तुइक्नय।  
 8 मेको बेक्शा लाइब लेवी आ थर डा चढ़ेबपुकीमी १० भाग डा भाग का ताइब दुम्शो बाक्नीम। तन्न गेना हना यो ब्रोंइशो बाक्ब देंचा पुंडसीबमी यो १० भाग डा भाग का तवा बाक्त।  
 9 अब्राहाम आ पतीकेमी लेवीपुकी १० भागमी भाग का ताइब दुम्शो बाक्नीम हना यो, डोंइती गेब यो दुम्शो बाक्मा बाक्त।  
 10 मारदे हना मेल्कीसेदेकमी अब्राहाम कली गुमानु, लेवीपुकी अब्राहाम आ रामी बाक्शो बाक्मा बाक्त। मिनु अब्राहाम रे पा १० भागमी भाग का गेब दुम्मा बाक्त, दे तुइक्नय।

मेल्कीसेदेक आ खाल डा चढ़ेब

- 11 लेवी आ खाल डा चढ़ेबपुकीमी परमप्रभु यावे आ अरेशो लोत्र यो ताम्तेकम। मेको आन पशोमी मुर आन कली पाको सेल्ले चाण्शो नम हना, हारून आ खाल डा ममाइ मेल्कीसेदेक आ खाल डा चढ़ेब का चोइक्वा ममाल वा।  
 12 चढ़ेब आन खाल फांडसाक्व हना, मेको अरेशो लोत्र यो फांडसीब।  
 13 सु आ पबंम मेको लोत्र ब्रेक्शो बाक्मे, मेको गेनायो चढ़ेतीक गेय मपाइब थर डा बाक्माक्त।  
 14 इं प्रभु यहूदा थर डा बाक्माक्त, दे गो नेल्लेमी तुइक्नय। यहूदा थर डा मुरपुकीम गेनायो चढ़ेतीक गेय मपशो बाक्मा बाक्त। इं किकी पिपी मोसामी यहूदा थर डा मुर चढ़ेब बाक्नीम, दे गेनायो मदेंमाक्त। उत्पत्ती ४९:१०; मती १:१-३  
 15 चढ़ेब आन खाल फांडसे बाक्त, दे थमा पा तुइक्नय। मारदे हना मेल्कीसेदेक खोदेशो पा मेको चढ़ेब सेल्चा पुंडसाक्व।  
 16 मेको आ किकी पिपी आन थर रे चढ़ेब मदुम्शो बाक्ब। तन्न गेनायो जाम्शा मलाइब सक्ति रे पा चढ़ेब दुम्शो बाक्ब।  
 17 मारदे हना मेको आ पबंम “मेल्कीसेदेक आ खाल डा गेना हना यो चढ़ेब दुम्ते” देशो बाक्ब। भजन संग्रह ११०:४; हिब्रू ५:६  
 18 डोंइती अरेशो लोत्रमी पाप क्याम्ने मचाण्ब। मिनु सुइ आन कली पाको सेल्ले मचाण्ब। मोपतीके ताइक्वा माल्ताक्व।  
 19 मिनु मेको आ पा डा नेल्ल क्येडा रिम्शो नक आस चोइश्शो बाक्त। मेको आस रे पा परमप्रभु यावे आ नेक्था जाक्दीन्ने चाण्पय।  
 20 परमप्रभु यावेमी मेको आस गेवानु, कसम जशा गेशो बाक्त। डोंइती चढ़ेबपुकी कसम मजथु चढ़ेब दुम्शो बाक्मा बाक्त।  
 21 तन्न मेकोमी कसम जशा “परमप्रभुमी कसम जशो बाक्ब। मिनु आ थुं मफाइक्ब। गे गेना हना यो चढ़ेब दुम्ते” दे माइक्वा पुंडसीशो बाक्त। भजन संग्रह ११०:४

22 मो माइक्या पुंडसीतीके येसु डोंइती पशो कबल क्येडा, नोले पशो रिम्शो कबल डा लोत्र खाप्व दुम्शो बाकत। हिबू ८:६; हिबू १२:२४

23 डोंइती डा चढेबपुकी गेना हना यो ब्रोंइशा बाकने मचाप्वतीके, शुश चढेबपुकी दुम्चा माल्मा बाकत। गिश बेक्या, मिश योत्रशा वोइक्या माल्मा बाकत।

24 येसु चहिं गेना हना यो ब्रोंइशा बाकतीके गेना हना यो चढेब दुम्शा बाकशो बाकब।

25 मोदुम्तीके येसु रे पा परमप्रभु यावे आ डोंइती जाकदीशो आन कली येसुमी गेना हना यो वारच पने चाप्व। मारदे हना मेको आन पबंम गेना हना यो परमप्रभु यावे आ डोंइती बाकशा पुंडशो बाकब। रोमी ८:३४; १यूहन्ना २:१

26 इ ठेयब चढेब दोदेशो माल्शो बाकत देशा हना, पाप रे डोन बाकशो, दोस मताइब, रिम्शो थुं पाइशो, पापी रे दिलशा बाकशो, स्वर्गमी नेल्ल क्येडा ठेयब सेल्चा पुंडसीशो माल्शो बाकत।

27 अरु चढेबपुकीमी नाकत किंत किंत डोंइती आन पशो पाप, नोले मुर आन पशो पाप क्याम्चा कली चढेशो खोदेशो पा आंचा ममालद। कालेमीन आ रां चढेशा, मुर नेल्ल आन पाप क्याम्ने थुन्तु। लेवी ९:७; लेवी १६:६,१५

28 परमप्रभु यावे आ अरेशो लोत्रमी पाको मदुम्शो मुर आन कली योत्रशा चढेब सेल्बाकत। परमप्रभु यावे आ अरेशो लोत्र तुइशो शुश बर्स नोले कसम जशो लोत्रमी गेना हना यो पाको बाकशो आ तौ कली ठेयब चढेब सेल्शा वोइशो बाकत।

## 8

नक कबल डा चढेब

1 मुल सम्म पशो लोत्रमी नेल्ल क्येडा तुइक्या माल्शो लोत्र मार बाकब देशा हना, इं के ठेयब चढेब स्वर्गम बाकब। मेको नेल्ल क्येडा ठेयब मान पाइक्या पुंडसीब आ ठेयब निल्लीके आ ग्युरा गे बाकशो बाकब। हिबू ४:१४

2 मुरपुकीमी सेल्शो ममाइ, परमप्रभु यावेमी सेल्शो थमा डा ताम्बुमी गेय पाइब दुम्शो बाकब।

3 ठेयब चढेब नेल्ले भेटी नु चोशा चढेचा कली योत्रचा पुंडसीशो बाकनीम। मोपतीके मेको ठेयब चढेबमी यो मारेइ थोत्रक चढेचा माल्ब।

4 रागीम बाकशो हना, ठेयब चढेब दुम्ने मचाप्व वा। मारदे हना परमप्रभु यावे आ अरेशो लोत्रमी ब्रेकशो खोदेशो पा चढेब शुश बाकनीम।

5 मेकोपुकीमी स्वर्ग डा ताम्बु आ वांकुमी गेय पाइनीम। मोसामी ताम्बु सेल्चा गोवानु “डांडामी बाकडेनु, इ कली कोइशो खोदेशो सेलो” दे परमप्रभु यावे रे माइक्या पुंडसे बाकत। प्रस्थान २५:४०; कलस्सी २:१७

6 मेको चढेबपुकीमी पशो गेय क्येडा खीस्त आ पशो गेय रिम्शो कबल डा बाकब। मारदे हना डोंइती पशो कबल क्येडा नोले पशो रिम्शो कबल डा लोत्र खाप्व दुम्शो बाकत। मेको नोले पशो कबल डोंइती गेशो लोत्र क्येडा रिम्शो लोत्रमी फ्रेशो बाकब। हिबू ७:२२

7 डोंइती पशो कबल डा लोत्रमी पाको सेल्शो हना, नक कबल पचा ममाल वा।

8 परमप्रभुम आ थुं मनुथु, इसाएली आन कली “नेनीने, प्रभुमी ‘काबु इसाएल आ खिं नु यहूदा आ खिं डा मुरपुकी नु नक कबल का पाइनुड। हिबू १०:१६-१७

9 मेको आन किकी पिपी आन कली पशो कबल खोदेशो ममाइ। मेको किकी पिपी आन कली गुइमी ग्याइशशा, इजीप्त रागी रे गुइशा लां कोइडु नु कबल पा नाता सेलतामी। तन्न मेकोपुकीमी नाता खोइक्तेक्म। मोपतीके गो यो मेको आन कली प्रोइशा ममिम्तुमी” दे परमप्रभुमी देंब। प्रस्थान १९:५-६

10 मेको कबल मार बाकब देशा हना, गो आं अरेशो लोत्र मेको आन मिम्तीकम वोइशशा, आन थुंम ब्रेक्नुड। मिनु गो मेको आन परमप्रभु यावे दुनुड। मिनु मेकोपुकी आं मुर दुम्नीम।

11 सुइमी आ लोक्ब नु आ वारच कली ‘परमप्रभु यावे कली तुइक्तीन’ दे शेंमुचा ममाल्नीम। मारदे हना आल रे खूशो सम्म डा नेल्लेमी आं कली तुइक्नीम।

12 मेको आन कली शिशी पा, आन पशो पाप नेल्ल क्याम्शा गेनुडमी। मेको आन मरिम्शो पशो गेनायो ममिम्नुड” देंमाकत। येरमीया ३१:३१-३४

13 नक कबल आ पबंम लोत्र पा डोंइती डा कबल कली माइत सेल्लु। मुल डा मेरे ममाल्शो नु माइत दुम्शो नेल्ल जाम्शा लचशो बाकब। रोमी १०:४

## 9

खीस्त खेयप का चढेशो

1 डोंइती डा कबलमी ठेयब सेल्चा कली अरेशो लोत्र नु रागीम परमप्रभु यावे आ बाकतीक बाकशो बाकमाकत। प्रस्थान २५:३१; प्रस्थान २५:२३; प्रस्थान २५:३०

2 मिनु ताम्बु का सेल्शो बाकमाकत। आगामी कोठा निकशी पाइशशो बाकमाकत। डोंइती डा कोठाम बत्ती दातीक दियारी का, टेबल का नु परमप्रभु यावे आ डोंइती वोइशशो कोइतीक शोब्ले बाकमाकत। मेको आ नोले चोत्रखो कोठा, दे नें वोइशशो बाकमाकत।

3 फारतीक वा आ आगा नेल्ल क्येडा चोत्रखो कोठा बाकशो बाकमाकत।

4 थम चोत्रखो कोठामी सुन के सेल्शो धूप चोतीक नु परमप्रभु यावे आ कबल पशो सुनमी गिल्लो सन्दोस बाकमाकत। मेको कबल पशो सन्दोसमी मार वोइशशो बाकमाकत देशा हना, मन्ना कुर पशो सुन के बोस, हारून आ कोच्वा दाप्शो



कोक्के नु परमप्रभु यावेमी फुल्लुमी मुशा ब्रेक्शा वोइश्शो अरेशो लोत्र मेको आगाम बाक्माक्त। प्रस्थान १६:३३; प्रस्थान २५:१०-२२; गन्ती १७:२३-२५

5 सन्दोस आ तारी करूब निकशी वोइश्शो बाक्तेकम। मेको निकशीमी “परमप्रभु यावे एकेर बाक्ब” दे आ शिशी पतीक कली वांकु गेशा वोइक्तेकम। मेको नेल्ल आन परबम मुल का का पा शेने मचाप्नुड।

6 मोदेशो ताम्बुमी चढेबपुकीमी नाक्त किंत किंत ओत्रशा, परमप्रभु यावे कली आन पचा माल्शो गेय पाम्तेकम। गन्ती १८:३-४

7 थम चोत्रखो कोठामी चहिं बर्समी खेयप का नेल्ल क्येडा ठेयब चढेबमी हुश लाइश्शा चढेथ ओत्रबाक्माक्त। आ पशो नु अरु आन पशो पाप क्याम्चा कली मेको हुश चढेबाक्माक्त। प्रस्थान ३०:३०; लेवी १६:२१४, १५

8 डोंइती डा कोठा बाक्मेनु, मुरपुकी थम चोत्रखो कोठामी ओत्रचा मताइनीम, दे परमप्रभु यावे आ सोक्तीम रुप्पाइक्ब। हिब्रू १०:२०

9 मेको मुल कली कोंइतीक का बाक्ब। मेकोमी मार कोंइब देशा हना, भेटी नु चोशा चढेशोमी मुर आन कली पाको सेल्ले मचाप्ब। हिब्रू ७:१९; हिब्रू १०:१-२

10 मेको पतीके जचा थोत्रक, तूचा थोत्रक, चिक्या नु चढेचा आ परबम बाक्नीम। मेको नेल्ल मुर आन मिम्शो शोर गाक्शो गेय बाक्नीम। नक लोत्र मजाकम सम्म मेको माइत लोत्र टिशा पामेक्ल, दे वोइश्शो बाक्माक्त। लेवी ११:-; गन्ती १९:-

### ख्रीस्तमी स्वर्ग डा ताम्बुमी गेय पशो

11 रागी डा ममाइ, मुर आन गुइमी सेल्लो क्येडा ठेयब नु रिम्शो स्वर्ग डा ताम्बुमी ख्रीस्त ठेयब चढेब दुम्शा, गेय पाइब।

12 बाछा, बोका आन हुश चढेशो ममाइ। कालेमीन स्वर्ग डा थम चोत्रखो कोठाम ओत्रदीश्शा, आ हुश चढेप्नु। मो पशोमी पाप रे प्रोंइतीक गेय गेना हना यो कली पने थुन्नु, मारेइ पचा मली।

13 बोका, ब्यफ आन हुश चढेशा, आन श्ये चोशो डा पुलु फ्रशा, मुर आन रां चोत्रखो सेल्ले चाप्ब हना, गन्ती १९:२, ९, १७

14 ख्रीस्त आ हुशेमी मेको क्येडा इ पशो जाम्शा लतीक गेय रे चोत्रखो सेल्ले चाप्ब। गेपुकी ब्रोंइशा बाक्ब परमप्रभु यावे आ गेय पचा कली ख्रीस्त गेना हना यो बाक्शो सोक्तीम पतीके मारेइ मरिम्शो मपथु, परमप्रभु यावे आ डोंइती आंम कली चढेवा बाक्त। १पयुस १:१८-१९; १यूहन्ना १:७; प्रकाश १:५; हिब्रू १:३

15 मोपतीके मेको नक कबल डा गारपाइक्ब बाक्ब। मोपा ब्रेशोपुकी आन गेना हना यो लीब शोप तामेक्ल। मारेदे हना ख्रीस्त बेक्त। मिनु मेको आन डोंइती डा कबलम पशो पाप यो क्याम्साक्ब। हिब्रू १२:२४; १तिमोथी २:५

### हुश जारशोमी कबल खाप्शो

16 मिनु “गो बेक्डा नोले गेनुड” दे कागज ब्रेक्बमी आ पशो कबल बेक्म नोले ला खाप्ब।

17 ब्रेक्पाइक्ब मबेक्म सम्म आ ब्रेक्पाइश्शो खाप्ने मचाप्ब। बेक्म नोले ला खाप्ब।

18 डोंइती पशो कबल यो हुश जारशोमी गाप्शो बाक्माक्त।

19 मोसामी मुर आन कली परमप्रभु यावे आ शेंशो अरेशो लोत्र नेपाइक्ने थुम्शा, बाछा नु बोका आन हुश नु ब्वाक्कु क्याल्शा, हिंसोप के सेल्लो ब्राक्सु कली लल ऊनमी फ्रेंशा, परमप्रभु यावे आ अरेशो लोत्र डा किताब नु मुर नेल्ल आन कली बुइक्तीमी बाक्त। गन्ती १९:६

20 मिनु मेकोमी “परमप्रभु यावेमी इन कली पशो कबल एको हुशेमी खाप्नु” दे तुइक्पाइक्मी बाक्त। प्रस्थान २४:८

21 मिनु मोपा थुम्शा, मुर आन कली खोदेशो पा ताम्बु नु ताम्बुमी वोइश्शो बोसपुकीमी यो बुइक्ता बाक्त। लेवी ८:१५

22 थमा पा परमप्रभु यावे आ अरेशो लोत्र ब्रेक्शो खोदेशो पा मारेइ मारेइ चोत्रखो सेल्ल्या कली हुश बुइक्चा माल्दा बाक्त। हुश मजारथु, पाप मक्याम्सीब, दे रुप्नया। लेवी १७:११

### ख्रीस्तमी आ हुश चढेशो

23 रागी डा मोदेशो थोत्रक कली चोत्रखो सेल्ल्या कली मोदेशो माल्ताक्ब हना, स्वर्गम बाक्शो कली चोत्रखो सेल्ल्या कली मेको क्येडा रिम्शो चढेचा माल्ताक्ब।

24 मारेदे हना ख्रीस्त मुरपुकीम सेल्लो ताम्बुमी मओत्र। मेको स्वर्गम बाक्ब ताम्बु आ खोदेशो ला बाक्त। तन्न मेको स्वर्गम ओत्रत। मुल मेकोम परमप्रभु यावे आ डोंइती आंइ परबम पुंडब। हिब्रू ७:२५; १यूहन्ना २:१

25 ख्रीस्तमी आंम कली शुश खेयप चढेचा ममाल्द। नेल्ल क्येडा ठेयब चढेब चहिं बर्स बर्सम आंम हुश ममाइ, मार मार आन हुश कुरशा मेको नेल्ल क्येडा चोत्रखो कोठा ओत्रचा माल्दा बाक्त।

26 ख्रीस्त मोदेशो बाक्शो हना, रागी सेल्ल्या रे मुल सम्म शुश खेयप श्येत जचा माल्द वा। तन्न मेकोमी रागी नुप्ची ना खेयप का पाप क्याम्चा कली आंम कली चढेवा बाक्त। १कोरिन्थी १०:११; गलाती ४:४; हिब्रू १:३

27 दोपा मुर खेयप का बेक्चा माल्नीमी नु मेको बेक्शा, निसाफ पचा पुंडसीनीम। उत्पत्ती ३:१९

28 मोपा ख्रीस्त शुश मुर आन पाप क्याम्चा कली खेयप का आ हुश चढेप्नु। मिनु लेंशा जाक्ब। पाप क्याम्थ चहिं मजाक्ब। तन्न मेको कली थमा सुइश्शा रिम्शा बाक्ब आन कली श्येत रे प्रोंइचा कली जाक्ब। हिब्रू १०:११, १२, १४

## 10

1 मेको साइ डा परमप्रभु यावे आ अरेशो लोत्र जाकचशो रिम्शो लोत्र आ वांकु ला बाकब। मेको डोंडती डा लोत्र थमा पा पाप क्याम्तीके मबा। मिनू मेको लोत्र टिशा बर्स बर्समी चढेम्तेकम हना यो, परमप्रभु यावे आ नेकथा जाकब मुर आन कली पाको सेल्ने मचापब। हिब्रू ८:५

2 मिनू परमप्रभु यावे कली मान पाइबपुकी खेयप का पाको दुम्तेकम हना, चढेबमी मारदे लेंशा चढेचा माल्बा डा। मुर पाको दुम्तेकम हना, लेंशा चढेचा माल्बा डा?

3 तन्न मेको चढेशोमी बर्स बर्समी पाप मिम्पाइकब, गेनायो मप्रेंसीब। लेवी १६:३४

4 मारदे हना ब्यफ नु बोका आन हुशेम पाप क्याम्ने मजापब, दे तुडकतय।

5 मोपतीके ख्रीस्त रागीम जाकमेनु, मेकोमी “गे चढेतीक नु भेटी ममाल्नी। तन्न गे आं कली मुर आ रां का सेलतीनी।

6 गे चोशा चढेतीके नु पाप आ पर्वम चढेतीके मदाकतीनी।

7 मिनू ‘परमप्रभु यावे, गो इन दाकशो पथ रागीम जाकती। आं पर्वम डोंडती ब्रेकशो लोत्र खाप्ता’ दे ब्रेकशो बाकब” दैत। भजन संग्रह ४०:७-९

8 मिनू मेकोमी “गे मार मार चढेशो, भेटी नु चोशा चढेतीक नु पाप आ पर्वम चढेशो मदाकतीनी। तन्न मेको आ अरेशो लोत्र टिशा चढेशो ला बाकनीम” दैत।

9 मेकोमी तेम्शा “रागीमी इन दाकशो गेय पाइनुड, देशा, साइ रे डा आन पशो प्रोंडपाइरशा, नक लां कोइताकब।

10 मिनू गोपुकी येसु ख्रीस्त आ रां चढेशोमी गेना हना यो परमप्रभु यावे आ मुर दुम्तय” दे रुब्य। यूहन्ना १७:१९

11 नाकत किंत किंत चढेबपुकीमी ताम्बुमी गेय पा चढेना चढेन बाकतेकम हना यो पाप मक्याम्सीब। प्रस्थान २९:३८

12 तन्न ख्रीस्तमी चहिं आ रां चढेशोमी पाप क्याम्तीक गेय पने थुम्तु। मिनू गेना हना यो परमप्रभु यावे आ ग्युरा गे निरशो बाकब।

13 आ जोरी सत्रु आन कली खोइल आगाम मवोदा सम्म रिम्शा बाकशो बाकब। भजन संग्रह ११०:१

14 खेयप का आ रां चढेशोमी गेना हना यो परमप्रभु यावे नु काथा बाकचा ताइब आन कली पाको सेलतीनी।

15 परमप्रभु यावे आ सोकतीमी इं कली “एको लोत्र थमा बाकब” दे साइ डा लोत्र मिम्पाइरशा यो तुडकपाइकब।

16 मेकोमी “नोले मेकोपुकी नु नक कबल का सेलनुड। आं लोत्र मेको आन कली आन कोत्रजम वोडकपाइरशा, आन थुमी ब्रेकशा गेनायो मप्रेंब सेलनुडमी। हिब्रू ८:१०

17 गो मेको आन पशो पाप प्रेंशा गेनायो ममिम्नुड” देशो बाकब। येरमीया ३१:३३-३४

18 मोपतीके पाप क्याम्से नोले गेनायो चढेचा ममाल्ब, दे तुडकनय। हिब्रू ८:१२

ठेयब थुं पशा आस पा बाक्य

19 आं दाकशो लोकबपुकी, येसु आ हुशेमी परमप्रभु यावे आ डोंडती जाकदीत्या ताइनय, दे तुडकनय। मत्ती २७:५१; रोमी ५:२

20 मारदे हना आ रां चढेशा, फारशो वा खाकशा, नक ब्रोंडतीक लां सेलतु। हिब्रू ९:८

21 मिनू परमप्रभु यावे आ खिं डा ठेयब चढेब दुम्त।

22 मोपतीके रिम्शो थुं पा, रिम्शो थमा सुइकब दुम्शा, पाप नेल्ल क्याम्चा पुंडसीशो तुडरशा नु इं रां रिम्शो ब्वाक्कुम चिकशा ग्येरशा परमप्रभु यावे आ नेकथा जाकदीय्य। हिब्रू ४:१६; एफिसी ५:२६; १पत्रुस ३:२१

23 ठेयब थुं पशा आस पा बाक्य। मारदे हना लोत्र गेबमी मेको लोत्र दोपा यो खापब, दे तुडकनय। हिब्रू ४:१४

24 दाकमुशा, रिम्शो गेय पा वारच पमुशा अरेपमुने।

25 थमा सुइकब आन गुम्तीके लशा, लोत्र नेंचा मप्रोनीन। का निकशी लचा मदाकब दुम्शो बाकतेकम। मोपतीके “लचा माल्ब” दैचा मप्रोनीन। येसु ख्रीस्त लेंशा जाकचशो बाकब, दे मप्रेंथु बाककीन। हिब्रू ३:१३; रोमी १३:११-१२

नोले शोंडसीशो मदुम्य

26 मिनू मुल मार देनुड देशा हना, ख्रीस्तम सेल्शो नक लां तुडरशा यो मेको लां मखोइकनुड दैतय हना, मोदेशो चहिं नेल्ल क्येडा ठेयब पाप बाकब। मेको पाप चहिं मारेड चढेशोमी मक्याम्सीथु लीशा बाकब। हिब्रू ६:४-८; गन्ती १५:३०

27 नक लां मखोइकब आन कली मारेड आस मलीब। परमप्रभु यावे कली मटीबपुकी मीम खतम सेल्चा पुंडसीनीम। नक लां मखोइकबपुकी यो मोपा खतम दुम्नीम।

28 साइ परमप्रभु यावे आ अरेशो लोत्र मटीब आन कली सांकछी निकशी सां आन लोत्र नेंशा, दोस गेशा, काइ शिशी मपथु साइकबाकमा बाकत। ब्यवस्था १७:६

29 मिनू परमप्रभु यावे आ तौ कली खोइलीम दिम्ब, शुश सजाइ गेशा साइकचा पुंडसाकम, दे तुडकनय। डोंडती आंम कली पाको सेल्शो नक कबल डा हुश आ पर्वम शुक्शी पा “हुश नेल्ल कांडचीक बाकब, मार अर्को लोत्र बाकबा डा?” दैनीम। परमप्रभु यावे आ सोकती आ पर्वम यो शुक्शी पाइनीम। मोदेशो पाइबपुकी शुश सजाइ गेचा मपुंडसीनीमी डा? हिब्रू २:३; हिब्रू १२:२५

30 मोदेशो पाइब आन कली सजाइ गेब कली तुडरशा बाकनय। आं चहिं लोत्र कामी “क्येक लेत्तीक गेय आं के बाकब। मिनू गो पाइनुड” दैब। मिनू लेंशा “परमप्रभुमी आ मुर आन कली निसाफ पाइब” दैब। ब्यवस्था ३२:३५-३६

31 मोपतीके ब्रोंडशा बाकब परमप्रभु यावे आ गुड रे पा सजाइ गेचा पुंडसीचा चहिं नेल्ल क्येडा हिंका डा बाकब, दे तुडकनय। हिब्रू १२:२९

32 साइ इन थुमी छेडछेड दुम्शा, थमा सुइकब दुम्नीनु, मार दुम्मे, मेको मुल यो मिम्तीने। मार दुम्त देशा हना, शुश श्येत जाइतीनी हना यो, फाल्शा बाक्तीनी। हिब्रू ६:४

33 इन कली मुर आन कुल शुक्शी पा श्येत गेमेनु, फाल्तीनी। अरु आन कली श्येत जशो तनीनु, मेकोपुकी नु थुं का दुम्शा, मेको आन श्येत यो फाल्तीनी। १कोरिन्थी ४:९

34 जेल्खानम चोकशा वोइशशो आन कली शिशी पा युम्थ लाइतीनी। मिनु गे यो श्येत जाइतीनी। इन बाक्शो शोंप रोइशशा लदमेनु, गेमी “इं के गेनायो मजाम्ब शोंप बाक्ब” दे तुइशशा, लाइक्चा गेशा ग्येरसीशा बाक्तीनी। मत्ती ६:२०; मत्ती १९:२१, २६

35 मोपतीके मुल यो आस पचा मप्रोनीन, इनाम ताइनय, दे तुइशशा, इन थुं बारपतीने।

36 गे फाल्तीक सक्ति माल्नीनी। परमप्रभु यावे आ दाक्शो गेय पना पन बाक्कीन। मिनु आ गेनुड देशो थोव्रक ताइतीनी। लूका २१:१९; याकूब ५:७

37 मार ब्रेक्शो बाक्ब देशा हना, लोत्र कामी “ ‘गो जाक्नुड’ देबमी मजाक्थु मप्रोंडब, देश पा यो मबाक्ब।

38 आं ठीक पाइब मुरपुकीमी आं कली थमा सुइशशा, ब्रोंइशा बाक्नीम। नोले शोंइसाक्म हना, मेको आन कली तशा मग्येरनुड” दे ब्रेक्शो बाक्ब। हबकुक २:३-४; रोमी १:१७

39 तन्न नोले शोंइसीशा खतम दुम्चा पुंडसीब मदुम्नय। गेना हना यो परमप्रभु यावे नु बाक्चा ताइनय, दे थमा सुइशशा बाक्नय। १थिस्सलोनिकी ३:३

## 11

माइत कबल डा थमा सुइक्तीके

1 थमा सुइक्चा चहिं मार बाक्ब देशा हना, आस पशो थमा दुम्शो तांडसीब नु इं मिक्चीम मतशो थोव्रकी बाक्नीम, दे मिम्चा बाक्ब। मिनु बाक्नीमी यो। मेको मोदेशो मिम्चा कली थमा सुइक्चा देसीब। २कोरिन्थी ५:७

2 मोपा थमा सुइशशोमी इं किकी पिपीपुकी ठीक दुम्मा बाक्त।

3 गोपुकीमी यो मोपा इं थमा सुइशशोमी सरीड रागी नेल्ल दुम्मेनु, मिक्चीम तशो थोव्रकी के सेल्शो मनम, तन्न परमप्रभु यावेमी “दुमीन” देशो लोत्रमी दुम्शो बाक्नीम, दे तुइक्नय। उत्पत्ती १:१-२, ४

किकी पिपीपुकीमी थमा सुइशशो

4 काइन नु हाबील निम्फामी परमप्रभु यावे कली भेटी चढेम्सेनु, काइन क्येडा हाबील आ चढेशो रिम्शो बाक्माक्त। मारदे हना हाबीलमी परमप्रभु यावे कली थमा सुइक्बाक्माक्त। मिनु हाबील आ चढेशो ताक्शा, परमप्रभु यावेमी “हाबीलमी थमा सुइक्ती। मोपतीके ठीक दुम्पाइक्ता” दे कोइताक्व। हाबील बेक्शा लशा, मिश बर्स दुम्शा यो आ थमा सुइशशो आ परबम चहिं मुल सम्म लोत्र पना पन बाक्नय। उत्पत्ती ४:३-४

5 हानोकमी परमप्रभु यावे कली थमा सुइक्बाक्माक्त। मोपतीके आ मबेक्थु सेसीन, परमप्रभु यावे नु लशा बाक्चा तवा बाक्त। हानोक रागीम बाक्मेनु, परमप्रभु यावे आ देशो टिशा, आ थुं नुपाइशशो बाक्माक्त, दे तुइक्नय। हिब्रू लोत्रमी हानोक कली एनोक बाक्ब। उत्पत्ती ५:२४

6 थमा मसुइक्थु मेको आ थुं नुपाइक्ने मजाप्ब। परमप्रभु यावे आ नेक्था जाक्दीन्ने यो मजाप्ब। मेको बाक्ब, दे थमा सुइक्चा माल्ब। मिनु मेको बाक्ब, दे थमा सुइक्बपुकीम मेको कली माल्नीम। मिनु आ कली माल्ब आन कली तपांडसीब।

7 नोआह यो थमा सुइक्ब बाक्माक्त। यावेमी मेको कली “नोले ओदेशो दुम्ब” मदानु, मेको लोत्र थमा सुइशशा टिशा, टेयब डोंगा सेल्शा, आ खिं डा मुर आन कली ओइशा, बेक्चा मंगेथु प्रोंडमी बाक्त। नोआहमी मो पशो तशा यो अरुमी थमा मसुदमे बाक्त। मिनु आन थमा मसुइक्तीके दोसी दुम्शा, नेल्ल बेक्चा माल्मा बाक्त। नोआह चहिं थमा सुइशशोमी ब्रोंइचा तांडसीब, दे कोइब दुम्माक्त। उत्पत्ती ६:८-९, १३-२२

8 अब्राहाममी यो परमप्रभु यावे आ लोत्र थमा सुइक्बाक्माक्त। यावेमी “इ कली नोले गेनुड देशो रागी कोइनन। मोपतीके एक्केर रे लावो” देमेनु, अब्राहाममी परमप्रभु यावे आ देशो टिशा, ते लचा मतुइक्थु, यो मलेत्वा डा पा मेको रागी प्रोंइशा गाक्माक्त। उत्पत्ती १२: २१:-

9 मिनु थमा सुइशशा कोइशो रागीम जाक्दीशशा, परमप्रभु यावे आ गेशो लोत्र ताइब आ तौ इसहाक, आ चच याकूब नु काथा बाक्शा, अर्को रागी डा मुर खोदेशो पा खिं मसेल्थु ताम्बु कीशा बाक्माक्त।

10 सरीड नु रागी कली सेल्ब परमप्रभु यावेमी दुशा ग्येरशा बाक्तीक सहर यो सेल्ब बाक्ब। अब्राहाममी मेको सहर कली रिम्शो बाक्माक्त।

11 थमा सुइशशोमी अब्राहाम आ मीश सारा आल मथीब थारी बाक्शा यो, आल थीब दुम्माक्त। मारदे हना लोत्र गेब परमप्रभु यावेमी आ लोत्र दोपा यो खाप्ब, दे थमा सुइशशो बाक्माक्त।

12 मेना अब्राहाम आल मथीब खाल्पा बाक्माक्त हना यो, नोले आ खिं डा मुर सोरुल खोदेशो पा शुश दुम्शा, हिक्ने मचाप्चा डा दुम्मा बाक्त।

13 अब्राहाम नु आ खिं डा मुरपुकीमी परमप्रभु यावेमी गेशो लोत्र थमा सुइशशा बेक्मा बाक्त। मेको लोत्र गाप्शो मतथु, डोन रे तशा मजाक्दीत्थु, बेक्मा बाक्त। मेकोपुकीमी “इं रागी मजाक्दीत्थु, अर्को आन रागीम बाक्तय” देशो बाक्मा बाक्त। उत्पत्ती २३:४; उत्पत्ती ४७:९; इइतिहास २९:१५

14 मो देमानु “आंइ रागी माल्शा गाक्तक” दे तुइक्पाइक्नीम।

15 मेकोपुकीमी आन यूशा लशो रागी मिम्ताक्म हना, लेशशा लम वा।

16 तन्न गूशा लशो रागी क्येडा रिम्शो बाक्तीके परमप्रभु यावेम गेब, दे तुइश्शा, परमप्रभु यावे गे लमा बाक्त। मिनु परमप्रभु यावे मेको आन परमप्रभु यावे दुम्चा मुने मपाइब। मेको आन कली बाक्तीके सहर का सेल्शा वोइश्शो बाक्ब।

17 अब्राहाममी आ थुं थाम्चा पुंडसीशा थमा सुइश्शा, आ तौ इसहाक कली चढेवा बाक्त। इसहाक अब्राहाम आ कांडचीक तौ बाक्माक्त। मेको रे पा परमप्रभु यावे आ गेशो लोत्र थमा दुम्चा माल्लो बाक्माक्त। उत्पत्ती २२:१-१९; याकूब २:२१

18 मारदे हना परमप्रभु यावेमी अब्राहाम कली “इसहाक रे पा इ चच युइ रागीम लीनीम” दे लोत्र गेशो बाक्माक्त। उत्पत्ती २१:१२

19 अब्राहाममी “आं तौ बेक्त हना यो, परमप्रभु यावेमी बेक्शो रे सेने चाप्व” दे मिम्ता बाक्त। परमप्रभुमी अब्राहाम आ मिम्शो तुइश्शा, आ तौ कली मसाइक्पाइक्थु लेत्ता बाक्त।

20 इसहाकमी परमप्रभु यावे आ देशो नोले दुम्ब लोत्र थमा सुइश्शा, आ तौ याकूब नु एसाव आस कली आसीक गेम्सी बाक्त। उत्पत्ती २७:१-४०; उत्पत्ती ४८:- ५०:-

21 याकूबमी थमा सुइश्शा, आ बेक्ची ना कोक्केमी आ पिया तिकशा, परमप्रभु यावे कली ठेयब सेल्शा, योसेफ आ तौ आस कली आसीक गेम्सी बाक्त। उत्पत्ती ४७:३१

22 मिनु नोले योसेफमी यो आ बेक्ची जाक्त, दे तुइश्शा डा मिन “इसाएलीपुकी इजीप्त रे गूशा गाक्नीम” दे परमप्रभु यावे आ देशो लोत्र मिम्शा, आ मुर आन कली “गे लेन्नीनु, आं रुश यो लाइश्शा लने” दे माइक्मी बाक्त। मारदे हना आ यो “परमप्रभु यावे आ देशो जाक्दीप्व” दे थमा सुइश्शो बाक्माक्त।

23 मोसा जरमेसेनु, आम आफोमी थमा सुइश्शा “परमप्रभु यावेमी एको आल कली ब्रोंडपाइक्ने चाप्व। मोपतीके एको इश दारशो आल कली मसाइक्चा” दैशा, पिप आ हुकुम मटिथु महिंथु, आस तौ मोसा कली महिना सां सम्म खुइश्शा वोदसे बाक्त। प्रस्थान २:१२,१४

24 मिनु मोसा मोपा कोल्शा ठेयब दुम्शा, परमप्रभु यावे कली थमा सुइश्शा, मार पवा बाक्त दैशा हना “मुल डा मेरे फाराओ आ तमी आ तौ मद्मुनुड, आं मुर नु लाइनुड” दे लमाक्त।

25 पापीपुकी नु काथा बाक्शा, सुख जचा क्येडा परमप्रभु यावे आ मुर नु बाक्शा, श्येत जशा बाक्चा योव्रतु।

26 मारदे हना इजीप्त डा शोंप नु मान तशा यो मारेइ मसुइक्थु “ख्वीस्तमी श्येत जशो खोदेशो पा श्येत जचा थमा डा शोंप नु मान बाक्ब, दे मिम्ताक्व। मिनु नोले इनाम यो तांडसीब” दे तुइश्शा थमा सुइश्शो बाक्माक्त।

27 “मतांडसीब परमप्रभु यावे कली मिक्चीम तशो खोदेब पा आं नेक्थान ताइनुड” दे थमा सुइश्शा, पिपी गाइश्शो तशा यो महिंथु, इसाएली आन कली इजीप्त रे गुंइशा लाइक्मी बाक्त।

28 इजीप्त रे गुंइचा डोंइती पास्सा चाड डा भोज जपाइक्मी बाक्त। मारदे हना “तेको खिं डा लाप्यो आ पियामी हुश बुइश्शो बाक्मे, मेकेर परमप्रभु यावे आ स्वर्ग डा गेय पाइबमी जेठा तौ कली मसाइक्ब” दे परमप्रभु यावे आ लोत्र थमा सुइश्शा, हुश बुइक्पाइक्मी बाक्त।

29 मिनु थमा सुइश्शोमी लल समुन्द्रम सोव्रशो लां दुम्माक्त। मिनु खोइल का यो मजित्थु शोक्समा बाक्त। मेको आन नोले खोइश्शा खेदा पाइब इजीप्त डा मुरपुकी चहिं समुन्द्रमी गुम्शा बेक्मा बाक्त।

30 परमप्रभु यावे आ देशो लोत्र थमा सुइश्शा, यरीको सहर ७ नाक्त सम्म हिरसमा बाक्त। मिनु ७ नाक्त गारो नेल्ल ब्रेम्मा बाक्त। यहोसु २:-; ६:१-२५

31 डोंइती राहाब तेल्लेममी मोसाम सोइश्शो क्यारी पाइब आन कली जतीक बाक्तीक गेशा मान पशो बाक्माक्त। मिनु आन देशो लोत्र थमा सुइक्तीके मटीब नेल्ल नु मबेक्थु, ब्रोंइचा तवा बाक्त। याकूब २:२५

32 में डा लाक्शा मार देनुडा? मारदे हना मोदेशो थमा सुइक्ब शुश बाक्नीम। गिदोन, बाराक, साम्मोन, येफता, दाऊद, सामुएल नु परमप्रभु यावे आ लोत्र पाइब नेल्ल आन पशो मिम्पाइक्तन्नी हना, आं लोत्र गेनायो मनुप्व। न्यायाधीस ६:११-८:३२; न्यायाधीस ४:४-२४; न्यायाधीस १३:१-१६,३१; न्यायाधीस ११:१-१२,७; १सामुएल १७:-; दानीएल ६:-

33 मोदेशो थमा सुइक्बपुकीमी मार पामे बाक्त दैशा हना, कोइमी लडाइ पा ग्राशा, रागी आंम के सेल्मे बाक्त। कोइमी श्येत जाइब आन कली वारच पामे बाक्त। कोइमी डोंइती देशो लोत्र थमा दुम्शो तामे बाक्त। गुप्स आन शोत्र रे यो ब्रोंइमा बाक्त।

34 मीम हुम्चा पुंडसीशा यो मबेक्मा बाक्त। तरवारमी क्योरचामेनु यो ब्रोंइमा बाक्त। मारेइ पने मचाप्व बाक्मा बाक्त हना यो, पने चाप्व दुम्मा बाक्त। लडाइ पामेनु यो ठेयब थुं पाइश्शो दुम्शा, आन जोरी सत्रु आन कली फुशा खेरमे बाक्त।

35 मीश मुरपुकीमी आन तौ बेक्शा लशा, बेक्शो रे सेसीशो तामे बाक्त। मिनु मेको आलपुकी एको रागीम ब्रोंइमा बाक्त। कोइमी “बेक्शा नोले बेक्शो रे सेसीशा गेनायो मबेक्सीब, ग्येरशा बाक्चा तांडसीब” दे थमा सुइश्शा, श्येत जशा यो फाल्शा बाक्मा बाक्त। शुश श्येत जशा तुप्या पुंडसमा बाक्त हना यो “थमा सुइक्चा प्रॉइनीकी” दे मदेंमा बाक्त। “थमा सुइक्चा प्रॉइनीकी” देशो नम हना, प्रॉइशा सोइक्तेम वा। “थमा सुइक्चा मप्रॉइनीकी” देशोमी श्येत जना जन साइक्चा पुंडसमा बाक्त। १राजा १७:१७-२४; २राजा ४:८-३७;

36 का निकशी शुक्शी लोत्र पा कोराम युक्शा, गुइ खोइली साइलोलम पाइश्शा, जेल्खानम चोक्शा वोइक्चा पुंडसमा बाक्त। १राजा २२:२७; येरमीया २०:१-३; येरमीया ३७:११-१६

37 फुल्लु आप्शा साइक्चा पुंडसमा बाक्त, आरामी रिक्शा साइक्चा पुंडसमा बाक्त, तरवारम क्योरशा साइक्चा पुंडसमा बाक्त। २इतिहास २४:२१

38 तेड बाक्का मतथु, जचा फेक्का मतथु, भेडा नु क्यारश आन कुशल फेक्का, एर ओथ हिरना हिरन गोरशो रागी रोगुमी प्रोक्का, पुक्खीमी खुडक्का खुडक्का बाक्का बाक्त। मोपा श्येत जाडब आन कली एको रागीमी बाक्का ब्रोडचा मगारब। मारदे हना रिम्शो मुर बाक्नीन। एको रागी चहिं मरिम्शो बाक्ब।

39 मेको नेल्ले थमा सुडशशा, परमप्रभु यावे आ डोंइती ठीक दुम्मा बाक्त। परमप्रभु यावे आ गेशो लोत्र चहिं गाप्शो मतामे बाक्त। हिब्रू ११:४-५

40 मारदे हना परमप्रभु यावेमी इं पर्वम शुश रिम्शो मिम्शो बाक्का बाक्त। मिनु मेकोपुकी यो गोपुकी नु रिम्शो दुम्मल। मेको नक लां रे पा पाको मसेल। मेको आन कली नु इं कली काथा वोडशशो बाक्ब, दे रुब्य।

## 12

येसु कली थमा सुडशशा

1 साड थमा सुडक्कपुकी शुश बाक्का बाक्त। मेकोपुकीमी इं कली कोव्रना कोव्रन बाक्नीन। मोपतीके दोरब मुर खोदेशो पा, इं कली तेक्ब नु खोल्ने चाप्बपुकी तिल्शा, पापमी इं खोइली फ्रेंचा मगेथु, दोरय। १कोरिन्थी ९:२४

2 थमा सुडक्तीक लां कोडशा, पाको सेल्ब येसु कली मिम्तय। मेकोमी शीम केप्शा कांटी थोकशा क्वाडशशा साडक्का पुंडसीचा आ पर्वम, मुने आ पर्वम मारेड ममिम्ता बाक्त। नोले मान पा ग्येरसीशा बाक्का ताडनुड, दे मिम्ता बाक्त। मिनु मुल परमप्रभु यावे आ ग्युरा गे निरशो बाक्ब। हिब्रू ५:८-९; फिलिप्पी २:८-१०

3 येसु रागीम बाक्मेनु, पापीपुकीमी शुक्शी पा खेदा पा शुश मरिम्शो पाप्तेक्म हना यो, मेको नेल्ल फाल्तु। मेको आ श्येत फाल्शो मिम्तीने। मेको मिम्ताक्नी हना, इन थुं बारनीनी। लांमी गाक्का दशो खोदेशो मदुमीनी। मती २६:६७; लूका २:३४

4 पाप नु लडाड पा मुल सम्म हुश जुडक्थी मदुमी।

परमप्रभुमी इं कली कोव्रब

5 तमी तौ आन कली अर्ती गेशो खोदेशो पा इन कली डोंइती गेशो अर्ती प्रेंदीनी माड, दे मिम्पाडक्नन्नी। ओदें ब्रेक्शो बाक्ब “आं तौ, परमप्रभुमी इं कली शेंदानु, शेंसो। इ कली श्येत जपदानु ‘फाल्ने मचबु’ मदेनो। मेको कली सोपी ममिम्ती।

6 परमप्रभुमी सु कली दाक्बा, मेको कली सजाड गेब। सु कली आ तौ मिम्बा, मेको कली तुप्ब” दे ब्रेक्शो बाक्ब। हितोपदेस ३:११-१२; प्रकाश ३:१९

7 श्येत गेचा पुंडसीनीनु, परमप्रभु यावेमी शेंताक्की, दे मिम्तीने। आफोमी आल कली पशो खोदेशो पा, परमप्रभु यावेमी इन कली पाडब। आफोमी शेंचा मपुंडसीब तौ बाक्बा डा?

8 आल नेल्ले शेंचा पुंडसीनीन। परमप्रभु यावेमी इन कली मशेंताक्क हना, आ तमी तौ मननी। आफ मपाडशशो बाक्नीनी।

9 एको रागी डा इं आफोमी इं कली तुप्तेक्म हना यो, मेको आन कली मान पा आन लोत्र टीतय। मिनु गेना हना यो आ नु काथा बाक्का कली स्वर्ग डा आफ आ देंशो टिचा ममाल्नया डा?

10 इं आफपुकीमी इं कली आन मिम्स पा नाक्ती का निक्शी सम्म शेंताक्म। स्वर्ग डा आफोमी चहिं इं कली रिम्शो थुं पाडशशो सेल्चा दाक्ब। पाप रे डोन बाक्शो आ खोदेशो दुम्शो तचा दाक्ब। मोपतीके इं कली शेंब।

11 मोदेशो पा शेंचा पुंडसीयानु, मग्येरनय। श्येत जाडनय। श्येत फाल्ने चाप्बपुकी ठीक दुम्नीम, आन थुं नाडक्का ताडनीम, दे रुब्य। २कोरिन्थी ४:१७-१८

12 मोपतीके श्येत जाडतीनी हना यो, लांमी गाक्का दशो खोदेशो मदुमीन, इन गुड खोइल सेस दुम्शा गाक्कीन।

13 लां ब्रेम्शो सेल्शा, रिम्शो पा थेक्शा गाक्कीन। सुड दशा, खोइली खाडशशा, आन पोक्क मबुडक्कल। रिम्शो पा गाक्का, आन दशो सामल। हितोपदेस ४:२६-२७

14 मुर नेल्ल नु दुशा गारशा बाक्कीने। पाप रे डोन बाक्शा, रिम्शो थुं पशा गेय पा कोंइदीने। मो पाडतीनी हना, प्रभु नु काथा बाक्का ताडनीनी। रोमी १२:१८; २तिमोथी २:२२

15 अर्ती गेमुशा वारच पमुशा बाक्कीने। सुड परमप्रभु यावे आ शिशी मताडब मदुम्ल। सुडमी थुं चोशा दुशा बाक्ब आन कली फ्राशा, मुर आन कली मरिम्शो मसेलल। ब्यवस्था २९:१७

16 सुड एसाव खोदेशो मरिम्शो मदुम्ल। एसावमी काले आ कोव्रज प्रिंचा कली डोंइती जरमेशो तौमी तचा डा शोप नु आसीक आ लोकब कली प्रोना बाक्त। उत्पत्ती २५:३३-३४

17 नोले आस आफोमी अडस योक्गानु, एसावमी डोंइती जरमेशो तौ आ तचा डा अडस गेयीनी, दे डाक्का डाक्क पुंडशा यो आ आफ आ थुं लेप्पाडक्ने मचबा बाक्त। मिनु परमप्रभु यावे आ डोंइती आ नें मलीमाक्कत, दे नेल्लेमी तुडक्कीनी। उत्पत्ती २७:३०-४०

रिम्शो राज्य ओव्रचा ताडनय

18 साड इं किकी पिपीपुकीमी परमप्रभु यावे कली गुम्शो खोदेशो पा मगुमीनी। मेकोपुकीमी गुडमी थिचा डा डांडामी मी ब्रशा तामे बाक्त। मिनु छिडछिड दुम्शा क्येर गोस्स बोक्शा, फश गिवार पा बुंबु पवा बाक्त। गे मेक सम्म मजाक्शो बाक्नीनी। प्रस्थान १९:१२, १६, १८; ब्यवस्था ४:११

19 मिनु तुराही ताप्शो डेयब रेयके खोदेंब पा परमप्रभु यावे आ लोत्र नेन्मे बाक्त। मेको लोत्र नेने मचाप्थु “मुल डा मेरे ओं देंब लोत्र मपचा” दे थम हिंशा पुन्मे बाक्त। प्रस्थान २०:१९

20 मेकोपुकीमी नेने मचाप्शो लोत्र “एको डांडा थीब बस्तु जन्तु बाक्त हना यो, मेको कली फुल्लु आप्शा साडक्का माल्ब” देंशो लोत्र बाक्माक्त। प्रस्थान १९:१३

- 21 मोदेशो हिंचा डा दुम्यो तशा, मोसामी “हिंशा खिंखि पाता” देंमाक्त। ब्यवस्था ९:१९
- 22 तन्न गे सियोन डांडाम ब्रोंडशा बाकब परमप्रभु यावेमी स्वर्गम सेल्शो यरूसलेम सहर जाकदीशशा बाक्या ताइनीनी। मेकेर परमप्रभु यावे आ स्वर्ग डा गेय पाइब बाकनीम। गलाती ४:२६; एफिसी २:६; फिलिप्पी ३:२०; प्रकाश २१:२; प्रकाश ५:११
- 23 आन नें स्वर्गम ब्रेक्चा पुंडसीशा, इन क्येडा डोंडती जाकदीशशा, पाप रे ब्रोंडशा ग्येरशा बाक्या ताइबपुकी बाकनीम। परमप्रभु यावेमी मुर नेल्ल आन कली निसाफ पाइब आ नेक्था बाकनीम। लूका १०:२०
- 24 नक कबल खाण्व येसु बाकब। मिनु येसु आ जारशो हुश यो बाकब। मेको हुश हाबील आ हुश खोदेशो ममाड। हाबील आ हुशेमी “आं कली साइकब सजाइ गेचा पुंडसमल” देंब। येसु आ हुशेम चहिं “मेको आन पाप नेल्ल क्याम्शा, सजाइ जचा रे प्रोंडतामी” देंब। हिब्रू ९:१५; उत्पती ४:१०
- 25 होस पांडसीने। इन कली लोत्र पाइब कली इन ची मकोइदीने। इं किकी पिपीपुकीमी मुर आ देशो मटीमे बाक्त। मिनु सजाइ गेचा पुंडसमा बाक्त। गोपुकी स्वर्ग रे लोत्र पाइब कली इं ची कोंडताक्य हना, सजाइ मतथु ब्रोंडनया डा? हिब्रू २:२; हिब्रू १०:२८-२९
- 26 परमप्रभु यावेमी लोत्र पवानु, खिनु कुशो खोदेब पा रागी नेल्ले हिम्से बाक्त। मुल इं कली मार लोत्र पाइब देशा हना “मुल यो लेंशा काले रागी ला ममाड, सरीड यो हिम्नुड” देंब। हग्गे २:६
- 27 “मुल यो लेंशा काले हिम्नुड” देशो लोत्र रे मार रुम्सीब देशा हना, हिम्सीबपुकी सेल्चा पुंडसीशो बाकनीम। मिनु फाइक्या पुंडसीनीम। महिम्सीबपुकी चहिं लीनीम, दे रुम्सीब।
- 28 मोपतीके गेनायो महिम्सीब राज्य ओत्रचा ताइनय, दे तुडशशा, परमप्रभु यावे कली मान पा ठेयब सेल्ना सेल्ल “गे रिम्शो पाइब बाकनीनी” देशा, ग्येरशा आ दाकशो गेय पना पन बाक्य।
- 29 इं परमप्रभु यावे नेल्ल खतम सेल्ल मी खोदेशो बाकब। हिब्रू १०:३१; ब्यवस्था ४:२४

## 13

रिम्शो गेय कोंडदीने

- 1 लोकब खोदेशो पा दाकमुशा गारशा बाकनीन। यूहन्ना १३:३४; २पत्रुस १:७
- 2 इन खिंम जाकब सुड आन कली जचा बाक्या गेचा मप्रोनीन। मोपा गेशोमी का निकशीमी आन मतुडक्यु परमप्रभु यावे आ स्वर्ग डा गेय पाइब आन कली मान पचा ताम्तेकम। रोमी १२:१३; १पत्रुस ४:९; ३यूहन्ना ५-८; उत्पती १८:२-३; उत्पती १९:२-३
- 3 जेल्खानम चोक्या पुंडसीशो आन कली काथा बाकशो मिम्शा वारच पने। श्येत गेचा पुंडसीब आन कली तशा, आंम श्येत जशो खोदेशो मिम्तीने। मत्ती २५:३६
- 4 गे नेल्लेमी “ग्युंवे पशो रिम्शो बाकब” दे मिम्तीने। मुर आ मीश नु मुरु आ वोंडश मडम्मल। मीश वोंडश आस नाता खोडकब नु तेल्लेम आन कली परमप्रभु यावेमी निसाफ पाइब।
- 5 क्येट चेम्चा गे इन थुं महिरदीने। गेपुकी नु मार मार बाक्या, मेको मोशोमीन इन थुं नाइशशा बाकनीन। मारदे हना मेकोमी “गे नु बाकनुड, मिनु गेनायो मप्रोंडनन” देंब। यहोसु १:५; १तिमोथी ६:६
- 6 प्रभु आ देशो तुडशशा “प्रभुमी आं कली कोत्रशा, वारच पाइब। मुरपुकीमी मार पने चाप्नीमी डा? मारेड पने मचाप्नीम। मोपतीके महिंथु बाकती” दे ठेयब थुं पा बाक्य। भजन संग्रह ११८:६

इन थुं दूली शेंब गे महिरदीने

- 7 इन कली परमप्रभु यावे आ लोत्र शेंब आन पशो मिम्तीने। मेकोपुकी बेक्ची सम्म थमा सुडक्या मप्रोनेम। मेको आन पशो खोदेशो पने।
- 8 साइ डोंडती, मुल नु गेना हना यो येसु खीस्त मफांडसीथु बाकब, दे तुडकतीन। यसैया ४१:४; १कोरिन्थी ३:११; प्रकाश १:१७-१८; प्रकाश २२:१३
- 9 मुल सम्म मनेशो नु दूली शेंब लोत्रमी इन थुं क्याल्चा मगेने। परमप्रभु यावे आ शिशीमी रिम्शो थुं पाइशशो दुम्तय, दे गेनायो मप्रेंदीने। चोत्रखो जशोमी ठीक थुं मसेल्ल, दे रुपीने। एफिसी ४:१४; २कोरिन्थी १:२१; रोमी १४:१७; १तिमोथी ४:८
- 10 गुडमी सेल्शो ताम्बुम गेय पाइबपुकीमी येसु आ भोज जचा मताइनीम।
- 11 साइ ठेयब चढेबमी पाप क्याम्चा कली बस्तु भाव क्योरशा, थम चोत्रखो कोठाम ओत्रशा हुश चढेम्तेकम। श्ये चहिं गुंडशा, मुर मबाक्तीकेम लाइशशा चोम्तेकम। मिनु सुडमी मेको श्ये ब्वचा मताम। लेवी १६:२७
- 12 मोपतीके मुर आन पाप क्याम्चा कली येसु कली सहर रे गुंडशा, श्येत जपाइक्तेकम। येसुमी मुर आंम के सेल्चा कली आ हुश चढेपु। मत्ती २१:३९; यूहन्ना १९:१७
- 13 आ मुर दुम्शा, मेको मेर यूशा, आ नु काथा बाक्या, आ बुदी शुक्शी पाइक्या पुंडसाक्य। हिब्रू ११:२६; हिब्रू १२:२
- 14 एको रागीमी गेना हना यो बाक्या मताइनय। जाक्यशो सहर कली रिम्शा बाकनीकी। हिब्रू ११:१०; हिब्रू १२:२२
- 15 येसु रे पा परमप्रभु यावे कली मान पा ठेयब सेल्ना सेल्ल बाक्य। मेको यो इं शोत्र डा भेटी बाकब। भजन संग्रह ५०: १४, २३; होसे १४:३
- 16 अरु आन कली रिम्शो पने। मथीब मचाण्व आन कली मार माल्दा, मेको गेचा मप्रेंदीने। मिनु परमप्रभु यावेमी इन कली मोदेब रिम्शो पशो तशा ग्येरब।

17 इन कली शेंब आन लोव्र नेंशा टिने। मेकोपुकीमी “परमप्रभु यावे आ डोंइती जिम्मा ब्राइनुड” दे तुइरशा इन कली शेंनीमी, कोव्रनीम। शेंब आन लोव्र टीतीनी हना, मेकोपुकीमी ग्येरशा शेंनीम। इन कली मटिशो तशा चहिं, आन थुं हेल्शो दुम्शा, शेंचा ब्रीनीम, मिनु इन कली यो मरिम्शो दुम्ब। १थिस्सलोनिकी ५:१२; इजीकीएल ३:१७-१९

आंइ कली प्रार्थना पने

18 आंइ पबंम परमप्रभु यावे कली पुंइना पुंइन बाक्कीने। मारेइ दोस ताइब मटुम्क, दे आंइ थुं नाइरशा बाक्कीकी। मारेइ पाइतक हना यो, रिम्शो पय, दे थुं फ्रेशा बाक्तक। रोमी १५:३०; २कोरिन्थी १:११-१२

19 “युम्चा तयल” दे परमप्रभु यावे कली पुंइचा मप्रोनीन।

आसीक गेशो

20 नेल्ल क्येडा ठेयब भेडा गोठला, इं प्रभु येसुमी आ हुशेम गेना हना यो लीब कबल खाप्टु। दुशा बाक्चा गेब परमप्रभु यावेमी मेको कली बेक्शो रे सेंताक्व। यूहन्ना १०:११; १पत्रुस २:२५

21 परमप्रभु यावेमी येसु ख्रीस्त रे पा इन थुं रिम्शो सेलल, आ दाक्शो गेय पपदल, आ कली ग्येरपाइक्ब सेलल। येसु ख्रीस्त कली गेना हना यो ठेयब सेल्या। आमेन। आमेन आ अर्थ “गो यो मेकोन मिम्नुड” बाक्ब।

नोले डा लोव्र

22 आं दाक्शो लोकबपुकी, इन कली आं ब्रेक्शो थुं बारपाइक्तीक लोव्र शुश मब्रेक्तु। रिम्शो पा रुप्चा माल्नीनी।

23 नेनीने, इं लोकब तिमोथी कली जेल्खान रे प्रोइतेक्म। आं गाक्चा क्येडा डोंइती एक जाक्त हना, इन कली युम्थ पीनस्कु।

24 शेंब नु थमा सुइक्ब नेल्ल इन कली “रिम्शो बाक्कीन” देंती। इटाली डा थमा सुइक्ब लोकबपुकीमी यो इन कली “रिम्शो बाक्कीन” देंतेक्म।

25 प्रभु आ शिशी गेपुकी नु लील।

## याकूब

**ब्रेक्ब मुर:** एको चिठी ब्रेक्ब याकूब बाक्ब। मेको येसु आ लोकब बाक्त। गलाती १:१९ मेको यरूसलेम डा थमा सुइक्ब आन शेंब दुम्त। गलाती २:१; प्रेरित १५:१३-२१ मेको ६२ ए. डी.म फुल्लु आप्शा साइक्चा पुंडसाक्ब।

**गेना ब्रेक्शो:** एको किताब ४४ ए. डी. रे ५० ए. डी. दातेमी ब्रेक्शो बाक्त।

**मारदे ब्रेक्शो:** येसु ख्रीस्त कली थमा सुइक्तीके मुर आन पशो गेयमी तांडसीब, दे रूपाइक्चा कली ब्रेक्शो बाक्ब। थमा सुइक्ब आन पतीके मार बाक्ब, दे शेंतीके बाक्ब।

डोंडती डा लोत्र

1 गो, याकूब, परमप्रभु यावे नु प्रभु येसु ख्रीस्त आस वाइल नड। गो ब्रशा बाक्शो १२ थर डा यहूदी इन कली नमो पाइनुड। गे रिम्शो बाक्कीन।

थमा सुइक्तीके दोपा ठीक दुम्बा

2 आं लोकबपुकी, इन थमा सुइक्तीके ठीक बाक्म कों, मबाक्म, दे थुं थाम्चा पुंडसाक्नी हना, ग्येरसीने। रोमी ५:३-५; १पत्रुस ४:१३

3 मारदे हना इन थमा सुइक्चा ठीक बाक्त हना, गेपुकी खोइली थेक्शा शुश फाल्ब दुम्नीनी।

4 येसु ख्रीस्त कली थमा सुइश्शा, खोइली थेक्शा बाक्शोमी परमप्रभु यावे आ डोंडती इन कली ठीक सेल्ब। मोपा परमप्रभु यावे नु बाक्चा कली थम रिम्शो नु ठीक दुम्शा, अरु मारेइ ममाल्नीनी।

5 तुइक्ब थुं माल्तीनी हना, गेपुकीमी परमप्रभु यावे कली “गो तुइक्ब थुं माल्नुड” दे पुनीन। परमप्रभु यावेमी मगाइक्थ, शुश तुइक्ब थुं गेब। याकूब ३:१५; हितोपदेस २:३-६

6 परमप्रभु कली पुंडनीनु “आं पुंडशो गेब” दे थमा सुइश्शा पुनीन। “तुइक्ब थुं गेबा कों, मगेबा” दे थमा मसुइक्ब मुर खोदेशो पा मपुनीन। मोदेशो मुर फशेम नेप्शो समुन्द्र डा ब्वाक्कु खोदेशो बाक्ब। मकूस ११:२४; १तिमोथी २:८

7 मोदेशो मुरुम मारेइ मताइब।

8 थुं निक्शी पाइश्शो मुर आ थुं कामी परमप्रभु यावे आ लां खोइक्ब, थुं कामी मुर आन लां खोइक्ब।

पुडग नु क्येट थीब मुर

9 मिनु इन दातेमी सुइ पुडग थमा सुइक्ब लोकब बाक्त हना, मेकोमी “परमप्रभु यावेमी आं कली ठेयब मुर सेलती” दे ग्येरसेक्ल। याकूब २:५

10 मेकेर थमा सुइक्ब क्येट थीब मुर बाक्त हना, मेकोमी “गो परमप्रभु यावे आ डोंडती पुंडब दुम्शा, आं पुंडशो गेब” दे ग्येरसेक्ल। क्येट थीब मुर बोइश्शो फू बेक्शो खोदेशो पा सोल बेक्नीम। १तिमोथी ६:१७; १पत्रुस १:२४

11 नां दाप्शा डा मिन शुश हुप्तानु, घांस नेल्ल सोल सुल बेक्नीम। मिनु आन फू सफा नेल्ल हेम्नीम। मोपा आ दारस जाम्ब। मेको खोदेशो पा क्येट थीब मुर यो आ गेय पस डा पस बेक्नीम। यसेया ४०:६-७

ब्रोंडतीक सिरपेच

12 सु इन दातेमी आ थमा सुइक्तीके ठीक बाक्म कों, मबाक्म देय थुं थाम्चा पुंडसीशा फाल्ने चाप्बा, मेको मुर ग्येरसेक्ल। मेको थुं थाम्तीके ठीक दुम्त हना, मेको मुरुमी ब्रोंडतीक सिरपेच ताइब। परमप्रभु यावेमी “सुम आं कली दाक्बा, मेकोमी ब्रोंडतीक सिरपेच ताइब” दे लोत्र पशो बाक्ब। २तिमोथी ४:८

13 पाप पचा चिक्शो मुरुमी “परमप्रभु यावेमी आं कली पाप पपाइक्चा चिक्ताक्ब” दे गेनायो देंचा मदुम्ब। मारदे हना सुइमी परमप्रभु यावे कली थुं नाक्शा, पाप पपाइक्ने मचाप्ब। आं यो सुइ कली पाप मपपाइक्ब।

14 मुरुपुकीमी दोपा पाप पाइनीम देशा हना, आम दला दाक्स पा पाप पाइनीम। उत्पती ३:६; रोमी ७:७-८

15 मोपा दला दाक्स पामेनु, पाप यूब। मेको पाप बारने थुमानु, मेको मुर नरकम लाइनीम। मेको पाप पतीके बाक्ब। रोमी ७:१०

16 आं दाक्शो थमा सुइक्ब लोकबपुकी, दूली लां मखोतीन।

17 हाइश्शो नु रिम्शो ठीक मिन्तीके थुं नेल्ल परमप्रभु यावे रे जाक्ब। मिनु परमप्रभु यावे छेडछेड कली सेल्ब बाक्ब। मोपतीके परमप्रभु यावे छेडछेडमी बाक्ब। छिडछिड डा गेय काइ मपाइब। आ थुं यो मफाईसीब। मती ७:११; १यूहन्ना १:५

18 परमप्रभु यावेमी इ कली आ थमा लोत्र पतीकेमी नक जरमेशो मुर सेल्लु। मोदेशो पा डोंडती सिश्शो फल खोदेशो पा आ मुर दुम्तय। यूहन्ना १:१३; १पत्रुस १:१२३

परमप्रभु आ लोत्र नेंशा पचा

19 आं दाक्शो लोकबपुकी, मार तुइक्चा माल्नीनी देशा हना, गेपुकी नेंस डा नेंस बाक्कीन। शुश मब्वाक्कीन। शुश मचुरीन। हितोपदेस २९:२०; उपदेसक ५:१-२; उपदेसक ७:९

20 चुरब मुरुमी परमप्रभु आ ठीक पतीके मपाइब।



21 मोपतीके ग्रांग्रा दिचा डा गेय नु काड मरिम्शो पतीके नेल्ल प्रोनीन। गे ठेयब मलेत्थु, इन थुमी वोडशशो परमप्रभु यावे आ अरेशो लोत्र टिने। मोपा गेपुकी परमप्रभु यावे आ अरेशो लोत्र टिनीनु, मेको लोत्रमी इन कली नरकर रे प्रॉइने चाप्ब। १पत्रुस २:१

22 गेपुकी परमप्रभु यावे आ लोत्र नेनीन। नेंचा ला ममाइ, मार मार देशो बाक्मे, मेको यो पचा माल्नीनी। गेपुकीमी मेको लोत्र नेंशा मपाइतीनी हना, जोल पांडसीनीनी। मत्ती ७:२१; रोमी २:१३

23 सु परमप्रभु यावेमी देशो लोत्र नेंशा मपाइबा, मेको ऐना कोत्रब मुर खोदेशो बाक्ब।

24 मेको मुरुमी ऐना कोत्रशा, आ कुल दोदेशो तांडसे, मेको यु प्रेंब।

25 सुमी इन कली प्रॉइने चाप्ब परमप्रभु यावे आ ठीक पतीके अरेशो लोत्र नेनीमी, नेंचा ला ममाइ पना पन यो बाक्नीमी, मेको मुर आन पतीकेमी आसीक ताइनीम। याकूब २:१२; रोमी ८:२; यूहन्ना १३:१७

26 सुमी “गो थमा सुइक्ब नड” दे मिम्बा, तन्न हेंथे ब्वाक्बा, मेको मुर जोल पाइब बाक्ब। मिनु आ थमा सुइक्तीके मोशा दुम्ब। १पत्रुस ३:१०

27 मखाल्थु ठीक पा थमा सुइक्तीके दोदेशो बाक्ब देशा हना, रोम रोइक्च नु वॉइश बेक्शो मीश मुर श्येत जामेनु, वारच पचा नु थमा मसुइक्ब पाप पाइब आन खोदेशो पाप काड मपचा, मेको इं आफ, परमप्रभु यावे आ डोंइती ठीक पा थमा सुइक्तीके बाक्ब।

## 2

युम्तीकेमी कुल मकोत्रमुने

1 आं लोकबपुकी, इं प्रभु येसु खीस्त कली थमा सुइक्नीनी। मेको छेडछेड डा प्रभु बाक्ब। मोपतीके गेपुकी यो मुर आन कुल मकोत्रडीन।

2 थम दारशो वा फेक्शो नु सुन के औंठी पांडशो मुर का नु जेक्शो वा फेक्शो पुडग मुर का इन युम्तीक खिमी जाक्ताक्स हना,

3 मेको दारशो वा फेक्शो कली कोत्रशा “हजुर, मेकेर निस्सीने” दे लोत्र पशा, पुडग कली चहिं “हयु उड राप्शा बाक्को। आं खोइल आ नेक्था निस्सो” दे माइक्तीनी हना,

4 गे इन दातेमी आइक्च नु ठेयब तिल्लीनी। मोदेशो पनीनु, मरिम्शो निसाफ मपनी डा?

5 आं लोकबपुकी, नेनीन, परमप्रभु यावेमी रागी डा पुडग आन कली शुश थमा सुदमेक्ल, दे मयोत्रडा डा? मिनु परमप्रभु यावे कली दाक्ब नेल्ल आ राज्य ओत्रचा ताइनीम मदेंम डा? १कोरिन्थी १:२६; १कोरिन्थी ११:२२; लूका १२:२१

6 गे चहिं पुडग आन कली दिप्नीनी। मेको शुश क्येट थीब मुरपुकी इन कली श्येत गेब मुर मनमी डा? मेकोपुकीमी इन कली अडडाम मचाक्दीलीमी डा?

7 येसु खीस्त आ नें आ पबंम शुक्शी लोत्र मपाइनीमी डा? १पत्रुस ४:१४

दाक्मुने

8 परमप्रभु यावे आ राज्य डा अरेशो लोत्रम मार ब्रेक्शो बाक्ब देशा हना “अरु आन कली आंम इन कली दाक्शो खोदेशो पा दाक्तीन” दे ब्रेक्शो बाक्ब। मो पाइतीनी हना, गेपुकी रिम्शो पाइनीनी। लेवी १९:१८

9 तन्न गेपुकीमी थमा सुइक्ब का कली ठेयब सेल्शा, अरु आन कली आइक्च सेल्तीनी हना, गे पाप पाइनीनी। मिनु परमप्रभु यावे आ अरेशो लोत्र मटीब दुम्नीनी। ब्यवस्था १:१७

10 मुर कामी परमप्रभु यावे आ अरेशो लोत्र नेल्ल पशा, का चहिं मपाप्टु हना, लोत्र नेल्ल मटीब खोदेशो दुम्ब। मत्ती ५:१९

11 परमप्रभु यावेमी “मीश वॉइश आस नाता मखोइक्चा” दे ब्रेक्शो बाक्ब। मिनु “मुर मसाइक्चा” दे यो ब्रेक्शो बाक्ब। तेल्लेम मपथ, तन्न मुर आन कली साइक्तीनी हना, गेपुकी परमप्रभु यावे आ अरेशो लोत्र मटीब पापी दुम्नीनी। प्रस्थान २०:१३-१४

12 परमप्रभु यावेमी इन कली पाप रे ब्रॉइतीक लां कोंइशा, निसाफ पाइब। मेको मिम्शा, गेय पने।

13 शिशी मपाइबपुकीमी निसाफ पची नाक्त शिशी मताइनीम। निसाफ क्येडा शिशी ठेयब बाक्ब। मत्ती ५:७; मत्ती १८:३०, ३४; मत्ती २५:४०, ४६

थमा सुइक्चा नु टिचा

रोमी ३:२१-३१; मत्ती ७:२१

14 आं लोकबपुकी, मुर कामी “गो थमा सुइक्नुड” दे परमप्रभु यावे आ अरेशो लोत्र नु गारब गेय मपाप्टु हना, आ थमा सुइक्शोमी मेको कली पाप रे प्रॉइने चाप्बा डा? मत्ती ७:२१

15 मिनु लोकब का के जचा फेक्चा मबाक्त हना,

16 मेको कली “थुं नाइश्शा बाक्को। परमप्रभुमी इ कली फेक्तीक गेवल। जचा गेवल” देशा, गे मेको कली आ माल्शो मारेड मगेतीनी हना, इन थमा सुइक्तीके शोर गाक्शो बाक्ब। १यूहन्ना ३:१८

17 इन थमा सुइक्तीकेमी गेय मपाप्टु हना, मेको थमा सुइक्तीके बेक्शो बाक्ब।

18 मुर का निकशीमी “गे थमा सुइक्ब दुम्तीनी। गो चहिं परमप्रभु यावे आ गेय पाइब दुम्तक। मोपतीके इन थमा सुइक्शो कोंइदीन। इन गेय कोंइचा ममाल्नीनी। गो यो आंइ पशो गेय रे आंइ थमा सुइक्तीके कोंइनीकी” देंने चाप्नीम। गलाती ५:६

19 गेपुकी परमप्रभु यावे का ला बाकब, दे थमा सुइक्नीनी। मोपा रिम्शो पाइनीनी। वोलपुकीमी यो मेको थमा सुइश्शा हिंशा ख्रिस्त्रि पाइनीम।

20 गे दूली पाइबपुकी, गेय मपथु थमा सुइक्तीके शोर गाकशो बाकब, मेको तुइक्तीन।

थमा सुइक्चा मार बाकबा?

21 मिनु इं किकी अब्राहाममी आ तौ इसहाक परमप्रभु यावे कली चढेचा, दे परमप्रभु यावे आ डोंइती ठीक गेय पाइब दुम्माक्त। उत्पत्ती २२:१-१९; हिब्रू ११:१७; रोमी ४:२-३

22 आ थमा सुइक्तीके नु आ गेय काथ काथा पवा बाक्त। मोपा आ थमा सुइक्तीके आ गेयमी ठीक दुम्शो बाक्माक्त। 23 मिनु अब्राहाम आ पर्वम ब्रेक्शो लोत्र ठीक दुम्माक्त। मार ब्रेक्शो बाक्त देशा हना “अब्राहाममी परमप्रभु यावे कली थमा सुदा बाक्त। मेको थमा सुइश्शोमी अब्राहाम कली ठीक सेला बाक्त” दे ब्रेक्शो बाक्त। मिनु मुरपुकीमी अब्राहाम कली “परमप्रभु यावे आ वारच” दे याइनी नें वोदमे बाक्त। उत्पत्ती १५:६; यसैया ४१:८

24 मुरुमी थमा सुइक्चा ला ममाइ, आन गेयमी यो ठीक दुम्मीम, दे गेपुकी रुपे मचाप्नीनी डा?

25 अब्राहाम खोदेशो पा राहाब माइश्शो तेल्लेम मीश मुरुमी यो थमा सुइक्ब दुम्शा, आ पशो गेयमी ठीक दुम्माक्त। दोदेंब गेय पवा बाक्त देशा हना, इस्माएल डा मुर निक्शी आस कली अरु लां कोंइशा, सोइक्ता बाक्त। हिब्रू ११:३१; यहोसु २:-

26 मिनु दोपा सोक्त मपाइश्शो मुर बेक्शो बाकबा, मोपा थमा सुइक्बमी थमा सुइश्शो गेय मपाप्टु हना, आ थमा सुइक्तीके बेक्शो बाकब।

### 3

मुर आ शोत्रमी दोपा पाप पाइबा

1 आं लोकबपुकी, शुश शेंब मुर मडुमीन। मारदे हना परमप्रभुमी मेको शेंसीब आन क्येडा शेंब आन कली शुश कोत्रशा, आन लोत्र नेंशा, निसाफ पाइब।

2 गो नेल्लेमी शुश गलती पाइनय। सुमी लोत्र पवानु, काइ गलती मपाइबा, मेकोमी रॉम मपचा डा गेय यो मपाइब। मेको मुर थम रिम्शो बाकब।

3 गोपुकीमी शारा बिप्पाइक्चा कली लगम पाइक्नय। मोपा मेको शारा आ रॉ नेल्ल चलने चाप्नय।

4 जहाज यो मिम्तीन। दोदेशो ठेयब बाक्त हना यो, दोदेशो ठेयब फशेमी मेको कली गाक्पाइश्शो बाक्त हना यो, चलेबमी मेको कली इम्चीली थोत्रकमी चलेशो बाकब। मिनु ते लाइक्चा दाक्ता, मेकेर लाइक्ने चाप्ब।

5 मेको इम्चीली चलेतीके खोदेशो मुर आ लें बाकब। मुर आ लेंमी ठेयब लोत्र पाइब। मेको लें आइक्च बाक्त हना यो, ठेयब मरिम्शो पने चाप्ब। इम्चीली मीम ठेयब ब्वाकी क्रोइक्ने चाप्ब।

6 मुर आ लें मी खोदेशो बाकब। मेकोमी रॉ नेल्ल मरिम्शो सेलब। मेकोमी मरिम्शो लोत्र पशा, रॉ कली पापी सेलब। रागी नेल्ल कली क्रोइक्ब। आंमा यो नरकमी ग्रोइक्ब। हितोपदेस १६:२७; मत्ती १२:३६-३७; मत्ती १५:११,१८

7 मुरपुकीमी बस्तु भाव, जन्तु, चिक्बी नेल्ल आन कली शेंने चाप्नीम। मिनु मेको आन कली शेंताक्म हना यो,

8 आंम आन लें कली शेंने मचाप्नीम। मुरुमी आन लेंमी मरिम्शो पाइनीम। दोपा ओश्येर जशा, मुर बेक्नीमी, मोपान लें यो मुर कली साइक्ने चाप्चा डा ओश्येरमी ब्रीशो बाकब।

9 गोपुकीमी प्रभु नु आ आफ कली “गे ठेयब नसी” दे लोत्र पाइनय। मिनु परमप्रभु यावेमी आ खोदेशो सेल्शो मुर आन कली सराप पाइनय। भजन संग्रह १४१:३; उत्पत्ती १:२६-२७

10 मोपा शोत्र कामी आसीक लोत्र नु सराप लोत्र पाइनीम। आं लोकबपुकी, मो पचा मदुम्ब। एफिसी ४:२९

11 ब्वाक्कु बुक्तीक का रे कशो नु ब्रोत्रशो ब्वाक्कु कालेमी यीबा डा?

12 आं लोकबपुकी, फोत्रशी रवामी तेल रवा आ फल मसिप्ब। अडगुर रवामी फोत्रशी मसिप्ब। मेको खोदेशो पा हिक्सी डाम्शो ब्वाक्कु रे ब्रोत्रशो ब्वाक्कु गूने मचाप्ब।

इन गेय तेको लां रे जाक्बा?

13 मिनु इन दातेमी सु निप्स पाइश्शो नु रुप्तीक थु पाइश्शो मुर बाक्मा, मेकोमी आ गेय रे पा आ ब्रेम्तीके रुप्तीक थु रे जाक्ब, दे कोंइदल।

14 गे अरु मुर आन थोत्रक वाल्तीक नु आंम कली ला मिम्तीक थु बाक्त हना, ठेयब लेशशा, थमा शेंतीके कली जोल मसेलीन माइ? मबाक्कीन।

15 ओदेशो मिम्तीके परमप्रभु आ गेशो रुप्तीक थु मबाक्ब। तन्न मुर आन थुं रे नु सैतान रे जाक्ब। याकूब १:५

16 मुरुमी मुर आन के थोत्रक वाल्चा नु आंम कली ठेयब सेल्चा ला मिम्ताक्व हना, मेको मुरुमी मरिम्शो गेय नु अरु पाप यो पना पन बाक्ब।

17 परमप्रभुमी गेशो निप्स पाइश्शो थुंमी मुर कली ग्रॉग्रा दिचा डा गेय मपपाइक्ब। सुइ नु मजिपाइक्ब। ब्रेम्शो सेलब। गाइश्शो फालपाइक्ब। शुश शिशी पपाइक्ब। रिम्शो गेय पपाइक्ब। कुल कोत्रशा, गेय मपपाइक्ब। जोल मपपाइक्ब।

18 थुं नाइश्शा बाक्ब मुरपुकी ठीक गेय पशा, मुरपुकी नु दुशा गारशा बाक्नीमी। मेको परमप्रभु यावे आ गेशो ठीक पतीकेमी बाक्ब। फिलिप्पी १:११; मत्ती ५:९

## 4

मुर आन दला दाक्स

1 इन दातेमी जिचा खेचा ते रे जाकबा? गे इन दला दाक्स आ परबम जीनीनी, ममाइ?

2 गेपुकी मारेइ मारेइ माल्नीनी, तन्न मताइनीनी। मोपतीके मुर आन थुं जिक्शा, साइक्नीनी। मिनु अरु आन के मार मार तशा वाल्नीनी, तन्न मताइनीनी। मोपतीके जीनीनी। गेपुकी परमप्रभु यावे कली मपुंडनीनी। मोपतीके मताइनीनी। गलाती ५:१५

3 गेपुकीमी पुंडतीनी हना यो, मारेइ मताइनीनी। मारेदे हना आंम दला दाक्स पचा कली ला पुंडनीनी। मोपतीके इन पुंडशो मताइनीनी।

4 गे परमप्रभु यावे आ लां प्रोइशा हेंथे गाकबपुकी, गे थमा मसुइकब आन वारच बाक्तीनी हना, परमप्रभु यावे आ जोरी सत्रु दुम्नीनी। सु थमा मसुइकब आन वारच दुम्बा माल्बा, मेको परमप्रभु यावे नु जोरी सत्रु दुम्ब। लूका ६:२६; रोमी ८:७; १यूहन्ना २:१५

5 परमप्रभु यावेमी ब्रेक्पाइशो लोव्रमी “परमप्रभु यावेमी आ सोक्त इं रांमी वोइकतु। तन्न मुरुमी दला दाक्स पशो तशा, मेकोमी शुश रुश पाइब” दे यो ब्रेक्पाइशो बाकब।

6 तन्न परमप्रभु यावेमी मेको क्येडा शुश शिशी पाइब। मिनु “गो टेयब लेशशो मुर आन कली शिशी मपाइनुड। ब्रेम्शो, टेयब मलेशशो मुर आन कली ला शिशी पाइनुड” दे ब्रेक्पाइशो बाकब। अय्युब २२:२९; हितोपदेस ३:३४; मती २३:१२; १पत्रुस ५:५

7 गेपुकी परमप्रभु यावेमी देशो लोव्र टिने। सैतान रे डोन बाक्कीन। मो पाइतीनी हना, सैतानमी इन कली प्रोइब। मती २३:१२; १पत्रुस ५:८-९

8 परमप्रभु यावे आ नेक्था लने। मो पाइतीनी हना, मेको इन नेक्था जाकब। गे पापीपुकी “आंइ पाप क्याम्दीने” देशा, माफ पुनीने। थुं निक्शी पाइशो मुरपुकी, इन थुं परमप्रभु यावे गे लेशशा, थुं का दुमीने। जकरिया १:३; यसैया १:१६

9 मिनु सुर्ता पने। रोंका पा डाक्कीने। इन रिच्चा आ पा डा रोंका पने। इन ग्येरचा आ पा डा सुर्ता पने।

10 प्रभु येसु आ डोंइती आइक्च दुम्शा, ब्रेम्शो दुमीन। मिनु परमप्रभु यावेमी इन कली टेयब सेलब।

परमप्रभु निसाफ पाइब बाकब

11 आं लोकबपुकी, शुक्शी लोव्र मपमुने। सुम लोकब आ परबम शुक्शी लोव्र पाइबा, दोस गेबा, मेकोमी परमप्रभु यावे आ अरेशो लोव्र मटीब। मेकोमी परमप्रभु यावे आ अरेशो लोव्र क्येडा “गो जोकब तुइकब नड” दे मिम्शा, निसाफ पाइब खोदेशो दुम्ब। “परमप्रभु यावे आ अरेशो लोव्र रिम्शो देय मरिम्शो” दे लोव्र पाइब यो दुम्ब। मोपा गे परमप्रभु यावे आ अरेशो लोव्र मपाइब दुम्शा, निसाफ पाइब दुम्तीनी।

12 परमप्रभु यावे अरेशो लोव्र गेब नु निसाफ पाइब बाकब। परमप्रभु यावेमी ला पाप रे प्रोइने नु नरकम सोइक्ने चाप्व। इन नेक्था बाकब आन कली मोपा नाकब, सु ननी डा? मती ७:१; रोमी १४:४

13 गेपुकीमी मार लोव्र पाइनीनी देशा हना “दीसा निल्थी सहरम लशा, बर्स का सम्म बाक्य। मिनु शुश क्येट चेम्प” दे मिम्शा लोव्र पाइनीनी। हितोपदेस २७:१

14 दीसा निल्थी मार दुम्बा, ब्रोंइनीनी कों, बेक्नीनी कों मारेइ मतुइक्नीनी। इन गिंम मार में? मेको गोस्स खोदेशो बाकब, इच्का का ला लीशा, जाम्ब। लूका १२:२०

15 गे मार देंचा माल्शो ननी देशा हना “गोपुकी ब्रोंइतय हना, प्रभुम आंइ मिम्शो दाक्ताकव हना, गो आंइ मिम्शो गेय पाइनय” दे लोव्र पचा माल्नीनी। प्रेरित १८:२१; १कोरिन्थी ४:१९

16 गेपुकी चहिं टेयब लेशशा, आंम थुं डा लोव्र पाइतीनी। मोदेशो टेयब लेशशा बाक्चा मरिम्शो दुम्ब।

17 सु रिम्शो गेय पस जोक्बा तुइक्बा, तन्न मपाइबा, मेको कली मरिम्शो दुम्ब। लूका १२:४७

## 5

क्येट थीब आन कली हुइशशो

1 नेनीन, गे क्येट शुश थीब मुरपुकी, डाक्कीन। रोंका पने। मारेदे हना गे नोले श्येत जाइब दुम्नीनी। लूका ६:२४-२५

2 इन बाक्शो शोंप नेल्ल राक्शो दुम्तेक्मे। इन वासी नेल्ल तुम्बुम नेक्तेक्म। मती ६:१९

3 इन सुन चांदी नेल्ल खिया जोशो बाकब। मेको खियामी इन कली “मरिम्शो मुर” दे कोइब। सुन चांदी कली खिया जोशो खोदेशो पा इन रां कली मीम दाक्ब। गे क्येट शुश हेंताक्नी।

4 इन रूम गेय पाइब आन गाल्च मुल सम्म जोल पा मगेनी। मेको खेल्ला आन कली मगेशो गाल्चम आ मुर नेल्ल आन परमप्रभु यावे नु लोव्र पान्तु। मिनु मेकोमी मेको खेल्ला आन पुंडशो लोव्र नेंने थुम्तु। ब्यवस्था २४:१४-१५

5 गेपुकी रागीमी दुक्चा, जचा, ब्वचामी शुश शोंप पाइशो दुम्शा, ग्येरशा बाक्तीनी। मिनु क्योरची नाक्त कली थुल्शा दोम्पाइशो खोदेशो पा गेपुकी निसाफ पची नाक्ती टेयब सजाइ ताइब दुम्नीनी। लूका १६:१९-२५

6 गेपुकीमी रिम्शो गेय पाइब मुर आन कली दोस गेशा साइक्तीनी। मेकोपुकीम ब्वालेइ पा, मारेइ लोव्र मलेत्तेम। याकूब २:६

प्रभु जाक्चा चिक्शो बाकब

7 मिनु आं दाक्शो लोकबपुकी, नेनीने, रूमि गेय पाइब मुरुमी मेको आ खुम्शो बाली नाली मीब, दे आ थुं नाइशशा, हिंडद नु बर्खा रिम्शो खोदेशो पा प्रभु आ जाक्चा रिम्दीन। लूका २१:१९; हिब्रू १०:३६

- 8 थुं नाइश्शा बाक्कीन। मारदे हना प्रभु जाक्चा चिक्शो बाक्ब। मोपतीके प्रभु कली टिचा मप्रोंइथु बाक्कीन।
- 9 आं दाक्शो लोकबपुकी, गेपुकीमी अरु थमा सुइक्ब आन परबम गन गन मपने। मो पाइतीनी हना, निसाफ पचा पुंडसीनी। नेनीन इन निसाफ पाइब जाक्चान चिक्शो बाक्ब।
- 10 आं दाक्शो लोकबपुकी, साइ डा परमप्रभु यावे आ लोत्र पाइबपुकीमी परमप्रभु यावेमी देशो लोत्र पशा, शुश श्येत जशा यो फाल्शा, परमप्रभु यावे कली मप्रोंइथु बाक्शो बाक्तेक्म। मिनु मेको आन खोदेशो पा बाक्कीन। मती ५:१२
- 11 नेनीने, मेको परमप्रभु यावे कली मप्रोंइब आन परबम “ग्येरशो मुर दुम्तेक्म” दे लोत्र पाइनीकी। अय्युब माइश्शो मुर का श्येत जशा यो, परमप्रभु यावे कली काइ मप्रोंइथु, बाक्शो बाक्त। गेपुकी मेको आ कथा नेतीनी। परमप्रभु यावेमी मारदे अय्युब कली मेको शुश श्येत जचा गेवा, तुइक्ताक्नी। परमप्रभु यावेमी गिश लेम्शा शिशो पाइबा, मेको ताइतीनी। इं कली आ लेम्शो नु आ शिशो कोंइताक्व। अय्युब १:२१; अय्युब ४२:१०-१६

कसम जचा आ परबम लोत्र

- 12 आं लोकबपुकी, आं नेल्ल क्येडा ठेयब अरेतीक लोत्र मार बाक्ब देशा हना, कसम मजने। सरीड कोत्रशा, खप थिशा, चुक्ब थिशा कसम मजने। इन देशो लोत्र दुम्ब हना “दुम्ब” मतुम्ब हना “मतुम्ब” देनीन। गे जोल पाइतीनी हना, गे निसाफ पचा पुंडसीनी। मती ५:३४-३७

रोइ पाइब आन कली लोत्र

- 13 इन दातेमी सु सु श्येत जामे, मेकोमी परमप्रभु यावे नु लोत्र पामेक्ल। सु सु ग्येरशो बाक्मा, मेकोपुकीमी “परमप्रभु यावे नेल्ल क्येडा ठेयब बाक्ब” दे कुम्सो पामेक्ल। भजन संग्रह ५०:१५; कलस्सी ३:१६
- 14 इन दातेमी सु रोइ पाइबा, मेकोमी ग्युम्तीके डा शेंब खाल्पा आन कली ब्रेत्चा माल्ब। मेकोपुकीमी रोइ पाइब आन तारी गुइ वोइश्शा, प्रभु आ नेमी तेल खेक्शा, परमप्रभु यावे कली पुंडचा माल्नीम। मर्कूस ६:१३
- 15 मोदेशो थमा सुइश्शा पुंडशोमी मेको रोइ पाइब मुर साब। मेको रोइ पाइबमी पाप पशो बाक्त हना, मेको यो क्याम्सीब। मर्कूस १६:१८
- 16 मोपतीके रोइ सापाइक्चा कली इन पशो पाप शोत्रमुशा, प्रभु नु लोत्र पमुने। ठीक थमा सुइक्ब आन पुंडशो लोत्रमी ठेयब गेय पाइब। प्रेरित १२:५
- 17 एलीया इं खोदेशो मुर का बाक्माक्त। मेकोमी परमप्रभु यावे कली “रेउ यिचा मगेने” दे शुश पुना बाक्त। मिनु बर्स सां ६ महिना सम्म रागीम काइ रेउ मयिमाक्त। १राजा १७:१; लूका ४:२५
- 18 नोले मेकोमी “रेउ यिपतीन” दे पुना बाक्त। मिनु नोले रेउ यिशा, बाली नाली वामा बाक्त। १राजा १८:४१-४५

नोले डा लोत्र

- 19 आं दाक्शो लोकबपुकी, इन दाते डा मुर का थमा लां रे डोन लत हना, अर्को थमा सुइक्बमी मेको कली आ पशो पाप रूप्पाइश्शा, परमप्रभु यावे आ लां गे लेप्पाइक्तु हना, गलाती ६:१
- 20 मेको मुरुमी मेको मटीब मुर कली बेक्चा रे प्रोंइब। मिनु मेको के शुश पाप बाक्त हना यो, क्याम्सीब, दे मेकोमी तुइक्चा माल्ब। भजन संग्रह ५१:१५; हितोपदेस १०:१२; १पत्रुस ४:८

## १ पत्रुस

**ब्रेक्ब मुर:** एको चिठी येसु आ शेंसीब पत्रुसमी इस्राएली मद्रुमो मुर आन कली ब्रेक्बो बाक्त।

**गेना ब्रेक्बो:** एको चिठी ६४ ए. डी. नोले ब्रेक्बो बाक्त। मेना रोम सहर डा मुरपुकीमी थमा सुडक्ब आन कली शुश खेदा पा, साडक्चा गोत्रमे बाक्त। रोम सहर कली यो बेबीलोन यो देंनीम। १पत्रुस ५:१३

**मार ब्रेक्बो:** पत्रुसमी थमा सुडक्ब आन कली “बोल्यो दुमीन। थमा सुडक्बपुकीमी श्येत जचा माल्नीम” दे ब्रेक्बो बाक्त।

डोंइती डा लोत्र

1 गो येसु खीस्त आ सोइशो पत्रुस नड। एको चिठी पोन्टस, गलातीया, कापाडोसीया, एसीया नु बिथीनीया रागीम ब्रशा बाक्बो इस्राएल रागी डा थमा सुडक्ब, इन कली ब्रेक्ताक्नी। हिब्रू १३:१४

2 इं आफ परमप्रभु यावेमी इन कली योत्रशा, आ मुर दुम्नीम देंत। मिनु आ सोक्तीमी इन कली येसु खीस्त कली टीब सेल्लु। आ हुशेमी चोत्रखो सेल्लु। परमप्रभु यावे आ गेशो शिशी नु थुं नाडक्तीके डोंइती क्येडा मुल गे नु शुश बाक्ल। रोमी ८:२९

ब्रोंइचा आ पर्वम शेंशो

3 इं प्रभु येसु खीस्त आ आफ नेल्ल आसीक पाइशो बाक्ब, दे गो मान पय। मेको आ शुश शिशी पतीके नु येसु खीस्त बेक्बो रे सेंसीशोमी इं कली ब्रोंइशा बाक्तीक आस गेशा, नक जरमेशो मुर सेल्लु। कलस्सी १:५

4 मिनु इं कली स्वर्गमी जाम्शा मलाइब, काड मबियेब नु गेना हना यो लीब शोप वोइशो बाक्ब। कलस्सी १:१२

5 परमप्रभु यावे आ सक्तिमी इं कली कोत्रब। गो पाप रे ब्रोंइशो मुर बाक्नय, दे थमा सुडक्नय। मेको नेल्ल नोले डा नाक्तीमी कोइब। यूहन्ना १०:२८

6 गे मेको तुइशो, ग्येरनीनी। मुल इचका नाक्त सम्म थुं थाम्चा कली मार मार श्येत जाइनीनी। १पत्रुस ५:१०; २कोरिन्थी ४:१७

7 मारदे श्येत जाइनीनी देशा हना, इन थमा सुइशो थमा कों, जोल कों, दे नाक्चा कली श्येत जाइनीनी। मोपा श्येत जाइतीनी हना, इन थमा सुडक्तीके मीम याप्पाइशो सुन क्येडा शुश क्येट लाइब दुम्ब। मिनु येसु खीस्त आ यिचि ना ठेयब सेल्लिक, छेडछेड नु मान पतीक दुम्ब। हितोपदेस १७:३, यसैया ४८:१०

8 गे मेको कली मताइतीनी हना यो, दाक्नीनी। मेको कली मुल सम्म मतथु यो, थमा सुडक्तीनी। गे गिश ग्येरना ग्येरन बाक्बो बाक्नीनी, देंने मचाप्नीनी। यूहन्ना २०:२९; २कोरिन्थी ५:७

9 इन थमा सुडक्तीकेमी पाप रे ब्रोंइचा ताइनीनी।

10 साइ डोंइती परमप्रभु यावे आ लोत्र पाइबपुकीमी गे शिशी ताइब दुम्नीनी, दे लोत्र पशो बाक्तेक्म। मिनु पाप रे ब्रोंइतीके तुइक्चा कली शुश माल्शो बाक्तेक्म। लूका १०:२४

11 मेकोपुकीमी आन आगामी बाक्बो खीस्त आ सोक्त कली “पाप रे प्रोंइब सु बाक्मे, गेना जाक्बा?” दे हिल्लो पामे बाक्त। मोदेशो पा माल्ना माल्न खीस्त आ श्येत जचा नु छेडछेडम लचा आ पर्वमी नोले दुम्ब लोत्र पामे बाक्त। भजन संग्रह २२:२, यसैया ५२:१३- ५३:१२

12 मेकोपुकीमी आन पाला डा मुर आन कली ला लोत्र मपामे। नोले डा मुर, इन कली यो लोत्र पा शेंदमे बाक्त। इन कली दोपा शेंदमे बाक्त देशा हना, परमप्रभु यावेमी आ सोक्त स्वर्ग रे सोइशो बाक्त। मेको आ पतीकेमी शेंबपुकीमी इन कली ग्येरपाइक्ब लोत्र शेंताक्म। परमप्रभु यावे आ स्वर्ग डा गेय पाइबपुकीम यो मेको तचा तुइक्चा दाक्नीम। एफिसी ३:१०

परमप्रभु आ मुर दिम्शो

13 मोपतीके इन थुं फ्रेदीन। गेय पचा डोंइती मिम्तीन। येसु खीस्त जाक्मेनु, इन कली शिशी पाइब, दे आस पा बाक्कीन। लूका १२:३५-३६

14 मुल टीब आल खोदेशो पा इन डोंइती मतुइक्थु पशो मरिम्शो पचा क्येडा डोन बाक्कीन। रोमी १२:२

15 इन कली ब्रेक्ब, येसु खीस्त दोदेशो बाक्मे, गे यो मोदेशो दुम्शा बाक्कीन।

16 परमप्रभु यावे आ ब्रेक्पाइशो लोत्रमी “गेपुकी आं कली ला ठेयब सेलीन। मारदे हना गो का ला इन परमप्रभु नड” दे ब्रेक्बो बाक्ब। लेवी १९:२

17 गेपुकीमी परमप्रभु यावे कली “इं आफ” दे पुंइना पुंइन बाक्नीनी। मेकोमी मुर आन कुल मकोत्रथु, आन पशो कोत्रशा, निस्सफ पाइब। मोपतीके गे रागीमी बाक्नीनु, पाप पचा हिनीन। रोमी २:११; फिलिप्पी २:१२

18 इन किकी पिपी रे “गो नरक लाइब बाक्नीकी” दे तुइक्नीनी। मुल गे नरक लतीक लां रे प्रोंइचा पुंइसीशो बाक्तीनी। दोपा प्रोंइचा पुंइसीशो बाक्तीनी देशा हना, जाम्शा लाइब सुन नु चांदी थाप्शा ममाइ, १कोरिन्थी ६:२०; १कोरिन्थी ७:२३; १पत्रुस ४:३

19 येसु खीस्तमी मारेइ मद्रुमो पाठा बुद पा आंम हुश शाइक्पाइशो इन कली नरक रे प्रोंइतु। हिब्रू ९:१४; यसैया ५३:७; यूहन्ना १:२९

20 परमप्रभु यावेमी रागी सेल्चा क्येडा डोंइती “येसु खीस्त पाप रे प्रोंइब दुम्ब” दे मिम्शो बाक्माक्त। मेको रागी नुप्ची ना इन पर्वम तुइक्पाइशो बाक्त। रोमी १६:२५-२६

21 गे येसु ख्रीस्त आ पतीके परमप्रभु यावे कली थमा सुइक्नीनी। मेकोमी येसु ख्रीस्त कली बेक्शो रे सेंपाइशशा, छेडछेडम वोइक्तु। मोपतीके गे “परमप्रभु यावेमी इं कली कोत्रब” दे थमा सुइशशा आस पने।

22 दोपा येसु ख्रीस्त आ देशो टिशा, थमा गेय पा पाप रे डोन बाक्नी, मोपा गे लोकब आन कली यो थमा पा दाक्नीनी। गे थमा सुइक्बपुकी इन थुं नेल्लेमी थमा पा दाक्मुने।

23 गे नक जरमेशो खोदेशो बाक्नीनी। जाम्शा लाइब ममाइ। गेनायो मजाम्ब दुम्तीनी। मेकोन ब्रोंइचा गेब नु गेना हना यो लीब परमप्रभु यावे आ लोत्र बाक्ब। यूहन्ना १:१३; याकूब १:१-१८

24 परमप्रभु यावे आ देशो लोत्र मार बाक्त देशा हना, रागी डा मुर नेल्ल घांस खोदेशो बाक्नीम। मेको आन दारस बोइशशो फू खोदेशो बाक्ब। आ घांस सोत्रब, मिनु फू यो हेम्ब। याकूब १:१०-११

25 तन्न परमप्रभु यावे आ देशो लोत्र गेना हना यो लीब। मेको आ ग्येरपाइक्ब लोत्र बाक्ब। मिनु शेंबपुकीमी मेको इन कली शेंताक्मे। यसैया ४०:६-८

## 2

परमप्रभु आ योत्रशो मुर

1 मोपतीके गे नेल्ल मरिम्शो पचा, मुर आन कली मरिम्शो लोत्र पतीक नु गाइक्तीके ताइक्तीन। मिनु जोल पतीके, गेहे पतीके नु मुर आन लोत्र कुरशा गाक्चा नेल्ल ताइक्तीन। याकूब १:२

2 नक थिशो आलम दूध तूचा माल्लो खोदेशो पा, गे यो परमप्रभु यावे आ लोत्र तुइक्चा मालीन। गे मोदेशो पाइतीनी हना, इन पाप रे ब्रोंइशो थुं बारना बारन लाइब। हिब्रू ५:१२-१३; मत्ती १८:३

3 मारदे हना गेमी परमप्रभु रिम्शो पाइब बाक्ब, दे तुइक्नीनी। भजन संग्रह ३४:१०

4 येसु ख्रीस्त ब्रोंइचा गेब फुल्लु बाक्ब। मेको आ नेक्था लने। मुरपुकीमी मेको कली ममाल्लो फुल्लु खोदेशो पा ताइक्ताक्म। तन्न परमप्रभु यावेमी “मेको कली योत्रशो नु नेल्ल क्येडा दाक्शो बाक्ब” दे मिम्ब। भजन संग्रह ११८:२२; यसैया ८:१४-१५; मत्ती २१:४२

5 मिनु गे यो ब्रोंइचा गेब फुल्लु खोदेशो बाक्नीनी। मोपतीके परमप्रभु यावे आ सोक्तीम सेल्लो खिं डा फुल्लु दुमीन। परमप्रभु यावे आ डोंइती राप्ब मुर दुमीन। आ सोक्त डा चढेतीक गेय पा बाक्कीन। येसु ख्रीस्त आ पतीके परमप्रभु यावेमी इन पशो ताक्ब। एफिसी २:२१-२२; हिब्रू ३:६; रोमी १२:१

6 मारदे हना परमप्रभु यावे आ लोत्रमी मार ब्रेक्शो बाक्ब देशा हना “नेनीन, गो सियोन डांडामी फुल्लु का वोइक्नुड। मेको मुर डा फुल्लु दुम्शा, योत्रशीशा नु दाक्सीशा बाक्ब। सु सुमी मेको कली थमा सुदमे, मेको मुर मुने दोक्चा ममाल्नीम” दे ब्रेक्शो बाक्ब। यसैया २८:१६

7 मोपतीके थमा सुइक्बपुकीमी मेको कली दाक्नीम। तन्न थमा मसुइक्ब खिं सेल्लपुकीमी मेको फुल्लु कली ताइशशो बाक्तेक्म। तन्न मेको मुर डा फुल्लु दुम्त।

8 मिनु लेंशा “मेको फुल्लुमी मुर आन कली दाइल पपाइक्ब। मेको ठेयब फुल्लुमी मुर आन कली थिप्पाइक्ब” दे ब्रेक्शो बाक्ब। मुरपुकीमी परमप्रभु यावे आ लोत्र मटितीके दाइल पांइसीनीम, दे डोंइती मेको आ पर्वम देशो बाक्ब। भजन संग्रह ११८:२२; यसैया ८:१४; रोमी ९:३३; लूका २:३४

9 तन्न गे परमप्रभु यावे आ योत्रशो मुर दुम्तीके, आ राज्य डा चढेब परमप्रभु यावे आ रागी डा मुर दुम्तीनी। मारदे मोदेशो दुम्तीनी देशा हना, परमप्रभु यावेमी इन कली रिम्शो पशा, छिडछिड रे गुंइशा, आम आ छक लाक्चा डा छेडछेडमी वोइशशो बाक्त। मिनु अरु नेल्ल आन कली शेंचा, दे मोदेशो दुम्तीनी। प्रस्थान १९:६; यसैया ४३:२१; प्रकाश १:६; ब्यवस्था ४:२०; ब्यवस्था ७:६; एफिसी ५:८

10 डोंइती गे परमप्रभु यावे आ मुर मबाक्नी। मुल परमप्रभु यावे आ मुर दुम्तीनी। डोंइती गे परमप्रभु यावे आ शिशी मतशो बाक्तीनी। तन्न मुल परमप्रभु यावे आ शिशी ताइब दुम्तीनी। होसे २:२५; रोमी ९:२४-२६

थमा सुइक्ब दोपा बाक्चा माल्नीमी

11 आं दाक्शो लोकबपुकी, गो इन कली इन थुं बारपाइक्तीक लोत्र पाइनुड। गो रागीम बाक्क्यानु, रागी डा पौना खोदेशो बाक्नय। मोपतीके इन दला दाक्स पा रागी डा मुर खोदेशो मपने। ग्रामा दिचा डा गेय रे डोन बाक्कीन। मारदे हना मोदेशो गेय इन थमा सुइक्तीक थुं नु जीब। भजन संग्रह ३९:१३

12 थमा मसुइक्ब आन दातेमी रिम्शो पने। मेकोपुकीमी इन पर्वम “मरिम्शो पाइब बाक्नीम” दे मरिम्शो लोत्र पाम्तेक्म हना यो, इन रिम्शो पतीक तशा, परमप्रभु यावे नु ग्रुम्ची ना मेकोपुकीमी परमप्रभु यावे कली ठेयब सेल्लेक्ल। मत्ती ५:१६

13 प्रभु आ पर्वम सरकारमी अधिकार गेशो मुर आन कली टिने। पिप नेल्ल क्येडा ठेयब बाक्ब। मोपतीके टिचा माल्नीनी। रोमी १३:१-७; तीतस ३:१

14 मिनु आ वोइशशो ठेयब मुर आन कली यो टिचा माल्नीनी। मेकोपुकी मरिम्शो पाइब आन कली सजाइ गेचा नु रिम्शो पाइब आन कली “गे रिम्शो पाइतीनी” देंचा कली वोइशशो बाक्नीम।

15 परमप्रभु यावे आ दाक्शो मार बाक्ब देशा हना, इन रिम्शो पतीकेमी मतुइक्ब नु निप्स मपाइशशो आन कली सिक्सी पपतीन। १पत्रुस ३:१६; तीतस २:८

16 पाप रे प्रोंइचा पुंइसीशो मुर दुम्शा बाक्कीन। “पाप रे ब्रोंइचा ताइनुड” दे मिम्शा मरिम्शो मपने। परमप्रभु यावे आ चाइलीम वाइल दुम्शा बाक्कीन। गलाती ५:१३; २पत्रुस २:१९

17 मुर नेल्ल आन कली मान पने। थमा सुइक्ब आन कली दाक्तीने। परमप्रभु यावे कली मान पा हिनीन, पिप कली मान पने। रोमी १२:१०; हितोपदेस २४:२१

येसु आ श्येत जशो कोंडतीके

18 गे खिं डा गेय पाइबपुकी, इन होत्रप क्येडा हिंशा टिने। रिम्शो पाइब होत्रप कली ला ममाइ, मरिम्शो होत्रप कली यो टिचा माल्नीनी। एफिसी ६:५; तीतस २:९

19 इन होत्रपमी इन कली बिल्चीन श्येत गेम्तेक्म हना यो, गे परमप्रभु यावे कली मिम्शा, श्येत फाल्शा बाक्कीन। मेको परमप्रभु यावे आ दाक्शो बाक्ब।

20 गे मरिम्शो पशा, तुप्चा पुंडसीनीनु, मेको फाल्शा बाक्तीनी हना, मार रिम्शो पनी डा? रिम्शो पशा यो, श्येत गेचा पुंडसीशा, फाल्शा बाक्तीनी हना, परमप्रभु यावे आ दाक्शो पाइनीनी। १पत्रुस ३:१४; मती ५:१०

21 मोदेंशो पचा, दे योत्रशो ननी। खीस्त यो इन परबम श्येत जशा, इन कली कोंडतीक दुम्त। मोपतीके गे आ खोदेंशो पचा माल्नीनी। १पत्रुस ३:१८; मती १६:२४

22 मेकोमी काइ पाप मपवो। जोल यो मपवो। यूहन्ना ८:४६; यसैया ५२:९

23 मुरपुकीमी मेको कली शुक्शी लोत्र पाम्तेक्म हना यो, मेको आन कली लोत्र मलेत्त। मिनु श्येत जशा यो, मुर आन कली हिंच मकोंइद। तन्न ठीक पा निसाफ पाइब कली जिम्मा गेंसाक्व।

24 मेको इं पाप क्याम्चा कली शीमी क्येप्शा कांटी थोकशा साइक्चा पुंडसाक्व। इं पाप पतीक थुं साइक्चा नु इं ठीक पतीक थुं प्रोंइचा, दे साइक्चा पुंडसाक्व। मोपा मेको आ कांटी थोकशो गारपुकीमी गे साशा ठीक दुम्तीनी। १यूहन्ना ३:५; गलाती ३:१३; रोमी ६:८,११

25 डोंइती गे हेंथे गाक्ब भेडा खोदेंशो बाक्तीनी। तन्न मुल इन गोठला नु इन थुं कोत्रब आ नेक्था लेशशा जाक्तीनी। यसैया ५३:६; यूहन्ना १०:१२

### 3

मीश वोंइश कली अरेतीक लोत्र

1 गे मीश मुरपुकी, आंम वोंइश आ देशो टिने। का निक्शी वोंइश मुरपुकी परमप्रभु यावे आ लोत्र मटीब बाक्तेक्म हना यो, आ मीश आ रिम्शो पशो तशा, लोत्र मपथु यो, थमा सुइक्ब दुम्नीम। एफिसी ५:२२; १कोरिन्थी ७:१६

2 इन मान पशो नु इन पाप रे डोन बाक्शो तशा, मोदेंशो पाइनीम।

3 रिम्शो पतीक मार बाक्ब देशा हना, जाम्शा लाइब नोस पचा, चांमी मार मार चुंडसीचा, सुन पांडेचा नु शुश क्येट लाइब वा फेक्चा ममाइ, यसैया ३:१८-२३; १तिमोथी २:९

4 मुर आन थुमी खुइशो जाम्शा मलाइब पांडेतीके बाक्ब। मेको मार बाक्ब देशा हना, ब्रेम्शो नु सिक्सी पा बाक्तीक थुं बाक्ब। मेको परमप्रभु यावे आ डोंइती शुश रिम्शो बाक्ब।

5 साइ डोंइती पाप रे डोन बाक्शो मीश मुरपुकीम परमप्रभु यावे कली आस पा आंम वोंइश कली टिशो बाक्तेक्म।

6 सारामी अब्राहाम कली मान पा टिशो बाक्त। मिनु मुल गे यो ठीक गेय पशा, श्येत जचा महिंथु, मेको आ तमी खोदेंशो दुम्तीनी। उत्पती १८:१२

7 गे वोंइश मुरपुकी, आंम मीश नु रिम्शो पा बाक्कीने। मीश मुरपुकी वोंइश मुर खोदेंशो पा बोल्यो मबाक्नीम, दे तुइक्नीनी। मेको मिम्शा, इन मीश कली मान पने। मारदे हना गे निम्फा परमप्रभु यावे आ शिशी ताइब बाक्नीसी। मो पाइतीनी हना, इन पुंडशो लोत्र परमप्रभु यावे आ डोंइती मतेक्सीब। १कोरिन्थी ७:५; एफिसी ५:२५

थमा सुइक्ब आन कली अरेशो

8 मिनु नोले गे नेल्ल थुं का डा दुम्शा, मुर आन कली दाक्शा, इन लोकब नु दाक्मुने। ब्रेम्शो थुं पाइशो मुर दुमीन।

9 इन कली मरिम्शो पाइब आन कली मरिम्शो मपने। इन कली शुक्शी लोत्र पाइब आन कली शुक्शी लोत्र मपने, आसीक गेने। मारदे हना गे आसीक ताइब दुम्चा कली योत्रशो बाक्नीनी। थिम्सलोनिकी ५:१५

10 मिनु परमप्रभु यावे आ लोत्रमी “सु सु ब्रोंइचा नु रिम्शो बाक्चा दाक्नीमी, मेकोमी शुक्शी लोत्र मपने। सुइ आन कली जोल मपने। मुर नु दुशा बाक्कीन। याक्ूब १:२६

11 मरिम्शो पचा प्रोंइशा, ठीक गेय ला पने।

12 मारदे हना परमप्रभु यावेमी ठीक पाइब आन कली कोत्रब। आन पुंडशो लोत्र नेंचा कली आ नोफा दाइक्ब। तन्न मरिम्शो पाइब आन कली मकोत्रब, आन पुंडशो लोत्र यो मनेंब” दे ब्रेक्शो बाक्ब। भजन संग्रह ३४:१३-१७

येसु खीस्त नेल्ल आन क्येडा ठेयब बाक्ब

13 गे ठीक गेय ला पाइतीनी हना, सुम इन कली श्येत गेबा डा?

14 ठीक पशा यो मोशा श्येत जाइतीनी हना, आसीक ताइब दुम्तीनी। इन कली श्येत गेब कली महिनीन। इन थुमी ग्येतथ लुक्च मदुमीन। १पत्रुस २:२०; मती ५:१०

15 तन्न इन थुमी “खीस्त ला प्रभु बाक्ब” दे मेको कली ठेयब सेलीन। गे गेना हना यो “इन थमा सुइक्तीके मार में” दे हिल्लो पाइब आन कली लोत्र लेत्चा ठीक दुम्शा बाक्कीन। ब्रेम्शो थुमी रिम्शो लोत्र पा लोत्र लेत्तीने। १पत्रुस २:२१-१४

16 इन थुं डा मिन्तीक कली पाप रे डोन वोतीन। इन कली शुक्शी पाइबपुकी खीस्त आ नेंमी रिम्शो पशो तशा, मुने दोक्मल। १पत्रुस ४:६

- 17 मरिम्शो पशा श्येत जचा क्येडा ठीक पशा, श्येत जचा परमप्रभु यावे आ दाकशो बाकव।  
 18 मारदे हना ख्रीस्त यो मुर नेल्ल आन पाप क्याम्चा कली साइक्या पुंडसाकव। ठीक पाइबमी ठीक मपाइब आन श्येत जापु। मो पशा इ कली परमप्रभु यावे आ बाक्तीक चाकदीपब। मोपतीके साइक्या पुंडसीशा यो, सेंचा पुंडसाकव।  
 19 नोले मेको आ सोक्त लशा, जेल्खानमी बाकशो सोक्त आन कली लोत्र पापु।  
 20 मेको सु बाक्तेकम देशा हना, साइ डोंइती नोआहमी ठेयब डोंगा सेलानु, परमप्रभु यावेमी रिम्ना रिम्न बाकशो बाक्त। तन्न परमप्रभु यावे कली काइ मटीब, नोआह आ पाला डा बेकशो मुर बाक्तेकम। ८ जना मुर चहिं नोआह आ सेल्शो डोंगामी बाकशा, ब्वाकुकु रे ब्रोंइचा ताम्तेकम। उत्पत्ती ७:७; २पत्रुस २:५  
 21 ब्वाकुकुमी खुम्शा गुंडतीके मेको नु गारचा डा बाकव। मेकोमी इन कली मुल प्रोंइब। इन रां चिक्या ममाइ, तन्न इन थुं डा मिम्तीके रिम्शो दुम्ल, दे परमप्रभु यावे कली पुंडतीके बाकव। मेको नेल्ल येसु ख्रीस्त आ सेंसीशो रे जाकव। एफिसी ५:२६; हिब्रू १०:२२  
 22 मेको स्वर्ग लशा, परमप्रभु यावे आ ग्युरा गे बाकव। परमप्रभु यावे आ स्वर्ग डा गेय पाइबपुकी, अधिकार तशोपुकी नु सक्ति पाइशो नेल्लेमी मेको आ देशो टीनीम। एफिसी १:२०-२१

## 4

थमा सुइकब श्येत जचा माल्नीम

- 1 दोपा ख्रीस्त रागीम बाकशा, श्येत जवा, मोपा गो नेल्ल श्येत जचा मालन्य, दे मिम्तीन। सु सु रागीमी श्येत जाइनीमी, मेको मरिम्शो पतीक कली प्रोंइने थुम्शो बाक्नीम।  
 2 मिनु गे रागीमी बाक्नी सम्म इन दला दाक्स मपथु, परमप्रभु यावे आ दाकशो पने।  
 3 डोंइती परमप्रभु यावे कली मतुइकथु मारेइ मारेइ पाइतीनी, मुल मेको गापु। थमा मसुइकबपुकीमी मार पाइनीम देशा हना, महिब दुम्शा आन दला दाक्स पाइनीम। दुक्शा बाक्नीम, शुश जशा तूशा बाक्नीम नु ग्रांरा दिचा डा मूर्ति पूजा पाइनीम। एफिसी २:२-३; तीतस ३:३  
 4 गे चहिं मुल मेको आन पशो खोदेशो मपाइनीनी। मोपतीके मेकोपुकी छक लाक्नीम। मिनु इन परबम शुक्शी पाइनीम।  
 5 तन्न मेकोपुकीमी बेकशो नु ब्रोंइशो मुर आन कली निसाफ पाइब आ डोंइती मेको आ परबम लोत्र पचा माल्नीम। रतिमोथी ४:१  
 6 मोपतीके बेकशो मुर आन कली यो परमप्रभु यावे आ ग्येरपाइकब लोत्र शेंशो बाक्त। परमप्रभु यावे खोदेशो पा सोक्तीम ब्रोंइचा तामेक्ल, दे रागीमी बाक्मानु, निसाफ पचा पुंडसाकम। १पत्रुस ३:१९

परमप्रभु आ पपाइशो गेय

- 7 रागी नु रागीमी बाकशो मारेइ मारेइ नुच्चा चिकशो बाक्तेकम। मोपतीके इन गेय पचा डोंइती मिम्शा नु आंम रां कली अरेशा प्रार्थना पने। १कोरिन्थी १०:११; १यूहन्ना २:१८  
 8 नेल्ल क्येडा ठेयब मार बाकब देशा हना, शुश दाकमुचा बाकब। मारदे हना दाकमुतीकेमी शुश पाप यो ग्याम्ब। हितोपदेस १०:१२; याकूब ५:२०  
 9 मगाइकथु बास गेमुने।  
 10 परमप्रभु यावेमी इन कली गेय का का पपाइशो बाक्त। मोदेशो पा वारच पमुने। परमप्रभु यावेमी गेशो गेय रिम्शो पने।  
 11 सुमी लोत्र पाइबा, मेकोमी परमप्रभु यावे आ खुइशो लोत्र पवल। सुमी गेय पाइबा, मेकोमी परमप्रभु यावे आ गेशो सक्तिमी पवल। मोपा नेल्लेमी येसु ख्रीस्त आ नेमी परमप्रभु यावे कली ठेयब सेल्मेक्ल। मेको छेडछेडमी बाकशा, गेना हना यो सक्ति पाइशो बाकव। आमेन। रोमी १२:७

थमा सुइकब आन श्येत

- 12 मिनु आं दाकशो लोकबपुकी, इन कली थुं थाम्चा डा श्येत शुश दुम्त हना, महिनीन। मेको मारेइ ममाइ। इन थमा सुइकतीके नाक्या कली बाकव। १पत्रुस १:६-७  
 13 गे ख्रीस्त आ श्येत जशो खोदेशो पा श्येत जाइतीनी हना, ग्येरसीने। मारदे हना आ छेडछेड पा जाक्ची ना शुश ग्येरनीनी। प्रेरित ५:४१; याकूब १:२; रोमी ८:१७  
 14 ख्रीस्त आ नेमी श्येत जाइतीनी हना, आसीक ताइब दुम्नीनी। मारदे हना छेडछेड डा परमप्रभु यावे आ सोक्त गे नु बाकव। मती ५:११; एफिसी १:१३  
 15 गेपुकी मुर कली साइकब, खुइ पाइब, ग्रांरा दिचा डा गेय पाइब नु अरु आन कली ग्येत्य लुकच सेल्शा, सजाड तपाइकब खोदेशो मदुमीन।  
 16 तन्न गे थमा सुइकब दुम्शा, श्येत जाइतीनी हना, मुने मपने। येसु ख्रीस्त आ नेमी परमप्रभु यावे कली ठेयब सेलीन। फिलिप्पी १:२०  
 17 निसाफ पची ना दुम्चशो बाक्त। परमप्रभु यावे आ खिं डा मुर डोंइती निसाफ पचा पुंडसीनीम। मिनु गो डोंइती डा बाक्तय हना, ग्येरपाइकब लोत्र थमा मसुइकब आन कली दोदेंब दुम्बा? येरमीया २५:२९; इजीकीएल ९:६  
 18 मिनु ठीक पाइब मुरपुकी हेरा ब्रोंइचा मताइब दुम्तेकम हना, थमा मसुइकब नु मरिम्शो पाइबपुकी दोदेशो दुम्नीमी? हितोपदेस ११:३१



19 मोपतीके परमप्रभु यावेमी सु कली श्येत जचा गेबा, मेकोपुकीमी ठीक गेय पशा, आमं थुं परमप्रभु यावे कली जिम्मा गेमेक्ल। परमप्रभु यावेमी आ मुर आन कली गेनायो मप्रॉइब। भजन संग्रह ३१:६

## 5

खाल्पा नु ठिटा आन कली अरेशो

1 गो इन खोदेंशो खाल्पा नड। गो थमा सुइक्ब आन दातेमी बाक्शो शेंब खाल्पा इन कली अर्ती गेनुड। गो ख्रीस्त आ श्येत जशो तशो नड। मुल गो जाक्चशो छेडछेड डा मुर यो दुम्ती। २यूहन्ना :१; मती २६:३७,६९; रोमी ८:१७

2 इन कली मार अर्ती गेनुड देंशा हना, गे परमप्रभु यावे आ योत्रशो मुर आन गोठला खोदेंशो दुम्शा, मेको आन कली रिम्शो पा कोवडीन। इन थुंमी “आं मदाक्शो गेय बाक्ब” दे मिम्शा ममाड, तन्न “गो मेको गेय दाक्नुड” दे ग्येरशा पने। “क्येट चेम्नुड” दे मिम्शा ममाड, तन्न रिम्शो शेंतीके गेय शुश पने। यूहन्ना २१:१६; प्रेरित २०:२८; १तिमोथी ३:२-७

3 “गो परमप्रभु यावे आ योत्रशो मुर आन कली हुकुम पाइब दुम्ती” दे ममाड, तन्न मेको दोदेंब दुम्चा माल्नीमी, इन पशो गेयमी कोइदीन। इजीकीएल ३४:२-४; २कोरिन्थी १:२४; तीतस २:७

4 नेल्ल क्येडा टेयब गोठला जाक्मेनु, गे गेना हना यो लीब परमप्रभु यावे आ छेडछेड डा सिरपेच ताइनीनी। हिबू १३:२०; १कोरिन्थी ९:२५; २तिमोथी ४:८

5 मिनु गे ठिटापुकी, शेंब खाल्पा आन देंशो लोत्र टिने। गे नेल्ल ब्रेम्शो थुं पाइशो दुम्शा, गेय पमुने। मारदे हना परमप्रभु यावेमी टेयब लेशो मुर आन कली मकोवब, ब्रेम्शो थुं पाइशो मुर आन कली ला शिशी पाइब। एफिसी ५:२१; अय्युब २२:२९; हितोपदेस ३:३४; मती २३:१२; याकूब ४:६

6 मोपतीके गेपुकीमी “नेल्ल सक्ति परमप्रभु यावे केन बाक्ब” दे आ देंशो लोत्र ब्रेम्शो थुंमी ठीक पा टिने। मो पाइतीनी हना, परमप्रभु यावेमी आ मिम्ची ना इन कली टेयब सेलब। याकूब ४:६

7 गेपुकीमी “मार जाइनीकी? मार तूनीकी? मार फेक्नीकी? मार दुम्नीकी?” दे हिंशा, सुर्ता पचा ममाल्नीनी। मारदे हना परमप्रभु यावेमी इन कली कोवब। भजन संग्रह ५५:२१; मती ६:२५; फिलिप्पी ४:६

8 गेय पचा डोंइती मिम्तीन। होस पा बाक्कीन। मारदे हना इन कली मदाक्ब सैतानमी शोत्रलु बेक्शो गुप्स खोदेंशो पा “सु कली ब्वाइनुडा” दे माल्ना माल्न गाक्ब। १थिस्सलोनिकी ५:६; लूका २२:३१; २कोरिन्थी २:११

9 गेपुकीमी थमा सुइशशा “गो सैतान कली तुडक्नुड” दे मेको कली काइ मटिने। रागी नेल्ल डा थमा सुइक्ब लोकबपुकीम मोदेंशो श्येत जाइनीम दे तुडक्नीनी।

पत्रुस आ गेशो आसीक

10 मिनु का निक्शी नाक्त श्येत जनी नोले नेल्ल शिशी पाइब परमप्रभु यावेमी “गेना हना यो छेडछेडमी बाक्चा गेनुडमी” दे ख्रीस्त आ नेंमी इन कली ब्रेशो बाक्त। मेकोमी इन कली आ राज्यम गारचा डा सक्ति पाइशो नु ठीक सेलब। १पत्रुस १:६

11 मेको गेना हना यो नेल्ल क्येडा टेयब बाक्ब। आमन।

नोले डा लोत्र

12 गो सिल्वानस थमा सुइक्ब लोकब बाक्ब, दे मिम्शा, आं ब्रेक्शो आइक्ब चिठी मेको नु सोइक्ताकड। गो इन कली परमप्रभु यावे आ थमा शिशी मार बाक्मे, मेको शेंताक्नी। मिनु गे मेको तुइशशा, थमा सुइक्चा मप्रॉइथु बाक्कीन। प्रेरित १५:२२

13 इन खोदेंशो बेबीलोनम बाक्शो योत्रशोपुकीमी यो इन कली “रिम्शो बाक्कीन” दे आं कली ब्रेक्पाइक्तीमी। मिनु आं तौ मर्कुसमी यो मो देंत। २तिमोथी ४:११

14 गे दाक्मुशा, प्रभु आ नेंमी मुम्मुने। परमप्रभु यावेमी ख्रीस्तम बाक्शो नेल्ल इन कली थुं नाइक्चा गेवल।

## २ पत्रुस

**ब्रेकब मुर:** पत्रुसमी एको चिठी थमा सुइकब आन कली नोले ब्रेकशो बाक्त।

**गेना ब्रेकशो:** एको चिठी डोंइती डा क्येडा इच्छा नोले ६४-६५ ए. डी.मी मेर ब्रेकशो बाक्त।

**मार ब्रेकशो:** पत्रुसमी थमा सुइकब आन कली परमप्रभु यावे आ लोव पाइब आन ब्रेकशो लोव तुइश्शा नु होस पा बाक्कीन, दे अरेशो बाक्त। मारदे हना मेको आन दाते रे दूली शेंब बोक्तेकम। मेको दूली शेंबपुकी दोदेशो बाक्नीमदेशा हना,

१. प्रभु येसु खीस्त परमप्रभु यावे आ तौ मबाकब।
२. क्येट शुश दाकब बाक्नीम।
३. मरिम्शो पचा मुने मपाइनीम।
४. नक नु बोल्यो मदुम्शो थमा सुइकब आन कली हेंथे लां कोइनीम।

डोंइती डा लोव

1 गो येसु खीस्त आ वाइल नु आ सोइश्शो, सिमोन पत्रुस नड। इं परमप्रभु यावे नु पाप रे प्रॉइब येसु खीस्त रे पा ठीक दुम्तय, दे थमा सुइश्शा, थुं का दुम्तय। मोपतीके इन कली एको चिठी ब्रेक्ताकड।

2 परमप्रभु यावे नु प्रभु येसु कली तुइक्तीकेमी शिशी नु इन थुं नाइक्तीके बारना बारन लल।

थमा सुइक्चा नु गेय गारचा माल्ब

3 परमप्रभु यावे आ सक्तिमी ब्रोंइचा नु परमप्रभु यावे आ डोंइती बाक्चा कली मार मार माल्या, मेको नेल्ल इं कली मो गेप्टु। दोपा गोप्टु देंशा हना, मेको कली तुइक्तीके गेप्टु। आ छेडछेडमी बाक्चा नु आ पतीके नेल्ल पचा कली योव्रतु। १पत्रुस २:४

4 मोपा आ नेल्ल क्येडा टेयब थोकशा पशो लोव्र गेप्टु। मेको तुइश्शा, गेपुकी रागी डा मुर आन दला दाक्स पतीके रे ब्रोंइशा, प्रोक्ने चाप्नीनी। मोपा गेपुकी परमप्रभु यावे आ पशो खोदेशो पाइब दुम्नीनी।

5 मोपतीके गे इन थमा सुइक्तीके नु इन पशो गेय गारचा माल्ब। इन पशो गेय नु “परमप्रभु यावे आ दाक्शो मार बाक्मे?” दे तुइक्चा माल्नीनी। गलाती ५:६, २२

6 इन तुइक्तीकेमी आंमा अरेशीचा माल्नीनी। आंमा कली अरेशीतीके, पपाइक्तीके नु थमा सुइक्तीके मप्रोंइनुड, दे खोइली थेक्शा बाक्चा माल्नीनी। इन खोइली थेक्शा बाक्तीकेमी परमप्रभु यावे खोदेशो पा गेय पने।

7 परमप्रभु यावे खोदेशो पा गेय पशा, थमा सुइकब आन कली आंम इन लोकब खोदेशो पचा माल्नीनी। लोकब खोदेशो पा दाक्चा माल्नीनी। गलाती ६:१०

8 गेपुकी मोदेशो शुश पाइतीनी हना, इं प्रभु येसु खीस्त कली तुइक्तीकेमी रिम्शो पा शुश फल सिश्शो खोदेशो दुम्ब।

9 सुम मोदेशो मपाइबा, मेको ब्रा ब्रा पा ताइब बाक्ब। मेको मुर आ डोंइती पशो पाप क्याम्शो बाक्ब, दे प्रेशो बाक्ब। १यूहन्ना २:९, ११

10 मोपतीके आं लोकबपुकी, गेपुकीमी “गो ब्रेश्शो नु योव्रशो मुर बाक्नीकी” दे गेना हना यो मिम्चा माल्नीनी। मो पाइतीनी हना, गे गेनायो नोले मशोंइसीनीनी।

11 मिनु नोले पाप रे प्रॉइब इं प्रभु येसु खीस्तमी इन कली आ गेना हना यो लीब राज्यमी रिम्शो पा ओव्रचा गेब।

12 मोपतीके गो इन कली नेल्ल नाक्ती मोदेशो मिम्पाइक्नुड। गेपुकी मेको तुइश्शा नु थमा शेंतीके पाइब दुम्तीनी हना यो, गो इन कली मिम्पाइक्नुड।

13 गो ब्रोंइडा सम्म इन कली मिम्पाइक्चा रिम्शो बाक्ब, दे मिम्नुड। २कोरिन्थी ५:१

14 इं प्रभु येसु खीस्तमी “गे शुश नाक्त मलीनेवे” दे कोंइताकयी। यूहन्ना २१:१८-१९

15 मिनु आं लचा नोले गे नेल्ल नाक्ती आं शेशो मिम्ने चाप्नीनी, दे शुश गेय पना पन बाक्नुड।

छिडछिडम ब्रशो बत्ती

16 गोपुकीमी इन कली इं प्रभु येसु खीस्त आ सक्ति नु आ रागीम जाक्शो आ पर्वम मुर आन सेल्शो कथा मशेंदक। तन्न गोपुकीमी “येसु खीस्त नेल्ल क्येडा टेयब बाक्ब” दे आंम आंइ मिक्चीम ताइतक।

17 इं आफ परमप्रभु यावेमी मेको कली मान पशा, आ छेडछेड तपाइश्शा “मेको आं दाक्शो तौ बाक्ब। मेको कली तशा, गो ग्येरसाकयी” देशो सेंदा छेडछेड रे गूत। मती १७:५

18 गोपुकीमी मेको सेंदा सरीड रे नेंतक। मारदे हना गोपुकी मेको नु परमप्रभु यावे आ डांडाम बाक्शो नकी।

19 मिनु गोपुकीमी साइ डा परमप्रभु यावे आ लोव्र पाइब आन पशो लोव्र मुल रिम्शो पा रूप्तक। गे यो परमप्रभु यावे आ साइ डा लोव्र पाइब आन ब्रेकशो लोव्र रुप्चा नु तुइक्चा कली छिडछिडमी ब्रशो बत्ती खोदेशो पा होस पा बाक्कीन। मिनु नोले इन थुमी सुक्कुर सोरुल खोदेशो पा छेडछेड दुम्नीनु, आन ब्रेकशो नेल्ल रुप्चीनी। भजन संग्रह ११९:१०५

20 गेपुकी डोंइती मार रुप्चा माल्नीनी देशा हना, परमप्रभु यावे आ साइ डा लोव्र पाइब आन ब्रेकशो लोव्र मुर आन मिम्शो लोव्र ममाइ,

21 मुर आन थुं रे मपीब। तन्न परमप्रभु यावे आ सोक्तीम आ मुर आन कली सुम्शा, परमप्रभु यावे आ लोव्र ब्रेक्पाइश्शो बाक्ब, दे रुप्चा माल्नीनी। १तिमोथी ३:१६-१७

## 2

दूली शेंबपुकी  
यहूदा ३-१९

1 साइ डोंडती परमप्रभु यावे आ लोत्र जोल पा दूली शेंबपुकी बाक्मा बाक्त। मुल मोदेशो जोल पा शेंबपुकी इन गुम्तीक खिंमी यो जाक्नीमी। मेकोपुकीमी खुइश्शोमी खतम सेल्ब शेंतीके शेंनीमी। प्रभुमी मेको आन कली ग्याप्शा यो, मेकोपुकी “गो मेको कली मतुइक्नुड” दे जाप्शा लाइब बाक्नीम। मती २४:११; १तिमोथी ४:१

2 शुशेमी आन शेशो नेशा, हेंथे पा दला दाक्स यो पाइनीम। मुरपुकीमी मेको आन कली तथा थमा लां कली शुक्शी लोत्र पाइनीम।

3 मेको आन शीम पतीकेमी इन कली दूली लोत्र पा, इन क्येट योल्नीम। मेकोपुकी डोंडती रे नरक लचा चिक्शो बाक्नीम।

4 का निक्शी परमप्रभु यावे आ स्वर्ग डा गेय पाइबपुकी यो पाप पतीके शिशी मतामे। परमप्रभु यावेमी मेको आन कली नरकमी ताइश्शा, नेल्ल क्येडा मरिम्शो बाक्तीकेमी सोइक्ताक्मी। मिनु निसाफ पची नाक्त सम्म छिडछिडमी चोक्शा वोइक्तीमी।

5 मिनु परमप्रभु यावेमी साइ डा मुर आन कली शिशी मपशु, नोआह ला ठीक पाइब बाक्तीके मेको नु अरु ७ जना आन कली ला श्येत रे प्रोंडतीमी। मेना परमप्रभु यावेमी रागी नेल्ल ब्वाक्कुमी ब्रीपाइश्शा, आ कली मटीब आन कली साइश्शो बाक्त। उत्पत्ती ८:१८; १पत्रुस ३:२०; २पत्रुस ३:६

6 परमप्रभु यावेमी सोदोम नु गोमोररा माइश्शो सहर निक्शी कली मीम क्रोइश्शा, पुलु सेल्शो बाक्त। मेको मटीब आन कली कोंडतीक चिनु बाक्त। उत्पत्ती १९:२४-२५

7 परमप्रभु यावेमी ठीक पाइब लोत माइश्शो मुर कली श्येत रे प्रोंडशो बाक्त। लोतमी पाप पाइब आन कली तथा, आ थुं शुश मनुशो बाक्त।

8 मारदे हना मेको ठीक पाइबमी नाक्त कित कित आन ग्रॉग्रा दिचा डा गेय तथा नु नेशा, आ ठीक मिम्तीक थुं शुश खाइश्शो बाक्त।

9 परमप्रभु यावेमी चहिं आंम कली टीब मुर आन कली “दोपा थुं थाम्चा डा श्येत रे गुंनुडा” दे तुइक्ब। मिनु ठीक मपाइब आन कली सजाइ गेचा कली निसाफ पची नाक्त सम्म वोइक्ब। १कोरिन्थी १०:१३

10 मिनु सु सु आन दला दाक्स नु ग्रॉग्रा दिचा डा गेय पाइनीमी नु अधिकार गेशो आन कली मटीनीमी, मेकोपुकीमी नेल्ल क्येडा शुश सजाइ ताइनीम। मोदेशो जोल पा शेंब काइ महिंब दुम्शा, ठेयब लेश्शा, थमा सुइक्ब आन कली शुक्शी पचा महिनीम।

11 तन्न परमप्रभु यावे आ स्वर्ग डा गेय पाइबपुकी मेको आन क्येडा ठेयब नु सक्ति पाइश्शो बाक्तेकम हना यो, मेको जोल पा शेंब आन कली प्रभु आ डोंडती दोस मगेनीम।

12 मेको दूली शेंब ममिम्ब ग्याइक्चा नु साइक्चा पुंइसीचा कली जरमेशो बस्तु भाव खोदेशो पा, आन तुइश्शो ला पाइनीम। मेकोपुकीम काइ मरुप्नीम। तन्न शुक्शी पाइनीम। मिनु बस्तु भाव खोदेशो पा खतम दुम्नीम।

13 आन मरिम्शो पशो आ परबंम मरिम्शो पाइक्चा पुंइसीनीम। नाक्तीम आन दला दाक्स पशा ग्येरशा बाक्नीमी। गेपुकी नु भोज जशा, मुने दोक्चा डा पा इन गुम्तीक खिं मरिम्शो लुम्सीशो सेल्ब बाक्नीम।

14 मेकोपुकीमी मुर आन मीश तथा वाल्नीम। पाप पचा गेनायो “मोक्ल” मदेंनीम। सक्ति मपाइश्शो थमा सुइक्ब आन कली लेम्शा, आंम दूली लां खोइक्पाइक्नीमी। मेकोपुकी शीम बाक्नीम। मिनु सराप रशो मुर बाक्नीम।

15 ठीक लां प्रोंडशा, हेंथे गाक्शा, बेओर आ तौ बालाम माइश्शो मुर खोदेशो दुम्तेकम। बालाममी मार पशो बाक्त देंशा हना, मरिम्शो गेय पतीके रे ताक्शो क्येट शुश दाक्शो बाक्त। गन्ती २२:७-३५

16 मेकोमी मरिम्शो मिम्शा पचा चिक्तानु, हुइक्चा पुंइसे बाक्त। दोपा हुइक्चा पुंइसे बाक्त देशा हना, मब्वाक्ब गधामी मुर आ सेंदामी लोत्र पवा बाक्त। मिनु परमप्रभु यावे आ लोत्र पाइब कली मेको आ मरिम्शो गेय रे तेक्गा बाक्त।

17 मेको दूली शेंबपुकी ब्वाक्कु मयीब धारा नु फशेम बेरपाइश्शो गोस्स खोदेशो बाक्नीम। मेको नेल्ल क्येडा छिडछिड डा बाक्तीकेमी वोइक्चा पुंइसीनीम।

18 मेकोपुकीमी हेंथे लोत्र पा पाप रे प्रोंडचा पुंइसीशो नक थमा सुइक्ब दुम्शो मुर आन कली आन हेंथे पतीके ग्रॉग्रा दिचा डा गेय पपाइक्नीम।

19 मेकोपुकीमी “गे पाप रे प्रोंडशो मुर बाक्नीनी” दे लोत्र पाइनीम। तन्न ग्रॉग्रा दिचा डा गेय आन वाइल बाक्नीम। मार मारमी मुर आन कली ग्राबा, मेको आन वाइल दुम्नीम। गलाती ५:१३; १पत्रुस २:१६

20 मुरपुकी ई प्रभु येसु ख्रीस्त कली तुइक्तीकेमी रागी रागी डा मुर आन पाप रे ब्रोंडशो बाक्तेकम हना, मेको लेंशा पापमी मुर कली ग्रात हना, मेको पाप आ वाइल दुम्नीम। मेको आन कली डोंडती डा दुम्तीके क्येडा नोले शुश मरिम्शो दुम वा। मती १२:४५

21 मुरपुकीमी ठीक लां गाक्चा तुइश्शा यो, मेको डोंडती रे पाप रे डोन बाक्चा, दे परमप्रभु यावे आ अरेशो लोत्र प्रोंडशा, पापम लेत्तेकम हना, मेको तुइक्चा क्येडा गेनायो मतुइश्शो हना रिम्शो दुम वा। लूका १२:४७-४८

22 मिनु मुर आन देंतीक लोत्र “कुचुममी आ मेशो लेंशा जाइब।” मिनु “पोत्र कली गिश चिक्शा हना यो, लेंशा ग्रॉग्रामी गुम्दीब” देशो लोत्र थमा बाक्ब। हितोपदेस २६:११

## 3

येसु आ जाक्ची नाक्त

1 आं दाक्शो लोकबपुकी, गो इन कली चिठी निक्शी ब्रेक्ताक्ड। गो एको चिठी निक्शीमी इन थुंमी मिम्पाइश्शा फुकपाइक्ता। २पत्रुस १:१३

2 इन कली मार फुकपाइक्चा दाक्ताक्ड देशा हना, परमप्रभु यावे आ साइ डा लोत्र पाइब आन ब्रेक्शो लोत्र फुकपाइक्चा दाक्ताक्ड। पाप रे प्रोइब प्रभु आ अरेशो लोत्र इन कली मिम्पाइक्चा दाक्ताक्ड। इन शेंबपुकीमी इन कली शेंताक्मे।

3 नोले डा नाक्त शुक्शी पाइबपुकी जाक्नीमी, दे तुइक्चा माल्नीनी। मेकोपुकीमी शुक्शी पा, आंम दला दाक्स पाइनीम। १तिमोथी ४:१; यहूदा:१८

4 मेकोपुकीमी “लेंशा जाक्नुड देंब, ते जाक्मे? इं किकी पिपी बेक्शो बाक्तेक्म। रागी सेल्चा रे ओदेंशो बाक्त” देंनीमी। यसैया ५:१९; इजीकीएल १२:२२; मती २४:२८

5 मेको शुक्शी पाइबपुकीमी “डोंइती परमप्रभु यावेमी लोत्र पशा, सरीड कली मसेल। रागी नु ब्वाक्कु यो मफ्रादीम्सी” दे शेंनीम। मती २४:३८; उत्पती १:२,६,९; भजन संग्रह २४:२

6 मेना रागी नु मुर नेल्ल आन कली ब्वाक्कुमी खुम्शा सदा बाक्त। २पत्रुस २:५; उत्पती ७:२१

7 मुल सम्म बाक्ब सरीड नु रागी कली “बाक्ल” दे परमप्रभु यावेमी खाल का डा लोत्र पशा, वोदा बाक्त। परमप्रभु यावेमी रागी नु मटीब मुर नेल्ल आन कली मीम क्रोइक्चा, दे निसाफ पची नाक्त सम्म कली वोइश्शो बाक्त।

8 मिनु आं दाक्शो लोकबपुकी, प्रभु कली नाक्त का हजार का बर्स खोदेंशो बाक्ब। मिनु हजार का बर्स नाक्त का खोदेंशो बाक्ब। भजन संग्रह ९०:४

9 प्रभुम आ देशो लोत्र ठीक पा पाइब। तन्न का निक्शी मुरपुकीमी “प्रभुम आ देशो मपाइब। नोले ला जाक्ब” देंनीम। तन्न प्रभुमी “सुइ जाम्शा मलमल। आं गे लेम्मल” दे रिम्ब। हबक्कु २:३; १तिमोथी २:४

10 प्रभु जाक्मेनु, खुइ जाक्शो खोदेंशो पा जाक्ब। मेना सरीड ठेयब रेयके पा जाम्ब। मारेइ मारेइ ग्रोइश्शा नुप्नीम। रागी नु रागीम बाक्शो मारेइ मारेइ मीम खतम दुम्नीम। १थिस्सलोनिकी ५:२-३; मती २४:२९; प्रकाश २०:११; यसैया २४:१९

11 मोदेंशो दुम्मेनु, नेल्ल मीम ग्रोइश्शा, मारेइ मलीब। मोपतीके गेपुकी परमप्रभु यावे कली थमा सुइश्शा, आ देशो लोत्र टिशा, पाप रे डोन बाक्शा, परमप्रभु आ नेक्था बाक्चा माल्नीनी।

12 गेपुकी परमप्रभु यावे आ नाक्त जाक्ब, दे रिम्शा नु गेना दुम्बा, दे मिम्स डा मिम्स बाक्चा माल्नीनी। मारेदे हना मेना सरीड नेल्ल मीम ग्रोइश्शा नुप्ब। मार मार बाक्मे, मेको नेल्ल मीम ग्रोइश्शा नुप्नीम।

13 तन्न आ डोंइती देंशो “नक सरीड नु नक रागी सेल्नुड। मेकेर नेल्ल रिम्शो नु ठीक ला पाइनीम” देंशो लोत्र रिम्नय। यसैया ६५:१७; प्रकाश २१:१; प्रकाश २१:२७

14 आं दाक्शो लोकबपुकी, मोदेंशो रिम्शा, गलती मपाइब नु दोस मताइब दुम्चा कली शुश गेय पने। परमप्रभु यावेमी इन कली मोदेंशो पशो नु थुं नाइश्शा बाक्शो ग्रुम्चा दाक्ब। १कोरिन्थी १:७-८

15 प्रभु आ रिम्ना रिम्न बाक्तीके मुर आन कली पाप रे प्रोइचा बाक्ब, दे मिम्तीन। इं दाक्शो लोकब पावलमी आं खोदेंशो पा, इन कली आ तशो तुइक्तीकेमी चिठी ब्रेक्ताक्व। रोमी २:४

16 मेको आ पर्वम आ चिठी नेल्लेमी लोत्र पाइब। पावल आ ब्रेक्शो लोत्र का निक्शी रुप्चा कली श्येत बाक्ब। मजोक्ब नु थमा मसुइक्ब मुरपुकीमी मेको दूली शेंनीम। परमप्रभु यावे आ ब्रेक्पाइश्शो अरु लोत्र यो दूली शेंनीम। मोपा आमा जाम्शा लाइब दुम्नीम।

नोले डा लोत्र

17 मोपतीके आं दाक्शो लोकबपुकी, गे मेको डोंइती रे तुइश्शा, होस पा बाक्कीन। मोपा मबाक्तीनी हना, गेपुकी दूली शेंब आन दूली शेंतीके खोइश्शा, इन थमा सुइक्तीके साम्नीनी।

18 तन्न इं प्रभु, इं कली पाप रे प्रोइब येसु ख्रीस्त आ शिशी नु मेको कली तुइक्तीकेम बारना बारन लल। मेको कली मुल नु गेना हना यो ठेयब सेल्य। आमेन।

## १ यूहन्ना

**ब्रेक्ब मुर:** एको चिठी येसु आ शेंसीब, यूहन्नाम डोंइती ब्रेक्शो बाक्ब। चिठी ब्रेक्ची ना मेको खाल्पा दुम्शो बाक्त।  
**गेना ब्रेक्शो:** एको चिठी गेना ब्रेक्शो बाक्मे, ठीक पा मतुइक्नीम। दूली शेंबपुकी १०० ए. डी. क्येडा डोंइती जाक्शो बाक्तेकम। मेको आन पर्वम लोत्र ब्रेक्शो बाक्ब। मोपतीके मेना ब्रेक्शो बाक्ब, दे मिम्सीब।

**मार ब्रेक्शो:**

१. ठीक पा थमा सुइश्शो कोंइतीके यूहन्ना १:५-२:२७
२. परमप्रभु यावे आ मुर दुम्शो दोपा तुइसीबा यूहन्ना २:२८-४:२१

थमा सुइक्ब आन कली ठेयब शेंतीके

- 1 नेल्ल क्येडा डोंइती रे बाक्शो, सु बाक्त देशा हना, ब्रोंइचा गेब लोत्र माइश्शो बाक्त। गोपुकीमी मेको आ लोत्र नेतक। आंइ मिक्चीमी ताइतक। आंइ मिक्चीमी कोत्रतक। आंइ गुडमी थीतक। यूहन्ना १:१; यूहन्ना १:१४; यूहन्ना १:४
- 2 मेको ब्रोंइचा गेब लोत्र माइश्शो रागीमी तपांइसीचा पुंइसाक्ब। मिनु गो मेको कली ताइतक। मोपतीके गोपुकीमी मेको आ लोत्र शेंनीकी। मिनु इन कली यो गेना हना यो, इं आफ नु बाक्चा आ पर्वम शेंनीकी। मेको गेना हना यो ब्रोंइशा बाक्तीक माइश्शो डोंइती आ आफ परमप्रभु यावे नु बाक्त। मिनु परमप्रभुमी मेको आंइ कली कोंइताक्ब।
- 3 मिनु आंइ तशो नु नेशो इन कली शेंनीकी। मारदे हना गो नेल्ल थुं का डा दुम्बल। मिनु गो नेल्ल इं आफ परमप्रभु यावे नु आ तो येसु ख्रीस्त नु थुं का डा बाक्नय।
- 4 गो नेल्ल इं थुं ग्येरसीशा बाक्च, दे एको चिठी ब्रेक्शा, इन कली सोइक्ताक्ब। १यूहन्ना ५:१३; यूहन्ना १५:११; यूहन्ना १६:२४

परमप्रभु छेडछेड बाक्ब

- 5 मेकोमी आंइ कली नेपाइश्शो लोत्र इन कली शेंनीकी। मार लोत्र शेंनीकी देशा हना, परमप्रभु यावे छेडछेड बाक्ब। मिनु मेको नु छिडछिड काइ मबाक्ब। याकूब १:१७
- 6 गोपुकीमी छिडछिडम गाक्शा यो “परमप्रभु यावे नु थुं का डा बाक्नय” देंतय हना, जोल्फे दुम्नय। थमा गेय मपाइनय। १यूहन्ना २:४
- 7 मेको छेडछेडमी बाक्शो खोदेशो पा, गो छेडछेडमी गाक्तय हना, अर्को थमा सुइक्बपुकी नु थुं का डा दुम्नय। मिनु आ तो येसु आ हुशेमी इं मरिम्शो पशो नेल्ल क्याम्ब। हिब्रू ९:१४; प्रकाश १:५
- 8 गोपुकीमी “मरिम्शो काइ मपक” देंतय हना, इं आंमा मिक्च सिल्लो बाक्नय। इं थुं आगामी थमा मबाक्ब।
- 9 गोपुकीमी “मरिम्शो पाइतक” देंतय हना, इं मरिम्शो पतीके क्याम्शा, इं कली शेक्ब। मारदे हना मेको आ देशो पाइब नु ठीक पाइब बाक्ब। भजन संग्रह ३२:३-५; हितोपदेस २८:१३
- 10 गोपुकीमी “मरिम्शो काइ मपक” देंतय हना, मेको कली जोल्फे सेल्लनय। मिनु आ देशो लोत्र इं थुंमी मलीब। रोमी ३:१०-१८

## 2

पाप रे प्रोंइब येसु ख्रीस्त बाक्ब

- 1 मिनु आं आलपुकी, इन कली मारदे ब्रेक्ताक्ड देशा हना, गो इन कली “मरिम्शो मपने” देंचा कली ब्रेक्ताक्ड। मिनु थमा सुइक्ब कामी पाप पाप्तु हना, मेको आ पर्वम आ आफ कली पुंइब का बाक्ब। मेको पुंइब सु बाक्ब देशा हना, मेको नेल्ल ठीक पाइब येसु ख्रीस्त बाक्ब।
- 2 दोपा नेल्ल ठीक पाप्तु देशा हना, मरिम्शो पाइब आन बेक्तीकेमी साइक्चा पुंइसाक्ब। इं पाप कली ला ममाड, तन्न रागी नेल्ल डा मुर आन पाप क्याम्चा कली यो साइक्चा पुंइसाक्ब। १यूहन्ना ४:१०; कलस्सी १:२०; यूहन्ना ११:५१-५२
- 3 मिनु गोपुकी येसु ख्रीस्त आ मुर दुम्शो, दोपा तुइक्नय देशा हना, परमप्रभु यावे आ अरेशो लोत्र पना पन बाक्तीके येसु ख्रीस्त कली थमा पा तुइक्नय।
- 4 मिनु सुमी “गो येसु ख्रीस्त आ मुर दुम्शा, मेको तुइक्नुड” देंबा, तन्न आ अरेशो लोत्र मटीबा, मेको जोल्फे बाक्ब। मोदेशो मुर आगामी परमप्रभु आ थमा पतीके मबाक्ब।
- 5 सु चिंही आ देशो लोत्र पना पन बाक्बा, मेको मुरुमी परमप्रभु यावे कली थमा पा दाक्ब। मोदेशो दुम्शो मुरुमी “गो येसु ख्रीस्त आ मुर दुम्ती” दे तुइक्ब। यूहन्ना १४:२१-२३
- 6 मिनु सुमी “गो येसु ख्रीस्त नु बाक्नुड” देंबा, मेको येसु ख्रीस्त खोदेशो दुम्चा माल्ब। यूहन्ना १३:१५; १पत्रुस २:२१-२३

थमा सुइक्ब आन दाक्मुशो

- 7 आं दाक्शो थमा सुइक्ब लोक्बपुकी, गो इन कली नक अरेशो लोत्र मब्रेक्तु। एको अरेशो लोत्र माइत बाक्ब। गोपुकी मेको डोंइती रे पाइनीनी। मिनु गो मेको माइत अरेशो लोत्र नेशो बाक्तीनी। यूहन्ना ११:३४; २यूहन्ना :५

8 मिनू मेको ब्रेकशा यो गो इन कली नक अरेशो लोत्र ब्रेकनुड। मारदे हना मेको नक अरेशो लोत्र येसु ख्रीस्तमी खाण्टु। मिनू गेपुकी यो पाइनीनी। गो मेको मारदे ब्रेक्ताकड देशा हना, मुल छिडछिड जाम्ना जाम्न लाइब। मिनू थमा छेडछेड बारना बारन बाकब। यूहन्ना ८:१२; रोमी १३:१२

9 मिनू सुमी “गो परमप्रभु यावे आ छेडछेडमी बाकनुड” देबा, तन्न आ लोकब आन कली मदाकबा, मेको छेडछेडमी ममाड, छिडछिडमी बाकब। १ यूहन्ना ४:२०

10 सु चहिं आ थमा सुइकब लोकब आन कली दाकबा, मेको छेडछेडमी गाकना गाकन बाकब। मोदेशो दुम्षो मुरुमी मरिम्शो गेय मपाइब।

11 सु चहिं आ लोकब आन कली मदाकबा, मेको मुर छिडछिडमी गाकब। मिनू ते लाइबा मतुइकब। छिडछिडमी मेको कली मिक्च मताइब सेल्ब।

रागी नु रागी डा थोवक

12 आं दाकशो तमी तौपुकी, गो इन कली मारदे ब्रेकना ब्रेकन बाक्ती देशा हना, इन पशो मरिम्शो नेल्ल येसु ख्रीस्त आ नेमी क्याम्सीशो बाकत। मोपतीके गो इन कली ब्रेकना ब्रेकन बाक्ती।

13 आम आफपुकी, गो इन कली मारदे ब्रेकना ब्रेकन बाक्ती देशा हना, गे मेको डोंडती रे बाकब कली तुइक्नीनी। मोपतीके गो इन कली ब्रेकना ब्रेकन बाक्ती। ठेयब वोइश आलपुकी, गो इन कली मारदे ब्रेकना ब्रेकन बाक्ती देशा हना, गे सैतान कली ग्रातीनी। मोपतीके गो इन कली ब्रेकना ब्रेकन बाक्ती। मिनू आं तमी तौपुकी, गो इन कली मारदे ब्रेक्ताकड देशा हना, गे इं आफ परमप्रभु यावे कली तुइक्नीनी। मोपतीके गो इन कली ब्रेक्ताकड। यूहन्ना १:१

14 मिनू आं आलपुकी, गो इन कली मारदे ब्रेक्ताकड देशा हना, गे इं आफ कली तुइक्नीनी। गो आम आफ इन कली मारदे ब्रेक्ताकड देशा हना, गे डोंडती रे बाकब कली तुइकब बाक्नीनी। गो ठेयब वोइश आल इन कली मारदे ब्रेक्ताकड देशा हना, गेपुकी बोल्यो दुम्तीनी। गे परमप्रभु यावे आ लोत्र इन थुमी वोइशशा, सैतान कली ग्रातीनी। मोपतीके गो इन कली ब्रेक्ताकड। एफिसी ६:१०;

15 गेपुकी रागी नु रागी डा थोवक कली मदाक्तीन। सु चहिं रागी कली दाकबा, मेको आ थुमी इं आफ, परमप्रभु यावे आ दाकशो मबाकब। याकूब ४:४

16 मिनू रागीमी मार बाकब देशा हना, मेको मुर आन रांमी मार मार पचा दाक्नीमी, मेकोन पाइनीमी। मेको आन मिक्चीमी मार मार कोव्रचा दाक्नीमी, मेकोन कोव्रथ लाइनीम। आन शुश शॉप आ पबंम ठेयब लेत्तीके इं आफ परमप्रभु यावे रे ममाड, रागी डा मुर आन पतीके बाकब।

17 मिनू रागी नु रागी डा मुर आन दाकशो नेल्ल जाम्ब। सु चहिं परमप्रभु यावे आ देशो पाइबा, मेको मुर गेना हना यो ब्रोंइशा बाकब।

दूली शेंब जाक्तेकम

18 आं तमी तौपुकी, रागी जाम्चशो बाकब। दोपा तुइक्ताक्य देशा हना, ख्रीस्त आ पबंम दूली शेंब का जाकब, दे डोंडती रे तुइशशो ननी। ख्रीस्त आ पबंम दूली शेंब शुश जाक्तेकम। मोपतीके रागी जाम्चशो बाकत, दे तुइक्ताक्य। १पत्रुस ४:९; मती २४:२४; २थिस्सलोनिकी २:३-४

19 मेको दूली शेंबपुकी इं दाते रे गूतेकम। मेकोपुकी चहिं इं खोदेशो पा येसु ख्रीस्त कली थमा सुइकब मनम। इं खोदेशो पा येसु ख्रीस्त कली थमा सुइकब नम हना, गोपुकी नु काथा बाकम वा। तन्न इं दाते रे गूशा लाम्तेकम। मिनू इं खोदेशो पा येसु ख्रीस्त कली थमा सुइकब मनम, दे तुइसीब। प्रेरित २०:३०; १कोरिन्थी ११:१९

20 येसु ख्रीस्तमी इन कली परमप्रभु यावे आ सोक्त गेप्टु। मोपतीके नेल्ल तुइक्नीनी।

21 इन कली एको लोत्र मारदे ब्रेक्ताकड देशा हना “गे मतुइकब ननी” दे ममिम्नुड। थमा लोत्र तुइक्नीनी। मिनू मेको इन तुइशशो थमा लोत्र क्येडा जोकब सेल्चा, दे ब्रेक्ताकड। थमा शेंतीकेमी येसु ख्रीस्त आ पबंम जोल मबाकब।

22 दूली शेंबमी मार शेंब देशा हना “येसु ख्रीस्त परमप्रभु यावे आ सोइशशो ममाड। परमप्रभु यावे नु आ तौ पोबु मनसी” दे शेंब। मेको ख्रीस्त आ पबंम दूली लोत्र शेंब बाकब।

23 सु सुमी “येसु ख्रीस्त परमप्रभु यावे आ तौ ममाड” दे शेंनीमी, मेको इं आफ परमप्रभु यावे नु थुं का डा मबाक्नीम। सु सुमी चहिं “येसु ख्रीस्त परमप्रभु यावे आ तौ बाकब” दे शेंनीमी, मेको इं आफ, परमप्रभु यावे नु थुं का डा बाक्नीम। यूहन्ना ५:२३; १ यूहन्ना ४:१५

24 मिनू इन डोंडती रे नेशो शेंतीके मिम्शा बाक्कीन। इन डोंडती रे नेशो शेंतीके मिम्शा बाक्तीनी हना, गेपुकी इं आफ, परमप्रभु यावे नु आ तौ नु थुं का डा दुम्शा बाक्नीनी।

25 परमप्रभु यावेमी “गो इन कली गेना हना यो ब्रोंइशा बाक्चा गेनुड” देशो बाकब।

26 मुर का निक्शीमी इन कली दूली शेंनीमी। मोपतीके गो इन कली एको लोत्र ब्रेक्ताकड।

27 येसु ख्रीस्तमी इन कली परमप्रभु यावे आ सोक्त गेप्टु। मिनू मेको गेपुकी नु बाकब। मेको परमप्रभु यावे आ सोक्त गेपुकी नु बाक्मेनु, अको शेंब ममाल्नीनी। परमप्रभु यावे आ सोक्तीमी इन कली नेल्ल शेंना शेंन बाकब। मेको आ शेंशो थमा बाक्तीके जोल मटुम्ब। मेकोमी डोंडती इन कली शेंशो टिशा, मेको नु थुं का डा दुम्शा, बाक्कीन। यूहन्ना १६:१३; २कोरिन्थी १:२१-२२; येरमीया ३१:३४

28 आं तमी तौपुकी, येसु ख्रीस्त नु थुं का डा दुम्शा बाक्कीन। मेको यिमेनु, गोपुकी महिब दुम्ने चाप्यल। मेको आ डोंडती मुने मदोक्यल।

29 “येसु ख्रीस्त नेल्ल ठीक पाइब बाकब” दे तुडक्ताकनी हना, सु सुम ठीक पाइनीमी, मेको नेल्ल परमप्रभु आ आलपुकी नमी, दे तुडक्नीनी। १ यूहन्ना ३:७-१०

### 3

परमप्रभु आ आल दुम्शो

1 इं आफोमी इं कली शुश दाकशा “परमप्रभु यावे आ तमी तौ” दे नें वोडशो बाक्त। मिनू गोपुकी आ तमी तौ दुम्तय। मोपतीके रागी डा मुरपुकीमी इं कली मतुडक्नीम। मारदे मतुडक्नीम देशा हना, मेकोपुकीमी येसु ख्रीस्त कली यो मतुडक्नीम। यूहन्ना १:१२; यूहन्ना १६:३

2 आं दाकशो लोकबपुकी, मूल गोपुकी परमप्रभु यावे आ आल दुम्तय। नोले गो दोदेशो दुम्नया, मारेड मतुडक्नय। मिनू येसु ख्रीस्त ग्रामेनु, गोपुकी मेको खोदेशो दुम्नय। दोपा मेको खोदेशो दुम्नय देशा हना, गोपुकी मेको कली दोदेशो बाकमे, दे तशा, मेको खोदेशो दुम्नय। रोमी ८:१७; फिलिप्पी ३:२१; कलस्सी ३:४

3 मिनू सु मेको आ मग्रूम सम्म रिम्शा बाकबा, मेको येसु ख्रीस्त पाप रे डोन बाकशो खोदेशो पा, मेको यो पाप रे डोन बाकब।

4 मिनू सुम मरिम्शो पाइबा, मेकोमी परमप्रभु यावे आ अरेशो लोत्र मटीब। मरिम्शो मार बाकब देशा हना, परमप्रभु यावे आ अरेशो लोत्र मटिचा मरिम्शो बाकब।

5 मरिम्शो क्याम्चा कली येसु ख्रीस्त जाक्त, दे तुडक्नीनी। मिनू मेकोमी काइ मरिम्शो मपवा। यसैया ५३:४-६; यूहन्ना १:२९; १ पत्रुस २:२४; यसैया ५३:९; यूहन्ना ८:४६

6 सु चहिं मेको नु थुं का डा दुम्शा बाकबा, मेकोमी मरिम्शो मपाइब। सुम चहिं मरिम्शो पना पन बाकबा, मेको येसु ख्रीस्त नु थुं का डा मटुम्थु, मेको कली मतुडक्ब। रोमी ६:११,१४

7 आं आइक्च आलपुकी, दूली लोत्र शेंब आन लोत्र मनेनीन। सुम ठीक गेय पाइबा, मेको मुर यो येसु ख्रीस्त खोदेशो पा ठीक पाइब बाकब। १ यूहन्ना २:२९

8 सु चहिं मरिम्शो पना पन बाकबा, मेको मुर सैतान रे जाकशो बाकब। मारदे हना सैतान डोंडती रे मरिम्शो पना पन बाकशो बाकब। मोपतीके परमप्रभु यावे आ ती सैतान आ गेय थुम्चा कली रागीमी जाक्त। यूहन्ना ८:४४

9 परमप्रभु यावे आ आलपुकीमी पाप मपाइनीम। मारदे पाप मपाइनीम देशा हना, परमप्रभु आ थुं मेको आन थुंमी बाकब। मोपतीके परमप्रभु आ आलपुकीमी पाप मपाइनीम। १ यूहन्ना ५:१८

10 मिनू तेको मुर परमप्रभु यावे आ आल बाकनीमी नु तेको मुर सैतान आ आल बाकनीमी, दे तुंडसीब। दोपा तुंडसीब देशा हना, सु सु ठीक गेय मपाइनीमी नु आ लोकब आन कली मदाकनीमी, मेको परमप्रभु यावे आ आल मनमी। मेको सैतान आ आल बाकनीम। यूहन्ना ५:१८

11 मिनू इन डोंडती रे नेशो लोत्र मार बाक्त देशा हना, गोपुकी दाकमुचा मालनय। यूहन्ना १३:३४

12 काइन खोदेशो दुम्चा मटुम्ब। काइनमी सैतान आ मुर दुम्शा, आ लोकब कली सदा बाक्त। काइनमी आ लोकब कली मारदे सदा बाक्त देशा हना, आ थुं डा गेय मरिम्शो बाकमाक्त। आ लोकब आ गेय चहिं परमप्रभु यावे आ डोंडती ठीक बाकमाक्त। उत्पती ४:८

13 आं लोकबपुकी, रागी डा मुरपुकीमी इन कली मदाकथु श्येत गेमेनु, छक मलाककीन। मती ५:११; यूहन्ना १५:१८-१९

14 गोपुकी बेक्तीक राज्य रे पा, ब्रोंडतीक राज्यमी बाकनय। दोपा तुडक्नय देशा हना, थमा सुडक्ब लोकब आन कली दाकनय। सुम चहिं मदाकबा, मेको बेक्तीक राज्यमी बाकब। यूहन्ना ५:२४

15 सुम थमा सुडक्ब लोकब आन कली मदाकबा, मेको मुर साइक्ब बाकब। मिनू सुम थमा सुडक्ब लोकब आन कली साइक्बा, मेको गेना हना यो ब्रोंडशा बाकचा मताइब, दे तुडक्नीनी। मती ५:२१-२२

16 मिनू लोकब आन कली दाकचा, दोपा तुंडसीब देशा हना, येसु ख्रीस्त इं कली दाकशा, साइक्चा पुंडसाक्ब। मिनू गोपुकीमी यो लोकब आन कली दाकचा मालनय। थमा सुडक्ब लोकब आन कली मबेक्या सम्म वारच पचा मालनय। यूहन्ना १५:१३

17 सुमी शुश शोप थिशा यो, लोकब आन कली श्येत जशो तशा “गो मारेड मगेनुड” दे मिम्बा, मेको मुर आ थुं रे परमप्रभु यावे आ गेशो दाक्तीक सक्ति यो जाम्शा लाइब। ब्यवस्था १५:७; १ यूहन्ना ४:२०

18 आं आइक्च आलपुकी, गोपुकी दाकमुय। मिनू “इ कली दाकनुड” दे लोत्र पशा ममाइ, तन्न पतीकेमी दाकमुचा मालनय। याकूब २:१५-१६

19 गोपुकी थमा पा दाकशा, गेय पाइतय हना, इं थुंमी “थमा लां खोडक्ब नय” दे थमा पा तुडक्नय।

20 मिनू इं थुंमी इं कली दोस गेप्टु हना, इं थुं क्येडा परमप्रभु यावे ठेयब बाकब। मिनू मेकोमी नेल्ल तुडक्ब। लूका १५:२०-२२

21 आं दाकशो लोकबपुकी, इं थुंमी इं कली दोस मगेप्टु हना, गोपुकी महिंथु, परमप्रभु यावे आ डोंडती जाकदीलनय।

22 मिनू गो महिंथु पुंडतय हना, इं पुंडशो गेब। मारदे हना गोपुकी आ अरेशो लोत्र पशा, आ दाकशो पाइनय। मर्कूस ११:२४

23 मिनू आ अरेशो लोत्र मार बाकब देशा हना, परमप्रभु यावे आ सोडशो येसु ख्रीस्त कली थमा सुडक्चा नु इं दातेमी दाकमुचा इं कली अरेशो लोत्र बाकब। यूहन्ना ६:२९; यूहन्ना १५:१७

24 सुमी आ अरेशो लोत्र पाइबा, येसु नु थुं का डा बाकब। मिनू येसु यो मेको मुर नु थुं का डा बाकब। परमप्रभु यावे नु गोपुकी थुं का डा दुम्तय, दे दोपा तुडक्नय देशा हना, मेकोमी गेशो सोक्तीमी शेशो रे तुडक्नय। १ यूहन्ना ४:१३; रोमी ८:९

## 4

थमा नु जोल दोपा तुंडसीबा?

1 आं दाकशो लोकबपुकी, शेंबपुकीमी शेंदमेनु, गेपुकीमी परमप्रभु यावे रे पा शेंनीमी देय मशेंनीमी मेको रूपीन। मारदे हना रागीमी शुश दूली पा, परमप्रभु यावे आ लोत्र पाइब बाक्नीम। मती ७:१५

2 परमप्रभु यावे आ सोक्त आ शेंतीके दोपा तुंडसीब देश हना, सुमी “येसु ख्रीस्त परमप्रभु यावे आ सोइक्तीके रागीम जाक्त” देबा, मेको मुर परमप्रभु यावे नु थुं का डा बाक्ब।

3 सुम चहिं “येसु परमप्रभु यावे आ सोइशो ममाइ” दे शेंबा, मेको परमप्रभु यावे नु थुं का डा मबाक्ब। मेको येसु आ पर्वम दूली शेंब बाक्ब। येसु आ पर्वम दूली शेंथ जाक्ब, दे नेंतीनी। मिनु मेको मुल रागीमी बाक्ब।

4 आं आइक्च आलपुकी, गेपुकी परमप्रभु यावे नु थुं का डा दुम्शा, मेको रागीमी बाक्ब दूली शेंब आन कली ग्रातीनी। मारदे हना रागी डा मुर आन थुंमी बाक्शो दूली शेंब सोक्त क्येडा इन थुंमी बाक्ब परमप्रभु यावे आ सोक्त टेयब बाक्ब।

5 मेको येसु ख्रीस्त आ पर्वम दूली शेंबपुकी रागी डा मुर बाक्नीम। मोपतीके आन शेंतीके परमप्रभु यावे के ममाइ, रागी डा बाक्ब। मिनु रागी डा मुरपुकी मेको आन शेंशो दाक्नीमी। यूहन्ना १५:१९

6 गोपुकी चहिं परमप्रभु यावे नु थुं का डा बाक्नय। सुमी परमप्रभु यावे कली तुइक्बा, मेकोमी आंइ शेंशो टीब। सु चहिं परमप्रभु यावे नु थुं का डा मबाक्बा, मेकोम आंइ शेंशो मटीब। मोपा थमा बाक्बा देय दूली शेंतीक बाक्बा, दे तुइक्ने चापनय। यूहन्ना ८:४७; १कोरिन्थी १४:३७

परमप्रभुमी दाक्मुपाइक्ब

7 आं दाकशो लोकबपुकी, दाक्मुय। मारदे हना परमप्रभु यावेमी थमा सुइक्ब आन कली दाक्मुपाइक्ब। सुमी दाक्बा, मेको परमप्रभु यावे आ आल दुम्शा, परमप्रभु यावे कली तुइक्ब।

8 सुम चहिं मदाक्बा, मेकोमी परमप्रभु यावे कली मतुइक्ब। मारदे हना परमप्रभु यावे दाक्ब बाक्ब।

9 परमप्रभु यावेमी दोपा आ दाक्चा कोंइताक्व देश हना, आ का ला तौ रागीमी सोइक्ताक्व। मिनु आ तौ साइक्चा पुंडसीतीके इं कली गेना हना यो ब्रोंइशा बाक्चा गेपु। यूहन्ना ३:१६

10 मिनु परमप्रभु यावे आ दाक्चा मार बाक्ब देश हना, गोपुकी खोंइती परमप्रभु यावे कली काइ मदाक्ताक्व हना यो, परमप्रभु यावेमी इं कली दाक्ताक्व। गिश दाक्ताक्व देश हना, आंम तौ कली साइक्चा पुंडसीब पपाइक्चा कली रागीमी सोइक्ताक्व। इं कली मरिम्शो गेय नु सैतान आ राज्य रे प्रोंइचा, दे साइक्चा पुंडसीचा कली रागीमी सोइक्ताक्व।

11 आं दाकशो लोकबपुकी, परमप्रभु यावेमी इं कली दोपा दाक्ता, मोपा गोपुकी यो दाक्मुचा मालनय।

12 मुरपुकीम परमप्रभु यावे कली गेनायो मतामे। तन्न गोपुकी दाक्मुयानु, परमप्रभु यावे इं नु थुं का दुन्त। मिनु परमप्रभु यावे आ दाक्तीक इं थुंमी लीब। यूहन्ना १:१८

13 परमप्रभु यावेमी इं कली आ सोक्त गेपु। मोपतीके गो परमप्रभु यावे नु थुं का डा दुम्नय नु मेको गो नु थुं का डा दुम्शो तुइक्नय।

14 मिनु गोपुकी परमप्रभु यावेमी आ तौ रागीमी सोइशो ताइतक। गोपुकीमी “इं आफ, परमप्रभुमी आ तौ कली मुर आन कली पाप रे प्रोंइचा, दे रागीमी सोइक्ताक्व” दे शेंना शेंन बाक्नीकी। यूहन्ना ३:१७

15 सुमी “येसु परमप्रभु यावे आ तौ बाक्ब” देबा, मेको परमप्रभु यावे नु थुं का डा बाक्ब। मिनु परमप्रभु यावे यो मेको नु थुं का डा बाक्ब। १यूहन्ना ५:५

16 मोपतीके गोपुकी “परमप्रभु यावेमी इं कली दाक्ब” दे तुइशो थमा सुइक्नय। परमप्रभु यावेमी मुर आन कली दाक्ब। सुमी दाक्ना दाक्न बाक्बा, मेको परमप्रभु यावे नु थुं का डा बाक्ब। परमप्रभु यावे यो मेको नु थुं का डा बाक्ब।

17 दोपा मुर आन कली दाक्चा रिम्शो दुम्त देश हना, गोपुकी परमप्रभु यावे आ निसाफ पची नाक्त महिनय। मारदे हना गोपुकी परमप्रभु यावे नु थुं का डा दुम्शा, रागीमी बाक्नय। १यूहन्ना २:२८

18 मिनु दाक्ना दाक्न बाक्तय हना, महिनय। मारदे हना मुरपुकी सजाइ तशा हिनीम। मिनु सु हिबा, मेको आ दाक्शो शुश बाक्ब।

19 गोपुकी चहिं परमप्रभु यावे कली मारदे दाक्नय देश हना, मेकोमी खोंइती इं कली शुश दाक्ताक्व।

20 सुमी चहिं “गो परमप्रभु यावे कली दाक्नुइ” देबा, मिनु थमा सुइक्ब लोकब आन कली काइ मदाक्बा, मेको मुर आ देशो लोत्र यो जोल बाक्ब। मारदे हना सुमी आ नु बाक्शो लोकब आन कली मदाक्बा, मेकोमी मुर आन मतशो परमप्रभु यावे कली दोपा दाक्ने चाप्बा डा? मचाप्ब। १यूहन्ना ३:१७

21 मिनु परमप्रभु यावेमी इं कली अरेशो लोत्र मार बाक्त देश हना “सुमी परमप्रभु यावे कली दाक्बा, मेकोमी थमा सुइक्ब आन कली यो दाक्चा माल्ब” दे शेंशो बाक्त। मर्कूस १२:२९-३१

## 5

थमा सुइक्ब सक्ति पाइशो बाक्नीम

1 मिनु सुमी “येसु परमप्रभु यावे आ सोइशो ख्रीस्त बाक्ब” दे थमा सुइक्बा, मेको मुर परमप्रभु यावे आ आल बाक्ब। मिनु सुमी आफ कली दाक्बा, मेकोमी आ आल कली यो दाक्ब।

2 गोपुकी थमा पा परमप्रभु यावे आ आल आन कली दाक्नय, दे दोपा तुइक्नय देश हना, परमप्रभु यावे कली दाक्नय। मिनु आ अरेशो लोत्र टीनय।



3 गोपुकीमी “परमप्रभु यावे कली दाकनय” दँतय हना, आ अरेशो लोत्र टिशा पाडनय। आ देशो लोत्र टिशा पचा रयेत ममाइ। यूहन्ना १४:१५, २३, २४; मत्ती ११:३०

4 मिनु परमप्रभु यावे आ आलपुकीमी रागी डा मुर आन दाकशो गेय कली ग्रानीम। दोपा ग्रानीम देशा हना, येसु ख्रीस्त कली थमा सुइक्चा मप्रोंइथु ग्रानीम। यूहन्ना १६:३३; १कोरिन्थी १५:५७

5 सु सुमी ग्रानीम देशा हना “येसु परमप्रभु यावे आ तौ बाकब” दे थमा सुइक्बमी ग्रानीम। १यूहन्ना ४:४

परमप्रभु आ तौ आ सांकछी

6 मिनु येसु ख्रीस्त ब्वाक्कु नु हुश रे जाकत। ब्वाक्कु रे ला ममाइ, तन्न ब्वाक्कु नु हुश रे जाकत। १यूहन्ना ४:२; मर्कूस १:९; यूहन्ना १९:३४-३५

7 परमप्रभु यावे आ सोकत मेको आ सांकछी बाकब। मारदे हना परमप्रभु यावे आ सोक्तीम थमा लोत्र ला पाइब। यूहन्ना १:३३

8 मोपा सांकछी सां बाकनीम। का परमप्रभु यावे आ सोकत बाकब, का ब्वाक्कु रे जरमेतीके बाकब नु का मुर आन मरिम्शो पतीके आ पर्वम येसु साइक्चा पुंडसीशो डा हुश बाकब। मिनु मेको सांफा गारनीमी।

9 गोपुकी मुर आन सांकछी नेशा थमा सुइक्नय। परमप्रभु यावे आ सांकछी मुर आन सांकछी क्येडा ठेयब बाकब। मिनु परमप्रभु यावेमी आ तौ येसु ख्रीस्त आ पर्वम मेको सांकछी गेप्टु।

10 सु परमप्रभु यावे आ तौ कली थमा सुइक्बा, मेको मुर आ थुंमी सांकछी लीब। सु चहिं परमप्रभु यावे कली थमा मसुइक्बा, मेकोमी “परमप्रभु यावे जोल्फे बाकब” दँब। मारदे हना “आं तौ बाकब” दे परमप्रभु यावेमी देशो थमा मसुइक्ब। यूहन्ना ३:३२-३४; रोमी ८:१६

11 मिनु मेको आ सांकछी मार बाकब देशा हना, परमप्रभु यावेमी इं कली गेना हना यो ब्रोंइशा बाक्तीक गेप्टु। मोदेशो ब्रोंइशा बाक्तीक आ तौमी पतीके बाकब।

12 सु मेको आ तौ नु बाकबा, मेको गेना हना यो ब्रोंइशा बाक्चा ताइब। सु चहिं परमप्रभु यावे आ तौ नु मबाक्बा, मेको गेना हना यो ब्रोंइशा बाक्चा मताइब।

13 मिनु गोपुकी परमप्रभु यावे आ तौ आ नें कली थमा सुइक्नीनी। मोपतीके गेना हना यो ब्रोंइशा बाक्चा ताइब बाक्नीनी, दे गो इन कली तुइक्पाइक्चा कली ब्रेक्ताकड। यूहन्ना २०:३१

परमप्रभु कली पुंडतीक लोत्र

14 मिनु मेको कली थमा सुइश्शोमी इं पुंडशो आ दाकशो बाकत हना, मार पुंडतय हना यो, इं कली नेशा गेब। यूहन्ना १४:१३

15 गोपुकीमी इं मार मार पुंडशो नेंब, दे तुइक्ताक्य हना, इं पुंडशो यो गेब, दे तुइक्नय।

16 मिनु सुमी आ लोक्ब मबेक्चा डा सजाइ तचा डा पा मरिम्शो पशो ताइबा, मिनु आ लोक्ब आ पर्वम पुंडबा, मेको मुर आ पुंडशो परमप्रभु यावेमी गेब। मेको थमा सुइक्ब लोक्ब गेना हना यो ब्रोंइशा बाक्चा ताइब। तन्न बेक्चा डा मरिम्शो पतीक यो बाकबा, मोदेशो मरिम्शो पाइब कली पुंड्या ममाल्ब, दे इन कली देनुड। मर्कूस ३:२८-३०

17 परमप्रभु यावे कली मगारचा डा गेय नेल्ल मरिम्शो बाक्नीम। तन्न कोइ मरिम्शो पतीके क्याम्चा डा बाक्नीम।

येसु ख्रीस्त नु बाकबपुकी

18 मिनु “सु परमप्रभु यावे रे जरमेशो बाकमे, मेको मुरुम मरिम्शो मपाइब। मारदे हना परमप्रभु यावे रे जरमेशो आन कली येसु ख्रीस्तमी कोत्रब। मिनु सैतानमी मेको आन कली मथीब” दे तुइक्नय। १यूहन्ना ३:९; यूहन्ना १७:१५

19 मिनु गोपुकीमी “गोपुकी परमप्रभु यावे आ मुर नय” तन्न सैतानमी नेल्ल रागी डा मुर आन कली हुकुम पाइब, दे तुइक्नय। गलाती १:४

20 मिनु परमप्रभु यावे आ तौमी इं कली रुप्तीक थुं गेप्टु, दे तुइक्नय। मेको रुप्तीक थुंमी थमा पतीके कली तुइक्नय। गोपुकी मेको थमा पाइब नु थुं का डा बाक्नय। मोपा आ तौ येसु ख्रीस्त नु यो थुं का डा बाक्नय। मेको थमा परमप्रभु यावे नु गेना हना यो ब्रोंइशा बाक्तीक बाकब। यूहन्ना १७:३

नोले डा लोत्र

21 मोपतीके “आं आइक्च आलपुकी, मूर्ति रे डोन बाक्कीन” दे इन कली ब्रेक्शा अरेतन्नी। १कोरिन्थी १०:१४

## २ यूहन्ना

**ब्रेकब मुर:** यूहन्नामी आंम कली खाल्पा देशा, एको चिठी थमा सुइक्ब आन कली नोले ब्रेकशो बाक्ब।

**गेना ब्रेकशो:** डोंडती डा चिठी खोदेशो पा १०० ए. डी. नुप्चा क्येडा डोंडती मीश मुर, दे खुइशो नें वोइशो, थमा सुइक्ब आन गुमतीके कली ब्रेकशो चिठी बाक्ब।

**मार ब्रेकशो:** परमप्रभु यावे कली दाक्तीक कोंडतीके आ देशो टिचा बाक्ब। दूली शेंब आन पर्वम यो लोत्र बाक्ब।

डोंडती डा लोत्र

1 गो येसु ख्रीस्त कली थमा सुइक्ब आन शेंब खाल्पामी आ योत्रशो मीश मुर नु आ आल इन कली चिठी ब्रेकताक्नी। गो इन कली थमा पा दाक्नी। गो ला ममाइ, सु सुम परमप्रभु यावे आ पर्वम थमा शेंतीके तुइक्वते, मेकोपुकीमी यो इन कली दाक्नीमी। ३यूहन्ना :१

2 मारदे हना परमप्रभु यावे आ थमा शेंतीके इ थुम बाक्ब, मेको गेना हना यो लीब।

3 मिनु इं आफ, परमप्रभु यावे नु आ तौ येसु ख्रीस्तमी इं कली शिशो नु थुं नाइशो बाक्चा गेम्सेकल। परमप्रभु यावे आ थमा शेंतीके नु आ गेशो दाक्मुचा यो गोपुकी नु बाक्ल।

थमा लां खोइक्चा नु दाक्चा

4 गो इन आल आन दाते डा का निक्शी थमा लां खोइक्ब तशा, शुश ग्येरसीनुड। मारदे हना इं आफोमी इं कली मोदेशो अरेशो लोत्र गेशो बाक्ब।

5 मिनु गोमी “गोपुकी दाक्मुय” दे मीश मुर इन कली देशो नक अरेशो लोत्र मब्रेक्नुड। तन्न साइ डोंडती रे दाक्मुचा, दे अरेशो लोत्र बाक्शो बाक्ब। १यूहन्ना २:७

6 मिनु आ अरेशो लोत्र पचा दाक्चा बाक्ब। मेको इन डोंडती रे नेशो अरेशो लोत्र बाक्ब। मेको अरेशो पने।

दूली शेंब आन पर्वम शेंशो

7 मिनु मुल रागीमी शुश मुर आन कली मरिम्शो लां कोंडब जोल्फेपुकी जाक्तेक्म। मेको मुरपुकीमी “येसु ख्रीस्त मुर दुम्शा रागीमी मजरमेसे” दे शेंनीम। मेको मोदेशो शेंब चहिं जोल्फे नु नेल्ल क्येडा मरिम्शो पाइब बाक्नीम। १यूहन्ना २:१८; १यूहन्ना ४:१-३

8 गोपुकी मार कली गेय पनी, मेको मुल यो पना पन बाक्कीन। मो पाइतीनी हना, ठेयब इनाम ताइनीनी। गलाती ४:११

9 सुम चहिं ख्रीस्त आ थमा शेंतीके लोत्र प्रोंडबा, मेको परमप्रभु यावे नु थुं का मबाक्ब। सुम चहिं ख्रीस्त आ थमा शेंतीक लोत्र मप्रोंडबा, मेको आफ नु तौ निम्फा नु थुं का डा बाक्ब। १यूहन्ना २:२३

10 सुइ मुर इन बाक्तीके जाक्शा, थमा शेंतीके लोत्र मपाप्तु हना, मेको कली सिं ओत्रचा मगेने। मिनु मेको कली “रिम्शो बाक्को” दे यो मदेनीन। २थिस्सलोनिकी ३:६

11 मारदे हना सुमी मेको मोदेशो मुर कली “रिम्शो बाक्कीन” देबा, मेकोमी मेको आ दूली शेंतीके नु आ मरिम्शो गेय यो पाइब।

नोले डा लोत्र

12 मिनु गोमी इन कली शुश ब्रेकचा माल्ती हना यो, कागज नु मसीम मब्रेक्नुड, इन कलीन गुमथ जाक्नुड। मिनु कोत्रमुशा लोत्र पाइनय, दे आस पाइनुड। मोपा गुमथ हना, शुश ग्येरनय। ३यूहन्ना :१३

13 इन योत्रशो समी आ तमी तौपुकीमी यो इन कली “रिम्शो बाक्कीन” दे ब्रेकपाइक्तीमी।

## ३ यूहन्ना

**ब्रेकब मुर:** यूहन्ना आ नेल्ल क्येडा नोले ब्रेकशो चिठी बाकब।

**गेना ब्रेकशो:** एको चिठी १०० ए. डी. क्येडा डोंडती ब्रेकशो बाकब।

**मार ब्रेकशो:** थमा शेशो कोंडतीके नु दाकचा मप्रोंडतीक आ पबंम ब्रेकशो लोत्र बाकब।

डोंडती डा लोत्र

१ गो येसु ख्रीस्त कली थमा सुइक्ब आन शेंब खाल्पामी, आं थमा पा दाकशो गायस इ कली एको चिठी ब्रेकताकड।  
२यूहन्ना :१

२ आं दाकशो लोकब, इ जचा बाकचा नेल्ल रिम्शो बाकल। इ थमा सुइक्तीके रिम्शो बाकब, दे गो तुइक्नुड।

३ मिनु इ बाकतीके रे जाकब थमा सुइक्बपुकीमी “गायस रिम्शो पा येसु ख्रीस्त आ पबंम थमा लां खोइक्ब” दे शेंताकयीमी।  
मेको नेंनु, गो शुश ग्येरसाकयी। २यूहन्ना :४

४ आं आलपुकी येसु ख्रीस्त आ पबंम थमा लां खोइक्नीम देंशो नेंनु, आं कली नेल्ल क्येडा ग्येरपाइक्ब।

गायसमी जाकचा गेशो

५ आं दाकशो लोकब, गे येसु ख्रीस्त कली थमा सुइक्ब आन कली वारच पाइतीनी, मोपा रिम्शो गेय पाइतीनी। मोदेंशो गेय अर्को सहर डा येसु ख्रीस्त कली थमा सुइक्ब आन कली पाइतीनी, मेको थम रिम्शो बाकब।

६ इ खिंमी जाकचा बाकशा, थमा सुइक्बपुकीमी “गायसमी थमा सुइक्ब आन कली शुश दाकशा, खिंमी बाकचा गेपु” दे आंड युम्तीकेमी नेंपाइक्तेक्म। मिनु गे मोपा येसु ख्रीस्त कली थमा सुइक्ब आन कली खिंमी बाकचा गेचा ला ममाइ, तन्न आन लची ना मेकोपुकीमी मार मार मालनीमी, मेको नेल्ल परमप्रभु यावेमी खोदेंशो पा गेशा सोइक्ताकनी हना, गे रिम्शो दुम्नीनी। तीतस ३:१३

७ मारदे हना मेकोपुकी येसु ख्रीस्त आ पबंम शेंथ लाइनीम। मिनु थमा मसुइक्बपुकी रे मारइ मलाइक्नीम। १कोरिन्थी ९:१२

८ मिनु गोपुकीमी मोदेंशो मुर आन कली रिम्शो पा वारच पचा मालनय। मो पयानु, गोपुकी मेकोपुकी नु गारशा, गेय पना पन बाकनय। हिब्रू १३:२

ठेयब लेशो शेंब आ पबंम

९ गो इन युम्तीके डा थमा सुइक्ब आन कली ब्रेकताकडमी। तन्न डियोत्रीफसमी आंम कली ठेयब सेल्शा, गोपुकी आंड कली मदाकब।

१० मिनु गो मेकेर जाकशा, मेको आ पशो गेय आ पबंम लोत्र पाइनुड। मेकोम मार पाइब देंशा हना, आं कली श्येत गेचा, दे आं पबंम काइ मरिम्शो लोत्र पना पन गाकब। मिनु मेको ला ममाइ, आं सोइश्शो लोकब आन कली जाकचा मगेव। सु चहिं मेको आन कली जाकचा गेचा दाकबा, डियोत्रीफसमी मेको कली “जाकचा गेचा मदुम्ब” देंब। मिनु मेकोपुकी आ देंशो मटिम्तेक्म हना, मेको आन कली थमा सुइक्ब आन युम्तीके रे तिल्लब।

११ आं दाकशो थमा सुइक्ब लोकब, मरिम्शो मुर आन तस मखोतो। तन्न रिम्शो मुर आन तस खोतो। सु रिम्शो गेय पाइबा, मेको परमप्रभु यावे आ मुर बाकब। सु चहिं मरिम्शो पाइबा, मेको परमप्रभु यावे कली मतुइक्ब बाकब।

१२ मिनु थमा सुइक्ब नेल्लेमी “देमेत्रीयस रिम्शो थमा सुइक्ब बाकब” दे तुइश्शा देंनीम। मिनु मेको आ थमा लां खोइक्तीकेमी, येसु ख्रीस्त नु थुं का बाकब, दे कोंडब। गो यो मेको आ पबंम “देमेत्रीयस रिम्शो मुर बाकब” दे सांकळी गेनुड। गो जोल मपाइनुड, दे तुइक्नेवे।

नोले डा लोत्र

१३ गो इ कली शुश ब्रेकचा माल्ती हना यो, गो मसी नु कलममी मब्रेक्नुड। २यूहन्ना :१२

१४ तन्न इ कली युम्थ जाकचा कली आस पाइनुड। मिनु युम्था कोत्रमुशा लोत्र पाइनस।

१५ इ थुं नाइश्शा बाकल। आं वारचपुकीमी यो “गे रिम्शो बाककीन” दे आं कली ब्रेकपाइक्तीमी। गे अरु थमा सुइक्ब वारच आन कली यो “रिम्शो बाककीने” दे का का पा आन नें थिशा, माइक्मी।

## यहूदा

**ब्रेकब मुर:** एको चिठी याकूब आ लोकब यहूदाम ब्रेकशो बाकब। आंम कली “येसु आ वाइल” देंब। डोंइती थमा मसुइकब बाकशा, नोले थमा सुइकब दुन्त। प्रेरित १:१४

**गेना ब्रेकशो:** एको चिठी ६६ ए. डी. नु ६८ ए. डी. दातेमी ब्रेकशो बाकब। थमा सुइकबपुकीमी येसु आ सोइइशो मुर आन कली आंमन तशो बाकतेकम।

**मारदे ब्रेकशो:** एको चिठी रिम्शो थमा सुइकचा आ पर्वम ब्रेकशो बाकब।

१. डोंइती डा लोत्र यहूदा १:१-२
२. दूली शेंब आन पर्वम लोत्र यहूदा १:३-१३
३. दूली शेंब सजाइ ताइनीम यहूदा १:१४-२६
४. थमा सुइकतीके बोल्यो दुम्चा माल्ब नु नोले डा लोत्र यहूदा १:१७-२५

डोंइती डा लोत्र

1 गो याकूब आ लोकब यहूदा नड। गो येसु ख्रीस्त आ वाइल दुन्ती। परमप्रभु यावे, इं आफ आ दाकशो नु येसु ख्रीस्त कली योव्रशा वोइइशो मुर, इन कली ब्रेकताकड। मती १३:५५

2 परमप्रभु यावे आ दाकतीके, थुं नाइकतीके नु दाकमुतीके गेपुकी नु शुश बाकल।

दूली शेंब आन पर्वम शेंशो

२पत्रुस २:-

3 आं दाकशो लोकबपुकी, गो इन कली इं पाप रे प्रॉइतीक आ पर्वम ब्रेकचा दाकती। थमा सुइकतीके आ पर्वम दोपा गेय पचा, दे इन कली शेंचा दाकताकड। मेको थमा सुइकतीके पाप रे डोन बाकब आन कली डोंइती रे शेंने थुम्शो बाकत। १:१८

4 तन्न का निकशी निसाफ पाइकचा पुंइसीबपुकीमी “थमा सुइकब बाकनीक” देखु पा, थमा सुइकब आन युम्तीकेमी बाकनीम। मेकोपुकीमी परमप्रभु यावे कली मटिथु “परमप्रभु यावेमी शिशी पाइब” दे मिम्शा, आंम दला दाक्स पना पन बाकनीम। मिनु इं होत्रप, प्रभु येसु ख्रीस्त आ पर्वम “परमप्रभु यावे आ तौ ममाइ” देंनीम।

5 गेपुकी डोंइती रे “दोपा ठीक पा थमा सुइकचा” दे नेल्ल शेंसीशो बाकतीनी हना यो, गो इन कली लेंशा मेको शेंशो लोत्र मिम्पाइकचा दाकनुड। मार मिम्पाइकचा दाकनुड देशा हना, परमप्रभु यावेमी आ मुर आन कली इजीप्त रागी रे प्रॉइपाइइशा, तन्न नोले मेको थमा मसुइकब आन कली सदा बाकत। गन्ती १४:३५; १कोरिन्थी १०:५

6 परमप्रभु यावे आ स्वर्ग डा गेय पाइब का निकशीमी परमप्रभु यावे कली मटिथु आन बाकतीके प्रॉइतेकम। परमप्रभु यावेमी मेको आन कली टेयब निसाफ पची नाकत सम्म गेना हना यो मप्रॉइचा डा पा साडलोमी पाइइशा, नेल्ल क्येडा मरिम्शो बाकतीक छिडछिडमी वोइइशो बाकब। उत्पती ६:२-४

7 सोदोम, गोमोरा नु आस एर ओंथ बाकशो सहर डा मुरपुकीमी आन खोदेशो पा गांरा दिचा डा नु मपचा डा दूली गेय पशो बाकतेकम। परमप्रभुमी मेको आन कली कोंइतीक दुम्पाइकचा कली गेना हना यो ब्रशो मीमी सजाइ गेशो बाकत। उत्पती १९:१,४-११

8 मोदेशो तुइइशा यो मेको थमा सुइकनीकी देखु पाइबपुकीमी आंम मिम्तीके पशा, आंम रां कली गांरा दिचा डा सेल्लेकम। मिनु अधिकार पाइब आन कली मटिथु, स्वर्गम बाकब आन पर्वम शुक्शी पाइनीम।

9 परमप्रभु यावे आ नेल्ल क्येडा टेयब स्वर्ग डा गेय पाइब मिकाएलमी चहिं सैतान कली मोसा आ बेकशो रां आ पर्वम लोत्र पशा “परमप्रभुमी इ कली हुइकब” दे आंमा शुक्शी पा निसाफ पचा हिंमाकत। दानीएल १२:१; जकरिया ३:२

10 मेको मुरपुकी चहिं आन मतुइइशो नेल्ल आन पर्वम शुक्शी पाइनीम। मिनु मिम्तीक मपाइइशो बस्तु भाव आन तुइइशोमी खोदेशो पाइनीम। मिनु मेको पशा, खतम सेल्चा पुंइसीनीम।

11 मेको आन पर्वम आबी। काइन खोदेशो दुम्शो बाकतेकम। बालाम बुदी परमप्रभु यावे कली मटिथु, क्येट आ पर्वम दूली गेय पाइनीम। मिनु कोराह माइइशो मुर खोदेशो पा जाम्शा लाइनीम। उत्पती ४:८; गन्ती ३१:१६; गन्ती १६:-

12 मेकोपुकी इन युम्शो भोजमी जाकशा, दाइल पपाइकब फुल्लु खोदेशो पा बाकनीमी। आंम दातेम ग्येरपमुइनीम, तन्न महिंथु आंम कोव्रज ला प्रिनीम। मेको रेउ मपाइइशो फशेम बेशो गोस्स खोदेशो बाकनीम। फल सिट्ची ना फल मसिप्ब रवा खोदेशो बाकनीम। शाकश दुल्शो रवा खोदेशो पा, निकशी खेयप बेकशो बाकनीम। १कोरिन्थी ११:२१

13 मेको समुन्द्र डा टेयब हिंचा डा छाल खोदेशो बाकनीम। आंम मुने डा बोग्यो गुंइनीम। दोकशो सोरुल खोदेशो बाकनीम। मेको आन कली नेल्ल क्येडा मरिम्शो छिडछिड डा बाकतीके वोइइशो बाकब। यसेया ५७:२०

14 मिनु आदम रे ७ पाला नोले डा हनोक माइइशो मुर का बाकत। मेकोमी मोदेशो मुर आ पर्वम परमप्रभु यावेमी तुइकपाइइशो लोत्र पवा बाकत। मेकोमी “नेनीन, प्रभु नु आ योव्रशो हजार हजार जाकतेकम। हनोक कली हिंबू लोत्रमी एनोक देंनीम। उत्पती ५:२१

15 परमप्रभु यावे कली मटीब नेल्ल आन कली आन थमा मसुइकतीकेमी पशो मटितीके तपाइकनीम। परमप्रभु यावे रे डोन बाकब पापीपुकीम परमप्रभु यावे कली मार मार मरिम्शो लोत्र पामे, मेको आन कली निसाफ पशा, सजाइ गेचा, दे जाकतेकम” दे लोत्र पवा बाकत।

16 मेकोपुकी गन गन पाइब बाक्नीम। मेकोपुकीमी “गो श्येत जना जन बाक्नुड” दे गेनायो मग्येरथु, आन दला दाक्स पना पन बाक्नीम। ठेयब लोव्र पा, ठेयब लेशशो मुर बाक्नीम। मेकोपुकीमी आंम कली ठेयब सेल्सीचा कली मुर आन कुल कोव्रनीम।

बोल्यो थमा सुइक्ब दुमीन

17 आं दाक्शो लोकबपुकी, इं प्रभु येसु ख्रीस्त आ सोइशशोपुकीमी डोंइती देशो लोव्र ति फुकशा मिम्चा माल्नीनी।

18 मेकोपुकीमी इन कली “मेको नोले डा नाक्त शुक्शी लोव्र पाइनीम। परमप्रभु यावे कली मटिथु, आंम दला दाक्स पाइनीम” देतेकम। १तिमोथी ४:१; २पत्रुस ३:३

19 मेकोपुकीम मुर आन कली ब्रापाइक्नीम। परमप्रभु यावे कली ममिम्थु, परमप्रभु यावे आ सोक्त मपाइशो बाक्नीम। १कोरिन्थी २:१४

परमप्रभु कली ठेयब सेल्चा

20 आं दाक्शो लोकबपुकी, इन रिम्शो थमा सुइक्तीके बारपतीन। परमप्रभु यावे आ सोक्तीमी प्रार्थना पने। कलस्सी २:७; १थिस्सलोनिकी ५:११

21 परमप्रभु यावेम इन कली दाक्ब, दे मिम्ना मिम्न बाक्कीन। इं प्रभु येसु ख्रीस्तमी इन कली दाक्शा, शिशी पशा, इन कली गेना हना यो परमप्रभु यावे नु बाक्चा गेब, दे रिम्शा बाक्कीन।

22 का निक्शी थमा सुइक्ने मचाप्शो मुर आन कली ठीक पा थमा सुइक्तीके शेदीन।

23 का निक्शी कली मी रे फो फु गुंइशो खोदेशो पा प्रोनीन। का निक्शी कली शिशी पने, तन्न आन ग्रांया दिचा डा पाप क्येडा हिंशा, आन लुम्सीशो वासी यो मथिने। याकूब ५:९; प्रकाश ३:४

नोले डा लोव्र

24 येसु ख्रीस्तमी इन कली पाप मपाइब सेल्ने चाप्ब। इन कली दोस मताइब सेल्शा, ग्येरसीशा, परमप्रभु यावे आ छेडछेड आ डोंइती राप्पाइक्ने चाप्ब। १थिस्सलोनिकी ५:२३

25 परमप्रभु यावे का ला बाक्ब। मेकोमी इं प्रभु येसु ख्रीस्त आ पतीकेमी इं कली पाप रे प्रोंइतु। नेल्ल छेडछेड पाइशो, नेल्ल क्येडा ठेयब दुम्तीके, नेल्ल सक्ति नु नेल्ल अधिकार मेको केन बाक्ब। मेको डोंइती बाक्त। मुल यो बाक्ब। मिनु गेना हना यो बाक्ब। आमेन।

## प्रकाश

**ब्रेक्ब मुर:** एको किताब येसु आ शेंसीब यूहन्ना आ ब्रेक्शो बाक्ब। थमा सुइक्ब आन युम्तीके डा इतिहासम मोदेशो ब्रेक्शो बाक्त।

**गेना ब्रेक्शो:** इरेनेयुस, थमा सुइक्ब आन इतिहास ब्रेक्बमी “प्रकाश सासन पाइब दोमीतीयन आ सासन पशो नुप्ची ना ब्रेक्शो बाक्ब” देंब। मेको १४-१५ ए. डी. मेर बाक्त।

### मार ब्रेक्शो:

१. प्रभु येसु खीस्त नु मेको कली थमा सुइक्ब आन युम्तीके। प्रकाश १:- ३:-
२. प्रभु येसु खीस्त नु रागी रागी डा मुर प्रकाश ४:- - ११:१४
३. सैतान नु थमा सुइक्ब आन जोरी सत्रु प्रकाश ११:१५; - १४:२०
४. थमा सुइक्ब आन जोरी सत्रु बुशो प्रकाश १५:१; - १९:२१
५. येसु खीस्त नु आ राज्य प्रकाश २०:१; - २२:२१

### डोंइती डा लोत्र

१ परमप्रभु यावेमी येसु खीस्त कली “मार मार दुम्या चिकता, आ रागी डा वाइलीम वाइलपुकीमी तुइक्तमेक्ल” दे कोइताक्व। मिनु येसु खीस्तमी आ स्वर्ग डा गेय पाइब कली आ वाइल यूहन्ना आ बाक्तीके सोइक्ताक्व। मारदे सोइक्ताक्व देशा हना, मेको दुम्यशो लोत्र शेंथ सोइक्ताक्व।

२ मिनु गो, यूहन्नामी, परमप्रभु यावे आ लोत्र नेंता, येसु खीस्त आ पशो ताता। मिनु मेको नेल्ल आन सांकछी दुम्ती।

३ मिनु सु सुमी परमप्रभु यावेमी तुइक्पाइशो एको किताब डा लोत्र पढेनीमी, नेनीमी नु टीनीमी, मेको आसीक रशो नु ग्येरसीशो मुर दुम्नीम। मारदे हना मेको लोत्र दुम्यशो बाक्त। १यूहन्ना १:१-२; यूहन्ना २१:२४; प्रकाश २२:१०

### एसीया डा युम्तीके कली चिटी

४ गो यूहन्नामी एसीया डा येसु खीस्त कली थमा सुइक्ब ७ ओटा सहर डा थमा सुइक्ब आन युम्तीके डा शेंब आन कली चिटी ब्रेक्ताक्ड। मिनु मुल बाक्ब, डोंइती बाक्शो, नोले यो जाक्बमी नु परमप्रभु यावे आ ठेयब नित्तीके आ डोंइती बाक्ब ७ ओटा ठाउं डा परमप्रभु यावे आ सोक्तीमी इन कली “शिशो तशा नु थुं नाइशशा बाक्चा तामेक्ल” देताक्स। प्रस्थान ३:१४-१५; प्रकाश ३:१; प्रकाश ५:६

५ मिनु येसु खीस्तमी यो मो देंत। मिनु मेको सु बाक्ब देशा हना, परमप्रभु यावे आ देशो थमा पाइब सांकछी नु नेल्ल क्येडा डोंइती बेक्शो रे सेंसीशो नु रागी डा पिप आन कली सासन पाइब बाक्ब। येसु खीस्तमी ई कली दाक्शा, आ हुशेमी ई पाप रे प्रोंइतु। प्रकाश ३:१४; यूहन्ना १८:३७; १तिमोथी ६:१३

६ ई कली परमप्रभु यावे, आ आफ आ राज्य डा मुर सेल्शा, परमप्रभु यावे आ डोंइती राब्ब सेल्लु। मोपतीके आ छेडछेड नु सक्ति गेना हना यो बाक्ल, आमेन। प्रकाश ५:१०; प्रस्थान १९:६; १पत्रुस २:५,९

७ मिनु येसु खीस्त लेशशा, दोपा यीबा देशा हना, सरीड रे गोस्सुमी गिल्लीशा यीब। मिनु मुर नेल्लेमी मेको कली यिन यिन पशो ताडनीम। मेको कली साइक्पाइक्बपुकीमी यो ताडनीम। मिनु थर थर डा मुरपुकीम मेको कली तशा, रोंका पा डाक्नीम। एको थमा लोत्र बाक्ब। आमेन। मती २४:३०; जकरिया १२:१०; यूहन्ना १९:३७

८ परमप्रभु यावे मुल बाक्ब, डोंइती यो बाक्शो बाक्त। मिनु नोले यो जाक्ब। नेल्ल सक्ति पाइशशो परमप्रभु यावेमी “गो आल्फा नु ओमेगा नड” देंत। आल्फा नु ओमेगा माइशशो ग्रीक लोत्रमी डोंइती नु नोले डा अच्छेर बाक्नीस। प्रकाश २१:६; यसेया ४१:४; प्रकाश ४:८

### येसुमी यूहन्ना कली पपाइशशो गेय

९ मिनु गो इन लोकब यूहन्ना, येसु खीस्त कली थमा सुइक्ब नड। गो इन बुदी श्येत जशो परमप्रभु यावे आ राज्य डा मुर यो नड। मोपतीके श्येत जशा, इन खोंदेशो पा येसु खीस्त कली रिम्शा बाक्नुड। गो येसु आ सांकछी दुम्ती। मिनु परमप्रभु यावे आ लोत्र शेंताक्ड। मोपतीके मुरुमी आं कली पात्मोस माइशशो टापुमी लाइशशा प्रोंइतीमी।

१० मिनु गो परमप्रभु यावे आ नाक्त परमप्रभु यावे आ सोक्तीम बाक्ती। मिनु आं नोले तुराही ताप्शो खोंदेशो ठेयब सेंदा नेंता।

११ मेको सेंदामी आं कली “मार मार ताडनेवे, मेको नेल्ल कागजम ब्रेक्तो। मिनु ब्रेक्शा डा मिन, एसीया डा ७ ओटा सहर डा येसु खीस्त कली थमा सुइक्ब आन युम्तीके डा मुर आन कली सोइक्तो। मेको ७ ओटा सहर चहिं एफिसस, स्मिरना पेरागामोम, थिआटीरा, सारडीस, फिलाडेल्फीया नु लाओडीसीया नम” देंत।

१२ मिनु गो नु लोत्र पाइब कली कोत्रडु, दे बिर लेत्ती। लेशशा कोत्रडुनु, ७ ओटा सुन के दियारीम बती ब्रशो ताता।

१३ मेको ७ ओटा दियारी आन दातेमी मुर का बाक्शो खोंदेशो ताता। मेको मुर दोदेशो तांइसाक्व देशा हना, खोइली सम्म लाइशशो वा फेक्शो नु सुन के किप्तीके कुचुमी किप्शो बाक्त। प्रकाश २:१; दानीएल ७:१३

१४ मेको आ पिया नु आ चां बुश ऊन नु फुं खोंदेशो बुश तांइसाक्व। आ मिक्च हुरु पा ब्रशो मी खोंदेशो तांइसाक्व। प्रकाश २:१८; प्रकाश १९:१२

१५ आ खोइली याप्पाइशशा टल्केशो कांसा खोंदेशो तांइसाक्व। मिनु आ सेंदा ठेयब खोला आन रेयके खोंदेशो नेंसाक्व।

16 मिनू मेको आ ग्युरा गुडमी ७ ओटा सोरुल शेशो बाक्त। मिनू निम्फा गे क्योरतीक पाइश्शो हेश्शो तरवार का आ शोत्र रे गूत। मिनू आ कुल नाक्त डा नां खोदेशो पा कोत्रने मचाप्चा डा तांडसाक्व।

17 मिनू गोमी मेको मोदेशो तडानु, बेक्शो मुर खोदेब पा मेको आ खोइलीम गोल्ती। मिनू मेकोमी चहिं आ ग्युरा गुड आं तारी वोइश्शा “महिनो, गो नेल्ल क्येडा डोंइती नु नेल्ल क्येडा नोले डा नड। दानीएल ८:१८

18 ब्रोंइशा बाक्व नड। गो बेक्शा यो, लेंशा मबेक्चा डा पा ब्रोंइती। मिनू नरक नु बेक्शा लशो मुर आन बाक्तीक डा रोक्तीक सांचो गो नु बाक्व।

19 गे मार मार तवी, मेको ब्रेक्तो। गे मार ब्रेक्चा माल्नेवे देशा हना, मुल मार बाक्बा, नोले मार दुम्बा, मेको नेल्ल ब्रेक्तो।

20 मिनू आं ग्युरा गुडमी बाक्शो ७ ओटा सोरुल नु ७ ओटा खपीम बाक्शो सुन के दियारी आ खुइश्शो अर्थ मार बाक्व देशा हना, मेको आं गुडमी तशो ७ ओटा सोरुलपुकी मेको एसीया डा ७ ओटा सहर डा थमा सुडक्व आन युम्तीके डा शेंब नम। मेको ७ ओटा दियारी चहिं मेको एसीया डा ७ ओटा सहर डा थमा सुडक्व आन युम्तीके डा मुर नम” दे माडक्ती।

## 2

एफिसस कली चिठी

1 मिनू येसु ख्रीस्तमी आं कली एफिसस सहर डा थमा सुडक्व आन शेंब कली ब्रेक्पाइक्ती। एको आ ग्युरा गुडमी ७ ओटा सोरुल नु ७ ओटा सुन के दियारी आन दातेमी हिरब आ लोत्र बाक्व। प्रेरित १८:१९

2 मेकोमी “गो इन पशो गेय, इन फाल्शो श्येत नेल्ल तुइक्नुड। मिनू गे मरिम्शो मुर आन कली फाल्ने मचाप्नीनी। मिनू गे सोइश्शो, आं लोत्र शेंब दुम्बु पाइब मुर आन कली नाक्शा, जोल्फ बाक्नीम, दे तुइक्नीनी। १यूहन्ना ४:१

3 गे फाल्शा, आं कली थमा सुडक्तीनी। मोपा थमा सुडक्चा मदथु, आं परबम श्येत फाल्नीनी, दे गो तुइक्नुड। १तिमोथी ५:१२

4 तन्न गो इन कली लोत्र का पचा माल्नुड। मार लोत्र पचा माल्नुड देशा हना, डोंइती गे आं कली थमा पा दाक्ताक्नी। मुल चहिं डोंइती डा खोदेशो पा दाक्चा प्रोंइतीनी।

5 इन डोंइती डा आं कली दाक्शो मिम्तीने। इन थुं आं गे लेत्तीने। मिनू इन डोंइती डा पशो गेय पने। गे मेको दाक्चा डा गेय मपाइतीनी हना, गो इन बाक्तीके जाक्शा, इन दियारी आ बाक्तीके रे तिल्लुड।

6 तन्न इन गेय का रिम्शो बाक्व। गेपुकी निकोलाइटन आन शेंतीके डा गेय ग्रॉग्रा दीनीनी। गो यो ग्रॉग्रा दीनुड। भजन संग्रह १३९:२१

7 परमप्रभु यावे आ सोक्तीमी थमा सुडक्व मुर आन कली शेंशो लोत्र सु सुमीं नेने चाप्नीमी, मेकोमी नेन्मेक्ल। सु सुमी सैतान कली ग्रानीमी, मेको आन कली परमप्रभु यावे आ रूमी बाक्व ब्रोंइतीक रवा आ फल ब्वचा गेनुड” दे ब्रेक्पाइक्ती। प्रकाश २२:२; उत्पत्ती २:९

स्मिरना कली चिठी

8 मिनू येसु ख्रीस्तमी आं कली स्मिरना सहर डा थमा सुडक्व आन शेंब कली ब्रेक्पाइक्ती। मेकोमी “गो नेल्ल क्येडा डोंइती नु नेल्ल क्येडा नोले नड। गो बेक्शा यो ब्रोंइती” देंत। प्रकाश १:११; प्रकाश १:१८

9 मेकोमी “गो इन श्येत जशो तुइक्नुड। गे थमा पा प्रुडग बाक्नीनी, दे गो तुइक्नुड। तन्न गे इन थुम शोप पाइश्शो बाक्नीनी, दे यो तुइक्नुड। मरिम्शो लोत्र पाइब सु सु नमी देशा हना ‘यहूदी नकी’ देंकु पाइबपुकी सैतानमी शेंशो मुर नम। याकूब २:५; प्रकाश ३:९

10 मिनू मुल इन कली श्येत दुम्चाप्तु। तन्न महिनीने। नेनीन, मुल दियाबलस सैतानमी गे का निक्शी इन कली थुं थाम्चा कली जेल्खानम चोक्पाइक्व। गे १० नाक्त सम्म ला श्येत जाइनीनी। साइक्चाम्तेक्म हना यो, फाल्शा थमा सुडक्चा मप्रोनीन। मो पाइतीनी हना, गो इन कली गेना हना यो ब्रोंइशा बाक्तीक सिरपेच गेनुड। मती १०:१९, २८; प्रकाश ३:११; २तिमोथी ४:८

11 परमप्रभु यावे आ सोक्तीमी थमा सुडक्व मुर आन कली शेंशो लोत्र सु सुमीं नेने चाप्नीमी, मेकोमी नेन्मेक्ल। सु सुमी सैतान कली ग्रानीमी, मेको निक्शी खेयप बेक्चा ममाल्नीम। मिनू परमप्रभु यावेमी गेशो सजाइ यो मताइनीम” दे ब्रेक्पाइक्ती। प्रकाश २०:१४

पेरगामोम कली चिठी

12 मिनू येसु ख्रीस्तमी आं कली पेरगामोम सहर डा थमा सुडक्व आन शेंब कली ब्रेक्पाइक्ती। आ शोत्र रे निम्फा गे क्योरतीक पाइश्शो हेश्शो तरवार पाइश्शोमी

13 “इन बाक्तीक सहरम सैतान आ नित्तीके बाक्व, दे गो तुइक्नुड। गेपुकीमी ‘गो येसु ख्रीस्त आ मुर नकी’ दे आं कली थमा सुडक्चा मप्रोंइनी। मिनू इन सहरम सैतान आ नित्तीके बाक्मेनु, अन्टीपास माइश्शो आं कली मप्रोंइथु, थमा सुडक्व नु आं लोत्र शेंब बाक्त। मिनू मुरुमी मेको कली सैतान आ बाक्तीकेमी बाक्शा, साइक्तेक्म हना यो, गे आं कली थमा सुडक्चा मप्रोंइनी।

14 तन्न गो इन कली लोत्र का पचा माल्नुड। मार लोत्र पचा माल्नुड देशो हना, गे का निक्शीमी मरिम्शो गेय पाइतीनी। इन युम्तीके डा का निक्शीमी बालाम माइश्शो मुर आ शेंशो थमा सुइक्नीमी। बालाममी मार शेंताक्व देशा हना, डोंइती बालाक माइश्शो पिप कली इझाएल जात डा वोंइश मुर आन कली खतम सेल्लु। दोपा खतम सेल्लु देशा हना, चढेशो थोत्रक ब्वपाइक्तु। मिनू तेल्लेम पपाइक्तु। गन्ती ३१:१६; २पत्रुस २:१५; यहूदा :११

15 मिनू गे इन युम्तीकेमी निकोलाइटन आन शेंशो लोत्र का निक्शीमी थमा सुइक्नीमी।

16 मोपतीके इन थुं गो आं गे लेत्तीन। मलेत्ताक्नी हना, गो इन गुम्तीकेमी रीब पा जाक्नुड। मिनु आं शोत्र डा तरवारमी मेको नु लडाइ पाइनुड।

17 परमप्रभु यावे आ सोक्तीमी थमा सुइक्ब मुर आन कली शेंशो लोत्र सु सुमी नेंने चाप्नीमी, मेकोमी नेन्मेक्ल। मिनु सु सुमी सैतान कली ग्रानीमी, मेको आन कली खुइश्शा वोइश्शो मन्ना शोब्ले गेनुड। मिनु गोमी मेको ग्राब आन कली बुश हीरा का का गेनुड। मेको बुश हीरा तार हीरा ताइब आन नक नें ब्रेक्शो बाक्ब। मेको नें हीरा ताइबमी ला तुइक्नीम। अर्को मुरुमी चहिं मतुइक्नीम” दे ब्रेक्पाइक्ती। भजन संग्रह ७८:२४; यसैया ६२:२

थिआटीरा कली चिठी

18 मिनु परमप्रभु यावे आ तौमी आं कली थिआटीरा सहर डा थमा सुइक्ब आन शेंब कली ब्रेक्पाइक्ती। एको आ मिक्च हुरुर पा ब्रशो मी खोदेशो तांडसीशो नु आ खोइली याप्पाइश्शो टल्केशो कांसा खोदेशो तांडसीशो आ लोत्र बाक्ब। प्रेरित १६:१४; प्रकाश १:१४-१५

19 मेकोमी “गो इन पशो गेय तुइक्नुड। इन आं कली दाक्शो, इन थमा सुइश्शो, इन थमा सुइक्ब आन कली पशो गेय नु इन श्येत फाल्शो तुइक्नुड। गे डोंइती क्येडा शुश गेय पाइनीनी।

20 तन्न इन कली लोत्र का पचा माल्नुड। मार लोत्र पचा माल्नुड देशा हना, गे इजेबेल माइश्शो मीश मुर कली इन गुम्तीकेमी बाक्चा गेतीनी। इजेबेलमी ‘गो परमप्रभु यावेमी तुइक्पाइश्शो लोत्र पाइब नड’ देखु पा, आं गेय पाइब आन कली मरिम्शो पचा शेंताक्मी। मार मरिम्शो पचा शेंताक्मी देशा हना, तेल्लेम पचा नु मूर्ति कली चदेशो थोत्रक जचा ब्वचा दुम्ब, दे शेंताक्मी। २राजा ९:२२

21 गोमी मेको कली ‘इ थुं गो आं गे लेत्तो। इ तेल्लेम पचा ताइक्तो’ दे रिम्ताक्ड। मेकोमी आ थुं गो आं गे लेत्ता नु आ तेल्लेम पचा ताइक्ने मबीस।

22 मिनु गो मेको कली रोइ पाइक्नुड। मिनु मेको नु तेल्लेम पाइब आन तेल्लेम पचा प्रोंइशा, गो आं गे लेत्ने मबिस्साक्म हना, मेको आन कली यो ठेयब श्येत गेनुडमी।

23 आ आल आन कली मुर साइक्ब रोइम साइक्नुडमी। मेको आन श्येत जशा, बेक्शो तशा ‘गोम पाप्नु’ दे थमा सुइक्ब नेल्लेमी तुइक्नीमी। मिनु थमा सुइक्ब आन गुम्तीके डा मुर नेल्लेमी ‘येसु ख्रीस्तमी मुर आन थुं नु आन पशो तुइक्ब। मिनु नोले दोपा पामे, मोपा गेब’ दे तुइक्नीम। भजन संग्रह ७:१०; येरमीया १७:१०

24 तन्न थिआटीरा डा थमा सुइक्ब आन गुम्तीकेमी इजेबेल आ शेंशो मपाइबपुकी यो बाक्नीम। मेकोपुकीमी इजेबेल आ शेंसीब बुदी सैतान आ ठेयब गेय यो मतुइक्नीम। मिनु आं कली रिम्शो पा थमा सुइक्ब आन कली अर्को श्येत मगेनुड।

25 गे इन तुइश्शो गो मजाक्डा सम्म पना पन बाक्कीन। प्रकाश ३:११

26 सु सुमी सैतान कली ग्रानीमी, मेकोमी बेक्ची ना सम्म आं गेय पाइनीमी, गो मेको आन कली रागी रागी डा मुर आन कली सासन पतीके सक्ति गेनुड।

27 मिनु मेकोपुकीमी खप के ग्योब आन कली फलाम के कोक्केमी चोंइटा चोंइटा पशो बुद पा रागी डा मुर आन कली सासन पाइनीम। गो यो मोदेशो सक्ति आं आफ रे तशो नड। भजन संग्रह २:८-९

28 मिनु गोमी मेको सैतान कली ग्राब आन कली सुनी डा सुक्कुर सोरुल गेनुड।

29 परमप्रभु यावे आ सोक्तीमी थमा सुइक्ब मुर आन कली शेंशो लोत्र सु सुमी नेंने चाप्नीमी, मेकोमी नेन्मेक्ल” दे ब्रेक्पाइक्ती।

### 3

सारडीस कली चिठी

1 मिनु येसु ख्रीस्तमी आं कली सारडीस सहर डा थमा सुइक्ब आन शेंब कली ब्रेक्पाइक्ती। एको ७ ओटा ठांउ डा परमप्रभु यावे आ सोक्त नु ७ ओटा सोरुल नु बाक्ब आ लोत्र बाक्ब। मेकोमी “गो इन पशो गेय तुइक्नुड। गेपुकीमी चहिं ‘गो ख्रीस्त कली थमा सुइश्शा, ब्रोंइशा बाक्नीकी’ देंनीनी। तन्न इन थमा सुइक्तीके बेक्शो खोदेंब पा इप्शो बाक्ब। प्रकाश १:४

2 मोपतीके सेंशा बोक्कीन। इन बेक्चा चिक्शो थमा सुइक्तीके बारपतीन। गोमी इन गेय ताता। मेको इन गेय आं परमप्रभु यावे कली मगारनीम। लूका २२:३२

3 मिनु इन तशो नु इन नेंशो मिम्तीन। मेको कली मप्रेंथु, इन थुं गो आं गे लेत्तीन। गे मो मपाइतीनी हना, गो खुइ खोदेशो पा इन बाक्तीकेमी जाक्नुड। मिनु गो गेना जाक्नुडा, गे मतुइक्नीनी। १थिस्सलोनिकी ५:२

4 मिनु सारडीस सहर डा थमा सुइक्ब आन गुम्तीकेमी का निक्शी रिम्शो पा थमा सुइक्ब यो बाक्नीम। मेकोपुकीमी पाप मपाम, मोपा आन वा मलुम्शीशो बाक्ब। मारदे हना मेको आन नाक्त किंत डा गेय परमप्रभु यावे कली गारब। मोपतीके मेकोपुकी गो नु बुश वा फेक्शा, हिरचा शिरनीम। यहूदा :२३

5 सु सुमी सैतान कली ग्रानीमी, मेको आन कली मोपा बुश वा फेक्चा गेनुड। मिनु मेको आन नें परमप्रभु यावे नु ब्रोंइचा ताइब आन नें ब्रेक्शो किताब रे मक्याम्नुड। गोमी आं आफ नु आ स्वर्ग डा गेय पाइब आन डोंइती ‘मेको आं मुर नम’ देंनुड। प्रकाश ७:१३; लूका १०:२०; मत्ती १०:३२

6 परमप्रभु यावे आ सोक्तीमी थमा सुइक्ब आन कली शेंशो लोत्र सु सुम नेंने चाप्नीमी, मेकोमी नेन्मेक्ल” दे ब्रेक्पाइक्ती।

फिलाडेल्फीया कली चिठी



7 मिनू येसु ख्रीस्तमी आं कली फिलाडेलफीया सहर डा थमा सुइक्ब आन शेंब कली ब्रेक्पाइक्ती। मेको परमप्रभु यावे आ तौ, थमा पा पाप रे प्रोंडब, दाऊद आ राज्य डा सांचो थीबमी लाप्चो रोक्या डा मेरे सुइमी चोक्ने मचाप्नीमी। मिनू चोक्गा डा मेरे सुइमी रोक्ने मचाप्नीमी। यसैया २२:२२

8 मेकोमी “गो इन पशो गेय तुइक्नुड। गे इन सक्ति आइक्च बाक्त हना यो, आं देशो टीतीनी। मिनू गेपुकीमी ‘येसु ख्रीस्त कली मतुइक्नुड’ दे गेनायो मदेंनी। मोपतीके गो इन कली लाप्चो रोक्या वोइक्ता। मेको सुइमी चोक्ने मचाप्नीमी।

9 मिनू इन गुम्तीकेमी का निक्शीमी ‘यहूदी नकी’ दे जोल पाइनीमी। मेकोपुकी चहिं सैतान आ शेंशो मुर बाक्नीमी। नेनीन, गो मेको आन कली इन खोइलीमी बाप्शा सेउ पपाइक्नुड। गोमी इन कली दाक्नुड, दे मेको आन कली तुइक्पाइक्नुड। प्रकाश २:९; यसैया ४९:२३; यसैया ६०:१४

10 मिनू गे शुश श्येत फालशा, आं देशो लोत्र मप्रोंडनी। मोपतीके रागी नेल्ल डा मुर आन थुं थाम्या कली जाक्शो श्येत रे प्रोंडनन्नी। प्रकाश १४:१२; मत्ती ६:३३

11 मिनू गो फ्रा लेशशा यीनुड। थमा सुइक्चा मप्रोनीन। मोपा बाक्तीनी हना, सुइमी इन सिरपेच रोइक्ने मचाप्नीमी। प्रकाश २:१०

12 सु सुमी सैतान कली ग्रानीमी, गोमी मेको आन कली आं परमप्रभु यावे आ खिं डा थाम खोदेशो बोल्यो सेल्लुड। मिनू मेको गेना हना यो परमप्रभु यावे आ खिंमी बाक्नीमी। मिनू मेको मुर आन तारी आं परमप्रभु यावे आ नें, आं परमप्रभु यावे आ सहर आ नें नु आं नक नें ब्रेक्नुड। आं परमप्रभु यावे आ सहर चहिं नक यरूसलेम माइशो बाक्ब। मेको नक यरूसलेम आं परमप्रभु यावे आ बाक्तीक स्वर्ग रे यीब। प्रकाश १४:१; प्रकाश २१:२

13 परमप्रभु यावे आ सोक्तीमी थमा सुइक्ब आन कली शेंशो लोत्र सु सुमी नेंने चाप्नीमी, मेकोमी नेन्मेक्ल” दे ब्रेक्पाइक्ती।

लाओडीसीया कली चिठी

14 मिनू येसु ख्रीस्तमी आं कली लाओडीसीया सहर डा थमा सुइक्ब आन शेंब कली ब्रेक्पाइक्ती। एको आमन माइशो, दीगो पाइब परमप्रभु यावे आ सांकछी नु रागी नु मारेड मारेड सेल्ल आ लोत्र बाक्ब। कलस्सी २:१; कलस्सी ४:१३; २कोरिन्थी १:२०; प्रकाश १:५; कलस्सी १:१५

15 मेकोमी “गो इन पशो गेय तुइक्नुड। इन थमा सुइक्चा सिक्स यो ममाड, होश यो ममाड, कि सिक्स कि होश दुम्यो हना, रिम्यो दुम वा।

16 तन्न इन थमा सुइक्तीके गाम्या चिक्शो बाक्ब। मोपतीके गो इन कली तेशा ताइक्नुड।

17 मिनू गेपुकीमी ‘आंइ के शुश शोंप बाक्ब। गो शोंप पाइशो नकी। गो मारेड ममाल्नीकी’ देंनीनी। तन्न गो इन कली श्येत जाइब नु पुडग, मिक्च मताइब नु हेरा शिन्ना गाक्शा पुंडब खोदेशो दुम्यो ताता। १कोरिन्थी ३:१८; १कोरिन्थी ४:८

18 मोपतीके गो इन कली लोत्र का पाइनुड, मार लोत्र पाइनुड देशा हना, गे शोंप पाइशो दुम्या कली आं सुन ग्यापीन। मेको सुन याप्पाइशो बाक्ब। मेको ग्याप्तीनी हना, गे शोंप पाइशो दुम्नीनी। मिनू फेक्चा कली बुश वा ग्यापीन। मेको ग्याप्तीनी हना, मुने मदोक्नीनी। मिनू इन मिक्च, सापाइक्चा कली मिक्चीम खेक्तीके ग्यापीन। ग्याप्शा खेक्साक्नी हना, गे ताइनीनी।

19 गो आं दाक्शो मुर आन कली आन मरिम्यो पतीके कोंडनुड। नोले गो मेको आन कली श्येत गेशा, आल खोदेशो पा शेंनुड। इन थुं गो आं गे लेत्तीन। इन थमा सुइक्तीके बारपतीन। हितोपदेस ३:१२; १कोरिन्थी ११:३२; हिब्रू १२:६

20 नेनीन, गो लाडगाम जाक्शा ‘बाक्नी?’ दे ब्रेत्नुड। सु सुमी आं सेंदा नेंशा ‘ओवडीन’ देंनीमी, गो मेको नु बाक्थ ओव्रनुड। मिनू मेको नु काथा बाक्शा, खमे जाइनुड। यहन्ना १४:२३

21 सु सुमी सैतान कली ग्रानीमी, मेको आन कली आं टेयब नित्तीकेमी निप्पाइक्नुड। गो डोंइती प्राती। मोपा गो आं आफ आ टेयब नित्तीकेमी आफ नु निस्साक्यी। मत्ती १९:२८

22 परमप्रभु यावे आ सोक्तीमी थमा सुइक्ब आन कली शेंशो लोत्र सु सुमी नेंने चाप्नीमी, मेकोमी नेन्मेक्ल” दे ब्रेक्पाइक्ती।

## 4

परमप्रभु कली पशो कुम्सो

1 मिनू नोले सरीड गे कोंव्रता। मिनू मेकेर लाप्चो का रोक्या वोइशो ताता। मिनू डोंइती आं नेंशो तुराही ताप्शो खोदेशो टेयब सेंदा लेंशा नेंता। मेको सेंदामी “एक कुवो। नोले मार दुम्बा, गो इ कली कोंडनन” दे माइक्ती। प्रकाश १:१०

2 मिनू गो परमप्रभु यावे आ सोक्तीमी ब्रीती। स्वर्गमी टेयब नित्तीके वोइशो ताता। मेको टेयब नित्तीकेमी का निशो ताता। भजन संग्रह ४७:९; यसैया ६:१; इजीकीएल १:२६-२८

3 मेको टेयब नित्तीके बुश नु लल टल्केशो हीरा खोदेशो तांइसाक्व। मेको टेयब नित्तीके आ एर ओंथ वाक्श दाप्शो ताता। मेको वाक्श गिग हीरा खोदेशो तांइसाक्व।

4 मिनू टेयब नित्तीके आ एर ओंथ २४ ओटा आइक्च नित्तीकपुकी बाक्तेक्म। मेको नित्तीकपुकीमी बुश वा फेक्शो नु आन पियामी सुन के सिरपेच गुप्शो २४ जना शेंब खाल्पा निशो बाक्तेक्म। प्रस्थान १९:१६; प्रकाश १:४

5 मिनू मेको नित्तीक रे चिला दाप्शो तांइसाक्व। मिनू बुंबु पशो रेयके नु सेंदापुकी नेंसाक्व। मिनू टेयब नित्तीक आ डोंइती ७ ओटा ब्रशो तोव्रशी बाक्तेक्म। मेको ७ ओटा तोव्रशी चहिं परमप्रभु यावे आ ७ टाउम बाक्शो सोक्त बाक्तेक्म। प्रस्थान १९:१६

6 मिनू नित्तीक आ डोंइती समुन्द्र खोदेंशो दिंम का बाक्त। मेको दिंम सिसा खोदेंब टल्केशो तांडसाक्व। मिनू मेको ठेयब नित्तीके आ एर ओंथ आन रं नेल्ले शुश मिक्च पाइशशो ४ ओटा सेस जन्तु बाक्तेक्म। इजीकीएल १:५, १०, २२

7 मेको सेस जन्तुपुकी दोदेंब तांडसाक्म देशा हना, डोंइती डा जन्तु गुप्स खोदेंशो तांडसाक्व, अकों सेस जन्तु बोहोर खोदेंशो तांडसाक्व। नोले डा सेस जन्तु आ कुल मुर के खोदेंशो तांडसाक्व। मिनू नेल्ल क्येडा नोले डा सेस जन्तु बेरशो ककाकुली खोदेंशो तांडसाक्व। इजीकीएल १०:१४

8 मिनू मेको सेस जन्तु ६, ६ ओटा फ्रां पाइशशो बाक्तेक्मे। मेको आन फ्रां नेल्ल नु आन रं नेल्लेमी मिक्च पाइशशो बाक्तेक्म। मिनू मेकोपुकी नाक्दो नाक्त परमप्रभु यावे कली कुम्सो पना पन बाक्बाक्तेक्म। मार कुम्सो पाइबाक्तेक्म देशा हना, “परमप्रभु यावे, गे का ला परमप्रभु ननी। गे नेल्ल सक्ति पाइशशो बाक्नीनी। गे डोंइती बाक्शो बाक्तीनी। मुल यो बाक्नीनी। मिनू नोले यो जाक्नीनी” दे कुम्सो पना पन बाक्बाक्तेक्म। यसैया ६:२-३; प्रस्थान ३:१४

9 मोपा मेको ४ ओटा सेस जन्तुम गेना हना यो ब्रोंइशा बाक्ब ठेयब नित्तीकेमी निप्ब कली “गे छेडछेड, मान ताइब नु रिमशो पाइब बाक्नीनी” देंमानु,

10 मेको २४ जना शेंब खाल्पामी मेको ठेयब नित्तीकेमी निप्ब आ डोंइती आन पोक्च थेक्शा सेउ पाप्तेक्म। मिनू गेना हना यो ब्रोंइशा बाक्ब कली मान पाप्तेक्म। मिनू मेकोपुकीमी आन सिरपेच पुइशशा, मेको ठेयब नित्तीकेमी निप्ब आ डोंइती वोइशशा

11 “गे प्रभु, आंइ परमप्रभु यावे ननी। गे सक्ति पाइशशा, छेडछेडम बाक्शा, मान ताइब बाक्नीनी। मारदे हना गे मारेइ मारेइ सेलतीनी, मोपा इन दाक्शा सेल्लो मुल सम्म बाक्ब” दे कुम्सो पना पन बाक्तेक्म।

## 5

छाप थोक्शो कागज

1 मिनू गो मेको ठेयब नित्तीकेमी निप्ब आ ग्युरा गुइमी ओल्लो कागज का शेशो ताता। मेको कागजम निप्फा गे ब्रेक्शो बाक्त। मिनू मेको कागज ७ ओटा छाप थोक्शा, प्राक्ने मचाप्चा डा सेल्लो बाक्त। प्रकाश ४:३; इजीकीएल २:१-१०

2 मिनू गो सक्ति पाइशशो परमप्रभु यावे आ स्वर्ग डा गेय पाइब का ताता। मेकोमी ठेयब सेंदामी “सुमी मेको ७ ओटा छाप प्रुइशशा, कागज प्राक्ने चाप्चा?” दे हिल्लो पाप्तु।

3 मिनू स्वर्गमी, रागीमी नु रागी आगाम बाक्बपुकीमी सुइमी मेको कागज प्राक्ने मचबेम, कोवने यो मचबेम।

4 मोपतीके गो शुश डाक्ती। मारदे हना सुइमी मेको कागज प्राक्ने मचबेम, कोवने यो मचबेम।

5 मिनू मेको शेंब खाल्पा कामी आं कली “मडाक्को। मेको गुप्स, यहूदा आ थर डा पिप दाऊद आ खिं डा बाक्ब। मेकोमी सैतान कली ग्रात। मोपा मेको कागज डा ७ ओटा छाप पुइशशा प्राक्ने चाप्च” देंत। उत्पत्ती ४९:९-१०; यसैया ११:१

पाठा कली नक कुम्सो पशो

6 मिनू गोमी ठेयब नित्तीके, ४ ओटा सेस जन्तु नु शेंब खाल्पा आन दातेमी क्योरशो पाठा खोदेंशो पा दोक राप्शो ताता। मेको पाठा के ७ ओटा प्रोव नु ७ ओटा मिक्च बाक्त। मेको मिक्च चहिं परमप्रभु यावेमी रागी रागीमी सोइशशो परमप्रभु यावे आ ७ ओटा सोक्त बाक्तेक्म। यसैया ५३:७; यहूदना १:२९

7 मिनू मेको पाठामी मेको ठेयब नित्तीकेम निप्ब आ ग्युरा गुइ रे मेको कागज ताक्तु।

8 मोपा ताक्गानु, सेस जन्तु नु शेंब खाल्पापुकी पाठा आ डोंइती पोक्च थेक्शा बाप्तेक्म। मेकोपुकीमी ठेयब ताप्तीके नु सुन के थनौरो कुरशो बाक्तेक्म। मिनू सुन के थनौरो चहिं धूपमी ब्रीशो बाक्तेक्म। मेको धूपमी ब्रीशो थनौरो चहिं थमा सुइक्ब मुर आन मान पशो नु पुंइशो लोव बाक्तेक्म।

9 मिनू मेकोपुकीमी पाठा कली नक कुम्सो का पाप्तेक्म। मार नक कुम्सो पाप्तेक्म देशा हना “मेको कागज ताक्ने नु प्राक्ने चाप्च, गे का ला ननी। मारदे हना गे मुर आन कली परमप्रभु यावे आ नेक्शा बाक्पाइक्चा कली ग्याप्तीनी। दोपा ग्याप्तीनी देशा हना, साइक्चा पुंइसीशा, इन हुश शाइशशा ग्याप्तीनी। मिनू गे मार मुर ग्याप्तीनी देशा हना, नेल्ल थर रे, नेल्ले लोव रे, नेल्ल जात रे नु नेल्ल रागी रे मुरपुकी ग्याप्तीनी। भजन संग्रह ३३:३

10 मिनू गे मेको आन कली परमप्रभु यावे आ राज्य डा पिप नु आ डोंइती राप्ब सेलतीनी। मिनू रागी नेल्ल कली सासन पाइब यो सेलतीनी” दे कुम्सो पाप्तेक्म। प्रकाश १:६; प्रस्थान १९:६

पाठा कली मान पशो

11 मिनू मेको ठेयब नित्तीके गे कोवना कोवना बाक्डानु, सेस जन्तु नु शेंब खाल्पा आन एर ओंथ शुश परमप्रभु यावे आ स्वर्ग डा गेय पाइब आन सेंदा नेता। मिनू मेकोपुकी गिश बाक्तेक्म देशा हना, हजार हजार, लाख लाख बाक्तेक्म। हिब्रू १२:२२

12 मिनू मेकोपुकीमी “मेको साइक्चा पुंइसीशो पाठा का ला सक्ति पाइशशो, शोंप पाइशशो, जोक्तीक तुइक्तीक, बोल, मान, छेडछेड नु रिमशो पाइब बाक्नीनी देंचा शिरशो बाक्ब” दे ठेयब सेंदामी देंतेक्म। इतिहास २९:११; फिलिप्पी २:९-१०

शुश मुह्म मान पशो

13 मिनू स्वर्गमी बाक्ब, रागी नु रागी आगाम बाक्ब, समुन्द्र तारी नु आगाम बाक्ब नेल्लेमी “गेना हना यो ठेयब नित्तीकेमी निप्ब नु पाठा कली गे रिमशो पाइब बाक्नीनी, मान, छेडछेड ताइब नु सासन पाइब बाक्नीनी” देंशो नेता।

14 मिनु मेको ४ ओटा सेस जन्तुमी “आमेन” दैतेक्म। मिनु मेको खाल्पापुकीमी बाप्शा सेउ पाप्तेक्म।

## 6

पाठामी छाप प्राक्शो

1 मिनु मेको पाठामी मेको कागज रे ७ ओटा छाप रे का प्राक्शो ताता। मिनु सेस जन्तु कामी बुंबु पशो खोदेशो पा “पिवो” दे ब्रेशो नेता।

2 मिनु गो बुश शारा का ताता। मेको शारा डोइक्बमी लिब्रा कुरशो बाक्त। मेको कली सिरपेच गेशो बाक्त। मिनु मेको ग्राना ग्रान गाक्त। जकरिया ६:१-८

3 मिनु पाठामी मेको लीशो ६ ओटा छाप रे का प्राक्गानु, अर्को सेस जन्तुमी “पिवो” दे ब्रेशो नेता।  
4 मिनु गो अर्को शारा का ताता। मेको शारा चहिं शुश लल बाक्त। मिनु शारा डोइक्ब कली रागी डा मुर आन दुशा बाक्तीके नेल्ल रोइक्चा कली नु मुर क्योरमुपाइक्चा कली ठेयब चुक्ब गेशो बाक्त।

5 मिनु पाठामी मेको लीशो ५ ओटा छाप रे का प्राक्गानु, अर्को सेस जन्तुमी “पिवो” दे ब्रेशो नेता। मिनु गो क्येर शारा का ताता। मेको शारा डोइक्बमी तुला का ग्याइशो बाक्त।

6 मिनु गो मेको ४ ओटा सेस जन्तु आन दातेमी सेंदा कामी “काबु डा गेय कली माना निकशी चेरब फस गाल्च माल्ताक्व। मिनु काबु डा गेय कली माना सां क्योत्रज फस गाल्च माल्ताक्व। तेल नु अङ्गुर शांबु कली चहिं मारेइ मपचा” देशो नेता।

7 मिनु पाठामी ४ ओटा लीशो छाप रे का प्राक्गानु, नोले डा सेस जन्तुमी “पिवो” देशो नेता।

8 मिनु गो हौ शारा का ताता। मिनु मेको शारा डोइक्ब आ नें चहिं साइक्पाइक्ब नु बेक्पाइक्ब बाक्त। मिनु रागी डा बेक्शो मुरपुकीमी मेको आ नोले खोइक्तेक्म। मिनु मेको कली रागी डा ४ भाग डा भाग का मुर आन कली साइक्पाइक्चा, दे अधिकार गेशो बाक्त। दोपा साइक्पाइक्चा गेशो बाक्त देशा हना, कोइ आन कली तरवारम साइक्पाइक्चा, कोइ आन कली अन्कालम बेक्पाइक्चा, कोइ आन कली मुर साइक्ब रोइ पा बेक्पाइक्चा नु कोइ आन कली जन्तुमी साइक्पाइक्चा, दे अधिकार गेशो बाक्त। इजीकीएल १४:२१

9 मिनु पाठामी मेको लीशो छाप सां रे का प्राक्गानु, गो चढेतीके आगाम शुश मुर आन कली ताता। मेकोपुकी परमप्रभु यावे आ लोत्र टिचा कली नु अर्को आन कली येसु खीस्त परमप्रभु यावे आ तौ बाक्ब, दे शेंचा आ पर्बम साइक्चा पुंडसीशो मुर बाक्तेक्म।

10 मिनु मेकोपुकीमी ठेयब सेंदामी “परमप्रभु, गे का ला परमप्रभु नु थमा पा नेल्ल आन कली सासन पाइब बाक्नीनी। गेना आंड कली साइक्ब आन कली निसाफ पाइनीनी? गेना रागीम बाक्ब आन कली क्येक्क लेत्नीनी?” दैतेक्म।

11 मिनु परमप्रभु यावे आ स्वर्ग डा गेय पाइबमी मेको आन कली बुश वा का का फेक्चा कली गेपु। मिनु मेकोमी मेको आन कली “इच्का रिम्दीन, अर्को इन खोदेशो पा येसु आ गेय पाइब नु अर्को थमा सुइक्ब लोकब इन बुदी साइक्चा पुंडसीमा सम्म रिम्दीन” दैत।

12 मिनु पाठामी मेको लीशो छाप निकशी रे का प्राक्गानु, ठेयब खिनु कुत। मिनु नां कुखी खोदेशो क्येर दुम्त। तास्ला चहिं हुश खोदेशो लल दुम्त। यसैया २४:२१-२३; योएल ३:३-४; मत्ती २४:२९

13 मिनु ठेयब फशेमी फोत्रशी आ ममीशो गेडा तोक्शो खोदेब पा सरीड डा सोरुलपुकी रागीमी दोक्तेक्म।

14 मिनु सरीड ओल्शो कागज खोदेशो पा लाक्तु। डांडा, टापु नेल्ल याक्साक्म। यसैया ३४:४

15 मेना रागी डा पिपपुकी नु ठेयब मुरपुकी, फौज डा कप्तानपुकी, शॉप पाइशो नु बोल्यो मुरपुकी, वाइलीम वाइल नु मुर नेल्ल पहाड डा सेरथे फुल्लु नु पुक्खीमी खुइसाक्म। यसैया २:१०,१९

16 मिनु पहाड नु सेरथे फुल्लु कली “गो आंड कली सुक्की। मेको ठेयब नित्तीकेमी निप्ब नु पाठा आस गाइक्चा रे आंड कली खुइक्तीकी। लूका २३:३०

17 मारदे हना मेको आस गाइक्ची नाक्त जाक्त। सुइ मेको आस डोंइती राप्ने मचाप्नीम” दे ठेयब सेंदामी ग्रीतेक्म। आमोस ५:१८; रोमी २:५; मलाकी ३:२

## 7

इसाएली छाप थोक्सीशो

1 मिनु नोले गो ४ जना परमप्रभु यावे आ स्वर्ग डा गेय पाइबपुकी रागी डा ४ कुनामी राप्शो तातामी। मेकोपुकी रवा आ सफा काइ यो महिम्पाइक्चा, रागी नु समुन्द्रमी फश मपपाइक्चा कली राप्शो बाक्तेक्म। दानीएल ७:२

2 मिनु अर्को परमप्रभु यावे आ स्वर्ग डा गेय पाइब का नां दाप्तीके रे कुशो ताता। मिनु गेना हना यो ब्रोंइब परमप्रभु यावे आ छाप मेको नु बाक्शो बाक्त। मेकोमी रागी नु समुन्द्र बिग्रेचा कली अधिकार तशो ४ जना परमप्रभु यावे आ स्वर्ग डा गेय पाइब आन कली ठेयब सेंदामी

3 “गोपुकीमी आंड परमप्रभु यावे आ वाइलीम वाइल आन कुप्फीमी छाप मथोक्शो सम्म रागी, समुन्द्र नु रवा आन कली मबिग्रेने” दैत। प्रकाश ९:४; इजीकीएल ९:४,६

4 मिनु गिश मुरपुकी छाप थोक्चा पुंडसीशो बाक्तेक्म देशा हना, इसाएली आन १२ थर डा लाख का ४४ हजार मुर छाप थोक्चा पुंडसीशो बाक्तेक्म। मिनु इसाएली आन थर डा तेको तेको बाक्तेक्म देशा हना, प्रकाश १४:१,३

5 यहूदा आ थर रे १२ हजार,  
रूबेन आ थर रे १२ हजार,

गाद आ थर रे १२ हजार,  
 6 आशेर आ थर रे १२ हजार,  
 नाप्ताली आ थर रे १२ हजार,  
 मनस्से आ थर रे १२ हजार,  
 7 सिमियोन आ थर रे १२ हजार,  
 लेवी आ थर रे १२ हजार,  
 इस्साकार आ थर रे १२ हजार,  
 8 जबूलन आ थर रे १२ हजार,  
 योसेफ आ थर रे १२ हजार नु  
 बेन्यामीन आ थर रे १२ हजार मुरपुकी छाप थोक्या पुंडसीशो बाक्तेकम।

अर्को रागी डा मुर

9 मिनु नोले हिक्वे मचाप्या डा पा रागी रागी नेल्ल डा, जात नेल्ल डा, थर नेल्ल डा मुर नेल्ल नु लोत्र नेल्ल डा मुर ठेयब नित्तीकेमी निपब नु पाठा आस डोंइती राप्शो तातामी। मेकोपुकीम बुश वा फेकशो बाक्तेकम। मिनु आन गुइमी खजूर रवा आ राशी शेशो तातामी।

10 मिनु मेकोपुकीमी परमप्रभु यावे नु पाठा आस कली “मेको ठेयब नित्तीकेमी निपब आंइ परमप्रभु यावे नु पाठामी ला पाप रे प्रोइने चाप्नीस” दे ठेयब सेंदामी ग्रीतेकम।

11 मिनु परमप्रभु यावे आ स्वर्ग डा गेय पाइब नेल्ले, ठेयब नित्तीके, शेंब खाल्पा नु मेको ४ ओटा सेस जन्तु आन एर ओंथ बाक्तेकम। मिनु मेको नेल्लेमी ठेयब नित्तीकेमी निशशो परमप्रभु यावे आ डोंइती खुम्की पा बाप्शा, परमप्रभु यावे कली मान पाप्तेकम।

12 मेकोपुकीमी “आमेन। नेल्ल आसीक गेचा नु छेडछेड, जोक्ब तुडक्ब थुं, रिम्शो पाइब, मान सक्ति नु सासन पतीके नेल्ल गेना हना यो आंइ परमप्रभु यावे केन बाक्ल। आमेन” दे नेल्लेमी देतेकम।

13 मिनु मेको शेंब खाल्पा कामी आं कली “मेको बुश वा फेकशो मुरपुकी सु नमी? ते रे जाक्मा?” दे हिल्लो पती।

14 मिनु गोमी “हजुर, गो मतुडक्नुड, गे तुडक्नीनी” देंती। मिनु मेको खाल्पामी “मेकोपुकी ठेयब श्येत रे जाक्तेकम। मिनु मेको आन मरिम्शो पतीके लुम्सीशो वा पाठा आ हुशेमी मुरतीके बुश दुम्त। मती २४:२१; प्रकाश १२:११

15 मो दुम्तीके मेकोपुकी परमप्रभु यावे आ ठेयब नित्तीके आ डोंइती बाक्नीम। मिनु नाक्दो नाक्त परमप्रभु यावे आ खिंमी परमप्रभु यावे कली गेय पाइनीम। मिनु ठेयब नित्तीकेमी निपबमी मेकोपुकी नु बाक्शा, मेको आन कली कोत्रब।

16 मुल मेकोपुकी लेंशा शोत्रलु मबेक्नीम। तूतु मदाक्नीम। नां नु अर्को रापमी मेको आन कली गेनायो मनापब। यसैया ४९:१०

17 मारदे हना मेको ठेयब नित्तीके आ दातेमी बाक्शो पाठामी मेको आन कली कोत्रशा, गोठला पाइब। मिनु मेकोमी मेको आन कली ब्रोंइचा गेब ब्वाक्कु बुक्तीके कोइब। मोपा परमप्रभु यावेमी मेको आन प्रेक्कु फिक्ब” देंत। भजन संग्रह २३:२; प्रकाश २१:४; यसैया २९:८

## 8

पाठामी नोले डा छाप प्राक्शो

1 मिनु पाठामी ७ ओटा छाप रे नेल्ल क्येडा नोले डा छाप प्राक्गानु, आधा घन्टा सम्म स्वर्गमी सिक्सी पा काइ रेयके मपाम। हबक्कु २:२०

2 मिनु नोले गो ७ जना परमप्रभु यावे आ स्वर्ग डा गेय पाइबपुकी परमप्रभु यावे आ डोंइती राप्शो तातामी। मिनु मेकोपुकीमी तुराही का का ताक्तेकम। मती २४:३१

3 मिनु अर्को परमप्रभु यावे आ गेय पाइब का जाक्शा, चढ़ेतीक आ नेक्था राप्त। मेकोमी सुन के थनौरो कुरशो ताता। मिनु मेकोमी शुश धूप ताक्तु। मार पचा कली ताक्तु देंशा हना, थमा सुइक्ब आन परमप्रभु यावे कली मान पशो नु पुंडशो लोत्र सुन के चढ़ेतीकेमी ब्वाइक्चा कली ताक्तु।

4 मिनु परमप्रभु यावे कली मान पा पुंडशो लोत्र नु मेको धूप आ कुन परमप्रभु यावे आ स्वर्ग डा गेय पाइब आ गुइ डा थनौरो रे परमप्रभु यावे आ डोंइती लत।

5 मिनु नोले मेको परमप्रभु यावे आ स्वर्ग डा गेय पाइबमी धूप चढ़ेतीके डा मी लाइशशा, मेको थनौरोमी कुर पाप्तु। मिनु रागीमी ताइक्ताक्व। मिनु रागीमी बुंबु पाप्तु, शुश रेयके पाप्तु। चिला पा खिनु कुत। इजीकीएल १०:२

डोंइती डा ४ ओटा तुराही

6 मिनु मेको ७ ओटा तुराही शेयब परमप्रभु यावे आ स्वर्ग डा गेय पाइबपुकीमी तुराही ताप्या चिक्ताकम।

7 मिनु डोंइती डा तुराही शेयब परमप्रभु यावे आ स्वर्ग डा गेय पाइबमी ताप्तु। मोपा तबानु, सरीड रे रागी तारी हुश ब्वांइसीशो मुप्स नु मी यित। मिनु रागी के भाग सां डा भाग का, रवा आन भाग सां डा भाग का नु घांस नेल्ल दुप्शा नेक्तु। प्रस्थान १:२३-२६

8 मिनु लीशो ६ जना परमप्रभु यावे आ स्वर्ग डा गेय पाइब कामी तुराही ताप्तु। मोपा तबानु, ठेयब मी ब्रशो डांटा खोदेशो समुन्द्रमी ताइशशो ताता। प्रस्थान ७:२०-२१

9 मिनु समुन्द्र के भाग सां डा भाग का हुश दुम्त। मेकेर बाक्ब जन्तु नु डांइपुकी भाग सां डा भाग का बेक्तेकम। मिनु जाजपुकी भाग सां डा भाग का खतम दुम्तेकम।

10 मिनु लीशो ५ जना परमप्रभु यावे आ स्वर्ग डा गेय पाइब कामी तुराही ताप्तु। मिनु सरीड रे मी ब्रशो रांको खोदेशो ठेयब सोरुल खोला इनार नु ब्वाक्कु बुक्तीके डा भाग सां डा भाग का तार दोक्त। यसैया १४:१२

11 मेको सोरुल आ नें कशो बाक्त। तेकेर मेको सोरुल दोक्मे, मेकेर डा ब्वाक्कु कशो दुम्त। मिनु शुश मुरपुकी मेको कशो दुम्शो ब्वाक्कु तूशा बेक्तेक्म।

12 मिनु लीशो ४ जना परमप्रभु यावे आ स्वर्ग डा गेय पाइब डा कामी तुराही ताप्तु। मिनु नां तास्ला नु सोरुल आन भाग सां डा भाग का खतम दुम्तेक्म। मोपा छेडछेड डा भाग सां डा भाग का छिडछिड दुम्त। नाक्त डा भाग सां डा भाग का यो छिडछिड दुम्त। मिनु नाक्दो डा भाग सां डा भाग का यो छिडछिड दुम्त। प्रकाश ६:१२; प्रस्थान १०:२१

13 मिनु नोले ककाकुली का सरीडमी बेरशो ताता। मेकोमी ठेयब सेंदामी “मुल परमप्रभु यावे आ स्वर्ग डा गेय पाइब सांमी तुराही ताप्चा लीतेक्म। मेको आन ताप्चो रेयकेमी रागी डा मुर आन कली थम हिंचा डा दुम्चाप्तु। आवी आवी आवी, तुराही ग्रीशोमी रागी डा मुरपुकी शुश श्येत जाइनीम” दे ग्रीशो नेता।

## 9

लीशो तुराही सां डा निक्शी

1 मिनु लीशो ३ जना परमप्रभु यावे आ स्वर्ग डा गेय पाइब कामी तुराही ताप्तु। मिनु गोमी सोरुल का सरीड रे दोक्शो ताता। मेको सोरुलमी ठेयब दुइशो, पुं मपाइशो ढोडोडगा डा लाप्चो रोक्तीके सांचो ताक्तु।

2 मिनु मेकोमी ठेयब दुइशो पुं मपाइशो ढोडोडगा डा लाप्चो रोक्कानु, कुन गूत। मेको कुन ठेयब मी आ कुन खोदेब तांडसाक्म। मेको कुन गूमेनु, नां नु सरीड छिडछिड दुम्त। योएल २:२,१०

3 मिनु मेको कुन रे माले खोदेशो रागीमी गूतेक्म। मेको आन सक्ति रागी डा बिच्छी आन के खोदेशो बाक्त।

4 मिनु मेको आन कली “मेको रागी डा घांस नु रवा डा सफा मबिगेने, परमप्रभु यावे आ छाप कुप्फीमी मथोक्शो मुर आन कली ला श्येत गेने। प्रकाश ७:३

5 मिनु मेको आन कली मसतीन, तन्न ५ महिना सम्म श्येत गेने” देशो नेता। मेको श्येत चहिं बिच्छीमी मुर आन कली क्राइशो खोदेशो बाक्म।

6 मिनु मोदेशो दुम्मेनु, मुरपुकी बेक्चा दाक्नीम। तन्न बेक्ने मचाप्नीम। प्रकाश ६:३६

7 मिनु मेको माले आन रां दोदेशो तांडसाक्म देशा हना, लडाइ पचा कली ठीक पा वोइशो शारा खोदेशो तांडसाक्म। मेकोपुकी सुन के सिरपेच खोदेशो गुप्शो बाक्तेक्म।

8 मेको आन चां मीश मुर आन चां खोदेशो बाक्त। मेको आन खुइ गुप्स आन खुइ खोदेशो बाक्त।

9 मेको आन कुचु डा फेक्तीके फलाम के खोदेशो बाक्त। मिनु मेको आन बेरशो रेयके चहिं शुश शारामी बग्गी कीशा, लडाइ पथ लशो रेयके खोदेशो नेंसाक्म।

10 मेको आन मीलुमी बिच्छी के खोदेशो फूरो बाक्त। मेको आन श्येत गेतीके या बाक्त। मिनु मुर आन कली ५ महिना सम्म श्येत गेचा अधिकार तशो बाक्तेक्म।

11 मेको आन के पिप का बाक्त। मेको पिप सु बाक्त देशा हना, दुइशो, पुं मपाइशो ढोडोडगा डा गेय पाइब बाक्त। मेको पिप आ नें हिलू लोवमी अब्बादोन नु ग्रीक लोवमी अपोल्लीयोन देंनीम। मेको निम्फा आस अर्थ चहिं खतम पाइब बाक्म।

12 डोंइती डा हिंचा डा श्येत नुप्त। मिनु अर्को हिंचा डा श्येत निक्शी बाक्नीस।

13 मिनु लीशो निक्शी परमप्रभु यावे आ स्वर्ग डा गेय पाइब कामी तुराही ताप्तु। मिनु गो परमप्रभु यावे आ डोंइती वोइशो सुन के सेल्शो चढेतीके आ ४ सुर रे सेंदा गूशो नेता। प्रकाश ८:३; प्रस्थान ३९:१-३

14 मेको सेंदामी मेको तुराही ताप्ब परमप्रभु यावे आ स्वर्ग डा गेय पाइब कली “युफेटीस माइशो ठेयब खोला आ नेक्थाम पाइशो ४ जना सैतान आ गेय पाइब आन कली प्रोंइमी” देशो नेता। प्रकाश १६:१२

15 मिनु मेको परमप्रभु यावे आ स्वर्ग डा गेय पाइबमी मेको आन कली प्रोंइतु। मेकोपुकी डोंइती मारदे पाइशो वोइशो बाक्तेक्म देशा हना, परमप्रभु आ देशो घन्टा, नाक्त, महिना नु बर्स नेल्ल रागी डा मुरपुकी भाग सां डा भाग का साइक्चा, दे ठीक पा वोइशो बाक्तेक्म। प्रकाश ८:-

16 मिनु गोमी “शारा डोइशो लडाइ पाइबपुकी २० करोड बाक्नीम” देशो नेता।

17 मिनु मेको शारा नु शारा डोइक्बपुकी दोदेशो तातामी देशा हना, मेको शारा डोइक्ब आन कुचुमी पीतल के फेक्तीके फेक्शो तातामी। मेको फेक्तीके मी खोदेशो लल गिम गिम नु हौ ताता। मेको शारा आन पिया गुप्स आ पिया खोदेशो ताता। मिनु आन शोव रे मी, कुन नु गन्धक गूत।

18 मिनु मेको मी, कुन नु गन्धक रे मुरपुकी भाग सां डा भाग का बेक्तेक्मे।

19 मिनु मेको शारा आन मीलु चहिं बुस्स आ पिया खोदेशो तांडसाक्म। मोपतीके मेको शारा आन बोल शोत्र नु मीलुमी बाक्त। मिनु शोत्र नु मीलुमी मुर आन कली श्येत गेम्तेक्म।

20 मिनु मबेक्थु लीशो मुरपुकीमी मेको आन मरिस्थो पचा मप्रोनेम। मार मरिस्थो पाम्तेक्म देशा हना, वोल नु देवी देवता आन कली खुम्की पा सेउ पाम्तेक्म। मताइब, मनेंब, मगाक्ब सुन, चांदी, कांसा, फुल्लु नु शी के सेल्शो मूर्ति आन कली खुम्की पा सेउ पाम्तेक्म। प्रकाश १६:९

21 मिनु मेकोपुकीमी मुर साइक्चा, टुना मुना पचा, चिन्ता बाक्चा, तेल्लेम पचा नु खुइ पचा मप्रोनेम। मिनु आन थुं यो परमप्रभु यावे गे मलेत्तेम।

## 10

यूहन्नाम इन्चीली किताब जशो

- 1 मिनु नोले गोमी सक्ति पाइश्शो परमप्रभु यावे आ स्वर्ग डा गेय पाइब का गोस्सुमी गिल्सीशा, रागीमी यिशो ताता। मेको आ पियामी वाक्श दाप्शो बाक्त। मिनु मेको आ कुल नां खोदेशो नु आ खोइली हुरुर पा ब्रशो मी के थाम खोदेशो तांइसाक्व।
- 2 आ गुइमी इन्चीली प्राक्शो किताब शेशो बाक्त। मेको आ ग्युरा खोइली समुन्द्र तार नु आ पेरा खोइली चहिं रागी तार थेक्शा राप्त।
- 3 मेकोमी गुप्स खोदेशो पा टेयब सेंदामी ग्रीत। मोपा ग्रीमेनु, ७ ओटा बुंबुमी रेयके पाम्तेक्म। भजन संग्रह २९:३-९
- 4 मेको ७ ओटा बुंबु आ लोत्र ब्रेक्चाडानु, सरीड रे सेंदा कामी “मेको ७ ओटा बुंबु आन लोत्र मब्रेक्तो, मुर आन कली मशेंदो” देशो नेता। दानीएल १२:४,९
- 5 मिनु डोंइती तशो परमप्रभु यावे आ स्वर्ग डा गेय पाइब टेयब समुन्द्र नु रागीम खोइली थेक्बमी कसम जचा कली आ ग्युरा गुइ सरीड गे पोक्तु।
- 6 मिनु मेकोमी दोपा कसम जाप्तु देशा हना, गेना हना यो ब्रोंइशा बाक्ब, सरीड नु सरीडम बाक्ब नेल्ल सेल्ब, रागी नु रागीम बाक्ब नेल्ल सेल्ब, समुन्द्र नु समुन्द्रम बाक्ब नेल्ल सेल्ब, परमप्रभु यावे आ नेमी “मुल देश मपचा” दे कसम जाप्तु। दानीएल १२:७
- 7 मिनु मेको आ कसम जशो लोत्र मार बाक्त देशा हना “नेल्ल क्येडा नोले डा परमप्रभु यावे आ स्वर्ग डा गेय पाइबमी तुराही तबानु, परमप्रभु यावेमी आ लोत्र पाइब आन कली ‘मुल रिन्ची ना नुप्त’ दे डोंइती रे मशेंशो परमप्रभु यावे आ खुइश्शो लोत्र मुल दुम्चाप्तु” दे कसम जाप्तु। प्रकाश ११:१५; प्रेरित ३:२१
- 8 मिनु मेको आं नेशो स्वर्ग डा सेंदामी आं कली लेंशा “लावो, मेको रागी नु समुन्द्र तार राप्शो परमप्रभु यावे आ स्वर्ग डा गेय पाइब आ गुइमी बाक्शो किताब ताक्को” देशो नेता।
- 9 मिनु गो मेको परमप्रभु यावे आ स्वर्ग डा गेय पाइब आ नेक्था लती। मिनु गोमी मेको कली “मेको इन्चीली किताब गेयीनी” देंती। मेकोमी “ताक्को। मिनु जावो। इ शोत्रमी खुदो खोदेशो पा ब्रोत्रब। मिनु इ कोत्रजमी चहिं काइब” दे माइक्ती। इजीकीएल ३:१-३
- 10 मिनु गो मेको इन्चीली किताब परमप्रभु यावे आ स्वर्ग डा गेय पाइब आ गुइ रे ताक्शा डा मिन जाता। आं शोत्रमी खुदो खोदेशो जिज दुम्त। दाक्गुनु चहिं आं कोत्रज कत।
- 11 मिनु लोत्र पाइब कामी आं कली “गे लेंशा शुश मुरपुकी, शुश रागी, शुश लोत्र डा मुर नु शुश पिप आन डोंइती परमप्रभु यावे आ लोत्र नेपाइक्चा माल्नेवे” देशो नेता। येरमीया १:९-१०

## 11

यूहन्नाम पुक्तीक ताक्शो

- 1 मिनु परमप्रभु यावे आ स्वर्ग डा गेय पाइब कामी पुक्तीक का गेती। मेकोमी आं कली “लो, बोक्को। परमप्रभु यावे आ खिं नु चढ्तेतिके पुक्को। परमप्रभु यावे आ खिं आगाम सेउ पाइब आन कली हिक्को। इजीकीएल ४०:३; जकरिया ३:५-६; इजीकीएल ४२:२०
- 2 मिनु परमप्रभु यावे आ खिं डा लाडगा रागी रागी डा मुर आन कली गेशो बाक्त। मेको मपुक्को। मेकोपुकीमी परमप्रभु यावे आ योत्रशो सहर ४२ महिना सम्म खोइलीमी दिप्शा ताइश्शा बिग्रेनीम” देंत। लुका २१:२४

परमप्रभु आ सांकछी निक्शी

- 3 मिनु नोले गो परमप्रभु यावेमी आ सांकछी निक्शी आस कली मार लोत्र पशो नेता देशा हना “गे आं लोत्र पाइब दुम्तीसी। गो इस कली आं लोत्र पचा कली सक्ति गेनुड। गे निक्शीमी अरन्डी फेक्शा, हजार का सहे निक्शी ६० नाक्त सम्म आं लोत्र पाइनीसी” दे परमप्रभु यावेमी आ सांकछी निक्शी आस कली लोत्र पशो नेता। प्रकाश १२:६
- 4 मिनु मेको सांकछी तेल रवा निक्शी नु दियारी निक्शी खोदेशो दुम्शा, रागी डा प्रभु आ डोंइती बाक्नीस। जकरिया ४:३, ११-१४
- 5 सु सुमी मेको निक्शी आस कली बिग्रेचा माल्नीमी, मेको साइक्चा पुंडसीनीम। दोपा साइक्चा पुंडसीनीम देशा हना, मेको आस शोत्र रे मी गृशा, मेको साइक्चा पुंडसीनीम।
- 6 मेको निक्शीमी परमप्रभु यावे आ लोत्र पाम्सेनु, रेउ मयिपाइक्ने चाप्नीस। मेकोमी ब्वाक्कु के हुश सेल्ने चाप्नीस। मिनु रागी कली मार श्येत गेचा दाक्तसे, मेकोन पने चाप्नीस। गिश खेयप मो पचा दाक्तसे, मिश खेयप यो पने चाप्नीस। १राजा १७:१; प्रस्थान ७:१९-२०
- 7 मिनु मेको निक्शीमी परमप्रभु यावे आ लोत्र थुम्से नोले, मेको पुं मपाइश्शो ढोडोडगा रे टेयब जन्तु कुशा, मेको निक्शी नु राप्शी पा यात। ग्राशा डा मिन मेको आस कली साइक्तु। प्रकाश १३:३; प्रकाश १३:७
- 8 मेको आस बेक्शो रां चहिं टेयब सहर डा लामि लीताक्से। मेको टेयब सहर आ खुइश्शो नें चहिं सोदोम नु इजीप्त माइश्शो बाक्त। मेको टेयब सहरमी मुरपुकीमी मेको आस प्रभु कली शीम कांटी थोक्शा साइश्शो बाक्तेक्म।
- 9 मिनु थर नेल्ल डा, जात नेल्ल डा, आंम आंम लोत्र पाइब नु रागी रागी डा मुर नेल्लेमी मेको आस बेक्शो रां नाक्त सां नु आथा मेकेर बाक्त। मुरपुकीमी मेको आस कली तुरसुमी वोइक्चा मगेमे।

10 मारदे हना मेको परमप्रभु यावे आ लोत्र पाइब निकशीमी रागीम बाक्ब आन कली शुश श्येत गेतीके, रागीम बाक्बपुकीमी मेको आस कली साइशो तशा, शुश ग्येरशा, मार मार गेमुन्तेकम।

11 मिनु नाक्त सां नु आधा नोले परमप्रभु यावे आ ब्रोइचा गेब सोक्त मेको आस बेक्शो रांमी ओत्रत। मिनु मेको निकशी छुल छाल बोक्शा राप्ताकस। मिनु रागी रागी डा मुरपुकीमी मेको आस कली तशा थाप्पा हितेकम।

12 मिनु सरीड रे ठेयब सेंदामी मेको निकशी आस कली “एक कुस” देशो नेताकस। मिनु गोस्सुमी गिल्सीशा, इर सरीड लाम्ताकस। मेको आस जोरी सत्रपुकीमी मेको आस कली सरीड गे लशो ताम्तेकम।

13 मिनु मेको निकशी लसान, ठेयब खिनु कुत। मेको सहर डा १० भाग डा भाग का ब्रेत। मिनु ७ हजार मुर मेको खिनुमी बेक्तेकम। मेको लीशो मुरपुकी चहिं क्युल क्युल पा हिंशा, स्वर्ग डा परमप्रभु यावे कली मान पाम्तेकम।

14 हिंचा डा श्येत निकशी नुप्शा, नोले डा हिंचा डा श्येत जाक्चाप्तु। प्रकाश ९:१२

नेल्ल क्येडा नोले डा तुराही

15 मिनु मेको नोले डा परमप्रभु यावे आ स्वर्ग डा गेय पाइबमी आ तुराही ताप्तु। मिनु स्वर्गमी ठेयब सेंदापुकी नेता। मेकोपुकीमी “आइ परमप्रभु नु आ खीस्तामी रागी नेल्ल कली सासन पाइब दुम्ताकसे। मिनु गेना हना यो सासन पना पन बाक्नीसी” देशो नेता।

16 मिनु परमप्रभु यावे आ डोंइती मेको २४ जना शेंब खाल्पा आन नित्तीकेमी निशरा, परमप्रभु यावे आ डोंइती खुम्की पा बाप्शा मान पाम्तेकम। प्रकाश ४:४,१०

17 मिनु मेकोपुकीमी “परमप्रभु यावे, गे नेल्ल सक्ति पाइशो परमप्रभु बाक्नीनी। गे मुल बाक्नीनी, डोंइती यो बाक्तीनी। इन ठेयब सक्तिमी सासन पचा गोइतीनी।

18 मिनु रागी रागी डा मुरपुकी गाइक्ताकम। मिनु मेको आन पर्वम गाइक्ताकमी। बेक्शो मुर आन कली निसाफ पची ना दुम्त। मिनु इन लोत्र पाइब, इन नोले खोइक्ब, इन नें कली मान पा हिंब, आइक्च नु ठेयब मुर नेल्ल आन कली इनाम गेची ना दुम्त। मिनु गे रागी कली बिग्रैथ मुर आन कली बिग्रैथ जाक्तीनी” दे परमप्रभु यावे कली दैतेकम। भजन संग्रह २:३

19 मिनु परमप्रभु यावे आ स्वर्ग डा खिं रोक्साक्व। मिनु मेको कबल पशो सन्दोस परमप्रभु यावे आ खिंम तांडसाक्व। मिनु चिला पाप्तु। शुश रेयके नु बुंबु पशो नेंसाक्व। खिनु यो कुत। मिनु ठेयब मुप्स यित। प्रकाश १५:५

## 12

आल थिचा चिक्शो मीश मुर

1 मिनु गो सरीडमी ठेयब चिन्ड का ताता। मेको चिन्ड दोदेंब बाक्त देशा हना, मीश मुर का नां फेक्सीशा, तास्ला तारी राप्शो बाक्त। मेको आ पियामी १२ ओटा सोरुल के सिरपेच गुप्शो बाक्त।

2 मिनु मेकोमी कोब्रज कुरशो बाक्त। मोपतीके सुत्केरी रोइम श्येत जशा, आल थिचा कली ग्रीशो बाक्त।

3 मिनु गो सरीडमी अर्को चिन्ड का ताता। मेको चिन्ड दोदेंब बाक्त देशा हना, ठेयब लल बुस्स का बाक्त। मेको बुस्स के ७ ओटा पिया नु १० ओटा ग्रीव बाक्तेकम। आ ७ ओटा पियामी ७ ओटा मुकुट गुप्शो बाक्त।

4 मेको आ मीलुमी सरीड डा सोरुल भाग सां डा भाग का कीशा, रागीमी तोक्तीमी। मिनु मेको ठेयब बुस्स मेको आल थिचशो मीश मुर आ डोंइती राप्शा, आ आल ब्वचा कली रिम्शा बाक्त। दानीएल ८:१०

5 मिनु मेको मीश मुरुमी वोंइश आल का थित। मेको वोंइश आल नोले रागी डा मुर आन कली फलाम के कोक्केमी सासन पाइब दुम्ब। मिनु परमप्रभु यावे आ स्वर्ग डा गेय पाइबपुकीमी मेको वोंइश आल कली परमप्रभु यावे आ ठेयब नित्तीकेम लाइशशा वोइक्तेकम। भजन संग्रह २:९

6 मिनु मेको मीश मुर आल थिशा नोले गोरशो रागीमी प्रोक्त। मेकेर परमप्रभु यावेमी बाक्तीके ठीक पशो बाक्त। मिनु मेको कली हजार का सहे निकशी ६० नाक्त थुल्तेकम। प्रकाश ११:३

7 मिनु नोले स्वर्गमी परमप्रभु यावे आ ठेयब स्वर्ग डा गेय पाइब मिकाएल माइशशो नु आ गेय पाइबपुकी गारशा, ठेयब बुस्स नु आ गेय पाइबपुकी नु लडाइ पथ लाम्तेकम।

8 मिनु ठेयब बुस्स आ गेय पाइबपुकी लडाइ पा बुम्तेकम। मिनु नोले मेको ठेयब बुस्स नु आ गेय पाइबपुकीमी स्वर्गमी बाक्तीक मथिदेम। उत्पत्ती ३:१

9 मिनु मेको ठेयब बुस्स आ नें मार बाक्त देशा हना, माइत बुस्स, दियाबलस, सैतान बाक्त। मिनु मेको रागी रागी नेल्ल डा मुर आन कली पाप पपाइक्चा कली रागीमी तोक्चा पुंडसीशो बाक्त। मिनु मेको आ गेय पाइबपुकी यो रागीमी तोक्चा पुंडसीशो बाक्तेकम। प्रकाश २०:२; उत्पत्ती ३:१; लुका १०:१८

10 मिनु गो सरीडमी ठेयब सेंदा का नेता। मिनु मेको सेंदामी “मुल थमा सुइक्ब आन कली आन पाप रे ब्रोंइतीके जाक्ने थुम्तु। आइ परमप्रभु यावे आ सक्ति तांडसाक्व नु आ खीस्त आ अधिकार जाक्त। मारदे हना थमा सुइक्ब आन कली दोस गेब रागीमी तोक्चा पुंडसाक्व। मेकोमी नाक्दो नाक्त इ परमप्रभु यावे आ डोंइती आइ लोक्ब आन कली दोस गेशो बाक्त। प्रकाश ११:१५

11 मिनु थमा सुइक्बपुकीमी सैतान कली ग्राशो बाक्तेकम। दोपा सैतान कली ग्राशो बाक्तेकम देशा हना, पाटा आ हुश चढेशोमी नु आन सांकछी आन पतीके सैतान कली ग्राशो बाक्तेकम। मेकोपुकीमी आम कली ममिम्थु, येसु खीस्त आ पर्वम साइक्चा पुंडसीचा यो महिम। प्रकाश ७:१४; प्रकाश ६:९

12 मोपतीके स्वर्ग नु स्वर्गमी बाकब नेल्ल ग्येरसीन। तन्न रागी नु समुन्द्रम श्येत दुम्चाप्टु। मारदे हना सैतान थाम्पा गाइशरा, रागी नु समुन्द्रम यित। मारदे गाइक्ताकव दैशा हना, मुल आ गेय पचा शुश नाकत मली, दे तुइक्ताकव” दैशो नैता।

13 मिनु मेको टेयब बुस्सुमी आम कली रागीमी तोक्शो तशा, मेको वोंइश आल थीब मीश मुर कली “साइक्नुड” दे खेदा पाप्टु।

14 मिनु मेको मीश मुरुमी टेयब ककाकुली आ फ्रां निक्शी ताकतु। मारदे ताकतु दैशा हना, मेको टेयब बुस्स रे ब्रोंइशा, गोरशो रागीमी बेरशा, प्रोक्चा कली ताकतु। मेको गोरशो रागीमी परमप्रभु यावेमी आ दाक्ची ना सम्म मेकेर थुल्लो बाकत।

15 मिनु मेको टेयब बुस्सुमी “मेको मीश मुर कली योल्दल” दे आ शोत्र रे खोला खोदैशो पा शुश ब्वाक्कु गुंडताकव।

16 रागीमी चहिं मेको मीश मुर कली वारच पाप्टु। दोपा वारच पाप्टु दैशा हना, रागी आ शोत्र पाक्शा, मेको टेयब बुस्स आ शोत्र रे गूशो खोला कली दाकतु।

17 मिनु मेको टेयब बुस्सुमी मीश मुर प्रोक्शो तशा, गाइशरा, मेको मीश मुर आ चच युड नु राम्शी पथ लत। आ चच युड चहिं सु नम दैशा हना, परमप्रभु यावे आ शेंशो लोत्र टीब नु येसु कली थमा सुइशरा, आ लोत्र पाइब नम।

18 मिनु मेको टेयब बुस्स समुन्द्र आ नेक्था राप्शा, रिम्शा बाकत।

## 13

समुन्द्र रे गूशो जन्तु

1 मिनु गो समुन्द्र रे ७ ओटा पिया नु १० ओटा ग्रोत्र पाइशरो जन्तु का गूशो ताता। मेको आ १० ओटा ग्रोत्रमी १० ओटा मुकुट गुप्शो बाक्तेक्म। आ पियापुकीमी चहिं परमप्रभु कली शुक्शी पाइब नें ब्रेक्शो बाक्तेक्म। दानीएल ७:३-७

2 मिनु आं तशो जन्तु जोइ खोदैशो बाकत। आ खोइल चहिं वां के खोदैशो बाकत। आ शोत्र गुप्स आ शोत्र खोदैशो बाकत। मिनु मेको टेयब बुस्सुमी आ सक्ति आ नित्तीके नु आ टेयब अधिकार मेको जन्तु कली गेप्टु।

3 मिनु मेको जन्तु आ ७ ओटा पिया डा का साइक्चा डा पा क्योरशो खोदैशो ताता। तन्न आ टेयब गार साशो बाकत। मिनु रागी रागी डा मुर नेल्ल मेको जन्तु तशा, छक लाक्शा, आ नोले खोइक्तेक्म।

4 टेयब बुस्सुमी मेको जन्तु कली आ अधिकार गेतीके मुर नेल्लेमी टेयब बुस्स कली खुम्की पा सेउ पाप्तेक्म। मिनु मेको जन्तु कली यो खुम्की पा “एको जन्तु खोदैशो टेयब सु बाक्मे? सु एको नु जिशा ग्राने चाप्बा?” दे सेउ पाप्तेक्म।

5 मिनु मेको जन्तु कली टेयब लेशरा, ब्वाक्चा नु परमप्रभु आ परबम मरिम्शो लोत्र पचा कली शोत्र गेशो बाकत। मेको कली ४२ महिना सम्म सासन पचा कली अधिकार गेशो बाकत। प्रकाश ११:२

6 मेकोमी परमप्रभु यावे कली मरिम्शो लोत्र पाप्टु। मिनु मेकोमी आ नें आ परबम, आ बाक्तीके आ परबम नु आ बाक्तीकेमी बाक्ब आन परबम यो मरिम्शो लोत्र पाप्टु।

7 मेकोमी परमप्रभु यावे आ योत्रशो मुरपुकी नु लडाइ पशा, ग्राचा कली अधिकार तशो बाकत। मिनु मेको कली जात नेल्ल, मुर नेल्ल, आम आम लोत्र पाइब नु रागी रागी डा मुर नेल्ल आन कली सासन पतीके अधिकार यो गेशो बाकत। प्रकाश ११:७; दानीएल ७:२१

8 मिनु सु सु आन नें क्योरशो पाठा आ ब्रोंइतीक किताबमी मब्रेक्शो बाक्मे, मेकोपुकीमी मेको जन्तु कली खुम्की पा सेउ पाइनीम। मेको किताब रागी सेल्चा क्येडा डोंइती रे बाकत।

9 सु सुमी परमप्रभु यावे आ लोत्र नैशा, रुन्ने चाप्नीमी, मेकोमी नेन्मेक्ल।

10 सु जेल्खानमी लचा योत्रसीशो बाक्मे, मेको जेल्खानमी लचा माल्ब। तन्न सुमी तरवारमी साइक्बा, मेको तरवारमी साइक्बा पुंडसीब। मिनु परमप्रभु यावे आ योत्रशो मुरपुकीमी श्येत फाल्लो “परमप्रभु यावेमी तुइक्ब” दे थमा सुइशरा बाक्चा माल्नीम। उत्पत्ती ९:६; मत्ती २६:५२; प्रकाश १४:१२

खप रे गूशो जन्तु

11 मिनु गो खप रे अर्को जन्तु का गूशो ताता। मेको के पाठा के खोदैशो ग्रोत्र निक्शी बाकत। मिनु मेकोमी टेयब बुस्स खोदैशो पा लोत्र पाइबाकत।

12 डोंइती डा जन्तु नु बाक्शा, मेको डोंइती डा जन्तु आ अधिकार यो पाइक्बाकत। मिनु मेकोमी रागी डा मुर नेल्ल आन कली डोंइती डा जन्तु कली सेउ पपाइक्बाकत। मेको डोंइती डा जन्तु चहिं तेको बाकत दैशा हना, आ बेक्चा डा गार साशो जन्तु बाकत।

13 मिनु मेको नोले डा जन्तुमी टेयब छक लाक्चा डा गेय पाप्टु। मार छक लाक्चा डा गेय पाप्टु दैशा हना, मेकोमी मुर आन डोंइती सरीड रे मी यिपाइक्तु। मत्ती २४:२४; २थिस्सलोनिकी २:९

14 मेकोमी डोंइती डा जन्तु नु बाक्शा, आ पशो छक लाक्चा डा गेयमी मुर आन कली “परमप्रभु आ सक्ति पाइशरो नड” दे जोल पा छक लाक्चा डा गेय पशा, मुर आन कली पाप पपाइक्तु। मार पाप पपाइक्तु दैशा हना, मेकोमी रागी डा मुर आन कली “गार पाइशरो जन्तु आ मूर्ति सेल्चा” दे शेंताक्मी।

15 मिनु मेकोमी जन्तु आ मूर्ति कली ब्रोंइचा सोक्त गेचा अधिकार यो तशो बाकत। मिनु मेकोमी सोक्त गेवानु, मेको ब्रोंइतीक सोक्त पाइशरो मूर्ति लोत्र पचा गोप्टु। मिनु मेको जन्तुमी मूर्ति आ डोंइती खुम्की पा सेउ मपाइब मुर आन कली साइक्पाइक्तु।

16 मिनु मेको जन्तुम मार अर्को गेय पाप्टु दैशा हना, मेकोमी टेयब नु आइक्च, शोप पाइशरो नु पुडग, वाइलीम वाइल नु मुर नेल्ल आन कली कि ग्युरा गुइमी कि कुप्फीमी चिन्ड वोइक्पाइक्तु। प्रकाश १९:२०



17 मिनू सु सु चिन्ड मपाइश्शो बाक्मा, मेकोपुकीमी मारेइ ग्याप्ने नु लेयने मचबेम। मिनू मेको चिन्ड कि जन्तु आ नें कि आ हिक्तीक चिन्ड बाक्त।

18 मेको जन्तु आ नें आ हिक्तीक चिन्ड आ अर्थ मार बाक्मे, दे तुइक्का कली जोक्ब तुइक्ब थुं माल्ब। जोक्ब मुरुमी जन्तु आ हिक्तीक चिन्ड तुइक्ब, मारदे हना मेको मुर आ हिक्तीक नु गारब। मेको हिक्तीक चिहं ६ सहे ६६ बाक्ब। प्रकाश १५:२

## 14

लाख का ४४ हजार मुर

1 मिनू नोले गो मेको पाठा सियोन डांडामी राष्शो ताता। मिनू लाख का ४४ हजार मुर पाठा नु बाक्तेक्म। मेको आन कुप्फीमी येसु नु आ आफ आ नें ब्रेक्सीशो बाक्त। प्रकाश ७:४; प्रकाश ३:१२

2 मिनू गो स्वर्ग रे सेंदा का नेता। मेको सेंदा दोदेशो बाक्त देशा हना, शुश ब्वाक्कु आ रेयके नु ठेयब बुंबु पशो रेयके खोदेशो नेता। तन्न शुश मुरपुकीमी ठेयब तार पाइश्शो ताप्तीके ताप्शो रेयके बाक्त। प्रकाश १:१५

3 मिनू मेको ठेयब ताप्तीके ताप्बपुकीमी ठेयब निल्तीक आ डांडती, मेको ४ ओटा सेस जन्तु नु शेंब खाल्पा आन डांडती नक कुम्सो का पाम्तेक्म। मेको कुम्सो सुइमी शेंसीने मचबेम। तन्न मेको लाख का ४४ हजार मुरुम ला मेको कुम्सो शेंसीने चाप्तेक्म।

4 मिनू मेको मुरपुकी रागी डा पाप रे डोन बाक्शो बाक्तेक्म। मिनू मेकोपुकी पाठा तेक तेक लमे, मेक मेक लाइबाक्तेक्म। मेकोपुकी रागी डा मुर आन दाते रे गुंइशा, परमप्रभु यावे नु पाठा आस डांडती डा योत्रसीशो मुर बाक्तेक्म। १कोरिन्थी ७:१,८

5 मिनू मेकोपुकीम काइ जोल मपशो बाक्तेक्म। मारदे हना पाप मपाइबपुकी बाक्तेक्म।

स्वर्ग डा गेय पाइब सां आन लोत्र

6 मिनू स्वर्ग आ दातेमी गो परमप्रभु यावे आ स्वर्ग डा गेय पाइब का बेरशो ताता। मेको रागीमी लीशो मुर आन कली गेना हना यो पाप रे प्रोइब जाक्त, दे ग्येरपाइब लोत्र शेंथ यित। मेको नेल्ल रागी डा, नेल्ल जात डा, नेल्ल लोत्र पाइब नु शुश मुर आन कली शेंथ यित।

7 मिनू मेकोमी ठेयब सेंदामी “परमप्रभु यावेमी सरीड, रागी, समुन्द्र नु ब्वाक्कु बुक्तीके नेल्ल सेल्लु। मोपतीके इन पोक्च थेक्शा, परमप्रभु यावे कली मान पा हिनीन। मेको कली ठेयब सेलीन। मिनू “गे नेल्ल सेल्ल ननी” देशा मान पने। मारदे हना मेको आ निसाफ पची ना दुम्त” देत।

8 मिनू परमप्रभु यावे आ स्वर्ग डा गेय पाइब अर्को कामी मेको डांडती डा आ नोले खोइश्शा, मेकोमी “बेबीलोन माइश्शो ठेयब सहर खतम दुम्त। मारदे हना मेकोमी डांडती नेल्ल रागी डा मुर आन कली पाप पपाइक्तु। रागी डा मुरपुकी बेबीलोन आ परबम परमप्रभु यावे आ गाइश्शो ताम्तेक्म” देत। प्रकाश १८:५; यसैया २१:९; येरमीया २५:१५-१६; येरमीया ५१:७

9 मिनू सां आन दाते डा परमप्रभु यावे आ स्वर्ग डा गेय पाइबमी अर्को निक्शी आस नोले खोइश्शा, ठेयब सेंदामी “सु सुमी मेको जन्तु नु आ मूर्ति कली सेउ पाइनीमी, मेको आन कुप्फीमी कि ग्युरा गुइमी चिन्ड वोइक्पाइक्नीमी, प्रकाश १३:१२-१७

10 मेको आन कली तशा, परमप्रभु यावे शुश गाइक्ब। मिनू मेको मुरपुकीमी आ गाइश्शो तचा माल्नीम। दोपा परमप्रभु आ गाइश्शो तचा माल्नीम देशा हना, पाप रे डोन बाक्ब परमप्रभु यावे आ स्वर्ग डा गेय पाइब नु पाठा आस डांडती मेको मुरपुकी हुरुर पा ब्रशो मी नु गन्धकम श्येत जचा माल्नीम। भजन संग्रह ७५:७

11 मेको मी आ कुन गेनायो मकाप्ब। मेको जन्तु नु जन्तु आ मूर्ति कली सेउ पाइबपुकी नु जन्तु आ नें आ चिन्ड वोइक्पाइक्बपुकी नाक्दो नाक्ती श्येत जना जन बाक्नीम” देत।

12 मेना रागीमी परमप्रभु यावे आ योत्रशो थमा सुइक्बपुकीमी श्येत फाल्चा माल्नीम। मारदे हना मेकोपुकीमी परमप्रभु यावे आ अरेशो लोत्र पाइनीम। मिनू येसु कली थमा सुइक्नीम। प्रकाश १३:१०

13 मिनू गो स्वर्ग रे सेंदा का नेता। मेकोमी “मुल रे सु सु प्रभु कली थमा सुइश्शा बेक्नीमी, मेकोपुकी ग्येरसमल। मेको लोत्र ब्रेक्तो” देता। मिनू परमप्रभु यावे आ सोक्तीमी “थमा, मेको मुरपुकी ग्येरसीशो बाक्नीम। मारदे हना मेकोपुकीमी रागीमी परमप्रभु यावे आ गेय पशा नाइक्नीम। मिनू परमप्रभु यावेमी आन गेय तुइश्शा, आन तचा डा गेब” देत। फिलिप्पी १:२३; यसैया ५७:२; हिब्रू ४:३०; १तिमोथी ५:२४-२५

थमा मसुइक्ब आन कली निसाफ

14 मिनू नोले गो बुश गोस्स का ताता। मिनू मेको गोस्स तारी मुर का निश्शो खोदेशो ताता। मेको आ पियामी सुन के सिरपेच गुष्शा डा मिन आ गुइमी हेश्शो गुये का ग्याइश्शो ताता। दानीएल ७:१३; मर्कुस १३:२६

15 मिनू गो अर्को परमप्रभु यावे आ स्वर्ग डा गेय पाइब कली परमप्रभु यावे आ खिं रे गूशो ताता। मिनू मेकोमी गोस्स तार बाक्ब कली ठेयब सेंदामी “रागी डा बाली मीशो बाक्त। मुल रिक्ची ना दुम्त। मिनू मुल रिक्चा गोवो” देत। योएल ४:१३; मती १३:३९

16 मिनू गोस्सुमी निप्बमी गुये शेशा, रागी कली मीशो बाली खोदेशो पा रिक्तु।

17 मिनू गो अर्को परमप्रभु यावे आ स्वर्ग डा गेय पाइब कली परमप्रभु यावे आ खिं रे गूशो ताता। मेको नु यो हेश्शो गुये का बाक्त।

18 मिनू नोले अर्को परमप्रभु यावे आ स्वर्ग डा गेय पाइब का धूप चढेतीके रे गृशो ताता। मेकोमी मी कली अधिकार पाइबाक्त। मेकोमी ठेयब सेंदामी हेरशो गुये शेयब कली “रागी अङ्गुर रू खोदेशो पा मीशो बाक्त। मोपतीके गुयेमी फल सेक्चा गोवो” देशो नेता।

19 मिनू परमप्रभु यावे आ स्वर्ग डा गेय पाइबमी आ गुयेमी रागी कली फल सेक्शो खोदेशो पा सेक्तु। सेक्शा खुष्शा, परमप्रभु यावे आ ठेयब फल कोलमी वोडक्तु। मेको कोल चहिं मार बाक्त देशा हना, परमप्रभु यावे आ गाइक्चा बाक्त।

20 मिनू खाक्तीके सहर रे डोन बाक्त। खाक्मने, मेको कोल रे रस खोदेशो पा हुश शांडसाक्व। मिनू मेको हुश १६ हजार स्तादीयोन डोन दोक राप्शो शारा आ शोत्र सम्म लत। स्तादीयोन का १८५ मिटर बाक्ब यैसेया ६३:३

## 15

लाख का ४४ हजार मुर

1 मिनू गो स्वर्गमी अर्को ठेयब नु छक लाक्चा डा चिन्ड ताता। मेको चिन्ड दोदेशो बाक्त देशा हना, ७ जना परमप्रभु यावे आ स्वर्ग डा गेय पाइबपुकीमी ७ ओटा श्येत गेचशो बाक्तेक्म। मिनू मेको श्येतपुकी नोले डा बाक्तेक्म। मारदे हना मेको आन नोले परमप्रभु आ गाइक्चा नुब्ब। प्रकाश १६:१

2 मिनू गो सिसा नु मी ब्वाइशो दोम्ली खोदेशो दिम का ताता। मेको दिममी मुरपुकीम परमप्रभु यावे आ गेशो ठेयब ताप्तीके शेशा, राप्शो तातामी। मेको मुरपुकी चहिं सु बाक्तेक्म देशा हना, मेकोपुकीमी मेको जन्तु कली ग्राशो बाक्तेक्म। दोपा यातेक्म देशा हना, जन्तु नु जन्तु आ मूर्ति कली सेउ मपामे नु आ नें आ हिक्तीके चिन्ड यो मवोइक्पाइक्सीशो बाक्तेक्म। प्रकाश ४:६

3 मिनू परमप्रभु यावे आ वाइल मोसा नु पाठा आ कुम्सो पाम्तेक्म। मिनू मेको कुम्सो मार लोत्र बाक्त देशा हना “परमप्रभु यावे, गे नेल्ल सक्ति पाइशो परमप्रभु बाक्नीनी। इन गेय ठेयब नु छक लाक्चा बाक्नीमी। गे इन लां नेल्ल ठीक नु थमा बाक्नीमी। गे गेना हना यो पिपू बाक्नीनी। प्रस्थान १५:१,११; येरमीया १०:६-७; ब्यवस्था ३२:४; भजन संग्रह १४५:१७

4 नेल्लेमी इन कली मान पा हिंशा इन नें ठेयब सेलनीमी। मारदे हना गे ला परमप्रभु बाक्नीनी। रागी रागी डा मुर नेल्ले इन डोंइती जाक्शा, पोक्च थेक्शा, खुम्की पा बाप्नीमी। मारदे हना इन निसाफ पतीके नेल्लेमी ताम्तेक्म” देशो कुम्सो आ लोत्र बाक्त। भजन संग्रह ८६:९; येरमीया १६:१९-२१

गाइशो डा ७ ओटा डप्का

5 मिनू नोले गो स्वर्गमी परमप्रभु यावे आ खिं रोक्शो ताता। प्रकाश ११:१९

6 मेकेर रे मेको ७ जना श्येत गेब परमप्रभु यावे आ स्वर्ग डा गेय पाइबपुकी गूतेक्म। मेकोपुकी रिम्शो टल्केशो बुश वा फेक्शा, सुन के पेटी किप्शो बाक्तेक्म।

7 मिनू मेको ४ ओटा सेस जन्तु डा कामी मेको ७ जना परमप्रभु यावे आ स्वर्ग डा गेय पाइब आन कली ७ ओटा सुन के डप्का गोप्तु। मेको सुन के डप्का गेना हना यो ब्रोंइशा बाक्ब परमप्रभु यावे आ गाइक्चामी ब्रीशो बाक्तेक्म। प्रकाश ४:६-८; प्रकाश १४:१०

8 मिनू परमप्रभु यावे आ खिं परमप्रभु आ छेडछेड नु सक्ति डा कुनमी ब्रीशो बाक्त। मिनू परमप्रभु यावे आ ७ जना स्वर्ग डा गेय पाइबपुकीमी श्येत मंगेमे सम्म सुइ परमप्रभु यावे आ खिं ओवने मचाप्बाक्तेक्म। यैसेया ६:४; प्रस्थान ४०:३४; १राजा ८:१-११; इजीकीएल ४४:४

## 16

मेको ७ ओटा श्येत

1 मिनू नोले गो परमप्रभु यावे आ खिं रे ठेयब सेंदा का नेता। मेको सेंदामी परमप्रभु यावे आ ७ जना स्वर्ग डा गेय पाइब आन कली “लने। परमप्रभु आ गाइक्चामी ब्रीशो ७ ओटा डप्का रागीमी मोतीन” देंत।

2 मिनू डोंइती डा परमप्रभु यावे आ स्वर्ग डा गेय पाइबमी आ कुरशो डप्का रागी तार मोइक्तु। मिनू मेकोमी मोदानु, ठेयब जन्तु आ चिन्ड वोंइसीब नु आ मूर्ति कली सेउ पाइबपुकी मरिम्शो पा खाइक्ब गार मुम्तेक्म। प्रस्थान ९:१०-११

3 मिनू अर्को परमप्रभु यावे आ स्वर्ग डा गेय पाइबमी आ कुरशो डप्का समुन्द्र तार मोइक्तु। मिनू मेकोमी मोदानु, समुन्द्र डा ब्वाक्कु क्योरशो मुर आन हुश खोदेशो दुम्त। मिनू समुन्द्र डा सेस जन्तु नु डांड नेल्ल बेक्तेक्म।

4 मिनू लेंशा अर्को परमप्रभु यावे आ स्वर्ग डा गेय पाइबमी आ डप्का खोला नु ब्वाक्कु बुक्तीके तार मोइक्तु। मिनू मेकोमी मोदानु, मेको ब्वाक्कु हुश दुम्त। प्रस्थान ७:१७-२१

5 मिनू ब्वाक्कु कली कोत्रब परमप्रभु यावे आ स्वर्ग डा गेय पाइबमी परमप्रभु यावे कली “इन मुर आन कली पशो निसाफ ठीक बाक्ब। गे मुल बाक्नीनी। मिनू गे डोंइती यो बाक्तीनी। गे का ला परमप्रभु बाक्नीनी।

6 रागी डा मुरपुकीमी इन योत्रशो मुर नु इन लोत्र पाइब आन कली क्योरशा, आन हुश शाइक्पाइशशा साइक्तेक्म। मिनू गे मेको रागी डा मुर आन कली हुश तूपाइक्तीनी। मार पामे, मेको ताम्तेक्म” देशो नेता।

7 मिनू गोमी मेको धूप चढेतीके रे सेंदा कामी लोत्र पशो नेता। मेकोमी “परमप्रभु यावे, गे नेल्ल सक्ति पाइशो परमप्रभु बाक्नीनी। मारेड मारेड पने चाप्नीनी। इन पशो निसाफ थमा नु ठीक बाक्नीनी” देशो नेता। प्रकाश ९:१३; प्रकाश ६:१०-११

8 मिनू लेंशा अर्को परमप्रभु यावे आ स्वर्ग डा गेय पाइबमी आ कुरशो डप्का नां तार मोइक्तु। मिनू मेकोमी मोदानु, नांमी मुर आन कली मीम खोदेशो पा क्रोइक्चा गोप्तु।

9 मोपा शुश होशेमी मुरपुकी दुष्शा, श्येत जाम्तेक्म। मिनु दुष्शो आ पबर्म परमप्रभु यावे आ नें कली सराप पाम्तेक्म। मारदे हना मेकोमी श्येत गेप्टु। मिनु मेको मुर आन शुं परमप्रभु यावे गे मलेत्तेम। परमप्रभु यावे कली मान यो मपाम।

10 मिनु लेंशा अर्को परमप्रभु यावे आ स्वर्ग डा गेय पाइबमी मेको आ कुरशो डप्का ठेयब जन्तु आ नित्तीकेमी मोइक्तु। मिनु मेकोमी मोदानु, मेको ठेयब जन्तु आ राज्यमी छिडछिड दुम्त। मिनु मुरपुकीम शुश श्येत जाम्तेक्म।

11 मोपतीके स्वर्ग डा परमप्रभु कली सराप पाम्तेक्म। मारदे हना मेकोमी ठेयब मरिम्शो गार दुम्पाइशशा, श्येत गेप्टु। तन्न आन मरिम्शो पचा मप्रोनेम।

12 मिनु लेंशा अर्को परमप्रभु यावे आ स्वर्ग डा गेय पाइबमी आ कुरशो डप्का युफ्रेटीस माइशशो ठेयब खोलामी मोइक्तु। मिनु मेकोमी मोदानु, खोला डा ब्वाक्कु सोव्रत। मारदे सोव्रत देशा हना, नां दाप्तीके रे पीब पिप आन लां ठीक पचा कली सोव्रत। यसैया ११:१५-१६

13 मिनु गो ठेयब बुस्स, ठेयब जन्तु नु जोल पा परमप्रभु यावे आ लोत्र पाइब आन शोत्र रे कुक्कु खोदेशो वोल सां यूशो तातामी। प्रकाश १२:३

14 मेकोपुकी छक लाक्वा डा चिन्ड कौडब सैतान आ गेय पाइब वोल बाक्तेक्म। मिनु मेकोपुकीमी परमप्रभु यावे, नेल्ल सक्ति पाइशशो परमप्रभु आ ठेयब नाक्तीमी नु लडाइ पचा कली रागी रागी डा पिप आन कली ब्रथ लाम्तेक्म। मो दुम्मेनु, येसुमी मुर आन कली

15 “नेनीन, गो खुड खोदेब पा जाक्नुड। सु थमा सुइशशा मइप्यु सेंशा, ठीक दुष्शा बाक्मे, मेको ग्येरसेक्ल। तन्न सु पाप पाइबा, मेको शिन्ना गाक्ब मुर खोदेब पा मुने दोक्ब” दे येसुमी माइक्तीमी। १थिस्सलोनिकी ५:२

16 मिनु मेको वोल सांमी रागी रागी डा पिप ब्रथ लशा, जाक्शा, हिबू लोवमी आरमागेडोन माइशशो रागीमी खुम्साक्म।

17 मिनु नोले डा परमप्रभु यावे आ स्वर्ग डा गेय पाइबमी आ कुरशो डप्का फशेमी मोइक्तु। मिनु मेकोमी मोदानु, परमप्रभु यावे आ खिं रे नु आ नित्तीक रे ठेयब सेंदा कामी “मुल नुप्ट” देशो नेंता।

18 मिनु चिला, ठेयब रेयके, बुंबु पशा, ठेयब खिनु कुत। मुरपुकी रागीमी बाक्मानु, मोमो ठेयब खिनु गेनायो मकुशो बाक्माक्त।

19 मिनु मेको ठेयब सहर सां दुम्त। रागी रागी डा सहरपुकी ब्रेत्तेक्म। मिनु परमप्रभु यावेमी बेबीलोन ठेयब सहर कली फ्रुकुतु। मारदे फ्रुकुतु देशा हना, मेको मुर आन पाप तशा “गो सजाइ गेनुडमी” दे गाइशशा फ्रुकुतु। प्रकाश १४:८-१०

20 मेना टापु नेल्ल ब्वाक्कुमी सुम्साक्म, डांडापुकी ब्रेशशा, दिम दुम्तेक्म। प्रकाश ६:१४

21 मिनु मुर आन बाक्तीकेमी शुश मुप्स यित। मेको मुप्स टलेन्ट का सम्म हेल्लो बाक्तेक्म। मिनु मेको मुप्स मुर तार दोक्मेनु, मुरपुकी मेको मुप्स तशा, परमप्रभु यावे कली सराप पाम्तेक्म। मारदे हना मेको मुप्सीम रागीमी बाक्ब मुर आन कली शुश हिचा डा श्येत गेप्टु। टलेन्ट ३५ किलो कोदेशो बाक्ब। प्रस्थान ९:२३

## 17

ठेयब तेल्लेम कली सजाइ

1 नोले गो परमप्रभु यावे आ स्वर्ग डा गेय पाइब का ताता। मेको सु बाक्त देशा हना, मेको डोंइती डा ७ जना श्येतमी ब्रीशो डप्का कुरबपुकी डा का बाक्त। मिनु मेकोमी “एके पिवो, गो इ कली ब्वाक्कु तार बाक्ब ठेयब तेल्लेम कली गेशो सजाइ कौडिनन। प्रकाश १५:१

2 रागी रागी डा पिपपुकीमी मेको नु तेल्लेम पाम्तेक्म। मिनु मेको आन तेल्लेम पशो तशा, रागी रागी डा मुरपुकीमी यो मोदेशो पाम्तेक्म” दे आं कली देंत।

3 मिनु मेकोमी आं कली परमप्रभु यावे आ सोक्तीमी बाक्शा, मुर मबाक्तीकेमी लाइक्ती। मिनु गो मीश मुर का लल जन्तु तारी निशशो ताता। मेको जन्तु दोदेशो तांडसाक्व देशा हना, आ रां नेल्ल परमप्रभु यावे कली मरिम्शो लोत्र ब्रेक्शा वोइशशो बाक्त। मेको ७ ओटा पिया नु १० ओटा ग्रीव पाइशशो बाक्त।

4 मिनु मेको मीश मुर दोदेशो तांडसाक्व देशा हना, पिप आन फेक्शो खोदेशो वा नु लल वा फेक्शो बाक्त। सुन, हीरा नु मोती पांइशो बाक्त। मेकोमी सुन के कचौरा कुरशो बाक्त। मेको कचौरा आ तेल्लेम पतीके, ग्रांया दिचा डा नु मरिम्शो गेयमी ब्रीशो बाक्त। येरमीया ५१:७

5 मिनु मेको आ कुप्फीमी खुइशशो लोवमी आ नें ब्रेक्शो बाक्त। मार ब्रेक्शो बाक्त देशा हना “बेबीलोन ठेयब सहर, तेल्लेमपुकी नु नेल्ल रागी रागी डा ग्रांया दिचा डा आन ममा” दे ब्रेक्शो बाक्त।

6 मिनु गो मेको मीश मुर कली परमप्रभु यावे आ योव्रशो मुर नु येसु आ सांक्छी आन हुशेमी दुक्शो ताता। मेको कली तडानु, गो शुश छक लाक्ती। प्रकाश १८:२४

7 परमप्रभु यावे आ स्वर्ग डा गेय पाइबमी चहिं आं कली “गे मारदे छक लाक्डे? मेको मीश मुर नु मेको आ डोइशशो ७ ओटा पिया नु १० ओटा ग्रीव पाइशशो जन्तु आस खुइशशो लोत्र गो इ कली शेंनुड।

8 इ तशो जन्तु डोंइती बाक्त, मुल चहिं मबा। तन्न नोले पुं मपाइशशो ढोडोडगा रे कुशा खतम दुम्ब। रागी सेल्चा रे डा ब्रोंइतीक किताबमी आन नें मब्रेक्शो मुरपुकी चहिं मेको जन्तु तशा छक लाक्तीम। मारदे हना मेको जन्तु डोंइती बाक्त, मुल मबा, नोले जाक्ब।

9 रुब्ब मुर आन कली एको तुइक्तीके लोत्र बाक्ब। मेको ७ ओटा पिया ७ ओटा डांडा नम। मेको मीश मुर मेको डांडा तार निप्ब। प्रकाश १३:१८

10 मिनु मेको ७ ओटा डांडापुकी ७ ओटा पिप यो नम। मेको रे ५ ओटा बेक्शा लाक्तेक्म। मिनु कामी सासन पना पन बाक्ब। अर्को लीशो का चहिं मुल सम्म मजाक्शो बाक्त। मिनु नोले जाक्शा डा मिन, छिन का ला सासन पाइब।

11 मिनू मेको डोंडती बाक्शो नु मुल मबाक्शो जन्तु चहिं मेको अर्को ७ ओटा पिप आन नोले जाक्शो बाक्ब। मिनू नोले जाक्शो यो, मेको ७ ओटा रे जाक्ब। मिनू मेको नरक लाइब।

12 मिनू मेको इ तशो १० ओटा ग्रोत्र चहिं मुल सम्म सासन पचा मतशो १० जना पिप नम। मिनू मेको आन कली नु ठेयब जन्तु कली घन्टा का पिप आन अधिकार गेशो बाक्ब। प्रकाश १३:१

13 मेको १० जना पिप थुं का दुम्शा, आन सक्ति नु अधिकार ठेयब जन्तु कली गेनीम।

14 मोदेशो दुम्मेनु, मेकोपुकी पाठा नु लडाइ पाइनीम। मिनू लडाइमी पाठा ग्राब। मारदे पाठा ग्राब देशा हना, मेको पाठा प्रभु आन प्रभु नु पिप आन पिप बाक्ब। मिनू मेको नु बाक्शोपुकी आ ब्रेशो नु योत्रशो मुरपुकी बाक्नीमी। मेको नु बाक्बपुकी आ ब्रेशो नु योत्रशो दीगो पाइब यो बाक्नीमी” दे आं कली देत। प्रकाश १९:१६; प्रकाश १९:१४

15 मिनू मेको परमप्रभु यावे आ स्वर्ग डा गेय पाइबमी लेशा “तेल्लेम आ नेक्था डा शुश ब्वाक्कु, मार बाक्ब देशा हना, मेको मुरपुकी नम। मिनू मेको शुश मुर आन हुल, रागी रागी डा मुर नु शुश लोत्र ब्वाक्ब मुर बाक्नीम। यसैया ८:७; येरमीया ४७:२

16 मेको इ तशो १० ओटा ग्रोत्र नु मेको ठेयब जन्तु मेको तेल्लेम आ जोरी सत्रु दुम्नीम। मेको कली श्येत गेशा, आ फेक्शो वा पुइक्नीम। मिनू आ श्ये ब्वाइनीम। मिनू आ लीशो नेल्ले मीम चोइनीम।

17 मारदे मोदेशो पाइनीम देशा हना, परमप्रभु यावेमी आ देशो थमा दुम्पाइक्चा कली मेको आन थुं का दुम्पाइक्तीमी। मिनू मोपा मेको १० जना पिपमी राज्य नु सक्ति ठेयब जन्तु कली गेनीम। परमप्रभु यावे आ लोत्र खाप्चा कली मोदेशो दुम्ब।

18 मिनू इ तशो मीश मुर चहिं ठेयब सहर बाक्ब। मेको रागी रागी डा पिप आन कली सासन पाइब बाक्ब” दे शेताक्यी। प्रकाश १८:१०

## 18

बेबीलोन सहर नुप्त

1 मिनू नोले गो शुश अधिकार पाइशशो परमप्रभु यावे आ स्वर्ग डा गेय पाइब का सरीड रे यिशो ताता। मेको आ टल्केशोमी रागी नेल्ल छेइछेइ दुम्त। इजीकीएल ४३:२

2 मिनू मेकोमी ठेयब सेंदामी “मेको ठेयब बेबीलोन सहर ब्रेशा नुप्त। मेको ब्रेशो सहर वोल आन बाक्तीके जेल्खान दुम्त। मेको ग्रान्ना दिचा डा चिक्ब आन जेल्खान दुम्त। प्रकाश १४:८; येरमीया १५:३९

3 मारदे मेको सहर मोदेशो दुम्त देशा हना, रागी रागी डा मुर नेल्लेमी आ ग्रान्ना दिचा डा गेय शेंसीशा मोदेशो पाम्तेक्म। मिनू रागी रागी डा पिपपुकीमी यो मोदेशो पाम्तेक्म। मिनू रागी रागी डा ग्याक्ब लेयबपुकी मेको सहर डा शुश थोत्रक रे शोप पाइशशो दुम्तेक्म” देत। यसैया ५१:७; नाहुम ३:४

4 मिनू नोले स्वर्ग रे अर्को सेंदा का नेता। मेको सेंदामी “आं मुरपुकी, मेको सहर रे गूशा पिने। मेकेर रे मगूतीनी हना, गे मेकोपुकी खोदेशो मरिम्शो पाइनीनी। मोपा मरिम्शो पाइतीनी हना, मेको खोदेशो पा सजाइ ताइनीनी। यसैया ४८:२०; येरमीया ५०:८; येरमीया ५१:६,४५; २कोरिन्थी ६:१७

5 मेको आन मरिम्शो पशो देल्शा, सरीड सम्म जाक्शो बाक्त। मिनू परमप्रभुमी मेको आन मरिम्शो पशो मिम्शो बाक्त। उत्पती १८:२०-२१; येरमीया ५१:९

6 मिनू गे इन कली गेशो श्येत मेको कली लेत्तीन। श्येत का ला ममाइ, निक्शी खेयप श्येत गेने। इन कली गेशो श्येत निक्शी खेयप गेचा ठीक दुम्ब। भजन संग्रह १३७:८; येरमीया ५०:१५,२९; २थिस्सलोनिकी १:६

7 मिनू आंम कली गिश ठेयब सेला, मिश श्येत गेशा, सुर्ता नु रोंका पपतीन। मिनू मेकोमी आ थुंमी चहिं ‘गो पिपीम नइ। गो वोंइश बेक्शो मीश मुर मनइ। मोपतीके गो सुर्ता गेनायो मपाइनुइ’ देंब। यसैया ४७:७-९

8 मोपा मोमो ठेयब लेशो लोत्र पतीके, काबु मेको कली श्येत दुम्ब। मेको कली मार श्येत दुम्ब देशा हना, मेको सहरमी मुर साइक्ब रोइ जाक्ब, मिनू रोंका पाइनीम, अन्काल यो दुम्ब। मिनू मेको सहर मीम दुप्शा पुलु दुम्ब। मेको श्येत नेल्ल मारदे दुम्ब देशा हना, मेको आन कली निसाफ पाइब परमप्रभु यावे सक्ति पाइशशो बाक्ब” देशो नेता।

मुरपुकी बेबीलोन तशा डाक्शो

9 मिनू रागी रागी डा पिपपुकी मेको नु तेल्लेम पाम्तेक्म। मेको आ शोप यो दाक्शो बाक्तेक्म। मोपतीके मेकोपुकी ग्रीडशो सहर कली तशा, रोंका पा डाक्नीम।

10 मिनू मेको आ श्येत तशा हिंशा, डोन रे कोत्रबपुकीमी “आबी, आबी, मेको ठेयब बेबीलोन माइशशो सहर गिश दारशो सेल्शो बाक्त। मुल चहिं घन्टा कामी इ निसाफ दुम्त” देनीम। येरमीया ५१:८

11 मिनू रागी रागी डा ग्याक्ब लेयबपुकी मेको सहर तशा, डाक्शा रोंका पाइनीम। मारदे डाक्शा रोंका पाइनीम देशा हना, मेको आन लेयचा डा थोत्रक सुइमी मग्याप्नीम।

12 आन लेयचा डा थोत्रक मार बाक्त देशा हना, सुन, चांदी, हीरा, मोती, शुश क्येट लाइब सुती वा, प्याजी रइ डा वा, रेसम वा, लल वा, ब्रोत्रशो रिना पाइशशो शी, हात्ती आन खुइ शुश क्येट लाइब शी, कांसा, फलाम नु दारशो फुल्लु रे सेल्शो थोत्रकपुकी बाक्तेक्म।

13 मिनू सिन्कोली, चां खेक्तीक तेल, मस्ला, ब्रोत्रशो रिना पाइब तेल, धूप, अडगुर शांबु, जचा तेल, थम रिम्शो फस, चेरब, बी ब्यफ, भेडा, शारा, बग्गी नु वाइलीम वाइल मेको मुर आन लेयतीक थोत्रकपुकी बाक्तेक्म।

14 मिनु मेको ग्याप्ब लेयबपुकीमी मेको सहर कली “इन दाक्शो ब्रोव्रशो फल फुल जाम्तेकम। इन ग्योम्सीचा, इन शोंप पाइश्शो दुम्चा नेल्ल गेनायो मथित्चा डा पा जाम्शा लाम्तेकम” दैतेकम।

15 मिनु मेको सहर रे शोंप पाइश्शो ग्याप्ब लेयबपुकी सहर रे डोन बाक्शा, मेको सहर कली गेशो सजाइ तशा हितेकम। मिनु मेकोपुकीमी डाक्शा रोंका पशा,

16 “आबी आबी, मेको ठेयब सहर, मेको सहर डा मुरपुकी शुश क्येट लाइब सुती वा, प्याजी नु लल रड डा वा फेक्शो बाक्तेकम। मिनु मेकोपुकीम शुश सुन, हीरा नु मोती पांइशो बाक्तेकम। प्रकाश १७:४

17 तन्न मुल घन्टा कामी मेको सहर डा शोंपपुकी खतम दुम्तेकम” दैतेकम। मिनु डोंगा चलेबपुकी, डोंगामी गेय पाइबपुकी नु डोंगामी डोइश्शा ग्याप्ब लेयब मुर नेल्ल सहर रे डोन राप्शा, इजीकीएल २७:२७-३६

18 सहर दुप्शो कुन तशा “मेरे सहर खोदेंब ठेयब अर्को मबा” दे ग्रीतेकम।

19 मिनु मेकोपुकी सुर्ता पशा, रोंका पा डाक्तेकम। मेकोपुकीमी “आबी आबी, मेरे ठेयब सहर। मेरे सहर डा डोंगा आन होव्रपुकी मेरे सहरमी मार मार लेयशा, शोंप पाइश्शो दुम्शो बाक्तेकम। तन्न घन्टा कामी मेरे सहर जाम्शा लत।

20 मिनु स्वर्गमी बाक्ब नेल्ले ग्येरसीने। परमप्रभु यावे आ योव्रशोपुकी, ख्रीस्त आ सोइश्शोपुकी नु परमप्रभु यावे आ लोव्र पाइबपुकी ग्येरसीने। मारदे हना, परमप्रभु यावेमी इन कली गेशो श्येत आ पर्वम मेको कली सजाइ गेण्टु” दैशो नैता। येरमीया ५१:४८

बेबीलोन सहर मथिसीब

21 मिनु बोल्यो परमप्रभु यावे आ स्वर्ग डा गेय पाइबमी ठेयब यात खोदेशो फुल्लु का क्युकुतु। मिनु मेको फुल्लु कली समुन्द्रमी ताइक्ताक्व। मेको परमप्रभु यावे आ स्वर्ग डा गेय पाइबमी “मेको फुल्लु खोदेशो पा ठेयब बेबीलोन सहर ताइक्चा पुंडसीब। मोपतीके मेको सहर गेनायो मथिसीब। येरमीया ५१:६३-६४

22 मिनु मेको ठेयब सहर दोपा नुप्ब दैशा हना, ठेयब ताप्तीके ताप्शो, कुम्सो पशो मुराली ताप्शो नु तुराही ताप्शो मेकेर लेशा मनैसीब। मिनु मार मार सेल्ब सीप पाइश्शो मुरपुकी मेकेर लेशा मथिसीब। यात हिल्लो आ रेयके मेकेर का यो लेशा मनैसीब। यसैया २४:८; इजीकीएल २६:१३

23 मेकेर बनी दाशो हाम्सो का यो लेशा मतांइसीब। मेकेर ग्युम्ले नु ग्युम्ली आस सेंदा लेशा मनैसीब। मारदे मोदेशो दुम्ब दैशा हना, रागी डा ठेयब मुर ग्याप्ब लेयबपुकी बाक्तेकम। मेकोपुकीमी मेको आन टुना मुनामी रागी नेल्ल डा मुर आन कली दूली लां खोइक्पाइक्तेकम। येरमीया २५:१०; यसैया २३:८

24 मिनु मेको सहर डा मुरपुकीमी परमप्रभु यावे आ लोव्र पाइबपुकी नु परमप्रभु यावे आ योव्रशो मुर आन कली साइश्शो बाक्तेकम। नेल्ल रागी डा सु सु मुर साइश्शो बाक्मा, मेको सहरमी साइश्शो बाक्तेकमे” दे परमप्रभु यावे आ स्वर्ग डा गेय पाइबमी दैत। प्रकाश ६:१०; प्रकाश १७:६

## 19

पाठा आ ग्युंबे

1 मिनु नोले गो स्वर्गमी शुश मुरपुकीम कुम्सो पशो ठेयब रेयके खोदेशो नैता। मिनु मेकोपुकीमी “हाल्लेलया, आंइ परमप्रभु ला मुर आन कली पाप रे प्रोइब बाक्ब। छेडछेड नु सक्ति नेल्ल आंइ परमप्रभु यावे केन बाक्ब।

2 मारदे हना परमप्रभु यावे आ पशो निसाफ थमा नु ठीक बाक्ब। मिनु परमप्रभु यावेमी रागी नेल्ल डा मुर आन कली खतम सेल्ब तेल्लेम कली ठीक पा सजाइ गेण्टु। मेको तेल्लेममी शुश परमप्रभु यावे आ वाइलीम वाइल आन कली साइक्तीके, मुल मेको कली क्येक्क लेत्ताक्व” दे ग्रीशो नैता। प्रकाश ६:३०; ब्यवस्था ३२:४३

3 मिनु मेको स्वर्गमी बाक्बपुकीमी लेशा “हाल्लेलया, मेको सहर दुप्शो आ कुन गेनायो मनुप्शु कुडब” दैतेकम।

4 मिनु मेको २४ जना शेंब खाल्पा नु ४ ओटा सेस जन्तुपुकीमी आ ठेयब नित्तीकेमी निश्शो परमप्रभु यावे कली खुम्की पा बाप्शा सेउ पाप्तेकम। मिनु मेकोपुकीमी “आमेन, हाल्लेलया” दैतेकम। प्रकाश ४:४; प्रकाश ५:३१; प्रकाश ४:६; भजन संग्रह १०६:४८

5 मिनु परमप्रभु यावे आ नित्तीक रे सेंदा का गूशो नैता। मेको सेंदामी “परमप्रभु यावे आ वाइलीम वाइल, परमप्रभु यावे कली मान पा हिंब आइक्च नु ठेयब मुर नेल्लेमी ‘आंइ परमप्रभु यावे नेल्ल क्येडा ठेयब बाक्ब’ देनीन” दैशो नैता।

6 मिनु नोले गो शुश मुर आन सेंदा ठेयब खोला आ रेयके नु ठेयब बंबु आ रेयके खोदेशो पा नैता। मिनु मेको सेंदामी “हाल्लेलया, प्रभु, नेल्ल सक्ति पाइश्शो आंइ परमप्रभु यावे नेल्ल सासन पाइब बाक्ब।

7 गो नेल्ल ग्येरसय। गो नेल्लेमी “इन सक्ति नेल्ल क्येडा ठेयब बाक्ब” दैयं। गो नेल्लेमी परमप्रभु यावे कली मान पय। मारदे हना पाठा आ ग्युंबे दुम्चशो बाक्त। मिनु आ ग्युम्लीम आंम कली ग्योम्सीशा, ठीक दुम्शो बाक्त। प्रकाश २१:९

8 मेको ग्युम्ली कली सुती के रिम्शो बुश टल्केशो वा फेक्चा कली गेशो बाक्त” दैशो नैता। मिनु मेको सुती के रिम्शो वा मार बाक्ब दैशा हना, परमप्रभु यावे आ योव्रशो आन ठीक पतीके बाक्ब। यसैया ६१:१०

9 मेको परमप्रभु यावे आ स्वर्ग डा गेय पाइबमी आं कली “एको लोव्र ब्रेक्तो। पाठा आ ग्युंबे जचा कली ब्रेत्चा पुंडसीबपुकी ग्येरसीशो मुरपुकी बाक्नीम” दे माइक्ती। मिनु मेकोमी लेशा आं कली “मेको थमा पा परमप्रभु आ लोव्र बाक्ब” दे माइक्ती। लूका १४:१५

10 मिनु नोले गो मेको परमप्रभु यावे आ स्वर्ग डा गेय पाइब कली सेउ पचा कली आ खोइलीमी बाप्ती। मेकोमी चहिं आं कली “मपावो। गो गे नु इ लोक्बपुकी खोदेशो येसु आ लोव्र पाइब, परमप्रभु यावे आ वाइल नड। परमप्रभु यावे कली

मान पावो। मारदे हना येसु आ लोत्र पाइबपुकीम परमप्रभु यावेमी तुइक्पाइश्शो लोत्र ला पाइनीम” दे माइक्ती। प्रकाश २२:८-९

बुश शारा डोइक्ब

11 मिनु नोले गो स्वर्ग रोक्सीशा, बुश शारा का ताता। मेको शारा तार डोइक्ब का बाक्त। मेको शारा डोइक्ब सु बाक्त देशा हना, दीगो नु थमा पाइब माइश्शो बाक्त। मेको घूस मताक्थु ठीक पा निसाफ पाइब बाक्त। लडाइ पाइब यो बाक्त। मती २४:३०; प्रकाश ३:३४; यसैया ११:४-५

12 मिनु मेको दोदेंब तांइसाक्ब देशा हना, मेको आ मिक्च हुकर पा ब्रशो मी खोदेशो तांइसाक्ब। आ पियामी शुश मुकुटपुकी बाक्तेक्म। मिनु मेको तारी नें का ब्रेक्शो बाक्त। मेको नें सुइमी मतुइक्नीम। मेकोम ला तुइक्ब। प्रकाश १:३४; प्रकाश ३:१२

13 मिनु मेकोमी हुशेमी खुम्शो वा फेक्शो बाक्त। आ नें परमप्रभु यावे आ लोत्र माइश्शो बाक्त। यसैया ६३:१-३; यूहन्ना १:१

14 मिनु स्वर्ग डा फौजपुकी बुश शारा डोइश्शा, मेको आ नोले खोइश्शो बाक्तेक्म। मेको शारा डोइक्बपुकी रिम्शो बुश सुती के वा फेक्शो बाक्तेक्म। प्रकाश १७:३४

15 मिनु मेको डोंइती डा बुश शारा डोइक्ब आ शोत्र रे रागी रागी डा मुर आन कली साइक्चा कली हेश्शो तरवार का यूत। मिनु मेकोमी फलाम के कोक्केमी मेको आन कली सासन पाइब, नेल्ल सक्ति पाइश्शो परमप्रभु यावे आ गाइक्चा डा कोल खोइलीमी दिम्ब। भजन संग्रह २:९; प्रकाश १४:१९-२०

16 मिनु मेको डोंइती डा शारा डोइक्ब आ वा नु आ फिलामी नें का ब्रेक्शो बाक्त। मार नें ब्रेक्शो बाक्त देशा हना, पिप आन पिप नु प्रभु आन प्रभु, दे ब्रेक्शो बाक्त। प्रकाश १:५; १तिमोथी ६:१५

ठेयब जन्तु नु जोल पाइब

17 मिनु नोले गो परमप्रभु यावे आ स्वर्ग डा गेय पाइब का नांमी राप्शो ताता। मेकोमी शुश ग्येत्थ सरीडमी बेरब चिकब आन कली ठेयब सेंदामी “परमप्रभु यावे आ गेशो ब्वचा कली खुम्सीशा यिने। इजीकीएल ३९:४, १७-२०

18 मार ब्वचा कली यिने देशा हना, पिपी, कप्तान, बोल्यो मुर, शारा, शारा डोइक्ब, वाइलीम वाइल, आइक्च नु ठेयब मुर नेल्ल आन श्ये ब्वचा कली यिने” दे ग्रीशा माइक्तीमी।

19 मिनु गो ठेयब जन्तु नु रागी डा पिप आन फौजपुकी मेको डोंइती डा बुश शारा डोइक्ब नु आ फौजपुकी नु लडाइ पचा कली खुम्सीशो ताता। प्रकाश १६:१४, १६

20 मोपा मेकोपुकी लडाइ पामेनु, मेको ठेयब जन्तु नु जोल पा परमप्रभु यावे आ लोत्र पखु पाइब आस कली ग्याइक्ताक्म। परमप्रभु यावे आ लोत्र पखु पाइब चहिं ठेयब जन्तु नु बाक्शा, छक लाक्चा डा गेय पाइब बाक्त। मोपा मेको ठेयब जन्तु नु आ मूर्ति कली पूजा पाइब नु आ चिन्ड वोइक्ब आन कली मरिम्शो लां शेंशा खोइक्पदा बाक्त। मिनु मेको निक्शी सेसीन गन्धक नु ठेयब मी ब्रतीकेमी हुम्चा पुंइसाक्स। प्रकाश १३:११-१७; २थिस्सलोनिकी २:८

21 मिनु लीशो मेको आस फौजपुकी चहिं मेको बुश शारा डोइक्ब आ शोत्र रे यूशो तरवारमी साइक्चा पुंइसाक्म। मिनु चिकबपुकी मेको नेल्ल आन श्ये ब्वशा रूतेक्म।

## 20

सैतान कली पाइश्शो

1 मिनु नोले गो परमप्रभु यावे आ स्वर्ग डा गेय पाइब स्वर्ग रे पुं मपाइश्शो ढोडोडगा डा सांचो नु ठेयब साडलो शेशा, यिशो ताता। प्रकाश ९:१

2 मिनु मेकोमी ठेयब बुस्स कली ग्याइश्शा पाइक्ताक्व। मेको ठेयब बुस्स आ नें मार बाक्त देशा हना, साइ डोंइती डा बुस्स, दियाबलस नु सैतान मेको आ नें बाक्त। मिनु मेको परमप्रभु यावे आ स्वर्ग डा गेय पाइबमी मेको कली हजार का बर्स सम्म पाइक्ताक्व। दियाबलस आ देशो “मुर आन कली खाल्ब” बाक्ब। प्रकाश १२:९

3 मिनु रागी रागी डा मुर आन कली मरिम्शो लां मकोइदल, दे मेको कली पुं मपाइश्शो ढोडोडगामी तोक्तु। मिनु परमप्रभु यावे आ स्वर्ग डा गेय पाइबमी मेको एफिसस ढोडोडगा चोक्शा, सांचो पाइश्शा, छाप थोक्ताक्व। मोपा मेको ठेयब बुस्स कली हजार का बर्स सम्म चोक्तु। मिनु हजार का बर्स नोले मेको छिन का कली प्रोंइचा पुंइसीब।

हजार का बर्स डा सासन

4 मिनु नोले गो नित्तीकपुकी ताता। मेको नित्तीकपुकीमी मुर निश्शो बाक्तेक्म। परमप्रभु यावेमी मेको आन कली निसाफ पचा गेन्तु। मिनु नोले गो येसु कली थमा सुइश्शा, आ लोत्र नु परमप्रभु यावे आ लोत्र पतीके आन पिया खोइक्चा पुंइसीब आन कली तातामी। मेकोपुकीमी ठेयब जन्तु नु मेको आ मूर्ति कली पूजा मपामे बाक्त। मिनु मेको ठेयब जन्तु आ छाप आन कुप्फीम नु आन गुडमी यो वोइक्चा मबिस्समा बाक्त। मिनु मेको लेंशा ब्रोंइशा, ख्रीस्त नु हजार का बर्स सम्म सासन पाक्तेक्म। प्रकाश ३:२१; मती १९:२८; १कोरिन्थी ६:२

5 मिनु अर्को लीशो मुरपुकी चहिं हजार का बर्स नोले ला सेसीनीम। मेको डोंइती डा सेसीतीके बाक्ब। १थिस्सलोनिकी ४:१६

6 मिनु सु सु डोंइती बेक्शो रे सेसीनीमी, मेको ग्येरशो नु परमप्रभु यावे आ योत्रशो मुरपुकी बाक्नीम। मेको लेंशा मबेक्नीम। मेकोपुकीमी लेंशा बेक्चा मताइनीम। परमप्रभु यावे नु ख्रीस्त आस डोंइती बाक्नीमी। मिनु हजार का बर्स सम्म ख्रीस्त नु सासन पाइनीम।

नेल्ल क्येडा नोले डा लडाइ

7 मिनु मेको हजार का बर्स नोले सैतान पुं मपाइश्शो ढोडोडगा रे प्रोडचा पुंडसाक्व।

8 मोपा ग्रूशा, रागी नेल्ल डा मुर आन कली परमप्रभु यावे कली मटिथु, हेंथे गाक्पाइक्व। हेंथे गाक्बपुकी चहिं गोग नु मागोग माइश्शो डा मुरपुकी देंनीम। मिनु सैतानमी हिकने मचाप्चा डा मुर आन कली लडाइ पचा कली खुप्ताक्व। इजीकीएल ३८:२

9 मिनु सैतान आ फौजपुकी रागी नेल्ल साप्पा, लडाइ पथ जाक्तेक्म। मेकोपुकीमी येसु ख्रीस्त कली थमा सुइक्व, परमप्रभु यावे आ योव्रशो आन बाक्तीके नु परमप्रभु यावे आ दाक्शो सहर कली पुम्ताक्म। तन्न स्वर्ग रे मी दोक्शा, मेको पुम्ब नेल्ल आन कली नेक्तीमी।

10 मिनु मुर आन कली मरिम्शो लां शेंब दियाबलस गन्धक रे हुरु पा ब्रशो मी ब्रतीकेमी हुम्चा पुंडसाक्व। मेकेर ठेयब जन्तु नु जोल पा परमप्रभु यावे आ लोव्र पखु पाइब यो बाक्ताक्स। मिनु मेकेर बाक्बपुकी नाक्दो नाक्ती गेना हना यो श्येत गेचा पुंडसीनीम। प्रकाश १९:२०

ठेयब बुश नित्तीके

11 मिनु नोले गो ठेयब बुश नित्तीके का नु मेकेर निम्ब कली ताता। रागी नु स्वर्ग मेको कली तशा प्रोक्ताक्स। मिनु मेको आस कली बाक्तीके मबा। मत्ती २५:३१-४६; २पत्रुस ३:७,१०,१२

12 गो ठेयब बुश नित्तीके आ डोंइती ठेयब नु आइक्च बेक्शो मुरपुकी राप्शो तातामी। किताबपुकी प्राक्शो बाक्तेक्म। मिनु गो अर्को किताब का यो प्राक्शो ताता। मेको ब्रोंइतीक किताब बाक्त। मिनु मेको ठेयब बुश नित्तीके आ डोंइती राप्शो बेक्शो मुर आन निसाफ पचा पुंडसीनीम। दोपा निसाफ पचा पुंडसीनीम देंशा हना, मेकोपुकीमी रागीमी बाक्मानु, मार मार पामे, मेको किताबमी बेक्शो पदेशा, निसाफ पचा पुंडसीनीम। यूहन्ना ५:२८-२९; दानीएल ७:१०

13 मेको ठेयब बुश नित्तीके आ डोंइती राप्शो बेक्शो मुरपुकी ते रे जाक्तेक्म देंशा हना, समुन्द्रमी बेक्शो मुरपुकी समुन्द्र रे जाक्तेक्म। बेक्पाइक्व आ बेक्पाइश्शो नु बेक्शो आन बाक्तीके रे जाक्तेक्म। मिनु मेको नेल्ल रागीमी बाक्मानु, मार मार पामे, मेको निसाफ पचा पुंडसाक्म।

14 बेक्पाइक्व नु बेक्शो आन बाक्तीके हुरु पा ब्रशो मी ब्रतीकेमी हुम्चा पुंडसाक्स। मेको हुरु पा ब्रशो मीमी हुम्शीशो मार बाक्त देंशा हना, मेको निकशी खेयप बेक्चा डा मेको नोले डा बेक्चा बाक्त। १कोरिन्थी १५:२६,५५

15 सु सु आन नें ब्रोंइतीक किताबमी मब्रेक्शो बाक्मे, मेको हुरु पा ब्रशो मीमी हुम्चा पुंडसाक्म।

## 21

नक यरूसलेम

1 नोले गो नक सरीड नु नक रागी ताता। डोंइती डा सरीड, डोंइती डा रागी नु समुन्द्र जाक्तेक्म। यसैया ६५:१७; २पत्रुस ३:१३

2 परमप्रभु यावे आ सहर नक यरूसलेम माइश्शो परमप्रभु यावे आ बाक्तीके रे यिना यिन पाइश्शो ताता। मेको सहर ग्युम्ले कली गुम्चशो ग्युम्ली खोदेंशो दुम्शा, ग्योम्सीशा यिशो बाक्त। गलाती ४:४६; हिब्रू १२:२२; प्रकाश १९:७-८

3 मिनु गो ठेयब नित्तीके रे ठेयब सेंदा का ग्रूशो नेंता। मेकोमी “कोव्रडीन, परमप्रभु यावे आ बाक्तीकेमी मुरपुकी यो बाक्नीम। परमप्रभु यावे मुरपुकी नु बाक्ब। मेकोपुकी परमप्रभु यावे आ मुर बाक्नीम। मिनु परमप्रभु यावे आ मुरपुकी नु बाक्ब। प्रस्थान २९:४३५; येरमीया ७:२३

4 परमप्रभु यावेमी मेको मुर आन कली लोम्शा, आन प्रेक्कु फिक्व। मुल रे मुरपुकी मबेक्नीम। मोपतीके गेंका मपाइनीमी, मडाक्नीमी, श्येत यो मजाइनीम। मारदे हना डोंइती मार मार बाक्मा, मेको नेल्ल नुप्तेक्म” दे ठेयब सेंदामी देंशो नेंता। प्रकाश ७:१७; यसैया २५:८; यसैया ३५:१०; यसैया ६५:३९

5 मेको ठेयब नित्तीकेमी निम्बमी “नेनीन, गो नेल्ल नक सेल्लुडमी” देंत। मिनु नोले मेकोमी आं कली “मेको लोव्र ठीक नु थमा बाक्ब। मोपतीके ब्रेक्तो” देंत।

6 मिनु मेकोमी लेंशा आं कली “गो आल्फा नु ओमेगा नड। नेल्ल क्येडा डोंइती नु नेल्ल क्येडा नोले डा गो नड। सु सुमी तूत दाक्नीमी, मेको आन कली ब्रोंइचा गेब ब्वाक्कु बुक्तीक रे मोशा तूचा गेनुड। प्रकाश १:८; प्रकाश २२:१३

7 सु सुमी सैतान कली ग्रानीमी, मेकोम आं देंशो नेल्ल ताइनीम। मिनु गो मेको ग्राब आन परमप्रभु यावे दुम्नुड। मेकोपुकी चहिं आं तमी तौ दुम्नीम।

8 तन्न मुर तशा हिंबपुकी, परमप्रभु यावे कली थमा मसुइक्वपुकी, पापमी गुम्शोपुकी, मुर आन कली साइक्वपुकी, तेल्लेम पाइबपुकी, टुना मुना पाइबपुकी, देवी देवता आन कली पूजा पाइबपुकी, नु जोल पाइबपुकी नेल्ल गन्धक रे हुरु पा ब्रशो मीमी हुम्चा पुंडसीनीम। मिनु मेको नोले डा बेक्तीक बाक्ब” दे माइक्ती।

9 मिनु नोले गो परमप्रभु यावे आ स्वर्ग डा गेय पाइब का जाक्शो ताता। मेको सु बाक्त देंशा हना, डोंइती डा ७ जना श्येतमी ब्रीशो डप्का कुरबपुकी डा का बाक्त। मेकोमी आं कली “एके पिवो, गो इ कली ग्युम्ली कोंइनुड। मेको ग्युम्ली पाठा आ मीश बाक्ब” दे माइक्ती।

10 मेकोमी आं कली परमप्रभु यावे आ सोक्तीमी बाक्शा, ठेयब डांटा तार लाइक्ती। मिनु मेकेर आं कली परमप्रभु यावे आ बाक्तीके रे यिना यिन पाइश्शो परमप्रभु यावे आ योव्रशो यरूसलेम माइश्शो सहर कोंइताक्यी।

11 मिनु मेको सहर दोदेंशो तांडसाक्व देंशा हना, परमप्रभु यावे आ छेडछेड नु सक्ति पाइश्शो बाक्त। मिनु परमप्रभु यावे आ छेडछेड नेल्ल क्येडा रिम्शो टल्केशो बुश यास्पेर माइश्शो हीरा खोदेंशो तांडसाक्व।

12 मिनू मेको सहर दोपा सेल्शो बाक्त देशा हना, मेको सहर आ एर ओंथ ठेयब गारो प्रोत्रशो बाक्त। मिनू मेको गारोमी १२ ओटा ठेयब लाप्चोपुकी बाक्तेकम। मिनू १२ जना परमप्रभु यावे आ स्वर्ग डा गेय पाइबपुकी मेको लाप्चो का कामी बाक्शो बाक्तेकम। इस्राएल आ १२ जना तो आन नें नु थर मेको लाप्चो का कामी ब्रेक्शो बाक्तेकम।

13 मिनू मेको लाप्चोपुकी ते ते बाक्तेकम देशा हना, पूर्वम लाप्चो सां बाक्तेकम। उत्तरम लाप्चो सां बाक्तेकम। दक्खिनम लाप्चो सां बाक्तेकम। पच्छिमम लाप्चो सां बाक्तेकम।

14 मिनू मेको सहर डा गारोमी १२ ओटा जग बाक्तेकम। मेको जगमी पाठा आ सोइशशो १२ जना आन नें ब्रेक्शो बाक्तेकम।

15 मिनू गो नु लोत्र पाइबमी मेको सहर, लाप्चो नु गारो पुक्चा कली सुन के पुक्तीके का कुरशो बाक्त।

16 मिनू मेकोमी मेको सहर कली पुक्त्तु। मेको सहर ४ पाटे चारै सुर बराबर दुइशशो १२ हजार स्तादीयोन बाक्त। आ येत्थ गे यो मोशोन दुइशशो बाक्त। स्तादीयोन का १८५ मिटर बाक्ब।

17 मिनू मेकोमी सहर आ गारो पुक्गानु, सहे का ४४ कुबीत ब्रेम्शो बाक्त। मेको परमप्रभु यावे आ स्वर्ग डा गेय पाइब आ पुक्तीके मुर आन पुक्तीके खोदेशो बाक्त। कुबीत का गज का खोदेशो, ०.५ मिटर बाक्ब।

18 मेको गारो बुश टल्केशो हीरा के सेल्शो बाक्त। मेको सहर चहिं सिसा खोदेशो मारेइ मब्वाइशशो सुन के बाक्त।

19 मिनू गारो आ जग नेल्ल खाल डा हीरापुकीम ग्योम्शो बाक्तेकम।

डोइती डा जग सरीड खोदेशो नीलो यस्पर माइशशो हीरामी ग्योम्शो बाक्त। मेको आ नोले डा जग साफीर माइशशो हीरामी ग्योम्शो बाक्त। मेको आ नोले डा जग बुश कल्केदोन माइशशो हीरामी ग्योम्शो बाक्त। मेको आ नोले डा जग गिगी स्मारद माइशशो हीरामी ग्योम्शो बाक्त।

20 मेको आ नोले डा जग सुन्तला रड डा सारदोनीक्स माइशशो हीरामी ग्योम्शो बाक्त। मेको आ नोले डा जग लल सारदीस माइशशो हीरामी ग्योम्शो बाक्त। मेको आ नोले डा जग हौ नु गिगी ब्वाइशशो क्रीसोलीथ माइशशो हीरामी ग्योम्शो बाक्त। मेको आ नोले डा जग सुन रड डा बेरील माइशशो हीरामी ग्योम्शो बाक्त। मेको आ नोले डा जग शुश हौ तोपास माइशशो हीरामी ग्योम्शो बाक्त। मेको आ नोले डा जग गिगी क्रीसोप्रास माइशशो हीरामी ग्योम्शो बाक्त। मेको आ नोले डा जग लल नु नीलो ब्वाइशशो हीराचीन्त माइशशो हीरामी ग्योम्शो बाक्त। मिनू नेल्ल क्येडा नोले डा जग प्याजी रड डा आमेथीस्त माइशशो हीरामी ग्योम्शो बाक्त।

21 मिनू मेको १२ ओटा लाप्चो चहिं १२ ओटा मोती के सेल्शो बाक्तेकम। लाप्चो का मोती काम सेल्शो बाक्त। मिनू मेको सहर डा लांपुकी सिसा खोदेशो मारेइ मब्वाइशशो सुन के बाक्तेकम।

22 मिनू गो मेको सहरमी परमप्रभु यावे आ खिं मतड। मारदे हना परमप्रभु यावे, नेल्ल सक्ति पाइशशो परमप्रभु नु पाठा आंमान मेकेर बाक्नीस।

23 मिनू मेको सहरमी नां नु तास्ला दाप्चा ममाल्ब। मारदे हना परमप्रभु यावे आ छेडछेड नेल्ल सहरमी दाप्ब। पाठा मुर आन कली छेडछेड गेब बत्ती बाक्ब। यसैया ६०:३, ५, ११, १९, २०

24 मिनू रागी रागी डा मुरपुकी मेको सहर डा छेडछेडमी बाक्नीम। मिनू रागी रागी डा पिप आन शोंप नु दारस मेकेर चाक्नीम।

25 मेको सहर डा लाप्चोपुकी गेना हना यो रोक्शो बाक्नीम। मारदे हना मेकेर गेनायो नाक्दो मडुम्ब। जकरिया १४:७

26 मिनू रागी रागी डा मुरपुकीमी आन शोंप नु दारस मेको सहरमी चाक्नीमी।

27 मिनू जाम्शा लाइबपुकी, ग्रांघा दिचा डा गेय पाइबपुकी नु जोल पाइबपुकी चहिं मेको सहरमी ओत्रचा मताइनीम। पाठा आ ब्रोंइतीक किताबमी नें ब्रेक्शोपुकी ला ओत्रचा ताइनीम।

## 22

ब्रोंइचा गेब खोला

1 मिनू परमप्रभु यावे आ स्वर्ग डा गेय पाइबमी ब्रोंइचा गेब खोला कोंइताक्यी। मेको खोला टल्केशो सिसा खोदेशो तांइसाक्व। मिनू मेको खोला परमप्रभु यावे नु पाठा आस ठेयब नित्तीके रे गूशा, इजीकीएल ४७:१-१२; जकरिया १४:८; उत्पत्ती २:१-१०

2 सहर डा लां आ दाते रे पा शाइशशो बाक्त। मेको खोला ओंथ हांबु नु आइक्ची हांबुमी ब्रोंइचा गेब रवा बाक्शो बाक्तेकम। मेको ब्रोंइचा गेब रवापुकीमी १२ किसीम डा फल सिब्बाक्तेकम। महिनामी खेयप का सिबाक्तेकम। मेको ब्रोंइचा गेब रवा आ सफा रागी रागी डा मुर आन कली सापाइक्चा कली बाक्तेकम।

3 मिनू मेको सहरमी सराप रशो काइ मबाक्नीम। मारदे हना परमप्रभु यावे नु पाठा आस ठेयब नित्तीके मेकेर बाक्ब। मिनू परमप्रभु यावे आ वाइलपुकीमी परमप्रभु यावे कली गेय पाइनीम। यहोसु ७:११-१३

4 मेकोपुकीमी परमप्रभु यावे आ कुल ताइनीम। मेको आन कुप्फीमी परमप्रभु यावे आ नें ब्रेक्शो बाक्ब। प्रकाश ३:१२

5 मेको सहरमी गेनायो नाक्दो मडुम्ब। मिनू मेको सहरमी बाक्ब आन कली बत्ती नु नां आ छेडछेड यो ममाल्नीम। मारदे हना परमप्रभु, परमप्रभु यावे मेको आन छेडछेड बाक्ब। मिनू मेकोपुकीमी गेना हना यो सासन पाइनीम।

एको किताब आ पर्वम

6 मिनू मेकोमी आं कली “एको लोत्र नेल्ल थमा बाक्ब। मोपतीके थमा सुइक्ने चाप्नीम। परमप्रभु यावे आ लोत्र पाइब आन सोक्त्त डा प्रभु बाक्ब। मोपतीके आ वाइलीम वाइल आन कली आ स्वर्ग डा गेय पाइब का सोइक्ताक्व। मारदे सोइक्ताक्व देशा हना, दुम्चशो लोत्र शेंथ सोइक्ताक्व। आमेन। प्रकाश १:१



7 मिनू नेनीन, गो फ्रा लेशशा जाक्नुड” दे माइक्ती। सु सुमी एको किताबमी ब्रेक्शो लोत्र नेंशा पाइनीमी, मेको ग्येरसीशो मुर बाक्नीम।

8 गो यूहन्ना नड। एको लोत्र नेंता नु मार दुम्चशो बाक्मे, मेको नेल्ल ताता। मिनू आं कली कोइब परमप्रभु यावे आ स्वर्ग डा गेय पाइब कली सेउ पचा कली आ खोइलीमी बाप्ती।

9 मेकोमी चहिं आं कली “मपावो, गो परमप्रभु यावे आ लोत्र पाइब इ लोकबपुकी नु एको किताबमी ब्रेक्शो लोत्र पाइबपुकी खोदेशो परमप्रभु यावे आ वाइल नड। परमप्रभु यावे आ डोंइती बाप्शा मान पावो” दे माइक्ती।

10 मिनू मेकोमी आं कली “एको किताबमी ब्रेक्शो लोत्र दुम्चाप्टु। मोपतीके खुइशशा मवोतो, पढेशा नेंपाइक्मी। प्रकाश १०:४; प्रकाश १:३

11 सु सुमी पाप पाइनीमी, मेको पामेक्ल। सु सु ग्रान्रा दिचा डा बाक्मा, मेको मोदेन बाक्मल। सु सु चहिं ठीक पाइब बाक्नीमी, मेको ठीक पा बाक्मल। सु सु प्रभु आ मुर बाक्मा, मेको मोदेशोन बाक्मल” दे परमप्रभु यावे आ स्वर्ग डा गेय पाइबमी देंत। दानीएल १२:१०

12 मिनू नोले येसुमी “नेनो, गो फ्रा लेशशा जाक्नुड। मिनू जाक्शा, मुर नेल्ल आन कली आन पशो खोदेशो पा गेनुड। मेको आन गेय दोपा पामे, मोपा गेनुड।

13 गो आल्फा नु ओमेगा नड। नेल्ल क्येडा डोंइती डा नु नेल्ल क्येडा नोले डा नड। गोइब नु थुम्ब यो गो नड। प्रकाश १:८; हिब्रू १३:८

14 ग्येरसीशो मुर सु सु बाक्नीम देशा हना, सु सुमी आन वा मुरमे, मेको आन कली ब्रोंइचा गेब रवा आ फल ब्वचा गेनुड। मिनू मेको मुरपुकी मेको सहर डा लापचो रे ओत्रचा ताइनीम। प्रकाश ७:१४

15 सु सुमी चहिं टुना मुना पाइनीमी, तेल्लेम पाइनीमी, मुर साइक्नीमी, मूर्ति नु फुल्लु कली सेउ पाइनीमी। जोल पना पन बाक्नीमी। मेको कुचुम खोदेशो पा सहर रे लाडगा बाक्नीमी” देंत। प्रकाश २१:८, २७; १कोरिन्थी ६:९-१०

16 मिनू येसुमी “गो येसु नड। गो दाऊद पिपी क्येडा डोंइती बाक्ती। मिनू आ चच युइ यो नड। गो टल्केशो सुक्कुर सोरुल यो नड। गो परमप्रभु यावे आ स्वर्ग डा गेय पाइब कली थमा सुइक्ब आन युम्तीकेमी शेंथ सोइक्ताक्ड” देंत। यसैया ११:१०; लूका १:७८

17 मिनू परमप्रभु यावे आ सोक्त नु ग्युम्लीमी मुर आन कली “पिने” देनीस। मिनू सु सुमी मेको लोत्र नेंनीमी, मेकोमी यो “पिने” देंमल। सु सु तूत दाक्नी, पिने। मिनू ब्रोंइचा गेब ब्वाक्कु मोशा तूडीन। यसैया ५५:१; यूहन्ना ७:३७

नोले डा लोत्र

18 सु सुमी एको किताबम ब्रेक्शो परमप्रभु यावेम तुइक्पाइशो लोत्र नेंनीमी, मेको आन कली गो लोत्र का पाइनुड, मार लोत्र पाइनुड देशा हना, सु सुमी एको लोत्रमी अर्को लोत्र तेम्नीमी, मेको सजाइ ताइनीमी। मार सजाइ ताइनीमी देशा हना, परमप्रभु यावेमी एको किताबमी ब्रेक्शो श्येत मोदेशो मुर आन कली गेब। ब्यवस्था ४:२

19 सु सुमी परमप्रभु यावेमी तुइक्पाइशो एको किताबम ब्रेक्शो लोत्र खोइक्नीमी, मेको यो सजाइ ताइनीम। मार सजाइ ताइनीम देशा हना, परमप्रभु यावेमी मोदेशो मुर आन कली ब्रोंइचा गेब रवा आ फल ब्वचा मगेब। मिनू मेको मुरपुकी परमप्रभु यावे आ योत्रशो यरूसलेम सहरम ओत्रचा यो मताइनीम।

20 मिनू एको लोत्र पाइबमी “आमेन, गो फ्रा लेशशा यीनुड” देंत। मिनू थमा सुइक्बपुकीमी “आमेन, प्रभु येसु जाक्कीन” देंतेक्म। १कोरिन्थी १६:२२

21 प्रभु येसु आ शिशी नेल्ल नु बाक्ल।